


Icamanal toteco;
Santa Biblia



Bible without Deuterocanon in Nahuatl, Huasteca Central
(MX:nch:Nahuatl, Huasteca Central)

Icamanal toteco; Santa Biblia

Bible without Deuterocanon in Nahuatl, Huasteca Central

(MX:nch:Nahuatl, Huasteca Central)

copyright © 2005 Wycliffe Bible Translators, Inc.

Language: Nahuatl, Huasteca Central

Translation by: Wycliffe Bible Translators, Inc.

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Nahuatl, Central Huasteca

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
c565d9f9-d202-544b-b78a-3c93df26508e

Contents

GÉNESIS	1
ÉXODO	85
LEVÍTICO	161
NÚMEROS	215
DEUTERONOMIO	286
JOSUÉ	347
JUECES	387
Rut	430
1 SAMUEL	436
2 SAMUEL	492
1 REYES	540
2 REYES	596
1 CRÓNICAS	653
2 CRÓNICAS	710
ESDRAS	773
NEHEMÍAS	791
ESTER	816
JOB	830
SALMOS	874
PROVERBIOS	1024
ECLESIASTÉS	1070
CANTARES	1085
ISAÍAS	1093
JEREMÍAS	1187
LAMENTACIONES	1282
EZEQUIEL	1291
Daniel	1383
OSEAS	1412
JOEL	1428
AMÓS	1433
ABDÍAS	1445
JONÁS	1447
MIQUEAS	1451
NAHÚM	1460
HABACUC	1464
SOFONÍAS	1468
HAGEO	1472
ZACARÍAS	1475
MALAQUÍAS	1492
MATEO	1498
MARCOS	1568
LUCAS	1610

JUAN	1681
HECHOS	1732
ROMANOS	1796
1 CORINTIOS	1825
2 CORINTIOS	1854
GÁLATAS	1873
EFESIOS	1884
FILIPENSES	1894
COLOSENSES	1901
1 TESALONICENSES	1908
2 TESALONICENSES	1914
1 TIMOTEO	1917
2 TIMOTEO	1925
TITO	1931
FILEMÓN	1935
HEBREOS	1937
SANTIAGO	1960
1 PEDRO	1967
2 PEDRO	1976
1 JUAN	1981
2 JUAN	1988
3 JUAN	1989
JUDAS	1990
APOCALIPSIS	1993

Génesis

Quenicatza pejqui nochi cati onca

¹ Quema pejqui nochi cati onca, Toteco Dios quichijchijqui ilhuicacti huan taltipacti.

² Pero taltipacti amo quenicatza nesiyaya, san cactoya, yon amo tacualtalili. San oncayaya se hueyi tzintayohuilot cati quixtzactoya nopa at cati tahuel huejcata. Huan Itonal Toteco Dios nemiyaya aixco.

³ Huan Toteco Dios quijito: “¡Ma onca taahuili!” Huan oncac taahuili. ⁴ Huan Toteco Dios quitachili nopa taahuili cati quichijtoya huan quiitac para cuali. Teipa quiyocatali nopa taahuili ica nopa tzintayohuilot.

⁵ Huan Toteco Dios quitocaxti nopa taahuili “tonaya” huan nopa tzintayohuilot quitocaxti “tayohua”. Huan panoc tiotac huan panoc ijnaloc. Huan ya ni elqui nopa achtohui tonali.

⁶ Huan Toteco Dios quijito: “Ma onca ajacat cati quixelos nopa at para mocahuas iyoca.” Huan quej nopa elqui. ⁷ Huajca Toteco Dios quichijqui nopa ajacat cati quixelo nopa at para tajco nopa at mocajqui tatzinta huan ne seyoc tajco mocajqui huejcapa. ⁸ Huan campa oncac ajacat quitocaxti “ilhuicacti”. Huan panoc tiotac huan panoc ijnaloc. Huan ya ni elqui nopa ompa tonali.

⁹ Huan Toteco Dios quijito: “Ma mosejcotili nopa at cati eltoc tatzinta ilhuicacti para ma mopanexiti cati huactoc.” Huan quej nopa elqui.

¹⁰ Huan Toteco Dios quitocaxti nopa cati huactoc “tali”. Huan nopa at cati mosejcotilijtoya quitocaxti “hueyi at”. Huan Toteco Dios quitachili cati quichijtoya huan quiitac para cuali.

¹¹ Huan Toteco Dios quijito: “Ma temaca nopa tali nochi tamanti xihuit cati xoxohuic huan sesen icone ma eli quej ya. Ma onca xihuit cati temaca iyol huan cuame cati temacaj inintajca. Huan sesen tamanti ma quincagua iconehua cati quej ya.” Huan quej nopa elqui. ¹² Huajca nopa tali temacac nochi tamanti xihuit cati xoxohuic. Temacac xihuit cati temacaj iniyol huan cuame cati temacaj inintajca. Huan sesen iniconehua elqui quej nopa xihuit o nopa cuahuit cati temacac. Huan Toteco Dios quitachili cati quichijtoya huan quiitac para cuali.

¹³ Huan panoc tiotac huan panoc ijnaloc. Huan ya ni elqui nopa expa tonali.

¹⁴ Huan Toteco Dios quijito: “Ma onca taahuili nepa ilhuicac para ma tatanexiti ipan taltipacti para quiyocatalis tonaya huan tayohua huan para ma tenextilica taya tonali, huan taya xihuit huan taya ipohual ipan ne xihuit itztoque. ¹⁵ Huan ma cahuanica nepa ilhuicac para taahuise ipan taltipacti.” Huan quej nopa elqui. ¹⁶ Huajca quej nopa Toteco Dios quichijchijqui nopa ome huejhueyi taahuili. Quichijqui tonati cati más hueyi para tatanextis tonaya huan nopa metzti para tatanextis tayohua. Huan Toteco Dios nojquiya quinchijchijqui sitalime. ¹⁷ Huan Toteco Dios quintali nopa taahuilme ipan ilhuicacti para ma tatanextica ipan taltipacti. ¹⁸ Nopa hueyi taahuili para taahuis tonaya huan cati amo más hueyi taahuis tayohua para quej ni moyocatalise taahuili huan tzintayohuilot. Huan quiyolpacti Toteco Dios nochi cati quichijtoya pampa elqui cuali. ¹⁹ Huan panoc tiotac huan panoc ijnaloc. Huan ya ni elqui nopa najpa tonali.

- ²⁰ Huan Toteco Dios quijto: “Ma temi nopa at ica miyac tamanti cati yoltoque. Huan ma temi nochi ilhuicacti ica miyac tamanti totome cati patanij.” ²¹ Huajca Toteco Dios quinchijchijqui nochi huejhueyi tapiyalme cati itztoque ipan hueyi at huan nochi tamanti michime. Huan quichijqui para sesen ma quinpiya iconehua quej ya. Huan quinchijchijqui nochi totome huan quichijqui para ma quinpiyaca ininconeuhua quej injuanti. Huan Toteco Dios quitachili nochi cati quichijtoya huan quiitac para cuali. ²² Huan Toteco Dios quitiochijqui sesen tamanti cati quinchijtoya huan quinilhui: “Ximomiyacullica huan xijtemitica nopa hueyi at.” Huan Toteco Dios quinnahuati nopa totome: “Xijpiyaca miyac amoconeuhua huan xijtemitica campa hueli ipan taltipacti.” ²³ Huan panoc tiotac huan panoc ijnaloc. Huan ya ni elqui nopa macuilpa tonali.
- ²⁴ Huan Toteco Dios quijto: “Ma onca ipan taltipacti nochi tamanti tapiyalme. Ma onca tapiyalme cati mosisiníaj huan cati maxojtzitzi huan nojquiya cati mohuahuatatzaj talchi.” Huan quej nopa elqui. ²⁵ Huajca quej nopa Toteco Dios quinchijchijqui nochi tapiyalme huan quintachili huan nochi quiitac para cuali.
- ²⁶ Teipa Toteco Dios quijto: “Ama ma tiquinchiuaca masehualme. Tiquinchihuase ma elica quej tojuanti huan quiipiyase totachiyalis. Huan injuanti quiipiyase tanahuatili ica michime, huan totome, huan ica tapiyalme cati mosisiníaj, huan ica cati maxojtzitzi huan ica nochi cati nemij ipan taltipacti.”
- ²⁷ Huajca Toteco Dios quinchijqui masehualme ica itachiyalis. Quena, quej yaya itachiyalis Toteco Dios quinchijqui. Quinchijchijqui tacat huan sihuat.
- ²⁸ Huan Toteco Dios quintiochijqui huan quinilhui: “Xiquinpiyaca miyac amoconeuhua para injuanti itztose campa hueli ipan nochi taltipacti para ma tanahuatica. Nojquiya nimechtalía xiquinnahuatica nochi michime, totome huan nochi cati nemij ipan taltipacti.”
- ²⁹ Huan teipa Toteco Dios quinilhui nopa tacat huan sihuat: “Xiquitaca, nimechmaca nochi tamanti xihuit cati quiipiya iyol huan nochi cuahuit cati quiipiya itajca para anquicuase. ³⁰ Huan nopa tapiyalme, totome huan nochi sequinoc tamanti cati nemij ipan taltipacti niquinmaca nochi sacat huan xihuit cati xoxohuic para quicuase.” Huan quej nopa elqui.
- ³¹ Huan Toteco Dios quitachili nochi cati quichijtoya huan quiitac para tahuel cuali. Huan panoc tiotac huan panoc ijnaloc. Huan ya ni elqui nopa chicuasempa tonali.

2

¹ Huajca quej nopa Toteco Dios quitamisencajqui nochi ilhuicacti, huan nochi taltipacti huan nochi cati onca nopona.

² Quema ajsic nopa chicompa tonali, Toteco Dios ya tantoya cati quichi-huayaya huan mosiyajquetzqui. ³ Huan Toteco Dios quitiochijqui nopa chicompa tonali huan quijto para elis tatzejtelolitic pampa ipan nopa tonali ya tantoya itequi huan mosiyajquetzqui.

Adán huan Eva ipan xochimili, Edén

⁴ Huajca quej nopa TOTECO Dios quichijqui taltipacti huan ilhuicacti. Nica techilhuía quenecatza TOTECO Dios quichijqui ilhuicacti huan taltipacti. ⁵ Achtohui amo oncayaya xihuit yon amo teno panquistoya pampa

TOTECO Dios ayemo quichijtoya ma huetzi at ipan taltipacti. Nojquiya amo aqui itztoya para tequitis. ⁶ Pero masque TOTECO Dios amo quichijtoya ma huetzi at, ten taltita tejcoyaya apocti huan quiatequiyaya nopa tali. ⁷ Huan TOTECO Dios quicuic tali huan quichijchijqui itacayo se tacat. Huan quiyacailpitzqui huan quimacac nemilisti. Huan nopa tacat pejqui quipiya nemilisti.

⁸ Teipa TOTECO Dios quitojqui se xochimili cati itoca Edén nopa imelac campa quisa tonati. Huan nopona quicajqui nopa tacat cati quichijchijtoya.

⁹ Huan TOTECO Dios quichijqui ma moscalti xochimilijtic nochi tamanti cuame cati yejyetzitzi nesiyaya huan nochi tamanti cuame cati temacaj cuatajcyot para quicuase. Huan tatajco nopa xochimili TOTECO Dios quitojqui se cuahuit cati temaca itajca huan itoca cuahuit cati temaca nemilisti. Nojquiya quitojqui seyoc cuahuit ica itajca huan itoca nopa cuahuit cati temachiltia cati cuali huan cati amo cuali.

¹⁰ Ipan Edén oncayaya se hueyat cati quiatequiyaya nopa xochimili. Huan ten nopona, moxelo huayaya huan mochihuayaya nahui pilhueyatzitzi.

¹¹ Nopa achtohui amaxali ten nopa hueyat itoca Pisón huan ya ni cati tayahualo huayaya campa hueli ipan nochi nopa tali cati itoca Havila campa onca oro. ¹² Nopa oro ten nopa tali eliyaya senquisa cuali. Nojquiya nopona oncayaya se taajhuayacayot cati patiyó huan piltetzitzi cati yejyetzitzi cati itoca ónice. ¹³ Huan nopa ompa amaxali ten nopa hueyat itoca Gihón huan tayahualo huayaya campa hueli ipan nopa tali cati itoca Cus. ¹⁴ Huan nopa expa amaxali ten nopa hueyat itoca Tigris huan pano iteno tali Asiria imelac campa quisa tonati. Huan nopa najpa amaxali ten nopa hueyat itoca Eufrates.

¹⁵ Huajca TOTECO Dios quihuicac nopa tacat huan quicajqui ipan nopa xochimili cati itoca Edén para ma quimocuitahui, ¹⁶ huan TOTECO Dios quinahuati: “Huelis tijcuas itajca ten hueli cuahuit ipan ni xochimili, ¹⁷ pero ne cuahuit cati itoca ‘cuahuit cati temachiltia cati cuali huan cati amo cuali’, amo. Amo xijcualili itajca, pampa ipan nopa tonali quema tijcuas itajca, melahuac timiqis.”

¹⁸ Teipa TOTECO Dios quijito: “Amo cuali para itzto iselti ni tacat. Para amo cuesihuis, nijchihuilis se acajya cati quinamiqui huan cati quipalehuis.”

¹⁹ Huan ica tali TOTECO Dios quinchijtoya nochi tapiyalme huan nochi totome. Teipa quihuiquili nopa tacat para ma quintocaxtali. Huan cati nopa tacat quintocaxtali, ya nopa elqui inintoca. ²⁰ Huajca nopa tacat quintocaxtali nochi tamanti tapiyalme cati maxojtzitzi, huan nochi totome huan nochi tapiyalme cati mosisinaj. Pero yon se ten nopa tapiyalme amo quinamijqui para quipalehuis nopa tacat para amo cuesihuis. ²¹ Huajca TOTECO Dios quichijqui tahuel ma cochi Adán. Huan quema cochtóya, quiquixtili se ielchiqui omiyo huan sempo quimotzquilti inacayo quej eltoya. ²² Huan ica nopa tacat ielchiqui, TOTECO Dios quisencajqui se sihuat huan quihuicac campa nopa tacat.

²³ Huan quema nopa tacat quiitac nopa sihuat, quijito:

“¡Ama quena!

Ya ni san se ica na,
pampa inacayo quisqui nonacayotipa,
huan iomiyo quisqui noomiyotipa.

Itoca elis ‘sihuat’,

pampa TOTECO Dios techquixtili ten na, nitacat.”

²⁴ Huan yeca se tacat quicahuas itata huan inana para mosejcotilis ihuaya isihua huan nopa ome mochihuase san se inintacayo. ²⁵ Huan masque nopa tacat huan isihua xolome nemiyayaj, amo pinahuayayaj.

3

Adán huan Eva quiixpanoque TOTECO Dios

¹ Nopa cohuat eliyaya cati más talnamiqui huan más quimatiyaya quenicatza tacajcayahuas que nochi sequinoc tapiyalme cati TOTECO Dios quinchijtoya. Huan se tonali nopa cohuat quitatzintoquili nopa sihuat:

—¿Amo amechilhuijtoc Dios para amo xijcuaca itajca yon se cuahuit ipan ni xochimili?

² Huan nopa sihuat quinanquili:

—Huelis tijcuase itajca ten hueli cuahuit, ³ pero iyojtzi ne cati eltoc tatajco xochimili Dios techilhuijtoc amo cuali tijcuase, yon tiqitzquise itajca ne cuahuit pampa sinta tijchihuase, timiquise.

⁴ Pero nopa cohuat quilhui nopa sihuat:

—Amo neli. Amo anmiquise. ⁵ Cuali quimati Dios sinta anquicuase itajca nopa cuahuit elis quej amechtapolis amoixteyol huan amotalnamiquilis huan anquimatise cati cuali huan cati amo cuali. Quej nopa anelise quej ya.

⁶ Teipa nopa sihuat quiitac para yejyetzzi itajca nopa cuahuit huan neyaya cuali para quicuas. Huajca quiixtocac pampa nojquiya quinejqui quipiyas talnamiquilisti. Yeca quitejqui se huan quicaujqui. Huan teipa quimacac ihuehue huan ya nojquiya quicaujqui. ⁷ Huan ipan nopa talojtzi elqui quej tapojqui iniixteyol huan nochi ome momacaque cuenta para xolomé itztoyaj huan mopinajque. Huajca quiijtzonque ixihuiyo nopa cuahuit cati itoca higuera para quichihuase iniixpantzajca huan ica ya nopa motzajque.

⁸ Huan teipa ica tiotac quema tasesestoc, nopa tacat huan isihua quicajque TOTECO Dios nemiyaya xochimilijtic. Huan motalojque motatitoj iica nopa cuame para TOTECO Dios ma amo quinita. ⁹ Pero TOTECO Dios quinojnotzqui nopa tacat huan quitatzintoquili:

—¿Canque tiitztoc?

¹⁰ Huan nopa tacat tananquili:

—Nijcajqúi para tinemiyaya xochimilijtic huan nimajmajqui pampa nixolot. Huan yeca nimotati.

¹¹ Huajca Toteco Dios quitatzintoquili:

—Huan ¿ajquiya mitzilhuijtoc para tixolot? ¿Tijcuajtoc itajca nopa cuahuit cati nimitzilhui amo xijcua?

¹² Huan nopa tacat tananquili:

—Nopa sihuat cati techmacac quej notahuical, yaya techmacac se itajca nopa cuahuit huan yeca nijcujqui.

¹³ Huajca TOTECO Dios quitatzintoquili nopa sihuat:

—¿Para ten tijchijqui ya ni?

Huan nopa sihuat quinanquili:

—Nopa cohuat nechcajcajqúi huan yeca nijcujqui itajca nopa cuahuit.

TOTECO Dios quintatzacuiliti

¹⁴ Huan teipa TOTECO Dios quilhui nopa cohuat:

—Ica ya ni cati tijchijtoc, tielis más titatelchihuali que nochi sequinoc tapiyalme. Huan san timohuahuatatztinemis ipan tali huan taltepociti tijcuas nochi monemilis. ¹⁵ Nijchihuas ximocualancaitaca ta ica nopa sihuat,

huan moixhui ica ya iixhui mocualancaitase. Iixhui mitztzonxamanis huan ta tijcotztantzacanis.

¹⁶ Huan TOTECO Dios quiilhui nopa sihuat:

—Nijchihuas xineltaijyohui quema ticonepiyas huan ica tacuajcualoli titatacatiltis. Pero ta tijnequis mohuehue, huan yaya mitznahuatis.

¹⁷ Huan TOTECO Dios quiilhui nopa tacat:

—Pampa tijneltoquili mosihua huan tijcuajqui itajca nopa cuahuit cati nimitzilhui amo xijcua, tatelchihuali elis nochi tali por ta motajacol. Huan ica miyac tequit tijpiyas cati tijcuas nochi monemilis. ¹⁸ Nopa tali quixhualtis huiŷtzi huan sahua mecat. Huan tijcuas nopa cuali xihui cati moscaltis nopona. ¹⁹ Huan timitonis miyac para tijpantis tacualisti cati ica timopanoltis hasta quema timiquis huan sempa timochihuas tali. Na nijchijqui motacayo ica tali, huan quema timiquis, sempa timochihuas tali.

²⁰ Huan Adán quitocaxti isihua Eva. (Eva quinequi quijjtos Nemilisti.) Huan Eva elqui ininana nochi masehualme cati itztoque. ²¹ Huan TOTECO Dios quinchihuili Adán huan Eva iniyoyo ica inincuetaxo tapiyalme huan quinyoyonti.

TOTECO quinquixti Adán huan Eva ipan xochimili

²² Huan TOTECO Dios moilhui: “Ama ni masehualme mochijtoque quej tojuanti pampa quimatij cati cuali huan cati amo cuali. Sinta quiteguise itajca nopa cuahuit cati temaca nemilisti, itztose para nochipa quej ni.”

²³ Huajca TOTECO quinquixti ten nopa xochimili cati itoca Edén. Huan nopa tacat quititanqui ma tequiti ipan nopa tali cati ica quisencajtaya itacayo. ²⁴ Huan teipa quema TOTECO Dios ya quinquixtijtoya, quintali sequij ilhuicac ehuan cati inintoca querubines para itztose imelac nopa xochimili ica campa quisa tonati para ma quimocuitahuica nopa xochimili. Huan TOTECO Dios nojquiya quitali nopona se macheta cati lementoya huan momalacachohuayaya campa hueli para amo aqui ajsis campa nopa cuahuit cati temaca nemilisti.

4

Caín huan iicni Abel

¹ Huan Adán cochqui ihuaya isihua, huan isihua conecuc huan quitacatilti se oquichpil cati quitocaxti Caín. (Caín quinequi quijjtos Nijpixtoc.) Quej nopa quitocaxti pampa Eva quijjto: “Ica itapalehuil TOTECO nijpixtoc se tacat.”

² Huan teipa Eva quitacatilti seyoc oquichpil cati quitocaxtali Abel.

Huan quema nopa ome moscaltijque, Abel quinmocuitahui borregojme, huan Caín miltequitic. ³ Huan se tonali Caín quihualiquili TOTECO se tacajcualisti cati quipixcatoya. ⁴ Huan Abel nojquiya quihualiquili TOTECO sequij borregojme cati más tomahuaque huan cati achtohui tacatque. Huan quinmicti huan quimacac TOTECO. Huan TOTECO quicualitac Abel ica itacajcualis huan quisei. ⁵ Pero ica Caín huan itacajcualis amo quicualitac. Yeca Caín cualanqui miyac huan fiero tachixtinenqui.

⁶ Huajca TOTECO quiilhui Caín: “¿Para ten ticalani huan fiero titachixtinemi? ⁷ ¿Amo tijmati sinta tijchihuas cati cuali, nimitzselis huan tipaquis? Pero sinta amo tijchihua cati cuali, mitztanis tajtacoli. Nopa tajtacoli eltoc quej se tecuani cati mitzchiya mocalteno huan quinequi mitztanis, pero monequi ta xijtanis ya.”

⁸ Huan panoc se ome tonati huan Caín quinotztejqui iicni Abel huan quiilhui:

—Ma tiyaca cuatita.

Huan quema ajsitoj cuatita, Caín quitehui iicni Abel huan quimicti.

⁹ Huajca TOTECO quitatzintocuili Caín:

—¿Canque itztoc moicni Abel?

Huan Caín quinanquili:

—Amo nijmati na. Amo notequi para nijmocuitahuis noicni.

¹⁰ Huan TOTECO quiihui:

—¿Para ten tijchijtoc ya ni? Tijmicti moicni huan ieso tijtoyajtoc ipan tali. Huan ama eltoc quej ieso techtajtania chicahuac ma nimitztatzacuili.

¹¹ Huajca ama, por cati tijchijtoc, nimitztelchihuas. Ayecmo huelis titequitis ipan ni tali pampa tijnenpolojtoc ica ieso moicni. ¹² Huan masque titatojtocas, ayecmo teno tiqueliltis. Monequi san tinentinemis campa hueli ipan taltipacti huan amo cana tijpiyas para timochantalis.

¹³ Huajca Caín quinanquili TOTECO:

—Nelchicahuac ni tatzacuiliti huan amo huelis niquiyohuis. ¹⁴ Ama techquixtia huejca ten ni tali huan ayecmo huelis nimitztechcahuis ta. Nielis se ninejnenquet campa hueli tali huan amo huelis nimosiyajquetzas. Quej ni cati hueli nechpantis, nechmictis.

¹⁵ Pero TOTECO quinanquili:

—¡Amo! Sinta acajya mitzmictis, nijtatzacuilitis chicome huelta más para nijcuepilis.

Huajca TOTECO quitalili ipan Caín se tanextili para nochi quixmatisquíaj para yaya huan amo quimictisquíaj. ¹⁶ Huan Caín quistejqui campa ihuaya camanaltiyaya TOTECO huan yajqui itztoti ipan se tali itoca Nod cati mocahua imelac Edén para campa quisa tonati.

Ixhuihua Caín

¹⁷ Huan Caín ihuaya cochqui isihua, huan yaya conecuc huan quitacatilti se oquichpil cati itoca Enoc. Teipa Caín quichijqui se altepet huan quitocaxti nopa altepet Enoc quej itoca icone. ¹⁸ Huan Enoc motacachijqui huan elqui itata Irad. Huan teipa Irad moscalti huan elqui itata Mehujael. Huan teipa Mehujael motacachijqui huan elqui itata Metusael. Huan Metusael moscalti huan elqui itata Lamec.

¹⁹ Huan Lamec quinpixqui ome isihuahua; se itoca Ada huan ne seyoc Zila. ²⁰ Huan Ada quitacatilti Jabal. Huan Jabal motacachijqui huan elqui inintata masehualme cati mocajque ipan calme ten yoyomit huan quinxinachohuayayaj huan quinsalcitayayaj tapiyalme. ²¹ Huan Jabal quipixqui se iicni cati itoca Jubal. Huan Jubal moscalti huan quiyolilti tapitzali huan nopa tatzotzonalí cati itoca arpa. Huan yaya elqui inintata masehualme cati tatzotzonaj. ²² Huan Zila, nopa seyoc isihua Lamec, quitacatilti se oquichpil cati itoca Tubal Caín cati elqui se teposchijquet. Huan Tubal Caín quitejtzonayaya nopa teposti cati itoca bronce huan cati itoca hierro huan ica nopa teposti quichijchihuayaya miyac tamanti. Huan Tubal Caín quipixqui se isihua icni cati itoca Naama.

²³ Huan se tonali Lamec quinilhui iome sihuajhua Ada huan Zila: “Xijtacaquilica cuali cati nimechilhuis.

Nijmicti se tacat pampa nechcoco.

Huan elqui se telpocat cati nechmaquilijtoya.

²⁴ Sinta se acajya quichihuilisquía se tenijqui Caín,

quiselisquía se tatzacuiliti chicome huelta más chicahuac.

Pero sinta se acajya nechcuepilisquía cati nijchijtoc na, niLamec,

monequisquía quiselis se tatzacuiliti cati amo san chicome hueltas, pero se tatzacuiliti cati tahuel más chichahuac.”

Adán, Eva huan ininconehua

²⁵ Huan Adán cochqui ihuaya isihua, huan isihua sempa conepixqui huan quitacatilti seyoc oquichpil cati quitocaxti Set. (Set quinegui quijitos Nechmacatoc.) Quej nopa quitocaxti pampa quijito: “Toteco Dios techmacatoc seyoc conet ipataca Abel cati Caín quimicti.”

²⁶ Huan quema Set motacachijqui, quipixqui se icone cati quitocaxti Enós. Huajca ipan nopa tonali tacame pejque quihueyichihuaq TOTECO san sejco.

5

Iteipan ixhuihua Adán

(1 Cr. 1:1-4)

¹ Ya ni inintoca iteipan ixhuihua Adán:

Quema Toteco Dios quinchijqui masehualme, quinchijchijqui quej ya itachiyalis. ² Quinchijchijqui tacame huan sihuame huan ipan nopa tonali quema quinchijqui, quintiochijqui huan quintocaxti “masehualme”.

³ Huan quema Adán quipixqui 130 xihuit, tacatqui icone cati elqui quej ya huan san se inintachiyalis huan quitocaxti Set. ⁴ Huan quema ya tacajtoya Set, Adán noja itztoya seyoc 800 xihuit huan quinpixqui más iconehua, tacame huan sihuame. ⁵ Huan mijqui Adán quema quipixqui 930 xihuit.

⁶ Huan Set quipiyayaya 105 xihuit quema tacatqui icone, Enós. ⁷ Teipa Set noja itztoya seyoc 807 xihuit huan noja quinpixqui sequinoc iconehua, tacame huan sihuame. ⁸ Huan mijqui Set quema quipixqui 912 xihuit.

⁹ Huan Enós quipiyayaya 90 xihuit quema tacatqui icone, Cainán. ¹⁰ Teipa Enós noja itztoya seyoc 815 xihuit huan noja quinpixqui más iconehua, tacame huan sihuame. ¹¹ Huan Enós mijqui quema quipixqui 905 xihuit.

¹² Huan Cainán quipiyayaya 70 xihuit quema tacatqui icone, Mahalaleel.

¹³ Teipa Cainán itztoya seyoc 840 xihuit huan noja quinpixqui más iconehua, tacame huan sihuame. ¹⁴ Huan Cainán mijqui quema quipixqui 910 xihuit.

¹⁵ Huan Mahalaleel quipiyayaya 65 xihuit quema tacatqui icone, Jared.

¹⁶ Teipa Mahalaleel itztoya seyoc 830 xihuit huan noja quinpixqui más iconehua, tacame huan sihuame. ¹⁷ Huan mijqui Mahalaleel quema quipixqui 895 xihuit.

¹⁸ Huan Jared quipiyayaya 162 xihuit quema tacatqui icone, Enoc. ¹⁹ Teipa, Jared itztoya seyoc 800 xihuit más huan noja quinpixqui más iconehua, tacame huan sihuame. ²⁰ Huajca Jared quiaxiti 962 xihuit huan huajca mijqui.

²¹ Huan Enoc quipiyayaya 65 xihuit quema tacatqui icone, Matusalén.

²² Huan Enoc nochipa quichijqui ipaquilis Toteco Dios. Huan teipa quema Matusalén ya tacajtoya, Enoc itztoya seyoc 300 xihuit más huan noja quinpixqui sequinoc iconehua, tacame huan sihuame. ²³ Huajca ica nochí Enoc quiaxiti 365 xihuit. ²⁴ Huan pampa Enoc nochipa nejnentoya quej Toteco Dios ipaquilis, se tonali polijqui pampa Toteco Dios quihuicac.

²⁵ Huan Matusalén quipiyayaya 187 xihuit quema tacatqui icone cati quitocaxti Lamec. ²⁶ Huan teipa Matusalén itztoya seyoc 782 xihuit más huan noja quinpixqui más iconehua, tacame huan sihuame. ²⁷ Huajca ica nochí Matusalén quiaxiti 969 xihuit huan huajca mijqui.

²⁸ Lamec qui piyayaya 182 xihuit quema tacatqui icone, ²⁹ huan quitocaxti Noé. (Noé quinequi quijtos Techyoltalis.) Quej nopa quitocaxti pampa quijto: “TOTECO quitelchijqui ni tali, huan monequi fitequitise tahuel chichahuac para titaeltise, pero ni conet techyoltalis.”

³⁰ Huan teipa quema Noé ya tacajtoya, Lamec noja itztoya seyoc 595 xihuit huan noja quinpixqui más iconehua, tacame huan sihuame. ³¹ Huajca Lamec qui axiti 777 xihuit huan huajca mijqui.

³² Huan Noé qui piyayaya 500 xihuit quema tacatque iconehua, Sem, Cam huan Jafet.

6

Inintaixpanol masehualme ipan taltipacti

¹ Huan masehualme pejqe momiyaquiliaj ipan ni taltipacti huan quinpixque iniichpocahua. ² Huan ipan nopa tonali sequij cati quintocaxtiyayaj “itelpocahua Toteco Dios”^{*} quintaque para yejyectziti iniichpocahua masehualme ipan ni taltipacti. Huajca quintapejpenijque cati quinixtocayayaj huan mosihuajtijque inihuaya. ³ Huan TOTECO quijto: “Notonal amo quinijyohuis masehualme huan inintajtacolhua para nochipa pampa masehualme san panoni. Huajca ama ni quincahuilis ni masehualme ma itztoca san se 120 xihuit.”

⁴ Huan ipan nopa tonali huan nojquiya teipa itztoyaj huejcapantique tacame ipan taltipacti. Inijuanti nesque quema nopa “itelpocahua Toteco Dios” mosejcotilijque ihuaya iniichpocahua masehualme para quinpiyase coneme inihuaya. Huejcajquiya inijuanti itztoyaj huejhueyi masehualme cati nochi quinixmatiyayaj.

⁵ Huan TOTECO quiiac para nelmiyac inintaixpanolhua masehualme ipan taltipacti huan nochipa moilhuiyayaj cati amo cuali quichihuase. ⁶ Yeca ica tequipacholi TOTECO pejqe moyolpata. Moyolihui sinta cuali elqui para quinchiytoya masehualme huan nelia quiyolcoco. ⁷ Huan TOTECO quijto: “Niquinpolihuiltis masehualme cati ni quinchijchijtoc ipan taltipacti. Nojquiya ni quinmictis nochi tapiyalme, totome huan cati mohuahuatatzaj talchi. Nimocuesohua huan nimoilhuía: ¿Para ten ni quinchijchijqui?”

⁸ Pero Noé quipanti cati cuali pampa TOTECO quicualitac.

Icaaacal Noé

⁹ Ama nimechpohuilis cati panoc ica Noé. Noé eliyaya se cuali tacat iixpa Toteco Dios. Yon se ipan nopa tonali amo huelqui quitatelhui ica yon se tamanti. Yaya nejnenqui quej Toteco Dios quinequiyaya. ¹⁰ Huan Noé quinpixqui eyi itelpocahua. Inintoca elque Sem, Cam huan Jafet.

¹¹ Huan ipan nochi taltipacti campa hueli oncayaya cati fiero iixpa Toteco Dios huan nochi masehualme san mosisiniyayaj. ¹² Huan Toteco Dios quiiac para nelfiero eltoya, huan nochi masehualme san mocuapolojtoyaj ipan tajtocoli. ¹³ Huajca Toteco Dios quiihui Noé: “Niquinpolihuiltis nochi masehualme campa hueli ipan taltipacti pampa nochi san mosisiniaj, yeca

* **6:2** 6:2 Sequij masehualme cati miyac momachtijtoque Icamanal Toteco moilhuiaj para “itelpocahua Toteco Dios” camanalti ten ilhuicac ehuan. Nica moilhuiaj camanalti ten nopa ilhuicac ehuan cati tajtacolchijque huan quicajtejqe Toteco para quitoquilise Amocualtacat, huan yeca mocuetque cati tiquintocaxtiaj ajacame. Sequinoc masehualme moilhuiaj para “itelpocahua Toteco Dios” camanalti ten iteipan ixhuhua Set cati achtohui quitoquilijque Toteco, pero teipa miyac ten inijuanti pejqe mosihuajtiaj ica iniichpocahua masehualme cati amo quixmatiyayaj Toteco.

niquinixpolos ica nochi cati onca. ¹⁴ Huajca xijchihua se cuaacali ica nopa cuahuit cati itoca resina huan calijtic xijchihuili pilcuartojtzitzi. Xijtzacua ica chapopoji campa hueli iijtic huan ipani para amo calaquis at. ¹⁵ Quej ni xijchihua nopa cuaacali. Xijchihua 135 metros ihuehueyaca, 22 metros huan tajco ipatajca huan 13 metros huan tajco ihuejcapanca. ¹⁶ Xijchihua nopa cuaacali ica eyi pisos huan xijtali se ventana nechca tapamit. Huan xijtali se caltemit ipan se lado. ¹⁷ Nijtitanis tahuel miyac at cati momanas huejcapa hasta quitzonpolihuiltis nochi tali huan nochi cati quipiyaj nemilisti campa hueli ipan taltipacti. Nochi cati onca ipan tali polihuis. ¹⁸ Pero nijcahua nocamanal mohuaya para nimechmocuitahuis ipan nopa cuaacali. Huan ta ticalaquis ipan cuaacali huan calaquise mohuaya mosihua, motelpocahua huan moyexhua. ¹⁹ Nojquiya tiquinhuicas mohuaya ome tapiyalme, se oquichti huan se sihuatzi ten nochi tamanti tapiyalme cati itztoque ipan taltipacti para noja ma itztoca mohuaya. ²⁰ Mohuaya calaquise ome ten nochi tamanti totome, tapiyalme huan cati mohuahuatatzaj para ma amo miquica. ²¹ Nojquiya xijhuica mohuaya nochi tamanti tacualisti cati monquis anquicuase amojuanti huan nochi nopa tapiyalme.”

²² Huan Noé quichijqui nochi quej Toteco Dios quihuhijtoya.

7

Nopa tahuel miyac at

¹ Teipa TOTECO quihuhui Noé: “San ta ten nochi masehualme cati ama itztoque tijchihua cati xitahuac. Yeca xicalaqui ipan cuaacali ihuaya mosihua huan moconehua. ² Xiquinhuica mohuaya chicome oquichme huan chicome sihuatzitzi ten nochi tamanti tapiyalme cati cuali para tacajcualisti. Pero xijhuica san se oquichti huan se sihuatzi ten nopa tapiyalme cati amo motequihuaj para tacajcualisti. ³ Nojquiya xiquinhuica chicome oquichme huan chicome sihuatzitzi ten nochi tamanti totome para amo polihuis inixinacho ipan taltipacti. ⁴ Pampa ica chicome tonati nijchihuas ma huetzi at, huan huetzqui at para 40 tonati huan 40 yohuali. Quej nopa niquinpolihuiltis nochi cati yoltoque cati niquinchijchijtoc ipan ni taltipacti.”

⁵ Huan Noé quichijqui nochi quej TOTECO quinahuatijtoya.

⁶ Huan Noé quipiyayaya 600 xihuit quema momanqui nochi nopa miyac at para quitzonpolihuiltis taltipacti. ⁷ Huan Noé calajqui ipan cuaacali ihuaya iconehua, isihua huan iyexhua para momanahuisse ten nopa miyac at cati huala. ⁸ Huajca ojome hualajque nochi nopa tapiyalme campa Noé. Hualajque tapiyalme cati cuali para tacajcualisti huan cati amo cuali para tacajcualisti, cati patanij huan cati mohuahuatatzaj. ⁹ Ojome nochi hualajque campa Noé huan calajque ipan cuaacali. Calajqui se oquichti huan se sihuatzi ten sesen tamanti tapijali quej Toteco Dios tanahuatijtoya.

¹⁰ Huan ica chicome tonati hualajqui tahuel miyac at ipan taltipacti.

¹¹ Quema Noé quipiyayaya 600 xihuit, ipan nopa 17 tonali ten nopa ompa metzti tapojqui nochi amelme campa meyayaya nopa at cati onca tatzinta huan tahuel pejqui toponi at. Huan pejqui huetzi at cati amo moquetzqui.

¹² Huan para 40 tonati huan 40 yohuali taquiyahuiyaya ipan taltipacti. ¹³ Quena, ipan nopa tonal quema pehuasquia huetzis at, Noé calajqui ipan cuaacali ihuaya iconehua, Sem, Cam huan Jafet. Huan ihuaya isihua huan eyi iyexhua. ¹⁴ Huan inihuaya calajque nochi tamanti tecuanime cati mosisiníaj, huan tapiyalme cati maxojtzitzi, huan nochi cati mohuahuatatzaj

talchi huan nochi tamanti totome. ¹⁵ Nochi tapiyalme calajque ihuaya Noé ipan cuaacali ica inihuical. ¹⁶ Calajqui se oquichti huan se sihuatzi quej Toteco Dios quinahuatijtoya Noé. Teipa TOTECO quitzajqui icalte nopa cuaacali.

¹⁷ Huan para 40 tonati san at hualayaya. Huan quema pejqui tejco nopa at, nopa cuaacali motananqui huan pejqui nemi aixco. ¹⁸ Huan nopa at noja más tejoc huan tahuel huejcata mochijqui, pero nopa cuaacali nejnentiyajqui aixco. ¹⁹ Huan teipa noja más tejcotiyajqui hasta quinzonpolihuilti nopa tepeme cati más huejcapantique ipan taltipacti. ²⁰ Huan teipa quema ya quitzactoya nopa tepeme noja tejoc nopa at seyoc chicueyi metros iixco nopa tepeme. ²¹ Yeca quej nopa mijque nochi cati itzttoyaj ipan taltipacti. Mijque nochi totome, huan tecuanime cati mosisiníaj huan tapiyalme cati maxojtztzi. Nojquiya mijque nochi tamanti piltapiyaltztzi cati mohuahuatatzaj talchi huan nochi masehualme. ²² Nochi cati itzttoyaj ipan taltipacti cati taijyotilanayayaj mijque. ²³ San Noé huan nochi cati itzttoyaj ipan cuaacali mocajque. Nochi sequinoc quinzonpolihuilti. Nochi masehualme, tapiyalme, totome huan nochi cati mohuahuatatzaj mijque. ²⁴ Huan nopa at quitzonpolihuilti nochi taltipacti para 150 tonati.

8

Quema tanqui nopa miyac at

¹ Huajca Toteco Dios quielnamijqui Noé ica nochi nopa tapiyalme cati itzttoyaj iijtic cuaacali. Huan Toteco Dios quichijqui ma taajaca ipan tali, huan nopa at pejqui temo. ² Huan motzajque nopa amelme campa meyayaya at tatzinta taltipacti, huan motzajqui nepa ilhuicac huan ayecmo taquiyajqui. ³ Huan nopa at pejqui temotiya yolic. Huan ica seyoc 150 tonali miyac temotoya nopa at. ⁴ Huan quema ajsic nopa 17 tonali ten nopa chicompa metzi, nopa cuaacali motalito ipan se tepet ipan nopa tepeme cati itoca Ararat. ⁵ Huan mojmota más temotiyahuiyaya nopa at. Huan quema ajsic nopa achtohui tonal ten nopa majtacpa metzti, nesqui inintzonpac nopa tepeme cati más huejcapantique.

⁶ Huajca Noé quichixqui seyoc 40 tonati huan quitapo nopa ventana cati quichijtoya ipan nopa cuaacali. ⁷ Huan quiquixti se cacalot huan quicahuili ma yahui. Huan nopa cacalot san patantinenqui campa hueli hasta huajqui tali. ⁸ Teipa nojquiya quimajcajqui se paloma para quitas sinta ya huajqui nopa tali. ⁹ Pero nopa paloma mocuetqui ipan cuaacali pampa amo cana quipanti para mosiyajquetzas, pampa nopa tali noja temitoya ica at. Huajca Noé quiquixti imax, quitzqui nopa paloma huan quicalaqui.

¹⁰ Huajca Noé quichixqui seyoc chicueyi tonati huan sempa quititanqui nopa paloma calteno ten nopa cuaacali. ¹¹ Huan ica tiotac quema pejtoya tzintatayohuiya, nopa paloma mocuetqui huan quihualicayaya ipan itenchapich imaxihuiyo se cuahuit cati itoca olivo. Quej nopa Noé momacac cuenta para nopa tali huactiyahuiyaya. ¹² Huan Noé sempa quichixqui seyoc chicome tonati huan sempa quititanqui nopa paloma, pero ama quena, nopa paloma ayecmo mocuetqui.

¹³ Huajca quema Noé quipiyayaya 601 xihuit ipan nopa achtohui tonali ten nopa achtohui metzti, tantoya nopa at. Huan Noé quiquixtili ipantzajca nopa cuaacali huan quiiac nochi huactinemiya. ¹⁴ Huan ipan nopa tonali 27 itequi nopa ompa metzti, ya tami huactoya nopa tali.

¹⁵ Huajca Toteco Dios quillhui Noé: ¹⁶ “Xiquisa ten nopa cuaacali ihuaya mosihua, moconehua huan moyexhua. ¹⁷ Nojquiya xiquinquixti nochi tapiyalme cati itztoque mohuaya. Xiquinquixti nopa totome huan nochi tapiyalme para ma yaca huan ma quinpiyaca miyac ininconeua huan ma quitemitica ni taltipacti.”

¹⁸ Huajca Noé, huan isihua, huan iconehua huan iyexhua quisque ten nopa cuaacali. ¹⁹ Nojquiya quisque nochi totome, huan nochi tapiyalme cati mosisiníaj, huan cati maxojtzitzi huan nochi cati mohuahuatatzaj. Huan sesen tamanti tapiyali quisqui ica iconehua cati quitoquilliyayaj.

²⁰ Teipa Noé quichijqui se taixpamit para TOTECO. Huan quicuic ten sesen tamanti tapiyali huan sesen tamanti totot cati cuali para tacajcahualisti. Huan quinmicti huan quintati ipan nopa taixpamit quej se tacajcahualisti para TOTECO. ²¹ Quema TOTECO quijnejqui ipocyo cati ajhuiyac, yaya moilhui: “Amo quema más nijtatzacuiltis taltipacti por inintajtacolhua masehualme pampa se masehuali hasta quema tacati san moilhuía ten amo cuali para quichihuas. Nojquiya ayecmo quema niquinpolihuiltis nochi tapiyalme quej nijchijqui ni huelta.”

²² “Nochi tonali quema eltos ni taltipacti,

oncas toquisti huan pixquisti.

Nochipa oncas tatotonilót huan tasesecayot.

Oncas metzti quema tahuaguis huan metzti quema huetzis miyac at,

Nochipa oncas tonaya huan tayohua.

Ni tamanti amo quema tamis quema noja eltos taltipacti.”

9

Cati Toteco Dios quitencahuili Noé

¹ Huan Toteco Dios quitiochijqui Noé huan iconehua ica ni camanali: “Xiquinpiyaca miyac amonehua huan xijtemitica ni taltipacti. ² Nochi tapiyalme ipan taltipacti amechimacasise. Anquipiyase tanahuatili ica nochi totome ipan ajacat, huan nochi tapiyalme ipan tali huan nochi cati itztoque ipan hueyi at. ³ Huelis anquincuase nochi tapiyalme pampa nimechmaca nochi cati itztoque para tacualisti quej nojquiya nimechmacatoc nochi xihuit cati xoxohuic para tacualisti. ⁴ Pero onca se tamanti cati amo cuali para anquicuase. Amo xijcuaca nacat ica ieso pampa inemilis se tapiyali eltoc ipan ieso. ⁵ Amo xitemicti. Sinta se acajya quimictis se masehuali, monequi miquis. Huan sinta se tapiyali quimictis se masehuali, monequi miquis. Quena, monequi se masehuali techmacas cuenta taya quinchihuilijtoc sequinoc masehualme.

⁶ “Sinta acajya quimictia se masehuali, monequi sequinoc quimictise nopa temictijquet.

Pampa Toteco Dios quichijchijtoc se masehuali quej ya itachiyalis.

⁷ Pero amajuanti, xiquinpiyaca miyac amonehua.

Quena, ximomiyaquilica huan xijtemitica ni taltipacti, ica aixhuihua huan amoteipan ixhuihua.”

⁸ Teipa Toteco Dios quinilhui Noé huan iconehua: ⁹ “Ama nijcahua nocamanal ica amajuanti huan amoteipan ixhuihua, ¹⁰ huan ica nochi totome, huan nochi tapiyalme cati itztoque ipan taltipacti huan ica nochi cati quisque ipan cuaacali amohuaya. ¹¹ Nijcahua nocamanal para ayecmo quema niquinpolihuiltis sempa nochi masehualme huan nochi tapiyalme ica miyac at campá hueli. Ayecmo quema oncas tahuel miyac at cati mo-manas campá hueli ipan nochi taltipacti para quisosolos. ¹² Ya ni elis nopa

tanextili ten nopa camanali cati nijchihua amohuaya huan inihuaya nochi tapiyalme para nochipa. Quinextis para ayecmo quema oncas tahuel miyac at hasta quinmictis nochi masehualme huan tapiyalme. ¹³ Nijtalijtoc noacosemalo ipan mixti huan eltos quej se tanextili ten nopa cati nijtencahuilía ni taltipacti. ¹⁴ Huan quema nijchihuas ma huala mixti ipan taltipacti, noacosamalo monextis ipan nopa mixti, ¹⁵ huan huajca niquelnamiqis nocamanal cati nijcajqui amohuaya huan inihuaya nochi tamanti tapiyalme. Ayecmo quema huezsis tahuel miyac at campa hueli ica sempa hasta quinpolos nochi tamanti cati itztoque. ¹⁶ Pampa quema nopa acosamalot monextis ipan mixti, niquitas huan niquelnamiqis nopa camanali cati na, niamoTeco Dios, nijchijtoc para nochipa amohuaya huan inihuaya nochi masehualme huan nochi tapiyalme cati itztoque ipan ni taltipacti. ¹⁷ Ni acosamalot elis nopa tanextili ten nopa camanali cati nijchijtoc inihuaya nochi masehualme huan tapiyalme ipan taltipacti.” Quej nopa Toteco Dios quiilhui Noé.

Noé huan iconehua

¹⁸ Iconehua Noé cati ihuaya quisque ipan cuaacali elque Sem, Cam huan Jafet. Huan Cam elqui itata Canaán. ¹⁹ Ten ni ieyi telpocahua Noé quisque nochi masehualme cati teipa momoyajque campa hueli ipan taltipacti para quitemitise.

²⁰ Huan Noé cati momajtoya miltequiti, quitojqui se xocomeca mili. ²¹ Huan teipa se tonali quiiic miyac xocomeca at huan ihuintic. Huan huetzqui xolot icalijtic ipan ichaj cati tachijchihuali ica yoyomit. ²² Huan quema Cam, cati eliyaya itata Canaán, quiiitac para itata huetztoya xolot, yajqui quinpohuilito iicnihua. ²³ Huajca Sem huan Jafet quicuique se yoyomit huan quitallijque iniajcoltipa huan icanejnentiyaajque para amo quiiitase inintata xolot. Huan quema calajque ipan icalijtic, tachixtiyaajque sejcoyoc para amo quiiitase Noé huan quitzajque Noé ica nopa yoyomit.

²⁴ Huan quema Noé isac huan ayecmo ihuintitoya, quimatqui cati Cam, icone teipan ejquet, quichijtoya huan quimatqui para amo quitepanitztoya.

²⁵ Huajca quiiijto:

“¡Toteco Dios ma quitelchihua Canaán!
¡Ma elis inintequipanojca sequinoc,
huan amo aquí ma quitepanitas!”

²⁶ Huan Noé nojquiya quiiijto:
“Ma tijhueyitalica TOTECO cati Sem quihueyimati.
Huan Canaán ma elis itequipanojca Sem.”

Huan nojquiya quiiijto:

²⁷ “Toteco Dios más ma quihueyili ital Jafet.
Huan iteipan ixhuihua Jafet ma itztoca inihuaya iteipan ixhuihua Sem.
Huan Canaán ma eli inintequipanojca.”

²⁸ Huan quema tanqui nopa miyac at, Noé noja itztoya seyoc 350 xihuit,
²⁹ huan mijqui quema quipiyayaya 950 xihuit.

10

Ixhuihua Noé

(1 Cr. 1:5-23)

¹ Sem, Cam huan Jafet eliyayaj iconehua Noé huan ya ni iniixhuihua cati quinpixque quema ya tantoya nopa miyac at cati momanqui ipan nochi taltipacti.

Ixhuihua Noé ica itelpoca, Jafet

² Itelpocahua Jafet elque:

Gomer, Magog, Madai, Javán, Tubal, Mesec huan Tiras.

³ Itelpocahua Gomer elque:

Askenaz, Rifat huan Togarma.

⁴ Itelpocahua Javán elque:

Élisa, Tarsis, Quitim huan Dodanim.

⁵ Huan iixhuihua Jafet teipa momiyaquilijque huan mocajque nechca hueyi at ipan campa hueli talme campa camanaltiyayaj ica sese inincamanal.

Itxhuihua Noé ica itelpoca, Cam

⁶ Itelpocahua Cam elque:

Cus, Mizraim, Fut huan Canaán.

⁷ Itelpocahua Cus elque:

Seba, Havila, Sabta, Raama huan Sabteca.

Itelpocahua Raama elque:

Seba huan Dedán.

⁸ Huan Cus nojquiya elqui itata Nimrod cati quipixqui miyac chicahualisti campa hueli ipan taltipacti. ⁹ Nochi quitocamatiyayaj Nimrod huan quimatiyayaj para ica itapalehuil TOTECO elqui se cuali tapejquet. Yeca quema masehualme quihueyitaliyayaj se tacat, quijtosquíaj: “Yaya itztoc quej Nimrod, se cuali tapejquet ica itapalehuil TOTECO.” ¹⁰ Nopa achtohui altepeme cati moscaltijque ipan itanahuatil Nimrod elqui Babel, Erec, Acad huan Calne ipan tali Sinar. ¹¹ Huan itanahuatil Nimrod pejqui ipan tali Sinar huan momoyajqui hasta tali Asiria. Yaya quichijqui nopa altepeme cati inintoca Nínive, Rehobot huan Cala. ¹² Huan quichijqui Resén cati eltoya tatajco nopa hueyi altepet Nínive huan Cala.

¹³ Huan Mizraim elqui itata:

Ludim, Ananim, Lehabim, Naftuhim, ¹⁴ Patrusim, Caftorim huan Casluhim cati elqui inihueyi tata nopa filisteos.

¹⁵ Huan Canaán elqui itata iachtohui cone cati itoca:

Sidón huan quipixqui se iteipan cone cati itoca eliyaya Het. ¹⁶ Huan Canaán nojquiya elqui inihuejcapan tata nopa masehualme: jebuseos, amorreos, gergeseos, ¹⁷ heveos, araceos, sineos, ¹⁸ arvadeos, zemareos huan hamateos.

Teipa nochi ni masehualme cati eliyayaj iteipan ixhuihua Canaán momoyajque campa hueli. ¹⁹ Inintal elqui ten tali Sidón hasta nopa piltaltzi cati itoca Gaza cati eltoya ipan ojti para Gerar. Huan neca campa quisa tonati inintal yajqui hasta altepet Lasa ipan ojti para nopa altepeme Sódoma, Gomorra, Adma huan Zeboim.

²⁰ Nochi ya ni elque iteipan ixhuihua Cam. Huan nica ijcuiljtoc inintoca ininfamilias, huan inincamanal cati sesen camanaltiyayaj. Huan ijcuiljtoc iniestados huan inintal ipan cati sese itztoya.

Iteipan ixhuihua Noé ica itelpoca, Sem

²¹ Huan Sem elqui inihueyi tata Heber huan iconehua. Sem elqui cati achtohui tacatqui ten inana huan teipa tacatqui iicni Jafet.

²² Huan Sem quinpixqui itelpocahua cati inintoca eliyayaj:

Elam, Asur, Arfaxad, Lud huan Aram.

²³ Itelpocahua Aram elque:

Úz, Hul, Geter huan Mas.

²⁴ Huan Arfaxad elqui itata Sala,

huan Sala elqui itata Heber.

²⁵ Teipa Heber quinpixqui ome itelpocahua:

Se motocaxtiyaya Peleg. (Peleg quinequi quijitos Motajcoitac.) Quej nopa itoca pampa ipan nopa tonali taltipacti motajcoitac. Huan iicni Peleg motocaxtiyaya Joctán.

²⁶ Huan Joctán elqui itata:

Almodad, Selef, Hazar Mavet, Jera, ²⁷ Adoram, Uzal, Dicla, ²⁸ Obal, Abimael, Seba, ²⁹ Ofir, Havila huan Jobab. Nochi ya ni eliyayaj iconehua Joctán.

³⁰ Huan iteipan ixhuihua Joctán itztoyaj ipan nopa tali tatajco Mesa huan nopa tepeme campa quisa tonati imelac Sefar.

³¹ Nochi ya ni elque iteipan ixhuihua Sem ica inihuejhueyi familias, huan inincamanal, huan ininpiltaltitzi. Huan techilhuía nochi tali ica se tanahuatijquet campa mocahuayayaj para itztose.

³² Huajca ni cati nimitzphuilljtoc eltoya inintoca itayacanca teipan ixhuihua Noé. Huan sese injuanti mochijqui se hueyi familia ica iniixhuihua cati teipa ehuan. Nojquiya nica quijitohua nopa tali campa mocajque para itztose. Huan quema panotoya nopa miyac at, nochi xinachti masehualme quisque ten iixhuihua Noé huan campa hueli momoyajque ipan taltipacti.

11

Nopa torre cati itoca Babel

¹ Ipan nopa tonali nochi masehualme cati itztoyaj ipan taltipacti quipiyayayaj san se inincamanal huan camanaltiyayaj san se. ² Huan quema masehualme pejqque momoyahuaj, miyac yajque para campa quisa tonati. Nopa quipantijque se tamayamit ipan tali Sinar huan nozona nelia miyac masehualme mocajque huan ayecmo quinejqque momoyahuase.

³⁻⁴ Huan se tonali injuanti moilhuijqque se ica seyoc: “Xihualaca ma tijchihuaca se hueyi altepet huan se huejcapantic torre cati ajsis hasta ilhuicac. Huan quej ni nochi techixmatise huan amo monequis timoxelose huan tiyase campa hueli ipan taltipacti. Ma tijchihuaca ladrillos huan ma tiquicxítica cuali ipan tit.”

Huan quitequihuijqque ladrillos ten soquit huan amo tet huan quitequihuijqque chapopoji para quitatzquiltise huan amo soquit.

⁵ Pero TOTECO temoc huan quiiitaco nopa altepet huan nopa torre cati nopa masehualme quichijchiuayayaj. ⁶ Huan yaya moilhui: “Nopa masehualme itztoque san sejco huan san se inincamanal. Yeca ni tamanti cati ama quichihuaj san ipejya cati hueli quichihuase san sejco. Teipa huelis quichihuase san cati injuanti quinequise. ⁷ Achi más cuali titemose para tiquinpatilise inincamanal para ayecmo ma quimachilica cati mocamanal-huise.”

⁸ Huajca quej nopa TOTECO quichijqui huan yeca quiquetzqui inintequi huan ayecmo quichijque nopa altepet. Quej nopa TOTECO quinsemanqui nopa masehualme campa hueli ipan taltipacti para ma momoyahuaca quej ya quinequiyaya. ⁹ Huan nozona itoca elqui Babel. (Babel quinequi quijitos Campa Amo Huelque Momachilíaj Se Ica Seyoc.) Quej nopa itoca pampa nozona TOTECO quipatac inincamanal nochi masehualme cati itztoyaj ipan ni taltipacti para ayecmo huelque momachilíaj. Huan ten nozona TOTECO quinsemanqui campa hueli ipan taltipacti.

*Iteipan ixhuihua Sem**(1 Cr. 1:24-27)*

¹⁰ Ya ni eltoqa inintoca iteipan ixhuihua Sem. Tanqui nopa miyac at huan ome xihuit teipa quema Sem quiptiyayaya 100 xihuit, tacatqui ioquichpil Arfaxad. ¹¹ Teipa Sem noja itztoya seyoc 500 xihuit huan quinpixqui más iconehua, tacame huan sihuame.

¹² Huan quema Arfaxad quipixqui 35 xihuit, tacatqui ioquichpil Sala.

¹³ Teipa Arfaxad noja itztoya seyoc 403 xihuit huan quinpixqui más iconehua, tacame huan sihuame.

¹⁴ Sala quiptiyayaya 30 xihuit quema tacatqui ioquichpil Heber. ¹⁵ Huan teipa Sala noja itztoya seyoc 403 xihuit huan quinpixqui más iconehua, tacame huan sihuame.

¹⁶ Heber quiptiyayaya 34 xihuit quema tacatqui ioquichpil cati itoca Peleg.

¹⁷ Teipa Heber noja itztoya seyoc 430 xihuit huan quinpixqui más iconehua, tacame huan sihuame.

¹⁸ Huan quema Peleg quipixqui 30 xihuit, tacatqui ioquichpil Reu. ¹⁹ Huan teipa Peleg noja itztoya seyoc 209 xihuit huan noja quinpixqui más iconehua, tacame huan sihuame.

²⁰ Reu quiptiyayaya 32 xihuit quema tacatqui ioquichpil Serug. ²¹ Teipa Reu noja itztoya seyoc 206 xihuit huan quinpixqui más iconehua, tacame huan sihuame.

²² Huan quema Serug quipixqui 30 xihuit, tacatqui ioquichpil Nacor.

²³ Huan teipa Serug noja itztoya seyoc 200 xihuit huan quinpixqui más iconehua, tacame huan sihuame.

²⁴ Nacor quiptiyayaya 29 xihuit quema tacatqui ioquichpil Taré. ²⁵ Teipa Nacor noja itztoya seyoc 119 xihuit huan quinpixqui más iconehua, tacame huan sihuame.

²⁶ Huan Taré ya quipixtoya 70 xihuit quema tacatque ioquichpillhua Abram, Nacor huan Harán.

Iteipan ixhuihua Taré

²⁷ Ama ya ni inintoca iteipan ixhuihua Taré. Taré elqui itata Abram, Nacor huan Harán. Huan teipa Harán elqui itata Lot. ²⁸ Huan Harán nojquiya quinpixqui ome iichpocahua. Se itoca Isca huan se itoca Milca. Pero Harán mijqui quema ayemo miqiyaya itata huan quema nochi injuanti noja mocahuayayaj para itztose nozona campa tacatque ipan nopa altepet cati itoca Ur ipan nopa tali campa itztoyaj nopa caldeos.

²⁹ Huan Abram mosihuajti ihuaya Sarai. Huan Nacor mosihuajti ihuaya imachcone, Milca, cati elqui iichpoca Harán. ³⁰ Huan Sarai eliyaya se sihuat cati amo huelyaya quimpiya coneme.

³¹ Taré itztoya ipan altepet Ur ipan nopa tali campa itztoyaj nopa caldeos huan quisqui para yas ipan tali Canaán. Huan Taré quinhuicac itelpoca Abram, huan iyex, Sarai, huan iixhui, Lot, cati eliyaya itelpoca nopa mijcatzi Harán. Pero quema injuanti ajsitoj ipan altepet Harán, mocajque nozona.

³² Huan nozona mijqui Taré quema quiptiyayaya 205 xihuit.

12*TOTECO quinoztzqui Abram*

¹ TOTECO ya quiihuijtota Abram:

“Xijcajtehua motal, huan moteixmatcahua huan ichaj motata. Huan xiya hasta se tali cati nimitznextilis.

² Huan nimitzmacas miyac moixhuihua,

huan niquinmiyaquilis moteipan ixhuihua hasta elise tahuel miyaqui masehualme ipan inintal.

Nimitztiochihuas huan nijchihuas para campa hueli nochi ma mitzixmatica. Huan tielis se tatiochihualisti para sequinoc.

³ Niquintiochihuas injuanti cati mitztiochihuase.

Huan injuanti cati mitztelchihuase, niquintelchihuas.

Huan niquintiochihuas nochi masehualme ipan taltipacti por ta.”

⁴ Huajca Abram quisqui quej TOTECO quinahuatitjtoya huan quiپیayaya 75 xihuit quema quisqui ipan altepet Harán para yas tali Canaán. ⁵ Huan quihuicac isihua Sarai huan imachcone Lot. Nojquiya Abram quihuicac nochi nopa miyac tamanti huan tapiyalme cati quinپیayaya huan nochi itequipanojcahua cati hualajtoyaj ihuaya ten altepet Harán pampa quincojtoya para iaxcahua.

⁶ Huan quema injuanti ajsitoj ipan tali Canaán, Abram quipanoc nopa tali hasta ajsitoj campa eltoc nopa hueyi ahua cuahuit cati itoca More nechca altepet Siquem. Ipan nopa tonali itztoyaj cananeos ipan nopa tali. ⁷ Huan nozona TOTECO monexti ica Abram huan quiilhui: “Ni tali niquinmacas moteipan ixhuihua.”

Huajca Abram quichijqui se taixpamit nozona para TOTECO cati monextitjtoya ica ya. ⁸ Teipa yajqui itztoti campa tepeco tatajco altepet Betel huan campa quisa tonati huan nozona quiquetzqui ichaj ten yoyomit. Altepet Betel mocahuayaya ica irravesco para campa temo tonati. Huan altepet Hai mocajqui ica inejmat para campa quisa tonati. Huan nozona Abram quichijqui seyc taixpamit huan quihueyichijqui TOTECO. ⁹ Teipa sempa pejqui nejnemi hasta nopa tali cati itoca Neguev.

Abram yajqui tali Egipto

¹⁰ Ipan nopa tonali amo oncayaya tacualisti ipan nopa tali pampa amo taquiyajtoya. Huajca Abram yajqui para itztoti ipan tali Egipto para se ome xihuit, pampa nelía amo teno oncayaya para quicuase campa itztoyaj.

¹¹ Huan quema ajsityahuiyayaj Egipto, Abram quiilhui isihua Sarai: “Xiquita, cuali nijmati para nelía tiyejyectzi, ¹² huan quema nopa egiptome mitzitase, quijitose: ‘Ni sihuat, ya isihua ni tacat. Huajca ma tijmictica huan nopa sihuat elis toaxca.’ ¹³ Yeca para ma amo teno nopantis, xiqijtos para tinoicni. Quej nopa techselise ica yejyectzi por ta, huan amo nimiquis.”

¹⁴ Huajca quej nopa mocajque huan quema ajsitoj ipan tali Egipto, nopa egiptome quiitaque para Sarai eliyaya nelyejyectzi. ¹⁵ Huan nojquiya quiitaque nopa huejhueyi tacame cati itztoyaj ichaj nopa hueyi Tanahuatijquet Faraón huan quiilhuitoj nopa tanahuatijquet para nopa sihuat eliyaya nelyejyectzi. Huajca Faraón quinnahuati ma quihuicaca ichaj para quicualtalis para teipa elis isihua.

¹⁶ Huan pampa quiixtocac Sarai, Faraón quiseli Abram ica cuali. Huan Faraón quimacac Abram borregojme, huacaxme, burrojme, camellos huan tequipanohuani ten tacame huan sihuame para ma elica iaxcahua.

¹⁷ Pero TOTECO quitatzacuiliti nopa Faraón inihuaya nochi cati itztoyaj ipan ichaj ica cocolisti cati más fiero pampa Sarai itztoya ipan ichaj. ¹⁸ Yeca nopa Faraón quinzotzqui Abram iixpa huan quiajhuac. Quiilhui: “¿Para ten techchihuilijtoc ni tamanti? ¿Para ten amo techilhui para ni sihuat eliyaya mosihua? ¹⁹ Ta tiquijto para ya moicni huan yeca nimocuili. Xiquita, nica itztoc. ¡Xijhuica huan ya xiya!”

²⁰ Huajca nopa Faraón quinnahuati imasehualhua ma quicahuilica Abram ma quisa ipan nopa tali ihuaya isihua huan ica nochi cati quiپیtoya.

13

Abram huan Lot moxelojqe

¹ Huajca Abram quisqui tali Egipto ihuaya isihua, huan ihuaya Lot huan ica nochi cati quipixtoyaj. Huan neñnenque para norte huan sempa calajque ipan nopa tali Canaán ipan nopa huactoc tali cati itoca Neguev. ² Huan Abram nelía moricojchijtoya. Quipiyayaya miyac oro, plata huan tapiyalme. ³ Quema quisque Neguev, yajque ica yolic huan ajsitoj campa nopa pilaltepzi Betel. Huan teipa ajsitoj campa mocajtoyaj achtohui, tatajco Betel huan Hai. ⁴ Nopona eliyaya campa quichijtoya se taixpamit. Huan nopona sempa quihueyichijqui TOTECO.

⁵ Huan Lot cati nemiyaya ihuaya Abram nojquiya moricojchijtoya. Quipixqui san se imiyaca tapiyalme quej itío Abram. Quinpixqui miyac borregojme, chivojme, huacaxme huan miyaqui tequipanohuani cati itztoyaj ipan miyac calme ten yoyomit. ⁶ Huan nopa tali campa mocahuayayaj Abram huan Lot amo quinaxiliyaya para quintamacase nochi inintapiyalhua. Huan yeca ayecmo hueliyaya itztoque san sejco pampa nelmiyaqui itztoyaj. ⁷ Huan itequipanojcahua Abram cati quinmocuitahuiyayaj itapiyalhua mocualaniyayaj inihuaya cati quinmocuitahuiyayaj Lot itapiyalhua. Huan ipan nopa tonali nojquiya itztoyaj cananeos huan ferezeos campa injuanti huan eliyayaj mahuililme.

⁸ Huajca se tonali Abram quihui Lot: “Tojuanti tiicnime. Amo cuali para ma monajnanquilica motequipanojcahua ihuaya notequipanojcahua huan pehuas timoculanise tiome. ⁹ Ma timoxeloca. Xiquita, nica eltoc nochi ni tali para tijtapejpenis campa tijnequis. Sinta tijnequi tiyas nepa ica tonejmat, huajca na niyas ica toarraves. Huan sinta tiyas ica toarraves, huajca na niyas ica tonejmat.”

¹⁰ Huan Lot quitajtachili nochi nopa yejyetzti tali ten nopa hueyat Jordán hasta nopa pilaltepzi Zoar. Quítac para quipiyayaya miyac at huan eliyaya quej se xochimili. Tahuel cuajcualtzi nesiyaya quej nopa tali Egipto. Ya ni panoc quema TOTECO ayemo quintamiltiyaya nopa altepeme Sodoma huan Gomorra. ¹¹ Huajca Lot quitapejpeni nochi nopa tamayamit nechca hueyat Jordán huan yajqui para campa quisa tonati. Quej ni moxelojqe Abram huan Lot. ¹² Huajca Abram mocajqui ipan tali Canaán huan Lot yajqui itztoti ipan nopa altepeme campa tamaya. Huan Lot yolic quihuenijtiyajqui ichaj ten yoyomit hasta ajsito ipan altepet Sodoma ¹³ campa masehualme quipiyayayaj ininemilis tahuel fiero. Tahuel tajtacolchihuayayaj iixpa TOTECO.

¹⁴ Teipa quema Lot ya quistoya, TOTECO quihui Abram: “Abram, xitachiya huejca ica norte huan ica sur, huan ica campa quisa tonati huan ica campa ontemo. ¹⁵ Nochi ni tali cati hueli tiquita, na nimitzmacas. Huan para nochipa elis moaxca huan iniaxca moteipan ixhuihua. ¹⁶ Nijchihuas ma elica tahuel miyaqui moteipan ixhuihua quej imiyaca taltepociti. Huan sinta se huelisquía quipohuasquía taltepociti, nojquiya huelis quinpohuasquía nochi moteipan ixhuihua. ¹⁷ Huajca ximoquetza, xinejnemi huan xijtachiliti ihuehueyaca huan ipatajca, pampa na nimitzmacas.”

¹⁸ Huajca Abram quitananqui ichaj ten yoyomit huan quiquetzqui hasta campa oncayaya miyac ahua cuame cati eliyaya iaxca se tacat cati itoca Mamre nechca altepet Hebrón. Huan nopona Abram quichijqui se taixpamit para TOTECO.

14

Abram quimanahui Lot

1-4 Para 12 xihuit nopa Tanahuatijquet Quedorlaomer ten tali Elam quinchihualtiyaya macuiliti tanahuatiani huan inimasehualhua ma quitequipanoca, pero ipan nopa 13 xihuit, nopa macuiliti tanahuatiani quinyolaxitijque huan mosisinijque. Huajca mosentilijque ipan nopa tamayamit Sidim nopa macuiliti tanahuatiani cati inintoca Tanahuatijquet Bera ten altepet Sodoma, Tanahuatijquet Birsa ten altepet Gomorra, Tanahuatijquet Sinab ten altepet Adma, Tanahuatijquet Semeber ten altepet Zeboim huan seyoc cati elqui tanahuatijquet ten altepet Bela cati nojquiya itoca Zoar. Sidim campa mosentilijque mochua tatajco tepeme nechca campa eltoc nopa Hueyi At Cati Mictoc. Mosentilijque para momanahuisse ten Quedorlaomer para ayecmo quitequipanose.

Huan seyoc eyi tanahuatiani mosentilijque ihuaya Quedorlaomer para quipalehuisse tatehuis. Ni eyi elque Tanahuatijquet Amrafel ten altepet Sinar, Tanahuatijquet Arioc ten altepet Elasar huan Tanahuatijquet Tidal ten altepet Goim.

5 Huajca ipan nopa 14 xihuit, Quedorlaomer huan eyi tanahuatiani cati quipalehuiyayaj quisque huan nimantzi quintanque nopa refaitame ipan tali Astarot Karnaim, huan nopa zuzitame ipan tali Ham huan nopa emitame ipan Save Quiriataim. 6 Huan quinquixitijyayque nopa horeos campa nopa cuatitamit Seir hasta nopa tamayamit ipan tali Parán cati eltoc nechca nopa huactoc tali campa amo teno eli. Nochi ni masehualme nopa Quedorlaomer quintanqui. 7 Huan quema tacuepiliyayaj Quedorlaomer huan cati ihuaya itztoyaj, ajsitoj ipan tali En Mispal cati nojquiya itoca Cades. Huan quintanque nochi nopa amalecitame huan amorreos cati itztoyaj ipan nopa altepet Hazezón Tamar.

8-9 Huajca nopa macuiliti tanahuatiani ten altepeme Sodoma, Gomorra, Adma, Zeboim huan Bela o Zoar yajque ipan nopa tamayamit cati itoca Sidim huan mocualtalijque para motehuisse inihuaya nopa nahui tanahuatiani cati eliyaya Tanahuatijquet Quedorlaomer ten tali Elam, huan ihuampoyohua cati inintoca: Tanahuatijquet Tidal ten altepet Goim, Tanahuatijquet Amrafel ten altepet Sinar huan Tanahuatijquet Arioc ten altepet Elasar. 10 Pero nopa macuiliti amo huelque tatanij. Huan ipan tamayamit Sidim oncayaya miyac ostot ica chapopoji. Huajca quema nopa tanahuatiani ten Sodoma huan Gomorra huan inihuampoyohua quinequiyayaj cholose ten nopa tatehuilisti, sequij ten inijuanti huetzque ipan nopa ostot huan sequinoc chololijque campa tepeme.

11 Huajca tatanqui Quedorlaomer huan ihuampoyohua. Huan quicuique nochi tacualisti huan tamanti cati ipati cati oncayaya ipan altepeme Sodoma huan Gomorra huan quistejque. 12 Huan pampa Lot, imachcone Abram, itztoya ipan altepet Sodoma, nojquiya quihuicaque ilpitoc ica nochi cati quipixtoya. 13 Pero cholo se tacat huan quipohuilico Abram, nopa hebreo tacat quema mochahuayaya campa iahuamil se amorreo tacat cati itoca Mamre. Mamre eliyaya iicni Escol huan Aner cati nojquiya quimapalehuiyayaj Abram.

14 Huajca quema Abram quimatqui para imachcone Lot quihuicatoyaj ilpitoc, quinsentili 318 itequipanojcahua cati temachme cati tacajtoyaj ipan ichaj, huan momachtijtoyaj tatehuisse huan yajque para quipantij Quedorlaomer huan quimanahuisse Lot. Huan quintepotztoaque hasta nopa pilaltepetzti cati itoca Dan. 15 Huan ica tayohua Abram quinpanti huan quintajcoitac itequipanojcahua huan quinyahualojque huan pejque

quintehuáj quema amo quinchiyayaj. Huan quintehuijtijayque hasta altepet Hoba cati mocahua ica norte ten altepet Damasco. ¹⁶ Huan Abram quintanqui. Huan quimanahui imachcone, Lot, huan nopa sequinoc tacame huan sihuame cati quinhuicatoyaj. Huan quincuili nochi cati quichtectoyaj.

Melquisedec quitiochiqui Abram

¹⁷ Huan quema Abram ya quitantoya Quedorlaomer huan cati quipalehuiyayaj, mocuetqui ipan ojti para ichaj. Huan ipan nopa tamayamit tatajco tepeme campá itoca Save o Inintamaya Tanahuatiani, hualajqui quinamiquico nopa tanahuatijquet ten altepet Sodoma.

¹⁸ Huan nojquiya hualajqui quinamiquico Melquisedec, nopa tanahuatijquet ten altepet Salem*. Yaya nojquiya eliyaya Itotajtzi Toteco Cati Más Hueyi. Huan Melquisedec quinmacac Abram huan itequipanojcahua pantzi huan xocomecat iayo. ¹⁹ Huan quitiochiqui Abram ica ni camanali: “Abram, ma mitztiochihua Toteco Cati Más Hueyi, yaya cati quichijqui ilhuicacti huan taltipacti.

²⁰ Quena, ma tijhueyichihua Toteco Cati Más Hueyi, pampa quichijqui xiquintani mocualancaitacahua.”

Huajca Abram quimacac Melquisedec se diezmo ten nochi cati quitantoya.

²¹ Teipa nopa tanahuatijquet ten Sodoma quihui Abram:

—San techmactili nopa masehualme cati ehuaní noaltepe cati tiquinmanahuijtoc huan ximocahui nochi tamantzitzi cati eliyaya iniaxca.

²² Pero Abram quinanquili:

—Niquilhuijtoc TOTECO cati quichijqui ilhuicacti huan taltipacti, ²³ para amo teno nijselis cati eliyaya amoaxca. Amo niycuis yon se icpat, yon se lazo cati ica niquilpis notecac para amo quema huelis tiquijtos ta techricojchijqui. ²⁴ Amo teno nijnequi para na. San tijselise cati quicuajque notequipanojcahua. Pero nopa tacame cati yajque nohuaya, Aner, Escol huan Mamre, xiquincahuili ma quicuica cati quinaniqui para quiselise.

15

TOTECO quichijqui se camanal sencahuali ihuaya Abram

¹ Teipa TOTECO quinotzqui Abram ipan se tanextili cati elqui quej se temicti huan quihui:

“Amo ximajmahui, Abram, pampa na nimitzmocuitahuis. Motaxtahuil elis nelhueyi.”

²⁻³ Pero Abram quinanquili:

—TOTECO, Ta Cati Más Tijpiya Tanahuatili, san tapic para techmacas miyac tamanti pampa amo nijpiya se conet para nijcahuilijtehuas. Amo techmacatoc yon se nocone. Huan notequipanojca Eliezer cati ehua altepet Damasco quiselis nochi cati nijpiya quema nimiquis.

⁴ Huan TOTECO quinanquili:

—Amo yaya quiselis cati tijcajtihuas. Quiselis se mocone cati tijpiyas teipa huan quipiyas ta moeso.

⁵ Huajca TOTECO quihuicac Abram calteno huan quihui:

—Xijtachili ilhuicacti huan xijchihua fuerza xiquinpohua nopa sitalime. Quej nopa elis inimiyaca moteipan ixhuihua. Itztose tahuel miyaqui hasta amo aqui huelis quinpohuas.

* 14:18 14:18 Salem teipa motocaxis Jerusalén.

⁶ Huajca Abram quineltozac cati TOTECO quuijto huan TOTECO quuijcuilo nepa ilhuicac para Abram itztoya xitahuac iixpa. ⁷ Huan TOTECO quuiihui: —Na nimoTECO. Nimitzhualicac ten altepet Ur campa itztoque nopa caldeos para nimitzmacas ni tali para timoaxcatis.

⁸ Pero Abram quuiihui:

—TOTECO, ta cati más tijpiya tanahuatili, ¿quenicatza huelis nijmatis sinta melahuac nijselis ni tali?

⁹ Huan Toteco Dios quinanquili:

—Techhualiquili se becerra, se chivo huan se oquich borrego cati quipiyaj eyi xihuit. Nojquiya techhualiquili se pichontzi huan se paloma.

¹⁰ Huajca Abram quihualiquili Toteco Dios nochi ni tapiyalme. Quinmicti, huan quintajajcoitac huan quinijixnamicti, pero nopa totome amo quinta-jcoitac. ¹¹ Huan tzojpilome temoyayaj ipan nopa tapiyalme cati mictoyaj, pero Abram quinmajmatiyaya.

¹² Huan quema ya tatayohuatoya, Abram nelcochqui huan quimatqui para hualajqui ipan ya se tzintayohuilot huan tahuel majmahuiyaya.

¹³ Huajca TOTECO quuiihui:

—Moteipan ixhuihua yase itztotij ipan seyoc tali quej seyoc tali ehuan. Huan masehualme cati nozona ehuan quinquehuisse chicahuac huan quinitase quej iniaxchua huan nozona moteipan ixhuihua taijyohuisse para 400 xihuit. ¹⁴ Pero teipa na nijtatzacuiltis nopa tali huan imasehualhua cati quinquehuisse. Huan moteipan ixhuihua quisase ica miyac tamanti cati tahuel ipati. ¹⁵ Pero ta timiquis quema ya tihuehujitots, quema noja oncas tasehuilisti. Mitztalpachose quema ayemo ajsitos nopa tonali.

¹⁶ Nozona ipan nopa tali mocahuase hasta miquise moteipan ixhuihua cati achtohui calajque ipan nopa tali. Mocahuase hasta miquise ininconeuhua, huan iniixhuihua huan ininconeuhua iniixhuihua. Huan huajca quena, nopa masehualme huan ininconeuhua tacuepilise sempa nica ipan ni tali. Pero para amantzi ayemo ajsi tonali para hualase pampa ayemo tahuel nelfiero quichihuaq nopa amorreos cati ama itztoque nica ipan ni tali. Huajca ayemo ajsi nopa tonali para niquintatzacuiltis quej nijchihuas teipa ipan nopa tonali quema sempa hualase moteipan ixhuihua nozona.

¹⁷ Huan quema ya temotoya tonati huan nochi ya tzintayohuatoya, nesqui quej se comit cati quipixtoya tilemecti huan popocayaya. Huan nopa comit panoc tatajco campa nopa tapiyalme cati Abram quinqejectoaya. ¹⁸ Huan quej nopa ipan nopa tonali, TOTECO quicajqui icamanal ica Abram huan quuiihui:

—Nochi ni tali niquinmacas moteipan ixhuihua. Quiselise nochi ni tali ten campa pehua ica nopa hueyi hueyat ipan tali Egipto ica campa temo tonati huan noja quiselise hasta nopa hueyi hueyat cati itoca Eufates campa quisa tonati. ¹⁹ Nochi ni tali elis iniaxca campa ama itztoque nopa masehualme ceneos, cenezeos, cadmoneos, ²⁰ heteos, ferezeos, refaitame, ²¹ amorreos, cananeos, gergeseos huan jebuseos. Nochi elis iniaxca moteipan ixhuihua.

16

Agar huan icone, Ismael

¹ Sarai, isihua Abram, amo huelqui conepiya, pero quipiyayaya se itequipanojca ten tali Egipto cati itoca Agar. ² Huajca Sarai moilhui quichihuas quej momajtoyaj quichihuaq ipan nopa tonali huan quimactilis ihuehue itequipanojca. Yeca quuiihui Abram:

—Xiquita, TOTECO amo nechcahuilijtoc ma niconepiya, huajca xicochi ihuaya notequipanojca Agar para yaya huelis quinpiyas coneme cati elise quej na noconeua.

Huan Abram quichihui cuenta cati Sarai quiilhui. ³ Huan Sarai quinotzqui Agar, nopa Egipto ejquet, huan quimactili Abram para ihuaya ma cochi. Quema panoc ya ni, Abram ya quipixtoya majtacti xihuit para itztoc ipan tali Canaán. ⁴ Huan Abram quiixmatqui Agar, huan Agar conecuc. Huan quema Agar momacac cuenta para ya conepeya, mohueyimatqui huan pejqui quicualancaita Sarai. ⁵ Huajca Sarai quiilhui Abram:

—Ta motajtacol para nechcualancaita Agar. Na nimitzmactili para ihuaya ximoteca, pero quema quimatqui para conepeyas, mohueyimatqui. Ma TOTECO quiiyto ajquiya quipeya tajtacoli, sinta ta o na.

⁶ Huan Abram quinanquili:

—Xiquita, Sarai, motequipanojca Agar itztoc momaco para tijtatzacuiltis quej tiquitas cuali.

Huajca Sarai pejqui quitaiyohuiltia Agar, huan yeca Agar cholojtejqui. ⁷ Pero iilhuicac ejca TOTECO quipanti Agar campa meyayaya at ipan nopa huactoc tali campa amo teno eli. Itztoc ipan nopa ojti cati yahui para Shur.

⁸ Huan iilhuicac ejca TOTECO quitatzintoquili:

—Agar, tiitequipanojca Sarai, ¿canque tihuala huan canque tiya?

Huan Agar quinanquili:

—Nicholohua imaco noteco, Sarai.

⁹ Huajca iilhuicac ejca TOTECO quiilhui:

—Xiya sempa campa moteco huan xijneltoquili nochi cati mitznahuatis.

¹⁰ Huan nojquiya iilhuicac ejca TOTECO quiilhui:

“Na niqinmiyaquilis moteipan ixhuihua hasta amo aqui huelis quinpo-huas.

¹¹ Ya ticonecuitoc huan tijpiyas se oquichpil huan tijtocaxis Ismael, pampa TOTECO quicajqui quema timocuesohuayaya.

(Ismael quinequi quiiytos TOTECO Tacaqui.)

¹² Huan mocone elis se tacat cati mosisinia.

Motehuis inihuaya nochi, huan nochi quinequise quitehuise.

Huan yaya itztos ica cualanti mojmosta ica nochi iicnihua.”

¹³ Huan Agar quitocaxtali TOTECO cati ihuaya mocamanalhuijtoya “Toteco Dios Cati Nochi Quiita”. Quej nopa quitocaxti pampa moilhuiyaya: “Niquitztoc Toteco Dios cati techita huan noja niitztoc.”

¹⁴ Huan yeca nopa ameli cati mocahua tatajco Cades huan Bered ama quitocaxtijtoque Beer Lahai Roi. (Beer Lahai Roi quinequi quiiytos Iamel Yaya Cati Itztoc Huan Cati Nechita.)

¹⁵ Huan Agar quitacatili icone Abram, huan Abram quitocaxti Ismael.

¹⁶ Huan Abram quipeyayaya 86 xihuit quema tacatqui Ismael.

17

Se tanextilijcayot ten nopa camanal sencahuali

¹ Huan quema Abram quipeyayaya 99 xihuit, TOTECO Cati Quipeya Nochi Chicahualisti monexti campa ya huan quiilhui:

—Na niamoTeco Dios Cati Nijpiya Nochi Chicahualisti. Ximotemachi ipan na huan xijchihua san cati xitahuac noixpa. ² Huan na nijcahuas nocamanal ica ta para temachti nijchihuas para tiquinpiyas tahuel miyac moteipan ixhuihua.

³ Huan Abram motancuaquetzqui huan mohuijtzonqui hasta talchi quema Toteco Dios quicamanalhuiyaya. Huan Toteco Dios nojquiya quilhui:

⁴—Nijcahua nocamanal ica ta para tielis tiinintata tahuel miyac masehualme cati itztose ipan tahuel miyac talme. ⁵ Huan motoca ayecmo elis Abram. (Abram quinequi quijitos Se Teta Cati Nochi Quitepanitaj.) Ama motoca elis Abraham. (Abraham quinequi quijitos Inintata Miyac Masehualme Cati Itztoque Ipan Miyac Talme.) Quej nopa elis motoca pampa nimitzchihuas tiinintata miyac masehualme ipan miyac talme. ⁶ Quena, nijchihuas para moteipan ixhuihua ma elica nelía miyaqui. Ipan ta quisase huejhueyi tanahuatiani cati quinnahuatise inimasehualhua ipan miyac talme. ⁷ Huan na nijtamichihuas nochi cati nijcajtoc nocamanal para nijchihuas ica ta huan moteipan ixhuihua teipa para nochipa. Ni elis se camanal sencahuali cati amo quema tamis. Nochipa nielis nimoDios huan niininDios moteipan ixhuihua. ⁸ Huan nochi ni tali cati itoca Canañ campaa ama tiitztoc, nimitzmacas ta huan moteipan ixhuihua. Huan elis iniaxca para nochipa, huan na nielis niininDios.

⁹ Huan Toteco Dios sempa quilhui Abraham:

—Huan ya ni cati ta huan nochi moteipan ixhuihua monequi xijchihuaca. Monequi xijneltocaca nochi cati quijtohua ni camanali cati nijchihua mohuaya. ¹⁰ Huan ya ni nopa camanali cati monequi xijchihuaca. Monequi nochi oquichpilme huan tacame ma motequíllica quej nimitzilhúa. ¹¹ Ma quitzontequica iyecapa nopa cuetaxti ipan ininpiltacayohua. Ya nopa itoca circuncisión. Huan ya nopa elis nopa tanextili ten ni camanal sencahuali cati nijchihua amohuaya. ¹² Huajca ama monequi ta huan nochi tacame cati mitztequipanohua, masque tijcojqui nopa tacat para moaxca quema ya hueyi, o quitacatilti se motequipanojca, monequi nochi motequílise. Huan nojquiya monequi anquintequílise nochi amooquichpilhua cati tacajtiyase teipa. Xijchihuaca quema quipiyas chicueyi tonati ica tacajtoc. Quej nopa monequis ica moteipan ixhuihua, huan ininteipan ixhuihua motequipanohua huan ica nochi tequipanohuani cati tiquincohuas ten sequinoc talme. ¹³ Nochi tacame huan oquichpilme monequi motequílise. Huan quej nopa elis quej anquihuicase se tanextili ten nocamanal ipan amonacayo huan nopa camanali cati nijchihua amohuaya huejcahuas para nochipa. ¹⁴ Huan cati amo motequílise monequi xijquixtica para ayecmo quema itztos inihuaya momasehualhua pampa amo quitepanitac nopa camanali cati nijchijtoc ica amojuanti.

¹⁵ Nojquiya Toteco Dios quilhui Abraham:

—Huan mosihua, ayecmo elis itoca Sarai. Ama itoca elis Sara. (Sara quinequi quijitos Iichpoca Se Tanahuatijquet.) ¹⁶ Huan Sara nijtiochihuas huan temachtí nimitzmacas se mocone ipan ya. Huan yaya elis ininana miyac masehualme ipan miyac talme, huan miyac iteipan ixhuihua elise huejhueyi tanahuatiani.

¹⁷ Huan Abraham motancuaquetzqui huan mohuijtzonqui talchi para quihueyichihuas Toteco Dios, pero yolhuetzayaya pampa amo quineltocayaya. San moilhuiyaya: “¿Quenicatza huelis nijpiyas se conet quema ya nijpiya 100 xihuit? Huan ¿quenicatza huelis Sara conepiyas quema ya quiaxiti 90 xihuit?”

¹⁸ Huajca Abraham quilhui Toteco Dios:

—Sinta huelis, san xijcahua nooquichpil Ismael ma itztos ica motatiochihualis.

¹⁹ Huan Toteco Dios quinanquili:

—¡Amo! Amo ya nopa cati nimitzilhuía. Niquijto mosihua Sara quipiyas se icone cati tijtocaxtis Isaac. Huan ihuaya ya nicompahuis nopa camanali huan inihuaya iteipan ixhuihua para nochipa. ²⁰ Pero nojquiya nijcactoc cati techtajtanjitoc para Ismael huan quena, nijtiochihuas. Nijchihuas ma quinpia miyac iconehua huan para ma momiyaquilica iixhuihua. Huan yaya elis inintata 12 huejhueyi tacame. Ica ya huan iteipan ixhuihua niqinchihuas ma elica se xinach masehualme ica miyac imasehualhua huan quipiyase se hueyi tali. ²¹ Pero nopa camanal sencahuali nijchihuas ica Isaac, nopa conet cati Sara quitacatiltis ne se xihuit, quej ama.

²² Huan quema Toteco Dios tanqui camanalti ihuaya Abraham, quistejqui. ²³ Huan nimantzi ipan nopa tonal Abraham quitzontequili iyecapa nopa cuetaxti ipan ipiltacayo Ismael. Huan nojquiya quintzontequili inincuetaxo nochi itequipanojcahua cati tacajtoyaj ipan ichaj huan nochi tacame cati quincojtoya. Quena, nochi tacame cati itztoyaj ipan ichaj huan cati quitequipanohuayaj motequilijqe quej Toteco Dios tanahuati. ²⁴⁻²⁵ Huan Abraham quipiyayaya 99 xihuit, huan icone, Ismael, quipiyayaya 13 xihuit quema quintzontequilijque inincuetaxo. ²⁶ Huajca ipan nopa tonal quema Toteco Dios quicamanalhui Abraham, Abraham huan icone, Ismael, motequilijqe. ²⁷ Huan nojquiya motequilijqe nochi nopa itequipanojcahua, tacame huan oquichpilme, cati itztoyaj ipan ichaj, masque tacatque nopona o quincojtoya ipan sequinoc talme.

18

TOTECO quilhui Abraham quipiyas se icone

¹ Huan TOTECO monexti campa Abraham quema itztoya ipan nopa ahuamili campa nopa huejhueyi cuame cati iaxca Mamre. Quej ni panoc. Se tonali Abraham mosehuijtoya calteno nechca ichaj ten yoyomit ipan nopa hora quema más tatotoniya. ² Huan Abraham ajcotachixqui huan quinitac eyi tacame ajsitihualayayaj nechca ichaj. Huan quema quinitac, moquetzqui huan motalo para quinnamiquis huan motancuaquetzqui huan mohuijzonqui hasta talchi, ³ huan quijto:

—Tatame, techchihuilica se favor, xipanoca techpaxaloca. ⁴ Huan sinta anquuitaj cuali, nitajtanis se quentzi at para anmoicxipajpacase huan anmosiyajquetzase se quentzi itzinta ni cuahuit campa taecahuíaj. ⁵ Nojquiya nimechhualiquilis se quentzi tacualisti para xijpiyaca tetili huan teipa sempa huelis anyase ipan amoojhui. Para na se paquilisti anhualajtoque huan nijnequi nimechtequipanos sinta antechcahuilise.

Huan injuanti quinanzquilijque:

—Cualtitoc.

⁶ Huan Abraham calajqui ipan ichaj ten yoyomit huan quilhui Sara:

—Nimantzi xijcui eyi tatamachihuali ten harina cati más cuali huan xijchihua pantzi.

⁷ Teipa Abraham motalo campa itztoyaj itapiyalhua huan quitapejpeni se becerro cati nelía yejyectzi. Huan quimacac se itequipanojca, huan ya nimantzi quichijqui se tacualisti. ⁸ Huan teipa Abraham quinhualiquili mantequilla, lechi huan nopa becerro tacacatzoli huan quinmacac ma quicuaca. Huan Abraham moquetzqui nechcatzi cuatzinta para quintequipanos quema injuanti tacuayayaj.

⁹ Huan quema tanque tacuaj, nopa paxalohuani quitatzintoquilijque Abraham:

—¿Canque itztoc mosihua Sara?

Huan Abraham tananzquil:

—Itztoc nepa calijtc.

¹⁰ Huajca se ten nopa tacame quijto:

—Ne se xihuit quej ama sempa nimitzpxaloqui, huan mosihua Sara ya quitacatiltijtos icone.

Huan Sara moqetztoya icalixpa, quintacaquiliytoya cati camanaltiyayaj ihuaya Abraham. ¹¹ Huan Abraham huan Sara eliyayaj huehuentzitz, huan ya panotoya nopa xihuit para Sara quipiyasquía se icone. ¹² Huan yeca amo huelqui moijyohui para amo huetzcas huan moilhui: “¿Quenicatza huelis nijpiyas ni paquillisti ama quema nohuehue huan na ya tihuehuentzitz?”

¹³ Pero TOTECO quilhui Abraham:

—¿Para ten huetzcas Sara? ¿Para ten quijto: ‘¿Quenicatza huelis nijpiyas ni paquillisti ama quema nohuehue huan na ya tihuehuentzitz?’ ¹⁴ ¿Timoilhuía para onca se tamanti cati na, nimoTeco Dios, amo hueli nijchihuas? Ne se xihuit sempa nimechpxaloqui huan Sara quipixtos icone.

¹⁵ Huan quema Sara quicajqui cati quijto, majmajqui huan istacatic huan quijto:

—Na amo nihuetzac.

Pero TOTECO quinanquili:

—Na nijmati para tihuetzac.

Abraham quitajtani TOTECO por Sodoma

¹⁶ Teipa nopa paxalohuani moqetzque huan pejqque nejnentiyahuij ipan ojti para altepet Sodoma. Huan Abraham inihuaya yajqui para quinnahu-atijtehuas.

¹⁷ Huajca TOTECO moilhui: “Monequi niquilhuis Abraham cati nijchihuas, ¹⁸ pampa yaya elis inintata miyaqui tacame huan sihuame cati mochi-huase se hueyi xinach masehualme cati quipiyase miyac chichualisti. Huan niquilhuijtoque para niquintiochihuas nochí masehualme ipan nochí talme ipan taltipacti ica ya. ¹⁹ Na nijtapejpenijtoque para ma quinnextili icone-hua ma quineltoaca notamachtíl huan ma quichihuaca nochí cati cuali huan cati xitahuac. Huan na niqinchihuilis nochí cati cuali niquilhuijtoque.”

²⁰ Huajca TOTECO quilhui Abraham:

—Nechyolmelajtoque para nopa masehualme ipan altepeme Sodoma huan Gomorra nelmosisiníaj. Nelfiero ininemilis huan tahuel miyac inintajtacolhua. ²¹ Ama niya nepa para niqitas sinta nelía inintajtacol nelhueyi quej nechilhuijtoque. Huan quej nopa nijmatis.

²² Huan ne seyoc ome paxalohuani quisque para Sodoma, pero TOTECO mocajqui ihuaya Abraham. ²³ Huan Abraham quinechcahui huan quitatz-intoquili:

—¿Tiquinpolos masehualme cati itztoque xitahuaque inihuaya cati tajta-colejque? ²⁴ Sinta itztoque 50 masehualme cati cuajcualme ipan nopa altepet, ¿noja tijtatzacuiltis nopa altepet? ¿Amo tijtapojpolhuis nopa altepet por nopa 50 masehualme? ²⁵ Amo cuali sinta tiqinmictis cuajcualme inihuaya cati tahuel tajtacolchijtoque pampa quej nopa nesi para nochí ome quipiyaj san se inintajtacol. ¡Amo xijchihua ya nopa! Ta, tijuez cati más tihueyi ipan nochí ni taltipacti, huan nijmati ta tijchihuas cati xitahuac.

²⁶ Huan TOTECO quinanquili:

—Sinta niqinpanntis 50 masehualme cati itztoque xitahuaque ipan nopa altepet, huajca niqintapojpolhuis nochí por nopa 50 masehualme cati itztoque xitahuaque.

²⁷ Pero Abraham sempa quilhui:

—Techtapojpolhui Toteco, sinta sempa nimitzcamanalhuía, pampa ta, tiToteco Dios, huan na san nise masehuali. ²⁸ Pero nohueli polihuij macuilti masehualme para ajsis 50 cati itztoque xitahuaque. ¿Tiquinmictis nochi ipan nopa altepet sinta san polihuij nopa macuiltij?

Huan TOTECO quinanquili:

—Sinta niqinipantis 45 masehualme cati xitahuaque, amo nijpolos nopa altepet.

²⁹ Huan Abraham sempa quilhui:

—Pero nohueli san itztoque 40 masehualme cati xitahuaque.

Huan TOTECO quijto:

—Sinta itztoque 40 cati xitahuaque, amo nijtamiltis nopa altepet.

³⁰ Pero Abraham sempa quilhui:

—Nimitztajtania amo xicualani nohuaya pampa nimitztatzintoquilia miyac huelas, pero nohueli tiquinipantis san 30 masehualme cati itztoque xitahuaque.

Huan Toteco sempa quilhui:

—Sinta itztoque 30 masehualme cati itztoque xitahuaque, amo nijpolos nopa altepet.

³¹ Huan Abraham noja quitatzintoquili:

—Toteco, nijmati para nimitznelcuatotonía pampa nimitznojnotza quej ni, pero ¿taya panos sinta san 20 masehualme cati itztoque xitahuaque tiquinipantis?

Huan Toteco quilhui:

—Sinta itztoque 20 cati xitahuaque, amo niqinmictis cati itztoque ipan nopa altepet.

³² Huan Abraham sempa quitatzintoquili:

—NoTeco, amo xicualani nohuaya, pero nimitztatzintoquilis san ni huela: ¿Taya tijchihuas sinta san tiquinipantis majtacti masehualme cati itztoque xitahuaque?

Huan Toteco quilhui:

—Sinta itztoque majtacti masehualme cati xitahuaque, amo nijsosolos nopa altepet.

³³ Huan quema TOTECO tanqui camanalti ihuaya Abraham, quistejqui. Huan Abraham no yajqui ichaj.

19

TOTECO quitamilti Sodoma huan Gomorra

¹ Huan quema ya tayohuayaya nopa ome ilhuicac ehuaní ajsitoj altepet Sodoma. Huan Lot mosehujtoya nechca icalte nopa altepet campa tayacanani momajtoyaj mosentilíaj. Huan quema Lot quinitac, moquetztiquisqui para quinnamiquiti huan quinseli íca yejectzi. Huan motancuaquetzqui huan mohuijzonqui hasta talchi, ² huan quinhui:

—Tatame, techchihuilica se favor, ximocahuaca ni tayohua ipan nochaj. Nopona annoicxipajpacase huan antonilise. Huan mosta cualca huelis sempa anyase ipan amoojhui.

Pero quijtojqe:

—¡Amo! Tascamati. Tojuanti san ticochise nica calteno ipan calle.

³ Pero Lot quinnelchihualti para ma cochica ichaj hasta quijtojqe para quena, huan yajque ichaj. Huan quema ajsitoj, Lot tanahuati ma quinsencahuilica se cuali tacualisti íca pantzi cati amo quipiya tasonejcajot. Huan nopa paxalohuani tacuajqe.

⁴ Huan teipa quema ayemo motecayayaj, nochi nopa tacame ten altepet Sodoma quiyahualocoj ichaj Lot. Hualajque cati más telpocame hasta cati más huehuentziti, ⁵ huan pejque quitzajtzilíaj Lot:

—¿Canque itztoque nopa tacame cati hualajque mochaj ni tayohua? ¡Xiquinquixti para timotecase inihuaya!

⁶ Huajca Lot quisqui calteno para quincamanhulis huan cuali quitzajqui nopa caltemit iica*. ⁷ Huajca Lot quinilhui nopa fiero tacame:

—Amo, nohuampoyohua, nimechtajtanía amo xijchihuaca nopa tamanti cati fiero. ⁸ Niqinpiya ome noichpocahua cati ayemo quiixmajtoque yon se tacat, niqinquixtis huan nimechmacas para xijchihuaca inihuaya cati anquinequij, pero amo teno xiquinchihuilica ni tacame pampa nopaxalojcahua.

⁹ Pero quinanquilijque:

—¡Ximijcueni tiseyoc tali ejquet! ¿San tiajsico nica huan tijnequi technahuatis? ¡Ama timitzchihuilise más fiero que inijuanti!

Huan nimantzi pejque quitemajmatíaj Lot huan monechcahuijque campa caltemit para quitahuisose. ¹⁰ Pero ipaxalojcahua quitapojque caltemit huan nimantzi quitzajque Lot huan quicalaquijque calijtic. Teipa sempa quitzajque caltemit. ¹¹ Huan ipaxalojcahua quinchijque ma popoyotiyaca nopa tacame cati itztoyaj calteno. Huan nochi hasta cati más telpocat huan hasta cati más huehuentzi, mocajque popoyotziti. Huan cuatique quitemohuaj nopa caltemit.

¹² Huajca nopa paxalohuani quilhuijque Lot:

—Sinta tiqinpiya más moteixmatcahua nica ipan ni altepet, motaca conehua, mosihua conehua, momonticahua o sequinoc moteixmatcahua, monequi xiquinquixti huan huejca xiquinhuica. ¹³ Pampa tijtamiltise ni altepet huan miquise nochi cati itztoque nica pampa tahuel miyac tajtacoli quichijtoque. TOTECO quitacaquilijtoc hasta ayecmo quijyohuía cati fiero quichihuaj nica ehuan. Huajca techitantoc para ma tijtamiltica ica nochi cati nica itztoque.

¹⁴ Huajca Lot yajqui qunitato cati teipa elisquíaj imonticahua pampa ya quinjantoyaj iichpocahua huan quinilhui:

—¡Ximoisihuiltica, xiquisaca huan huejca xiyaca pampa TOTECO quitamiltis ni altepet!

Pero imonticahua amo quineltoaque. Moilhuijque san ahuilca-manaltiyaya. ¹⁵ Huan quema ya tanestihualayaya, nopa ilhuicac ehuan quisihiultijque Lot huan quilhuijque:

—Nimantzi ximoisihuilti huan xiquinhuica mosihua huan ne ome moichpocahua huejca para amo anmiquise quema tijtamiltise ni altepet.

¹⁶ Huan Lot huejcahuayaya. Pero pampa TOTECO quitasojtac, nopa ilhuicac ehuan quimaitzquijque, huan quinitzquijque isihua huan iichpocahua huan quinquixtijque ipan nopa altepet para quinmanahuise. ¹⁷ Huan quema nochi ichampoyohua Lot quistoyaj ten nopa altepet, nopa ilhuicac ehuan quinhuijque:

—¡Ximotaloca para amo anmiquise! Amo ximoicantachilica, yon amo ximoquetztiyaca campa tamaya. Ximotaloca hasta campa tepeyo, sinta anquinequij anmomanahuise huan amo anmiquise.

¹⁸ Pero Lot quinilhui:

* **19:6** 19:6 Ipan nopa tonali se tacat tahuel monequiyaya quinmanahuis ipaxalojcahua sinta ya quinselijtoya ipan ichaj.

—¡Amo, tatame! ¡Nelía nimechtajtanía, techtacaquilica se talojtzi! ¹⁹ Nelía antechchiuilijtoque se hueyi favor huan anquimanahuijque nonemilis, pero na amo nihueli nicholos hasta campa tepeixco pampa huejca. Nopa tatzacuiltili huelis techajstisi ipan ojti, huan huajca, quena, timiquise. ²⁰ Nechca nica onca se pilaltepetzti campa huelis ticholose. ¡Techcahuili tiyase nepa para timomanahuisse pampa nelía se altepet cati pisiltzi!

²¹ Huajca se ten injuanti quuijto:

—Cualtitoc, nijchihuas cati titajtantoc. Amo nijtamiltis nopa altepet cati tiquijtohua. ²² Pero xiyaca, xicholajtehuaca nimantzi pampa amo teno huelis nijchihuas hasta anajstij nepa.

Huan yeca Lot quitocaxti nopa pilaltepetzti Zoar. (Zoar quinequi quuijtos Pisiltzi.)

²³ Huan quema ya tanestoya cuali, Lot ya ajsitoya ipan pilaltepetzti Zoar.

²⁴ Huan TOTECO quichijqui ma huetzi ten ilhuicac ipan altepeme Sodoma huan Gomorra se tamanti tit ica azufre cati tahuel tata. ²⁵ Huan nojquiya quintamilti nochi sequinoc ranchos ipan nopa tamayamit ica nochi cati itzttoyaj nopona huan ica nochi xihuit. ²⁶ Pero isihua Lot cati hualayaya iica, ican tachixqui huan itacayo mocuetqui istat huan mocajqui ijcatoc quej se teteyot.

²⁷ Huan tonili ica ijnaloc, Abraham yajqui campa mocamanalhujtoya ihuaya TOTECO. ²⁸ Huan ten nopona tachixqui ipan altepeme Sodoma huan Gomorra huan ipan nochi nopa ranchos cati eltoya ipan nopa tamayamit. Huan quiiat para tahuel tejcoyaya pocti quej elisquía se horno.

²⁹ Huajca quej nopa Toteco Dios quintatzacuilti nopa altepeme campa Lot itztoya. Pero Toteco Dios quielnamijqui Abraham huan cati quitajtanijtoya huan quiijueni Lot ten nopa fiero tatzacuiltilisti.

Campa pejque moabitame huan amonitame

³⁰ Teipa Lot majmajqui para mocahuas ipan pilaltepetzti Zoar huan yajqui tepeixco ihuaya iichpocahua huan nochi eyi mocajque nepa ipan se ostot. ³¹ Huan se tonali nopa iichpoca cati achtohui ejquet quiihui nopa teipan ejquet:

—Totata ya huehuentzi, huan amo aqui yon se tacat ipan ni tali cati huelis timotahuicaltise ihuaya. ³² Yeca ma tiquihuintica totata huan ma tiquixmatica para tiquinpiyase cati ya iconehua para amo polihuis itoca.

³³ Huan ipan nopa tayohua quimacaque inintata xocomecat iayo cati nelcococ huan nopa achtohui ejquet motejqui ihuaya. Pero itata amo quimatqui ten panoc, yon quema motejqui, yon quema mijquejqui. ³⁴ Huan tonili nopa achtohui ejquet quiihui nopa teipan ejquet:

—Xiquita, tayohua nimotejqui ihuaya totata, huajca ni tayohua nojquiya tiquihuintise para ta timotecas ihuaya. Huan quej nopa tiome tijpiyase cati ya iconehua.

³⁵ Huajca ipan nopa tayohua sempa quimacaque inintata xocomecat iayo huan nopa teipan ejquet motejqui ihuaya. Pero Lot amo quimatqui sinta itztoya, yon quema motejqui, yon quema mijquejqui. ³⁶ Quej nopa nochi ome iichpocahua conecuique ten inintata. ³⁷ Huan nopa achtohui ejquet quipixqui se icone cati quitocaxti Moab. Quema moscalti Moab, elqui inintata nochi masehualme cati ama inintoca moabitame. ³⁸ Huan nopa teipan ejquet quipixqui icone cati quitocaxti Ben Ammi. Quema moscalti Ben Ammi yaya elqui inintata nochi masehualme cati ama inintoca amonitame.

20

Abraham huan Abimelec

¹ Teipa Abraham quisqui ipan Mamre huan yajqui tali Neguev huan mocajqui ipan altepet Gerar cati mocahua tatajco ten Cades huan Shur. ² Huan quema itztoya nozona, quijtohuayaya para isihua Sara eliyaya icni. Huajca Abimelec, nopa tanahuatijquet ten Gerar, tatitanqui ma quicuitij Sara para teipa quichihuas isihua. ³ Pero se tayohua Toteco Dios quinojnotzqui Abimelec ipan temicti huan quihui: “Abimelec, timiquis pampa nopa sihuat cati tijcuitoc ya motahuicaltijtoc.”

⁴ Pero Abimelec ayemo quinechcahuijtoya nopa sihuat huan quinanquili: “Toteco, ¿techmictis masque amo teno nijchijtoc? ⁵ Yaya Abraham cati nechilhui para nopa sihuat eliyaya icni, huan Sara nojquiya quijto para Abraham eliyaya itaca icni. Huajca nochi nijchijqui ica cuali noyolo. Huan na amo teno cati amo cuali nijchijtoc.”

⁶ Huan Toteco quinanquili ipan temicti: “Na cuali nijmati para tijchijqui ica cuali moyolo huan yeca amo nimitzcachuili xijnechcahui para amo xitajtacolchihua ica na. ⁷ Huajca ama, xijcueli isihua nopa tacat pampa yaya se tajtolpanextijquet huan motatajtis huan tajtanis para xiitzto. Pero sinta amo tijcuelis, ta huan nochi cati itztoque mohuaya anmiquise.”

⁸ Huajca tonili, Abimelec mijquejqui cualca huan quinojnotzqui itequipanojcahua huan quinpohuili nochi cati quitemictoya. Huan quema quicajque, nelia momajmatijque. ⁹ Teipa Abimelec quinojnotzqui Abraham huan quihui: —¿Taya tijchijtoc? ¿Taya tamanti amo cuali nimitzchihuilitoc para techhualiquilitoc na huan nomasehualhua ni hueyi tajtocoli? Techchihuilitoc se tamanti cati amo quinamiqui techchihuilitosquia. ¹⁰ ¿Taya timoilhuyaya quema tijsencajqui ni tamanti?

¹¹ Huan Abraham quinanquili:

—Na nimoilhui para nica huelis amo aqui cati quitepanita Toteco Dios huan nimoilhui techmictisquiaj pampa quinequisquiaj nosihua. ¹² Huan melahuac masque yaya nosihua, nojquiya noicni pampa yaya iichpoca notata, pero amo icone nonana. Yeca huelqui nimosihuajti ihuaya. ¹³ Huan quema Toteco Dios nechahuati ma nijcajehua ichaj notata para campa hueli tiyase, niquilhui Sara sinta nechicnelia ma quijto ipan sesen altepet campa tiajsisquiaj para na niicni.

¹⁴ Huajca Tanahuatijquet Abimelec quicueli Abraham isihua Sara. Nojquiya quinsentili borregojme, huacaxme, huan taca tequipanohuani, huan sihua tequipanohuani huan quimacac Abraham, ¹⁵ huan quihui:

—Xijtachiliti nochi notal huan xijtajejpeni campa más mitzpectis para tiitztos.

¹⁶ Huan Tanahuatijquet Abimelec quihui Sara:

—Nijmacatoc cati tijtocaxtia ‘moicni’ se mil plata tomi huan quej nopa nelcuali nimitztaxtahuia pampa nimitzpinahuati inixpa nochi cati itztoque mohuaya. Huan amo aqui huelis camanaltis fiero ten ta por cati panoc. Nochi elis xitahuac.

¹⁷⁻¹⁸ Huan Toteco Dios quichijtoya para yon se sihuat cati itztoya ichaj Tanahuatijquet Abimelec ma amo conepiya Sara itztoya ichaj. Huajca Abraham quitajtani TOTECO para ma quichicahua Abimelec huan isihua, huan nopa sequinoc isihua tequipanojcahua para sempa huelise conepiyase. Huan injuanti mochicajque

21

Tacatqui Isaac, icone Abraham

¹ TOTECO quipixqui hueyi iyolo ica Sara huan quitiochijqui quej mo-cajtaya ihuaya Abraham para quichihuas. ² Huan Sara conecuc huan quimacac Abraham se icone quema ya eliyaya nelhuehuentzi. Huan nopa oquichpil tacatqui ipan nopa metzti cati Toteco Dios quillhuijtaya. ³ Huan Abraham quitocaxtali icone, Isaac. ⁴ Huan Abraham quitzontequili iyecapa nopa cuetaxti ipan ipiltacayo quema quipiyayaya chicueyi tonati tacaj-toya quej Toteco Dios quinquahuatijtoya ma quichihua. ⁵ Huan Abraham quipiyayaya 100 xihuit quema tacatqui Isaac. (Isaac quinequi quijitos Huetzquisti.) ⁶ Huajca Sara quijito: “Toteco Dios quichijtoc ma nihuetzca, huan nochi cati quimatise para nijpixtoc se nocone huetzcase nohuaya. ⁷ ¿Ajquia quillhuijtosquía Abraham para na nijchichitiquía icone? Pero ama nijmacatoc se icone quema ya huehuentzi.”

Agar huan Ismael quinquixtijque

⁸ Huan nopa oquichpil Isaac moscalti huan teipa ipan nopa tonali quema Sara quichichijquixtili, Abraham ilhuichijqui. ⁹ Huan Sara quiiitac para Ismael cati Abraham quipixqui ica Agar nopa Egipto ejquet, quihuihuijtayaya Isaac. ¹⁰ Huajca Sara yajqui quillhuito Abraham: “¡Xijquixti nopa tequipanoj-quet, Agar, ihuaya icone! Amo quinamiqui para icone ma quiselis san se ihuaya nocone Isaac quema timiquis.”

¹¹ Huan ni tamanti cati Sara quijito tahuel quiyolcoco Abraham pampa nopa oquichpil Ismael nojquiya eliyaya icone. ¹² Pero Toteco Dios quillhui: “Amo ximocueso ica nopa oquichpil huan motequipanojca. Xijchihua nochi cati Sara mitztajtania pampa moteipan ixhuihua hualase ipan Isaac. ¹³ Huan nojquiya ica mocone cati nopa sihua tequipanojquet quitacatili niqin-miyaquilis iteipan ixhuihua huan mochihuase seyoc xinachti masehualme ica nelía miyac imasehualhua pampa yaya nojquiya mocone.”

¹⁴ Huajca tonili nelcualca, Abraham quicuc tacualisti huan se cuetaxti temitoc ica at huan quimamalti Agar huan quillhui ma quisa ihuaya io-quichpil Ismael. Huan nopa sihuat yajqui huan san nentinemiyaya ipan nopa huactoc tali Beersebá campa amo teno eli pampa amo quimatiyaya canque yas. ¹⁵ Huan quema tanqui nopa at cati eltoya ipan nopa cuetaxti, quicajtejqui nopa oquichpil cuatzinta, ¹⁶ huan yajqui mosehuito ica huejca pampa amo quinequiyaya quiiitac quema miquisquía. Huan quema Agar mosehuijtaya imelac, nopa oquichpil pejqui tahuel choca.

¹⁷ Huan Toteco Dios quicajqui para chocayaya nopa oquichpil, huan ilhuicac ejca Toteco Dios quinojnotzqui Agar ten ilhuicac huan quillhui: “¿Taya tijpiya Agar? Amo ximajmahui pampa Toteco Dios quicactoc quej choca ne oquichpil nozona campa itztoc. ¹⁸ Xiya, xijtananati nopa oquichpil huan xijmatilana. Amo ximajmahuica. Na nijchihuas ma itzto huan iteipan ixhuihua momiyaquilise huan mochihuase se xinachti masehualme cati nelía miyac imasehualhua.”

¹⁹ Huajca Toteco Dios quej quixtapo Agar para ma quita se ameli ica at. Huan yaya yajqui huan quitemitito nopa cuetaxti ica at huan quiamacac Ismael. ²⁰⁻²¹ Huan Toteco Dios itztoya ihuaya nopa oquichpil huan quipalehui ma moscalti ipan nopa huactoc tali cati itoca Parán. Huan yaya elqui se cuali tapejquet ica cuataminti. Huan teipa inana quisihuajti ica se ichpocat ten tali Egipto.

Abraham huan Abimelec quichijque se camanali

²² Nojquiya ipan nopa tonali Tanahuatijquet Abimelec yajqui ihuaya Ficol, nopa tayacanquet ten isoldados para quicamanalhuise Abraham. Huan Tanahuatijquet Abimelec quiihui Abraham:

—Nochi quiiatj para Toteco Dios mitzpalehuía ipan nochi tamanti cati tijchihua. ²³ Huajca ama xijtestigojquetza Toteco Dios para amo techtehuis, yon na, yon noconehua, yon noteipan ixhuihua. San techchihuulis cati cuali quej nimitzchihuili. Nojquiya xijchihua san se ica ni masehualme ten ni altepet campa ama tiitztoc quej se seyoc tali ejquet.

²⁴ Huan Abraham quinanquili:

—Cualtitoc, nijtestigojquetza Toteco Dios.

²⁵ Teipa Abraham quiyolmelajqui Abimelec ten se ameli cati itequipanojcahua Abimelec quiquixtilijtoyaj. ²⁶ Huan Abimelec quinanquili:

—Amo nijmati ajquiya huelqui quichijqui ya nopa. Amo teno nijmatiyaya ten ni tamanti hasta amantzi pampa amo aqui techyolmelajtoc.

²⁷ Huajca Abraham quincuic borreojme huan huacaxme huan quimacac Tanahuatijquet Abimelec para quiiptos para temachtí amo moixpanose quej quiipto nopa camanali cati quisencahuayaya ihuaya. ²⁸ Pero teipa Abraham quiniyocaquixti chicome pilsihua borreojtzi ten iaxcahua, ²⁹ huan Abimelec quitatzintoquili:

—¿Para ten tiquiniyocaquixtjtoc ne chicome pilsihua borreojtzi?

³⁰ Huan Abraham quinanquili:

—Xiquinseli ni chicome pilsihua borreojtzi cati nimitzmaca para ma nesi ta tijmati para na nijchijqui nopa ameli.

³¹ Huajca yeca quitocaxtijque campa itztoyaj Beerseba. (Beerseba quinequi quiiptos Ameli Campa Quitestigojquetzque Toteco Dios.) Quej nopa quitocaxtijque pampa nopona nopa ome quitestigojquetzque Toteco Dios ten taya quichihuasquía.

³² Huan nopona ipan Beerseba, quema tanque quichihua nopa camanali para amo moixpanose, Abimelec ihuaya Ficol cati quinyacanqui isoldados, mocuetque campa itztoyaj ipan nopa tali cati nojquiya inintal nopa filisteos.

³³ Huan ipan Beerseba, Abraham quitojqui se cuahuit cati itoca tamarisco. Huan nopona quihueyichijqui TOTECO, Nopa Dios Cati Nochipa Itztoc.

³⁴ Huan para miyac xihuit Abraham mocajqui nopona ipan inintal nopa filisteos.

22

Toteco quieyeco itaneltoquilis Abraham

¹ Teipa panoc tonali huan Toteco Dios quieyeco Abraham para quitas sinta nelía quineltoquilía. Huan Toteco Dios quiihui:

—Abraham.

Huan Abraham quinanquili:

—Quena, nica niitztoc.

² Huan Toteco Dios quiihui:

—Xijcui Isaac moiyojti cone cati nelía tiquicnelía huan xiya hasta nopa tali cati itoca Moriah. Nopona techmaca quej se tacajcualisti ipan se tepet cati nimitznexilis.

³ Huajca tonili nelcualca, Abraham mijquejqui huan quisiyaji iburro, huan quitzontejqui cuahuit para ipan quitatis tacajcualisti. Huan quistejqui huan yajqui ihuaya icone, Isaac, huan ome itequipanojcahua hasta campa Toteco Dios quiihui. ⁴ Huan hualhuicta, Abraham quihuejcaitac nopa lugar, ⁵ huajca quinihui itequipanojcahua:

—Ximocahuaca nica ica ni pilburrojtzi. Nooquichpil huan na tiyase achi nepa huan tijhueyichihuahitij Toteco Dios huan teipa titacuepilise.

⁶ Huan Abraham quicuic nopa cuahuit para nopa tacajcahualisti huan quitali iajcoltipa Isaac. Huan quicuic nopa cuchillo huan tit huan quej nopa nochi ome yajque san sejco. ⁷ Teipa Isaac quiilhui Abraham:

—¡Papá!

Huan Abraham quinanquili:

—¿Taya tijnequi, nocone?

Huan Isaac quiiyto:

—Xiquita, tijpiyaj cuahuit huan tit, pero ¿canque eltoc nopa pilborregojtzi para nopa tacajcahualisti?

⁸ Huan Abraham quinanquili:

—Nocone, Toteco Dios quichihuas para ma onca se pilborregojtzi para nopa tacajcahualisti.

Huan noja nejnentiyajque san sejco. ⁹ Huan quema ajsitoj campa Toteco Dios quiilhuijtoya, Abraham quichihijqui se taixpamit huan quicuialti nopa cuahuit. Teipa quiilpi icone, Isaac, huan quitali ipan taixpamit iixco nopa cuahuit. ¹⁰ Huan Abraham quitananqui nopa cuchillo para quimictis icone. ¹¹ Huan ipan nopa talojtzi, iilhuicac ejca TOTECO quihualnojnnotzqui ten nepa ilhuicac:

—¡Abraham! ¡Abraham!

Huan Abraham tananquili:

—Nica niitztoc.

¹² Huan iilhuicac ejca TOTECO quiilhui:

—Amo teno xijchihuili nopa oquichpil. Ya niquita para tiquimacasi huan tijneltoaca Toteco Dios huan amo tijtasomatqui para techmacas moiyojtzi cone.

¹³ Huan Abraham tachixtejqui huan quiiac se borrego cati tacantoya ica icuacua ipan imacuayo se huietzcuahuit. Huajca yajqui, huan quicuito huan ya nopa quimacac Toteco Dios quej se tacajcahualisti quej ipataca icone.

¹⁴ Teipa Abraham quitocaxtali campa itztoyaj: “Campa TOTECO Temacac Cati Monejqui.” Huan yeca noja moihtoia hasta ama: “Ipan ni itepe TOTECO, yaya temacac cati monequi.”

¹⁵ Huan iilhuicac ejca TOTECO quinoztzqui Abraham ica ompa, ¹⁶ huan quiilhui para TOTECO quej ni quiihtoia:

—Pampa tijchijtoc ni tamanti huan amo tijtasomatqui moiyojtzi cone, nimotestigojquetza noselti ¹⁷ para nimitztiochihuas tahuel miyac. Nijchihuas para moteipan ixhuihua ma elica pano miyac miles ten masehualme hasta amo aqui huelis quinpohuas. Elise quej inimiyaca nopa sitalime nepa ilhuicac huan quej imiyaca xali cati onca iteno hueyi at. Nojquiya inijuanti nochipa quintanise inincualancaitacahua. ¹⁸ Huan niquintiochihuas nochi masehualme ipan nochi talme ipan taltipacti ica moixhui pampa techneltoquilijtoc.

¹⁹ Huan Abraham mocuetqui hasta campa mocajtoyaj itequipanojcahua, huan teipa san sejco mocuetque Beerseba. Huan Abraham mocajqui no-pona para itztos.

Iconehua Nacor

²⁰ Teipa panoc miyac tonali huan ajsico camanali para nopa sihuat Milca nojquiya quimacatoya coneme Nacor, itaca icni Abraham. ²¹ Huan iniachtohui cone elqui Uz, huan teipa tacatqui Buz. Teipa tacatqui Kemuel cati teipa elqui itata Aram. ²² Huan teipa tacatque Quesed, Hazo, Pildas, Jidlaf huan

Betuel. ²³ Huan Betuel moscalti huan elqui itata Rebeca. Ya ni nopa chicueyi telpocame cati Milca quimacac Nacor cati eliyaya icni Abraham.

²⁴ Huan nojquiya Nacor quinpixqui telpocame ica Reúma, itequipanojca. Ininconehua elqui Teba, Gaham, Tahas huan Maaca.

23

Sara mijqui huan quitojque

¹ Sara itztoya 127 xihuit, ² huan mijqui ipan altepet Quiriat Arba cati nojquiya itoca Hebrón huan mocahua ipan tali Canaán. Huan Abraham mocueso huan quichoquili Sara pampa mijqui. ³ Teipa quisqui campa huilantoya itacayo Sara huan yajqui campa nopa heteo tacame cati itztoyaj ipan nopa pilaltepetzi huan quinilhui:

⁴—Masque nise seyoc tali ejquet nica campa amojuanti, technamaquiltica se quentzi amotal campa nijtocas nomijcatzi.

⁵ Huan nopa heteo tacame quinanquilijque:

⁶—¡Nohuampo, techtacaquili! Tojuanti timitzitaj para tise hueyi tacat cati Dios quitapejpenijtoc. Ayecmo más ximocueso. Xijtalpacho momijcatzi ipan nopa ostot cati más cuali tijpiyaj nica. Amo teno timitztasomatilise cati monequi tijtequihuis.

⁷ Huajca Abraham moquetzqui huan mohuijzonqui ica tatepanitacayot iniixpa nopa heteos, ⁸ huan quinilhui:

—Sinta nelía anquiitaj cuali para nijtalpachos nica nomijcatzi, techchi-huilica se favor. Xijtajtanica Efrón, icone Zohar, ⁹ ma technamaquilti nopa ostot cati itoca Macpela cati eltoc imiltateno. Na nijtaxtahuis quej quinamiqui para nopa tali, huan quej nopa elis noaxca se ostot nica para ipan nitetalpachos.

¹⁰ Huan Efrón nopa heteo itztoya nopona inihuaya. Huan Abraham camanaltiyaya chicahuac para ma quicaquica nochi ihuampoyohua huan nochi cati mosehuijtoyaj nechca icalte nopa altepet.

¹¹ Huan Efrón quiijto:

—¡Amo, tate! Na san tapic nimitzmaca nopa tali huan nopa ostot cati eltoc nopona. Iniixpa nohuampoyohua nica nimitzmaca para nopona xijtoxa momijcatzi.

¹² Pero Abraham mohuijzonqui ica tatepanitacayot iniixpa nopa tacame cati nopona ehuan. ¹³ Huan quilhui:

—¡Se favor, techtacaquili! Nimitztajtanía xijseli nopa tomi para nopa tali huan teipa nijtalpachos nopona nomijcatzi.

¹⁴ Huajca Efrón quinanquili:

¹⁵—Techtacaquili, tate. Nopa tali ipati nahui kilos huan tajco ten plata tomi, pero amo teno monequi. San xijseli huan nopona xijtalpacho momijcatzi.

¹⁶ Huan Abraham quiitac cuali ipati cati Efrón quiijtojtoya iniixpa nopa heteo tacame. Yeca quitamachijqui nopa tomi huan quimacac, huan nochi quimatiyayaj para xitahuac.

¹⁷ Huan quej ni elqui iaxca Abraham nopa tali cati quiyahualojtoya nopa ostot Macpela cati eltoya imelac campa quisa tonati ipan tali Mamre ihuaya nochi cuame cati eltoya nopona. ¹⁸ Nochi elqui iaxca Abraham iniixpa nopa heteos huan nochi cati mosehuijtoyaj nechca icalte nopa altepet.

¹⁹ Huan Abraham quitalpacho Sara ipan nopa ostot Macpela ipan nopa mili Mamre nechca altepet Hebrón cati eltoc ipan tali Canaán. ²⁰ Huajca

nopa heteo tacame quimacaque Abraham se amatajcuiloli para nopa tali cati quinamaquiltijque para ipan quitalpacho Sara.

24

Abraham quitemohuili isihua Isaac

¹ Huan Abraham ya eliyaya nelhuehuentzi, huan TOTECO quitiochijtoya ica nochi tamanti. ² Huan se tonali quinotzqui itayacanca tequipanojca cati quimocuitahuiyaya nochi cati iaxca huan quihui:

—Xijtali momax itzinta nometztomahuiya, ³ huan ica ya nopa tijtestigoj-quetzas TOTECO, nopa Dios cati quinahuatía ilhuicacti huan taltipacti para amo tijcahuas nocone Isaac ma mocuili se sihuat ten ni tali Canaán campa tiitztoque. ⁴ Monequi xiya ipan notal campa nihualajqui huan xijtapejpeni se isihua campa noteixmatcahua.

⁵ Huan itequipanojca quinanquili:

—Pero ¿taya nijchihuas sinta nopa sihuat amo quinequis hualas nohuaya? ¿Tijnequi ma nijhuicas mocone ipan nopa tali campa tiquisqui?

⁶ Huan Abraham quijito:

—¡Amo! Amo xijhuica nocone nepa. ⁷ TOTECO Dios mitzpalehuis, yaya cati tanahuatía ipan ilhuicacti huan cati nechquixti ichaj notata huan noteixmatcahua. Yaya cati nohuaya mocajtoc para quinmacas ni tali noteipan ixhuihua, quititanis iilhuicac ejca ma mitzyacana para tijhualicas ten nepa se ichpocat para nocone. ⁸ Huan sinta nopa ichpocat amo quinequis hualas mohuaya, huajca ta timocahuas timajcajtoc ten ni camanali, pero amo xijhuica nocone nepa.

⁹ Huajca itequipanojca Abraham quitali imax itzinta iquescuayo huan quitestigojquetzqui Toteco Dios para temachti quichihuasquía cati quinequiyaya. ¹⁰ Teipa quitapejpeni miyac tamanti cati más cuali cati iteco quipiyayaya para temajmacati. Huan quincuic majtacti camellos cati iaxca Abraham huan yajqui altepet Nacor ipan tali Mesopotamia.

¹¹ Quema itequipanojca ajsitinemiyaya nechca nopa altepet, ya peytoya tzintayohuiya. Huan ipan nopa hora miyac sihuame huan ichpocame hualayayaj atacuiquij. Huajca quinsiyajcuili nopa camellos nechca se ameli, ¹² huan pejqui motatajtía ica TOTECO. Quiihui: “TOTECO Dios, ta tiiTeco noteco, Abraham, xijchihua para ama ma quisa cuali notequi nica pampa tiquicnelía noteco Abraham. ¹³ Nimocahuas nica nechca ni ameli campa ichpocame hualahuij atacuiquij. ¹⁴ Techcahuili para nopa ichpocat cati niquihuis ma quitemohui ico para ma niatis, ma technanquili: ‘Xiati, huan nojquiya niquinamacas mocamellos’. Huan quej nopa nijmatis para ya nopa cati tijtapejpenijtoc para isihua Isaac. Huan quej nopa nijmatis para tijtasojtatoc noteco, Abraham.”

¹⁵ Huan ayemo tamiyaya motatajtía quema quiitac se ichpocat quiquechpanojtihualayaya ico. Huan nopa ichpocat itoca eliyaya Rebeca huan yaya elqui se iixhui Nacor cati elqui iicni Abraham. Nacor huan isihua, Milca, quipixque se telpoca tacat cati itoca Betuel cati elqui itata nopa ichpocat.

¹⁶ Huan Rebeca eliyaya nelyejectzi huan amo quema itztoya ihuaya se tacat. Huan Rebeca temotoya hasta campa eltoc ameli quitemitito ico huan ya ixtejcoyaya hasta talpani ica at. ¹⁷ Huan nopa tequipanojquet motalo quiajsito huan quihui:

—Techcahuili ma niqui se quentzi at ipan moco.

¹⁸ Huan nopa ichpocat quinanquili:

—Xiati, tate.

Huan nimantzi quitemohui ico ten iajcolpa huan quiamacac. ¹⁹ Huan quema nopa tequipanojquet tanqui ati, Rebeca quiiyto:

—Nojquiya nijquixtis at para mocamellos hasta tami atise.

²⁰ Huan nimantzi ateqjui campa atij tapiyalme. Huan motalo miyac huelta huan temoc campa ameli atacuiti hasta quintamiamacac nochi nopa camellos. ²¹ Huan nopa tequipanojquet san quitachiliyaya huan amo teno quiiytohuayaya. San moilhuyiyaya quenicatza TOTECO quipalehujtoyaya ipan iojhui. ²² Huan quema nopa camellos tanque atij, nopa tacat quiquixti se anillo ten oro cati quipixqui chicuase gramos ietica huan quimacac para quitalis ipan iyacatzol. Nojquiya quimacac ome maquechcosti ten oro cati quipixqui ietica chicuase gramos, ²³ huan quilhui:

—Techilhui ajquiya motata huan sinta onca ipan mochaj campa nomasehualhua huan na huelis timocahuase.

²⁴ Huan yaya tananquili:

—Niiichpoca Betuel, yaya cati elqui icone Milca huan Nacor. ²⁵ Ipan tochaj onca campa timocahuas huan nojquiya onca miyac sacat huan tacualisti para mocamellos.

²⁶ Huajca nopa tequipanojquet motancuaquetzqui huan quihueyichijqui TOTECO, ²⁷ huan quiiyto: “Nimitzhueyichihua, TOTECO, ta cati tiiteco noteco, Abraham. Ta titemachtí huan nelía tijtasojtatoc noteco huan techyacantoc ipan ojti hasta nica campa ininchaj iteixmatcahua.”

²⁸ Huan Rebeca motalojtiyajqui hasta ichaj inana huan quilhuito nochi cati quipanotoya. ²⁹ Huan Rebeca quipiyayaya se itaca icni cati itoca Labán. Huan Labán motalo hasta campa ameli quitemoco nopa tacat, ³⁰ pampa quiiytoya nopa anillo, huan nopa maquechcosti cati iicni quihuicayaya ipan imax huan quicactoya cati panoc. Huan Labán monechcahui campa itequipanojca Abraham cati noja itztoya ihuaya icamellos nechca ameli, ³¹ huan quilhui:

—Xihuala nochaj, ta cati TOTECO mitztiochijtoc. ¿Para ten tiitztoc nica huecatzi? Nijcualtalijtoc nochaj para ta huan nojquiya onca campa mocahuase mocamellos.

³² Huajca itequipanojca Abraham yajqui ihuaya. Huan nozona Labán quintatemohuili nopa camellos huan quintamacac. Teipa quihualicac at huan quinmacac nopa tequipanojquet huan nopa masehualme cati ihuaya hualayayaj para ma moicxipajpacaca. ³³ Huan quema quintalilijque tacualisti para tacuase, itequipanojca Abraham quiiyto:

—Na amo nitacuas hasta niqijtos cati monequi niqijtos.

Huan Labán quiiyto:

—Huajca techilhui.

³⁴ Huan nopa tequipanojquet quiiyto:

—Na niitequipanojca Abraham. ³⁵ TOTECO miyac quitiochijtoc noteco huan quiricojchijtoc. Quimacatoc tahuel miyac borregoime, huacaxme, camellos huan burroime. Quimacatoc miyac taca tequipanohuani huan sihua tequipanohuani, huan iyoca quimacatoc tahuel miyac oro huan plata.

³⁶ Nojquiya Sara, isihua Abraham, quimacac se icone quema eliyaya neltenantzi. Huan noteco quicahuilijtehuas icone nochi cati quipiya. ³⁷ Pero ya techchihualti ma nijtestiojquetza Toteco Dios para amo nijcahuas para icone ma mocuili se sihuat cati ehua ipan nopa tali Canaán campa tiitztoque.

³⁸ Techilhui ma nihuala nica campa iteixmatcahua itata huan ma nijtemo ten amojuanti se sihuat para icone. ³⁹ Huan na nijtajtani noteco taya monequi nijchihuas sinta nopa sihuat amo quinequis hualas nohuaya. ⁴⁰ Huan

ya technanquili: 'Na ninentoc ipan iojhui TOTECO huan nijmati yaya quititanis iilhuicac eja huan mitzyacanas para nochi quisas cuali ipan moojhui. Huan temachtí tijpantis se sihuat para nocone nepa campa noteixmatcahua huan iteixmatcahua notata.' Quej nopa techilhui. ⁴¹ Pero techilhui sinta noteixmatcahua amo quinequise mitzmacase nopa ichpocat, nopona tamis ni camanali cati tijtestigojquetztoc Toteco Dios para tijchihuas.

⁴² "Huajca ama quema niajsico campa ameli, niquilhui TOTECO Dios, yaya cati iTeco noteco, Abraham: 'Sinta mopaquilis ta, xijchihua nochi ma quisa cuali ipan ni noojhui. ⁴³ Ama niitztoc nechca ni ameli. Huajca xijchihua para quema hualas se ichpocat atacuiqui huan niquilhuis: 'Se favor, techcahuili niquis se quentzi at ipan moco, ⁴⁴ para ma nechnanquili: Xiati, huan nojquiya nijquixtis at para mocamellos. Huan quej nopa nijmatis para yaya nopa ichpocat cati tijtapejpenijtoc para icone noteco.' Quej nopa niquilhui TOTECO. ⁴⁵ Huan ayemo nitamiyaya nimotatajtía quema niqitac Rebeca quiquechpanojtihualayaya ico. Huan Rebeca temoc campa ameli para atacuis huan niquilhui: 'Se favor, techcahuili niquis se quentzi at ipan moco.' ⁴⁶ Huan Rebeca nimantzi quitemohui ico para ma niati huan nechilhui: 'Xiati huan nojquiya nijquixtis at para mocamellos.' ⁴⁷ Huan teipa nijtatzintoquili: '¿Ajquiya tiiichpoca?' Huan ya nechnanquili para yaya iichpoca Betuel cati elqui icone Nacor huan Milca. Huajca nijtalili se anillo ipan iyacatzol huan se maquehcosti ipan imax. ⁴⁸ Huan nimotancuaquetzqui huan nijhueyichijqui huan nijpaquilismacac TOTECO Dios, yaya cati iTeco noteco Abraham pampa nechyacanqui ipan ojti cati xitahuac para nijpantis para icone se ichpocat cati itztoc se iteixmatca noteco. ⁴⁹ Huajca ama techilhuica sinta anquichihuase cati cuali huan xitahuac ihuaya noteco huan anquicahuilise Rebeca ma yas nohuaya. Huan sinta amo, techilhuica nojquiya para nijmatis taya monequis nijchihuas."

⁵⁰ Huajca Labán huan Betuel quinanquilijque:

—Nochi ya ni huala ten TOTECO huan tiqitaj para yaya ipaquilis. Huajca amo huelis tojuanti timitzilhuisse quena o amo. ⁵¹ Xiquita, nica itztoc Rebeca. Huelis tijhuicas para ma eli isihua icone moteco quej TOTECO quitallijtoc.

⁵² Huajca quema itequipanojca Abraham quicajqui ya nopa, motancuaquetzqui iixpa TOTECO huan mohuijtzonqui hasta talchi para quitascamatis. ⁵³ Teipa quiquixti miyac tamanti ten oro, plata huan miyac yoyomit huan quimacac Rebeca. Nojquiya itaca icni huan inana quintamajmacac. ⁵⁴ Huan quema tanqui, ya ihuaya nopa tacame cati ihuaya yahuiyayaj tacuajque huan taique huan nopona mocajque nopa yohuali. Huan tonili nopa tequipanojquet quijito:

—Techcahuilica para nimantzi ma nitacuepili hasta ichaj noteco.

⁵⁵ Pero itaca icni huan inana Rebeca quihuhijque:

—Noja ma mocahua ni ichpocat majtacti tonali tohuaya huan teipa yas mohuaya.

⁵⁶ Pero nopa tequipanojquet quinilhui:

—Amo techtzacuilica más pampa TOTECO quichijtoc ma quisa cuali noojhui, yeca techcahuilica nimantzi ma sempa niya ichaj noteco.

⁵⁷ Huajca injuanti quinanquilijque:

—Tijnotzase nopa ichpocat huan tiquitase taya quijitos.

⁵⁸ Huajca quinqotzque Rebeca huan quitatzintoquilijque:

—¿Tijnequi tiyas ihuaya ni tacat amantzi?

Huan Rebeca tananquili:

—Quena, niyas.

⁵⁹ Huajca quicahuilijque Rebeca ma yahui ihuaya itequipanojca Abraham huan injuanti cati hualajtoyaj ihuaya. Huan nopa sihua tequipanojquet cati nochipa quimocuitahuijtoya Rebeca nojquiya yajqui ihuaya. ⁶⁰ Huan iteixmatcahua quitiochijque Rebeca quej ni:

“Toicni, ¡xieli ininana tahuel miyac masehualme!

¡Moteipan ixhuihua nochipa ma tatanica, ica inincualancaitacahua!”

⁶¹ Huajca Rebeca ihuaya itequipanojcahua tejqoque ipan camellos huan quitoquilijque itequipanojca Abraham. Huan quej nopa ne tequipanojquet quicuutejqqui Rebeca.

⁶² Teipa ipan tali Canaán Isaac cati mochantijtoya ipan Neguev, hualayaya ten nopa ameli cati itoca Iamel Toteco Cati Itztoc Huan Techita. ⁶³ Huan se tonali ica tiotac Isaac quisqui ichaj para nejnemis huan motatajtis huan tachixqui huan quinitac sequij camellos cati monechcahuiyayaj. ⁶⁴ Huan Rebeca nojquiya huejca tachixqui huan quema quiitac Isaac, temoc ten nopa camello, ⁶⁵ huan quiilhui nopa tequipanojquet:

—¿Ajquiya ne tacat cati quistinemi ipan ne mili huan toixmelac huala?

Huan nopa tequipanojquet tananquili:

—Yaya noteco.

Huajca Rebeca moixtzajqui ica itzontzajcayo.

⁶⁶ Huan quema ajsitoj, nopa tequipanojquet quipohuili Isaac nochi cati quichijtoya. ⁶⁷ Huan teipa Isaac quihuicac Rebeca ipan ichaj ten yoyomit cati achtohui elqui iaxca Sara huan quichijqui isihua. Huan Isaac quiicneli Rebeca huan quej nopa moyoltali pampa inana mijqui.

25

Iteipan ixhuihua Abraham huan Cetura

(1 Cr. 1:32-33)

¹ Huan Abraham mocuili seyoc isihua cati itoca Cetura. ² Huan iconehua cati quinpixqui ihuaya elque Zimram, Jocsán, Medán, Madián, Isbac huan Súa. ³ Huan teipa Jocsán quinpixqui itelpocahua cati inintoca Seba huan Dedán. Huan iteipan ixhuihua Dedán elque nopa asureos, letuseos huan leumeos. ⁴ Huan iconehua Madián elque Efa, Efer, Hanoc, Abida huan Elda. Nochi ya ni elque iteipan ixhuihua Cetura. ⁵ Huan Isaac quiseli nochi cati Abraham quipiyayaya quema mijqui. ⁶ Pero quema ayemo miquiyaya, quintamajmacac iconehua cati tacajtoyaj ica isihua tequipanojcahua huan quintitanqui neca quentzi más para campa quisa tonati huan quej nopa quiniyocatali ica icone Isaac.

Mijqui Abraham huan quitojqque

⁷ Huan Abraham itztoya 175 xihuit. ⁸ Huan mijqui san pampa eliyaya nelhuehuentzi huan yajqui mosejcotilito inihuaya ihuejcapan tatahua. ⁹ Huan Isaac huan Ismael, itelpocahua Abraham, quitalpachojque ipan nopa ostot cati itoca Macpela cati mocahua más campa quisa tonati ten altepet Mamre. Nopa ostot eltoya ipan ital se heteo tacat itoca Efrón cati elqui icone Zohar. ¹⁰ Huan Abraham quincohuilijtoya nopa heteos nopa tali para ipan quitocas isihua, Sara. ¹¹ Teipa quema Abraham mijqui, Toteco Dios miyac quitiochijqui Isaac. Huan Isaac mocahuayaya para itztos nechca nopa ameli cati itoca Iamel Yaya Cati Itztoc Huan Cati Techita.

Iteipan ixhuihua Ismael

(1 Cr. 1:28-31)

¹² Nica eltoc inintoca iconehua Ismael cati elqui icone Abraham ihuaya Agar, isihua tequipanojca Sara cati hualajqui ten tali Egipto. ¹³ Ya ni inintoca quej tacajtíyajque: Nebaiot, cati elqui achtohui ejquet, teipa Cedar, Adbeel, Mibsam, ¹⁴ Misma, Duma, Massa, ¹⁵ Hadar, Tema, Jetur, Nafis huan Cedema. ¹⁶ Nochi ya ni inintoca nopa 12 iconehua Ismael. Sesen mochijqui tayacanquet ipan se hueyi familia ten iixhuihua. Huan nica quiipiya campá mochantalíjtíyajqui huan nopa pilaltepéztizti cati mochijqui quihuicayaya sesen hueyi familia itoca.

¹⁷ Huan Ismael quipiyayaya 137 xihuit quema mijqui huan mosejcotilito inihuaya ihuejcapán tatahua. ¹⁸ Teipa iteipan iXHuihua Ismael mosemanque campá huéli ipan nopa tali ten Havila hasta Shur nechca iteno tali Egipto ipan ojti para Asiria. Nopona iteipan iXHuihua Ismael mocajque huan nochipa motehuiyayaj.

Tacatqui Jacob huan Esaú

¹⁹ Amantzi nimechpohuilis cati panoc ica Isaac, icone Abraham. ²⁰ Isaac quipiyayaya 40 xihuit quema mosihuahti ihuaya Rebeca cati eliyaya iichpoca Betuel huan iicni Labán. Labán huan Betuel eliyayaj nopa arameos cati itztoyaj ipan tali Aram. ²¹ Huan Rebeca amo huéliyaya conepiya huan Isaac quitajtani TOTECO por ya. Huan TOTECO quicajqui cati quitajtani huan Rebeca conecuic. ²² Pero quinpixqui cuateme cati motehuiyayaj iijitico huan moilhui: “Sinta quej ni elís nonemilis, amo huélis níquijyohuís.”

Huajca yajqui quitajtánito TOTECO para ten quej nopa ipantíyaya, ²³ huan TOTECO quinanquili:

“Ome coneme itztoque ipan moiiti.

Huan injuanti huan ininteipan iXHuihua mochihuase ome xinach masehualme.

Huan sesen quínpíyas miyac imasehualhua huan itztose ipan ome talme.

Ya pejtoque motehuáj quema ayemo tacatij,

huan para nochipa ininteipan iXHuihua nojqúiya motehuisse.

Se elís más tetic que ne seyoc.

Huan nopa teipan ejquet quipiyas más tanahuatili que nopa achtohui ejquet.”

²⁴ Huan quema ajsic nopa tonali para Rebeca conepiyas, nelía quinpixqui cuateme. ²⁵ Nopa achtohui ejquet nesiyaya chichiltic huan quípíxqui miyac itzoyo ipan nochi itacayo. Huan quitocaxtijque Esaú. (Esaú quinequi quiijtos Cati Quipiya Miyac Itzoyo.) ²⁶ Huan nimantzi tacatqui ne seyoc cati quiitzquilijtóya icotzta iachtóhui cone icni ica se imax. Yeca quitocaxtijque Jacob. (Jacob quinequi quiijtos Cati Taitzquía o Cati Tacajcayahua.) Huan Isaac quipiyayaya 60 xihuit quema Rebeca conepixqui.

Esaú quinamacac itanahuatil ten achtohui ejquet

²⁷ Huan nopa oquichpílme moscaltijque. Huan Esaú elqui se tacat cati quipactía nejnemi cuatita huan elqui se cuali tapejquet. Pero Jacob eliyaya se tacat cati quípíxqui iyolo huan quipactía mocahuas ichaj. ²⁸ Huan Isaac más quiicneli Esaú pampa quipactíyaya quicuas cati quinmictíyaya quema taphuayaya, pero Rebeca quiicneli Jacob.

²⁹ Huan se tonali quema Jacob quichihuayaya tacualisti, Esaú mocuetqui ten cuatita nelsiyajtoc. ³⁰ Huan quíilhui iicni:

—Techchihuili se favor, techmaca se quentzi nopa tacuali chichiltic cati tijiya nopona pampa ya niapismiqui.

(Yeca Esaú nojquiya quitocaxtiyayaj Edom cati quinequi quiiijos Chichiltic.)

³¹ Huan Jacob quiihui:

—Achtohui techmaca motequiticayo pampa tiachtohui ejquet.

³² Huajca Esaú quiihui:

—Tiquita ya niapismiqui huan nopa tanahuatili cati nijpiya pampa niachtohui ejquet amo techpalehuis quema nimiquis.

³³ Huajca Jacob quiihui:

—Xijtestigojquetza Toteco Dios amantzi para noaxca.

Huan Esaú quitestigojquetzqui Toteco huan quej nopa quipanoltili Jacob nopa tanahuatili cati eliyaya iaxca pampa achtohui ejquet. ³⁴ Huajca Jacob quimacac Esaú pantzi huan se tacualisti ten lentejas. Huan quema Esaú tanqui tacua, moquetzqui huan yajqui, yon amo quinejnehuili sinta quipolojtoya itanahuatil ten achtohui ejquet pampa amo quiiayaya para miyac ipati.

26

Isaac yajqui Gerar

¹ Ipan nopa tonali oncayaya se hueyi mayanti pampa amo oncayaya tacualisti ipan nochi nopa tali. Quej ni nojquiya panotoya achtohuiya quema Abraham noja itztoya. Huan yeca Isaac yajqui altepet Gerar campa tanahuatiyaya Abimelec, inintanahuatijca flisteos. ² Nopona TOTECO monexti ica Isaac huan quiihui: “Amo xiya tali Egipto, ximocahua campa na nimitzilhuis ³ nica ipan ni tali. Huan na niitztos mohuaya huan nimitzti-ochihuas. Huan se tonali nimitzmacas ta ihuaya moteipan ixhuihua nochi ni talme. Quej nopa nijtamichihuas cati nijtencahuili motata Abraham para temachtij nijchihuas. ⁴ Huan nijchihuas ma elica nelmiyaqui moteipan ixhuihua quej sitalime ipan ilhuicac. Huan niquinmacas nochi ni talme. Nojquiya niquintiochihuas nochi masehualme ipan nochi talme ipan taltipacti por moixhui. ⁵ Nochi ya ni nijchihuas pampa Abraham techneltoquili huan quichijqui cati niqulihui. Quitoquili nochi cati niqulihui para monequi quichihuas. Quitoquili notanahuatil, notamachtij huan nochi noleyes.”

⁶ Huajca Isaac mocajqui ipan altepet Gerar. ⁷ Huan quema nopa masehualme cati nopona ehuan quitatzintoquilijque quenicatza quiiayaya Rebeca, Isaac majmajqui quiiijos eliyaya isihua huan ispacatic huan quiiijo para eliyaya iicni. Isaac moilhui nopa tacame cati nopona ehuan quimictisquij huan moculisquij Rebeca pampa eliyaya nelyejyectzi.

⁸ Huan quema Isaac mocajtoya nopona miyac tonali, se tonali Abimelec tachixtoya ipan iventana huan quiiat para Isaac quinajnahuyaya isihua Rebeca. ⁹ Huajca titatanqui ma quinoztatij huan quiihui:

—Yaya mosihua, ¿amo que? Huajca, ¿para ten tiquijto para eliyaya moicni? Huan Isaac tananquili:

—Na nimoilhui nohueli nechmictisquij por ya.

¹⁰ Huajca Abimelec quiihui:

—¿Para ten techajcayajtoc ica ni tamanti? San se quentzi huan se cati ehua nica hueltosquía motectosquía ihuaya mosihua huan topani huetztoquía se tatzacuiliti.

¹¹ Huajca Tanahuatijquet Abimelec quinilhui nochi imasehualhua:

—Sinta acajya quicuato-tonía ni tacat o isihua, quipantis miqulisti.

¹² Huan ipan nopa xihuit nopona ipan nopa tali, Isaac tojqui huan quisen-tili miyac pixquisti hasta 100 hueltas imiyaca pampa TOTECO quiochijqui.

¹³ Huan Isaac moricojchijqui. Huan nochi cati iaxca más momiyaquili hasta nelnelía mochiqqui se hueyi tacat ica miyac chicahualisti. ¹⁴ Quinpixqui tahuel miyac borregojme, chivojme, huacaxme huan tequipanohuani. Huajca nopa filisteos pejque quicualancaitaj. ¹⁵ Huan quitemitijque ica tali nochi íamel Isaac. Ni amelme quixajtoyaj itequipanojcahua Abraham, itata Isaac, huejcajquiya quema noja itztoyaj ipan nopa tali. ¹⁶ Huajca teipa Tanahuatijquet Abimelec quihui Isaac:

—Xiya sejcayoc pampa ica nochi motequipanojcahua huan motapiyalhua nelía anmiyaqui huan anitztoque más antetique que tojuanti.

¹⁷ Huajca Isaac huan nochi cati itztoyaj ihuaya yajque. Huan quiquetzque ininchajchaj ten yoyomit ipan nopa tamayamit tatajco nopa tepeme nechca altepet Gerar. Huan nozona mocajqui. ¹⁸ Huan Isaac sempa quitapo nochi nopa ameli cati itata quixajtoya cati nopa filisteos quitzactoyaj quema mijqui. Huan sempa quitocaxti sesen ameli quej itata quintocaxtalijtoya achtohuiya. ¹⁹ Huan se tonali itequipanojcahua Isaac quichihuayaj se ameli ipan nopa tamayamit huan quipantijque campa meyayaya se yejyetzitzi at. ²⁰ Pero altepet Gerar ehuan cati quinmocuitahuiyayaj borregojme pejque monajnanquiliáj inihuaya cati quinmocuitahuiyayaj iborregojhua Isaac. Quinilhuiyayaj para nopa at eliyaya iniaxca. Yeca Isaac quitocaxti nopa ameli Esek pampa ica monajnanquilijq. (Esek quinequi quijtos Tanajnanquili.) ²¹ Huan teipa itequipanojcahua Isaac quitapojque seyoc ameli, pero sempa ica mocualanijque. Huan nopa ameli quitocaxti Sitna. (Sitna quinequi quijtos Cualancaitali.)

²² Huajca Isaac quincajtejq huan moiyoaqui xit huejca. Nopona quixajqui seyoc ameli, pero amo aquí yajqui nepa para quitehuis. Huajca quitocaxti Rehobot. (Rehobot quinequi quijtos Hueyi Tali.) Quej nopa quitocaxti pampa Isaac quijto para ama TOTECO quitiuchijto huan quimacatoc se hueyi tali cati quixali para nochi itapiyalhua ma moscaltica.

²³ Huan Isaac yajqui campa itoca Beerseba, ²⁴ huan nopa tayohua TOTECO monexti ica ya huan quihui:

“Na niDios cati niiTeco motata, Abraham.

Amo ximajmahui, na niitztoc mohuaya.

Nimitztiuchihuas huan niquinmiyaquilis moteipan ixhuihua,

pampa niquelnamiqqui cati nijtencahuili notequipanojca Abraham.”

²⁵ Huajca Isaac quisencajqui se taixpamit nopona huan quihueyichijqui TOTECO. Huan nopona quiquetzqui ichaj ten yoyomit, huan itequipanojcahua quixajque se ameli.

Isaac huan Abimelec quichijque se camanali

²⁶ Se tonali Abimelec hualajqui ten altepet Gerar para mocamanalhuis ihuaya Isaac. Ihuaya hualayaya ihuampo Ahusat cati quitálnamictiyaya huan Ficol cati quinnahuatiyaya isoldados. ²⁷ Huan Isaac quintatzintoquili:

—¿Para ten anhualajque antechitaquij? Antechquixtijque ipan amotal pampa antechcualancaitayaj.

²⁸ Huan quihuijq:

—Tiquitztoque para TOTECO itztoc mohuaya, huan timoilhuíaj cuali ma tijchihuaca se camanali. Nopa camanali elis ya ni: ²⁹ Xijtestigojquetza para amo quema techcocos pampa tojuanti amo quema timitzcocojtoque. Nochia timitzchihuilijtoque cati cuali huan quema monejq tinoiyocaquixtis ten tojuanti, timitzmajcajq ica cuali quej titohuampo. Huan ama xiquita quenicatza TOTECO mitztiuchijtoc.

³⁰ Huajca Isaac quinchihuili se hueyi tacualisti, huan san sejco injuanti tacuajque huan taique. ³¹ Huan tonili ica ijnaloc, mijquejque huan quites-tigojquetzque Toteco para amo quema moixpanosquíaj se ica seyoc. Teipa Isaac quinnahuatijtejqui ica cuali.

³² Ipan nopa tonal, itequipanojcahua Isaac quiyolmelahuacoj para quipantijtoyaj at campa taxahuayayaj. ³³ Huan Isaac quitocaxti nopa ameli Seba. (Seba quinequi quijijos Campa Tatestigojquetzqui.) Huan yeca nopa altepet hasta ama itoca Beerseba. (Beerseba quinequi quijijos Ameli campa Tatestigojquetzque.)

³⁴ Huan quema Esaú quipiyayaya 40 xihuit mosihuajti ihuaya Judit cati eliyaya iichpoca Beeri se heteo tacat. Huan nojquiya Esaú mosihuajti ihuaya Basemat iichpoca seyoc heteo tacat cati itoca Elón. ³⁵ Huan ni ome sihuame quinmacaque Isaac huan Rebeca miyac tequipacholi.

27

Isaac quitiochijqui Jacob huan Esaú

¹ Huan Isaac eliyaya nelhuehuentzi huan ayecmo tachiyayaya. Huan se tonali quinotzqui Esaú, icone cati achtohui ejquet huan quiilhui:

—¡Nocone!

Huan Esaú quinanquili:

—Techilhui taya tijnequi, papá.

² Huan Isaac quijito:

—Ya tiquita para ninelhuehuentzi huan ten hueli tonali hueli nimiquis.

³ Yeca nijnequi xiya cuatita ica mocuahuitol huan cuataminti para xijmictiti se masat. ⁴ Teipa xijsencahua se tacualisti ajhuiyac quej na nechpactía huan xijhualica para nijcuas. Huan huajca nimitzmacas notatiochihual iixpa Toteco quema ayemo nimiqui.

⁵ Pero Rebeca quitacaquiliytoya cati Isaac quiilhuyaya Esaú. Huan teipa quema Esaú yajqui cuatita para quiitzquiti se masat para itata, ⁶ Rebeca quinotzqui Jacob, iteipan cone huan quiilhui:

—Nijcajqui para motata mocamanalhuyaya ihuaya moicni Esaú huan quiilhuyaya, ⁷ para ma quiitzquiti se masat huan ma quisencahuili se tacualisti cati ajhuiyac para quicuas. Quiijto para teipa quimacas itatiochihual iixpa TOTECO quema ayemo miqui. ⁸ Huajca nocone, xijtacaquili cuali cati nimitzilhuis: ⁹ Xiya campa itztoque totapiyalhua huan techhualiquili ome oquich chivojme cati más cuali. Huan nijsencahuilis motata se tacualisti ajhuiyac quej ya quipactía. ¹⁰ Huan teipa tijhuiquilis ma quicua, huan quej nopa mitztiochihuas iixpa Toteco quema ayemo miqui.

¹¹ Pero Jacob quiilhui inana:

—Noicni quiptiya miyac itzoyo ipan nochi itacayo, huan na, amo. ¹² Sinta notata techitzquis, quimatis amo niEsaú. Huan moilhuis para san ica nimahuiltía, huajca nijchihuas ma nechtelchihuas huan amo nechtiochihuas.

¹³ Pero inana quinanquili:

—Nocone, na nopani ma huetzi nopa tatelchihuali. Ta xijchihua cati nimitzilhuía huan techhualiquili nopa oquich chivojme.

¹⁴ Huajca Jacob quincuito nopa oquich chivojme huan quinhuicac campa inana. Huan inana quisencajqui se tacualisti ajhuiyac quej Isaac quipactiyaya. ¹⁵ Huan Rebeca quiquixti nopa yoyomit cati más cuali cati Esaú, iachtohui cone, quiajoctoya ipan ichaj. Huan nopa yoyomit quitaili

Jacob cati elqui iteipan cone. ¹⁶ Huan quinquixtili inincuetaxo nopa chivojme ica nochi iniijhuiyo huan ica quipijqui Jacob ipan imax huan iquechta campá amo quipiyayaya itzoyo. ¹⁷ Teipa quimacac nopa tacualisti huan nopa pantzi cati quisencajtoya.

¹⁸ Huajca Jacob calajqui campá itztoya itata huan quiilhui:

— ¡Papá!

Huan Isaac quinanquili:

— Nica niitztoc. ¿Ajquiya ta, nocone?

¹⁹ Huan Jacob quiilhui:

— Na niEsaú, moachtohui cone. Ya nijchijtoc cati techilhui. Ximijquehua, ximosehui huan xijcua ni masat cati nijmictito huan techmaca motatiochihual.

²⁰ Huajca Isaac quitatzintoquili:

— ¿Quenicatza huelqui tijpanti nelnimantzi, nocone?

Huan Jacob quinanquili:

— TOTECO, moDios, nechpalehui para nijpanti.

²¹ Pero Isaac quiilhui:

— Ximonechcahui huan techcahuili ma nimitzijtzqui sinta nelía tinocone Esaú.

²² Huan Jacob monechcahui para ma quiitzqui itata. Huan Isaac quiijto: “Nijcaqui motoscac quej Jacob, pero momax eltoc quej tiEsaú.”

²³ Huan Isaac amo quimatqui sinta eliyaya Jacob pampa imax quipiyayaya miyac itzoyo quej iicni, Esaú. Huajca quema quimacasquía itatiochihual iixpa Toteco, ²⁴ sempa quitatzintoquili:

— ¿Nelía ta tinocone Esaú?

Huan Jacob quiilhui:

— Quena, na niEsaú.

²⁵ Huajca itata quiilhui:

— Techtequili, nocone, para nijcuas cati tijmictito, huan teipa nimitzmacas notatiochihual.

Huajca Jacob quitequili para ma tacua itata huan nojquiya quihualiquili xocomecat iayo. Huan Isaac tacuajqui, ²⁶ huan teipa quiilhui:

— Ximonechcahui, nocone huan techzoponi.

²⁷ Huan quema Jacob monechcahui para quitzoponis, Isaac quiijnejqui iyoyo huan moilhui huelis nelía iachtohui cone. Huajca quitiochijqui ica ni camanali:

“Ajhuiyac cati niquijnecui ten nocone.

Mijyotía quej cuatitamit cati TOTECO quitiochijtoc.

²⁸ Toteco Dios ma mitzmaca at ten ilhuicac, para tijpiyas pixquisti cati más cuali ipan motal.

Ma mitzmaca miyac trigo, huan miyac xocomecat iayo.

²⁹ Miyac masehualme ma mitztequipanoca.

Ma motancuaquetzaca moixpa, masehualme ten miyac talme.

Xiquinnahuati moicnihua.

¡Huan ma motancuaquetzaca moixpa nochi cati monana quintacatilti!

Cati mitztelchihuase elise tatechihualme.

Huan cati mitztiochihuase elise tatiochihualme.”

³⁰ Teipa Isaac tanqui quitiochihua Jacob huan quema Jacob quisayaya ten campá itata, Esaú mocuetqui ten tapehuato. ³¹ Huan Esaú nojquiya quisencajqui se tacualisti ajhuiyac huan quihuiquili itata. Huan quiilhui:

—Ximoquetza, papá. Xijcua ni cati nijpehuato huan techmaca motatiochihual iixpa Toteco.

³² Huajca Isaac quitatzintoquili:

—¿Ajquiya ta?

Huan ya tananquili:

—Na niEsaú, moachtohui ejca.

³³ Huan Isaac amo quimatiyaya taya quuijtos. Huan ica itoscac huihuipicayaya, quuijto:

—Huajca, ¿ajquiya nechhualiquili nopa tacualisti cati quicuito ipan cuatitamt? Na nijcujqui quema ayemo tiajsiyaya huan nijmacac nopa tatiochihualisti, huan ya neliá elis tatiochihuali.

³⁴ Quema Esaú quicajqui cati itata quuijto, tzajtzic tahuel chichahuac ica miyac tequipacholi huan teipa quuijto:

—¡Techochihua nojquiya, papá!

³⁵ Pero Isaac quinanquili:

—Ya hualajqui moicni, huan nechcayajqui. Quihuicac nopa tatiochihuali cati eliyaya para ta.

³⁶ Huan Esaú quuijto:

—¡Yeca quitocaxtijque Jacob! (Jacob quinequi quuijtos Tacajcayajquet.) ¡Ica ni mochihua ome huelta nechcayajtoc! Achtohui nechquixtili notanahuatil cati noaxca eltoya pampa niachtohui ejquet. Huan ama nechquixtilijtoc notatiochihual. ¿Amo ticajtoc seyc tatiochihuali para na?

³⁷ Huajca Isaac quinanquili:

—Xiquita, na nijmacatoc Jacob tanahuatili para mitznahuatis. Niquuijtojtoc para iteixmatcahua elise itequipanojcahua. Niquilhuijtoc para quipiyas miyac trigo huan miyac xocomecat iayo. ¿Taya mocahuas para noja huelis nimitzmacas, nocone?

³⁸ Huan Esaú noja quilhui:

—¿San hueli titemaca san se tatiochihuali, papá? ¡Techochihua nojquiya!

Huan Esaú sempa tahuejchijqui huan chocac.

³⁹ Huajca Isaac quilhui:

“Tiitztos huejca ipan tali cati amo hueli taixhualtía, huan campa amo huetzis at.

⁴⁰ Huan monequis timomanahuis ica momacheta.

Tielis tiitequipanojca moicni, pero quema ayecmo huelis tiquijyohuis más, timoquixtis imaco.”

Jacob cholo pampa quimacasiyaya Esaú

⁴¹ Huajca Esaú quicualancaitac Jacob pampa quiihtequijtoya itatiochihual huan pejqui moilhuía: “Ya nechca para miguis notata. Quema ya panotos nopa tequipacholi, nijmictis noicni, Jacob.”

⁴² Huan Rebeca quimatqui cati Esaú moilhuyaya quichihuas, huajca Rebeca tatitanqui ma quinotzatij Jacob. Huan quema ajsico, Rebeca quilhui:

—Xiquita, ica nopa cati tijchihuili moicni, Esaú, yaya ama quinequi mitzmictis. ⁴³ Yeca, nocone, techacaquili; xicholo nimantzi hasta tali Harán hasta ichaj noicni, Labán. ⁴⁴ Ximocahua nopona se ome xihuit hasta quema ayecmo cualantos moicni. ⁴⁵ Huan quema ya quielcajtos cati tijchihuili, nitatitanis ma mitzyolmelahuaca para sempa xihuala. ¡Amo nijnequi niquinpolos ome nocone huan ipan san se tonal!

⁴⁶ Huan teipa Rebeca quilhui Isaac:

—Ya nisiyajtoc por ni heteo ichpocame cati Esaú mocuilijtoc. Sinta Jacob mocuilis se ichpocat cati ehua nica ipan tali Canaán, más cuali ma nimiqui.

28

¹ Huajca Isaac quinzotzqui Jacob, huan quitiochijqui huan quiilhui: “Amo ximosihuajti ica se sihuat ten ni tali Canaán. ² Xiya tali Aram campa ichaj mohueyi tata Betuel huan ximosihuajti ihuaya se iichpoca motío Labán. ³ Toteco Cati Quipiya Nochi Chicahualisti ma mitztiochihua huan ma mitzmaca miyac moixhuihua para ipan ta ma quisaca nelmiyaqui masehualme cati itztose ipan miyac talme. ⁴ Toteco ma mitzmaca ta huan moteipan ixhuihua nopa tatiochihuali cati quitencahuili Abraham. Ma amechaxcati ni tali campa ama tiitztoque quej tiseyoc tali ehuan pampa ya ni nopa tali cati quitajtolcahuili Abraham para quinmacas iteipan ixhuihua.”

⁵ Huajca quej nopa Isaac quititanqui Jacob ipan tali Aram. Huan Jacob ajsito ichaj Labán cati eliyaya icone Betuel cati ehua tali Aram. Huan Labán eliyaya iicni Rebeca cati eliyaya inana Jacob huan Esaú.

Esaú mosihuajti

⁶ Esaú quimatqui para Isaac quimacac itatiochihual Jacob huan quititanqui ipan tali Aram para ma mosihuajtiti nepa. Huan quinahuatijtoya ma amo mosihuajti ica se sihuat cati ehua tali Canaán. ⁷ Nojquiya quimatqui para Jacob quistoya para tali Aram quej itata huan inana quiilhuijtoyaj. ⁸ Huajca Esaú quitac para itata amo quipactiyayaj sihuame cati ehuan tali Canaán campa injuanti itztoyaj. ⁹ Yeca yajqui quititao itío, Ismael, cati nojquiya icone Abraham. Nopona mosihuajti ihuaya se iichpoca cati itoca eliyaya Mahalat huan cati eliyaya iicni Nevaiot. Huajca Mahalat mochijqui isihua Esaú inihuaya nopa sequinoc sihuame cananeos cati ya mocuilijtoya.

Toteco Dios monexti ica Jacob ipan Betel

¹⁰ Huan Jacob quistoya altepet Beerseba huan yajqui ipan nopa ojti cati yahui altepet Harán. ¹¹ Huan ajsic ipan se lugar huan nopona panoc nopa tayohua pampa ya temotoya tonati. Huan quicuic se tet huan quitequihui para itzonteto. Huan motejqui huan cochqui. ¹² Huan quipixqui se temicti huan quiitayaya se escalera cati ijcatoya talchi huan ajsiyaya hasta ilhuicac. Huan ilhuicac ehuan ten TOTECO cati ipan temoyayaj huan tejcoyayaj. ¹³ Nojquiya quiitayaya para TOTECO Dios itztoya huejcapa huan quiilhuiyaya: “Na nininTeco mohueyi tata Abraham huan motata Isaac. Ta huan moteipan ixhuihua niquinmacas ni tali campa amantzi tiitztoc. ¹⁴ Moteipan ixhuihua elise nelmiyaqui quej imiyaca taltepocti cati amo aqui huélis quinpohuas. Huan mosemanase campa huéli. Yase hasta sur, huan norte, huan hasta campa quisa tonati huan hasta campa oncalaqui. Huan niquntiochihuas nochi familias ipan taltipacti ica ta huan moixhui. ¹⁵ Na niitztoc mohuaya. Nimitzmocuitahuís campa huéli campa tiyas huan nijchihuas xitacuepilis ipan ni tali. Amo nimitztahuelcahuas. Nijchihuas nochi cati mohuaya nimocajtoc nijchihuas.”

¹⁶ Huan quema Jacob isac, moilhui: “Nelía TOTECO itztoc ipan nica huan amo nijmatiyaya.”

¹⁷ Huan Jacob majmajqui miyac huan moilhui: “¡Nica neltatzetzelotlic! ¡Nica eltoc ichaj Toteco! ¡Ni icalte ilhuicac!”

¹⁸ Huan tonili Jacob mijquejqui cualca huan quicuic nopa tet cati quitequihuijtoya para itzonteto. Huan quiquetzqui quej se tanextili para nopona

campa Toteco quicamanalhui. Huan nopa tet quitequili aceite para quiyocatalis para Toteco. ¹⁹ Huan nechca nopona eltoya se altepet cati itoca Taahuili, pero Jacob quipatili itoca huan quitalili Betel. (Betel quinequi quijtos Ichaj Toteco.)

²⁰ Huan nopona Jacob quitestigojquetzqui Toteco Dios taya quichi-huasquía huan quijto: “Toteco, sinta ta nohuaya tiitztos huan techmocuitahuis ipan ni noojhui cati nijchihua, huan sinta techtamacas huan techmacas cati nimoquentis, huajca na nimitztequipanos. ²¹ Huan sinta amo nimococos huan nitacuepilis ica cuali ipan Ichaj notata, huajca san ta, TOTECO, nijmatis para noTeco. ²² Huan nica campa nijtalitoc ni tet, elis mochaj, Toteco, campa nimitztencahuilis tacajcahualisti. Huan nochipa nimitzmactilis se diezmo ten nochi cati techmacas.”

29

Jacob ipan Harán

¹ Jacob sempa quitzqui iojhui huan yajqui ipan se tali nechca campa quisa tonati.

² Huan nopona ipan potrero quuitac se ameli huan nechca mosentiliyayaj borregoyme ipan eyi tatilimit pampa nopa tapiyalme momatque atij ipan nopa ameli. Huan quitzactoyaj nopa ameli ica se tet cati nelhueyi. ³ Huan nopa tamocuitahuiani momajtoyaj mochiyaj hasta quema mosentilijtose nochi nopa borregoyme cati sesen injuanti iaxcahua huan san sejco qui-ijcueniyayaj nopa hueyi tet. Teipa quinamacayayaj ininborregojhua huan teipa san sejco sempa quitzacuayayaj ica nopa hueyi tet. ⁴ Huajca Jacob quintatzintoquili nopa tamocuitahuiani:

—¿Canque amochaj, nohuampoyohua?

Huan injuanti tananquilijqe:

—Tihualahuij altepet Harán.

⁵ Huajca quinilhui:

—¿Anquiixmatij Labán iixhui Nacor?

Huan quiilhuijqe:

—Quena, tiquixmatij.

⁶ Huan Jacob quinilhui:

—¿San cuali itztoc?

Huan nopa tamocuitahuiani quijtojque:

—Quena, itztoc cuali. Xiquita, ne huala iichpoca, Raquel, ihuaya iborregojhua.

⁷ Huajca Jacob quijto:

—Noja cualca para anquinzacuase borregoyme. ¿Para ten amo anquina-macaj huan anquinhuicaj sempa ma tacuatij?

⁸ Pero nopa tamocuitahuiani quijtojque:

—Amo hueli tijchihuj. Monequi tijchiyase ma hualaca nochi borregoyme huan tamocuitahuiani para sentic tiquijcuenise ni tet cati ica quitzacuaj ni ameli para tiquinamacase toborregojhua.

⁹ Huan quema Jacob noja camanaltiyaya inihuaya, ajsico Raquel ihuaya iborregojhua itata pampa eltoya itequi para quinmocuitahuis. ¹⁰ Huan nimantzi quema Jacob quuitac Raquel, iichpoca ito Labán, ica iborregojhua, yajqui huan iseltitzi quijcueni nopa tet cati ica quitzactoyaj nopa ameli. Huan quinamacaj iborregojhua. ¹¹ Teipa quitajpalo huan quitzoponi huan pejqqui choca chichahuac. ¹² Huan Jacob quipohuili para yaya eliyaya icone Rebeca cati iicni Labán. Huajca Raquel motalojtiyajqui huan quipohuilito itata.

¹³ Huan quema Labán quicajqui cati Raquel quipohuili, para Jacob eliyaya icone isihua icni, motalojtejqm para quiseliti. Huan quinajnahuaqqui, huan quitzoponi huan quihuicac ichaj. Teipa Jacob quipohuili para ten hualajqui.
¹⁴ Huan Labán quiilhui: “Melahuac ta huan na san se toeso.”

Jacob tequitic para Raquel huan Lea

Huan Jacob mocajqui ihuaya Labán se metzti. ¹⁵ Teipa Labán quiilhui:
 —Amo hueli techtequipanos san tapic san pampa nimoteixmatca. Techilhui quesqui tijnequi ma nimitztaxtahui.

¹⁶ Huan Labán quiniyayaya ome iichpocahua. Nopa achtohui ejquet itoca Lea huan nopa teipan ejquet, Raquel. ¹⁷ Huan iixteyolhua Lea amo quiniyayaya miyac tetili, pero Raquel eliyaya senquisa yejectzi. ¹⁸ Huan Jacob quiixtocayaya Raquel huan huajca quinanguili:

—Nimitztequipanos chicome xihuit sinta techmacas Raquel para elis nosihua.

¹⁹ Huajca Labán tananguili:

—Cualtitoc, más cuali nimitzmacas ta, huan amo se cati amo niqixmati. Huajca ximocahua nohuaya huan nimitzmacas.

²⁰ Huan quej nopa Jacob tequitic chicome xihuit para Raquel, pero ya amo quimatqui sinta nelmiyac tonali pampa tahuel quicneliyaya.

²¹ Huan quema tanqui nopa chicome xihuit, Jacob quiilhui Labán:

—Techmaca nosihua para ma nimosihujti ihuaya pampa ya tanqui nopa tonali cati ica nimocajqui mohuaya para nitequitiz.

²² Huajca Labán quinnotzqui nochi cati itztoyaj nozona para ma hualaca ipan nopa ilhuit ten nenamictili ²³ Pero ica tayohua Labán quicuic Lea huan quihuiquili Jacob. Quej nopa quimacac Lea para elis isihua huan Jacob cochqui ihuaya. ²⁴ Nojquiya Labán quimacac Lea se sihua tequipanojqquet cati itoca Zilpa para ma quipalehui. ²⁵ Huan quema tanesqui, Jacob quiitac para cochtaya ihuaya Lea. Huajca yajqui quiilhuito Labán:

—¿Taya techchihuilijtoc? ¿Amo nimitztequipano para Raquel? Huajca ¿para ten techcayajtoc?

²⁶ Huan Labán quiilhui:

—Nica amo timomajtoque para motahuicaltis nopa teipan ejquet sinta ayemo motahuicaltia nopa achtohui ejquet. ²⁷ Xicaxiti se samano ihuaya Lea, huan teipa nojquiya timitzmacase Raquel sinta timotemacas titequitis nohuaya seyoc chicome xihuit.

²⁸ Huan Jacob motemacac. Huan quema tanqui se samano itahuicaltis ica Lea, Labán quimactili Raquel para ma quichihua isihua. ²⁹ Labán nojquiya quimacac Raquel se sihua tequipanojqquet cati itoca Bilha para ma quipalehui. ³⁰ Huan Jacob mosejcotili ihuaya Raquel huan más quicneli que Lea, masque monequiyaya quitequipanos Labán seyoc chicome xihuit por ya.

Iconehua Jacob

³¹ Huan quema TOTECO quiitac para Jacob amo quicneliyaya Lea, quichijqui ma conepiya, pero Raquel quichijqui ma amo conepiya. ³² Huan Lea conecuc huan quipixqui se icone cati quitocaxti Rubén. (Rubén quinequi quiijtos Quiitac Notequipachol.) Quej nopa quitocaxti pampa quiijto: “TOTECO quiitac quenicatza tahuel nimocuesohuayaya huan nechmacatoc se conet, yeca ama nohuehua technequis.”

³³ Teipa Lea quipixqui seyoc icone cati quitocaxti Simeón. (Simeón quinequi quiijtos Se Cati Tacaqui.) Quej nopa quitocaxti pampa Lea quiijto:

“TOTECO quicactoc para amo nechicnelía huan yeca nechmacac seyoc nocone.”

³⁴Huan seyoc huela Lea quipixqui seyoc icone huan quitocaxti Leví. (Leví quinequi quijitos Motatzquilljtoc.) Quej nopa quitocaxti pampa quijito: “Ama nohuehue itztos más nohuaya pampa ya nijmacatoc eyi oquichpilme.”

³⁵Huan Lea quipixqui seyoc icone cati quitocaxti Judá. (Judá quinequi quijitos Nijpaquilismacas.) Quej nopa quitocaxti pampa quijito: “Ni huela, quena, nijpaquilismacas TOTECO.”

Teipa ayecmo conepixqui.

30

¹Quema Raquel quitac para amo hueliyaya quimaca coneme Jacob, pejqui quicualancaita iachtohui icni, Lea, huan quillhui ihuehue:

—Techmaca coneme pampa sinta amo, nimiquis.

²Pero Jacob cualanqui ihuaya huan quillhui:

—¡Amo na niDios! Yaya TOTECO cati amo mitzcahuilía xiconepiya.

³Huajca Raquel quillhui ihuehue:

—Huajca xijcui notequipanojca Bilha huan ximocahua ihuaya. Huan quema yaya quinpiyas coneme, elis quej na noconeua.

⁴Quej ni Raquel quimacac Jacob itequipanojca, Bilha, para ma quinpiya coneme ihuaya. Huan Jacob mosejcotili ihuaya Bilha, ⁵huan ya quimacac Jacob se icone. ⁶Huajca Raquel quijito: “Toteco quichijtoc cati xitahuac para na pampa quicajqui cati nijtajtani huan techmacac se nocone. Yeca ni oquichpil itoca elis Dan.” (Dan quinequi quijitos Yaya Quichijtoc Cati Xitahuac Para Na.)

⁷Teipa Bilha, itequipanojca Raquel, quimacac Jacob seyoc icone. ⁸Huajca Raquel quijito: “Nimotehuijtoc ihuaya noachtohui icni huan nijtantoc. Yeca ni oquichpil itoca elis Neftalí.” (Neftalí quinequi quijitos Notatehuijtcayo.)

⁹Quema Lea quitac para ayecmo hueliyaya conepiya, quimacac Jacob itequipanojca, Zilpa para ma conepiya ihuaya. ¹⁰Huan quema Zilpa quimacac se icone Jacob. ¹¹Lea quijito: “¡Se suerte! Yeca nopa oquichpil itoca elis Gad.” (Gad quinequi quijitos Suerte.)

¹²Teipa Zilpa quimacac Jacob seyoc icone, ¹³huan Lea quijito: “¡Paquilisti! Ama sihuame quijitose para nipaqui. Yeca nopa oquichpil itoca elis Aser.” (Aser quinequi quijitos Paquilisti.)

¹⁴Se tonalí Rubén yajqui mila quema eliyaya trigo pixquisti huan nozona quipanti se tamanti xihui pajti huan quihuiquili inana, Lea. Nopa xihui pajti itoca eliyaya mandrágoras huan nochi quijitohuayayaj para nopa xihuit quichihua se tacat más ma quicneli isihua. Huan quema Raquel quitac nopa cuali xihui pajti, quillhui Lea:

—Techchihuili se favor, techmaca se ome ten nopa xihui pajti cati mocone quihualiac.

¹⁵Pero Lea quillhui:

—¿Timoilhúa se quentzi tamanti para techcuiljtoc nohuehue, huan nojuiya tijnequi techcuilis ni cuali xihui pajti cati nocone techhualiquili?

Huan Raquel quijito:

—Sinta techmacas se quentzi ixihui pajo mocone, nijcahuilis Jacob ma cochi mohuaya ni tayohua.

¹⁶Huajca ica tiotac Lea quinamiquito Jacob quema hualayaya ten imil huan quillhui:

—Ama ticochis nohuaya pampa nimitzpatatoc ica se cuali xihui pajti cati nocone techhualiquili.

Huajca nopa tayohua Jacob cochqui ihuaya Lea. ¹⁷ Huan Toteco Dios quitacaquili cati Lea quitajtani, huan conecuc huan quimacac Jacob imacuilpa cone. ¹⁸ Huajca Lea quijito: “Ni oquichpil itoca elis Isacar.” (Isacar quinequi quijitos Se Taxtahuil.) “Quej nopa nijtocaxtis pampa Toteco Dios techmacatoc notaxtahuil pampa nijmacac nohuehue notequipanojca.”

¹⁹ Teipa Lea conecuc huan quimacac Jacob ichicuasempa cone, ²⁰ huan quijito: “Dios techmacatoc se cuali nemacti. Ama nohuehue techtepanitas pampa ya nijmacatoc chicuaseme oquichpilme. Yeca ni oquichpil itoca elis Zabolón.” (Zabolón quinequi quijitos Tatepanitacayot.)

²¹ Teipa Lea quipixqui se sihuapil cati quitocaxti Dina. ²² Pero Toteco Dios nojquiya quielnamijqui Raquel. Quicajqui cati quitajtaniyaya huan quicahuili ma conepiya. ²³ Huan Raquel conecuc huan quitacatilti se oquichpil huan quijito: “Toteco Dios techquixtilijtoc nopa pinahualisti para amo hueli niconepiya. ²⁴ Ma TOTECO nechcahuili nijpiyas seyoc.” Yeca quitocaxti José. (José quinequi quijitos Seyoc.)

Momiyaquiliyque itapiyahlua Jacob

²⁵ Teipa quema Raquel quitacatiltijtoya José, Jacob quiilhui Labán:

—Techcahuili ma nitacuepili ipan notal ²⁶ inihuaya noconeuhua huan nosihuahjua pampa nimitztequipanojtoc por injuanti. Huajca ama nechcahuili ma niya. Cuali tijmati quenecatza nimitztequipanojtoc.

²⁷ Pero Labán quinanquili:

—Sinta tinohuampo, ximocahua nohuaya pampa se tajtolpanextijquet cati quimati tachiya para TOTECO techilhui yaya nechtioc hijtoc por ta. ²⁸ San techilhui quesqui tijnequi tijtanis huan nimitztaxtahuis.

²⁹ Huajca Jacob quiilhui:

—Cuali tijmati quenecatza nimitztequipanojtoc huan quenecatza niquinmocuitahujtoc motapiyahlua. ³⁰ Nelquentzi tijpiyayaya quema ayemo nihualayaya huan ama tijpiya tahuel miyac. TOTECO mitztioc hijtoc campa hueli niitztoya, pero ¿hasta quema nipehuas nitequitis para nochampoyohua?

³¹ Huan Labán quiilhui:

—¿Quesqui tijnequi ma nimitztaxtahui?

Huan Jacob quinanquili:

—Amo teno techtaxtahui. Noja niquinmocuitahuis moborregojhua sinta tijselis cati nimitzilhuis. ³² Ma tiyaca campa moborregojhua huan ama niquinoyocaquixtis nochi chivojme huan borregojme cati cuicuilitique huan pipintojtique. Nochi chivojme cati amo senquisa chocoxtique huan nochi borregojme cati amo senquisa chipahuaque elise noacahua. Ya nopa elis notaxtahuil. ³³ Quej nopa mosta huicta, huelis tijtachiliqui cati nijtantoc huan nimantzi tijmatis sinta nijchihua cati cuali mohuaya o amo. Pampa sinta ipan notapiyahlua oncas chivojme cati chocoxtique huan borregojme cati chipahuaque, huajca tijmatis ya nopa nimitzichtequilijtoc.

³⁴ Huan Labán quijito:

—Cualtitoc, quej nopa ma eli.

³⁵ Huan ipan nopa tonal Labán quiniyocaquixti nochi pilborregojtitzti cati cuicuilitique, huan nochi chivojme cati pintojtique o cati quipixtoya quentzi chipahuaque, huan quinmacac iconehua Jacob para ma quinmocuitahuica. ³⁶ Teipa iconehua quinhuicaque huejca quej eyi tonati ten ojti ihuejca ten ichaj Jacob.

Huan Jacob noja mocajqui huan quinmocuitahui iborregojhua Labán.

³⁷ Huan Jacob quitzontejqui cuamacuayot xoxohuic ten nopa cuame

álamo, almendro huan castaño, huan iyocatizti quixixinqui para ma nesi cuicuiltic, chipahuac huan chocoxtic. ³⁸⁻³⁹ Teipa nopa pitzajcuahuit quitali campa atiyayaj nopa tapiyalme pampa nozona momatque momamaj. Huan ya nopa quichihuayaya para ininconehea ma tacatica cuicuiltique, majmanchadojtique huan pijpintojtique. ⁴⁰ Huan Jacob quiniyocaquixitayaya nopa sihua borregoyme cati senquisa chipahuaque cati eliyaya iaxcahua Labán huan amo quincahuiliyaya ioquich borregojhua Labán cati chipahuaque ma quinnehcahuica para ma quinconemacaca. San quincahuiliyaya ma quinmaltica oquich borregoyme cati yahuhique cati ya iaxcahua para ma quiniyaca ininconehea cati cuicuiltique huan yeca ininconehea elise iaxcahua ya. Quej nopa Jacob quisencajqui cati ya itapiyalhua iyoca ten itapiyalhua Labán. ⁴¹ Nojquiya mojmota quema nopa tapiyalme cati tomahuaque huan tetique momamayayaj, Jacob quitaliyaya nopa pitzajcuahuit cati iyocatizti quixixintoya campa atiyayaj para ma quitaca. ⁴² Pero quema hualayayaj tapiyalme cati cocoxquetique, amo quitaliyaya nopa pitzajcuahuit. Yeca nopa tapiyalme cati más cocoxquetique mocajque para Labán huan cati más tomahuaque para Jacob. ⁴³ Quej nopa Jacob moricojchijqui huan quinpixqui tahuel miyac borregoyme. Nojquiya quinpixqui miyac taca tequipanohuani huan sihua tequipanohuani huan tahuel miyac camellos huan burroyme.

31

Jacob cholo ten Labán

¹ Pero Jacob quimatqui para iconehua Labán quiijtojinemiyayaj para yaya quicuitoya nochi cati iaxca inintata, Labán huan ica ya nopa Jacob moricojchitoya. ² Nojquiya quitac para Labán ayecmo quitachiliyaya cuali quej achtohuiya. ³ Huajca TOTECO quiihui Jacob: “Xitacuepili ipan ital motatahua campa itztoque moteixmatcahua huan na niyas mohuaya.”

⁴ Huajca Jacob tatitanqui ma quinnnotzati Raquel huan Lea para ma hualaca ipan nopa potrero campa yaya itztoya ihuaya iborregojhua. ⁵ Huan Jacob quinihui:

—Niquita para amotata ayecmo techita san se quej achtohuiya, pero noTeco Dios cati notata quitequipanohua nochipa nohuaya nemi. ⁶ Cual anquimatij nijtequipanojtoc amotata hasta campa nihuelto, ⁷ huan ya nechcayajtoc huan nechpatilijtoc notaxtahuil majtacti hueltas. Pero masque ya nopa, Toteco Dios amo quicahuilijtoc ma nechcoco. ⁸ Quema Labán quiihto techtaxtahuis ica tapiyalme cati manchadojtique, nochi tacatiyayaj manchadojtique. Huan quema quiihto nechtaxtahuis ica cati cuicuiltique, nochi tacatiyayaj cuicuiltique. ⁹ Quej nopa Toteco Dios quicuili itapiyalhua para nechmacas.

¹⁰ “Se tonali quema nopa tapiyalme momamayayaj, nijpixqui se temicti. Huan ipan temicti niquitac para nochi oquich chivoyme cati tamamayayaj elque cuicuiltique, manchadojtique huan pijpintojtique. ¹¹ Ipan nopa temicti iilhuicac ejca Toteco Dios nechnojnatzqui ica notoca huan nijnanquili: ‘Nica niutzoc.’ ¹² Huajca yaya techilhui: ‘Xijtachili cuali huan tiqitas para nochi oquichme cati quinconemacaj nopa sihua borregoyme itztoque cuicuiltique, manchadojtique huan pijpintojtique. Quej nopa eltoc pampa niqitztoc nochi cati amo xitahuac mizchihuilijtoc Labán. ¹³ Na nimoTeco cati nimonexti ipan Betel campa ta tijquetzqui nopa tet quej se tanextilijcayot, huan techtajtolcahuili cati techchihuilisquía. ¡Xiisihui huan

xiquisa ten nica huan xitacuepili ipan nopa tali campa titacatqui! Quej nopa Toteco nechilhui.”

¹⁴ Huajca Raquel huan Lea tananquilijque:

—Tojuanti ayecmo teno tijpiyaj ipan ichaj totata. ¹⁵ Techchihua quej amo techixmati. Technamacac huan nochi cati quiseli por tojuanti ya quitamilti.

¹⁶ Nelía nochi ricojyot cati Toteco Dios quiquixtilijtoc totata eltoc toaxca huan iniaxca toconehua. Huajca xijchihua nochi cati Toteco Dios mitznahuatijtoc.

Jacob quistejqui ipan tali Aram

¹⁷⁻¹⁸ Huajca Jacob mocualtali para tacuepilis ipan tali Canaán campa itztoya itata, Isaac. Quinilhui iconehua huan isihuahjua ma tejcoca ipan camellos. Huan quicuic nochi cati iniaxca huan quistejqe ipan ojti. Nojquiya quinhuicac nochi tapiyalme cati quinselijtoya por itequi ipan tali Aram. Quej nopa quisqui para tacuepilis tali Canaán campa itztoya itata, Isaac.

¹⁹ Huan Labán yajtoya huejca para quinximas iborregejhua huan Raquel quiichtequili iteteyohua para quinhuicas. ²⁰ Nojquiya Jacob quicajcayajqui Labán nopa Aram ejquet pampa amo quiilhui sinta quisasquía. ²¹ San cholojtejqui ica nochi cati iaxca, huan quiipanoc nopa hueyat Eufrates huan yajqui campa nopa tepeme ipan tali Galaad.

Labán quítepotztocac Jacob

²² Eyi tonati teipa, quiilhuijqe Labán para Jacob cholojtoya. ²³ Huajca Labán ihuaya iteixmatcagua quintepotztocatiyajqui huan ica chicome tonati quinajsitoj ipan cuatita ipan tali Galaad. ²⁴ Pero nopa tayohua Toteco Dios noxeti ica Labán nopa tali Aram ejquet, ipan se temicti huan quiilhui: “Ximotachili para amo xijnojnotta Jacob ica cualanti.”

²⁵ Huan Jacob quiqetztocac ichaj ten yoyomit campa tepeme ipan tali Galaad huan nozona Labán quiajsito. Huan nojquiya nozona Labán quiqetziqei ichaj ten yoyomit. ²⁶ Huan Labán quitatzintoquili Jacob:

—¿Taya tijchijtoc? ¿Para ten techcayajtoc? ¡Tiquinhualicatoc nica noichpocahua quej itztozquijaj ipan se tatehuilisti! ²⁷ ¿Para ten techcayajtoc huan ticholojtejqei huan amo teno techilhui? Sintá nijmajtosquía, na nimitmajcaytosquía ica paquillisti, huan ica tapitzali, huan tambores huan arpa.

²⁸ Yon amo techcahuili ma niquintzoponi noichpocahua huan noixhuihua. ¡Tijchijqui se huiluyot! ²⁹ Na nihueltosquía nimechchihuilijsosquía cati fiero, pero tayohua nechnojnottzqui Toteco Dios cati motata quítequipanohua huan nechilhui ma nimitachili para amo nimitznottzcas ica cualanti. ³⁰ Sintá nelía tiquistoc pampa tijnequi titacuepilis ichaj motata, cualtitoc. Pero ¿para ten techichtequili noteteyohua?

³¹ Huajca Jacob quinanquili Labán:

—Nelía nijmajmajqui. Nimoilhui para nohuili techquixtilisquía moichpocahua masque amo nijnequisquía. ³² Pero sintá se cati nica itztoz quiipiya moteteyohua, ¡ma miquí! Toteixmatcagua nica itztozque testigos. Huajca xijtemo sintá tijhualicaj se tamanti cati moaxca huan sintá tijpantía, xijhuica.

Pero Jacob amo quimatiyaya sintá Raquel quinichtectocac nopa teteyome.

³³ Huajca Labán calajqui ipan ichaj Jacob huan ipan ininchaj nopa ome sihua tequipanohuani. Teipa calajqui ipan ichaj Lea, pero amo quinpanti iteteyohua. Huan quema quisayaya ipan ichaj Lea para calaquis ipan ichaj Raquel, ³⁴ Raquel quincuic nopa teteyome huan quintali iijtic cati ica quipepechtía icamello huan ipan mosehui. Huan Labán quintemo nochi calijtic huan amo quinpanti. ³⁵ Huan Raquel quiilhui:

—Papá, amo xicualani sinta amo nimotanana moixpa pampa ama nijpiya nococolis cati totequiya tisihuame.

Huan Labán quintemo iteteyohua campa hueli, pero amo quinpanti.

³⁶ Huan Jacob cualanqui huan quiajhuac Labán ica ni camanali:

—¿Taya amo cuali nijchijtoc? ¿Catiyqui notajtatoc cati ica miyac cualanti techtepotztocatoc? ³⁷ Tijtajtachilijtoc nochi tamanti cati noaxca huan ¿taya tijpantijtoc ten mochaj? ¡Xijtali nica iniixpa moteixmatcagua huan noteixmatcagua para ma quijitoca ajquiya ten tiome quijitohua cati melahuac!

³⁸ Ica nopa 20 xihuit cati nitequitic mohuaya, amo quema moconetahuisojque moborregojhua, yon mochivojhua huan amo quema nijcuajqui yon se.

³⁹ Amo quema nimitzhualiquili tapiyalme cati quinmictiyayaj tecuanime. San na nitaxahuayaya por cati polihuiyaya. Sinta tonaya o tayohua sequinoc techtachtequiliyayaj, ta techinamayaya. ⁴⁰ Tonaya nitonalmiquiyaya huan tayohua nisecmiquiyaya huan nimocochsolohuayaya. ⁴¹ Quej nopa eltoya para 20 xihuit ipan mochaj. Para sese moichpoca nimitztequipano

chicome xihuit huan para motapiyalhua nitequitic chicuase xihuit. Huan majtacti hueltas techpatili notaxahuil. ⁴² Sinta amo itzotsequia nohuaya noTeco Dios cati iTeco nohueyi tata Abraham huan notata Isaac, nelía techitanisquía san nomax. Pero Toteco Dios quuitac quenicatza nitequitic hasta tahuel nisiyajqui. Quuitac miyac nimocuesohuayaya huan yeca tayohua mijzahuac.

Jacob huan Labán quichijque se camanali

⁴³ Huajca Labán quinanquili Jacob:

—Ni ichpocame noichpocagua, ni ixhuime noixhuihua. Ni tapiyalme notapiyalhua. Nochi cati nica tiquita noaxca. Amo teno amo cuali huelis niquinchiuilis noichpocagua o ininconeagua. ⁴⁴ Yeca xihuala huan ma tijchihuaca se camanal sencahuali cati elis quej se testigo cati techitase tiome para ma tijchihuaca nochi cati quijitohua.

⁴⁵ Huajca Jacob quicuic se tet huan quiquetzqui quej se tanextili, ⁴⁶ huan quinilhui iteixmatcagua:

—¡Xijsentilica teme!

Huan nochi quisentilijque teme huan quimontonojque huan nozona tacuajque nechca nopa temontomit. ⁴⁷ Huan Labán quitocaxti campa itztoya Jegar Sahaduta ipan ya icamanal. (Jegar Sahaduta quinequi quijitos Testigo.) Huan Jacob quitocaxti Galaad ipan ten ya icamanal. (Galaad ipan icamanal Jacob quinequi quijitos Testigo.)

⁴⁸ Huajca Labán quiiilhui:

—Ni temontomit mocahuas quej testigo cati techitas tiome para ma tijtamichihuaca cati tiqijitajque.

Huan yeca teipa motocaxti Galaad nozona, ⁴⁹ huan nojquiya itoca elqui Mizpa. (Mizpa quinequi quijitos Se Torre Cati Tachiya.) Pampa Labán quijito:

—Ma TOTECO techtachili tiome quema ayecmo huelis timoitase. ⁵⁰ Huan sinta tiquincualancaitas noichpocagua o timocuilis sequinoc sihuame, masque amo niaqui para niquitas, xijmati para san yaya Toteco Dios quitachilis.

⁵¹ Huan Labán noja quiiilhui Jacob:

—Xiquita, nica nijtalijtoc ni temontomit cati elis se tanextili tatajco tiome.

⁵² Ni teme elise testigos para yon ta, yon na, amo quema tijpanose ni nepamit para timoixpanose. ⁵³ Toteco Dios cati iTeco mohueyi tata, Abraham, huan nohueyi tata, Nacor, ma quijito ajquiya ten tojuanti quichihua cati cuali.

Huajca Jacob quitestigojquetzqui Toteco cati itata, Isaac, quihueyichihua. ⁵⁴ Teipa nozona quimacac tacajcahualisti Toteco huan quinnotzqui iteixmatcahua ma tacuaquij. Huan nochi tacuajqque huan mocajque nopa tayohua campa nopa tepet.

⁵⁵ Hualmosta ica ijnaloc, Labán mijquejqque, huan quintzoponi iixhuihua, huan iichpocahua huan quintiochijqui. Teipa mocuetqui para ital.

32

Jacob huan Esaú mopantijque

¹ Huan quema Jacob quisqui huan nejnemiyaya ipan ojti, sequij iilhuicac ejcahua Toteco Dios quinamiquicoj. ² Quema Jacob quinintac, quijito: “Nica tonilijque Toteco Dios huan iilhuicac ejcahua.” Yeca quitocaxti campa itztoya Mahanaim. (Mahanaim quinequi quijitos Campa Tonilijque Ome Pamit.)

³ Huan Jacob quintitanqui itayolmelajcahua imelac hasta Seir ipan tali Edom para quiitatij iicni, Esaú. ⁴ Huan Jacob quinilhui: “Xiquilhuitij Esaú para niitequipanojca niitztoya ihuaya Labán nochi ni xihuit, ⁵ huan para niquinpiya huacaxme, burrojme, borregojme huan chivojme. Nojquiya niquinpiya tequipanohuani tacame huan sihuame. Xiquilhuitij nimechtiani annotayolmelajcahua para anquiiatase para yaya ma quimati nihuala huan ma techselis ica cuali.”

⁶ Huan quema nopa tayolmelahuani mocuetque, quihuijqque Jacob:

—Tiyajque tiqitatoj moicni, Esaú huan ya huala para mitzseliqui ihuaya 400 tacame.

⁷ Huan quema Jacob quicajqui ya nopa, majmajqui miyac huan pejqque tahuel mocuesohua. Huajca quintajcoxelo nopa tacame cati itztoyaj ihuaya huan san se quichijqui ica nopa borregojme, huacaxme huan camellos,

⁸ pampa moilhui: “Sinta Esaú huala ica imiyaca huan quintehuis se tajco notequipanojcahua, huajca ne seyoc tajco huelis cholose.” ⁹ Huan pejqque motatajtía ica TOTECO huan quihui: “Toteco Dios, ta cati tiiTeco nohueyi tata Abraham huan notata Isaac. Ta techilhui ma sempa niyas campa noteixmatcahua ipan notal huan tijchihuasquía nochi ma quisa cuali.

¹⁰ Amo quinamiqui techtasojtas huan techchihuilis cati noca timocajtoc para tijchihuas. Quema niquisqui notal huan nijpanoc ni hueyat Jordán, san nocuatopil nijpiyayaya, huan ama niquinpiya miyaqui noconeuhua hasta mochihuaj ome huejhueyi pamit pampa hueyi techtiochijtoc. ¹¹ Toteco Dios, ama se favor, techmanahui imaco noicni, Esaú. Niqumacasi para hualas techmictiqui huan quinmictiqui ni sihuame huan coneme. ¹² Pero ta tiqijtojtoc tijchihuas para nochi ma quisa cuali huan para noteipan ixhuihua elise nelmiyaqui quej xali nepa ipan hueyi at cati amo hueli mopohua.”

¹³ Huan nopa tayohua Jacob quitapejqque cati quipixtoya para quitamajmacas iicni, Esaú. ¹⁴ Huan quiniyocatali 200 sihua chivojme, 20 oquich chivojme, 200 sihua borregojme, 20 oquich borregojme, ¹⁵ huan 30 sihua camellos inihuaya iniconehua. Nojquiya quiniyocatali 40 huacaxme, 10 torojme, 20 sihua burrojme huan 10 oquich burrojme. ¹⁶ Teipa quinmactili itequipanojcahua huan quinxejxelo sesen tamanti tapiyalme huan quinilhui:

—Xitayacanaca huan amo xiquincahuilica ma mosejcotilica sequinoc tamanti tapiyalme. Se tatilimit fen se tamanti tapiyalme ma tayacanaca,

huan teipa inintepotzco ma hualaca seyoc tatilimit ica seyoc tamanti tapiyalme.

¹⁷ Huan Jacob quinihui itequipanojcahua cati tayacanayayaj:

—Quema anquipantise noicni, Esaú, huan amechtatzintoquilis ajquiya amoteco huan canque anyahuij huan ajquiya iaxca nopa tapiyalme cati anquinhuicaj, ¹⁸ xijnanquilica: ‘Ni se nemacti para ta, toteco Esaú. Jacob, motequipanojca, mitztitanilía huan ya huala totepotzco.’

¹⁹ Nojquiya Jacob san se quihui itequipanojca cati teipa hualayaya ica más tapiyalme huan nopa sequinoc cati inintepotzco hualayayaj. Quinihui:

—Quema anquipantise Esaú, xiquilhuica san se. ²⁰ Nojquiya xiquilhuica: ‘Motequipanojca, Jacob, huala totepotzco.’

Quej nopa quichijqui Jacob pampa moihui: “Nijyoltalis ica cati nijtitani ma quihuiquilica, huan teipa nechitas na huan cuali nechselis.”

²¹ Huajca tayacanque nopa tequipanohuani ica nopa tapiyalme cati quimacayaya iicni. Huan nopa tayohua Jacob mocajqui ipan ichaj ten yoyomit.

Jacob motehui ihuaya iilhuicac ejca TOTECO

²² Ipan nopa tayohua Jacob mijquejqui huan quincuitejqui nopa ome isihuajhua, nopa ome isihua tequipanojcahua, huan nopa 11 iconehua, huan quinchihualti ma quixcotonaca nopa pilatajtzi Jaboc. ²³ Huan quinchihualti itequipanojcahua ma quinpanoltica nochí tapiyalme huan tamanti cati iaxca ipan nopa seyoc nali. ²⁴ Huan Jacob mocajqui iseltitzi. Huan monexti se tacat cati motehui ihuaya hasta tanesqui. ²⁵ Pero quema nopa tacat quiiitac para amo hueliyaya quitani, quiiitzi qui Jacob iquestzinta huan quilecueni.

²⁶ Huan nopa tacat quihui:

—Techmajcahua pampa ya tanesi.

Huan Jacob quihui:

—Sinta amo techtiochihuas, amo nimitzmajcahuas.

²⁷ Huan nopa tacat quihui:

—¿Taya motoca?

Huan ya quinanquili:

—Notoca Jacob.

(Jacob quinequi quiijtos Tacajcayajquet.)

²⁸ Huajca nopa tacat quihui:

—Motoca ayecmo elis Jacob. Motoca elis Israel.

(Israel quinequi quiijtos Se Cati Motehuía Ica Toteco.)

—Quej nopa motoca pampa timotehuijtoc ihuaya Toteco Dios huan ihuaya masehualme huan titatantoc.

²⁹ Huajca Jacob quihui:

—Techihui taya motoca ta.

Pero nopa tacat quinanquili:

—¿Para ten techtatzintoquilía notoca?

Teipa nopa tacat quiochijqui Jacob. ³⁰ Huan Jacob quitocaxti campa itztoya Peniel. (Peniel quinequi quiijtos Ixayac Toteco.) Quej nopa quitocaxti pampa quiiito: “Niquixtachilijtoc Toteco Dios huan noja niutztoc.”

³¹ Huan Jacob leuestejqui Peniel quema quisqui tonati, pero metzcua-chotiyaya pampa luecentoya iquesomiyo. ³² Yeca hasta ama iteipan ixhuihua Israel amo quicuaj ilejleto imetztomahuiya se tapiyali pampa nozona iilhuicac ejca TOTECO quimaquili Jacob.

33

Jacob huan Esaú moyoltalijque

¹ Huan quema Jacob quiitac para Esaú hualayaya imelac ica 400 tacame, quinxejxelo nopa coneme ihuaya Lea, Raquel huan nopa ome sihua tequipanohuani. ² Quintali ma tayacanaca nopa sihua tequipanohuani ihuaya ininconehea. Teipa quitali Lea ihuaya iconehua huan hasta tateipa quintali Raquel huan José. ³ Jacob tayacanqui huan mohuijtzonqui hasta talchi chicome huelta para quitepanitas iicni quema monechahuiyaya. ⁴ Pero Esaú motalo quinamiquito. Huan quicuanajnahuaajqui, huan quitzoponi, huan nochi ome choaque. ⁵ Teipa Esaú quinitac nopa sihuame huan coneme cati hualayayaj huan tatzintocac:

—Huan ¿ajquiya inijuanti ni cati hualahuij mohuaya?

Huan Jacob quinanquili:

—Ni cati Toteco Dios nechmacatoc.

⁶ Huajca nopa sihua tequipanohuani ihuaya ininconehea monechahuijque huan mohuijtzonque. ⁷ Teipa monechahuijque Lea huan iconehua huan san se quichijque. Huan más teipa ajsicoj José huan Raquel huan nojquiya mohuijtzonque. ⁸ Huan Esaú quiilhui Jacob:

—¿Taya timoilhua tijchihuas ica nochi nopa tapiyalme cati niquinpantijti-hualajqui?

Huan Jacob quiilhui:

—Nijnequi nimitzmacas ta, noicni, para techseli ica cuali.

⁹ Huan Esaú quiijto:

—Amo, noicni. Na ya niquinpiya miyac. Ximocahua ica cati moaxca.

¹⁰ Pero Jacob quiilhui:

—Amo, xijchihua se favor, xiquinseli pampa nimitzmaca. Para na nimitzita, eltoc quej niquita ixayac Toteco pampa techselijtoc ica cuali. ¹¹ Xijseli cati nimitzhualiquilijtoc pampa Toteco Dios tahuel nechricojchijtoc huan nochi cati tiquita, noaxcahua.

Huan pampa Jacob quinelchihualti ma quiseli, Esaú quiseli. ¹² Teipa Esaú quiijto:

—Ma ya tiyaca huan san sejco tiajsise.

¹³ Pero Jacob quiilhui:

—Noicni, ta tijmati para coneme amo quipiyaj tetili, yon amo quipiyaj tetili nopa piltapiyaltizti. Sinta tiquinquixtise chicahuac san se tonal, siyahuisse huan nochi miquise. ¹⁴ Más cuali para timotayacanaltis huan na niyas ica yolic quej nejnemij ni tapiyalme huan coneme hasta timosejcotilise ipan tali Seir.

¹⁵ Huan Esaú quiijto:

—¡Cualtitoc! Techcahuili ma nimitzcahuilijtehua se ome tacame cati hualahuij nohuaya.

Pero Jacob quiilhui:

—¡Amo! Amo ximocuatotoni. Cati ipati eltoc para tojuanti tiome ma tiiztoc ica cuali.

¹⁶ Huan nopa tonali Esaú tacuepili Seir. ¹⁷ Huan Jacob yajqui altepet Sucot huan nozona quichijqui se cali huan quinchihuili pilxajcaltizti itapiyahua. Yeca quitocaxti campa itztoya Sucot. (Sucot quinequi quiijtos Pilxajcaltizti.)

¹⁸ Teipa quema Jacob hualayaya ten tali Aram, ajsico ica cuali ipan tali Canaán huan quiquetzque iniyoyoncalhua nechca altepet Siquem. ¹⁹ Huan teipa ica 100 plata tomí quicojqui nopa tali ten iteixmatcahua Hamor cati

elqui itata Siquem. ²⁰ Huan nozona quichijqui se taixpamit huan quitocaxti El Elohe Israel. (El Elohe Israel quinequi quijitos: Tahuel Hueyi Toteco Dios Cati Toteco Tiisraelitame.)

34

Cati panoc ica Dina

¹ Huan Dina, nopa ichpocat cati Lea quimacac Jacob, yajqui quinpaxaloto nopa ichpocame cati nozona ehuani. ² Pero nozona itztoya se telpocat cati itoca Siquem. Yaya eliyaya icone Hamor; se heveo tacat cati quinyacanayaya nopa heveos nozona. Huan Siquem quichihualti Dina ma moteca ihuaya huan quipinahualti. ³ Pero masque ya nopa quichihuil, nopa telpocat nelía quixtocac huan quicneli huan quicamanalhui Dina ica nochi iyolo para nojquiya ma quicneli. ⁴ Huajca mocamanalhui ihuaya itata, Hamor; huan quinihui:

—Xiya xiquijtaniti nopa ichpocat. Nijnequi nimosihuaajtis ihuaya.

⁵ Huan Jacob quimatqui para Siquem quipinahualtijtoya iichpoca, pero itelpocahua noja itztoyaj potrero ica inintapiyahu huan yeca amo teno quijito hasta ajsique. ⁶ Huan ipan nopa tonali Hamor; itata Siquem, quicamanalhuito Jacob ten Dina.

⁷ Huan quema itelpocahua Jacob tacuepilijque, huan quimatque cati panotoya, nelía cualanque pampa eliyaya se hueyi pinahualisti para nochi iteixmatcagua Jacob para se tacat san quej hueli motecasquía ihuaya iichpoca. ¡Elqui se tamanti cati amo quema mochijosquía ica israelitame!

⁸ Pero Hamor hualajqui quincamanalhuico Jacob huan itelpocahua huan quinihui:

—Nocone Siquem nelía quicnelía amosihua icni. Se favor, xijcahuilica ma mocuili. ⁹ Nojquiya ma timohuampojchihuaca huan quej nopa timosihuaajtise ihuaya amoichpocahua, huan amojuanti ihuaya toichpocahua. ¹⁰ Ximocahuaca ipan total. Xijtapejpenica nopa tali cati más anquinequise huan nozona xiitzto. Nica huelis antanamacase, antacohuase huan annoaxcatise talme.

¹¹ Huan nopa telpocat Siquem nojquiya quinihui Jacob huan iicnihua Dina:

—Nimechtajtanía ma tiitzto ica yejyectzi. ¹² Techilhuica quesqui tomi huan tamanti anquinequij para nopa ichpocat huan nimechmacas. Para na amo teno sinta antechtajtanise cati patiyó. San nijnequi xijcahuilica nopa ichpocat ma monamicti nohuaya.

¹³ Pero pampa Siquem quipinahualtijtoya Dina, itelpocahua Jacob quinejque quincajcayahuase Siquem huan itata, Hamor; ¹⁴ huan huajca quinihuijque:

—Amo hueli tijnamacase toicni ica se tacat cati amo motequilijtoc iyecapa nopa cuetaxti ipan itacayo pampa ya nopa elisquía se pinahualisti para tojuanti. ¹⁵ San huelis tijselise se tacat sinta elis quej tojuanti. Huajca achtohui nochi tacame ten amotal monequi ma motequilica inincuetaxo para quipiyase nopa machiyot cati itoca circuncisión. ¹⁶ Huan huajca, quena, huelis anmosihuaajtise ihuaya toichpocahua huan tojuanti ihuaya amoichpocahua. Huan tiitztose tafaico ten amojuanti huan tielise san se altepet. ¹⁷ Pero sinta amo anquiselíaj cati timechtajtaníaj huan amo anmotequilíaj nopa machiyot, huajca tiquistehuase huan tijhuicase toshua icni.

¹⁸ Huajca Hamor huan itelpoca quicualcajqque nopa camanali. ¹⁹ Huan nimantzi yajqui nopa tellocat huan motequilli icuetaxo pampa tahuel qui-ixtocayaya iichpoca Jacob. Huan Siquem elqui cati más quipixqui tatepan-itacayot ica itata iteixmatcahua. ²⁰ Huajca ya huan itata, Hamor, yajque iteno icaltempa nopa altepet campa nochi momatque mosentilíaj huan quiniilhuijqque cati nopona ehuaní:

²¹—Ni masehualme quinequij elise tohuampoyohua. Ma mocahuaca nica tohuaya huan tanamacase pampa onca miyac tali para injuanti. Huelis timosihuajtise ihuaya iniichpocahua, huan injuanti ihuaya toichpocahua. ²² Pero amo mocahuase para ma tielica san se altepet sinta nochi tojuanti cati titacame amo timotequillise iyecapan cuetaxo ipan totacayohua quej injuanti momajtoque quichihuaj. ²³ Pero sinta quena, teipa nochi cati quipiyaj huan nochi inintapiyalhua elise toaxca. Huajca ma tijchihuaca cati quijtohuaj.

²⁴ Huan nochi tacame ipan nopa altepet cati ya quipixtoyaj xihuit para elise soldados quicualcajqque cati quijtojqque huan motequillijque nopa cuetaxi. ²⁵ Pero ica ihuictatica quema nopa tacame noja xoxocoxtoyaj pampa motectoyaj, Simeón huan Leví, nopa ome itelpocahua Jacob cati eltoyaj itaca icnihua Dina, yajque campa nopa altepet huan ica inimacheta quinmictijque nochi nopa tacame pampa amo quijyohuijqque cati quichijque. ²⁶ Quimictijque Hamor ihuaya icone, Siquem, huan quiquixtijtejqque Dina ipan ichaj Siquem huan quistejqque. ²⁷ Huan ajsicoj nopa sequinoc itelpocahua Jacob, huan panoque campa nopa mijcatzitzí huan quinichtequillijque nochi cati quipixtoyaj ipan nopa pilaltepetzí pampa quipinahuajtijtoyaj iniicni. ²⁸ Quinhuicaque nochi borregojme, huacaxme, burrojme huan nochi cati oncayaya ipan nopa altepet huan ipan mila. ²⁹ Quiichtejqque nochi cati oncayaya ipan calme huan quinhuicaque nochi coneme huan sihuame. ³⁰ Huajca quema Jacob quimatqui, quinihui Simeón huan Leví:

—Anquichijtoque ma nimocahua fiero. Ama nopa cananeos huan nopa ferezeos cati itztoque ipan ni tali techcualancaitase, huan mosejcotilise, huan techtehuise huan techmictise na huan nochi noteixmatcahua pampa amo timiyaqui.

³¹ Pero itelpocahua Jacob quihuijqque:

—Pero amo hueli quichihuilise toicni quej se ahuilnenca sihuat huan amo teno oncas.

35

Toteco Dios quitiuchijqui Jacob ipan Betel

¹ Teipa Toteco Dios quihui Jacob: “Ximoquetza huan xiya xiiztoti Betel. Nopona xijchihua se taixpamit para techhueyimatis pampa nopona nimonexti ica ta quema ticholohuayaya ten moicni, Esaú.”

² Huajca Jacob quihui ichampoyohua huan nochi cati ihuaya yahuiyayaj: —Xiquinquixtica nochi teteyome cati anquipiyaj, huan ximaltica huan xijpataca amoyoyo. ³ Teipa xihualaca, ma tiyaca Betel pampa nepa nijchihuas se taixpamit huan tijhueyichihuase Toteco Dios cati nechpalehui quema nimocuesohuayaya. Yaya cati nohuaya yajtoc campa hueli campá ninententoc.

⁴ Huajca quimactilijque Jacob nochi ininteteyohua huan nochi pijpiloli ica teteyome cati quihuicayayaj ipan ininacas, huan Jacob quintalpacho itzinta se ahuat cati eltoya nechca altepet Siquem. ⁵ Huan quema quisque nopona,

Toteco Dios quichijqui para nochi nopa pilaltepztitzi cati nejnechca ma quinimacastica miyac, huan yeca amo quintepotztocaque.

⁶ Huan Jacob huan nochi masehualme cati ihuaya nejnemiayaj ajsitoj ipan Luz cati nojquiya itoca Betel ipan tali Canaán. ⁷ Huan nozona quichijqui se taixpamit huan quitocaxti El Betel. (El Betel quinequi quijtos Itaixpa Toteco Dios Cati Nechnamijqui Nica Betel.) Pampa quema mocholohtiyaya ten iicni, Toteco Dios monextijtoya ihuaya nozona. ⁸ Nojquiya nozona mijqui Débora, nopa sihuat cati quimocuitahujtoya Rebeca. Huan quitalpachojque itzinta se ahua cuahuit nechca Belén. Huan Jacob quitocaxti nopa cuahuit Alónbacut. (Alónbacut quinequi quijtos Ahuat Campa Nochi Chocaque.)

⁹ Nojquiya Toteco Dios ya monextijtoya sempa ica Jacob quema tacuepiliyaya ten tali Aram huan quitochijqui. ¹⁰ Huan Toteco Dios quihuhijtoya:

“Ta motoca Jacob.”

(Jacob quinequi quijtos Tacajcayajquet.)

“Pero ayecmo mitztocaxtise Jacob.

Ama motoca elis Israel.”

(Israel quinequi quijtos Se Cati Moquetza Ica Chicahualisti Iixpa Toteco.)

¹¹ Huan nojquiya quema Toteco Dios quipatili itoca, Toteco quihui:

“Na nimoTeco Dios Cati Nijpiya nochi Chicahualisti.

Nijchihuas xiquinpiya miyac moconehua huan moteipan ixhuihua.

Huan miyac masehualme quisase ipan moteipan ixhuihua,

huan mochihuase miyac altepeme ipan inintal.

Ipan moteipan ixhuihua oncas tanahuatiani huan sesen quinnahuatis imasehualhua ipan ital.

¹² Nopa tali cati nijmacac Abraham huan Isaac,

mohuejcapan tatahua,

nojquiya nimitzmacas ta huan teipa niquinmacas moteipan ixhuihua.”

¹³ Huan Toteco Dios quistejqui nozona campa quicamanalhui Jacob.

¹⁴ Huan Jacob quicuic se tet huan quiquetzqui quej se tanextili para quielnamiquis campa camanaltitoya ihuaya Toteco. Huan quitequili aceite huan xocomecat iayo nopa tet para quiyocatalis para Toteco. ¹⁵ Huan quitocaxti campa itztoya, Betel. (Betel quinequi quijtos Ichaj Toteco Dios.)

Mijqui Raquel

¹⁶ Teipa Jacob huan ifamilia quistejque ten Betel. Huan quema noja huejca itztoyaj para ajsitij altepet Efrata, Raquel ajsic tonali para conepiyas huan nelia taijyohuiyaya. ¹⁷ Huan ipan nopa hora cati más ohui, nopa sihuat cati quipalehuiyaya para ma conepiya quihui: “Amo ximajmahui pampa tijtacatiltitoc seyoc oquichpil.”

¹⁸ Pero Raquel ya miquiyaya huan quema tantinemiayaya iijyoyo, quitocaxti ioquichpil Benoni. (Benoni quinequi quijtos Oquichpil Cati Tacatqui Ica Taohujcayot.) Pero teipa itata quitocaxti nopa ipiloquichpil Benjamín. (Benjamín quinequi quijtos Oquichpil Cati Más Quipiya Tanahuatili.)

¹⁹ Quej nopa Raquel mijqui huan quitalpachojque ipan ojtí para altepet Efrata cati ama itoca Belén. ²⁰ Huan Jacob quiquetzqui se tet campa quitocoyaj Raquel huan nopa tet hasta ama quejipa quinextía campa quitojque.

²¹ Huan Israel, cati achtohui itoca eliyaya Jacob, quistejqui ipan ojtí huan quiquetzato ichaj ten yoyomit ipan seyoc lado nopa altepet Migdal Edar.

²² Huan quema Israel mochahuayaya nozona, Rubén motecato ihuaya Bilha, se itequipanojca itata. Huan itata quimatqui huan tahuel cualanqui.

*Iconehua Jacob**(1 Cr. 2:1-2)*

Huan Israel quinpixqui 12 itelpocahua.

²³ Nopa coneme cati quinpixqui ihuaya Lea elque:

Rubén iachtohui ejca, Simeón, Leví, Judá, Isacar huan Zabulón.

²⁴ Cati quinpixqui ihuaya Raquel elque:

José huan Benjamín.

²⁵ Huan cati quinpixqui ihuaya Bilha cati eliyaya itequipanojca Raquel elque:

Dan huan Neftalí.

²⁶ Huan nopa coneme cati quinpixqui ihuaya Zilpa, cati eliyaya itequipanojca Lea, elque:

Gad huan Aser.

Ya ni nochi ioquichpilhua Jacob cati tacatque ipan tali Aram.

Imiquilis Isaac

²⁷ Huan Jacob ajsito ichaj campa itztoya itata, Isaac, ipan Mamre, nopa altepet nechca Arba o Hebrón, campa huejcajquiya mochantijtoyaj Abraham huan Isaac. ²⁸ Huan Isaac quipiyayaya 180 xihuit quema mijqui.

²⁹ Quena, quema eliyaya nelhuehuentzi, yajqui mosejcotilito ihuaya ihuejcapan tatahua. Huan iconehua Esaú huan Jacob quitalpachojque.

36*Iteipan ixhuihua Esaú**(1 Cr. 1:34-54)*

¹ Huan ya ni iteipan ixhuihua Esaú cati nojquiya itoca Edom.

² Esaú mosihuajti inihuaya sihuame cati ehuan tali Canaán. Isihuajhua inintoca eliyaya Ada, iichpoca Elón nopa heteo tacat, huan Aholibama, iichpoca Aná huan iixhui Zibeón nopa heveo tacat. ³ Huan nojquiya mosihuajti ihuaya Basemat, iichpoca Ismael, huan isihua icni Nebaiot.

⁴ Huan Ada quimacac Esaú se icone cati itoca Elifaz. Huan Basemat quitacatilti Reuel, ⁵ huan Aholibama quintacatilti Jesús, Jaalam huan Coré. Ya ni iconehua Esaú cati tacatque quema noja itztoya ipan tali Canaán.

⁶ Huan Esaú quincuitejqui isihuajhua, itaca conehua huan isihua conehua huan itequipanojcahua huan yajqui ipan seyoc tali para moyocaquixtis ten iicni, Jacob. Quinhuicac nochi itapiyalhua huan nochi tamantziti cati quisentilijtoya ipan Canaán. ⁷ Nelmiyac quipiyayayaj nochi ome icnime hasta ayecmo hueliyayaj itztoque san sejco. Nopa tali cati ipan itztoyaj amo quinaxiliyaya para quintamacase inintapiyalhua. ⁸ Yeca Esaú cati nojquiya quitocaxtiyayaj Edom yajqui itztoti campa tepeyo ipan tali Seir.

⁹ Nica eltoc inintoca iteipan ixhuihua Esaú cati quintocaxtijque edomitate. Inijuanti itztoyaj campa tepeyo ipan nopa tali cati itoca Seir.

¹⁰ Inintoca iconehua Esaú elque Elifaz huan Reuel.

Elifaz elqui icone isihua, Ada, huan Reuel elqui icone isihua, Basemat.

¹¹ Iconehua Elifaz elque Temán, Omar, Zefo, Gatam huan Senaz.

¹² Elifaz quipixqui se isihua tequipanojca cati itoca Timna cati quimacac se icone cati quitocaxti Amalec. Huan iconehua Elifaz elque iixhuihua Esaú huan isihua, Ada.

¹³ Huan iconehua Reuel elque:

Nahat, Zera, Sama huan Miza. Inijuanti elque iixhuihua Basemat nopa seyoc isihua Esaú.

14 Huan Esaú quinpixqui iconehua ica isihua cati itoca eliyaya Aholibama cati elqui iichpoca Aná huan iixhui Zibeón. Inintoca iniconehua elque:

Jeús, Jaalam huan Coré.

15 Ama nimitzilhuis nopa tayacanani ipan iteipan ixhuihua Esaú.

Ipan iconehua Elifaz, iachtohui cone Esaú, elque:

Tayacanani Temar, Omar, Zefo, Cenaz, ¹⁶ Coré, Gatam huan Amalec.

Nochi ya ni elque tayacanani ipan iteipan ixhuihua Elifaz ipan tali Edom. Huan nochi injuanti elque iteipan ixhuihua Ada, isihua Esaú.

17 Huan iconehua Reuel, icone Esaú, elque:

Tayacanani Nahat, Zera, Sama huan Miza. Inijuanti tayacunque ipan iconehua Reuel ipan tali Edom huan elque iixhuihua Basemat, isihua Esaú.

18 Iconehua Esaú ica isihua Aholibama, iichpoca Aná, elque:

Tayacanani Jeús, Jaalam huan Coré. Inijuanti quinyacunque iniixhuihua.

19 Nochi injuanti elque nopa tayacanani ipan iteipan ixhuihua Esaú o Edom. Huan sesen injuanti mochijqui se hueyi familia ica miyac masehualme.

20 Iconehua Seir, nopa horeo tacat cati itztoyaj ipan nopa tali, elque:

Lotán, Sobal, Zibeón, Aná, ²¹ Disón, Ezer huan Disán. Ya ni elque tayacanani ten horeos cati elque iixhuihua Seir ipan tali Edom.

22 Iconehua Lotán elque:

Hori huan Hemam. Huan Timna elqui isihua icni Lotán.

23 Iconehua Sobal elque:

Alván, Manahat, Ebal, Sefo huan Onam.

24 Iconehua Zibeón elque:

Aja huan Aná. Aná elqui cati quipanti campa meya at totonic ipan nopa huactoc tali quema quinmocuitahuyaya iburrojhua itata.

25 Iconehua Aná elque:

Disón huan se isihuapil cati itoca Aholibama.

26 Iconehua Disón elque:

Hemdán, Esbán, Itrán huan Querán.

27 Iconehua Ezer elque:

Bilhán, Zaaván huan Acán.

28 Iconehua Disán elque:

Uz huan Arán.

29 Nopa tayacanani ten horeos elque:

Lotán, Sobal, Zibeón, Aná, ³⁰ Disón, Ezer huan Disán. Ya ni elque inintayacanhua nopa horeos ipan sesen pilaltepertzitzi ipan tali Seir.

Nopa tanahuatiani ipan tali Edom

31 Nica quijtohua inintoca nopa huejhueyi tanahuatiani cati tanahuati-
jqe ipan tali Edom achtohuiya quema israelitame ayemo quipiyayaj se
tanahuatijquet:

32 Bela, icone Beor, elqui tanahuatijquet ipan Edom huan ialtepe itoca
eliyaya Dinaba.

33 Quema Bela mijqui, pejqui tanahuatía Jobab, icone Zera, cati ehuayaya
ipan pilaltepertzí Bosra.

34 Quema Jobab mijqui, tanahuati Husam cati hualajqui altepet Temán.

- ³⁵ Quema Husam mijqui, pejqui tanahuatía Hadad, icone Bedad, cati quintanqui nopa tali Madián ehuaní quema quinamiquicoj ipan tali Moab. Yaya ehuyaya ipan altepet Avit.
- ³⁶ Quema mijqui Hadad, pejqui tanahuatía Samla cati ehuyaya ipan Masreca.
- ³⁷ Quema Samla mijqui, pejqui tanahuatía Saúl cati ehuyaya ipan Rehobot, nopa pilaltepetzi cati eltoc nechca nopa hueyat Eufrates.
- ³⁸ Quema mijqui Saúl, tanahuati Baal Hanán cati eliyaya icone Achor.
- ³⁹ Huan quema mijqui Baal Hanán, tanahuati Hadad. Ialtepe Hanán itoca eliyaya Pau huan Mehetabel cati eliyaya iichpoca Matred huan iixhui Mezaab elqui isihua.
- ⁴⁰ Nica eltoc inintoca itayacanca teipan ixhuihua Esaú huan sesen ini-juanti quiyacanqui ihueyi familia huan campa sesen tayacanqui ipan nopa altepet cati quihuicac inintoca. Inintoca eltoc:
- Timna, Alva, Jetet, ⁴¹ Aholibama, Ela, Pinón, ⁴² Cenaz, Temán, Mibzar, ⁴³ Magdiel huan Iram. Nochi ni tacame tayacanque ipan tali Edom cati quihuicac itoca inihuejcapan tata, Esaú. Huan sese altepet cati iniaxchahua quihuicac itoca itayacanca ixhui cati tayacanqui nozona.

37

José ihuaya iicnihua

¹ Jacob mocajqui para itzto ipan tali Canaán campa itztaya itata quema ayemo miquiyaya. ² Huan ya ni cati panoc ica Jacob * huan iconehua.

Quema José, icone Israel, eliyaya se telpocat cati quipiyayaya 16 xihuit, quinmocuithuiyaya borregoyme inihuaya itepotz icnihua cati eliyayaj in-iconehua Bilha huan Zilpa, ne sequinoc isihuahua itata. Huan teipa José quihhuico itata nochi cati amo cuali quichihuayaj iicnihua.

³ Huan Israel más quicneli José que ne sequinoc itelpochahua pampa tacatqui quema eliyaya nelhuehuentzi. Huan yeca quichihuili se iyoyo cati huehueyac huan tahuel yejectzi. ⁴ Pero quema iicnihua quiitaque para inintata más quicneliyaya José que inijuanti, pejqe quicualancaitaj huan yon quentzi amo quinequiyayaj quuitase.

⁵ Se tonali José quipixqui se temicti huan quinpohuili iicnihua, pero ya nopa quichijqui más ma quicualancaitaca. ⁶ Huan ya ni cati quinilhui:

—Xijtaquilica huan nimechpohuili nopa temicti cati nijpixqui.

⁷ Nijtemijqui para nochi tojuanti tiitztoyaj mila, tijsentiliyayaj tamontomit ten trigo tzonti. Huan nimantzi cati na nijsentilijtoya motananqui huan moquetzqui xitahuac huan cati anquisentilijtoyaj techyahualojque huan quej motancuaquetzque para techtepanitase.

⁸ Huajca iicnihua quihhuijque:

—¿Tijnequi tiqijtos para tielis tihueyi tanahuatijquet huan technahuatis?

Huajca más quicualancaitaque por itemic huan quej quinpohuilijtoya.

⁹ Teipa José quipixqui seyoc temicti huan nojquiya quinpohuili iicnihua. Quinilhui:

—Xijtaquilica, nijpixqui seyoc temicti huan niquitayaya para tonati huan metzti huan 11 sitalime nechhueyitepanitayaj.

¹⁰ Huan José nojquiya quinpohuili ni temicti itata huan iicnihua; huan itata quiajhuc huan quihhui:

* 37:2 37:2 O Israel.

—¿Taya tiqijtosnequi ica ni temicti cati tijpixqui? ¿Timoilhúa para monana, moicnihua huan na monequis timitzhueyitepanitase?

¹¹ Huan iicnihua quicualancaitaque, pero itata miyac moilhuiyaya ten ni tamanti.

José quinamacaque iicnihua

¹² Se tonali iicnihua José quinhuicaque iborregojhua inintata para quite-mojtiyase sacat huan ajsitoj nechca altepet Siquem. ¹³ Huan ipan ichaj inintata quiilhui José:

—Xiquita, moicnihua quintacualtíaj noborregojhua nechca Siquem. Ni-nequi xiya xiquinitati.

Huan José quinankuili:

—¡Cualtitoc!

¹⁴ Huajca itata quiilhui:

—Xiquitati quenicatza itztoque moicnihua huan nopa borregojme. Huan teipa xihuala techyolmelahuquí.

Huajca quej nopa, Israel quititanqui José para ma yahui campa nopa tamayamit nechca Hebrón. Huan quema José ajsito Siquem,

¹⁵ quintemohuayaya iicnihua campa huéli. Huan quipanti se tacat huan quitatzintoquili:

—¿Taya tijtemojtinemi?

¹⁶ Huan José tanankuili:

—Na niqintemojtinemi noicnihua. ¿Huelis techilhuis canque quin-mocuitahuíaj ininborregojhua?

¹⁷ Huan nopa tacat quijito:

—Ya mijcuenijteque nica. Nijcajqui quijtohuaj para yahuij Dotán.

Huajca José quintemojtiyajqui huan quinpanti ipan Dotán. ¹⁸ Huan injuanti quihuejcaitaque, huan quema ayemo onajsiyaya, quisencajque quenicatza quimictise. ¹⁹ Quiijtojque:

—¡Xiquitaca ne huala cati tatemiqui! ²⁰ Xihualaca, ma tijmictica huan tijcalaquise ipan se ten ni ostome campa achtohuiya eltoya at huan tiqijtose para se tecuani quicuajqui. Huan tiquitase taya panos ica itemic.

²¹ Pero quema Rubén quicajqui ni tamanti, quinejqui quimanahuis José ten ne sequinoc iicnihua. Huajca quijito:

—Ma amo tijmictica, ²² para amo tijtoyahuase esti. San ma tijmajcahuaca ipan ne ostot cati eltoc ipan ni huactoc tali, pero amo teno ma tijchihuilica.

Rubén quijito ya ni pampa quinequiyaya para teipa quimanahuisquía José huan quihuicasquía campa itata. ²³ Pero quema José ajsito campa itztoyaj iicnihua, injuanti quiquixtilijque iyoyo cati nelyejyectzi cati moquentijtoya. ²⁴ Huan quíitzquijque huan quimajcajque ipan nopa ostot cati amo quipiyayaya at pampa huactoya. ²⁵ Teipa quema mosehuijque para tacuase, quinitaque sequij ismaelitame cati ehuyayaj Galaad ica inincamellos cati quimamayaj tacualpajti huan taajhuiyacayot ten bálsamo huan mirra, huan yahuiyayaj para tali Egipto. ²⁶ Huajca Judá quinilhui iicnihua:

—¿Taya tijtanise sinta tijmictise toicni huan tijtatise imiquilis? ²⁷ Más cuali ma tiquinnaquiltica ne ismaelitame huan ma amo tijmictica pampa yaya toicni.

Huan iicnihua quicualcajque cati quinilhui. ²⁸ Huajca teipa quema panoque nozona nopa tanamacani cati ehuan tali Madián, iicnihua José quiquixtijque ipan ostot huan quinnamaquiltijque ica 20 plata tomi. Huan

nopa tanamacani cati eliyaya iteipan ixhuihua Ismael quihuicaque ipan tali Egipto.

²⁹ Huan teipa Rubén mocuetqui campa ameli huan amo quipanti José ostoco, quitzayanqui iyoyo pampa neltahuel mocuesohuayaya. ³⁰ Teipa mocuetqui campa itztoyaj iicnihua huan quinihui:

—¡Nopa telcopat ayecmo aqui! ¿Taya huelis nijchihuas?

³¹ Huan nopa icnime quicuique iyoyo José huan quipolojque ieso se chivo cati quimictijque, ³² huan quihuiquilijque inintata huan quiilhuijque: “Tijpantijque ni yoyomit. Xiquita sinta iyoyo mocone o amo.”

³³ Huan quema Jacob quiixmatqui, quijto: “¡Quena, yaya nopa iyoyo nocone! Se tecuani quicocototzqui huan quicuajqui.” ³⁴ Huajca Jacob quitzayanqui iyoyo huan moyoyonti ica yoyomit ten tequipacholi huan chocac para miyac tonali pampa mijqui icone. ³⁵ Huan nochi iconehua quicajcahualtiyayaj para quiyoltalise, pero amo huelqui moyoltalía. Tahuel chocayaya por icone huan quijtohuayaya: “Nimocuesos por nocone hasta quema nimiquis.”

³⁶ Huan ipan tali Egipto nopa madianita tacame quinamacaque José ica se tacat cati itoca Potifar cati quipiyayaya se hueyi tequit nozona ihuaya nopa hueyi tanahuatijquet Faraón. Yaya elqui tayacanquet ten nopa tacame cati quimocuitahuiyaya inemilis Faraón.

38

Judá huan Tamar

¹ Ipan nopa tonali Judá moyocaquixti ten iicnihua huan yajqui itztoti ipan pilaltepetzi Adulam huan mocajqui ichaj se tacat cati itoca Hira. ² Nozona quixmatqui iichpoca se cananeo tacat cati itoca Súa huan mosihuajti ihuaya. ³ Huan conecuc huan quipixqui se icone cati quitocaxti Er. ⁴ Sempa conecuc huan quipixqui seyoc icone cati quitocaxti Onán. ⁵ Huan noja quipixqui seyoc icone cati quitocaxti Sela cati tacatqui quema injuanti itztoyaj ipan altepet Quezib.

⁶ Judá quisihuajti Er, iachtohui ejca, ica se sihuat cati itoca Tamar. ⁷ Pero TOTECO amo quipactiyaya inemilis Er pampa eliyaya nelfiero, yeca quimicti. ⁸ Huajca Judá quiilhui itelpoca Onán:

—Ximosejcotili ihuaya icahual moicni quej quinamiqui tijchihuas pampa tihuejpol huan xijpiya se conet para quiselis cati eliyaya iaxca moicni.

⁹ Pero Onán quimatiyaya sinta tacatisquía se conet nochi masehualme quitasquaj para icone iicni huan amo ya icone. Yeca quema quinechahuiyaya ihuejpol, quitoyahuayaya ixinacho talchi para ma amo conecui pampa amo quinejqui quimacas iicni cati mijqui iteipan ixhuihua quej monequiyaya quichihuase. ¹⁰ Huan TOTECO quiitac para fiero cati quichijqui Onán pampa amo quichijqui cati monejqui. Yeca Toteco nojquiya quimicti. ¹¹ Huajca Judá quiilhui iyex Tamar:

—Ximocahua ticahuali huan xiiztoti ichaj motata hasta moscaltis nocone Sela.

Pero amo ya nopa cati Judá moilhuiyaya. Yaya majmahuiyaya para Sela mocuilis Tamar pampa moilhui huelis miquisquía quej iicnihua mijque sinta itztos ihuaya. Huan Tamar yajqui itztoti ichaj itafa quej quinahuati.

¹² Huan panoc miyac xihuit huan nojquiya mijqui isihua Judá cati elqui iichpoca Súa. Huan teipa quema Judá ayecmo mocuesohuayaya, yajqui ipan pilaltepetzi Timnat campa itequipanojcahua quinximayayaj iborregojhua.

Nojquiya ihuaya yajqui ihuampo, Hira, cati ehuyaya altepet Adulam. ¹³ Huan Tamar quimatqui para iyextat yahuiyaya Timnat quinximati ibor-regojhua, ¹⁴ huajca moquixtili iyoyo quej cati moquentiaj cahual sihuame huan moixtzajqui ica se yoyomit quej quichihuj ahuilnenca sihuame huan mosehui iteno pilaltepetzí Enaim cati eltoc ipan ojti para Timnat. Quichijqui ya ni pampa quiiac Sela ya motacachijtoya huan Judá amo quisihuaajtijtoya ihuaya. Huajca noja ayemo quipiyayaya se conet quej monejqui para quihuicas ieso huan itoca ihuehue cati mijqui.

¹⁵ Huan Judá quiiac ipan ojti huan moilhui para eliyaya se ahuilnenca sihuat pampa moixtzactoya. ¹⁶ Huajca quicajqui iojhui para quinechcahuis, yon amo quimatqui para eliyaya iyex huan quiihuhui:

—Techcahuili ma nimoteca mohuaya.

Huan yaya quinanquili:

—¿Taya techmacas sinta nimotecas mohuaya?

¹⁷ Huan Judá quinanquili:

—Nimitztitanilis se pilchivojtzi.

Huan ya quiiito:

—Cualtitoc, pero techcahuilijtehua cati moaxca hasta techtitanilis.

¹⁸ Huan Judá quiihuhui:

—¿Taya tijnequi ma nimitzcahuilijtehua?

Huan Tamar quiiito:

—Techmaca mosello ihuaya imecayo huan mocuatopil cati tijpiya momaco.

Huan Judá quimacac huan motejqui ihuaya, huan yaya quiconemacac.

¹⁹ Teipa Tamar moquixtilito cati ica moixtzactoya huan sempa motalili iyoyo quej cati cahual sihuame moquentiaj.

²⁰ Teipa Judá quititanqui nopa pilchivojtzi ica ihuampo cati ehuyaya altepet Adulam para ma quiiilhuiti nopa sihuat ma quicuepili cati iaxca. Pero ihuampo ayecmo quipanti. ²¹ Huajca quintatzintoquili cati nopona ehuan:

—¿Canque itztoc nopa ahuilnenca sihuat cati ehua Enaim cati itztoya ojtenti?

Huan quinanquilijqque:

—Nica amo aqui yon se ahuilnenca sihuat.

²² Huajca ihuampo tacuepili campa Judá huan quiihuhui:

—Amo nijpanti nopa sihuat. Huan nopa masehualme cati nopona ehuanitechilhuijqque para amo aqui yon se ahuilnenca sihuat nopona.

²³ Huan Judá quiihuhui:

—Techhuihuiitase sinta sempa tiyas tijtemoti. Nijchijqui cati niqiiito huan nijtitanqui nopa pilchivojtzi huan amo tijpanti. Huajca ma mocahui nopa sihuat cati nijmacac.

²⁴ Huan quema panotoya eyi metzti, se hualajqui campa Judá huan quiihuhui:

—Huelis moyex Tamar tacanentoc pampa quinemiltia se conet ipan itacayo.

Huan Judá quiihuhui:

—¡Xijquixtica ten nopa altepet huan xijtatica!

²⁵ Pero quema quiquixtiyayaj, Tamar tatitanqui ma quiihuitij iyextat: “Nechconemacac yaya cati iaxca ni tamanti. Xiquita cuali ajquiya iaxca ni sello, ihuaya imecayo huan ni cuatopili.”

²⁶ Huan Judá quiixmatqui nopa tamanti huan quiiito: “Yaya quichijtoc cati cuali huan na, amo. Yaya quinejqui se conet para quihuicas itoca ihuehue cati mijqui huan amo nijtahuicalti ihuaya nocone Sela quej monequiyaya.”

Huan Judá ayecmo quema motejqqui ihuaya Tamar. ²⁷ Huan quema ajsic tonali para conepiyas, quinpixqui cuateme. ²⁸ Huan ipan nopa talojtzi quema tacatiyayaj, se ten inijuanti quiquixti imax, huan nopa cocoxcaitaquet quiiipili se icpat chichiltic huan quijto: “Ya ni quisqui achtohui.”

²⁹ Pero teipa nopa pilconetzi quicalaqui imax huan icni nelía tacatqui achtohui. Yeca nopa cocoxcaitaquet quitocaxti nopa conet Fares. (Fares quinequi quiiijos Cati Moojtapojtoc.) Quej nopa quitocaxti pampa quijto: “Yaya moojtapo para quisqui achtohui.”

³⁰ Huan teipa tacatqui nopa seyoc oquichpil cati quiipiyayaya nopa icpat chichiltic imaco huan quitocaxti Zara. (Zara quinequi quiiijos Chichiltic.)

39

José ihuaya isihua Potifar

¹ Huan nopa ismaelita tanamacani quihuicaque José hasta tali Egipto. Nopona quicojqqui se tacat itoca Potifar cati quipixtoya se hueyi tequit ica Tanahuatijquet Faraón. Eliyaya inintayacanca nopa tacame cati quimocuitahuiyayaj inemilis. ² Pero TOTECO itztoya ihuaya José huan quichijqui para nochi ma quisa cuali cati José quichijqui ipan ichaj iteco.

³ Huan iteco quiiitac para TOTECO itztoya ihuaya José huan quitióchihuayaya huan nochi cati quichijqui quisqui cuali. ⁴ Huan iteco quicneli huan quitali para ma eli cati más quipalehuisquía. Nojquiya quichijqui ma quinnahuati nochi tequipanohuani ipan ichaj huan quitali imaco nochi cati quipixqui.

⁵ Huan ten nopa tonali quema Potifar quicajqui imaco José ichaj huan nochi cati quipixqui, TOTECO pejqqui más quitióchihua Potifar, huan iteixmatcahua huan nochi cati quipixqui ipan ichaj huan ipan mila. ⁶ Huan Potifar ayecmo mocuatotoniayaya ica teno, san para tacuas pampa motemachi ipan José. Huan nochi eltoya imaco huan nochi quisayaya cuali.

Huan José eliyaya yejyectzi huan nesiayaya se cuali telpocat. ⁷ Huan quema panoc tonali, isihua iteco pejqqui quixtoca. Huan se tonali quiiilhui:

—Ximoteca nohuaya.

⁸ Pero José amo quinejqqui huan quiiilhui:

—Xiquita, mohuehue quicajtoc nomaco nochi cati quiipiya huan quimati sinta nica niitztoc, amo quiipiya teno para ica mocuatotonis. ⁹ Ipan ni cali amo aquí más tayacana que na. Noteco nechmacatoc nomaco nochi para nijchihuas cati na niquitas para cuali. San ica ta amo nijpiya tanahuatili pampa tiisihua. Huajca, ¿quenicatza huelis nitajtolchihuas ica Toteco Dios huan nijchihuas mohuaya se tamanti cati tahuel fiero?

¹⁰ Huan masque nopa sihuat mojmota quinzayaya José ma moteca ihuaya, José amo quichijqui, yon amo quinechcahui campa itztoya. ¹¹ Pero se tonali José monejqqui calaquis ichaj iteco para quichihuas itequi huan amo aquiyaya yon se más tequipanojqquet nopona. ¹² Huan nopa sihuat quiiizqui ipan iyoyo huan quiiilhui:

—Ximoteca nohuaya.

Pero José motalojtejqqui huan quicajtejqqui iyoyo ipan imax. ¹³ Huan quema nopa sihuat quiiitac para quicahuilijtejqqui iyoyo imaco, ¹⁴ tzajtzc chicahuac, huan quinnotzqui itatequipanojqcagua huan quiniilhui:

—Xiquitaca, nopa hebreo tacat cati nohuehue techhualiquili san techpinahualtia. Calajqui nica para techchihualtis ma nimoteca ihuaya, pero na nitzajtzc chicahuac. ¹⁵ Huan quema techcajqqui para nitzajtzc ica nochi nochichualis, motalojtejqqui hasta quicajtejqqui iyoyo nica.

¹⁶ Teipa nopa sihuat quiajojqui José iyoyo hasta ajsico ihuehue. ¹⁷ Huan quipohuili quej quinpohuilijtoya nopa tequipanohuani huan quihlhi:

—Nopa hebreo cati tijcojqui huan techhualiquili calajqui ipan nocuarto huan quinequiyaya ma nimoteca ihuaya. ¹⁸ Pero quema nitzajtzc chicahuac, motalojtiquisqui huan quicajtejqui iyoyo nica. ¹⁹ Quej nopa nechchi-jqui motequipanojca cati tijcojqui.

Huan iteco José cualanqui miyac quema quicajqui cati isihua quipo-huiliyaya. ²⁰ Huan quiitzqui José huan tanahuati ma quicalaquica ipan tatzacti campa itztoyaj nochí tacame cati nopa hueyi tanahuatijquet quintzactoya. ²¹ Pero TOTECO noja itztoya ihuaya José huan quinextili quenicatza quicnelía pampa quichijqui para nopa tayacanca tetzajquet ma quicalita. ²² Huan nopa tayacanca tetzajquet quincajqui imaco José nochí sequinoc cati tzactoque. Huan José tanahuatiyaya nochí cati nopona mochihuayaya. ²³ Huan nopa tayacanquet amo monequiyaya mocuatotonis ica teno cati eltoya imaco José pampa TOTECO itztoya ihuaya huan quichi-huayaya para nochí ma quisa cuali.

40

José quinmachilti taya quijtosnequi ome temicti

¹ Panoc miyac tonali huan yaya cati quipiyayaya itequi para quiyecos nochí itailis nopa tanahuatijquet ten Egipto para quitas sinta quipixqui ipa-jyo quichijqui cati amo quipacti iteco. Huan nojquiya taixpanoc itayacanca panchijca nopa tanahuatijquet. ² Huajca Faraón cualanqui inihuaya ni ome itequipanojcahua, ³ huan quintitanqui ipan tatzacti cati eltoya ipan ichaj inintayacanca nopa tacame cati quimocuitahuiyayaj. Huan eltoya san sejo campa José tzactoya. ⁴ Huan nopa tayacanca tetzajquet quihlhi José ma quinmocuitahui. Huan panoque miyac tonali ipan tatzacti san sejo.

⁵ Huan se tayohua yaya cati quiyecohuayaya itailis Faraón huan nopa seyoc cati quichihuayaya ipantzi quipixque sesen temicti. Huan sesen temicti quijtosnequiyaya sesen tamanti. ⁶ Huan ica ijnaloc José quinpantico moneltequipachohuayayaj, ⁷ huan quinilhui:

—¿Para ten anmotequipachohuaj?

⁸ Huan quihlhiujque:

—Tijpixque sesen temicti huan amo tijpiyaj ajquiya techpohuilis taya quijtosnequi.

Huan José quinilhui:

—Yaya Toteco Dios cati temachiltía taya quijtosnequi se tamanti. Huajca techpohuilica taya anquitemijque.

⁹ Huajca nopa tacat cati itequi para quiyecos itailis Faraón quihlhi:

—Ipan notemic niquitayaya se xocomeca tzonti, ¹⁰ cati quipixqui eyi imacuayo. Huan nopa xocomeca cuahuit chamanqui, huan cahuanqui ixochiyo, huan temacac itajca. Huan teipa icsc itajca. ¹¹ Huan nijpiyayaya nomaco icaxi Faraón. Huan nijcuiyaya nopa xocomecat itajca huan nijpatz-cayaya ipan icaxi. Teipa nijtaliyaya imaco Faraón.

¹² Huan José quihlhi:

—Nopa motemic quej ni quinequi quijtos. Nopa eyi imacuayo elis eyi tonati, ¹³ pampa ica eyi tonati Faraón mitzquixtis nica, huan mitztalis sempa ipan motequi. Huan sempa tijmacas icaxi imaco quej achtohuiya tijchihuayaya. ¹⁴ Quema panos ya nopa, techelnamiqui huan xijchihua se favor, xijcamanhui Faraón ten na para ma techquixti ipan ni tatzacti.

¹⁵ Techichtejque ipan nopa tali campa itztoque hebreos. Amo quinamiqui niitstos nica pampa amo teno cati amo cuali nijchijtoc.

¹⁶ Huan quema nopa tayacanquet ten panchihuani quitac cati José quiijtojtaya, quiihui:

—Nojquiya nijpixqui se temicti huan niqitayaya para niqiijpahuijtoya eyi chiquihuit ten pantzi. ¹⁷ Huan nopa chiquihuit cati huejcapa quiiyayaya nochí tamanti pantzi para Faraón, pero totome hualayayaj huan quicuayayaj cati eltoya ipan nochiqui cati niqicpahuijtoya.

¹⁸ Huajca José quinanquili:

—Ya ni cati motemic quinequi quiiptos; nopa eyi chiquihuit ten pantzi elis eyi tonati. ¹⁹ Huan ica eyi tonati Faraón mitzquixtis ten nica huan quichihuas ma mitzcuahuiyonica ipan se cuahuit huan totome quicuase monacayo.

²⁰ Huan hualhuicta quiaxiti ixihui Faraón huan quichijqui se hueyi ilhuit para nochí cati quihuicayayaj tequit ipan ichaj. Huan iniiexa nochí itanotzallhua, Faraón tatitanqui ma quinquixtica ipan tatzacti yaya cati achtohuiya quiyecohuayaya itailis huan nojquiya nopa tayacanca panchijquet.

²¹ Huan cati quiyecohuayaya itailis sempa quitali ipan itequi huan sempa pejqí quimaca icaxi quej achtohuiya. ²² Pero ica nopa panchijquet tatitanqui ma quicuahuiyonica ipan se cuahuit quej José quiijtojtaya. ²³ Pero masque ya nopa panoc, nopa cati quiyecohuayaya itailis Faraón amo quielnamijqui José.

41

José quimatilti taya quiiptosnequi itemic Faraón

¹ Quema panotaya ome xihuit, se tonali Faraón quipixqui se temicti. Quitemijqui para ijcataya iteno nopa hueyat Nilo, ² huan chicome huacaxme cati yejectzitzí huan tomahuaque quisayayaj ipan nopa hueyat huan tacuajtinemiyayaj. ³ Huan iniica quisque chicome huacaxme cati fierojtique huan cocoxquetique. Quisque ipan nopa hueyat huan moquetzque itenó nechca nopa sequinoc. ⁴ Teipa nopa huacaxme fierojtique huan cocoxquetique quincuaajque nopa chicome huacaxme yejectzitzí huan tomahuaque.

Huan Faraón isac. ⁵ Teipa sempa cochqui huan quipixqui seyoc temicti. Quiitayaya chicome imacuayo trigo yejectzitzí cati temitoya ica iyol huan moscaltiyaya ipan san se tzonti. ⁶ Huan iniica chamanqui seyoc chicome imacuayo trigo cati huactoc huan pitzantzitzí cati quitatijtoya nopa huacajacat cati huala campa quisa tonati. ⁷ Huan nopa chicome imacuayo trigo cati huactoc quincuaajque nopa chicome imacuayo cati tomahuac huan temitoc. Huan Faraón isac huan momacac cuenta para eliyaya se temicti. ⁸ Pero ica ijnaloc moneltequipachohuayaya huan tanahuati ma hualaca nochí tetonalitani huan nochí talnamijca tacame ipan tali Egipto. Huan Faraón quinpohuili itemic, pero yon se ten injuanti amo huelqui quiihui taya quinequiyaya quiiptos.

⁹ Huajca nopa tacat cati quipixqui itequi para quiyecos itailis Faraón quielnamijqui José huan quiihui Faraón:

—Ama niquelnamiqui cati amo cuali nijchijtoc. ¹⁰ Quema ticualanqui nohuaya huan ihuaya nopa tayacanca panchijquet, techititanqui tiome ipan nopa tatzacti ipan ichaj nopa tayacanquet ten nopa tacame cati mitzmocuitahuíaj. ¹¹ Huan se tayohua nopa panchijquet huan na, tijpixque sesen temicti. Huan sesen temicti quipixqui cati quinequiyaya quiiptos. ¹² Huan

nopona ipan nopa tatzacti itztoya tohuaya se hebreo tellocat cati quitequipanojfoya nopa tayacanquet. Huan tijpohuilijque totemic huan nopa hebreo techilhui taya quijitosnequi. ¹³ Huan nochi panoc san quej techilhui. Na nitacuepili sempa ipan notequi huan nopa seyoc quicuapilojque.

¹⁴ Huajca Faraón tatitanqui ma quinoztatij José huan nimantzi quiquixtijque ten nopa tatzacti. Huan José malti, huan motentzonxinqui, huan quipatac iyoyo huan monexti iixpa Faraón. ¹⁵ Huan Faraón quihlhi:

—Nijpixqui se temicti huan amo aquí hueltoc quiixtoma, pero nijcactoc quema tijcaqui se temicti, hueli tiquixtoma.

¹⁶ Huan José quinanquili:

—Amo nihueli na, pero Toteco Dios, quena. Yaya mitznextilis taya quinequi quijitos motemic.

¹⁷ Huan Faraón quihlhi José:

—Ipan notemic, niquitayaya para nijcatoya iteno nopa hueyat Nilo, ¹⁸ huan ipan nopa hueyat quisque chicome huacaxme tomahuaque huan yejectzitzitzi cati tacuajtinemiyayaj. ¹⁹ Huan iniica quisque seyoc chicome huacaxme cati fierojtique huan cocoxquetique. ¡Amo quema niqinintztoya huacaxme nelfierojtique ipan nochi tali Egipto! ²⁰ Huan ni huacaxme cocoxquetique huan fierojtique quincuaajque nopa achtohui huacaxme cati tomahuaque. ²¹ Pero masque quincuaajque, amo tomahuique. Noja eliyayaj cocoxquetique quej achtohui.

“Huan teipa niisac. ²² Teipa nijtemijqui chicome imacuayo trigo yejectzitzitzi huan tomahuaque cati temitoya ica iyol huan moscaltiyayaj ipan san se tzonti. ²³ Huan iniica moscaltiyaya seyoc chicome imacuayo cati tzocoyoltic, huan pitzantzitzitzi, huan huactoya ica nopa huac ajacat cati huala campa quisa tonati. ²⁴ Huan ni chicome imacuayo cati pitzantzitzitzi quincuaajque nopa chicome imacuayo cati tomahuaque. Na niqinipohuili notemic nopa tacame cati tetonalitaj, pero yon se amo hueltoc nechilhuis taya quijitosnequi.”

²⁵ Huajca José quihlhi Faraón:

—Nopa ome temicti cati tijpixqui, san se. Toteco Dios mitzyolmelajtoc cati yaya quichihuas. ²⁶ Nopa chicome huacaxme cati yejectzitzitzi quinequi quijitos chicome xihuit. Huan san se quijitosnequi nopa chicome imacuayo trigo cati yejectzitzitzi. ²⁷ Huan nopa chicome huacaxme cocoxquetique huan fierojtique cati quisque iniica nopa sequinoc, quinequi quijitos seyoc chicome xihuit. Huan san se quijitosnequi nopa chicome imacuayo trigo cati amo moscaltit huan cati quihuatzqui nopa huac ajacat cati huala campa quisa tonati. Quinequi quijitos chicome xihuit quema amo teno oncas. ²⁸ Ya ni panos san quej nimitzilhujtoc pampa Toteco Dios mitznextilijtoc cati ya quichihuas. ²⁹ Hualas chicome xihuit quema oncas tahuel miyac pixquisti ipan nochi tali Egipto. ³⁰ Huan teipa hualas chicome xihuit cati amo teno oncas. Huan nopa mayanti ajsis campa hueli ipan nochi tali Egipto hasta amo aquí quielnamiquis nopa xihuit cati cuali. ³¹ Elis nelhueyi nopa mayanti hasta amo nesis cati achtohuiya oncac. ³² Ta tijpixqui nopa temicti ompa pampa Toteco Dios motalijtoc quichihuas ni tamanti huan quichihuas nimantzi.

³³ “Huajca xijtemo se tacat cati cuali iyolo huan cati talnamiqui para tayanacas ipan ni tali Egipto. ³⁴ Huan ya ni xijchihua, totanahuatijca. Xijnahuati ma quintali gobernadores campa hueli ipan nochi ni tali para quiajocuisse se coxtali ten sesen macuili coxtali cati quipixcase ipan tali Egipto ipan nochi nopa chicome xihuit quema tahuel taelis. ³⁵ Ma quisentilica nopa trigo

ipan nochi altepeme ipan nopa chicome cuali xihuit cati huala huan ma quitalica campa ta tijnahuatís, totanahuatijca. Huan teipa oncas tacualisti para nochi masehualme. ³⁶ Quej nopa, mocahuas ajoctoc nopa trigo ipan total para masehualme amo apismiquise ipan nopa chicome xihuit quema oncas mayanti.”

José elqui gobernador ipan tali Egipto

³⁷ Huajca Faraón huan itapalehujicahua quicualcajqe cati José quiijto, ³⁸ huan Faraón quinilhui:

—¿Canque tijpantise seyoc tacat quej ya ni cati quiipiya itonal Toteco Dios?

³⁹ Huan teipa Faraón quiilhui José:

—Amo aquí cati más talnamiqui huan cati más quimati que ta. San ta mitzmatiltijtoc Toteco Dios nochi ni tamanti. ⁴⁰ Huajca momaco mocahuas nochi cati noaxca huan nochi nomasehualhua quineltocase cati tiquinilhuis. San na nielis más hueyi que ta pampa na nihueyi tanahuatijquet. ⁴¹ Xiquita, na nimitztalía tigobernador ipan nochi ni tali Egipto.

Quema quiijto ya ni, ⁴² Faraón moquixtili ipan imax ianillo cati quipixtoya nopa sello cati quinexti itanahuatil huan quitallili imax José. Teipa tanahuati ma quiyoyontica ica lino yoyomit cati nelcuali huan ma quitallilica iquechta se costi ten oro. ⁴³ Quichijqui nopa ompa tanahuatijquet huan quiilhui ma tejco ipan iompa carro. Huan quinnahuati itequipanojcahua ma quiyacantiyaca huan chichahuac ma teyolmelahuase: “¡Ximotancuaquetzaca! ¡Huala tanahuatijquet!” Quej nopa Faraón quitalli José para ma tanahuati ipan nochi nopa tali Egipto.

⁴⁴ Huan teipa Faraón quiilhui:

—Na nimitzmaca motequiticayo huan yon se ipan nochi Egipto huelis quiolinis imacpil sinta amo tijmaca tanahuatili.

⁴⁵ Huan Faraón quitocaxtali José, Zafnat Panea, huan quisihuahti ihuaya Asenat, iichpoca Potifera nopa totajtzi ipan altepet On. Huan campa hueli ipan tali Egipto nochi quiixmatque José. ⁴⁶ Huan José quiipiyayaya 30 xihuit quema pejqui quitequipanohua Faraón, nopa tanahuatijquet ipan tali Egipto.

Teipa José quinahuatijtejqe Faraón huan pejqui yahui campa hueli ipan nochi tali Egipto. ⁴⁷ Huan nopa tali temacac miyac pixquisti ipan nopa chicome xihuit quema tahuel oncac, ⁴⁸ huan José quiajojqui miyac trigo ipan nopa altepeme. Quicajtiyajqui ipan sese altepet nopa trigo cati quisentilijque ipan nopa pilaltepetzitzitzi nechca. ⁴⁹ Huan José quisentili miyac trigo quej imiyaca xali iteno hueyi at. Nelmiyac eliyaya nopa trigo hasta ayecmo quiijcuilo quesqui coxtali pampa amo hueliyaya quipohuaj.

⁵⁰ Huan quema ayemo pehuayaya nopa xihuit ten mayanti, José quinixqui ome iconehua ihuaya isihua, Asenat. ⁵¹ Nopa achtohui quitocaxti Manasés. (Manasés quinequi quiijtos Niquinelcajtoc.) Quej nopa quitocaxti pampa quiijto: “Toteco Dios quichijtoc ma niquelcahua noteixmatcahua huan nochi cati nitaijyohuijtoc.” ⁵² Huan iompa cone quitocaxti Efraín. (Efraín quinequi quiijtos Temaca Itajca.) Quej nopa quitocaxti pampa quiijto: “Toteco Dios quichijtoc ma niquinpiya noconehua ipan ni tali campa nitaijyohuijtoc.”

⁵³ Huan tanqui nopa chicome xihuit quema tahuel oncac pixquisti ipan tali Egipto, ⁵⁴ huan pejqui nopa chicome xihuit quema amo oncac pixquisti quej José quiijto. Huan oncac mayanti ipan nochi talme nechca, pero ipan tali Egipto oncayaya tacualisti. ⁵⁵ Huan quema Egipto ehuan pejqe mayanaj,

yajque quitajtanitoj trigo Faraón huan Faraón quinilhui nochi egiptome: “Xiyaca xiquitatij José huan xijchihuaca cati ya amechilhuis.”

⁵⁶ Huan quema nopa mayanti ajsic campa hueli ipan nochi nopa tali, José quitapo nochi nopa huejhueyi calme campa quiajtoctoyaj trigo para quin-namaquiltis nopa egiptome pampa nopa mayanti eliyaya tahuel chichahuac.

⁵⁷ Huan masehualme cati ehuan ten campa hueli talme ajsiyayaj ipan tali Egipto para quicohuase trigo ica José pampa ipan nochi nopa talme, amo teno oncayaya para quicuaese.

42

Icnihua José yajque tali Egipto

¹ Quema Jacob quimatqui para oncayaya trigo ipan tali Egipto, quinilhui itelpocahua: “¿Para ten anmochiyaj se ica seyoc para anquitasé ajquiya techpalehuis? ² Nechilhuijtoque para ipan tali Egipto onca trigo. Xiyaca nepa huan xijcohuatij para noja tiitztose.”

³ Huajca majtacti ten iicnihua José yajque tali Egipto quicohuatij trigo. ⁴ Pero Jacob amo quicahuili ma yahui Benjamín, inelicni José pampa moilhui nohueli ipantisquía se tamanti cati fiero. ⁵ Huajca itelpocahua Israel yajque inihuaya nochi sequinoc cati yahuiyayaj tacohuatij pampa campa hueli ipan nochi tali Canaán oncayaya mayanti.

⁶ Huan José eliyaya gobernador ipan tali Egipto huan yaya cati quinna-maquiltiyaya trigo nochi masehualme cati ajsiyayaj ten campa hueli talme. Huan quema iicnihua José monextijque iixpa, motancuaquetzque huan mohuijtzonque talchi quej momatque tatepanitaj. ⁷ Huan José quinixmatqui iicnihua quema quininitac, pero quichijqui quej amo quinixmatiyaya. Quin-camanalhui ica cualanti huan quinilhui:

—¿Canque anhualahuij?

Huan quihlhuijque:

—Tihualahuij tali Canaán para titacohuaquij.

⁸ Huan masque José quinixmatqui iicnihua, inijuanti amo quiixmatque.

⁹ Huan quielnamijqui nopa temicti cati quipixqui ten iicnihua achtohuiya huan quinilhui:

—Amo neli anhualahuij para antacohuase. Anhualajtoque anquिताquij quenicatza eltoc total huan canica huelis antechtanise.

¹⁰ Huan inijuanti quinanquiliijque:

—¡Amo, tate! Timotequipanojcahua tihualajtoque tijcohuaquij trigo.

¹¹ Nochi tojuanti tiiconehua san se tacat. Ticuajcualme. Amo quema tijajtoque ipan se altepet para tijtachilise quenicatza huelis tijtanise.

¹² Huan José quijto:

—¡Amo neli! Anhualahuij para anquिताquij quenicatza huan canica huelis antechtanise ipan total.

¹³ Pero inijuanti tananquiliijque:

—Timotequipanojcahua tiitztoque 12 tiicnime ica san se tacat huan tiitztoque ipan tali Canaán. Toicni teipan ejquet mocajqui ihuaya totata huan se ayecmo aqui tohuaya.

¹⁴ Pero José sempa quinilhui:

—Temacht amajuanti antachiyani, ¹⁵ pero ica ya ni tiquitase. Ica itanahu-atil Faraón, nitanahuatía para amo huelis anquisase nica hasta ma huala amoicni teipan ejquet. ¹⁶ Ma yahui se ten amajuanti para quicuiti. Nopa sequij mocahuase tzactoque. Tiquitase sinta nelía cati anquijtojtoque.

Sinta amo, huajca nijmatis melahuac antachiyaj pampa anquinequij antechtanise.

¹⁷ Huan José quintzajqui nochi injuanti para eyi tonati, ¹⁸ pero ica ihualhuicaca quinilhui:

—Na nijtepanita Toteco Dios, huajca xijchihuaca ya ni huan nimechcahuilis anitztose. ¹⁹ Sinta nelía ancuajcualme, ma mocahua tzactoc san se ten amojuanti. Huan sequinoc amojuanti xijhuicaca trigo para ma tacuaca amofamilia. ²⁰ Pero monequi techhualiquilica amoicni teipan ejquet para tiqitase sinta anquijtojqe cati melahuac. Pero sinta amo, huajca aniquise.

Huan injuanti quicalcajqe, ²¹ pero moilhuiyayaj se ica seyoc:

—Melahuac fiero tijchihuilijque toicni. Amo tijtacaquilijque quema tahuel mocuesohuayaya huan techtajtaniyaya ma tijtasojfaca. Huan yeca ama topani eltoc ni cuesoli.

²² Huan Rubén quinilhui:

—Na nimechilhui para amo teno xijchihuilica, pero amo antechcajqe huan ama monequi titaxtahuase por imiquilis.

²³ Pero amo quimatiyayaj sinta José quimachiliyaya inincamanal pampa José quinnojnatzayaya ica inincamanal egiptome huan seyoc quinixtomiliyaya cati quijtohua. ²⁴ Huan José mohuejcatali ten iicnihua para amo huelis quiitase huan pejqui choca. Teipa moyoltali huan mocuetqui campa itztoyaj para quincamanalhui. Huan quiyocaquixti Simeón huan iniixpa quinnahuati itequipanojcahua ma quiilpica. ²⁵ Teipa tanahuati ma quintemilica inincoxtalhua iicnihua huan ma quicuepilica sese itomi ipan inincoxtal. Nojquiya tanahuati ma quinmacaca tacualisti para ipan ojti. Huan itequipanojcahua quej nopa quichijque. ²⁶ Huan quintamamaltijque ininburrojhua huan quistejqe.

²⁷ Huan quema ajsitoj campa tonilisquíaq, se ten injuanti quitapo icoxtal para quitamacas iburro huan quiitac itomi eltoya icoxtalijtic. ²⁸ Huajca quinilhui iicnihua:

—¡Xiquitaca nechcuepilijque notomi! ¡Nica eltoc ipan nocoxtal!

Huan nochi momajmatijque miyac, huan huihuipicayayaj huan moilhuiyayaj se ica seyoc:

—¿Taya techchihuilijtoc Toteco Dios?

²⁹ Huan quema ajsitoj tali Canaán, quipohuilijque inintata, Jacob, nochi cati quinpanotoya, quiilhuijqe:

³⁰ —Nopa tacat cati tanahuatía ipan nopa tali technojnotzqui ica cualanti huan techilhui para san tiyajtoyaj tijtatchiyatij ipan ital para huelis tijtanisquíaq. ³¹ Pero tiquilhuijqe para ticuali masehualme huan amo quema tijtatchilijtoque se tali. ³² Tiquilhuijqe para tieliyayaj 12 tiicnime ten san se tacat, huan se ayecmo itztoc tohuaya. Nojquiya tiquilhuijqe para nopa teipan ejquet mocajtoya mohuaya ta nica ipan Canaán. ³³ Huajca ya techilhui para monequi quiitas sinta nelía ticuajcualme. Quiijto monequi se ten tojuanti ma mocahua nozona huan para nopa sequinoc tojuanti ma tijhualicaca trigo para tofamilias cati mayanaj, ³⁴ pero quiijto teipa monequi tijhuiquilise toicni teipan ejquet. Quej nopa quiijto para melahuac quimatis sinta ticuali masehualme o san titachiyani. Huan quiijto para quej nopa quimajcahuas toicni huan huelis titacohuase ipan ital ica cuali.

³⁵ Huan quema iicnihua José quixcuetque inincoxtal, quiitacque para ipan sese inincoxtal oncayaya ininpilbolsa ica nopa tomi cati quihuicatojay. Huajca injuanti huan inintata momajmatijque. ³⁶ Huan Jacob quinilhui:

—Antechquixtilise nochi noconeuhua. José ayecmo aqui tohuaya, Simeón nojquiya, huan ama antechquixtilise Benjamín. Amo teno quisa cuali para na.

³⁷ Huajca Rubén quiilhui itata:

—Xijcahua Benjamín ma yahui. Huan nijmocuitahuis huan nimitzcuepilis. Sinta amo nimitzcuepilis, huelis tiquinmictis nochi ome noconeuhua.

³⁸ Pero Jacob quiilhui:

—Nocone amo yas amohuaya. Iicni ya mijqui huan san ya mocahua. Sinta ipantis cati fiero ipan ojti, antechchihuilise ma nihuehuejmiqui ica tequipacholi.

43

Benjamín quihuicaque tali Egipto

¹ Huan nopa mayanti más eliyaya ipan inintal. ² Huan Jacob huan iteixmatcahua quitamicuajque nochi nopa trigo cati quicuitoj ipan tali Egipto, huajca quinilhui itelpocahua:

—Xiyaca sempa xijcohuatij trigo.

³ Pero Judá quiilhui:

—Nopa tacat ya techilhuijtoc para amo huelis tiquitase sinta amo tijhucase toicni teipan ejquet. ⁴ Huajca sinta tijcahuas ma yahui tohuaya Benjamín, tiyase tijcohuatij trigo. ⁵ Pero sinta amo tijcahuas ma yahui, amo tiyase pampa san tapic. Nopa tacat techilhui sinta amo tijhuicaj toicni teipan ejquet, amo huelis tiquitase.

⁶ Huajca Israel quiijto:

—¿Para ten antechchihuilíaj cati fiero huan anquiilhuijque nopa tacat para anquipyayayaj seyoc amoicni?

⁷ Huan injuanti quiilhuijque:

—Tiquilhuijque pampa ya techtatzintoquiliyaya miyac ten tojuanti huan tofamilias. Techtatzintoquili sinta noja itztoc totata, huan sinta tijpiyaj seyoc toicni. Huan san tijnanquiliyayaj cati techtatzintoquiliyaya. ¿Quenicatza tijmatisquíaj para techilhuisquía ma tijhuiquilica toicni?

⁸ Huan Judá quiilhui Israel, itata:

—Sinta tijnequi ma tiitzotca, xijcahuili ma yahui Benjamín, huan na nijmocuitahuis huan tiyase nimantzi. Quej nopa amo timiquise, yon ta, yon tojuanti, yon toconeuhua. ⁹ Huan sinta ten hueli ipantis, na notajtacol. Sinta amo nimitzcuepilis, huajca nijhuicas tajtacoli moixpa para nochipa. ¹⁰ Sinta amo tihuejcajtosquíaj, ya tiyajtosquíaj huan ya tihualajtosquíaj ompa.

¹¹ Huajca itata quinilhui:

—Ayecmo onca seyoc tamanti cati hueli tijchihuase, huajca ama xijchihuaca ya ni. Xijtemilica amocoxtal tamanti cati más cuali cati temaca ni total para xijtamajmacatij nopa tacat. Xijhuiquilica quentzi bálsamo, sayolnecti, taajhuiyacayot, mirra, huan almendras huan nopa nueces cati itoca pistache cati nelía ajhuiyac. ¹² Xijhuicaca nojquiya ome huelta imiyaca nopa tomi cati amechcuelijque ipan amocoxtal. Nohueli mocuapolojque. ¹³ Huan xijhuicaca amoicni Benjamín huan sempa xiquitatij nopa tacat. ¹⁴ Toteco Díos Cati Quipiya Nochi Chicahualisti ma amechtasojta. Ma amechpalehui iixpa nopa tacat para ma quicahuili nopa seyoc amoicni huan Benjamín para ma hualaca amohuaya. Huan ica na, sinta monequi niquinpolos noconeuhua, huajca quej nopa ma eli.

¹⁵ Huajca itelpocahua Jacob quihuicaque iniicni, Benjamín, huan tamanti cati temajmacatij, huan ome hueltas imiyaca tomi. Teipa quistejque, moisi-huiltijque yajque tali Egipto huan monextitoy iixpa José. ¹⁶ Huan quema José quiitac Benjamín inihuaya hualayaya, quihhui itequipanojca cati más tayacana ipan ichaj:

—Xiquinhuica ni tacame nochaj, huan xijmicti se huacax huan xijcualtali pampa tacuase nohuaya tajcotona.

¹⁷ Huan nopa tequipanojquet quichijqui quej José quinahuati huan quinhuicac ichaj. ¹⁸ Pero injuanti momajmatijque pampa quinhuicayaya ichaj José huan moilhuijque:

—Techhualicatoc nica por nopa tomi cati techcuelijque quema achtohui tihualajque. Ama quijitos tiqichitequilijque, huan techquixtilis to-tapiyalhua huan techitzquise. Techchihualtise ma titequitica quej titequipanohuani cati quincotoc.

¹⁹ Huajca quema ajsitoy campa calaquij ipan ichaj José, monechahuijque campa nopa tayacana tequipanojquet, ²⁰ huan quihhuijque:

—¡Tate, techtacaquili! Quema achtohui tihualajque tijcohuacoy trigo, ²¹ tiquistejque ica totrigo huan tiajsitoy campa ticochisquij ipan ojtí. Huan tijtapojque tocoxtalhua, huan icamacó sesen coxtali eltoya totomi sesen tijuantí. Eltoya ajsitoc totomi cati ica tijcojtoyaj nopa trigo. Huan ama tijhualicatoy para tijcuese. ²² Huan iyoca tijhualicaque más tomi para tijcohuase más trigo. Pero amo tijmatij ajquiya quitali totomi ipan tocoxtalhua.

²³ Huan nopa tayacanca tequipanojquet quihhui:

—Amo ximocuesoca. Dios amoTeco huan iTeco amotata, huelis yaya quitali nopa tomi ipan amocoxtalhua pampa na nijseli nopa tomi cati antechmacaque.

Huan nopa tequipanojquet quiquixti Simeón huan quihualicac campa itztoyaj nopa icnime. ²⁴ Teipa quinhuicac san sejco hasta ichaj José. Huan quinmacac at para ma moicxipajpacaca huan nojquiya quintamacac in-inburrojhua. ²⁵ Huan injuanti quicualtalijque cati quimacacaj José huan quichixque para ma ajsi tajcotona pampa quicactoyaj para tacuasquía inihuaya.

²⁶ Huan quema José ajsito ichaj, quimacaque cati quihuiquilijtoyaj, huan motancuaquetzque huan mohujtzonque hasta talchi para quitepanitase.

²⁷ Huan José quintatzintoquili quenicatza itztoyaj huan nojquiya quihhui: —¿Quenicatza itztoc amotata, nopa tatatzi cati antechcamanalhuijque? ¿Noja itztoc?

²⁸ Huan injuanti quihhuijque:

—Totata, motequipanojca, noja itztoc huan itztoc cuali.

²⁹ Huan José quixtemo Benjamín hasta quipanti. Elqui inelicni cati quitacatilti inana. Huan José quijto:

—¿Ya ni amoicni teipan ejquet cati antechcamanalhuijque?

Huan José quihhui Benjamín:

—¡Ma Toteco Dios mitztiochihua, nocone!

³⁰ Huan quema José quijto ya ni, monejqui moyoltetilis para amo chocas iniixpa pampa sempa quiitac iicni. Huan nimantzi quistihuetzqui, huan calajqui ipan icuarto huan nozona tahuel miyac chocac. ³¹ Teipa quema huelqui moyoltali, mixami huan mocuetqui campa itztoyaj iicnihua. Teipa quihhui itequipanojcahua: “¡Xijtecaca ne tucalísti!”

³² Huan quitequilijque José itacualis iseltitzi ipan se mesa, huan iicnihua ipan seyoc. Huan ipan seyoc mesa quintequilijque nopa egiptome cati

tacuayayaj ihuaya José. Pampa tali Egipto ehuani quiniyayayaj hebreo masehualme huan amo tacuayayaj inihuaya. ³³ Huan José quinilhui sese iicnihua canque mosehuisse. Quinsehui quej tacajtiyajque ten achtohui ejquet hasta cati teipan ejquet. Pejqui ica cati más hueyi hasta cati más pilsiltzi. Huan nopa icnime san motachilijque. ³⁴ Huan quema quitequillijque nopa tacualisti cati eltoya ipan imesa José, Benjamín quitequillijque macuili hueltas más imiyaca que cati quitequillijque ne sequinoc. Huan quej nopa san sejco taique huan tacuajque.

44

Icaxi José

¹ Teipa José quihhui itayacanca tequipanojca:

—Xijtemiti inincoxtal ni tacame ica nochi trigo cati hueli quihucase huan xijtali sese inintomi ipan icamac inincoxtal. ² Nojquiya xijtali nocaxi ten plata ipan icoxtal iniicni cati teipan ejquet, ihuaya nopa tomi cati taxtajqui para trigo.

Huan nopa tequipanojquet quichijqui quej José quinquahuatijtoya. ³ Huan quema sanoc tanestoya, José quincahuili iicnihua ma yaca ihuaya ininburrohua. ⁴ Pero ayemo huejca yajtoyaj ten nopa altepet quema José quihhui itequipanojca:

—Xiya xiquintoquili nopa tacame huan quema tiquinajsiti, xiquinilhui: ‘¿Para ten anquicuctoque cati cuali ica cati amo cuali? ¿Para ten anquichtectoque nopa caxit ten plata ⁵ cati noteco quitequihúa para ipan atis huan para quuitas cati panos teipa? ¡Anquichijtoque cati fiero!’

⁶ Huan quema nopa tequipanojquet quinajsito, quinilhui nochi ya ni. ⁷ Huan nopa icnime quihhuijque:

—¿Para ten techcamanalhuía quej nopa? ¡Amo quema tijchihuasquía nopa tamanti! ⁸ Xiquita, sempa tijhualicaque ten tali Canaán nopa tomi cati eltoya ipan tocoxtal. ¿Quenicatza tiquichtequise oro o plata ten ichaj moteco? ⁹ ¡Ma miqui cati hueli ten tojuanti cati tijpantilis nopa caxit huan nochi tojuanti timitztequipanose san tapic!

¹⁰ Huajca nopa tequipanojquet quijto:

—Cualtitoc cati anquijtohuaj, pero san yaya cati quipiya nopa caxit techtequipanos san tapic. Nopa sequij amo quipiyase tajfacoli.

¹¹ Huan sesen ten inijuanti nimantzi quitemohui icoxtal huan quitapo. ¹² Huan nopa tequipanojquet quitemo ipan sesen coxtali. Pejqui ica cati achtohui ejquet hasta nopa teipan ejquet huan quipanti nopa caxit ipan Benjamín icoxtal. ¹³ Huajca quitzayanque iniyoyo ica hueyi tequipacholi. Huan teipa quintamamaltijque ininburrohua huan mocuetque ipan nopa altepet. ¹⁴ Huan quema Judá huan iicnihua ajsitoy ichaj José, ya noja itztoya nopona. Huan motancaquetzque iixpa huan mohujtzonque talchi, ¹⁵ huan José quinilhui:

—¿Taya anquichijtoque? ¿Amo anquimatij para se tacat quej na quimati cati quichihua sequinoc?

¹⁶ Huan Judá quijto:

—¿Taya huelis timitznanquilise? ¿Quenicatza huelis tijnextise para amo tijchijtoque? Toteco Dios techpantijtoque titajtacolchijtoque. Huajca nica tiztoque huan timitztequipanose san tapic ihuaya cati quipixtoya nopa caxit.

¹⁷ Pero José quijto:

—Amo, amo quej nopa. San ya ne cati quipiyayaya nopa caxit techte-quipanos san tapic. Huan nopa sequinoc ten amojuanti huelis antacuepilise ica cuali hasta ichaj amotata.

Judá quinejqui quiselis itatzacuiltis Benjamín

¹⁸ Huajca Judá monechcahui campa José huan quihlhuí:

—Na nimitztajtania, noteco, para techcahuili nimitzilhuis se tamanti cati amo aquí quimati. Xijchihua se favor, amo xicalani nohuaya pampa tieltoc quej Faraón. ¹⁹ Achtohui ta techtatzintoquili sinta tijpiyayaj totata huan ten seyoc totaca icni. ²⁰ Huan timitzilhuique para tijpiyaj totata cati huehuentzi huan tijpiyaj se toicni cati neltelpocat cati tacatqui quema totata eliyaya nelhuehuentzi. Huan timitzilhuique para totata quicnelia miyac. San ya mocahua ten inana. Nopa seyoc icni ya mijqui. ²¹ Huajca techtajtani ma tijhualicaca pampa tijnequiyaya tiquixmatis. ²² Huan timitzilhuique nopa telpocat amo hueli quicajtehua itata. Sinta quicajtehuasquia, itata miquisquia. ²³ Pero ta techilhui sinta ya amo hualasquia tohuaya, ayecmo techselisquia.

²⁴ “Huajca quema timocuetque campa totata, tijpohuilijque nochí cati techilhuijtoya. ²⁵ Huan teipa totata techilhui ma tihualaca tijcohuaquij se quentzi trigo. ²⁶ Pero tiquilhuique para amo hueli tihualase sinta toicni teipan ejquet amo hualas tohuaya. Sinta amo tohuaya huala, amo huelis timitzitase. ²⁷ Huan totata techilhui: ‘Anquimatij nosihua nechmacac ome noconeua. ²⁸ Huan se ten nopa ome quisqui huan nimoilhuía se tecuani quicaujqui pampa hasta ama ayecmo niquitztoc. ²⁹ Sinta anquihuicaj huejca ni seyoc nocone huan sinta ipantisi se tamanti cati fiero, antechchihuase ma nihuehujmiqui ica tequipacholi.’

³⁰ “Yeca sinta toicni amo tacuepilis tohuaya, ³¹ totata cati ya nelhuehuentzi nimantzi miquis ica tequipacholi pampa amo quiitas. Huan tijhuicase tajtacoli por imiquilis. ³² Na niquilhui notata para ma quicahua nomaco huan nijmocuitahuisquia. Nojquiya niquilhui para sinta amo nijcuepilis, huajca nijhuicas tajtacoli iixpa para nochípa. ³³ Yeca nimitztajtania, techcahuili ma nimocahua na para nimitztequipanos huan amo ya. Xijcahuili ma tacuepili ihuaya iicnihua. ³⁴ ¿Pampa quenicatza huelis nitacuepilis huan niquitas notata, sinta noicni amo yahui nohuaya? Amo nijnequi niquitas quenicatza taijyohuis notata.”

45

José quinilhui iicnihua ajquiya ya

¹ Huan José ayecmo huelqui moijyohuía para amo chocas iniixpa itequipanojcahua cati itztoyaj nozona. Huan chicahuac quinilhui: “¡Xiquisaca nochí amojuanti cati anitztoque nica!”

Huajca nochí itapalehuicahua quisque pampa José quinequiyaya itztos iseltitzi ica iicnihua quema quinilhui ajquiya ya.

² Huan yaya pejqú choca chicahuac hasta nochí nopa egiptome ipan ichaj quicajque. Huan ajsic nopa camanali hasta nopa hueyi tequicali campa itztoc Faraón. ³ Huan José quinilhui iicnihua:

—Na niJosé. ¿Noja itztoc notata?

Huan iicnihua tahuel momajmatijque iixpa hasta amo hueliyayaj camanaltij. ⁴ Pero ya quinilhui:

—Ximonechcahuica campa na.

Huan quema monechcahuique campa ya, yaya quinilhui:

—Na niamoicni José cati antechnamacaque para ma nechhualicaca tali Egipto. ⁵ Amo ximocuesoca, yon amo ximocualanica pampa antechnamacaque. Toteco Dios nechtitanqui nica achtohui que amouanti para amo timiquise. ⁶ Ya panoc ome xihuit ica mayanti ipan ni tali, pero noja polihui seyoc macuili xihuit quema amo oncas yon quentzi pioxuisti huan amo aqui huelis tatojtocas. ⁷ Toteco Dios nechtitanqui nica achtohui que amouanti para nijmanahuis amonemilis para ma mocahuaca amoteipan ixhuihua para mochihuase tahuel miyac masehualme ipan taltpacti. ⁸ Huajca amo elqui amouanti cati antechtitanque nica. ¡Amo! Elqui Toteco cati nechtitanqui, huan nechtalijtoc niitapalehuijca Faraón huan na cati nijconsejomaca. Yaya nechtalijtoc ma nitanahuati ipan ichaj huan ma nieli nigobernador ipan nochi ni tali Egipto. ⁹ Huajca xiyaca nimantzi campa itztoc notata huan xiquilhuica para icone, José, quijtohua para Toteco Dios nechtalijtoc ma nitanahuati ipan nochi tali Egipto. Huajca nimantzi ma huala nechitaqui. Ma amo huejcahua. ¹⁰ Huelis itztos nonechca, nozona campa itoca Gosén nica ipan tali Egipto ihuaya amouanti, huan amonehua, huan amoixhuihua, huan nochi amotapiyalhua huan nochi cati anquipiyaj. ¹¹ Nica nimechmacas tacualisti para nochi amofamilia huan nochi cati itztoque amohuaya para amo teno quinpolos. Noja oncas ni mayanti para seyoc macuili xihuit. Sinta amo hualas, amouanti huan nochi cati anquipiyaj tahuel antaijyohuise.

¹² Teipa José quijto:

—Xiquitaca amouanti huan Benjamín para nelía na niJosé. ¹³ Huajca xijpohuilica notata taya tanahuatili nijpiya nica ipan Egipto huan nochi cati anquitztoque nica. San monequi nimantzi xijhualica notata.

¹⁴ Huan José ica nochi iyolo quicuanajnahuaqqui icni Benjamín huan chocac miyac iquechpa. Huan Benjamín quicuanajnahuaqtoc chocac ipan José. ¹⁵ Teipa José quintzoponi nochi iicnihua huan chocac quema quincuanajnahuaqqui. Huan teipa iicnihua pejqque quicamanalhuaj.

¹⁶ Huan ipan ichaj Faraón quicajque para ajsicoj iicnihua José huan nelía pajque Faraón huan nochi itapalehuijcahua. ¹⁷ Huan Faraón quilhui José:

—Xiquinilhui moicnihua ma quintamamaltica inintapiyalhua huan ma tacuepilica ipan tali Canaán, ¹⁸ huan ma nechhualiquilica amotata huan nochi ininteixmatcahua. Na niquinmacas nopa tali cati más cuali ipan nochi ni tali Egipto. Huan quicuase cati más cuali cati ni tali temaca. ¹⁹ Xiquinilhui ma quihuicaca cuacarrojme ten tali Egipto para ma quinhualicaca inisihua-jhua ihuaya ininonehua huan amotata. ²⁰ Ma amo mocuesoca ica cati ama quipiyaj. Nochi cati cuali cati onca ipan ni tali Egipto teipa elis iniaxca.

²¹ Huan quej nopa quichijque itelpocahua Israel. Huan José quinmacac cuacarrojme quej Faraón tanahuatijtoya huan quinmacac tacualisti para ipan ojtí. ²² Nojquiya quinmacac yoyomit yancuic para mopatase, pero Benjamín quimacac 300 tomi ten plata huan macuili iyoyo para mopatas. ²³ Huan para itata José quititanili majtacti burrojme tamamajtoque ica tamanti cati onca ipan tali Egipto huan nojquiya quinmacac seyoc majtacti burrojme tamamajtoque ica trigo, pantzi huan tacualisti para ma tacua itata ipan ojtí. ²⁴ Huan quema José quinmajcajqui iicnihua, quinhui:

—Amo ximonajnanquilica ipan ojtí.

Huan injuante yajque. ²⁵ Huan quisque ipan tali Egipto huan ajsitoj ipan tali Canaán campa itztoc inintata, Jacob. ²⁶ Huan quema quipohuilijque Jacob para José noja itztoc huan yaya cati tanahuatiyaya ipan nochi tali Egipto, amo quimatiyaya taya quijtos, yon taya quichihuas pampa amo

hueliyaya quineltoca. ²⁷ Pero quema quipohuilijque nochi cati José quijto-jtoya huan quema quinitac nopa cuacarrojme cati José quintitantoya para quinhuicase, nella pajqui miyac. ²⁸ Huan huajca quijto: “Nelia temachtí, nocone José noja itztoc huan amo nimiquis hasta niyas niqitatí.”

46

Jacob yajqui tali Egipto

¹ Huan Israel, cati nojquiya itoca eliyaya Jacob, quisqui ipan ojti ica nochi cati quipiyayaya. Huan quema ajsito ipan Beerseba, quimacac se tacajc ahualisti Toteco Dios, yaya cati nojquiya iTeco itata, Isaac. ² Huan nopa tayohua Toteco quicamanalhui Israel ipan se temicti, huan quinojnotzqui ica itoca Jacob. Huan Jacob quinanquili:

—Nica niitztoc, noTeco.

³ Huajca Toteco Dios quihlhu:

—Na niDios nimoTeco. Na niiTeco motata. Amo ximajmahui para tiyas tali Egipto pampa nopona nijchihuas para moteipan ixhuihua tahuel momiyaquulise hasta mochihuase se altepet ica tahuel miyac masehualme ica san se inieso. ⁴ Na niyas mohuaya ipan Egipto huan teipa niquinquixtis moteipan ixhuihua nopona. Quema timiquis, motelpoca José itztos mon-echca.

⁵ Huan itelpocahua Jacob quitejcoltijque inintata, huan inincone hua huan inisihuahua ipan nopa cuacarros cati Faraón quintitantoya huan yajque. Huan quej nopa Israel quistejqui ten Beerseba. ⁶ Huan Jacob huan itelpocahua quinhuicaque inintapiyálhua huan nochi cati quipixtoyaj ipan tali Canaán. ⁷ Yajque nochi iconehua huan iixhuihua; tacame huan sihuame.

⁸ Nica nimitzilhuas inintoca itelpocahua huan iteipan ixhuihua Israel o Jacob cati yajque tali Egipto.

⁹ Yajqui Rubén iachtohui cone Jacob.

Yajque iconehua Rubén:

Hanoc, Falú, Hezrón huan Carmi.

¹⁰ Yajque Simeón huan iconehua:

Jemuel, Jamín, Ohad, Jaquín, Zohar huan Saúl cati eliyaya icone se sihuat cananea.

¹¹ Yajque Leví huan iconehua:

Gersón, Coat huan Merari.

¹² Yajque Judá huan iconehua:

Sela, Fares huan Zara. Pero iconehua cati inintoca Er huan Onán ya mictoyaj ipan tali Canaán. Huan iconehua Fares elque:

Hezrón huan Hamul.

¹³ Yajque Isacar huan iconehua:

Tola, Fúa, Job huan Simrón.

¹⁴ Yajque Zabulón huan iconehua cati inintoca eliyaya:

Sered, Elón huan Jahleel.

¹⁵ Nochi ni tacame cati nimitzilhuijtoc nica elque iconehua Jacob ihuaya Lea huan yajque tali Egipto ica Jacob. Huan nochi ni inincone hua tacatque quema itztoyaj ipan tali Aram. Nojquiya Jacob huan Lea quipixque se iniichpoca cati itoca Dina. Inincone hua huan iniixhuihua Jacob huan Lea mochijque 33.

¹⁶ Nojquiya yajque tali Egipto Gad huan iconehua:

Zifión, Hagui, Ezbón, Suni, Eri, Arodi huan Areli.

¹⁷ Yajque Aser huan iconehua:

Imna, Isúa, Isúi, Bería huan inisihua icni cati itoca Sera.
 Huan Bería ya quinpixqui iconehua:
 Heber huan Malquiel.

¹⁸ Cati nimitzilhuijtoc nica elque iconehua Jacob ica Zilpa huan yajque tali Egipto inihuaya. Zilpa elqui nopa tequipanojquet cati Labán quimacac iichpoca, Lea, huan teipa Lea quimacac ihuehue para ma eli isihua. Huan iniconehua huan inixhuihua Jacob ihuaya Zilpa elque 16 masehualme para nochi.

¹⁹ Huan nojquiya yajque iconehua Raquel, isihua Jacob cati mijqui, huan inintoca iniconehua elque:

José huan Benjamín. ²⁰ Huan ipan Egipto José quinpixqui coneme ihuaya isihua Asenat. Asenat elqui iichpoca Potifera, cati eliyaya se totajtzi nopona ipan altepet On. Iniconehua elque: Manasés huan Efraín.

²¹ Huan iconehua Benjamín elque:

Bela, Bequer, Asbel, Gera, Naamán, Ehi, Ros, Mupim, Hupim huan Ard.

²² Cati nimitzilhuijtoc nica elque iconehua huan iixhuihua Raquel huan Jacob. Huan mochijque 14 masehualme para nochi.

²³ Huan nojquiya yajque tali Egipto Dan, icone Jacob, huan icone: Husim.

²⁴ Huan nojquiya yajque Neftalí huan iconehua: Jahzeel, Guni, Jeser huan Silem.

²⁵ Huan injuanti elque iconehua Bilha, nopa tequipanojquet cati Labán quimacac iichpoca, Raquel, huan teipa Raquel quimacac Jacob para ma eli isihua. Huan iconehua huan iixhuihua Jacob ica Bilha elque chicome para nochi.

²⁶ Huan para nochi nopa masehualme cati yajque Egipto ihuaya Jacob cati nelía san se inieso elque 66, huan amo quipojque inintelpocahua inisihujhua. ²⁷ Huan ica nopa ome iconehua José cati tacatque ipan Egipto mochijque 70 masehualme ipan ifamilia Jacob quema ajsitoj nopona.

²⁸ Huan Jacob quititanqui Judá ma tayacana para quiitati José huan quimachiltis para ma quinamiquiqui ipan tali Gosén. Huan quema Judá ajsito campa José, ²⁹ yaya tanahuati ma quicualtica icuacarro para yas quinamiquiti itata. Huan quema ajsito iixpa itata, quinajnahujqui huan huejcajqqui choca ipan iajcol. ³⁰ Huan Israel quiilhui José:

—Ama ya huelis nimiquis pampa nelía nimitzitztoc ica noixteyol huan nimitzpanti noja tiitztoc.

³¹ Huan José quinilhui iicnihua huan nochi ifamilia itata:

—Niyas niquitati Faraón para nijyolmelahuati para ya anajsitoque. Niquihuis para noicnihua huan iteixmatcahua notata cati itztoyaj ipan tali Canaán ya hualajtoque para mocahuase nohuaya. ³² Huan quinhualicatoque ininborregojhua, inihuacaxhua huan nochi cati quipiyaj pampa inintequi eltoc para quinmocuitahuíaj borregojme huan quiniscaltíaj tapiyalme. Quej nopa niquilhuis. ³³ Huajca quema nopa Faraón amechnotzas huan amechtatzintocquis ipan taya antequitij, ³⁴ xiquilhuica para nochipa anquiniscaltijtoque borregojme, san se quej amohuejcapan tatahua. Quej nopa amechcahuilis anmocahuase ipan tali Gosén pampa egiptome quini-jiyaj cati quinmocuitahuíaj borregojme huan amo quinequij itztose inihuaya.

47

¹ Huan José yajqui quiyolmelahuato Faraón huan quiilhui para itata huan iicnihua ya ajsicoj ten tali Canaán huan itztoyaj ipan tali Gosén ihuaya ininborregojhua, huan inihuacaxhua huan nochi cati quipiyaj. ² Huan quintapejpeni macuiliti iicnihua huan quinhuicac iixpa Faraón para ma quinixmatica. ³ Huan Faraón quintatzintoquili:

—¿Taya tequit anquichihua?

Huan injuanti quiilhuijque:

—Tojuanti, timotequipanojcahua, tiquinmocuitahuaj borregojme quej tohuejcapan tatahua quichijque. ⁴ Huan tihualajtoque para timocahuase ipan ni tali pampa amo onca sacat para toborregojhua nepa ipan tali Canaán pampa nopa mayanti taniel chicahuac nopona. Se favor, totanahuatijca, techcahuili ma timocahuaca ipan tali Gosén.

⁵ Huan Faraón quiilhui José:

—Motata huan moicnihua hualajtoque para mocahuase nica mohuaya.

⁶ Huajca huelis quitequihuse campa más cuali ipan ni tali Egipto. Xiquinmaca nopa tali Gosén para nopona ma mocahuaca pampa nelcuali. Huan sinta tijmati sequij ten injuanti cati más quimatij nopa tequit, huajca xiquintali nochi notapiyalhua inimaco.

⁷ Teipa José quihuicac itata, Jacob, iixpa Faraón para ma quiixmati. Huan Jacob quitiochijqui Faraón, ⁸ huan Faraón quiilhui:

—¿Quesqui xihuit tijpiya?

⁹ Huan Jacob quinanguili:

—Nijpanotoc 130 xihuit cati nelohui. Pero ya nopa nelquentzi pampa ayemo nicajsi nopa xihuit cati nohuejcapan tatahua itztoyaj.

¹⁰ Teipa Jacob quinahuatijtejqqui Faraón huan quisqui. ¹¹ Huan José quimacac itata huan iicnihua nopa talme cati más cuali ipan tali Egipto, nopa tali cati itoca Ramesés para ma itztoca nopona quej Faraón tanahuatijtoya.

¹² Nojquiya José quinmacayaya tacualisti nochi iteixmatcahua quej sese injuanti monejqui para quitequihuse.

José tenamaquilti trigo ipan nopa mayanti

¹³ Huan teipa ipan yon se tali ayecmo oncac tacualisti pampa nopa mayanti más motananqui. Ipan tali Egipto huan ipan tali Canaán nochi tahuajqui. ¹⁴ Huan nochi tomi ipan tali Egipto huan ipan tali Canaán ajsico imaco José pampa quinamacayaya trigo. Huan yaya quihuicac nopa tomi tequicalco campa itztoya Faraón. ¹⁵ Huan quema ayecmo aqui quipixqui tomi ipan tali Egipto huan ipan tali Canaán, nopa egiptome yajque quiilhuitoj José:

—¡Techmaca cati tijcuase! Amo techcahuili ma tiapismiquica moixpa san pampa ya tanqui totomi.

¹⁶ Huan José quinnanguili:

—Sinta ayecmo anquipiyaj tomi, huajca xiquinhualicaca amotapiyalhua huan nimechpatilis ica trigo.

¹⁷ Huan nopa egiptome quinhuicaque inincahuayojhua, ininborregojhua, ininchorrojhua, inihuacaxhua huan ininburrojhua, huan José quinpatili ica trigo. Quej nopa quinpanolti nochi nopa xihuit. ¹⁸ Huan quema panoc nopa xihuit, injuanti sempa yajque quiilhuitoj José:

—Ta tijmati ayecmo tijpiyaj tomi huan ama nochi totapiyalhua amoaxca. Ayecmo tijpiyaj seyoc tamanti cati huelis timitzmacase, san total mocahua huan totacayohua. ¹⁹ Pero amo techcahuili ma tiapismiquica moixpa.

Techcohua tojuanti ihuaya totalhua ica trigo. Huan tijtequipanose Faraón san tapic huan totalhua elis iaxca, pero techmaca trigo para tiitztose huan para ni tali ma amo nenpolihuis.

²⁰ Huajca José quicojqui para Faraón nochi piltaltziti ipan tali Egipto pampa nochi nopa egiptome quinamacaque inintalhua pampa amo huelque quiiyohuáj nopa mayanti. Quej nopa nochi nopa tali panoc imaco Faraón. ²¹ Huan José quinchijqui nopa egiptome campa hueli ma elica tequipanohuani cati tequitique san tapic. ²² Pero amo quicojqui inintal nopa totajtziti pampa Faraón quinmacayaya trigo san tapic. Huan amo monejqui quinamacase inintalhua.

²³ Teipa José quinihui nopa egiptome:

—Ama amojuanti ihuaya amotalhua anmocahuaj iaxca Faraón pampa nimechcojtoc para anelise iaxca ya. Nica anquipiyaj xinachti para xijtocaca.

²⁴ Pero quema anpixcase, monequi anquixelose nopa pixquisti cati oncas ica macuili partes. Se parte elis iaxca Faraón huan nopa seyoc nahui partes elis amoaxca para anquitocase, huan para anquicuase amojuanti huan amoconehua huan cati itztoque ipan amochajchaj.

²⁵ Huan inijuanti tananquilijque:

—Techmanahujtoc para amo timiquise. Ica paquilisti tijtequipanose Faraón san tapic.

²⁶ Huajca José quichijqui nopa tanahuatili ipan nochi tali Egipto para ipan sesen macuili coxtali cati pixcase monequi quimacase Faraón se coxtali. Huan ni tanahuatili noja quitoquiláj. Pero nopa totajtziti amo teno monjqui taxtahuase pampa inintalhua amo quema elqui iaxca Faraón.

Jacob quinequiyaya motalpachos ipan tali Canaán

²⁷ Huan nopa israelitame mocajque ipan nopa piltaltzi Gosén ipan tali Egipto huan nozona nochi quisqui cuali para inijuanti. Huan inijuanti tahuel momiyaquilijque. ²⁸ Huan Jacob itztoya 17 xihuit ipan Egipto huan quiaxiti 147 xihuit.

²⁹ Huan se tonali Israel quimatqui ayecmo huejcahuas para miquis, huajca tatitanqui ma quinoztatij José huan quiihui:

—Se favor, xijtali momax noquescuayotzinta huan xijtestigojquetza Toteco para tijchihuas cati nimitztajtanis. Amo techtocas nica ipan tali Egipto. ³⁰ Quema nimiquis huan nimosiyajquetzati ihuaya nohuejcapan tatahua, techhuica huan techtoaca campa inijuanti toctoque.

Huan José quiihui:

—Quena, quej nopa nijchihuas.

³¹ Huan itata sempa quiihui:

—¡Xijtestigojquetza Toteco Dios!

Huan José quitestigojquetzqui Toteco Dios para temachti quichihuas. Huan huajca Israel mohuijtzonqui ica itzonteco ipan icuatopil huan quihueyichijqui Toteco.

48

Jacob quitiochijqui Efraín huan Manasés

¹ Teipa quema panotoya se quentzi tonali quiihuijque José para itata mococohua. Huajca José yajqui quiihato huan quihuicac iome telpocahua, Manasés huan Efraín. ² Huan quema quiyolmelajque Jacob para icone, José, ajsitoya para quiihato, quichijqui campeca huan mosehui ipan itapech.

³ Huan quiihui José:

—Toteco Dios Cati Quipiya Nochi Chicahualisti monexti campa niitztoya nechca altepet Luz ipan tali Canaán huan techtiochijqui. ⁴ Huan techilhui para quinmiyaquilis noconeuhua huan noteipan ixhuihua hasta mochiuase tahuel miyac masehualme. Nojquiya techilhui para noteipan ixhuihua quinmacasquía nopa tali huan elis iniaxca para nochipa. ⁵ Huajca ama huan teipa ni ome moconeuhua, Efraín huan Manasés, cati tacatque nica ipan tali Egipto quema ayemo niajsiyaya elise quej noaxcahua para quiselise san se quej Rubén huan Simeón quiselise. ⁶ Pero nopa moconeuhua cati tacatise teipa elise moaxcahua ta. Huan inijuanti quiselise cati iniaxca ipan nopa tali cati elis iniaxca Efraín huan Manasés. ⁷ Quema nitacuepiiyaya ten tali Aram, mijqui monana Raquel ipan Canaán quema tinejnemiyayaj ipan ojtí huan san quentzi polihuiyaya para tiajsitij altepet Efrata. Huan nijtojqui nopona ipan ojtí para altepet Efrata cati ama itoca Belén.

⁸ Huan Israel quinitac itelpocahua José huan quijito:

—Huan ¿ni telpocame?

⁹ Huan ya quihhui:

—Ni noconeuhua cati Toteco Dios nechmacatoc nica ipan tali Egipto.

Huan itata quihhui:

—Xijchihua se favor, xiquinnechahuilti campa na para niquinmacas notatíoehual.

¹⁰ Huan Israel eliyaya nelhuehuentzi huan ayecmo cuali iixteyol, huan yeca ayecmo hueliyaya tachiya cuali. Huan José quinnehcahuilti itelpocahua campa itata, huan Jacob quintzoponi huan quinnajnahuaqqui. ¹¹ Teipa Jacob quihhui José:

—Ayecmo nijchiyayaya para sempa nimitzitas huan masque ya nopa, Toteco Dios nechcahuilijto nojquiya ma niquinita moconeuhua.

¹² Huan José quinjcueni itelpocahua cati itztoyaj nechca itancuaco itata, huan motancuaquetzqui huan mohuijzonqui talchi ica hueyi tatepanitacayot iixpa itata. ¹³ Huan teipa José quinmatilanqui nopa ome itelpocahua huan quitali Efraín ica inejmat huan Manasés ica iarraves, huan quinnehcahuilti campa itata, Israel. Quej nopa Efraín mocajqui ica iarraves Israel huan Manasés ica inejmat. ¹⁴ Pero quema Israel quixitajqui imax, momanepano huan quitali inejmat ipan itzonteco Efraín cati eliyaya teipan ejquet, huan quitali iarraves ipan itzonteco Manasés cati eliyaya achtohui ejquet. ¹⁵ Huajca Israel quintiochijqui quej ni:

“Ma Toteco Dios quintiochihua ni telpocame.

Yaya nopa Dios cati ihuaya nejnenque notatahua Abraham huan Isaac, huan cati nechmocuitahuijto nochi nonemilis.

¹⁶ Yaya nopa Ilhuicac ejquet cati nechmanahuijtinencoc ten nochi cati fiero. Yaya ma quintiochihua ni telpocame.

Huan nochi masehualme ma quimatica inijuanti noaxcahua,

huan iniaxcahua notatahua, Abraham huan Isaac.

Ma quinqiyaca miyac ininconeuhua huan ma tahuel momiyaquilica inin-teipan ixhuihua ipan taltipacti.”

¹⁷ Pero José amo quipacti para itata quitallijtoya inejmat ipan itzonteco Efraín huan quitzquili imax para quijjcuenis huan quitallis ipan itzonteco Manasés. ¹⁸ Quihhui:

—¡Amo, papá! Ya ni cati achtohui ejquet. Xijtali monejmat ipan itzonteco.

¹⁹ Pero itata amo quinejqui quichihuas huan quihhui:

—Nijmati, nocone, ya nijmati. Nojquiya iteipan ixhuihua mochiuase nelía miyac masehualme cati nochi quintepanitase. Pero iicni teipan ejquet

elis más hueyi que ya huan iteipan ixhuihua iicni más momiyaquilise huan mochihuase miyac talme.

²⁰ Huajca ipan nopa tonali Jacob quintiochijqui Efraín huan Manasés huan quinihui:

“Nochi sequinoc noteipan ixhuihua quitequihuse amotoca para tatiochi-huase huan quijjtose:

‘Toteco Dios ma mitzchihua hueyi quej quinchijqui Efraín huan Manasés.’ ” Quej nopa Israel quitali para Efraín elis más hueyi huan teipa Manasés.

²¹ Teipa Israel quinihui itelpoca, José:

—Xiquita, ya ajsitinemi nopa tonali para nimiquis, pero Toteco Dios itztos amohuaya huan quichihuas para sempa xiyaca ipan inintal mohuejcapan tatahua. ²² Huan nimitzmacatoc ta nopa tali cati más cuali que nopa cati niquinmacac moicnihua pampa más tihueyi. Yeca nimitzmaca cati niquin-quixtili nopa amorreo masehualme ica nomacheta huan nocuahuitol.

49

Itayacapan camanal Jacob

¹ Huan Jacob quinnotzqui itelpocahua huan quinihui: “Ximonechcahuica huan nimechilhuis cati amechpanos teipa.

² Noconehua, ximonechcahuica huan techcaquica.

Na niJacob huan amojuanti annoconehua.

Techtacaquilica niamotata, Israel.

³ Ta Rubén, tinoachtohui cone.

Tieliyaya tinochichualis huan quema titacatqui eltoya quej nopa achtohui iselca notetilis.

Tijpiyas miyac chicahualisti huan tatepanitacayot.

⁴ Pero ayecmo tielis cati más tihueyi,

pampa tiitztoc quej at cati tehuilana.

Quej nopa eltoc pampa techpinahualti quema timotejqui ipan notapech ihuaya notequipanojca.

⁵ Simeón huan Leví nelía anicnime pampa san se amonemilis.

Amomachetas anquitequihuíaj san para tatehuilisti.

⁶ ¡Amo quema nijnequi nijcaquis amocamanal,

yon amo quema nimosentilis amohuaya!

Pampa quema ancualaniyayaj, antemictijque,

huan san pampa anquinejque, anquinmetzpostejque torojme.

⁷ ¡Tatelchihualtic, quena, tatelchihualtic amocualancayo,

pampa annelfierojtique huan amo antatasojtaj!

¡Nimechsemanas huan anitztose campa hueli ipan nochi tali Israel!

⁸ Ta tiJudá, moicnihua mitzpaquilismacase.

Huan tiquinizquis mocualancaitacahua ininguechta huan tiquintanis.

Hasta moicnihua motancaquetzase para mitztepanitase.

⁹ Ta tiJudá, tielis quej icone se tecuani cati tacuepili pactoc por nopa tapiyali cati quimictijtoc.

Tielis quej se león cati mopachohua huan moteca talchi,

huan quichiya taya quitzquis.

Tielis quej se sihua león cati nelía quiyiya tetili.

Amo aquí mitzcuesolmacas.

¹⁰ Amo aquí huelis quiquixtis nopa tanahuatili cati moteipan ixhuihua quiyiyase.

Yon amo aqui hueli quinquixtilis nopa tepos cuatopili cati quipiyase para ica tetatzacuiltise.

Quipiyase tanahuatili para nochipa.

Huan teipa hualas moteipan ixhui cati temacas tasehuilisti.

Yaya cati nelía iaxca nopa tepos cuatopili huan nopa tanahuatili para tanahuatis.

Huan masehualme ipan nochi talme campa hueli quichihuase cati yaya quinilhuía.

¹¹ Elis se tominpixquet huan campa hueli oncas xocomeca mili cati iaxca.

Quilpis iburro ipan ten hueli xocomeca tzonti cati quinequis, huan sinta quinequi, quilpis ipilconeburro ipan nopa xocomeca macuayot cati más cuali.

Quipiyas miyac xocomecat iayo hasta nesis quej huelis ica quichicuenis iyoyo.

Quena, hasta mocahuas quipiyas iayo xocomecat cati temacas nochi imil.

¹² Iixteyol elis más yayahuic que xocomecat iayo,

huan itancochhua más chipahuac que lechi.

¹³ Ta tiZabulón, moteipan ixhuihua itztose iteno hueyi at,

huan nopona ajsise miyac cuaacalme.

Motal ajsis hasta tali Sidón.

¹⁴ Ta tiIsacar, moteipan ixhuihua elise tejtetique quej se tapiyali cati quimati tamama etic.

Mosiyajquetzase campa quintzacuaj borregojme.

¹⁵ Quema quítase quenicatza nelía cuali amotal para ipan anmosiyajquetzase huan quenicatza nelía yejyetzzi,

huajca motancuaquetzase huan mociuitapantise para tamamase.

Huan yon amo molinise moteipan ixhuihua quema quinchihuase ma tequipanoca san tapic.

¹⁶ Ta tiDan, ta huan moixhuihua antetajtolsencahuase quej quinamiqui pampa anelise se hueyi familia ipan tali Israel.

¹⁷ Moteipan ixhuihua elise quej se cohuat cati itztoc ojtipa,

huan quintzacanía inincotzta cahuayojme huan quintahuisohua cati tejco-toque ipan cahuayojme.

¹⁸ ¡TOTECO! Nijchiya para techmanahuis.

¹⁹ Ta tiGad, miyac soldados hualase huan quintehuisse moteipan ixhuihua, pero teipa injuanti moicancuepase huan quinquixtijiyase.

²⁰ Ta tiAser, moteipan ixhuihua quipiyase tacualisti cati cuali.

Quena, temacase facualisti cati ajhuiyac quej cati quicuj huejhueyi tanahuatiani.

²¹ Ta tiNefalí, moteipan ixhuihua elise quej se masat cati nemi campa quinequi huan cati quintacatiltía yejyetzzi pilconemasatzitzi.

²² Ta tiJosé, moteipan ixhuihua elise quej se cuali cuahuit cati quitoctoque campa ameli.

Temaca miyac itajca huan imacuayohua moscaltía miyac hasta quipano nopa tepamit cati tilahuac.

²³ Masehualme quincualancaitase moteipan ixhuihua, huan quinmajcahuilise cuataminti huan nochipa quinmacase tequipacholi.

²⁴ Pero moteipan ixhuihua quiquetzase inincuahuitol xitahuac, huan amo huilhuipicase inimax quema quitequihuisse pampa elise tejtetique.

Quena, tatanise pampa noTeco Dios, Yaya Cati Quipiya Nochi Chicahualisti quinpalehuis.

Yaya quinmocuitahuis pampa yaya totamocuitahuijca tiisraelitame.

Yaya nopa Hueyi Tet cati techmanahuijtoc miyac huelta.

²⁵ Quena, ma amechpalehui ininTeco mohuejcapan tatahua.

Ma amechtiochihua ta huan amoteipan ixhuihua yaya Toteco Dios cati quipiya nochi chicahualisti.

Ma qaintiochihuas moteipan ixhuihua ica miyac tatiochihualisti quej at cati huala ten huejcapa ipan ilhuicac,

huan cati huala huejcata ipan hueyi at huan quichihuas ma moscaltis amomilhua.

Ma mitztiochihuas ta huan moteipan ixhuihua huan mosihuajhua.

Ma amechmacas miyac amoconehua cati moscaltise cuali.

Ma tahuel momiyaquilica amotapiyalhua.

²⁶ Quena, José, Toteco ma mitztiochihua, yaya cati noTeco na, nimotata.

Ni tatiochihuali momiyaquilis hasta ajsis ipan nopa tepeme cati huejcahuase para nochipa.

Nochi ya ni elis nopa tatiochihualisti cati ta tijpiyas, José,

pampa Toteco mitziyocatali ten moicnihua para tielis tiintanahuatijca.

²⁷ Ta tiBenjamín, moteipan ixhuihua tatanise quej se tepechichi.

Ica ijnaloc quicuase cati quimictijtoque,

huan hasta tiotac quipiyase cati mocajtoc para temajmacase.”

²⁸ Ya ni nopa 12 itelpocahua Israel huan nopa tatiochihuali cati inintata quinmacac. Quinilhui cati quinamiqui para sesen quiselis pampa Toteco quinextili cati panos ica ininteipan ixhuihua sese ten injuanti.

Imiquilis Jacob

²⁹ Nojquiya Jacob quinmacac itelpocahua ni tanahuatili: “San quentzi polihui para nimiquis. Techalpachoca inihuaya nohuejcapan tatahua ipan nopa ostot cati eltoc ipan ital Efrón nopa heteo. ³⁰ Quena, techtalitij nozona ipan tali Canaán ipan nopa ostot ipan nopa mila cati itoca Macpela, iixpa Mamre. Nopa cati Abraham quicohuili Efrón para ipan ma quintalpacoca nochi iteixmatcahua. ³¹ Nozona quinctochoque Abraham ihuaya isihua, Sara, huan Isaac huan isihua, Rebeca, huan nozona nijtalpacho Lea. ³² Nopa tali huan nopa ostot cati eltoc nozona quincuhuili nopa heteo tacame.”

³³ Huan quema Jacob tanqui quinnahuatía itelpocahua, motejqui ipan itapech huan mijqui.

50

¹ Huajca José quinajnahuajqui itacayo itata huan chicahuac chocac huan quitzoponi. ² Teipa quinnahuati nopa itepajtijcahua ma quitallilica taajhuiyacayot cati pajyo ipan itacayo itata para ma amo palani. Huan quej nopa quichijque. ³ Huan quitallilijque nopa pajtaajhuiyacayot 40 tonati pampa monejqui quitamiltise nopa tonali para amo palanis.

Huan nopa egiptome quichoquilijque Israel 70 tonali. ⁴ Teipa quema panoc nopa choquisti, José quincamanalhui itapalehuijcahua ipan ichaj Faraón huan quinilhui:

—Se favor, xijcamanalhuica Faraón ten na huan xiquilhuica ⁵ para quema notata miqiyaya, nechchijqui ma nijtestigojquetza Toteco Dios para nijtalpachosquía ipan se ostot ipan tali Canaán cati iaxca toteixmatcahua. Huajca xijtajtanica ma nechcahuili ma niya tali Canaán nijcahuati notata. Huan quema ya nijtalpachojtos, sempa nihualas.

⁶ Huan nopa Faraón tananquili para quena huan quilhui José:

—Xiya xijtalpachoti motata quej ya mitzilhui.

⁷ Huan José yajqui quitalpachoto itata. Huan ihuaya yajque nochi nopa tacame cati quipiyayaj tanahuatili para tanahuatise ihuaya José. Huan nojquiya yajque cati quipiyayaj tanahuatili ipan ichaj Faraón huan ipan tali Egipto. ⁸ Huan yajque nochi iicnihua José inihuyaya nochi iteixmatcagua itata. Ipan tali Gosén san quincajtejqe ininconeuhua huan inintapiyalhua. ⁹ Nojquiya yajque miyac masehualme ipan cuacarrojme huan ipan cahuayojme ihuaya José. Elque tahuel miyac masehualme cati yajque. ¹⁰ Huan quema ajsitoj campa quiyolquixtíaj trigo ipan Atad nechca nopa hueyat Jordán, nochi quipixque se hueyi choquisti huan ica miyac tequipacholi José quichoquili itata para chicome tonati.

¹¹ Huan quema nopa cananeos cati ehuyayaj nozona quiitaque para nelía chocayayaj campa tayolquixtíaj campa itoca Atad, quijtojqe: “Tahuel hueyi inintequipachol nopa egiptome.” Huan yeca quitocaxtijque Abel Mizraim. (Abel Mizraim quinequi quijtos Campa Nopa Egiptome Chocaque.) Abel Mizraim mocahua nechca hueyat Jordán para campa temo tonati.

¹² Huan itelpocahua Jacob quichijque ica inintata nochi cati ya quintajtanijtoya. ¹³ Quihuicaque ipan tali Canaán huan quitalpachojque ipan nopa ostot cati eltoc ipan mila Macpela nechca Mamré cati Abraham quicohuilijtoya Efrón, nopa heteo tacat, para ipan quintalpachosquíaj nochi iteixmatcagua. ¹⁴ Teipa quema ya quitalpachojtoyaj inintata, José tacuepili ipan tali Egipto ihuaya iicnihua huan nochi sequinoc cati ihuaya yajtoyaj.

Itayacapan nemilis José

¹⁵ Quema iicnihua José momacaque cuenta para inintata Jacob ya mictoya, moilhujque: “Nohueli José techcualancaitas huan quinequis techcuelipilis ica cati fiero tijchihuilijque huejcajquiya.”

¹⁶ Huajca tatitanque ma quilhuitij: “Quema totata ayemo miqiyaya, ¹⁷ technahuati ma timitzilhuica, xijchihui se favor huan techtapojpolhui totajacol timoicnihua quema timitzchihuilijque cati fiero. Huan tojuanti nojquiya timitztajtaníaj techtapojpolhui cati timitzchihuilijque. Ama tijtequipanohuaj Toteco Dios cati totata quitoquili.”

Huan José chocac quema quicajqui ni tamanti. ¹⁸ Huan teipa ajsicoj iicnihua huan mohuijtzonque iixpa ica tatepanitacayot huan quilhujque: —Nica techpixtoc para timoaxcagua. Timitztequipanose san tapic.

¹⁹ Pero José quinilhui:

—Amo ximajmahuica. Na amo niDios para nimechtatzacuiltis. ²⁰ Melahuac anquequiyayaj antechchihuilise cati nelía amo cuali, pero Toteco Dios quisencajqui para ica cati fiero antechchihuilijque, yaya quichihuasquía se tamanti cati nelpano cuali. Yaya quinequiyaya quimanahuis ininemilis miyac masehualme huan ya nopa cati ama anquilitaj ten pano. ²¹ Huajca amo ximajmahuica. Nimechmacas amojuanti huan amoconehua ten anquicuase.

Huan José quincamanalhui ica teicnelijcayot huan quej nopa quinyoltali.

Imiquilis José

²² Huan José ihuaya nochi iteixmatcagua noja mocajque ipan tali Egipto huan yaya amo mijqui hasta quipixqui 110 xihuit. ²³ José itztoya hasta iconehua Efraín quinpixque iniixhuihua. Nojquiya itztoya hasta Maquir, icone Manasés, quinpixqui iconehua. Quena, iixhuihua Manasés mahuiltijque iicxita inihueyi tata José.

²⁴ Huan se tonali José quinilhui iicnihua: “San polihui quentzi para nimitiquis, pero teipa Toteco Dios hualas amechpalehuiqui huan amechquixtiqui ten ni tali para amechhuicas ipan nopa tali cati quintencahuili Abraham, Isaac huan Jacob para quinmacas.” ²⁵ Huajca José quincamanalhui iicnihua cati nojquiya eliyayaj itelpocahua Israel quej ya. Huan quinchihualti ma quitestigojquetzaca Toteco para quihuicase iomiyohua inihuaya quema ajsis tonali para quisase ten tali Egipto. Quinilhui: “Quema Toteco Dios hualas huan amechhuicas sempa ipan tali Canaán, monequi anquihuicase noomiyohua amohuaya.”

²⁶ Huajca José mijqui ipan tali Egipto quema quipiyayaya 110 xihuit huan itacayo quipajtijque ica pajtaajhuiyacayot para amo palanisquía. Huan quitalijque ipan se cuacajo ipan tali Egipto.

Éxodo

Inintaiyohuilis israelitame ipan tali Egipto

¹ Nopa tacat cati itoca Israel yajqui ipan tali Egipto ihuaya 12 itelpocahua, huan sese ten inijuanti nojquiya quihuicac ifamilia. Huan ya ni inintoca itelpocahua Jacob cati ihuaya yajque tali Egipto: ² Rubén, Simeón, Leví, Judá, ³ Isacar, Zabulón, Benjamín, ⁴ Dan, Neftalí, Gad huan Aser. ⁵ Huan nochi iteixmatcahua Jacob cati yajque mochijque 70 masehualme. Pero seyoc itelpoca cati itoca José ya itztoya ipan tali Egipto.

⁶ Huan ica miyac xihuit mijqui José, huan iicnihua huan nochi nopa masehualme cati achtohui hualajtoyaj. ⁷ Pero teipa iniixhuihua quinpixque miyac ininconehua huan motocaxtiyayaj israelitame. Huan nopa israelitame tahuel momiyaquilijtiyajque hasta mochijque tahuel miyaqui masehualme huan campa hueli itztoyaj ipan Gosén ipan tali Egipto.

⁸ Huan teipa panoc miyac xihuit huan pejqui tequit se yancuic tanahuatijquet ipan tali Egipto cati amo quema quixmajtoya José. Huan nopa yancuic tanahuatijquet quinilhui nopa egiptome: ⁹ “Xiquitaca, nopa israelitame mochijtoque nelmiyaqui masehualme huan más quipiyaj chichahualisti que tojuanti. ¹⁰ Huajca monequi tijchihuase se tamanti para ayecmo momiyaquilise, pampa sinta oncas se tatehuilisti, huelis mosejcotilise ica tocualancaitacahua para techtehuise huan teipa cholose ten ni tali.”

¹¹ Huan yeca nopa egiptome quintalijque tacame cati tetique para ma quinchihualtica israelitame ma tequitica tahuel chichahuac. Quinchihualtijque ma quichijchihuaca nopa altepet Pitón huan Ramesés para nopa hueyi tanahuatijquet Faraón. Huan quinquehijque nopa altepeme para ipan quiajocuisse tacualisti. ¹² Pero quema noja más quintaiyohuiltiyayaj israelitame, noja más momiyaquilijayaj. Yeca nopa egiptome pejque más quimacasi.

¹³ Huajca nopa egiptome tahuel quinquehijque nopa israelitame huan amo quintasojtaque. ¹⁴ Tahuel amo quinpateitayayaj. San quinquehijayaj chichahuac huan quintaiyohuiltiyayaj miyac. Quinchihualtijque ma quicualtica soquit huan ma quichihuaca ladrillos huan miyac tamanti miltequit. Huan quema tahuel taiyohuiyayaj nopa israelitame ipan nochi ni tequit, noja más nopa egiptome quinchihuilijque ten fiero.

¹⁵ Nojquiya nopa hueyi tanahuatijquet quicamanalhui Sifra huan Fúa, nopa sihuame cati quinpalehuiyayaj israelita sihuame quema conepiyayaj huan quinilhui:

¹⁶ —Quema anquipalehuise se hebreo sihuat para conepiyas, xiquitaca taya tacajtoc. Sinta tacajtoc se sihuapil, xijcahuaca ma itzto, pero sinta se oquichpil, xijmictica.

¹⁷ Pero masque quej nopa quinilhui nopa tanahuatijquet, nopa sihuame quimacisque Toteco Dios huan amo quichijque cati nopa tanahuatijquet quinnahuatijtoya. Quincayque ma itztoca nopa oquichpilme. ¹⁸ Huajca nopa tanahuatijquet ten Egipto tatitanqui ma quinnótzati nopa ome sihuame huan quintatzintoquili:

—¿Para ten anquincahuilíaj ma itztoca hebreo oquichpilme? ¿Para ten amo anquinmictíaj?

¹⁹ Huan nopa sihuame quinanquilijque Faraón:

—Nopa hebreo sihuame amo tatacatiltíaj yolic quej Egipto sihuame. Más cuali inintacayo huan nimantzi tatacatiltíaj quema tojuanti ayemo tionajsij para tiquinpalehuise.

²⁰⁻²¹ Huan pampa nopa sihuame quitepanitaque Toteco Dios, yaya quintiochijqui huan quinchijqui nojquiya ma quinpiyaca ininconehua. Huan nopa hebreos o israelitame más momiyaquilijque hasta mochijque tahuel miyaqui. ²² Huajca Faraón quinmacac se tanahuatili nochi imasehualhua: “Nochi hebreo oquichpilme cati tacatise monequi xiquinmajcahuaca ipan hueyat, pero sihuapilme xiquincahuaca ma itztoca.”

2

Itacatilis Moisés

¹ Se tonali se tacat cati eliyaya se iteipan ixhui nopa huejcapan tata Levi mosihuajti ihuaya se sihuat cati nojquiya eliyaya se iteipan ixhui, pero ipan seyoc familia. ² Huan isihua conecuic huan quipixqui se icone. Huan quema quitaque para nopa oquichpil eliyaya yejyetzí, quitatijque para eyi metzti. ³ Pero quema itatahua ayecmo huelque quitatíaj más tonali, quicuique se chiquihuit cati quichijtoyaj ica acat, huan inana quitzajtzajqui ica chapopojti para amo calaquis at. Teipa quitali nopa pilconetzi iijtic nopa chiquihuit huan quicahuato acatzala iteno nopa hueyat Nilo. ⁴ Nojquiya quihui ihuelti nopa pilconetzi ma quihuejcatachilijto para quiitas taya ipantis.

⁵ Huan más tiotac, iichpoca nopa Faraón inihuaya itequipanojcahua temoque para maltitij hueyat. Huan quema nejnemiyyaj nechca hueyat, quiitaque nopa chiquihuit tatajco ten nopa acame. Huajca nopa ichpocat quititanqui se isihua tequipanojca ma quicuiliti nopa chiquihuit. ⁶ Huan quitapo nopa aca chiquihuit huan quitachili iijtic. Huan nopona itztoya se piloquichpiltzi cati chocayaya. Huan iichpoca Faraón quitasojtac huan quijto:

—Ni se piloquichpiltzi hebreo.

⁷ Huajca iicni nopa pilconetzi monechcahui campa iichpoca Faraón huan quihui:

—¿Tijnequi ma nijnotzati se sihuat hebreo cati tachichitía para ma quiscalti ni oquichpil?

Huan iichpoca Faraón tananquili:

⁸—Quena, xijnotzati.

Huajca iicni nopa pilconetzi yajqui quinotzato inana, ⁹ huan iichpoca Faraón quihui:

—Xijhuica ni oquichpil huan techchichitili, huan na nimitzxtahuis motequi.

Huajca inana nopa piloquichpiltzi quihuicac huan quiscalti. ¹⁰ Huan quema ya moscaltijtoya, quimactili iichpoca Faraón. Huan nopa ichpocat quichijqui icone huan quitocaxti Moisés. (Moisés quinequi quijtos Taquixtli.) Quej nopa quitocaxti pampa quijto:

—Na nijquixti ipan at.

Moisés cholo ten tali Egipto

¹¹ Se tonali quema Moisés ya motacachijtoya, quisqui para quinpaxaloti nopa hebreos pampa quimatqui para quipiyayaya san se esti ica inijuanti huan quitac para nelohui inintequi. Huan quitac se tacat Egipto ejquet quihuitequiyaya se tacat hebreo huan quitasojtac, pampa eliyaya san se

inieso. ¹² Huajca Moisés tachixqui campa hueli huan quema amo aqui quitac, quimicti nopa tacat Egipto ejquet huan quitati itacayo ipan xali. ¹³ Huan tonili sempa quisqui Moisés huan quitac para ome hebreos motehuiyayaj, huajca quitatzintoquili cati tatehuiyaya:

—¿Para ten tijmaquilía mohuampo huan san se amoeso anquipiayaj?

¹⁴ Huan nopa hebreo tacat quinanquili:

—¿Ajquiya mitztalijtoc ta quej titayacanquet o tijuez ica tojuanti? ¿Huelis timoillhuía techmictis quej yalohua tijmicti nopa Egipto ejquet?

Quema Moisés quicajqui ni tamanti, majmajqui, pampa quimatqui para sequij quimatiyayaj para quimictijtoya nopa tacat Egipto ejquet. ¹⁵ Huan quema Faraón quimatqui para Moisés quimictijtoya se tacat Egipto ejquet, tatitanqui ma quitemotij para quimictis, pero Moisés cholojtejqui huan yajqui itztoti ipan tali Madián. Huan quema ajsito nepa mosehuito nechca se ameli.

¹⁶ Huan nozona ipan tali Madián itztoya se totajtzi cati itoca Reuel huan quinpixtoya chicome iichpocahua. Huan ipan nopa tonali injuanti hualajtoyaj campa nopa ameli para quiquixtise at huan quitemitise campa atij tapiyalme huan quinamacase inintata iborregojhua. ¹⁷ Pero hualajque sequinoc borrego tamocuitahuiani huan quinquixtijque nopa ichpocame. Huajca Moisés motananqui, huan quinmanahui huan teipa quinamacac ininborregojhua. ¹⁸ Huan quema nopa ichpocame tacuepilijque campa itztoya inintata Reuel ya quintatzintoquili:

—¿Quenicatza ama antacuepilijque nimantzi?

¹⁹ Huan tananquilijque:

—Se Egipto ejquet techmanahui inimaco nopa sequinoc tamocuitahuiani. Huan teipa yaya quiquixti at para tojuanti huan quinamacac toborregojhua.

²⁰ Huan inintata quintatzintoquili:

—Huan ¿canque itztoc nopa tacat? ¿Para ten anquicajtejque iseltitzi? Xiyaca xijnotzatij ma tacuaqui.

²¹ Huan Moisés hualajqui huan mocajqui ipan ichaj Reuel. Huan teipa Reuel quimacac Moisés iichpoca cati itoca Séfora para ma quichihua isihua.

²² Huan teipa Séfora quipixqui icone huan Moisés quitocaxti Gersón. (Gersón quinequi quiiijos Seyoc Tali Ejquet.) Pampa quiiijo: “Ama na niseyoc tali ejquet ipan ni tali cati amo niqixmati.”

²³ Huan Moisés panoc miyac xihuit ipan tali Madián, huan nopa tanahuatijquet ten tali Egipto, mijqui. Pero nopa israelitame noja tahuel taijohuiyayaj huan mocuesohuayayaj pampa tequipanohuayayaj san tapic. Huan talojtitzti quitajtaniyayaj Toteco Dios ma quinpalehui ipan inintaijyohuilis. ²⁴ Huan Toteco quincajqui. Quena, quinchihuilis cuenta pampa amo quielcajqui cati ininca mocajtoya Abraham, Isaac huan Jacob para quinmacas iniixhuihua se tali. ²⁵ Huajca Toteco Dios quinitac nopa israelitame huan quintasojtac.

3

Toteco quinojnotzqui Moisés

¹ Se tonali Moisés quinmocuitahuayaya iborregojhua imontaj, Jetro*, cati eliyaya se totajtzi ipan tali Madián.

Huan Moisés quinhuicac nopa borregojme hasta nese lado ten nopa huactoc tali hasta se tepet itoca Horeb†. (Horeb quinequi quiiijos Nopa Tepet

* **3:1** 3:1 Jetro nojquiya itoca Reuel. † **3:1** 3:1 Nopa tepet Horeb nojquiya itoca tepet Sinai.

Campa Toteco Itztoc.) ² Huan nozona iilhuicac ejca TOTECO monexti ipan se tilelemecti cati tatayaya tatajco se xihuitzonti. Huan Moisés quitac para nopa xihuitzonti lemeniyaya, pero amo tamiyaya. ³ Huajca moilhui: “Amo quema niqiztzc se tamanti quej ni. Niyas niqitaci para ten amo tamitata nopa xihuitzonti.”

⁴ Huan quema TOTECO quitac para Moisés monechahuyaya para quitachilis, quinojnotzqui tatajco ten nopa xihuitzonti huan quiilhui:

—¡Moisés! ¡Moisés!
Huan Moisés quiijto:
—Nica niitztoc.

⁵ Huajca TOTECO quiilhui:

—Amo ximonechahui. Xijquixti motecac pampa tatzejtzeltic ni tali campa timoquetza, pampa nica nojquiya niitztoc na.

⁶ Huan TOTECO nojquiya quiilhui:

—Na niininTeco mohuejcapan tatahua Abraham, Isaac huan Jacob.

Huajca Moisés moixtajqui pampa majmajqui para quitachilis Toteco Dios, ⁷ huan TOTECO sempa quiijto:

—Niqiztzc quenicatza taijyohuíaj nomasehualhua cati itztoque ipan tali Egipto. Nijcactoc quenicatza chocaj pampa inintayacancagua fiero quinchihuíaj. Niqintasoja pampa tael taijyohuíaj. ⁸ Yeca nitomotoc para niqinmaquixtis inimaco nopa egiptome. Huajca niqinquixtis ipan nopa tali huan niqinhuicas hasta se tali cati hueyi huan cuali cati nochi temaca hasta mocagua itajca. Ipan nopa tali ama itztoque nopa cananeos, heteos, amorreos, ferezeos, heveos huan jebuseos. ⁹ Huajca pampa nijtacaquilijtoc quenicatza techtaztziáj nopa israelitame, huan niqiztzc quenicatza nopa egiptome fiero quinchihuíaj, ¹⁰ ama nimitztitanis tiqitaci Faraoón. Nijnequi tiyas para tiqinquixtis nopa israelitame ten tali Egipto pampa injuanti nomasehualhua.

¹¹ Huajca Moisés quiilhui Toteco Dios:

—¿Pero aqquiya na para niyas nijcamanalhuiti Faraoón huan niqinquixtiti ten tali Egipto nopa israelitame?

¹² Huan Toteco Dios quinanquili:

—Na niitztos mohuaya. Huan ya ni elis se tanextili para huelis tijmatis temacti para na nimitztitani. Quema ya tiqinquixtijtos nomasehualhua ipan tali Egipto, antacuepilise nica huan nochi amojuanti antechhueyichi-huase ipan ni tepet Horeb.

¹³ Pero Moisés quinanquili:

—Pero sinta niyas huan niqinilhuis nopa israelitame para yaya cati ininTeco inihuejcapan tatahua techtitantoc campa injuanti, techtatztintoquilise quenicatza motoca, huajca, ¿taya niqinilhuis?

¹⁴ Huan Toteco Dios quinanquili:

—NA NIITZTOC CATI NOCHIPA NIITZTOC. Huan tiqinilhuis nopa israelitame: Yaya cati itoca YAYA CATI NOCHIPA ITZTOC techtitantoc campa amojuanti.

¹⁵ Huan nojquiya Toteco Dios quiilhui Moisés:

—Nojquiya xiqinilhui nopa israelitame para na cati niininTECO amohuejcapan tatahua, Abraham, Isaac huan Jacob, mitztitantoc campa injuanti. Xiqinilhui ya ni elis notoca para nochipa. Ya ni nochipa eliyaya notoca huan nochipa elis notoca. Ica ni notoca techtocaxtise para nochipa nochi masehualme cati tacajtiyase. ¹⁶ Xiya huan xiqinixentili nochi huehue tacame ipan nopa israelitame huan xiqinilhui para na niDIOS cati niininTeco amohuejcapan tatahua, Abraham, Isaac huan Jacob, nimonexti campa

ta. Huan nimitzilhui para niqinhualtachilijtoc huan niquitztoc quenicatza fiero quinchihuilíaj ipan tali Egipto. ¹⁷ Huan nojquiya xiquinilhui para niquintencahuilíá niqinixtis ten nopa taijyohuilsti ipan Egipto, huan niqinhuicas ipan nopa tali campa itztoque nopa cananeos, heteos, amorreos, ferezeos, heveos huan jebuseos. Campa niqinhuicas eltoc se tali cati nochi temaca hasta mochua itajca.

¹⁸ “Huan temacti nopa huehue tacame mitzneltocase. Huan teipa monequi tiyas inihuaya para anquitatij nopa hueyi tanahuatijquet ten tali Egipto. Huan tiquilhuis para na niDIOS cati niamoTECO anhebreo masehualme huan para na nimonexti ica ta. Xiquilhui monequi quincahuas ma yaca israelitame ipan nopa huactoc tali campa amo teno eli. Xiquilhui monequi anyase eyi tonati ipan ojti para antechmacatij tacajcahualisti na, niamoTECO Dios. Quej nopa xiquilhuiti. ¹⁹ Pero na cuali nijmati para nopa tanahuatijquet ten tali Egipto amo amechahuas anquisase hasta nijnextilis para nelia hueyi nochicahualis. ²⁰ Yeca na nimomaxitahuas huan niquincocos nopa egiptome ica miyac huejhueyi tiochicahualnescayot cati nijchihuas ipan inintal para niquinnexilis nohueyi chicahualis. Huan teipa, quena, nopa Faraón amechahuas para anquisase. ²¹ Nojquiya nijchihuas para nopa egiptome ma quinequica amechpalehuise huan amechmajmase tamanti quema anquisase. Yeca quema anquisase, amo anyase san amomax. ²² Huan monequi sesen sihuat quitajtanic cati icalnechca o seyoc cati ihuaya itztoque para ma quimaca yoyomit cati cuali huan tamanti ten oro huan plata. Huan xiquinyoyontise amoconehua para quej nopa anquinquiltijtehuase Egipto ehuan nochi cati quipixtoque.”

4

¹ Huan Moisés tananquili:

—¿Taya nijchihuas sinta nopa israelitame amo techneltocase, yon amo techchihuilise cuenta? Huelis quiijtose para ta, TOTECO, amo timonextijtoc nohuaya.

² Huajca TOTECO quihhui Moisés:

—¿Taya tijpiya momaco?

Huan Moisés tananquili:

—Se cuatopili.

Huan TOTECO quihhui:

³—Xijmajcagua talchi.

Huan Moisés quimajcajqui talchi huan ipan nopa talojtzi nopa cuatopili mochijqui se cohuat. Huan Moisés motalojtejqui pampa quimacasiyaya,

⁴ pero TOTECO quihhui:

—Xiquitzqui ipan icuitapil.

Huan Moisés quiiqtzi nopa cohuat huan sempa mocuetqui cuatopili.

⁵ Huan TOTECO quihhui:

—Quej nopa tijchihuas iniixpa nopa israelitame para ma quineltocaca para na niininTeco amohuejcapan tatahua, Abraham, Isaac huan Jacob nimonextijtoc moixpa para nimitztequimacas.

⁶ Huan TOTECO quihhui:

—Huan ama, xijcalaqui momax moyolixco.

Huan Moisés quicalaqui imax iyolixco huan quema quiquixti, quiiac para quipiyayaya nopa fiero tacayo palanca cocolisti cati itoca lepra huan eliyaya chipahuac quej set. ⁷ Huajca TOTECO quihhui:

—Sempa xijcalaqui momax moyolixco.

Huan Moisés quej nopa quichijqui. Huan quema sempa quiquixti imax, ya mochicajtoya huan eltoya cuali quej nochi itacayo. ⁸ Huajca TOTECO quiilhui:

—Sinta ica nopa achtohui tanextili, amo mitzneltoquilise, huajca mitznel-tocase ica nopa cati ompa. ⁹ Pero sinta amo mitzneltocase ica ni ome tanextili, xijquixti at ten nopa hueyat huan xijtoyahua talchi. Huan quema nopa at cati tijquixtis ipan hueyat toyahuis talchi, mochihuas esti.

Huan Moisés quiilhui TOTECO:

¹⁰ —¡Toteco! Na amo hueli nitatenquixtía cuali. Huan amo san ama o yalohua amo nihueli. Ni huejcajquiya. Nochipa quema nicamanalti, ohui quisa camanali ipan nonenepil.

¹¹ Pero TOTECO quiilhui:

—Na niqunmacatoc inincamac masehualme. Na nijchihua para se ma amo hueli camanalti, o ma amo hueli tacaqui. Nijchihua para se ma tachiya, o ma amo tachiya. ¹² Huajca xiya huan na niitztos mohuaya quema ticamanaltis, huan nimitznexstilis cati monequi tiqijtos.

¹³ Huan Moisés sempa quiijto:

—¡Toteco! Xijchihua se favor, xijtítani seyoc huan amo na.

¹⁴ Huajca TOTECO cualanqui ihuaya Moisés huan quiilhui:

—¿Tiquita cualtitoc para yas mohuaya moicni Aarón cati nojquiya iixhui mohueyi tata Levi? Na nijmati para ya cuali camanalti. Huan ama huala ipan ojti mitznamiquiqui. Yaya paquis miyac quema mitzitas. ¹⁵ Huajca xijcamanahui huan xijpohuili nochi cati monequi quiijtos, huan yaya quiijtos cati tiquilhuis. Huan na niitztos amohuaya quema ancamanaltise huan nimechnexstilis cati monequis anquichihuase. ¹⁶ Ta tiquilhuis Aarón cati monequi quiijtos huan Aarón quinilhuijtiyas sequinoc cati ta tiquilhuis. Yaya camanaltis cati ta ticamanaltisquía huan mitztepanitas quej elisquía ta tiDios. ¹⁷ Pero xijhuica ni cuatopili ipan momax pampa ica ya ni tijchihuas tanextilijcayot cati huejhueyi.

Moisés tacuepili ipan tali Egipto

¹⁸ Huajca Moisés tacuepili ichaj imontaj Jetro, huan quiilhui:

—Techcahua ma nitacuepili ipan tali Egipto campa itztoque noicnihua cati san se esti tijpiyaj. Nijnequi niquitas sinta noja itztoque.

Huan Jetro tananquili:

—Xiya ica cuali.

¹⁹ TOTECO quiilhui Moisés quema noja itztoya ipan tali Madián:

—Amo ximajmahui para titacuepilis ipan tali Egipto, pampa ya mijque nochi cati quinequiyayaj mitzmictise.

²⁰ Huajca Moisés quicuitejqui isihua huan icone huan quinehuilti ipan se burro huan mocuetqui ipan tali Egipto. Huan ipan imax quihuicayaya nopa cuatopili cati Toteco Dios quimacac. ²¹ Huan teipa TOTECO quiilhui Moisés:

—Quema tiajsiti tali Egipto, xiquita para tijchihuas iixpa Faraón nochi nopa tanextili cati nimitzmacatoc chichahualisti xijchihua. Pero na nijy-oltetilis para amo quincahuas ma quisaca israelitame. ²² Huajca tiquilhuis Faraón para na niamoTECO niqijtohua para nopa israelita masehualme niquinicnelía quej se quiicnelía icone achtohui ejquet. ²³ Huan xiquilhui para ya niquilhuijto ma quincagua ma quisaca para yase techhueyichihua-tij. Pero sinta amo quincahuas ma quisaca, na nijmictis icone achtohui ejquet. Quej nopa xiquilhuiti Faraón.

²⁴ Huan quema mosiyajquetzqui Moisés huan iteixmatcahua nopa tay-ohua ipan ojti para tali Egipto, TOTECO monexti ica Moisés, huan

quinequiyaya quimictis pampa amo quichijqui quej quijitohua tanahuatili. Amo quitectoya iyecapa nopa cuetaxti cati eltoc ipan ipiltacayo ioquichpil. ²⁵ Huajca isihua Moisés cati itoca Séfora quicuic se cuchillo ten tet huan quitequili cati monequi ipan ipiltacayo icone huan quitoxonqui ipan iicxi Moisés huan quihui: “Nelia, ta tise nohuehue cati espoltic.”

²⁶ Huajca TOTECO ayecmo cualanqui ica Moisés huan quicahuili ma yahui. Huan Séfora quitocaxti Moisés “nohuehue cati espoltic” pampa monejqui yaya quitequili icuetaxo icone.

²⁷ Nojquiya TOTECO quihuijtoya Aarón para ma yahui ipan nopa huactoc tali para mopantiti ihuaya Moisés. Huajca Aarón yajqui quinamiquito Moisés ipan nopa tepet campa monextijtoya Toteco Dios. Huan nopona Aarón quitajpalo huan quitzoponi. ²⁸ Huan Moisés quipohuili Aarón nochi tamanti cati TOTECO quihuijtoya ma quijito, huan nojquiya quinextili nopa huejhueyi tanextili cati quinahuatijtoya ma quichihua. ²⁹ Huajca Moisés huan Aarón ajsitoj tali Egipto huan quinsentilijque nopa huehue israelita tacame. ³⁰ Huan Aarón quinpohuili nochi cati TOTECO quihuijtoya Moisés, huan quichijqui nopa tanextili cati TOTECO quinextilijtoya ma quichihua.

³¹ Huan nochi nopa tacame quineltocaque para TOTECO quintitantoya. Huan quema quimatque israelita masehualme para TOTECO quintacaquiliytoyaj huan quinitztoya quenicatza taijyohuiyayaj, motancuaquetzque iixpa TOTECO huan quihueyichijque.

5

Moisés huan Aarón camanaltique ihuaya Faraón

¹ Teipa Moisés huan Aarón yajque quicamanalhuitoj nopa Faraón huan quihuijque:

—TOTECO Dios cati tiisraelitame tijhueyichihua miztilhuía para xiquinc-ahua imasehualhua ma yaca campa huactoc tali para ma quihuihuichihuilij.

² Pero Faraón tananquili:

—¿Huan ajquiya ‘amoTECO’ para na ma nijneltoquili huan ma niquinc-ahua ma yaca ne israelitame? Amo niquixmati amoTECO, huan yon amo niquincahuas ma yaca.

³ Huajca Moisés huan Aarón quijitojque:

—Toteco Dios cati toTeco tihebreos hualajtoc technamiquiqui huan techilhuitoc cati monequi ma tijchihua. Huajca techahua ma tiyaca eyi tonati ipan ojti ipan nopa huactoc tali para tijmacatij tacajcahalisti TOTECO Dios, pampa sinta amo, nohueli timiquise ica se hueyi cololista o ica macheta.

⁴ Pero nopa tanahuatijquet ten tali Egipto quihui Moisés huan Aarón:

—¿Para ten anquintequipolohuaj ni tacame? Ma tacuepilica ipan inintequi.

⁵ Huan nojquiya nopa Faraón quihui:

—Ama itztoque tahuel miyaqui israelitame ipan ni tali, huan san anquintequipolohuaj.

⁶ Huajca ipan nopa tonali Faraón quinmacac se yancuic tanahuatili nopa tayacanani cati quinnahuatiyayaj huan quinhuitequiyayaj nopa israelita tequipanohuani. Quihui:

⁷—Ayecmo xiquinmacaca sacat israelitame para quichihuse soqui ladrillos quej mochijtihualajtoc. Ma yaca injuanti para quisentilitij nopa sacat cati monequi. ⁸ Pero xiquinchihualtica ma temactilica san se imiyaca ladrillos quej achtohui. Yon se ladrillo ma amo polihui. Pampa nopa israelitame

tatzcacalactoque huan yeca tahuejchihuaaj huan quijtohuaj quinequij yase quimacatij tacajcahualisti ininTeco. ⁹ Huaajca xiquinchihualtica ma tequitica más chichahuac nopa tacame. Xiquintequihuica para ma amo quitacaquilica ni istacatili cati Moisés huan Aarón quinilhuíaj.

¹⁰ Huaajca nopa tayacanani huan tetecome quisque huan yajque quinilhuitoj nopa israelitame:

—Nopa Faraón tanahuatijtoc ma ayecmo timechmacaca sacat. ¹¹ Ama monequi anyase anquitemotij. Pero monequi anquitamichihuase san se imiyaca ladrillos quej anquichihuayayaj achtohuiya.

¹² Huaajca nopa israelitame campa hueli yajque ipan tali Egipto quitemotoj sacatzontij cati noja mocajtoya ten cati masehualme ya quitzon-tectoyaj, huan ya nopa quitequihuijque pampa ayecmo oncayaya sacat. ¹³⁻¹⁴ Huan mojmosta itayacanhua Faraón quinisihuiltiyayaj más huan quinilhuyayaj:

—Xijchihuaca san se imiyaca ladrillos ipan se tonal quej quema amechmacayayaj sacat.

Huan nojquiya nopa Egipto tetecome quinmaquiliyayaj nopa israelita tayacanani huan quinilhuyayaj:

—¿Quenicatza, yon yalohua, yon ama, amo anquixitijtoque san se imiyaca ladrillos quej achtohuiya anquichihuayayaj?

¹⁵ Huan nopa israelita tayacanani yajque tajtanitoy tapalehuili ica tanahuatijquet Faraón, huan quilhuijque:

—¿Para ten quej ni techihuilía? ¹⁶ Nopa Egipto tetecome ayecmo techmaca sacat. Huan amo san ya nopa, nojquiya technahuatíaj ma tijchihuaca san se imiyaca soqui ladrillos, huan hasta techmaquilíaj pampa amo tihuelij. Pero injuanti inintajtacol, pampa amo techmacaj sacat.

¹⁷ Huaajca Faraón quinnanquili:

—¡San antatzihuini! ¡Quena, antatzihuij! Huan yeca anquijtojtinemij anyase anquimacatij tacajcahualisti amoTECO. ¹⁸ Xiyaca xitequititij, huan masque ayecmo amechmacase sacat, monequi antemactilise san se imiyaca ladrillos.

¹⁹ Huan nopa tayacanani ten israelitame mocuesojque quema quinilhuijque para monequi ma amo temos imiyaca nopa soqui ladrillos quej achtohuiya quichihuayayaj. ²⁰ Huan quema quisque iixpa Faraón, quinpan-titoy Moisés huan Aarón quinchixtoyaj. ²¹ Huan nopa israelita tayacanani quinilhuijque:

—TOTECO ma quiita cati amo cuali anquichijtoque ica tojuanti, huan ma amechtatzacuiliti. Amojuanti amotajtacol para itequiticahua Faraón ma techtachilica fiero. Eltoc quej anquitalijtoque macheta ipan inimax para ma techmictica ica cati anquilhuijtoque nopa tanahuatijquet.

Moisés motatajti ica TOTECO

²² Huaajca Moisés motatajti huan quilhui TOTECO:

—Toteco, ¿para ten tiquinchihuilía cati amo cuali ni masehualme? ¿Para ten techtitanqui? ²³ Hasta ipan nopa tonali quema nihualajqui nijcamanalhuico nopa Faraón quej techilhui, yaya noja más quintaijyohuiltitoc momasehual-hua, huan ta amo teno tijchitoc para tiquinmaquixtix.

6

¹ Huan TOTECO quinnanquili:

—Ama tiquitas cati nijchihuas ica Faraón. Amo quincahuas nomasehualhua ma quisaca ipan ni tali hasta quuitas ihueyitilis nochicahualis. Pero quema quuitas nochicahualis, hasta quinquixtis para ma yaca.

TOTECO sempa quinojnotzqui Moisés

² Huan noja Toteco Dios quicamanalhui Moisés huan quiilhui:

—NiamoTECO Cati Nochipa Niitztoc. ³ Nimonexti ica Abraham, Isaac huan Jacob huan niqinmatilti quenicatza niitztoc pampa niqinilhui notoca: NimoTECO Dios cati nijpiya nochi chicahualisti, pero amo niqinilhui ni seyoc notoca: Na Cati Nochipa Niitztoc. ⁴ Nojquiya inihuaya nijchijqui nopa camanali para niqinmacas nopa tali Canaán campaa achtohui itztoyaj quej seyoc tali ehuaní. ⁵ Huan na nijcactoc quenicatza chocaj nopa israelitame pampa nopa egiptome quinquipanolitaj tahuel chicahuac huan amo niquelcajtoc cati niquintencahuilijtoc. ⁶ Ama xiquinilhui nochi israelitame para na niamoTECO niqinmaquixtis ten inintequi cati tahuel ohui ipan ni tali Egipto. Quena, ica na nochicahualis huan ica huejhueyi tanextili, niqinmanahuis. Pampa nijchihuas huejhueyi tanextili para niquintatzacuilitis nopa egiptome pampa quej nopa xitahuac. ⁷ Huan xiquinilhuiti na nimoaxcatis nopa israelitame huan elise nomasehualhua. Huan na nielis niininTeco. Quej nopa quimatise para na niininTeco Dios cati niqinmocuítahuía, huan na cati niqinquixtis ten nopa tequit cati tahuel etic ipan ni tali Egipto. ⁸ Huan xiquinilhuiti niqinhuicas ipan nopa cuali tali cati niquintencahuili niqinmacas Abraham, Isaac huan Jacob. Huan niqinmacas nopa israelitame nopa tali para elis iniaxca. Xiquinilhui na niininTECO niqijtohua.

⁹ Huajca Moisés quinpohuili israelitame nochi ya ni, pero amo quitacaquilijque pampa mocuesohuayayaj ica inintequi cati tahuel chicahuac. ¹⁰ Teipa TOTECO quiilhui Moisés:

¹¹ —Xiya xiquilhuiti Faraón nopa tanahuatijquet ipan tali Egipto para ma quincahua ma quisaca nopa israelitame ten ital.

¹² Pero Moisés quinanquili TOTECO:

—Yon nopa israelitame amo techchihuilitaj cuenta, ¿huajca quenicatza techtacahuilitaj nopa Faraón? Eltoc pampa amo cuali nitatenquixtia quema nicamanalti.

¹³ Huajca quej nopa TOTECO quincamanalhui Moisés ihuaya Aarón huan quinilhui cati monequi quinilhuse nopa israelitame huan Faraón. Huan quinquimacac ma quinquixtica israelitame ipan tali Egipto.

Inintoca nopa tayacanca tatame ipan israelitame

¹⁴ Huan ya ni inintoca nochi inintayacanca tatahua israelitame huan ajquiya injuanti cati tacatque teipa ten sesen hueyitata cati eliyaya itelpocahua Israel.

Rubén cati elqui iachtohui cone Israel huejcajquiya quinpixqui iconehua cati inintoca: Hanoc, Falú, Hezrón huan Carmi. Huan sesen ten ni tacame quinpixqui miyac iixhuihua huan sesen mochijqui se hueyi familia, pero nochi hualajque ten Rubén.

¹⁵ Huan Simeón itelpoca Israel huejcajquiya quinpixqui iconehua cati inintoca: Jemuel, Jamín, Ohad, Jaquín, Zohar huan Saúl cati elqui icone se cananea sihuat. Sesen ten ni tacame quinpixqui miyac iixhuihua huan sesen mochijqui se hueyi familia, pero nochi hualajque ten Simeón.

- 16 Huan Leví, cati eliyaya itelpoca Israel huejcajquiya, itztoya 137 xihuit. Huan ipan inemilis quinpixqui itelpocahua cati inintoca: Gersón, Coat huan Merari.
- 17 Huan iconehua Gersón cati mochijque huejhueyi familias elque: Libni huan Simei.
- 18 Huan Coat itztoya 133 xihuit huan iconehua elque: Amram, Izhar, Hebrón huan Uziel.
- 19 Huan iconehua Merari elque Mahli huan Musi. Nochi ya ni mochijque huejhueyi familias huan hualajque ten inihueyi tata Leví. Huan pejqui inintoca ica cati achtohui ejquet huan yajtiyajque hasta cati teipan ejquet.
- 20 Huan ten iconehua Coat, Amram mosihuajti ihuaya iahui cati eliyaya iicni itata huan itoca eliyaya Jocabed, huan ya quintacatilti Aarón huan Moisés. Huan Amram itztoya 137 xihuit para nochi.
- 21 Huan Izhar quinpixqui itelpocahua cati inintoca: Coré, Nefeg huan Zicri.
- 22 Huan iconehua Uziel elque: Misael, Elzafán huan Sitri.
- 23 Huan Aarón mosihuajti ihuaya Elisabet cati eliyaya iichpoca Aminadab huan isihua icni Naasón, huan quitacatilti Nadab, Abiú, Eleasar huan Itamar.
- 24 Huan iconehua Coré elque Asir, Elcana huan Abiasaf. Nochi ya ni mochijque huejhueyi familias huan hualajque ten Coré.
- 25 Huan Eleazar, icone Aarón, mosihuajti ica se iichpoca Futiel huan ya quitacatilti Finees.

Nochi ni lista eltoc inintoca nopa tacame cati quinyacanque nopa huejhueyi familias ten ininteixmatcahua. Huan nochi hualajque ten inihueyi tata Leví.

²⁶ Huan ni Aarón huan Moisés cati mopantía inintoca ipan ni lista eltoc san se nopa tacame cati TOTECO quinilhui ma quinchihuaca nopa israelitame ma motecpanaca ica pamit huan ma quinquixtica ipan tali Egipto. ²⁷ Huan nojquiya elque Moisés huan Aarón cati quicamanalhuitoj Faraón, nopa tanahuatijquet ten tali Egipto para ma quimaca caquihui quinixtise nopa israelitame. Huan teipa elque Moisés huan Aarón cati quinyacanque nopa israelitame ten nopa tali.

TOTECO quinnojnötzqui Moisés huan Aarón

²⁸ Huan ipan nopa tonali quema TOTECO quinojnötzqui Moisés ipan tali Egipto, ²⁹ quiilhui:

—Na niDIOS. Xiquilhui Faraón nopa tanahuatijquet ipan tali Egipto nochi nopa tamanti cati nimitzilhuía.

³⁰ Huan Moisés quinanquili TOTECO:

—Na amo nihueli nitatenquixtía cuali quema nicamanalti, huajca ¿quenicatza techtacaquilis nopa Faraón?

7

¹ Huan huajca TOTECO quiilhui Moisés:

—Xiquita, nimitzchihuas quej tielisquía se Dios quema timoquetzas iixpa Faraón. Huan moicni Aarón elis quej motajtolpanextijca huan yaya camanaltis por ta. ² Huan monequi tiquilhuis Aarón nochi cati nimitznahuatis huan teipa yaya camanaltis ihuaya Faraón para ma quincagua ma quisaca ten ital nopa israelitame. ³ Pero na nijchihuas para nopa Faraón ma moyoltetili huan amo quinequis. Huan nijchihuas ipan tali Egipto miyac

tanextili huan tamanti cati amo quema quuitzoque. ⁴ Pero nopa Faraón amo amechchihuilis cuenta. Huan na nijtalis nomax ipan Egipto huan nijtazacuiltis. Huan nijchihuas miyac huejhueyi tamanti para niquintajtolsencahuas hasta niqunquixitis nomasehualhua cati quisase ipan huejhueyi tatehujca pamit. ⁵ Huan quema ya nijnextijos nochicahualis ipan tali Egipto huan ya niqunquixitijos nopa israelitame nozona, nopa egiptome quimatise para na niamoTECO.

⁶ Huan Moisés huan Aarón quichijque nochi quej TOTECO quinnahuatijtoya. ⁷ Huan Moisés quipiyayaya 80 xihuit huan Aarón 83 xihuit quema camanaltique ihuaya Faraón.

Icuatopil Aarón

⁸ Huan TOTECO quinihui Moisés huan Aarón:

⁹—Quema Faraón amechilhuis para xijchihuaca se tanextili, xijcui mocuatopil huan xijmajcahua talchi iixpa para ma mochihua se cohuat.

¹⁰ Huajca Moisés huan Aarón yajque quuitatoj Faraón, huan quichijque senquisa cati TOTECO quinnahuatijtoya. Aarón quimajcajqui talchi icuatopil iixpa Faraón huan itapalehujcahua, huan nopa cuatopili mocuetqui se cohuat. ¹¹ Huajca Faraón quinnotzqui nopa talnamiquini huan tenahualhuani huan cati quimatiyayaj tacajcayahuaj huan sesen ten injuanti nojquiya quichijque cati Aarón quichijtoya ica inintenhualhuicayo. ¹² Sesen ten injuanti quimajcajqui icuatopil talchi huan sesen cuatopili mocuetqui cohuat. Pero icuatopil Aarón quincuaajqui inincuatopil nopa sequinoc. ¹³ Pero masque ya nopa quichijqui, Faraón moyoltetili quej TOTECO quijtojtoya para quichihuasquía huan amo quichihuilis cuenta Moisés.

Nopa tatzacuilti ten esti

¹⁴ Teipa TOTECO quinihui Moisés:

—Faraón moyoltetilitoc huan amo quincahuas ma quisaca nopa israelitame. ¹⁵ Pero mosta cualca xiya xiquitati quema temos campa at. Xijchiya iteno nopa hueyat Nilo huan xijhuica nopa cuatopili cati mocuetqui cohuat.

¹⁶ Huan nozona tiquilhuis Faraón para na niDios huan niamoTECO nochi anhebreo masehualme. Huan nimitztitancoc tiquilhuis para ma quincagua ma yaca nomasehualhua para techhueyichihuatij ipan huactoc tali, huan niquita para hasta ama, amo techtacauilijtoc. ¹⁷ Huajca xiquilhui para niamoTECO niqijtohua para ama yaya quimatis para na cati nelía niDios huan niininTECO nopa israelitame. Huan xiquilhui para quema tijmaquilis nopa at ica nopa cuatopili cati tijpiya momaco, nopa at mochihuas esti.

¹⁸ Huan xiquilhui para michime miquise, huan nopa hueyat mijyotis hasta egiptome quijiyase para quise nopa at. Quej nopa tiquilhuis Faraón.

¹⁹ Nojquiya TOTECO quinihui Moisés:

—Xiquilhui Aarón ma quicui icuatopil huan ma quixitahua imax imelac nopa hueyame huan nopa atajme. Ma quixitahua imax ipan campa tameya huan campa quitecaj at ipan tali Egipto, huan nochi mochihuas esti. Huan nojquiya nopa at ipan nochi conme huan tamanti cati quipiyaj at ipan ininchaj mochihuas esti hasta nopa at ipan comit cati quichijtoque ten tet.

²⁰ Huajca Moisés huan Aarón quichijque nochi senquisa quej TOTECO quinnahuatijtoya. Huan quitanancui icuatopil huan quimaquili nopa hueyat Nilo iixpa Faraón huan itequitacahua, huan nochi at mocuetqui esti.

²¹ Huan nochi michime mijque, huan nopa hueyame nelía mijyotiyaya hasta amo aquí hueliyaya ati. Oncayaya esti ipan nochi tali Egipto.

²² Pero nopa talnamiquini huan tenahualhuiani ipan tali Egipto quichi-
jqe san se ica inintenhualhuijcayo, huan huajca Faraón moyoltetili huan
amo quitacaquili Moisés huan Aarón, quej TOTECO quijtojtoya para panos.
²³ Huan Faraón mocuetiqisqui huan yajqui ipan icaltanahuatil, yon amo
quichihuili cuenta ni tamanti. ²⁴ Huan nochi nopa egiptome monejq
quichihuase ameli iteno hueyat para quiquixtise at cati cuali pampa nopa
at ipan hueyat amo huelyaya moi.

Nopa tatzacuiliti ten temasolime

²⁵ Huan TOTECO quichijqui ma mochihua esti nopa at ipan hueyat Nilo,
huan teipa panoc chicome tonati.

8

¹ Huan TOTECO quiilhui Moisés:

—Xiya xiquitati Faraón huan xiquilhuiti para niamoteco niqijtohua
para ma quincagua ma yaca nomasehualhua para techhueyichihuatij.
² Pampa sinta amo quincaguas ma yaca, na tahuel nijtatzacuilitis nochi ital
ica temasolime. ³ Nopa hueyat Nilo quinyolitis tahuel miyac temasolime.
Huan nopa temasolime calaquise ipan ichaj, huan calaquise ipan itapech
campa cochi. Huan calaquise ipan ininchaj itapalehuijcahua huan imase-
hualhua. Huan hasta calaquise campa quisajsaltaj harina huan campa
panexcitaj. ⁴ Huan nopa temasolime huitonise ininpani, huan ininpani
itequipanojcahua huan ipan nochi imasehualhua.

⁵ Huan nojquiya TOTECO quiilhui Moisés:

—Teipa xiquilhui Aarón ma tamanextis ica icuatopil ipan nopa hueyame,
atajme, huan campa mantoc at para nopona ma quisaca temasolime huan
ma quitemitica ni tali Egipto.

⁶ Huajca quej nopa Aarón tamanexti ica icuatopil ipan nopa at cati eltoya
ipan tali Egipto, huan nopona quisque temasolime cati quitemitijque nochi
nopa tali. ⁷ Pero nopa tenahualhuiani nojquiya san se quichijque ica
inintenhualhuijcayo. Nojquiya quichijque ma hualaca temasolime ipan
tali Egipto.

⁸ Teipa Faraón tatitanqui ma quinzotatij Moisés ihuaya Aarón huan quinil-
hui:

—Xijtajtanica amoteco para ma techijcuenili ni temasolime na ihuaya
nomasehualhua. Huan huajca niqincaguas imasehualhua ma yaca
quimacatij tacajchualisti.

⁹ Huan Moisés quinquili Faraón:

—Nimitzahuilia para ta techilhui nopa hora quema tijnequi ma nimotata-
jtis por ta, huan por injuanti cati mitzpalehuaj, huan por momasehualhua.
Huan ipan nopa hora quema ta tiqijtos, nimotatajtis ica TOTECO para nopa
temasolime ma mitztalcahuica, huan ma quitcalcahuica amochajchaj. Huan
ipan nopa hora amechtcalcahuise huan mocahuase san ipan hueyat.

¹⁰ Huajca nopa Faraón quijto:

—Xijchihua mosta.

Huan Moisés tananquili:

—Quej nopa elis, huan yeca tijmatis para amo aqui itztoc quej TOTECO
Dios, ¹¹ pampa nopa temasolime ayecmo itztose ipan amochajchaj. Mitztal-
cahuise huan quintalcahuise motequipanojcahua, huan momasehualhua.
San mocahuase ipan nopa hueyat Nilo.

¹² Huajca Moisés huan Aarón quisque ipan ichaj Faraón. Huan teipa Moisés quitajtani TOTECO ma quiniycueni nopa temasolime cati quintitan-toya ipan Faraón. ¹³ Huan TOTECO quichijqui cati Moisés quitajtani, huan mijque nopa temasolime cati itztoyaj ipan calme huan calixpame huan ipan mila. ¹⁴ Huan nopa masehualme quinsentilijque nopa temasolime cati mictoyaj huan quinmontonojque campa hueli huan tahuel mijyotiyayaj. ¹⁵ Pero masque quej nopa elqui, quema Faraón quiitac para ayecmo onca nopa tamanti, moyoltetili huan amo quintacaquili Moisés huan Aarón, quej TOTECO quijtojtaya para quichihuasquía.

Nopa tatzacuiliti ten atime

¹⁶ Huajca TOTECO quiilhui Moisés:

—Xiquilhui Aarón ma quixitahua icuatopil huan ma quimaquili nopa taltepociti para ma mochihuaca atime.

¹⁷ Huajca quej nopa quichijqui. Huan Aarón quimaquili nopa taltepociti ica icuatopil, huan mocuetqui atime cati quinajsic nochi masehualme huan tapiyalme, pampa nochi taltepociti mochijque atime.

¹⁸ Huan injuanti cati tenahualhuaj quichijque campeca para quinchihuase atime ica inintetanahualhuijcayo, pero amo huelque. Huan oncac atime ipan masehualme huan ipan tapiyalme.

¹⁹ Huajca nopa tenahualhuani quiilhuijque Faraón:

—¡Ni tamanti san Dios hueli quichihua!

Pero Faraón moyoltetili huan amo quintacaquili, quej TOTECO quijtojtaya para quichihuasquía.

Nopa tatzacuiliti ten sayolime

²⁰ Huan TOTECO quiilhui Moisés:

—Mosta ximijquehua cualca huan xiya xijnamiquti Faraón quema yas hueyat para maltiti huan xijcamanalhui. Xiquilhui para nimoTECO niqij-tohua ma quincagua ma yaca nomasehualhua para ma techhueyichihuatij.

²¹ Pampa sinta amo quincaguas ma yaca, na nijtitanis miyac tahuipamit ten sayolime ipan ya, ipan itequiticahua huan ipan nochi imasehualhua. Quena, temis ica sayolime ininchajchaj nochi Egipto ehuan, huan hasta talchi nojquiya temis. ²² Pero quema quej ni panos niqiyocaquixtis tali Gosén campa itztoque nomasehualhua. Nopona amo oncas yon se sayoli. Quej nopa yaya quimatis para na niamoteCO cati niitztoc ipan ni tali. ²³ Nijchihuas ya ni para nesis catijqui nomasehualhua huan catijqui amo nomasehualhua. Quej ni elis mosta.

²⁴ Huan TOTECO quej nopa quichijqui. Huan hualajque nochi tamanti sayolime ipan Faraón huan ipan ininchajchaj cati quitequipanohuayayaj. Nochi tali Egipto temic ica sayolime.

²⁵ Huajca Faraón tanahuati ma quinzotatij Moisés huan Aarón huan quinil-hui:

—Xiyaca xijmacatij tacajcahalisti amoTeco Dios, pero amo xiquisaca ten ni tali.

²⁶ Huan Moisés tananquili:

—Amo cuali tijchihuase quej nopa, pampa anEgipto ehuan anquinijiyaj nopa tapiyalme cati tijmacaj TOTECO Dios. Huan sinta anEgipto ehuan antechitase, na cuali nijmati para antechmictise ica tet. ²⁷ Monequi tiyase ipan huactoc tali hasta campa hueli tiajsise ipan eyi tonati, huan nopona tijmacase tacajcahalisti TOTECO Dios cati tijtequipanohuaj pampa quej nopa yaya technahuatía.

²⁸ Huajca nopa Faraón quijito:

—Na nimechcahuas xiyaca ipan huactoc tali para xijmacaca itacajc-ahualis amoTECO Dios, pero amo xiyaca nelhuejca. Huan xijtajtanica amoTECO Dios por na.

²⁹ Huan Moisés tananquili:

—Quema na niquisas nica, nijtajtanis TOTECO para mosta ma mitztalcahuica nopa sayolime. Huan nojquiya quintalcahuise cati mitzpalehuíaj huan nochi Egipto ehuaní. Pero ximomocuitahui amo techcayahuaca, yon ayecmo xiquintzacuili israelitame para yase quimacatij tacajcahualisti TOTECO.

³⁰ Huan quema Moisés quisqui ichaj Faraón, quitajtani TOTECO, ma tamica nopa sayolime, ³¹ huan TOTECO quichijqui cati Moisés quitajtani. Huan nopa sayolime quitcalhuijque Faraón, huan itayacanhua huan nochi Egipto ehuaní. ³² Pero Faraón sempa moyoltetili, huan amo quincahuili ma yaca nopa israelitame.

9

Nopa tatzacuiliti ipan tapiyalme

¹ Huajca TOTECO quiilhui Moisés:

—Xiya xiquitati Faraón huan xiquilhuiti para na niDIOS, niininTECO hebreo masehualme, huan na niquilhuía ma quincagua nomasehualhua ma yaca techhueyichihuatij. ² Huan xiquilhui sinta amo quincahuas ma yaca huan noja quintzacuiljtos, ³ huajca na niininTECO nijtalis nomax ipan tapiyalhua cati itztoque campa potrero, huan niqinmacas se hueyiocolisti cati nelfiero. Nopaocolisti quinajsis icahuayojhua, iburrojhua, icamellos, ihuacaxhua, huan iborregojhua. ⁴ Pero na niininTECO niqiniyocatalis inintapiyalhua israelitame ica cati iniaxchua nopa Egipto ehuaní, pampa amo nijcahuas ma miqui yon se tapiyali ten israelitame.

⁵ Nojquiya TOTECO tayolmelajqui nopa tonali quema quichihuas pampa quijito:

—Na nijchihuas ni tamanti mosta.

⁶ Huan tonili TOTECO ya nopa quichijqui. Nochi inintapiyalhua Egipto ehuaní mijque, pero amo mijqui yon se inintapiyal israelitame. ⁷ Huan Faraón tatitanqui ma yaca quiitatij inintapiyalhua nopa israelitame huan quipantitoj yon se tapiyali amo mictoya. Pero masque ya nopa elqui, Faraón moyoltetili huan amo quincahuili ma yaca nopa israelitame.

Nopa tatzacuiliti ten taxhuisme

⁸ Huajca TOTECO quinilhui Moisés huan Aarón:

—Xijcuica ome tamojtzoli cuajnexti campa quicxitíaj pantzi huan xijmajcahua para huejcapa ipan ajacat iixpa Faraón. ⁹ Huan nopa cuajnexti mochi-huas taltepociti cati más cuechtic huan mosemanas ipan nochi tali Egipto huan quichihuas ma quisaca miyac taxhuisme ipan nochi masehualme huan tapiyalme ipan tali Egipto.

¹⁰ Huajca Moisés ihuaya Aarón quicunque cuajnexti campa quicxitíaj pantzi huan yajque quiitatoj Faraón. Nozona Moisés quimajcajqui nopa cuajnexti para huejcapa, huan ya nopa quichijqui ma quisaca taxhuisme cati temalohuayayaj ipan nochi masehualme huan tapiyalme. ¹¹ Huan nopa tenahualhuani amo huelque monextijque iixpa Moisés pampa inijuanti nojquiya quinpixque taxhuisme campa hueli quej nochi Egipto ehuaní.

¹² Pero TOTECO quichijqui para nopa Faraón ma moyoltetili huan ma amo quintacaquili Moisés huan Aarón, quej TOTECO quihuijtuya Moisés.

Nopa tatzacuiliti ten tesihuit

¹³ Huajca TOTECO quihuijtuya Moisés:

—Mosta ximijquehua cualca huan xiya xiquilhuiti Faraón para na ninTECO nopa hebreo masehualme huan niqijtohua ma quincagua ma yaca nomasehualhua para techhueyichihuatij. ¹⁴ Pampa ni huelta nijtitanis se tatzacuiliti cati ajsis ipan iyolo Faraón, huan ipan iniyolo nochi cati quipalehuíaj huan nochi imasehualhua. Huan ica ya ni yaya quimatis para amo aquí seyoc Dios ipan nochi taltipacti, san na. ¹⁵ Xiquilhui Faraón para na nihueltosquía nijmictijtosquía ica se cocolista ihuaya nochi imasehualhua. ¹⁶ Pero xiquilhui na nijtali ipan itequi huan nijcajtoc ma itzto hasta ama para nijnextilis nohueyi chicahualis huan para nochi masehualme ipan taltipacti ma quicaquica ajquiya na. ¹⁷ Pero masque quitztoc nochi cati nijchijtoc iixpa, noja quintzacuilia nomasehualhua huan amo quincagua ma yaca. ¹⁸ Huajca xiquilhui para mosta ipan ni hora nijchihua ma huetzi tesihuit nelchicahuac quej amo quema huetztoc ipan nochi tali Egipto hasta quema pejqui ni tali huan hasta ama. ¹⁹ Huajca xiquilhui para nimantzi ma tanahuati ma quintzacuaca inintapiyahuac, pampa nopa tesihuit quinmictis nochi masehualme huan nochi tapiyalme cati amo quintzacuase calijtic.

²⁰ Huan sequij itapalehuijcahua Faraón quineltocaque cati TOTECO quijto huan moisihuitijque quincalaquij calijtic nochi inintapiyahuac huan inintequipanojcahua cati quincotoyaj. ²¹ Pero itztotoyaj sequij cati san quiahuiltmatque icamanal TOTECO cati Moisés quinilhuijtuya, huan quincajque ipan cuatitamit huan amo quintzajque calijtic. ²² Huajca TOTECO quihuijtuya Moisés: —Xijtanana momax huan xijmanexti ilhuicacti para ma huetzi tesihuit campa hueli ipan nochi tali Egipto. Huetzis ipan nochi masehualme huan tapiyalme huan huetzis ipan nochi tatocti ipan inimil Egipto ehuan.

²³ Huajca Moisés quitananqui icuatopil hasta ilhuicac huan TOTECO quititanqui tatomonilot, tapetanilot huan tesihuit ipan nochi tali Egipto. Huan nelía fiero elqui. ²⁴ Tahuel chicahuac huetzqui nopa tesihuit huan tapetaniyaya huan amo motilquetzayaya. Hasta ipejya Egipto amo quema huetztuya se tesihuit quej nopa. ²⁵ Huan nopa tesihuit quipolo nochi cati oncayaya ipan tali Egipto. Quinmicti nochi masehualme huan tapiyalme cati amo itztotoyaj calijtic, huan quipolo nochi tatocti ipan mili huan nochi cuame ipan inintal. ²⁶ San ipan tali Gosén campa itztotoyaj israelitame, amo huetzqui yon se tesihuit.

²⁷ Huajca nopa Faraón tatitanqui ma quinnotzatiq Moisés huan Aarón huan quihuijtuya:

—Ama nitajtacolchijtoc. Cati amoTECO quichihua, ya nopa xitahuac huan cati na huan nomasehualhua tijchihua, amo cuali. ²⁸ Nelmiyac tatomonilot huan tesihuit techajsitoc, huajca ayecmo niqintzacuilis más nopa israelitame. Xijtajtanica, amoTECO, por tojuanti para ma ayecmo huetzi tesihuit, huan na niqincahuas ma yaca israelitame.

²⁹ Huan Moisés quinanquili:

—Nimantzi quema niquisas ten ni altepet, nijtananas nomax huan nitotatajtis ica TOTECO. Huan ayecmo huetzis nopa tesihuit huan ayecmo tatomonis, huan quej nopa tijmatis para ni taltipacti iaxca TOTECO. ³⁰ Pero na cuali nijmati para yon ta, yon cati mitzpalehuíaj, amo anquitepanitaj TOTECO Dios.

³¹ Huan nochi nopa tatocti cati itoca lino huan cebada nenpolijque, pampa nopa cebada ya eltoya para xitinis huan nopa lino xochiyojtoya. ³² Pero nopa trigo ihuaya nopa centeno amo teno ipantic, pampa xitini teipa.

³³ Huan quema Moisés quisqui campa Faraón huan campa nopa al-tepet, quitananqui imax ica TOTECO huan motatajti. Huan nimantzi nochi motilquetzqui. Ayecmo huetzqui tesihuit, yon ayecmo taquiya-jqui, huan ayecmo tatomonqui. ³⁴ Pero quema nopa Faraón quiitac para ayecmo taquiayahuiyaya, yon ayecmo huetziyaya tesihuit, yon ayecmo tatomoniyaya, sempa tajtacolchijqui. Huan amo san ya moyoltetili, pero nojquiya san se quichijque nochi cati quipalehuiyayaj. ³⁵ Huan pampa moyoltetili, Faraón amo quincahuili ma yaca nopa israelitame quej TOTECO teyolmelajtoya ica Moisés para quichihuasquía.

10

Nopa tatzacuilti ten chapolime

¹ Huan TOTECO quiilhui Moisés:

—Xiya xiquitati Faraón pampa na nijchitoc para ya ihuaya itequiticahua ma moyoltetilica para huelis nijchihuas ni huejhueyi tanextili cati nijchihua iniixpa. ² Huan yeca se tonali ta huelis tiquinpohuilis moconehua huan moixhuihua nopa huejhueyi tamanti cati nijchijqui iniixpa Egipto ehuan. Quena, niqunyoltetilijtoc para xijmatica para na niDIOS, niamoTECO.

³ Huajca Moisés huan Aarón yajque quiitatoj Faraón huan quiilhuijque:

—TOTECO Dios cati tihebreo masehualme tiquixmatij mitztajtania hasta quema timoechcapanos iixpa. Quiijtohua monequi xiquincagua ma yaca imasehualhua para ma quihueyichihuatij. ⁴ Quiijtohua sinta amo tijchihuas, mosta quichihuas ma hualaca chapolime ipan motal. ⁵ Huan nopa chapolime quitemitise ni tali hasta ayecmo nesis talchi. Quicuase cati quentzi mocahua ama ten cati anquitojque cati amo nenpolij ica tesihuit. Huan nopa chapolime quicuase nochi cuame cati mocahua. ⁶ Temise ipan mochaj huan ininchajchaj motequipanojcahua huan nochi sequinoc Egipto ehuan. Ipan nochi ininemilis, amotatahua yon amohuejcapan tatahua cati huejcajquiya itztoyaj amo quema quiitztoque se tamanti quej cati ama nijchihuas.

Quema Moisés tanqui camanalti, moicancuetqui huan quisqui ten ichaj Faraón. ⁷ Huan itequiticahua Faraón quiilhuijque:

—¿Hasta quema ni tacat noja techcuesolmacas? Xiquincagua ma yaca nopa masehualme ma quihueyichihuatij ininTECO Dios. ¡Ay Tanahuatij-quet! ¡Ayemo tiquta para total Egipto ya tamisosolijtoc?

⁸ Huan Faraón tatitanqui sempa ma quinnotzatij Moisés huan Aarón huan quiilhui:

—Xiyaca xijhueyichihuatij, amoTECO Dios. Pero achtohui techilhuica ajquiya injuanti yase.

⁹ Huan Moisés tananquili:

—Monequi nochi tiyase. Yase topilcanehua hasta tohuehue masehualhua. Yase totelpocahua, toichpocahua, nochi toborregojhua huan nochi tohuacaxhua, pampa tijchihuase se hueyi ilhuit para TOTECO.

¹⁰ Pero nopa Faraón quinilhui:

—Tanemijya nesi para amo ya nopa cati anquichihuase. ¿Anmoilhúaj para na nimechcahuas anyase inihuaya nochi amosihuajhua huan amoconehua huan para amoTeco yas amohuaya? ¹¹ ¡Amo! ¡Amo quej nopa elis! Xiyaca san

antacame para xijhueyichihuatij amoTECO, pampa ya nopa cati anquijto-huaj anquinequij.

Huan itapalehuijcahua quinquixtijque Moisés huan Aarón iixpa Faraón.

¹² Huan TOTECO quiilhui Moisés:

—Xijxitahua momax ipan tali Egipto para ma hualaca chapolime huan ma quitemitica. Ma quicuaca nochi tatocti huan nochi cati mocajqui quema huetzqui tesihuit campa hueli ipan inintal.

¹³ Huan yeca Moisés quixitajqui imax ipan tali Egipto, huan TOTECO quichijqui ma huala se ajacat campa quisa tonati huan quiilpitzqui nopa tali se tonal huan se yohuali. Huan tonili nopa ajacat ya quinhualicatoya chapolime. ¹⁴ Huan nopa chapolime calajque campa hueli ipan inintal. Amo quema oncatoya imiyaca chapolime quej nopa ipan se tali, yon ayecmo quema oncas. ¹⁵ Quitemitijque nopa tali hasta amo nesiyaya talchi, huan quicuajque nochi tatocti huan nochi cuatacti cati mocajtoya ipan cuame cati momanahuij quema huetzqui tesihuit. Amo teno cati xoxohuic mocajqui ipan nochi tali Egipto, yon ipan cuame, yon ipan mila.

¹⁶ Huajca Faraón tatitanqui nimantzi ma quinnotzatij Moisés huan Aarón huan quinilhui:

—Nitajtacolchijtoc ica amoTECO Dios huan ica amojuanti, ¹⁷ pero nimechtajtania para san ni huelta techtapojpolhuica notajtacol. Huan ximotatajtica ica amoTECO Dios por na para ma techtalcahui ni tatzacuiliti cati temictia.

¹⁸ Huan Moisés quisqui ichaj Faraón, huan motatajti ica TOTECO por ya.

¹⁹ Huan TOTECO quipatac iojhui nopa ajacat, huan mocuetqui se chicahuac ajacat campa temo tonati huan quinhuicac nopa chapolime huan quinmajajqui ipan Hueyi At cati itoca Chichiltic. Huan amo mocajqui ipan Egipto yon se chapoli. ²⁰ Pero TOTECO quichijqui para Faraón ma moyoltetili huan ma amo quincahuili ma yaca nopa israelitame.

Nopa tatzacuiliti ten tzintayohuilot

²¹ Huajca TOTECO quiilhui Moisés:

—Xijxitahua momax para ilhuicac, huan ipan nochi tali Egipto ma onca se tzintayohuilot cati nelyayahuic huan tilahuac hasta huelis tiqitzquis.

²² Huajca Moisés quitananqui imax para ilhuicac, huan oncac se tzintayohuilot nelhueyi ipan tali Egipto. ²³ Para eyi tonati amo aqui hueliyaya quiita cati icalnechca huan amo aqui quisqui ipan ichaj. Pero ipan nochi ininchajchaj nopa israelitame onca yaya taahuili.

²⁴ Huajca nopa Faraón tatitanqui ma quinnotzatij Moisés huan quiilhui:

—Xiyaca xijhueyichihuatij amoTECO, huan xiquinhuicaca nojquiya amoconehua, pero ma mocahuaca nica amoborregojhua inihuaya amohuacaxhua.

²⁵ Pero Moisés tananquili:

—¡Amo tihuelise! Monequi techcahuas ma tiquinhuicaca nopa tapiyalme para nopa tacajcahualisti cati tijtatisa para tijmacase TOTECO Dios.

²⁶ Huajca nojquiya totapiyalhua yase tohuaya. Yon se tapiyali amo hueli tijcajtehuase pampa monequi tiqintapejpenise sequij injuanti cati titamacase quema tijhueyichihuase TOTECO Dios. Huan amo tijmatise taya tapiyalme tiqintequihuisse hasta tiajsise nepa.

²⁷ Pero TOTECO quichijqui para Faraón ma moyoltetili huan amo ma quincahuili ma yaca. ²⁸ Nojquiya Faraón quiilhui Moisés:

—Techtalcahui huan ximomocuitahuí para ayecmo techixtachiliqui sempa. Ipan nopa tonali quema timonextiqui noixpa, timiquis.

²⁹ Huan Moisés quinanquili:

—Cuali cati tiquijtoctoc. Ayecmo quema nimitzitas sempa.

11

Miqis nopa achtohui ejquet ipan sesen cali

¹ Huan TOTECO quiilhui Moisés:

—Noja nijhualicas seyec tatzacuiltili ipan Faraón huan nopa egiptome. Huan teipa amo san amechahuas xiyaca, pero quena, hasta amechquixtis.

² Ama xiquinilhui israelitame para monequi nochi tacame huan sihuame ma quitajtanica inincalnehcahuá tamanti ten oro huan plata.

³ Huan TOTECO quichijtoya para nopa egiptome ma quincualitaca nopa israelitame. Yeca quinmajmacaque nopa israelitame cati quintajtaniyayaj. Nojquiya nopa tequichihuani cati quipalehuiyayaj Faraón quitepanitacque Moisés huan nochi egiptome nojquiya quicualitacque.

⁴ Huajca Moisés quiilhui Faraón:

—TOTECO quiijtohua para tajco yohual panos ipan nochi tali Egipto,

⁵ huan quinmictis nochi amoachtohui cone hua ipan nochi amochajchaj nochi anEgipto ehuan. Miqis moachtohui cone ta tiFaraón cati timosehuía ipan nopa siyaj yejyetzzi campa titanahuatía huan hasta miqis iachtohui cone sesen sihua tequipanoyquet cati tisi para iteco. Nojquiya miquise nochi iniachtohui cone hua amotapiyalhua. ⁶ Ipan nochi tali Egipto, masehualme axtise chicahuac quej amo quema quichijtoque, huan quej ayecmo quema quichihuase sempa. ⁷ Pero campa itztoque israelitame, yon se chichi amo taajhuas huan amo miqis yon se masehuali o tapiyali. Huajca Faraón ta tijmatis para TOTECO nelía quinicnelía israelitame. ⁸ Huan hualase techitacqui nochi ni tequichihuani cati mitzpalehuía huan motancuaquetzase noixpa para techilhuisse chicahuac para ma tiyaca inihuaya nochi tomasehualhua. Huan quema panos ya nopa, huajca quena, niyas.

Huan Moisés quisqui iixpa nopa Faraón nelcualantoc. ⁹ Huan TOTECO ya quiilhujtoya Moisés:

—Nopa Faraón amo amechtacaquilis, huan yeca quej nopa nijchihuas noja más huejhueyi tiochicahualnescayot ipan Egipto para niquinnextilis nohueyi chicahualis.

¹⁰ Huajca masque Moisés ihuaya Aarón quichijque nochi ni huejhueyi tiochicahualnescayot iixpa Faraón, TOTECO quichijtoya ma moyoltetili Faraón huan yeca amo quincahuili ma quisaca nopa israelitame ten tali Egipto.

12

Nopa Pascua

¹ Huan ipan tali Egipto TOTECO camanaltic ihuaya Moisés huan Aarón, huan quinilhui:

² “Ama huan para nochipa ni metzti elis nopa achtohui metzti ten amoxihui anisraelitame. Huan ni metzti elis cati más ipati para amojuanti.

³ Xiquinilhuica nochi israelitame para ama huan teipa sesen xihuit ipan 10 itequi ni metzti, sesen ten amojuanti ma quicui se pilborregoxtzi o se oquich chivo para ifamilia. Sese familia quicuis san para ichaj. ⁴ Huan sinta pisiltzi se familia huan amo hueli quicuase nochi se pilborregoxtzi, huajca ma quitajcoitase se pilborregoxtzi ihuaya cati itztoque icalnehc huan quicuase san sejo. Monequi quinpohuase quesqui inimiya nopa masehualme cati itztoque huan quesqui imiyaca cati sesen huelis quicuas para quimatise

quenicatza ihuexca se pilborregojtzi huelise quitamise. ⁵ Huan xiquinilhuica monequi quitapejpenise se oquich tapiyali cati quipiya se xihuit, huan cati amo teno cati amo cuali quipiya itacayo. Huelis quitequihuse se pilborregojtzi o se chivo.

⁶ “Monequi quiajocuse nopa tapiyali cati quitapejpenise hasta 14 itequi ni metzti. Huan ipan nopa tonali quema tiotaquixtos, sesen familia ten israelitame quimictise inintapiyal. ⁷ Huan teipa quicuise ieso nopa tapiyali huan quipolose nopa tencuayomit cati eltoc itzompac icalte nopa cali campa quicuase inacayo. Nojquiya quipolose nopa caltemit itencuayo cati eltoc ipan inejmaz huan iarraves. ⁸ Huan ipan nopa tayohua quicuase nopa nacat tacacatzoli. Huan quicuase ica quilil cati chíchic huan pantzi cati amo quipiya tasonejcyot. ⁹ Ma amo quicuaca nopa nacat xoxohuic, yon tapahuaxti. Monequi anquithuatzase nopa tapiyali yajmaxtic ica itzonteco, imetz huan nochi cati quipixtoc iijtico. ¹⁰ Huan amo teno hueli anquicahuase para seyoc tonali. Sinta se tamanti mochahua nopa tayohua huan amo anquitamicuase, monequi anquitatise.

¹¹ “Quej ni antacuase. Achtohui ximoyoyontica ica amotaque huan xi-moilpica. Xijquixtica amotecac huan xijpixtocca amocuatopil amomaco. Huan huajca, quena, xijcuaca nimantzi nopa tapiyali, pampa ya nopa noPas-cua, niamoTECO, quema na nimechpanós pero amo aquí ten amojuanti niquis. ¹² Pero ipan nopa tayohua nipanós ipan nochi tali Egipto huan niqinmictis nopa oquichpilme cati achtohui ehuaní ipan sesen familia ten egiptome huan nopa oquichti cati achtohui tacatqui ten inintapiyalhua. Huan niqintamiltis nochi inintaixcopincayohua nopa Egipto ehuaní. Na niamoTECO.

¹³ “Huan nopa esti elis quej se tanextili ipan calme para xijnexctica campa anitztoque. Huajca quej nopa quema niqitas nopa esti, san nimechcalpanós huan amo teno ininpantis amoconehua quema niqinmictis nopa Egipto ehuaní ininconehua. ¹⁴ Huan ni tonali quema niqintatzacuiltis egiptome monequi anquielnamiquise sesen xihuit. Ipan ni tonali monequi antechchiuilise se hueyi ilhuit na, niamoTECO. Anquichihuase ni ilhuit para nochipa huan ni ilhuit panos ten tetajme hasta ininconehua. ¹⁵ Huan ipan nopa ilhuit anquicuase pantzi cati amo quipiya tasonejcyot para chicome tonati. Huajca ipan nopa achtohui tonali monequi xijquixtica nochi tasonejcyot ipan amochajchaj. Sinta acajya quicuas pantzi cati quipiya tasonejcyot ipan nopa chicome tonati ipan nopa ilhuit, monequi xijquixtica ten israelitame para nochipa. ¹⁶ Ipan nopa achtohui tonali ximosentilica san sejo ipan se tasentili cati tatzetzeltolitic huan sempa ximosentilica ipan nopa chicompa tonali. Ma amo aquí tequitis ipan nopa tonali. San huelis anquisencahuase tacualisti para nochi ma tacuaca. ¹⁷ Quena, xijchihuaca nopa ilhuit ten pantzi cati amo quipiya tasonejcyot sesen xihuit ipan ni tonali quema nimechquixti nochi amojuanti ipan tali Egipto. Huajca xiilhuichihuaca ipan ni tonali para nochipa. Huan ni ilhuit panos ten tetajme hasta ininconehua para nochipa. ¹⁸ Quena, sesen xihuit ica tiotac ipan 14 itequi nopa achtohui metzti, xipehuaca xijcuaca pantzi cati amo quipiya tasonejcyot huan san ya nopa xijcuaca hasta tiotac ipan 21 itequi nopa metzti.

¹⁹ “Monequi amo oncas tasonejcyot ipan amochajchaj para nopa chicome tonati. Pampa sinta acajya quicuas pantzi ica tasonejcyot, monequi anquiquixtise ten israelitame. San se anquichihuase masque quicuas se cati ehua seyoc tali, o se israelita cati nozona ehua. ²⁰ Amo teno xijcuaca cati

quipiya tasonejcaoyot, masque campa hueli anitztoque. Monequi xijcuaca san nopa pantzi cati amo quipiya tasonejcaoyot.”

Quej nopa TOTECO quiihui Moisés huan Aarón ma quinilhuitij israelitame.

²¹ Huajca Moisés quinnotzqui nochi nopa huehue tacame cati taya-canayayaj ipan israelitame huan quinilhui: “Xiyaca nimantzi huan xijtapejpenica sesen ten amojuanti se pilborregojtzi o se chivo para amofamilias, huan xiquinmictica para anilhuichihuase para nopa Pascua. ²² Xijcuaca se tatzquili ten nopa xihuit cati itoca hisopo huan xixxolonica ipan nopa esti cati eltoc ipan huajcali. Huan xijpoloca itzompac huan ipan nochi inejmat huan iarraves itencuayo amocalte. Huan yon se ten amojuanti amo hueli quisas calteno hasta quema tanezis. ²³ Huan quema TOTECO panos para quinmictis nopa egiptome, sinta quiitas nopa esti itzompac huan ipan nochi ome iteno se calfemit, huajca san quipanos nopa cali. Quej nopa, TOTECO amo quicahuilis nopa tasosolojquet ma calaqui ipan amochajchaj para quinmictis amoconehua.

²⁴ “Monequi amojuanti ihuaya amoixhuihua, xijtepanitaca ni tanahu-atilme para nochipa. ²⁵ Huan quema ya ancalactose ipan nopa cuali tali cati TOTECO amechmacas quej amechtencahuilijtoc, monequi anquichihuase ni tamanti. ²⁶ Huan quema amoconehua amechtatzintoquilis taya quiijtosnequi ni ilhuit cati anquichihua, ²⁷ xiquinilhuica para ni tapiyali ten Pascua cati tijmictiáj eltoc se tacajchualisti para TOTECO. Techel-namiquiltia quenicatza elqui quema TOTECO quinmicti nopa egiptome, pero san quipanoc tochajchaj tiisraelitame cati nojquiya tiitztoyaj ipan tali Egipto huan amo quimicti yon se ten tofamilias.”

Quej nopa Moisés quinpohuili nopa israelita tayacanani. Huan nopa tayacanani motancuaquetzque huan mohuijtzonque talchi huan quihueyichi-quej TOTECO. ²⁸ Huan teipa yajque huan quichijque cati TOTECO quinahu-atiytaya Moisés huan Aarón.

Mijqui nopa achtohui ejquet ipan sesen cali

²⁹ Huan tajco yohual TOTECO quimicti sese achtohui ejquet ipan sesen familia ten Egipto ehuaní. Quimicti iachtohui cone Faraón cati mosehuía ipan nopa yejyectzi siyaj para tanahuatis, hasta iniachtohui cone cati itztoya ipan tatzacti, huan nojquiya quinmicti iniachtohui conehua nochi tapiyalme.

³⁰ Huajca nopa tayohua mijquejque Faraón huan nochi itequiticahua cati quipalehuiyayaj, huan nochi sequinoc egiptome, huan campa hueli ipan nochi nopa tali Egipto nochi chocayayaj huan tahuejchihuayayaj. Amo oncayaya yon se cali ten Egipto ehuaní campa amo oncayaya se mijcatzi.

³¹ Huajca ipan nopa tayohua Faraón tatitanqui ma quinotzatij Moisés ihuaya Aarón, huan quinilhui:

—Amantzi xiquisaca. Xiyaca amojuanti inihuaya nochi nopa israelitame. Xiquincahuaca nomasehualhua. Xiyaca xijhueyichihuatij amoTECO quej anquijtojqque. ³² Xiquinhuicaca nojquiya amoborregojhua huan amohuacaxhua quej anquijtojttoyaj, huan xiyaca. Huan xijtajtanica, amoTECO, por na.

³³ Huan nopa Egipto ehuaní quinisihuiltijque nopa israelitame para ma quisaca ten nopa tali pampa moilhuyayaj huelis nochi egiptome miqisquáj. ³⁴ Huajca nopa israelitame quicuique inintix, masque ayemo quipiyayaya tasonejcaoyot para mosonehuas. Huan quitalijque ipan tix-huapali, huan quimimilojqque ica yoyomit huan quitalijque iniajcoltipa.

³⁵ Nojquiya quichijque cati Moisés quinnahuatijtoya huan quintajtanijque

nopa egiptome yoyomit huan tamanti ten oro huan plata. ³⁶ Huan TOTECO quichijqui para nopa Egipto ehuan ma quincualitaca nopa israelitame huan quinmacaque nochí cati tajtaniyayaj, huan yeca nopa israelitame nelía quintaquijquixtilijque nopa egiptome.

Quisque ipan tali Egipto nopa israelitame

³⁷ Huan nopa israelitame quisque Ramesés huan nejnenque hasta Sucot. Huan sinta mopohuasquíaj san inijuanti cati ya quipiyayayaj xihuit para tatehuse, mochihuayayaj nechca 600 mil, pero amo quinpojque sihuame huan coneme. Huan nochí icxinejnemiyayaj. ³⁸ Huan inihuaya yajque miyac tamanti masehualme cati amo israelitame huan nojquiya miyac borregojme huan huacaxme. ³⁹ Huan quichijque pantzi ica nopa tixti cati quiquixtijtoyaj. Huan nopa tixti amo quipixqui tasonejca yot pampa nopa egiptome quinquixtijque huan amo quiaxilijque para quichihuase inintacualis.

⁴⁰ Nopa israelitame itztoyaj ipan tali Egipto para 430 xihuit. ⁴¹ Huan ipan nopa tonali quema quiaxitiijque nopa 430 xihuit, nochí imasehualhua TOTECO quisque ipan nopa tali. ⁴² TOTECO quitapejpeni nopa tayohua huan quiyocatali para ya pampa elqui ipan nopa tayohua quema quinquixti nopa israelitame ipan tali Egipto. Huajca sese xihuit nopa tayohua nochí israelitame cati ama itztoque huan cati teipa tacajtiyase monequi quiyocatalise para TOTECO.

Nopa ley para quenicatza quichihuase nopa Pascua Ilhuit

⁴³ Huan TOTECO quinilhui Moisés huan Aarón:

“Ya ni nopa tanahuatilme para nopa Pascua Ilhuit. Yon se cati ehua seyoc tali amo huelis quicuas ten nopa tapiyali cati anquimictijtoque. ⁴⁴ Pero se tequipanojquet cati anquicojtoque, quena, huelis quicuas sinta ya anquitequilitoque iyecapan cuetaxo ipan itacayo. ⁴⁵ Pero se cati ehua seyoc tali cati san panotinemí, o se tequipanojquet cati anquitaxtahuíaj pampa amo amoaxca amo huéli quicuas ten nopa tapiyali.

⁴⁶ “Monequi xijcuaca sesen tapiyali calijitc ipan se cali. Amo xijquixtica calteno yon se quentzi ten nopa nacat. Amo xijtapanilica yon se iomiyo nopa tapiyali. ⁴⁷ Nochi israelita masehualme sentic monequi ilhuichihuase.

⁴⁸ Huan sinta itztoc se seyoc tali ejquet amohuaya cati quinequi ilhuichihuas amohuaya para quinescayotis cati TOTECO quichijqui ipan Pascua, monequi ma motequili nopa cuetaxti ipan itacayo, huan san se quichihuas ica nochí ioquichpilhua huan nochí itaca tequipanojcahua. Teipa quena, huelis quichihuas nopa ilhuit huan quicuas nopa nacat quej nochí sequinoc cati tacatque ipan amotal quichihuaj. Pero yon se oquichpil huan yon se tacat amo huelis quicuas inacayo nopa tapiyali sinta amo motequilitoc iyecapa nopa cuetaxti ipan itacayo. ⁴⁹ Se cati amo motequilitoc quej monequi amo huéli quicuas masque tacatqui quej israelita, o tacatqui ipan seyoc tali huan ama itztoc tatajco ten amojuantí.”

⁵⁰ Huan nochí nopa israelitame quichijque senquisa quej TOTECO quinahuatijtoya Moisés huan Aarón. ⁵¹ Huajca ipan nopa tonali TOTECO quinquixti imasehualhua ten tali Egipto motecpantoyaj ica miyac pamit quej soldados.

13

Sese achtohui ejquet elis taiyocatalili para TOTECO

¹ Huan TOTECO quinojnotzqui Moisés huan quiilhui:

² “Techiyocatalili nochi oquichpilme cati achtohui ehuan, pampa nochi oquichpilme cati achtohui ehuan ten israelitame huan nochi inioquich tapiyalhua cati achtohui ehuan, nochi elise noaxcahua.”

³ Huajca Moisés quinilhui nochi masehualme:

“Xiquelnamiyuca ni tonali huan xiilhuichihuaca ipan ni tonali sesen xihuit, pampa ipan ni tonali ica hueyi chichahualisti TOTECO techquixti ten tali Egipto campa titequipanohuayayaj quej titacohualme cati techcojtoyaj para tiiniacahua. Huan ipan ni tonali amo quema xijcuaca pantzi cati quipiya tasonejcaoyot. ⁴ Ama ni tonali anquisaj. ⁵ Huajca sesen xihuit ipan ni metzti monequi anquielnamiyuca ni tonali. Huan teipa san se anquichhuase quema TOTECO amechhuicatosa ipan nopa cuali tali campa itztoque nopa cananeos, heteos, amorreos, heveos huan jebuseos cati quintencahuili tohujcapan tathua para techmacas. Nopa tali quipiya miyac itajca hasta mocahua. Nopona nojquiya monequi xiilhuichihuaca ipan ni metzti. ⁶ Para chicome tonati anquicuase pantzi cati amo quipiya tasonejcaoyot, huan ipan nopa tayacapan tonali monequi anilhuichihuase para TOTECO. ⁷ Para chicome tonati anquicuase pantzi cati amo quipiya tasonejcaoyot. Ma amo oncas yon se tamanti tasonejcaoyot ipan amochaj. Huan yon se pantzi ica tasonejcaoyot amo oncas ipan amotal. ⁸ Huan teipa ipan nopa tonali anquinhuisse amonehua para ya ni tijchihuaj pampa TOTECO techchihuili nochi nopa tiochicahualnescayot quema techquixti ipan tali Egipto. ⁹ Huan quej anquitalisquij se tanextili ipan amomax o ipan amocuaixco cati amechelnamiquiltisquía se tenijqui, ya ni amechelnamiquiltis para monequi anquintoquillise nopa tanahuatilme cati techmacac TOTECO para nochipa, pampa nelía elqui TOTECO cati techquixti ten tali Egipto ica ihueyi chichahualis. ¹⁰ Huan yeca monequi tiilhuichihuase sesen xihuit ipan ni tonali quej ni tanahuatili quijtohua.

¹¹ “Huan teipa ajsis nopa tonal quema TOTECO amechhuicas ipan nopa tali campa ama itztoque nopa cananeos huan yaya amechmactilis nopa cuali tali quej amechtencahuili amojanti huan amohuejcapan tathua para quichihuas. ¹² Huan quema anajsise nopona, nojquiya monequi anquimacase TOTECO nochi oquichpilme cati achtohui ehuan huan nochi oquich tapiyalme cati achtohui tacatij pampa injuanti nelía iaxcahua. ¹³ Huelis anquicohuilise TOTECO iachtohui cone se sihua burra para elis amoaxca sinta anquinequij. Para anquicohuilise Toteco, monequi anquimacase TOTECO se pilborregoxtzi quej se tacajchahualisti para anquimanahuisse nopa pilburroxtzi. Pero sinta amo anquitemactilise se pilborregoxtzi quej se tacajchahualisti para anquimatase ica nopa pilburroxtzi, huajca monequi anquiquechpostequise nopa pilburroxtzi. Nojquiya monequi anquicohuilise TOTECO amooquichpilhua cati achtohui ehuan ica se tacajchahualisti cati anquitemactilise. ¹⁴ Huan teipa quema amonehua amechtatztintoquillise taya quijtosnequi ni tamanti cati tijchihuaj, anquinhuisse para TOTECO techquixti ica hueyi chichahualisti ipan tali Egipto campa titetequipanojtoyaj quej techcojtosquij para tiiniacahua. ¹⁵ Huan quema nopa Faraón moyoltetili huan amo quinequij techcahuilis ma tiquisaca, TOTECO quinmicti nopa achtohui ehuan ipan sesen familia ten nopa Egipto ehuan. Huan nojquiya quinmicti nochi inioquich tapiyalhua cati achtohui tacatque. Huan yeca tijmacaj TOTECO nochi oquich tapiyalme cati tacatij achtohui quej se tacajchahualisti. Nojquiya tijchohuilise TOTECO tooquichpilhua cati achtohui ehuan. ¹⁶ Huan ni ilhuit techelnamiquiltía ten TOTECO quej tijpixtosquij se tajcuiloli ipan tomox o ipan tocuaixco cati techelnamiquiltisquía se tenijqui. Techelnamiquiltía para TOTECO techquixti ten tali Egipto ica hueyi

chicahualisti. Quena, quej nopa anquinilhuse.”

Nopa tilelemecti huan nopa mixti

¹⁷ Huajca teipa, quena, Faraón quincajqui ma quisaca nopa israelitame, huan quisque Egipto ica teposti para tatehuse. Pero Toteco Dios amo quinuicac ipan nopa ojti cati pano ipan inintal nopa filisteos, masque eliyaya se ojti más xitahuac. Yaya moilhui: Sinta nimantzi monequi tatehuse, nopa israelitame sempa quinequise tacuepilise ipan tali Egipto. ¹⁸ Yeca Toteco Dios quichijqui para nopa israelitame ma temoca huan ma quimacaca se huelta campa hueli ipan nopa huactoc tali cati yahui campa nopa Hueyi At Chichiltic.

Huan nopa israelitame quisque ica pamit huan ica teposti quej elisquía yahui para tatehuitij. ¹⁹ Huan Moisés nojquiya quihuicayaya iomiyohua José, pampa José quichijtoya para iixhuihua Israel ma quitestigojquetzaca Toteco para quihuicasquía iomiyohua. Quinilhujtoya: “Melahuac, Toteco Dios teipa hualas amechpalehuiqui, huan quema ya nopa panos, monequi anquihuicase noomiyohua ten tali Egipto.” Huajca yeca quihuicaque.

²⁰ Huan nopa israelitame quistejque ipan Sucot huan yajque hasta Etam campa pehua nopa huactoc tali, huan nopona quiquetzque iniyoyoncalhua cati taxinepaloli ica inijhuyio chivojme. ²¹ Huan ica tonaya TOTECO itztoya inihuaya ipan se mixti cati quinyacanayaya ipan ojti huan ica tayohua quinyacanayaya ica se tilelemecti cati quintaahuiliyaya. Yeca injuanti huelque nejnemij tonaya huan tayohua. ²² Huajca mojmota nopa mixti tayacantijajqui tonaya huan nopa tilelemecti ica tayohua huan amo quema quincajtejqui.

14

Israelitame quixcotonque nopa Hueyi At Chichiltic

¹ Huan TOTECO quinojnotzqui Moisés huan quiilhui:

² “Xiquinilhui nopa israelitame ma tacuepilica huan ma quiquetzaca iniyoyoncalhua ipan Pi Hahiro, tatajco ten Migdol huan nopa hueyi at. Nopona mocahuase atenti iixmelac Baal Zefón. ³ Quej nopa Faraón moilhuis para anmomasiltijtoque pampa anitztoque tatajco ten huactoc tali huan hueyi at huan amo huelis anholose. Moilhuis amo anquimatij canica anyase huan san anmocuapolojtinemij ipan huactoc tali. Quej nopa moilhuis. ⁴ Huan nijchihuas Faraón ma moyoltetili huan ma amechtepotztoca. Huan huajca nijnextis nochicahualis ipan ya inihuaya isoldados para nopa egiptome ma quimatica na niamoTECO.”

Huan nopa israelitame quichijque quej TOTECO quijto. ⁵ Huajca quema nopa tanahuatijquet ten tali Egipto quicajqui para nopa israelitame choloytoyaj, yaya inihuaya cati quipalehuiyayaj moyolcuetque, huan moilhujque: “¿Para ten tiquincahuilijque ma yaca nopa israelitame huan ayecmo na techtequipanoca?”

⁶ Huan nimantzi Faraón tanahuati para ma quincualtalica itatehujca carrojhua huan quistejqui quinyacantijajqui isoldados. ⁷ Huan iica hualajque 600 tatehujca carrojme cati más cuajcualme ihuaya nochí sequinoc tatehujca carrojme ten Egipto, huan itayacanca soldados itztoyaj ipan sesen carro. ⁸ Huan TOTECO quichijqui Faraón ma moyoltetili huan ma quintoquili nopa israelitame masque injuanti ya quistoyaj ica hueyi chicahualisti.

⁹ Huan nopa egiptome ica nochi inisoldados huan tatehujca carrojme huan cahuayojme quintepotztocatiyajque nopa israelitame, huan quinajsitoj iteno nopa hueyi at nechca Pi Hahiroto huan iixpa Baal Zefón campa quiquetzttoyaj iniyoyoncalhua. ¹⁰ Huan quema nopa israelitame quiitaque para Faraón ihuaya nopa egiptome monechcahuiyayaj, tahuel majmajque huan quitajtanjique TOTECO ma quinpalehui. ¹¹ Huan nopa israelitame quiilhujique Moisés:

—¿Para ten techhualicatoc nica para ma timiquica ipan ni huactoc tali? Sinta tijnequiyaya techmictis, oncayaya campa techtalpachojtosquía ipan tali Egipto. ¿Para ten techquixti ten nopona? ¹² Ipan Egipto timitzilhuijque para techcahua tiquintequipanose nopa egiptome. Más cuali elisquía noja tiquintequipanosquíaj huan amo timiquise nica ipan huactoc tali.

¹³ Pero Moisés quinnanquili:

—Amo ximajmahuica. San ximoquetzaca huan amo ximolinica huan xiquitaca quenicatza TOTECO amechmaquixtis, pampa nopa egiptome cati ama anquinitaj ayecmo quema anquinitase sempa. ¹⁴ Yon amo monequi antatehuise, TOTECO tatehuis por tojuanti.

¹⁵ Huajca TOTECO quiilhui Moisés:

—¿Para ten san antechtajtanjaj tapalehuili? ¡Xiquinnahuati nopa israelitame ma quiitzquica iniojhui! ¹⁶ Huan ta xijtananu mocuatopil huan xixjтахua momax para tijtajcoitas nopa hueyi at, huan huajca nopa israelitame huelis quiixcotonase ipan se ojti huactoc. ¹⁷ Huan na nijchihuas nopa egiptome ma moyoltetilica huan ma amechoquilica ipan hueyi at. Huan huajca nijnextis nochicahualis iixpa Faraón, huan isoldados, huan inintatehujca carrojhua, huan injuanti cati yahuij ipan cahuayojme. ¹⁸ Huan quema ya nijnextijtos nochicahualis ipan Faraón, huan itatehujca carrojhua, huan ipan injuanti cati tejcotoque ipan cahuayojme, nopa egiptome quimatise para na niamoTECO.

¹⁹ Huan iilhuicac ejca Toteco Dios cati itztoya inihuaya ipan nopa mixti cati nejnemiyaya iniixpa, mopatac campa itztoya huan motali iniica. ²⁰ Huan yeca nopa mixti mocajqui tatajco ten nopa soldados ten Egipto huan nopa israelitame. Huan iica nopa mixti nesiya yayahuic iniixpa nopa egiptome, pero iixpa nopa mixti quintaahuiliyaya nopa israelitame. Huajca yeca nopa egiptome amo huelqué quinajsij nopa israelitame nochi nopa tayohua.

²¹ Huan Moisés quixitajqui imax ipan nopa hueyi at, huan TOTECO quitangui se ajacat chichahuac cati hualajqui campa quisa tonati huan taajacac nochi tayohua huan quitajcoitac nopa hueyi at. Huajca quej nopa TOTECO quicuetqui nopa hueyi at ica huactoc tali. ²² Huan nesqui ipan hueyi at se huactoc ojti huan ipan nopa ojti nopa israelitame panoque tatajco campa motapojtoya huan moquetzttoy nopa at tahuel huejcapa quej eliyaya ome tepamit, se ipan ininejmat huan seyoc ipan iniarraves.

²³ Huan teipa nopa Egipto ehuan quintoquilijque. Quena, nochi nopa cahuayojme ica itatehujca carrojhua Faraón huan injuanti cati yahuiyayaj ipan cahuayojme calajque inintepotzco huan quintoquilijtiyajque hasta tatajco nopa hueyi at. ²⁴ Huan tajco yohual, TOTECO cati itztoya ipan nopa hueyi mixti huan ipan nopa tilelemecti quintac nopa soldados ten tali Egipto huan quinhuihuichijqui para ma amo quimatica taya quichihuase. ²⁵ Huan quinquixtili nopa tepos yahuali cati ipan nemiyayaj inintatehujca carrojhua para ma ayecmo huelica quihuicase inicarrojhua. Huajca nopa egiptome quiijtojque:

—Ma timochololtica ten ni israelitame, pampa DIOS, ininTECO techtehuía huan quinmanahuía.

²⁶ Huan teipa quema nopa israelitame ajsitoj seyoc nali, TOTECO quiilhui Moisés:

—Xijxitahua momax ipan nopa hueyi at para nopa at ma mosentili huan ma quinatzonpolihuilti nopa egiptome ipan inintatehujca carrojhua inihuaya cati tejcoctoque ipan cahuayojme.

²⁷ Huan Moisés quixitajqui imax ipan nopa hueyi at, huan quema tanestihualayaya, nopa at mocuetqui campa ipa eltoya. Huan quema nopa egiptome quinejque cholose, nopa hueyi at quinhuicac, huan quej nopa TOTECO quinisahuilti. ²⁸ Huan quema nopa at mocuetqui campa ipa eltoya, quinatzonpolihuilti nochi nopa soldados, carrojme huan cahuayojme cati calactoyaj ipan hueyi at para quintoquilise israelitame. Yon se ten isoldados Faraón amo mocajqui yoltoc. ²⁹ Pero nopa israelitame ya quixcotontoyaj nopa hueyi at ipan se ojti huactoc tatajco campa nopa at moquetztoya quej ome tepamit ten at, se ipan ininejmat huan se ipan iniarraves.

³⁰ Huajca ipan nopa tonali TOTECO quinmaquixti nopa israelitame ten nopa egiptome huan nopa israelitame quiitaque inintacayohua nopa egiptome iteno nopa hueyi at. ³¹ Huan quema nopa israelitame quiitaque nopa hueyi chichahualisti cati TOTECO quinextijtaya ica nopa egiptome, quihueyitepanitaque, huan motemachijque ipan ya huan ipan itequipanojca Moisés.

15

Huicat para quihueyichihuas TOTECO

¹ Huajca Moisés inihuaya nopa israelitame huicaque ni huicat para TOTECO:

“Nihucas para TOTECO pampa tatangui ica ihueyi chichahualis. Quinisahuilti ipan hueyi at nopa cahuayojme inihuaya cati ininpa tejcoctoyaj.

² TOTECO techchijtoc ma nihuica ica paquilisti.

Yaya Notemaquixtijca cati techmaca tetli.

Yaya Dios noTeco cati nijtepanita, huan nijpaquilismacas.

Yaya nopa Dios cati notata quihueyichijqui, huan nijhueyitalis.

³ TOTECO ya nopa tatehujquet cati más quiipiya chichahualisti.

Quena, TOTECO, ya nopa itoca.

⁴ Quinisahuilti ipan hueyi at nopa tatehujca carrojme,

inihuaya isoldados Faraón.

Nopa soldados cati más cuajcualme ipan nochi tali Egipto,

misahujque ipan hueyi at cati itoca Chichiltic.

⁵ Huetzque hasta atatzinta quej teme.

Huan nopa at cati huejcata quinatzonpolihuilti.

⁶ ¡Ay, TOTECO! Tijpiya hueyi chichahualisti,

huan tiquintamilti toculancaitacahua.

⁷ Huan ica mohueyi chichahualis tiquinpolo cati motalijque moixpa.

Tejcoc mocualancayo quej se hueyi tit,

huan quinpolihuilti.

Inijuantí tami tataque quej sacat.

⁸ Chichahuac tiquilpitzqui nopa hueyi at,

huan nopa at motajcoítac.

Nopa hueyi at motananqui huan moquetzqui oncac,

quej moquetzaj ome huejcapantique tepame.

Nopa hueyi at cati huejcata motetictali.

⁹ Tocualancaitacahua mohueyimatque huan quiijtojqque:

‘Tiquintoquillise hasta tiquinajsitij,

huan tiquinquixtilise nochi cati quipiyaj,

huan timochihuase titominpiyani ica cati iniaxca.

Teipa tijquixtise tomacheta huan tiquintzontamiltise ica tomax.’

Quej nopa moilhuijqque.

¹⁰ Pero ta, TOTECO, titailpitzqui, huan nopa hueyi at quintolo.

Misahuijqque quej teposti ipan at cati huejcata.

¹¹ ¡Ay TOTECO! Amo aquí seyoc Dios cati ica huelis timitzhuicalotise.

Amo aquí tatzejtzeloltic quej ta.

Amo aquí quipiya mohueyi chichahualis. Cati ta tijchihua temajmatía.

Huajca quinamiqqui para timitzhueyichihuase.

¹² Titenextili mochichahualis, huan quintolo nopa tali.

¹³ Ica moteicnelijcayo techyacanas tojuanti timomasehualhua cati techmaquixtijtoc.

Ica mochichahualis techhuicas hasta mochaj cati tatzejtzeloltic.

¹⁴ Nochi tacame ipan nochi talme huihuipicase quema quimatise cati tijchijtoc.

Nopa filisteos majmahuise pampa quinitzquis majmajti.

¹⁵ Huan nopa tayacanani ten soldados ipan tali Edom, yon amo huelis taijyotilanase.

Nopa tanahuatiani ten tali Moab huihuipicase ica majmajti.

Huan ayecmo quipiyase chichahualisti injuanti cati mooquichmatiyayaj ipan tali Canaán.

¹⁶ Hueyi majmajti quinajsis.

Quena, quinamiqqui ma majmahuica.

Tocualancaitacahua ayecmo techtehuise,

san majmahuise ica mohueyi chichahualis, TOTECO,

huan mocahuase quej teme.

Tojuanti cati techcojtoc para timoaxcahua tijpanoque nopa at ica temachili.

Injuanti amo teno huelqui techchihuillise pampa ta techmanahui.

¹⁷ ¡Ay TOTECO! Techhuica para tiitztotij ipan motepe cati tatzejtzeloltic.

Techyacana hasta nopa tali campa tijtapejpeni para tiitztose,

nopona ipan mochaj cati ta tijchijchijqui.

¹⁸ TOTECO, titanahuatis para nochipa.”

Cati huicac María

¹⁹ Quema itatehuijca carrojhua Faraón huan icahuayojhua huan cati

ipan tejcotoyaj calajque ipan hueyi at, TOTECO quichijqui nopa hueyi at

ma quihuica. Pero nopa israelitame quixcotonque nopa hueyi at ipan

se ojti huactoc. ²⁰ Huajca nopa sihua tajtolpanextijquet María, ihuelti

Aarón, quicuic se tepos tatzilinti, huan nochi israelita sihuame quitzilini-

ijtiyahuyayaj nopa tepos tatzilinti, huan huicayayaj, huan mijtotiyayaj.

²¹ Huan María huicayaya huan quinnanquiliyaya ica ni camanali:

“Xihuicaca para TOTECO,

pampa tatanqui ica ihueyi chichahualis.

quinisahuilti ipan hueyi at nopa cahuayojme,

huan injuanti cati ipan tejcotoyaj.”

Nopa at cati chichic

²² Huan Moisés quinyacanqui nopa israelitame huan quistejqque ten nopa

Hueyi At Chichiltic, huan yajque ipan nopa huactoc tali itoca Shur. Huan

nejnenque para eyi tonati pero amo quipantiyayaj at. ²³ Huan quema ajsitoj campa se ameli cati itoca Mara, amo huelque quique nopa at cati oncayaya nopona pampa eliyaya chichic. Yeca nopa ameli quitocaxtiqque Mara cati quinequi quijtos “chichic”.

²⁴ Huan nopa israelitame pejqque cualancamanaltij ica Moisés, huan quijtohuayayaj: “¿Taya huelis tiquise?” ²⁵ Huajca Moisés quitajtani TOTECO itapalehuil para quimatis taya quichihuas, huan TOTECO quinextili se cuamacuayot. Huan Moisés quimajcajqqui nopa cuahuit ipan at, huan nopa at mocuetqui se cuali at.

Huajca nopona TOTECO quincamanalhui israelitame para quinyejyecos sinta quitoquilisquíaj huan ya ni cati quintencahuili. ²⁶ Quinilhui: “Sinta anquitacaquilise cati niamoTECO Dios nimechilhuía, huan anquichihuase cati xitahuac noixpa huan anquinelto case notanahuatil, amo nimechtitanilis yon se cocolisti cati nijtitanqui ipan nopa egiptome, pampa na niamoTECO Cati Nimechcicahua.”

²⁷ Huan teipa nopa israelitame ajsitoj Elim campa oncayaya doce ameli huan 70 palma cuame, huan nopona nechca at quiquetzque iniyoyoncalhua.

16

TOTECO quinmacac nopa tacualisti cati itoca Maná

¹ Huan nochi israelitame quisque Elim huan ajsique ipan nopa huactoc tali cati itoca Sin cati mocahua tatajco ten Elim huan Sinaí. Huan ajsitoj nopona ipan 15 itequi nopa ompa metzti ipan inixihui. ² Huan nopona ipan nopa huactoc tali, nochi pejqque quitajilhuijáaj Moisés huan Aarón. ³ Huan nopa masehualme quinilhuiyayaj:

—Más cuali eltosquía sinta TOTECO techcahuilijtosquía ma timiquica ipan tali Egipto. Nepa timosehujtoyaj nechca nopa chachapali cati temitoya ica nacat huan titacuayayaj hasta tiixhuiyayaj, pero ama antechhualicatoque ipan ni huactoc tali para antechapismictise.

⁴ Huajca TOTECO quillhui Moisés:

—Nijchihuas para tacualisti ma huetzi ten ilhuicac quej quema taquiyahui. Huan mojmosta nopa israelitame monequi quisentilise san cati quitequihuisse ipan nopa tonali. Nijnequi niqitas ajquiya quinelto case cati niquilhuis huan ajquiya, amo. ⁵ Huan sesen samano ipan nopa chicusasempa tonali quema quisentilise para quihuicase inincha, ma quisentilica cati monequi para ome tonati.

⁶ Huan Moisés huan Aarón quinilhuijqque nopa israelitame:

—Ica tiotac anquimatise para yaya TOTECO amechquixti ipan tali Egipto, ⁷ huan ica ijnaloc anquitate itatanex, pampa quicajqui para anquitajilhuiyayaj. Pampa amo na huan Aarón cati antechtajilhuijáaj ¿Ajquiya tojuanti? Tojuanti amo titanahuatíaj.

⁸ Huan Moisés quijto:

—Ica tiotac TOTECO amechmacas nacat para antacuase, huan ica ijnaloc amechmacas pantzi hasta mocahuas, pampa quicactoc para amojuanti anquitajilhuijqque. Amo tojuanti antechtajilhuijqque. Tojuanti amo teno topati. Pero quena, anquitajilhuijqque TOTECO.

⁹ Huan teipa Moisés quillhui Aarón ma quinilhui nochi israelitame:

—Ximonechcahuica iixpa TOTECO, pampa ya quicactoc cati ica anquitajilhuijqque.

¹⁰ Huan ipan nopa talojtzi quema Aarón quincamanalhuyaya nopa israelitame, nochi tachixque ica campa nopa huactoc tali, huan itatanex

TOTECO monexti ipan se mixti. ¹¹ Huan TOTECO quinojnotzqui Moisés huan quiilhui:

¹² —Nijcactoc quenicatza noca camanaltij huan techtaijilhuíaj ni israelitame. ‘Xiquinilhui para quema tiotaquiyas, quicuase nacat, huan ica ijnaloc quicuase pantzi hasta ixhuisse. Quej nopa quimatise para na niDIOS, niininTECO.’

¹³ Huan ipan nopa tiotac hualajque miyac totome cati inintoca codornices, huan quitemitijque campa itztoyaj nopa israelitame. Huan ica ijnaloc huetzqui ajhuechti huan quinyahualojtoya campa mocahuayayaj. ¹⁴ Huan teipa quema nopa ajhuechti ya pojquejtaya, mocajqui ipan nopa tali se tamanti chipahuac quej ichcat. ¹⁵ Huan nopa israelitame amo quimatiyayaj taya eliyaya, huajca quema quiitaque, moilhuijque se ica seyoc: “¿Huan ya ni taya?” Huan Moisés quinilhui:

—Ya ni nopa pantzi cati TOTECO amechmacatoc para amotacualis. ¹⁶ Huan ya ni nopa tanahuatilme cati techmacatoc TOTECO: Sesen ten amojuanti ma quisentili cati monequi para quicuase cati itztoque ipan ichaj. Xijcuica quej ome litros para quicuas sesen masehuali ipan amofamilia.

¹⁷ Huan nopa israelitame quichijque quej quinilhuijtaya. Huan sequij miyac quisentilijque huan sequinoc amo más. ¹⁸ Huan quitamachijque ica se tatamachihuali cati itoca gomer cati quicui nechca ome litros. Huan amo mocajqui cati quisentilijtoya miyac, yon amo quipolo cati quisentilijtoya quentzi. Sesen ten injuanti quipixqui san cati monequiyaya para quicuase ichampoyohua.

¹⁹ Huan teipa Moisés quinilhui:

—Amo aquí ma quicahua yon se quentzi ni tacualisti para mosta.

²⁰ Pero sequij amo quitacaquillijque Moisés huan quiajojque nopa tacualisti para ne seyoc tonali. Huan tonili quiitaque oculilojtaya huan mijyotiyaya. Huajca Moisés cualanqui ica injuanti.

²¹ Huajca sesen israelita quisentiliyaya ica ijnaloc cati monequiyaya para quicuase, huan tajcotona quema tatotoniyayaya atiyayaya cati mocahuayaya talchi. ²² Pero ipan chिकासempa tonali quisentiliyayaj cati quicuasquíaj para ome tonati, quijjtosnequi se nahui litro para sesen masehuali. Huan nopa israelita tayacanani yajque quiphuillitaj Moisés cati quichihuayayaj, ²³ huan Moisés quinilhui:

—¡Cuali! Ya nopa cati TOTECO tanahuatijtoc, pampa mosta elis nopa tonali para timosiyajquetzase. Timosiyajquetzase pampa eltoc se tonali tatzejtzeloltic. Nopa tonali taiyocatalili san para TOTECO huan amo titequitise. Huajca xijmolonica cati anquinequij huan xiquicxitica cati anquinequij ama huan xijtequihuica cati monequi ama, pero xicajocuica cati mocahuas para mosta.

²⁴ Huajca injuanti quiajojque tacualisti para mosta, quej tanahuatijtoya Moisés. Huan tonili noja eliyaya cuali. Amo potehui, yon amo quinpixqui oculilime. ²⁵ Huajca ipan sábado Moisés quijjto:

—Ama xijcuaca cati mocahua pampa ama ni tonali para timosiyajquetzase ica TOTECO huan amo anquipantise tacualisti. ²⁶ Mojmosta para chिकासen tonati huelis anquisentilise, pero ipan nopa chicompa tonali, timosiyajquetzase huan amo teno oncas calteno para anquisentilise.

²⁷ Pero sequij masehualme quisque ipan nopa chicompa tonali para quisentilise, pero amo teno quipantijque. ²⁸ Huajca TOTECO quiilhui Moisés:

—¿Hasta quema anquinelto case cati nimechnahuatía huan cati nimechmachtía? ²⁹ Xiquitaca para na, niamoTECO, nimechmacatoc ni tonali

para ximosiyajquetzaca. Yeca ipan nopa chिकासempe tonali nimechmacas tacualisti para ome tonati. Huan ipan nopa chicompa tonali nochi monequi mochahuase ipan ininchajchaj huan amo ma quisaca.

³⁰ Huajca nopa israelitame mosiyajquetzque ipan nopa chicompa tonali.

³¹ Huan quitocaxti que “maná” nopa chipahuac pantzi cati quisen-tiliyayaj. (Maná quinequi quijitos: ¿Taya Ya Ni?) Eliyaya chipahuac quej culanto iyol, huan iajhuiyaca elqui quej pantzi cati quichijtoque ica necti.

³² Huan Moisés quijito:

—TOTECO techmacatoc tanahuatili ma tijtemitica ome litro ica maná huan ticajocuisse para toixhuihua cati teipa tacajtiyase ma quuitaca nopa tacualisti cati TOTECO techmacac ipan ni huactoc tali quema techquixti ipan tali Egipto.

³³ Huajca Moisés quilhui Aarón para ma quicui se chiquihuit huan ma quitema nozona ome litro ten maná. Huan quilhui para teipa ma quitali iixpa TOTECO huan ma quiajocui para quiiase iniixhuihua.

³⁴ Huajca Aarón quichijqui cati TOTECO quinahuati Moisés, huan teipa quitali nopa chiquihuit ipan icaxa TOTECO.

³⁵ Huan nopa israelitame quicujque maná para 40 xihuit hasta ajsitoj ipan tali Canaán campa sequinoc tatojtoctoyaj huan oncayaya ten quicuase.

³⁶ Huan injuanti quitequihuijque se tatamachihuali cati itoca gomer cati eliyaya quej ome litro. Huan monequiyaya majtacti gomer para elisquía se tatamachihuali cati itoca efa cati quicuisquía quej 20 litros.

17

Nopa at cati quisqui ipan tet (Nm. 20:1-13)

¹ Huan nochi nopa miyaqui israelitame quisque ten tali Sin huan yajque ica yolic quej TOTECO quinnahuatiyaya. Huan nejnentiyaque huan quiijuenijtiyaque iniyoyoncalhua mojmosta hasta ajsitoj campa itoca Refidim. Pero nozona amo oncayaya at para atise, ² huajca cualunque ica Moisés huan quilhuijque:

—¡Techmaca at para tiatise!

Huan Moisés quinnanquili:

—¿Para ten ancualanij ica na? San anquicualancamacaj huan anquiyeyjeh-cohuaj TOTECO.

³ Pero nochi amiquiyayaj huan quitajilhuiyayaj Moisés, quilhuiyayaj:

—¿Para ten techchijqui ma tiquisaca ipan tali Egipto? ¿Para ten techhualiac nica? San techamictis ica toconehua huan totapiyalhua.

⁴ Huajca Moisés quinojnotzqui TOTECO huan quilhui:

—¿Taya nijchihuas ica ni masehualme? ¡San se quentzi más huan techtepa-chose!

⁵ Huan TOTECO quinnanquili:

—Xijhuica nopa cuatopili cati ica tijmaquili nopa hueyat Nilo. Huan xiquisa huan ximotali iniixpa ni masehualme para titayacanas. Huan xiquinhuica sequij huehue tacame cati quipiyaj tequit ica israelitame, huan xiya. ⁶ Huan na nimitzchixtos campa nopa tet nechca tepet Horeb. Huan xijmaquili nopa tet huan nozona quisas at para atise nochi ni israelitame.

Huajca Moisés quej nopa quichijqui iniixpa nopa huehue tacame ten nopa israelitame. ⁷ Huan quitocaxti nozona campa itztoya Masah. (Masah quinequi quijitos Campa Quiyeyjecoque TOTECO Para Ma Quinmicti.)

Huan nojquiya quitocaxti Meriba. (Meriba quinequi quijitos Tanajnan-quilisti.) Quej nopa quitocaxti pampa nozona nopa israelitame quinajnan-quilijque huan quijejeceojque TOTECO huan quijtojque: “¿Itztoc TOTECO tohuaya o amo aqui?”

Nopa tatehuilisti ica nopa amalecitame

⁸ Huan hualajque nopa amalecitame huan pejqe quintehuaj nopa israelitame ipan Refidim. ⁹ Huan Moisés quihui Josué:

—Xiquintapejpeni tacame huan xiquintehuitij nopa amalecitame. Huan mosta na nimoquetzas tachiquiltipa ica icuatopil Toteco nomaco.

¹⁰ Huan Josué huan nopa tacame quichijque cati Moisés quinnahuati, huan quintehuitoj nopa amalecitame. Huajca Moisés, Aarón huan Hur tejqoche tachiquiltipa para quintachilise. ¹¹ Huan quema Moisés quitanayaya imax, nopa israelitame tataniyayaj, pero quema quitemo-huiyaya imax, tataniyayaj nopa amalecitame. ¹² Huan teipa Moisés macuatic. Huajca quicuique se tet para ipan mosehuis huan Aarón ihuaya Hur quimatanantoyaj. Se moquetzqui ica inejmat huan se ica iarraves. Huajca san quej nopa Moisés huelqui quijyohui momatanantoc hasta quema calajqui tonati. ¹³ Huan yeca Josué quintamimicti nopa amalecita soldados ica imacheta.

¹⁴ Huan TOTECO quihui Moisés:

—Xiquijcuilo ni camanali ipan se amat cati huejcahuas para ma quielnamiquica nopa israelitame para nochipa, huan nojquiya xiyolmelahua Josué ten ya ni. Na niquintamiltis nochi nopa amalecitame ipan ni taltipacti huan amo aqui quinelnamiquis.

¹⁵ Huan Moisés quichijqui se taixpamit cati quitocaxti: “TOTECO Itztoc Quej Se Bandera Cati Techyacana.” ¹⁶ Huan Moisés quijto: “Quej se bandera tomaco, Toteco techyacana ma titatanica. Pampa nopa amalecita masehualme motanantoque iixpa TOTECO, yaya quintehuis para nochipa.”

18

Jetro quipaxalo Moisés

¹ Huan Jetro, nopa totajtzi ten tali Madián cati elqui imontaj Moisés, quicajqui quenicatza TOTECO quinquixtitoya nopa israelitame ten tali Egipto. Nojquiya quicajqui nochi nopa yejyetzti tamanti cati quinchihuilijtoya Moisés huan imasehualhua. ²⁻³ Moisés quitantoyaya isihua, Séfóra, ma yahui ichaj quema quinmanahuiyaya nopa israelitame. Huan Jetro imonta Moisés sempa quiselijtoya iichpoca inihuaya ome iconehua. Se ten nopa coneme itoca eliyaya Gersón. (Gersón quinequi quijitos Seyoc Tali Ejquet.) Quej nopa Moisés quitocaxti pampa quijtojtoya: “Nielqui nise seyoc tali ejquet ipan se tali cati amo niquixmati”. ⁴ Huan nopa seyoc icone itoca eliyaya Eliezer. (Eliezer quinequi quijitos Toteco Dios Yaya Notapalehuijca.) Quej nopa quitocaxti pampa quijtojtoya: “Toteco Dios cati notata quitoquili hualajqui techpalehuico huan techmaquixti ten imacheta Faraón.”

⁵ Huajca se tonali quema nopa israelitame ya ajsitoyaj ipan huactoc tali, Jetro quicuitejqqui isihua huan iconehua Moisés huan yajque campa Moisés quiquetztoya ichaj ten yoyomit nechca itepe Toteco. ⁶ Huan Jetro tatitanqui ma quiyolmelahuatij Moisés para ya ajsitoyaj. Quihui:

—Na niJetro, momontaj. Nihualajtoc nimitzitaqui huan nijhualica mosihua huan moconehua.

⁷ Huan Moisés quisqui para quiseliti imontaj, huan quitajpalo ica yejyetzti huan quitzoponi. Huan teipa quema motajpalojque, calajque ipan se cali ten yoyomit. ⁸ Huan nozona Moisés quipohuili imontaj nochi cati TOTECO quichihuilijtoya Faraón huan nopa egiptome pampa quinicneli nopa israelitame. Huan quipohuili nochi tamanti cati ininpanitoyaya ipan ojti huan quenicatza TOTECO quinmaquixtijtoya.

⁹ Huan Jetro pajqui quema quicajqui quenicatza TOTECO quinpalehuijtoya nopa israelitame huan quinmaquixtijtoya ten nopa egiptome. ¹⁰ Huan Jetro quijto:

—Ma tijhueyichihuaca TOTECO cati amechmanahuijtoc imaco Faraón huan nochi egiptome, huan nochi cati fiero inijuanti amechchihuiiyayaj.

¹¹ Ama niqiztoc para TOTECO itztoc más hueyi ten nochi sequinoc cati quintocaxtalíaj dioses, pampa amechmanahuijtoc inimaco masehualme cati mohueyimatiyayaj huan cati fiero amechchihuiiyayaj.

¹² Teipa Jetro quimacac Toteco sequij tacajcahualisti huan quitati se tapiyalí iixpa. Huan Aarón ihuaya nochi nopa huehue tacame ten nopa israelitame yajque tacuatoj ihuaya imontaj Moisés iixpa Toteco Dios.

Moisés quintali sequij jueces

(Dt. 1:9-18)

¹³ Tonili Moisés mosehui quej juez para quintacaquilis nopa israelitame cati motatelhuiyayaj se ica seyoc. Huan semilhuit miyac masehualme ijcatoyaj iixpa hasta nochi cuatiyayaj. ¹⁴ Huajca quema Jetro imontaj Moisés quitaq nochi nopa tequit cati Moisés iseltitzi quichihuayaya iniixpa nopa israelitame, quihui:

—¿Taya tiquinchihuilía ni masehualme? Amo cuali para san ta timosehuía para titetajtolsencahuas huan nochi inijuanti semilhuit moquetztoque.

¹⁵ Huan Moisés quinanguili imontaj:

—Nochi hualahuij techitaquij para ma nijtajtani Toteco Dios taya ipaquilis. ¹⁶ Huan quema mocualaníaj se ica seyoc, hualahuij techitaquij para ma niquinilhui ajquiya quichijtoc cati melahuac. Huajca na niquinilhúa taya quijtohua Toteco Dios huan taya itamachtil.

¹⁷ Huajca Jetro, imontaj Moisés, quihui:

—Amo cuali cati tijchihua. ¹⁸ Tisiyajcamiquis huan nojquiya siyahuse nochi nopa masehualme cati hualahuij campá ta. Ni tequit nel tetec para ta. Moseltitzi amo huelis tijtamichihuas. ¹⁹ Huajca ama xijcaqui huan nimitzilhuís cati monequi tijchihuas huan Toteco mitztiochihuas. Ta motequi timonextis iixpa Toteco por nochi ni masehualme huan xijtali iixpa nopa tamanti cati quincuesohua. ²⁰ Nojquiya monequi xiquinmachi itanahuatilhua huan cati yaya quijtohua huan xiquinilhui quenicatza monequi itztose huan taya monequi quichihuase. ²¹ Nojquiya monequi xiquintapejpeni ten nochi nopa masehualme sequij tayacanca tacame cati temachme huan cati quitepanitaj Toteco Dios. Xiquintapejpeni cati amo istacatij huan cati amo quinequij cati seyoc iaxca. Xiquintali sequij nopa tayacanca tacame ma quipiyaca tanahuatili ica mil masehualme. Huan tatzinta sese ten inijuanti, xiquintali 10 tacame cati quipiyase tanahuatili ica 100 masehualme. Huan tatzinta ten sesen nopa 100 masehualme, xiquintali ome tacame cati quipiyase tanahuatili ica 50 masehualme. Huan tatzinta ten sesen nopa 50 masehualme, xiquintali 5 tacame cati san quipiyase tanahuatili ica 10 masehualme. ²² Huan inijuanti quisencahuase cati quincuesos ni masehualme ipan ten hueli talojtzi. Huan san nopa tamanti cati más huejhueyi mitzhualiquilise huan inijuanti quisencahuase nochi tamanti cati amo ohui. Quej nopa amo

elis tahuel ohui nopa tequit pampa anquichihuase san sejco. ²³ Sinta Toteco mitzcahuilis xijchihua ya ni, huajca huelis tiquijyohuis motequi, huan nochi nopa masehualme paquise.

²⁴ Huajca Moisés quitacaquili imontaj huan quichijqui nochi cati quihuijtoya. ²⁵ Quintapejpeni tayacanca tacame cati más temachme ipan nopa israelitame huan quinmacac sequij ten inijuanti tanahuatili ica sesen mil masehualme. Huan tatzinta ten sesen nopa tayacanani, quinmacac 10 tacame tanahuatili ica 100 masehualme. Huan tatzinta sesen nopa tacame, quinmacac 2 tacame tanahuatili ica 50 masehualme. Huan tatzinta sesen inijuanti, quinmacac 5 tacame tanahuatili ica 10 masehualme. ²⁶ Huan inijuanti quintajtolsencahuayayaj masehualme ipan ten hueli tonali. Huan san nopa tamanti cati huejhuéyi quihuiquiliyayaj Moisés, pero nochi camanali cati amo más ohui quisencahuayayaj inijuanti. ²⁷ Huan teipa Moisés quinahuatijtequi imontaj, Jetro, huan yaya mocuetqui ipan ital.

19

Nopa israelitame ajsique ipan huactoc tali Sinaí

¹ Ipan nopa tonali quema quiaxiti eyi metzti para quistoyaj nopa israelitame ten tali Egipto, inijuanti ajsitoj ipan nopa huactoc tali nechca tepet Sinaí. ² Huan teipa quistejque ipan Refidim huan ajsitoj campa tepet Sinaí, huan nopona quiquetzque iniyoyoncalhua iixpa nopa tepet ipan nopa huactoc tali. ³ Huan nopona Moisés tejoc ipan nopa tepet para mopantis ihuaya Toteco Dios. Huan TOTECO quinojnotzqui Moisés ten nopa tepet huan quihui ma quinilhui nopa israelitame * ni camanali:

⁴ —Amojuanti ya anquitztoque cati nijchijqui ica nopa egiptome. Anquimatij nimechmocuitahuijtoc. Quena, quej se hueyi cuatojti quinhuica iconehua ipan ieltapal para amo teno huelis quinajsis, quej nopa nimechhualicatoc campa na. ⁵ Huajca ama sinta anquicaquise cati nimechilhuijtoc huan anquichihuase nopa camanali cati nijpiya amohuaya, huajca anelise annotapejpenilhua ten nochi masehualme. ⁶ Huan anelise se altepet ica seyoc xinachtí masehualme cati iyoca ten nochi sequinoc. Nochi anelise totajtziti huan tatzejzeloltique noixpa.

Quej nopa TOTECO quihui Moisés ma quinilhui nopa israelitame.

⁷ Huajca Moisés yajqui huan quinnotzato nopa huehue tacame cati quipiyayayaj tanahuatili ica nopa israelitame huan quinilhui nochi cati TOTECO quinahuatijtoya. ⁸ Huajca nochi nopa israelitame tananquilijqe san se:

—Nochi cati TOTECO tanahuatijtoc, tijchihuase.

Huajca Moisés yajqui quihuihuito TOTECO cati nopa israelitame tananquilijqe, ⁹ Huan TOTECO quihui:

—Xiquita, na nimonextis amoixpa ipan se mixti cati tilahuac para nopa masehualme ma nechcaquica quema nimitzcamanahuis. Quej nopa motemachise ipan ta para nochipa.

Huan Moisés quihui TOTECO taya quinanquilijqoyaj nopa israelitame.

¹⁰ Huan TOTECO quijito:

—Xiya xiquincualtaliti nopa masehualme ama huan mosta, huan xiquiniyocacahua senquisa para na. Monequi quichicuenise iniyoyo, ¹¹ huan ma mocualtise para huicta, pampa huicta nitemos na niamoTECO, huan niitstos ipan tepet Sinaí iniixpa nochi nopa masehualme. ¹² Huajca xijchihua se nepamit yahualtic nopa tepet huan xiquinnahuati nopa

* 19:3 19:3 Iixhuihua Jacob.

masehualme ma amo quiixcotonaca. Huan xiquinilhui ma motachilica para amo tejcose, yon amo ajsise campa nopa nepamit, pampa cati quiajsis nopa tepet o nopa nepamit temachti monequi anquimictise. ¹³ Huan amo aquí huelis quitális imax ipan nopa masehuali o nopa tapiyali cati monequi miquis, pampa monequi anquimictise ica tet o ica cuataminti, masque se masehuali o se tapiyali. Amo huelis anquicahuase ma itzto. Masehualme san huelise monechcahuise itzinta nopa tepet quema quicaquise quipitzaj icuacua se oquich borrego.

¹⁴ Huajca Moisés temoc ten nopa tepet huan quincualtali nopa masehualme para quihueyichihuase Toteco. Huan nochi quichicuenijque iniyoyo. ¹⁵ Huan Moisés quinilhui:

—Monequi anmocualtise para huicta. Huan tacame huan sihuame ma amo motecaca san sejco ipan ni tonali.

¹⁶ Huan ihuictaca ica ijnaloc, pejqui tatomoni huan tapetani, huan se mixti cati nelía tilahuac motali ipan nopa tepet. Huan quicajque se tapitzali cati nelía chichahuac hasta nochi nopa israelitame pejque huihuipicaj. ¹⁷ Huan Moisés quinyacanqui nochi nopa israelitame, huan injuanti quisque campa quiquetzfoyaj ininchajchaj para mopantise ihuaya Toteco Dios. Huan moquetzatoj itzinta nopa tepet. ¹⁸ Huan nochi nopa tepet Sináí popocayaya pampa TOTECO hualtemotoya ipan se tit. Nopa pocti tejcoyaya quej campa tacacatzohuaj, huan nochi nopa tepet mojmoliníyaya tahuel chichahuac. ¹⁹ Huan quema nopa tapitzali tahuel chichahuac eltiyajqui, Moisés camanaltic, huan Toteco Dios quininquili ica itoscac cati elqui quej se tatomonilot.

²⁰ Huan TOTECO temoc hasta itzompac nopa tepet Sináí huan quinotzqui Moisés ma teajo. Huan Moisés tejcoc, ²¹ huan TOTECO quihhui:

—Xitemo huan xiquinelnamiquiltiti nopa masehualme para ma amo quiixpanoca nopa nepamit campa niquinilhuitoc. Yon ma amo mocuatopejtiyaca pampa quinequise techitase para amo miquise. ²² Hasta nojquiya nopa totajtzitzi cati quipiyaj inintequi para technechcahuise monequi mocualchichihuase huan moiyocacahuase san para na para amo niquintzontamiltis.

²³ Huan Moisés quininquili TOTECO:

—Nopa masehualme amo motemacase tejcose ipan ni tepet Sináí, pampa ta titanahuati ma nijtali se nepamit huan ma niqiyocacahua ni tepet san para ta, huan ya nopa nijchijtoc.

²⁴ Pero TOTECO quihhui:

—Xitemo sempa huan xijcuiti Aarón. Pero amo xiquincahuili nopa totajtzitzi, yon nopa masehualme, ma mocuatopehuaca huan ma quiixpanoca nopa nepamit para tejcose campa niitztoc, pampa sinta quichihuase, niqincocototzas.

²⁵ Huajca Moisés temoc sempa huan quinilhuito nopa israelitame cati TOTECO quihhui.

20

Nopa Majtacti Tanahuatilme (Dt. 5:1-21)

¹ Huan Toteco Dios camanaltic huan quijto nochi ni camanali:

² “Na niDIOS, niamoTECO cati nimechquixti ipan tali Egipto campa antetequipanohuayayaj san tapic quej amechcojtosquáj.

³ Amo xijtepanitaca seyoc quej amoTeco, san na.

- ⁴ Amo xijchihuaca itachiyalis yon se tamanti para anquitepanitase. Amo xiquixcopinaca cati eltoc ipan ilhuicac, yon cati eltoc ipan ni taltipacti, yon cati onca ipan hueyat para anquihueyichihuase. ⁵ Amo ximotancuaquetzaca iniixpa taixcopincayome cati tachijchihualme, yon amo xiquinhueyichihuaca, pampa na niDIOS, niamoTECO, huan nimechtasomati huan nijnequi san na techhueyimatica. Huan quema niquintatzacuiltia tetajme cati amo quinequij techitase, nopa tatza-cuiltili nojquiya quinajsis ininconeua, huan iniixhuihua huan in-
inteipan ixhuihua. ⁶ Pero ica cati techicneliaj huan cati quichihuaj notanahuatil, niqunicnelis huan niqintasojtas ininconeua, huan iniixhuihua huan hasta nopa iniixhuihua quinpiyase iniixhuihua mil huelta. Quena, notasojtacayo quinajsis para nochipa.
- ⁷ Amo xicahuilmatica notoca niamoTECO Dios, pampa amo quinamiqui. Temachti nijtatzacuiltis cati san quej hueli quitequihuia notoca.
- ⁸ Xiquelnamiquica sábadu, nopa tonali para amosiyajquetzase, huan xijtepanitaca. Ma elis taiyocatalili ten nochi sequinoc tonali. ⁹ Ipan chicuasen tonali xijchihuase nochi cati monequi anquichihuase. ¹⁰ Pero nopa chicompa tonali elis se tonali para ximosiyajquetzaca huan techhueyitalica na niamoTECO Dios. Ipan nopa tonali amo hueli antequitise, yon amo xijcahuilica ma tequiti amotelpoca, yon amoichpoca, yon amotequipanojca, yon amosihua tequipanojca, yon amotapiyahlua, yon nopa seyoc tali ejquet cati itztoc ipan amochaj. ¹¹ Pampa ica chicuasen tonali TOTECO quichijqui ilhuicacti, taltipacti, hueyi at huan nochi cati quiyiya. Huan mosiyajquetzqui ipan nopa chicompa tonali. Yeca TOTECO quitiochijqui nopa chicompa tonali huan quiyocatali para ma timosiyajquetzaca.
- ¹² Xijtepanitaca amotata huan amonana para anitztose miyac xihuit ipan nopa tali cati TOTECO Dios amechmacas.
- ¹³ Amo xitemictica.
- ¹⁴ Amo ximomecatica.
- ¹⁵ Amo xitachtequica.
- ¹⁶ Amo aqui xiquistacahuica.
- ¹⁷ Amo xiquixtocaca seyoc ichaj, yon amo xiquixtocaca seyoc isihua, yon itaca tequipanojca, yon isihua tequipanojca, yon itoro cati tapoxonia, yon iburro. Amo xiquixtocaca yon se tamanti cati seyoc iaxca.”

Nopa israelitame quiimacasse Toteco Dios

(Df. 5:22-33)

¹⁸ Nochi israelitame quicajque nopa tatomonilot huan nopa tapitzali. Quiitaque nopa tapetanilot huan nopa tepet cati popocayaya. Huan tahuel majmajque, huan huihuipicaque huan mohuejcaquetzque. ¹⁹ Huan quiilhijque Moisés:

—Techcamanalhui ta huan timitzneltoquilise. Pero ma amo techcamanalhui Toteco Dios, pampa huelis timiquise.

²⁰ Huan Moisés quinnanquili:

—Amo ximomajmatica. Toteco Dios hualajtoc quej ni para amechnextilis ihueyi chicalualis para xiquimacastica para nochipa huan para amo antajtalchihuase.

²¹ Huan nochi nopa masehualme más mohuejcaquetzque. Huan Moisés monechcahui campa nopa mixti cati yayahuic campa itztoya Dios.

Nopa tanahuatilme ten nopa taixpamit

²² Huan TOTECO quiilhui Moisés:

“Quej ni xiquinilhui nopa israelitame: ‘Ya anquiitzoque para nimech-nojnotztoc ten ilhuicac. ²³ Amo xijchihuaca tamanti ten oro, o ten plata o ica yon se tamanti para anquihueyimatise. Monequi techtepanitaca san na. ²⁴ Techchihuilica se taixpamit ica soquit huan ipani antechmacase tacajcahualisti. Nozona xijtencahuaca nopa tacajcahualisti cati tatatili huan nopa tacajcahualisti para anquipiyase tayoltalili ica na, niamoTECO. Huan nozona anquintencahuase pilborregojtzitzi huan huacaxme quej amotacajcahualis. Huan campa hueli campa na nimechchihualtis para anmoilhuise ten na, nozona xijchihuaca se taixpamit. Huan nozona na niyas huan nimechtiochihuas. ²⁵ Sinta antechchihuilise se taixpamit ten tet, amo xijtequica nopa tet. Pampa sinta anquitequise ica teposti, amo quinamiqui anquitalise ipan notaixpa. ²⁶ Huan nijnequi notaixpa ma amo quipiyas escalones campa tacame monequi tejcosse para quiajsise. Amo nijnequi para seyoc hueli quiitas tatzinta icuex cati tejcos nozona.’

21

Tanahuatilme para tequipanohuani

(Dt. 15:12-18)

¹ “Ya ni nopa tanahuatilme cati tiquinmacas israelitame:

² “Sinta tijcohuas se tequipanojquet hebreo para moaxca, san monequi mitztequipanos chicuasen xihuit. Ipan nopa chicompa xihuit, monequi tijmajcahuas para ayecmo elis moaxca. Huan amo teno monequi mitztax-tahuis para quisas huan elis majcajtoc para yas campa quinequis. ³ Sinta ajsico iseltitzi, yas iseltitzi. Pero sinta ajsico ica isihua, monequi isihua yas ihuaya. ⁴ Sinta iteco quimacas se sihuat huan nopa sihuat quimpiyas oquichpilme huan sihuapilme; nopa sihuat huan iconehua mocahuase para iteco huan nopa taca tequipanojquet yas iseltitzi. ⁵ Pero sinta nopa taca tequipanojquet quijtos para amo quinequi itztos majcajtoc para yas campa ya quinequis huan quijtohua quicnelia iteco, isihua, huan iconehua huan quinequi mocahuas inihuaya, huajca yaya huelis mocahuas para noja elis iaxca iteco. ⁶ Huan iteco quihuicas iniixpa jueces, huan nozona quinech-ahuiltise iteno nopa caltemit cati quiyahualtzacua nopa altepet huan ica se hueyi tepos huitzmalot quicoyonilis inacas. Quej nopa yaya mochihuas itequipanojca iteco para nochipa.

⁷ “Sinta se tacat quinamacas iichpoca para ma tequipano san tapic, nopa ichpocat amo hueli mochihuas majcajtoc quej mochihuaj majcajtoc taca tequipanohuani. ⁸ Pero sinta iteco nopa ichpocat amo quixtocac huan yeca amo quichijqui isihua, masque quitapejpeni para se tonali elisquia isihua, huajca seyoc huelis quicohuas nopa ichpocat sempa. Pero nopa teteco amo huelis quinamacas nopa ichpocat ica se cati seyoc tali ejquet. ⁹ Huan sinta nopa teteco quitapejpeni se sihua tequipanojquet hebreo para quimacas itelpoca para ma quichihua isihua, monequi nopa teteco ayecmo quiitas quej se tequipanojquet, monequi quiitas quej elisquia iichpoca. ¹⁰ Huan sinta nopa teteco quicuis se hebrea ichpoca tequipanojquet para isihua huan teipa quicuis seyoc isihua, amo hueli quiquixtilis yon quentzi itacualis nopa cati achtohui. Noja monequi quitamacas cuali, huan quiyoyontis cuali huan itztos ihuaya. ¹¹ Huan sinta amo quinequi quichihuilis nochí ni eyi tamanti, nopa sihuat huelis mochihuas majcajtoc para yas campa yaya quinequis huan amo teno monequis taxtahuas para quisas.

Tanahuatilme para cati tatehuaj o tecocohuaj

12 “Sinta acajya quimaquilis seyoc huan yaya miquis, monequi anquimictise nopa temictijquet. 13 Pero sinta cati temicti amo quinequiyaya quicocos, san panoc pampa huelis quej nopa Toteco Dios quicahuilli ma eli, na nimitznextilis teipa canque huelis yas nopa masehuali para momanahuiti para amo aqúi quuitzquis huan quimictis. 14 Pero sinta nopa temictijquet mocualanis ihuaya seyoc huan quisencahuas quenicatza huelis quicajcayahuas huan quimictis, huajca monequi xijmictica. Masque nopa temictijquet motatiti tiopan calijtic huan quuitzquis notaixpa para momanahuis, monequi tijquixtis, huan xitanahuatis ma quimictica.

15 “Sinta se quimaquilis inana o itata, monequi anquimictise.

16 “Sinta se teichtequis, masque quinamacas nopa masehuali para ma tequipano, o noja quipixtos imaco quema anquipantise, monequi anquimictise.

17 “Sinta se quitelchihuas itata o inana, monequi anquimictise.

18 “Sinta masehualme motehuaj huan se quimaquilis ne se ica se tet, o ica se imax, pero amo miquis, san huetztos ipan itapech, nopa cati tecoco amo monequi miquis. 19 Sinta nopa cocoxquet huelis motananas huan huelis quisas calteno ica icuatopil, huajca san monequi taxtahuas nopa tecocojquet cati ica mopajtis huan taxtahuas nochi nopa tonali tequit cati quipolos hasta cuali mochicahuas.

20 “Sinta se acajya quihuetequis itaca o isihua tequipanojca ica se cuahuit, huan yaya miquis pampa quicoco, monequi anquitzacuultise iteco por cati quichijtoc. 21 Pero sinta nopa tequipanojquet itzots para se ome tonati huan teipa miquis, amo monequi anquitzacuultise iteco, pampa nopa tequipanojquet iaxca.

22 “Sinta ome tacame motehuaj huan quicocose se sihuat cati cone hue huan ica ya nopa quichihuase ma tacatis icone quema ayemo ajsi tonali, ya ni cati anquichihuase. Sinta amo miqui nopa conet, huajca cati quiyiya tajtocoli monequi taxtahuas imiyaca cati quijjtos ihuehue nopa sihuat huan nopa jueces. 23 Pero sinta miquis nopa conet, monequi anquimictise cati quicoco nopa sihuat. 24 Huan sinta se teixteyolcocos, xiquixteyolcococa cati tecoco. Sinta tetancochtepehuas, xijtancochtepehuaca. Sinta se quicocos ipan imax o imetz se acajya, monequi nojquiya anquicocose cati tecocohua. 25 Sinta se tetatía, nojquiya xijtatica. Huan sinta se tetzontequis, xijzontequica. Sinta se quitejzotas seyoc, nojquiya xijtejtzona yaya cati tetejtzontoc.

26 “Sinta se teteco quimaquilis itaca o isihua tequipanojca ipan iixteyol, huan quicahuas ixpitzitic huan ayecmo huelis tachiyas ica nopa iixteyol, monequi quicahuillis nopa tequipanojquet ma elis majcajtoc pampa quixteyolcoco. 27 Huan sinta se quitancochtepehua itaca o isihua tequipanojca, monequi quicahuillis nopa tequipanojquet ma eli majcajtoc pampa quitancochtepejqui.

Tanahuatilme para tamanti cati san pano

28 “Sinta se toro quitompojhuis se masehuali ica icuacua huan miquis, monequi anquimictise nopa toro ica tet huan amo xijcuaca inacayo. Pero amo xijtzacuultica cati iaxca nopa tapiyali. 29 Pero sinta nopa toro ya momajtoya tetompojuía huan iteco quimati huan amo quitzacua cuali nopa toro, huan sinta teipa quimictis se acajya, monequi anquitzontepachose nopa toro huan iteco hasta miquise. 30 Pero sinta iteixmatcahua cati nopa toro quimicti, achi más paquise ica tomi huan amo quinequise ma miqui iteco nopa toro, monequi nopa teteco ma quintaxtahuas ica tomi cati quijjtose para quimanahuis inemilis. 31 Nojquiya quej ni elis sinta

nopa toro quitompojhuís se sihuapil o se oquichpil. ³² Pero sinta nopa toro quitompojhuía se taca o sihua tequipanojquet, monequi anquimictise nopa toro ica tet, huan cati iaxca nopa tapiyali monequi quitaxtahuis iteco nopa sihua o taca tequipanojquet 30 plata tomi.

³³ “Sinta acajya quitapojtehua se ameli huan amo quitzacua huan teipa misahuis se toro o se pilburrojzi, ³⁴ huajca cati iaxca nopa ameli monequi quitaxtahuis quej ipati nopa toro cati quipolo. Inacayo nopa tapiyali cati mictoc elis iaxca cati taxtajqui.

³⁵ “Sinta itoro se masehuali quicocos itoro seyoc masehuali hasta miquis, huajca quinamacase nopa toro cati itztoc huan quitajcoitase nopa tomi. Nojquiya quitajcoitase nopa toro cati mictoc. ³⁶ Pero sinta nopa teteo ya quimajtoya para nopa tapiyali ipa tetompojhuía huan amo quitacaquili, monequi amo san quitaxtahuis tajco. Monequi quitaxtahuis nochi cati ipati nopa tapiyali cati quimicti, huan nopa toro cati mictoc elis iaxca.

22

Tanahuatilme para cati tachtequis

1 “Sinta se acajya quiichtequis se toro o se borrego huan quimictis o quinamacas, monequi taxtahuis macuiliti torojme para sesen toro, o nahui borregojme para sesen borrego.

2 “Sinta acajya quipantis se tachtejquet quema calaqui techaj tayohua para tachtequis huan nopa cati chane quicocos nopa tachtejquet huan yaya miquis, nopa cati chane amo quihuicas tajtacoli. ³ Pero sinta ica tonaya quimictis se tachtejquet, quena, quipiyas tajtacoli cati temictitoc.

“Cati tachtequi monequi quiixtahuas cati ipati cati quiichtectoc. Huan sinta amo quiipiya tomi, monequi monamacas para tequipanos huan quej nopa quiixtahuas cati quiichtectoc.

4 “Sinta masehualme quipantise se toro, se burro o se borrego tachtecti cati noja itztoc imaco nopa tachtejquet, monequi taxtahuas ompa cati ipati.

5 “Sinta acajya quinmalacanis itapiyalhua huan tacuajcuatij tetocmilita o texocomeca miltita, monequi quicuepilis yaya cati iaxca nopa tali se taxtahuili quej ipati nopa pixquisti cati más cuali quipixtoya ipan imil o ipan nopa ixocomecamil para quiixtahuas cati itapiyalhua quinenpolojque.

6 “Sinta acajya tajchinohua huan nopa tit panos ipan seyoc imila, huan quitatía nopa trigo cati quimontonojtoque, o cati ya eltoc para pixquisti o quitatía nochi tatocti, yaya cati quitati monequi taxtahuas por nochi cati quitati nopa tit.

7 “Sinta se masehuali quimactilis tomi o tamanti cati ipati se ihuampo para ma quimocuitahuili, huan se tachtejquet calaquis ipan nopa cali huan quitachtequilis, sinta quipantise, monequi nopa tachtejquet quiixtahuas ompa imiyaca ten cati quicuitoc. ⁸ Pero sinta amo quipantise nopa tachtejquet, huajca cati quimocuitahuía nopa tamanti quihuicase iniixpa jueces para quuitase sinta yaya quicuitoc cati eltoya iaxca ihuampo cati ipan motemachi.

9 “Quema se quipolos se toro, o se burro, o se borrego, o se yoyomit, o ten huili tamanti huan teipa quipantis imaco seyoc, huan sinta ne se quijtohua para iaxca, huajca nochi ome cati quijtohua para iniixca monequi yase iniixpa jueces, huan nopa jueces quijtohua ajquiya iaxca. Huan yaya cati tecullitoc monequi quicuepas ompa.

10 “Sinta acajya quimactilis seyoc ma quimocuitahuili se burro, se toro, se borrego o seyoc tapiyali huan nopa tapiyali miquis, o mocos, o cholos huan amo aquí quiitac taya panoc, ¹¹ nopa masehuali cati quimocuitahuiyaya monequi quitestigojquetzas TOTECO para amo teno cati amo cuali quichijtoc ica cati quicahuilijtoyaj. Huan cati iaxca nopa tapiyali monequi quineltoquilis icamanal ihuampo cati quitestigojquetztoc TOTECO. Huan nopa cati tamocuitahuiyaya amo teno monequi taxtahuas. ¹² Pero sinta iixpa quichtequilijque nopa tapiyali, huajca nopa cati tamocuitahuiyaya monequi quixtahuilis iteco nopa tapiyali quej ipati. ¹³ Huan sinta nopa tapiyali quicocototzqui se tecuani, huajca nopa cati quimocuitahuiyaya monequi quinextis iómiyo nopa tapiyali cati mijqui huan quej nopa amo monequi taxtahuas.

¹⁴ “Sinta acajya motanehui se tapiyali, huan nopa tapiyali ipantis se tenijqui, o miquis, huan amo quiitac iteco, huajca yaya cati motanejqui monequi taxtahuas. ¹⁵ Pero sinta nopa teteco noja itztoc ihuaya itapiyal quema ipantis se tenijqui, nopa cati motanejtoc amo monequi taxtahuas. Huan sinta se motanehui se tapiyali huan taxtahua para quitequihuis huan ipantis se tenijqui, amo monequi taxtahuas pampa ya taxtajtoc.

Tanahuatili para tacame

¹⁶ “Sinta se tacat quicajcayahuas se ichpocat cati amo quiijtantoque huan quichihualtis cochis ihuaya, monequi quitaxtahuis itata san se quej cati quitaxtahuisquía se tacat cati quinequisquía mocuilis ihuaya nopa ichpocat. Huan quema ya quitaxtahujtos itata nopa ichpocat, huelis mocuilis. ¹⁷ Huan masque itata nopa ichpocat amo quinequis quimactilis para ma eli isihua, nopa tacat monequi taxtahuas quej imiyaca tomi cati momajtoque temacaj para se ichpocat.

¹⁸ “Amo xijcahuilica ma itzto se tenahualhujquet. Monequi xijmictica.

¹⁹ “Sinta acajya quichihuas se tamanti ica se tapiyali quej elisquía itahuical, monequi anquimictise.

²⁰ “Sinta se quimacas se tacajcahualisti se taixcopincayot o seyoc tamanti cati quiita quej elisquía Dios, xijmictica. San na, niamoTECO, techmacaca tacajcahualisti.

²¹ “Amo xijcayahuaca, yon amo xijchihuilica cati fiero se seyoc tali ejquet, pampa amojuanti nojquiya aneltoyaj anseyoc tali ehuan ipan tali Egipto.

²² “Amo xijtairyohuiltica se sihuat cati cahualtzi, yon se icnotzi. ²³ Pampa sinta anquinchihuilij cati fiero, inijuanti techtajtanise ma niquinpalehui huan na nijcaquis huan niquinpalehuis. ²⁴ Huan nicualanis miyac huan nimechmictis ica macheta, huan amosihuajhua nojquiya mocahuase cahualtitziti huan amoconehua icnotzitziti.

²⁵ “Sinta anquitanejtise tomi se teicneltziti cati nojquiya se israelita quej amojuanti, amo ximochihuaca quej se tetomintanejtijquet. Amo xiquinamaca itanca. ²⁶ Sinta teicneltziti se masehuali cati anquitanejtijaj huan monequi amechcahuilijtehuas itaque, monequi xijcuepilica quema tiotaquiyas, ²⁷ pampa huelis setzi itaque quipiya para moquentis quema taseseya huan san ya nopa quipiya para ica mopiquis quema cochi. Huan sinta ya taijyohuis huan techtajtanis ma nijpalehui, nijtacaquilis huan nijpalehuis pampa na nitetasojta.

²⁸ “Amo xiquintajilhica amotequiticahua, yon amo xijtajibhuica yaya cati tanahuatía ipan amotal.

²⁹ “Amo xihuejcahuaca para antechhualiquilise cati noaxca ten nochi amopixquis huan ten nochi amoxocomecamil.

“Monequi techmacilica amoachtohui oquichpil. ³⁰ Nojquiya monequi techmacaca iniachtohui conehea amohuacaxhua huan amoborregojhua. Huelis mocahuase chicome tonati ihuaya ininana, pero ipan nopa chicueyi tonali techmacaca.

³¹ “Monequi anelise notatzejtzeltolica masehualhua.

“Amo xiquincuaca tapiyalme cati tecuanime quinmictijtoque cuatita. Nopa nacat monequi xiquinmacaca chichime.

23

Tanahuatilme para ma tijchihuaca cati xitahuac

¹ “Amo xijmoyahuaca se camanali cati amo melahuac ten sequinoc. Amo xijpalehuica se fiero masehuali. Amo xijtestigojquetzaca se tamanti cati amo melahuac por ya.

² “Quema itztoque miyaqui cati quichihuasnequij cati amo cuali, amo ximocalaquica inihuaya.

“Quema anmochihuase antestigos para anquijitose miyacapa cati melahuac panotoc, amo xiquijtoca cati amo melahuac quej miyac masehualme quinequise xijchihuaca, pampa amo xitahuac sinta anquichihuase quej nopa. ³ Yon amo xitatestigojquetza ica cati amo melahuac pampa tijchicoicnelña se cati teicneltzi huan tijnequi tijpalehuis.

⁴ “Sinta anquipantilise amocualancaitaca itoro o iburro cati cholojtoc, monequi xijhuiquilica. ⁵ Sinta tijpanti mocualancaitaca quitananasnequi iburro cati huetztoc ica itamamal cati etic, amo xijcajtuhua hasta tijpalehuis quitananas.

⁶ “Xiquinchihuili nochi teicneltzitzitzi cati xitahuac quema onca se cualanti.

⁷ “Xijtalcahui se cati quinequi quitatelhuis seyoc ica cati amo melahuac. Amo xijcahua ma quimictica se cati amo teno quichijtoc. Pampa na nijtatzacuilitis nojquiya yaya cati quicahuas se acajya ma quimicti se masehuali cati xitahuac.

⁸ “Quema titetajtolsencahua, amo xijseli se taxtahuili ixtacatzitzi. Cati quiselña taxtahuili ixtacatzitzi ayecmo huelis quiitas cati melahuac, huan amo quicahuilña ma camanalti cati quijitohua cati xitahuac.

⁹ “Amo xijtaijyohuiliti se cati seyoc tali ejquet, pampa nojquiya aneltoyaj anseyoc tali ehuan ipan tali Egipto. Huan anquimatij quenicatza anquimatiyaj quema anitztoyaj ipan se tali cati amo amoaxca.

Temacht monequi anmosiyajquetzase

¹⁰ “San chicuasen xihuit antatojtocase huan anpixcase ipan amotal.

¹¹ Huan quema ajsis nopa chicompa xihuit, amo teno xijtocaca. San xijcahuaca amotal ma mosiyajquetza. Huan sinta moscaltis iseltitzitzi se quentzi tocti, xiquincahuilica cati teicneltzitzitzi ipan amotal ma mopixquilica para ica mopanolitise. Huan cati mocahua ma quicuaca tapiyalme ten cuatita. Nojquiya quej nopa anquichihuase ica amoxocomeca mil huan ica amoolivo mil.

¹² “Chicuasen tonati anquichihuase nochi cati monequi anquichihuase, pero ipan nopa chicompa tonali monequi ximosiyajquetzaca. Nojquiya ma mosiyajquetzaca amotorojhua huan amoburrojhua. Ma mosiyajquetzaca amoteqipanocahua cati anquincojtoque huan nopa seyoc tali ehuan cati amechpaxalohuj. Nopa tasiyajquetzalitzi amechpalehuis nochi amojuanti para sempa anquipiyase tetili.

¹³ “Ximotachilica huan xijchihuaca nochi ya ni cati nimechilhujtoc. Amo quema xiquintestigojquetzaca inintoca taixcopincayome cati ne sequinoc quinhueyimatij. Yon amo quema xijtenquixtis inintoca.

Nopa eyi huejhueyi ilhuit ipan se xihuit

(Éx. 34:18-26; Dt. 16:1-17)

¹⁴ “Eyi huelta ipan se xihuit antechilhuichihuilise. ¹⁵ Xijchihuaca nopa ilhuit ten pantzi cati amo quiyiya tasonejca yot quej nimechnahuatijtoc. Xijcuaca pantzi cati amo quiyiya tasonejca yot chicome tonati quej nimechilhujtoc. Anquicuase ipan metzti Abib ipan nopa tonali cati nimitzilhui, pampa ipan nopa metzti anquistejque tali Egipto. Huan amo aqui hueli technechahuis sinta amo techhualiquilia se tacajcahualisti.

¹⁶ “Nojquiya xijchihuaca nopa ilhuit ten ipejya pixquisti huan techhualiquilica cati achtohui anquixtoque ten anquitoque ipan amomil. Huan nojquiya sesen xihuit xijchihuaca nopa ilhuit ten itamiya pixquisti quema ya anquisentilijtoque nochi nopa pixquisti cati temacac cati anquitoctoque.

¹⁷ “Expa ipan se xihuit monequi nochi antacame ximonextica noixpa, na niamoTECO Cati más Nijpiya Tanahuatili.

¹⁸ “Quema antechmacase ieso se tapiyali para se tacajcahualisti, amo techmacaca san sejco ihuaya pantzi cati quiyiya tasonejca yot. Yon amo xicajocuica ichiyajca nopa tapiyali para antechmacase seyoc tonali.

¹⁹ “Ipan nopa achtohui tonali ten nopa achtohui pixquisti, xijtapejpenica cati más cuali ten itajca cati temaca amotal huan techmactilica, na niamoTECO Dios.

“Amo xiquixitica se pilcone chivojtzi ipan inana ilechi quej quichihuaj tenahualhuiani.

Toteco Dios iilhuicac ejca

²⁰ “Xiquita, na nijtitanis noilhuicac ejca ma amechyacana, huan ma amechmocuitahui ipan ojti huan ma amechhuica hasta nopa tali cati nimechcualtalilijtoc. ²¹ Xijtacaquilica cuali cati yaya amechilhuis huan xijneltoquilica. Amo xijhuejcamajcahuaca, pampa yaya quihuica nochi nopa tanahuatili cati nijhuica na huan amo amechtapojpolhuis amotajtacolhua sinta anquihuejcamajcahuase. ²² Pero sinta nelia anquicaquise cuali nochi cati nimechilhuia huan anquichihuase nochi cati nimechnahuatijtoc, na nielis niininculancaitaca amoculancaitacahua huan niquintajiyohuiltis cati amechtaiyohuiltise. ²³ Noilhuicac ejca amechycanas huan amechhuicas ipan inintal nopa amorreos, heteos, ferezeos, cananeos, heveos huan jebuseos. Huan na niquintzontamiltis amoixpa. ²⁴ Amo ximotancuaquetzaca iniixpa inintaixcopincayohua nopa masehualme, yon amo xiquinhueyichihuaca. Amo quema xijtoquilica sequinoc fiero tamanti cati nopa masehualme quichihuaj. Monequi xiquintzontamiltica nochi nopa masehualme huan senquisa xiquinsosoloca nochi nopa teme cati quinhueyichihuaj. ²⁵ San techhueyichihuaca na, niamoTECO Dios, huan nijtiochihuas amotacualis ihuaya amoa.

“Huan nijchihuas para ma amo amechajsi cocolisti. ²⁶ Amo oncas yon se sihuat ipan amotal cati amo huels conepiyas o cati coneuetzis. Huan nijchihuas para anitzotse miyac xihuit ipan ni taltipati.

²⁷ “Na nijtitanis se hueyi majmajti ipan nochi nopa fiero masehualme campa anajsise hasta amo quimatise taya quichihuase. Huan nijchihuas ma cholojtehuaca amoixpa nochi amoculancaitacahua. ²⁸ Niquintitanis

etzame ma tayacanaca huan ma quinquixtijiyaca nopa heveos, nopa cananeos, huan nopa heteos amoixpa. ²⁹ Pero amo niquinquixtis nochi san ipan se xihuit. Sinta quej nopa nijchihuasquía, polihuisquía nochi cati tatojtoc-toque, huan momiyaquilisquía^{aj} tecuanime cati itztoque cuatita cati huelis amechcocose. ³⁰ Pero ica yolic niquinquixtijiyas amoixpa quej nojquiya yolic anquinpixtiyase más amoconehua huan anmomiyaquilijtiyase para anmoaxcatise nopa tali.

³¹ “Quej ni nijquetztoc inepa amotal: Pejtehuas amotal ipan nopa Hueyi At Chichiltic huan yas hasta nopa Hueyi At Mediterráneo*. Nojquiya pejtehuas ipan huactoc tali ica sur huan tamis ipan nopa hueyat Eufrates ica campa huala tonati. Na nijtalijtoc amomaco nochi masehualme cati ehuaní ipan nopa tali para xiquinjuixtica.

³² “Amo xijchihuaca yon se camanali inihuaya, yon ica inintaixcopincayohua. ³³ Amo xiquincahuilica ma mocahuaca ipan amotal para amo amechchihuase xitajacolchihuaca ica na. Sinta anquinhueyichihuase inintaixcopincayohua, huajca nelía amechmasiltise.”

24

Tayacanani ma tejcoca ipan tepet Sinaí

¹ Huan TOTECO quiilhui Moisés:

—Xitejco campa na niiztoc, ta ihuaya Aarón, Nadab, Abiú huan nopa 70 huehue tacame cati mohuaya quinyacanaj ni israelitame. Inijuanti ma motancuaquetzaca ica huejca para techhueyimatise. ² San ta, Moisés, huelis timonechcahuis campa na, niamOTECO, niiztoc. Nopa sequinoc tayacanani amo huelise technechcahuise, huan nopa sequinoc israelitame amo huelis tejcose nica amohuaya.

Israelitame quiselijque nopa camanali ica Toteco

³ Huan Moisés yajqui quinpohuilito nopa israelitame nochi cati TOTECO quijtojtoya huan cati tanahuatijtoya. Huan nochi israelitame ica sempa tananquilijque:

—Nochi cati TOTECO quijtojtoc, tijchihuase.

⁴ Huajca Moisés quijcuilo nochi cati TOTECO quiilhujtoya. Huan tonili cualca mijquejqui huan quichijchijqui se taixpamit itzinta nopa tepet, huan quiquetzqui nopa taixpamit ipan doce teme quej imiyaca itelpocahua Israel cati ica pejqui nopa doce huejhueyi familias ten israelitame cati ama onca. ⁵ Teipa quintitanqui sequij israelita telpocame ma quimacaca TOTECO tacajcahalisti tatatili. Huan quinmictijque huan quintatijque torojme para tacajcahalisti para quipiyase tasehuilisti ica TOTECO. ⁶ Huan Moisés quicuic tajco nopa esti, huan quitejqui ipan huajcalme huan nopa seyoc tajco quijtzelo ipan taixpamit. ⁷ Teipa quicuic nopa amat cati quipixtoya itanahuatil TOTECO, o nopa camanal sencahuali cati TOTECO quichijtoya inihuaya israelitame huan cati monequi quineltocase. Huan quinpohuili nochi nopa amat huan inijuanti quijtojque:

—Quena, tijneltoquilise TOTECO huan tijchihuase nochi cati yaya techilhujtoc.

⁸ Huajca Moisés quicuic nopa esti ipan huajcalme, huan quinijtzelhuili nochi israelitame, huan quijto:

—Ya ni nopa esti cati quipehualtía nopa camanal sencahuali cati TOTECO quichijqui amohuaya quema amechmacac nochi ni tanahuatili.

* 23:31 23:31 Hueyi at ten nopa filisteos.

Moisés huan tayacanani tejcoque ipan tepet Sinaí

⁹ Huan teipa Moisés tejcoc ipan nopa tepet ihuaya Aarón, Nadab, Abiú huan nopa 70 huehue tacame cati quinyacanayayaj nopa israelitame. ¹⁰ Huan nopa israelita tayacanani quiiataque Dios, ininTeco israelitame. Huan iixitantita eltoya se piso azultic quej nopa yejyetzti tet cati itoca zafiro, huan eliyaya tahuel tzalantic quej ilhuicacti. ¹¹ Huan masque nopa tayacanca israelitame quiiataque Toteco Dios huan san sejco tacuajque huan atique iixpa, amo quinmicti.

Ma quichihuaca nopa yoyon tiopamit

¹² Huan TOTECO quiilhui Moisés:

—Xitejco campa niitztoc ipan ni tepet huan ximocahua nica. Huan nimitzmacas nopa tepatacti campa niqijcuilojtoc nopa ley huan nopa tanahuatilme para tiquinmacthis israelitame.

¹³ Huan Moisés tejcoc ipan itepe Toteco ica Josué itapalehujica. ¹⁴ Huan Moisés quinilhui nopa huehue tacame:

—Techchiyaca nica hasta quema titacuepilise. Nica mocahuas Aarón huan Hur amohuaya, huan sinta acayja quipiya se cualanti quema amo nuaqui, ma quinilhuica injuanti.

¹⁵ Huan Moisés tejcoc ipan nopa tepet huan se mixti quitzajqui. ¹⁶ Huan itatanex TOTECO temoc ipan tepet Sinaí, huan nopa mixti quitzajqui nopa tepet para chicuasen tonati. Huan quema ajsic nopa chicompa tonali, TOTECO quinoztzqui Moisés tatajco ten nopa mixti. ¹⁷ Huan nopa israelitame cati itztoyaj tatzinta quiajcotachilijque huan quiiataque itatanex TOTECO, huan para injuanti elqui quej se tilelemecti cati nochi quitatiyayaj tepeixco. ¹⁸ Huajca Moisés tejcotiyajqui ipan nopa tepet, huan calajqui ipan nopa mixti huan nozona mocajqui para 40 tonati huan 40 yohuali.

25

Tanahuatilme para tacajcahualisti

(Éx. 35:4-9)

¹ Huan nojquiya TOTECO quiilhui Moisés:

² “Xiquinilhui nopa israelitame para hueli techmacase tacajcahualisti sinta quinequij. Xijsentilica nochi tamanti cati sese israelita quinequi techmacas ica nochi iyolo. ³ Sinta quinequij techmacase se tenijqui, huelis xiquinselhuili tamanti ten oro, plata huan cobre. ⁴ Nojquiya huelis tiquin-selhuilis icpat ten nopa tzonti cati itoca lino cati tamalinti nelcanactzi, huan nojquiya icpat ten iniijhuiyo borregojme cati quipajtoque azultic, morado, o chichiltic. Nojquiya xijseli inincuitapan ijhuiyo chivojme, ⁵ huan inincue-taxo pesojme huan nopa cuahuit cati itoca acacia. ⁶ Xijseli aceite para ica quitatise taahuili. Xijseli taajhuiyacayot para aceite cati quitequihuaj para taiyocacahuase para na, huan nojquiya para ica anquisencahuase copali cati ajhuiyac. ⁷ Nojquiya huelis techmacase teme cati pajpatiyo. Huelis techmacase nopa tet ónice huan sequinoc teme cati yejyetzitzi para anquitatzquiltise ipan nopa pantzajcayot huan nopa yolixtzajcayot para nopa hueyi totajtzi iyoyo. ⁸ Teipa techchihuilica se cali para ipan niitztos tatajco ten amojuanti. ⁹ Pero monequi xijsencahua nochaj ica nochi cuamesas huan tamantzitzi senquisa quej ni taixcopinali cati ama nimitznexilis.

Nopa caxa

(Éx. 37:1-9)

10 “Ma quichihuaca se caxa yejyetzzi ica nopa cuahuit cati itoca acacia. Huan nopa caxa quipiyas 1 metro 10 centímetros ihuehueyaca huan 65 centímetros ipatajca huan ihuejcapanca. 11 Xicalaxoca ica senquisa oro ijitic huan ipani. Huan yahualtic itejteno xijchijchiuili se corona ten oro. 12 Xijchihuili nahui huejhueyi anillos ten oro. Xijtalica nopa anillos najcac campa imetzhua, ome ipan se lado huan ome ipan ne seyoc. 13 Huan xijchihuaca ome cuahuit cati huehueyac huan pitzahuac para ica anquiquechpanose. Huan xicalaxoca nopa cuahuit ica oro, 14 huan ma pano se ten nopa cuahuit huehueyac ipan nopa ome anillo ipan sesen lado ipan inacasta nopa caxa para quej nopa huelis anquitananase. 15 Huan ayecmo xijquixtilica nopa cuahuit cati ica anquihuicase. Ma mocahua nopa cuahuit ipan ianillos nopa caxa. 16 Huan quema anquisencahuase nopa caxa, xijtalica ijitic nopa tepatacti ica nopa tanahuatilme cati nimitzmacas.

17 “Huan xijchihuaca nopa caxa itzajca ten senquisa oro cati quipiyas se metro 10 centímetros ihuehueyaca huan 65 centímetros ipatajca. Nopona iixco nopa caxa timopantise huan nimechtasojtas quema antajta-colchihuase. 18 Xiquinchihuaca nojquiya ome ilhuicac ehuan cati inintoca querubines cati ijcatose ipan itzajca nopa caxa. 19 Xiquinchijchihuaca nopa ome querubines ica san se tatecti oro cati tatejtzonti ica itzajca nopa caxa. Se querubín moquetzas ipan se iteno huan ne se ipan seyoc iteno ica ihuehueyaca. 20 Huan nopa querubines monequi quipatajtose inieltapal itzompac nopa caxa para quiecahuilise. Huan moixnamictose nopa querubines huan tachixtose tatzinta ipan itzajca nopa caxa, pampa nopona nite-tasojtas. 21 Quema ya tasencahuali itzajca, xijtalica caxa ijitic nopa tepatacti ica nopa tanahuatili cati nimitzmacas. 22 Huan nopona tatajco ten nopa querubines cati ijcatoque iixco itzajca nopa caxa, nimechnamiquis huan nimechtasojtas. Quena, nopona itzonco nopa caxa cati quipiya nopa tepatacti cati quipiya nopa camanal sencahuali cati ica nimocajtoc amohuaya, nimechmatiltis nochí notanahuatilhua cati nijpiya para anisraelitame.

Cuamesa para nopa pantzi cati quinextía para TOTECO itzoc tohuaya

(Éx. 37:10-16)

23 “Xijchihuaca se cuamesa ica nopa cuahuit acacia, huan quipiyas 90 centímetros ihuehueyaca, 45 centímetros ipatajca, huan 65 centímetros ihuejcapanca. 24 Xicalaxoca nopa cuamesa ica senquisa oro. Nojquiya xijchihuilica icorona ten oro itejteno. 25 Nojquiya yahualtic itejteno nopa cuamesa ma quipiya se icorona ten chicome centímetros huan tajco ihuejcapanca. Xicalaxoca nopa corona ica senquisa oro. 26 Nojquiya xijchihuilica nahui anillos ten senquisa oro cati anquitalilise ipan sese inacasta campa imetzhua. 27 Nopa anillos monequi tatzquitose itantita nopa corona nechca nopa cuamesa campa pehua imetz, huan ipan nopa anillos calaquis nopa cuahuit huehueyac para ica anquihuicase nopa cuamesa. 28 Huan nopa cuahuit huehueyac cati ica anquiquechpanose nopa cuamesa monequi xijchihuaca ica acacia cuahuit, huan xicalaxoca ica senquisa oro. 29 Nojquiya xijchijchihuaca platos, huejhueyi cucharas ten oro, tepos huitzcucharas huan huejhueyi xarros para ipan anatecase. Huan ica antechmacase, na niamoTeco, nopa tacajcahalisti cati anquitoyahuase noixpa. 30 Huan monequi mojmosta noixpa anquitalise iixco nopa mesa nopa pantzi cati tenextilía para niitztoc amohuaya.

Nopa taahuil quetzali

(Éx. 37:17-24)

³¹ “Huan nojquiya xijchijchihuaca se taahuil quetzali ten senquisa oro cati tatejtetzonalí ica martillo. Quipiyas se icuayo huan chucuase imacuayohua. Huan sesen pilcaxitzitzi cati ipan tatatise quipiyas iyejyejca. Nesis quej se xochit mimilijtoc huan se xochit cati cahuantoc, huan nochi iyejyejca monequi elis san se tatecti oro. ³² Huan ica nopa chucuase imacuayohua ten nopa taahuil quetzali quipiyas, eyi imacuayohua quisas se lado huan ne seyoc eyi imacuayohua quisas ne seyoc lado. ³³ Huan ipan sese imacuayo quipiyas eyi pilcaxitzitzi cati quiyecchijtoque para nesis quej eyi ixochiyo nopa almendra. Sesen quipiyas se xochit mimilijtoc huan se xochit cahuantoc. Nochi chucuase imacuayo cati quisase ipan icuayo nopa taahuil quetzali quipiyase san se xochit. ³⁴ Huan icuayo cati eltoc tatajco nopa taahuil quetzali quipiyas nahui pilcaxitzitzi ica inintachiyalis quej ixochiyo se almendra. Sesen quipiyas se xochit mimilijtoc huan se xochit cahuantoc. ³⁵ Campa quisa nopa achtohui ome imacuayohua ipan sesen lado icuayo, oncas se xochit mimilijtoc itantita imacuayo. Huan nojquiya itantita ipan sesen lado nopa ompa huan expa imacuayohua oncas se xochit mimilijtoc. Huajca quipiyas se xochit mimilijtoc itantita nochi chucuase imacuayohua ipan nopa taahuil quetzali. ³⁶ Ixochiyo huan imacuayohua elis tasencahuali ica san se tatecti ten senquisa oro cati tatejtzontí ica martillo.

³⁷ “Huan xijchijchihuilica chicome piltahuiltzitzitzi cati anquitatise para ma taahuica ica iniixmelac. ³⁸ Nojquiya xijchihuaca nopa cucharas para ica anquisehuise taahuili huan nochi pilplatotzitzitzi, huan nochi xiquinchihuaca ica senquisa oro. ³⁹ Monequis quej 33 kilos ten senquisa oro para anquichihuase huan anquiyectalise nopa taahuil quetzali.

⁴⁰ “Ximotachili para tijchihuas nochi san quej na nimitznextilía amantzi nica ipan ni tepet.

26

Nopa cortinas para itzontzajca nopa yoyon tiopamit

(Éx. 36:8-38)

¹ “Xijchijchihuili nopa yoyon tiopamit majtacti cortinas ica icpat ten lino tamalinti hasta nelía canactzi, huan icpat ten iniijhuiyo borregoime cati quipajtoque azulitic, morado huan chichiltic. Huan ma quixinepalo se cati tahuel quimati para nesis iniixcopinca nopa ilhuicac ehuaní cati inintoca querubines. ² Huan sesen cortina quipiyas 12 metros huan tajco ihuehueyaca, huan ipatajca elis ome metro. Huan nochi nopa cortinas elis san se inihuejhuexca. ³ Huan xijsalo nopa macuili cortinas san sejco. Huan nojquiya xijsalo nopa sequinoc macuili cortinas san sejco. Quej nopa quisas ome cortinas cati nelía huehueyac. ⁴ Huan ipan se iteno ten nopa achtohui macuili cortinas cati tijsalojtoc, xijchihuili tailpili ica itzojhuaso cati tijtenyahualos ica icpat cati azulitic. Nojquiya san se tijchihuas ipan se iteno nopa sequinoc macuili cortinas cati tijsalojtoc. ⁵ Ipan nopa achtohui tasalolí ten cortinas, xijchihuili 50 tailpili huan ipan sesen xijcahua itzojhuaso. Teipa xijtenyahualos campá tijchihuili itzojhuaso ica icpat azulitic. Xijchihuili seyoc 50 ipan ne seyoc cortina cati tijsalojtoc para ma moixnamiquica nopa 50 tailpili ipan se cortina ica cati eltoc ipan ne seyoc. ⁶ Huan xijchihua 50 tepos chijcoli ten senquisa oro cati ica tijsojsos nopa ome cortinas cati tijsalojtoc, huan quej nopa elis san se tamantí para itzontzajca nopa yoyon tiopamit.

⁷ “Huan nojquiya tijchihuas 11 cortinas ica se yoyomit tetic cati taxinepalolí ica iniijhuiyo oquich chivojme para elis quej se hueyi cuetaxti para tijtzontzacuas nopa yejyectzi yoyomit cati tijtalijtoc itzompac nopa yoyon

tiopamit. ⁸ Monequi nopa tzontzajcayot cati eltoc quej se hueyi cuetaxti ten iniijhuiyo chivojme elis 13 metros huan tajco ihuehueyaca, huan ome metro ipatajca. Nochi nopa 11 cortinas monequi elis san se ihuejhuexca. ⁹ Huan anquisalose macuili cortinas san sejco, huan iyoca anquisalose nopa seyoc chicuase cortinas san sejco. Huan quema anajsitij ipan nopa chicuaseempa cortina, xijhuilpachoca para anquihuiyonise iixmelac nopa yoyon tiopamit campa ticalaquis. ¹⁰ Huan nojquiya ipan iteno nopa cortinas, xijchiuilica 50 tailpili, sese ica itzojhuaso. Xijchihuaca 50 tailpili ica itzojhuaso ipan se cortina, huan ipan ne se san se xijchihua, 50 tailpili sese ica itzojhuaso. Huan moixnamiquise nopa achtohui tasaloli cortinas huan nopa seyoc tasaloli cortinas itejteno campa itzojhuaso. ¹¹ Huan nojquiya xijchihua 50 tepos chicolli ten senquisa bronce cati ica quisojsos itzojhuaso nopa 50 tailpili ipan iteno se cortina ica itzojhuaso nopa 50 tailpili ipan iteno seyoc cortina, huan quej nopa elis san se itzontzajca quej se hueyi cuetaxti. ¹² Huan tajco se cortina mocahuas cuapilijtos iica nopa tiopamit huan seyoc tajco iixpa. ¹³ Huan nopa yoyomit cati mocahuas cuapilijtoc oncac quitzacuas nopa tiopamit. Tajco metro cuapilijtos se lado huan seyoc tajco metro cati cuapilijtos seyoc lado ten nopa tiopamit.

Sequinoc itzontzajca nopa yoyon tiopamit

¹⁴ “Huan nojquiya tijchihuilis seyoc itzontzajca para yas iixco nopa itzontzajca cati eltoc quej se hueyi cuetaxti. Huan ya ni tijchihuas ica inincuetaxo borregojme cati quipiyaj se xihuit huan tijpas inincuetaxo ica chichiltic. Huan nopa najpa itzontzajca, xijchihua ica inincuetaxo pesojme huan quitzacuas nopa itzontzajca cati tachijchihuali ica borregojme inincuetaxo.

Icaltepayo nopa yoyon tiopamit

¹⁵ “Huan nojquiya xijchihuaca nopa huapalme cati moquetztos xitahuac para mochihuas nopa caltepamit ten nopa tiopamit. Xijchihuaca nopa huapalme ica acacia cuahuit. ¹⁶ Huan nochi huapalme monequi elis nahui metro huan tajco ihuehueyaca, huan 65 centímetros ipatajca. ¹⁷ Huan sesen huapali quihuicas ome imax cati huelis calaquis ipan seyoc huapali cati moquetza inechca. Xijchihua nopa huapalme para nopa yoyon tiopamit quej ni. ¹⁸ Xijchihua 20 huapalme cati motequihuis ipan nopa caltepamit cati eltoc ica sur. ¹⁹ Huan xijchihua 40 icuatetonyo ten senquisa plata, huan nopa 20 huapalme calaquis ininpani para moquetzas xitahuac. Sese huapali monequi quipiyas ome icuatetonyo tatzinta para nopa ome imax.

²⁰ “Huan nopa caltepamit cati eltoc ica norte ipan nopa yoyon tiopamit nojquiya quipiyas 20 huapalme. ²¹ Huan quipiyas 40 icuatetonyo ten plata. Ome icuatetonyo mocahuas tatzinta se huapali huan se ipan sese imax. ²² Huan para iica nopa tiopamit campa temo tonati xijchihuilis chicuase huapalme. ²³ Nojquiya xijchihuilis ome huapalme para yas iica nopa tiopamit oncac ipan iesquina. ²⁴ Nopa huapalme cati yas calesquina, monequi tatzquis ica tepos chicolli tatzinta huan huejcapa. ²⁵ Huajca para iica oncas chicueyi huapalme huan 16 icuatetonyo ten plata, ome icuatetonyo para sese huapali.

Cuaixtapali para nopa huapalme

²⁶ “Nojquiya xijchihua cuaixtapali ten cuahuit acacia. Xijchihua macuili cuaixtapali para nopa huapalme ipan se caltepamit, ²⁷ huan seyoc macuili cuaixtapali para nopa huapalme ipan seyoc caltepamit. Huan xijchihua seyoc macuili para nopa huapalme cati yas campa temo tonati, iica nopa

tiopamit. ²⁸ Huan nopa cuaixtapali cati panos tatajco ipan ihuejcapanca nopa huapalme monequi elis san se tatecti cuahuit huehueyac cati ajsis ipan se iesquina nopa caltepamit hasta seyoc iesquina. ²⁹ Huan xicalaxoca nopa huapalme huan nopa cuaixtapalme ica oro, huan xijchihua nopa anillos calteno campa calaquise nopa cuaixtapalme ica senquisa oro. ³⁰ Huan xijquetza nopa yoyon tiopamit senquisa quej nimitznextili nica tepeixco.

Cortina cati más calijitc ipan nopa yoyon tiopamit

³¹ “Nojquiya xijchihua se cortina ica lino icpat cati nelia canactzi huan icpat cati quipajtoque azultic, morado huan chichiltic. Huan quema quixinepalohua nopa yoyomit se yoyonchijquet cati cuali quimati, ma ipan quixinepalos noilhuicac ejcagua na, niamoTECO cati inintoca querubines. ³² Huan xijpatahuas nopa cortina huan tijcuapilos ica tepos chijcolme ten oro ipan nahui taquetzalme ten cuahuit acacia cati qualaxojtoque ica oro. Huan nopa taquetzalme moquetzase ipan nahui caltetomit ten plata. ³³ Xijcuapilo nopa cortina itantita nopa tepos chijcolme. Huan iica nopa cortina xijtali nopa caxa cati quipiya notanahuatilhua. Huan ni cortina quiyocatalis nopa achtohui cuarto campa tatzejtzololitic ica nopa seyoc cuarto cati más calijitc cati itoca campa más tatzejtzololitic cati quipiya nocaxa.

³⁴ “Huan ipan nopa caxa xijtali itzajca campa nimechtasojtas quema antechixtzacuilise amotajtacolhua. ³⁵ Huan ipan nopa achtohui cuarto cati más calteno quema ayemo ticajsi campa nopa cortina, xijtali nopa cuamesa ica norte. Huan ipan nopa cuarto ica sur, xijtali nopa taahuil quetzali iixmelac nopa cuamesa.

Cortinas campa calaquise ipan nopa yoyon tiopamit

³⁶ “Huan para campa ticalaquis ipan nopa achtohui cuarto ipan yoyon tiopamit, xijchihua se cortina cati taxinepaloli ica lino icpat nelcanactzi huan ihuaya icpat cati azultic, morado huan chichiltic. Ma quichihua se yoyonchijquet cati cuali quimati. ³⁷ Huan nojquiya ni cortina xijcuapilo ica tepos chijcoli cati senquisa oro ipan macuili taquetzali ten cuahuit acacia cati tiquixaltis ica oro. Huan xijchihua macuili icuatetonyo ten bronce cati yas tatzinta ten nopa macuili taquetzalme.

27

Taixpamit campa quitatise tacajcahualisti

(Éx. 38:1-7)

¹ “Xijchihua se taixpamit ica cuahuit cati itoca acacia. Huan elis cuadrado ica 2 metros huan 25 centímetros ihuehueyaca huan ipatajca, huan quipiyas 1 metro huan 25 centímetros ihuejcapanca. ² Huan ipan najcac iesquinajyo xijchihuili nahui icuacua cati san se inihuejhuexca. Xijchihua ica san se tatecti cuahuit huan xicalaxo ica nopa teposti bronce. ³ Nojquiya xijchihuili nochi cati quitequihuse nopona. Xijchihuili cati ipan quitemase cuajnexti, huan itepos palas, huan nopa huajcali para quiselis esti, huan nopa tepos chijcoli para ica quitzquise nopa nacat, huan nopa teposti para ticoli. Huan nochi tijchihuas ica bronce. ⁴ Huan xijchijchihuili se tixicti ten bronce ica ivarillas. Xijtalili se anillo ipan sese inacasta para ica tijquixtis. ⁵ Huan xijsehui nopa tixicti ipan nopa iteno cati mocahua tatajco ten nopa taixpamit, pampa ya nopa para ipan mosehuis tixicti campa oncas tit. ⁶ Nojquiya xijchihua cuahuit huehueyac para nopa taixpamit para ica anquihuicase. Xijchihua ica cuahuit acacia huan xiquixalti ica bronce. ⁷ Huan nopa

cuahuit huehueyac cati anquisencahuase, xijcalaqui ipan ome lados ten nopa taixpamit ipan nopa anillos para huelis anquihucase. ⁸Xijchihua nopa taixpamit ica huapalme, huan ma mocahua ijticacahuaxtic campa tipitzase. Huan xijchihua nochi senquisa quej nimitznextili nica ipan ni tepet.

Nopa calixpamit

(Éx. 38:9-20)

⁹“Nojquiya tijchihuilis cati elis quej se calixpamit cati quiyahualos nopa yoyon tiopamit. Huan xijchihuili se tatzacti ten cortinas ten lino yoyomit. Huan ihuehueyaca nopa lado ica sur elis 45 metros. ¹⁰Huan ipan nopa lado quipiyas 20 itaquetzalo cati moquetzas ipan 20 inincuatetonyo ten nopa teposti bronze. Huan xijtatacatzos nochi nopa taquetzali ica plata cati quipiya se ianillo. Huan nojquiya xijchihua tepos chijcoli ica plata para ica tijtatzquiltis nopa anillos ipan taquetzali ica nopa icuatetonyohua. ¹¹Nopa tatzacti ten cortinas ica norte elis san se, 45 metros ihuehueyaca. Huan xijcuapilo nopa cortinas ipan 20 taquetzalme cati tijtatacatzos ica plata cati quipiya se ianillo, huan nopa taquetzali moquetzas ipan 20 cuatetomit. Huan nopa tepos chijcoli nojquiya xijchihua ica plata. ¹²Huan nopa cortinas cati quitzacuas iica nopa yoyon tiopamit campa huetzi tonati quipiyas 22 metros huan tajco ihuehueyaca. Huan xijcuapilo ipan 10 taquetzali cati moquetzas ipan 10 cuatetomit. ¹³Huan iixmelac nopa yoyon tiopamit campa quisa tonati, nojquiya tijpatahuas cortinas cati ihuehueyaca 22 metros huan tajco. ¹⁴Huan oncas cortinas ipan sesen lado campa tapojtoc para calaquise. Ipan se lado nopa cortinas quipiyase 7 metros huan quicuapilose ipan eyi taquetzali cati moquetzas ipan eyi cuatetomit. ¹⁵Huan ipan ne seyoc lado nojquiya nopa cortina quipiyas 7 metros huan quicuapilojtose ipan eyi taquetzali cati moquetzas ipan eyi cuatetomit.

Cortinas para campa calaquise ipan calixpamit

¹⁶“Huan tatajco, campa tapojtoc para calaquise, xijtali se cortina cati quipiyas 9 metros ihuehueyaca. Huan xijcuapilo nopa cortina ipan nahui taquetzali cati moquetzas ipan nahui cuatetomit. Huan nopa cortinas campa ancalaquise monequi elis taxinepaloli ica lino icpat cati nelia canactzi ihuaya icpat cati azulitic, morado huan chichiltic. Huan quixinepalos se cati tahuel quimati. ¹⁷Huan tiquinalaxos ica plata nochi nopa taquetzalme ipan nopa tatzacti ten cortinas yahualtic ten nopa calixpamit. Huan xijtatacatzos sesen taquetzali ica se tatecti plata cati quipiya ianillo. Nojquiya nopa taquetzalme quipiyas tepos chijcolme ten plata, huan icuatetonyo ten bronze. ¹⁸Huan nopa tatzacti cati quitzacuas nopa calixpamit cati quiyahualohua nopa yoyon tiopamit quipiyas 45 metros ihuehueyaca, huan 22 metros huan tajco ipatajca. Huan nopa tatzacti ten cortinas quipiyas 2 metros huan 25 centímetros ihuejcapanca. Huan nopa cortinas xijchihua ica lino tamalinti nelcanactzi. ¹⁹Nochi tamantzitzi cati quitequihuse ipan nopa tequit tiopam calijtic huan nochi tepos chijcolme para ipan quicuapilose nopa tamantzitzi elis ten bronze. Huan nopa estacas para nopa yoyon tiopamit huan nopa tatzacti ten cortinas monequi xijchihua ica bronze.

Aceite para taahuil quetzali

(Lv. 24:1-4)

²⁰“Huan xiquinnahuati nopa israelitame ma quihualicaca aceite cati más cuali cati quisa quema quitisij olivos. Huan anquitequihuse para nopa taahuili nochipi tatatos. ²¹Huan nopa taahuil quetzali anquiquetzase ipan nopa achtohui cuarto ipan nopa yoyon tiopamit campa timopantise. Nopa cuarto eltoc iixmelac nopa cortina cati quitzacua campa mocahua nopa caxa

ipan nopa cuarto campa más tatzejtzeltic. Huan Aarón huan itelpocahua quitatisé nopa taahuili noixpa, na niamoTECO, sesen tiotac huan tatatos hasta ica ijnaloc. Huan ni tanahuatili monequi quichihuase israelitame huan iniixhuihua ama huan teipa.

28

Iniyoyo nopa totajtzitzi

(Éx. 39:1-31)

¹“Xijnotza ma huala moicni Aarón huan itelpocahua Nadab, Abiú, Eleazar huan Itamar para huelis tiquniyocatalis para na. Pampa niquintapejpenitoc ipan nochi israelitame para ma elica totajtzitzi cati techtequipanose.

² Huan xijchihuili moicni Aarón iyoyo cati tatzejtzeltic para ica techtequipanos. Huan iyoyo monequi elis nelía yejectzi para nochi quitepanitase pampa quej nopa quinamiqui ihueyitilis nopa hueyi tequit cati quichihuas noixpa. ³ Huan nochi masehualme cati talnamiquij para quisencahuas se tamanti huan cati niqinmacatoc yajatili, xiquinilhui ma hualaca para quichihuaquij iyoyo Aarón cati quinextis para yaya itzotc iyoca ten sequinoc totajtzitzi, pampa yaya elis nototajtzi para techtequipanos.

Iyoyo nopa hueyi totajtzi

⁴“Huan ya ni nopa yoyomit cati monequi quichihuilise Aarón para moquentis: iyolixtzajca, ipantzajca cati amo quipiya imancax, iyoyo cati huehueyac, ipaniyoyo cati yejectzi tajtzonti, icuatzajca huan itzinquenchilpica. Ma quichihuaca ni yoyomit para moicni Aarón huan nojquiya ma quinchihuilica iniyoyo itelpocahua para huelis techtequipanose quej nototajtzitzi. ⁵ Huan cati quipiyaj talnamiquilisti quichihuase iniyoyo ica piltepos mecatzitzitzi ten oro huan ica icpat cati azultic, morado, huan chichiltic, huan quixinepalose ica lino icpat cati tamalinti nelía canactzi.

Ixpantzajcayo nopa hueyi totajtzi

⁶“Huan quichihuase nopa ixpantzajcayot ica miyac piltajco ilpicayotzitzitzi cati taxinepaloli ten oro cati nelcanactzi, huan icpat cati azultic, morado huan chichiltic, huan ica lino icpat tamalinti nelcanactzi. Huan monequi quichihuase masehualme cati nelía cuali quimatij. ⁷ Monequi iixpantzajcayo elis ome tatecti ten yoyomit cati moixnamiquis iajcoltipa, huan iyolixco huan iica mocahuas se iyoyo. ⁸ Huan iixpantzajcayo huan itzinquenchilpica monequi elis ten san se taxinepaloli yoyomit. Huan itzinquenchilpica ica cati quiilpis iyoyo elis yejectzi tachijchihuali. Xijxinepaloca nopa yoyomit ica ipiltajco ilpicayo cati taxinepaloli ica oro cati canactzi, huan icpat ten lino cati tamalinti nelía canactzi, huan icpat cati quipajtoque azultic, morado huan chichiltic.

⁹“Huan xijcui ome piltetzitzi cati itoca ónice huan ipani xijtejtequi huan xiquijcuilo inintoca nochi itelpocahua Israel. ¹⁰ Chicuase inintoca xijtejtequi ipan se tet huan chicuase ipan seyoc tet. Huan xiquijcuilo inintoca quej tacajtijayque. ¹¹ Quema quitalise nopa tocayot ipan nopa tet, monequi quitejtequise quej elisquía se sello. Huajca nopa ome teme quipiyase nochi inintoca itelpocahua Israel. Huan itejteno sesen tet xijchihua ipiltencuayo ten senquisa oro. ¹² Huan xijtali nopa ome tet iajcoltipa nopa ixpantzajcayot para nopa totajtzi nochipa quihuicas inintoca iajcolpa para ma techelnamiquiltijtinemi na, niamoTECO ten itelpocahua Israel. ¹³ Huan xijtatziqultis nopa piltetzitzi ipan oro. ¹⁴ Huan xijchihua ome piltajco ilpicayotzitzitzi cati taxinepaloli ten oro cati nelía canactzi. Huan nopa piltajco

ilpicayotzitzí quitatzquiltise ipan ipiltencuayohua nopa teme ten ónice cati quihuica iajcoltipa.

Iyolixtzajcayo nopa hueyi totajtzi

¹⁵ “Teipa ica yolic, xijchihuaca nopa yolixtzajcayot cati quipiyas cati amehnēxtilis taya nopaquilis na, niamoTECO Dios. Huan xijtequihui nopa piltepos mecatzitzí ten oro, huan lino icpat tamalinti nelcanactzi, huan icpat cati quipajtoque azultic, morado huan chichiltic quej tijtequihui ipan nopa ixpantzajcayot. ¹⁶ Monequi tijcuilpachos para tijchihuas se bolsa cati ome panti. Ihuehuyaca huan ipatajca nopa bolsa elis 22 centímetros huan tajco, pampa cuadrado. ¹⁷ Huan iixpa xijtatquiltili nahui pamit ten piltetzitzí cati yejyectzitzí. Ipan nopa achtohui pamit xijtatquiltili se piltetzí cati itoca rubí, se topacio huan se sardónice. Ya ni elis nopa achtohui pamit. ¹⁸ Ipan nopa ompa pamit, xijtatquiltili se esmeralda, se zafiro huan se diamante. ¹⁹ Huan ipan nopa expa pamit xijtatquiltili se jacinto, se ágata huan se amatista. ²⁰ Huan ipan nopa najpa pamit xijtatquiltili se berilo, se ónice huan se jaspe. Nochi ni piltetzitzí monequi tatzquitose ipan ininiltencuayohua ten oro cati mochahuas inintejtēno. ²¹ Huan imiyaca nopa piltetzitzí monequi elis quej imiyaca itelpocahua Israel, doce. Huan sesen piltetzí quinescayotís se itelpoca Israel huan anquitejtequise ipan sesen tet quej se pilsellojtzi cati quipiyas itoca se itelpoca Israel.

²² “Huan para quitatacatzos nopa yolixtzajcayot ipan nopa ixpantzajcayot, xijchihuili piltajco ilpicayotzitzí cati taxinepaloli ica piltepos mecatzitzí cati canactzi huan senquisa oro. ²³ Huan teipa xijchihua ome anillo ten oro, se ipan sesen iesquinajyo ica huejcapa ipan nopa yolixtzajcayot. ²⁴ Nopa ome piltajco ilpicayotzitzí panose ipan nopa ome anillo cati eltoc iajcoltipa nopa ixpantzajcayot. Quej nopa xijtatquiltis nopa yolixtzajcayot ica nopa ixpantzajcayot. ²⁵ Nojquiya iniyacapa nopa piltajco ilpicayotzitzí moilpise ipan nopa anillos cati eltoc iajcoltipa nopa ixpantzajcayot. ²⁶ Teipa xijchihua seyoc ome anillo ten oro huan xiquintatacatzo nopa ome esquinas cati tatzinta ipan nopa yolixtzajcayot, pero xiquintatacatzos nopa ome anillos tatzinta ten nopa yolixtzajcayot campa moteca ipan cati quipantzacua. ²⁷ Huan teipa xijchihua seyoc ome anillos ipan nopa ixpantzajcayot, se ipan sesen lado iijtic nechca itzinquechilpica. ²⁸ Huan teipa xiquilpi nopa anillos cati tatzinta ipan nopa yolixtzajcayot ipan ni anillos ipan nopa ixpantzajcayot ica se listoj azultic para nopa yolixtzajcayot ma motali huan ma mochahua cuali ipan nopa ixpantzajcayot campa itajcoya huan amo papatacus. ²⁹ Huan yeca quema Aarón calaquís campa tatzetzeloltic nochipa huelis quihuicas inintoca itelpocahua Israel iyolixco ipan nopa iyolixtzajcayo huan techelnamiqultis na, niamoTECO, ten injuanti.

Nopa Urim huan Tumim para quipantise ipaquilis Toteco

³⁰ “Huan iijtic nopa yolixtzajcayot campa ibolsa, xijtali nopa Urim huan nopa Tumim, nopa dados tatzetzeloltic ten na, niamoTECO, cati anquitequihuse quema anisraelitame monequis anquimatise ‘quena’ nopaquilis se tamanti, o ‘amo’. Huan Aarón quihuicas iyolixco nopa Urim huan Tumim, nopa dados tatzetzeloltic ten na, niamoTECO quema calaquís noixpa.

³¹ “Huan xijchihua iyoyo huehuyac cati senquisa azultic cati moquentis itantita nopa ixpantzajcayot. ³² Huan monequi xijquechtequis campa calaquís itzonteco nopa totajtzi. Huan campa quiquechtequise monequi quihuilpachose se quentzi huan quiyahualose ica icpat para mochihuas se

yejyectzi tajtzonti yahualtic para amo tzayanis iquechta. ³³ Huan icuex-tejteno nopa iyoyo huehueyac monequi xijchihua se tajtzonti yejyectzi campa xiquixcopina nopa cuactati granada ica icpat azultic, morado huan chichiltic para ma quiyahualo icuexteno. Huan tatajco ten nopa granadas monequi xijcuapilojtiyas pilcampanajtzitzi ten oro. ³⁴ Monequi elis se pilcampanajtzitzi ten oro huan teipa se granada tajtzonti, teipa seyoc pilcampanajtzitzi ten oro huan seyoc granada tajtzonti, huan quej nopa yajtiyas ipan nochi itejteno. ³⁵ Huan ya nopa moquentis Aarón quema techtequipanos na, niamoTECO, calijtic campa más tatzejtzololitic. Huan quema Aarón calaquis o quisas ipan nopa nopa cuarto tzilinis nopa pilcampanajtzitzi ten oro para amo miqis.

Nopa piltepos patactzi ten oro

³⁶ “Nojquiya xijchihua se tatecti oro cati canactzi quej se piltepos patactzi quej se credencial huan ipan xijtejtequi se tajcuiloli quej campa quichihuaj se sello huan quijjtos: TAIYOCATALILI PARA TOTECO. ³⁷ Huan xiquilpi nopa piltepos patactzi ica se listój azultic iixpa ipan icuatzaica. ³⁸ Huan nopa piltepos patactzi mocahuas cuapilijtos ipan icuaixco Aarón. Huan quema nopa israelitame quiiyocatalise se tacajcahualisti para na huan quihualicase, sinta ayemo senquisa tapajpacti nopa tacajcahualisti noixpa na, niamoTECO, huajca Aarón ica nopa piltepos patactzi huelis quihuicas inintaixpanolhua cati quiajsitoque nopa tacajcahualisti. Huan huajca inon tacajcahualisti niqitas para tatzejtzololitic huan nijselis. Yeca Aarón monequi motalilis nopa cuatzajcayot ica nopa piltepos patactzi nochipa quema calaquis tiopan calijtic noixpa.

Ininpaniyoyo nopa totajtzitzi

³⁹ “Huan ipaniyoyo nopa hueyi totajtzitzi xijchihuili taxinepaloli ica icpat ten lino tamalinti nelía canactzi. Huan nojquiya icuatzaica quichihuase ica lino, huan xijchihua itzinquechilpica huan ma quipiya itachijchihuayo cati yejyectzi. ⁴⁰ Huan nojquiya xiquinchihuili itelpocahua Aarón ininpaniyoyo, huan inintzinquechilpica cati yejyectzi tajtzonti huan inincuatzaica. Huan ica nopa iniyoyo yejyectzi, nochi masehualme quintepanitase. Nelía quinamiqui quipiyase inihueyitilis por nopa hueyi tequit cati quichihuase noixpa.

⁴¹ “Huajca ica nochi ni yoyomit xiquinyoyonti moicni Aarón huan itelpocahua. Teipa xiquinajalti aceite ipan inintzonteco huan xiquiniyocatali para na. Huan quej nopa xiquintequimaca para ma techtequipanoca quej totajtzitzi. ⁴² Huan nojquiya xiquinchihuili inintatzintayoyo ica nopa cuali yoyomit lino para ma motalilica tatzinta ten nopa sequinoc iniyoyo. Huan quintzacuas ten inintzinquechta hasta ininquescuayotipa. ⁴³ Huan Aarón huan itelpocahua monequi moquentise quema calaquise tiopan calijtic para techtequipanose, o quema monechcahuise campa nopa taixpamit ipan nopa cuarto campa tatzejtzololitic. Huan sinta moquentise cati nimechilhuía, amo motajtacoltise huan miquise. Ni tanahuatilme elis para Aarón huan itelpocahua para nochipa.

29

Xiquiniyocatali nopa totajtzitzi para TOTECO

(Lv. 8:1-36)

¹ “Huan ya ni cati monequi xijchihua para tiquiyocatalis Aarón huan itelpocahua para ma elica nototajtzitzi. Xijcui se becerro huan ome oquich

borregojme cati nelía cuajcualme huan amo teno amo cuali quipiyaj. ² Huan ica harina ten trigo cati amo quipiya tasonejca yot, xijchihua pantzi. Huan nojquiya xijchihua tortas cati quipiya aceite. Huan xijchihua seyoc pantzi cati nesis quej taxcali huactoc cati tiquixajalos ica aceite. ³ Huan xijtema nochi ni pantzi ipan se chiquihuit, huan techmaca na niamoTeco ipan taixpamit ica nopa becerro huan nopa ome oquich borregojme. ⁴ Huan xihualica Aarón huan itelpocahua ipan icalixpa nopa yoyon tiopamit campa timopantise nechca campa calaquise, huan nopona xiquinpa jpacas ica at.

Pejqui itequi nopa achtohui hueyi totajtzi

⁵ “Huan xijcui nopa yejectzi yoyomit cati anquisencahuilijtoque huan xijyoyonti Aarón ica nopa ixpantzajca yot, nopa yolixtzajca yot, huan ica ipaniyoyo. Huan xiquilpi nopa ixpantzajca yot ica nopa tajco ilpicayot. ⁶ Huan xijtalís ipan itzonteco nopa cuatzajca yot. Huan ipan nopa cuatzajca yot xijtali nopa piltepos patactzi ten oro cati quijtohua: TAIYOCATALILI PARA TOTECO. ⁷ Huan xijcuis nopa aceite para tiquinajaltis masehualme huan tamanti para tiquiniyocatalis para na, niamoTECO, huan ticajaltis ipan itzonteco Aarón para tiquiyocatalis para techtequipanos na, niamoTeco. ⁸ Huan xiquinhualica itelpocahua huan xiquinyoyonti ica nopa yoyomit cati anquichijque para inijuanti. ⁹ Huan xiquintajcoilpi huan xiquintalili inincuatza jca, huan inijuanti quiselise nopa tequit ica nochi nopa tanahuatili huan elise totajtzitzi noixpa para nochipa. Quej ni, huajca xiquiniyocatali Aarón huan itelpocahua.

Tacajcahualisti para quiniyocatalis nopa totajtzitzi

¹⁰ “Xijhuica nopa becerro iixpa nopa yoyon tiopamit, huan Aarón huan itelpocahua ma quitálica inimax ipan itzonteco nopa becerro. ¹¹ Teipa xijmicti nopa becerro noixpa na, niamoTECO, ipan nopa calixpamit nechca icalte campa calaquise ipan nopa yoyon tiopamit campa timopantise. ¹² Huan xijcui se quentzi ieso nopa becerro huan xijtali ica momacpil ipan nochi nahui icuacua nopa taixpamit campa quitatise tacajcahualisti. Huan nopa esti cati mocahuas, xijtoyahua nechca itzinta nopa taixpamit. ¹³ Teipa xijcui nochi nopa tachiyajca yot cati eltoc ipan icuetaxcol nopa becerro, huan cati eltoc ipan ieltapach huan nopa ome ieyo, huan nochi nopa tachiyajca yot cati eltoc ipan ieyo, huan xijtati ipan nopa taixpamit. ¹⁴ Pero inacayo nopa becerro, ica icuetaxo huan icuit, xijhuica huejca, campa amo onca calme huan xijtatiti. Huan ni becerro elis se tacajcahualisti para tajtocoli.

¹⁵ “Huan nojquiya xijcui se ten nopa oquich borregojme, huan Aarón ihuaya itelpocahua ma quitálica inimax ipan itzonteco. ¹⁶ Huan xijmicti nopa oquich chivo huan ieso xijtzejtzeλο yahualtic taixpamit ipan iquesta. ¹⁷ Huan inacayo nopa oquich borrego, xijhuejhuelos. Huan xijpajpaca icuetaxcol huan imetz, huan xijtencahua ipan taixpamit ihuaya itzonteco huan nopa sequij cati tijhuejhuelojtoc. ¹⁸ Huan xijtatis nochi nopa oquich borrego ipan nopa taixpamit. Huan ya ni elis se tacajcahualisti tatatili para na, niamoTECO. Huan nelía ajhuiyac mijyotis huan techpactis, pampa elis se tacajcahualisti tatatili cati antechmacaj ica tit.

¹⁹ “Teipa xijcui nopa seyoc oquich borrego, huan Aarón huan itelpocahua quitálice inimax ipan itzonteco. ²⁰ Huan xijmicti nopa oquich borrego, huan xijcui quentzi ieso huan xijpolo itzinta ininacas cati ininejmat Aarón huan itelpocahua. Nojquiya xijpolo quentzti nopa esti ipan inihueyi majpil huan inihueyi xojpil cati ininejmat. Huan xijtzejtzeλο nopa esti yahualtic itejteno nopa taixpamit campa Quitatise Tacajcahualisti campa iquejquesta.

²¹ Huan xijcui quentzi ten nopa esti ipan taixpamit huan quentzi nopa aceite cati ica titaiyocatalía, huan xiquijtzelo ipan Aarón huan ipan iyoyo, huan ipan itelpocahua huan ipan iniyoyo nojquiya. Huan ica ya nopa Aarón huan itelpocahua huan iniyoyo elis tatzejtzeltolc huan taiyocatalili para na, niamoTECO.

²² “Teipa xijquixtili ichiyajca nopa oquich borrego. Xijcui nopa tachiya-jcayot campa icuitapil, icuetaxcol huan ieltapach. Huan xijcui nopa ome ieyo huan ininchiyajca, huan nopa imetz ten inejmat, pampa ica nopa tacajcahualisti ten nopa oquich borrego tiquintequitalis Aarón huan itelpocahua para techtequipanose. ²³ Nojquiya xijcui se pantzi ten nopa chiquihuit cati quiyiya pantzi cati amo quiyiya tasonejca yot cati eltoc noixpa na, niamoTECO. Huan nojquiya xijcui se torta cati quiyiya aceite huan se ten nopa seyoc pantzi cati nesi quej taxcali huactoc cati anquixajalojtoque aceite. ²⁴ Huan nochi ni pantzi huan ichiyajca nopa borrego, xijtali imaco Aarón huan inimaco itelpocahua. Huan injuanti quihuisose noixpa, niamoTECO, pampa ya nopa elis se tacajcahualisti cati anquihuisose noixpa para antechmacase. ²⁵ Teipa xijcui ten inimax nochi cati quihuisojque noixpa huan xijtali ipan nopa taixpamit noixpa quej se tacajcahualisti tatatili. Huan nopa tacajcahualisti mijyotis ajhuiyac huan techpactis na niamoTECO. Ya ni elis se tacajcahualisti tatatili cati antechmacaj ipan tit.

Inintacualis nopa totajtzitzi

²⁶ “Huan teipa xijcui iyolix nopa oquich borrego cati ica tijtequitalía Aarón para techtequipanos, huan xijhuisos noixpa, niamoTECO, huan teipa nopa iyolix elis para ta, Moisés. ²⁷ Huan nochipa quema tiquiniyocatalis tacame para ma elica totajtzitzi, Aarón huan itelpocahua quiselise iyolix huan imetz nopa borrego cati quihuisojque noixpa para techmacase. ²⁸ Quena, ya ni elis se tanahuatili para nochipa para xiquinmaca Aarón huan itelpocahua iyolix huan imetz se tacajcahualisti. Amo quema ma quielcahuaca israelitame para quinmacase ni nacat nopa totajtzitzi, masque temacaj se tacajcahualisti para moyoltalise nohuaya, niamoTECO, o temacaj se tacajcahualisti para techtascamatilise. Ya ni quinamiqui quiselise totajtzitzi para iniaxca.

Nopa hueyi totajtzi

²⁹ “Huan nochi ni iyoyo Aarón cati tatzejtzeltolc teipa elis para nopa itelpoca cati qutoquillis ipan itequi quej nopa hueyi totajtzi cati más quiyiya tequiticayot. Huan quej nopa, ni yoyomit panos ten se itelpoca hasta se iixhui, huan hasta se iixhui itelpoca. Sesen cati quiselis ni tequit para elis hueyi totajtzi cati ama quiselía Aarón, nojquiya quiselis ni yoyomit cati ihuaya yahui ni tequit. Quiselise quema quiiyocatalise sese ica aceite para quitequitalise para techtequipanos, niamoTECO. ³⁰ Huan nopa itelpoca Aarón cati quiselis itequi teipa, monequi moquentis ni yoyomit tatzejtzeltolc para chicome tonati, huan teipa quena, hueli pehuas tequitis ipan nopa achtohui cuarto campa tatzejtzeltolc.

³¹ “Huan xijcui inacayo nopa oquich borrego cati tijtequihujtoc para tiquiniyocatalis Aarón huan itelpocahua, huan xijcacatzo campa tapajpacti noixpa na, niamoTECO. ³² Huan Aarón huan itelpocahua quicuase inacayo nopa oquich borrego ihuaya nopa pantzi cati eltos ipan nopa chiquihuit ipan calixpamit nechca campa calaajise ipan nopa yoyon tiopamit. ³³ Quena, san injuanti huelis quicuase ni tacajcahualisti cati tijtequihui quema tiquiniyocatali para ma techtequipanoca na, niamoTECO. Amo aquí más hueli quicuas, san injuanti, pampa nopa nacat huan nopa pantzi taiyocatalili, huan tatzejtzeltolc para na. ³⁴ Huan sinta mocahuas quentzi pantzi o

quentzi nacat hasta tonilis, monequi xijtatis, ayecmo huelis quicuase pampa taiyocatalili para na.

³⁵ “Huajca para chicome tonati tiquinchihuilijtiyas Aarón huan itelpocahua nochi cati nimitznahuatía para xiquiniyocatali ma techtequipanoca. ³⁶ Ipan sesen tonali techmaca, niamoTECO, se becerro quej se tacajcahualisti para techixtzacullis inintajtacolhua. Nojquiya xijpajpaca nopa taixpamit noixpa ica se tacajcahualisti cati anquitencahuase ipani. Mojmosta xicalti nopa taixpamit ica aceite para tiquiyocacahuas para na, niamoTeco. ³⁷ Para chicome tonati xijtencahua tacajcahualisti huan xijpajpaca nopa taixpamit para elis tahuel tatzejtzolotlic, huan nochi cati quiajsis nopa taixpamit elis tatzejtzolotlic, taiyocatalili para na.

Tacajcahualisti tatatili cati monequi mojmosta
(Nm. 28:1-8)

³⁸ “Huan teipa mojmosta xiquintencahua ipan nopa taixpamit ome pilborregojtzitzi cati quipiyaj sese xihuit. ³⁹ Xijtencahua se pilborregojtzi ica ijnaloc, huan se pilborregojtzi techmaca quema calaquiti tonati. ⁴⁰ Huan ica nopa pilborregojtzi ica ijnaloc, xijtencahua ome litros huan tajco harina cati más cuali taxacualoli ica se litro aceite cati tatejteztoni ten olivos. Huan nojquiya xijtecas ipan taixpamit se litro xocomecat iayo. Ya nopa elis se tacajcahualisti cati quitoyahuase para techmacase. ⁴¹ Huan ne seyoc pilborregojtzi techmaca, niamoTECO, ica tiotac quema oncalaqui tonati. Huan nojquiya ma techmacaca nopa harina quej quichijque ica nopa tacajcahualisti cati ica ijnaloc, huan ma techmacaca xocomecat iayo quej quitoyajque ipan taixpamit ijnaloc. Huan ya ni elis se tacajcahualisti para na cati antechmacase ipan tif huan mijyotis ajhuiyac huan techpactis. ⁴² Ya ni elis nopa ome tacajcahualisti cati monequi anquichihuase mojmosta para ama huan teipa. Huan anquitencahuase noixpa na, niamoTECO, ni tacajcahualisti ipan nopa taixpamit campa tatatise ipan nopa calixpamit nechca campa icalte nopa yoyon tiopamit campa timopantise. Huan nozona nimechcamanalhuis. ⁴³ Quena, nozona nojquiya niqinnamiquis nopa israelitame. Huan nopa yoyon tiopamit elis tatzejtzolotlic pampa quipiyas notatanex. ⁴⁴ Huaajca niqiniyocatalis para na nopa tiopamit campa timopantise, huan nopa taixpamit campa tatatise. Huan niqiniyocatalis Aarón huan itelpocahua para ma elica nototajtzitzi huan nochi elise tatzejtzolotlique. ⁴⁵ Huan na nimocahuas para niitztos tatajco israelitame huan na nielis niininTeco. ⁴⁶ Huan inijuanti techixmatise para na niDIOS niininTeco cati niqinquixti ipan tali Egipto para nimocahuas huan niitztos inihuaya. Quena, na niDIOS, niininTECO.

30

Nopa taixpamit para copali
(Éx. 37:25-28)

¹ “Nojquiya xijchihua se taixpamit para ipan anquitatise copali. Xijchihua ica nopa cuahuit cati itoca acacia. ² Huan ihuehueyaca iixpa monequi elis 45 centímetros huan ipatajca nojquiya 45 centímetros para elis cuadrado, huan ihuejcapanca elis 90 centímetros. Huan iixco nopa taixpamit huan icuacua monequi elis san se tatecti cuahuit. ³ Huan tiquixaltis ica oro ipani, huan ipan iquespa huan icuacua. Xijchihuili se icorona itejteno cati senquisa oro. ⁴ Nojquiya xijchihuili nahui anillo ten oro, ome ipan se lado campa inacasta huan ne ome ipan seyoc inacasta. Huan ipan nopa anillos anquicalaquise

nopa cuahuit huehueyac para ica anquiuhicase. ⁵ Huan xijchihua nopa huehueyac cuahuit ica nopa cuahuit cati itoca acacia, huan xiquixalti ica oro. ⁶ Huan ipan nopa achtohui cuarto campa tatzejtzeltolitic, xijтали ni taixpamit para copali. Xijquetza ni taixpamit iixmelac nopa cortina cati quitzacua nopa cuarto campa más tatzejtzeltolitic campa eltoc nopa caxa ica nopa tanahuatili huan itzajca campa timopantise. ⁷ Huan sese ijnaloc quema ajsis hora para Aarón quitejtequis imecha nopa taahuili, monequi quitatis copali cati ajhuyiac ipan nopa taixpamit para copali. ⁸ Huan nojquiya mojmosta ica tapoyahui quema Aarón quinsenhua huan quintatis nopa taahuilme, quitatis copali noixpa na, niamoTECO. Quej nopa oncas copali cati atas noixpa mojmosta para nochipa hasta amoixhuihua quipiyase iniixhuihua. ⁹ Ipan nopa taixpamit para copali, amo xijtati seyoc tamanti copali, yon amo xiquintali tapiyalme para tatase. Amo xijтали tacajchualisti ten harina, yon amo xijtoyahua ipani nopa tacajchualisti cati monequi tijtoyahuas. ¹⁰ Huan se huelta ipan se xihuit Aarón quitapajpacchihuas nopa taixpamit para copali quema quitalis ipan icuacua se quentzi ieso nopa tacajchualisti para techixtzacuilis amotajacolhua. Huan amoixhuihua huan iniixhuihua quej ni nojquiya quichihuase ipan ni taixpamit para copali se huelta ipan se xihuit. Ni taixpamit para copali nelía tatzejtzeltolitic para na niamoTECO.”

Nopa tomi cati ica sesen quimanahuis inemilis

¹¹ Huan TOTECO nojquiya quihui Moisés:

¹² “Quema tijchihua se censo para tiquinpohuas nopa israelitame, sesen monequi quitaxtahuis TOTECO para quimanahuis inemilis. Quej nopa monequi para amo aqui miquis pampa tiquinpohua. ¹³ Quema mopohuase, sesen masehuali monequi temacas se plata tomi cati quipiya chicuase gramos ietica huan ya nopa elis se tacajchualisti para na, niamoTECO. ¹⁴ Quena, nochi cati ya quiaxijtitoque 20 xihuit, monequi moijcuilose huan monequi temacase nopa tomi. ¹⁵ Yaya cati rico amo taxtahuas más, yon cati teicneltzi amo taxtahuas pilquentzi. Nochi techmacase na, niamoTECO, nopa plata tomi cati quipiya chicuase gramos ietica para quimanahuisse ininemilis. ¹⁶ Huan tijcuis nopa tomi cati temacatose israelitame para momanahuisse, huan xijtequihui ipan itequi nopa yoyon tiopamit campa timopantise. Ica ya ni, niamoTECO nimechelnamiquis huan antechixtzacuilise amotajacolhua para huelis anitztose.”

Nopa hueyi paila ten bronce

(Éx. 38:8)

¹⁷ Huan TOTECO quihui Moisés:

¹⁸ “Nojquiya xijchihua se hueyi paila ica nopa teposti bronce para ipan momajtequise totajtzitzi. Nojquiya xijchihui ica bronce se tamanti cati ipan mosehuis nopa hueyi paila. Huan xijsehui ipan nopa calixpamit tatajco ten nopa taixpamit campa quitatise tacajchualisti huan nopa cortina cati quitzacua nopa yoyon tiopamit. ¹⁹ Huan nopona momajtequise huan moicxipajpacase Aarón huan itelpocahua. ²⁰ Huan sesen huelta quema calaquise ipan nopa yoyon tiopamit campa timopantise, monequi momajtequise huan moicxipajpacase para amo miquise. Nojquiya quema monequis monechahuisse campa nopa taixpamit para quichihuase inintequi huan quitatise nopa tacajchualisti cati techtencahuilise na, niininTECO, ²¹ monequi momajtequise huan moicxipajpacase para amo miquise. Huan ni tanahuatili monequi mocahuas para nochipa para Aarón, iixhuihua huan iniixhuihua quineitocase.”

Nopa aceite para taiyocatalise para Toteco

(Éx. 37:29)

²² Huan TOTECO nojquiya quillhui Moisés:

²³ “Xijsentili ni taajhuiyacayot cati nimitzilhuía cati más cuali: Chicuase kilos cati senquisa mirra, eyi kilo canela, eyi kilo cálamó cati mijyotía ajhuiyac, ²⁴ chicuase kilos cati casia huan nahui litros aceite cati itoca oliva. ²⁵ Huan ma quisencahua nochi ya ni se taajhuiyacachijquet cati cuali quimati itequi para ma elis nopa aceite cati tatzejzeloltic cati tapojpohuase para ica taiyocatalise para notequi na, niamoTECO. ²⁶ Huan xijtequihui ni aceite para ticajaltis nopa yoyon tiopamit campa timopantise huan nopa caxa ica nopa tanahuatili. ²⁷ Nojquiya xicajalti nopa cuamesa huan nochi nopa tamantzitzi cati motequihuis nozona, huan xicajalti nopa taahuil quetzali ihuaya nochi cati motequihuis nozona, huan xicajalti nopa taixpamit para copali. ²⁸ Xicajalti nopa taixpamit campa quitatise tacajcualisti huan nochi tamanti cati motequihua nozona. Nojquiya xicajalti nopa hueyi paila ten bronce ihuaya cati ipan mosehujtoc. ²⁹ Monequi tiquinajaltis para tiquiniyocatalis para na huan quej nopa nochi elis tahuel tatzejzeloltic, huan nochi cati quizzquise nopa tamantzitzi elise tatzejzeloltique.

³⁰ “Nojquiya tiquinajaltis Aarón huan itelpocahua ica aceite, huan tiquiniyocatalis para ma elica nototajtzitzi. ³¹ Huan xiquinilhui nopa israelitame: ‘Ni aceite elis para taajaltise quema quiiyocatalise tamanti o masehualme para elise para TOTECO. Ni aceite anmotequilise para nochipa. ³² Amo xijteca ipan cati hueli masehuali itacayo. Huan amo aqui ma quichihua seyoc taajhuiyacayot cati san se ica ya ni. Ni aceite tatzejzeloltic, huan monequi anquuitase quej se tamanti tatzejzeloltic. ³³ Sinta se acajya quisencahuas se taajhuiyacayot quej ni, o sinta se acajya quipolos se cati amo se nototajtzitzi, monequi anquiquixitise ten israelitame para nochipa.’ ”

Copali

(Éx. 37:29)

³⁴ Nojquiya TOTECO quicamanalhui Moisés huan quillhui:

“Xijmanelo se taajhuiyacayot ica san se imiyaca tachipinti ten aceite ten resina, ten istit huan ten gálbano cati ajhuiyac mijyotía, huan nochi xijmanelo ihuaya nopa copali cati senquisa cuali. ³⁵ Huan ica ni tamanti ma quisencahua se copali cati senquisa cuali. Ma quimanelo nelía cuali quej quimati quichihua se taajhuiyacachijquet cati cuali quimati itequi. Huan ni copali elis tatzejzeloltic san para na, niamoteco. ³⁶ Xijtjtisi cuali se quentzi ni tamaneloli hasta nelía cuechtic mocahuas, huan xijtali iixpa nopa caxa cati quipiya notanahuatil ipan nopa yoyon tiopamit campa timopantise. Huan monequi xijmatica ni tamaneloli copali eltoc tatzejzeloltic. ³⁷ Amo aqui ma quichihua seyoc copali cati senquisa quej ni pampa ni tamaneloli copali eltoc tatzejzeloltic para na niamoTECO. ³⁸ Sinta se acajya quichihuas seyoc quej ni san para quijjnecuis, monequi anquimictise.”

31

Bezaleel huan Aholiab

(Éx. 35:30; 36:1)

¹ Huajca TOTECO quillhui Moisés:

² “Xiquita, na nijtapejpenijtoc Bezaleel cati icone Uri huan iixhui Hur cati tacatqui ipan nopa hueyi familia ten iixhuihua Judá. ³ Nijtemitijtoc Bezaleel ica noTonal. Huan nijmacatoc miyac yajatili huan tamachilisti para huelis

quichihuas nopa yoyon tiopamit ica nochi tamanti cati monequi. ⁴ Yaya cuali quimati quitejtzonas oro, plata huan bronce para quichihuas ten hueli cati monequi. ⁵ Nojquiya hueli quieyjectalis piltetzitzi cati patiyo para ma petani huan quimati quenicatza quiquejquetzas sese piltetzitzi ipan se piltencuayot para mocahuas yejyetzitzi. Nojquiya ya hueli quitejtequis cuahuit huan quieyjectalis para nesis quej ten hueli tamanti cati tiquilhuis. ⁶ Nojquiya nijtapejpenijtoc Aholiab, icone Ahisamac ipan nopa hueyi familia ten iixhuihua Dan, para elis itapalehuijca. Huan nochi sequinoc cati achi más quipiyaj initalnamiquilis para quichihuase tamantzitzi cati yejyetzitzi, nojquiya niquinmacatoc iniyajatil para ma quichihuaca nochi cati nimitznahuatijtoc. ⁷ Huajca inijuanti hueli quichihuase nopa yoyon tiopamit campa timopantise, huan nopa caxa campa eltoc notanahuatilhua, huan itzajca nopa caxa campa nimechtasojtas huan antechixtzacuilise amotajtacolhua. Nojquiya quichihuase nochi nopa tamantzitzi cati motequihuis tiopan calijtic. ⁸ Quichihuase nopa cuamesa huan cati motequihuis nopona. Nojquiya quichihuase nopa taahuil quetzali cati senquisa oro ica nochi cati motequihuis ihuaya, huan quichihuase nopa taixpamit para copali. ⁹ Quichihuase nopa taixpamit campa quitatise tacajcahualisti ica nochi tamantzitzi cati motequihuis. Nojquiya quichihuase nopa hueyi paila huan cati ipan mosehuis huan nochi cati motequihuis ihuaya. ¹⁰ Nojquiya quixinepalose iyoyo tatzejtelolitic nopa totajtzi Aarón huan quichihuase iniyoyo itelpocahua. ¹¹ Huan quema quichihuase nopa aceite cati ica antaajaltise para antaiyocatalise para na huan quema quichihuase nopa copali cati ajhuyac mijyotía para quitatise ipan nopa taixpamit para copali, monequi nochi mochihuas senquisa quej nimitznahuatijtoc.”

Nopa tonali para ma timosiyajquetzaca

¹² Huan TOTECO nojquiya quihhui Moisés:

¹³ “Xiquinilhui nopa israelitame para monequi ma mosiyajquetzaca ipan nopa tonali cati nimechnahuati. Pampa nopa tonali elis quej se tanextili para amechelnamiquiltis amojuanti huan amoixhuihua cati amoca nimocajtoc. Huan quej nopa elis para nochipa hasta amoixhuihua teipa ehuan quipiyase iniixhuihua. Quej nopa anquimatise para na, niamoTECO, cati nimechchihua antatzejtelolitic. ¹⁴ Huajca monequi ma mosiyajquetzaca ipan nopa tonali cati nimechilhui para mosiyajquetzase pampa nopa tonali tatzejtelolitic huan taiyocatalili para na. Sinta se amo quitepanita ni tanahuatili, monequi anquimictise. Sinta se tequitis ipan se tonali para anmosiyajquetzase, xijmictica. ¹⁵ Chicuse tonati antequitise, pero ipan nopa chicompa tonali monequi anmosiyajquetzase pampa tatzejtelolitic huan taiyocatalili para na, niamoTECO. Sinta se acajya tequitis ipan nopa tonali, monequi miquis. ¹⁶ Nochi israelitame ama huan iniixhuihua teipa ma amo tequitica ipan nopa tonali para mosiyajquetzase. Monequi quitepanitase nopa tonali pampa quinextia nopa camanali cati nijchijtoc amohuaya. ¹⁷ Ni tamanti elis se tanextili para nochipa ica anisraelitame huan na, pampa ica chicuse tonati na, niamoTECO, nijchijqui ilhuicacti huan taltipacti, huan ipan nopa chicompa tonali, ayecmo nitequitic, san nimosiyajquetzqui.”

¹⁸ Huan quema TOTECO tanqui camanalti ihuaya Moisés ipan nopa tepet Sinaí, quimacac ome tepacti campa ijcuilijtoc itanahuatilhua. Huan Toteco Dios quijcuilojtoya ica ya imax.

32

Nopa becerro ten oro
(Dt. 9:6-29)

¹ Quema nopa israelitame quitaque para Moisés huejcahuayaya huan amo nimantzi temoyaya ten nopa tepet, mosentilijque campa Aarón huan quiilhuijque:

—Techchihuili se taixcopincayot para ma techyacana pampa amo tijmatij taya ipantitoc Moisés cati techquixti ipan tali Egipto.

² Huan Aarón quinilhui:

—Ma moquixtilica ininpijpilolhua amosihuahua, amotelpocahua huan amoichpocahua; huan ma techhualiquilica nica.

³ Huajca nochi moquixtilijque ininpijpilolhua huan quihuiquilijque Aarón. ⁴ Huan yaya quisei huan quaitili nopa oro, huan quema quiquixti ipan tit, quitejtzonqui ica se martillo huan quichijqui quej se becerro. Huajca nopa israelitame quijtojqe:

—¡Xitacaquica anisraelitame, ya ni todios cati techquixti ipan tali Egipto!

⁵ Huan quema Aarón quitac quenicatza paquiyayaj nopa israelitame, quisencajqui se taixpamit iixpa nopa becerro, huan teyolmelajqui:

—Mosta tijpiyase se ilhuit para TOTECO.

⁶ Huan tonili nochi israelitame mijquejqe cualca huan quinmictijque tapiyalme huan quintatijque ipan nopa taixpamit, huan temacaque tacajcahualisti para Toteco ma moyoltali ica injuanti. Teipa nochi mosehuijqe huan quichijque se hueyi tacualisti huan tacuajque huan taique quej amo monequi. Huan teipa nochi quichijque cati fiero quej cati quichihuaq ten hueli masehualme.

⁷ Huajca TOTECO quiilhui Moisés:

—Xitemo amantzi ten ni tepet, pampa momasehualhua cati tiquinquixti ipan tali Egipto monenpolojojqe. ⁸ Nimantzi quicajtejqe nopa tanahuatilme cati niquinahuati ma quitoquilica. Quiatilijque oro huan mochihuiijque se becerro huan amantzi quihueyichihuaq huan quimactilíaj tacajcahualisti, huan quijtohuaj: ‘Anisraelitame, ya ni amodios cati amechquixti ipan tali Egipto.’

⁹ Nojquiya TOTECO quiilhui Moisés:

—Niquitzoc quenicatza itztoque ni masehualme huan niquta para nelyoltetique. ¹⁰ Huajca ama techcahua, pampa nelia tahuel nicualani inihuaya huan niquintzontamiltis, pero ten ta, Moisés, niquinchihuas sequinoc masehualme cati momiyaquilise tahuel miyac huan itztose ipan se hueyi tali.

¹¹ Pero Moisés chicahuac quitajtani ITECO Dios ma amo quichihua, quijto:

—¡Ay TOTECO! ¿Para ten ticualanis ica momasehualhua cati ta tiquinquixti ipan tali Egipto ica mohueyi chicahualis? ¹² Nopa egiptome quijtose para ta cati tiininTeco tiquinquixti ipan tali Egipto, pampa ya timoilhuijtoya para tiquinmictis ipan tepeme pampa tijnequiyaya tiquinixpolihuiltis ten ni faltipacti. TOTECO, amo hueli tiquincahuilise nopa egiptome ma quijtoya ya nopa. Yeca ayecmo xicalani. Ximoyolcuepa ica cati timoilhuijtoc tijchihuas huan amo xiquincoco momasehualhua. ¹³ Xiquinelnamiqui Abraham, Isaac, huan Israel motequipanojcahua cati ta timotestigojqetzqui ica moseltitzi huan tiquinilhui tiquinmiyaquilis iniixhuihua para ma elica tahuel miyaqui hasta amo aqui huелиs quinpohuas. Tiquijto itztose quej imiyaca sitalime nepa ilhuicac. Huan nochi ni tali tiquinmacas iniixhuihua. Huan tiquijto quiselise huan elis iniaxa para nochipa. Quena, quej nopa tiquintencahuili motequipanojcahua.

¹⁴ Huajca TOTECO moyolcuetqui ica cati moilhuijtoya quinchihuilis imasehualhua. ¹⁵ Huan Moisés pejqui temo ten nopa tepet, huan quihualicayaya imaco nopa ome tepacti cati quipixtoya nopa fanahuatilme. Huan itanahuatilhua Toteco ijcuilijtoya iixpa huan iica nopa tepacti. ¹⁶ Yaya Toteco Dios cati quitejtejqui nopa tet huan quichijquí nopa tepacti huan yaya cati ipan tajcuilo.

¹⁷ Huan quema Josué quicajqui tahuejchihuayayaj nopa israelitame nopona tatzinta, quiilhui Moisés:

—Nijcaqui tahuejchihuaj campa itztoque nopa masehualme quej elisquía onca se tatehuilisti.

¹⁸ Pero Moisés quinanquili:

—Amo tahuejchihuaj pampa tatantoque, yon amo quichihuaj pampa sequinoc quintantoque. Nijcaqui cati huicaj seyoc tamanti huicat.

¹⁹ Huan quema Moisés monechcahuiyaya campa itztoyaj nopa israelitame, quiitac nopa becerro huan quenecatza mijtotiyaj, huan nelia cualanqui. Huan quimajcajqui itzinta tepet nopa tepacti cati quihuicayaya imaco huan cuectic mocajqui. ²⁰ Huan quicuic nopa becerro cati quichijtoyaj huan quitati, huan quitsiqui hasta quichijqui tatixtic. Huan nopa itatixo quijtzelo ipan at, huan quinchihualti nopa israelitame ma quica nopa at.

²¹ Huan Moisés quiilhui Aarón:

—¿Taya mitzchihuilijque ni masehualme para tiquinyacantoc ma quichihuaca ni tajtacoli nelhueyi?

²² Huan Aarón tananquili:

—Amo xicualani nohuaya, tate. Ta cuali tijmati ni masehualme quinpacía quichihuase cati amo cuali. ²³ Inijuanti techilhuijqe ma niquinchihuii se taixcopincayot para techyacanas pampa amo tijmatiyayaj faya mopantic ta cati techquixti ipan tali Egipto. ²⁴ Huan na niquinanquili para sinta quipiyaj tamanti ten oro, ma quiquixtica huan inijuanti techmacaque. Huan nijtali nopa oro ipan tit huan quisqui ni becerro.

²⁵ Huan Moisés quiitac para nochi quipolojtoyaj ininpinahualis. Huan Aarón quinchahuilijtoya ma quichihuaca ten hueli cati quinequiyayaj quichihuase. Huan quiitac inincualancaitacahua quinhuetzquiliyayaj. ²⁶ Huajca moquetzqui iixmelac campa calaquiyayaj ipan ipejya nopa altepet ten iniyoyoncalhua. Huan Moisés quijito:

—Nochi cati itztoque ica TOTECO ma hualaca nica nohuaya.

Huan nochi iixhuihua Leví mosentilijque ihuaya. ²⁷ Huajca Moisés quinilhui cati moyocatalijtoyaj ica ya:

—TOTECO Dios ten tiisraelitame quijitohua para sesen ten amojuanti monequi xijcuica amomacheta, huan xipehuaca ipan nopa achtohui calme huan xipanotiyaca hasta campa ontami nochi ni yoyoncalme. Huan xicalaquica ipan sesen yoyoncali huan xiquinmijmictijtiyaca masque amoicnihua, amohuampoyohua o amocalnechcahua pampa tahuel fiero quichijtoque.

²⁸ Huan iixhuihua Leví quichijque quej Moisés tanahuatijtoya huan ipan nopa tonali mijque nechca eyi mil masehualme. ²⁹ Huajca Moisés quinilhui:

—Ama anmoyocatalijque para itequi TOTECO pampa anquineltocatoque cati amechnahuatijtoc, masque monejqui anquintzontamiltijque amoconehua huan amoicnihua. Huajca ama TOTECO amechtiochihuas.

³⁰ Huan tonili Moisés quinilhui nopa sequinoc israelitame:

—Anquichijtoque se huayi tajtacoli. Ama monequi niyas huan nitejcos campa itztoc TOTECO huan niquitas sinta nihuelis nimechixtzacuulis amotajacol.

³¹ Huajca Moisés mocuetqui campa itztoya TOTECO, huan quiilhui:

—Melahuac nopa masehualme quichijtoque se hueyi tajtacoli huan mochihuilijque se taixcopincayot ten oro. ³² Na nimitztajtania chichahuac xiquintapojpolhui. Sinta amo, nojquiya techmicti na, huan xiquixpolo notoca ipan nopa amatapohuali cati tiquijcuilo.

³³ Pero TOTECO quinancuili Moisés:

—San niqixpolos itoca huan nijmictis cati noca tajtacolchihua. ³⁴ Huajca xiya xiquinhuica nopa masehualme hasta campa nimitzilhui. Huan xijmati para temachti noilhucac ejca mitzyacanas. Pero quema ajsis nopa tonali quema nitetatzacuiltis, niqintatzacuiltis ni masehualme por inintajtacolhua.

³⁵ Huan TOTECO quititanqui se tatzacuiltijca cocolisti ipan nopa masehualme pampa quihueyichijque nopa becerro cati Aarón quichijqui.

33

Quenicatza ma motecpanaca quema yase ipan ojti

¹ Huan TOTECO quiilhui Moisés:

—Xiquisa ten nica huan xiquinyacana nopa masehualme cati tiquinquixti ipan tali Egipto, huan xiquinhuica hasta nopa tali cati niquintencahuili Abraham, Isaac huan Jacob para niqinmacas inixhuihua. ² Huan nijtitanis se noilhucac ejca ma mitzyacana, huan yaya quinquixtis ten nopa tali nopa cananeos, amorreos, heteos, ferezeos, heveos huan jebuseos. ³ Huan amechhuicas ipan nopa tali cati nochi temaca hasta mocahua itajca. Pero na amo niyas amohuaya, pampa nohueli nimechixpolihuiltis ipan ojti, pampa tahuel tetic amoyolo.

⁴⁻⁵ Huan TOTECO quiilhui Moisés:

—Xiquinilhui nopa israelitame para injuanti nelía yoltetique. Xiquinilhui sinta nitztosquia inihuaya seyoc se talojtzi, huelis niqintamiixpolihuiltijosquia. Huajca xiquinilhui ma moquixtilica nochi nopa tayejechchijchijcayot ten oro cati quihualicaj quej pactoque, huan niqitas taya nijchihuas ica injuanti.

Huan tahuel miyac mocuesojque nopa israelitame quema quicajque ni camanali cati chichahuac. Huan nochi moquixtilijque inijejejeja ten oro huan iniyoyo cati yejectzitzitzi para amo nesis quej pactoque, pampa ayecmo paquiyayaj. ⁶ Huajca ipan tepet Horeb nopa israelitame moquixtilijque ininpijpololhua, inincoshua, huan nochi cati ica mocualtiyayaj para moyejechchijchihuase. Huan ayecmo quitequihuijque.

Nopa yoyon Cali campa mopantijque ihuaya Toteco

⁷ Huan Moisés ya momajtoya quiquetza iyoca se yoyoncali achi quentzi huejca ten iniyoyoncalhua nopa israelitame. Huan quitocaxti nopa yoyoncali campa timopantise ihuaya TOTECO. Huan quema acajya quinequiyaya quitatzintoquilis TOTECO se tenijqui para quimatis ipaquilis, yahuiyaya ipan nopa yoyoncali campa mopantis ihuaya TOTECO cati eltoya iyoca ten ne sequinoc yoyoncalme. ⁸ Huan quema Moisés yahuiyaya para mopantiti ihuaya TOTECO, nochi masehualme momajtoyaj quisaj ininchajchaj huan moquetzaj calteno nechca caltemit huan quitachilíaj Moisés hasta quema oncalaquiyaya ipan nopa yoyoncali. ⁹ Huan sesen huelta quema Moisés calaquiyaya ipan nopa cali, nopa mixti hualtemoyaya huan motaliyaya icaltejtено nopa tiopa quema TOTECO camanaltiyaya ihuaya Moisés. ¹⁰ Huajca quema nopa israelitame quiitayayaj nopa mixti moquetztaya icaltejtено

nopa yoyoncali, sese ten injuanti motancuaquetzayaya icalixpa huan qui-hueyichihuayaya Toteco.

¹¹ Huan TOTECO quicamanalhuyiaya Moisés moixtachilijtoyaj quej se cati camanalti ihuaya ihuampo. Huan teipa Moisés tacuepiliyaya campa ne sequinoc yoyon calme. Pero nopa telpoca tacat Josué, itelpoca Nun cati quipalehuyiaya Moisés, mocahuayaya nopona ipan nopa yoyoncali campa Mopantíaj ihuaya TOTECO.

Toteco quinextili Moisés itatanex

¹² Huan Moisés quiilhui TOTECO:

—Xiquita, techilhuía ma niquinyacana ni israelitame hasta nopa cuali tali, pero amo techilhuía ajquiya tijtitanis nohuaya. Nojquiya tiquijtohua para cuali techixmati huan techcualitztoc. ¹³ Ama nimitztajtania se favor. Sinta nelía techcualitztoc, techilhui taya mopaquilis para nijchihuas huan quej nopa más huelis nimitzixmatis. Huan na nimitzneltocas huan noja techcualitztinemis. Huan xiquelnamiqui para ni masehualme cati niquinyacana, nochi moaxcahua.

¹⁴ Huan TOTECO quinanquili:

—Na, niamoTECÓ, niyas mohuaya huan nijchihuas para timosiyajquetzas.

¹⁵ Huan Moisés quijito:

—Sinta amo tiyas tohuaya, amo techchihua ma tiquisaca ten nica.

¹⁶ Pampa sinta amo tiyas tohuaya, sequinoc masehualme amo quimatise para techinelía, na huan ni momasehualhua. Sinta ta amo tohuaya tiyas, huajca tiitztose san se quej ten hueli masehualme. Pero sinta ta tiyas tohuaya, nesis techtapejpenijtoc huan techiyocatalijtoc ten nochi sequinoc masehualme ipan ni taltipacti.

¹⁷ Huan TOTECO quiilhui Moisés:

—Huajca nijchihuas cati tiquijtojtoc pampa nijmati tijchihuas cati cuali, huan ta nimitzitas para tinonelhuampo.

¹⁸ Huajca Moisés quijito:

—Huajca nimitztajtania, techcahuili ma nimitzita ta ica nochi motatanex cati yejyectzi.

¹⁹ Huan TOTECO quinanquili:

—Na nijchihuas ma panos moixpa nochi cati cuali ten na. Huan quema nipanans, niqijtos cati quijitosnequi notoca, TOTECO. Na nijtapejpenía ajquiya nijtasojtas huan ajquiya ihuaya nijpiyas hueyi noyolo. ²⁰ Pero noxayac amo huelis tiqitas, pampa yon se masehuali amo huelis quiitas noxayac huan itztos.

²¹ Huajca TOTECO quiilhui:

—Nica nonechca eltoc se hueyi tet, nopona ximoquetza ipani. ²² Huan na nimitztalis campa tacoyontoc ipan nopa hueyi tet, huan quema nipanans huan nesis notatanex nimitzixtzacuas ica nomax hasta ya nipanotos. ²³ Teipa niqijcuenis nomax, huan huelis tiqitas nocuitapa, pero noxayac amo tiqitas.

34

Nopa yancuic tepacti ica nopa tanahuatilme

(Dt. 10:1-5)

¹ Huan TOTECO quiilhui Moisés:

—Xijtejtequi omé tepacti cati san cuali ihuejhuexca quej nopa achtohui tepatacme cati nimitzmacac. Huan ipani niqijcuilos nopa camanali cati

quixtoy nopa sequij cati tijtatatzqui. ² Nojquiya ximonemili para mosta cualca titejcos ipan tepet Sinaí. Xihuala ximonextiqui noixpa itzompac nopa tepet. ³ Ma amo aquí tejcoc mohuaya huan amo aquí más itzot nopa tepet. Yon se tapiyali amo hueli tacuajtinemis iteno nopa tepet.

⁴ Huajca Moisés quitejtejqui nopa ome tepatacti san se quej nopa cati achtohui. Huan tonili cualca mijquejqui, huan quicuic nopa ome tepatacti imaco huan tejcoc ipan tepet Sinaí quej TOTECO quinquahuatijtoya. ⁵ Huajca TOTECO temoc ipan se mixti huan moquetzqui ihuaya Moisés, huan quiyolmelajqui taya quinequi quijtos itoca, TOTECO. ⁶ Huan TOTECO panoc iixpa Moisés huan quijtojtiyajqui:

—Na niDIOS, moTECO. Na cati nitetasojta huan nijpiya hueyi noyolo ica masehualme. Ohui para nicualani, pampa tahuel niteicnelía. Huelis timotemachis ipan na pampa senquisa nitemachti. ⁷ Niquinnextilis tahuel nelpano miyac masehualme quenicatza niquinicnelía, pampa niquintapopolhuía inintajtacolhua quema techhuejcamajcahuaj huan techixpanoj. Pero sinta se acajya tajtacolchihua, amo niquijtohua para amo teno quichijtoc. Nijtatzaucultía por itajtacol, huan nojquiya niquintatzaucultis iconehua, huan iixhuihua, huan hasta iixhuihua ininconehua por nopa cati fiero yaya quichijqui.

⁸ Huajca Moisés nimantzi mohujtzonqui talchi, huan quihueyichijqui TOTECO. ⁹ Huan Moisés quijto:

—Totec, sinta ama techcualitzotoc, xiya tohuaya huan techyacana, pampa nelía ni masehualme yoltetique. Pero techtapojpolhui totaixpanolhua huan totajtacolhua, huan techseli para ma tielica timoaxcahua para nochipa.

Nopa yancuic camanal sencahuali ica israelitame
(Dt. 7:1-5)

¹⁰ Huan TOTECO quinanquili:

“¡Cualtitoc! Ya ni nopa camanal sencahuali cati ica nimocahuas amohuaya. Amoixpa nochi annomasehualhua nijchihuas huejhueyi tanextili quej cati amo quema mochijtoc ipan yon se tali ipan nochi ni taltipacti. Huan quinitase nohueyi chicahualis nochi nopa masehualme cati mohuaya itztoque. Quinitase cati na, niamoTECO, hueli nijchihua pampa temajmati nopa hueyi tamanti cati nijchihuas ica ta.

Amo xiquinnechahui taixcopincayome

¹¹ “Ipan ni camanal sencahuali cati tijchihuaj san sejco, monequi ta tijchihuas cati nimitznahuatijtoc ama, huan na amoixpa niquinquixtijtiyas ten amotal nopa amorreos, cananeos, heteos, ferezeos, heveos huan jebuseos.

¹² “Pero ximomocuitahuica para amo xijchihuaca yon se camanali inihuaya masehualme cati itztoque ipan nopa tali campa ancalaquise para anitzotij. Sinta anmomatise inihuaya, amechtahuisose ipan tajtacoli. ¹³ Pero quena, xijhuelonica nochi nopa taixpamit cati iniaxca, huan xijtamitatapatzaca ininteteyohua. Huan xijzontequica nopa fiero taquetzalme ica nopa taixcopincayot Asera cati inijuanti quinhueyichihuaj.

¹⁴ “Amo quema ximotancuaquetzaca iixpa o xijhueyichihuaca seyoc quej elisquía se dios. Na niamoTECO huan techtocaxtiaj nopa DIOS CATI TETASOMATI, pampa nimechtasomati huan nijnequi san na techhueyichihuaca.

¹⁵ “Yeca amo xijchihuaca yon se camanali ica nopa masehualme cati itztoque ipan nopa tali. Huan quema inijuanti quinhueyichihuase huan quinentcahualise tacajchualisti inintaixcopincayohua, huan motemacase inixpa quej tacanenca sihuame, nojquiya amechnotzase para xiyaca inihuaya.

Pero nimechilhuía, amo xiyaca. Amo ximomatica ica injuanti pampa huelis anquinhueyichihuase inintaixcopincayohua huan anquicuase cati tacajcajtoque. ¹⁶ Amotelpocahua amo hueli moasihujtise ica iniichpocahua pampa nopa inchpocame quinhueyichihuaj taixcopincayome cati amo neli dios huan quinchihualtise amotelpocahua nojquiya ma quichihuaca.

¹⁷ “Amo quema xijchihuaca yon se taixcopincayot.

Ilhuit ipan sesen xihuit

(Éx. 23:14-19; Dt. 16:1-17)

¹⁸ “Monequi xiilhuichihuaca ipan nopa ilhuit ten pantzi cati amo quipiya tasonejcajot. Monequi para chicome tonati anquicuase nopa pantzi cati amo quipiya tasonejcajot quej nimitznahuatijtóc. Xijchihuaca ni ilhuit ipan nopa tonali cati nimitzilhui ipan metzti Abib, pampa ipan nopa metzti anquisque ipan tali Egipto.

¹⁹ “Nochi cati achtohui ehua elis noaxca. Elise noaxcahua nochi iniachtohui oquich conehua amotapiyahlua, masque amohuacaxhua, amoborregojhua o amochivojhua. ²⁰ Pero sinta tacatis se pilburrojtzi, huelis techcohuilise para anquiteguihuise sinta antechmacase se pilborregojtzi. Pero sinta amo antechcohuilise nopa pilburrojtzi, monequi anquiquechposteq- uise. Nojquiya monequi antechcohuilise amoachtohui oquichpilhua ica se tacajcahualisti. Huan amo aquí huelis hualas techitaqui san ica imax. Monequi techhualiquilise se tacajcahualisti.

²¹ “Xitequitica para chicuasen tonati, pero ipan nopa chicompa tonali, monequi ximosiyajquetzaca. Masque antapoxoníaj o anpixcaj, monequi anmosiyajquetzase.

²² “Nojquiya xiilhuichihuaca ipan nopa ilhuit ten ipejya pixquisti quema achtohui anquixcase trigo. Nojquiya xiilhuichihuaca ipan nopa ilhuit ten itamiya pixquisti quema nechca itamiya se xihuit.

²³ “Eyi huelta ipan se xihuit monequi nochi tacame huan oquichpilme ma monextica noixpa, na niamoTECO, niamoDios anisraelitame. ²⁴ Huan na niinquixtijtiyas amoixpa nopa masehualme cati amo techixmatij ipan nopa tali, huan nijhueyilijtiyas amotal. Huan quema anyase anmonextitij noixpa na, niamoTECO Dios, eyi huelta ipan se xihuit, amo aquí huelis quiixtocas o moaxcatis amotal.

²⁵ “Quema antechmacase tacajcahualisti, amo techmacaca ica yon se tamanti cati quipiya tasonejcajot. Nojquiya amo huelis anquijajocuisse hasta mosta yon se quentzi ten nopa tacajcahualisti para Pascua.

²⁶ “Nopa cati achtohui taquis ipan amomil, huan nopa cati más cuali itajca monequi anquihuicase ipan nohaj, na niDIOS, niamoTECO.

“Amo xiquixtica se pilconechivojtzi ipan inana ilechi quej quichihuaj tenahualhuiani.”

Moisés quiijcuilo nopa tanahuatilme

²⁷ Huan TOTECO quiilhui Moisés: “Xiquijcuilo ni tanahuatilme cati nimitzmaca, pampa ica ni tanahuatilme nijchihuas ni camanali mohuaya huan inihuaya nopa israelitame.”

²⁸ Huan Moisés itztoya ihuaya TOTECO ipan nopa tepet para 40 tonati huan 40 yohuali. Huan ipan nochi nopa tonali amo tacuajqui, yon amo atic. Huan huajca TOTECO quiijcuilo ipan nopa tepatacme nochi nopa majtacti tanahuatilme cati monequi ma quichihuaca israelitame ipan nopa camanali cati TOTECO quichihuayaya inihuaya.

Ixayac Moisés petaniyaya

²⁹ Huan Moisés temoc ten tepet Sinaí ica nopa ome tepatacti cati quipixtoya nopa tanahuatilme. Huan petaniyaya ixayac pampa camanaltitoya ihuaya Toteco Dios, pero yaya amo quimatiyaya. ³⁰ Huan quema Aarón huan nochi nopa israelitame quiitaque ixayac Moisés petaniyaya, tahuel majmajqe huan amo quinejqe quinechcahuise. ³¹ Huajca Moisés quinnotzqui ma quinechcahuica huan Aarón ica nochi tayacanani monechcahuicoj huan Moisés quincamanalhui. ³² Huan teipa monechcahuijqe nochi nopa sequinoc israelitame, huan Moisés quinilhui nochi nopa tanahuatilme cati TOTECO quimacac ipan tepet Sinaí. ³³ Huan quema Moisés tanqui quincamanalhuia, moixtzajqui ica se yoyomit.

³⁴ Pero sesen huelta quema Moisés calaquiyaya ipan nopa tiopamit iixpa TOTECO para mocamanalhuis ihuaya, moquixtiliyaya nopa yoyomit cati ica moixtzacuayaya huan quej nopa mocahuayaya hasta quema quisayaya. Huan quema quisayaya para quinyolmelahuas israelitame cati TOTECO quinnahuatijtoya, ³⁵ nopa israelitame sempa quiitayayaj para petaniyaya ixayac, huajca Moisés sempa moixtzacuayaya. Huan quej nopa mocahuayaya moixztactoc hasta sempa oncalaquiyaya para camanaltis ihuaya Toteco Dios.

35

Tanahuatili para tonali para mosiyajquetzase

(Éx. 31:12-17)

¹ Huan Moisés quinsentili nochi israelitame huan quinilhui: “Ya ni nopa tanahuatili cati TOTECO quiijtojtoc ma tijchihuaca. ² Quiijto para huelis titequitise chicuasen tonati, pero nopa chicompa tonali elis para tojuanti se tonali tatzejtelolitic, huan ipan nopa tonali monequi ximosiyajquetzaca para TOTECO. Sinta acayja tequitis ipan nopa tonali, monequi miquis. ³ Yon amo xitipitzaca ipan amochajchaj ipan nopa tonali para anmosiyajquetzase.”

Quisentili tacajcahualisti para nopa yoyon tiopamit

(Éx. 25:1-9)

⁴ Huan Moisés quincamanalhui nochi israelitame, huan quinilhui: “Ya ni cati TOTECO tanahuatijtoc ma tijchihuaca. ⁵ Nochi amojuanti cati anquinequij anquimacase TOTECO se tenijqui ica amopaquilis huan ica nochi amoyolo, huelis anquimacase huan tijsentilise nopa tamanti. Huelis anquihualicase cati anquipiayaj ten oro, plata o bronce. ⁶ Huelis anquihualicase icpat ten lino cati tamalinti nelcanactzi. Xijhualicaca nojquiya icpat cati quipajtoque azultic, morado huan chichiltic. Nojquiya xijhualicaca nopa yoyomit cati tetic quej se cuetaxti cati taxinepaloli ica oquich chivo iijhuiyo. ⁷ Xijhualicaca inincuetaxo borregojme huan pesojme cati quipajtoque chichiltic. Nojquiya xijhualicaca nopa cuahuit cati itoca acacia, ⁸ huan oliva aceite para taahuilme. Nojquiya monequi nopa taajhuiyacayot cati quimanelose ica nopa aceite para quinajaltise tamanti huan masehualme para quiniyocatalise para itequi TOTECO. Huan monequi quichicahuase nopa taajhuiyajcayot para nopa copali cati ajhuiyac mijyotia. ⁹ Nojquiya xijhualicaca nopa piltetzitzi cati yejyetzitzi cati inintoca ónice huan sequinoc piltetzitzi cati yejyetzitzi para tijtalise ipan nopa ixpantzajcayot huan nopa yolixtzajcayot para nopa hueyi totajtzi.

Nopa tamantzitzi cati motequihuijqe tiopan calijtic

(Éx. 39:32-43)

10 “TOTECO tanahuatijtoc para nochi amojuanti cati anquipiyaj talnamiquilisti huan yajatili para anquichihuase se cuali tequit, xihualaca para anquichihuase nochi ni tequit cati tanahuatijtoc TOTECO ma tijchihuaca. 11 Monequi tijchihuase nopa yoyon tiopamit ihuaya itzontzajca, itepos chijcolhua, ihuapalhua, icuaixtapalhua, itaquetzalhua huan itepos cuatetonyo. 12 Tijchihuase nopa caxa ica cuahuit huehueyac para tijhuicase huan itzajca campa Toteco techtasojtas huan nopa cortina cati quitzacuas. 13 Nojquiya tijchihuase nopa cuamesa huan cuahuit huehueyac para tijhuicase huan nochi cati motequihuía ica nopa cuamesa, ihuaya nopa pantzi cati tenextilía para TOTECO itztoc tohuaya. 14 Quichihuase nopa taahuil quetzali cati elis para taahuili, huan nochi cati motequihuía nopona huan itaahuilhua, huan iaceite. 15 Quichihuase nopa taixpamit para copali huan nopa cuahuit huehueyac cati ica quihuicase. Quichihuase nopa aceite para titaiyocatalise para Toteco huan nopa tamaneloli copali cati ajhuiyac mijyotía. Nojquiya quichihuase icortina para tijcuahuiyonise campa nopa caltemit campa calaquise ipan nopa yoyon tiopamit. 16 Quichihuase nopa taixpamit campa quitatise tacajcahualisti ica itixic huan iteposixtapalhua. Nojquiya quichihuase nopa cuahuit huehueyac para ica tijhuicase huan nochi nopa tamantzitzi cati motequihuis nopona. Huan quichihuase nopa hueyi paila ten bronze ihuaya cati ipan mosehuis. 17 Quichihuase nopa tatzacti ten cortina cati quiyahualos nopa calixpamit. Huan nopa calixpamit quiyahualos nochi nopa yoyon tiopamit. Nojquiya quichihuase itaquetzalhua nopa cortina tatzacti, huan itepos cuatetonyo sesen ten nopa taquetzalne. Nojquiya quichihuase nopa cortinas cati tijcuahuiyonise cati quitzacuas campa ancalaquise ipan calixpamit. 18 Quichihuase estacas, huan lazos para moilpis huan motetzilos nopa yoyon tiopamit, huan nopa taquetzali. 19 Quichihuase nopa yoyomit cati moquentise totajtzitzi cati tequitise tiopan calijtic. Quena, monequi quichihuase nopa yoyomit tatzetzelolitic para Aarón, huan nojquiya quichihuase cati moquentise itelpocahua.”

Nochi israelitame quihualicaque ofrendas para ichaj TOTECO

20 Huan nochi israelitame motanantejqe campa itztoya Moisés huan yajque ininchajchaj. 21 Huan nochi cati quimachilijque para TOTECO quinyoltacani ma quimacaca se tenijqui huan ipan iniyolo quinequiyayaj quimacase, temacaque. Huan nopa israelitame quihualicaque nochi nopa ofrendas para nopa yoyoncali campa mopantise ihuaya TOTECO, huan nochi nopa tamantzitzi cati monequiyaya para quichihuase nopa tequit tiopan calijtic. Nojquiya quihualicaque cati monequiyaya para iyoyo tatzetzelolitic nopa totajtzi. 22 Huan hualajque tacame huan sihuame cati ica nochi iniyolo quinequiyayaj quimacase se tenijqui. Huan miyaqui quihualicayayaj tamanti ten oro cati quitequihuijtoyaj para moyejyechihuase. Quihualicaque pijpilolme, anillos, maquechcosme huan ten hueli tatecti oro. Huan nochi ni oro quitencahuilijque TOTECO quej se ofrenda. 23 Sequinoc quihualicaque icpat azultic, morado huan chichiltic huan lino icpat cati tamalinti nelcanactzi, huan nojquiya quihualicaque yoyomit cati tetic quej se cuetaxti cati taxinepaloli ica inijhuiyo oquich chivojme. Quihualicaque inincuetaxo pesojme huan ininpochquiyo borregoyme cati quipajtoque chichiltic. 24 Huan nochi cati quinequiyayaj temacase se ofrenda ten plata, o bronze, quihualicaque campa TOTECO. Huan cati quipiyayaj nopa cuahuit acacia cati monequi motequihuis ipan ichaj TOTECO, quihualicaque.

25 Huan miyaqui sihuame cati hueliyayaj tamalinaj cuali huan cati ica nochi iniyolo tequitiyayaj, quihualicaque icpat cati azultic, morado huan

chichiltic. Nojquiya quihualicaque lino icpat cati nelcanactzi. ²⁶ Huan sequinoc sihuame cati cuali huelyayaj tamalinaj, quimalinque inijhuyio oquich chivojme huan quichijque yoyomit cati tetit. ²⁷ Huan nopa tayanani quihuicaque piltetzitzi cati itoca ónice huan sequinoc piltetzitzi cati pajpatiyio para quitatzquiltise ipan nopa ixpantzajcayot huan yolixtzajcayot para nopa totajtzi. ²⁸ Huan nojquiya quihualicaque xihuit cati ajhuiyac mijyotía huan aceite para taahuili. Nojquiya quihualicaque aceite para nopa tamaneloli cati ica teajaltise quema taiyocatalise para Toteco, huan nopa copali cati ajhuiyac mijyotía.

²⁹ Huan nochi israelitame sihuame huan tacame cati quimachilijque ipan iniyolo para hueli quichihuase se ten nopa tamanti tequit cati TOTECO quinahuatijtoya Moisés, quichijque huan quihuicaque cati quisencajtoyaj para ma eli quej se ofrenda para TOTECO.

Bezaleel huan Aholiab
(Éx. 31:1-11)

³⁰ Huan Moisés quinilhui nopa israelitame: “Xiquitaca para TOTECO quitapejpenijtoc Bezaleel, icone Uri huan iixhui Hur cati tacatqui ipan nopa hueyi familia ten iixhuihua Judá, para tayacanas ipan nochi ni tequit. ³¹ Huan Toteco Dios quitali Itonal ica ihueyi chichualis ipan Bezaleel para tayacanas. Huan Toteco quimacatoc talnamiquilisti huan yajatili para quimatis miyac tamanti tequit para huellis quichihuas nochi cati monequi, ³² huan para huellis quichihuas tamanti yejectzitzitzi ica oro, plata huan bronce. ³³ Cual quimati quintequis huan quinalaxos piltetzitzi para petanise. Nojquiya quimacatoc yajatili para elis se cuali cuaxinquet cati hueli quitejtequi huan quiyectalia cuahuit para quichihuas cati yejectzi. ³⁴ Nojquiya Toteco Dios quimacac talnamiquilisti Bezaleel ihuaya Aholiab para ma quinmachtica sequinoc nochi cati injuanti quimatij. Aholiab eliyaya icone Ahisamac huan tacatqui ipan nopa hueyi familia ten iixhuihua Dan. ³⁵ Huan Toteco Dios quinmacatoc nochi ome tahuel miyac inintalnamiquilis para ma quichihuaca miyac tamanti tequit. Quimatij quenicatza quicualtalise oro, huan quenicatza cuatequise. Quimatij quenicatza quichihuase yoyomit cati yejectzi tajtzontitzi ica icpat cati azultic, morado, huan chichiltic, taxinepaloli ica lino icpat nelcanactzi. Quipiyaj yajatili para quichihuase nochi ni tequit, huan para quiyolilitise nochi nopa tamantzitzi cati monequi quichihuase, huan quichihuase sese ica itachiyalis cati monequi.

36

Nopa israelitame quihualicaque onpano miyac tamanti hasta mocajqui

¹ “Huajca Bezaleel huan Aholiab huan nochi sequinoc masehualme cati TOTECO quinmacatoya talnamiquilisti para ni tequit, huan quipixque ipan iniyolo para tapalehuise, monejqui tequitise huan quichihuase nopa yoyon tiopamit senquisa quej TOTECO tanahuatijtoya.”

² Huajca Moisés quinotzqui Bezaleel huan Aholiab, huan nochi masehualme cati TOTECO quinmacatoya talnamiquilisti huan cati motemacayayaj ica nochi iniyolo para tequitise, huan nochi hualajque. ³ Huan Moisés quinmactili nochi tamanti cati nopa israelitame quihualicatoyaj cati monequi quitequihuise ipan nopa yoyon tiopamit.

Huan mojmosta nopa israelitame noja quihualicayayaj ofrenda para quitequihuise. ⁴ Huajca teipa nochi injuanti cati quichihuayayaj tamanti

quiltquetzque inintequi, ⁵ huan quicamanalhuitoj Moisés huan quiilhuijque: “Nochi quihualicatoque tahuel miyac tamanti hasta conpano cati monequi para tijchihuase nochi cati TOTECO tanahuatijtoc.”

⁶ Huajca Moisés tanahuati ma quinyolmelahuatij nochi israelitame ipan ininchajchaj para yon se tacat o sihuat ayecmo ma quisencahua seyoc tamanti para nopa tiopamit, yon ayecmo ma tahuajhualicaca. ⁷ Pampa ya quipixtoyaj tahuel miyac cati quitequihuse huan hasta miyac mocahuayaya.

Nopa cortinas ten lino

(Éx. 26:1-37)

⁸ Huan nopa masehualme cati Toteco quinmacatoya talnamiqulisti para ma tequitica nopona, quichijque itzontzajca nopa tiopamit. Quichijque ica 10 cortinas ica lino tamalinti nelcanactzi huan taxinepaloli ica icpat cati azultic, morado, huan chichiltic huan ipani nesiyaya inintachiyalis nopa ilhuicac ehuan cati inintoca querubines. ⁹ Huan sesen ten nopa cortinas eliyaya 12 metros huan tajco ihuehuyaca, huan ome metro ipatajca. ¹⁰ Huan quisalojque itamiya se cortina ica itamiya seyoc nopa macuili cortinas para mochijqui san se cortina cati huehueyac. Huan nopa seyoc macuili cortinas nojquiya quijtzonque para mochijqui san se cortina cati huehueyac huan nopa ome cortinas huehueyac elqui para sesen lado itzontzajca nopa tiopamit. ¹¹ Huan ipan se iteno ten sesen nopa ome huehueyac cortinas cati quimojmotzquiltijtoyaj, quichihuilijque tailpili ica itzojhuaso campa mosojosos, huan quitenyahualojque sese itzojhuaso ica icpat azultic. ¹² Para nochi quichihuilijque 50 tailpili sese ica itzojhuaso para mosojosos ipan se lado nopa ome huehueyac cortinas cati achtohui tasaloli. Huan teipa quinchijque nopa tailpili ipan sese para ma moixnamictica ica nopa tailpili ipan seyoc. ¹³ Nojquiya quichijque 50 tepos chijcoli ten oro para quisalose nopa 50 tailpili ipan sesen ten nopa ome cortinas tasaloli. Quej nopa quichijque para quitzacuase huejcapa ipan nopa yoyon tiopamit.

Nopa cortinas para itzontzajca nopa yoyon tiopamit

¹⁴ Nojquiya quichijque 11 cortinas ten nopa tetic yoyomit cati taxinepaloli ica inijhuiyo oquich chivojme para quichijque iompa tzontzajca nopa yoyon tiopamit. ¹⁵ Huan sesen cortina ihuehuyaca eliyaya 13 metros huan tajco, huan ome metro ipatajca, huan nochi 11 cortinas quipixqui san se inihuejhuexca. ¹⁶ Huan quisalojque macuili cortinas san sejco huan iyoca quisalojque seyoc chicuase cortinas. ¹⁷ Huan ipan sese lado ten nopa ome huehueyac cortinas quichihuilijque 50 tailpili ica inintzojhuaso campa mosojosos. ¹⁸ Nojquiya quichihuilijque 50 tepos chijcoli ten bronce para ipan quisalose inintzojhuaso nopa tailpili ipan se cortina ica nopa tailpili ipan seyoc cortina para iompa tzontzajca nopa yoyon tiopamit elis tasaloli san sejco.

¹⁹ Huan nopa expa itzontzajca quichijque ica inincuetaxo oquich chivojme cati quipajque chichiltic, huan nopa najpa itzontzajca cati elqui más calixco quichijque ica inincuetaxo pesojme.

Nopa caltepamit ten huapalme

²⁰ Huan para icaltepayo nopa tiopamit quinquejquetzque nopa huapalme cati eliyaya ten cuahuit acacia. ²¹ Huan sese huapali quipixqui nahui metros huan tajco ihuehuyaca, huan 65 centímetros ipatajca. ²² Sese huapali quipixqui ome tepos chijcoli para quisalos ica ne sequinoc huapalme ipan sesen lado. ²³ Huan ijcatoyaj 20 huapalme ipan nopa caltepamit ica sur.

Itepos cuatetonyo nopa huapalme

²⁴ Huan tatzinta ten sesen nopa huapali calaquiyaya ipan ome itepos cuatetonyo ten plata para moquetzas cuali. Oncayaya 40 tepos cuatetomit, ome cuatetomit ipan sese huapali. Huan sesen huapali quipixtoya ome tepos chijcoli para quitatzquiltis ipan itepos cuatetonyo. ²⁵ Ipan nopa caltepamit ica norte oncayaya seyoc 20 huapalme, ²⁶ huan 20 itepos cuatetonyo. Tatzinta ten sese huapali oncayaya ome itepos cuatetonyo. ²⁷ Iica nopa tiopamit ipan nopa lado campa temo tonati quipixqui chicuase huapalme. ²⁸ Huan quitallijque seyoc huapali iica tiopamit campa sese iesquina. ²⁹ Huan quej nochi sequinoc huapalme, nopa huapalme campa inincalnacasta quipixqui tepos chijcoli ica tatzinta huan ica huejcapa para quisojsos ica nopa huapalme cati ininechca. ³⁰ Huajca campa temo tonati oncayaya chicueyi huapalme huan 16 tepos cuatetomit cati ipan moquetztoya, ome cuatetomit tatzinta ten sesen huapali.

Nopa cuaixtapali

³¹ Quichijque cuaixtapali huejhuehueyac ten cuahuit acacia huan quitallijque iixpa nopa huapalme ipan nopa caltepamit cati quiyahualojque nopa tiopamit. Quichijque macuili cuaixtapali para iixpa nopa huapalme ipan se lado ten nopa tiopamit, ³² huan seyoc macuili cuaixtapali para iixpa nopa huapalme ipan ne seyoc lado, huan seyoc macuili cuaixtapali para iniixpa nopa huapalme cati moquetzque iica nopa tiopamit ica campa temo tonati. ³³ Huan nopa cuaixtapali cati panoc tatajco ten nopa huapalme cati moquetztoyaj pejque ica se iesquina tiopamit huan ajsic hasta seyoc iesquina nopa tiopamit. ³⁴ Huan nopa huapalme quinixaltijque ica oro, huan nopa anillos campa calaquiyayaj nopa cuaixtapalme elqui senquisa oro. Nojquiya quixaltijque ica oro nopa cuaixtapalme cati huejhuehueyac.

³⁵ Huan nopa cortina cati quitzajqui nopa cuarto cati más calijtic quichijque ica lino cati tamalinti nelcanactzi huan taxinepaloli ica icpat cati quipajtoyaj azultic, morado huan chichiltic. Huan ipan nopa taxinepaloli nesiyayaj ome ilhuicac ehuan cati inintoca querubines. ³⁶ Huan para ipan mohuyonis nopa cortina quichijque nahui taquetzali ica cuahuit acacia huan quinixalti ica oro. Huan ipan nopa taquetzali quitallijque tepos chijcoli ten oro. Huan sesen ten nopa nahui taquetzalme moquetztoya ipan inincuatetonyo ten plata.

Cortina campa calaquise ipan yoyon tiopamit

³⁷ Nojquiya quichijque se cortina para quitzacuase campa calaquise ipan yoyon tiopamit. Quichijque ica lino nelcanactzi cati taxinepaloli ica icpat azultic, morado, huan chichiltic huan quijtzonque yejyetzzi ica itachijchihualo. ³⁸ Huan ni cortina tatzquitoya ipan macuili taquetzali ica macuili tepos chijcoli. Huan inintzompac nopa macuili taquetzalme huan tepos chijcolme quixaltijque ica oro, huan nopa macuili icuatetonyo cati ipan moquetzqui nopa taquetzali quichijque ica bronce.

37

Nopa caxa

(Éx. 25:10-22)

¹ Huan teipa Bezaleel quichijqui nopa caxa ica cuahuit acacia huan quipixqui 110 centímetros ihuehueyaca, huan 65 centímetros ipatajca, huan 65 centímetros ihuejcapanca. ² Iijtic huan ipani quialti ica senquisa oro, huan yahualtic itejteno quipiyayaya oro. ³ Huan quichihuili nahui anillo

ten oro huan quitallili najcac ipan inacasta. ⁴ Nojquiya quichijqui cuahuit huehueyac huan quiixalti ica oro. ⁵ Huan ipan nopa anillos quicalaqui nopa cuahuit huehueyac para quej nopa huelis quihuicase nopa caxa.

Itzajca nopa caxa campa Toteco tetasojta

⁶ Teipa quichijqui itzajca nopa caxa campa Toteco quintasojtas masehualme. ⁷ Nojquiya iixco itzajca quinquetzqui ome iilhuicac ejcahua Toteco cati inintoca querubines cati tatejtzonti ica martillo. Huan nopa ilhuicac ehuan huan itzajca nopa caxa elqui ten san se tatecti oro. Huan nopa ilhuicac ehuan moquetzttoyaj ipan sese iteno itzajca. ⁸ Se iilhuicac ejca Toteco moquetztoc ipan se iteno huan nopa seyoc ipan seyoc iteno. Nopa querubines huan itzajca nopa caxa elqui ten san se tatecti oro tatejtzonti. ⁹ Nopa ilhuicac ehuan moixnamictoyaj huan moeltapal tanantoyaj quej elisquá quicahuiliyayaj huan quitachiliyayaj itzajca nopa caxa campa TOTECO quintasojtas masehualme.

Nopa cuamesa para pantzi

(Éx. 25:23-30)

¹⁰ Nojquiya quichijqui nopa cuamesa ica cuahuit acacia. Huan quipiyayaya 90 centímetros ihuehueyaca, huan 45 centímetros ipatajca, huan 65 centímetros ihuejcapanca. ¹¹ Huan quiixalti ica senquisa oro. Huan quichihuilijque nopa cuamesa se corona ten oro cati quitenyahualo iixco. ¹² Nojquiya quitenyahualo iixco nopa cuamesa ica se pilhuapaltzi cati quipiya chicome centímetros ipatajca. Huan yahualtic quitejtejqqui para quichihuili iyejyejca huan quiixalti nochi ica senquisa oro. ¹³ Huan quichihuili nahui anillo ten oro, huan quitalli najcac ipan inacasta nopa cuamesa campa pehua iicxihua iquespa nopa mesa. ¹⁴ Nopa anillos eltoya huejcapa ipan iicxi nechca nopa pilhuapaltzi cati quitentzactoya nopa cuamesa. Huan quichijchijqui cuahuit huehueyac huan quicalaqui ipan nopa anillos ipan nopa cuamesa para quej nopa huelis quihuicase.

¹⁵ Huan para quichihuas nopa cuahuit huehueyac para ica quihuicase nopa cuamesa quitequihui cuahuit acacia, huan quiixalti ica oro. ¹⁶ Nojquiya quichijqui cati quitequihuse ipan cuamesa quej platome, huejhueyi cucharas, teposhuitzcucharas huan huejhueyi xarros para tacajchualisti cati atic.

Nopa taahuil quetzali

(Éx. 25:31-40)

¹⁷ Nojquiya quichijqui se taahuil quetzali cati senquisa oro. Iicxi, icuayo, ipilcaxihua, ixochiyo mimilijtoc huan cahuantoc huan nochi iyejca quichihuili ica san se tatecti oro cati tatejtzonali ica martillo. ¹⁸ Huan quipixtoya chicuase imacuayohua; eyi imacuayohua ipan se lado, huan nopa seyoc eyi ipan seyoc lado. ¹⁹ Ipan sese imacuayo quipixqui eyi pilcaxitzitzi cati ipan tatatise huan quipixqui itachiyalis quej se almendra ixochiyo cati mimilijtoc huan se cati cahuantoc. Huan ipan nochi nopa chicuase imacuayohua quej nopa eliyaya. ²⁰ Huan ipan icuayo nopa taahuil quetzali quipiyayaya nahui pilcaxitzitzi, sese ica itachiyalis se xochit almendra, se nesiyaya se xochit mimilijtoc huan se quej se xochit cahuantoc. ²¹ Huan tatzinta ten sesen nopa chicuase imacuayohua cati tatzquitoyaj ipan icuayo nopa taahuil quetzali quipiyayaya se xochit cahuantoc. ²² Huan nochi ixochiyohua huan imacuayohua huan icuayo eliyaya ten san se tatecti oro huan tatejtejtzonti ica martillo. ²³ Nojquiya quichihuili chicome piltahuiltitzi, huan nopa

cucharas cati ica quisehuyayaj nopa taahuilme, huan quichihuilijque iplatohua. Huan nochi quichijque ica senquisa oro. ²⁴ Huan nopa taahuil quetzali ten oro quipixqui 33 kilos ietca.

Nopa taixpamit para copali

(Éx. 30:1-5)

²⁵ Nojquiya quichijqui se taixpamit campa quitatise copali huan elqui cuadrado, ica 45 centímetros ihuehuyaca huan ipatajca, huan quipiyayaya icuacua ipan nochi nahui iesquina, huan nochi san eliyaya se tatecti cuahuit.

²⁶ Huan quiixalti ica senquisa oro nochi itzontzajca, huan iquesta, huan icuacua. Huan yahualtic iixco quiquetzqui se corona ten oro cati quiyectali.

²⁷ Huan nojquiya quichihuii nahui anillos itantita nopa nahui iesquinajyo, huan nozona quicalaqui nopa cuahuit huehuyac para ica quihuicase.

²⁸ Huan nopa cuahuit huehuyac quichijqui ica cuahuit acacia, huan quiixalti ica oro.

Nopa aceite tatzejtzelolitic huan nopa copali

(Éx. 30:22-38)

²⁹ Nojquiya quichijqui nopa aceite cati tatzejtzelolitic para ica taiyocalitise para Toteco, huan quichijqui nopa copali cati ajhuiyac mijyotía. Nochi quichijqui Bezaleel, se taajhuiyacachijquet cati achi más quimatiyaya.

38

Taixpamit campa quitatise tacajcahualisti

(Éx. 27:1-8)

¹ Huan nojquiya ica cuahuit acacia quichijqui se taixpamit cati cuadrado iixco campa quitatise tacajcahualisti. Quipixqui 2 metros 25 centímetros ihuehuyaca huan ipatajca. Huan ihuejcapanca eltoya 1 metro 25 centímetros. ² Huan ipan najcac iesquina quichihuii icuacua. Huan quichijqui ica san se tatecti cuahuit huan quiixalti ica nopa teposti bronce.

³ Huan quichihuii nochi cati monequi quitequihuse ipan nopa taixpamit quej nopa tepos caja cati ipan quitemase cuajnexti, nopa huajcalme para quiselise esti, huan nopa tepos chijcoli para ica quitzquise nopa nacat, huan palas para ica quiquixtise cuajnexti, huan nopa teposti para ticoli.

Huan nochi quichijqui ica bronce. ⁴ Huan ica bronce quichihuii se tixicti ica ipiltepos ixtapalhua para iixco huelis motecas nopa tacajcahualisti cati quitatíaj. Huan quisehui nopa tixicti ipan tajco ihuejcapanca iijtico nopa taixpamit campa quipixqui se itencuayo. ⁵ Huan nojquiya najcac campa iesquina quichihuii nahui anillos para ipan quicalaquise nopa cuahuit huehuyac para ica quihuicase. ⁶ Huan quichijchijqui nopa cuahuit huehuyac ica cuahuit acacia huan teipa quiixalti ica bronce. ⁷ Huan quincalaqui nopa huehuyac cuame ipan nopa anillo cati eltoya iquesta nopa taixpamit para huelis quihuicase. Huan quichijqui nopa taixpamit ica huapali huan mocajqui ijti cacahuaxtic.

Nopa hueyi paila ten bronce para ipan momajtequise

(Éx. 30:18)

⁸ Huan quichijqui ica bronce nopa hueyi paila ten bronce para at huan nopa cati ipan mosehuía. Quichijque ica miyac tescat ten bronce cati sihuame momajtoyaj quitequihuíaj, pampa sihuame cati tequipanohuayayaj campa icalte nopa yoyon tiopamit quihualicaque inintescas huan temacaque.

Nopa calixpamit

(Éx. 27:9-19)

⁹ Teipa Bezaleel quichijchijqui se calixpamit cati quiyahualo nochi nopa yoyon tiopamit. Huan tzactoya nopa calixpamit ica cortinas quej se tepamit. Huan nopa cortinas cati quitzajqui nopa calixpamit ica sur quipixqui 45 metros ihuehueyaca. Huan quichijqui nopa cortinas taxinepaloli ica icpat ten lino nelia canactzi. ¹⁰ Huan ica sur tatzquitoyaj nopa cortinas ipan 20 taquetzalme ica 20 inincuatetonyo ten bronce huan inintepos chijcolhua huan inianillos ten plata. ¹¹ Huan ica norte nopa cortinas cati mochijqui nopa tatzacti quipixqui 45 metros ihuehueyaca, huan tatzquitoyaj ipan 20 taquetzalme, huan 20 inincuatetonyo ten bronce ica inintepos chijcolhua huan inianillos ten plata. ¹² Huan campa temo tonati nopa cortinas cati quitzajqui nopa lado quipixqui 22 metros huan tajco ihuehueyaca, huan quipixqui 10 taquetzali, huan 10 cuatetomit para ipan tatzquis. Huan nopa taquetzali, huan inintepos chijcolhua huan inianillos nochi elqui ten plata. ¹³ Huan ica campa quisa tonati nopa cortinas cati quitzajqui nopa lado quipixqui 22 metros huan tajco. ¹⁴ Huan tatajco ten nopa tatzacti campa quisa tonati mocajqui tapojtoc quej caltemit para calaquise ipan calixpamit. Huan ipan se lado campa calaquise eltoya se cortina cati quipiyayaya 7 metros ihuehueyaca, huan eyi taquetzali sese ica icuatetonyo para ipan tatzquijque. ¹⁵ Huan ipan ne se lado ten campa calaquiyayaj nojquiya eltoya se cortina cati quipiyayaya 7 metros ihuehueyaca, huan 3 taquetzali huan sesen ica icuatetonyo para ipan tatzquijque. ¹⁶ Huan nochi nopa cortinas cati mochijqui nopa tatzacti cati eltoya yahualtic ten nopa calixpamit mochijtoya ica yoyomit taxinepaloli ten lino icpat cati canactzi. ¹⁷ Huan icuatetonyo sesen taquetzali eliyaya ten bronce, huan itepos chijcolhua huan ianillos eliyaya ten plata. Huan iixco sesen taquetzali quixalti ica plata. Huan nochi nopa tepos barras para ipan quicuapilose nopa cortinas eliyaya ten plata.

Nopa caltemit para calaquise ipan calixpamit

¹⁸ Huan campa nopa cortina cati quitzacuayaya campa calaquij ipan nopa calixpamit elqui taxinepaloli ica lino icpat cati nelcanactzi huan icpat cati azultic, morado huan chichiltic. Nochi ya ni quichijchijqui se cati quimatiyaya taxinepalohua. Huan nopa cortina eliyaya 9 metros ihuehueyaca huan 2 metros 25 centímetros ihuejcapanca san se quej nopa sequinoc cortinas cati quiyahualojque nopa calixpamit. ¹⁹ Huan campa calaquiyayaj quipixqui 4 taquetzali, sese ica icuatetonyo ten bronce para ipan moquetzas. Huan itepos chijcolhua huan ianillos nopa taquetzalme eliyaya ten plata huan itzonco sesen taquetzali nojquiya quixalti ica plata. ²⁰ Huan nochi estacas eltoya ten nopa teposti bronce huan quitequihui para quipis huan quitezilos nopa tiopamit. Huan nopa cortina tatzacti quiyahualo nopa calixpamit. Huan nopa calixpamit quiyahualo nopa yoyon tiopamit.

Cati quitequihuse tiopan calijtic

²¹ Huan ya ni nopa cuenta ten nopa yoyon tiopamit para elis ichaj nopa caxa ica itanahuatil TOTECO. Huan quichijque nochi quej Moisés tanahuati-toya. Huan Itamar, icone totajtzi Aarón, tayacanqui para quitzitziyas sesen tequit. Huan nopa levitame quijcuilojque quesqui imiyaca sesen tamanti quitequihuijtoyaj para quichihuase nopa yoyon tiopamit.

²² Huan Bezaleel, icone Uri huan iixhui Hur ipan nopa hueyi familia Judá, tayacanqui para quichihuas iixcopinca sesen tamanti senquisa quej TOTECO quinahuati Moisés ma quisencahua. ²³ Huan quipalehui Aholiab,

icone Ahisamac, cati tacatqui ipan nopa hueyi familia Dan. Huan Aholiab eliyaya se tepos tejtzonquet para tayejectalis, huan se cuali taxinepalojquet ica icpat. Huan quimatqui quichihuas yejectzi yoyomit cati quipixqui itajtzonyo ica lino icpat cati canactzi huan icpat cati azultic, morado huan chichiltic.

²⁴ Nochi oro cati motequihui para nochi tamanti ipan nopa tiopamit eliyaya oro cati israelitame quimacatoyaj TOTECO. Huan ietica quipano 965 kilos quej nopa tamachihuali cati quitequihuijque ipan nopa tiopamit.

²⁵ Huan imiyaca plata cati quitequihuijque quipanoc 3 mil 319 kilos.

²⁶ Nochi ni plata elqui cati quininanque nopa 603 mil 550 tacame cati moijcuilojque ipan nopa censo pampa ya quiaxitijque 20 xihuit. Sesen ten inijuanti temacaque macuili gramos ten plata quema moijcuilojque.

²⁷ Quitequihuijque 3 mil 300 kilos ten plata para inincuatetonyo icaltepayo tiopamit huan nopa taquetzalme para cortinas campa calaquise. Ica ni plata quichijque icuatetonyo 100 taquetzalme. Elqui nechca 33 kilos ten plata cati quitequihui ipan icuatetonyo sesen taquetzali. ²⁸ Huan nopa plata cati mocajqui, quitequihuijque para itepos chijcolhua, ianillos, huan para itzonco sesen ten nopa taquetzalme.

²⁹ Huan nopa bronce cati nopa israelitame quimacaque TOTECO quipanoc 2 mil 336 kilos ietica. ³⁰ Huan ica nopa bronce quichijque inincuatetonyo nopa taquetzalme cati quicuataquechi nopa cortinas campa calaquij ipan calixpamit. Huan quichijque nopa taixpamit ten bronce para ipan quitatise tacajchualisti, huan quichijqui itixic ica ipilteposixtapalhua ten bronce cati ipan quitejque nopa tapiyali para quitatise. Huan nojquiya ica ni bronce quichijqui nochi nopa tamantzitzi cati monequiyaya campa taixpamit.

³¹ Nojquiya quitequihui bronce para nopa cuatetomit para taquetzalme cati quicuataquechi nopa cortinas cati quitzajqui nopa calixpamit huan nopa cortinas campa calaquij ipan calixpamit. Huan quitequihui bronce para iestacas para quilpis huan quitetzilos nopa tiopamit huan nochi nopa taquetzalme.

39

Niyoyo nopa totajtzitzi

(Éx. 28:1-43)

¹ Nojquiya iniyoyo nopa totajtzitzi cati quitequihuse quema tequitise tiopan calijtic quixinepalojque ica icpat azultic, morado huan chichiltic. Huan quichijque iyoyo Aarón cati tatzejtzolotlic quej TOTECO quinahuatijtoya Moisés. Huan ni yoyomit quitequihuía san quema calaqui ipan tiopamit campa tatzejtzolotlic.

Ixpantzajcayot

² Nojquiya quichijque ipantzajcayo taxinepaloli ica icpat ten oro cati azultic, morado, huan chichiltic huan lino icpat cati nelía canactzi. Huan nochi elqui nelía cuali tasencahuali. ³ Quicuique se tatecti oro, huan quitejtzonque hasta quichijque se piltepos mecatzi cati nelía canactzi quej icpat. Huan nopa piltepos mecatzi ten oro quixinepalojque ihuaya lino icpat cati canactzi huan icpat cati azultic, morado huan chichiltic. Huan quichijchijqui nopa tequit se cati nelía quimatiyaya tequiti huan nelía yejectzi mocajqui. ⁴ Huan nopa ixpantzajcayot elqui ome pedazos ten yoyomit. Huan nojquiya quichijqui seyoc tatecti para iajcoltipa campa moixnamiquiyaya iyolixco huan icuitapa. ⁵ Nojquiya nopa itzinquechilpica cati yejectzi quichijchijque ica san se yoyomit quej cati quitequihuijque

ipan nopa ixpantzajcayot. Nochi eltoya ten nopa piltepos mecatzi ten oro taxinepaloli ica lino icpat nelía canactzi huan ica icpat azultic, morado huan chichiltic. Nochi elqui quej TOTECO quihlhi Moisés.

⁶ Huan quichijque piltetzitzi cati yejectzi cati itoca ónice huan quitali ipan oro. Huan ipani quijcuiljoque inintoca nochi itelpocahua Israel quej se sello cati quiyiya tajcuiloli cati nesi. ⁷ Huan quitalili iajcoltipa nopa ixpantzajcayot para ica quinelnamiquiltis TOTECO ten itelpocahua Israel. Huan nochi quichijque quej TOTECO quinquahuatijtoya Moisés.

Iyolixtzajcayo nopa hueyi totajtzi

⁸ Huan nojquiya se cati tahuel quimati tequiti quichijchijqui nopa yolixtzajcayot quej nopa pantzajcayot. Quixinepalo nopa icpat ten oro, lino icpat ihuaya icpat cati azultic, morado huan chichiltic. ⁹ Huan quihuilpacho nopa yolixtzajcayot huan quichijqui se bolsa cati cuadrado. Ihuehueyaca huan ipatajca eltoya 22 centímetros. ¹⁰ Huan iyolixco oncayaya nahui tatilimit ten piltetzitzi cati yejectzitzi. Ipan nopa achtohui pamit quitatzquiltijque se piltetzi cati itoca rubí, se topacio huan se sardónice. Ya ni elqui nopa achtohui tatilimit. ¹¹ Huan ipan nopa ompa tatilimit quitalilijtoya se esmeralda, se zafiro huan se diamante. ¹² Huan ipan nopa expa tatilimit quitatzquiltijque se jacinto, se ágata huan se amatista. ¹³ Huan ipan nopa najpa tatilimit quitatzquiltijque se berilo, se ónice huan se jaspe. Huan mocajqui nochi ni piltetzitzi tatzquitoque ipan ininpiltencuayahua ten oro cati mocahua inintejtano huan cati quiechijtoyaj. ¹⁴ Huan imiyaca nopa piltetzitzi elqui 12 quej inimiyaca itelpocahua Israel. Huan sese elqui quej se pilsellojtzi cati quichihua itoca se itelpoca Israel.

¹⁵ Nojquiya quichijque para nopa yolixtzajcayot ipiltajco ilpicayo cati taxinepaloli ten oro. ¹⁶ Huan quichihuili nopa yolixtzajcayot ome anillos ten oro oncac ipan iesquina cati huejcapa huan nozona quicalajqui nopa piltajco ilpicayotzi huan quitatzquilti nopa yolixtzajcayot ica cati eltoc iajcoltipa ipan nopa ixpantzajcayot. ¹⁷ Huan quitatzquiltijque oncac nopa ome piltajco ilpicayotzi ten oro cati yejectzitzi taxinepaloli ipan inacas huejcapa ten nopa yolixtzajcayot. Huan teipa seyoc iteno nopa piltajco ilpicayotzi quitatzquilti ipan sese anillo iajcoltipa ipan nopa ixpantzajcayot. ¹⁸ Huan quitalijque oncac ni ome ipiltajco ilpicayo ten oro cati tayechehuali, se ipan sese ten nopa ome anillo cati eltoc iajcoltipa huan ica quitatzquiltijque iyolixco nopa yolixtzajcayot ica iajcoltipa nopa ixpantzajcayot. ¹⁹ Huan quichijque seyoc ome anillo ten oro cati quitatzquiltijque ipan sese lado ipan itejteno nopa yolixtzajcayot. ²⁰ Nojquiya quichijque ome anillos ten oro cati quitatzquiltijque tatzinta ipan cati elqui iajcoltipa huan teipa quisalojque seyoc iteno ihuaya itzinquechilpica. ²¹ Huan quinechicojque nopa yolixtzajcayot ica nopa ixpantzajcayot huan quihlijque ica se listó azultic para ma motali cuali ipan nopa ixpantzajcayot itzinquechilpica para nochipa san sejco tatzquitose nopa yolixtzajcayot ica nopa ixpantzajcayot huan amo papatacas. Huan nochi quichijqui senquisa quej TOTECO quinquahuatijtoya Moisés.

Sequinoc iniyoyo totajtzi

²² Huan nojquiya quichihuili nopa totajtzi iyoyo cati huehueyac cati mocajqui tatzinta ten nopa ixpantzajcayot, huan quichijqui nochi ica yoyomit azultic. ²³ Huan quiquechtejqui campa calaquis itzonteco huan quiyahualojque campa quiquechtectoya ica se yejectzi tajtzontzi cati tayahualoli para amo tzayanis. ²⁴ Huan itejteno iyoyo huehueyac quichihuili se tajtzontzi ica

iixcopinca nopa cuatacti cati itoca granada. Quiixcopinqui quema quix-inepalo lino icpat huan icpat azultic, morado huan chichiltic. ²⁵ Nojquiya quichihuilijque pilcampanajtzi cati senquisa oro, huan quillpijque tatajco nopa granadas. Huan quej nopa yajtiyajqui ipan nochi itejteno iyoyo. ²⁶ Quipixqui se pilcampanajtzi huan se granada, seyoc pilcampanajtzi huan seyoc granada ipan nochi itejteno icuex iyoyo huehueyac. Huan nopa totajtzi motalili nopa yoyomit quema quitequipano TOTECO tiopan calijtic. Huan nochi quichijque senquisa quej TOTECO quinahuatijtoya Moisés.

²⁷ Huan para Aarón huan itelpocahua quinchihuilijque inintatzintayoyo ica yoyomit ten lino cati nelcanactzi. ²⁸ Nojquiya quixinepalojque nopa cuatzajcayot ica icpat ten lino cati nelcuali, huan quiyectalijque nopa yoyomit para inincuaixco ica icpat ten lino cati nelia cuali, huan quichijque inintatzintayoyo nojquiya ica icpat tamalinti ten lino huan nelia canactzi. ²⁹ Nojquiya quichijque inintzinquechilpicayo ica lino icpat nelcanactzi huan icpat cati azultic, morado huan chichiltic. Huan quichijque yejyectzi itajtzonyo senquisa quej TOTECO quinahuatijtoya Moisés.

³⁰ Nojquiya quichijqui se piltatectzi ten oro para quitalis ipan icuatzaica huan ipani tajcuilojque quej se sello cati quijto: TAIYOCATALILI PARA TOTECO. ³¹ Huan quillpijque ica se icpat azultic huan quitalijque iixpa nopa cuatzajcayot senquisa quej TOTECO quinahuatijtoya Moisés.

Moisés quitachili nopa yoyon tiopamit

(Éx. 35:10-19)

³² Huan quej ni tanqui nochi nopa tequit cati quichihuayaj para quichi-huase nopa yoyon tiopamit campa mopantise ihuaya TOTECO. Huan nochi quichijque nopa israelitame senquisa quej TOTECO quinahuatijtoya Moisés.

³³ Huan nochi nopa tiopamit ica nochi tamanti cati quichijtoyaj quihualiquilijque Moisés. Quihualiquilijque nopa yoyon Cali cati quichijtoyaj ica nopa tetic yoyomit cati taxinepaloli ica iniijhuiyo oquich chivojme. Quihualicaque nopa cuamesas, tepos chijcolme, huapalme, cuaixtapali, taquetzalme huan icuatetonyo. ³⁴ Quihualiquilijque itzontzajca cati quichijtoyaj ica inincuetaxo oquich borregojme cati quipajtoyaj chichiltic, huan itzontzajca cati quichijtoyaj ica inincuetaxo pesojme huan nojquiya nopa cortinas ten ica quitzacuas nopa cuarto campa eltoya nopa caxa.

³⁵ Quihualicaque nopa caxa huan cuahuit huehueyac para ica quihucase, huan itzajca, ³⁶ huan nopa cuamesa ica nochi cati motequihuis ipani, huan nopa pantzi cati quitaliaj ipan nopa mesa para tenextilis Toteco itztoc tohuaya. ³⁷ Nojquiya quihualicaque nopa taahuil quetzali ten oro ica nochi itaahuilhua cati quitalilijtoyaj sesen campa monequiyaya huan nojquiya quihualicaque nochi nopa tamantzitzi cati monequi quitequihuse ica nopa taahuil quetzali ihuaya nopa aceite cati quitequilise para ma tata. ³⁸ Huan quihualicaque nopa taixpamit ten oro, ihuaya nopa copali cati ajhuiyac huan nopa aceite para taiyocatalise, huan nopa cortina para quicuapilose campa calaquise. ³⁹ Quihualicaque nopa taixpamit ten bronce huan nochi cati nopona motequihua. Nojquiya quihualicaque itixic ten bronce huan nopa cuahuit huehueyac para ica quihucase. Huan nochi quixaltijtoyaj ica bronce. Nojquiya quihualicaque nopa hueyi paila huan icuayo cati ipan momajtequise totajtzi.

⁴⁰ Quihualicaque nopa cortinas cati mochihuas itzajca nopa calixpamit, ihuaya itaquetzalo huan itepos cuatetonyo. Nojquiya quihualicaque nopa cortinas para campa caltemit campa calaquise ipan calixpamit, huan nopa lazos huan estacas para quillpise huan quitetzilose sesen taquetzali, huan nochi tamanti cati motequihuis tiopan calijtic.

⁴¹ Nojquiya quihuiquilijque Moisés para ma quiita iyejyejca iniyoyo nopa totajztzti cati moquentise quema calaquise para tequitise tiopan calijtic campa tatzejtzeloltic. Quihualiquilijque nopa yoyomit cati tatzejtzeloltic para nopa hueyi totajtz Aarón, ihuaya nopa yoyomit para itelpocahua quema quichihuae inintequi tiopan calijtic.

⁴² Huan nopa israelitame quichijque nochi senquisa quej TOTECO quinahuatijtoya Moisés. ⁴³ Huan quema Moisés quitachili nochi cati quichijtoyaj, quitac para quichijtoyaj senquisa quej TOTECO tanahuatijtoya, huan quintiöchijqui nochi inijuanti cati quichijchijtoyaj.

40

Quiquetzque nopa yoyon tiopamit

¹ Teipa TOTECO quiilhui Moisés:

² “Xijquetza nopa yoyon tiopamit campa timopantise ipan nopa achtohui tonali ipan nopa achtohui metzti ten nopa yancuic xihuit ipan amocalendario. ³ Huan ipan nopa yoyon tiopamit ipan nopa cuarto más calijtic, xijtali nopa caxa, huan xijtzacua campa calaquise ipan nopa cuarto ica nopa cortina. ⁴ Huan ipan nopa seyoc cuarto cati amo más calijtic, xijcalaqui nopa cuamesa para pantzi huan xijtali campa monequi. Teipa xijcalaqui nopa taahuil quetzali huan xijtati.

⁵ “Huan nojquiya ipan nopa cuarto cati amo más calijtic, xijtali nopa taixpamit ten oro campa quitatise copali huan nopa taixpamit ten copali mocahuas iixmelac nopa caxa cati eltoc ipan nopa cuarto cati más calijtic. Huan xijcuapilo seyoc cortina campa calaquise ipan nopa achtohui cuarto cati amo más calijtic huan ni cortina elis iixmelac nopa taixpamit ten oro huan quitzacuas campa calaquise ipan nopa cuarto cati amo más calijtic. ⁶ Huan ipan nopa calixpamit, xijtali nopa taixpamit campa quitatise tacajchualisti. Huan moquetzas iixmelac nopa cortina campa calaquise ipan nopa cuarto cati amo más calijtic. ⁷ Teipa tatajco ten nopa yoyon tiopamit huan nopa taixpamit, xijtali nopa hueyi paila cati quitequise at para momajtequise. ⁸ Huan teipa xijquetza nopa tatzacti ten cortinas para xijchihua icalixpayo yahualtic nopa yoyon tiopamit. Huan cati campa calaquise ipan calixpamit, xijcuapilo nopa seyoc cortina.

⁹ “Huan xijcui nopa aceite cati ica teajaltise para taiyocatalise para TOTECO. Huan xiquijtzelhui nopa yoyon tiopamit huan nochi cuamesas cati eltoc ipani. Xiquijtzelhui nochi cati quitequihuse nopona. Huan nochi mocahuas tatzejtzeloltic, taiyocatalili para na, niamoTECO. ¹⁰ Teipa xiquijtzelhui nopa taixpamit campa quitatise tacajchualisti huan nochi cati motequihua ihuaya. Huan quej nopa moiycatalijtos nopa taixpamit huan elis tahuel tatzejtzeloltic. ¹¹ Nojquiya xiquijtzelhui nopa hueyi paila campa momajtequise huan icuayo ten bronce huan quej nopa tiquiyocatalis huan tijchihuas tatzejtzeloltic para na.

¹² “Huan xijhuica Aarón ihuaya itelpocahua ipan nopa calixpamit hasta iixmelac campa calaquise ipan nopa yoyon tiopamit campa timopantise, huan nopona ma maltica ica at. ¹³ Huan xijyoyonti Aarón ica nopa yoyomit tatzejtzeloltic. Huan xicajalti ica aceite para tiquiyocatalis para techtequipanos quej nototajtzti cati más hueyi. ¹⁴ Teipa xiquinhuica itelpocahua, huan xiquinyoyonti ica nopa yoyomit huehueyac cati anquinchijchihuilijque. ¹⁵ Huan xiquinajalti aceite quej tijchijqui ica inintata, huan inijuanti nojquiya techtequipanose quej tofajtzitzi. Huan quema tiquinajaltis aceite,

pehuas se familia ten totajtzitzi cati amo tamis pampa iniixhuihua elise nototajtzitzi para nochipa.”

¹⁶ Huan Moisés quichijqui nochi senquisa quej TOTECO quinahuatijtoya.

¹⁷ Huajca ipan nopa achtohui tonali, ipan nopa achtohui metzti quema yahuiyaya para ome xihuit quistoyaj ipan talí Egipto, quiquetzque nopa yoyon tiopamit. ¹⁸ Huan quema Moisés quiquetzqui nopa yoyon tiopamit, quiquetzqui itepos cuatetonyo, ihuapalhua, huan quicalaqui icuaixtapalhua huan itaquetzalhua. ¹⁹ Teipa quipatajque nopa cortina para quitzontzacuase, huan nojquiya nopa seyoc itzontzajca quitali san quej TOTECO quinahuatijtoya.

²⁰ Teipa quicuic nopa ome tepacti cati quipixtoya itanahuatilhua TOTECO huan quitali ipan nopa caxa. Teipa quicalaqui nopa cuahuit huehuyac para ica quihuicase campa monequiyaya. Huan iixco quitali itzajca campa nopa totajtzi quinixtzacuulis inintajtacolhua masehualme iixpa TOTECO. ²¹ Quema ya eltaya tasencahuali nopa caxa, quicalaqui ipan nopa cuarto cati más tiopan calijtic, huan quicuapilo nopa cortinas para quitzacuas nopa cuarto cati quipixtoya nopa caxa san quej TOTECO quinahuatijtoya.

²² Teipa ica norte ipan nopa achtohui cuarto cati amo más calijtic, quitali nopa cuamesa. Nopa cuarto eltoc iixpa nopa yejyectzi Cortina. ²³ Huan ipan nopa cuamesa quitenqui nopa pantzi iixpa TOTECO senquisa quej TOTECO quinahuatijtoya Moisés.

²⁴ Huan nojquiya ipan nopa cuarto cati amo más calijtic, ica sur quitali nopa taahuil quetzali iixmelac nopa cuamesa para pantzi. ²⁵ Huan quintati nopa taahuilme iixpa TOTECO quej TOTECO quinahuatijtoya ma quichihua.

²⁶ Huan ipan nopa cuarto nojquiya quitali nopa taixpamit ten oro. Huan quiquetzqui iixmelac nopa cortina cati quitzacuayaya nopa cuarto cati más calijtic. ²⁷ Huan ipan nopa taixpamit ten oro quitati nopa copali cati ajhuiyac quej TOTECO quinahuatijtoya.

²⁸ Nojquiya Moisés quicuapilo se cortina para quitzacuas campa calaquise ipan nopa cuarto cati amo más calijtic ipan nopa yoyon tiopamit. ²⁹ Huan ipan nopa calixpamit iixmelac campa calaquise ipan nopa yoyon tiopamit, quitali nopa taixpamit campa quitatise tacajchualisti. Huan ipan quintatijque tapiyalme para tacajchualisti. Nojquiya quitati tacajchualisti ten harina quej TOTECO quinahuatijtoya.

³⁰ Huan ipan nopa calixpamit cati eltoc tatajco ten nopa yoyon tiopamit huan taixpamit campa quitatise tacajchualisti, quitali nopa hueyi paila, huan quitequili at para nopona ma moicxipajpacaca huan ma momajtequica totajtzitzi. ³¹ Huan Moisés inihuaya Aarón huan itelpocahua nopona momajtequijque huan moicxipajpajque. ³² Huan sesen huelta quema injuanti calaquiyayaj ipan nopa yoyon tiopamit o sinta quinechcahuiyayaj nopa taixpamit campa quitatise tacajchualisti, monequiyaya mopajpacase quej TOTECO tanahuatijtoya.

³³ Teipa Moisés quiquetzqui nopa tatzacti ten cortinas cati quitzajqui nopa calixpamit yahualtic ten nopa yoyon tiopamit huan nopa taixpamit. Huan campa calaquij ipan calixpamit, quicuapilo nopa cortina para elis quej se caltemit. Huan ica ya nopa Moisés quitamilti nopa tequit.

Itatanex Toteco
(Nm. 9:15-23)

³⁴ Huan se mixti quisentzajqui nopa yoyon tiopamit. Huan itatanex TOTECO cati nelía yejyectzi quitemiti nopa tiopamit. ³⁵ Huan Moisés

amo huelqui calaqui tiopan calijtic pampa nopa mixti motalijtoya nozona. Huan itatanex TOTECO cati tahuel cahuaniyaya quisentzajqui nopa yoyon tiopamit. ³⁶ Huan ipan nopa tonali quema nopa israelitame nentinemiyayaj campa hueli, sinta nopa mixti quitacahuiyaya nopa yoyon tiopamit, nopa israelitame quitananayayaj nopa yoyon tiopamit campa mopantiyayaj ihuaya TOTECO huan quitoquiliyayaj nopa mixti. ³⁷ Pero sinta nopa mixti amo mijcueniyaya, inijuanti nojquiya amo mijcueniyayaj hasta quema nopa mixti sempa mijcuenisquía. Huan huajca, quena, quema mijcuenisquía, inijuanti quitoquilisquía. ³⁸ Huan quej nopa elqui ipan nochi iniojhui. Tonaya nopa mixti ten TOTECO motaliyaya itzompac nopa tiopamit huan tayohua mochihuayaya quej se tit huan yeca nopa israelitame hueliyayaj tachiyase tonaya huan tayohua.

Levítico

Nopa tacajcahualisti tatatili

¹ TOTECO quinotzqui Moisés ten nopa yoyon tiopamit campa mopantiyaj huan quilhui:

² “Xiquinilhuiti nopa israelitame ni tanahuatilme. Quema anquinequise antechhualiquilise se tacajcahualisti na, niamoTECO, monequi antechhualiquilise se ten amohuacaxhua, o se ten amoborregojhua o se ten amochivojhua.

³ “Sinta elis se tacajcahualisti tatatili ten amohuacaxhua, huajca monequi antechmacase se becerro cati amo quiapiya yon se tamanti cati amo cuali ipan itacayo. Monequi anquihuicase nopa tapiyali noixpa hasta campa icalte nopa yoyon tiopamit campa timopantíaj huan quej nopa na, niamoTECO, nijselis. ⁴ Huan nopa masehuali cati quihualica quitalis imax ipan itzonteco nopa tapiyali, huan quej nopa, nopa tapiyali elis ipataca nopa masehuali. Huan na nijselis nopa tacajcahualisti huan niqitas para mijqui por nopa masehuali para quiixtzacuilis itajtacolhua noixpa. ⁵ Huan nopa masehuali quimictis nopa tapiyali nozona noixpa, niamoTECO. Huan itelpocahua Aarón, nopa totajtzitzi, quiijzelose ieso nopa tapiyali yahualtic nopa taixpamit cati elfoc nechca icalte nopa yoyon tiopamit huan quej nopa techmacase. ⁶ Huan nopa masehuali quiquixtilis icuetaxo nopa tapiyali cati elis quej se tacajcahualisti tatatili huan quihuejhuelos itacayo. ⁷ Teipa itelpocahua Aarón, nopa totajtzitzi, tipitzase huan quitalise miyac cuahuit ipan nopa taixpamit. ⁸ Huan teipa itelpocahua Aarón quitalise nochi nacat tahuejhueloli ten nopa tapiyali ihuaya itzonteco huan ichiyajca ipan nopa cuahuit cati lementos. ⁹ Pero achtohui quipajpacase icuetaxol huan iqescuayohua nopa tapiyali huan teipa nopa totajtzitzi quitalise icuetaxol huan iqescuayohua ipan nopa taixpamit para ma tata. Huan ya ni elis se tacajcahualisti tatatili cati mijyotis nelía ajhuiyac noixpa huan techyolpactis, niamoTECO.

¹⁰ “Huan sinta nopa tapiyali cati temacas para se tacajcahualisti tatatili elis se borrego o se chivo, huajca monequi elis se oquichti cati amo quiapiya yon se tamanti cati amo cuali ipan itacayo. ¹¹ Huan nopa masehuali cati quihualica nopa tacajcahualisti moquetzas nechca iqespa nopa taixpamit ipan nopa ladó norte huan quimictis nopa tapiyali noixpa, na niamoTECO. Huan itelpocahua Aarón, nopa totajtzitzi, quicuisse ieso nopa tapiyali huan ica quiatzejtelhuisse yahualtic nopa taixpamit. ¹² Huan nopa masehuali cati femaca nopa tacajcahualisti, quihuejhuelos, huan nopa totajtzi quicuis nopa tapiyali itzonteco huan ichiyajca, huan quitalise ipan tit. ¹³ Pero nopa masehuali cati temacas nopa tapiyali monequi achtohui quipajpacas icuetaxol huan iqescuayohua. Huan teipa quema ya quipajpactos, nopa totajtzitzi quitatise ipan nopa taixpamit. Huan elis se tacajcahualisti tatatili cati mijyotis nelía ajhuiyac huan techyolpactis, niamoTECO.

¹⁴ “Pero sinta acajya quinequi techmacas na, niamoTECO, se totot quej se tacajcahualisti, huajca hueli techmacas se paloma o se pichontzi.

¹⁵ “Huan nopa totajtzi quihuicas nopa paloma o nopa pichontzi campa nopa taixpamit huan quiqechhuilacatzos hasta quicotonas itzonteco huan quitatis itzonteco ipan taixpamit. Teipa quicahuilis ma quisa ieso nopa paloma ielchiquitipa nopa taixpamit. ¹⁶ Huan teipa nopa totajtzi quicuis

iapompo huan iijhuiyo nopa piltototzi huan quinmajcahuas ielchiquitipa nopa taixpamit ica campa quisa tonati campa eltoc nopa cuajnexti. ¹⁷ Teipa quitzquis ipan ieltapalhua huan quitajcotequis, pero amo quicotonas. Teipa nopa totajtzi temacas nopa paloma quej se tacajcahualisti huan quitatis ipan tit cati eltoc ipan nopa taixpamit. Huan elis se tacajcahualisti tatatili cati mijyotis ajhuiyac huan techyolpactis, niamoTECO.

2

Nopa tacajcahualisti ten harina ten trigo huan cebada

¹ “Quema se masehuali quinequis techmacas na, niamoTECO, se tacajcahualisti ten harina ten trigo o cebada, monequi quicuechtilis iyol hasta mochihuas se harina cati nelía cuechtic. Nojquiya monequis quitequilis aceite huan copali nopa harina. ² Teipa quimacas se itelpoca Aarón huan nopa totajtzi quicuis se quentzi nopa harina ica imax huan quitatis ipan nopa taixpamit quej se fanextili para ipan nopa talojtzi techmaca nochi nopa tacajcahualisti. Huan ya ni elis se tacajcahualisti tatatili cati mijyotis ajhuiyac noixpa na, niamoTECO, huan techyolpactis. ³ Huan nochi nopa harina cati mocahuas ten nopa tacajcahualisti tatatili elis iniaxca Aarón huan itelpocahua, nopa totajtzitzi para quicuase. Huan nochi elis se tacajcahualisti cati tahuel tatzejzelolitic para na, niamoTECO.

⁴ “Huan sinta acajya quinequi techmacas se tacajcahualisti ten harina cati taicxitili ipan horno, huajca monequi quicuechtilis iyol hasta mochihuas se harina cati nelía cuechtic, huan quimanelos ica aceite para quichihuas se pantzi, pero amo hueli quipiyas tasonejcaoyot. Nojquiya se masehuali hueli techmacas pantzi cati quej se taxcali huan cacatztic cati amo quipiya tasonejcaoyot huan san taajjaloli ica aceite.

⁵ “Huan sinta nopa tacajcahualisti ten harina eli taicxitili ipan se comali, huajca nojquiya monequi elis tachijchihuali ica harina cati nelía cuechtic cati amo quipiyas tasonejcaoyot huan cati tamaneloli ica aceite. ⁶ Huan teipa monequi quihuejhuelos nopa pantzi huan ipani quitoyahuas aceite. Huan ya ni nojquiya elis se tacajcahualisti ten harina.

⁷ “Huan sinta nopa tacajcahualisti ten harina elis se pantzi cati taicxitili ipan sartén, huajca nojquiya monequi elis tachijchihuali ica harina cati nelía cuechtic huan tamaneloli ica aceite. ⁸ Huan quema se masehuali quihualicas se tacajcahualisti para na, niamoTECO, cati taicxitili ipan horno, comali o sartén, monequi quimactilis nopa totajtzi huan yaya quihuicas campa nopa taixpamit.

⁹ “Huan nopa totajtzi quicuis san se quentzi ten nopa tacajcahualisti ten harina para quitatis para na ipan nopa tit ipan taixpamit. Huan nopa pocti ten nopa tit mijyotis ajhuiyac huan techpactis, niamoTECO. ¹⁰ Huan nochi cati mocahua ten nopa tacajcahualisti tatatili elis iniaxca nopa totajtzitzi, Aarón huan itelpocahua, para quicuase. Huan nochi elis se tacajcahualisti tahuel tatzejzelolitic para na, niamoTECO.

¹¹ “Yon se tacajcahualisti ten harina cati antechhualiquilise, amo quema huélis quipiyas tasonejcaoyot, yon sayolnecti. Pampa yon se tamanti cati anquitatise ipan taixpamit para antechmacase amo hueli quipiyas tasonejcaoyot, yon sayolnecti. ¹² Pero quema ajsis nopa ilhuit quema anquipixcase amomil, huélis antemacase tacajcahualisti ten harina cati quipiya tasonejcaoyot huan sayolnecti. Pero sinta quipiya tasonejcaoyot o sayolnecti, amo hueli anquitatise quej se tacajcahualisti cati ajhuiyac mijyotis noixpa.

13 “Nojquiya monequi anquitalise istat ipan nochi tacajcahualisti cati quiapiya harina, pampa istat eli se tanextili cati amechelnamiquiltia ten nopa camanali cati na, niamoTECO Dios, nijchijqui amohuaya. Huajca nochipa monequi antechmacase istat ica amotacajcahualis.

14 “Sinta anquinequij antechmacase, se tacajcahualisti ten nopa cati achtohui anquixcaque ipan mili, huelis se tamanti quej trigo o cebada iyol, monequi xijjolquixtica huan xijcacatztilica ipan tit. 15 Huan ipan nopa tacajcahualisti xijteca aceite huan copali. Ya nopa nojquiya elis se tacajcahualisti ten harina. 16 Huan nopa totajtztzi quicuisse se quentzi ten nopa tacajcahualisti cati tamaneloli ica aceite huan copali para quitatise noixpa para techmacase. Huan quema quichihuase ya nopa, quixnextise para nochi nopa tacajcahualisti eli tatzejzeloltic huan noaxca na, niamoTECO.

3

Nopa tacajcahualisti para ma onca tayoltalili ica TOTECO

1 “Sinta se masehuali quinequis techmacas na, niamoTECO, se tacajcahualisti para moyoltalis ica na, huelis techmacas se toro o se huacax. Pero nopa tapiyali monequi elis tapajpactic. Amo quiapiyas yon se tamanti cati amo cuali ipan itacayo. 2 Huan nopa masehuali cati quihualicas nopa tacajcahualisti quitalis imax ipan nopa tapiyali itzonteco huan quimictis nozona nechca caltemit ten nopa yoyon tiopamit. Huan itelpocahua Aarón, nopa totajtztzi, quicuisse nopa esti huan quiajtzelhuisse yahualtic ten nopa taixpamit.

3 “Huan ten nopa tacajcahualisti quicuisse cati techmacase na, niamoTECO ipan tit. Quicuisse nopa tachiyajcayot cati eltoc ijitico, huan nopa tachiyajcayot cati eltoc ipan icuetaxcol. 4 Huan quicuisse nopa ome ieyo ica nochi ichiyajca, huan nopa parte cati más hueyi ten ieltapach huan quiquixtise san sejco ica ieyo. 5 Huan nochi ya ni itelpocahua Aarón, nopa totajtztzi, quitatise para na, niamoTECO, ipan nopa tit ipan taixpamit. Huan elis se tacajcahualisti cati ajhuiyac mijyotis huan techpactic.

6 “Huan sinta se masehuali quinequis techmacas tacajcahualisti para moyoltalis ica na, monequi techmacas se chivo o se borrego. Huelis techmacase se sihuatzti o se oquichti. Pero monequi nopa tapiyali elis tapajpactic. Amo hueli techmacas yon se tapiyali cati quiapiya se tamanti cati amo cuali ipan itacayo. 7 Huan san se quichihuas sinta nopa tacajcahualisti cati techmacas elis se pilborregojtzi. 8 Nopa masehuali cati temacas, quitalis imax ipan nopa tapiyali itzonteco, huan quimictis nozona campa icalte nopa yoyon tiopamit. Teipa nopa totajtztzi quicuisse se quentzi esti huan quiajtzelhuisse yahualtic ten nopa taixpamit.

9 “Huan ipan nopa taixpamit quitatise nochi ichiyajca. Quitatise icuitapil cati quiapiya miyac ichiyajca huan quicotonase nechca icuitapa nopa tapiyali. Nojquiya quitatise nochi ichiyajca cati mopantia ijitico huan tatajco ten icuetaxcol. 10 Quitatis ieyo ica nochi ichiyajca huan nopa parte cati más hueyi ten ieltapach cati quiquixtise san sejco ica ieyo. 11 Huan nochi ni tamanti nopa totajtzi quitatis ipan nopa taixpamit, huan ya ni elis se tacajcahualisti ten tacualisti cati techmacase, na niamoTECO, ipan tit.

12 “Sinta se acayja quinequi quihualicas se sihua chivo para techmacas, 13 huajca nopa masehuali quitalis imax ipan nopa tapiyali itzonteco, huan teipa quimictis nozona nechca icalte nopa yoyon tiopamit campa timopantiaj. Huan nopa totajtztzi quicuisse se quentzi ieso nopa tapiyali huan quiajtzelhuisse yahualtic ten nopa taixpamit.

14 “Huan quiquixtilise nopa tapiyali nopa tachiyajcayot cati eltoc ijtico, huan nochi nopa tachiyajcayot cati eltoc ipan icuetaxcol, huan quitalise ipan nopa taixpamit para techmacase ipan tit. 15 Nojquiya quitalise nopa ome ieyo huan nopa tachiyajcayot cati eltoc ipani. Huan quitalise nopa parte cati más hueyi ten ieltapach cati quiquixtise ihuaya ieyo. 16 Huan ya ni elis se tacajcahualisti cati nopa totajtzi techmacas, niamoTECO, ipan tit huan mijyotis ajhuiyac huan techpactis. Nochi tachiyajcayot elis noaxca na, niamoTECO.

17 “Quena, ya ni elis se tanahuatili cati monequi anquitepanitase, amouanti huan nochi amoixhuihua masque campa hueli anmopantíaj: Amo xijcuaca esti, yon tachiyajcayot.”

4

Tacajcahualisti para tajtacoli

1 Huan teipa TOTECO quiillhui Moisés:

2 “Xiquinilhui nopa israelitame ni tanahuatilme. Sinta se ten amouanti tajtacolchihuas huan quiixpanos se notanahuatil na, niamoTECO, huan amo quimati sinta taixpano, ya ni cati monequi quichihuas.

3 “Sinta elis nopa hueyi totajtzi cati tajtacolchihuas masque amo quimatiyaya, quinchihuas para nopa sequinoc masehualme nojquiya ma quihuicaca tajtacoli huan monequi nopa hueyi totajtzi temacas noixpa se becerro cati amo teno quiipiya cati amo cuali ipan itacayo. Ya nopa elis se tacajcahualisti para nopa tajtacoli cati ya quichijtoc. 4 Huan monequi nopa hueyi totajtzi quihuicas nopa tapiyali campa icalte nopa yoyon tiopamit campa timopantíaj, huan nozona quitalis imax ipan itzonteco nopa tapiyali huan quimictis nozona noixpa. 5 Huan teipa nopa hueyi totajtzi quicuis se quentzi ten nopa tapiyali ieso huan quihuicas ipan nopa yoyon tiopamit.

6 Huan nopa totajtzi quixolonis imacpil ipan nopa esti huan taatzetzelhuis chicome huelta noixpa nozona iixmelac nopa cortina cati quitzacua nopa cuarto Campa Más Tatzejtzelolitic. 7 Teipa nojquiya nopa hueyi totajtzi quiajalos esti nopa nahui icuacua nopa taixpamit campa quitatíaj copali cati mocahua yoyon tiopamit calijtic noixpa. Huan nopa esti cati noja mocahua, quitoyahuas talchi itzinta nopa taixpamit para tacajcahualisti tatatili cati eltoc nechca icalte nopa yoyon tiopamit. 8 Teipa quiquixtilis nochi nopa tachiyajcayot cati eltoc ijtico nopa becerro huan nochi cati eltoc ipan icuetaxcol. 9 Nojquiya quiquixtis nopa ome ieyo ihuaya ininchiyajca huan nopa parte cati más hueyi ten ieltapach cati quiquixtis ica sempa ica nopa ieyo. 10 Huan nochi ni tamanti nopa totajtzi techmacas na, niamoTeco, ipan nopa taixpamit para tacajcahualisti tatatili. Quijtosnequi quichihuas san se quej quichijqui ica nopa becerro cati techmacas quej se tacajcahualisti para moyoltalise ica na. 11 Pero icuetaxo nopa becerro, huan inacayo, itzonteco, iicixhua, icuetaxcol huan icuit, 12 quinequi quijtos nochi cati mocahua, monequi quicahuatij ipan se lugar cati tapajpacti noixpa huan cati mopantía huejca ten nopa yoyon calme campa anmochijtoque. Quena, quihuicase campa concahuaj nopa cuajnexti ten nopa tacajcahualisti cati quitatíaj ipan taixpamit. Huan nozona quitatise ica cuahuit cati mocahua ten nopa becerro cati elqui nopa tacajcahualisti para nopa tajtacoli cati quichijqui nopa totajtzi.

13 “Sinta nochi israelitame quichihuase se tajtacoli, o sinta quichihuase se tamanti cati na, niamoTECO, niqinnahuatijtoc ma amo quichihuaca, masque yon se ten injuanti amo quimatiyaya inta ten nopa tajtacoli, nochi

nopa masehualme quihuicase tajtacoli noixpa. ¹⁴ Huajca quema quimatisse para quichijtoque tajtacoli, monequi quihualicase se becerro huan techmacase quej se tacajcahualisti para tajtacoli. Nopa becerro quihualicase iixpa nopa yoyon tiopamit, ¹⁵ huan noixpa nopa huehue tacame cati quinyacanañ israelitame quitalise inimax ipan nopa tapiyali itzonteco huan nozona quimictise. ¹⁶ Teipa nopa hueyi totajtzi quicuis se quentzi ieso nopa tapiyali huan quihuicas ipan nopa yoyon tiopamit. ¹⁷ Huan teipa quixolonis imacpil ipan nopa esti huan taatzetzelhuis chicome hueltas noixpa iixmelac nopa cortina. ¹⁸ Huan nojquiya nopa esti quiajalos nopa nahui icuacua nopa taixpamit cati eltoc noixpa tiopan calijtic. Huan nopa esti cati noja mocahuas quitoyahuas talchi itzinta nopa taixpamit campa temaca tacajcahualisti tatatili. Nopa taixpamit eltoc nechca icalte nopa yoyon tiopamit. ¹⁹ Huan nojquiya quiquixtilis nopa becerro nochi ichiyajca, huan quitatis ipan nopa taixpamit. ²⁰ Huan san se quichihuas nopa totajtzi ica ni becerro cati temacaj quej quichijqui ica nopa becerro para nopa tacajcahualisti por tajtacoli. Huan quej nopa quichihuas nopa totajtzi para quixtzacuas nochi nopa tajtacoli cati quichijque nopa israelitame, huan niquintapojpolhuis. ²¹ Teipa cati mocahuas ten ni becerro nopa totajtzi quihuicas se quentzi huejca ten campa anmochijtoque. Nozona quitatis quej niqijto quitatisquia ne seyoc becerro. Ya ni elis se tacajcahualisti para nochi inintajtacolhua nochi israelitame.

²² “Sinta se tayacanquet ten nopa israelitame quichihuas se tajtacoli huan quiixpanos se notanahuatil, niamoTECO Dios, masque amo quimatiyaya, huajca yaya quihuica tajtacoli noixpa. ²³ Huajca quema ya quimachilijtos para quichijtoc se tajtacoli, nimantzi ma quihuicas se oquich chivo para techmacase quej se tacajcahualisti. Nopa tapiyali monequi elis tapajpactic. Amo quipiyas cati amo cuali ipan itacayo. ²⁴ Huan nopa masehuali quitalis imax ipan nopa oquich chivo itzonteco huan quimictis campa quinmictiañ nopa tapiyalme para tacajcahualisti tatatili. Huan teipa techmactilis na, niamoTECO, huan elis se tacajcahualisti para itajtacol. ²⁵ Teipa nopa totajtzi ica imacpil quicuis se quentzi ieso nopa tapiyali cati quincenjajque quej se tacajcahualisti por tajtacoli huan quiajalos nopa nahui icuacua nopa taixpamit para tacajcahualisti tatatili. Huan nochi nopa esti cati noja mocahuas quitoyahuas itzinta nopa taixpamit. ²⁶ Huan nochi ichiyajca nopa oquich chivo nojquiya monequi techmacase ipan tit quej quitatiañ ichiyajca nopa tapiyali cati se tacajcahualisti para moyoltalise ica na, niamoTECO. Huan quema ya quichijtos nochi ya ni, teipa nijtapojpolhuis nopa tayacanquet.

²⁷ “Sinta cati hueli israelita quichihuas se tajtacoli, yaya quihuica tajtacoli masque amo quimatiyaya para na, niamoTECO, nitanahuatijtoya amo aqui ma quichihua nopa tamanti. ²⁸ Huan teipa quema ya quimachilijtos para quichijtoc nopa tajtacoli, nimantzi monequi quihuicas se chivo cati sihuatzi cati amo quiyaya yon se tamanti cati amo cuali ipan itacayo. Huan ya nopa elis se tacajcahualisti para nopa tajtacoli cati quichijqui. ²⁹ Huan quihuicas nopa tapiyali campa quinmictiañ nopa tapiyalme para tacajcahualisti tatatili. Huan nozona quitalis imax ipan nopa tapiyali itzonteco cati elis se tacajcahualisti por tajtacoli huan teipa quimictis. ³⁰ Huan nopa totajtzi quicuis ica imacpil se quentzi ieso huan quiajalos ipan nopa nahui icuacua nopa taixpamit para tacajcahualisti tatatili. Huan nopa esti cati noja mocahuas, quitoyahuas talchi itzinta nopa taixpamit. ³¹ Nojquiya nopa masehuali monequi quiquixtilis nochi ichiyajca nopa tapiyali. Quena, san se quichihuas quej quichihua ica nopa tacajcahualisti cati temacaj para

moyoltalise ica na. Huan teipa nopa totajtzi quitalis nopa tachiyajcayot ipan nopa taixpamit huan quitatis. Huan elis se tacajcahualisti cati mijyotis ajhuiyac huan techpactis na, niamoTECO. Huan quej nopa, quichihuas nopa totajtzi para techixtzacuulis itajtacol nopa masehuali. Huan nijtapojpolhuis.

³² “Pero sinta nopa masehuali quinequi techmacas se pilborregojtzi quej se tacajcahualisti por tajtacoli, hueli quihualicas se pilsihua borregojtzi cati amo quiptiya ipan itacayo yon se tamanti cati amo cuali. ³³ Huan quitalis imax ipan itzonteco nopa tapiyali huan quimictis campa quinmictiaj nopa tapiyalme cati quinquihuaaj para tacajcahualisti tatatili. ³⁴ Huan nopa totajtzi quicuis se quentzi ieso nopa tapiyali ica imacpil huan quiajalos icuacua nopa taixpamit para tacajcahualisti tatatili. Huan nopa esti cati noja mocahuas quitoyahuas talchi itzinta nopa taixpamit. ³⁵ Teipa quiquixtilis nochi ichiyajca nopa pilsihua borregojtzi. Quena, san se quichihuas quej quichijqui ica nopa pilborregojtzi cati techtencahuilijque quej se tacajcahualisti para moyoltalise ica na. Huan nopa totajtzi quitatis nochi nopa tachiyajcayot ipan nopa taixpamit huan techmacas na, niamoTECO, ica nopa tit. Huan ica cati quichihua nopa totajtzi techixtzacuulis nopa tajtacoli cati nopa masehuali quichijqui, huan nijtapojpolhuis.

5

Tajtacoli cati monequi se tacajcahualisti

¹ “Sinta se acajya quuitac quema panoc se tamanti cati amo cuali, o quicactoc se camanali cati amo cuali, huan teipa tequichihuani quitemohuaj se testigo cati quiitztoc nopa tamanti o quicactoc nopa camanali, huajca monequi teyolmelahuas cati nelia quiitztoc o quicactoc. Pampa sinta amo teyolmelahuas ten panoc, yaya quihuicas tajtacoli noixpa huan monequi techhualiquilis se tacajcahualisti.

² “Nojquiya monequi quihualicas se tacajcahualisti sinta se acajya quiitzquis se tamanti cati amo tapajpactic. Sinta mictoc se tapiyali cati amo tapajpactic para anquicuase masque teaxca o ehua cuatita, huan se masehuali quiitzquis itacayo, monequi techhualiquilis se tacajcahualisti. Nojquiya mochihuas amo tapajpactic noixpa cati quiitzquis itacayo se piltapiyaltzi cati mohuahuatatza talchi masque cati quiitzqui amo quimatiyaya sinta quiitzqui. Pero temachtí mochijtoc amo tapajpactic huan monequi techhualiquilis se tacajcahualisti.

³ “O sinta quiitzquis cuitat o ten hueli at cati quistoc ipan itacayo se masehuali, ayecmo elis tapajpactic noixpa. Huan quema quiitas para quichijtoc nopa tamanti huan quihuica tajtacoli noixpa, monequi quihualicas se tacajcahualisti.

⁴ “Sinta se acajya tatestigojquetzas para quichihuas se tamanti cati cuali o amo cuali, huan teipa motejtemos huan quiitas para achi cuali amo camanaltitosquía, yaya quihuicas tajtacoli noixpa huan monequi quihualicas se tacajcahualisti.

⁵ “Sinta se acajya quichihuas cati hueli ten ni tamanti, huajca monequi technelilhuis na, niamoTECO, taya quichijtoc, ⁶ huan monequi quihualicas noixpa nopa tacajcahualisti para nopa tajtacoli cati quihuica. Huelis quihualicas se sihua borrego o se sihua chivo. Huan nopa totajtzi techmacas para techixtzacuulis itajtacol nopa masehuali noixpa.

⁷ “Pero sinta nopa masehuali amo quiptiya miyac tomi para quicohuas se pilborregojtzi, huajca hueli techmacas ome palomajme o ome pichones. Huan ni totome elise tacajcahualisti por nopa tajtacoli cati quihuica. Techmacas se quej se tacajcahualisti por tajtacoli huan nopa seyoc techmacas

quej se tacajcahualisti tatatili. ⁸ Huan nopa totome quinhualicas campa nopa totajtzi huan yaya temacas nopa achtohui piltototzi quej se tacajcahualisti por tajtacoli. Achtohui quipilquechhuilacatzos pero amo quicahuilis ma cotoni itzonteco. ⁹ Teipa quicuis se quentzi ieso huan ica quiajtzehuis se elichiqui nopa taixpamit. Huan nopa esti cati noja mocahuas quitoyahuas talchi itzinta nopa taixpamit. Huan ya ni elis se tacajcahualisti por tajtacoli. ¹⁰ Huan nopa ompa piltototzi techmacas quej se tacajcahualisti tatatili, huan quichihuas san se quej quijtohua nopa tanahuatili. Huajca quej nopa quichihuas nopa totajtzi para techixtzacuillis itajtacol nopa masehuali noixpa. Huan na, niamoTECO, nijtapojpolhuis.

¹¹ “Huan sinta itomi se acajya noja amo quiaxilía para quincohuas ome palomajme o ome pichones, hueli quihuicas ome kilo harina para techmacas quej se tacajcahualisti por itajtacolhua. Pero amo quitailis aceite, yon copali, pampa ya ni elis se tacajcahualisti por tajtacoli. ¹² Huan monequi quihualicas nopa harina campa nopa totajtzi, huan nopa totajtzi quicuis se quentzi ten nopa tacajcahualisti quej se tanextili para techmaca nochi nopa harina. Huan nopa se quentzi quitatis ipan nopa taixpamit quej quitatía nochi sequinoc tacajcahualisti para na. Ya ni elis se tacajcahualisti por tajtacoli. ¹³ Huan ica nochi ya ni nopa totajtzi quixtzacuillis itajtacol cati quichijtoc nopa masehuali, huan na nijtapojpolhuis nopa tajtacoli cati quichijtoc. Huan nopa harina cati noja mocahuas elis para nopa totajtzitzi inintacualis quej nojquiya mochihua ica nochi cati mocahua quema temacaj tacajcahualisti ten harina.”

Tacajcahualisti para cati tajtacole noixpa

¹⁴ Nojquiya TOTECO quillhui Moisés:

¹⁵ “Sinta se masehuali quichihuas cati amo cuali, huan quisoquihuis tamantzitzi cati tatzejtzeloitque, huan amo quimatiyaya quema quichihua, teipa quema quimatis, monequi quihualicas se tacajcahualisti pampa tajtacole noixpa. Huan nopa tacajcahualisti elis se oquich chivo cati amo quipiya yon se tamanti cati amo cuali ipan itacayo. Huan nopa tapiyali monequi elis ipati quej ome plata tomi cati motequihuía ipan nopa yoyon tiopamit o achi más. Ya ni elis se tacajcahualisti para cati quihuica tajtacoli noixpa. ¹⁶ Huan nopa masehuali monequi quixtahuas cati ipati nopa tamanti cati quisoquihijtoc cati achtohui eliyaya tatzejtzeloitic. Huan nojquiya quipihullis seyoc 20 por ciento más. Quej nopa, nopa totajtzi techixtzacuillis itajtacol nopa tacat noixpa, huan na, niamoTECO, nijtapojpolhuis.

¹⁷ “Cati hueli masehuali cati quixpanos notanahuatil, niamoTECO, masque amo quimatqui sinta quichijqui, quihuica tajtacoli noixpa huan monequi quiselis itazacuillitlis. ¹⁸ Huan monequi quihuicas se tacajcahualisti campa nopa totajtzi. Huan nopa tacajcahualisti elis se oquich borrego cati ipati quej cati ta, Moisés, tiquijtos. Huan nopa oquich borrego amo quipiyas yon se tamanti cati amo cuali ipan itacayo. Huan nopa totajtzi techmacas nopa tacajcahualisti para techixtzacuillis itajtacol nopa masehuali pampa amo quimatiyaya sinta quichihuayaya tajtacoli. Huan na, niamoTECO, nijtapojpolhuis. ¹⁹ Ya ni elis se tacajcahualisti para cati quihuica tajtacoli pampa tajtacolchijtoc noixpa.”

6

Tacajcahualisti para cati amo quichijqui cati temachtí

¹ Huan TOTECO quillhui Moisés:

2 “Sinta se acajya tajtacolchihuas huan quicajcayahuas seyoc pampa amo quineltoac nocamanal, niamoTECO, monequi quihualicas se tacajcahalisti. Huelis ya amo quimocuitahui cuali cati ihuampo quicahuili imaco para quimocuitahuís, o huelis quiichtequilijtoc, o quiquixtilijtoc se tenijqui pampa yaya más tetic, o huelis amo tacuetqui cati quitanejtique. 3 O huelis se masehuali quipantis cati seyoc quipolojtoya, huan istacatis o tatestigojquetzas ica cati amo melahuac huan quijjtos amo quiiztoc. Nochi ya ni se tajtacoli. Nojquiya tajtacoli ten hueli tamanti amo cuali cati se masehuali quichihua ica tamantzitzi cati seyoc iaxca. 4 Huan quema moitas o seyoc quitas para tajtacolchijtoc huan quihuica tajtacoli noixpa pampa quipiya cati amo iaxca, o tatestigojquetztoc ica cati amo melahuac, huajca nimantzi monequi ma quicuepa nopa tamanti. 5 Huan iyoca monequi noja temacas seyoc 20 por ciento quej elisquía se multa. Nochi temacas ipan san se tonali quema ipan nopa yoyon tiopamit techmacas se tacajcahalisti para nopa tajtacoli cati quihuica. 6 Monequi techhualiquilis se oquich borrego cati tapajpactic huan senquisa cuali itacayo huan cati cuali ipati. 7 Huan nopa totajtzi techmacas nopa tapiyali huan techixtzacullis itajtacol nopa masehuali. Huan na, quena, nijtapojpolhuis ten hueli cati quichijtoc.”

Quenicatza ma temaca tacajcahalisti tatatili cati yajmxtic

8 Huan TOTECO quihui Moisés:

9 “Xiquinilhuiti Aarón huan itelpocahua para quej ni eltoc tanahuatili para se tacajcahalisti tatatili. Nopa tacajcahalisti monequi eltos ipan nopa tit seyohual hasta ijnaloc huan nopa tit mocahuas lementoc. 10 Huan tonili nopa totajtzi moquentis itatzintán yoyo ten lino nechca itacayo huan teipa iyoyo huehueyac ten lino. Huan quiquixtis nopa cuajnexti cati mocahua ten nopa tacajcahalisti huan quitalis ipan se ilado nopa taixpamit. 11 Teipa quiquixtis nopa iyoyo huan moquentis ne seyoc tamanti iyoyo huan quihuicas nopa cuajnexti hasta se lugar cati tapajpactic noixpa cati mocahua huejca ten campa anmochijtoque, huan nopona quicahuas.

12 “Nochipa monequi lementos se tit ipan taixpamit. Amo quicahuase ma sehui. Huan sese ijnaloc nopa totajtzi monequi quitallis cuahuit nopa taixpamit huan teipa quitalis nopa tapiyali para nopa tacajcahalisti tatatili cati monequi mojmosta. Nojquiya nopona quitatis nopa tachiyajcayot ten nopa tacajcahalisti cati masehualme temacaj para moyoltalise ica na, niamoTECO. 13 Quena, amo quema hueli quicahuase para sehuis nopa tit ipan taixpamit. Monequi nochipa lementos.

Quenicatza temacase tacajcahalisti ten harina

14 “Ya ni nopa tanahuatilme para tacajcahalisti ten harina. Itelpocahua Aarón monequi moquetzase iixmelac nopa taixpamit para techmacase nopa tacajcahalisti noixpa na, niamoTECO. 15 Se tacajcahalisti ten harina elis ten se harina cati quichijtoque nelcuehtic huan quimanelojtoque ica aceite huan copali. Huan se ten nopa totajtzitzi quicuis ica imax se quentzi ten nopa tacajcahalisti ten harina huan quitatis ipan nopa taixpamit para quinxestis techtencahuilijtoc nochi noixpa. Huan mijyotis ajhuiyac noixpa na, niamoTECO. 16 Huan ica nopa harina cati mocahua ten nopa tacajcahalisti, Aarón huan itelpocahua, nopa totajtzitzi, quichihuase pantzi para quicuase, pero amo huelis quitallise tasonejca yot ipani. Huan monequi quicuase nopona campa tatzejzeloltic ipan nopa calixpamit ipan nopa yoyon tiopamit. 17 Ma momocuitahuica para amo quicixitise ica tasonejca yot. Niqinmacatoc ni harina para elis iniaxca ten nochi nopa tacajcahalisti cati techmacaj ica tit. Eltoc tahuel tatzejzeloltic quej nojquiya

tatzejtzeloctic nopa tapiyalme cati techmacaj para tacajcahualisti por tajtacoli huan para cati quihuica tajtacoli. ¹⁸Nochi oquichpilme huan tacame cati iconehua huan iixhuihua Aarón cati hueli quicuase cati mocahuas ten nochi nopa tacajcahualisti cati techmaca ica tit. Huan quej ni elis tanahuatili para iteipan ixhuihua cati oquichpilme cati teipa tacajtiyase ipan ifamilia Aarón. Pero san inijuanti hueli quicuase pampa inijuanti taiyocatalilme para na. Mochihuas tatzejtzeloctic cati hueli masehuali cati quiitzquis nopa pantzi cati quichijtoque ica harina cati mocajqui ten nopa tacajcahualisti. Nojquiya mochihuas tatzejtzeloctic ten hueli masehuali o tamanti cati quitoxomas.”

Quenicatza ma temacaca tacajcahualisti para totajtzitzi

¹⁹ Huan TOTECO nojquiya quiilhui Moisés:

²⁰ “Ipan nopa tonali quema Aarón o iteipan ixhuihua moiycatalise para elise totajtzitzi, sesen monequi quihualicas para na, niamoTECO, ni tacajcahualisti. Techmacas se tacajcahualisti cati quiipiya ome kilo ten harina nelcuectic. Huan tajco ten nopa tacajcahualisti techmacase ica ijnaloc huan nopa seyoc tajco techmacase ica tiotac. ²¹ Nopa tacajcahualisti monequi elis taicxitili ipan se comali huan cuali tamaneloli ica aceite. Huan quema ya icstitoc, quihuejhuelos nopa pantzi cati quichijtoque ica nopa tacajcahualisti ten harina huan techmacas. Huan mijyotis nelía ajhuiyac para na. ²² Huan san se techmacas nopa itelpoca cati se tonali calaquis quej nopa yancuic hueyi totajtzi ipataca Aarón. Huan ni tacajcahualisti elis noaxca na, niamoTECO, huan monequi quitatise nochi nopa tacajcahualisti para techmacase ipan pocti pampa quej nopa nimechnahuatia. ²³ Huajca monequi quitatis senquisa nochi nopa tacajcahualisti ten harina cati nopa totajtzi techmacas para ya iseltitzi. Yon quentzi amo aqui hueli quicuas.”

Quenicatza ma quimacaca tacajcahualisti por tajtacoli

²⁴ Huan TOTECO quiilhui Moisés:

²⁵ “Xiquinilhui Aarón huan itelpocahua ni tanahuatilme para nopa tacajcahualisti por tajtacoli. Ni tacajcahualisti cati tahuel tatzejtzeloctic huan nopa tapiyali monequi quimictise campa quinmictíaj tapiyalme para tacajcahualisti tatatili. ²⁶ Huan nopa nacat cati mocahua elis iaxca nopa totajtzi cati techmacas nopa tacajcahualisti por tajtacoli para quicuas, pero monequi quicuas campa tatzejtzeloctic nozona ipan calixpamit, iixpa nopa yoyon tiopamit campa timopantíaj. ²⁷ Ten hueli tamanti o masehuali cati quitoxomas quentzi nopa nacat mochihuas tatzejtzeloctic, taiyocatalili para techtequipanos na. Huan sinta se quentzi ten ieso quiajsis iyoyo, nopa masehuali monequi quichicuenis iyoyo nozona campa tatzejtzeloctic. ²⁸ Sinta quiicxiti nopa nacat ipan se chachapali cati tachijchihuali ica soquit, monequi quitapanas teipa. Pero sinta quiicxiti nopa nacat ipan se tamanti tachijchihuali ica nopa teposti bronce, san monequi quipajpacas ica miyac cuidado teipa.

²⁹ “San totajtzitzi huan inioquichpilhua hueli quicuase se tacajcahualisti por tajtacoli, pampa ya ni nopa tacajcahualisti cati tahuel tatzejtzeloctic. ³⁰ Pero sinta ieso nopa tapiyali ya quihuicatoque tiopan calijtic campa nopa cuarto cati Más Tatzejtzeloctic para quiixtzacuase inintajtacol masehualme, huajca amo aqui hueli quicuas inacayo. Nochi itacayo nopa tacajcahualisti monequi anquitatise noixpa.

¹ “Ya ni nopa tanahuatilme para nopa tacajcahualisti para cati quihuica tajtacoli noixpa, niamoTECO. Nopa tacajcahualisti elis tahuel tatzejtzeloitc. ² Nopa tapiyali cati quitencajtoque quej se tacajcahualisti para cati quihuica tajtacoli, monequi quimictise ipan nopa lugar campa quinnictiáj nopa tapiyalme cati quintequihuáj para tacajcahualisti tatatili. Huan ica ieso nopa tapiyali quitatejtzelhuisse yahualtic nopa taixpamit itzinta. ³ Huan nopa totajtzi techmacas nochi ichiyajca masque cati mopantía campa tatzquitoc icuitapil o ipan icuetaxcol. ⁴ Huan temacas nopa ome ieyo ihuaya nopa tachiyajcayot cati mopantía ininpani. Nojquiya temacas nopa parte hueyi ten ieltapach cati quiquixtis ihuaya ieyo. ⁵ Teipa nopa totajtzi quitatis nochi nopa partes ipan taixpamit, huan elis se tacajcahualisti para cati quihuica tajtacoli. Elis se tacajcahualisti cati techmacase niamoTECO ica tit huan mijyotis ajhuyiac noixpa. ⁶ Nochi totajtzitzi hueli quicuase nopa nacat cati mocahua ten se tacajcahualisti para cati quihuica tajtacoli, pero monequi quicuase campa tatzejtzeloitc pampa ni se tacajcahualisti tahuel tatzejtzeloitc.

⁷ “San se tanahuatili eltoc para nopa nacat cati mocahua ten nopa tacajcahualisti por tajtacoli huan nojquiya para nopa tacajcahualisti para cati quihuica tajtacoli. Nopa nacat iniaxca nopa totajtzitzi cati temacase nopa tacajcahualisti para techixtzacuilise nopa tajtacoli noixpa huan injuanti ma quicuaca. ⁸ Pero quema se totajtzi techmacas se tacajcahualisti tatatili para se masehuali, nopa totajtzi san quiselis nopa tapiyali icuetaxo. ⁹ Huan nojquiya nochi tacajcahualisti ten harina cati taixxitili ipan horno, comali o sartén, elis para ma quitequihui nopa totajtzi cati techmacas. ¹⁰ Pero nochi tacajcahualisti ten harina masque tamaneloli ica aceite o amo, elis iniaxca iixhuihua Aarón. Huan monequi quinmajmacase sesen ten injuanti san se imiyaca.

Quenicatza ma temacaca nopa tacajcahualisti para ma onca tayoltalili

¹¹ “Ya ni nopa tanahuatili para nopa tacajcahualisti para ma onca tayoltalili ica na cati masehualme temacaj. ¹² Sinta eli se tacajcahualisti para tascamatili, monequi temacase ihuaya pantzi cati quipiya aceite, pero amo quipiyas tasonejcajot. Nojquiya monequi temacas ihuaya pantzi cati sepantic huan cacatztic cati amo quipiya tasonejcajot huan cati taajaloli ica aceite. Nojquiya monequi temacas pantzi ten harina cati tahuel tatzotzoltili huan cati quihuica aceite. ¹³ Pero ica ni tacajcahualisti para tascamatili monequi quihualicas pantzi cati, quena, quipiya tasonejcajot. ¹⁴ Se quentzi ten sesen tamanti ten ni tacajcahualisti nopa totajtzi quitejcoltis huejcapa huan quihuisos noixpa para techmacas. Huan teipa ni elis iaxca nopa totajtzi cati tapalehuía huan quiajtzelhui ieso nopa tapiyali ipan taixpamit.

¹⁵ “Huan cati quitencajqui nopa tapiyali quej se tacajcahualisti para ma onca tayoltalili ica na huan para techtascamatis monequi quicuas inacayo nopa tapiyali ihuaya ifamilia ipan nopa tonali quema techmacas. Amo teno huelis quicahuase para seyoc tonali.

¹⁶ “Pero sinta se masehuali quihualicas se tacajcahualisti para ma onca tayoltalili ica na pampa tatestigojquetza cati quichihuas o cati amo quichihuas, o sinta quihualica san ica ipaquilis, huajca quena, nopa nacat cati mocahuas elis iaxca cati quihualicac. Huan injuanti quicuase ipan nopa tonali o hasta mosta. ¹⁷ Huan sinta ipan eyi tonati noja eltos nopa nacat, huajca monequi quitatis nochi. ¹⁸ Pero sinta se masehuali quicuas nacat ipan eyi tonati cati quisqui ten se tacajcahualisti para ma onca tayoltalili ica na cati yaya techmacac, nopa tacajcahualisti ayecmo elis se tamanti

cati techpactis na. Amo nijselis nopa tacajc ahualisti huan niqutas quej se tamanti fiero noixpa huan amo nijselis yaya cati techmacac. Huan nopa masehuali cati quicuajqui ipan eyi tonati quihuicas itajacol noixpa.

¹⁹ “Nojquiya sinta se quentzi nopa nacat huetzis ipan se tamanti cati amo tapajpactic noixpa, huajca ayecmo aqui huelis quicuas. Monequi quitatise nochi.

“Pero nopa nacat cati amo quiajsis cati amo tapajpactic, quena, cati hueli masehuali cati amo tapajpactic hueli quicuas.

²⁰ “Huan sinta cati hueli masehuali cati amo tapajpactic quicuas se quentzi inacayo nopa tapiyali cati noaxca na, niamoTECO, pampa se techmacatoc quej se tacajc ahualisti para ma onca tayoltalili ica na, monequi xijquixtica ten amojuanti para ayecmo quema huelis itztos ica anisraelitame.

²¹ “Mahuilili sinta se masehuali quitoxomas se tamanti cati amo tapajpactic, masque cati quisa ipan inintacayohua masehualme, o se tapiyali cati amo tapajpactic, o ten hueli tamanti cati amo tapajpactic noixpa. Cati quitoxomas se tamanti cati amo tapajpactic huan teipa quicuas quentzi nacat ten se tacajc ahualisti cati techmacatoc para ma onca tayoltalili ica na cati ya o seyoc techmacatoc, monequi xijquixtica ten amojuanti para ayecmo quema huelis itztos ica anisraelitame.”

Amo aqui hueli quicuas esti yon tachiyajcayot

²² Huan teipa TOTECO quihui Moisés:

²³ “Xiquinilhui nopa israelitame ni tanahuatilme. Amo aqui huelis quicuas yon se tamanti tachiyajcayot masque ininchiyajca huacaxme, borregojme o chivojme. ²⁴ Pero ininchiyajca tapiyalme cati mijque ica iniselti o cati quinmictijque sequinoc tecuanime, hueli xijtequihuica ica ten hueli tequit, pero amo xijcuaca.

²⁵ “Huan sinta cati hueli masehuali quicuas ichiyajca se tapiyali cati quitencajtoque quej se tacajc ahualisti para na ipan tit, monequi xijquixtica ten amojuanti para ayecmo quema huelis itztos ica anisraelitame.

²⁶ “Masque campa hueli anmochantalse, amo quema xijcuaca esti. Amo xijcuaca inieso totome cati patanij, yon sequinoc tamanti tapiyalme. ²⁷ Sinta se masehuali quicuas esti, monequi xijquixtica ten campa amojuanti para ayecmo quema huelis itztos ica anisraelitame.”

Cati iaxca nopa totajtzi para ma quicuaca

²⁸ Huan TOTECO quihui Moisés:

²⁹ “Xiquinilhui nopa israelitame ni tanahuatilme. Quema se acajya quinequis techmacas na, niamoTECO, se tacajc ahualisti para ma onca tayoltalili ica na, monequi quihualicas nopa partes cati monequi quitatis noixpa. ³⁰ Quena, monequi ya iseltitzi quihualicas ica imax nopa tachiyajcayot ihuaya iyolix ten nopa tacajc ahualisti para quitatise noixpa. Pero achtohui nopa tapiyali iyolix monequi quihuisos nopa totajtzi noixpa campa taixpamit. ³¹ Huan teipa iyolix nopa tapiyali elis iniaxca Aarón huan itelpocahua para ma quicuaca. Pero nopa totajtzi techmacas nochi nopa tachiyajcayot ipan tit ipan taixpamit. ³² Nojquiya quema se techmacas se tacajc ahualisti para ma onca tayoltalili ica na, monequi techmacas nopa tapiyali iqescuayo nejmat para elis iaxca nopa totajtzi. ³³ Quema se israelita temacas se tacajc ahualisti para ma onca tayoltalili nohuaya, nopa totajtzi cati techmacas ieso huan ichiyajca nopa tapiyali quiselis iqescuayo nopa tapiyali para iaxca. ³⁴ Pampa na nijquixtilitoc iyolix huan iqescuayo cati inejmat nopa tapiyali cati quihuisohuaj noixpa para techmacase, huan nijmacatoc Aarón huan itelpocahua para elis iniaxca nochipa. ³⁵ Quena,

ipan nopa tonali quema Aarón huan itelpocahua monextijque noixpa para mochihuase totajtzitzi, niquniyocatali ni partes para ma quicuaca ten nochi tacajcahualisti tatatili cati masehualme techmacase na, niamoTECO. ³⁶ Huan ipan nopa tonali quema niquntequitali para ma elica totajtzitzi, nitanahuati para nopa israelitame ma quinmacaca nopa totajtzitzi ni partes ten tacajcahualisti pampa iniaxca. Huan ya nopa monequi nopa totajtzitzi quiselise hasta ininteipan ixhuihua cati tacajtiyase teipa huan para nochipa.”

³⁷ Huajca nica eltoc nopa tanahuatilme para quenecatza ma tijmacaca TOTECO se tacajcahualisti ten harina, se tacajcahualisti por tajtacoli huan se tacajcahualisti para cati quihuica tajtacoli iixpa, huan se tacajcahualisti para ma onca tayoltalili ica ya. Nojquiya techilhuiá catijqui tacajcahualisti monequi temacas se totajtzi para moyocatalis quema quiselía itequi para TOTECO. ³⁸ Nochi ni tanahuatilme TOTECO quimacac Moisés ipan nopa tepet Sinaí quema nopa israelitame noja itztoyaj ipan nopa huactoc tali, pampa nozona TOTECO techilhui para monequi ma tijhuicaca tacajcahualisti iixpa.

8

Moisés quiniyocatali Aarón huan itelpocahua

(Éx. 29:1-37)

¹ Teipa TOTECO quiilhui Moisés:

² “Ama xiquinhuica Aarón huan itelpocahua hasta campa icalte nopa yoyon tiopamit. Huan xijhuica iniyoyo nopa totajtzitzi huan nopa aceite para tiqinaltis. Nojquiya xijhuica nopa becerro cati techmacase quej se tacajcahualisti por tajtacoli. Huan xiquinhuica nopa ome oquich borregojme huan nopa chiquihuit ica pantzi cati amo quipiya tasonejayot. ³ Huan xiquinilhui nochi nopa israelitame nojquiya ma mosentilica nozona.”

⁴ Huajca Moisés quichijqui nochi senquisa quej TOTECO quinahuati. Huan quema mosentilijtoyaj nochi israelitame campa icalte nopa yoyon tiopamit,

⁵ Moisés quinilhui: “Ya ni cati TOTECO tanahuatijtoc ma tijchihuaca.”

⁶ Huan teipa Moisés quichijqui ma monechcahuica Aarón huan itelpocahua huan quinpaipajqui ica at. ⁷ Huan teipa quiquenti Aarón itatzintan yoyo cati huehueyac, huan quitalili itzinquechilpica huan nojquiya quitalili ipantzajca. Huan ipan nopa pantzajcayot quitali nopa seyoc ipantzajca cati amo quipixqui imancax. ⁸ Teipa Moisés quitalili nopa yolixtazcayot cati quipixqui ibolsa huan nozona quitalili nopa Urim huan nopa Tumim, nopa dados tatzejzeloltic ten Toteco. ⁹ Huan teipa ipan itzonteco Aarón quitalili icuatzajca cati eli quej se tzonyahuati. Huan ipan icuaixco quitalili nopa piltepos patactzi cati tatzejzeloltic huan cati tachijchihuali ica oro cati quixnextia para yaya nopa hueyi totajtzi. Quej nopa TOTECO quinahuati ma quitalili Aarón.

¹⁰ Teipa Moisés quicuic nopa aceite cati quitequihuaj para ica taiyocatalíaj para elis iaxca Toteco, huan quipolo nochi tamanti cati onca ipan nopa yoyon tiopamit huan quej nopa quiniyocatali para elise senquisa para TOTECO iaxca. ¹¹ Huan quijtzelo nopa aceite ipan nopa taixpamit chicome huelta para quiyocatalis para elis iaxca Toteco nopa taixpamit huan nochi tamantzitzi cati motequihuaj ipan nopa yoyon tiopamit. Nojquiya quiajtzelhui nopa hueyi paila huan cati ipan mosehujtoc huan quej nopa quintatzelolchijqui. ¹² Huan teipa nojquiya quitejqui quentzi aceite ipan itzonteco Aarón para quiyocatalis para itequi. ¹³ Huan teipa Moisés sempa quinnotzqui ma monechcahuica Aarón itelpocahua huan quinquenti iniyoyo cati

huehueyac, huan quintalili inintzinquenchilpica, huan nojquiya quintalili inintzontzajcayohua. Huan nochí quichijqui quej TOTECO quinahuatijtoya.

¹⁴ Teipa quicuic nopa becerro para nopa tacajcahalisti por tajtacoli, huan Aarón huan itelpocahua quitelijque inimax ipan itzonteco nopa tapiyali. ¹⁵⁻¹⁶ Huan Moisés quimicti nopa tapiyali huan ica imacpil quicuic se quentzi esti huan quiajalo nopa nahui icuacua nopa taixpamit cati campa iesquina. Huan nojquiya quiatzejtzelhui nopa taixpamit para quitatzejtzelolchihuas. Huan nopa esti cati mocajqui quitoyajqui talchi itzinta nopa taixpamit. Teipa quicuic nopa tachiyajcayot cati mopantía ipan icuetaxcol ihuaya nopa parte cati más hueyi ten ieltapach, huan ome ieyo ihuaya ininchiyajca, huan quitencajqui iixpa TOTECO ipan tit ipan nopa taixpamit. ¹⁷ Huan nopa becerro inacayo huan icuetaxo, huan icuetaxcol ica icuit, quitatito ipan se lugar cati mocahua huejca ten campa mochijtoyaj. Quichijqui senquisa quej quinahuatijtoya TOTECO.

¹⁸ Teipa quihualiac nopa oquich borrego para nopa tacajcahalisti tatatili iixpa TOTECO. Huan Aarón huan itelpocahua quitelijque inimax ipan itzonteco nopa tapiyali, ¹⁹ huan Moisés quiquechtzontejqui huan quiatzejtzelhui yahualtic nopa taixpamit ica ieso. ²⁰ Teipa quihuejhuelo nopa oquich borrego. Huan nopa nacam tatecti ihuaya itzonteco huan ichiyajca quitati ipan nopa taixpamit para quimacas TOTECO ipan pocti. ²¹ Pero achtohui quipajajqui icuetaxcol huan iguescuayo ica at, huan teipa quitati ipan nopa taixpamit. Huan quej nopa, nochí nopa oquich borrego yajmaxtic tatak iixpa TOTECO. Huan nopa tapiyali elqui se tacajcahalisti tatatili cati mijyoti ajhuiyac para ya. Huan Moisés quimacac TOTECO nopa tacajcahalisti ipan tit senquisa quej quinahuatijtoya.

²² Teipa Moisés quixnexti nopa seyoc oquich borrego cati elqui se tacajcahalisti para quiniyocatalis Aarón huan itelpocahua, huan injuanti quitelijque inimax ipan itzonteco. ²³ Huan teipa Moisés quiquechtzontejqui nopa tapiyali, huan quicuic se quentzi ieso huan quitalili Aarón ipan inacas nejmat. Huan nojquiya quitalili ipan ihueyi xojpil cati inejmat huan ipan ihueyi majpil cati inejmat. ²⁴ Teipa Moisés quinilhui itelpocahua Aarón ma monechcahuica huan nojquiya quintalili ipan ininacas nejmat huan inixocpillhua cati hueyi cati inejmat huan ipan inimaxpil cati hueyi cati nojquiya ininejmat. Huan nopa esti cati mocajqui quiatzelhui itzinta huan yahualtic nopa taixpamit.

²⁵ Teipa quicuic nopa tachiyajcayot huan icuitapil cati quipixtoya ichiyajca. Nojquiya quicuic nopa tachiyajcayot cati mopantía ipan icuetaxcol, ieltapach, huan nopa ome ieyo huan iguescuayo cati inejmat. ²⁶ Huan ten nopa chiquihuit cati quipixtoya pantzi cati amo quipiyayaya tasonejcajot cati eltoya iixpa TOTECO, Moisés quiquixti se pantzi, huan se pantzi cati tamaneloli ica aceite, huan se pantzi cati sepantic huan cacatztic. Huan nochí ya ni qutali ininpani nopa partes cati quisqui ipan nopa oquich borrego. ²⁷ Huan nochí ni tamanti qutali imaco Aarón huan ipan inimax itelpocahua para injuanti ma quihuisoca iixpa TOTECO para quimacase. ²⁸ Huan teipa sempa quicuic nopa tamanti ten inimax, huan quitati ipan nopa taixpamit ihuaya nopa tacajcahalisti tatatili para quimacas TOTECO. Huan ya ni, quena, elqui se tacajcahalisti para quiniyocatalis Aarón huan itelpocahua para tequitise quej totajtzi. Huan mijyoti ajhuiyac para TOTECO. Ya ni elqui nopa tacajcahalisti cati quimacac TOTECO ipan tit. ²⁹ Huan teipa Moisés quicuic nopa oquich borrego iyolix huan quimacac

TOTECO quej se tacajchualisti tahuisoli iixpa, pampa quihuiso iixpa no-pona campa nopa taixpamit. Huan teipa iyolix nopa tapiyali mocajqui iaxca Moisés pampa quej nopa tanahuati TOTECO.

³⁰ Teipa quicuic se quentzi ten nopa aceite para teiyocatalise huan se quentzi ten nopa esti cati eltoya ipan taixpamit huan ica quiatzejtzelhui iyoyo Aarón. Huan nojquiya quiatzejtzelhui iniyoyo itelpocahua Aarón. Huan quej nopa quichijqui ma elica taiyocatalilme Aarón huan itelpocahua para quitequipanose TOTECO, huan nojquiya iniyoyo quiyocatalili para TOTECO.

³¹ Huan Moisés nojquiya quinilhui Aarón huan itelpocahua: “Xiquicxit-ica nuan nacat ipan at nechca icalte ni yoyon tiopamit. Huan nozona xijcuaca ihuaya nopa pantzi cati eltoc ipan nopa chiquihuit cati quiyiya nopa tacajchualisti para amechiyocatalise para TOTECO. Quena, xijchihuaca quej niqijtojtoc pampa nimechnahuatía para monequi amojuanti xijcuaca. ³² Huan nopa nacat huan pantzi cati noja mocahuas, monequi anquitatise. ³³ Huan amo hueli anquistehuase ten icalte nopa yoyon tiopamit para chicome tonati, pampa monequi chicome tonati para tamis nochí cati monequi para nimechiyocatalis para TOTECO. ³⁴ Huan nochí ni tamanti cati tijchijtoque, tijchijque pampa TOTECO quej nopa quinequiyaya ma tijchihuaca para quiixzacuas amotajacolhua iixpa. ³⁵ Huan sempa nimechnahuatía para tonaya huan tayohua para chicome tonati monequi anmochahuase nechca icalte nopa yoyon tiopamit. Quena, quej nopa TOTECO amechnahuatijtoc para amo anniquise.”

³⁶ Huan Aarón huan itelpocahua quichijque nochí cati TOTECO quinhuatijtoya Moisés.

9

Nopa totajtzitzi quipehualtisque inintequi

¹ Panoc nopa chicome tonati para moiyocatalise para TOTECO huan ipan nopa chicueyi tonati Moisés quinnotzqui Aarón huan itelpocahua huan nochí nopa huehue tacame cati tayacanque ica israelitame. ² Huan quiilhui Aarón: “Xijcui se becerro para tijmacas TOTECO quej se tacajchualisti por tajtocoli para ta. Huan nojquiya xijcui se oquich borrego para elis se tacajchualisti tatatili. Huan ni tapiyalme monequi elise tapajpactique. Amo quiyiyase ipan inintacayo yon se tamanti cati amo cuali. ³ Huan xiquinilhua nopa israelitame ma quicuica se oquich chivo para quimacase quej se tacajchualisti por tajtocoli. Huan nojquiya ma quicuica se becerro huan se pilborregoxtzi cati sanoc quiaxitijtoque sesen xihuit para quinmacase quej se tacajchualisti tatatili. Ni tapiyalme monequi elise tapajpactique. Amo quiyiyase yon se tamanti cati amo cuali ipan inintacayo. ⁴ Huan nojquiya xiquinilhui monequi quicuise se toro cati taxahua huan se oquich borrego para ma quimacaca quej se tacajchualisti para ma onca tayoltalili ica TOTECO. Nojquiya monequi quihualicase se tacajchualisti ten harina cati quicuechtijtoque huan quichijtoque se harina huan quimanelojtoque ica aceite. Quena, nochí ya ni monequi xijchihuaca pampa ama TOTECO monextis ica amojuanti.”

⁵ Huajca nochí israelitame quihuicaque ni tamanti cati quinhuatijtoya Moisés campa nopa yoyon tiopamit icalixpa. Huan nochí nopa israelitame monechahujque huan ijcatoyaj nozona iixpa TOTECO.

⁶ Huajca Moisés quinilhui: “Quema ya anquichijtose nochí cati tanahuatía TOTECO, monextis ihueyitilis ica amojuanti.”

⁷ Teipa Moisés quiilhui Aarón: “Ximonechcahui campa nopa taixpamit huan xijmaca TOTECO nopa tacajcahualisti por tajtacoli cati elis para ta motajtacolhua. Huan xijtencahua nopa tacajcahualisti tatatili cati quixtzacuas motajtacolhua iixpa. Teipa xijmaca TOTECO nopa tacajcahualisti para quixtzacuas inintajtacolhua nochi israelitame iixpa quej yaya tanahuatijtoc.”

⁸ Huajca Aarón monechcahui campa nopa taixpamit huan quimicti nopa becerro quej se tacajcahualisti para tajtacoli por ya itajtacol. ⁹ Huan itelpocahua quihualiquilijque nopa esti, huan Aarón quicuic se quentzi ten nopa esti ica imacpil huan quiajalo nopa nahui icuacua nopa taixpamit. Huan nopa esti cati noja mocajqui quitoyajqui talchi itzinta nopa taixpamit.

¹⁰ Huan teipa quitati nochi nopa tapiyali ichiyajca, ieyo huan nopa parte cati más hueyi ten ieltapach. Nochi quimacac TOTECO ipan pocti quej yaya quinquahuatijtoya ma quichihuaca. ¹¹ Pero inacayo nopa tapiyali huan icuetaxo quitati ipan se lugar huejca ten campa timochijtoyaj.

¹² Huan teipa Aarón quimicti nopa tapiyali cati elqui para tacajcahualisti tatatili, huan itelpocahua quihuiquilijque nopa esti. Huan quiatzejtzelhui ica nopa esti yahualtic ipan nochi ielchiqui nopa taixpamit. ¹³ Huan quihuejhuelojque nopa tapiyali huan quihuiquilijque Aarón itzonteco huan sesen tatecti. ¹⁴ Teipa quipajajqui icuetaxcol huan iquescuayo huan nojquiya quitencajqui ipan tit ipan nopa taixpamit ihuaya nopa tacajcahualisti tatatili.

¹⁵ Teipa quihualiac nopa oquich chivo cati quihualicatoyaj nopa israelitame. Huan quimicti huan quitencajqui quej se tacajcahualisti por tajtacoli para nopa israelitame inintajtacolhua. Nochi quichijque quej achtohui quichijqui ica nopa seyc tacajcahualisti para tajtacoli cati yaya temacac por ya. ¹⁶ Huan teipa quihualiac nopa tacajcahualisti tatatili. Huan quitencajqui iixpa TOTECO senquisa quej quijto itanahuatil.

¹⁷ Teipa quihualiac nopa tacajcahualisti ten harina. Huan quicuic se quentzi ten nopa harina cati quicuechtilijtoyaj ten nopa tacajcahualisti cati quihualicatoyaj, huan quitati ipan nopa taixpamit ihuaya nopa tacajcahualisti tatatili cati quitencajque ica ijaloc.

¹⁸ Teipa quiquechtzontejqui nopa toro cati quimati tapoxonia huan nopa oquich borrego cati temacatóyaj nopa israelitame quej se tacajcahualisti para ma onca tayoltalili ica TOTECO. Huan itelpocahua Aarón quihuiquilijque nopa esti, huan yaya quiatzelhui yahualtic huan itzinta nopa taixpamit. ¹⁹ Teipa quicuic nopa toro ichiyajca huan ichiyajca nopa oquich borrego. Huan quicuic nopa tachiyajcayot cati mopantia ipan inincuitapil huan cati mopantia ipan inincuitaxcol. Huan quicuic inieyo huan nopa parte ten inieltapach cati quipixqui ininchiyajca. ²⁰ Huan nochi nopa partes itelpocahua quitalijque ipan nopa tapiyalme iniyolix para quimacase Aarón. Huan nochi nopa tachiyajcayot quitati ipan nopa taixpamit para quimacas TOTECO ipan pocti. ²¹ Pero iniyolix huan ininquescuayo cati inejmat, Aarón quitencajqui iixpa TOTECO quej se tacajcahualisti tahuisoli. Huan Aarón nochi quichijqui quej Moisés quinquahuatijtoya.

TOTECO ihueyitilis monexti iniixpa nochi israelitame

²² Huan Aarón quitejcolti imax para campa itztoyaj nopa israelitame huan quintiochijqui. Huan quema ya quitencajtoya nopa tacajcahualisti por tajtacoli, huan nopa tacajcahualisti fatatili, huan nopa tacajcahualisti para ma onca tayoltalili ica TOTECO, Aarón temoc ten campa nopa taixpamit. ²³ Huan Moisés huan Aarón calajque calijtic ipan nopa yoyon tiopamit. Huan teipa quisque huan quintiochijque nopa israelitame, huan TOTECO ihueyitilis

monexti iniixpa nochi nopa israelitame cati mosentilijtoyaj nozona. ²⁴ Huan TOTECO quititanqui tit ten iixpa huan nimantzi quitamitati nochi nopa tacajcahalisti huan nopa tachiyajcayot cati eltoya ipan nopa taixpamit.

Huan quema nopa israelitame quiitaque ya nopa, quitzajtzilijque TOTECO ica paquulisti huan motancuaquetzque huan mohuijtzonque ica inixayac hasta talchi.

10

Tajtacolchijque Nadab huan Abiú

¹ Se tonali ome itelpocahua Aarón, injuanti cati inintoca eliyaya Nadab huan Abiú, quicuique sese ticomit huan ipan quitailijque tit cati amo tatzejtzeloltic ihuaya copali huan quitatijque iixpa TOTECO. Pero cati quichijque amo elqui quej TOTECO quinnahuatijtoya ma quichihuaca. ² Huan TOTECO quititanqui se tit huan quintamitati huan mijque nozona iixpa. ³ Huan teipa Moisés quiilhui Aarón:

—TOTECO quinequiyaya techilhuis para quej ni panos quema quiijo: ‘Ni Quinnextilis para nitatzejtzeloltic, nochi cati monechcahuáj campá na. Huan nochi israelitame techhueyitalise.’

Huan Aarón amo molini.

⁴ Huan Moisés quinzotzqui Misael huan Elzafán cati eliyayaj itelpocahua Uziel, itío Aarón, huan quinilhui:

—Xihualaca huan xiquinhuicaca amoteixmatcahua inintacayohua. Xiquinquixtica ten nopa calixpamit cati iixpa ni yoyon tiopamit huan xiquinhuicaca huejca ten campá timochijtoque.

⁵ Huan monechcahuijque huan quinhuicacae ininteixmatcahua inintacayohua, huan noja moquentijtoyaj iniyoyo cati huehueyac ten totajtzitzi. Huan quinhuicacae huejca ten campá timochijtoque quej Moisés quinnahuatijtoya.

Quenicatza monemiltise totajtzitzi

⁶ Teipa Moisés quicamanalhui Aarón huan nopa ome itelpocahua cati inintoca eliyaya Eleazar huan Itamar, huan quinilhui:

—Amo xichocaca yon amo ximocuesoca. Amo xijcahuaca amotzoncal ma nesis fiero, yon amo xijtzayanaca amoyoyo. Pampa sinta anmotequipachose, TOTECO nojquiya amechtzentamiltis huan yaya nelía cualanis ica nochi ni israelitame. Pero moicnihua, nochi nopa sequinoc israelitame, quena, hueli quinchoquilise Nadab huan Abiú huan hueli mocuesose por nopa tit cati TOTECO quititanqui. ⁷ Pero amo hueli anquisase ten nozona campá nopa yoyon tiopamit. Sinta anquisase, anmiquise, pampa antaiyocatalilme para TOTECO por nopa aceite cati nimechajalti.

Huan Aarón huan nopa ome itelpocahua quichijque nochi quej quinnahuati Moisés.

⁸ Teipa TOTECO quicamanalhui Aarón huan quiilhui: ⁹ “Ta huan motelpocahua amo hueli anquise xocomeca at o ten hueli tamanti tailisti cati cococ quema ancalaquise ipan nopa yoyon tiopamit. Sinta anquise, anmiquise. Ni tanahuatili monequi anquitoquilise amojuanti huan nochi amoteipan ixhuihua cati tacajtiyase para nochipa. ¹⁰ Monequi anquimachilise catijqui tamantzitzi tatzejtzeloltic para na huan catijqui amo, huan catijqui tapajpactic noixpa huan catijqui amo tapajpactic. ¹¹ Huan monequi anquimachtise nopa israelitame nochi notanahuatil cati na, niamotECO, nimechmacatoc ica Moisés.”

¹² Teipa Moisés quincamanalhui Aarón huan nopa ome itelpocahua cati noja itztoyaj cati inintoca eliyaya Eleazar huan Itamar. Quinilhui:

—Xijcuica nopa harina cati noja mocahua ten nopa tacajcahalisti cati anquimacaque TOTECO ipan tit. Xijpiyaca cuidado para amo quipiyas tasonejcaoyot huan xijcuaca nechca ielchiqui nopa taixpamit, pampa ya ni elis se tacajcahalisti cati tahuel tatzejtzeltic. ¹³ Huan monequi xijcuica huan xijcuaca nozona yoyon tiopan calijtic campa tatzejtzeltic. Huan nopa cati mocahua ten nopa tacajcahalisti ten harina elis moaxca para motacualis, Aarón, huan para inintacualis motelpocahua. Quena, ni parte ten nopa tacajcahalisti cati anquitatise iixpa TOTECO elis amoaxca, pampa quej nopa tanahuatijtoc TOTECO ma nimechilhui. ¹⁴ Pero iyolix nopa tapiyali cati anquihuisohuaj iixpa TOTECO huan iquescuayo cati nojquiya elis amoaxcahua, hueli anquicuase ipan ten hueli lugar cati tapajpactic. Quena, amojuanti huan amooquichpilhua huan amosihuapilhua hueli anquicuase nopa iyolix huan iquescuayo pampa amoaxca ten nochitacajcahalisti para ma onca tayoltalili ica TOTECO cati israelitame temacaj.

¹⁵ Nopa israelitame monequi quihualicase iquescuayo nopa tapiyali cati anquejcoltise huan iyolix cati anquihuisose iixpa TOTECO para antemacque ma nojquiya anquitatise nopa tachiyajcaoyot. Huan teipa nopa partes elis amoaxca. Quena, ni ome tamanti mocahuas para ta huan para moconehua para nochipa pampa quej nopa tanahuatijtoc TOTECO.

¹⁶ Huan teipa Moisés tatzintocac canque eltoc nopa oquich chivo cati quitencajque quej se tacajcahalisti por tajtacoli huan quipanti para ya quitatijtoyaj. Huan tahuel cualanqui ihuaya Eleazar huan Itamar, nopa ome itelpocahua Aarón cati noja itztoyaj. Huan quinilhui:

¹⁷ —¿Para ten amo anquicujque nopa tacajcahalisti por tajtacoli campa tatzejtzeltic tiopan calijtic? Pampa nelía eliyaya tatzejtzeltic huan TOTECO amechmacac para anquiquixtise nopa tajtacoli cati israelitame quihuicaj iixpa huan para anquixtzacuase inintajtacolhua. ¹⁸ Monectoya anquicujtosquíaj yoyon tiopan calijtic campa tatzejtzeltic quej na nimechnahuatijtoya, pampa amo ya nopa tacajcahalisti cati anquihuicaj ieso tiopan calijtic campa Más Tatzejtzeltic cati amo hueli anquicuase.

¹⁹ Pero Aarón quilhui Moisés:

—Inijuanti quitencajque inintacajcualis para tajtacoli huan inintacajcualis tatatlili iixpa TOTECO. Pero ica inimiquilis ne sequinoc notelpocahua, na nimoilhui sinta tijcuasquíaj ama nopa tacajcahalisti por tajtacoli, huelis amo quipactijtosquía TOTECO. Yeca amo nijcuajqui.

²⁰ Huan quema Moisés quicajqui ya nopa, ayecmo cualanqui.

11

Tapiyalme cati tapajpactic huan cati amo

(Dt. 14:3-21)

¹ Huajca TOTECO sempa quinilhui Moisés ihuaya Aarón:

² “Xiquinilhua nopa israelitame para san hueli quicuase ni tapiyalme cati ama nimechilhuis. ³ Hueli quicuase cati quipiyaj iniisti maxaltic huan quicujcuaj inintacualis ome huelta. ⁴ Pero amo hueli anquicuase nopa camello, ⁵ nopa cuatochi, ⁶ huan nopa pesojti, pampa masque ni tapiyalme quicujcuaj inintacualis ome huelta, amo quipiyaj iniisti maxaltic.

⁷ “Nojquiya amo hueli anquicuase nopa pitzot, pampa masque quipiya iisti maxaltic, amo quicujcuaj ome huelta itacualis, huan yeca niquta para amo tapajpactic.

⁸ “Amo hueli anquicuase ininacayo ni tapiyalme yon amo hueli anquitzquise se itacayo quema mictoc pampa amo tapajpactic.

⁹ “Huan ten nochi michime huan tapiyalme cati itztoque ipan at, san hueli anquincuase cati quipiyaj inieltapal huan inipetayo. Quena, masque anquintzquise ipan hueyi at o ipan se atajti san ni michime anquincuase.

¹⁰ Amo hueli anquincuase yon se tamanti cati itztoc ipan hueyi at o ipan hueyame sinta amo quipiya ieltapal huan ipetayo quej quipiyaj michime.

¹¹ Nochi ni tamanti anquiiijiyase huan amo hueli anquintzquise inintacayo cati mictoque. ¹² Huan sempa nimechilhuía ya ni: Amo xijcuaca yon se tamanti cati itztoc ipan at sinta amo quipiya ieltapal huan ipetayo quej se michi.

¹³ “Huan nojquiya itztoque totome cati amo hueli anquincuase. Amo xijcuaca yon se hueyi cuatojti, yon se huajti, yon tzojipilot cati momati nechca at, ¹⁴ yon se tamanti tzojipilot, ¹⁵ o yon se tamanti cacalot. ¹⁶ Yon amo xijcuaca nopa huejcapantic totot avestruz, yon nopa cuatojti cati nemi ten tayohua, yon nopa atotot cati chipahuac, o yon se tamanti cuajti. ¹⁷ Amo xijcuaca nopa tololojti, yon nopa cuamojmojti cati hueyi, yon nopa cuamojmojti cati ijcatoc iijhuyio ipan itzonteco, ¹⁸ yon nopa cuamojmojti chipahuac, yon nopa totot yayahuic cati quincua michime, yon nopa pelícano, yon nopa tzojipilot cati quincua tapiyalme cati mictoque. ¹⁹ Yon amo xijcuaca nopa garza, yon nopa cigüeña, yon nopa totome cati quipiyaj huejhueyi inimetz, yon tztzome. Nochi ni tapiyalme amo hueli anquincuase.

²⁰ “Nojquiya monequi xiquinijiyaca nochi tamanti sayolime cati patanij huan quipiyaj nahui inimetz. Amo xiquincuaca. ²¹ Pero itztoque sequij tamanti cati quipiyaj inieltapal huan nahui iniicxihua cati hueli anquicuase. Sinta ipan inimetz quipiyaj inintancia cati quinpalehuáj para huitonij, huajca quena, hueli anquincuase. ²² Hueli anquincuase nochi tamanti pilchapoltziti, nochi chapolime cati huejhueyi, huan nochi chapolime cati quicuaaj xihuit huan quipiyaj inieltapal. ²³ Pero nochi nopa sequinoc sayolime huan chapolime cati quipiyaj nahui iniicxi, amo hueli anquincuase.

²⁴ “Ni tamanti quichihua para se masehuali elis amo tapajpactic:

“Sinta se masehuali quitzquis itacayo se ten ni totome o sayolime cati mictoque, mocahuas amo tapajpactic hasta tayohua.

²⁵ “Huan sinta se masehuali quitzquis itacayo se ten ni tamanti tapiyalme quema ya mictoc, monequi nimantzi quichicuenis iyoyo huan noja mocahuas amo tapajpactic hasta tayohua.

²⁶ “Nojquiya anmochihuase amo antapajpactique quema anquitzquise itacayo se tapiyali cati amo senquisa maxaltic iisti o amo quicuajcua ome huelta itacualis.

²⁷ “Nojquiya amo huelis anquincuase tapiyalme quej chichime cati amo quipiyaj senquisa iniisti. Huan sinta se masehuali quitzquis itacayo se ten ni tapiyali cati mictoc mocahuas amo tapajpactic hasta tayohua. ²⁸ Quena, quema se masehuali quitzquis itacayo se ten ni tapiyali cati mictoc monequi nimantzi quichicuenis iyoyo, pero noja mocahuas amo tapajpactic hasta tayohua.

²⁹ “Huan ten nopa tapiyalme cati motalohuaj talchi, ya ni cati amo cuali para anquincuase: sehueme, quimichime, temasolime, tusame, ³⁰ cocodrilojme, axilime, topitzime, huan tzonpetachiquime.

³¹ “Sinta se masehuali quitzquis itacayo se ten ni tapiyalme cati mictoc, mocahuas amo tapajpactic hasta tayohua.

³² “Nojquiya mocahuas amo tapajpactic nochi tamanti cati ipan huetzis nopa tapiyali itacayo. Quena, sinta nopa tapiyali cati mictoc huetzis ipan se

tamanti cuahuit, o se yoyomit, o se cuetaxti o se coxtali, huajca nopa tamanti mocahuas amo tapajpactic. Monequis anquitalise ipan at huan mocahuas amo tapajpactic hasta tayohua, pero teipa elis tapajpactic.

³³ “Huan sinta nopa tapiyali huetzis ipan se tamanti cati tachijchihuali ica soquit, huajca nochi tamantzitzi cati quipixtoya iijtic elise amo tapajpactic, huan monequi anquitapanase nopa comit. ³⁴ Huan sinta nopa at cati ica quitapajpacchihuj cati amo tapajpactic huetzis ipan se tamanti tacualisti o se tamanti tailisti, nopa tamanti nojquiya mochihuas amo tapajpactic pampa quiajsic nopa at.

³⁵ “Sinta itacayo se ten ni tapiyali cati mictoc huetzis ipan ten hueli tamanti horno cati tachijchihuali ica soquit, huajca nopa horno mocahuas amo tapajpactic huan monequi anquixitinise.

³⁶ “Huan sinta nopa tapiyali huetzis ipan se ameli cati quiyia at, nopa at mocahuas tapajpactic, pero nopa masehuali cati quiquixtis nopa tapiyali itacayo, yaya, quena, mocahuas amo tapajpactic.

³⁷ “Huan sinta itacayo nopa tapiyali cati mictoc huetzis ipan xinachti cati quicajtoyaj para quitocase ipan mila, huajca nopa xinachti noja mochihuas tapajpactic. ³⁸ Pero sinta itacayo nopa tapiyali cati mictoc huetzis ipan xinachti cati xolontoc, huajca mocahuas amo tapajpactic.

³⁹ “Huan sinta anquipiyaj se tapiyali cati onca caquihuili para anquicuase pero nopa tapiyali miquis ica cocolisti, huajca amo xiquitzqui itacayo. Pampa sinta se masehuali quitzquis itacayo, nopa masehuali mocahuas amo tapajpactic hasta tayohua. ⁴⁰ Huan sinta se masehuali quicuas inacayo o quihuicas itacayo nopa tapiyali, monequi nimantzi quichicuenis iyoyo, pero noja mocahuas amo tapajpactic hasta tayohua.

⁴¹ “Monequi xiquinijiyaca nochi tapiyalme cati mohuahuatatzaj talchi huan amo xiquincuaca.

⁴² “Amo hueli anquincuase nochi tamanti cati mohuahuatatzaj talchi ica iniyolix, yon nopa cohuame cati nejnemij ica nahui iniicxi. Nojquiya amo hueli anquincuase nopa tapiyalme cati mohuahuatatzaj talchi huan quipiyaj miyac iniicxi, pampa nelia amo tapajpactique noixpa. ⁴³ Amo xijtoxomaca yon se ten ni tapiyalme pampa amechchihuas amo antapajpactique. ⁴⁴ Na niamoTECO Dios. Nijnequi ximomocuitahuica cuali huan xielica antatzejteloltique pampa na nitatzejteloltic. Huajca amo xiquitzquica yon se ten ni tapiyalme cati mohuahuatatzaj talchi pampa amechchihuas amo antapajpactique noixpa. ⁴⁵ Na niamoTECO cati nimechquixti ipan tali Egipto para nielis niamoTeco Dios. Huajca ama, monequi anelise antatzejteloltique pampa na nitatzejteloltic.

⁴⁶ “Huajca nica nimechilhuijtoc nopa tanahuatilme cati monequi anquitoquilise ica nochi totome, tapiyalme, tamanti cati itztoque ipan at huan tamanti cati mohuahuatatzaj talchi. ⁴⁷ Ni tanahuatilme amechpalehuise para anquimatise taya eli se tapiyali cati tapajpactic huan taya eli se tapiyali cati amo tapajpactic. Huan nojquiya amechpalehuis para anquimatise taya tapiyali hueli anquicuase huan taya tapiyali amo hueli anquicuase.”

12

Quenicatza motapajpacchihuas se sihuat

¹ Huan TOTECO nojquiya quihui Moisés:

² “Xiquinilhui nopa israelitame ni tanahuatilme. Quema se sihuat tane-miltis huan quitacatlitis se oquichpil, huajca nopa sihuat mocahuas amo tapajpactic para chicome tonati. Monequi quichihuas san se quej quichihua quema esotemo. ³ Huan ipan nopa chicueyi tonali, quiyecapantequilise

se quentzi icuetaxo ipan ipiltacayo nopa piloquichpiltzi. ⁴ Teipa nopa piloquichpiltzi inana amo huelis quiitzquis yon se tamanti cati tatzejtzelotfic para seyoc 33 tonati pampa noja quiipiya esotemolisti. Yon amo hueli calaquís tiopan calijit hasta tamis nopa tonali para motapajpacchihuas.

⁵ “Pero sinta nopa sihuat quitacatiltis se sihuapil, huajca mocahuas amo tapajpactic para ome samano. Huan monequi quitepanitas nopa tanahuatili para quema esotemo. Huan teipa quichiyas seyoc 66 tonati para motapajpacchihuas.

⁶ “Huan quema ya quitamiltijos nopa tonali para motapajpacchihuas, huajca masque tacatqui oquichpil o sihuapil, inana monequi quihuicas campa nopa totajtzi ipan icalte nopa yoyon tiopamit se pilborregojtzi cati sanoc quiipiya se xihuit para quimacas quej se tacajcahalisti tatatili. Nojquiya monequi quihuicas se paloma o se pichontzi para techmacas quej se tacajcahalisti por tajtocoli.

⁷ “Huan nopa totajtzi quintencahuas noixpa na, niamoTECO, huan techixtzacuilis itajtacol nopa sihuat noixpa. Huan quej nopa, nopa sihuat motapajpacchihuas ten nopa esotemolisti. Quena, ya ni eli nopa tanahuatili cati monequi quitoquilis quema quitacatiltis se conet masque oquichpil o sihuapil.

⁸ “Pero sinta nopa sihuat eli tahuel teicneltzi huan amo quiipiya tomi para techmacas se pilborregojtzi, huajca hueli quihuicas ome pichones o ome palomajme. Se ten nopa ome techmacas quej se tacajcahalisti tatatili, huan nopa seyoc techmacas quej se tacajcahalisti por tajtocoli. Huan quej nopa, nopa totajtzi techixtzacuilis itajtacol nopa sihuat, huan ya mocahuas tapajpactic noixpa.”

13

Nopa tacayo palanca cocolisti cati momahua

¹ TOTECO quinilhui Moisés ihuaya Aarón:

² “Quema anquilitase pehua temi icuetaxo se masehuali, o nesi para pehua cocome, o nesi para pehua mochihuas chipahuac icuetaxo, huelis quinequi pehuas nopa tacayo palanca cocolisti cati momahua. Huajca monequi anquihuicase nopa masehuali iixpa nopa totajtzi Aarón o iixpa se ten itelpocahua. ³ Huan nopa totajtzi quitachilis ica cuidado campa monextijtoc nopa cocolisti. Huan sinta campa quiipiya cocolisti, itzoyo pejtoc mochihua chipahuac huan sinta nopa cocot nesi para pejtoc itanüta icuetaxo, huajca xijmachilica cuali para quiipiya nopa tacayo palanca cocolisti. Huan huajca nopa totajtzi monequi teyolmelahuas para amo tapajpactic nopa masehuali.

⁴ “Huan sinta ipan icuetaxo nopa masehuali quinpiya muchas cati chichipahuac pero amo palantoc hasta más huejcata, huan itzoyo amo mocuectoc chipahuac, monequi nopa totajtzi quitzacuas nopa masehuali iseltitzi para chicome tonati. ⁵ Huan quema quiixitis chicome tonati, nopa totajtzi sempa quitachilis. Huan sinta nesis para nopa cocot amo más mohueyilijtoc ipan icuetaxo, huajca quitzacuas para seyoc chicome tonati. ⁶ Huan quema sempa ajsis nopa tonali chicome, monequi sempa quitachilis ica cuidado, huan sinta quiitas para nopa cocot amo más mohueyilía ipan icuetaxo huan pejtoc para tami, huajca nopa totajtzi teyolmelahuas para nopa masehuali eltoc tapajpactic noixpa. Pampa cati quipixtoya eliyaya san ten hueli cocot. Huan nopa masehuali monequi quichicuenis iyoyo, huan quej nopa sempa elis tapajpactic. ⁷ Pero sinta nopa cocot mohueyilis teipa quema nopa totajtzi quiijto para tapajpactic, huajca monequi sempa hualas iixpa nopa totajtzi.

⁸ Huan sinta nopa totajtzi quiijtos para nopa cocot mohueyilijtoc, huajca

teyolmelahuas para nopa masehuali amo tapajpactic pampa quipiya tacayo palancaocolisti.

⁹ “Quema se masehuali quinpiyas cocome ipan itacayo, monequi quihucase iixpa totajtzi. ¹⁰ Huan nopa totajtzi quitachilis ica cuidado, huan sinta quiitas para campa temitoc icuetaxo pehua mochihua chipahuac, huan itzoyo mocuetoc chipahuac, huan sinta tanemijya nesi inacayo tapojtoc campa temitoc, ¹¹ huajca ya nopa eli nopa tacayo palancaocolisti cati huejcajquiya quiajsitoc ipan icuetaxo. Huajca nopa totajtzi monequi teyolmelahuas para nopa masehuali amo tapajpactic. Amo monequi quitzacuas iselti para más quitachilise pampa quimati melahuac quiapiya nopaocolisti.

¹² “Pero sinta nopa totajtzi quiitas para nopa mancha cati nopa masehuali quiapiya ya mohueyilijtoc huan ya ajsitoc campa hueli ten iicxi huan hasta ipan itzonteco, ¹³ huajca quijtos para nopa masehuali tapajpactic, pampa nochí ya mochijtoc chipahuac huan ya panotoc nopa palancaocolisti.

¹⁴ Pero sinta ipan icuetaxo quinpiya cocome tapojtoc cati nesi inelnacayo, huajca amo tapajpactic, ¹⁵ pampa tapojtoc icocohua huan nesi inelnacayo huan ya ni eltoc tacayo palancaocolisti.

¹⁶ “Pero sinta nopa masehuali cati quipixqui se cocot tapojtoc huan nesiyya inacayo teipa quiitas para icoco mocuetoc chipahuac, huajca monequi sempa yas campa nopa totajtzi para ma quitachilis. ¹⁷ Huan nopa totajtzi quitachilis huan sinta campa cocojtoc nelía nesi chipahuac, huajca nopa totajtzi teyolmelahuas para tapajpactic nopa masehuali cati quinpixqui cocome.

¹⁸ “Quema icuetaxo se masehuali quiapiyas se cocot cati temalquisa huan teipa mochicahuas, ¹⁹ pero mocahuas temitoc huan nesis chipahuac, o nesis chichiltic huan chipahuac, huajca nopa masehuali monequi yas campa nopa totajtzi para ma quitachili. ²⁰ Huan sinta nopa totajtzi quiitas para nopa cocot pejtoc huejcata, tatzinta ten icuetaxo, huan para itzoyo pehua para elis chipahuac, huajca monequi teyolmelahuas para nopa masehuali amo tapajpactic, pampa quiapiya nopa tacayo palancaocolisti cati pejqui quej se cocot ica temali. ²¹ Pero sinta nopa totajtzi quitachilis huan amo quipantis itzoyo cati nesi chipahuac, huan sinta nopa cocot amo eltoc huejcata, huan san quentzi chipahuixtoc, huajca monequi quitzacuas iseltitzi para chicome tonati. ²² Huan sinta itamiya nopa chicome tonati, nopa cocot mohueyilis achi más, huajca nopa totajtzi quijtos para nopa masehuali amo tapajpactic pampa quiapiya se cocot. ²³ Pero sinta nopa mancha cati chipahuac san campa eltoc, huan amo más mohueyilijtoc, huajca quimachilise para san mocahua lipintic icuetaxo campa pachijqui nopa cocot. Huan nopa totajtzi quijtos para nopa masehuali eli tapajpactic noixpa.

²⁴ “Sinta se acayja motatis ipan itacayo ica ten hueli tamanti, huan sinta campa motatijtoc teipa nesis chipahuac, o nesis chichiltic huan chipahuac, ²⁵ huajca nopa totajtzi quitachilis ica cuidado campa motatijtoc nopa masehuali. Huan sinta quiitas para cocojtoc achi huejcata hasta tatzinta ten icuetaxo huan itzoyo ya mocuetoc chipahuac, huajca ya quiapiya nopa tacayo palancaocolisti cati yolqui ten campa motati. Huan nopa totajtzi monequi quijtos para nopa masehuali amo tapajpactic pampa quiapiya nopa tacayo palancaocolisti. ²⁶ Pero sinta nopa totajtzi quiitas para nopa masehuali amo quiapiya itzoyo chipahuac campa cocojtoc, huan amo más huejcata, san ipan nopa icuetaxo huan nesi para ya caxantiya, huajca san quitzacuas iseltitzi para chicome tonati. ²⁷ Pero quema tantosa nopa chicome tonati, monequi sempa quitachilis nopa totajtzi. Sinta quiitas para

campa cocojtoya achi más mohueyilijtoc, huajca nopa totajtzi quijjtos para, quena, nopa masehuali quipiya tacayo palanca cocolisti. ²⁸ Pero sinta campá cocojtoc amo más mohueyilijtoc huan nesi para ya caxantoc quentzi, huajca nopa totajtzi quijjtos para tapajpactic nopa masehuali noixpa. Cati quipiya eltoc pampa motati huan lipintic.

²⁹ “Sinta se tacat o se sihuat quipiya se cocot ipan itzonteco o ipan itentzo, ³⁰ huajca monequi yas campá nopa totajtzi para ma quitachili. Huan sinta nopa cocot nesis para panofoc tatzinta ten icuetaxo, huan sinta quiitas para nozona quipiya itzoyo cati nesi costic huan pitzantzi, huajca nopa totajtzi quijjtos para nopa masehuali amo tapajpactic pampa quipiya se tamanti cocot cati mochijtoc nopa tacayo palanca cocolisti ipan itzonteco o ipan itentzo.

³¹ Pero sinta nopa totajtzi quiitas para nopa cocot amo ajsitoc tatzinta ten icuetaxo huan noja quipiya itzoyo cati yayahuic, huajca nopa totajtzi san quitzacuas nopa masehuali iseltitzi para chicome tonati. ³² Huan quema tantosa nopa chicome tonati, nopa totajtzi monequi sempa quitachilis. Huan sinta quiitas para nopa cocot amo mohueyilijtoc huan amo pejtoc quipiya itzoyo cati nesi costic huan nesi para amo ajsitoc tatzinta ten icuetaxo nopa masehuali, ³³ huajca nopa totajtzi quichihualtis ma quihuataní itentzo. Pero yaya amo hueli quihuatanis campá cocojtoc. Quema tamis mohuatanis, monequi noja mochahuas tzactoc para seyc chicome tonati. ³⁴ Huan ipan nopa chicompa tonali nopa totajtzi sempa quitachilis. Huan sinta quiitas para nopa cocot amo mohueyilijtoc, huan nesi para amo ajsitoc huejcata ipan icuetaxo, huajca nopa totajtzi quijjtos para nopa masehuali eltoc tapajpactic. Huan teipa quema ya quichicuenijtos iyoyo, nopa masehuali mochahuas tapajpactic noixpa. ³⁵ Pero sinta nopa cocot mohueyilis quema ya quijjto para tapajpactic, ³⁶ huajca nopa totajtzi monequi sempa quitachilis. Huan ama, quena, sinta mohueyilijtoc, amo monequi quipantis itzoyo cati costic, pampa ya nesi nopa masehuali amo tapajpactic. ³⁷ Pero sinta quiitas para nopa cocot amo mohueyilia huan ya pejtoc para monextia itzoyo cati yayahuic, huajca quijjtosnequi ya caxantoc nopa cocot, huan tapajpactic nopa masehuali. Huajca nopa totajtzi quijjtos para tapajpactic.

³⁸ “Huan quema se tacat o se sihuat pehuas para quipiyas ipan icuetaxo cocome cati nesi chipahuac, ³⁹ huajca nopa totajtzi quitachilis icuetaxo nopa masehuali ica cuidado. Sinta quiitas nopa cocot san se quentzi chipahuac, huajca amo ya nopa tacayo palanca cocolisti. San quipiya ten hueli cocolisti cati quiajsic ipan icuetaxo huan tapajpactic eli nopa tacat noixpa.

⁴⁰ “Sinta se masehuali tepehuis nochi itzoncal hasta ayecmo mochahuas yon se, huajca nopa masehuali amo quipiya tacayo palanca cocolisti.

⁴¹ Huan sinta se masehuali tepehuis itzoncal icuaixco huan ipan icuajtol, huajca ya nojquiya tapajpactic, amo quipiya cocolisti. ⁴² Pero sinta campá tepehui itzoncal eltos se cocot cati nesis chipahuac huan chichiltic, huajca quijjtosnequi pejtoc tacayo palanca cocolisti campá tepejtoc itzoncal.

⁴³ Huajca monequi nopa totajtzi quitachilis campá yoli nopa cocot ipan itzonteco, o icuaixco. Sinta quiitas para nesi chipahuac huan chichiltic quej nopa tacayo palanca cocolisti, ⁴⁴ huajca ya nopa quipiya huan amo tapajpactic. Huan nopa totajtzi monequi quijjtos para nopa masehuali melahuac quipiya tacayo palanca cocolisti ipan itzonteco.

Tanahuatili ten yoyomit cati quipiya cocolisti

⁴⁵ “Se masehuali cati quipiya tacayo palanca cocolisti monequi quihuicas iyoyo tzayantoc, huan amo huelis moxilhuis. Monequi quitentzacuas ica se yoyomit huan monequi tzajzititayas: ‘Amo nitapajpactic. Amo nitapajpactic.’

⁴⁶ Huan masque nopa cocolisti huejcahuas ipan itacayo, monequi itztos iseltitzi huejca ten campa mochijtoque ne sequinoc masehualme.

⁴⁷ “Huan sinta se iyoyo o itaque se masehuali pojyajtoc, o quiapiya se mancha monequi quitachilis nopa totajtzi, masque eltoc cati tachijchihuali ica lino o ica borregojme iniijhuiyo. ⁴⁸ Masque nopa mancha eltoc ipan nopa icpat ten nopa yoyomit, o masque nopa yoyomit, o tamanti cati poyajtoc tasencahuali ica tapiyalme inincuetaxo; sinta yoli se mancha, huajca xi-jhuicaca campa nopa totajtzi. ⁴⁹ Huan sinta nesi quentzi xoxohuic o quentzi chichiltic nopa mancha cati yoli ipan nopa yoyomit o nopa tamanti cati quichijtoque ica cuetaxti, huajca campa nopa mancha o pejtoc nopa tacayo palanca cocolisti, huan monequi quihuicase iixpa nopa totajtzi para ma quitachili. ⁵⁰ Huan nopa totajtzi quitachilis nopa yoyomit, o nopa tamanti, huan quiiyocatalis para chicome tonati. ⁵¹ Huan quema ajsis tonali chicome, nopa totajtzi sempa quitachilis nopa mancha. Huan sinta quiitas para mohueyilijtoc ipan nopa yoyomit o ipan nopa cuetaxti, huajca quiiijosnequi para eli se mancha ten tacayo palanca cocolisti cati nelía fiero. Huajca nopa tamanti mocahuas amo tapajpactic masque taxinepaloli ipan nopa yoyomit, o mopantía ipan se tamanti ten cuetaxti. ⁵² Huajca nopa yoyomit cati tachijchihuali ica lino, o ica borregojme iniijhuiyo, o nopa tamanti ten cuetaxti cati quiapiya nopa mancha monequi quitatise pampa quiapiya nopa tacayo palanca cocolisti cati nelía fiero. ⁵³ Pero sinta quema tamis chicome tonati, nopa totajtzi quitachilis huan quiitas para nopa mancha amo más mohueyilijtoc, ⁵⁴ huajca quinnahuatis cati quihualicaque ma quichicuenica nopa tamanti cati quiapiya nopa mancha, huan sempa quiiyocatalis seyoc chicome tonati.

⁵⁵ “Huan quema ya quipajpactose, nopa totajtzi quitachilis sempa, huan sinta nesis para nopa mancha noja mocajtoc huan amo quipatatoc itachiyalis, huajca nopa tamanti monequi quitatise masque amo mohueyilijtoc más pampa quiapiya nopa tacayo palanca cocolisti. Masque nopa mancha san ajsi ipan se lado o ajsi ipan nochi ome lados, monequi xijtatica. ⁵⁶ Pero sinta nopa totajtzi sempa quitachilis huan quiitas para nopa mancha ayecmo más nesi quej achtohui, huajca san quitejtequis huan quiquixtis campa monextijtoc nopa mancha ipan nopa yoyomit, o cuetaxti o ipan nopa tamanti cati taxinepaloli. ⁵⁷ Pero sinta nopa mancha sempa monextis campa hueli ipan nopa yoyomit, o ipan nopa tamanti ten cuetaxti, huajca nopa tamanti cati quiapiya mancha monequi quitatise. ⁵⁸ Pero sinta quema ya quichicuenijtose nopa yoyomit o nopa tamanti ten cuetaxti ayecmo monextis nopa mancha, huajca san monequi quichicuenise seyoc huelta, huan teipa mocahuas tapajpactic huan sempa huelis quitequihuse.

⁵⁹ “Huajca ya ni elqui nopa tanahuatili para nopa tacayo palanca cocolisti cati monextia ipan yoyomit cati tachijchihuali ica lino, o ica borregojme iniijhuiyo, o ica cuetaxti, o monextijtoc ipan sequinoc tamanti cati tachijchihuali ica tapiyalme inincuetaxo. Quena, ya ni nopa tanahuatili cati quitequihuse para quiijtose sinta nopa tamanti eli tapajpactic o eli amo tapajpactic.”

14

Quenicatza motapajpacchihuase cati quipixque cocolisti

1 Huan TOTECO quiihui Moisés: 2 “Ya ni nopa tanahuatilme para se masehuali cati quipixtoya nopa tacayo palanca cocolisti huan quinequi

hualas campa nopa totajtzi para motapajpacchihuas. ³ Nopa totajtzi monequi yas campa itztoc nopa cocoxquet huejca ten campa anmochantijtoque para quitachilis ica cuidado. Sinta quiitas para ya pachijtoc campa quipixqui nopa cocot, ⁴ huajca tajtanis ma quihuiquilica ome totome cati tapajpactique huan cati anquipiyaj caquihuili para anquicuase. Tajtanis ma quinhuiquilica nepa campa itztoc nopa cocoxquet ihuaya tiocuahuit, se icpat cati chichiltic huan se imacuayo nopa xihuit cati itoca hisopo. ⁵ Teipa nopa totajtzi tanahuatis ma quiquechtzontequica se ten nopa ome totome. Quena, monequi quiquechtzontequis ipan se comit cati tachijchihuali ica soquit huan quipiya at ten se ameli. ⁶ Huan quicuis ica nopa tiocuahuit, huan nopa icpat cati chichiltic huan imacuayo nopa hisopo xihuit huan nopa seyoc piltototzi cati noja itztoc huan san sejco quinxolonis ica nopa achtohui tapiyali ieso ipan nopa comit cati quipiya at cati huala ten se ameli. ⁷ Huan teipa ica nopa tamanti cati xolontoc quiatzejtzelhuis nopa totajtzi chicome huelta nopa masehuali cati motapajpacchihuas ten icocolis. Huan teipa quijitos para tapajpactic. Huan nopa totot cati noja yoltoc quimajcahuas para ma patantinemi campa cuatitamt.

⁸ “Teipa nopa masehuali cati ya motapajpacchijtoc, monequi quichicuenis iyoyo, huan quihuatanis itzonal. Monequi maltis huan sempa calaquis para itztos campa nochi sequinoc israelitame mochiytoque. Pero noja ayemo huelis calaquis ipan ichaj ten yoyomit. ⁹ Huan ipan nopa chicompa tonali, nopa masehuali monequi sempa quitequis nochi itzonal, itentzo huan iixtentzoyo. Teipa sempa quichicuenis iyoyo huan maltis, huan ica ya nopa, motapajpacchihuas ten nopa cocolisti cati quipixtoya.

¹⁰ “Huan ipan tonali chicueyi, quincuis eyi pilborregojtziti cati quiipiyaj sesen xihuit huan cati amo quiipiyaj yon se tamanti cati amo cuali ipan inintacayo. Monequi ome oquichme huan se sihuatzi cati cuali inintacayo. Nojquiya quicuis chicome litro harina cati nelcuehtic huan tamaneloli ica aceite para se tacajcahualisti ten harina, huan ihuaya quihuicas tajco litro aceite. ¹¹ Huan nopa totajtzi cati tetapajpacchihua, quihuicas nopa masehuali cati motapajpacchihuas noixpa, niamoTECO. Huan ihuaya quihualicas nochi nopa tamantziti cati motequihuis, huan temacas noixpa na, niamoTECO nepa campa icalte nopa yoyon tiopamt. ¹² Teipa nopa totajtzi quicuis se ten nopa piloquich borregojtziti huan nopa tajco litro aceite huan quitencahuas noixpa quej se tacajcahualisti para nopa masehuali cati quihuica tajtacoli. Huan para techmacas monequi quinhuisos noixpa, niamoTECO. Huan elis quej se tacajcahualisti tahuisoli. ¹³ Huan teipa nopa totajtzi quiquechtzontequis nopa pilborregojtzi nopona campa yoyon tiopan caltemit campa quonmictíaj nopa tapiyalme para tacajcahualisti por tajtacoli huan para tacajcahualisti tatatili. Huan nopa tacajcahualisti por tajtacoli huan ni tacajcahualisti para cati quihuica tajtacoli noixpa elis iaxca nopa totajtzi para itacualis pampa tahuel tatzejtzolotlic.

¹⁴ “Huan nopa totajtzi quicuis se quentzi ieso nopa tapiyali cati quitencajtoc quej se facajcahualisti para cati quihuica tajtacoli noixpa huan nopa esti quiajalos ipan inacas nejmat nopa masehuali cati motapajpacchihuas. Nojquiya quiajalos ipan imacpil cati hueyi ten imax nejmat huan ipan ixocpil cati hueyi ten iicxi nejmat.

¹⁵ “Teipa nopa totajtzi quicuis nopa aceite huan quitecas quentzi ipan ten ya imax arraves. ¹⁶ Huan teipa nopa totajtzi quixolonis imacpil ten imax nejmat ipan nopa aceite huan ica imacpil taatzejtzelhuis chicome huelta noixpa na, niamoTECO. ¹⁷ Huan ica nopa aceite cati noja mocahuas ipan nopa totajtzi imax, quiajalos se quentzi inacas nejmat nopa masehuali

cati motapajpacchihuas. Huan nojquiya quiajalos ipan imacpil cati hueyi ten imax nejmat huan ipan ixocpil cati hueyi ten iicxi nejmat. Huan nojquiya quitalis aceite ipan nopa esti ten nopa tacajcahualisti para cati quihuica tajtacoli noixpa. ¹⁸ Huan nopa aceite cati noja mocahuas imaco nopa totajtzi quitequihuis para quiajalos ipan itzonteco nopa masehuali cati motapajpacchihuas huan techixtzacuilis itajtacolhua.

¹⁹ “Teipa nopa totajtzi techmacas nopa tacajcahualisti por tajtacoli para quixtzacuas itajtacolhua nopa masehuali cati quitapajpacchihua ten nopa cocolisti cati quichijtoya amo tapajpactic. Huan teipa quimictis nopa tapiyali cati techmacas quej se tacajcahualisti tatatili. ²⁰ Huan techmacas ipan taixpamit nopa tacajcahualisti tatatili ihuaya nopa tacajcahualisti ten harina. Huan ica nochi ya ni, nopa totajtzi techixtzacuilis nopa masehuali itajtacolhua, huan yaya mocahuas tapajpactic.

²¹ “Pero sinta nopa masehuali eli tahuel teicneltzi huan amo huelis quincouhas ome pilborregojtziti, huajca hueli techmacas setzi pilborregojtzi quej se tacajcahualisti para cati quihuica tajtacoli, pero achtohui quihuisos noixpa, niamoTECO, para se tacajcahualisti tahuisoli para techixtzacuilis itajtacolhua. Huan para nopa tacajcahualisti ten harina, san quihualicas ome kilo huan tajco harina cati tamaneloli ica aceite, ihuaya se tajco litro aceite.

²² “Nojquiya quihuicas ome pichones o ome palomas quej quiitas para quiaxilía itomi. Huan se ten nopa ome totome elis para techmacas quej se tacajcahualisti por tajtacoli, huan nopa seyoc techmacas quej se tacajcahualisti tatatili. ²³ Nochi ya nopa monequi quihuicas ipan nopa chicueyi tonali. Huan quimactilis nopa totajtzi nozona noixpa campa icalte nopa yoyon tiopamit campa timopantíaj. ²⁴ Huan nopa totajtzi quicuis nopa pilborregojtzi cati techmacas na, niamoTECO, quej se tacajcahualisti para cati quihuica tajtacoli. Nojquiya quicuis nopa tajco litro aceite, huan elis quej se tacajcahualisti cati quihuisos noixpa. ²⁵ Teipa quiquechtzontequis nopa pilborregojtzi para se tacajcahualisti para cati quihuica tajtacoli, huan quicuis se quentzi ieso huan quiajalos ipan inacas nejmat nopa masehuali cati quipajpaca huan quiajalos ipan imacpil cati hueyi ten imax nejmat huan ixocpil cati hueyi ten iicxi nejmat.

²⁶ “Teipa nopa totajtzi quicuis nopa aceite huan quitecas se quentzi ipan imax cati iarraves. ²⁷ Huan teipa quixolonis imacpil ten imax nejmat huan ica nopa aceite taatzetzelhuis chicome huelta noixpa, na niamoTECO. ²⁸ Nojquiya nopa totajtzi quicuis se quentzi nopa aceite cati quipixtoc ipan imax cati arraves huan quiajalos inacas nejmat nopa masehuali cati motapajpacchihua. Nojquiya quiajalos ipan imacpil cati hueyi ten imax nejmat huan ipan ixocpil cati hueyi ten iicxi nejmat. San se quiajalos campa quiajalo ieso nopa tapiyali cati quitencajqe para tacajcahualisti para cati quihuica tajtacoli. ²⁹ Huan nopa aceite cati noja mocahuas ipan imax nopa totajtzi, quiajalos ipan itzonteco nopa masehuali cati motapajpacchihua. Ya nopa techixtzacuilis itajtacol, na niamoTECO.

³⁰ “Teipa techmacas nopa totajtzi se ten nopa palomas o nopa pichones, ten hueli cati quiaxili itomi para quicouhas. ³¹ Techmacas se quej se tacajcahualisti por tajtacoli huan nopa seyoc techmacas quej se tacajcahualisti tatatili, huan ihuaya techmacas nopa tacajcahualisti ten harina.

³² “Huajca ya ni elqui nopa tanahuatilme cati monequi quitoquilis se masehuali cati ayecmo quiapiya tacayo palanca cocolisti huan amo quiaxilís para temacas se tacajcahualisti patiyó para ica motapajpacchihuas.”

Quenicatza ma quintapajpacchihuaca calme

³³ Huan TOTECO quilhui Moisés huan Aarón:

³⁴ “Quema ya anajsitose ipan tali Canaán cati na nimechmacatoc para amoaxca huan na nijtalis ipan se cali se mancha cati nesi para quipiya se hueyi cocolisti huan amo san axoloquistoc; ³⁵ huajca nopa masehualí cati iaxca nopa cali monequi yas quíitai nopa totajtzi huan quíilhuis: ‘Na níquita para ipan nochaj pejtoc mopanextía se mancha ten nopa hueyi cocolisti.’

³⁶ “Huan quema nopa totajtzi ayemo calaqui ipan nopa cali, tanahuatis ma quisaca nochí cati itzfoque nozona huan ma quiquixtica nochí tamantzitzi cati eltoc calijtic. Quej nopa amo quíijos para amo tapajpactic nochi nopa masehualme huan nopa tamantzitzi cati nozona onca. Huan teipa quema ya quíistose, nopa totajtzi calaquis huan quíitachilis nopa mancha cati mopanextijtoc.

³⁷ “Huan sinta nopa totajtzi quíitas para nozona campa coyontoc nopa tapepecholme mopanextijtoque muchas cati nesij chíchiltique o xoxohuíque huan nesij para calactoque hasta huejata ipan tapepecholi, ³⁸ huajca nopa totajtzi quisas huan quíitacuas nopa cali para chicome tonati. ³⁹ Huan quema ajsis nopa chicome tonali, nopa totajtzi monequi sempa hualas quíitachilíqui. Sinta quíitas para nopa mancha mohueyíilijtoc ipan nopa tapepecholi, ⁴⁰ huajca tanahuatis ma quiquixtica nopa teme ipan tapepecholi campa mopanextijtoc nopa mancha, huan monequi quíimajcahuatij huejca ten campa anmochijtoque ipan se lugar cati amo tapajpactic. ⁴¹ Huan nojquiya tanahuatis ma quíihuatanica nopa tapepecholi yahualtic campa eltoya nopa mancha. Huan nochí nopa soquít huan taltepocti quíicahuatij huejca ten campa anmochijtoque ipan se lugar cati amo tapajpactic. ⁴² Teipa nopa tacame quíicuíse sequínoc teme para quíitalise ipan campa quííicueníjque nopa teme cati quiپیayayaj muchas. Huan nojquiya quíitalise yancuíc soquít para quíitatzquíitise nopa tet.

⁴³ “Pero sinta nopa mancha sempa mopanextis ipan nopa cali quema ya quíipatoque nopa teme, huan ya quíihuataníjtoque nopa tapepecholi huan ya quíitalílijtoque soquít cati yancuíc, ⁴⁴ huajca nopa totajtzi calaquis huan sempa quíitachilis ica cuidado. Huan sinta quíitas para nopa mancha mohueyíilijtoc ipan nopa tapepecholi, huajca quííijosnequi ya pejtoc nopa hueyi cocolisti cati más fiero ipan nopa cali. Huan nopa cali elis amo tapajpactic huan quej nopa mocahuas. ⁴⁵ Huajca monequi ma quíitamíltica nopa cali huan nochí tet huan cuahuit huan soquít ma quíicahuatij ipan se lugar campa amo tapajpactic cati mocahua huejca ten campa anmochijtoque. ⁴⁶ Huan sinta acájya calaquis calijtic ipan nopa tonali quema nopa totajtzi tanahuati para eltos tzactoc, huajca ya mocahuas amo tapajpactic hasta tayohua. ⁴⁷ Huan cati huéli cati tacuas o motecas ipan nopa cali quema tzactoc monequi quíichíicuenis iyoyo.

⁴⁸ “Pero sinta quema ya quíipatoque nopa tet huan soquít, amo teno nesis quema sempa calaquis nopa totajtzi para quíitas nopa mancha, huajca quííijos para nopa cali tapajpactic pampa nopa hueyi cocolisti ya íxpólíjtoc. ⁴⁹ Huan quema nopa totajtzi quíitapajpacchíhuas nopa cali monequi quíintequíhuís ome totome, tíocuahuit, se ícpat cati chíchíltic huan se ímacuayo nopa cuahuit cati itoca hisopo. ⁵⁰ Huan quíiquechtzontequis se ten nopa ome totome ipan se huajcalí cati tachíjchíhuáli ica soquít cati quiپیyas at cati huala ipan se ameli. ⁵¹⁻⁵² Huan nopa totajtzi quíicuis nopa tíocuahuit, nopa hisopo xíhuít ímacuayo, nopa ícpat cati chíchíltic huan nopa seyoc totot cati yoltoc, huan san sejco quíinxolonis ipan nopa achtohuí totot íeso íhuaya nopa at ten ameli. Huan quíinquíxtis huan quíatzejtzelhuis chícome huéltá nopa cali. Huan quej nopa quíitapajpacchíhuas nopa cali. ⁵³ Teipa yas

huejca ten nopa altepet huan quimajcahuas nopa totot cati itztoc para ma patani ipan cuatitamit. Huan quej nopa ya quichijos nochí cati monequi para techixtzacuilis nopa tajtacoli cati eltoya ipan nopa cali, huan nopa cali mocahuas tapajpactic.”

⁵⁴⁻⁵⁵ Nochi ya ni eli nopa tanahuatili para campa hueli campa quipantíaj manchas ten nopa hueyi cocolisti masque mopanextía ipan se cali, o ipan se yoyomit, o ipan icuetaxo se masehuali, ⁵⁶ o sinta mopanextía campa samajtoc itacayo se masehuali, o campa motatijtoc, o campa iseli yoli se mancha. ⁵⁷ Huan ica ni tanahuatilmé ten cocolisti ipan icuetaxo se masehuali o ipan ten hueli tamanti, anquimatise quema amo tapajpactic se tamanti huan quema tapajpactic.

15

Tamanti cati amo tapajpactic ipan tacame

¹ Huan TOTECO quiilhui Moisés huan Aarón:

² “Xiquinilhuica nopa israelítame ni tanahuatilmé. Quema se tacat quiipiya at cati mojmosta temo ipan itacayo, huajca amo tapajpactic nopa tacat. ³ Huan masque quisehuiquilis toyahuis o motzacuas, nopa tacat mocahuas amo tapajpactic.

⁴ “Nochi tapechti cati ipan motecas nopa tacat cati aquisa mochihuas amo tapajpactic.

“Huan campa mosehuis, quichihuas para nopa siyaj o nopa tamanti elis amo tapajpactic noixpa.

⁵ “Huan cati hueli cati quitoxomas nopa tapechti, monequi quichicuenis iyoyo huan maltis, huan noja mocahuas amo tapajpactic hasta tayohua.

⁶ “Huan sinta se masehuali mosehuis ipan nopa siyaj o nopa tamanti campa ipan mosehui nopa tacat cati aquisa, huajca monequi quichicuenis iyoyo huan maltis, huan noja mocahuas amo tapajpactic hasta tayohua.

⁷ “Huan cati hueli cati quitoxomas nopa tacat cati aquisa, monequi quichicuenis iyoyo, huan maltis, huan noja mocahuas amo tapajpactic hasta tayohua.

⁸ “Huan sinta nopa tacat cati aquisa chajchas ipan se masehuali cati tapajpactic, huajca elis amo tapajpactic. Monequi nopa masehuali quichicuenis iyoyo huan maltis ica at, huan mocahuas amo tapajpactic hasta tayohua.

⁹ “Huan sinta nopa tacat cati atemo tejcos ipan se cahuayo, huajca nopa cahuayojsiya mochihuas amo tapajpactic.

¹⁰ “Cati hueli cati quitoxomas o quihuicas se tamanti cati ipan mosehuijtoc, o motectoc nopa tacat cati atemo, mocahuas amo tapajpactic hasta tayohua.

“Huan nopa masehuali monequi quichicuenis iyoyo huan maltis, huan noja mocahuas amo tapajpactic hasta tayohua.

¹¹ “Sinta nopa tacat cati atemo quiitzquis se acajya ica imax huan amo momajtequijtoc, huajca nopa tacat cati quiitzquili imax monequi quichicuenis iyoyo huan maltis, huan noja mocahuas amo tapajpactic hasta tayohua.

¹² “Sinta nopa tacat cati atemo quiitzquis se comit cati tachijchihuali ica soquit, huajca nopa comit monequi quitapanase. Huan sinta quinitzquis tamantzitzi cati tachijchihualme ica cuahuit, huajca nopa tamanti san monequi quinapjacase ica at.

¹³ “Sinta ayecmo atemos nopa tacat, huan quinequis pehuas motapajpacihuas monequi achtohui quichiyas seyoc chicome tonati. Huan sinta quinitas ayecmo atemo, huajca quichicuenis iyoyo huan mopajpacas ica at ten ameli. ¹⁴ Huan ipan tonali chicueyi, quincuis ome pichones o ome palomas huan monextis iixpa TOTECO campa icalte nopa yoyon tiopamit

huan quinmacas nopa totajtzi. ¹⁵ Huan nopa totajtzi techmacas se quej se tacajcahualisti por tajtacoli. Huan nopa seyoc techmacas quej se tacajcahualisti tatatili. Huan quej nopa, nopa totajtzi techixtzacuulis itajtacol nopa tacat por nopa atemolisti cati quipixqui.

¹⁶ “Quema se tacat quitoyahuas ixinacho, monequi quipajpacas nochi itacayo ica at, huan noja mocahuas amo tapajpactic hasta tayohua.

¹⁷ “Huan sinta toyahuis se quentzi ipan se yoyomit o ipan se cuetaxti, huajca nopa tamanti monequi quipajpacase ica at huan noja mocahuas amo tapajpactic hasta tayohua.

¹⁸ “Huan quema se tacat itztos ihuaya se sihuat huan quitoyahuas ixinacho, huajca nochi ome monequi mopajpacase ica at, huan mocahuase amo tapajpactic hasta tayohua.

Tamanti cati amo tapajpactic ipan sihuame

¹⁹ “Huan quema se sihuat esotemos, mocahuas amo tapajpactic para chicome tonati.

“Huan cati quitzquis nopa sihuat, mocahuas amo tapajpactic hasta tayohua.

²⁰ “Nochi tamanti cati ipan motecas o mosehuas nopa sihuat ipan nopa chicome tonati, mocahuas amo tapajpactic.

²¹ “Huan cati hueli cati quitzquis itapech nopa sihuat cati esotemo, monequi quichicuenis iyoyo huan maltis, huan noja mocahuas amo tapajpactic hasta tayohua.

²²⁻²³ “Huan cati hueli cati quitzquis nopa tapechti, o nopa siya, o ten hueli tamanti cati ipan mosehui nopa sihuat cati esotemo monequi quichicuenis iyoyo huan maltis, huan noja mocahuas amo tapajpactic hasta tayohua.

²⁴ “Sinta se tacat cochis ihuaya nopa sihuat ipan nopa tonali quema esotemo huan ieso quiajsis, huajca nopa tacat mocahuas amo tapajpactic para chicome tonati. Huan ten hueli tapechti cati ipan motecas nopa tacat nojquiya mocahuas amo tapajpactic.

²⁵ “Huan sinta se sihuat noja esotemos miyac tonali quema ayecmo ipohual, o pehuas esotemos ipan se tonali quema amo ipohual, huajca amo tapajpactic san se quej quema nelía ipohual.

²⁶ “Huan nochi tapechti huan siyas cati ipan mosehuis mocahuas amo tapajpactic san se quej elij amo tapajpactique quema nelía ipohual para esotemo.

²⁷ “Nojquiya cati hueli cati quitzquis nopa tapechti campa motejqui, o nopa siyas campa mosehui, mocahuas amo tapajpactic. Monequi quichicuenis iyoyo huan maltis, huan noja mocahuas amo tapajpactic hasta tayohua.

²⁸ “Huan quema ya tantos esotemo, monequi quipohuas chicome tonati huan teipa mocahuas tapajpactic. ²⁹ Huan ipan tonali chicueyi nopa sihuat cati esotemoyaya quema amo ipohual monequi quincuis ome pichones, o ome palomas, huan quinhuicas campa nopa totajtzi huan quimactilis nechca icalte nopa yoyon tiopamit. ³⁰ Huan nopa totajtzi techmacas se ten nopa totome quej se tacajcahualisti por tajtacoli, huan nopa seyoc techmacas quej se tacajcahualisti tatatili. Huan quej nopa, nopa totajtzi techixtzacuulis nopa esotemolisti cati nopa sihuat quipixqui cati quichi-huayaya amo tapajpactic noixpa.

³¹ “Monequi quej ni anquintapajpacchiuase israelitame quema amo tapajpactique. Pampa sinta amo motapajpacchiuase, quichi-huase amo tapajpactic nopa yoyon tiopamit campa na niitztoc tatajco ten inijuanti, huan quej nopa monequi miquise.

³² “Huajca nochi ya ni elqui nopa tanahuatili para se tacat cati atemo o cati toyahui ixinacho huan yeca mocajqui amo tapajpactic. ³³ Huan ni tanahuatilme nojquiya eli para sihuame quema esotemoj quema ipohual huan quema amo ipohual. Nojquiya nica eltoc tanahuatilme para facame cati cochij ihuaya se sihuat cati amo tapajpactic pampa esotemo.”

16

Nopa Tonali Quema Quiixtzacuase Tetajtacolhua

¹ TOTECO quicamanalhui Moisés quema ya mictoyaj nopa ome itelpocahua Aarón. Mijque pampa monechcahuijque campa itztoc TOTECO pero amo quej quinamiqui. ² Huan TOTECO quiilhui:

“Xiquilhui moicni, Aarón, amo hueli calaquis ten hueli hora ipan nopa cuarto cati Más Tatzejtzeltoc cati eltoc iica nopa cortina campa eltoc nopa caxa. Sinta calaquis nozona ipan se tonali quema amo onca tanahuatili para calaquis, miquis. Pampa iixco itzajca nopa caxa campa techixtzacuulis tetajtacolhua na noseltitzi niitztos ipan nopa mixti. ³ Huajca quej ni monequi mocualtis Aarón, quema ajsis nopa tonali sesen xihuit quema monequi calaquis ipan nopa cuarto cati Más Tatzejtzeltoc. Aarón monequi quihualicas se becerro para techmacas quej se tacajcahualisti por tajtacoli huan se oquich borrego para techmacas quej se tacajcahualisti tatatili.

⁴ Achtohui monequi maltis, huan teipa monequi moquentis itatzintan yoyo cati huehueyac huan cati tatzejtzeltoc, huan monequi moquentis itatzintan yoyo ten lino. Teipa motalilis itzinquechilpica, huan motalilis icuatzajca pampa ya ni iyoyo cati tatzejtzeltoc.

⁵ “Huan nopa israelitame quihuiquilise ome oquich chivojme para tacajcahualisti por tajtacoli. Huan quihuiquilise se oquich borrego para elis se tacajcahualisti tatatili. ⁶ Pero achtohui monequi Aarón ma techmaca nopa becerro quej se tacajcahualisti por tajtacoli cati techixtzacuulis cati ya itajtacolhua huan cati ya ifamilia inintajtacolhua. ⁷ Huan teipa quincuis nopa ome oquich chivojme huan quinhualicas noixpa campa icalte nopa yoyon tiopamit. ⁸ Huan teipa quichihuas suertes ica nopa ome oquich chivojme para quitas catijqui elis para na, niamoTECO, huan catijqui elis para quihuicas tetajtacolhua campa tahuel huactoc campa ayecmo quema huelis tacuepilis. ⁹ Huan Aarón quimictis nopa oquich chivo cati elis para na huan techmacas quej se tacajcahualisti por tajtacoli. ¹⁰ Pero nopa oquich chivo cati elis para quihuicas tetajtacolhua huejca, quixnextis noja yoltoc noixpa, niamoTECO. Huan teipa quitalis tetajtacolhua ipan nopa chivo quej monequi para techixtzacuulis inintajtacol huan teipa quititanis para yas huejca ipan nopa huactoc tali para quihuicas tetajtacolhua nozona huan ayecmo quema tacuepilis sempa.

¹¹ “Huan quema Aarón ya quimictijtos huan ya quitencajtos nopa becerro para techixtzacuulis itajtacolhua huan itajtacolhua iteixmatcahua, ¹² monequi quicuis se ticomit cati temitoc ica ticoli xahuantoc cati eltoc ipan taixpamit noixpa na, niamoTECO. Huan nojquiya quicuis ome tamojtzoli copali cati tatixti nelia nuechtic huan cati mijyotía ajhuiyac, huan calaquis ipan nopa cuarto iica nopa cortina. ¹³ Huan nozona ipan nopa cuarto campa na, niamoTECO, niitztoc, quitalis nopa copali ipan nopa tit cati quihualica. Huan quema quitatis nopa copali, ipocyo quichihuas se mixti para quixtzacuas nopa caxa itzajca para Aarón amo quitas huan amo miquis. Pampa ipan itzajca nopa caxa eltoc campa nijnextis tasojtacayot para masehualme. Huan iijtic nopa caxa oncas nopa tepacti ica nopa

camanali cati nijchihua amohuaya. ¹⁴ Teipa quihualicas se quentzi ieso nopa becerro huan ica imacpil quiatzejtzelhuis chicome huelta lixpa itzajca nopa caxa ica campa quisa tonati pampa nopona nitetasojta. Nojquiya taatzejtzelhuis ica imacpil seyoc chicome huelta iixmelac nopa caxa.

¹⁵ “Teipa quisas huan quimictis nopa oquich chivo cati techmacas quej se tacajcahualisti por tajtacoli para israelitame inintajtacolhua. Huan quihualicas quentzi ieso ipan nopa cuarto cati iica nopa cortina. Huan ica ya nopa, quiatzejtzelhuis iixco itzajca nopa caxa campa onca tasoj-tacayot para masehualme huan nojquiya quiatzejtzelhuis iixpa. Quena, san se quichihuas quej quichijqui ica nopa becerro ieso. ¹⁶ Huan quej nopa techixtzacuulis nopa tajtacoli cati israelitame quihuicaj cati quichijtoc ma amo eli tapajpactic nopa cuarto cati Más Tatzejtzeltolitic. Teipa san se quichihuas para quiixtzacuas nopa tajtacoli cati quichijtoc para nopa yoyon tiopamit ma amo eli tapajpactic. Pampa nopa yoyon tiopamit ica nopa cuarto cati Más Tatzejtzeltolitic mocahua tatajco campa mochiytoque nopa taj-tacolchijca israelitame cati amo tapajpactique noixpa. Yeca inintajtacolhua quichihua ma eli amo tapajpactic hasta calijtic ipan nopa yoyon tiopamit huan monequi anquitapajpacchihuase.

¹⁷ “Huan quema Aarón panos calijtic Campa Más Tatzejtzeltolitic para quiixtzacuas itajtacolhua, huan ifamilia inintajtacolhua, huan inintajtacolhua israelitame, huan nochi nopa tajtacoli cati quichijtoc para nopa cuarto ma eli amo tapajpactic, amo hueli itztos yon se masehuali ipan nopa yoyon tiopamit hasta yaya quisas. ¹⁸ Huan teipa yaya monequi quisas huan yas campa nopa taixpamit cati eltoc ipan calixpamit noixpa na, niamoTECO, para quiixtzacuas nopa tajtacoli cati onca nopona. Huan quicuis se quentzi ieso nopa becerro huan se quentzi ieso nopa oquich chivo huan quiajalos ipan nopa nahui icuacua nopa taixpamit cati eltoc ipan nahui inacasta. ¹⁹ Huan ica imacpil quitzejtzelos nopa esti chicome huelas ipan nopa taixpamit, huan ica ya nopa quitapajpacchihuas israelitame inintajtacolhua huan mocahuase tatzejtzeltolitic.

²⁰ “Huan quema Aarón tantosa quitapajpacchihua nopa cuarto cati Más Tatzejtzeltolitic, huan nopa yoyon tiopamit huan nopa taixpamit, tanahuatis ma quihualiquilica nopa oquich chivo cati itztoc. ²¹ Huan Aarón quitalis nochi ome imax ipan itzonteco nopa oquich chivo cati itztoc huan tech-pohuilis nochi inintajtacolhua huan inintaixpanolhua israelitame. Huan quema quitenpojtosa nochi tetajtacolhua, huajca nochi tetajtacolhua mocahuase ipan nopa tapiyali. Huan teipa se tacat cati yaya ya quitapejpenijtoc, ma quihuicas nopa tapiyali huan ma quicahuati huejca ipan nopa huactoc tali huan ayecmo quema tacuepilis. ²² Huan quema nopa tacat quimajc-ahuati nopa chivo, quihuicas nochi tetajtacolhua más huejca ipan se tali cati tahuel huactoc huan amo quema tacuepilis.

²³ “Huan teipa quema Aarón sempa calaquis yoyon tiopan calijtic monequi moquixtilis iyoyo huehueyac cati tachijchihuali ica lino cati moquentijtoya para calaquis ipan nopa cuarto Campa Más Tatzejtzeltolitic huan quicahuas iyoyo nopona ipan nopa cuarto Campa Tatzejtzeltolitic ten nopa yoyon tiopamit. ²⁴ Teipa mopajpacas ica at nopona ipan calixpamit ipan nopa yoyon tiopamit campa tatzejtzeltolitic, huan teipa sempa moquentis iyoyo cati huehueyac huan cati ipa quitequihua. Huan teipa hualas huan tech-macas nopa tacajcahualisti tatatili para ya huan nojquiya nopa seyoc tacajc-ahualisti para israelitame para quiixtzacuas itajtacolhua huan israelitame inintajtacolhua. ²⁵ Huan ichiyajca nopa tapiyali cati quitencajqqui quej se tacajcahualisti por tajtacoli, quitatis ipan nopa taixpamit. ²⁶ Huan nopa

tacat cati quitapejpenijque para quihuicas nopa oquich chivo huejca huan quititanis ipan nopa tali cati tahuel huactoc, quichihuas nopa tequit huan teipa quichicuenis iyoyo huan mopajpacas ica at. Huan huajca, quena, huelis calaquis sempa campa anmochijtoque.

²⁷ “Huan itacayo nopa becerro huan nopa oquich chivo cati elque tacajcahualisti por tajtacoli huan cati inieso quihuicac Campa Más Tatzejtzeltolitic para quiixtzacuas tajtacoli nozona, monequi quihuicase tahuel huejca ten campa anmochijtoque. Nozona quintatise ihuaya inincuetaxo, inincuitaxcol, inincuit huan nochi cati eltoya iniijtico. ²⁸ Huan teipa nopa cati quinhuicac, monequi quichicuenis iyoyo, huan mopajpacas ica at, huan teipa sempa hueli tacuepilis campa anmochijtoque.

²⁹ “Huajca ya ni nopa tanahuatilme cati monequi anquitepanitase nochipa: Ipan majtacti itequi nopa chicompa metzti ipan israelita calendario*, amo anquichihuase yon se tamanti tequit, pero monequi anmoechcapanose noixpa huan anmoyolcuesase. Ma amo tequitica israelitame, yon seyoc tali ehuan cati itztoque amohuaya, pampa ya ni se tanahuatili cati monequi nochi anquitepanitase. ³⁰ Ipan ni tonali nopa totajtzi quiixtzacuas amotajtacolhua para amechtapajpacchihuas huan yeca anmochihuase antapajpactique ten nochi amotajtacolhua noixpa na, niamoTECO.

³¹ Ipan nopa tonali monequi anmosiyajquetzase huan anmoyoltachilise para anmoechcapanose noixpa. Ya ni eli se tanahuatili cati monequi anquitepanitase para nochipa. ³² Huan teipa quema itztos seyoc hueyi totajtzi cati quiajalitise huan quiyocatalise para quiixtzacuas tajtacoli quej ipataca inintata Aarón, nopa yancuic totajtzi moquentis nopa yoyomit tatzejtzeltolitic cati tachijchihuali ica lino. ³³ Huan yaya quiixtzacuas tajtacoli por nopa cuarto Campa Más Tatzejtzeltolitic huan por nopa yoyon tiopamit, huan por nopa taixpamit. Huan nojquiya quiixtzacuas inintajtacolhua nopa totajtzitzi huan inintajtacolhua nochi israelitame.

³⁴ “Huajca xijmatica ya ni se tanahuatili cati monequi anquitepanitase para nochipa: Se huelta ipan se xihuit monequi techixtzacuilise inintajtacolhua israelitame.”

Huan Aarón quitoquili senquisu nochi ni tanahuatilme cati TOTECO quimacac Moisés.

17

San hueli temacase tacajcahualisti campa nopa yoyon tiopamit

¹ Teipa TOTECO quihui Moisés:

² “Xijmaca Aarón huan nochi israelitame ni tanahuatilme.

³ “Cati hueli israelita cati quimictis se huacax, se pilborregojtzi o se oquich chivo nechca ichaj o huejca ten campa anmochijtoque quihuicas tajtacoli noixpa. ⁴ Nochi tacajcahualisti huan nochi tapiyalme cati anquinmictise para tucualisti monequi achtohui xiquinhualicaca campa icalte nopa yoyon tiopamit para antechmacase na, niamoTECO. Sinta se masehuali quihuicas se tapiyali sejoyoc huan quimictis huan amo techmacatoc na quej niqijto, huajca quihuica tajtacoli pampa quitoyajqui esti. Huan nopa tacat monequi anquiquixtise ten campa amojuanti para ayecmo quema huelis itztos amohuaya. ⁵ Nimechmaca ni tanahuatili para israelitame ayecmo quema ma quimictica tapiyalme ipan sejoyoc. Monequi ma quinhualicaca campa icalte nopa yoyon tiopamit para techmacase na, niamoTECO. Ma quimacaca nopa totajtzi huan nozona quimictise nopa tapiyali quej se tacajcahualisti

* 16:29 16:29 Ipan septiembre o octubre ipan tocalendario.

para ma onca tayoltalili nohuaya na, niamoTECO. ⁶ Huan nopa totajtzi quiijtzelos nopa esti ipan nopa taixpamit cati eltoc nechca icalte nopa yoyon tiopamit. Huan nopa tachiyaicayot quitatis huan mijyotis ajhuiyac huan techyolpactis na, niamoTECO. ⁷ Huan yeca israelitame ayecmo quema hueli quinmacase tacajchualisti nopa ajacame campa hueli. Quej se tacanenca sihuat cati quicajtejtoc ihuehue, nopa israelitame tajtacolchijtoque miyac noixpa pampa nechcajtejtoc para quintoquilise ajacame. Ni tanahuatili para san nechca nopa yoyon tiopamit huélis quinmictise tapiyalme monequi xijtepanitaca amojuanti huan amoteipan ixhuihua cati tacajtiyase teipa.

⁸ “Huajca xiquinilhui para yon se israelita o seyoc tali ejquet cati itzoc amohuaya hueli quimictis se tapiyali o quitencahuas se tacajchualisti, ⁹ huan amo quihualicas campa icalte nopa yoyon tiopamit huan techmacas na, niamoTECO. Cati hueli cati quichihuas ya nopa, monequi anquiquixtise ten campa amojuanti para ayecmo quema hueli itzto ica anisraelitame. San nozona campa icalte nopa yoyon tiopamit nijtapejpenijtoc para antechmacase tacajchualisti huan san nozona anquinmictise tapiyalme.

TOTECO quiijo amo hueli quicuase esti

¹⁰ “Nojquiya sinta se israelita o se seyoc tali ejquet cati itzoc amohuaya quicuas esti, huajca na tahuel nicualanis ica nopa masehuali huan nijquixtis ten campa amojuanti para ayecmo quema huélis itzto ica anisraelitame. ¹¹ Pampa inemilis nopa tapiyali mocahua ipan ieso cati quipixtoc ipan itacayo. Huan nopa esti nimechmacatoc para anquiijtzelose ipan nopa taixpamit para ica antaxtahuase huan anquixtzacuase amotajtacolhua.

¹² “Huajca nimechilhuía anisraelitame: Yon se ten amojuanti huan yon se seyoc tali ejquet cati itzoc amohuaya amo hueli quicuas esti. ¹³ Huan sinta israelitame o seyoc tali ehuan tapehuatij huan quimictise se tamanti tapiyali o totot cati tapajpactic para anquicuase, monequi nozona campa quimictise, quitoyahuase talchi ieso huan ipani quitemilise tali. ¹⁴ Pampa inemilis nochí tamanti tapiyalme eltoc ipan inieso cati quipixtoque ipan ininacayo. Yeca niquinilhuijtoc ma amo quicuaca esti, pampa inieso nochí totome huan tapiyalme quinmaca nemilisti. Huajca cati hueli cati quicuas esti, monequi anquiquixtise ten campa amojuanti para ayecmo quema huélis itzto ica anisraelitame.

¹⁵ “Huan cati hueli israelita o seyoc tali ejquet cati quicuas inacayo se tapiyali cati mijqui ica iseltitzi, o cati quimictijque sequinoc tapiyalme, monequi quichicuenis iyoyo huan mopajpacas ica at. Huan noja mocahuas amo tapajpactic hasta tayohua. Teipa quema ajsis tayohua, mochihuas tapajpactic. ¹⁶ Pero sinta amo quichicuenis iyoyo, yon amo mopajpacas ica at, huajca quihuicas tajtacoli.”

18

Quenicatza ma mocahua tatzejtzeloltic se tacat ica isihua

¹ Huan TOTECO quiilhui Moisés:

² “Xiquinilhui nopa israelitame ni tanahuatilme.

“Na, niamoTECO Dios.

³ “Nimechilhuía amo xijchihuaca quej quichihuaj nopa masehualme cati ehuan ipan tali Egipto campa achtohuiya anitztoyaj.

“Yon amo xijchihuaca quej quichihuaj nopa masehualme cati itztoque ipan nopa tali Canaán campa nimechhuicas. Yon amo anquitoquilise inintanahuatilhua.

4-5 “Monequi anquitoquilise senquisa cati quijtohuaj notanahuatilhua huan anquichijtinemise nochi cati na nimechilhuía, pampa na niamoTECO Dios. Huan sinta anquinelto case huan anquichihuase senquisa cati quijtohuaj notanahuatilhua, huajca anquipantise nemeilisti por nopa tanahuatilme. Na, niamoTECO, nimechilhuía.

6 “Amo aqui hueli cochis ica seyoc cati iteixmatca cati san se inieso. Na niamoTECO, nimechilhuía.

7 “Se ichpocat amo hueli cochis ihuaya itata. Huan se telpocat amo hueli cochis ihuaya inana, pampa yaya inana huan amo quinamiqui para cochis ihuaya.

8 “Amo ximocuili se sihuat cati achtohui itztoya ihuaya motata.

9 “Amo xicochi ica se moicni o motepotz icni, masque elis san iichpoca motata, o san iichpoca monana. Amo hueli ticochis ihuaya masque nopa moicni tacatqui ipan san se cali mohuaya o tacatqui sejcayoc.

10 “Amo xicochi ihuaya se moixhui masque icone moichpoca o motelpoca. Elis quej timoixpanos ica moseli, pampa se moixhui eli quej ta.

11 “Amo xicochi ihuaya se ichpocat cati motepotz icni, pampa quitacatilti motepotz nana. Yaya eli moicni huan iichpoca motata.

12 “Amo xicochi ihuaya moahui cati motata isihua icni, pampa quipiyaj san se inieso ihuaya motata.

13 “Amo xicochi ihuaya moahui cati monana isihua icni, pampa quipiyaj san se inieso ihuaya monana.

14 “Amo xiquixpano motío cati motata itaca icni para ticochis ihuaya isihua, pampa eli moahui.

15 “Amo xicochi ihuaya moyex, pampa eli motelpoca isihua.

16 “Amo xicochi ihuaya isihua motaca icni pampa quej nopa tiquixpanos motaca icni.

17 “Amo xicochi ihuaya se sihuat huan nojquiya ihuaya iichpoca. Yon amo xicochi ihuaya se sihuat huan teipa ihuaya se iixhui, pampa san se inieso huan niquita tahuel fiero.

18 “Amo hueli timocuilis se sihuat huan nojquiya timocuilis iicni, pampa mocualancaitase. Pero sinta mosihua miquis, huajca, quena, hueli timocuilis mohuejpol.

19 “Amo xicochi ihuaya se sihuat quema esotemo.

20 “Amo xicochi ihuaya mohuampo isihua para amo tiquixpanos.

21 “Amo xijtemactili yon se mocone quej se tacajcahualisti para nopa teteyot cati itoca Moloc, pampa elis quej techtelchihua na, niamoTECO.

22 “Se tacat ma amo quichihua tamanti ihuaya seyoc tacat quej elisquía isihua, pampa ya nopa se hueyi tajtacoli.

23 “Yon se tacat amo hueli quichihuas tamanti ihuaya se tapiyali pampa nelía tahuel fiero. Huan se sihuat nojquiya amo hueli quichihuas tamanti ihuaya se tapiyali, pampa se hueyi tajtacoli huan amo quinamiqui.

24 “Huajca amo xijchihuaca yon se tamanti cati amechchihuas amo antapajpactique. Nopa masehualme cati itztoque ipan nopa talme campa nimechhuicas, quichijtoque miyac tamanti huan tahuel mochijtoque amo tapajpactique huan yeca niqinquixtis amoixpa. ²⁵ Quena, nochi nopa tali mocajtoc amo tapajpactique ica nopa miyac tamanti, huan yeca nochi nopa masehualme cati itztoque nozona niquintazacuiltis huan niqinquixtis.

26 Pero monequi anquitepanitase cati nimechilhuijtoc huan senquisa anquichijtinemise notanahuatilhua. Amo xijchihuaca yon se ten nopa fiero tamanti cati injuanti quichihuaj. Ni tanahuatili monequi anquitepanitase

nochi anisraelitame huan nochi seyoc tali ehuan cati itztoque campa amojuanti. ²⁷ Pampa nochi ni tamanti cati tahuel fiero quichijtoque nopa masehualme cati itztoque ipan nopa tali campa nimechhuicas. Yeca nopa tali mocajtoc tahuel amo tapajpactic noixpa. ²⁸ Amo xijchihuaca nopa tamanti cati amo cuali para amo nimechquixtis quej niquinquixti nopa masehualme cati nozona itztoque. ²⁹ Cati hueli cati quichihuas nopa tamanti cati fiero monequi anquiquixtise ten campa amojuanti para ayecmo quema huelis itztos ica anisraelitame. ³⁰ Huajca ximomocuitahuica miyac para xijneltocatinemica cati nimechilhuijtoc. Amo ximochihuaca amo tapajpactique noixpa ica nopa fiero tamanti cati quichihuayayaj nopa masehualme cati ama itztoque campa nimechhuicas. Na niamoTECO Dios.”

19

Quenicatza ma monemiltica xitahuac israelitame

¹ Huan TOTECO quiilhui Moisés:

² “Xiquinilhui nochi israelitame ni tanahuatilmé.

“Xiitzoca antatzejtzeltollique pampa na, niamoTECO Dios, nitatzejtzeltollic.

³ “Sese ten amojuanti monequi anquitepanitase amotata huan amonana.

“Huan monequi ximosiyajquetzaca ipan nochi nopa tonali para anmosiyajquetzase. Na, niamoTECO Dios, nimechilhuía.

⁴ “Amo quema sempa ximotemachica ipan teteyome huan taixcopincayome. Na, niamoTECO Dios cati nimechilhuía.

⁵ “Huan quema antechmacase se tacajcahualisti para ma onca tayoltalili ica na niamoTECO, monequi antechmacase quej quinamiqui, pampa sinta amo quinamiqui, amo nijselis. ⁶ Nopa nacat ten nopa tapiyali cati antechmacase para nopa tacajcahualisti monequi anquicuase nopa tonali quema antechmacase o tonili. Pero sinta mocaahas nacat hasta ihuicta, monequi anquitatise. ⁷ Huan sinta anquicuase se quentzi hasta hualhuicta, huajca ya nopa elis se tajtacoli noixpa huan na amo nijselis amotacajcahualis. ⁸ Sinta cati quicuas hasta huicta nopa tacajcahualisti cati se techmacas para ma oncas tayoltalili ica na, yaya quihuicas tajtacoli noixpa huan quiselis tatza-cuiltili pampa quichijtoc amo tapajpactic nopa tacajcahualisti cati eltoya tatzejtzeltollic para na, niamoTECO. Nopa masehuali monequi anquiquixtise ten campa amojuanti para ayecmo quema itztos ica anisraelitame.

⁹ “Quema ajsis nopa tonali para anpoxicase ipan amomil, amo xijcuica hasta campa milteno, yon amo xijtemoca cati mocajtoc, yon amo xijpepe-naca cati tepejtoc. ¹⁰ Huan san se anquichihuase ica amoxocomecamil. Amo xijtequica hasta inacasta amomil, yon amo xijtemoca cati mocajtoc o tepejtoc. Na niamoTECO Dios cati nimechilhuía.

¹¹ “Amo xitachtequica. Amo ximocajcayahuaca. Amo ximoistacahuica se ica seyoc.

¹² “Amo techtestigojquetzaca na quema anquijtohuaj anquichihuase se tamanti huan ya anquimatij amo anquichihuase. Sinta quej nopa anquichihuase, huajca anquisoquihuise notoca, na niamoTECO Dios.

¹³ “Amo aqui xijtaijyohuiltica, yon amo xitetachtequilica.

“Sinta se tequipanojquet tequiti ipan mochaj, amo xijchiya hasta seyoc tonali para tijmacas itaxtahuil.

¹⁴ “Amo xijtelchihua se tacat cati amo hueli tacaqui.

“Yon amo xijtali se tamanti campa nejnemi se popoyotzi para amo motepotanis. Monequi techimacastica na, niamoTECO.

15 “Se tequichijquet monequi tetajtolsencahuas xitahuac. Amo ma quichicoicneli cati feicneltzi, yon cati tapijpiya o cati hueyi. Nochi monequi ma quinchihuili san se.

16 “Amo xiquejelnamiqui se masehuali iniixpa sequinoc ichampoyohua quema yaya amo aqui.

“Amo xijtatelhui se masehuali ica se tamanti cati amo melahuac pampa tijnequi ma miqui. Na niamoTECO cati nimechilhuía.

17 “Amo xijcualancaita seyoc ipan moyolo.

“Quema seyoc mitzchihuilijtoc cati amo monequi, xiquilhui xitahuac cati itajtacol para yaya mocualtalis huan para amo tijhuicas tajtacoli nojquiya pampa amo teno tiquilhui.

18 “Amo quema xijcuelipili seyoc israelita cati mitzchihuilijtoc cati amo cuali, yon amo ximoyolilhui talojtitzti cati mitzchihuilijtoc para más timocualancamacas. Monequi xiquicneli seyoc quej ta moselti timoicnelía. Na niamoTECO cati nimechilhuía.

19 “Monequi xijtepanitaca notanahuatilhua.

“Amo xijmamalti mohuacax ica seyoc tamanti tapiyali.

“Ipan momila amo xijtoca ome tamanti xinachtí.

“Yon amo ximoquenti se yoyomit cati tachijchihuali ica lino icpat huan ica icpat ten ichcat.

20 “Sinta se tacat ten hueli quichihuas ihuaya se ichpoca tequipanojquet cati ya quiijtantoc seyoc, pero noja iaxca iteco huan ayemo itztoc majcajtoc, huajca monequi quiselis tatzacuilti nopa tacat, pero amo para miquis pampa nopa ichpocat noja eliyaya se tequipanojquet cati tacohuali. 21 Huan nopa cati tajtacolhijqui monequi quihuicas se oquich borrego campa icalte nopa yoyon tiopamit para quimacas TOTECO quej se tacajcualisti para cati quihuica tajtacoli. 22 Huan nopa totajtzi quixtzacuas nopa tacat itajtacolhua cati quichijtoc ica nopa oquich borrego cati elis nopa tacajcualisti para nopa tajtacoli cati quihuica, huan na, niamoTECO, nijtapojpolhuis.

23 “Huan quema ancalaquise ipan nopa tali huan anquitocase nochi tamanti cuahuit cati temaca itajca, nopa achtohui eyi xihuit amo anquicuase yon se itajca pampa monequi anquiritase nopa cuatajcyot para amo tapajpactic. 24 Huan ipan nopa nahui xihuit, nochi nopa cuatajcyot elis taiyocatalili para na, niamoTECO. Quena, nochi nopa cuatajcyot antechmacutilise para antechpaquillismacase. 25 Pero ipan macuili xihuit, quena, ya anhuelise anquicuase nopa cuatajcyot, huan sinta antechneltocase, nopa cuame noja más temacase inintajca.

26 “Amo hueli anquicuase yon se tamanti nacat ihuaya esti.

“Nojquiya amo quema xitetonalitaca, yon xijcahuilica seyoc ma amechtonalitas. Amo xitenahualhuica, yon amo xijcahuili seyoc ma quinahualhui seyoc para ta.

27 “Amo ximoximaca campa amocujtol, yon amo xijhuatanica san amotentz inacasta quej sequinoc quichihuaj para quitepanitase inintaixcopincayohua.

28 “Amo quema xijcococa amotacayo quej injuanti quichihuaj, yon amo xijtequica amotacayo quema anchocaj por cati mictoque. Amo xiquinixcopinaca taixcopincayome ipan amotacayo ica tinta. Na, niamoTECO, nimechnahuatía.

29 “Amo xijchihua para moichpoca ma moichpocapolo pampa ta tijtacanemilti. Pampa quej nopa anquichihuase para nopa tali cati nimechmacas ma eli tatelechihuali por ahuilnencayot huan quej nopa tafiero elis.

³⁰ “Xijtepanitaca nopa tonali cati nijtalijtoc para anmosiyajquetzase. Huan xijtepanitaca noyoyon tiopa. Na niamoTECO Dios.

³¹ “Amo quema xijtemoca se cati quincamanalhuia mijcatziti yon cati tetonalitaj. Yon amo quema xijtemoca se tamatquet, yon se cati mitzilhuis ten motonal pampa amechmahuisenpolos noixpa.

³² “Ximoquetzaca quema ajsi se huehuentzi o se nanatzi, huan xijnextilica miyac tatepanitacayot. Quema anquinextilíaj tatepanitacayot se huehuentzi o se nanatzi, antenextilíaj para antechimacasij na, niamoTECO.

³³ “Quema se seyoc tali ejquet hualas ipan amotal para mocahuas amohuaya, amo xijchihuilica cati amo cuali. ³⁴ Sinta se seyoc tali ejquet mocahuas amohuaya, monequi anquiritase quej se nopona ejquet. Quena, monequi xiquicnelica quej anmoicnelíaj pampa nojquiya anitztoyaj seyoc tali ehuaní ipan tali Egipto. Na, niamoTECO Dios, nimechnahuatía.

³⁵ “Quema antetajtolsencahuaj amo xitacajcayahuaca. Xijchihuaca san cati xitahuac. Quema anquitamachihuaj se tali o anquitamachihuaj se tenijqui ica ietica o ica imiyaca, monequi nochi nopa tatamachihuali elis senquisa xitahuac. ³⁶ San xijtequihuica tatamachihuali, teme, barras huan cualitros cati senquisa xitahuac para antatamachihuase. Amo quema xitecajcayahuaca yon pilquentzi. Na, niamoTECO Dios, cati nimechquixti ipan tali Egipto.

³⁷ “Huajca ximomocuitahuica para anquintepanitase nochi notanahuatilhua huan anquichijtinemise senquisa nochi cati nimechnahuatía, pampa na, niamoTECO, cati nimechilhúa.”

20

Tatzacuilti para cati amo quitepanita tanahuatilmé

¹ Huan TOTECO quiilhui Moisés:

² “Xiquinilhui nopa israelitame ni tanahuatili.

“Cati hueli cati itztoc amohuaya, masque se israelita o se seyoc tali ejquet, sinta temacas icone quej se tacajcahalisti para nopa teteyot cati itoca Moloc, monequi anisraelitame anquitepachose hasta miquis. ³ Na nimochihuas icualancaitaca huan ayecmo nijcahuilis itztos pampa quimacatoc icone nopa teteyot. Ica ya nopa quichijtoc amo tapajpactic noyoyon tiopa huan techpinahuajtjot na cati nitatzejtelolitic, huan quipinahuajtjot notoca. ⁴ Huan sinta israelitame ipan nopa tali cati nimechmacas amo quichihuilise cuenta quema seyoc temaca icone ica se teteyot huan amo quinequij quitepachose huan quimictise, ⁵ na nojquiya nimochihuas icualancaitaca yaya cati amo quichihuili cuenta huan nimochihuas incualancaitaca nochi ichampoyohua. Huan niqunquixtis ten anisraelitame para ayecmo quema huélis itztose amohuaya pampa amo quichihuili cuenta cati nopa tacat quichijqui. Amo san nijtatzacuiltis yaya cati temaca icone, pero nojquiya niquntatzacuiltis nochi masehualme cati yase quej ahuilnenca sihuame huan quihueyichihuase nopa teteyot Moloc. Nochi niqunquixtis ten campa amojuanti para ayecmo quema huélise itztose ica anisraelitame. ⁶ Sinta cati hueli masehuali yas campa se cati quijtohua quincamanalhuia mijcatziti o quijtohua para tetonalita, quinxtilia para nechcajtejtoc. Itztoc quej se tacanenca sihuat cati momecatijtoc. Huan na nimochihuas icualancaitaca huan nijquixtis ten campa amojuanti para ayecmo quema itztos ica anisraelitame.

⁷ “Huajca ximoiyocalica ten ni tamanti huan xiitztoca antatzejtelolitic, pampa na niamoTECO Dios cati nimechnahuatía. ⁸ Xiquinneltocaca

notanahuatilhua huan xiquinchijtinemica, pampa na, niamoTECO, cati nimechtatzejtzeloichihua.

⁹ “Cati quitelchihuas inana o itata, monequi xijmictica pampa tahuel quihuica tajtacoli noixpa.

¹⁰ “Sinta se tacat cochis ihuaya seyoc tacat isihua, huajca nopa tacat huan nopa sihuat monequi xiquinmictica.

¹¹ “Sinta se tacat cochis ihuaya itata isihua, huajca nopa tacat quiixpano itata, huan nopa ome, sihuat huan tacat, monequi xiquinmictica pampa tahuel quihuicaj tajtacoli noixpa.

¹² “Huan sinta se tacat cochis ihuaya iyex, huajca nopa ome monequi xiquinmictica pampa tahuel quiixpanotoque se ininteixmatca.

¹³ “Sinta se tacat cochis ihuaya seyoc tacat huan quichihuilis quej elisquía isihua, huajca nopa ome quichijtoque cati amo nijnequi niqitas huan monequi xiquinmictica. Quena, miquise pampa tahuel quihuicaj tajtacoli noixpa.

¹⁴ “Sinta se tacat mocuilis se ichpocat huan nojquiya mocuilis inana nopa ichpocat, huajca fiero. Nopa eyi monequi xiquinmictica huan xiquintatica para anquiquixtise nopa hueyi tajtacoli ten campa amojuanti.

¹⁵ “Sinta se tacat quichihuas cati amo quinamiqui ihuaya se tapiyali, huajca nopa tacat huan nopa tapiyali monequi xiquinmictica.

¹⁶ “Huan sinta se sihuat quichihuas cati amo quinamiqui ihuaya se tapiyali, huajca nopa sihuat huan nopa tapiyali monequi xiquinmictica. Miquise pampa tahuel quihuicaj tajtacoli noixpa.

¹⁷ “Sinta se telpocat cochis ihuaya se ichpocat cati itepotzicni pampa yaya itata iichpoca o huelis inana iichpoca, huajca nopa ome monequi anquihuicase iniixpa nochi israelitame huan xiquinmictica miyacapa para ayecmo hueli itztose campa anisraelitame para nochipa huan xiquinitaca quej mictoque. Pampa sinta se tacat cochis ihuaya isihua icni eli se tamanti cati nelía monequi tatzacuiliti.

¹⁸ “Sinta se tacat cochis ihuaya se sihuat ipan nopa tonali quema esotemo, huajca nopa ome monequi xiquinquixtica ten campa amojuanti para ayecmo quema itztose ica anisraelitame, pampa nopa tacat quiixtapo campa esotemo nopa sihuat huan nopa sihuat quinexti ieso.

¹⁹ “Amo xijchihua cati amo quinamiqui ihuaya moahui, yon monana isihua icni, yon motata isihua icni. Pampa sinta se masehuali ya nopa quichihuas ihuaya se iteixmatca cati nechca, nochi ome quihuicase tajtacoli huan quiselise tatzacuiliti.

²⁰ “Sinta se cochis ihuaya itío isihua, huajca quiixpano itío. Huan nopa ome quihuicase tajtacoli noixpa. Quema miquise, amo quipixtehuase yon se inincone.

²¹ “Sinta se tacat quicuulis isihua itaca icni, huajca quichihua se hueyi tajtacoli huan quiixpano itaca icni huan amo quipixtehuase yon se inincone.

²² “Monequi xijneltocaca huan xijchijtinemica nochi cati quiijtohua notanahuatilhua para amo amechisotas nopa tali campa nimechhuica para anitztotij. ²³ Amo xijchihuaca quej nopa masehualme cati ama itztoque nopona ipan nopa tali huan monequi niqinquixtis amoixpa. Quena, injuanti quichijtinetoque nochi ni fiero tamanti, huan yeca amo nijnequi niqinitas. ²⁴ Huajca na nijcajtoc nocamanal para anmoaxcatise inintal pampa na nimechmactilía para amoaxca. Nopa tali elis se cuali tali cati temacas itajca hasta mochahua.

“Na, niamoTECO Dios, cati nimechiyocatalijtoc ten nochi sequinoc masehualme.

²⁵ “Huan yeca monequi anquiniyocatalise nopa tapiyalme cati niqunita para tapajpactique para anquincuase huan injuanti cati amo tapajpactique huan amo cuali para anquincuase. Amo ximochihuaca amo antapajpactique noixpa ica yon se tapiyali o totot cati niqijtojtoc amo tapajpactic, o ica yon se tamanti cati mohuahuatatza talchi. Pampa na nimechiyocatalijtoc ten nopa tamanti cati amo tapajpactic. ²⁶ Monequi xiitztoca antatzejtzololtique noixpa, pampa na cati niamoTECO nitatzejtzololtic. Huan nimechiyocatalijtoc ten nopa sequinoc masehualme para xielica annoaxcahua.

²⁷ “Cati hueli tacat o sihuat cati quijtohua quincamanalhua inintonalhua mijcatziti o quicamanalhua se cati tetonalita, monequi xijmictica ica tet. Injuanti quihuicase tajtacoli por inimiqulis.”

21

Tanahuatilme para totajtziti

¹ Huan TOTECO quiilhui Moisés:

“Xiquinilhui nopa totajtziti cati itelpocahua Aarón para ma amo quitzquica ten hueli mijcatzi pampa quinchihuas amo tapajpactique noixpa.

² Huelis quiitzquise imijcatzi se ininteixmatca cati nelia nechca quej ininana, inintata, inioquichpil, inisihuapil, inintaca icni, ³ o se inisihua icni cati noja itzotc inimaco para quimocuitahuse pampa ayemo motahuicaltia. Ica injuanti quena hueli quitzquise inimijcatziti pampa ininteixmatcahua cati nelnechca. ⁴ Pero amo hueli mochihuase amo tapajpactique ica itacayo se mijcatzi cati san mosejcotilijtoya ihuaya se tacat cati eliyaya se ininteixmatca quej sequinoc tacame monequi quichihuase quema onca se mijcatzi.

⁵ “Nopa totajtziti amo hueli quinextis sinta motequipachohuaj quema miqui se masehuali. Amo quinamiqui quihuatanise inacasta inintentzo, yon amo hueli quitequise inintzoncal tahuel echcapa, yon amo quinamiqui quitequise inincuetaxo quej seyoc tali ehuan quichihuaj. ⁶ Monequi elise senquisa tatzejtzololtique para na, niamoTeco Dios. Pampa injuanti cati techmacase nopa tacajcahualisti tatatili huan nopa pantzi cati noaxca na, niamoTECO. Yeca monequi totajtziti elise tatzejtzololtique huan amo quiahuilmatise na notoca.

⁷ “Se totajtzi amo hueli mocuilis se sihuat cati ahuilnentoc, yon amo hueli mocuilis se sihuat cati moama sosolojtoc ihuaya ihuehue, pampa se totajtzi monequi mocahuas tatzejtzololtic para na, niiTeco Dios. ⁸ Se totajtzi monequi mocahuas taiyocalilili pampa yaya cati techmacas nopa tacajcahualisti noixpa na, niamoTeco Dios. Huajca ma mocahuaca tatzejtzololtique nopa totajtziti, pampa na, niamoTECO, nitatzejtzololtic, huan na cati nimechtatzejtzololchihua.

⁹ “Sinta se totajtzi iichpoca mochihuas se ahuilnenca sihuat, huajca moixpano huan quixpano itata. Huan monequi anquitatise hasta miquis.

Nopa hueyi totajtzi

¹⁰ “Huan nopa hueyi totajtzi cati ticajaltijtoque itzonteco ica nopa aceite para quinyacanas nochí sequinoc totajtziti, huan cati taiyocalilili para moquentis nopa yoyomit cati más tatzejtzololtic, amo hueli tenextilis para tahuel mocuesohua quema quiajsis se tequipacholi. Amo hueli quicahuas itzoncal ma elis fiero, yon amo huelis quitzayanas iyoyo quej quichihuaj sequinoc ica tequipacholi. ¹¹ Huan nopa hueyi totajtzi amo hueli mon-echcahuis campá eltoc se mijcatzi itacayo, masque eli inana o itata. Amo hueli mochihuas amo tapajpactic noixpa. ¹² Huan quema tequiti ipan nopa yoyon tiopamit, amo hueli quisas pampa quipiyaj se tequipacholi pampa

quichihuas amo tapajpactic nopa yoyon tiopamit. Taajtili nopa hueyi totajtzi para ma eli tatzejzeloltic huan taiyocatalili san para na, niamoTECO.

¹³ “Nopa hueyi totajtzi monequi mocuilis se ichpocat cati ayemo quixmati se tacat. ¹⁴ Amo hueli mocuilis se sihuat cati mijqui ihuehue o cati quicajtoc ihuehue, o cati ahuilnentoc. Monequi mocuilis se ichpocat cati nojquiya huala ipan nopa hueyi familia ten totajtzitzi. Monequi elis se cati nella cuali ichpocat. ¹⁵ Pampa monequi se totajtzi quitepanitas TOTECO itanahuatil para iconehua ma elica tapajpactique noixpa. Na niamoTECO cati nimechtatzejzelolchihua.”

Ajquiya injuanti amo hueli mochihuase totajtzitzi

¹⁶ Huan TOTECO quiilhui Moisés:

¹⁷ “Xiquilhui Aarón ni tanahuatili. Ama huan teipa yon se moixhui cati quipiya se tenijqui cati amo cuali ipan itacayo amo huelis mochihuas totajtzi, yon amo hueli monechcahuis para techmacas nopa pantzi cati eltoc para na, niamoTeco Dios. ¹⁸ Pampa yon se tacat cati amo ajsitoc itacayo amo hueli monechcahuis para quichihuas nopa tequit. Huajca sinta se tacat popoyotzi, o metzcototic, o lipintic itacayo, o sinta quipiya miyac ixocpilhua o imacpilhua, ¹⁹ o sinta quilecuenijtoc imax o iicxi, ²⁰ o sinta cuitapanponpontic, o tahuel amo huejcapantic, o amo cuali se iixteyol, o sahuati, o cocoti, o sinta quicocojtoc itecsis, amo hueli tequitis quej se totajtzi. ²¹ Huajca masque itztoc se iixhui nopa totajtzi Aarón, amo hueli techmacas, niamoTECO, se tacajcahualisti ipan tit sinta amo ajsitoc itacayo. Yon amo hueli techmacas nopa pantzi cati noaxca na, niamoTeco Dios. ²² Pero, quena, ininconeuhua totajtzitzi cati amo ajsitoc inintacayo hueli quicuase nopa tacualisti cati huala ten nopa tacajcahualisti, masque se tacualisti cati tatzejzeloltic, o cati tahuel tatzejzeloltic. ²³ San amo hueli calaquis para quinechcahuis nopa cortina pampa amo ajsitoc itacayo, yon amo hueli monechcahuis campa nopa taixpamit. Melahuac amo hueli quichihuas nopa tequit pampa quichihuas notiopa amo tapajpactic. Na, niamoTECO, cati niqiniyocatalijtoc nopa totajtzitzi.”

²⁴ Huajca Moisés quiilhui Aarón nochi ya ni huan nojquiya quinilhui itelpocahua huan nochi nopa israelitime.

22

Tanahuatilme para tamanti tatzejzeloltic

¹ Teipa TOTECO quiilhui Moisés:

² “Xiquinilhui Aarón huan itelpocahua ma momocuitahuica miyac para amo ma quichihuaca amo tapajpactic se tacajcahualisti cati tatzejzeloltic cati techmacaj israelitime. Amo hueli quiahuilmalise notoca na, niamoTECO Dios, huan notacajcahualis.

³ “Sinta se totajtzi cati amo tapajpactic quinechcahuis se tapiyali, o seyoc tamanti tacajcahualisti cati tatzejzeloltic cati se israelita quihualicatoc para techmacas, huajca monequi xijquixti nopa totajtzi para ayecmo quema huelis itzto noixpa. Ni tanahuatili elis para totajtzitzi ama huan nojquiya para moteipan ixhuihua cati mochihuase totajtzitzi teipa. Na niamoTECO nimechilhuía.

⁴ “Aarón, yon se ten moixhuihua cati quipiya nopa tacayo palancaocolisti, o cati atemoj ipan inintacayo amo hueli quicuas nopa tacajcahualisti cati tatzejzeloltic. Pero quema ya mochicajtoc huajca, quena, huelis quicuas.

“Nojquiya elis amo tapajpactic cati hueli totajtzi cati quinechcahuis se mijcatzi, o temotos ixinacho, ⁵ o quitzquis se tapiyali cati mohuahuatatza

talchi, o quiitzquis se tacat cati amo tapajpactic. ⁶ Cati hueli totajtzi cati amo tapajpactic ica ten hueli tamanti mocahuas amo tapajpactic noixpa, huan amo hueli quicuas nopa tacualisti tatzejtzololitic cati huala ten tacajcahualisti. ⁷ Pero quema tayohuiyas huan maltis, elis tapajpactic. Huan huajca, quena, hueli quicuas nopa tacajcahualisti cati tatzejtzololitic pampa ya nopa itacualis. ⁸ Se totajtzi amo hueli quicuas inacayo se tapiyali cati mijqui ica iselti, o cati quimictijque sequinoc tapiyalme, pampa sinta quicuas, huajca mochihuas amo tapajpactic noixpa. Na niamoTECO nimechilhuía.

⁹ “Huajca xiquinilhui nopa totajtzitzi ma qitoquilca nochi ni tanahuatili ica miyac tatepanitali para amo quiixpanose huan amo miquise por inintacol. Na niamoTECO cati niquintatzejtzololchihua.

¹⁰ “Yon se tacat cati amo totajtzi amo huелиs quicuas ten nopa tacajcahualisti cati tatzejtzololitic.

“Yon amo hueli quicuas se tacat cati san quipaxalohua se totajtzi, o san quipalehuía se totajtzi se ome tonati.

¹¹ “Pero sinta nopa totajtzi quicohuas se tequipanojquet ica itomi, huajca nopa tequipanojquet, quena, hueli quicuas nopa tacajcahualisti cati tatzejtzololitic. Huan sinta nopa tequipanojquet quinpiyas iconehua, huajca, injuanti nojquiya huelise quicuase nopa tacajcahualisti cati tatzejtzololitic cati nopa totajtzi quinmacas.

¹² “Huan sinta iichpoca se totajtzi motahuicaltis ihuaya se tacat cati amo totajtzi, huajca nopa ichpocat ayecmo huелиs quicuas nopa tacajcahualisti cati tatzejtzololitic. ¹³ Pero sinta miquis ihuehue o quicahuas ihuehue, huan amo quinpiyas iconehua, huan sempa tacuepilis ipan ichaj itata cati eli se totajtzi, huajca nopa ichpocat sempa huелиs quicuas itata itacualis quej quema eliyaya pisiltzi. Pero se tacat cati amo quiipiya teno ica nopa totajtzi amo hueli quicuas nopa tacualisti.

¹⁴ “Sinta se acajya mocuapolos huan quicuas nopa tacajcahualisti cati tatzejtzololitic, huajca monequi quicuepas san se imiyaca quej cati quicua-jqui, huan noja quipihuilis seyoc 20 por ciento. Huan quihualicas huan quimacas nopa totajtzi. ¹⁵ Huajca nopa totajtzitzi monequi ma quitajtachilica aquiya injuanti quincahuilise ma quicuaca nopa tacajcahualisti para amo quichihuase amo tapajpactic nopa tacajcahualisti cati tatzejtzololitic cati nopa israelitame techiyocatalilijtoque na, niamoTECO. ¹⁶ Pampa sinta se quiixpanos ni tanahuatili, quihuicas tajtacoli huan monequi quiselis tatzacuiltili. Na niamoTECO cati nijtatzejtzololchihua nopa tacajcahualisti.”

Taya tamanti tapiyalme ma temacaca quej tacajcahualisti

¹⁷ Huan TOTECO quiilhui Moisés:

¹⁸ “Xiquilhui Aarón, huan iconehua, huan nochi sequinoc israelitame ni tanahuatilme. Quema quinequis temacas tacajcahualisti cati hueli israelita o cati hueli seyoc tali ejquet cati itztoc campa amojuanti pampa tatestigojquetztoc para quichihuas se tamanti para na, o pampa san ica ipaquilis quinequi techmacas se tacajcahualisti, ¹⁹ huajca para nijselis monequi elis se becerro, se oquich borrego, o se oquich chivo cati senquisa cuali. ²⁰ Amo hueli techmacas yon se tapiyali cati quiipiya ipan itacayo se tamanti cati amo cuali, pampa amo nijselis.

²¹ “Sinta se masehuali quinequis techmacas, niamoTECO, se tacajcahualisti para ma onca tayoltalili ica na pampa tatestigojquetztoc, o pampa san ica ipaquilis quinequi techmacas se tacajcahualisti, huajca monequi elis se toro, o se borrego, cati amo teno cati amo cuali quiipiya itacayo para nijselis. ²² Amo techmacaca na, niamoTECO, se tapiyali cati amo tachiya,

o mometzpostectoc, o cotontoc imax, o cocoti, o sahuati, o quipiya seyoc tamanti cocolisti. Se tapiyali quej nopa amo quema xijtalica ipan notaixpa, niamoTECO. ²³ Pero sinta anquippiyaj se toro, o se pilborregoitzu cati quipiya miyac o amo miyac ixocpilhua, o quipiya cototzi o huehueyac se imetz, huajca quena, huelis antechmacase quej se tacajcahalisti cati san antechmacajica amopaquilis. Pero ni tamanti tapiyalme amo huelis antechmacase quej se tacajcahalisti quema monequi tacajcahalisti pampa antatestigojquetztoque cati anquichihuase. ²⁴ Nojquiya san se elis ni tanahuatili quema anajsise ipan amotal. Para tacajcahalisti, monequi se tapiyali cati senquisacualí. Amo quema techmacaca se tapiyali cati cocojtoc itejquis, o motejzontoc, o quihuahuatzojtoc itejquis o quiquixtilijtoque itecsis. ²⁵ Yon amo xiquincahuilica nopa seyoc tali ehuani ma quitencahuaca se tacajcahalisti quej nopa para elis tacualisti para na, niamoTeco Dios. Sinta quihualicase se tapiyali cati amo ajsitoc itacayo huan quinequise techmacase na, niamoTeco Dios, amo nijselis pampa amo tapajpactic. Amo cuali nochi itacayo.”

Quenicatza ma quinmictica tapiyalme

²⁶ Huan TOTEKO quiilhui Moisés:

²⁷ “Quema tacatis se becerro, se pilborregoitzu, o se piloquich chivojtzu monequi mocahuas ihuaya inana para chicome tonati. Pero quema quipiyas chicueyi tonati, huelis anquitequihuse quej se tacajcahalisti cati anquitatise para na, niamoTECO.

²⁸ “Ipan san se tonali amo hueli anquimictise se huacax ihuaya icone, o se sihua borrego ihuaya icone.

²⁹ “Quema antechmacase se tacajcahalisti para antechtascamatilise, monequi anquichihuase quej quinamiqui para nijselis. ³⁰ Monequi anquicuase nopa tapiyali inacayo ipan nopa tonali quema antechmacase. Amo hueli anquicahuase se quentzi para anquicuase hasta seyoc tonali. Na niamoTECO cati nimechilhuía.

³¹ “Xijtepanitaca notanahuatil. Quena, xijtoquilijtinemica senquisacati quijtohua pampa na, niamoTECO.

³² “Amo xijtequihuica notoca quej elisquía ten hueli tocyot pampa nitatzejzeloltic. Huan monequi nochi israelitame ma techiyocatalica huan ma techixmatica para niitztoc niyoca pampa nitatzejzeloltic. Huan na niamoTECO cati nimechtatzejzelolchihua. ³³ Na cati nimechmaquixti ipan tali Egipto para nielis niamoTECO huan niamoDios.”

23

Nopa ilhuime huan tonali para mosiyajquetzase

(Nm. 28:16-25)

¹ Huan TOTEKO quiilhui Moisés:

² “Xiquinilhuiti nopa israelitame ni tanahuatilme. Ya ni nopa tonali cati monequi anquiyocacahuase para na, niamoTECO para anquichihuase ilhuit huan antechhueyimatisé. Xiquintocaxtalica tonali para anquippiyase tasentili cati tatzejzeloltique. Huan ipan ni tonali nochi israelitame ma mosentilica huan ma techhuyitalica. Huan ya ni nopa tonali:

³ “Sesen samano para chicuase tonati antequitise, pero ipan tonali chicome, amo anquichihuase yon se tequit. Senquisacati mosiyajquetzase ipan nopa chicompa tonali. Elis se tonali tatzejzeloltic para anmosentilise huan antechhueyichihuase. Quej ni anquichihuase ipan sesen samano. Nopa chicompa tonali elis tatzejzeloltic huan taiyocatalili para na, niamoTECO.

Nopa ilhuime ipan sesen xihuit

⁴ “Huan ya ni eltoc nochi nopa tonali para anilhuichihuase huan anquiyase se tanechicoli tatzejtzeltolitic ipan sesen xihuit para antech-hueyichihuase na, niamoTECO:

Nopa ilhuit ten Pascua

⁵ “Nopa ilhuit ten Pascua monequi xijchihuaca ipan 14 itequi nopa achtohui metzti ipan amoisraelita xihui*, huan pehuas quema temo tonati ica tiotac.

⁶ “Ipan ne seyoc tonal, anpehuase anquichihuase nopa ilhuit ten pantzi cati amo quipiya tasonejcaoyot. Para chicome tonati san hueli anquicuase pantzi cati amo quipiya tasonejcaoyot. ⁷ Ipan nopa achtohui tonali ten nopa chicome tonati, anmosentilise ipan se tanechicoli tatzejtzeltolitic, huan ipan nopa tonali amo anquichihuase yon se tequit. ⁸ Huan ipan nochi nopa chicome tonati monequi anquitatise tacajcahualisti para na. Huan ipan nopa tonali chicome nojquiya anquiyase se tanechicoli tatzejtzeltolitic huan amo antequitise.”

Nopa ilhuit ten nopa tayacanca pixquisti

(Nm. 28:26-31)

⁹ Huan TOTECO quiilhui Moisés:

¹⁰ “Xiquinilhui israelitame ni tanahuatilme. Quema ya anajsitose ipan nopa tali cati nimechmacas huan ya anquixcatose cebada, monequi anquihuicase campa nopa totajtzi nopa achtohui manajo cati anquixcase. ¹¹ Anquihuicase ipan ne seyoc tonali quema ya manoc nopa tonali quema anmosiyajquetzque. Huan nopa totajtzi quihuisos noixpa niamoTECO, huan na nijselis quej se tacajcahualisti. ¹² Ipan nopa tonali nojquiya antechmacase se pilborregojtzi quej se tacajcahualisti tatatili. Monequi nopa pilborregojtzi quipiyas se xihuit huan amo quipiyas ipan itacayo yon se tamanti cati amo cuali. ¹³ Huan ihuaya ni pilborregojtzi monequi antechmacase se tacajcahualisti cati elis nahui kilos huan tajco ten harina cati tamaneloli ica aceite. Monequi anquitatise noixpa huan nelía techpactis. Nojquiya ihuaya monequi antechmacase se litro xocomecat iayo quej se tacajcahualisti cati anquitoyahuae noixpa. ¹⁴ Huan quema ayemo anquihuicaj ni tacajcahualisti, amo huelis anquicuase yon se pilquentzi ten nopa cebada ipan amomil. Amo hueli anquicuise iyol, yon amo hueli anquicacatzose iyol, yon amo hueli anquichihuase pantzi. Ya ni elis se tanahuatili cati monequi anquitepanitase para nochipa.

Nopa ilhuit ten pixquisti o ten Pentecostés

¹⁵ “Huajca nopa achtohui tonali anmosiyajquetzase huan nopa seyoc tonali anquihualicase nopa manajo yancuic huan teipa xipehuaca xijpohuaca chicome samano. ¹⁶ O huelis anquipohuase 50 tonali o chicome sábados cati ipan anmosiyajquetzaj, huan huajca anquihuicase seyoc tacajcahualisti cati quisa ten cebada para na, niamoTECO. ¹⁷ Anquihualicase ome pantzi ten amochajchaj para se tacajcahualisti cati anquihuisose noixpa, niamoTECO. Nopa pantzi monequi anquicaltalise ica se nahui kilos ten harina ica tasonejcaoyot. Ya ni elis se tacajcahualisti ten nopa tayacanca pixquisti. ¹⁸ Huan ica nopa pantzi nojquiya antechmacase chicome pilborregojtzitzi cati sanoc quipiyaj sese xihuit cati amo teno cati amo cuali quipiyaj. Nojquiya techmacaca se becerro huan ome oquich borregojme

* **23:5** 23:5 Quemantica ni tonali huetzi ipan itamiya marzo huan quemantica ipan ipejya abril ipan tocalendario ama.

huan nochi elise tacajcahualisti tatatili para na, niamoTECO. Huan nojquiya techmacaca nopa tacajcahualisti ten harina huan nopa tacajcahualisti cati tatoyahuali noixpa cati monequi techmacase ihuaya.

¹⁹ “Huan nojquiya antechmacase se oquich chivo quej se tacajcahualisti por tajtacoli, huan antechmacase ome pilborregojtizti quej se tacajcahualisti para ma onca tayoltalili ica na. ²⁰ Huan nopa totajtzitzi quinhuisose nopa ome pilborregojtizti noixpa, niamoTECO. Nojquiya quihuisose nopa ome pantzi ten nopa tayacapan pixquisti. Nochi ni tacajcahualisti elis taiyocatalili para na, niamoTECO, huan monequi anquinmactilise nopa totajtzitzi para ma eli inintacualis.

²¹ “Huan ipan san se nopa tonali anteyolmelahuase para oncas se tanechicoli cati tatejtzeltic para antechhueyichihuase. Amo huelis anquichihuase yon se tequit ipan nopa tonali. Ya ni elis se tanahuatili cati monequi nochi anisraelitame huan amoteipan ixhuihua anquitepanitase para nochipa.

²² “Huan quema anpixcase ipan amomila ipan nopa tali, amo xipixaca hasta campa amomilteno, yon amo xijpepenaca cati tepejtoc talchi. Ya nopa xijcahuaca para ma quipepenaca cati teicneltizti huan cati seyoc tali ehuan. Na niamoTECO Dios cati nimechilhuía.”

Nopa ilhuit ten tapitzalme

(Nm. 29:1-6)

²³ Huan TOTECO quiilhui Moisés:

²⁴ “Xiquinilhui israelitame ni tanahuatilme. Nopa achtohui tonali ipan nopa chicompa metzti ipan amoisraelita calendario † elis tatejtzeltic. Monequi anquielnamiquise quej se tonali para anmosiyajquetzase. Pero monequi anmosentilise ipan se tanechicoli cati tatejtzeltic para antechhueyimatise. Huan anquinpitase tapitzalme para antenotzase ipan ni ilhuit ten tapitzali. ²⁵ Huan ipan nopa tonali amo teno tequit anquichihuase, san antechmacase tacajcahualisti ipan tit.”

Nopa Tonali Para Quiixzacuas Tetajacolhua

(Nm. 29:7-11)

²⁶ Nojquiya TOTECO quiilhui Moisés:

²⁷ “Huan ipan nopa majtacpa tonali ipan nopa chicompa metzti anquichihuase nopa Tonali para Quiixzacuas Tetajacolhua. Ipan ni tonali anmosentilise ipan se tanechicoli cati tatejtzeltic para antechhueyimatise. Huan monequi anmosahuase, huan anmoicnonequise por amotajacolhua. Huan anquitencahuase se tacajcahualisti ipan tit noixpa, niamoTECO. ²⁸ Ipan nopa tonali amo anquichihuase yon se tequit, pampa elis nopa Tonali Para Quiixzacuas Tetajacolhua. ²⁹ Cati hueli masehuali cati amo mosahuas huan amo moicnonequis por itajacolhua ipan nopa tonali, monequi xijquixtica ten campa amojuanti para ayecmo quema itztos ica anisraelitame. ³⁰ Huan cati hueli cati quichihuas ten hueli tequit ipan nopa tonali, na nijtontamiltis para ayecmo itztos ica anisraelitame.

³¹ “Quena, amo hueli anquichihuase yon se tequit. Ni tanahuatili monequi anquitepanitase amojuanti huan amoteipan ixhuihua para nochipa. ³² Quena, ya ni elis se tonali para anmosiyajquetzase, huan monequi anmosahuase huan anmoicnonequise noixpa por amotajacolhua. Ni Tonali Para Quiixzacuas Tetajacolhua pehuas ica tiotac ipan nopa chicnajpa tonali ipan nopa metzti huan huejcahuas hasta ne seyoc tonali ica tiotac.”

† **23:24** 23:24 Quemantica ni tonali huetzi ipan itamiya septiembre huan quemantica ipan ipejya octubre ipan cati ama tocalendario.

Nopa ilhuit quema quichihuase pilxajcaltzitzi
(Nm. 29:12-40)

³³ Huan TOTECO quiilhui Moisés:

³⁴ “Xiquinilhui israelitame ni tanahuatili. Ipan 15 itequi nopa chicompa metzti ipan amocalendario, anquipehualtise para anquielnamiquise nopa ilhuit quema anquichihuase pilxajcaltzitzi. Huan anilhuichihuase noixpa, niamoTECO, para chicome tonati. ³⁵ Ipan nopa achtohui tonali ten nopa chicome tonati anmosentilise ipan se tanechicoli cati tatzejtzeltic para antechhueyichihuase. Ipan nopa tonali, amo hueli anquichihuase yon se tamanti tequit. ³⁶ Huan ipan nochi nopa chicome tonati, anquitatise tacajchualisti para na, niamoTECO. Huan ipan nopa chicueyi tonali anmosentilise ipan seyoc tanechicoli cati tatzejtzeltic para antechhueyichihuase. Ya ni itamiya nopa tanechicoli ten ni hueyi ilhuif. Ipan nopa tonali nojquiya amo aqui hueli quichihuas yon se tequit.

³⁷ “Huajca nica nimechilhuijtoc nopa tonali ipan se xihuit cati nijtalijtoc para anmosentilise huan anilhuichihuase para na, niamoTECO. Huan nojquiya ipan ni tonali anquitatise miyac tacajchualisti para na. Nojquiya anquitencahuase tacajchualisti ipan tit para na. Antechmacase tacajchualisti tatatili, tacajchualisti ten harina, huan tacajchualisti ten tapiyalme cati anquinmictijtoque huan tacajchualisti cati anquityohuase noixpa. Sesen tacajchualisti antechmacase ipan nopa tonali quema quinamiqui.

³⁸ Nochi ni tacajchualisti elis iyoca ten nopa tacajchualisti cati monequi antechmacase ipan nopa tonali para anmosiyajquetzase ipan sesen samano. Nojquiya nochi ya ni eltoc iyoca ten nopa tacajchualisti cati antechmacatijihualahuij, o nopa tacajchualisti cati antechmacase ica amoseltitzitzi quema antatestigojquetzase para anquichihuase se tenijqui o se tacajchualisti cati anquitencahuase noixpa pampa san ipan amoyolo quisa para anquichihuase.

³⁹ “Ipan 15 itequi nopa chicompa metzti, quema ya anpixaque, anquielnamiquise ni ilhuit noixpa, niamoTECO. Ni ilhuit quema anquichihuase pilxajcaltzitzi anquichihuase para chicome tonati. Huan ipan nopa achtohui tonali huan ipan nopa chicueyi tonati, monequi anmosiyajquetzase.

⁴⁰ Ipan nopa achtohui tonali ten ni ilhuit anquicuisse imacuayo cuame cati yejyectzitzi huan cati quipiyaj inintajca. Anquicuisse imacuayo apachij cuame huan inimacuayo cuame cati quipiyaj inixihuiyo huan moscaltíaj campá hueyat. Huan ica ya nopa anquichihuase pilxajcaltzitzi para ipan anitztose para chicome tonati huan anpaquise noixpa na, niamoTECO Dios.

⁴¹ Sesen xihuit anquichihuase ni ilhuit para chicome tonati para na. Ya ni eli se tanahuatili cati monequi anquitepanitase nochi anisraelitame cati ama anitztoque huan nochi cati teipa tacatise. ⁴² Ipan nopa chicome tonati nochi anitztose ipan pilxajcaltzitzi. ⁴³ Ica ni ilhuit, anquielnamiquise quema nimechquixti ipan tali Egipto huan nimechchijqui anitztose ipan pilxajcaltzitzi. Na niamoTECO Dios cati nimechilhuiá.”

⁴⁴ Huajca Moisés quinyolmelajqui nopa israelitame ten nochi nopa ilhuime cati TOTECO quiixquetztoya para tiquelnamiquise.

24

Nopa aceite para taahuilme yoyon tiopa calijtic
(Éx. 27:20-21)

¹ Huan TOTECO quiilhui Moisés:

2 “Xiquinnahuati israelitame ma quihualicaca aceite tzalantic para taahuili ipan Tiopamit. Nopa aceite monequi hualas ten olivas cati tatejtzonali. Ica nopa cuali aceite, nopa taahuilme amo quema sehuise. 3-4 Ma quinmocuitahui miyac nopa taahuilme ipan nopa taahuil quetzali cati senquisu oro. Quena, nopa taahuilme iixmelac nopa cortina cati quitzacua campa nocaxa monequi tatatose nochipa noixpa, niamoTECO. Huan elis Aarón itequi para quinpajpacas huan quintequilis aceite nopa taahuilme ijnaloc huan tiotac. Huan Aarón iixhuihua monequi quitepanitase ni tanahuatili para nochipa.

Nopa pantzi quinextía para TOTECO Itztoc Tohuaya

5-6 “Sesen chicueyi ipan nopa tonali para anmosiyajquetzase, nopa totajtzí monequi quitalis 12 pantzi ipan nopa mesa ten oro cati eltoc noixpa, niamoTECO. Sesen ten nopa pantzi monequi quichihuase ica nahui kilos huan tajco ten harina cati tahuel cuechtic. Huan quintecpanas ica ome tatecpicholi. Sesen tatecpichti quipiyas chicuase pantzi. 7 Huan ipan sesen pamit ten nopa pantzi quitalis copali cati nelía cuali. Ni copali teipa elis se tacajcualisti cati quitatis ipan taixpamit para techmacas, na niamoTECO. Huan nopa pilquentzi copali cati quitatis quinextis para techmaca senquisu nochí nopa pantzi. 8 Huan sesen chicueyi ipan nopa tonali para anmosiyajquetzase, nopa totajtzí monequi quitalis nopa pantzi noixpa quej se tanextilijcayot ten nopa camanali cati nijchijtoc inihuaya nochí israelitame. 9 Huan nopa pantzi elis para Aarón huan iconehua ma quicuaca, pero monequi quicuase campa tatzejtzeloltic. Quena, nozona ma quicuaca pampa nopa pantzi eltoc cati más tatzejtzeloltic ten nochí tamanti tacajcualisti cati techmacatoque ipan tit. Huan na, niamoTECO, niqunimaca ma quicuaca nopa totajtzízi huan ininconehua para nochipa.”

Tatzacuilitli para cati quitelchihuas o quiahuilmatís TOTECO

10 Itztoya se telpocat cati inana eliyaya se israelita sihuat, pero itata eliyaya se tali Egipto ejquet. Huan se tonali nopa telpocat mocualani ihuaya se israelita tacat nozona campa nochí mochijtoyaj. 11 Huan quema mohuilanayayaj, nopa telpocat quitelchijqui TOTECO. Huan sequinoc quihuicaque iixpa Moisés para ma quitajtolsencahua. Inana nopa telpocat eliyaya Selomit cati eliyaya iichpoca Dibri huan hualayaya ipan nopa hueyi familia Dan. 12 Huan quitzajque nopa telpocat huan quichixque para TOTECO ma quiilhui Moisés taya tatzacuilitli monequi quiselis. 13 Huan TOTECO quiilhui Moisés:

14 “Xijquixti nopa telpocat cati nechtelchijqui huejca ten campa anmochi- jtoque. Huan ma hualaca nochí cati quicajque quema nechtelchijqui, huan ma quitalica inimax ipan itzonteco. Huan teipa nochí israelitame ma quimaquilica ica tet hasta quimictise. 15 Huan xiquinilhui israelitame sinta acayja techtelchihuas na, niamoTECO, o quitelchihuas notoca, nojquiya quiselis nopa tatzacuilitli. 16 Quena, cati techtelchihuas na, niamoTECO, monequi miquis, huan monequi nochí israelitame quitepachose. Ni tanahu- atili elis san se para israelitame huan para seyoc tali ehuaní. Sinta se techtelchihuas monequi anquimictise.

17 “Nojquiya sinta se tacat quimictis seyoc, nopa tacat cati temicti monequi nojquiya xijmictica.

18 “Cati quimictis se tapiyali cati seyoc iaxca, monequi quicuepilis seyoc tapiyali cati san se.

19 “Sinta se acayja quicocos seyoc, monequi nojquiya san se anquicocose.

20 Sinta se acayja quipostequilis seyoc iomiyo, huajca nojquiya monequi

anquipostequilise iomiyo. O sinta se acajya quiixteyolquixtis seyoc, huajca nojquiya monequi anquiixteyolquixtise. Huan sinta se acajya tetancochtepehuas, huajca nojquiya monequi anquitancochtepehuase. Quena, quej se acajya quichihuilijtoc seyoc, monequi nojquiya anquichihuilise.

²¹ “Cati quimictis seyoc itapiyal, monequi quicuepas seyoc tapiyali cati san se. Pero sinta quimictis seyoc masehuali, monequi nojquiya xijmictica.

²² “Onca san se ni tanahuatili para nochi masehualme, masque israelitame o seyoc tali ehuan. Na, niamoTECO Dios, cati nimechnahuatia.”

²³ Huajca teipa Moisés quincamanalhui israelitame. Huan quihuicaque nopa telpocat cati quitelchijtoya TOTECO hasta huejca ten campa mochijtoyaj huan nozona nochi quimictijque ica tet. Huajca nopa israelitame quichijque senquisa quej TOTECO quinahuatijtoya Moisés.

25

Nopa xihuit quema mosiyajquetzas tali

¹ Quema Moisés itztoya ipan tepet Sinaí, TOTECO quihhui:

² “Xiquinilhui nopa israelitame para quema ya anajsitose ipan nopa tali cati nimechmacas, nopa tali iseli monequi mosiyajquetzas sesen huelta quema ajsis xihuit chicome. Huan ica ya nopa anquinextise para nopa tali noaxca na, niamoTECO. ³ Para chicuase xihuit hueli antatojtocase ipan amomila. Nojquiya hueli anquitzontequise nopa xocomecame inimacuayo para más temacas, huan hueli anquitequise itajca. ⁴ Pero ipan xihuit chicome, nopa tali monequi mosiyajquetzas huan elis se xihuit taiyocatalili para na para antenextilise antechtepanitaj. Amo xijtocaca yon se xinacti, yon amo xijzontequica imacuayo nopa xocomecat para ma chamani más. ⁵ Nopa cati ixhuas ica iseli ipan amomila campa tepejtoc iyol, amo xijpircaca, yon amo xicajocuca. Huan itajca nopa xocomecat cati moscaltia iseli, amo xijtequilica quej ipa anquichijtoque, pampa ipan nopa xihuit, nopa tali san mosiyajquetzas. ⁶ Pero cati ixhuas iseli ipan mila ipan nopa xihuit quema nopa tali mosiyajquetzas elis tacualisti para nochi hueli quitequihuse. Quitequihuis cati iaxca nopa mila, o itequipanojcahua cati quincojtoc, o itequipanojcahua cati quipalehuiaj se ome tonati, o nopa seyoc tali ehuan cati itztoque tatajco amojuanti. Nochi san se iniaxca elis para ma quicuaca, pero amo aqui huelis quipircas para quiajocuis. ⁷ Nojquiya amotapiyalhua huan nopa tapiyalme cati itztoque ipan cuatitamit san se hueli quicuease cati nozona eltoc ipan mila.

Nopa xihuit para nochi mochihuase majcajtoque

⁸ “Xijpohuaca hasta tamis chicome xihuit chicome hueltas, o 49 xihuit. Huan quema ya tantos huan ajsis ne seyoc tonali, campa hueli anquipitzase icuacua se oquich borrego. ⁹ Quena, campa hueli ipan nochi nopa tali Israel monequi anquipitzase tapitzali quema ajsis nopa Tonal Para Quiixzacuase Tetajtacolhua ipan majtacti itequi nopa chicompa metzti ipan 50 xihuit. ¹⁰ Pampa nopa xihuit 50 elis tatzejzelolitic. Nopa xihuit elis se xihuit quema nochi cati tahuicaj elise majcajtoque ten nopa cati tahuicaj. Nojquiya ipan nopa xihuit monequi anquinmajcahuase nochi amoisraelita tequipanojcahua cati monamacatoque para amechtequipanose. Quena, nochi israelita tequipanohuani mocahuase majcajtoque. Huan nochi israelitame cati quina macaque inintal, nopa tali sempa mochihuas iniaxca, o iniaxca iniixhuiahua. Huan sesen israelita monequi sempa yas campa quistoc ifamilia huan campa eliyaya ital para quiselis sempa nopa tali cati eliyaya iaxca. ¹¹ Nopa xihuit 50 elis se xihuit quema anelise anmajcajtoque

ten nochi amotequi. Amo antatojtocase, yon amo anquipixcase itajca cati ixhuac ica iseltitzi, yon itajca nopa xocomecat cati amo anquimocuitahuijtoque. ¹² Pampa nopa xihuit elis tatzetzeloltic huan nochi israelitame mochihuase majcajtoque. Ipan nopa xihuit quema anquicuase se tamanti cati iseli ixhuac, xijcuitehuaca campa mila huan nimantzi xijcuaca, pero amo xipixcaca, yon amo xicajocuica.

¹³ “Ipan nopa xihuit quema anmochihuase anmajcajtoque, sesen ten amojuanti monequi tacuepilis campa ital huan campa quisqui ifamilia. Huan masque ya quinamacatose ital, ipan nopa tonali sempa quimactilise. ¹⁴ Huajca quema anquicohuilfaj o anquinamaquiltiaj seyoc israelita se tali, amo ximocajcayahuaca. ¹⁵ Xijpohuaca quesqui xihuit mocahuas hasta nopa xihuit quema nochi mocahuas majcajtoc, huan xijtaxtahui quej quesqui xihuit huelis temacas itajca nopa tali hasta ajsis nopa xihuit quema sempa tacuepilis iaxca yaya cati achtohuiya quipixqui para iaxca. ¹⁶ Huan sinta polihui miyac xihuit para ajsis nopa 50 xihuit quema nochi mocahuas majcajtoc, huajca más patriyo anquixtahuase nopa tali para anquicohuase. Pero sinta pilquentzi xihuit eltos para sempa elis moaxca, amo más patriyo xijnamaca. Pampa nelia cati anquinamacaj eltoc imiyaca nopa pixquisti cati temacas nopa tali hasta sempa elis moaxca ta o cati achtohui quipixqui. Quena, quej nopa elis ipati nopa tali quema anquinamacase.

¹⁷ “Huajca techimacastica na, niamoTECO Dios, huan amo xijcayahuaca seyoc ica se taxtahuili cati amo ijqui. ¹⁸ Monequi xiquintepanitaca notanahuatilhua huan xiquintoquilijtnemica para quej nopa anitzose ica temachili ipan amotal. ¹⁹ Huan sinta anquitoquilise ni tanahuatili, nopa tali temacas miyac itajca, huan amechmacas para anquicuase hasta anixhuise cuali. Huan anitzose ica paquilisti ipan nopa tali.

²⁰ “Pero huelis amojuanti anmoilhuisse ya ni: ‘¿Taya tijcuase ipan nopa xihuit chicome, pampa amo antechcahuilfaj para titatojtocase, yon tipixcase?’ ²¹ Na nijtitanis notatiocihualis ipan nopa xihuit chicuase, huan yeca nopa cati anquipixcase ipan nopa xihuit, huejcahuas para anmopanoltise hasta anpixcase sempa ipan nopa expa xihuit. ²² Quena, quema sempa ajsis tonali para antatojtocase ipan xihuit chicueyi, noja anquicuajtose nopa pixquisti cati anquicuique ipan xihuit chicuase. Huan amechaxilis para ica anmopanoltise hasta oncas nopa pixquisti ipan xihuit chicnahui.

Sempa hueli se quicohuas tali cati quinamacac

²³ “Xiquelnamiquica para nopa tali noaxca. Yeca amo hueli anquina-macase para mocahuas seyoc iaxca para nochipa. Amojuanti san anajsini huan anpaxalohuani nica, huan eltoc quej san nimechtanejtia nopa tali. ²⁴ Nochipa quema anquinamacaj se tali, nopa amat monequi quijjtos para sempa hueli anquicohuase para amoaxca ipan ten hueli tonali.

²⁵ “Huan quema se israelita mochihuas teicneltzi huan monequis mitznamaquiltis se quentzi ital, huajca se iteixmatca cati nelnechca hueli mitzcohuilis sempa nopa tali cati mitznamaquiltijtoc.

²⁶ “Huan sinta nopa tacat amo quipiya yon se iteixmatca cati quipalehuis, pero ya iseli quisentilis nopa tomi, huajca yaya sempa hueli quicohuas nopa tali cati quinamacac. ²⁷ Huan monequi ximoilhauca quesqui xihuit ten pixquisti nopa tajojquet quiixtajtoc para elisquía iaxca nopa tali hasta nopa xihuit quema nochi elis majcajtoc. Huan quema nopa masehuali sempa quicohuas ital, monequi quicuepilis itomi nopa masehuali para nochi nopa xihuit cati quicojtoya para quitequihuis nopa tali pero ama ayecmo hueli quitequihuis pampa sempa quicojqui cati quinamacac. Pero quena, cati

eliyaya iaxca se tali sempa hueli quicohuas para elis iaxca sinta quipiya nopa tomi. ²⁸ Pero sinta amo quisentilis nopa tomi quej quinamiqui para sempa quicohuas ital, huajca nopa tali eltos iaxca cati quicojqui hasta ajsis nopa xihuit quema nochi tali mocahuas majcajtoc huan mocuepas ica cati achtohui eliyaya iaxca. Huan huajca ipan nopa xihuit, quena, nopa tacat cati quinamacac nopa tali, sempa quiselis para iaxca.

²⁹ “Sinta se tacat quinamacas se cali ipan se altepet cati moyahualtactoc ica tepamit, yaya huelis quicohuas sempa sinta quinequisquía para se xihuit huan sempa elis iaxca cati quinamacac. ³⁰ Pero quema ya quiaxitijos se xihuit quinamacatoc, huajca ayecmo hueli quicohuas sempa nopa cali cati eltoc ipan se altepet cati moyahualtactoc ica tepamit. Huan elis iaxca nopa tacat cati quicojtoc huan iniaxca iixhuihua para nochipa. Yon nopa cali amo hueli sempa mochihuas iaxca iteco cati achtohui ipan nopa xihuit quema nochi tali mocahuas majcajtoc. Quej nopa eltoc tanahuatili para calme cati mopantíaj ipan se altepet cati moyahualtactoc ica tepamit. ³¹ Pero calme cati mopantíaj ipan pilaltepetziti cati amo moyahualtactoque ica tepamit elise quej nopa talme campa mila. Quiijosnequi iteco cati quinamacac huelis quicohuas sempa ica tomi, huan sinta amo quicohuas sempa nopa cali, quema ajsis nopa xihuit 50 elis majcajtoc huan sempa mochihuas iaxca cati achtohui.

³² “Pero nopa calme cati mopantíaj ipan inialtepehua iixhuihua Leví, o nopa totajtiziti, amo san se. Masque moyahualtactoc nopa inialtepe ica tepamit, se levita tacat cati quinamacas ichaj sempa huelis quicohuas ipan ten hueli tonali. ³³ Huan se cali cati se iixhui Leví quinamacas, nojquiya elis iaxca nopa tacat ipan xihuit 50 quema nochi tali mocahuas majcajtoc. Pampa nopa levitame quiselijque ininchajchaj ipataca nopa tali campa hueltosquíaaj tatojtocase. Yeca amo aqui hueli quincuilis ininchajchaj para nochipa. ³⁴ Huan nopa potreros cati nechca inialtepehua iixhuihua Leví amo hueli monamacase, pampa nopa piltaltiziti mocahuas iniaxca para nochipa.

³⁵ “Sinta se israelita mochihuas teicneltzi huan yas campa ta, monequi xijpalehui quej elisquía se nejnenuet, o se seyoc tali ejquet, huan xijcahua ma itzto mohuaya. ³⁶ Quena, techimacasica na, niamoTeco Dios, huan xijcahuilica para amoicni ma itzto amohuaya. Huan amo xiquinamaca itanca quema anquitanejtíaj amotomi. ³⁷ Amo teno xitainamaca quema antetanejtíaj amotomi, yon amo xijtanica tomi sinta antemacase tacualisti. ³⁸ Pampa na, niamoTeco Dios cati nimechilhuía. Na cati nimechquixti ipan tali Egipto para nimechmactilis nopa tali Canaán huan para nielis niamoTeco Dios.

³⁹ “Sinta se moIsraelita icni mocahuas nelteicneltzi huan quinequis monamacas ica ta para mitztequipanos, huajca xijcohua, pero amo xijtequihui quej elisquía se tequipanojquet cati tijcojtoc para moaxca cati amo quipiya yon se tequiticayot. ⁴⁰ Monequi xiquitas quej elisquía se tepaxalojquet o se cuali tequipanojquet cati mitzpalehuía. Huan san huelis mitztequipanos hasta ipan nopa xihuit quema nochi mocahuas majcajtoc. ⁴¹ Huan ipan nopa xihuit quema nochi mocahuas majcajtoc yaya hueli quisas ihuaya iconehua huan tacuepilise campa itatahua inintal. ⁴² Pampa anisraelitame elij annotequipanojcahua cati nimechquixti ipan tali Egipto, huan amo quinamiqui annonamacase para anelise tequipanohuani cati seyoc iaxca huan antequipanose san tapic. ⁴³ Amo quema xijnahuati se israelita o xijtequihui chichahuac. Monequi techimacasica na, niamoTeco Dios.

⁴⁴ “Pero sinta anquinequij anquincohuase tequipanohuani para amoaxcahua para amechtequipanose san tapic, huajca huelis anquincohuase tacame huan sihuame cati ehuaní ipan sequinoc talme, pero amo cati israelítame. ⁴⁵ Nojquiya hueli anquincohuase seyoc tali ehuaní ininconeuhua cati itztoque campá amojuanti masque ininconeuhua tacatque ipan amotal. ⁴⁶ Huan quema anmiquise, huajca ni tequipanohuani cati amo israelítame cati anquincojtoque mocahuase iniaxcahua amoconehua, huan quintequipanose para nochipa. Pero anisraelítame amo hueli anquitequihuse seyoc israelita san tapic o anquinahuatise chichahuac.

⁴⁷ “Sinta se seyoc tali ejquet cati itztoc ipan amotal mochihuas se tapijpixquet huan se israelita mochihuas teicneltzi huan quinequis monamacas ica nopa seyoc tali ejquet, ⁴⁸ huajca cualtitoc. Pero masque monamacatos, nopa israelita noja quipiya tanahuatili para se iteixmatca quicohuas sempa para mocahuas majcajtoc. Quena, hueli quicohuas se iicni, ⁴⁹ se itío, o se imachicni, o cati hueli iteixmatca cati nelnechca. Huan sinta ya iseli huelis quisentilis tomi para quicuepilis iteco quej quicojqui, huajca nojquiya huelis momanahuis ica iselti. ⁵⁰ Monequi quichihuase cuentas ihuaya iteco para quitas quesqui monequi taxtahuas. Pehuase quipohuase ten nopa xihuit quema monamacac huan quipohuase hasta nopa 50 xihuit quema nochi mocahuas majcajtoc. San taxtahuas ten quesqui xihuit polihui para ajsis nopa xihuit quema elis majcajtoc. Quijtosnequi quicuepilis iteco cati monequisquía quitaxtahuis seyoc tequipanojquet para tequtis quej ipataca hasta nopa 50 xihuit quema elisquía majcajtoc. ⁵¹ Sinta noja polihui miyac xihuit para mocahuas majcajtoc, huajca quitaxtahuis iteco nechca imiyaca cati quiseli quema yaya monamacac ica ya. ⁵² Pero sinta ayecmo miyac xihuit polihui para mocahuas majcajtoc, huajca san quiixtahuas nopa xihuit cati noja polihui. ⁵³ Sinta nopa israelita monamacatoc ica se seyoc tali ejquet, yaya mocahuas ihuaya quej se tequipanojquet cati motemacas tetequipanos para se xihuit. Huan nopa seyoc tali ejquet amo hueli quinahuatis chichahuac, yon amo hueli moaxcatis para nochipa.

⁵⁴ “Huan sinta nopa israelita tacat noja ayemo momanahuijtoc huan ajsis nopa xihuit 50, huajca mocahuas majcajtoc ipan nopa xihuit. Huan ya ica nochi iconehua quisase majcajtoc san sejco. ⁵⁵ Nochi anisraelítame annotequipanojcahua na. Na cati nimechquixti ipan tali Egipto para antechtequipanose. Na niamoTECO Dios.

26

Nopa tatiocihuali para cati quitepanita TOTECO

(Dt. 7:12-24; 28:1-14)

¹ “Amo ximochijchihuilica teteyome, yon taixcopincayome. Quema anajise ipan amotal amo xijquetzaca se tet cati anquichijchijtoque huan anquipajtoque para anquihueyichihuase, pampa na niamoTECO Dios.

² Monequi xiquintepanitaca notanahuatilhua huan ximosiyajquetzaca ipan nopa tonali quema nimechnahuatijtoc. Xijtepanitaca noyoyon tiopa. Na niamoTECO cati nimechilhua.

³ “Sinta anquinneltocase notanahuatilhua huan anquitoquilise cati niquijtohua, ⁴ huajca nijchihuas para ma huetzi at ipan amotal quema monequi huetzis at. Huan nopa tali temacas miyac pixquisti, huan nopa cuame temacase miyac inintajca hasta mocahuas. ⁵ Quena, anquipiyase miyac trigo hasta noja anquipixtose ipan nopa tonali quema anpehuase anquitequise xocomecat itajca. Huan noja anquitequihuijtose nopa xocomecat itajca hasta nopa tonali quema sempa anquitocase trigo. Quena,

anquicuase ten nochi cati anquinequise hasta anixhuisse cuali. Huan anitztose ica paquilisti ipan amotal. ⁶ Quena, na noseltitzi nimechmacas tasehuilisti. Huan yeca quema ancochise, amo anmajmahuise. Amo oncas yon se tamanti cati amechmajmatis. Nijchihuas para nochi tapiyalme cati mosisiniaj ma ixpolihuica. Huan nopona ayecmo oncas tatehuilisti. ⁷ Anquinqixtise amocualancaitacahua huan anquintzontamiltise ica amomacheta. ⁸ Macuiltij ten amojuanti anquinqixtise cien amocualancaitacahua. Huan cien ten amojuanti anquinqixtise diez mil amocualancaitacahua. Huan quej nopa, nochi amocualancaitacahua anquintzontamiltise. ⁹ Pampa na, nimechtiochihuas huan nimechmiyaquilis. Huan cati niquijtojtoc nijchihuas ica amojuanti, temachti nijchihuas. ¹⁰ Quena, anquicuase nopa trigo cati huejcajquiya anquipixcaque. Huan quema ajsis tonali para anquipixcase nopa cati yancuic, monequis anquiquixtise cati anquipixcaque se xihuitaya para huelis anquiajocuisse cati yancuic.

¹¹ “Na nimochuas para niitstos tatajco ten amojuanti huan na nimechitas para hueyi amopati. ¹² Niitstos campa amojuanti huan na nielis niamoTeco Dios huan amojuanti anelise annomasehualhua. ¹³ Na niamoTECO cati nimechquixti ipan tali Egipto para ayecmo antetequipanose san tapic. Na cati nimechquixtili nopa cuahuit etic cati eltoya amoquechta para antapoxonise quej tapiyalme, huan na nimechchijqui ximoquetzaca xitahuac.

Nopa tatzacuiliti para cati amo quitepanita TOTECO

(Dt. 28:15-68)

¹⁴ “Pero sinta amo antechneltoquilise huan amo anquitepanitase nochi notanahuatilhua, ¹⁵ huan san anquihuejcamajcahuase huan amo anquinequise anquicaquise cati nimechilhujtoc, huajca amojuanti anquisosolose nopa camanali cati nijchijtoc amohuaya. ¹⁶ Huajca ya ni cati nimechchihuilis. Nimechtitanilis se cocolisti cati amechcocoxcamacas huan se majmajti cati nimantzi amechajsis, huan anquipantise cocolisti cati tahuel momahua. Nojquiya nimechmacas se cocolisti ten tatotonilot cati amechpopoyochihuas. Huan amotacayohua pehuas para nenpolihuis. Huan cati anquitocase ipan amomila, elis san tapic, pampa amocualancaitacahua amechichtequilise huan inijuanti quicuase. ¹⁷ Na nielis niamocualancaitaca, huan sequinoc amocualancaitacahua niquincahuilis ma amechtantica. Quena, inijuanti amechnahuatise. Huan ancholojtehuase ica majmajti masque amo aqui amechquixtia.

¹⁸ “Huan sinta noja amo antechneltoquilise masque ya nimechtitanilijtos nochi ya ni, huajca nimechtatzacuilitis chicome huelta por sese amotajtacol. ¹⁹ Quena, nijtamiltis nopa chichahualisti cati ica anmohueyimatij huan nijchihuas para nopa mixti ma ayecmo quitoyahua at. Huan ne tali nijchihuas ma elis quej xali. Quena, nijchihuas para elis quej nopa teposti bronce. ²⁰ San tapic anmosiyahuiltise para antatojtocase pampa nopa tali ayecmo taeliltis huan nopa cuame ayecmo temacase inintajca.

²¹ “Huan sinta noja antechcualancaitase huan amo anquinequise anquitacaquilise cati nimechilhúa, huajca nimechtatzacuilitis chicome huelta más chichahuac. Quena, nopa tatzacuiliti nimechtitanilis por amotajtacolhua. ²² Niquintitanis tapiyalme cati mosisiniaj para quintzontamiltise amoconehua huan amohuacaxhua. Huan nojquiya nimechtzontamiltis huan ayecmo anitztose anmiyaqui huan yeca ipan campa hueli ojti ayecmo itztose israelita masehualme.

²³ “Pero sinta teipa noja ayemo anmocualtalise, huan ayemo anquichitinemise cati na nijnequi huan san antechcualancaitase, ²⁴ huajca nimotalis

quej niamocualancaitaca huan nimechtatzacuiltis chicome huelta más chicahuac por sese amotajtacol. ²⁵ Huan nijchihuas para hualas se tatehuilisti campa amojuanti pampa anquisosolojtoque nopa camanali cati nijchijqui amohuaya. Huan sinta anmochololtise huan anmotatitij ipan amoaltepehua ica tepamit, huajca altepeijtic nijchihuas ma amechajsi se cocolisti cati temictía. Huan nimantzi amocualancaitacahua amechtanise.

²⁶ “Huan teipa nijchihuas ma huala se mayanti huan tahuel pilquentzi elis itajca amomila. Majtacti sihuame huelise quicxitise pantzi ipan setzi horno. Huan teipa anquipohuase nopa pantzi huan anmoxejxelhuilise para amechaxilis miyac tonali. Huan masque anquicuase se quentzi, amo anixhuise.

²⁷ “Huan sinta ica ya nopa noja ayemo antechnehtocase huan anquisehuiquilise anquichijtinemise cati amo nijnequi na, ²⁸ huajca nimochihuas niamocualancaitaca. Huan tahuel más miyac nicualanis ica amojuanti huan nimechtatzacuiltis chicome huelta más chicahuac por sese amotajtacolhua. ²⁹ Huan anmayanase hasta anquincuae amonehua cati oquichpilme huan cati sihuapilme. ³⁰ Huan na nijxitinis nopa taixpamit campa anquinhueyichihuaaj teteyome ipan tachiquili. Nojquiya nijsosolos amotaixpa campa anquitatíaj copali para amotaixcopincayohua. Amotacayohua cati mictoque niquintalis ipan amoteteyohua cati nojquiya mictoque. Huan ayecmo nijnequis nimechitas. ³¹ Nijxitinis amoaltepehua huan mocahuas quej se huactoc tali, huan nijsosolos campa antahueyichihuaayaj. Masque anquitatisquíaj copali noixpa, ayecmo nijselis.

³² “Nijsosolos nochi nopa tali. Huan quema amocualancaitacahua hualase para moaxcatise, quitase cati nijchijtoc huan quitachilise huan quietzaitase. ³³ Huan amojuanti nimechtitanis campa hueli ipan sequinoc talme huan nimechquixtis ica se macheta nomaco. Huan amotal mocahuas quej se huactoc tali, huan amoaltepehua mocahuas quej tasoli. ³⁴⁻³⁵ Huan quema anitztose ipan inintal amocualancaitacahua, nopa tali cati nimechmacac mosiyajquetzas. Quena, pampa amo anquicahuiliyayaj nopa tali ma mosiyajquetza sesen chicome xihuit quema anitztoyaj, nimechquixtis huan masque eltos tasosolijtoc, nopa tali mosiyajquetzas ica paquilisti quej quinamiquiyaya mosiyajquetzas.

³⁶ “Huan amojuanti cati noja anitztose ipan sequinoc talme, nimechchihuas para tahuel ximajmahuica ipan amoyolo hasta quema anquicaquise mojmolinía se tasoli, ancholose pampa anmoilhuse acajya amechtepotzoca ica macheta. Quena, anmajmahuse hasta anmotalose huan anhuetzise. Quej ni amopantis anisraelitame quema anitztose ipan amocualancaitacahua inintal. ³⁷ Hasta anmocuitiquisase se ica seyoc quema ancholose quej elisquía amechquixtíaj amocualancaitacahua ica macheta, pero amo. Huan ayecmo teno huelis anquichihuase inixpa amocualancaitacahua pampa ayecmo anquikipiyase chicahualisti. ³⁸ Huan anixpolihuse nopona tatajco ten injuanti. Quena, elis quej inintal amechcuas. ³⁹ Huan amojuanti cati noja anitztose ipan nopa tali ten amocualancaitacahua anmotequipachojtinemise por amotajtacol. Quena, mojmosta anquipolojtiyase más amochicahualis ica nopa tajtacoli cati amojuanti huan amohuejcapan tatahua anquichijtoque.

⁴⁰⁻⁴¹ “Pero teipa anquipanextise huan antechpohuilise nochi amotajtacolhua, huan antechpanextilise nopa tajtacoli cati quichijque amohuejcapan tatahua. Quena, antechpohuilise quenicatza amohuejcapan tatahua amo techneltoquilijque notanahuatil huan san quichijtinemise cati na amo

nijnequi niqutas. Huan yeca niquinnextili nocualancayo huan niquinhuicac ipan inintal inincualancaifacahua. Huan quema amojuanti anmoechcapanose huan anquiselise nopa tatzacuiliti cati quinamiqui para nochi amotajtacolhua noixpa, ⁴² huajca na niqelnamiquis nopa camanali cati nijchijqui ihuaya Abraham, Isaac huan Jacob huejcajquiya. Huan niqelnamiquis nopa tali cati niquinmacac huan quenecatza ama mocahua tasosolijtoc. ⁴³ Pampa monequi para nopa tali mosiyajquetzas huan amo aqui itztos nozona quej na niquijto quinamiqui para mosiyajquetzas. Huan anisraelitame teipa anquiselise amotatzacuiliti pampa amo anquitepanitaque notanahuatil, yon amo anquinejque ma nimechnahuati.

⁴⁴ “Huan masque anquichijtoque miyac tajtacoli huan anitztose ipan amocualancaitacahua inintal, na nimechelnamiquis. Amo nimechtahuelcahuas, yon amo nimechtzontamiltis nochi amojuanti, yon amo nijsosolos nopa camanali cati nijchijqui amohuaya. Na niamoTECO Dios. ⁴⁵ Huan pampa nimechicnelía, niqelnamiquis nopa camanali cati nijchijqui inihuaya amohuejcapan tatahua quema niqinquixti ipan tali Egipto quema nochi sequinoc talme ehuan san motachiliyayaj. Quena, niqinquixti para nielis niininTECO Dios.”

⁴⁶ Huajca nica eltoc nochi nopa tanahuatilme cati TOTECO quimacac Moisés ipan nopa tepet Sinaí para ma quinilhui israelitame.

27

Tamantzitzi cati taiyocatalili para TOTECO

¹ Huan TOTECO quiilhui Moisés:

² “Xiquinilhui israelitame ni tanahuatilme. Quema se acajya ica iselti quinequis techtestigojquetzas na para moyocacahuas para na, niamoTECO, o quiiyocacahuas se icone huan teipa quinequis momanahuis para elis majcajtoc, quej ni monequi taxtahuas. ³ Para se tacat cati quiapiya 20 xihuit hasta cati quiapiya 60 xihuit, taxtahuas 50 plata tomi cati quitequihuía ipan nopa yoyon tiopamit. ⁴ Pero sinta eli se sihuat, huajca san taxtahuas 30 plata tomi. ⁵ Huan para se oquichpil cati quiapiya macuili xihuit hasta 20 xihuit, taxtahuase 20 plata tomi. Huan para se sihuapil cati quiapiya macuili xihuit hasta 20 xihuit, taxtahuase majtacti plata tomi. ⁶ Pero para se piloquichpiltzi cati sanoc quiapiya se metzti ica tacatqui huan hasta cati quiapiya macuili xihuit, taxtahuase macuili plata tomi. Huan para se pilsihuapiltzi cati quiapiya se metzti hasta macuili xihuit, taxtahuase eyi plata tomi. ⁷ Huan para se tacat cati quiapiya 60 xihuit para huejcapa, taxtahuas 15 plata tomi. Huan sinta eli se sihuat cati quiapiya 60 xihuit para huejcapa, taxtahuas majtacti plata tomi. ⁸ Huan sinta se masehuali nelteicneltzi quiijtojtoc para motemacas ica na huan teipa quinequi sempa mocohuas pero amo huelis quisentilis nopa tomi cati monequi, huajca ma quihuicaca campá nopa totajtzi. Huan nopa totajtzi quiixquetzas quesqui plata tomi monequi taxtahuas nopa tacat teicneltzi. Quena, quiixquetzas quej quiitas para quiaxilis itaxtahuil nopa tacat cati quiijtojtoc para motemactilis ica na, niamoTECO, huan quinequi sempa mocohuas para mocahuas majcajtoc.

⁹ “Pero sinta se acajya tatestigojquetztoc para techmacas na, niamoTECO, se tapiyali, huajca nopa tacat monequi nelía techmactilis nopa tapiyali. Nochi nopa tamanti cati se quiijtos para techmacas elis tatzetzelolitic huan taiyocatalili para na. ¹⁰ Huan sinta se quiijtojtoc para techmacas na, niamoTECO, se nemacti, amo hueli moyolcuepas. Huan sinta moilhujtoc catijqui tapiyali techmacas huan quiijtojtoc para ya nopa techmacas, huajca nopa tapiyali ayecmo huelis quipatas. Yon amo hueli techmacas seyoc cati

más cuali o más fiero. Huan sinta techmacasquía seyoc quej ipataca, huajca nochi nopa ome tapiyalme mocahuase taiyocatalilme para na, niamoTECO, huan amo hueli sempa quincohuas.

¹¹ “Huan sinta quiiijos para techmacas se tapiyali cati amo tapajpactic para elis tacajcahualisti para na, niamoTECO, huajca nopa tacat quihuicas campa nopa totajtzi nopa tapiyali. ¹² Huan nopa totajtzi quitachilis sinta cuali o amo cuali, huan cati nopa totajtzi quixquetzas para ipati, ya nopa monequi quixtahuas ipan tiopamit para sempa mocohuis nopa tapiyali. ¹³ Pero sinta teipa quinequis sempa quicohuas nopa tapiyali, monequi taxtahuas cati ipati quixquetzoc nopa totajtzi huan nojquiya monequi quimiyaquilis seyoc 20 por ciento para quej nopa, nopa tapiyali sempa elis iaxca.

¹⁴⁻¹⁵ “Sinta acajya quiiyocatalis ichaj para elis tatzejtzeloitc para na, niamoTECO, huan teipa sempa quinequis mocohuis para iaxca, huajca quej ni quichihuas. Monequi ma huala nopa totajtzi ma quitachiliqui nopa cali huan quixquetzas quesqui ipati. Huan nopa imiyaca tomi cati nopa totajtzi quixquetzas, ya nopa elis ipati. Huan iyoca ten nopa ipati cati quixquetzoc nopa totajtzi, nopa tacat monequi quipihuilis seyoc 20 por ciento. Huan quema taxtahuas nochi ya nopa, nopa cali sempa elis iaxca.

¹⁶ “Huan sinta se acajya quiiyocatalis se quentzi tali cati quiselijtoc ten ihuejcapan tatahua para techmacas para elis noaxca, niamoTECO, huajca nopa totajtzi monequi quitachilis quenicaatza ihuexca nopa tali huan quesqui litros ten xinachti monequi para quitocas. Quej nopa quixquetzas ipati. Sinta quiiitas para ipan nopa pedazo monequi 220 lifros ten iyol cebada para quitocas para 50 xihuit huajca monequi taxtahuas 50 plata tomi. ¹⁷ Huan sinta se tacat quiiyocatalis ital ipan nopa xihuit 50 quema nochi mocahua majcajtoc, huajca nochi cati ipati monequi taxtahuas ipan tiopamit para mocohuis sempa nopa tali. ¹⁸ Pero sinta quiiyocatalis nopa tali quema ya panotoc nopa xihuit quema nochi mocahua majcajtoc, huajca nopa totajtzi quipohuas quesqui xihuit panotoc ten nopa xihuit huan quiquixtilis ten cati ipati elisquía para yajmaxtic 50 xihuit. San monequi taxtahuas para quesqui xihuit polihui para sempa ajsis nopa xihuit quema mocahuas majcajtoc.

¹⁹ “Huan sinta nopa tacat cati quiiyocatali ital sempa quinequis quicohuas nopa tali para iaxca, huajca monequi taxtahuas cati nopa totajtzi quixquetzas para ipati huan iyoca monequi quipihuilis seyoc 20 por ciento. Huan quej nopa, nopa tali sempa elis iaxca. ²⁰ Pero sinta amo quicohuas nimantzi para sempa elis iaxca huan quinamaquiltis seyoc, huajca teipa ayecmo quema sempa huellis quicohuas para iaxca. ²¹ Huan quema ajsis nopa xihuit para nochi mocahuas majcajtoc, nopa tali nojquiya mocahuas majcajtoc, huan elis taiyocatalili para na, niamoTECO, huan teipa elis para nopa totajtzitzi iniaxca.

²² “Huan sinta acajya techiyocatalilis na, niamoTECO, se quentzi tali cati san quicojtoc huan amo quiselijtoc ten ihuejcapan tatahua, ²³ huajca nopa totajtzi quipohuas quesqui xihuit polihui para ajsis nopa xihuit para nochi mocahuas majcajtoc. Huan quej nopa quixquetzas ipati. Huan nopa tacat cati quiiyocatalijtoc ital para na, niamoTECO, monequi nimantzi taxtahuas ipan nopa tonal. ²⁴ Huan quema ajsis nopa xihuit para nochi mocahuas majcajtoc, nopa tali sempa elis iaxca nopa achtohui teteco cati nopa tacat quicohuili.

²⁵ “Ipan nochi tamanti cati anquixquetzase ipati, monequi anquitequihuse nopa tatamachihuali para ietica nopa plata tomi cati motequihuía ipan nopa yoyon tiopamit.

Tamanti huan masehualme cati senquisa iaxcahua TOTECO

²⁶ “Nochi huacaxme huan borregoyme cati achtohui tacatij ten ininana amo hueli anquiniyocatalise para na, niamoTECO, pampa ya eltoc noaxcahua cati achtohui tacatij. ²⁷ Pero sinta anquinequij anquiycatalise se tapiyali cati iachtohui cone se tapiyali cati amo tapajpactic para tacajcahualisti huan yeca amo noaxca, huajca nopa tacat cati iaxca huelis sempa mocohuis sinta taxtahuas quej quixquetztoc nopa totajtzi para ipati nopa tapiyali. Huan iyoca monequi quipihuilis seyoc ²⁰ por ciento ten cati ipati. Huan sinta nopa tacat amo quinequis quicohuas sempa nopa tapiyali cati techmaca, huajca nopa totajtzi quinamaquiltis nopa tapiyali seyoc quej quixquetztoc para ipati pampa amo cuali para tacajcahualisti.

²⁸ “Pero se masehuali, o se tapiyali, o se tali cati se quiselijtoc ten ihuejcapan tatahua huan senquisa techmacatoc para elis noaxca, ayecmo aqui huelis quicohuas o quinamacas ica seyoc, pampa ya nopa senquisa noaxca huan tahuel tatzejtzolotc para na, niamoTECO. ²⁹ Sinta quijtohua tanahuatili para monequi miquis se masehuali, amo huelis taxtahuas para momanahuis. Monequi miquis.

³⁰ “Se diezmo ten nochi cati temaca momila eltoc noaxca. Quema nopa tali temacas iyol o nopa cuame temacase inintajca, monequi antechmacase na, niamoTeco, se tatamachihuali ten sesen majtacti tatamachihuali, pampa ya nopa eli noaxca huan tatzejtzolotc para na. ³¹ Huajca sinta acajya quinequis sempa mocohuis nopa iyol ten imila o itajca icuatatochua, huajca monequi taxtahuas cati ipati huan quimacas nopa totajtzi huan nojquiya monequi quipihuilis seyoc ²⁰ por ciento.

³² “Huan ipan sesen majtacti tapiyalme monequi anquiquixtise se para antechmacase na, niamoTECO. Amo xiquintapejpenica catijqui tapiyalme elise noaxcahua. Quema nopa tapiyalme motecpanaj para calaquise ipan tatzacti huan nopa tamocuitahuijquet quinpohua sesen quema panoj itzala icuatopil, sesen huelta quema quipohuas hasta ipan majtacti, huajca nopa tapiyali elis noaxca na. Quena, ya nopa se diezmo huan tatzejtzolotc para na nopa majtacpa tapiyali. ³³ Amo teno sinta nopa tapiyali cati elis noaxca elis cuali o amo cuali, amo huelis quixpatas. Huan sinta quipatas, huajca nochi ome tapiyalme, nopa cati eltoya noaxca huan nopa cati ipataya, nochi mocahuase taiyocatalilme para na, niamoTECO. Huan amo aqui hueli sempa quicohuas para iaxca.”

³⁴ Huajca ya ni nopa tanahuatilme cati TOTECO quimacac Moisés ipan nopa tepet Sinaí para quinilhuis nochi israelitame.

Números

Nopa censo cati israelitame quichijque ipan Sinaí

¹ TOTECO quicamanalhui Moisés ipan nopa huactoc tali Sinaí ipan nopa yoyon tiopamit campa mopantiyayaj. Quicamanalhui ipan 15 itequi nopa ompa metzti ipan nopa israelita calendario * quema ya panotoya se xihuit huan se metzti para nopa israelitame quistoyaj ten tali Égipto. Huan ya ni cati TOTECO quilhui:

²⁻³ “Monequi ta ihuaya Aarón xijtananaca se censo ten nochi israelita tacame cati quiaxitijtoque 20 xihuit para huejcapa huan cati hueli tatehúaj. Xiquijcuiloca sese itoca, huan itoca itata, huan itoca ihuejcapan tata, huan xiquinpohuaca quesqui itztoque. Huan quema ya anquinpojtose nochi, xiquintalica ipan tatehujca pamit para tatehuisse. ⁴ Nojquiya amechpalehuis se iteipan ixhui nochi nopa 12 huejcapan tatame cati huejcajquiya itztoyaj. Sesen motapalehujca elis cati más tayacana ipan iteixmatcahua ipan ihueyi familia. ⁵⁻¹⁵ Ya ni inintoca nopa tayacanani cati amechpalehuis ten sesen hueyi familia:

Familia, Tayacanquet
 Rubén, Elisur, icone Sedeur
 Simeón, Selumiel, icone Zurisadai
 Judá, Naasón, icone Aminadab
 Isacar, Natanael, icone Zuar
 Zabulón, Eliab, icone Helón
 Efraín, icone José, Elisama, icone Amiud
 Manasés, icone José, Gamaliel, icone Pedasur
 Benjamín, Abidán, icone Gedeoni
 Dan, Ahiezer, icone Amisadai
 Aser, Pagiel, icone Ocrán
 Gad, Eliasaf, icone Deuel
 Neftalí, Ahira, icone Enán

¹⁶ Ya ni elqui inintoca nopa tayacanani cati tapejpenilme para tayacanase ipan sesen hueyi familia.”

¹⁷ Huan Moisés huan Aarón inihuaya ni tayacanani cati TOTECO quincaxtalijtoya, ¹⁸ quinnotzque nochi israelitame ma mosentilica ipan nopa tonali quema TOTECO quicamanalhui Moisés. Huan pejqque quiniqcuilohuaj nochi tacame cati ya quiaxitijtoyaj 20 xihuit para huejcapa. Huan sesen quijcuilojqque ajquiya eliyaya ihuejcapan tata huan ajquiya itata. Moijcuilojqque sesentzitzí. ¹⁹ Huajca nopona ipan nopa huactoc tali cati itoca Sinaí quinpójque nochi ni tacame quej TOTECO quinahuatijtoya Moisés.

²⁰⁻⁴³ Huan quema Moisés, Aarón huan nopa 12 tayacanani ten israelitame ya tantoya inintequi, ya ni nopa tacame cati quinpójque cati quipiyayayaj 20 xihuit para huejcapa cati huelque yahuij tatehúitij:

Familia, Qesqui
 Rubén, iachtohui cone Israel, 46,500
 Simeón, 59,300

* **1:1** 1:1 Quemantica huetzi ni tonali ipan abril huan quemantica ipan mayo ipan tocalendario ama.

Gad, 45,650
 Judá, 74,600
 Isacar, 54,400
 Zabulón, 57,400
 Efraín, icone José, 40,500
 Manasés, icone José, 32,200
 Benjamín, 35,400
 Dan, 62,700
 Aser, 41,500
 Neftalí, 53,400

⁴⁴ Huajca ya ni techilhuía cati quipantijque Moisés huan Aarón huan nopa 12 tayacanani cati tayacanayayaj ipan sese ifamilia ten iteipan ixhuihua Israel. ⁴⁵ Quinpojqe nopa israelita tacame cati quiaxitijtoyaj 20 xihuit ica huejcapa huan cati huelque yahuij para tatehuitij. ⁴⁶ Huan quipantijque para nochi itztoyaj 603 mil 550 taca israelitame cati hueliyayaj tatehuitij.

Amo quinpojqe nopa levitame

⁴⁷ Pero amo quinpojqtoyaj tacame ipan nopa hueyi familia ten iteipan ixhuihua Leví, ⁴⁸ pampa TOTECO quiilhuijtaya Moisés: ⁴⁹ “Quema tijtananas se censo ten nochi israelitame cati hueli tatehuíaj, amo xiquinpoqhua nopa levitame, inijuanti cati hualajque ipan nopa huejcapan tata Leví. Amo xiquintali san sejo ihuaya ne sequinoc israelitame. ⁵⁰ Pero xiquintequimaca nochi levita tacame ma quimocuitahuica noyoyon tiopa cati quiipya nopa caja, huan nochi cati eltoc ipani, huan nochi tamantzitzi cati nopona calijtic quitequihuíaj. Quema anyase sejoyoc, elis levitame inintequi para quihucase nopa yoyon tiopa campa na nimocahua amohuaya huan nojquiya quihucase nochi cati quiipiyaj. Nojquiya levitame ma quiquetzaca iniyoyoncalhua nechca nochaj para ma quiyahualoca. ⁵¹ Huan quema monequi quihucase nopa yoyon tiopamit, inijuantiyja cati quicocópitzase. Huan quema anajsise campa anquiquetzase amoyoyoncalhua, inijuantiyja cati sempa quicualchijchihuase nopa tiopamit quej eltoya. Pero sinta se tacat cati amo se iteipan ixhui Leví quinechcahuis nopa yoyon tiopamit campa na niitztoc amohuaya, monequi anquimictise. ⁵² Huan monequi nochi masehualme ipan sesen hueyi familia ten israelitame quiipiyase inilugar campa quiquetzase iniyoyoncalhua san sejo ipan se pamit. Huan iteipan ixhuihua sesen huejcapan tata quiipiyase ininbandera nopona para quinex-tis canque eltoc ininpamit. ⁵³ Pero nochi nopa levitame quiquetzase iniyoyoncalhua yahualtic ten nopa yoyon tiopamit campa niitztoc amohuaya huan cati quiipya cati amohuaya nimocajtoc pampa inintequi levitame quimocuitahuise nopa tiopamit. Quimocuitahuise para cati hueli masehuali amo huelis monechcahuis huan amo nicualanis ica anisraelitame.”

⁵⁴ Huajca nopa israelitame quichijque senquisa nochi cati TOTECO quinahuati Moisés.

2

Campa sesen hueyi familia quiquetzase ininchaj ten yoyomit

¹ Nojquiya TOTECO quiilhui Moisés huan Aarón ni tanahuatilme:

² “Nochi israelitame monequi quiquetzase iniyoyoncalhua para huejca quiitase nopa yoyon tiopamit campa timopantíaj. Huan sesen mocahuas nechca ibandera ihuejcapan tata huan mocahuas nechca ihueyi bandera nopa tatehujca pamit cati iniaxca.

3-8 “Nopa tacame ten nopa huejhueyi familias ten Judá, Isacar huan Zabulón quiquetzase iniyoyoncalhua huan ininbandera ica campa quisa tonati ten nopa yoyon tiopamit. Huan nica eltoc inintoca sesen hueyi familia, inintayacanca huan quesqui tacame hueliyayaj yahuij tatehuitij:

Familia, Tayacanquet, Quesqui
Judá, Naasón, icone Aminadab, 74,600
Isacar, Natanael, icone Zuar, 54,400
Zabulón, Eliab, icone Helón, 57,400

9 Huajca ipan nopa tatehuijca pamit ten Judá elis tacame ten hualahuij ipan ni eyi huejhueyi familias huan para nochi elque 186,400 tacame cati hueliyayaj tatehuíaj. Huan ni tatehuijca pamit tayacantiyas quema anisraelitame anquistehuase para anmochihuase sejcoyoc.

10-15 “Nopa tacame ten nopa huejhueyi familias ten Rubén, Simeón huan Gad quiquetzase iniyoyoncalhua huan ininbandera ica sur ten nopa yoyon tiopamit. Huan nica eltoc inintoca sesen hueyi familia, inintayacanca huan quesqui tacame hueliyayaj yahuij tatehuitij:

Familia, Tayacanquet, Quesqui
Rubén, Elisur, icone Sedeur, 46,500
Simeón, Selumiel, icone Zurisadai, 59,300
Gad, Eliasaf, icone Reuel, 45,650

16 Huajca ipan nopa tatehuijca pamit Rubén elis tacame cati hualahuij ipan ni eyi huejhueyi familias huan para nochi elque 151,450 tacame cati hueliyayaj tatehuíaj. Huan ni tatehuijca pamit motecpanase iica nopa tatehuijca pamit Judá quema anquistehuase para anmochihuati sejcoyoc.

17 “Huan teipa motecpanase nopa levitame cati quihuicase noyoyon tiopa, niamoTECO quema anquisase para anyase sejcoyoc. Huan quisase tatajco ipan nochi huejhueyi familias san quej mocahuaj tatajco iniyoyoncalhua. Quej nopa quisase campa monequi sesen ica ibandera.

18-23 “Nopa tacame ten nopa huejhueyi familias ten Efraín, Manasés huan Benjamín quiquetzase iniyoyoncalhua huan ininbandera ica campa temo tonati ten nopa yoyon tiopamit. Huan nica eltoc inintoca sesen hueyi familia, inintayacanca huan quesqui tacame hueliyayaj yahuij tatehuitij:

Familia, Tayacanquet, Quesqui
Efraín, Elisama, icone Amiud, 40,500
Manasés, Gamaliel, icone Pedasur, 32,200
Benjamín, Abidán, icone Gedeoni, 35,400

24 Huajca ipan nopa Itatehuijca pamit Efraín elis tacame cati hualahuij ipan ni eyi huejhueyi familias huan para nochi elque 108,100. Huan ni tatehuijca pamit motecpanase iniica nopa levitame.

25-30 “Nopa tacame ten nopa huejhueyi familias ten Dan, Aser huan Neftalí quiquetzase iniyoyoncalhua huan ininbandera ica norte ten nopa yoyon tiopamit. Huan nica eltoc inintoca sesen hueyi familia, inintayacanca huan quesqui tacame hueliyayaj yahuij tatehuitij:

Familia, Tayacanquet, Quesqui
Dan, Ahiezer, icone Amisadai, 62,700
Aser, Pagiél, icone Ocrán, 41,500

Neftalí, Ahira, icone Enán, 53,400

³¹ Huajca ipan nopa tatehuijca pamit ten Dan elis nopa soldados ten ni eyi huejhueyi familias huan san sejco ajsique 157,600 tacame cati huelque tatehuisse. Huan ni tatehuijca pamit motecpanase iica ibandera hasta tateipa huan nejnemise iica nopa tatehuijca pamit Efraín.”

³² Huajca quema ya quinpojtayaj nochi israelita tacame cati hueliyayaj tatehuitij ipan nochi huejhueyi familias elque 603,550 tacame. ³³ Pero amo quintalijque san sejco nopa levitame pampa TOTECO quinahuatijtaya Moisés ma amo quinpoahuaca ica cati tatehuisse. ³⁴ Huajca nopa israelitame quichijque nochi senquisa quej TOTECO quinahuatijtaya Moisés. Huan sesen hueyi familia quiquetzqui ichaj ten yoyomit iica ibandera campa quinihuijtayaj. Huan quema quistejque, motecpantiyayque huan sesen hueyi familia nejnenqui senquisa quej TOTECO quinahuatijtaya Moisés.

3

Inintequi nopa levitame

¹ Ya ni techpohuilía ten iteixmatcahua Moisés huan iicni Aarón ipan nopa tonali quema TOTECO quicamanalhui Moisés ipan nopa tepet Sinaí.

² Inintoca iconehua Aarón eliyaya: Nadab cati achtohui ejquet, Abiú, Eleazar, huan Itamar. ³ Nochi injuanti quinajalti ica aceite huan quiniyocacajqui ma elica totajtztizi para tequitise tiopan calijtic. ⁴ Pero Nadab huan Abiú mijque iixpa TOTECO nepa ipan nopa huactoc tali Sinaí pampa amo qutoquilijque icamanal TOTECO huan quitequihuijque se tit cati amo tatzejzeloltic. Huan cati mijque ayemo quinpiyayayaj iniconehua, yeca san mocajqui Eleazar huan Itamar para quipalehuisse inintata Aarón ipan itequi quej totajtzi ipan inemilis.

⁵ Huan TOTECO quinojnotzqui Moisés huan quihlui:

⁶ “Xiquinnotza ma hualaca nochi iteipan ixhuihua Leví huan xijchihua para ma monextica iixpa Aarón para quitequipanose. ⁷ Huan injuanti quitequipanose Aarón huan quitequipanose nochi israelitame pampa quichihuase miyac piltequitztizi cati tiquinilhuis ma quichihuaca ipan nopa achtohui cuartos ipan nopa yoyon tiopamit campa timopantíaj. ⁸ Quimocuitahuisse nopa cuamesas huan nochi tamantzitzi cati eltoc ipan nopa yoyon tiopamit campa timopantíaj. Huan quichihuase nochi cati nimechnahuatjtoc anisraelitame xijchihuaca. ⁹ Huajca nochi levitame ma mocahuaca imaco Aarón huan itelpocahua. Quena, nochi tacame ipan nopa hueyi familia Leví quinpalehuisse nopa totajtztizi, yeca nochi levitame mocahuase iyoca ten nochi nopa sequinoc israelitame para melahuac ma elica iaxcahua Aarón huan iniaxcahua itelpocahua. ¹⁰ Pero san Aarón huan itelpocahua xiquintequimaca para ma elica totajtztizi, nopa sequinoc levitame, amo. Sinta seyoc cati amo totajtzi quichihuas itequi se totajtzi huan monechcahuis campa más tiopan calijtic, monequi xijmictica.”

Nochi levitame iaxcahua TOTECO

¹¹ Huan sempa TOTECO quinojnotzqui Moisés huan quihlui:

¹² “Ya nimechilhuitoc para monequi techmacaca nochi amoachtohui coneua, pampa injuanti noaxcahua. Pero para amo monequi antechmacatiyase amoachtohui coneua, ininpataca niquinselis nochi levitame para ma elica noaxcahua ininpataca nochi sequinoc israelitame, ¹³ pampa na noaxcahua nochi israelitame cati achtohui tacatij. Quema nijchijqui

para ma miqúica nochi cati achtohui ehuani ten nochi tali Egipto, nimocuili nochi coneme cati achtohui ehuani ten nochi anisraelitame, huan nojqúiya nochi tapiyalme cati achtohui tacatise, huan yeca nochi noaxcahua. Na niamoTECO.”

Motananqui se censo ten nochi levitame

14 Huan TOTECO sempa quinojnotzqui Moisés ipan huactoc tali Sinaí huan quuilhui:

15 “Xiquinpoehua nochi levitame ipan sesen cali, huan iyoca xiquinpoehua ajquiya inijuanti hualajque ipan sese itelpoca nopa huejcapan tata Leví. Xiquinpoehua nochi oquichpilme cati ya quiaxitijque se metzti para huejcapa.” 16 Huan Moisés quinpojqú senquisa quej quinahuatijtoya TOTECO.

17 Huan nopa huejcapan tata Leví quinpixqui eyi itelpocahua:

Gersón, Coat huan Merari.

18 Huan Gersón quinpixqui ome itelpocahua:

Libni huan Simeí.

19 Huan Coat quinpixqui nahui itelpocahua:

Amram, Izhar, Hebrón huan Uziel.

20 Huan Merari quinpixqui ome itelpocahua:

Mahli huan Musi.

Huajca nica nimitzilhuijtoc ajquiya itztoyaj nopa tayacanani ipan nopa familias ten iteipan ixhuihua nopa huejcapan tata Leví huan ama tiquinto-caxtía nochi levitame.

Ixhuihua Gersón, itelpoca Leví

21 Huajca iixhuihua Gersón mochijque ome huejhueyi familias cati quisqui ten itelpocahua, Libni huan Simeí. 22 Huan ama nochi inintaca ixhuihua cati quipiyayaj se metzti para huejcapa mochijque 7 mil 500.

23 Huan TOTECO quinnahuati iixhuihua Gersón ma quiquetzaca iniyoyoncalhua nechca nopa yoyon tiopamit ica campa huetzi tonati. 24 Huan Eliasaf, icone Lael, elqui nopa tayacanquet ten iixhuihua Gersón. 25 Huan inijuanti quipixque inintequi para quimocuitahuse nopa tiopamit huan nochi yoyomit cati quipixqui. Quimocuitahuijque itzajca, icortinas, 26 huan nopa cortinas cati mochihua nopa tatzacti cati quiyahualohua nopa taixpamit huan tiopamit, huan nopa cortinas cati quicuapilohuaj campa calaquise, huan nochi lazo cati motequihuía ipan nopa tiopamit. Ya nopa eliyaya inintequi iixhuihua Gersón.

Ixhuihua Coat itelpoca Leví

27 Huan iixhuihua Coat mochijque nopa nahui huejhueyi familias cati quisque ten itelpocahua, Amram, Izhar, Hebrón huan Uziel. 28 Huan ama nochi inintaca ixhuihua cati quipiyaj se metzti para huejcapa mochijque 8 mil 600. Huan iixhuihua Coat tequitiyayaj tiopan calijtic. 29 Huan TOTECO quinnahuati iixhuihua Coat ma quiquetzaca iniyoyoncalhua nechca tiopamit ica sur. 30 Huan Elizafán, icone Uziel, elqui nopa tayacanquet ten iixhuihua Coat. 31 Huan inijuanti quipixque tanahuatili para quimocuitahuse nopa caxa, nopa cuamesa para pantzi, nopa taahuil quetzali, nopa taixpamit para copali, nopa taixpamit para Tacajcualisti Tatatili, huan nochi teposti cati quitequihuijque tiopan calijtic. Nojqúiya quipixque inintequi para quimocuitahuse nopa cortina yejyetzti cati quitzacuayaya campa Tahuel Tatzejtzeltolitic. Nojqúiya quipixque inintequi para quicuualtise nochi ni tamanti sinta monequiyaya se quentzi tequit. Ya nopa eliyaya inintequi iixhuihua Coat.

³² Huan Eleazar, icone nopa totajtzi Aarón, eliyaya nopa tayacanquet cati más hueyi ipan nochi levitame. Yaya cati quintequimacayaya nopa tacame cati tapalehuiyayaj tiopan calijtic.

Iixhuihua Merari itelpoca Levi

³³ Huan iixhuihua Merari mochijque nopa ome huejhueyi familias cati quisque ten itelpocahua Mahli huan Musi. ³⁴ Huan ama nochi inintaca ixhuihua cati quipiyaj se metzti para huejcapa mochijque 6 mil 200. ³⁵ Huan TOTECO quinnahuati ma quiquetzaca iniyoyoncalhua nechca tiopamit ica norte. Huan Zuriel, icone Abihail, elqui nopa tayacanquet ten iixhuihua Merari. ³⁶ Huan injuanti quipixque inintequi para quimocuitahuisse nopa huapalme ica cati quichijque caltepamit, nopa cuaixtapalme, nopa taquetzalme, huan inintepos cuatetonyo, huan nochi tamantzitzi cati quitequihua. ³⁷ Nojquiya quimocuitahijque nopa taquetzalme para nopa calixpamit cati quiyahualohuayaya nopa tiopamit ihuaya nopa tepos cuatetomit para taquetzalme, ihuaya iniestacas huan inilazos. Ya nopa elqui inintequi iixhuihua Merari.

³⁸ Huan TOTECO quinnahuati Moisés, Aarón huan ininconeuhua ma quiquetzaca iniyoyoncalhua nechca nopa tiopamit ica campa quisa tonati. Huan quipixque inintequi para quimocuitahuilise nochi nopa yoyon tiopamit campa TOTECO mopantiyaya ica nopa israelitame. Huan sinta cati hueli tacat quinechcahuisquía nopa yoyon tiopamit, monequiyaya quimictise.

³⁹ Huan nochi nopa levita tacame cati Moisés huan Aarón quinpojque cati quipiyayaj se metzti para huejcapa ajsique 22 mil oquichipilme huan tacame.

Quenicatza quicohuilise TOTECO iniachtohui oquichpil

⁴⁰ Teipa TOTECO quiilhui Moisés:

“Xiquinpohua nochi achtohui ehuan oquichpilme huan tacame ipan israelitame cati quipiyaj se metzti para huejcapa, huan xiquinijcuilo ica inintoca. ⁴¹ Nochi levitame elise noaxcahua para techtequipanose na, niamoTECO. Huan yeca ayecmo nimoaxcatis iniachtohui coneuhua nochi israelitame. Huan inintapiyalhua levitame nimoaxcatis, huan yeca ayecmo elis noaxca iniachtohui cone sesen sihua tapiyali cati iniaxca sequinoc israelitame cati amo levitame.”

⁴² Huajca Moisés quinpojqui nochi israelitame cati achtohui ehuan cati oquichpilme o tacame senquisa quej TOTECO quinquahuatijtoya. ⁴³ Huan nochi oquich israelitame cati quiaixitijtoyaj se metzti quinjcuilolque huan mochijque 22 mil 273 para nochi.

⁴⁴ Huan TOTECO quicamanalhui Moisés huan quiilhui:

⁴⁵ “Techmaca nochi levitame para techtequipanose quej ininpataca amoquichpilhua cati achtohui ehuan, huan techmaca inintapiyalhua nopa levitame quej ininpataca inioquichtapiyalhua cati achtohui ehuan ten nochi israelitame. Quena, nochi levitame elise noaxcahua para ma techtequipanoca na, niamoTECO. ⁴⁶ Pero nopa achtohui ehuan oquichpilme huan tacame ten nochi israelitame quipano 273 imiyaca nopa oquichpilme huan tacame cati eliyayaj levitame. Huajca ten nopa 273 achtohui ehuan israelitame, amo aquí se oquichpil o taca levita para ica nijpatas huan monequi antechcohuilise. ⁴⁷ Huajca para sesen ten nopa 273, monequi techmacaca macuili plata tomi cati quipiya 11 gramos ietica quej nopa tatamachihuali cati quitequihuijaj ipan tiopamit. ⁴⁸ Huan xiquinmactili nopa

tomi Aarón ihuaya iconehua para antechcohulise nopa 273 achtohui ehuaní ipan israelítame cati mocajque.”

⁴⁹ Huajca Moisés quiseli nopa tomi cati nopa masehualme quitax-tahuiyayaj por nopa achtohui ehuaní israelítame cati mocajque. ⁵⁰ Huan para nochi quiseli 1 mil 365 plata tomi ica iética quej nopa tamachihuali cati quitequihuijque ipan tiopamit. ⁵¹ Huan teipa Moisés quinmactili Aarón huan itelpocahua nopa tomi senquisa quej TOTECO quinahuatijtoya.

4

Inintequi iteipan ixhuihua Coat

¹ Teipa TOTECO quinnojnotzqui Moisés huan Aarón huan quinilhui:

² “Xijtananaca se censo ten nochi nopa levítame cati nojquiya elij iteipan ixhuihua Coat. Xiquijcuiloca ajquiya inijuanti hualajque ipan sesen ten nopa huejhueyi tetatme cati eliyayaj itelpocahua nopa huejcapan tata Coat.

³ Ama xiquinpohuaca nochi tacame cati quipiyaj 30 hasta 50 xihuit huan cati huelise tequitise ipan nopa yoyon tiopamit campa timopantíaj.

⁴ “Huan ya ni nopa tequit cati quichihuae iteipan ixhuihua Coat ica nopa tamanti tatzejtzeloltic tiopan calijtic. ⁵ Quema monequi anquijcuenise nopa yoyon tiopamit para anyase sejoyoc, Aarón ihuaya iixhuihua calaquise achtohui huan quiquixtise nopa cortina cati quitzacua ipan caltemit campa calaquij campa nopa caxa cati quipiya cati amohuaya nimocajqui, niamoteco, huan ica ya nopa quitzacuase nopa caxa. ⁶ Huan ipani nopa cortina quitalise nopa seyoc cortina cati tachijchihuali ica inincuetaxo pesoyme. Huan iixco quipatahulise nopa patiyoyoyomit cati azultic huan sempa quicalaquise nopa cuahuit huehueyac ipan ianillos para quihucase.

⁷ “Teipa ipan nopa cuamesa campa eltoc nopa pantzi monequi xijpaj-patahuase se yoyomit azultic. Huan ipan nopa yoyomit quitalise nochi platome, cucharas, caxime huan nopa tazajme cati quitequihuijaj quema quitoyahuaj se tacajcahualisti tatoyahuali. Huan nojquiya nopa pantzi cati nochipa eltos nozona. ⁸ Huan iixco nochi nopa tamanti quipatahuase nopa patiyoyoyomit cati chichiltic. Huan teipa quipiquise ica inincuetaxo pesoyme huan teipa sempa quicalaquise nopa cuahuit huehueyac cati ica quihucase.

⁹ “Teipa quicuisse seyoc nopa patiyoyoyomit cati azultic huan quipatahuase ipan nopa taahuil quetzali ica itaahuilhua, iticuilhua, iplatos, huan nochi ixarro para aceite cati nozona quitequihuijaj. ¹⁰ Huan nochi nopa tamanti ihuaya nopa taahuil quetzali quimimilose ica inincuetaxo pesoyme. Huan teipa sempa quicalaquise nopa cuahuit huehueyac para quihucase.

¹¹ “Teipa quipatahuase seyoc patiyoyoyomit azultic ipan nopa taixpamit ten oro para copali. Teipa quipiquise ica inincuetaxo pesoyme huan sempa quicalaquise nopa huejhueyi cuahuit para ica quihucase. ¹² Huan nochi tamantzitzi cati motequihuíaj tiopan calijtic quisentilise huan quitalise ipan seyoc patiyoyoyomit azultic. Teipa quimimilose ica inincuetaxo pesoyme huan sempa quicalaquise nopa huehueyac cuahuit para quihucase.

¹³ “Teipa monequi quiquixtise nochi nopa cuajnexti ten nopa taixpamit campa quitatíaj tacajcahualisti. Huan ipan quipatahuase seyoc patiyoyoyomit morado. ¹⁴ Huan iixco quitalise nochi ten motequihuíaj ipan taixpamit. Quitalise itepos caja campa quitemaj cuajnexti, iteposchijcolhua para quitzquise nacat, ipalás, huan nopa huajcali para quiselis esti, huan nochi sequinoc teposme cati nozona motequihuijaj. Huan teipa quipiquise

ica inincuetaxo pesojme huan sempa quicalaquise nopa huehueyac cuahuit para ica quihuicase. ¹⁵ Huan quema Aarón huan itelpocahua ya tantose para quiqipiquise nochi nopa tamanti cati tatejtzeltolc cati eltoya tiopan calijtic, huajca quena, hueli quicuiquij iixhuihua Coat para quihuicase ipan ojti hasta campa anajsise. Pero iteipan ixhuihua Coat amo hueli quiitzquise nopa tamanti tatejtzeltolc, pampa miquise. Huajca nochi ni tamanti elis inintequi iteipan ixhuihua Coat para quihuicase.

Itequi Eleazar, itelpoca Aarón

¹⁶ “Huan Eleazar itelpoca nopa totajtzi Aarón quipiyas imaco nopa aceite para taahuilme, nopa copali cati ajhuiyac mijyotía, nopa tacajchualisti ten harina cati monequi mojmosta, huan nopa aceite cati tatejtzeltolc para taiyocatalise para na, niamoTECO. Nelía mocahua imaco Eleazar para quimocuitahuis nochi nopa yoyon tiopamit campa nimocahua amohuaya ica nochi cuamesas huan tamantzitzi cati onca tiopan calijtic huan nochi cati mochijtoc nopona.”

¹⁷ Huan TOTECO quinilhui Moisés ihuaya Aarón:

¹⁸ “Amo xiquincahuilica para iteipan ixhuihua Coat ma quichihuaca tamanti tequit cati amo quiqipiyaj tanahuatili quichihuase para amo miquise. ¹⁹ Para amo tantiyase iixhuihua Coat ipan levitame, quej ni anquichihuase. Aarón huan itelpocahua ma itztoca tiopan calijtic inihuaya huan ma quiilhuiaca sesen iixhui Coat taya monequi quichihuas huan taya monequi quihuicas para amo quinechahuis cati tatejtzeltolc huan miquise. ²⁰ Huan sinta amo aqui cati itelpocahua Aarón tiopan calijtic, huajca amo ma calaquica nopa coatitame yon se talojtzi, pampa huelis quitase se tamanti cati tatejtzeltolc, huan sinta quiitase se tenijqui, miquise.”

Inintequi iixhuihua Gersón

²¹ Teipa sempa TOTECO quinojnotzqui Moisés huan quiilhui:

²² “Xijtanana nojquiya se censo ten nochi nopa levitame cati iixhuihua Gersón cati itztoya huejcajquiya. Xiquijcuilo ajquiya injuanti hualajque ipan sesen ten nopa huejhueyi tetatme cati eliyayaj itelpocahua Gersón huejcajquiya. ²³ Xiquinpohuaca nochi tacame cati quiqipiyaj 30 hasta 50 xihuit cati huelise calaquise ipan notequi, niamoTECO, ipan nopa yoyon tiopamit campa timopantíaj.

²⁴ “Huan ya ni elis inintequi iixhuihua Gersón quema tequipanose tiopan calijtic huan quema quihuicase tamamali. ²⁵ Quihuicase nopa cortinas ica cati quichijque nopa cuartos ipan tiopa, huan nopa inincuetaxo pesojme cati ica quitzactoque, huan nopa cortinas cati ica quitzacuaj campa ancalaquij tiopan calijtic. ²⁶ Nojquiya quihuicase nopa cortinas ipan nopa tatzacti iteno calixpamit, ihuaya nopa cortina cati quitzacua campa ancalaquij campa calixpamit cati quiyahualohua nopa tiopamit huan nopa taixpamit. Huan quihuicase nochi lazos huan teposme cati motequiuhúaj ipan nopa cortinas. Huajca elis inintequi iixhuihua Gersón para quihuicase ni tamantzitzi. ²⁷ Huan Aarón ihuaya itelpocahua quinilhui iixhuihua Gersón sesen tequit cati monequi quichihuase huan cati quihuicase. ²⁸ Pero elis Itamar, itelpoca nopa totajtzi Aarón, cati achi más quinnahuatis iixhuihua Gersón ipan inintequi.

Inintequi iixhuihua Merari

²⁹ “Xiquinpohua nojquiya nochi levitame cati elij iixhuihua Merari ten huejcajquiya ica sese inintelpocahua, pampa nochi ome mochijtoque huejhueyi tetajme. ³⁰ Xiquinpohua nochi iniixhuihua cati quiqipiyaj 30 hasta

50 xihuit huan hueli calaquise tequipanose tiopan calijtic. ³¹ Iixhuihua Merari quihuicase nopa tiopamit ihuapalhua, icuaixtapalhua, itaquetzalhua huan itepos cuatetonyo. ³² Nojquiya quihuicase nopa taquetzalme ipan calixpamit huan ininteopos cuatetonyo, huan ininteopos estacas, huan inimecayohua huan nochi nopa tamantzitzi cati quitequihuiaj. Huan Itamar monequi quinotzas sesen tacat ica itoca huan quiilhuis taya quihuicas quema anmijcuenise. ³³ Huajca ya ni eli inintequi iixhuihua Merari huan monequi quinnahuatis Itamar, icone nopa totajtzi Aarón.”

³⁴ Huajca Moisés huan Aarón huan nochi nopa tayacanani ten nopa israelitame quinpojque iixhuihua Coat. Huan quiniyocatali ipan nahui familias quej quisque ten inahui telpocahua Coat huejcajquiya. ³⁵ Quinpojque cati quiipiyayaj 30 hasta 50 xihuit huan quiniijcuiljojque para quitequipanose TOTECO ipan nopa yoyon tiopamit campa timopantíaj. ³⁶ Huan iixhuihua Coat ajsique 2 mil 750. ³⁷ Ya ni elque nochi iixhuihua Coat cati hueliyayaj tapalehuise ipan nopa yoyon tiopamit. Huan Moisés huan Aarón quinpojque huan quiniijcuiljojque senquisa quej TOTECO quinahuatijtoya Moisés.

³⁸ Huan nojquiya quinpojque iixhuihua Gersón. Huan quiniyocatali ipan ome familias quej quisque ten sese nopa ome telpocahua Gersón huejcajquiya. ³⁹ Quinpojque cati quiipiyayaj 30 hasta 50 xihuit, ⁴⁰ huan quiniijcuiljojque para quitequipanose TOTECO ipan nopa yoyon tiopamit huan ajsique 2 mil 630. ⁴¹ Huajca ya ni elque nochi iixhuihua Gersón cati hueliyayaj tapalehuise ipan nopa yoyon tiopamit campa timopantíaj. Huan Moisés huan Aarón quinpojque huan quiniijcuiljojque senquisa quej TOTECO quinahuatijtoya Moisés.

⁴² Huan nojquiya quinpojque iixhuihua Merari. Huan quiniyocatali ipan ome familias quej quisque ipan sese ten nopa ome itelpocahua Merari huejcajquiya. ⁴³ Quinpojque cati quiipiyayaj 30 hasta 50 xihuit huan quiniijcuiljojque para quitequipanose TOTECO ipan nopa yoyon tiopamit campa timopantíaj. ⁴⁴ Huan iixhuihua Merari ajsique 3 mil 200. ⁴⁵ Huajca ya ni elque nochi iixhuihua Merari cati hueliyayaj tapalehuise ipan nopa yoyon tiopamit. Huan Moisés huan Aarón quinpojque senquisa quej TOTECO quinahuatijtoya Moisés.

⁴⁶ Huan Moisés huan Aarón quinpojque nochi levitame cati itztoyaj ipan nopa tonali. Huan quiniijcuiljojque inintoca nopa tacame cati quisque ipan Coat, Gersón huan Merari cati elque nopa eyi itelpocahua Leví cati huejcajquiya. Huan quiniijcuiljojque cati quisque ten sese ininchiueyi telpocahua. ⁴⁷ Huan nopa tacame cati quiipiyayaj 30 hasta 50 xihuit huan hueliyayaj tapalehuise ipan tiopamit huan tamamase, ⁴⁸ ajsique 8 mil 580. ⁴⁹ Huajca ya ni elque nochi iteipan iixhuihua Leví cati huelque tapalehuise ipan tiopamit. Huan senquisa quej TOTECO quinahuatijtoya Moisés, quinpojque nochi cati quichihuase tequit o cati quihuicase tamantzitzi.

5

Tamanti cati amo tapajpactic iixpa TOTECO

¹ Teipa TOTECO quicamanalhui Moisés huan quiilhui:

² “Xiquinnahuati nochi israelitame para ma quinquixtica ten ininchaichaj nochi cati palani ininacayo ica lepra, huan nojquiya cati atemoj ipan inintacayo ihuaya nochi cati amo tapajpacticque pampa quiitzquijque se mijcatzi. Huan xiquinquixtica huejca ten amoaltepe ten yoyoncalme.

³ Xiquirequixtica tacame huan nojquiya sihuame cati mopantíaj ica niocolisti, huan ma yaca itztotij huejca ten amochajchaj para amo quichihuase amo tapajpactic campa amoyoyoncalhua pampa nozona tatajco ten amouanti, niitztoc na cati nitatzejtzololitic.”

⁴ Huajca nopa israelitame quineltocaque nochi cati TOTECO quinahuatijtoya Moisés huan quinquirequixtica nochi cati quej nopa mococohuayayaj.

Tanahuatilme sinta se quichihua cati amo cuali

⁵ Huan TOTECO quinojnotzqui Moisés huan quilhui:

⁶ “Xiquirequixtica nochi israelitame para quema se tacat o se sihuat quixpano seyoc masehuali, na niquirequixtica para quihuica tajtacoli noixpa. ⁷ Huan monequi nopa tacat o nopa sihuat technelihuis noixpa cati quichijtoc huan teipa yas quitaxtahuiti nopa seyoc cati quichihuilijtoc fiero. Huan quicuepilis nochi cati quinenpolojtoc huan nojquiya quipihuilis 20 por ciento más huan amo quej quicuitoya. ⁸ Huan sinta nopa tacat cati quitachtequihijtoya o ten hueli quichihuilijtoya ya mictoc huan amo aqui yon se iteixmatca para quicuepilis, huajca nopa tomi cati quitahuiquilía elis para Toteco huan para quitechihuis se totajtzi. Huan nojquiya monequi quimacas nopa totajtzi nopa oquich borrego cati monequi. Huan nopa totajtzi techentcahuilis para techixzacuulis nopa tajtacoli cati quichijtoc nopa tacat.

⁹ “Nochi nemacti cati israelitame techhualiquilíaj na, niamoTECO, elis iaxca nopa totajtzi. ¹⁰ Nochi tamanti tacualisti huan tapalehuili ten inimil cati quimacase TOTECO, mocahuas iaxca nopa totajtzi.”

Tanahuatilme para cati mosihuaj tasomatij

¹¹ Huan TOTECO quinojnotzqui Moisés huan quilhui ma quinmaca israelitame ni tanahuatilme:

¹² “Sinta isihua se tacat quixpanos ihuehue huan mocahuas ica seyoc tacat, ¹³ pero amo aqui quitas para huelis quitatelhuis ica itajtacol, ya ni cati quichihuas. ¹⁴ Sinta ihuehue, quena, quitasomati isihua huan moilhuía para tajtacolchijtoc, o huelis ihuehue quitasomati isihua huan amo teno quichijtoc, quej ni anquisencahuase. ¹⁵ Nopa tacat monequi quihuicas isihua iixpa totajtzi ica se tacajcahualisti ten ome kilos harina ten cebada, huan techentcahuilis para na, niamoTECO. Pero amo quimanelos nopa harina ica aceite, yon amo quitallilis copali taajhuuyacayot, pampa ya nopa elis se tacajcahualisti para quimatis cati temacti, sinta moilhuía para tajtacolchijtoc isihua.

¹⁶ “Huan nopa totajtzi quihualicas nopa sihuat para ma monechcahui huan moquetzas noixpa, niamoTECO. ¹⁷ Huan nopa totajtzi quicuis se achi at cati taiyocatalili para na huan quitecas ipan se xarro ten soquit, huan quimanelos ica se achi taltepociti cati eltoc talchi ten nopa yoyon tiopamit campa itztoc. ¹⁸ Huan teipa nopa totajtzi quichihuas para nopa sihuat ma moquetza noixpa, niamoTECO, huan quitojomas itzoncal. Huan nopa totajtzi quitalis imaco nopa sihuat nopa tacajcahualisti ten harina pampa ihuehue moilhuía tajtacolchijtoc. Huan nopa totajtzi moquetzas iixpa nopa sihuat huan quipixtos imaco nopa xarro ica nopa at cati chichic huan cati quimaca se tatechihuali, o se tatzacuilitli cati tajtacolchijtoc. ¹⁹ Huajca nopa totajtzi quichihuas para nopa sihuat ma techestigojquetza, niamoTECO, sinta amo tajtacolchijtoc. Huan teipa nopa totajtzi quilhuis: ‘Sinta amo timocajtoc ica seyoc tacat quema ya tijpixtoc mohuehue, yon amo teno cati amo cuali tijchijtoc ica seyoc tacat, huajca amo teno ma mopanti quema

tiquis ni at cati chichic cati quihualica tatelechihualisti ipan cati tajtacolchijtoc. ²⁰ Pero sinta timochijtoc amo titapajpactic huan titaixpanotoc quema ya tijpixtoc mohuehue huan timocajtoc ica seyoc tacat, ²¹ huajca TOTECO ma mitztelchihua huan ma mitztatzacuiliti para nochi ma quuitaca. ²² Huan quema tiquis ni at cati chichic, quichihuas ma palani mometztomahuiya huan ma semahuiya moijti huan amo huelis tiquinpiyas coneme.' Huan nopa sihuat quijjtos: 'Quej nopa ma eli.'

²³ "Huajca nopa totajtzi quijjcuilos ni tatelechihualisti ipan se cuetax amat ica tinta huan teipa quixpolos nopa tinta huan nopa camanali ica nopa at cati chichic. ²⁴ Teipa quichihuas para nopa sihuat ma quii nopa at cati temaca se tatelechihualisti ipan cati tajtacolchijtoc. Huan nopa at calaquis iijtico huan quichihuas chichic iijtico sinta quipiya tajtacoli. ²⁵ Huan teipa nopa totajtzi quiselis ten imaco nopa sihuat nopa tacajcahualisti ten harina, huan quihuisos iixpa TOTECO huan quihuicas campá taixpamit. ²⁶ Huan quicuis se tamojtzoli ten nopa tacajcahualisti ten cebada huan quitatis ipan nopa taixpamit quej elisquía nochi nopa tacajcahualisti.

"Huan teipa quema nopa totajtzi ya quichijtos nochi ni tamanti, quimacas nopa at ma quii. ²⁷ Huan sinta mochijtoc amo tapajpactic huan quixpanotoc ihuehue, nopa at cati quihualica tatelechihualisti calaquis iijtico huan quichihuas para isihuayo ma semahuiya huan imetztomahuiya ma palani. Huan nochi imasehualhua quiiase nopa sihuat para tatelechihuali. ²⁸ Pero sinta nopa sihuat amo quipiya tajtacoli, amo teno oncas huan cuali huelis conepiyas.

²⁹ "Huajca ya ni eli nopa tanahuatili quema se quitasomati isihua pampa mochijtoc amo tapajpactic huan quixpanotoc ihuehue quema ya motahuacaltijtoya ihuaya. ³⁰ O ya ni nojquiya para quema se tacat moilhuía para isihua quixpanotoc huan quitasomati, huan quinequi quimatis cati temachtí. Ihuehue quixpantis isihua noixpa, ni amoTECO, huan nopa totajtzi quichihuilis senquisá quej quijjtohua ni tanahuatili. ³¹ Huan amo elis itajtacol ihuehue sinta quiajsis ni tatelechihualisti, pampa eli ya itajtacol. Huan monequi quijyohuis nochi tatzacuilitisti."

6

Tanahuatilme para nazareos

¹ Huan sempa TOTECO quiihui Moisés:

² "Xiquinilhui nochi israelitame para quema se sihuat o se tacat quinequi moiycacahuas para na ni amoTECO, para elis se nazareo huan moiycatalis para senquisá elis noaxca, huan amo quej sequinoc sihuame o tacame, ³ huajca nopa masehuali amo hueli quis xocomeca at huan yon se taili cati nelcococ. Yon amo hueli quis cati sihocoltijtoque, yon vinagre cati quichijtoque ica xocomeca at, o cati cococ. Nojquiya amo huelis quicuas xocomecat itajca, yon itajca cati ya huactoc. ⁴ Ipan nochi nopa tonali quema noca mocajtoc para moiycacahuas quej se nazareo, amo teno quicuas cati huala ipan xocomecat itajca, yon ixinacho, yon ipetayo. ⁵ Ipan nochi nopa tonali quema moiycacajtoc para na, amo hueli moximas. Yaya elis tatzejtzeltic huan taiyocatalili para na, ni amoTECO, huan quicahuas ma moscaltí huehueyac itzoncal hasta quitamiltis nochi nopa tonali huan nopa tamanti cati techilhujtoc. ⁶ Huan ipan nochi nopa tonali quema moiycatalijtoc para na, amo hueli monechcahuis campá se mijcatzi, pampa mochihuas amo tapajpactic noixpa. ⁷ Masque miquis itata, inana, o se isihuaicni, o se itacaicni, ma amo monechcahuis para mochihuas amo tapajpactic pampa

moyocatalijtoc para na, niamoTECO Dios, huan quipiyas itzoncal huehueyac cati quinescayotía cati noca mocajtoc. ⁸ Huan nochi tonali cati huejcahuas cati noca mocajtoc, monequi mocahuas tatzejtzeloctic noixpa.

⁹ “Huan sinta samolhui san huetzis mictoc se acaya cati moquetzotc ihuaya, huajca, quena, quichihuas amo tapajpactic noixpa, masque amo quinequiyaya mochihuas amo tapajpactic. Huajca quema ajsis chicome tonati para mochijtoc amo tapajpactic, monequi quitequis nochi itzoncal pampa itzoncal huehueyac quinescayotiyaya para taiyocatali para na.

¹⁰ Huan ipan chicueyi tonati, quinhualicas ome pilpichontziti, o ome pilpalomajtziti, huan quimacas nopa totajtzi campá icalte nopa yoyon tiopamit campá timopantíaj. ¹¹ Huan nopa totajtzi techtencahuilis nopa pil-tototzi quej se tacajcahualisti por tajtacoli, huan nopa seyoc techtencahuilis quej se tacajcahualisti tatatili. Huan ica ya ni techixtzacuilis itajtacol pampa itztoa nechca se mijcatzi. Huan nojquiya ipan nopa tonal sempa moyocatalis para na, niamoTECO, huan sempa pehuas quicahuas ma moscalti itzoncal. ¹² Nopa tonali cati ya panotoc quema achtohui moyocatalijtoya para na, quixpolo. Sempa monequi motemactilis ica na para elis nazareo nochi tonali quej quichijqui achtohui. Huan monequi quihualicas se pil-oquich borreojtzi cati san quiipya se xihuit para techtencahuilis quej se tacajcahualisti pampa quihuica tajtacoli.

¹³ “Huan quema ya tamis nochi nopa tonali cati motemacac para elis nazareo, ya ni nopa tanahuatili cati sesen monequi quitoquilis. Monequi huas huan techhualiquilis se tacajcahualisti campá icalte nopa yoyon tiopamit. ¹⁴ Techtencahuilis se piloquich borreojtzi cati san quiipya se xihuit huan cati amo teno quiipya huan elis se tacajcahualisti tatatili. Huan nojquiya techmacas se pilsihua borreojtzi cati san quiipya se xihuit huan amo teno quiipya huan nopa elis se tacajcahualisti por tajtacoli. Nojquiya techtencahuilis se oquich borrego cati amo teno quiipya huan elis para se tacajcahualisti para nimoyoltalis ihuaya. ¹⁵ Nojquiya ihuaya, techmacaca nopa tacajcahualisti ten harina huan cati tatoyahuali cati monequi techmacase ihuaya. Huan monequi nopa tacajcahualisti ten harina elis se chiquihuit temitoc ica pantzi cati amo quiipya tasonejçayot. Quipiyas tortas cati quichijtoque ica cuali harina maneltic ica aceite, huan nojquiya quiipyas pantzi cati cacatztic cati quixacualojoque ica aceite.

¹⁶ “Huan nopa totajtzi quitencahuas nochi ya ni noixpa ihuaya nopa tacajcahualisti por tajtacoli huan nopa tacajcahualisti tatatili cati ne nazareo quihualicac. ¹⁷ Huan techmacas nopa oquich borrego huan nopa chiquihuit ica pantzi cati amo quiipya tasonejçayot, huan elis se tacajcahualisti para tayoltalili ica na. Huan nopa totajtzi nojquiya techmacas nopa tacajcahualisti ten harina huan cati tatoyahuali cati ihuaya yahui.

¹⁸ “Huan nopona campá icalte nopa yoyon tiopamit campá timopantíaj, nopa nazareo monequi quiximas nochi itzoncal cati quinescayotiyaya cati noca mocajtoya, huan quicuis nochi nopa tzoncali huan quitalis ipan nopa tit cati eltoc itantita nopa tacajcahualisti para tayoltalili ica na.

¹⁹ “Huan teipa quema cuali motzoncaltectosa ne nazareo, nopa totajtzi quicuis iajcol nopa oquich borrego cati molontoya hasta cuali icstitoc, huan quitalis imaco ne nazareo ihuaya se pantzi ica tatzopelcayot huan se pantzi cati cacatztic cati eltoc ipan nopa chiquihuit huan cati amo quiipya tasonejçayot. ²⁰ Huan teipa nopa totajtzi quicuis huan quihuisos nopa tacajcahualisti noixpa, niamoTECO, para ma eli se tacajcahualisti tahuisoli. Huan nochi nopa tacajcahualisti mochihuas tatzejtzeloctic huan elis iaxca nopa totajtzi, ica nopa pantzi ihuaya ielchiqui huan iajcol nacayo nopa borrego cati tahuisoli. Huan teipa quema nopa totajtzi tamis techtencahuilía

nochi noixpa, ya cati eliyaya nazareo huelis quiis xomeca at pampa ya tanqui cati noca mocajqui, niamoTECO.

²¹ “Huajca ya ni elqui nopa tanahuatili para se nazareo, huan amechilhuía taya tacajchualisti monequi antechtencahuilise quema se quitamichihuas cati noca mocajtoc para quichihuas. Nojquiya monequi quihualicas nochi sequinoc tacajchualisti cati techilhui techmactilis quema moiycatali huan mochijqui nazareo.”

Camanali cati ica totajtzitzi tatiochihuase

²² Teipa TOTECO quiilhui Moisés:

²³ “Xiquilhui Aarón inihuaya iconehua para ma quintiochihuaca israelitame ica ni camanali. Ma quiijtoca:

²⁴ “Ma TOTECO mitztiochihua huan ma mitzmocuitahui.

²⁵ Ma cahuani ixayac TOTECO ica paquilisti quema moilhuía ten ta.

Ma quiipiya hueyi iyolo ica ta.

²⁶ Ma TOTECO mitznextili itaicnelijcayo huan ma mitzmaca itasehuilis ipan moyolo.’

²⁷ “Ica ni camanali, Aarón huan iconehua technotzase ma niquntiochihua israelitame huan, quena, na niquntiochihuas para nochi quimatise injuanti noaxcahua.”

7

Quitatzeltzelochihuase taixpamit

¹ Huan ipan nopa tonali quema Moisés ya quitamichijtoya nopa yoyon tiopamit campa TOTECO mocahuasquía inihuaya, quiatzejtzelhui ica aceite sesen tamanti cati eltoya calijtic, huan quiyocatali para TOTECO. Nojquiya quiatzejtzelhui ica aceite nopa taixpamit huan nochi cati motequihuía nopona. ² Teipa yajque nopa tayacanca israelitame ipan sesen hueyi familia cati tapalehuijtoyaj para quitananque nopa censo. ³ Huan quitalitaj iixpa TOTECO nochi cati quinequiyayaj quimactilise. Huan sesen ten nopa tayacanani quihualicac se hueyi toro. Huan sese ome tayacanani quihualicaque se cuacarro. Huajca ica nochi nopa nemacti cati quihualicaque elqui chicuase carrojme cati tzactoque, huan 12 huejhueyi torojme cati quimatij tatilanase huan quimacaque TOTECO iteno icalte nopa yoyon tiopamit campa mocahua TOTECO.

⁴ Huan TOTECO quiilhui Moisés: ⁵ “Xiquinseli nopa cuacarrojme huan nopa huejhueyi torojme cati quimatij tatilanaj, huan xiquinmaca nopa levitame para ma quintequihuica ipan nochi nopa tequit cati monequi para quihuicase cati eltoc ipan nopa yoyon tiopamit campa timopantíaj. Xijmaca sesen levita nopa tamantzitzi cati monequi quitequihuis ipan ten ya itequi.”

⁶ Huajca Moisés quinseli nopa cuacarrojme huan nopa huejhueyi torojme huan quinmajmacac nopa levitame. ⁷ Iixhuihua Gersón quinmacac ome cuacarrojme huan nahui huejhueyi torojme para quitequihuisse ipan inintequi. ⁸ Huan iixhuihua Merari quinmacac nahui cuacarrojme huan chicueyi huejhueyi torojme para quitequihuisse ipan inintequi. Nochi inin mocajqui imaco Itamar, icone nopa totajtzitzi Aarón. ⁹ Pero iixhuihua Coat amo quinmacac yon se cuacarro huan yon se toro, pampa monejqui quihuicase iniajcoltipa nopa tamantzitzi tatzejtzeloltique cati mocajqui inimaco para quimocuitahuise.

¹⁰ Huan nojquiya quema ajsic tonali para quiyocatalise nopa taixpamit para TOTECO huan quitatzeltzelochihuase, sesen ten nopa tayacanani ten nochi huejhueyi familias quihuicaque se nemacti huan quitalijque iixpa

nopa taixpamit. ¹¹ Huan TOTECO quiilhui Moisés: “Mojmosta ipan sesen tonal quema anquitatzejtzolochihuase nopa taixpamit, xijcahua para san setzi tayacanquet ma techmactili cati quihualicac.”

¹² Huaيجا ipan nopa achtohui tonali, quimactili inemac Naasón, icone Aminadab, ipan nopa hueyi familia Judá. ¹³ Huan inemac eliyaya se hueyi plato ixsepantic ten plata huan ietica eliyaya se kilo huan tajco, ihuaya se hueyi taza ten plata ica ietica quej tajco kilo ipan itatamachihual nopa yoyon tiopamit. Huan nopa plato huan nopa hueyi taza quihualicac temitoc ica harina cati achi más cuali maneltic ica aceite para se tacajc ahualisti ten harina. ¹⁴ Nojquiya quihualicac se cuchara cati senquisa oro ica 110 gramos ietica, huan temitoya ica copali. ¹⁵ Huan quihualicac se becerro, se oquich borrego huan se piloquich borregojtzi cati san quiipiya se xihuit para elise se tacajc ahualisti tatatili. ¹⁶ Nojquiya quihualicac se oquich chivo quej se tacajc ahualisti por tajtacoli. ¹⁷ Huan para se tacajc ahualisti para ma onca tayotalili ihuaya TOTECO, quinhualicac ome huejhueyi torojme cati quimatij tatilanaj, macuulti oquich borregoyme, macuulti oquich chivoyme huan macuulti piloquich borregojtziti cati san quiipiyaj se xihuit. Nochi ya ni elqui nopa nemacti cati Naasón, icone Aminadab, quihualicac.

¹⁸ Ipan ome tonati quihuicac inemac Natanael, icone Zuar, cati eliyaya tayacanquet ipan nopa hueyi familia Isacar. ¹⁹⁻²³ Huan inemac cati temacac elqui san se quej cati temacac Naasón.

²⁴ Ipan eyi tonati quihuicac se nemacti Eliab, icone Helón, cati eliyaya tayacanquet ipan nopa hueyi familia Zabulón. ²⁵⁻²⁹ Huan temactili inemac cati elqui san se quej nopa sequinoc.

³⁰ Ipan nahui tonati quihuicac se nemacti Elisur, icone Sedeur, cati eliyaya tayacanquet ipan nopa hueyi familia Rubén. ³¹⁻³⁵ Huan temactili nojquiya san se inemac quej nopa sequinoc.

³⁶ Ipan macuili tonati quihuicac se nemacti Selumiel, icone Zurisadai, cati eliyaya tayacanquet ipan nopa hueyi familia Simeón. ³⁷⁻⁴¹ Huan temactili nojquiya san se nemacti quej nopa sequinoc.

⁴² Ipan chिकासen tonati quihuicac se nemacti Eliasaf, icone Reuel, cati eliyaya tayacanquet ipan nopa hueyi familia Gad. ⁴³⁻⁴⁷ Huan temactili nojquiya san se nemacti quej nopa sequinoc.

⁴⁸ Ipan chicome tonati quihuicac se nemacti Elisama, icone Amiud, cati eliyaya tayacanquet ipan nopa hueyi familia Efraín. ⁴⁹⁻⁵³ Huan temactili nojquiya san se nemacti quej nopa sequinoc.

⁵⁴ Ipan chicueyi tonati quihuicac se nemacti Gamaliel, icone Pedasur, cati eliyaya tayacanquet ipan nopa hueyi familia Manasés. ⁵⁵⁻⁵⁹ Huan temactili nojquiya san se nemacti quej nopa sequinoc.

⁶⁰ Ipan chicnahui tonati quihuicac se nemacti Abidán, icone Gedeoni, cati eliyaya tayacanquet ipan nopa hueyi familia Benjamín. ⁶¹⁻⁶⁵ Huan temactili nojquiya san se nemacti quej nopa sequinoc.

⁶⁶ Ipan majtacti tonati quihuicac se nemacti Ahiezer, icone Amisadai, cati eliyaya tayacanquet ipan nopa hueyi familia Dan. ⁶⁷⁻⁷¹ Huan temactili nojquiya san se nemacti quej nopa sequinoc.

⁷² Ipan majtacti huan se tonati quihuicac se nemacti Pagiél, icone Ocrán, cati eliyaya tayacanquet ipan nopa hueyi familia Aser. ⁷³⁻⁷⁷ Huan temactili nojquiya san se nemacti quej nopa sequinoc.

⁷⁸ Ipan majtacti huan ome tonati quihucac se nemacti Ahira, icone Enán, cati eliyaya tayacanquet ipan nopa hueyi familia Neftalí. ⁷⁹⁻⁸³ Huan temactili nojquiya san se nemacti quej nopa sequinoc.

⁸⁴ Nochi ya ni elqui nopa nemacti cati nopa tayacanani ten israelitame temactilijque para quiyocatalise nopa taixpamit para TOTECO huan quitatzejtzelolchihuase. Ica nochi elqui 12 huejhueyi platos cati ixsepantique ten plata, 12 huajcali ten plata, huan 12 huejhueyi cucharas ten oro. ⁸⁵ Huan sesen plato quipixqui se kilo huan tajco ietica, huan sesen huajcali ten plata quipixqui tajco kilo ietica. Ica nochi nopa tamanti ten plata elqui nechca 26 kilos ietica ipan itatamachihual nopa yoyon tiopamit. ⁸⁶ Nojquiya oncayaya 12 cucharas ten oro cati temitoya ica copali cati quipixqui 110 gramos ietica ipan itatamachihual nopa yoyon tiopamit. Nopa oro ten nochi nopa cucharas quipixqui se kilo huan 320 gramos ietica.

⁸⁷ Huan nopa tapiyalme para tacajchualisti tatatili elque ica nochi 12 becerros, 12 oquich borregojme, 12 piloquich borregojtitzti cati san quipiyaj se xihuit ihuaya nopa 12 tacajchualisti ten harina cati monequiyaya inihuaya, huan 12 oquich chivojme para quinmacase quej tacajchualisti por tajtacoli.

⁸⁸ Huan nochi nopa tapiyalme cati quinhualicaque para tacajchualisti para tayoltalili elqui ica nochi 24 becerros, 60 oquich borregojme, 60 oquich chivojme huan 60 piloquich borregojtitzti cati sanoc quipiyayaj se xihuit. Nochi ya ni elqui cati quimactilijque TOTECO quema quiyocacahuayayaj huan quitatzejtzelolchihuayaj nopa taixpamit para TOTECO.

⁸⁹ Huan quema Moisés calajqui ipan nopa yoyon tiopamit campa mopantiyay ihuaya Toteco Dios para quicamanalhuis, quicajqui itoscac. Huan caquistic para itoscac quisayaya tatajco ten nopa ome ilhucac ehuan cati inintoca querubines cati moquetzttoyaj iixco itzajca icaxa. Huajca nopona Toteco Dios quicamanalhui Moisés.

8

Tanahuatilme para nochi taahuilme

¹ Huan TOTECO quicamanalhui Moisés huan quihhui:

² “Xiquihui Aarón quema quintalis nochi taahuilme, ma quichihua para ma taahui ica iixmelac ten nopa taahuil quetzali.”

³ Huan quichijqui Aarón nochi cati TOTECO quinhuatijtoya Moisés, huan quinchijchijqui nochi taahuilme para ma taahuica ica iixmelac. ⁴ Huan nopa taahuil quetzali quichijchijtoyaj ica senquisa oro cati quitejtejtzontoyaj san ica martillo. Ten iniicxi hasta iyecapa campa quichihuilijtoyaj ixochiyo, nochi quichijque san ica martillo. Nochi iyejyejca nopa taahuil quetzali elqui senquisa quej TOTECO quinxtilijtoya Moisés ma quichihua.

Quinyocacajqui nochi levitame para TOTECO itequi

⁵ Huan TOTECO quicamanalhui Moisés huan quihhui:

⁶ “Xiquinquixti nochi iteipan ixhuihua Leví ten ne sequinoc israelitame huan xiquintapajpacchihua noixpa para techtequipanose. ⁷ Ya ni cati tijchihuas: xiquinatzejtzelhuis ica at cati tetapajpacchihua noixpa. Teipa moximase huan mohuatanise hasta moquixtilise nochi tzoncali ipan inintacayo. Teipa maltise, huan cuali quichicuenise iniyoyo, huan quej nopa elise tapajpactique para techtequipanose. ⁸ Teipa ma quihualicaca se becerro huan nopa tacajchualisti ten harina cati ihuaya yahui. Ya nopa elis cuali harina maneltic ica aceite. Huan nojquiya quihucase seyoc becerro quej se tacajchualisti por tajtacoli. ⁹ Ta tijchihuas para nopa levitame ma monechcahuica icalteno ni yoyon tiopamit campa timopantiaj huan

nochi israelitame nojquiya nozona ma mosentilica. ¹⁰ Teipa xijchihua para nopa levitame ma moixnextica noixpa huan nopa sequinoc israelitame ma quintalilica inimax ipan inintzonteco. ¹¹ Huan Aarón quihuisos imax noixpa, niamoTECO, quej techmaca se tacajcahualisti tahuisoli, huan quej nopa techmactilis nochi levitame quej se hueyi tacajcahualisti cati nochi israelitame techmacaj na, niamoTECO. Huan ica ya nopa quiniyocatalis nochi levitame para techtequipanose.

¹² “Teipa nochi levitame quitalse inimax ipan inintzonteco nopa becerros. Teipa techtencahuilise se becerro quej se tacajcahualisti por tajtacoli huan seyoc becerro techmactilise quej se tacajcahualisti tatatili para na, niamoTECO, para techixtzacuilise inintajtacolhua nochi levitame. ¹³ Huan teipa xiquintali nochi nopa levitame para ma moquetzaca iniixpa Aarón huan itelpocahua, huan nochi techmacas quej se tacajcahualisti tahuisoli para na, niamoTECO. ¹⁴ Huan quej ni tiquniyocatalis nopa levitame ten nochi sequinoc israelitame, huan nochi levitame elise noaxcahua. ¹⁵ Huan quema ya anquintapajpacchijtose nopa levitame huan anquinnextijtose noixpa quej se tacajcahualisti tahuisoli, injuanti hueli calaquis para techtequipanose ipan ni yoyon tiopamit campa timopantíaj.

¹⁶ “Pampa nochi levitame senquisa noaxcahua huan amo quej sequinoc israelitame, pampa nimoaxcati nochi levitame quej ininpataca nochi ininconeua israelitame cati achtohui ehuan cati monequiyaya techmactilisqueíaj. ¹⁷ Pampa nelía noaxcahua nochi cati achtohui tacatij ten israelitame, masque ininconeua o inintapiyalhua, nochi cati achtohui tacatij noaxcahua. Pampa huejcaquiyua quema niquinmicti nochi coneme cati achtohui tacatque ipan tali Egipto, niquniyocatali para noaxcahua nochi coneme cati achtohui ehuan ten israelitame. ¹⁸ Pero ama quej ininpataca nopa achtohui ehuan ten nochi israelita coneme, nimoaxcatijtoc nochi levitame para noaxcahua. ¹⁹ Huan ama nochi levitame cati niquintapejpeni iyoca ten nochi sequinoc israelitame nijmaca Aarón huan itelpocahua quej se nemacti para quinpalehuise quichihuase nopa tequit tatzéjtzololte ipan ni yoyon tiopamit campa timopantíaj. Huan nopa levitame tequitise quej ininpataca nopa sequinoc israelitame. Huan techtencahuilise inintacajcahualis nopa sequinoc israelitame para quiixtzacuase inintajtacolhua noixpa na, niamoTECO. Huan quej ni, cati hueli israelita amo calaquis ipan ni yoyon tiopamit para tapalehuise para amo quinajsis israelitame se hueyi cocolisti cati ica miqoise.”

²⁰ Huajca Moisés, Aarón huan nochi israelitame quichijque ica nopa levitame nochi cati TOTECO quinahuatijtoya Moisés ma quichihuaca. ²¹ Huan nochi levitame motapajpacchijque huan quichicuenijque iniyoyo, huan Aarón quinpanexti iixpa TOTECO quej se tacajcahualisti tahuisoli. Huan Aarón nojquiya quitencajqui iixpa se tacajcahualisti para quinixtzacuilis inintajtacolhua para ma elica tapajpactique iixpa. ²² Huajca quema tanqui nochi ni tamanti cati mochijqui, nopa levitame pejque calaqui para quichihuase nochi inintequi ipan nopa yoyon tiopamit campa timopantíaj ihuaya TOTECO, huan tequitique ica itanahuatil Aarón huan itelpocahua. Huan nochi quichijque senquisa quej TOTECO quinahuatijtoya Moisés ma quinchihuili nopa levitame.

Quesqui xihuit ma tequit se levita

²³ TOTECO nojquiya quicamanalhui Moisés huan quilhui:

²⁴ “Nochi levitame quema quiaxitijtose 25 xihuit, monequi quipehualtise para techtequipanose ipan ni yoyon tiopamit campa timopantíaj. ²⁵ Huan

quisase ipan nopa tequit quema quiaxitise 50 xihuit. ²⁶ Teipa quema ya quiaxitijtose nopa xihuit para mosiyajquetzase, huelis quinpalehuise inihuampoyohua ica tequit cati amo ohui, pero nopa tequit cati ohui ayecmo ma quichihuaca. Quej nopa anquintequimacase levitame.”

9

Quenicatzá ma quinescayotica nopa Pascua ilhuit

¹ Quema TOTECO quicamanalhui Moisés huan quiilhui nochi ni camanali ya panotoya se xihuit para quistejque ipan tali Egipto huan calaquiyayaj ipan nopa achtohui metzti ipan xihuit ome. Huan ipan nopa tonali nopa israelitame itztoyaj ipan nopa huactoc tali Sinaí huan nojquiya TOTECO quiilhui ni camanali:

² “Sesen xihuit monequi nochi israelitame quinescayotise nopa ilhuit cati itoca Pascua ipan nopa tonali cati nimechnahuatijtoc. ³ Quema ya tiotaquixtos ipan 14 itequi ni metzti cati achtohui ipan toxihui, anquitoquulise nopa tanahuatili quej ijculijtoc. Senquisa quej nimechnextlijtoc para anquichihuase, ya nopa anquichihuase.”

⁴ Huaica Moisés quinnahuati nopa israelitame ma quinescayotica nopa Pascua ilhuit. ⁵ Huan nozona ipan nopa huactoc tali cati itoca Sinaí quema tiotaquixtoya ipan 14 itequi nopa achtohui metzti ipan nopa xihuit, injuanti ilhuichijque senquisa quej TOTECO quinnahuatijtoya Moisés.

⁶ Pero itztoyaj sequij tacame cati mochijtoyaj amo tapajpactique iixpa TOTECO pampa quitzquitoyaj se mijcatzi, huan yeca amo huelque quinescayotise nopa Pascua ipan nopa tonali. Huaica yajque quitatoy Moisés ihuaya Aarón ipan nopa tonali, ⁷ huan quinilhuijque:

—Masque tiqizquitoyaj se mijcatzi, huan timochijtoque amo titapajpactique iixpa TOTECO, ¿para ten amo huelis tijtencahuase se nemacti iixpa TOTECO ipan ni tonali quema nochi israelitame quinescayotíaj ni Pascua ilhuit?

⁸ Huan Moisés quinnanquili:

—Ximochiyaca hasta TOTECO techilhuis taya cuali para mochihuas quema quej ni pano.

⁹ Huan TOTECO quicamanalhui Moisés huan quiilhui:

¹⁰ “Xiquinilhui nopa israelitame quema injuanti o se inincone amo hueli quinescayotis nopa ilhuit Pascua inihuaya nochi sequinoc, huelis teipa quichihuase. Sinta se amo hueli quinescayotis nopa ilhuit quema monequi pampa monejqui quitzquis se mijcatzi o huelis se mopantía huejca ten ichaj quema sequinoc ilhuichihua, yaya hueli quinescayotise nopa ilhuit teipa. ¹¹ Pero quinescayotise quema tiotaquixtos ipan 14 ten nopa ome metzti ipan ne xihuit. Monequi quicuase nopa pilborregotzi ica xihuit cati chichic huan pantzi cati amo quiptiya tasonejca. ¹² Huan amo teno quicahuase para seyoc tonali, yon amo quipostequilise yon se iomiyo nopa pilborregotzi. Ma quinescayotica nopa Pascua senquisa quej nimechnextlijtoc anquichihuase. ¹³ Pero sinta se acayja cati tapajpactic huan amo cana yajtoc, san moilhuis para amo quinescayotis nopa Pascua ilhuit, monequi anquiquixtise para ayecmo huelis itztos amohuaya anisraelitame. Quej nopa anquichihuase, pampa amo techtencahuuli nopa tacajcualisti noixpa ipan nopa tonali quema, niamoteco, nijtali, huan yeca monequi quiselis nopa tatzacuilti por itajtacol.

¹⁴ “Nochi seyoc tali ehuan cati itztoque amohuaya nojquiya monequi quinescayotise nopa Pascua para na quej nimechnextlijtoc. Onca san

se tanahuatili para israelitame huan seyoc tali ehuani para quenecatza quinescayotise, huan nochi monequi san se quichihuase.”

Nopa mixti cati motali itzonta Itiopa TOTECO

(Éx. 40:34-38)

¹⁵ Ipan nopa tonali quema tanque quiquetzaj nopa yoyon tiopamit cati quipixtoya nopa camanali cati quichijtoya inihuaya, se hueyi mixti hualajqui quitzacuaco. Huan quema pejqui tiotaquiya, nopa mixti mopatac para nesis quej se tilelemecti itzonta nopa tiopamit huan quej nopa eltoya hasta tanesiyaya. ¹⁶ Huan quej ni eliyaya nochipa. Ica tonaya se mixti quitzacuayaya nopa yoyon tiopamit huan ica tayohua nesiyaya quej se hueyi tit. ¹⁷ Quema nopa mixti mijcueniyaya ten nopa yoyon tiopamit, nopa israelitame quistehuayayaj huan quitoquilijtayahuiyayaj. Huan quema nopa mixti moquetzayaya huan ayecmo nejnemiya, nopa israelitame nozona quiquetzayayaj iniyoyoncalhua. ¹⁸ Quej ni nopa israelitame mijcueniyayaj quema TOTECO quinnahuatiyaya, huan moquetzayayaj san campa quinilhuyaya. Nochi tonali quema nopa mixti mocahuayaya itzonta nopa tiopamit, amo quistehuayayaj. ¹⁹ Huan masque nopa mixti mocahuayaya ipan tiopamit miyac tonali huan amo mijcueniyaya, nochi israelitame quineltoculiyayaj itanahuatil TOTECO huan amo nejnemiya. ²⁰ Huan quema nopa mixti amo mocahuayaya miyac tonali, nopa israelitame nojquiya amo mocahuayayaj miyac tonali, pampa quej nopa TOTECO quinnextilijtoya. ²¹ Huan quema nopa mixti moquetzayaya ten se tiotac hasta ijnaloc, huajca nopa israelitame moquetzayayaj. Huan quema ica ijnaloc nopa mixti motananayaya, injuanti nojquiya motananayayaj huan quitoquiliyayaj. Pero masque tonaya o tayohua quema mijcueniyaya nopa mixti, injuanti quistehuayayaj para quitoquilise senquisa quej TOTECO tanahuatijtoya. ²² Sinta nopa mixti moquetzayaya ipan nopa yoyon tiopamit campa TOTECO itztoya se ome tonati, o se metzti, o se xihuit, nochi nopa israelitame mocahuayayaj nozona huan ayecmo nejnemiya. Pero quema nopa mixti motananayaya, injuanti quistehuayayaj huan quitoquiliyayaj. ²³ Huajca quema TOTECO quinnahuatiyaya, ma quiquetzaca iniyoyoncalhua, injuanti quinquetzayayaj. Huan quema TOTECO quinnahuatiyaya ma nejnemica para quitoquilise nopa mixti, quistehuayayaj. Quineltocaque nochi cati TOTECO quinnahuati Moisés ma quichihuaca.

10

Nopa ome tapitzali ten plata

¹ Huan TOTECO quicamanalhui Moisés huan quilhui:

² “Xijchihua ome tapitzali ica plata cati tatejtzonali ica martillo. Huan anquipitzase para anquinnotzase israelitame ma mosentilica o para ma quimatica quema monequi motecpanase para quisase. ³ Quema anquipitzase nochi ome tapitzalme ica sempa, nochi israelitame quimatise ma mosentilica imelac icalte ni yoyon tiopamit campa timopantíaj. ⁴ Pero quema anquipitzase setzi tapitzali, san mosentilise cati tayacanaj ipan sesen hueyi familia. ⁵ Huan quema anhuejcahuase anquipitzase, elis para anquistehuase, huan injuanti cati quiquetztoque ininchajchaj ica campa quisa tonati ten ni yoyon tiopamit achtohui quistehuase para nejnemise. ⁶ Huan quema anquipitzase ica ompa, motecpanase para nejnemise cati quiquetztoque ininchajchaj ica sur huan nochi sequinoc quintoquilise. ⁷ Pero quema san anquinnotzase masehualme para ma mosentilica, amo xihuejcahuaca xijpitzaca. ⁸ San totajtzitzi, injuanti cati itelpocahua Aarón,

huelise quipitzase nopa tapitzali. Ya ni elis se tanahuatili para anquitoquilise amojuanti huan amoixhuihua para nochipa.

⁹“Quema anajsise ipan amotal huan monequi anquintehuse amocualan-caitacahua, xijpitzaca chichahuac nopa tapitzali, huan na, niamoTECO Dios, nimechelnamiquis, huan nimechmanahuis inimaco amocualancaitacahua.

¹⁰Nojquiya xijpitzaca nopa tapitzali quema onca tonali ten paquillisti. Xijpitzaca quema anilhuichihuaj, o quema eli selic metzti, o quema anquitencahuaj tacajcahalisti tataatili o tacajcahalisti para ma onca tayoltalili ica na. Huan quej nopa na cati niamoTECO huan niamoDIOS nimechelnamiquis.”

Nopa israelitame quistejque ipan Sinai

¹¹Huan ipan 20 itequi nopa ompa metzti quema yahuiyaya para ome xihui quistoyaj ten tali Egipto, nopa mixti motananqui ten nopa yoyon tiopamit campa TOTECO mocahuayaya. ¹²Huajca nopa israelitame quistejque ipan nopa huactoc tali cati itoca Sinai huan quitoquilijque. Huan teipa nopa mixti moquetzato ipan nopa huactoc tali cati itoca Parán. ¹³Ya ni nopa achtohui huelta quema quistejque huan quitoquilijque nopa mixti quej TOTECO quinahuatijtoya Moisés ma quichihuaca.

¹⁴Huan achtohui motecpanque para nejnemise cati quihuicayayaj ibandera nopa tatehujca pamit Judá. Huan Naasón, icone Aminadab, quinyacanayaya nopa hueyi familia Judá. ¹⁵Huan teipa quitoquilijque nopa hueyi familia Isacar ica inintayacanca, Natanael, icone Zuar. ¹⁶Huan teipa yahuiyaya nopa hueyi familia Zabulón ica inintayacanca, Eliab, icone Helón.

¹⁷Huan quema tanque quicocopitzaj nopa yoyon tiopamit campa TOTECO mocajqui inihuaya, nopa levitame cati iniixhuihua Gersón huan Merari motecpanque huan pejque quihuicatihuij nopa yoyon tiopamit.

¹⁸Huan iniica motecpanque cati quihuicayayaj ibandera nopa tatehujca pamit Rubén. Huan Elisur, icone Sedeur, quinyacanayaya nopa hueyi familia Rubén. ¹⁹Teipa quintoquili nopa hueyi familia Simeón ica inintayacanca cati itoca Selumiel, icone Zurisadai. ²⁰Huan iniica yahuiyaya nopa hueyi familia Gad ica inintayacanca Eliasaf, icone Deuel.

²¹Huan iniica motecpanque iixhuihua Coat cati elqui seyoc itelpoca Leví huejcajquiya. Huan nopa coatitame quihuicayayaj nochi cuamesas, taixpamit huan tamanti tatzejtzeloltic ten nopa yoyon tiopamit. Huan cati tayacantiyajque nimantzi quiquetzatoj nopa yoyon tiopamit nozona campa yahuij para ya eltos tasencahuali quema ajsise ni tacame ica ni tamanti.

²²Teipa iniica coatitame motecpanque cati quihuicayayaj ibandera nopa tatehujca pamit Efraín. Huan Elisama, icone Amiud, quiyacanayaya nopa hueyi familia Efraín. ²³Huan iniica yahuiyaya Gamaliel, icone Pedasur, cati quiyacanayaya nopa hueyi familia Manasés. ²⁴Huan iniica motecpanque Abidán, icone Gedeoni, cati quiyacanayaya nopa hueyi familia Benjamín.

²⁵Huan taica motecpanque cati quihuicayayaj ibandera nopa tatehujca pamit Dan. Huan Ahiezer, icone Amisadai, quiyacanayaya nopa hueyi familia Dan. ²⁶Huan iniica Dan yahuiyayaj nopa hueyi familia Aser ica inintayacanca cati itoca Pagiél cati eliyaya icone Ocrán. ²⁷Huan iniica yahuiyaya nopa hueyi familia Neftalí ica inintayacanca Ahira cati eliyaya icone Enán.

²⁸Quej ni motecpanque nopa huejhueyi familias ten israelitame quema quistehuayayaj para yase sejoyoc.

Moisés quilhui itex ma yahui inihuaya

²⁹ Se tonali Moisés quiilhui itex, Hobab, cati eliyaya icone Ragüel ten tali Madián:

—Tojuanti tiyahuij ipan nopa tali cati TOTECO quiijtojtoc para techmacas. Xihuala tohuaya huan tiitztose cuali mohuaya, pampa TOTECO techtenc-ahuilijtoc cati cuali techchihuilis tiisraelitame.

³⁰ Pero Hobab quinanquili:

—Amo, amo nijnequi niyas. Nijnequi nitacuepilis notal campa itztoque noteixmatcahua.

³¹ Pero Moisés quiilhui:

—Amo techcajtehua. Ta cuali tiquixmati nochi ojtí ipan nopa huactoc tali huan canque cuali timocahuase. Xihuala tohuaya huan techyacana.

³² Sinta tihualas tohuaya, nochi cati cuali cati TOTECO techmacas tojuanti, timitzmacase nojquiya.

³³ Huajca yaya yajqui huan nochi injuanti quistejque ten itepe TOTECO huan nejnenque eyí tonati. Huan icaxa TOTECO cati quipixtoya cati quintencahuilijtoya tayacantiyahuiyaya huan quintemohuilijtinemiyaya canque mosiyajquetzase. ³⁴ Huan tonaya quema quistehuayayaj, nopa mixti cati TOTECO quinmacayaya yahuiyaya inintzonta. ³⁵ Huan quema quitananayayaj nopa caxa para quistehuase, Moisés chicahuac quiijtohuayaya: “¡Ximotanana TOTECO!

¡Xijchihua para nochi mocualancaitacahua ma mosemanaca!

¡Xijchihua para nochi cati amo quinequij mitzitase ma cholojtehuaca!”

³⁶ Huan quema quisehuiyayaj nopa caxa para mosiyajquetzase, Moisés sempa quiijtohuayaya chicahuac:

“¡Ximocuepa, TOTECO, nica caxa momasehualhua!

¡Tiitztoque tahuel nelpano miyac miles ten masehualme hasta amo aqui huelis techpohuas!

¡Nica ximocahua tohuaya!”

11

TOTECO quiyolaxitijque nopa israelitame

¹ Se tonali nopa israelitame pejque camanaltij cati amo monequi huan quitajilhuiyayaj TOTECO por nopa taijyohuilisti cati moilhuijque quipanoy-ayaj. Huan TOTECO quincajqui huan tahuel cualanqui. Huan quintitanili se tit cati pejqui quintatía cati quiquetztoyaj ininchajchaj itejteno campa nopa sequinoc israelitame quiquetztoyaj ininchajchaj. ² Huajca nochi israelitame cuatzajtzique chicahuac huan quitajtaniique Moisés ma quinpalehui. Huan Moisés quitajtani TOTECO tapalehuili huan nopa tit sejqui. ³ Huajca quitocaxtijque itejteno inialtepe Tabera. (Tabera quinequi quiijtos Campa Talemenci.) Pampa hasta nozona nopa tit ten TOTECO quintati.

⁴ Nopa masehualme cati amo israelitame cati nejnemiyayaj inihuaya israelitame huan hualajtoyaj ipan ten hueli xinachti masehualme, san moilhuiyayaj para quinequiyayaj quicuase nacat. Huan nopa israelitame nojquiya quintoquilijque huan pejque mochoquilíaj huan quiijtohuayayaj: “¡Nelia cuali elisquía sinta oncasquía nacat para tijcuase! ⁵ Tiquelnamiquij nopa michime cati tiquincuayayaj san tapic nepa ipan tali Egipto. Huan nojquiya tijcuayayaj pepinos, meloj, xonacat, seboyas huan ajos. ⁶ Pero ama nochi tiyamaníaj huan ayecmo timayanaj, pampa san ni maná onca para tijcuase.”

⁷ Huan nopa maná cati huetziyaya eliyaya quej iyol nopa colanto huan nesiyaya achi costic quej cuaesti. ⁸ Huan iajhuiyaca eliyaya quej taxcali ten

harina taxacualoli ica aceite. Huan mojmosta nopa israelitame quisayayaj calteno huan quisentiliyayaj. Teipa quitisiyayaj ipan inimet, o quitejtzonayayaj, o quimanayayaj huan ica quichihuayayaj se pantzi. ⁹ Ica tayohua, quema huetziyaya ajhuechti calteno, huetziyaya nojquiya nopa maná.

¹⁰ Huan Moisés quicajqui para masehualme ipan sese israelita familia mosehujtoyaj inincalixpa chocayayaj, pampa TOTECO tahuel cualanqui, huan Moisés nojquiya amo quipacti cati quichihuayayaj. ¹¹ Huajca Moisés quihlhuí TOTECO:

—¿Para ten quej ni techchihuilijtoc, na nimotequipanojca? ¿Taya amo cuali nijchijtoc moixpa para techmamaltijtoc nochi ni masehualme? ¹² Amo na niinintata o niininana. Inijuanti amo noconeua. ¿Para ten techilhúa ma niquinmamajtinemi hasta tiajsise campá nopa tali cati tiquinilhujtoc para tiquinmacas tohuejcapan tatahua? Na niquinhuica san quej se quihuica icone cati noja chichi. ¹³ ¿Canque hueli nijcuís nacat para quicuase nochi ni miyaqui israelitame? Nochi san techchoquiláaj huan techilhúaj: ‘Techmaca nacat para tijcuase.’ ¹⁴ Na amo nihueli niquinhuicas nochi ni miyaqui masehualme noseltitzi. Niqunita quej se tamamali cati tahuel etic para na. ¹⁵ Sinta quej ni techchihuilis nochipa, achi más cuali techmicti na ama sinta nelía techicnelía. Quej nopa amo monequi niquntas cati ni masehualme techchihuilise.

¹⁶ Pero TOTECO quinanquili:

—Techsentilhúilí 70 huehue tacame cati tijmati quenicatza tayacanase huan quihuicase tequiticayot ica ni miyaqui israelitame. Huan xiquinhualica campá nopa yoyon tiopamit campá timopantíaj huan nozona techchiya inihuaya. ¹⁷ Huan na nitemos huan nozona nimitzcamanalhuis. Huan nijcuís Notonalzi cati itztoc mohuaya huan nojquiya niqunmacas para inijuanti ma mitzpalehuica para anquinhuicase nochi ni miyaqui masehualme. Huan quej nopa amo monequi titequitis moseltitzi. ¹⁸ Huan nojquiya nimantzi xiquinnahuati nochi israelitame ma moyolpajpacaca noixpa, pampa mosta ica ijnaloc quicuase nacat. Xiquinilhuí ya niqunincacacot para chocaj huan quijtohuaj para elisquía cuali sinta oncasquía nacat para quicuase. Moilhúaj achi más cuali itztoyaj nepa ipan tali Egipto. Yeca ama na niqunmacas nacat para quicuase. ¹⁹ Huan amo quicuase se tonal, yon ome tonati, yon maculli tonati, yon majtacti tonati, yon 20 tonati. ²⁰ Pero quicuase nochi se metzti hasta quisas ipan iniyacatzol huan quijiyase, pampa inijuanti techhuejcamajcajtoque na, cati niamoTECO; na cati niitztoc tatajco ten inijuanti. Chocatoque noixpa huan quijtojtoque: ‘¿Para ten tiquisque nepa ipan tali Egipto?’

²¹ Huajca Moisés quijto:

—San tacame cati nejnemij nohuaya itztoque 600 mil huan iyoca sihuame huan coneme. ¿Quenicatza tiqijtohua techmacas nacat para tijcuase nochi se metzti? ²² Masque tiqunmictisquíaaj nochi toborregojhua huan tohuacaxhua, amo quinaxilisquía para nochi. Masque tiqunmacasquía nochi michime cati itztoque ipan hueyi at, amo quinaxilisquía.

²³ Pero TOTECO quinanquili:

—¿Ta timoilhúa tahuel pilquentzi nochichualis? Ama tiquntas sinta mochihuas o amo mochihuas cati niqijtohua.

Nopa huehue tacame camanaltij quej tajtolpanextiani

²⁴ Huajca Moisés quisqui huan quinpohuili nochi israelitame cati TOTECO Dios quihlhuítoya. Huan quinsentili nopa 70 huehue tacame ten nopa israelitame huan quintali yahualtic ten nopa yoyon tiopamit. ²⁵ Huan

TOTECO temoc ipan nopa mixti huan quicamanalhui Moisés. Huan teipa quicuic Itonaltzi cati itztoya ipan Moisés para quipalehuis, huan nojquiya quinmacac nopa 70 huehue tacame. Huan quema Itonaltzi motali ipan nopa huehue tacame, pejqe camanaltij quej tajtolpanextiani. Pero san se huela panoc huan ayecmo quema mochiqqui sempa.

²⁶ Huan itztoyaj ome ten nopa 70 huehue tacame cati TOTECO quintapejpenijtoya cati mocajtoyaj ipan ininchajchaj, se itoca Eldad huan ne se itoca Medad. Pero nojquiya Itonal TOTECO motali ipan inijuanti huan pejqe camanaltij quej tajtolpanextiani nopona campa itztoyaj ipan ininchajchaj.

²⁷ Huajca sequij telpocame motalojtiyajque huan quihilhui Moisés para Eldad huan Medad camanaltitoyaj quej tajtolpanextiani nepa campa ininchajchaj.

²⁸ Huajca Josué, icone Nun, cati quipalehuijtoya Moisés hasta itelpocatiya quijito:

—Noteco Moisés, xiquintacahualti.

²⁹ Pero Moisés quinanquili:

—¿Ta techtasomati? Nelcuali elisquía sinta TOTECO quinmacasquía Itonaltzi nochi israelitame huan nochi elise tajtolpanextiani.

³⁰ Huan Moisés huan nochi nopa huehue tacame tacuepilijque campa ininchajchaj.

TOTECO quintitanili miyac solime

³¹ Huan TOTECO quichijqui ma huala se ajacat chicahuac ten campa hueyi at huan quinhualicac tahuel miyac solime. Huan patantinemiyayaj campa hueli tafajco huan yahualtic nopa alpetet ten iniyoyoncalhua nopa israelitame. Huan nopa solime patantinemiyayaj echcapantzi san quej se metro ihuejcapanca. Huan nojquiya eliyaya temitoc ica solime huejca ten ininchajchaj hasta campa se huelis ajsis sinta nejnemis para se tonal ihuejca. ³² Huajca nochi nopa achtohui tonali huan yohuali huan ipan nopa seyoc tonali, nochi israelitame quintizquitinemiayaj huan quinmictijtine-miyayaj solime. Huan cati tahuel pilquentzi quisentili, quisentili quej 60 hueyi lalax chiquihuit ten senquisa solime. Huan pejqe quinquatzaj campa hueli itejteno inialtepe ten yoyon calme. ³³ Pero quema pejqe quicuaj nacat nopa israelitame, TOTECO cualanqui inihuaya huan quintitanili se hueyi cocolisti huan quichijqui ma miyuca miyaqui tacame. ³⁴ Huan yeca quitocaxtijque campa itztoyaj Quibrot Hataava (Quibrot Hataava quijitosnequi Campa Quintaltojque Cati Itzcuime), pampa nopona quintaltojque miyaqui cati tahuel quinequiyayaj nacat.

³⁵ Huan nopa israelitame motanantejqe ten Quibrot Hataava huan nejentiyajque hasta Hazerot huan nopona mocajque se quesqui tonali.

12

María huan Aarón ica camanaltique Moisés

¹ Teipa María ihuaya Aarón pejqe quiejelnamiqij Moisés, pampa Moisés mosihuaajtitoya ica se sihuat cati ehua ipan tali Etiopía. ² Huan nojquiya quijitojqe: “¿Ajquiya quijitohua para TOTECO san quicamanalhuía Moisés? Nojquiya techcamanalhuijtoc tojuanti.” Huan TOTECO quicajqui.

³ Melahuac Moisés eliyaya se tacat cati achi más moicnonequiyaya huan amo quej nochi sequinoc masehualme ipan taltipacti. ⁴ Huajca nimantzi TOTECO quihhui Moisés, Aarón huan María: “Xiyaca amojuantí aneyi campa nopa yoyon tiopamit campa timopantíaj.”

Huan nochi eyi yajque campa nopa yoyon tiopamit. ⁵ Huajca TOTECO temoc ipan nopa mixti huan moquetzqui campa nopa caltemit cati calaqui ipan nopa yoyon tiopamit. Huan quinnotzqui Aarón ihuaya María huan quema monechcahuijque, ⁶ TOTECO quinilhui: “Xijtacaquilica ni tamanti cati nimechilhuis:

Quema nimechtitanilía se tajtolpanextijquet para itztos amohuaya, na niamoTECO, nimonextía íca ya ipan se temicti o nimocamanalhuía ihuaya ipan se tanescayot.

⁷ Pero amo quej nopa nijcamanalhuía ni notequipanojca Moisés.

Yaya cati achi más temachtí techneltoca que nochi sequinoc notequipanojcahua.

⁸ Huan quema nicamanalti ihuaya Moisés, timoixtachilijtoque huan nicamanalti íca se camanali cati amo ohui huan cati nimantzi quimachilía.

Huan yaya quiita noxayac huan quenicatza na niitztoc.

Huajca ¿para ten anquiejelnamiqij notequipanojca Moisés?”

⁹ Huan TOTECO nelía cualanqui miyac inihuaya huan quisqui. ¹⁰ Huan quema nopa mixti mijcueni ipan nopa yoyon tiopamit, María pejqui palani itacayo huan mocajqui chipahuac. Huan quema Aarón moicancuetqui para quitachilis María, quiitac quipixtoc nopa fiero tacayo palanca cocolisti cati itoca lepra. ¹¹ Huajca nimantzi Aarón quiilhui Moisés: “Xijpiya hueyi moyolo íca tojuanti, noteco. Amo techtatzacuilti por ni totajtacol. Nelía tihuihuitique huan yeca quej nopa ticamanaltique. ¹² Pero amo xijcahua para María ma eli quej se conet cati tacati mictoc, cati quisa iijtico inana íca icuetaxo papalacatoc.”

¹³ Huajca Moisés quitzajtzili TOTECO: “¡Toteco Dios, nimitztajtanía xijpiya hueyi moyolo, huan xijchicahua!”

¹⁴ Huan TOTECO quinanquili: “Sinta itata san quiixchajchatosquía, monequi pinahuasquía hasta chicome tonati, huajca xijquixtica huan ma itzto huejca ten amoaltepe ten amoyoyoncalhua para chicome tonati. Huan quema tamis chicome tonati, sempa hueli hualas campa ichaj.”

¹⁵ Huan quej nopa María quiquixtijque huejca ten inialtepe huan nopona mocajqui chicome tonati. Huan nopa israelitame amo mijcuenijque hasta sempa quiselijque María ipan inialtepe ten yoyon calme. ¹⁶ Teipa motanantejque ten campa itztoyaj campa itoca Hazerot huan yajque quiquetzatoj ininchajchaj ipan nopa huactoc tali cati itoca Parán.

13

Moisés quintitanqui tachiyani ipan Canaán (Dt. 1:19-25)

¹ Huan nopona TOTECO quicamanalhui Moisés huan quiilhui:

² “Xiquintitani tacame para ma tachiyatij quenicatza eltoc nopa tali Canaán cati na nimechmacas anisraelitame. Xijtitani se tayacanca tacat ten sesen hueyi familia.”

³ Huajca senquisa quej TOTECO quinahuati ma quichihua, Moisés quichijqui. Quintitanqui tayacanca israelitame cati itztoyaj ipan nopa huactoc tali Parán para ma yaca ipan nopa cuali tali. ⁴⁻¹⁵ Huan ya ni itoca sesen tayacanquet ten sesen hueyi familia cati yajque:

Familia, Tayacanquet
Rubén, Samúa, icone Zacur

Simeón, Safat, icone Horí
 Judá, Caleb, icone Jefone
 Isacar, Igal, icone José
 Efraín, Oseas, icone Nun
 Benjamín, Palti, icone Rafú
 Zabulón, Gadiel, icone Sodi
 Manasés, icone José, Gadi, icone Susi
 Dan, Amiel, icone Gemali
 Aser, Setur, icone Micael
 Neftalí, Nahbi, icone Vapsi
 Gad, Geuel, icone Maqui

¹⁶ Huajca ya ni elqui inintoca nopa tacame cati Moisés quintitanqui ma tachiyatij ipan nopa tali. Pero Moisés quitocaxpatac Oseas, icone Nun, huan quitocaxti Josué.

¹⁷ Huan quema Moisés quintitanqui ma tajtachiyatij ipan nochi nopa tali Canaán, quinilhui:

—Xiyaca huan xipanoca ica norte ten tali Neguev huan xitejcoca ipan nopa tepeme. ¹⁸ Huan xijtachelica quenicatza eltoc nopa tali huan xijtachelica sinta nopa tacame cati itztoque nozona tejtetique o amo; sinta miyaqui injuanti o amo miyaqui. ¹⁹ Xijtachelica quenicatza eltoc nopa tali, sinta cuali temaca itajca, o amo. Xijtachelica sinta nopa altepeme ipan cati itztoque moyahualojtoque ica tepamit, o san tapojtoc altepeme campa quiquetztoque ininchaj para se talojtzi. ²⁰ Xijtachelica sinta cuali nopa tali huan miyac tamanti moscaltía nozona, o amo. Xiquitaca sinta onca miyac cuame, o amo. Nojquiya xijcuica quentzi itajca nopa tali para antechhualiquilise. (Elqui ipohual nopa achtohui tatequisti ten itajca xocomecat.)

²¹ Huajca nopa tacame yajque ixtacatzí tachiyatoj ipan nochi nopa tali ten nopa huactoc tali Zin hasta campa itoca Rehob ica norte, inechca campa itoca Hamat. ²² Quema quisque, yajque ica norte huan quipanoque nopa huactoc tali campa itoca Neguev huan yajque hasta altepet Hebrón. Nozona itztoyaj iteixmatcahua Ahimán, Sesai huan Talmi. Nochi injuanti eliyayaj iteipan ixhuhua Anac. (Nopa altepet Hebrón nelía quipiyayaya miyac xihuit. Ya quichijchijtoyaj huan quiquetztoyaj chicome xihuit achtohui que quema pejqui altepet Zoán ipan tali Egipto cati nojquiya huejcajquiya quichijchijque.) ²³ Huan ajsitoj hasta ipan nopa tamaya cati itoca Escol, huan nozona quitejque se quechti ten itajca xocomecat, huan elqui hueyi hasta monejqui quicuapilojqe nopa quechti uvas ipan se cuahuit huan ome tacame quiquechpanojtihuajajque. Huan nojquiya quihualicaque sequij granadas huan higos cati nozona moscaltiyaya. ²⁴ Huan nopa israelitame quitocaxtijque nopa tamayamit Escol (Escol quinequi quijtos Quechti.), pampa nozona quitejque nopa hueyi quechti ten itajca xocomecat.

²⁵ Huan quema ya tantoyaj quitachilijtinemij nopa tali para 40 tonali, ²⁶ tacuepilijqe ipan Cades ipan nopa huactoc tali Parán campa itztoyaj Moisés, Aarón huan nochi nopa sequinoc israelitame. Huan quinpohuilijque nochi cati quipantijtoyaj huan quinnextilijque nopa cuatajcajot cati oncaiyaya ipan nopa tali. ²⁷ Huan quej ni quihuilijque Moisés:

—Tiyajque ipan nopa tali cati techtitanqui ma tijtachilitij. Melahuac nochi temaca hasta mocahua itajca, huan ya ni se quentzi cati temaca nopa tali. ²⁸ Pero nopa tacame cati nozona itztoque nelía tejtetique, huan nopa altepeme nelía huejhueyi, huan cuali moyahualtactoque ica tepamit. Huan

nojquiya tiquinitaque nozona iteipan ixhuihua Anac cati nelía huejcapantique. ²⁹ Campa itoca Neguev itztoque nopa amalecitame, huan nozona campa tahuejcapanco itztoque nopa heteos, jebuseos huan nopa amorreos. Huan iixmelac hueyi at hasta campa hueyat Jordán itztoque nopa cananeos.

³⁰ Huajca Caleb quichijqui para ma ayecmo tahuejchihuaca nochi nopa israelitame cati itztoyaj iixpa Moisés, huan quijto:

—¡Ma tiyaca nimantzi huan ma timoaxcatca nopa tali! ¡Temachtit tojuanti tihuelise tiqintanise huan timoaxcatise!

³¹ Pero nopa sequinoc cati yajtoyaj ihuaya quijtojqque:

—¡Amo! Tojuanti amo tihuelise timotehuse inihuaya nopa tacame, pampa inijuanti achi más tetique que tojuanti.

³² Huan pejque quinilhuáj nopa israelitame para nopa tali huan nopa tacame cati itztoque nozona nelía amo cuali eliyayaj. Quijtojqque:

—Nopa tali cati tijtachilitoj quinpiya tacame mahuililme. Tahuel quimatij tatehuáj huan huejcapantique hasta temajmatíaj. ³³ Nojquiya tiquinitaque nozona iteipan ixhuihua Anac cati tahuel huejcapantique huan tejtetique. Inijuanti seyoc xinachtí masehualme cati amo quej tojuanti. Huan iniixpa timomajmatiyayaj san quej tipilchapoltziti huan inijuanti techtachiliyayaj quej tielisquáj tipilchapoltziti.

14

Israelitame motzontochonchijque iixpa TOTECO

(Dt. 1:26-33)

¹ Huajca nochi nopa israelitame pejque cuatzajtzi huan seyohual chocayayaj huan tahuejchihuayayaj. ² Huan nochi pejque quiejelnamiqij Moisés huan Aarón. Quijtohuayayaj: “¡Achi más cuali timictosquáj nepa ipan tali Egipto! ¡O cuali timiquisquáj nica ipan ni huactoc tali, ³ para amo techhuicas TOTECO ipan nopa tali, huan nozona techmictise ica macheta! Huan quema techmictise, tosihuajhua huan toconeua mocahuase inimaco tocualancaitacahua para mochihuase inintequipanojcahua. ¡Achi más cuali elisquá titacuepilisquáj sempa ipan tali Egipto!”

⁴ Huajca nimantzi pejque moilhuáj se ica seyoc: “¡Ma tijtalica se totayanca para ma techhuica para titacuepilise tali Egipto!”

⁵ Huajca Moisés ihuaya Aarón motancuaquetzque iniixpa nochi nopa israelitame huan hasta moixtaltenamijque. ⁶ Huan Josué ihuaya Caleb cati quitachilitoj nopa tali, quitzayanque iniyoyo para quinescayotise tahuel mocuesohuayayaj, ⁷ huan inijuanti quinilhuijque nochi nopa israelitame:

—¡Techacaquilica! Nopa tali cati tijtachilitoj nelía nel cuali. ⁸ Sinta TOTECO paquí ica tojuanti, ya techhuicas ipan nopa cuali tali cati nochi temaca hasta mocahua huan ya techmactilis. ⁹ Pero amo xiquixpanoca TOTECO, yon amo xiquinimacasic nopa tacame nozona, pampa nimantzi tiqintanise. Amo aquí huelis quinmanahuis pampa TOTECO itztoc tohuaya. Huajca amo ximajmahuica.

¹⁰ Pero nochi nopa israelitame quinequiyayaj quintepachose. Huan iniixpa nochi nopa israelitame monexti itatanex TOTECO ipan nopa yoyon tiopamit campa Mopantíaj. ¹¹ Huan TOTECO quilhui Moisés:

—¿Hasta quema techuatotonise ni israelitame? ¿Amo quema technelto-case masque nijchijtoc tahuel miyac tanextili iniixpa? ¹² Na niqincocos ica se miqulisti huan niqinpolihuiltis. Huan ica ta nijchihuas seyoc

tamanti masehualme cati achi más hueyi huan más tejtetique huan amo quej inijuanti.

¹³ Pero Moisés quinanquili TOTECO huan quihhui:

—Sinta quej nopa tijchihuas, nimantzi quicaquise nopa Egipto ehuan cati quiiatque quenicatza tiquinquixti ni masehualme ipan inintal ica mohueyi chichahualis. ¹⁴ Huan nopa Egipto ehuan quicaquise huan quinpoihilise masehualme nica. Pampa masehualme ipan ni tali quicactoque ten ta mohueyi chichahualis huan quenicatza nochipa tiitztoc tatajco ten tojuanti. Quicactoque quenicatza techixtachilía para techcamanalhuis quema nopa mixti cati moaxca moquetza totzonta. Huan quenicatza techyacana ica se mixti tonaya huan ica se tilelemecti tayohua. ¹⁵ Sinta tiquinmictis nochi ni israelitame ica sempa, nochi masehualme ipan sequinoç talme cati quicactoque ten mohueyitilis quiijtose, ¹⁶ ta tiquinmicti ipan ni huactoc tali pampa amo tihuelqui tiquinmocuitahui para itztose hasta tiquinhuicas ipan nopa cuali tali cati tiqintencahuili para tiquinmacas. ¹⁷ Huajca yeca ama nimitztajtania, xijnexi mohueyi chichahualis huan xiquintapojpolhui. Xijchihua quej techilhuijtoc para tijchihuas. Toteco, ta tiqiijtoc, ¹⁸ amo nimantzi ticualani, huan tahuel hueyi motaicnelilis. Titetapojpolhuía taixpanoli, pero amo tiquixpolos inintajtacol quej elisquía amo teno quichijtoque. Pampa tiqiijtohua ica ta, sesen tajtacoli quihuica itatzacuilitlis. Huan quema se tetaj tajtacolchihua, tijtatzacuilitía huan tiqintatzacuilitía iconehua huan iteipan ixhuihua huan hasta iteipan ixhuihua quinpiyase iniconehua por cati quichijqui nopa tetaj. Quej nopa tiqiijtoc TOTECO. ¹⁹ Huajca ama ica nopa mohueyi teicnelijcayo, xiquintapojpolhui inintajtacol nochi ni masehualme san quej miyac huelta tiqintapojpolhuijtoc ten quema tiquistejque ipan tali Egipto.

TOTECO tiqintatzacuiliti nopa israelitame
(Dt. 1:34-40)

²⁰ Huan TOTECO quiijtoc:

—Cualtitoc, niqintapojpolhuis quej techtajtanijtoc. ²¹ Pero melahuac nimitzilhuía quej temacti na niitztoc huan temacti notatanex nesis campa hueli ipan nochi taltipacti, ²² nojquiya temacti yon se ten ni masehualme cati quiiztoque nohueyitilis amo quiitas nopa cuali tali. Pampa masque quiiztoque nochi nopa tanextili cati nijchijqui ipan tali Egipto huan ipan huactoc tali, techyejyecojoque huan amo quineltocatoque notanahuatl ya majtacti huelta. ²³ Huajca yon se ten ni masehualme amo quiitase nopa cuali tali cati niqinillhui niqinmacas inintatahua. Amo quiitas yon se cati techhuejcamajcajtoc. ²⁴ Pero notequipanojca Caleb, quena. Pampa ya quipixtoc seyoc tamanti iyolo huan senquisa techneltocatoc, ya, quena, nijcahuilis ma calaqui ipan nopa tali cati quitachililo, huan ya ihuaya iconehua quiselise cati iniaxca nozona. ²⁵ Huan pampa anquinimacasij nopa amalecitame huan cananeos cati itztoque ipan nopa tamayamit, mosta monequi antacuepilise ipan huactoc tali ipan nopa ojti cati yahui Hueyi At Chichiltic.

²⁶ Huan nojquiya TOTECO quihhui Moisés ihuaya Aarón:

²⁷ —Ayecmo niqinijyohuis ni masehualme cati techeljnamictinemij. Nijcactoc nochi cati quiijtohuaj ten na. ²⁸ Huajca xiquinyolmelahua: 'Nimotestigojquetza noseltitzi, niamoTECO, para nimechchihuilis senquisa cati anquiijtoc. Anquiijtoc achi cuali anmiquisquía ipan ne huactoc tali, ²⁹ huajca nochi cati anquixitijtoque 20 xihuit huan anmoijcuilojtoque

ipan nopa censo, monequi anmiquise ipan ni huactoc tali pampa antechel-namijque. ³⁰ Yon se ten amojuanti amo calaquis ipan nopa tali cati nimo-matananqui hasta ilhuicac huan niqijto para melahuac nimechmacasquí. San calaquise Caleb, icone Jefone, huan Josué, icone Nun. ³¹ Huan amonehna cati anquijtojqe huetzisquíaj inimaco amoculancaitacahua, na niquinhuicas ipan nopa cuali tali cati anquihuejcamacajque. ³² Pero amotacayohua mocahuas ipan ni huactoc tali. ³³ Huan amonehna nentinemise ipan ni huactoc tali para 40 xihuit. Quej nopa injuanti quiixtahuase por amotajtacolhua hasta nochi amojuanti anmiquise ipan ni huactoc tali. ³⁴ Anquitachilijtinence 40 tonati nopa cuali tali, huan yeca nojquiya anquise amotzacuiltlil 40 xihuit para anquixtahuase amotajtacolhua, se xihuit para sesen tonal. Quej nopa anquimatise quenicatza ipanti se cati techhuejcamajcahua.’ Quej nopa xiquinilhuica. ³⁵ Na niamoTECO nimechyolmelajtoc, huan quej nopa nimechchiuilis nochi antzontochon tacame cati anmosejcotilijtoque para amo anquichihuase cati cuali ica na. Nochi anmiquise ipan ni huactoc tali.

Mijque cati quitachilitoj nopa tali

³⁶ TOTECO quinmicti nopa tacame cati Moisés quintitanqui para ma quitachilitij nopa cuali tali huan teipa injuanti mocuetque huan camanaltique fiero ten cati quiitzoyaj. ³⁷ Injuanti mijque ica se cocolisti nopona iixa para TOTECO. ³⁸ San Josué, icone Nun, ihuaya Caleb, icone Jefone, mocajque yoltoque, huan nochi nopa sequinoc tacame cati quitachilitoj nopa cuali tali huetzque mictoque.

Ininculancaitacahua quintanque nopa israelitame (Dt. 1:41-46)

³⁹ Huan quema Moisés quinilhui nopa israelitame nochi cati TOTECO quinilhuijtoya, nochi tahuel mocuesojque. ⁴⁰ Huan tonili cualca mijquejqe huan pejqe tejoj campa nopa tepeme cati eltoya nechca, huan quiijtohuayayaj:

—Melahuac titajtacolchijtoque, pero ama nica tiitztoque. Ma tiyaca nimantzi para timoaxcatise nopa tali cati TOTECO techilhuijtoc para techmacas.

⁴¹ Pero Moisés quinilhui:

—¡Amo xiquixpanoca cati TOTECO quiijtojtoc! ¡Nopa tamanti cati anquichihuaj amo quisas cuali! ⁴² Amo xiyaca, pampa TOTECO amo itztoc amohuaya, huan temachti amechtanise amoculancaitacahua. ⁴³ Nopa amalecitame huan nopa cananeos amechtehuise, huan anhuetzise inimaco, huan amechmictise. Amo anquitacaquilijtoque TOTECO, huan TOTECO amo itztos amohuaya.

⁴⁴ Pero injuanti amo quichihuilijque cuenta huan tejcotiyajque ipan nopa tepet masque yon Moisés, yon nopa caxa cati quipixtoya cati quintencahuilijtoya TOTECO amo yajqui inihuaya. ⁴⁵ Huajca motananque nopa amalecitame ihuaya nopa cananeos cati itztoyaj ipan nopa tali huan temoque, huan quinmictijtihualajque nopa israelitame hasta Horma.

15

Tanahuatilme para tacajcahualisti

¹ Huan TOTECO quicamanalhui Moisés huan quilhui:

2 “Xiquincamanalhui nopa israelitame huan xiquinilhui quema calactiyase ipan nopa cuali tali cati niquinmacas para ipan itztotij, ³ huan quinequise techpaquilismacase ica se tacajcahualisti tatatili, o se tacajcahualisti cati techmacase ipan tit, quej ni monequi quichihuase. Masque techmacase nopa tacajcahualisti pampa quitamichijtoque se tenijqui cati techtencahuilijtoque quichihuase, o pampa huelis san ica ininpaquilis quinequij techmacase se tenijqui, o pampa ajsis se ilhuit quema monequi se tacajcahualisti, o quinequij techyolpactise ica cati mijyotis ajhuiyac noixpa, huajca monequi techmacase se borrego, se chivo, o se becerro. ⁴ Ihuaya sesen tacajcahualisti monequi nojquiya techmacase nopa tacajcahualisti ten harina cati ihuaya yahui. Sinta techmacas se pilborregojtzi, monequi ihuaya techmacase ome kilo cati cuali harina tamaneloli ica se litro aceite. ⁵ Huan sinta techmacase se pilborregojtzi quej se tacajcahualisti tatatili, nojquiya ma techmacaca se litro xocomeca at quej se tacajcahualisti tatoyahuali huan mijyotis cuali noixpa. ⁶ Huan sinta techmacase se oquich borrego, ihuaya techmacase nojquiya nahui kilos cati cuali harina tamaneloli ica se litro huan se achi ten aceite. ⁷ Huan nojquiya ihuaya techmacase se litro huan se achi ten xocomeca at quej se tacajcahualisti tatoyahuali noixpa. ⁸ Huan sinta techtencahuilise se becerro quej se tacajcahualisti tatatili, o pampa quitamiltijtoque cati techtencahuilijtoque quichihuase, o sinta techmacase pampa quinequij quipiyase tayoltalili ica na, ⁹ monequi ihuaya nopa becerro techmacase se tacajcahualisti ten chicuase kilos cati cuali harina tamaneloli ica ome litros ten aceite. ¹⁰ Huan ihuaya nojquiya techmacase ome litro ten xocomeca at quej se tacajcahualisti tatoyahuali noixpa. Huan nochi san sejco quitatise huan mijyotis ajhuiyac noixpa huan techpactis. ¹¹⁻¹² Huajca quej ni sese israelita monequi quisencahuas sesen becerro, sese oquich borrego, sesen pilborregojtzi, o sesen chivo cati techmacase. ¹³ Nochi israelitame quichihuase nochi ya ni quema techmacase se tacajcahualisti cati quitatij para ajhuiyac niqijnecuis.

¹⁴ “Huan san se quichihuas se cati seyoc tali ejquet cati itztos amohuaya, huan quinequis nojquiya techtencahuilise se tacajcahualisti cati quitatis. San se tanahuatili quitoquilise nochi para quenicatza quisencahuase cuali inintacajcahualis para na. ¹⁵ Israelitame huan seyoc tali ehuan cati itztoque inihuaya san se tanahuatili quitoquilise para nochipa. ¹⁶ Quej nopa anisraelitame huan seyoc tali ehuan san se anitzose noixpa.”

¹⁷ Huan TOTEKO quicamanalhui Moisés huan quiilhui:

¹⁸ “Xiquinilhui nochi israelitame para quema calactosejya ipan nopa cuali tali campa na niquinhuicas, ¹⁹ huan pehuase quicuase nopa trigo cati temaca nopa tali, monequi quiyocatalise se achi para techtencahuilise. ²⁰ Quema achtohui quisentilise trigo sesen xihuit huan quichihuase nopa achtohui tixti, ma techsencahuilica se pantzi huan quihuise noixpa quej se tacajcahualisti ten pantzi ten nopa trigo pixquisti. ²¹ Huan quitencahuase ni tacajcahualisti ten nopa achtohui trigo ipan sesen xihuit hasta inixhuihua quinpiyase inixhuihua huan para nochipa.

²²⁻²³ “Huan masque nelia quinequise quichihuase nochi senquisa cuali, sinta injuanti o inixhuihua teipa ehuan, amo quichihuase nochi ni tanahuatilme cati nimechmacatoc ica Moisés hasta quema nipejqni nijmaca tanahuatilme, huajca ya ni cati monequi quichihuase. ²⁴ Quema nochi injuanti quitase para amo nochi tamanti cati quichihuayaj eltoya senquisa cuali noixpa, huajca monequi techtencahuilise se becerro quej se tacajcahualisti tatatili cati tahuel ajhuiyac mijyotis para na. Huan ihuaya techmacase itacajcahualis ten harina huan ten xocomeca at quej quijtohua

nopa tanahuatili cati nimechilhuitoc. Huan nojquiya techtencahuilise se chivo quej se tacajcahualisti por nopa tajtacoli cati quichijque. ²⁵ Huaيجا nopa totajtzi techmacas nopa tacajcahualisti para techixtzacuulis inintaj-tacolhua nochi israelitame huan niquintapojpolhuis, pampa ya techtenc-ahuil nopa tacajcahualisti por nopa tajtacoli cati quichijque masque amo quimatiyayaj. ²⁶ Huan niquintapojpolhuis nochi israelitame huan nochi seyoc tali ehuan cati itztose inihuaya nopa tajtacoli cati nochi injuanti sentic quichijque masque amo quimatiyayaj.

²⁷ “Sinta tajtacolchihuas se masehuali san pampa amo quimati, quema quitas cati quichijqui, quitencahuas se sihua chivo cati san quiyiya se xihuit quej se tacajcahualisti por tajtacoli. ²⁸ Huan nopa totajtzi tech-macas nopa tacajcahualisti para techixtzacuulis itajtacol noixpa pampa amo quimatiyaya sinta quichihuayaya se tajtacoli, huan na nijtapojpolhuis. ²⁹ Huan san se quitoquilise ni tanahuatili israelitame huan nopa seyoc tali ehuan cati itztose amohuaya quema quichihuase tajtacoli pero amo quimatiyayaj sinta quichijque.

³⁰ “Pero sinta tajtacolchihua se tacat ica ipaquilis, masque se israelita o amo, yaya tahuél techhuejcamajcahua na, niámoTECO, huan monequi miquis para ayecmo itztos amohuaya. ³¹ Anquimictise pampa amo quine-ji quicaquis nocamanal huan amo quineltocac notanahuatil, huan nochi itajtacol huetzis ipan ya.”

Tatzacuiliti para cati tequiti ipan sábado

³² Quema nopa israelitame itztotaj ipan nopa huactoc tali, quipantijque se tacat quisentiliyaya cuahuit ipan se tonali para mosiyajquetzase. ³³ Huan injuanti cati quipantijque quihuicaque iixpa Moisés ihuaya Aarón huan iniixpa nochi israelita tayacanani, ³⁴ huan quitalijque ipan tatzacti pampa ayemo quimatiyayaj taya ipaquilis TOTECO para quichihuilise. ³⁵ Pero teipa TOTECO quihui Moisés: “Nopa tacat monequi miquis. Nochi anisraelitame monequi anquixitise huejca ten amoaltepe campa anquinetztoque amoyoncalhua huan anquitepachose hasta miquis.”

³⁶ Huaيجا nopa israelitame quixitijque nopa tacat ten inialtepe huan quihuicaque huejca. Huan quitzontepachojque hasta quimictijque sen-quisa quej TOTECO quihuaittoya Moisés.

Itenhuaxo iniyoyo

³⁷ Huan TOTECO quicamanalhui Moisés, huan quihui:

³⁸ “Xiquincamanalhui nochi israelitame, huan xiquinilhui para iniyoyo monequi quitallise itenhuaxo ica icpat cati azultic. ³⁹ Huan quema an-quitachilise itenhuaxo amoyoyo, anquielnamiquise itanahuatil TOTECO huan anquitoquilise. Huan amo antechajtehuase quej se tacanenca sihuat quicahua ihuehue. Yon amo anquichihuase san cati anquinequij anquichi-huase, o cati amoilhuaj para cuali. ⁴⁰ Quej nopa anquielnamiquise nochi notanahuatil huan anquineltoque, huan aneltose antatzejtelotique san para na, niámoTeco Dios. ⁴¹ Na niDIOS niámoTeco, huan na nimechquixti ipan tali Egipto para antechixmatise para niámoTECO. Quena, na niámoTeco Dios.”

¹ Se tonali pejqui motanana Coré ihuaya Datán, Abiram huan On. (Coré eliyaya icone Izhar, cati eliyaya icone Coat, cati eliyaya icone Leví huejcajquiya. Huan Datán huan Abiram eliyayaj iconehua Eliab huan On eliyaya icone Pelet. Huan nochi ni eyi eliyayaj iteipan ixhuihua Rubén cati itztoya huejcajquiya.) ² Huan Coré, Datán, Abiram huan On mohueyimatque huan motanange inihuaya 250 israelita tayacanani. Nopa 250 tacame quipiyayayaj tequiticayot huan tetalnamicliyayaj huan nochi israelitame quinixmatiyayaj. ³ Huan nochi injuanti mosentilijque huan motalijque iixpa Moisés ihuaya Aarón, huan quinilhuijque:

—Ayecmo timechijyohuise más. Amojuanti amo más ancuajcualme que sequinoc tiisraelitame. Nochi tiisraelitame techtapejpenijtoc TOTECO, huan yaya itztoc tohuaya nochi tojuanti. Huajca ¿para ten amojuanti tahuel anmohueyichihua huan anquinequij antechnahuatise nochi sequinoc tiisraelitame?

⁴ Huan quema Moisés quicajqui nopa tamanti, motancuaquetzqui huan huetzqui ica ixayac iixpa TOTECO. ⁵ Teipa quiilhui Coré inihuaya cati quitoquiliyayaj:

—Mosta ica ijnaloc TOTECO quinextis ajquiya injuanti iaxcahua huan ajquiya injuanti quinita para tatzejzeloliti huan ajquiya quitapejpenijtoc para quinechcahuis ica tacajcahualisti, pampa san cati TOTECO quitapejpenis huelis quimactilis tacajcahualisti. ⁶ Huajca xijchihuaca ya ni para tijmatise: Coré, ta huan nochi cati itztoque mohuaya, mosta xijcuica ticomit, ⁷ huan ipan xijtalica ticoli. Huan xijtemilica copali huan xijtalica iixpa TOTECO. Huan nopa tacat cati TOTECO quitapejpenis, ya nopa cati tiquitase para tatzejzeloliti. Amojuanti, anlevitame, tahuel anmohueyimajtoque.

⁸ Nojquiya Moisés quiilhui Coré:

—¡Techtacaquilica, amojuanti anlevitame! ⁹ ¿Amo anquiiatj para hueyi ipati cati Toteco Dios amechchihuilijtoc? ¿Para ten anquiiatj para tahuel pilquentzi para TOTECO cati tiisraelitame tijhueyichihua, amechtapejpenijtoc san amojuanti para aniaxcahua? Amechiyocatalijtoc ten nochi sequinoc israelitame para anquinechcahuise huan antequitise ipan ni iyoyon tiopa campa yaya itztoc tohuaya. Nica eltoc campa anquintequipanose nochi israelitame. ¹⁰ Quena, TOTECO mitztapejpenijtoc ta, tiCoré, huan nochi moicnihua cati levitame para antequitise inechca. Amo cuali para anquiiatj ya nopa quej amo teno. ¿Para ten ama anquinequij anmochihuase antotajtzitzi nojquiya? ¹¹ Amo anmotochonchijtoque ica Aarón huan anquitaijilhuaj. Yaya amo teno quichijtoc. Anmotochonchijtoque huan anquitaijilhuaj TOTECO.

¹² Teipa Moisés tanahuati ma quinotzatij Datán huan Abiram cati eliyayaj iconehua Eliab, pero san tananquilijque:

—Amo tiyase. ¹³ Ta timoilhuía tahuel pilquentzi para techquixtijtoc ipan tali Egipto cati temacayaya itajca hasta mocahua para ma timiquiquij nica ipan ni huactoc tali, huan ¿ama tijnequi tielis titotanahuatijca nojquiya? ¹⁴ Amo techhuacatoc ipan se tali cati nochi temaca hasta mocahua, yon amo techmacatoc se tomil, yon se toxocomecamil. Tijnequi nochi ma timitztoquilica quej san tipopoyotzitzi. ¡Amo, amo timitzitatij!

¹⁵ Huajca Moisés tahuel cualanqui huan quiilhui TOTECO:

—Amo xijseli inintacajcahualis. Na amo teno niquincuilijtoc, yon se pilburrojti. Amo teno cati amo cuali nijchihuilijtoc yon se ten injuanti.

¹⁶ Teipa Moisés quiilhui Coré:

—Mosta ximonextica iixpa TOTECO, huan Aarón nojquiya nopona itztos. ¹⁷ Sesen ten amojuanti xijhuicaca amotico huan ipan ma qitali copali. Ta

ihuaya Aarón huan nopa sequinoc 250 tacame anquihuicase amotico huan anquitalise san sejco iixpa TOTECO.

¹⁸ Huajca sesen ten injuanti quicuic itico, huan ipan quitali ticoli huan copali huan moquetzqui ihuaya Moisés huan Aarón iixpa nopa yoyon tiopamit campá timopantíaj ihuaya TOTECO. ¹⁹ Huan Coré quichijtoya ma mosentilica nopona nochi nopa israelitame para ma quitachilica taya panos. Huan itatanex TOTECO monexti iniixpa nochi nopa israelitame.

²⁰ Huan TOTECO quicamanalhui Moisés ihuaya Aarón huan quinilhui:

²¹ —Ximoiyocalica ten nochi ni tzochochon tacame, huan na niquintzon-tamiltis ipan se talojtzi.

²² Huan Moisés huan Aarón motancuaquetzque iixpa TOTECO hasta moix-taltenamijque, huan quijtojque:

—¡Ay Toteco Dios! Ta cati tiquinmaca nemilisti nochi masehualme, amo xicualani inihuaya nochi ni israelitame por itajtacol san se tacat.

²³ Huajca TOTECO quihlhui Moisés:

²⁴ —Xiquincamanalhui nochi nopa israelitame huan xiquinnahuati ma mijcuenica ten ininčaj Coré, Datán huan Abiram.

²⁵ Huajca Moisés moquetztiquisqui huan yajqui campá itztoya Coré, Datán huan Abiram, huan quitoquilijque nochi nopa 250 tayacanca israelitame.

²⁶ Huan nopona Moisés quinilhui nopa masehualme:

—Ximoiyocalica ten iniyoyoncalhua ni tacame cati fierojtjique, huan amo xijcuica teno cati iniaxca para amo ancalaquise ipan inintajtacol.

²⁷ Huan nopa israelitame mijcuenijque ten ininčajčaj. Huan Coré, Datán huan Abiram inihuaya inisihuahua, huan ininconeuhua moquetztoyaj calixpa nechca sese icalte. ²⁸ Huan Moisés quijto:

—Ica ya ni anquimatise para TOTECO techtitantoc para ma nijchihua nochi cati nijchijtoc, huan amo nijchihua san pampa na nijnejqui. ²⁹ Sinta ni tacame miguise quej sequinoc tacame miqij, huajca quijtosnequi TOTECO amo techtitantoc para nimechyacanas. ³⁰ Pero sinta TOTECO quichihuas se tamanti cati amo quema anquitztoque huan ni tali tapohuis huan quintolos ica nochi cati injuanti quipixtoque, huan nochi huetzise yoltoque talijtic, huajca anquimatise para ni tacame quixpanotoque TOTECO.

³¹ Huan quema tanqo camanalti Moisés, nopa tali motapo campá injuanti itztoyaj, ³² huan quintolo nochi nopa tacame cati mosentilijtoyaj ihuaya Coré inihuaya inisihuahua huan ininconeuhua cati inihuaya itztoyaj huan nochi cati quipiyayaj. ³³ Huan nochi injuanti huetzque yoltoque taltita ica nochi cati eliyaya iniaxca, huan nopa tali sempa motzajqui. Quej nopa nochi cati tajtacolchijque polijque huan ayecmo itztoyaj ica nopa israelitame. ³⁴ Huan quema nopa israelitame cati itztoyaj ininechca quicajque cuatzajziyayaj cati huetziyayaj, motalojtejque huan quijtojtiyajque: “Huelis techtolos nojquiya.” ³⁵ Huan nojquiya TOTECO quititanqui tit huan quintamitati nochi nopa 250 tacame cati quitatijtoyaj nopa copali.

³⁶ Huajca TOTECO quihlhui Moisés:

³⁷ “Xijnahuati Eleazar itelpoca Aarón para ma quiquixti nochi nopa ticomit cati mopantía ipan nopa tit campá mijcatzitzit pampa tatzejtelolitic. Ma quitepehua huan ma quisehui nopa ticoli ³⁸ cati eltoc ipan sesen ticomit ten nopa tacame cati tajtacolchijque huan yeca mijque. Pero ya mochijtoya tatzejtelolitic nopa ticome quema quitequihuique noixpa. Xiquincua huan xiquintejetzonaca para ica nopa teposti anquichihuilise se itzajca nopa taixpamit. Huan nopa israelitame quitase huan quielnamiqise para san itelpocahua Aarón hueli quitatise copali noixpa.”

³⁹ Huajca nopa totajtzi Eleazar quinsentili nochi nopa ticome ten bronce cati quihucitoyaj nopa tacame cati mijque huan tanahuati ma quichihuilica se itzajca nopa taixpamit. ⁴⁰ Huan ya nopa elis se ejemplo para nochi israelitame, para yon se cati amo itelpoca Aarón amo hueli monechcahuis campa taixpamit para quitatis copali iixpa TOTECO para amo ipantis quej ipantic Coré huan nochi cati quitoquiliyayaj. Huan nochi mochijqui san quej TOTECO quinahuatijtoya Eleazar ica Moisés.

⁴¹ Huan nopa seyoc tonal ica ijnaloc, nochi nopa israelitame pejque quinejelnamiqij Moisés huan Aarón. Huan quijtohuayayaj:

—¡Amojuanti anquinmictijtoque nochi imasehualhua TOTECO!

⁴² Huajca nochi nopa tacame cati mosejcotilijtoyaj para quitehuise Moisés huan Aarón tachixque campa nopa yoyon tiopamit, huan quिताque nopa mixti quitzactoya, huan monextiyaya itatanex TOTECO. ⁴³ Huajca quinechcahuijque Moisés ihuaya Aarón nopa yoyon tiopamit campa mopantíaj ihuaya TOTECO. ⁴⁴ Huan TOTECO quihhui Moisés:

⁴⁵ —Ximoiyocatalica ten ni fiero tacame, huan niqintzontamiltis ica se talajtzi.

Huan Moisés huan Aarón motancuaquetzque huan huetzque ica inixayac iixpa TOTECO. ⁴⁶ Huan teipa Moisés quihhui Aarón:

—Xijcui nopa ticomit huan ipan xijfali ticoli cati eltoc ipan taixpamit, huan xijfali copali, huan nimantzi xiya campa itztoque nopa israelitame. Huan ica ya nopa tiquixtzacuas inintajtacolhua, pampa icualancayo TOTECO tejcotoc huan ya pejqui se hueyi cocolisti cati quinnictía.

⁴⁷ Huajca Aarón quichijqui cati Moisés quinahuatijtoya, huan motalotijiyajqui campa mosentilijtoyaj nopa israelitame. Huan nopa cocolisti cati TOTECO quintitanilijtoya ya pejtaya huan campa hueli israelitame miquiyayaj. Huajca Aarón quitati nopa copali huan quixtzajqui inintajtacolhua nopa israelitame. ⁴⁸ Huan moquetzqui tatajoc ten inijuanti cati ya mictoyaj huan inijuanti cati noja yoltoyaj, huan nopa miqulisti huan nopa cocolisti motilquetzqui. ⁴⁹ Huan para nochi, inijuanti cati mijque ipan nopa cocolisti elque 14 mil 700 huan ya ni eliyaya iyoca ten inijuanti cati mijque ihuaya Coré. ⁵⁰ Teipa tacuepili Aarón campa itztoya Moisés ipan icalte nopa yoyon tiopamit campa mopantíaj ihuaya TOTECO pampa ya tantoya nopa miqulisti.

17

Icuatopil Aarón cati chamanqui

¹ Teipa TOTECO quicamanalhui Moisés huan quihhui:

²⁻³ “Xiquinnahuati nopa tayacanani ten sesen hueyi familia ma techhualiquilica se cuatopili. Para nochi, mochihuase 12 cuatopilme cati techhualiquilise. Huan ipan sesen tiquijcuilos itoca cati quihualiac, pampa sesen tayacanquet ten sese hueyi familia quipiya se cuatopili. Huan tiquijcuilos itoca Aarón ipan nopa cuatopili cati huala ipan nopa hueyi familia Leví. ⁴ Huan nochi xijfalic calijtic ipan nopa yoyon tiopamit campa timopantíaj. Xijfalic iixpa nopa caxa cati quipiya nopa camanali cati nijchijqui amohuaya. ⁵ Huan na nijchihuas para ma chamani icuatopil cati na nijtajejenijtoc. Huan ica ya ni nopa israelitame ayecmo techcualancamacase pampa amechejelnamiqij.”

⁶ Huajca Moisés quinilhui nopa israelitame, huan yeca sesen cati taya-canayaya ipan se hueyi familia quimacac icuatopil, huan quinsentili 12

cuatopilme. Huan ihuaya nopa cuatopilme nojquiya eltoya icuatopil Aarón. 7 Huan Moisés quitali nopa cuatopilme iixpa TOTECO campa más calijtic ipan nopa yoyon tiopamit campa eltoc nopa caxa.

8 Huan tonili quema Moisés sempa yajqui ipan nopa yoyon tiopamit, quitiac ya chamantoya icuatopil Aarón cati eliyaya ten nopa hueyi familia ten Leví. Huan icuatopil Aarón quipixtoya ichamanca, ixochiyo, huan hasta nojquiya temacatoya almendras icsitoc. 9 Huajca Moisés quinquixti nochi nopa cuatopilme cati eltoya iixpa TOTECO huan quinnextili nochi nopa israelitame. Huan nopa israelita tayacanani san quitachilijque cati panotoya huan sesen quicuic icuatopil.

10 Huajca TOTECO quiilhui Moisés: “Sempa xijtali icuatopil Aarón iixmelac nopa caxa huan nozona mocahuas quej se tanextili cati quinelnamiquiltis nochi israelitame cati panoc ica nopa masehualme cati motochonchijque huan pejqque techcualancaitaj. Huan sinta sequinoc sempa techelnamiquise, tiquinnextilis na tanextili para ma quitilquetzaca inintzontochoyo huan amo niquinnictis.”

11 Huan Moisés quichijqui nochi quej TOTECO quinahuati. 12 Pero nopa israelitame noja quiejelnamiquiyayaj Moisés huan quijtohuayayaj: “¡Timocuapolojtoque! ¡Nochi timiquise! 13 Pampa nochi miquij cati monechcahuíaj campa nopa yoyon tiopamit ten TOTECO. Huajca senquisu nochi tojuanti timiquise, ¿ax que?”

18

Inintequi nopa totajtitziti huan levitame

1 Teipa TOTECO quiilhui Aarón:

“Ta ihuaya motelpocahua huan moixhuihua cati hualahuij ipan mofamilia anquihuicase tajtacoli sinta acajya quichihuas amo tapajpactic nopa yoyon tiopamit. Nojquiya anquihuicase tajtacoli sinta amo mochijtoc senquisu nochi cati monequi ipan amotequi quej antotajtitziti.

2 Xiquinhualicaca amoteixmatcagua cati nojquiya hualahuij ipan nopa hueyi familia Leví, huan ma amechpalehuica, ta ihuaya motelpocahua, ipan nopa tequit cati monequi anquichihuase ipan noyoyon tiopa. 3 Quena, moteixmatcagua amechpalehuise ipan sequij tamanti tequit. Pero san ta, Aarón, ihuaya motelpocahua hueli anmonechcahuise campa nopa mesas o taixpamit pampa antatzejzeloltique. Huan sinta sequinoc monechcahuise, miquise, huan ta nojquiya timiquis. 4 Inijuanti amechpalehuise ipan nochi tequit cati monequis ipan ni yoyon tiopamit campa timopantíaj, pero yon se tacat cati amo levita amo huelis monechcahuis campa amojuanti. 5 San ta huan motelpocahua hueli antequitise campa nopa mesas huan campa nopa taixpamit. Huan sinta quej nopa mochihuas, huajca ayecmo nicualañis ica amojuanti anisraelitame. 6 Pampa na niquincuitoc moicnihua, nopa levitame, huan niquiniyocaquixtijtoc ten nochi nopa sequinoc israelitame para nimechmacas quej totajtitziti para ma amechpalehuica ipan nopa tequit cati monequi calijtic ipan nopa yoyon tiopamit. 7 Pero san ta, Aarón, inihuaya motelpocahua huelis antatatisé huan anquichihuase nochi nopa tequit tatzetzeloltic cati mochijtoc campa taixpamit, huan nochi cati mochijtoc más tiopan calijtic campa Más Tatzetzeloltic iica nopa cortina pampa na nimechtalijtoc antotajtitziti. Huan nopa hueyi tequit cati anquichihuase, na nimechmacatoc quej se nemacti. Huan san amojuanti huelis antechchihuilise nopa tequit ten totajtitziti quej nimechnahuatijtoc.

Huan sinta seyoc cati amo totajtzi quichihuas itequi se totajtzi, monequi anquimictise.”

Quenicatza mopanoltise totajztizi huan levitame

⁸ Nojquiya TOTECO quiilhui Aarón:

“Na nimechmacatoc nochi tacajcahualisti cati israelitame quihuijhuise noixpa. Quena, nochi tacajcahualisti tatzejtzeloltic elis amoaxca pampa nimechmacatoc, ta huan motelpocahua. Ni elis se tanahuatili para nochipa.

⁹ Elis amoaxca nochi partes ten nopa tatzejtzeloltic tacajcahualisti cati amo quiajsi tit. Amoaxca nochi nopa tacajcahualisti ten harina, huan nochi tacajcahualisti por tajtacoli, huan nochi tacajcahualisti cati techmacaj pampa quihuicaj tajtacoli noixpa. Nochi ya ni niquiyocatalijtoc para anquitequihuse. ¹⁰ San nopa se quentzi cati nimechnahuatijtoc anquitatise ipan taixpamit ten sesen tacajcahualisti elis para na. Nochi antotajztizi inihuaya amotaca conehua huelis anquicuase ni tacajcahualisti cati tatzejtzeloltic, pero san hueli anquicuase campá tatzejtzeloltic.

¹¹ “Nojquiya nimechmaca nochi tacajcahualisti tahuisoli, huan nojquiya huelis quicuase amonehua masque oquichpilme o sihuapilme. Nochi ya ni elis amoaxcahua para nochipa. Cati hueli ten amoteixmatcahua cati tapajpactic noixpa, huelis quicuas ni tacajcahualisti. ¹² Nojquiya nimechmaca, antotajztizi, nochi iniachtohui tajca inimil nopa israelitame cati injuanti techhualiquilaj sesen xihuit. Elis cati achi más cuali ten nochi aceite, nochi xocomeca at, huan nochi trigo. ¹³ Nopa cati achtohui pixcase israelitame ipan inintatochui huan techmacase, nochi elis para antotajztizi huan amoteixmatcahua cati tapajpactic noixpa. ¹⁴ Nochi cati taiyocatalili para na ipan inintal israelitame, elis para amojuanti.

¹⁵ “Nojquiya elise amoaxcahua iniachtohui conehua israelitame, huan iachtohui cone sese inintapiyal. Nochi ya ni techmacase huan elis para amojuanti. Pero injuanti sempa techcohuilise iniachtohui conehua. Nojquiya nochi iniachtohui conetapiyalhua cati amo tapajpactic techcohuilise ica ininpati cati ta tiquitas para cuali. ¹⁶ Quema iniachtohui conehua quipiyase se metzti, techcohuilise ica macuili tomi ten plata cati sesen quipiya 11 gramos letica ipan nopa tatamachihuali ten tiopamit. Huan ya nopa tajselis para ininpati sese iniachtohui cone.

¹⁷ “Pero amo xiquincahua ma taxtahuaca para techcohuilise cati achtohui tacatis ten inihuacaxhua o ininborregojuhua o ininchovojuhua. Nopa tapiyalme iniachtohui conehua elise san para na. Huan monequi tiquimictis, huan inieso xicajtzelhuis ipan nopa taixpamit. Huan ininchiyajca xijta quej se tacajcahualisti tatatili cati ajhuiyac mijyotía para na. ¹⁸ Pero quema israelitame techmactilise huacaxme, borregoime huan chivojme, nopa nacat cati quihuisose noixpa para techmacase quej iniyolix huan ininquescuayo nopa tapiyalme, elis para anquitequihuse. ¹⁹ Huajca nochi cati nopa israelitame quiyocatalijaj para quihuisose noixpa, nimechmaca ta huan motelpocahua para ma quicuaca amonehua, masque oquichpilme o sihuapilme. Ya ni elis se tanahuatili para nochipa. Ya ni se camanali cati nimechtencahuilía, niamoTECO. Nochi ya ni nimechmacas. Huan quej istat amo quema quipolos ipoyeca, nojquiya nocamanal amo quema tamis ica ta, Aarón, huan ica moixhuihua.”

²⁰ Nojquiya TOTECO quiilhui Aarón:

“Antotajztizi huan anlevitame, amo anquiselise tali para amoaxca quema anajsise ipan nopa cuali tali campá anyase, huan quema momajmacase cati quitanise ipan tatehuilisti, amo teno anmoaxcatise. Pampa quej ipataca

nopa tali cati ne sequinoc israelitame quinaxcatise, antechpiyase na. Huan na nielis niamoaxca huan na cati antechselise, huan san ya nopa monequi.

²¹ “Huan amoicnihua cati iteipan ixhuihua Leví cati amo totajtztzi, niquinmacas nopa diezmos cati techmacaj nochi israelitame. Ica ya ni niquintaxtahuis inintequi cati quichihuaaj ipan nopa yoyon tiopamit campa timopantíaj. ²² Ayecmo huelis monechcahuis campa yoyon tiopamit campa timopantíaj yon se israelita cati amo totajtzi, o amo se levita; pampa sinta quinechcahuis, quihuicas itajtacol, huan nozona miquis. ²³ San levitame tapalehuise ipan ni yoyon tiopamit campa timopantíaj. Huan injuanti quihuicase tajtacoli sinta cati amo cuali mochjtoc nozona. Huajca ni elis se tanahuatili para nochipa cati panos ten tetatme hasta ininconeuhua iniixpa nochi israelitame: yon se levita amo hueli quiselis cati ya ital. ²⁴ Pero niquinmacatoc levitame nochi diezmos * cati israelitame techmacaj na, niamoTECO. Huan yeca niqijtojtoc ten injuanti: Anlevitame amo anquiselise tali para amoaxca quemá nopa sequinoc amoisraelita icnihua quiselise.”

²⁵ Huajca TOTECO quicamanalhui Moisés huan quiilhui:

²⁶ “Xiquinilhui nochi nopa levitame para quemá quiselise nopa diezmos cati israelitame techmacase huan cati niquinmacatoc para iniaxca, injuanti monequi quiquixtise se diezmo huan techmacase na, niamoTECO. Elis se diezmo ten nochi diezmos san sejco. ²⁷ Huan na, niamoTECO, niqitas ya ni quej elisquía inindiezmo ten trigo o ten xocomeca at cati techmacase sinta quipixtosquíaj inintal. ²⁸ Huajca quej nopa, nopa levitame cati quiselise nopa diezmos cati techmacase israelitame, quiyocatalise se diezmo para na, niinTECO, huan quimacase nopa totajtzi Aarón. ²⁹ Huan quemá nopa levitame techmacase nopa diezmo ten nochi nopa diezmos cati quiselijtoque, monequi quitapejpenise cati achi más cuali huan achi más tatzejzelolitic ten nochi para techmacase.

³⁰ “Nojquiya xiquinilhui nopa levitame para quemá quiyocatalijtoque cati achi más cuali para na, huajca nopa cati mocahua huelis quiitase quej inintrigo huan inixocomeca iayo. ³¹ Huan hueli quicuase campa quinequise inihuaya ininteixmatcahua. Ya nopa elis inintaxtahuil pampa tequipanohuaaj ipan ni yoyon tiopamit campa timopantíaj. ³² Quemá ya quiyocatalijtoque nochi cati achi más cuali para na, huelis quicuase nochi cati mocajtoc, huan amo se tajtacoli, pampa ya techmacatoque cati achi más cuali. Pero xiquinilhui nopa levitame ma momocuitahuica para amo san quej hueli quiitase nochi nopa tacajchualisti cati tatzejzelolitic cati techmacaque israelitame para amo miquise.”

19

Quenicatza ma tetapajpacchihuaca

¹ TOTECO nojquiya quinilhui Moisés huan Aarón:

² “Ya ni se tanahuatili cati ama na, niamoTECO, nimechmaca: Xiquinilhui nochi israelitame san sejco ma techhualiquilica se huacax cati quipiya iijhuiyo achi chichiltic. Monequi elis se huacax cati amo quipiya teno cati amo cuali, huan cati amo aquí quitequihujtoc para tapoxonis. ³ Huan ma quimactilica nopa totajtzi Eleazar, huan ya quiquixtis huejca ten amoaltepe huan tanahuatis para se ma quimicti iixpa. ⁴ Huan nozona nopa totajtzi

* **18:24** 18:24 Diezmos quinequi quijtos 10 por ciento. Ya nopa quinequi quijtos ten sesen majtacti tapiyalme cati quintacatitise itapiyalhua se masehuali, quimacase TOTECO se tapiyali. O quimacas TOTECO se cuartillo ten sesen majtacti cuartillos cati itajca imil.

Eleazar quicuis se achi ieso ica imacpil huan quimelac itas nopa yoyon tiopamit ica huejca, huan taatzeltzelos iixmelac chicome huelta ica nopa esti. ⁵ Teipa se quitatis nochí nopa huacax iixpa Eleazar. Quitatis icuetaxo, inacayo, ieso huan icuit. ⁶ Huan quema tatas, nopa totajtzi quicuis se cuahuit ten tiocuahuit, se imacuayo nopa xihuit itoca hisopo, se quientz borrego ichcat cati chichiltic, huan quimajcahuas nochí ipan tit campa tata nopa huacax.

⁷ “Teipa nozona nopa totajtzi monequi quichicuenis iyoyo, huan maltis cuali ica at. Huan teipa huelis tacuepilis sempa campa amoaltepe ten amoyoyoncalhua, pero nopa totajtzi mocahuas amo tapajpactic noixpa hasta tayohua huan huajca, quena, elis tapajpactic. ⁸ Huan nopa tacat cati quitatis nopa huacax, nojquiya monequi quichicuenis iyoyo nozona huan maltis ica at; huan mocahuas amo tapajpactic noixpa hasta tayohua. Huan teipa ya nojquiya elis tapajpactic. ⁹ Huan teipa seyoc tacat cati tapajpactic noixpa, quisentilis nopa cuajnexti ten nopa huacax huan quiajocuis huejca ten amoaltepe ipan se lugar cati quitapajpacchijtoque noixpa. Huan nozona mocahuas nopa cuajnexti para anisraelitame anquitequihuse para ica anquichihuse se at para ica motapajpacchihuse cati ayemo tapajpactic noixpa huan nopa at quinquixtilis inintajtacol. ¹⁰ Huan nopa tacat cati eliyaya tapajpactic, pero quisentili nopa cuajnexti, mochijtoc amo tapajpactic noixpa, huan monequi quichicuenis iyoyo. Huan mocahuas amo tapajpactic noixpa hasta tayohua. Huajca quej nopa anquichihuse nopa at, huan anquitequihuse para anmotapajpacchihuse noixpa. Huan amo san anisraelitame anquitequihuse, nojquiya quitequihuse seyoc tali ehuan cati itztose amohuaya, huan para nochípa huejcahuas ni tanahuatili.

¹¹ “Quema se masehuali quitzquis se mijcatzi, mochihuas amo tapajpactic noixpa para chicome tonati. ¹² Huan ipan eyi tonati huan ipan chicome tonati, monequi motapajpacchihuas ica nopa at cati tetapajpacchihua noixpa, huan elis tapajpactic. Pero sinta se amo motapajpacchihuas ipan nopa eyi huan nopa chicome tonati, elis amo tapajpactic noixpa. ¹³ Nochí cati quitzquía itacayo se mijcatzi huan amo motapajpacchihua quej quijtohua tajcuiloli, quichihuas amo tapajpactic nopa yoyon tiopamit campa na niiztoc amohuaya. Huan nopa tacat monequi anquimictise para ayecmo itztos amohuaya anisraelitame. Miquis san pampa amo quiatzeltzelhuijque ica nopa at cati tetapajpacchihua huan yeca elis amo tapajpactic noixpa.

¹⁴ “Ya ni se tanahuatili para quema se acayja miquis ipan se yoyoncali. Nochi cati mopantiaj calijtic ihuaya huan nochí cati calaquise nozona mocahuase amo tapajpactic noixpa para chicome tonati. ¹⁵ Nochi tazajme huan nochí tamanti cati eltoya calijtic cati amo cuali tzactoc elis amo tapajpactic.

¹⁶ “Sinta se itztoc campa mili huan quitzquis se mijcatzi cati quimictijtoque ipan tatehuilisti o ica ten hueli tamanti, mochihuas amo tapajpactic. O sinta se quitzquis se iomyo se mijcatzi, o quitzquis tali campa quitaltojque se mijcatzi elis amo tapajpactic noixpa para chicome tonati.

¹⁷ “Huajca quema monequi se acayja mochihuas amo tapajpactic quej nopa, para huelis motapajpacchihuas, monequi xijcuica achi icuajnexo nopa huacax cati quitafijque quej se tacaahualisti por tajtacoli, huan xijtalica ipan se comit huan xijtequilica at ten se ameli. ¹⁸ Huan se tacat cati tapajpactic noixpa quicuis se imacuayo nopa xihuit cati itoca hisopo, huan quixolonis ipan nopa at huan quiatzeltzelhuis cati mochijtoc amo tapajpactic. Huan sinta nopa mijcatzi mijqui calijtic, monequi quiatzeltzelhuis nopa yoyoncali, huan nochí tamanti cati tapojtoya calijtic, huan nochí cati itztoyaj nozona. Huan sinta mochijtoc amo tapajpactic pampa quitzqui itacayo se

cati mijqui huejca ipan tatehuilisti o ica ten hueli tamanti, o sinta quiajsis se iomiyo se mijcatzi o quiitzqui campa quitoctoyaj se mijcatzi nojquiya quiatzejtzelhuis. ¹⁹ Se cati tapajpactic noixpa monequi quiatzejtzelhuis yaya cati mochijtoc amo tapajpactic ipan eyi tonati huan ipan chicome tonati. Huan nojquiya ipan nopa chicome tonati, nopa tacat cati mochijtoya amo tapajpactic, monequi maltis ica at huan quichicuenis iyoyo huan quema ajsis tayohua elis tapajpactic.

²⁰ “Pero sinta se mochijtoc amo tapajpactic noixpa huan amo motapajpacchihuas, san mocahuas amo tapajpactic, monequi anquimictise para ayecmo itztos amohuaya. Miquis pampa quichihuas amo tapajpactic noyoyon tiopa cati eltoc amohuaya, pampa amo moatzejtzelhuijtoc ica nopa at cati quitapajpacchijtosquía. ²¹ Ya ni elis se tanahuatili para nochipa. Huan ya cati quiatzejtzelhúa seyoc ica nopa at cati tetapajpacchihua nojquiya monequi quichicuenis iyoyo, pampa cati hueli cati quiajsis nopa at cati tetapajpacchihua, mocahuas amo tapajpactic hasta tayohua. ²² Nojquiya nochi tamanti cati se tacat cati amo tapajpactic noixpa quiajsis o quiitzquis, mochihuas amo tapajpactic. Nojquiya cati hueli cati quiitzquía nopa tamanti cati amo tapajpactic, mocahuas amo tapajpactic hasta tayohua.”

20

Quisqui at ipan nopa hueyi tepexit

(Éx. 17:1-7)

¹ Huan nopa israelitame sempa ajsitoj ipan nopa huactoc tali cati itoca Zin ipan abril, nopa achtohui metzti ipan iniyancuic xihui, huan mocajque campa itoca Cades. Huan nopona mijqui María, huan quitaltojque.

² Huan amo oncayaya at nopona para quiise nopa israelitame. Huan sempa mosentilijque huan tacualancachijque ica Moisés huan Aarón, ³ huan quiixcoilhuijque Moisés:

—Achi más cuali timictosquía inihuaya nopa sequinoc israelitame cati TOTECO quinmicti iixpa. ⁴ ¿Para ten techhualiac, tiimasehualhua TOTECO, ipan ni huactoc tali para tojuanti huan totapiyalhua ma timiquica nica? ⁵ ¿Para ten techquixti nepa ipan tali Egipto huan techhualiac nica campa nelía tahuel fiero? Amo quipiya tatoc, yon higos, yon xocomeca mili, yon granada. ¡Yon amo onca at para tiquise!

⁶ Huan Moisés ihuaya Aarón quincajtejque nopa miyaqui israelitame calteno huan calajque ipan nopa yoyon tiopamit campa Mopantiaj ihuaya TOTECO, huan nopona motancuaquetzque huan mohuijtzonque talchi, huan itatanex TOTECO monexti iniixpa. ⁷ Huan TOTECO quilhui Moisés:

⁸ —Xijcuitehua icuatopil Aarón, huan xiya ihuaya ya huan xiquinsentiliti nochi israelitame. Teipa iniixpa nochi israelitame xijnojnotta nopa hueyi tet, huan xiquilhui ma amechmaca at. Huan quej nopa anquiquixtise at ipan nopa tepexit para nochi ma atica inihuaya inintapiyalhua.

⁹ Huajca Moisés quicuic nopa cuatopili cati eltoya iixpa TOTECO, senquisa quej quinahuatijtoya. ¹⁰ Huan Moisés ihuaya Aarón quinsentilijque nochi nopa israelitame iixpa nopa tepexit, huan Moisés quinilhui:

—¡Xitacaquica anmosisinijca masehualme! ¿Huelis monequi tojuanti ma timechquixtilica at ipan ni hueyi tepexit para timechamacase?

¹¹ Huan quema Moisés quiijto ya ni, quitananqui imax huan ome huelta quitzohuitejqui nopa hueyi tepexit ica nopa cuatopili. Huan tahuel miyac at quisqui, huan nochi nopa israelitame huan inintapiyalhua pejque atij.

¹² Pero TOTECO quilhui Moisés ihuaya Aarón:

—Pampa amo anmotemachijque ipan na, huan amo anquinnextilijque nopa israelitame para na nitatzejtzeltolitic huan niyoca ten nochi sequinoc, amo anquinyacananse ipan nopa tali cati nimechmacatoc.

¹³ Huan quitocaxtijque campa itztoyaj Ameli Ten Meriba, (Meriba quiijsosnequi Campa Monajnanquilijque) pampa nozona nopa israelitame monajnanquilijque ica TOTECO huan ya quinnextili para tatzejtzeltolitic huan nelía iyoca.

Amo huelque panoj ipan tali Edom

¹⁴ Quema nopa israelitame itztoyaj ipan Cades, Moisés quintitanqui sequij itayolmelajcahua ma quitatij nopa tanahuatijquet ten tali Edom para ma quihhuica ni camanali:

“Tojuanti tiiteipan ixhuihua Israel cati huejcajquiya eliyaya iicni mohuejcapan tata. Ta cuali tijmati nopa taohuijcaoyot cati topantitoc.

¹⁵ Tohuejcapatatahua yajque ipan tali Egipto huan nozona huejcajque para itztose, pero nopa Egipto ehuan tahuel techtaijyohuilitiyaj.

¹⁶ Pero quema tijtaztzilijque TOTECO ma techpalehui, techacaquili huan techtitanili se iilhuicac ejca, huan techquixti ipan nopa tali Egipto.

“Huan ama nica tiitzoque ipan Cades, se altepet campa monepantía ica motal. ¹⁷ Yeca timitztajaníaj techmaca caquihuii tipanose ipan motal. Amo ticalaqueise campa onca tocti o campa se xocomeca mili, yon amo tiquise at ten yon se moamel. San tiyase ipan nopa hueyi ojti huan amo tijcahuase nopa ojti hasta quemá tiquistose ipan motal.”

¹⁸ Pero nopa hueyi tanahuatijquet ten tali Edom quinnanquili:

“Amo timechcahuilise anpanose ipan total. Huan sinta anhualase, na ihuaya nosoldados timechnamiquise.”

¹⁹ Pero nopa israelitame sempa quiijtojque:

“San tiyase ipan nopa ojti cati nochi quitequihuíaj, huan sinta tojuanti o totapiyalhua quiise amoa, timechtaxtahuse. San techchiuilica se favor huan techcahuilica tiicxinejnemise ipan amotal.”

²⁰ Pero nopa hueyi tanahuatijquet ten tali Edom quinnanquili:

“¡Amo anpanose!”

Huan quisqui ica miyaqui isoldados cati quihucayayaj inintepos para quinnamiqitij nopa israelitame. ²¹ Huajca pampa nopa tanahuatijquet ten tali Edom amo quinejqui ma panoca nopa israelitame ipan ital, moicanquetque ten ital huan quitemojque seyoc ojti.

Mijqui Aarón

²² Teipa nochi nopa israelitame quisque ipan altepet Cades, huan nejnen-tiyajque hasta itzinta nopa tepet Hor. ²³ Huan nozona itzinta nopa tepet Hor nechca campa monepantía ihuaya tali Edom, TOTECO quinilhui Moisés huan Aarón:

²⁴ “Ya ajsic tonali para miquis Aarón. Amo calaquis ipan nopa cuali tali cati na niquinmacatoc israelitame, pampa nepa campa Ameli Meriba amo anquineltoaque cati na nimechnahuati. ²⁵ Huajca ta, Moisés, xijhuica Aarón ihuaya icone Eleazar tepeixco ipan tepet Hor. ²⁶ Huan nozona xijquixtilis Aarón iyoyo ten totajtzi huan xijtalili Eleazar, pampa nozona miquis Aarón.”

²⁷ Huajca Moisés quichijqui senquisa quej TOTECO quinahuati. Huan nochi inijuanti tejcoque ipan tepet Hor iniixpa nochi israelitame. ²⁸ Huan nozona Moisés quixquixtili Aarón iyoyo ten totajtzi huan qitalili itelpoca,

Eleazar. Huan nozona tepeixco mijqui Aarón, huan Eleazar ihuaya Moisés temoque ipan nopa tepet. ²⁹ Huan quema quimatque nopa israelitame para ya mictoya Aarón, quichoquilique para 30 tonati.

21

Nopa israelitame quintanque nopa cananeos

¹ Itztoya se hueyi tanahuatijquet cananeo cati tanahuatiyaya ipan altepet Arad ipan tali Neguev, huan ya quicajqui para nopa israelitame hualayayaj ipan ojti ten Atarim Huajca motananqui para quintehuiti huan quinitzquijque sequij israelita tacame huan quinhuicague ilpitoque. ² Huajca nopa israelitame quichijque se camanali ica TOTECO. Quilhuijque sinta quinpalehuisquía para quintanise nopa cananeos, huajca injuanti quintzontamiltisquaj nochí cati itzttoyaj nozona ica inialtepehua. ³ Huan TOTECO quintacaquili nopa israelitame huan quinpalehui ma quintanica nopa cananeos. Huan nopa israelitame quintamimictijque huan quisosolojque nochí nopa altepeme. Huajca nozona pejqui motocaxtia Horma. (Horma quijjtosnequi Tasosololi.)

Nopa tepos cohuat ten bronce

⁴ Teipa nopa israelitame quisque campa tepet Hor huan yajque ipan ojti cati yahui para Chichiltic Hueyi At para quiyahualose tali Edom para amo calaquise. Pero ipan ojti ayecmo quipixque iniyolo, ⁵ huan pejque ten hueli camanaltij ica Toteco Dios huan ica Moisés. Quijtohuayayaj:

—¿Para ten antechquixtijque ipan tali Egipto para ma timiquica ipan ni huactoc tali? ¡Amo teno onca cati huélis tijcuase, yon at para tiquise! ¡Huan techyolajsic ni maná cati techmaca para tijcuase pampa nelia fiero!

⁶ Huajca TOTECO quintitanili cohuame cati quipiyayayaj inintencococa huan quema quintzacaniyayaj, eliyaya quej quintatiyaya huan nimantzi miquiyayaj. Huan ica ya nopa mijque miyaqui israelitame. ⁷ Huajca yajque nopa israelitame campa itztoya Moisés huan quilhuijque:

—Titajtalcolchijtoque pampa ticamanaltitoque cati amo cuali ica TOTECO, huan ica ta. ¡Xijtajtani TOTECO ma quiniycueni nopa cohuame!

Huan Moisés quitajtani TOTECO por nopa israelitame. ⁸ Huajca TOTECO quilhui Moisés:

—Xijchihua se cohuat ten bronce cati nesis quej se ten nopa cohuame. Huan xijtali huejcapa ipan se asta, huan quema se acaya quitzacanis se cohuat, ma quitachili nopa cohuat, huan cati quitachilis, momaquixtis.

⁹ Huan Moisés quichijqui se cohuat ica bronce huan quitali huejcapa ipan se teposti huan quema se acaya quitzacaniyaya se cohuat, san quitachiliyaya nopa cohuat ten bronce huan amo miquiyaya.

Nopa ojti campa nejnentiyaque israelitame

¹⁰ Huan nopa israelitame quitoquilijque iniojhui huan teipa quiquetzque iniyoyoncalhua hasta Obot. ¹¹ Huan quistejque ten Obot huan quitoquilijque iniojhui huan mochihuatoj ipan Ijeabarim ipan nopa huactoc tali ica campa quisa tonati ten tali Moab. ¹² Huan teipa sempa quitoquilijque iniojhui huan quiquetzque iniyoyoncalhua ipan nopa tamayamit Zered. ¹³ Huan teipa quitoquilijque iniojhui huan mochihuatoj ipan noca nali ten nopa hueyat Arnón. Nopa hueyat Arnón mopantía ipan nopa huactoc tali huan onquisa ipan inintal nopa amorreos, huan eltoc campa monepantía tali Moab ihuaya inintal nopa amorreos. ¹⁴ Ya ni nojquiya mopantía ijcuilijtoc ipan nopa amat cati quipiya itatehuilis TOTECO, quijtohua:

“Ximoilhui cati Toteco quichijqui ipan nopa Hueyi At Chichiltic, huan ipan nopa pilatajtzitzi ten nopa hueyat Arnón.

¹⁵ Camanalti ten nopa miyac atajme cati yahuij hasta tali Ar, huan tami campa monepantía ica tali Moab.”

¹⁶ Huan nopa israelitame quistejque campa nopa hueyat Arnón huan quitoquilijque iniojhui hasta Beer. (Beer quinequi quijitos Ameli.) Nopona TOTECO quilhui Moisés: “Xiquinsentili nochi nopa israelitame huan niquinmacas at.”

¹⁷ Huajca elqui ipan nopa tonal quema nopa israelitame huicaque ica paquilisti, quijtojque:

“¡Ma tihuicaca ten ni ameli:

‘Ma meya at nica!’

¹⁸ Huan quisqui at ipan nopa ameli,

cati totayacanhua quixajque.

Quixajque ica inimax huan ica inintepospala.

Quena, ica inincuatopil cati ica tanahuatíaj,

techtaxahuilijque ni ameli.”

Huan nopa israelitame quistejque campa nopa huactoc tali huan quitoquilijque iniojhui huan panoque Matana, ¹⁹ Nahaliel huan Bamot. ²⁰ Huan quisque Bamot huan quitoquilijque iniojhui hasta nopa tamayamit cati eltoya ipan nopa tali Moab cati eltoya itzinta nopa huejcapantic tepet Pisga. Iixco nopa tepet hueliyaya moquetzase huan tachiyase hasta nopa huactoc tali campa hualajtoyaj.

Israelitame qitanque Tanahuatijquet Sehón

(Dt. 2:26-37)

²¹ Nopa israelitame quintitanque inintayolmelajcagua ma quitatij nopa hueyi Tanahuatijquet Sehón cati quinnahuatíyaya amorreos, huan ma quilhui:

²² “Tojuanti tijnequij tipanose ipan motal. Amo ticalaquise campa antatojtocque, o campa se xocomeca mili. Amo tiquise at ipan yon se amoamel. San tipanose ipan nopa hueyi ojti hasta tiquisase ipan motal.”

²³ Pero Tanahuatijquet Sehón amo quincahuili ma panoca. San quinsentili nochi isoldados huan quisque quinnamiquitij nopa israelitame ipan huactoc tali, huan ajsitoj campa Jahaza huan motehuijque inihuaya. ²⁴ Pero nopa israelitame tatehuijque ica inimacheta huan tatanque. Huan injuanti moaxcatijque ital Sehón cati pejqui ica nopa hueyat Arnón hasta nopa hueyat Jaboc. Quinequi quijitos moaxcatijque ital Sehón hasta campa monepantía ica inintal nopa amonitame. Nopa amonitame quipixtoyaj inintal achi cuali yahualtzactoc que inintal nopa amorreos.

²⁵ Huajca nopa israelitame moaxcatijque nochi nopa altepeme ten nopa amorreos huan pejque quitequihuíaj nopa hueyi altepet Hesbón huan nochi iranchos. ²⁶ Hesbón eliyaya ialtepe Tanahuatijquet Sehón huan nopona mosehuijtoya para quinnahuatis nopa amorreos. Sehón quiichtequilijtoya nopa altepet nopa tanahuatijquet ten moabitame. Nojquiya Sehón quincuilijtoya nochi inintal nopa moabitame hasta nopa hueyat Arnón. ²⁷ Huan se tajcuiljoquet quijcuiljojtoya quenicatza Tanahuatijquet Sehón tatantoya. Quej ni quijto:

“Xihualaca ipan altepet Hesbón.

Ma tijcualtica para elis nopa altepet campa tanahuatis nopa hueyi Tanahuatijquet Sehón.

²⁸ Sehón nochi quisosolo ica nopa tit cati pejqui ipan altepet Hesbón. Quitamilti nochi hasta altepet Ar ipan tali Moab. Quinmicti nochi huejhueyi tacame cati tanahuatiyayaj campá itoca Arnón.

²⁹ ¡Titeicnelti ta titali Moab! ¡Tipolijtoc!
 ¡Nojquiya nochi anQuemos ehuaní!
 Motelpocahua nochi cholojque, huan moichpocahua huetzque imaco nopa hueyi Tanahuatijquet Sehón.

³⁰ Yaya quisosolojtoc nochi ipan altepet Hesbón huan hasta Dibón huan Nofa. Huan nopa tit cati quipehualti yajqui hasta Medeba.”
 Quej nopa quijcuilo nopa tajcuilojquet.

Israelitame qitanque Tanahuatijquet Og ipan Basán
 (Dt. 3:1-11)

³¹ Huajca nopa israelitame quitequihuijque cati eliyaya inintal nopa amorreos. ³² Huan ten nozona Moisés quintitanqui tacame ma quitachilitij ixtacatzi nopa altepet Jazer. Teipa nopa israelitame yajque huan moaxcatijque Jazer ihuaya nochi altepeme inechca, huan quinquixtijque nochi amorreos cati nozona itztoyaj. ³³ Teipa yajque ipan altepet Basán, pero nopa hueyi Tanahuatijquet Og ipan Basán, motananqui ica nochi isoldados huan hualajqui quintehuico nopa israelitame campá altepet Edrei. ³⁴ Huan TOTECO quihui Moisés: “¡Amo xiquimacásica Og! Na ya nijtalijtoc amomaco ica nochi isoldados huan nochi ital. Huan ta tijchihuilis san se quej tijchihuilí Sehón, inintanahuatijca nopa amorreos cati itztoya ipan altepet Hesbón.”

³⁵ Huajca quej ni nopa israelitame quimictijque Tanahuatijquet Og ihuaya itelpocahua huan nochi isoldados. Yon se amo quicajque itztoc huan moaxcatijque nochi inintal.

22

Balac tatitanqui ma quinotzati Balaam

¹ Huan nopa israelitame sempa pejque nejnemij ipan iniojhui huan qui-quetzque iniyoyoncalhua ipan nopa tamayamit ipan tali Moab iteno hueyat Jordán imelac altepet Jericó.

² Huan Balac, icone Zipor, cati eliyaya inintanahuatijca nopa moabitame, quiitztoya nochi cati nopa israelitame quinchihuilijtoyaj nopa amorreos.

³ Huan nojquiya quiitayaya para nopa israelitame eliyayaj tahuel miyaqui, yeca yaya huan imasehualhua campá huéli ipan tali Moab tahuel majmajque ica injuanti. ⁴ Huajca nopa moabitame quincamanalhuijque nopa huehue tacame ten Madián ehuaní huan quinilhuijque: “Ne israelitame quitamiltise cati eltoc ipan total quej se huacax quitamicua sacat ipan se potrero.”

Huajca Tanahuatijquet Balac cati tanahuatiyaya ipan nopa tali Moab, ⁵ quintitanqui tacame ma quicamanalhuitij Balaam, se tachixquet cati eliyaya icone Beor. Balac itztoya ipan ichaj ipan altepet Petor nechca nopa hueyi hueyat Eufrates. Huan Balac quinequiyaya Balaam ma quipalehuiqui, huajca quinilhui nopa tacame ma quihuitij ni camanali:

“Hualajtoque tahuel miyaqui masehualme ten tali Egipto huan quiquetzaj iniyoyoncalhua campá huéli hasta quitamitzacuaj nochi tali, huan ama mochiytoque noixmelac. ⁶ Xihuala nimantzi huan techtelchihuiliqui ni masehualme, pampa injuanti más tetique que tojuanti. Huélis quej nopa nihuelis niquintanis huan niqunquixtis ipan ni tali.

Pampa cuali nijmati quema ta tijtiochihua se acajya, nelía quiselía se tatiochihuali huan quema ta tijtelchihua se acajya, nelía quiselía se tatelchihuali.”

⁷ Huajca nopa huehue tacame ten tali Moab huan Madián yajque ica tomi inimaco para quitaxtahuise para ma quintelchihuaqui. Huan quema ajsitoj campa Balaam, quiilhuijque nochi cati quinilhuijtoya ma quiilhuica. ⁸ Huan Balaam quinilhui:

—Ximocahuaca nica ni tayohua, huan nimechilhuis cati DIOS techilhuis ma nijchihua.

Huan nopa huehue tacame mocajque nopa tayohua ihuaya Balaam.

⁹ Huan Toteco quinojnotzqui Balaam, huan quitatzintoquili:

—¿Ajquiya ne tacame cati iztoque mohuaya?

¹⁰ Huan Balaam quinanquili:

—Balac, icone Zipor, cati tanahuatía ipan tali Moab quintitantoc para ma technotzaquij. ¹¹ Quiijtohuaj hualajtoque tahuel miyac masehualme ten tali Egipto huan quiquetzaj iniyoyoncalhua campa hueli hasta quitamitzacuaj nochi tali, huan ama mochantalijtoque iixmelac. Quinequi ma niya nimantzi huan ma niquintelchihua nopa masehualme para huelis quintanis huan quinquixtis.

¹² Huajca Toteco quiilhui Balaam:

—Amo xiya inihuaya, yon amo xiquintelchihua nopa masehualme, pampa na niquintiochijtoc.

¹³ Huajca ica ijnaloc Balaam mijquejqui huan quinilhui nopa tacame cati Balac quintitantoya:

—Xitacuepilica ipan amotal, pampa TOTECO amo nechcahuilía ma niya amohuaya.

¹⁴ Huajca nopa tayacanani ten tali Moab tacuepilijque campa itztoya inintanahuatijca Balac, huan quiilhuijque:

—Balaam amo quinejqui hualas tohuaya.

¹⁵ Pero Balac sempa quintitanqui achi más tacame cati achi más quipiyayayaj tatepanitacayot que nopa cati achtohui yajque. ¹⁶ Huan yajque quiitatoj Balaam huan quiilhuijque:

“Balac, icone Zipor, techtitantoc. Chicahuac mitztajtánia xijchihuili se favor huan xiya xijpalehuiti. Amo xijchiya. ¹⁷ Quiijtohua mitzmacas huejhueyi tatepanitacayot huan nochi cati tahuel patiyoy cati tijtajtanis. San xijchihua se favor huan xiya, huan xiquintelchihuati nopa masehualme.”

¹⁸ Pero Balaam quinnanquili:

—Masque Balac techmacasquía ichaj temitoc ica oro huan plata, na amo hueli nijchihuas se tamanti, yon cati hueyi, yon cati pisiltzi, cati TOTECO amo nechcahuilis ma nijchihua. ¹⁹ Pero ximochiyaca. Ximocahuaca nica ni tayohua huan niquitas sinta TOTECO techilhuis seyoc tamanti.

²⁰ Huan ica tayohua Toteco Dios monexti campa itztoya Balaam huan quiilhui:

—Pampa nopa tacame hualajtoque para mitzcuiquij, ximijquehua huan xiya inihuaya. Pero san tijchihuas cati na nimitzilhuis.

Balaam mopanti ihuaya iilhuicac ejca TOTECO

²¹ Huajca tonili Balaam mijquejqui cualca, huan quipejpechti iburro huan yajqui inihuaya nopa moabitame.

²² Pero Toteco Dios cualanqui ihuaya Balaam pampa yahuiyaya inihuaya. Huajca quema Balaam nejnentiayahuiyaya burrojtipa huan ihuaya

yahuiyayaj ome itequipanojcahua, hualajqui iilhuicac ejca TOTECO, huan motajcoquetzqui ipan iojhui para amo panos. ²³ Huan quema nopa burro quiitac iilhuicac ejca TOTECO ica se macheta imaco, moicancuetqui huan calajqui ipan se mili. Huan Balaam quihuitejqui iburro hasta sempa pejqui nejnemi ipan iojhui. ²⁴ Huan teipa iilhuicac ejca TOTECO motajcoquetzqui ipan ojti campa tatzocopilca ipan nopa xocomeca mili huan noch oncac quiipiyaya tepamit. ²⁵ Huan quema nopa burro quiitac iilhuicac ejca TOTECO, momajmati huan mopepecho ipan se tepamit, huan quimetzcuaapitzac Balaam Huajca Balaam sempa quihuitejqui nopa burro. ²⁶ Huan teipa iilhuicac ejca TOTECO sempa quisqui huan quiyacanqui Balaam, huan moquetzqui campa nelía tatzocopilca huan amo cana hueliyaya panos nopa burro. ²⁷ Huan quema nopa burro quiitac iilhuicac ejca TOTECO, motejqui talchi. Huajca Balaam tael cualanqui, huan chicahuac quihuitejqui ica icuatopil. ²⁸ Huan ipan nopa talojtzi TOTECO quichijqui para nopa burro ma camanali, huan ma quiilhui Balaam:

—¿Taya nimitzchihuilijtoc para eyi huelta techhuitectoc?

²⁹ Huan Balaam quinanquili:

—Techpinahualtijtoc. Sinta nijpiyasquía se macheta nomaco, amantzi nimitzmictisquía.

³⁰ Huajca nopa burro quiilhui:

—¡Ximoilhui! Nimoburro cati nochipa ipan titejco, ¿huelis quej ni nimitzchihuilijtoc nochipa?

Huan Balaam quijito:

—¡Amo, amo quema!

³¹ Huajca TOTECO quichijqui para Balaam ma quiita iilhuicac ejca cati mosehuijtaya tajco ojti ica se macheta imaco. Huan Balaam motancuaquetzqui hasta moixtaltenamijqui. ³² Pero iilhuicac ejca TOTECO quiilhui:

—¿Para ten tijhuitejqui eyi huelta moburro? Na nihualajtoc para nimitzoztzuacas, pampa campa tiya amo techpactía. ³³ Ni burro techitac huan yeca mochicoquixti eyi huelta. Sinta amo moquetztozquía moburro, melahuac na nimitzmictijtosquía, huan ya nijcajtosquía moburro ma itzto.

³⁴ Huan nopa tachixquet Balaam quiilhui iilhuicac ejca TOTECO:

—Nitajtacolchijtoc. Amo nijmatiyaya sinta ta techojtzacuayaya. Sinta amo mitzpacría para ma niya, nitacuepilis.

³⁵ Pero iilhuicac ejca TOTECO quinanquili:

—Hueli tiyas inihuaya nopa tacame, pero san tiquijtos cati na nimitzilhuis.

Balac quiseli Balaam

Huajca Balaam yajqui inihuaya nopa tayacanani cati Balac quintitantoya.

³⁶ Huan quema Tanahuatijquet Balac quimatqui para hualayaya Balaam, yajqui quiselito ipan se altepet cati eltoya nechca nopa hueyat Arnón campa tali Moab monepantía ica seyoc tali. ³⁷ Huan Tanahuatijquet Balac quiilhui:

—Na nitatitanqui para ma mitzilhuitij xihuala nimantzi. ¿Para fen amo tijnequiyaya tihualas hasta ama? ¿Timoilhuiyaya para amo nihuelis nimitzmacas cati nimitzilhui?

³⁸ Huan Balaam quinanquili:

—Ama nimitzitaco. Pero amo hueli niqijtos san ten hueli camanali. San niqijtos nopa camanali cati Toteco techilhuis.

³⁹ Huan Balaam yajqui ihuaya Tanahuatijquet Balac hasta Quiriat Huzot.

⁴⁰ Huan nopona Tanahuatijquet Balac tanahuati ma quinmictica huacaxme huan borreojme huan ma quintencahuilca Balaam ihuaya nopa taya-canani cati itztoyaj ihuaya.

⁴¹ Huan tonili ica ijnaloc, Tanahuatijquet Balac quihuicac Balaam hasta itzonco tepet Ramot Baal para ma quintachili nochi nopa israelitame cati quiquetzttoyaj iniyoyoncalhua campa hueli tatzinta ipan tamayamit.

23

Balaam camanalti camanali ten Toteco

¹ Huajca Balaam quiilhui Tanahuatijquet Balac:

—Techchihui nica chicome taixpame, huan techcualtalili chicome becerros huan chicome borregoyme.

² Huan Tanahuatijquet Balac quichijqui senquisa quej Balaam quinahuatijtoya. Huan ipan sesen taixpamit quitencahuilijque se becerro huan se borrego.

³ Huan teipa nopa tachixquet Balaam quiilhui Balac:

—Ximocahua nica ica motacajcahualis tatatili huan na niyas nepa para niquitas sinta TOTECO technamiquiqui. Teipa nimitzilhuis cati ya techilhuis para ma nimitzilhui.

Balaam quintiochijqui nopa israelitame

Huajca Balaam yajqui ipan se piltepetzi cati amo teno quipiya, ⁴ huan Toteco hualajqui quinamiquico huan quiilhui:

—Na nijcualtalijtoc chicome taixpamit huan ipan sesen taixpamit nimitz-tencahuilijtoc se becerro huan se borrego.

⁵ Huajca TOTECO quimacac Balaam nopa camanali cati quinequiyaya ma quiijto, huan quiilhui:

—Xitacuepili campa itztoc Tanahuatijquet Balac huan xiquijto nochi senquisa quej nimitzilhuijtoc.

⁶ Huan Balaam mocuetqui huan quipantico Tanahuatijquet Balac ijcatoc nechca nopa tacajcahualisti cati quitatijtoya. Huan ihuaya itzttoyaj nochi nopa tayacanani ten nopa tali Moab. ⁷ Huajca Balaam quiijto ni camanali:

“Techchijtoc ma nihuala nica nopa hueyi Tanahuatijquet Balac ipan ni tali Moab.

Huan nihualajtoc ten nopa tepeme ipan tali Aram ica campa quisa tonati. ‘Xihuala’, yaya techilhui, ‘xiquintelchihuaqui ni israelitame.

Xijcahua mocualancayo ma tejco ica injuanti para ma ininpanti cati fiero.’

⁸ Pero amo hueli niquintelchihuas sinta Toteco amo quintelchijtoc.

Amo hueli niquincualancaitas cati TOTECO amo quincualancaita.

⁹ Niquinita ten nica itzonco ni hueyi tepet.

Nojquiya niquintachilia piltepetziti.

Niquinita para moiycatalijtoque ten sequinoc.

Injuanti seyoc tamanti masehualme.

Amo quej sequinoc taltipac ehuan.

¹⁰ Tahuel miyaqui injuanti hasta itztoque quej taltepocti.

Amo aqui hueli quinpohua.

Yon se amo hueli quimatis quesqui itztoque.

Nipaguisquia sinta nimitzualicac xitahuac iixpa TOTECO quej injuanti.

Ma nimitzualicac ica nopa tatióchihualisti cati se israelita quipiya.”

¹¹ Huajca nopa Tanahuatijquet Balac quiilhui Balaam:

—¿Taya tijchijtoc? Na nimitzualicac para xiquintelchihua nocualancaitacahua, huan ta tiquintiochijtoc.

Sempa Balaam camanalti camanali ten TOTECO

¹² Huan Balaam quinancuili:

—Monequi san niquijtos cati TOTECO techilhuis.

13 Huajca Tanahuatijquet Balac quiilhui Balaam:

—Xihuala nohuaya huan ma tiyaca sejcayoc. Huan ten nopona hueli tiquitas san se achi ten nochi nopa miyaqui israelitame. Ten nopona huелиs tiquintelchihuas san se achi ten injuanti.

14 Huajca Tanahuatijquet Balac quihuicac Balaam ipan se mili campa itoca Zofim itzonco nopa tepet Pisga, huan nopona quichijqui chicome taixpamit huan quitencajqui se becerro huan se borrego ipan sesen taixpamit.

15 Huajca nopona Balaam quiilhui Tanahuatijquet Balac:

—Ximocahua nica nechca motacajcahualis tatatili huan na niquitati Toteco Dios nopona.

16 Huan TOTECO quinamiquico Balaam huan quimacac nopa camanali cati quinequiyaya ma quiijto. Huan nojquiya quiilhui:

—Xitacuepili campa itztoc Tanahuatijquet Balac huan xiquilhui cati na nimitzilhuijtoc.

17 Huan Balaam tacuepili huan quiitac Balac ijcatoc nechca nopa tacajcahualisti tatatili, huan ihuaya itztoyaj nopa tayacanani ten tali Moab. Huan Tanahuatijquet Balac quitatzintoquili:

—¿Taya mitzilhuijtoc DIOS?

18 Huajca Balaam sempa pejqui camanalti huan quiijto ni camanali:

“¡Tanahuatijquet Balac, ta cati tiicone Zipor, cuali techtacaquili!

19 Toteco amo itztoc quej titacame.

Yaya amo istacati.

Yon amo moyolpata quej se tacat.

Cati yaya quiijtohua para oncas, ya nopa oncas.

Cati yaya quitencahua, ya nopa quichihua.

20 Technahuatijtoc ma niquintiochihua ni masehualme.

Huan pampa yaya ya quintiochijtoc,

amo hueli na niquijtos para amo.

21 TOTECO amo quipantía tajtacoli ipan ni israelitame.

Injuanti cati iteipan ixhuihua Jacob.

Amo hualas tequipacholi ipan injuanti pampa TOTECO cati inintata qui-hueyichijqui itztoc inihuaya.

Yeca injuanti tzajtzi ica paquilisti,

pampa tahuel hueyi inintanahuatijca cati inihuaya yahui.

22 Quej se hueyi toro quipiya icuacua,

ni masehualme quipiyaj TOTECO quej ininchicahualis, yaya cati quinquixti ipan tali Egipto.

23 Amo aqui hueli quintelchihuas ni iteipan ixhuihua Jacob.

Ni israelitame amo teno huелиs quinchihuilis se tenahualhuijquet.

Nochi quiijtohuaj:

‘Toteco Dios quinchihuilijtoc huejhueyi tamanti.’

24 Ni masehualme motananaj huan temajmatía,

quej se tecuani cati amo mosiyajquetza,

hasta quicuas cati moitzquillijtoc,

huan quiis ieso cati momictilijtoc.”

25 Huajca Tanahuatijquet Balac quiilhui Balaam:

—Masque amo hueli tiquintelchihuas, amo xiquintiochihua.

26 Pero Balaam quinanquili:

—¿Amo nimitzilhui para na san niquijtos cati TOTECO techilhui?

27 Huajca Tanahuatijquet Balac quiilhui:

—Techchihuili se favor, xihuala nohuaya huan nimitzhuicas sejcoyoc. Huelis ten nopona Toteco mitzcahuilis xiquintelchihua.

²⁸ Huan Balac quihuicac Balaam hasta itzonco nopa hueyi tepet Peor campa nesityaya nochi nopa huactoc tali cati eltoya tatzinta. ²⁹ Huan nopona Balaam quiilhui Tanahuatijquet Balac:

—Techchihuili nica chicome taixpamit, huan xiquinsenhua chicome becerros huan chicome borregoyme quej tacajcahualisti.

³⁰ Huajca Tanahuatijquet Balac quichijqui nochi senquisa quej quinahuati Balaam Huan ipan sesen nopa taixpamit quitencajqui se becerro huan se borrego.

24

¹ Huajca Balaam ya quitztuya para san tapic se masehuali quintelchihuas israelitame pampa TOTECO quinequiyaya quintiochihuas. Yeca Balaam ayecmo yajqui para quichihuas quej se tenahualhuijquet. Yajqui xitahuac campa huelqui tachiyas imelac ipan nopa huactoc tali huan quinitac nopa israelitame. ² Huan quema Balaam tachixqui huan quinitac nochi nopa israelitame cati quiquietzttoyaj iniyoyoncalhua ica pamit, sese ica ihueyi familia imasehualhua, nimantzi Itonaltzi Toteco Dios motali ipan ya, ³ huan pejqui quijtohua ni camanali:

“Ya ni nopa camanali cati niBalaam, niicone Beor, nijhualica.

Na nise tacat cati cuali hueli niquita cati ininpantis ni israelitame.

⁴ Nijactoc icamanal Toteco cati quipiya nochi chicahualisti, huan niqiztoc para yaya cati quipiya nochi chicahualisti huan cati technextlijtoc.

Huan quema nihuetzqui iixpa, techtapohuili noixteyol huan nochi nijmachili.

Huajca ya ni cati techilhui para ininpantis:

⁵ Nelía paquij iteipan ixhuihua Jacob por nopa tatiocihualisti cati quinchiya.

Tayejectzi elis campa ininchajchaj israelitame huan nopona oncas paquilisti.

⁶ Niquita para momoyajtoc ininchajchaj campa hueli ipan huejhueyi tamayamit campa xoxohuic sacapetat.

Nesi quej se hueyi xochimili cati tahuel yejectzi huan cati nochi temaca pampa eltoc atenti.

Nesi quej se mili ten áloes cati TOTECO quintoctoc.

Itztoque quej miyac tiocuame cati tatocati atenti.

⁷ Miyac at quipiyase israelitame hasta mocahuas.

Quipiyase at para quiatequise inintatochui.

Quipiyase inintanahuatijca cati más hueyi que nochi totanahuatijcahua.

Huan tahuel hueyi elis itanahuatil.

⁸ Toteco Dios cati quinquixti ipan tali Egipto itztoc inihuaya.

Yaya ininchicahualis quej se hueyi toro quipiya huejhueyi icuacua.

TOTECO quintzontamiltis nochi masehualme ipan nochi talme cati quincualancaitaj.

Quena, quinpostequilis iniomiyo, huan quinmictis ica cuataminti.

⁹ Nopa israelitame itztoque quej se tecuani cati motectoc para mosiyajquetzas,

huan amo aqui motemaca para quiixitis. ¡TOTECO quintiochihuas cati amechtiochihua, anisraelitame,

huan quintelchihuas nochi cati amechtelchihua!”

Más icamanal Balaam

¹⁰ Huajca quema Tanahuatijquet Balac quicajqui nopa camanali cati Balaam quiiyto, tahuel cualanqui ica ya, huan momatejtejtzonqui huan quiilhui:

—Na nimitznotzqui para xiquintelchihua nocualancaitacahua, huan ta hasta eyi huelta tiquintiochijtoc. ¹¹ ¡Xiquisa nica! Na nijnequiyaya nimitzmacas miyac tamanti cati tahuel patiyó, pero Toteco amo quinejqui ma nimitzmaca.

¹² Huan Balaam quiilhui Tanahuatijquet Balac:

—Achtóhui niquinilhui nopa tacame cati techtitanili ¹³ para masque Tanahuatijquet Balac techmacasquía ichaj temitoc ica oro huan plata, amo hueli niquixpanos cati techilhuía TOTECO. Amo teno cati cuali, yon cati amo cuali niqijtos san pampa na nijnequi niqijtos. San cati TOTECO techilhuía, ya nopa niqijtos. ¿Amo quej nopa niquinilhui? ¹⁴ Huan ama, quena, nitacuepilis notal, pero achtóhui nimitzilhuis cati ni israelitame quinchihuilise amomasehualhua teipa.

Itamiya icamanal Balaam

¹⁵ Huajca Balaam sempa camanaltic quej se tachixquet huan quiiyto ni camanali:

“Ya ni nocamanal niBalaam, niicone Beor.

Ama cuali niquita cati huala.

¹⁶ Nicamanaltis na cati nijcactoc icamanal TOTECO.

Quena, Toteco cati más hueyi techmachiltijtoc ni cati ya quimati.

Niquitztoc ya cati quipiya nochi chicahualisti,

huan ya ni cati technextilijtoc.

¹⁷ Niquita se cati amo aquí ama.

Yaya cati nijtachilía nozona hasta tahuel huejca,

yaya hualas teipa.

Monextis se sitali cati hualas ten iteipan ixhuihua Jacob.

Yaya elis se hueyi Tanahuatijquet cati motananas ipan ni israelitame.

Quintzonpechis Moab ehuaní.

Quintamiltis iteipan ixhuihua Set.

¹⁸ Israelitame quitanise nopa tali Edom huan Seir.

Quena, moaxcátise inintal inincualancaitacahua.

Quichihuase huejhueyi tamanti cati temajmatise.

¹⁹ Se tanahuatijquet quisas ipan iteipan ixhuihua Jacob, huan quintzontamiltis nochi cati mocahuaj ipan altepeme ipan tali Edom.”

²⁰ Teipa Balaam quitachili ininchajchaj iteipan ixhuihua Amalec, huan sempa camanaltic quej se tachixquet huan quiiyto ni camanali:

“Imasehualhua Amalec hualahuj ten huejcajquiya, pero se tonali amo teno mocahuas, tamisosolihuis.”

²¹ Huan Balaam nojquiya quintachili campa ininchajchaj nopa queni-tame, huan sempa camanaltic quej se tachixquet huan quiiyto ni camanali: “Amojuanti anceneos, cuajcuali campa anmomanahuíaj.

Anitztoque temachti quej se totot ica itepasol huejcapa campa huejhueyi tet.

²² Pero amechsosolose nopa soldados ten tali Asiria, huan amechhuicase anilpitoque.”

²³ Teipa Balaam quitamilti icamanal huan quiiyto:

“¡Ay! ¿Ajquiya noja huelis itztos quema Toteco Dios quichihuas ni tamanti?

²⁴ Huejhueyi cuaacalme quiixcotonase hueyi at huan hualase ica tacame ten tali Chipre,

huan quema injuanti tacuepilise, quicajtehuase tali Asiria huan Heber tami sosolijtoc.”

²⁵ Huan quema Balaam tantoya quijitohua ni camanali, quisqui huan tacuepili ichaj. Huan Tanahuatijquet Balac nojquiya quistejqui.

25

Israelitame quihueyichijque Baal Peor

¹ Huan quema nopa israelitame noja mocahuayayaj ipan Sitim, sequij israelita tacame pejqque ten hueli quichihuaaj ica moabita sihuame, ² pampa nopa moabita sihuame quinnotzayayaj ma yaca campa tacuayayaj huan quintacajcahuiliyayaj inintaixcopincayohua. Huan nopa israelitame pejqque tacuaj ipan nopa tacualisti huan pejqque quihueyichihuaaj inintaixcopincayohua. ³ Huajca quej nopa mosejcotilijque ica nopa teteyot Baal Peor. Huan TOTECO tahuel cualanqui ica injuanti. ⁴ Huajca TOTECO quiilhui Moisés:

—Xiquinsentili nochi cati tayacanaj ipan ni tamanti huan xiquinmicti miyacapa. Huan teipa xiquincuapilo ipan cuahuit cati huejcapantic para nochi quinitase. Quej nopa sehuis nocualancayo ica ni israelitame.

⁵ Huajca Moisés quinnahuati nopa jueces ten nopa israelitame, huan quinilhui:

—Nochi amojuanti xiquinmictitij nochi amoteixmatcahua cati mosejcotilijtoque ica nopa taixcopincayot Baal Peor.

⁶ Huan quema Moisés noja camanaltiyaya, se israelita tacat panoc iixpa cati quihualicayaya se sihuat madianita hasta ipan ichaj. Huan nojquiya panoque iniixpa nochi nopa israelitame cati mosentilijtoyaj huan chocayayaj iixpa TOTECO nozona nechca icalte nopa yoyon tiopamit campa TOTECO mopantiyaya inihuaya. ⁷ Huan quema quiitac nopa tamanti Finees, icone Eleazar huan iixhui totajtzi Aarón, moquetzqui huan quistihuetzqui ten nopa tasentili. Huan quicuic se tepos choso, ⁸ huan quitoquilijtoyajqui nopa israelita tacat ipan ichaj ten yoyomit campa quihuicatoya nopa sihuat huan quisentapalpanoc itacayo nopa israelita tacat huan nopa sihuat ica icuachoso. Huan quej nopa tanqui nopa cocolisti cati TOTECO quititantoya para quinmictis israelitame por inintajtacol ica nopa teteyot Baal Peor, ⁹ pero ya mictoyaj 24 mil israelitame.

¹⁰ Huan teipa TOTECO quiilhui Moisés:

¹¹ —Finees, icone Eleazar huan iixhui nopa mijcatzi totajtzi Aarón, quichijqui para ma sehui nocualancayo ica ni israelitame, pampa ya quitasomatqui notatepanitacayo iniixpa israelitame quej na nijtasomati. Huan tahuel cualanqui ica injuanti pampa quicualancaitac cati fiero quichihuaayaj injuanti huan yeca amo quincahuili itztose. Huajca por ya, amo niquintzontamiltis nochi israelitame quej nijchihuasnequiyaya. ¹² Huajca xiquilhui Finees para ama na nijchihuas se camanali ihuaya para nochipa tijpiyase tayoltalili. ¹³ Huan nitayolmelahua para yaya ihuaya nochi itelpocahua elise totajtzitzi para nochipa, pampa ica icualancayo huan ica cati quichijqui, quitasomatqui notatepanitacayo, niiTeco. Huan ica ya nopa techixtzacuili inintajtacolhua ni israelitame.

¹⁴ Huan itoca nopa tacat israelita cati quichosojhuique ihuaya nopa sihuat madianita eliyaya Zimri, icone Salu. Huan eliyaya se tayacanquet ten se familia ipan nopa hueyi familia Simeón. ¹⁵ Huan nopa sihuat madianita itoca eliyaya Cozbi huan elqui iichpoca Zur, se tayacanquet ipan se hueyi familia ipan tali Madián.

¹⁶ Teipa TOTECO quihhui Moisés:

¹⁷—Ama monequi xiquinitaca nopa madianitame quej amocualancaitacahua huan xiquinmictica. ¹⁸ Pampa injuanti amechitaque quej inincualancaitacahua quema ica miyac tamanti amechajcayajque para xijhueyichihuaca inintaixcopincayo Baal Peor. Nesiyaya quej amechajcayahuasnequiyayaj quema hualajqui iniicni Cozbi, iichpoca nopa tayacanquet ten Madián. Quimictijque Cozbi ica se cuachoso cati huehueyac ipan nopa tonali quema nijtitanqui nopa cocolisti ma temicti pampa anquihueyichijtoyaj Baal Peor.

26

Se yancuic censo quema panotoc 40 xihuit

¹ Quema ya panotoya nopa hueyi miquisti, TOTECO quincamanalhui Moisés huan Eleazar cati elqui icone nopa nopa mijcatzi totajtzi Aarón huan quinilhui:

² “Xijtananaca se censo ten nochi israelita tacame cati quiaxitijtoque 20 xihuit huan hueli yahuij ipan tatehuilisti. Xiquijcuiloca itoca sese itata huan cati ihueyi familia para tijmatis quesqui itztoque.”

³ Ipan nopa tonali nopa israelitame itztoyaj ipan nopa hueyi tamayamit ipan tali Moab nechca nopa hueyat Jordán imelac altepet Jericó. Huan Moisés huan Eleazar, nopa hueyi totajtzi, quinnotzqui nopa tayacanani ten israelitame huan quej TOTECO quinilhuijtoya, quinilhui para ⁴ ma moiycuiloca nochi tacame cati quiaxitijtoque 20 xihuit para huejcapa cati huelij yahuij ipan tatehuilisti quej TOTECO tanahuatijtoc.

Huajca quinpojque quesqui tacame itztoyaj ipan sesen hueyi familia ipan nopa hueyi tasentili ten nopa masehualme cati achtohui pejque ipan tali Egipto huan ya ni cati quipantijque.

Tatehuijca tacame ipan hueyi familia Rubén

⁵ Rubén, iachtohui cone Israel, huejcajquiya quinpixqui nahui itelpocahua: Enoc, Falú, Hezrón huan Carmi. Huan ininteipan ixhuihua sesen ten ni tacame mochijque familias cati huejhueyi.

Iteipan ixhuihua Enoc mochijque nopa enoquitame.

Iteipan ixhuihua Falú mochijque nopa faluitame.

⁶ Iteipan ixhuihua Hezrón mochijque nopa hezronitame.

Iteipan ixhuihua Carmi mochijque nopa carmitame.

⁷ Huan ipan nopa tonali quema quinpojque cati itztoyaj ipan nochi nopa familias ten iteipan ixhuihua Rubén, quinpojque 43 mil 730 tatehuijca tacame.

⁸ Huan Falú quipixqui itelpoca cati itoca Eliab. ⁹ Huan itelpocahua Eliab elque Nemuel, Datán huan Abiram huan Datán huan Abiram elque nopa tacame cati mosejcotilijque huejcajquiya ihuaya Coré huan quichijque cati fiero iixpa TOTECO, huan ica Moisés huan Aarón. ¹⁰ Huan motapo tali huan quintolo ni ome tacame ihuaya Coré. Nojquiya ipan nopa tonali TOTECO quinmicti ica tit 250 masehualme cati intoquiliyayaj. Nochi ya ni elqui se hueyi ejemplo para nochi nopa israelitame cati mocajque. ¹¹ Pero ipan nopa tonali itelpocahua Coré amo itztoyaj ihuaya inintata huan amo mijque.

Tatehuijca tacame ipan hueyi familia Simeón

¹² Simeón, iompa telpoca Israel, huejcajquiya quinpixqui macuiliti itelpocahua: Nemuel, Jamín, Jaquín, Zera huan Saúl. Huan ininteipan ixhuihua sesen ten ni tacame mochijque huejhueyi familias.

Iteipan ixhuihua Nemuel mochijque nopa nemuelitame.

Iteipan ixhuihua Jamín mochijque nopa jaminitame.

Iteipan ixhuihua Jaquín mochijque nopa jaquinitame.

¹³ Iteipan ixhuihua Zera mochijque nopa zeraítame.

Iteipan ixhuihua Saúl mochijque nopa saulítame.

¹⁴ Huan ipan nopa tonali quema quinpojque cati itztoyaj ipan nochi familias ten iteipan ixhuihua Simeón, quinpojque 22 mil 200 tatehuijca tacame.

Tatehuijca tacame ipan hueyi familia Gad

¹⁵ Gad, itelpoca Israel, huejcajquiya quinpixqui chicome itelpocahua: Zefón, Hagui, Suni, Ozni, Eri, Arod huan Areli. Huan ininteipan ixhuihua sesen ten ni tacame mochijque familias huejhueyi.

Iteipan ixhuihua Zefón mochijque nopa zefonítame.

Iteipan ixhuihua Hagui mochijque nopa haguítame.

Iteipan ixhuihua Suni mochijque nopa sunítame.

¹⁶ Iteipan ixhuihua Ozni mochijque nopa oznítame.

Iteipan ixhuihua Eri mochijque nopa erítame.

Iteipan ixhuihua Arod mochijque nopa arodítame.

¹⁷ Iteipan ixhuihua Areli mochijque nopa arelítame.

¹⁸ Huan ipan nopa tonali quema quinpojque cati itztoyaj ipan nopa familias ten iteipan ixhuihua Gad, quinpojque 40 mil 500 tatehuijca tacame.

Tatehuijca tacame ipan hueyi familia Judá

¹⁹ Judá, itelpoca Israel, huejcajquiya quinpixqui ome itelpocahua cati inintoca Er huan Onán. Inijuantí mijque nimantzi ipan nopa tali Canaán.

²⁰ Pero teipa Judá nojquiya quinpixqui sequinoc eyi itelpocahua: Sela, Fares huan Zera. Huan ininteipan ixhuihua sesen ten ni tacame mochijque huejhueyi familias.

Iteipan ixhuihua Sela mochijque nopa selaítame.

²¹ Iteipan ixhuihua Fares mochijque nopa faresítame.

Iteipan ixhuihua Zera mochijque nopa zeraítame.

Huan Judá itelpoca cati itoca Fares quinpixqui ome itelpocahua, Hezrón huan Hamul cati mochijque nopa hezronítame huan nopa hamulítame.

²² Huan ipan nopa tonali quema quinpojque cati itztoyaj ipan nopa familias ten iteipan ixhuihua Judá, quinpojque 76 mil 500 tatehuijca tacame.

Tatehuijca tacame ipan hueyi familia Isacar

²³ Isacar, itelpoca Israel, huejcajquiya quinpixqui nahui itelpocahua: Tola, Fúa, Jasub huan Simrón. Huan ininteipan ixhuihua mochijque familias huejhueyi.

Iteipan ixhuihua Tola mochijque nopa tolaitame.

Iteipan ixhuihua Fúa mochijque nopa fuanítame.

²⁴ Iteipan ixhuihua Jasub mochijque nopa jasubítame.

Iteipan ixhuihua Simrón mochijque nopa simronítame.

²⁵ Huan ipan nopa tonali quema quinpojque cati itztoyaj ipan nopa familias ten iteipan ixhuihua Isacar, quinpojque 64 mil 300 tatehuijca tacame.

Tatehuijca tacame ipan hueyi familia Zabulón

²⁶ Zabulón, itelpoca Israel, huejcajquiya quinpixqui eyi itelpocahua: Sered, Elón huan Jahleel. Huan ininteipan ixhuihua sesen ten ni tacame mochijque huejhueyi familias.

Iteipan ixhuihua Sered mochijque nopa sereditame.

Iteipan ixhuihua Elón mochijque nopa elonitame.

Iteipan ixhuihua Jahleel mochijque nopa jehleelitame.

²⁷ Huan ipan nopa tonali quema quinpojque cati itztoyaj ipan nopa familias ten iteipan ixhuihua Zabulón, quinpojque 60 mil 500 tatehuijca tacame.

Tatehuijca tacame ipan hueyi familia Manasés

²⁸ José, itelpoca Israel, huejcajquiya quinpixqui ome itelpocahua: Manasés huan Efraín. ²⁹ Ten Manasés quisqui ome familias huejhueyi.

Se quisqui ten itelpoca cati itoca Maquir. Huan iteipan ixhuihua mochijque nopa maquiritame.

Huan nopa se hueyi familia quisqui ten itelpoca cati itoca Galaad cati elqui itelpoca Maquir. Huan iteipan ixhuihua Galaad mochijque nopa galaaditame.

³⁰ Huan itelpoca Galaad cati itoca Jezer, iteipan ixhuihua mochijque nopa jezeritame.

Huan itelpoca Galaad cati itoca Helec, iteipan ixhuihua mochijque nopa helequitame.

³¹ Huan itelpoca Galaad cati itoca Asriel, iteipan ixhuihua mochijque nopa asrielitame.

Huan itelpoca Galaad cati itoca Siquem, iteipan ixhuihua mochijque nopa siquemitame.

³² Huan itelpoca Galaad cati itoca Semida, iteipan ixhuihua mochijque nopa semidaitame.

Huan itelpoca Galaad cati itoca Hefer, iteipan ixhuihua mochijque nopa heferitame.

³³ Hefer quipixqui itelpoca cati itoca Zelofehad, pero yaya amo quipixqui yon se itaca cone. Zelofehad san quinpixqui iichpocahua cati inintoca: Maala, Noa, Hogla, Milca huan Tirsa.

³⁴ Huan ipan nopa tonali quema quinpojque cati itztoyaj ipan nopa familias ten iteipan ixhuihua Manasés, quinpojque 52 mil 700 tatehuijca tacame.

Tatehuijca tacame ipan hueyi familia Efraín

³⁵ Efraín, cati itelpoca José, quinpixqui eyi itelpocahua: Sutela, Bequer huan Tahán. Huan ininteipan ixhuihua sesen ten ni tacame mochijque familias huejhueyi.

Iteipan ixhuihua Sutela mochijque nopa sutelaítame.

Iteipan ixhuihua Bequer mochijque nopa bequeritame.

Iteipan ixhuihua Tahán mochijque nopa tahanitame.

³⁶ Huan Sutela, itelpoca Efraín, quinpixqui itelpoca cati itoca Erán huan iteipan ixhuihua mochijque nopa eranitame.

³⁷ Huan ipan nopa tonali quema quinpojque cati itztoyaj ipan nopa familias ten iteipan ixhuihua Efraín, quinpojque 32 mil 500 tatehuijca tacame.

Huajca ya nimitzilhuijtoc ten iteipan ixhuihua José huan catijqui huejhueyi familias quisque ipan ya.

Tatehuijca tacame ipan hueyi familia Benjamín

³⁸ Benjamín, itelpoca Israel, huejcajquiya quinpixqui macuilti itelpocahua: Bela, Asbel, Ahiram, Sufam huan Hufam Huan ininteipan ixhuihua sesen ten ni tacame mochijque huejhueyi familias.

Iteipan ixhuihua Bela mochijque nopa belaitame.

Iteipan ixhuihua Asbel mochijque nopa asbelitame.

Iteipan ixhuihua Ahiram mochijque nopa ahiramitamame.

³⁹ Iteipan ixhuihua Sufam mochijque nopa sufamitamame.

Iteipan ixhuihua Hufam mochijque nopa hufamitamame.

⁴⁰ Huan Bela, itelpoca Benjamín, quinpixqui itelpocahua Ard huan Naamán. Huan ininteipan ixhuihua mochijque nopa arditame huan nopa naamitamame.

⁴¹ Huan ipan nopa tonali quema quinpojque cati itztoyaj ipan nopa familias ten iteipan ixhuihua Benjamín, quinpojque 45 mil 600 tatehuijca tacame.

Tatehuijca tacame ipan hueyi familia Dan

⁴² Dan, itelpoca Israel, huejcajquiya quipixqui setzi itelpoca cati itoca eliyaya Súham.

Iteipan ixhuihua Súham mochijque nopa suhamitamame.

⁴³ Huan ipan nopa tonali quema quinpojque cati itztoyaj ipan nopa familias ten iteipan ixhuihua Dan, quinpojque 64 mil 400 tatehuijca tacame.

Tatehuijca tacame ipan hueyi familia Aser

⁴⁴ Aser, itelpoca Israel, huejcajquiya quinpixqui eyi itelpocahua: Imna, Isúi huan Bería. Huan ininteipan ixhuihua ten sesen ni tacame mochijque huejhueyi familias.

Iteipan ixhuihua Imna mochijque nopa imnitame.

Iteipan ixhuihua Isúi mochijque nopa isuítamame.

Iteipan ixhuihua Bería mochijque nopa beriaitamame.

⁴⁵ Huan Bería, itelpoca Aser, quinpixqui itelpocahua cati inintoca Heber huan Malquiel. Huan iniixhuihua mochijque nopa heberitamame huan malquielitamame.

⁴⁶ (Nojquiya Aser quipixqui se ichpocat cati itoca Sera.)

⁴⁷ Huan ipan nopa tonali quema quinpojque cati itztoyaj ipan nopa familias ten iteipan ixhuihua Aser quinpojque 53 mil 400 tatehuijca tacame.

Tatehuijca tacame ipan hueyi familia Neftalí

⁴⁸ Neftalí, itelpoca Israel, huejcajquiya quinpixqui nahui itelpocahua: Jahzeel, Guni, Jezer huan Silem Huan iniixhuihua ten sesen ni tacame mochijque huejhueyi familias.

Iteipan ixhuihua Jahzeel mochijque nopa jahzeelitame.

Iteipan ixhuihua Guni mochijque nopa gunitamame.

⁴⁹ Iteipan ixhuihua Jezer mochijque nopa jezeritamame.

Iteipan ixhuihua Silem mochijque nopa silemitamame.

⁵⁰ Huan ipan nopa tonali quema quinpojque cati itztoyaj ipan nopa familias ten iteipan ixhuihua Neftalí, quinpojque 45 mil 400 tatehuijca tacame.

⁵¹ Huajca quema tanque moijcuilohuaj nochi nopa israelita tacame cati huelque yahuij ipan tatehuilisti, quinpojque 601 mil 730 tacame.

⁵² Huajca TOTECO quiilhui Moisés:

⁵³ “Quema anmoaxcatise nopa cuali tali cati nimechmacas, xiquinmaj-maca tali sesen nopa huejhueyi familias quej inimiyaca tacame cati moijcuiloltoque ama ipan ni censo. ⁵⁴ Nopa huejhueyi familias cati achi más miyac tacame quinpiyaj, tiquinmacas achi más hueyi tali. Huan nopa huejhueyi familias cati amo miyac tacame quinpiyaj, tiquinmacas pilquentzi tali. ⁵⁵ Pero para tijmatis canque quiselis sesen hueyi familia monequi timahuiltis ica piltetzitzi. Quej nopa tijmatis canque sesen hueyi familia moaxcatis ital. ⁵⁶ Huan nopa tali cati elis iniaxca moxelhuilise quej quinnextis

nopa suerte iixpa TOTECO para elis iniaxca. Huan nopa hueyi familia cati achi hueyi quiselis achi más, huan cati pisiltzi, amo más miyac tali quiselis.”

Nopa tacame ipan nopa hueyi familia Leví

⁵⁷ Leví, itelpoca Israel, huejcajquiya quinpixqui eyi itelpocahua: Gersón, Coat huan Merari. Huan initeipan ixhuihua ten sesen ni tacame mochijque familias cati huejhueyi.

Iteipan ixhuihua Gersón mochijque nopa gersonitame.

Iteipan ixhuihua Coat mochijque nopa coatitame.

Iteipan ixhuihua Merari mochijque nopa meraítame.

⁵⁸ Huan nojquiya iteipan ixhuihua Leví mochijque:

- nopa familia ten libnitame,
- nopa familia ten hebrontame,
- nopa familia ten mahlitame,
- nopa familia ten musitame,
- nopa familia ten coreitame.

Huan Coat, itelpoca Leví, quipixqui se iteipan telpoca cati itoca Amram

⁵⁹ Huan Amram mosihuahti ica Jocabed cati nojquiya tacatqui ipan nopa hueyi familia ten iteipan ixhuihua Leví quema inijuanti itztoyaj ipan tali Egipto. Huan Amram huan Jocabed quinpixque ininconeua cati inintoca Aarón, Moisés huan María. ⁶⁰ Huan teipa Aarón quinpixqui iconehua cati inintoca Nadab, Abiú, Eleazar huan Itamar. ⁶¹ Pero Nadab ihuaya Abiú mijque iixpa TOTECO quema quitatijque nopa copali ica tit cati amo elqui tatzejtzeloltic.

⁶² Huan quinpójque nochi oquichpilme huan tacame ipan nopa hueyi familia Leví cati quiaxitiytoyaj se metzti para huejcapa. Huan nochi nopa taca levitame mochijque 23 mil. Pero amo quinpójque nopa levitame ica nopa sequinoc huejhueyi familias ten israelitame pampa nopa levitame amo quiselise yon se inintal.

⁶³ Ya ni elqui nochi nopa israelitame cati Moisés ihuaya nopa totajtzi Eleazar quinpójque ipan nopa tamayamit ipan tali Moab nechca hueyat Jordán, imelac nopa altepet Jericó quema itztoyaj para calaquise ipan nopa tali. ⁶⁴ Huan ipan ni censo amo quipójque yon se tacat cati quipojtaya Moisés huan Aarón huejcajquiya ipan nopa achtohui censo cati quitananque ipan nopa huactoc tali Sinaí, pampa nochi nopa tacame ipan nopa achtohui censo ya mictoyaj. ⁶⁵ TOTECO quijtojtaya para nochi nopa tacame miquisquíaj ipan nopa huactoc tali huan quej nopa panoc. Yon se amo mocajqui yoltoc, san Caleb, icone Jefone, huan Josué, icone Nun.

27

Cati quiselise tesihuaconeua

¹ Ipan nopa hueyi familia Manasés itztoyaj macuilti sihua icnime cati inintoca Maala, Noa, Hogla, Milca huan Tirsá. Inijuanti iichpocahua Zelofehad, icone Hefer, cati eliyaya icone Galaad, cati eliyaya icone Maquir, cati eliyaya icone Manasés, cati eliyaya icone José. ² Huan nopa macuilti sihua icnime yajque campa icalte nopa yoyon tiopamit campa mopantiyaj ihuaya TOTECO. Nopona quicamanalhuitoj Moisés ihuaya nopa totajtzi Eleazar, huan nopa tayacanani huan nopa sequinoc israelitame cati nopona itztoyaj. Huan quinilhuijque: ³ “Totata mijqui nepa ipan huactoc tali, pero amo moiycatalijtoya ihuaya Coré cati quichijqui cati fiero iixpa TOTECO. Yaya

san mijqui por ya itajtacol quej nochi tacame miqij huan amo quicajqui yon se itelpoca. ⁴ ¿Amo hueli techmacas tiiichpocahua se tali quej cati quiselise inintelpocahua toteteyohua para amo polihuis itoca totata ipan ifamilia san pampa amo quipixqui se itelpoca?”

⁵ Huajca Moisés quiihui TOTECO ten ininpantiyaya ni sihuame huan cati quinequiyayaj. ⁶ Huan TOTECO quinanquili: ⁷ “Iichpocahua Zelofehad quipiyaj razón. Xiquinmaca para iniaxca cati quiselisque inintata ipan nopa tali nechca campa quiselise inintiojhua. ⁸ Nojquiya xiquinilhui nochi nopa israelitame, sinta se acajya miqis huan amo quicajtehuas yon se itelpoca, nopa tali cati ya quipiya panos inimaco iichpocahua. ⁹ Huan sinta amo quipiya yon se iichpoca, huajca ital quiselise itaca icnihua. ¹⁰ Huan sinta amo quipiya yon se icni, huajca quincahuilijtehuas itaca icnihua itata. ¹¹ Huan sinta itata amo quipixqui se icni, huajca nopa tali quiselise iteixmatcagua cati más nechca. Ya ni elis se tanahuatili para nochipa para nochi israelitame quitoquilise. Ma quichihuaca senquisá quej nimitznahuatijtoc ama.”

Josué quiselis itequi Moisés
(Dt. 31:1-8)

¹² Huan TOTECO quiihui Moisés:

—Xitejco ipan ni tepet Abarim huan xijtachili nopa tali cati niquinmacatoc ni israelitame. ¹³ Huan quema ya tiqitztos, huajca timiqis huan timosej-cotilis ica mohuejcapan tatahua quej panoc ica moicni Aarón. ¹⁴ Timiqis nopona pampa ipan nopa huactoc tali Zin quema nopa israelitame techéjelnamijque, amo antechneltoquiliijque cati nimechilhui, yon amo antech-hueyichijque iniixpa quema techtajtanijque at. (Ya ni panoc campa nopa at Meriba cati mopantía nechca Cades ipan huactoc tali Zin.)

¹⁵ Huajca Moisés quiihui TOTECO Dios:

¹⁶ —¡Ay noTECO! Ta cati tiquinmaca nemilisti nochi masehualme. Xij-tapejpeni se acajya cati quinyacanas ni masehualme. ¹⁷ Monequi se cati quinyacanas ipan tatehuilisti huan quinmocuitahuis para momasehualhua ma amo nemica quej borregojme cati amo quipiyaj inintamocuitahujca.

¹⁸ Huan TOTECO quinanquili Moisés:

—Xijnotza Josué, icone Nun. Yaya se tacat cati quipiya notonaltzi. Huan xijitali momax ipan itzonteco. ¹⁹ Huan ma moquetza iixpa nopa totajtzi Eleazar iniixpa nochi israelitame. Huan nopona iniixpa nochi nopa tacame, xijteqitali. ²⁰ Huan iniixpa xijmaca se achi nopa tequiticayot cati ta tijpiya para injuanti ma quitepanitaca huan ma quineltoquilica. ²¹ Nojquiya teipa para Josué quimatis taya monequi quichihuas, monequi monexis iixpa nopa totajtzi Eleazar. Huan Eleazar techtajtanis por ya ica nopa Urim, nopa dados tatzejtelzoltic cati nimechmacatoc. Huan ica nopa Urim nijnextilis nopaquilis. Huan quej nopa injuanti quimatise taya monequi quichihuase. Huajca ica cati Eleazar quinihuas para nopaquilis, Josué huan nopa tayacanani huan nopa israelitame quimatise taya quichihuase.

²² Huajca Moisés quichijqui senquisá quej TOTECO quiihuijtoya. Qui-huicac Josué huan quiixnexti ica nopa totajtzi Eleazar huan iniixpa nochi nopa israelitame. ²³ Huan Moisés quitali imax ipan itzonteco Josué, huan quitequimacac quej TOTECO quinahuatijtoya.

28

*Tacajcahualisti cati monequi mojmosta**(Éx. 29:38-46)*¹ Huan teipa TOTECO quiilhui Moisés:² “Xiquinilhui nopa israelitame para nopa pantzi huan nopa tacajcahualisti tatatili cati mojmosta techtencahuilíaj níquita quej se quiita itacualis. Huan ajhuiyac mijyotía noixpa na. Ma amo quielcahuaca techtencahuilise nochipa quej nimechilhuijtoc.³ “Mojmosta monequi antechmacase ome piloquich borregoijtzi quej tacajcahualisti tatatili. Techmacaca pilborregoijtzi cati sanoc quiaxitijtoque se xihuit huan cati amo teno quipiyaj. ⁴ Se monequi xijmictica ica ijnaloc huan nopa seyoc ica tiotac. ⁵ Huan inihuaya techmacaca se tacajcahualisti ten harina cati elis ome kilo cati cuali harina tamaneloli ica se litro aceite ten olivo. ⁶ Ya ni san se ica nopa tacajcahualisti tatatili cati nimechnahuati huejcajquiya xipehuaca techmacaca nopona nechca tepet Sinaí. Huan mojmosta monequi antechmacatiyase para elis se tacajcahualisti cati ajhuiyac mijyotis noixpa. ⁷ Huan ihuaya sesen pilborregoijtzi monequi nojquiya antechmacase se litro xocomeca at cati elis se tacajcahualisti tatoyahuali. Huan para antechtencahuilise, monequi anquityahuase noixpa tiopan calijtic ipan nopa cuarto tatzetzeloltic. ⁸ Huan nojquiya quema ya tiotaquiya, techmaca nopa seyoc pilborregoijtzi huan ihuaya nojquiya nopa tacajcahualisti ten harina huan ten tatoyahuali quej ica ijnaloc. Huan anquitatise nopa tacajcahualisti para antechtencahuilise huan ajhuiyac mijyotis noixpa na, niamoTECO.*Tacajcahualisti cati monequi sesen samano*⁹ “Huan ipan nopa tonali quema monequi anmosiyajquetzase sesen chicueyi, monequi antechtencahuilise ome piloquich borregoijtzi cati sanoc quiaxitijtoque se xihuit huan cati amo teno quipiyaj. Nojquiya ihuaya techmacaca nopa tacajcahualisti ten harina cati ihuaya yahui cati elis nahui kilo ten cuali harina tamaneloli ica aceite, huan nojquiya techmacaca nopa tacajcahualisti cati tatoyahuali noixpa. ¹⁰ Huan ni tacajcahualisti tatatili cati antechtencahuilise sesen sábado quema anmosiyajquetzase monequi elis iyoca ten nopa ome tacajcahualisti tatatili huan inintacajcahualis tatoyahuali cati antechmacase mojmosta.*Tacajcahualisti cati monequi sesen metzti*¹¹ “Ipan nopa achtohui tonal ipan sesen metzti antechtencahuilise se tacajcahualisti tatatili cati elis ome becerros, se oquich borrego, huan chicome piloquich borregoijtzi cati sanoc quiaxitijtoque se xihuit huan cati amo teno amo cuali quipiyaj ipan inintacayo. ¹² Huan nojquiya ihuaya sesen becerro antechtencahuilise sesen tacajcahualisti ten harina cati elis chicuase kilos ten cuali harina tamaneloli ica aceite. Huan ihuaya nopa borrego antechtencahuilise nahui kilo cati cuali harina tamaneloli ica aceite. ¹³ Huan ihuaya sesen pilborregoijtzi antechtencahuilise se tacajcahualisti ten harina cati elis ome kilo ten cuali harina tamaneloli ica aceite. Nochi elis se tacajcahualisti tatatili cati ajhuiyac mijyotis noixpa na, niamoTECO. ¹⁴ Nopa tacajcahualisti tatoyahuali cati antechtencahuilise inihuaya, elis ome litros xocomeca at ica sesen becerro, huan se litro huan tajco ica nopa borrego, huan se litro para sesen nopa pilborregoijtzi. Ya ni eli nopa tacajcahualisti tatatili cati monequi antechmacase sesen metzti ipan se xihuit. ¹⁵ Huan iyoca ten nopa tacajcahualisti tatatili huan nopa tacajcahualisti tatoyahuali

cati inihuaya yahui, nojquiya sesen metzti monequi antechtencahuilise se tacajcahualisti por tajtacoli cati elis se oquich chivo.

Tacajcahualisti para nopa Pascua ilhuit

(Lv. 23:5-8)

¹⁶ “Ipan 14 itequi nopa achtohui metzti ipan sesen amoxihui, monequi anquinescayotise nopa Pascua ilhuit para antechhueyichihuase, niamoTECO.
¹⁷ Huan ipan nopa seyoc tonali, anquipehualtise se ilhuit cati elis chicome tonati quema amo anquicuase yon se pantzi cati quipiya tasonejcyot.
¹⁸ Huan ipan nopa achtohui tonali ten nopa chicome tonati, anquichihuase se tasentilisti tatzejtzeltolitic para sempa anmoiyocatalise para na. Huan ipan nopa tonali amo anquichihuase yon se tequit. ¹⁹ Huan para nopa tacajcahualisti tatatili, antechtencahuilise, niamoTECO, ome becerros, se oquich borrego, huan chicome piloquich borregoijtzi cati sanoc quiaxitijtoque sesen xihuit huan cati amo teno quipiyaj. ²⁰ Huan para nopa tacajcahualisti ten harina cati yahui inihuaya, antechtencahuilise harina cati nel cuali cati tamaneloli ica aceite. Xitechmacaca chicuase kilo ten harina para sesen becerro huan nahui kilo para sesen ten nopa borrejome, ²¹ huan ome kilos para sesen pilborregoijtzi. ²² Nojquiya antechmacase se chivo quej se tacajcahualisti por tajtacoli para antechixtzacuilise amotajtacolhua. ²³ Nochi ya ni antechtencahuilise iyoca ten nopa tacajcahualisti tatatili cati monequi mojmosta ipan nochi ijnaloc. ²⁴ Huaيجا nochi ya ni antechmacase sesen tonali ipan nopa chicome tonati ten nopa ilhuit. Huan nochi elis tacajcahualisti cati tatatili cati ajhuyiac mijyotis noixpa na, niamoTECO. Nojquiya monequi antechtencahuilise nopa tacajcahualisti cati tatoyahuali cati monequi ihuaya sese. Huan iyoca, monequi nochi sequinoc tacajcahualisti cati ya nimechilhuijtihualajtoc. ²⁵ Huan ipan nopa chicome tonati, nojquiya anquipiyase se tasentilisti cati tatzejtzeltolitic para anmoiyocatalise para na. Huan ipan nopa tonali, amo anquichihuase yon se tequit.

Nopa ofrenda ten nopa achtohui pixquisti

(Lv. 23:9-22)

²⁶ “Ipan nopa tonali para nopa ilhuit ten ipejya pixquisti, cati nojquiya itoca ilhuit ten samanos, antechhualiquilise se quentzi nopa yancuic harina cati achtohui anquipixcaque ten cati anquitojque. Huan nojquiya ipan nopa tonali anquipiyase se tasentilisti tatzejtzeltolitic para anmoiyocatalise para na, huan amo anquichihuase yon se tequit. ²⁷ Huan antechtencahuilise tacajcahualisti tatatili cati ajhuyiac mijyotis noixpa, huan nopa tacajcahualisti elis ome becerros, se oquich borrego, huan chicome piloquich borregoijtzi cati sanoc quiaxitijtoque se xihuit. ²⁸ Huan nopa tacajcahualisti ten harina elis cuali harina tamaneloli ica aceite. Huan monequis chicuase kilo harina ica sesen becerro, huan nahui kilo ica nopa borrego, ²⁹ huan ome kilo ica sesen ten nopa pilborregoijtzi. ³⁰ Huan nojquiya antechmacase se chivo quej se tacajcahualisti por tajtacoli para antechixtzacuilise amotajtacolhua. ³¹ Sesen tacajcahualisti tatatili monequi nojquiya quipiyas nopa tacajcahualisti tatoyahuali cati ihuaya yahui. Huan iyoca, techtencahuilica nochi nopa sequinoc tacajcahualisti tatatili huan nopa tacajcahualisti ten harina cati monequi. Huan nochi tapiyalme cati antechmacase monequi amo teno amo cuali quipiyase.

¹ “Ipan nopa achtohui tonal ipan metzti chicome ipan nopa israelita calendario * ipan sesen xihuit anquichihuase se tasentilisti tatzetzeloltic para sempa anmoiycatalise para na, huan yon se tequit amo anquichihuase ipan nopa tonali. Nopa elis se tonali para anquipitzase tapitzali. ² Huan ipan nopa tonali antechtenuhuilise se tacajcahualisti tatatili cati ajhuiyac mijyotis noixpa para antechhueyichihuase. Huan cati antechmacase elis se becerro, se oquich borrego huan chicome piloquich borregojtzitzi cati sanoc quixitijtoque se xihuit huan cati amo teno quipiyaj. ³ Nojquiya monequi techmacaca nopa tacajcahualisti ten harina cati yahui inihuaya cati elis harina cati cuali cati tamaneloli ica aceite. Monequi antechtenuhuilise chicuase kilo ten harina para nopa becerro, nahui kilo para nopa oquich borrego, ⁴ huan ome kilo para sesen pilborregojtzi. ⁵ Huan nojquiya techtenuhuilise se chivo quej se tacajcahualisti por tajtacoli para antechixtzacuulise amotajtacolhua. ⁶ Nochi ni tacajcahualisti monequi antechmacase iyoca ten nopa tacajcahualisti tatatili cati antechmacase ipan ipejya se metzti, huan iyoca ten nopa tacajcahualisti cati antechmacase mojmosta. Huan sesen ten nopa tacajcahualisti monequi quipiyas itacajcahualis ten harina huan cati tatoyahuali cati ihuaya yahui quej nimechnahuatijtoc. Huan nochi tacajcahualisti tatatili elis tacajcahualisti cati antechmacase ica tit para ajhuiyac mijyotis noixpa na, niamoTECO.

Tacajcahualisti para nopa tonali quema Quiixtzacuas Tetajtacolhua
(Lv. 23:26-32)

⁷ “Huan quema panos 10 tonati sempa anquichihuase se tasentilisti tatzetzeloltic para sempa anmoiycatalise para na. Huan anmoicnuequise huan anmosahuase, huan amo anquichihuase yon se tequit. ⁸ Huan ipan nopa tonali antechtenuhuilise ni tacajcahualisti tatatili cati ajhuiyac mijyotis noixpa para antechhueyichihuase. Monequi antechmacase se becerro, huan se oquich borrego, huan chicome piloquich borregojtzitzi cati sanoc quixitijtoque se xihuit huan cati amo teno quipiyaj. ⁹ Huan inihuaya techmacaca nopa tacajcahualisti ten harina cati monequi, cati elis se cuali harina tamaneloli ica aceite. Monequi chicuase kilo para nopa becerro, nahui kilo para nopa oquich borrego, ¹⁰ huan ome kilo para sesen pilborregojtzi. ¹¹ Nojquiya antechtenuhuilise se oquich chivo quej se tacajcahualisti por tajtacoli. Huan nopa chivo elis iyoca ten nopa oquich chivo cati antechmacase para antechixtzacuulise amotajtacolhua. Huan nojquiya ni chivo elis iyoca ten nopa tacajcahualisti tatatili, huan tacajcahualisti ten harina, huan tacajcahualisti cati tatoyahuali cati monequi antechmacase mojmosta.

Tacajcahualisti para ilhuit ten pilxajcaltzitzitzi
(Lv. 23:33-44)

¹² “Huan quema panos macuili tonati, anquichihuase seyoc tasentilisti tatzetzeloltic para anmoiycatalise para na, huan yon se tequit amo anquichihuase. Huan ipan nopa tonali anquipehualtise anquinescayotise se ilhuit para antechhueyitalise, huan nopa ilhuit huejcahuas seyoc chicome tonati. ¹³ Huan para antechhueyichihuase ipan nopa achtohui tonali antechmacase se tacajcahualisti tatatili cati ajhuiyac mijyotis noixpa. Huan nopa tacajcahualisti elis 13 becerros, ome oquich borregojme, huan 14 piloquich borregojtzitzi cati sanoc quixitijtoque se xihuit huan cati amo teno quipiyaj. ¹⁴ Huan inihuaya techmacaca nopa tacajcahualisti ten harina cati quinamiqui sesen cati elis cuali harina tamaneloli ica aceite. Antechmacase chicuase kilo harina ica sesen ten nopa 13 becerros, nahui kilo ica sesen

* 29:1 29:1 Quemantica ni tonal huetzi ipan septiembre huan quemantica ipan ipejya octubre ipan tocalendario ama.

ten nopa oquich borregojme, ¹⁵ huan ome kilo harina ica sesen ten nopa 14 pilborregojtitzti. ¹⁶ Nojquiya ipan nopa tonali antechtencahuilise se oquich chivo quej se tacajcahualisti por tajtacoli. Huan iyoca techtencahuilica nopa tacajcahualisti tatatili cati monequi mojmosta ica nopa tacajcahualisti ten harina, huan cati tatoyahuali cati inihuaya yahui.

¹⁷ “Huan ipan ome tonati ten nopa ilhuit, antechtencahuilise 12 becerros, ome oquich borregojme huan 14 piloquich borregojtitzti cati quiaxitiytoque se xihuit huan cati amo teno quipiyaj. ¹⁸ Huan inihuaya nopa becerros, borregojme huan pilborregojtitzti monequi antechmacase nopa tacajcahualisti ten harina huan cati tatoyahuali cati inihuaya yahui, sese ica imiyaca cati ya nimechnahuatijtoc. ¹⁹ Nojquiya ipan nopa tonali antechtencahuilise se oquich chivo quej se tacajcahualisti por tajtacoli. Huan iyoca techtencahuilica nopa tacajcahualisti tatatili cati monequi mojmosta ica nopa tacajcahualisti ten harina huan cati tatoyahuali cati inihuaya yahui.

²⁰ “Huan ipan eyi tonati ipan nopa ilhuit, antechtencahuilise 11 becerros, ome oquich borregojme, huan 14 piloquich borregojtitzti cati quiaxitiytoque se xihuit huan cati amo teno quipiyaj. ²¹ Huan inihuaya nopa becerros, borregojme huan pilborregojtitzti monequi antechmacase nopa tacajcahualisti ten harina huan cati tatoyahuali cati inihuaya yahui, sese ica imiyaca cati ya nimechnahuatijtoc. ²² Nojquiya ipan nopa tonali antechtencahuilise se oquich chivo quej se tacajcahualisti por tajtacoli. Huan iyoca techtencahuilica nopa tacajcahualisti tatatili cati monequi mojmosta ica nopa tacajcahualisti ten harina huan cati tatoyahuali cati inihuaya yahui.

²³ “Huan ipan nahui tonati ten nopa ilhuit, antechtencahuilise 10 becerros, ome oquich borregojme huan 14 piloquich borregojtitzti cati quiaxitiytoque se xihuit huan cati amo teno quipiyaj. ²⁴ Huan inihuaya nopa becerros, borregojme huan pilborregojtitzti monequi antechmacase nopa tacajcahualisti ten harina huan cati tatoyahuali cati inihuaya yahui, sese ica imiyaca cati ya nimechnahuatijtoc. ²⁵ Nojquiya ipan nopa tonali, antechtencahuilise se oquich chivo quej se tacajcahualisti por tajtacoli. Huan iyoca techtencahuilica nopa tacajcahualisti tatatili cati monequi mojmosta ica nopa tacajcahualisti ten harina huan cati tatoyahuali cati inihuaya yahui.

²⁶ “Huan ipan maculi tonati ten nopa ilhuit, antechtencahuilise 9 becerros, ome oquich borregojme, huan 14 piloquich borregojtitzti cati quiaxitiytoque se xihuit huan cati amo teno quipiyaj. ²⁷ Huan inihuaya nopa becerros, borregojme huan pilborregojtitzti monequi antechmacase nopa tacajcahualisti ten harina huan cati tatoyahuali cati inihuaya yahui, sese ica imiyaca cati ya nimechnahuatijtoc. ²⁸ Nojquiya ipan nopa tonali, antechtencahuilise se oquich chivo quej se tacajcahualisti por tajtacoli. Huan iyoca techtencahuilica nopa tacajcahualisti tatatili cati monequi mojmosta ica nopa tacajcahualisti ten harina huan cati tatoyahuali cati inihuaya yahui.

²⁹ “Huan ipan chिकासen tonati ten nopa ilhuit, antechtencahuilise 8 becerros, ome oquich borregojme huan 14 piloquich borregojtitzti cati quiaxitiytoque se xihuit huan cati amo teno quipiyaj. ³⁰ Huan inihuaya nopa becerros, borregojme huan pilborregojtitzti monequi antechmacase nopa tacajcahualisti ten harina huan cati tatoyahuali cati inihuaya yahui, sese ica imiyaca cati ya nimechnahuatijtoc. ³¹ Nojquiya ipan nopa tonali, antechtencahuilise se oquich chivo quej se tacajcahualisti por tajtacoli. Huan iyoca techtencahuilica nopa tacajcahualisti tatatili cati monequi mojmosta ica nopa tacajcahualisti ten harina huan cati tatoyahuali cati inihuaya yahui.

³² “Huan ipan chicome tonati ten nopa ilhuit, antechtencahuilise chicome becerros, ome oquich borregojme huan 14 piloquich borregojtitzti cati

sanoc quiaxitijtoque se xihuit huan cati amo teno amo cuali quiipiyaj. ³³ Huan inihuaya nopa becerros, borregoyme huan pilborregoijtzi monequi antechmacase nopa tacajcahualisti ten harina huan cati tatoyahuali cati inihuaya yahui, sese ica imiyaca cati ya nimechnahuatijtoc. ³⁴ Nojquiya ipan nopa tonali, antechtencahuilise se oquich chivo quej se tacajcahualisti por tajtacoli. Huan iyoca techtencahuilica nopa tacajcahualisti tatatili cati monequi mojmosta ica nopa tacajcahualisti ten harina huan cati tatoyahuali cati inihuaya yahuij.

³⁵ “Huan ipan chicueyi tonati ten nopa ilhuit, anquichihuase se tasentilisti tatzetzelolitic para anmoyocatalise sempa para na, huan amo anquichihuase yon se tequit. ³⁶ Huan ipan nopa tonali, para antechhueyichihuase antechmacase se tacajcahualisti tatatili cati ajhuiyac mijyotis noixpa. Huan nopa tacajcahualisti elis se becerro, se oquich borrego, huan chicomé piloquich borregoijtzi cati quiaxitijtoque sesen xihuit huan cati amo teno quiipiyaj. ³⁷ Huan inihuaya nopa becerro, borrego huan pilborregoijtzi monequi antechmacase nopa tacajcahualisti ten harina huan cati tatoyahuali cati inihuaya yahui, sese ica imiyaca cati ya nimechnahuatijtoc. ³⁸ Nojquiya ipan nopa tonali, antechtencahuilise se oquich chivo quej se tacajcahualisti por tajtacoli. Huan iyoca techtencahuilica nopa tacajcahualisti tatatili cati monequi mojmosta ica nopa tacajcahualisti ten harina huan cati tatoyahuali cati inihuaya yahui.

³⁹ “Huajca nochi ni tacajcahualisti antechtencahuilise na, niamoTECO, ipan senen tonali cati niquixquetztoc. Huan nochi ya ni elis iyoca ten se tacajcahualisti tatatili, o ten harina, o cati tatoyahuali, o se para tayoltalili ica na cati anquinequise antechmacase. Huan elis iyoca ten se tacajcahualisti cati antechmacase quema noca mocahuaj se tenijqui.”

⁴⁰ Huajca Moisés quinpohuili nochi nopa israelitame nochi ni tanahuatili cati TOTECO quimacatoya.

30

Cati ica mocahuaj TOTECO taya quichihuase

¹ Huan Moisés quincamanalhui nochi tayacanani ten sesen hueyi familia ten nopa israelitame, huan quinilhui:

“TOTECO tanahuatijtoc ² para quema se tacat quitencahuas para quichihuas se tamanti para TOTECO, o motestigojquetzas para amo quichihuas se tamanti, monequi quitamichihuas nochi cati quijtojtoc.

³ “Huan quema se ichpocat cati noja itztoc ihuaya itata, quitencahuilis Toteco para quichihuas se tamanti, o motestigojquetzas para amo quichihuas se tamanti, ⁴ huan itata quimati huan amo teno quijtohua, huajca nopa ichpocat monequi quitamichihuas cati quijtojtoc. ⁵ Pero sinta itata quijtos nimantzi ipan nopa tonali para amo quicahuilis para quitamichihuas cati quijtojtoc, huajca amo monequi quichihuas, pampa itata amo quinejqui. Huan TOTECO quitapojpolhuis cati quijtojtoc pampa itata amo quicahuili ma quichihua.

⁶ “Huan sinta se ichpocat quitencahuilijtoc TOTECO para quichihuilis se tamanti, masque ohui quichihuas huan teipa monamictis, ⁷ huan sinta ihuehue amo quitzacuilia nimantzi quema quicaqui, huajca nopa ichpocat monequi quitamichihuas cati quijtojtoc. ⁸ Pero sinta quema quimatis ihuehue, nimantzi ipan nopa tonali quijtos para amo quinequi ma quitamichihua, huajca amo monequi quichihuas pampa ihuehue quiquixtilijtoc ichicahuilis cati quijtojtoc, masque quijto cati nelia ohui. Huan TOTECO quitapojpolhuis cati quijto.

⁹ “Pero sinta se sihuat cati icnotzi, o cati quicajqui ihuehue, o cati ihuehue moamasosolo ihuaya quitencahuas para techchiuilis se tamanti, o motestigojquetzas para amo quichihuas se tamanti, huajca cati quijtojtoc, ya nopa monequi quitamichihuas.

¹⁰ “Huan sinta se sihuat cati ya monamictijtoc techtencahuilis se tenijqui, o motestigojquetzas para quichihuas se tamanti, ¹¹ huan ihuehue quimati, huan amo teno quiilhuía, huajca quena, cati quijtojtoc quiyiya chichahualisti huan monequi quitamichihuas. ¹² Pero sinta ipan nopa tonal quema ihuehue quimatis yaya quijtos para amo quicahuas quichihuas, huajca ayecmo quiyiya chichahualisti cati quijtojtoc pampa ihuehue quiquixtili ichichahualis. Huan TOTECO quitapojpolhuis cati quijtojtoc.

¹³ “Huajca se tacat huelis quimacas chichahualisti, o quiquixtilis ichichahualis cati isihua quitencajtoc ica TOTECO para quichihuas o amo quichihuas, sinta nimantzi quijtos. ¹⁴ Pero sinta ya amo molinía huan quej nopa pano se ome tonati, huajca, quena, monequi quitamichihuas. ¹⁵ Huan sinta ya quichiya hasta seyoc tonal huan teipa quijtos para amo quicahuilis ma quichihua, huajca ya quihuicas nopa tajtacoli por cati isihua quitencajqui quichihuas huan amo quichijqui.”

¹⁶ Huajca ya ni nopa tanahuatili cati TOTECO quimacac Moisés ten queni-catza elis ica se tacat huan isihua, huan se tetaj ica iichpoca quema noja itztoc imaco sinta nopa isihua o iichpoca motestigojquetzas para quichihuas se tamanti.

31

Israelitame quisosolohuaj tali Madián

¹ Huan TOTECO quiilhui Moisés:

² “Ximomacuepa ica nopa madianitame por cati quinchihuilijque nopa israelitame huan teipa timiquis.”

³ Huajca Moisés quinilhui nopa israelitame:

—Sequij ansoldados monequi ximocualtica huan xijcuica amotepos para ica antatehuitij. Monequi timomacuepase ica nopa madianitame ica itequiticayo TOTECO. ⁴ Sesen hueyi familia monequi quintitanis se mil soldados para tatehuitij.

⁵ Huajca quej nopa mosentilijque 12 mil soldados, se mil ten sesen hueyi familia. Huan nochi ya mocualtalijtoque para yase tatehuitij ica nopa madianitame. ⁶ Huan Moisés quintitanqui nopa 12 mil soldados huan quilitanqui Finees, itelpoca nopa totajtzi Eleazar, para quinyacanas. Huan ya nojquiya quihuicac sequij tamantzitzi cati quitequiuhúaj tiopan calijtic, huan nopa tapitzali para quipitzase para quinyolmelahuase quema pehuase para tatehuise.

⁷ Huan quintehuijque nopa madianitame huan quinmictijque nochi quej TOTECO quinahuatijtoya Moisés. ⁸ Quinmictijque Evi, Requem, Zur, Hur huan Reba cati eliyayaj nopa maculti tanahuatiani ten madianitame. Huan nojquiya quimictijque Balaam, icone Beor ica macheta. ⁹ Huan nopa israelitame quinitzquijque huan quinhuicaque ilpitoque nopa sihua madianitame inihuaya ininonehua cati pisiltzitzitzi. Huan quincuilijque huan quinhuicaque nochi inintapiyalhua, huan nochi tamanti cati patiyi cati quipixtoyaj. ¹⁰ Huan nojquiya quintamitatilijque nochi inialtepehua huan campa mochihuayayaj. ¹¹ Huan nopa soldados quihuicaque nochi nopa tamanti cati quitantoyaj inihuaya nopa tapiyalme, sihuame huan coneme.

¹² Huan quihuiquilijque Moisés huan nopa totajtzi Eleazar huan nopa sequinoc israelitame cati mocajtoyaj campa ininchaj ipan nopa tamayamit ipan tali Moab, nechca hueyat Jordán, iixmelac altepet Jericó.

¹³ Huan Moisés, Eleazar huan nochi nopa tayacanani ten israelitame quisque campa ininchaj huan quinnamiquitoj nopa soldados. ¹⁴ Huan Moisés cualanqui ica nopa soldados cati quipiyayaj tequiticayot, injuanti cati quinyacanayayaj se mil o se cien soldados, ¹⁵ huan quinilhui:

—¿Para ten anquincajque yoltoque nochi ni sihuame? ¹⁶ Ya ni injuanti cati quitoquilijque icamanal Balaam, huan quinchijque ma tajtacolchihuaca nochi nopa israelitame quema quicajtejqe TOTECO para quihueyichihuase Baal ipan nopa tepet Peor. Huan elqui inintajacol injuanti para huetzqui nopa cocolisti topani, tiimasehualhua TOTECO. ¹⁷ Huajca xiquinmictica amantzi nochi oquichpilme huan nochi sihuame cati ya quixmajtoque se tacat. ¹⁸ Huan nochi sihuapilme cati nelía ayemo teno quimatij huelis itzose, huan elise amoaxcahua. ¹⁹ Huan nochi amojuanti cati anquimictijtoque se acajya o anquitzquitoque se mijcatzi, monequi ximocahuaca hueja ten amoaltepe. Amo xicalaquica ipan toaltepe ten yoyon calme. Huan ipan eyi tonati huan chicome tonati, monequi ximopajpacaca ica nopa at cati tetapajpacchihua quej TOTECO quijtohua. Huan nojquiya xiquinpajpacaca nopa sihuapilme cati amoaxcatijtoque. ²⁰ Nojquiya xijtapajpacchihuaca nochi tamanti cati anmocuilijqe ten cuahuit huan ten yoyomit para anmotalilise, huan yoyomit ten cuetaxti o ten inijhuyio chivojme.

²¹ Huan nopa totajtzi Eleazar quinilhui nochi nopa soldados cati yajtoyaj tatehuitoj:

—Ya ni nopa tanahuatili cati TOTECO quimacac Moisés: ²² Nochi tamanti cati amo hueli tata quej oro, plata, bronce, hierro, estaño, huan plomo cati anmocuilijqe, ²³ monequi anquicalaquise ipan tit para anquipajpacase. Huan teipa xicatzetzhuica ica nopa at cati tapajpacaca iixpa TOTECO. Huan nochi tamanti cati amo quijyohuis tit, monequi xijpajpacaca san ica nopa at. ²⁴ Huan ipan chicome tonati monequi anquichicuenise amoyoyo huan sempa anmocahuase antapajpactique iixpa TOTECO. Teipa sempa hueli ancalaquise campa toaltepe.

Momajmacaque cati quincuilijque madianitame

²⁵ Huan TOTECO quilhui Moisés:

²⁶ “Xiquinpoehua quesqui tapiyalme huan sihuapilme anquincuilijque nopa madianitame. Ma mitzpalehui nopa totajtzi Eleazar ihuaya nopa tayacanani ten sesen hueyi familia, huan xiquijcuiloca quesqui itztoque. ²⁷ Huan xijtajcoitaca cati onca. Tajco elis iniaxcahua injuanti cati tatehuitoj, huan nopa seyoc tajco elis iniaxca ne sequinoc israelitame. ²⁸ Nojquiya xijcuica se achi para na cati elis quej se impuesto. Ipan cati iniaxca nopa soldados, elis noaxca se masehuali, se huacax, se burro o se borrego ipan sesen 500. ²⁹ Huan injuanti cati noaxcahua anquimacase nopa totajtzi Eleazar para techmactilis na, niamoTECO. ³⁰ Huan ten nopa seyoc tajco cati eli iniaxca ne sequinoc israelitame, antechiyocatalilise se sihuapil, se huacax, se burro huan se borrego ten sesen 50. Huan nochi injuanti anquimacase nopa levitame cati quimocuitahuíaj noyoyon tiopa, niamoTECO.”

³¹ Huajca Moisés huan Eleazar quichijque senquisa quej TOTECO quinahutajtoya Moisés.

³² Huan cati mocajque yoltoque cati nopa soldados quincuilijtoyaj inincualancaitacahua elque: 675 mil borregojme, ³³ 72 mil huacaxme, ³⁴ 61 mil burrojme ³⁵ huan 32 mil ichpocame cati ayemo quixmatiyayaj se tacat.

³⁶ Huajca nopa tajco ten tapiyalme huan ichpocame cati elqui iniaxca nopa soldados elque:

337 mil 500 borregojme,

³⁷ huan ten inijuanti 675 elqui iaxca TOTECO quej se impuesto.

³⁸ Huan 36 mil huacaxme,

huan ten inijuanti 72 elqui iaxca TOTECO.

³⁹ Huan 30 mil 500 burrojme,

huan ten inijuanti 61 elqui iaxca TOTECO.

⁴⁰ Huan 16 mil ichpocame,

huan ten inijuanti 32 elque iaxcahua TOTECO.

⁴¹ Huan Moisés quincuic nopa tapiyalme huan sihuapilme cati elqui quej se impuesto para TOTECO huan quimactili nopa totajtzi Eleazar quej TOTECO quinahuatijtoya.

⁴² Huan Moisés quiiyocatali nopa tajco cati elis iniaxca nopa israelitame ten ne tajco cati eliyaya iniaxca nopa soldados. ⁴³ Huan nopa tajco cati elqui iniaxca nopa israelitame elque: 337 mil 500 borregojme, ⁴⁴ 36 mil huacaxme, ⁴⁵ 30 mil 500 burrojme ⁴⁶ huan 16 mil sihuapilme.

⁴⁷ Huan ten ya ni cati eliyaya iniaxca nopa israelitame, Moisés quintapepeni se ipan sesen 50 ichpocame huan tapiyalme quej TOTECO quinahuatijtoya, huan quinmactili nopa levitame cati quimocuitahuiyayaj iyoyon tiopa TOTECO.

⁴⁸ Huajca nopa soldados cati quipixque tequiticayot ica sesen mil soldados huan ica sesen 100 soldados monechcahuijque campa Moisés, ⁴⁹ huan quiihuijque: “Timotequipanojcahua tiquinpojtoque nochi soldados cati itzfoyaj tomaco quema titatehuitoj, huan yon se amo polijtoc. ⁵⁰ Huajca tijnequij tijmactilise TOTECO se nemacti para tijtascamatilise. Huan nochi macosti, maquechcosti, anillos, pijpiloli huan costi ten oro cati sesen timopantilijtoyaj tijhualicatoque para tijmacase TOTECO. Ma eli se taixtzaculi para quixtzacuas totajtacolhua, pampa amo senquisa tijtoquilijqe itanahuatil.”

⁵¹ Huajca Moisés ihuaya Eleazar quinselilijque nochi nopa tamanti tayejejcayot ten oro cati quihualicaque. ⁵² Huan nochi nopa oro cati san nopa tayacanani ten soldados ica iniyolo quimactilijque TOTECO quipanoc 184 kilos ietica huan tahuel eliyaya patiyoy. ⁵³ Huan iyoca oncayaya miyac tayejejcayot, pampa sesen soldado cati amo tayacanquet quitencahuili TOTECO nopa tamanti ten oro cati eltoya imaco. ⁵⁴ Huajca Moisés ihuaya Eleazar nopa totajtzi quiselijque nopa oro cati nopa tayacanani quihualicatoyaj, huan quitalijque tiopan calijtic campa mopantiyayaj ica TOTECO para TOTECO ma quinelnamiqui nopa israelitame.

32

Inixhuihua Rubén huan Gad quiselijque inintal

(Dt. 3:12-22)

¹ Huan nopa israelitame ipan nopa huejhueyi familias Rubén huan Gad quinpuyayayaj tahuel miyaqui tapiyalme. Huan quiiunque para nopa tali Jazer huan tali Galaad nechca campa itztoyaj, eliyaya nelia cuali para tapiyalme huan yeca inijuanti quinequiyayaj. ² Huajca yajque quiiatoy Moisés, nopa totajtzi Eleazar huan nopa tayacanani ten nochi israelitame huan quinihuijqe:

³ —Xiquitaca, TOTECO techcahuilijtoc tiisraelitame ma tijtanica nochi ni talme ten Atarot, Dibón, Jazer, Nimra, Hesbón, Eleale, Sebam, Nebo huan Beón. ⁴ Huan nochi ni talme nelia cuali para tapiyalme, huan tojuanti,

timotequipanojcahua, tiquinpiyaj miyaqui tapiyalme. ⁵ Huajca sinta anquijta para cuali, techmacaca ni tali para elis cati tijselise, huan ayecmo teno tijselise ipan nopa tali ipan neca nali ten hueyat Jordán.

⁶ Pero Moisés quinnanquili iteipan ixhuihua Rubén huan Gad:

—¿Anquinequij para nopa sequinoc israelitame yase tatehuitj huan amojuanti san amosehuse nica? ⁷ ¿Anquinmajmatise nopa israelitame para ma amo panoca ipan nopa tali cati TOTECO quinmacatoc? ⁸ Quej nopa quichijque amotafahua quema niquintitanqui ten Cades Barnea para ma quitajtachilitij nopa cuali tali. ⁹ Inijuanti ajsitoj hasta ipan nopa tamayamit ten Escol huan cuali quitajtachilijque nopa tali, huan teipa quinmajmaticej nopa israelitame para ma amo calaquica ipan nopa cuali tali cati TOTECO quinmacatoya. ¹⁰ Huan TOTECO tahuel cualanqui ica inijuanti ipan nopa tonali, huan ya motestigojquetzqui, ¹¹ huan quijto para yon se ten ni tacame cati quisque ipan tali Egipto huan cati ya quixitijque 20 xihuit, amo calaquise ipan nopa tali cati ininca mocajqui Abraham, Isaac huan Jacob para quinmacasquia ininteipan ixhuihua. Pampa nopa tacame amo quitoquiljtoque ica nochi iniyolo. ¹² San hueli calaquise Caleb, icone Jefone nopa cenezeo, ihuaya Josué, icone Nun, pampa inijuanti quitoquiljque TOTECO ica nochi iniyolo. Huajca quej nopa quijto TOTECO ipan ne tonal. ¹³ Huan ya tahuel cualanqui ica nopa israelitame huan quichijqui ma nejnemica ipan nopa huactoc tali para 40 xihuit. Monequiyaya nejnentinemise nopona hasta mijque nochi cati quisque ipan tali Egipto pampa inijuanti san sejco tacatque ipan Egipto huan ica sempa quixpanoque TOTECO, huan monejqui miquise iixpa. ¹⁴ Huan ama amojuanti, aniniconehua ne tajtacolchijca tetatme, anquinequij anquitoquilise inifero ojhui, huan anquinequij anquixpanose TOTECO para noja más cualanis ica tojuanti tiisraelitame. ¹⁵ Sinta amo anquitoquiljaj TOTECO, ya quichihuas para nochi israelitame noja más xihuit ma huejcahuaca ipan ni huactoc tali hasta nochi miquise, huan amojuanti anquiyase tajtocoli por inimiquilis.

¹⁶ Huajca ininteipan ixhuihua nopa huejhueyi familias Rubén huan Gad monechahujque campa Moisés huan quihujque:

—¡Amo! Amo ya nopa cati tiquijtohuaj. Tojuanti tijnequij tijchihuase tatzacti para totapiyalhua, huan altepeme para toconehua huan toshuhua-jhua. ¹⁷ Huan teipa titacame tijhuicase totepos huan tiquinyacantiyase ne sequinoc israelitame titatehuitj hasta tiquincalaquitij nochi inijuanti ipan inintal cati quiselise. Pero toconehua huan toshuhua mocahuase nica ipan altepeme cati cuali moyahualtactose ica tepamit para amo teno ininpantis ica masehualme cati itztoque nica nechca. ¹⁸ Huan tojuanti amo titacuepilise tochajchaj hasta nochi israelitame moaxcatijtoseya inintal cati elis iniaxca para quiselise. ¹⁹ Pero tojuanti amo tijselise yon se tali ica neca nali ten hueyat Jordán, pampa ya tijselijtose nica ipan ni nali.

²⁰ Huan Moisés quinnanquili:

—Sinta melahuac anquitamichihuase cati anquijtohuaj huan anmocualtalise huan anquihuicase amotepos para antatehuitj ipan itatehuilis TOTECO, huajca cuali. ²¹ Pero monequi nochi amosoldados quiixcotonase nopa hueyat Jordán iixpa TOTECO huan tatehuse hasta TOTECO quin-tamiquixtis nochi icualancaitacahua iixpa, ²² huan mocuiljtos nopa tali. Huan teipa, quena, ya huelis anhualase ipan amotal nica quema ya anquichijtose nochi cati anmocajtoyaj iixpa TOTECO huan inixpa israelitame para anquichihuase. Huan ni talme nica elis amoaxca iixpa TOTECO. ²³ Pero sinta amo anquitamichihuase nochi ya ni cati anquijtojtoque, huajca cuali

xijmatica para antajtacolchijtose ica TOTECO, huan se tonali amechajsís se tatzacuiltli ica nopa tajtacoli. ²⁴ Huajca ama xipehuaca xijcualtalica altepeme para amonehua huan amosihuajhua, huan tatzacti para amoborregojhua, huan teipa xijtamichihuaca nochi cati anquijtojqoue.

²⁵ Huan nochi iteipan ixhuihua Rubén huan Gad quinanquilijque:

—Timotequipanojcahua tijchihuase senquisa nochi cati ta technahuatijtoc. ²⁶ Toconehua, tosihuajhua huan totapiyalhua mocahuase ipan altepeme ipan tali Galaad. ²⁷ Huan tojuanti cati hueli tijhuicaj teposti tijpanose ni hueyat iixpa TOTECO huan titatehuitij quej technahuatijtoc.

²⁸ Huajca Moisés quinahuati nopa totajtzi Eleazar, Josué huan nopa tayanani ten nochi israelitame ica ni camanali:

²⁹—Sinta nochi nopa tatehujca tacame ipan nopa huejhueyi familias Gad huan Rubén quipanose hueyat Jordán cuali mocualtalijtoque para tatehuitij quej TOTECO quinnahuatía, huan tatehuse hasta quema anquitamitan-tosejya nopa cuali tali, huajca xiquinmacaca nopa tali Galaad para ma eli iniaxca. ³⁰ Pero sinta amo quipanose ica inintepos para tatehuitij, huajca elis amoaxca se tali ipan neca nali ipan tali Canaán campa anquiselise amjuanti.

³¹ Huan nochi iteipan ixhuihua Gad huan Rubén tananquilijque:

—Tijtamichihuase cati TOTECO technahuatijtoc, timotequipanojcahua.

³² Temachtí cuali timocualtalijtose ica totepos huan tijpanose nopa hueyat quej TOTECO technahuatía para titatehuitij ipan tali Canaán, pero teipa timocahuase ica ni tali cati ama tijselíaj ipan ni nali ten ni hueyat Jordán.

³³ Huajca Moisés quinmacac nopa hueyi familia Gad, Rubén huan tajco nopa hueyi familia Manasés, cati elqui icone José, nopa talme ipan nica nali. Huan quiselijque nopa tali cati achtohui quinahuatijayaj nopa amorreo tanahuatiani, Sehón huan Og ten altepet Basán. Nojquiya quiselijque nochi nopa altepeme cati quinahuatijayaj huan nochi tali cati quinyahualojtoya.

³⁴ Huan nopa hueyi familia Gad quicualchijchijque nopa altepet ten Dibón, Atarot, Aroer, ³⁵ Atarot Sofán, Jazer, Jogbeha, ³⁶ Bet Nimra huan Bet Arán, huan cuali quinyahualzajque ica tepamit huan quichijque tatzacti para ininborregojhua.

³⁷ Huan nopa hueyi familia Rubén quicualchijchijque nopa altepet ten Hesbón, Eleale, Quiriataim, ³⁸ Nebo huan Baal Meón huan quipataque inintoca. Huan nojquiya quicualchijchijque nopa altepet Sibma.

³⁹ Huan iixhuihua Maquir, cati elqui icone Manasés ten huejcajquiya, moaxcatito nopa tali ten Galaad cati quitequihuiyayaj nopa amorreos huan moaxcatijque nopa tali. ⁴⁰ Huajca Moisés quinmacac iixhuihua Maquir nopa tali Galaad, huan nozona mocajque para itztose. ⁴¹ Huan iixhuihua Jair, nopa seyoc icone Manasés ten huejcajquiya, yajque moaxcatitoj cati eliyaya iniaxca sequinoc amorreos huan quitocaxtijque Havot Jair. ⁴² Huan Noba ihuaya iteixmatcahua yajque moaxcatitoj Kenat ica nochi pilaltepertziti cati iaxca, huan quitocaxtijque Noba quej ya itoca eltoya.

33

Nopa ojti cati israelitame quitoquilijtoyaj

¹ Nica eltoc inintoca nochi nopa lugares campa nopa israelitame pan-tiyajque quema quisque ipan tali Egipto ica nochi nopa huejhueyi pamit ten inimasehualhua, huan quinyacantiyahuiyaya Moisés ihuaya Aarón.

² Moisés quiijcuiltojtiyajqui nochi inintoca nopa lugares campa quiquetziya-
jqe iniyoyoncalhua.

³ Nopa israelitame quistejqe ipan altepet Ramesés ipan tali Egipto ipan
14 itequi nopa achtohui metzti ipan nopa israelita calendario*. Quinescay-
otijque nopa ilhuit Pascua huan ica ijnaloc ten nopa seyoc tonali quistejqe
ica hueyi chichahualisti iniixpa nopa egiptome. ⁴ Huan quema quistejqe,
nopa egiptome noja quintaltocayaj ininconeua cati achtohuime pampa
TOTECO quichijtoya ma miquica. Huan TOTECO nojquiya quintamitepejqe
nochi inintaixcopincayohua.

⁵ Huan nopa israelitame quistejqe altepet Ramesés huan quiquetzque
iniyoyoncalhua ipan Sucot.

⁶ Quistejqe Sucot huan mochihuatojq ipan Etam campa pehua nopa
huactoc tali.

⁷ Quistejqe Etam huan mocuetque para quimacase se huelta ica Pi
Hahiroc cati mocahua ica campa quísa tonati ten Baal Zefón, huan nozona
mochijque nechca Migdol.

⁸ Huan quema quistejqe Pi Hahiroc, quiixcotonque nopa hueyi at huan
ajsitojq campa nopa huactoc tali. Huan nejnentiyaqque eyi tonati ipan nopa
huactoc tali ten Etam huan mochijque campa Mara.

⁹ Huan quistejqe ipan Mara huan ajsitojq ipan nopa huactoc tali cati itoca
Elim campa oncayaya 12 amelme huan 70 apachij cuame, huan mochijque
nozona.

¹⁰ Teipa quistejqe Elim huan mochihuatojq nechca nopa hueyi at cati itoca
Chichiltic.

¹¹ Huan quistejqe campa nopa Hueyi At Chichiltic huan mochihuatojq
ipan nopa huactoc tali cati itoca Sin.

¹² Huan quistejqe campa nopa huactoc tali Sin huan mochihuatojq ipan
Dofca.

¹³ Huan quistejqe Dofca huan mochihuatojq ipan Alús.

¹⁴ Teipa quistejqe Alús huan mochihuatojq ipan huactoc tali ten Refidim
campa amo oncayaya at para quisee.

¹⁵ Huan quistejqe Refidim huan mochihuatojq ipan nopa huactoc tali
Sinaí.

¹⁶ Teipa quistejqe ipan nopa huactoc tali Sinaí huan mochihuatojq ipan
Kibrot Hataava.

¹⁷ Huan quistejqe Kibrot Hataava huan mochihuatojq ipan Hazerot.

¹⁸ Huan quistejqe Hazerot huan mochihuatojq ipan Ritma.

¹⁹ Teipa quistejqe Ritma huan mochihuatojq ipan Rimón Peres.

²⁰ Huan quistejqe Rimón Peres huan mochihuatojq ipan Libna.

²¹ Huan quistejqe Libna huan mochihuatojq ipan Rissa.

²² Huan quistejqe Rissa huan mochihuatojq ipan Ceelata.

²³ Teipa quistejqe Ceelata huan mochihuatojq ipan nopa tepet Sefer.

²⁴ Huan quistejqe campa nopa tepet Sefer huan mochihuatojq ipan
Harada.

²⁵ Huan quistejqe Harada huan mochihuatojq ipan Macelot.

²⁶ Teipa quistejqe Macelot huan mochihuatojq ipan Tahat.

²⁷ Huan quistejqe Tahat huan mochihuatojq ipan Tara.

²⁸ Teipa quistejqe Tara huan mochihuatojq ipan Mitca.

²⁹ Huan quistejqe Mitca huan mochihuatojq ipan Hasmona.

* **33:3** 33:3 Ni tonali quemantica huetzi ipan marzo huan quemantica ipan ipejya abril ipan
tocalendario ama.

30 Huan quistejque Hasmona huan mochihuatoj ipan Moserot.

31 Huan quistejque Moserot huan mochihuatoj ipan Bene Jaacán.

32 Huan quistejque Bene Jaacán huan mochihuatoj ipan Hor ipan tali Gidgad.

33 Huan quistejque Hor ipan tali Gidgad huan mochihuatoj ipan Jotbata.

34 Huan quistejque Jotbata huan mochihuatoj ipan Abrona.

35 Huan quistejque Abrona huan mochihuatoj ipan Ezión Geber.

36 Huan quistejque Ezión Geber huan mochihuatoj ipan huactoc tali ten Zin campa Cades.

37 Huan quistejque Cades huan mochihuatoj ipan nopa tepet Hor campa monepantía nopa tali Edom.

38 Huan quej TOTECO quinahuati ma quichihua, tejcoc nopa totajtzi Aarón ipan ne tepet Hor huan nozona mijqui ipan nopa achtohui tonali ten nopa macuilpa metzti ipan nopa israelita calendario[†], quema ya quipiyayaya 40 xihuit para quistoyaj ipan tali Egipto. 39 Huan quema Aarón mijqui ipan nopa tepet Hor, quipiyayaya 123 xihuit.

40 Huan Tanahuatijquet Arad cati itztoya ipan nopa huactoc tali Neguev ipan tali Canaán quicajqui para ajsitihualayayaj nopa israelitame.

41 Huan nopa israelitame quistejque ipan tepet Hor huan mochihuatoj ipan Zalmona.

42 Huan quistejque Zalmona huan mochihuatoj ipan Punón.

43 Huan quistejque Punón huan mochihuatoj ipan Obot.

44 Huan quistejque Obot huan mochihuatoj ipan Ije Abarim campa monepantía ica tali Moab.

45 Huan quistejque Ije Abarim huan mochihuatoj ipan Dibón Gad.

46 Huan quistejque Dibón Gad huan mochihuatoj ipan Almón Diblataim.

47 Huan quistejque Almón Diblataim huan mochihuatoj ipan nopa tepeme ten Abarim cati mocahua más nechca campa quisa tonati ten Nebo.

48 Huan quistejque ipan nopa tepeme ten Abarim huan mochihuatoj ipan nopa tamayamit ipan tali Moab nechca nopa hueyat Jordán, huan iixmelac altepet Jericó cati eltoya ipan seyoc nali. 49 Huan quiquetzque iniyoyoncalhua nechca hueyat Jordán ipan nopa tamayamit ten tali Moab, huan ininchajchaj pejqui campa Bet Jesimot huan ajsic hasta Abel Sitim.

Quenicatza ma momajmacaca tali Canaán

50 Ipan nopa tamayamit ipan tali Moab nechca hueyat Jordán, iixmelac altepet Jericó, TOTECO quicamanalhui Moisés huan quihui:

51 “Xiquinilhui nopa israelitame ya ni: Quema anquixcotonase ni hueyat Jordán huan ancalaquise ipan tali Canaán, 52 xiquinmictica nochi cati itztoque ipan nopa tali. Xiquinsosolhuilica nochi inindioses masque quichitoque ica tet, o ica teposti tatejtejtzontí. Nochi inintaixcopincayohua huan ininteteyohua xiquinsosolhuilica huan nojquiya xijssoloca nochi taixpamit campa tacajcahuaj ipan tepeme. 53 Ximocuilica nopa tali huan nozona ximochantica para anitztose, pampa na nimechmactilía para elis amoaxca. 54 Pero monequi ximomajmacaca nopa tali ica sorteo quej imiyaca imasehualhua sesen hueyi familia. Nopa huejhueyi familias ica más miyacacame quichihuase se sorteo para nopa talme cati achi hueyi, huan nopa

† 33:38 33:38 Ni tonali eltoc ipan julio.

huejhueyi familias cati amo quipiya más miyaqui tacame quichihuase sorteo para nopa talme cati amo más hueyi. Huan ijquiyampa, cati nopa sorteo quinextis para elis iaxca se familia, ya nopa elis iaxca.

⁵⁵ “Pero sinta amo anquintamimictise cati ama itztoque ipan nopa tali, huajca cati mocahuase tahuel amechcuesolmacase quej se cuatejti cati calaquí ipan amoixteyol o quej se huitzti cati calaquí ipan amotacayo. Huan miyac antaijyohuise ipan nopa tali cati nimechmaca. ⁵⁶ Huan na nimechtatzacuiltis amojuanti quej nimoilhuiyaya niquintatzacuiltis inijuanti.”

34

Campa monepantía nopa tali cati moaxcatise

¹ Huan nojquiya TOTECO quiilhui Moisés:

² “Nojquiya xiquinmaca ni tanahuatlime nopa israelitame: Quema ancalactosejya ipan tali Canaán cati nimechmacas para amoaxca, ya ni nopa talme cati ihuaya anmonepantise:

³ “Ica sur anmonepantise ica nopa huactoc tali Zin nechca nopa tali Edom Inepa amotal pehuas ica campa quisa tonati ten nopa Hueyi At Mictoc, ⁴ huan yajtiyas para sur hasta nopa taixtejcolis cati itoca Acrabim Huan panos ipan nopa huactoc tali Zin huan ajsis hasta campa Cades Barnea. Teipa panos campa Hasaradar hasta Asmón, ⁵ huan ten Asmón quitoquilis nopa atajti cati monepantía ica tali Egipto huan quitoquilijtiyas hasta norte campa nopa Hueyi At Mediterráneo.

⁶ “Huan ica campa huetzi tonati anmonepantise ica nopa Hueyi At Mediterráneo.

⁷ “Huan nopa nepamit para amotal ica norte pehuas ica nopa Hueyi At Mediterráneo huan yajtiyas xitahuac para campa quisa tonati hasta ajsis campa nopa tepet Hor. ⁸ Huan teipa ten tepet Hor yas hasta Lebo Hamat, huan teipa hasta Zedad. ⁹ Teipa ten Zedad yas hasta Zifrón huan tamis ipan Hazar Enán. Ya ni elis nopa nepamit ten amotal ica norte.

¹⁰ “Huan nopa nepamit ten amotal ica campa quisa tonati, pehuas ipan Hazar Enán huan yas hasta Sefam. ¹¹ Huan ten Sefam inepa amotal yas hasta Ribla achi más para campa quisa tonati ten Aín. Huan ten Aín temos hasta inaliyo campa quisa tonati ipan nopa Hueyi At Cineret. ¹² Huan quitoquilis nopa hueyat Jordán hasta itamiya nopa Hueyi At cati itoca Mictoc.

“Nochi ya ni elis nopa nepamit cati quiyahualohua amotal.”

Quenicatza ma moxelhuilica nopa tali

¹³ Huan Moisés quinmacac nopa israelitame ni tanahuatili:

“Huajca ya ni nopa tali cati anmomajmacase ica sorteo quej TOTECO technahuatijtoc. Huan quiselise nochi nopa chicnahui huejhueyi familias huan tajco cati mocajtoque. ¹⁴ Pampa nopa huejhueyi familias Rubén ihuaya Gad huan nopa tajco hueyi familia Manasés ya mocuillijtoque nopa tali cati elis iniaxca, ¹⁵ ipan ni nali ten hueyat Jordán. Inintal mocahua achi más para campa quisa tonati ten altepet Jericó ica iixmelac ipan seyoc nali ni hueyat.”

¹⁶ Huan TOTECO quicamanalhui Moisés huan quiilhui:

¹⁷ “Para temajmacase nopa tali niquintapejpenijtoc Eleazar nopa totajtzi huan Josué, icone Nun. ¹⁸ Pero nojquiya ma quinpalehuica sese tayacanquet ipan sesen hueyi familia. ¹⁹⁻²⁸ Huajca nica eltoc inintoca sesen tayacanquet ten sesen hueyi familia cati quinpalehuise:

Familia, Tayacanquet
 Judá, Caleb, icone Jefone
 Simeón, Semuel, icone Amiud
 Benjamín, Elidad, icone Quislón
 Dan, Buqui, icone Jogli
 Manasés icone José, Haniel, icone Efod
 Efraín icone José, Kemuel, icone Siftán
 Zabulón, Elizafán, icone Parnac
 Isacar, Paltiel, icone Azán
 Aser, Ahiud, icone Selomi
 Neftalí, Pedaél, icone Amiud

²⁹ Huajca ya ni eltoc inintoca nopa tacame cati TOTECO quintequimacac ma quinxelhuilica nopa tali Canaán nopa israelitame.”

35

Altepeme cati levitame quiselise

¹ Huan quema nopa israelitame noja itztoyaj ipan nopa tamayamit ipan tali Moab nechca hueyat Jordán huan iixmelac altepet Jericó, TOTECO quicamanalhui Moisés huan quiilhui:

² “Xiquinnahuati israelitame para sesen hueyi familia monequi quiiyocacahuase sequij altepeme ipan nopa tali cati quiselise para quinmacase levitame para ipan itztose. Nojquiya ma quinmacaca potrerós campa sacayo cati quiyahualohua nopa altepeme. ³ Quej nopa, nopa levitame quipiyase campa itztose, huan quipiyase sacat para inihuacaxhua huan ininborregojhua. ⁴ Nopa potrerós cati anquinmacase monequi elis 450 metros yahualtic ten nopa tepamit cati quiyahualojtoc sese altepet. ⁵ Nochi nopa potrero cati quiyahualohua se altepet elis cuadrado huan quipiyas 900 metros más hueyi ipan sesen lado huan amo quej cati quipiya nopa tepamit cati quiyahualohua nopa altepet ipan nopa lado. Huan nopa altepet mocahuas tatajoc, huan nopa potrerós campa quintacualtise inintapiyalhua, nochi yahualtic.

Altepeme para ipan momanahuse cati temictijtoque

⁶ “Anquinmacase levitame 42 altepeme huan iyoca anquinmacase chicuase altepeme cati monequi xijtoca xitca: ‘altepeme campa huéli momanahuse’. Huan nozona ipan nopa chicuase altepeme, huélis cholos se masehuali cati quimictijtos se acajya. ⁷ Huajca ica nochi monequi xiquinmacaca 48 altepeme, sese ica ipotreros para inintapiyalhua. ⁸ Huan ni inialtepehua levitame monequi anquinquixtise ten inintal nochi huejhueyi familias campa huéli. Huan nopa huejhueyi familias cati hueyi inintal quinmacase más altepeme nopa levitame, huan nopa huejhueyi familias cati achi pisiltzi inintal amo miyac altepeme quinmacase.”

Altepeme campa huéli momanahuse (Dt. 19:1-13; Jos 20:1-9)

⁹ Huan TOTECO nojquiya quiilhui Moisés:

¹⁰ “Xiquinilhui nopa israelitame ya ni: ‘Quema anquiixcotonase nopa hueyat Jordán huan ancalaquise ipan tali Canaán, ¹¹ monequi anquitapejpenise chicuase “altepeme campa huéli momanahuse” campa huélis calaquiti para momanahuis se cati temictijtoc masque amo quinequiyaya. ¹² Huan nozona amo huélis quicuepilis iteixmatca nopa mijcatzi cati

quinamiqui para momacuepas ica cati quichijtoc. Quej nopa se cati temictis amo miquis hasta hueli monextis iniixpa jueces huan masehualme para quinilhuis taya panoc. ¹³ Huan quej ni anquiniyocatalise altepeme campa tacame momanahuise: Xijtapejpenica eyi altepeme ipan ni lado ten hueyat Jordán campa más nechca campa quisa tonati. ¹⁴ Huan nopa seyoc eyi altepeme anquitapejpenise ipan nopa seyoc lado ten hueyat Jordán ipan tali Canaán. ¹⁵ Huan nopa chicuase altepeme elis campa momanahuise huan motatise nochí israelitame huan sequinoc tali ehuan cati itztoque amohuaya quema quimictise se acajya, pero amo quichijque ica iniyolo o amo quinequiyayaj.

¹⁶ “ Pero sinta se acajya quimaquilis seyoc ica se teposti huan nopa cati quicocojtoc miquis, huajca nopa tacat nelía se temictijquet huan quena, nopa temictijquet quiپیya para anquimictise.

¹⁷ “ ‘O sinta se acajya quimaquilis seyoc ica tet huan nopa masehuali miquis, huajca yaya se temictijquet, huan quiپیya anquimictise.

¹⁸ “ ‘O sinta se acajya quimaquilis seyoc ica cuahuit huan nopa masehuali ica ya nopa miquis, huajca yaya cati temaquili, mochijtoc se temictijquet huan monequi anquimictise. ¹⁹ Iteixmatca nopa mijcatzi cati quinamiqui momacuepas quiپیya quimictis quema quipantis.

²⁰ “ ‘Sinta se acajya quiojchiya seyoc, huan quicuatopehuas o quimajcahuilis se tamanti pampa quicualancaita, o san pampa quinequi cualanti; sinta nopa tacat miquis, huajca yaya se temictijquet. ²¹ O masque se quimaquilis seyoc ica imax pampa mocualanijtoque, huan nopa tacat miquis, huan amo teno quihuicayaya ipan imax, huajca cati tecoco quiپیya para miquis pampa mochijtoc se temictijquet. Huan monequi iteixmatca nopa mijcatzi ma momacuepas quema quipantis huan quimictis.

²² “ ‘Pero sinta se acajya quicuatopejqui seyoc cati amo ihuaya cualaniyaya, o sinta quimajcahuili se tamanti, pero amo quichiyayaya ma pano ya nopa, huajca ya nopa amo san se. ²³ O sinta amo quicualancaitayaya, yon amo quichiyayaya quicocos, huan huetzis ten imaco se tenijqui huan quimictis, huajca ya nopa amo san se. ²⁴ Sinta quej ni pano huan amo quicualancaitayaya, huajca monequi anisraelitame anmosentilise huan anquitajtolsencahuase cati melahuac ica ya huan iteixmatca nopa mijcatzi. ²⁵ Sinta anquijtaj para amo quinamiqui miquis cati tecocojtoc, huajca monequi anquimanahuise ten imaco iteixmatca nopa mijcatzi, huan anquicahuilise ma mocahua ipan nopa altepet ten tamanahuili. Huan ya ni nopa tanahuatili cati monequi quitoquilise ipan se altepet campa tacame momanahuise. Cati tecocojtoc monequi nochipa itztos ipan nopa altepet ten tamanahuili hasta miquis nopa hueyi totajtzi cati quialtjtoque nopa aceite para quiiyocatalise para TOTECO. ²⁶ Pero sinta nopa tacat cati temictijtoc quisas ipan nopa altepet cati ipan momanahuía, ²⁷ huan iteixmatca nopa mijcatzi quipantis huan quimictis, huajca cati momacuectoc amo quihuicas tajtacoli pampa quimicti, pampa quisqui ten nopa altepet. ²⁸ Pampa cati temictijtoc monequi senitztos ipan nopa altepet campa tacame momanahuise hasta miquis nopa hueyi totajtzi. Huan sinta mocahuas hasta miquis nopa hueyi totajtzi, huajca quena, huelis tacuepilis ipan ichaj ipan ital.

²⁹ “ ‘Huan ya ni elis se tanahuatili para anquitoquilise hasta amoixhuihua quiپیyase iniixhuua.

Tanahuatilme para aqjiya monequi anquimictise

30 “Sinta se acajya quimictía seyoc huan itztoque masehualme cati quiitaque huan nechtestigojquetzase noixpa para melahuac quiitaque quema quimicti, huajca monequi anquimictise nopa temictijquet. Pero sinta itztoc setzi testigo cati quiitac ten panoc, amo aquí huelis anquimictise por cati quiijtohua san se masehuali.

31 “Nojquiya amo huelis anquiselise itomi se tacat cati temachti temictijtoc ica cualanti para momanahuis huan amo teno ipantis. Sinta temachti se temictijquet, quiyiya miqis.

32 “Nojquiya amo hueli anquiselise itomi se cati monequi nochipa itztos ipan se altepet campa masehualme momanahuisse, huan anquicahuilise ma tacuepilli ichaj quema ayemo miqui nopa hueyi totajtzi.

33 “¡Amo! Monequi anquitoquilise nochi ni tanahuatili para amo anquichihuase amo tapajpactic nopa tali huan amo anquicahuilise ma momahua cati amo cuali nozona. Pampa se cati temictía quichihua amo tapajpactic nopa tali huan quichihua ma momahua cati amo cuali ipan nopa tali. Huan yon se amo aquí huelis quipajpacas nopa tali ten nopa esti cati quitoyajqui, sinta amo miqis nopa temictijquet cati temicti ica cualanti.

34 “‘Ximomocuitahuica para amo anquichihuase amo tapajpactic nopa tali campa anyase. Amo xijcahuaca ma momahua cati amo cuali. Pampa na, niamoTECO, nozona nojquiya nimocahuas para niitztos amohuaya.’”⁵

36

Cati sihuame quiselise

¹ Nochi tayacanani ten nopa familia Galaad, cati elqui icone Maquir, cati elqui icone Manasés, cati elqui icone José, yajque quiitatoj Moisés huan nopa israelita tayacanani, huan quiilhuijque:

² —Moisés, TOTECO mitznahuati xijtajcoita nopa tali huan ica sorteo xijmajmaca sese israelita cati quitocaros para quiselis. Huan nojquiya TOTECO mitznahuati para nopa tali cati quitocarohuayaya toicni Zelofehad, xiquinmaca iichpocahua pampa yaya amo quinpixqui telpocame. ³ Pero sinta monamictise ica tacame ipan sequinoc huejhueyi familias ten tiisraelitame, nopa tali cati quiselijque ipan tohueyi familia, teipa elis iniaxca nopa sequinoc huejhueyi familias cati inihuaya monamictise. Quej nopa techcuilijtiyase total cati tijselijtoque ipan sorteo. ⁴ Pampa teipa quema ajsin nopa Xihuit Quema Nochi Elis Majcajtoc quema quinmajcahuase nochi tetequipanohuani ipan tali Israel, nopa tali cati eltoya iaxca tohueyi familia Manasés ayecmo elis toxca huan mochihuas ital seyoc hueyi familia cati ihuaya monamictijtose.

⁵ Huajca Moisés quitajtani TOTECO huan teipa quinyolmelajqui nochi nopa israelitame cati TOTECO quinahuatijtoya. Quiijto:

—Ni tacame ipan ni hueyi familia Manasés cati icone José quiyij razón. ⁶ Huajca ya ni cati TOTECO tanahuatia. Iichpocahua Zelofehad huelise monamictise ica cati quinequise, pero monequi inihuehuejhua nojquiya hualase ipan nopa hueyi familia Manasés quej injuanti. ⁷ Quej nopa yon se tali cati quiseli se hueyi familia amo panos ipan seyoc hueyi familia. Pampa sesen hueyi familia ten israelitame monequi mocahuase ica nopa tali cati quitocaro nopa hueyi familia para quiselis. ⁸ Huan quema quinamiqui para se sihuat ipan ten hueli hueyi familia quiselis se tali, quiyiya monamictis ica se tacat cati huala ipan san se ihueyi familia ihuaya. Huan yeca sesen israelita mocahuis cati quiselijtoc ten ya ihueyi familia. ⁹ Quej nopa se tali cati quiselis se hueyi familia para iaxca, amo panos ipan seyoc hueyi

familia. Huan sesen hueyi familia ten israelitame mocahuase ica nopa tali cati quitocarohua.

¹⁰ Huajca iichpocahua Zelofehad quichijque nochi cati TOTECO quinahuati Moisés. ¹¹ Maala, Tirsa, Hogla, Milca huan Noa, iichpocahua Zelofehad, monamictijque ica ininconeuhua inintiojhua. ¹² Huajca inihuehujhua nojquiya itztoyaj ipan nopa hueyi familia Manasés cati elqui icone José huejcajquiya. Huan yeca nopa tali cati quiselijque nopa ichpocame mocajqui ipan inintal nopa hueyi familia Manasés campa monequiyaya.

¹³ Huajca nochi ya ni nopa tanahuatili huan tamachtili cati TOTECO quinmacac israelitame ica Moisés campa nopa tamayamit ipan tali Moab, nechca hueyat Jordán, huan iixmelac altepet Jericó.

Deuteronomio

Itamiya camanal Moisés

¹ Ni amatapohuali quipiya nopa camanali cati Moisés quinilhui nochi israelitame quema itztoyaj ipan nopa huactoc tali ipan neca nali hueyat Jordán para campá quisa tonati. Quiquetzttoyaj iniyoyoncalhua ipan nopa tamayamit campá itoca Arabá, nechca altepet Suf. Nopa altepet Parán, eltoya ipan se lado huan altepeme Tofel, Labán, Hazerot huan Dizahab ipan seyoc lado huan nopa israelitame tatajco mocajque. ² Masque san monequi 11 tonati para masehualme icxinejnemise ten tepet Horeb* hasta Cades Barnea sinta pano nechca tepet Seir, ³ nopa israelitame huejcajque 40 xihuit ipan ojti para ajsise. Huan quema panotoya 40 xihuit huan seyoc 11 metzti, ipan nopa achtohui tonali ten nopa metzti majtacti ipan nopa israelita calendario † Moisés quinilhui nopa israelitame nochi ni camanali cati TOTECO quinahuatijtoya ma quinilhui. ⁴ Quincamanalhui quema nopa israelitame ya quitantoyaj Sehón Tanahuatijquet ten nopa amorreos cati itztoya ipan altepet Hesbón huan Tanahuatijquet Og ten tali Basán cati itztoya ipan altepet Astarot nechca Edrei. ⁵ Huajca ipan nopa tonali quema nopa israelitame noja itztoyaj ipan tali Moab huan ayemo quiixcotontoyaj nopa hueyat Jordán, Moisés pejqui para sempa quinilhuis nopa israelitame ni tanahuatilme. Huan quinilhui:

⁶ “Quipiya 40 xihuit TOTECO Dios technojnotzqui tiisraelitame ipan tepet Horeb huan quiijto: ‘Ya anhuejcajtoque miyac tonali ipan ni tepet, ⁷ huan monequi ximocualtica huan xiyaca campá nopa tachiquilme ipan inintal nopa amorreos. Ximoaxcatitij nochi nopa tali campá onca tachiquilme huan nochi pilaltepztitzi cati nechca. Nojquiya ximoaxcatica nochi talme ipan nopa huactoc tali. Huan ximoaxcatica campá tepeme, huan campá tamayamit, huan campá nopa huactoc tali cati itoca Neguev huan hasta iteno nopa Hueyi At Mediterráneo campá inintal cananeos. Nojquiya ximoaxcatitij nopa tali Líbano hasta nopa hueyat Eufrates. ⁸ Nimechmactilía nochi ni tali. Huajca xiyaca huan ximocuijcuilica, pampá nochi ya nopa eltoc nopa tali cati na, niamoteco, niquintencahuili amohuejcapan tatahua Abraham, Isaac huan Jacob para niqinmacasquía inihuaya amojuanti cati anininteipan ixhuihua.’

Moisés quinquimacac jueces

(Éx 18:13-27)

⁹ “Ipan nopa tonali nojquiya na nimechilhui para na noseltitzi amo ni-huelis nimechyacanas nochi amojuanti, pampá anitztoque quej se tamamali cati tahuel etic para nijhuicas noselti. ¹⁰ TOTECO Dios amechmacatoc miyac amoconehua, huan ama tiisraelitame tiitztoque tahuel timiyaqui quej imiyaca sitalime ipan ilhuicacti. ¹¹ Nojquiya nimechilhui para TOTECO Dios cati tohuejcapan tatahua quiixmatque ma amechmiyaquili seyoc mil huelta imiyaca más que ama anitztoque, huan ma amechtiochihua quej techtencahuilijtoc para quichihuas. ¹² Pero nimechilhui para na noseltitzi amo huelis nijhuicas nochi amocuesol. Amo huelis nijtajtolsencahuas sesen

* 1:2 1:2 Nopa tepet Horeb nojquiya quitocaxtláj tepet Sinaí, pero san se tepet. † 1:3 1:3 Ni tonali quemantica huetzi ipan enero huan quemantica ipan febrero ipan cati ama tocalendario.

tamanti quema anmocualanise. ¹³ Achi cuali xiquintapejpenica tacame ten sese hueyi familia para techpalehuise. Xiquintapejpenica tacame cati talnamiquij huan nimantzi huelis quichihuase se tenijqui. Huan injuanti niqumitalis ma amechyacanaca. Quej nopa nimechilhui.

¹⁴ “Huan anquijtojqe: ‘Cualtitoc cati tiquijtohua.’

¹⁵ “Huajca niquntequimacac tayacanca tacame cati amoteixmatcahua cati anquintapejpenijtoyaj. Niqumitali tacame cati talnamiquij huan cuali quichihuaj inintequi. Sequij niqumitali ma quinmocuitahuica se mil masehualme, sequinoc 100 masehualme, sequinoc 50 masehualme huan sequinoc 10 masehualme para injuanti ma tatajtolsencahuaca campa amojuanti. ¹⁶ Nojquiya niquinnahuati nopa jueces: ‘Xitajtolsencahuaca xitahuac quej quinamiqui, masque se cualani ica israelitame cati icnime o se israelita masehuali ica se cati seyoc tali ehua. ¹⁷ Amo xiquinchicoicnelica masehualme quema antetajtolsencahuaj. Masque tominpiyaj o teicneltziti, nochi xiquinchihuica cati xitahuac. Amo xiquimacastica yon se masehuali pampa antetajtolsencahuaj ica itequiticayo Toteco Dios. Huan sinta huala se tamanti achi ohui, ya nopa techhualiquilica, huan na nijsencahuas.’

¹⁸ “Huan ipan nopa tonali nojquiya nimechilhui miyac tamanti cati monquiyaya anquichihuase.

Israelitame quitachilitoj nopa tali
(Nm 13:1–14:4)

¹⁹ “Huan tiquisque ten tepet Horeb quej TOTECO Dios technahuati. Huan tijpanotinenque nochi nopa huactoc tali cati tahuel hueyi huan tatemajmati quej anquimatij. Huan tiyajque ipan tepeme campa nopa amorreos huan teipa tiajsique tali Cades Barnea. ²⁰ Huan quema tiajsicoj ipan inital nopa amorreos, nimechilhui amojuanti huan amotatahua para nopa tali elqui cati TOTECO Dios techmacas. ²¹ Niqumijto: ‘Xiquitaca TOTECO Dios ya quitaliyto nopa tali toixmelac, huajca xitejcoca huan ximoaxcatitij pampa quej nopa techilhuitoc. Amo ximajmahuica, yon amo ximotzinquixtica.’

²² “Pero amotatahua hualajque ica na huan quijtojqe para achtohui ma tiqumitanica sequij tacame ma techyacanaca huan ma quiixmatitij nopa tali. Quej nopa quema mocuepasquij techmachiltisquij taya ojti tiqumizquise huan ipan taya altepeme tiajsitij.

²³ “Huan nijcualcajqe cati quijtojqe huan niqumitanqui 12 tacame, se tacat ten sesen hueyi familia. ²⁴ Huan injuanti yajque huan tejcoque ipan nopa tepeme huan teipa ajsitoj campa itoca Tamayamit ten Escol. Huan campa hueli nopa tali quiixmatitoj. ²⁵ Huan quicuutejqe se ome cuactati cati oncayaya ipan nopa tali huan techhualiquilijque. Technextilijque para, quena, nelia cuali nopa tali cati TOTECO Dios techmacayaya. ²⁶ Pero amotatahua amo quinejqe calaquise. San quitahuelcajqe nopa camanali cati TOTECO Dios techmacac.

²⁷ “Huan ipan ininchajchaj pejqe camanaltij quej amo monequi huan quijtojqe para TOTECO amo techicneliyaya huan yeca techquixti ten tali Egipto para techtemactilis inimaco ni amorreos para ma techtzontamiltica. ²⁸ Quijtojqe para amo huelise yase pampa iniicnihua cati yajtoyaj quinmajmaticoj huan quinilhuijqe para itzttoyaj nozona más miyaqui masehualme que tojuanti. Techilhuijqe para nozona itzttoyaj masehualme huejhueyi huan inialtepehua quipixtoyaj tepamit huejcapantic hasta ilhuicac. Nojquiya injuanti quinitzttoyaj iconehua Anac nozona, nopa masehualme cati tahuel huejcapantique.

²⁹ “Pero na niqinilhui: ‘Amo ximomajmatica huan amo xiquinimacastica.
³⁰ TOTECO Dios techyacantiyas huan yaya tatehuis por tojuanti huan quichihuas huejhueyi tamanti quej tiquitaque techchihuili ipan tali Egipto, ³¹ huan ipan nochi nopa ojti ipan huactoc tali campa amoTECO Dios techyacantiyajqui hasta ipan nopa tonali. Quena, amoTECO Dios techquechpanojtoc quej se tetaj quichihua ica ipilcone.’

³² “Pero masque quej nopa niqinilhui, amotatahua amo quineltoaque icamanal TOTECO Dios, ³³ yaya cati techyacantiyajqui huan quitapejpenitijiyajqui sesen lugar para ma tijquetztiyaca tochajchaj ten yoyomit ipan toojhui hasta ama. Yaya ica tayohua techtaahuilijtinentoya ica se tilelemecti ipan ojti campa monequiyaya tinejnemise huan ica tonaya techyacanayaya ica se mixti.

TOTECO cualanqui ica nopa israelitame
(Nm 14:20-35)

³⁴ “Huajca quema TOTECO quicajqui cati amotatahua quijtohuayayaj, nelía cualanqui miyac huan quijto ³⁵ para yon se masehuali cati ya motantoya ipan nopa tonali, amo huelis quiitas nopa cuali tali cati quintencahuili inihuejcapan tatahua. ³⁶ TOTECO quijto para san Caleb, icone Jefone, quena, quiitas. Huan quijto para yaya ica iconehua quiselise nopa tali cati quitachilitoj pampa yaya senquisa quitoquili.

³⁷ “Nojquiya ica cati quichijque amotatahua, TOTECO cualanqui ica na, niMoisés, huan techilhui para amo nihuelis niajsis ipan nopa tali tatencahuili. ³⁸ Pero techilhui para Josué, icone Nun, cati techpalehuía, yaya huelis ajsis nopona. Huajca techilhui para ma nijjolchicahua Josué pampa yaya amechmajmacas nopa tali nochi anisraelitame. ³⁹ Huan TOTECO camanaltic ten amojuanti huan quijto: ‘Huan amoconeua cati ayemo teno quimachilíaj, injuanti quiselise nopa tali. Huan masque anquijtohuaj para amocualancaitacahua amechcuilisquíaj, injuanti elise cati calaquise ipan nopa tali cati nimechmacas para anmoaxcatise.’ Quej nopa quijto TOTECO ipan nopa tonali.

⁴⁰ “Teipa TOTECO quinilhui amotatahua para monequi ma tacuepilica ipan nopa huactoc tali huan ma panoca ipan ojti cati yahui para Hueyi At Chichiltic.

Inincualancaitacahua quintanque nopa israelitame
(Nm 14:39-45)

⁴¹ “Huan ipan nopa tonali amotatahua quicajque cati TOTECO quijto huan techilhuijque para nelía titajtolchijtoyaj ica ya, huan para nimantzi yasquíaj huan tatehuisquíaj quej TOTECO Dios quinnahuatijtoya. Huan amotatahua quicuique teposti para ica tatehuse, huan mocualtalijque para tej cose ipan nopa tepet para tatehuitij. Moilhuijque para amo ohui elisquía para tatehuitij nopona.

⁴² “Pero TOTECO techilhui ma niqinilhui ma amo tejcoca para tatehuitij pampa yaya amo itztosquía inihuaya, huan inincualancaitacahua quinmicitise.

⁴³ “Pero masque na, niamoTECO, niqinilhui amotatahua ma amo yaca, amo techtaaquilijque, san mosentanchijque huan yajque campa nopa tepeme. ⁴⁴ Huan nopa amorreos cati itztoyaj nopona, panquisque huan quintojtocatijajque amotatahua quej tacame quinquixtíaj etzame. Huan quintanque. Huan inintacayohua amotatahua huetzque ten Seir hasta Horma. ⁴⁵ Huan teipa cati noja mocajque mocuetque mochoquiliyayaj iixpa

TOTECO, pero yaya amo quitacaquili inintequipachol. ⁴⁶ Huan yeca monejqui amotatahua huan nochi tojuanti taniel tihuejcajqe para tiitztoyaj ipan tali Cades.

2

Israelitame nejnentiyaque miyac xihuit

¹ “Teipa titacuepilijque campa huactoc tali ipan nopa ojti cati yahui para nopa Chichiltic Hueyi At pampa quej nopa technahuati TOTECO. Huan para miyac xihuit tijyahualojtinenque nopa tepet Seir.

² “Huan teipa TOTECO techilhui, ³ para ya huejcajtoc san tijyahualojtine-mij nopa tepet. Techilhui ma tiyaca ica norte, ⁴ huan para ma niqunilhui nopa israelitame ma panoca ipan inintal iixhuihua Esaú cati itztoque ipan tali Seir. Techilhui injuanti techimacasiyayaj, huajca monequi ma timomocuitahuica miyac. ⁵ Monejqui ma amo tiquinpehualtica para timotehuisse pampa TOTECO amo techmactilijtoya yon se pilquentzi ten inintal. Techilhui campa tachiquili ipan tali Seir mocahuas iniaxca iixhuihua Esaú pampa yaya quinmactilijtoya. ⁶ TOTECO techilhui monequi tiquincohuilisquíaaj tacualisti huan nojquiya ma tiquincohuilica at para tiquise. Quena, temacht monequi ma tiquinixtahuilica nochi cati tijtequihuijqe. ⁷ Techilhui ma tijtacaquilica pampa yaya techtiochijtoya ipan nochi tamanti cati tijchijtoyaj. Techmocuitahuijtoya ipan toojhui ipan huactoc tali huan ipan nochi nopa 40 xihuit yaya itztoya tohuaya huan amo teno techpolojtoya. Nochi ya ni technahuati TOTECO Dios.

⁸ “Huajca teipa tinejnenque huan tijpanoque inintal toicnihua cati iteipan ixhuihua Esaú ipan Seir. Huan tiquixcotonque nopa ojti ipan huactoc tali cati yahui ica sur para altepeme Elat huan Ezión Geber. Huan tiyajque quentzi ica norte ipan nopa ojti ipan nopa huactoc tali cati itoca Moab.

⁹ “Huan TOTECO techilhui: ‘Amo xiquincualancamacaca, yon amo xiquinpehualtica Moab ehuan para amo amechtehuisse pampa injuanti iixhuihua Lot huan niqunmacatoc nopa tali Ar para iniaxca. Huan amo nimechmacas yon se quentzi ten nopa tali para amoaxca.’ ¹⁰ (Huejcajquiya nopona itztoyaj taniel miyaquí emitame, se tamanti masehualme cati huejcapantique quej iconehua Anac. ¹¹ Huan nopa moabitame quintocaxtiyayaj nopa emitame huan iconehua Anac, ‘emitame o huejcapantique masehualme’.) ¹² Huan achtohuiya ipan tali Seir itztoyaj nopa horeos, pero teipa iconehua Esaú quinxitijque huan quinsemanque. Huan nopona mocajque iixhuihua Esaú ininpataca san se quej anisraelitame anquinxitise nopa masehualme cati itztoque ipan nopa tali cati TOTECO amechaxcatis.)

¹³ “Huan teipa TOTECO techilhui ma timotananaca nimantzi huan ma tiquixcotonaca nopa atajti cati itoca Zered. Huajca tiquixcotonque nopa atajti.

¹⁴ “Huajca ya panotoya 38 xihuit ten quema achtohuiya tiisraelitame tiquisatoj ipan Cades Barnea huan hasta nopa tonal quema tiquixcotonque nopa atajti Zered para nelía tiyase ipan tali tatencahuali. Ipan nopa miyac xihuit mictiyahuiyayaj nochi israelita tacame cati huejcajquiya ya quiaxitijtoyaj 20 xihuit huan huelosquíaaj tatehuitij quema Toteco quiniilhui ma yaca, pero amo quinejqe yase. Huajca TOTECO quitestigojquetzqui para amo hueli tiyase ipan nopa tali hasta nochi nopa tacame miquisse huan quej nopa panoc. ¹⁵ TOTECO ica ichichualis quintzontamiltijiyajqui hasta senquisa nochi nopa tacame mijque.

16 “Huan quema ya mictoyaj senquisa nochi cati quipiyayaj xihuit para tatehuse ipan nopa tonali huejcajquiya huan amo yajque, ¹⁷ TOTECO tech-nojnotzqui huan techilhui ¹⁸ ama, quena, monequi tiquixcotonase tali Moab huan tiyase hasta Ar. ¹⁹ Pero techilhui para quema timopantise inihuaya nopa amonitame cati nojquiya iixhuihua Lot, ma amo tiquincualanmacaca, yon ma amo tiquinpehualtica para tiquintehuse. Yaya quijto para amo techmacas yon se quentzi ten inintal pampa ya quinmacatoc iixhuihua Lot.” Quej nopa quijto.

²⁰ (Huejcajquiya nochi moilhuique para ni tali eliyaya inintal nopa masehualme cati huejcapantique pampa nozona itztoyaj nica huan nopa amonitame quintocaxtiyayaj zomzomeos. ²¹ Huan itztoyaj tahuel miyaqui masehualme huejcapantique. Quipiyayaj san se inihuejcapanca quej iixhuihua Anac, pero TOTECO quintzontamilti ica nopa amonitame huan amo quincahuili ma mocahuaca para itztose ipan ni tali. ²² TOTECO san se quichijqui ica iixhuihua Esaú cati ama itztoque ipan tali Seir. TOTECO quintzontamiltijiyajqui nopa horeos iniixpa iixhuihua Esaú para injuanti huelqui mocahuase ipan inintal campa ama itztoque. ²³ Nojquiya quej ni quinpanoc nopa heveos cati itztoyaj ipan altepeme hasta Gaza. Hualajque nopa caftoreos ten tali Caftor huan quintzontamilticoj huan teipa mocajque nopa filisteos nopona.)

Huan Moisés quinilui: ²⁴ “Huajca TOTECO techilhui ma timotananaca huan ma tiquisaca para tiquixcotonase nopa atajti Arnón. Techilhui para yaya techmactilisquia nopa Tanahuatijquet Sehón cati quinnahuatia amorreos ipan Hesbón. Quijto nochi ital mocahuas tomaco para timocuijcuilise. Huajca quema tiajsique nopona techilhui, para ma tijpehualtica tijtehuse para huelis timoaxcatise nopa tali. ²⁵ Huan TOTECO quijto para ipan nopa tonali quichihuas para masehualme campa hueli ipan taltipacti ma pehuaca techimacasica. Quena, techilhui para masehualme huihui- case masque san quicaquise se acajya camanalti ten tojuanti tiisraelitame.

Israelitame qitanque Tanahuatijquet Sehón (Nm 21:21-30)

²⁶ “Huajca quema tiitztoyaj ipan huactoc tali cati itoca Cademot, na, ni Moisés, niqintitanqui tacame ma quicamanalhuitij Tanahuatijquet Sehón para ma amo cualani, ²⁷ pero ma techcahuili tipanose ipan ital. Quilhuijque para timocahuase ipan nopa hueyi ojti campa nochi panoj. Amo tiquitzquisquiaj yon se tamanti. ²⁸ Nochi tacualisti cati tijcuasquiaj tiquincohuilisquiaj. Nojquiya nochi at cati tiquisquiaj nojquiya tiquincohuilisquiaj. San monequiyaya techcahuilis tiicxinejnemise huan tipanose ipan nopa ojti ipan ital. ²⁹ Quilhuitoj para ya techcahuilijque ma tijpanoca inintal iixhuihua Esaú cati itztoque ipan Seir huan nopa moabitame cati itztoque ipan Ar. Quilhuitoj para tojuanti tiyahuij hueyat Jordán para tiquixcotonase huan tiajsise ipan nopa cuali tali cati TOTECO Dios techmaca. Quej nopa nitatitanqui ma quilhuitij Tanahuatijquet Sehón.

³⁰ “Pero amo quinejqui ma tijpanoca ital pampa TOTECO Dios quiyoltetil- ijtoya para huelis quitalis nopa Tanahuatijquet amomaixco quej quichijtoc ama.

³¹ “Huan teipa TOTECO techilhui: ‘Ya nipejtoc para nijtalis amomaco Tanahuatijquet Sehón ica nochi ital. Xipehuaca ximoaxcatoca pampa ya nopa cati nimechmaca.’

³² “Huajca Tanahuatijquet Sehón ica nochi imasehualhua techtehuicoj ipan Jahaza, ³³ pero TOTECO Dios techmactili tomaco para ma tiquintanica inihuaya nochi iconehua huan imasehualhua. ³⁴ Huan timoaxcatijque nochi ialtepehua huan nojquiya tiquinmictijque nochi tacame, sihuame huan coneme ipan sese altepet huan amo aqui tijcajque ma itzto. ³⁵ San timoaxcatijque nopa tapiyalme huan nochi tamanti cati pajpatiyo cati tijpantijque ipan nopa altepeme cati tiquintanque.

³⁶ “Huajca tiquintanque nochi altepeme ten altepet Aroer cati mocahua nechca hueyat Arnón huan nochi altepeme ipan tamayamit hasta altepet Galaad. Yon se altepet amo huelqui quiiyohui totatehuilis pampa TOTECO Dios techmactilijtoya tomaco. ³⁷ Pero amo tiquintehuijque amonitame. Amo tiquincuilijque inintal nechca nopa hueyat Jaboc, yon nopa altepeme cati eltoc campa tepeme, yon nopa sequinoc altepeme cati TOTECO Dios technahuatijtoya ma amo tiquintehuaica.

3

Israelitame quitanque Tanahuatijquet Og

(Nm 21:31-35)

¹ “Teipa tiyajque ipan seyoc ojti para tali Basán para tijtehuise Tanahuatijquet Og. Huan yaya huan isoldados nimantzi techtehuicoj ipan piltaltzi Edrei.

² “Huan TOTECO techilhui: ‘Amo xiquimacasi pampa nijtalijtoc amomaco nopa tanahuatijquet ihuaya nochi imasehualhua huan inintal. Huan anquintanise quej anquichijque ica Tanahuatijquet Sehón cati mosehujtoya para tanahuatis ipan altepet Hesbón.’

³ “Huajca quej nopa TOTECO Dios techcahuili ma tijtanica Tanahuatijquet Og ica nochi imasehualhua. Huan tiquintamimictijque huan amo tijcajque yoltoc yon se. ⁴ Huan timoaxcatijque nochi 60 altepeme campa tali Argob cati eliyaya iaxca Tanahuatijquet Og. Yon se altepet amo tijcajque cati amo timocuilijque. ⁵ Huan nochi nopa altepeme eltoya cuali tasenchuali ica tepamit cati huejcapantic, huan quipiyayaya huejhueyi caltemit cati cuali motzacuaj. Nojquiya timoaxcatijque nochi sequinoc altepeme cati amo motzactoyaj ica tepamit. ⁶ Huan tiquintamimictijque quej tijchijque ica Tanahuatijquet Sehón ten Hesbón huan imasehualhua. Tiquinmictijque nochi tacame, sihuame huan coneme ipan nochi nopa altepeme. ⁷ Pero inintapiyalhua timocuijcuilijque. Nojquiya tijhuicaque nochi tamanti cati ipati.

⁸ “Huajca ica ya nopa tijpixtoyaj tomaco nochi nopa talme cati quinhuatiyayaj nopa ome tanahuatiani ten nopa amorreos ipan nica nali hueyat Jordán. Elqui toxca ten nopa hueyat Arnón hasta tepet Hermón. ⁹ (Nopa Sidón ehuan quitocaxtiyayaj tepet Hermón ica ‘tepet Sirión’, huan nopa amorreos quitocaxtiyayaj ‘tepet Senir’.) ¹⁰ Huan nojquiya elqui toxca nochi nopa altepeme ipan tali Galaad huan nochi cati eltoya ipan tali Basán hasta Salca huan Edrei. Nochi ya ni achtohuiya quinhuatiyaya Tanahuatijquet Og ipan Basán.

¹¹ “San mocajtoya Tanahuatijquet Og ten nopa huejcapantique masehualme cati inintoca refaitame. Huan itapech Tanahuatijquet Og eliyaya tachihuali ica teposti huan ihuehueyaca quipiyayaya quipaño nahui metro. Huan ipatajca quipiyayaya nechca ome metro. Huan quiajtoque itapech para nochi cati quinequij quitachilitij. Eltoc ipan altepet Rabá, se ten inialtepehua amonitame.

*Eyi huejhueyi familias mocajque nechca Jordán
(Nm 32:1-42)*

¹² “Huan nopa tali cati timoaxcatijtoyaj ipan nopa tonali niquinmacac iixhuihua Rubén huan Gad huan nopa tajco iixhuihua Manasés. Niquinmacac iixhuihua Rubén huan Gad nopa tali ten altepet Arnón nechca hueyat Arnón ica norte ihuaya tajco ten nopa tepeme ipan tali Galaad ica nochi ialtepehua.

¹³ Huan nopa tajco iixhuihua Manasés cati quinejqque quiselise inintal ipan nica nali hueyat Jordán niquinmacac nopa seyoc tajco ten nopa tepeme ipan tali Galaad, huan nochi tali huan altepeme ipan tali Basán campá ifoca Argob. Nopona eltoya iaxca Tanahuatijquet Óg. Nochi nopa talme inintoca eliyaya ‘Inintal Huejcapantique Masehualme’ pampa achtohuiya nopona itztoyaj. ¹⁴ Iixhuihua Jair cati elqui se iixhui Manasés huejcajqquiya mocuilijque nochi nopa talme ten Argob hasta campá inepa tali Gesur huan tali Maaca. Huan hasta ama Basán nojquiya quitocaxtiaj Havot Jair o Ital Jair. ¹⁵ Huan tali Galaad niquinmactili iixhuihua Maquir. ¹⁶ Huan nopa huejhueyi familias ten Rubén huan Gad niquinmacac nopa tali cati pehua ica Galaad huan yahui ipan nopa tamayamit nechca hueyat Arnón. Nopa tali quipixqui inepa ipan tajco nopa tamayamit huan ajsic hasta nopa hueyat Jaboc cati monepantía ica nopa amonitame. ¹⁷ Ininepa ica campá calaqui tonati elqui nopa hueyat Jordán. Huan pejtehua campá Mantoc At Cineret ica norte, huan quipixqui nochi nopa Arabá, huan hasta campá tepet Pisga ontemo ipan nopa Hueyi At Arabá ica sur. Nopa Hueyi At Arabá nojquiya itoca Hueyi At Mictoc*.

¹⁸ “Huan ipan nopa tonali nimechilhui amojuanti cati anitztoque ipan ifamilia Rubén, Gad huan tajco Manasés para masque TOTECO Dios amechmactilijtoya ni tali para amoaxca, monequi nochi amosoldados ma quiitzquica ininteposhua huan quinyacanase iniisraelita icnihua para quiixcotonase ni hueyat Jordán huan quinpalehuise iniicnihua para moaxcatise inintal nojquiya. ¹⁹ San mocahuase nica ipan altepeme nopa sihuame, coneme huan nochi nopa tapiyalme cati anquinpiyaj, ²⁰ hasta TOTECO Dios quinmacas nochi amoisraelita icnihua inintal ipan nopa seyoc nali ten hueyat Jordán. Huajca quena, huelis anmocuepase hasta ni tali cati ama amoaxca huan campá itztoque amofamilias. Quej nopa nimechilhui.

²¹ “Nojquiya ipan nopa tonali niquilhui Josué: ‘Ica moixteyol ta tiqiztoc nochi cati TOTECO Dios quichijtoc ica nopa ome tanahuatiani. Nojquiya san se TOTECO quichihuas ica nochi sequinoc tanahuatiani campá anyahuij.

²² Amo xiquinimacasicá pampa TOTECO Dios, amotemaquixtijca, yaya tatehuis por amojuanti.’

TOTECO amo quicahuili Moisés ma calaqui ipan tali Canaán

²³ “Huan ipan nopa tonali nimotatajti ica TOTECO huan niquilhui: ²⁴ “TOTECO Dios Cati Más Tijpiya Tanahuatili, ya tijpehualtijtoc technextilía mohueyitilis huan mochicahuális. Amo aquí seyoc DIOS ipan ilhuicacti, yon ipan taltipacti cati huelis quichihuas ni yejyectziti tamanti huan tiochicahualnescayot cati ta hueli tijchihua. ²⁵ Nimitztajtanía se favor. Techcahuili nojquiya nijpanos ni hueyat Jordán pampa nijnequi niqutas nopa cuali tali ica nopa tachiquilme huan nijnequi niqutas nopa campá itoca Líbano.’ Quej nopa niquilhui.

* **3:17** 3:17 Ni hueyi at nojquiya itoca Hueyi At Poyec, o Hueyi At ten Istat o Hueyi At Arabá, pero san se hueyi at.

²⁶ “Pero anquimatij TOTECO cualantoya ica na por cati quichijtoyaj amotatahua huan masque nijtajtani, amo nechcahuili nicalaquis ipan nopa tali. San techilhui: ‘¡Ya! Ayecmo techilhui más ni tamanti.’ ²⁷ Techilhui para ma nitejco iixco nopa tepet Pisga huan nopona nitachiyas para sur; para campa ancalaqui tonati, huan campa hualquisa, huan campa norte. Huan ten nopona huelis niqutas nopa cuali tali, pero nechilhui para nopa hueyat Jordán amo hueli nijpanos para nicalaquis ipan nopa tali. ²⁸ Pero techilhui ma nijtequimaca Josué quej nopataca huan ma nijyolchicahua huan ma nijmaca fetili pampa yaya amechyacanas nochi anisraelita masehualhua para anquiixcotonase nopa hueyat. Yaya cati amechmactilis nopa cuali tali cati nijtachilis. Quej nopa TOTECO techilhui.

²⁹ “Huan teipa timocajque campa nopa tepeme, iixmelac campa itoca Bet Peor.”

4

Moisés quintalnamicti nopa israelitame

¹ Huan teipa Moisés quinilhui nopa israelitame: “Ama nochi amojuanti xjtacaquilica ni tanahuatili huan ni tamachtili cati nimechilhúa para xjtoquilijtiyaca. Sinta anquichihuase ni tamanti, huelis ancalaquise huan aniztose ipan nopa tali cati amechmacas TOTECO, ininDios amohuejcapan tatahua. ² Amo xijmiyaquilica, yon amo xijquixtilica cati nimechilhuis. San xijchijtinemica nochi ni tanahuatilme pampa yaya, TOTECO Dios, cati amechmaca. ³ Anquiitzoque quenicatza quintzontamilti toisraelita icnihua cati quihueyichijque nopa taixcopincayot Baal ipan altepet Peor. ⁴ Pero amojuanti anquineltoquilijque TOTECO Dios ica nochi amoyolo huan yeca noja aniztoque hasta ama.

⁵ “Huajca nojquiya ipan nopa tali cati anquiselise monequi anquitoquilijtiyase nopa tanahuatili huan tamachtili cati noTECO Dios technahuatijtoc para nimechmachtis. ⁶ Ximomocuitahuica miyac para anquichihuase nochi ni tanahuatilme pampa quej nopa quiitase nochi sequinoc masehualme para antalnamiquij huan antamachilíaj. Huan nopa masehualme amechitase huan quicaquise ten amotanahuatilhua huan quiijtose para anisraelitame aniztoque se tamanti masehualme cati nelía cuajcualtzi. Quiijtose para nelnelía antalnamiquij huan antamachilíaj. Quej nopa quiijtose. ⁷ Pampa amo onca seyoc tali, yon cati hueyi ica miyaqui imasehualhua, cati quiipya se dios cati itztoc nelía nechca para quinpalehuis quema quitzajzilíaj quej TOTECO Dios itztoc ica tojuanti. ⁸ Huan amo onca seyoc tali ica imasehualhua cati quiipiyaj tanahuatilme huan tamachtilme cati xitahuac quej cati nimechnextilis ama.

⁹ “Huajca ximomocuitahuica miyac para amo xiquelcahuaca yon se tamanti cati anquiitzoque ica amoixteyol. Ma mocahua ipan amoyolo huan ipan amotalnamiquilis nochi tonali hasta anmiquise. Huan xiquinpohuilica amoconehua huan amoixhuihua nochi huejhueyi tamanti cati TOTECO techchihuilijtoc.

Xiquelnamiquica quema TOTECO camanaltic ipan Sinai

¹⁰ “Nojquiya amoconehua xiquinpohuilica ten nopa tonali quema nochi tiisraelitame timoquetzque iixpa TOTECO Dios nechca nopa tepet Sinai. Huan TOTECO techilhui ma niquisentili nochi israelitame para ma quitacaquilica itoscac para tijmachilise para monequi tijhueyitepanitase san ya para nochipa. Huan nojquiya monequi ma tiquinnextilica toconeua quej nopa

ma quichihuaca. ¹¹ Xiquinilhuica amoconehua quenicatza timonechcahui-
jque itzinta nopa tepet, huan huejcapa quisayaya tit, pocti huan tilelemecti
quej elisquía nopa tepet tatayaya. Huan ipan nopa tzintayohuilot tejcoyaya
se pocti cati tilahuac huan yayahuic hasta ajsiyaya huejcapa ipan ilhuicacti.
¹² Huajca TOTECO amechnojtzqui tatajco ten nopa tit. Nochi anquicajque
itoscac, pero amo teno anquitaque, yon amo anquimatque quenicatza
nesiyaya. San itoscac anquicajque. ¹³ Huan TOTECO amechilhui taya
monequi anquichihuase para anquitamichihuase nopa camanal sencahuali
cati quichijtoya amohuaya. Amechilhui monequi anquineltoquilise nopa
majtacti tanahuatilme huan quinjcuilo ipan ome tepacti. ¹⁴ Huan TOTECO
technahuati na ma nimechmaca nopa tanahuatilme huan tamachtilme cati
monequi anquichihuase ipan nopa tali campa anajsitij huan anmoaxcatise.

Techilhui ma amo tiquintepanitaca teteyome

¹⁵ “Ipan nopa tonal quema TOTECO amechcamanalhui ten tatajco nopa
tit ipan tepet Sinaí, amo aqui anquitaque itachiyalis. Huajca ximo-
mocuitahuica miyac ¹⁶ para amo xijchihuaca cati fiero yon amo xijchihuaca
se taixcopincayot cati nesis quej se tenijqui para anquintepanitase quej
elisquía amoTECO. Amo xijchihuaca se taixcopincayot cati nesis quej se
tacat o se sihuat, ¹⁷ o se tapiyali ipan taltipacti, yon cati nesis quej se totot
cati patani ipan ilhuicacti. ¹⁸ Yon amo xijchihuaca se taixcopincayot para
anquihueyichihuase cati nesi quej se tamanti cati moxitanía talchi o cati
nejnemi atita quej michime. ¹⁹ Huan quema antachiyase para ilhuicac,
huan anquinitase sitalime, tonati, huan metzti huan metzi sequinoc tamanti
cati eltoc nepa huejcapa, amo ximoilhuica para cuali anquinhueyichihuase,
pampa amoTECO Dios quinchijchijqui nopa tamanti para nochi mase-
hualme ipan ni taltipacti. ²⁰ Pero ica amojuanti huan amotatahua, TOTECO
amechquixti ten tali Egipto campa tahuel antaijyohuiyayaj quej elisquía
anitztoquáj ipan se horno cati tahuel totonic. Huan ama amechhijqui
anixcahua san ya, quej ama anitztoque. ²¹ Pero TOTECO cualanqui ica
na por amojuanti huan quijto amo nihuelis niquixcotonas nopa hueyat
Jordán para nicalaquis ipan nopa cuali tali cati anquiselise. ²² Huajca
monequi nimiquis ipan ni tali huan amo nijpanos hueyat Jordán. Pero
amojuanti, quena, anpanose huan anmoaxcatise nopa cuali tali. ²³ Huajca
ximomocuitahuica miyac. Xijneltocaca nopa camanali cati TOTECO Dios
quichijtoc amohuaya huan amo ximochijchihuilica yon se teteyot, o yon se
taixcopincayot, ²⁴ pampa TOTECO Dios, yaya se Dios cati tetasomati huan
amo amechcahuilis xijtepanitaca seyoc tamanti. ¡Yaya quej se tit cati nochi
quitzontamiltía!

²⁵ “Huan quema anquinpiyase amoconehua huan amoixhuihua huan ya
anhuejcajtose anitztose ipan nopa cuali tali, sinta antajtacolchihuase iixpa
TOTECO huan anmochihuilise teteyome o taixcopincayome cati quinescayot-
tise se tenijqui, huajca xijmatica TOTECO Dios tahuel cualanis ica amo-
juanti. ²⁶ Huan na nijtestigojquetza TOTECO cati quichijqui ilhuicacti huan
taltipacti para melahuac nimantzi anixpolihuse. Ayecmo anitztose ipan
nopa cuali tali cati ama anquipanose ni hueyat Jordán para anquiselise,
pampa nimantzi masehualme amechtontamiltise. ²⁷ Huan nopa se quentzi
cati noja mocahuase ten amojuanti TOTECO quinsemanas campa hueli
ipan nochi altepeme huan talme ipan taltipacti. ²⁸ Huan nozona, quena,
quintequipanose teteyome cati masehualme quinqmachijchijtoque. Pero
nopa teteyome ten cuahuit huan ten tet amo tacauij, yon amo tacuaj, yon
amo taijyotilanaj.

²⁹ “Pero sinta nopona anquitemose TOTECO Dios, anquipantise. Quena, anquipantise sinta anquitemose ica nochi amoyolo huan ica nochi amoalma. ³⁰ Huan quema ajsis nopa tonali ten taijyohuilisti huan tequipacholi cati amechajsis ipan nopa tayacapan tonali, anmocuepase ica amoTECO Dios huan quena, anquineltofase cati amechilhuía. ³¹ Pampa amoTECO Dios tahuel tetasojta. Yaya amo amechtahuelcahuas, yon amo amechtazontamiltis nochi amojuanti. Amo quielcahuas nopa camanal sencahuali cati quichijqui ica amohuejcapan tatahua.

³² “Pero ximotatzintoquilica amojuanti, sinta ica nochi nopa tamanti cati panotoc hasta ipejya taltipacti quema Toteco achtohui quichijqui se masehuali sinta oncatoc se tamanti quej ni. Xijtemoca campa hueli ten se iyecapa ilhuicacti hasta seyoc, sinta panotoc se tamanti hueyi quej ni o sinta se quicactoc ten se tamanti quej ni. ³³ Amo onca seyoc tali cati nochi imasehualhua quicactoque itoscac Toteco Dios cati amanalitic tatajco ten nopa tit quej amojuanti anquicactoque huan noja anantztoque anyoltoque para antepohuilise. ³⁴ Amo oncatoc seyoc Dios cati quiitztoc se tamanti masehualme cati quintequipanohuayayaj seyoc tali ehuan san topic huan quinquixtilijtoc ica huejhueyi tanextili huan tiotchahualnescayot; huan moaxcati nopa masehualme quej amoTECO Dios amechchihuilijtoc. Pampa yaya quintitanili nopa egiptome miyac tayejyecoli huan tamanti cati temajmati. Quintehui ica ihueyi chichualis. Quena, TOTECO quinmanexti huan quintajtolsencajqui. Nochi ni tamanti cati anquitztoque ica amoixteyol para TOTECO amechchihuilijtoc, amo quema panotoc seycoc. ³⁵ TOTECO Dios quichijqui nochi ni huejhueyi tanextili para xijmachilica yaya cati nelnelía DIOS, huan iyoca ten ya, amo aqui seyoc. ³⁶ Huan para amechxitahuas quej quinamiqui yaya amechnojnatzqui ten ilhuicac, huan ipan taltipacti amechnextili se hueyi tit, huan nopona ipan nopa tit amechcamanalhui.

³⁷ “Huan pampa yaya quinicneli amohuejcapan tatahua, quichijqui nochi ni huejhueyi tamanti, huan quintapejpeni ihuaya amojuanti cati aniniixhuihua, para anelise imasehualhua. Huan yeca yaya iseltitzi amechquixti ipan tali Egipto ica ihueyi chichualis huan hualajqui amohuaya ipan ojtí. ³⁸ Huan yaya quintzontamilti amoixpa sequinoc tamanti masehualme cati más miyaqui huan más quipiyaj chichualisti que amojuanti pampa quinequi amechmacas inintal. Quinejqui xijselica para amoaxca quej ama mochihua.

³⁹ “Huajca xijmatica cuali ipan amotalnamiquilis para san yaya amoTECO cati nelnelía Dios ipan taltipacti huan ipan ilhuicacti huan amo aqui seyoc. ⁴⁰ Huajca monequi xijchihuaca nochi itanahuatilhua huan itamachtilhua cati na nimechmaca ama ni tonali. Huan quej nopa cuali elis para amojuanti huan amoixhuihua, huan anitztose miyac xihuit ipan nopa cuali tali cati amoTECO Dios amechmacas para nochipa.”

Altepeme campa hueli momanahuisé

⁴¹ Huajca Moisés quintapejpeni eyi altepeme campa masehualme huelis momanahuitij ipan ni inaliyo hueyat Jordán para campa quisa tonati. ⁴² Huan sinta se acajya quimictis seyoc masque amo quinequiyaya, huelis momanahuiti ipan se ten nopa eyi altepeme pampa nopona amo aquí huelis quitacuepilis. ⁴³ Huan ya ni inintoca nopa altepeme: Beser ipan nopa huactoc tali ipan inintal nopa familia Rubén, Ramot ipan tali Galaad ipan inintal nopa familia Gad, huan Golán ipan tali Basán ipan inintal nopa familia ten tajco iteipán ixhuihua Manasés.

Quenicatza TOTECO quinmacac nopa tanahuatilme

⁴⁴ Ya ni nopa tanahuatilme, tamachtilme, ⁴⁵ huan leyes cati na, ni Moisés, ni quinmacac nopa israelitame quema quisque ipan tali Egipto. Huan ni quinilhui sempa quema itztoyaj nozona, ⁴⁶ nechca hueyat Jordán ipan inaliyo para campa quisa tonati lixmelac altepet Bet Peor ipan nopa tali cati eliyayaya iaxca mijcatzi Tanahuatijquet Sehón ten amorreos. Yaya tanahuatiyaya ipan altepet Hesbón, pero ti israelitame tijtanque quema ti quisque ipan tali Egipto. ⁴⁷ Huan timoaxcatijque nopa tali huan ital Tanahuatijquet Og cati mosehui ipan Basán. Ya ni eliyaya nopa ome tanahuatiani ten amorreos ica campa quisa tonati ten hueyat Jordán. ⁴⁸ Huan inital pehua campa altepet Aroer iteno nopa hueyat Arnón huan yahui hasta tepet Sion, cati nojquiya quitocaxtiyayaj tepet Hermón. ⁴⁹ Huan nochi nopa huactoc tali Arabá nechca hueyat Jordán ipan neca nali para campa quisa tonati huan hasta nochi nopa Hueyi At Mictoc * cati mocahua itzinta tepet Pisga.

5

Nopa majtacti tanahuatilme

(Éx 20:1-17)

¹ Huan Moisés quinnotzqui nochi israelitame ma mosentilica huan quinilhui:

“Xijtacaquilica, anisraelitame, ni tanahuatilme huan tamachtilme cati nimechilhuía ama. Monequi xijmatica nochi huan ximomocuitahuica para anquintoquilijiyase.

² “TOTECO Dios quichijqui se camanal sencahuali tohuaya ipan tepet Horeb o Sinaí. ³ TOTECO amo san quichijqui nopa camanali para quin-nahuatis tohuejapan tatahua cati mijque, pero nojquiya quichijqui para technahuatis tojuanti cati ama tiitztoque nica. ⁴ TOTECO camanaltic tohuaya tatajco ten nopa tit huan ihuaya timoixtachilijque.

⁵ “Huan na niitztoya tatajco ten TOTECO huan amojuanti para nimechilhuijtiyas cati TOTECO quijitohuayaya, pampa amojuanti anquimacasiyayaj nopa tit huan amo antejcoque campa yaya itztoya ipan nopa tepet. Huan TOTECO quijito:

⁶ ‘Na niamoTECO Dios cati nimechquixti ipan tali Egipto campa antequipanohuayayaj san tapic.

⁷ Amo quema xijhueyichihuaca seyoc quej amoTeco, san na.

⁸ Amo ximochihuilica, yon amo xijtepanitaca yon se teteyot o yon se tamanti taixcopinali, masque quipiyas itachiyalis cati eltoc nepa ilhuicac, o ipan ni taltipacti o cati eltoc ipan at. ⁹ Amo ximohuijtzomaca iniixpa, yon amo xiquinhueyichihuaca, pampa na niamoTECO Dios huan nimechtasomati huan nijnequi san na techhueyichihuaca. Huan quema niquintatzacuilitia cati amo quinequij techitase, nopa tatza-cuiliti nojquiya quinajsis ininconehua, huan iniixhuihua, huan inincone-hua iniixhuihua. ¹⁰ Pero ica masehualme cati techicnelaj huan quichihuaj notanahuatil, niquintasojtas ininconehua huan iniixhuihua. Quena, por injuanti niquintasojtas ininteipan ixhuihua cati quinpiyase ininconehua mil hueltas.

¹¹ Amo xicahuilmatica notoca niamoTeco DIOS, pampa na temachtij nizatza-cuilitis cati san quiahuilmatis notoca.

¹² Xiquelnamiquica sábado, nopa tonali para anmosiyajquetzase, huan xijtepanitaca. Ma elis taiyocatalili ten sequinoc tonali pampa quej

* 4:49 4:49 Ni hueyi at nojquiya itoca Hueyi At Poyec, o Hueyi At ten Istat o Hueyi At Arabá.

nopa na, niamoTECO Dios, nimechnahuatijtoc. ¹³ Xitequitica chicuase tonati huan ipan nopa tonali xijchihuaca nochi cati monequi anquichihuase. ¹⁴ Pero ipan nopa chicompa tonali monequi ximosiyajquetzaca huan techhueyichihuaca na niamoTECO Dios. Amo xitequitica, yon amo xijcahuilica ma tequiti amotelpoca, yon amoichpoca, yon amotaca tequipanojca, yon amosihua tequipanojca, yon amotoro cati quimati taxahua, yon amoburro, yon nopa seyoc tali ejquet cati itztoc ipan amotal. Amo aqui tequitis, san ximosiyajquetzaca. ¹⁵ Xiquelnamiquica para amojuanti nojquiya aneliyayaj antequipanohuani ipan tali Egipto campá amo quema huelqui amosiyajquetzque yon se tonal huan na niamoTECO Dios nimechquixtica ica miyac chichahualisti. Huajca yeca na nimechnahuatía ximosiyajquetzaca.

¹⁶ Xijtepanitaca amotata huan amonana quej na, niamoTECO Dios, nimechnahuatijtoc. Huan quej nopa anitztose miyac xihuit huan nochi quisas cuali para amojuanti ipan nopa tali cati nimechmacas.

¹⁷ Amo xitemictica.

¹⁸ Amo ximomecatica.

¹⁹ Amo xitachtequica.

²⁰ Amo aqui xiquistacahuica.

²¹ Amo xiquixtocaca seyoc isihua, yon ichaj, yon imil, yon itaca tequipanojca, yon isihua tequipanojca, yon itoro cati quimati taxahua, yon iburro. Amo teno xiquixtocaca cati seyoc iaxca.'

Quema tahuel momajmatijque israelitame iixpa TOTECO (Éx 20:18-26)

²² "Nochi ya ni nopa camanali cati TOTECO techilhui ten tatajco nopa tit huan nopa mixti tilahuac quema amotatahua huan amojuanti anmosentilijtoyaj itzinta nopa tepet. Teipa ayecmo teno más quiijto. Teipa quiijcuilo ni camanali ipan ome tepacti huan techmacac. ²³ Pero quema anquicajque itoscac cati quisayaya tatajco ten nopa tit. Ama technextilijtoc para anquitaque nochi nopa cuatitamit tatayaya, hualajque nechcamanalhuicoj nochi amotayacanhua ipan sesen hueyi familia inihuaya nopa huehue tacame cati quihuicayayaj tequiticayot. Huan techilhuijque: ²⁴ 'TOTECO Dios nelnelía melahuac technextilijtoc itatanex huan ihueyitilis, huan tijcactoque itoscac cati quisayaya tatajco ten nopa tit. Amo technextilijtoc para DIOS, quena, hueli camanalti ica masehualme huan injuanti amo miquij. ²⁵ Pero sinta techcamanalhuis ica ompa, temachti nopa hueyi tilelemecti techtzontamiltis. Huan amo tijnequij timiquise. ²⁶ Yon se masehuali amo quema quicactoc itoscac Toteco Dios cati yoltoc para camanaltis ihuaya ten tatajco se hueyi tit huan teipa mochahua yoltoc. Tojuanti nojquiya timiquise sinta más techcamanalhuis. ²⁷ Más cuali ximonechchahui ta huan xijtacaquili nochi cati TOTECO Dios mitzilhuis huan teipa techpohuilis cati yaya mitzilhuis, huan tojuanti tijchihuase cati technahuatis.'

²⁸ "Quema amojuanti ancamanaltiyayaj nohuaya, TOTECO quitacaquilijtoya nochi cati anquijtohuayayaj, huan teipa techilhui para quicajqui nochi cati anquijtojque huan cuali cati anquijtojque. ²⁹ Quiijto elisquía nelcuali sinta para nochipa anquitepanitasquíaaj huan anquichihuasquíaaj nochi itanahuatilhua quej anquijtohuaj, huan amo quema anquipatasquíaaj amotalnamiquilis. Quej nopa amojuanti huan amoconehua anquipiyase se

nemilisti cati nelyejyetzzi. ³⁰ Huajca techilhui ma niya huan ma nimechilhuiti para xitacuepilica hasta amoyonchajchaj, ³¹ huan para na ma nimocahua nopona ihuaya para techilhuis nochi nopa tanahuatilme cati monequi nimechnextilis para anquichihuase ipan nopa cuali tali cati amechmacas para amoaxca. Quej nopa techilhui TOTECO.

³² “Huajca ama monequi amojuanti xijchihuaca nochi cati TOTECO Dios amechnahuatijtoc huan amo ximocuapoloca yon quentzi. ³³ Xijtoquilica nopa ojti cati TOTECO Dios amechnextilijtoc para anitztose miyac xihuit huan nochi quisas cuali para amojuanti ipan nopa tali cati yaya amechmacas para anmoaxcatise.

6

Nopa hueyi tanahuatili

¹ “Huajca ya ni nopa tanahuatilme cati amoTECO Dios technahuatijtoc ma nimechnextili para xijchihuaca ipan nopa tali cati anquiselise para amoaxca. ² Ni tanahuatilme nimechmaca para xiquimacascas huan xijtepanitaca TOTECO amojuanti, amoconehua, huan amoixhuihua nochi tonali ipan amonemilis. Monequi xijchihuaca nochi cati quijtohua ni tanahuatilme huan leyes. Huan sinta quej nopa anquichijunemise, anitztose miyac xihuit. ³ Huajca anisraelitame, xijtacaquilica cati nimechnahuatia huan ica miyac tamocuitahuili xijneltoquilica para cuali anitztose huan anquinpiyase miyac amoconehua huan amoixhuihua ipan nopa cuali tali cati nochi temaca hasta mocahua itajca. Pampa ya nopa cati TOTECO inDios amohuejcapan tatahua quintencahuili para panos sinta anquineltoquilijiyase itanahuatilhua.

⁴ “Huajca xijtacaquilica anisraelitame: TOTECO Dios san yaya toTeco. TOTECO itztoc setzi.

⁵ “Xiquicnelica TOTECO Dios ica nochi amoyolo, huan ica nochi amoalma, huan ica nochi amochicahualis.

⁶ “Xijzontecontalica nochi ni tamanti huan ximoilhuica talojtitzti cati nimechilhuitoc ama. ⁷ Xiquinnextilica amoconehua mojmosta. Xiquin-pohuilica ni tanahuatilme quema anitztoque ipan amochaj, huan quema anyahuij ipan ojti. Xiquinmachtica quema anmotecase para ancóchise huan quema anmijquehuase. ⁸ Ma eli quej elisquía anquinpiyaj ni tanahuatilme ijcuilijtoc ipan amomax huan ipan amocuaixco quej se tanextili para anquinneltocaj huan amo anquielcahuaj. ⁹ Xiquinijcuiloca ipan nopa taqetzalme huan caltemit ten amochajchaj.

Monequi nopa israelitame ma quinneltocaca TOTECO

¹⁰ “Quema amoTECO Dios amechchihuas xicalaquica ipan nopa cuali tali cati quintencahuili amohuejcapan tatahua, Abraham, Isaac, huan Jacob para amechmacasquía, nojquiya amo xiquincahuaca. TOTECO amechmacas nopa cuali tali cati quipiya huejhueyi altepeme cati yejyetzitzi cati amojuanti amo anquinchijchijtoque. ¹¹ Quipiyas calme tejtemitoque ica nochi tamanti cati cuali cati amojuanti amo anquinchijchijtoque. Quipiyas amelme cati amo anquinxajtoque huan quipiyas mili ica miyac cuame ten olivos para aceite cati amo anquintoctoque. ¹² Pero quema antacuase hasta anixhuise nopona, amo xiquelcahuaca TOTECO cati amechquixti ipan tali Egipto campa antetequipanohuayayaj san tapic. ¹³ Xiquimacascas huan xijtepanitaca amoTECO Dios huan san ya xijtequipanoca, huan monequi antatestigojquetzase san ica yaya itoca. ¹⁴ Amo xiquintoquilica nopa dioses cati quinhueyichihuaj nopa masehualme nopona amonechca pampa ya

nopa amo cana Dios. ¹⁵ AmoTECO Dios cati amohuaya itztoc yaya quinta-somati cati ya iaxcahua. Huan sinta anquihueyichihuase seyoc, cualanis ica amojuanti huan amechtontamiltis huan anpolijtehuase ten ni taltipacti.

¹⁶ “Amo xijyejyecoca amoTECO Dios quej anquichijque ipan Masah. ¹⁷ Ica miyac tamocuitahuili xijchihuaca nochi nopa tanahuatili huan leyes huan tamachtili cati ya amechnahuatijtoc. ¹⁸ Xijchihuaca san cati xitahuac, huan cati cuali huan cati quiyolpactis TOTECO. Quej nopa cuali anquisase huan ancalaquise huan anmoaxcatise nopa cuali tali cati TOTECO quintencahuili amohuejcapan tatahua para amechmacas. ¹⁹ Huan quej nopa yaya quint-zontamiltijiyas amocualancaitacahua amoixpa quej quijtojtoc quichihuas.

²⁰ “Huan teipa ica miyac xihuit quema amoconehua amechtatzintoquilise para ten monequi quipiyase nochi ni tanahuatilme cati technahuatijtoc TOTECO Dios, ²¹ monequi xiquinilhuica ya ni: ‘Tojuanti san tapic tijte-quipanohuayayaj nopa Faraón ipan tali Egipto huan TOTECO techquixti ica miyac chichahualisti. ²² Toseltitzitzi tiquitaque nochi huejhueyi tanex-tili, huan huejhueyi tiotchahualnescayot cati quichijqui. Quena, TOTECO quichijqui huejhueyi tamanti ipan tali Egipto cati tahuel quinmajmati Faraón huan nochi imasehualhua. ²³ Pero tojuanti techquixti ten nopona para techhuicas ipan nopa cuali tali cati quintencahuili tohuejcapan tatahua para techmacas. ²⁴ Huan yaya TOTECO Dios technahuati ma tijchihuaca nochi ni tanahuatilme huan ma tijtepanitaca para quej nopa tuitztose ica cuali huan yaya techmocuitahuis para tihuejcahuase tuitztose. Huan quej nopa quichijtoc hasta ama. ²⁵ Huan sinta tijchihuase ni tanahuatilme quej TOTECO Dios technahuatijtoc, huajca nochi quisas cuali para tojuanti.’ Quej nopa xiquinnanquilica amoconehua.

7

Tanahuatilme para se nemilisti tatzejtzeltic

(Éx 34:11-17)

¹ “TOTECO Dios amechchihuas xicalaquica ipan nopa tali cati anmoax-catise, huan quintzontamiltis amoixpa nopa heteos, gergeseos, amorreos, cananeos, ferezeos, heveos huan jebuseos, masque tahuel miyaqui huan más quipiyaj chichahualisti que amojuanti. ² Huan quema amoTECO Dios ya amechmactilijtos nochi nopa masehualme amomaco para xiquintan-ica, monequi senquisa xiquintzontamiltica huan amo xijchihuaca yon se camanali inihuaya, yon amo xiquintasojtaca. ³ Amo ximotahuicaltica inihuaya. Ma amo motahuicaltica amoconehua ica iniichpocahua, yon amoichpocahua ica inintelpocahua. ⁴ Pampa quichihuase para amocone-hua ma mohuejcatalica ten TOTECO huan quinhueyichihuase inintetey-ohua, huan quej nopa icualancayo TOTECO hualtemos huan amechtontamiltis san ipan se talojtzi.

⁵ “Monequi xijtamiltica nochi taixpame campa quinhueyichihuaj inin-teteyohua. Xijxitinica nochi nopa teme huan taquetzalme cati quinitaj para tatzejtzeltic, huan nochi inintaixcopincayohua cati quinhueyichihuaj. Huan nochi xiquintatica, ⁶ pampa anisraelitame TOTECO Dios amechtapejpenijtoc ten nochi xinach masehualme cati itztoque ipan ni taltipacti para anitztose taiyocatalili san para ya.

Tatiochihualme israelitame

⁷ “TOTECO amo amechtapejpeni pampa aneliyayaj más anmiyaqui que sequinoc xinach masehualme, pampa nelía inijuanti quinpixque más miyaqui masehualme que amojuanti. Más anpilquentzitzitzi aneliyayaj que

nochi sequinoc tamanti masehualme. ⁸ Pero TOTECO amechtapejpeni pampa amechicneli. Yeca amechquixti ipan tali Egipto campa antequipanohuayayaj san topic. Quena, quej quintencahuili amohuejcapan tatahua para quichihuas amechquixti imaco Faraón nopa tanahuatijquet ipan tali Egipto ica hueyi chichahualisti.

⁹ “Xijmachilica cuali para amoTECO Dios yaya cati nelnelía Dios huan cati nelnelía temacti. Para nochipa yaya quitamichihuas cati quijtojtoc para quichihuas ipan nopa camanali cati quichijqui amohuaya. Sinta tijchihuase itanahuatilhua, techicnelis tojuanti, toconehua, huan iniixhuihua cati quinpiyase ininconeua hasta mil hueltas. ¹⁰ Pero quintaxtahuis quej quinamiqúi nochi cati amo quinequij quuitase. Quena, nimantzi quintzontamiltis nochi cati quicualancaitaj. ¹¹ Huajca ximomocuitahuica para anquineltoquilise nopa tanahuatilme, leyes, huan tamachtilme cati ama nimechnahuatía xijchihuaca.

Tatichihualisti para cati quineltocas TOTECO
(Lv 26:3-13; Dt 28:1-14)

¹² “Sinta anquineltoquise ni tanahuatilme, amoTECO Dios nojquiya amechicnelis quej quijtohua ipan nopa camanal sencahuali cati quichijqui ica amohuejcapan tatahua. ¹³ Quena, amechicnelis huan amechtiochihuas huan quichihuas ximomiyaquilica. Quintiochihuas amoconeua huan cati anquixcase. Quichihuas para anquixcase tahuel miyac trigo, xocomeca at huan aceite. Quintiochihuas amohuacaxhua huan amoborogojhua para tahuel miyaqui mochiuase ipan nopa tali cati quintencahuili amohuejcapan tatahua para amechmacas. ¹⁴ Más anelise antatichihualme que nochi sequinoc masehualme. Ipan nochi amojuanti, amo oncas yon se sihuat cati amo huelis conepeyas. Huan nochi tacame quipiyase ininconeua. Nojquiya ipan amotapiyalhua, amo oncas oquichme cati amo taxinachose, yon amo oncas sihua tapiyalme cati amo huelis conepeyase. ¹⁵ TOTECO amechquixtilis nochi tamanti cocolisti huan amo quicahuilis ma amechajsi nopa fiero cocolisti cati anquitaque ipan tali Egipto. Pero quena, quintitanilis nopa fiero cocolisti nochi amocualancaitacahua. ¹⁶ Huan monequi xiquintzontamiltica nochi masehualme cati amoTECO Dios amechmactilía amomaco. Amo xiquintasojtaca huan amo xiquinhueyichihuaca inintaixcopincayohua, pampa amechmasiltise.

¹⁷ “Huelis anmoilhuáj: ‘¿Quenicatza huelis tiquintanise nopa masehualme nozona pampa injuanti más miyaqui que tojuanti?’ ¹⁸ Pero nimechilhuía amo xiquinimacasica. Xiquelnamiquica cati quichijqui amoTECO Dios ica Faraón huan nochi egiptome. ¹⁹ Xiquelnamiquica nopa huejhueyi taijyohuulisti cati TOTECO Dios quinmacac. Xiquelnamiquica nopa huejhueyi tanescayot huan tiochichahualnescayot cati anquitaque quichijqui amoTECO Dios ica ihueyi chichahualis quema amechquixti ten tali Egipto. Ya nopa sempa quichihuas TOTECO Dios ica nochi masehualme cati ama anquinimacasij. ²⁰ Teipa TOTECO Dios quintitanis etzame campa injuanti cati motatijtose para momanahuse huan nopa etzame quinquixtise hasta anquintzontamiltise senquis nochi.

²¹ “Huajca amo ximajmahuica iniixpa amocualancaitacahua, pampa amoTECO Dios cati itzotc amohuaya, yaya tahuel hueyi huan temajmati. ²² Huan ica yolic TOTECO quinquixtijiyas nopa masehualme amoixpa huan quintzontamiltis. Pampa sinta quinmictis nochi san se huelta, nopa tecuanime cati itztoque ipan cuatitamit momiyaquilise campa anitztose.

²³ Pero amoTECO Dios ica yolic quintalis nochi nopa masehualme amomaco huan quinhuihuichihuas para xiquintzontamiltica senquisa nochi injuanti.

²⁴ Nochi inintanahuatijcahua niquintalijtiyas amomaco huan anquinmic-tijtiyase para ayecmo aqui quinelnamiquis. Amo aqui huelis moquetzas amoixpa. Senquisa anquintzontamiltise.

²⁵ “Monequi xiquintatica ininteteyohua. Amo xiquixtocaca nopa oro huan plata cati ica quinaltijtoque nopa teteyome, yon amo xijnequica anmoaxcatise para amo amechmasiltise, pampa TOTECO Dios amo quinequi quuitas.

²⁶ Amo teno xijhuicaca ipan amochajchaj cati TOTECO amo quinequi quuitas o cati amo quipactia, pampa yaya quijtojtoc para nochi xiquixpolihuilitica.

8

Amo san ica pantzi monequi para ma itzto se masehuali

¹ “Ximotachilica para xijchihuaca nochi nopa tanahuatilme cati nimechnahuatia ama. Sinta quej nopa anquichihuase, cuali anitztose. Huan anmomiyaquilise miyac huan ancalaquise, huan anmoaxcatise nopa cuali tali cati TOTECO quintencahuili amohuejcapan tatahua para amechmacas.

² Huan xiquelnamiquica nochi nopa ojti cati amoTECO Dios quichijqui ma tinejnemica ipan nopa huactoc tali para 40 xihuit. Quinequiyaya amechehcapan talis huan amechejyecos para quimatis quenicatza amotalnamiquilis huan para quuitas sinta anquichihuase itanahuatil, o amo.

³ Huan yaya quichijqui xitajiyohuica huan ximayanaca. Huan teipa amechtamacac ica maná, se tacualisti cati amo anquiixmatiyayaj, yon amohuejcapan tatahua, amo quiixmatiyayaj. Huan ya nopa quichijqui para amechnextilis para amo san ica pantzi monequi para itztos se masehuali. Nojquiya monequi quineltocatiyas nochi icamanal TOTECO. ⁴ Ipan nopa 40 xihuit quema annejnénque ipan huactoc tali, amo tanqui amoyoyo huan amo anicxisemajque. ⁵ Xijmachilica para TOTECO Dios amechtatzacuilti huan amechtalanamicti quej se tetaj quichihua ica icone.

⁶ “Huajca xijchihuaca nochi itanahuatil amoTECO Dios huan san ya xijhueyimatica. Xijtoquilica nopa cuali ojti cati amechnextilijtoc huan xiquimacacisa, ⁷ pampa TOTECO Dios amechhuicas ipan se cuali tali. Elis se tali cati quiptiya miyac pilatajtizti, amelme huan hueyame campa hueli ipan tamayamit huan ipan tepeme. ⁸ Elis se tali cati quiptiya miyac necti, trigo, cebada, xocomeca mili, figuera mili, huan miyac mili ica olivo cuame cati temaca miyac aceite. ⁹ Ipan nopa tali amo anmotequipachose ten taya anquicuase, pampa oncas miyac tacualisti. Amo anmotequipachose ica yon se tamanti. Ipan teme anquipantise hierro hasta mocahuas para anquichihuase teposti, huan nojquiya ipan tepeme onca nopa teposti cobre. ¹⁰ Pero quema anajsitose huan antacujtose hasta cuali anixhuitose, xijhueyichihuaca TOTECO Dios cati amechmacatoc nopa cuali tali.

Amo xiquelcahuaca TOTECO

¹¹ “Xijpiyaca cuidado para quema ya anquipixtose nochi cati monequi, amo anquielcahuase amoTECO Dios. Amo xijcahuaca nochipa xijchihuaca nochi itanahuatilhua huan nochi ni icamanal cati nimechnahuatijtoc ama.

¹² Amo ximohueyimatica quema ya antacujtose, huan ya anixhuitose huan anitztose ipan cuajcuali calme cati anquisenajtose. ¹³ Anquinittase amotapiyalhua nelmomiyaquilise, huan anquixpitiyase miyac oro, huan plata huan tamantizti. ¹⁴ Pero amo ximohueyimatica huan amo xiquelcahuaca amoTECO Dios cati amechquixti ipan tali Egipto campa antetequipanohuayayaj san tapic. ¹⁵ Amo xiquelcahuaca yaya cati amechchijqui

xinejnemica ipan nopa hueyi huactoc tali cati nelía temajmati, huan campa itztoque miyac cohuame huan colome, huan campa amo oncayaya at. Pero TOTECO quichijqui ma quisa at ipan se hueyi tepexit huan quej nopa anquixque at para anatique. ¹⁶ Huan ipan nopa huactoc tali amechtamacayaya ica maná, se tacialisti cati amojuanti, yon amohuejcapan tatahua amo quixmajtoyaj. Quinequiyaya amechyeyecos huan amechchcapantalis para más anmotemachise ipan ya, huan teipa amechmacas cati cuali.

¹⁷ “Amo quema ximoillhuica para nochi nopa ricojyot cati anquixiyase anquitantoque san ica amojuanti amochicahualis, pampa amo cana. ¹⁸ Monequi xiquelnamiyuica amoTECO Dios, pampa san yaya amechmaca chichualisti para anquixiyase nopa ricojyot cati anquixiyaj. Yaya quinequiyaya quitamichihuas cati quijto nopa camanal sencahuali cati quichijqui ica amohuejcapan tatahua.

¹⁹ “Pero sinta anquielcahuase TOTECO Dios, huan anquintoquilise teteyome cati amo cana DIOS; sinta anquinhueyichihuase huan anmohuizomase iniixpa, na nimechilhuía ama para amechtontamiltis nochi amojuanti. Huan amo teno mocahuas ten amojuanti. ²⁰ Anquixiyase quenicatza TOTECO quixontamiltis amoixpa nopa sequinoc tamanti masehualme cati quinhueyichihuaj teteyome ipan nopa tali. Huan amojuanti nojquiya quej nopa amechtontamiltis sinta amo anquineltoctiyase nochi cati TOTECO Dios quijtohua.

9

Israelitame tatanise ica ichichualis Toteco

¹ “Xijtaquilica anisraelitame, ya tonali hora para xiquixcotonaca ni hueyat Jordán huan xiquintanitij nopa sequinoc tamanti masehualme cati más huejhueyi huan más quixiyaj chichualisti que amojuanti. Quixiyaj huejhueyi altepeme cati cuali moyahualtzactoque ica tepamit cati huejhuejcapantique. ² Nopa masehualme nepa itztoque tahuel huejcapantique pampa iixhuihua Anac, nopa huejcapantic tacat ten huejcajquiya. Anquicactoque nopa camanali cati quijtohua para amo aqui huelis quintanis iixhuihua Anac. Quej nopa moillhuíaj nochi masehualme.

³ “Pero xijmatica ama para amoTECO Dios amechyacanas. Quena, yaya tayacanas huan quixontamiltitijyas quej se hueyi tit. Amoixpa quinechcapantalis masehualme para huelis anquintanise huan anquixixtise ipan nopa tali ipan se talojtzi. Quena, anquixontamiltise quej quema se ixjicopis pampa TOTECO quej nopa amechilhuijtoc xijchihuaca.

⁴ “Huan quema TOTECO Dios ya quixixtijos nopa masehualme ten amoixpa, amo xiquijtoca: ‘Tojuanti tijselijtoque ni cuali tali pampa ticuajcualme iixpa TOTECO, huan yeca techmactilijtoc.’ Amo cana ya nopa. TOTECO quixixtis nopa masehualme amoixpa pampa tahuel miyac inintajtacollhua injuanti. ⁵ Amo amechcalaquis ipan nopa cuali tali huan amechaxcatis pampa anxitahuague iixpa o cuajcualtzi amoyolo. Yaya quixixtis nopa masehualme por inintajtacollhua huan nojquiya para quitamichihuas nopa camanali cati yaya quinecahuili Abraham, Isaac huan Jacob, amohuejcapan tatahua. ⁶ Huajca xijmatica para TOTECO Dios amo amechmactilía nopa cuali tali pampa annejnemij xitahuac, pampa amo cana. Amojuanti tahuel antzontochontique para anquineltoctise TOTECO Dios.

Israelitame mosentanchijque ica Toteco

⁷ “Xiquelnamiquica quenicatza anquicualancamacaque TOTECO Dios ipan nopa huactoc tali huan amo quema xiquelcahuaca. Anquichijque ma cualani ipan nopa tonal quema tiquistejque ipan tali Egipto huan hasta tajsicoj nica. Nochipa anmotzontochonchijque ica ya.

Quema nopa israelitame tajtacolchijque

(Éx. 31:18–32:35)

⁸ “Ipan nopa tepet Siná anquicuesolmacaque TOTECO huan yaya tahuel cualanqui ica amojuanti hasta quinequiyaya amechtzentamiltis. ⁹ Ya nopa panoc quema nitejcotoya ipan nopa tepet para nijselis ten TOTECO nopa ome tepactati ica nopa camanal sencahuali cati quichijtoya amohuaya. Huan nopona nimocajqui 40 tonati huan 40 yohuali huan amo teno nijcuajqui, yon niquic. ¹⁰⁻¹¹ Huan quema tanqui nopa tonali, TOTECO techmacac nopa ome tepactati campa tajcuilojtoya ica inacpil. Huan nopa ome tepactati quipixtoya nopa tanahuatilme cati TOTECO techmacac itzonpac nopa tepet quema camanaltic ten tatajco nopa hueyi tit ipan nopa tonali quema nochi sequinoc israelitame mosentilijtoyaj tepetzinta. ¹² Huan quema techmacac nopa tepactati, techilhui ma nimoisihuilti huan ma nitemo hasta campa itztoyaj nochi anisraelitame, pampa quijto para nopa nomasehualhua cati niquinquixti ipan tali Egipto ya mocuapolojtoyaj. Tahuel nimantzi quielcajque nopa cuali ojti cati quinnahuatijtoya ma quitoquilica. Ya mochijchihuilijtoyaj se taixcopincayot ten oro taatiltili.

¹³ “Nojquiya TOTECO quijto para ya quijtoya para tahuel tiztontochontique tiisraelitame. ¹⁴ Huan techilhui ni camanali: ‘Techtalcahui, pampa niqintzontamiltis huan niquinixpolos ten ni taltipacti, pero ipan ta nijchihuas se tamanti masehualme cati más quipiyase chicalhualisti huan más miyaqui que injuanti.’ Quej nopa techilhui.

¹⁵ “Huan quema nitemoyaya ten nopa tepet cati tatayaya, nijhualicayaya ipan nomax nopa ome tepactati cati quipixqui nopa camanal sencahuali. ¹⁶ Huan niquitac para amojuanti huan amotatahua antajtacolchijtoyaj ica TOTECO Díos, huan anmochihuilijtoyaj se becerro ten oro taatiltili para anquihueyichihuase. Ya anquitalcahuijtoyaj nopa cuali ojti cati amechnahuatijtoya xijtoquilica para san ya anquihueyichihuase. ¹⁷ Huaajca nijcuamajcaqui nopa ome tepactati cati nijpixtoya nomaco huan nijtamitapanqui amoixpa. ¹⁸ Teipa sempa nimotancuaquetzqui iixpa TOTECO para seyoc 40 tonati huan 40 yohuali. Huan amo teno nijcuajqui, yon niquic, pampa tahuel antajtacolchijtoyaj iixpa, huan tahuel anquicualanijque TOTECO. ¹⁹ Na nojquiya nimomajmatijtoya por icalancayo TOTECO ica amojuanti pampa quinequiyaya amechtzentamiltis. Pero teipa TOTECO sempa nechcaquili cati nijtajtani huan amo amechmicti. ²⁰ Huan ipan nopa tonali TOTECO nojquiya cualantoya ica Aarón huan quinequiyaya quitzontamiltis, pero na nimotatajti por ya huan quicahuili ma itzto. ²¹ Huan nijcuic nopa becerro cati ica antajtacolchijtoyaj huan cati anmochijchihuilijtoyaj para anquihueyichihuase, huan nijmajcaqui ipan tit. Huan teipa nijchijqui cuechtic hasta elqui san quej cuajnexti huan nijtepejqui ipan se atajti cati temoyaya ipan nopa tepet.

²² “Nojquiya sempa anquicualanijque TOTECO quema tiitztoyaj campa itoca Tabera, huan campa itoca Masah huan campa itoca Kibrot Hataava. ²³ Huan sempa anquicualanijque ipan Cades Barnea, quema TOTECO amechnahuatí: ‘Xitejcoca huan ximoaxcatitij nopa cuali tali cati nimechmacatoc.’ Sempa anmotzontochonchijque huan amo anquineltoquilijque para amechpalehuisquía, huan amo anquichijque cati amechilhui. ²⁴ Quena,

hasta quema achtohui nimechixmatqui huan hasta ama, nochipa anmot-zontochonchijtoque ica TOTECO. ²⁵ Yeca nimocajqui nimotancuaquetztoc iixpa TOTECO para 40 tonati huan 40 yohuali pampa ya quijijtoya para amechtzontamiltisquía.

²⁶ “Huan nimotatajti ica TOTECO huan niquilhui: ‘TOTECO Dios, ta cati más tijpiya tanahuatili, amo xiquintamilti ni miyac momasehualhua cati ta tiquinselijtoc para moaxcahua. Ta cati tiquinmanahuijtoc ica mohueyitilis. Quena, ta tiquinquixti ipan tali Egipto ica hueyi chicahualisti.’ Niquilhui: ²⁷ ‘Amo xijtachili inintzontochonyo ni masehualme, yon inintaixpanolhua huan inintajtacolhua. San xiquinelnamigui motequipanojcahua Abraham, Isaac huan Jacob ten huejcajquiya.’ ²⁸ Niquilhui: ‘Amo xiquincahuili ma quijitoca nopa masehualme ipan nopa tali campá techquixti para ta, TOTECO, amo tihuelqui techhuicas ipan nopa tali cati techtencahuilijtoya, o san techcualancaitayaya huan yeca techquixti san para techmictis ipan ni huactoc tali.’ ²⁹ Niquilhui: ‘Ya ni momasehualhua huan moaxcahua cati tiquinselijtoc huan cati ta tiquinquixti ipan tali Egipto ica mohueyi chicahualis.’ Quej nopa niquilhui TOTECO.”

10

Nopa yancuic camanal sencahuali (Éx 34:1-10)

¹ “Huajca ipan nopa tonali TOTECO techilhui sempa ma nijtequi ome tepacti cati san se quej nopa cati achtohui huan sempayano ma nitejco ipan tepet para nicamanaltis ihuaya. Huan teipa techilhui ma tijchihuaca nojquiya se caxa ten cuahuit. ² Yaya quijito para sempayano quijicuilos ipan nopa yancuic tepatacme nopa camanali cati quijicuilojtoya ipan nopa tepatacme cati achtohuiya huan na niquintapanqui. Huan techilhui para teipa ma niquinajocuis nopa tepatacme ipan nopa caxa.”

³ “Huajca nijchijqui se caxa ica cuahuit cati itoca acacia, huan nojquiya nijtequi nopa ome tepacti cati yancuic huan nitejoc sempa ipan tepet. ⁴ Huan TOTECO quijicuilo ipan nopa tepacti nopa majtacti tanahuatilme, quej quichijtoya achtohuiya quema camanaltic amohuaya ten tatajco nopa tit ipan nopa tepet quema nochí anmosentilijtoyaj tatzinta. Huan techmacac nopa tepacti, ⁵ huan nihaultemoc ten nopa tepet. Huan quej technahuatijtoya TOTECO nijtali ipan nopa caxa cati quichijchijtoyaj masehualme huan noja nozona eltoc.”

⁶ (Huan teipa tiisraelitame tiquistejque campá iniamel iconehua Jaacán, huan tinejneneque hasta Mosera. Huan nozona mijqui Aarón huan tijtojque. Huan Eleazar, icone Aarón, mochijqui hueyi totajtzi. ⁷ Huan nozona tiquisque huan tiyajque para Gudgoda, huan ten nozona tiyajque Jotbata campá onca miyac atajme. ⁸ Huajca nozona TOTECO, pampa hueyi iyolo, quintapejpeni nopa hueyi familia ten Leví para ma quihuicaca nopa caxa cati quipiya nopa majtacti tanahuatilme cati elqui nopa camanal sencahuali cati TOTECO quichijtoya tohuaya. Nojquiya TOTECO quintapejpeni nopa levitame para ma moquetzaca iixpa. Quintapejpeni para ma quitequipanoca huan ma tetiochihuaca ica itequiticayo. Huan ya nopa quichihuaj hasta ama. ⁹ Huan yeca nopa levitame amo quiselise tali para iniaxca quej anisraelitame cati aniniichihua anquiselise, pampa levitame quiselise TOTECO quej iniaxca. Quej nopa yaya quijijtoytoc.)

¹⁰ “Huan na, ni Moisés, niitztoya ipan nopa tepet para seyoc 40 tonati huan 40 yohuali, quej achtohuiya nijchijqui. Huan sempa nijtajtani TOTECO para ma amo amechtontamiliti huan sempayano techtacaquili.

¹¹ “San techilhui: ‘Ximocualtali para xiquinyacana ni israelitame para ma quitanitij nopa tali cati ni quintencahuili inihuejcapan tatahua.’

Cati TOTECO tajtani

¹² “Huan ama ya ni cati tajtani TOTECO Dios, yaya cati moTeco, ma tijchi-huaca tiisraelitame. Quinequi ma tiquimacastica huan ma tijtoquilica iojhui. Quinequi ma tiquicnelica huan ma tijtequipanoca ica nochi toyolo huan toalma. ¹³ Quinequi ma tijchihuaca nochi nopa tanahuatilme huan leyes cati nimechilhuiá ama para huelis tiitztose ica cuali. ¹⁴ Xijmatica para nochi ni taltipacti huan nochi ilhuicacti hasta nopa ilhuicac cati más huejcapa, huan nochi cati eltoc ipani, nochi iaxca amoTECO Dios. ¹⁵ Pero masque tahuel hueyi TOTECO, yaya quinicneli amohuejcapan tatahua, huan quintapejpeni san injuanti huan amojuanti, aniniixhuihua, ten nochi masehualme ipan ni taltipacti para anelise aniaxchahua quej ama anquiiitaj.

¹⁶ “Huajca xijquixtica cati fiero ipan amoyolo huan ayecmo ximotzontochonnequica iixpa TOTECO.

¹⁷ “TOTECO Dios, yaya cati toTeco tojuanti, yaya nopa Dios cati más hueyi ten nochi cati quintocaxtiaj dioses. Más hueyi que nochi cati quintocaxtiaj tetecome. Quena, tayacantoc ten nochi masehualme. Yaya nelpano hueyi huan nelpano quiptiya chichahualisti hasta temajmati. Amo aquí quichicoicnelía huan amo aquí huelis quimacas se tenijqui para ma quichihuili se favor. ¹⁸ Yaya quinchihuilia cati xitahuac cati icnotzitzitzi huan cahual ahume. Quinicnelía seyoc tali ehuan cati ama itztoque amohuaya, huan quintamaca huan quinyoyontía. ¹⁹ Huajca amojuanti, nojquiya monequi xiquinicnelica seyoc tali ehuan pampa nojquiya aneliyayaj seyoc tali ehuan ipan tali Egipto.

²⁰ “Xijtepanitaca amoTECO Dios huan san ya xijhueyichihuaca. Xiitztoaca antemachme iixpa, huan san ipan ya itoca xitatestigojquetzaca. ²¹ Pampa san ya quinamiqui para anquihueyichihuase, pampa san ya Dios huan san ya amoTeco Dios. Yaya iseltitzi quichijtoc nopa huejhueyi tiochichahualnescayot cati anquiiitztoque, huan nopa huejhueyi tamanti cati temajmati. ²² Quema tohuejcapan tatahua ajsitoj tali Egipto san eliyayaj 70 masehualme, pero ama TOTECO techchijtoc tiisraelitame ma timomiyaquilica hasta tiitztoque timiyaqui quej inimiyaca nopa sitalime ten ilhuicac.

11

Ihueyitilis TOTECO

¹ “Huajca monequi xiquicnelica amoTECO Dios huan mojmosta xijchi-huaca nochi nopa tanahuatilme, leyes huan tamachtilisti cati ya amechmacatoc. ² TOTECO Dios quinequi xijmachilica cuali quenicatza ya quintalnamictía masehualme cati amo quinequij quitoquilise. Amo niquinca-manalhuía amoconehua. Injuanti amo quixmajtoque, yon amo quiitztoque nochi nopa tamanti huejhueyi cati ica TOTECO tetatzacuiliti. Amo quiitztoque itatanex huan ihueyi chichahualis huan quenicatza tetajtolxitahua. ³ Amo quiitztoque nopa tanextili huan huejhueyi tiochichahualnescayot cati TOTECO quichijqui ica Tanahuatijquet Faraón huan imasehualhua ipan tali Egipto. ⁴ Amo quiitztoque cati quichijqui ica nopa Egipto soldados huan inincahuayojhua huan inintatehuijca carrojhua, huan quenicatza quinisahui

ipan nopa Hueyi At Chichiltic quema injuanti techtepotztocayayaj. TOTECO quintzontamilti huan hasta ama iniixhuihua amo teno hueli techchihuilíaj. ⁵ Amoconehua amo quimatij nochi cati TOTECO amechchihuilijitihualajtoc ipan nopa huactoc tali huan hasta quema tiajsicoj nica. ⁶ Ayemo itztoyaj quema TOTECO quitatzacuiliti Datán huan Abiram, iconehua Eliab huan iixhuihua Rubén. Huan amo quitaque quenicatza tapojqui tali huan quintolo ica nochi inifamilias, iniyoyoncalhua huan ica nochi cati quipixtoyaj quema nochi tiisraelitame tijtachilijtoyaj. ⁷ Pero amojuanti cati anhuejhueyi nochi anquitztoque huan anelque antestigos ten nopa huejhueyi tamanti cati quichijqui TOTECO.

Tatiochihualme ipan nopa tali tatencahualli

⁸ “Huajca xijchihuaca nochi nopa tanahuatilme cati ama nimechmacatoc huan quej nopa anelise antejteticque para ancalaquise huan anmoaxcatise nopa cuali tali campa anajsitij. ⁹ Huan quej nopa anitztose miyac xihuit ipan nopa tali campa nochi onca hasta mocahua itajca cati TOTECO quintencahuilli amohuejcapán tatahua para amechmacasquía amojuanti cati aniniixhuihua. ¹⁰ Nopa tali campa anajsitij amo quej nopa huactoc tali ten Egipto campa anquistejque campa monequiyaya anquitocase sesen xinacti, huan teipa ica amoicxi anquicuatopehuayayaj nopa at ipan aojme para anquiatequise. Ica miyac tequit nopa tali huelqui temaca itajca. ¹¹ Pero nopa tali campa anajsitij para anmoaxcatise elis se tali campa onca tepeme huan tepexit. Nopa tali quitequihuía cati huala ten ilhuicac para quitatejzelhuis. ¹² Ya nopa se tali cati amoTECO Dios iselti quimocuitahuía huan yaya quitachilía ten ipejya hasta itamiya sesen xihuit.

¹³ “Sinta ica miyac tamocuitahuilli anquichihuase nochi ni tanahuatilme cati ama nimechmacatoc huan anquicnelise amoTECO Dios, huan anquihueyichihuase ica nochi amoyolo huan ica nochi amoalma, ¹⁴ yaya quichihuas ma huetzi at sesen huelta quema monequi para nopa tali amechmacas yejyectzi pixquisti ten trigo, aceite huan cuali xocomecat iayo. ¹⁵ Nojquiya TOTECO quichihuas ma yoli cuali sacat ipan potrero para amotapiyálhua huan anquipiyase tacualisti hasta mocahuas.

¹⁶ “Pero ximomocuitahuica miyac para amo teno amechcajcahuas para anmoiyocacahuase ten TOTECO. Amo teno o amo aquí ma amechchihua anquinhueyichihuase teteyome huan anmotancuaquetzase iniixpa. ¹⁷ Sinta ya nopa anquichihuase, TOTECO cualanis ica amojuanti huan amo quicahuilis ma taquiyahui. Quej nopa, nopa tali amo temacas itajca huan nimantzi anmiquise ipan nopa cuali tali cati anquiselise.

Xiquinmachtica amoconehua

¹⁸ “Huajca monequi xicajocuica ni camanali ipan amoyolo huan ipan amotalnamiquilis. Ma eli quej anquillpisquíaj ipan amomax o ipan amocuaixco para anquineltochase huan amo anquinelcahuase. ¹⁹ Xiquinmachtica amoconehua ni tanahuatilme. Xiquinpohuilica ipan ojti quema annentinemij. Xiquinmachtica quema anmocohtecase huan quema annijquehuase. ²⁰ Xiquijcuiloca ni tanahuatilme ipan amotaquetzalhua huan ipan amocalte ipan amochajchaj. ²¹ Quej nopa amonemilis huan ininemilis amoconehua nelhuejcahuas ipan nopa cuali cati TOTECO amechchihuilijtoc. Amoiixhuihua itztose nopona nochi tonali quema oncas ilhuicacti huan taltipacti.

²² “Sinta senquisa anquichihuase nochi ni tanahuatilme cati ama nimechnahuatía xijchihuaca, huan anquiicnelise amoTECO Dios huan anquitoquilise ipan nochi iojhui, ²³ TOTECO quinquixtis amoixpa nochi nopa masehualme cati ama itztoque nozona. Anquintanise masque más miyaqui huan más quipiyaj chichahualisti que amojuanti. ²⁴ Campa hueli campa anyase, nopa tali mochihuas amoaxca. Inepa amotal pehuas campa nopa huactoc tali ipan sur huan yas hasta campa tali Líbano ica norte, huan ten nopa hueyat Eufrates campa quisa tonati yas hasta nopa Hueyi At Mediterráneo campa temo tonati. ²⁵ Amo aquí huélis amechtánis pampa TOTECO Dios quinchihuas ma momajmática nochi masehualme huan ma amehimacásica campa hueli campa anpanose, quej yaya quiijtojtoc para quichihuas.

²⁶ “Huaica ama nijtalijtoc amoixpa tatióchihualisti o tatléchi hualisti para xijtápejpenica catijqui anquinequij. ²⁷ Pampa anquiselise huéyi tatióchihualisti sinta anquineltocase nochi itanahuatilhua TOTECO Dios cati nimechnahuatijtoc ama. ²⁸ Huan tatléchi hualisti anquiselise sinta anquintoquilise teteyome cati ama amo anquinoxmatij. Anquiselise tatléchi hualisti sinta amo anquineltocase itanahuatilhua o sinta anquicahuase iojhui TOTECO Dios cati nimechnextilijtoc.

²⁹ “Quema amoTECO Dios ya amechhuicatos ipan nopa tali cati anmoaxcatise, xijtalica se tatióchihualisti ipan tepet Gerízim huan se tatléchi hualisti ipan tepet Ebal. ³⁰ Ni tepeme eltoc nepa seyoc lado ten hueyat Jordán para campa temo tonati ipan inintal nopa cananeos cati itztoque ipan tamayamit iixmelac altepet Gilgal cati mocahua nechca nopa ahuacuame campa itoca More. ³¹ Ama ya nechcatitoc para anquioxotonase hueyat Jordán para anquitanitij nopa cuali tali cati amoTECO Dios amechmactilij. Huaica quema ya anquitanose nopa tali huan ya ipan anitztose, ³² xijchihuaca nochi ni tanahuatilme cati ama nimechmactilijtoc.

12

Ma quihueyichihuaca TOTECO san ipan nopa yoyon tiopamit

¹ “Ya ni nopa tanahuatilme huan leyes cati monequi anquichihuase nochi amonemilis ipan nopa tali cati TOTECO ininDIOS amohuejcapan tatahua amechmacas para anmoaxcatise.

² “Monequi senquisa xiquintamiltica nochi nopa lugares campa nopa masehualme quinhueyichihuaj ininteteyohua ipan nochi nopa altepeme cati anquintanise. Xijxosoloca nopa lugares masque eltoc ipan tepeme, o tachiquiltipa o itantita huejhueyi cuame ica inixihuiyo. ³ Xijtahuisoca nochi taixpame, huan xijtatapatzaca nochi nopa teme cati quinitaj para tatzejtzeltique. Xijtatica nochi taquetzalme campa quihueyimatij nopa teteyot Asera pampa tahuel fiero cati quinextía nozona. Xiquintamiltica nochi nopa taixcopincayome ten nochi sequinoc dioses. Ma amo mocahua yon se tamanti cati amechelnamiquiltis para nopona tahuejchihuayaj.

⁴ “Amo hueli anquihueyichihuase amoTECO Dios ica tacajchualisti campa hueli quej nopa masehualme nozona quichihuaj. ⁵ San hueli anquihueyichihuase huan anquimacase tacajchualisti ipan itiopa campa yaya mocahuas. Huan ten nochi nopa talme cati nochi amofamilias quiselise, yaya quitapejpenis canque quinequi ma mocahuas ichaj. Huan nopona huélis anyase para anquihueyichihuatij. ⁶ Nopona anquinhucase tapiyalme para tacajchualisti tatatili, huan amodiezmo, huan nochi nopa tacajchualisti cati anquitananase huan anquihuisose iixpa para

anquimacase. Huan nozona anquihuicase nopa sequinoc tacajcahualisti cati monequi quema anquitencahuilise TOTECO taya anquichihuase. Nojquiya nozona anquihuicase nopa tacajcahualisti cati anquimacase ica amopaquilis, huan nojquiya nopa tacajcahualisti por iniachtohui ecahua amohuacaxhua huan amoborregojhua. ⁷ Huan san nozona huelis anilhuichihuase ica amofamilias huan anquicuase nopa nacat ten amotacajcahualis cati elis para amojuanti. San nozona campa ichaj amoTECO Dios huelis anpaquise inihuaya amofamilias ica nopa pixquisti cati quisqui ten amotequi huan por nochi cati yaya ica amechtiochijtoc.

⁸ “Nozona sesen masehuali ayecmo huelis quichihuas cati ya quinequi quej anquichihuaj ama. Nozona monequi senqisa anquitoquilise ni tanahuatilme. ⁹ Amantsij ayemo anajsij campa anmosiyajquetzase ipan nopa tali cati amoTECO Dios amechmacas, ¹⁰ pero se tonali anquipanose ni hueyat Jordán huan anajsitij ipan nopa tali cati amechmactilis huan anitztose anmajcajtoque ten nochi amocualancaitacahua cati achtohuiya amechyahualojtoyaj. Yeca ayecmo monequi anmajmajtose. ¹¹ Huajca ipan nopa tonali monequi anquihuicase nochi tacajcahualisti cati nimechnahuatijtoc hasta nopa lugar cati amoTECO Dios quitapejpenis para ichaj. Anquihuicase tapiyalme para tacajcahualisti tatatili, huan sequinoc tacajcahualisti, huan amodiezmo, huan amotacajcahualis tahuisolis, huan nochi tacajcahualisti cati anquimacase quema anquitencahuilijtose TOTECO para anquichihuase se tenijqui. ¹² Huan nozona iixpa amoTECO Dios anilhuichihuase san sejco ica amoconehua huan amotequipanojcahua. Nojquiya xiquinnotzaca nopa levitame cati itztose ipan amoaltepe, pampa injuanti amo quiselise tali para iniaxca quej amojuanti anquiselise.

¹³ “Pero ximomocuitahuica para amo xiquintatica tapiyalme para TOTECO san campa hueli. ¹⁴ San huelis anquichihuase ipan nopa lugar cati yaya quitapejpenis quej ichaj ipan ital se hueyi familia. Nozona huelis anquimacase tacajcahualisti TOTECO huan anquichihuase nochi cati nimechnahuatijtoc.

¹⁵ “Pero quena, huelis anquimictise amotapiyalthua campa amochajchaj ipan ten hueli tonali para anquicuase ininacayo. Xijcuaca nochi nopa nacat cati anquinequi quej TOTECO Dios amechtiochijtos ica tapiyalme. Huan nochi masehualme huelis quicuase nopa nacat masque tapajpactique iixpa TOTECO quej quijtohua tanahuatili para totajtzitzi, o amo tapajpactique quej hasta ama anquimictijtihualahuij huan anquincuaajtihualahuij nochi tamanti masame campa hueli. ¹⁶ San nopa esti amo huelis anquicuase. Monequi anquitoياهوase talchi quej elisquía at.

¹⁷ “Pero quema anajsitij ipan nopa tali, amo huelis anquimictise, yon amo huelis anquicuase se tapiyali quej se tacajcahualisti nozona ipan amoaltepe o campa amochajchaj. Amo huelis anquicuase ipan amoaltepe nopa diezmo ten amotrigo, o amoxocomeca iayo, o amoaceite pampa iaxca TOTECO. Yon nozona amo huelis anquincuase nopa achtohui ehuan ten amohuacaxhua, yon amoborregojhua cati elise se tacajcahualisti para TOTECO. Amo xijcuaca nozona yon se tapiyali cati anquijtojqe anquimacase TOTECO quej se tacajcahualisti. Masque elis se tacajcahualisti pampa anquitencahuilijque TOTECO taya anquichihuase, o masque se tacajcahualisti cati san ica amopaquilis anquimacase, o se tacajcahualisti cati anquihuijhuise iixpa para anquimacase. ¹⁸ Nochi ni tacajcahualisti monequi xiquimictica nechca tiopamit iixpa amoTECO Dios campa yaya quitapejpenis para nozona quiquetzas ichaj. Nozona iixpa amoTECO Dios anquicuase inihuaya

amoconehua, amotequipanojcahua huan nopa levitame cati ehuan amoal-tepe. Quej nopa san sejco huelis anpaquise por itajca nochi amotequi.
¹⁹ Nochi tonali ipan amonemilis ximomocuitahuica para amo anquiel-ahuase anquinmajmacase cati anquipiyaj nopa levitame cati itztoque amo-huaya.

²⁰ “Quema amoTECO Dios quihueyilis nopa tali quej quijto quichihuas huan anquinequise anquicuase nacat, huan anitztoque huejca ten nopa tiopamit huelis anquicuase ipan ten hueli tonali ²¹ masque huejca anitz-toque ten nopa lugar cati TOTECO Dios quitapejpenis para ichaj. Huelis anquinmictise amohuacaxhua, o amoborregojhua cati TOTECO amech-macatos, huan huelis anquicuase cati anquinequise nopona campa anitz-tose quej nimechnahuatijtoc. ²² Quena, quej ama onca caquihuili para anquinmictise masame campa hueli huan cati hueli masehuali masque tapajpactic o amo tapajpactic huelis quicuas, teipa anquipiyase caquihuili para anquicuase ininacayo sequinoc tapiyalme ipan nopa tali sinta anitztose huejca ten campa tiopamit. ²³ Pero monequi xijpiyaca miyac tamocuitahuili para amo xijcuaca nopa esti, pampa nopa esti quihuica inemilis nopa tapiyali. Huajca amo quinamiqui anquicuase inemilis se tapiyali ica nopa nacat. ²⁴ Monequi anquitoyahuase ieso talchi huan ma yahui quej elisquía at. ²⁵ Amo xijcuaca esti para amojuanti huan amoconehua itztose cuali pampa anquichijtose cati xitahuac iixpa TOTECO. ²⁶ Pero nopa tamanti cati anquiiyocatalijtoque quej se nemacti o tacajcahalisti para TOTECO, o cati monequi anquinmacase quema anquitamiltise cati anquitencahuil-ijtoque anquichihuase, nochi ya ni monequi anquinextise iixpa TOTECO ipan nopa lugar campa yaya quitapejpenijos. ²⁷ Huan san nopona ipan itaixpa amoTECO Dios huelis anquitatise nopa tacajcahalisti tatatili. Huan nopa sequinoc tacajcahalisti monequi anquitoyahuilise nopa esti ipan taixpamit, pero nopa nacat huelis anquicuase.

²⁸ “Xijtacaquilca cuali huan xijchihuaca nochi cati nimechnahuatijtoc para quej nopa amojuanti huan amoconehua ica cuali anitztose nochipa, pampa anquichijtose cati quinamiqui huan cati xitahuac iixpa amoTECO Dios.

Amo quema ma quinhueyitalica teteyome

²⁹ “Teipa amoTECO Dios quintzontamiltis nochi nopa masehualme, huan anquiselise nopa tali para amoaxca huan nopona anitztose. ³⁰ Quema ya panotos nochi ya nopa, amo ximomasiltica ica inintalnamiqulis nopa masehualme cati achtohuiya itztoyaj nopona huan TOTECO quinquinxti amoixpa. Amo ximoyolilhua: ‘¿Quenicatza quichijque nopa masehualme cati itztoyaj nica achtohui para quinhueyichihuase ininteteyohua?’ Amo ximoyolilhua para nojquiya anquinequise anquinhueyichihuase. ³¹ Pampa nochi tamanti cati nelpano fiero cati amoTECO Dios amo quiiyohuía huan amo quinequi quitas, ya nopa quichihuaj nopa masehualme cati ama itztoque ipan nopa tali para quinhueyichihuaj ininteteyohua. Hasta quintatíaj inincone-hua ipan tit para quinmacase ininteteyohua quej elisquía se tacajcahalisti.

³² “Huajca monequi ximomocuitahuica miyac para anquichihuase nochi cati nimechnahuatijtoc. Amo xijquixtilica, yon amo xijpihuilica ni tanahu-atilme.

1 “Teipa huelis monextis campa amojuanti se cati quijtos para yaya se tajtolpanextijquet, o yaya se tachixquet cati tachiya ipan temicti huan ipan tanextili. 2 Huelis amechyolmelahuas taya hualas achi nepa huan teipa nelia mochihuas cati amechpohuilijtoc. Pero sinta nojquiya amechilhuis: ‘Ma tiyaca huan ma tiqintoquilica nopa teteyome cati amo anquixmatij, huan ma tiqinhueyichihuati,’ 3 amo xijneltoquilica. Pampa ica cati quijtohua nopa tajtolpanextijquet o se tachixquet, TOTECO Dios amechyeyjyecohua para quimatis sinta anquicneliaj ya ica nochi amoyolo huan ica nochi amoalma. 4 Monequi xijtoquilica san amoTECO Dios huan san ya xiquimacasia. Monequi xijchijinemica itanahuatil huan xijtacaquilica cati amechilhuia. Monequi san ya xijhueyimatica huan ipan ya ximotatzquilica. 5 Huan nopa tajtolpanextijquet o tachixquet monequi xijmictica pampa amechilhui ximosentanchihuaca ica amoTECO Dios cati amechmanahui campa antetequipanohuayayaj san tapic ipan tali Egipto. Quinequiyaya amechiyocatalis ten nopa ojti cati TOTECO amechnahuatijtoc xijtoquilica. Huan sinta anquimictise, huajca anquiquixtise cati amo cuali ten amojuanti.

6 “Monequi xijmictica ten hueli masehuali masque se cati anquicneliaj sinta quinequi amechcuapolos para anquihueyichihuase ten hueli teteyot. Huajca sinta se moicni, o se moichpoca, o motelpoca, o mosihua cati tiquicnelia, o se mohuampo cati más nechca mitzichtacailhuis para cuali anquihueyichihuase teteyome cati ta huan amohuejcapan tatahua amo anquixmatiyayaj, monequi xijmictica. 7 Sinta quijtohua xiquintoquilica ininteteyohua masehualme cati itztoque nechca, o huejca, o nica o nozona ipan nochi taltipacti; 8 amo xijtacaquilica. Amo xiquintoquilica nopa teteyome, yon amo xijtasojtaca nopa masehuali. Monequi xijnextica miyacapa cati quijtojtoc, 9 huan teipa monequi xijmictica. Ta achtohui monequi ximomatana ica ya quema nochi mosentiliaj para tijmajcahulis nopa achtohui tet, huan teipa nochi sequinoc masehualme nojquiya quichihuase. 10 Xijtepachoca hasta miquis, pampa yaya quinequiyaya amechiyocatalis ten TOTECO Dios cati amechquixti ipan tali Egipto campa antetequipanohuayayaj san tapic. 11 Huan quej ni nochi sequinoc israelitame quimatise huan majmahuise huan amo aqui motemacas para nojquiya quichihuas se tamanti fiero quej nopa.

12 “Huan quema amoTECO amechmacatosa nopa tali, ya ni cati anquichihuase sinta anquicaquise para onca se altepet 13 campa itztoque israelitame cati amo cuajcualme huan cati amo quineltocej TOTECO. Sinta anquicaquise para itztoque cati quincupolohuaj sequinoc cati itztoque nozona huan quinnextiliaj ma quinhueyichihuaca teteyome cati amo anquixmatij, 14 monequi xitatzintoca cuali campa hueli ten quenicatza eltoc nopa tamanti nozona. Huan sinta nozona tatajco ten amojuanti melahuac eltoc se altepet ten masehualme cati quichihuaj ni tamanti cati TOTECO amo quinequi quitas, 15 monequi xiquinmictica ica macheta nochi cati itztoque ipan nopa altepet ica nochi inintapiyalhua huan xijtamiltica nochi cati nozona onca. 16 Teipa xijsentilica nochi cati pajpatiyto cati onca ipan nopa altepet huan xijtalica tatajco tianquis. Huan xijtatica huan nojquiya xijfamitatica nochi nopa altepet quej se tacajcahualisti tatatili para amoTECO Dios. Huan quej nopa, nopa altepet san mochahuas se tamontomit ten tet cati sosoltic huan ayecmo quema quicalchijchihuase.

17 “Amo teno ximoaxcatca cati eltoya ipan nopa altepet. Nochi xijzontamiltica huan xijtatica para TOTECO amo cualanis ica amojuanti quej quinculancaitayaya nopa masehualme ipan nopa altepet. Huan quej nopa

amechtasojtas, huan amechicnelis huan amechchihuas ximomiyaquilica quej quintencahuili amohuejcapan tatahua para quichihuas. ¹⁸ Huan ya nopa quichihuas pampa anquineltoquilitose itanahuatil amoTECO Dios, huan anquichijtose nochi nopa tanahuatilme cati na nimechmacatoc ama, huan anquichijtose san cati xitahuac iixpa TOTECO.

14

¹“Aniconehua TOTECO Dios, huajca amo xijchihuaca cati sequinoc quichihua]. Amo ximotequilica yon se tamanti ipan amotacayohua quej quichihua] para quinhueyitalise ininteteyohua, yon amo xijhuatanica amocuaixco quema se acajya miqiu. ² Anitztoque masehualme cati antaiyocatalilme para amoTECO Dios pampa yaya amechtapejpenijtoc para aniaxcahua. Amechtapejpenijtoc ten nochi sequinoc xinach masehualme ipan taltipacti para anelise se tamanti masehualme cati senquisa ya iaxca.

Tapiyalme tapajpactique huan cati amo tapajpactique (Lv 11:1-47)

³“Amo xijcuaca yon se tapiyali cati amo tapajpacti iixpa TOTECO.

⁴“Ya ni inintoca tapiyalme cati huelis anquincuase: torojme, borregoyme, chivoyme, ⁵ nochi tamanti masame, huan nopa cuatitan chivoyme huan borregoyme.

⁶“Huelis anquincuase nochi nopa tapiyalme cati quicuaajcuaj ompa inintacualis huan nojquiya quipiyaj iniisti maxaltic. ⁷ Pero amo huelis anquincuase tapiyalme sinta san quicuaajcuaj ompa inintacualis, pero amo maxaltic iniisti, o maxaltic iniisti pero amo quicuaajcuaj ompa inintacualis.

“Huajca amo xiquincuaca camellos, cuatochime huan pesoyme, pampa masque quicuaajcuaj inintacualis ompa, amo ixtapantoc iniistihua. Nochi injuanti mocahuaj amo tapajpactique para amojuanti.

⁸“Huan pitzome nojquiya amo tapajpactique pampa masque quipiyaj iniisti maxaltic, amo quicuaajcuaj ompa inintacualis. Amo xijcuaca nacat ten ni tapiyalme, yon amo xiquitzquica inintacayohua cati mictoque.

⁹“Ica tapiyalme huan michime cati itztoque ipan at, san huelis anquincuase cati quipiyaj ininpileltapalhua huan nojquiya cati quipiyaj inincacahuayo. ¹⁰ Pero nochi sequinoc monequi anquinitase para amo tapajpactique.

¹¹“Huelis anquincuase nochi tamanti totome cati tapajpactique. ¹² Pero amo huelis anquincuase nopa totot cati itoca hueyi cuatojti, yon cati quitapana omit, yon nopa tzojppilot cati itztoq nechca at. ¹³ Amo hueli anquincuase yon se tamanti tzojppilot, ¹⁴ yon se tamanti cacalot, ¹⁵ yon nopa huejcapantoc cuatotoli avestruz, yon nopa cuatojti ten tayohua, yon nopa atotot cati chipahuac. Amo hueli anquincuase yon se tamanti cuatojti, ¹⁶ yon nopa tololojti, yon nopa cuamojmojti cati hueyi, yon nopa cuamojmojti cati ijcatoc iijhuiyo ipan itzonteco. ¹⁷ Amo xijcuaca nopa pelicano cati patani campaa at, yon nopa cuatojti cati quincua tapiyalme mictoque, yon nopa totot yayahuic cati quincua michime, ¹⁸ yon nopa cigüehña, yon nopa garza, yon nopa atotome cati quipiyaj inimetz huehueyac, yon nopa tzotzo. Nochi ya ni amo tapajpactique huan amo hueli anquincuase.

¹⁹“Nochi tamanti sayolime cati patanij san sejco anquinitase para amo tapajpactique huan amo huelis anquincuase. ²⁰ Pero cati quipiyaj inieltapal quej chapolime hueli anquinitase para tapajpactique, huan quena, huelis anquincuase.

21 “Amo xijcuaca yon se tapiyali cati mijqui iseltitzi, pampa anitztoque masehualme cati tatzejzelolifique para TOTECO Dios. Pero, quena, huelis anquinmacase o anquinmacaquitise nopa nacat sequinoc tali ehuan cati itztoque amohuaya ipan amoaltepehua. Inijuanti quena, huelis quicuase.

“Amo xiquicxitica se pilchivojtzi ipan ilechi inana quej quichihua se tenahualhuijquet.

Quenicatza ma temacaca diezmo

22 “Ximomocuitahuica para sesen xihuit xiquiyocatalica para TOTECO nopa diezmo cati iaxca ten nochi cati anquipixcase. 23 Huan quema ya antemacase TOTECO Dios amodiezmos ten trigo, xocomecat iayo, aceite, huan amoachtahui ejcahua ten amohuacaxhua, amoborregojhua huan amochivojhua, huajca huelis anquicuase cati elis amoaxca iixpa ya ipan nopa lugar cati yaya quitapejpenis para quiquetzas ichaj para itztos. Huan quej nopa anquimajtiyase anquimacasise TOTECO Dios para nochipa.

24 Huan se tonali quema TOTECO Dios amechtiochihuas huan amechmacas tali, sinta amotal mocahuas nelía huejca ten nopa lugar campa yaya qui-quetzas ichaj, huelis amo huelis annejnemise huan anquihuicase nochi tamanti huan tapiyalme cati mochihua amodiezmo. 25 Sinta quej nopa eltoc, huajca huelis anquinmacase nopa diezmos ten sesen tamanti huan san nopa tomi anquihuicase campa TOTECO Dios quitapejpenijtos para ichaj.

26 Huan quema anajsitij, huelis anquicohuase nochi cati annoilhuisse más cuali. Huelis anquicohuase huacaxme, borregojme, xocomecat iayo, o ten hueli seyoc taili o tamanti cati anquineguise para huelis anquimacase. Huan nozona teipa huelis anihuichihuase huan anpaquise iixpa amoTECO Dios san sejco ica nochi amochampoyohua.

27 “Pero amo quema xiquelcahuaca xiquinmajmacaca cati anquipiay nopa levitame cati itztoque ipan amoaltepehua pampa amo quiselijtoque inintal quej amojuanti.

28 “Huan sese eyi xihuit monequi xiquiyocatalica amodiezmo ten nochi pixquisti ten nopa xihuit huan xicajocuica ipan amoaltepehua. 29 Huan ya nopa anquinmacase nopa levitame pampa inijuanti amo quiselijtoque tali, o xiquinmacaca sequinoc tali ehuan cati ajsitoque amohuaya, o cati icnotzitzi o cahual sihuame. Quej nopa inijuanti nojquiya huelis tacuase hasta ixhuise. Huan sinta quej nopa anquichihuase, amoTECO Dios amechtiochihuas ipan nochi tamanti cati anquichihuase.

15

Tapojpolhuili ten nochi tahuiquilisti

1 “Sesen chicome xihuit monequi xiquintapojpolhuica israelitame cati amechtahuiquilijtose, 2 huan quej ni anquichihuase. Sinta sese israelita masehuali quitanejtjtoc ihuampo o iteixmatca se tenijqui, quema ajsis nopa xihuit, ma quitapojpolhui cati quitanejtjtoc. Amo ma quichihuanti ma quitaxtahui cati quitahuiquiliyaya sinta yaya se israelita pampa ya ajsico nopa xihuit cati TOTECO quixquetztoc para tapojpolhuili ten nochi israelita tahuiquilisti. 3 Pero se seyoc tali ejquet cati amechtahuiquilía, quena, noja hueli anquitajtanise ma amechcuelipili cati amechtahuiquilía ipan nopa xihuit. Pero sinta elis se israelita cati amechhuiquilía, amo. 4 Para quej nopa amo itztose teicnelztitzi ipan nopa tali cati annoaxcatise, pampa amoTECO Dios nelía amechtiochihuas miyac nozona, 5 sinta anquineltoctiyase nochi nopa tanahuatilme cati ama nimechmacatoc. 6 Quena, amoTECO Dios amechtiochihuas quej quijtojtoc quichihuas, huan yeca anquipiyase para

anquintanejtise sequinoc talme, pero anisraelitame amo quema monequis anmotanehuise. Huan anquinnahuatise miyac talme huan inimasehualhua, pero amojuanti amo huelis amechnahuatis se sejcayoc ejquet.

⁷ “Quema amoTECO Dios amechmacas nopa tali, sinta itztose sequij amoisraelita icnihua nopona cati nelía teicneltziti, amo ximochihuaca nel anoylletique ica injuanti. Yon amo ximoitzcuintequica. ⁸ Xijtapoca amomax huan ica paquilisti xiquintanejtica nochi cati monequi. ⁹ Huan ximomocuitahuica para amo ximoillhuica para amo antetanejtise pampa nehca para hualas nopa xihuit chicome quema motapojpolhuis nochi tahuiquilisti. Sinta quej nopa anmoillhuise huan anquinxextise anixcualantoque ica seyoc israelita cati mopantía ipan taohuijcayot huan amo teno anquitanejtise, huajca ximomocuitahuica pampa yaya huelis quinojnotzas TOTECO huan quipohuilis cati anquichijtoque. Huan TOTECO quijtos para antajtacolchijtoque. ¹⁰ Monequi nochipa antepalehuise ica paquilisti huan amo ximochihuaca anitzcuinte pampa sinta anquichihuase ni tanahuatili, amoTECO Dios amechtiochihuas ipan nochi tamanti cati anpehuase anquichihuase. ¹¹ Cati teicneltziti nochipa itztose ipan taltipacti huan yeca nimechnahuatía, xijpiyaca hueyi amoyolo ica amojuanti nochi cati quipanoj taohuijcayot ipan amotal, huan xiquinpalehuica miyac.

Xihuit para quinmajcahuase tetequipanohuani
(Éx 21:1-11)

¹² “Sinta se israelita tacat o sihuat mochihuas teicneltzi hasta monamacas ica ta para elis moaxca para mitztequipanos san tapic, san huelis mitztequipanos chicuase xihuit. Huan ipan xihuit chicome ten itequi, monequi tijmajcahuas para ayecmo elis moaxca. ¹³ Huan quema tijmalacanis, amo xijcahuili ma yahui san quiaja. ¹⁴ Monequi xijmaca sequij motapiyalhua huan se parte ten motrigo huan moxocomeca iayo cati cuali. Quena, xijmaca ten nochi cati TOTECO ica mitztiochijtoc huan mitzmacatoc. ¹⁵ Amo xiquelcahuaca para amojuanti nojquiya antetequipanohuayayaj san tapic ipan tali Egipto huan TOTECO Dios amechmaquixti, huan yeca nimechmaca ni tanahuatili.

¹⁶ “Huan sinta se moisraelita tequipanojca quijtohua amo quinequi mitzcahuas pampa mitzicnelía huan quipactía mochaj huan quilita para cuali tijmocuitahuía, ya ni cati tijchihuas. ¹⁷ Xijcui se hueyi huitzmalot huan xijnechcahuiliti campacaltemit huan tijcoyonilis inacas ipan nopa caltemit, huan quej nopa yaya elis motequipanojca para nochipa. Nojquiya san se hueli tijchihuas ica mosihua tequipanojca cati quinequis mocahuas mohuaya. ¹⁸ Pero quema ajsis tonali para tijmajcahuas se motequipanojca huan nelía quistehuas, amo ximoillhui para amo cuali tijmajcahuas. Xiquelnamiqui para ipan nopa chicuase xihuit mitztequipanojtoque cuali huan itequi ipati eliyaya ompa ten itequi san ten hueli tequipanojquet. Huan nojquiya moTECO Dios mitztiochihuas ipan nochi tamanti cati tijchihuas pampa tijmajcajqui ica cuali quej mitznahuatijtoc xijchihua.

Iaxcahua TOTECO nochi achtohui ejca tapiyalme

¹⁹ “Nochi nopa oquichme cati achtohui tacatij ipan amohuacaxhua o amoborregojhua, monequi xiquiniyocaquixtica para TOTECO Dios.

“Amo xijtequipanoltica nopa toro cati achtohui tacatis ten amohuacaxhua, yon amo xijximaca nopa achtohui ejca borrego. ²⁰ Pampa monequi sesen xihuit anquimictise nopa achtohui ehuani para se tacajcualisti huan anquincuase ica amochampoyohua iixpa TOTECO Dios ipan nopa

lugar cati yaya quitapejpenijtos para quiquetzas ichaj. ²¹ Pero sinta se achtohui eja tapiyali quipiya se tenijqui cati amo cuali, amo huelis anquimacase TOTECO Dios quej se tacajcahualisti. Amo xijmacaca se tapiyali cati amo hueli nemi, o huelis amo tachiya, o quipiya seyoc tamanti. ²² Pero nopa tapiyalme, quena, huelis teipa anquincuae ica amochampoyohua nopona campa anitztoque. Huan cati hueli masehuali hueli quicuas, masque tapajpactic o amo, quej ama, nochi hueli quicuase se masat. ²³ Pero amo xijcuaca ieso. San xijtoyahuaca talchi quej elisquía at.

16

Nopa ilhuime ipan sesen xihuit

(Éx 23:14-17; 34:18-24)

¹ “Quema ajsis nopa metzti Abib ipan toisraelita calendario quema qui-xquetztoc para nopa ilhuit cati itoca Pascua*, monequi temachti xiquel-namiquica nopa ilhuit pampa ipan nopa metzti amoTECO Dios amechquixti ipan tali Egipto ica tayohua.

² “Huan ipan nopa Pascua ilhuit anquitencahuase iixpa amoTECO Dios tacajcahualisti tatatili ten huacaxme huan borregojme. Huan xijmacaca ipan nopa lugar cati yaya quitapejpenijtos para nopona moquetzas ichaj.

³ Quema antemacase se tapiyali para se tacajcahualisti huan teipa anquicuae, monequi xijcuaca ica pantzi cati amo quipiya tasonejcajot. Huan para chicome tonati anquicuae pantzi cati amo quipiya tasonejcajot, pampa nopa pantzi amechelnamiquiltis ten taijyohuillisti. Huajca xiquel-namiquica nopa tonali ipan nochi amonemilis quema anmoisihuiltijque miyac para nimantzi anquistehuase ipan tali Egipto huan amo oncac yon se talojtzi para mosonehuas amopantzi. ⁴ Huan ipan nopa chicome tonati amo oncas yon se pilquentzi tasonejcajot ipan nochi amotal. Nojquiya monequi nimantzi xijcuaca inacayo nopa tapiyali cati anquimacatoque TOTECO quej tacajcahualisti ipan nopa achtohui tiotac. Huan yon se quentzi ten nopa nacat ma amo mocahuas para mosta ijnaloc.

⁵ “Amo xijmictica nopa tapiyali para Pascua, yon amo xijcuaca ipan ten hueli altepét cati TOTECO Dios amechmacas. ⁶ San huelis anquichihuase ipan nopa lugar cati yaya quitapejpenijtos para nopona mocahuas ichaj. Huan monequi xijmictica ica tiotac quema ya temoc tonati, pampa ipan nopa hora antacuaajtejqe ipan tali Egipto. ⁷ Huan inacayo nopa tapiyali cati anquimactilíaj TOTECO monequi xiquixcitica huan xijcuaca campa amoTECO Dios quitapejpenis para ichaj, huan tonilis ica ijnaloc anmocuepase para amochajchaj. ⁸ Huan ipan nochi nopa chicuase tonati ten nopa ilhuit anquicuae pantzi cati amo quipiya tasonejcajot. Huan ipan chicome tonati nochi amojuanti anquichihuase se tasentili para anquihueyichihuase amoTECO Dios huan ipan nopa tonali amo anquichihuase yon se tamanti tequit.

Nopa ilhuit ten samanos

⁹ “Quema panotosa chicome samanos ten quema pejqe anquixcaj trigo, ¹⁰ anquichihuase nopa ilhuit ten samanos para anquitepanitase amoTECO Dios huan anquimacase TOTECO nopa tacajcahualisti cati ipan amoyolo quisa anquimacase. Xijmacaca quej imiyaca TOTECO amechtiochijtos. ¹¹ Huan anilhuechihuase huan anpaquise nopona iixpa amoTECO Dios ipan nopa lugar cati yaya quitapejpenijtos para nopona quiquetzas ichaj. Huan

* **16:1** 16:1 Quemantica huetzi ipan marzo huan quemantica ipan abril ipan cati ama tocalendario.

anyase nozona san sejo ica amoconehua, huan amotequipanojcahua, huan inihuaya nopa levitame, nopa sequinoc tali ehuani, nopa icnotzitzitzi huan nopa cahual sihuame cati itztose ipan amoaltepe. ¹² Huan san sejo anquielnamiquise para aneltoyaj antefequipanohuani ipan tali Egipto. Huajca monequi xijchihuaca nochi ni tanahuatilme.

Nopa ilhuit quema mochihuaj Pilxajcaltzitzitzi

¹³ “Huan sempa quema ya antantose anquixcaj trigo huan antantose anquipatzcase itajca amoxomeca, anquichihuase seyoc ilhuit para chicome tonati huan nopa ilhuit anquitocaxtise ilhuit quema mochihuaj Pilxajcaltzitzitzi. ¹⁴ Ipan nopa ilhuit nojquiya xipaquica ica amoconehua, huan amotequipanojcahua, huan inihuaya nopa levitame, nopa seyoc tali ehuani, nopa icnotzitzitzi huan nopa cahualme cati itztose ipan amoaltepe.

¹⁵ “Para chicome tonati anilhuchihuase huan anpaquise iixpa amoTECO Dios nozona campa yaya quitapejpenijtos, pampa amoTECO Dios amechti-ochihuas miyac ica miyac pixquisti por nochi amotequi cati anquichihuase. Huajca teipa monequi anpaquise san sejo ica hueyi paquillisti.

¹⁶ “Huajca quej nimechilhujtoc nica nochi taca israelitame monequi monextise expa ipan se xihuit iixpa amoTECO Dios campa yaya quitapejpenijtos para quipiyas ichaj. Anmonextise ipan nopa Pascua ilhuit, ipan nopa ilhuit ten samanos, huan ipan nopa ilhuit quema mochihuaj pilxajcaltzitzitzi. Huan amo ximonextica san amomax, ¹⁷ monequi sesen ma quihuicas itacajcahualis para temacas quej imiyaca TOTECO Dios quitiochijtoc.

Quenicatzca tetajtolsencahuase nopa jueces

¹⁸ “Xiquintequitatica jueces huan tequichihuani ipan sesen altepet ipan nopa tali cati amoTECO Dios amechmacas para elis iaxca sesen hueyi familia. Huan injuanti ma quintajtolsencahuase masehualme quej quinamiqui. ¹⁹ Huan nopa jueces ma amo tacajcayahuaca quema tetajtolsencahuaj, yon ma amo techicoicnelica. Ma amo mocahuaca para se quinmacas se tenijqui para quixtzacuase cati nopa juez ya quimati para melahuac o para quipatzca inincamanal masehualme cati xitahuaque.

²⁰ “Ica nochi amoyolo xijtemoca nopa tetajtol sencahualisti cati nelia xitahuac, huan san ya nopa xijtoquilica para huelis noja anitztose huan amoaxcatise nopa tali cati amoTECO Dios amechmacas.

²¹ “Amo xijquetzaca se taquetzali para nopa teteyot Asera pampa tavel fiero. Yon se cuahuit quej ni amo hueli moquetzas nechca itaxpa TOTECO Dios. ²² Yon amo quema xiquinquetzaca teme tatecti para anquinhueyimatise pampa ya nopa amoTECO Dios amo queinequi quitas.

17

Xijmacaca TOTECO tacajcahualisti cati cuali

¹ “Amo xijmactilica amoTECO Dios se toro o se borrego cati mococohua, o cati quipolohua se tenijqui, o quipiya se tenijqui cati amo cuali. Pampa TOTECO Dios amo queinequi quitas se tacajcahualisti quej nopa.

² “Quema anitztose ipan nopa altepeme cati amoTECO Dios amechmacas, huelis anquicaquise para se tacat o se sihuat quipinahualtia TOTECO huan quixpano nopa camanal sencahuali. ³ Huelis quihueyichihua se teteyot o huelis anquicaquise para nopa masehuali quihueyichihua tonati, o metzti o sitalime cati nimechnahuatijtoc amo xiquinhueyichihuaca. ⁴ Quema anquicaquise para se quej nopa quichihua, monequi xitatzintocaca cuali campa hueli ten nopa tamanti, huan sinta anquimatise para nelia temacht

panotoc nopa tamanti cati TOTECO amo quinequi quiitas campa anisraelitame, ⁵ huajca monequi xijhuicaca nopa masehuali cati quichijtoc cati amo cuali hasta campa antetajtolsencahuaj. Huan nozona xijtepachoca hasta miquis.

⁶ “Monequi itztose ome o eyi masehualme cati tatestigjquetzase para quiitztoque quema quichijqui cati fiero para se juez huelis quiijtos ma miqui. Amo aqui hueli anquimictise sinta setzi masehuali tatestigjquetza para quiitztoc quichijqui cati amo cuali. ⁷ Huan quema monequi antemictise, injuanti cati tatestigjquetzase para quichijqui cati amo cuali, achtohui quimajcahuilise tet. Huan teipa nochi masehualme cati itztose ipan nopa altepet, nojquiya ya nopa quichihuase. Huan quej nopa tamis nochi cati amo cuali cati onca ipan nopa altepet.

⁸ “Quemantica monequi antequichihuani anquisencahuase se cuesoli cati más ohui, huan ohui anquimatise cati melahuac. Huelis acaya temicti, o huelis onca se hueyi cualanti, o huelis ome motehuiyayaj. Ipan ten hueli tamanti cati pano ipan amoaltepe, sinta ohui anquimatise cati melahuac, huajca xiyaca campa TOTECO Dios quitapepenijtoc para quiquetzas ichaj. ⁹ Huan nozona xiquinpohuilica nopa levita totajtzitzi o nopa juez cati nozona tequiti. Huan xiquinilhuica taya cuesoli anquijpiyaj. Huan injuanti quitajtolsencahuase quej quinamiqui, huan amechilhuisse taya monequi anquichihuase. ¹⁰ Huan antequichihuani, monequi anquichihuase san se quej amechnahuatise xijchihuaca cati quihuicaj tequit nozona campa TOTECO quitapepenijtos para itztos. Amo teno más xijchihuaca. ¹¹ Senquisa xijtoquilica nopa tanahuatili cati amechmachtise huan xijchihuaca nochi inincamanal. Amo xijpataca yon quentzi. ¹² Huan sinta se masehuali yahui quitajtaniti consejo se juez o se totajtzi cati quitequipanohua TOTECO huan teipa mohueyimatis huan amo quineltocas cati nopa juez o nopa totajtzi quiilhui, monequi miquis. Quej nopa anquitzontamiltise taixpanoli cati onca campa anisraelitame. ¹³ Pampa nochi masehualme quimatise cati panotoc huan majmahuisse para taixpanose.

Quenicatza ma nejnemi se israelita tanahuatijquet

¹⁴ “Quema ya anajsitose ipan nopa tali cati amoTECO Dios amechmacas, huan ya anmoaxcatijtose huan nozona anitztose, huelis anquinequise se tanahuatijquet. Huelis anquijjtose: ‘Tijnequij tijpiyase se tanahuatijquet cati technahuatis quej quiipiyaj sequinoc masehualme cati itztoque ipan ni talme tonechca.’ ¹⁵ Huajca monequi xijtequitalica quej tanahuatijquet nopa tacat cati TOTECO Dios quitapepenis. Monequi xijtalica se israelita huan amo se cati seyoc tali ehua. ¹⁶ Pero amo quinamiqui para nopa tanahuatijquet quinmiyaquilis icahuayojhua, yon para quintitanis tacame ma itztotij ipan tali Egipto para quinmiyaquilis icahuayojhua nozona, pampa TOTECO amechilhujtoc para ayecmo quema ximocuepaca tali Egipto. Quej nopa quiijtohua. ¹⁷ Amo quinamiqui para se tanahuatijquet ma quinpiyas miyac sihuame pampa quiquixtise ten iojhui TOTECO. Huan amo cuali para quiipiyas miyac oro o plata.

¹⁸ “Huan quema nopa tanahuatijquet quiselis itequi para tanahuatis, monequi yaya iseli quiijcuilos ni tamachtilme ipan se amat para quipixtos. Ma quiijcuilo iniixpa nopa levita totajtzitzi. ¹⁹ Huan nopa amatajcuiloli ica ni tanahuatilme monequi nopa tanahuatijquet nochipa quiipiyas imaco. Monequi qui pohuas mojmota para nochi inemilis para quimatis quenicatza quitepanitas TOTECO Dios huan quenicatza quichijtinemis nochi camanali cati quiijtohua ni tamachtili. ²⁰ Quej nopa amo moilhuis yaya más hueyi que sequinoc imasehualhua huan amo moiyocaquixtis ten ni tanahuatilme.

Huan quej nopa yaya ica nochi iixhuihua huejcahuase para tanahuatise ipan tali Israel.

18

Cati quiselise nopa levita totajtzitzi

¹ “Nopa levita totajtzitzi huan nochi sequinoc levitame, amo quiselise tali quej sequinoc israelitame quiselise. Monequi quicuase ten nopa tacajcahualisti cati masehualme quimactilíaj TOTECO ipan tit. Quena, panose ica nopa diezmos cati quiselise. ² Amo quiselise yon se tali quej nopa sequinoc israelitame quiselise, pampa inijuanti quiselise TOTECO para iniaxca huan amo tali. Quej nopa quiijtojtoc.

³ “Huan quema masehualme quihualicaj tacajcahualisti para quimactilise TOTECO, huelis se toro o se borrego, nopa totajtzitzi monequi quiselise iajcol, icamachal huan cati onca iijtico nopa tapiyali. ⁴ Nojquiya monequi quiselise nopa achtohui pixquisti ten trigo, xocomeca at huan aceite, huan nopa achtohui iniihuiyo amoborregojhua quema anquinximase. ⁵ Pampa amoTECO Dios quintapejpenijtoc nopa levitame ten nochi sequinoc huejhueyi familias para inijuanti huan ininteipan ixhuihua para nochipa san ya ma quitequipanoca.

⁶ “Sinta teipa cati hueli levita cati itztoc ipan cati hueli altepet ipan tali Israel, quinequi quisas huan yas ipan seyoc altepet campá TOTECO quitapejpenijtoc para ichaj, ⁷ yaya huelis tequitis para TOTECO Dios quej sequinoc ilevita icnihua cati quitequipanohuaj TOTECO nopona. ⁸ Yaya hueli quiselis san se imiyaca tacualisti quej nopa sequinoc quiselíaj huan ya nopa elis iyoca ten quiselis quema miquis itata.

Ma amo quintoquilica cati ehuaní ipan nopa tali

⁹ “Quema ya anajsitose ipan nopa tali cati amoTECO Dios amechmactilis para amoaxca, amo quema xijchihuaca quej quichihuaj nopa masehualme cati nopona itztoque. ¹⁰ Amo quema xijtencahuaca se amocone quej tacajcahualisti, yon amo xijchihuaca se amocone ma pano ipan tit. Amo quema xiyaca ica se cati tetonalita, o cati teilhuía taya oncas teipa, o cati tamati, o ica se cati tenahualhuía. ¹¹ Amo quema xiyaca ica se cati tehuihuichihua, yon cati tequiti ica magia, yon cati quinnojnótza ajacame o cati mijcatzitzí. ¹² TOTECO Dios tahuel quincualancaita cati quichihuaj nochi ni tamanti, yon amo quinequi quinitas. Huan yaya quinquixtis nopa masehualme amoixpa ipan nopa tali pampa inijuanti quichihuaj nochi ni tamanti cati fiero. ¹³ Monequi amojuanti xiitztoca senquisa xitahuac iixpa TOTECO. ¹⁴ Nopa masehualme ipan nopa tali cati anmoaxcatise quintacaquilíaj cati tenahualhuíaj huan tetonalitaj, pero ica amojuanti, amoTECO Dios amo amechcahuilía xijchihuaca ya nopa.

Nopa tajtolpanextijquet cati teipa hualas

¹⁵ “TOTECO Dios quichihuas para ma quisa ten campá amojuanti seyoc tajtolpanextijquet quej na huan yaya, quena, monequi anquitacaquilise. ¹⁶ Ya nopa cati anquijtanijque TOTECO Dios huejcajquiya ipan tepet Sinaí, ipan nopa tonali quema nochi anmosentilijque nopona iixpa, pampa anquiijtojque: ‘Ayecmo tijnequij tijaquise itoscac TOTECO Dios, yon ayecmo tijnequij tiquitase nopa hueyi tit, pampa timajmahuij para timiquise.’ Quej nopa anquiijtojtoc.

¹⁷ “Huajca TOTECO techilhui: ‘Cuali cati quiijtojtoque nopa masehualme.

¹⁸ Na nijchihuas ma quisa ipan ininteixmatcahua se tajtolpanextijquet quej

ta. Huan niqulh Luis nocamanal cati yaya quinilhuiti nopa masehualme. Huan yaya quinpohuilis cati nijnahuatís. ¹⁹ Huan cati huéli masehuali cati amo quicaquis nocamanal cati nopa tajtolpanextijquet quijjtos ten na, na nijtatzacuiltis. ²⁰ Huan sinta nopa tajtolpanextijquet mohueyimatís huan quijjtos camanali cati na amo nijmacatoc o sinta camanaltís ica inintequiticayo teteyome, huajca monequi miquis.’ ²¹ Huelís amojuanti anmoilhuisse: ‘¿Huan quenecatza tijmatise cati quijjtohua amo ya cati TOTECO quinahuatijtoc?’ ²² Quej ni anquimatise. Sinta se masehuali quijjtohua camanalti ica notequiticayo na niamoteco huan amechilhuis taya panos teipa, huan amo mochihuas, huajca amo nijmacatoc nopa camanali cati quijjto. Yaya san camanaltic ten ya iselti italnamiqulís pampa mohueyimatqui. Huajca amo xiquimacasica ya.

19

Altepeme campa huéli momanahuisse (Nm 35:9-28; Jos 20:1-9)

¹ “Quema amoteco Dios ya quintzontamiltijtos nopa masehualme ipan nopa tali huan anmoaxcatijtose inialtepehua huan ininchajchaj, ² monequi anquiyocatalise eyi altepeme ipan nopa tali cati TOTECO Dios teipa amechmacas para anmoaxcatise. ³ Xijxexeloca nopa tali ica eyi partes, huan ipan sesen parte xiquiyocacahuaca se altepet para amojuanti campa se masehuali huéli mochololtís sinta quimictís seyoc masque amo quinequiyaya. Huan monequi anquimocuitahuisse cuali nochi nopa ojti cati onajsi ipan nopa altepeme.

⁴ “Huan se cati temictijtoc huelís mochololtís huan mocahuas nepa huan quimanahuis inemilís sinta quinextís para amo quinequiyaya temictís huan amo panoc pampa quicualancaitayaya nopa masehuali. ⁵ Sinta ome tacame yahuij cuatzontequitij campa onca huejhueyi cuahuit huan nopona se copínís ihacha huan quiajsís ihuampo, huajca cati temicti huelís mochololtís ipan ten huéli ten nopa eyi altepeme huan quej nopa quimanahuis inemilís. ⁶ Pero sinta tahuel huejca mocahua nopa altepet campa huéli momanahuis, huelís iteixmatca nopa mijcatzi quipantís nopa temictijquet huan quimictís ipan ojti masque amo quinamiquiyaya miquis, pampa amo quimicti nopa masehuali pampa quicualancaitayaya. ⁷ Huajca yeca nimechnahuatía xiquiyocalica eyi altepeme para amojuanti anquintequihuisse.

⁸⁻⁹ “Huan sinta ica cuidado anquitoquilise nochi ni tanahuatilme cati nimechmaca ama, huan anquicnelise amoteco Dios, huan nochipa annejnemise ipan iojhui, huajca amoteco Dios más quihueyilí amotal. Quena, yaya amechmacas nochi nopa tali cati quintencahuilijtoc amohuejcapan tatahua para amechmacas. Huan quema ya nopa panos, huajca monequi anquiyocaquixtise seyoc eyi altepeme campa momanahuisse masehualme iyoca ten nopa eyi cati ya anquipixtose. ¹⁰ Huan quej ni amo anquiyahuase ieso se masehuali ipan nopa tali cati amoteco Dios amechmactilía sinta amo quinamiqui para miquis. Huan quej nopa amo huetzís ipan amojuanti se tatzacuilti ten se miqulísti.

¹¹ “Pero sinta se tacat quicualancaita seyoc, huan quiojchiya campa yahui para quimictís, huan teipa yas ipan se ten ni altepeme campa huéli momanahuis, ¹² monequi nopa huehue tacame ten nopa altepet quintitanise tacame para quicuitij ten nopa altepet campa huéli momanahuis. Huan monequi ma quimactilica se iteixmatca cati más nechca nopa mijcatzi para ma quimicti. ¹³ Amo xijtasojtaca cati temictijtoc. Xiquinquixtica ipan

israelitame cati quitoyahuaj inieso masehualme cati amo teno quichijtoque. Quej nopa nochi elis cuali campá anitzotse.

¹⁴ “Ipan nopa tali cati TOTECO Dios amechmacas, monequi anquitepanitase nepamit. Amo quema xiquijcuenica nopa teme cati quinextíaj se nepamit cati quitalijque amohuejcapán tatahua.

Istacatica tajtolpanextiani

¹⁵ “Amo quema xijtajtacoliti se masehuali ica ten huéli taixpanoli sinta itztoc setzi masehuali quej testigo cati quiitac ten quichijquí. Nochipa monequi ome o eyi testigos cati quijtohuaj san se camanali ten quenicitatza taixpanoc.

¹⁶ “Sinta se tacat cati fiero italnamiqulis monextis quej se testigo huan quiistacahuís seyoc, huan quiijtos taixpanotoc, ¹⁷ huajca nopa ome tacame monequi monextise iixpa TOTECO huan iniixpa nopa totajtziti huan nopa jueces cati quipiyase tequiticayot ipán nopa tonali. ¹⁸ Huan nopa jueces quitemose ica cuidado ten panotoc. Huan sinta quipantise para cati tetelhuía quitestigojquetztoc cati amo melahuac, ¹⁹ huajca nopa tatzacuilti cati quinequiyaya ma quiseli nopa seyoc, quiselis yaya cati istacatic. Huan quej nopa anquitamiltise nochi cati amo cuali cati onca tatajco amojuanti.

²⁰ “Huan nochi masehualme quimatise ni tamanti huan majmahuise huan ayecmo quitatelhuise se cati amo teno quichijtoc. ²¹ Amo xijtasojtaca cati tatestigojquetztoc cati amo melahuac. Sinta quinequiyaya ma miquí nopa seyoc, huajca yaya xijmictica. Huan sinta quinequiyaya para nopa seyoc ma quipolo iixteyol, itancoch, imax o iicxi, huajca xijquixtillica cati yaya iixteyol, itancoch, imax o iicxi.

20

Tanahuatili ten tatehuilisti

¹ “Quema anquisase para anquintehuitij amocualancaitacahua, sinta anquinitase para quinpiyaj más cahuayojme, huan más tatehuijca carrojme, huan más miyaquí soldados que amojuanti, amo xiquinimacasica pampa amojuanti amohuaya yahui amoTECO Dios cati amechquixti ipán tali Egipto. ² Huan quema ajsis tonali para anmotehuise, monequi nopa totajtziti monechahuís campá nopa tatehuijca pamit ten soldados huan quiijtos: ³ ‘Xijtacaquilica anisraelitame, ama anmotehuise ica amocualancaitacahua. Amo ximoyolmajmatica, yon amo xiquinimacasica, yon amo xihuihuipicaca, yon amo xitapoloca iniixpa. ⁴ Pampa amoTECO Dios, yaya itztoc ica amojuanti. Yaya quintehuí amocualancaitacahua huan quichihuás xitatanica.’

⁵ “Huan sempa monequi nopa tayacanani ma quincamanalhuica nopa soldados huan sinta se ten injuanti quichijtoc se yancuic cali huan ayemo ipán itztoc, ma yahui ichaj. Pampa huélis miquis ipán tatehuilisti huan elis seyoc cati achtohui quitequihuis nopa yancuic cali. ⁶ Sinta se ten injuanti quitotoc se yancuic xocomeca mili huan ayemo quicalilijtoc itajca, ma yahui ichaj. Pampa huélis miquis ipán tatehuilisti huan elis seyoc cati quitequis nopa xocomecat itajca. ⁷ Huan sinta se ten injuanti quijtantoc se ichpocat huan ayemo mocuillijtoc, ma yahui ichaj. Pampa huélis miquis ipán tatehuilisti huan elis seyoc cati mocuilis nopa ichpocat.

⁸ “Huan nopa tayacanani nojquiya quintazintoquilise nopa soldados sinta se tahuel majmahui huan moilhuía tapolos sinta yas tatehuiti. Sinta se quiijtos para, quema majmahui, ma yahui ichaj para nopa majmati amo quinmahuas sequinoc soldados.

⁹ “Huan quema nopa tayacanani ya tantose quincamanalhuíaj nopa soldados, quincahuase inimaco nopa capitanes ten soldados.

¹⁰ “Huan quema anmonechcahuise campa se altepet para anquitehuise, achtohui xiquintencahuilica quenicatza hueli amoyoltalise inihuaya. ¹¹ Huan sinta nopa masehualme cati itztoque ipan nopa altepet quiselíaj nopa camanali huan amechcaltapose para ancalaquise, huajca amechtequipanose san tapic ipan tequit cati ohui. ¹² Pero sinta amo quinequise moyoltalise amohuaya huan san pehuase amechtehuise, huajca xijyahualoca nopa altepet huan xijtehuica. ¹³ Huan quema amoTECO Dios amechmactilis amomaco, xiquinmictica ica macheta nochi tacame cati itztoque nopona. ¹⁴ Pero nopa sihuame, coneme, tapiyalme huan nochi cati onca ipan nopa altepet elis para amojuanti anquihuicase. Huan ximoyolpaquiltica quema anquitequihuíaj nochi nopa tamanti cati amoTECO Dios amechcahuilijtoc xiquincuilica amocualancaitacahua. ¹⁵ Huan ya ni nojquiya xijchihuaca ica nochi altepeme cati mocahua huejca ten campa anitztoque.

¹⁶ “Pero ipan altepeme cati nechca amotal cati amoTECO Dios amechmacas para amoaxca monequi amo aqui xijcahuaca ma itzto. ¹⁷ Monequi xiquintzontamiltica nochi heteos, amorreos, cananeos, ferezeos, heveos huan jebuseos quej TOTECO Dios amechnahuatijtoc xijchihuaca.

¹⁸ “Quinequi xiquinmictica para amo amechnextilise anquichihuase nopa fiero tamanti cati injuanti quichihuaj para ica quinhueyichihuaj ininteteyohua. Pampa quej nopa amechchihuase xitajtacolchihuaca iixpa amoTECO Dios.

¹⁹ “Sinta monequi miyac tonali anquitehuise se altepet para anmoaxcatise, xijcuaca inintajca nopa cuame cati nopona onca, pero amo xijzontequica. Nopa cuame amo ya tacame cati amocualancaitacahua para anquitehuise. ²⁰ San huelis anquintzontequise cuame cati amo temacaj inintajca para anquintequihuise quej taquetzalme para anquimaquilise itepa nopa altepet hasta huetzis amomaco.

21

Taya ma quichihua cati quipantía se mijcatzi

¹ “Ya ni xijchihuaca quema anitztose ipan nopa tali cati amoTECO Dios amechmacas para amoaxca sinta anquipantise canajya itacayo se masehuali cati nesí para acajya quimictijtoc huan amo aqui quimati ajquiya quimicti para anquitatzacuiltise. ² Nopa huehue tacame huan jueces quixtamachihuase quesqui ihuejcaca ten campa eltoc nopa mijcatzi hasta sesen altepeme cati nechca para quimatise catijque altepet más nechca. ³ Huajca nopa huehue tacame cati itztoque ipan nopa altepet cati más nechca monequi quitzquise se becerro cati ayemo quitequipanoltijtoque para taxahuas, ⁴ huan quihuicase campa se tali cati quiapiya se atajti ica at campa amo quema tapoxonijtoque, yon amo quema tatojtoctoque. Huan nopona quiquechpostequise nopa becerro.

⁵ “Huan teipa monechcahuise nopa levita totajtzitzi cati TOTECO Dios quintapejpeni ma quichihuaca itequi huan para tatiocihuase ipan itoca. Huan nopa totajtzitzi tetajtolsencahuase ipan ten hueli cualanti huan cati injuanti quijtose, ica ya nopa tamis camanali. ⁶ Huan nopa huehue tacame ten nopa altepet cati más nechca momajtequise itzonco nopa becerro cati quiquechpostejque, ⁷ huan quijtose ni camanali: ‘Tojuanti amo tijmictijtoque nopa tacat, yon amo tiquitztoque ajquiya quimicti. ⁸ TOTECO, techtapojpolhui ni tajtacoli timoisraelita masehualhua cati ta techcojtoc.

Amo techtajtacolti ica ieso ni tacat cati amo teno quichijtoya.’ Huan quema quej nopa quichihuase nopa huehue tacame, nopa altepet ehuani amo quihuicase tajtacoli por imiquilis nopa masehuali. ⁹ Pampa quema anquichihuase cati xitahuac iixpa TOTECO, anmoquixtilise nopa tajtacoli cati nochi anquihuicasquíaj quej anquimictijtosquíaj nopa tacat.

Sihuame cati quinitzquíaj ipan tatehulisti

¹⁰ “Quema anquitehuitij se altepet ten amocualancaitacahua huan TOTECO Dios quichihuas para ma huetzica amomaco, xiquinhuicaca ilpitoque nopa masehualme para amechtequipanose. ¹¹ Huan sinta acajya quitaas ipan injuanti se sihuat cati achi yejyetzzi huan quixtocas para mocullis, huajca ¹² monequi quihuicas ichaj. Huan nozona ichaj quichihualtis ma motequili itzoncal huan motzonhuatanis huan ma quitequi iistihua. ¹³ Huan monequi ma moquixtili iyoyo cati quipixtoya quema quitzquijque huan motalilis cati yancuic. Quema ya quipiya se metzti yajmaxtic ipan ichaj para quinchoquilis itatahua, nopa tacat ya huelis mocullis huan mochihuas ihuehue huan yaya mochihuas isihua. ¹⁴ Huan sinta teipa ayecmo quixtocas huelis quicahuas nopa sihuat ma yahui campa ya quinequi. Pero nopa tacat amo huelis quinamacas ica tomi, yon amo quichihuas quej se sihua tequipanojquet cati quicojtoc pampa quipinahualtijtoc.

Cati elis iaxca se achtohui ejquet

¹⁵ “Ya ni nopa tanahuatilme para se tacat cati quinpiya ome isihuahua, huan se quiicnelia huan nopa seyoc amo. Sinta nochi ome quintacatiltijtoque iconehua, pero nopa achtohui ejquet eli icone nopa sihuat cati amo quiicnelia, monequi quichihuas cati xitahuac. ¹⁶ Quema ajsis tonali para nopa tetaj quinmajmacas iconehua cati quipixtoc, amo huelis quichihuas quej achtohui ejquet se icone nopa sihuat cati quiicnelia pampa amo xitahuac. Iachtohui cone eli yaya cati icone isihua cati amo quiicnelia huan yaya, quena, quipiya quiselis ompa imiyaca quema miquis itata. ¹⁷ Monequi quimacas nopa iachtohui cone ompa imiyaca que cati quiselis nopa sequinoc iconehua, pampa ya nopa iaxca pampa yaya cati achtohui tacatqui ten ichichualis itata. Huan quipiya tanahuatili para quiselis nochi cati quitocarohua se achtohui ejquet masque icone isihua cati amo quiicnelia.

Se telpocat cati amo taneltoaca

¹⁸ “Sinta acajya quipiya se icone cati amo taneltoaca huan san mosisinia, ya ni cati quichihuase itatahua. Sinta amo quinnetloca cati quihuhíaj itatahua, yon amo momajmatia quema quitatzacuiltíaj, ¹⁹ huajca itatahua monequi quitzquise huan quihuicase campa nopa huehue tacame cati tayacanaj ipan nopa altepet. ²⁰ Huan monequi quinilhuitij para inicone tahuel tzontochontic huan mosisinia huan amo quinnetloquilia. Ma quinilhuiti sinta yaya se neltacuajquet huan taiquet. ²¹ Huan teipa nochi tacame ten nopa altepet quimictise nopa telpocat ica tet. Huan quej nopa anquitamiltise cati amo cuali ten tatajco amojuanti, pampa nochi israelítame quicaquise, huan momajmatise.

Miyac tanahuatilme

²² “Sinta se tacat quichihuas se hueyi tajtacoli ica cati monequi miquis, huan anquimictise huan anquihuyionise itacayo ipan se cuahuit, ²³ amo quinamiqui para itacayo mocahuas nozona se yohual huan quichihuas amo tapajpactic nopa tali. Monequi xijtocaca ipan nopa tonali pampa

tatelchihualisti cati huiyontoc ipan se cuahuit, huan amo quinamiqui xijchihuaca amo tapajpactic nopa tali cati amoTECO Dios amechmacas para anmoaxcatise.

22

Tanahuatili para timopalehuise

¹ “Sinta anquipantíaj mocuapolojtoc se tapiyali cati seyoc iaxca, huelis se borrego o se toro cati taxahua, amo quinamiqui para amo teno anquichihuase. Monequi sempa anquihuiquilise itapiyal. ² Pero sinta iteco nopa tapiyali itztoc huejca, o sinta amo tiquixmati ajquiya iteco, huajca nopa tapiyali anquihuicase amochaj. Nopona anquipixtose hasta iteco hualas huan quitemos, huan huajca monequi anquicuepilise. ³ Nojquiya ya nopa monequi anquichihuase ica se burro, o se yoyomit, o ten hueli tamanti cati seyoc masehuali ipan amotal quipolos huan anquipantise. Amo san xijchihuaca quej elisquía amo anquiitaque nopa tamanti.

⁴ “Sinta anquiitase huetztoc ipan ojti se acajya iburro o itoro, amo san xijcahuaca quej nopa. Xijpalehuitij iteco para quitananas.

⁵ “Se sihuat ma amo moquenti yoyomit ten tacame huan se tacat amo moquenti yoyomit ten sihuame, pampa TOTECO Dios amo quinequi quitas cati quej nopa quichihua.

⁶ “Sinta tijpantía se toto tepasoli talchi, o ipan se cuahuit, huan quiyiya iconehua o tecsisti, huan nopa tena quinpachohua, amo huelis tiquitzquis nopa tena ica iconehua. ⁷ Huelis tijcuis itecsis o iconehua, pero xijcahuas ma yahui nopa tena. Huan quej nopa nochi yas cuali ica amojuanti huan anquiyiyase se hueyi nemilisti.

⁸ “Quema acajya ten amojuanti quichihuas se cali yancuic, monequi quitailis se tepamit itejteno calcuitapa, huan quej nopa amo quihuicas tajtacoli por ieso se cati amo momocuitahuis huan mocuatepexihuis ten calcuitapa huan miquis.

⁹ “Ipan se xocomeca mili amo huelis anquitocase seyoc tamanti xinachtitajaco isurcos, pampa TOTECO ayecmo amechcahuilis xijtequihuica cati anquitocoque yon nopa xocomecat itajca.

¹⁰ “Amo quema xijpoxonica amotal ica se toro huan se burro para san sejco ma tequitica.

¹¹ “Amo ximotalilica yoyomit taxinepaloli ica iniichcayo borregojme maneltic ica lino.

¹² “Xijtalilica itehuaxo ipan nahui esquina ten nopa taquemit cati anmoquentíaj.

Tanahuatilme para ma amo momecatica

¹³ “Sinta se tacat mocuilis se ichpocat, huan cochis ihuaya huan teipa quicualancaitas, ¹⁴ huan quitaijilhuis para ipa quinixmajtoya sequinoc tacame o quijtos miyacapa para quema mosejcotilijque, amo quipanti para yaya nelía eliyaya se ichpocat, huajca ya ni xijchihuaca. ¹⁵ Sinta quej nopa quijtos, itatahua nopa ichpocat monequi yase campa nopa huehue tacame cati tayacanaj ipan nopa altepet huan cati mosehuíaj campa icalteno, huan quinnextilise nopa yoyomit cati quiixnextis para temachtit inicone nelía eliyaya se ichpocat quema monamicti ica nopa tacat. ¹⁶ Huan nopa tetaj quinilhuis nopa huehue tacame: ‘Nijmactili noichpoca para elis isihua ni tacat, pero ama ayecmo quinequi. ¹⁷ Ama quijtohua para amo nelía eliyaya se ichpocat quema mocuili. Pero nica eltoc cati quinextía para, quena, nelía eliyaya se ichpocat.’ Huan quema quijtos ya ni, quipajpatahuas nopa

yoyomit ica ieso iniixpa nopa huehue tacame. ¹⁸ Huajca nopa huehue tacame quitzquise nopa tacat cati mosihuaajtitoya huan quitatzacuiltise. ¹⁹ Quichihualtise para quiixtahuas se multa cati elis 100 plata tomi huan nopa tomi quimacase itata nopa ichpocat pampa quipinahualti se israelita ichpocat. Huan teipa nopa sihuat quejipa elis isihua huan amo quema huelis quicahuas ipan nochi inemilis.

²⁰ “Pero sinta quitajilhuía huan nesis para melahuac amo eliyaya se ichpocat quema mocuili huan amo onca se tamanti cati quinextía para quena, se ichpocat, ²¹ huajca monequi nopa huehue tacame quihuicase icalteno ichaj itata, huan nopa masehualme ten nopa altepet quimictise ica tet. Pampa quichijtoc se hueyi taixpanoli ipan israelitame huan tacanenqui quema itztoya ipan ichaj itata. Huan quej nopa anquitamiltise nopa taixpanoli cati onca tatajco anisraelitame.

²² “Sinta anquipantise se tacat cati motectoc ihuaya se sihuat cati quiyiya ihuehue, monequi anquinmictise nochi ome. Huan quej nopa anquitamiltise nopa tajtacoli ipan israelitame.

²³ “Sinta anquipantise se tacat cati motectoc ihuaya se ichpocat cati quijtantoc seyoc tacat, quej ni anquichiuase. Sinta ni tajtacoli pano ipan nopa altepet, ²⁴ huajca monequi anquinhuicase nochi ome campa tetajtolsencahuaj nopa huehue tacame nechca nopa caltemit ipan itepa nopa altepet huan anquinmictise ica tet. Monequi nopa ichpocat miquis pampa amo quintzajtzili ma quimanahuica cati itztoyaj ipan nopa altepet. Huan nopa tacat miquis pampa quipinahualtijtoc isihua se iisraelita teixmatca. Huan quej nopa anquitamiltise tajtacoli cati onca tatajco ten amojuanti.

²⁵ “Pero sinta se tacat quipantis se ichpocat ipan se potrero cati quijtantoc seyoc tacat huan quichihualtis ma moteca ihuaya, san monequi xijmictica nopa tacat cati quichihualti ma ihuaya moteca. ²⁶ Nopa ichpocat amo teno xijchihuilica pampa amo tajtacolchijtoc para miquis. Se tacat cati quichihualtia se ichpocat ma moteca ihuaya monequi miquis san se quej monequi miquis se tacat cati quimictía seyoc masehuali. ²⁷ Pero xijmictica san nopa tacat pampa quipanti nopa ichpocat iseli campa potrero, huan masque tzajtztosquía chichahuac, amo aqui quicactosquía para quimanahuis.

²⁸ “Sinta quipantíaj para se tacat quichihualtijtoc ma moteca ihuaya se cuali ichpocat cati ayemo aqui quijtantoc, ²⁹ nopa tacat quiyiya quimactilis itata nopa ichpocat 50 plata tomi pampa quipinahualtijtoc. Nojquiya monequi mocuilis nopa ichpocat huan amo huelis quicahuas ipan nochi inemilis.

³⁰ “Amo aqui ma motecas ihuaya isihua itata, yon icahual sihua itata pampa ica ya nopa quipinahualtia itata.

23

Ajquiya amo huelis itztos ica israelitame

¹ “Sinta se tacat quipixtoc itecsis cati pajpatztic, o sinta quitzontectoc itoto, amo huelis itztos amohuaya campa anmocahuaj amojuanti cati animasehualhua TOTECO.

² “Se cuatita conet yon iixhuihua para nochipa amo hueli itztose campa amojuanti cati animasehualhua TOTECO anmocahuaj.

³ “Nojquiya amo hueli itztos amohuaya yon se amonita, yon moabita masehuali, yon iniixhuihua. Amo hueli itztose para nochipa campa anitztoque amojuanti cati animasehualhua TOTECO. ⁴ Ya ni eltoc pampa quema anquisque ipan tali Egipto, inijuanti amo amechmacaque at, yon tacualisti. Nojquiya inijuanti quifaxtahuijque Balaam, icone Beor, cati ehua altepet

Petor ipan tali Mesopotamia, para ma amechtelchihua, ⁵ pero amoTECO Dios amo quinejqui quitacaquillis Balaam. Huan quipatac nopa tatelechihualisti ica se tatiocihualisti para amojuanti, pampa yaya amechicnelía. ⁶ Huajca amo quema xiquinpalehuica ni masehualme, yon amo quema xiitzoca ica cuali inihuaya.

⁷ “Amo quema xiquincualancaitaca iixhuihua Esaú cati inintoca edomitame pampa injuanti quej amoicnihua. Yon amo quema xiquincualancaitaca nopa egiptome pampa anitztoyaj ipan inintal quej seyoc tali ehuaní.

⁸ Sinta se Egipto ejquet quisqui amohuaya anisraelitame huan noja itzoc amohuaya hasta quínpiyas iixhuihua, huajca iixhuihua huelise calaquise para itztose amohuaya animasehualhua TOTECO huan monequi xiquinitaca quej israelitame.

Tanahuatilme para altepeme tapajpactique

⁹ “Quema ansoldados anquintehuitij amocualancaitacahua, monequi xi-moiyocacahuaca ica nochi cati amo tapajpactic iixpa TOTECO. ¹⁰ Sinta ixinacho se soldado quisqui tayohua, nopa soldado elis amo tapajpactic iixpa TOTECO huan monequi moiyoacaxixtis ten campa mochijtoque nopa sequinoc soldados. Huan amo huelis calaquis sempa campa sequinoc ¹¹ hasta tiotac quema temotosa tonati. Huajca, quena, huelis maltis ica at huan sempa huelis calaquis campa itztoque nopa sequinoc.

¹² “Huan xiquiyocatalica se lugar para ancuatenpanose cati elis quentzi huejca ten campa amochijtoque. ¹³ Huan sesen soldado monequi quihuicas se pala ica iteposhua huan quema quinequi cuatenpanose, monequi quixahuas se pilostotzi huan teipa quixiztacuas icuit ica tali. ¹⁴ Pampa monequi nochi elis tatzejzeloltic campa anquiquetztoque amoyoyoncalhua pampa amoTECO Dios nemi nozona tatajco ten amojuanti para amechmanahuis huan amechchihuas xitatanica ica amocualancaitacahua. Yaya amo quinequi quitas se tamanti cati amo tapajpactic campa amojuanti para amo amechiyocacahuas.

Tanahuatilme para xiteselica

¹⁵ “Sinta se tequipanojquet cholohua ten iteco huan ajsis campa amochaj, amo xijtemactilica imaco cati achtohuaya eliyaya iteco. ¹⁶ Xijcahuilica ma mocahua para itztos ica amojuanti campa quinequi ipan nopa altepet cati quipactía. Amo xijtaijyohuiltica.

Ma amo elica tacanenca sihuame huan sihuanenca tacame

¹⁷ “Yon se israelita tacat amo hueli motemacas para inihuaya ahuilnemis sihuame cati yahuij para quinhueyichihuatij teteyome quej quichihuaq tacame ipan nopa talme cati amo quiximatij TOTECO. Huan yon se israelita sihuat amo hueli motemacas para quinselis nopa tacame cati yahuij para quinhueyichihuatij teteyome. ¹⁸ Amo aqui huelis quimacas tomi TOTECO Dios cati quitantoc ica ahuilnencayot, masque se tacat cati quiselía tomi para itztos ica sihuame, o se sihuat cati quiselía tomi para itztos ica tacame. Masque nopa tomi elis se ofrenda cati anquimacaj TOTECO ica amopaquillis, amo xijmacaca pampa nopa tomi hualajqui ipan se tajtacoli cati TOTECO tahuel amo quinequi quitas.

¹⁹ “Quema anquitanejtise tomi, o tacualisti, o ten hueli tamanti se amoisraelita icni, quema amechcuelipilis nopa tomi, amo quema xijtajtanica ma amechtaxtahui itanca. ²⁰ Sinta anquitanejtise cati se seyoc tali ejquet, quena, huelis anquitajtanise ma amechtaxtahui itanca, pero ica amoisraelita icnihua, amo. Quej nopa amoTECO Dios amechtiochihuas ipan nochi tamanti cati anquichihuase ipan nopa tali cati anmoaxcatise.

²¹ “Quema anquitencahuilise TOTECO Dios para temachti anquichihuase se tenijqui o para anquimacase se tamanti, amo xijhuejcahualtica para anquitamichihuase, pampa elis se taixpanoli. TOTECO Dios amechtajtania xijchihuaca cati anquitencahuilijque. ²² Pero amo tajtacoli sinta amo anquitencahuase para anquichihuase se tamanti. ²³ Monequi ximomocuitahuica para anquichihuase nochi cati ica amopaquilis anquitencahuilijtoque anquichihuase.

²⁴ “Quema anpanose ipan seyoc masehuali ixocomeca mil cati itzotc amonechca, huelis anquicuase nopa xocomecat itajca quej anquinequise, pero amo huelis anquitemase ipan se chiquihuit huan anquihuicase. ²⁵ Sinta anpanose campa seyoc quichijtoc itrigo mil, huelis anquicuise itajca ica amomax para anquicaujtiyase, pero amo huelis anquifequise ica se amoteles.

24

Quenicatza hueli mocahuase se tacat huan isihua

¹ “Quema se tacat mocuilía se sihuat para elis itahuical, huan teipa ayecmo quipactis pampa quipantilía quichijtoc cati amo cuali, yaya hueli quimacas se amatajcuiloli cati quiijtohua para quicahua huan teipa quiquixtis ten ichaj. ² Huan sinta nopa sihuat quisas huan sempa monamictis ica seyoc, ³ huan miquis ihuehue cati teipa mocuilis o sinta yaya nojquiya quiijcuilos se amatajcuiloli para quicahuas, ⁴ nopa tacat cati elqui iachtohui huehue amo huelis sempa mocuilis pampa eltoc quej nempolijtoc nopa sihuat para ya. Ya ni se tamanti cati TOTECO amo quinequi quiitas. Huajca ximomocuitahuica para amo anquihualicase tajtacoli ipan nopa cuali tali cati amoTECO Dios amechmacas para amoaxca.

Sequinoc tanahuatilme

⁵ “Se tacat cati yancuic mosihuaajtjtoc, amo quinamiqui yas ipan tatehuilisti, yon amo huelis quiselis se tequit para se xihuit. Yaya monequi itztos ipan ichaj huan quimacas paquilisti isihua cati mocuilijtoc.

⁶ “Amo aqui huelis tetanejtis tomi huan tajtanis ma quicahuilijtehuaca se molino o nopa tet cati ipan quitjitsij trigo para harina pampa amo huelis quichihuase pantzi. Ya nopa elisquía quej quitajtanisquía ma quimaca inemilis.

⁷ “Sinta anquipantise se israelita cati quiichtectoc seyoc israelita, o cati quichihua para seyoc israelita ma quitequipano san tapic, o sinta anquipantise cati quinamaca seyoc israelita, monequi anquimictise nopa israelita cati fiero quichijtoc para tamis cati amo cuali cati onca tatajoc ten amojuanti.

⁸ “Monequi xijneltocaca senquisa cati amechilhuisse nopa levita totajtztzi sinta onca nopa cocolisti cati itoca lepra, pampa niqinnahuajtjtoc ten monequi amechilhuisse huan monequi amojuanti ximomocuitahuica xijneltocaca nochi cati quiijtose. ⁹ Xiquelnamiquica taya quichijqui TOTECO Dios ica María ipan ojti quema tiquisque ipan tali Egipto.

¹⁰ “Sinta antetanejtise se tenijqui, amo xicalaquica ipan ichaj para anquicuilise cati amechcahuilijtehuas. ¹¹ Ximochiyaca calixpa huan yaya quiquixtis huan amechmacas cati amechcahuilijtehuas. ¹² Huan sinta yaya se masehuali nelteicneltzi huan amechcahuilijtehuas itaque, amo xicochica nopa tayohua ica itaque ipan amochaj. ¹³ Quema temos tonati monequi anquicuepilise para huelis mopiquis ica itaque quema cochis huan yaya amechtiochihuas pampa anquitasojtaque. Huan amoTECO Dios amechitas para anquichijtoque cati xitahuac iixpa.

¹⁴ “Amo xijtaijyohuiltica se cati teicneltzi cati amechmapalehuía, yon amo xijhuejcahualtica para anquitaxtahuisse, masque eli se cati san sejco ehua ica amojuanti, o se tacat cati seyoc tali ehua cati itztoc amohuaya ipan amoaltepe. ¹⁵ Xijtaxtahuaica se teicneltzi mojmosta quema ayemo oncalaqui tonati pampa yaya teicneltzi huan quimonequilia nopa tomi para ica mopanoltis. Pampa sinta amo, huelis yaya quitzajtzilis TOTECO huan quihuis cati anquichijtoque huan TOTECO quitas para antajacolchijtoque.

¹⁶ “Amo hueli anquimictise se tetaj por cati fiero quichijtoc se icone. Yon amo hueli anquimictise icone se masehuali por cati quichijtoc itata. Quema monequi anquimictise se masehuali, xijmictica sesen por itaixpanol cati yaya iseltitzi quichijtoc.

¹⁷ “Xiquinchihuilica san cati xitahuac nochí icnotzitzi, cahualme huan sequinoc tali ehuaní. Amo quema xijtajtanilica se cahualtzi ma amechcahuilijtehua iyoyo. ¹⁸ Nochipa xiquelnamiquica para achtohui antequipanohuayaj san tapic ipan tali Egipto, huan amoTECO Dios amechquixti. Huajca yeca nimechnahuatía xijchihuaca ni tanahuatilme.

¹⁹ “Quema anquipixcatinemij trigo ipan amotriga mil huan anquilitaj para anquipanoque se trigo tzonti, amo ximocuepaca para anquipixcase. Xijcahuaca para se seyoc tali ejquet, o se icnotzi, o se cahuali ma mocuili cati amohuaya itztoc. Huan quej nopa TOTECO Dios amechtiochihuas ipan nochí cati anquichihuase.

²⁰ “Huan nojquiya quema anquihuitequise amoolivo cuahua para ma huetzica amoolivos, amo xijhuitequica inimacuayohua ome huelta. Cati mocahuas elis para nopa seyoc tali ehuaní, nopa icnotzitzi huan nopa cahualtzitzi.

²¹ “Huan quema anquitequilíaj itajca amoxocomeca mil, amo xicom-pahuica sesen tzonti para anquicuisse cati mocahua. Xiquincahuilica nopa seyoc tali ehuaní, huan icnotzitzi huan cahualme. ²² Xiquelnamiquica amojuanti nojquiya aneltoyaj antequipanohuani ipan tali Egipto, huan yeca na nimechnahuatía xijchihuaca nochí ni tanahuatilme.

25

Más tanahuatilme

¹ “Quema masehualme quipiyaj se cualanti huan yahuij monextitij iniixpa jueces campá mosehuíaj para ma quitajtolsencahuaca, nopa jueces monequi quimanahuise cati amo teno quichijtoc huan quitatzacuilitise cati taixpanotoc. ² Sinta quinamiqui cati taixpanotoc para ma quihuitequica, nopa juez tanahuatis ma quixtapachoca huan nozona iixpa ma quihuitequica ten quesqui huelta quinamiqui por cati quichijtoc. ³ Huelis quihuitequise se masehuali hasta 40 huelta, pero amo más, pampa huelis tahuel anquicocose o anquipinahualtise miyacapa.

⁴ “Amo xijcamailpica se toro cati ipan moquejquetza trigo para quiy-olquixtis.

Se conet quihuicas itoca itata cati mijqui

⁵ “Sinta ome taca icnime itztoque ipan san se tali huan se miquis huan amo quicajtehuas yon se icone, nopa icahual monequi monamicctis ica se tacat cati huala ipan ifamilia cati mijqui. Monequi ihuejpol nopa cahuali mocuillis huan quichihuas cati quinamiqui para ihuejpol se cahuali ma quichihuá. ⁶ Huan nopa achtohui pilconetzi cati nopa sihuat quitacatiltis monequi quihuicas itoca nopa tacat cati mijqui huan teipa quiselis ital. Quej nopa, itoca cati mijqui amo ixpolihuis campá israelitame. ⁷ Pero sinta nopa tacat

amo quinequis mosihuajtis ica ihuejpol, nopa sihuat monequi monextis iteno nopa caltemit ipan itepa nopa altepet campa mosehuíaj nopa huehue tacame huan quinilhuis: ‘Nohuejpol amo quinequi mosejcotilis nohuaya quej quinamiqui para ma mocahua itoca iicni ipan total tiisraelitame.’⁸ Huajca nopa huehue tacame ten nopa altepet quinzotzase nopa tacat huan quicamanalhuise huan sinta yaya quisehuiquilis quijjtos amo quinequi mosihuajtis ica ihuejpol,⁹ nopa sihuat quinechcahuis huan iniixpa nopa huehue tacame quiquixtilis itecac ipan iicxi, huan quixchajchas huan quijjtos: ‘¡Quej ni quichihuilíaj se tacat cati amo quinequi quinpiyas coneme para iicni!’¹⁰ Huan teipa nochi israelitame quipinahualtise huan quitocaxtise ‘nopa tacat cati san iicxipa nemi pampa quiquixtilijque itecac’.

Sequinoc tanahuatilme

¹¹ “Sinta ome israelita tacame motehuíaj huan monechcahuía isihua se ten nopa tacame para quimanahuis ihuehue huan quitzquis nopa seyoc tacat ipan itacayo campa amo quinamiqui,¹² huajca nopa tequichihuani tanahuatise ma quitzontequilca imax nopa sihuat. Ma amo quitasojtaca.

¹³⁻¹⁴ “Quema antanamacaj o antacohuaj, amo xijtequihuica tamamachihuali cati amo xitahuac tamamachihua. Yon amo xijpiyaca se tamamachihuali hueyi huan se cati pisiltzi.¹⁵ Monequi xijpiyaca cuajcuali tamamachihualme cati ajsitoc para quej nopa anitztose miyac xihuit ipan nopa tali cati amoTECO Dios amechmacas,¹⁶ pampa TOTECO Dios quincualancaita nochi masehualme cati tacajcayahuaj huan quichihuaj cati amo xitahuac.

Ma quintzontamilica amalecitame

¹⁷ “Xiquelnamiquica cati amechchihuilijque nopa amalecitame ipan nopa ojti quema anquistinemiyayaj ten tali Egipto.¹⁸ Xiquelnamiquica taya amechchihuilijque quema nochi amojuanti tahuel ansiyajtoyaj huan antapolohuayayaj. Yon quentzi amo quiimacacase Toteco Dios, huan yajque amoica ipan ojti huan quintehuijque amomasehualhua cati más teicneltique cati ica yollic yahuiyayaj amoica.¹⁹ Huajca quema amoTECO Dios ya amechmanahujtos ten nochi amocualancaitacahua cati amechyahualose ipan nopa tali cati amechmacas para amoaxca, monequi xiquinxpolihuilica nochi amalecitame ten ni taltipacti para amo aqui quinelnamiquis sinta se tonali itztoyaj. Amo xiquelcahuaca xijchihuaca ya ni.

26

Nopa tacajcahualisti ten nopa achtohui pixquisti

¹ “Ya ni cati monequi xijchihuaca quema ya anajsitose huan ya anquitan-tose nopa tali cati amoTECO Dios amechmacas para amoaxca huan nopona anitztose.² Monequi xijcuica nopa achtohui itajca ten nopa pixquisti cati amechmacas nopa tali huan anquihuicase ipan se chiquihuit hasta campa TOTECO quitapejpenijtos para quiquetzas itiopa campa itztos.³ Huan nopona anmonextise campa nopa totajtzi cati tequiti huan anquihulise: ‘Ica ni ofrenda, na niqijjtohua ama iixpa TOTECO noDios para ya nicalajqui ipan nopa tali cati tohuejcapan tatahua quintencahuili techmacasquía.’⁴ Huan nopa totajtzi quicuis nopa chiquihuit cati anquimacase, huan quitalis iixmelac itaixpa amoTECO Dios,⁵ huan anquijjtose ni camanali iixpa amoTECO Dios:

“ Nohuejcapan tata Jacob eliyaya se arameo tacat cati nechca eltoya para miquis quema calajqui ipan tali Egipto ica tahuel quentzi iconehua. Pero nopona mocajqui huan iixhuilhua mochijque tahuel miyaqui

masehualme ica miyac chicahualisti. ⁶ Pero teipa nopa egiptome quinquipanolitayaj ipan tequit cati nelía ohui huan tahuel quintaijyohuiltiyaj. ⁷ Huajca nohuejcapan tatahua quitajtanijque TOTECO ininDios ma quinpalehui huan yaya quintacaquili. Huan quinitac teicnelitque, huan quenicatza quintaijyohuiltiyaj huan quinitac nochi inintequi cati ohui. ⁸ Huan yaya tahuel quinmajmati egiptome ica ihueyi chicahualis huan ica miyac tanexfli huan ica miyac ti-ochicahualnescayot cati quichijqui quema techquixti ipan tali Egipto. ⁹ Huan techhualicac nica huan techmacatoc ni tali campá onca nochi tamanti hasta mocahua. ¹⁰ Huan yeca ama na nijhualica nopa achtohui pixquisti ten nopa tali cati TOTECO Dios techmacatoc.

Quej nopa anquijitose.’

“Huan teipa xijtalica nopa chiquihuit iixpa amoTECO Dios huan ximotancuaquetzaca iixpa huan xijhueyichihuaca. ¹¹ Teipa xijchihuaca se ilhuit ipan xiyolpaquica iixpa TOTECO ica nochi tamanti cati yaya amechmacatoc ta huan mochampoyohua. Nojquiya xiquinnotzaca nopa levitame huan seyoc tali ehuaní cati amohuaya itztose para ma moyolpaquiltica amohuaya ipan nopa tacualisti.

Nopa seyoc diezmo cati monequi sesen eyi xihuit

¹² “Huan ipan nopa expa xihuit monequi sempa xiquiyocaquixtica seyoc amodiezmo ten nochi cati anquipiyaj. Sempa xijquixtilica se chiquihuit ipan sesen majtacti chiquihuime ten itajca amotal huan xiyajmamacac nopa levitame, nopa icnotzitzí, nopa cahualtitzí, huan injuanti cati ehuaí ipan sequinoc talme cati itztoque ipan amoaltepe ipan amotal para quej nopa injuanti huelise tacuase hasta ixhuisse. ¹³ Huan teipa sesen ten amojuanti anquijitose iixpa amoTECO Dios:

“ Ya niquiyocaquixtijtoc ten nochaj nopa diezmo cati tatzejtzeltoc para ta. Huan ya niquinmajmacatoc nopa levitame, nopa icnotzitzí, nopa cahualtitzí huan nopa sequinoc tali ehuaní cati itztoque ipan total. Nijchijtoc nochi cati ta títanahuatijtoc. Amo niquelcajqui, yon amo niquixpanotoc yon se motanahuatil. ¹⁴ Amo teno ten nopa diezmo nijcuaíqui quema nimomijcahuijtoya, yon amo niquitzqui quema amo nitapajpactic nieliyaya, huan amo niquintencahuilijtoc mijcatzitzí. TOTECO Dios, nimitzneltoquiliijtoc huan nijchijtoc nochi cati technahuatijtoc. ¹⁵ Ten ilhuicac ipan mochaj tatzejtzeltoc xihualtachia huan techtiochihua tiisraelitame pampa tojuanti timomasehualhua. Xijtiochihua ni tali cati nochi temaca hasta mocahua. Ta techmacatoc ni tali san quej tiquintencahuilí tohuejcapan tatahua para tijchihuasquía.’

Israelitame itztoyaj taiyocatalilme para TOTECO

¹⁶ “Ama ni tonali amoTECO Dios amechnahuatía xijtoquilica nochi ni tanahuatilme huan leyes. Monequi ximomocuitahuica miyac para xiquinneltocaca ica nochi amoyolo huan ica nochi amoalma. ¹⁷ Ama anquijitotoc para TOTECO Dios, yaya amoTECO. Huan anquijitotoc anquitoquiliijtiyase iojhui huan anquichihuase nochi itamachtihua, íleyes huan itanahuatilhua huan anquitoscacaquise. ¹⁸ Nojquiya ama amoTECO quijitotoc para anisraelitame, animasehualhua cati san yaya iaxcahua quej amechtencahuilí quichihuasquía huan monequi xijneltoquilica nochi itanahuatilhua, ¹⁹ para yaya amechhueyitalis más huejcapa que nochi sequinoc masehualme. Más masehualme amechhueyichihuase, huan amechixmatise huan amechtepanitase que nochi sequinoc masehualme cati TOTECO

quinchijtoc. Huan anelise antaiyocatalilme huan antatzejtzeloitque para TOTECO Dios quej yaya amechilhuijtoc.”

27

Teme ipan tepet Ebal para se taelnamiquilisti

1 Teipa Moisés inihuaya nopa huehue tacame ten israelitame quinnahu-atijque nopa masehualme huan quinilhuijque:

“Xijtoquilica nochi ni tanahuatilme cati ama nimechnahuatía. 2 Ipan nopa tonali quema anquixcotonase nopa hueyat Jordán huan ancalaquise ipan nopa tali cati amoTECO Dios amechmacas, monequi xiquinquejquetzaca teme cati huejhueyi huan xiquinchipahualtica ica nexti. 3 Huan ipan nopa teme xiquijcuiloca nochi camanali ten ni tanahuatilme cati nimechnahu-atijtoc xijchihuaca. Ya ni anquichihuase quema achtohui anajsitij ipan nopa tali cati nochi temaca hasta mocahua cati amoTECO Dios amech-mactilis quej quijtojtoc quichihuas. 4 Huajca quema ya anquipanotose nopa hueyat Jordán, monequi xiquinquetzaca ipan tepet Ebal nopa teme cati ya nimechilhuijtoc, huan xiquinchipahualtica ica nexti. 5 Nojquiya monequi xijchihuaca se taixpamit ica teme para amoTECO Dios, huan amo xiquintejtequica nopa teme ica yon se teposti. 6 Xiquintequihuica teme cati yajyajmaxtic huan amo tatecti para anquichijchihuase nopa taixpamit. Huan nozona ipan nopa taixpamit xijmactilica amoTECO Dios tacajcahal-isti tatatili. 7 Xijmacaca tacajcahalisti para tasehuilisti huan nozona iixpa amoTECO Dios xijcuaca ten nopa tacajcahalisti huan xiilhuichihuaca. 8 Ipan nopa teme xiquijcuiloca para ma nesi cuali nochi ni camanali ten ni tanahuatilme.”

9 Teipa Moisés ihuaya nopa levita totajtzitzi quinilhuijque nopa israeli-tame:

“Israelitame, amo ximolinica. San xijtacaquilica. Ama amojuanti an-mocuetoque imasehualhua amoTECO Dios. 10 Huajca monequi xijneltoc-uilica amoTECO Dios huan xijchihuaca nochi itanahuatilhua huan ita-machtilhua cati ama timechnahuatijtoque xijchihuaca.”

Cati quinajsis israelitame sinta amo quineltocase

11 Huan nojquiya ipan nopa tonali Moisés quinilhui nochi nopa mase-hualme:

12 “Quema ya anquipanotose nopa hueyat Jordán, nopa huejhueyi familias ten Simeón, Leví, Judá, Isacar, José huan Benjamín moquetzase ipan nopa tepet Gerizim para tayolmelahuase taya tatiocihualisti anisraelitame an-quipantise sinta anquineltochase TOTECO. 13 Huan nopa huejhueyi familias ten Rubén, Gad, Aser, Zabulón, Dan huan Neftalí moquetzase ipan tepet Ebal para tayolmelahuase taya tatelchihualisti anquiselise sinta amo an-quineltocase TOTECO. 14 Huan nopa levitame tananquilise ica inintoscac cati chichahuac para nochi anisraelitame anquicaquise huan quijitose ni camanali:

15 “Tatelchihuali ma eli cati quichijchihuas se taixcopincayot ica teposti taatitili, o cati ica imax quinchijchihuas teteyome, huan ixtacatzí quintalis canajya campa amo aquí quimatis para quinhueyitalis. Ya nopa TOTECO amo quinequi quitas.

Huan nochi anisraelitame anquijitose: ‘Quej nopa ma eli.’

16 Tatelchihuali ma eli cati amo quitepanitas itata o inana.

Huan nochi anisraelitame anquijitose: ‘Quej nopa ma eli.’

- 17 Tatelchihuali ma eli cati quiiijcuenis nopa tet cati quinextía se nepamit para quiihtequilis seyoc ital.
 Huan nochi anisraelitame anquiijtose: 'Quej nopa ma eli.'
- 18 Tatelchihuali ma eli cati quicuapolos ipan ojti se cati popoyotzi.
 Huan nochi anisraelitame anquiijtose: 'Quej nopa ma eli.'
- 19 Tatelchihuali ma eli cati quichihuulis cati amo xitahuac se seyoc tali ejquet, o se cahualtzi o se icnotzi.
 Huan nochi anisraelitame anquiijtose: 'Quej nopa ma eli.'
- 20 Tatelchihuali ma eli cati ihuaya motecas isihua itata pampa quiixpano itata.
 Huan nochi anisraelitame anquiijtose: 'Quej nopa ma eli.'
- 21 Tatelchihuali ma eli cati quichihuas ten hueli ica se tapiyali.
 Huan nochi anisraelitame anquiijtose: 'Quej nopa ma eli.'
- 22 Tatelchihuali ma eli cati ihuaya motecas isihua icni o se cati icone itata o inana.
 Huan nochi anisraelitame anquiijtose: 'Quej nopa ma eli.'
- 23 Tatelchihuali ma eli cati ihuaya motecas imona.
 Huan nochi anisraelitame anquiijtose: 'Quej nopa ma eli.'
- 24 Tatelchihuali ma eli cati quimictis seyoc ixtacatzi.
 Huan nochi anisraelitame anquiijtose: 'Quej nopa ma eli.'
- 25 Tatelchihuali ma eli cati quiselis tomi para quimictis seyoc cati amo teno quichijtoc.
 Huan nochi anisraelitame anquiijtose: 'Quej nopa ma eli.'
- 26 Tatelchihuali ma eli cati amo quintepanitas ni tanahuatilme huan amo quinneltocas.
 Huan nochi anisraelitame anquiijtose: 'Quej nopa ma eli.'

28

Tatiochihualisti para cati taneltocaj (Lv 26:3-13; Dt 7:12-24)

- 1 "Sinta nelnelía melahuac anquinelto case amoTECO Dios huan anquichihuase nochi ni itanahuatilhua cati ama nimechnahuatía, huajca yaya amechchihuas más anhuejhueyi que nochi sequinoc masehualme ipan ni taltipacti. 2 Sinta anquitacaquilise cati TOTECO Dios amechilhuijtoc, anquipantise nochi ni tatiochihualisti.
- 3 Anelise antatiochihualme ipan altepet huan campa anmilchihuase.
- 4 Tatiochihualme elise nochi amoconehua, huan nochi cati anquipixcase, huan nochi ininconehua amohuacaxhua, amoborregojhua huan nochi sequinoc amotapiyalhua.
- 5 Amechtiochihuas huan nochi amochiquihua motzontis ica cuacti huan nojquiya oncas cati anquitequihuse campa anquimanelohuaj huan anquisasaltíaj amoharina para anquichihuase amopantzi.
- 6 TOTECO amechtiochihuas ipan nochi tamanti cati anquichihuase. Amechtiochihuas quema anhualahuij huan quema anyahuij.
- 7 "Amomaco TOTECO amechmactilis amocualancaitacahua cati quinequise amechtehuise. Masque hualase campa amujuanti cuali motecpantose, pero pasoltic yase para mochololtise ten amujuanti.
- 8 "TOTECO amechtiochihuas huan quitemitis amocualcal campa anquiajtoctse cati anquixcatoque. Amechtiochihuas ipan nochi tamanti cati anquichihuase. Yaya tahuel amechtiochihuas ipan nopa tali cati amechmacas para ipan anitztose, huan anitztose ica paquillisti.

9 “TOTECO amechchihuas se xinach masehualme cati antatzejtzelo-
tique para ya quej amechtencahuilijtoc amechchihuas sinta anquichihuase
itanahuatilhua huan anquitoquilise iojhui. 10 Huan nochi sequinoc mase-
hualme ipan taltpacti quitasé para anisraelitame anitztoque masehualme
cati TOTECO moaxcatijtoc. Huan nochi quimatise anquihuicaj itoca huan
amechimacasisé. 11 TOTECO amechmacas tahuel miyac tamanti cati cuali
para anmoricojchihuase. Amechmacas miyaqui amoconehua, huan amo-
tapiyalhua quinpiyase miyaqui iniconehua. Yaya amechmacas miyac
pixquisti ipan nopa tali cati quintencahuilijtoya amohuejcapan tatahua
amechmacas. 12 Huan TOTECO quitapos campa onca ihueyi ricojyo nepa
ilhucac huan amechmacas at quema monequi ipan nochi amotal. Huan
quitiocihuas nochi amotequi. Anquipiyase hasta mocahua para huelis an-
quintanejtise tacualisti sequinoc talme imasehualhua. Pero amojuanti amo
aqui monequis anquitajtanise ma amechtanejtica se tenijqui. 13 TOTECO
amechchihuas antayacanase huan amo anhualase taica. Mojmosta más an-
tejtose huan amo anyase para tatzinta. Pero monequi xijnelfocaca itanahu-
atilhua amoTECO Dios cati ama nimechnahuatía huan ica tamocuitahuili,
nochi xijchihuaca. 14 Amo ximoiyocalica ten ni tanahuatilme para anyase
campa amorraves, yon amonejmat, san xitahuac xiyaca. Huan amo quema
xiquintoquilica teteyome, yon amo xiquintepanitaca.

Tatelchihualisti para cati amo quineltocase TOTECO
(Lv 26:14-46)

15 “Pero sinta amo anquineltocase amoTECO Dios, yon amo anquichi-
jtinemise nochi itanahuatilhua huan ileyas cati ama na nimechnahuatijtoc,
hualas amopani nochi ni tatechihualisti.

16 Anelise antatelchihualme ipan altepet huan campa anmilchihuase.

17 TOTECO quitelchihuas amochiquihua huan mocahuase cactoque.
Quitelchihuas campa anquimanelohuaj huan anquisasaltíaj
amoharina huan amo teno anquipiyase.

18 Elise tatechihualme amoconehua, huan nochi cati anquipixcase. Elise
tatechihualme iniconehua amohuacaxhua, huan amoborregojhua
huan nochi sequinoc amotapiyalhua.

19 Huan amojuanti nojquiya anelise antatelchihualme ipan nochi tamanti
cati anquichijtiyase. Quena, anelise antatelchihualme quema an-
hualahuuj huan quema anyahuuj.

20 “TOTECO amechtitanilis tatechihualisti huan amechchihuas ximocua-
jcuapoloca huan amo anquimatise taya anquichihuase ipan nochi nopa
tamanti cati panos hasta ipan se talojtzi amechtontamiltise amocualan-
caitacahua pampa anquichijtoque cati fiero huan anquitaluelcajtoque
TOTECO. 21 TOTECO amechtitanilis tahuel hueyi cocolisti hasta nochi
amechtontamiltis ipan nopa tali campa ancalaquise para annoaxcatise.

22 TOTECO amechmacas huactaxisti, tasemajcayot huan totonic ipan amo-
tacayo. Oncas tatotonilot cati teijyomictis, tahuaquisti huan huejhueyi
cocolisti ipan amotrigomil. Huan nochi ni cocolisti amechtopotztocas hasta
amechtontamiltis. 23 Nozona huejcapa ipan ilhuicacti huan tatzinta ipan
tali elis quej teposti. Ilhuicacti amechtatomatilis nacti at huan tali amech-
tasomatilis itajca. 24 TOTECO quichihuas ma huetzi amopani xali huan amo
at. Quena, amotal quicuepas taltepocti hasta amechtontamiltis.

Israelitame amo tatanise sinta tajtacolchihuase

25 “Huan TOTECO amechtemactilis inimaco amocualancaitacahua para
ma amechtánica. Anyase campa injuanti cuali annotecpantose, pero teipa

anmotamixelose para anmochololtise ten injuanti. Nochi masehualme ipan taltipacti amechhijyase pampa tahuel fiero anitztose. ²⁶ Nopa totome huan tecuanime quicuase amotacayohua huan amo aqui itztos para quinmajmatis.

²⁷ “TOTECO amechtitanilis fiero cocome quej quinchihuili nopa Egipto ehuaní, huan amechchihuas tahuel xisemahuiyaca campá huéli ipan amotacayo. Amechmacas sahuame, huan nopa cocolisti cati tahuel ajhuayohua huan amo oncas pajti cati ica anmochicahuase ten ni cocolisti. ²⁸ Nojquiya TOTECO amechchihuas xilocojtiyaca, xipopoyotiyaca, huan ximocuapolojtinemica. ²⁹ Huan antamachijtinemise quema tona quej se popoyotzi quichihua ipan tzintayohuilot. Yon se tamanti amo quisas cuali ipan nochi cati anquichihuase. Talojtzitzi amechtajiyohuiltise huan amechtachtequilise. Amo aqui hualas para amechpalehuis. ³⁰ Anquijitanise se sihuat para anmocuilise, pero seyoc ihuaya motecas. Anmochijchihuilise amochajchaj, pero amo anquiaxilise para anquitequihuse. Anquichihuase xocomeca mili, pero amo huélis anquiahuiyacmatise itajca. ³¹ Amoixpa quiquechtequise huan quihuejhuelose inacayo amotoro cati taxahua, pero yon quentzi amo huélis anquicuase. Amechcuilise amopilburro huan ayeemo amechcuelilise. Amoborregojhua mocahuase inimoc amocualancaitacahua, huan amo aqui amechpalehuis para sempa anmoaxcatise. ³² Amoixpa quinmactilise sequinoc tali ehuaní amooquichpilhua huan amosihuapilhua. Masque tahuel anquintemose mojmosta huan anquinequise anquinatase, amo teno huélis anquichihuase. ³³ Nopa pixquisti ten amotal huan itajca nochi amotequi quicuase masehualme cati amo anquinixmatij. Huan antajiyohuise nochipa huan san ten huéli amechchihuilise mojmosta. ³⁴ Quema anquitate nochi ni huejhueyi taohuijcyot, anmolocojchihuase. ³⁵ TOTECO amechtajiyohuiltis ica nopa cocolisti cati quichihua ma palani amotancua huan amoquescuayo. Ica nopa cocolisti amo onca pajti. Huan ipan nochi amotacayo ten amoicxi hasta ipan amotzonteco anquipyase cocome cati amo quiyiya pajti.

³⁶ “TOTECO quichihuas para amojuanti huan amotanahuatijca amechhuicase ipan seyoc tali cati amojuanti huan amohuejcapan tatahua amo anquiixmatque. Huan nozona amechchihualtise anquinhueyichihuase teteyome cati tachijchihualme ica cuahuit huan tet. ³⁷ Huan annessise fiero hasta anquinmajmatise nochi masehualme nozona cati amechitase. Huan amechhuetzquilise huan anelise quej se ahuilcamanali para injuanti ipan nopa tali campá TOTECO amechhuicas.

Sinta tajtacolchihuase, amo oncas itajca inimil

³⁸ “Anquitocase miyac xinachtí pero anquixcase pilquentzi, pampa quitamicuase chapolime. ³⁹ Anquitocase xocomeca milme huan anquinmocuitahuise. Pero amo anquifequise inintajca, yon amo anquise iayo pampa oculime quitamicuase. ⁴⁰ Anquipyase olivo cuame campá huéli ipan amotal, però amo huélis anmopolose aceite, pampa itajca iseli tephuis. ⁴¹ Anquinpiyase amotelpocahua huan amoichpocahua, però amo mocahuase amohuaya pampa quinhuicase ilpitoque ipan sequinoc talme para tetequipanose san tapic. ⁴² Chapolime quitamicuase nochi amocuahua huan nochi amotatoc. ⁴³ Nopa sequinoc tali ehuaní cati itztose ipan amotal mochihuase más miyaqui huan más tejtetique. Huan amojuanti anquipoloytiyase más huan más amochicahualis. ⁴⁴ Injuanti amechtatanajtise huan amojuanti amo teno anquipyase para anquintanejtise. Injuanti tayacanase, huan amojuanti anyase hasta taica.

45 “Nochi ni tatelechihualisti elis para amojuanti sinta amo anquinequij anquicaquise amoTECO Dios. Ni tatelechihualisti amechtoquillijtiyas hasta amechajsis huan amechtzontamiltis sinta amo anquinequij anquichihuase itanahuatilhua huan ileyas cati yaya tanahuatijtoc. 46 Nochi ni fiero tamanti amechajsis sinta amo antechtaquillíaj. Huan elis quej se tanextili para nochipa cati amechnextilis amojuanti huan amoixhuihua nopa hueyi tajta-coli cati anquichijtoque iixpa TOTECO. 47 Huan pampa amo anquihueyichique amoTECO Dios ica paquillisti huan ica cuali amoyolo iixpa quema amechmacayaya miyac tamanti, 48 huajca yaya amechcahuilis anquinte-quipanose amocualancaitacahua cati TOTECO amechtitanilis para amech-taniquij. Huan antetequipanose ica mayanti, huan amiguisti, yon amo an-quipiyase amoyoyo. Nochi tamanti anquipolose. AmoTECO amechchihuas antetequipanose chicahuac hasta amechtzontamiltis. Antequitise quej se tapiyali ica se teposti ilpitoc iquechta cati tahuel quicocohua. 49 TOTECO quinhualicas campa amojuanti sequinoc tali ehuan cati más huejca itztoque ipan taltipacti. Huan amechajsiquij quej se cuatojti patantihuala nelchic-ahuac huan quicuitehuas se piyo. Elise se xinach masehualme cati yon inincamanal, amo anquimachilise. 50 Elise masehualme cati ixcialantose, huan amo quintepanitase huehuentziti, yon amo quinicnelise pilconet-ziti. 51 Huan inisoldados quincuase nochi ininconeua amotapiyallhua huan quicuase itajca amomilhua hasta quitamiltise. Amo amechcahuilise trigo, yon xocomeca at, yon aceite, yon ininconeua amohuacaxhua, yon ininconeua amoborregojhua, huan anmiquise ica mayanti.

52 “Quiyahualose nochi amoaltepehua huan quintehuse hasta quihue-huelotzase nochi calme cati más huejhuejcapa huan nopa tepame cati cuali tachijchihuali cati ipan anmotemachijtoyaj para amechmanahuise. Quinyahualose huan quintanise nochi altepeme ipan nochi nopa tali cati amechmacas amoTECO Dios. 53 Tahuel anmayanase huan anquincuase amooquichpilhua huan amosihuapilhua cati TOTECO Dios amechmaca-toc ten amotacayo. Quena, ininacayo anquicuase quema amechtehuise amocualancaitacahua. 54 Hasta nopa tacame cati más quiapiyaj teicnelili huan más tetasojtaj campa amojuanti, teipa fiero quitachilise iniicni, huan inisihua cati quicneliyayaj, huan iconehua cati noja itztoque. 55 Huan amo quinmacase quentzi nopa nacat ten seyoc icone cati quicuj pampa amo teno más oncas. Tahuel antaijyohuise quema amocualancaitacahua quiyahualose nochi amoaltepehua. 56 Huan nopa sihuat cati ama achi más momahuilía huan amo quinequi moquetzas talchi iixcipa, teipa quicualan-caitas ihuehue huan iconehua cati tahuel quinicneliyaya. San fiero quin-tachilis. 57 Quincualancaitas hasta ixtacatziti quicuas ixic icone cati quisqui iijtico quema tacatqui para amo quinmacas sequinoc iconehua, pampa amo oncas tacualisti ipan nopa tonali quema amocualancaitacahua hualase huan quintehuse amoaltepehua.

58 “Nochi ya ni hualas amopani sinta amo anquinequise amomocuitahuise huan anquichihuase senquisa nochi ni tanahuatilme cati ijcuilijtoc ipan ni amatapohuali. Huan sinta amo anquimacasise amoTECO Dios cati temajmati huan cati quinamiqui para nochi amojuanti xijtepanitaca, 59 yaya amechtitanilis amojuanti huan amoixhuihua nochi ni huejhueyi cocolisti cati temajmati huan amo quiapiya pajti huan tahuel antaijyohuise. 60 Amechmacas nochi nopa fiero cocolisti cati quinajsic nopa masehualme ten tali Egipto huan tahuel amechmajmatiyaya. Huan nopa cocolisti amo quema amechcahuas. San anquisehuiquillise

anquiiyyohuise mojmosta. ⁶¹ Nojquiya TOTECO amechmacas tatzacuilitli huan amechtitanilis nochi sequinoc cocolisti cati más fiero cati amo mopantia ijcuilitoc ipan ni amatajcuiloli ten tanahuatilmé. Huan antaiyyohuise hasta yaya amechtzentamiltis. ⁶² Huan san se ome anisraelitame anmocahuase anitztoque, masque aneltoyaj anmiyaqui quej inimiyaica sitalime ipan ilhuicac, pampa amo anquitacaquilijqque itoscac amoTECO Dios.

⁶³ “Huan quej TOTECO paquiyaya para amechchihuilía cati cuali huan amechmiyaquilía, teipa paquis pampa yaya amechtamitasosolhuilijtos, huan ya amechtzentamiltijtos. Huan sinta amo anquineltocase amechpolihuiltis ipan nopa talme campá anyase para anmoaxcatitij. ⁶⁴ TOTECO amechsemanas huan amechxejxelos inintzala nochi masehualme ten se iye-capá tali hasta seyoc. Huan nópona anquinhueyichihuase teteyome, huan taixcopincayome cati tachijchihualme ica cuahuit huan tet cati amojuanti huan amohuejcapan tatahua amo quinixmatque. ⁶⁵ Huan quema anitztose ipan nopa sequinoc talme, amo anyolpactose, yon amo anquipantise se piltaltzi campá huelis anmosiyajquetzase, pampa TOTECO amechchihuas ximajmahuica. Yaya quichihuas ma temí amoixteyol ica cuesoli, huan temis amoyolo ica miyac tequipacholi. ⁶⁶ Mojmosta amonemilis eltos mahuilili. Tayohua huan tonaya anmajmahuise huan amo quema anquipiyase temachtí amonemilis. ⁶⁷ Nelía tahuel anmajmahuise hasta se ijnaloc anquiiytose: ‘¡Nijnequisquía ma ya tayohuiya!’ Huan se tayohua anquiiytose: ‘¡Nijnequisquía ma ya tanesi!’ Quej nopa anquiiytose por nochi nopa fiero tamanti cati anquiiytose cati amechchihuas ximomajmatica. ⁶⁸ Masque TOTECO amechilhuijtoc para amo quema anmocuepase ipan tali Egipto ipan nopa ojti cati ipan anquisque, yaya amechhuicas sempa ipan tali Egipto ipan cuaacalmé. Huan nópona antacame huan ansihuame anmonamacase para antetequipanose san tapic ica amocualancaitacahua, pero amo aquí quinequis amechcohuas.”

29

Nopa camanal sencahuali ihuaya TOTECO

¹ Ya ni nopa camanal sencahuali cati TOTECO quinahuati Moisés ma quichihua ica nopa israelitame ipan tali Moab, iyoca ten nopa seyoc camanal sencahuali cati yaya quichijqui inihuaya ipan tepet Horeb*.² Huan Moisés quinsentili nochi israelitame huan quinilhui:

“Anquiiytocque nochi cati TOTECO quichihuilí Faraón, huan nochi itapalehuijcahua huan nochi imasehualhua ipan tali Egipto. ³ Anquiiytocque nochi nopa hueyi tanextili huan tiochicahualnescayot cati TOTECO quichijqui para tenextilis ihueyi chichualis. ⁴ Pero hasta ama TOTECO amo amechmacatoc se amoyolo para xijmachilica taya quiiytosnequi nochi nopa tamanti cati anquiiytocque ica amoixteyol huan anquicactocque ica amonacas. ⁵ Para 40 xihuit nimechyacanqui ipan nopa huactoc tali, huan ipan nochi nopa tonali amo tantoc amoyoyo, yon amotecac. ⁶ Amo anquicua-jque pantzi, yon amo anquiique xocomecat iayo, yon amo anquiique seyoc taillisti cati más cococ, pero yaya amechmacac tacualisti para xijmatica para TOTECO Dios, yaya cati nelía amoTECO.

* 29:1 29:1 O Sináí.

⁷ “Quema tiajsicoj ipan ni tali, hualajqui techtehuico Sehón, nopa tanahuatijquet ten Hesbón, huan Og nopa tanahuatijquet ten Basán, pero tiquin-tanque. ⁸ Huan timoaxcatijque inintal huan tiquinmajmacaque nopa huejhueyi familias Rubén, Gad huan tajco nopa hueyi familia Manasés. ⁹ Huajca ama monequi xijchihuaca nochi cati quijtohua j ni tanahuatilme ten ni camanal sencahuali huan quej nopa nochi cati anquichihuase quisas cuali.

¹⁰ “Ama nochi anisraelitame anmoquetzaj nica iixpa amoTECO Dios ica nochi amotayacanhua ipan sesen hueyi familia, huan ica huehue tacame cati quiipiyaj tequiticayot campa amojuanti, huan ica nochi amotayacanca soldados. ¹¹ Huan itztoque nica nochi amoconehua, amosihuajhua huan nopa sequinoc tali ehuani cati itztoque amohuaya huan cuajcuahuij huan asacaj. ¹² Nochi anitztoque nica iixpa TOTECO Dios para ancalaquise ipan ni camanal sencahuali cati amoTECO Dios ama quichihua amohuaya. Huan amojuanti nojquiya anmotestigojquetzase para anquineltocase nochi cati eltoc ipan ni camanali. ¹³ Ama yaya quinequi sempa amechhueyitalis quej animasehualhua. Quinequi sempa quijtos ama para yaya amoTeco Dios quej quintencahuili amohuejcapán tatahua Abraham, Isaac huan Jacob para quichihuasquía. ¹⁴ Pero TOTECO amo san quichihua ni camanali huan tatestigojquetzqui ica amojuanti ¹⁵ cati anmoquetztoque nica. Nojquiya quichihua ica nochi sequinoc cati ama ayemo tacatij para itztose nica iixpa.

¹⁶ “Anquielnamiquij cuali quenicatza tiisraelitame tiitztoyaj nepa ipan tali Egipto huan quenicatza tipanoque ipan sequinoc talme huan altepeme cati tiqipantijque ipan ojti huan tiajsicoj nica. ¹⁷ Nojquiya anquinitztoque nopa fiero teteyome huan taixcopincayome cati tachijchihualme ica cuahuit, tet, plata huan oro cati nopa masehualme quinhueyichihuayaj. ¹⁸ Amo xijcahuaca ma itzto campa amojuanti se tacat, se sihuat, se familia, o se hueyi familia cati quinequis quihuejcamajcahuas TOTECO Dios huan pehuas quinhueyichihuas ininteteyohua sequinoc talme. Pampa cati quinhueyichihua j teteyome temahuaj huan itztoque quej se cuahuit cati temaca itajca cati tecocohua huan temictía.

¹⁹ “Amo aqui cati quitacaquílía ni camanali ten ni tatechihualisti ma moilhui para amo quema quiajsis ya. Ma amo moilhui para yaya se masehuali cati nelcuali huan yeca amo quiajsis tatzacuilitli masque quichihuas san cati ya quinequi huan quinhueyichihuas teteyome. Sinta quej nopa moilhuis, yaya motaminenpolos huan amechnenpolos nojquiya. ²⁰ TOTECO ayecmo quitapojpolhuis cati quej nopa moilhuis. Tahuel cualanis ica ya pampa TOTECO quintasomati itanahuatilhua. Huan nochi ni tatechihualisti cati ijcuilitoc ipan ni amatapohuali quiajsis cati quej nopa moilhua. Huan TOTECO quixpolos ya huan nochi iixhuihua ten ni taltipacti. ²¹ Huan TOTECO quiiyocatalis nopa tacat ten nochi huejhueyi familias ten israelitame. Huan Toteco quichihuas ma quiajsi nochi nopa tatechihualisti cati nopa camanal sencahuali quijtohua para quiajsis huan cati eltoc ijcuilitoc ipan nopa Tapohuali ten nopa Tanahuatilme.

Taiyohuise iniconehua sinta tajtacolchihuase

²² “Teipa amoconehua cati tacatise, huan amoixhuihua cati hualase teipa, huan nochi sequinoc tali ehuani cati ajsiqij ten huejhuejca, quitase nochi nopa tatzacuilitli huanocolisti cati TOTECO quititanis ipan ni tali, ²³ huan quijtoque: ‘Nochi ni tali san quiipiya azufre, istat huan tasoli cati tata. Amo teno huelis quitocase huan amo teno huelis quiyoliltis, pampa yon se xihuit, amo huelis moscaltis ipan ni tali. Eltoc quej huejcajquiya quema

TOTECO quinsosolo altepeme Sodoma, Gomorra, Adma huan Zeboim cati quitamisosolo ica ihueyi cualancayo.’

²⁴ “Huan teipa nochi taltipac ehuani tatzintocase: ‘¿Para ten ya ni quichiqui DIOS ica ni tali? ¿Para ten nimantzi cualanqui?’

²⁵ “Huan tananquillise quej ni: ‘Ya ni eltoc pampa nopa israelitame quihuejcamajcayque nopa camanali cati ininTECO cati elqui ininDios inihuejcapan tatahua quichijqui ica inijuanti quema quinquixti ipan tali Egipto.

²⁶ Inijuanti yajque motatajtitoj huan motancuaquetzatoj iniixpa teteyome cati amo nelía dios huan cati amo quinixmatiyayaj, yon amo quiptiyayaj caquiuhlli para quinhueyichihuase. ²⁷ Huan yeca ininDIOS nelía cualanqui ica ni tali huan quichijqui ma huetzi ininpani nochi tatelechihualisti cati ijcuilijtoc ipan ni amatapohuali. ²⁸ Huan DIOS quinquixti ten ni tali ica ihueyi cualancayo huan quinmajcayqui ipan sequinoc talme quej eltoc hasta ama.’ Quej nopa quijitose sequinoc masehualme ten anisraelitame.

²⁹ “Onca sequij tamanti ixtacatz cati amo tijmatij pampa TOTECO amo technextilijtoc. Nopa tamanti iaxca TOTECO toDIOS. Pero nopa tamanti cati yaya technextilijtoc eltoc para tojuanti huan toconehua para nochipa ma tijchijtinemica nochi ni camanali cati quijitohua ni tanahuatilme.

30

Quenicatza sempa quiselise tatiochihualisti

¹ “Teipa amopani hualas nochi ni tatiochihualisti huan ni tatelechihualisti cati nimechpohuilijtoc ipan ni tonali huan cati nimechtalilijtoc para xijtapejpenica. Huan anmotepotztocase ten ni tonali ipan nopa talme campá amoTECO Dios amechtitantoc. ² Huan sinta quema anmotepotztocase, amajuanti huan amoixhuihua anmocuepase ica amoTECO Dios huan anquineltocase cati quijitohua quej nimechnahuatía ama ica nochi amoyolo huan ica nochi amoalma, ³ huajca amoTECO Dios quipatas amonemilis huan sempa amechtasojtas. Huan yaya amechsejcotilis sempa ten nochi talme campá amechsemantos. ⁴ Huan masque amechsemantoc campá más huejca ipan iyacapa ni taltipacti, hasta nepa yas amechtemoti, huan ten nepa yaya amechhualicas. ⁵ Huan teipa TOTECO Dios amechhualicas sempa ipan ni tali cati amohuejcapan tatahua moaxcatijque huan sempa amoaxcatise amajuanti. Huan TOTECO quichihuas para quisas cuali amotequi huan amechmiyaquilis más huan amo quej amohuejcapan tatahua. ⁶ Huan yaya quitalis nopa tanextili ten nopa camanal sencahuali ipan amoyolo huan ipan iniyolo amoixhuihua. Amechyolpajpacas para xiquicnelica ica nochi amoyolo huan ica nochi amoalma, huan quej nopa nelnelía anquiyase nemilisti.

⁷ “Huan amoTECO Dios quichihuas ma huetzi nochi ni tatelechihualisti ipan amoculancaitacahua, huan ipan cati amo quinequij amechitase. ⁸ Huan amajuanti sempa anquineltocase cati quijitohua amoTECO Dios huan anquichihuase nochi itanahuatilhua cati na nimechnahuatía ama. ⁹ Huajca quena, TOTECO quichihuas ma quisa nelía cuali nochi tamanti cati anquichihuase ica amomax. Huan nochi quisas cuali para amoconehua, huan ininconehua amotapiyalhua, huan momiyaquilis nopa pixquisti ten amotatoc. Quena, amoTECO Dios sempa paquis amohuaya huan sempa amechchihuilis cati cuali, quej achtohuiya paquiyaya huan quinchihuiliyaya cati cuali amohuejcapan tatahua. ¹⁰ Quej nopa elis sinta anquineltocase amoTECO Dios, huan anquichihuase nochi itanahuatilhua cati ijcuilijtoc ipan ni amatapohuali ten tanahuatilme, huan anmocuepase ica ya ica nochi amoyolo huan ica nochi amoalma.

11 “Ni tanahuatili cati ama nimechmaca amo tahuel ohui para anquichihuase, yon amo ohui para anquimachilise. 12 Ni tanahuatilme amo eltoc nepa ilhuicac para anquijitose: ‘¿Ajquiya huelis tejcos nepa ilhuicac por tojuanti para techhualiquilis, huan techchihuas ma tijtacaquilica itanahuatilhua TOTECO huan quej nopa tijchihuase?’ 13 Nojquiya ni tanahuatilme amo eltoc ipan ne seyoc nali ten ni hueyi at para anquijitose: ‘¿Ajquiya huelis quiixcotonas ne hueyi at por tojuanti para techhualiquilis itanahuatilhua TOTECO huan techchihuas ma tijtacaquilica huan tijchihuase?’ ¡Amo! 14 Ni camanali cati huala ten TOTECO eltoc tahuel amonechca. Eltoc ipan amocamac para antacamanalhuse huan eltoc ipan amotalnamiquilis para huelis anmonejnehuilise cati quijitohua huan xijchihuaca.

15 “Xiquitaca, ama nijtalijtoc amoixpa ipan se lado nemilisti huan cati cuali, huan ipan seyoc lado, miqulisti huan cati amo cuali, huan mon-equi xijtapejpenica. 16 Ama nimechnahuatía xiquicnelica amoTECO Dios huan xijtoquilica iohui, huan xijchihuaca nochi itanahuatilhua huan ileyas. Sinta quej nopa anquichihuase, huajca anitztose cuali huan anquinpiyase miyaqui amoconehua, huan TOTECO Dios amechtiochihuas ipan nopa tali campá ancalaquise ama para anmoaxcatise. 17 Pero sinta ipan amoyolo anmohuejcatalise ten TOTECO huan amo anquineltoquilise nochi ni tanahuatilme, huan sinta teteyome amechajcayahuase huan pehuas anquinhueyitalise huan anquintequipanose, 18 huajca, nimechilhúa ipan san se talojtzi anmiquise. Amo anhuejcahuase anitztose ipan nopa tali cati ama anquixcotonase hueyat Jordán para anmoaxcatitij.

19 “Huajca ama ipan ni tonali nijnotza ilhuicacti huan taltipacti quej testigo para ama nijtalijtoc amoixpa nemilisti huan miqulisti, huan fati-ochihualisti huan tatechihualisti para xijtapejpenica. Huajca xijtapejpenica nemilisti para amojuanti huan amoixhuihua nelnelía anitztose. 20 Xijtapejpenica xiquicnelica amoTECO Dios huan xijneltoquilica. Ximotemacaca ica ya pampa yaya amonemilis, huan yaya amechchihuas anitztose miyac xihuit ipan nopa tali cati TOTECO quintencahuili amohuejcapán tatahua, Abraham, Isaac huan Jacob para amechmacasquía.”

31

Josué cati quiselis itequi Moisés

(Nm 27:12-23)

1 Huan na niMoisés sempa niquincamanalhui nochi israelitame, huan niqinilhui:

2 “Na nijpiya 120 xihuit huan ayecmo nihueli nimechyacanas ipan tatehuilisti. Nojquiya TOTECO techilhuijtoc para amo huelis nijpanos ni hueyat Jordán. 3 Pero amoTECO Dios amohuaya yas huan yaya amechyacanas para anquixcotonase ni hueyat. Yaya quintzontamiltis nochi nopa masehualme amoixpa, huan anmoaxcatise iníntal. Huan Josué elis amotayacanca quej quijtojtoc TOTECO. 4 Huan TOTECO quinchihuilis nochi nopa masehualme cati itztoque nopona quej quichijqui ica Sehón huan Og, nopa tanahuatiani ten nopa amorreos cati quintzontamilti huan moaxcati nochi iníntal. 5 Huan quema TOTECO quichihuas para nopa altepeme ma huetzica amomaco, xiquinchihuilica nochi cati nimechnahuatijtoc xijchihuaca. 6 Ximoyoltetilica huan ximoyolchicahuaca. Amo ximajmahuica, yon amo xihuihuipicaca iniixpa, pampa amoTECO Dios yaya yahui amohuaya huan amo amechcahuas, yon amo amechtahuclcahuas.”

⁷ Teipa nijnotzqui Josué huan iniixpa nochi israelitame niquilhui: “Ximoyoltetili huan ximoyolchicahua, pampa ta tiqinhuicas ni masehualme ipan nopa tali cati TOTECO quintencahuili inihuejcapan tatahua para quinmacas. Huan elis ta cati tiqinmajmacas nopa tali. ⁸ TOTECO mitzyacantiyas ta huan itztos mohuaya. Amo mitzcahuas, yon mitztahuelcahuas, huajca amo ximomajmati, yon amo ximocueso.”

Tapojpolhuili para nochi tahuiquilisti

⁹ Huajca Moisés quiijcuilo nochi ni tanahuatilme huan quinmactili nopa levita totajtzitzi cati quihuicayayaj nopa caxa ica nopa camanal sencahuali huan niqinmactili nochi nopa huehue tacame cati quiipiyayayaj tequiticayot ica israelitame. ¹⁰⁻¹¹ Huan quinmacac ni tanahuatili, quinilhui: “Sesen chicome xihuit, monequi xijpohuaca ni tanahuatilme quema ajsis nopa xihuit quema nochi israelitame quintapojpolhuise iniisraelita icnihua cati quintahuiquilíaj. Xijpohuaca ipan nopa samano quema anquielnamiquise nopa ilhuit quema mochihuaj Pilxajcaltzitzí, huan nochi anmosentilise iixpa TOTECO Dios ipan nopa lugar cati yaya quitapejpenijtos.

¹² “Xiquinsentilica nochi tacame, sihuame, coneme huan sequinoc tali ehuan cati itztoque amohuaya ipan amoaltepehua para ma quicaquica quema anquipo huase ni ley huan quimatise huan quitepanitase amoTECO Dios, huan ica miyac tamocuitahuili ma quichihuaca nochi cati quiijtohua nopa camanali ipan ni tanahuatilme. ¹³ Huan amoconehua cati ayemo teno quimatij ten ni tanahuatilme, huelis quicaquise huan quiyecose quitepanitase amoTECO Dios nochi tonali cati anitztose ipan nopa tali cati anquipanose ni hueyat Jordán huan anmoaxcatise.”

Itayacapan tanahuatil TOTECO para Moisés

¹⁴ Huan teipa TOTECO quiilhui Moisés:

“Xiquita, ya monechcahuía nopa tonali para timiquis. Huajca xijnotza Josué, huan ximonextica anome ipan nopa yoyon tiopamit campa timopantíaj para niqiyocatalis para nopa tequit cati quichihuas.”

Huajca Moisés huan Josué yajque ipan nopa yoyon tiopamit campa mopantíaj ihuaya TOTECO, ¹⁵ huan nopona monexti TOTECO ipan se mixti cati motali campa calteno ten nopa yoyon tiopamit. ¹⁶ Huan TOTECO quiilhui Moisés:

“Ya nechca para timiquis huan timosentilis ica motatahua. Huan ni israelitame nechcajtehuase huan quiixpanose nopa camanal sencahuali cati quichijque nohuaya. Quichihuase quej ahuilnenca sihuame cati momecatijquej ica sequinoc, pampa quinhueyichihuase teteyome cati amo quinixmatij cati onca ipan nopa tali. ¹⁷ Huajca teipa tahuel nicualanis ica injuanti. Huan ipan nopa tonali niqincahuas huan nimoicancuepas. Amo niqincahuas huan masehualme quintzontamiltise. Quena, tahuel miyac taijyohuilisti huan taohuijayot quinajsis hasta ica ohui quiijtose: ‘¿Huelis nochi taijyohuilisti techajsi pampa Toteco Dios ayecmo itztoc tohuaya?’ ¹⁸ Huan nelnelía nimoicancuepas ica injuanti ipan nopa tonali por nochi cati amo cuali quichijtose huan pampa quinhueyichijtose teteyome. Huan yeca amo nimocuatotonis por injuanti.”

¹⁹ Huan ama TOTECO quiijtohua: “Xiquijcuiloca ni huicat huan xiquinmactica nopa israelitame para ma huicaca huan elis quej se testigo ica injuanti cati quinnextilis para amo cuali ma nechcajtehuaca. ²⁰ Pampa na niqincahuas ipan nopa tali cati niqintencahuili inihuejcapan tatahua.

Elis se tali campa nochi onca hasta mocahua. Huan tacuajtose huan ixhuitose huan moricojchijtose, pero teipa yase ica teteyome. Quena, nechcahuase huan quinhueyichihuase teteyome huan quinqtequipanose. Ayecmo technequise huan quixpanose nopa camanal sencahuali cati nijchijqui inihuaya. ²¹ Pero teipa quema quinajsis miyac tamanti taijyohuulisti, huajca ni huicat elis quej se testigo cati quintelhuía huan quinpohuilis cati fiero quichijtoque. Huan iniixhuihua quielnamiquise ni huicat huan huicase. Ama quema ayemo niquincahuilía ma calaquica ipan nopa tali cati niquintencahuili, ya cuali nijmati canque ajsiti inintalnamiqulís.”

²² Huajca ipan nopa tonali Moisés quijcuilo ni huicat huan quichijqui para nochi israelitame ma quitzontecontalica. ²³ Huan TOTECO quitequimacac Josué, icone Nun, huan quihhui:

“Ximoyoltetili huan ximoyolchicahua pampa elis ta cati tiquinhuicas ni israelitame hasta nopa tali cati nimechtencahuilijtoc huan na niitztos mohuaya.”

²⁴ Quema Moisés tanqui quijcuilohua nochi nopa camanali ten nopa tanahuatilme ipan se amatapohuali, ²⁵ quincamanalhui nopa levita totajtziti cati quipiyayayaj nopa tequit para quihuicase nopa caxa ica nopa camanal sencahuali ten TOTECO, huan quinihui:

²⁶ “Xijhuicaca ni amatapohuali ica itanahuatilhua TOTECO, huan xijtalica inacasta nopa caxa cati quihuica nopa camanal sencahuali cati quichijqui TOTECO Díos para nozona ma elto quej se testigo cati quita ten anquichihuaaj.

²⁷ “Na nijmati tahuel anmotepanitaj huan antzontochontique. Ipan nochi ni tonali quema ninejntoc amohuaya, anmotzontochonchijtoque ica TOTECO, huan nijmati para noja más anmotzontochonchihuase ica ya quema ya nimictos. ²⁸ Huajca ma monechcahuica campa na nochi huehue tacame huan nopa tayacanquet ten sesen hueyi familia para niquinilhuis ni tamanti huan niquintestigojquetzas ilhuicacti huan taltipacti ica inijuanti. ²⁹ Nijmati quema nimiquis anmotzontochonchihuase huan anquicahuase nopa ojti cati nimechnahuatijtoc xijtoquilica. Huan teipa ipan nopa tayacapan tonali huetzis amopani cati tahuel fiero, pampa anquichihuase cati amo cuali iixpa TOTECO huan anquicualanise TOTECO por nopa teteyome cati anmochihuilise.” Quej nopa Moisés quinihui nopa levitame.

Nopa huicat cati quichijqui Moisés

³⁰ Huajca Moisés quipojqui ni huicat ten ipejya hasta itamiya iniixpa nochi israelitame cati mosentilijtoyaj nozona, quinihui:

32

1 “Nochi ipan ilhuicacti huan taltipacti ma quitacaquilica cati na niqijtos.

2 Xijselica notamachtli quej anquiselíaj at quema taquiyahui.

Quej ajhuechti nochi quitzacua huan pitzajat quixolonía xihuime huan sacat,

san nocamanal xijmatica.

3 Na nitayolmelahua itoca TOTECO.

Niteilhuía quenicatza nelpano hueyi ihueyitilis Toteco Díos.

4 Yaya cati techmanahuía.

Nochi itequi eltoc cuali.

Xitahuac nochi cati quichihua.

Yaya nopa Toteco Díos cati temachtli.

Amo quema quichihua cati amo ijqui.

Yaya quichihua cati melahuac huan xitahuac.

⁵ Pero nopa israelitame amo quichijtoque cati cuali.

Amo quinamiqui elise iconehua pampa motzontochonchijtoque ica ya.

⁶ ¿Quej nopa anquitaxtahuíaj TOTECO, anisraelitame?

Antzontochontique huan anhuhuitique.

¿Amo yaya amotata cati amechtacatili?

Yaya amechchijtoc huan amechmacatoc nemilisti.

⁷ Xiquelnamiquica nopa tonali cati huejcajquiya huan quenicatza panotihualajque amohuejcapan tatahua.

Xiquintatzintotquili amotatahua huan nopa huehue tacame ma amechpo-huilica.

⁸ Oncac se tonali huejcajquiya quema Toteco Cati Más Hueyi quinmajmacac nochi xinach masehualme sesen tali campa itztosquíaj.

Yaya quiquetzqui miyac nepamit campa hueli para tatajco ma onca talme ica inimasehualhua quej inimiyaaca israelitame.

⁹ Pampa tiisraelitame tiimasehualhua TOTECO.

Tiixachua cati yaya teipa quiselis quej se quiselía se tenijqui cati se tetaj quimacatehua icone.

¹⁰ TOTECO techpanti tiisraelitame huan tohuejcapan tatahua ipan nopa huactoc tali,

campa nopa ajacat quitzohuitectoc chichahuac huan campa amo teno onca.

Techmanahui, huan techmacti huan techmocuithui cuali quej elisquía tiiixteyol sital.

¹¹ Techchihuili quej se cuatojti moeltapalpapatatza ipan itepasol huan quinnotza ipilconehua para ma patanica.

Huan quema quinita iconehua siyahuij patantinemij, quipatahua ieltapal para ieltapaltipa ma huetzica huan quinhuicas campa tepeixco hasta campa itepasol.

Quej nopa techmocuithuijtoc TOTECO.

¹² Yaya TOTECO iseli techyacantoc huan amo aqui más.

Amo quipixqui yon se dios cati quipalehui.

¹³ TOTECO quichijqui ma titatanica.

Techtamacac tiisraelitame ica nopa cuatajcajot cati más cuali onca ipan mili. Ipan tepeixco quiquixti necti huan techmacac ma tijcuaca huan ipan se-quinoc teme cati tetic techquixtili aceite.

¹⁴ Techtamacac ica mantequilla huan lechi ten inintapiyallhua.

Tijcuajque ininacayo nopa pilborregoijtitzi cati más yejyectzitzi.

TOTECO techtamacac ica oquich borregojme huan oquich chivojme cati achi cuali cati oncayaj ipan tali Basán.

Techmacac nopa trigo cati más cuali,

huan tiquique cati más cuajcualtzi xocomecat iayo.

¹⁵ Pero tiisraelitame pejqui tineltacuaj,

huan pejqui más timochihuaj tihuejhueyij hasta tahuel tielque titom-ahuaque.

Huan tijtahuelcajque Toteco Dios cati techchijchijqui.

Tijhuejcamajcajque nopa hueyi tet cati techmanahuijtoya,

huan amo tijnejque yaya cati totemaquixtijca.

¹⁶ Huan tiisraelitame tijpejpehualtijque huan tijcualanijque TOTECO Dios,

pampa tiquinhueyichijque teteyome cati fierojtique.

¹⁷ Tiisraelitame tiquinmactilijque tacajcualisti ajacame ten Amocualta-cat,

quema titatencahuayayaj iniixpa nopa teteyome cati amo ya Toteco Dios,

huan amo quema tiquinixmajtoyaj.

Inijuanti eliyayaj teteyome cati yancuique,
casi sanoc onajsiroj huan casi totatahua amo quintepanitayayaj.

18 Israelitame, anquielcajtoque amoTata huan amoTamanahuijca. Anquielcajque Toteco Dios casi techmacatoc nemilisti.

19 Huan TOTECO quiitac casi tijchihuayayaj huan tahuel cualanqui ica tojuanti.

Tojuanti casi tiioquichpillhua huan tiisihuapillhua tijchihuilijque ma techcualancaita.

20 Huan teipa TOTECO quiiyto: 'Na nojquiya nimoicancuepas ica injuanti, huan niqúitas hasta canque tamis inisisinjicayo.

Nelnelía injuanti amo cuajcualme.

Itztoque quej coneme casi amo aqui huelis ininpa motemachis.

21 Techhijque ma niquintasomati pampa quinhueyichijque teteyome huan taixcopincayome casi amo ya Toteco Dios.

Techpejpehualtijque ica ininteteyohua. Huajca na nojquiya niqinchihuas ma techtasomatica pampa niqinpalehuis masehualme casi amo ya nomasehualhua.

Huan niqinpejpehualtis nopa israelitame ica masehualme casi quintaj para amo ininpati.

22 Nocualancayo tejcos quej se tit,

huan lemenis hasta ajsis campa más huejcata ipan micta. Quitamitatis nochi taltipacti huan itajca.

Hasta campa pehua tepeme quitatis nopa tit.

23 Nielis quej se casi quinmajcahuilis cuataminti, pampa nijtitanis ipan injuanti nochi casi amo cuali.

24 Cocoxcatiyase ica mayanti huan miqúise ica tatotonilot.

Se fiero cocolisti quintzontamiltis.

Niquintitanilis tecuanime casi mosisiníaj huan cohuame casi tahuel pajyojque casi mohuahuatatzaj talchi.

25 Ipan calles huetzise ininconeuhua mictoque ica macheta,

huan ipan calijtic oncas majmati.

Telpocame huan ichpocame miqúise, huehuentzitzitzi huan coneme casi noja chichij nojquiya.

26 Na niqúijto para niqinsemanas huan niquintamiixpolos ipan taltipacti hasta amo aqui quinelnamiquis.

27 Pero amo niqúijyohuisquía quema techpaquitasquíaj nocualancaitacahua.

Amo nijnequi ma mohueyimatica injuanti casi techcualancaitaj huan quiijtose:

Amo elqui ininDIOS casi quintamilti nopa israelitame. Tojuanti toseltitzitzitzi tijchijque ica tochicahualis.'

Quej nopa quiijtojtosquíaj amocualancaitacahua.

28 Pero anisraelitame anquipolojtoque talnamiqúilisti,

huan anhuihuitique. ¡Amo teno anquimachiliaj!

29 Sinta elisquía antamatini, huajca anquimachilisquíaj huan anquimatísquíaj canque antamitij.

30 Pampa ¿quenicatza elqui para setzi amocualancaitaca huelqui amechquixti mil anisraelitame?

Huan ¿quenicatza elqui para ica ome amechquixtijque 10 mil?

Ya ni elqui pampa niamoTECO, casi niamotamanahuijca, nimechtemactili inimaco amocualancaitacahua.

31 Inintamanahuijca amocualancaitacahua amo hueli quitanis totamanahuijca tojuanti.

32 Pero anisraelitame anitztoque quej xocomeca tzonti cati amo cuali. Anitztoque quej masehualme ten altepeme Sodoma huan Gomorra huejca-jquiya.

Huan nopa xocomeca at cati anquiyoliltíaj quipiya ipajyo huan tahuel chichic.

33 Amoxocomeca ayo eltoc quej inintencococa nopa cohuame cati temictíaj quej mahuaquijme.

34 Nicajoctihuala miyac tamanti fiero para ica nimechtatzacuiltis. Quena, nicajoctoc tatzacuilti quej elisquía miyac tomi.

35 Nochi nicajoctoc para nopa tonali quema nimomacuepas huan nimechmacas anisraelitame.

Pampa amo huejcahuas para ajsis nopa talojtzi quema anhuetzise. Ya eltoc nechca nopa tonali quema nimechtzontamiltis.

Ya amechnechcahuía amohora.’

36 TOTECO quistehuas huan quintajtolsencahuas imasehualhua quema quiitas ayecmo quipiyaj fuerza.

TOTECO quintasojtas itequipanojcahua huan quinchihuas ma moyolcuepaca ica ya quema quiitas nochi quincajtejtoque huan amo aqui quinpalehuía.

37 Huan TOTECO quinilhuis:

‘¿Canque itztoque amoteteyohua, nopa tamanahuiani cati ipan anmotemachiyayaj?

38 ¿Canque itztoque cati quicuayayaj ichiyajca amotacajcahualis, huan quiiyayaj nopa xocomecat iayo cati anquinmactiliyayaj?

Ma motananaca para ma amechpalehuiquij.

Ma hualaca huan ma amechmanahuiquij, pero amo hueli.

39 San na niijoytzi niDIOS, huan iyoca ten na amo aqui seyoc.

Na nitemaca nemilisti huan nitequixitlía.

Na nitecocohua huan na nitepajtía.

¡Amo aqui huelis momanahuís ten na nomaco!

40 Nijtanana nomax para ilhuicac huan nitatestigojquetza.

Niquijtohua: Nelía melahuac,

41 huan temachtí nijtentis nomacheta cati cahuani huan nipehuas nitetaj-tolsencahuas,

huan nimomacuepas ica nocualancaitacahua.

¡Niquinmacas cati quinamiqui cati amo quinequij techitase!

42 Nochi nocuataminhua nijchihuas xolontoc ica inieso.

Huan ica nomacheta niquintzontamiltis nochi inijuanti.

¡Quena, ipan nomacheta oncas inieso cati niquinmijmictijtoc huan cati niquinitzquitoc!

¡Nojquiya quipiyas inieso inintayacancahua nocualancaitacahua cati quipiyaj inintzoncal huehueyac!’

43 ¡Ximoyolpaquiltica, nochi amasehualme ipan taltipacti inihuaya imasehualhua TOTECO Dios!

Yaya momacuepas ica cati quinmictijque itequipanojcahua.

Quena, quincuepilis icualancaitacahua.

Quipajpacas ital huan imasehualhua.”

Itayacapan tanahuatilhua cati quinmacac Moisés

⁴⁴ Huan Moisés ihuaya Josué, icone Nun, monextijque iniixpa nochi israelitame, ⁴⁵ huan Moisés quinpohuili ni huicat ten ipejya hasta itamiya.

⁴⁶ Teipa quinilhui nopa israelitame:

“Ximoyolilhua cuali ipan nochi ni tamanti cati ama na nimechmachiltía, huan xiquinnahuatica amoconeua ma quichihuaca nochi cati quijtohua ni tanahuatilme. ⁴⁷ Pampa ya ni amo ya se tamanti cati amojuanti huelis san anquiahuilmatisé. Ni tanahuatilme eltoque nemilisti para amojuanti. Huan sinfa anquineltocase ni tanahuatilme, anhuejcahuase para anitztose ipan nopa cuali tali cati ama anquipanose ni hueyat Jordán huan anmoaxcatise.”

Toteco quicahuili Moisés ma quiita nopa cuali tali

⁴⁸ Ipan nopa tonali TOTECO quicamanalhui Moisés huan quihui:

⁴⁹ “Xiya ipan nopa tepeme Abarim huan xitejco hasta nopa tepet Nebo cati eltoc ipan inintal moabitame iixmelac altepet Jericó ipan seyoc nali ne hueyat. Huan ten nozona xijtachili nopa tali Canaán cati niquinmacas ma moaxcatice ni israelitame. ⁵⁰ Huan teipa timiquis ipan nopa tepet cati ipan titejcos, huan timosejcotilis inihuaya moteixmatcahua. Timiquis quej moicni Aarón cati mijqui ipan tepet Hor huan mosejcotili ica iteixmatcahua. ⁵¹ Anome, ta huan Aarón, amo anmotemachijque ipan na iniixpa nopa israelitame quema anitztoyaj campá nopa atajti Meriba nechca Cades ipan nopa huactoc tali Zin. Huan amo antechhueyichijque iniixpa. ⁵² Huajca san ica huejca huelis tijtachilis nopa tali cati niquinmactilis ni israelitame, pero amo huelis ticalaquis ipan nopa tali.”

33

Moisés quintiochijqui nochi israelitame

¹ Quema polihuyaya quentzi para miquis Moisés, itequipanojca Toteco Dios, yaya quintiochijqui nochi nopa israelitame ica ni camanali. ² Quiijto: “Quema monexti TOTECO, itatanex hualajqui ten campá hueli.

Hualajqui ten tepet Siná, ten Seir huan ten nopa tepeme ipan Parán. Hualajqui ten ilhuicac campá quiyahualojtoyaj majtacti mil ilhuicac ejcahua.

Yaya techhualiquili nopa tanahuatilme cati elqui quej se tit cati toponi cati quihucayaya ipan inejmat.

³ TOTECO nelía techicnelía tiimasehualhua, huan techpixtoc imaco nochi tiitatzejtzeltica masehualhua.

Tojuanti tijtoquilíaj.

Tijtalíaj toicxihua campá pano iicxihua.

Huan tijtacaquilíaj huan nimantzi tiyahuij campá yaya techtitani.

⁴ TOTECO techmacac itanahuatilhua ica na, ya nopa cati más ipati cati tiisraelitame tijpiyaj.

⁵ TOTECO mochijqui totanahuatijca tiisraelitame quema nochi tayacanani huan nochi ixhuime ten nochi huejhueyi israelita familias timosentilijque.”

⁶ Huan Moisés quiijto ten nopa hueyi familia ten iixhuihua Rubén:

“¡Ma itzto nopa familia ten iixhuihua Rubén!

Ma amo miquica, ma amo tamica,

masque Rubén amo quinpiya miyaqui iteipan ixhuihua cati hualahuij ica ya ieso.”

⁷ Huan ten nopa hueyi familia Judá, Moisés quiijto:

“TOTECO, xijtaqaquili inintoscac iixhuihua Judá cati techyacanañ ipan tatehualisti.

Xijchihua ma mocuepaca ica cuali huan sempa mosejcotiliquij tohuaya. Xiquinmanahui ica mohueyi chichualis. Xiquinpalehui ica inincualancaitacahua.”

⁸ Huan Moisés quijto ten iixhuihua Leví:

“TOTECO, nopa levitame cati mitztequipanohuaj ica temachili, ta tiquinmacatoc nopa Tumim huan Urím, modados cati tatzejtzeltic, para huelis quimatise mopaquilis.

Tijjejyeco inihuejcapan tata campa nopa at Meriba campa nochi israelitame quinajnancuiliyayaj.

Tijchijqui para iixhuihua mitztequipanose xitahuac.

⁹ TOTECO, nopa levitame injuanti cati más mitzneltoquilíaj mocamanal.

Más itztoque temachtí ica ta,

hasta quínitaque inintatahua, ininanhua huan iniicnihua, quej amo quínixmatiyayaj para quitamichihuase mocamanal.

¹⁰ Injuanti techmachtíaj tíisraelitame nochi motanahuatilhua.

Quitálíaj copali ipan motaixpa moixpa,

huan tapiyalme mitzmacaj ipan motaixpa quej tacajchualisti tatatili.

¹¹ Xiquintiochihua levitame, TOTECO,

huan ica paquili xijseli nochi inintequi.

Xiquinpanpojpostequi nochi inincualancaitacahua para ayecmo ma motananaca.”

¹² Ten nopa familia Benjamín Moisés quijto:

“TOTECO tahuel quínicnelía iixhuihua Benjamín,

huan injuanti itztoque ica temachili ipan imax.

Nochipa yaya quínmocuitahuía huan quínmanahuía.”

¹³ Ten iixhuihua José, Moisés quijto:

“Ma TOTECO quitiochihua inintal iixhuihua José.

Ma quiselica nopa at cati más cuali ten ilhuicac.

Ma meya nozona nopa at cati eltoc más tahuejcata ten ni taltipacti.

¹⁴ Inintal ma temaca cati más cuajcuali pixquisti cati icstoc campa cuali tona huan cuali metztóna.

¹⁵ Iixhuihua José para nochipa ma quiselica itajca cati más cuali temaca nopa tepeme huan tachiquilme cati huejca.

¹⁶ Ma quiselica nopa cuatacti cati más cuajcuali onca ipan taltipacti.

Quena, miyac cati cuali ma quiselica hasta mocahuas.

Huan ma quínita ica cuali TOTECO cati monexti nohuaya ipan nopa xihui tzonti cati tatayaya.

Nochi ni tatiochihualisti ma huala ipan iixhuihua José,

yaya cati quínahuatiyaya iicnihua huejcajquiya.

¹⁷ Iixhuihua Efraín, icone José, elij nelía huejhueyi quej iachtohui cone se toro.

Iixhuihua quipiyase chichualisti quej icuacua se toro.

Elise tetique quej se búfalo cati ayemo aquí químaxojtilijtoc.

Nopa miyaquí miles ten inisoldados iixhuihua Efraín,

huan nopa miyaquí miles ten iixhuihua Manasés quínacuajhuise nochi tamanti masehualme hasta campa más huejca talme ipan ni taltipacti,

huan quíntanise nochi ica san se huelta.”

¹⁸ Ten iixhuihua nopa huejhueyi familias ten Zabulón huan Isacar Moisés quijto:

“Xiyolpaquica aniixhuihua Zabulón huan Isacar quema anyahuij campa
 hueli tali ipan amotequi,
 huan quema anmocuepaj ipan amoyoyoncalhua para anmosiyajquetzase.
 Nochi amotequi ma quisa cuali.

¹⁹ Anquinnotzase sequinoc masehualme ma yaca campa tepet,
 huan nopona antemacase para TOTECO nopa tacajc ahualisti ten tascamatili
 cati más cuali.

Anquitanise tomi ica nochi iricojyo cati onca ipan hueyi at,
 huan nochi cati ipati cati motatijfoc ipan xali iteno hueyi at.”

²⁰ Ten iixhuihua nopa hueyi familia Gad Moisés quijto:
 “Ma tijhueyichihuaca TOTECO cati quinmacac huejhueyi talme iixhuihua
 Gad.

Iixhuihua Gad mosohuaj huan tachiyaj cuali,
 quej se sihua tecuani cati quichiya para ipan huitonis se para quicotonilis
 imax huan itzonteco.

²¹ Gad motapejpenili huan mocahui cati más cuali tali.
 Quiselijque achi miyac quej cati quinamiqui tayacanani.
 Yaya ihuaya imasehualhua yajque quej tayacanani ten israelitame para
 tatehuitij.

Inijuanti quichihuase nochi cati xitahuac cati TOTECO quinnahuatijtoya ma
 quichihuaca.”

²² Ten iixhuihua Dan Moisés quijto:
 “Iixhuihua Dan itztoque quej icone se tecuani cati quisa campa motatijtoc
 ipan ojti ipan Basán,
 huan huitoni ininpa cati quipanoj para quincocos.”

²³ Ten iixhuihua Neftalí Moisés quijto:
 “TOTECO amechcualita aniixhuihua Neftalí,
 huan nelmiyac itatiochihual anquiselijtoque.
 Ximoaxcatica nopa hueyi at campa temo fonati,
 huan nopa tali Neguev ica sur.”

²⁴ Ten iixhuihua Aser Moisés quijto:
 “TOTECO más ma quintiochihua iixhuihua Aser que nochi sequinoc icone-
 hua Israel.

Nojquiya iniicnihua quinicnelise.
 Ma quixolonica iniicxihua ipan aceite pampa nochi quipiyaj hasta mocahua.

²⁵ Huan nochi inincaltenhua quipiyase hierro huan bronce para ica motza-
 cuase para nochi cati quipiyaj mocahuas temachti.
 Huan ininchicahualis huejcahuas ipan nochi ininemilis.”

²⁶ “Amo aqui seyoc quej Toteco toDios tiisraelitame.
 Yaya nopa tanahuatijquet cati más hueyi cati nejnentinemi ipan ilhuicac ica
 nochi iyejyejca.

Yaya nimantzi huala ten ilhuicac para techpalehuiqui.

²⁷ Toteco Dios nochipa itztoya huan nochipa itztos, yaya cati ipan timo-
 temachíaj.

Imaco tiitztoque nica ipan taltipacti huan ichicahualis cati amo quema tamis
 para techpalehuía.

Yaya quinquixtis amoixpa icualancaitacahua huan amechnahuatis xiquint-
 zontamiltica.

²⁸ Huajca israelitame nochipa itztose ica temachili.

Quena, iixhuihua Israel nochipa yolpaquise.

Anitztose ipan amotal ica miyac trigo huan xocomecat iayo.

Huan taquiyahuis cuali quema monequi.

29 Tahuel antatiochihualme anisraelitame. Amo aquiyme sequinoc masehualme quej amojuanti cati amechmaquixtijtoc TOTECO.

Yaya cati amechmanahuía huan amechpalehuía.

Yaya quej amomacheta cati ica antatanise.

Por ya nochi amocualancaitacahua motancuaquetzase amoixpa, huan ininpa anmoquetzase.”

34

Imiquilis Moisés huan campa motojqui

1 Huajca Moisés quisqui ten nopa huactoc tali Moab huan tejoc ipan nopa tepeme cati itoca Nebo. Yajqui hasta iixco nopa tepet Pisga cati eltoc iixmelac altepet Jericó. Huan ten nozona TOTECO quinextili nochi tali tatencahuali ten Galaad hasta Dan, 2 huan nochi nopa tali Neftalí, Efraín huan Manasés huan nochi tali Judá hasta nopa Hueyi At Mediterráneo. 3 Huan quinextili nopa tali Neguev, huan nopa tamayamit ten Jericó, nopa altepet ten palmeras huan quinextili hasta Zoar. 4 Huan TOTECO quiilhui:

“Ya ni nopa tali cati nijtencahuili Abraham, Isaac huan Jacob para niquin-macasquía iniixhuihua. Ama nimitzcachuilijtoc para ica moixteyol xiquita, masque amo huelis ticalaquis ipan ne tali.”

5 Huan quej nopa Moisés, itequipanojca TOTECO, mijqui ipan nopa tali Moab quej TOTECO quiilhuijtoya. 6 Huan TOTECO quitojqui ipan se tamayamit ipan tali Moab, iixmelac Bet Peor, ipan se lugar cati hasta ama amo aqui quimati. 7 Huan masque quiipiyayaya 120 xihuit quema mijqui, cuali tachiyayaya huan noja eliyaya neltetic itacayo.

8 Huan nopa israelitame quichoquilijque Moisés para 30 tonali ipan nopa huactoc tali ten Moab quej momajtoyaj quichihuj. Huan teipa tanqui nopa tonali ten choquisti.

9 Huan Josué, icone Nun, quiseli tahuel miyac talnamiquilisti quema Moisés quitali imax ipan ya. Huajca nopa israelitame quitepanitaque Josué huan quitoquilijque icamanal para quichihuase nochi cati TOTECO quinahuatijtoya Moisés ma quichihuaca.

10 Pero ayecmo quema oncac seyoc tajtolpanextijquet ipan israeli-tame quej Moisés cati moixtachiyaya ihuaya TOTECO quema ihuaya camanaltiyaya. 11 Huan pampa quej nopa moixmatiyaya ica TOTECO, huelqui quichihua huejhueyi tanextili huan tiöchicahualnescayot cati TOTECO quititanqui ma quichihua ipan tali Egipto iixpa Faraón, huan iniixpa itapale-huijcahua huan nochi sequinoc cati itzttoyaj ipan ital. 12 Huan ica Moisés TOTECO quichijqui huejhueyi tamanti iniixpa israelitame cati quinmajmati. Quinnextili quenecatza ihueyi chichualis TOTECO.

Josué

TOTECO quinojnotzqui Josué

¹ Moisés, itequipanojca TOTECO mijqui, huan TOTECO quinojnotzqui Josué, itelpoca Nun, cati ipa quipalehuiyaya Moisés huan quiilhui:

² “Ya mijqui notequipanojca Moisés. Huajca ama monequi para ta inihuaya nochi ni masehualme ximocualtica huan xiquixcotonaca ni hueyat Jordán para anyase ipan nopa tali cati nimechmacas. ³ Huan na nimechmacas nochi nopa tali cati ipan annejntiyase quej ihuaya nimocajqui Moisés para nijchihuas. ⁴ Nimechmacas nopa tali cati pehua ipan huactoc tali ica sur huan onajsi ica norte hasta nopa tepet Líbano. Campa temo tonati nopa tali pehua ipan nopa hueyi at Mediterráneo huan yahui hasta nopa hueyi hueyat Eufates. Quena, nochi inintal nopa heteo masehualme elis amoaxca. ⁵ Amo aquí huelis mitztanis ipan nochi monemilis. Na niitstos mohuaya quej niitstoya ihuaya Moisés. Amo quema nimitzcajtehuas, yon amo nimitztahuelcahuas. ⁶ Ximoyoltetili huan ximoyolchicahua pampa ta tiqinyacanas ni masehualme para tiquinaxcatis nopa tali cati inihuaya nimocajqui inihuejcapan tatahua para niquinmacasquía. ⁷ San ximoyoltetili huan ximoyolchicahua. Ximomocuitahui para tijchihuas nochi nopa tanahuatilme cati notequipanojca Moisés mitzmacatejqui. Huan sinta tijchihuas nochi quej cati eltoc ipan nopa tanahuatilme, huajca nochi cati tijchihuas quisas cuali. ⁸ Amo quema xijcahua xiquinelnamiquiltijtinemi israelitame cati quijjothua nopa amatapohuali cati quiipiya notanahuatil. Ximoihuijtinemi ten notanahuatil tonaya huan tayohua para huelis tijchihuas nochi cati quijjothua. Quej nopa tinejnis ica talnamiquilisti huan nochi cati tijchihuas quisas cuali. ⁹ Pero nimitznahuatía ximoyoltetili huan ximoyolchicahua. Amo ximajmahui, yon amo ximocueso, pampa na, nimoTECO Dios, niitstos mohuaya campa hueli campa tinentinemis.”

Josué mocualtali para quitanise nopa tali

¹⁰ Huajca Josué quinnahuati nochi cati quinyacanayayaj nopa masehualme: ¹¹ “Xiyaca ipan nochi yoyon calme huan xiquinnahuatica nochi israelitame na quichihuaca tacualisti, pampa ica eyi tonati tiqixcotonase ni hueyat Jordán para timoaxcatise nopa tali cati TOTECO Dios techmacas.”

¹² Nojquiya Josué quincamanalhui iteipan ixhuihua Manasés huan quinilhui:

¹³⁻¹⁴ —Xiquelnamiquica cati amechnahuati Moisés, itequipanojca TOTECO. TOTECO Dios amechmacatoc ni tali ipan ni inaliyo hueyat Jordán para nica huelis anmosiyajquetzase. Huan anquincajtehuase amosihuajhua, amoconehua huan amotapiyallhua nica, pero nochi amosoldados monequi quipanose ni hueyat ica inintepos mocualtalijtose para tatehuise. Inijuanti quinyacanase huan quinpalehuise inicnihua para quitanise nopa tali. ¹⁵ Huan amosoldados tatehuise nopona ipan seyoc inaliyo hasta quema TOTECO techpalehuis ma tijtanica nopa tali campa ne sequinoc israelitame huelise mosiyajquetzase. Teipa anhuallase nica ipan amotal ipan ni inaliyo Jordán para campa quisa tonati huan ya anitstose ica paquilisti ipan ni amotal cati amechmacac Moisés, itequipanojca TOTECO.

¹⁶ Huan inijuanti tananquilijque:

—Tijchihuase nochi cati technahuatijtoc, huan campa techtitanis, no-pona tiyase. ¹⁷ Quej tijneltoquilijque Moisés nochi cati technahuati, nojquiya nochipa timitzneltoquulise. San tijnequij para TOTECO Dios cati tijtequipanohuaj ma yahui mohuaya quej ihuaya yajqui Moisés. ¹⁸ Sinta se acaya amo quinequi quichihuas cati ta tijnahuatís, tijmictise. San ximoyolchicahua huan ximoyoltetili.

2

Josué quintitanqui tacame ma quitatij Jericó

¹ Teipa Josué quinnahuati ome israelitame ma quisaca ipan Sitim campa itztoyaj huan itxatcatzi ma yaca para quitatij quenicatza eltoc nopa tali Jericó. Quinilhui: “Xiyaca xijtajtachilitij nopa tali huan nopa altepet Jericó.”

Huan nopa ome tacame yajque Jericó huan ajsitoy ipan se cali campa cochij paxalohuani. Huan nopa cali eliyaya iaxca se ahuilnenca sihuat cati itoca Rahab huan nozona mocajque. ² Pero se acaya quiyolmelahuato nopa tanahuatijquet ipan Jericó para ajsitoyaj sequij israelitame nopa tayohua para quitachilise nopa tali.

³ Huajca nopa tanahuatijquet tatitanqui ma quilhuitij Rahab:

—Techmaca nopa tacame cati itztoque ipan mochaj, pampa hualajtoque para quitachilise quenicatza huelis quitanise toaltepe.

⁴ Pero nopa sihuat ya quintatijtoya nopa tacame huan huajca quijto:

—Melahuac sequij tacame techpaxalocoy, pero amo nijmati canque ehuanij. ⁵ Huan quema tayohuixqui, ipan nopa hora para quitzacuase nopa caltemit ipan nopa tepamit cati quiyahualtzactoc toaltepe, injuanti yajque. Huan amo nijmati canica yajtoque. Pero sinta nimantzi anquintoquulise, huelis anquinajsitij.

⁶ Pero nelía nopa sihuat quinchihualtijtoya ma tejococa calcuitapa huan quintatijtoya itantita ome tamontomit ten lino icuayo cati quihuatzayaya.

⁷ Huan nopa tacame cati nopa tanahuatijquet quintitantoya quintemotijyajque nopa ome tacame ipan nopa ojti cati ajsi hueyat Jordán campa masehualme hueli quixcotonase. ⁸ Huan teipa quema ayemo cochiyayaj nopa tacame cati yajque quitachilitoy nopa tali, Rahab tejoc calcuitapa huan quinilhui:

⁹ —Na nijmati Dios amechmacatoc ni tali pampa yaya quichijtoc para nochi total ehuaní ma amechimacasica. Melahuac nochi cati itztoque nica ya majmajcamiquij por amojuanti. ¹⁰ Tijcactoque quenicatza Dios amechhuachili nopa at ipan nopa Hueyi At Chichilitc para huelqui anquixcotonque quema anquisque tali Egipto. Nojquiya tijcactoque quenicatza anquintzontamiltijque Sehón huan Og, nopa ome inintanahuatijcahua amorreos cati itztoyaj ipan nopa seyoc inalio hueyat Jordán.

¹¹ Huan quema tijcajque nochi ya ni, nelía timajmajque hasta amo aqui motemaca para amechtehuis, pampa Dios, amoTECO, yaya quinahuatía ilhuicac huan taltipacti. ¹² Yeca na nimechtajtanía chichahuac, xijtes-tigoquetzaca amoTECO para antechchihuilise cati cuali, na huan nochi noteixmatcahua, quej na nimechchihuilijtoc. Techilhuica para melahuac ¹³ antechmanahuise, na ica notata, nonana, notaca icnihua huan nosihua icnihua huan nochi cati toaxcahua para amo timiquise.

¹⁴ Huan tananquilijque:

—Timechmanahuise sinta techmanahuise huan amo aqui tiquilhuis ten tojuanti. Quena, sinta amo techcajcahuas, timitzchihuilise cati cuali huan cati xitahuac quema TOTECO techmacas ni tali.

¹⁵ Huan ichaj Rahab eltoya ipan nopa hueyi tepamit cati quiyahualojtoya nopa altepet. Huajca ica se hueyi lazo Rahab quintemohui nopa israelitame ipan se iventana nopa tepamit. ¹⁶ Huan Rahab quinilhui:

—Xiyaca ipan tepeme para amo amechpantise nopa tacame cati amechtemohuaj. Ximotatica nozona para eyi tonati hasta injuanti sempa hualase. Teipa huelis anyase.

¹⁷ Huan quinanquilijqe:

—Tojuanti tijchihuase cati tijtestigojquetzque, pero amo elis totajtacol sinta timiquis sinta amo techneltoca. ¹⁸ Huajca quema tijcaquis para tojuanti ticalactihualahui ipan ni tali, xijhuiyoni ni hueyi lazo chichiltic ipan moventana cati ica techtemohuijtoc huan xiquinsentili nica calijtic motata, monana, moicnihua huan nochi ininteixmatcahua. ¹⁹ Sinta se quisas, elis itajtacol sinta miquis. Pero sinta acajya quinajsis cati itztoque ipan ni mochaj, huajca elis tojuanti totajtacol. ²⁰ Pero sinta tiquinilhuis sequinoc ten ni tamanti, tojuanti ayecmo monequi tijchihuase cati timitzilhuijqe huan tijtestigojquetzque TOTECO para timitzchihuilise.

²¹ —Cualtitoc, quej nopa timocahuaj —tananguili Rahab.

Huajca momanahuatijque huan yajque. Teipa nopa sihuat quihuiyoni nopa hueyi lazo chichiltic ipan iventana.

²² Huan nopa ome tacame yajque ipan tepeme huan nozona motatijque para eyi tonati hasta nopa soldados cati quintemohuayayaj campa hueli ipan nopa ojti sempa yajque altepet Jericó pampa amo quinpantijque. ²³ Huajca teipa nopa ome tacame temoque ten nopa tepeme huan panoque hueyat Jordán huan ajsitoj campa itztoya Josué itelpoca Nun huan quipohuilijque nochi cati panotoya. ²⁴ Huan quihuijqe Josué: “TOTECO quitajlitoc tomaco nochi nopa tali pampa nochi cati itztoque ipan nopa tali ya majmajcamiqij por tojuanti.”

3

Nopa israelitame quixcotonque hueyat Jordán

¹ Tonili nelcualca Josué ihuaya nochi nopa israelitame quisque Sitim, huan ajsitoj hueyat Jordán huan tonilijque nozona. ² Huan quema ya panotoyay eyi tonati nozona iteno nopa hueyat, nopa tayacanani panotinenque campa nochi nopa israelitame, ³ huan quinnahuatijque cati monequi quichihuase. Quinilhuijqe: “Xiquintachilica nopa levita totajtzitzi cati quipiyaj inintequi para quihuicase icaxa TOTECO Dios cati quipiya cati tohuaya mocajtoc. Huan quema anquinitase quistehuase, huajca xiquisaca huan xiquintoquilica. ⁴ Quej nopa anquimatise canica monequi anyase, pampa amo quema anpanotoque ipan nopa ojti hasta ama. Pero amo xijnechahuica icaxa TOTECO. San xijhuejcaitztiyaca quej se kilómetro ihuejcaca.”

⁵ Huan Josué quinilhui: “Ximaltica huan ximoyolpajpacaca iixpa TOTECO quej amechilhuijtoc para ximoiyocalica para ya, pampa mosta TOTECO quichihuas huejhueyi tamanti amoixpa ica cati san anquitachilise.”

⁶ Huan Josué quinnotzqui nopa totajtzitzi huan quinilhui: “Xijhuicaca icaxa TOTECO cati quipiya cati tohuaya mocajtoc huan techyacanaca para ancalaquise ipan ni hueyat.”

Huajca nopa totajtzitzi quiquechpanojque nopa caxa huan quinyacunque nopa masehualme. ⁷ Huan TOTECO quihui Josué: “Ni tonali nipehuas nimitzhueyitalis iniixpa nochi israelitame. Quej nopa quitate para temacti na niitztoc mohuaya quej niitztoya ihuaya Moisés. ⁸ Huan xiquinnahuati nopa totajtzitzi cati quihuicaj nopa caxa para quema ajsise iteno nopa

hueyat Jordán, ma calaquica huan ma nejnemica se quentzi. Huan teipa ma moquetzaca nozona ipan nopa hueyat.”

⁹ Huajca Josué quinilhui nopa israelitame: “Xihualaca huan xijtacaquilica cati quijtohua TOTECO Dios cati tijtequipanohuaj. ¹⁰ Ama anquilitase para Toteco Dios cati itztoc, nelía itztoc amohuaya, huan yaya quiniycueni-jiyas amoixpa nochi nopa cananeos, hititame, heveos, ferezeos, gergeseos, amorreos huan jebuseos. Huan quej ni anquimatise. ¹¹ Icaxa Toteco, yaya nopa Dios cati quinahuatía nochi taltipacti ama quixcotonas nopa hueyat Jordán amoixpa. ¹² Huajca xiquintapejpenica 12 tacame, se ten sesen hueyi familia. ¹³ Huan quema calaquic atita iniicxi nopa totajtztizi cati quihuicaj icaxa TOTECO huan injuanti moquetzase ipan nopa hueyat, ipan nopa talajtzi nopa at moxelos. Huan nopa at cati huala ica huejcapa ayecmo motalos. San mosejcotilis huan mochihuas se tamontomit pampa nopa caxa iaxca TOTECO, yaya cati quinahuatía nochi taltipacti.”

¹⁴ Huajca nopa israelitame quisque para quixcotonase nopa hueyat Jordán, huan nopa totajtztizi tayacantiyahuiyayaj ica nopa caxa cati quipixqui cati inihuaya mocajqui TOTECO. ¹⁵ Huan elqui ipan nopa tonali para pixquisti quema nopa hueyat Jordán tatemic miyac. Huan quema nopa totajtztizi calajque ipan nopa hueyat huan mometzxolonijque, ¹⁶ nopa at cati hualayaya ica huejcapa ayecmo motalo. San sejco momanqui nopa at hasta nesiyaya huejcapantíc quej se hueyi tepamit. Momanqui nopa at huejca ten nopa israelitame. Momanqui nozona nechca altepet Adam huan ajsic hasta altepet Saretán. Huan nopa at cati quinpanoc huan temoyaya para hueyi at cati itoca Mictoc temotiyajqui hasta ayecmo nesqui. Quej nopa moxelo nopa at ipan hueyat Jordán, huan nopa israelitame quixcotonque iixmelac altepet Jericó. ¹⁷ Huan nopa totajtztizi cati quihuicayayaj icaxa TOTECO moquetzque tatajco hueyat Jordán ipan tali cati huactoc hasta nochi nopa sequinoc israelitame quixcotonque nopa hueyat.

4

Se temontomit para teelnamiqultis cati TOTECO quichijqui

¹ Nochi nopa masehualme quixcotonque hueyat Jordán, huan teipa TOTECO quilhui Josué: ² “Xiquintapejpeni 12 tacame ten nopa israelitame, sesen ten sesen nopa huejhueyi familias. ³ Huan xiquinilhui ma quiquixtica 12 teme cati eltoc tatajco nopa hueyat nechca campa ijcatoque nopa totajtztizi. Huan ma quihuicaca huan ma quitalica campa mosiyajquetzase ni yohuali.”

⁴ Huajca Josué quinnotzqui nopa 12 tacame cati quintapejpenijtoya ten sesen nopa huejhueyi familias, ⁵ huan quinilhui: “Xicalaquica ipan nopa hueyat hasta tatajco campa eltoc icaxa TOTECO Dios. Huan sese ten amojuanti xijquechpanotij se tet huan xijhualicaca nica. Monequi 12 tet quej inimiyaca itelpocahua tohuejcapan tata Israel ica cati pejqui nopa 12 huejhueyi familias. ⁶ Huan ni teme elis quej se tanextili para amojuanti. Huan teipa quema amoconehua amechtatztintoquilise: ‘¿Taya quijtosnequi ni teme?’, ⁷ anquinnanquilise: ‘Quema nopa tacame cati quihuicayayaj icaxa TOTECO tayacantiyajque para calaquise ipan hueyat Jordán, nopa at moxelo. Huajca ni teme mocahua quej se tanextilijcayot para nochi israelitame ma quielnamiquica ten panoc ipan nopa tonali.’”

⁸ Huajca nopa tacame quichijque cati Josué quinnahuatijtoya. Quicuique 12 teme ten Jordán quej imiyaca nopa huejhueyi familias ten israelitame.

Huan quihuicaque campa mosiyajquetzaj nochi nopa israelitame huan nozona quinquetzque quej TOTECO quiilhuitoyaya Josué. ⁹ Nojquiya Josué quiquetzqui seyoc 12 teme ipan nopa hueyat campa ijcatoyaj nopa totajtzitzi cati quihuicayayaj icaxa TOTECO. Huan nopa teme noja eltoc hasta ama.

¹⁰ Huan nopa totajtzitzi cati quihuicayayaj icaxa TOTECO mocajque tatajco hueyat Jordán hasta quemana nopa israelitame tanque quichihuaj nochi cati TOTECO quinahuatijtoya Josué para ma quinilhui nopa israelitame ma quichihuaca, huan nojquiya cati Moisés quinahuatijtoya Josué ma quichihua.

Huan nopa israelitame moisihuiltijque para panose. ¹¹ Huan quemana nochi nopa israelitame ajsique ne seyoc inaliyo nopa hueyat, nopa totajtzitzi ica icaxa TOTECO quiixcotonque iniixpa nochi nopa masehualme. ¹²⁻¹³ Huan nechca 20 mil soldados cati hualajque ten nopa huejhueyi familias Rubén, Gad huan ten tajco nopa hueyi familia Manasés nojquiya panoque iniixpa nochi nopa israelitame. Huan inijuanti mocualtalijtoyaj para tatehuse huan quihuicayayaj inintepos quej Moisés quinahuatijtoya. Huan panoque iixpa TOTECO huan yajque ipan nopa tamayamit nechca altepet Jericó. ¹⁴ Huan ipan nopa tonali TOTECO quihueyitali Josué iniixpa nopa israelitame, huan yeca quitepanitaque Josué nochi inemilis san se quej quitepanitaque Moisés ipan nochi inemilis.

¹⁵ Teipa TOTECO quiilhui Josué: ¹⁶ “Xiquinnahuati nopa totajtzitzi cati quihuicaj nopa caxa ica cati amohuaya nimocajtoc para ma quisaca ipan nopa hueyat Jordán huan ma tejcoxa campa tiitztoc.”

¹⁷ Huan Josué quinnahuati ma tejcoxa, ¹⁸ huan nimantzi quemana nopa totajtzitzi cati quihuicaj icaxa TOTECO quisque ipan nopa hueyat huan moqetzque ipan tali huactoc ipan ni inaliyo, nopa at ipan nopa hueyat sempa mosentili quej achtohui eltoya huan sempa tatemic miyac.

Nopa teme para teelnamiqultis ipan Gilgal

¹⁹ Huan nopa israelitame tejcoque ten hueyat Jordán ipan majtacti itequi nopa achtohui metzti ipan inixihui. Huan quiquetzque iniyoyoncal nechca Gilgal iixmelac Jericó ica campa quisa tonati. ²⁰ Huan ipan Gilgal Josué quinquetzqui nopa 12 teme cati quihualicaque ten hueyat Jordán. ²¹ huan quinilhui nopa israelitame: “Mosta huicta quemana amonehua cati tacajtiyase amechtatzintoquilise: ‘¿Taya quiijtosnequi ni teme?’, ²² xiquinpohuilica para ni teme techelnamiqultia para tiisraelitame tijpanoque ni hueyat Jordán ipan tali huactoc. ²³ Pampa TOTECO Dios quihuatzqui nopa at hasta nochi tipanoque san se quej quihuatzqui nopa Hueyi At Chichiltic hasta tipanoque. ²⁴ Quena, xiquinpohuilica taya quinequi quiijtos ni teme para nochi masehualme ipan ni faltipacti ma quimatica TOTECO Dios quiipiya hueyi chichualisti huan para amajuanti nochipa xijhueyitepanitaca.”

5

TOTECO quinchihuili israelitame se tiochichualnescayot

¹ Huan quicajque cati TOTECO quinchihuili nopa israelitame nochi nopa tanahuatiani ten nopa amorreos cati itztoyaj ipan ni inaliyo Jordán campa temo tonati huan nochi nopa amor tanahuatiani ten cananeos cati itztoyaj nechca hueyi at. Quicajque quenicatza TOTECO quihuatzqui nopa hueyat Jordán hasta nopa israelitame quiixcotonque. Huan yeca nochi majmahuiyayaj huan huihuipicayayaj hasta amo aqui motemacac quintehuiti.

Sempa tetequiltaj nopa machiyot circuncisión

² Huan TOTECO quiilhui Josué: “Xijchihua cuchiyos ten tet, huan sempa xiquinpanolti nochi israelita tacame huan oquichpilme huan xiquintzontequili iyecapa cuetaxo inintacayo sinta ayemo quichijtoque. Xijchihua san se quej anquichijque achtohuiya.”

³ Huan Josué quichijqui cuchiyos huan quintequili iyecapa cuetaxo inintacayo nochi oquichpilme huan taca israelitame ipan se tachiquili cati quitocaxtijque Aralot. (Aralot quuijtosnequi Tachiquili Ten Nopa Cuetaxti Cati Tetequiliyque.) ⁴⁻⁶ Quema achtohuiya quisque ipan tali Egipto, nochi oquichpilme huan taca israelitame ya motequiliytoyaj. Pero teipa monejque nejnemise 20 xihuit ipan nopa huactoc tali campá amo teno onca hasta mijque senquisa nochi nopa tacame cati quisque ipan tali Egipto huan quipixque xihuit para tatehuitij, pero amo quinejque yase. Huan nopa oquichpilme cati tacajtihualajque ipan nopa huactoc tali amo quintequiliytoyaj. Inintatahua mijque pampa amo quinejque quinelto case TOTECO yon amo quinejque calaquise ipan nopa tali cati nochi temaca hasta mocahua itajca. Yeca TOTECO amo quincahuili nopa tacame ma quiitaca nopa cuali tali cati inihuaya mocajtoya inihuejcapan tatahua para quinmacas. ⁷ Huajca Josué quintequili iyecapa cuetaxo inintacayo nochi tacame huan oquichpilme cati tacatque ipan nopa huactoc tali pampa inintatahua cati mijque amo quintequiliytoyaj. Huan ama TOTECO quincahuilía ma calaquica ipan nopa tali quej ininpataca inintatahua cati amo quinequiyayaj. ⁸ Huan quema ya tantoyaj quintequiliáj nopa machiyot ipan nochi taca israelitame, mocajque nopona campá itztoyaj hasta mochicajque huan ayecmo cuajcualohuayaya inintacayo.

⁹ Huan huajca TOTECO quiilhui Josué: “Ama, pampa anmotequiliytoque iyecapa cuetaxo amotacayohua, nimechquixtilijtoc nopa pinahualisti cati anguipixque ipan tali Egipto.” Huajca quitocaxti Gilgal campá itztoyaj. (Gilgal quuijtosnequi Quiquixti.) Huan quej nopa itoca hasta ama.

¹⁰ Huajca quema nopa israelitame noja mochahuayayaj ipan Gilgal ipan nopa tamayamit nechca altepet Jericó, ilhuichijque para quinescayotijque nopa Pascua Ilhuit ica tiotac ipan 14 itequi nopa metzti. ¹¹ Huan tonili quicuajque cati quipantiyayaj fen itajca nopa tali huan quichijque pantzi cati amo quipiyayaya tasonejca yot huan quicuajque cuayoli tacacatzoli. ¹² Huan ipan seyoc tonali quema ya quicuajtoyaj itajca nopa tali, ayecmo huetzqui maná. Huajca nopa israelitame ayecmo quema quipixque maná para quicuase. Ipan nopa xihuit san quicuajque nopa pixquisti cati quipantijtinemiyayaj ipan tali Canaán.

TOTECO quititanili Josué se itapalehuijca

¹³ Huan ipan nopa tonali quema Josué huan nopa israelitame itztoyaj nechca altepet Jericó, monexti iixpa se cati nesqui quej se tacat cati quipiyayaya se macheta imaco. Huan Josué quinechcahui huan quitatziniquili:

—¿Tiitztoc tohuaya o tiitztoc inihuaya toculancaitacahua?

¹⁴ Huan nopa tacat tananquili:

—Amo ya nopa. Na nihualajtoc pampa nitayacanquet cati más nihueyi ten iilhuicac ejcahua TOTECO.

Huajca Josué motancuquetzqui huan mohuijzonqui hasta icuajtlo ajsic talchi, huan quihueyichijqui huan quiilhui:

—Nimotequipanojca. Techilhui taya tijnequi ma nijchihua.

¹⁵ Huan nopa hueyi tayacanquet ten iilhuicac ejcahua TOTECO tananquili:

—Xijquixti motecac. Campa tiijcatoc eltoc tatzetzeloltic, pampa na, nimoTECO, nojquiya niijcatoc nica.

Huan Josué quichijqui cati quilhui.

6

Nopa israelitame qitanque altepet Jericó

¹ Amo aquí huelyiaya calaquis, yon quisas ten altepet Jericó pampa cuali quitzactoyaj nopa caltemit ipan inintepa cati quiyahualojtoya pampa inijuanti quinimacasiyayaj nopa israelitame. ² Huan TOTECO quilhui Josué: “Na nimitzmactilijtoc altepet Jericó, huan itanahuatijca huan nochi isoldados para anquitanise. ³ Ta huan nochi amosoldados xinejnemica yahualtic ten ne altepet se huelta. Quej nopa monequi xijchihuaca mojmosta para chicuase tonati. ⁴ Teipa nejnemise nopa chicome totajtzitzi cati quitayacanaltise icaxa TOTECO. Huan sesen totajtzi ma quihuica se icuacua se oquich borrego. Huan quema ajsis nopa tonali chicome, xiyahualoca nopa altepet chicome huelta huan nopa totajtzitzi quipitziyase nopa cuacua-
jti. ⁵ Huan quema anquicaquise para huejcahuase tapitzase chicahuac huan amo motensehuise, nochi amomasehualhua ma tzajtzica ica nochi ininchicahualis. Huan huetzis nopa tepamit cati ica quiyahualtzoque nopa altepet. Huan ipan nopa talojtzi monequi nochi amojuanti xicalaquica ipan nopa altepet huan xiquinteuhitij cati itztoque amoixmelac.”

⁶ Huajca Josué, icone Nun, quinnotzqui nopa totajtzitzi huan tacame huan quinilhui: “Xijcuica nopa icaxa TOTECO cati quipiya cati tohuaya mocajtoc. Huan chicome ten amojuanti antayacanase. Huan sesen amojuanti anquihuicase icuacua se oquich borrego.” ⁷ Huan quinilhui nopa israelitame: “Amantzi xijpeshualtica xinejnemica yahualtic nopa altepet. Tayacantiyase nopa soldados ica inintepos para tatehuise, teipa nopa chicome totajtzitzi ica tapitzali huan teipa icaxa TOTECO.”

⁸ Huan nochi quichijque cati Josué quinilhui. Nopa chicome totajtzitzi tapitztiyahuiyayaj huan amo mosiyajquetzayayaj huan quinyacanayayaj nopa totajtzitzi cati quihuicayayaj icaxa TOTECO. ⁹ Huan iica nopa caxa hualayayaj más soldados para tamocuitahuise iica.

¹⁰ Huan Josué nojquiya quinnahuati nopa israelitame: “Amo xicananaltica hasta ipan nopa talojtzi quema nimechnahuatis xitzajtzica. Huan ipan nopa talojtzi monequi xitzajtzise ica nochi amochicahualis.”

¹¹ Huajca ipan nopa tonali quihuicaque icaxa TOTECO huan nejnemique yahualtic nopa altepet se huelta. Teipa sempa yajque campa mocajtoyaj huan nozona tonilijque. ¹²⁻¹³ Huan tonili nelcualca Josué mijquejqui huan nopa totajtzitzi quiqechpanojque icaxa TOTECO. Huan nopa soldados ica inintepos para tatehuise tayacantiyahuiyayaj. Teipa tapitztihualayayaj chicome totajtzitzi cati quihuicayayaj sese inintapitzal cati quichijtoyaj ten icuacua se oquich borrego. Teipa hualayayaj nopa totajtzitzi cati quihuicayayaj icaxa TOTECO. Huan teipa sequinoc soldados quitoquiliyayaj nopa caxa. Huan nopa cati tapitzayayaj amo motensehuiyayaj. ¹⁴ Huan quiyahualojque nopa altepet se huelta. Huan quej nopa quichijque mojmosta para chicuase tonati.

¹⁵ Quema ajsic nopa chicompa tonali, nochi mijquejque nelcualca huan pejqque quiyahualohuaj nopa altepet quej achtohui quichijtoyaj, pero ama quiyahualojque chicome huelta. ¹⁶ Huan quema tamiyaya nopa chicome huelta nopa totajtzitzi nelchicahuac huan huejcajqque quipitzque nopa cuacua-
jti huan amo motensehuijque. Huan Josué quinnahuati nopa tacame: “¡Xitzajtzica, pampa TOTECO amechmactilijtoc ni altepet!

17 Xiquinmictica nochi cati itztoque ipan ni altepet huan xijosoloca nochi cati eltoc nozona. Nochi eltos quej se tacajchualisti para TOTECO. San xiquinchahuilica ma itztoca Rahab nopa ahuilnenca sihuat huan cati itztose ihuaya ipan ichaj pampa yaya quintati nopa tacame cati quitachilicoj ni tali. 18 Ximomocuitahuica para amo anquixtocase yon se tamanti ipan nopa altepet para anmocuulise pampa nochi iaxca TOTECO huan techilhui ma tijosoloca. Huan sinta se mocuilis se tenijqui, icualancayo TOTECO techajsis nochi tiisraelitame. 19 San xijhualicaca nochi ten oro, huan ten plata, huan nochi tamanti ten bronce huan ten hierro pampa ya nopa monequi tiquiyocatalise para TOTECO. Huan ticajocuisse campa eltoc nochi tamanti cati patiyoy cati iaxca.”

20 Huajca nopa totajtzitzi quipitzque nopa tapitzali. Huan quema nopa israelitame quicajque nopa tapitzali, tzajtzique tahuel chichahuac, huan nopa tepamit cati ica quitzactoyaj nopa altepet huetzqui. Huan sesen calajqui xitahuac iixmelac ipan nopa altepet huan quintzontamiltijque cati itztoyaj.

21 Huan quintamimictijque ica macheta nochi tacame, sihuame, telpocame, ichpocame, huehuentzitzitzi huan tename. Nojquiya quinmictijque nochi huacaxme, borregojme huan burrojme. Nochi quintzontamiltijque.

22 Huan Josué quinilhui nopa ome tacame cati yajtoyaj tajtachiyatoj ipan nopa tali: “Xiyaca ichaj nopa ahuilnenca sihuat huan xijquixtica ica nochi masehualme cati ihuaya itztoque quej ihuaya anmocajque.”

23 Huajca nopa tacame calajque huan quinquixtijque Rahab ihuaya itata, inana, iicnihua, iteixmatcahua huan nochi inintequipanojcahua. Huan quinhuicague ma itztoca huejca ten campa mocajcaytoyaj nopa israelitame ipan iniyoyoncalhua. 24 Teipa nopa israelitame quitatijque nopa altepet huan nochi cati oncayaya nozona. San quiquixtijque cati elqui ten plata, oro huan nochi tamanti ten bronce huan hierro huan quitatijque ipan itiopa TOTECO campa quiajocuiyayaj nochi tamanti cati patiyoy. 25 Huan Josué quinmanahui Rahab, iteixmatcahua huan inintequipanojcahua cati iaxcahua pampa quintati nopa tacame cati quintitantoya ma quitachilitij altepet Jericó. Huajca hasta ama Rahab noja itztoc inihuaya israelitame.

26 Huan teipa Josué quitelchijqui cati quicualchijchihuasquia nopa altepet. Huan quijto:

“Tatelchihuali nopa tacat cati sempa quicualtalisnequis ni altepet. Miquis iachtohui oquichpil quema pehuas quitalis itzinpehualtil. Huan quema quiquetzas nopa caltemit, miquis ioquichpil cati más teipa ejquet.”

27 Huan TOTECO itztoya ihuaya Josué. Huan nochi masehualme campa hueli quicajque cati TOTECO quichijtoya.

7

Itajacol Acán

1 Pero amo nochi nopa israelitame quineltocaque cati Josué quinilhui. Amo quitamiltijque nochi quej nopa tanahuatili quijto ma quichihuaca. Itztoya se tacat ipan nopa hueyi familia Judá cati tajtacolchijqui. Itoca eliyaya Acán huan elqui icone Carmi, cati elqui icone Zabdi cati elqui icone Zara. Huan Acán mocuili tamantzitzi ipan nopa altepet cati monequiyaya ma quitati. Huajca TOTECO tahuel cualanqui ica nochi israelitame por nopa tajtacoli.

Ininculancaitacahua israelitame quintanque

² Teipa quema ya quitantoyaj nopa altepet, Josué quintitanqui sequij tacame ma quisaca ipan Jericó huan ma quitajtachilitij altepet Hai cati mocahuayaya nechca Bet Avén huan campa quisa tonati ten Betel. Huan inijuanti yajque. ³ Huan quema sempa hualajque, quilhuijque Josué: “Amo monequi ma yaca nochi tosoldados pampa amo miyaqui masehualme itztoque ipan nopa altepet. San monequi xiquintitani ome o eyi mil soldados para quintanise nopa masehualme ten Hai para amo nochi soldados yase huan siyahuisse.”

⁴ Huajca san eyi mil israelita tacame tejqoque para quitehuitij Hai. Pero Hai ehuaní quinchijque ma cholojtehuaca. ⁵ Huan quintojtocatihualajque nopa israelitame ten huejcapan nopa caltemit ipan nopa tepamit cati quiyahualo inialtepe hasta altepet Sebarim. Huan quinmictijque huelis se 36 israelitame ipan nopa taixtemolis. Yeca nochi israelitame huihuipicayayaj ica majmajti.

⁶ Huan Josué huan nopa huehue tacame quitzayanque iniyoyo huan motancuaquetzque ica inixayac talchi iixpa icaxa TOTECO huan motzontaltemijque quej se tanextili para tahuel mocuesohuayayaj. Quej ni mocajque hasta quema tiotaquixqui. ⁷ Huan Josué quijjto:

—¡TOTECO Cati Más Tijpiya Tanahuatili! ¿Para ten tijchijqui tiisraelitame ma tiquixcotonaca hueyat Jordán sinta techtemactilis inimaco nopa amorreos para ma techtzontamiltica? ¡Más cuali sinta timocajtosquíaaj ica cati tijpixtoyaj ipan ne seyoc nali! ⁸ Ama amo nijmati taya niqijtos pampa ni israelitame cholojtejqoque iniiixpa inincualancaitacahua. ⁹ Huan nopa cananeo huan nochi cati itztoque nechca quicaquise ten panotoc, huan san sejo hualase huan techtehuise. Huan techtzontamiltise hasta amo aqui techelnamiquis ipan ni taltipacti. Huan ayecmo mitztepanitase. Ayecmo hueyi elis motoca.

¹⁰ Huan TOTECO quinanquili:

—¡Ximotanana! ¿Taya tijchihua ica moxayac talchi? ¹¹ Nopa israelitame tajtacolchijtoque pampa quixpanoque cati niquinnahuati quema inihuaya nimocajqui niquinmocuifahuís. Quicuitoque tamanti cati monequiyaya quitamatisquíaaj. Huan amo san quichitejqque nopa tamanti, nojquiya istacatitoque huan itxatatzi quitatijtoque ica tamanti cati iniaxca. ¹² Yeca nopa israelitame amo huelque quintanij inincualancaitacahua huan mon-ejqú cholose, pampa ama tatelchihualme ni israelitame. Huan sinta amo nima anquisosolose nopa tamanti cati monequiyaya anquintatisquíaaj, ayecmo niitztos amohuaya. ¹³ Huajca ximotanana huan xiquinilhui nopa israelitame ma mopajpacaca noixpa. Ma moiycatalica para na pampa mosta monextise noixpa pampa quej nopa niamoTECO Dios niqijtohua. Xiquinilhui para quipiyaj tamanti cati monequiyaya quitatijtosquíaaj huan yeca ayecmo huelis anquintanise amocualancaitacahua hasta anquiquixtise nopa tamanti. ¹⁴ Mosta monequi nochi israelitame panose noixpa. Huan anquichihuase se sorteo para nimitznextilis ipan catijqui ten nopa 12 huejhueyi familias onca ni tajtacoli. Teipa nochi iteipan ixhuihua nopa huejcapan tata cati icone Israel panose noixpa. Huan nimitznextilis ipan catijqui hueyi tata iteipan ixhuihua onca ni tajtacoli. Huan teipa nochi tetateme cati hualajque ipan ya panose noixpa ica inifamilias huan nopa tetaj cati nijtapejpenis, monequi panose sesentzitzit itelpocahua huan inifamilias huan na nijtapejpenis nopa tacat cati quichijtoc. ¹⁵ Huan nopa tacat cati mocuilijtoc nopa tamanti cati na, niamoTECO, niquinilhui ma quitatica,

monequi anquimictise ihuaya nochi cati itztoque ipan ichaj. Teipa xiquintati ica nochi cati iniaxca pampa yaya quiixpanotoc nocamanal para amo teno quiquixtisquía ten Jericó. Yeca amechmacatoc nochi anisraelitame se hueyi tajtacoli.

TOTECO quitatzacuilti Acán

¹⁶ Huan tonili Josué mijquejqui cualca huan tanahuati ma moyocatalica sesen ten nopa 12 huejhueyi familias huan quej nopa ma panoca iixpa Toteco. Huan TOTECO quinexti para elqui se ipan nopa hueyi familia ten iteipan ixhuihua Judá cati quichijqui nopa tajtacoli. ¹⁷ Teipa Josué quichijqui ma monextica iyoca iteipan ixhuihua sesen ten nopa huejcapan tatame cati eliyayaj iteipan ixhuihua Judá. Huan TOTECO quinexti para elqui se iteipan ixhui nopa huejcapan tata Zera cati quichijqui nopa tajtacoli. Huan sesen familia ten itelpocahua Zera panoc huan quinexti para elqui ifamilia Zabdi. ¹⁸ Huan teipa sesen telpocat ten Zabdi panoc ica iconehua, huan TOTECO quinexti para elqui Acán cati tajtacolchijtoya. Acán elqui itelpoca Carmi, huan iteipan ixhui Zabdi. Ihuejcapan tata itoca eliyaya Zera cati elqui itelpoca Judá itelpoca Israel ten huejcajquiya.

¹⁹ Huajca Josué quiilhui Acán:

—Nocone, xijhueyitali TOTECO Dios cati tiisraelitame tijtequipanohuaj. Techilhui melahuac cati tijchijtoc. ¡Amo xijtati!

²⁰ Huan Acán quinancuili:

—Melahuac, nitajtacolchijtoc ica TOTECO Dios huan nimitzilhuis cati nijchijqui. ²¹ Ipan nopa ricojyot ipan altepet Jericó, niqitac se yejectzi yoyomit cati quihualicatoyaj ten tali Babilonia. Huan niqitac 200 plata tomi huan se tatecti oro quej tajco kilo ietica. Huan nelía niqixtocac nopa tamanti huan nimocuili. Huan tijpantis canque nijtaltojqui itzala nochaj ten yoyomit huan nopa plata tomi nijtali itzala nopa yoyomit.

²² Huajca nimantzi Josué quintitanqui tacame ipan ichaj huan quipantijque nochi cati quitatijtoya taltita. ²³ Huan quicuique ten ichaj huan quihuicaque campa Josué huan nochi nopa israelitame mosentlijtoyaj. Huan nopona quitencajque nochi iixpa TOTECO. ²⁴ Huan teipa Josué huan nochi nopa israelitame quihuicaque Acán, iteipan ixhui Zera, ipan nopa tamayamit cati itoca Acor. Huan ihuaya quitalijque nopa plata, nopa yoyomit, nopa oro huan isihua conehua huan itaca conehua. Nojquiya quitalijque ihuacaxhua, iburrojhua, iborregojhua huan ichaj ten yoyomit huan nochi cati eliyaya iaxca.

²⁵ Huan Josué quiilhui Acán:

—Tijhualiac ipan tojuanti se hueyi taohuijcyot. Huan ama TOTECO mitzmacas ta se taohuijcyot.

Huan quema quijito ya ni, nochi israelitame quitechajoyque Acán ihuaya nochi cati iaxcahua hasta mijque huan teipa quintatijque. ²⁶ Teipa quintemilijque se tamontomit ten tet huan hasta ama noja ijcatoc. Huan nopa lugar noja itoca Tamaya ten Acor. (Acor quijitosnequi Campa Taohuijcyot.) Huajca ica ya nopa tanqui icualancayo TOTECO ica nopa israelitame.

8

Nopa israelitame qitanque altepet Hai

¹ Huan teipa TOTECO quiilhui Josué: “Amo ximajmahui yon amo xiyolcuesihui. Xiquinhuica nochi mosoldados huan sempa xijtehuitij nopa altepet

Hai pampa na nijtalijtoc momaco nopa tanahuatijquet ten Hai huan imasehualhua. Huan anquitanise inialtepe huan inintal. ² Huan tijchihuas ica Hai huan itanahuatijca san se quej tijchijqui ica Jericó huan itanahuatijca. Pero ama quena, huelis anmoaxcatise nochi tamanti cati eltoc nopona huan nochi ininfapiyalhua. Huajca ixtacatzi xiquintitani sequij soldados para ma motatica iica nopa altepet para quinichtacahuse huan quintanise.”

³ Huajca Josué quincualtali nochi isoldados para quitehuitij Hai. Achtohui quintapejpeni 30 mil tacame cati más motemacayayaj para tatehuse. Huan quintitanqui ica tayohua, ⁴ huan quinilhui: “¡Xijtaquíllica cuali! Ximotatica iica nopa altepet pero nechcatzi. Huan ximocualchijhijtose para anquitehuse. ⁵ Huan na ihuaya nopa soldados cati itztoque nohuaya timonechcahuse iixmelac nopa altepet. Huan quema injuanti cati itztoque ipan nopa altepet quisase ten nopa caltemit ipan inintepa para techtehuíqui, ticholose quej achtohuiya tijchijque. ⁶ Huan injuanti hualase totepoczco pampa moilhuse para sempa ticholojtehuase. ⁷ Huan huajca monequi anquisase nimantzi ten campa anmotatijtose huan anquitzquise nopa altepet pampa amoTECO Dios amechmacas amomaco. ⁸ Huan quema ya anquitanose nopa altepet, xijtatica quej TOTECO quijtojtoc huan quej na nimechnahuatijtoc.”

⁹ Huajca Josué quintitanqui, huan injuanti yajque huan motatijque iica altepet Hai para campa calaqui tonati, tatajco ten altepet Betel huan Hai. Huan Josué panoc nopa yohuali ipan ichaj ten yoyomit campa mocajchahuayaj nochi nopa israelitame.

¹⁰ Tonili Josué mijquejqui nelcualca huan quinsentili isoldados. Huan Josué huan nopa huehue tacame cati eliyayaj inintayacanhua nopa israelitame tayacantiyajque para quitehuitij altepet Hai. ¹¹ Huan nochi injuanti nejnentiyajque huan monechcahuijque iixmelac nopa altepet ica norte. Huan oncayaya se tamayamit tatajco ten campa injuanti mocahuayaj huan altepet Hai. ¹² Huan Josué quintitanqui se macuili mil tacame para ma motatica tatajco Betel huan Hai quentzi más para campa calaqui tonati. ¹³ Huajca sesen yajqui campa monequiyaya; sequij campa temo tonati huan sequij mocajque imelac nopa altepet ica norte. Huan nopa yohuali Josué mocajqui ipan nopa tamayamit.

¹⁴ Huan quema nopa tanahuatijquet ten Hai quítac Josué, moisihuitli huan quisqui ten itepa nopa altepet cualca ica isoldados para quitehuitij nopa israelitame ipan nopa tamayamit nechca hueyát Jordán. Pero amo quimatiyayaj para sequinoc israelitame motatijtoyaj iica ialtepe. ¹⁵ Huajca Josué ihuaya isoldados san tachijque para majmahuiyayaj huan cholojtejque ten nopa Hai ehuaní. Huan yajque ipan ojti cati panoyaya ipan nopa huactoc tali campa amo teno eli. ¹⁶ Huan nopa tanahuatijquet quinnahuati nochi isoldados cati mocajtoyaj altepet Hai para ma quitepotztocaca Josué. Huan quej nopa, nopa israelitame quinyacunque para ma quicajtehuaca inialtepe huan ma yaca huejca. ¹⁷ Huan amo mocajqui yon se tacat ipan Hai o ipan Betel cati amo quintoquili nopa israelitame. Nochi yajque, huan nopa altepet mocajqui tapojtoc. Amo aquí mocajqui para quimanahuis.

¹⁸ Huajca TOTECO quíilhui Josué: “Xijxitahua mocuachoso cati huehueyac para Hai para xiquinnextili mosoldados ma calaquica ipan nopa altepet pampa na nimitzmactilis.”

Huan quej nopa Josué quixitajqui. ¹⁹ Huajca injuanti cati motatijtoyaj nimantzi motanunque huan calajque ipan nopa altepet. Huan quitanque huan quitatijque.

20-21 Huan quema nopa tacame ten altepet Hai moicancuetque, quitaque pocti tejcoyaya ten inialtepe hasta ilhuicac. Huan Josué huan nopa israelita soldados cati cholohuayayaj ica campa nopa huactoc tali moicancuetque huan quitaque para injuanti cati motatijtoyaj iica nopa altepet ya calactoyaj huan quitatijtoyaj. Huajca nimantzi sempa mocuetque huan quinte-huicoj nopa tacame ten altepet Hai cati quintoquiliyayaj. Huan nojquiya nopa israelita soldados cati calactoyaj ipan altepet quisque huan pejque quintehuáj nopa Hai ehuan ten iniica huan huajca ayecmo cana hueliyayaj cholose. ²² Nopa israelitame quinyahualojque; sequij iniixpa huan sequinoc iniica. Huan nopa israelitame quintamimictijque nopa altepet Hai ehuan huan amo aqui quicajque ma cholo. ²³ San quicahuilijque ma itzto nopa tanahuatijquet hasta quihuicaque iixpa Josué.

²⁴ Huajca nopa israelitame quintamimictijque ica macheta nochi altepet Hai ehuan cati quintepotztocatinemiyayaj ipan huactoc tali. Teipa nochi israelitame yajque ipan altepet Hai huan quintamimictijque cati itztoyaj nopona. ²⁵ Huajca ipan nopa tonali mijque nochi 12 mil tacame huan sihuame cati itztoyaj ipan Hai, ²⁶ pampa Josué amo quitemohui imax cati quitananayaya ichoso hasta isoldados quintamimictijque nochi ipan Hai. ²⁷ Pero nopa israelitame mocuilijque nochi tapiyalme huan tamanti cati oncayaya ipan nopa altepet quej TOTECO quiilhuijtoya Josué ma quichi-huaca. ²⁸ Huan teipa Josué quitamitati nopa altepet. San mocajqui se tamontomit ten tasoli campa amo aqui quinequi monechcahuis hasta ama. ²⁹ Huan Josué quicuahuyoni nopa tanahuatijquet ten Hai ipan se cuahuit huan nopona mocajqui hasta tiotac. Huan quema calaquito tonati, Josué tanahuati ma quitemohuica itacayo huan ma quimajcahua nehca campa eltoya nopa caltemi para calaquij ipan itepa nopa altepet. Huan quinilhui ma quimontonoca tet icuitapa. Huan nopa tamontomit ten teme noja eltoc.

TOTECO quiompahui icamanal ica israelitame

³⁰ Huajca ipan tepet Ebal Josué quichijqui se taixpamit para TOTECO Dios cati tiisraelitame tijhueyichihuaj. ³¹ Quichijqui senquisa quej Moisés, itequipanojca TOTECO, tanahuatijtoya ma tijchihuaca. Quichijque nopa taixpamit ica tet cati amo tatecti quej ijcuilijtoc ipan nopa tapohualisti ten itanahuatilhua Moisés. Huan nopa israelitame quimacaque TOTECO tacajcahualisti tatatili ipan nopa taixpamit huan nojquiya quimacaque taca-jcahualisti para ma onca tayoltalili ica Toteco. ³² Teipa iniixpa nochi israelitame Josué quiijcuilo ipan nopa tet cati ica quichijtoya nopa taixpamit nopa tanahuatilme cati Moisés quinmacatoya. ³³ Huan nochi israelitame mo-quetzque iixpa icaxa TOTECO. Tajco ten nopa israelitame ijcatoyaj iixmelac nopa caxa ica tepet Gerizim iniica inihuaya inihuehue masehualhua, inintayacanhua, injueces huan nopa masehualme ten sequinoc altepeme cati itztoyaj inihuaya. Huan nopa seyoc tajco israelitame ijcatoyaj iixmelac nese lado nopa caxa ica nopa tepet Ebal iniica, inihuaya inihuehue masehualhua, inintayacanhua, injueces huan nopa masehualme ten sequinoc altepeme cati itztoyaj inihuaya. Huan nopa totajtizti cati hualajque ipan nopa hueyi familia ten levitame quihuicayayaj nopa caxa huan mocajque tatajco nopa israelitame. Quichiyayayaj para quintiochihuase nopa masehualme. Nochi elqui senquisa quej Moisés, itequipanojca TOTECO, tanahuatijtejqui hue-jcajquiya ma quichihuaca nopa totajtizti para ma quintiochihuaca nopa israelitame.

³⁴ Huan teipa Josué quipojqui nochi nopa camanali ten nopa tanahu-atilme cati TOTECO quinmacatoya. Quipojqui nochi tatiochihualisti huan

nochi tatelechihualisti cati ijcuilijtoc ipan nopa tapohualisti cati quipixtoya itanahuatilhua TOTECO. ³⁵ Huan Josué amo quiyocacajqui yon se camanali cati quinahuati Moisés. Nochi quipojqui iniixpa nochi nopa israelitame cati itztoyaj nozona. Huan ijcatoyaj nozona nochi israelitame ica sihuame, coneme huan nochi sejcayoc ehuani cati itztoyaj inihuaya.

9

Gabaón ehuani quincajcayajque israelitame

¹ Huan nopa tanahuatiani cati itztoyaj ipan ne seyoc inaliyo hueyat Jordán para campa temo tonati quicajque cati panoc ica altepet Jericó pampa nochi masehualme cati itztoyaj iteno nopa hueyi at Mediterráneo huan hasta ipan nopa tepeme ten Líbano quimatque. Nozona itztoyaj nochi nopa tanahuatiani ten nopa heteos, amorreos, cananeos, ferezeos, heveos huan jebuseos.

² Huan huajca nochi mosentilijque ica san se iniyolo para quitehuise Josué huan nopa israelitame.

³ Pero injuanti cati itztoyaj ipan altepet Gabaón quicajque cati Josué quinchihuilitoyaya altepeme Jericó huan Hai, ⁴ huan pejqque moilhuíaj quenicatza huelis quincajcayahuase nopa israelitame para momanahuise. Huajca quicuique tamanti cati ayecmo cuali para tachihuase quej huejca hualayajaj. Quitalijque huehue coxtali ininpani ininburrojhua. Huan quitalijque cuetax bolsas cati nojquiya sosoltic cati ipan quitectoyaj xocomeca at. ⁵ Huan motalilijque tecacti sosoltic huan coyontoc. Huan motalilijque iniyoyohua cati neltantoc. Huan quihuicaque pantzi cati pojyajtoya huan huactoc. ⁶ Huan ajsicoj campa Josué mocajcahuayaya ipan Gilgal huan quicamanalhuijque Josué huan nopa israelita tayacanani. Quinilhuijque:

—Tojuanti tihualahuij nelhuejca. Tihualajtoque para timochihuase tihuampojme huan tijsencahuase se camanal sencahuali para amo quema timotehuise.

⁷ Huan nopa israelitame quinnanquiliijque nopa Gabaón ehuani:

—Huelis anitztoque nechca ten tojuanti huan quej nopa amo hueli timocahuase amohuaya para amo timotehuise.

⁸ Huan nopa Gabaón ehuani quinanquiliijque Josué:

—Tojuanti timechtequipanose san tapic.

Huan Josué quinilhui:

—¿Ajquiya amojuanti huan canque anhualahuij?

⁹ Huan tananquiliijque:

—Timotequipanojhua tihualajtoque nelhuejca pampa tijcactoque cati amoTECO Dios amechihuilitoc. Tijcactoque ten ihueyitilis huan nochi nopa tanextili cati quichijqui ipan tali Egipto. ¹⁰ Tijcactoque nochi cati quinchihuili nopa ome inintanahuatijcahua amorreos cati itztoyaj ne seyoc inaliyo hueyat Jordán; Sehón nopa tanahuatijquet ten Hesbón huan Og nopa tanahuatijquet ten tali Basán cati mosehujtoya para tanahuatis ipan altepet Astarot. ¹¹ Huan yeca tohuehue masehualhua huan nochi cati itztoque ipan total techilhuijque ma tijcuica cati monequi para ipan ojti huan ma tihualaca timechitaquij. Quinequiyayaj ma timechilhuiquij para timechtequipanose san tapic sinta timohuampojchihuase. ¹² Huan ni topantzi cati tijhualacatoque tijcuitejque noja totonic. Pero ama xiquitaca. Ya huactoc huan hasta pojyajtoc. ¹³ Ni cuetax bolsas cati ipan tijtejque xocomeca at, nojquiya eltoya yancuic quema tijtemitijque huan ama ya tzayantoc. Nojquiya tahuel tantoc toyoyo huan totecac, pampa nelía huejca tinejnentoque.

¹⁴ Huan nopa israelitame huan Josué quiyecojque nopa tacualisti cati quihualicayayaj huan quinneltocaque nopa gabaonitame, pero amo quitatz-intoquilijque TOTECO achtohui taya quichihuase. ¹⁵ Huajca Josué quichijqui se camanali inihuaya para mohuampojchihuase huan quinchahuilise ma itztoca. Huan yaya huan nopa tayacanca israelitame nojquiya quitestigoj-quetzque TOTECO para amo quinmictise.

¹⁶ Huan quemaya panotoya eyi tonati, nopa israelitame quimatque para nopa gabaonitame hualayayaj nechcatzi huan nelía itztoyaj ipan inintal. ¹⁷ Huajca nopa israelitame yajque quintemotoj. Huan ica eyi tonati ajsitoj ipan inialtepe cati eliyaya Gabaón, Cafira, Beerot huan Quiriat Jearim. ¹⁸ Pero nopa israelitame amo quinmictijque, pampa inintayacancagua quitestigojquetztoyaj TOTECO Dios cati tiisraelitame tijtequipanohuaj para amo tiquinmictisquíaj.

Yeca nopa israelitame pejqque quinejelnamiqij inintayacancagua pampa cualanque ica nopa camanali cati quichijque. ¹⁹ Pero nopa tayacanani quinilhuijqque nopa israelitame:

—Tojuanti tijtestigojquetztoque TOTECO Dios cati tijtequipanohuaj para amo teno tiquinchihuilise, huan yeca ama amo teno huelis tiquinchihuilise. ²⁰ Monequi tiquincahuase pampa sinta amo tijchihuase cati tijtestigojquetz-que TOTECO Dios, yaya tahuel cualanis ica tojuanti.

²¹ Huajca nopa tayacanca israelita tacame tanahuatijque ma amo quinmictica nopa Gabaón ehuan pero ma quintequihuica quej cuajcuahuini huan asacani. Huan quej nopa quichijque.

²² Huan Josué quinnotzqui nopa gabaonitame huan quinilhui:

—¿Para ten antechajcayajque? Antechilhuijqque para huejca amochajchaj, pero nelía nechcatzi anhualahuaj. ²³ Huajca pampa cati anquichijtoque, Toteco Dios amechtelchijtoc huan para nochipa antechtequipanose. Monequi ancuatapanase huan anasacase para itaixpa Toteco ipan ichaj.

²⁴ Huan quinanquilijque Josué:

—Nochi ya ni tijchijque pampa tijmatiyayaj antechmictisquíaj. Tijcayque para amoTECO Dios quinhuatijtoya Moisés ma amechmaca ni tali huan ma techzontamiltica nochi cati tiitztoque nica. Huajca timajmahuiyayaj. ²⁵ Pero tiitztoque momaco; xijchihua cati más cuali tiquita.

²⁶ Huajca Josué amo quinchahuili nopa israelitame ma quinmictica nopa gabaonitame. ²⁷ Pero quichijqui ma elica cuajcuahuini huan asacani para nopa israelitame huan para itaixpa TOTECO. Huan hasta ama ya nopa quichihuaj nopa gabaonitame ipan nopa lugar campa TOTECO quitapejpenijtoc para itaixpa.

10

Nopa israelitame quintanque nopa amorreos

¹ Huan Adonisedec nopa tanahuatijquet ten altepet Jerusalén quicajqui quenicatza Josué quitantoya altepet Hai huan quimictijtoya itanahuatijca. Huan momacac cuenta para quisosolo nochi cati eltoya ipan Hai san se quej quisosolo nochi ipan altepet Jericó huan quimicti itanahuatijca. Nojquiya Tanahuatijquet Adonisedec quicajqui para nopa gabaonitame quichijtoyaj se camanali ica nopa israelitame huan ama mocahuayayaj inihuaya. Huajca nelía majmajqui. ² Huan noja más majmajqui pampa quimatqui para Gabaón nelía eliyaya se altepet hueyi huan quipiyayaya chichahualisti quej nopa altepeme campa mosehuía se tanahuatijquet. Nojquiya altepet Gabaón

eliyaya más hueyi que altepet Hai, huan nochi isoldados nelía mooquich-matuyayaj. ³ Yeca Tanahuatijquet Adonisedec quintitanqui itayolmelajcahua ma yaca quitatij Tanahuatijquet Hoham ipan altepet Hebrón, Tanahuatijquet Piream ipan altepet Jarmut, Tanahuatijquet Jafia ipan altepet Laquis huan Tanahuatijquet Debir ipan altepet Eglón. Huan quinilhui: ⁴ “Xihualacana, techpalehuiquij tijtehuise altepet Gabaón pampa inijuanti mohuamopchijtoque ihuaya Josué huan nopa israelitame.” ⁵ Huan quej nopa inisoldados nopa macuilti tanahuatiani ten amorreos, (inijuanti nopa tanahuatiani ten Jerusalén, Hebrón, Jarmut, Laquis huan Eglón) mosejcotilijque para quitehuise Gabaón. Huan yajque huan mocajcajque nechca nopa altepet para quitehuitij.

⁶ Huajca nopa Gabaón ehuan quititanilijque se amat Josué campa itztoya ipan Gilgal huan quiyolmelajque: “Amo techtahuelcahua tojuanti cati timotequipanojcahua. Xihualaca nimantzi techpalehuiquij huan techmanahuiquij, pampa nochi nopa tanahuatiani cati quinnahuatij amorreos campa tachiquiltipa mosentilijtoque para techtehuise.”

⁷ Huajca Josué quisqui ten Gilgal ica nochi isoldados cati más motemacayayaj. ⁸ Huan TOTECO quiilhui Josué: “Amo xiquinimacasi pampa na nimitzmactilis momaco. Huan amo aqui huelis mitztanis.”

⁹ Huan Josué nejnenqui nochi se yohual ten Gilgal huan quinichtacahuito nopa amorreos. ¹⁰ Huan TOTECO quichijqui ma momajmatica inixpa nopa israelitame huan ma cholojtehuaca. Huan quipalehui Josué ma quinmicti miyac ipan se hueyi tatehuilisti nechca Gabaón. Teipa quichijqui para nopa israelitame ma quintepotztocatiyaca ne sequinoc ipan nopa taixtemolis nechca altepet Bet Horón. Huan ya nopa quinpalehui para noja ma quinmictitijyaca nopa amorreos hasta ipan nopa altepeme Azeca huan Maceda.

¹¹ Huan quema nopa amorreos temoque nopa taixtemolis nechca Bet Horón para mochololtise ten nopa israelitame, TOTECO quititanqui tesihuit ininpani ten ilhuicac cati eliyaya quej huejhueyi teme. Huan TOTECO quinmicti más amorreos ica tesihuit que cati israelitame quinmictijque ica inimacheta.

¹² Huan quema TOTECO quintemactiliyaya nopa amorreos inimaco israelitame, Josué quicamanalhui TOTECO inixpa nopa israelitame huan quiijto:

“Ma moquetza tonati ipan nopa altepet Gabaón.

Huan ma moquetza metzti ipan nopa tamayamit Ajalón.”

¹³ Huajca tonati huan metzti moquetzque, hasta nopa israelitame quintanque inincualancaitacahua.

Huan ya ni huan nochi cati panoc ijcuilijtoc ipan nopa tapohualisti Jaser. Huan nopa tonati moquetzqui tatajco ipan ilhuicacti huan quichixqui nechca se tonal para calaquiti. ¹⁴ Amo quema oncatoya seyoc tonali quej nopa tonali, yon amo quema oncas; pampa TOTECO quitacaquili icamanal se tacat. Huan TOTECO nelía tatehuiyaya por nopa israelitame.

¹⁵ Teipa Josué huan nopa israelitame sempa yajque campa mocajcahuayayaj ipan Gilgal.

¹⁶ Huan ipan nopa tatehuilisti nopa macuilti tanahuatiani cholojque huan motatijque ipan se ostot nechca altepet Maceda. ¹⁷ Pero se acayja quiilhui Josué canque motatuyayaj. ¹⁸ Huajca Josué tanahuati: “Xijmimiloca huejhueyi teme campa calajque ipan nopa ostot huan cuali xijzacuaca. Teipa xiquincahuaca soldados nopona ma quimocuitahuica para amo huelis quisase. ¹⁹ Pero amojuanti amo ximoquetzaca. Xiquintepotztocatiyaca

amocualancaitacahua huan xiquintehuijtiyaca ica iniica. Amo xiquinc-ahuilica ma calaquica ipan inialtepe, pampa amoTECO Dios amechmactil-jitoc amomaco.”

²⁰ Huajca Josué inihuaya nopa israelitame quintanque nopa amorreos huan quinmictijque ipan se hueyi tatehuilisti. San se ome cholojque huan motatitoy ipan altepeme cati tzactoya. ²¹ Huan nochi israelita soldados ajsique ica cuali campa itztoya Josué nechca Maceda campa mocajcajttoyaj. Huajca amo aqui motemacac para camanaltis cati fiero ten nopa israelitame.

²² Teipa Josué quijto: “Xijtapoca nopa ostot campa anquintzajque nopa macuiliti tanahuatiani huan techhualiquilica.”

²³ Huajca nopa israelitame quinquixtijque ten nopa ostot nopa macuiliti tanahuatiani; nopa tanahuatijquet ten Jerusalén, Hebrón, Jarmut, Laquis huan Eglón. ²⁴ Huan quema quinhuilicaque iixpa Josué, quinnnotzqui nochi nopa israelita soldados para ma monechcahuica. Huan quinnahuati nopa tayacanani ten isoldados, quinilhui: “Xiquintaliliquij amoicxi ininquuechta ni tanahuatiani.”

Huan quej nopa quichijque. ²⁵ Huajca Josué quinilhui: “Amo ximajmahuica yon amo xiyolcuésihuica. Ximoyoltetilica huan ximosemacaca pampa quej ni TOTECO quinchihuilis nochi amocualancaitacahua.”

²⁶ Teipa Josué quinmicti nopa tanahuatiani huan tanahuati para sesen ma quicuahuyonica ipan se cuahuit. Huan quej nopa quincajque hasta quema tiotaquixqui. ²⁷ Huan quema calaquito tonati, Josué tanahuati ma quintemohuica nopa mijcatzitzi huan ma quintemaca ipan nopa ostot cati ipan motatitoyaj. Teipa quitzajque nopa ostot ica huejhueyi teme huan quej nopa noja eltoc hasta ama.

Campa hueli tatanque israelitame

²⁸ Ipan nopa tonali nojquiya Josué quitanqui nopa altepet Maceda huan quitamisololo. Quimachetajhui inintanahuatijca huan nochi cati itztoyaj nozona, huan amo aqui mocajqui yoltoc. Quichihuili nopa tanahuatijquet ipan Maceda san se quej quichihuili nopa tanahuatijquet ten altepet Jericó.

²⁹ Huan teipa Josué huan nopa israelitame quisque ipan Maceda huan yajque quitehuitoy altepet Libna. ³⁰ Huan nojquiya TOTECO quinmactili nopa altepet ihuaya itanahuatijca. Huan quinmictijque nochi cati itztoyaj nozona ica macheta. Amo aqui mocajqui yoltoc, huan quichihuiliyque inintanahuatijca san se quej quichijque ica nopa tanahuatijquet ten Jericó.

³¹ Teipa Josué huan nopa israelitame quisque ipan Libna huan quiyahualotoj altepet Laquis para quitehuise. ³² Huan tonili TOTECO quinmactili altepet Laquis huan nopa israelitame quinmachetajhuiyque nochi cati itztoyaj nozona quej quichijtoyaj ipan Libna.

³³ Huan quema quitehuyayaj Laquis, Tanahuatijquet Horam ipan altepet Gezer hualajqui ica isoldados para quimanahuico nopa altepet, pero Josué nojquiya quitanqui ya inihuaya nochi isoldados huan amo aqui quicajqui yoltoc.

³⁴ Huan quema Josué huan nopa israelita soldados cati itztoyaj ihuaya quisque altepet Laquis, quiyahualotoj altepet Eglón para quitehuise. ³⁵ Huan ipan nopa tonali quitanque nopa altepet huan quinmachetajhuiyque nochi cati nozona itztoyaj. Quintamimictijque quej quichijtoyaj ica Laquis.

³⁶ Teipa quistejque altepet Eglón huan yajque altepet Hebrón para quitehuitij. ³⁷ Huan quitanque nopa altepet huan quinmachetajhuiyque nopa tanahuatijquet huan nochi masehualme cati itztoyaj nozona huan ipan

nochi pilaltepetzitzi nejnechca. Quichijque san se quej quichijque ica altepet Eglón. Huan amo aqui mocajqui yoltoc.

³⁸ Teipa Josué huan nopa israelita soldados sempa yajque altepet Debir para quitehuitij. ³⁹ Huan quimachetajhuijque nopa tanahuatijquet huan nochi cati itztoyaj ipan nopa altepet huan ipan nochi ipilaltepehua. Huan amo aqui mocajqui yoltoc ipan Debir pampa quintamimictijque nochi quej quichijtoyaj ipan altepet Hebrón huan Libna.

⁴⁰ Quej nopa Josué quitanqui nochi nopa tali huan inintanahuatijcahua. Ica norte quitanqui campa nopa tachiquiltipa, huan ica sur campa nopa huactoc tali Neguev. Quitanqui nopa tamayan tali campa temo tonati huan nopa taixtemolis ica campa quisa tonati. Nochi altepeme quitamisosolo huan nochi masehualme quintamimicti. Amo aqui mocajqui yoltoc quej technahuatijtoya TOTECO Dios cati tiisraelitame tijtequipanohuaj. ⁴¹ Quintamitanqui huan moaxcati nochi nopa tali ten Cades Barnea ica sur hasta Gaza campa temo tonati, huan nochi nopa tali ten Gosén hasta altepet Gabaón ica norte. ⁴² Nochi ya ni quichijqui ica se huelta pampa TOTECO Dios cati tiisraelitame tijtequipanohuaj yaya tatehui por tojuanti. ⁴³ Huan teipa Josué huan nochi israelita soldados sempa yajque campa mocajcaytoyaj ne sequinoc israelitame ipan tali Gilgal.

11

Josué quitanqui Jabín huan nochi cati nechca mocajque

¹ Quema Tanahuatijquet Jabín ipan altepet Hazor quimatqui ya nopa, tatitanqui ma quinyolmelahuatij miyac tanahuatiani para ma mosentilica ica inisoldados para san sejco ma quitehuitij israelitame. Quiyolmelajqui nopa tanahuatijquet Jobab ten tali Madón huan nojquiya nopa tanahuatijquet ten Simrón huan ten Acsaf. ² Nojquiya quinyolmelajqui nochi nopa tanahuatiani cati itztoyaj ipan tepeme ica norte, huan campa tamayantipa ipan Arabá ica sur ten nopa hueyat Cineret huan campa tepeme nejnechca Dor neca campa calaqui tonati. ³ Quinyolmelajqui nopa tanahuatiani ten nopa cananeos ica campa quisa tonati huan nopa sequinoc campa calaqui tonati. Nojquiya quinyolmelajqui nopa tanahuatiani ten nopa amorreos, heteos, ferezeos huan jebuseos cati itztoque campa tepeme huan nopa tanahuatijquet ten nopa heveos cati itztoque ipan itaixtemolis tepet Hermón ipan tali Mizpa.

⁴ Huan nochi ni tanahuatiani quisque ica inisoldados huan ica miyac tatehuijca carrojme huan tahuel miyac cahuayojme. Itztoyaj tahuel miyac soldados hasta amo aqui hueliyaya quinpohua pampa nesiyyayaj quej imiyaca xali iteno hueyi at. ⁵ Nochi injuanti mosentilijque huan mocajque nechca nopa ameli cati itoca Merom para quitehuise israelitame.

⁶ Pero TOTECO quiilhui Josué: “Amo xiquinimacasi pampa mosta quej ama ni hora na ya nimehmictilijtos nochi injuanti. Huan anquitequise se inimetztalo inincahuayojhua para amo motalose huan anquintatise inintatehuijca carrojhua.”

⁷ Huajca Josué huan nochi isoldados quinichtacatehuitoj nechca hueyat Merom huan pejque quitehuíaj. ⁸ Huan TOTECO quintemactili inimaco nopa israelitame, huan quitehujijque huan quitepotztocatiyajque hasta nopa Hueyi Altepet Sidón huan hasta Misrefot Maim. Huan para campa quisa tonati quitepotztocaque hasta nopa Tamaya ten Mizpa, huan yon se amo mocajqui yoltoc. ⁹ Huan Josué quichijqui quej TOTECO tanahuatijtoya

huan quitejque se inimetztalo inincahuayojhua huan quitati inintatehuijca carrojhua.

¹⁰ Teipa quema Josué ya yahuiyaya ichaj, quitanqui altepet Hazor, huan quimicti itanahuatijca. (Achtohuiya altepet Hazor yaya quipiyayaya tequiticayot ica nochi sequinoc altepeme ipan nochi ni talme.) ¹¹ Huan quinmicti ica macheta nochi cati nozona itzttoyaj huan quitatijque nopa altepet. ¹² Huan teipa Josué quintehui nochi nopa altepeme cati iniaxchua nopa tanahuatiani cati mosentilijtoyaj para tatehuise. Quintanqui nopa altepeme huan quinmicti nochi cati itzttoyaj nozona quej Moisés, itequipanojca TOTECO, tanahuati huejcajquiya ma quichihuaca. ¹³ Pero nopa israelitame amo quitatijque yon se altepet cati quichijtoyaj ipan tet. San Hazor, quena, quitatijque. ¹⁴ Quintamimictijque cati itzttoyaj ipan nopa altepeme huan moaxcatijque nochi tapiyalme huan tamanti cati oncayaya. Yon se masehuali amo mocajqui yoltoc.

Josué quichijqui cati Moisés quinahuati

¹⁵ Nochi tanahuatilme cati TOTECO quinahuatijtoya Moisés ma quichihuaca, Moisés quipanoltijtoya ica Josué para ma quichihua. Huan Josué quichijqui senquisa nochi nopa tanahuatilme. Josué amo quiiyocacajqui yon se tanahuatili cati TOTECO quinahuatijtoya Moisés. ¹⁶ Huan Josué quitanqui nochi nopa tali campa hueli. Quitanqui nopa tali campa tepeme, campa huactoc tali Neguev, nochi tali Gosén, nochi nopa tamayamit nechca at, nochi tali Arabá, huan nochi nopa tepeme huan tamayantipa cati ama eltoc ipan tali Israel. ¹⁷ Mocuiliijtoyaj inintal ica inepa cati pehua ipan tepet Halac nechca Seir ica sur huan yahui hasta Baal Gad ipan nopa Tamayamit Líbano ica norte cati mocahua itzinta tepet Hermón. Huan Josué quiniztqui huan quinmicti nochi tanahuatiani ipan nopa tali, ¹⁸ masque huejcajqui para quintehuijtinenci. ¹⁹ San ica nopa heveos ten altepet Gabaón quichijque se camanali, pero nochi sequinoc heveos quinmictijque. ²⁰ Pampa TOTECO quinyoltetili inincualancaitacahua para ma motzontochonchihuaca huan ma quintehuitij nopa israelitame. Huan teipa nopa israelitame quintzontamiltijque huan amo quipixque iniyolo inihuaya quej TOTECO quinahuatijtoya Moisés ma quichihuaca.

²¹ Ipan nopa tonali Josué yajqui quintzontamilito nopa masehualme huejcapantique cati eliyayaj iteipan ixhuihua Anac huan itzttoyaj ipan tepet Hebrón, Debir, Anab huan ipan nochi tepeme campa ama tali Judá huan tali Israel. Quinmicti huan quinsosolhuili inialtepehua. ²² Huan quej nopa amo mocajqui yon se huejcapantique masehuali ipan inintal nopa israelitame. San, quena, sequij mocajque ipan tali Gaza, Gat huan Asdod. ²³ Huajca quej nopa Josué quitanqui nochi nopa tali quej TOTECO quihuijtoya Moisés. Huan Josué quinmajmacac nopa israelitame nopa tali para iniaxca quej TOTECO quijto. Quinmajmacac sesen ten nopa hueyi familias quej imiyaca iteipan ixhuihua. Huan teipa, quena, oncac fasehuilisti ipan nopa tali huan ayecmo oncac tatehuilisti.

12

Nopa tanahuatiani cati quitanqui Moisés

¹ Ipan ne seyoc inaliyo hueyat Jordán, Moisés quinyacantoya nopa israelitame ma quitanica Sehón, inintanahuatijca amorreos cati itztoya ipan altepet Hesbón, huan Og, nopa tanahuatijquet ten altepet Basán. Yeca quitanque

nopa tali ten nopa tamayamit Arnón huan ten nochi nopa tamayamit nechca hueyat Jordán hasta nopa tepet Hermón ipan norte.

² Huan Sehón cati elqui tanahuatijquet ten nopa amorreo masehualme quinahuatiyaya nopa tajco ten tali Galaad cati eltoya ipan sur. Nopa tali eltoya tatajco ten nopa tamayamit. Nopa hueyat Jaboc mocahuayaya ica norte huan nopa tamayamit ten hueyat Aroer ipan sur. Nopa hueyat Jaboc elqui ininewa inintal nopa amonitame. Huan ica sur, pero quentzi más para campa quisa tonati, inewa Sehón ajsic hasta nopa altepet Aroer ipan iteno nopa tamayamit Arnón. Huan ica sur, pero quentzi más para campa temo tonati inewa ajsic hasta nopa altepet ipan nopa tamayamit ten hueyat Arnón cati mocahua tatajco altepet Aroer huan nopa Hueyi At Mictoc.

³ Inewa Tanahuatijquet Sehón ica campa temo tonati elqui nopa tamayamit nechca hueyat Jordán cati pejqui ica norte ipan nopa hueyi mantoc at cati itoca Cineret huan ontami ica sur campa nopa Hueyi At Mictoc. Nojquiya mocajqui ipan ital Tanahuatijquet Sehón nopa tali cati pejqui ica nopa Hueyi At Mictoc huan yajqui para campa quisa tonati hasta altepet Bet Jesimot cati mocahua itzinta tepet Pisga.

⁴ Huan Moisés huan nopa israelitame nojquiya quitanque Og, nopa tanahuatijquet ten Basán. Tanahuatijquet Og elqui iyoytzi ten nopa huejcapantique masehualme cati inintoca refaítame. Huan yaya mosehui para tanahuatis ipan altepeme Astarot huan Edrei. ⁵ Huan ital Og quipixqui nopa tepet Hermón, Salca, huan nochi nopa tali Basán. Huan ital yajqui hasta inepantipa Gesur huan Maaca campá temo tonati, huan ica sur quipixqui tajco ten nopa tali Galaad campá ajsi inewa ital Sehón cati achtohui yaya eliyaya tanahuatijquet ipan altepet Hesbón.

⁶ Moisés ihuaya nopa israelitame quintanque ni tanahuatiani, huan Moisés quinmacac ni talme nochi iteipan ixhuihua Rubén, Gad, huan tajco ten iteipan ixhuihua Manasés.

Nopa tanahuatiani cati quintanqui Josué

⁷ Huan Josué huan nopa israelitame quintanque ni tanahuatiani ten nimitzilhuis cati itztoyaj ipan talme ten nopa hueyat Jordán hasta campá calaquí tonati. (Ni tali pejtehua ica Baal Gad ipan Itamaya Líbano huan ontantoc ipan tepet Halac cati tejco hasta tepet Seir.) Huan Josué quinmajmacac israelitame ni tali quej inimiyaca iteipan ixhuihua ten sesen hueyi familia quipiyayaya. ⁸ Ni tali quipixqui nopa tepeme, nopa tamayamit nechca hueyat Jordán, nopa Arabá, nopa taixtemolis, nopa huactoc tali campá amo teno eli huan nopa Neguev. Ni talme eliyaya iniaxca nopa heteos, amorreos, cananeos, ferezeos, heveos huan jebuseos.

⁹ Nopa tanahuatiani cati Josué huan nopa israelitame quintanque elque nopa tanahuatiani ten ni altepeme:

Jericó, Hai cati eltoya nechca Betel,

¹⁰ Jerusalén, Hebrón,

¹¹ Jarmut, Laquis,

¹² Eglón, Gezer,

¹³ Debir, Geder,

¹⁴ Horma, Arad,

¹⁵ Libna huan Adulam,

¹⁶ Maceda, Betel,

¹⁷ Tapúa, Hefer,

¹⁸ Afec, Sarón,

¹⁹ Madón, Hazor,

²⁰ Simron Merón, Acsaf,

²¹ Taanac, Meguido,

²² Cedes, Jocneam ipan Carmelo,

²³ Dor ipan tali Dor,

Goim ipan tali Gilgal,

²⁴ huan nojquiya nopa tanahuatijquet ipan altepet Tirsá.

Elque 31 tanahuatiani para nochi cati Josué huan nopa israelitame quintanque.

13

Nopa talme cati polihui qitanise israelitame

¹ Huan quema Josué ya eliyaya huehuentzi, TOTECO quiilhui: “Ta ya tihuehuentzi huan noja mocahua miyac talme para anquitanise. Ya ni cati polihui:

² “Nochi inintal nopa filisteos, nochi inintal nopa gesureos, ³ nochi nopa tali cati ama iniaxca nopa cananeos cati pehua campa temo tonati ica hueyat Sihor ipan inepa tali Egipto huan ica norte yahui hasta inepantipa tali Ecrón. Nojquiya polihui nopa macuili altepeme ten nopa filisteos: Gaza, Asdod, Ascalón, Gat huan Ecrón. Huan ica sur polihui nopa tali ten nopa aveos, ⁴ huan ica sur, nochi inintal cananeos ica nopa altepet Mehara cati nelía eliyaya iniaxca nopa sidonios huan nochi nopa tali ica norte hasta Afec campa inepa inintal nopa amorreos. ⁵ Nojquiya polihui inintal nopa gibilitame ica nochi tali Líbano para campa quisa tonati. Nopa tali pehua ica altepet Baal Gad itzinta tepet Hermón huan yahui hasta campa se huéli calaqui ipan Hamat ica norte.

⁶ “Nojquiya polihui nochi inintal nopa sidonios cati itztoque ipan nopa tepeme tatajco Líbano huan Misrefotmáim.

“Na niqunquixtis nochi ni masehualme amoixpa anisraelitame. Huajca monequi nojquiya annoilhuise quenicatza anquinmajmacase nochi ni talme quej nimitznahuatijtoc. ⁷ Xijxelo ni tali ica nopa chicnahui huejhueyi familias cati ayemo quiselijtoque tali huan ica ne seyoc tajco nopa hueyi familia Manasés cati amo quiselijtoc.”

Inintal Manasés, Rubén huan Gad

⁸ Nopa hueyi familia Rubén huan Gad, huan tajco nopa hueyi familia Manasés ya quiselijque inintal pampa Moisés, itequipanojca TOTECO, quinmacac nopa tali cati elis iniaxca nozona ipan nese inaliyo hueyat Jordán para campa quisa tonati.

⁹ Inintal ajsi ica sur huan campa quisa tonati hasta altepet Aroer iteno nopa hueyat Arnón. Nojquiya quiapiya nopa altepet tatajco nopa tamayamit Arnón, huan quiapiya nochi nopa tamayamit ten altepet Dibón campa sur hasta altepet Medeba más ica norte. ¹⁰ Huan inintal ajsi ica campa quisa tonati hasta inepantipa Amón. Inintal quiapiya nochi nopa altepeme cati nopa Tanahuatijquet Sehón ten nopa amorreos quinhauati. Sehón mosehui ipan altepet Hesbón para tanahuatis. ¹¹ Nopa tali nojquiya quiapiya Galaad, inintal nopa gesureos huan maacateos. Quiapiya nochi nopa tepet Hermón huan nochi tali Basán cati ontantoc hasta Salca, ¹² huan nochi itanahuatilis Og, nopa tanahuatijquet ten tali Basán cati mosehui para tanahuatis ipan altepet Astarot huan

Edrei. (Huan Og eliyaya nopa iyoytzi huejcapantic refaíta tacat cati mocajqui pampa Moisés quintehuijtoya huan quinmicti.) ¹³ Pero nopa israelitame amo quinquixtijque nopa gesureos huan maacateos, huan yeca inijuanti itztoque inihuaya israelitame hasta ama.

Inintal iteipan ixhuihua Levi

¹⁴ Quema quinmajmacayaya nopa huejhueyi familias inintal, amo teno quiselijque iteipan ixhuihua Levi. Monequiyaya nopa levitame quiselisquíaj nochi nopa tacajcahalisti tatatili cati israelitame quitencahuasquíaj iixpa TOTECO Dios. Huan TOTECO quinahuati para nopa tacajcahalisti elisquía iniacxa quej ipataca se tali.

Inintal iteipan ixhuihua Rubén

¹⁵ Ya ni nopa tali cati Moisés quimacac nopa hueyi familia Rubén quej imiyaca imasehualhua.

¹⁶ Quimacac nopa tali cati pehua ipan altepet Aroer ipan iteno nopa tamayamit Arnón, huan nopa altepet cati eltoc tatajco nopa tamayamit ihuaya nochi nopa tamayamit nechca Medeba. ¹⁷ Huan inintal quiptiya altepet Hesbón huan nochi pilaltepertzitzi cati eltoc ipan nopa tamayamit. Nopa pilaltepertzitzi eliyaya Dibón, Bamot Baal, Bet Baal Meón, ¹⁸ Jahaza, Cademot, Mefaat, ¹⁹ Quiriataim, Sibma huan Zaret Sahar cati mocahua ipan nopa tepet ipan nopa hueyi tamayamit. ²⁰ Inintal nojquiya quiptiya altepeme: Bet Peor, Bet Jesimot, nopa taixtemolis ipan tepet Pisga, ²¹ huan nochi nopa altepeme cati eltoc ipan tamayamit. Huan quiptiya nochi itanahuatilis Sehón inintanahuatijca nopa amorreos cati mosehui para tanahuatis ipan altepet Hesbón. Moisés quintantoya Sehón huan nopa tayacanani ipan Madián cati itztoyaj ipan ital huan quipalehuiyayaj. Inintoca eliyaya Evi, Requem, Zur, Hur huan Reba. ²² Nojquiya nopa israelitame quimictijque Balaam, nopa tetonal tachilijquet cati elqui icone Beor. ²³ Huan nochi nopa talme cati quiseli nopa hueyi familia Rubén tanqui campa iteno hueyat Jordán. Nopa altepeme huan pilaltepertzitzi cati eltoya ipan nopa tali, quiselijque nopa familias cati iteipan ixhuihua Rubén.

Inintal iteipan ixhuihua Gad

²⁴ Ya ni nopa tali cati Moisés quimacac nopa hueyi familia Gad quej inimiyaca imasehualhua.

²⁵ Quimacac altepet Jazer, huan nochi nopa altepeme ipan tali Galaad huan tajco ten inintal nopa amonitame cati ajsic hasta nopa seyoc altepet Aroer cati mocahua nechca altepet Rabá pero quentzi más para campa quisa tonati. ²⁶ Huan nojquiya quiselijque nopa tali cati pejqui ipan altepet Hesbón huan yajqui hasta altepeme Ramat Mizpa huan Betonim, huan cati pehua ica altepet Mahanaim huan yahui hasta inepa Debir. ²⁷ Huan ipan nopa tamayamit nechca hueyat Jordán nopa hueyi familia Gad nojquiya quiselijque altepeme Bet Aram, Bet Nimra, Sucot, Zafón huan nopa tali cati mocahuayaya cati eliyaya iaxca Sehón, nopa tanahuatijquet ten altepet Hesbón. Huan inintal Gad ica campa temo tonati ajsic hasta iteno hueyat Jordán huan yajqui ica norte hasta nopa mantoc at Cineret. ²⁸ Nochi ni altepeme ica ininpilaltepehua quiselijque nopa familias cati eliyayaj iteipan ixhuihua Gad.

Inintal nopa tajco iteipan ixhuihua Manasés

²⁹ Huan ya ni nopa tali cati Moisés quimacac nopa tajco hueyi familia Manasés quej imiyaca ifamilias.

³⁰ Quinselijque nochi nopa tali cati achtohui eliyaya iaxca Tanahuatijquet Og ipan tali Basán. Inintal pejqui ica altepet Mahanaim huan quipixqui nochi setenta pilaltepztitzi cati Jair achtohuiya quitantoya ipan tali Basán. ³¹ Nojquiya quipixqui tajco tali Galaad huan nopa altepeme Ashtarot huan Edrei campa mosehui Tanahuatijquet Og para tanahuatis. Nochi ni tali elqui iniaxca iteipan ixhuihua Maquir cati elqui icone Manasés huejcajquiya huan quinmajmacac quej inimiyaca inifamilias.

³² Huajca nochi ya ni nopa talme cati Moisés temacac ipan itamayantipa tali Moab ipan iteno hueyat Jordán campa quisa tonati imelac Jericó ipan seyoc nali. ³³ Pero Moisés amo quinmacac iteipan ixhuihua Leví yon se inintal. Pero quej ipataca se inintal quinilhui para quiselise TOTECO toDIOS tiisraelitame quej iniaxca huan amo tali.

14

Quinxexelhuilijque nopa tali ipan Canaán

¹ Ya ni nopa talme ipan tali Canaán cati quinxexelhuilijque nopa israelitame ipan nopa chicnahui huan tajco huejhueyi familias cati ayemo quiseliyayaj cati elis iniaxca. Huan Josué, nopa hueyi totajtzi Eleazar, huan nopa tayacanquet ipan sesen hueyi familia quipixque nopa tequit para quinmajmacase nopa tali. ² Achtohui mahuiltijque ica piltetzitzi huan ica ya nopa TOTECO quinexti taya hueyi familia quiselisque sesen tali, pampa quej nopa TOTECO quinahuatijtoya Moisés ma quichihua. ³ Huan ipan seyoc inaliyo hueyat Jordán para campa quisa tonati, Moisés ya quinmacatoya tali nopa huejhueyi familias Rubén huan Gad huan tajco nopa hueyi familia Manasés. Pero nopa levitame amo quinmacac tali. ⁴ Pampa José quinpixqui ome itelpocahua huejcajquiya cati inintoca Manasés huan Efraín, huan injuanti mochijque ome huejhueyi familias quej ipataca iteipan ixhuihua Leví cati amo quinpojqui inihuaya nopa 12 huejhueyi familias. Huan nopa tayacanani amo quinmacaque iteipan ixhuihua Leví se tali. San quinmacaque altepeme para ipan itztose ica quentzi potrerros nechca para quiniscaltise tapiyalme. ⁵ Huajca nopa israelitame quixelojque nopa tali quej TOTECO quinahuatijtoya Moisés.

Caleb tajtanqui se ital

⁶ Se tonali sequij iteipan ixhuihua Judá yajque campa Josué ipan Gilgal. Huan se ten injuanti cati itoca Caleb cati elqui itelpoca Jefone huan iixhui Cenez quiilhui Josué: “Xiquelnamiqúi cati TOTECO quiilhui Moisés ipan Cades Barnea ten ta huan na. ⁷ Na nijpiyayaya 20 xihuit quema Moisés techtitanqui Cades Barnea para ma tijtachilitij nopa tali cati TOTECO techmacasquía. Huan quema sempa nihualajqui, niquiilhui cati nijmatqui ipan noyolo para melahuac. ⁸ Pero injuanti cati yajque nohuaya quichijque ma momajmatica nopa masehualme. Quinilhuijque amo huelis tijtanise. Pero na nijtoquili TOTECO Dios ica nochi noyolo. ⁹ Huajca Moisés quitestigojquetzqui TOTECO huan techilhui: ‘Nochi nopa tali cati ipan tinejntoc elis moaxca ta huan moixhuihua para nochipa, pampa timotemachi ipan TOTECO Dios ica nochi moyolo.’

¹⁰ “Quej nopa techilhui. Ya nopa quipiya 45 xihuit. Huan quej quiijto TOTECO, yaya nechcahuilijtoc ma niutzto nochí nopa xihuit fen quema tiisraelitame tinemiyayaj ipan huactoc tali huan hasta ama. Huan ama xiquita, ya nijpíxtoc 85 xihuit. ¹¹ Huan noja nijpiya chichahualisti quej quema Moisés techtitanqui ma nijtachiliti ni tali. Huan noja hueli ninejnemi cuali huan nitatehuía quej ipan nopa tonali. ¹² Huajca nimitztajtanía, techmaca nopa tepeyo cati TOTECO techilhui techmacasquía ipan nopa tonali. Tiquelnamiqui nepa tiquinpantijque iixhuihua nopa huejcapantíc tacat Anac. Huan nozona oncayaya huejhueyi altepeme cati tzactoc ica tepamit cati cuali tachihuali, pero sinta TOTECO techpalehuis, niqunquixtís quej ya techilhuijtoc ma tijchihuaca.”

¹³ Huajca Josué quitiochijqui Caleb, huan quimacac nopa altepet Hebrón para elis iaxca huan iniaxca iteipan ixhuihua. ¹⁴ Yeca nopa tali eltoc iaxca Caleb huan iteipan ixhuihua hasta ama, pampa ica nochí iyolo Caleb quitoquili TOTECO Dios cati tiisraelitame tijtequipanohuaj. ¹⁵ Achtohui Hebrón itoca eliyaya Quiriat Arba, (Quiriat Arba quinequi quiijtos Ialtepe Arba) pampa Arba elqui nopa tacat cati más hueyi ipan nopa anaceo masehualme. Huan tanqui nochí tatehuilisti, huan oncac tasehuilisti ipan nopa tali.

15

Inintal iteipan ixhuihua Judá

¹ Ya ni nopa tali cati TOTECO quinexti ipan nopa sorteo para ma quimacaca nopa hueyi familia Judá. Inintal pejqui ica campa quisa tonati ica inepa tali Edom huan quiixcotona nopa huactoc tali Zin ica sur.

² Quiijtosnequi ininepa Judá ica sur pejqui ica nopa Hueyi At Mictoc campa inaliyo ica sur, ³ huan yahui quentzi más ica sur ipan nopa taixtemolis Acrabim, huan quipano nopa huactoc tali Zin hasta ica sur ten Cades Barnea huan hasta Hezrón. Teipa ininepa tejco hasta Adar huan teipa tayahualohua hasta Carca. ⁴ Ten nozona ininepa Judá yahui hasta Asmón huan hasta nopa atajti ten Egipto huan quitoquilía hasta nopa hueyi at cati itoca Mediterráneo. Ya ni ininepa ica sur.

⁵ Huan ininepa Judá ica campa quisa tonati eltoc iteno nopa Hueyi At Mictoc quej yahui ica norte hasta campa hueyat Jordán calaqui ipan Hueyi At Mictoc.

Nozona campa calaqui ne hueyat pejtehua ininepa ica norte. ⁶ Teipa ininepa tejco hasta Bet Hogla huan pano ica norte ten Bet Arabá, huan teipa yahui campa eltoc nopa tet cati iaxca eliyaya Bohán, icone Rubén.

⁷ Teipa nopa nepamit tejco ipan nopa tamayamit Acór hasta altepet Debir; huan teipa yahui ica norte hasta sempa ajsi ipan Gilgal imelac nopa taixtemolis Adumín cati mocahua ica sur ten nopa atajti. Teipa nopa nepamit pano campa meya nopa at campa itoca En Semes huan yahui hasta En Rogel. ⁸ Huan ten nozona ininepa pano ipan nopa tamaya Benhinom cati mocahua ica sur ten nopa taixtemolis nechca Jebús. (Jebús ama itoca Jerusalén.) Teipa tejco nopa nepamit para campa temo tonati hasta itzompac nopa tepet ipan tamaya Hinom huan yahui ica norte ipan tamaya Refaim hasta itamiya. ⁹ Huan ten itzompac nopa tepet ininepa Judá yahui huijcoltic hasta campa meya nopa At ten Neftoa. Teipa yahui hasta nopa altepeme ipan tepet Efrón. Huan teipa ininepa yahui huijcoltic ica norte hasta Baala cati nojquiya itoca Quiriat Jearim. ¹⁰ Teipa ininepa iteipan ixhuihua Judá

quiyahualojtoya ten Baala para campa temo tonati hasta tepet Seir huan hasta itaixtemolis tepet Jearim o Quesalón ica norte, huan teipa ininepa temo hasta Bet Semes huan hasta Timna. ¹¹ Teipa ininepa yahui ipan nopa taixtemolis Ecrón ica norte huan yahui huijcoltic hasta Socrón huan hasta tepet Baala huan hasta Jabneel huan ontami ica nopa Mediterráneo hueyi at.

¹² Huan ininepa Judá para campa temo tonati ya nopa iteno nopa hueyi at. Huajca nochi ya ni inepa ital nopa hueyi familia Judá ica nochi ininteipan ixhuihua.

*Ital Caleb
(Jue. 1:10-15)*

¹³ Huan TOTECO quiilhui Josué ma quimaca Caleb itelpoca Jefone se tali ipan inintal iteipan ixhuihua Judá. Huajca quimacac altepet Quiriat Arba (Arba elqui itata Anac) cati nojquiya itoca altepet Hebrón. ¹⁴ Huan Caleb quinquixti ten Hebrón nopa eyi itelpocahua Anac cati inintoca Sesai, Ahimán huan Talmi, huan moaxcati nopa altepet. ¹⁵ Huan Caleb quisqui ten nopona huan quintehuito nopa tacame ipan nopa altepet Debir cati achtohuiya itoca eliyaya Quiriat Sefer. ¹⁶ Huan Caleb quinyolmelajqui isoldados para quimacas iichpoca, Acsa, para mochihuas isihua nopa tacat cati quitanisquía nopa altepet Debir. ¹⁷ Huan quitanito Otoniel itelpoca Cenaz cati eliyaya iicni Caleb. Huan huajca Caleb quimacac iichpoca Acsa para elis isihua Otoniel. ¹⁸ Huan ipan nopa netahuicaltili quema nopa telpocat quihuicayaya isihua, quiilhui ma quitajtani itata se quentzi más tali quej se nemacti. Huajca Acsa temoc ten iburro para quicamanalhui itata Caleb. Huan itata quitatzintoquili:

—¿Taya tijnequi?

¹⁹ Huan nopa ichpocat quinanquili:

—Nijnequi para ma nesi techtiochijtoc, techmaca seyoc nemacti. Nopa tali cati techmacatoc huactoc huan amo teno hueli eli nopona, huajca nojquiya techmactili se tali ica se ome ameli.

Huajca Caleb quimacac nopa ameli cati eltoc ica norte huan cati eltoc ica sur.

Inialtepehua iteipan ixhuihua Judá

²⁰ Nica nimitzilhuis nopa altepeme cati iteipan ixhuihua Judá quiselijque.

²¹ Ica sur nechca Edom quiselijque ni altepeme:

Cabseel, Edar, Jagur, ²² Cina, Dimona, Adada, ²³ Cedes, Hazor, Itnán, ²⁴ Zif, Telem, Bealot, ²⁵ Hazor Hadata, Queriot, Hezrón (cati nojquiya itoca Hazor), ²⁶ Amam, Sema, Molada, ²⁷ Hazar Gada, Hesmón, Bet Pelet, ²⁸ Hazar Sual, Beerseba, Bizotia, ²⁹ Baala, Iim, Esem, ³⁰ Eltolad, Quesil, Horma, ³¹ Siclag, Madmana, Sansana, ³² Lebaot, Silhim, Aín huan Rimón. Huajca elqui 29 altepeme huan ininpilaltepehua.

³³ Ipan tamayamit quiselijque ni altepeme:

Estaol, Zora, Asenat, ³⁴ Zanoa, En Ganim, Tapúa, Enam, ³⁵ Jarmut, Adulam, Soco, Azeca, ³⁶ Saaraim, Aditaim, Gedera huan Gederotaim. Huajca elqui 14 altepeme huan ininpilaltepehua ipan tamayamit.

³⁷ Huan nojquiya ipan tamayamit eltoya ni altepeme: Zenán, Hadasa, Migdal Gad, ³⁸ Dileán, Mizpa, Jocteel, ³⁹ Laquis, Boscat, Eglón, ⁴⁰ Cabón, Lahmam, Quitlis, ⁴¹ Gederot, Bet Dagón, Naama huan Maceda. Huajca ya ni elqui 16 altepeme ica ininpilaltepehua.

- ⁴² Nojquiya Libna, Eter, Asán, ⁴³ Jifta, Asenat, Nezib, ⁴⁴ Keila, Aczib huan Maresa. Huajca mochiqqui chicnahui altepeme huan ininpilaltepehua.
- ⁴⁵ Nojquiya quiselijque Ecrón huan nochi nopa altepeme huan nopa pilal-tepetzitzí cati eltoya nechca. ⁴⁶ Huan ten altepet Ecrón inepa tali Judá yajqui hasta nopa Hueyi At Mediterráneo huan quipixqui nochi nopa altepeme nechca altepet Asdod ica ininpilaltepehua. ⁴⁷ Huajca nozona Judá quipixqui altepet Asdod ica ipilaltepehua huan Gaza ica ipilaltepehua huan nochi tali hasta hueyat Egipto ica sur huan hasta iteno nopa hueyi at Mediterráneo.
- ⁴⁸ Campa tepeme quiselijque ni altepeme ica nochi ininpilaltepehua: Samir, Jatir, Soco, ⁴⁹ Dana, Quiriat Sana (cati nojquiya itoca Debir), ⁵⁰ Anab, Estemoa, Anim, ⁵¹ Gosén, Holón huan Gilo. Huajca ya ni mochiqqui 11 altepeme ica ininpilaltepehua.
- ⁵² Huan quiselijque Arab, Duma, Esán, ⁵³ Janum, Bet Tapúa, Afeca, ⁵⁴ Humta, Quiriat Arba (cati nojquiya itoca Hebrón), huan Sior. Huajca ya ni mochiqqui chicnahui altepeme ica ininpilaltepehua.
- ⁵⁵ Nojquiya quiselijque Maón, Carmel, Zif, Jura, ⁵⁶ Jezreel, Jodeam, Zanoa, ⁵⁷ Caín, Gabaa, Timna. Huajca mochiqqui majtacti altepeme huan ininpilaltepehua.
- ⁵⁸ Nojquiya quisei Halhul, Bet Sur, Gedor, ⁵⁹ Maarat, Bet Anot, Eltecón. Huajca ya ni mochiqqui chicuase altepeme huan ininpilaltepehua.
- ⁶⁰ Nojquiya quiselijque altepeme Quiriat Baal (cati nojquiya itoca Quiriat Jearim) huan Rabá ihuaya ininpilaltepehua. Huajca ya ni mochiqqui ome altepeme.
- ⁶¹ Ipan nopa huactoc tali quiselijque ni altepeme: Bet Arabá, Midín, Secaca, ⁶² Nibsán, nopa cati itoca Altepet ten Istat huan Engadi. Huajca mochiqqui chicuase altepeme huan ininpilaltepehua.
- ⁶³ Pero iteipan ixhuihua Judá amo huelqui quinquixtijque nopa jebuseos cati itztoyaj ipan altepet Jerusalén. Huajca nopa jebuseos noja itztoque nozona inihuaya iteipan ixhuihua Judá hasta ama.

16

Inintal iteipan ixhuihua José

- ¹ Huan nopa sorteo quinexti para iteipan ixhuihua itelpocahua José ma quiselica se tali cati quipixqui inepa ica sur.
- Pejtejqui ica iteno hueyat Jordán campá altepet Jericó huan quentzi más para campá quisa tonati ten ameli Jericó. Huan ininepa teipa panoc ipan huactoc tali huan yajqui ica norte ten Jericó hasta nopa tepeyo Betel. ² Huan ten Betel cati nojquiya quihuihua Luz panoc hasta Atarot ipan inintal arquiteame. ³ Teipa ininepa yahui para campá temo tonati hasta inintal nopa jafletitame huan hasta inepa Bet Horón Cati Tatzinta huan hasta Gezer. Huan teipa yahui hasta nopa Mediterráneo hueyi at.
- ⁴ Huajca nopa ome huejhueyi familias, Manasés huan Efraín, quiselijque ni tali para iniaxca. Nochi inijuanti iteipan ixhuihua José cati huejca-jquiya itztoya.

Inintal iteipan ixhuihua Efraín

- ⁵ Ama nimechilhuis catijqui tali quiselijque iteipan ixhuihua Efraín.

Ininepa ica campa quisa tonati pejtehua ica altepet Atarot Adar huan yajqui hasta Bet Horón Cati Huejcapa, ⁶ huan teipa yahui hasta Hueyi At Mediterráneo campa temo tonati. Huan ininepa ica norte pehua nopona ipan nopa hueyi at, huan yahui para campa quisa tonati hasta Micmetat ica norte huan pano hasta Taanat Silo huan Janoa. ⁷ Huan inepa quisa Janoa, huan yahui ica sur hasta Atarot huan Naarat, huan pano iteno altepet Jericó huan onquisa campa hueyat Jordán. ⁸ Huan nopa nepamit ica norte cati eltoya más para campa temo tonati pehua ica Tapúa huan quitoquilia nopa pilatajtzi cati itoca Caná para campa temo tonati hasta nopa Hueyi At Mediterráneo. Huan ya ni elqui nopa tali cati quiselijque iteipan ixhuihua Efraín huan ihueyaca nopa tali elqui quej imiyaca inifamilias. ⁹ Nojquiya Efraín iteipan ixhuihua quiselijque sequij altepeme ipan nopa tali cati quintocaro nopa tajco hueyi familia Manasés.

¹⁰ Pero iteipan ixhuihua Efraín amo huelque quinquixtíaj nopa cananeos cati itztoque ipan altepet Gezer. Yeca nopa cananeos noja itztoque inihuaya israelitame huan quintequipanohuaj.

17

Inintal nopa seyoc tajco ten nopa hueyi familia Manasés

¹ Ama nimechilhuis catijqui tali quiselijque iteipan ixhuihua Manasés cati elqui iachtohui cone José huejcajquiya. Manasés huejcajquiya quipixqui iachtohui cone cati itoca Maquir. Huan Maquir cuali quimatiyaya tatehuía. Huan Maquir ihuaya itelpoca Galaad huan iniixhuihua ya quiselijtoyaj inintal ipan seyoc nali Jordán para campa quisa tonati cati ama itoca nopa talme Galaad huan Basán. ² Huajca ama ipan ni inaliyo Jordán para campa temo tonati san quixelohuayayaj tali ica iteipan ixhuihua Manasés cati quisque ten itelpocahua cati inintoca eliyaya Abiezer, Helec, Asriel, Siquem, Hefer, huan Semida. Ya ni inintoca itaca ixhuihua Manasés, icone José, huan sesen quipixqui miyac iteipan ixhuihua.

³ Pero se iteipan ixhuihua Manasés cati itoca Zelofehad amo quipixqui yon se oquichpil. Zelofehad elqui icone Hefer huan iixhui Galaad, huan iteipan ixhui Maquir cati elqui icone Manasés huejcajquiya. Zelofehad san quipixqui macuilti ichpocame cati inintoca eliyaya Maala, Noa, Hogla, Milca huan Tirsá. ⁴ Huan nopa ichpocame yajque iixpa totajtzi Eleazar huan Josué, icone Nun, huan quinihujique: “TOTECO quinquahuati Moisés ma techmactili tali quej quiselisquíaaj sequinoc ixhuime ipan tohueyi familia.”

Huajca quej TOTECO tanahuatijtoya, Josué quinmacac tali quej ihuexca cati quiselijque inintiojhua.

⁵ Huajca iteipan ixhuihua Manasés quiselijque majtati huejhueyi talme. Iyoca nojquiya quiselijque nopa talme Galaad huan Basán cati mocahua ipan seyoc inaliyo Jordán para campa quisa tonati, ⁶ pampa ni ichpocame cati iteipan ixhuihua Manasés nojquiya quiselijque tali para iniaxca ica tacame cati iteipan ixhuihua.

⁷ Huan nopa tali cati quiselijque iteipan ixhuihua Manasés quipixqui inepa ica norte huan quentzi más para campa temo tonati cati pejqui ica ital hueyi familia Aser. Huan ital Manasés yajqui ten inepa ica Aser ica sur hasta altepet Micmetat cati eltoya iixmelac Siquem para campa quisa tonati. Huan ten Micmetat inepa yajqui ica sur hasta nopa tali campa itztoyaj Tapúa ehuani. ⁸ (Nopa tali Tapúa eliyaya iaxca Manasés,

pero altepet Tapúa eliyaya iniaxca iteipan ixhuhua Efraín masque mocajqui ipan inepa ital Manasés.)⁹⁻¹⁰ Teipa inepa Manasés quitoquili iteno ica norte ten nopa pilatajtzi Caná huan onquisayaya hasta campa nopa Hueyi At Mediterráneo. (Sequij altepeme cati eltoyaj ica sur ten nopa pilatajtzi eliyaya iaxca nopa hueyi familia Efraín masque eltoya ipan ital Manasés.) Huajca ital Efraín eltoya iteno ica sur. Huan ica norte iteno eltoya inintal iteipan ixhuhua Manasés huan nopa hueyi at eltoya ininepa ica campá temo tonati. Huan ininepa Manasés ica norte huan quentzi para campá temo tonati monepantía ihuaya inintal iteipan ixhuhua Aser. Huan ica norte huan quentzi para campá quisa tonati monepantía ihuaya inintal iteipan ixhuhua Isacar.

- ¹¹ Huan iteipan ixhuhua Manasés nojquiya quiselijque altepeme ipan inintal nopa huejhueyi familias Isacar huan Aser. Huan nopa altepeme inintoca Bet Seán, Ibleam, Dor (casi eliyaya se atajti), Endor, Taanac huan Meguido. Huan ica sese altepet nojquiya quiselijque nochi ininipaltepéhua casi quinyahualojtoya.
- ¹² Pero iteipan ixhuhua Manasés amo huelque moaxcatijque nochi nopa altepeme pampa nopa cananeos mocajque nozona huan amo huelque quinquixtijque. ¹³ Pero teipa quema nopa israelitame quentzi más motananque, quinchihualtijque nopa cananeos ma quinquiquipanoca san tapic; pero amo nelía quinquixtijque.

Inintal iteipan ixhuhua José

¹⁴ Huan iteipan ixhuhua José casi nojquiya eliyaj ininteipan ixhuhua Manasés huan Efraín yajque quicamanalhuitoj Josué huan quihuhijque:
—¿Para ten techmacac san se piltaltzi huan TOTECO techtiochijtoc hasta techhijtoc timiyaqui?

¹⁵ Huan Josué quinnanquili:

—Sinta nelía anmiyaqui huan amo amechaxilía nopa tali, huajca monequi xitejoca campá nochi nopa cuame casi iniaxca ferezeos huan refaitame huan nozona xitatzontequica huan ximoaxcatica.

¹⁶ Huan iteipan ixhuhua José tananquilijque:

—Yon nopa hueyi cuatitamit amo techaxilis. Huan nochi nopa cananeos casi itztoque campá tamayamit quipiyaj tepos carros para tatehuse. Huan nojquiya quipiyaj tepos carros casi itztoque ipan Bet Seán huan ipilaltepehua huan casi itztoque ipan tamayamit Jezreel.

¹⁷ Huajca Josué quinnanquili ininteipan ixhuhua Efraín huan Manasés huan quinnilhui:

—Anmiyaqui huan anquipiyaj miyac chicahualisti. Amo san anquiselese se piltaltzi, ¹⁸ pero nojquiya anmoaxcatise nopa hueyi cuatitamit. Xitatzontequica hasta campá inepa ica norte. Masque nopa cananeos quipiyaj tepos carros huan neltetique, nijmati anhuelise anquinqixtise.

18

Quenicatza quixelojque nopa tali casi mocajqui

¹ Huan quema tantoya quixelohuaj nopa tali, nochi israelitame mosenlijque nechca altepet Silo para quiquetzase nopa yoyon tiopamit campá TOTECO mopantiyaya inihuaya. ² Huan masque nopa israelitame quipixque tequiticayot ipan nochi nopa tali, masehualme ipan chicome huejhueyi familias ayemo quiselijtoyaj inintal.

³ Huajca Josué quinilhui nopa israelitame: “¿Hasta quema huelis anquichiyase para anmoaxcatise nopa tali cati amechmacatoc TOTECO Dios yaya, cati quitequipanojque amotatahua? ⁴⁻⁵ Nopa hueyi familia Judá ya quipiya ital ica sur huan iteipan ixhuihua José ya quipiyaj inintal ica norte. Pero monequi sesen ten nopa chicome huejhueyi familias cati ayemo quiseljitoque inintal ma quintapejpenica eyi tacame huan techtitanilise. Huan na niquintitanis ipan nopa tali cati polihui timoaxcatise. Huan ini-juanti quicotonase nopa tali ica chicome tacotonti. Huan quitachilijtinemise nopa tali, ⁶ huan quichihuase se iixcopinca nopa tali huan quuijcuilose inepa nopa tali cati quinequij quiselise huan techhualiquilise. Huan nijtals iixpa TOTECO Dios huan nimahuiltis ica nopa piltetzitzi para niquitas ajquiya quiselis sesen tali. ⁷ Pero iteipan ixhuihua Leví amo quipiyase se tali cati moaxcatise pampa quipiyase inintequi para quitequipanojse TOTECO quej toajtztitzi para quiselise nopa tacajcualisti huan ya nopa elis nopa tati-ochihualisti cati TOTECO quinmaca. Huan Moisés, itequipanojca TOTECO, ya quinmactilijtoc iteipan ixhuihua Gad huan Rubén huan tajco iteipan ixhuihua Manasés inintal ipan seyoc inaliyo hueyat Jordán para campa quisa tonati.”

⁸ Huajca Josué quinilhui nopa tacame cati quintapejpenijtoyaj: “Xipan-otinemica ipan nochí nopa tali huan xiquixcopinaca ipan se amat huan xiquijcuiloca quenicatza ihuexca. Teipa techhualiquilica, huan nimahuiltis iixpa TOTECO nica ipan Silo para ma technextili quenicatza nimechmactilis sese amojuanti cati elis amoaxcahua.”

⁹ Huajca nopa tacame quitachilijtinemique nopa tali huan quitamachijque huan quicotonque ica chicome tacotonti. Huan quuijcuilojque sese altepet cati eltoya ipan sese tacotonti. Huan teipa sempa yajque campa Josué itztoya ipan Silo. ¹⁰ Huan Josué mahuilti ica piltetzitzi iixpa TOTECO para quimatis ajquiya quiselis sesen tali. Huan quej TOTECO quinextili, quinmactili inintal sesen hueyi familia ten nopa israelitame, huan ihuexca inintal elqui quej imiyaca inifamilias.

Inintal iteipan ixhuihua Benjamín

¹¹ Huan ajsic tonali para mahuiltis para quimatis catijqui tali elis iniaxca iteipan ixhuihua Benjamín. Huan quisqui para elqui iniaxca se tali cati eltoya tatajco ten inintal iteipan ixhuihua Judá huan José.

¹² Ininepa benjaminitame ica norte pejqui ica hueyat Jordán campa quisa tonati, huan yajqui para campa temo tonati huan ica norte quixcotonqui altepet Jericó, huan teipa panoc ipan nopa tepeme hasta ajsic ipan nopa huacoc tali nechca altepet Bet Avén. ¹³ Ten nozona ininepa sempa yajqui para altepet Luz (ó Betel) huan temoc hasta altepet Atarot Adar ipan nopa tepeyo cati mocahua ica sur ten altepet Bet Horón Cati Tatzinta.

¹⁴ Huan ten nozona ininepa iteipan ixhuihua Benjamín quimaca se huelta huan yahui ica sur para quixcotonas nopa tepeme nechca Bet Horón para campa temo tonati. Teipa ajsi ipan nopa pilaltepetzí cati itoca Quiriat Baal (cati nojquiya itoca Quiriat Jearim), se altepet cati elqui iniaxca iteipan ixhuihua Judá. Ya ni ininepa Benjamín ica campa temo tonati.

¹⁵ Huan ininepa benjaminitame ica sur pehua ica Quiriat Jearim huan yahui para campa temo tonati hasta campa nopa ameli cati itoca Neftoa.

¹⁶ Teipa ininepa yahui hasta itzinta nopa tepet cati mocahua ica norte ten nopa Tamayamit Refaim campa pehua nopa Tamayamit

Hinom. Huan teipa ininepa benjaminitame yahui más ica sur ipan nopa Tamayamit Hinom huan pano ica sur hasta nopa taixtemolis ten nopa altepet cati ama itoca Jerusalén huan teipa yahui más ica sur hasta nopa ameli Rogel. ¹⁷ Teipa ininepa benjaminitame quimaca huelta huan yahui ica norte hasta En Semes huan teipa hasta Gelilot cati mocahua iixmelac nopa taixtejcolis para Adumín. Teipa temo más ica sur hasta nopa tet cati itoca Bohán. (Bohán elqui icone Rubén cati huejcajquiya itztoya.) ¹⁸ Teipa ininepa pano ica norte iteno nopa tamayamit nechca hueyat Jordán huan teipa quitoquilía nopa taixtemolis hasta nopa tamayamit cati itoca Arabá. ¹⁹ Teipa ininepa iteipan ixhuihua Benjamín ica sur pano Bet Hogla ica norte huan ajsi hasta campa hueyat Jordán calaqui ipan nopa Hueyi At Mictoc ica norte.

²⁰ Huan ininepa benjaminitame ica campa quisa tonati eltoc hueyat Jordán. Huajca nochi ya ni techilhuitoc nochi ininepa nopa tali cati iteipan ixhuihua Benjamín quiselijque ica nochi inifamilias.

Inintal iteipan ixhuihua Benjamín

²¹ Huan nojquiya quiselijque iteipan ixhuihua Benjamín ni altepeme quej inimiyaca inifamilias. Quiselijque:

Jericó, Bet Hogla, Casis, ²² Bet Arabá, Zemaraim, Betel, ²³ Avim, Pará, Ofra, ²⁴ Quefar Haamoni, Ofni, huan Geba. Huajca 12 altepeme huan ininpilaltepehua.

²⁵ Nojquiya quiselijque Gabaón, Ramá, Beerot, ²⁶ Mizpa, Cafira, Mozah, ²⁷ Requem, Irpeel, Tarala, ²⁸ Zela, Elef, Jebús (casi nojquiya itoca Jerusalén), Gabaa huan Quiriat. Mochijque 14 altepeme huan iyoca nochi ininpilaltepehua.

Nochi ya ni quiselijque iteipan ixhuihua Benjamín ica nochi inifamilias.

19

Inintal iteipan ixhuihua Simeón

¹ Huan ica ompa mahuilti Josué ica piltetzitzi iixpa TOTECO, huan quinex-tili catijqui tali ma quimaca nopa hueyi familia Simeón ica ihuexca quej inimiyaca inifamilias. Huan quiselijque tali ipan inintal iteipan ixhuihua Judá. ² Casi iteipan ixhuihua Simeón quiselijque elqui nochi ni altepeme ica nochi ininpilaltepehua:

Beer Seba, Seba, Molada, ³ Hazar Sual, Bala, Ezem, ⁴ Eltolad, Betul, Horma, ⁵ Siclag, Bet Marcabot, Hazar Susa, ⁶ Bet Lebaot huan Saruhén. Huajca mochijque 13 altepeme ica ininpilaltepehua.

⁷ Huan quiselijque Aín, Rimón, Eter huan Asán, nahui altepeme huan ininpilaltepehua. ⁸ Huan iteipan ixhuihua Simeón quiselijque nochi ni altepeme casi más mocajqui ica sur quej altepet Baalat Beer (casi nojquiya itoca Ramat) casi eltoc ipan nopa Neguev.

Nochi ya ni quiselijque iteipan ixhuihua Simeón ica ihuexca quej inimiyaca inifamilias. ⁹ Nopa tali casi quinmacaque, quiquixtijque ten nopa tali casi quiselijtoyaj iteipan ixhuihua Judá pampa nelpano hueyi para inijuanti.

Inintal iteipan ixhuihua Zabulón

¹⁰ Huan ica expa mahuilti ica piltetzitzi iixpa TOTECO, huan quinexti catijqui tali ma quimaca nopa hueyi familia Zabulón ica ihuexca quej imiyaca inifamilias.

Huan ininepa iteipan ixhuihua Zabulón ajsic ica sur hasta altepet Sarid,

¹¹ huan ten Sarid yajqui para campa temo tonati hasta Marala huan hasta Dabeset huan teipa ajsic campa nopa pilatajtzi nechca Jocneam.

¹² Huan ten Sarid ininepa iteipan ixhuihua Zabulón yajqui para campa quisa tonati hasta campa monepantía ica Quislot Tabor huan teipa ajsic altepet Daberet huan tejcoc hasta altepet Jafia. ¹³ Teipa yajqui para campa quisa tonati hasta altepeme Gat Hefer, Ita Cazin huan Rimón.

Huan teipa quichihua se huelta para yas altepet Nea. ¹⁴ Ica norte ininepa iteipan ixhuihua Zabulón yahui hasta altepet Hanatón, huan ontami ica nopa tamayamit cati itoca Jefe El. ¹⁵ Huan ipan nopa tali iteipan ixhuihua Zabulón nojquiya quiselijque ni altepeme: Catat, Naalal, Simrón, Idala, huan Belén ihuaya nochi ininpilaltepehua.

Huajca ica nopa sequinoc elqui 12 altepeme.

¹⁶ Huajca ya ni elqui cati quiselijque iteipan ixhuihua Zabulón huan ihuexca inintal elqui quej imiyaca inifamilias.

Inintal iteipan ixhuihua Isacar

¹⁷ Huan ica najpa mahuilti Josué ica piltetzitzi iixpa TOTECO, huan quinexti catijqui tali ma quinmaca iteipan ixhuihua Isacar ica ihuexca quej imiyaca inifamilias. ¹⁸ Huan ipan nopa tali cati quiselijque iteipan ixhuihua Isacar quipixqui ni 16 altepeme ica ininpilaltepehua:

Jezreel, Quesulot, Sunem, ¹⁹ Hafaraim, Sihón, Anaharat, ²⁰ Rabit, Quisión, Abez, ²¹ Remet, En Ganim, En Hada huan Betpases. ²² Huan ininepa Isacar ajsic hasta altepeme Tabor, Sahazima huan Bet Semes, huan ontami ipan hueyat Jordán.

²³ Nochi ya ni quiselijque iteipan ixhuihua Isacar huan inifamilias cati pejque ica inihuejcapan fatahua.

Inintal iteipan ixhuihua Aser

²⁴ Huan ica macuilpa mahuilti Josué ica piltetzitzi iixpa TOTECO, huan quinexti catijqui tali ma quinmaca iteipan ixhuihua Aser ica ihuexca inintal quej imiyaca inifamilias. ²⁵ Huan inintal quipixqui ni altepeme:

Helcat, Halí, Betén, Acsaf, ²⁶ Alamelec, Amad huan Misaal ipan ininepa ica sur. Huan ininepa para campa temo tonati onajsi hasta altepet Carmelo huan Sihor Libnat. ²⁷ Ininepa ica campa quisa tonati yahui ten altepet Betdagón hasta quinamijqui ital Zabulón huan quiajsi nopa tamayamit Jefe El, huan teipa pano ica norte hasta Bet Emec, Neiel, huan hasta Cabul, ²⁸ Hebrón, Rehob, Hamón, Caná huan hasta Sidón cati hueyi. ²⁹ Teipa ininepa quimacac huelta hasta altepeme Ramá huan Tiro, nopa altepet ica se hueyi tepamit. Huan teipa ininepa ajsic ipan nopa Hueyi At Mediterráneo ipan altepet Hosa. Ni tali nojquiya quipixqui Aczib, ³⁰ Uma, Afec huan Rehob.

³¹ Huajca ni tali quipixqui 22 altepeme ica nochi ininpilaltepehua huan quiselijque iteipan ixhuihua Aser huan ihuexca inintal elqui quej imiyaca inifamilias.

Inintal iteipan ixhuihua Neftalí

³² Huan ipan nopa chिकासемпа huelta mahuilti Josué ica piltetzitzi iixpa TOTECO, quinextili catijqui tali ma quinmaca iteipan ixhuihua Neftalí ica ihuexca quej imiyaca inifamilias.

³³ Huan ininepa pejqui ica altepet Helef ipan nopa hueyi ahua cuahuit nechca Alón Saanim huan yajqui Adami Neceb, Jabneel, Lacum, huan onquisa ipan hueyat Jordán. ³⁴ Teipa nopa nepamit yajqui para campa temo tonati huan panoc Aznot Tabor huan yajqui hasta Hucoc. Huan monepantiyaya ica sur ica inintal iteipan ixhuihua Zabulón, huan monepantiyaya ica inintal iteipan ixhuihua Aser ica campa temo tonati. Huan hueyat Jordán eliyaya inepa para campa quisa tonati. ³⁵ Huan nopa altepeme cati quinyahualtzaoque ica tepamit elqui Sidim, Zer, Hamat, Racat, Cineret, ³⁶ Adama, Ramá, Hazor, ³⁷ Cedec, Edrei, En Hazor, ³⁸ Irón, Migdal El, Horem, Bet Anat huan Bet Semes. Huajca inintal quipixqui 19 altepeme ica nochi ininpilaltepehua.

³⁹ Nochi ni altepeme ica nochi ininpilaltepehua quiselijque iteipan ixhuihua Neftalí ica nochi inihuejhueyi familias.

Inintal iteipan ixhuihua Dan

⁴⁰ Huan ica chicompa, mahuilti Josué ica piltetzitzi iixpa TOTECO, huan quinextili catijqui tali ma quinmaca iteipan ixhuihua Dan quej imiyaca inifamilias. Huajca iteipan ixhuihua Dan quiselijque ni altepeme:

⁴¹ Zora, Estaol, Ir Semes, ⁴² Saalabín, Ajalón, Jetla, ⁴³ Elón, Timnat, Ecrón, ⁴⁴ Elteque, Gibetón, Baalat, ⁴⁵ Jehud, Bene Berac, Gat Rimón, ⁴⁶ Mejarcón, Racón huan nojquiya nopa tali cati eltoc nechca Jope.

⁴⁷ Pero iteipan ixhuihua Dan noja amo moaxcatijtoyaj nochi nopa tali cati quiselijque para iniaxca. Huajca tejcoque huan quintehuijque cati itztoyaj ipan tali Lesem huan moaxcatijque huan quintamimictijque nopona. Huan mocajque para itztose nopona, huan teipa quitocaxti-que Lesem, Dan, quej itoca inihuejcapan tata.

⁴⁸ Huajca nochi ni altepeme ica nochi ininpilaltepehua elqui iniaxcahua iteipan ixhuihua Dan huan ihuexca inintal elqui quej imiyaca inifamilias.

Ital iteipan ixhuihua Josué

⁴⁹ Huan nopa israelitame tanque quixexlohuaj nopa tali ica nopa 12 huejhueyi familias. Huan teipa iyoca quimactilijque se tali Josué para iaxca.

⁵⁰ Huan quej TOTECO quiijto, quimacaque Josué cati tajtanisquía. Huajca Josué tajtanqui ma quimacaca altepet Timnat Sera campa tepeyo ipan tali Efraín. Huan quimacaque. Huajca Josué sempa quisencajqui nopa altepet huan nopona mocajqui para itztos.

⁵¹ Huajca elqui nopa totajtzi Eleazar, Josué huan nochi israelita tayanani cati mahuiltijque ica piltetzitzi iixpa TOTECO nechca altepet Silo huan quimactilijque nopa tali nopa huejhueyi familias. Huan mahuiltijque calixpa campa calaquij ipan nopa yoyon tiopamit campa TOTECO mopantiyaya Inihuaya. Huan tanque quixelohuaj nopa tali.

20

Altepeme campa hueli momanahuse
(Nm. 35:6-34; Dt. 4:41-43; 19:1-13)

¹ Teipa TOTECO quinojnotzqui Josué huan quilhui: ² “Xiquinilhui nopa israelitame ma quitapejpenica sequij altepeme cati anquintocaxtise ‘altepeme campa hueli momanahuisse’ quej achtohuiya nijnahuati Moisés.

³ Quej nopa sinta se masehuali quimictis seyoc, masque amo quinequiyaya quimictis, huelis momanahuiti ipan se ten nopa altepeme huan nopona amo aquí huelis quimictis para quitacuepilise por cati quichijtoc.

⁴ “Huan quema se tacat ajstiti para momanahuis ipan se altepet, monequi yas campa nopa caltemit para calaquis ipan nopa altepet campa itztoque nopa huehue tacame huan quinpohuilis nochi ten panotoc. Huan nopa tayacanani huelis quiselise ipan nopa altepet huan quimacase campa itztos.

⁵ Huan sinta se quitoquilis cati quinequi quicuepilis por cati quichijtoc, amo hueli quitemactilise. Monequi quimanahuisse pampa san panoc, amo quinequiyaya temictis huan amo quipiyayaya cualanti ihuaya cati mijqui.

⁶ Huan nopa tacat cati temicti monequi mocahuas ipan nopa altepet hasta quinextis iixpa se juez huan nopa masehualme nopona para amo elqui itajtacol cati panoc, huan injuanti nojquiya quijitose para amo itajtacol. Huan quema ya quitajtolseñajtoque teipa mocahuas nopona hasta miquis nopa totajtzi cati más hueyi. Huan teipa, quena, nopa temictijquet huelis tacuepilis ichaj ipan ialtepe campa quistejqui.”

⁷ Huajca nopa israelitame quitapejpenijque chicuase altepeme. Quitapejpenijque eyi ipan ni inaliyo para campa temo tonati huan eyi ipan ne seyoc inaliyo hueyat Jordán para campa quisa tonati. Campa temo tonati quitapejpenijque Cedés ica norte ipan tali Galilea ipan nopa tepeyo ipan ital Neftalí, huan altepet Siquem ipan tepeyo ipan ital Efraín huan altepet Quiriat Arba (cati nojquiya itoca Hebrón) ipan nopa tepeyo ipan ital Judá.

⁸ Huan ipan neca inaliyo hueyat Jordán para campa quisa tonati quitapejpenijque altepet Beser ipan huactoc tali ipan ital Rubén, huan altepet Ramot ten tali Galaad ipan ital Gad huan altepet Golán ipan tali Basán cati ama inintal nopa tajco iteipan ixhuhua Manasés. ⁹ Huajca ni altepeme quintocaxtijque “altepeme campa hueli momanahuisse”. Quiyocatalijque para israelitame huan para nopa seyoc tali ehuaní cati itztoyaj inihuaya ma ipan momanahuica sinta temictise masque amo quinequiyayaj. Huan se temictijquet motatis ipan se ten ni altepeme para iteixmatcahuá nopa mijcatzi cati quinamiqui para momacuepase amo huelise quitacuepilise hasta moquetzas nopona iixpa nopa juez huan nopa masehualme para ma quitajtolseñahuaca sinta nelía quinequiyaya quimictis o amo.

21

Inialtepehua iteipan ixhuhua Leví (1 Cr. 6:54-81)

¹ Huan nopa tayacanani ten iteipan ixhuhua Leví yajque quiitatoj nopa totajtzi Eleazar, ihuaya Josué huan nochi ne sequinoc tayacanani ipan nochi huejhueyi familias ten israelitame. ² Huan quincamanalhuijque nepa ipan Silo ipan tali Canaán huan quinilhuijque: “TOTECO quinahuati Moisés ma techmactili altepeme campa tiitztose huan potrereros campa tacuase to-tapiyallhua.” ³ Huajca nopa israelitame quineltocaque cati TOTECO tanahuatijtoya huan sesen hueyi familia quinmacac nopa levitame sequij altepeme ica ininpotrereros ipan inintal.

⁴ Leví huejcajquiya quinpixqui eyi itelpocahua: Coat, Gersón huan Merari. Huan achtohui mahuiltijque ica piltetzitzi para quimatise catijqui quiselise iteipan ixhuhua Coat cati inintoca eliyayaj coatitame. Huan nopa coatitame

cati nojquiya eliyayaj iteipan ixhuihua Aarón, se iteipan ixhui Coat, injuanti quiselijque 13 altepeme ipan nopa talme cati iniaxca iteipan ixhuihua Judá, Simeón huan Benjamín. ⁵ Pero nopa sequinoc coatitame cati amo eliyayaj iteipan ixhuihua Aarón quiselijque majtacti altepeme ipan nopa talme cati iniaxca iteipan ixhuihua Efraín, Dan huan nopa tajco iteipan ixhuihua Manasés.

⁶ Teipa mahuiltijque ica piltetzitzi para quimatise catijqui quiselise iteipan ixhuihua Gersón, huan quiselijque 13 altepeme ipan nopa talme cati iniaxca iteipan ixhuihua Isacar, Aser, Neftalí huan ne seyoc tajco iteipan ixhuihua Manasés cati mocajque ipan seyoc inaliyo nopa hueyat Jordán ipan tali Basán.

⁷ Huan sempa mahuiltijque ica piltetzitzi para quimatise catijqui quiselise iteipan ixhuihua Merari, huan quiselijque 12 altepeme ipan nopa talme cati iniaxca iteipan ixhuihua Gad huan Zabulón.

⁸ Huajca quej tenextili nopa piltetzitzi, nopa israelitame quinmactilijque iteipan ixhuihua Leví altepeme huan potrereros para inintapiyalhua quej TOTECO quinahuatijtoya Moisés.

⁹⁻¹⁰ Huajca nopa piltetzitzi quinexti para coatitame cati iteipan ixhuihua Aarón achtohui ma quiselica inialtepehua. Huajca iteipan ixhuihua Judá huan Simeón quiiyocatalijque altepeme para quinmacase.

¹¹ Huan quinmacaque Quiriat Arba ica nochi ipotreros ipan nopa tepeyo ipan ital Judá. Nopa altepet eliyaya itoca Arba pampa Arba elqui itata Anac huan nopa altepet nojquiya itoca Hebrón. ¹² Pero nopa milcahualme cati mocajqui más huejca ten nopa altepet huan ipilaltepehua quimacaque Caleb, icone Jefone.

¹³ Huan Hebrón nojquiya quiselijque iteipan ixhuihua Aarón huan eliyaya se altepet campa hueli momanahuis para ipan momanahuis se tacat cati temictijtoya.

Huan nojquiya iteipan ixhuihua Aarón quiselijque Libna, ¹⁴ Jatir, Estemoa, ¹⁵ Holón, Debir, ¹⁶ Aín, Juta, huan Bet Semes ica nochi ininpotrereros. Huajca nopa huejhueyi familias Judá huan Simeón quinmactilijque iteipan ixhuihua Leví chicnahui altepeme.

¹⁷ Huan nopa hueyi familia Benjamín quinmactilijque nahui altepeme huan ininpotrereros: Gabaón, Geba, ¹⁸ Anatot huan Almón.

¹⁹ Huajca ica nochi iteipan ixhuihua Aarón quiselijque 13 altepeme ica ininpotrereros.

²⁰ Huan nica eltoc inintoca nopa nahui altepeme ica ininpotrereros cati nopa hueyi familia Efraín quinmacac nopa sequinoc levitame cati eliyayaj iteipan ixhuihua Coat pero amo hualajque ipan Aarón teipa.

²¹ Quiselijque Siquem ipan nopa tepeyo ipan ital Efraín cati nojquiya eliyaya se altepet campa hueli momanahuis. Huan quiselijque Gezer, ²² Kibsaim huan Bet Horón ica ininpotrereros.

²³ Huan nopa hueyi familia Dan quinmacac nahui altepeme ica ininpotrereros: Elteque, Gibetón, ²⁴ Ajalón huan Gat Rimón.

²⁵ Huan nopa tajco hueyi familia Manasés ica campa temo tonati quinmacaque ome altepeme ica ininpotrereros: Taanac huan Gat Rimón.

²⁶ Huajca para nochi nopa sequinoc coatitame quiselijque majtacti altepeme ica ininpotrereros.

²⁷ Huan nopa levitame cati hualajque ipan icone Leví cati itoca eliyaya Gersón quiselijque ni altepeme:

Nopa tajco ten nopa hueyi familia Manasés cati itztoque ica campa quisa tonati quiselijque ome altepeme ica ininpotrerros: Golán ipan tali Basán, se altepet campa hueli momanahuisse, huan Beestera.

²⁸ Ten nopa hueyi familia Isacar quinselijque nahui altepeme ica ininpotrerros: Císón, Daberat, ²⁹ Jarmut huan En Ganim.

³⁰ Ten nopa hueyi familia Aser quinselijque nahui altepeme ica ininpotrerros: Míseal, Abdón, ³¹ Helcat huan Rehob.

³² Ten nopa hueyi familia Neftalí quinselijque eyi altepeme ica ininpotrerros: Cedés, se para ipan momanahuisse ipan tali Galilea, huan Hamot Dor huan Cartán. ³³ Huajca ica nochí nopa gersonitame quiselijque 13 altepeme ica ininpotrerros.

³⁴ Huan nopa levitame cati hualajque ten icone Leví cati itoca Merari quiselijque ni altepeme:

Ten nopa hueyi familia Zabulón quinselijque nahui altepeme ica ininpotrerros: Jocneam, Carta, ³⁵ Dimna huan Naalal.

³⁶ Ten nopa hueyi familia Rubén quinselijque nahui altepeme ica ininpotrerros: Beser, Jahaza, ³⁷ Cademot huan Mefaat.

³⁸ Ten nopa hueyi familia Gad quinselijque nahui altepeme ica ininpotrerros: Galaad, se altepet campa hueli momanahuisse, huan Mahanaim, ³⁹ Hesbón huan Jazer.

⁴⁰ Huajca ica nochí iteipan ixhuhua Leví cati hualajque ipan icone Merari huejcajquiya quiselijque 12 altepeme.

⁴¹ Huajca para nochí iteipan ixhuhua Leví san sejco quiselijque 48 altepeme, ⁴² huan sese altepet quipixqui ipotrerros.

TOTECO quichihua cati quijtohua

⁴³ Huajca TOTECO quinmactili nopa israelitame nochí nopa tali cati inihuya mocajqui inihuejcapan tatahua para quinmacasquía. Huan nopa israelitame nozona mocajque para itztose. ⁴⁴ Huan TOTECO quinmacac tasehuilisti quej quijto. Huan amo aquí huelqui inihuya moixnamiquis para quintehuis pampa TOTECO quinmacac chichahualisti para ma quintanica nochí inincualancaitacahua. ⁴⁵ Nochi nopa cuali tamanti cati TOTECO quinilhui quinmacasquía, nochí quinmactili.

22

Mocuetque ininchajchaj nopa soldados ten seyoc inaliyo Jordán

¹ Huan Josué quinsentili nopa soldados cati hualajque ipan nopa huehueyi familias Rubén, Gad huan nopa tajco iteipan ixhuhua Manasés cati mochanselhuijque campa quisa tonati, ² huan quinilhui: “Anquineltoaque nochí cati TOTECO quinahuati Moisés xijchihuaca. Huan nochí cati na nimechilhuitoc, anquichijtoque. ³ Amo anquintahuelcajtoque amoicnihua masque miyac tonali titatehuijtoque. Anquichijtoque nochí cati amoTECO Dios amechnahuatijtoc. ⁴ Ama amoTECO Dios techpalehuitoc ma titatanica huan techmacatoc tojuanti cati tiamoicnihua, tasehuilisti quej techilhui. Huajca ama sempa huelis anyase amochajchaj huan amoaltepehua ipan ne seyoc inaliyo hueyat Jordán para campa quisa tonati campa Moisés

itequipanojca TOTECO amechmactili amotal. ⁵ San ximomocuitahuica xijchihuaca senquisa nochi nopa tanahuatili cati Moisés amechmacac. Xiquicnelica TOTECO Dios huan xinemica ipan iojhui. Xijneltoquilica nochi itanahuatilhua huan san ya xijhueyichihuaca. Xijtequipanoca ica nochi amoyolo huan ica nochi amotonaltzi.”

⁶⁻⁷ Moisés quinmactilijtoya tajco iteipan ixhuhua Manasés nopa tali Basán campa guisa tonati, pero nese tajco iteipan ixhuhua Manasés quiselijque tali cati Josué quinmacac para campa temo tonati. Huan Josué quintiochijqui huan monahuatijque, ⁸ huan quinilhui: “Sempa xiyaca amochajchaj ica nochi amoricojyo cati anquitantoque ten tocalancaitacahua. Anquinpiyaj tahuel miyac tapiyalme, plata, oro, bronce huan yoyomit. Huajca quema anajsise, xiquinmajmacatij amoicnihua ipan amotal.”

⁹ Huajca nopa soldados cati eliyayaj iteipan ixhuhua Rubén, Gad huan tajco iteipan ixhuhua Manasés quincajteque nopa sequinoc israelitame ipan Silo ipan tali Canaán. Huan quiixcotonque hueyat Jordán huan sempa yajque ipan nopa tali cati TOTECO quiilhuijtoya Moisés ma quinmacaca.

Nopa taixpamit nechca hueyat Jordán

¹⁰ Pero ipan ojti quema noja itztoyaj ipan tali Canaán huan quinechchuiyayaj iteno hueyat Jordán para quiixcotonase, nopa soldados cati eliyayaj iteipan ixhuhua Rubén, Gad huan tajco iteipan ixhuhua Manasés quiquetzque se taixpamit cati nelía hueyi. ¹¹ Huan quema nopa israelitame campa temo tonati quicajque para iteipan ixhuhua Rubén, Gad huan Manasés quiquetztoyaj se taixpamit ipan inepa Canaán nechca hueyat Jordán, ¹² mosentilijque nochi nopona ipan altepet Silo para quintehuitij. ¹³⁻¹⁴ Pero achtohui quititanque Finees, icone totajtzi Eleazar, ica majtacti huejhueyi tayacanani, se tayacanquet ten sesen hueyi familia cati mocahuayayaj ipan nopa tali campa temo tonati. Huan ajsique campa itztoyaj iteipan ixhuhua Rubén, Gad huan tajco iteipan ixhuhua Manasés nopona ipan tali Galaad. ¹⁵ Huan quema ajsitoj ipan tali Galaad, quinilhuijque:

¹⁶ —Nochi israelitame cati quitepanitaj TOTECO techtitantoque ma timechtatzintoquilijij: ‘¿Para ten quej ni antajtacolchihuaj iixpa TOTECO Dios cati tiisraelitame tijtequipanohuaj huan anmoiyocacahuaj para amo anquinelto case tohuaya? Anquichijtoque se taixpamit para ma nesi ayecmo anquitepanitaj TOTECO. ¹⁷ ¿Amo anquielnamiqij nopa tajtacoli cati sequij tacame quichijque ipan Peor quema quinhueyichijque nopa taixcopincayome, huan TOTECO techtatzacuiliti ica se hueyi cocolisti? Huan hasta ama nopa tajtacoli noja techcocohua. ¹⁸ Huan ama amojuanti ¿nojquiya anquineqij anmoiyocatalise huan anmoyoltetilise ica TOTECO? Huan sinta anmotzontetilaj iixpa ama, mosta yaya cualanis ica nochi tiisraelitame. ¹⁹ Huan sinta amo anhuelij anquihueyichihuase TOTECO nopona ipan ne inaliyo Jordán campa guisa tonati pampa anquijitaj amo tapajpactic iixpa TOTECO nopa tali cati anquiselijque, huajca xipanoca hasta nese inaliyo ni hueyat campa TOTECO itzfoc tohuaya ipan iyoyon tiopa huan timechmacase tali campa tojuanti. Pero amo ximotzontetilica ica TOTECO yon ica tojuanti. Amo xijquetzaca se taixpamit para seyoc dios cati amo ya TOTECO Dios cati ya quiipiya itaixpa. ²⁰ ¿Amo anquielnamiqij quema Acán, icone Zera, tajtacolchijqui iixpa TOTECO huan quicuic cati quitelchijtoya TOTECO, huan TOTECO techtitanili miyac tatzacuiliti nochi tiisraelitame? Amo san mijqui Acán, pero mijque miyaqui israelitame por itajtacol.’

Quichijque nopa taixpamit pampa quiicnelaj TOTECO

²¹ Huajca iteipan ixhuihua Rubén, Gad huan tajco iteipan ixhuihua Manasés quinnanquilijque nopa tayacanani ten nopa huejhueyi familias ten israelitame huan quinilhuijque:

²² —TOTECO yaya cati quipiya nochi chicahualisti. Yaya cati quinhuaatli nochi cati sequinoc quintocaxtiaj dioses. San yaya TOTECO. Yaya quimati para melahuac tocamanal, huan xijmatica nochi amojuanti nojquiya. Tijtestigojquetzaj TOTECO para amo tijchijtoque ni taixpamit para timoiyocatalise huan timoyoltetilise. ²³ Yon amo tijchijtoque para tijcajtehuase TOTECO o para ipan tijmacase tacajcahualisti tatatili o ten harina, o para onca tayoltalili ihuaya. Sinta quej nopa, huajca amantzi ma techtatzacuiliti TOTECO. ²⁴ Pero tijchijque pampa tiquicneliaj. Timoiilhuijque huelis mosta o huicta amoteipan ixhuihua quinilhuijque toteipan ixhuihua para amo quipiyaj tanahuatili para yase quihueyichihuatiq TOTECO Dios cati tiisraelitame tijtequipanohuaj amohuaya nozona ipan amotal. Huelis quinilhuijque toteipan ixhuihua para amo teno quipiyaj amohuaya. ²⁵ Huelis moilhuijque para TOTECO quitalijtoc ni hueyat Jordán para techiyocahuase huan quinilhuijque toteipan ixhuihua ten tohuejhueyi familias Rubén, Gad huan tajco ifamilia Manasés para amo teno tijpiyaj ica TOTECO. Huan quej nopa amoteipan ixhuihua quinchihuase toteipan ixhuihua ma ayecmo quitepanitaca TOTECO.

²⁶ “Yeca timoiilhuijque más cuali ma tijchihuaca se taixpamit, pero amo para ipan tijtatise o tijtencahuase tacajcahualisti. ²⁷ ¡Amo! Tijchijque nopa taixpamit para ma quinelnamiquiliti amoixhuihua huan toteipan ixhuihua para tojuanti nojquiya tijhueyichihuaj TOTECO. Pero san tijcahuase tacajcahualisti iixpa TOTECO ipan iyoyon tiopa campa amojuanti. Huan amoconehua amo huelise quinilhuijque toconeua para amo quipiyaj tanahuatili para quihueyichihuase TOTECO amohuaya. ²⁸ Huan sinta amoixhuihua quej nopa quijitose, toixhuihua quinnanquilise: ‘Xiquitaca ni taixpamit cati totatahua quichijchijtoque quej TOTECO itaixpa, pero amo quichijque para tacajcahualisti tatatili. Quichijchijque san para technextilis para amojuanti huan tojuanti san se tiitztoque.’

²⁹ “Ma amo quema timoiilhuijque para timohuejcatalise ten TOTECO. Amo quema timohuejcachihuase ten ya, o tijchihuase se taixpamit para tojuanti totacajcahualis, yon para tacajcahualisti tatatili, yon tacajcahualisti ten harina. Pampa tijmatij san nopa taixpamit cati eltoc ipan iyoyon tiopa TOTECO Dios quinamiqui para tacajcahualisti.”

Quej nopa quijitajque.

³⁰ Huajca quema nopa totajtzi Finees huan nopa tayacanani ten nopa huejhueyi familias ten israelitame quicajque cati nopa soldados ten Rubén, Gad, huan tajco familia Manasés quijitajque, nelia pajque. ³¹ Huan nopa totajtzi Finees quinilhuijque:

—Ama tijmatij temachti TOTECO itztoc ica nochi tojuanti pampa tiqitaj amo antajtacolchijtoque iixpa ya. Huan yeca antechijcuenilijtoque se hueyi tatzacuiliti cati hueltosquia techajsisotquia.

³² Teipa Finees cati eliyaya icone nopa totajtzi Eleazar inihuaya nopa sequinoc tayacanani, quincajtejque nopa soldados ten Rubén, Gad huan tajco nopa familia Manasés ipan tali Galaad huan sempa yajque ipan tali Canaán, huan quinphuilijque nopa israelitame nochi cati panotoya. ³³ Huan nochi nopa israelitame nozona pajque miyac ica cati quijitajque, huan quicalitajque cati panotoya. Huan nopa israelitame quihueyichijque Toteco Dios, huan ayecmo moilhuijque para quintehuitij iniicnihua huan quisosolotij nopa tali campa itztoque iteipan ixhuihua Rubén huan Gad. ³⁴ Huajca

iteipan ixhuihua Rubén huan Gad quitocaxtalijque nopa taixpamit: “Nopa taixpamit cati techelnamiquiltis.” Pampa quiijtojqque: “Ijcatoc quej se testigo para techelnamiquiltis amojuanti huan tojuanti para san TOTECO yaya DIOS.”

23

Itamiya camanal Josué

¹ Huajca ica miyac xihuit TOTECO quinchijqui nopa israelitame ma quin-tanica nochi inincualancaitacahua huan teipa oncac tasehuilisti ipan inin-tal. Huan Josué ya eliyaya huehuentzi. ² Huajca quinnotzqui nochi jueces, huehue tacame huan tayacanani ipan nochi huejhueyi familias, huan nochi tequichihuani huan quinilhui:

“Nijpiya miyac xihuit huan ya nihuehuentzi. ³ Ya anquitztoque cati TOTECO Dios quichijtoc por tojuanti ica nochi nopa masehualme cati ejque ipan ni tali pampa TOTECO Dios tatehui por tojuanti. ⁴ Huan ama ya nimechmactili ica rifa nochi tali ten hueyat Jordán hasta nopa Hueyi At Mediterráneo campa oncalaqui tonati. Nimechmactili cati timoaxcatijtoque huan nochi cati noja polihui tijtanise. ⁵ Huan yaya TOTECO Dios amoixpa quinixqitis nochi cati noja itztoque nopona. Huan quichihuas para an-moaxcatise nopa tali quej yaya tohuaya mocajtoc.

⁶ “Huajca ximoyoltelica. Ximomocuitahuica para anquichihuase nochi cati ijcuilijtoc ipan itanahuatilhua Moisés. Amo ximoiyocacahuaca yon quentzi. ⁷ Amo teno xijpiyaca ica inijuanti cati noja itztoque ipan nopa tali. Amo xiquijtoaca inintoca ininteteyohua, yon amo xiquintestigojquetzaca inintaixcopincayohua. Amo xiquinhueyichihuaca, yon amo ximotancua-quetzaca iniixpa. ⁸ San xijtoquiliijtiyaca TOTECO Dios quej anquichijtoque hasta ama.

⁹ “Yaya TOTECO Dios quinixqitijtoc amoixpa miyac masehualme cati nelía tejtetique cati camanaltiyayaj miyac camanali huan itztoyaj ipan miyac huejhueyi altepeme. Huan hasta ama amo aqui huelqui amechtani. ¹⁰ San setzi ten amojuanti huelis quinmajmatis se mil tacame pampa TOTECO Dios tatehuía por amojuanti quej tohuaya mocajtoc quichihuas. ¹¹ Huajca ximomocuitahuica para san xiquicnelica yaya TOTECO Dios.

¹² “Sinta anmoiycacahuase ten TOTECO huan anmosejcotilise ica ini-juanti cati noja mocahuaj ipan ni talme, o sinta anmosihujtise ica ini-ichpocahua, o sinta anquincahuilise ma mocuilica se israelita ichpocat, ¹³ xijmatica para melahuac TOTECO Dios ayecmo quinixqitis ten nopa talme amoixpa. ¡Amo! Huan inijuanti elise quej taquetzti huan quichihuase xi-huetzica. Amechchihuilise quej elisquía se amechhuitequi ipan amocuitapa ica se lazo. Elise quej se huiztzi ipan amoixteyol cati tahuel cococ. Miyac amechcuesolmacase hasta anmiquise huan ayecmo anitztose ipan nopa tali cati TOTECO Dios amechmacatoc.

¹⁴ “Nechca eltoc para nimiquis quej pano ica nochi masehualme. An-quimatij ica nochi amoyoltzi huan ica nochi amotonaltzi para amo teno polijtoc cati TOTECO Dios amohuaya mocajtoc. Nochi cati quiiyto quichi-huasquía, yaya quichijtoc. ¹⁵ Huan quej TOTECO Dios amechtichijtoc ica nochi nopa cuali tamanti cati amechtencahuili, nojquiya TOTECO Dios amechhualiquilis nochi nopa fiero tamanti cati quiijtojqtoc panos hasta yaya amechmictis huan ayecmo huelis anitztose ipan nopa tali sinta amo anquito-quilise. ¹⁶ Huajca sinta anquixpanose nopa camanali cati TOTECO Dios quichijqui amohuaya huan cati amechnahuatijtoc huan anquinhueyichi-huase teteyome o anmotancuaquetzase iniixpa, TOTECO nelía cualanis ica

amojuanti. Huan yaya amechmictis huan nimantzi amechtampilohuiltis ipan ni tali cati amechmacatoc.”

24

Toteco quiompahui nopa camanal sencahuali ica israelitame

¹ Teipa Josué quinsentili nochi israelitame ten nochi huejhueyi familias ipan altepet Siquem, ica nochi huehue tacame, nochi tayacanani, jueces huan tequichihuani. Huan nochi monextitoy iixpa Toteco Dios. ² Huan Josué quincamanalhui nopa israelitame huan quiniilhui:

—Ya ni cati TOTECO Dios cati tiisraelitame tijtequipanohuaj amechilhuía: ‘Nelía huejcajqüiya amohuejcapan tatahua mocahuayayaj nopona ipan seyoc inalayo hueyat Eufrates para campa quisa tonati, huan quinhueyichihuayayaj teteyome quej elisquía Dios. Huan Taré, cati elqui itata Abraham huan Nacor, nojqüiya ya nopa quichijqui. ³ Pero na nijtapejpeni amohuejcapan tata Abraham cati itztoya ipan seyoc inalayo hueyat Eufrates, huan nijyacanqui campa hueli ipan tali Canaán huan nijmacac icone, Isaac, para ipan ya niquinmiyaquilis iteipan ixhuihua. ⁴ Huan nijmacac Isaac ome iconehua, Jacob huan Esaú. Huan nijmactili Esaú nopa tali Seir. Huan Jacob cati nojqüiya itoca Israel, huan itelpocahua cati elque amohuejcapan tatahua teipa yajque ipan tali Egipto. ⁵ Teipa niquintitanqui Moisés huan Aarón huan ica injuanti, niquintitanili miyac taohuijca yot nopa tali Egipto ehuan. Huan teipa niquinquixti ⁶ amohuejcapan tatahua ten tali Egipto. Huan niqunihualiac hasta ajsitoy campa nopa Hueyi At Chichiltic. Huan quintoquiliyayaj nopa egiptome ica inintatehuijca carros huan inincahuayojhua. ⁷ Pero amohuejcapan tatahua techtazjtzilijque niininTECO para ma niquinpalehui. Huan nijchijqui ma onca se tzintayohuilot tatajco ten campa amotatahua huan nopa egiptome. Huan nijchijqui nopa hueyi at ma huala ininpani nopa egiptome huan quintamitzajqui. Huan anquimatij nochi cati niqunichihui nopa Egipto ehuan.

“Huan teipa para miyac xihuit anitztoyaj ipan nopa huactoc tali campa amo teno onca. ⁸ Huan teipa nimechhualiac hasta inintal nopa amorreos cati itztoyaj ipan nopa seyoc inalayo Jordán para campa quisa tonati. Huan injuanti amechtehuijque, pero na nimechpalehui xiquintanica. Niquint-zontamilti amoixpa huan anmoaxcatijque nopa tali. ⁹ Huan quema Balac, icone Zipor cati elqui inintanahuatijca moabitame, pejqui amechtehuisnequi anisraelitame; yaya tanahuati ma quinoztatij Balaam, icone Beor, para ma amechtelchihua. ¹⁰ Pero amo nijcajqüi ma amechtelchihuaqui Balaam. Nijchihualti ma amechtiochihua miyac hueltas huan quej nopa nimechmanahui ten Balaam.

¹¹ “Teipa anpanocoy hueyat Jordán para ni seyoc hueyanali huan anajsi que altepet Jericó. Huan nopa Jericó ehuan amechtehuijque huan nojqüiya amechtehuijque nopa amorreos, ferezeos, cananeos, heteos, gerge-seos, heveos huan jebuseos, pero na nimechmactili amomaco. ¹² Huan niquintitanqui miyac cuaxicojme ma amechyacantiyaca huan quinquixtijque nopa ome tanahuatiani ten amorreos ihuaya inimasehualhua. Na nimechtanili amocualancaitacahua. Amo anquintanque ica amomacheta huan amochicahualis. ¹³ Huan nimechmactili tali ipan cati amo antequitoyaj. Nimechmactili altepeme para ipan anitztose cati amo anquinchitoyaj. Huan nimechmacac xocomeca mili xocomeca at huan olivo cuame para amoaceite cati ama anquitequihúaj, pero amo anquintojque.’ Quej nopa quijito TOTECO.”

Monequi nochipa tijtequipanose TOTECO

Huajca nojquiya Josué quinilhui:

¹⁴—Huajca ama xijtepanitaca huan xiquicnelica TOTECO. Xijtequipanoca ica nochi amoyolo huan ica temachili. Xiquinquixtica huan xiquinmajcahuaca nochi nopa teteyome cati amohuejcapan tatahua quihueyitepanitaque ipan seyoc inaliyo Eufrates huan ipan tali Egipto. San TOTECO xijtequipanoca. ¹⁵ Pero sinta amo anquinequij anquitequipanose TOTECO, huajca xijtapejpenica ama ni tonali ajquiya anquitequipanose. ¿Anquinhueyichihuase nopa teteyome cati amohuejcapan tatahua quintepanitaque huejcaquiya ipan seyoc inaliyo nopa hueyi hueyat o inintaixcopincayohua nopa amorreos campaa ama anitztoque? Pero xijmatica ya ni: Na ica nochi nochampoyohua tijtequipanose TOTECO.

¹⁶ Huajca nochi nopa israelitame tananquilijque:

—Amo quema timoiyocatalise ten TOTECO. Amo quema tijcahuase huan tijhueyichihuase seyoc. ¹⁷ Elqui yaya TOTECO Dios cati quinquixti tohuejcapan tatahua ipan tali Egipto campaa tequipanohuayayaj san tapic. Yaya cati quichijqui miyac huejhueyi tiochicahualnescayot para tojuanti. Yaya cati techmocuitahujtoc ten tocualancaitacahua campaa hueli tinentoque ipan tohueyi ojhui hasta ama. ¹⁸ Yaya TOTECO cati quinquixti toixpa miyac masehualme ipan miyac talme. Nojquiya quinquixti nopa amorreos cati itztoyaj ipan ni tali. Huajca tojuanti nojquiya tijtequipanose huan tijhueyichihuase san TOTECO Dios.

¹⁹ Huajca Josué quinilhui nochi cati nopona itztoyaj:

—Amo huelis anquitequipanose TOTECO quej hueltzi, pampaa yaya tatzejtzelolitic. Huan yaya amo quiiyohuía se cati quiiytohua quitequipanohua sinta nojquiya quintepanita teteyome cati amo nelia Dios. Ya nopa quicualancaita. Sinta anquitepanitaj seyoc, amo amechtapojpolhuis. ²⁰ TOTECO nochipa itztoya cuali amohuaya, huajca amo xijcahuaca TOTECO yon amo xijtequipanoca seyoc. Sinta quej nopa anquichihuase, yaya moyolcuepas huan amechtatzacuiltis hasta amechfamimictis.

²¹ Pero nochi nopa masehualme quinanquilijque Josué:

—¡Amo quema tijchihuase! San TOTECO tijtequipanose.

²² Huajca Josué quinilhui nochi nopa miyaqui israelitame:

—Huajca ama antestigos para melahuac cati anquiijtojqtoque. Anquites-tigojqquetztoque TOTECO para anquitapejpenijtoque anquitequipanose san ya.

—Tojuanti titestigos —injuanti tananquilijque.

²³ Huajca Josué quinilhui:

—Sinta anquinpiyaj teteyome, nochi xiquinmajcahuaca. Huan ximoyolcuepaca huan xijtoquilica san TOTECO Dios cati tiisraelitame tijtequipanohuaj.

²⁴ Huan nochi nopa israelitame quinanquilijque Josué:

—San TOTECO Dios tijtequipanose huan san yaya tijneltoquilise.

²⁵ Huajca nopa tonali nepa nechca altepet Siquem, Josué quichijqui se camanal sencahuali inihuaya israelitame huan TOTECO, huan quinilhui nopa tanahuatilme huan tamachtili cati monequi quineltofase. ²⁶ Huan Josué quiijcuiolo nochi ni tanahuatilme cati nopa masehualme quiijtojqtoque quineltofase ten nopa Amatapohuali ten Itanahuatilhua Toteco Dios. Huan Josué tanahuati ma quihualicaca se hueyi tet huan ma quiquetzaca nopona campaa nopa ahuat nechca iyoyon tiopa TOTECO. ²⁷ Huan Josué quinilhui nochi nopa israelitame:

—Ni tet cati tijquetzaj nica quinextis nochi cati panotoc ama. Quej se testigo quichihua, quicajqui nochi camanali cati TOTECO techilhui, huajca sinta amo anquichihua quej anquijtojqe, yaya amechtatelhuis.

²⁸ Huan teipa Josué quinnahuatijtejqe nopa israelitame huan sesen ya-jqui ipan ital cati quiselijtoyaj para iniaxca.

*Mijqui Josué
(Jue. 2:6-10)*

²⁹ Huan teipa mijqui Josué, icone Nun, cati eliyaya itequipanojca TOTECO. Huan quipixqui 110 xihuit quema mijqui. ³⁰ Huan quitojqe itacayo nechca altepet Timnat Sera, ipan ten ya ital cati quiselijtoya ipan nopa tepeyo cati eliyaya iniaxca iteipan ixhuhua Efraín. Campa quitojqe mochahua ica norte ten tepet Gaas.

³¹ Huan nopa israelitame quitequipanojqe TOTECO nochi tonali quema noja itztoya Josué huan quema noja itztoyaj nochi nopa huehue tacame cati quiixmatque Josué huan quiitztoyaj nopa huejhueyi tiochicahualnescayot cati TOTECO quichijqui para nopa israelitame.

Quitapachojque iomiyo José

³² Huan nojquiya nopa israelitame quihualicatoyaj iomiyo José ten tali Egipto, huan quitojqe nozona nechca Siquem. Quitojqe ipan nopa tali cati inihuejcapan tata Jacob, cati huejcajquiya mijqui, quincohuilijtoya iconehua Hamor ica 100 plata tomi. (Ni tali teipa elqui iniaxca iteipan ixhuhua José.)

Mijqui nopa totajtzi Eleazar

³³ Huan nojquiya mijqui Eleazar cati elqui icone Aarón, huan quitojqe nechca altepet Guebéa ipan ital Finees cati eliyaya icone. Huan ital elqui ipan nopa tachiquilme cati quiselijque iteipan ixhuhua Efraín.

Jueces

Iteipan ixhuihua Judá amo quitantoyaj nochi inintal

¹ Quema ya mictoya Josué, nopa israelitame quitatzintoquilijque TOTECO taya ipaquilis para quimatise catijqui hueyi familia isoldados achtohui yase para quintehuitij nopa cananeos.

² Huan TOTECO quinnanquili: “Achtohui monequi yase tatehuitij nopa soldados ipan nopa hueyi familia Judá. Huan inijuanti tatanise pampa nijtalijtoc inimaco nopa tali.”

³ Huan nopa tayacanani ipan nopa hueyi familia Judá quinnotzque nopa tayacanani ipan nopa hueyi familia Simeón huan quinilhuijque: “Xihualaca huan techpalehuica para tiquintehuitij nopa cananeos cati itztoque ipan nopa tali cati elis toaxca para timoaxcatise. Huan teipa timechpalehuise tiquintehuitij cati itztoque campa elis amoaxca.”

Huan isoldados Simeón nimantzi motemacaque para quinpalehuitij.
⁴ Huan isoldados Judá tayacantiyajque huan TOTECO quichijqui ma quintanica nopa cananeos huan ferezeos. Huan san ipan altepet Bezec, quinmictijque 10 mil tacame. ⁵ Quipantitoy Tanahuatijquet Adoni Bezec ipan altepet Bezec quema tatehuiyayaj, ⁶ pero yaya cholo. Huan isoldados Judá huan Simeón quitoquilijque huan quiitzquitoj huan quitzontequilijque ihueyi macpilhua huan ihueyi xocpilhua. ⁷ Huajca Tanahuatijquet Adoni Bezec quiijto: “Na niquintzontequilijtoc 70 tanahuatiani inihueyi macpilhua huan inihueyi xocpilhua, huan niquinchihualti ma quicuaca san nopa panpayaxti cati huetziyaya nomesatantita, huan ama Toteco Dios techcuelijtoc. Techchihuilijtoque san se quej na niquinchihuii sequinoc.”

Huan teipa nopa soldados quihuicaque altepet Jerusalén huan nozona mijqui.

Iteipan ixhuihua Judá quitanque Hebrón huan Jerusalén

⁸ Isoldados Judá nojquiya quinmictijque miyac Jerusalén ehuan ica macheta. Quitanque nopa altepet huan quitatijque.

⁹ Teipa isoldados Judá yajque quintehuitoy nopa cananeos cati itztoyaj ipan tepeme huan ipan tali Neguev. Nojquiya quintehuitoy campa nopa tamayamit nechca hueyi at. ¹⁰ Huan nojquiya yajque quintehuitoy nopa cananeos cati itztoyaj ipan altepet Hebrón. (Achtohuiya Hebrón itoca eltoya Quiriat Arba.) Huan nojquiya quinmictijque nopa huejcapantique tacame Sesai, Ahimán huan Talmai.

Otoniel quitanqui altepet Debir (Jos. 15:15-19)

¹¹ Teipa quitehuitoy nopa altepet Debir cati achtohuiya quitocaxtiyayaj Quiriat Sefer. ¹² Huan Caleb quinilhui: “Yaya cati tayacanas para quitehuiti huan quitanis altepet Debir, na nijmactilis noichpoca Acса para ma eli isihua.”

¹³ Huan tayacanqui para tataniti Otoniel cati eliyaya icone Cenaz cati eliyaya iicni teipan ejquet Caleb. Huajca Caleb quimactili Otoniel iichpoca para ma eli isihua. ¹⁴ Huan quema nopa ichpocat Acса yahuiyaya ihuaya Otoniel, quicamanalhui ihuehue pampa moilhui cuali ma quitajtanjtehua itata se quentzi más tali. Huajca teipa nopa ichpocat iseltitzi temoc ten

iburro huan quinechcahuito itata. Huan quema Caleb quiitac iichpoca, quitatzintoque:

—¿Taya tijnequi?

¹⁵ Huajca nopa ichpocat quiillhui itata:

—Tijpoxtoc hueyi moyolo ica na huan techmacatoc se tali campa nopa huactoc tali Neguev. Pero se favor, nojquiya techmaca se quentzi tali campa meya at.

Huajca Caleb quimacac nopa amelme cati eltoya ica tatzinta huan ica huejcapa.

Cati quitanque isoldados Judá huan Benjamín

¹⁶ Huan quema isoldados nopa hueyi familia Judá calajque ipan nopa huactoc tali ica tatzinta campa itoca Arad, nojquiya yahuiyayaj inihuaya iteipan ixhuihua imontaj Moisés cati inintoca ceneos. Pampa nopa ceneos quistejque campa quipixtoyaj ininchaj ipan nopa altepet ten apachij cuame huan yajque mocahuatoj inihuaya imasehualhua nopa hueyi familia Judá ipan inintal.

¹⁷ Huan teipa isoldados Judá yajque inihuaya isoldados nopa hueyi familia Simeón san quej mocajtoyaj huan quintehuitoj nopa cananeos cati itztoyaj ipan altepet Sefat huan quintamimictijque. Huajca nopa altepet quitocaxtijque Horma (Horma quinequi quijitos Tamimictoque.) ¹⁸ Huan isoldados Judá nojquiya quintanque nopa altepeme Gaza, Ascalón huan Ecrón ica nochi nopa pilaltepertziti cati eltoya nechca. ¹⁹ Huan TOTECO nochipa itztoya ihuaya iteipan ixhuihua Judá, huan yeca quinzontamiltijque nochi masehualme cati itztoyaj campa tepeyo huan mocuilijque nopa tali. Pero amo huelque quinquixtiaj injuanti cati itztoyaj ipan tamayamit pampa quipixtoyaj tepos carrojme.

²⁰ Huan nopa altepet Hebrón quimactilijque Caleb quej Moisés quijtojtoya ma quichihuaca. Huan itztoyaj nopona iniixhuihua nopa eyi itelpocahua Anac cati tahuel huejcapantique, pero Caleb quinnimicti.

Benjaminitame amo quitantoyaj nochi inintal

²¹ Pero iixhuihua Benjamín amo huelque quinquixtiaj ipan Jerusalén nopa jebuseos. Yeca nopa jebuseos huan iixhuihua Benjamín itztoque san sejco nopona hasta ama.

Iteipan ixhuihua José quitanque Betel

²² Nojquiya iixhuihua José quitehuitoj altepet Betel huan TOTECO itztoya inihuaya. ²³ Huan quintitanque tacame ixtacatzí ma tachiyatij ipan altepet Betel. (Betel achtohuuya itoca eliyaya Taahuili.) ²⁴ Huan nopa tacame cati yajque tajtachiyatoj quitaque se tacat cati quisayaya ipan nopa altepet huan quiillhuijque: “Sinta technextilis quenicatza huelis ticalaquise ipan ni altepet, amo teno timitzchihuilise quema tijtanise.”

²⁵ Huan quinnextili canque huelis calaquise ipan nopa altepet. Huan teipa iixhuihua José calajque huan quintamimictijque ica macheta nochi cati itztoyaj nopona. Pero nopa tacat cati quinpalehui quicajque ma yahui ica nochi ifamilia. ²⁶ Huan nopa tacat yajqui ipan inintal heteos, huan nopona quipehualti seyoc altepet huan quitocaxti Taahuili. Huan hasta ama quej nopa itoca.

Iixhuihua Manasés amo quitanque nochi inintal

²⁷ Nojquiya iixhuihua Manasés amo huelque quinquixtiaj cati itztoyaj ipan altepeme Bet Seán, Taanac, Dor, Ibleam, Meguido huan pilaltepertziti

nechca. Yeca nopa cananeos noja mocajque ipan nopa tali. ²⁸ Pero quema nopa israelitame pejqe motananaj huan quipiay chicahualisti, quinchihualtiqque nopa cananeos ma quinquipanoca san tapic, pero amo huelque quinquixtíaj.

²⁹ Nojquiya iixhuihua Efraín amo huelque quinquixtíaj nopa cananeos cati itztoyaj ipan altepet Gezer. Huajca mocajque nopona inihuaya.

Cati qitanque nopa sequinoc huejhueyi familias

³⁰ Nojquiya iixhuihua Zabalón amo huelque quinquixtíaj cati itztoyaj ipan altepet Qutrón, yon ipan Naalal. Huajca nopa cananeos nopona mocajque inihuaya, pero nopa israelitame quinchihualtiqque ma quinquipanoca san tapic.

³¹ Nojquiya iixhuihua Aser amo huelque quinquixtíaj cati itztoyaj ipan altepeme Aco, Sidón, Ahlab, Aczib, Helba, Afec huan Rehob. ³² Huajca iixhuihua Aser mocajque inihuaya nopa cananeos cati itztoyaj ipan nopa tali pampa amo huelque quinquixtíaj.

³³ Nojquiya iixhuihua Neftalí amo huelque quinquixtíaj cati itztoyaj ipan altepet Bet Semes, yon ipan Bet Anat. San mocajque nopona inihuaya nopa cananeos pero quinchihualtiqque ma quinquipanoca chicahuac.

³⁴ Nopa amorreos quinchihualtiqque iixhuihua Dan ma mochahuaca ipan tepeme huan amo quincahuilijque ma itztoca campa tamaya. ³⁵ Huan nopa amorreos teipa moaxcatijque nopa tepet Heres, huan altepeme Ajalón huan Saalim nojquiya. Pero quema iixhuihua José pejqe motananaj, quinchihualtiqque nopa amorreos ma quinquipanoca chicahuac. ³⁶ Huan ininepa nopa amorreos pejtejqe campá nopa taixtejcolis cati itoca Acrabim huan yajqui hasta Sela huan más ica huejcapa.

2

Iilhuicac ejca TOTECO monexti ipan Boquim

¹ Huan iilhuicac ejca TOTECO hualajqui ten altepet Gilgal huan ajsic ipan altepet Boquim, huan quinihuito nopa israelitame: “Na nimechquixti ipan tali Egipto huan nimechhualicatoc ipan ni tali cati inihuaya nimocajqui niquinmacas amohuejcapan tatahua. Nimechilhui amo quema nijsosolos nopa camanal sencahuali cati nijchijqui amohuaya. ² Nojquiya nimechilhui para amojuanti amo quema xijchihuaca yon se camanali inihuaya nopa masehualme cati nica itztoque. Nimechilhui monequi xijsosoloca inintaixpa. Pero amo antechneltoquilijque cati nimechnahuati. ¿Para ten ya nopa anquichijque? ³ Huajca pampa amo antechneltocatoque, ama amo niquinquixtis amoixpa nopa masehualme cati ehuan ipan nopa altepeme. Huan inijuanti amechcuesolmacase quej se huitzti cati calagui ipan amoicxi, huan inintaixcopincayohua amechmasiltise ipan tajtacoli.”

⁴ Huan quema iilhuicac ejca TOTECO tanqui camanalti, nochi nopa israelitame pejqe chocaj chicahuac. ⁵ Huan nopona quitocaxtijque Boquim. (Boquim quinequi quijtos Chocani.) Huan nopona quitencajqe tacajchualisti iixpa TOTECO.

Josué mijqui
(Jos. 24:29-31)

⁶ Huan Josué quinmajcajqe nochi nopa israelita soldados, huan sese ten inijuanti yajqui para moaxcatiti nopa tali cati quiselijtoya. ⁷⁻⁹ Huan Josué, icone Nun, cati eliyaya itequipanojca TOTECO, mijqui quema quipiyayaya 110 xihuit. Huan quitojqe ipan ital ipan altepet Timnat Sera campa nopa

tepeme ipan inintal iixhuihua Efraín. Eltoya ica norte ten tepet Gaas. Huan nopa israelitame quihueyichihuayayaj TOTECO nochi tonali quema Josué itztoya. Nojquiya quihueyichijque teipa quema noja itztoyaj sequij huehue tacame cati quitzttoyaj nopa huejhueyi tiochicahualnescayot cati TOTECO quinchihuilil israelitame achtohuiya.

¹⁰ Pero teipa tami mijque nochi nopa masehualme cati ipan ininemilis quitzttoyaj Josué. Huan iniixhuihua cati yancuic tacajtijayque, amo quixmatiyayaj TOTECO yon amo quimatiyayaj nopa huejhueyi tamanti cati quinchihuilijtoya israelitame.

Nopa israelitame quitahuelcajque TOTECO

¹¹ Yeca iniixhuihua nopa israelitame pejque quichihuaaj cati amo cuali iixpa TOTECO. Pejque quinhueyichihuaaj nopa taixcopincayome ten Baal ipan sese altepet. ¹² Quena, quitahuelcajque TOTECO, yaya cati eliyaya inDios inintatahua huan cati quinquixtijtoya ipan tali Egipto. Huan quintoquilijque taixcopincayome cati amo ya dios huan quinhueyichijque ininteteyohua nopa masehualme cati itztoyaj nopona nechca. Quej nopa quichijque para TOTECO ma cualani ica inijuanti. ¹³ Quena, nopa israelitame quicajtejque TOTECO huan quinhueyichijque nopa teteyome Baal huan Astarot. ¹⁴ Huajca TOTECO tahuel cualanqui ica inijuanti huan quintemactili inimaco tachtequini huan quintami tachtequilijque. Huan nojquiya Toteco quintemactili inimaco inincualancaitacahua huan yeca ayecmo huelque quinxnamiquij para quintehuse.

¹⁵ Huan campa hueli campa yahuiyayaj nopa israelitame para tatehuitij, TOTECO quintzacuiliyaya para amo huelis tatanise. TOTECO quinilhuijtoya para quinpanosquía huejhueyi taijyohuilisti. Quena, quintajtolcahuili para quej nopa elis huan yeca quej nopa ininpantic.

TOTECO pejqui quinquitalía jueces ipan tali Israel

¹⁶ Teipa TOTECO quintali jueces para quinmanahuse israelitame inimaco inincualancaitacahua. ¹⁷ Pero amo quintacaquilijque nopa jueces. Quinhueyichijque taixcopincayome cati amo Dios huan motancuaguetzque inixpa. Inihuejcapán tatahua quitoquilijque itanahuatilhua TOTECO, pero inijuanti, amo. Nimantzi quicajtejque. ¹⁸ Huan quema TOTECO quitananayaya se juez para quinyacanas, ihuaya itztoya nopa juez para quipalehuis. Huan quinmanahui israelitame inimaco inincualancaitacahua nochi tonali quema nopa juez itztoya. TOTECO quintasojtayaya huan quinmanahuiyaya israelitame pampa quincacuiyaya quenicatza axtiyayaj quema quintaijyohuiltiyayaj inincualancaitacahua. ¹⁹ Pero quema sesen juez miquiyaya, nopa israelitame sempa moicancuepayayaj huan más fiero tachihuayayaj que inintatahua quichijtoyaj. Quinquipanohuayayaj huan quinhueyichihuayayaj taixcopincayome cati amo ya dios. Amo quinequiyayaj quicahuase iojhui cati fiero, yon nopa fiero tamanti cati quichihuaayaj.

²⁰ Huan TOTECO tahuel cualanqui ica nopa israelitame huan quijito: “Ni masehualme quiixpanotoque nopa camanali cati nijchijqui inihuaya inintatahua huan amo quinequij techneltocase, ²¹ huajca na ayecmo niqin-palehuis para quinquixtise nopa masehualme ipan campa hueli altepeme cati Josué ayemo quintantoya quema mijqui.”

²² Huan TOTECO quincahuili ma itztoca nopa masehualme ipan inintal para quinejyecos israelitame. Quinequiyaya quitas sinta noja quitoquilise iojhui quej achtohuiya quichijtoyaj inihuejcapán tatahua, o amo. ²³ Huan yeca TOTECO amo quicahuili Josué ma quinquixti nopa masehualme ipan

campa hueli altepeme pampa amo quinmactili imaco. San quincahuili ma mocahuaca nozona campa itztotaj nopa israelitame.

3

TOTECO quincajtejqui sequinoc masehualme ipan nopa tali

¹ Ya ni nopa masehualme huan inintanahuatijcahua cati quincajqui TOTECO para ica quinyeyecos nopa israelitame pampa nopa israelitame cati itztotaj ipan nopa tonali amo teno quimatiyayaj ten tatehuilisti. Inijuanti ayemo eliyayaj huejhueyi para tatehuise quema inintatahua tatehuijque para quitanise tali Canaán. ² Yeca TOTECO quincahuili ni israelitame ma tatehuica para quitanise inintal para quej nopa quinelto case pampa ayemo quimatiyayaj ten tatehuilisti. ³ TOTECO nozona quincajqui nopa filisteos ica macuulti inintanahuatijcahua, huan sequinoc masehualme cati inintoca cananeos, sidonios huan heveos cati itztotaj ipan nopa tepeme cati pejqui ica Líbano ipan tepet Baal Hermón huan onajsi ipan altepet Hamat. ⁴ TOTECO quinequiyaya ni masehualme ma quinyeyecoca israelitame para quuitas sinta nelia quinelto case nopa tanahuatilme cati quinmacatoya inihuejcapan tatahua ica Moisés, o amo quinelto case.

⁵ Huan nopa israelitame itztotaj inihuaya nopa cananeos, heteos, amorreos, ferezeos, heveos huan jebuseos. ⁶ Huan nopa israelitame motahuicaltijque inihuaya nopa sequinoc xinacti masehualme. Huan ica ya nopa nojquiya pejque quinhueyichihua ininteteyohua.

Otoniel, nopa achtohui juez

⁷ Huajca nopa israelitame quichijque cati amo cuali iixpa ininTECO Dios huan ayemo quielnamijque. Huan pejque quinhueyichihua nopa taixcopincayome cati itoca Baal huan Asera.

⁸ Huan yeca TOTECO pejqui cualani ica nopa israelitame huan quinmactili imaco Tanahuatijquet Cusan Risataim ten tali Mesopotamia, huan nopa israelitame quitequipanojque san tapic para chicueyi xihuit. ⁹ Huajca nopa israelitame pejque quitzajtzilíaj TOTECO huan TOTECO quitananqui se tamanahuijquet para ma quinmanahui. Yaya itoca Otoniel huan elqui icone Cenaz cati eliyaya iicni teipan ejquet Caleb. ¹⁰ Toteco Itonal motali ipan Otoniel para quinyacanas, huan Otoniel elqui juez huan quintajtolsencajqui nopa israelitame. Huan quema yajqui para tatehuiti ica inincualancaitacahua, Toteco quipalehui ma quitani Tanahuatijquet Cusan Risataim cati hualajqui ten tali Mesopotamia.

¹¹ Huan teipa oncac tasehuilisti ipan nopa tali para 40 xihuit. Huan teipa mijqui Otoniel cati eliyaya icone Cenaz.

Aod, nopa ompa juez, quinmanahui israelitame ten moabitame

¹² Huan nopa israelitame sempa tajtacolchijque iixpa TOTECO. Huan yeca TOTECO quimacac más chichualisti Eglón nopa tanahuatijquet ipan tali Moab quema quintehuiyaya israelitame pampa amo cuali quichijtoyaj iixpa. ¹³ Huan Eglón quinnotzqui nopa amalecitame huan amonitame huan quintehuijque nopa israelitame huan quintanque huan moaxcatijque nopa altepet ten apachij cuame. ¹⁴ Huan nopa israelitame quitequipanojque Eglón san tapic para 18 xihuit.

¹⁵ Huan nopa israelitame pejque quitzajtzilíaj TOTECO huan TOTECO quitananqui se tamanahuijquet para ma quinyacana huan ma quinmanahui. Huan nopa tacat itoca eliyaya Aod huan elqui icone Gera se iixhui Benjamín. Huan yaya maarravestic. Huan se tonali nopa israelitame quititanque

Aod ma quihuiquili iniimpuesto nopa Tanahuatijquet Eglón. ¹⁶ Huan Aod mochihuilijtoya se macheta cati oncac tatequi cati san tajco metro ihuehueyaca, huan quilpi itzinquechta tatzinta iyoyo ica inejmat. ¹⁷ Teipa quihucac nopa tomi huan quimacato Tanahuatijquet Eglón ipan tali Moab. Huan Tanahuatijquet Eglón eliyaya se tacat cati tomahuac. ¹⁸ Huan quema Aod ya quimacatoya nopa tomi, quisqui para ichaj. Pero teipa quema Aod ajsito altepet Gilgal campa oncayaya teteyome, quinmajcajqui nopa tacame cati ihuaya yahuiyayaj. ¹⁹ Huan mocuetqui iseltitzi campa itztoya Tanahuatijquet Eglón huan quilhuito:

—Tanahuatijquet, nijpiya se camanali cati monequi nimitzilhuis ixtacatzí.

Huajca Tanahuatijquet Eglón quinilhui itequipanojcahua ma amo molinica huan ma quisaca calteno. ²⁰ Huan Tanahuatijquet Eglón mosehuijtoya iseltitzi ipan icuaroto huejcapa campa más tasesestoc, huan nozona Aod calajqui huan quilhui:

—Ni camanali cati nijhualica, techmacatoc Toteco Dios para ta.

Huan Tanahuatijquet Eglón moquetztiquisqui campa mosehuijtoya ipan isiya para quiselis. ²¹ Huajca Aod cati maarravestic quiquixti imacheta cati quitalihjtoya itzinquechta ica inejmat huan quisentapalhuili Tanahuatijquet Eglón ipan iijti. ²² Quisentapalhuili chichahuac hasta itzincuaoyo nopa macheta tami calaquito ipan iijti. Huan pampa tomahuac, motzajqui hasta ayecmo nesqui nopa macheta huan Aod ayecmo quiquixtili. Huan nopa macheta quisqui itzinpa. ²³ Teipa Aod quisqui campa calajqui ipan nopa cuarto. Huan quitzajqui nopa caltemit ica llaves huan cholo ipan ventana.

²⁴ Huan quema ya quistoya Aod, hualajque itequipanojcahua Tanahuatijquet Eglón huan quitaque tzactoc icalte, huan moilhuijque huelis cuatenpanohua huan yeca itztoya nozona ipan nopa cuarto, yeca san quichixque. ²⁵ Teipa quema ya cuesijtoyaj quichiyaj huan quitaque amo quisayaya huan amo quitapohuayaya icalte, huajca quicuique illaves huan quitapojque nopa caltemit huan quipantijque inintanahuatijca huetztoc talchi cuali mictoc.

²⁶ Huan quema injuanti quichiyayaj para calaquise, Aod cholo huan panoto campa nopa teteyome huan ajsito hasta Seirat. ²⁷ Huan quema ajsito campa israelitame ipan nopa tepeme ipan inintal iixhuihua Efraín, quipitzqui se cuacajti para ma mosentilica israelitame. Huan injuanti hualajque huan hualtemoque ihuaya Aod cati quinyacanayaya.

²⁸ Huajca Aod quinilhui: “Techtoquilica para tiquintehuitij nopa moabitame, pampa TOTECO Dios techmactilis tomaco injuanti cati tuculancaitacahua.”

Huajca nopa israelitame qitoquilijque huan quitzajque campa nochi quimatij quixcotonaj hueyat Jordán huan amo aqui quicahuilijque ma pano. ²⁹ Ipan nopa tonali quinmictijque quej 10 mil moabita soldados cati más tejtetique huan más quimatiyayaj tatehuáj, huan amo aqui cholo. ³⁰ Huajca quej nopa, israelitame quintanque moabitame. Huan teipa oncac tasehuilisti para 80 xihuit ipan nopa tali.

Samgar, nopa expa juez, quinmanahui israelitame ten filisteos

³¹ Huan nopa juez cati teipa monexti elqui Samgar, icone Anat. Huan Samgar quinmicti 600 filisteos ica icamachal omiyo se huacax huan quej nopa quinmanahui nopa israelitame.

4

Débora, nopa najpa juez, quitanqui Sísara

¹ Huan quema ya mictoya Aod, nopa israelitame sempa pejque quichihuaaj cati amo cuali iixpa TOTECO. ² Huan TOTECO quintemactili imaco Jabín inintanahuatijca cananeos, yaya cati mosehui para tanahuatis ipan altepet Hazor. Huan Sísara elqui itayacanca ten isoldados huan itztoya ipan altepet Haroset Goim. ³ Huan Tanahuatijquet Jabín chichahuac quintajyohuiltijtoya nopa israelitame para 20 xihuit huan quinpiyayaya 900 tepos carrojme para ica tatehuisse. Huajca nopa israelitame quitzajtzilijque TOTECO para ma quinpalehui.

⁴ Huan ipan nopa tonali quintajtolsencahuayaya nopa israelitame se sihua juez cati itoca Débora. Yaya itztoya se tajtolpanextijquet huan isihua Lapidot. ⁵ Débora nochipa mosehui para tetajtolsencahuas campa nochi quitocax-tiyayaj “Débora icoyol”. Nopa coyol cuahuit eltoya ipan nopa tepeme ipan tali Efraín tatajco altepeme Ramá huan Betel. Huan nochi israelitame conitayayaj Débora para ma quintajtolsencahua.

⁶ Huan se tonal Débora tanahuati ma quinotztatij Barac, icone Abinoam, cati itztoya ipan altepet Cedes ipan inintal iixhuihua Neftalí. Huan quema hualajqui, Débora quiilhui:

—TOTECO cati toDios tiisraelitame mitznahuatía xiquinsentili 10 mil tacame cati hualahuij ipan nopa huejhueyi familias Neftalí huan Zabulón huan xiquinyacana hasta nopa tepet Tabor. ⁷ Nopona anquinte-huisse isoldados Tanahuatijquet Jabín huan inintayacanca cati itoca Sísara. Huan Toteco quichihuas ma monechcahui campa ta campa hueyat Cisón ica itatehuijca carrojhua huan ica tahuel miyac isoldados. Huan quichihuas ma huetzica momaco huan anquintanise.

⁸ Huan Barac quiijto:

—Sinta ta tiyas nohuaya, niyas, pero sinta amo nohuaya tiyas, na amo niyas.

⁹ Huan Débora quiilhui:

—Cualtitoc, niyas mohuaya. Pero pampa amo timotemacac titayacanas, quema huetzis Sísara huan isoldados, masehualme amo mitzhueyitalise para tijtanqui ta. Pampa elis se sihuat cati TOTECO quitemactilis Sísara imaco.

Huajca Débora yajqui ica Barac hasta Cedes. Huan Barac quinnotzqui iixhuihua Zabulón huan Neftalí ma mosentilica ipan altepet Cedes. ¹⁰ Huan mosentilijque 10 mil soldados huan quistejque ica Barac quej inintayacanca. Huan Débora inihuaya yajqui. ¹¹ Huan Heber nopa quenita moiycatalijtoya ten sequinoc quenita masehualme. (Quenitame elque inintoca iixhuihua itex Moisés.) Huan Heber quiquetztijayajqui ichaj ten yoyomit campa hueli huan ajsito hasta campa nopa hueyi ahua cuahuit cati itoca Zaanaim cati eltoya nechca altepet Cedes. ¹² Huan Sísara quicajqui para Barac, icone Abinoam, yajtoya ipan tepet Tabor. ¹³ Huajca Sísara quinsentili 900 itatehuijca carrojhua huan nochi isoldados huan quistejqui inihuaya ten altepet Haroset Goim huan ajsitoyaj campa nopa hueyat Cisón.

¹⁴ Huajca Débora quiilhui Barac:

—Xiya amantzi, pampa ama TOTECO mitzyacantiyas huan mitzmactilis Sísara momaco.

Huajca Barac temoc ipan tepet Tabor ica 10 mil soldados. ¹⁵ Huan TOTECO quichihualti Sísara huan isoldados huan cati ihuaya itztoyaj ipan tatehuijca

carrojme tahuel ma momajmatica hasta mohuihuichijque. Huan Barac huan isoldados pejqe quinmictíaj ica macheta. Huajca Sísara temoc ipan icarro huan cholojtejqú san iicxipa. ¹⁶ Huan Barac huan isoldados quintoquilijiyajque isoldados huan cati itztoyaj ipan tatehujca carrojme hasta altepet Haroset Goim. Huan amo mocajqui itztoc yon se isoldado Sísara. Nochi mijque ica macheta. ¹⁷ Huan Sísara cholo san iicxipa huan yajqui campa nopa cali ten yoyomit cati iaxca Jael isihua Heber, nopa quenita. Yajqui ichaj pampa Heber huan Tanahuatijquet Jabín ipan altepet Hazor quichijtoyaj se camanali para amo oncas cualanti ica injuanti.

¹⁸ Huajca nopa sihuat, Jael, quisqui ichaj para quiselis Sísara huan quiilhui: —Xicalaqui nica, notanahuatijca. Amo ximajmahui, pampa amo aqui mitzajsis nica.

Huan yaya calajqui ipan ichaj ten yoyomit para motatis, huan Jael quipijqui ica se taquemit. ¹⁹ Huan Sísara quitajtani quentzi at pampa tahuel amiquiyaya.

Pero nopa sihuat quitapo se cuetaxti cati ipan quitectoya lechi huan quimacac ma quii huan sempa cuali quipijpijqú. ²⁰ Huan Sísara quiilhui nopa sihuat:

—Ximoquetza calteno huan sinta acajya hualas huan mitztatzintoquilis sinta nica nimotatijtoc, xiquilhui para amo.

²¹ Huan tahuel cochqui pampa nelía siyajtoya. Huan Jael, isihua Heber, quicuic se cuaestaca huan se martillo huan ica yolic monechahuijtiyajqui campa ya. Huan quiquechili nopa cuaestaca ipan itzonteco huan quisentapaloltili hasta mocajqui tatzquitoc ipan tali, huan nimantzi mijqui.

²² Huan ajsico Barac cati quitemohuayaya Sísara huan Jael quinamiquito huan quiilhui:

—Xihuala huan nimitznexilis nopa tacat cati tijtemohua.

Huan calajqui Barac huan quiitac Sísara cuali mictoc ica se cuaestaca ipan itzonteco. ²³ Huajca quej nopa iniixpa nopa israelitame Toteco Dios quintanqui isoldados Jabín, inintanahuatijca cananeos. ²⁴ Huan mojmosta nopa israelitame más quipixtiyajque chichahualisti iixpa Jabín inintanahuatijca cananeos, huan teipa quitzontamiltijque.

5

Inihuica Débora huan Barac

¹ Ipan nopa tonali Débora ihuaya Barac, cati eliyaya icone Abinoam, quej ni huicaque:

² “Ma tijhueyichihuaca TOTECO pampa nopa tayacanca israelitame moneltalijque,

huan nopa israelitame nimantzi motemacaque para tatehuitij.

³ Techtacaquilica, antanahuatiani huan amojuanti cati anquihuicaj tequiticayot,

huan na nijhuicatis TOTECO, yaya cati toDios tiisraelitame.

Quena, yaya nijhuicatis huan nijhueyitalis.

⁴ TOTECO, quema ta tiquisqui ipan Seir huan tinejntenyajqui ipan tali Edom,

molini tali huan ten nopa mixti ipan ilhuicacti taquiyajqui chichahuac.

⁵ Nopa tepeme huihuipicaque moixpa TOTECO,

ta cati techmocuitahuía titali Israel ehuani.

Quena, tepet Siná nojquiya huihuipicac moixpa.

6 Ipan nopa tonali quema noja itztoya Samgar, icone Anat, hasta quema itztoya Jael, nochi israelitame quicajtejqe nochi huehueyi ojme huan ayecmo nejenque nopona pampa momajmatiyayaj para quintachtequilise. San quitoquilijque piloiztizi cati huijcoltic para motatijtiyase.

7 Nochi paquilisti tantoya huan yon se israelita amo itztoya ica cuali hasta na, niDébora, nimotananqui quej elisquía niininana israelitame.

8 Israelitame quinhueyichihuayayaj taixcopincayome cati amo ya Dios.

Nochi sequinoc altepet ehuanitechtehuijqe hasta tocalteno.

Nopa fiero tacame cati technahuatiyayaj amo techcahuiliyayaj ma tijpiyaca yon se totepostzajca o teposti cati ica timomanahuisquíaj.

Amo oncac yon se ipan 40 mil israelitame.

9 Nelía nipaqui ica antanahuatiani ipan tali Israel.

Nijtascamati TOTECO por amojuanti.

Anyajque ipan tatehuilisti ica nochi amoyolo.

Ma tijhueyichihuaca TOTECO.

10 Nochi tiisraelitame ma tijhueyichihuaca TOTECO.

Nochi cati tominpiyani huan cati tejcoj ipan burrojme chipahuaque,

huan cati mosehuíaj campa tatzotzoltic ma paquica.

Huan nojquiya ma huicaca nochi cati teicneltziti huan monequi nejnemise.

Nochi ma tihuicaca ica tascamatili.

11 Inijuanti cati quimatij tatehuíaj sempa mosentilíaj campa ameli inihuaya cati quinamacaj ininborregojhua.

Nopona nopa soldados cati tatantoque tepohuilíaj quenecatza nelía hueyi cati TOTECO quinchihuili, masque san teicneltzizi.

TOTECO quichijqui para tiisraelitame tahuel ma titatanica.

Huan yeca ama nochi tiisraelitame, tojuanti cati tiimasehualhua TOTECO, sempa timosehuíaj campa caltemit huan tiitztoque ica cuali.

12 Xiisa Débora.

Xiisa huan xihuica se huicat.

Huan ta Barac, tiicone Abinoam, ximotanana.

Xiquinhuica nopa masehualme cati tiquinitzqui ipan tatehuilisti.

Ma mitztequipanotij.

13 Temoque nopa israelita tacame cati mosemacayayaj.

Yajque motehuitoj inihuaya inincualancaitacahua.

Nopa tacame cati quitoquilíaj TOTECO motecpanque huan yajque, masque amo nesiyaya sinta huelis tatanise.

14 Hualajque israelita tacame ten tali Efraín campa nopa amalecitame achtohui itztoyaj.

Huan quitoquilijtiyajque isoldados ten nopa hueyi familia Benjamín.

Nopa tanahuatijca israelitame hualajque ten ital Maquir.

Tacame ten nopa hueyi familia Zabulón hualtemoque.

15 Nojquiya nopa tequichihuani huan soldados ten nopa hueyi familia Isacar temoque hasta nopa tamayamit ihuaya Débora.

Huan iteipan ixhuihua Isacar quipalehuijqe Débora, huan nojquiya Barac quipalehui.

Quena, moisihuiltijque para tapalehuisse.

Pero iixhuihua Rubén amo yajque.

16 ¿Para ten mocajque ininchaj iixhuihua Rubén campa tzactoque ininborregojhua?

¿Huelis san quintacaquiliyayaj nopa tamocuitahuiani quema quinnotzayayaj inintapiyalhua ica tapitzali?

Iixhuihua Rubén amo pajca itztoque pampa amo yajque.

¹⁷ Iixhuihua Galaad mocajque ne seyoc inaliyo Jordán huan iixhuihua Dan mocajque campa nopa cuaacalme.

Iixhuihua Aser mocajque iteno hueyi at huan amo mijcuenijque campa itztoyaj.

San mosiyajquetzayayaj.

¹⁸ Pero iixhuihua Zabulón ihuaya Neftalí, inijuanti, quena.

Yajque tatehuitoj huan amo moilhuijque sinta miquisquíaj.

¹⁹ Huajca nopa tanahuatiani ten cananeos hualajque tatehuicoj nechca altepet Taanac,

campa pehua nopa at ten altepet Meguido,

pero amo teno quitanque.

Amo quihuicaque yon se tomi.

²⁰ TOTECO huan nochi sitalime ipan ilhuicacti techpalehuijque para tijtanise Sísara.

²¹ Elqui quej nopa atajti Cisón tejcoc miyac huan nochi quinhuicac.

Quena, quinhuahuatatzqui nochi inimícahua.

(Ma quiپیya fuerza noyolo para nijtamiltis ni nohuica.)

²² Huajca caquistic nopa cahuayo tecacti pampa motalojtiyajque.

Masque tahuel motemacayayaj nopa soldados ipan inincahuayojhua, quis-tejque ica majmajti.

²³ Ilhuicac ejca TOTECO quijto: ‘Xiquintelchihua cati ehuani Meroz.’

Ma itztoca senquisa tatechihualme cati nozona itztoque, pampa amo hualajque quipalehuicoj TOTECO para quintehuisse icualancaitacahua cati nelia elque tejtetique.

²⁴ Pero niqijtohua tahuel xijtiochihua nopa sihuat Jael, isihua Heber, nopa quenita.

Más ma quitiochihua Jael que nochi sihuame cati mocahuaj ipan yoyon calme.

²⁵ Sísara quitajtani at huan Jael quimacac lechi.

Ipan se taza cati yejectzi, quimacac crema.

²⁶ Ica se imax quicuic nopa cuaestaca huan ica inejmat quicuic se martillo cati ica quimaquili Sísara ipan itzonteco.

Quicuacoyoni huan panoc ipan itzonteco nopa cuaestaca.

²⁷ Huan nozona campa huetztoya, mijqui.

Quena, iicxita Jael huetztoya huan nozona mijqui.

²⁸ Inana Sísara mocuesohuayaya,

huan tachiyayaya ipan ventana,

para quiitas sinta huala.

Moilhuyaya:

¿‘Para ten amo huala Sísara ica icarro?’

¿‘Para ten icarro huejcahua,

huan amo caquisti para huala ica cahuayo tecacti?’

²⁹ Huan inana moilhuyaya para melahuac cati isihua tequipanojcahua cati más talnamiquij quilhuyayaj.

Inijuanti quilhuyayaj:

³⁰ ‘Huelis miyac tamanti mocuilijque quema tatanque,

huan ama nochi moxejxelhuilíaj.

Huelis sesen soldado quiselis se o ome ichpocame huan elis iaxca Sísara nopa yoyomit cati más yejectzi ica miyac colores.

Huelis techhualiquilis miyac tamanti cati yejyectzi tajtzonti.
Huan cati más yejyectzi taijilpili mocahuas para iquechta ya.’

³¹ TOTECO, nochi mocualancaitacahua ma miquica,
pero masehualme cati mitzhueyichihuaq ma elica quej nopa tonati quema
quisa ica nochi ichicahualis.”

Quej nopa huicayayaj Débora ihuaya Barac.

Huan teipa nopa israelitame quipixque tasehuilisti ipan nopa tali para 40
xihuit.

6

TOTECO quinqotzqui Gedeón ma quinyacana israelitame

¹ Huan nopa israelitame sempa quichijque cati amo cuali iixpa TOTECO,
huan yaya quintemactili inimaco nopa madianitame. Huan nopa madi-
anitame quintajyohuiltijque chichahuac para chichome xihuit, ² huan tahuel
fiero quinchihuiltijque israelitame. Yeca por cati nopa madianitame quinch-
ihuiltiyayaj, nopa israelitame motatitoj campa taostoco huan nozona moca-
jqe para itztose campa cuatitamit ipan tepeme. ³ Huan quema nopa is-
raelitame tatojtocayayaj ipan inimil, nopa madianitame, huan amalecitame
huan sequinoc xinachti masehualme cati hualayayaj campa quisa tonati
quitamiltiyayaj nochi cati quitoctoyaj. ⁴ Nochi quisosolojqe ipan inimil
israelitame hasta altepet Gaza. Huan amo teno quinchahuiltijque para nopa
israelitame ma quicuaca. Nojquiya quincuiltijque israelitame nochi inin-
borregojhua, inihuacaxhua huan ininburrojhua. ⁵ Pampa ajsiyayaj nelía
miyac nopa seyoc tali ehuaní ipan inincamellos hasta amo aquí hueliyaya
quinpohua. Huan quinhualicayayaj nochi inintapiyalhua cati itztoyaj quej
chapolime cati nochi quitamiltíaj. Huan quiquetzayayaj ininchajchaj ten
yoyomit nozona huan mocahuayayaj hasta nochi quitamiltisquíaj, huan
nopa tali mocahuasquía huactoc. ⁶ Huan quej nopa, nopa israelitame
mocajque pilteicneltziti por nopa madianitame huan huajca quitzajtzili-
jqe TOTECO. ⁷ Huan quema nopa israelitame quitajtanijqe TOTECO ma
quinmanahui ten nopa madianitame, ⁸ TOTECO quintitanili se tajtolpanexti-
jqet huan yaya quinihui nopa camanali cati TOTECO toDÍOS tísraelitame
quimacac. TOTECO quijto: “Na nimechquixti ipan tali Egipto campa anitz-
toyaj anilpitoque huan antequipanohuayayaj san tapic. ⁹ Nimechmanahui
inimaco nopa egiptome huan inimaco nochi sequinoc cati amechcualan-
caitayayaj. Amoi xpa niqunquixti huan nimechmactili inintal. ¹⁰ Huan
nimechihui para na niamotECO Dios huan para amo xiquinhueyichihuaca
nopa taixcopincayome cati nopa amorreos nozona quintepanitaq, pero amo
antechtaquiltijque.”

Iilhuicac ejca Toteco quinojnotzaco Gedeón

¹¹ Teipa se tonali hualajqui iilhuicac ejca TOTECO huan mosehui itzinta
nopa ahuat cati eltoc nechca altepet Ofra cati eliyaya iaxca Joás iixhui
Abiezer. Huan Gedeón, icone Joás, quichtacatejtejtzonayaya trigo campa
tacoyontoya huejcata ipan tet para nozona quipatzcasquía xocomecat para
quiquixtilis iayo. Quej nopa, amo nesiyyaya pampa amo quinequiyaya nopa
madianitame ma quiitaca huan mocuilise nopa trigo.

¹² Huan iilhuicac ejca TOTECO monexti iixpa Gedeón huan quiilhui:

—TOTECO itztoc mohuaya huan tielis se soldado cati tahuel motemacas
ipan tatehuilisti.

¹³ Huan Gedeón quitatzintoquili:

—Sinta TOTECO itztoc tohuaya, huajca ¿para ten topanti nochi ni tamanti cati ohui? ¿Para ten amo techchihuilia nopa tiochicahualnescayot cati tohuejcapan tatahua quijtojque quinchihuili quema quinquixti ipan tali Egipto? Ama eltoc quej TOTECO techtahuelfajtoc huan techtemactilijtoc inimaco nopa madianitame.

¹⁴ Huan TOTECO quitachili huan quiilhui:

—Na nimitzmacas nochicahualis. Xiya ta, xiquinmanahuiti israelitame inimaco nopa madianitame pampa ama na nimitztitani.

¹⁵ Pero Gedeón sempa quinanquili:

—¿Ay noTeco, quenicatza huelis niquinmanahuis israelitame? Nihuala ipan nopa familia cati más teicneltzi ipan nochi iixhuihua Manasés. Huan ipan noteixmatcahua nieli cati más nipisiltzi.

¹⁶ Huan TOTECO quinanquili:

—Na niitztoc mohuaya huan tiquintanis nopa madianitame quej elisquía san se tacat.

¹⁷ Huan Gedeón sempa quiilhui TOTECO:

—Sinta techtapejpenijtoc huan techcualita, huajca xijchihua se tanextili para nelía nijmatis tiitztoc TOTECO cati techcamanalhuía. ¹⁸ Se favor nimitztajtania, amo xiquisa hasta nimocuepas huan nimitzhualiquilis se nemacti cati nijnequi nimitzmacas.

Huan TOTECO quinanquili:

—Nica nimitzchiyas hasta sempa tihualas.

¹⁹ Huajca Gedeón yajqui quicuaitalito se pilchivojtzi ihuaya 20 litros harina huan quichijqui pantzi cati amo quiipiya tasonejcaoyot. Teipa quitali nopa nacat ipan se chiquihuit huan nopa nacat iayo ipan se hueyi comit. Huan quihuicac nochi para quimacas campa itztoya iilhuicac ejca Toteco ahuatzala.

²⁰ Huajca iilhuicac ejca Toteco Dios quiilhui: “Xijhualica nopa nacat huan nopa pantzi cati amo quiipiya tasonejcaoyot huan xijtali ipan ni tet huan ipani nopa nacat xijtoyahua iayo.”

Huan Gedeón quej nopa quichijqui. ²¹ Huan nopa iilhuicac ejca TOTECO quiajsic nopa nacat huan nopa pantzi cati amo quiipiya tasonejcaoyot ica icuatopil. Huan ten nopa tet quisqui tit cati quitati nopa nacat ihuaya nopa pantzi para quinextis TOTECO quiseli itacajhualis. Huan nopa iilhuicac ejquet san polijqui iixpa.

²² Huajca Gedeón quiitac para eliyaya iilhuicac ejca TOTECO huan quijto:

—¡Ay TOTECO Cati Más Tijpiya Tanahuatili! Niquitztoc ixayac moilhuicac ejca.

²³ Pero TOTECO quiilhui:

—Ximoyoltali huan amo ximajmahui pampa amo timiquis.

²⁴ Huajca nozona Gedeón quiquetzqui se taixpamit para quielnamiquis TOTECO huan quitocaxti “TOTECO, Yaya Cati Temaca Yoltasehuilisti”. Huan ni taixpamit noja eltoc hasta ama nepa Ofra campa itztoque iixhuihua Abiezer. ²⁵ Huan nopa yohuali TOTECO quiilhui Gedeón:

—Xijcui nopa toro cati ompa ejquet cati motata iaxca huan cati quiipiya chicome xihuit. Huan xijtahuiso nopa taixpamit ten Baal cati motata quipixtoc. Huan xijzontequi nopa taixcopincayot Asera cati quiquetztoc ielchiquitipa nopa seyoc. ²⁶ Huan xijchihua se taixpamit para TOTECO Dios itzompac nopa tepet huan xijsencahua nopa teme ica tamocuitahuili quej monequi. Huan xijcui nopa toro cati ompa tacatquet, huan xijmicti huan techmaca quej se tacajhualisti. Huan xijtequihui nopa cuahuit ten nopa taixcopincayot Asera cati tijzoztontequi para xijtati ipan nopa taixpamit.

Gedeón quichijqui cati Toteco quilhui

²⁷ Huajca Gedeón quincuc majtacti itequipanojcahua huan quichijqui quej TOTECO quinahuati. Pero majmajqui para quichihuas tonaya pampa moilhuyaya quitasquíaj iteixmatcahua huan cati ehuan i pan nopa altepet. Huajca quichijqui ica tayohua.

²⁸ Huan ica ijnaloc quema mijquejque nopa masehualme cati ehuan i pan nopa altepet, quítaque para sosolijtoya nopa taixpamit ten Baal. Nojquiya quítaque para se quitzontectoya nopa itaixcopincayo Asera cati quichijtoyaj ica cuahuit. Huan nojquiya quítaque nopa taixpamit huan i pan quitencajtoyaj nopa toro.

²⁹ Huajca motatzintoquilijque se ica seyoc: “¿Ajquiya quichijqui ni tamanti?”

Pero teipa quimatque para quichijtoya Gedeón, icone Joás. Huajca yajque huan quilhuitoj Joás:

³⁰ —Xijquixti motelpoca para tijmictise pampa quixitini itaixpa Baal huan quitzojtzontejqui itaixcopincayo Asera cati tijchijtoyaj i pan taquetzali.

³¹ Huan Joás quinnanquili nochi injuanti cati moquetztoyaj inechca ica ni camanali:

—¿Para ten anquinequij anquimanahuse Baal huan antatehuse por ya? ¿Anmoilhuáj Baal amo hueli momanahuis ica iselti? Nelía anhuihuitique para anquijitose amo hueli momanahuis Baal. Ma miqui nimantzi cati ya nopa moilhuía. Sinta Baal nelía eli se dios, huajca ma momanahui iseltitzi huan ma quintehui cati quisosolojque itaixpa.

³² Huajca i pan nopa tonali pejque quitocaxtíaj Gedeón, Jerobaal. Jerobaal quijjosnequi “ma momanahui Baal iseltitzi”. Quej nopa quitocaxtijque pampa quisosolojtoya itaixpa Baal.

³³ Teipa mosentilijque nochi madianitame, huan amalecitame, huan sequinoc xinachtí masehualme cati hualajque campa quisa tonati huan quipanoque hueyat Jordán huan mochijque campa nopa tamayamit Jezreel.

³⁴ Huan Itonal TOTECO motali i pan Gedeón huan Gedeón quipitzqui nopa cuacuajti para nochi iixhuihua Abiezer ma mosentilica ihuaya. ³⁵ Nojquiya quinnahuati nopa tayolmelahuani ma yaca i pan nochi nopa tali campa itztoyaj iixhuihua Manasés para ma mosentilica ihuaya. Nojquiya tatitanqui ma quinyolmelahuatij israelítame i pan nopa huejhueyi familias Aser, Zabulón huan Neftalí. Huan nochi injuanti nima hualajque mosentilicoj ihuaya Gedeón.

³⁶ Huan Gedeón quilhui Toteco Dios: “Sinta nelía techtequihuis para ma niquinmanahui israelítame quej tiquijtohua, ³⁷ quej ni technextili. Nica campa quitejteztonaj trigo nijtalis se ipochquiyó borrego. Sinta ica ijnaloc xolontos san ipochquiyó nopa borrego ica ajhuechti huan nopa tali mocahuas huactoc, huajca nijmachilis para techtequihuis para niquinmanahuis israelítame quej techilhuijtoc.”

³⁸ Huan quej nopa panoc. Quema mijquejqui ica ijnaloc quipatzcac ijhuiyo nopa borrego huan quisqui at hasta temic se hueyí caxit ica ajhuechti.

³⁹ Pero Gedeón sempa quilhui Toteco Dios: “Amo xicualani sinta nijmitztajtánis seyoc tamanti tanextili para temachtí nijmatis sinta melahuac. Ama nimitztajtánia para ma mocahua huactoc nopa ijhuiyo borrego huan nopa tali cati quiyahualojtoc ma xolonto ica ajhuechti.”

⁴⁰ Huan quej nopa quichijqui Toteco Dios nopa tayohua. Mocajqui huactoc nopa ijhuiyo borrego huan nochi nopa tali xolontoya ica ajhuechti.

7

Gedeón quintanqui nopa madianitame

¹ Huajca Gedeón cati nojquiya itoca Jerobaal huan nochi cati ihuaya itztoyaj mijquejque cualca, huan yajque mochihuatoj nechca nopa ameli Harod. Huan nopa madianitame mochijtoyaj ica huejcapa campa nopa tamayamit iicxita nopa tachiquili cati itoca More.

² Huan TOTECO quiilhui Gedeón: “Nopa tacame cati tiquinhualica neltahuel miyaqui. Huajca amo huelis nimechpalehuis para anquintanise nopa madianitame. Pampa huelis anmohueyimatise huan anmoilhuisse amoseltitzitzi anmomanahuijque.” ³ Huajca ama xiquinyolmelahua nochi nopa tacame sinta se acajya huihuipica o majmahui, ma quisa ten ni tepet Galaad huan ma yahui ichaj.”

Huajca quisque 22 mil tacame para yase ininchaj huan san mocajque 10 mil.

⁴ Huan TOTECO quiilhui Gedeón: “Noja mocahuaj tahuel miyaqui mosoldados. Ama xiquinhuica ma atitij huan nozona niquinyejyecos huan nimitznextilis ajquiya yas mohuaya huan ajquiya amo yas. Huan quema nimitzilhuis para se yas mohuaya, yaya yas. Huan quema nimitzilhuis se amo yas, huajca amo yas.”

⁵ Huajca Gedeón quinhuicac nochi campa at para ma atica huan TOTECO quiilhui Gedeón: “Xiquiniyocatali nopa tacame ica ome panti: Inijuanti cati quitananaj nopa at ipan inimax para quipipitzose quej chichime huan inijuanti cati motancuaquetzase para atise ipan nopa hueyat.”

⁶ Huan san 300 tacame quipipitzojque at ica inimax quej chichime. Huan nochi nopa sequinoc san motancuaquetzque huan atique.

Nopa 300 isoldados Gedeón cati TOTECO quintapejpeni

⁷ Huajca TOTECO quiilhui Gedeón: “Na niquintanis nopa madianitame ica ni 300 tacame cati san quipipitzojque at. Nopa sequinoc sempa xiquintitani ma yaca ininchajchaj.”

⁸ Huajca Gedeón quinsentili nochi nopa soqui xarros huan oquich borrejojme inincuacua cati quihualicayayaj nopa sequinoc tacame huan quintanqui ma yaca ininchajchaj. Huan san mocajque ihuaya nopa 300 tacame cati tapejpenilme. Huan nopa madianitame mochijtoyaj tatzinta campa tamayamit. ⁹ Huan nopa yohuali TOTECO quiilhui Gedeón: “Ximijquehua huan xitemo ica mosoldados campa nopa madianitame mochijtoque, pampa na nimitzmacatoc momaco huan nijchihuas xiquintani. ¹⁰ Pero sinta timajmahui para tiquintehuiti, huajca achtohui xitemo nepa ihuaya motequipanojca Fura. ¹¹ Huan xijtacaquililitij taya moilhuaj nopa madianitame. Huan huajca tijpiyas más chichahualisti huan tijnequis titemos ica mosoldados para tiquintehuiti campa mochijtoque.”

Huajca Gedeón ichtaca yajqui ihuaya itequipanojca Fura hasta iteno campa mochijtoyaj nopa madianita soldados. ¹² Huan nozona itztoyaj nochi nopa madianitame, amalecitame huan nopa tacame cati hualajque ica campa quisa tonati. Tahuel miyaqui itztoyaj huan nesiyayaj san quej tahuel miyaqui chapolime. Quinpiyayayaj miyac camellos hasta amo aqui hueliyaya quinpohua. Eliyaya quej imiyaca xali iteno hueyat. ¹³ Huan ipan nopa talojtzi quema ajsito Gedeón, quicajqui para se tacat quipohuiliyaya ihuampo cati quitemictoya huan quej ni quiilhuiyaya:

—Ipan se temicti niquitac cati eliyaya quej se pantzi cati momimilohjthualajqui huan ajsico nica campa timochijtoque. Huan quitejtzonaco chichahuac se hueyi yoyon cali huan nopa yoyon cali huetzqui.

14 Huan ihuampo quihlhu:

—Cati tijtemijqui quijitosnequi para nopa israelita Gedeón, icone Joás, hualas ica nochi ichicahualis huan Toteco Dios quimactilis imaco nochi timadianitame huan nochi cati itztoque tohuaya. Huan yaya techtamimictis.

15 Huan quema Gedeón quicajqui nopa temicti huan taya quinequi quijtos, quihueyichijqui Toteco. Huan teipa sempa mocuetqui campa nopa israelitame mochijtoyaj huan quinilhu:

—Ximotananaca pampa Toteco techmacatoc nopa madianitame tomaco para tiquintanise.

16 Huan quinxelo nopa 300 tacame huan quintali ica eyi pamt huan sesen tacat quimacac se cuacuajti huan se soqui xarro cati ijtic quipixtoya tilemecti. **17** Huan quinilhu:

—Quema niajsiti campa mochijtoque, xijtachilica taya nijchihuas huan nochi amojuanti nojquiya ya nopa xijchihuaca. **18** Quema na huan cati nohuaya yahuij tijpitzase nopa oquich borregojme inincuacua, nojquiya xijpitzaca yahualtic campa mochijtoque, huan nojquiya xitzajtza chichahuac huan xiqijitoca: ‘Tihualahuij ica ichicahualis TOTECO huan ica Gedeón.’

19 Huan quej nopa Gedeón ihuaya nopa 100 tacame cati ihuaya yahuiyayaj ajsitaj nechca campa nopa madianitame mochijtoyaj. Huan eliyaya tajco yohual quema mopatayayaj inintamocuitahuijcahua. Huan nopa 100 tacame nimantzi pejque tapitzaj huan quitapanque nopa soqui xarros cati ipan quihucayayaj nopa tilemecti. Huan nopa sequinoc ihuical quichijque. **20** Huan nopa eyi panti ten soldados quipitzque inincuacua borregojme huan quitapanque nopa soqui xarros. Huan quihucayayaj nopa tilemecti ica iniarraues huan ica ininejmat quitzquityahuiyayaj nopa cuacuajti para huelise quipitzase. Huan tahuejchijtyahuiyayaj: “Tihualahuij ica ichicahualis TOTECO huan ica Gedeón.”

21 Huan sesen tacat san moquetzqui nopona yahualtic campa mochijtoyaj nopa madianitame. Huajca nochi nopa madianita soldados pejque motalohuaj huan tzajtziyajque cholojque. **22** Huan quema nopa 300 tacame quipitztoyaj nopa cuacuajti, TOTECO quichijqui para nopa madianitame ma mofehuica huan ma momictica campa hueli campa mochijtoyaj. Huan cati mocajque yoltoque cholojque hasta altepet Bet Sita cati mocahua ipan ojti para altepet Zerera. Nojquiya cholojtejque hasta inepa altepet Abel Mehola nechca Tabat.

23 Huan teipa Gedeón quinnottzqui ma mosentilica nochi israelita soldados cati iixhuihua Neftalí, Aser huan Manasés huan quintoquilijtyajque nopa madianitame. **24** Nojquiya Gedeón quintitanqui tayolmelahuani para ma quinyolmelahuatij nochi tacame cati iixhuihua Efraín huan quinilhu: “Xitemoca nimantzi huan xiquintehuiquij. Xijzacuatij campa quixcotonaj hueyat Jordán nechca Bet Bara para amo panose nopa madianitame.”

Huajca nochi iixhuihua Efraín hualajque huan quichijque cati quinilhujtaya. Huan quipixque inimaco nochi nopa hueyat hasta altepet Bet Bara.

25 Huan quinitzquijque nopa ome tayacanani ten madianitame cati inintoca Oreb huan Zeeb. Huan Oreb quimictijque campa nopa tet cati ama itoca Oreb. Huan Zeeb quimictijque campa quicoyonijtoyaj para quipatzcase xomecat huan campa ama itoca Zeeb. Huan teipa quema ya quinxixtijtoyaj nopa madianitame, quihualiquilijque Gedeón inintzonteco Oreb huan Zeeb hasta ne seyoc nali hueyat Jordán.

8

Gedeón quintzqui tanahuatiani ten madianitame

¹ Pero teipa nopa soldados ipan nopa hueyi familia Efraín cualanque ihuaya Gedeón huan pejqe mocamaijixnamiquij ihuaya. Huan quitatzintoquijque para ten amo quinnotztejqui quema achtohui yajqui quintehuito nopa madianitame.

² Huan Gedeón quinnanquili:

—¿Amo anquii taj para nopa quentzi cati aniixhuihua Efraín anquichijque eltoc más hueyi que nochí cati tojuanti cati tiiixhuihua Abiezer tijchijtoque? ³ Toteco Dios amechmactili amomaco Oreb huan Zeeb nopa ome tanahuatiani ten madianitame. Amo teno nijchijtoc na cati ipati que cati anquichijtoque.

Huan quema iixhuihua Efraín quicajque cati quii jto Gedeón, ayecmo cualanque. ⁴ Huan Gedeón ihuaya nopa 300 tacame ajsitoj Jordán huan quixcotonque masque nelsiyajtoyaj pampa quintepotztocatiyahuiyayaj incucalancaitacahua. ⁵ Huan Gedeón quintajtani nopa tacame ten Sucot:

—Nimechtajtanía xiquintamacaca cati nohuaya hualahuij, pampa tahuel siyajtoque huan mayanaj. Huan na nijtepotztocatiyas Zeba huan Salmuna, nopa tanahuatiani ten madianitame.

⁶ Huan nopa tayacanani ipan altepet Sucot quej ni tananquijque:

—Ayemo anquintzquij Zeba huan Zalmuna, huajca amo hueli tiqintamacase mosoldados. Pampa sinta amo anquintzquise huan timechtamacase, injuanti hualase huan techtatzacuilitse.

⁷ Huan Gedeón quii jto:

—Quema TOTECO ya quintemactilijtos nomaco Zeba huan Zalmuna, sempa nihualas nica huan nijhuejhueloqui amonacayo ica huitzti huan ica huitzajpoli cati onca ipan huactoc tali.

⁸ Huan teipa Gedeón tejoc campá altepet Peniel huan nojquiya quintajtani ma quintamacaca isoldados. Huan nopa Peniel ehuaní tananquijque san se quej nopa Sucot ehuaní. ⁹ Huajca Gedeón nojquiya quinilhui nopa Peniel ehuaní:

—Quema ya niquintantos, sempa nihualas nica huan nijtahuisoqui ni huejcapantic tepancali campá antamocuitahuíaj.

¹⁰ Huan nopa tanahuatiani Zeba huan Zalmuna itzttoyaj ipan tali Carcor huan inihuaya itzttoyaj quej 15 mil inisoldados. San injuanti mocahuayayaj ten nochí nopa soldados cati hualayayaj ica campá quisa tonati, pampa Gedeón huan isoldados ya quinmictijtoyaj 120 mil soldados. ¹¹ Huajca Gedeón huan isoldados tejcoque ipan nopa ojti cati pano campá itoca Noba huan Jogbeha para campá quisa tonati. Huan quej nopa ajsitoj campá mochijtoyaj nopa soldados huan quintehuitoj quema injuanti amo quinchiyayaj. ¹² Huan tanahuatiani Zeba huan Zalmuna, nopa ome tanahuatiani ten tali Madián, cholojque. Pero Gedeón huan isoldados quintepotztocatiyajque huan quinzquijque huan quinmajmatijque nochí inisoldados. ¹³ Teipa Gedeón, icone Joás, mocuetqui ten campá tatehuitoj ipan nopa ojti cati itoca Heres. ¹⁴ Huan quii zqui se tellocat ten altepet Sucot huan quitatzintoquili inintoca nopa tayacanani huan huehue tacame ipan nopa altepet. Huan nopa tellocat quii jcuilo 77 inintoca.

¹⁵ Huajca Gedeón yajqui ipan altepet Sucot huan mocamanalhui inihuaya nopa tacame huan quinilhui:

—¿Anquielnamiquij quenicatza antechpajcaitaque pampa ayemo niquintzquitoya Zeba huan Zalmuna? ¿Anquielnamiquij para amo

anquinejque anquinmacase pantzi nosoldados cati nelsiyajtoyaj, pampa ayemo tiquitzquitoyaj Zeba huan Zalmuna? ¡Cualtitoc! Nica itztoque.

¹⁶ Huajca Gedeón quinzitzi nopa tayacanani huan huehue tacame ten altepet Sucot huan quicuic huitzti huan cuame cati huitzpolitic cati onca ipan nopa huactoc tali huan ica ya nopa quinhuitejqui huan quintaijyohuiliti.

¹⁷ Huan nojquiya ipan altepet Peniel quitahuiso nopa huejcapantic tepancali cati ijcatoya nopona huan quintamimicti nopa tacame cati nopona itztoyaj.

¹⁸ Teipa Gedeón quintatzintoquili nopa tanahuatiani Zeba huan Zalmuna: —¿Quenicatza inintachiyalis nesiyya nopa tacame cati anquinmictijque ipan nopa altepet Tabor?

Huan tananquilijque:

—Inijuanti nesiyyaj quej ta. Sesen nesiyya quej se tanahuatijquet icone.

¹⁹ Huan Gedeón quijito:

—Eliyayaj noicnihua, inijuanti cati nonana iconehua. Nijtestigojquetza TOTECO cati itztoque, sinta amo anquinmictijosquáj, na nojquiya amo nimehmictisquía ama.

²⁰ Huan quinahuati se iachtohui cone cati itoca Jeter:

—Ximotanana huan xiquinmicti.

Pero Jeter noja eliyaya se cone tacat huan majmajqui, huan amo motemacac quinmictis. ²¹ Huajca Zeba huan Zalmuna quihuijque Gedeón:

—Ta ximotanana huan techmicti pampa se tacat quipiya itequi para mosemacas temictis.

Huan Gedeón moquetzqui huan quinmicti Zeba huan Zalmuna, huan quinculli ininquecheyejca inincamellos cati quinextiyaya para yaya tanahuatijquet.

²² Huan teipa nopa israelitame quihuijque Gedeón:

—Pampa ta techmanahuitoc ica nopa madianitame, ama tijnequij para ta techyacanas. Xieli titotanahuatijca, ta, mocone huan moixhuihua.

²³ Pero Gedeón quinnanquili:

—Na amo nielis niamotanahuatijca, yon nocone amo amechyacanas. Yaya cati amechyacanas elis TOTECO. Yaya elis amotanahuatijca. ²⁴ San quena, nijnequi nimechtajtanic para sese amojuanti techmacaca se anillo cati anquincullijque amocualancaitacahua. (Pampa inijuanti cati tiqintanque eliyayaj iixhuihua Ismael huan momajtoyaj quitequihuáj anillos ipan iniyacatzol huan ipan ininacas.)

²⁵ Huan inijuanti tananquilijque:

—Nochi timitzmacase ica cuali.

Huan quipatajque se yoyomit huan sese ten inijuanti quitali se anillo nopona. ²⁶ Huan ietica nochi nopa anillos ten oro elqui quej 19 kilos. Huan iyoca quihualicaque sequinoc tamanti ten oro cati moquechcostiyayaj, huan yoyomit cati morado quej cati motaliliyayaj nopa tanahuatiani ten tali Madián. Huan amo quipojque ininquechcoshua nopa camellos. ²⁷ Pero ica nochi nopa oro Gedeón quichijchijqui se yolixtajcayot huan quicahuato ipan ialtepe Ofra. Huan teipa nochi israelitame quitahuelcajque Toteco huan quihueyitalijque nopa yolixtajcayot cati Gedeón quichijqui. Huajca cati quichijqui Gedeón quinmasilti ya ihuaya ifamilia ipan tajtacoli.

²⁸ Huajca quej nopa, nopa israelitame quintanque nopa madianitame huan ayecmo quema huelque motananaj sempa. Huan ipan tali Israel oncac tasehuilisti para 40 xihuit quema noja itztoya Gedeón.

Mijqui Gedeón cati tayacanqui ipan tali Israel

²⁹ Huan quema tantoya tatehuía Gedeón, cati nojquiya quitocaxtiyayaj Jerobaal huan cati eliyaya icone Joás, yaya yajqui itztoti ipan ichaj ipan ital. ³⁰ Huan Gedeón quinpixqui 70 itelpocahua, pampa quinpixqui miyac sihuame. ³¹ Nojquiya quipixtoya se iompaca sihua ipan altepet Siquem huan nojquiya quipixqui se icone ihuaya huan quitocaxtali Abimelec. ³² Huan quema Gedeón mijqui ya eltoya nelhuehuentzi huan quitojque nechca itata ipan se ostot nechca altepet Ofra ipan nopa tali cati iniaxca iixhuihua Abiezer.

³³ Huan quema ya mictoya Gedeón, nopa israelitame sempa quicajtejque Toteco huan pejqque quinhueyichihuaq nopa taixcopincayome cati inintoca baales. Huan quitapejpenijque Baal Berit para elis inindios. ³⁴ Huan nopa israelitame ayecmo quielnamijque TOTECO Dios cati quinmanahuijtoya inimaco inincualancaitacahua. ³⁵ Yon amo quinmacaque tatepanitacayot iixhuihua Gedeón (o Jerobaal) por nochi cati cuali quinchihuilijtoya israelitame.

9

Abimelec quinmicti iicnihua para huelis tanahuatis

¹ Se tonali Abimelec cati eliyaya se itelpoca Gedeón (o Jerobaal) huan moscalti ipan altepet Siquem sempa yajqui ipan ialtepe para quinpaxaloti iicnihua inana. Huan quincamanalhui nochi cati itztoyaj ipan ichaj ihueyi tata huan quinilhui:

² —Xiyaca huan xiquincamanalhuitij nopa tayacanani ipan ni altepet. Xiquintatzintocuilica sinta quinequij ma quinyacanaca nopa 70 tanahuatiani, nopa sequinoc itelpocahua Gedeón, o sinta quinequij san na ma niquinyacana. Xiquelnamiquica para niicone Gedeón cati niehua nica huan yeca san se tonacayo huan toeso.

³ Huan itiojhua Abimelec yajque quincamanalhuitoj injuanti cati nopona ehuan huan quinilhuijqque cati Abimelec quijto. Huan nopa Siquem ehuan motemacaque para quipalehuise Abimelec pampa ehuyaya nopona huan eliyaya quej ininteixmatca. ⁴ Huan quimacaque 70 plata tomi cati quicuitoyaj itioipa nopa teteyot Baal Berit. Huan ica nopa tomi Abimelec quintanejqui sequij tacame cati mosisiníaj huan san nejnemini huan injuanti ihuaya yajque. ⁵ Huan yajque campa ichaj itata ipan altepet Ofra huan ipan se hueyi tet quintamimictijque nochi 70 itepotz icnihua pampa eliyayaj iconehua Gedeón. San mocajqui itztoc nopa teipa ejquet, Jotam, pampa cholo huan motatito. ⁶ Huajca nochi cati ehuyayaj altepet Siquem huan nopa tacame cati tominpiyayaj ipan Milo mosentlijque campa se ahua cuahuit nechca nopa hueyi tet cati moqetztoya ipan altepet Siquem. Huan nopona iniselti quitalijque Abimelec para ma eli tanahuatijquet ipan tali Israel.

⁷ Quema Jotam quimatqui ya nopa, tejcoc ipan nopa tepet Gerizim huan nopona chichahuac tahuejchijqui huan quinilhui:

“Techtacauilica anSiquem ehuan sinta anquinequij Toteco Dios ma amechtiochihua. Na nimechilhuis se huicalot. ⁸ Se tonali nopa cuame quinejqque quipiyase se inintanahuatijca. Huan achtohui yajque quiitatoj nopa cuahuit cati temaca olivos para aceite huan quihuijqque: ‘Xieli titotanhuaatijca.’ ⁹ Pero nopa olivo cuahuit amo quinejqque huan quinannquili: ‘Amo nijcahuas nitemacas noaceite cati quitequihuij para quintiochihuaq masehualme huan nielis niamotanahuatijca san pampa nijnequi nielis más nihueyi que sequinoc cuame.’”

10 “Huajca nopa cuame yajque quitatoj nopa cuahuit cati temaca nopa cuatajca yot higuera huan quillhuijque: ‘Xieli titotanahuatijca.’ 11 Huan nopa higuera cuahuit tananquili: ‘Amo huelis nijcahuas nitemacas notajca cati tzopelic para niyas huan nielis más hueyi que sequinoc cuame.’

12 “Teipa yajque quitatoj nopa xocomeca tzonti huan quillhuijque: ‘Xieli titotanahuatijca.’ 13 Huan nopa xocomeca tzonti tananquili: ‘Amo huelis nijcahuas nitemacas noxocomeca ayo cati quipactia Toteco Dios huan masehualme para nielis más hueyi que sequinoc cuame.’

14 “Huajca teipa nochi nopa cuame quillhuitoj nopa huitzcuahuit: ‘Xieli titotanahuatijca.’ 15 Huan nopa huitzcuahuit quinnanquili: ‘Sinta nelía antechtapepenijtoque huan anquinequij antechtalise ma nieli niamotanahuatijca, huajca xihualaca huan ximoecahuilica notzala. Pero sinta amo, nijchihuas para quisas se tit ten campá na huan quintatis nochi nopa tiocuame ipan tali Líbano.’ ”

16 Huajca Jotam quijto: “Ni huicalot quinequi quijtos anquitemojtoque cati más fiero para amechyacanas. Huajca ximoillhuica ama sinta cuali anquichijtoque para anquitalijque Abimelec quej amotayacanca. ¿Anquijtoque anquichijtoque cati cuali ica mijcatzi Gedeón huan iixhuihua? ¿Anquichihuijtoque cati quinamiqui por nochi nopa cuali tamanti cati notata Gedeón amechihuihua quemá itztoya? 17 Xiquelnamiquica para notata tatehui huan ica quentzi miquisquía para amechmanahuis inimaco nopa madianitame. 18 Pero ama anmosentanchihuj ica notata huan iteixmatcahua, huan anquimictijque ipan se tet nopa 70 iconehua. Huan ama ipan Siquem anquitequitalijque Abimelec quej amotanahuatijca cati icone notata ica iompaca sihua. Huan san anquitalijque pampa eliyaya se amoteixmatca. 19 Sinta anquichijtoque cati xitahuac huan cati cuali ica Gedeón huan iteixmatcahua, huajca cuali xitztoca ihuaya Abimelec huan nojquiya ma cuali itzto Abimelec amohuaya. 20 Pero sinta amo anquichijtoque cati cuali ica Gedeón, huajca ma quisa tit ten Abimelec huan ma amechtanimicti, huan ma quisa tit ten amojuanti cati anehuani Siquem huan Milo para xijmictica Abimelec.”

21 Huan quemá Jotam tanqui camanalti, cholo huan yajqui motatito campá tali Beer huan nozona mocajqui para itzto pampa quimacasiyaya itepotz icni, Abimelec.

Siquem mosentanchijqui ica Abimelec

22 Huan quemá tantoya eyi xihuit para Abimelec tanahuatis ipan tali Israel, 23 TOTECO Dios quititanili se iajaca Amocualcatat cati tequitic ipan ya huan ipan nopa masehualme ipan altepet Siquem para ma mocualancaitaca. Huan nopa Siquem ehuan mosentanchijque para ayecmo quitoquilise Abimelec. 24 Huan ica cati quiajsic, Toteco quicuepilli Abimelec pampa quitoyajqui inieso iicnihua quemá quinmictijque nopa 70 itelpocahua Gedeón. Huan nopa Siquem ehuan nojquiya quiselijque inintaxtahuil pampa quipalehuijque. Huan quej ni panoc. 25 Nopa Siquem ehuan pejqque quintalaj tacame cuatita para ma quiojchiyaca Abimelec. Huan quemá quichiyayaj, quintachtequiliyayaj nochi cati nozona panoyayaj. Huan se quilhui Abimelec para quiojchiyayaj.

26 Huan ipan nopa tonali Gaal, icone Ebed, ihuaya iicnihua yajque mocahuatoj ipan altepet Siquem huan nima nochi quixmatque huan ipan ya motemachijque. 27 Huan quemá nopa Siquem ehuan quitequiyayaj itajca

xocomecat huan quimapatzcayayaj para quichihuase xocomeca at, ilhuichi-huayayaj campa itiopa ininteteyohua. Huan quema tahuel tacuajtoyaj huan taitoyaj, nochi pejque quitelchihuaj Abimelec. ²⁸ Huan Gaal quijito: “¿Taya ipati Abimelec para tojuanti cati tiSiquem ehuani ma tijtequipanoca? Yaya san icone Gedeón. Nojquiya amo teno ipati itequipanocja, Zebul, cati nica tanahuatía. Más cuali ma tijtequipanoca Hamor tohuejcapan tata tiSiquem ehuani. Ma ayecmo tijtoquilica Abimelec. ²⁹ Sinta na nielisquía niamotanahuatijca, nijquixitjosquía nimantzi nopa Abimelec. Na niquilhuisquía ma huala inihuaya isoldados para timotehuise.”

³⁰ Huan quema Zebul, cati quipixqui tanahuatili ipan nopa altepet Siquem, quicajqui cati quijitojtoya Gaal, nelía cualanqui. ³¹ Huan ixtacatzitaitanqui ma quiyolmelahuatij Abimelec ya ni: “Gaal inihuaya iicnihua ajsitoque ipan altepet Siquem huan quintajtolmacaj Siquem ehuani para san sejco ma mitztehuise. ³² Huajca ama ximijquehua ni tayohua ihuaya mosoldados huan ximotatitij cuatita. ³³ Huan ica ijnaloc cualca quema ayemo quisa tonati, xiquintehuica cati ehuani ipan ni altepet. Huan quema Gaal inihuaya isoldados quisase para mitztehuise amohuaya, xijchihuilij quej tiquita para cuali.”

³⁴ Huajca quema Abimelec quiseli nopa camanali, mijquejtejqui inihuaya isoldados huan mochijque nahui panti. Huan hualajque huan quiyahualojque altepet Siquem, huan quichixque. ³⁵ Huan ica ijnaloc Gaal quisqui calteno itepa nopa altepet huan moquetzqui calteno, huan Abimelec inihuaya nochi isoldados pejque quisaj ten campa mochijtoyaj. ³⁶ Huan quema Gaal quintac nopa tacame hualayayaj, quihlui Zebul cati quipixqui tanahuatili nopona:

—Xitachiya campa ne tepet. Nopona temotihualahuij tatehuijca tacame.

Huan Zebul quinanguili:

—¡Amo! Ta tiquita ne tepeme iniecahuilo huan timoilhuía para tacame.

³⁷ Pero Gaal sempa camanaltic huan quijito:

—Xiquita temotihualahuij tacame ten nopa campa más huejcapa, huan nojquiya hualahuij se pamt ten soldados campa ne ahuaoyo campa tetonaltaj.

³⁸ Huan Zebul quinanguili Gaal huan quihlui:

—Ama sempa xicamanalti huan xiquijto para amo teno ipati Abimelec para elis totanahuatijca. Nopona itztoque isoldados cati amo tiquinpatitayaya. Huajca ama xiquisa huan ximotehui inihuaya.

³⁹ Huan Gaal quinyacanqui nopa Siquem ehuani huan motehuitoj ihuaya Abimelec. ⁴⁰ Pero Abimelec quitepotztocatihualajqui Gaal huan Gaal cholo. Huan Abimelec quintanqui huan quincocojtihualajqui miyac soldados huan injuanti huetztihualajque hasta icalteno nopa tepamt cati quiyahualohua nopa altepet. ⁴¹ Huan teipa Abimelec mocajqui ipan altepet Aruma. Huan Zebul cati quipixqui tanahuatili ipan altepet Siquem quiquixti Gaal ipan nopa altepet ihuaya iicnihua para ma ayecmo itztoca nopona.

⁴² Huan ne seyoc tonali nopa Siquem ehuani yajque para sempa tatehuitij. Huan quema Abimelec quimatqui, ⁴³ quincuitejqui isoldados huan quichijqui eyi tatilimit. Huan quintali ipan se mili para ma ojchiyaca. Huan quema quitaque nopa Siquem ehuani quisayayaj ipan inialtepe, quisque campa motatijtoyaj huan pejque quinmictíaj. ⁴⁴ Huan Abimelec ihuaya nopa tatilimit ten soldados cati ihuaya itztoyaj motalojque hasta campa caltemit ipan nopa tepamt cati quitzacua nopa altepet para amo calacuisse sempa huan momanahuisse ipan inialtepe. Huan ne seyoc ome tatilimit

yajque quintehutoj nochi cati itztoyaj campa mili, huan quintamimictijque. ⁴⁵ Huan Abimelec semilhuit quintehui nopa Siquem ehuani hasta quitamisosolo nopa altepet huan quintamimicti nochi cati nozona itztoyaj. Huan quitenque istat nozona para ma ayecmo taeli huan quicajqui tatzitzicatoc.

⁴⁶ Quema quicajque cati oncac nopa tominpiyani cati itztoyaj ipan nopa hueyi torre nechca Siquem, yajque momanahutoj campa más calijtic ipan itiopa nopa teteyot Baal Berit. ⁴⁷ Huan quiyolmelahuatoj Abimelec para nochi nopa tayacanca tacame motatijtoyaj ipan nopa tiopamit. ⁴⁸ Huajca Abimelec yajqui ipan tepet Salmón campa nopa tiopamit ica nochi isoldados cati ihuaya itztoyaj. Huan ica se hacha quitzontejqui imacuayo se cuahuit, huan quitananqui huan quiquechpano. Huan quinnahuati isoldados nojquiya ya nopa ma quichihuaca nimantzi huan ma quitoquilica. ⁴⁹ Sesen ten nopa tacame nojquiya quitzontejque se imacuayo se cuahuit huan yajque ihuaya Abimelec hasta campa nopa huejcapantic tiopamit ten ne teteyot. Huan nozona quimontonojque nopa cuahuit huan teipa quitatijque. Huan quej ni mijque nochi cati motatijtoyaj ipan nopa huejcapantic tepancali ten nopa teteyot nechca Siquem. Itztoyaj calijtic quej se mil tacame huan sihuame.

⁵⁰ Teipa Abimelec yajqui altepet Tebes huan quintehuito huan quintanqui. ⁵¹ Huan tatajco ten nopa altepet eltoya se huejcapantic tepancali para huejca tachiyase. Nozona motatijtoyaj nochi tacame huan sihuame para momanahuise inihuaya inintayacancahua. Quitzactoyaj cuali nochi caltemit huan tejcotoyaj hasta itzompac nopa huejcapantic tepancali. ⁵² Huan Abimelec ajsico hasta campa icalte nopa tepancali para quintatis. ⁵³ Pero se sihuat quimajcayqui iteyo se molino huan quiajsic ipan itzonteco Abimelec huan quicuatzyanqui.

⁵⁴ Huan Abimelec nima quinoztzqui itapalehuijca huan quihui: “Xijquixti momacheta huan techmicti para amo quijitose para se sihuat nechmicti.”

Huan itapalehuijca quisentapalhulli huan nima mijqui. ⁵⁵ Huan quema nopa israelitame quiitaque mictoc Abimelec, sesentzitzitzi sempa yajque ininchaj. ⁵⁶ Huajca quej nopa quitaxtahui Toteco Dios ica nochi cati amo cuali quichijtoya Abimelec pampa quixpanoc itata huan quintamimicti nochi nopa 70 itepotz icnihua. ⁵⁷ Huan nojquiya Toteco Dios quincuepili nochi nopa Siquem ehuani pampa quipalehuijque quinmicti icnihua. Huajca quej nopa panoc para ma tami nopa tatelechihuali cati Jotam, icone Gedeón, ica quintelchijtoya.

10

Tola, nopa chicompa juez

¹ Teipa quema ya mictoya Abimelec, motananqui Tola para mochihuas juez huan para quinmanahuas israelitame. Huan Tola elqui icone Fúa huan iixhui Dodo huan hualajqui ten nopa hueyi familia Isacar. Huan Tola itztoya ipan altepet Samir campa nopa tepeme ipan inintal iixhuihua Efraín. ² Huan ya tanahuati huan quintajtolsenajqui israelitame para 23 xihuit. Teipa mijqui huan quitojque ipan altepet Samir.

Jair, nopa chicuexpa juez

³ Teipa tanahuati Jair cati ehuyaya Galaad huan tanahuati 22 xihuit quej juez. ⁴ Huan nopa juez Jair quinpixqui 30 itelpochahua cati tejcoyayaj ipan 30 burrojme, huan quipixtoyaj 30 altepeme cati iniaxchahua ipan tali Galaad.

Huan nopa altepeme hasta ama eltoc huan quintocaxtíaj “ialtepehua Jair”.
 5 Huan mijqui Jair, huan quitojqe ipan altepet Camón.

Amonitame quintaiyohuiltijque israelitame

6 Pero nopa israelitame sempa quixpanoque TOTECO huan pejqe quinhueyichihuaq nopa teteyome cati inintoca Baal, Astarot huan sequinoc teteyome cati quinhueyichihuaqayaj masehualme ten tali Siria, Sidón, Moab, Amón huan Filistea. Huan nopa israelitame quielcajqe TOTECO huan ayecmo quihueyichijque. 7 Huan TOTECO nelía cualanqui inihuaya huan quintemactili inimaco nopa filisteos huan amonitame. 8 Huan nopa filisteos huan amonitame tahuel quintaiyohuiltijque huan quintejtzonque nopa israelitame. Huan para 18 xihuit quej nopa ininpantic nochi nopa israelitame cati mochijtoyaj ipan seyoc nali ten hueyat Jordán ica campa quisa tonati, ipan tali Galaad campa inintal amorreos. 9 Huan teipa inixhuihua nopa amonitame quipanoque hueyat Jordán para nojquiya quinteuhise iixhuihua Judá, Benjamín huan Efraín huan nelía quintaiyohuiltijque nopa israelitame. 10 Huajca nopa israelitame chichahuac quitzajtzilijque huan quitajtanijque TOTECO ma quinpalahui, quiilhuijqe: “Toteco Dios, titajtacolchijtoque ica ta, pampa timitztahuelcajqe huan tiquinhueyichijque nochi nopa teteyome ten Baal.”

11 Huan TOTECO quej ni quinnanquili nopa israelitame: “¿Amo nimechmanahui quema amechtaiyohuiltiyaj nopa egiptome, amorreos, amonitame, huan filisteos? 12 Huan nojquiya quema nopa sidonios, amalecitame huan madianitame amechtaiyohuiltijque, na nimechmanahui inimaco. 13 Pero masque na nimechpalehuijtoc miyac, amojuanti antechtahuelcajqe huan anquinhueyichijtoque taixcopincayome. Yeca ama ayecmo nimechmanahuis. 14 Xiyaca huan xiquintajtanitij amotaixcopincayohua cati anquintapejpenijtoque. Inijuanti ma amechmanahuica quema antaiyohuíaj.”

15 Huan nopa israelitame quiilhuijqe TOTECO: “Hueyi titajtacolchijtoque ica ta. Xijchihua ica tojuanti quej tiquita quinamiqui, pero timitztajtaníaj ica nochi toyolo, techmanahui ama.”

16 Huan quiniycuenijque nochi nopa teteyome cati quinpixtoyaj huan quihueyichijque TOTECO. Huan Totecó mocueso quema quinitac quenicatza taiyohuiyayaj.

17 Huan inisoldados nopa amonitame mosentilijtoyaj para quinteuhise nopa israelitame huan mochijtoyaj ipan tali Galaad. Huan inisoldados israelitame mosentilijque huan mochijque ipan altepet Mizpa. 18 Huan nopa tayacanca tacame ipan tali Galaad moilhuijqe: “¿Ajquiya huelis techyacanas para quinteuhise nopa amonitame? Yaya cati motananas elis tojuez huan technahuatis nochi tiGalaad ehuani.”

11

Jefté, nopa chicnajpa juez

1 Jefté eliyaya se tacat ten tali Galaad cati tahuel motemacayaya ipan tatehuilisti. Itata itoca eliyaya Galaad quej inintal itoca, pero inana elqui se ahuilnenca sihuat. 2 Nopa tacat Galaad quinpixqui sequinoc ioquichpilhua ica cati inelsihua. Huan quema nopa telpocame mosaltijque, quiquixitijque Jefté huan quiilhuijqe para amo teno huelis quiselis ten inintata pampa eliyaya icone seyoc sihuat.

³ Huajca Jefté quintalcahuijtejqui itepotz icnihua huan yajqui itztoti ipan tali Tob. Huan nozona momatqui inihuaya tacame cati sentamique huan Jefté quinyacanayaya para ojchiyase huan tachtequise. ⁴ Huan ipan nopa tonali nopa amonitame pejqque quintehuíaq israelitame. ⁵ Huajca nopa israelitame cati tayacanayaj ipan tali Galaad yajque quinzotzatoj Jefté ipan ital Tob, ⁶ huan quihuijque:

—Xihuala tohuaya huan tielis titotayacanca, huan tiquintehuisse nopa amonitame.

⁷ Huan Jefté quinnanquili nopa huehue tacame ten tali Galaad:

—¿Para ten antechtemohuaj ama quema antaijyohuíaq? Nelía antechcualancaitaj huan hasta antechquixtijque ipan ichaj notata.

⁸ Huan nopa huehue tacame ten tali Galaad quinnanquilijqque Jefté:

—Monequi techpalehuis huan yeca tihualahuij timitzitaquij. Xihuala tohuaya huan san sejco tiquintehuitij nopa amonitame huan ta technahuatis nochi cati tiehuani tali Galaad.

⁹ Huajca Jefté sempa quintatzintoquili nopa tayacanca tacame ten tali Galaad:

—¿Sinta nimocuepas amohuaya huan san sejco tiquintehuisse nopa amonitame huan sinta TOTECO quichihuas para ma huetzica nomaco, nelía temachti nielis niamotayacanca?

¹⁰ Huan nopa huehue tacame ten tali Galaad quinnanquilijqque Jefté:

—Tijtestigojqquetzaj TOTECO para quej nopa elis.

¹¹ Huajca Jefté yajqui inihuaya nopa tacame huan nochi nopa altepet quitequitalijque Jefté para ma eli inijuez huan inintayacanca. Huan nozona campa itoca Mizpa miyacapa Jefté quihuij TOTECO nochi nopa camanali cati monequiyaya para quiselis itequi ica cuali.

¹² Huan teipa Jefté tatitanqui ma quitatzintoquilitij inintanahuatijca amonitame: ¿“Taya tijnequi tohuaya para ama tijnequi techtehuis ipan total”?

¹³ Huan nopa tanahuatijquet amonita quinnanquili itayolmelajca Jefté huan quihuij: “Timechtehuisse pampa anisraelitame antechichtequilijqque nochi total quema anquisque tali Egipto. Anmoaxcatijque cati pejqqui ipan nopa atajti Arnón huan yahui hasta nopa atajti Jaboc huan onajsi hasta hueyat Jordán. Huajca ama techcueli total ica cuali.”

¹⁴ Huan Jefté sempa quintitanqui sequinoc tayolmelahuani para quiiatij nopa tanahuatijquet ten amonitame, ¹⁵ huan para ma quihuijca ni camanali:

“Tohuejcapan tatahua tiisraelitame amo moaxcatijtoque inintal moabitame, yon amotal anamonitame. ¹⁶ Pampa quema tiisraelitame tiquisque tali Egipto, tijpanoque nopa hueyi at cati itoca Chichiltic huan tiajsicoj hasta altepet Cades. ¹⁷ Huan tohuejcapan tatahua tiisraelitame quitajtanijqque se favor nopa tanahuatijquet ipan tali Edom para ma quincahuili panose ipan ital. Pero nopa tanahuatijquet ten Edom amo quincahuili. Nojqquiyaj quitajtanijqque nopa tanahuatijquet ten tali Moab. Pero yon ya amo quincahuili ma panoca huan yeca nopa israelitame mocajque ipan altepet Cades.

¹⁸ “Teipa tohuejcapan tatahua panoque ipan nopa huactoc tali campa amo teno eli huan quiyahualojque tali Edom huan tali Moab hasta ajsitoj iteno tali Moab ica campa quisa tonati. Huan mochijque ipan seyc nali ten nopa atajti Arnón cati monepantía ica tali Moab, pero amo calajque nozona.

- 19 “Huajca nopa israelitame quitatitanijque Tanahuatijquet Sehón inintanahuatijca amorreos cati mosehujtoya para tanahuatis ipan altepet Hesbón. Huan quitajtani que ma quincahuili panose para huelis ajsitij ipan cati tojuanti total.
- 20 “Pero Tanahuatijquet Sehón amo motemachi ipan israelitame para quincahuilis ma panoca ipan ital. Quinsentili isoldados huan mochihuatoj nechca altepet Jahaza huan quintehui nopa israelitame cati eliyayaj tohuejcapan tatahua.
- 21 “Pero TOTECO Dios tiisraelitame quichijqui para tohuejcapan tatahua ma quitanica nopa Tanahuatijquet Sehón ihuaya isoldados huan moaxcatijque nochi inintal nopa amorreos. 22 Moaxcatijque inintal amorreos cati pehua ica nopa atajti Arnón hasta ajsi campa atajti Jaboc, huan cati pehua campa huactoc tali huan ajsi hasta hueyat Jordán.
- 23 “Huajca ¿para ten ama anamonitame anquinequij antechquixtilise cati TOTECO toDIOS tiisraelitame quinixtili nopa amorreos huan quinmactili tohuejcapan tatahua tiisraelitame? 24 Sinta amotaixcopincayo, Quemos, amechmacas se tenijqui, anquiselisqueiaj para moaxca, ¿ax que? Tojuanti nojquiya tijmachilíaj toxca cati TOTECO Dios techmacatoc pampa tequixtijiyajqui toixpa para huelis tijtanise. 25 ¿Huelis ta timomati más ticuali que Balac, icone Zipor, cati elqui tanahuatijquet ipan tali Moab? Balac amo quintehui israelitame para quincuilis inintal quema yaya itztoya. 26 Tiisraelitame ya tijpixtoque ni tali 300 xihuit huan ama ¿ta tijnequi? Nochi ni xihuit tiitztoque ipan altepeme Hesbón, Aroer huan nochi ni sequinoc altepeme cati mocahua iteno nopa atajti Arnón, ¿para ten ica 300 xihuit amo anquinctoque para anmoaxcatise? 27 Na amo teno nimitzchihuilijtoc, pero ta quena, pampa ta tihualajtoc para techtehuis. Pero TOTECO, yaya Juez, huan TOTECO techtajtolsencahuas tiisraelitame huan anamonitame para tiquitase ajquiya qui piya tajtacoli.
- “Quej nopa quihuijque nopa tacame cati quiiatoj nopa tanahuatijquet ten amonitame ipan altepet Amón.”

28 Pero inintanahuatijca amonitame amo quitacaquili nopa camanali cati Jefte quititanilijtoya.

Cati Jefte quitajtolcahuili TOTECO

29 Huan Itonal TOTECO hualajqui huan motali ipan Jefte. Huan quinyancanqui isoldados huan quipanoque tali Galaad huan Manasés, huan teipa panotoj altepet Mizpa ipan tali Galaad. Huan quisque nozona huan quintehuitoj nopa amonitame. 30 Huan Jefte quitajtolcahuili TOTECO cati quichihuasquia, huan quihui: “Sinta tijchihuas ma niquintani nopa amonitame, 31 huajca cati achtohui quisaqui ipan nochaj para techseliqui quema nimocuepas huan ya nitatantos, na nimitziyocahuilis quej se tacajcahualisti.”

32 Huan Jefte yajqui quintehuito nopa amonitame, huan TOTECO quichijqui ma quintani. 33 Huan Jefte quinmicti miyac icualancaitacahua. Huan quintanqui 20 altepeme cati eltoyaj ten altepet Aroer hasta altepet Minit, huan nojquiya hasta Abel Keramin. Quej nopa, nopa israelitame quintanque nopa amonitame.

34 Huan quema Jefte tacuepili ichaj ipan altepet Mizpa, quinamiquico ichpoca cati eliyaya iyojtzi icone. Huan quinamiquico miltotitihualajqui

huan tatzotzontihualajqui ica pandero. ³⁵ Huan quema Jefté quiitac para huala iichpoca para quinamiquiqui, quitzayanqui iyoyo ica cuesoli huan quijito:

—¡Ay tinoichpoca! Nelía hueyi nimocuesohua huan ta cati techcuesol-maca. Na nijtencahuilijtoc Toteco para nijmacas cati achtohui technamiquiqui, huajca monequi nijchihuas cati niqijtojtoc.

³⁶ Huajca nopa ichpocat quihhui itata:

—Notata, monequi xijchihua ica na quej tijtencahuilijtoc TOTECO, pampa TOTECO quichijqui xiquintani mocualancaitacahua, nopa amonitame.

³⁷ Huan nopa ichpocat nojquiya quihhui itata: “San nijnequi techcahuili ma niyas achtohui campa nopa tepeme para ome metzti ihuaya nohuampoyohua para nichocati pampa amo quema nimonamictis.”

³⁸ Huajca Jefté quicajqui iichpoca ma yahui para ome metzti. Huan yajqui ihuaya ihuampoyohua ipan nopa tepeme huan chocaque pampa amo quema monamictisquía. ³⁹ Quema ya panotoya ome metzti mocuetqui ichaj campa itata, huan Jefté temacac iichpoca para quisentequipanos Toteco tiopan calijtic quej quijtojtoya. Huajca amo quema itztoya ihuaya se tacat. ⁴⁰ Huan pampa iichpoca Jefté motemacac quichihuas cati itata quitencahuilijtoya Toteco, ama nopa israelita ichpocame yahui iyoca huan quielnamiquij para nahui tonati sesen xihuit.

12

Jefté huan iixhuihua Efraín

¹ Teipa nopa hueyi familia Efraín mosentilijque isoldados huan panoque ica norte huan quihhuijque Jefté:

—¿Para ten tiyajqui tiquintehuito nopa amonitame huan amo technotztejqui para ma tiyaca mohuaya? Tojuanti tijtamititise mochaj huan ta nojquiya.

² Huan Jefté quinnanquili:

—Na ihuaya noteixmatcahua titaiyyohuiyayaj tahuel ica nopa amonitame huan nimechnotzqui, pero amo anhualajque antechmanahuicoj. ³ Huan quema niqitac para amo anquinequij antechmanahuise, huajca masque nimoilhui nimiquisquía, nimotali chicahuac, huan niquintehui nopa amonitame. Huan quena, TOTECO quichijqui ma nitatani. Huajca, ¿para ten anhualahuij ama para antechtehuise?

⁴ Huan israelitame cati tali Efraín ehuan quinhuetzquilijque huan quinilhuijque nopa israelitame ten tali Galaad: “Amojuanti amo neli anGalaad ehuan. San anitztoque nopa tasolme cati ancholojtejque total Efraín huan Manasés.”

⁵ Huajca Jefté quinsentili isoldados ten tali Galaad huan pejqui quinte-huía nopa tali Efraín ehuan huan quintanque. Huan Jefté ihuaya nopa Galaad ehuan moaxcatijque campa nochi quixcotonayayaj hueyat Jordán para calaquitij ipan tali Efraín. Huan nopa Efraín ehuan amo huelque mocuepaj ipan inintal. Huan nopa Efraín ehuan cati cholosnequiyayaj ten nopa tatehuilisti, ajsiyayaj campa nopa hueyat huan quinequiyayaj panose, pero nopa Galaad soldados quintatzintoquiliyayaj sinta nelía ehuan ipan tali Efraín. Huan sinta quijtosquía para amo, ⁶ huajca quinyejyecosquía sinta melahuac amo nopona ehuan. Huan para quimatis cati melahuac, quinnahuatiyayaj ma quijtocha nopa camanali “Shibolet”. Huan sinta amo huelisquía quitenquixtise cuali huan san quijtosquía “Sibolet”, huajca quimatisquía para nelía Efraín ehuan. Huan sinta eliyayaj Efraín ehuan,

huajca quinitzquiyayaj huan quinmictiyayaj nozona nechca hueyat Jordán. Huan quej nopa quinixmatque huan quinmictijque 42 mil Efraín tacame.

⁷ Huan Jefté, ten tali Galaad, elqui juez huan tanahuati ipan nopa israelitame para chicome xihuit. Teipa mijqui Jefté huan quitojque nozona ipan se altepet ipan tali Galaad.

Ibzán, nopa majtacpa juez

⁸ Teipa se tacat itoca Ibzán cati ehuayaya altepet Belén elqui juez huan tanahuati campá nopa israelitame. ⁹ Huan Ibzán quinpixqui 30 itelpocahua huan 30 iichpocahua. Huan nochi nopa 30 iichpocahua quintemactili para monamictise ica tacame cati tacatque ipan sequinoc huejhueyi familias. Huan nojquiya nopa 30 itelpocahua quinhualiquili ichpocame ten sequinoc huejhueyi familias para mosihuajtise. Huan Ibzán elqui juez huan quinhahuati israelitame para chicome xihuit. ¹⁰ Teipa mijqui huan quitojque nechca altepet Belén.

Elón, nopa juez majtacti huan se

¹¹ Teipa elqui juez Elón cati tacatqui ipan nopa hueyi familia Zabulón, huan quipixqui tequiticayot ica israelitame para majtacti xihuit. ¹² Huan mijqui Elón huan quitojque nechca altepet Ajalón ipan tali Zabulón.

Abdón, nopa juez majtacti huan ome

¹³ Teipa elqui juez Abdón, icone Hilel, cati ehuayaya altepet Piratón. ¹⁴ Huan Abdón quinpixqui 40 itelpocahua huan 30 itaca ixhuihua, huan injuanti nemiyayaj ipan 70 burrojme. Huan Abdón quinhahuati israelitame para chicueyi xihuit. ¹⁵ Huan mijqui Abdón cati eliyaya icone Hilel ten altepet Piratón. Huan quitojque ipan altepet Piratón ipan tali Efraín ipan nopa tepeme ipan nopa tali cati achtohuiya eltoya iniaxca nopa amalecítame.

13

Quenicatza tacatqui Sansón

¹ Huan nopa israelitame sempa quichijque cati amo cuali iixpa TOTECO huan TOTECO quintemactili inimaco nopa filisteos para ma quinhahuatica chicahuac para 40 xihuit. ² Huan itztoya se tacat cati itoca Manoa ipan nopa hueyi familia Dan huan yaya ehuayaya altepet Zora. Huan isihua Manoa amo hueliyaya conepeya. ³ Huan se tonali monexti iilhuicac eja TOTECO iixpa ni sihuat, huan quihui: “Masque hasta ama ticuahuactoya, ama ticonecuis huan tijtacetiltis se oquichpil. ⁴ Huajca ximomocuitahui para amo xiqui xocomecat iayo yon cati hueli taili cati cococ. Yon amo xijcua se tenijqui cati mitzchihuas amo tapajpactic iixpa TOTECO. ⁵ Pampa ama ticonecuis huan tijtacetiltis se oquichpil cati elis se nazareo huan elis taiyocatalili para iaxca Toteco Dios hasta quema tacatis. Amo quema motzoncaltequis. Huan yaya quipehualtis quinmanahuis israelitame inimaco nopa filisteos.”

⁶ Huan nopa sihuat hualajqui huan quipohuilico ihuehue ten panoc huan quijito: “Se tacat ten Toteco Dios hualajqui campá na. Yaya nesiyaya quej se iilhuicac eja Toteco Dios. Tahuel yejectzi eliyaya hasta temajmati para nijtachilis. Huan amo nijtatzintocquili canque huala huan ajquiya ya, yon amo techilhui itoca. ⁷ Pero techilhui para niconecuis huan nijtacetiltis se oquichpil. Nojquiya nechilhui ma amo niqúi xocomecat iayo, yon amo ma niqúi ten hueli taili cati cococ. Yon ma amo nijcua se tenijqui cati techchihuas amo tapajpactic iixpa Toteco Dios, pampa ni oquichpil elis se

nazareo cati senquisa taiyocatalili para TOTECO Dios ten itacatilis hasta quemá miquis. Quej nopa techilhui.”

⁸ Huajca Manoa motatajti ica TOTECO huan quilhui: “Ay noTeco, nim-itzajtania sempa ma huala nopa tacat cati ta tijtitanqui. Ma technextiliqui quenicatza tiquiscaltise nopa oquichpil cati tacatis.”

⁹ Huan Toteco Dios quitacaquili Manoa huan iilhuicac ejca Toteco Dios sempa monexti campa nopa sihuat quemá itztoya imila, pero ihuehue amo itztoya ihuaya. ¹⁰ Huajca nopa sihuat nima motalojtejqui quiyolmelahuato ihuehue huan quilhui:

—Sempa monextijtoci ica na nopa tacat cati hualajqui ne seyoc tonali.

¹¹ Huajca Manoa moquetztiquisqui huan yajqui ihuaya isihua hasta campa itztoya nopa tacat huan quilhui:

—¿Ta tieli nopa tacat cati tijcamanalhuico nosihua ne seyoc tonali?

Huan nopa tacat quinanquili:

—Quena, na.

¹² Huajca Manoa quijto:

—Quema tacatis ni oquichpil cati tiquijtojtoc, ¿quenicatza monequi tiquiscaltise? ¿Taya tanahuatilme tijnextilise para ma quitoquilis ipan inemilis?

¹³ Huan iilhuicac ejca TOTECO quinanquili:

—Moshua ma quichihua nochi nopa tanahuatili cati nijmacatoc. ¹⁴ Ma amo quicua cati huala ipan xocomeca tzonti. Ma amo quii xocomecat at yon ten hueli taili cati cococ. Yon ma amo quicua se tacualisti cati quichihuas amo tapajpactic iixpa Toteco. Nochi ya ni cati niquilhuijtoc ma quichihua.

¹⁵ Huan Manoa ayemo quimatiyaya sinta nelía nopa tacat eliyaya iilhuicac ejca TOTECO huan quilhui:

—Timitztajtaniaj ximocahua tohuaya se talojtzi para timitzsencahuilise se pilchivojtzi para tijcuas.

¹⁶ Huan iilhuicac ejca TOTECO quinanquili Manoa:

—Masque nimocahuas, amo nijcuas motacualis. Pero sinta tijnequi tijsencahuas se pilchivojtzi para tijmacas TOTECO quej se tacajcahuilisti tatatili, cualtitoc.

¹⁷ Huajca Manoa quilhui iilhuicac ejca TOTECO:

—¿Taya motoca para huelis timitzhueyitepanitase quemá tacatis nopa oquichpil?

¹⁸ Pero iilhuicac ejca TOTECO quinanquili:

—Amo techtatzintoquili notoca pampa tahuel pano cuajcualtzi notoca hasta amo aqui huelis quimachilis.

¹⁹ Huajca Manoa quicuic nopa pilchivojtzi para tacajcahuilisti ihuaya nopa tacajcahuilisti ten harina huan nozona quitencajqui iixpa TOTECO ipan se tet. Huan iilhuicac ejca TOTECO quichijqui se tiochicahuilnescajot quemá noja quitachilijtoyaj Manoa ihuaya isihua. ²⁰ Huan quichijqui se tit ma tejco ten nopa taixpamit hasta ilhuicac, huan iilhuicac ejca TOTECO tejco ilhuicac tatajco ten nopa tit. Huan quemá Manoa ihuaya isihua quitaque ya nopa, motancuaquetzque huan mohujtzonque hasta talchi. ²¹ Huan iilhuicac ejca TOTECO ayecmo monexti ihuaya Manoa ica isihua. Huajca Manoa quimatqui para eliyaya iilhuicac ejca TOTECO. ²² Huan Manoa quilhui isihua:

—Temachtí timiquise pampa tiquitztoque Toteco Dios.

²³ Huan isihua quinanquili:

—Sinta TOTECO quinequisquía techmictis, amo quiselijtosquía nopa tacajcahuilisti tatatili, yon ten harina. Amo technextilijtosquía nochi ni tamanti, yon amo techyolmelajtosquía cati panos teipa.

²⁴ Huan teipa nopa sihuat quitacatilti se oquichpil huan quitocaxtali Sansón. Huan nopa oquichpil moscalti, huan motacachijqui huan TOTECO quitiochijqui. ²⁵ Huan teipa quema Sansón itztoya campa mocahuayayaj iteipan ixhuihua Dan tatajco ten altepet Zora huan Estaol, pejqui nesi para Itonal TOTECO hualayaya ipan ya huan quimacayaya miyac chicahualisti.

14

Inetahuicaltil Sansón, nopa juez majtacti huan expa

¹ Huan se tonali Sansón yajqui ipan altepet Timnat huan quiitac se filitea ichpocat cati quiixtocac. ² Huan mocuetqui ichaj huan quiilhui itata ihuaya inana:

—Niixtoca se ichpocat cati ehua Timnat huan nijnequi xiyaca xiquijtanitij para nimocuilis.

³ Huan itata ihuaya inana quiilhuijqe:

—¿Amo hueli tijpantis se ichpocat nica ihuaya toteixmatcahua o ipan ni altepet? ¿Para ten monequi timocuilis se filitea sihuat cati amo quineltoca Toteco, yon amo motequiliáj ipan inintacayo nopa tanextili circuncisión quej Toteco tanahuatía?

Huan Sansón quinanquili itata:

—Pero na ya nopa niixtoca, techijtanilitij para nimocuilis.

⁴ Huan itata huan inana amo quimatiyaya para nochi ni tamanti panoyaya pampa TOTECO quej nopa quinequiyaya ma pano. Yaya quicualtaliyaya para ica ni tamanti quintanisquía nopa filiteos pampa ipan nopa tonali inijuanti quinnahuatiyayaj tali Israel ehuan.

⁵ Huan quema Sansón yahuiyaya altepet Timnat ihuaya itata huan inana, ajsito campa nopa miyac xocomeca milme cati iniaxcahua nopa Timnat ehuan. Huan quisqui campa ya se león cati nelía tetic huan nanalcatihualayaya para quiajsis. ⁶ Huan Itonaltzi TOTECO motali ipan Sansón ica miyac chicahualisti. Huan masque amo teno quipiyayaya imaco, quicocotzqui nopa león quej elisquía se pilchivojtzi. Pero amo quiilhui itata huan inana. ⁷ Huan ajsito altepet Timnat huan quicamanalhuijqe nopa ichpocat cati quiixtocayaya huan tasencajqe.

⁸ Huan teipa quema Sansón sempa yahuiyaya ichaj nopa ichpocat para quicuiti, Sansón quisqui ten iojhui para quitachiliti itacayo nopa león cati quimictijtoya. Huan quiitac ipani quinpixtoya cuajneeme huan necti.

⁹ Huan quixixti necti huan quicuaajtijajqui ipan ojtí. Huan quema sempa quinajsito itata huan inana nojquiya quinmacac quentzi necti ma quicuaca, pero amo quinilhui para nopa necti quicuitoyaya ipan se león itacayo.

¹⁰ Huan itata Sansón yajqui ichaj nopa ichpocat para tami tasencahuas para nopa ilhuit ten netahuicaltili. Huan Sansón quichijqui se ilhuit para telpocame cati elisquía ihuampoyohua ipan nopa netahuicaltili pampa quej ni momajtoyaj quichihujaj cati mosihuajtijayaj. ¹¹ Huan imontaj huan imona quiitaque para ajsico Sansón huan quinnotzque 30 telpocame filisteos para ma itztoca ihuaya ipan iilhui. ¹² Huan Sansón quej ni quinilhui nopa telpocame:

—Nimechtatzintoquilis se ahuil tatzintoquili cati ohui huan sinta antechilhuise taya quijtosnequi ipan ni chicomé tonati ten ni ilhuit, huajca na nimechmacas 30 yoyomit cati senquisa lino huan 30 yoyomit para quema anilhuichihuase. ¹³ Pero sinta amo anquimatise taya quijtosnequi, huajca antechmacase 30 noyoyo ten lino, huan 30 noyoyo para quema niilhuichihuas.

Huan quinanquilijque:

—Techilhui nopa ahuil tatzintoquili cati ohui huan timitztacaquilise.

¹⁴ Huan quej ni quinilhui:

“Ipan se tecuajquet, quisqui tacualisti, huan ten se cati tetic quisqui cati tzopelic.”

Huan panoc eyi tonati huan nopa tanotzalme amo quimatque taya quiijsosnequi nopa ahuil tatzintoquili cati ohui. ¹⁵ Huan ipan chicompa tonati, quilhuijque isihua Sansón:

—Xijtatzintoquili Sansón taya quiijsosnequi nopa ahuil tatzintoquili cati ohui, pampa sinta amo, tijtatis ichaj motata huan ta nojquiya. ¿Huelis antechnotzque ipan ni ilhuit para antechtominquixtilise?

¹⁶ Huajca isihua Sansón pejqui choca iixpa Sansón huan quiijsito:

—Amo techicnelía. San techcualancaita pampa amo tijnequi techilhuis taya quiijsosnequi nopa ahuil tatzintoquili cati ohui cati tiquintatzintoquili nopa telpocame nica.

Huan Sansón quinanquili:

—Yon notata, yon nonana amo niquinilhuijtoc. ¿Para ten monequi nim-itilhuis ta?

¹⁷ Huajca nopa sihuat chocac iixpa Sansón nochi nopa tonali quema noja oncac nopa ilhuit, huan quema ajsic nopa tonali chicome, Sansón quilhui isihua taya quiijsosnequi nopa ahuil tatzintoquili cati ohui pampa quinelcualancamacatoya. Huan nopa sihuat nima quinilhuito nopa telpocame cati quiijsosnequi. ¹⁸ Huan quema ayemo oncalaquiyaya tonati ipan tonali chicome, nopa telpocame hualajque huan quipohuilijque Sansón taya quiijsosnequi nopa ahuil tatzintoquili. Quiijtojqe:

“¿Taya más tzopelic que necti?

¿Huan taya más tetic que se león?”

Huan Sansón quinnanquili:

“Sinta amo anquichijtosquíaj nosihua ma chocaqui noixpa, amo anquima-jtosquíaj taya quiijsosnequi cati nimechtatzintoquili.”

¹⁹ Huan Itonal TOTECO motali ipan Sansón huan quimacac chicahualisti huan yajqui altepet Ascalón. Nozona quinmicti 30 tacame huan quin-quixtili iniyoyo. Huan quinmacac nopa telpocame cati quimatque taya quiijsosnequi nopa ahuil tatzintoquili. Huan Sansón nelcualaniyaya huan mocuetqui ichaj ihuaya itata. ²⁰ Huajca isihua Sansón quimactilijque ma mocuili seyoc cati eliyaya inelhuampo, yaya cati itztoya más nechca ya ipan nopa netahuacaltili.

15

¹ Panoc miyac tonali huan ajsic ipohual para quitequise trigo. Huan Sansón yajqui quipaxaloto isihua pampa quinequiyaya ihuaya itzto. Huan quihuiquili se pilchivojtzi huan quilhuito itata:

—Nijnequi nicalaquis campá nosihua itztoc ipan icuarto.

Pero itata nopa ichpocat amo quicahuili ma calaqui, ² huan quiijsito:

—Na nimoilhui ya tijcajtejtaya huan yeca nijmactili mohuampo. Pero nijpixtoc seyoc noichpoca cati más pisiltzi. ¿Amo tiquita más yejyectzi? Huajca ya ximocuili quej ipataca.

³ Huan Sansón quiijsito:

—Ayecmo aquí huelis techtajtacoltis ica cati fiero nimechchihuilis anfilis-teos, pampa amo cuali antechchihuilijtoque.

Sansón quitati ininpixquilis ica cayochime

4 Huan Sansón yajqui huan quinitzqui 300 cayochime huan quincuitapilipi ojome cayochime huan tatajco ten sese ome inincuitapilhua quinilpili se ticuahuit. 5 Teipa quitati nopa ticuahuit huan quinmajcajqui nopa cayochime ma motalojtiyaca campa inintatoc nopa filisteos. Quej nopa tami tatac nopa trigo cati noja moquetzoya huan cati ya quitectoyaj ipan inimil. Nojquiya tatac inixocomeca mil huan nochi inincua ten olivo. Nochi cati quitoctoyaj tatac.

6 Huan nopa filisteos quiijtojqe:

—¿Ajquiya quichijqui ya ni?

Huan tananquilijque:

—Sansón quichijqui, yaya cati imontica nopa tacat cati ehua altepet Timnat pampa quiquixtili isihua huan quimactilí cati inelhuampo ipan nopa nenamictili.

Huan nopa filisteos hualajque huan quitatijque nopa sihuat ihuaya itata.

7 Huan quema Sansón quimatqui cati quichijque nopa filisteos, quinilhui: —Pampa anquichijque ya nopa, ama amo nimosiyajquetzas hasta nimechtzontamiltis.

8 Huan quintamimicti nochi filisteos nopona huan amo quintasojtac. Teipa yajqui para itztoti nechca tepet Etam campa onca se ostof ipan tet.

Sansón temicti ica icamachal omiyo se burro

9 Huan nopa filisteos yajque mochihuatoj ipan tali Judá nechca altepet Lehi. 10 Huan tali Judá ehuaní quintatzintoquilijque:

—¿Para ten anhualahuij nica?

Huan nopa filisteos tananquilijque:

—Tihualahuij tiqitzquiquij Sansón para tijcuepilise por cati techchihuilijtoc.

11 Huan mosentilijque eyi mil israelita tacame ten tali Judá huan yajque campa Sansón ipan nopa tet nechca Etam huan quihuilijque:

—¿Amo tijmati nopa filisteos quiipiyaj tequiticayot ica tojuanti huan inimaco tiitztoque? ¿Para ten tiquintehuijtoc quej ni?

Huan Sansón quinnanquili:

—San niquincuepilijtoc cati techchihuilijtoque.

12 Huajca nopa Judá ehuaní quihuilijque:

—Tihualahuij para timitzitzquise huan timitztemactilise inimaco nopa filisteos.

Huan Sansón quinnanquili:

—Xijtestigojquetzaca Toteco para amo antechmictise.

13 Huan nopa Judá ehuaní tananquilijque:

—¡Amo! Amo timitzmictise. San timitzitzquise huan timitztemactilise inimaco.

Huajca quincahuili ma quitatacatzoca ica ome mecat cati yancuic huan quichihualtijque ma quisa ten nopa tepet. 14 Huan Sansón ajsito nepa altepet Lehi ilpitoc, huan nopa filisteos quisacoj tahuejchijtihualahuij para quinamiquise. Pero Itonal TOTECO motali ipan Sansón, huan nopa lazo cati yancuic cati ica quihuilijtoyaj elqui quej nopa icpat lino cati tatatoc, nochi cocotocac huan Sansón mocajqui majcajtoc. 15 Huan quipanti se pilburrojtzí icamachal omiyo cati noja yancuic eltoya huan quitananqui huan ica ya nopa quinmicti mil tacame. 16 Huajca Sansón quiijto:

“Ica se burro icamachal omiyo, nijchijqui se tamontomit.

¡Amo! Nijchijtoc nelia ome tamontomit

ica se burro icamachal omiyo,
pampa ica niquinmicti mil tacame.”

¹⁷ Huan quema tanqui camanalti, quimajcajqui nopa camachali, huan nozona quitocaxti Ramat Lehi. (Ramat Lehi quinequi quijtos Tepet Ten Icamachal Omiyo Se Burro.)

¹⁸ Huan teipa Sansón pejqui amiqui tahuel huan motatajti ica TOTECO huan quijto: “Nelía hueyi cati tijchijtoc ica nomax pampa techmaquixtijtoc tiisraelitame ten nopa filisteos. Huajca ama, amo techcahuili ma niamij-camiquis huan nimocahuas inimaco cati amo mitzneltocaj.”

¹⁹ Huajca Toteco Dios quicoyoni nopa tet nozona nechca Lehi huan mexqui at. Huan Sansón atic huan pejqui quipiya más chichualisti. Huan quitocaxti nozona Enhacore. (Enhacore quinequi quijtos Nopa Ameli Ten Nopa Tacat Cati Motatajti.) Huan nopa ameli hasta ama eltoc nozona nechca Lehi.

²⁰ Huan Sansón quinyacantiyajqui israelitame para 20 xihuit pero nopa filisteos noja quinahuatiyayaj nopa tali.

16

Sansón quiquixti icalte altepet Gaza

¹ Se tonali Sansón yajqui altepet Gaza. Nozona quuitac se ahuilnenca sihuat huan cochqui ihuaya. ² Huan nimantzi Gaza ehuan quimatque ajsitoya Sansón huan quiyahualojque nopa altepet. Huan seyohual tamocuitahuijque iteno nopa caltemit ipan nopa tepamit cati quiyahualohua nopa altepet para amo huelis quisas. Huan amo aqui moliniyaya, san moilhuiyayaj: “Mosta quema tanesis, tijmictise.”

³ Pero Sansón san mocajqui ihuaya nopa ahuilnenca sihuat hasta tajco yohual. Teipa mijquejqui huan ica ichichualis quicuitejqui nopa huejhueyi caltemit ipan itepa nopa altepet ihuaya nopa ome huejhueyi itaquetzalo. Huan quiquechpanojtejqui huan tejcoc itzompac nopa tepet cati eltoc iixmelac altepet Hebrón huan nozona quicajtejqui.

Sansón huan Dalila

⁴ Teipa quema panoc tonali, Sansón quiixmatqui se sihuat cati itoca Dalila ten tali Sorec huan quicneli. ⁵ Huan nopa tayacanani ten filisteos yajque quicamanalhuitoj Dalila. Quiilhuijque ma quitemo canque huala ichichualis Sansón para quej nopa quimatise quenicatza quitanise huan quitatacatzose. Quiilhuijque quimacasquíaj mil 100 plata tomi cati paj-patiyo.

⁶ Huajca Dalila quiilhui Sansón:

—Techilhui canque huala mochichualis pampa amo aqui hueli mitztatacatzohua para mitztanis.

⁷ Huan Sansón quinanquili nopa sihuat:

—Sinta techtatacatzosquíaj ica chicome cuetax lazo cati ayemo huactoc quej quitequihuíaj ipan se cuahuitoli, huajca tamis nochichualis huan nielis quej sequinoc tacame.

⁸ Huan nopa tayacanani quihualiquilijque nopa sihuat chicome cuetax lazo cati ayemo huactoc, huan ica quitatacatzo Sansón. ⁹ Huan quintatijtoya nopa tacame ipan se cuarto huan quema ya tantoya quitatacatzohua, Dalila quijto:

—¡Sansón, nopa filisteos itztoque nica para mitzitzquise!

Pero Sansón quicotonqui nopa cuetax lazo quej elisquía san se icpat cati tatatoc. Huajca amo aquí quimatqui canque huala ichicahualis. ¹⁰ Huan Dalila quiilhui Sansón:

—San techcaycayahua huan amo techilhuía cati melahuac. Ama techilhui melahuac quenicatza se huelis mitztatacatzos.

¹¹ Huan Sansón quej ni quiilhui:

—Sinta techtatacatzose ica lazo cati yancuic huan amo tatequiuhui, huajca tamis nochicahualis huan nielis quej sequinoc tacame.

¹² Huajca Dalila quicuic lazos cati yancuic huan ica ya nopa quitatacatzo huan quiilhui:

—¡Sansón, nopa filisteos hualajtoque para mitzitzquise!

Huan nelía nopa tacame cati tajtachiyaj motatijtoyaj calijtic. Pero Sansón quicotonqui nopa lazo quej elisquía icpat. ¹³ Huajca Dalila quiilhui Sansón:

—Hasta ama noja techcaycayahua huan san techistacahuía. Techilhui quenicatza se huelis mitztatacatzos.

Huajca Sansón quiilhui:

—Sinta se quicuis ni chicome taxinepaloli ten notzoncal huan quixinepalos ihuaya se yoyomit huan quitatacatzos ipan cuaestacas, huajca tamis nochicahualis.

¹⁴ Huan quema cochqui Sansón, Dalila quixinepalhuili itzoncal huan quitatacatzo ipan cuaestacas huan quiilhui:

—¡Sansón, nopa filisteos hualajtoque para mitzitzquise!

Pero Sansón sempa isatiquisqui huan quipostejqui nopa cuaestacas huan nopa yoyomit. ¹⁵ Huan nopa sihuat quiijto:

—¿Quenicatza tiquijtohua techicnelía, huan amo timotemachía ipan na? Techcaycayajtoc eyi huelta huan ayemo techilhuijtoc canque huala mochicahualis.

¹⁶ Huan pampa Dalila mojmosta quicualancamacayaya, Sansón ayecmo huelqui moijyohuía para amo quiilhuis canque huala ichicahualis. ¹⁷ Huajca Sansón moyolyamanili huan quiilhui:

—Amo quema nimotzoncaltectoc pampa nise nazareo cati niaxca Toteco Dios hasta quema ayemo nitacatiyaya. Sinta se techximas huajca nopa chichahualisti techtalcahuis, huan niyamaniyas huan nielis quej ne sequinoc tacame.

¹⁸ Huan quema Dalila quimatqui para ama nelía quiilhuijtoya nochi cati melahuac cati eltoya ipan iyolo sempa quinnotzqui nopa tayacanani huan quinilhui:

—Sempa xihualaca pampa ama, quena, techilhuijtoc cati melahuac.

Huajca nopa macuilti tayacanani ten filisteos hualajque campa Dalila huan quihualicayayaj nopa tomi para quitaxtahuise. ¹⁹ Huan Dalila quichiqui ma cochi Sansón ipan imetz, huan quema ya cochtaya, quinotzqui se tacat para ma quixima. Huan quitequili itzoncal cati taxinepaloli ica chicome taxinepaloli. Huan Dalila pejqui quitaijyohuiltía pampa quiitac quitalcahuijtejqui ichicahualis.

²⁰ Huan nopa sihuat quiilhui:

¡Sansón, nopa filisteos hualahuij mitzitzquiquij!

Huan Sansón isatiquisqui huan moilhui: “Amantzi nimomanahuis quej nochipa nijchijtihualajtoc.”

Pero Sansón amo quimatiyaya sinta TOTECO Itonal ya quitalcahuijtoya, huan ayecmo itztoya ihuaya. ²¹ Huan nopa filisteos quiitzquijque huan

quixteyolquixtijque huan quihuicaque hasta altepet Gaza. Nozona quitat-acatzojque ica tepos cadena ten bronce huan quichihualtijque ma tisi quej se tequipanjojquet nozona ipan tatzacti.

Imiquilis Sansón

²² Pero ica tonali itzoncal Sansón sempa pejqui moscaltía. ²³ Huan teipa nopa filisteos cati tayacanayayaj quichijque se hueyi ilhuit para quipaquilismacase huan quimacase tacajcahalisti ininteteyo, Dagón. Quiijtohuayayaj: “Todios techmactili tomaco tocualancaitaca, Sansón.”

²⁴ Huan quema nopa miyaqui filisteos quiitaque Sansón, quihueyichijque ininteteyo Dagón huan quiijtojque: “Todios techmactilijtoc tomaco tocualancaitaca. Yaya cati quisosolojtoc nochi total. Yaya cati quinmicti miyac ten tohuampoyohua, ama tijpixtoque tomaco.”

²⁵ Huan quema nelihuintitoyaj huan monelhueyimajtoyaj, quiijtojque:

—Xijhualicaca Sansón para ma techpaquilismaca.

Huan yajque quicuijtoj campata tatzacti huan quiquetzque tatajco campata nopa ome taquetzalme. Huan nochi quihuetzquiliyayaj huan ica paquiyayaj. ²⁶ Huajca Sansón quiilhui nopa oquichpil cati quimatilanayaya:

—Xijtali nomax ipan nopa ome taquetzalme cati quitanantoc itzontzajca ni cali pampa nijnequi nimotaquechis.

²⁷ Huan nelía temitoya nopa hueyi tiopamit ica filisteo tacame huan sihuame. Nozona nojquiya itzttoyaj nochi inintanahuatijcagua. Huan itzompac nopa cali mosehuijtoyaj quej 3 mil tacame huan sihuame cati quitachiliyayaj Sansón tatzinta huan ica paquiyayaj.

²⁸ Huajca Sansón motatajti ica TOTECO huan quej ni quiilhui: “TOTECO, Ta Cati Más Tijpiya Tanahuatili, techelnamiqui huan techtaçaquili san ama. San ni huelta techmaca chichahualisti sempa para huelis niqincuepilis ni filisteos cati techquixtilijque noixteyol.”

²⁹ Huan Sansón quitali imax ipan nopa ome taquetzalme cati eltoya tatajco ipan nopa hueyi cali huan cati quitanantoya itzontzajca. Huan Sansón ica nochi ichichahualis quincuatopejqui nopa taquetzalme se ica inejmat huan se ica imaarraves.

³⁰ Huan Sansón quiijto: “Ma nimiqui inihuaya ni filisteos.”

Huajca mopachó huan ica nochi ichichahualis quincuatopejqui nopa hueyhueyi taquetzalme cati quitanantoyaj nopa tzontzajcayot. Huan nopa hueyi cali campata ilhuichihuayayaj huetzqui huan quintzonpechi nochi nopa tanahuatiani huan nochi filisteos cati nozona itzttoyaj. Huajca Sansón quinmicti más miyac filisteos nozona quema ya nojquiya mijqui huan amo quej quinmicti ipan nochi inemilis. ³¹ Huan hualajque nochi icnihua Sansón huan nochi iteixmatcagua itata, huan quicuicoj itacayo huan quihuicaque. Huan quitocatoj tatajco ten altepet Zora huan Estaol ipan nopa ostot campata quitocoyaj Manoa cati eliyaya itata. Huan Sansón quinyacantoya israelitame para 20 xihuit quej inijuez.

17

Micaía quipixqui ten ya itioya

¹ Campa tepeme ipan tali Efraín itztoya se tacat cati itoca Micaía. ² Huan se tonali Micaía quiilhui inana:

—Na nijajqui tijtelchihua nopa tachtejquet cati quiichtejqui ni mil 100 plata tomi. Pero nica eltoc huan na cati niqichtectoc.

Huan inana quinanquili:

—Ma TOTECO mitztiochihua, nocone, pampa techilhuitoc cati melahuac.

³ Huan quicuepili inana nopa mil 100 plata tomi, huan inana quijto:

—Ni tomi nijnequi niqiyocatalis para TOTECO por ta, nocone. Nijnequi ica niqinchijchihuas ome teteyome. Se ma quitejtequica huan nopa seyoc ma quitejteztzonaca ten ni plata. Huajca sempa nimitzcuepilia ni tomi.

⁴ Pero nopa tacat sempa quicuepili inana nopa tomi. Huajca inana quicuic 200 ten nopa plata tomi huan quimacac se teposchijquet para quinchijchihuas teteyome. Se teteyot ma san quitejteztzonaca ica plata huan seyoc ma quitejtequica huan ma quaitilica nopa plata. Huan quema tanque quicualtijque, quitalijque ipan ichaj Micaía. ⁵ Huan ichaj ni tacat Micaía temitoya ica teteyome huan quipixtoya nojquiya se yolixtzajcayot huan sequij pilteteyotziti. Huan Micaía hasta quitali se itelpoca para ma eli cati ya itotajtzi. ⁶ Quej nopa quichijqui pampa ipan nopa tonali amo aqui tanahuatiyaya ipan nopa tali Israel, huan sese israelita quichihuayaya san cati ya quinequiyaya.

⁷ Huan itztoya se telpoca tacat cati eliyaya iixhui Leví cati momajtoya paxalojtinemi campa hueli huan itztoya ipan altepet Belén ipan tali Judá, ⁸ pero quicajqui nopa tali huan yajqui quitemoto seyoc altepet para ipan itztos. Huan ipan ojti ajsico campa ichaj Micaía campa nopa tachiquilme ipan tali Efraín. ⁹ Huan Micaía quitatzintoquili nopa telpoca tacat:

—¿Canque tiehua?

Huan nopa levita telpocat quinanquili:

—Na nihuala ten altepet Belén ipan tali Judá huan nijtemohua canque huelis nimocahuas.

¹⁰ Huajca Micaía quihui:

—Ximocahua nochaj huan nimitzchihuas tinototajtzi huan nimitztax-tahuis majtacti plata tomi se xihuit. Nojquiya nimitzmacas moyoyo huan motacualis.

Huan nopa levita yajqui ihuaya. ¹¹ Huajca nopa levita mocajqui ichaj huan elqui quej se iteixmatca. ¹² Huan Micaía quiyocatali ni levita tacat para ma eli inintotajtzi, huan mocajqui ichaj.

¹³ Huan Micaía moilhui: “Ama temachti TOTECO techtiochihuas pampa nijtapejpenijtoc se totajtzi cati nella se iixhui Leví.”

18

Iteipan iixhuihua Dan quicajtejttoyaj TOTECO

¹ Ipan nopa tonali amo aqui tanahuatiyaya ipan tali Israel. Huan nojquiya ipan nopa tonali iteipan iixhuihua Dan ayemo quipiyayayaj nochi inintal huan quinequiyayaj moaxcatise nochi quej sequinoc huejhueyi familias ten iixhuihua Israel quichijtoyaj. ² Huajca iixhuihua Dan quintapejpenijque macuilti tatehuijca tacame cati tetique cati ehuyayaj ipan altepet Zora huan Estaol. Huan quintitanque ma quitachilitij ixtacatzí campa elisquía inintal huan ma quiiitaca quenicatza eltoc. Huan quinilhijque ma yaca huan ma quitachilitij nopa tali.

Huan ipan ojti injuanti yajque hasta campa tepeme ipan tali Efraín. Huan quema ajsitoj ichaj Micaía para tonilise, ³ quitoscacajque nopa levita tacat cati nopona mocahuayaya huan quitoscamachilijque. Huajca quitatzinto-quilijque:

—¿Taya tijchihua nica? ¿Para ten tihualajqui? Huan ¿para ten tiitztoc nica?

⁴ Huan nopa levita quinnanquili huan quinilhui nochi ten panotoya. Nojquiya quijto:

—Huan nojquiya Micaía quinejqui ma nieli niitotajtzi huan techtaxtahuía huan yeca nitequiti nica.

⁵ Huajca nopa macuulti tacame quiihuijqque:

—Xijtatziintoquili Toteco Dios sinta quisas cuali totequi huan sinta cuali toojhui.

⁶ Huan nopa levita tacat tananquili:

—Quena, nochi quisas cuali, huan TOTECO amechpalehuis.

⁷ Huan nopa macuulti iixhuihua Dan quisque huan ajsitoj campa altepet Lais, huan quitaque ipan nopa tali para amo aqui mocuesohuayaya ica yon se teno. Nochi cuali monahuatiyayaj huan quipiyayaj nochi tamanti. Itztoyaj temachti quej nopa masehualme ipan altepet Sidón. Amo teno quincuesohuayaya, yon amo aqui quinnahuatiyaya. Huan Lais mocajqui nel huejca ten altepet Sidón. Huan Lais ehuan amo tanamacayaj ica sequinoc, yon amo tacohuayaj ten sequinoc pampa nochi quipiyayaj.

⁸ Huan nopa macuulti tacame mocuetque ipan nopa altepeme Zora huan Estaol huan ininteixmatcahua quintatzintoquilijqque:

—¿Quenicatza eltoc campa antajtachiyatoj?

⁹ Huan nopa macuulti tacame tananquilijqque:

—Xihualaca, ma tiquintehuitij, pampa tojuanti tijtachilitoj nopa tali huan tiquitatoj para nelcuali. Amo xijchiyaca. Nopa tali elis toaxca sinta san timoaxcatitij. ¹⁰ Quema tiyase nozona, tiajsitij campa masehualme cati amo quema mocuesohuaj huan itztoque ipan se tali cati hueyi huan nochi quipiya. Huan Toteco Dios techmactilijtoc tomaco.

¹¹ Huajca quistejqque ten altepet Zora huan Estaol, 600 tatehuijca tacame cati iixhuihua Dan ica inintepos para tatehuse. ¹² Huan yajque mochihuatoj nechca altepet Quiriat Jearim ipan tali Judá. Huan yeca quitocaxtijque Campa Mochijqui Dan, huan hasta ama quej nopa itoca. Elfoc ica campa calaqui tonati nechca altepet Quiriat Jearim. ¹³ Huan teipa quisque nozona, huan panoque campa tepeyo ipan tali Efraín huan ajsique hasta campa ichaj Micaía. ¹⁴ Huan nopa macuulti tacame cati achtohuiya yajque quitachilitoj campa altepet Lais, quej ni quinilhuijqque nopa sequinoc tacame:

—¿Anquimatij para ipan ni cali eltoc nopa yolixtzajcayot huan pilteteyotz-
itzi, huan nopa teteyot cati quitejtectoque huan se cati quichijchijque ten
plata? Sintá tijcuise iteteyohua, tijpiyase cati tijhueyichihuase ipan total
quema timoaxcatise.

¹⁵ Huan quema ajsitoj ichaj nopa levita telpocat cati eltoya nechca ichaj Micaía, quitatzintoquilijqque quenicatza itztoc. ¹⁶ Huan nopa 600 tatehuijca tacame ten iixhuihua Dan itztoyaj iteno nopa caltemit huan cuali mocualtalijtoyaj ica inintepos para tatehuse. ¹⁷⁻¹⁸ Huan nopa macuulti tacame cati achtohuiya quitachilitoj nopa tali monechcahuitoj ichaj Micaía. Huajca calaquitoj huan quincuitoj nopa teteyome, nopa yolixtzajcayot, huan nopa pilteteyotziti, quema nopa totajtzi mocahuayaya calteno inihuaya nopa 600 tacame ica inintepos para tatehuse. Huan nopa levita totajtzi quintatzintoquili:

—¿Taya anquichihuaj?

¹⁹ Huan quinanquilijqque:

—Amo ximolini. Xihuala tohuaya para tielis titotajtzi. ¿Amo tiquita para más cuali tielis titotajtzi ipan tohueyi familia huan amo san titotajtzi ipan se cali campa itztoc setzi tacat?

²⁰ Huan nopa levita totajtzi yolpajqui huan quicuic nopa yolixtzajcayot, nopa pilteteyotzitzí, huan nopa sequinoc teteyome huan yajqui inihuaya.

²¹ Huan nopa tacame sempa pejque nejnemij ipan iniojhui huan quintayacanalitijque ininconehua, inihuacaxhua huan inijuanti cati quihuicayayaj cati patiyó para más quinmcouitahuisse sinta Micaía quintehuíqui. ²² Huan quema iixhuihua Dan ya yajtoyaj huejca ten ichaj Micaía, icalnechcaxhua Micaía mosentilijque ihuaya huan pejque quintoquiláj. ²³ Huan quintzajtzilijque iixhuihua Dan para ma moquetzaca, huan inijuanti moicancuetque huan quilhúijque Micaía:

—¿Taya tijpiya? ¿Para ten tiquinsentilijtoc miyac tacame?

²⁴ Huan Micaía tananquili:

—Antechcuilijtejqe noteteyohua cati niquinchijchijtoya huan nojquiya nopa totajtzi cati itztoya nohuaya. Amo teno antechcahuilijtejqe, ¿huan nopa antechtatzintoquiláj taya nijpiya ica amojuanti?

²⁵ Huan iixhuihua Dan quinanquilijqe:

—Amo techtzajtzili chichahuac toica. Huelis se ten ni tatehuijca tacame cati san cuajcualantoc quinequis mitzmaquilis. O huelis mitzmictis ta ihuaya nochi mosoldados.

²⁶ Huan ica ya nopa, iixhuihua Dan quitoquilijque iniojhui, huan Micaía quíitac para inijuanti nelía miyaqui para ya, huajca mocuetqui ichaj.

²⁷ Huan iixhuihua Dan quinhuicaque nopa teteyome cati Micaía quinchijchijtoya ihuaya nopa totajtzi huan ajsitoy ipan altepet Lais campa amo aquí tamocuitahuyaya pampa amo aquí majmahuyaya. Huan calajque nopona, huan quintamimictijque huan quitatijque nopa altepet. ²⁸ Huan amo aquí huelqui quinmanahuía pampa huejca quítayayaj altepet Sidón huan amo aquí ihuaya monojnotzayayaj. Huan ni altepet eltoya ipan nopa tamayamit nechca altepet Bet Rehob. Huan teipa iixhuihua Dan sempa pejque quisencahuaj altepet Lais huan nopona mocajque. ²⁹ Huan quitocaxtijque nopa altepet Dan quej inihuejcapan tata Dan icone Israel. Pero achtohuiya nopa altepet itoca eliyaya Lais.

³⁰ Huan iixhuihua Dan quintalijque nopa teteyome para quinhueyichihuase huan inintotajtzi eliyaya nopa telpoca tacat, Jonatán, cati eliyaya icone Gersón huan iixhui Moisés. Huan Jonatán ihuaya iconehua elque inintotajtzi nopa hueyi familia Dan hasta nopa tonali quema inincualancaitacaxhua moaxcatijque nopa tali huan quinhuicaque ilpitoque. ³¹ Huajca nopa hueyi familia Dan quinhueyichihuayayaj teteyome cati Micaía quinchijchijqui ipan nochi nopa tonali quema ichaj Toteco Dios eltoya ipan Silo.

19

Se levita tacat huan iompaca síhua

¹ Nojquiya ipan nopa tonali quema israelitame ayemo quipiyayayaj se tanahuatijquet ipan inintal, itztoya se levita tacat cati mocaahuayaya campa cuatitamit ipan nopa tepeme ipan tali Efraín. Huan mocuili seyoc síhuat quej iompaca síhua huan yaya ehuayaya ipan altepet Belén ipan tali Judá.

² Pero teipa nopa síhuat momecatí ica seyoc tacat. Teipa quístejqe huan yajqui ichaj itata ipan tali Belén, huan nopona mocajqui quej nahui metzti.

³ Huan teipa ihuehue motanantejqe huan quitoquili para quinojnotzati ica taicnelili para ma huala ihuaya. Huan nopa tacat nojquiya quihuicac se itequipanojca huan se ome burrojme. Huan nopa síhuat quíseli ihuehue ica cuali huan quihuicac ichaj itata para ma quiixmati. ⁴ Huan quema itata nopa síhuat quinamijqui nopa tacat, paquiyaya para quiixmatis. Huan

imontaj quiseli nopa tacat ica paquillisti huan quinequiyaya ma mocahua para quinpaxalos. Huan mocajqui ichaj imontaj nopa levita tacat para eyi tonati, huan tacuajque, huan taique huan mopaquillismacaque san sejco.

⁵ Huan ipan nahui tonati, nochi mijquejque cualca, huan nopa levita mocualtali para tacuepilis ital, pero imontaj quiilhui para achtohui ma tacuajtehua. ⁶ Huan sempa mosehujque huan tacuajque san sejco. Huan teipa itata nopa sihuat quiilhui nopa levita tacat:

—Nijnequi ximocahua sempa ni yohuali huan san sejco tiyolpaquise.

⁷ Huan quema nopa levita tacat moquetzqui para yas, imontaj quichi-hualti sempa ma mocahua. Huajca nopa yohuali sempa mocajqui nozona.

⁸ Huan ipan macuili tonati, mijquejqui cualca para yas ichaj, pero itata nopa sihuat sempa quiilhui:

—Ximocahua sempa ni tonali huan hasta tiotac tiyas. Huan sempa tacuajque san sejco.

⁹ Teipa nopa levita tacat motananqui para yas ihuaya isihua huan itequipanojca. Pero imontaj cati eliyaya itata nopa sihuat quiilhui:

—Ya tiotac, ximocahua nohuaya sempa huan tiilhuichihuase huan tipaquise. Mosta cualca anmijquehuase huan anyase amochaj.

¹⁰ Pero nopa levita tacat ayecmo quinejqui mocahuas ipan nopa yohuali, huajca motananqui huan quistejqui. Teipa ajsito hasta iixmelac altepet Jebús cati nojquiya itoca Jerusalén. Huan ihuaya yahuiyayaj isihua huan ome burrojme cati quipiyayaj inisiya.

¹¹ Huan quema ajsitoj ipan altepet Jebús, ya tapoyahuixtoya, huan itequipanojca quiilhui nopa levita:

—Ya tayohua. Más cuali ma ticalaquica ipan ni altepet campa itztoque jebuseos para ticochise.

¹² Pero nopa levita quinanquili itequipanojca:

—Amo ticalaquise ipan ni altepet ica seyoc xinachti masehualme. San tiyase campa itztoque israelitame. ¹³ Huajca xihuala huan tiyase ipan altepet Gabaa (o Ramá) huan nozona timocahuase.

¹⁴ Huajca quipanoque nopa altepet huan yajque ipan iniojhui. Huan ya eliyaya tayohua quema ajsicoj ipan altepet Gabaa cati eliyaya iniaxca israelitame cati iteipan ixhuihua Benjamín. ¹⁵ Huan calajque nozona para tonilise. Huan mosehuitoj tianquis pampa amo aqui quinmacayaya campa mocahuase. ¹⁶ Pero teipa hualajqui se tacat huehuentzi cati mocuepayaya nel tiotac ten itequi ipan imila. Yaya elqui se iteipan ixhui Efraín cati ehuyaya campa tepeme ipan tali Efraín, huan sanoc ajsitoya para itzto ipan altepet Gabaa, pero sequinoc Gabaa ehuan eliyayaj iteipan ixhuihua Benjamín. ¹⁷ Huan quema nopa huehuentzi quinítac nopa paxalohuani mosehujtoque ipan tianquis, quinilhui:

—¿Canque anyahuij huan canque anhualahuij?

¹⁸ Huan nopa levita tacat quinanquili:

—Na niehua tali Efraín. San tipanoj nica. Tiquistejque ipan altepet Belén ipan tali Judá huan ama titacuepilía nochaj, pero ayemo aqui techmacatoc campa timocahuase. ¹⁹ Tojuanti tijhualicaj sacat cati huactoc huan sequinoc tacualisti para totapiyalhua huan nojquiya tijhualicaj tacualisti huan taili para na, nosihua huan notequipanojca, huajca amo teno techpolohua.

²⁰ Huan nopa tacat cati huehuentzi quiijto:

—¡Amo ximocueso! Nochi cati mitzpolohua na nocuenta elis, san amo nijnequi ximocahuaca ni yohuali ipan tianquis pampa mahuilili.

²¹ Huan quinhuicac ichaj, huan quintamacac inintapiyalhua huan quinixipajajqui quej momajtoyaj quichihujaj. Huan san sejco tacuajque huan taique. ²² Huan quema pejtoya mopaquilismacaj, hualajque mosinijca tacame cati ehuañi nopona huan quiyahualojque nopa cali campa mocajtoyaj. Huan pejque quitajtacañaj caltemit, huan quinojnatzque nopa huehuentzi cati iaxca nopa cali huan quej ni quiilhuijque:

—Xijquixti nopa tacat cati itztoc mocalijtc para ihuaya ticochise.

²³ Huan quisqui nopa huehuentzi cati iaxca nopa cali huan quinilhui:

—Amo, noicnihua, amo xijchihuaca cati nelía fiero. Ni tacat mosiyajquetzotc ipan nochaj para ma nijmocuitahui. Amo xijchihuaca cati amo cuali.

²⁴ Nica itztoc noichpoca cati amo quema quiixmajtoc se tacat, huan nojquiya itztoc nica isihua ni tacat. Ni quinquixtis huan huели anquinhuihuilitase huan anquinchihuilise cati anquinequij, pero ni tacat amo teno xijchihuilica.

²⁵ Pero nopa tacame amo quitacaquilijque, huan yeca nopa levita quiquixti isihua huan quinmacac. Huan nopa tacame quiitzquijque nopa sihuat huan san ica mahuiltijque huan ten hueli quichihuilijque nochi yohuali hasta ijnaloc. Huan quicajque quema ya tanestihuala. ²⁶ Huan quema tanestihualayaya, nopa sihuat mocuepasneguiyaya ipan ichaj nopa huehuentzi, pero san ajsic icalteno huan huetzqui. Huan nopona mocajqui hasta tanesqui. ²⁷ Huan nopa levita tacat mijquejqui cualca, huan caltapo para quisas. Huan quipanti isihua huetztoya calteno huan imax quitajitoya ipan caltencuahuit.

²⁸ Huan nopa levita quiilhui isihua:

—Ximijquehua, ma ya tiyaca.

Pero nopa sihuat amo quinanguili pampa ya mictoya.

Huajca nopa levita tacat quitananqui nopa sihuat, huan quitali ipan iburro huan yajqui ichaj. ²⁹ Huan quema ajsito ichaj, quicuic se cuchillo huan quitzojtzontejqui campa sajalijtoc iomiyo huan quichijqui 12 tacotonti. Teipa quititanqui se tacotonti ipan sesen nopa 12 huejhueyi familias ipan tali Israel para quinnextilis cati iniisraelita icnihua quichihuilijtoyaj.

³⁰ Huan nochi cati quiitaque nopa quentzi itacayo quiijtojque:

—Amo quema tiquitztoque se tamanti quej ni. Amo quema panotoc se tamanti cati nelía fiero quej ni hasta nopa tonali quema tohuejcapan tatahua tiisraelitame quisque ten tali Egipto huan hasta ama. Ma timoilhuica ten ni tamanti huan taya tijchihuase para tiqintatzacuiltise cati quichijque.

20

Nochi israelitame quintatzacuiltijque benjaminitame

¹ Huajca mosentilijque nochi israelitame cati campa hueli ehuañi. Hualajque ten tali Dan ica huejcapa hasta altepet Beerseba ica tatzinta huan hasta tali Galaad ica campa quisa tonati. Huan nochi mosentilijque iixpa TOTECO ipan altepet Mizpa para quintajtolsecahuase cati quichijque ni tamanti. ² Huan nopona moixnextijque nochi tayacanani ten sesen hueyi familia ipan iteipan ixhuihua Israel. Huan nojquiya itztoyaj nopona 400 mil israelita soldados ica inimacheta. ³ Huan iteipan ixhuihua Benjamín nima quimatque para nochi sequinoc israelitame mosentilijtoyaj ipan altepet Mizpa, pero amo yajque nopona. Huan ipan nopa hueyi tasentili nopa israelitame quitatzintoquilijque nopa levita tacat quenecizca elqui para isihua mijqui. ⁴ Huajca nopa levita tacat cati eliyaya ihuehue nopa sihuat quiijto:

—Na niajsito ihuaya nosihua para titonilise ipan altepet Gabaa cati eltoc ipan inintal nopa benjaminítame. ⁵ Huan ipan nopa yohuali miyac Gabaa ehuaní quiyahualojque nopa cali campa nimocajtoya pampa quinequiyayaj techmictise na, pero elqui nosihua cati inijuanti ten hueli quichihuilijque. Nochi panoque ipani hasta quimictijque. ⁶ Huajca na nijcuic nosihua huan nijtojtzontejqui huan nijchijqui 12 tacotonti. Huan nijtitanqui ipan nochi tali Israel para ma quimatica ni hueyi tajtacoli cati panotoc. Huan niqijto:

⁷ “¡Techtacaquilica nochi anisraelítame! Techilhucica taya monequi tiquinchihuilise cati quichijtoque ni tamanti.”

⁸ Huajca nochi nopa hueyi tanechicoli mochijque quej san se tacat huan motanque huan quijtojque:

—Yon se ten tojuanti amo mocuepas ichaj ama, yon amo yas campa timochijtoque hasta tiquintatzacuiltise cati quichijque ni tamanti. ⁹ Ya ni cati tijchihuase. Tiquintehuitij cati itztoque ipan altepet Gabaa huan timoaxcatise inintal. ¹⁰ Pero achtohui monequi sequij tacame ma quitemoca tacualisti para nochi tojuanti. Tiquintapejpenise 10 tacame ten sesen 100 tacame, o 100 tacame ipan sesen 1000 tacame, o se mil ipan sesen 10 mil tacame. Huan ni tacame cati tiquintapejpenise ipan nochi huejhueyi familias ipan Israel quitemose tacualisti. Huan tojuanti tiquintehuitij nopa Gabaa ehuaní, inijuanti cati benjaminítame, pampa fiero quichijtoque ica nochi tiisraelítame.

¹¹ Huajca nochi tacame ipan tali Israel san sejco motalijque quej san se tacat para quitehuitij nopa altepet.

¹² Pero achtohui nopa israelítame quintitanque tacame para ma quintatzintoquilitij nochi benjaminítame: “¿Taya ni tamanti cati nelía fiero cati mochijtoc campa amujuanti? ¹³ Techmactilica nopa mosisinijca tacame ipan altepet Gabaa cati quichijque ni tamanti para tiquinmictise huan tijquixtise ni tajtacoli ipan total Israel.”

Pero nopa benjaminítame amo quintacaquilijque nopa sequinoc israelítame, masque eliyayaj ininteixmatcahua. ¹⁴ Huan iteipan ixhuhua Benjamín quistejque ten nochi inialtepehua huan mosentilijque. Teipa yajque ipan altepet Gabaa para quinpalehuise nopa Gabaa ehuaní para quitehuitij nopa sequinoc israelítame cati hualajtoyaj para quitehuise. ¹⁵ Huan nopa benjaminítame cati hualajque ten miyac altepeme mochijque 26 mil tacame nochi ica inimacheta. Huan mosejcotilijque inihuaya nopa 700 Gabaa ehuaní cati tapejpenilme para tatehuise. ¹⁶ Huan ipan nopa benjaminítame itztoyaj seyoc 700 tacame cati marravestique huan nelía cuali quimatiyayaj tatehuitzashúaj. Huelque quiajsij ten hueli, masque huejca quiitayayaj. ¹⁷ Pero nopa sequinoc israelita tacame cati hualajtoyaj ten nopa sequinoc huejhueyi familias cati amo benjaminítame mochijque 400 mil. Huan nochi eliyayaj tacame cati motemacayayaj para tatehuise huan quihuicayayaj inintepos.

¹⁸ Teipa nopa miyaqui israelítame yajque ichaj Toteco Dios ipan altepet Betel para quitatzintoquilitij taya quichihuase. Huan quitatzintoquilitoj Toteco Dios: “¿Catijqui nopa hueyi familia itacahua achtohui monequi yase quitehuitij nopa tacame ten ne hueyi familia Benjamín?”

Huan TOTECO quinnanquili: “Itacahua nopa hueyi familia Judá achtohui yase.”

Nopa tatehuilisti ica nopa hueyi familia Benjamín

19-20 Huajca ica ijnaloc motanantejque nopa miyaqui israelitame ten campa hueli altepeme para yase quintehuitij nopa benjaminítame ten altepet Gabaa. 21 Huan iteipan ixhuihua Benjamín quisque altepet Gabaa huan quinmictijque 22 mil ten nopa sequinoc israelitame ipan nopa tonali.

22-23 Huan nopa israelitame yajque quicamanalhuitoj TOTECO huan iixpa chocaque hasta tiotac. Huan quitatzintzoquilijque taya monequi quichihuase. Quijtojque: “TOTECO, ¿monequi timocuepase huan sempa tiquintehuitij nopa tacame ten nopa hueyi familia Benjamín cati elij toicnihua?”

Huan TOTECO quinnanquili: “Quena, xiyaca huan xiquintehuitij.”

Huajca nopa israelitame moyolchicajque, huan sempa mocualtalijque huan yajque campa achtohui motalijtoyaj para tatehuitij.

24 Huan nopa miyaqui israelitame sempa monechcahuitoj campa nopa benjaminítame para quintehuisse. 25 Huan nopa benjaminítame quisque ipan altepet Gabaa, huan quintehuicoj huan quinmictijque seyoc 18 mil israelitame ica machetas.

26-27 Huajca nochi nopa miyaqui israelita tacame yajque campa ichaj Toteco Dios ipan Betel pampa ipan nopa tonali iCaxa TOTECO eltoya nopona ipan Betel para se quesqui tonali. Huan nopona mocajque iixpa TOTECO huan sempa chocaque. Pero ama, quena, nochi mosajque huan quitemojque ipaquilis TOTECO ica nochi iniyolo hasta tiotac. Huan quimacaque TOTECO tacajchualisti tatatili huan tacajchualisti para ma onca tayoltalili ica ya, huan quitajtanijque itapalehuil. Huan sempa nopa israelitame quitatzintzoquilijque Toteco Dios taya monequi quichihuase. 28 Huan ipan nopa tonali Finees itztoya quej totajtzi. Finees eliyaya icone Eleazar huan iixhui Aarón. Huan nopa israelitame ica Finees quitatzintzoquilijque Toteco quej ni: “¿Monequi timocuepase sempa para tiquintehuitij iteipan ixhuihua Benjamín cati toteixmatcahua o san nica tijtamiltise?”

Huan Toteco quinnanquili: “Xiyaca huan xiquintehuitij sempa mosta, pampa mosta niquintemactilis amomaco.”

29 Huajca sequij ten nopa miyaqui israelitame yajque motatitoy yahualtic altepet Gabaa 30-31 para tajtachiyase ixtacatzi huan teipa nimantzi calaquisse ipan nopa altepet. Huan nopa sequinoc soldados cati quitehuisquiaj nopa altepet quinilhuittejque para quema ya calactose ipan altepet huan moaxcatijtose, quinyolmelahuase ica miyac pocti cati tejcos. Huan quema nopa sequinoc ya yajtoyaj motatitoy, nopa sequinoc israelita soldados ica expa yajque huan mochijque quej quintehuisquiaj nopa benjaminítame ipan altepet Gabaa senquisa quej achtohuiya quichijque huan mosemacaque quej quichijtoyaj achtohui. Huan nopa benjaminítame nojquiya quisque altepet Gabaa quej achtohui para quinnamiquitij, pero ama más quintoquilijque huan huejca quicajtejque inialtepe. 32 Huan nopa benjaminítame pejque quinmictíaj nopa sequinoc israelitame quej achtohuiya panoc. Huan quinmictijque campa nopa cuatitamit ipan nopa ojti cati yahui ten altepet Gabaa hasta Betel huan quinmictijque quej 30 israelita soldados.

Huan nopa benjaminítame nelía paquiyayaj huan moilhuyayaj: “Sempa tiquintanise san quej achtohui.”

Pero nopa israelitame san quichihuayayaj quej cholohuayayaj para quej nopa, nopa benjaminítame ma quintoquilica huan ma quicajtehuaca huejca inialtepe. 33 Huan quema nopa israelita soldados ajsitoy nechca Baal Tamar, moicanquetque huan pejque quintehuíaj nopa Gabaa ehuan huan nopa sequinoc iixhuihua Benjamín cati quistoyaj ten inialtepe. 34 Huan nimantzi nopa 10 mil israelita soldados cati tapejpenilme cati motatijtoyaj ipan nopa tamayamit nechca altepet Gabaa nojquiya quisacoj huan pejque quintehuíaj

nopa benjaminítame. Huan nopa tatehuilisti mochijqui más chichahuac. Huan nopa benjaminítame amo quimatiyayaj para quintehuiyayaj ica inixmelac huan ica iniica huan para quipolose. ³⁵ Huajca quej nopa TOTECO quinpalehui nopa miyaqui israelítame para ma quintamiltica nopa israelita tacame cati eliyayaj iteipan ixhuihua Benjamín. Huan ipan nopa tonali quinmictijque 25 mil 100 benjaminita soldados ica macheta. ³⁶ Huajca quimachilijque para ya quipololjque.

³⁷ Huan nopa sequinoc tacame cati motatijtoyaj quistejque campa quint-zontamiltiyayaj nopa Gabaa ehuaní, huan nimantzi calaquitoj ipan altepet Gabaa huan quintamimictitoj nochi cati itztoyaj nozona. ³⁸ Huan quema nopa pochtí pejqú itejco ipan nopa altepet hasta ilhuicac, nopa benjaminítame moicanítaque huan quiítaque. ³⁹ Huan nopa benjaminítame pejqú momajmatíaj quema nopa sequinoc israelítame cati mochijque quej cholu-huayayaj, moicancuetque para quintehuiquij. ⁴⁰⁻⁴² Nopa benjaminítame quiítaque para nochi inijuanti miquisquíaj, huajca quinequiyayaj cholose huan yase campa huactoc tali. Pero nopa miyaqui israelítame quintehuiyayaj inixmelac huan iniica huan quinmictiyayaj huan amo huelque cholose. ⁴³ Huan nopa miyaqui israelítame quinyahualojque nopa benjaminítame huan quintepotztocatiyajque. Huan quinmictijiyajque hasta altepet Menúha huan hasta iixmelac altepet Gabaa campa quisa tonati. ⁴⁴ Huan quinmictijque 18 mil benjaminita soldados cati motemacayayaj huan cuali quimatiyayaj tatehuíaj. ⁴⁵ Huan nopa benjaminítame cati mocajque cholosnequiyayaj para campa huactoc tali campa eltoc nopa tet Rimón. Pero macuili mil quinmictijque ipan ojti huan noja quintepotztocatiyajque hasta altepet Gídom. Huan nozona quinmictijque seyoc ome mil tacame.

⁴⁶ Huajca ipan nopa tonali nopa miyaqui israelítame quinmictijque ica inimacheta quipano 25 mil israelítame ten iixhuihua Benjamín, huan nochi eliyayaj tacame cati cuali quimatiyayaj tatehuíaj. ⁴⁷ Huan san mocajque yoltoque 600 benjaminita soldados. Inijuanti cholojque hasta campa nopa huactoc tali huan mocajque nozona nahui metzti nechca nopa tet cati itoca Rimón. ⁴⁸ Huajca ipan nopa tonali nopa israelítame quinmictijque nochi sequinoc benjaminítame huan inintapiyahua. Huan yajque ipan nochi benjaminita altepeme ipan nopa tali huan quitamitatijque.

21

Quinpalehuique benjaminítame ma sempa momiyaquilica

¹ Quema nopa tayacanca israelítame mosentilijque achtohuiya nepa altepet Mizpa para quimatise quenicatza mijqui isihua nopa levita tacat, inijuanti quifestigojquetzque Toteco para amo aquí quicahuilisqueíaj ma temactili iichpoca para monamictis ihuaya se benjaminita tacat. ² Huan teipa quema nopa israelítame ya quintamimictijtoyaj nopa benjaminítame, sempa mosentilijque ipan Betel campa eltoya iCaxa Toteco Dios. Huan choaque chichahuac iixpa Toteco Dios hasta tayohuixqui huan quej ni quijtohuayayaj:

³ “¡Ay TOTECO Dios titoTECO tiisraelítame!

¿Para ten panoc ya ni ipan tali Israel?

¿Para ten ixpolihuis se hueyi familia?”

⁴ Huan tonili cualca mijquejque nochi nopa israelítame huan quichijque se taixpamit. Huan quitencahuilijque TOTECO tacajchualisti tatatili huan tacajchualisti para moyoltalise ihuaya. ⁵ Huan tatzintocaque: “¿Itztcoc

acajya ten tiisraelitame cati amo yajqui ipan nopa tanechicoli ipan altepet Mizpa campá eltoc iCaxa TOTECO huan campá timotajtolmacaque para amo tijmacase se iteipan ixhui Benjamín se toichpoca? Nochi quimatiyayaj sinta amo yasquáj, miquisquáj.”

⁶ Huan nopa israelitame mocuesohuayayaj por cati ininpantitoya nopa benjaminítame huan moilhuiyayaj: “Se hueyi familia ixpolihuisnequi ipan tali Israel. ¿Quenicatza tijchihuase para tiquintemohuilise sihuame nopa benjaminita tacame cati noja mocahuaj yoltoque? ⁷ Nochi tojuanti ica titatestigojquetzque TOTECO ipan altepet Mizpa para amo tiquinmacase toichpocahua para ma elica inisihuahua.”

⁸ Huan quimatque para nopa israelitame cati itztoyaj ipan altepet Jabes ipan tali Galaad amo yajtoyaj, ⁹ pampa amo aqui itztoya para tananquilis ten nopa altepet quema quipanoltijque inintoca ipan tanechicoli. ¹⁰ Huajca nopa hueyi tasentili ten israelitame quintitanque 12 mil soldados cati más motemacayayaj para quinmictise nopa Jabes ehuan huan quej ni quinilhuijque: “Xiyaca huan xiquinmictitij cati itztoque ipan altepet Jabes ipan tali Galaad, pampa amo monextijque ipan tohueyi tasentilis ten nochi tiisraelitame. ¹¹ Xiquinmictica nochi tacame, huan nochi sihuame cati ya monamictijtoque, huan nochi coneme, pero ichpocame, amo.”

¹² Huan ipan altepet Galaad quinpantijque 400 ichpocame cati ayemo monamictijtoyaj huan quinitzquijque huan quinhualicaque campá quiquetztoyaj iniyoyoncalhua ipan altepet Silo cati eltoc ipan tali Canaán.

¹³ Huajca nochi nopa tasentili ten israelitame tanahuatijque ma quintemoca nopa benjaminita tacame cati motatiyayaj nechca Tet Rimón para quinilhuisse ma moyoltaliqij inihuaya. ¹⁴ Huan nopa benjaminita tacame hualajque huan quinmactilijque nopa 400 ichpocame cati quincuitoj ipan altepet Jabes. Pero amo quinaxili para nochi, pampa miyac tacame amo quinselijque. ¹⁵ Huan nopa israelitame tahuel mocuesohuayayaj pampa TOTECO quichijtoya ma ixpolihui se hueyi familia ipan iixhuihua Israel.

¹⁶ Huajca nopa huehue tacame cati quinyacanayayaj israelitame sempa moilhuijque: “¿Canque tiquincuisse sihuame para tiquinmactilise nopa benjaminita tacame cati quinpolohua sihuame, pampa tiquinmictijque nochi inisihuahua?”

¹⁷ Tahuel monequi tiquinpantilise sihuame nopa benjaminítame para se hueyi familia amo polihuis ipan tali Israel. ¹⁸ Pero tojuanti amo hueli tiquinmacase toichpocahua, pampa nochi tiisraelitame tijtestigojquetzque TOTECO huan tiqijtojque: “Ma eli tatechihuali cati temactilis iichpoca para ma eli isihua se benjaminita tacat.”

¹⁹ Huan nopa huehue tacame ten Israel san sejco moilhuijque para nopa benjaminita tacame hueli quinitzquise sihuame para iniaxca huan amo injuanti quinmacasquáj. Huajca quijtojque: “Sesen xihuit tiilhuichihua para TOTECO ipan nopa tamayamit nechca altepet Silo. Tijpiyaj nopa ilhuit nozona tatajco ten altepet Betel huan Lebona nechca nopa ojti cati quisa Betel huan yahui hasta altepet Siquem. Eltos ilhuit nozona ojtenti para campá quisa tonati.”

²⁰ Huajca nopa huehue tacame ten Israel quinnahuatijque nopa benjaminita tacame ma yaca huan ma motatitij xocomeca milita para mocuilise se ichpocat, ²¹ huan quej ni quinilhuijque: “Xiyaca ipan nopa tamayamit huan xitachixtoxa cuali. Huan quema anquinítase mijtotitijhualahuij ichpocame cati ehuan altepet Silo, xiquisase campá anmotatijtoque, huan

ximoitzquilica sese amojuanti se ichpocat huan xiquinhuicaca amochajchaj ipan amotal.”

Quej nopa quinilhuijque.

²² Huan teipa quema hualase inintatahua o iniicnihua nopa ichpocame huan techtatztintoquiliquij para ten tiquincahuilijtoque ma quinitzquica, tiquinnanquilise para ma quintapojpolhuica huan ma quincahuilica ma mocuilica nopa ichpocame pampa amo tiquinajsique ichpocame para nochi inijuanti quema tiquintehutoj altepet Jabes ehuan. Tiquinilhuse para amo quihuicase tajtacoli ipan ya ni pampa amo quintemactilijque iniichpocahua.

²³ Huajca nopa benjaminita tacame quichijque quej quinilhuijque, huan sesen inijuanti quiichtejqui se ichpocat quema mijtotiyayaj huan quinhuicaque campa inintal. Huan nopa benjaminitame sempa pejque momiyaquilíaj huan pejque quincualchijchihuj nopa altepeme cati polijtoya huan nozona mocajque para itztose. ²⁴ Teipa nochi nopa israelita tacame cati mosentilijtoyaj, quisque. Huan sesen yajqui campa ichaj ipan nopa tali cati ihueyi familia quiselijtoya para iniaxca.

²⁵ Huan ipan nopa tonali amo aqui tanahuatiyaya ipan nochi tali Israel. Nochi masehualme san quichihuayayaj cati quinequiyayaj huan cati quitayayaj para cuali.

Rut

Se israelita familia yajqui ipan tali Moab

¹ Ipan nopa tonali quema nopa jueces tanahuatiyayaj ipan tali Israel, oncac se hueyi mayanti ipan nochi nopa talme. Huan itztoya se tacat cati itoca Elimelec ten altepet Belén * ipan tali Judá. Huan pampa eliyaya chicahuac nopa mayanti Elimelec quisqui ialtepe huan yajqui itztoti se quesqui tonali ipan tali Moab. Huan ihuaya yajqui isihua huan ome itelpocahua. ² Isihua itoca eliyaya Noemí, huan nopa ome inintelpocahua inintoca eliyaya Mahlón huan Quelión. ³ Huan quema noja itztoyaj nozona ipan tali Moab, mijqui Elimelec huan mocajqui iseltitzi Noemí ica ome itelpocahua. ⁴ Huan amo huejcajqui mosihuajtijque nopa tellocame inihuaya ome ichpocame ten tali Moab. Se ichpocat itoca Orfa huan seyoc Rut. Pero quema panotoya se majtacti xihuit para itztoyaj nozona, ⁵ nojquiya mijque nopa tellocame Mahlón huan Quelión. Huajca mocajqui iseltitzi nopa sihuat Noemí, yon ihuehue, yon iconehua.

Rut yajqui ihuaya Noemí hasta Belén

⁶⁻⁷ Huan se tonali ipan tali Moab Noemí quicajqui se camanali para TOTECO sempa quintasojtatoya imasehualhua ipan tali Judá campa quisque huan quinmacatoya se pixquisti cati yejectzi. Huajca Noemí mocualtali para tacuepilis ipan tali Judá huan quistejqui inihuaya ome iyexhua. ⁸ Pero ipan ojti Noemí moyolcuetqui huan quinilhui:

—Más cuali sempa xiyaca amochajchaj campa amonanahua. Ma TOTECO amechtaxtahui pampa cuali anitztoyaj ica notelpocahua huan ica na nojquiya. ⁹ Huan ma amechcahuili sempa ximonamictica huan xiittoca ica paquilisti.

Huajca Noemí quintzoponi huan quinnahuatijtejqqui Rut huan Orfa, pero injuanti pejqque chocaj, ¹⁰ huan quihhuijqque:

—¡Tijnequij tiyase mohuaya campa momasehualhua!

¹¹ Pero Noemí quinilhui:

—¡Amo hueli anyase, noconeua! Monequi sempa xiyaca amotal. San tapic anyase nohuaya. Ayecmo niquinpiyas más coneme para huelis mosihuajtise amohuaya quej timomajtoque. ¹² Nimechilhúa, xitacuepilica. Ya ninanatzi para sempa nimonamictis. Huan masque sempa nimonamictisquía ni tayohua huan niquinpiyasquía más coneme, ¹³ amo huelis amochiyase ma motajtamica para mosihuajtise amohuaya. ¡Amo, noconeua! ¡Amo quej nopa! Nijpiya se tequipacholi cati más hueyi que amojuanti pampa yaya TOTECO techtajyohuilitjtoc.

¹⁴ Huan sempa pejqque chocaj. Teipa Orfa quitzoponi iyexna huan quinnahuatijtejqqui, pero Rut mocajqui ihuaya. ¹⁵ Huajca Noemí quihhui:

—Xiquita, mohues ya mocuetqui ital campa imasehualhua huan itaixcopincayohua. Xiya ihuaya.

¹⁶ Pero Rut quinnanquili:

—¡Amo techilhui para ma nimitzcajtehua huan ma timoiyocatalica! Campa tiyas, na nojquiya niyas. Campa tiitztos, nozona niitztos na. Momasehualhua elise nomasehualhua, huan moTeco Dios elis noTeco. ¹⁷ Campa ta timiquis, nojquiya nozona nimitquis na huan nozona nijnequi

* 1:1 1:1 Belén nojquiya itoca Efrata.

ma techtalpachoca. Ma TOTECO hueyi techtatzacuiliti sinta moseltitzi nimtzcahuas. Niitztos mohuaya hasta miqulilisti techiyocatalis.

¹⁸ Huan quema Noemí quiitac para Rut nelía quinequiyaya yas ihuaya, ayecmo teno quiilhui. ¹⁹ Huan quej nopa, nopa ome quitoquilijque nopa ojti hasta ajsitoj altepet Belén. Huan quema calajque nopona, nochi Belén ehuaní san quitachilijque huan quijtohuayayaj:

—¿Amo ya ne Noemí?

²⁰ Pero Noemí quinnanquiliyaya:

—Ayecmo techtocaxtica niNoemí. (Noemí quijitosnequi Paquilisti.) Ama techtocaxtica Mara. (Mara quijitosnequi cati Chichic.) Pampa Toteco Cati Quipiya Nochi Chicahualisti techmacatoc miyac tequipacholi. ²¹ Quema niquistejqui nochi nijpiyayaya, pero ama nitacuepíla san ica nomax. Huajca amo techtocaxtica Noemí pampa TOTECO Cati Quipiya Nochi Chicahualisti huelis quipantijtoc cati amo cuali ipan na huan techtaijyohuiltijtoc.

²² Huajca quej nopa Noemí huan iyex Rut ten tali Moab quicajtejque Moab huan tacuepílijque ipan altepet Belén. Huan ajsitoj quema pejtoyaj quipixcaj cebada.

2

Rut tequitic ipan imil Booz

¹ Huan itztoya ipan Belén se tominpíxquet cati itoca Booz cati eliyaya iteixmatca Elimelec cati elqui ihuehue Noemí. ² Huan se tonali Rut quiilhui iyexna Noemí:

—Techcahuili ma niya ipan se mili. Huelis se acajya techtasojtas huan nechcahuilis niyas inintepotzco injuanti cati pixcatinemij para nijpejpeniyas cati tepehui.

Huan iyexna quiilhui:

—Cualtitoc, nócone, xiya.

³ Huajca Rut yajqui ipan se mili huan quisentilijtiyajqui cati quitepejtiyahuiyayaj nopa pixcani. Huan quimatqui para nopa mili eliyaya iaxca Booz iteixmatca Elimelec cati ya mictoya. ⁴ Huan ipan nopa tonali Booz quisqui Belén, huan ajsito imila huan quintajpalo nopa pixcani:

—¡Ma TOTECO itzto amohuaya!

Huan quiilhuijque:

—¡Ma TOTECO mitztiochihua!

⁵ Huan teipa Booz quitatzintoquili nopa tacat cati quinyacanayaya nopa pixcani:

—¿Ajquiya iteixmatca ne ichpocat?

⁶ Huan nopa tacat quijto:

—Yaya nopa tali Moab ejquet cati hualajqui ihuaya Noemí. ⁷ Techtajtani ma nijcahuili ma yas inintepotzco nopa pixcani para quipejpeniyas cati tepehui. Tequipanojtoc nochi ijnaloc huan hasta ama. Amo mosiyajquetztoc yon se quentzi.

⁸ Huajca Booz yajqui huan quiilhuito Rut:

—Nocone, amo xiya xijpejpenati ipan seyoc mili. Ximocahua nica ica nosihua tequipanojcahua. ⁹ Xitachili campa pixcaj huan teipa xiquintoquili campa tequititij. Niquininahuatijtoc notequipanojcahua ma amo mitzcutatonica. Quema tiamiquis, xiya campa nopa comit huan xiqui at cati notequipanojcahua quiquixtijtoque.

¹⁰ Huan Rut motancuaquetzqui iixpa huan mohuijtzonqui hasta talchi para quitascamatis ica cuali huan quiilhui Booz:

—¿Quenicatza huelis nelhueyi moyolo ica na huan techtasojtatoc huan na niseyoc tali ejquet?

¹¹ Huan Booz quinanquili:

—Nijcactoc nochí cati cuali tijchihuilijtoc moyexna hasta quema mijqui mohuehue. Nojquiya nijmati tijquincajtejqui motatahua huan motal campa titacatqui para tihualas tiitztoqui tohuaya masque amo techixmati. ¹² ¡Ma TOTECO mitztaxtahui! ¡Ma mitzpalehui TOTECO Dios cati toTeco tiisraelitame huan cati ipan timotemachijtoc huan ma mitztaxtahui por nochí cati tijchijtoc!

¹³ Huan Rut quinanquili:

—Tascamati. Nelía cuali moyolo ica na, huan mocamanal techyolchicajtoc pampa technoijnotztoc ica taicnelili. Techpalehuijtoc masque amo monequi. Na yon amo niitztoc se motequipanojca.

¹⁴ Huan teipa quema ajsic hora para tacuase, Booz quinoztzqui Rut huan quiilhui:

—Nica xihuala, xitacuaqui tohuaya. Eltoc pantzi huan xixoloni ipan ni vinagre cati tasencahuali.

Huan Rut mosehui ihuaya itequipanojcahua huan Booz quimacac cebada tahuatzali. Huan Rut tacuajqui hasta ixhuic, huan noja mocajqui nopa tacualisti cati quimacatoya. ¹⁵ Huan teipa moquetzqui para sempa tequititi. Huan quema Rut ya quistoya, Booz quinnahuati itequipanojcahua:

—Xijcahuaca ma quicui nojquiya campa montonijtoc, huan amo teno xiquilhuica. ¹⁶ Nojquiya xijtepehuaca sequij xinachtí para ma quipejpna. ¡Amo aqúi ma quiajhua!

¹⁷ Huan Rut quisentili iyol cebada hasta tayohuixqui. Huan quioxqui huan quitamachijqui huan quipanoc 6 cuartillos ten cebada. ¹⁸ Huan quihuícac nopa cebada huan facuepili ipan altepet. Huan quinxentili iyexna cati quisentilijtoya, huan nojquiya Rut quimacac Noemí nopa tacualisti cati mocajqui tajco tona.

¹⁹ Huan iyexna quitatzintoquili:

—¿Canque titequitic ama? ¿Ajquiya iaxca campa tijsentili nelmiyac cebada? ¡Ma Toteco quitiochihua yaya cati quej ni mitzpalehuijtoc!

Huan Rut quipohuili iyexna ihuaya ajquiya tequitiyaya. Quiijto:

—Nopa tacat cati ihuaya nitequitiyaya itoca Booz.

²⁰ Huan Noemí quiilhui:

—¡Ma TOTECO quitiochihua! TOTECO noja techtasojta cati mictoque tohuehuejhua. Nopa tacat Booz, yaya se toteixmatca cati nechca, huan yeca quinamiqui para yaya quicohuas total huan techmocuitahuis quej quijtohua tanahuatili.

²¹ Huan Rut noja quiilhui Noemí:

—Nojquiya techilhui noja ma nitequititi inihuaya itequipanojcahua hasta tamis pixquisti.

²² Huan Noemí quinanquili iyex:

—Nocone, xijchihua cati Booz quijtohua huan ximocahua inihuaya isihua tequipanojcahua, pampa huelis mitzpanos se tamanti cati amo cuali ipan seyoc mili.

²³ Yeca Rut noja quisentilijtinenqui ihuaya itequipanojcahua Booz hasta quema tanque quipixcaj cebada huan hasta tanque quipixcaj trigo. Huan noja mocahuayaya ipan iyexna ichaj.

¹ Teipa se tonali Noemí quiilhui Rut:

—¡Nocone, techtacaquili! Monequi nimitztemohuilis mohuehue para tipaquis huan sempa tijpiyas mochaj. ² ¿Tiquelnamiqui nopa tacat Booz campa titequitiyaya inihuaya isihua tequipanojcahua? Ama ni yohuali yaya yas imila quiyejyectiti cebada. ³ Huajca xijchihua cati nimitzilhuis. Ximalti huan ximoajhuiyalti huan ximoquenti moyoyo cati achi cuali. Huan xiya xiquitati Booz ipan imila, pero amo xijcahua ma mitzixmati hasta quema ya tanqui tacuas. ⁴ Huan xiquita canque moteca. Huan quema ya cochtos, xiya huan xiquijcueni itaque iicxita huan nopona ximoteca. Quej nopa tijtajtanis ma mitzmocuitahuis quej quijtohua tanahuatili. Huan teipa yaya mitzilhuis taya monequi tijchihuas.

⁵ Huan Rut quiilhui Noemí:

—Nijchihuas nochi cati techilhuijtoc.

⁶ Huajca teipa Rut yajqui mila huan quichijqui nochi cati iyexna quiilhuijtoya. ⁷ Huan Booz tanqui tacua huan paquiyaya. Teipa yajqui motecato para cochis nechca campa quimontonojtoyaj iyol cebada. Huan teipa ica yolic Rut hualajqui huan quijcuenili itaque huan nopona iicxita motejqui. ⁸ Huan nechca tajco yohual, Booz isatihuetzqui, huan quema mocuetqui, momacac cuenta para se sihuat motectoya iicxita.

⁹ Huajca yaya quijito:

—¿Ajquiya ta?

Huan Rut quiilhui:

—Na niRut. Ta tinoteixmatca cati nechca huan quinamiqui para ta para tijcohuas total huan timonamictis ica na quej quijtohua tanahuatili.

¹⁰ Huan Booz quinanquili:

—¡Ma TOTECO mitztiochihua! Más tijnextijtoc tatepanitacayot ica iteixmatcahua mohuehue ama huan amo quej tijchijqui quema tihualajqui ihuaya moyexna. Pampa tihueltosquia tijtemojtosquia se cati más tellocat, masque cati teicneltzi, o cati tominpiya. Pero amo ya nopa cati tijchijqui.

¹¹ Huajca amo ximajmahui, Rut. Nochi quimatit se ticuali sihuat, huan yeca nijchihuas cati techtajtania. ¹² Melahuac na se nimoteixmatca cati nechca cati quinamiqui mosihuajtis mohuaya, pero itztoc seyoc tacat cati moteixmatca cati más nechca. ¹³ Huajca ni yohuali ximocahua nica. Huan sinta mosta nopa seyoc tacat quinequis quicohuas motal huan monamictis mohuaya, cuali pampa yaya moteixmatca cati más nechca. Pero sinta amo quinequis, huajca nijtestigojquetza TOTECO para na nijchihuas. Huajca ama, xicochi hasta tanesis.

¹⁴ Huajca Rut cochqui iicxita Booz. Huan tonili mijquejqui quema noja tzintatayohuayaya huan amo aqui huelqui quiitac pampa Booz quijtojtoya monequi amo aquí quimatis para hualajtoya se sihuat nopona campa imil.

¹⁵ Huan Booz quiilhui:

—Ximoquixfili cati ica timopanpictoc huan xijsohua nica.

Huajca Rut moquixtili cati ica mopictoya, huan Booz quemili chicuase tatamachihuali ten iyol cebada. Teipa quipalehui quimamaltis huan Rut sempa yajqui campa altepet. ¹⁶ Huan quema Rut ajsito ichaj, iyexna pejqui quitatzintoquilia:

—¿Quenicatza elqui, nocone?

Huan Rut quipohuili nochi cati Booz quichijtoya huan quiilhuijtoya.

¹⁷ Huan nojquiya quijito:

—Techmacac ni chicuase tatamachihuali ten iyol cebada. Techilhui amo cuali nitacuepilis mochaj huan amo teno nijhualicas.

¹⁸ Huajca Noemí quijito:

—Ama, nocone, xijchiya hasta tijmatis taya panos. Booz amo mosiyajquetzas ama hasta quisencahuas ni tamanti.

4

Booz mosihuajti ihuaya Rut

¹ Teipa Booz yajqui mosehuito nechca hueyi caltemit ipan nopa tepamit campa nochi quisaj huan calaquij pampa nozona momajtoyaj mosentilij tacame. Teipa Booz quitiac huala iteixmatca cati quihuijtoyaj Rut para más quipixtoya tanahuatili quimocuitahuis. Huajca Booz quihui:

—Xihuala nica, ximosehuiqui.

Huan iteixmatca yajqui huan mosehui. ² Huan Booz quinnotzqui majtacti huehue tacame cati tayacanayayaj ipan nopa altepet huan nojquiya quihui ma mosehuica ihuaya pampa quej nopa momatque quisencahuaj se camanali ipan nopa tonali. Huan quema mosehuijtoyaj, ³ Booz quihui iteixmatca:

—Tiquixmati Noemí cati mocuctoc ten tali Moab. Yaya quinamaca nopa tali cati eliyaya iaxca toteixmatca Elimelec. ⁴ Nijnequi xijmati pampa huelis tijnequis tijcohuas. Huan sinta tijnequi tijcohuas, xiquijto amá iniixpa ni huehue tacame cati mosehuíaj nica para nochi quimatise. Pampa ta tiiteixmatca cati más nechca huan yeca achtohui tijpiya tanahuatili para tijcohuilis ital sinta tijnequi. Pero sinta amo tijnequi tijcohuas, techihui ama, pampa teipa quinamiqui para na nijcohuas.

Huan iteixmatca tananquili huan quihui Booz:

—Nijnequi nijcohuas.

⁵ Huajca Booz quihui:

—Nojquiya xiquelnamiqui sinta tijcohuas nopa tali, monequi timocuilis Rut, nopa cahualtzi cati huala ten tali Moab. Quej nopa ne tali noja mocahuas ica itoca nopa mijcatzi huan quema anquiyase se conet, quihuicas itoca nopa mijcatzi huan quiselis ital.

⁶ Huan quema iteixmatca quicajqui ni tamanti, tananquili:

—Sinta quej nopa, amo huelis nijcohuas yon amo hueli nimocuilis Rut, pampa monequiscuía niinquixtilis cati eliscuía iniaxca nonelcnehua para niquincahuilis coneme cati tacatise. Pero sinta ta tijnequi tijcohuas, nimitzpanoltilia nopa tanahuatili para xijcohua.

⁷ Ipan nopa tonali ipan tali Israel momajtoyaj quema se quinamacayaya se tali o se quimacayaya seyoc tanahuatili para quicohuas se tali, huajca nopa tanamácaquet moquixtiliyaya se itecac huan quimacayaya ne seyoc. Huan yeca, ⁸ iteixmatca Booz moquixtili itecac huan quimactili Booz, huan quihui:

—Ta xijcohua nopa tali.

⁹ Huajca Booz quihui nopa tayacanani huan nochi cati mosentilijtoyaj nozona:

—Ama nochi antestigos para nijcohuilia Noemí nopa tali cati elqui iniaxca Elimelec, Quelión huan Mahlón. ¹⁰ Nojquiya antestigos para nimocuilía Rut cati huala tali Moab para elis nosihua, yaya cati icahual Mahlón. Quej nopa yaya hueli quipiyase se oquichpil cati quihuicas itoca ihuehue cati mijqui huan quiselis ital nica. Ama antestigos.

¹¹ Huan nopa huehue tacame huan nochi cati nozona itztoyaj tananquili-
jqe:

—Quena, tojuanti titestigos. ¡TOTECA ma quichihuas nopa sihuat cati calaquis ipan mochaj ma eli quej tohuejcapan nanahua Raquel huan Lea, pampa nochi tiisraelitame tihualajque ten injuanti! Huan ta xieli se hueyi

tacat ipan altepet Belén huan nochi ma camanaltica para mitztepanitase. ¹² TOTECO ma mitzmaca miyac moconeua ica nopa sihuat para anquinpiyase miyac amoixhuihua quej quinpixqui Fares cati elqui icone Tamar huan Judá.

¹³ Huaica quej nopa elqui quema Booz mocuili Rut para elis isihua. Huan teipa Booz ihuaya mocajqui Rut, huan TOTECO quintiochijqui, huan Rut quitacaltiti se piloquichpiltzi. ¹⁴ Huan sihuame ipan nopa altepet quiilhuiyayaj Noemí:

—¡Ma tihueyichihua TOTECO pampa ama mitzmacatoc se moixhui para mitzmocuitahuis! ¡Moixhui ma eli se hueyi tacat ipan tali Israel! ¹⁵ Moyex Rut mitzicnelía huan mitzpalehuijtoc más huan amo quej miyac telpocame. Mitzmacatoc se moixhui cati mitzchicahualismacas huan mitzpalehuis quema ya tielis tinanatzi.

¹⁶ Huan Noemí quimocuitahui nopa piloquichpiltzi ica paquilisti quej elisquía icone. ¹⁷ Huan quema icalnechahua Noemí quiitaque, quiijtojque:

—¡Tacajtoc se icone Noemí!

Huan quitocaxtalijque Obed. Huan Obed moscalti huan elqui itata Isaí huan ihueyi tata David.

Ihuejcapán tatahua David

¹⁸ Ya ni inintoca iteipan ixhuihua Fares cati itztoya huejcajquiya huan cati elqui ihuejcapán tata Booz.

Fares quipixqui icone itoca Hezrón,

¹⁹ huan teipa Hezrón quipixqui icone cati itoca Ram.

Ram moscalti huan quipixqui icone cati itoca Aminadab.

²⁰ Teipa Aminadab moscalti huan quipixqui icone cati itoca Naasón.

²¹ Teipa Naasón quipixqui icone cati itoca Salmón.

Huan Salmón motacachijqui huan quipixqui icone cati itoca Booz.

Huan Booz moscalti huan quipixqui nopa conet cati itoca Obed.

²² Huan teipa Obed motacachijqui huan quipixqui icone cati itoca Isaí.

Huan Isaí motacachijqui huan quipixqui icone cati itoca David.

1 SAMUEL

Elcana ihuaya nopa ome isihuajhua

¹ Itztoya se tacat ten altepet Ramataim Zofim ipan tali Efraín, huan ya itoca eliyaya Elcana. Elcana elqui icone Jeroham, cati elqui icone Eliú, cati elqui icone Tohu, cati huejcajquiya elqui icone Zuf. Huan Elcana itztoya ipan nopa hueyi familia ten iixhuihua Efraín. ² Huan Elcana quinpixtoya ome isihuajhua. Se itoca eliyaya Ana huan nopa seyoc Penina. Huan Penina quinpiyaya iconehua, pero Ana, amo.

³ Huan sesen xihuit Elcana huan nochi ichaj ehuaní quisayayaj ipan inialtepe huan yahuiyayaj altepet Silo. Nopona quihueyitaliyayaj TOTECO Cati Quinyacana Iilhuicac Ejchua Ma Tatanitij. Huan nopona quimacayayaj tacajchualisti iixpa. Huan nopona tequitiyayaj nopa ome totajtztzi, Ofni huan Fines, cati eliyayaj iconehua Eli.

⁴ Huan quema Elcana quimacayaya tacajchualisti TOTECO, quinmacayaya se tatecti nopa nacat isihua Penina huan sese iconehua. ⁵ Pero nochipa quimacayaya Ana nopa nacat cati más cuali. Pampa masque TOTECO quichijtoya Ana para amo hueli conepiya, Elcana tahuel quicneliyaya. ⁶ Huan Penina iompa sihua quicualancaitayaya huan quipinajiyaya pampa amo conepiyayaya.

⁷ Huan sesen xihuit quema yahuiyayaj Silo campa itiopa TOTECO, Penina ten hueli quihuiyaya Ana. Huan quichihuayaya para ma choca Ana hasta amo hueliyaya tacua. ⁸ Huajca Elcana cati eliyaya ihuehue quihui:

“¿Para ten tichoca Ana? ¿Para ten tahuel timocuesohua hasta amo titacua? ¿Amo timoilhuía para más cuali techpixtos na que majtacti moconehua?”

⁹ Huan se tonali quema itztoyaj ipan altepet Silo huan tantoya inintacualis campa ichaj TOTECO, Ana motatajtito ica TOTECO. Huan nopa totajtzi Eli mosehuijtoya ipan se cuasiya nechca nopa yoyon tiopamit icalte. ¹⁰ Huan Ana ica miyac tequipacholi pejqui motatajtía ica TOTECO huan nelía mochoquiliyaya. ¹¹ Huan chicahuac quihui TOTECO ten taya quichihuasquía sinta quimacasquía se conet, quijto: “TOTECO, Ta Cati Tiquinyacana Moilhuicac Ejchua Ma Tatanitij, sinta techtacaquilisquía, huan tiquitasquía notequipachol, huan techtasojtasquía huan techmacasquía se nooquichpil; huajca nimitzmactilis para mitztequipan noschi tonali ipan inemilis. Huan para monextis para ya senquisa moaxca, amo quema motequilis itzoncal.”

¹² Huan Ana huejcajqui motatajtí iixpa TOTECO, huan Eli quitachilijtoya. ¹³ Pero motatajtíyaya ixtacatzí huan san motenjoliniyaya. Yeca Eli amo quicaquiyaya taya quijtohuayaya. Huan moilhui para huelis ihuinti, ¹⁴ yeca quihui:

—¿Para ten tihualajqui sinta tiihuinti? Xijcahua nopa taili.

¹⁵ Huajca Ana quinanquili:

—¡Amo, tate! Na amo niihuinti. Amo teno niquitoc. Nijpiya se hueyi cuesoli huan ama niquihuijtoc TOTECO nochi notequipachol. ¹⁶ Amo ximoilhui para se nifero sihuat. Nihuejcajtoc nimotatajtía pampa tahuel miyac nimocuesohua huan yeca amo nicamanaltitoc.

¹⁷ Huajca Eli quihui:

—Xiya ica paquilisti, huan Toteco Dios cati toTeco tiisraelitame ma mitzmaca cati tijtanjitoc.

¹⁸ Huan Ana quinanquili:

—Tascamati, tate. Sinta techtasojta, xijchihua se favor, ximotatajti por na. Huan Ana quisqui ica miyac paquilisti, huan tacuajqui huan ayecmo mocueso. ¹⁹ Huan tonili mijquejque nel ijnalti huan quihueyitalijque TOTECO huan mocuetque ininchaj ipan altepet Ramá.

Tacatqui Samuel

Huan Elcana cochqui ihuaya isihua Ana, huan TOTECO quielnamijqui cati Ana quitajtaniytoya. ²⁰ Huan Ana conecuc, huan teipa ajsic tonali huan quitacatiliti se piloguichpiltzi. Huan quitocaxtali Samuel pampa quijito: “Ya ni nijtajtani TOTECO.” (Samuel quinequi quijitos Cati Quitajtaniytoc TOTECO.)

²¹ Huajca Elcana huan nochi ichampoyohua yajque Silo para quimacase tacajchualisti TOTECO quej momajtoyaj quichihujaj sesen xihuit. ²² Pero Ana amo yajqui. Quiilhui ihuehue:

—Amo niyas hasta quema nijchichijcahualtis ni conet. Huajca quena, nijhuicas ipan ichaj TOTECO, huan nopona nijcahuas para ma quitequipano TOTECO para nochipa.

²³ Huajca Elcana cati eliyaya ihuehue quiilhui:

—Cualtitoc, xijchihua cati tiquita para cuali. Ximocahua hasta quema tijchichijcahualtis, huan ma TOTECO quichihua ica ya nochi cati tijtajtaniytoc.

Huajca Ana mocajqui huan quimocuitahui icone hasta quichichijcahualti.

Ana quihuicac Samuel nepa Silo

²⁴ Huan teipa quema nopa conet mochichijcajqui, masque noja pisiltzi, Ana quihuicac ichaj TOTECO nepa ipan Silo. Nojquiya quihuicac eyi becerros huan nechca 24 litros trigo huan se cuetaxti temitoc ica xocomecat iayo. Nochi quihuicac para quimactilis TOTECO. ²⁵ Huan quinmictijque nopa becerros huan quihualicaque nopa conet iixpa nopa totajtzi Elí. ²⁶ Huan Ana quiilhui:

—Tate, ¿techelnamiqui? Na ninopa sihuat cati nimotatajtiyaya nica huan techtachilijtoya. ²⁷ Na nijtajtani TOTECO para ma techmaca ni oquichpil huan yaya techmacatoc. ²⁸ Huan ama nijhualicatoc para nijmactilis TOTECO para ma quitequipano nochi inemilis.

Huan Elcana quihueyitali TOTECO nopona.

2

Ana quitascamatili TOTECO

¹ Huan Ana motatajti ica TOTECO huan quijito:

“TOTECO, nelía niyolpaqui ipan ta. Miyac techtiochijtoc huan techmacatoc yancuic chicahualisti. Huan ama huélis niquinanquilis nocualancaitacahua, pampa ta, TOTECO, techmaquixtijtoc ten notequipachol. Huan yeca nelía niyolpaqui.

² Amo aquí seyoc cati tatzejzeloltic quej ta, TOTECO. Amo aquí seyoc Dios.

Amo aquí seyoc cati huéli temanahuía quej ta, san Toteco Dios tiiyojtzi.

³ Amojuanti anmasehualme, amo ximohueyimatica. Amo xicamanaltica chicahuac.

Amo ximotepanitaca.

Pampa TOTECO san yaya Dios cati nochi quimati. Yaya amechtajtolsencahuas ica cati anquichihujaj.

⁴ Tiquinfuerzajcuilía cati yolchicahuacque,

huan tiquinyolchicahua cati amo quipiyaj fuerza.

⁵ Masehualme cati quipixque tacualisti hasta mocahua, ama taijyohuíaj ica mayanti.

Huan cati mayanayayaj, ama hasta mocahua inintacualis.

Huan nopa sihuat cati amo hueli conepiya, ama ya quinpixtoc hasta chicome iconehua.

Huan nopa sihuat cati quinpiyayaya miyac iconehua, ama ayecmo teno quinpiya.

⁶ TOTECO, ta titemictía huan ta titemaca nemilisti.

Ta titemohuía campa miquilisti huan ta cati titetejcoltía.

⁷ TOTECO, ta tiquinchihua sequij masehualme teicneltziti, huan sequij ta tiquinricojchihua.

Ta cati titeicnotalía huan titehueyichihua.

⁸ TOTECO, ta tiqintanana nopa teicneltziti cati itztoque talchi.

Quena, tiqintanana cati mosehuíaj campa cuajnexti,

huan tiqinhueyichihua para ma mosehuica inihuaya huejhueyi tequichihuan.

Quena, TOTECO tiquinchihua ma mosehuica campa más onca tatepanitacayot.

Pampa ta cati más tihueyi.

Huan ta moaxca nochi tamanti hasta nopa taquetzali cati ipan tijquetzqui ni taltipacti.

⁹ TOTECO, tiqinmocuitahuía cati taiyocatalilme para ta, pero cati sentamique itztose ipan tzintayohuilot campa ayecmo molinise. Amo aquí tatanis san ica ya ichicahualis.

¹⁰ TOTECO, tiqintzontamiltis nochi cati mitztehuíaj.

Tatatzinaltis ten ilhuicacti ininca nocualancaitacahua.

Tiqintajtolsencahuas nochi masehualme campa hueli ipan taltipacti.

TOTECO, ta cati tijmacas chicahualisti nopa tanahuatijquet cati tijtapejpenijtoc.

Quena, yaya cati ticajaltijtoc para quichihuas itequi, tijhueyichihuas.”

¹¹ Huan Elcana huan nochi ichampoyohua tacuepilijqe ininchaj ipan altepét Ramá, pero nopa conet Samuel mocajqui huan quitequipano TOTECO quej quinahuati totajtzi Elí.

Nopa tajtacoli cati quichijque iconehua Elí

¹² Huan itelpocahua Elí nelía eliyayaj sentamique huan yon quentzi amo quiixmatiyayaj TOTECO. ¹³ Quema tequitiyayaj quej totajtztzi huan hualayaya se acájya para quitatis tacajchualisti para TOTECO, injuanti quititaniyayaj se inintequipanojca ica se hueyi teposhuitzi imaco cati quipiyayaya eyi cuachijcoli. Huan quema nopa nacat ten nopa tacajchualisti ya icsiyaya, ¹⁴ inintequipanojca quicalaquiyaya nopa teposhuitzi ipan chachapali o ipan ten hueli campa quicxitíaj nopa nacat huan nochi nopa nacat cati quiquixtiyaya quinhuiquiliyaya itelpocahua Elí. Huan quej nopa quichijque cati amo monequi nochipa ica nochi israelitame cati ajsiyayaj Silo para quihueyitalise TOTECO. ¹⁵ Nojquiya quemantica nopa tequipanojquet ajsiyaya quema ayemo quitatiyayaj ichiyajca nopa nacat ipan taixpa, huan quinilhuiyaya cati temacaj tacajchualisti: “Techmaca nacat para nijcacatzohuiti nopa totajtzi pampa yaya amo quiselis sinta ya icsitoc. Yaya quinequi xoxohuic para quicacatzos.”

¹⁶ Huan quemantica nopa tacame quinanquiliyayaj quej ni: “Huelis ti-
jhuicas ten tijnequis, pero achtohui xijcahua ma tata ichiyajca quej qui-
ijtohua tanahuatli, huan huajca huelis tijcuis”. Huan quema quej nopa
quinanquiliyayaj, huajca nopa tetequipanojquet quiijtohuayaya: “Tech-
maca amantzi pampa sinta amo techmacas nimitzquixtilis ica cualanti.”

¹⁷ Huajca nelía se hueyi tajtacoli cati quichihuayayaj ni telpocame iixpa
TOTECO, pampa san quiahuilmatiyayaj nopa tacajcahualisti cati nopa is-
raelitame quihualicayayaj para quimacase TOTECO.

Samuel quitequipano TOTECO tiopan calijtic

¹⁸ Huan nopa piloquichpiltzi Samuel quitequipanohuayaya TOTECO
tiopan calijtic huan moyoyontiyaya ica se pilyolixtzajcayotzi ten lino yoy-
omit quej moyoyontíaj totajtzitzi. ¹⁹ Huan sesen xihuit inana quichihuiliyaya
seyoc pilpantzajcayotzi huan quihuiquiliyaya quema yahuiyaya campá
tiopa ihuaya ihuehue para quimacati TOTECO nopa tacajcahualisti cati
monejqui sesen xihuit. ²⁰ Huan sesen xihuit nopa totajtzí Eli quitiochijqui
Elcana ihuaya isihua, itatahua Samuel huan quihuiyaya Elcana: “Ma
TOTECO mitztiochihua huan ma mitzmaca más coneme ica ni sihuat pampa
quimactilijtoc ni icone para quitequipanos TOTECO.”

Huan teipa injuanti tacuepiliyayaj ininchaj. ²¹ Huan TOTECO quitiochi-
jqui Ana huan quimacac eyi ioquichpilhua huan ome isihuapilhua. Huan
Samuel moscaltijtiyajqui ipan itiopa TOTECO.

²² Huan Elí eliyaya nelía huehuentzi. Huan quimatiyaya nochi cati
fiero cati itelpocahua quinchihuiliyayaj nopa israelitame. Quimatiyaya
quenicatza cochiyayaj inihuaya nopa sihuame cati quimocuitahuíaj nopa
caltemit ipan nopa Yoyon Tiopamit campá TOTECO mopantiyaya inihuaya.

²³ Huajca Elí quinilhui itelpocahua: “¿Para ten anquichihua cati nelía fiero?
Nijcactoc nochi cati imasehualhua TOTECO mopohuilíaj para anquichihua.

²⁴ Noconeuhua, monequi xijcahuaca. Nelía amo cuali cati anquichihua. An-
quintajtacoltíaj imasehualhua TOTECO. ²⁵ Sinta se quichihuilía seyoc tacat
cati fiero, quiselis se tatzacuiliti. Pero amojuanti anquichihua cati fiero ica
TOTECO, huajca ¿ajquiya huelis amechmanahuis ten nopa hueyi tatzacuiliti
cati amechajsis?”

Pero itelpocahua Elí amo quinejqque quitacaquilise cati inintata quinil-
huiyaya pampa TOTECO ya motemacatoya para quinzontamiltis.

²⁶ Pero nopa oquichpil Samuel moscaltiyaya huan Toteco Dios
quipactiyaya nochi cati quichihuayaya, huan nojquiya nochi masehualme
quicualitayayaj.

TOTECO quiyolmelajqui Elí ten taya panos ica ichaj ehuaní

²⁷ Huan se tonali hualajqui se itajtolpanextijca Toteco Dios para quipax-
aloqui Elí huan quimacac ni camanali cati TOTECO quihuijtiyahuiyaya:
“Na nimonexti iníixpa mohuejcapan tatahua quema itztoyaj ipan tali Egipto
huan quitequipanohuayayaj Faraón san topic. ²⁸ Huan nijtapejpeni mo-
huejcapan tata Leví huan iteipan ixhuihua ipan nochi iconehua Israel para
anelise nototajtzitzi. Nimechtapejpeni para anquitatise tacajcahualisti ipan
notaixpa, huan para anquitatise copali, huan para noixpa anmotalilise nopa
yoyomit cati monequi para se totajtzí. Nojquiya nimechcahuili anquicuae
nopa cuali nacat ten nochi tacajcahualisti cati israelitame techmacase para
techhueyitalise. ²⁹ Huajca ¿para ten anquichijtoque quej amo teno ipati nopa
tacajcahualisti huan nopa nemacti cati nitanahuatijtoc ma techhualiquilica
ipan notiopa? ¿Para ten tiquinicnelijtoc más motelpocahua huan amo na?”

¿Para ten anmotomajtoque ica nopa achtohui nacat cati más cuali ten sesen tacajchualisti cati quihualicaj noisraelita masehualhua?”

³⁰ “Huajca ama na cati niamoTECO Dios nochi anisraelitame niquijtohua para masque niquijtojtoya para ta huan nochi moteipan ixhuihua techtequipanosquíaq nochipa, ama niquijtohua para ayecmo niquincahuilis techtequipanose cati amo techtepanitaj. Na niquinicnelis niujuanti cati techicnelíaj huan cati techcualancaitaj, niquinicnotalis. Huan nojquiya na cati niamoTECO anisraelitame nimitzilhuía ³¹ para monequi xitacaqui pampa monechcahuía tonali para nimechcuilis nopa chichahualisti cati anquipayaj huan nopa chichahualisti cati quipiyayaj mohuejcapan tatahua huan ayecmo aquí ten amoixhuihua itzto hasta huehuejtiyas. ³² Huan timocuesos quema tiqitas quenicatza niquechcapantalis mochaj huan moixhuihua huan ica sempa niquintiochihuas sequinoc israelitame tahuel miyac. Huan yon se moixhui amo itzto hasta huehuejtiyas. ³³ Nopa se quesqui ten mofamilia cati niquincahuas yoltoque taijyohuise huan quipiyase hueyi tequipacholi huan nochi ininconeua miquise quema noja telpocame. ³⁴ Huan para tijneltocas para, quena, temachti nijchihuas cati niquijtojtoc, ya ni cati panos. San ipan se tonal miquise ica sempa nochi ome motelpocahua, Ofni huan Finees.

³⁵ “Huan teipa nijtalis se totajtzi cati itzto xitahuac huan cati techtequipanos huan quichihuas senquisa cati niquilhuis ma quichihua. Huan niquintiochihuas nochi ichaj ehuaní, huan ten ifamilia para nochipa itztose totajtzitzi cati techtequipanose huan itztose iixpa nopa tanahuatijquet cati na nijtapejpenijtos. ³⁶ Huan niujuanti cati mocajtose ten mochan ehuaní hualase huan motancuaquetzase iixpa nopa totajtzi huan quitajtanise tomi huan ten quicuase. Nojquiya moixhuihua quitajtanise se tequit quej totajtzitzi para huelis tequipanose ipan taixpamit huan quej nopa quipiyase inintacualis.” Quej nopa quijto nopa tajtolpanextijquet.

3

TOTECO quinojnotzqui Samuel

¹ Huan nopa piloquichpiltzi Samuel quipalehuiyaya Elí huan quej nopa quitequipanohuayaya TOTECO. Huan ipan nopa tonali TOTECO amo más quinojnotzayaya masehualme para quinilhuis se camanali. Amo talojtzitzi quincamanalhuyaya quej achtohuiya. ² Huan Elí ya eliyaya nelhuehuentzi huan ya popoyotiyaya. Huan se tonali Elí mosiyajquetztoya ipan ichaj, ³ huan Samuel cochtaya ipan itiopa TOTECO campa icaxa Toteco Dios. Huan tajco yohual quema nopa taahuili cati tiopan calijtic noja taahuijtoya, ⁴ TOTECO quinojnotzqui Samuel:

—¡Samuel!

Huan Samuel tananquili:

—Nica niitztoc.

⁵ Huan nimantzi mijquejqui huan yajqui quitato Elí huan quiilhui:

—Nica niitztoc. ¿Para ten technotztoc?

Huan Elí quinanquili:

—Na amo nimitznotztoc. Xiya ximotecati sempa.

Huajca Samuel sempa motecato. ⁶ Huan TOTECO sempayano quinojnotzqui huan quijto:

—¡Samuel!

Huan Samuel sempa yajqui quitato Elí huan quiilhui:

—Nica niitztoc. ¿Para ten technotztoc?

Huajca Elí quinanquili:

—Na amo nimitznotztoc. Xiya ximotecati sempa.

⁷ Huan Samuel ayemo quixmatiyaya TOTECO pampa amo quema quinojnotztoya. ⁸ Huan TOTECO sempa quinojnotzqui Samuel ica expa, huan Samuel sempa yajqui quiiato Elí huan quiilhui:

—Nica niitztoc. ¿Taya tijnequi ma nijchihua?

Huajca Elí quimachili para eliyaya TOTECO cati quinojnotzayaya Samuel, ⁹ huajca quiilhui:

—Xiya huan ximoteca. Huan sinta sempa mitznojnotzas, huajca xiquijto: ‘TOTECO, techilhui taya tijnequi pampa nimotequipanojca huan nimitzcactoc.’

Huajca quej nopa Samuel yajqui huan motejqui sempa.

¹⁰ Huan TOTECO hualajqui sempa, huan moquetzqui nopona huan quinojnotzqui quej achtohuiya. Huan quiilhui:

—¡Samuel, Samuel!

Huajca Samuel quinanquili:

—TOTECO, techilhui taya tijnequi pampa nimotequipanojca huan nimitzcactoc.

¹¹ Huajca TOTECO quiilhui Samuel:

—Xiquita, nijchihuas se tamanti ipan tali Israel, huan cati quicaquis hasta itacaquillis quicocos. ¹² Nijchihuas nochi tamanti fiero cati niquilhuijtoc Elí para nijchihuas ica ichaj ehuaní. ¹³ Niquilhuijtoc para niquintzacuiltis nochi ichaj ehuaní para nochipa por inintajtacol itelpocahua cati ya quimati. Itelpocahua techahuilmajtoque huan yaya amo quintacahualtijtoc. ¹⁴ Huan ya niquilhuijtoc Elí para amo quema niquintapojpolhuilis nopa tajtacoli cati quichijtoque masque techmacase miyac tacajhualisti o ofrendas para ma nimoholtali.

¹⁵ Teipa Samuel motejqui sempa hasta tanesqui. Huan huajca mijquejqui huan caltapo ipan tiopamit quej momajtoya quichihua nochipa, pero majmahuiyaya quipohuilis Elí cati TOTECO quiilhuijtoya. ¹⁶ Pero Elí quinojnotzqui huan quiilhui:

—¡Nocone, Samuel!

Huajca Samuel quinanquili:

—Nica niitztoc.

¹⁷ Huajca Elí quiilhui:

—¿Taya mitzilhuijtoc Toteco Dios? Nimitztajtanía para amo techtatili yon se teno cati TOTECO mitzilhuijtoc. Sinta techtatilis se tenijqui, ma TOTECO mitztatzacuiliti.

¹⁸ Huajca Samuel quiilhui Elí nochi cati TOTECO quiilhuijtoya huan amo teno quitatili. Huajca Elí quiilhui:

—Yaya TOTECO cati mitznojnotztoc. Ma quichihua cati yaya quiita para cuali quichihuas.

¹⁹ Huan Samuel moscaltijtiyajqui huan TOTECO itztoya ihuaya huan quipalehuiyaya. Huan mochijqui nochi nopa camanali cati TOTECO quiilhuijtiyajqui Samuel para teyolmelahuas. ²⁰ Huan nochi israelitame ten tali Dan ica huejcapa huan hasta altepet Beerseba ica tatzinta quimatque para nelia Samuel eliyaya se itajtolpanextijca TOTECO cati itztoc xitahuac. ²¹ Huan TOTECO monextijtinenqui iixpa Samuel ipan altepet Silo para ma quixmati. Huan quimacayaya camanali para teyolmelahuas.

4

Nopa filisteos quichtejque icaxa TOTECO.

¹ Huan Samuel quinpohuiliyaya nopa israelitame nochi cati TOTECO quihhuiyaya. Huan ipan nopa tonali nopa filisteos mosejcotilijque para quintehuisse nopa israelitame. Huajca nochi israelita soldados quisque para moixnamiquise inihuaya huan mochijque nechca campa itoca Eben Ezer huan nopa filisteos mochijque ipan se lugar cati itoca Afec. ² Huan quema nopa filisteos quintehuijque nopa israelitame, quintanque huan quinmictijque 4 mil israelita tacame. ³ Huan quema nopa israelita soldados tacuepilijque campa mochijtoyaj, nopa huehue tacame cati quipixtoyaj tequiticayot ipan tali Israel quijtojque: “¿Para ten techtahucajqui TOTECO huan techcajqui para ma techtanica nopa filisteos? Ma tiyaca altepet Silo huan ma tijhualicaca icaxa TOTECO para ma itzo tohuaya, para ma techyacana huan para ma techmanahui ten tocualancaitacahua.”

⁴ Huajca nopa tacame yajque altepet Silo huan quicuitoj icaxa TOTECO Cati Quinyacana ilhuicac Ejcahua Ma Tatanitij huan cati mosehuía ipan isiya yejyectzi nepa ilhuicac tatajco ten nopa ilhuicac ehuan cati inintoca querubines. Huan inihuaya nopa tacame nojquiya yajque Ofni huan Finees, nopa ome itelpocahua Eli.

⁵ Huan quema ya quihualicatoyaj icaxa TOTECO nepa campa mochijtoyaj nopa israelitame, nochi tzajtzique chicahuac ica miyac paquilsti hasta mojmolini tali pampa nochi tahuejchihuayaj. ⁶ Huan nopa filisteos quicajque nopa tahuejchihualisti, huan quijtojque: “¿Taya pano ica nopa hebreo tacame? ¿Para ten tahuel yolpaquij?”

Huan teipa quimatque para quihualicatoyaj icaxa TOTECO nopona campa mochijtoyaj nopa israelitame. ⁷ Huajca nelia momajmatijque pampa moilhuijque: “Toteco Dios ajsitoc campa mochijtoque nopa israelitame. ¡Tajuanti titeicneltziti! Amo quema timopantijtoyaj ica se tamanti quej ni. ⁸ ¡Titeicneltziti! ¿Ajquiya techmanahuis sinta tihuetzise inimaco nopa dioses cati quipiyaj hueyi chicahualisti? Quema israelitame itztoyaj ipan tali huactoc, nopa dioses quincocojque nopa egiptome ica miyac tamanti cati ohui huan cati fiero. ⁹ Huajca ximosemacaca anfilisteo soldados huan ximoyolchicahuaca. Xitatehuica quej amo quema para amo anelise inintequipanojcahua israelitame quej injuanti amechtequipanohuayaj.”

¹⁰ Huajca nopa filisteos quintehuijque nopa israelitame huan sempa quintanque. Quinmictijque 30 mil israelita soldados cati icxinejnemiyayaj para tatehuise. Huan nopa israelitame cati mocajque yoltoque tacuepilijque campa mochantalijtoyaj pampa nelia tahuel fiero elqui nopa miqulisti.

¹¹ Huan nopa filisteos nojquiya quichtejque icaxa Toteco Dios huan quimictijque Ofni huan Finees, nopa ome itelpocahua Eli.

¹² Pero se soldado cati eliyaya se iixhui Benjamín mochololti ten nopa tatehuilisti huan yajqui Silo. Yaya quihuicayaya iyoyo tzayantoc huan motalilijtoya talcuajnexti ipan itzonteco. ¹³ Huan quema ajsito ipan nopa altepet, quitiac Eli mosehuijtoya ipan se cuasiya ojtenti nechca icalte nopa altepet. Tahuel mocuesohuayaya por icaxa Toteco Dios para ma amo teno ipanti. Huan nopa tacat calajqui ipan nopa altepet huan tepohuili ten panotoya. Huan teipa nochi nopa tacame ipan Silo pejque chocaj chicahuac.

¹⁴ Huan quema Eli quicajqui nopa tahuejchihualisti, quijto:

—¿Para ten nochi tahuejchihua? ¿Taya panotoc?

Huajca nopa tacat cati mochololtijtoya ipan tatehuilisti nimantzi yajqui quipohuilito nochi ten panotoya.

¹⁵ Huan Elí quipiyayaya 98 xihuit huan ayecmo hueliyaya tachiya. ¹⁶ Huan nopa tacat quilhui Elí:

—Nimochololti ipan nopa tatehuilisti.

Huajca Elí quilhui:

—¿Taya panotoc ipan nopa tatehuilisti, nocone?

¹⁷ Huan quinanquili:

—Miyac israelita soldados cholojque iniixpa nopa filisteos, huan miyac quinmictijque. Huan nojquiya quinmictijque nochi ome motelpocahua. Huan icaxa Toteco Dios techichtequilijque nopa filisteos.

¹⁸ Huan quema nopa tacat quijto para icaxa Toteco Dios quinichtequilijtoyaj, Elí huetzito ica iica nechca nopa caltemit campa mosehujtoya. Huan moquechpostejqui huan mijqui pampa ya huehuentzi eltoya huan tomahuac eliyaya. Huan quintajtolsencajtoya israelitame para 40 xihuit.

¹⁹ Huan iyex Elí cati eliyaya isihua Finees cone hue eliyaya huan nechcatoyaya para tacatis icone. Huan quema quicajqui para nopa caxa ten Toteco Dios quincuillijtoyaj nopa filisteos huan iyextat huan ihuehue ya mictoyaj, huajca pejqui cuajcualo huan quitacatilti icone. ²⁰ Huan nopa sihuat mijqui quema quitacatiltiyaya nopa conet. Pero quema ayemo miqiyaya nopa sihuame cati itztoyaj ihuaya quilhuijque ma amo majmahui pampa quipixqui se oquichpil. Pero yaya amo tananquili yon amo molini. ²¹⁻²² Huan quitocaxtali nopa conet Icabod cati quinequi quijtos: “Ihueyitilis TOTECO ayecmo eltoc tohuaya.” Quej ni quitocaxti nopa conet pampa quimachili para nelía ihueyitilis TOTECO ayecmo nesiyaya tohuaya tiisraelitame pampa sequinoc quinichtequilijtoyaj icaxa Toteco Dios huan pampa iyextat huan ihuehue ya mictoyaj. Huan masque quicamanalhujque para quiyolchicahuase, ayecmo quintacaquili pampa ya mictoya.

5

Nopa caxa ipan inintal filisteos

¹ Nopa filisteos quiiachtejque icaxa Toteco Dios campa itoca Eben Ezer huan quihuicaque hasta altepet Asdod, ² huan quicalaquijque ipan inintiopa campa quipixtoyaj itaixcopincayo Dagón huan quitallijque inechca. ³ Huan tonili ica ijnaloc, yajque tacame ten Asdod huan quiiatoyaj para nopa taixcopincayot Dagón huetztoc ixtapachijtoc iixpa icaxa TOTECO. Huajca quitananque huan quitallijque campa ipa eltoya. ⁴ Pero tonili sempa yajque altepet Asdod ehuan huan sempa quipantijque inintaixcopincayo Dagón huetztoya talchi iixpa icaxa TOTECO. Huan itzonteco, imax huan imetz Dagón nochi postectoyaya huan tepejtoya campa nochi calaquij ipan tiopam caltemit, huan san mocajtoya yajmaxtic itacayo. ⁵ Huan yeca hasta ama quema itotajzitzi nopa teteyot Dagón calaquij ipan inintiopa ipan altepet Asdod, amo moquetzaj campa huetzqui itacayo Dagón.

⁶ Huan TOTECO tahuel qintatzacuiliti nochi nopa masehualme ipan altepet Asdod huan nochi pilaltepztizti cati nechca. Huan quincoco ica cocome cati tojtolonciti cati nelía fiero. ⁷ Huan quema nopa tacame ten altepet Asdod quiiataque nochi ten panoyaya, quijtojque: “Nopa caxa ten ininTeco Dios nopa israelitame amo hueli mocahuas más tonali nica ica tojuanti pampa ya techatzacuilitijtoc chichahuac huan nojquiya quitatzacuilitijtoc totiotzi Dagón.”

⁸ Huajca quinsentilijque nochi tayacanca filisteos huan motatzintoquijque:

—¿Taya tijchihuase ica icaxa ininTeco nopa israelitame?

Huajca quinilhuijque:

—Ma quihuicaca ipan altepet Gat.

Huajca nopa filisteo tacame quihuicaque icaxa Toteco Dios nozona. ⁹ Pero quema quiaxititoj icaxa ipan nopa altepet, TOTECO momatananqui nojquiya ica nochi nopa masehualme ipan nopa altepet, huan nochi mohuihuichijque ica majmajti. Huan nochi pejqque quinpiyaj cocome cati tojtoloncic campa hueli ipan inintacayo. TOTECO quintatzacuiliti ten cati más pisiltzitzitzi hasta cati más huejhueyi, huan inijuanti nelía taijyohuiyayaj. ¹⁰ Huajca nopa filisteos ten altepet Gat quihuicaque icaxa Toteco Dios hasta altepet Ecrón. Pero quema quiaxititoj nopa caxa nozona nochi masehualme ten nopa altepet tzajtziqque huan quijtojqque: “¡Techhualiquilíaj nojqquiya nopa caxa ten ininTeco israelitame para ma techmicti nochi tojuanti huan toaltepe!”

¹¹ Huan campa hueli ipan nopa altepet miyac mijque pampa Toteco Dios nelía fiero quintatzacuiliti. Huajca nopa tacame ten nopa altepet quinoztzque nochi nopa tayacanca filisteos ipan inintal para ma mosentilica huan quinilhuijque: “Xijhuicaca ni caxa ten ininDios israelitame huan xijcucapaca campa anquiichtectoque para ma amo timiquica nochi tojuanti.”

¹² Huan nopa masehualme cati nozona ehuan cati amo mijque nelía taijyohuiyayaj pampa temitoya inintacayo ica cocome cati tojtoloncic. Huajca campa hueli san caquistiyaya choquisti.

6

Nopa filisteos quicuetque icaxa TOTECO

¹ Huan icaxa TOTECO eltoya chicome metzti ipan inintal filisteos. ² Huajca nopa filisteos quinoztzque nochi inintotajtzitzitzi huan nochi tenahualhuani para quintatzintoquilise taya quichihuase. Quiijtojqque:

—¿Taya tijchihuase ica ni icaxa ininTeco? Techilhuaica quenicatza huelis tijcucapase ica cuali campa eltoya.

³ Huajca quinilhuijque:

—Sinta anquicucapase icaxa ininTeco israelitame, amo xijcucapaca san quej nopa. Monequi antemacase se tacajcualisti para anquixtahuase cati anquichijtoque huan huajca anpachihuise. Huan sinta amo anmochicahuase, huajca anquimachilise para amo ya Dios quititantoc ni cocolisti.

⁴ Huajca nopa filisteos motatzintoquilijque:

—¿Huan taya tacajcualisti huelis titemacase para tiquixtahuase cati tijchijtoque?

Huajca quinilhuijque:

—Itztoque macuiliti filisteo tayacanani, huajca xijchihuaca macuili tamanti ica oro cati nesis quej nopa cocome cati itoca tumores cati anquipiyaj. Nojqquiya xiquinchihuaca macuiliti quimichime ica oro quej nopa quimichime cati quitamiitzquitoque total. Nopa tacajcualisti monequi elis san se para amomasehualhua huan amotayacancagua pampa nochi amojuanti anquijyohuíaj san se. ⁵ Huajca xijchihuaca nopa taixcopincayot ica oro quej nopa cocome huan nopa quimichime cati anquipiyaj para quej nopa anquinextise anquihueyitepanitaj ininTeco nopa israelitame para ma ayecmo amechtatzacuiliti, huan ma ayecmo quinenpolo amotal. ⁶ Amo ximoyoltetilica quej quichijque nopa egiptome huan Faraón. Amo quincahuilijque ma quisaca nopa israelitame hasta quema TOTECO quintatzacuiliti nelía fiero. ⁷ Huan ama nojqquiya xitanahuatica para ma quichihuaca se cuacarro yancuic huan xiquintapejpenica ome huacaxme cati quinpiyaj ininconeua huan cati amo quema quintalilijtoque cuahuit

ipan ininquechcuayo para tapoxonise. Huan xiquinilpilica nopa cuacarro para quitlantiyase, pero ininconeua xiquintzacuaca ipan corral para amo quintoquilise. ⁸ Huan anquitalise icaxa TOTECO ipan nopa cuacarro. Huan nojquiya iteno xijtalica seyoc cuacajo ica nochí nopa tamanti ten oro cati antemacase quej tacajcahualisti pampa anquihuicaj tajtacoli iixpa. Huan teipa anquinmajcahuase nopa huacaxme huan nopa cuacarro para ma yaca iniselti campa quinequise. ⁹ Huan monequi anquintachilise. Sinta quitoquilise nopa ojti cati yahui ipan altepet Bet Semes ipan nopa tali campa itztoque israelitame, huajca tijmatise para ininTeco israelitame yaya cati techtatzacuilitjtoc. Pero sinta amo yase nozona, huajca tijmatise para san ica iselti techajsic ni cocolisti cati fiero.

¹⁰ Huajca nopa tacame quej nopa quichijque. Quintzquijque ome huacaxme cati quinpixtoyaj ininconeua huan quinilpilijque nopa cuacarro para quitlantiyase. Huan quintzajque ininconeua. ¹¹ Huan qutalijque icaxa TOTECO ipan nopa cuacarro huan ihuaya se cuacajo cati quinpixqui nopa taixcopincayome ten quimichime ica oro huan nopa cocomé ten oro cati quichijtoyaj quej nopa cocolisti cati quinajsitoya. ¹² Huan nopa huacaxme quitzquijque nopa ojti cati yahui para altepet Bet Semes, huan yajque xitahuac. Huan tzajtziyajque pampa moajque ininconeua, pero amo moicancuetque, yon amo quicajque iniojhui huan amo mocuapolojque. Huan nopa filisteos yajque iniica hasta campa tami inintal huan campa pehua inintal Bet Semes ehuaní. ¹³ Huan nopa Bet Semes ehuaní quipixcayaj trigo ipan se tamayamí. Huan quitachilijque huan quitaque icaxa TOTECO huala huan nella yolpajque. ¹⁴ Huan quema nopa cuacarro ajsico ipan ital Josué cati ehua ipan altepet Bet Semes, moquetzqui nozona campa eltoya se hueyi tet. Huajca nopa Bet Semes ehuaní quitequihuijque nopa cuahuit ten nopa cuacarro huan ica ya nopa quichijque se tit. Huan nopa huacaxme quinmictijque huan quimacaque TOTECO quej se tacajcahualisti tatatili. ¹⁵ Huan sequij levitame quitemohuijque icaxa TOTECO ihuaya nopa cuacajo cati quipixtoya nopa tamanti ten oro. Huan nochí qutalijque ipan nopa hueyi tet. Huan ipan nopa tonali nochí Bet Semes ehuaní quimacaque TOTECO miyac tacajcahualisti tatatili. ¹⁶ Huan quema nopa macuilti filisteo tayacanani quitaque nochí cati nopa israelitame quichijtoyaj, tacuepilijque ipan inialtepe Ecrón.

¹⁷ Huan nopa macuili tamanti tojtolontic ten oro cati temacaque nopa filisteos quipiyayayaj inintachiyalis inincohua cati tojtolontique. Huan elque tacajcahualisti para TOTECO para quixtahuase inintajacolhua nopa tayacanani ten altepeme Asdod, Gaza, Ascalón, Gat huan Ecrón por cati quichijtoyaj ica icaxa. ¹⁸ Nopa macuilti quimichime ten oro quinescayotiyayaj nopa macuili altepeme huan ininpilaltepehua ten nopa macuilti tayacanani. Quinixnextijque nopa altepeme cati quipiyayayaj tepamit huan cati amo quipiyayayaj. Huan nopa tet cati tahuel hueyi cati ipan qutalijque nopa caxa noja eltoc ipan ital Josué ipan altepet Bet Semes para teelnamiquiltis ten panoc nozona ica icaxa TOTECO.

¹⁹ Pero Toteco Dios quinmicti 70 tacame ten altepet Bet Semes pampa tachixque ijtíc icaxa. Huan nochí nopa tacame ipan nopa altepet chocaque pampa TOTECO quinmictijtoya miyaqui. ²⁰ Teipa nopa Bet Semes ehuaní quijtojque: “¿Ajquiyá huelis itzto iixpa TOTECO pampa yaya nopa Dios cati tatzetzolontic? ¿Canque huelis tijtitanise ni caxa ten TOTECO?”

²¹ Huajca quintitanque tacame ipan altepet Quiriát Jearim para ma quinilhuitij quej ni: “Nopa filisteos quicuetque icaxa TOTECO. Huajca xihualaca huan xijhuicaca.”

7

1 Huajca nopa tacame ten altepet Quiriat Jearim hualajque, huan quicuique icaxa TOTECO huan quihuicaque ichaj Abinadab cati eltoya tachiquiltipa. Huan quiiyocatalijque itelpoca Eleazar para quimocuitahuis.

Samuel se tayacanquet ten israelitame

2 Huan teipa huejcajqui icaxa TOTECO 20 xihuit nopona ipan altepet Quiriat Jearim. Huan ipan nopa tonali nochi israelitame mocuesohuayayaj pampa nesiyaya quenicatza TOTECO quintahuelcajtoya.

3 Huan Samuel quinilhui nochi israelitame: “Sinta amojuanti nelía anquenequij amoyolcuepase ica nochi amoyolo ica TOTECO, huajca xiquincahuaca amoteteyohua huan nochi taixcopincayome ten amodios Astarot cati anquiiyayaj. Inijuanti amo melahuac. Ximotemacaca para anquitoquilise san TOTECO huan xijhueyitepanitaca san ya. Huan yaya amechmanahuis ten nopa filisteos.”

4 Huajca nopa israelitame quiniycuenijque nochi taixcopincayome ten Baal huan ten Astarot, huan quihueyitalijque san TOTECO.

5 Huan teipa Samuel quiiyto: “Ma mosentilica nochi israelitame ipan altepet Mizpa, huan nepa nimotatajtis ica TOTECO por amojuanti.”

6 Huajca nochi israelitame mosentilijque ipan altepet Mizpa, huan nopona quiquixtijque at ipan se ameli huan quitoyajque talchi quej se tacajcahalisti para TOTECO. Huan ipan nopa tonali nochi mosajque pampa mocuesohuayayaj por inintajtacolhua huan quiiytojque: “Nelía titajtacolchijtoque iixpa TOTECO.” Huan nopona Samuel quintajtolsencajqui nopa israelitame iixpa TOTECO, huan quinchihualti ma moicnonequica iixpa.

7 Huan quema quimatque nopa filisteos para nochi israelitame mosentilijtoyaj ipan altepet Mizpa, huajca mocualtalijque nopa tayacanani ica inisoldados para yase quintehuitij. Huan quema quicajque nopa israelitame para hualayayaj nopa filisteos, nelía momajmatijque.

8 Huan nopa israelitame quihuitoj Samuel: “Amo xijcaxanili xijtajtani TOTECO Dios por tojuanti para ma techmanahui inimaco ni filisteos.”

Nopa israelitame tatanque campá itoca Eben Ezer

9 Huajca Samuel quicuique se pilborregoxtzi cati noja chichi huan yajmaxtic quimacac TOTECO quej se tacajcahalisti tatatili. Huan quitajtani TOTECO para ma quinpalehui nopa israelitame. Huan TOTECO quitacaquili. 10 Huan quema Samuel noja quitiyaya nopa tacajcahalisti, ajscoj nopa filisteos para quintehuse. Huajca TOTECO tatatzinalti chichahuac huan quinmajmati hasta huihuitixque. Huan quej nopa, nopa israelitame huelque quintanque.

11 Huan nopa israelitame quisque, huan quintoquilijque nopa filisteos hasta altepet Bet Car huan quinmictijiyajque.

12 Huajca Samuel quitali se hueyi tet tatajco ten altepet Mizpa huan Sen huan quitocaxtali Eben Ezer. (Eben Ezer quinequi quiiytos: Se Tet Cati Quinescayotía Itapalehuil TOTECO.) Huan Samuel quiiyto: “Hasta ama TOTECO techpalehuijtoc.”

13 Huan nopa filisteos mopinahualtijque huan ayecmo tacuepiliijque sempa ipan tali Israel. Huan TOTECO quintajyohuilti nopa filisteos nochi tonali quema Samuel itztoya. 14 Huan nochi nopa altepeme ten altepet Ecrón hasta Gat cati nopa filisteos quinichtequilijtoyaj nopa israelitame, sempa quimacaque pampa nopa israelitame quimanahuijque inintal. Huan nojquiya oncac tasehuilisti ica israelitame huan nopa amorreos.

Samuel tequitic quej tajtolpanextijquet, totajtzi huan juez

¹⁵ Huan Samuel tequitic quej juez ipan nochi inemilis. ¹⁶ Huan sesen xihuit yahuiyaya ipan altepet Betel, Gilgal huan Mizpa para quisencahuas nochi cualanti ipan nochi altepeme pampa quej nopa elqui itequi. ¹⁷ Huan teipa sempa tacuepiliyaya altepet Ramá pampa nopona quipixtoya ichaj huan nopona nojquiya quintajtolsencahuayaya israelitame. Huan nopona nojquiya quichijqui se taixpamit para TOTECO.

8

Israelitame quinejque se inintanahuatijca

¹ Huan quema Samuel huehuejtixqui, quintequimacac itelpocahua para elise jueces huan para quintajtolsencahuase israelitame. ² Huan iachtohui cone itoca eliyaya Joel huan ompaca cone itoca eliyaya Abías. Inijuanti tanahuatijayaj quej jueces ipan altepet Beerseba. ³ Pero inijuanti amo nejnengue xitahuac quej inintata. Tahuel quinequiyayaj moaxcatise cati sequinoc iniaxca huan quiselijque tomi para tetajtolsencahuase huan para tacajcayahuase. Amo quichijque cati xitahuac.

⁴ Huajca nochi nopa huehue tacame ten tali Israel mosentilijque huan hualajque quuitacaj Samuel ipan altepet Ramá. ⁵ Huan quiilhuijque: “Ya tihuehuejtixqui, huan moconehua amo nejnemij xitahuac quej ta. Huajca tojuanti tijnequij xijtali se tanahuatijquet para ma technahuati quej nochi talme quipiyaj.”

⁶ Huan Samuel amo quipacti quema quicajqui para quuijtohuayayaj: “Techmaca se tanahuatijquet para technahuatis quej nochi sequinoc talme quipiyaj.” Huajca Samuel motatajti ica TOTECO para quimatis taya quichihuas.

Nopa israelitame amo quinejque TOTECO ma quinnahuati

⁷ Huan TOTECO quiilhui: “Xijchihua cati inijuanti mitztajtaníaj pampa amo ta cati mitzhuejcamajcajtoque. Techhuejcamajcajtoque na pampa amo quinequij ma niquinahuati. ⁸ Hasta nopa tonali quema niquinquixti ipan tali Egipto huan hasta ama inijuanti techtahuelcajtoque huan quinquapanojtoque teteyome cati amo melahuac. Huan ama quej nopa mitztahuelcahuaj ta nojquiya. ⁹ Huajca ama xijchihua cati inijuanti mitztajtaníaj. Pero xiquinmachilti taya quinequi quuijtos para quipiyase se tanahuatijquet huan quenicatza quinquahuatis teipa, huan quenicatza quinchihuilis cati fiero.”

¹⁰ Huajca Samuel quinquilhui nochi israelitame cati TOTECO quiilhuijtoya.

¹¹ Quinquilhui:

—Amojuanti anquuijtohuaj anquinequij amotanahuatijca, pero xijmatica quej ni elis quema anquipiyase. Se tanahuatijquet quinchihuas amotelpocahua itequipanojcahua. Inijuanti motalojtiyase iniixpa nopa cuacarros campa yaya yahui. Huan sequinoc yase cahuayojtipa para quimanahuise.

¹² Quintalise amotelpocahua para elise tayacanani cati quinquahuatise se mil soldados, huan sequinoc cati quinquahuatise sesen 50 soldados. Huan sequinoc quinchihualtis quitaxahuilise huan quipixquulise imila. Sequinoc quicuualtallise nopa tatehujca teposme, huan sequinoc quihuicase itatehujca carro huan nochi tamanti cati inijuanti quitequihuisse ipan se tatehuilisti, pero amo quintaxahuise. ¹³ Huan nojquiya amechcuilis amoichpocahua para quicuualtallise taajhuiyacayot, huan para quichijchihuase tacualisti huan pantzi pampa nochi monequis quitequipanose nopa tanahuatijquet.

¹⁴ Nojquiya amechcuilis cati más cuali ten amomilhua, huan amoxocomeca milhua huan amocua cati temaca olivo aceite. Huan nochi cati eliyaya

amoaxca quinmajmacas itequipanojcahua cati más tapejpenilme. ¹⁵ Huan nojquiya amechcuilis se coxtali ten sesen majtacti coxtalme ten amotrigo huan quej nopa quichihuas ica nochi sequinoc tamanti cati anquikipiyase. Huan nochi nopa diezmo quinmajmacas itequiticahua huan itapalehuijcahua. ¹⁶ Huan nojquiya amechcuilis amotelpocahua huan cati más cuajcualme ten amotequipanojcahua, tacame huan sihuame. Amechcuilis cati más cuajcualme ten amohuacaxhua huan amoburrojhua para quintequihuis ipan ya itequi. ¹⁷ Huan amechtajtani se borrego ten sesen majtacti amoborregojhua. Huan hasta amojuanti amoseltitzitzi anquitequipanose san tapic. ¹⁸ Huan teipa nelía amotequipachose huan anmochoquilise por nopa tanahuatijquet cati ama anmotajtañaj, pero ipan nopa tonali TOTECO amo amechtacaquilis.

¹⁹ Huan nopa israelitame masque quicajque nochi ya ni cati Samuel quinilhui, amo quichihuilijque cuenta huan quiijtojque:

—Tojuanti tijnequi se totanahuatijca, ²⁰ para technahuatis huan tiitztose quej sequinoc talme. Huan totanahuatijca techyacantiyas ipan tatehuilisti.

²¹ Huajca Samuel quintaquilis huan quiilhui TOTECO cati quiijtojtoyaj nopa israelitame.

²² Huan TOTECO quiilhui:

—Xijchihua cati injuanti quiijtohuaj huan xijtali se tanahuatijquet para quinahuatis.

Huajca Samuel quinilhui para quena, quinmacasquía inintanahuatijca. Huan quinilhui nochi israelitame para ma mocuepaca ininchajchaj ipan inialtepe.

9

Samuel quitali Saúl quej tanahuatijquet

¹ Itztoya se tacat ipan iixhuihua Benjamín cati itoca eliyaya Cis. Yaya nelía tominpiyayaya huan nochi quitepanitayayaj. Huan Cis elqui icone Abiel, cati elqui icone Zeror. Huan Zeror huejcajquiya elqui icone Becorat cati elqui icone Afia cati eliyaya se iixhui Benjamín. ² Huan Cis quipixtoya se icone cati itoca eliyaya Saúl. Huan Saúl eliyaya se telpocat yejectzi, huan yon se telpocat amo quiaxiliyaya iyejca huan itachiyalis ipan nochi tali Israel. Huan Saúl eliyaya huejcapantic. Nochi sequinoc tacame san quiaxiliyayaj iajcoltipa.

³ Huan se tonali Cis quinpolo iburrojhua huan quititanqui itelpoca Saúl ihuaya se itequipanojca para ma quintemotij.

⁴ Huan injuanti nejnentiayajque campa tepeme ipan tali Efraín, huan teipa quipanoj talis Salisa, huan amo quinajsique. Huan panotiyajque nojquiya ipan tali Saalim huan teipa ipan tali Benjamín, huan amo cana quinajsique.

⁵ Huan quema ajsique ipan tali Zuf huan amo quinajsique, Saúl quiilhui itequipanojca cati ihuaya nemiyaya:

—Ma titacuepilica para tochaj pampa huelis notata ya mocuesojtos por tojuanti, huan ayecmo san mocuesojtos por iburrojhua cati polijtoque.

⁶ Huajca itequipanojca quinanzquili:

—Nica ipan ni altepjet itzoc se tajtolpanextijquet cati nochi quitepanitaj pampa nelía mochihua nochi cati quiijtohua. Ma tiquitatij pampa huelis techilhuis canque itztoque nopa burrojme.

⁷ Huajca Saúl quiilhui:

—Cualtitoc, ma tiyaca. ¿Pero taya huelis tijhuiquilise nopa tacat? Amo teno tijpiyaj. Ya tanqui topantzi, huan amo teno onca, huajca ¿taya tijmacatij nopa tajtolpanextijquet?

⁸ Huan itequipanojca quiilhui:

—Nijpixtoc se pilplatatomi cati huelis tijmacase nopa tajtolpanextijquet para ma techilhui canque itztoque nopa burrojme.

⁹ (Achtohuiya quema se quinequiyaya quimatis se tenijqui huajca quii-tohuayayaj: “Ma tiquitatij yaya cati tachiya”; pampa cati ama itoca Tajtolpanextijquet, achtohuiya quintocaxtiyayaj Tachiyani.)

¹⁰ Huajca Saúl quiilhui itequipanojca:

—Cualtitoc, ma tiyaca tijtemotij.

Huajca calajque ipan nopa altepet campa itztoya nopa tajtolpanextijquet.

¹¹ Huan quema ixtejcotiyahuiyayaj ipan se tepet, quinamijque se quesqui ichpocame cati yajtoyaj atacuitoj, huan quintatzintoquilijque:

—¿Nica itztoc nopa cati tachiya?

¹² Huan injuanti tananquilijque:

—Quena, pero ximoisihuiltica xiyaca pampa amantzi onajsico ipan ni altepet para quimacase TOTECO tacajcahualisti ipan se tepet para masehualme ten ni altepet. ¹³ San quema ancalaquise ipan altepet, nimantzi xijtemoca pampa huelis nimantzi quisas para yas campa tepet para tacuas. Pampa nopa masehualme amo tacuase hasta quema ajsiti pampa yaya cati quitiochihuas nopa tacajcahualisti huan teipa tacuase nopa tanotzalme. Huajca xiisihuica xitejcocha para anquipantise.

¹⁴ Huajca Saúl huan itequipanojcahua ixtejcoque ipan nopa tepet huan ajsitoyaj ipan nopa altepet. Huan quema sanoc onajsitoyaj quinamijque Samuel cati quistihualayaya para yasquia ipan nopa tepet campa oncasquia tacualisti.

¹⁵ Huan TOTECO ya quinojnotztoya Samuel ica yalohua, huan quiilhuijtoya: ¹⁶ “Mosta ipan ni hora nimitztitanilis se tacat cati ehua ipan tali Benjamín. Yaya cati ticajaltis para elis inintanahuatijca nomasehualhua nopa israelitame. Huan quinmanahuis israelitame inimaco nopa filisteos, pampa niquintachilijtoc quenecatza taijyohuáj nomasehualhua huan niquincactoc quenecatza techtajtaníaj tapalehuili huan yeca niquintasojtatoc.”

¹⁷ Huan quema Samuel quiitac Saúl, TOTECO quinojnotzqui Samuel huan quiilhui: “Nozona tijpixtoc nopa tacat cati yalohua nimitzilhui. Yaya cati quinahuatis noisraelita masehualhua.”

¹⁸ Huan Saúl monechcahui campa itztoya Samuel ipan caltemit ipan itepa nopa altepet, huan quiilhui:

—Nimitztajtanía techilhui canque eltoc ichaj yaya cati tachiya.

¹⁹ Huan Samuel quinanquili:

—Na cati nitachiya. Xitejco nohuaya ipan ne tepet, huan titacuase san sejco. Huan mosta cualca nimitzilhuis nochí cati tijnequi tijmatis huan teipa nimitznahuatijtehuas. ²⁰ Huan amo ximocueso por nopa burrojme cati polijque huictaya pampa ya quinajsique. Huan nojquiya ama ta huan ichaj ehuaní motata tahuel antapijpiyaj. Moaxca nochí cati ipati ipan tali Israel pampa tijnahuatía.

²¹ Huan Saúl tananquili:

—Pero na nihuala ten nopa hueyi familia Benjamín cati achi más pisiltzi ten nochí huejhueyi familias ipan tali Israel, huan amo aquí techpatiita. Huajca ¿para ten techilhuía nochí ya ni?

²² Huajca Samuel quihuicac Saúl ihuaya itequipanojca huan quincalaqui ipan nopa hueyi calí para nopa ilhuit campa tacualtalijtoyaj para tacuase. Huan quinsehui campa más cuali siyaj inixpa nopa 30 huejhueyi tacame cati mosehuijtoyaj nozona. ²³ Huan nimantzi Samuel quinahuati ya cati quintacualtequiliyaya:

—Xijhualica nopa nacat cati achi cuali cati nimitznahuati para xiquiy-ocaquixti.

²⁴ Huajca nopa tacualchijquet quihualicac iquescuayo nopa tapiyali cati eliyaya san nacat huan quitali iixpa Saúl. Huan Samuel quiilhui:

—Ximonechahui huan xijcua pampa ni nacat niqiyocaquixti para ta quema ayemo niqinnotztoya nochi ni tanotzalme.

Huan ipan nopa tonali Saúl tacuajqui ihuaya Samuel. ²⁵ Huan quema tanque tacuaj, tacuepilijque sempa ipan nopa altepet huan Samuel quihuicac Saúl ichaj, huan quihuicac calcuitapa ten ichaj. Huan nozona Samuel quipohuili Saúl nochi cati panosquía. ²⁶ Huan Saúl cochqui ipan ichaj Samuel huan tonili nelcualca Samuel quiixiti Saúl huan quiilhui:

—Ximijquehuaya pampa ya ajsic hora para tiyas.

Huan Saúl mijquejqui huan Samuel yajqui ihuaya para quicahuati iteno altepet.

²⁷ Huan quema temotiyahuiyayaj campa itepa nopa altepet Samuel quiilhui Saúl:

—Xiquilhui motequipanojca para ma tayacana huan ta ximochiya se quentzi pampa monequi nimitzyolmelahuas cati Toteco Dios techilhujtoc.

10

Samuel quiajalti Saúl para elis tanahuatijquet ten israelitame

¹ Huan quema ya quistejtaya itequipanojca Saúl, Samuel quiquixti se frasco ica aceite cati quihuicayaya, huan quitequili Saúl ipan itzonteco, huan quitzoponi huan quiilhui:

—TOTECO mitziyocatalijtoc ama para tielis tiinintanahuatijca iisraelita imasehualhua. ² Ama quema tiquisas nica tiquinpantis ome tacame nechca campa huejcajquiya quitalpachojque Raquel ipan altepet Selsa ipan tali Benjamín. Huan inijuanti mitzilhuise para ya quinpantijque nopa burrojme cati tiqintemohuayaya. Huan motata ayecmo mocuesohua por nopa burrojme. Ama mocuesohua por ta huan campa hueli moca tajtantinemi para mitzpantis. ³ Huan teipa quema tiajsiti campa nopa ahua cuahuit campa itoca Tabor, mitznamiquise eyi tacame cati yahuij Betel quihueyichihuatij Toteco Dios. Huan se ten inijuanti quinhualica eyi pilchivojtziti. Huan seyoc quihualica eyi pantzi huejhueyi. Huan nopa seyoc quihualica se cuetaxti temitoc ica xocomecat iayo. ⁴ Huan inijuanti mitztajpalose huan mitzmacase ome pantzi, huan ta tijselis. ⁵ Teipa tiyas altepet Gabaa Elohim campa itztoque nopa soldados filisteos. (Gabaa Elohim quinequi quiijtos Itachiquil Toteco Dios.) Huan quema ticalaquis nozona ipan nopa altepet tiquinámiquis sequij tajtolpanextiani cati hualtemose tachiquiltipa huan tatzotzontihualase ica salterio, pandero, flauta huan arpa. Huan inijuanti tayolmelajtihualase nopa camanali cati Toteco Dios quinmacatoc. ⁶ Huan ipan nopa talotzi hualtemos Itonal TOTECO ipan fa, huan ta nojquiya tiqijtos nopa camanali cati TOTECO mitzchihuas xiquijto. Titeyolmelahuas icamanal TOTECO inihuaya nopa tajtolpanextiani. Huan nimantzi Itonal TOTECO mitzchihuas se tacat yancuic. ⁷ Huan quema panos nochi ya ni cati nimitzilhujtoc, huajca xijchihua cati tiquita para cuali pampa Toteco

Dios itztos mohuaya para mitzpalehuis. ⁸ Huan teipa xitayacantiya hasta altepet Gilgal huan nozona techchiyas chicome tonati pampa niyas nozona para nijtatiti tacajchualisti huan nijmacas nemacti TOTECO. Huan quema niajsiti, nimitzilhuis taya más monequi tijchihuas.

⁹ Huan nimantzi quema Saúl quinahuatijtejqei Samuel, Toteco Dios quipatac Saúl huan quimacac seyoc tamanti iyolo. Huan nochi cati Samuel quihuijtoya para panosquía ya nopa panoc. ¹⁰ Quema Saúl ajsito ihuaya itequipanojca ipan nopa tachiquili, nimantzi quinamijque nopa tajtolpanextiani cati hualtemoyayaj. Huan Itonal Toteco Dios calajqui ipan Saúl huan nojquiya pejqei camanalti icamanal TOTECO quej nopa sequinoc tajtolpanextiani. ¹¹ Huan nochi cati quixmatiyayaj motatzintoquiliyayaj: “¿Taya ipanti Saúl, icone Cis? ¿Nelía ya se tajtolpanextijquet?”

¹² Huan se tacat ten nozona quijto: “Saúl amo icone se tajtolpanextijquet. ¿Quenicatza mochijtoc tajtolpanextijquet?”

Huajca ica ya ni pejqei nopa camanali para Saúl nojquiya huelqui camanalti icamanal TOTECO masque itata amo ya nopa quichijqui.

¹³ Huan quema Saúl tanqui camanalti TOTECO icamanal, yajqui ipan nopa tepet campa eltoya se taixpamit.

¹⁴ Huan itío Saúl quitatzintoquili Saúl huan itequipanojca:

—¿Canque anyajtoyaj?

Huan yaya quinanquili:

—Tiyajtoyaj tiqintemotoj nopa burrojme huan amo tiquinajsitoy. Huajca tiyajque tiquitatoj nopa tajtolpanextijquet Samuel para tijmatise canque itztoyaj.

¹⁵ Huajca itío quitatzintoquili:

—Huan ¿taya amechilhui Samuel? Techilhuica.

¹⁶ Huajca Saúl quihui:

—Teychymelajqui para nopa burrojme ya quinajsitoyaj.

Pero Saúl amo teno quihui itío para quialtijtoya para elis tanahuatijquet.

¹⁷ Huan teipa Samuel quinsentili nochi israelitame iixpa TOTECO ipan altepet Mizpa, ¹⁸ huan quihui ni camanali cati quiselijtoya ten Toteco Dios ten tiisraelitame:

—Na niamoTECO huan niamoDios anisraelitame. Nimechquixti ipan tali Egipto. Huan nimechmanahui inimaco egiptome huan inimaco nochi nopa tacame ipan nochi talme cati amechtaijyohuiltiyayaj. ¹⁹ Pero ama amojuanti antechahuelcajtoque niamoTECO Dios cati nimechmanahujtoc ten nochi amocuesolhua huan amotaijyohuilis, pampa ama anquijtohuaj anquinequij ma nijtali se amotanahuatijca para amechnahuatís. Huajca para anquimatise ajquiya elis amotanahuatijca ma mosejcotilica nochi israelitame ipan sesen hueyi familia huan nochi cati más taixmatilme ma moxteca noixpa.

²⁰ Huan Samuel quichijqui ma monechcahuica nochi nopa 12 huejhueyi familias ten israelitame. Huan nopa piltetzitzi quinextili para nopa tanahuatijquet itztoc ipan nopa familia ten iteipan ixhuihua Benjamín. ²¹ Huan teipa quihuijque para ma monechcahuica iteipan ixhuihua sesen ten nopa huejcapan tatame cati elque iixhuihua Benjamín ten huejcajquiya, huan nopa piltetzitzi quinextili nopa tanahuatijquet hualas ipan iteipan ixhuihua Matri. Huan teipa nopa piltetzitzi huetzito ipan Saúl, icone Cis, para elis tanahuatijquet, pero quema quitemojqe Saúl, amo quipantijque. ²² Huajca quitatzintoquilijqe TOTECO para quimatise sinta Saúl amo

hualajtoya nozona, huan TOTECO quinilhui: “Saúl motatijtoc campa eltoc amotamamal.”

²³ Huajca motalojtejqe tacame huan quihualicaque nimantzi huan quitalljqe tatajco nochi israelitame. Huan nelía huejcapantic eliyaya, sequinoc tacame san quiaxiliyaj hasta iajcol. ²⁴ Huan Samuel quinilhui nochi nopa israelitame:

—Xijtachelica ni tacat cati TOTECO quitapejpenijtoc para elis amotanahuatijca. Amo aquí seyoc quej ya ipan nochi tali Israel.

Huajca nochi israelitame quijtojque chichahuac:

—Ma huejcahuas itzot totanahuatijca.

²⁵ Huajca Samuel quinilhui nopa israelitame nochi nopa tanahuatili cati inintanahuatijca qitoquilisquía, huan quijcuilo ipan se amatajcuiloli huan quiajojqui tiopan calijtic iixpa TOTECO. ²⁶ Huan teipa Samuel quinahuati nochi nopa israelitame para ma tacuepilica ininchajchaj. Huan Saúl nojquiya yajqui ichaj ipan altepet Gabaa. Huan ihuaya yajque sequij tacame cati motemacatoyaj para quimocuitahuise pampa Toteco Dios quinyoltacanjtoya. ²⁷ Pero sequinoc tacame cati fiero iniyolo quijtojque: “¿Quenicatza huelis techmanahuis ni tacat, Saúl?” Huan amo quitepanitaque. San quihuihuiitaque huan amo teno quimacaque, pero Saúl amo quinchihuii cuenta.

11

Saúl quintanqui nopa amonita masehualme

¹ Teipa Nahas, inintanahuatijca amonitame, yajqui altepet Jabes ipan tali Galaad inihuaya nochi isoldados para quintehuse nopa israelitame. Pero nopa israelitame nozona amo quinejqe ma quintehuíca, huajca quinilhuijqe:

—Xijscenahuaca se amatajcuiloli tohuaya para amo antechtehuise huan tojuanti timechtequipanose.

² Huan Nahas quinanquili:

—Cualtitoc, nimoyoltalis amohuaya sinta anmocaahuase para nimechquixtilis amoixteyol cati nejmat para timechpinahuatise inixpa nochi sequinoc israelitame.

³ Huajca nopa huehue tacame ten altepet Jabes quihuijqe:

—Techahuilica chicome tonati para tiquinyolmelahuase nochi israelitame ten ya ni. Sinta amo aquí quinequis techmanahuis huajca, quena, timotemactilise ica amojuanti huan timechtequipanose.

⁴ Huan miyac tacame yajque ipan altepet Gabaa cati eliyaya ialtepe Saúl huan quinyolmelajque nopa masehualme ten nochi cati panoyaya. Huan nochi nopa masehualme pejqe chocaj chichahuac.

⁵ Huan Saúl yajtoya tapoxonito campa imil ica ome torojme huan quema mocuetqui ipan ialtepe, tatzintocac:

—¿Taya pano? ¿Para ten chocaj nochi ni masehualme?

Huan nopa tacame quipohuijqe nochi cati nopa israelitame ten altepet Jabes quijtojtoyaj para quinchihuilisquía inincualancaitacahua. ⁶ Huan quema Saúl quicajqui ya ni, Itonal Toteco Dios motali ipan Saúl huan nelía cualanqui. ⁷ Huajca quinmicti nopa ome torojme cati ica tapoxoniyaya huan quinhuejhuelo, huan quintanqui tacame cati quihuaque sese pedazo ipan nochi tali Israel huan nopa tacame quijtojtiyajque: “Quej ni ininpanis nochi inintapiyahlua injuanti cati amo quinequise mosentilise ihuaya Saúl huan Samuel para tatehuitij.”

Huan TOTECO quichijqui para ma quiimacastica Saúl huan nimantzi mosentilijque nochi tacame quej elisquía san se tacat. ⁸ Huan quema Saúl quinpójqui cati mosentilijtoyaj ipan Bezec, eliyayaj 300 mil israelita tacame ten tali Israel huan 30 mil israelita tacame ten tali Judá. ⁹ Huan nimantzi quinilhijque nopa israelita tatitanilme cati hualajtoyaj ten altepet Jabes:

—Xiquinilhuica Jabes ehuan para mosta ica tajcotona ya timechmanahuijtose.

Huajca nimantzi nopa tatitanilme tacuepilijque huan quinyolmelahuatoj nochi altepet Jabes ehuan para hualayayaj quinpalehuiquij. Huajca nochi nelía yolpajque.

¹⁰ Huan para tacajcayahuase nopa Jabes ehuan quinilhuitoj inincualan-caitaca:

—Mosta timotemacase ica amojuanti huan huelis antechchihuilise cati anquinequise.

¹¹ Huan tonili ica ijnaloc, Saúl quinxelo isoldados ica eyi tatilimit huan calajque campa cochiyayaj nopa amonita soldados. Huan Saúl huan isoldados pejqque quinmijmictíaj huan quinmictijtiyajque hasta tajco tona. Huan nopa quentzi cati mocajque yoltoque mosemanque campa hueli para cholose huan amo mocajque ome san sejco.

¹² Huan teipa miyac masehualme ten nopa altepet quihhuijque Samuel:

—¿Canque itztoque nopa tacame cati quijtojque para Saúl amo huelisquía elis totanahuatijca? Techhualiquilica huan tiquinmictise.

¹³ Pero Saúl quijto:

—¡Amo! Amo aquí tijmictise ni tonali pampa ama TOTECO techmanahuijtoc tiisraelitame.

¹⁴ Huajca Samuel quinilhui nochi nopa israelita tacame:

—Ma tiyaca ama nepa altepet Gilgal huan sempa ma tiquiyocalica Saúl para elis tanahuatijquet ten tiisraelitame.

¹⁵ Huajca nochi nopa israelitame yajque altepet Gilgal, huan nopona iixpa TOTECO quitequitalijque Saúl para elis tanahuatijquet. Huan quimacaque TOTECO tacajcahalisti para moyoltalise ihuaya. Huan Saúl huan nochi israelitame nelía yolpaquiyayaj.

12

Samuel quicahua tanahuatili imaco Saúl

¹ Huan Samuel quinilhui nochi israelitame:

“Xiquitaca nijchijtoc cati antechtajtanijqque huan nimechtalilijtoc se tanahuatijquet. ² Huan nica amoixpa ya anquipixtoque amotanahuatijca cati amechyacanas. Pero para na, ya nihuehuejtixqui huan ya nitzonchiphahuac. Noconehua itztoque amohuaya. Nimechtequipanojtoc hasta quema nieliyaya nitelpocat huan hasta ama. ³ Huan ama nica niitztoc. Huajca techilhuica iixpa TOTECO huan iixpa ni tanahuatijquet cati TOTECO quitapejpenijtoc sinta nijchijtoc cati amo cuali. Sinta nijcuilijtoc se acajya ihuacax o iburro, xiquijtoca. Sinta niquistacahuijtoc se acajya o sinta nijcajayajtoc se acajya, huajca techilhuica ama. Sinta nijselijtoc se taxtahuil para nijchihuas cati amo xitahuac, xiquijtoca ama huan nijcuelilis.”

⁴ Huajca nochi quijtojque:

—Amo quema techistacahuijtoc. Amo quema techtaijyohuiltijtoc huan amo quema techcuilijtoc yon se teno cati toaxca.

⁵ Huajca Samuel quijto:

—TOTECO itztoc testigo huan techcactoc ama. Huan ni itanahuatijca cati ya quialtijtoc nojquiya techcactoc para amo teno amo cuali nimechchiuilijtoc.

Huan nochi injuanti tananquilijque:

—Quena, injuanti techcactoque.

Samuel quinelnamiquilti israelitame quenicatza TOTECO quinmanahuijtoya

⁶Huan Samuel quinojnotzqui nochi nopa israelitame huan quinilhui:

—Yaya TOTECO cati quitequitali Moisés huan Aarón. Huan elqui ya cati quinquixti tohuejcapan tatahua ipan tali Egipto. ⁷Huajca ama ximoquetzaca cuali huan amo ximolinica pampa nijnequi nimechelnamiquiltis nochi cati TOTECO amechchiuilij huan nochi cati quinchihuilijtoc tohuejcapan tatahua. ⁸Quema Jacob huan ichaj ehuanij yajque tali Egipto huan nopa egiptome quintaijyohuiltiyayaj, tohuejcapan tatahua quitajtanjique TOTECO para ma quinpalehui. Huajca TOTECO quintitanili Moisés huan Aarón, huan quinquixtijque tohuejcapan tatahua ipan tali Egipto huan quinhualicaque nica ipan ni tali. ⁹Pero injuanti nimantzi quielcajque TOTECO Dios, huan yaya quintemactili imaco Sísara cati eliyaya se tayacanquet ten isoldados Jabín cati eliyaya tanahuatijquet ipan altepet Hazor. Huan quinmactili inimaco nopa filisteos huan imaco nopa tanahuatijquet ten tali Moab, huan injuanti quintehuijque nopa israelitame. ¹⁰Huan nopa israelitame sempa quitajtanjique TOTECO ma quinpalehui huan quiihujique para tajtacolchijtoyaj pampa quicajtoyaj huan quinhueyitepanitayayaj nopa taixconpicayome Baal huan Astarot. Huan tohuejcapan tatahua quiihujique TOTECO ma quinmanahui ten inincualancaitacahua. Huan ica mocajque para quihueyitalise san ya.

¹¹“Huajca sempa TOTECO quititanqui Jerobaal, o Gedeón, ihuaya Barac, Jefe huan na niSamuel para ma timechmanahuica ten amoculancaitacahua, huan quej nopa anitztoyaj ica cuali huan oncac tasehuilisti. ¹²Pero quema anquimatque para Nahas, yaya cati inintanahuatijca amonitame, quinequiyaya amechtehuis; huajca antechilhujique para anquinequiyayaj se amotanahuatijca para amechyacanas masque TOTECO Dios eliyaya amotanahuatijca. ¹³Pero cualtitoc, pampa ama ya anquipixtoque nica amotanahuatijca cati TOTECO amechmacatoc pampa anquitajtanjique. ¹⁴Huajca ama sinta anquihueyitepanitase TOTECO, huan anquitequipanose, huan amo anquixpanose itanahuatilhua huan sinta anmonejnemiltise quej ya quipactía, huajca amojuanti huan amotanahuatijca anitzose cuali. ¹⁵Pero sinta amo anquitepanitase huan amo anquichihuase itanahuatilhua, huajca yaya amechtatzacuiltis chichahuac quej quintatzacuilti amohuejcapan tatahua.

¹⁶“Huajca ama ximochiyaca nica para anquiritase se tanextili cati TOTECO quichihuas amoixpa. ¹⁷Huan anquiritase para anquichijque se huihuiyot quema anquitajtanjique TOTECO se tanahuatijquet. Cualí anquimatij para amo quema taquiyahui ipan ni tonali ten pixquisti, pero na nijtajtani TOTECO ma tatatzinalti huan ma quichihuas taquiyahuis hasta anquimachilise para tahuel hueyi amotajtacol pampa antajtantoque amotanahuatijca.”

¹⁸Huan nimantzi Samuel quitajtani TOTECO. Huan TOTECO tatatzinalti huan quichijqui ma taquiyahui chichahuac. Huan nochi nopa israelitame momajmatijque huan quimacasque TOTECO huan Samuel.

¹⁹Huan nochi injuanti quiihujique Samuel:

—Xijtajtani moTECO Dios por tojuanti para ma amo timiquica. Quena, nelía tijhueyilijtoque totajtacolhua noja más pampa titajtantoque se tanahuatijquet.

²⁰ Huajca Samuel quinanquili:

—Amo ximomajmatica. Quena, nelía anquichijtoque cati fiero. Pero ama ayecmo ximohuejcataloga yon quentzi ten TOTECO. Xijtequipanoca san ya ica nochi amoyolo. ²¹ Amo xijcahuaca TOTECO para anquinhueyitalise nopa taixcopincayome cati amo teno ininpati pampa injuanti amo amechpalehuise. Amo amechmanahuise pampa amo teno hueli quichihua. ²² Pero TOTECO amo amechtahuelcahuas anisraelitame pampa yaya tahuel hueyi huan ica ipaquilis quinequi xielica aniaxcahua. ²³ Ma TOTECO techtatza-cuiliti miyac sinta nitajtacolchihuas huan nijcahuas para nimotatajtijtinemis por amojuanti. Na noja nimechmachtis cati cuali para anmonejnemiltise ipan se ojti cati cuali huan xitahuac. ²⁴ San monequi xijtepanitaca TOTECO ica nochi amoyolo huan nelía xijtequipanoca quej quinamiqui. Mojmosta ximoihuica ten nochi nopa huejhueyi tamanti cati ya amechchihuilijtoc. ²⁵ Pero sinta antajtacolchihuase más ica taixcopincayome, TOTECO quichihuas para amojuanti huan amotanahuatijca anmiquise.

13

Saúl amo quineltocac TOTECO

¹ Huan Saúl quipiyayaya 30 xihuit quema pejqüi tanahuatía ipan tali Israel. Huan tanahuati 42 xihuit. ² Huan Saúl quintapejpeni eyi mil soldados cati más cuajcualme ten nochi israelita soldados para tamocuitahuise. Ome mil mocajque ihuaya ipan pilaltepzi Micmas huan ipan nopa cuatitamit campa tepeyo nechca altepet Betel. Huan ne seyoc mil soldados mocajque ihuaya Jonatán ipan altepet Gabaa ipan tali Benjamín. Pero ne sequinoc soldados cati amo tapejpenilme quinahuati Saúl ma mocuepaca inincha-jhaj. ³ Huan Jonatán huan isoldados quintehuijque nopa filisteo soldados cati itztoyaj ipan Gabaa huan quintzontamiltijque, huan quimatque nochi sequinoc filisteos. Huan Saúl tanahuati ma quipitzaca nopa tapitzali campa hueli ipan inintal israelitame para quinmachiltise nochi. Quinilhui: “Nochi anisraelitame xijtacaquilica taya panoc* ipan campa hueli altepeme campa anitztoque.”

⁴ Huajca nochi nopa israelita tacame quimatque para Saúl quintamim-icitijtoya nopa filisteo soldados, huan yeca nopa miyaqui filisteos tahuel quincualancaitayayaj cati israelitame huan quintehuisnequiyayaj. Huajca yeca quinotzqui nochi israelita soldados ma mosentilica campa Saúl ipan altepet Gilgal, huan ya nopa quichijque.

⁵ Huan nopa filisteo soldados nojqüiya mosentilijque para quintehuisse nopa israelitame. Nopa filisteos quipixtoyaj 30 mil tatehuijca carrojme huan chicuase mil soldados cati yahuiyayaj cahuayojtipa. Huan iyoca quinpiyayayaj soldados quej imiyaca xali nechca hueyi at. Huan nochi ñi miyaqui soldados ixtejcoque ipan nopa tepet huan mochijque nechca nopa pilaltepzi Micmas cati mopantiyaya achi más campa quisa tonati ten campa itoca Bet Avén.

⁶ Huan quema nopa israelitame quitaque para nopa filisteos cati eliyayaj inincualancaitacahua quinyahualohuayayaj, tahuel momajmatijque. Huan motatijque campa ostot, huan campa huitztí, huan campa huejhueyi teme,

* 13:3 13:3 O anhebreo masehualme.

huan ipan ostome huan amelme. ⁷ Huan miyac ten nopa israelitame quiix-cotonque hueyat Jordán, huan cholojque hasta tali Gad huan Galaad. Pero Saúl noja mocajqui campa itoca Gilgal huan nochi isoldados quitoquiliyayaj huihuipicayayaj ica majmajti.

⁸ Huan Saúl quichixqui chicome tonati para Samuel ma huala, quej Samuel quiilhujtoya. Huan quema Samuel noja amo ajsiyaya, miyac israelita soldados quicajtejqe para tacuepilise ininchajchaj. ⁹ Huajca Saúl quijito:

—Techhualiquilica tapiyalme para nijmacas TOTECO quej tacajcahualisti tatatili huan quej tacajcahualisti para ma onca tayoltalili ihuaya.

Huan Saúl quitati tacajcahualisti iixpa TOTECO masque amo quiipiyayaya tequiticayot para quichihuas.

¹⁰ Huan quema sanoc ontantoya quitatía nopa tacajcahualisti, ajsico Samuel. Huan Saúl yajqui quinamiquito huan quitajpalo. ¹¹ Huan Samuel quiilhui:

—¿Para ten tijchijtoc ni tamanti cati amo quinamiqui tijchihuas?

Huan Saúl quinanquili:

—Niquitac para nochi ni tacame nechcajtehuayayaj huan ta amo tiajsiyaya. Huan nijmatqui para nopa filisteos ya mosentilijtoyaj ipan nopa pilaltepetzi Micmas. ¹² Huajca nimoilhui huelis hualase nica Gilgal para techtehuiquij huan ayemo nimotatajtjtoya ica TOTECO para nijtajfanis itapalehuil. Huajca nimofuerzajhui huan nijtati na nopa tacajcahualisti iixpa TOTECO huan amo nimitzchixqui.

¹³ Huan Samuel quiilhui Saúl:

—Nelía tijchijtoc se huihuiyot. Tiquixpanotoc itanahuatilhua TOTECO moDios cati yaya mitznahuati ica na. Sinta tijneltocatosquía, yaya mitztalij-tosquía ta huan moteipan ixhuihua para antanahuatise ipan tali Israel para nochipa. ¹⁴ Pero ama motanahuatilis amo huejcahuas. TOTECO quinequi se tacat cati quineltoquilis para quinahuatis imasehualhua; se tacat cati quiipiya cuali iyolo iixpa ya. Huan TOTECO quitemojtoc nopa tacat huan quipantijtoc huan quitelijtoc para ya elis inintanahuatijca imasehualhua pampa ta amo tijtepanitztoc cati TOTECO mitznahuati.

¹⁵ Huan Samuel quistejqe Gilgal huan yajqui altepet Gabaa ipan tali Benjamín. Huan Saúl quinpojqui isoldados cati mocajtoyaj ihuaya, huan san eliyayaj quej 600 tacame.

¹⁶ Huajca Saúl, huan itelpoca cati itoca Jonatán huan nochi nopa tacame cati itztoyaj inihuaya mocajque ipan altepet Gabaa ipan tali Benjamín. Huan nopa filisteos mochijtoyaj ipan altepet Micmas. ¹⁷ Huan eyi tatilimit ten filisteo soldados quistejqe campa mochijtoyaj huan hualajque para tasosolose. Se tatilimit yajqui altepet Ofra ipan tali Sual. ¹⁸ Seyoc tatilimit yajqui campa itoca Bet Horón. Huan nopa seyoc tatilimit yajqui campa nopa tepeme cati quiyahualojtoque nopa tamayamit Zeboim huan teipa nejnenque hasta nopa huactoc tali.

¹⁹ Huan ipan nochi nopa tali Israel amo itztoya yon se teposchijquet, pampa nopa filisteos amo quinchahuiliyayaj tequitise, para nopa israelitame amo huelise mochihuilise teposti quej machetas o cuachoso para ica tatehuisse. ²⁰ Huajca quema nopa israelitame quinequiyayaj quitentise inintepos cati ica tapoxoníaj o iniazadón, o iniacha o inihuingaro, monequiyaya yase ica se filisteo tacat para ma quintentili. ²¹ Huan san para quintentilise se inintepos cati ica tapoxoníaj o se azadón quinamamayayaj tahuel miyac plata tomi. Huan para quintentilise iniacha o inintepos cati yecapan tatequi,

quininamayayaj nojquiya patiyó. ²² Huan yeca nochí nopa israelita tacame cati yahuiyayaj ihuaya Saúl huan Jonatán amo quihuicayayaj machetas yon cuachosos. San Saúl huan Jonatán, quena, quihuicayayaj. ²³ Huan nopa filisteos yajque ipan tali Micmas para tamocuitahuise campá masehualme panoyayaj ipan nopa tepeme para israelítame amo hueli ajsise campá mochijtoyaj.

14

Jonatán quintanqui nopa filisteos

¹ Huan quema panotoya se ome tonati, Jonatán, icone Saúl, quicamanalhui itamocuitahujca cati quihuicayaya itepostzajca huan quiilhui:

—Xihuala nohuaya huan ma tipanoca hasta ne seyoc nali hasta nopa tepet campá mochijtoque nopa filisteos.

Pero Jonatán amo teno quiilhui itata, Saúl. ² Huan Saúl mocajqui inihuaya nopa 600 soldados campá itoca Gabaa campá se hueyi granada cuahuit nechca altepet Migrón. ³ Huan ihuaya itztoya Ahías cati quihuicayaya ipantzajca pampa eliyaya totajtzi. Huan itata Ahías itoca eliyaya Ahitob, huan Ahitob eliyaya icni Icabod. Huan Ahitob elqui icone Finees. Huajca nopa totajtzi Ahías elqui iteipan ixhui Elí cati achtohuiya eliyaya nopa totajtzi iixpa TOTECO ipan Silo. Huan amo aquí quimatiyaya para Jonatán amo itztoya nozona inihuaya. ⁴ Huan Jonatán quichihuayaya campeca para ajsisquía campá nopa filisteos. Huan ipan ojti monejqqui panose iixco tepexit tatajco ome huejhueyi tet cati inintoca Boses huan Sene. Huan nopa tet nelpano tatequi. ⁵ Se ten ni hueyi tet mocahuayaya ipan norte cati moixnamictoya ica pilaltepctzi Micmas, huan nopa seyoc mocahuayaya ica tatzinta cati tachixtoya ica campá altepet Gabaa.

⁶ Huan Jonatán quiilhui itamocuitahujca:

—Ma tiyaca hasta campá itztoque nopa fiero filisteo tacame pampa huelis TOTECO quichihuas se tanextili ica tojuanti. Amo teno ohui para ya. Sinta yaya quinequis ma tiquntanica tocalancaitacahua huan techpalehuis, hueli tiquntanise masque amo timiyaquí o san se ome tiitztoque.

⁷ Huan nopa itamocuitahujca quinanquili:

—Cualtitoc, xijchihua nochí cati tiquita para cuali huan nimitzpalehuis.

⁸ Huajca Jonatán quiilhui:

—Ma timonechcahuica campá itztoque nopa filisteos huan ma techitaca quema tipanose iixco nopa tepexit. ⁹ Huan sinta injuanti techtzajtzilise para ma tiqunchiyaca nozona, huan motemacase techtehuiquí, huajca tiqunchiyase huan amo titejcase campá injuanti. ¹⁰ Pero sinta injuanti techtzajtzilise ma tiixtejcoca nepa campá itztoque, huajca tijmatise para amo motemacaj huan tiixtejcase tiquntehuitij pampa quinequi quiijtos para TOTECO techmactilijtoc tomaco nochí injuanti.

¹¹ Huan quej nopa quichijque. Nochi ome monextijque para ma quinitaca nopa filisteos. Huan nopa filisteos quinitaque huan quiijtojque: “Xiquinitaca ne hebreo tacame ya quistoque ipan ostot campá motatijtoyaj.”

¹² Huan teipa quitzajtzilijque Jonatán huan itamocuitahujca, huan quinilhuique:

—Xiixtejcoca nica para timechpohuilise se piltamantzi.

Huajca Jonatán quiilhui itamocuitahujca:

—Techtoquili huan tiixtejcase pampa TOTECO techmactilijtoc nochí injuanti tomaco tiisraelítame.

¹³ Huaјca Jonatán ihuaya itamocuitahuiјca ixteјcoque ica inimax huan inimetz ipan nopa tepet. Huan nochi filisteos cati Jonatán quintepexihuiyaya, itamocuitahuiјca quinmictiyaya. ¹⁴ Huan ipan ni achtohui tatehuilisti Jonatán ihuaya itamocuitahuiјca quinmictijque 20 tacame ipan se tali cati tahuel pilquentzi. ¹⁵ Huan nimantzi tahuel momajmatijque nochi nopa filisteo soldados huan nochi cati quintalijtoyaj para tamocuitahuse. Huan nimantzi moјmolini tali huan nochi tapoloјque.

¹⁶ Huan isoldados Saúl cati tamocuitahuiyayaj tepeixco nechca altepet Gabaa ipan tali Benjamín, quintaque nochi nopa filisteo soldados motalohuayayaj campa hueli huan tahueјchihuayayaj ica majmajti. ¹⁷ Huaјca Saúl quinilhui nochi isoldados:

—Xiquintocaxtazjtzilca nochi para anquimatise sinta yajtoc se acayja ten toјuanti.

Huan quema tanque quipanoltiaј nochi inintoca, momacaque cuenta para amo aquí Jonatán huan itamocuitahuiјca. ¹⁸ Huaјca Saúl quihui Ahías:

—Xijhualica nimantzi icaxa Toteco Dios.

Pampa ipan nopa tonali nopa israelitame injuantijya quipixtoyaj nopa caxa para ica quitemose ipaquilis Toteco Dios.

¹⁹ Pero quema Saúl noja camanaltiyaya ihuaya nopa totajtzi Ahías, quicajqui para nopa filisteos achi más tahueјchihuayayaj huan mohuihuichihuayayaj ica majmajti huan amo aquí quimatiyaya taya quichihuas. Huaјca Saúl quihui nopa totajtzi:

—Ayecmo xijhualica.

²⁰ Huaјca Saúl amo quichixqui para quimatis taya ipaquilis Toteco Dios. Nimantzi quinsentili nochi nopa 600 tacame cati itztoyaj ihuaya, huan yajque ipan nopa tatehuilisti. Pero quema aјsitoј noјona, quintaque para nopa filisteos momictiyayaj se ica seyoc pampa ayecmo quimatiyayaj taya quichihuase pampa san huihuitixtoyaj. ²¹ Huan nopa hebreos * cati itztoyaj inihuaya nopa filisteos sempa mosentilijque inihuaya nopa israelita soldados cati itztoyaj ihuaya Saúl huan Jonatán. (Masehualme cati sequinoc tali ehuan quintocaxtiyayaj nopa israelitame, hebreos.) ²² Huan nopa israelitame cati motatijtoyaj ipan cuatitamit campa tepeme ipan tali Efraín, quicajque para nopa filisteos cholohuayayaj. Huaјca injuanti noјquia quisque huan peјque quintoquilijyahuiј nopa filisteos. ²³ Huan nelia elqui hueyi nopa tatehuilisti pampa aјsito hasta campa itoca Bet Avén. Huan queј nopa TOTECO quinmanahui nopa israelitame ipan nopa tonali.

Saúl tatestigoјquetzqui

²⁴ Huan nochi nopa israelitame nelpano siyahuiyayaj pampa amo tacuatoyaj huan yeca ayecmo quipiyayayaj fuerza. Queј nopa elqui pampa Saúl huihuitixqui huan quinchihualti isoldados ma quifestigoјquetzaca TOTECO para amo quicuase yon se teno. Quinilhui: “Sinta se quicuas se tenijqui quema ayemo tayohua huan ayemo nimomacuectoc ica nocualancaitacahua, monequi miquis.” Huaјca amo aquí quiyeco yon se teno. ²⁵ Huan nochi nopa soldados aјsitoј ipan se cuatitamit campa oncayaya necti, ²⁶ huan nochi injuanti calajque noјona huan quitaque hasta motalohuayaya nopa necti. Pero amo aquí quiyeco pampa quimacasiyayaj cati ica quifestigoјquetzttoyaj TOTECO huan cati Saúl quinilhuiјtoya panos. ²⁷ Pero Jonatán amo quimatiyaya cati itata quiiјtoјtoya, huaјca yaya, quena, quiteјqui nopa necti ica se cuatopili cati quihuicayaya huan quicuajqui huan quicuic fuerza.

* 14:21 14:21 O israelitame.

²⁸ Huajca se soldado israelita quiihui para itata quinihuijtoya para tatechihuali ma eli cati quicuasquí se tenijqui ipan nopa tonali huan yeca nochi nopa tatehuijca tacame ayecmo quipiyayayaj fuerza. ²⁹ Huajca Jonatán quinanquili:

—Amo cuali cati quichijtoc notata pampa nopa tanahuatili quincocojtoc huan quinuajmatijtoc nochi ni tacame. Ama na nimomachilía nijpiya fuerza pampa nijcujtoc se quentzi necti. ³⁰ Huan achi más cuali momachilitosquíaj nochi ni tacame sinta quicujtosquíaj nochi nopa tacualisti cati quincuilijque inincualancaitacahua. Quej nopa achi más filisteos tiquinmic-tijosquíaj.

³¹ Pero nopa israelitame noja quintoquilijque huan quiniictijiyajque nopa filisteos ten pilaltepetzi Micmas hasta Ajalón masque nelía tahuel siyajtoyaj. ³² Huan teipa nochi nopa tacame yajque campá filisteos huan quinitzquijque ininborregojhua, inihuacaxhua huan ininbecerros huan quiniictijque talchi. Huan quicujque ininacayo xoxohuic ica nochi inieso.

³³ Huan sequij quiihuijque Saúl:

—Nopa israelitame tajtacolchihua jixpa TOTECO pampa quicuj nacat ica esti huan ica ya nopa quixpanoj TOTECO itanahuatil.

Huan Saúl quinihui:

—Amojuanti nelía antaixpanotoque. Techhualiquilica nica se hueyi tet,

³⁴ huan xiquinihuij nochi nopa tacame para ma techhualiquilica inihuacaxhua o ininborregojhua, huan ma quiniictica nica ipan ni tet para toyahuis nopa esti. Huan quej nopa huelis quicuase huan amo sempa quixpanose TOTECO ica nopa nacat cati inijuanti quicuj ica esti.

Huajca ipan nopa yohuali nochi soldados quinihualicaque inintapiyálhua huan quiniictijque nopona. ³⁵ Huan Saúl quichijqui se taixpamit para TOTECO. Huan ya ni elqui nopa achtohui taixpamit cati Saúl quichijqui para ica quitascamatis TOTECO pampa quipalehuijtoya miyac.

³⁶ Huan teipa Saúl quijto:

—Ma tiixtemoca ama ni yohuali huan ma tiqintehuitij nopa filisteos hasta taneis. Ma tiqinichtequilitij nochi cati quipiyaj huan amo aquí tijcahuase ma itzto.

Huan nochi nopa soldados tananquilijque:

—Cualtitoc, tijchihuase cati tiquita para cuali.

Pero nopa totajtzi quijto:

—Achtohui ma tijtatzintoquilica Toteco Dios.

³⁷ Huajca Saúl quitatzintoquili Toteco Dios:

—¿Tijnequi tiyase tiqintehuitij nopa filisteos? ¿Techmactilis tomaco nochi inijuanti?

Huan TOTECO amo quinanquili ipan nopa tonali. ³⁸ Huajca Saúl moilhui para elqui por se soldado itajtacol. Huajca quinihui:

—Nochi cati tayacanani ximonechcahuica nica huan tiquitase canque eltoc nopa tajtacoli. ³⁹ Huan nijtestigojquetza TOTECO, para masque elis nocone Jonatán cati tajtacolchijtoc, temacht monequi miquis.

Huan yon se tacat amo camanaltic para quinanquilis. ⁴⁰ Huan teipa Saúl quijto:

—Na huan nocone Jonatán timoquetzase ni lado huan nochi amojuanti ximocahuaca nopona huan tiquitase taya quinxetis TOTECO.

Huan nochi nopa israelitame tananquilijque:

—Cualtitoc. Xijchihua cati tiquita para cuali.

⁴¹ Huajca Saúl quiihui TOTECO cati toDios tiisraelitame:

—Ta TOTECO Dios ten tiisraelitame, technextili ama ajquiya tajtacolchijtoc. Tijmajcahuase ni Urim huan Tumim. Huan sinta nitajtacolchijtoc na huan nocone, huajca ma quisa Urim; pero sinta tajtacolchijtoque sequinoc israelitame, huajca ma quisa Tumim.

Huan quema quimajcajque, huetzqui Urim ipan Saúl huan Jonatán.

⁴² Huajca sempa Saúl quiiyto:

—Ama xijmajcahua para tijmatise sinta na o nocone.

Huan huetzqui ipan Jonatán para tajtacolchijtoya.

⁴³ Huajca Saúl quiihui Jonatán:

—Techilhui taya tijchijtoc.

Huan Jonatán quiihui:

—Nijcuajqui se quentzi necti cati nijtejqui ica se cuatopili cati ni-huicayaya, pero nica niitztoc huan nimotemaca nimiquis sinta monequi nimiquis.

⁴⁴ Huajca Saúl quiiyto chicahuac:

—Ma Toteco Dios techtatzacuiliti sinta amo timiquis ama ni tonali pampa tijchijqui ya ni, Jonatán.

⁴⁵ Pero nochi nopa israelita soldados quiihuijque Saúl:

—Amo quinamiqui para miquis Jonatán pampa yaya techmaquixti nochi tiisraelitame ama ni tonali. Huan tojuanti tijtestigojquetztoque TOTECO para yon se itzonalc amo huetzis pampa yaya Jonatán cati ica itapalehuil Toteco Dios quichijtoc hueyi tatanilisti ama ni tonali.

Huan quej nopa nochi nopa israelita tacame quimanahuijque Jonatán para amo miquis. ⁴⁶ Huan Saúl ayecmo yajqui para quintehuiti nopa filisteos. Huan nopa filisteos cati mocajque yoltoque tacuepilijque inintal.

⁴⁷ Huajca quej nopa Saúl tenextili para elqui tanahuatijquet huan quichijqui temachti itanahuatilis. Huan Saúl huan isoldados quintehuitoj inincualancaitacahua campa hueli ipan tali Moab, Amón huan Edom. Huan quitehuijque nopa tanahuatijquet ten Soba huan ten nopa filisteos. Huan campa hueli campa injuanti yahuiyayaj para quintehuitij inincualancaitacahua, tataniyayaj. ⁴⁸ Huan quichijqui huejhueyi tamanti hasta motemacac quintanqui nopa amalecitame huan quej nopa quinmanahui nopa israelitame ten inincualancaitacahua.

⁴⁹ Huan iconehua Saúl inintoca eliyaya Jonatán, Isúi huan Malquisúa. Huan iichpoca cati achtohui ejquet itoca eliyaya Merab huan cati teipa ejquet Mical. ⁵⁰ Huan isihua Saúl itoca eliyaya Ahinoam cati elqui iichpoca Ahimaas. Huan nopa tayacanquet ten isoldados itoca eliyaya Abner cati elqui icone Ner. Huan Ner elqui itío Saúl, ⁵¹ pampa Cis, itata Saúl, huan Ner, itata Abner, eliyayaj icnime huan eliyayaj iconehua Abiel.

⁵² Huan nelia oncac miyac tatehuilisti ica nopa filisteos ipan nochi tonali quema tanahuatiyaya Saúl. Huan sesen huelta quema Saúl quipantiyaya se telopocat cati yolchicahuac, quicalaquiyaya para ma mochihua soldado.

15

Saúl amo quichijqui cati TOTECO quiihui

¹ Se tonali Samuel quiihui Saúl:

—Na cati nimitztequitali titanahuatijquet pampa quej nopa TOTECO technahuati ma nijchihua. Huan ama monequi xijtacaquili cati yaya techilhuijtoc ma nimitzilhui. ² TOTECO Cati Quinyacana Nochi Ilhuicac Ejcahua Ma Tatanitij quijtohua ya ni: ‘Ama niquintatzacuilitis nopa amalecitame por cati quinchihuiliijque inihuejcapan tatahua nopa israelitame quema

amo quincahuilijque panose ipan inintal quema quisque ipan tali Egipto. ³ Huajca ama xiya huan xiquinmicti nochi amalecitame huan nojquiya xiquintzontamilti inintapiyalhua. Amo aqui xijtasojta. Xiquinmicti nochi tacame, sihuame, coneme, huan hasta nochi pilconetzitzi cati sanoc ontacatij. Huan nojquiya xiquinmicti nochi inintapiyalhua, masque huacaxme, borregojme, camellos o burrojme. Nochi monequi xiquinmictica.⁷

⁴ Huajca Saúl quinsentili nochi israelita soldados ipan Telaim, huan eliyayaj 200 mil soldados ten tali Israel, huan iyoca eliyayaj 10 mil ten tali Judá. ⁵ Huajca Saúl huan isoldados quiyahualotoj altepet Amalec huan motatijque itejteno nopa altepet ipan se tamayamit. ⁶ Huan Saúl quititanqui se cati quinilhuito nopa ceneo xinachtí tacame cati mocahuayayaj inihuaya nopa amalecitame:

—Xiquincajtehuaca ni amalecitame huan xiquisaca ten ni altepet pampa amojuanti anquintasojaque tohuejcapan tatahua tiisraelitame quema quisque ipan tali Egipto huan amo quinamiqui anniquise inihuaya.

Huajca nimantzi quisque nopa ceneos ten inialtepe amalecitame. ⁷ Huajca Saúl pejqui quinmictia nopa amalecitame ipan Havila huan quinmictijtiyajqui hasta campa nopa tepamit Shur cati mocahua campa quisa tonati ten tali Egipto. ⁸ Huan quitzquijque Agag, nopa tanahuatijquet ten amalecitame, pero nochi sequinoc amalecitame cati quinpantijque quin-tamimictijque. ⁹ Pero Saúl huan isoldados amo quimictijque Tanahuatijquet Agag. Huan nojquiya amo quinmictijque nopa borregojme huan huacaxme cati más cuajcualme, yon amo quinmictijque nopa chivojme huan borregojme cati más tomahuaque. Pero nochi cati quiitaque para nelquentzi ipati, quena, quinmictijque.

¹⁰ Huan TOTECO quinojnotzqui Samuel huan quiilhui:

¹¹ —Nelía nimocuesohua ama pampa nijtali Saúl quej tanahuatijquet pampa ya techtahuelcajtoc huan amo quichihua cati nijnahuatijtoc ma quichihua.

Huajca Samuel nelía cualanqui ica Saúl huan nochi se yohual motataji huan quitajtani TOTECO por ya. ¹² Huan tonili cualca Samuel yajqui quitemoto Saúl huan se quiilhui para Saúl ya yajqui ipan cuatitamit Carmel campa quichijtoc se taixcopincayot. Quiilhui para nopona san panosquia huan teipa temosquia hasta Gilgal.

¹³ Huajca Samuel yajqui campa itztoya Saúl. Huan quema Saúl quiitac Samuel, quiilhui:

—¡Ma TOTECO mitztiochihua! Nijtamichijtoc cati TOTECO technahuati.

¹⁴ Huan Samuel quiilhui:

—Huajca ¿para ten nijcaqui tzajtzij nopa borregojme huan huacaxme?

¹⁵ Huan Saúl quinanquili:

—Nopa tapiyalme quinhualicaque nosoldados ten nopa amalecitame. Quincajque yoltoque cati más cuajcualme borregojme huan huacaxme para quinmictise nica para quimacase tacajcualisti TOTECO Dios, pero nochi sequinoc tapiyalme tiquintamimictijque.

¹⁶ Huajca Samuel quiilhui Saúl:

—Techtacaquili, nijnequi nimitzyolmelahuas cati TOTECO techilhui ama ni yohuali.

Huan Saúl quinanquili:

—Techilhui.

¹⁷ Huan Samuel quiilhui:

—Masque timomachilía para amo teno mopati, TOTECO mitzchijqui titay-acanquet ten nochi israelitame. Mitzchijqui titanahuatijquet. ¹⁸ Huan yaya mitztitanqui ipan se tequít huan mitznahuati xiquintzontamilti nochi nopa tajtacolchijca amalecitame huan xiquintehui hasta tiquintamimictis. ¹⁹ Huajca ¿para ten amo tijtepanitac TOTECO itanahuatil? ¿Para ten timo-temacac para tijcuis tamanti cati eliyaya iniaxca nopa amalecitame? Nelía tijchijtoc cati fiero iixpa TOTECO.

²⁰ Huajca Saúl quinanquili:

—Pero na nijchijtoc cati TOTECO technahuati. Niyajqui campa yaya techtitanqui, huan nijhualicatoc Tanahuatijquet Agag ten nopa amalecitame. Huan niquintzontamiltijtoc nochi nopa amalecitame. ²¹ Pero ni israelita soldados, injuantijya quincuique nochi ni borregojme huan huacaxme cati achi más cuajcualme pampa quinequij quimacase quej tacajchualisti TOTECO Dios ipan Gilgal.

Samuel quipanti itajtacol Saúl

²² Huan Samuel quiilhui:

“¿Taya más quipactía TOTECO?

¿Achi más quinequi tacajchualisti tatatili,
o quinequi ma tijneltocaca cati techilhuijtoc?

Nimitzilhuía más quipactía ma tijneltocaca.

Pampa más ipati iixpa para tijneltocase,

huan amo para tijmacase ininchiyajca oquich borregojme.

²³ Sinta se masehuali mosentanchihua ica cati TOTECO quinahuatijtoc ma quichihua,

TOTECO quiita san se quej se cati tenahualhuía.

Huan sinta se moyoltetilía ica TOTECO,

yaya quiita quej se cati quinhueyichihua teteyome.

Huan ama pampa ta tijtahuelcajtoc itanahuatilhua TOTECO,

ya nojquiya mitztahuelcajtoc huan ayecmo mitzcahuilis tielis titanahuatij-quet.”

²⁴ Huan Saúl quiilhui Samuel:

—Quena, na nitajtacolchijtoc pampa niquixpanotoc cati TOTECO tech-nahuati ica ta. Niqunimacasqui nopa tacame cati nohuaya itztoyaj huan nijtacaquili cati techtajtanijque. ²⁵ Huajca nimitztajtanía, techtapojpolhui ni tajtacoli huan xihuala nohuaya para tijhueyitalitij TOTECO.

²⁶ Pero Samuel quiilhui:

—Amo, amo niyas mohuaya pampa tiquiyocacajtoc TOTECO itanahuatil-hua huan ama ya mitziyocacajtoc huan ayecmo quinequi tielis titanahuati-quet ipan Israel.

²⁷ Huan quema Samuel mocuetqui para yasquía, Saúl quiitzquili iyoyo cati ica mopictoya para ma amo yahui. Huan tzayanqui iyoyo.

²⁸ Huan Samuel quiilhui Saúl:

—Quej techzayanilijtoc noyoyo, TOTECO mitztzayanilijtoc motanahuatil ipan Israel ama ni tonali. Huan quimactilis seyoc cati más cuali huan amo quej ta. ²⁹ Huan TOTECO, yaya cati tohueyitilis tiisraelitame, amo istacati huan amo moyolcuepa pampa yaya amo itztoc quej se masehuali cati moyolcuepa.

³⁰ Huan Saúl quiijto:

—Na nitajtacolchijtoc, pero nimitztajtanía para techtepanita quej ni-tanahuatijquet iniixpa ni huehue tacame huan nochi ni israelitame. Huan xiya nohuaya para tijhueyitalitij TOTECO Dios.

³¹ Huajca Samuel quitoquili Saúl huan mocuetqui ihuaya huan Saúl quihueyitalí TOTECO.

³² Huan Samuel quihui:

—Techhualiquili Agag nopa tanahuatijquet ten nopa amalecitame.

Huan Agag monexti san pactoc iixpa Samuel pampa moilhuyaya para ayecmo aquí quimictisquía. ³³ Pero Samuel quihui Agag:

—Ica macheta tiquinmictijtoc miyac tacame huan tiquincajqui ininahuan iniselti quej amo quema quinpixque ininconeua. Huajca quej nopa nojquiya mocahuas monana.

Huan quema Samuel tanqui quihuí ya ni, quitojtzontejqui Agag iixpa TOTECO nozona ipan Gilgal.

³⁴ Huan teipa Samuel quisqui huan yajqui ipan altepet Ramá. Huan Saúl yajqui ichaj ipan ialtepe cati itoca Gabaa ten Saúl. ³⁵ Huan Samuel ayecmo quema yajqui para quitati Saúl, pero nelía tahuel mocueso ica nochi cati Saúl quichijtoya. Huan TOTECO moyolcuetqui para quichijtoya Saúl tanahuatijquet ipan Israel.

16

Samuel quiajalti David ma eli tanahuatijquet

¹ Teipa TOTECO quihui Samuel:

—¿Hasta quema tamis timocuesos por Saúl? Ayecmo xichoca pampa na ayecmo nijnequi para elis tanahuatijquet ipan Israel. Xijtemiti se cuacuajti ica aceite cati ica titetequitallía por na pampa nijnequi xiya ichaj Isaí cati itzotc altepet Belén. Nimotapejpenilijtoc se icone para ma elis notanahuatijca.

² Huajca Samuel quitatzintoquili TOTECO:

—Huan ¿quenicatza nijchihuas para niyas? Sintá quimatis Saúl, huajca techmictis.

Huan TOTECO quihui:

—Xijhuica se pilhuacaxtzi huan tiquijtos para tiyajtoc techmacati tacajc ahualisti nimoTECO. ³ Huan tijnotzas Isaí campa tijtatis nopa tacajc ahualisti huan na nimitzilhuis taya tijchihuas. Huan nimitznextilis ajquiya ten iconehua ticajaltis ica aceite para tijtequitallis.

⁴ Huajca Samuel quichijqui quej TOTECO quihui huan quema ajsito ipan pilaltepetz Belén nopa huehue tacame ten nopa altepet quisque quinamiquicoj huihuipicayaj. Huan quihuique:

—¿Tijchijtoque cati amo cuali, o san ica mopaquilis tihualajtoc?

⁵ Huan Samuel quinanquili:

—Quena, nihualajtoc para nijmacas tacajc ahualisti TOTECO. Ximoiyocatalica para TOTECO huan xihualaca nohuaya para tijmacase tacajc ahualisti.

Huan Samuel quiniyocatali Isaí huan iconehua huan quinpajpajqui quej quijto tanahuatili. Teipa quinoztqui ma yaca quimacatij tacajc ahualisti TOTECO. ⁶ Huan quema calajque Isaí huan iconehua, Samuel quitachili itelpoca cati itoca Eliab huan moilhui para temachti ya nopa tacat cati TOTECO quitapejpenijtoc para elis tanahuatijquet.

⁷ Pero TOTECO quihui Samuel: “Amo xijtachili iyejca se tacat, yon quenicatza ihuejcapanca para tiquixmatis ajquiya nijtapejpenijtoc pampa ni telcopat cati moixpa itzotc amo nijnequi. Na niamoTECO amo nitechilía quej masehualme teitaj para nijmatis ajquiya cuali. Masehualme quitachilíaj itachiyalis se tacat huan iyejca itacayo, pero na nijtachilía iyolo.”

⁸ Huajca Isaí quinotzqui Abinadab huan quinexti iixpa Samuel, huan Samuel quiilhui:

—Yon ya amo quitapejpenijtoc TOTECO.

⁹ Teipa Isaí quinexti Sama iixpa Samuel huan Samuel quiijto:

—Yon ya amo quitapejpenijtoc TOTECO.

¹⁰ Huan Isaí quinexti chicone iconehua iixpa Samuel huan ica sesen Samuel quiilhui Isaí para yon se ten inijuanti amo elqui cati TOTECO quitapejpenijtoya.

¹¹ Huajca teipa Samuel quiilhui Isaí:

—¿Ayecmo tiquinpiya más moconehua?

Huan Isaí quinanquili:

—¡Quena! Polihui se cati teipan ejquet. Pero yaya amo cana yajtoc, san quinmocuithuía borregojme.

Huajca Samuel quiilhui Isaí:

—Xitatitani ma quinotzatij pampa amo huelis titacuase hasta quema ya ajsiqui.

¹² Huajca nimantzi Isaí tanahuati ma quinotzatij. Huan yaya quipixqui itzoncal quentzi chichiltic huan iixteyol cati nelía yejyetzzi huan itacayo cati nelía cuali. Huan TOTECO quiilhui Samuel:

—Yaya cati nijtapejpenijtoc. Xicalti ica aceite para tijtequimacas.

¹³ Huan Samuel quicuic nopa cuacuajti cati quipiyayaya aceite huan amo teno quiijto, san quitequili ipan itzonteco David iniixpa nochi iicnihua. Huan ipan nopa tonali Itonal TOTECO calajqui ipan David para quimacas hueyi chichahualisti. Huan teipa Samuel mocuetqui ichaj ipan altepet Ramá.

David quitequipano Tanahuatijquet Saúl

¹⁴ Huan Itonal TOTECO ya quitahuelcajtoya Saúl huan ipan ya hualayaya se iajaca Amocualtatcat cati TOTECO quititantoya. Huan nopa ajacat quitaijyohuilti Saúl. ¹⁵ Huan itequipanojcahua Saúl quiilhuiyayaj:

—Tijpiya se iajaca Amocualtatcat cati Toteco Dios mitztitanili. ¹⁶ Huajca techcahuili timotequipanojcahua ma timitztemohuilise se cati hueli tatzotzona ica arpa huan quema hualas nopa ajacat cati amo cuali huan mitztaijyohuiltis, yaya quitzotzonas nopa arpa huan ica ya nopa tiitztos más cuali.

¹⁷ Huajca Saúl quinanquili itequipanojcahua:

—Cualtitoc, huajca techtemohuilica se cati tatzotzona cuali huan techhualiquilica.

¹⁸ Huan se itequipanojca quiijto:

—Na niquitztoc se icone Isaí cati hueli tatzotzona cuali nepa altepet Belén. Yaya motemaca huan quimati tatehuía huan talnamiqui para camanaltis cuali. Se telpoca tacat cati nelía yejyetzzi huan TOTECO itztoc ihuaya.

¹⁹ Huajca Saúl quintitanqui tacame para ma quiilhuitij Isaí: “Techtitanili mocone David cati quinmocuithuía borregojme.”

²⁰ Huan Isaí quititanqui icone, David, ihuaya se burro cati quitamamalti ica pantzi, huan se cuetaxti temitoc ica xocomecat iayo, huan se pilchivojtzi quej se nemacti. ²¹ Huan David ajsico iixpa Saúl huan Saúl nelía quiicneli huan quitequimacac ma eli itamocuithahujca. ²² Huan teipa Saúl quititanili se amatajcuiloli Isaí huan quiilhui ma quicahuili David ma mocahua para quitequipanos pampa nelía quipactiyaya. ²³ Huan quema calaquiyaya ipan Saúl nopa iajaca Amocualtatcat cati Toteco Dios quititanilijtoya, David

nimantzi quicuiyaya iarpa huan quitzotzonayaya. Huan nopa amo cual ajacacat quistehuayaya, huan Saúl momatiyaya más cuali.

17

Goliat quinhuihuiitac israelitame

¹ Huan más teipa nopa filisteos quinsentilijque nochi inisoldados para tatehuse huan mosentilijque ipan altepet Soco ipan tali Judá. Huan mochi-que tatajco nopa ome altepeme Soco huan Azeca campá itoca eliyaya Efes Damim. ² Huan Saúl nojquiya ica nochi nopa israelita soldados mosentilijque ipan tamayamit Ela huan mocualtalijque para quintehuse nopa filisteos. Huajca nopa filisteos huan israelitame moixtachilijtoyaj. ³ Nopa filisteos ipan se piltepetzi huan nopa israelitame ipan seyoc piltepetzi huan san quinxelohuayaya nopa tamayamit cati mocajqui tatajco. ⁴ Huan nimantzi quisqui se hueyi tacat campá itztoyaj nopa filisteos. Yaya itoca eliyaya Goliat ten altepet Gat huan quiipiyaya eyi metro ihuejcapanca. Huan nochi quiixmatiyayaj pampa miyac tatantoya ipan tatehuilisti. ⁵ Huan quihuicayaya itepostzontzajca cati eliyaya bronce. Huan motalilijtoya se tepos pantzajcayot ten bronce, huan ietica eliyaya 55 kilo. ⁶ Huan cati motalilijtoya para ica quitzacuas imetz nojquiya eliyaya nochi bronce. Huan quihuicayaya se cuachoso ten bronce. ⁷ Huan icuayo icuachoso eliyaya tomahuac huan iyecapa eliyaya nopa teposti hierro. Huan san iyecapa quiipiyaya ietica quej chicome kilo. Huan itamocuitahuijca cati tayacantiyajqui nojquiya quihuicayaya se tepostzajcayot. ⁸ Huan Goliat moquetzqui tatajco huan quinilhui nopa israelita soldados:

—San tapic anmocuallajaj para nochi antatehuse. Na nifilisteo huan amojuanti anitequipanojcahua Saúl. Na nitatehuis por tojuanti tifilisteos. Huajca amojuanti nojquiya xijtapejpenica se ten amojuanti cati tatehuis por amojuanti. Huan san ya ma motehuiqui nohuaya. ⁹ Huan sinta ya techtanis huajca tojuanti cati tifilisteos timechtequipanose amojuanti cati anisraelitame. Pero sinta na nijtanis, huajca amojuanti antechtequipanose. ¹⁰ Ama ni tonali nimechpehualtia anisraelita soldados. Techitanilica se tacat para ihuaya nimotehuis.

¹¹ Huan quema Saúl huan nochi nopa israelita soldados quicajque cati ni filisteo quijtohuayaya nelia mocuesojque huan momajmatijque.

David ya mocuctoya ichaj

¹² Huan David eliyaya icone Isaí cati itztoya ipan pilaltepetzi Belén ipan tali Judá. Huan Isaí eliyaya huehuentzi huan quinpixtoya chicueyi iconehua huan David eliyaya cati más teipan ejquet. ¹³⁻¹⁴ Nopa eyi iconehua Isaí cati achtohui tacatque inintoca eliyaya Eliab, Abinadab huan Sama. Huan injuanti ya motemacatoyaj para quipalehuse Saúl ipan tatehuilisti huan itztoyaj ihuaya. Pero David eliyaya cati nelia tateipa ejquet. ¹⁵ Huan David san yahuiyaya quemantica para quitequipanos Saúl huan sempa tacuepiliyaya ichaj para quinmocuitahuis iborregojhua itata ipan Belén. ¹⁶ Huan nopa hueyi filisteo tacat quisayaya para quinpejpehualtis nopa israelitame ica ijnaloc huan ica tiotac. Huan quej nopa quichijqui mojmosta para 40 tonati.

¹⁷ Huan se tonali Isaí quiilhui icone David:

—Xiquinhuiquili moicnihua ni 20 litros trigo cati tacacatztili huan ni majtacti huejhueyi pantzi. ¹⁸ Huan nojquiya xijhuiquili inintayacanca ni

majtacti queso. Huan xiquinitati moicnihua sinta itztoque cuali, huan techhualiquili se amacamanali ten injuanti sinta cuali itztoque.

¹⁹ Pampa Saúl huan nochí nopa israelita soldados huan moicnihua itztoque ipan tamayamit Ela campá motehuij inihuaya nopa filisteos.

²⁰ Huajca tonili David mijquejqui nelijnaloc, huan iborregojhua quincajtejqui imaco seyoc para má quinnocuitahui. Huan David yajqui huan quihucac nochí tamanti cati itata, Isaí, quihuhijtoyá. Huan quemá ajsito campá itztoyaj nopa israelita tacame, quinpantifo quistinemiyyaj campá cochque para yase tatehuitij huan nochí cuatzajtziyyaj para tatanise.

²¹ Huan nochí israelítame huan filisteos moixtachilijtoyaj. ²² Huajca David quicajtejqui nochí cati quihualicayaya imaco nopa tacat cati quipixqui itequi para quimocuitahuis tamamali. Huan motalojtiyyajqui hasta campá moixnamictoyaj nopa soldados para quinitati sinta itztoque cuali iicnihua.

²³ Huan quemá noja quincamanalhuyiyaya iicnihua, sempa monexti nopa huejcapantic filisteo tacat cati itoca eliyaya Goliat ten altepet Gat. Yaya huisqui campá filisteo soldados huan pejqui camanalti. Moquetzqui tatajco huan quuijto quej nochípa quiniilhuyiyaya nopa israelítame. Huan David quicajqui.

²⁴ Pero quemá nopa israelita soldados quitayayaj nopa filisteo, san cholohuayayaj pampa tahuel quimacasiyyaj. ²⁵ Huan san ya nopa camanaltiyayaj nopa israelítame se ica seyoc. Quiijtohuayayaj: “¿Tiquitzoc nopa tacat cati camanalti? San techhuihuiita. Quiijtohua para nopa tanahuatijquet quiricojchihuas cati ihuaya motehuis. Quiijtohua para nopa tanahuatijquet quimacas iichpoca para elis isihua sinta quitanis. ¿Amo tijcactoc? Quiijtohua para nopa familia cati tatanis ayecmo quemá monequis taxtahuase impuestos o quichihuase comun tequit.” Huan quej nopa nochí mocamanalhuyiyaj.

David mosemacac para quitehuis Goliat

²⁶ Huajca David pejqui quiniilhuía cati itztoyaj inechca:

—Amo quinamiqui tijcahuilise ni filisteo cati amo quixmati TOTECO ma techtaijilhui tojuanti cati tiisraelítame. Tojuanti tiixcahua Toteco Dios cati nelía itzto. ¿Taya quuijtohua quimacase cati quitanis huan quitamiquixtis ni pinahualisti ten tiisraelítame?

²⁷ Huajca nopa tacame quinanquiliyque David huan quipohuilijque nochí cati quicactoyaj para quimacasquía cati quitanisquía Goliat.

²⁸ Pero iachtohui icni David cati itoca eliyaya Eliab quicajqui cati David quuijtohuayaya huan nelía cualanqui ihuaya huan quihuhui:

—¿Para ten tihualajtoc nica? Ta motequi san para tiquinnocuitahuis nopa se ome borregojme ipan huactoc tali. ¿Ajquiya imaco tiquincajtejtoc? Na nimitzixmati quenicatza tahuel timotepanita. Huan ama timohueyimajtoc hasta tihualajqui tiquitaco ni tatehuilisti quej se hueyi soldado, ¿ax que? San fiero moyolo.

²⁹ Huan David quinanquili:

—¿Taya amo cuali nijchijtoc? Na san niontatzintoca.

³⁰ Huan teipa quicajtejqui iachtohui icni huan yajqui quintatzintoquilito sequinoc san se, huan injuanti nojquiya san se quinanquiliyque. ³¹ Huan quicajque sequinoc tacame cati David quuijtohuayaya para amo cuali quicahuilis Goliat ma quinhuihuiita israelítame cati iaxcahua TOTECO. Huan injuanti quihuhitoy Saúl. Huajca Saúl quinoztzqui David. ³² Huan David quihuhui Saúl:

—Amo aquí ma moyolmajmati por nopa filisteo pampa na niyas huan nijtehuis.

³³ Pero Saúl quinanquili:

—Amo, ta amo tihuelis tiyas tijtehuiti nopa filisteo. Ta noja titelpocat huan yaya ya momajtoc tatehuía hasta quema pisiltzi.

³⁴ Pero David quinanquili:

—Quema na nimotequipanoyca niquinmocuitahuyaya iborregojhua notata, se tonali hualajqui se León para quihuicas se borrego huan seyoc tonali hualajqui se oso. ³⁵ Huan nochi ome niquintoquili huan niquinquixtili nopa borregojme. Huan quema tacuepilijqe huan quinequiyayaj techtehuise, niquinitzqui ipan inintentzo huan niquinmaquili hasta niquinmicti.

³⁶ Huajca ya nijmictijtoc se León huan se oso, huan quej nopa nijchihuas nojquiya ica ni filisteo tacat cati amo teno quiپیya ica TOTECO. Pampa tahuel techtajijlhujtoc tiisraelitame huan tojuanti tiiaxachua Toteco Dios cati itztoc. ³⁷ Elqui yaya TOTECO cati techmanahui ten nopa León huan nopa oso huan yaya nojquiya techmanahuis ten imaco ni filisteo.

Huajca Saúl quilhui David:

—Huajca xiya huan TOTECO ma yahui mohuaya.

³⁸ Teipa Saúl quitallil David nochi nopa teposti cati yaya momatqui motallía quema tatehuyaya. Ipan itzonteco quitallil se itepos tzontzajca ten bronce huan quimacac se teposti para moyolixtzacuas huan mometztcuas. ³⁹ Huan David motzinquechilpi imacheta, huan quiyeyeco sinta huelisquía nejnemis ica nopa taeticayot pampa amo momajtoya. Pero amo huelqui nejnemi huan huajca quilhui Saúl:

—Amo huelis nitatehuis ica nochi ni teposti nopani pampa amo nijyeyecojtoc, yon amo hueli ninejnemi.

Huajca David moquixtili nochi cati motalijtoya, ⁴⁰ huan quicuitejqui icuatopil. Huan quitapejpeni macuili piltetzitzi cati ajalaxtic ipan se atajti. Huan quitalli nopa piltetzitzi ipan se pilyoyoncoxtaltzi cati quihuicayaya. Huan imaco quihuicayaya itehuitatz huan yajqui para moixnamiquiti ihuaya nopa hueyi filisteo tacat.

⁴¹ Huan nopa filisteo nejnentihualayaya huan monechcahuyaya campa itztoya David. Huan itamocuitahujca tayacantihualayaya ica se hueyi tepostzajcayot. ⁴² Huan quema nopa filisteo quuitac David, quihuetzquili pampa David eliyaya sanoc se telpocat huan ixchichiltic huan yeyectzi.

⁴³ Huan nopa filisteo quilhui David:

—Na amo nichichi para tihualas technamiquiqui ica se cuahuit momaco.

Huan nopa filisteo quitelchijqui David ica inintoca itaixcopincayohua.

⁴⁴ Huan teipa quilhui David:

—Xihuala nica huan niquinmacas motacayo para ma quicuaca nopa totome huan nopa tapiyalme cati itztoque cuatita.

⁴⁵ Huajca David quinanquili nopa filisteo huan quilhui:

—Ta tihuala ica macheta huan ica cuachoso para techtehuiqui. Pero na nihuala para nimitztehuis ica itequiticayo TOTECO Cati Quinyacana Nochi ilhuicac Ejchua Ma Tatanitij. Yaya toDios nochi tiisraelita soldados huan yaya cati tijmahuispolojtoc. ⁴⁶ Huajca ama ni tonali TOTECO mitztemactilis nomaco, huan nimitzmictis huan nimitzquechtzontequis. Huan nojquiya miquise nochi ni filisteo soldados. Huan totome huan tapiyalme cati nemij cuatita quicuase inintacayohua. Huan quej nopa nochi masehualme ipan taltipacti quimatise para itztoc se Dios cati nelía temachtí ipan tali Israel.

⁴⁷ Huan nojquiya nochi cati mosentilijtoque nica quimatise para TOTECO

amo monequi teposti, yon macheta, yon cuachoso para ica temanhuis, pampa TOTECO iseltitzi tatehuis. Huan yaya cati amechtemactilis tomaco ama.

⁴⁸ Huan quema Goliat pejqui nejnemi para quinamiqui David, David nojquiya nimantzi motalo para quiixnamiquiti. ⁴⁹ Huan nimantzi quiquixti se tet cati quihuicayaya ipan ipilyoyoncoxtal, huan quitali ipan ifehuitatz huan quimajcahuili Goliat huan quiajsic ipan icuaixco. Huan nopa tet calajqui huan nopona mocajqui tatzquitoc. Huan Goliat huetzqui ixtapachijtoc.

⁵⁰ Huan quej nopa David quitanqui nopa filisteo san ica se tatehuitatz huan ica se tet. Huan ica ya nopa quimaquili huan quimicti. Huan David amo quipixtoya yon se macheta imaco. ⁵¹ Huan teipa David motalo hasta campa huetztoya nopa filisteo, huan quiquixti Goliat imacheta ten icuetaxo, huan quimicti huan quiquechtzontejqui. Huan quema nopa filisteos quitaque para nopa tacat huejcapantic ya mictoya, cholojtejque. ⁵² Huajca nochi israelita soldados cati hualajtoyaj ten tali Israel huan tali Judá tza-jtzique huan quintoquiliqque nopa filisteos. Huan quinmictijtoyajque ipan nopa tamayamit Gat hasta campa nopa caltemit ipan nopa tepamit cati quiyahualo altepet Ecrón. Huan ipan nochi nopa ojti cati yahui ten Saaraim hasta Gat huan Ecrón huetztoyaj inintacayohua nopa filisteo soldados.

⁵³ Teipa tacuepiliqque nopa israelita soldados huan calajque campa mochantalijtoyaj nopa filisteos huan quincuiliqque nochi cati quipixtoyaj. ⁵⁴ Huan David quicuitejqui itzonteco Goliat, huan quihuicac ipan altepet Jerusalén. Pero nochi Goliat itepos cati ica tatehuiyaya, David quihuicac ichaj.

⁵⁵ Pero quema Saúl quitac David monechahuiyaya para quiixnamiquis nopa filisteo, quitatzintoquili Abner nopa hueyi tayacanquet ten isoldados, huan quiilhui:

—¿Ajquiya itatahua huan ifamilia ne telpocat?

⁵⁶ Huan Abner quinanquili:

—Tanahuatijquet, melahuac amo teno nijmati ten ifamilia.

Huajca Saúl quiilhui:

—Huajca xitetatzintoquili ten ya.

⁵⁷ Huajca quema David ya quimictijtoya nopa filisteo, huan tacuepiliyaya huan imaco quihualicayaya ifzonteco, Abner quinamiquito huan teipa quihuicac iixpa Saúl. ⁵⁸ Huajca Saúl quitatzintoquili David ten ifamilia huan quiilhui:

—Techilhui telpocat, ¿ajquiya motatahua huan mofamilia?

Huan David quicamanalhui huan quiilhui canque hualajqui huan quiilhui:

—Na niicone Isaí cati ehua altepet Belén.

18

Jonatán huan David mohuampoqchijque

¹⁻² Huan David tanqui camanalti ihuaya Saúl. Huan Saúl ayecmo quicahuili David ma mocuepa ichaj para mocahuas. Quichijqui ma eli itapalehuijca. Huan Jonatán, icone Saúl, mochijqui inelhuampo David huan ten nopa tonali huan teipa quicneli quej ya moicneliyaya. ³ Huan Jonatán quichijqui se camanali ihuaya David para elis ihuampo para nochipa pampa Jonatán nelía quicneli quej ya moicneliyaya. ⁴ Huan para quitamiltis nopa camanal sencahuali moquixtili iyoyo cati cuali huan nopa cati ica mopictoya

huan quimacac David. Huan nojquiya quimacac imacheta, huan icuahuitol huan itzinquechilpica cati quitequihui ipan tatehuilisti. ⁵ Huan David yahuiyaya campa hueli campa Saúl quititaniyaya huan nochi cati quichijqui quisqui nelía cuali. Huajca Saúl quichijqui David se tequitiquet para ma quinahuati isoldados. Huan nochi israelitame huan nochi nopa soldados quincompacti para yaya ma quinnahuati.

Saúl pejqui quicualancaita David

⁶ Pero se tamanti quicualancamacac Saúl. Panoc quema nopa israelitame tacuepiliyayaj ten tatehuilisti quema David ya quimictijtoya Goliat. Quisque sihuame ipan nochi altepeme para quanamijque Tanahuatijquet Saúl. Huicatihualayayaj huan mijtotijtihualayayaj ica miyac paquilisti huan quihualicayayaj nochi tamanti tatzotzonalí. ⁷ Pero quema nopa sihuame mijtotiyayaj, huicayayaj:

“Se mil tacame quinmicti Saúl,
pero majtacti mil quinmicti David.”

⁸ Huajca nelía cualanqui Saúl quema quicajqui cati nopa sihuame quiijto-huayayaj, huan quiijto:

—Quiijtohuaj para David quinmictijtoc majtacti mil huan na san se mil. San polihui para quichihuase tanahuatijquet.

⁹ Huajca ipan nopa tonali Saúl pejqui quicualancaita David huan ayecmo quicualitac quej achtohui.

¹⁰ Huan tonili Toteco Dios quititanqui se iajaca Amocualtacat cati calajqui ipan Saúl huan nelía chichahuac quiitzqui. Huan Saúl tachihuayaya fiero ipan icaltanahuatil quej se cati locojti. Huan David pejqui quitzotzona iarpa quej quichihuayaya achtohuiya. Huan Saúl quipixtoya se cuachoso imaco, ¹¹ huan quimajcahuili David pampa quinequiyaya quisentapalhuilis ica icuachoso huan quicahuas tatzquitoc ipan tapepecholi. Pero David huitonqui huan momanahui huan quej nopa panoc ompa quema Saúl quimajcahuili icuachoso.

¹² Huan Saúl quiimacasiyaya David pampa TOTECO quipalehuiyaya huan itztoya ihuaya. Pero TOTECO ya quicajtejtoya Saúl huan ayecmo itztoya ihuaya. ¹³ Huan pampa Saúl quicualancaitac David, quiquixti para ayecmo ma huala ipan icaltanahuatil. San quicahuili elis inintayacanca se mil soldados. Pero David quisayaya ipan tatehuilisti quej monejqui huan tacuepiliyaya ica cuali. ¹⁴ Huan nochi tamanti cati David quichihuayaya quisayaya cuali pampa TOTECO itztoya ihuaya huan quipalehuiyaya. ¹⁵ Huan yeca Saúl achi más momajmatiyaya pampa quiitayaya para David mohueyichijtiyahuiyaya. ¹⁶ Huan nochi israelitame ipan tali Israel huan ipan tali Judá quiicneliyayaj David pampa ica cuali yahuiyaya huan tacuepiliyaya para quinyacanas ipan tatehuilisti.

¹⁷ Huan se tonali Saúl quiilhui David:

—Na nimitzmacas noichpoca, Merab, cati achtohui ejquet para elis mosihua. Pero achtohui monequi tielis se cuali soldado cati yolchichahuac para tiquintehuis icualancaitacahua TOTECO.

Pero ipan iyolo Saúl moilhuiyaya: “Amo cuali sinta na nijmictis David, huajca nijmajcahuas ica nopa milisteo tacame para injuanti ma quimictica.”

¹⁸ Pero David amo teno moilhui huan quinanquili:

—Pero ¿quenicatza na nielis nimomontica huan ta titanahuatijquet? Na amo teno nijpiya, yon nochaj ehuaní amo teno quipiyaj ica ta.

¹⁹ Pero quema ajsic tonali para Saúl quimacasquía David iichpoca, Merab, amo quimacac David. Yaya quimacac seyoc tacat cati itoca Adriel ten altepet Mehola.

Saúl quinejqui quimacas David seyoc iichpoca quej isihua

²⁰ Huan Mical, nopa seyoc iichpoca Saúl, quiixtocayaya David huan quema quiiilhuique Saúl, yaya nelía pajqui. ²¹ Huan Saúl moilhui para quimacas David ni seyoc iichpoca huan ica ya quisencahuasquía para nopa filisteos ma quimictica. Huajca ica ompa quiiilhui David:

—Ama, quena, tielis tinomontica.

²² Huan Saúl quinahuati itequipanojcahua, quinilhui:

—Xijcamanalhuiti David ixtacatzi huan xiquilhuica para na nitanahuatijquet niquicnelía huan nochi notequipanojcahua nojquiya quitepanitaj miyac. Huajca cuali para quiselis noichpoca huan mochihuas nomontica.

Quej nopa xiquilhuitij.

²³ Huajca itequipanojcahua Saúl quiihuitoj David. Huan David quinankuili:

—¿Anmoilhuáj nicaxilis na cati niteicneltzi para nitaxtahuas cati monequi para ma nieli niimontica se tanahuatijquet?

²⁴ Huan nopa tacame yajque quiihuitoj Saúl cati David quiiijtojtoya.

²⁵ Huajca Saúl quinilhui itequipanojcahua, quej ni xiquilhuitij David:

—Nopa tanahuatijquet amo quinequi tomi quej sequinoc momajtoque temacaj por inisihua. Quinequi momacuepas ica icualancaitacahua. Hua-jca quinequi xiquinmicti 100 filisteo tacame huan xiquintequilis iyecapan cuetaxo inintacayo huan tijmactilis.

Pero nelía Saúl quinequiyaya nopa filisteos ma quimictica David ipan tatehuilisti.

²⁶ Pero quema itequipanojcahua Saúl quiiilhuique David nochi ya ni, huajca quipacti para elis imontica nopa tanahuatijquet. Huan quema ayemo ajsiyaya tonali para quiselis cati quitanisquía, ²⁷ David huan isoldados yajque huan quinmictijque 200 filisteo tacame huan David quintequili iniyecapan cuetaxo inintacayo huan quimactilico Tanahuatijquet Saúl. Huan Saúl monejqui quimacas iichpoca, Mical, para ma eli isihua.

²⁸ Pero Saúl quimachili para TOTECO itztoya ihuaya David huan quipalehuiyaya, huan quitac para iichpoca nelía quiiicneliyaya, hua-jca ²⁹ achi más quimacacqui quej amo quema quimacastoya huan mojmosta achi más quicualancaitzinemiya.

³⁰ Huan nochipa quema nopa filisteos quinte-huiyayaj nopa israelitame, David achi más tataniyaya que nochi nopa sequinoc itayacancahua Saúl. Hua-jca nochi tacame quitoquilisnequiyayaj David huan quitepanitayayaj miyac.

19

Saúl quinejqui quimictis David

¹ Teipa Saúl quiiilhui icone, Jonatán, huan nochi itequipanojcahua para ma quimictica David. Pero Jonatán nelía quiiicneliyaya David huan elqui inelhuampo. ² Hua-jca nimantzi quiyolmelajqui David cati itata moilhuiyaya huan quiiilhui:

—Notata Saúl quitemohua quenicatza huelis mitzmictis. Hua-jca mosta ica ijnaloc ximomocuitahui huan ximotati cuatita campa amo aqui mitzitas huan nopona ximocahua. ³ Huan niquisas ihuaya notata hasta campa

timotatijtos, huan nijcamanalhuis ten nochi cati cuali tijchijtoc para nijmatis taya moilhuía ten ta. Huan teipa nimitzmachiltis.

⁴ Huan tonili Jonatán quicamanalhui itata Saúl huan quiilhui:

—Amo teno cati fiero xijchihuili motequipanojca David pampa yaya amo teno amo cuali mitzchihuilitoc. Mitzpalehuilitoc miyac. ⁵ Elqui ya cati motemacac huan quimicti nopa huejcapantic filisteo masque hueltosquía mictosquía nopona. Pero nopona ica David, TOTECO quichijqui se hueyi tamanti huan techmanahui nochi tiisraelitame inimaco focualancaitacahua quej ta tiquitac huan tiyolpajqui. Huajca ama ¿para ten tijnequi tijmictis David masque amo teno fiero mitzchihuilitoc? Nochi cati quichihua mitz-palehuía.

⁶ Huajca Saúl quitacaquili cati quiilhui icone, Jonatán, huan quiijto:

—TOTECO nechcaqui para ama niquijtohua para amo miquis David.

⁷ Huajca quema quisqui itata, Jonatán quinozqui David huan quiilhui nochi cati itata quiijtojtoya. Huan teipa quihuicac iixpa Saúl huan David quitequipanohuayaya Saúl quej achtohuia.

⁸ Teipa sempa oncac seyoc tatehuilisti ica nopa filisteos, huan David sempa yajqui huan quintehuito huan quintanqui. Quinmicti miyac huan sequij cholojteque. ⁹ Huan teipa iajaca Amocualtatcat cati TOTECO quititanilijtoya sempa calajqui ipan Saúl quema mosehujtoya ipan ichaj ica se cuachoso imaco huan David tatzotzonayaya. ¹⁰ Huan Saúl quimajcahuili icuachoso David pampa quinequiyaya quitatzquiltis ipan tapepecholi. Pero David mijcueni huan amo quiajic huan ipan nopa yohuali cholojtequi.

¹¹ Huan Saúl quinahuati isoldados ma yaca ichaj David para ma quichiyaca hasta quisas ica ijnaloc huan huajca, quena, ma quimictica. Pero isihua, Mical, quimatqui huan quiilhui David:

—Monequi timochololtis amantzi ni yohuali pampa mosta mitzmictise.

¹² Huan teipa Mical quitemohui David ipan se ventana, huan mochololti.

¹³ Huan nimantzi Mical quicuito se teteyot huan quitali ipan itapech huan quitalili itzonteco cati quiipiyayaya iijhuiyo se borrego para ma nesi quej itzoncal huan quiipijqui ica se itaque. ¹⁴ Huan quema Saúl quinahuati isoldados para ma quiitzquiti, Mical quinilhui para David mococohua. ¹⁵ Huan sempa Saúl quintitanqui tacame para ma quitemotij David huan quinilhui:

—Techhualiquilica ipan itapech para nijmictis.

¹⁶ Huajca quema ajsicoj nopa tacame cati quintitantoya Saúl, calajque ipan ichaj David campá itapech huan quipantijque se hueyi teteyot huan ipan itzonteco quipixtoya iijhuiyo se borrego.

¹⁷ Huajca teipa Saúl quiilhui Mical:

—¿Para ten techcajcajajtoc? Tijcajtoc para ma mochololti yaya cati nocualancaitaca.

Huan Mical quinanquili:

—Nijchijqui pampa techilhui para techmictisquía sinta amo nijpalehuisquía ma mochololti.

¹⁸ Huajca quej nopa David huelqui mochololti, huan yajqui quiitato Samuel ipan altepet Ramá. Huan quipohuili nochi cati Saúl quichihuilitoya. Teipa David huan Samuel yajque itztotij ipan pilaltepetzi Naiot.

¹⁹ Huan quema Saúl quimatqui para David itztoya ipan Naiot nechca Ramá, ²⁰ quintitanqui isoldados ma quiitzquiti. Pero quema isoldados ajsitoj nopona, quinaitaque miyac tajtolpanextiani cati quiseliyayaj camanali ten Toteco Dios huan teyolmelahuayayaj cati quiseliyayaj. Nojquiya quiitaque

para nozona itztoya Samuel inihuaya huan para yaya quinyacanayaya para quiselise camanali ten Toteco Dios. Huan nimantzi Itonal Toteco Dios hualajqui ipan nopa soldados cati Saúl quintitantoya. Huan inijuanti nojquiya pejqque quiselíaj camanali ten Toteco huan teyolmelahuayayaj cati quiseliyayaj.

²¹ Huajca quema Saúl quimatqui ya ni, sempa quintitanqui sequinoc tacame huan inijuanti nojquiya pejqque tayolmelahuaj camanali cati TOTECO quinmacayaya. Huan ica expa Saúl quintitanqui sequinoc tacame, huan inijuanti nojquiya ininpantic. ²² Huajca Saúl motemacac para yaya yas ipan altepet Ramá. Huan quema ajsito campa se ameli cati eltoc campa itoca Secú tatzintocac canque itztoya Samuel ihuaya David. Huan quilhuijqque para itztoyaj ipan Naiot nechca Ramá. ²³ Huajca yajqui nozona. Pero ipan ojti Itonal Toteco Dios calajqui ipan Saúl huan yaya nojquiya pejqque quiselía camanali ten Toteco huan pejqque tayolmelahua nopa camanali huan quej nopa quichijqui hasta ajsito ipan Naiot nechca Ramá. ²⁴ Huan Saúl moquixtili iyoyo huan itztoya xolot. Huan mocajqui xolot iixpa Samuel nochi nopa tonali huan nopa yohuali quiseliyaya camanali ten Toteco. Yeca nozona pejqque nopa camanali cati masehualme motajtaniyayaj: “¿Saúl nojquiya eli se tajtolpanextijquet o amo?”

20

Jonatán quimanahui David

¹ Pero David ya quistoya ipan pilaltepetzi Naiot nechca Ramá. Yaya yajqui campa itztoya Jonatán huan quilhui:

—¿Taya nijchijtoc? ¿Para ten motemacatoc motata para temachti techmictis?

² Huan Jonatán quinanquili:

—Amo neli quinequi mitzmictis. Notata amo quichihuas se tamanti hueyi o pisiltzi sinta amo techmachiltis achtohuí. ¿Para ten techtatilis notata ni tamanti? Amo nijneltoca.

³ Pero David sempa quilhui Jonatán:

—Motata quimatí cuali para ta huan na timohuampojchijtoque. Yeca amo quinequi mitzilhuis pampa moilhuía para timocuesos. Pero melahuac nimitzilhuía para ya nieltoc para nimiquis.

⁴ Huajca Jonatán quilhui David:

—Huajca ¿quenicatza huelis nimitzpalehuis? San techilhui huan nijchihuas por ta.

⁵ Huajca David quinanquili Jonatán:

—Xiquita, mosta pehuas nopa ilhuit ten nopa metzti yancuic. Huan monequi para niitstos ihuaya motata para titacuase san sejco quej timoma-jtoque. Pero techcahuili nimotatis cuatita huan nimocahuas nozona hasta huicta ica tiotac. ⁶ Huan sinta motata techtemos huan mitztatzintoquilis ten na, xiquilhui para nimitztajtani miyac huelta para techcahua ma niya ipan noaltepe Belén pampa nochi nochaj ehuaní mosentilíaj sesen xihuit para ilhuichihuase quema temacaj inintacajcahualis. ⁷ Huan sinta motata quijjtos para cualtitoc, huajca nijmatis para nochi cuali eltoc. Pero sinta motata cualanis, huajca nijmatis para motemacatoc para techmictis. ⁸ Huajca nimitztajtania techchihuili ni favor, pampa tijchijtoque se camanal sencahuali iixpa TOTECO para amo quema timotahuelcahuase. Sinta nitajacolchijtoc, huajca ta techmicti, pero amo techhuica iixpa motata.

⁹ Pero Jonatán quinanquili:

—¡Na amo quema nimitzchihuilis ya nopa! Sinta nijmatis para nelía notata motemacatoꝝ mitzmictis, huajca nimitzilhuis.

¹⁰ Huajca David quitatzintoquili Jonatán:

—¿Huan ajquiya yas techilhuiti sinta motata mitznanquilis cualantoc?

¹¹ Huan Jonatán quilhui:

—Xihuala nohuaya ma timoiyocaquixtica.

Huajca san sejo yajque campa huelque camanaltij san injuanti ome.

¹² Huan nopona Jonatán quilhui David:

—Nijtestigojquetza TOTECO toDios tiisraelitame para mosta o huicta, nijcamanalhuis notata para nijmatis taya moilhúa. Sinta nochi eltos cuali para ta, huajca nimitzmachiltis. ¹³ Pero sinta notata cualantos huan nelía quinequi mitzmictis, ma TOTECO techtatzacuilti chicahuac sinta amo nimitzilhuis para huelis timochololtis. Huan ma TOTECO itzto mohuaya quej achtohuiya itztoya ihuaya notata. ¹⁴ Huan sinta noja niitztos teipa, techtasojta quej TOTECO mitztaojtatoc, huan techcahuili ma niitzto. ¹⁵⁻¹⁶ Huan sinta niniquis huan TOTECO ya quintzontamiltijos nochi mocualancaitacahua ipan ni taltipacti, se favor xiquintasoja nochaj ehuaní.

Huajca quej ni Jonatán quichijqui se camanal sencahuali ihuaya David.

¹⁷ Huan Jonatán quichijqui David sempa ma quitestigojquetza TOTECO para mopalehuisquíaj huan quichihuasquíaj nochi cati quijtojttoyaj pampa Jonatán nelía quicneliyaya David quej ya moicneliyaya.

¹⁸ Teipa Jonatán quilhui David:

—Mosta quilhuihuilise nopa metzti yancuic, huan mitztemose pampa amo aqui itztos ipan mosiya campa mesa para nopa tacualisti. ¹⁹ Huan para huicta achi más nochi mitztemose. Huajca xiya ximotatiti campa timotatij achtohuiya campa nopa miyac tet cati itoca Ezel. ²⁰ Huan niyas nopona nechca huan nijmajcahuas eyi cuataminti, quej nijmaquilisquía para nicasis se tenijqui. ²¹ Huan teipa niquilhuis notequipanojca: ‘Xiya, xijtemoti nopa cuataminti.’ Huan sinta tijaquis para niquilhuis: ‘Nopa cuataminti mocajtoc achi nica, xijcuiti’, huajca huelis tiquisas pampa tijmatis para onca tasehuilisti ica notata huan amo teno fiero mopantis. ²² Pero sinta tijaquis para niquilhuis notequipanojca: ‘Xiya más para neca pampa nopa cuataminti nopona achi neca huetzqui’, huajca monequi ticholos nimantzi pampa TOTECO quinequi xicholo. ²³ Huan xiquelnamiqui para TOTECO techcactoc huan mocahua testigo ica nochi cati tiquijtojttoque ama huan quej timocajtoque. Huan ya techtatzacuiltis sinta amo tijtamichihuase tocamanal.

²⁴ Huajca David motatito campa achtohui motatijtoya. Huan quema ajsic nopa ilhuit ten metzti yancuic, huajca Tanahuatijquet Saúl mosehui campa mesa para tacuas. ²⁵ Huan Saúl mosehui campa ipa mosehuiyaya nechca nopa tapepecholi, huan Jonatán mosehui iixmelac itata. Huan Abner mosehui inacasta Saúl. Pero campa David momatqui mosehuía mocajqui cactoc.

²⁶ Huan ipan nopa tonali Saúl amo teno quijto ten David, pampa moilhui huelis quiajsitoya se tenijqui cati quichijqui amo tapajpactic iixpa TOTECO huan ayemo mopajpactoya. ²⁷ Pero tonili sempayano mocajqui cactoc campa momatqui mosehuía David, huan eliyaya nopa ompa tonali ipan nopa ilhuit para nopa metzti yancuic. Huajca Saúl quitatzintoquili icone, Jonatán:

—¿Para ten amo hualajtoc tacuaqui icone Isaí yon yalohua huan yon ama?

²⁸ Huan Jonatán quinanquili Saúl:

—David techtajtani ma nijcahuili yas ialtepe Belén, ²⁹ pampa ichaj ehuan quichihuase se ilhuit ica nopa tacajcahualisti ipan ialtepe. Huan iicni quiihni monequi ma yas. Huajca techilhui ma nijchihuili se favor huan ma nijcahuili yas paxaloti ipan ichaj. Yeca amo hualajtoc para tacuas mohuaya.

³⁰ Huajca Saúl cualanqui huan quiihni Jonatán:

—¡Tihuihuitic quej motajtacolchijca nana! ¿Timoilhuá amo nijmati para tijtapepenijtoc timohuampojchihuas ica David masque ica ya nopa timopinahualtis ta huan tijpinahualtis monana? ³¹ Pampa sinta tijcahuas ma itzto ipan ni tali David cati icone Isaí, ta amo quema huelis tielis titanahuatijquet. Huajca ama xitanahuati ma quitemotij huan ma techhualiquilica para nijmictis.

³² Huajca Jonatán quiihni:

—Huan ¿para ten tijmictis? ¿Taya amo cuali quichijtoc?

³³ Huajca Saúl nimantzi quimajcahuili icuachoso Jonatán para quimictis. Huan Jonatán quimachili para nelía itata quisencajtoya quimictis David.

³⁴ Huajca Jonatán quisqui campa imesa huan amo tacuajqui ipan nopa ompa tonali ipan ilhuit pampa nelía mocuesohuayaya por David. Huan mocuesohuayaya pampa eliyaya se pinahualisti cati itata quichihuayaya.

³⁵ Huan tonili Jonatán quisqui nelijnaloc huan quihuicac se oquichpil huan quichijqui nochi quej mocajtoya ihuaya David.

³⁶ Huan Jonatán quiihni nopa oquichpil:

—Ximotalo para tijtemoti nopa cuataminti cati nijmajcahuas.

Huan quema nopa oquichpil motalojtiyahuiyaya, Jonatán quimajcajqui nopa cuataminti huan quichijqui para ma huetzi más huejca ten iixmelac.

³⁷ Huan quema nopa oquichpil ajsito campa huetztoya nopa cuataminti, huajca Jonatán quitzajtzi chichahuac ica nochi ifuerza huan quiihni:

—Huetztoc nopa cuataminti más para neca.

³⁸ Huan sempa Jonatán quitzajtzi nopa oquichpil huan quiihni:

—Ximoisihuilti ximotalo huan xijcui. Amo ximoquetza.

Huan nopa oquichpil quinsentili nopa cuataminti, huan quihualiquili Jonatán. ³⁹ Huan nopa oquichpil amo teno quimatqui taya onca, san Jonatán ihuaya David quimatiyayaj taya quinequiyaya quijtos. ⁴⁰ Huan teipa Jonatán quimactili nochi nopa cuataminti huan icuahuitol nopa oquichpil, huan quinahuati ma quihuiquili nochi ipan altepet.

⁴¹ Huan quema nopa oquichpil ya yajtoya, David quisqui campa motatijtoya iica nopa huejhueyi teme ica tatzinta ipan nopa tali. Huan moixhuijzonqui eyi huelta huan icuaixco ajsic hasta talchi iixmelac Jonatán. Huan teipa moquetzqui huan motzoponijque ica hueyi tatepanitacayot huan chocaque san sejco hasta ayecmo huelqui choca David. ⁴² Huan Jonatán quiihni David:

—Xiya ica tasehuilisti ipan moyolo pampa timoilhuijtoque iixpa TOTECO para amo quema timoelcahuase para nochipa. Huan tijtajtanijtoque TOTECO ma itzto tohuaya huan ica toconehua para nochipa para moicnelise, huan yaya ya nopa quichihuas.

Huajca David yajqui huan Jonatán tacuepili ipan ialtepe.

21

David cholohua ten Saúl

¹ Huan David yajqui altepet Nob para quitas nopa totajtzi Ahimelec. Pero quema Ahimelec quuitac, momajmati huan quiihni:

—¿Para ten tihuala moselti huan amo aqui huala mohuaya?

² Huan David quinanquili:

—Nopa tanahuatijquet technahuati ma nijsencahuaqui se tamanti. Huan techilhui para amo aqui ma niquilhui para ten techtitantoc huan para ten niitztoc nica. San niquinilhuijtoc nosoldados cati niquinahuatia ma techchiyaca ipan se lugar. ³ Pero ama ¿taya tijpiya para tijcuase? Techmaca se macuili pantzi o ten tijpantis.

⁴ Huan nopa totajtzi quinanquili:

—Nijpiya pantzi, pero amo ya ten hueli pantzi. San nijpixtoc nica nopa pantzi cati taiyocatalili para tacajcualisti para TOTECO. Pero huelis nim-itzmaca sinta nosoldados amo cochtoque inihuaya sihuame para se ome tonati huan itztoque tapajpactique quej monequi para quicuase ni pantzi.

⁵ Huajca David quinanquili:

—Amo ximocueso, nosoldados amo quinechcahuijtoque inisihuahua yalohua huan huictaya. Nomasehualhua motapajpacchijtoque nochipa quema tiquisaj para tijchiuatij se tequit. Huajca noja más itztoque tapajpactique ama.

⁶ Huajca nopa totajtzi quimacac nopa pantzi cati taiyocatalili para TOTECO pampa amo quiپیayaya seyoc tamanti pantzi. San quiپیayaya cati quitalijtoya iixpa TOTECO yalohua, pero ama ya quiijcuenijtoya ipan taixpamit para quintalis sequinoc cati noja totonic.

⁷ Huan ipan nopa tonali itztoya nozona se itequipanojca Saúl cati itoca eliyaya Doeg ten tali Edom. Eliyaya se tayacanquet ten nopa tamocuitahuiani ten iborregojhua Saúl. Yaya mopajpacayaya iixpa TOTECO quej quiijto nopa tanahuatili huan quiitac nochi ten panoc.

⁸ Huan nojquiya David quiilhui Ahimelec:

—¿Amo tijpiya se cuachoso o se macheta nica? Amo teno nijcuitejqui, yon se macheta, yon se teposti, pampa nitalochquistejqui ipan itequi nopa tanahuatijquet.

⁹ Huan nopa totajtzi quinanquili:

—Quena, nijpixtoc nica imacheta Goliat, nopa flisteo cati tijmicti ipan nopa tamayamit Ela. Eltoc pictoc ipan se yoyomit huan huiyontoc iica toyoyo cati tatzejtzelolitic. Huelis tijhuicas sinta tijnequi pampa amo nijpiya seyoc nica, san ya nopa.

Huajca David quiilhui:

—Cualtitoc, techmaca. Amo onca seyoc cuali quej nopa.

David yajqui alpet Gat

¹⁰ Huan ipan nopa tonali David quisqui nozona, huan cholo huan yajqui campa Tanahuatijquet Aquis ten alpet Gat. ¹¹ Pero itequipanojcahua Aquis quiixmatque huan quiijtoque:

—¿Amo ya ni David nopa hueyi tayacanquet ten nochi ni tali? ¿Amo ya ni cati quihuicatiyayaj nopa miltotiani huan quiijtohuayayaj:

‘Se mil tacame quinmicti Saúl, huan majtacti mil quinmicti David?’

¹² Huan quema David quicajqui ni camanali, quitali ipan iyolo huan momajmati pampa moilhui huelis tanahuatijquet Aquis quichihuilisquia se tamanti cati amo cuali. ¹³ Huajca nimantzi David quipatac itachiyalis huan mochijqui quej locojtiyaya huan ten hueli quiijcuilohuayaya ipan caltemit, huan quichihuayaya para ma motalo ichajchac ipan itentzo. ¹⁴ Huajca Aquis quiniilhui itequipanojcahua:

—¿Para ten techhualiquilijque ni tacat? ¿Amo anquuitaj para locojti? ¹⁵ Ya tiquinpixtoque miyaqui cati locojtij nica. ¿Huelis amoilhuáj para nijcahuilis ni tacat calaquis ipan nochaj?

22

Ichaj ehuaní David huan sequinoc tacame mosentilijque ihuaya

¹ Huajca David quisqui ipan altepet Gat huan yajqui motatito ipan nopa osot nechca altepet Adulam. Huan nimantzi quimatque iicnihua huan nochi ichaj ehuaní huan inijuanti yajque nozona campa itztoya para ihuaya mosejcotilijque. ² Huan nojquiya mosentilijque ihuaya nochi cati taijyohuiyayaj, huan cati tahuicayayaj, huan cati quipiyayayaj tequipacholi, huan nochi cati amo yolpaquiyayaj ica Saúl. Huan David mochijqui inintayacanca, huan ica nochi eliyayaj quej 400 tacame.

³ Huan David quisqui nozona huan yajqui altepet Mizpa ipan tali Moab huan quihui nopa tanahuatijquet nozona:

—Nimitztajtania xiquincagua itztose nica notata huan nonana amohuaya hasta quema nijmatis taya quichihuas Toteco Dios para na.

⁴ Huan quej nopa David quinhuicac itata huan inana iixpa nopa tanahuatijquet ten tali Moab, huan inijuanti mocajque nozona nochi nopa tonali quema David itztoya ipan nopa hueyi ostot. ⁵ Huan se tonali nopa tajtolpanextijquet Gad quihui David:

—Amo ximocagua nica ipan ni ostot ipan ni tepet. Xiquisa huan xiya tali Judá.

Huajca David quisqui huan ajsito campa nopa cuatitamit cati itoca Haret.

Saúl quinmicti nopa totajtztizi ipan Nob

⁶ Huan quema Saúl mosehujtoya itantita se tamarisco cuahuit ipan altepet Gabaa, quimatqui para sequinoc quipantijtoyaj David ihuaya nochi cati yahuiyayaj ihuaya. Huan Saúl quipixtoya icuachoso. Huan nochi itequipanojchagua quiyahualojtoyaj. ⁷ Huan Saúl quinilhui nochi itequipanojchagua cati quiyahualojtoyaj:

—Antacame ten tali Benjamín, ¿huelis amoilhuáj para David, icone Isaí, amehmacas tali huan xomeca milme quej na nijhijtoc, huan yeca anquinequij antechtahuelcahuase? ¿Anmoilhuáj para amechchihuas nochi anhuejhueyi tequichihuani huan antayacanani ipan se mil soldados, o se cien soldados quej na nimechchihuiljtoc? ⁸ ¡Amo! Pero masque miyac nimechpalehujtoc amojuanti, ama yon se ten amojuanti amo techilhui para nocone Jonatán quichijtoya se camanal senchuali ihuaya David. Huan yon se ten amojuanti amo mocuesohua por na. Yon se amo techilhujtoc para nocone quichijqui ma techcualancaita notequipanojca David, huan ma techpíjixtinemi quej ama quichihua.

⁹ Huajca ipan nopa talojtzi Doeg nopa edomita cati eliyaya se itequipanojca Saúl cati más hueyi quijto:

—Niquitac David quema yajqui altepet Nob para quuitato Ahimelec, icone Ahitob. ¹⁰ Huan nopa totajtzi Ahimelec quitatzintoquili TOTECO por David huan quimacac tacualisti. Nojquiya quimacac imacheta Goliat nopa filisteo.

¹¹ Huajca Tanahuatijquet Saúl tanahuati ma quinotzatij nopa totajtzi Ahimelec, icone Ahitob, huan nochi nopa totajtztizi cati itztoyaj ipan altepet Nob huan nochi ininchaj ehuaní. Huan quema nochi inijuanti ajsicoj iixpa Tanahuatijquet Saúl, ¹² quej ni Saúl quihui:

—Techtacaquili, Ahimelec, tiicone Ahitob.

Huan Ahimelec quinanquili:

—Quena, nica niitztoc titotanhuatijca.

¹³ Huajca Saúl quiilhui:

—¿Para ten timosentijtoc ica icone Isaí para antehcualancaitase? Ta tijmacac David pantzi huan macheta, huan tijtatzintoquili Toteco Dios por ya para noja más ma techcualancaita. Ta tijyolchicajtoc para ma techtehui quej ama quichihua.

¹⁴ Huan Ahimelec quinanquili:

—Tate, amo aqui yon se ten motequipanojcahua cati nelía motemach quej David huan hasta nojquiya tijchijtoc momontica. Yaya nopa hueyi tayacanguet ten mosoldados huan nochi ipan mocaltanhuatil nelía quitepanitaj. ¹⁵ ¿Huelis timoilhuía para sanoc ipan nopa tonali nipejqui nijtatzintoquilla Toteco Dios por ya? ¡Amo! Na nochipa nijchijtoc huan tipaquiyaya. Huajca amo techtajtacolti na nimotequipanojca, yon amo xiquintajtacolti nochaj ehuan pampa amo teno nijmatiyaya ten ni tamanti cati techilhuía para David mitzcualancaita.

¹⁶ Pero Tanahuatijquet Saúl quiilhui:

—Monequi timiquis Ahimelec, ta huan nochi iixhuihua motata.

¹⁷ Huan nimantzi nopa tanahuatijquet quinhuaitequipanojcahua cati quimocuitahuiyayaj:

—Xiquinmictica ni totajtzitzi ten TOTECO pampa injuanti nojquiya itztoque ihuaya David, pampa quimatque quema cholojtinemiyaya huan amo techilhuicoj.

Pero itequipanojcahua amo quinequiyayaj quinmictise itotajtzitzi TOTECO. ¹⁸ Huajca nopa tanahuatijquet quinhuaite Doeg nopa tacat ten Edom:

—Ta xiquinmicti.

Huajca Doeg momatananqui huan quinmicti 85 tacame cati moyoyontijtoyaj ica lino yoyomit pampa totajtzitzi. ¹⁹ Teipa yajqui altepet Nob, inialtepe totajtzitzi. Huan nozona quinmicti nochi tacame, sihuame, huan coneme hasta cati sanoc ontacatiyayaj. Nojquiya quinmicti nochi inintapiyahlua quej huacaxme para tapoxonise, burrojme, huan borrojme.

²⁰ Pero Abiatar cati elqui icone Ahimelec huan iixhui Ahitob mochololti, huan yajqui campa itztoya David. ²¹ Huan Abiatar quiilhui David nochi quenicatza Saúl quinmictijtoya nochi itotajtzitzi TOTECO. ²² Huan David quiilhui:

—Cuali nijmatiyaya ipan nopa tonali para nopa tacat Doeg ten tali Edom quiilhuiscuía Saúl para techitztoya nozona ihuaya nopa totajtzitzi. Huajca na notajtacol para quinmictijtoque nochi nopa totajtzitzi cati eliyayaj mochaj ehuan. ²³ Pero ximocahua nohuaya huan amo ximajmahui pampa yaya cati quinequi mitzmictis, nojquiya techtemohua para techmictis. Huan sinta timocahuas nohuaya, tiitztos temachti.

23

David quimanahui altepet Keila

¹ Huan se tonali nopa filisteos calajque ipan altepet Keila, huan quinichte-quiliyayaj inintrigo cati yancuic quiyolquixitjtoyaj, huan David quimatqui.

² Huajca David quitatzintoquili TOTECO taya ipaquilis, quiilhui:

—¿Tijnequi ma niyas niquintehuiti nopa filisteos?

Huan TOTECO quiilhui:

—Quena, xiya huan xiquintehuiti nopa filisteos huan xijmanahui nopa altepet.

³ Pero nopa tacame cati itzttoyaj ihuaya David, quiilhuique:

—Ya tiitztoque ica majmajti nica ipan tali Judá. Huan achi más timamahuse sinta tiyase altepet Keila para tiquintehuitij nochi inisoldados nopa filisteos.

⁴ Huajca David sempa quitatzintoquili TOTECO, huan TOTECO quiilhui:

—Ximocualtica huan xiyaca altepet Keila, pampa na nimechmactilis amomaco nopa filisteos.

⁵ Huajca David huan nochi nopa tacame cati itzttoyaj ihuaya, yajque altepet Keila. Huan quintehuique nopa filisteos huan quintzontamiltijque, huan quincuilijque nochi inintapiyalhua. Huan quej nopa David quinmanahui nochi cati ehuyayaj ipan altepet Keila.

⁶ Huan nopa totajtzi Abiatar, icone Ahimelec, yajqui ihuaya David ipan altepet Keila huan quihuicac nopa yolixtajcayot ica nopa piltetzitzi cati momatque quitequihaaj para quimatise taya TOTECO quinequiyaya ma quichihuaca. ⁷ Huan quema Saúl quicajqui para David itztoya ipan altepet Keila, quiijto: “Toteco Dios quitahuelcajoc David huan techmactilijtoc nomaco pampa calactoc ipan nopa altepet cati tzactoc ica se tepamit yahualtic.”

⁸ Huan nimantzi Saúl quinotzqui nochi isoldados ten campa hueli altepeme para yase Keila para quiyahualotij David huan nochi nopa tacame cati itzttoyaj ihuaya ipan altepet Keila.

⁹ Huan quema David quimatqui para Saúl quinequiyaya quichihuilis cati fiero, quiilhui Abiatar para ma quihualiquili nopa pantzajcayot para quimatisquía taya quinilhuisquía TOTECO. ¹⁰ Huan David quiijto:

—TOTECO ta cati titoDios tiisraelitame, nijcactoc para temachti Saúl quinequi hualas nica ipan altepet Keila huan quinequi quisosolos ni altepet pampa niitztoc nica. ¹¹ ¿Nelía hualas quej nijcactoc? Huan quema ajsis ¿techtemactilise imaco ni tacame ten ni altepet Keila? TOTECO, nimitztajtanía techilhui.

Huan TOTECO quiilhui:

—Saúl, quena, hualas.

¹² Huan David quitatzintoquili TOTECO:

—Huan ¿quena, techtemactilise ni Keila ehuan huan nochi nosoldados imaco Saúl?

Huan TOTECO quinanquili:

—Quena, amechtemactilise.

¹³ Huajca David huan nochi nopa tacame cati yajtoyaj ihuaya cati eliyayaj 600 tacame, quisque altepet Keila huan nejnenque campa hueli campa amo más mahuilili. Huan quema Saúl quimatqui para David quistoya ten nopa altepet huan mocholotijtoya, huajca moyolcuetqui huan amo yajqui altepet Keila.

David ipan nopa huactoc tali

¹⁴ Huan David yajqui campa huactoc tali huan quitemo campa itztose temachti ipan ostot huan nozona mocajqui. Huan mocajqui ipan se tepet ipan nopa huactoc tali Zif. Huan masque Saúl nelía quitemohuayaya mojmota, Toteco Dios amo quitemactili David imaco Saúl.

¹⁵ Huan se tonali quema David itztoya nechca Hores ipan huactoc tali Zif, quimatqui para Saúl hualayaya ipan ojti para quimictis.

¹⁶ Huan ajsico Jonatán, icone Saúl, ipan Hores, huan quiyolchicajqui David para ma motemachi ipan Toteco Dios. ¹⁷ Huan quiilhui:

—Amo ximajmahui, pampa notata Saúl amo huelis mitzajsis. Ta tielis titanahuatijquet ipan tali Israel. Huan na niitztos mohuaya huan nielis motemach, huan ya nopa hasta notata Saúl quimati.

¹⁸ Huan quej nopa, nopa ome sempa quiyancuillijque cati achtohui mo-tajtolcahuilijtoyaj iixpa TOTECO. Huan teipa Jonatán mocuetqui ichaj huan David mocajqui ipan Hores.

¹⁹ Pero nopa tacame ten altepet Zif yajque altepet Gabaa campa itztoya Saúl huan quiilhuijque:

—Tanahuatijquet Saúl, timitzyolmelahuaj para David motatijtoc ipan total ipan nopa ostot nechca Hores ipan tachiquili Haquila cati mocahua ica tatzinta ten huactoc tali. ²⁰ Huan quema tijnequis tiyas tijtemoti, timitzmac-tilise momaco.

²¹ Huajca Tanahuatijquet Saúl quinilhui:

—Ma TOTECO amechtiocihua pampa antechtasojtatoque. ²² Huajca ama, xiyaca huan ximotemachica sinta nelía itztoc campa anquiitague pampa techilhuijtoque nelía quimati quenicatza tacajcayahuas. ²³ Huajca xij-tachilica cuali nochi campa motatijtinemi, huan techilhuiquij cati temachtí. Huan na niyas amohuaya para nijpantis masque monequi nijtemojtiyas tatajco ten nochi nopa miyaqui masehualme ipan nochi tali Judá.

²⁴ Huan nopa tacame quiyacantiyajque Saúl huan tacuepillijque ipan altepet Zif para quitemose David.

Huan David huan nochi isoldados itztoyaj ipan huactoc tali Maón ipan nopa tamayamit cati mocahua ica tatzinta. ²⁵ Huan Saúl huan nochi isoldados yajque quitemotoj David, pero nimantzi sequij yajque quiilhuitoj David para Saúl hualayaya. Huajca David ixtemoc ten nopa tepet campa itztoya. Huan mocajqui ipan nopa tepexit cati mopantiyaya ipan tali Maón. Huan quema Saúl quimatqui, nojquiya yajque ipan huactoc tali Maón para quitemoti. ²⁶ Huan Saúl huan nochi isoldados yahuiyayaj ipan se lado ten nopa tepet, huan David huan nochi isoldados yahuiyayaj ipan nopa seyoc lado ten nopa tepet. Huan David moisihuilijyaya pampa quinequiyaya mochololtis imaco Saúl, pero amo huelqui pampa Saúl quinyahualojtoya huan ya eltoya para quiitzquise. ²⁷ Pero ipan nopa talojtzi ajsico se tacat cati quiilhuico Saúl:

—Xitacuepili total nimantzi pampa nopa filisteos calactoque.

²⁸ Huajca nimantzi Saúl huan nochi isoldados tacuepillijque para quin-tehuitij nopa filisteos huan quicajque quitoquílaj David. Huan yeca nopa lugar quitocaxtijque Sela Hama Lecot. (Sela Hama Lecot quinequi quijtos Nopa Tet Campa Quicahuili Ma Cholo.) ²⁹ Teipa David tejcoc ipan nopa tepeme para mocahuato ipan nopa ostot En Gadi.

24

David amo quinejqui quimictis Saúl

¹ Teipa Saúl tanqui quintehui nopa filisteos huan quiilhuijque para David itztoya ipan huactoc tali En Gadi. ² Huajca quinhuicac 3 mil israelita soldados cati más tapejpenilme huan yajque quitemotoj David huejcapa ipan nochi nopa tepeme campa oncayaya huejhueyi tet, huan campa san hueli nemij chivojme cati momajtoque nemij ipan tepeme. ³ Huan ipan iojhui ajsito campa se corral ten borregojme huan nechca eltoya se ostot.

Huan Saúl calajqui nozona para cuatenpanos. Huan David huan nochi isoldados itztoyaj nozona más calijtic ipan nopa ostot. ⁴ Huan nopa tacame quiilhuijque David:

—TOTECO ya mitzilhuijtoc para mitzmactilis momaco mocualancaitaca para tijchihuilis cati tiquitas para cuali, huan ama ya ajsic hora pampa itztoc momaco para tijmictis.

Huajca David monechcahui yolicatzi huan quitzontequili se quentzi iyoyo Saúl ipan nopa tzintayohuilot. ⁵ Pero teipa David moyolcoco pampa quitequiliytoya iyecapa iyoyo Saúl. ⁶ Huan quinihuyi nochi nopa tacame cati itztoyaj ihuaya:

—Ma TOTECO techtapojpolhui pampa nijchihuili cati fiero Saúl, yaya cati noteco. Nijchihuili cati amo monequi yaya cati TOTECO quitapejpenijtoc para elis tanahuatijquet.

⁷ Huan quej nopa David quinchihualti isoldados para ma amo quimictica Saúl. Huan teipa Saúl quisqui ipan nopa ostot huan yajqui.

⁸ Huan David moquetzqui huan yajqui iica Saúl huan quitzajtzili huan quiilhui:

—Noteco, Tanahuatijquet Saúl.

Huan quema Saúl moicancuetqui, David mohuijzonqui hasta talchi ica hueyi tatepanitacayot. ⁹ Huan quiilhui:

—¿Para ten tiquintacaquilía inijuanti cati mitzilhuíaj nijnequi nimitzmictis? ¹⁰ Ama tiquita para ya nopa amo melahuac pampa masque TOTECO mitztemactili nomaco ipan ni ostot huan nochi nosoldados techilhuiyayaj ma nimitzmicti, amo nijnejqui. Nimoilhui para amo hueli nijmictis nopa tanahuatijquet cati TOTECO quitapejpeni huan quitequitali.

¹¹ “Pero xiquita taya nijpixtoc nomaco. Nica eltoc iyecapa moyoyo cati nijzontejqui, pero amo nimitzmicti. Huajca xijmati para amo nimoilhuía para nimitzchihuilis cati fiero, yon amo nimitzixpanotoc. Pero ta, quena, techtoquilía huan tijnequi techmictis. ¹² Ma TOTECO techtajtolsencahua tojuanü tiome. Huan ma mitztatzacuiliti por cati tijnequi techchihuilis, pero xijmati para na amo quema nimomatananas ica ta para nimitzchihuilis cati fiero. ¹³ Eltoc quej quiijtohua nopa camanali cati huejcajquiya quitequihuíaj: ‘Tamanti cati fiero quisa ipan masehualme cati fierojtique.’ Pero masque ya nopa, amo nimomatananas na para nimitzchihuilis cati fiero. ¹⁴ Huan ¿para ten ta cati titanahuatijquet ipan tali Israel techtoquilía na cati amo teno nopati? Na niitztoc quej se chichi cati mictoc, o quej se tecpimit. ¹⁵ Huajca ma TOTECO techtajtolsencahua na huan ta. Huan ma quitatzacuiliti cati quiapiya tajtacoli. Yaya notamanahuijca ma techtasojta huan ma techmanahui momaco.”

¹⁶ Huan quema David tanqui camanalti, Saúl quiijto:

—¿Nelía eltoc ta, tinocone David, cati ticamanalti?

Huan pejqqui choca Saúl, ¹⁷ huan quiilhui:

—Ta nelía tixitahuac, pero na, amo, pampa techtaxtahuijtoc ica cati cuali, masque cati fiero nimitzchihuilijtoc na. ¹⁸ Ama nijmachilía para ta nelía techtasojtac pampa masque TOTECO techtemactili momaco ta amo techmicti. ¹⁹ Amo aquí seyoc cati quipantis icualancaitaca huan quicahuas ma yas ica cuali. Ma TOTECO mitztaxtahui hueyi pampa techtasojtatoc ama ni tonali. ²⁰ Huan ama niquita para ta tielis titanahuatijquet huan nochi tali Israel eltos ipan motanahuatilis, huan eltos temachtí momaco. ²¹ Techilhui ama iixpa TOTECO para amo tiquintzontamiltis nochaj ehuaní, yon noixhuihua huan quej nopa amo tamis notoca.

²² Huajca David tatestigojquetzqui para amo quema quichihuasquía ya nopa, huan teipa Saúl tacuepili ichaj. Huan David huan nochi nopa tacame cati itztoyaj ihuaya tacuepilijque sempa campa mochijtoyaj ipan nopa ostot.

25

Mijqui Samuel

¹ Huan amo huejcajqui mijqui Samuel, huan nochi israelitame mosentilijque huan quichoquilijque. Huan quitalpachojque campa ichaj ipan altepet Ramá. Huan ipan nopa tonali David quisqui huan yajqui ipan nopa huactoc tali cati itoca Parán.

David huan Abigail

² Huan ipan altepet Maón itztoya se tacat cati itoca Nabal cati eliyaya se tominpixquet. Nabal quinpixtoya 3 mil borregojme, huan se mil chivojme. Ipan nopa tonali yaya itztoya nechca altepet Carmel pampa nozona quinximayaya iborregojhua. ³ Huan nopa tacat Nabal quipixtoya isihua cati itoca Abigail. Huan Abigail eliyaya se sihuat yejyectzi huan nelía tzontalnamiqiyaya. Pero ihuehue Nabal cati eliyaya se iixhui Caleb, amo quej nopa. Yaya tahuel tzontochontic eliyaya huan nochipa quichihuayaya cati fiero.

⁴ Huan quema David quimatqui para Nabal quinximayaya iborregojhua, ⁵ quintitanqui majtacti tacame cati quinilhui ma yaca Carmel para quitatij Nabal huan ma quillhuica para David quihualtajpalohua. ⁶ Nojquiya quinilhui ma quicamanalhuica ica cuali huan ma quillhuica ni camanali: “Ma TOTECO mitztiochihua ta, huan nochi mochaj ehuan, huan nochi cati tijpiya. ⁷⁻⁸ Nijmati para anquinximaj moborregojhua huan anilhuichihua. Nimitztajtania para xiquintasoja nopa masehualme cati itztoque nohuaya huan techpalehui se quentzi ica tacualisti. Quema motequipanojcahua cati quinmocuitahuyayaj moborregojhua itztoyaj nica nechca tojuanti, amo quema tiquinchihuilijque cati fiero, huan amo quema tiquintachtequilijque masque huejcajqui itztoyaj ipan ni tali nechca Carmel. Xiquintatzintozquili motequipanojcahua huan injuanti mitzilhuise para melahuac cati nimitzilhuía. Huajca yeca se favor, techmaca ten hueli cati tijpiya para ni nomasehualhua huan na, nimocone, huelis tipanose.” Quej nopa quinahuati ma quillhuica.

⁹ Huajca itequipanojcahua David yajque huan quilhuitoj Nabal nochi quej David quinilhuitoyaj, huan mochixque para Nabal ma quinanzquili.

¹⁰ Pero Nabal quinanzquili fiero, quinilhui:

—¿Ajquiya ni David cati icone Isai? Amo teno ya noixpa. Ipan ni tonali itztoque miyaqui tequipanohuani cati cholojtinemij ten ininteco quej yaya quichijtoc. ¹¹ ¿Huelis niquincuilis notequipanojcahua inintacualis, huan nopa nacat huan xocomecat iayo cati niquincualtalilijtoc, para niquinmacas tacame cati amo niquinixmati huan amo nijmati canque ehuan?

¹² Huajca itatitanilhua David tacuepilijque huan quillhuicoj David nochi quej quinilhuitoyaj Nabal. ¹³ Huajca David quinilhui nopa tacame cati itztoyaj ihuaya:

—Ximotzinquechilpica amomacheta huan ximocualtica para tiyase.

Huan David huan nochi nopa tacame mocualtalijque. Yajque ihuaya David 400 tacame huan quincajque 200 para quimocuitahuse inintamantzitzi.

¹⁴ Pero se itequipanojca Nabal yajqui quilhuito Abigail isihua Nabal ten panoc. Quilhui:

—David quintitanqui tacame para quitajpaloquij noteco, Nabal, pero amo quinseli cuali. San quintajilhui huan quinmajcajqui. ¹⁵ Pero David huan nopa masehualme cati itztoque ihuaya nelia techtasojtaque quema tiitztoyaj ininechca. Amo quema techcualancamacaque, yon amo quema techichte-quillijque se neniijqui quema nopona tiquinmocuithuiyayaj toborregojhua. ¹⁶ Tonaya huan tayohua injuanti techyahualojtoyaj quej se tepamit huan techmanahuiyayaj ica toborregojhua. ¹⁷ Huajca nimantzi ximoilhui taya monequi tijchihuas pampa temacht hualas cati fiero ipan Nabal huan ipan nochi mochaj ehuan. Mohuehue nelia mosisinia huan amo aqui huelis quilhuis se tamanti.

Abigail quintamaca isoldados David

¹⁸ Huajca Abigail nimantzi quicuic 200 pantzi, huan ome cuetaxti cati temitoya ica xocomecat iayo, huan macuiliti borregojme cati quincualtalijtoya para quintzoyonise, huan 400 litros trigo cati tacacatztili, huan 100 tatecti ten xocomecat itajca cati huactoc, 200 tatecti ten higos cati huactoc. Huan nochi ya ni quinmamalti burrojme. ¹⁹ Huan quinhui itequipanojcahua:

—Xitayacanaca ica nopa tamanti huan na niyas amoica.

Pero Abigail amo teno quilhui ihuehue. ²⁰ Huan Abigail tejoc ipan se burro huan yajqui. Huan quema ixtejcoyaya ipan se taixtejcolis ixtacatzti campa cuatita, quinamijqui David ihuaya nochi isoldados hualtemoyayaj.

²¹ Huan David moilhuiyaya: “San tapic nijmanahuijtoc nochi cati Nabal quipiyayaya ipan huactoc tali, huan amo aqui nijcahuili ma quicuili teno, pampa ama techtaxtahuijtoc ica cati fiero nochi cati cuali nijchihuilijtoc.

²² Ma Toteco Dios techtatzacuiliti sinta para mosta amo niquintamimictijtos nochi tacame cati ihuaya nemij huan nochi cati iaxca.”

²³ Huan quema Abigail quitac David, nimantzi temoc ipan iburro huan mohuijtzonqui hasta talchi. ²⁴ Huan motancuaquetzqui iicxita David huan quilhui:

—Tate, nopa tajtacoli ma huetzi ipan na ica nochi cati panotoc. Pero nimitztajtania xijtacaquili se talojtzi cati nimitzilhuis. ²⁵ Amo xijchihui cuenta Nabal pampa ya nelia se tacat cati mosisinia. Itoca Nabal quinequi quijjtos ‘huihuitic’ huan ya nelia huihuitic. Huan na nimotequipanojca, amo niquinitac nopa tacame cati tiquintitanqui. ²⁶ Huan ama, noteco, TOTECO mitzmanahuijtoc pampa amo quinejqui tihualas huan titemictis huan timomacuepas. Na nochi mocualancaitacahua huan nochi injuanti cati quinequij mitzchihuilise cati fiero ma elica tatechihualme quej Nabal.

²⁷ San ama xijseli nochi ni tamanti cati nimitzhualiquilijtoc para ta huan nochi nopa tacame cati itztoque mohuaya. ²⁸ Huan nimitztajtania techtapoplohui notaixpanol para nihualas quej ni nimitzitaqui. Melahuac TOTECO quichihuas para ta huan moconehua quipiyase tequiticayot. Yaya TOTECO quichihuas para motanahuatilis elis temacht pampa ta, noteco, titatehuia por TOTECO. Huan amo teno cati amo cuali tijchijtoc hasta ama ipan nochi monemilis. ²⁹ Huan masque se acayja quinequis mitzmictis, TOTECO moDios mitzmanahuis ica ichichualis. Huan TOTECO quinnmictis nochi mocualancaitacahua huan quimajcahuas ininemilis quej quema se acayja quimajcahua tet ica se tatehuitatzi. ³⁰ Huan quema TOTECO quichihuas nochi cati cuali cati moca mocajtoc huan mitzchihuas tiintanahuatijca israelitame, ³¹ amo tipinahuas ica se tamanti cati tijchijtoc ama, yon amo timocuesos para tiquelnamictos para tijmicti cati amo mitzthuiyaya. Nojquiya, noteco, quema TOTECO mitzhueyichihuas, techelnamiqui.

³² Huajca David quilhui Abigail:

—Tascamati TOTECO Dios ten tiisraelitame pampa yaya mitztitanqui para technamiquiqui. ³³ Ma TOTECO mitztiochihua pampa nelía titalnamiqui. Huan techtzacuiliq para ma amo nijchihuati cati fiero huan para amo nitemicti. ³⁴ Nijtestigojquetzqui TOTECO cati itztoc, yaya cati toDios tiisraelitame para ama nijmictijtosquía Nabal huan nochi itequipanojcahua. Pero TOTECO techmanahujtoc pampa mitztitanqui technamiquiqui. Tascamati miyac.

³⁵ Huan David quiseli nochi nopa tamanti cati Abigail quihualiquilijtoya, huan quihlui:

—Huelis titacuepilis mochaj huan amo timajmahuis pampa amo nijmictis mohuehue. Nijtapojpolhuijtoc quej techtajtanijtoc.

³⁶ Huan Abigail mocuetqui ichaj, huan quema ajsito, Nabal quichihuayaya se hueyi tacualisti ipan ichaj quej elisquía se tanahuatijquet. Huan nelía yolpactoya Nabal huan cuali ihuintitoya. Huan yeca Abigail amo teno quihlui ipan nopa tonali. ³⁷ Huan tonili quema ayecmo ihuintiyaya, isihua quihlui ihuehue quenecatza hualayaya David huan nopa tacame para quimictise huan taya quichijqui para ma moyoltali. Huan Nabal quimaquili se ajaca cocolisti huan ayecmo mojmolinij. Elqui quej tet. ³⁸ Huan quej nopa mocajqui para majtacti tonali, huan teipa TOTECO quichijqui ma miqui.

³⁹ Huan quema David quimatqui para Nabal ya mictoya, quijto:

—Nijtascamati TOTECO pampa ya quitaxtahui Nabal por cati techchihuili. Huan TOTECO techmanahuj para na amo nijchihuas cati fiero. TOTECO quichijqui para nopa fiero tamanti cati Nabal techchihuili ma huetzi ipan ya.

Teipa David quintitanqui tacame ma quijtanitij Abigail para quichihuas isihua. ⁴⁰ Huan quema nopa itequipanojcahua David ajsitoj ichaj Abigail ipan altepet Carmel, quihluique:

—David techhualtitanqui para ma timitzcuiqui para tielis tiisihua.

⁴¹ Huajca Abigail, mohuijzonqui hasta talchi ica miyac tatepanitacayot huan quijto:

—Na niitztoc para nijchihuas nochi cati David technahuatis hasta niquinicxipajpacas itequipanojcahua sinta quej nopa technahuatis.

⁴² Huajca nimantzi mocualtali, huan tejcoc ipan se burro, huan nojquiya quinhuicac macuilti ichpocame cati quitequipanohuayayaj. Huan yajqui inihuaya nopa tacame cati David quintitantoya. Huan David quichijqui isihua.

⁴³ Huan nojquiya David quicuitoya Ahinoam ten altepet Jezreel para elis isihua. Huajca nochi ome elque isihuajhua. ⁴⁴ Pero Saúl quiquixtilijtoya iichpoca, Mical, cati eliyaya isihua David, huan ya quimactilijtoya seyoc tacat cati itoca Palti cati eliyaya icone Lais ten altepet Galim.

26

David sempa quitapojpolhui Saúl huan amo quimicti

¹ Huan nopa altepet Zif ehuani sempa yajque altepet Gabaa quuitatoj Saúl huan quihluitoj: “David motatijtoc ipan nopa tachiquili Haquila cati mocahua nechca huactoc tali.”

² Huajca Saúl nimantzi quisqui inihuaya 3 mil soldados cati más tapejpenilme ten nochi israelita soldados huan yajque para quitemotij David ipan huactoc tali Zif. ³ Huan Saúl mochijqui ipan nopa tachiquili Haquila nechca nopa ojti cati eltoya iteno nopa huactoc tali ica campa quisa tonati. Huan David itztoya nopona ipan huactoc tali, huan quicajqui para Saúl

quitemojtihualayaya. ⁴ Huajca quintitanqui tacame para ma quitatij hasta campa mocajtoya Saúl. ⁵ Huan teipa David yajqui campa mocahuayaya huan quipanti Saúl ihuaya Abner, icone Ner, yaya cati eliyaya itayacanca cati quinahuatiyaya nochi isoldados. Huan David quiitac para Saúl cuali cochtoya huan isoldados yahualtic cochtoyaj.

⁶ Huajca David quinotzqui Ahimelec nopa heteo tacat, huan quinotzqui Abisai cati eliyaya icone Sarvia huan iicni Joab; huan quinihui:

—¿Ajquiya quinequi yas nohuaya para ticalaquise campa itztoc Saúl?

Huan Abisai quijito:

—Na niyas mohuaya.

⁷ Huajca David huan Abisai nimantzi calajque campa itztoyaj isoldados Saúl, huan quipantitoj Saúl cuali cochtoya huan icuachoso quitoctoya talchi nechca itzonteco. Huan Abner huan nochi isoldados nojquiya cuali cochtoyaj, huan yahualtic quipixtoyaj Saúl. ⁸ Huajca Abisai quihui David:

—Toteco Dios mitzmactilijtoc mocualancaitaca momaco. Se favor, techahuili na ma nijmicti ama. San se huelta nijsentapalhuilis ica ne cuachoso huan mocahuas tatzquitoc talchi. Huan amo monequis ompa nijchihuas.

⁹ Pero David quihui:

—Amo, amo xijmicti, pampa amo aqui hueli quimictis ni tanahuatijquet cati TOTECO quitapejpenijtoc, huan amo quihuicas tajtacoli iixpa TOTECO.

¹⁰ TOTECO yaya temacht, huan se tonali quichihuas para miquis ipan tatehuilisti o pampa san ajsis ihora. ¹¹ Pero ma TOTECO techmanahu para amo quema nijmictis ni itanahuatijca cati quitapejpenijtoc. Pero ma tijcuilica icuachoso huan iteco ica at cati eltoc nechca itzonteco huan tijhuicase.

¹² Huajca David quihuicac icuachoso Saúl huan nopa tecomit cati eltoya itzonta huan yajqui. Huan amo aqui quiitac, yon quicajqui. Amo aqui isac pampa nochi cochtoyaj. TOTECO quichijtoya para nochi san ma quintzonpechi cochisti.

¹³ Teipa David quipanoc huan tejoc itzompac seyoc tepet, huan Saúl mocajqui huejca ipan seyoc tepet.

¹⁴ Huan nozona David quihualtaztjzili Abner huan nochi nopa soldados:

—Abner, xiisa, technanquili.

Huajca Abner quinanquili huan quihui:

—¿Ajquiya ta cati titzajtzi huan tiquixitia nopa tanahuatijquet?

¹⁵ Huan David quihui:

—¿Amo ta titacat? Quiijtohuaj amo aqui mitzaxilia ipan nochi tali Israel. Huajca ¿para ten amo tijmocuitahuia cuali moteco, yaya cati tanahuatijquet? Se hualajqui para quimictis. ¹⁶ Nelía fiero ni tamanti cati tijchijtoc. Nelía melahuac quinamiqui timiquis huan quinamiqui ma miquica mosoldados pampa amo anquimocuitahuijtoque cuali amotanahuatijca cati TOTECO quitapejpenijtoc. Xijtemo ama icuachoso nopa tanahuatijquet huan nopa cati ipan quihuica at cati eltoya nechca itzonteco. Xiquita sinta tijpantis.

¹⁷ Huan quema Saúl quitoscamachili para eliyaya David cati camanaltiyaya, quijito:

—¿Amo ta motoscac cati nijcaqui, tinocone David?

Huan David quinanquili:

—Quena, noteco huan notanahuatijca, na cati nicamanalti.

¹⁸ Huan David nojquiya quihui:

—¿Para ten techtoquilía, na nimotequipanojca? ¿Taya nijchijtoc? Techihui notajtacol. ¹⁹ Nimitztajtania titanahuatijquet xijtacaquili cati nimitzilhuia.

Sinta TOTECO mitzchijtoc techcualancaita, huajca nijmacas se tacajcualisti para nimoyoltalis ihuaya. Pero sinta se tacat mitzchijtoc techcualancaita, huajca ma TOTECO mitztelchihua. Pampa amojuanti antechquixtijtoque ipan notal para ayecmo huei niitztos ica imasehualhua TOTECO. Antechmajcajtoque nica. Eltoc quej antechilhuijtosquíaj: ‘Xiya xiquintequipanoti sequinoc dioses.’ ²⁰ Amo cuali para techchihualtis ma nimi qui ipan seyoc tali. Amo nijnequi nijcahuas noeso huejca ten itiopa TOTECO. Nelía se huihuiyot para ta cati titanahuatijquet ipan tali Israel tihualajtoc techtemohua na hasta nica. Na san niitztoc quej se tecpimit. Amo aqui yasquí ipan tepeme para quitepotztocas san setzi xacoyoiti.

²¹ Huajca Saúl quiijto:

—David, tinocone, nelía nitajtacolchijtoc. Nimochijtoc nihuihuitic. Nelía nitaixpanotoc, pero ya ximocuepa. Amo teno cati fiero nimitzchihuilis pampa ta nelía tijnextijtoc para techtepanita.

²² Pero David quimachili para amo neli huan quiilhui:

—Nica eltoc icuachoso ne tanahuatijquet. Ma huala se acajya para quihuiquilis. ²³ Huan ma TOTECO quitaxtahui cati quichihua cati cuali. Masque TOTECO mitztemactili ama nomaco, amo nijnejqui nimomatananas para nimitzmictis pampa TOTECO mitztapejpenijtoc. ²⁴ Huan quej ama nijmanahujtoc monemilis ama ma TOTECO techmanahui ica nochi cati fiero para amo nimi quis.

²⁵ Huan Saúl quiijto:

—Ma TOTECO mitztióchihua, tinocone David. Ta tijchihuas huejhueyi tamanti huan titatanis ipan nochi tamanti cati tijchihuas.

Huajca Saúl mocuetqui ichaj, huan David nojquiya yajqui sejcayoc.

27

David ipan inintal filisteos

¹ Huan David moilhuyaya: “Se tonali techpantis Saúl huan techmictis. Más cuali niquisas ipan ni tali huan niyas ipan inintal filisteos. Quej nopa Saúl ayecmo techtemos quema quimatis ayecmo niitztoc ipan tali Israel. Huan quej nopa nimomanahuis imaco.” ² Huajca David huan nopa 600 tacame cati itztoyaj ihuaya, yajque altepet Gat para itztose inechca Tanahuatijquet Aquis cati eliyaya icone Maoc. ³ Huan nochi isoldados David itztoyaj nozona ihuaya inifamilias, huan David itztoya ihuaya ome isihuajhua. Se itoca eliyaya Ahinoam ten altepet Jezreel huan nopa seyoc itoca eliyaya Abigail cati eliyaya isihua Nabal ten altepet Carmel. Huan nochi inijuanti mocajque ipan altepet Gat campa tanahuatiyaya Aquis. ⁴ Huan Saúl quimatqui para David ya quistoya ipan tali Israel huan itztoya ipan altepet Gat huajca ayecmo quitemo.

⁵ Huan nozona David quiilhui Aquis:

—Sinta techcualitztoc, huajca nimitztajtania techmaca se altepet para ipan tiitztose pampa amo quinamiqui para na cati san nimotequipanojca niitztos ipan ni hueyi altepet campa eltoc mocaltanahuatil.

⁶ Huajca Aquis quimacac David altepet Siclag huan yeca nopa altepet teipa mocajqui iniaxca nopa tanahuatiani ten tali Judá.

⁷ Huan David itztoya ipan inintal nopa filisteos para se xihuit huan nahui metzti.

⁸ Huan David huan nochi nopa tacame cati itztoyaj ihuaya tejcoque hasta inintal nopa gesuritame, gezritame huan amalecitame, huan quintehuijque. Nopa tacame mocajtoyaj ipan nopa tali cati yahui ten Shur hasta tali Egipto.

⁹ Huan quema David quintehuiyaya ipan se lugar, amo quicahuayaya yoltoc yon se facat huan yon se sihuat. Nojquiya moaxcati nochi ininborregojhua, inihuacaxhua, ininburrojhua, inincamellos huan iniyoyo. Huan teipa sempa tacuepiliyaya campa itztoya Tanahuatijquet Aquis. ¹⁰ Huan quema Tanahuatijquet Aquis quitatzintozquiliyaya: “¿Ipan catijqui altepet ticalajqui ama para tiquintachtequilis?”

Huajca David amo quiiilhuiyaya xitahuac, san quinanquiliyaya: “Nicalajqui ica tatzinta ipan tali Judá, o ica tatzinta ten Jerameel, o ica tatzinta ten inintal nopa ceneos.”

¹¹ Huan David amo quicahuayaya yoltoc yon se tacat huan yon se sihuat, huan quej nopa amo aqui hueliyaya yahui ipan altepet Gat para quiiilhuiti nopa tanahuatijquet ten taya quichihuayaya. Huan quej ni quichijqui David nochipa quema itztoya ipan inintal filisteos. ¹² Huan Tanahuatijquet Aquis quineltocayaya nochi cati David quiiilhuiyaya huan moilhuiyaya: “Cuali para calaqui David campa israelitame, pampa ama nochi injuanti quicualancaitase. Huan quej nopa David elis notequipanojca para nochipa.”

28

David inihuaya inincualancaitacahua israelitame

¹ Huan se tonali nopa filisteos quinsentilijque nochi inisoldados para yase quintehuitij israelitame, huan tanahuatijquet Aquis quiiilhui David:

—Ta huan nochi momasehualhua xihualaca techpalehuiquij ipan se tatehuilisti.

² Huan David quinanquili:

—Cualtitoc. Ama tiqúitas para quena nihueli nimitzpalehuis.

Huan Aquis quiiilhui:

—Sinta nelía miyac techpalehuis, huajca na nimitzchihuas notamocuitahujca para nochi nonemilis.

Saúl yajqui campa se tenahualhuijquet

³ Ipan ni tonali quema David itztoya ipan seyoc tali, mijqui Samuel huan nochi israelitame quichoquillijque. Huan quitalpachojque ipan Ramá cati eliyaya ialtepe. Huan Saúl ya quinquixtijtoya nochi nopa tenahualhuiani huan cati quincamanalhuiyaya mijcatziti.

⁴ Huan nopa filisteos mosentilijque ipan se lugar cati itoca eliyaya Sunem, huan Saúl quinsentili nochi israelitame huan mochijque ipan tepet Gilboa.

⁵ Huan quema Saúl quinitac para itztoyaj tahuel miyac filisteo soldados, nelía moyolmajmati. ⁶ Huajca motatajti ica TOTECO para tatzintocas taya quichihuas. Pero TOTECO amo quinanquili. Amo quinextili taya eliyaya ipaquilis ipan temicti, yon ica nopa tatzejtzeltitjca dados cati TOTECO quinmacatoya cati itoca Urim. Yon amo quinextili ipaquilis ica se itajtolpanextijca.

⁷ Huajca Saúl quinilhui itequipanojcahua:

—Techtemohuilica se sihuat cati hueli quincamanalhuía mijcatziti, huan niyas niquitati.

Huan itequipanojcahua quiiilhuijque:

—Ipan altepet Endor itztoc se sihuat cati quiijtohua hueli quinojnotza mijcatziti.

⁸ Huajca Saúl moquixtili iyoyo cati cuali huan moyoyonti quej se cati hueli huan quinhuicac ome tacame huan yajque ica tayohua quiiitotoj nopa sihuat, huan quiiilhui:

—Nijnequi nicamanaltis ihuaya se cati ya mictoc. ¿Huelis tijnotzas itonal nopa mijcatzi cati nimitzilhuis?

⁹ Huan nopa sihuat quiilhui:

—Tijmati cuali para Tanahuatijquet Saúl tanahuati ma quinquixtica nochi tenahualhuiani huan cati mocamanalhuáj inihuaya mijcatziti. San huelis tijnequi techmasiltis huan titeyolmelahuas para ma techmictica nojquiya.

¹⁰ Huajca Saúl quiilhui iixpa TOTECO para amo teno fiero ipantis pampa amo aquí quiilhuisquía.

¹¹ Huajca nopa sihuat quiilhui:

—¿Ajquiya nopa mijcatzi cati tijnequi ma nijnojnotza?

Huan Saúl quiilhui:

—Xijnotza Samuel.

¹² Huan nimantzi ipan nopa talojtzi nopa sihuat quiitac Samuel, huan quitzajtzi chichahuac Saúl huan quiilhui:

—¿Para ten techcayajtoc? ¡Ta tiSaúl!

¹³ Huan nopa tanahuatijquet quiilhui:

—Amo ximomajmati. San techilhui taya tiquitztoc.

Huan nopa sihuat quiilhui:

—Niquitztoc se tacat quej se mixti cati hualtejco.

¹⁴ Huan Saúl quiilhui:

—¿Quenicatza itachiyalis?

Huan quinanquili:

—Se tacat huehuentzi huala cati mopictoc ica iyoyo huehueyac.

Huajca Saúl quimachili para eliyaya Samuel huan mohuijtonqui hasta talchi para quinexilis se hueyi tatepanitacayot.

¹⁵ Huan Samuel quiilhui:

—¿Para ten techcualancamacatoc huan tijchijtoc ma nihuala?

Huan Saúl quinanquili:

—Na tahuel nitaiyohuía huan nopa filisteos techtehuáj. Huan Toteco Dios techtahuelcajtoc huan amo technanquilía, yon ipan temicti huan yon ica itajtolpanextijcahua huan yeca nimitznotztoc pampa nijnequi techilhui taya nijchihuas.

¹⁶ Huajca Samuel quinanquili:

—¿Para ten techtatziintoquilía na sinta TOTECO mitztahuelcajtoc huan mochijtoc mocualancaitaca? ¹⁷ TOTECO ya quichijtoc mohuaya quej ya mitzilhuijtoya achtohui ica na para quichihuas. Ya mitzcuilijtoc motanahuatilis huan ya quimacatoc David cati itztoya monecha. ¹⁸ Pampa ta amo tijtepanitztoc itanahuatilhua TOTECO. Amo tiquinmicti nopa amalecitame quej yaya mitznahuati xijchihua. Huan yeca ama TOTECO mitzchihuilia ni tamanti. ¹⁹ Ama TOTECO mitztemactilis ta huan nochi israelitame inimaco nopa filisteos. Huan mosta timiquis huan tiitztos nica nohuaya huan moconehua nojquiya. Huan nochi israelitame quintemactilis TOTECO inimaco nopa filisteos.

²⁰ Huan ipan nopa talojtzi Saúl huetzqui ixtapachijtoc, pampa nelpano momajmati por cati quiilhui Samuel. Huan ayecmo quipixqui fuerza pampa amo teno quicuajtoya se tonal huan se yohuali. ²¹ Huan nopa sihuat quiitac para Saúl nelía tahuel momajmatijtoya, huan quinechcahuito huan quiilhui:

—Nimitztacaquilijtoc huan nijchijtoc cati techtajtani masque huelosquía nimictosquía. ²² Ama nijnequi para ta nojquiya xijtacaquili cati nimitzilhuís. Techcahuili ma nimitzcualtalilis se tacualisti para tijcuas para tijpiyas fuerza huan huelis tiajsiti campá tiyas.

²³ Pero Saúl amo quinejqui huan quiilhui:

—Amo nitacuas.

Pero itequipanojcahua huan nopa sihuat quilhuijque miyac huelta para ma tacua. Huan teipa quintacaquili huan moquetzqui campa huetztoya talchi huan mosehui ipan se tapechti. ²⁴ Huan nopa sihuat quimicti se becerro cati quitomajtoya nozona ipan ichaj. Huan quixacualo iharina huan quichijqui pantzi cati amo quipixqui tasasaltili huan quicixiti. ²⁵ Huan quihualiquili Saúl huan itequipanojcahua huan nochi tacuajque. Huan quema tanque tacuaj monahuatijque huan yajque ipan nopa yohuali.

29

David momanahui huan amo yajqui para quintehuis israelitame

¹ Huan nochi nopa filisteo soldados mosentilijque ipan se lugar cati itoca Afec. Huan nopa israelitame mochijtoyaj nechca nopa ameli cati itoca Jezreel. ² Huan nopa filisteos moxelojtoyaj inisoldados ica tatilimit. Sequij tatilimit quipixqui 100 tacame huan sequij ica se mil huan tayacan-tiyahuyayaj. Huan David huan imasehualhua yahuyayaj iniica ihuaya Tanahuatijquet Aquis. ³ Huan nopa tayacanca filisteos quilhuijque Tanahuatijquet Aquis:

—¿Taya quichihuj nica ni tacame hebreos?

Huan Aquis quinanquili:

—Ya ni David cati eliyaya itequipanojca Tanahuatijquet Saúl cati tanahuati ipan tali Israel. Yaya quipiya se xihuit itzotc nohuaya huan amo quema nijpantilijtoc yon se itaixpanol.

⁴ Pero nopa tayacanani ten soldados cualanque ihuaya Tanahuatijquet Aquis huan quilhuijque:

—Xijnahuati ni tacat ma mocuepa ipan nopa altepet cati tijmacatoc. Ma amo yahui tohuaya ipan ni tatehuilisti pampa nozona moyolcuepas huan quinequis techtehuis tojuanti quema ya tiitztose ipan nopa tatehuilisti. Huan iteco Saúl quinequis quiselis sempa. Huan sinta techmictis huan quinextilis Saúl toztonteconhua, huajca ¿amo timoilhuía Saúl quiselisquía?

⁵ Yaya David cati quihuicatyayaj huan quijtohuayayaj:

‘Mil tacame quinmicti Saúl,
pero majtacti mil quinmicti David.’

⁶ Huajca Aquis quinotzqui David huan quilhui:

—Nimitzilhuía iixpa TOTECO para nelía tijchihua cati xitahuac huan se paquilisti para na para titatehuiti tohuaya. Ipan ne tonali quema tihualajqui techitaco huan hasta ama amo quema nimitzpantilijtoc yon se taixpanoli. Pero nopa filisteo tayacanani amo mitzcualitaj. ⁷ Huajca más cuali para titacuepillis. Xiya ica cuali para amo más tiquincualancomacas.

⁸ Huan David quinanquili Aquis huan quilhui:

—¿Taya nijchijtoc? ¿Taya tiquitztoc cati amo mitzpacría ipan nochi ni tonali quema niitztoc mohuaya para niquintehuiti nocualancaitacahua?

⁹ Huan Aquis quilhui David:

—Na cuali nijmati para nelía tiyolcuali quej se iilhuicac ejca Toteco Dios, pero nopa tayacanca filisteos ya motemacatoque para amo tiyas tohuaya ipan ni tatehuilisti. ¹⁰ Huajca xiquisaca mosta nel ijnaloc ta huan nochi mosoldados huan ximocuepaca.

¹¹ Huajca David huan nochi nopa tacame cati itztoyaj ihuaya quisque nel ijnaltzi huan tacuepillijque ipan inintal nopa filisteos. Huan nopa filisteos tejcotiyajque hasta altepet Jezreel.

30

David quintehui nopa amalecitame

¹ Huan hualhuicta ajsicoj David huan nochi nopa tacame cati itztoyaj ihuaya campa ininchajchaj ipan altepet Siclag. Huan quinpantijque para nopa amalecitame calactoyaj ica tatzinta ipan nopa altepet huan quitatijtoyaj. ² Huan quinhuicatoyaj nochi sihuame huan coneme huan nochi cati itztoyaj nopona. Pero amo quinmictijtoyaj, san quinhuicatoyaj.

³ Huan quema David huan nochi cati quinyacanayaya ajsicoj ipan nopa altepet huan quiitaque para nochi tatatoya, huan quinhuiquilijttoyaj nochi inisihuajhua huan ininconeuhua, ⁴ huajca pejque chocaj chichahuac. Huan mochoquilijqe hasta yolcuatiquie huan ayecmo huelque chocaj pampa ayecmo quipiyayayaj más fuerza. ⁵ Huan nojquiya quihuiquilijttoyaj David nochi ome isihuajhua: Ahinoam cati eliyaya jezreelita, huan Abigail cati eliyaya isihua Nabal ten Carmel. ⁶ Huan nochi nopa tacame cati itztoyaj ihuaya quijtohuayayaj para quimictise David ica tet pampa tahuel mocuesohuayaj por ininconeuhua. Huajca David tahuel mocuesohuayaya, pero David quitemo TOTECO Dios huan moyolchicajqui ipan ya.

⁷ Teipa David quilhui nopa totajtzi Abiatar cati eliyaya icone Ahimelec:

—Nimitztajtanía para techhualiquili nopa pantzajcayot ica nopa piltetzitzi para nijmatis taya ipaquilis TOTECO para ma nijchihua.

Huan Abiatar quihualiquili. ⁸ Huan David quitatzintoquili TOTECO:

—¿Tijnequi ma niquintoquili ni tachtequini? Huan sinta niquintoquilis, ¿huelis niquinajsiti?

Huan TOTECO quilhui:

—Quena, xiquintoquili pampa quena, tiquinajsiti huan tiquinmanahuis nochi cati quinhuicatoque.

⁹ Huajca quisqui David inihuaya nopa 600 tacame cati itztoyaj ihuaya huan ajsitoj campa atajti Besor. ¹⁰ Huan nopona mocajque 200 isoldados David pampa tahuel siyajtoyaj, huan amo huelque quiixcotonaj nopa atajti Besor. Huan David huan nopa 400 tacame yajque. ¹¹ Huan quipantijque se tacat ten tali Egipto cati huilantoc ipan ojti huan quihualiquilijqe David. Huan imasehualhua David quimacaque pantzi huan quicujajqui huan nojquiya quiamacaque. ¹² Nojquiya quimacaque se quentzi tatecti ten higos huactoc huan ome taxcali ten xocomecat huactoc. Huan quema tacujajqui sempa pejqui quipiya fuerza pampa amo teno quicujajtoya para eyi tonati. ¹³ Huan huajca David quilhui:

—¿Ajquiya ta, huan canque tihuala?

Huan nopa telpocat Egipto ejquet quinanquili:

—Na niehua tali Egipto huan niitequipanojca se amalecita. Huan quipiya eyi tonati nechajqui nica noteco, pampa nimococohuayaya. ¹⁴ Tojuanti tiyajtoyaj ticalaquitoj ica tatzinta ipan tali Judá campa inialtepe nopa cere-teos huan ica tatzinta ten ital Caleb. Huan nojquiya tijtatijque altepet Siclag.

¹⁵ Huajca David quilhui:

—¿Hueli techhuicas hasta campa injuanti itztoque?

Huan nopa tacat quinanquili:

—Sinta tijtestigojquetza Toteco Dios para amo techmictis yon amo techtemactilis ica noteco, huajca, quena, nimechhuicas hasta campa itztoque.

¹⁶ Huajca nopa tacat quinhucac David huan nopa tacame cati itzttoyaj ihuaya hasta campá itzttoyaj nopa tachtequini. Huan injuanti mosemantoyaj ipan nochi nopa tali. Huan tacuayayaj huan taiyayaj huan ilhuichi-huayayaj ica miyac paquilisti por nochi cati quiichtectoyaj ipan inintal filisteos huan ipan tali Judá. ¹⁷ Huan David huan nochi soldados pejqe quinmictíaj nopa yohuali, huan tonili se tonali quinmictijque, huan hasta tiotac quintamimictijque. San cholojqe 400 telpocame cati tejcoque ipan camellos huan yajque.

¹⁸ Huan quej nopa David quincuili sempa nochi cati nopa amalecitame quinichtequilitoyaj, huan nojquiya quinmanahui nochi óme isihuajhua. ¹⁹ Huan yon se conet amo quipolojqe. Amo quipolojqe yon se tamanti, yon hueyi, yon pisiltzi pampa nochi cati quincuilitoyaj, sempa moaxcatijque. ²⁰ Huan nojquiya David quincuili ininborregojhua huan inihuacaxhua nopa tachtequini. Huan soldados quinchijque ma tayacantiyaca nopa tapiyalme cati yaya ipa iniaxca. Huan nochi quijtojqe: “Nochi ya ni iaxca David pampa quitantoc.”

²¹ Huan teipa David huan nochi injuanti ajsitoj ipan nopa atajti Besor campá mocajtoyaj nopa 200 tacame cati ayecmo huelque nejnemij pampa tahuel siyajtoyaj. Huan quisque nochi injuanti huan quinamiquicoj David huan nochi nopa tacame cati hualayayaj ihuaya. Huan David quintajpalo ica cuali. ²² Pero sequij tacame cati amo cuajcualme cati hualayayaj ihuaya David quijtojqe: “Injuanti cati amo yajtoyaj tatehuitoj amo quiselise yon se teno. San tiquinmacase inisihuajhua huan inincone-hua huan ica ya nopa ma yaca.” ²³ Pero David quinilhui:

—Amo, noicnihua, amo hueli anquichihuase quej nopa ica cati TOTECO techmacatoc. Pampa TOTECO techmocuitahuijtoc huan techmanahuijtoc inimaco injuanti cati techtehuijqe. Techmactilijtoc nochi nopa masehualme cati techtachtequilitoyaj. ²⁴ Huan amo aquí amechtacaquilis cati anquijtohuaj. Monequi nopa tacame cati mocajque nica huan quimocuitahuijqe totamantzitzi quiselise san se ininparte quej cati yajque ipan tatehuilisti.

²⁵ Huan huajca ipan nopa tonali David quichijqui ya nopa ma eli se tanahuatili para nochi israelitame ma quitepanitaca. Huan hasta ama noja quitepanitaj.

²⁶ Huan quema David ajsico ipan altepet Siclag cati tatatoc, quinhualtitanili nopa huehue tacame ipan tali Judá se quentzi ten nochi tamanti cati quincuilitoyaj inincualancaitacahua huan quinilhui ni camanali: “Nica nimechtitanilia se nemacti; san se quentzi ten tiquincuilijqe icualancaitacahua TOTECO.” ²⁷ Huan nojquiya quintitanili nopa tayacanani cati itzttoyaj ipan altepeme Betel, Jatir, ²⁸ Aroer, Sifmot, Estemoa, ²⁹ Racal, huan Ramot cati mocahua ica tatzinta. Nojquiya quintitanili nopa huehue tacame cati itzttoyaj ipan Jerameel inialtepe nopa ceneos, ³⁰ huan ipan altepeme Horma, Corasán, Atac, ³¹ Hebrón huan campá hueli campá David panotoya ica nochi imasehualhua.

31

*Mijqui Saúl ipan tatehuilisti huan iconehua nojquiya
(1 Cr. 10:1-12)*

¹ Huan nopa filisteos nelía quintanque nopa israelitame, huan nopa israelita soldados cholojtejqe iniixpa. Huan nopa filisteos quinmictijque miyac israelitame ipan tepet Gilboa. ² Teipa nopa filisteos quitoquilijqe Saúl huan itelpocahua. Huan quimictijque Jonatán, Abinadab huan Malquisúa. Nochi injuanti eliyayaj itelpocahua Saúl. ³ Huan teipa nochi nopa filisteo soldados pejqe chichahuac quitehuíaj Saúl huan quitepehuiliyayaj nopa cuataminti hasta se quiajsic Saúl huan taniel quicoco.

⁴ Huajca quiilhui itamocuitahuijca cati quihuiquiliyaya itepostzajca:

—Xijquixti momacheta huan techmicti para amo hualase nopa fiero tacame filisteos, huan techchihuilijque cati injuanti quinequise para más ma nitaijyohui huan san techhuihuilitase quema techmictise.

Pero itamocuitahuijca amo quinejqe quimictis pampa majmahuiyaya. Huajca teipa Saúl quiquixti imacheta huan momajcajqe ipani huan momicti. ⁵ Huan quema itamocuitahuijca quiitac para Saúl momictijtoya, ya nojquiya momajcajqe ipan imacheta huan nozona mijqui ihuaya Saúl.

⁶ Huan quej nopa, san ipan se tonal mijqui Saúl inihuaya eyi itelpocahua huan itamocuitahuijca huan nochi israelita soldados cati ihuaya itztoyaj.

⁷ Huan nopa israelitame cati quipixtoyaj ininchaj ipan seyoc lado ten nopa tamayamit nechca hueyat Jordán quimatque para nopa israelitame cholo-huayayaj huan quimatque para Saúl ya mictoya, huajca nojquiya quisque ipan inialtepe huan cholojqe. Huan huajca nopa filisteos hualajque para itztose ipan inialtepehua.

⁸ Huan tonili quema nopa filisteo soldados yajque ipan tepet Gilboa para quintacuijcuilitij cati mictoyaj, quiitatoj para Saúl huan eyi itelpocahua mictoyaj. ⁹ Huajca quiquechtzontejque Saúl huan quicuilijqe nochi itepos. Teipa quintanque tacame ma yaca huan ma quihuicaca nopa tamanti ipan nochi inintal filisteos huan ma teyolmelahuaca ipan nochi inialtepehua para ya mictoya Saúl. Nojquiya tayolmelahuatoj nopa cuali camanali ipan inintiopa campa quincaytoyaj inindioses. ¹⁰ Pero teipa nochi itepos Saúl quiajojque ipan itiopa nopa taixcopincayot Astarot. Huan itacayo Saúl quicuapilojqe ipan nopa tepamit cati quiyahualojtoya altepet Bet Sán.

¹¹ Huan quema nopa tacame ten altepet Jabes ipan Galaad quimatque cati nopa filisteos quichihuilijtoyaj Saúl, ¹² mosentilijque nochi cati mooquich-matuyayaj huan nejnenque seyohual huan ajsitoj campa quicuapilojtoyaj itacayo Saúl huan itelpocahua ipan itepa altepet Bet Sán. Huan quinte-mohuijqe huan quinhuicacque inialtepe, Jabes, huan nozona quintatijque.

¹³ Huan teipa quisentilijque iniomiyohua huan quintalpachojque itzinta se cuahuit ipan Jabes. Huan mosajque para chicome tonati pampa taniel mocuesohuayayaj.

2 Samuel

David quicajqui para mijqui Saúl

¹ Quema ya mictoya Saúl, David mocuetqui ipan ialtepe Siclag pampa ya tantoya quintzontamiltía nopa amalecitame huan nopona mocajqui ome tonati. ² Huan ipan ne seyoc tonali, ajsico se tacat cati quisqui ten campa isoldados Saúl. Yaya quihualicayaya iyoyo tzayantoc huan motalilijtoya taltepecti ipan itzonteco pampa quipiyayaya hueyi tequipacholi. Huan quema ajsico campa David mohuijzonqui ica miyac tatepanitacayot. ³ Huajca David quitatzintoquili nopa tacat:

—¿Canque tihuala?

—Na nicholajtejqui campa toisraelita masehualhua tatehuíaj—tananquili nopa tacat.

⁴ Huan David quihui:

—Techilhui taya panotoc ipan nopa tatehuilisti.

Huan nopa tacat quinanquili:

—Miyac toisraelita soldados mictoque huan miyac cholojtejtoque. Huan nojquiya mijqui Saúl huan icone, Jonatán.

⁵ Huan David quitatzintoquili:

—Huan ¿quenicatza tijmatqui para mijqui Saúl huan icone?

⁶ Huajca quinanquili:

—Na niitztoya ipan tepet Gilboa huan nopona niquitac para Saúl motatzquilijtoya ipan icuahoso. Huan monechahuiyayaj icualancaitacahua ipan tatehuicaj carros. Nojquiya hualayayaj miyaqui tacame ipan cahuayojme. ⁷ Huan ipan nopa talojtzi Saúl techitac huan technotzqui. Huajca nimonechahui campa itztoya. ⁸ Huan yaya techtatzintoquili ajquiya na huan niquilhui para nieliyaya se niamalecita tacat. ⁹ Huajca techilhui: ‘Xihuala huan techmicti pampa tahuel nitaijyohúa, huan noja niyoltoc.’ ¹⁰ Huajca nimonechahui huan nijmicti pampa niquitac para ayecmo huelis itztos pampa tahuel cocojtoya. Huan nijcuili icorona cati quipixtoya ipan itzonteco huan nopa costí cati quipixtoya ipan imax huan nimitzhualiquilía ta.

¹¹ Huan quema quicajqui nochi cati quijto, David huan nopa tacame cati itztoyaj ihuaya quitzayanque iniyoyo pampa tahuel mocuesojque. ¹² Huan pejqe quichoquillaj Saúl huan itelpoca Jonatán, huan nopa isoldados TOTECO huan nochi sequinoc israelitame, pampa tahuel miyac tacame mictoyaj ipan tatehuilisti ipan nopa tonali. Huan mosajqui David huan itequipanojcahua, huan amo teno quicujque hasta tayohua. ¹³ Huan David quilhui nopa tacat:

—¿Canque tiehua?

Huan quinanquili:

—Na niseyoc tali ejquet, niamalecita.

¹⁴ Huan David quilhui:

—Huajca ¿para ten amo timajmajqui timomatananqui huan tijmicti Saúl cati TOTECO quitapejpenijtoya huan quitequitalijtoya?

¹⁵⁻¹⁶ Huajca David nimantzi quinotzqui se soldado huan quilhui:

—Xijmicti ni tacat.

Huan David quilhui nopa tacat:

—Timiquis pampa ta ica moseli tiqijto para tijmicti Saúl, nopa tacat cati TOTECO quitapejpenijtoya para elis tanahuatijquet.

Huan isoldado hualajqui huan quimicti ica icuachoso.

David quinchoquili Saúl huan Jonatán

¹⁷ Huan David quisencajqui se huicat huan huicac ten Saúl huan icone, Jonatán, cati mictoyaj. ¹⁸ Huan tanahuati ma quinmachtica nopa soldados cati ehuan ipan tali Judá. Huan ni huicat nojquiya mopantía ijcuilijtoc ipan nopa ama tajcuiloli cati itoca Jaser. Huan quej ni quijtohua:

¹⁹ “Noisraelita icnihua, nopa tacat cati más yejyectzi tijpixque, mictoc.

Yaya cati achi más techmacayaya paquilisti quimictijtoque nepa huejcapa campa tepeme.

Quena, yaya cati más tetic huetztoc.

²⁰ Amo xiquinilhuica tocualancaitacahua cati itztoque ipan altepet Gat.

Yon amo xiquinpohuica cati itztoque ipan tianquis ipan altepet Ascalón, para amo techhuetzquilise nopa filisteo sihuame.

Amo tijnequij ma techpinajtica nopa sihuame cati amo quinelto caj TOTECO.

²¹ Saúl mijqui ipan tepet Gilboa.

Huajca amo quema ma taquiyahui nopona.

Yon amo quema ma onca ajhuechti.

Ma ayecmo taelilti pampa nopona mijqui cati motemacac.

Nopona mijqui Saúl quej se ten hueli tacat,

quej elisquía amo ya cati quitapejpeni Toteco.

²² Saúl huan Jonatán nochipa tataniyayaj ipan tatehuilisti.

Inijuantí quinmictiyayaj inincualancaitacahua,

masque tahuel motemacayayaj.

Amo quema mocuetque ipan se tatehuilisti san ica inimax,

pampa nochipa tataniyayaj.

²³ Nochi tojuanti tiquinicneliyayaj huan tahuel tiquinnequiyayaj.

Nelía se paquilisti para tiquinixmatque.

San sejco nemiyayaj quema itztoyaj huan nojquiya san sejco mocajque ipan miquilisti.

Achi más chichahuac huelque motalojque que ne hueyi cuatojti cati hueli patani.

Elque más tetique injuantí que se león.

²⁴ Anisraelita sihuame, xijchoquilica Saúl cati yejyectzi amechyoyontiyaya ica yoyomit cati morado quej motaliláj sihua tanahuatiani.

Quena, Saúl quieyjecchijqui amoyoyo ica oro,

huajca xijchoquilica.

²⁵ Yaya cati motemacac ya mictoc ipan tatehuilisti.

Mijqui Jonatán ipan ne tepet Gilboa.

²⁶ Nimitzchoquilía noicni, Jonatán,

pampa tahuel nimitzicneli.

Huan techicneli miyac nojquiya hasta motaicnelil quitani inintaicnelil sihuame.

²⁷ Mictoque cati más motemacayayaj.

Ayecmo quinemiltíaj inintepos pampa ya mictoque.”

Quej nopa elqui nopa huicat cati David quisencajqui para quichoquilis Saúl huan Jonatán.

2

Quichijque David tanahuatijquet ipan tali Judá

¹ Huan teipa David quitatzintoquili TOTECO:

—¿Tijnequi ma niya para niitztos ipan se altepet ipan tali Judá?

Huan TOTECO quinanquili:

—Quena.

Huajca David quiilhui:

—¿Ipan taya altepet niyas?

Huan TOTECO quiilhui:

—Xiya altepet Hebrón.

² Huajca David yajqui huan quinhuicac nopa ome isihuajhua. Se itoca Ahi-noam cati eliyaya se jezreelita sihuat huan nese itoca Abigail cati achtohui eliyaya isihua Nabal ipan altepet Carmel. ³ Huan nojquiya quinhuicac nopa tacame cati nejnentoyaj ihuaya, sese ica isihua huan iconehua. Huan nochi yajque para itzose ipan altepet Hebrón.

⁴ Huan teipa hualajque nopa tayacanca tacame ten tali Judá. Huan quialtijque David ica aceite huan quichijque tanahuatijquet ipan inintal.

Huan teipa quiilhuique David quenicatza nopa masehualme ipan altepet Jabes ipan tali Galaad quitasojtaque Saúl itacayo huan quitalpachotoj.

⁵ Huajca David quintitanqui tacame ma yaca quinilhuitij ni camanali: “Ma TOTECO amechtiochihua miyac pampa anquitasojtaque nopa mijcatzi Saúl huan ica miyac amotaicnelijcayo anquitalpachojque. ⁶ Huajca ama ma TOTECO amechtasojta. Ma amechita ica cuali huan ma amechnextili cati xitahuac. Huan na nojquiya nimechchiuilis cati cuali por cati anquichijtoque. ⁷ Huajca ama masque ya mictoc Saúl, amotanahuatijca, ximoyolchicahuaca, huan ximosemacaca huan ximotalica tohuaya pampa nopa tayacanani ipan tali Judá techchijtoque niinintanahuatijca.”

Is Boset quichijque tanahuatijquet ipan tali Israel

⁸ Teipa Abner, icone Ner, cati quinyacanayaya isoldados Saúl quihuicac Is Boset, icone Saúl, ipan altepet Mahanaim, ⁹ huan nozona quichijqui tanahuatijquet. Huan itanahuatilis quiajsic tali Galaad, Gesuri, Jezreel, Efraín, Benjamín huan hasta nochi cati itoca tali Israel ica huejcapa. ¹⁰ Huan Is Boset quiptiyayaya 40 xihuit quemá pejqui tanahuatía ipan tali Israel ica huejcapa huan san huejcajqui ome xihuit. Huan nochi cati itztoyaj ica tatzinta campa itoca tali Judá quitoquilique Tanahuatijquet David. ¹¹ Huan David elqui tanahuatijquet ipan tali Judá para chicome xihuit huan tajco huan quipixqui ichaj ipan altepet Hebrón.

¹² Huan teipa Abner quisqui ipan tali Mahanaim inihuaya isoldados Tanahuatijquet Is Boset huan yajque altepet Gabaón ipan tali Judá campa itztoyaj iixhuihua Benjamín, pampa nojquiya quinequiyaya mocuilis nopa tali Judá para elis iaxca Tanahuatijquet Is Boset. ¹³ Huajca quisqui Joab, icone Sarvia, cati eliyaya nopa tayacanquet ten isoldados David huan yajqui ica isoldados quinnamiquitoj. Huan monamijque campa nopa mantoc at ipan altepet Gabaón. Huan isoldados David mocajque ipan se nali, huan isoldados Is Boset ipan seyoc nali nopa mantoc at. ¹⁴ Huan Abner cati eliyaya itayacanca Is Boset quinzotzqui Joab cati eliyaya itayacanca David, huan quej ni quiilhui:

—Achtohui ma motehuica san sequij totelpocahua para tiquintachilise huan tiqutase ajquiya tatanis.

Huan Joab tananquili:

—Cualtitoc.

¹⁵ Huajca quintapejpenijque majtacti huan ome telpoca soldados cati itztoyaj ica David huan majtacti huan ome telpoca soldados ten tali Benjamín cati itztoyaj ica Is Boset. Huan moixnamijque nopa telpocame huan pejque motehuíaj. ¹⁶ Huan sese injuanti quitzoncalitzqui cati itztoya imelac huan mocalaquilijque inincuatamin cati huehueyac ipan inielchiqui cati itztoya iixmelac. Huan nochi nopa 24 telpocame mijque ica sempa. Huan yeca quitocaxtijque nopa lugar “campa tatequi nopa cuachosojme”, huan mocahua ipan altepet Gabaón. ¹⁷ Huan teipa pampa amo aqui tatantoya, pejque tatehuíaj nelía chicahuac nochi isoldados David ihuaya isoldados Is Boset. Huan ipan nopa tonali isoldados David tahuel quintanque isoldados Is Boset huan inintayacanca Abner. ¹⁸ Huan nojquiya nozona itztoyaj nopa ome iicnihua Joab, nopa tayacanquet ten isoldados David, cati inintoca eliyaya Abisai huan Asael. Huan Joab, Abisai huan Asael nochi eliyayaj iconehua Sarvia. Huan Asael tahuel hueliyaya motalohua chicahuac quej se masat. ¹⁹ Huan yaya pejqui quitepotztoca Abner, nopa tayacanquet ten isoldados Is Boset, huan amo teno quicahuili ma quitzacuili. Amo quicajqui iojhui, yon nica, yon neca. San quitoquilijtiyajqui. ²⁰ Huan quema Abner moicancuetqui huan quítac para quitoquilijyaya, quiilhui:

—¿Amo ta tiAsael?

—Quena, na niAsael —quinanquili.

²¹ Huajca Abner quiilhui:

—Ximijcueni. Xijtoquili seyoc nosoldado huan ximocahua ica nochi cati yaya quipiya.

Pero Asael amo quinejqqui quicahuas.

²² Huajca Abner sempa quiilhui Asael:

—¡Techcahua! ¿Para ten monequi nimitzmictis? Huan ¿taya noxayac ica nijtachilis moicni Joab quema sempa timonamiquise?

²³ Pero Asael amo quitacaquili. Huajca Abner quisentapalhuili ica icuachoso cati huehueyac huan nozona huetzqui mictoc Asael. Huan teipa nochi cati ajsiyayaj campa huetztoya Asael moquetzayayaj ica tatepanitacayot.

²⁴ Huan teipa Joab huan Abisai pejque quitoquilíaj Abner huan quema calaquito tonati, ya ajsitoyaj ipan se tachiquili cati itoca Amma nechca Gía ipan nopa ojti cati yahui para altepet Gabaón. ²⁵ Huan mosentilijque miyac iixhuihua Benjamín para quipalehuise Abner huan moquetzque tachiquilipa. ²⁶ Huan Abner quinotzqui Joab chicahuac ica huejca huan quiilhui:

—¿Monequi nochipa tijsenhuiquilijtose timomictíaj? ¿Amo tiquita para tatehulisti techhualiquilía miyac tequipacholi? Xiquintacahualti mosoldados para ma techcahuaca pampa tiicnime.

²⁷ Huan Joab quinanquili:

—Nelía cati nimitzilhuía, sinta ta achtohui amo tiquijtojosquía ma tiquintapejpenica 12 totelpocahua para tatehuise, amo oncatosquía tatehulisti. Nochi nosoldados san mocuetosquíaj ininchajchaj ama ijnaloc.

²⁸ Huajca teipa Joab quipitzqui cuacuajti huan nochi isoldados David moquetzque huan ayecmo tatehuijque, yon ayecmo quintoquilijque nopa sequinoc israelitame cati ejque tali Israel ica huejcapa. ²⁹ Huan Abner huan nochi isoldados nojquiya nejnenque seyohual huan quiixcotonque nopa tamayamit huan nopa hueyat Jordán huan nejnenque hasta ajsitoj ipan altepet Mahanaim.

³⁰ Huan Joab nojquiya quinsentili isoldados David huan quinpojqui huan polihuiyayaj 19, huan iyoca polihuiyaya Asael cati Abner quimictijtoya.

³¹ Pero isoldados David quinmictijtoyaj 360 cati motalijtoyaj ihuaya Abner; itayacanca isoldados Tanahuatijquet Is Boset, huan nochi eliyayaj iixhuihua Benjamín cati calactoyaj ihuaya.

³² Huan teipa Joab huan isoldados quihuicaque itacayo Asael huan quitalpachojque nechca itata ipan altepet Belén. Huan teipa nejnenque seyohual huan quema tanestihualayaya ajsitoj ipan inialtepe, Hebrón.

3

¹ Huan ica ya ni pejqui miyac tatehuilisti ica injuanti cati quitoquiliyayaj icone Saúl huan cati quitoquiliyayaj David. Pero isoldados David achi más momiyaquiliytiahuiyayaj huan quipixtiyahuiyayaj más chichahualisti. Huan isoldados icone Saúl caxantiyahuiyaya ininchichahualis pampa quitahuelcajtiahuiyayaj.

*Ya ni iconehua David cati tacatque ipan altepet Hebrón
(1 Cr. 3:1-4)*

² Huan nopona ipan altepet Hebrón tacatque iconehua David:

Iachtohui cone quitocaxti Amnón huan eliyaya icone ica Ahinoam cati eliyaya se jezreelita.

³ Iompa cone quitocaxtali Quileab huan eliyaya icone Abigail cati achtohui eliyaya isihua Nabal cati ejqui altepet Carmel.

Iexpa cone David quitocaxtali Absalón huan eliyaya icone seyoc isihua cati itoca Maaca cati eliyaya iichpoca Tanahuatijquet Talmái cati tanahuati ipan tali Gesur.

⁴ Inajpa cone David quitocaxti Adonías huan eliyaya icone seyoc isihua cati itoca Haguit.

Imacuilpa cone David quitocaxtali Sefatías huan eliyaya icone seyoc isihua cati itoca Abital.

⁵ Ichicuasempa cone David quitocaxti Itream huan eliyaya icone seyoc isihua cati itoca Egla.

Nochi ya ni eliyaya iconehua David cati tacatque ipan altepet Hebrón.

Abner mosejcotili ihuaya David

⁶ Huan nochi nopa xihuit quema tatehuiyayaj isoldados David ica isoldados Tanahuatijquet Is Boset, Abner itayacanca Is Boset achi más mohueyimatiyaya. ⁷ Huan teipa Abner motemacac para cochis ihuaya se sihuat cati achtohui eliyaya iompaca sihua Tanahuatijquet Saúl cati ya mictoya. Huan itoca nopa sihuat eliyaya Rizpa huan eliyaya icone Aja. Huajca Tanahuatijquet Is Boset quitacahualti Abner huan quiihui:

—¿Para ten ticochtoc ihuaya cati eliyaya icahual notata, Tanahuatijquet Saúl?

⁸ Huan Abner tahuel cualanqui ica cati Tanahuatijquet Is Boset quiihto, huan quinanquili:

—¿Techita para se nichichi? ¿Techita nise mocualancaitaca quej cati ehuaní tali Judá? ¿Quenicatza huelis? Na nimitzchihuilihtoc cati cuali ta huan motata Saúl, huan iicnihua huan ihuampoyohua. Na nihueltosquía nimitztemac-tilijtosquía ica David, pero amo nijnejqui. San nimitztequipano cuali, huan ama quej notaxtahuil, techtatelhuía para nitajtacolchijtoc ihuaya se sihuat. ⁹ Ma Toteco Dios techtatzacuiliti sinta amo nijpalehuiti David para

ma quimoyahuas itanahuatilis hasta quiajsis nochi talme cati TOTECO quiilhujtoc para quimacas. ¹⁰ Nijpalehuis mitzquixtilis ta huan ichaj motata Saúl nochi amotanahuatilis ipan ni tali Israel huan nijchihuas ma pano ica David hasta ya quinnahuatis nochi israelitame campa hueli ten tali Dan ica huejcapa hasta altepet Beerseba ica tatzinta.

¹¹ Huan Tanahuatijquet Is Boset amo huelqui quinanquili Abner pampa quiimacasiyaya. ¹² Teipa Abner quintitanqui tacame para ma quiitatij David huan para ma quiilhuitij quej ni: “Nochi ni tali Israel nelía moaxca ta para tijnahuatis. Xijchihua se camanal sencahuali nohuaya huan techmaca nopa teguit cati nijnequi ipan motanahuatilis huan nimitzmactilis momaco nochi tali Israel ica huejcapa.”

¹³ Huan David quiijto: “Cualtitoc, nijchihuas se camanal sencahuali mohuaya, pero san se tamanti monequi. Amo nimitznamiquis para ticananaltise hasta techhualiquilis nosihua Mical, yaya cati iichpoca Tanahuatijquet Saúl cati ya mictoc.” ¹⁴ Huan nojquiya para nesis xitahuac, David quitajcuilhui Tanahuatijquet Is Boset huan quiilhui: “Techmactili nosihua Mical pampa timosencajque ica cuali. Huan nijtaxtahui motata Saúl cati tajtanqui pampa quinejqui ma niqinmicti nopa 100 filisteo tacame huan nijchijqui.”

¹⁵ Ama Mical ihuehue eliyaya Paltiel huan yaya eliyaya icone Lais. Huajca Tanahuatijquet Is Boset tanahuati para ma quicuilica. ¹⁶ Huan ihuehue yajqui ihuaya isihua huan chocatiyajqui. Huan quitoquiliitijyajqui nochi ojti hasta altepet Bahurim, huan nopona Abner quiilhui: “Xitacuepili mochaj.” Huan Paltiel mocuetqui ichaj.

¹⁷ Huan Abner quincamanalhui nopa huehue tacame ten tali Israel huan quinilhui: “Achtohui anquinctoyaj para elis amotanahuatijca David, ¹⁸ huajca ama ya ajsic nopa tonali para quej nopa ma eli. TOTECO quiijtojtoc: Elis ica imax David para niqinmanahuis israelitame ten nopa filisteos huan ten nochi sequinoc inincualancaitacahua.”

¹⁹ Huan Abner nojquiya quincamanalhuito iixhuihua Benjamín. Teipa yajqui altepet Hebrón quiitua David huan quiilhuito nochi cati nopa tacame ipan tali Israel cati iixhuihua Benjamín quinequiyayaj quichihuase. ²⁰ Huan yajque ihuaya Abner 20 tacame para quiitatij David, huan David quichijqui se hueyi tacualisti para Abner huan cati ihuaya hualayayaj. ²¹ Huan teipa Abner quiilhui David:

—Na nimocuepas nimantzi huan niquinsentiliti nochi tacame ipan tali Israel para ma quichihuaca se camanal sencahuali mohuaya huan ma mitzchihuaca titanahuatijquet. Huan quej nopa tiquinnahuatis nochi israelitame quej hasta huejcajquiya tijnequiyaya.

Huajca David quinnahuatijtejqui, huan Abner yajqui ica cuali.

Joab quimicti Abner

²² Huan quema Abner sanoc onquistoya, ajsic nopa tayacanquet Joab huan soldados David. Inijuanti yajtoyaj ipan tatehuilisti huan quihualicayayaj miyac tamanti cati quincullitoyaj inincualancaitacahua. Huan Abner ayecmo itztoya ihuaya David pampa ya yajtoya ichaj ica cuali. ²³ Huan quema ajsicoj Joab huan soldados cati hualayayaj inihuaya sequinoc, inijuanti quiilhuique: Abner, icone Ner, quipaxaloco Tanahuatijquet David huan David quiseli ica cuali huan quema quinnahuatijtejqui para yas, yajqui ica cuali. ²⁴ Huajca Joab nimantzi yajqui quiitua David huan quiilhui:

—¿Taya tijchijtoc? Abner hualajqui mitzpxaloco huan tijcahuilijtoc ma cholo tomaco. ²⁵ Cuali tijmati Abner san hualajqui para mitzcajayahuas.

Hualajqui para quitachilis quenicatza huelis calaquis ipan toaltepe huan teipa sempa hualas techtehuiqui.

²⁶ Huajca Joab quisqui iixpa David huan quintitanqui soldados para ma quiajsitij Abner huan ma quihhuica ma mocuepa. Huan quiajsitij nechca nopa ameli Sira, huan quihhuijque ma mocuepa huan mocuetqui inihuaya nopa soldados. Huan David amo teno quimatiyaya. ²⁷ Huan quema Abner ajsico campa icalte altepet Hebrón, Joab quiiyocaquixti para camanaltis ihuaya ixtacatzi. Huan nozona Joab quicalaquili imacheta iijtico Abner huan nimantzi mijqui. Huan quej nopa Joab momacuetqui pampa quimictijtoya iicni, Asael. ²⁸ Huan quema David quimatqui para quimictijtoya Abner quijto: “TOTECO quimati para na huan inijuanti cati niquinahuatía amo tijhuicaj tajtacoli pampa quimictijque Abner cati eliyaya icone Ner, pampa amo teno tijmatiyayaj. ²⁹ Yaya Joab cati quihuica tajtacoli ihuaya ichampoyohua. Amo quema ma polihui cocolisti ipan ichaj, yon ma amo polihuica cati metzcuaachotzitz, yon cati cuahuactoque, yon cati miqij ica mayanti, yon cati miqij ipan tatehuilisti.”

³⁰ Huajca quej nopa Joab huan iicni Abisai quimictijque Abner, pampa Abner achtohuiya quimictijtoya iniicni, Asael, ipan ne tatehuilisti cati oncac ipan altepet Gabaón.

³¹ Huajca David quihhui Joab huan nochi cati itztoyaj ihuaya: “Xijtza-yanaca amoyoyo, huan ximoyoyontica ica cati fiero huan xijchoquilica Abner.” Huan David yahuiyaya iniica cati quihhuicayayaj itacayo Abner para quitapachotij. ³² Huan quitapachojque Abner ipan altepet Hebrón. Huan David chichahuac chocac nozona pampa quitapachohuayayaj huan nochi cati itztoyaj ihuaya nojquia chocaque. ³³ Huan David quihhuicati Abner ica ni huicac cati tahuel tetequipacho, quijtohuayaya quej ni: “¿Para ten timijqui quej ni, Abner?”

Amo quinamiqui.

Timijqui quej se tachtejquet.

³⁴ Momax amo cana ilpitoya, yon moicxi amo ilpitoya ica tepos cadena.

Pero timijqui quej miqij se cati huetzi inimaco fiero tacame.”

Huan nochi cati itztoyaj nozona sempa chocaque.

³⁵ Huan David amo tacuajqui ipan nopa tonali. Huan hualajque tacame huan quihhuijque para ma tacua, pero amo quinejqui. Quinilhui:

—Ma techtatzacuili Toteco sinta nijcuas se pantzi o se tenijqui hasta ixpolihuis tonati.

³⁶ Huan nochi nopa israelitame campa hueli quimatque quenicatza David tahuel quichoquili Abner, huan quinipacti. Melahuac nochi cati David quichihuayaya tepactiyaya. ³⁷ Huan quej nopa quimachilijque nochi israelitame ipan nochi altepeme ipan tali Judá huan ipan tali Israel para David amo tanahuatijtoya ma quimictica Abner.

³⁸ Huan David quinilhui isoldados:

—Nelía ama mictoc se tohueyi tayacanca tiisraelitame. ³⁹ Huan masque TOTECO techtequitali nitanahuatijquet, amo nijpiya chichahualisti para nijtatzacuilitis Joab huan Abisai, cati iconehua Sarvia para niquinahuatilis ni tajtacoli cati quichijtoque. Inijuanti tahuel yoltetique huan tejtetique. Toteco iseli ma quintaxtahui por ni tajtacoli cati quichijtoque pampa quimictijque Abner.

4

¹ Huan quema quimatqui Tanahuatijquet Is Boset cati eliyaya icone Saúl para Abner mictoya ipan altepet Hebrón, taniel momajmati huan nochi ipan tali Israel nojquiya moyolmajmatijque. ² Huan itzttoyaj ome tacame ipan itanahuatilis Is Boset cati quipiyayayaj inintequi para quinyacanase soldados huan yase ipan sequinóc talme para tachtequitij. Se itoca eliyaya Baana huan seyoc Recab, huan injuanti iconehua Rimón ten altepet Beerot huan eliyaya se iixhui Benjamín ten huejcajquiya, ³ pampa nopa masehualme ten altepet Beerot nojquiya eliyayaj iixhuihua Benjamín masque cholojtejque para itztotij ipan altepet Gitaim huan mocajque nopona quej san paxalohuani hasta ama.

⁴ (Jonatán, icone Saúl, quipixtoya se icone cati metzcuachotiyaya cati itoca Mefi Boset. Metzcuachotixqui ipan nopa tonali quema ajsic camanali ten altepet Jezreel para mijqui Jonatán cati eliyaya itata nopa oquichpil huan Saúl cati eliyaya ihueyi tafa. Ipan nopa tonali nopa oquichpil san quipiyayaya macuili xihuit, huan se sicut cati quimocuitahuiyaya quicuitejqui nopa conet para cholojque. Huan pampa motalohuayaya huan moisihiultiyaya para cholose, nopa conet huetzito huan mocajqui metzcuachotic.)

⁵ Huan nopa tayacanani Recab huan Baana yajque ichaj Tanahuatijquet Is Boset quema tajcotona huan chichahuac tonayaya, huan yaya mosiyaqueztzoya ipan icuarto. ⁶ Mochijque quej quinequiyayaj quiquixtise trigo para quitequihuse, huan amo aqui quinitac. ⁷ Pero Baana huan Recab xitahuac calajque ipan icuarto nopa Tanahuatijquet Is Boset campa cochtaya huan quicalaquilijque se cuataminti iijtico huan quimictijque. Huan teipa quiquechtzontejque huan cholojtejque huan quihuicaque itzonteco. Huan nejnenque seyohual para choixcotonase nopa tamayamit huan ajsitoj altepet Hebrón campa itztaya David. ⁸ Huan quema ajsitoj, quinextilijque David Is Boset itzonteco huan quihhuijque:

—Xijtachili nica timitzhualiquilijtoque itzonteco Tanahuatijquet Is Boset, icone Saúl, cati mitzcualancaitayaya huan quinequiyaya mitzmictis. Huan ama TOTECO quichijtoc ximomacuepa ica Saúl huan nochi iixhuihua.

⁹ Huan David quinnanquili Recab huan iicni Baana huan quinihui:

—Iixpa TOTECO cati techmanahuijtoc ten nochi notequipachol, nimechihuis cati melahuac. ¹⁰ Quema se techilhuico para Saúl mictoya huan moihuiyaya se cuali camanali techhualiquilijtoc, niqitzqui huan nitanahuati ma quimictica nopona ipan altepet Siclag huan quej nopa nijtaxtahui por nopa camanali cati techmacac. ¹¹ ¿Huajca ama amo anquijtaj achi más monequi nimechchihuilis anfiero tacame pampa anquimictijque ni cuali tacat ipan ichaj campa cochtaya? Quena, nimechtaxtahuais por cati anquichijtoque ica Is Boset huan nimechpolihuiltis ipan ni taltipacti.

¹² Huan David quinnahuati isoldados ma quimictica, huan quimictijque. Huan quintzontequilijque inimax huan iniicxi. Huan inintacayo quicuapilojque nechca nopa mantoc at ipan altepet Hebrón. Huan quitalpachojque itzonteco Tanahuatijquet Is Boset ipan Hebrón ipan nopa ostot campa quitalpachojtoyaj Abner.

5

David quichijque tanahuatijquet ten nochi israelitame

(1 Cr. 11:1-3)

¹ Teipa ajsicoj nopa huehue tacame cati tayacanayayaj ipan nochi huejhueyi familias cati itzttoyaj ipan tali Israel huan quitacoj David ipan altepet Hebrón. Huan quihhuijque: “Tojuanti tiicnime huan san se toeso.

² Masque achtohuiya Saúl eliyaya totanahuatijca, melahuac ta tieliyaya tiitamocuitahuijca huan elqui ta cati nelía techyacanayaya para titatehuse. Huan ama TOTECO mitzilhuijtoc para ta tielis totamocuitahuijca huan totanahuatijca tiisraelitame.”

³ Huaica nozona David quichijqui se camanal sencahuali iixpa TOTECO ica nochi nopa huehue tacame ten tali Israel. Huan inijuanti quialtijque David ica aceite huan quitequitalijque para elis tanahuatijquet ten nochi israelitame. ⁴ Huan David quipiyayaya 30 xihuit quema pejqui tanahuatía huan tanahuati 40 xihuit. ⁵ Achtohui para chicome xihuit huan tajco mosehui ipan altepet Hebrón huan quinnahuati san nopa israelitame ipan tali Judá. Huan teipa mosehui ipan altepet Jerusalén para 33 xihuit huan quinnahuati nochi israelitame ipan tali Judá huan ipan tali Israel.

Jerusalén mochijqui nopa altepet cati tayacana

(1 Cr. 11:4-9)

⁶ Huan quema nopa tayacanani quialtijque David para elis inintanahuatijca, David huan nochi isoldados yajque altepet Jerusalén para quinquixtitij nopa jebuseos cati itztoyaj nozona. Pero inijuanti quihuihuiitague huan quitajilhuijque David: “Ta amo quema huelis ticalaquis nica. Hasta cati popoyotzitzi huan cati metzcuchotique mitztzacullisquij para amo huelis ticalaquis.”

Quej nopa quijtojque pampa moilhuijque para David amo huelis calaquis.

⁷ Pero David huan isoldados tatanque huan moaxcatijque campa nelpano tilahuac huan temachtí nopa tepamif ipan tepet Sion, huan ama nochi quitocaxtiáj nopa colonia ipan Jerusalén ica Ialtepe David. ⁸ Huan quej ni David quitanqui nopa altepet. Nopa tonali quema David quicajqui quitajilhuijaj, quinihui isoldados: “Nochi cati anquequij anquinte huse nopa jebuseos, xicalaquica ipan nopa hueyi tubo campa calaquí at ipan inialtepe. Huan quej nopa anajsitij campa itztoque huan anquinmictise nopa sentan tacame cati quinequij techtanise tojuanti cati inijuanti techtocaxtiáj ‘tipopoyotzitzi huan timetzcuchotique’. Tahuel niquincualancaita.” Ica ni pejqui nopa camanali cati ama quijtohuaj campa hueli: “Cati popoyotzitzi huan cati metzcuchotique amo hueli calaquise ipan ichaj Toteco, pampa quej nopa quintocaxtiyayaj nochi nopa masehualme cati quinhueyichihuayayaj taixcopincayome quej quichihuayayaj nopa jebuseos.”

⁹ Huan David mochantali ipan nopa colonia ipan Jerusalén nechca campa quipixtoya itepa nelpano tilahuac huan temachtí huan quitocaxtalijtoya Ialtepe David. Huan quiquetzqui seyoc tepamit yahualtic ichaj huan ichaj pejqui nozona ipan nopa altepet cati itoca Milo huan yajqui hasta más calijtic ten nopa altepet.

Hiram quintitanqui tacame campa David

(1 Cr. 14:1-2)

¹⁰ Huan David más mohueyichijtiyahuiyaya pampa TOTECO Dios Cati Quinyacana Iilhuicac Ejchua Ma Tatanitij itztoya ihuaya. ¹¹ Huan Tanahuatijquet Hiram cati quinnahuatiyaya altepet Tiro quititanili David huejhueyij tacame para ma quipaxalotij David. Huan inihuaya quititanqui miyac tiocuahuit, huan cuaximani huan calchihuaní cati quimatiyayaj quitejtequij tet para quichihuilise David se hueyi cali. ¹² Huan David quimachili para elqui TOTECO cati quitequitalijtoya para elis inintanahuatijca israelitame.

Huan quimachili para yaya TOTECO cati tahuel quihueyitalijtoya itanahu-
 atilis huan quichijqui pampa TOTECO tahuel quinicnelía nopa israelitame
 huan quintapejpenijtoya para iaxcahua.

Sequinoc iconehua David

(1 Cr 3:5-9; 14:3-7)

¹³ Huan quema David ya quiijcuenijtoya ichaj ten altepet Hebrón hasta
 Jerusalén, mocuili más isihujhua huan iompa sihuajhua, huan tacatque
 más iconehua; oquichpilme huan sihuapilme. ¹⁴ Ya ni iconehua David cati
 tacatque ipan altepet Jerusalén: Samúa, Sobab, Natán, Salomón, ¹⁵ Ibhar,
 Elisúa, Nefeg, Jafia, ¹⁶ Elisama, Eliada huan Elifelet.

David quintanqui nopa filisteos

(1 Cr 14:8-17)

¹⁷ Huan quema nopa filisteos quicajque para nopa israelitame ipan tali
 Israel nojquiya quialtijtoyaj David para elis inintanahuatijca, yajque ica
 nochi inisoldados para quiiitzquise. Huan David quicajqui para hualayayaj
 nopa filisteos, huajca yajqui motatito ipan altepet Jerusalén ipan nopa
 cuarto campa más tilahuac itepa huan cuali tzactoc. ¹⁸ Huan nopa filisteos
 hualajque huan moxejxelojque ipan nochi nopa tamayamit cati itoca Refaim
 nechca Jerusalén. ¹⁹ Huajca David motatajti ica TOTECO huan quiiilhui:

—¿Tijnequi ma niya niquintehuiti ni filisteos? ¿Techmactilis nomaco para
 niquintanis?

Huan TOTECO quiiilhui:

—Quena, xiquintehuiti huan temachtí na nimitzmactilis nochi momaco.

²⁰ Huajca David quisqui huan quintehui nopa filisteos huan quintanqui.
 Teipa quitocaxtali nopa lugar Baal Perazim cati quinequi quiiijos “ojtapo-
 jtoc” pampa quiiijo: “TOTECO chichahuac ajsitoc ica nocualancaitacahua
 quej chichahuac quisa at campa quitapohua se aojti.” ²¹ Huan nopa filisteos
 cholojque huan quicajtejque ininteteyohua huan David ica isoldados quin-
 tatiique.

²² Huan teipa nopa filisteos sempa tacuepilijqe huan mochihuacoj campa
 itztoyaj achtohuiya ipan nopa tamayamit Refaim. ²³ Huan sempa David
 quitatzintoquili TOTECO taya ipaquilis. Huan TOTECO quiiilhui:

—Quena, pero amo xiya xiquinnamiquiti campa iniixmelac. Achtohui
 xiquinyahualoca ixtacatzí huan xiquintehuitij campa nopa cuame balsame-
 ras. ²⁴ Huan quema anquicaquise tahuejchihualisti quej soldados cati taca-
 capatzasquía huejcapa ipan ixihuiyo nopa balsamerar, huajca nimantzi
 xiquintetzopaca, pampa nopa caquisti quinequi quiiijos para na niquistoc
 para nimechyacanas anquintanise nopa filisteos.

²⁵ Huajca David quichijqui senquisa quej TOTECO quinahuatijtoya huan
 yaya inihuaya isoldados pejqe quinmictíaj nopa filisteos ten altepet Gabaón
 huan ajsito hasta altepet Geser.

6

David quinejqui quihualicas icaxa TOTECO ipan Jerusalén

(1 Cr 13:5-14)

¹ David sempa quinsentili cati más tapejpenilme ten nochi israelita sol-
 dados huan mochijque 30 mil soldados. ² Huan nochi injuanti quistejqe
 ihuaya David para yase ipan altepet Baala ipan tali Judá. Yajque para
 quihualicase icaxa Toteco Dios. Nopa caxa cati quihuica itoca TOTECO Cati
 Quinyacana iilhuicac Ejcahua Ma Tatanitij huan cati eltoc itzonco nopa

ome querubines cati eltoque itzonco nopa caxa. ³⁻⁴ Huan quiquixtijque icaxa Toteco Dios cati eltoya ipan se tepet ipan ichaj Abinadab huan quitallijque ipan se cuacarro yancuic. Huan Uza huan Ahío iconehua Abinadab quihuicaque nopa cuacarro cati quihuicayaya icaxa Toteco Dios. Huan Ahío tayacantiyahuiyaya. ⁵ Huan David huan nochi nopa israelitame quitoquilijtijyahuiyayaj. Huan miltotijyahuiyayaj ica miyac paquilisti. Huan huicatiyahuiyayaj iixpa TOTECO ica nochi tamanti tatzotzonalí quej arpas, salterios, panderos, flautas huan címbalos.

⁶ Quema ajsitoj campa itrigo mil Nacón, nopa huacaxme cati quihuicayayaj nopa cuacarro motepotanjique, huan Uza momatananqui para quitzacuulis icaxa Toteco Dios para amo huetzis. ⁷ Huan TOTECO tahuel cualanqui ica Uza pampa amo quiimacasqui quiitzquis icaxa huan quimicti nopona nechca nopa caxa.

⁸ Huan David tahuel mocueso por cati quichijtoya TOTECO ica Uza huan quitocaxti nopa lugar Pérez Uza. (Pérez Uza quiijtosnequi Campa Toteco Cualanqui Ica Uza.) Huan hasta ama quej nopa itoca. ⁹ Huan David quiimacasqui TOTECO ipan nopa tonali huan quiijto: “¿Quenicatza huelis nijhuicas icaxa TOTECO campa niitztoc?” ¹⁰ Huaيجا ayecmo quinejqui quihuicas icaxa TOTECO ipan Jerusalén campa itoca Ialtepe David, huan tanahuati ma quihuicaca ichaj Obed Edom cati achtohui ejquet ipan altepet Gat, pero ama quiipixtoya ichaj nechca campa eltoya nopa caxa. ¹¹ Huan nopona mocajqui icaxa TOTECO eyi metzti, huan TOTECO miyac quitiochijqui Obed Edom huan nochi ichaj ehuaní.

*David quihuicac icaxa TOTECO ipan Jerusalén
(1 Cr. 15:1–16:6)*

¹² Teipa quema David quimatqui para TOTECO miyac quitiochijtoya Obed Edom pampa quiipixqui icaxa, yajqui nopona, huan ica miyac paquilisti quiquixti icaxa Toteco Dios huan quihuicac ipan nopa colonia cati itoca Ialtepe David. ¹³ Huan quema nopa tacame cati quihuicayayaj icaxa Toteco Dios quimajcajttoyaj iniicxi chicuase huelta, moquetzque huan mochixque huan David quitencajqui se toro huan se becerro cati tomahuac quej tacajc-ahualisti para Toteco Dios.

¹⁴ Huan David miltotiyaya ica nochi ichicahualis iixpa TOTECO huan moyoyontijtoya quej moyoyontíaj totajtitzti. ¹⁵ Huan quej nopa David huan nochi nopa israelitame quihuicatiyajque icaxa TOTECO ica miyac paquilisti. Huan inihuaya yajque cati tapitztyajque.

¹⁶ Huan quema icaxa TOTECO quiaxitijtihualayayaj ipan Ialtepe David, Mical, isihua David cati eliyaya icone Saúl tachiyayaya ipan ventana, huan quiitac para Tanahuatijquet David huitontihualayaya huan miltotijtihualayaya huan tahuel quicualancaitac ipan iyolo.

¹⁷ Huan quicalaquijque icaxa TOTECO ipan se yoyon cali cati David quicualtalijtoya para ya nopa. Huan David quimacac tacajcahalísti TOTECO cati tatatili huan tacajcahalísti para ma onca tayoltalili ihuaya TOTECO. ¹⁸ Quema tanqui quitencahua nopa tacajcahalísti, David quintiochijqui nochi nopa israelitame ipan itoca TOTECO, Yaya Cati Quinyacana Iilhuicac Ejcahua Ma Tatanitij. ¹⁹ Huan quinmajmacac nochi israelita tacame huan sihuame senen pantzi huan se tatecti nacat huan se torta ten xocomecat huactoc. Teipa quema tanqui nochi nopa ilhuit, nopa tacame huan sihuame tacuepilijque ininchajchaj.

²⁰ Huan David nojquiya tacuepili ichaj para quintiochihuas ichaj ehuani. Huan Mical, isihua cati eliyaya icone Saúl, quisqui huan quinamiquico ihuehue huan quihuihuitac, huan quihui:

—Fiero tinesiyaya ama, ta cati tiTanahuatijquet ipan Israel. Timonextijtloc iniixpa moichpoca tequipanojcahua quej ten hueli tacat, pampa timoquixtili motaque cati huehueyac ten tanahuatijquet.

²¹ Huan David quinanquili:

—Nochi nijchijtloc ica nochi noyolo para nipaquis iixpa TOTECO pampa yaya techtapejpenijtloc para nielis niTanahuatijquet ten imasehualhua ipátaca motata huan ifamilia, huajca yeca nimijtotijtloc iixpa. ²² Huan sinta ninesi noja más nihuihuitic moixpa pampa nimoicnonequi iixpa ya, amo teno para na. Sequinoc techhueyitepanitase pampa nimoicnonejqui iixpa TOTECO hasta nojquiya techhueyitepanitase nopa ichpoca tequipanohuani cati inihuaya ticamanalti.

²³ Huan TOTECO quichijqui Mical, iichpoca Saúl, ma amo quema conepiya hasta mijqui.

7

David quinequi quichihuas itiopa Toteco Dios

(1 Cr. 17:1-27)

¹ Huajca teipa David mosehui ipan nopa caltanahuatili huan ayecmo quisayaya para tatehuis pampa TOTECO quimacac tasehuilisti ica nochi icualancaitacahua. ² Huan David quihui nopa tajtolpanextijquet Natán:

—Na nimopantía ipan se cali yejyectzi huan icaxa Toteco Dios eltoc ipan se yoyon cali.

³ Huan Natán quinanquili:

—Xijchihua nochi cati tiquita cuali para tijchihuas, pampa TOTECO itztoc mohuaya.

⁴ Huan ipan nopa tayohua TOTECO quinojnotzqui Natán huan quihui:

⁵ “Xiya xiquilhuiti notequipanojca David para yaya amo quichihuas se cali campa niitztos. ⁶ Amo quema nimopantijtloc ipan se caltiopamit hasta nopa tonali quema niqunquixti amohuejcapan tatahua ipan tali Egipto huan hasta ama. Nochipa nimopantijtloc ipan se yoyon cali.

⁷ Ninejnenci inihuaya israelitame campa hueli pero amo quema nijtajtanjtloc se tayacanquet cati nijtalijtloc para quinmocuitahuis nomasehualhua para ma techchihuili se tiopamit ten tiocuahuit.

⁸ “Xiquilhui David para na niiTECO Cati Niqunyacana Noilhuicac Ejcahua Ma Tatanitij huan niqulhuía ya ni: ‘Na nimitztapejpeni para tielis tanahuatijquet ipan noisraelita masehualhua quema tieliyaya se tamocuitahuijquet ten borregojme. ⁹ Na nimocajtloc mohuaya campa hueli campa tinemiyaya, huan mocualancaitacahua na niquntzon-tamiltijtloc. Nimitzchihuas noja más tihueyi hasta tielis hueyi quej nopa tacame cati más motepanitaj ipan ni taltipacti. ¹⁰ Huan nojquiya niquntapejpeniltijtloc se tali campa niquntalis noisraelita masehualhua. Huan nozona itztose ipan se tali cati iniaxca huan ayecmo aqui quincualancamacas. Huan cati fierojtique ayecmo quintajiyohuiltise quej quichihuayayaj achtohuiya ¹¹ ipan nopa tonali quema niquntali jueces ma quinyacanaca noisraelita masehualhua. Huan nijchihuas para tiitztos ica cuali ica mocualancaitacahua.

“ Pero na cati nimoTECO nimitzilhuiá para amo ta cati techchihuilis nochaj, elis na cati nimitzchihuilis ta, David, se cali ten tanahuatiani huan

se tanahuatiliti cati mocahuas para moteipan ixhuihua. ¹² Huan quema timiquis huan timosiyajquetzas ica motatahua, na nijtalis se mocone cati quisas ten moxinacho para tanahuatis huan itanahuatilis nijchihuas temachti. ¹³ Huan yaya cati mocone, quena, techchi-huilis se tiopamit huan nijchihuas temachti itanahuatili para nochipa. ¹⁴ Huan na nielis quej itata huan yaya elis quej nocone. Huan sinta yaya techixpanos, na nijtatzacuiltis quej se tetaj quichihua ica icone. Quena, niquntequihuis tacame ten sequinoc talme para ma quitatzacuiltica por na. ¹⁵ Pero nochipa nijpiyas hueyi noyolo ica ya. Amo quema nijtahuelcahuas quej nijtahuelcajqui Saúl cati achtohui elqui tanahuatijquet huan nijquixti para nimitztalis ta titanahuatis. ¹⁶ Huan na niquintalis moteipan ixhuihua para quipiyase tanahuatili para nochipa noixpa. Quena, motequiticayo ten tanahuatijquet nimitzmacatoc para nochipa huan nochipa se moteipan ixhui tanahuatis.’”

¹⁷ Quej nopa TOTECO quiilhui Natán ipan se tanextili para ma quiilhui David. Huan Natán yajqui huan quiilhuito David nochi cati TOTECO quiilhuijtoya.

David quihueyitali huan quitascamatqui TOTECO

¹⁸ Huan Tanahuatijquet David yajqui campa nopa Yoyon Tiopamit huan motali iixpa TOTECO huan quiijto:

“TOTECO, ta cati tijpiya nochi tanahuatili, na amo teno nopati. Yon nofamilia amo hueyi para techhueyichijtoc quej tijchijtoc. ¹⁹ Huan amo san ya nopa cati tijchijtoc, pero nojquiya tiqijtojtoc para noteipan ixhuihua tanahuatise para nochipa. TOTECO, amo aqui seyoc cati quipiya hueyi iyolo quej ta tijpiya ica na.

²⁰ “Huan ¿taya más huelis nimitzilhuis para nimitztascamatis? TOTECO, ta cati tijpiya nochi tanahuatili, ta cuali techixmati. ²¹ Ica mopaquilis tijchihua nochi ni huejhueyi tamanti quej tiqijtojtoc tijchihuas, huan nochi tijchijtoc pampa hueyi moyolo. Huan techilhui para ma nijmati na taya tijchihuas teipa.

²² “TOTECO, ta cati tijpiya nochi tanahuatili, tahuel tihueyi. Amo quema tijcactoque ten seyoc quej ta. Amo aqui seyoc Dios; ta tiyojtzi. ²³ Huan amo onca seyoc tali imasehualhua cati quiselijtoque tatiochihuali quej ta techtiochijtoc tiisraelitame cati techchijtoc timomasehualhua. Ta, Toteco Dios, cati techquixti ipan tali Egipto huan tiquinquixti toixpa sequinoc tali ehuan ica ininteteyohua, pampa techicnelía. Techchihuilis huejhueyi tanextili nepa iniixpa nopa Egipto ehuan. Huan nochi tijchijqui para ma mohueyitali motoca ta. ²⁴ Pampa, TOTECO, ta tiqijtojtoc para techtapejpenijtoc tiisraelitame para ma tielica timomasehualhua para nochipa huan ta timochijtoc toDios tojuanti.

²⁵ “Huaica TOTECO Dios, temachti xijchihua cati tiqijtojtoc techchihuilis. Xijchihua para notanahuatili huejcahuas huan para se noteipan ixhui nochipa tanahuatis moixpa quej tiqijtojtoc. ²⁶ Nochi masehualme ma mitzhueyichihuaca para nochipa. Huan ma nochi quiijtoya: ‘TOTECO, Ta Cati Tiquinyacana Nochi Moilhuicac Ejcahua Ma Tatani-tij, ta cati toDios tiisraelitame.’ Huan para nochipa temachti xijcahuili se noteipan ixhui ma mosehui quej motanahuatijca moixpa.

27 “Pampa ta, TOTECO, Cati Tiquinyacana Moilhuicac Ejcahua Ma Tatanitij, tijpiya nochi chicahualisti huan ta tito Teco nochi tiisraelitame. Techilhuijtoc para tijchihuas temachtí notanahuatilis huan yeca na, nimotequipanojca, nimotatajtijtoc quej ni para nijselis cati techilhuijtoc. 28 Ta tiTOTECO Dios, ta cati nelnelia tiDios. Huajca melahuac nopa cati cuali cati tiquijtohua techchihuilis. Ta tiquijtojtoc para techchihuilis se nochaj ten tanahuatiani cati huejcahuas ica se noteipan ixhui cati tanahuatis para nochipa. 29 Huajca xijchihua cati tiquijtojtoc. Huan ama techtiochihua huan xiquintiochihua noconeuhua huan noteipan ixhuihua para nochipa, pampa quej nopa, ta TOTECO Dios, noca timocajtoc para tijchihuas. Huan pampa techtiochijtoc, notanahuatilis huan noteipan ixhuihua cati tanahuatise elise tatiochihualme para nochipa.”

8

David tatanqui campa hueli (1 Cr 18:1-13)

1 Huan teipa David quintanqui nopa filisteo masehualme huan quinicnotali. Moaxcati nopa altepet Gat cati eliyaya inialtepe cati más hueyi.

2 Nojquiya quintanqui moabita tacame huan quinchijqui para ma mote-caca talchi nejnechca se inacasta seyoc. Huan quintamachijque ica ihuehuyaca se lazo. Huan teipa quintamachijtiyajque sempa ica nopa lazo, huan nopa tacame cati inintacayohua mocajque ipan nopa ompa lazo ihuehuyaca quinmictijque. Huan tacame cati inintacayohua mocajque ipan nopa expa lazo, quincahuilijque ma itztoca. Huan nopa moabitame cati mocajque yoltoque elque itequipanojcahua David huan quitaxtahuijque impuestos.

3 Huan nojquiya David qitanqui Tanahuatijquet Hadad Ezer cati elqui tanahuatijquet ipan altepet Soba huan eliyaya icone Rehob. Quitanqui quema yahuiyaya para sempa moaxcatis nochi nopa tali nechca hueyat Eufrates. 4 Huan ipan nopa tonali David quinitzqui mil 700 soldados cati yahuiyayaj cahuayojtipa huan 20 mil cati icxinejnemiyayaj huan quinhuicac ilpitoque. Huan nojquiya quincocohuilijque sese iniicxi nochi nopa cahuayojme cati quihuicayayaj nopa tatehuijca carrojme. San quincajqui cuali nopa cahuayojme cati monejqui para quitlanase san 100 tatehuijca carrojme.

5 Huan quema hualajque nopa sirios ten altepet Damasco para quipalehuisse quiaj Hadad Ezer, nopa tanahuatijquet ten altepet Soba, David nojquiya quinmicti 22 mil ten injuanti. 6 Huan David quintali miyac soldados para tamocuitahuise ipan nopa sirios ipan altepet Damasco. Huan nopa sirios elque itequipanojcahua David huan sesen xihuit quitaxtahuiyayaj impuestos. Huan TOTECO quipalehui David campa hueli campa ya yahuiyaya.

7 Huan David quincuili nojquiya iniyolixtzajcahua cati itayacanca soldados Hadad Ezer quihuicayayaj iniixpa huan nochi eliyaya oro. Huan David nochi quihuicac ipan altepet Jerusalén. 8 Huan nojquiya Tanahuatijquet David quicuic tahuel miyac tamanti ten bronce ipan altepeme Beta huan Berotai cati quinquahuatiyaya Hadad Ezer.

9 Quema Tanahuatijquet Toi ipan altepet Hamat quimatqui para David quintanqui nochi soldados Hadad Ezer, 10 quititanqui itelpoca cati itoca Joram para quipaxalos ica cuali huan quihueyitalis David pampa quitantoya Hadad Ezer cati eliyaya nojquiya icualancaitaca. Huan Joram quihuiquili David miyac tamanti ten oro, plata huan bronce.

¹¹ Huan Tanahuatijquet David quiiyocatali nochi ni tamantzitzi para TOTECO quej nojquiya quiiyocatalijtoya para TOTECO nochi oro huan plata cati tequixtilijihualajtoya ipan campa hueli altepeme cati quitanti-hualajtoya. ¹² Quinquixtilijtoya miyac tamantzitzi nopa sirios, moabitame, amonitame, filisteos, huan amalecitame. Huan nochi quimacac Toteco quej nojquiya quiiyocatali para ya nochi cati quicuiliijtoya Hadad Ezer, nopa tanahuatijquet ten Soba.

¹³ Huan quej nopa David mochijqui hueyi campa hueli. Huan quema tacuepili ten nopa tatehuilisti, David quinmicti 18 mil edomitame ipan nopa Tamayamit ten Istat.

¹⁴ Huan David quintali miyac soldados para tamocuitahuise ipan tali Edom. Huan nochi nopa Edom ehuan mochijque itequipanojcahua David, pampa TOTECO quipalehuiyaya David campa hueli yahuiyaya para ma tatani.

Itayacancahua David

(2 S. 20:23-26; 1 Cr. 18:14-17)

¹⁵ Huan David tanahuati ipan Israel huan quichijqui cati xitahuac huan cati cuali ica nochi imasehualhua. ¹⁶ Huan Joab, icone Sarvia, eliyaya nopa tayacanquet ten isoldados David. Huan Josafat, icone Ahilud, cati quiijcuilijtiyajqui cati panoc mojmosta ipan itanahuatilis David. ¹⁷ Huan Sadoc, icone Ahitob, huan Ahimelec, icone Abiatar, eliyayaj totajtzitzi. Huan Seraías eliyaya itajcuilojca David. ¹⁸ Huan Benaía, icone Joiada, quinnahuatiyaya nopa soldados cati quimocuitahuuiyayaj David huan cati motalohuayayaj para quihuicase se camanali quema quititaniyaya para sejcayoc. Huan iyoca ten Benaía, David quinpixqui itelpocahua quej itapalehuijcahua cati más huejhueyi.

9

David huan Mefi Boset

¹ Se tonali David tatzintocac: “¿Amo mocajtoc itztoc yon se ichaj ehuan Saúl para huelis nijpalehuis por iteicnelil mijcatzi Jonatán cati tahuel niquicneliyaya?”

² Huan quipanti se tacat cati tatequipanojtoya ipan ichaj Saúl cati itoca eliyaya Siba. Huajca quinotzque para yas iixpa Tanahuatijquet David. Huan quema ajsito David quiihlui:

—¿Ta tiSiba?

Huan quinanquili:

—Quena.

³ Huajca David quiihlui:

—¿Amo mocajtoc yoltoc se acajya ten ifamilia Saúl cati huelis nijnextilis itaicnelijcayo Toteco Dios?

Huan Siba quinanquili:

—Mocajtoc se icone Jonatán cati amo hueli nejnemi pampa metzcuchotic ipan nochi ome iicxi.

⁴ Huan David quitatzintoquili Siba canque itztoc. Huan Siba quiihlui para itztoc ipan altepet Lodebar ipan ichaj Maquir, icone Amiel. ⁵⁻⁶ Huajca David nimantzi tanahuati ma quihualicaca Mefi Boset icone mijcatzi Jonatán huan iixhui mijcatzi Saúl. Huan quema Mefi Boset ajsico iixpa David, motancuaquetzqui ica miyac tatepanitacayot.

⁷ Huan David quiihlui:

—Amo ximajmahui. Na nelía nijnequi nimitzpalehuis huan nimitzchi-huilis cati cuali pampa tahuel niquicneli motata Jonatán. Na nimitzcuepilis nochí nopa tali cati eliyaya iaxca mohueyi tata Saúl huan ta tiitztos nica ipan nochaj huan nochipa titacuas nohuaya.

⁸ Huan Mefi Boset mohuijtzonqui talchi ica tatepanitacayot. Huan teipa quilhui David:

—Na amo niteno para tahuel techtasojtas. Niitztoc quej se chichi cati mictoc.

⁹ Huan teipa David quinzotzqui Siba itequipanojca Saúl huan quilhui:

—Nochi cati eliyaya iaxca moteco Saúl huan nochí ichaj ehuaní ama nijmactilijtoc Mefi Boset cati iixhui Saúl. ¹⁰ Huan ta, moconehua huan motequipanojcahua antequitise ipan nochí ital para oncas cati monequi para ichaj ehuaní, pero Mefi Boset tacuas mojmosta ipan nomesa nohuaya.

Huan Siba quinpixtoya 15 iconehua huan 20 itequipanojcahua. ¹¹ Huan Siba quilhui Tanahuatijquet David:

—Nimotequipanojca nijchihuas nochí cati techilhuijtoc ma nijchihua.

Huajca Mefi Boset itztoya ipan ichaj Tanahuatijquet David huan tacuajqui ihuaya quej elisquía se icone. ¹² Huan Mefi Boset quipixtoya se io-quichpil cati itoca eliyaya Micaía. Huan nochí ichaj ehuaní Siba quitequipanohuayayaj Mefi Boset. ¹³ Pero Mefi Boset cati metzcuachotic ipan nochí ome iicxi mocajqui para itztos nozona ipan altepet Jerusalén huan nochipa tacuayaya ihuaya Tanahuatijquet David.

10

Tatehuilisti ica nopa sirios huan amonitame

(1 Cr. 19:1-19)

¹ Huan quema ya panotoya tonali, mijqui inintanahuatijca nopa amonitame huan Hanún icone mocajqui tanahuatijquet ipan itanahuatilis. ² Huan David quijto: “Na nijchihuas cati cuali ica Hanún, icone Nahas, quej itata quichijqui cati cuali ica na”. Huan David quintitanqui tacame para ma quiyoltalitij pampa mijqui itata. Huan quema ajsitoj ipan inintal amonitame, ³ nopa tayacanani cati quipalehuiyayaj Tanahuatijquet Hanún quilhuijque: “¿Para ten timoilhuía David quintitantoc ni tacame para mitzyoltalise pampa mijqui motata? Amo ya nopa. Quintitantoc para ma quixmatiquij cuali total huan teipa techtehuiquij huan techtanise.”

⁴ Huajca Hanún quinzitqui itatitanilhua David huan quintequili san se lado inintentzo cati huehueyac para quinpinahualtis. Huan nojquiya quintequilijque iniyoyo huehueyac hasta inintzinpa, huan quinnmajcajque para ma tacuepilica. ⁵ Huan quema quimatqui David cati quinchihuilijtoyaj itatitanilhua, quintitanqui tacame para ma quinnamiquitij. Huan quinhuitoj ma mocahuaca ipan altepet Jericó hasta quema moscaltis huehueyac inintentzo huan huajca hualase, pampa tahuel fepinajti quej quinchijtoyaj.

⁶ Huan quema nopa amonitame quimachilijque para quicualancamacatoyaj David, quintaxtahuijque 20 mil tali Siria tacame cati icxinejnemiyayaj cati hualajque ten tali Bet Rehob huan altepet Soba. Huan quintaxtahuijque se mil tacame ma hualaca ica nopa tanahuatijquet ten Maaca huan 12 mil tacame ma hualaca ten Is Tob. ⁷ Huan quema David quimatqui cati quichihuayayaj, quititanqui icapitán, Joab ica nochí soldados cati más tetique. ⁸ Huan nopa amonitame motalijque para quimocuitahuse nopa caltemit ipan nopa tepamit cati quiyahualo inialtepe. Huan nochí nopa tali

Siria tacame cati hualajque ten Soba, Is Tob huan Maaca mochijque quentzi huejca ten nopa altepet ipan tamayamit.

⁹ Huan quema Joab quita para oncac quinpixtoya icualancaitacahua, quiniyocatali nopa israelita soldados cati más tapejpenilme para yase ihuaya ya huan quinte huise nopa sirios. ¹⁰ Huan nopa sequinoc soldados quincajtejqui ihuaya iicni, Abisai, para ma quintetzopaca nopa amonitame. ¹¹ Huan Joab quilhui iicni, Abisai: “Sinta tiquita para nopa sirios tech-tanisnequij, techpalehuiqui. Huan sinta na niqitas para nopa amonitame mitztanisnequij, na nimitzpalehuis. ¹² Ximoyolchicahua huan ximosemaca para titate huise chicahuac para tijmanahuise total huan toaltepehua timasehualhua Toteco Dios. Huan TOTECHO ma quichihuas cati ipaquillis ipan ni tatehuilisti.”

¹³ Huajca Joab huan nochi isoldados monechcahuijque para quinte huise nopa sirios, huan nopa sirios cholojtejque. ¹⁴ Huan quema nopa amonitame quitaque para nopa sirios cholohuayayaj, injuanti nojquiya cholojtejque iniixpa Abisai huan isoldados, huan sempa calajque para motatise ipan inialtepe. Huan Joab huan nochi isoldados tacuepilhijque para ininchaj ipan altepet Jerusalén.

¹⁵ Huajca nopa sirios quitaque para amo yajatij para moixnamiquise inihuaya nopa israelitame. Huan sempa mocualtalijque para tate huise, ¹⁶ huan hualajqui Hadad Ezer para quinpalehuis. Yaya eliyaya tanahuati-jquet ipan altepet Soba. Huan Hadad Ezer tatitanto ya para ma hualaca nopa sequinoc sirios cati itztoyaj ipan seyoc nali hueyat Eufrates huan nochi injuanti ajsicoj ipan se lugar cati itoca Helam. Huan ni soldados quinyacanayaya Sobac cati eliyaya capitán ten isoldados Hadad Ezer. ¹⁷ Huan quema David quilhuijque cati nopa sirios quichihuayayaj, sempa quinsentili nochi israelita soldados huan quixcotonque hueyat Jordán huan yajque Helam. Huan nopa sirios mocualtalijque huan quitechuijque David ihuaya isoldados. ¹⁸ Huan nopa sirios sempa cholojtejque iixpa isoldados David. Huan David quinmicti 700 sirios cati yahuiyayaj ipan tatehuica carrojme, huan 40 mil cati nemiyayaj cahuayojtipa. Nojquiya quicoco Sobac cati quinyacanayaya isoldados Hadad Ezer huan nozona mijqui. ¹⁹ Huajca nochi nopa tanahuatiani quitaque para amo yajatij ica tali Israel. Yeca motemacaque ica Israel huan quichijque se camanal sencahuali inihuaya para quintequipanose. Huajca nopa sirios ayecmo motemacaque para quinpalehuise nopa amonitame iixpa David pampa majmahuiyayaj.

11

Itajacol David

¹ Huan teipa quema pejqui yancuic xihuit, ipan nopa tonali quema nochi tanahuatiani momatij quisaj para tatehuitij, David san quititanqui Joab huan nopa israelita soldados ma tatehuitij. Huan quiyahualotj altepet Rabá huan pejqque quinte huaj nopa amonitame. Pero David mocajqui ipan Jerusalén.

² Huan se tiotac David mijquejqqui campa mosiyajquetztzo ya huan pejqui paxalohua calcuitapa ten icaltanahuatil. Huan quita se sihuat cati maltiyaya ipan seyoc calcuitapa. Huan David quita para tahuel yejectzi eliyaya. ³ Huajca tatzintoc taya itoca nopa sihuat, huan quilhuijque para itoca Betsabé huan eliyaya icone Eliam huan isihua Urías, se heteo tacat. ⁴ Huan David tititanqui para ma quinotzaca nopa sihuat huan ma quihualiquilica. Huan Betsabé hualajqui huan David cochqui ihuaya. Huan

teipa nopa sihuat mopajpajqui quej quijtohuayaya itanahuatilhua Moisés para monequi quichihuas se cati ya nopa quichijtoc huan tacuepili ichaj. ⁵ Huan teipa quimatqui para quiconemacatoya David huan quititanili se amatajcuiloli para ma quimati David.

⁶ Huan David quitajcuilhui Joab para ma quititanili Urías, nopa heteo tacat cati eliyaya ihuehue Betsabé, pampa Urías eliyaya se soldado David. Huan Joab quititanqui Urías ma yahui ichaj David. ⁷ Huan quema Urías ajsico ichaj David, David quitatzintoquilli quenicatza itztoc Joab huan isoldados, huan taya oncatoc ipan ne tatehuilisti. ⁸ Huan teipa David quilhui:

—Xiya mochaj, huan ximalti huan ximosiyajquetza.

Huan quema ya quistoya, David quititanili se tacualisti cati cuali quej se nemacti. ⁹ Pero Urías amo yajqui ichaj. Yaya san cochqui nechca caltemit ipan icaltanahuatil David campa cochij itequipanojcahua. ¹⁰ Huan quilhuijqe David:

—Urías amo yajqui cochito ichaj.

Huajca David quinotzqui Urías huan quilhui:

—¿Para ten amo ticochito mochaj? Pampa ya huejcajtoc para amo ticochtoc ipan mochaj.

¹¹ Huan Urías quinanquili:

—Icaxa Toteco, huan noteco Joab, huan nochi israelita soldados ten tali Israel huan tali Judá, itztoque ipan cuatitamit ipan pilxajcaltziti. ¿Quenicatza huelis niyas nochaj nitacuati, huan nitaiti huan nicochis ihuaya nosihua? ¡Amo! Amo quema nijchihuas ya nopa.

¹² Huajca quilhui David:

—Cualtitoc. Ximocahua ama nica huan mosta nimitzcahuilis titacuepilis ipan tatehuilisti.

Huajca Urías mocajqui nozona. ¹³ Huan David quinotzqui ma tacua huan ma tai ihuaya, huan David quihuinti. Huan quema tayohuixqui, Urías quisqui huan cochito sempa campa itequipanojcahua David, huan amo yajqui ichaj.

¹⁴ Huan tonili David quitajcuilhui Joab huan quititanili nopa tajcuiloli ica Urías. ¹⁵ Huan ipan nopa tajcuiloli quilhuiyaya ya ni: “Xijtalica Urías ipan nopa achtohui tatilimit ten soldados iixmelac campa más mahuilili nopa tatehuilisti. Huan teipa ximoquixtica huan xijcajtehuaca iseli para ma quicococa huan ma quimictica.”

¹⁶ Huajca quej nopa quichijqui Joab. Quema quiyahualojque nopa altepet para quitehuise, Joab quitali Urías campa quimatiyaya itztoyaj nopa soldados cati más temachme ten inincualancaitacahua. ¹⁷ Huan teipa quisque inincualancaitacahua ipan nopa altepet huan quinmictijque miyac isoldados David, huan nojquiya mijqui Urías, nopa heteo tacat. ¹⁸ Huan Joab quititanqui se tacat ma quilhuiti David nochi cati panotoya ipan nopa tatehuilisti. ¹⁹ Huan Joab quilhui itatitanil: “Huan quema titamis tijpohuilía David nochi cati panotoc, ²⁰ sinta yaya cualanis huan mitzilhuis: ‘¿Para ten anmonechahuijqe ipan itepa nopa altepet? ¿Amo anquimatiyayaj para huelis tejcose tepanixco huan quimajcahuase ten hueli teposti?’ ²¹ O sinta quijtos: ‘¿Amo anquielnamiqij cati panoc ipan altepet Tebes quema se sihuat quimicti Abimelec, icone Jerobaal, ica se metat cati quimajcahuili ten huejcapa? Huajca ¿para ten anmonechahuijqe tael?’ Huajca sinta quej nopa mitzilhuis David, xiquilhui: ‘Nojquiya mijqui motequipanojca, Urías, nopa heteo tacat.’ ”

²² Huan nopa tatitanili quisqui iixpa Joab huan yajqui quitato David. Huan quemaajsito, nochi quipohuili David quej Joab quiilhuijtoya.

²³ Quiilhui:

—Tocualancaitacahua hualajque para techtehuisquíaq cuatita, pero tiqintoquilijque hasta campa calaquitoj ipan inialtepe. ²⁴ Huan nopona inisoldados cati moquetzttoyaj tepanixco pejqe techmaquilíaj ica inincuatamin. Huajca mijque se quesqui ten mosoldados, huan nojquiya mijqui Urías nopa heteo tacat.

²⁵ Huajca David quiilhui nopa tacat:

—Quej ni xiquilhui Joab: Amo ximocueso por cati panotoc. Quemantica miqij soldados ipan tatehuilisti quej nopa. San ximoyolilhui quenicatza huelis tiquintetzopas teipa ica noja más soldados hasta tiquintzontamiltis nochi tocualancaitacahua. Quej nopa xijvolchicahua Joab.

²⁶ Huan quema nopa sihuat cati eliyaya isihua Urías quicajqui para mictoya ihuehue, motequipacho huan tahuel quichoquili. ²⁷ Huan quema tanqui nopa tonali para quichoquilis, David tatitanqui ma quihualiquilica ichaj huan quichijqui isihua. Huan teipa quitacatliti se oquichpil. Pero TOTECO quiitac para fiero ni tamanti cati David quichijqui.

12

Natán quiilhui David para tajtacolchijtoc

¹ Huan TOTECO quititanqui itajtolpanextijca, Natán, ma quiitati David. Huan quema Natánajsito iixpa David, quipohuili se camanali huan quiilhui:

—Ipan se altepet itzttoyaj ome tacame; se tapijpixquet huan se cati teicneltzi. ² Huan nopa tapijpixquet quinpiyayaya miyac huacaxme huan borrejoyme. ³ Pero nopa teicneltzi amo teno más quipiyayaya, san se pilsihua borrejojtzi cati quicojtoya huan quimocuitahuijtoya. Huan nopa pilborrejojtzi moscaltijtoya ihuaya iteco iconehua. Huan iteco quitamacayaya ica ten ya itacualis huan quiamacayaya ten itaza. Huan hasta cochiyaya imaco huan nopa tacat quiicneliyaya nopa pilsihua borrejojtzi quej elisquía se icone. ⁴ Huan se tonali se tacat paxaloto ipan ichaj nopa tapijpixquet huan yaya amo quinejqqui quimictis se huacax, o se borrego cati íaxca para quitamacas nopa paxalojqquet, huajca nopa tapijpixquet yajqui quicuilito nopa teicneltzi ipilborrego. Huan quimicti huan quicuáltalili nopa paxalojqquet.

⁵ Huajca David quema quicajqui nopa huicalot, tahuel cualanqui ica nopa tacat cati tapijpixquet huan quiilhui Natán:

—Nelia quinamiqui ma miqqui nopa tapijpixquet. ⁶ Huan quinamiqui para quicuepilis nopa tacat teicneltzi nahui borrejoyme quej ipataca nopa se cati quicuilito, pampa quichijqui cati fiero huan amo tetasojtac.

⁷ Huajca Natán quiilhui:

—¡Ta tiitztoc nopa tacat tapijpixquet! TOTECO Dios tiisraelitame mitzilhuía ya ni: ‘Na cati nimitztequitalijtoc titanahuatijquet ten Israel. Na cati nimitzmanahuijtoc ten Saúl. ⁸ Na nimitzmacac icaltanahuatil moteco Saúl, huan isihuajhua. Nimitzmacac tanahuatili ica nochi israelitame campa hueli ipan tali Israel huan tali Judá. Huan sinta tiqitasquía nochi ya nopa para pilquentzi, nimitzmacatquía tahuel más miyac. ⁹ Huajca ¿para ten tijtahuelcajtoc notanahuatili huan techixpanotoc ica ni tamanti cati tahuel fiero? Tijmicti Urias, nopa heteo tacat, huan tijcuili isihua. Tiquintequihui amonita tacame para ma quimictica. ¹⁰ Huajca ama nochipa oncas tatehuilisti ipan mochaj ehuani pampa techtahuelcajtoc huan tijchijtoc mosihua

cati eliyaya isihua Urías. ¹¹ Na nijchihuas para motelpocahua huan tacame cati itztoque mocalijtic motananase para mitztelhise. Huan na nimitzcullis mosihuajhua moixpa huan niquinmactilis sequinoc huan injuanti cochise inihuaya miyacapa. ¹² Ta tijchijqui nochi ni tamanti ixtacatzi, pero na nijchihuas miyacapa para nochi israelitame quimatise.’

¹³ Huajca David quiilhui Natán:

—Quena, nelía nitajtacolchijtoc iixpa TOTECO.

Huan Natán quiilhui:

—TOTECO mitztapojpolhuijtoc motajtacol huan amo timiquis por ya ni.

¹⁴ Pero pampa tahuel tiquixpanotoc TOTECO ica ni tamanti, tiquinchiuilijtoc icualancaitacahua TOTECO para quihuetzquilise huan quimahuispolose itoca. Huajca nopa mocone cati ontacatqui miquis.

¹⁵ Huan Natán tacuepili ichaj. Huan TOTECO quimacac se hueyiocolisti nopa conet cati isihuacahual Urías quitacatilti ica David. ¹⁶ Huan David pejqui motatajtía huan quitajtani Toteco ma quichicahua nopa conet. Huan mosajqui huan mixtapacho talchi seyohual. ¹⁷ Huan nopa huehue tacame cati más quipiyayaj tequiticayot ipan icaltanahuatil yajque quitatotj huan quiilhuijque ma mijquehua huan ma tacua inihuaya, pero David amo quinejqui.

¹⁸ Huan quema ya panotoya chicome tonati, nopa conet mijqui, huan nopa tacame majmahuiyayaj quiilhise David. Moilhuiyayaj: “Quema noja yoltoya nopa conet huan tijyoltalisquiáj, ya amo quinejqui techtacaquilis, huajca ama sinta tiquilhise para ya mijqui, huelis más fiero mochihuilis.”

¹⁹ Huan quema David quiitac para mocamanalhuiyayaj ixtacatzi nopa tacame, quimachili para ya mictoya nopa conet. Huajca quintatzintocquili sinta ya mictoya nopa conet, huan quiilhuijque para, quena.

²⁰ Huajca David mijquejqui campa huetztoya, huan malti, huan mopatac huan mocualtali. Teipa yajqui ipan itiopa TOTECO huan quihueyitali. Teipa tacuepili ichaj huan tacuajqui. ²¹ Huan itequipanojcahua san quitachilijque huan quiilhuijque:

—¿Para ten quej nopa titachihua? Quema mocone noja yoltoya, amo titacuayaya huan tahuel tichocayaya. Huan quema mijqui, timijquejqui huan titacuajqui.

²² Huan David quinnanquili:

—Quema noja yoltoya nopa conet nichocayaya huan nimosahuayaya pampa nimoilhuiyaya huelis Toteco Dios quipiyas hueyi iyolo ica na huan quichicahuas nocone. ²³ Pero ama ya mijqui. ¿Para ten nimosahuas huan nichocas? ¿Huelis na sempa nijyolcuís? ¡Amo! Na niyas teipa campa yaya itztoc, pero yaya ayecmo tacuepilis campa niitztoc na.

Tacatqui Salomón

²⁴ Huan David quiyoltali isihua, Betsabé, huan cochqui ihuaya. Huan quipixqui seyoc icone cati quitocaxtali Salomón. Huan TOTECO quiicneli ni conet. ²⁵ Huan TOTECO quititanqui Natán ma quiitati David. Huan pampa TOTECO quiicneli, Natán quiilhui ma quitocaxti nopa conet Jedidías. (Jedidías quinequi quijitos Yaya Cati TOTECO Quiicnelía.)

David moaxcati altepet Rabá

(1 Cr. 20:1-3)

²⁶ Huan Joab ica isoldados yajque huan quintehuijque nopa amonitame ipan altepet Rabá. Huan quitanque nopa pilaltepetzti campa huala nopa at cati quitequihuiyaya hueyi altepet Rabá. ²⁷ Huajca Joab quintitanqui

tacame para ma quilhuitij David: “Ya nijyahualojtoc altepet Rabá huan niquincuilijtoc nopa altepet cati quimaca at altepet Rabá. ²⁸ Huajca ama xiquinsentili nochi nopa israelita soldados cati mocajtoque huan xihualaca, ximoaxcatiquij ni altepet para ta tielis nopa tatanquet, huan amo quihuicas notoca na quej elisquía na nijtanqui.”

²⁹ Huajca David quichijquí quej Joab quilhuitioya. Quinsentili nochi soldados, huan yajqui ipan altepet Rabá huan quintehui. Huan moaxcati nopa altepet. ³⁰ Huan quicuilijque icorona nopa tanahuatijquet huan quitalijque ipan itzonteco David. Huan nopa corona hueyi ipati eliyaya pampa nochi elqui ten oro huan quiپیayaya piltetzitzi yejectzitzitzi cati pajpatiyó. Huan nopa corona quipixquí 33 kilos ietica. Huan nojquiya ipan nopa altepet mocuili David miyac tamanti cati patiyó. ³¹ Huan David quinquixti nopa amonitame cati mocajtoyaj yoltoque ipan nopa altepet huan quintali ma tequitica ica sierras, picos huan hachas. Huan nojquiya quinchijqui ma quichihuaca tabiques ipan hornos. Nojquiya quinchijqui itequipanojcahua nopa amonitame ipan sequinoc altepeme. Huan teipa David tacuepili ipan altepet Jerusalén inihuaya nochi isoldados.

13

Amnón quiichpocapolo Tamar

¹ Huan David quipixtoya se itelpoca cati itoca Absalón huan yaya quiپیayaya se isihua icni cati tahuel yejectzi eliyaya cati itoca Tamar. Huan ica seyoc isihua David quipixquí seyoc itelpoca cati itoca eliyaya Amnón. Huan Amnón nelía quixtocac Tamar masque eliyaya itepotzicni. ² Huan Amnón nelpano quixtocayaya Tamar hasta mococolisucic. Huan Tamar eliyaya se ichpocat huan ipan nopa tonali tahuel momatiyayaj quinmocuítahuíaj ichpocame para amo aquí quinnechcahuis. Huajca yeca Amnón moilhuiyaya para elis ohui para quicajcayahuas. ³ Huan Amnón quiپیayaya se ihuampo cati itoca eliyaya Jonadab cati eliyaya nojquiya imachicni pampa yaya eliyaya icone Simea, cati eliyaya icni David. Huan Jonadab tahuel quimatiyaya quenicatza tacajcayahuas. ⁴ Huan se tonali quitatzintóquili Amnón:

—Amnón, ta tiitelpoca nopa tanahuatijquet, ¿para ten más timocuesohua mojmosta? ¿Taya tijpiya? ¡Techilhui!

Huan Amnón quinancuili:

—Na niqixtocac Tamar, icni Absalón.

⁵ Huajca Jonadab quilhui:

—Na nimitzilhuis quenicatza tijchihuas. Ximotecati ipan motapech huan ximococoxcanequi. Huan quema yas motata David mitzpacaloti, xiquilhui quej ni: ‘Nimitztajtania xijtítani noicni Tamar ma techcualtaliliqui se tacualisti para nijcuas.’

⁶ Huajca quej nopa quichijqui Amnón. Huan quema itata yajqui quipaxaloto quilhui:

—Nimitztajtania para xijtítani noicni Tamar para ma techcualtaliliqui noixpa se ome pantzi, huan ma techtamaca.

⁷ Huajca David quititanqui Tamar ichaj Amnón, huan quilhui:

—Xiya ichaj moicni Amnón huan xijcualtaliliti itacualis para ma tacua.

⁸ Huan Tamar yajqui ichaj Amnón huan yaya mococoxcanectoya ipan itapech. Huan Tamar nimantzi pejqui quixacualohua harina, huan quichijqui pantzi huan quicixiti. ⁹ Huan quema ya eltoya, quitequili itacualis huan quihualiquili Amnón, pero ya amo quinejqui tacuas. Huan quinnahuati

nochi itequipanojcahua ma quisaca, huan nochi quisque. ¹⁰ Huan Amnón quiilhui Tamar:

—Ama, techhualiquili notacualis nica ipan nocuarto huan techtamaca.

Huan Tamar quihuiquili. ¹¹ Huan quema Tamar monechcahui campa Amnón itztoya, Amnón quinajnahuajqui huan quiilhui:

—Xicochiqui nohuaya.

¹² Huan Tamar quinanquili:

—Amo, noicni, amo techfuerzajhui pampa tijmati se tajtacoli cati nelía fiero ipan total Israel. ¡Amo techixpano! ¹³ Amo quema tamis nopinahualis. ¿Canque niyas para nimotatis? Huan ica ta, teipa mitzixmatise quej se cati más tiferio ipan Israel. Más cuali san xijcamanalhui nopa tanahuatijquet para ma techcahuili timotahuicaltise huan temachti techcahuilis.

¹⁴ Huan Amnón amo quinejqui quitacaquilis. Huan pampa eliyaya más tetic, quifuerzajhui huan quiichpocapolo. ¹⁵ Huan nimantzi Amnón tahuel quicualancaitac ica se hueyi cualanti. Quicualancaitac teipa hasta quipanoquej quicicneliyaya achtohui, huan quiilhui:

—Ximoquetza huan xiya.

¹⁶ Huan Tamar amo quinejqui quisas huan quiilhui:

—Noja más hueyi elis motajtacol para techquixtia que quema techixpanoc.

Pero Amnón amo quitacaquili, ¹⁷ huan quinotzqui se itequipanojca huan quiilhui:

—Xijquixti ni sihuat huan xijzacua cuali nopa caltemit.

¹⁸ Huan itequipanojca quiquixti Tamar. Huan yaya moyoyontijtoya cuali ica iyoyo huehueyac huan yejectzi quej nochi iichpocahua nopa tanahuatijquet moquentiyayaj. ¹⁹ Huajca quitzayanqui iyoyo huan motalili cuajnexti ipan itzonteco huan mocuaitzquitiyajqui huan chocatiyajqui.

²⁰ Huan Absalón, iicni, quiilhui:

—¿Mitzixpanotoc Amnón? ¿Ax que? Ximoyoltali, noicni. Amo tahuel ximocueso, pampa yaya moicni.

Huan Tamar mocajqui ichaj iicni Absalón. ²¹ Huan quema Tanahuatijquet David quicajqui cati quichijtoya Amnón, tahuel cualanqui. ²² Huan Absalón tahuel quicualancaitac Amnón por nopa tajtacoli cati quichihuili iicni, Tamar; pero amo teno quiilhuiyaya.

Absalón quimicti Amnón cati eliyaya iicni

²³ Teipa quema ya panotoya ome xihuit, itequipanojcahua Absalón yajtojaj Baal Hazor ipan tali Efraín para quinximase iborregojhua. Huan Absalón quinnotzqui nochi iicnihua ma yaca para ilhuichihuati. ²⁴ Huan Absalón nojquiya yajqui quiitato itata, Tanahuatijquet David, huan quiilhui:

—Notequipanojcahua yajtoque quinximatij noborregojhua huan nignequi para ta xiitzto nohuaya huan nochi motapalehuicahua.

²⁵ Huan David quinanquili:

—Amo, nocone, amo huelis tiyase tinochi, pampa tahuel ohui elis para ta.

Huan masque Absalón nelchicahuac quitajtani ma yahui, David amo quinejqui yas, pero pajqui para quichihuayaya nopa ilhuit huan quitiochiqui. ²⁶ Huan Absalón quiilhui:

—Sinta ta amo hueli tiyas, nimitztajtania xijtítani noicni Amnón.

Huan David quiilhui Absalón:

—¿Para ten tijnequi ma yahui moicni Amnón?

²⁷ Pero pampa Absalón quisenhuiquili quitajtania, David quicajqui ma yahui Amnón huan nochi itelpocahua. ²⁸ Huan Absalón quinilhuijtoya

itequipanojcahua: “Quema anquuitase para Amnón ya cuali taitoc huan nimechilhuis para xijmictica, huajca amo ximomajmatica. San ximoyolchichahuaca huan ximotemacaca xijchihuaca nocamanal.”

²⁹ Huan itequipanojcahua Absalón quimictijque Amnón quej quinilhuijtoya. Huan teipa nochi itelpocahua Tanahuatijquet David moquetzque huan tejoque ipan inimula huan cholojque.

³⁰ Huan quema inijuanti noja hualayayaj ipan ojti, ajsico campa David se tacat cati quihualiquiliyaya se camanali, huan quijto: Absalón quinmicti nochi motelpocahua huan yon se amo mocajqui yoltoc. ³¹ Huajca David tahuel mocueso huan quitzayanqui iyoyo huan motejqui talchi huan nochi itequipanojcahua nojquiya quichijque. ³² Huan teipa tananquili Jonadab, icone Simea cati elqui iicni David, huan quihui:

—Tanahuatijquet David, amo ximoilhui para nochi moconehua quinmictijque. San Amnón quimictijque, pampa Absalón motemacatoc quimictis ipan nopa tonali quema quixpanoc iicni, Tamar. ³³ Huajca ama, amo xijneltoca ne camanali para nochi motelpocahua mictoque, pampa san Amnón mijqui.

³⁴ Huan Absalón cholo. Huan nopa telpocat cati tachixtoya tepanixco quitac para monechahuiyayaj miyac tacame cati hualayayaj ipan ojti.

³⁵ Huajca Jonadab quihui Tanahuatijquet David:

—Xiquita, ya hualahuij motelpocahua quej nimitzilhuijtoc.

³⁶ Ipan nopa talojtzi ajsicoj itelpocahua David, huan nochi pejque chocaj. Huan David huan nochi itequipanojcahua nojquiya chochaque chichahuac.

³⁷ Huan Absalón cholo huan yajqui ipan altepet Gesur campa itztoya Tanahuatijquet Talmai, icone Amiud. ³⁸ Huan nozona mocajqui eyi xihuit.

³⁹ Huan David mojmosta mochoquiliyaya pampa quitemohuayaya Absalón, huan ya moyoltalijtoya para mijqui Amnón.

14

Absalón tacuepili Jerusalén

¹ Huan quema Joab, icone Sarvia, quimatqui para Tanahuatijquet David tahuel quinequiyaya quita icone, Absalón, ² huajca tanahuati ma quicuitij se sihuat ten pilaltepetz Tecoa pampa tahuel talnamiquiyaya. Huan Joab quihui quenicatza ma quihuiti nopa tanahuatijquet, quijto: “Ximoyoyonti huan ximochihua quej tijpiya miyac tequipacholi. Amo ximoyejecchihua para quej nopa tinesis para ya huejcajtoc tijpiya tequipacholi pampa acaya mijqui. ³ Huan xiya iixpa nopa tanahuatijquet huan tiquilhuis quej nimitzilhuis.”

Huan Joab quihui nochi cati quinequiyaya ma quihuis David. ⁴ Huan nopa sihuat ten Tecoa yajqui quitato Tanahuatijquet David. Huan quema ajsito, mohujtzonqui hasta talchi ica miyac tatepanitacayot huan quihui:

—Techpalehui, Tanahuatijquet.

⁵ Huan David quihui:

—¿Taya tijpiya?

Huan ya quinanquili:

—Na niicnotzi pampa nohuehue ya mijqui. ⁶ Huan niquinpiyayaya ome noconehua. Huan se tonali motehuijque campa tequitiyayaj huan amo aquí quinmanahui. Huan se ten inijuanti quimicti iicni. ⁷ Huan ama nochi nochan ehuanitechcualancaitaj huan quinequij ma niquinmactili nocone cati quimicti iicni para nojquiya quimictise quej ya quimicti iicni. Pero sinta

niquinmactilis, ayecmo nijpiyas yon se aqui ipan taltipacti huan ixpolihuis itoca nohuehue.

⁸ Huajca Tanahuatijquet David quiilhui nopa sihuat:

—Xiya mochaj huan na nitanahuatis para amo aqui huelis quicocos.

⁹ Huan nopa sihuat quiilhui Tanahuatijquet David:

—Ma huetzi nopa tajtacoli ipan na huan ipan notata. Huan ta titanahuatijquet amo tijhuicas tajtacoli ipan ni tamanti, yon motanahuatil.

¹⁰ Huan David quiilhui:

—Sinta se acajya mitzcuatotonis por motelpoca, techhualiquili huan ayecmo quemama mitzcuatotonis.

¹¹ Huan nopa sihuat sempa quiilhui:

—Nimitztajtanía iixpa TOTECO Dios cati tijtequipanohua para ma amo aqui quimicti nocone. Na ayecmo nijnequi ma onca miqulisti.

Huan David quiilhui:

—Nelía nimitzilhuía yon se tamanti amo quichihuilise mocone.

¹² Huan nopa sihuat sempa quiilhui:

—Techcahuili nimitztatzintoquilis seyoc tamanti.

—Techilhui —quiilhui David.

¹³ Huajca nopa sihuat quiilhui:

—¿Para ten amo tiquinchiuilis sequinoc israelitame cati tiquijtojtoc techchiuilis na huan nocone? Pampa ica cati tiquijtojtoc timotajtacolmacac ica moseli. Ta nojquiya amo tijcahuilijtoc ma tacuepili mocone, Absalón, cati mohuejcatelijtoc. ¹⁴ Nochi tojuanti timiguise se tonali. Tonemilis amo huejcahua. San eltoc quej at cati toyahui talchi huan amo aqui hueli quisentilía. Huan Toteco Dios amo quimictía se cati mohuejcatelijtoc, yaya quitemohua quenicatza quicuepaltis sempa. ¹⁵ Pero na nihualajqui moixpa pampa nochi nopa masehualme techmajmatijque na huan nocone huan quinequij techmictise. Huan nimoilhui para nimitzitaqui para techmanahuisquía. ¹⁶ Pampa noselti nimoilhui: Quema nopa tanahuatijquet quicaquis cati niitequipanojca niquilhuía, techmanahuis ten nopa tacame cati quinequij techzontamiltise na huan nocone, huan techixpolose ipan ni tali Israel cati Toteco Dios techmacatoc. ¹⁷ Huan nojquiya nimoilhui: Quena, nopa tanahuatijquet techyoltalis ica cati techilhuis, pampa yaya itzoc quej iilhuicac ejca Toteco Dios cati quimachilía cati cuali huan cati fiero. TOTECO Dios cati moTeco ma itzto mohuaya.

Quej nopa quijto nopa sihuat.

¹⁸ Huan David quiilhui nopa sihuat:

—Nijnequi nimitztatzintoquilis se tamanti. Amo teno techneltatili, san techilhui cati melahuac.

—Cualtitoc, notanahuatijca, techilhui taya tijnequi tijmatis —quinanquili nopa sihuat.

¹⁹ Huan David quiilhui:

—Techilhui sinta Joab mitztitantoc.

Huan nopa sihuat quinanquili:

—Quena, Joab techtitanqui huan yaya techilhui quenicatza ma nimitzcanalhui. ²⁰ Huan quichijqui nochi para timomacas cuenta ten ni tamanti huan quenicatza elisquía sinta tijtajtolsencahuayaya seyoc masehuali icone. Pero ta tahuel titalnamiqui quej se iilhuicac ejca Toteco huan tijmati nochi cati pano.

²¹ Huajca David quinzotzqui Joab huan quiilhui:

—Cualtitoc, xiya huan xiquilhuiti Absalón ma huala.

²² Huan Joab mohuijtzonqui hasta talchi, huan quitiochijqui Tanahuatijquet David huan quiilhui:

—Ama nijmachilijtoc para techtasojta pampa tijchijtoc quej nimitztaj-taniyaya.

²³ Huajca Joab motananqui huan yajqui altepet Gesur campa itztoya Absalón huan sempa quihualicac ipan Jerusalén. ²⁴ Huan David quichijqui ni tanahuatili: “Quema ajsis, xiquilhuica Absalón para ma ajsiti ichaj, pero ma amo moixnexti campa nochaj, pampa amo nijnequi niquitas.”

²⁵ Huan Absalón eliyaya nelía yejyetzzi huan ipan nochi tali Israel amo oncayaya seyoc quej ya. Nochi itacayo ten iicxi hasta itzoncal ipan itzonteco, amo tenó cati amo cuali quipixqui; senquisu cuali nochi itacayo. Huan nochi israelitame quihueyichihuayayaj. ²⁶ Huan itamiya sesen xihuit motequiliyaya itzoncal pampa etic, huan ietica eliyaya ome kilo huan tajco.

²⁷ Huan Absalón quinpiyayaya eyi ioquichpilhua huan se isihuapil cati quitocaxtalijtoya Tamar, huan Tamar nojquiya mochijqui se sihuat tahuel yejyetzzi.

²⁸ Huan mocajqui Absalón ome xihuit huan tajco ipan altepet Jerusalén huan amo quiitac ixayac itata, Tanahuatijquet David. ²⁹ Huajca Absalón tatitanqui ma quinotzatij Joab para ma yahui quiitati Tanahuatijquet David huan ma quicamanalhui por ya. Pero Joab amo quinejqui yas. Huan ica ompa quinotzqui huan sempa amo quinejqui. ³⁰ Huajca teipa Absalón quinahuati itequipanojcahua ma quitatitij imil Joab campa quitoctoia cebada pampa imil Joab mocahuayaya iteno imil Absalón. Huan itequipanojcahua yajque quitatitoy. ³¹ Huajca Joab yajqui quiitato Absalón huan quiilhui:

—¿Para ten motequipanojcahua yajque techtatilitoy nomil campa nijtoc-toya cebada?

³² Huan Absalón quinanquili:

—Pampa na nitatitancoc para ma mitznotzatij huan para tihualasquía nica. Nimitztitanisquía xiquitati Tanahuatijquet David. Nijnequi xijtat-intoquili para ten nechquixti ipan altepet Gesur sinta amo quinequiyaya techitas. Más cuali nimocajtosquía nepa. Na nijnequi ma nechahuili niquitas huan sinta quiita para nijhuica tajtacoli, ma techmicti.

³³ Huan Joab yajqui quipohuilto David nochi quej quiilhuijtoya Absalón. Huan David tanahuati ma quinotzatij Absalón. Huan quema Absalón ajsico iixpa David mohuijtzonqui hasta talchi quej momatque quichihuaj, huan David quitzoponi.

15

Absalón quinsentili soldados ten majtacti familias

¹ Huan quema panotoyaya tonali, Absalón mocohui se tepos carro quej se tanahuatijquet, huan mocohui cahuayojme para quitlanase huan 50 tacame para motalose iixpa para teyolmelahuase para huala. ² Huan Absalón pejqui mijquehua ijnaltzi mojmosta huan pejqui moquetza campa caltemit ipan itepa nopa altepet. Huan quema hualayaya se acajya para quitas tanahuatijquet David pampa quipiyayaya se cualanti, Absalón quinojnotzayaya ica cuali huan quiilhuiyaya: ¿Ten taya altepet tihuala? Huan yaya cati ajsiyaya quiilhuiyaya para eli se israelita. ³ Huan teipa Absalón quiilhuiyaya: “Nelía cuali cati tiquijtohua huan, quena, quinamiqui para se mitztajtolsencahuas. Pero Tanahuatijquet David amo quitatijtoc yon se para mitzpaléhuis ipan ni tamanti.” ⁴ Tahuel techpactisquía sinta techtequitalisquía na para nimechtajtolsencahuas. Quej nopa nochi cati quipiyasquía

se cualanti hualasquíaj techitaquij huan na niquintajtolsencahuasquía xi-tahuac. ⁵ Huan sinta se acajya hualayaya huan mohuijtzomayaya iixpa Absalón, ya amo quicahuiliyaya. Nimantzi quimaitzquiyaya huan quitzoponiyaya. ⁶ Huan quej nopa quichihuayaya ica nochi israelitame cati hualayayaj campa nopa tanahuatijquet para ma quinsencahuili se tenijqui. Huajca yeca Absalón quichijqui para nochi israelitame cati hualayayaj ipan tali Israel ma quicnelica.

⁷ Huan quema quiaxiti nahui xihuit para ajsitoya ipan Jerusalén, Absalón quihui David:

—Nimitztajtanía techahua niyas ipan altepet Hebrón nijmacati tacajcahualisti Toteco, pampa quej nopa nimocajtoc ica TOTECO. ⁸ Pampa quema niitztoya ipan altepet Gesur niquilhui TOTECO sinta nechcahuilisquía nihualas nica ipan altepet Jerusalén, huajca nijtequipanos huan nijmacas tacajcahualisti.

⁹ Huan Tanahuatijquet David quihui:

—Cualtitoc, xiya huan xijchihua quej tiquijtojtoc.

Huan Absalón yajqui ipan altepet Hebrón. ¹⁰ Huan quema Absalón ya ajsitoya Hebrón quintitanqui tacame ipan nochi altepeme campa itztoyaj israelitame huan quinilhuique para ma quitacaquilise se tapitzali. Huan quema quicaquise molinis tapitzali, quimatise para Absalón quitequitalijtoque ipan altepet Hebrón para elis tanahuatijquet ipan tali Israel huan monequi teyolmelahuse. ¹¹ Huan nojquiya Absalón quinnotztoya 200 tacame ipan Jerusalén para ma yaca tacuatij ihuaya. Huan injuanti amo teno quimatiyayaj taya teipa quichihuasquía Absalón. ¹² Huan quema Absalón quitatiyaya tacajcahualisti, nojquiya tatitanqui ma quinotzati Ahitofel ten ialtepe Gilo. Yaya eliyaya se cati quiconsejomacayaya David. Huan Ahitofel ajsico huan moiycatali ica Absalón. Huan nopa masehualme cati qitoquiliyayaj Absalón momiyaquiliyayaj pampa tahuel miyac israelitame calaquiyayaj ihuaya hasta quipixque miyac chicahualisti.

David cholo ten Jerusalén

¹³ Huan ajsico se tacat cati quihui David para nochi israelitame ipan tali Israel quitoquiliyaj Absalón quej inintanahuatijca. ¹⁴ Huajca David quinilhui nochi itapalehuijcahua cati itztoyaj ihuaya:

—Ma tiisihuica ticholose para timomanahuse, pampa sinta amo, yon se ten tojuanti huelis cholos. Xiisihuica para amo techajsis, pampa sinta techajsis nica, techtamimictise cati tiitztoque ipan ni altepet.

¹⁵ Huan nochi itapalehuijcahua quinanquiliqje:

—Tiitztoque mohuaya huan tijchihuase cati ta tiquita para cuali.

¹⁶ Huan nimantzi quisqui Tanahuatijquet David ica nochi ichaj ehuani. San quincajqui majtacti isihuajhua para quimocuitahuse nopa caltanahuatili. ¹⁷ Huan quema quistiyahuiyayaj Tanahuatijquet David ica nochi imasehualhua, moquetzque iteno nopa altepet. ¹⁸ Huan panoque nochi nopa soldados para quintayacanalitise. Huan itztoyaj nojquiya nochi nopa soldados cati quimocuitahuiyayaj nopa tanahuatijquet huan cati motalohuayayaj para quihuicase camanali huan temachilitise. Huan 600 tacame cati quistoyaj ipan altepet Gat huan icxinejnentoyaj hasta Jerusalén nojquiya panoque. ¹⁹ Huan David quinotzqui Itai cati quinyacanayaya nopa altepet Gat ehuani huan quihui:

—¿Para ten tihualajtoc nica? Más cuali para titacuepilis ipan Jerusalén, huan ximocahua ihuaya nopa yancuic tanahuatijquet. Ta tiehua seyoc tali

huan huejca moaltepe. ²⁰ San tionajsico huan amo quinamiqui para nimitzchihualtis ticalaquis ica tojuanti. Yon amo nijmati canque tiajsitij. Más cuali para xitacuepili huan nojquiya nochi injuanti cati hualajtoque mohuaya. Huan ma TOTECO mitzióchihua huan ma itzto mohuaya nochipa.

²¹ Huan Itai quinanquili:

—Na nijtestigojquetza Toteco Dios, para campa hueli ta tiyas, na niyas mohuaya, masque nimiquis mohuaya o noja niitztos.

²² Huajca Tanahuatijquet David quinanquili:

—Cualtitoc, xitayacantiyaca huan anyase tohuaya.

Huan Itai huan nochi isoldados, huan ichaj ehuan, huan iconehua yajque ihuaya David. ²³ Huan oncac se hueyi choquisti ipan nochi nopa tali quema Tanahuatijquet David huan nochi cati itztóyaj ihuaya quisque. Huan quiix-cotonque nopa atajti Cedrón para calaquise ipan nopa huactoc tali. ²⁴ Huan inihuaya yahuiyayaj nojquiya nopa totajtztzi Abiatar huan Sadoc huan nochi nopa levitame. Huan injuanti quihuicayayaj icaxa Toteco Dios huan qutilijque ojtenti hasta quema nochi panoque. ²⁵ Huan Tanahuatijquet David quihlhuí Sadoc:

—Xijhuica icaxa Toteco Dios sempa ipan altepet Jerusalén huan sinta TOTECO nechcahuilis, nitacuepilis huan sempa niquitas icaxa Toteco huan iYoyon Tiopa. ²⁶ Huan sinta TOTECO techilhuis para ayecmo quipactía cati nijchihua, huajca ma techchihuili cati yaya quinequi.

²⁷ Huan nojquiya Tanahuatijquet David quihlhuí nopa totajtzi Sadoc:

—¿Amo ta tise tachixquet? Nimitzilhuía sempa xiya ipan Jerusalén quema amo aquí mitzita huan xiitzto ica mocone, Ahimaas, huan ica Jonatán, icone Abiatar. ²⁸ Huan na nimitzchiyas nica huan ayemo nicalaquis ipan nopa huactoc tali hasta quema antechyolmelahuase taya pano ipan nopa altepet.

²⁹ Huajca Sadoc huan Abiatar sempa quihuicaque icaxa Toteco Dios ipan Jerusalén, huan nozona mocajque. ³⁰ Huan David ixtejcoc nopa taixtejcolis ipan nopa tepet Olivos. San chocatiyajqui huan motzontzactiyajqui, yon amo quihuicayaya itecac, pampa tahuel motequipachohuayaya. Huan nochi cati itztóyaj ihuaya nojquiya motzontzajque huan chocatinenque. ³¹ Huan teipa se quihlhuí David para Ahitofel nojquiya motalijtoya ihuaya Absalón. Huajca David motatajti ica TOTECO huan quihlhuí: “Se favor, TOTECO, xijchihua para icamanal Ahitofel ma nesi quej camanali cati amo teno ipati para amo aquí quichihuas cati quijtohua.”

³² Huan quema David ajsito iixco nopa tepet campa masehualme quihueyitaliyayaj Toteco Dios, quinamijqui se huehuentzi itoca Husai ten nopa familia Arquita. Quihualicayaya iyoyo tzyantoc huan tali ipan itzonteco pampa tahuel mocuesohuayaya ten cati ipantic David. ³³ Huan David quihlhuí:

—Achi cuali amo xicholo tohuaya, pampa monequi timitzchixtiyase.

³⁴ Más cuali sempa xiya Jerusalén huan xiquihlhuí notelpoca Absalón para tijtequipanos. Xiquihlhuí para miyac xihuit techconsejomacayaya huan techtequipanohuayaya huan ama tijpalehuis ya. Huan quej nopa quema Ahitofel quihlhuí ma quichihua se tenijqui, ta tiquihlhuí ma quichihua seyoc tamanti para amo qitoquilis icamanal Ahitofel. ³⁵ Huan nojquiya itztoque ipan Jerusalén nopa totajtztzi Abiatar huan Sadoc cati mocahuaj tohuaya. Xiquinilhuí nochi cati tijcaqui cati Absalón quisencahua para quichihuas.

³⁶ Huan injuanti quipiyaj ome iniconehua cati itztoque nozona inihuaya: Jonatán, icone Abiatar huan Ahimaas, icone Sadoc. Huajca hueli techtilise iniconehua para ma techmachiltica nochi cati anquimatij.

³⁷ Huajca Husai ihuampo David yajqui ipan altepet Jerusalén huan ajsito quema Absalón calactiyahuiyaya ipan nopa altepet.

16

Siba quiistacahui David

¹ Quema David sanoc pejtoya ixtemo ten nopa tepet, quinamijqui Siba cati eliyaya itequipanojca Mefi Boset. Huan quinhuicayaya ome burrojme cati quintamamaltijtoya ica 200 pantzi, 100 fatecti ten xocomecat, 100 pantzi ten higos huactoc huan se cuetaxti temitoc ica xocomeca at. ² Huan David quitatzintoquili Siba:

—¿Para ten tijhualica nochi ya ni?

Huan Siba quinancuili:

—Ni burrojme niquinhualicatoc para ma ipan tejcoca mochan ehuan, huan ni pantzi para ma quicuaca mosoldados, huan ni xocomecat iayo nojquiya para ma quica cati siyahuij ipan huactoc tali.

³ Huan David quiilhui Siba:

—¿Huan canque itztoc Mefi Boset, moteco?

Huan Siba quinancuili:

—Mocajqui Jerusalén, pampa quijto ama huelis mochihuas tanahuatijquet. Huan quej nopa sempa moaxcatis itanahuatilis ihueyi tata.

⁴ Huan David quiilhui Siba:

—Huajca na nimitzmactilía ama nochi cati iaxca Mefi Boset.

Huan Siba mohuijtzonqui hasta talchi iixpa quej quihueyitepanitayaya. Huan quitascamatqui huan yajqui.

Se tacat ten altepet Bahurim quitelchijqui David

⁵ Teipa Tanahuatijquet David huan nochi cati itztoyaj nejnenque ihuaya hasta ajsitoj ipan se altepet itoca Bahurim. Huan nozona quisqui se tacat cati eliyaya se iteixmatca mijcatzi Saúl huan itoca eliyaya Simei huan elqui icone Gera. Huan nopa tacat Simei quitelchihuayaya, ⁶ huan quimajcahuiliyaya tet Tanahuatijquet David huan nochi itequipanojcahua cati ihuaya yahuiyayaj. Nojquiya quinmajcahuiliyaya tet nopa huejhueyi soldados cati quimocuitahuiyayaj David ipan sese lado. ⁷ Huan ya quitelchihuayaya Tanahuatijquet David huan quiilhuiyaya:

—¡Xiya, xiya tiferio tacat! ¡Titemictijquet! ⁸ TOTECO mitzcuepilijtoc pampa tiquinmicti ichaj ehuan Saúl, huan timocuili itanahuatil huan nochi cati eliyaya iaxca. Huajca yeca ama TOTECO quimacatoc motanahuatil mocone, Absalón, pampa tiferio huan tijtoyajqui miyac esti.

⁹ Teipa Abisai, icone Sarvia, quiilhui Tanahuatijquet David:

—Techcahuili ma nijquechtzontequiti ne huihui tacat. ¿Para ten yaya cati itztoya quej se chichi cati mictoc ma mitzelchihua quej ni? Ta titanahuatijquet.

¹⁰ Huan David quinancuili:

—¡Amo! Amo ximocalaquica ipan ni tamanti, aniconehua Sarvia. Huelis TOTECO quiilhuijtoc ma nechtelchihua. Huan sinta quej nopa, ¿ajquiya tojuanti para tiquilhuisse ma amo quichihua?

¹¹ Huan David quiilhui Abisai huan nochi itequipanojcahua:

—Xiquitaca, Absalón nocone cati quisqui ipan notacayo quinequi nechmictis, pero ni tacat cati iixhui Benjamín cati amo quema itztoya tohuaya san nechtelchihua. Amo teno xijchihuilica pampa huelis TOTECO quinahuatijtoc ma quichihua. ¹² Huan teipa huelis TOTECO nechitas para amo

notajtacol nopa tamanti cati ica nechtelchihuayaya huan huajca, quena, Toteco nechtióchihuas por ni tatechihualisti cati ama nijpanti.

¹³ Huan David huan nochi itequipanojcahua panotiyajque ipan iniojhui, huan nopa tacat Simej quintoquilijiyajqui ipan se lado ten se tepet. Huan quintelchijiyajqui, huan quinmajcahuilijiyajqui tet huan taltepocti. ¹⁴ Huan Tanahuatijquet David huan nochi imasehualhua ajsitoy campa yahuiyayaj tahuel siyajtoque huan mocajque nozona se quentzi para mosiyajquetzase.

Absalón quitanqui altepet Jerusalén

¹⁵ Huan Absalón huan nochi nopa tacame cati itztoyaj ihuaya calajque ipan Jerusalén, huan Ahitofel itztoya inihuaya. ¹⁶ Huan Husai ihuampo David quinamiquito Absalón huan quihueyichijqui huan quihui:

—Xihuejcahua xiitzo, titotanahuatijca.

¹⁷ Huan Absalón quihui:

—¿Quej nopa tijtascamati mohuampo David? ¿Para ten amo tiyajqui ihuaya?

¹⁸ Huan Husai quihui Absalón:

—¡Amo! Amo nihueli pampa na nimocahuas mohuaya ta. Mitztapejpenijtoc TOTECO, huan ni masehualme nica huan nochi israelitame campa hueli para tielis titanahuatijquet. ¹⁹ Huajca ¿para ten amo nimitztequipanos? ¿Amo quinamiqui nimitzpalehuis ta cati tiicone David? Quena, quej nijtequipano motata David, nojquiya nimitztequipanos ta.

²⁰ Huan teipa Absalón yajqui quiiato Ahitofel cati teconsejomaca huan quihui:

—Techihui taya nijchihuas.

²¹ Huan Ahitofel quihui:

—Xicochi inihuaya isihuajhua motata David cati quincajtoc para quimocuitahuse nopa caltanahuatili. Huan quej nopa nochi israelitame quimatisa para tahuel tijcualancamacatoc motata huan ayecmo hueli anmoyoltalise. Huan huajca nochi cati mitztoquilíaj más moyolchicahuase.

²² Huajca imasehualhua quichijque seyoc cuarto para Absalón iixco ichaj David. Nozona Absalón cochqui inihuaya isihuajhua itata huan nochi israelitame quiiataque. ²³ Huan Absalón quichihuayaya nochi cati Ahitofel quihuiyaya quej itata, David, nojquiya quichijqui. Pampa nochi icamanal Ahitofel elqui temachti quej quistosquía ipan icamac Toteco Dios.

17

Husai amo quicahuili Ahitofel ma quimicti David

¹ Huan nojquiya Ahitofel quihui Absalón:

—Techcahuili ma niquinhuicas 12 mil soldados huan tijtemose David ni yohuali. ² Nicajsis quema ya siyajto huan amo quipiyas fuerza para momanahuis. Huan nopa tacame cati itztoque ihuaya momajmatise huan cholose huan huajca nijmictis san David. ³ Huan niquincuepas nochi imasehualhua ica ta, huan moyoltalise huan oncas paquilisti. Pampa nochi israelitame mitztoquilise sinta ayecmo itzto David.

⁴ Huan Absalón huan nochi nopa huehue tacame quiiytoque para cuali cati Ahitofel quiiytoque para quichihuas.

⁵ Pero Absalón quiiyto:

—Ma tijnotzase nojquiya Husai ten ichaj ehuani Arquita, huan tijcaquise taya consejo techmacas ica cati quiiytoque Ahitofel.

⁶ Huan Husai ajsico huan Absalón quiihúi:

—Ahitofel quiijtojtoc para quej ni tijchihuase. ¿Quenicatza timoillhuía ta? ¿Cuali tijchihuase o amo?

⁷ Huan Husai quinanquili:

—Nimoillhuía para ni huelta huelis amo cuali cati Ahitofel quiijtojtoc.

⁸ Tijmati motata, huan nochi nopa soldados cati itztoque ihuaya, tahuel mosemacaj. Nimantzi tahuel cualanise quej se tenan osa cati itztoc cuatita huan quicuiliijtoque iconehua. Motata quipanotoc miyac tatehuilisti huan tahuel quimati quenicatza tatehuis. Yaya amo cochi campa itztoque nopa sequinoc imasehualhua. ⁹ Niquita para ya motatijtoc ipan se ostot o se lugar ixtacatzí, huan sinta yasquáj mosoldados ama quitemotij, yaya quisas huan quintetzopas huan quinmictis. Huan nimantzi nochi quicaquise nopa camanali para quinmictijque ta momasehualhua. ¹⁰ Huan moyolmajmatise momasehualhua, masque ama tahuel motemacaj huan quipiay iniyolo quej se tecuani. Sinta moyolmajmatise, ayecmo quinequise tatehuise pampa nochi israelitame quimatij para motata tahuel quipiya tetili huan isoldados nojquiya. ¹¹ Na nimitzilhuía para achtohui xiquinsentili nochi israelita soldados ten campa hueli. Xiquinsentili cati itztoque ipan altepeme ten tali Dan ica huejcapa hasta cati itztoque ipan altepet Beerseba ica tatzinta. Huan ica ya nopa, quena, tiquinpiyas tahuel miyac mosoldados quej imiyaca xali iteno hueyi at, huan ta tiquinyacanas ipan tatehuilisti. ¹² Huan quej nopa, quena, tijpantitij motata ipan cati hueli lugar campa itztos, huan tiquintetzopatij quej quema huetzi ajhuechti ipan nochi cati onca. Huan quej nopa nochi tiquinmictise. Huan amo aquí mocahuas yoltoc, yon motata. ¹³ Huan sinta inijuanti motatij ipan se altepet, tiyase tinochi ica lazo hasta tijsolose nopa tepamit huan tijtilanase sesen tet cati eliyaya ipan nopa tepamit hasta campa tamayamit. Amo tijcahuase yon se tet cati mosehujtos ipan seyoc.

¹⁴ Huajca Absalón huan nochi nopa israelitame quiijtojtoc para más cuali cati Husai quiijtojtoca huan amo cati Ahitofel quiijtojtoca. Pampa TOTECO quichijtoya para amo quipatiitasquáj cati Ahitofel quiijtojtoca para ma huala cati fiero ipan Absalón.

¹⁵ Huan Husai quinilhuito nopa totajtzitzi Sadoc huan Abiatar nopa camanali ica cati Ahitofel quiconsejamacac ma quichihuaca Absalón huan nopa huehue tacame ten Israel. Nojquiya Husai quinilhui cati ya iseli quinilhuijtoya ma quichihuaca. ¹⁶ Huan nojquiya quinilhui:

—Xijtitanica se acaya nimantzi para ma quiihuiti David ma amo mocahuaca nopona, pero ma quixcotonaca hueyat Jordán. Pampa sinta amo, quimictise totanahuatijca huan nochi masehualme cati itztoque ihuaya.

¹⁷ Huan Jonatán huan Ahimaas mocahuayayaj altepeteno campa itoca En Rogel para amo aquí quinitasquía sinta calaquiyayaj Jerusalén. Huan ya quisencajtoyaj para se sihua tequipanojquet ma quinmacati camanali, huan inijuanti quiyolmelahuasquáj Tanahuatijquet David. ¹⁸ Pero quema Jonatán huan Ahimaas quisque ten En Rogel para quiihuitij David, se telpocat quinitac huan yajqui quiihuito Absalón. Huajca nopa telpocame moisihiultijque huan ajsitoj ichaj se tacat ipan altepet Bahurim cati quipiyayaya icalixpa se ameli cati amo quipiyayaya at. Huan nopona calajque huan motatijque. ¹⁹ Huan isihua nopa tacat quitentzajqui nopa ameli huan ipani quihuatzqui trigo. Huan amo aquí quimatqui sinta itztoyaj amelco. ²⁰ Huan quema ajsicoj isoldados Absalón huan quitatzintoquiliijque nopa sihuat:

—¿Canque itztoque Ahimaas huan Jonatán?

Huan nopa sihuat quijto:

—Ya quixcotonque nopa pilatajtzi huan yajque.

Huajca nopa soldados yajque quintemotoj, pero amo quinpantijque. Huan sempa tacuepilijque Jerusalén.

²¹ Huajca teipa Jonatán huan Ahimaas quisque huan yajque quilhuitoj David para ma quisaca huan ma quixcotonaca hueyat Jordán pampa Ahitofel quinequiyaya para nopa yohuali yasquía quinmictiti. ²² Huajca nimantzi David huan nochi cati itztoyaj ihuaya quisque huan quixcotonque hueyat Jordán. Huan quema tanesqui nochi ya itztoyaj seyoc nali, huan amo aquí mocajtoya.

²³ Huan quema Ahitofel quiitac para Absalón amo quichijqui cati ya quihuijtoya ma quichihua, tejoc ipan iburro, huan yajqui ichaj ipan ialtepe. Teipa quicualtali nochi tamanti huan moquechcuapiloto huan mijqui. Huan quitalpachojque campa itata quitalpachojtoyaj.

David ipan Mahanaim

²⁴ Huan David ajsito altepet Mahanaim. Huan Absalón huan nochi nopa israelita soldados cati mosentilijtoyaj ihuaya quixcotonque hueyat Jordán para quitoquilise. ²⁵ Huan Absalón quitelijtoya Amasa ma quinyacana isoldados ipataca Joab cati quinyacanayaya isoldados David. (Inana Joab eliyaya Sarvia. Huan Sarvia quipixqui se isihua icni cati itoca Nahas cati quipixqui se iichpoca cati itoca eliyaya Abigail. Huan se ismaelita tacat itoca Ítra quiconemacac Abigail huan quej nopa tacatqui Amasa. Huajca Amasa eliyaya imachicni Joab.)

²⁶ Huan Absalón huan nochi israelita soldados mochihuatoj ipan tali Galaad. ²⁷ Quema David ajsito altepet Mahanaim nimantzi quinamiquicoj Sobi, Maquir huan Barzilai cati quihualiquiliyayaj miyac tamanti. (Sobi elqui se amonita tacat cati eliyaya icone Nahas ipan altepet Rabá. Huan Maquir eliyaya icone Amiel ten altepet Lodebar. Huan Barzilai ehua altepet Rogelim ipan tali Galaad.) ²⁸ Huan injuanti quihualiquiliyayaj tapechme, tazas, chachapali, trigo, cebada, harina, huan sinti cacatztic, et, lentejas, ²⁹ necti, manteca, queso huan borregoyme. Huan nochi quihualiquilijque David huan imasehualhua para ma quicuaca, pampa moilhuiyayaj; huélis mayanaj, huan siyahuij, huan amiquij, pampa panoque ipan nopa huactoc tali campa amo teno onca.

18

David mocualtali para tatehuilisti

¹ Huan David quincualtali nochi isoldados cati ihuaya itztoyaj huan quintali tayacanani ipan sesen mil soldados huan ipan sesen cien soldados.

² Huan teipa David quinxelo isoldados cati itztoyaj ihuaya ica eyi pamit. Huan Joab quitali ma quinyacana se pamit, huan seyoc pamit quimacac Abisai cati eliyaya icone Sarvia huan iicni Joab para ma quinyacana, huan ne seyoc pamit quimacac Itai, nopa geteo tacat. Huan Tanahuatijquet David quinilhui:

—Na nojquiya niyas nitatehuiti amohuaya.

³ Pero injuanti quinanquilijque:

—¡Amo! Amo xiya, pampa tocalanacaitacahua amo techchihuilise cuenta. Sinta ticholose o techmictise miyac ten tojuanti, amo teno. Injuanti san mitztemohuaj ta para mitzmictise. Huan ta tahuel miyac mopati. Mopati

quej 10 mil ten tojuanti. Más cuali ximocahua nica para techtitanilis tapalehuilli sinta monequis.

⁴Huan David quinilhui:

—Cualtitoc, nijchihuas cati amojuanti anquii taj para cuali.

Huan David ijcatoya campa caltemit ipan itepa nopa altepet huan nochi isoldados pejqe quisaj ica pamit para tatehuise. Sequij pamit quihuicayayaj 100 soldados huan sequij se mil.

⁵Huan David quinilhui nopa tayacanani Joab, Abisai huan Itai:

—Sinta antechicnelíaj, xijmocuitahuica notelpoca Absalón.

Huan nochi nopa masehualme quicajque cati David quinnahuatijtoya nopa tayacanca soldados ten Absalón.

⁶Huan yajque nochi isoldados David huan monamijque inihuaya nopa israelitame cati isoldados Absalón ipan se cuatitamit ipan tali Efraín. ⁷Huan isoldados David quintanque nopa sequinoc israelita soldados ipan se hueyi tatehuilisti cati nelía chichahuac. Huan quinmictijque 20 mil ten injuanti.

⁸Huan nochi nopa soldados cati motehuiyayaj mosemantoyaj ipan nochi nopa hueyi cuatitamit cati ajsi campa hueli ipan nopa tali. Huan más miyaqqui mijque pampa mococojque ipan nopa cuatitamit cati fiero, huan amo quej cati mijque ica teposti.

⁹Huan Absalón yahuiyaya ipan se macho huan monamijqui inihuaya isoldados David. Huan quinejqqui mochololtis, pero nopa macho calajqui itantita se ahua cuahuit cati qui piyayaya miyac imacuayohua. Huan nopona Absalón cuatacanqui itzonteco huan mocajqui cuapilijtoc huejcapa huan imacho yajqui iseli. ¹⁰Huan se ten isoldado David quii tac huan quiihuito Joab:

—Na niquitztoc Absalón cuapilijtoc ipan se ahua cuahuit.

¹¹Huan Joab quinanquili:

—Sinta tiquitac, ¿para ten amo tijmicti? Na nimitztaxtahuijtosquía ica 10 tomi ten plata, huan nimitzmacatosquía se motzinquechilpica para tielis se tayacanquet.

¹²Huan nopa tacat quinanquili Joab:

—Masque techmacatosquía mil tomi ten plata, amo nijmictisquía pampa nochi tojuanti tijcayque quema David mitzilhui ta, huan Abisai, huan Itai para ma tijmocuitahuica Absalón. ¹³Huan sinta nijmictijtosquía, Tanahuatijquet David nimantzi quimajtosquía para na nijchijqui huan ta moseli techtatelhuijtosquía.

¹⁴Huajca Joab quiiyto:

—Ayecmo nimochiyas más nica.

Huan Joab quicuitejqqui eyi cuachoso huan yajqui campa cuatacantoya Absalón huan quicalaquili nochi eyi ipan iyolixco quema noja itztoya ipan nopa ahua cuahuit. ¹⁵Huan teipa ajsicoj majtacti telpocame cati quihuicayayaj iteposolixtajca Joab, huan injuanti quimictijque Absalón.

¹⁶Huan Joab tanahuati ma quipitzaca nopa tapitzali, huan quej nopa quinquetzqui isoldados para ma ayecmo tatehuicaj para amo miquise sequinoc. ¹⁷Huan quitananque itacayo Absalón huan quitelijque ipan se hueyi ostot cati eltoya ipan nopa cuatitamit. Huan ipani quimontonojque miyac tet. Huan nochi nopa israelita soldados cati ihuaya motalijtoyaj Absalón cholojtejqque huan yajque ininchajchaj.

¹⁸Huan quema noja itztoya Absalón, tanahuati ma quiquetzaca quej se teteyot cati hueyi ten ya campa nopa Tamayamit ten Tanahuatiani. Huan

cati quichijchijqui quipixqui se tajcuiloli ica itoca. Huan nochi quitocaxtali-jque “iteteyo Absalón” huan hasta ama quej nopa quitocaxtíaj. Absalón quijto quichijqui ya nopa pampa amo quipixtoya se oquichpil para quihuicas itoca quema miquis.

¹⁹ Huan Ahimaas, icone Sadoc, quiilhui Joab:

—Techcahuili ma nimotalo huan niquilhuiti David para TOTECO ya quimanahuijtoc ten icualancaitacahua.

²⁰ Huan Joab quinanquili:

—¡Amo! Amo ta cati tijhuicas camanali ama, pero seyoc tonali, quena. Ama monequi seyoc quiyolmelahuati para mictoc icone nopa tanahuatijquet, pampa amo paquis ica nopa camanali.

²¹ Huan Joab quiilhui se tacat ten tali Etiopía:

—Xiquilhuiti David nochi ten panotoc.

Huan nopa tacat ten Etiopía mohuijtzonqui iixpa Joab huan motalojtejqui.

²² Huajca Ahimaas, icone Sadoc, sempa quiilhuico:

—Techcahuili ma nimotali para nimotalos iica ne tacat cati yahui.

Huan Joab quinanquili:

—¿Para ten tijnequi tiyas? Amo teno tijtanis ica cati tiquijtoti.

²³ Huan Ahimaas tananquili:

—Masque amo teno nijtanis, na nijnequi niyas.

Huajca Joab quiilhui:

—Huajca xiya.

Huan Ahimaas motalojtijayqui ipan seyoc ojti campa tamayamit huan quitanqui nopa Etiopía tacat. ²⁴ Huan David mosehuijtoya campa nopa caltemit ipan nopa tepamit cati más tatajco ipan ne altepet. Huan nopa tacat cati quimocuitahuyaya nopa altepet itztoya tepanixco huan quitac se tacat cati motalojtihuayaya iseli. ²⁵ Huajca quiilhui Tanahuatijquet David. Huan David quiilhui:

—Sinta huala iseli, huelis quihualica se cuali camanali.

Huan quema monechcahuiyaya nopa motalojquet, ²⁶ nopa tacat cati quimocuitahuyaya altepet sempa quitac para seyoc motalojtihuayaya huan nojquiya iseli, huajca quitzajtzi cati quimocuitahuyaya caltemit ipan tepamit:

—Seyoc tacat motalojtihuaya iseli.

Huan Tanahuatijquet David quicajqui huan quijto:

—Huelis quihualica se cuali camanali.

²⁷ Huan nopa tachixquet quijto:

—Cati tayacana motalohua senijqui Ahimaas, icone Sadoc.

Huan David quinanquili:

—Ahimaas yaya se cuali tacat huan temacht quihualica cati cuali.

²⁸ Huan Ahimaas ajsico campa itztoya Tanahuatijquet David huan mohuijtzonqui hasta talchi, huan quitajpalo huan quiilhui:

—Ma tijtascamatica TOTECO yaya cati moDios pampa mitzmanahuijtoc inimaco mocualancaitacahua cati momatanantoyaj para mitztehuise.

²⁹ Huan Tanahuatijquet David quiilhui Ahimaas:

—¿Quenicatza itztoc Absalón?

Huan ya quinanquili:

—Amo nijmati, pampa quema Joab techtitanqui niqunitac miyaqui motananayayaj, pero amo nijmatqui taya panotoc.

³⁰ Huajca Tanahuatijquet David quiilhui:

—Ximochiya huan ximoquetza nozona.

³¹ Huan ipan nopa talojtzi ajsico nopa tacat ten tali Etiopía huan quiilhui Tanahuatijquet David:

—Nijhualica se cuali camanali. Toteco mitzmanahuijtoc ten nochi mocualancaitacahua.

³² Huan nopa tanahuatijquet quitatzintoquili:

—¿Itztoc cuali notelpoca Absalón?

Huan nopa tacat quinanquili:

—Nelcuali elisquía sinta nochi mocualancaitacahua cati teipa motananase mocahuase mictoque quej ama panoc ica Absalón.

³³ Huan nopa tanahuatijquet tahuel moyoltequipacho huan tejcoc ipan icuarto itzompac nopa caltemit huan tahuel mochoquili. Huan quijtojtiya-
jqui: “Nocone Absalón, nocone Absalón. Nipaquisquía sinta na nimictosquía quej mopataca.”

19

Joab Quiyoltali David

¹ Huan quiilhuitoj Joab para Tanahuatijquet David tahuel motequipa-
chouayaya huan quichoquiliyaya icone, Absalón. ² Huan nochi nopa
tacame químatque para David tahuel mocuesohuayaya, huajca injuanti
nojquiya tahuel mocuesojque. ³ Huan nochi nopa soldados calajque ipan
nopa altepet itxatcatzi huan ica pinahualisti quej mochololtijtosquía ipan se
tatehuilisti. ⁴ Huan nopa tanahuatijquet moixtzajqui huan chocayaya chic-
ahuac huan quijtohuayaya: “Absalón nocone, Absalón nocone, nocone.”

⁵ Huan Joab hualajqui quiiitaco Tanahuatijquet David huan quiilhui:

—Tanahuatijquet, ama tahuel techpinahualtjtoc nochi cati
timitztequipanohuaj. Tojuanti timitzmanahuilijtoque monemilis ten
mocualancaitacahua huan tiquinmanahuijtoque moconehua, huan nochi
mosihuajhua huan moompaca sihuajhua. Huan ama ta techchihua quej
tijchijosquía se hueyi tajtacoli. ⁶ Tiquinicnelía cati mitzcualancaitaj
huan tojuanti cati timitzicnelíaj, techcualancaita. Technextilijtoc ama
para amo teno topati moixpa huan achi más tipactosquía sinta nochi
techmictijtosquía huan san Absalón itztosquía. ⁷ Na nimitzilhuía monequi
xiquisa huan xiquinyolchicahua mosoldados pampa sinta amo tijchihuas,
temacht amo mocahuas yon se ten injuanti ni yohuali mohuaya. Huan
sinta nochi mitzcajtehuase elis más fiero que nochi nopa tequipacholi cati
mitzajsihualajtoc ipan nochi monemilis hasta quemá ticonetzi tieliyaya
huan hasta ama.

⁸ Huajca David quisqui huan mosehui campa caltemit ten nopa altepet,
huan nochi nopa soldados huan altepet ehuan quicajque para Tanahuatij-
quet David mosehuijtoya campa nopa caltemit. Huajca nimantzi hualajque
nochi injuanti quiiitacoj huan David quinseli ica yejyetzzi. Huan nopa
israelitame cati itztoyaj ihuaya Absalón cholojque hasta ininchajhaj.

David tacuepili altepet Jerusalén

⁹⁻¹⁰ Huan campa hueli ipan tali Israel ica huejcapa israelitame
mocamanalhuiyayaj huan quijtohuayayaj: “David techmanahuijtoc
ten toculancaitacahua nopa filisteos, pero quemá tijtalijque Absalón
quej totanahuatijca, ya quiquixti David. Pero ama mijqui Absalón ipan
tatehuilisti. Huajca ¿para ten tijchiyaj? ¿Para ten amo tiquilhuía David para
ma huala para sempa elis totanahuatijca?”

11 Huan quicajqui Tanahuatijquet David, huan huajca quititanqui se ma quinilhuiti ni camanali Sadoc huan Abiatar nopa totajtztzi cati eliyayaj tayacanani ipan tali Judá ica tatzinta. Quinilhui: “Xiquincamanalhuica nopa huehue tacame ipan tali Judá huan xiquintatzintoquilica para ten amo technotztoque para ma nihuala para sempa nielis tanahuatijquet huan niitostos ipan nocaltanahuatil ipan tali Judá. Pampa nochi israelitame cati itztoque ica huejcapa quinequij sempa ma nieli inintanahuatijca huan san amojuanti ayemo teno anquijtohuaj. 12 Xiquinilhuita nopa tali Judá ehuan para injuanti noicnihua huan san se tonacayo huan foeso. Amo quinamiqui technotzase hasta teipa para ma nitacuepili ipan nohaj ipan intal. 13 Nojquiya xiquilhuica Amasa cati eliyaya tayacanquet ten isoldados Absalón para nijtalis para quinyacanas nosoldados huan amo Joab, pampa Amasa nomachcone. Xiquilhuica ma Toteco Dios techtatzacuilti sinta amo nijchihuas cati niquilhuijtoc.” Quej nopa quijto David.

14 Huan quema Amasa cati achtohuia quinyacanqui isoldados Absalón quicajqui para quichihuas David itayacanca ten nochi isoldados, huajca pejqui quinyoltalia nochi israelitame ipan tali Judá para ma quinzaca David. Huan ica san se iniyolo quintitanqui ma quilhuitij David huan nochi cati ihuaya itztoyaj ma tacuepilica ipan Jerusalén. 15 Huajca Tanahuatijquet David quistejqui ica imasehualhua para tacuepilise Jerusalén, huan quema ajsitoj campa quixcotonase hueyat Jordán, nesiyaya quej nochi tali Judá ehuan san sejco hualajtoyaj tali Gilgal para quinamiquise David huan quej nopa san sejco panose ipan hueyat.

16 Huan Simei, nopa tacat cati achtohuia quisqui ipan altepet Bahurim huan quitelchijqui David ama moisihuiliti huan quinamiquico. Huan hualajqui inihuaya nochi nopa israelitame ten tali Judá. Huan Simei cati eliyaya icone Gera huan se iixhui Benjamín, 17 quinhualicayaya se mil tacame cati nojquiya iixhuihua Benjamín. Huan nojquiya ihuaya Simei hualayaya Siba cati achtohuia elqui itequipanojca Tanahuatijquet Saúl huan quinpixqui 15 iconehua huan 20 itequipanojcahua. Huan nochi injuanti ajsitoj achtohui ipan hueyat Jordán, 18 huan tequitique chichahuac para quinpanoltijque nochi ichaj ehuan David ipan hueyat Jordán. Huan miyac hueltas quiixcotonque hueyat Jordán para Tanahuatijquet David ma quiita quenicatza injuanti cuali quitequipanohuayaj. Huan quema Tanahuatijquet David quixcotonasnequiyaya nopa hueyat, Simei mohuijtzonqui talchi iixpa, 19 huan quilhui:

—Amo techtajtacolti por nopa fiero tamanti cati nijchijqui quema tiquisayaya Jerusalén. Techtapojpolhui huan ayecmo xiquelnamiqui nochi cati nimitzchihuili. 20 Nijmati para tahuel hueyi notajtacol ica ta, huan yeca ama nihualajqui achtohui ten nochi Israel ehuan * para nimitzseliqui.

21 Huan Abisai huan iicni cati eliyayaj iconehua Sarvia quilhuijque Tanahuatijquet David:

—¿Amo tijniqui ma tijmictica Simei pampa mitzelchijqui ta cati TOTECO mitzapejpenijtoc?

22 Huan David quinnanquili:

—¡Amo! Amo quinamiqui para aniconehua Sarvia antechilhuise ma nijchihua cati fiero. ¿Para ten monequi miquis se ipan total Israel? Na nitanahuatijquet ipan Israel huan niqijtohua amo aquí tijmictise.

23 Huan teipa David quitachili Simei huan quilhui:

—Amo ximomajmatí, amo timiquis.

* 19:20 19:20 O iixhuihua José.

²⁴ Huan nojquiya Mefi Boset quinamiquico Tanahuatijquet David, ya cati iixhui mijcatzi Saúl. Huan Mefi Boset amo moicxipajpactoya, yon amo maltijtoya, yon amo motentzonxintoya, yon amo quipatatoya iyoyo hasta quema David quisqui, huan hasta ama quema ajsitihualayaya ica paquilisti ipan Jerusalén. ²⁵ Huajca David quiilhui:

—Mefi Boset, ¿para ten amo tiyajqui nohuaya?

²⁶ Huan Mefi Boset quinanquili:

—Ay notanahuatijca, Siba notequipanojca nechcajcayajqui. Na nij-nahuati ma quisiyajti se burro huan ma techhualiquili para ipan nitejcos para niyas mohuaya, pero nechcajcayajqui huan nechcajtejqqui noselti. Tijmati para nimetzcuacho ipan nochi ome nometz. ²⁷ Huan ama techistac-ahuijtoc moixpa pampa mitzilhuijtoc para amo nijnejqui niyas mohuaya, pero amo cana. Pero ta titanahuatijquet, tijmati nochi quej tielisquía tiilhuicac ejca Toteco Dios. Huajca xijchihua cati tiquita para quinamiqui ica tojuanti. ²⁸ Pampa tojuanti cati tiichaj ehuani Saúl san quinamiquiyaya techmictijtosquía. Pero techicnelijtoc huan hasta technotzqui para ma niitzto mochaj huan ma nitacua mohuaya mojmosta. Amo teno quinamiqui nimitztajtani más.

²⁹ Huan David quinanquili:

—Amo monequi ticamanaltis más. Ma eli quej niquijtojtoc para Siba huan ta annotajcoxelhulise nopa tali.

³⁰ Huan Mefi Boset quinanquili:

—Más cuali nochi ma mocuili ya. Na nipaqui miyac san pampa titacuepil-ijtoc ica cuali ipan mocaltanahuatil.

³¹ Huan nojquiya nopa huehue tacat Barzilai hualajqui ten altepet Rogelim ipan tali Galaad huan quipanoc hueyat Jordán hasta seyoc nali ihuaya Tanahuatijquet David. ³² Huan Barzilai ya eliyaya huehuentzi. Quipiyayaya 80 xihuit. Yaya quimacayaya David huan imasehualhua nochi ten ica panose quema mochahuayayaj ipan altepet Mahanaim pampa nelía quipiyayaya tomi. ³³ Huan Tanahuatijquet David quiilhui:

—Nijnequi xiya nohuaya ipan altepet Jerusalén huan nimitzmocuitahuis.

³⁴ Huan Barzilai quinanquili:

—Na ayecmo nihuejcahuas para niitztos. ¿Para ten niyas Jerusalén san para nimitztequimacati? ³⁵ Ama ya nijpiya 80 xihuit. Ayecmo hueli nijmati sinta ajhuiyac cati nijcua huan cati níqui. Ayecmo hueli niquinaquili cuali nopa tacame huan sihuame cati huicaj. Huajca ¿para ten nimitzohuijmacati?

³⁶ Na nihualajtoc san para nimitzmacahuaqui nica campa hueyat Jordán. Huajca ¿para ten techtencahuilía ni hueyi tamanti? ³⁷ San techcahuili nitacuepilis ipan noaltepe huan nimiquis nepa campa notatahua mijque, huan nimotalpachos campa inijuanti motalpachojque. Pero nica itztoc nocone Quimam. Ma yahui mohuaya huan xijchihua cati tiquita para cuali.

³⁸ Huan Tanahuatijquet David quiilhui:

—Cualtitoc, ma yahui nohuaya Quimam huan nijchihuulis cati nimitzchi-huillijtosquía ta. Huan nochi cati tijnequi techtajtani para nimitzchihuulis, nijchihuás.

³⁹ Huan quema David huan nochi imasehualhua tamipanoque ipan hueyat Jordán, David quitzoponi Barzilai huan quitiocnijqui. Huan Barzilai yajqui ichaj. ⁴⁰ Huan David nejnentiyajqui hasta altepet Gilgal. Huan ihuaya yajqui Quimam huan nochi nopa tali Judá ehuani huan nechca tajco nopa masehualme ten tali Israel. ⁴¹ Huan nochi nopa israelita tacame

cati hualajque ten tali Israel ica huejcapa cualanque huan yajque quiitatoj Tanahuatijquet David huan quiilhuique:

—¿Para ten san nopa israelita tacame ten tali Judá ica tatzinta quinpanolti-
jque nochi mochan ehuani huan nochi amotamantzitzi ipan hueyat Jordán?

⁴² Huan nochi nopa tacame ten tali Judá tananquiliqque:

—Tojuanti tijchijque nochi pampa ni tanahuatijquet huala ipan san se
tohueyi familia ica tojuanti. Yaya iixhui tohuejcapan tata Judá quej tojuanti.
¿Para ten ancualanij ica ya ni? Amo tijtajtanjitoque ma techtaxtahui, yon
amo techtamacac.

⁴³ Huan nopa israelitame ten tali Israel ica huejcapa tananquiliqque:

—Tojuanti achi más toaxca Tanahuatijquet David huan amo amojuanti,
pampa tijpiyaj majtacti huejhueyi familias ipan total, huajca majtacti huelta
más toaxca. Huan achtohui tojuanti tijnotzque para ma tacuepili ipan ichaj
huan amo amojuanti. ¿Para ten techcualancaitztoc huan techiyocacajtoc?

Huan quej nopa monajnanquiliqque, pero nopa israelitame cati tali Judá
ehuani camanaltiyayaj más fiero que nopa tali Israel ehuani.

20

Seba mosisini ica David

¹ Huan ipan nopa tonal itztoya nozona se tacat cati eliyaya fiero inemilis
cati itoca Seba cati eliyaya icone Bicri ipan nopa hueyi familia Benjamín.
Huan yaya quipitzqui tapitzali huan quinilhui nopa israelitame ten tali
Israel:

“AnIsrael ehuani, xiyaca amochajchaj.

Ni David cati icone Isai amo totanahuatijca.

Amo teno tijselise nica.

Ma tiyaca tochajchaj ipan total.”

² Huan ipan nopa tonali nochi israelitame ten tali Israel ica huejcapa
quicajtejque David huan quitoquiliqque Seba, icone Bicri. Pero nopa israeli-
tame ten tali Judá ica tatzinta mocajque ihuaya, huan nejnenque ihuaya ten
nopa hueyat Jordán hasta Jerusalén.

³ Huan David ajsito ipan icaltanahuatil, huan tanahuati ma quinpanoltica
ipan seyoc cali nopa majtacti iompaca sihuajhua cati quincajtoya para
quimocuitahuse icaltanahuatil. Huan David quintali tetequipanohuani
para quinmocuitahuse huan mojmosta quinmacayaya inintacualis, pero
ayecmo cochqui inihuaya. Nozona mocajque tzactoque iyoca ten nopa
tanahuatijquet quej cahual toahuime hasta quema mijque.

Joab quimicti Amasa

⁴ Huan Tanahuatijquet David quinahuati Amasa cati achtohui elqui taya-
canquet ten isoldados Absalón huan quiilhui:

—Xiquinnotzati nochi nopa soldados ten tali Judá para ipan eyi tonati
monequi ma mosentilica huan ma monextica nica noixpa. Huan ta nojquiya
monequi timonextis.

⁵ Huajca Amasa yajqui para quinsentilis nochi nopa soldados ten tali
Judá, pero amo huelqui tacuepili ipan nopa tonal quema mocajtoya para
tacuepilis. ⁶ Huan Tanahuatijquet David quiilhui Abisai:

—Xiquinsentili nochi nosoldados cati nica mocahuaj huan xijtoquili Seba,
pampa huelis techchihuulis más fiero que Absalón. Huan sinta calaquis ipan
se altepet tzactoc para motatis, elis ohui para tijpantise.

⁷ Huajca Joab ica isoldados cati achi más tapeppenilme huan cati
quimocuitahuyayaj nopa tanahuatijquet quisque Jerusalén ica Abisai para

quitemotij Seba. ⁸ Huan quema injuanti monechcahuiyayaj campa eltoya se hueyi tet ipan altepet Gabaón, monamijque ihuaya Amasa cati quinsen-tiliyaya isoldados David quej quiilhui. Huan Joab quihuicayaya iyoyo cati nochipa quitequihuyaya ipan tatehuilisti huan motzinquechilpitoya ica se cinturón cati quiipiyaya campa quiajocuiyaya imacheta ipan icuetax cati amo ohuijti para quiquixtía. Huan quema monechcahui campa Amasa huan mohuijtzonqui, huetzqui imacheta huan quitilanqui. ⁹ Huan Joab quiilhui Amasa:

—¿Tiitztoc cuali, noicni?

Huan quiitzquili itentzo Amasa ica inejmat para quitzoponisquía.

¹⁰ Huan Amasa amo moilhui taya quichihuilisquía Joab. Huan Joab quicalaquili iijtico nopa macheta huan quicuetaxcolquixti. Huan nimantzi mijqui Amasa huan nozona mocajqui huetztoc itacayo. Huan Joab huan iicni, Abisai, nimantzi quistejque para quitemotij Seba. ¹¹ Teipa se isoldado Joab moquetzqui campa eltoya itacayo Amasa huan quiijto:

—Cati itztoc ihuaya David ma quitoquilica Joab para quitemotij Seba.

¹² Huan Amasa espoltic huetztoya tajco ojti huan nochi cati panoyayaj moquetzayayaj huan quitachiliyayaj. Huan nopa soldado quiitac para nochi moquetzayayaj nozona, huajca quiijcueni itacayo huan quiixtzajqui ica se yoyomit. ¹³ Huan teipa nochi quitoquilijque Joab.

¹⁴ Huan Seba panoc ipan nochi nopa altepeme ipan tali Israel. Yajqui ipan altepet Abel Bet Maaca hasta ipan nochi inintal ifamilia Barim. Huan miyac mosentilijque ihuaya huan quitoquilijque. ¹⁵ Huan ajsicoj Joab huan nochi isoldados David hasta altepet Abel Bet Maaca, huan quiyahualojque nopa altepet huan quimontonojque tet para huelis panose iixco nopa achtohui tepamit. Teipa pejque quisosolohuaj nopa seyoc tepamit cati más tatajco ipan altepet. ¹⁶ Huan se sihuat cati talnamiqui cuatzajtzc ipan nopa altepet huan quiijto:

—Techcaquica, xiquilhuica Joab para nijnequi nijcamanalhuis.

¹⁷ Huan quema Joab monechcahui, nopa sihuat quitatzintoquili:

—¿Ta tiJoab?

Huan Joab quinanquili:

—Quena.

Huan ya quiilhui:

—Xijtacaquili cati nimotequipanojca nimitzilhuis.

Huan Joab quiijto:

—Cualtitoc.

¹⁸ Huajca nopa sihuat quiijto:

—Huejcajquiya nochi momatque quiijtohuaj: ‘Cati quinequi quimatis se tenijqui ma tajtani consejo ipan altepet Abel’, huan quej nopa mosenc-ahuayaya nochi cualanti, pampa toaltepe quinpiyayaya masehualme cati talnamiquij. ¹⁹ Na niitztoc inihuaya cati quinequij para ma onca tatepanita-cayot para totanahuatijca huan para tiitztose ica cuali. Huan ama ta tijnequi tijsosolos toaltepe cati ya tahuel miyac xihuit quiipiya. ¿Cuali para tijsosolos cati iaxca TOTECO?

²⁰ Huan Joab quinanquili nopa sihuat:

—Amo nijnequi nitasosolos. ²¹ Pero se tacat cati itoca Seba, icone Bicri huan cati huala ipan nopa cuatitamit ipan tali Efraín motanantoc para quitzontamiltis itanahuatilis Tanahuatijquet David huan yaya calactoc ipan ni altepet. Techmactili huan tijcahuase ni altepet.

Huan nopa sihuat quinanquili Joab:

—Cualtitoc, timitzmajcahuilise itzonteco ten ni tepamit.

²² Huan nopa sihuat ica miyac talnamiquilisti yajqui huan quincamanalhui nochi nopa altepet ehuani. Huan inijuanti quitzontejque itzonteco Seba, icone Bicri, huan quimajcahuilijque Joab. Huan Joab quipitzqui nopa tapitzali para ayecmo ma tatehuica isoldados. Huan quicajque nopa altepet, huan nochi tacuepilijque ininchajchaj. Huan Joab yajqui ipan altepet Jerusalén campa itztoya Tanahuatijquet David.

Itequipanojcahua David

(2 S. 8:15-18; 1 Cr. 18:14-17)

²³ Huan Joab quinnahuatiyaya nochi israelita soldados. Huan Benaía cati elqui icone Joiada quinnahuatiyaya nopa soldados cati más tapejpenilme cati quimocuitahuayaj nopa tanahuatijquet huan motalohuayayaj ica camanali. ²⁴ Huan Adoram quinnahuatiyaya nopa tacame cati monequiyaya tequitise se quesqui tonati san tapic para quitaxtahuise impuestos nopa tanahuatijquet. Huan Josafat, icone Ahilud, eliyaya cati quiijcuilo sesen tamanti cati panoc ipan itanahuatilis David mojmosta. ²⁵ Huan Seba elqui itajcuilojca, huan Sadoc huan Abiatar eliyaya totajtztzi. ²⁶ Huan Ira, ten pilaltepetzi Jair, nojquiya eliyaya totajtzi, pero mocajqui san ica David.

21

Eyi xihuit ten mayanti

¹ Ipan nopa tonali quema David eliyaya tanahuatijquet oncac se hueyi mayanti, huan quej nopa elqui eyi xihuit. Huan David motatajti ica TOTECO huan quitatzintoquili: “¿Ajquiya itajtacol para hualajtoc nopa mayanti?”

Huan TOTECO quilhui: “Hualajtoc por itajtacol Saúl huan ichaj ehuani cati quinpacki temictiáj, huan yeca quinmictijque nopa gabaonita masehualme.”

² Huajca David quinnotzqui nopa gabaonitame cati noja itzttoyaj, huan camanaltic inihuaya. (Nopa gabaonitame amo eliyayaj israelitame. Inijuanti eliyayaj cati noja mocajque ten nopa amorreos. Huejcajquiya nopa israelitame quichijtoyaj se amatajcuiloli inihuaya para amo quinmictisquíaj. Pero Saúl, quena, quinmicti sequij pampa quincualancaitayaya pampa amo israelitame. Amo ejque ipan tali Israel, yon ipan tali Judá.) ³ Huajca David quintatzintoquili nopa gabaonitame:

—¿Taya huelis nimechchiuilis para quentzi nimechcuepilis por nopa cati fiero amechchiuili Saúl? ¿Taya nimechmacas para antechtapojpolhuise tiisraelitame huan anquitañanise TOTECO ma techtiochihua sempa?

⁴ Huajca nopa gabaonitame quinanquilijque David:

—Amo tijnequij tomi, yon oro, yon plata, pampa Saúl amo techtahuiquilía ya nopa. Yon amo quinamiqui tipehuase tiquinmictise israelitame por itajtacol.

Huajca David quinhui:

—Huajca ¿techilhuica taya anquitañaj cuali ma nijchihua huan ya nopa nijchihuas?

⁵ Huan inijuanti quinanquilijque:

—Nopa mijcatzi Tanahuatijquet Saúl eliyaya nopa tacat cati quinequiyaya techtamimictis para yon se ten tojuanti amo mocajtosquía tiyoltoque ipan nochi tali Israel. ⁶ Huajca techmaca chicome iixhuihua ya. Huan tiquincaupilose miyacapa iixpa TOTECO ipan Gabaa cati eliyaya ialtepe Saúl, yaya cati TOTECO achtohui quitapejpeni para elis tanahuatijquet.

Huajca David quinhui:

—Cualtitoc, nimechmacas.

⁷ Pero Tanahuatijquet David amo quinmacac Mefi Boset, icone nopa mijcatzi Jonatán huan iixhui nopa mijcatzi Saúl, pampa ica mocajtoya Jonatán iixpa TOTECO para quinmocuitahuis iconehua. ⁸ Huajca David quintzqui ome tacame cati eliyayaj iixhuihua Saúl, se itoca Armoni huan seyoc cati nojquiya itoca Mefi Boset. Pero ininana eliyaya Rizpa, iichpoca Aja, se iompaca sihua Saúl. Huan David nojquiya quintzqui seyoc macuulti iixhuihua Saúl cati eliyayaj itelpocahua iichpoca Saúl cati itoca Mical, huan inintata elqui Adriel, cati eliyaya icone Barzilai nopa meholatita tacat. ⁹ Huan David nochi quinmactili nopa gabaonitame, huan injuanti quincuapilojque ipan se tepet iixpa TOTECO. Huan nochi chicome mijque ica sempa quema masehualme sanoc pejtoyaj quipixcaj cebada.

¹⁰ Huan Rizpa, iichpoca Aja, quicuito se yoyomit cati fiero huan quipatajqui ipan se hueyi tet nechca campa quincuapilojtoyaj itelpocahua huan nopona mocajqui. Huan amo quincahuili totome ma monechcahuica tonaya campa inintacayohua, yon tapiyalme ma monechcahuica ica tayohua. Huan quej nopa quichijqui ten quema pejqqui pixcaj huan hasta quema pejqqui taquiyahui huan nochi quimachilijque para nopa tali ayecmo quihucayaya tajtacoli iixpa TOTECO.

¹¹ Huan quiyolmelajque David para Rizpa, cati eltoya se iompaca sihua Saúl, quinmocuitahuiyaya inintacayo itelpocahua, ¹²⁻¹⁴ huajca David tanahuati ma quintalpachoca ipan altepet Zela ipan tali Benjamín campa quitalpachojque Cis, itata Saúl. Huan nojquiya David tanahuati ma quicuitij iniomiyohua Saúl huan Jonatán. Nopa tacame ipan altepet Jabes Galaad quiihetejque iniomiyohua Saúl huan Jonatán ipan tianquis ipan altepet Bet Sán campa nopa filisteos quincuapilojtoyaj quema quinmictijque ipan tatehuilisti nepa Gilboa. Huan David tanahuati para ma quihucaca iniomiyohua Saúl huan Jonatán huan quitalpachose inihuaya iniixhuihua. Huan nochi mochijqui quej Tanahuatijquet David tanahuatijtoya. Huan sempa pejqqui quinnanquilia TOTECO quema nopa israelitame quitajtaniyayaj se tenijqui huan tanqui nopa mayanti.

Tatehuilisti ica nopa filisteos

¹⁵ Huan se tonali quema nopa filisteos sempa quisque para quintehuse israelitame, yajqui David inihuaya nochi isoldados. Huan quema quintehuiyayaj, David nelía siyajqui. ¹⁶ Huan ajsico se filisteo tacat huejcapantic cati itoca eliyaya Isbi Benób. Eliyaya se iniixhui nopa masehualme cati tahuel huejcapantique. Huan quihualicayaya icuachoso cati quipiyayaya 30 kilos ietica huan imacheta yancuic cati oncac tatentili. Huan monechcahui para quimictis David. ¹⁷ Huan Abisai, itelpoca Sarvia, quipalehuico David huan quimicti nopa filisteo. Huan teipa nochi isoldados David quiihujijque ma ayecmo quisas inihuaya ipan se tatehuilisti. Quiijtojque sinta ya miquis, elis quej sehuis nopa taahuili ipan tali Israel. Huajca David ayecmo yajqui ipan tatehuilisti.

Quintehujque nopa huejcapantique tacame (1 Cr. 20:4-8)

¹⁸ Huan teipa quema panoc tonali, sempa oncac seyoc tatehuilisti ica nopa filisteos ipan tali Gob. Huan Sibecai, se husatita tacat, quimicti Saf cati nojquiya huejcapantic pampa elqui se iniixhui injuanti cati tahuel huejcapantique. ¹⁹ Huan nojquiya seyoc huelta oncac seyoc tatehuilisti ipan Gob ica nopa filisteos huan Elhanán, icone Jaare Oregim, ten altepet

Belén quimicti seyoc Goliat ten altepet Gat cati nojquiya huejcapantic huan quihuicayaya icuachoso cati tomahuac.

²⁰ Huan oncá seyoc tatehuilisti ipan altepet Gat huan itztoya nozona se tacat cati nelía huejcapantic cati quipiyayaya 12 imacpilhua huan 12 ixocpilhua, chicuase ipan sese imax, huan chicuase ipan sese iicxi. Huan ya nojquiya eliyaya icone se masehuali cati tahuel hueyi. ²¹ Huan quinhuetzquili israelitame, huan huajca se tacat itoca Jonatán quimicti. Yaya eliyaya icone Simea, iicni David. ²² Huan nochi ni nahui huejhueyi tacame eliyayaj iniixhuihua nopa huejcapantique masehualme ipan altepet Gat. Huan nochi mijque inimaco David huan isoldados.

22

Nopa huicat cati David quiijcuilo (Salmo 18)

¹ Huan ya ni eltoc nopa huicat cati David huicac para TOTECO pampa quinmanahuijtoya ten nochi icualancaitacahua huan ten Saúl. ² Quiijto: “TOTECO, ipan ta nimotatía.

Ta cati techmanahuía.

Eltoc quej nielisquía calijtic ipan se cali ica tepamit cati tilahuac campá amo teno hueli nechajsis.

Ta tinotemaquixtijca.

³ NoTeco Dios, ta techyahualohua para amo huelis techajsis nocualancaitacahua.

San ipan ta nimotemachis.

Ta cati techyahualohua para techmanahuis ten mosisinijca tacame.

NoTeco Dios, ipan ta nijmati nitemachti.

Tinotemaquixtijca.

Techmanahuía ten cati techmictisquía.

⁴ Nijnotzas, TOTECO, cati quinamiqui tijhueyichihuase.

Huan yaya techmaquixtis ten nocualancaitacahua.

⁵ Quema nochi techyahualtzacuayayaj para techmictise,

huan nijmatqui techtanisnequiyaya cati amo cuali, ica nochi ichichualis, nimitztajtzili.

⁶ Quema nijmatiyaya nimiquisquía huan techtilanayaya campá mijcatzitzi, huan nimoixnamiquiyaya ica miqilisti,

⁷ huajca ipan notaohuijcayo nijnojnnotzqui TOTECO.

Quena, nijtjajtzili noTeco Dios ma techpalehui.

Huan yaya techtacaquili hasta nepa ipan ilhuicac.

Quena, quitacaquili cati niquilhui,

huan techpalehui.

⁸ Huajca chichahuac mojmolini tali,

huan nojquiya molini ilhuicacti campá motatzquijtoc.

Nochi mohuihuixojque pampa Toteco Dios cualanqui ica nocualancaitacahua.

⁹ Elqui quej pocti quisayaya ipan iyacatzol.

Huan icamaco quisayaya tilelemecti cati tetzontamiltiyaya.

Quena, elqui quej lemeniyaya miyac ticuahuit, pampa tahuel cualantoc.

¹⁰ Huan TOTECO quiechcapano ilhuicacti huan hualtemoc para techpalehuis.

Nejnentihualajqui ipan mixti cati nelyayahuic.

¹¹ Elqui quej TOTECO tejcoc ipan ieltapal se querubín ilhuicac ejquet huan patantihualajqui ajacatipa.

12 Yaya motzajqui ica tzintayohuilot,

huan at quiyahualo para amo aqui quiitasquía.

13 Cahuaniyaya itatanex TOTECO huan elqui quej tapetaniyaya iixpa.

Huan itatanex lemeniyaya quej ticuahuit.

14 Tatomonqui nelía chicahuac ten ilhuicac huan ajsic campa hueli,

pampa TOTECO Cati Más Hueyi camanaltic.

15 Quimajcajqui cuataminti huan nocualancaitacahua cholojque campa hueli.

Tahuel tapetanalti huan quitamisosolo.

16 Quema yaya tailpitzqui ica cualanti,

quixexelo nopa hueyi at cati tahuel huejcata,

huan nopa ojme cati eltoc atatzinta monexti.

Huan nesqui tanemijya nochi itzinpehualtil ni taltipacti,

pampa TOTECO teajhuac chicahuac.

17 TOTECO momaxitajqui ten ilhuicac huan techitzqui.

Techmaquixti quema nimisahuiyaya ipan miyac at.

18 Techmanahui ten nocualancaitacahua cati más tetique.

Techmaquixti ten injuanti cati techcualancaitayayaj,

huan cati techpanoyayaj ica ininchicahualis.

19 Injuanti nechtehuijque quema nechajsitoya se hueyi tequipacholi.

Pero TOTECO nechpalehui huan nechtali campa temachtli.

20 Techhuicac campa amo mahuilili.

Techmaquixti pampa techicnelía.

21 TOTECO techtaxtahuijtoc pampa nijchihua cati xitahuac iixpa.

Techpalehui pampa quiitac para amo teno nijchijtoya.

22 Quena, nijtoquilihtoc iojhui TOTECO,

huan amo nijcajtoc.

Amo nijcajtejtoc noTeco Dios para nijtoquilis cati amo cuali.

23 Niquixmati itanahuatilhua,

huan amo quema nimohuejcatelijtoc ten cati quijtohua.

24 Ninejntoc xitahuac iixpa,

huan nimomocuitahuijtoc para amo nitajtacolchihuas.

25 Yeca TOTECO techtaxtahuijtoc,

pampa nijchijtoc cati xitahuac.

Techtiochijtoc pampa techitztoc para nitapajpacti iixpa.

26 Ta, TOTECO tiquintasoja cati tetasojtaj.

Tiquinchiuilía nel xitahuac cati nejnemi xitahuac.

27 Timonextía titapajpactic ica cati tapajpactic.

Pero timonextía tahuel tichicahuac ica injuanti cati fiero inintalnamiquilis.

28 Ta tiquinmaquixtía cati mocuesohuaj,

pero tiquintachilía masehualme cati mohueyimatij, huan tiquinicnotalía.

29 TOTECO, tinothahuil.

Techtaahuilía ipan tzintayohuilot.

30 Ica mochicahualis Toteco Dios huelis niquintanis miyac soldados cati

nocualancaitacahua.

Huelis nihuitonis para nipanós iixco nopa tepamit ipan inialtepe.

31 Xitahuac nochi iojhui Toteco Dios.

Nochipa quisa melahuac cati quijtohua icamanal TOTECO.

Yaya quinmanahuía nochi cati motemachíaj ipan ya.

32 Amo aqui seyoc Dios,

san yaya TOTECO.

Amo aqui seyoc quipiya tetili para techmanahuis quej Toteco Dios.

³³ Yaya Toteco Dios cati techchicahualismaca.

Quichihua temachti noojhui.

³⁴ TOTECO quichihua noicxihua ma elica sonectzitzí.

Quinchihua temachti quej inícxí chivojme cati motalohuaj campa tepeixco. Techtalijtoc huejcapa huan niya ica temachili.

³⁵ TOTECO techmaca noyajatil para huelis nitatehuis.

Nechfuerzajmaca hasta ica nomax huelis nijcuilpachos se tepos huitoli cati tetit cati quichijtoque ica bronce.

³⁶ Ta techmanahuía quej se teposti cati techyahualohua.

Quena, techmaquixtía huan ica motaicnelil techhueyichijtoc.

³⁷ Noojhui tijchijtoc patahuac para amo niohuijtis, huan para amo nimopeyahuas quema ninejnemis.

³⁸ Niquintoquili nocualancaitacahua, huan niquintzontamilti.

Amo nitacuepili hasta nochi niquinmicti.

³⁹ Niquintzontamilti nochi para amo aqui huelis sempa motananas. Inijuanti huetzque noicxita.

⁴⁰ Ta techmacac tetili para huelis nitatehuis.

Ta techtanilijtoc nocualancaitacahua huan mocajtoque noicxita.

⁴¹ Huan ta tijchijqui para nochi nocualancaitacahua ma choloca noixpa. Niquintzontamiltijtoc nochi cati techcualancaitayayaj.

⁴² Inijuanti tatzajtzilijque para acajya ma quimaquixtíqui, pero amo aqui quinpalehui.

Hasta nojquiya quitajtanijqe TOTECO ma quinpalehui, pero amo quintacaquili.

⁴³ Huaaja na niquinchijqui quej taltepocti.

Niquintajyohuulti huan ininpani nimoquejquetzqui quej soquit ipan ojti.

⁴⁴ Techmanahuijtoc ten nopa fiero tacame cati mopantíaj ipan noaltepe.

Techtalijtoc para ica temachili nielis niinintanahuatijca miyac talme.

Ama techtequipanohuaj masehualme cati ehuaní ipan talme cati achtohuiya amo niquinixmatiyaya.

⁴⁵ Huan cati ehuaní ipan sequinoc talme huihuipicaj noixpa.

Techneltoquilíaj quema quicaquij ten nochicahualis.

⁴⁶ Sequinoc tali ehuaní momajmatíaj,

huan quisaj ten campa motatijtoque,

huihuipicatihualahui noixpa.

⁴⁷ TOTECO itztoc.

Ma tijpaquilismacaca yaya ipan cati nimotatía.

Ma tijhueyichihuaca Toteco Dios,

pampa yaya cati techmaquixtía.

⁴⁸ Toteco Dios quincuepilía nochi nocualancaitacahua.

Quintantoc nochi altepeme huan quinchijtoc ma techtepanitaca.

⁴⁹ Quena, TOTECO techmanahuijtoc ten nocualancaitacahua.

Techtalijtoc más huejcapa que nopa tacame cati techajsisnequiyayaj.

Techmaquixtijtoc ten nopa tacame cati mosisiníaj ica na.

⁵⁰ Yeca nimitztascamati, TOTECO.

Nimitzhueyitalis iniixpa cati ehuaní ipan nochi talme.

Nimitzhuicatis ni huicat para nimitzpaquilismacas.

⁵¹ TOTECO, ta techmanahuijtoc huan techtalijtoc nimotanahuatijca.

Techtasojtatoc na, niDavid, cati ta techtapejpenijtoc.

Ta tiqintasojtas nochi noteipan ixhuihua para nochipa.”

23

Itamiya camanal David

¹ Ya ni itamiya camanal David:

“Na ni David, niicone Isaí, nicamanalti.

Na cati Toteco Dios techhueyitalijtoc.

Na cati techtapejpeni huan techchijqui nitanahuatijquet,

Toteco Dios, yaya cati i Dios tohuejcapan tata Jacob.

Na cati Toteco techmacac miyac huicac yejyetzitzi para tiisraelitame hueli ica tijpaquillismacase.

² Itonal TOTECO quitequihuía nocamac para ma ni quijto icamanal.

Toteco quichijqui para icamanal ma quisa nocamaço.

³ Yaya Toteco to Dios tiisraelitame nechcamanalhuijtoc.

Yaya cati ipan tiisraelitame timochiyaj techilhui:

‘Hualas se cati tanahuatis xitahuac campa masehualme.

Yaya techimacasis huan tanahuatis quej monequi.

⁴ Yaya elis quej nopa taahuili cati quisa cualca.

Elis quej quema taahuijtihuala tonati yejyetzzi ica ijnaloc quema amo onca yon quentzi mixti.

Yaya temacas paquulisti quej techmaca paquili para chamanis sacat ipan tali quema yancuic taquiyajtoc.’

⁵ Huan Toteco Dios quintapejpenijtoc nochaj ehuan cati teipa tacajtiyase para tanahuatise iixpa.

Huan nohuaya quichijtoc se camanal sencahuali para nochipa cati qui piya nochi cati mocajtoc ica na para techchihuilis teipa.

Nopa camanal sencahuali cati nohuaya quichijqui qui piya nochi tanahuatili cati monequi huan elis temachti para nochipa.

Temachti yaya quitamichijtiyas sesen tamanti cati techilhuijtoc quichihuas ica noixhuihua huan nochi quisas cuali para na.

Masque noja polihui para panos,

nijmati para se tonali panos nochi cati nijnequisquía ma onca pampa quej nopa noca mocajtoc.

⁶ Pero nochi cati amo quitepanitaj Toteco itztose quej huitzti cati tijcuatepehuaj huejca.

Amo aquí quinequis quinitzquis ica imax.

⁷ Huan sinta acajya quitzontequisnequis nopa huitzti,

monequi momapiquis huan quihuicas itepos cuatopil para amo quimachajcos.

Monequi quintatis ipan tit huan senquisa quitamiltis.”

Inintoca isoldados David cati más motemacayayaj.

(1 Cr. 11:10-47)

⁸ Ya ni inintoca nopa eyi tacame cati más tetique huan más motemacayayaj ten nochi isoldados David. Yaya cati más hueyi ten nopa eyi itoca Joseb Basebet cati ten Tacmon cati quinyacanqui nopa eyi. Ica icuatamin quinmicti 800 tacame ipan se tatehuilisti.

⁹ Nopa ompa hueyi soldado itoca Eleazar cati elqui icone Dodo huan iixhui Ahohi. Eleazar monexti para nelía motemacayaya quema san ni eyi tacame huan David mocajque para quintehuse nopa filisteos. Huan nochi sequinoc israelita soldados cholojque. ¹⁰ Huan Eleazar pejqui quinmictia filisteos ipan nopa tonali, huan quinmictijtiyajqui hasta tahuel siyajqui. Huan macuatiyaya hasta amo hueliyaya quimajcagua imacheta. Huan Toteco nelía quipalehui David huan nopa eyi soldados, huan yeca tahuel tatanque ipan nopa tonali. Huan teipa nopa sequinoc israelitame cati cholojtejtoyaj

tacuepilijqe san para quinquixtilise nopa filisteo soldados cati mictoyaj nochi cati ipati cati quihuicayayaj.

¹¹ Huan nopa expa hueyi soldado itoca eliyaya Sama, icone Age, ten altepet Harar. Se tonali mosentiljqe se hueyi pamit ten filisteo soldados para quintehuse israelitame campa itoca Lehi. Huan nochi sequinoc israelita soldados nozona cholojtejqe. ¹² Huan Sama moquetzqui tatajco se mili ten miyac lentejas huan iseli quintehui huan quimanahui nopa mili huan quinmicti miyac filisteos ipan nopa tonali. Tahuel quintanqui, pampa TOTECO quipalehui.

¹³ Se tonali quema pixquisti, nopa filisteo soldados mosentiljtoyaj ipan tamayamit Refaim huan campa hueli pixcayayaj. Nojquiya calactoyaj miyac filisteo soldados ipan altepet Belén, ¹⁴ huan huajca David mochahuayaya ipan nopa ostot nechca Adulam pampa más temachti. Huan nozona hualajque quipaxalocoj eyi soldados ten nopa 30 itayacanca soldados David cati más motemacayayaj. ¹⁵ Huan David quijto: “¡Nelía cuali elisquía para niquis se quentzi ten nopa cuali at ten ne ameli cati eltoc iteno nopa caltemit para calaquis ipan Belén!”

¹⁶ Huajca nopa eyi tacame cati nelmotemacayayaj quisque huan quiix-cotonque campa itztoyaj nopa filisteos huan quiquixtijque at ipan nopa ameli nechca altepet Belén huan quihuiquiljqe David. Huan ya mocueso ica cati quijtojtoya huan amo quic. San quitoyajqui talchi iixpa TOTECO quej se tacajahualisti. ¹⁷ Huan quijto: “TOTECO, ¿quenicatza niquisquía ni at? Elisquía quej niquisquía inieso ni tacame cati motemacaque para techcuilitoj, pampa huelis mictosquíaq san por cati niqijto.”

Quej nopa motemacayayaj ni eyi tacame cati quipaxalotoj David.

¹⁸ Huan Abisai, iicni Joab huan icone Sarvia, quinnahuatiyaya nopa 30 tacame cati más motemacayayaj ipan tatehuilisti. Se tonali iseli moix-namijqui ica 30 icualancaitacahua huan quinmicti ica icuachoso. Yeca ya nojquiya hueyi quej nopa achtohui eyi cati niqintocaxti para más motemacayayaj ten isoldados David. ¹⁹ Abisai eliyaya más hueyi que nopa 30 huan yeca mochijqui inintayacanca. Huan nochi quiixmatque Abisai para hueyi, pero amo eliyaya se ten nopa eyi cati más taixmatilme.

²⁰ Huan Benaía, icone Joiada, ten altepet Cabseel eliyaya se tacat cati tahuel motemacayaya. Ipan tali Moab quinmicti ome iconehua Ariel cati eliyayaj huejcapantique. Huan se tonali quema tasehuetziyaya quipanti se tecuani cati itoca león huan quimicti ipan se ostot. ²¹ Huan seyoc huelta Benaía quihuicayaya se cuahuit huan pejqui quitehuía se tacat huejcapantic ten tali Egipto huan nopa tacat quihuicayaya icuachoso huehueyac imaco. Huan Benaía quiquixtili icuachoso huan ica quimicti. ²² Tamanti quej ni quichijti-hualayaya Benaía, huajca nojquiya nochi quiixmatque para hueyi quej nopa eyi tacame pampa tahuel motemacaque. ²³ Pero amo eliyaya se ten inijuanti. Pero nopa 30 soldados cati tahuel motemacayayaj quitepanitaque miyac Benaía. Huan David quitequitali ma quinnahuati isoldados cati itztoyaj ihuaya ya para quimocuitahuise.

Nopa soldados cati más motemacayayaj

²⁴ Ipan nopa 30 soldados cati más motemacayayaj itztoyaj ya ni:

Asael, iicni Joab,

Elhanán, icone Dodo, ten altepet Belén,

²⁵ Sama ten altepet Harod,

Elica ten altepet Harod,

- ²⁶ Heles ten altepet Palti,
 Ira, icone Iques, ten altepet Tecoa,
²⁷ Abiezer ten altepet Anatot,
 Mebunai ten altepet Husah,
²⁸ Salmón ten altepet Ahoh,
 Maharai ten altepet Netofa,
²⁹ Heleb, icone Baana, ten altepet Netofa,
 Itai, icone Ribai, ten altepet Gabaa ipan inintal iixhuihua Benjamín,
³⁰ Benaía ten altepet Piratón,
 Hidai cati ehuyaya campa itaixtemolis Tepet Gaas,
³¹ Abi Albón ten altepet Arba,
 Azmavet ten altepet Bahurim,
³² Eliaba ten altepet Saalbón,
 Jonatán, se icone Jasén,
³³ Sama ten altepet Arar,
 Ahíam, icone Sarar, cati nojquiya hualajqui ten altepet Arar,
³⁴ Elifelet, icone Ahasbai, ten altepet Maaca,
 Eliam, icone Ahitofel, ten altepet Gilo,
³⁵ Hezrai ten altepet Carmel,
 Paarai ten altepet Arba,
³⁶ Igal, icone Natán, ten altepet Soba,
 Bani, ten altepet Gad,
³⁷ Selec ten altepet Amón,
 Naharai ten altepet Beerot (cati eliyaya itamocuitahuijca Joab, icone Sarvia),
³⁸ Ira ten altepet Itra,
 Gareb ten altepet Itra,
³⁹ huan Urías, nopa heteo tacat.

Huajca ica nochi eliyayaj 37 isoldados David cati más motemacayayaj para tatehuise.

24

David quinpohua nopa israelitame

(1 Cr. 21:1-17)

¹ Huan TOTECO sempa cualanqui inihuaya nopa israelitame, huan quichi-jqui David ma quinpohua nochi isoldados ipan itanahuatilis ipan tali Israel huan Judá. ² Huajca David quinquatuati Joab, nopa tayacanquet ten isoldados, quillhui:

—Xiya ipan nochi huejhueyi familias ten israelitame ten tali Dan ica huejcapa hasta altepet Beerseba ica tatzinta, huan xijtanana se censo para nijmatis quesqui tacame itztoque cati tetique para tatehuise.

³ Huan Joab quinquanquili David:

—TOTECO moDios ma mitzcahuili tiitztos miyac xihuit más para tiqitas quenicatza Toteco quinqmijaquilis mosoldados cien hueltas más que cati ama eltoc, pero amo quinquamiqui para timohueyimatis quema tijmatis para tahuel miyaqui mosoldados.

⁴ Pero Tanahuatijquet David amo quitacaquili huan amo quinchihuili cuenta nopa sequinoc tayacanani ten isoldados, huan quijjto para ma mochihua nopa censo. Huajca Joab huan nochi nopa tayacanani ten soldados quisque iixpa nopa tanahuatijquet huan yajque quiniyculotoj nochi nopa israelita tacame. ⁵ Huan achtohui quixcotonque hueyatl Jordán huan pejqque quiniyculohuaj tacame ipan altepet Aroer, huan teipa ipan nopa

altepēt cati eltoc tatajco nopa tamayamit, huan teipa yajque ipan altepeme Gad huan Jazer. ⁶ Teipa yajque ipan tali Galaad huan Cades ipan inintal nopa heteo masehualme, huan teipa ajsitoj ipan tali Dan ica huejcapa. Huan sempa quichijque se huela huan hualajque ipan pilaltepētzitzi nechca altepēt Sidón. ⁷ Huan teipa ajsicoj ipan altepēt Tiro huan ipan nochi nopa altepeme ten nopa heveo huan cananeo masehualme, huan para tamise ajsicoj ipan altepēt Beerseba ica tatzinta ipan tali Judá. ⁸ Huan quema tanqui chichnahui metzti huan 20 tonati para tajcuilojtinenque ipan nochi altepeme ten israelitame, inijuanti tanque inintequi huan tacuepiliijque ipan altepēt Jerusalén. ⁹ Huan Joab quihui Tanahuatijquet David quesqui tacame moijcuilojque. Huan ipan tali Israel eliyayaj 800 mil tacame cati noja tetique para tatehuse ica teposti huan ipan tali Judá 500 mil.

¹⁰ Teipa quema ya tantoyaj quitananaj nopa censo, David moyolcueso pampa quinpoytoya imasehualhua. Huajca motatajti ica TOTECO huan quihui:

—TOTECO, nitajtacolchijtoc miyac moixpa pampa niquinpojtoc nopa tacame. TOTECO, nimitztajtanía techtapojpolhui, pampa nieliyaya tahuel nihuihuiti para nijchihuas ni tamanti cati nijchijtoc.

¹¹ Huan ipan seyoc tonali ica ijnaloc Toteco quinojnotzqui itajtolpanex-tijca, Gad, cati Toteco quitequihuiyaya para quicamanalhuis David huan quihui: ¹² “Xiya huan xiquihuiti David para monequi ma quitapejpeni taya yaya quinequi ten ni eyi tamanti tatzacuiliti cati nijtencahuilía para nijchihuas.” ¹³ Huajca yajqui Gad campa ichaj David huan quihui:

—Monequi timoilhuis huan tijtapejpenis taya tatzacuiliti tijnequi, huan na nitacuepilis huan niquilhuis Tóteco cati techilhuis. ¿Tijnequi ma onca chicomex xihuit ten mayanti ipan nochi motal? O ¿tijnequi mocualancaitaca ma mitzquixitjinemi para eyi metzti huan ticholojtinemis iixpa? O ¿tijnequi para ma huala se hueyi cocolisti cati tahuel tamahua para eyi tonati ipan nochi motal?

¹⁴ Huan David quinanquili:

—Tahuel nimocuesohua. ¿Quenicatza huelis nijmatis catijqui más cuali para tojuanti? Ma tihuetzica imaco TOTECO huan tijselise nopa hueyi cocolisti, pampa yaya hueyi itaicnelil. Pero ma amo tihuetzica inimaco toculancaitacahua.

¹⁵ Huajca TOTECO quititanqui se cocolisti cati tahuel fiero ipan nochi israelitame ten Dan ica huejcapa hasta altepēt Beerseba ica tatzinta. Pejqui ica ijnaloc se tonali huan quej nopa elqui eyi tonati, huan mijque 70 mil israelitame. ¹⁶ Huan quema nopa iilhuicac ejca TOTECO cati temictiyaya quixitajqui imax para temictis ipan Jerusalén, TOTECO moyolcuetqui huan quihui: “San ya nopa, ayecmo xitemicti.”

Huan nopa ilhuicac ejquet itztoya ipan nopa piso campa quihuitequiyaya itrigo nopa jebuseo tacat cati itoca Arauna. ¹⁷ Huan David quuitac iilhuicac ejca TOTECO huan motatajti ica TOTECO huan quijto:

—Na cati nitajtacolchijtoc, techtatzacuiliti na. Ni nomasehualhua cati itztoque quej nopilborregojhua, amo teno quichijtoque. Se favor, techtatzacuiliti san na huan nochan ehuani.

David quichijqui se taixpamit

(1 Cr. 21:18-27)

¹⁸ Huajca Gad huajajqui quuitaco David nopa tonali ica se camanali ten TOTECO huan quihui: Xiya ital Arauna, se jebuseo tacat, campa nopa piso campa quihuitequi itrigo, huan xijchihua se taixpamit para TOTECO.

¹⁹ Huajca David yajqui quej TOTECO quiilhujtoya itajtolpanextijca, Gad, para ma quichihua. ²⁰ Huan quema Arauna quuitac para monechcahuiyayaj campa ya, Tanahuatijquet David huan nochi itequipanojcahua, yajqui quinamiquito huan mohuijtzonqui hasta talchi iixpa, ²¹ huan quiilhui:

—Tínotanahuatijca, ¿para ten tihualajtoc para techpaxalos?

Huan David quinanquili:

—Nijnequi nimitzcuhuilis motal campa tijhuitequi trigo para nijchihuas nopona se itaixpa TOTECO para ma tamis nopa cocolisti cati fiero.

²² Huan Arauna quinanquili:

—Notanahuatijca, ximocuili para elis moaxca nochi cati monequi. Nica itztoque torojme para tiquinmictis para tacajcahualisti. Nojquiya nochi ni cuahuit cati nijtequihua para nijhuitequi trigo. Nojquiya eltoc nopa cuahuit cati nopa torojme quihuicayayaj ipan ininquechta quema tapoxoniyayaj san sejco. Nochi xijtequihui para tit para tijtatis nopa tacajcahualisti. ²³ Nochi san nimitzmaca. TOTECO moDios ma quipacti nopa tacajcahualisti cati tijmacas.

²⁴ Pero Tanahuatijquet David quiilhui:

—¡Amo! Amo nijselis quej se nemacti. Na nimitzcuhuilis quej quinamiqui ipati, pampa amo nijnequi nijmacas TOTECO noDios se tacajcahualisti cati amo teno ica niquixtajtoc.

Huan David quicohuili nopa lugar campa quihuitequiyaya trigo inihuaya nopa huacaxme huan nopa cuahuit, huan quitaxahui 50 plata tomi. ²⁵ Huan David quichijqui se taixpamit nopona huan quimacac TOTECO tacajcahualisti tatatili huan tacajcahualisti para ica moyoltalise ihuaya. Huan TOTECO quitacaquili cati David quitajtaniyaya, huan huajca tanqui nochi nopa fiero cocolisti ipan Israel.

1 Reyes

Ihuehuejyo David

¹ Ya huehuejtixtoya Tanahuatijquet David. Huan masque quiyoyontiyayaj huan cuali quitaquentiyayaj, amo mototoniliyaya. ² Huajca itequipanojcahua quiihujque: “Monequi tijtemose se ichpocat ma mitzpalehuiqui huan ma mitzmocuihahuiqui. Yaya huelis cochis mohuaya huan mitztonilis.” Huan Tanahuatijquet David quinilhui para quena.

³ Huan quitemojque se ichpocat yejyetzzi ipan nochi tali Israel. Huan quipantijque se cati itoca Abisag ten altepet Sunem huan quihuicaque campa Tanahuatijquet David. ⁴ Huan Abisag nelía eliyaya se ichpocat yejyetzzi, huan yaya pejqui quitaquentía nopa tanahuatijquet huan quimocuitahuía, pero David amo quema quixmatqui.

Adonías quinejqui mochihuas tanahuatijquet

⁵ Huajca Adonías, icone David ica isihua Haguit, motananqui huan mosisini ica itata huan quiiyto: “Na nielis nitannahuatijquet huan nitequitis quej ipataca notata.” Huajca Adonías mocuili miyac tatehuijca carrojme huan miyac tacame cati nemiyayaj cahuaajtipa huan 50 tacame cati san ixinejnemiyayaj para motalose iixpa. ⁶ Quema moscalti Adonías, itata amo quema quitalnamicti, yon amo quema quiihui para amo cuali cati quichihuayaya. Huan Adonías elqui nelía yejyetzzi huan elqui teipa ejquet ten Absalón. ⁷ Huan Adonías quicamanalhui Joab, icone Sarvia, huan nojquiya quicamanalhui nopa totajtzi Abiatar. Huan inijuanti quisencajque se camanali ihuaya huan quiiytojque para quipalehuisquiáj para mochihuas tanahuatijquet. ⁸ Pero sequij amo mosejcotilijque inihuaya. Mocajqui ica David nopa totajtzi Sadoc, Benaía icone Joiada, nopa tajtolpanextijquet Natán, Simei, Rei huan nochi isoldados David cati más temachme. Nochi ni tacame mocajque ihuaya David.

⁹ Huan Adonías yajqui ipan nopa tepet campa nopa hueyi tet cati itoca Zohelet cati eltoc nechca nopa ameli cati itoca Rogel. Huan nozona quinmicti pilborregoijtzi huan torojme cati más tojtomahuaque huan quichijqui se hueyi tacialisti. Quinnotzqui ma hualaca nochi iconehua Tanahuatijquet David, pampa inijuanti iicnihua. Huan nojquiya quinnotzqui nochi tacame ipan tali Judá cati quihuicayayaj tequiticayot ipan itannahuatilis itata. ¹⁰ Pero Adonías amo quinnotzqui nopa tajtolpanextijquet Natán, yon Benaía, yon isoldados David cati más temachme, yon iicni cati itoca Salomón. ¹¹ Teipa Natán quicamanalhuito Betsabé, inana Salomón, huan quiihui:

—¿Amo timomacatoc cuenta para Adonías, icone David ica nopa sihuat Haguit, mochijtoc tanahuatijquet huan David amo quimati? ¹² Para amo timiquis huan nojquiya para tijmanahuis inemilis motelpoca Salomón, xij-tacaquili cati nimitzilhuis para tijchihuas. ¹³ Xiya nimantzi ximopanextiti iixpa Tanahuatijquet David huan xiquilhui: ‘Noteco, ¿amo ta techilhui para tocone Salomón teipa tanahuatis quema ya tamis motequi ta? ¿Amo tiquijtojtoc para yaya mosehuis ipan mosiya cati yejyetzzi quej mopataca? Huajca ¿para ten ama mochijtoc tanahuatijquet motelpoca Adonías?’ ¹⁴ Quej nopa xiquilhuiti huan quema noja tijcamanalhuía, na niyas motepotzco huan nicalaquiti huan niquilhuis para melahuac cati ta tiquilhuía.

¹⁵ Huajca Betsabé calaquito campa icuarta ihuehue, nopa tanahuatijquet. Huan David ya eliyaya nelhuehuentzi huan nopa ichpocat Abisag, cati ehua Sunem, quitequipanohuayaya. ¹⁶ Huan Betsabé mohujtzonqui hasta talchi iixpa huan David quitatzintzoquili:

—¿Taya tijnequi?

¹⁷ Huan Betsabé quiilhui:

—Noteco, ta tijtestigojquetzqui TOTECO Dios para tocone, Salomón, elis tanahuatijquet quej mopataca huan tanahuatis ipan mosiya yejyetzqui quema ta tijcahuas motequiticayo. ¹⁸ Pero ama mocone Adonías ya mochijtoc tanahuatijquet huan ta amo tijmati. ¹⁹ Ya quinmictijtoc torojme, becerros huan miyaqui borrejojme cati más tojtomahuaque. Quichijtoc se hueyi tucualisti huan quinnotztoc nochi moconehua. Nójquiya quinnotztoc nopa totajtzqui Abiatar huan Joab cati quinyacana mosoldados, pero amo quinnotztoc totelpoca Salomón. ²⁰ Huajca ama, noteco, nochi israelitame san mitzchiyaj para titeyolmelahuas ajquiya elis tanahuatijquet quej mopataca huan mosehuis ipan mosiya quema tijcajtehuas motequiticayo. ²¹ Sinta amo teno tijchihuas ama, teipa quema timiquis, techmictise na huan motelpoca Salomón quej tielisquejáj titemictiani.

²² Huan quema Betsabé noja quicamanalhuyaya David, se itequipanojca quiilhui para ajsico tajtolpanextijquet Natán. ²³ Huajca calaquito huan mohujtzonqui hasta talchi iixpa nopa tanahuatijquet. ²⁴ Huan quijito:

—Noteco huan notanahuatijca, ¿nelía tiquijtojtoc para motelpoca Adonías elis tanahuatijquet quema tijcajtehuas motequiticayo huan para yaya mosehuis ipan mosiya yejyetzqui para tanahuatis? ²⁵ Ama yaya quinmictijtoc miyac torojme, becerros huan borrejojme cati tomahuaque. Huan quinnotztoc miyac moconehua huan motayacanca ten mosoldados huan nojquiya quinnotztoc Abiatar, nopa totajtzqui. Huan nozona nochi tacuaj huan taj huan cuatzajtzij: ‘¡Ma itzo miyac tonali totanahuatijca Adonías!’ ²⁶ Pero na amo technotzoque. Yon amo quinnotzoque totajtzqui Sadoc, yon Benaía, icone Joiada, yon motelpoca Salomón. ²⁷ Amo nijneltoaca para ta tijchijtoc ni huíhuíyot. Amo tijchihuasquía se tamanti quej ni huan amo techilhuis, na cati nimitzpalehuía. Monequisquía achtohui techyolmelahuasquía tojuanti cati timotequipanojcahua ajquiya tijnequisquía ma mocahua quej mopataca ipan motequi quema tijcajtehuas motequiticayo.

David quitali Salomón para tanahuatis

²⁸ Huajca Tanahuatijquet David tanahuati sempa ma quinnotzatij isihua, Betsabé. Huan Betsabé ajsico huan moquetzqui iixpa. ²⁹ Huan Tanahuatijquet David quitestigojquetzqui TOTECO huan quijito:

—Nijtestigojquetza TOTECO cati techmaquixtijtoc ten miyac tequipacholi.

³⁰ Ama ni tonali nijtamichihuas cati ya nijtestigojquetztoc TOTECO toDIOS tiisraelitame para nijchihuas. Ama nijtalis mocone Salomón para mosehuis ipan nosiya huan tanahuatis quej nopataca.

³¹ Huajca Betsabé motancaquetzqui huan mohujtzonqui hasta talchi iixpa David para quitascamatis huan quijito:

—Nimitzcamati miyac, Tanahuatijquet David. ¡Xitzo miyac tonali, noteco!

³² Huan Tanahuatijquet David quijito:

—Xijnotzatij nopa totajtzqui Sadoc, huan nopa tajtolpanextijquet Natán huan Benaía cati icone Joiada.

Huan injuanti ajsicoj huan moixnextitoj iixpa Tanahuatijquet David.
 33 Huan quinihui:

—Xijtejcoltica ipan nomula nocone Salomón, huan nochi amojuanti huan notequipanojcahua xijhuicaca hasta altepet Gihón. 34 Huan nozona mon-equi amojuanti, titotajtzi Sadoc huan tajtolpanextijquet Natán, xijtzonal-tica ica aceite nocone Salomón huan xijtequitalica para elis tanahuatijquet ipan nochi ni tali Israel. Teipa xijpitzaca nopa tapitzali huan xicuatzajtza: ‘¡Ma itzto miyac tonali totanahuatijca Salomón!’ 35 Huan quema sempa anquihualicase nica, anquisehuise ipan nosiya campa nimosehuía huan yaya tanahuatis quej nopataca pampa yaya cati nijtapejpenijtoc ma eli tanahuatijquet ipan ni tali Israel huan tali Judá.

36 Huan Benaía quihui Tanahuatijquet David:

—¡Quej nopa ma eli! Notanahuatijca, TOTECO Dios cati tijtequipanohua ma quichihua para quej nopa ma eli. 37 TOTECO ma itzto ihuaya Salomón quej itztoya mohuaya. Huan TOTECO ma quichihua para yaya quipiyas noja más hueyi tequiticayot que cati ta tijpixqui, notanahuatijca David.

Salomón mochiqui tanahuatijquet

(1 Cr. 29:22)

38 Huan yajqui nopa totajtzi Sadoc, huan nopa tajtolpanextijquet Natán, huan Benaía huan itequipanojcahua David cati quimocuitahuayaj huan quitejcoltijque Salomón ipan imula Tanahuatijquet David huan quihuicague nepa Gihón. 39 Huan nozona nopa totajtzi Sadoc quicuic ipan nopa yoyon tiopamit nopa cuacuajomit cati quipixtoya nopa aceite huan nozona quitzonaliti Salomón. Huan nochi nopa masehualme tapitzque huan cuatzajtzi que nochi itatoquihualicahua huan quijijtoque: “¡Ma itzto miyac tonali totanahuatijca Salomón!” 40 Huan teipa nochi nopa masehualme mocuetque altepet Jerusalén ihuaya Salomón huan tapitztihualayayaj ica miyac paquillisti. Huan tahuejchihuayaj hasta quimachiliyayaj molinia tali pampa nelía tahuel chichahuac cuatzajtziyayaj.

41 Huan Adonías huan nochi itanotzalhua sanoc tantoyaj tacuaj quema quicajque cati tahuejchihuayaj. Huan Joab quicajqui quipitzayayaj tapitzali huan quijito:

—¿Para ten tahuejchihuaj miyac nepa ipan toaltepe?

42 Huan quema noja camanaliyaya, ajsito Jonatán, icone nopa totajtzi Abiatar, huan Adonías quihui:

—Xipano. Ta tise cuali tacat, huelis tijhualica se cuali camanali.

43 Huan Jonatán quinanquili Adonías:

—¡Amo ya nopa! Totanahuatijca David quitalijtoc Salomón para elis tanahuatijquet. 44 Quinahuati totajtzi Sadoc, tajtolpanextijquet Natán huan Benaía, icone Joiada, huan nochi nopa tacame cati quimocuitahuaj inemilis Tanahuatijquet David ma quitejcoltica Salomón ipan imula para quinxestize yaya tanahuatijquet. 45 Huan nopa totajtzi Sadoc huan nopa tajtolpanextijquet Natán ya quitzonalitijtoque ica aceite huan quitequitalijtoque para elis totanahuatijca nepa Gihón. Huan ama ya mocuetoque huan tahuel pactoque. Yeca onca miyac tahuejchihualisti ipan toaltepe huan ya nopa anquicactoque. 46 Huan nojquiya Salomón ya mosehuía ipan David isiya cati yejectzi. 47 Huan nopa tacame cati quipalehuaj Tanahuatijquet David hualajque para quiochihuase David huan quihuijque: ‘Toteco Dios ma quichihua Salomón noja más hueyi que ta. Huan ma quipiya más hueyi tequiticayot que ta.’ Huan teipa David motancuaquetzqui nozona ipan

itapech huan quihueyichijqui Toteco Dios. ⁴⁸ Huan motata quitascamatqui TOTECO cati toDIOS tiisraelitame pampa quema yaya noja itztoya, TOTECO quitapejpeni se para elis tanahuatijquet huan para mosehuis ipan isiya yejyectzi huan yaya noja huelqui quüita ica iixteyol.

⁴⁹ Huajca nochi itanotzalhua Adonías pejque tahuel momajmatíaj huan nimantzi moquetztiquisque huan sesen ten injuanti yajqui ipan iojhui.

⁵⁰ Huajca Adonías motalojtejqqui huan momatatzquilito ipan icuacua nopa taixpamit tiopan calijtic para quimanahuis inemilis pampa quimacasiyaya Salomón huan moilhui huelis amo quimictisquía tiopan calijtic. ⁵¹ Huan se tacat quilhui Salomón:

—Tanahuatijquet Salomón, Adonías mitzimacasi, huan ama momatatzquilitoc ipan icuacua taixpamit ipan yoyon tiopamit huan chicahuac mitztajtania xijtestigojquetza Toteco Dios para amo tijmictis.

⁵² Huan Salomón quijito:

—Sinta quinextía para itztoc cuali tohuaya, amo teno ipantis. Pero sinta mosisinis ica tojuanti, huajca miquis.

⁵³ Huajca Salomón tatitanqui ma quicuitij campa itztoya campa taixpamit. Huan Adonías hualajqui huan motancuaquetzqui iixpa Tanahuatijquet Salomón. Huan Salomón quilhui: “Ya xiya mochaj.”

2

Itayacapan tanahuatilhua David

¹ Quema monechcahuiyaya nopa tonali para miquis David, quiconsejmacac icone, Salomón, huan quilhui: ² “Na ya nimiquis quej pano ica nochi masehualme ipan taltipacti. Ximotetili huan ximochihua se titacat.

³ Xijtoquili nochi itanahuatilhua TOTECO Dios. Xinejnemi ipan iojhui huan xijchijtinemi nochi cati ya quipactía. Xijchihua sesen itanahuatilhua, ileyes, itamachtilhua huan iejemplos cati quijicuilo Moisés para nochi quisas cuali para ta ica cati tijchihuas huan campa tijas. ⁴ Huan sinta tijchihuas nochi ya ni, huajca TOTECO quichihuas cati techtencahuili. Techilhui sinta noconehua huan noixhuihua teipa ehuan nemise cuali iixpa huan quitoquilise ica nochi iniyolo, huan ica nochi inialma huan quichihuase san cati melahuac, huajca se noixhui nochipa mosehuis ipan nosiya yejyectzi para tanahuatis ipan ni tali Israel.

⁵ “Ta ya tijmati taya techchihuili Joab cati icone Sarvia. Quinmicti nopa ome huejhueyi tayacanani ten nosoldados. Quimicti Abner cati icone Ner huan Amasa, icone Jeter. Quinmicti quema oncaiyaya tasehuilisti. Huan yeca ica cati quichijqui, quichijqui ma nesi quej onca se tatehuilisti. Huan inieso quipajqui itzinquechilpica huan itecac. ⁶ Ta tiitztoc se titacat cati talnamiqui, huajca temachti tijmatis taya tijchihuas. Amo xijcahuilis para Joab huehuejmiquis ica paquilisti.

⁷ “Xijpiya hueyi moyolo ica iconehua Barzilai cati ehua tali Galaad. Xiquincahuili ma tacuaca campa momesa mojmosta pampa techpalehuijqque miyac quema nicholohuayaya ten moicni Absalón. ⁸ Nojquiya amo xiquelcahua Simei, icone Gera, cati se iteipa ixhui Benjamín huan ehua altepet Bahurim. Yaya techtelchijqui ica camanali cati más fiero quema nicholohuayaya ipan ojti para Mahanaim. Huan teipa quema nimocuetqui, techseli nepa ipan hueyat Jordán huan nijtestigojquetzqui TOTECO para amo nijmictisquía na. ⁹ Pero masque niquilhui ya nopa, noja quihuica tajtacoli iixpa TOTECO. Huajca monequi tijmictis huan amo xijtapojpolhui.

Ta titalnamiqui huan tijmati cuali taya tijchihuas ica ya. Xijchicahua para ma toyahui ieso huan ma miqui.”

Mijqui David
(1 Cr. 29:26-30)

¹⁰ Huan teipa David mijqui huan quitalpachojque ipan Jerusalén ipan nopa colonia cati itoca Ialtepe David. ¹¹ Huan David quinnahuati israelitame 40 xihuit. Chicome xihuit mosehui para tanahuatis ipan altepet Hebrón huan 33 xihuit mosehui ipan altepet Jerusalén.

Salomón tanahuati ipan Jerusalén
(1 Cr. 29:23-25)

¹² Huan teipa mosehui Salomón ipan isiya yejyectzi, huan pejqui tanahuatía huan elqui temachti itequiticayo.

Itamiya Adonías huan itatoquilijcahua

¹³ Teipa se tonali hualajqui Adonías, icone Haguit, cati eliyaya seyoc isihua David. Huan quiitaco Betsabé cati eliyaya inana Tanahuatijquet Salomón. Huan Betsabé quiilhui:

—¿Tihualajtoc ica cuali?

Huan Adonías quiilhui:

—Quena, nihualajtoc ica cuali. ¹⁴ San nijnequi techchihuili se favor.

Huan Betsabé quiijto:

—Techilhui taya tijnequi.

¹⁵ Huan quiijto Adonías:

—Ta tijmati para nochi israelitame quinequiyayaj na ma nieli niinin-tanahuatijca. Pero nochi mopatac, huan ama nopa tequiticayot quiipiya noicni pampa quej nopa quinejqui TOTECO. ¹⁶ Huajca ama san nijnequi nimitztajtanis techchihuili se hueyi favor. Amo techilhui para amo.

Huan Betsabé quiijto:

—Techilhui taya tijnequi.

¹⁷ Huajca Adonías quiilhui:

—Na nijnequi xijtajtani nopa Tanahuatijquet Salomón ma techmaca Abisag para nijchihuas nosihua, nopa ichpocat cati ehua altepet Sunem. Nijmati para yaya amo mitzilhuis, amo, pampa tiinana.

¹⁸ Huan Betsabé quiilhui:

—Cualtitoc, huajca nijtajtanis.

¹⁹ Huajca Betsabé yajqui quicamanalhuito Tanahuatijquet Salomón por Adonías. Huan nopa tanahuatijquet moquetzqui huan quiseli inana ica cuali. Teipa nimantzi mosehui ipan isiya yejyectzi huan tanahuati ma quihualiquilica se siyaj yejyectzi para inana. Huan Betsabé mosehui ica inejmat Salomón. ²⁰ Huan quiilhui:

—Nijnequi nimitztajtanis se favor. Amo techilhui para amo.

Huan Tanahuatijquet Salomón quiijto:

—Techtajtani nochi cati tijnequi, nonana. Amo nimitzilhuis para amo.

²¹ Huan inana quiijto:

—Xijcahuili moicni Adonías ma mosihuahti ica Abisag ten altepet Sunem cati quimocuitahui motata David.

²² Huan Tanahuatijquet Salomón quiilhui inana:

—¿Para ten techtajtania nopa ichpocat Abisag para Adonías? ¿Amo tijmachilía? Sinta noicni techtajtania nopa ichpocat cati nochi quiitaj quej

elisquía se isihua notata pampa quimocuitahui, huajca eltoc quej techtaj-tanía ma nijmaca noicni nohueyi tanahuatijcayo para quinahuatis. Tijmati para yaya cati achtohui ejquet huan quinequiyaya tanahuatis quej nopataca. Huan tijmati para Joab huan nopa totajtzi Abiatar ya mosejcotilijque ihuaya.

²³ Huajca Tanahuatijquet Salomón quitestigojquetzqui TOTECO huan quiijto: “Ma Toteco Dios techtatzacuilti sinta amo nijchihuas ma miqui Adonías ama ni tonali por ni tamanti cati mitzilhuijtoc techtajtaniqui. ²⁴ Yaya TOTECO cati techmacatoc ni teguiticayot huan techsehui ipan isiya yejyetzti notata David para ma nitanahuati. Huan yaya quichijtoc nochaj ma eli se familia ten tanahuatiani ica se nocone cati techtoquillis ipan ni hueyi teguiticayot huan teipa iconehua huan iixhuihua cati tacajtiyase. Huajca temachti ama ni tonali miquis Adonías.”

²⁵ Huajca Tanahuatijquet Salomón quinahuati Benaía ma quiitzqui Adonías. Huan yaya quiitzqui huan quimicti. ²⁶ Huan teipa Tanahuatijquet Salomón quilhui nopa totajtzi Abiatar: “¡Xiya mochaj ipan pilaltepetzti Anatot! Quinamiqui nimitzmictisquía nojquiya, pero amo nimitzmictis ama pampa tijhuicac icaxa TOTECO Cati Quipiya Nochi Tanahuatili quema notata itztoya. Nojquiya titajiyohui ihuaya quema quipanoyaya miyac cuesoli.” ²⁷ Huajca quej nopa Salomón quiquixti Abiatar ipan itequi huan ayecmo teguitic quej ihueyi totajtzi TOTECO. Huan ica ya nopa tanqui nopa camanali cati TOTECO quiijtojtoya ipan Silo para yon se iixhui totajtzi Elí amo quitamiltisquía itequi quej totajtzi.

²⁸ Huan quema Joab quimatqui para Salomón ya quimictijtoya Adonías, tahuel momajmati. Joab amo quipalehuijtoya Absalón, icone David cati achtohui mosisini ihuaya itata, pero quena, Joab quipalehuijtoya Adonías quema quinequiyaya mochihuas tanahuatijquet. Huajca Joab motalojtejqui huan yajqui campa itaixpa Toteco ipan nopa yoyon tiopamit huan momatatzquili ipan icuacua nopa taixpamit pampa moilhui huelis amo quimictisquía j yoyon tiopan calijtic. ²⁹ Huan quimachiltijque Tanahuatijquet Salomón para Joab itztoya campa taixpamit. Huan Salomón quinahuati Benaía ma yahui quitzontamiltiti. ³⁰ Huajca Benaía yajqui campa taixpamit yoyon tiopan calijtic huan quilhui Joab:

—Totanahuatijca quiijtohua, xiquisa.

Huan Joab quinanquili:

—¡Amo niquisas! ¡Nica nimiquis!

Huajca Benaía quilhuito Tanahuatijquet Salomón cati quiijto. ³¹ Huan Tanahuatijquet Salomón quilhui:

—Xijchihua quej yaya quiijtohua. Nopona xijmicti huan teipa xijhuica xijtalpachoti. Huan quej nopa ayecmo nijhuicas tajtacoli na, yon ichaj notata pampa amo tijmictijtoque Joab, pampa yaya achtohuiya quinmicti cati amo teno quichijtojaj. ³² Huajca ama TOTECO quicuepilis Joab pampa quinmicti ome tacame cati más cuajcualme huan más xitahuaque que ya. Amo teno ten nopa tamanti quimatiyaya notata hasta teipa. Joab quimicti Abner, icone Ner, cati elqui nopa hueyi tayacanquet ten soldados ipan tali Israel. Huan nojquiya Joab quimicti Amasa, icone Jeter, cati elqui nopa hueyi tayacanquet ten soldados ipan tali Judá. ³³ Huajca Joab huan iixhuihua quihuicase tajtacoli para nochipa por ni ome cati quinmicti. Pero para nochipa ma onca itasehuillis TOTECO ica notata David huan ica nochi iixhuihua teipa ehuan huan ica nochi cati mosehuise para tanahuatise ipan isiya.

³⁴ Huajca Benaía yajqui campa itztoya Joab huan quimicti. Teipa quitapachojque nechca ichaj ipan nopa huactoc tali campa amo teno eli. ³⁵ Huan Tanahuatijquet Salomón quitali Benaía para ma eli nopa hueyi tayacanquet ten isoldados quej ipataca Joab. Huan para hueyi totajtzi, Salomón quitali Sadoc quej ipataca Abiatar. ³⁶ Teipa Salomón tatitanqui ma quinotzatiñ nopa tacat Simeí, cati David quiilhujtoya ma quimicti huan quiilhui:

—Xijchihua se cali nica ipan altepet Jerusalén huan xiitzo nica, pero amo quema xiquisa ten ni altepet. ³⁷ Pampa sinta tiquisas ten altepet Jerusalén huan tiquixpanos nopa pilatajtzi Cedrón, xijmati cuali para timiquis huan elis ta motajtacol.

³⁸ Huajca Simeí quinanquili nopa tanahuatijquet:

—Cualtitoc. Xitahuac ni tatzacuiliti cati tiquijtojtoc huan ya nopa nijchihuas.

Huajca Simeí mocajqui para itztoz miyac tonali nepa ipan Jerusalén. ³⁹ Pero quema ya panotoya eyi xihuit, cholojque ome itequipanojcahua cati quincojtoya. Inijuantí cholojque hasta campa itztoya nopa hueyi tanahuatijquet Aquis ipan tali Gat. Huan quiyolmelajque Simeí para itequipanojcahua itztoyaj nozona. ⁴⁰ Huajca Simeí moquetzqui huan quipejpechti iburro huan yajqui tali Gat campa itztoya Tanahuatijquet Aquis para quintemoti itequipanojcahua. Huan quema quinpanti, sempa quinhuicac hasta altepet Jerusalén. ⁴¹ Huan quema Salomón quimatqui para quistoya Simeí ipan altepet Jerusalén, huan yajqui tali Gat huan ya mocuctoya; ⁴² tanahuati ma quinotzatiñ Simeí para ma monexti iixpa. Huan Salomón quiilhui:

—¿Amo nimitzchijqui xijtestigojquetza TOTECO para timocahuasquía nochipa ipan ni altepet Jerusalén? ¿Amo ni quijto sinta se tonali tiquisasquía para tiyas sejoyoc, temachti timiquis? Huan ¿amo ta techilhui para xitahuac nopa tatzacuiliti cati nimitzmacac huan san ya nopa tijchihuasquía?

⁴³ Huajca ¿para ten tijchijtoc cati tijtestigojquetzqui TOTECO para amo tijchihuas? ¿Para ten amo tijtacaquili cati nimitznahuati?

⁴⁴ Huan nojquiya Salomón quiilhui:

—Nijmati tiqelnamiqui nochi nopa fiero tamanti cati tijchihuili notata David. Huajca ama TOTECO mitzcuepilis cati fiero tijchijqui. ⁴⁵ Ma TOTECO techtiochihua huan ma quitiochihua itequiticayo notata huan se iixhui ma quipiyas tequiticayot para nochipa para tanahuatis ipan isiya.

⁴⁶ Huan teipa Tanahuatijquet Salomón quinahuati Benaía ma quiitzqui Simeí huan ma quimicti. Huajca quiquixti huan quimicti. Huan nopa hueyi tequiticayot cati Tanahuatijquet David achtohuiya quipixqui mocajqui temachti imaco Salomón.

3

Salomón mosihuajti ica iichpoca Faraón

¹ Salomón mohuampojchijqui ica nopa Faraón cati eliyaya hueyi tanahuatijquet ipan tali Egipto huan mosihuajti ihuaya se iichpoca. Huan quihualicac para ma itzto ipan altepet Jerusalén ipan nopa colonia cati itoca Ialtepe David hasta quema tamisquía quichijchihua nopa hueyi cali para ya huan itioya TOTECO. Nojquiya más quicualchijchihuayaya nopa tepamit cati quiyahualojtoc nopa altepet Jerusalén. ² Ipan nopa tonali nochi israelitame tacajcahuayayaj para TOTECO ipan taixpamit campa hueli ipan huejcapante tepeme pampa ayemo quiquetztoyaj se tiopamit para TOTECO.

Salomón quitajtani TOTECO ma quimaca talnamiquilisti

(2 Cr. 1:1-13)

³ Huan Salomón quicneli TOTECO huan quichijqui nochi cati quillhuijtejqwi itata, David para ma quichihua. Pero Salomón nojqwiya monejqwi quimacas TOTECO tacajcahualisti huan quitatis copali inintzompac nopa huejcapantique tepeme pampa ayemo oncayaya tiopamit campa quihueyimatise TOTECO. ⁴ Nopa tepet cati nochi masehualme más quitequihuijqwe ten nochi sequinoc huejcapantique tepeme itoca eliyaya tepet Gabaón. Huajca nopa Tanahuatijquet yajqui nopona huan quimacac TOTECO se mil tacajcahualisti ipan nopa taixpamit.

⁵ Huan nopa yohuali TOTECO monexti ica Salomón ipan temicti huan Toteco Dios quillhui: “Techtajtani cati tijnequi huan na nimitzmacas.”

⁶ Huajca Salomón quijito: “Ta tijpixqui nelcuali moyolo ica notata David cati elqui motequipanojca. Miyac tiquicneli pampa nejnenqui xitahuac moixpa, huan quichijqui cati cuali huan san ipan ta motemachi. Huan tijpixtoc hueyi moyolo ica ya hasta ama ni tonal pampa techcahuiljtoc na niicone ma nijtoquili ipan itequi. ⁷ Quena, TOTECO Dios, ama techtalijtoc, na niicone, ma nimosehui ipan isiya yejectzi para nitanahuatis quej ipataca notata David, pero niitztoc quej se conet cati amo quimati catijqui ojti quitoquilis. ⁸ Pero nica niitztoc tatajco ten ni israelitame cati ta tiquintapejpenijtoc quej momasehualhua. Huan inijuanti tahuel miyaqui hasta amo aqui hueli quinpohua. ⁹ Huajca techmaca, na nimotequipanojca, talnamiquilisti para huelis niquintajtolxitahuas ica cuali. Xijchihua ma nijmachili cati cuali huan cati amo cuali, pampa amo aqui yon se tacat cati iseltitzi quiqiya talnamiquilisti para quinnahuatis moisraelita masehualhua.”

¹⁰ Huan quiyolpacti Toteco pampa Salomón motajtani talnamiquilisti.

¹¹ Huan Toteco Dios quillhui: “Pampa ta techtajtanjtoc talnamiquilisti para titajtolxitahuas cuali, huan amo techtajtani para tiitztos miyac tonali, yon amo techtajtani para timoricojchihuas, yon para tiquintanis mocualan-caitacahua, ¹² huajca, quena, nimitzmacas hueyi talnamiquilisti. Nimitzmacas se talnamiquilisti cati quipano nochi cati sequinoc quipixtoque hasta ama. Huan quipanos cati quipiyase masehualme teipa. ¹³ Huan nojqwiya nimitzmacas cati amo timotajtanjtoc. Nimitzmacas riciojyot huan miyac tatepanitacayot. Amo aqui yon se tanahuatijquet ipan ni taltipacti cati elis quej ta ipan nochi monemilis. ¹⁴ Huan sinta tijtoquilis noojhui huan tijchihuas notanahuatilhua quej quichijqui motata David, huajca na nojqwiya nimitzmacas miyac tonali para tiitztos ipan ni taltipacti.”

¹⁵ Huan teipa Salomón isac huan momacac cuenta para temiquiyaya. Huan mocuetqui Jerusalén huan moquetzqui iixpa icaxa TOTECO cati quipiyayaya nopa tanahuatilme cati TOTECO quimacatoya Moisés. Nopona quimacac TOTECO tacajcahualisti tatatili huan tacajcahualisti ten tayoltalili para quitascamatis por nochi cati quillhuijqtoya. Teipa nopona quichijqui se hueyi tacualisti ica ininacayo nopa tapiyalme cati mocajtoyaj imaco huan quinnottzqui nochi itequipanojcahua.

Salomón tetajtolsencajqwi xitahuac

¹⁶ Teipa panoc tonali huan hualajque ome ahuilnenca sihuame para ma quinsencahuili inincuesol. Huan monexticoj iixpa Tanahuatijquet Salomón.

¹⁷ Huan se ten injuanti quijito:

—Noteco, tojuanti tiitztoque tiome san sejco ipan se cali. Huan na nijtacatilti se pilconetzi quema yaya itztoya nohuaya. ¹⁸ Huan ica eyi tonati yaya nojqwiya quipixqui se icone quema tiitztoyaj san sejco. Huan

tojuanti timocahuaj san sejco huan amo aqui más itztoc tohuaya ipan tochaj.
¹⁹ Pero tayohua mijqui cati ya icone pampa motejqm ipani quema cochtaya.
²⁰ Huan teipa yaya mijquejqm tajco yohual quema nicochtaya huan quitali icone cati mictoc nomaco huan quicuic nocone para cochis ihuaya. ²¹ Huan ica ijnaloc quema nimijquejqm para nijchichitis nocone, niqitac para mictoc. Pero quema tanesqm, niqitac para amo na nocone.

²² Huajca nopa seyoc sihuat quihhui ne seyoc sihuat:

—¡Amo! Ni conet cati yoltoc ya ni na nocone huan nopa conet cati mictoc, ta mocone.

Huan nopa seyoc sihuat sempa quihhui:

—¡Amo! Ta mocone yaya cati mictoc huan na nocone cati yoltoc.

Quej nopa monajnanquihyayaj nopa sihuame iixpa nopa tanahuatijquet.

²³ Huajca Tanahuatijquet Salomón moihui: “Sesen ten injuanti quihjtohua para nopa conet cati yoltoc iaxca huan nopa conet cati mictoc iaxca ne se.”

²⁴ Huajca Salomón tanahuati:

—Techhualiquilica se macheta.

Huan quihualiquilijque nopa tanahuatijquet se macheta cati oncac taten-tili. ²⁵ Teipa Salomón quihahuati itequipanojca:

—Xijtajcotequi nopa pilconetzi cati yoltoc huan xijmaca tajco sesen ten injuanti.

²⁶ Huajca nopa sihuat cati nelnelía inana nopa pilconetzi cati yoltoc huan tahuel quihneliyaya cuatzajzitejqm huan quihjto:

—¡Amo, noteco! Xijmaca nopa pilconetzi ne se sihuat huan amo xijmicti.

Pero nopa seyoc sihuat quihjto:

—Más cuali ma quimictica huan ma quitajcotequica para amo mitzmacase ta, yon na.

²⁷ Huajca nopa tanahuatijquet quihhui itequipanojca:

—Amo xijmicti. Xijmaca nopa pilconetzi yaya cati quinequi ma yolto pampa yaya nelía inana.

²⁸ Huan nochi israelitame nimantzi quicajque quenicatza nopa tanahuatijquet quinsencahuiljtoya inincuesol nopa sihuame huan san quitachilijque por cati quichijqui. Huan masehualme quimachilijque para Toteco Dios quimacatoya hueyi talnamiqulisti para tetajtolsencahuas xitahuac.

4

Tacame cati quipalehuijque Salomón

¹ Huajca Salomón elqui tanahuatijquet ten nochi israelitame. ² Huan itayacanca tequipanojcahua cati más quihucayayaj tequiticayot elque ni tacame:

Azarías cati elqui icone nopa totajtzi Sadoc,

³ Elihoref huan Ahías iconehua Sisa, elque tajcuilohuani ipan tequicali, Josafat, icone Ahilud, quihcuilohuayaya nochi cati panoyaya ipan itequi Tanahuatijquet Salomón,

⁴ Benaía, icone Joiada, elqui nopa hueyi tayacanquet ten nochi isoldados Salomón,

Sadoc huan Abiatar elque itotajtzitzi TOTECO,

⁵ Azarías, icone Natán, quipixqui tequiticayot ica nochi gobernadores ipan sesen estado,

Zabud, icone Natán, elqui itaconsejomacaca huan inelhuampo Salomón,

⁶ Ahisar quipixqui imaco nopa hueyi tequicali para quimocuitahuis.

Huan Adoniram, icone Abda, elqui tayacanquet ten nochi comun tequit.

⁷ Salomón quixelo tali Israel ica 12 talme quej elisquía estados huan 12 gobernadores quiپیayayaj tequit; sesen ipan se iestado. Inintequi nopa tequichihuani elqui para quitemose tucualisti para quitamacase nopa tanahuatijquet, ichaj ehuan huan nochi itapalehuijcahua. Sesen tequitquet ten sesen estado monejqui quintamacas para se metzti ipan sesen xihuit.

⁸ Nica eltoc inintoca nopa 12 gobernadores huan canque tequitique: Hur quihuicayaya tequit ipan nochi tali Efraín campa tahuel tepeyo.

⁹ Decar quihuicayaya tequit campa altepeme Macaz, Saalbim, Bet Semes, Elón huan Bet Hanán.

¹⁰ Hesed quihuicayaya tequit ipan altepet Arubot, Soco huan nochi nopa tali cati itoca Hefer.

¹¹ Abinadab mosihuajti ica Tafat, iichpoca Tanahuatijquet Salomón, huan quihuicayaya tequit ipan nochi talme Dor.

¹² Baana, icone Ahilud, quihuicayaya tequit ipan altepeme Taanac, Meguido huan ipan nochi tali Bet Seán cati eltoc inechca nopa altepet Saretán cati eltoc achi más tatzinta ten altepet Jezreel. Baana quihuicayaya tequit ten altepet Bet Seán hasta Abel Mehola huan hasta Jocmeam.

¹³ Geber quihuicayaya tequit ipan tali Galaad ipan nopa altepet Ramot. Nojquiya quihuicayaya tequit ipan altepet Jair cati quihuica itoca nopa tacat Jair cati elqui icone Manasés. Nojquiya Geber quiپیxtoya imaco nopa altepeme campa itoca Argob ipan tali Basán. Nozona oncayaya 60 altepeme ica tepame huan caltemit cati cuajcuali tasencahuali. Huan inincaltenhua tachijchihuali ica nopa teposti cati itoca bronce.

¹⁴ Ahinadab, icone Iddo, quihuicayaya tequit ipan altepet Mahanaim.

¹⁵ Ahimaas cati mosihuajti ihuaya seyoc iichpoca Salomón quihuicayaya tequit ipan nochi nopa tali Neftalí.

¹⁶ Baana, icone Husai, quihuicayaya tequit ipan nochi tali Aser huan altepet Alot.

¹⁷ Josafat, icone Parúa, quihuicayaya tequit ipan tali Isacar.

¹⁸ Simeí, icone Ela, quihuicayaya tequit ipan tali Benjamín.

¹⁹ Geber, icone Uri, quihuicayaya tequit ipan tali Galaad, huan nochi campa achtohui eltoya ital Tanahuatijquet Sehón ten nopa amorreos, huan Tanahuatijquet Og cati quihuicac tequit ipan tali Basán. Geber iseltitzi eliyaya gobernador ipan nochi nopa huejhueyi talme.

Italnamiqulis Salomón huan nochi iricojyo

²⁰ Itztoyaj tahuel miyaqui israelitame campa hueli ipan tali Judá huan Israel. Nopa israelitame itztoyaj quej imiyaca xali iteno hueyi at. Huan nochi nopa masehualme nelía paquiyayaj huan quiپیayayaj tahuel miyac tucualisti huan taili. ²¹ Huan Tanahuatijquet Salomón quiپیxqui tanahuatili ica nochi tequichihuani ten hueyat Eufrates hasta inintal filisteos campa inepa tali Egipto ica tatzinta. Huan nochi masehualme cati ehuan ipan nopa talme quitaxtahuiyayaj impuestos Salomón huan quitequipanojqque nochi inemilis.

²² Para ica panose Salomón, huan ichaj ehuan huan itequipanojqcahua, mojmosta monequiyaya quiselise 6 mil 600 litros ten harina cati achi cuali huan 13 mil 200 litros ten harina. ²³ Huan majtacti huejhueyi torojme cati quintomajtoque ipan tatzacti, huan 20 torojme cati quintomajtoque campa potrero, huan 100 borregoime o chivoime, huan iyoca miyaqui masame, gacelas huan miyac sequinoc tamanti tapiyalme huan totome tojtomahuaque.

²⁴ Huan Salomón quinnahuatíyaya nochi nopa talme cati eltoyaj ica campa calaquí tonati ten nopa hueyat Eufates, ten altepet Tífsa hasta Gaza. Huan campa hueli ipan nochi itál oncayaya tasehuilisti huan nochi masehualme itztoyaj cuali. ²⁵ Huan ipan nochi inemilis Tanahuatijquet Salomón nochi israelítame ten tali Dan ica huejcapa hasta Beerseba ica sur quípíxque paquilisti huan itztoyaj ica temachili. Amo cana oncayaya tatehuilisti. Huan sesen familia quípíxqui ichaj huan imil.

²⁶ Huan Salomón nojqúíya quín píxtoya 4 mil calme para icahuayojhua cati quintilanayayaj itatehuíjca carrojhua. Huan quín píxtoya 12 mil soldados cati químatíyayaj tejcoj ipan cahuayo. ²⁷ Huan nochi gobernadores químacayayaj tacualisti Salomón sesen metzti para nochi cati itztoyaj ipan ichaj, huan quíchihuayayaj campeca para amo teno ma quín polo. ²⁸ Huan nojqúíya quíhualíquílíyayaj cebada ica nochi íxíhuíyo quej monequí para icahuayojhua huan para itapíyálhua cati tamamayayaj. Quíhualíquílíyayaj sesen metzti quej quíntocarohuayaya huan sesen tamanti quíhuicayayaj ipan nopa lugar campa monejqui.

²⁹ Huan Toteco Dios químacac Salomón míyac talnamíquílísti huan tamachilísti. Quena, itálnamíquílís amo aquí huelíyaya quíaxíllí pampa elíyaya tahuel talnamíqui. ³⁰ Huan itálnamíquílís Salomón quípano nochi talnamíjca tacame cati itztoque campa hualquísa tonati huan nochi cati ehuaní ipan tali Egipto. ³¹ Elquí más talnamíqui que Etán ten altepet Ezra huan más talnamíqui que Hemán, Calcol huan Darda cati elíyayaj íconehua Mahol. Huan nochi masehualme ipan nochi sequínoc talme cati nechca nojqúíya quíixmatíyayaj Salomón. ³² Salomón quííjcuilo 3 mil tamachtli huan 1005 huícat. ³³ Huan huelquí tamachtía cuali ten míyac tamanti cuame, masque huejhueyí cuame quej nopa tíocuame ten tali Líbano o nopa pílxí-huítzítzi cati mocaltíyaya campa coyotoc tapepecholi. Nojqúíya huelquí tamachtía ten míyac tamanti tapíyalme, totome, cohuame huan míchime. ³⁴ Huan tanahuatíani ten nochi talme quíntítanque íntáyacancagua para ma quítacaquílítj itálnamíquílís Salomón.

5

Salomón tacualtali para quíchihuas nopa hueyí tiopamít (2 Cr. 2:1-18)

¹ Tanahuatijquet Hiram ipan tali Tiro nochípa elíyaya ínelhuampo Tanahuatijquet David. Huan quema Hiram químatquí para Salomón elíyaya tanahuatijquet ipan nochi tali Israel, quíntítanquí ítequípanojcahua ma quíilhuitj Salomón para nelpaquíyaya pampa Salomón mochíjtoya tanahuatijquet.

² Huan teipa Salomón quítítanílí Tanahuatijquet Hiram ní camanali ica ítequípanojcahua, quííjto:

³ “Ta tíjmati notata David amo huelquí quíchíjchíhua se tíopamít para TOTECO Dios, pampa quípíxquí míyac tatehuilísti ica míyac talme cati quíyahualojtoyaj. Amo huelquí quíchíjchíhua se tíopamít hasta TOTECO quíchíjqui ma quíntáni nochi ícualancaitacagua. ⁴ Pero ama, quena, noTECO Dios techmacatoc tasehuilísti ica nochi talme campa hueli. Amo níjpiya yon se nocualancaitaca ipan seyoc tali huan notal ehuaní nojqúíya nochi paquíj. ⁵ Huajca ama nímotemacatoc níjchíjchíhuas se tíopamít campa masehualme quítepanítase ítoca TOTECO, pampa quej nopa TOTECO quíilhúi notata David ma níjchíhua. Pampa TOTECO quíilhúi notata para na, níicone, cati yaya quítalísquía para

tanahuatis ipan isiya David, na nijchijchihuasquía se tiopamit campa quitepanitase itoca.

6 “Huajca ama nimitztajtania techpalehui ipan ni tequit huan xiquinnahuati motequipanojcahua ma techtzontequilica tiocuame ipan nopa cuatitamit ten tali Líbano. Notequipanojcahua quinpalehuise motequipanojcahua huan na nimitzmacas cati ta techilhuis para xitahuac niquintaxtahuis. Cualí tijmati para amo aquí quimati quema, huan quenicatza cuatequis quej anSidón ehuani.”

7 Quema nopa Tanahuatijquet Hiram quicajqui icamanal Salomón, tahuel yolpajqui huan quijto: “¡Tascamati TOTECO, pampa tijmacatoc David se icone cati tahuel talnamiqui para elis tanahuatijquet ica nochi nopa miyaqui israelitame!”

8 “Huan Tanahuatijquet Hiram quinanquili Salomón ica ni amacamanali cati ica quihui:

“Nijselijtoc nopa camanali cati techtitanili, huan nijchihuas nochi cati tech-tajtania. Nimitzmacas nochi cuame ten tiocuahuit huan ten ciprés cati tijnequi. 9 Notequipanojcahua huelis quinhuicase nopa cuame ten nopa cuatitamit Líbano hasta nopa hueyi at. Nopona quinilpise para quichihuase cuatapechti huan yase iixco hueyi at hasta campa ta techilhuis. Huan nopona quitojtomase huan ta tiquinselis huan tiquinhuicas. Huan huelis techtaxtahuis ica tacualisti para nochaj ehuani.”

10 Huajca Tanahuatijquet Hiram quimacac Salomón nochi cuahuit ten tiocuahuit huan ten ciprés cati motajtanjtoya. 11 Huan huajca Salomón quititaniliyaya Tanahuatijquet Hiram sesen xihuit 4 millones 400 mil litros ten trigo huan 4 mil 400 litros ten aceite para nochi ichaj ehuani. 12 Huan TOTECO quimacac talnamiquili Salomón quej quihuijtoya. Huan Tanahuatijquet Hiram huan Salomón mohuampojchijque huan quisencajque se camanali san sejo para nochipa itztose ica cualí se ica seyoc.

Tacame cati tequipanojque ipan Ichaj TOTECO

13 Teipa Tanahuatijquet Salomón quintemo 30 mil tacame ten campa hueli ipan nochi tali Israel para quichihuase comun tequit. 14 Huan quintitanqui ipan nopa hueyi cuatitamit ipan tali Líbano. Huan mopatijayque 10 mil tacame sesen metzti. Quej nopa itztoyaj se metzti nepa ipan Líbano huan ome metzti ipan ininchajchaj. Huan Adoniram quinyacanqui nopa tacame ipan nopa tequit. 15 Nojquiya Salomón quin-tequimacac 70 mil tacame para tasacase huan 80 mil cati quitejtequiyayaj tet nopona campa tepeme. 16 Huan quin-tequitali 3 mil 300 tayacanani para quitachilise nopa tequit huan quin-tequimacase sequinoc. 17 Huan Salomón quinnahuati nopa tacame ma quiquixtica huejhueyi teme ipan tepeme huan ma quin-tejtequica sesen para monamiquise cuali ipan itzinpehualtil nopa tiopamit. Huan nopa teme quisqui tahuel patiyó. 18 Huan tacame ten altepet Gebal quinpalehuijque inincalchijcahua Salomón huan Hiram para quicualtalise nochi cuame huan teme para nopa tiopamit.

6

Salomón quipehualti nopa tiopamit

(2 Cr. 3:1-14)

1 Quema yahuiyaya para 480 xihuit para TOTECO quinquixtijtoya israelitame ipan tali Egipto, huan yahuiyaya para nahui xihuit para tanahuatis Salomón, ipan metzti ome ipan israelita calendario, nopa metzti cati itoca

Zif*, Tanahuatijquet Salomón pejqui quichijchihua nopa hueyi tiopamit para TOTECO. ² Huan nopa tiopamit cati quichijchijqui Tanahuatijquet Salomón para TOTECO quipiyayaya 27 metros ihuehuyaca, huan 9 metros ipatajca huan ihuejcapanca quipiyayaya 13 metros huan tajco. ³ Huan icalixpa nopa tiopamit nojquiya quipiyayaya 9 metros ihuehuyaca, huan 4 metros huan tajco ipatajca. ⁴ Huan quichihuili nopa tiopamit ventanas pajpatahuac ica calijtic huan para calteno amo más pajpatahuac. ⁵ Huan yahualtic nopa tiopamit ipan sesen lado ihuehuyaca huan ica iica quichijque pilcuartojtitzti. Huan tatajco mocajqui nopa cuarto Tatzejtzeltolitic huan nopa cuarto cati Más Tatzejtzeltolitic. ⁶ Quipixqui eyi pisos ten cuartos cati quiyahualo nopa cuartos Tatzejtzeltolitic. Nopa cuartos ipan nopa piso cati más tatzinta quipiyayaya 2 metro huan 25 centímetros ininpatajca. Huan nopa cuartos ipan nopa ompa piso quipiyayaya 2 metro huan 70 centímetros ininpatajca. Huan nopa piso más huejcapa quipiyayaya 3 metro huan 15 centímetros. Huan nopa cuartos motatzquilitoyaj ipan nopa tepamit ten nopa tiopamit ica cuatetomit ten tiocuahuit cati mosehuijtaya ipan se apechtí ten nopa cuartos tatzejtzeltolitic cati mocajqui tatajco. Quej nopa quichijque para nopa taquetzalme ma amo calaquica ipan nopa cuartos tatajco cati tatzejtzeltolitic.

⁷ Huan nopona campa tepexit campa quiquixtiyayaj tet para quichihuase nopa tiopamit, quitejtequiyayaj sesen tet para monamiquise cuali ica cati yas inechca. Huajca quema quihualicaque campa quiquetzase nopa tiopamit, nochi nopa teme ya eltoya senquisa tacualtalilme. Yeca quema quichijchijque nopa tiopamit ayecmo quitequihuijque yon se martillo, yon se cincel, yon se tamanti teposti. ⁸ Huan para calaquise tiopan calijtic quipixqui se caltemit ica sur ica inejmat nopa tiopamit ipan nopa achtohui piso. Huan nojquiya tejcotiyajqui se ascahuasti san quej se tenaquisti para masehualme huelise ajsise ipan nopa ome piso. Huan seyoc ascahuasti quej nopa yajqui ten nopa ome piso hasta nopa eyi piso cati más huejcapa.

⁹ Huan quema Salomón ya quitamiltijtoya nopa tiopamit, quitzontzajqui ica miyac cuatetomit huan huapalme cati senquisa tiocuahuit. ¹⁰ Huan quej ya niqijto quichijchijqui nopa cuartos cati quiyahualohuayaya nochi nopa tiopamit ipan eyi lados huan quipixqui eyi pisos. Huan ihuejcapanca sesen cuarto ipan sesen piso elqui 2 metros huan 25 centímetros. Huan motatzquilitoyaj ipan itepa nopa tiopamit ica cuatetomit ten tiocuahuit. ¹¹ Huan se tonali TOTECO quimacac Salomón ni camanali, quihui: ¹² “Ama ta tijchijchihua ni tiopamit, huan sinta tijtoquilis notamachtilhua huan tijchihuas cati quijtohua nochi noleyes, huan tijneltoacas nochi notanahuatilhua, huajca na nimitzchihuilis nochi cati nijntecahuili motata David para nijchihuas. ¹³ Na nimocahuas para niitztos tatajco israelitame huan amo quema niqincajtehuas pampa amojuanti anomasehualhua.”

Quenicatza nesiayaya tiopan calijtic

¹⁴ Huajca quej nopa Salomón tanqui quichijchihua nopa hueyi tiopamit. ¹⁵ Huan calijtic sesen cuarto quitzajque itzompac huan ipan itepa ten talchi hasta huejcapa ica huapalme ten tiocuahuit. Huan quej piso quitalijque senquisa huapalme ten ciprés.

¹⁶ Huan nopa cuarto Tatzejtzeltolitic quixelojque para nopona campa más calijtic mochihuas nopa cuarto cati Más Tatzejtzeltolitic huan quitzajque nopa cuarto ica huapali ten tiocuahuit ten talchi hasta huejcapa huan

* 6:1 6:1 Ipan abril o mayo ipan tocalendario ten ama.

nojquiya san se quichijque itzompac. Huan nopa cuarto cati Más Tatzejtzololitic quipiyayaya quej 9 metros ihuehuyaca. ¹⁷ Huan nopa cuarto cati Tatzejtzololitic cati tatajco mocajqui ipan tiopamit quipiyayaya 18 metros ihuehuyaca. ¹⁸ Huan nochi tepamit ipan nochi cuartos ipan tiopamit quintzajque nopa tet ica huapalme ten tiocuahuit. Huan nopa huapalme nochi quinjejechijtoyaj ica taixcopincayome ten xochit cati cahuantoc huan cuatajca yot. Huan yon se tet amo nesiyaya. ¹⁹ Huan quijejechijque nopa cuarto cati Más Tatzejtzololitic cati eltoya calijtic ipan tiopamit para nozona quitalse icaxa TOTECO ica itanahuatilhua. ²⁰ Huan nopa cuarto cati Más Tatzejtzololitic huan más calijtic quipiyayaya 9 metros ihuehuyaca, huan 9 metros ipatajca huan 9 metros ihuejcapanca. Huan nopa huapali cati ica quitzactoya nopa tepamit, Salomón quiajalti senquisia ica oro. Huan nojquiya quiajalti nopa taixpamit ten tiocuahuit ica senquisia oro. ²¹ Nojquiya quiajalti ica senquisia oro nochi nopa cuarto Tatzejtzololitic. Huan quitzajqui icalte cati calaquip ipan nopa cuarto campa Más Tatzejtzololitic ica tepos cadenas cati senquisia oro para amo aquí huélis calaquis san quej huéli. ²² Huajca quitamiixalti nochi tiopan calijtic ica oro. Huan nojquiya nopa taixpamit cati eltoya nechca campa Más Tatzejtzololitic quiajalti ica senquisia oro.

²³ Nojquiya nozona campa Más Tatzejtzololitic quinchijchijqui ome querubines ten olivo cuahuit. Huan sesen quipixqui 4 metros huan tajco inihuejcapanca. ²⁴ Huan ieltapal se ilhuicac ejquet elqui 2 metros huan 25 centímetros huan ne se ieltapal nojquiya 2 metros huan 25 centímetros. Huajca ten iyecapa se ieltapal hasta iyecapa ne seyoc ieltapal quema mopatajtoque mochijqui 4 metros huan tajco. ²⁵ Nochi ome nopa querubines elque san se. San se inintachiyalis huan inihuexca huan san se tachijchihuali. ²⁶ Huan inihuejcapanca nochi ome querubines elqui san se tatamachihuali, 4 metros huan tajco. ²⁷ Huan Salomón quintali nopa ome querubines nejnechca se ica seyoc tatajco ipan nopa cuarto campa Más Tatzejtzololitic huan nopa ome quipatajtoyaj nopa nahui inieltapal. Huan iniyecapa inieltapalhua cati quipixtoyaj inica quiajsiyaya sesen tapepecholi. Huan ne sequij inieltapal cati eltoya más ica iniixpa moajsiyayaj tatajco ipan nopa cuarto cati Más Tatzejtzololitic. ²⁸ Huan nojquiya quiniajalti nopa querubines ica oro. ²⁹ Huan ipan nopa tapepecholi campa Tatzejtzololitic huan campa Más Tatzejtzololitic quintejtectoyaj nopa huapalme huan quinixcopintoyaj querubín ilhuicac ehuan, apachij cuame huan xochime cati cahuantoque. Quinixcopinque ica calijtic huan ica calteno. ³⁰ Huan ipiso nopa ome cuartos cati Tatzejtzololitic quiajaltijque ica oro.

³¹ Huan campa calaquise ipan nopa cuarto cati Más Tatzejtzololitic quichijqui ome caltemit ica huapali cati monamiquiyaya ten nopa cuahuit olivo. Huan itencuayo nopa caltemit elqui yejyetzí huan quipixqui macuilli ixayac. ³² Huan ipan ni ome caltemit ten olivo cuahuit calijtic huan calteno quinixcopinque nopa querubín ilhuicac ehuan, apachij cuame huan xochime cati cahuantoque. Huan nochi quinajalti ica oro. ³³ Huan quichihuali icalte para calaquis campa Tatzejtzololitic ica cuahuit ten olivo huan itencuayo nopa caltemit quipiyayaya nahui iesquinajyo. ³⁴ Pero nopa ome caltemit eliyaya ten cuahuit ciprés, huan sesen ten nopa ome caltemit quipiyayaya iixnamic cati mohuilpachohuayaya. ³⁵ Huan ipan nopa caltemit quinixcopinque nopa querubines, apachij cuame huan xochime cati cahuantoque. Huan nochi quinajalti ica oro. ³⁶ Huan quichijchijqui nopa

tamapamit cati calijtic ica eyi pamit ten tet tecpantoc huan teipa se pamit ten apechme ten tiocuahuit.

³⁷ Huan quema Tanahuatijquet Salomón yahuiyaya para nahui xihuit ipan itequi, quema pejqui metzti Zif ipan toisraelita calendario[†], quitalijque itzinpehualtil nopa hueyi tiopamit para TOTECO.

³⁸ Huan quema Salomón yahuiyaya para 11 xihuit ipan itequi, ipan nopa metzti Bul, nopa chicueyi metzti ipan toisraelita calendario[‡], quitamiltijque nochi nopa hueyi tiopamit ica nochi tamanti cati monequiyaya. Huajca tequitique quipano chicome xihuit para quichihuase nopa hueyi tiopamit para TOTECO.

7

Seyoc cali quichijchijqui Salomón

¹ Teipa Salomón mochijchihuili se hueyi cali para ipan itztos huan tequitis. Huan monejqui 13 xihuit para quisencahuas. ² Se cuarto ipan ichaj Salomón quitocaxti, “Cuatitamit ten Líbano”. Huan quipixqui 45 metros ihuehueyaca, huan 22 metros huan tajco ipatajca huan nechca 13 metros huan tajco ihuejcapanca. Huan quipixqui nahui pamit ten tojtomahuaque taquetzalme ten tiocuahuit. Huan ipani motalijtoya nopa apechme ten tiocuahuit. ³ Quipixqui 45 apechme cati momoyajtoyaj ipan eyi pamit. Sesen pamit quipixqui 15 apechme. Huan nochi apechme motalijtoyaj ipan nopa nahui pamit ten taquetzalme ten tiocuahuit cati tojtomahuaque. ⁴ Huan oncayaya eyi pamit ten ventanas huan sesen ventana eltoya iixmelac seyoc ventana ipan ne seyoc tepamit ten nopa cali.

⁵ Nochi caltemit huan ventanas eliyaya san se ica nahui iesquinajyo. Huan onca eyi caltemit ipan sesen lado huan sesen caltemit eltoya iixmelac se caltemit ipan ne seyoc tepamit. ⁶ Huan nojquiya iixmelac nopa cali, quichijqui seyoc cuarto cati quitocaxti Calijticti ten Taquetzalme. Huan elqui se hueyi cuarto cati quipiyayaya 22 metros huan tajco ihuehueyaca, huan nechca 13 metros huan tajco ipatajca. Huan calijtic oncayaya miyac taquetzalme cati tojtomahuaque. Huan iixmelac ni cali quichijqui se calixpamit ica taquetzalme huan itzontajca. ⁷ Huan nojquiya quichijqui se Cuarto Campa Tetajtolsencahuas para nozona mosehuis nopa tanahuatijquet para quintajtolsencahuas masehualme cati taixpanose. Huan nochi nopa cali quitzajque ica huapalme ten tiocuahuit ten talchi hasta huejcapa.

⁸ Huan iica nopa cali campa tetajtolsencahuas, Salomón quichijchijqui ichaj para ipan itztos huan quipixqui se calixpamit. Huan nojquiya elqui san se tamanti tequit ica ne sequinoc calme. Nojquiya quichijqui se cali para isihua cati eliyaya iichpoca Faraón. ⁹ Huan ipan nochi nopa calme hasta inintzinpehualtil quichijque ica tahuel huejhueyi tet cati nelía patiyó. Huan nochi quintejtejque ica tepos serrucho ipan nochi lados huan tatamachihuali san quej monequiyaya para quinamiquis cuali campa monequiyaya calaquis ipan sesen cali. ¹⁰ Inintzinpehualtil nopa calme eliyaya senquisá tet cati pajpatiyo huan tahuel huejhueyi. Sequij quipiyayaya nahui metro huan tajco inihuehueyaca huan sequij eyi metro huan eyi mistit inihuehueyaca. ¹¹ Huan ten tatzinta hasta huejcapa nojquiya quitequihuijque teme cati pajpatiyo ipan nochi tepamit ipan nopa calme. Huan sesen tet quitejtejque senquisá cuali campa monequi calaquis. Huan nojquiya quitequihuijque

[†] 6:37 6:37 Ipan abril o mayo ipan tocalendario ten ama. [‡] 6:38 6:38 Ipan octubre o noviembre ipan tocalendario ten ama.

cuatetomit ten tiocuahuit. ¹² Huan nopa hueyi calixpamit nojquiya quipixqui eyi pamit ten tet cati quiyahualohuayaya. Huan sesen tet elqui cuali tatamachihuali huan cuali tecpantoc. Huan teipa ten nopa eyi pamit ten tet quipixqui se pamit ten apechme ten tiocuahuit san se quej quipixqui nopa seyoc calixpamit cati eltoya tiopan calijtic ipan ichaj TOTECO para ipan calaquisé masehualme.

Salomón tatitanqui ma quicuitij Hiram
(2 Cr. 2:13-14; 3:15-17)

¹³ Huajca Tanahuatijquet Salomón tanahuati ma quicuitij nepa ipan al-tepet Tiro se tacat cati itoca Hiram. ¹⁴ Hiram eliyaya tajco israelita pampa elqui icone se cahual sihuat ten nopa hueyi familia Neffali. Huan itata cati ejqui Tiro quimatiyaya tequiti ica bronce. Huajca Hiram nojquiya tahuel quimatiyaya quichihua nochi tamanti tequit ica bronce. Huan yaya eliyaya se talnamijca tacat ica miyac tamachilisti huan miyac yajatili. Huajca Hiram hualajqui campa Tanahuatijquet Salomón huan pejqui quichihua nochi nopa tequit. ¹⁵ Huan yaya quichijchijqui ome huejhueyi tepos taquetzalme ten bronce huan cati ijticacahuaxtique. Huan sesen quipiyayaya chicueyi metro ihuejcapanca huan macuili metro huan tajco sinta motamachihuas yahualtic.

¹⁶ Nojquiya quichijchijqui ome coronas ica bronce cati quitelijque ipan inintzonteco nopa tepos taquetzalme ma quipiyaca iniyejejeja. Huan ihuejcapanca sesen ten nopa coronas eliyaya 2 metros huan 25 centímetros.

¹⁷ Nojquiya para iyejejeja sesen corona ipan sesen nopa tepos taquetzali quichijchijqui chicome matat cati taxinepaloli, huan ipan nopa matat quipixqui tepos cadenas ten bronce. ¹⁸ Nojquiya quichijqui ome pamit ten granadas ten bronce cati quiyahualohuayaya nopa matat huan nopa tepos cadenas. Huan nochi ya ni quichijqui para ma eli nelpano yejyectzi icorona sesen ten nopa tepos taquetzalme. Huan nochi quichijchijqui ica senquisá bronce.

¹⁹ Huan ipan inintzonteco nopa coronas ten nopa tepos taquetzalme cati mopantiyaya ipan tamapamit nesiyayaj quej lirio xochime cati nechca ome metro inihuejcapanca. ²⁰ Nojquiya ipan nopa ome tepos taquetzalme huejcapa nechca nopa coronas huan nechca nopa matat quitelijtoya ome pamit ica 200 granadas ten bronce cati quiyahualo para elis nelpano yejyectzi.

²¹ Huan Hiram quinquetzqui nopa huejhueyi tepos taquetzalme campa icalixpa nopa hueyi tiopamit. Huan quitali se taquetzali ica sur huan quitocaxti Jaquín. Huan ne se quiquetzqui ica norte huan quitocaxti Boaz.

²² Huan inintzonteco nopa coronas nesiyaya quej lirio xochime. Huan quej nopa mocajqui nopa tequit ipan nopa taquetzalme.

Tamantzitzi ten nopa tiopamit
(2 Cr. 4:1-5:1)

²³ Hiram nojquiya quichijchijqui se tepos paila para at huan eliyaya nelpano hueyi. Huan quichijque ica senquisá bronce huan quitocaxti nopa paila "Hueyi At". Eltoya malacachtic quej se hueyi huajcali. Huan ten se lado hasta seyoc lado icamacoyajca quipiyayaya 4 metros huan tajco huan 2 metros ihuejcatanca. Huan quiiipitoyaj yahualtic ica se mecat cati quipiyayaya 13 metros huan tajco ihuehuyaca.

²⁴ Huan itejteno, quentzi tatzinta ten itenyacapa ome pamit ten cuacti ten bronce quiyahualojtoya nopa hueyi tepos paila para quiyeyecchihuas. Quipixqui quej se 20 cuacti ipan sesen metro yahualtic. ²⁵ Huan nopa hueyi tepos paila mosehuijtoya ipan 12 torojme ten senquisá bronce. Eyi torojme tachixtoyaj ica norte, eyi campa huetzi tonati, eyi ica sur huan eyi

ica campa hualquisa tonati. ²⁶ Itilajca nopa hueyi paila elqui nechca tajco mistit. Huan itenyacapa nesqui quej iquejcho se lirio xochit huan nopa hueyi paila quicuiyaya 74 mil litros ten at.

²⁷ Nojquiya quichijqui majtacti tamanti quej carretillas ica senquisa bronce huan iixco sesen quipixqui se mesa. Ihuehueyaca huan ipafajca nopa mesa elqui se metro huan nahui mistit. Huan ihuejcapanca nopa mesa elqui se metro huan nechca ome mistit. ²⁸ Huan nopa tamanti quej carretillas quipiyayaya tepos huapalme ipan nahui ielchiqui cati mosalojtoya ipan taquetzali campa esquina. Huan nopa tepos huapalme ipan ielchiqui quipixqui tepos barras para quimacas tetili. ²⁹ Huan ipan nochi nopa huapalme oncayaya taixcopincayot ten tecuanime cati inintoca leones, torojme huan querubín ilhuicac ehuaní. Huan tatzinta ten nopa torojme huan nopa leones quinxicopintoyaj ipan nopa bronce sequij tamanti yejyetzitzi cati malacachtique cati nesiyaya para quichijtoya ica imacuayo xihuit ihuaya xochime. ³⁰ Sesen ten nopa tamanti quej carretillas quipiyayaya nahui ruedas ten senquisa bronce huan nopa eje cati ipan momalacachohuaj nopa ruedas nojquiya elque senquisa bronce. Huan sesen quipixqui nahui esquinas huan ipan sesen iesquina nopa carretillas motetonijtoya nahui cuatetonme cati senquisa bronce para ipan mosehuis nopa tepos comit. Huan quiyecchijtoque nopa cuatetonme ipan sesen ininquespa ica cati nesiyaya quej xochi yahualme huan tasencahuali ten teposti. ³¹ Huan icamac nopa comit eltoya ica calijtic ten nopa tatzacti cati quiyahualojtoc huan quisa hasta huejcapa 45 centímetros. Icamac eliyaya yahualtic, huan cati quipalehuijtoya nopa carretillas quipiyayaya 68 centímetros huan tajco ihuejcapanca. Nojquiya ipan icamac quipiyayaya taixcopinali, huan nopa taixcopinali amo eliyaya mimiltic, eliyaya xitahuac ica nahui iesquinajyo.

³² Nopa nahui iruedas eltoyaj itzinta ten nopa tencuayome campa quisa-lojtoque ipan ejes campa momalacachohua nopa ruedas motatzquilijtoya ipan nopa carretillas. Ihuejcapanca sesen rueda eliyaya 68 centímetros huan tajco. ³³ Huan inintachiyalis nopa ruedas eliyaya san quej irueda se tatehuijca carro. Huan nopa tepos ejes cati ipan momalacachohuaj nopa ruedas huan nopa tepos ejes cati yahui tatajco huan nopa cati ica moilpía nochi quichijque ica senquisa bronce taatili. ³⁴ Huan ipan sesen ten nopa nahui iesquina ten nopa carretillas quipixqui itaquetzalhua cati quichijtoya san se ica nopa carretillas. ³⁵ Huan iteno nopa mesa ipan nopa carretilla quiyecchijtoya ica se tamanti yahualtic cati quipiyayaya 22 centímetros huan tajco ihuejcapanca. Huan nopa taquetzalme ica nopa tepos huapalme eliyaya tachijchihuali san se ica nopa carretilla.

³⁶ Hiram quichijchijqui taixcopinali ten querubín ilhuicac ehuaní, leones huan apachij cuame. Quej nopa ipan nochi ielchiqui ten nopa tepos huapalme huan ipan nopa taquetzalme quiyecchijque campa huéli. Huan quipixqui xochit yahualtic quej coronas campa huéli. ³⁷ Huan san se quichijchijqui nopa majtacti carretillas, ica san se inihuejhuexca huan san se tachijchihuali pampa quiatilijtoya nopa bronce teposti ipan san se molde.

³⁸ Nojquiya quichijqui majtacti tepos comit ten senquisa bronce, sesen tepos comit para se carretilla. Huan icamac sesen quipiyayaya se metro huan 80 centímetros ipatajca huan icoyajca huéliyaya quicuis 880 litros ten at. Huan sesen tepos comit quitalijque ipan se carretilla. ³⁹ Huan Hiram quintali macuili carretillas ica inejmat nopa tiopamit huan macuili ica iarraves. Nopa tahuel hueyi paila cati itoca Hueyi At cati achtohui quichijchijqui quitalijque campa monamiqui iesquinajtpa ica sur huan ica campa hualquisa tonati.

⁴⁰ Hiram nojquiya quichijchijqui tepos chachapalme, tepos palas huan vasos. Huan quej nopa quitamichijqui nopa tequit para Salomón ipan itiopa TOTECO. ⁴¹ Huajca ica nochi quichijqui:

Nopa ome huejhueyi tepos taquetzalme, nopa coronas ica iyejca yahualtic ipan inintzonteco nopa tepos taquetzalme, huan ome matat cati quiyahualojtoyaj nopa ome coronas ipan inintzonteco nopa tepos taquetzalme,

⁴² nopa 400 granadas cati quinhuijconque ipan nopa tepos cadenas cati eltoya huejcapa ipan nopa ome coronas (sesen tepos cadena quipixqui ome pamit ten granadas cati quinhuijconque yahualtic ipan inintzonteco nopa tepos taquetzalme),

⁴³ nopa majtacti carretillas cati quipixque nopa majtacti pailas,

⁴⁴ nopa paila para at cati tahuel hueyi cati itoca nopa Hueyi At ihuaya nopa 12 torojme cati ipan motali,

⁴⁵ huan nopa tepos chachapalme, palajme huan huajcalme.

Nochi ni tamantzitzi Hiram quichijchihuili tanahuatijquet Salomón para nopa tiopamit para TOTECO. Huan nochi eliyaya senquisa bronce cati qualaxojque hasta cahuaniyaya. ⁴⁶ Nopa tanahuatijquet quinhahuati ma quichihua nopa moldes ten chachapali nepa ipan tamayamit nechca hueyat Jordán tatajco ten nopa altepet Sucot huan Saretán. ⁴⁷ Huan Salomón amo quitamachijqui quesqui ietica nochi tamanti ten bronce pampa tahuel miyac hasta amo aquí huelqui quimatis quesqui ietica.

⁴⁸ Nojquiya Salomón quichijchijqui nochi nopa tamanti para quitequihuse ipan nopa tiopamit huan nochi quichijchijque ica senquisa oro. Quichijqui:

nopa taixpamit ten oro,

nopa mesa ten oro cati ipan quitallaj nopa pantzi iixpa TOTECO,

⁴⁹ nopa taahuil quetzalme ten oro, macuili quiquetzqui ica inejmat huan macuili ica iarraves iixmelac nopa cuarto campá Más Tatzejteloltic, nopa miyac xochime, taahuilme huan huitzcucharas ica senquisa oro,

⁵⁰ nopa huajcalme, nochi cati elqui para ica quitequise imechajyo nopa taahuilme, huan nopa tazas, pilcucharajtzitzi huan nopa ticomit ten oro,

nopa caltemit tencuayome para campá calaquise ipan nopa cuarto campá Más Tatzejteloltic, huan nopa caltemit ten nopa tiopamit. Huan nochi qualaxojque ica senquisa oro.

⁵¹ Huajca quej ni tanqui nochi nopa tequit cati nopa Tanahuatijquet Salomón tanahuati ma quichihuaca ipan nopa tiopamit ten TOTECO. Huan quihualicac nochi nopa oro, plata huan tamantzitzi ten oro cati motequihuía tiopan calijtic cati David, itata, quiiyocatalijtoya para ichaj TOTECO. Huan nochi quihuicac tiopan calijtic campá quiajocujj tomi huan tamanti cati patiyó cati iaxca nopa tiopamit cati ichaj TOTECO.

8

Icaxa Toteco quihuicaque ipan nopa tiopamit

(2 Cr. 5:2-14)

¹ Huajca Salomón quinnotzqui ma mosentilica ipan altepet Jerusalén nopa huehue tacame ten israelitame, huan nopa tayacanani ipan iixhuihua sesen ten nopa 12 huejhueyi tatame cati huejcajquiya eliyayaj itelpocahua Israel. Nojquiya quinnotzqui nochi tayacanani ipan sesen familias. Huan nochi hualajque campá Tanahuatijquet Salomón para quicuiquij icaxa TOTECO

ten Ialtepe David cati nojquiya itoca Sion huan quitalise ipan nopa yancuic tiopamit.

² Huajca nochi tayacanani mosentilijque ihuaya Tanahuatijquet Salomón quema pehua nopa hueyi ilhuit para quichijchihuase pilxajcaltzitzi ipan nopa metzti Etanim, nopa chicome metzti ipan toisraelita calendario*. ³ Huan quema ajsicoj nochi tayacanca israelitame, nopa totajtzitzi quitananque icaxa TOTECO. ⁴ Huan nopa totajtzitzi inihuaya levitame quitananque nopa caxa, huan nopa yoyon tiopamit, huan nochi nopa cuamesas cati tatzejtzeloltic, huan nochi tepos cucharas huan tamanti cati quitequihuáj nopona huan quihuicaque ipan nopa yancuic tiopamit. ⁵ Huan Tanahuatijquet Salomón huan nochi nopa israelitame cati mosentilijtoyaj ihuaya iixpa nopa caxa quimacaque TOTECO tahuel miyac tacajcahualisti ten pilborregoitzitzi huan torojme hasta amo aqui huelyaya quinpohua. ⁶ Huan teipa nopa totajtzitzi quicalaquijque nopa icaxa TOTECO campa monequi mosehuis ipan nopa cuarto campa Más Tatzejtzeloltic ipan nopa hueyi tiopamit. Huan quitaliyque inieltapaltantita nopa huejhueyi querubín ilhuicac ehuan cati quinchijchijtoyaj. ⁷ Nopa huejhueyi querubín ilhuicac ehuan quipajpatajtoyaj inieltapalhua para quiecahuilise nopa caxa huan nopa cuahuit para ica quihuicase.

⁸ Nopa cuahuit para ica quihuicase eliyaya tahuel huehueyac hasta se cati itztoc ipan nopa cuarto cati Tatzejtzeloltic huelyaya quitas iyecapa nopa cuahuit. Pero se cati itztoc calteno amo huelyaya quifas. Huan quej nopa eltoc hasta ama. ⁹ Nopa caxa san quipixtoya nopa ome tepatacme cati Moisés quitali nopona quema nopa israelitame sanoc quistoyaj ipan tali Egipto huan itztoyaj nechca tepet Horeb†. Nopona TOTECO quichijqui se camanal sencahuali inihuaya israelitame, huan ipan nopa ome tepatacme ijcuilijtoc nopa tanahuatilme cati TOTECO quijto monequi israelitame ma quitepanitaca.

¹⁰ Huan quema nopa totajtzitzi ya quitaliytoyaj nopa caxa ipan nopa cuarto Cati Más Tatzejtzeloltic huan ya quisayayaj, se mixti quitemiti nochi itiopa TOTECO. ¹¹ Huan nopa totajtzitzi amo huelque mocajque para quichihuase inintequi tiopan calijtic pampa tahuel tamixtenqui pampa itatanex huan ihueyifilis TOTECO quitemitijtoya nochi ichaj.

Icamanal Salomón (2 Cr: 6:1–7:10)

¹² Huajca Salomón motatajti huan quijto:

“TOTECO, ta tiqijtojtoc para tiitztoc ipan se mixti cati tilahuac. ¹³ Huan ama tihualitztoc ipan ni tiopamit cati nijchijtoc para ipan xiitzto para nochipa.”

¹⁴ Huan sempa Tanahuatijquet Salomón moicancuetqui huan quinxnamijqui nopa israelitame cati icatoyaj nopona huan quintiochijqui. ¹⁵ Huan quinihui:

“Ma tijhueyichihuaca TOTECO, yaya cati toDios tiisraelitame. Ama yaya quitamichijtoc cati quitencahuili notata David para quichihuas. Yaya quihui notata ¹⁶ para amo quema quitapejpenijtoya se altepet para ipan itztos ten quema quinxixti israelitame ipan tali Egipto huan hasta nopa tonali. Ipan nochi inintal israelitame amo cana quinihui

* 8:2 8:2 Elqui ipan itamiya septiembre o ipejya octubre ipan tocalendario ten ama. † 8:9 8:9 Tepet Sinai huan Horeb, san se tepet.

ma quichihuilica se tiopamit cati quihuicasquía itoca para masehualme nozona quitepanitasquíaj. Pero quitapejpeni notata David ma eli tanahuatijquet ipan imasehualhua.

- 17 “Huan notata David quipixqui ipan iyolo para quichijchihuas ni tiopamit para ipan quitepanitas itoca TOTECO cati toDios tiisraelítame.
 18 Pero TOTECO quiilhui notata David para masque elqui cuali para quinequiyaya quichihuas ichaj para quitepanitas, 19 amo elisquía ya cati quichijchihuasquía nopa tiopamit. Quiilhui para se icone quichijchihuasquía nopa tiopamit.
- 20 “Huan ama TOTECO quitamichijqui cati quitencahuili notata para quichihuas pampa yaya techtali na nitanahuatijquet. Huan na nijchijtoc ni tiopamit para nijtepanitas TOTECO toDios tiisraelítame. 21 Huan nozona nijtalijtoc nopa caxa cati quiapiya nopa ome tepatacme ica nopa camanal sencahuali cati TOTECO quichijqui inihuaya tohuejcapan tatahua quema quinquixti ipan tali Egipto.”

Salomón motatajti huan quimacac Toteco nopa tiopamit

22 Teipa Salomón moquetzqui nechca nopa taixpamit ten TOTECO, iniixpa nochi israelítame huan momatananqui para ilhuicac. 23 Huan motatajti huan quiijto:

“TOTECO, titoDios tiisraelítame, amo aqui seyoc Dios quej ta, yon nepa ipan ilhuicac, yon ipan ni taltipacti. Ta nochipa tijchihua cati tiqijtohua para tijchihuas. Huan tiquinnextilía moteicnelijcayo nochi cati mitztequipanohuaj huan mitzneltocej ica nochi iniyolo. 24 Ta tijtamichijtoc nochi cati tijtencahuili tijchihuas motequipanojca David, notata. Quena, ta moseltitzi tiqijto huan ta moseltitzi tijchijtoc quej nochi tojuanti tiquitaj ama ni tonali.

25 “Huajca ama, TOTECO Dios, nojquiya xijchihua nopa seyoc tamanti cati tijtencahuili notata David para tijchihuas. Tiquilhui sinta iconehua huan iixhuihua teipa ehuaní quitoquilise moojhui huan nejnemise xitahuac moixpa quej yaya quichijqui, huajca para nochipa se iixhui elis tanahuatijquet ipan israelítame. 26 Huajca ama TOTECO, ta cati titoDios tiisraelítame, xijchihua cati tijtencahuili motequipanojca David huan xijcahua para se iixhui nochipa tanahuatis nica.

27 “Pero Toteco Dios, tijmatij para nelía ta amo hueli mitzcuis ni taltipacti para tiitztos san nica. Yon nopa ilhuicacti cati tiquitaj, yon nopa ilhuicacti cati más huejcapa cati amo hueli tiquitaj, amo hueli mitzcuis pampa tahuel tihueyi. Huajca ¿quenicatza mitzcuis ni piltiopantzi cati na nimitzchihuillijtoc? 28 Pero ama se favor, xijtacaquili nochi cati nimitzilhuía, TOTECO Dios. Xijchihua cuenta nochi cati na nimotequipanojca nimitztajtania moixpa ipan ni netatajtili.

29 “Xijtachili huan xijmocuitahui ni tiopamit tayohua huan tonaya pampa nica campa tiqijtojtoc para quihuicas motoca. Xijtacaquili ni netatajtili cati na, nimotequipanojca, nijchihua ama iixpa ni tiopamit.

30 Quena, se favor xijtacaquili cati na, nimotequipanojca, nimitztajtania huan cati nochi moisraelita masehualhua mitztajtandise quema motatajtise nica campa ni tiopamit. Quena, ten ilhuicac campa ta tiitztoc, techtacaquili huan techtapojpolhui.

31 “Quema se acajya quiixpanos seyoc masehuali huan monequis quihualicase nica iixpa ni taixpamit ipan ni tiopamit para tatestigojquetzas moixpa sinta nelnelía quichijtoc o amo, 32 xijtacaquili hasta nozona ilhuicac campa tiitztoc huan xijtajtolsencahua. Xijchihua ma quiajsi

tatzacuiltli yaya cati tajtacolchijtoc. Huan xijmanahui nopa masehualhual cati amo teno quichijtoc para ma nesi amo quihuica tajtocoli.

- 33 “Huan sinta se tonali inincualancaitacahua moisraelita masehualhua quintanise pampa tajtacolchijtoque moixpa, xiquintacaquili quema moyolcuepase. Sinta mitzpohuilise inintajtacolhua huan motatajtise moixpa nica campa ni tiopamit huan mitztajtanise tapojpolhui, 34 huajca xiquintacaquili ten nozona ipan ilhuicac campa tiitztoc huan xiquintapojpolhui inintajtacolhua pampa injuanti momasehualhua. Huan xijchihua para huelis mocuepase ipan ni inintal cati tiquinmacac inihuejcapan tatahua.
- 35 “Sinta tijtzacuas ilhuicacti para amo taquiyahuis pampa momasehualhua tajtacolchijtoque moixpa, huan teipa motatajtise ipan ni tiopamit huan mitzpohuilise inintajtacolhua, xiquintacaquili huan xiquintapojpolhui. Sinta moyolcuepase ten inintajtacolhua pampa tiquin-taijyohuiltijtoc, 36 xiquintacaquili ten nozona ilhuicac campa tiitztoc, huan xiquintapojpolhui inintajtacol motequipanojcahua. Quena, xiquintapojpolhui moisraelita masehualhua huan xiquinnexitli nopa cuali ojti cati monequi quitoquilise. Huan xijtitani at ipan ni tali cati techmacatoc timomasehualhua para toaxca.
- 37 “Xijtacaquili sinta ipan ni tali oncas mayanti o se hueyi cocolisti cati tamahua campa masehualme, o campa tocti, o sinta hualase miyac oculilime o chapolime. Xijtacaquili sinta hualase inincualancaitacahua huan quiyahualose inialtepehua para quintehuse o sinta hualas ten hueli tamanti cati más temajmati o cati más quintaijyohuiltis momasehualhua. 38 Sinta injuanti motatajtise pampa quimachilíaj nopa tajtocoli cati eltoc ipan iniyolo huan quitananase inimax campa ni tiopamit, xijtacaquili cati mitztajtanise. 39 Quena, xiquintacaquili hasta nozona ipan ilhuicac campa ta tiitztoc, huan xiquintapojpolhui. Xijxitahua huan xijmaca sesen ten injuanti quej quinamiquí ica quenicatza nejnentoc pampa san ta tiquixmati iyolo sesen masehualhual. 40 Huan quej nopa mitzimacasise nochi momasehualhua nochi tonali cati itztose ipan nopa tali cati ta tiquinmacatoc tohuejcapan tatahua.
- 41 “Nojquiya xiquintacaquili nopa masehualme cati amo israelitame cati hualase ten huejca pampa quinequise mitzhueyichihuase. 42 Huan motatajtise ipan ni tiopamit pampa quicaquise ten ta TOTECO, ipan sequinoc talme huan quicaquise quenicatza techmanahuijtoc timomasehualhua huan para tahuel hueyi mochicalualis. Huan sinta hualahuij huan motatajtise nica, 43 xijtacaquili hasta nozona ipan ilhuicac campa ta tiitztoc huan xijchihua nochi cati nopa seyoc tali ejquet mitztajtanijtoc moixpa para nochi altepeme ipan nochi talme ma mitzixmatica huan ma mitzicnelica. Nochi ma mitztepanitaca huan ma nemica quej ta tijnequí quej moaltepe Israel quichihua. Huan nochi ma quimachilica ni tiopamit quihuica motoca huan ta cati tojuanti timitzhueyichihuj nica ipan ni tiopamit cati nimitzchihuilijtoc.
- 44 “Huan quema momasehualhua yase tatehuitij ica inincualancaitacahua pampa tiqinnahuatis huan motatajtise ica ta, huan quiixnamiquise ni altepet cati ta tijtapepenijtoc huan ni tiopamit cati nijchijqui para ta, 45 xiquintacaquili hasta nozona ipan ilhuicac campa ta tiitztoc huan xiquinpaletui.

- 46 “Huan quema momasehualhua tajtacolchihuase moixpa ta, pampa amo aquí cati amo tajtacolchihua, huan sinta tachel ticalantos por inintajtacolhua, huan tiquintemactilis ica inincualancaitacahua para ma quinitzquica o ma quinilpica huan ma quinhuicaca ipan inintal, masque huejca o nechca, 47 sinta ipan nopa tali o altepet campá quinhuicatose momasehualhua moyolcúepase, huan motatajtise moixpa huan quijitose: ‘Titajtacolchijtoque huan tijchijtoque cati amo cuali’, 48 xiquintacaquili. Quena, sinta moyolcúepase moixpa ica nochi iniyolo huan ica nochi inintonal ipan inintal inincualancaitacahua campá quinhuicase ilpitoque, xiquintacaquili sinta motatajtise moixpa huan tachixtose iixmelac ni altepet cati ta tijtapejpeni huan ni tiopamit cati na nijchijqui para ta ipan ni tali cati ta tiquinmacac inihuejcapan tatahua. 49 Quena, xiquintacaquilis ten nopona ilhuicac campá tiitzoc, huan xijchihua cati mitztajtanise huan cati xitahuac. 50 Xiquintapojpolhui momasehualhua inintajtacolhua huan nochi cati quichijtose cati amo cuali ica ta. Huan xijchihua para ma quipiyaca hueyi iniyolo nopa masehualme cati quinhuicatoque ipan inintal huan ma quintasojtaca. 51 Pampa nopa israelitame nelía momasehualhua huan moaxcahua pampa ta tiquinquixti ipan tali Egipto campá taijyohuiyayaj quej ipan se horno ten teposti.
- 52 “Huaica nochipa xitacacto para quema na, nimotequipanojca, nimotatajtía moixpa huan quema moisraelita masehualhua mitztajtaníaj se tenijqui. ¡Tachtacaquili TOTECO, quema timotatajtíaj ica ta! 53 Pampa huejcajquiya tiquilhui motequipanojca Moisés, quema tiquinquixti tohuejcapan tatahua ipan tali Egipto para ta, tiTOTECO Cati Tijpiya Nochi Tanahuatili techiyocataliyaya para ta ten nochi sequinoc masehualme.”

Salomón quitajtani Toteco ma quintiochihua israelitame

- 54 Teipa Salomón moquetzqui, pampa motancuaquetztuya iixpa itaixpa TOTECO huan momatanantoya para ilhuicac quema motatajtiyaya.
- 55 Huaica ama moquetzqui huan quintiochijqui nochi israelitame huan quijto chichahuac:
- 56 “Ma tijhueyichihuaca TOTECO cati techmacatoc tasehuilisti tiisraelitame quej quijtojtuya para quichihuas. Amo techpolohua yon se tamanti cati quitencahuili itequipanojca Moisés.
- 57 “Ma itzto tohuaya TOTECO Dios, quej yaya itztuya inihuaya tohuejcapan tatahua. Ma amo quema techtachelcahua. 58 Ma techyoltilana campá ya para ma tijnequica tinejnemise ipan iojhui. Ma quichihua para ma tijnequica tijneltofase nochi itanahuatilhua huan nochi cati icamanal techmachtía huan cati quijtohua nochi nopa leyes cati quinmacac tohuejcapan tatahua. 59 Huan nochi ni nocamanal cati ica nijtajtanijtoc, TOTECO toDios, ma elto iixpa tonaya huan tayohua para yaya ma techpalehui na huan nochi anisraelitame ica nochi cati techpolohua mojmosta. 60 Quej nopa nochi masehualme ipan nochi taltipacti quimatise para TOTECO yaya Dios huan amo aquí seyoc quej ya. 61 Pero monequi ma tijpiyaca toyolo cati senquisa cuali iixpa TOTECO toDios. Huan monequi tinejnemise ipan itanahuatilhua huan tijchijtinemise cati ya quijto quej ama ni tonali anquichihuj.”

*Quiiyocatali tiopamit para TOTECO
(2 Cr. 7:4-10)*

⁶² Huajca Tanahuatijquet Salomón huan nochi israelitame quimacaque tacajcahualisti TOTECO. ⁶³ Huan Salomón quitencahuili TOTECO 22 mil torojme quej se tacajcahualisti para ma onca tayoltalili ica ya. Huan quimacac 120 mil pilborregoitzitzi.

Huan quej nopa, nopa tanahuatijquet huan nochi israelitame quiiyocatalijque nopa tiopamit para TOTECO. ⁶⁴ Ipan nopa tonali nojquiya quiiyocatali para ya nopa tali tatajco ipan nopa calixpamit cati eltoc iixmelac nopa tiopamit. Huan nopona quitencajqui tacajcahualisti tatatili, tacajcahualisti ten harina huan nopa tachiyaicayot ten nopa tacajcahualisti para tayoltalili ica Toteco pampa nopa taixpamit ten bronce cati eltoya iixpa TOTECO eliyaya pisiltzi para nochi nopa tacajcahualisti. ⁶⁵ Huan teipa quema ajsic nopa tonali, Salomón quichijqui nopa Ilhuit ten Pilxajcaltzitzitzi iixpa TOTECO Dios para chicome tonati. Itztoyaj nopona tahuel miyac israelitame cati mosentilijtoyaj ten se lado tali Israel hasta seyoc; ten campa calaquij ipan Hamat ica norte hasta nopa atenti ten Egipto. Huan nochi ilhuichijque para catorce tonati; chicome tonati para quiiyocatalijque nopa tiopamit huan seyoc chicome tonati para nopa ilhuit quema quichijque pilxajcaltzitzitzi. ⁶⁶ Huan quema tanqui ilhuichihua, Salomón quinnahuatijtejqui nochi nopa israelitame. Huan inijuanti yajque ininchajchaj ica paquilisti. Huan quitascamatilijtiyajque TOTECO por nopa Tanahuatijquet Salomón huan por nochi cati cuali TOTECO quichijtoya ica itequipanojca David huan nochi israelitame.

9

Toteco monexti iixpa Salomón (2 Cr. 7:11-22)

¹ “Huajca Salomón tanqui quichihua nopa hueyi tiopamit para TOTECO huan tanqui quichihua nopa seyoc cali cati ipan itzto huan tequitis huan para tanahuatiani cati quiselise inintequi. Huan tanqui quichihua nochi sequinoc tamanti cati quinequiyaya quichihuas. ² Huan teipa TOTECO sempa monexti iixpa Salomón quej monextijtoya achtohui nepa ipan tepet Gabaón. ³ Huan TOTECO quiihui:

“Na nijcactoc monetatajtilis huan nochi cati techtajtanijtoc. Na niquiyocatalijtoc para elis tatzejtzeltoc ni cali cati tijchijtoc cati quihuicas notoca para nochipa. Nochipa nijtachilijtos mojmosta huan nijmocuitahuis.

⁴ “Huan ta sinta tinemis noixpa quej nenqui motata David, huan tijchihuas cati xitahuac huan cati cuali ica nochi moyolo, tijchihuas nochi cati nimitznahuatía, huan tijneltocas nochi notanahuatilhua, ⁵ na nijchihuas para tijpiyas se familia ten tanahuatiani cati tacajtiyase ipan moteipa ixhuihua. Huan se moixhui elis tanahuatijquet ipan israelitame para nochipa san quej niqiihui motata David. Niquiihui para se ten iixhuihua elis tanahuatijquet para nochipa ipan israelita masehualme.

⁶ “Pero sinta ta o moconehua antechcahuase, o amo anquichihuase notanahuatilhua huan nocamanal cati nimechmacatoc, o sinta amojuanti anquinhueyichihuase teteyome huan anquinitase quej dios,

⁷ huajca na niqinquixtis nochi israelitame cati itztoque ipan ni tali cati niqinmactilijtoc. Huan ni tiopamit cati niquiyocatalijtoc para na, nijtahuisos huan ayecmo nijchihuulis cuenta. Huan ni tali Israel elis se lugar cati masehualme quisosolose. Huan quihuetzquulise nochi altepeme. ⁸ Huan quema sosolihuis ni tiopamit huan quicajtose san tet montonijtoc, nochi masehualme cati panose nica quuitase

huan quihuetzquilise. Huan motatzintoquilise para ten quej nopa niamoTECO nijchijqui ica ni tali Israel huan ica ni tiopamit.

9 “Huan sequinoc quinnanquilise para quej nopa elqui pampa nopa israelitame quitahuelcajque ininTECO Dios cati quinquixti inihuejcapan tatahua ipan tali Egipto huan pejque quinhueyichihuaaj taixcopincayome cati quinitayajaj quej dioses. Yeca ininTECO quichijqui ma quinjasi ni tamanti cati amo cuali.”

Ichicahualis Salomón moixmatqui campa hueli
(2 Cr. 8:1-18)

10 Huan tanqui nopa 20 xihuit cati monequiyaya para Salomón ma quisencahua nopa ome calme. Quichijqui nopa tiopamit para TOTECO huan se caltanahuatili para nopa tanahuatijquet ma ipan itztos huan ipan tequitis.

11 Huan Tanahuatijquet Salomón quimacac Hiram, nopa tanahuatijquet ten tali Tiro, 20 altepeme ipan tali Galilea pampa yaya quimacatoya nochi cuame ten tiocuahuit huan ten ciprés huan nochi oro cati quinequiyaya para nopa calme. 12 Pero quema Hiram yajqui quitachilito nopa altepeme cati quimacatoya Salomón, amo quipacti. 13 Huan quijto: “¿Taya ni altepeme cati techmacatoc, noicni?” ¡Amo teno ipati! Huaajca quitocaxti nopa tali Cabul. (Cabul quinequi quijtos Amo Teno Ipati.) Huan hasta ama quej nopa itoca. 14 Huan Hiram quititanilijtoya nopa Tanahuatijquet Salomón miyac oro. Ietica nopa oro eliyaya quej 3 mil 960 kilos.

15 Huan Salomón quinchihualti miyac masehualme ma quichihuaca comun tequit para quichihuase nopa tiopamit para TOTECO huan para quichihuase nopa caltanahuatili huan ichaj. Nojquiya quichijque cati itoca Milo ya ni elqui seyoc tepamit para quitaquechis nopa tepamit nechca ichaj. Huan quitamilti nopa tepamit cati monequiyaya para quiyahualos Jerusalén huan quinchijchijqui nopa altepeme ten Hazor, Meguido huan Gezer. 16 Nopa Faraón cati eliyaya tanahuatijquet ipan tali Egipto quitantoya altepet Gezer. Huan teipa quitati nopa altepet huan quinmicti nochi nopa cananeos cati itztoyaj nopona. Huan quimacac quej se nemacti nopa iichpoca quema mochijqui isihua Salomón. 17 Huaajca Salomón sempa quicualchijchijqui altepet Gezer. Huan nojquiya quicualchijchijqui altepet Bet Horón cati mocahua ica tatzinta. 18 Nojquiya quicualchijchijqui altepet Baalat huan Tamar cati eltoc ipan nopa huactoc tali ipan tali Judá. 19 Nojquiya Salomón quincualchijchijqui nochi altepeme campa quiajocuiyaya tacualisti. Nojquiya quincualchijchijqui nopa altepeme campa quiajocuiyaya itepos carrojhua huan icahuayojhua. Nochi cati quinequiyaya quichihuasa ipan ten hueli pilaltepetzitzi nechca altepet Jerusalén, o ipan nopa cuatitamit cati itoca Líbano campa hueli ipan nopa talme cati eltoya imaco, yaya quichijqui. 20 Noja itztoyaj sequij masehualme ipan ital Salomón cati amo israelitame. Itztoyaj nopa amorreos, heteos, ferezeos, heveos huan jebuseos. 21 Inijuanti eliyayaj inixhuihua nopa masehualme cati israelitame amo huelque quintzontamiltíaj. Huaajca Salomón quinchihualti para ma quichihuaca tequit cati etic huan quej nopa naja quichihuaaj hasta ama. 22 Pero Salomón amo quichihualti yon se israelita para ma tequiti chicahuac. Quinchijqui israelitame ma elica soldados, huejhueyi tequichihuani, tanahuatiani, tayacanani ten soldados huan quinchijqui ma yaca ipan itepos carrojhua huan ma elica cati nejnemij ipan cahuayojme. 23 Nojquiya Salomón quintali 550 israelitame cati quitachiliyayaj nochi nopa tamanti cati quichijchihuayaj huan nopa miyac tacame cati tequitiyayaj ipan sesen lugar.

²⁴ Teipa Salomón quihualicac isihua cati elqui iichpoca Faraón ten campa itoca Ialtepe David hasta ipan nopa yancuic cali para tanahuatiani tatajco Jerusalén. Teipa quichijchijqui nochi cati itoca Milo cati quitaquechiyaya nopa cali.

²⁵ Eyi huela ipan se xihuit, Salomón quimacayaya tacajchualisti TOTECO quej monejqui ipan nopa taixpamit cati quichijtoya para TOTECO. Nojquiya quifencajqui tacajchualisti tatatili huan tacajchualisti para ma onca tayoltalili ica TOTECO huan para quitascamatis. Nojquiya quitati copali iixpa TOTECO. Quej nopa quichijqui quema ya quisencajtoya nopa tiopamit.

²⁶ Teipa Tanahuatijquet Salomón nojquiya quichijchijqui huejhueyi cuaacalme nepa ipan altepet Ezión Geber cati eltoc inechca nopa pilaltepetzí Elot cati eltoc iteno nopa Chichiltic Hueyi At ipan tali Edom. ²⁷ Hiram quintitanqui tacame cati tahuel quimatij quinejnemiltiaj cuaacalme para quinejnemiltise icuaacalhua Salomón ipan hueyi at inihuaya itequipanojcahua Salomón. ²⁸ Nejnénque huan ajsitoj ipan tali Ofir campa quicuique nechca 14 toneladas ten oro, huan quihuiquilijque Tanahuatijquet Salomón.

10

Se sihua tanahuatijquet quipaxaloco Salomón

(2 Cr. 9:1-12)

¹ Nopa sihua tanahuatijquet ten tali Sabá quicajqui para nochi masehualme campa hueli camanaltiyayaj ten Tanahuatijquet Salomón pampa TOTECO tahuel quitiochijtoya ica miyac talnamiquilisti. Huajca yajqui ipan altepet Jerusalén para quieyeyecos italnamiqulis ica miyac tatzintoquili huan tamanti cati ohui. ² Huajca nopa sihua tanahuatijquet ajsico ipan altepet Jerusalén ica miyac itapalehujcahua huan tahuel miyac camelos cati quimamajthualayayaj miyac tamanti taajhuyiyacayot huan tahuel miyac oro huan piltetzitzi cati pajpatiyó. Huan quema nopa sihuat quitaic Salomón, quicamanalhui ten nochi cati moilhujtoya ipan iyolo para quitatzintoquilis.

³ Huan Salomón quinanquili nochi cati quitatzintoquili. Huan ica nochi cati quitatzintoquili, amo teno elqui ohui para Salomón. ⁴ Huan nopa sihua tanahuatijquet ten tali Sabá quitaic nochi italnamiqulis Salomón, huan nopa hueyi cali cati quichijtoya para ipan itztos. ⁵ Nojquiya quitaic nochi nopa tacualisti cati eltoya ipan imesa huan nopa calme cati ipan itztoyal itapalehujcahua huan quenicatza injuanti quimatiyayaj tequitij nelcuali huan iniyoyo nelyejyetzitzi cati moquentiyayaj. Quitaic nochi cati quitequipanohuayayaj Salomón nojquiya tahuel yejyetzitzi iniyoyo. Huan quitaic nopa tacajchualisti cati Salomón temacayaya ipan Ichaj TOTECO huan tahuel san quitetzaitac. ⁶ Huan nopa sihua tanahuatijquet quihui Salomón: “Nelia melahuac cati nijcajqui ipan notal ten nochi cati tijchijtoc huan ten nochi motalnamiqulis. ⁷ Pero amo nijneltochayaya hasta quema nihualajqui. Huan ama, quena, nijneltochayaya niquitztoc ica noixteyol. Nelia tahuel hueyi motalnamiqulis huan nochi nopa ricojyot cati tijpiya, huan cati nijcactoya eltoc nelquentzi ica cati niquitztoc. ⁸ Momasehualhua huan motequipanojcahua nochipa yolpactoque pampa itztoque nochipa moixpa huan quicaquij motalnamicayo. ⁹ Ma tijhueyichihuaca TOTECO Dios cati mitztapejpeni huan mitztalijtoc para titanahuatis ipan tali Israel. TOTECO tahuel quinicnelia israelitame huan para nochipa quinicnelis huan yaya mitztalijtoc tiinintanahuatijca para xitétajtolsencahua xitahuac huan para ma mochihua cati melahuac nica.”

¹⁰ Huajca nopa sihua tanahuatijquet ten tali Sabá quimacac Tanahuatijquet Salomón 3 mil 960 kilos ten oro, huan miyac taajhuiyacayot huan piltetzitzi cati tahuel patiyó. Amo quema ajsitoya inimaco israelitame miyac taajhuiyacayot quej nopa nemacti cati nopa sihua tanahuatijquet ten tali Sabá, quimacac Tanahuatijquet Salomón. ¹¹ Huan nopa huejhueyi cuaacalme cati quinemiltiyaya Tanahuatijquet Hiram quihualiquilijque Salomón miyac oro ten tali Ofir. Huan nojquiya quihualicaque miyac cuame cati itoca sándalo huan piltetzitzi cati yejyetzitzi. ¹² Ica nopa cuahuit ten sándalo Salomón quichijqui taquetzalme para nopa tiopamit huan para nopa sequinoc calme cati ipan itztos. Nojquiya quichijchijqui arpas huan salterios para nochi cati quimatiyayaj tatzotzonaj. Nopa imiyaca cuahuit sándalo amo quema ajsitoya ipan Israel quej nopa. ¹³ Huan Tanahuatijquet Salomón quimacac nopa sihua tanahuatijquet ten tali Sabá nochi ten ya quinejqui huan ten quitajtani iyoca ten cati ya quimacatoya quej se nemacti. Huan teipa nopa sihua tanahuatijquet tacuepli ipan ital inihuaya itequipanojcahua.

Itomi huan iricojyo Salomón
(2 Cr. 9:13-24)

¹⁴ Nopa oro cati quiseliyaya Salomón sesen xihuit eliyaya 22 mil kilos. ¹⁵ Huan amo quipohuayaya cati quixtahuayayaj piso nopa tanamacani, huan cati nochi nopa huejhueyi tanahuatiani ten tali Arabia taxtahuayayaj para panose ipan ital huan cati tequichihuani ten nochi italhua quiseliyayaj. ¹⁶ Nopa tanahuatijquet Salomón tanahuati ma quichihuaca 200 tepos yolixtzajcayome cati huejhueyi quej cati quitequihuáaj soldados para momanahuise. Huan quinilhui ma quichihuaca ica oro cati quitejtejzontoque. Huan ietica sesen tepos yolixtzajcayot eliyaya eyi kilos ten senquisa oro.

¹⁷ Huan tanahuati ma quichihuaca 300 yolixtzajcayome cati amo más huejhueyi nojquiya ica oro tatejtzonali huan sesen tepos yolixtzajcayot quipixqui itéca nechca ome kilos ten senquisa oro. Huan quintali nopa yolixtzajcayome ipan nopa hueyi cali cati itocayaya “Cuatitamit ten Líbano”. ¹⁸ Nojquiya Salomón tanahuati ma quichihuaca se tapechti huejcapa ihuaya se isiya huan ica leones huan nochi elqui senquisa tachijchihuali ica marfil. Huan tanahuati ma quixaltica ica oro cati más cuali. ¹⁹ Huan para ajsis ipan nopa siyaj cati huejcapa quipiyayaya chicuase escalones. Huan icuitapa isiya eliyaya quentzi tolontic. Huan isiya quipixqui campa quitalisquía imax ipan sesen lado. Huan inechca imax nopa siyaj ica inejmat huan ica iarraves quichijque se tecuani cati itoca león cati ijcatoc. ²⁰ Huan nojquiya ipan nopa chicuase escalones quipixqui 12 leones cati ijcatoque, chicuase ipan sesen lado. Se león ipan sesen lado sese escalones. Huan yon se siyaj cati ipan mosehuá se tanahuatijquet ipan ni taltipacti amo elqui nelyejyetzitzi quej nopa cati quichijtaya Salomón. ²¹ Huan nochi nopa vasos ten ipan quuiyaya se tenijqui nopa Tanahuatijquet Salomón eliyaya senquisa oro. Huan cati quitequihuiyayaj ipan nopa cali cati itocayaya “Cuatitamit ten Líbano” nochi eliyaya senquisa oro. Amo teno ten plata quipixqui, pampa quema Salomón itztoya, nopa plata quitayayaj quej amo teno ipati eliyaya. ²² Pampa ipan hueyi at Tanahuatijquet Salomón quipiyayaya huejhueyi cuaacalme cati nemiyayaj ica Hiram icuaacalhua ten Tarsis para tanamacase huan tacohuase. Huan sesen eyi xihuit ajsiyayaj huan quihualicayayaj oro, plata, marfil, monos huan pavos reales.

²³ Huajca quej ni Salomón quipixqui más talnamiquili huan más ricojyot que nochi sequinoc tanahuatiani ipan taltipacti. ²⁴ Huan nochi masehualme ten campa hueli ipan taltipacti quinequiyayaj quiitase Salomón huan quitacaquilise italnamiquilis cati Toteco Dios quimacatoya. ²⁵ Huan sesen xihuit nopa masehualme cati quipaxalohuayayaj quihuiquiliyayaj miyac nemacti. Quihualicaque miyac tamanti ten oro, plata, yoyomit cati yejectzitzitzi, teposti para tatehuilisti, taajhuiyacayot, cahuayojme huan mulas.

Salomón quichijqui tanamaquisti ica carrojme huan cahuayojme
(2 Cr. 1:14-17; 9:25-28)

²⁶ Huan Salomón quinsentili miyac tatehuijca carrojme huan cahuayojme. Quipixqui mil 400 tatehuijca carrojme huan 12 mil cahuayojme. Huan quintali ipan altepeme para tatehuijca carrojme huan sequij quintali nechca ya ipan altepet Jerusalén. ²⁷ Huan nopa Tanahuatijquet Salomón quichijqui ma onca miyac plata quej elisquia san ten hueli teme ipan altepet Jerusalén. Huan cuahuit ten tiocuame cati patiyo quipixqui campa hueli ipan tali Judá hasta elqui quej amo teno ininpati quej nopa cuame sicómoro cati amo aqui huels quitequihuis pampa amo xitahuac. ²⁸ Nojquiya Salomón quincojqui cahuayojme ten tali Egipto huan ten tali Cilicia huan quinscalti. Nopa tacohuani cati quitequipanohuayayaj Salomón yajque tali Cilicia para quincohuase quej ininpati eliyayaj. ²⁹ Ipan nopa tonali hueliyaya quincohuase tepos carrojme ten tali Egipto ica nechca 7 kilos ten plata tomi. Huan se cahuayo ipatiyaya nechca ome kilos ten plata tomi. Huan ni carrojme huan cahuayojme Salomón quinnamaquiltiyaya nochi nopa tanahuatiani ten nopa heteos huan nopa Siria ehuaní.

11

Salomón quicajqui iojhui Toteco

¹ Tanahuatijquet Salomón quinicneliyaya miyac sihuame cati campa hueli ehuaní. Iyoca ten iichpoca Faraón, nojquiya mocuili sihuame cati ehuyayaj tali Moab, Amón, Edom, Sidón huan nojquiya mocuili sequij heteo sihuame.

² Pero TOTECO quinihuijtoya nopa israelitame ma amo motahuicaltica inihuaya sihuame ten seyoc tali. Quinilhui para nopa sihuame quinchihuase ma quintoquilica ininteteyohua. Pero Salomón quinicneli huan motemacac para mosihuajtis inihuaya masque quimatiyaya cati quiijtojtoya TOTECO.

³ Quinpixqui 700 sihuame cati inelihuajhua huan 300 sihuame san itztoyaj ipan ichaj. Huan quej TOTECO quiijto, injuanti quiyolcuetque para ma quinhueyichihua ininteteyohua. ⁴ Huajca quema Salomón ya huehuejixtoya, isihuajhua quichijque ma quicajtehua iojhui TOTECO Dios huan ma quintoquili cati nopa isihuajhua inindioses. Huan Salomón ayecmo motemachi san ipan TOTECO Dios quej quichijtoya itata David.

⁵ Salomón quihueyichijqui nopa fiero taixcopincayot Astoret cati quitequipanohuayayaj nopa Sidón ehuaní. Huan quihueyichijqui Moloc nopa tiotzi cati más fiero cati quitequipanohuayayaj nopa amonita masehualme.

⁶ Huan quej nopa, Salomón quichijqui cati amo cuali iixpa TOTECO. Ayecmo quenejqui senquisa quitoquilis TOTECO quej quichijtoya itata, David.

⁷ Ipan nopa tepet Olivos campa hualquisa tonati, Salomón quichijqui se pilcaltzi para nopa taixcopincayot cati itoca Quemos cati Toteco Dios tahuel quicualancaita. Quemos eliyaya se taixcopincayot cati quihueyichihuayayaj moabita masehualme. Huan nojquiya ipan nopa tepet Salomón quichijqui

se pilcaltzi para nopa taixcopincayot cati itoca Moloc cati Toteco Dios tahuel quicualancaita. Moloc eliyaya se teteyot cati quihueyichihuayayaj nopa amonitame. ⁸ Huan nojquiya Salomón quichijqui taixpame huan pilcaltziti campa nochi isihuajhua cati seyoc tali ehuan huelyaya quitatise copali huan quitencahuase tacajachualisti ica ininteteyohua.

Icualancayo huan itzacuultilis Toteco

⁹ Huan TOTECO tahuel cualanqui ica Salomón pampa ipan iyolo quitahuelcajtaya TOTECO toDios tiisraelitame cati moixnextijtaya iixpa ome huelta. ¹⁰ Huan quema monexti iixpa, quihhui Salomón ma amo quinhueyichihua teteyome. Pero Salomón amo quitacaquili cati TOTECO quinahuatijtaya. ¹¹ Huajca TOTECO quihhui Salomón: “Pampa quej ni motalnamiqullis huan amo tijchijqui cati nimitzilhuijtoc xijchihua, huajca na nimitzcuilis motequiticayo para titanahuatis huan nijmacas se cati mitztequipanohua. ¹² Pero amo nijchihuas quema noja tiitztoc san pampa niquicnelía David, motata. Pero, quena, nijquixtilis mocone. ¹³ Pero amo nijquixtilis nochi itequiticayo. Na nijcahuilis mocone ma eli tanahuatijquet ipan se hueyi familia san pampa niquicnelía motata David huan niquicnelía ni altepet Jerusalén cati na nijtapejpenijtoc para elis nopa altepet cati quihuicas notoca.”

Salomón huan icualancaitacahua

¹⁴ Huajca TOTECO quichijqui ma motanana Hadad cati elqui icone nopa tanahuatijquet ten tali Edom. Huan Hadad mochijqui icualancaitaca Salomón. ¹⁵ Quipiya miyac xihuit David yajqui ipan tali Edom ihuaya Joab, nopa tayacanquet ten isoldados quema yajque para quintalpachotij sequij israelita soldados cati mictoyaj ipan tatehuilisti. Huan quema noja itztoyaj nepa, quinmictijque nechca nochi tacame huan oquichpilme ten tali Edom. ¹⁶ Huan Joab mocajqui nopona chicuase metzti inihuaya iisraelita soldados huan quinmictijyahuiyayaj nopa tacame ipan Edom. ¹⁷ Pero Hadad cati noja eliyaya se piloquichpiltzi cholojtaya inihuaya sequij itequipanojcahua itata. Huan injuanti quihuicaque ipan tali Egipto. ¹⁸ Teipa quistejque ipan altepet Madián huan ajsitoj ipan altepet Parán campa quinpantijque sequinoc tacame cati nopona ehuan huan mosentilijque inihuaya. Teipa ajsitoj ipan tali Egipto huan moixnextitoj iixpa Tanahuatijquet Faraón huan yaya quinmacac se cali. Nojquiya quinmacac tacualisti huan tali.

¹⁹ Huan Faraón huan Hadad mohuampoichijque, huan Faraón quimacac se ihuejpol para elis isihua. Ihuejpol eliyaya iicni nopa sihua tanahuatijquet Tahpenes cati eliyaya isihua Faraón. ²⁰ Teipa iicni Tahpenes quimacac Hadad se icone cati quitocaxti Genubat. Huan nopa sihua tanahuatijquet Tahpenes quiscalti ipan ichaj Faraón ihuaya ya iconehua. ²¹ Pero quema ajsic camanali ipan tali Egipto para ya mictoya David huan nojquiya ya mictoya Joab nopa tayacanquet ten isoldados, Hadad quimatqui huan yajqui quihhuito Faraón:

—Techcahua nitacuepilis ipan notal.

²² Huan Faraón quinanquili:

—¿Para ten tijnequi titacuepilis ipan motal? ¿Taya mitzpolohua nica cati tijpantis nepa?

Huajca Hadad quinanquili:

—¡Amo! Amo teno techpolohua nica, pero monequi techcahuas ma niya.

²³ Huan Toteco Dios nojquiya quitananqui seyoc tacat para ma mochihua icualancaitaca Salomón huan itoca eliyaya Rezón. Rezón eliyaya icone Eliada cati cholojtaya imaco iteco, nopa Tanahuatijquet Hadad Ezer ipan tali

Soba. ²⁴ Huan Rezón quinsentili miyac tacame cati mosisiníaj huan mochi-jqui inintayacanca. Huejcajquiya quema David quintanqui Soba ehuaní, Rezón huan ihuampoyohua yajque ipan altepet Damasco huan nozona yaya motananqui huan mochi-jqui tanahuatijquet. ²⁵ Rezón tanahuati nozona ipan tali Siria huan quimacac tequipacholi Salomón quej nojquiya quichi-huayaya Hadad pampa Rezón nelía mochi-jqui inincualancaitaca israelítame hasta mijqui Tanahuatijquet Salomón.

²⁶ Seyoc cati mosisini ica Salomón elqui Jeroboam, icone Nabat. Jeroboam tacatqui ipan nopa hueyi familia Efraín ipan altepet Sereda huan inana elqui se cahuali itoca Zerua. Jeroboam eliyaya se itequipanojca Salomón pero teipa pejqui mosisinía huan quiixpano. ²⁷ Nimitzilhuis quenicatza Jeroboam mochi-jqui icualancaitaca Salomón. Ipan nopa tonali quema Salomón quichihuayaya cati itoca Milo ipan Jerusalén huan quitaltemiyyaj imajcayya nopa ome tepame cati quiyahualohuayaya nopa altepet ipan nopa colonia cati itoca Ialtepe David, Jeroboam nozona tequitiyaya. ²⁸ Huan Jeroboam eliyaya se tacat ica miyac yajatili huan tahuel tequitic chicahuac. Huan quiitac Salomón para yaya se telpocat cati nelía tequiti cuali, huajca quitequimacac ma quinyacana nochi tacame cati eliyayaj iteipa ixhuihua José ten nopa familias ipan tali Efraín huan Manasés cati quichihuayaj comun tequit nozona.

²⁹ Huan se tonali quema Jeroboam quisayaya ten altepet Jerusalén, quinamijqui ipan ojti nopa tajtolpanextijquet Ahías cati ehua Silo. Huan Ahías mohujcontoya ica se yancuic iyoyo huehueyac huan nopa ome itz-toyaj iniselti ipan ojti. ³⁰ Huan Ahías moquixtili nopa iyoyo yancuic huan quitzayanqui huan quichijqui 12 tacotonti. ³¹ Huan quihui Jeroboam: “Xijcui majtacti tacotonti para ta pampa TOTECO Dios, yaya cati toDios tiisraelítame, quipiya ni camanalí para ta. Quej ni quijtohua TOTECO Dios: ‘Nijquixtilis ihueyi tequiticayo Salomón huan nimitzmacas ta majtacti huejhueyi familias. ³² Pero nijcahuilis san se hueyi familia para icone Salomón ma quinahuati pampa niquicnelía notequipanojca David huan nopa altepet Jerusalén cati nijtapejpenijtoc ten nochi altepeme ipan tali Israel. ³³ Nijquixtilis itequiticayo Salomón pampa yaya techtahuelcajtoc huan quihueyichijtoc nopa taixcopincayot Astoret cati inindios nopa Sidón ehuaní. Huan quihueyichijtoc nopa taixcopincayot Quemos cati quitequipanohuaj nopa tali Moab ehuaní. Huan quihueyichijtoc Moloc inintaixcopincayo nopa amonítame. Nijquixtilis itequiticayo pampa Salomón amo nejnentoc ipan noojhui. Amo quichijtoc cati xitahuac noixpa. Amo quineltocatoc notanahuatilhua huan notamachtilhua quej quichijqui David, itata. ³⁴ Pero amo nijquixtilis itequiticayo Salomón amantzi quema noja yoltoc san pampa niquicnelía notequipanojca David cati nijtapejpeni. David quichijqui nochi notanahuatilhua huan nochi cati niquihui. ³⁵ Pero nijquixtilis ihueyi tequiticayo itelpoca Salomón quema yaya pehuas tanahuatis huan nimitzmacas ta. Quena, nimitzmacas nopa majtacti huejhueyi familias para tiquinnahuatis. ³⁶ Huan san se hueyi familia ten israelítame nijcahuilis imaco itelpoca Salomón para quinahuatis. Yeca para nochipa notequipanojca David quiipiyas se iixhui para tanahuatis ipan altepet Jerusalén, nopa altepet cati nijtapejpeni para quihuicas notoca. ³⁷ Huan ta nimitzsehuyis ipan tequicalí campa tali Israel ica norte. Huan nimitzmacas tequiticayot para titanahuatis ipan nochi cati mitzyolpactis para xijnahuati.

³⁸ “ Huan sinta tijtacaquilis nochi cati nimitzilhuis huan tinemis ipan

noojhui huan tijchihuas cati xitahuac noixpa, huan tijneltocas nochi no-tanahuatilhua quej quichijqui David, notequipanojca, huajca na niitztos mohuaya. Huan nijchihuas para se moixhui nochipa quipiyas tequiticayot quej tanahuatijquet quej nijchijqui ica David. Huan nimitzmacas tali Israel. ³⁹ Huan na niqintatzacuiltis iixhuihua David por nochi cati quichijtoc Salomón, pero nopa tatzacuiliti amo huejcahuas para nochipa.’ ” Quej nopa, Ahías, nopa tajtolpanextijquet, quimacac Jeroboam nopa camanali ten Toteco.

⁴⁰ Huan por cati quiilhui, Salomón quinequiyaya quimictis Jeroboam, pero Jeroboam cholo huan yajqui ipan tali Egipto campa itztoya Tanahuatijquet Sisac. Huan nozona mocajqui hasta quema mijqui Salomón.

Imiquilis Salomón
(2 Cr. 9:29-31)

⁴¹ Nopa sequinoc tamanti cati quichijtoya Salomón huan quenicatza nel-hueyi italnamiqulis, nochi eltoc ijcuilijtoc ipan nopa amatapohuali cati itoca Cati Quichijqui Salomón. ⁴² Salomón tanahuati ipan altepet Jerusalén huan quipixqui tequiticayot ipan nochi israelitame para 40 xihuit. ⁴³ Huan quema Salomón mijqui, quitalpachojque ipan Jerusalén ipan nopa colonia cati itoca Ialtepe David. Teipa pejqúi tanahuatía icone cati itoca Roboam quej tanahuatijquet.

12

Roboam pejqúi tanahuatía
(2 Cr. 10:1-11:4)

¹ Roboam yajqui ipan altepet Siquem campa nochi israelitame mosen-tilijtoyaj para quitequimacase ma eli inintanahuatijca. ² Pero Jeroboam, icone Nabat, noja itztoya ipan tali Egipto quema quicajqui para mijqui nopa tanahuatijquet pampa mochololtijtoya ten Salomón. ³ Huan nopa tayacanani ten tali Israel ica norte tatitanque ma quinotzatij Jeroboam huan yaya hualajqui. Teipa nochi injuanti sentic yajque quicamanalhuitoj Roboam huan quiilhuijque:

⁴—Motata, Salomón, techchijqui ma titequitica tahuel chicahuac. Huajca timitztajtaniáj ama techquixtili se quentzi nopa tequit cati más ohui. Huan techquixtili se quentzi nopa miyac impuestos cati monequi timitztextahuise huan timitztequipanose ica cuali.

⁵ Huan Roboam quinnanquili:

—Ama xiyaca amochajchaj huan techcahuilica ma nimoyolihuis quentzi taya nijchihuas. Teipa ximocuepaca ica eyi tonati huan nimechilhuis.

Huan nopa tacame yajque. ⁶ Huajca nopa tanahuatijquet Roboam quin-tajtani nopa huehue tacame cati quiconsejomacayayaj itata quema ya noja itztoya. Huan quintatzintoquili:

—¿Quenicatza antechconsejomacaj para ma niquinilhui nopa tacame?

⁷ Huan nopa huehue tacame quiilhuijque:

—Sinta ama tijchihuas cati ni tacame mitzilhuiáj huan tiquinnanquilis ica cuali camanali, injuanti mitztequipanose para nochipa.

⁸ Pero Roboam amo quitacaquili cati quiilhuijque nopa huehue tacame. Yaya yajqui quintajtani consejo nopa telpoca tacame cati inihuaya moscalti huan cati ama quipalehuiyayaj. ⁹ Huan quinilhui:

—¿Quenicatza antechconsejomacaj para ma niquinnanquili nopa tacame cati quinequij ma niquinquixtili achi inintaohuijcayo cati notata quin-macac?

¹⁰ Nopa telpocame cati inihuaya moscaltijtoya quinnanquillique:

—Xiquinilhui nopa tacame sinta motata quichijqui ma tequitica chicahuac, ta tiquinchihuas ma tequitica más que ya. Xiquinilhui setzi momacpil quipiyas más chichahualisti que nochi imax motata. ¹¹ Huan sinta ohui cati motata quinmacac ma quichihuaca, noja más ohui elis cati tiquinmacas ma quichihuaca. Huan sinta yaya quinhuitejqui ica se cuarta ten cuetaxti, ta tiquinhuitequis ica nopa huehueyac cuarta cati itoca ‘colome’ pampa iyecapa quipiyas piltepostzitzitzi cati tajtatequi. Quej nopa xiquinnanquili.

¹² Huajca ica eyi tonati hualajqui Jeroboam ica nochi israelitame moixnexticoj iixpa Roboam, quej nopa tanahuatijquet quinnilhuijtoya.

¹³ Huan Tanahuatijquet Roboam quinnanquili chichahuac. Amo quitacaquili inincamanal nopa huehue tacame cati quinequiyayaj quitalnamicitise.

¹⁴ Quinnanquili ica inincamanal nopa telpoca tacame. Quinilhui:

—Anquijtohuaj para notata amechmacac tequit cati etic, huajca na nimechmacas tequit cati noja más etic. Anquijtohuaj para notata amechhuitequiyaya ica cuarta ten cuetaxti, pero na nimechhuitequis ica se cuarta cati iyecapa quipiyas piltepostzitzitzi.

¹⁵ Huajca nopa tanahuatijquet amo quichijqui cati quinequiyayaj nopa israelitame. Quej ni elqui pampa TOTECO quej nopa quinequiyaya. Ica ya ni TOTECO quichihuayaya ma mochihua nochi cati quilhuijtoya Jeroboam, icone Nabat, quema nopa tajtolpanextijquet Ahías, cati ehua ipan altepet Silo, quicamanalhui ipan ojti. ¹⁶ Quema nochi nopa israelitame quitaque para Tanahuatijquet Roboam amo quitacaquili cati quitajtanijque, quijtojqe: “Amo teno tijpiyaj tojuanti ica nopa mijcatzi David huan ica ni cati iixhui. Amo tijselise yon se achi tali nica ica ni Tanahuatijquet cati iteipa ixhui Isaí. Nochi tiisraelitame ma tiyaca tochajchaj huan ma tijcahuaca ni tanahuatijquet. Ni iixhui David ma quinmocuitahui san ten ya ichaj ipan ya ital.”

Huajca ipan nopa hora nochi tali Israel ehuaní yajque ininchajchaj. ¹⁷ Pero Roboam noja quipixqui tequiticayot ipan nopa israelitame cati ehuaní ipan altepeme ten tali Judá. ¹⁸ Huajca Roboam quititanqui Adoram cati quiyacana nochi comun tequit para ma yahui nozona ipan norte campa itoca tali Israel para ma quinchihualtiti nopa masehualme ma quineltocaca itanahuatilhua, pero nopa israelitame nozona quimictijque ica tet. Huajca quema quimatqui Tanahuatijquet Roboam, moisihuiliti huan tejoc ipan itafehuajca carro huan cholojtejqqui ten campa itztoya hasta altepet Jerusalén. ¹⁹ Huajca quej nopa moyocaquixtijque nopa tali Israel ehuaní ten itequiticayo iixhui David huan quej nopa eltoc hasta ama.

²⁰ Huan quema nochi tali Israel ehuaní quimatque para nelía mocuctoaya Jeroboam ipan inintal, quitatitanijque ma huala. Huan yaya moixnexti inixpa nochi Israel ehuaní ipan nopa hueyi tasentilisti huan injuanti quitequitallijque ma eli inintanahuatijca. Huan san nopa israelitame cati itztoyaj ipan altepeme ipan tali Judá mocajque ihuaya Tanahuatijquet Roboam cati eliyaya se iixhui David.

²¹ Huajca quema Roboam sempaajsito ipan altepet Jerusalén, quinsentili nochi isoldados cati más quimatque tatehuaj ten nopa hueyi familia Judá huan nopa hueyi familia Benjamín. Ica nochi mochijque 180 mil soldados cati más tapeppenilme para ma yaca quintehuitij nopa sequinoc israelitame cati ehuaní tali Israel ica norte para quinchihualtise ma sempa mocuepaca ipan itanahuatilis Roboam, icone Salomón. ²² Pero Toteco Dios quicamanalhui nopa tacat cati elqui se itajtolpanextijca huan itoca Semaías. Quiilhui: ²³ “Xiquilhui, Roboam, icone Salomón, cati itzotc tanahuatijquet ipan tali

Judá huan xiquinilhui nochi iniixhuihua Judá huan Benjamín huan nochi masehualme cati itztoque inihuaya ni camanali. ²⁴ Ya ni cati niininTECO niquinnahuatía: ‘Amo xiquintehuitij amoisraelita icnihua. Xitacuepilica nochi ipan amochajchaj pampa quej nopa na nopaquilis.’ ”

Huan quema quicajque cati quínilhuijtoya TOTECO, mocuetque inincha-jchaj quej quinnahuatijtoya.

Jeroboam motatajtía ica sequinoc teteyome

²⁵ Huajca Tanahuatijquet Jeroboam sempa quicualchijchijqui altepet Siquem cati eltoc ipan nopa cuatitamit ipan tali Efraín huan nopona yajqui para itztos. Teipa quisqui nepa huan yajqui para quisencahuato nopa altepet cati itoca Penuel. ²⁶ Huan Tanahuatijquet Jeroboam moyolilhui ipan iyolo: “Sinta na amo nijpiyas cuidado, nochi israelitame sempa quinequise mosejcotilise ica Roboam cati iixhui David. ²⁷ Pampa sinta ni masehualme yase ipan altepet Jerusalén para quitencahuase tacajcahualisti ipan itiopa TOTECO quej nochipa quichijtoque, moyolcuepase huan sempa mosej-cotilise ica Tanahuatijquet Roboam ten tali Judá. Teipa injuanti techmictise huan sempa itztose ihuaya ya.”

²⁸ Huajca Tanahuatijquet Jeroboam quintatzintoquili cati quipale-huiyayaj taya quichihuas huan teipa quinchijqui ome pilhuacaxtzitzi ten oro huan quínilhui nochi Israel éhuani: “Ayemo xiyaca ipan altepet Jerusalén para antahueyichihuatij pampa nelía ohui. Nica anquinpixtoque amodioses para xiquinhueyichihuaca. Inijuanti cati techquixtijque tiisraelitame ipan tali Egipto.” ²⁹ Huajca Tanahuatijquet Jeroboam quitali se pilhuacaxtzi ipan altepet Betel huan se ipan altepet Dan. ³⁰ Huan ya ni quinchijqui ma tajtacolchihuaca nopa masehualme pampa sequij israelitame yahuiyayaj nepa altepet Betel huan sequinoc hasta altepet Dan para quihueyichihuase Toteco Dios iniixpa nopa taixcopincayome ten pilhuacaxtzitzi. ³¹ Huan Jeroboam nojquiya quichijqui calme ipan huejcapantic tepeme. Huan quintequitali totajtztitzi nopona cati amo eliyayaj levitame. ³² Huan nojquiya Jeroboam quipehualti se ilhuit ipan Betel ipan 15 itequi nopa metzti chicueyi ipan toisraelita calendario*, quej cati Judá éhuani quichihuaq pero nopa ilhuit amo elqui quema quijto tanahuatili para ilhuichihuase. Huan ipan nopa ilhuit nopona ipan Betel, Jeroboam iseltitzi quitencajqui tacajcahualisti ipan nopa taixpamit. Nojquiya ipan Betel quintequitali totajtztitzi para tequitise ipan nopa calme cati quisencajtoya ipan tepeme campa hueli. ³³ Huajca ipan 15 itequi nopa metzti chicueyi, se tonali cati yaya iseltitzi quixquetzqui pampa yaya quiyolpacti, Jeroboam, quitencajqui tacajcahualisti ipan nopa taixpamit cati ya quichijchijtoya ipan Betel. Yaya quipehualti nopa ilhuit para nochi israelitame huan yaya iseltitzi tejoc huan quitati copali ipan taixpamit.

13

Se tajtolpanextijquet quiajhuac Jeroboam

¹ Quema Tanahuatijquet Jeroboam moquetztoya nechca taixpamit huan quitatiyaya copali, ajsico ipan Betel se tajtolpanextijquet cati ehua tali Judá cati TOTECO quitantoyaya. ² Huan ica itequiticayo TOTECO nopa tajtolpanextijquet quijto chichahuac: “TOTECO quijtojtoc para teipa tacatis se pilconetzi cati elis se iteipan iixhui David huan itoca elis Josías. Huan yaya quinmictis nopa totajtztitzi cati tequitij ipan ni huejcapantique tepeme cati amo quej

* 12:32 12:32 Ipan itamiya octubre o ipejya noviembre ipan tocalendario ten ama.

TOTECO quiijtojtoc. Yaya quintatis nopa totajtzitzi cati nica quitatíaj copali. Quena, nica ipan ni taixpamit tatas iniomioy.”

³ Huan ipan san se nopa tonali, nopa tajtolpanextijquet quinilhui taya tanextili oncas nimantzi para quimatise teipa nochi panos quej quiijtojtoc. Quinilhui: “Ya ni se tanextili cati TOTECO quiijtojtoc nimantzi mochihuas. Ni taixpamit tajco tapanis huan nopa cuajnexti cati eltoc ipani tepehuis talchi.”

⁴ Huan quema nopa tanahuatijquet quicajqui nopa camanali cati quiijtojtoya nopa tajtolpanextijquet ten nopa taixpamit ipan Betel, cualanqui huan momatananqui ten campa itztoya nechca taixpamit huan quimanexti nopa tacat huan quiijto: “¡Xiquitzquica!” Pero nopa imax cati ica quimanextijtoya nopa tajtolpanextijquet, mocajqui huactoc huan amo huelqui quiolinia.

⁵ Huan ipan nopa talojtzi nopa taixpamit tajco tapanqui huan nopa cuajnexti cati eltoya ipan taixpamit tepejqui talchi senquisa quej Toteco Dios quiijtojtoya ica nopa tajtolpanextijquet para panos. ⁶ Huajca nopa tanahuatijquet quiihui itajtolpanextijca Toteco:

—Nimitztajtania ximotatajti ica moTECO Dios para ni nomax ma mochicahua.

Huajca itajtolpanextijca TOTECO motatajti para ma mochicahua imax huan imax nopa tanahuatijquet mochijqui cuali quej ipa eltoya. ⁷ Huan nopa tanahuatijquet quiihui nopa tajtolpanextijquet:

—Xihualá nohuaya huan ma tiyaca nochaj para titacuas, huan nimitzmacas se tamanti.

⁸ Pero nopa tajtolpanextijquet quinanquili nopa tanahuatijquet:

—Masque techmacas tajco ten nopa hueyi cali cati tijpiya, amo niyas mohuaya, yon amo nitacuas, yon amo niatis ipan ni lugar. ⁹ Pampa TOTECO technahuatijtoc para ma amo nijchihua. Techilhui: ‘Amo xijcua pantzi, yon amo xiati nozona, yon amo xitacuepili ipan nopa ojti cati ipan tiyajqui.’

¹⁰ Huajca nopa tajtolpanextijquet yajqui ipan seyoc ojti, huan amo mocuetqui ipan nopa ojti cati ipan yajqui Betel.

¹¹ Ipan altepet Betel itztoya se huehuentzi tajtolpanextijquet. Huan iconehua quipohuiltoj nochi cati nopa tajtolpanextijquet ten tali Judá quichijqui ipan nopa tonali nepa ipan Betel. Nojquiya quipohuilijque inintata taya nopa tacat quiihuijtoya nopa tanahuatijquet. ¹² Huan inintata quintatzintquili:

—¿Ipan catijqui ojti yajqui nopa tacat?

Huan iconehua quinextilijque nopa ojti cati ipan quisqui nopa tacat ten Toteco Dios cati ehua tali Judá. ¹³ Huajca quinilhui iconehua:

—Xijpejpechtica noburro para ipan niyas.

Huan injuanti quipejpechtijque iburro, huan nopa tajtolpanextijquet cati huehuentzi tejcoc, ¹⁴ huan yajqui itepotzco nopa tajtolpanextijquet ten tali Judá cati elqui itequipanojca Toteco Dios. Huan quipantito mosehuijtoc itzinta se ahua cuahuit huan quitatzintquili:

—¿Ta tiitequipanojca Toteco Dios cati tihualajtoc ten tali Judá?

Huan yaya quinanquili:

—Quena, na.

¹⁵ Huan nopa huehuentzi quiihui:

—Ma tiyaca nochaj titacuati nohuaya.

¹⁶ Pero nopa tajtolpanextijquet ten tali Judá quinanquili:

—Amo nihuélis niyas mohuaya. Amo huéli nitacuas, yon niatis nica.

¹⁷ Pampa Toteco Dios techilhujtoc ma amo nitacua yon ma amo niati nica, yon ma amo nitacuepilis ipan nopa ojti cati ipan niajsico.

¹⁸ Pero nopa huehuentzi tajtolpanextijquet quichihualti huan quiilhui:

—Na nojquiya se nitajtolpanextijquet quej ta, huan se iilhuicac ejca TOTECO technuhuatijtoc ma nimitzhuica nochaj huan ma nimitztamaca.

Pero nopa huehue tacat quiiistacahuiyaya. ¹⁹ Huajca nopa tajtolpanextijquet ten tali Judá yajqui ihuaya huan tacuajqui huan atic ipan ichaj. ²⁰ Huan quema mosehuijtoya nechca mesa, TOTECO quicamanalhui nopa huehue tajtolpanextijquet cati quicuepaltijtoya, ²¹ huan yaya quiilhui nopa tajtolpanextijquet cati ehua tali Judá:

—TOTECO quiijtohua para ta amo tijneltoquilijtoc cati mitzilhui huan amo tijtepanitztoc nopa tanahuatili cati mitzmacac. ²² Ta timocuetqui huan titacuajqui huan tiatic campa TOTECO mitznahuati amo xijchihua. Huajca ama timiquis huan amo mitztalpachose campa motatahua quintalpachoque.

²³ Quema nopa tajtolpanextijquet ten tali Judá tanqui tacua huan ati, nopa tajtolpanextijquet cati huehuentzi, quipejpechtli iburro, ²⁴ huan tejcoc ipan iburro huan yajqui. Pero ipan ojti quisqui se león huan quimicti. Huan itacayo mocajqui huetztoc ipan ojti. Huan nopa burro huan nopa tecuani mocajque san sejco nechca nopa mijcatzi.

²⁵ Huan teipa panoque sequij masehualme huan quiitaque nopa mijcatzi huetztoc ipan ojti huan nopa tecuajquet noja itztoya iixteno. Huan quema ajsitoj ipan nopa altepet campa ehua nopa tajtolpanextijquet cati huehuentzi, tepohuilijque cati quiiiztoyaj ipan ojti. ²⁶ Huan quema quicajqui nopa tajtolpanextijquet cati quicuepaltijtoya ipan ojti, quiijto: “Yaya itajtolpanextijca TOTECO cati amo quineltocac cati TOTECO quinahuatijtoya. Yeca TOTECO quitemactili imaco nopa león, para ma quimicti quej Toteco Dios quiilhui para panos.”

²⁷ Huajca quinilhui iconehua ma quipejpechtica ipilburro. Huan injuanti quipejpechtlijque. ²⁸ Huan nopa tajtolpanextijquet cati huehuentzi yajqui huan quipantito nopa mijcatzi huetztoc ipan ojti huan inechca itztoya nopa burro huan nopa león. Huan nopa león amo quicujtoya nopa mijcatzi, yon amo teno quichihuilijtoya nopa burro. ²⁹ Huajca nopa tajtolpanextijquet cati huehuentzi quitananqui itacayo itajtolpanextijca Toteco Dios huan quitali ipan iburro. Huan mocuetqui ipan ialtepe nopa huehuentzi para quichoquilise huan quitalpachose. ³⁰ Huan quitalpacho ipan nopa ostot cati quichijtoya para ya. Huan chocac por ya huan quiijto: “¡Titeicnelti tinoicni!”

³¹ Huan quema ya quitalpachojtoyaj, quinilhui iconehua:

—Quema na nimiquis, techtalpachoca campa tijtalpachojque nopa tacat ten Toteco Dios. Xijtalca noomiyi campa eltoc ya iomiyohua. ³² Pampa melahuac mochihuas nochi cati yaya quiijto ica itequiticayo TOTECO ten nopa taixpamit ipan Betel huan ten nopa taixcopincayome cati eltoque ipan tepeme campa hueli ipan altepeme nica ipan tali Samaria.

³³ Pero masque nochi ya ni panoc iixpa Jeroboam, yaya amo moyolcuetqui, yon amo quicajqui cati amo cuali quichihuayaya. Quisehuiquili quintalía totajtzitzi ten hueli masehualme cati amo quinamiqui mochihuasé totajtzitzi. Huan cati hueli cati quinequiyaya mochihuas totajtzi quiiyocataliyaya para ma mochihua totajtzi ipan nopa tepeme campa quinnextiliyaya ma quihueyichihuaca TOTECO ica taixcopincayome. ³⁴ Huan ya ni elqui se hueyi tajtacoli para Jeroboam huan iconehua. Huan yeca Toteco Dios teipa quitamilti itequiticayo Jeroboam huan quinmicti nochi ichaj ehuan por ni tajtacoli cati quichijqui.

14

Ahías tepohuili para tamis itequiticayo Jeroboam

¹ Ipan nopa tonali, Abías, icone Jeroboam, huetzqui ipan se hueyi cocolisti.
² Huan Jeroboam quihhui isihua:

—Ximopata para ma amo mitzixmatica sinta tinosihua huan xiya ipan altepet Silo. Nopona itzotc Ahías, nopa tajtolpanextijquet cati techtali ma nieli nitanahuatijquet ipan ni tali Israel. ³ Xijhuica majtacti pantzi huan nopa tortas cati quipiya miyac tamanti cuali iijtic huan se soqui xarro ica necti. Huan xiquitati para ma mitzilhui taya panos ica ni conet.

⁴ Huan quej nopa quichijqui isihua Jeroboam. Mocualchijchijqui huan yajqui nepa ipan Silo huan ajsito ipan ichaj Ahías. Huan Ahías amo hueliyaya tachiya, pampa tahuel ya huehuetixtoya. ⁵ Pero TOTECO ya quimachilti-
 jtoya Ahías para hualayaya, quihhui: Isihua Jeroboam hualas mitztatz-
 inoquili taya panos ica icone, pampa tahuel mococohua. Hualas cuali
 mopatatos para amo xiquixmatica. Huan monequi tijnanquilis ica nopa
 camanali cati nimitzmacas. ⁶ Huan quema Ahías quicajqui se tanojnotza
 campa icalte, quijito:

—Xicalaqui, ta tiisihua Jeroboam. ¿Para ten timochihua quej tiseyoc?
 Na nijseljtoc se tanahuatili para nimitzcamanhuis chichahuac. ⁷ Xiya
 huan xiquihuiti Jeroboam nopa camanali cati TOTECO toDios tiisraelitame
 techmacatoc para ya. TOTECO quijito: ‘Na nimitzquixti ten tatajco ni mase-
 hualme huan nimitzchijqui titanahuatijquet ipan ni noisraelita masehual-
 hua. ⁸ Na nijcuili tequiticayot iixhui David huan nimitzmacac ta. Pero ta amo
 tielqui quej David, notequipanojca, cati quichijqui nochi notanahuatilhua,
 huan techtoquili ica nochi iyolo huan quichijqui cati xitahuac noixpa. ⁹ Ta
 achi más tijchijqui cati amo cuali que nochi sequinoc cati itztoyaj achto-
 huiya. Pampa timochihuilijtoc taixcopincayome ten teposti huan tiqunita
 quej modioses para techcualancamacas. Huan pampa timoancuectoc ica
 na, ¹⁰ nijtamiltis motequiticayo para amo huélise tanahuatise moconehua.
 Huan nijchihuas ma miquica nochi oquichpilme huan telpocame cati moax-
 cahua ipan tali Israel masque moconehua ica moxinach o tiquincojtoc para
 mitztequipanose. Amo aqui mocahuas para itztos. Niquintamiltis nochi
 moteixmatcahua quej nicochpanas huacax cuitat hasta amo teno mocahuas.

¹¹ “Chichime quincuase moteixmatcahua cati miquise ipan altepet. Huan
 cati miquise ipan cuatitamit quincuase totome cati nacacuj pampa quej
 nopa na niamoteco niquijtojtoc.”

¹² Huan teipa nopa tajtolpanextijquet Ahías quihhui isihua Jeroboam:
 “Ximoquetza huan xiya mochaj. Huan quema tijtalis se moicxi ipan nopa
 altepet, nopa piloquichpiltzi miquis. ¹³ Huajca nochi tali Israel ehuan
 chocase huan quitalpachose pampa san ya ten nochi ichaj ehuan Jeroboam
 quinpiyas cati quitalpachose huan pampa san ya ipan nochi iteixmatcahua
 Jeroboam quiyolpactía TOTECO toDios tiisraelitame. ¹⁴ Teipa TOTECO qui-
 tananas ipan tali Israel seyoc tanahuatijquet huan yaya quintzontamiltis
 nochi ichaj ehuan Jeroboam quema tanahuatis. Quena, nimantzi quichi-
 huas. ¹⁵ TOTECO quintzejtelos Israel ehuan san quej se hueyi hueyat
 quintzejtelohua nochi acacuame. Huan quej se quimacui xihuit cati amo
 quinequi ma elto ipan imila, quinquixtis israelitame ten ni cuali tali cati
 quinmacac inihuejcapan tathua, huan quinmajcahuas más para neca ten
 nopa hueyat Eufrates, pampa quinchijchijtoque nopa taquetzalme cati ipan
 quinpiyaj nopa fiero taixcopincayome para nopa tiotzi cati itoca Asera
 huan quinhueyichijtoque huan quicualancamacatoque TOTECO. ¹⁶ Toteco

Dios quintahuelcahuas israelitame pampa tajtacolchijtoc Jeroboam huan quinnextilijtoc israelitame nojquiya ma quichihuaca quej ya.”

¹⁷ Huajca isihua Jeroboam moquetzqui huan yajqui huan ajsito ipan alpetet Tirsá. Huan quema ya calactiyahuiyaya ipan icalte nopa alpetet, nopa piloquichpiltzi mijqui. ¹⁸ Huan quitalpachojque huan quichoquilijque nochi israelitame quej quijtojtoya TOTECO ica nopa tajtolpanextijquet Ahías cati elqui itequipanojca.

¹⁹ Huan nochi sequinoc tamanti cati quichijqui Jeroboam, huan nopa hueyi tatehuilisti cati quichijqui, huan quenicatza tanahuati, nochi eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel. ²⁰ Huan Jeroboam tanahuati 22 xihuit. Huan quema mijqui, pejqui tanahuatía icone cati itoca Nadad.

*Roboam tanahuati ipan tali Judá
(2 Cr. 12:1-16)*

²¹ Ipan tali Judá tanahuatiyaya Roboam cati eliyaya icone Salomón. Quipiyayaya 41 xihuit quema pejqui tanahuatía, huan tanahuati 17 xihuit nepa ipan alpetet Jerusalén, nopa alpetet cati TOTECO quitapejpeni ipan nochi alpeteme ten israelitame para quihuicas itoca para nozona itzots. Inana Roboam itoca Naama huan elqui se amonita sihuati. ²² Huan quema Roboam tanahuatiyaya ipan tali Judá, nopa Judá ehuan quichijque cati amo cuali iixpa TOTECO huan más quicualancamaque. Inintajtacol elqui más que cati inintatahua quichijtojaj. ²³ Inijuanti quichijchijque pilcaltzitzitzi para teteyome huan quimontonojque teme cati quinitayayaj para tatzejtzeltolijque huan nojquiya quinchijchijque taquetzalme ica nopa fiero taitxocopincayome para nopa tiotzi cati itoca Asera huan quintalijque campa hueli ipan tepeme huan inintzala huejhueyi cuame. ²⁴ Huan nojquiya ipan nopa tali itztojaj tacame cati tequitiyayaj campa quinhueyichihuayayaj inintaixcopincayohua. Inintequi elqui para quinselise tacame huan quichihuase cati fiero inihuaya. Huan quintocaxtiyayaj sodomitame. Huan nopa sodomitame quichijque nochi nopa tamanti tajtacoli cati quichihuayayaj nopa sequinoc xinachti masehualme cati TOTECO quinquixtijtoya iniixpa israelitame.

*Sisac quitehuico Jerusalén
(2 Cr. 12:2-12)*

²⁵ Huan quema Tanahuatijquet Roboam yahuiyaya para macuili xihuit para tanahuatis, hualajqui Sisac ica isoldados para quitehuicoj alpetet Jerusalén. Yaya elqui nopa tanahuatijquet ten tali Egipto. ²⁶ Huan Sisac quincuili miyac tomi huan tamanti ten oro huan ten patiyto ipan ichaj TOTECO. Nojquiya quicuili iricojyo ipan nopa cali ten tanahuatijquet. Senquisa nochi quichtequilijque. Huan quihuicaque nochi tepos yolixtzajcayot ten oro cati Salomón quisencajtoya para quitequihuse isoldados para ica momanahuse ipan tatehuilisti. ²⁷ Huajca quej ipatata nopa tepos yolixtzajcayot ten oro, tanahuatijquet Roboam quichijchijqui ten bronce huan quinmacac nochi tayacanani ten soldados cati tamocuitahuáj inechca nopa caltemit ten ichaj. ²⁸ Quema nopa tanahuatijquet yajqui ipan ichaj TOTECO, itamocuitahuicahua quihuicayayaj nopa tepos yolixtzajcayome. Huan quema mocuetqui ichaj, quitalijque ipan inincuarto nopa tamocuitahuani.

²⁹ Huan nochi sequinoc tamanti cati panoc ipan itequi Roboam eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ten Tali Judá.

³⁰ Huan talojtzitzi oncayaya miyac tatehuilisti ica Roboam huan Jeroboam. ³¹ Huan teipa mijqui Roboam huan quitalpachojque ica ihuejcapan tatahua ipan Ialtepe David. Inana itoca eliyaya Naama huan ehua tali Amón. Teipa pejqui tanahuatía icone cati itoca eliyaya Abíam.

15

Abíam tanahuati ipan tali Judá

(2 Cr. 13:1-22)

¹ Abíam pejqui tanahuatía ipan tali Judá quema Tanahuatijquet Jeroboam, icone Nabat, yahuiyaya para 18 xihuit tanahuatis ipan tali Israel. ² Huan Abíam tanahuati ipan altepet Jerusalén eyi xihuit. Inana itoca eliyaya Maaca cati elqui iichpoca Absalón. ³ Abíam quichijqui san se tajtacoli quej itata quichijtoya quema tanahuatíyaya. Amo quipixqui iyolo xitahuac iixpa TOTECO Dios cati elqui iTECO quej eliyaya iyolo David, ihueyi tata. ⁴ Pero pampa TOTECO quiiicneli David, noja quinmacac tanahuatili iixhuihua para tanahuatise ipan caltanahuatili ipan Jerusalén. Huan TOTECO quimacac Abíam se icone para tanahuatis ipan altepet Jerusalén quema yaya miquisquía. ⁵ Huan TOTECO quiiicneli David pampa quichijqui nochi cati cuali iixpa TOTECO. David amo moyocatali ten TOTECO, yon amo quema quitahuélcajqui cati TOTECO quinahuatijtoya ipan nochi tonali ten inemilis. San ipan nopa tamanti ten Urias nopa heteo tacat, amo quipacti TOTECO cati quichijqui.

⁶ Huan oncayaya tatehuilisti ica Abíam, icone nopa mijcatzi Roboam, huan Jeroboam nochi tonali ten inemilis. ⁷ Huan sequinoc tamanti cati panoc ipan itequi Abíam huan nochi cati quichijqui eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ten Tali Judá. ⁸ Huan quema Abíam mijqui, quitalpachojque campa itoca Ialtepe David. Huan tanahuati icone cati itoca Asa.

Asa tanahuati ipan tali Judá

(2 Cr. 14:1-5; 15:16-19)

⁹ Huan Asa pejqui tanahuatía ipan tali Judá quema Tanahuatijquet Jeroboam yahuiyaya para 20 xihuit tanahuatis ipan tali Israel. ¹⁰ Huan Asa tanahuati 40 xihuit ipan altepet Jerusalén. Itoca ihueyi nana eliyaya Maaca iichpoca Absalón. ¹¹ Asa quichijqui cati cuali iixpa TOTECO quej ihueyi tata David quichijtoya. ¹² Quinquixti nopa tacame cati quintocaxtiyayaj sodomitame para ayecmo ma quichihuaca ten hueli. Huan quiniycueni nochi taixcopincayome cati itata quinchijchijtoya. ¹³ Huan nojquiya quiquixtili ihueyi nana, Maaca, itequiticayo cati quipiyayaya quej nopa tenan sihua tanahuatijquet pampa quichijtoya se taquetzali ten nopa fiero taixcopincayome para nopa teteyot Asera. Huajca Asa quitzontejqui nopa taquetzali huan quitati nechca nopa atajti cati itoca Cedrón. ¹⁴ Pero campa tepeme amo senquisa quiniycueni nochi nopa taixpame cati amo eltoya quej quijitohua tanahuatili campa quihueyichihuayayaj TOTECO huan taixcopincayome san sejco. Pero Asa nejnenqui ica iyolo cuali iixpa TOTECO nochi inemilis. ¹⁵ Nojquiya Asa quitali ipan itiopa TOTECO nopa oro, plata huan tamanti cati tahuel patriyo cati itata huan ya quiiyocatalijtoya para quimacas TOTECO.

Asa huan Ben Adad mohuampojchijque

(2 Cr. 16:1-10)

¹⁶ Huan ipan nochi inemilis Tanahuatijquet Asa oncayaya tatehuilisti ica Baasa, nopa tanahuatijquet ipan tali Israel. ¹⁷ Huan Tanahuatijquet Baasa

calajqui ipan tali Judá huan quichijqui nelía cuali tachijchihuali nopa altepet Ramá para nozona mocahuase isoldados para quimocuitahuise nopa ojti. Huan quitzajqui nopa ojti para amo aquí huelis quisas, yon calaquis ten itál Tanahuatijquet Asa ipan tali Judá. ¹⁸ Huajca quema Baasa ya calactoya ipan tali Judá, Tanahuatijquet Asa quicuic nochi plata huan oro cati eltoya ipan itioya TOTECO huan ipan ichaj, huan quitali nochi inimaco itequipanojcahua. Huan quintitanqui ma quiiatij Tanahuatijquet Ben Adad ipan altepet Damasco ipan tali Siria, cati eliyaya icone Tabrimón huan iixhui Hezión. Huan quiihui:

¹⁹ “Ma tijchihuaca se camanal sencahuali san sejco quej totatahua quipixque. Xiquita, nimitztitanilía se nemacti ten oro huan plata. Xijosolo ama nopa camanal sencahuali ica nopa tanahuatijquet Baasa ten tali Israel para yaya ma techtalcahui huan ayecmo techcuatotonis.”

²⁰ Huan Ben Adad quiseli nochi ten quiihuijtoya nopa tanahuatijquet Asa huan quintitanqui nopa tayacanani ten soldados para ma quintehuitij se quesqui altepeme ipan tali Israel. Huan quintanqui nopa altepeme ten Ijón, Dan, Abel Bet Maaca huan Cineret huan nochi altepeme ten tali Neftalí.

²¹ Huan quema Baasa quimatqui ya nopa, ayecmo quicualchijchijqui altepet Ramá. Huan mocuetqui ipan altepet Tirsá ipan itál.

²² Huajca Tanahuatijquet Asa tatitanqui ma quinnotzatij nochi Judá ehuan para ma mosentilica huan para ma amo polihui yon se. Huan quinquimacac ma quisosoloca nochi teme huan nochi cuame cati Tanahuatijquet Baasa quitequihuiyaya para quichihuas más cuali nopa altepet Ramá. Huan Tanahuatijquet Asa quitequihui ya nopa para quincualchijchihuas altepeme Geba huan Mizpa ipan inintal iixhuihua Benjamín.

Asa mococo huan mijqui

(2 Cr. 16:11-14)

²³ Nopa sequij tamanti cati panoc ipan itequi Asa, huan nochi ichicahualis huan nochi cati quichijqui, huan nopa altepeme cati quincualchijchijqui, eltoc ijcuilijtoc ipan nopa amatapohuali cati itoca Catí Quichijque Nopa Tanahuatiani Ipan Tali Judá. Quema eliyaya huehuentzi, quipixqui se cocolisti ipan iicxi.

²⁴ Huan teipa mijqui huan quitalpachojque campa ihuejcapan tatahua quintalpachojtoyaj ipan Jerusalén ipan nopa colonia cati itoca Ialtepe David. Teipa pejqqui tanahuatía icone cati itoca Josafat.

Nadab tanahuati ipan tali Israel

²⁵ Quema Asa yahuiyaya para ome xihuit tanahuatis ipan tali Judá, Nadab, icone Jeroboam, pejqqui tanahuatía ipan tali Israel. Huan Nadab tanahuati para ome xihuit. ²⁶ Pero quichijqui cati amo cuali iixpa TOTECO, huan quichijqui tajtacoli quej itata quichijtoya. Huan nojquiya quinchijqui nochi israelitame ma tajtacolchihuaca. ²⁷ Pero Tanahuatijquet Baasa, icone Ahías, cati huala ipan ihueyi familia Isacar, motananqui inihuaya sequinoc ihuam-poyohua huan quimicti Nadab nepa ipan Gibetón, se altepet ten filisteo masehualme pampa Nadab huan nochi iisraelita soldados quiyahualojtoyaj nopa altepet Gibetón para quitehuis.

²⁸ Baasa quimicti Nadab quema Asa yahuiyaya para eyi xihuit tanahuatis ipan tali Judá. Huan teipa Baasa mochiqqui tanahuatijquet ipan tali Israel. ²⁹ Huan nima quema Baasa pejqqui tanahuatía, quimicti nochi iteixmatcahua Jeroboam quej TOTECO quiijtojtoya ica itequipanojca Ahías cati ehua ipan altepet Silo para panos. Huan amo aquí quicajqui ma itzto. ³⁰ Quej ni

elqui pampa Jeroboam tahuel tajtacolchijtoya huan quichijqui para ma tajtacolchihuaca nochi israelitame. Huan tahuel quicualani TOTECO ininDios israelitame.

³¹ Nochi sequinoc tamanti cati panoc ipan itequi Nadab huan nochi cati quichijqui eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel.

³² Huan nochi tonali ipan inintanahuatilis oncayaya tatehuilisti ica Tanahuatijquet Asa ipan Judá huan Baasa tanahuatijquet ipan tali Israel.

Baasa tanahuati ipan tali Israel

³³ Huan quema Tanahuatijquet Asa yahuiyaya para eyi xihuit tanahuatis ipan tali Judá, pejqui tanahuatía Baasa, icone Ahías, ipan tali Israel nepa ipan altepet Tirsa. Huan Baasa tanahuati 24 xihuit. ³⁴ Huan quichijqui cati amo cuali iixpa TOTECO huan quisehuiquili quitoquili ifiero ojhui huan itajtacol Jeroboam pampa quinmacayaya israelitame taixcopincayome para ma ica quihueyichihuaca Toteco huan yeca quinchijqui ma tajtacolchihuaca.

16

¹ Ipan nopa tonali nopa tajtolpanexijquet Jehú quimacac Tanahuatijquet Baasa se camanali ten se taijyohuilisti cati TOTECO quititaniyaya. Huan quihui: ² “Na nimitztananqui ipan taltepocti para nimitzchihuas titanahuatijquet campa noisraelita masehualhua, pero ta tinejnentoc ipan ifiero ojhui Jeroboam. Ta tijchijtoc ma tajtacolchihuaca noisraelita masehualhua. Huan tijchijtoc ma nicualani miyac por motajtacol. ³ Yeca ama nimitztzontamiltis ta huan nochi mochaj ehuan quej nijchijqui ica nochi iteixmatcahua Jeroboam cati elqui icone Nabat. ⁴ Huan moteixmatcahua cati miquise ipan altepet quincuase chichime, huan cati miquise ipan cuatitamt, quincuase nopa totome cati nacacauj.”

⁵ Huan nopa sequinoc tamanti cati panoc ipan itequi Baasa huan nochi cati quichijqui huan nopa chicahualisti cati quipixqui, eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel. ⁶ Huan quema mijqui Tanahuatijquet Baasa, quitalpachojque ipan altepet Tirsa. Teipa tanahuati icone cati itoca Ela.

⁷ Huaيجا ni camanali ten TOTECO cati quimacatoya Jehú nopa tajtolpanexijquet cati icone Hanani, elqui para Tanahuatijquet Baasa huan para ichaj ehuan pampa yaya quichijtoya nochi cati amo cuali iixpa TOTECO. Huan ica nochi cati quichijqui tahuel quicualancamacac TOTECO. Yeca TOTECO quinixpolihuilti quej quichijqui ica Jeroboam.

Ela huan Zimri tanahuatijque ipan Israel

⁸ Quema Tanahuatijquet Asa yahuiyaya para 26 xihuit tanahuatis ipan tali Judá, pejqui tanahuatía Ela, icone Baasa, ipan tali Israel. Huan mosehui para tanahuatis ipan altepet Tirsa huan tanahuati ome xihuit. ⁹ Pero Zimri, se itapalehuijca Ela, cati quimocuitahuiyaya tajco imiyaca itepos carrojhua para tatehuilisti, motanangui inihuaya sequinoc ihuampoyohua para quitehuise Ela. Huaيجا se tonali quema taiyaya Ela ipan altepet Tirsa ipan ichaj Arsa cati eliyaya se itapalehuijca nojquiya huan imaco eltoya nopa icaltanahuatil, Ela taic hasta cuali moihuinti. ¹⁰ Huan nimantzi ajsito Zimri huan quimicti para ya quipatas ipan itanahuatilis. Ni tamanti panoc quema Tanahuatijquet Asa yahuiyaya para 27 xihuit tanahuatis ipan tali Judá.

¹¹ Huan nima quema pejqui tanahuatía Zimri ipan nopa caltanahuatili ipan tali Israel, quinmicti nochi iteixmatcahua huan ichampoyohua Baasa.

Amo quicajqui ma itzto yon se tacat ten ichaj ehuan, iteixmatcahua o ihuampoyohua cati huelisquía momacuepase. ¹² Huan quej ni Zimri quintzontamilti nochi iteixmatcahua Baasa quej TOTECO quiyolmelajtoya Baasa ica nopa tajtolpanextijquet Jehú. ¹³ TOTECO quintatzacuilti por nochi itajtacolhua Baasa huan icone, Ela. Pampa inijuanti quinchijque ma tajtacolchihuaca nochi israelitame pampa quinchihualtijque ma quinhueyichihuaca taixcopincayome ten sequinoc altepeme, huan yeca TOTECO ininDios israelitame tahuel cualanqui inihuaya por inintajtacolhua.

¹⁴ Nochi sequinoc tamanti cati panoc ipan itequi huan nochi cati quichijqui eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel.

¹⁵ Huan quema Tanahuatijquet Asa yahuiyaya para 27 xihuit tanahuatis ipan tali Judá, pejqui tanahuatía Zimri, huan tanahuati san chicome tonati ipan altepet Tirsá. Huan nochi israelita soldados itztoyaj nechca nopa filisteo altepet cati itoca Gibetón pampa quitehuiyayaj. ¹⁶ Huan nopa soldados cati mochijtoyaj nechca altepet Gibetón, quimatque para Zimri quimicti Tanahuatijquet Ela. Huajca nochi nopa israelitame quitapejpenijque Omri para ma eli tanahuatijquet ipan tali Israel. Omri eliyaya se hueyi tayancaquet ten soldados. ¹⁷ Huajca Omri huan nochi nopa israelita soldados quicajtejqe altepet Gibetón huan yajque quitehuitoj altepet Tirsá.

¹⁸ Huan quema Tanahuatijquet Zimri quiitac para nopa israelita soldados ya quiitzquitoyaj nopa altepet, motzajqui ipan nopa caltanahuatili. Huan quilemenalti nopa cali campa hueli huan nopona calijtic mijqui. ¹⁹ Mijqui por nopa tajtacoli cati quichijtoya pampa quichijqui nochi cati amo cuali iixpa TOTECO. Nejnenqui ipan ifiero ojhui Jeroboam huan ica nopa tajtacoli cati quichijqui para ma quinhueyimatica teteyome ihuaya Toteco, quinnextili israelitame ma tajtacolchihuaca. ²⁰ Huan nochi cati quichijqui Zimri huan quenicatza quisencajqui para quimictis Tanahuatijquet Ela eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel.

Omri tanahuati ipan tali Israel

²¹ Huajca nopa israelita masehualme motajcoxelojqe ica ome talmiquilisti. Tajco inijuanti quinequiyayaj para Tibni, icone Ginat, ma elis tanahuatijquet. Huan nopa seyoc tajco quinequiyayaj Omri. ²² Pero nopa tajco israelitame cati quitoquilijque Omri huelque más que cati quitoquilijque Tibni, icone Ginat. Huajca quimictijque Tibni, huan Omri mochijqui tanahuatijquet.

²³ Quema Asa yahuiyaya para 31 xihuit para tanahuatis ipan tali Judá, pejqui tanahuatía Omri ipan tali Israel huan tanahuati 12 xihuit ica nochi. Chicuase ten nopa xihuit, yaya tanahuati ipan altepet Tirsá. ²⁴ Huan Omri quicohuili Semer nopa cuatitamit campa ama eltoc nopa altepet Samaria san ica 66 kilos ten plata. Huan nopona quichijqui se altepet huan quitocaxti Samaria por nopa tacat cati achtohuiya eliyaya iaxca.

²⁵ Nochi cati quichijtoyajqui Omri elqui amo cuali iixpa TOTECO. Yaya quichijqui cati eliyaya más fiero que nopa sequinoc tanahuatiani cati tanahuatijque achtohui que ya. ²⁶ Nejnenqui ipan nochi iohui Jeroboam, icone Nabat, huan quinhueyichijqui taixcopincayome huan quinchihualti nopa israelitame ma nojquiya tajtacolchihuaca. Yeca Omri tahuel quicalancamacac TOTECO Dios.

²⁷ Nopa sequinoc tamanti cati panoc ipan itequi Omri huan nochi cati quichijqui eltoc ijcuilijtoc ipan nopa amatapohuali cati itoca Cati Quichijque

Nopa Tanahuatiani Ipan Tali Israel. ²⁸ Huan Omri mijqui huan quitalpa-chojque ipan altepet Samaria, huan teipa pejqui tanahuatía icone cati itoca Acab.

Acab tanahuati ipan tali Israel

²⁹ Tanahuatijquet Acab, icone Omri, pejqui tanahuatía ipan tali Israel quema Asa yahuiyaya para 38 xihuit para tanahuatis ipan tali Judá. ³⁰ Huan Acab mosehui ipan altepet Samaria huan tanahuati ipan tali Israel para 22 xihuit. Huan Acab quichijqui cati amo cuali iixpa TOTECO. Quichijqui más amo cuali que cati quichijque nochi sequinoc tanahuatiani achtohui que ya. ³¹ Yaya moilhui para amo quenijqui sinta tajtacolchihuas huan motatajtis ica taixcopincayome quej quichijqui Jeroboam, icone Nabat. Huan Acab nojquiya mosihuajti ica Jezabel, ichpoca Et Baal nopa tanahuatijquet ipan tali Sidón. Huan pejqui motatajtía huan quinhueyitalía nopa teteyome ten Baal. ³² Huan quichihuili Baal se tiopamit huan taixpamit ipan altepet Samaria. ³³ Huan nojquiya quiquetzqui se taquetzali fiero para nopa taixcopincayot Asera. Huan quej nopa Acab quichijqui noja más fiero huan más quicualancamacac TOTECO ininDios nopa israelitame huan amo quej quichijque nopa sequinoc tanahuatiani cati tanahuatijque achtohui que ya. ³⁴ Ipan nopa tonali quema tanahuatiyaya Acab; Hiel, cati ehua Betel, sempa pejqui quicualchijchihua nopa altepet Jericó. Huan quema quitali itzinpehualtil, mijqui iachtohui cone cati itoca Abiram. Huan quema quitamilti huan quitali nochi nopa caltemit, mijqui icone teipa ejquet cati itoca Segub. Nochi ya ni mochijqui quej TOTECO huejcajquiya quihhuijtoya Josué, icone Nun, ma teyolmelahuas para panos.

17

Elías teyolmelahua para oncas tahuajquisti

¹ Huan nopa tajtolpanextijquet Elías ten altepet Tisbe ipan tali Galaad quihhui Acab: “Temachti nimitzilhuía amo taquiyahuis para se ome xihuit, yon amo huetzis ajhuechti ipan tali Israel hasta quema na niqijtos para oncas.”

² Huan TOTECO quihhui Elías: ³ “Xiquisa nica huan xiya ica campa hualquisa tonati huan ximotati nechca nopa atajti cati itoca Querit cati mocahua ica campa hualquisa tonati ten hueyat Jordán. ⁴ Nopona huelis tiatis ipan nopa atajti huan niquinnahuatijtoc totome ma mifzhuiquilica motacualis.”

⁵ Huajca Elías quichijqui cati TOTECO quinahuati huan yajqui para itztoti nechca nopa atajti Querit, cati eltoc iixmelac nopa hueyat Jordán. ⁶ Huan nopa totome quihuiquiliyayaj pantzi huan nacat mojmosta ica icjaloc huan ica tiotac, huan quiiyaya at ten nopa atajti Querit. ⁷ Huan panoc miyac tonali huan teipa huajqui nopa atajti Querit pampa amo taquiyajtoya ipan tali Israel.

Elías yajqui altepet Sarepta

⁸ Huajca TOTECO quihhui Elías: ⁹ “Ximoquetza huan xiya ipan altepet Sarepta ipan tali Sidón huan xiitzo ipan nopa altepet. Niqihhuijtoc sihuat cati icnotzi cati itztoc ipan nopa altepet ma mitztamaca.”

¹⁰ Huajca Elías moquetzqui huan yajqui nepa altepet Sarepta. Huan quema ajsito ipan icalte nopa altepet, quipanti se sihuat cuapejpenayaya, huan ya quinojnotzqui huan quihhui:

—Na nimitztajtanía techhualiquili se quentzi at ipan se vaso para niquis.

¹¹ Huan quema nopa sihuat yahuiyaya para quicuiliti nopa at, Elías sempa quinojnotzqui huan quiihlui:

—Nojquiya nimitztajtania techhualiquili se achi pantzi.

¹² Huan nopa sihuat quinanquili:

—Temachti na amo nijpiya yon se quentzi pantzi ipan tochaj. Pero nijpixtoc se achi harina huan se quentzi aceite huan ama nijsentilia se ome cuahuit para niquicxitis para nocone huan na para tijcuase huan teipa timiquise ica mayanti.

¹³ Huan Elías quinanquili:

—Amo ximajmahui. Xiya xijsencahuati quej tiquijtojtoc. Pero achtohui ica nopa harina cati tijpiya xijchihua se torta pisiltzi huan techhualiquili. Huan teipa xijsencahua seyoc para ta huan para mocone. ¹⁴ Pampa TOTECO toDios nochi israelitame quijto para amo tamis nopa harina, yon nopa aceite hasta nopa tonali quema TOTECO quichihuas ma huetzi at ipan ni tali Israel.

¹⁵ Huajca nopa sihuat cati icnotzi yajqui huan quichijqui cati Elías quiihluijtoya huan tacuajqui Elías, huan nopa sihuat huan icone. Huan quipixque tacualisti para miyac tonali. ¹⁶ Amo tanqui nopa harina campa quiajoctoya, yon nopa aceite cati eltoya ipan se soqui xarro, san quej TOTECO quijtojtoya ica Elías.

¹⁷ Huan se tonali, huetzqui ipan se cocolisti icone nopa sihuat cati icnotzi huan icocolis eliyaya tahuel chicahuac. Ayecmo quipixqui pajti huan mijqui.

¹⁸ Huajca nopa sihuat cati icnotzi quiihlui Elías:

—¿Taya nijpiya ica ta tiitequipanojca Toteco Dios? ¿Tihualajtoc para techelnamiquiltis notajacolhua huan tijchihuas ma miqui nocone?

¹⁹ Huan ya quiihlui:

—Techmaca mocone.

Huajca Elías quicuic nopa piloquichpiltzi huan quihuicac campa ya mocahua huan quitali nopa piloquichpiltzi ipan ten ya itapech.

²⁰ Huan nima motatajti ica TOTECO huan quiihlui: “NoTECO Dios, ¿para ten tijchijtoc ma mocueso nopa sihuat cati icnotzi cati ipan ichaj nimocajtoc, huan tijchijtoc ma miqui icone?”

²¹ Huan teipa motejqui ipan nopa piloquichpiltzi eyi huelta, huan quitzajtzili TOTECO huan quiihlui: “NoTECO Dios, nimitztajtania se favor, xijmaca itonal ni piloquichpiltzi para itzot.”

²² Huan TOTECO quitacaquili cati tajtanqui Elías huan quichijqui para nopa piloquichpiltzi ma moyolcui. ²³ Huan Elías nimantzi quitananqui nopa piloquichpiltzi huan quihuicac campa itztoya inana huan quiihlui:

—Xiquita mocone itztoc.

²⁴ Huan nopa sihuat quinanquili:

—Ama nelia nijmati cuali para ta tiitequipanojca Toteco Dios huan cati tiquijtohua nelia melahuac pampa huala ten TOTECO.

18

Elías sempa moixnexti iixpa Acab

¹ Huan panoc miyac metzti huan ya yahuiyaya para eyi xihuit amo huetzi at quema TOTECO quinojnotzqui Elías huan quiihlui: “Xiya huan ximoixnextiti iixpa Tanahuatijquet Acab huan xiquihui para na nijchihuas ma huetzi at ipan ni tali Israel.”

² Huajca Elías yajqui para moixnextiti iixpa Acab. Huan ipan nopa tonali nelia oncayaya se hueyi mayanti ipan estado Samaria campa itztoya Acab.

³ Huan Acab quinoztqui itayacanca tequipanojca cati itoca Abdías cati imaco eltoya icaltanahuatil. Huan Abdías nelía quitoquili TOTECO ica nochi iyolo.

⁴ Se huelta quema Jezabel quinequiyaya quinmictis nochi itajtolpanextijcahua TOTECO, Abdías quintati 100 itajtolpanextijcahua ipan ome huejhueyi ostome; 50 quintati ipan se ostot huan seyoc 50 ipan seyoc ostot. Huan quinmacayaya at huan tacualisti. ⁵ Huan Acab quiilhui Abdías:

—Monequi ma tijtachilica nochi tali Israel campa onca amelme ipan atajti huan tiquifase sinta hueli tijpantise xihuime para tiquintamacase mas que san se ome tocahuayojhua huan tomulas para amo nochi miquise.

⁶ Huajca quixelhuilijque nopa tali ica ome para senen yas ipan se tajco huan quitemos xihuime huan seyoc yas ipan ne se tajco. Huan Acab yajqui ipan se ojti iseltitzi huan Abdías yajqui ipan seyoc ojti iseltitzi. ⁷ Huan quema nejnentiyahuiyaya Abdías ipan ojti, monamijqui ihuaya Elías. Huan quema quiixmatqui, motancuaquetzqui iixpa huan quiilhui:

—¿Nelía ta, tinoteco Elías?

⁸ Huan Elías quiilhui:

—Quena, na.

Huan teipa quiilhui:

—Xiya, xiquilhuiti moteco Acab para na niiztoc nica.

⁹ Huan Abdías quinanquili:

—¿Taya tajtacoli nijchijtoc na para techtemactilis ica Acab para ma techmicti? ¹⁰ Nopa Tanahuatijquet Acab mitztemojtoc ipan nochi talme huan nochi ipan pilaltepetziti campa hueli. Huan nochi tanahuatiani quiilhuijtoque para amo mitzitztoque. Huan Acab quinchihualtijtoc nochi tanahuatiani ma tatestigojzetzaca sinta melahuac amo mitzitztoque. ¹¹ ¡Huan ama techtajtania ma niya huan ma niquilhui para tiiztoc nica! ¹² Quema na ya niyajos, huelis Itonal TOTECO mitzhuicas sejoyoc campa na amo nijmati. Huan quema na niquilhuis Acab tiiztoc nica, yaya mitztemoqui huan sinta amo mitzpantis, techmictis. Huan na niquicnelijtoc huan nijtequipanojtoc noTECO hasta quema nitelpocat. ¹³ ¿Amo aqui mitzpohuilijtoc cati nijchijqui quema Jezabel quinmictiyaya itajtolpanextijcahua TOTECO? Na niquintati se ciento tajtolpanextiani ipan ome ostot huan niquinmacac at huan tacualisti. ¹⁴ ¿Huan ama ta techilhuía ma niya niquilhuiti noteco Acab para tiiztoc nica? Sintá niyas, temachti techmictis.

¹⁵ Huan Elías quinanquili:

—Nijtestigojquetza iixpa TOTECO Cati Quinyacana Iilhuicac eycachua Ma Tatanitij, ama na noseltitzi nimoixnextis iixpa Acab.

¹⁶ Huajca Abdías yajqui quitemoto Acab huan quiyolmelahuato. Huan Acab hualajqui huan quinamiquico Elías.

Elías mopanti ihuaya Acab

¹⁷ Huan quema Acab quiitac Elías, quiilhui:

—¿Ta cati tiquincuesolmacatoc israelitame?

¹⁸ Huan Elías quinanquili:

—Na amo niquinmacatoc israelitame tequipacholi, pero ta quena, inihuaya mocha ehuani anquincuesolmacatoque pampa anquicajque itanahuatilhua TOTECO para anquinhueyichihuase nopa taixcopincayome ten Baal. ¹⁹ Huajca ama xiquinnahuati motequipanojcahua ma quinsentilica nochi israelitame ipan nopa tepet cati itoca Carmelo, ica nochi nopa 450 itajtolpanextijcahua Baal huan nopa 400 itajtolpanextijcahua Asera, cati Jezabel quintamaca.

Elías ihuaya itajtolpanextijcahua Baal

²⁰ Huajca Acab quinnotzqui nochi israelitame huan nochi tajtolpanextiani ipan nopa tepet Carmelo. ²¹ Huan monechcahui Elías iniixpa nochi israelitame, huan quinilhui:

—¿Hasta quema tamis anquipyase ome amotalnamiquilis? Sinta TOTECO yaya Dios, xijtoquilica. Huan sinta Baal yaya Dios, ya xijtoquilica.

Huan nopa israelitame amo teno tananquiliyque. ²² Huan Elías sempa quinilhui nopa israelitame:

—San na noseltitzi nimocajtoc niitajtolpanextijca TOTECO, pero nopa tajtolpanextiani ten Baal itztoque 450 tacame. ²³ Huajca ama xiquinhualicaca ome torojme. Huan amojuanti ximocuilica se, huan xijhuejhueloca huan xijtalica iixco nopa cuahuit ipan nopa taixpamit. Pero amo xijtalica tit ita. Huan na nijcualtalis nopa seyoc toro huan nijtalis iixco nopa cuahuit ipan itaixpa noTeco Dios, pero amo nijtalis tit itantita. ²⁴ Huan nimantzi ximotajjtica ica amotaixcopincayohua, huan na nimotajjtis ica Toteco Dios. Huan yaya cati tananquilis huan quititanis tit para quitatis nopa cuahuit, yaya nopa cati quinextia para melahuac Toteco Dios. Huan nochi nopa israelitame quilhuiyque para, quena, cualtitoc.

²⁵ Huajca Elías quinilhui nopa itajtolpanextijcahua Baal:

—Xijtapejpenica se ten nopa ome torojme huan xijcualtica achtohui amojuanti, pampa amojuanti anmiyaqui. Huan ximotajjtica ica amodios, pero amo xijtalica tit itantita.

²⁶ Huajca injuanti quicuique se toro huan quisencajque, huan pejque motatajtiaj ica Baal. Huan quitzajtzilijque ten ijnaloc hasta tajcotona. Huan quijtohuayayaj: “¡Baal, technanquili!” Pero amo aqui quinnanquili yon amo aqui quitoscacajque. Huan injuanti pejque huitonij chichahuac inechca nopa taixpamit cati quichijchijtoyaj. ²⁷ Huan ica tajcotona Elías pejqui quinpinajtia huan quinilhui:

—Xitzajtzica más chichahuac pampa yaya se dios. Huelis se tenijqui moyolilhuía, o huelis quipti se tequit, o huelis yahui ipan se ojti, o huelis cochts huan monequi anquixitise.

²⁸ Huan injuanti tzajtziyayaj más chichahuac huan mohuasaniyayaj ica cuchillos huan ica cuataminti cati huehueyac hasta quisqui inieso quej momajtoyaj quichihuaj. ²⁹ Huan quej nopa panoc tajcotona huan injuanti quisehuiquilijque cuatzajtzij, huan huitonij quej locojme hasta ajsic hora para quitencahuase nopa tacajchahualisti ica tiotac para TOTECO. Pero amo aqui quitoscacajque, yon amo aqui quinnanquili, yon amo aqui quinchihuili cuenta. ³⁰ Huajca Elías quej ni quinilhui nochi nopa israelitame:

—Technechahuica na.

Huan nochi israelitame monechcahuiyque campa ya. Huan Elías quicualtali nopa taixpamit ten TOTECO cati tahuel sosolijtoya. ³¹ Huan Elías quicuiic 12 teme cati quinnextiyaya sesen iconehua Jacob cati TOTECO quitocaxpatatoc huan quitocaxti Israel. ³² Huajca ica nopa teme quichijchijqui se taixpamit para TOTECO. Huan teipa quichijqui se aoji patahuac yahualtic ten nopa taixpamit huan nopa aoji quicuisqua se 20 litros ten cuayoli. ³³ Huan nimantzi quicualtali nopa cuahuit, huan quihuejhuelo nopa toro huan quitali iixco nopa cuahuit. ³⁴ Huan quinilhui:

—Xijtemitica nahui huejhueyi comit ica at huan xijtoyahuaca ipan nopa tacajchahualisti huan nopa cuahuit.

Huan injuanti quichijque huan teipa sempa quinnahuati:

—Xijchihuaca sempa.

Huan sempa quichijque quej quichijtoyaj achtohui. Huan quinilhui:

—Sempa xijchihuaca ica expa.

Huan quichijque ica expa. ³⁵ Huan huajca nopa at hasta motalohuayaya yahualtic campa nopa taixpamit, huan temitoya nopa aojti. ³⁶ Huan quema ajsic hora para quitencahuase nopa tacajcahualisti ica tiotac para TOTECO, nopa tajtolpanextijquet Elías monechcahui campa taixpamit huan motatajti ica TOTECO huan quijito: “TOTECO Dios, ta cati tiiTeco tohuejcapan tatahua, Abraham, Isaac huan Israel, xijchihua ama ma quimatica para ta tiToteco huan toDios tiisraelitame huan para na nimotequipanojca. Xijpanexti para na nijchijtoc nochi ya ni pampa technahuatijtoc. ³⁷ TOTECO, technanquili, para nopa masehualme ma quimatica para ta nelía tiDios huan para ama tiquinnótza ma mocuepaca ica ta.”

³⁸ Huajca ipan nopa talojtzi, huetzqui se tit ten TOTECO, huan quitamitati nopa tacajcahualisti, nopa cuahuit, nopa teme, nopa taltepecti huan hasta quitamihuatzqui nochi nopa at cati oncayaya ipan nopa aojti. ³⁹ Huan quema quitaque nopa tamanti, nochi nopa israelitame motancauquetzque huan quijitojque: “¡TOTECO yaya Dios! ¡TOTECO yaya Dios!”

⁴⁰ Huajca Elías quinilhui:

—Xiquinitzquica itajtolpanextijcahua Baal para amo ma cholo yon se.

Huan injuanti quinitzquijque huan Elías quinhuicac ipan nopa atajti cati itoca Cisón huan nopona quinmicti.

Elías motatajti para ma huetzi at

⁴¹ Huajca Elías quiihui Acab:

—Xiya xitacuati huan xiatiti pampa ya nijcaqui para monechcahuía at huan huetzis at tahuel chicahuac.

⁴² Huajca Acab yajqui tacuato huan atito. Huan Elías tejcoc hasta itzompac nopa tepet Carmelo, huan motancauquetzqui huan ixayac ajsic hasta itancuaco. ⁴³ Huan quiihui itequipanojca:

—Xiya huan xitachiya para campa hueyi at sinta tiquita mixti.

Huajca ya yajqui huan tachixqui. Huan teipa mocuetqui huan quiihui:

—Amo feno niquita.

Huan chicome huelta Elías quiihui:

—Xiya sempa xijtachiliti.

⁴⁴ Ica chicome huelta yajqui huan teipa mocuetqui huan quiihuico:

—Na niquita se mixti pisiltzi san quej imax se tacat cati motanana ipan hueyi at.

Huan Elías quiihui:

—Xiya xiquilhuiti Acab ma tejco ipan itepos carro huan ma quisa nimantzi para ichaj para nopa at amo quitzacuilis.

⁴⁵ Huajca Acab tejcoc ipan itepos carro huan yajqui hasta nopa altepet Jezreel. Huan ilhuicacti mochijqui yayahuic ica mixti huan hualajqui miyac ajacat huan huetzqui at nelchicahuac. ⁴⁶ Huan TOTECO quimacac miyac chicahualisti Elías huan yaya quiiipi iyoyo huan quicalaqui ipan itzinquechilpica huan motalojtejqui. Huan motalo chicahuac huan quiyacanqui Acab ipan itepos carro ica cahuyojme hasta ajsito ipan altepet Jezreel.

19

Elías mochololti huan yajqui hasta Horeb

¹ Huan Acab quipohuili isihua Jezabel nochi cati Elías quichijtoya huan quenacatza quinmictijtoya nochi itajtolpanextijcahua Baal. ² Huajca Jezabel quinahuati se tayolmelajquet ma quiihuiti Elías: “Ma techmictica nopa dioses sinta para mosta ipan ni hora amo nimitzmictijtoc, ta tiElías, quej tiquinmicti itajtolpanextijcahua Baal.”

³ Huajca quema Elías quimatqui para quinequiyaya quimictise, motanan-tejqui huan cholojtejqui para quimanahuis inemilis. Huan yajqui ipan altepet Beerseba ipan tali Judá, huan nozona quicajtejqui itequipanojca. ⁴ Teipa Elías nejnenqui semilhuit hasta nopa huactoc tali, huan mosehuito itzinta se cuahuit cati amo quiptiya miyac ixihuiyo huan quinequiyaya ma miqui. Quiilhui TOTECO: “¡Ya cuali noTECO! ¡Techquixtili nonemilis! ¡Pampa na amo más nicuali que notatahua!”

⁵ Huan Elías motejqui itzinta nopa cuahuit cati amo quiptiya miyac ixihuiyo. Huan quema cochtoya, se iilhuicac ejca TOTECO quiojolini huan quiilhui: “Ximijquehua huan xitacua.” ⁶ Huajca Elías isac, huan quiitac nechca itzonta eltoya se pantzi cati taicxtili ipan teme cati totonic huan ihuaya eltoya se comit temitoc ica at. Huajca mijquejqui, huan tacuajqui huan teipa sempa cochqui. ⁷ Pero nopa iilhuicac ejca TOTECO ica ompa quiojolini huan quiilhui: “Ximijquehua huan sempa xitacua huan xiati pampa tahuel hueyi ojti mitzplohua noja.”

Elías ipan Horeb

⁸ Huajca mijquejqui huan tacuajqui huan atic. Huan nopa tacualisti quimacac fuerza para nejnemis 40 tonati huan 40 yohuali hasta ajsito ipan nopa tepet Horeb*, nopa tepet ten Toteco Dios. ⁹ Huan quema ajsito nozona, calajqui ipan se ostot huan nozona panoc nopa yohuali. Pero se camanali ten TOTECO ajsic campa ya huan quiilhui: “¿Taya tijchihua nica, Elías?”

¹⁰ Huan Elías quinanquili: “Tahuel nimitztasomajtoc TOTECO, ta Cati Tiquinyacana Nochi Moilhucac Ejcahua Ma Tatanitij. Huan nopa israelitame quitahuelcajtoque nopa camanal sencahuali cati tijchijqui inihuaya, huan quisosolojtoque motaixpahua huan quinmictijtoque ica macheta nochi motajtolpanextijcahua. Huan san na noseltitzi nimocajtoc para nimitztequipanos. Huan ama techtemohuaj para techmictise nojquiya.”

¹¹ Huan TOTECO quiilhui: “Xiquisa calteno huan ximoquetza noixpa ipan ni tepet.”

Huajca Elías moquetzqui nozona. Huan TOTECO panoc huan se chichuac ajacat quitzohuitejqui nopa tepet hasta tapantejque huejhueyi teme iixpa TOTECO. Pero TOTECO amo itztoya ipan nopa ajacat. Teipa quema ya panotoya nopa ajacat mojmolini nopa tali. Pero TOTECO amo itztoya ipan nopa mojmolinilisti ten tali. ¹² Huan quema ya mojmolinijtoya nopa tali, teipa oncac se hueyi tit, pero TOTECO amo itztoya ipan nopa tit. Huan quema ya panotoya nopa tit, Elías quicajqui quej elisquía acayja quichtaca camanlhuiyaya ica yolic. ¹³ Huan quema Elías quicajqui, moixtajqui ica iyoyo, panquisqui huan moquetzqui campa calajqui ipan nopa ostot. Huan teipa quicajqui se cati quiilhui: “¿Taya tijchihua nica Elías?”

¹⁴ Huan ya quinanquili: “Tahuel nimitztasomati TOTECO, ta Cati Tiquinyacana Nochi Moilhucac Ejcahua Ma Tatanitij. Huan israelitame quitahuelcajtoque nopa camanal sencahuali cati tijchijqui inihuaya, huan quisosolojtoque motaixpahua huan quinmictijtoque ica macheta motajtolpanextijcahua. Huan san na noseltitzi nimocajtoc para nimitztequipanos huan techtemohuaj para techmictise nojquiya.”

¹⁵ Huan TOTECO quiilhui: “Ximocuepa ica campa tihualajqui huan xiya ipan huactoc tali ipan tali Damasco. Huan quema tiajsis nozona, xijtzonalti ica aceite Hazael para ma eli tanahuatijquet ipan tali Siria. ¹⁶ Huan Jehú, iixhui Nimsi, ticaltis para ma eli tanahuatijquet ipan tali Israel. Huan Eliseo, icone Safat, cati ehua Abel Mehola, xijtzonalti ica aceite para ma

* 19:8 19:8 Tepet Horeb nojquiya itoca tepet Sinai.

eli se tajtolpanextijquet quej mopataca ta. ¹⁷ Huan cati mochololtis ten imacheta Hazael, Jehú quimictis huan cati mochololtis ten imacheta Jehú, Eliseo quimictis. ¹⁸ Huan noja niquinpiya seyoc 7 mil masehualme ipan tali Israel cati amo motancuaquetzque iixpa Baal, yon amo quitzoponijque itaixcopincayo.”

Elías quinotzqui Eliseo

¹⁹ Huajca Elías yajqui huan quipanti Eliseo, icone Safat, talpoxoniyaya ipan se milcahuali ica 12 pares torojme cati tapoxoniyayaj ica se tepos arado huan yaya yahuiyaya iniica quintequihuiyaya. Huan Elías yajqui campa itztoya Eliseo huan quitallili iyoyo cati huehueyac ten se tajtolpanextijquet.

²⁰ Huajca Eliseo quincatejqui nopa torojme cati quintequihuiyaya huan motalotihualajqui iica Elías, huan quiilhui:

—Nimitztajtania techcahuili ma nijtzoponiti notata huan nonana, huan teipa nimitztoquilis.

Huan Elías quiilhui:

—Xiya, pero ximoyolilhui cati nimitzchihuilijtoc.

²¹ Huajca Eliseo quicajqui Elías huan mocuetqui. Huan quinitzqui ome itorohua, huan quinnicti, huan quicacatzo ininacayo huan quintamacac nopa masehualme cati itztoyaj nopona. Teipa yajqui ihuaya Elías huan möchijqui itemach.

20

Acab quintehui nopa Siria ehuan

¹ Teipa Tanahuatijquet Ben Adad ten tali Siria quinsentili nochi isoldados, huan 32 tanahuatiani ten sequinoc talme ica inintepos carrojhua huan inincahuayojhua. Huan yajque ipan nopa altepet Samaria, nopa taya-canca altepet ipan tali Israel huan quiyahualotoj huan quitehuitoj. ² Huan quinahuati se tayolmelajquet ma quiitati Acab cati elqui tanahuatijquet ipan tali Israel huan ma quiilhui: ³ “Quej ni quijtohua Ben Adad: ‘Noaxca nochi moplata huan mooro huan nopa mosihuajhua huan moconehua cati achi más yejyetzitzi.’ ”

⁴ Huan Tanahuatijquet Acab ten tali Israel quinanquili huan quiilhui: “Cualtitoc, elis san quej ta tiquijtohua, tinoteco. Nochi cati nijpiya ta moaxca.”

⁵ Huan teipa nopa tayolmelahuani sempa hualajque quiitacoj Acab huan quiilhuijque: “Ben Adad quej ni quijtohua: ‘Na nitatitanqui ma mitzilhuitij para techmaca nochi moplata, mooro, mosihuajhua, moconehua huan nochi cati tijpiya. ⁶ Mosta ipan ni hora niquintitanis notequipanojcahua campa tiitztoc, huan injuanti tajtachiyase cuali ipan mochaj huan ininca-jhaj motequipanojcahua. Huan quicuise huan quihualicase nochi cati ipati anquipixtoque.’ ”

⁷ Huajca nopa tanahuatijquet ten tali Israel quinnotzqui nochi huehue tacame ipan ital huan quinilhui:

—Xiquitaca, nopa tacat quitemohua cualanti. Na ya niquilhuijtoc huelis quinhuicas nosihuajhua, noconehua, noplata huan nooro.

⁸ Huan nochi nopa huehue tacame huan tayacanca israelitame quinanquijque:

—Amo xijtacaquili, yon amo xijchihua ten mitztajtania.

⁹ Huajca Acab quinilhui itayolmelajcahua Ben Adad:

—Xiquilhuica noteco, nopa tanahuatijquet para nijchihuas nochi cati technahuati achtohui, pero amo hueli nijchihuas cati ama techtajtania.

Huan itayolmelajcahua mocuetque huan quiyolmelahuatoj Ben Adad ica cati quiniilhuijtoya Acab. ¹⁰ Huan Ben Adad tanahuati ma quiilhuiti Acab: “Na nitatestigojquetza para ma techmictica nopa dioses sinta amo nijtamisosolos altepet Samaria hasta amo mocahuas yon se tamojtzoli ten taltepocti para niquinmacas notequipanojcahua para quielnamiquire nopa altepet.”

¹¹ Huan nopa tanahuatijquet ipan tali Israel tananquili huan quiilhui: “Amo ximohueyichihua amantzi quema ayemo titatani. Ximohueyichihuas quema ya titantantos.”

¹² Huan quema Ben Adad quicajqui nopa camanali, yaya taiyaya inihuaya nopa sequinoc tanahuatiani ipan iniyoyoncalhua. Huajca quinihui itequipanojcahua: “¡Ximonemilica para titatehuitij!” Huan nochi mocualtalique para quiyahualotij nopa altepet.

¹³ Huajca hualajqui se tajtolpanextijquet huan monextico iixpa tanahuatijquet Acab ipan tali Israel huan quiilhui:

—Quej ni quijitohua TOTECO: ‘Masque tiqita tachel miyaqui mocualan-caitacahua, ama na niquintemactilis momaco. Huan huajca tijmatis para melahuac na niTOTECO.’

¹⁴ Huan Acab quiilhui:

—¿Quenicatza quichihuas?

Huan nopa tajtolpanextijquet quijito:

—Quej ni quijitohua TOTECO: ‘Nopa tayacanca soldados cati neltelpocame cati hualahuij ipan nopa sequinoc estados ipan motanahuatilis, injuanti quichihuase.’

Huan Acab quiilhui:

—¿Ajquiya quipehualtis nopa tatehuilisti?

Huan nopa tajtolpanextijquet quinanquili:

—¡Ta!

Acab quintani nopa Siria ehuan

¹⁵ Huajca Acab quinsentili nopa 232 tayacanca soldados cati telpocame huan hualayayaj campa hueli ipan itanahuatilis huan nojquiya quinsentili nochi sequinoc israelita soldados huan ica nochi mochijque 7 mil tacame.

¹⁶ Huan quisque tajcotona quema Tanahuatijquet Ben Adad huan nochi nopa seyoc 32 tanahuatiani ten sequinoc talme taiyayaj ipan iniyoyoncalhua. ¹⁷ Huan quisque achtohui nopa tayacanca soldados cati telpocame huan campa hueli ehuyaya ipan tali Israel. Huan quema Ben Adad quiyolmelajque itayolmelajcahua para hualahuij sequij tacame ten altepet Samaria, ¹⁸ yaya quijito: “Sinta hualahuij ica cuali o ica cualancayot, xiquinitzquica yoltoque.”

¹⁹ Huajca quisque nochi nopa tayacanca soldados cati telpocame huan nochi más soldados iniica. ²⁰ Huan sesen israelita soldado pejqui quimictia sesen soldado ten tali Siria. Huan nimantzi cati huelque ten nopa sirio soldados cholojteque. Huan nopa israelita soldados quintepotzocaque para quinmictise. Pero Tanahuatijquet Ben Adad ten tali Siria mochololti ipan se cahuayo huan se ome más tacame cati tejcotoyaj ipan cahuayojme.

²¹ Huan yajqui Tanahuatijquet Acab ten tali Israel huan quintamimicti nochi nopa tali Siria ehuan huan inincahuayojhua masque yahuiyayaj cahuajtipa o ipan tatehuijca carrojme. Huan nechca nochi nopa sirios mijque ipan nopa tatehuilisti.

Toteco quiilhui Acab para mocuepas Ben Adad

²² Huan teipa nopa tajtolpanextijquet moixnextito iixpa nopa tanahuatijquet Acab ten tali Israel huan quiilhui:

—Xiya huan ximocualtica huan ximochihuaca más antetique para antehuisse pampa ne seyoc xihuit quema moseliltíaj cuame nopa tali Siria tanahuatijquet sempa hualas mitztehuiqui.

Ica ompa Acab quintani nopa Siria ehuaní

²³ Huan itapalehuijcahua Tanahuatijquet Ben Adad ipan tali Siria quihuijque:

—Nopa israelitame techtanque pampa ininDios, itztoc se Dios cati iaxca nochi tepeme. Pero sinta tiquintehuisse campa tamaya, tiquintanise.

²⁴ Huajca xiquintali tayacanani ten soldados ipan inilugar nopa tanahuatiani cati tiquinpíxqui. ²⁵ Huan xiquinsentili miyac tacame para mochihuase soldados san quej cati mijque. Techmaca san se imiyaca cahuayojme, carrojme huan tacame cati tiquinpiyayaj huan tiyase para timotehuisse inihuaya ipan tamayamit. Huan temachtí tiquintanise.

Huajca Ben Adad quintacaquili huan quej nopa quichijqui. ²⁶ Huan seyoc xihuit quema moseliltíaj cuame, Ben Adad quinsentili nochi isoldados ipan tali Siria huan yajque ipan se altepet itoca Afec para motehuisse ica israelitame. ²⁷ Nojquiya nopa israelitame quinsentilijque inisoldados huan quisque para tatehuitij ica nopa sirios huan mochijque iniixmelac. Pero nopa israelitame nesiayaj quej ome pamit ten pilborregotztizi huan nopa Siria ehuaní eliyayaj tahuel miyaqui hasta temifoya nopa tamayamit.

²⁸ Huajca moixnexti itequipanojca Toteco Dios iixpa Tanahuatijquet Acab ipan tali Israel huan quihuihí:

—Quej ni quijto TOTECO: ‘Nopa tali Siria ehuaní quijtojtoque para na san nise Dios ten tepeme huan amo ten tamayame, huajca na niquintemactilis momaco para xiquintani masque nelía injuanti tahuel miyaqui inisoldados. Huan quej nopa tijmatis para melahuac na niamoTECO.’

²⁹ Huajca para chicome tonati mosehuijque nopa israelitame campa mochijtoyaj iniixmelac nopa Siria ehuaní huan nopa sirios itztoyaj iniixmelac israelitame. Huan ipan nopa chicompa tonali pejqe motehuíaj. Huan nopa israelitame quinmictijque 100 mil tali Siria soldados cati san icxinejnemiyayaj san ipan se tonal. ³⁰ Huan nopa sequij cholojque huan motatitoj ipan altepet Afec, pero nopa tepamit cati ica quiyahualojtoyaj nopa altepet huetzqui ininpani nopa 27 mil tacame cati mochololtijtoyaj. Huan Ben Adad nojquiya cholo huan ajsito ipan nopa altepet huan motati ipan se cuarto cati nelcalijic.

³¹ Huan nopa itapalehuijcahua quihuijque:

—Tijcactoque para nopa tanahuatiani ten tali Israel quiapiyaj hueyi iniyolo. Huajca ma timoyoyontica ica yoyomit ten cuesoli, huan techtalili se lazo ipan toquechuayo huan tiqititaj nopa tanahuatijquet Acab para ma techcahuaca tiyoltoque.

³² Huajca moquentijque yoyomit ten cuesoli huan lazos ipan ininquechuayo huan yajque quilitatoj Tanahuatijquet Acab ten tali Israel huan quihuijque:

—Motequipanojca Ben Adad mitztajtaniá, se favor, xijcahuili ma itzto.

Huan Acab quinilhui:

—¿Noja itztoc? ¡Yaya noicni!

³³ Huan nopa tacame quicualcajqe ni camanali huan nimantzi quinankuilijque:

—Quena, moicni, Ben Adad, noja itztoc.

Huan Acab quinilhui:

—Xiyaca huan techhualiquilica.

Huajca Ben Adad moixnextito iixpa Acab, huan Acab quitejcolti ipan itepos carro quej ihuampo. ³⁴ Huan Ben Adad nimantzi quiilhui:

—Nimitzcuepilis nopa altepeme cati notata quicuiliytoya motata. Ta huelis tijpiyas tali para tianquis campa titanamacas ipan altepet Damasco san quej notata quichijqui ipan altepet Samaria.

Huan Tanahuatijquet Acab quiilhui:

—Huajca tijchihuase se camanal sencahuali huan nimitzcahuas para tiyas.

Huajca Acab quichijqui nopa camanal sencahuali ihuaya Ben Adad huan quicahuili ma yahui.

³⁵ Huan TOTECO quiilhui se itajtolpanextijca ma quiilhui se ihuampo para Toteco Dios quijtoyo:

—Techcoco ica momacheta.

Pero nopa ihuampo amo quinejqui quicocos. ³⁶ Huajca ya quiilhui:

—Pampa amo tijneltocac Icamanal TOTECO, ama quema techcajtehuas, mitzmictis se tecuani.

Huan quena, quema quicajtejqui nopa ihuampo, quipanti se tecuani ipan ojti huan nopa tecuani quimicti.

³⁷ Teipa nopa tajtolpanextijquet quipanti seyoc tacat, huan quiilhui: “Techcoco ica momacheta.” Huan nopa tacat, quena, quitejqui ica imacheta huan quicoco. ³⁸ Huajca nopa tajtolpanextijquet yajqui quichiyato Tanahuatijquet Acab ipan ojti, moixtactoya ica se yoyomit ipan iixteyolhua para amo quixmatis. ³⁹ Huan quema Tanahuatijquet Acab ajsico, nopa tajtolpanextijquet quitzajtzili huan quiilhui:

—Na niitztoya ipan tatehuilisti huan se soldado techhualiquili se tocualancaitaca cati quitzquitoya huan techilhui ma nijmocuitahu huan sinta cholos huajca nimiquis o nitaxtahuasquia 30 kilos ten plata. ⁴⁰ Huan quema na nimotequihuiyaya ipan sequinoc tamanti, tocualancaitaca san poli.

Huajca nopa tanahuatijquet ipan tali Israel quinanguili:

—Huajca ta motajtacol huan ya tiquijtoytoc para monequi timiquis.

⁴¹ Huan nopa tajtolpanextijquet nimantzi moquixtili cati ica moixtactoya, huan nopa tanahuatijquet ten tali Israel quixmatqui para eliyaya se ten nopa tajtolpanextiani ten TOTECO. ⁴² Huan yaya quiilhui:

—Quej ni quijtohua TOTECO: ‘Nopa huicalot mitznextilia ta huan pampa tijcajqui ma yahui Ben Adad cati na nimitzilhuiytoya ma miqui, ama monequi ta timiquis quej ipataca huan momasehualhua miquise quej inipataca cati ya imasehualhua.’

⁴³ Huajca Acab, nopa tanahuatijquet ipan tali Israel yajqui ichaj ipan altepet Samaria, mocuesojtoc huan cualantoc.

21

Acab quiixtocac ixocomecamil Nabot

¹ Itztoya se tacat itoca Nabot ten altepet Jezreel huan quipixtoya se xocomeca mili nechca nopa altepet huan nechca campa Tanahuatijquet Acab ten altepet Samaria quipixtoya seyoc icaltanahuatil. ² Huan se tonali Acab quiilhui Nabot:

—Technamaquilti moxocomecamil para nijtocas quilit pampa eltoc nechca nochaj. Nimitzxtahuis ica tomi o sinta tijnequi nimitzpatilis ica seyoc xocomeca mili.

³ Huan Nabot quinanguili Acab:

—TOTECO techtatzacuultis sinta nimitzmacas cati notatahua nechcahuilijteque, huajca amo quema nijchihuas.

⁴ Huajca Acab yajqui ichaj mocuesojtoc huan cualantoc por cati quiilhujtoya Nabot, pampa quiilhui para amo quimacas cati quicahuilijtejqe itatahua. Huan Acab ajsito ichaj, huan motejqe ica ixayac campá tapepecholi huan amo quinejqe tacuas. ⁵ Huajca Jezabel, isihua, monechcahui campá Acab huan quiilhui:

—¿Para ten tahuel timocuesojtoc huan amo tijnequi titacuas?

⁶ Huan Acab quiilhui:

—Pampa nijcamanalhui Nabot cati ehua nica Jezreel, huan niqulhui ma technamaquilti nopa ixocomecamil, o sinta quinequisquía nijpatilisquía ica seyoc xocomeca mili. Pero ya amo quinejqe technamaquiltis, yon amo quinejqe ma titapataca.

⁷ Huajca Jezabel, isihua quinanquili:

—¡Ta titanahuatijquet ipan ni tali Israel! ¡Ximijquehua huan xitacua huan amo xijchihuili cuenta cati mitzpanotoc! Na nimitzmacas ixocomecamil Nabot.

⁸ Huajca Jezabel quijcuilo amatajcuilolme quej elisquía Tanahuatijquet Acab quiniqcuiltojtoya huan quinsellojhui ica isello. Huan quintitanili nochi huehue tacame huan tayacanani ten altepet Jezreel campá itztoya Nabot.

⁹ Ipan nopa amatajcuiloli quijtohuayaya:

“Xiquinyolmelahuaca nochi tacame ma mosentilica huan ma mosahuaca. Huan nojquiya xijnótzaca Nabot huan xijsehuica iniixpa nopa tacame ten nopa altepet. ¹⁰ Huan xiquintemoca ome fiero tacame cati quitatelhuise Nabot para quitelchihuayaya Toteco Dios huan nopa tanahuatijquet. Huan teipa xijquixtica huejca ten nopa altepet huan xijtepachoca hasta miquis.”

¹¹ Huan nopa masehualme, huehue tacame, huan tayacanani ten nopa altepet, quichijque san quej Jezabel quinnahuatijtoya ipan nopa amame cati quintitanilijtoya. ¹² Huan tanahuatijque ma mosahuaca nochi cati ehuan ipan nopa altepet huan ma mosentilica huan quisehujque Nabot iniixpa nopa masehualme ten nopa altepet. ¹³ Huajca hualajque ome tacame cati fiero ininemis huan quitatelhujque Nabot para quitelchijtoya Toteco Dios huan nopa tanahuatijquet Acab. Huajca teipa quiquixtijque calixpa ten nopa altepet huan quitepachojque hasta quimictijque. ¹⁴ Teipa tatitanque ma quiilhuitij Jezabel para Nabot ya quitepachojque huan ya mictoc san quej ya quijtojtoya.

¹⁵ Huan quema Jezabel quimatqui, quiilhui Acab:

—Nabot amo quinejqe mitznamaquiltis ixocomecamil, pero ama, quena, huelis timoaxcatis yon amo tijtaxahuis pampa ya mictoc.

¹⁶ Huan quema Acab quicajqui para Nabot ya mictoc, moquetzqui huan yajqui moaxcatito ixocomecamil.

Elías tayolmelajqui taya ipantis Acab

¹⁷ Huajca TOTECO quinojnotzqui Elías cati ehua Tisbe huan quiilhui: ¹⁸ “Xiya huan xiquitati nopa tanahuatijquet Acab ten tali Israel. Ama yaya itztoc ipan tali Samaria campá ixocomecamil Nabot pampa yajtoc quitatati nopa xocomeca mili para moaxcatis. ¹⁹ Huan tiquilhuis para niamoTECO niqijtohua: ‘Tijmicti Nabot huan tijcuili cati eliyaya iaxca, huajca nopona ipan nopa lugar campá nopa chichime quipipitzojqe ieso, nojquiya quipipitose ta moeso.’ ”

²⁰ Huan Elías yajqui quitato Acab huan Acab quiilhui:

—¿Ya techpantijtoc, tinocualancaitaca?

Huan Elías quiilhui:

—Quena, nimitzpantijtoc para nimitzyolmelahuas nopa tatelechihualisti cati mitzajsis pampa timotemacatoc para tijchihuas cati amo cuali iixpa TOTECO. ²¹ Yeca TOTECO quijtohua quihualicas ipan ta nochi tamanti cati amo cuali. Quintzontamiltis nochi moteixmatcahua, huan amo quicahuilis ma itzto yon se ten moixhuihua. ²² Quintzontamiltis mochaj ehuaní san se quej quichijqui ica Jeroboam, icone Nabat, huan quej quichijqui ica ichaj Baasa, icone Ahías. Pampa tijcualancamacatoc TOTECO huan tiquinchijtoc ma tajtacolchihuaca nochi israelítame. ²³ Huajca TOTECO quijtojtoc: ‘Nopa chichime quicuase Jezabel nechca campa eltoc nopa tepamit cati ica quiyahualojtoque ni altepet Jezreel.’ ²⁴ Huan nochi moteixmatcahua cati miqwise ipan ni altepet, quincuase chichime, huan cati miqwise ipan cuatitamit, quincuase nopa tofome cati nacacuj.

²⁵ Amo oncac seyoc masehuali quej Acab cati monamacac para quichihuas cati amo cuali iixpa TOTECO, pampa isihua, Jezabel, tahuel quichihualti ma quichihua ya nopa. ²⁶ Nojquiya quichijqui cati nelía fiero iixpa TOTECO pampa quinhueyichijqui taixcopincayome san quej quichihuayayaj nopa amorreos masehualme cati TOTECO quinquixti ten iníntal quema calajque nopa israelítame.

²⁷ Huan quema Acab quicajqui nochi ni camanali ten Elías, quitzayanqui iyoyo, huan motalij yoyomit ten tequipacholi huan mosajqui. Cochiyaya ica nopa fiero yoyomit, huan tahuel mocuesohuayaya. ²⁸ Huajca TOTECO quihui Elías: ²⁹ “¿Tiquitztoc quenicatza Acab moechcapanojtoc noixpa? Huajca pampa moechcapanojtoc noixpa, amo nijhualicas taijyohuilisti ipan ichaj ehuaní quema noja itztos, pero quena, teipa quema miquis niqintzontamiltis nochi iconehua.”

22

Siria huan Israel ayecmo motehuijque (2 Cr 18:1-34)

¹ Huan para nechca eyi xihuit amo oncac tatehuilisti ica tali Siria huan tali Israel. ² Pero ipan nopa expa xihuit, Josafat, tanahuatijquet ten tali Judá, yajqui quipaxaloto nopa tanahuatijquet ten tali Israel. ³ Huan quema itztoya nopona Tanahuatijquet Acab ten tali Israel quinilhui itapalehuijcahua:

—¿Amo anquijta para nopa Siria ehuaní quejipa moaxcatijtoque toaltepe Ramot cati mopantía ipan tali Galaad, huan amo teno tijchijtoque para tiquinquixtilise?

⁴ Huan Acab quihui Tanahuatijquet Josafat:

—¿Tijnequi tihualas nohuaya para tiquintehuse nopa tali Siria ehuaní para sempa timoaxcatise altepet Ramot ten tali Galaad?

Huan Josafat quinanquili:

—Quena, ta huan na tiitztoque tiicnime. Nomasehualhua huan nocahuayos itztoque momaco para mitzpalhuisse.

⁵ Pero nojquiya Josafat quihui Acab:

—Pero nimitztajtanía achtohui ma tijtemoca sinta TOTECO ipaquilis ica se itajtolpanextijca.

⁶ Huajca nopa tanahuatijquet ten tali Israel quinsentili nopa 400 itajtolpanextijcahua cati ya iaxcahua huan quintajtanili:

—¿Cuali para nijtehuis altepet Ramot ipan tali Galaad o amo?

Huan inijuaní quihuijque:

—Xiyaca pampa TOTECO quintemactilis amomaco.

⁷ Pero Josafat quijto:

—¿Amo aquí se tajtolpanextijquet ten TOTECO para nimotatzintoquilis ica ya?

⁸ Huan nopa tanahuatijquet ten tali Israel quinancuili Josafat:

—Quena, itztoc se nica. Yaya itoca Micaías huan yaya icone Imla, pero na tahuel nijcualancaita pampa amo quema techilhuía cati cuali.

Pero Josafat quiilhui:

—Amo xiquijto ya nopa.

⁹ Huajca nopa tanahuatijquet ten tali Israel quinzotzi se itapalehuijca huan quiilhui:

—¡Techhualiquili nimantzi Micaías, icone Imla!

Micaías quiilhui Acab para miquis

¹⁰ Huan Tanahuatijquet Acab ten tali Israel huan Tanahuatijquet Josafat ten tali Judá mosehuijtoyaj ipan sese inisiya, nechca nopa caltemit campa plaza campa calaquij ipan altepet Siria. Nochi injuanti moquentijtoyaj iniyoyo cati más yejectzi para tanahuatiani, huan itajtolpanextijcahua Acab camanaltiyayaj iniixpa quej elisquía quiselíaj camanali ten TOTECO.

¹¹ Huan se tajtolpanextijquet cati itoca Sedequías huan cati elqui icone Quenaana, mochihuijtoya tepos cuacuajti huan cuatzajtziziyaya: “Quej ni quijtojtoc TOTECO: ‘Ica ni cuacuajti tiquintompojhuís nopa Siria ehuan hasta tiquintzontamiltis.’ ”

¹² Huan nochi nopa sequinoc tajtolpanextiani san se quijtohuayayaj quej quijtohuayaya Sedequías. Quiilhuiyayaj nopa tanahuatijquet: “Xiya ipan Ramot huan xiquintehuiti huan titatanis pampa TOTECO quitemactilis momaco nopa altepet.”

¹³ Huan nopa tayolmelajquet cati yajqui quinzotzato Micaías, quiilhui:

—Nochi nopa tajtolpanextiani, san se camanali quiilhuíaj nopa tanahuatijquet. Quiilhuíaj camanali cati cuali huan para tatanis. Huajca ta nojquiya xiquilhui san se camanali quej injuanti huan xiquilhui nopa tanahuatijquet para tatanis.

¹⁴ Huan Micaías quinancuili:

—Temachtí niqijtos san cati noTECO techilhuis para niqijtos.

¹⁵ Huajca Micaías ajsico campa nopa tanahuatijquet Acab huan nopa tanahuatijquet quiilhui:

—Micaías, ¿tiyase tijtehuitij altepet Ramot ten tali Galaad o tiquincahuase ma itztoca nopona?

Huan ya quinilhui:

—Quena, huelis tiyas huan titatanis pampa TOTECO quitemactilis momaco.

¹⁶ Huan nopa tanahuatijquet quiilhui:

—¿Hasta quesqui huelta nimitzilhuís para techilhui san cati melahuac cati TOTECO quijtohua?

¹⁷ Huajca Micaías quiilhui:

—Ipan se tanextili ten TOTECO niqitac quenicatza elis. Niqunitac nochi nopa israelita soldados cati mosemantoyaj, ipan cuatitamit campa hueli, quej pilborregojtzitzi cati amo quipiyaj inintamocuitahuíca. Huan TOTECO techilhui:

‘Ni masehualme ya mijqui ininteco, huajca xiquintitani ininchajchaj ica tasehuilisti.’ ”

¹⁸ Huajca nopa tanahuatijquet ten tali Israel quiilhui Tanahuatijquet Josafat:

—¿Amo nimitzilhuijtoc para ni tacat amo quema techilhuía se tamanti cati cuali? Yaya nochipa techilhuía cati amo cuali.

¹⁹ Huajca Micaías quilhui:

—Xijtacaquili ni seyoc camanali ten TOTECO. Na niquitac TOTECO mosehuitoc ipan isiya nepa ilhuicac ica nochi iilhuicac ejcahua huan cati itztoque nopona quiyahualojtoyaj ipan inejmat huan iarraves.

²⁰ “Huan TOTECO quijito: ‘¿Ajquiya yas quichihualtiti Acab para ma yahui tatehuiti ipan altepet Ramot ten tali Galaad huan quimictise nopona?’ Huan seqij quijitohuayayaj se tamanti huan sequinoc quijitohuayayaj seyoc tamanti.

²¹ “Huan teipa se ajacat moixnexti iixpa TOTECO, huan quilhui: ‘Na nijchihualtis para yas.’

“Huan TOTECO quilhui: ‘Huan ¿quenicatza tijchihuas?’ ²² Huan yaya quijito: ‘Na niyas huan nielis se ajacat cati niistacatis huan nicamanaltis ica inincamac nopa tajtolpanextiani.’

“Huan TOTECO quijito: ‘Cualtitoc. Huajca xiya xijchihuati.’ ²³ Huan ama tiquita, Tanahuatijquet Acab, para TOTECO quitelijtoc se ajacat cati istacati ipan inincamac nochi motajtolpanextijcahua pampa TOTECO quichijtoc para ma huetzi ipan ta nochi cati amo cuali.”

²⁴ Huajca Sedequías, icone Quenaana, monechcahui campa Micaías huan quitejtzonili ica imax huan quijito:

—¿Hasta quema Itonal TOTECO techtahuclajqui para ayecmo nechcamanalhuis huan san ta mitzcamanalhuis?

²⁵ Huan Micaías quinanguili:

—Tijmatis ipan nopa tonali quema timotatijtinemis tahuel calijtic ipan se cali para amo mitzmictise.

²⁶ Huajca Tanahuatijquet Acab ten tali Israel tanahuati:

—Xiquitzica Micaías huan xijhuicaca ilpitoc iixpa Amón, nopa tequitquet ipan nopa altepet huan iixpa Joás, nocone. ²⁷ Huan xiquinilhuica ma quicalaquica ipan tatzacti huan xijtamacaca ica san pantzi huan at cati monequi para ma yolto hasta quema nimocuepas ica paquilisti.

²⁸ Huan Micaías quilhui:

—Sinta timocuepas ica cuali huan ica paquilisti, huajca nesis para TOTECO amo mitzcamanalhujtoc ica na.

Huan teipa Micaías quijito:

—Nochi amojuanti xijtacaquilica cati niquijtojtoc.

²⁹ Huan quej ni, nopa tanahuatijquet ten tali Israel huan Josafat, tanahuatijquet ten tali Judá yajque inihuaya inisoldados nepa ipan altepet Ramot ten tali Galaad. ³⁰ Huan nopa tanahuatijquet ten tali Israel quilhui Josafat:

—Ximotalili moyoyo ten tanahuatijquet cati ipa timoquentía, pero na nimoquentis seyoc tacat iyoyo para amo aqui techixmatis sinta na.

Huajca Acab calajqui ipan nopa tatehuilisti moixtactoc huan moquentijtoc seyoc yoyomit quej cati moquentía se soldado. ³¹ Pero nopa tanahuatijquet ten tali Siria quinnahuatijtoya nopa ³² itayacancahua cati quihucayayaj inintepos carrojhua ya ni: “Amo aqui xijtehuica yon cati hueyi o cati pisiltzi. San xijtehuica nopa tanahuatijquet ten tali Israel.” ³² Huan quema nopa tayacanani ten nopa tepos carrojme quitaque Josafat ica iyoyo cati cuali, quijitoyque:

—Ya ni nopa tanahuatijquet ten tali Israel cati tijtemohuaj.

Huajca quiyahualojque para quimictise. Pero Josafat cuatzajtzic. ³³ Huajca nopa tayacanani quitaque para amo yaya nopa tanahuatijquet ten tali Israel, huajca quicajque.

³⁴ Pero se soldado tamotac ica icuahuitol san quej hueli huan quiajsic nopa tanahuatijquet ten tali Israel campa sasaliytoc nopa itepos yolixtzajca. Huajca Acab quiihni nopa cati quihuicayaya itepos carro para ma quicuepalti huan ma quiquixiti ten nopa tatehuilisti pampa tahuel cocojtoya.

³⁵ Pero nopa tatehuilisti mochijqui más chichahuac ipan nopa tonali. Huajca Tanahuatijquet Acab, quipalehujque para mocajqui ijcatoc ipan itepos carro iniixmelac nopa sirios cati quintehuiyayaj. Huan ieso cati quisayaya campa cocojtoc motalohuayaya ipan nopa tepos carro huan ica tiotac yaya mijqui. ³⁶ Huan quema calactiyahuiyaya tonati quinyolmelajque nopa israelita soldados: “¡Nochi tantoc! ¡Xitacuepilica nochi amochajchaj!”

³⁷ Huajca quej nopa mijqui nopa tanahuatijquet. Huan quihuicaque itacayo ipan altepet Samaria huan nozona quitapchojque. ³⁸ Huan quipajque itepos carro ipan nopa acomoli ten Samaria campa maltiyayaj nopa ahuilnenca sihuame. Huan nopa chichime quipipitzojque ieso Acab san quej TOTECO quiijtojtoya.

³⁹ Nochi cati panoc ipan itequi Acab huan nopa cali cati quichijqui senquisa ica marfil huan nochi altepeme cati quinchijchijqui, eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ten Tali Israel. ⁴⁰ Huan Acab mijqui, huan teipa tanahuati icone cati itoca Ocozías.

Josafat tanahuati ipan tali Judá (2 Cr. 20:31-37)

⁴¹ Huan Josafat, icone Asa, pejqui tanahuatía ipan tali Judá quema Acab yahuiyaya para nahui xihuit tanahuatis ipan tali Israel. ⁴² Huan Josafat quipiyayaya 35 xihuit quema pejqui tanahuatía. Huan tanahuati 25 xihuit ipan altepet Jerusalén. Inana itoca eliyaya Azuba huan eliyaya icone Silhi.

⁴³ Huan Josafat nejnenqui senquisa quej itata Asa. Quichijqui nochi cati xitahuac iixpa TOTECO. Pero nochi nopa taixpame para taixcopincayome cati eltoyaj ipan tepeme amo quiniycueni huan masehualme noja quitatiyayaj copali huan noja quitencahuayayaj tacajchualisti nozona.

⁴⁴ Huan Josafat quichijqui se camanal senchuali para ma onca tasehuilisti ihuaya nopa tanahuatijquet ten tali Israel. ⁴⁵ Huan nopa sequinoc tamanti cati panoc ipan itequi Josafat huan nopa hueyi chichualisti cati quipixqui, huan nochi tatehuilisti cati quichijqui, nochi eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ten Tali Judá. ⁴⁶ Huan Tanahuatijquet Josafat nojquiya quinquixti nochi nopa tacame cati quichijque tamanti ica sequinoc tacame para se taxtahuili huan quej nopa quihueyichihuayayaj inindios. Quej nopa quichijtoyaj ten quema tanahuatiyaya itata, Asa. ⁴⁷ Ipan nopa tonali amo oncayaya tanahuatijquet ipan tali Edom, pero itztoya se tequitiquet nozona.

⁴⁸ Huan Josafat quinchijchijqui miyac huejhueyi barcos para yasquíaj ipan hueyi at huejca huan quitemotij oro nepa ipan Ofir, pero amo quema quistejque. Tami sosolijque nopa barcos nepa ipan Ezión Geber. ⁴⁹ Ipan nopa tonali, Ocozías, icone Acab, quiihni nopa Josafat: “Ma yaca notequipanojchua inihuaya motequipanojchua ipan nopa huejhueyi barcos.” Pero Josafat amo quinejqui.

⁵⁰ Huan Tanahuatijquet Josafat mijqui huan quitapchojque ipan Ialtepe David, ihuejcapan tata. Teipa Joram cati eliyaya icone pejqui tanahuatía.

Ocozías tanahuati ipan tali Israel

⁵¹ Huan Ocozías pejqui tanahuatía ipan altepet Samaria ten tali Israel quema Josafat yahuiyaya para 17 xihuit tanahuatis ipan tali Judá. Huan Ocozías tanahuati ome xihuit ipan tali Israel. ⁵² Pero Ocozías quichijqui nochi cati amo cuali iixpa TOTECO. Nejnenui ipan ifiero ojhui itata, Acab, huan inana, Jezabel, huan Jeroboam, icone Nabat, cati quichijqui ma tajtacolchi-huaca nopa israelitame. ⁵³ Pampa yaya nojquiya quihueyichihuayaya nopa taixcopincayot Baal san quej itata quichijtoya. Huan quej nopa quicualan-camacac TOTECO cati toDios tiisraelitame.

2 Reyes

Mijqui Tanahuatijquet Ocozías

¹ Teipa quema ya mictoya Tanahuatijquet Acab, mosentanchijque tali Moab ehuaní ica tali Israel ehuaní. ² Huan Tanahuatijquet Ocozías ten tali Israel huetzqui ten se ventana huejcapa ipan ichaj nepa ipan altepet Samaria huan tahuel mococo. Huan quintitanqui itequipanojcahua ma yaca itioapa Baal Zebub, nopa taixcopincayot ten altepet Ecrón para quitatzintoquilitij sinta mochicahuas o amo. ³ Pero se ilhuicac ejca TOTECO quiyolmelajqui Elías, ten altepet Tisbe, taya quichihuayaya nopa tanahuatijquet. Huan quiilhui ma quinnamiquiti itequipanojcahua Tanahuatijquet Ocozías huan ma quinmaca ni camanali. Huan Elías quinilhui ni camanali para ma quiilhuitij ininteco: “¿Para ten monequi titatitanis ma quitatzintoquilitij taya panos nopa teteyot Baal Zebub ipan tali Ecrón? ¿Amo tijmati para Toteco Dios itztoc ipan ni tali Israel para tijtatzintoquilis?” ⁴ Huajca pampa tijchijtoc ya ni, TOTECO quiijtohua: ‘Ayecmo timijquehuas ipan motapech, nozona temachti timiquis.’”

Huan teipa Elías mocuetqui ichaj. ⁵ Huan itatitanilhua Tanahuatijquet Ocozías mocuetqui campa itztoya huan yaya quintatzintoquili:

—¿Para ten nimantzi anmocuetoque?

⁶ Huan injuanti quinancuilijque:

—Tijnamijque se tacat cati techilhui ma titacuepílica. Techilhui ma timitzolmelahuaca para TOTECO quiijtojtoc: ‘¿Para ten monequi titatitanis ma quitatzintoquilitij Baal Zebub, nopa teteyot ipan tali Ecrón? ¿Amo tijmati para Toteco Dios itztoc ipan ni tali Israel para tijtatzintoquilis ya? Huajca pampa tijchijtoc ya ni, ayecmo timijquehuas ipan motapech, pero nozona temachti timiquis.’

⁷ Huajca nopa tanahuatijquet quintatzintoquili:

—¿Quenicatza eliyaya nopa tacat cati anquinamijque huan amechilhui nopa camanali?

⁸ Huan quinancuilijque:

—Eliyaya se tacat ica iyoyo cati quisencajtoya ica inijhuiyo tapiyalme, huan motajcoilpitoya ica se cinturón ten cuetaxi.

Huan nopa tanahuatijquet quiijto:

—¡Yaya nopa Elías cati ehua altepet Tisbe!

⁹ Huajca nimantzi quititanqui se tayacanquet ica 50 isoldados para ma quicuitij Elías. Huajca nopa tayacanquet tejcoc hasta campa itztoya huan quema quipantitoj, Elías mosehuijtaya itzonatipa se tepet. Huajca nopa tayacanquet ten nopa soldados quilhui:

—¡Ta tiitequipanojca Toteco Dios, xitemo! Nopa hueyi tanahuatijquet quinequi xihuala tohuaya.

¹⁰ Huan Elías quinancuili nopa tayacanquet ten 50 soldados:

—Sinta na nelía niitequipanojca Toteco Dios, ma huetzi tit ten ilhuicac huan ma mitztati ica nochí 50 mosoldados.

Huan nimantzi huetzqui tit ten ilhuicac huan quitamitati ica nochí 50 isoldados.

¹¹ Huan nopa tanahuatijquet quititanqui seyoc tayacanquet ica 50 isoldados ma quitatij Elías huan quiilhuijque:

—¡Ta cati tiitequipanojca Toteco Dios, nimantzi xitemo pampa quej nopa quuijtohua nopa hueyi tanahuatijquet!

¹² Huan Elías quinnanquili:

—Sinta na niitequipanojca Toteco Dios, ma huetzi tit ten ilhuicac huan ma mitztati ihuaya nochi nopa 50 mosoldados.

Huan nimantzi huetzqui tit ten ilhuicac huan quitamitati inihuaya nopa 50 soldados.

¹³ Teipa sempayano nopa tanahuatijquet quititanqui seyoc tayacanquet ica sequinoc 50 isoldados. Pero nopa expa tayacanquet ten soldados tejoc hasta campa itztoya Elías, huan motancuaquetzqui iixpa huan ica nochi iyolo quilhui:

—Tiitequipanojca Toteco Dios, nimitztajtanía chichahuac, techtasojta na huan ni 50 soldados cati timotequipanojcahua. ¡Amo techmicti! ¹⁴ Tijmatij tiquinpolo nopa sequinoc soldados ica tit cati huetzqui ten ilhuicac, pero tojuanti techtasojta huan techcahua tiitzose.

¹⁵ Huan iilhuicac ejca TOTECO quinojnotzqui Elías huan quilhui:

—Xiya ihuaya, amo xiquimacasi.

Huan Elías motananqui huan temoc ipan nopa tepet, huan yajqui ihuaya nopa tayacanquet para quiiatati nopa hueyi tanahuatijquet. ¹⁶ Huan Elías quilhui:

—Quej ni quuijtohua TOTECO: ‘Pampa tiquintitanqui motatitanilhua ma quitatzintoquilitij Baal Zebub, nopa taixcopincayot ten altepet Ecrón, ayecmo timijquehuas ipan motapech, pero nica temachti timiquis pampa tijhijtoc quej amo tijmati sinta niitztoc niamoTeco Dios ipan ni tali Israel para techtatzintoquilisquía.’

¹⁷ Huajca mijqui Tanahuatijquet Ocozías san quej TOTECO quilhuijtuya ica Elías. Huan Joram cati eliyaya iicni mochiqqui tanahuatijquet pampa Ocozías amo quipixqui icone. Huan Joram pejqqui tanahuatía ipan tali Israel quema nopa seyoc Tanahuatijquet Joram cati eliyaya icone Josafat yahuyaya para ome xihuit tanahuatis ipan tali Judá.

¹⁸ Huan nochi sequinoc tamanti cati panoc ipan itequi Tanahuatijquet Ocozías huan nochi cati quichijqui eltoc ijcuilijtoc ipan nopa amatajcuiloli cati itoca Cati Quichijque Nopa Tanahuatiani Ipan Tali Israel.

2

Elías tejoc ilhuicac

¹ Teipa quema monechcahuiyaya nopa talojtzi para TOTECO quihuicas Elías hasta ilhuicac ipan se ajcomalacat, Eliseo quisayaya ten altepet Gilgal ihuaya Elías, ² pero Elías quilhui:

—Ximocahua nica, pampa TOTECO techtitantoc ma niya campa altepet Betel.

Pero Eliseo quinanquili:

—Temachti nimitzilhuía amo nimitzcahuas moseltitzi.

Huajca yajque san sejo hasta Betel.

³ Pero nopa telpoca tajtolpanextiani cati itztoyaj ipan Betel quinamiquicoj Eliseo huan quilhuijque:

—¿Ta no tijmati para ama TOTECO mitzquixtilis Elías, motamachtijca?

Huan Eliseo quinnanquili:

—Quena, nijmati, pero amo teno xiquijtoca.

⁴ Teipa Elías quilhui Eliseo:

—Ximocahua nica ipan Betel pampa TOTECO techtitantoc ma niya altepet Jericó.

Pero Eliseo quinanquili:

—Nelía temachtí nimitzilhuía, amo nimitzcahuas moseltitzi.

Huajca yajque san sejco hasta altepet Jericó. ⁵ Huan nopa telpoca tajtolpanextiani cati itztoyaj ipan altepet Jericó monechcahuitoj campá Eliseo, huan quiilhuijque:

—¿Ta no tijmati para ama TOTECO mitzquixtilis motamachtijca?

Huan Eliseo quinnanquili:

—Quena, ya nijmati, pero amo teno xiquijto.

⁶ Teipa Elías quiilhui Eliseo:

—Ximocahua nica Jericó pampa TOTECO techtitantoc hasta hueyat Jordán.

Pero Eliseo quinanquili quej nochipa quinanquiliyaya:

—Nelía temachtí nimitzilhuía, amo nimitzcahuas moseltitzi.

Huajca yajque nochi ome san sejco. ⁷ Huan hualajque 50 telpoca tajtolpanextiani huan moquetzque huejca iniixmelac Elías huan Eliseo para quintachilise. Huan Elías huan Eliseo moquetzque iteno hueyat Jordán.

⁸ Huan Elías moquixtili itaque cati quinextiyaya para eli se tajtolpanextijquet huan quimimilo, huan ica quitzohuitejqui nopa at san se huelta. Huan nimantzi nopa hueyat motajcoxelo huan nochi ome quiixcotonque ipan tali huactoc. ⁹ Huan quema ya quiixcotontoyaj, Elías quiilhui Eliseo:

—Techtajtani taya tijnequi ma nimitzchihui pampa amo huejcahuas para techhuicase.

Huan Eliseo quiilhui:

—Nimitztajtania ma nijseli motequi quej tayacanca tajtolpanextijquet.

¹⁰ Huan Elías quinanquili:

—Tahuel ohuí cati timotajtanijtoc. Pero sinta techitas quema techhuicase ten campá ta, TOTECO mitzmacas cati tijtajtania. Huan sinta amo techitas, huajca amo.

¹¹ Huan quema nopa ome tacame yahuiyayaj huan camanaltiyahuiyayaj, nimantzi monexti tatajco injuanti se carro cati senquisa tit ica cahuayojme cati nojquiya tit. Huan Elías ipan tejcoc huan yajqui ilhuicac ipan se ajcomalacat. ¹² Huan Eliseo quiitac nopa tamanti, huan quinojnotzqui chichahuac huan quiijto: “Notata, ta cati tieliyaya ichichualis ni tali Israel, ama ya techcajtejqui.”

Huan ayecmo quiitac más. Huan quitajcocotonqui ten ya iyoyo para ma nesi iteqipachol.

Eliseo quiseli itequi Elías

¹³ Huan Eliseo quitananqui itaque Elías cati huetzqui huan mocuetqui ipan nopa ojti campá hualajtoyaj hasta campá hueyat Jordán. Huan moquetzqui atenti. ¹⁴ Huan ica nopa taquemit cati huetztoya ten Elías, Eliseo quitzohuitejqui nopa at huan quiijto: “TOTECO, ta cati tiTeco Elías, xijnexti mochichualis.”

Huan quema quitzohuitectoya nopa hueyat, nimantzi motajcoxelo nopa at huan moquetzqui se pamit nica huan seyoc neca, huan Eliseo sempa quiixcotonqui nopa hueyat ipan huactoc tali.

¹⁵ Huan quema quiitaque cati panoc, nopa telpoca tajtolpanextiani cati itztoyaj ipan Jericó ipan nica nali hueyat, quiijtojque: “¡Nopa chichahualisti cati TOTECO quimacatoya Elías, ama motalijtoc ipan Eliseo!”

Huan nopa telpoca tajtolpanextiani hualajque quinamiquicoj Eliseo ipan ojti, huan motancuaquetzque iixpa huan mohuijtzonque talchi ica miyac tatepanitacayot. ¹⁶ Huan quilhuijque:

—Techcahuili ma tiquintanica nopa 50 tacame cati más tetique ten tojuanti para yase quitemotij motamachtijca, Elías. Huelis Itonal TOTECO san quitanantoc huan quitajitoc ipan se cuatitami o ipan se tachiquili.

Pero Eliseo quinilhui:

—Amo xiquintitanica.

¹⁷ Pero quifuerzajhuijque nopa tajtolpanextiani hasta moyolyamanili Eliseo huan quincahuili ma quintitanica nopa 50 tacame. Huan quitemojtin-enque para eyi tonati, pero amo quipantijque. ¹⁸ Huan quema mocuetque campa mocahuayayaj ipan altepet Jericó huan amo teno quipantijtoyaj, Eliseo noja itztoya nozona huan quinilhui:

—Na nimechilhui amo xijtemotij pampa san tapic.

Eliseo quichicajqui nopa at ipan Jericó

¹⁹ Huan nopa tacame cati ehuan ipan altepet Jericó quilhuijque Eliseo:

—Nica campa eltoc ni altepet nelía yejyetzzi quej tiquita, pero nopa at cati onca, amo cuali. Huan quichihua para nochi tosihuajhua ma quintahuisoca ininconeuhua huan ni total amo hueli taeliltía.

²⁰ Huajca Eliseo quijto:

—Techhualiquilica se xicali cati yancuic, huan xijtemitica ica istat.

Huajca quihualiquilijque. ²¹ Huan Eliseo yajqui campa meyayaya nopa ameli, huan quitenqui nopa istat amelijtic, huan quijto:

—Quej ni quijtohua TOTECO: ‘Ya nijchicajtoc ni at, huan ayecmo quihualicas miqulisti, yon cocolisti.’

²² Huajca hasta ama nopa at eltoc nelcuali quej Eliseo quijto para elis.

²³ Teipa Eliseo quisqui nozona huan yajqui ipan Betel. Huan quema tejcoyaya ipan ojti, quisque miyaqui telpoca tacame cati amo quitapanitayayaj TOTECO, huan pejqe ica paquij Eliseo. Quitzajtziliyayaj: “Ticuapepestic tacat, xitejco ticuapepestic tacat.”

²⁴ Huan moicantachili Eliseo huan qunitac, huan quintelchijqui ica itequiticayo TOTECO. Huan quisque omé osome ipan nopa cuatitami, huan quinmictijque 42 ten nopa telpocame. ²⁵ Huan teipa Eliseo quisqui nozona huan yajqui ipan tepet Carmelo. Teipa quisqui nozona huan mocuetqui altepet Samaria.

3

Joram tanahuati ipan tali Israel

¹ Huan Joram, icone Tanahuatijquet Acab, mochijqui tanahuatijquet ipan altepet Samaria ipan tali Israel quema Tanahuatijquet Josafat ipan tali Judá yahuiyaya para 18 xihuit tanahuatis. Huan Joram tanahuati 12 xihuit.

² Huan Joram quichijqui cati amo cuali iixpa TOTECO, pero amo neltahuel quej itata huan inana cati tahuel fiero quichijque. Pampa Joram quisosolo nopa taixcopincayot ten Baal cati itata quichijtoya. ³ Pero Joram quitoquili itajtacol Tanahuatijquet Jeroboam, icone Nabat, cati achtohuiya quinchijqui israelitame ma quinhueyitalica taixcopincayome ten becerros.

Eliseo tayolmelajqui quintanise Moab ehuan

⁴ Tanahuatijquet Mesa ten tali Moab quinsalcaltiyaya borregojme. Huan para quitaxtahuis impuestos sesen xihuit nopa tanahuatijquet ten tali Israel monejqui quimacas 100 mil borregojme, huan inijhuiyo seyoc 100 mil

oquich borregojme. ⁵ Pero quema ya mictoya Tanahuatijquet Acab ipan tali Israel, nopa tanahuatijquet ten tali Moab motananqui iixpa Tanahuatijquet Joram nopa yancuic tanahuatijquet para ayecmo teno quimacas. ⁶ Huajca quisqui Tanahuatijquet Joram ipan altepet Samaria huan quinsentili nochi isoldados ipan tali Israel. ⁷ Huan teipa tatitanqui ma quuitatij Josafat nopa tanahuatijquet ten tali Judá huan quiihui: “Nopa tanahuatijquet ten tali Moab motanantoc ica na para ayecmo teno techtaxtahuis. ¿Amo huelis tihualas techpalehuiqui tijtehuitij huan tijfuerzajhuise sempa techtaxtahuis impuestos?”

Huan nopa tanahuatijquet ten tali Judá quinanquili: “Quena, niyas mohuaya. Nosoldados huan nocahuayos itztoque momaco san quej moaxchahua para technahuatis. ⁸ San techilhui canque tijnequi ma tiyaca.”

Huan Tanahuatijquet Joram quiiyto: “Xipano ipan nopa ojti cati yahui ipan huactoc tali ipan tali Edom.”

⁹ Huajca quisqui nopa tanahuatijquet ten tali Israel, huan nopa tanahuatijquet ten tali Judá huan nopa tanahuatijquet ten tali Edom huan para monequi nejnengue chicome tonati ipan nopa ojti ipan nopa huactoc tali pampa amo huelque panose xitahuac. Huan tanqui nochi at hasta amo teno quipixque para quise inisoldados huan inintapiyahua. ¹⁰ Huajca nopa tanahuatijquet ten tali Israel quiiyto:

—¿Taya tijchihuase? ¿TOTECO techhualicatoc tieyi tanahuatiani huan tosoldados para techtemactilis imaco nopa tanahuatijquet ten tali Moab?

¹¹ Huan Tanahuatijquet Josafat quitatzintoquili:

—¿Amo aqui nica se itajtolpanextijca TOTECO, para tijtatzintoquillise TOTECO ica ya huan tijmatise taya monequi tijchihuase?

Huan se itequipanojca nopa tanahuatijquet ten tali Israel quiiyto:

—Nica itztoc Eliseo, icone Safat, cati quitequipano Elías.

¹² Huan Josafat quiiyto:

—Yaya quiselía camanali ten TOTECO.

Huajca nimantzi nopa tanahuatijquet ten tali Israel, huan nopa tanahuatijquet ten tali Edom huan Josafat, nopa tanahuatijquet ipan tali Judá, mosentilijque huan yajque quicamanalhuitoj Eliseo.

¹³ Huan Eliseo quiihui Joram, nopa tanahuatijquet ten tali Israel:

—¿Taya nijpiya na ica ta? Xiya ximotatzintoquiliti ica nopa istacatica tajtolpanextiani ten Baal cati monana huan motata quintoquiliyayaj.

Pero nopa tanahuatijquet ten tali Israel quiihui:

—Amo nijchihuas ya nopa, pampa yaya TOTECO cati techsejcotilijtoc tieyi tanahuatiani para techtemactilis inimaco nopa moabitame.

¹⁴ Huajca Eliseo quiihui:

—Nijtestigojquetza TOTECO Cati Quinyacana lilhuicac Ejchahua Ma Tatanitij para nimitzpalehuis san pampa itztoc mohuaya Tanahuatijquet Josafat ten tali Judá. Pero sinta ya amo itztoquía, huajca yon amo nimitztachilisque. ¹⁵ Techhualiquilica se cati quimati tatzotzona para moyamanilis noyolo.

Huan quema nopa tatzotzonquet pejqui tatzotzona, TOTECO quitali imax ipan Eliseo huan quimacac icamanal. ¹⁶ Huan Eliseo quiiyto:

—TOTECO quiiytohua para monequi xijchihuaca miyac aojme huan acomoli ¹⁷ para quicuis nopa at cati yaya quititanis. Quiijtohua amo anquicaquise ajacat, yon amo anquiiitase sinta huetzis at, pero ni tamayamit campa anitztoque temis ica at. Huan anatise cuali huan nojquiya nochi amohuacaxhua huan amocahuayojhua. ¹⁸ Pero ya ni sanoc ipejya cati TOTECO amechchihuilis pampa TOTECO nojquiya quintemactilis amomaco

nopa moabitame para anquintanise. ¹⁹ Huan anquitamiltise nochi inialtepehua cati quipiyaj inintepa yahualtic huan anquinsosolose nochi altepeme masque cati más yejectzitzí. Huan anquintzontequise nochi nopa cuajcuali cuame cati temacaj inintajca, huan anquintzacuase nochi iniamelhua para ayecmo meyas at. Huan nochi inintal cati taeliltía, anquitemitise ica teme.

²⁰ Huan tonili quema ajsic hora para quimacase TOTECO nopa tacajcahualisti tatatili cati monejqui ica ijnaloc, hualajqui at ten tali Edóm. Huan temic nopa tamayamit huan aojme huan acomoli ica at.

²¹ Huan nochi tali Moab ehuan quicajque para nopa tanahuatiani hualajtoyaj para quintehuiquij. Huajca mosentilijque nochi cati hueliyayaj tatehuaj masque coneme o huehuentzitzí. Huan moquetzque campa inepantipa inintal. ²² Huan ica ijnaloc nelcualca quema tonati pejqui quitaahuilía nopa at, nopa moabitame quiitaque iniixmelac chichiltic san quej esti. ²³ Huan quijtojqque: “Ya nopa esti. Temachti nopa tanahuatiani motehuijtoque huan momictijtoque. Huajca san monequi ama ma timoaxcatca cati quicajtejqque.”

²⁴ Pero quema ajsitoj nopa moabitame nopona campa mochijtoyaj nopa israelitame, nopa israelitame motananque huan pejque quinmictíaj huan nopa moabitame cholojtejqque. Huajca nopa israelitame quintepotztocaque huan calajque ipan inintal huan quinmictijtiyajque moabitame nopona nojquiya. ²⁵ Teipa quinsosolojqque nopa altepeme, huan quitemitijque ica tet nochi tali cati taeliltía, huan quitzajque nochi iniamel, huan quintzontejque nochi cuame cati temacaj inintajca. Teipa san mocajqui altepet Kir Hareset cati quichijchijtoyaj cuali ica teme. Pero nopa soldados cati quimatiyayaj quimajcahuaj huejhueyi tet san sejco para tasosolose, quiyahualojque nopa altepet huan pejque quitehuíaj itepa huan quej nopa quisosolojqque nopa altepet. ²⁶ Huan quema nopa tanahuatijquet ten tali Moab quiitac para amo tatanise ipan nopa tatehuilisti, quinsentili 700 isoldados cati quimatiyayaj tatehuíaj cuali ica machetas para quiitase sinta sentic huelise panose tatajco campa itztoya nopa tanahuatijquet ten tali Edom huan isoldados para quisase ten nopa altepet. Pero amo huelque quichihua. ²⁷ Huajca nopa tanahuatijquet ten tali Moab quicuic itelpoca cati achtohui ejquet huan cati quiselisque itequi para tanahuatis teipa, huan quitati quej se tacajcahualisti para ininteteyo ipan nopa tepamit cati quiyahualojtoya nopa altepet para nochi quiitase. Huan nelía quincualancamacac nopa israelitame quema quiitaque taya fiero quichijtoya. Huan nopa israelitame quistejqque huan mocuetque campa inintal pampa tahuel quijixque cati quichijqui.

4

Momiyaquili iaceite se sihuat cati icnotzi

¹ Se tonali isihua se telpoca tajtolpanextijquet quihlhi Eliseo:

—Mijqui nohuehue cati tijmati tahuel quitepanitayaya TOTECO. Pero yaya tahuicayaya tomi huan ama hualajtoc cati quitanejtijtoya huan quinequi quinhuicas ni ome noconeua para quitequipanose para nochipa.

² Huan Eliseo quitatzintoquili:

—¿Taya huelis nimitzchihuulis na? Techilhui taya tijpiya ipan mochaj.

Huan nopa sihuat cati icnotzi quinancuili:

—Amo teno nijpiya ipan nochaj, san se pilxarrojtzi cati quipiya aceite ten olivos.

³ Huajca Eliseo quihlhi:

—Xiya xiquintajtaniti mohuampoyohua ma mitztanejtica ojyolme, lemejtejme huan ten hueli tamanti conme. Amo ximotajtaniti san se ome. Xitaj-tani tahuel miyac. ⁴ Huan teipa xicalaqui ipan mochaj ica mooquichpilhua, huan ximocaltzacuaca huan xipehua xijteca nopa aceite ten mopilxarro ipan nochí tamanti cati mitztanejtijtoque. Huan quema se ya temitoc, xiquiyocatali huan seyoc nimantzi xijtemiti.

⁵ Huan yajqui nopa sihuat huan quichijqui cati quiilhui. Huan teipa mocaltzajqui ihuaya loquichpilhua. Huan injuanti quihualiquiliyayaj nopa conme huan lemetejme huan yaya quintequiliyaya aceite. ⁶ Huan quema ya quintemitijtoya nochí, quiilhui se icone:

—Techcuiliti seyoc comit.

Huan quijito:

—Ayecmo teno onca.

Huajca nopa aceite ayecmo miyaquixqui más. ⁷ Huan teipa nopa sihuat cati icnotzi yajqui quipohuilto Eliseo, itequipanojca Toteco Dios. Huan Eliseo quiilhui:

—Ama xiya xijnamacati nopa aceite para titaxtahuas cati titahuica. Huan ica cati mocahuas ten nopa tomi, huelis anpanose ta huan mooquichpilhua.

Eliseo quipalehui se sihuat

⁸ Se tonali Eliseo yajqui ipan altepet Sunem. Nopona itztoya se sihuat cati quiipiyaya tomi huan yaya quinotzqui ma tacuati ichaj. Huan teipa nochipa quema panoyaya Eliseo ipan nopa altepet, tacuajtiquisayaya ipan ichaj. ⁹ Huan teipa nopa sihuat quiilhui ihuehue:

—Na nijmati para nopa tacat cati quemantica pano techpaxalojtiquisa, yaya se tatzejzeloltic tajtolpanextijquet ten Toteco Dios. ¹⁰ Ma tijchihuilica se ipilcuarto nepa huejcapa ipan seyoc piso. Tijtalise se tapechti, se mesa, se seyaj huan se taahuili para nopona huelis mocahuas quema techpaxaloqui.

¹¹ Huan quej nopa quichijque. Huan se tonali quema Eliseo mosiyaj-quetzqui ipan nopa pilcuartojtzi ihuaya Giezi, itequipanojca cati nemiyaya ihuaya, ¹² Eliseo quiilhui:

—Xiquilhuiti nopa toahui cati nica ehua para nijnequi nijcamanalhuis.

Huan quinotzato nopa sihuat huan yaya hualajqui moixnextico iixpa. Huan Eliseo quiilhui itequipanojca:

¹³ —Xiquilhui ni toahui para tahuel tijtascamatij pampa techmocuitahuij-toc nica ipan ichaj. Xijtatzintoquili taya hueli tijchihuilise. ¿Huelis quinequis ma nijcamanalhuiti nopa tanahuatijquet ipan ni tali, o huelis ma nica-manalti ica nopa tayacanquet ten soldados nica para ma quipalehuica ica se tamanti?

Huan nopa sihuat quijito para amo monequi pampa itztoya ica yejectzi ica nochí ipan ialtepe huan teipa quisqui.

¹⁴ Pero teipa Eliseo sempa quiilhui itequipanojca:

—¿Taya huelis tijchihuilise ne toahui para tijtascamatise?

Huan itequipanojca quiilhui:

—Nopa sihuat amo quiipiya yon se icone huan ihuehue ya huehuentzi.

¹⁵ Huajca Eliseo quiilhui:

—Sempa xijnotzati nopa toahui.

Huan yajqui quinotzato huan nopa toahui moquetzaco ipan caltemit.

¹⁶ Huan Eliseo quiilhui:

—Ipan ne se xihuit cati huala, ipan ni metzti tijtacatilti se piloquichpiltzi. Huan nopa sihuat tananquili:

—¡Tate, ta cati tiitequipanojca Toteco Dios, amo techcaycayahua!

17 Pero quena, nopa sihuat conecuc huan quitacatilti se conet ipan nopa tonali quema xihuitic senquisa quej Eliseo quiilhuijtoya.

18 Huan nopa piloquichpiltzi moscalti, huan se tonali yajqui quitato itata cati itztoya ica itequipanojcahua cati pixcayayaj ipan imil. 19 Huan nimantzi nopa conet quiilhui itata:

—¡Techcocohua notzonteco! ¡Techcocohua notzonteco!

Huan itata quiilhui se tequipanojquet ma quihuica campa itztoc inana ipan ichaj. 20 Huajca nopa tequipanojquet quitananqui huan quihuicac campa itztoya inana. Huan nopa oquichpil mosehui ipan itancuaj inana hasta tajcotona huan teipa mijqui. 21 Huan nopa sihuat quihuicac campa icuarto nopa tajtolpanextijquet huan quitejqui ipan itapech huan quitzactejqui nopa caltemit ipan nopa cuarto. 22 Huan nimantzi quitatitani ihuehue huan quiilhui:

—Techtitanili se tequipanojquet ica se pilburrojtzti para huelis niyas nimantzi niqitatati itequipanojca Toteco Dios huan nima nimocuepas.

23 Huan ihuehue quitatzintoquili:

—¿Para ten tiquitati nopa tajtolpanextijquet ama? Ama amo yancuic metzti, yon amo eltoc se tonali para timosiyajquetzase.

Huan nopa sihuat quiilhui:

—Amo ximocueso, nohuehue, amo teno.

24 Huan teipa nimantzi quisiyajti nopa burro huan ipan tejcoc. Huan quiilhui itequipanojca:

—Xijmajmatl huan xiquisihuilti ni burro, huan amo xijcahua ma moquetza yon quentzi hasta quema nimitzilhuis.

25 Huan nopa sihuat yajqui huan ajsito ipan tepet Carmelo campa itztoya nopa tajtolpanextijquet. Huan Eliseo quiitac ica huejca huan quiilhui itequipanojca, Giezi:

—Xiquita ne huala ne toahui ten altepet Sunem. 26 Ximotalo xijnamiquiti. Xijtajtani quenicatza itztoc huan quenicatza itztoc ihuehue huan icone.

Huan itequipanojca yajqui huan nopa sihuat quiilhui para cuali itztoque.

27 Huan teipa nimantzi ajsito campa Eliseo huan momajcajqui talchi huan motatzquili iicxita Eliseo. Huan Giezi monechcahui para quiijcuenis, pero Eliseo quiilhui:

—Xijcahua pampa tahuel mocuesohua huan ayemo technextilijtoc TOTECO taya quitequipachojtoc.

28 Huajca nopa sihuat quiilhui:

—Na amo nimitztajtani ma nijpiya se conet. Ta, ica mopaquilis tiquijto. San nimitztajtani amo techcajcayahua huan techilhuis nijpiyas se conet sinta amo cana.

29 Huan Eliseo nimantzi quiilhui Giezi:

—Xijcuitehua nocuatopil huan ximotalo hasta campa ichaj. Huan sinta tijnamiquis se acayja ipan ojti, yon amo xijtajpalo. Huan sinta se acayja mitztajpalos, amo xijnanquili. Huan xijtaliti nocuatopil ixayac nopa oquichpil.

30 Huan inana nopa oquichpil quiilhui Eliseo:

—Nelía melahuac nimitzilhuía, amo nimitzcajtehuas.

Huajca Eliseo moquetzqui huan quisqui ihuaya. 31 Huan Giezi tayacan-tiyajqui huan quitali icuatopil icuajtoltipa nopa oquichpil, pero amo teno caquistic, yon amo molini. Huan Giezi quinamiquito Eliseo huan quiilhui:

—Nopa oquichpil amo isa.

32 Huan Eliseo calajqui ipan nopa cali, huan quiitac para nopa oquichpil ya mictoc, huan quitectoya ipan ten ya itapech. 33 Huajca calajqui ipan nopa cuarto huan quitzajqui caltemit para itztos iseltitzi ica nopa piloquichpiltzi

huan pejqui motatajtía ica TOTECO. ³⁴ Huan tejcoc ipan itapech huan motejqui ipan nopa oquichpil. Huan quitali icamac ipan icamac, huan iixteyol ipan iixteyol, huan imax ipan imax nopa oquichpil, huan itacayo nopa oquichpil pejqui mototonilía. ³⁵ Huan Eliseo temoc tatzinta ipan nopa cali huan nentinenqui ten se ielchiqui nopa cali hasta seyoc. Huan teipa tejcoc sempa campa nopa cuarto huan sempa motejqui ipan nopa oquichpil. Huan nopa oquichpil ajcujexco chicome huelta huan quitapo iixteyol. ³⁶ Huan Eliseo quinotzqui Giezi huan quiilhui:

—Xijnotza nopa sihuat cati nica ehua.

Huajca quinotzqui. Huan quema calajqui, Eliseo quiilhui:

—Nica itztoc mocone.

³⁷ Huan nopa sihuat monechcahui huan momajajqui talchi campa iicxi Eliseo huan quitascamatqui. Teipa quicuic icone huan quisqui.

Eliseo quicualtili nopa tacualisti cati pajyo

³⁸ Huan Eliseo sempa paxalo ipan altepet Gilgal huan oncayaya se hueyi mayanti nozona ipan nopa tali. Huan nopa telpoca tajtolpanextiani mosehuijtoyaj iixpa huan yaya quinmactiyaya. Huan Eliseo quiilhui itequipanojca: “Xijmana at ipan se hueyi chachapali huan xijchihua tacualisti para ni telpoca tajtolpanextiani.” ³⁹ Huajca quichijqui. Huan seyoc tequipanojquet quisqui huan yajqui ipan se milcahuali quitemoto quilit, pero quiajsito cuat-acti quej ayojti huan quitejqui miyac huan quitenqui ipan se yoyomit. Huan quihualicac huan quihuejhuelo huan quitenqui ipan nopa chachapali, pero amo quimatiyaya sinta eliyaya amo cuali quicuase. ⁴⁰ Teipa quintequilijque ma quicuaca nopa telpoca tajtolpanextiani. Pero quema pejque quicuaj nopa tacuali, inijuanti cuatzajtzique:

—¡Tajtolpanextijquet, ni tacuali pajyo huan techmictis!

Huan ayecmo huelque quicuajque. ⁴¹ Huan Eliseo quijito:

—Techhualiquilica se quentzi harina.

Huan quihualicaque. Huan Eliseo quijitzelo iijtic nopa hueyi chachapali huan teipa quinilhui:

—Ama ya cualtitoc. Xijcuaca.

Huan ayecmo teno cati amo cuali quipixqui nopa tacualisti.

Eliseo quintamacac cien masehualme

⁴² Huan seyoc tonali ajsico se tacat cati ehua Baal Salisa, huan quihualiquili nopa tajtolpanextijquet Eliseo se sempoali pantzi cati quichijtoya ica cebada cati quipixcaque ipan nopa achtohui pixquisti. Nojquiya quihualicac ipan immoral quentzi trigo iyol cati yancuic. Huan Eliseo quiilhui se tequipanojquet:

—Xiquinmaca nopa telpoca tacame para ma quicuaca.

⁴³ Pero nopa tequipanojquet quiilhui:

—Ni tacualisti nelquentzi. Huajca ¿quenicatza huelis quinaxilis para niquintamacas nopa 100 tacame?

Huan Eliseo quinancuili:

—Xiquinmajmaca nopa tacame para ma quicuaca, pampa TOTECO quijtohua quichihuas para nochi tacuase cuali huan hasta mocahuas tacualisti.

⁴⁴ Huajca nopa tequipanojquet quitali iniixpa huan nochi tacuajque cuali huan hasta mocajqui tacualisti quej TOTECO quijtojtoya.

¹ Itztoya se tacat cati itoca eliyaya Naamán cati eliyaya tayacanquet ten isoldados nopa tanahuatijquet ten tali Siria. Huan iteco nelía quiicneli. Huan ica Naamán TOTECO quichijqui ma tatani tali Siria. Huan Naamán tahuel mosemacayaya ipan tatehuilisti, pero quipixqui nopa palanca tacayo cocolista cati itoca lepra. ² Huan nopa soldados ten tali Siria momajtoyaj yahuij quinonichtequij israelita ichpocame huan quichtectoyaj se sihuapil israelita cati quitequipanohuayaya isihua Naamán ipan icalijtic. ³ Huan nopa sihuapil quiilhui isihua Naamán:

—Nijnequisquía noteco, Naamán, ma yahui quiitati nopa tajtolpanextijquet cati itztoc ipan altepet Samaria ten tali Israel. Yaya temachtí quichicahuasquía ten icocolis.

⁴ Huajca Naamán yajqui campa itztoya iteco, nopa tanahuatijquet ten tali Siria, huan quipohuilto cati quiilhuijtoya nopa sihuapil. ⁵ Huan iteco quiilhui:

—Huajca monequi xiya. Huan nijtitanis se amatajcuiloli para nopa tanahuatijquet ten tali Israel para mitzpalehuis.

Huajca Naamán quicuiejqui 30 mil tomi, huan 6 mil oro tomi huan majtacti taca yoyome cati más cuajcualtitzti. ⁶ Huan quihuiguili nopa hueyi tanahuatijquet ten tali Israel nopa amatajcuiloli cati quiijtohuayaya: “Nopa tacat cati quihuica ni amatajcuiloli, yaya notequipanojca cati itoca Naamán. Nimitztitanilijtoc Naamán para xijchicahua ten icocolis.”

⁷ Huan quema nopa tanahuatijquet ten tali Israel quipojqui nopa amatajcuiloli, quitzayanqui iyoyo para ma nesi moicnonequiyaya huan quiijto:

—¿Moilhuía para niDios cati hueli temictis o temacas nemilisti? ¿Para ten techtitanilía ni tacat para ma nijchicahua ten icocolis? Temachtí san quitemohua se cualanti ica na.

⁸ Huan Eliseo, itequipanojca Toteco Dios, quicajqui para nopa tanahuatijquet quitzayantoya iyoyo por nopa amatajcuiloli, huajca tatitanqui ma quiilhuitij ya ni: “¿Para ten tijtzayantoc moyoyo? Ma huala nopa tacat ma techitaqui huan yaya quimatis para itztoc se tajtolpanextijquet ipan ni tali Israel.”

⁹ Huajca Naamán yajqui ica icahuayojhua cati quitlanayayaj itepos carro, huan moquetzqui calixpa nechca caltemit ipan ichaj Eliseo. ¹⁰ Huan Eliseo san quititanqui se tayolmelajquet para ma quiilhui: “Xiya huan ximopajpaca chicome huelta ipan nopa hueyat Jordán, huan timochicahuas ten mococolis.”

¹¹ Pero Naamán quisqui cualantoc huan quiijtojtijajqui:

—Nimoilhui para temachtí quistosquía, huan motatajtisquía ica iTECO Dios para ma techchicahua, huan quitalisquía imax iixmelacampa nocolis huan quej nopa techchicahuasquía. ¹² Más cuali nopa ome hueyame, Abana huan Farfar, cati tijpiyaj ipan tali Damasco que nochi hueyame ipan ni tali Israel. ¿Para ten amo hueltosquía nimaltijtosquía ipan nopa hueyame para nimochihuas tapajpactic?

Huan yajqui tahuel cualantoc. ¹³ Pero itequipanojcahua monechcahuijque campa ya huan quiilhuijque:

—Tate, sinta nopa tajtolpanextijquet mitznahuatijtosquía xijchihua cati tahuel ohui, ¿amo tijchihuasquía? Huajca ¿para ten amo tijchihuas icamanal quema mitzilhuijtoc cati amo ohui? San mitzilhuijtoc para ximopajpaca huan timochicahuas ten mococolis.

14 Huajca Naamán yajqui huan moatzonpolihuilti chicome huelta ipan nopa hueyat san quej quínahuatijtoya nopa tajtolpanextijquet. Huan icuetaxo mochicajqui cuali huan elqui tapajpactic quej se oquichpil itacayo.

15 Huajca yaya huan nochi itequipanojcahua sempa yajque quuitatoj Eliseo, yaya cati itequipanojca Toteco Dios. Huan quema ajsito campa Eliseo, Naamán quilhui:

—Ama nijmati amo aqui seyoc ipan nochi taltipacti cati nelía Dios. Toteco Dios san itztoc nica ipan tali Israel. Nimitztajtania xijseli ni tamanti cati na, nimotequipanojca, nimitzhualiquilía.

16 Pero Eliseo quinanquili:

—Temachti nimitzilhuía amo teno nijselis.

Huan masque Naamán tahuel quinequiyaya quimacas, Eliseo amo quiseli.

17 Huan Naamán quijto:

—Huajca sinta amo tijnequi tijselis ni nemacti, techchihui se favor. Techcahuili ma nijhuica se quentzi tali ten ni tali Israel. San nijnequi nijhuicas quej ome burro tamamali. Huan na ayecmo nijmacas tacajcahualisti tatatili se taixcopincayot, san TOTECO. 18 Pero nijtajtania TOTECO ma techtapojpolhui se tajtacoli. Quema nopa hueyi tanahuatijquet quinequis quihueyichihuati itaixcopincayo, Rimón, ipan itiopa, huan monequis momatatzquiliytiyas ipan noajcol para nijnejnemiltis, ma TOTECO techtapojpolhuis sinta na nojquiya nijmohuijzomas.

19 Huan Eliseo quinanquili:

—Xiya ipan moojhui ica cuali.

Huajca Naamán quisqui huan quema ya huejca yajtoya, 20 Giezi, itequipanojca tajtolpanextijquet Eliseo, moilhui: “Noteco, quicajtoc ma yahui Naamán nopa tali Siria ejquet huan amo teno quiseli cati quihualicatoya. Temachti nimotalos huan nicajsiti huan nijtajtanis ma techmaca se teniqui.”

21 Huajca Giezi pejqui quitepotztoca Naamán, huan quema Naamán quitac ica iica, temoc ipan itepos carro para quiselis. Huan quilhui:

—¿Nochi eltoc cuali?

22 Huan Giezi tananquili:

—Quena, cualtitoc. Noteco techtitantoc ma nimitzilhuiqui para ajsicoj ome telpoca tajtolpanextiani cati ehuan ipan tepeme ten tali Efraín. Huan mitztajtania xiquinmaca eyi mil plata tomi huan ome taca yoyomit cati yancuic.

23 Huan Naamán quinanquili:

—Quena, techchihui se favor huan xijhuica chicuase mil plata tomi.

Huan chicahuac Naamán quilhui para ma quiseli. Huan quitali nopa tomi ipan ome coxtali huan nojquiya quitali nopa ome taca yoyomit cati cuajcualtzi huan quintitanqui ome itequipanojcahua ma yaca ihuaya para ma quihucaca nopa tamamali. 24 Huan quema ajsitoj ipan nopa tepet nechca altepet, Giezi quicuic nopa plata tomi cati quihucayayaj nopa tatequipanohuani huan quiajojqui ipan ichaj. Teipa quinnahuati nopa tequipanohuani ma yaca. 25 Huan teipa moixnextito iixpa iteco, Eliseo. Huan Eliseo quitatzintoquili:

—¿Canque tinemito Giezi?

Huan yaya quinanquili:

—Amo cana niyajtoc.

26 Huajca Eliseo quilhui:

—Niitzo ya nozona mohuaya ipan notonaltzi quema nopa tacat temoc ipan itepos carro para mitzselis. ¿Quinamiqui para timoricojchihuas ica plata

tomi, huan yoyomit, olivo milme, xocomeca milme, borregoyme, huacaxme, huan tequipanohuani por se tequit cati TOTECO san tapic quichihuili se seyoc tali ejquet? ²⁷ Huajca ama nopa palanca tacayo cocolisti lepra cati quipiyayaya Naamán tatzquis ipan ta huan ipan moconehua huan moixhuihua para nochia.

Huan quema Giezi quisqui ten campa itztoya Eliseo, itacayo nesiyya chipahuac quej nexti ica nopa cocolisti lepra.

6

Eliseo quipanti nopa hacha cati misahuijtoya

¹ Se tonali nopa telpoca tajtolpanextiani quihuijque Eliseo:

—Xiquita nica campa tiitztoque ica ta tahuel cuejcuejtzi para nochi tojuanti. ² Techcahua ma tiyaca nechca hueyat Jordán campa onca miyac cuame. Huan sesen tijzontequise se cuahuit huan nopona tijchihuase se cali cati más hueyi para ipan tiitztose.

Huan Eliseo quijto:

—Cualtitoc, xiyaca.

³ Huan se ten nopa telpoca tajtolpanextiani quihui:

—Nimitztajtania xiya tohuaya.

Huan Eliseo quijto:

—Cualtitoc, niyas amohuaya.

⁴ Huan Eliseo yajqui inihuaya hasta campa hueyat Jordán huan nopona pejque quintzontequij cuame. ⁵ Pero quema se quitzontequiyaya se cuahuit, huetzqui ihacha ipan hueyat. Huajca pejqui cuatzajtzij:

—¡Tamachtijquet! ¡Nopa hacha san timotanejtoque!

⁶ Huan itequipanojca Toteco Dios quitatzintoquili:

—¿Canque huetzqui?

Huan quinextilijque canque huetzqui. Huajca Eliseo quitzontejqui se cuahuit huan quimajcayqui nopona campa huetzqui nopa hacha, huan quichijqui para ma moaixcotali nopa hacha. ⁷ Huajca Eliseo quihui:

—Xijcui.

Huan yaya quicuic nopa hacha ica imax.

Quinitaque ilhuicac ehuan cati quinmocuitahuiyaya

⁸ Se tonali nopa tanahuatijquet ten tali Siria quintehuiyaya tali Israel ehuan huan quincamanahuiyaya isoldados canque cuali para mochihuase para tatehuse. ⁹ Huan nimantzi Eliseo, masque huejca itztoya, quiyolmatiyaya huan quititaniyaya se ma quimatilti itanahuatijca ten tali Israel huan ma quihui: “Ximocuitahuica para amo aqui panos campa nimizilhuía pampa nopona tali Siria soldados mochijtoque para amechtehuse.”

¹⁰ Huan nopa tanahuatijquet ten tali Israel quintitanqui isoldados ix-tacatzí para quitase sinta melahuac cati quijto tajtolpanextijquet Eliseo, huan quiitac para quena, temacti. Huan quej nopa quichijqui miyac huela. Yeca nopa israelitame miyac huela momanahuijque ica Siria ehuan ica icamanahuijque. ¹¹ Huan nopa tanahuatijquet ten Siria tahuel cualanqui huan quinnotzqui nochi itequipanojcahua huan quinilhui:

—Techilhuica ajquiya ten tojuanti itztoc ihuaya nopa tanahuatijquet ten tali Israel.

¹² Huajca se itequipanojca quihui:

—Tanahuatijquet, amo aquí itztoc ica ya, pero nopa tajtolpanextijquet cati itztoc nepa ipan tali Israel quimati nochi cati tiquijtohua, masque ixtacatzí ticamanalti ipan mocuarto. Huan yaya nochi quihui itanahuatijca.

13 Huan nopa tanahuatijquet ten tali Siria quiiyto:

—Huajca xiyaca xitatzintocaca canque itztoc Eliseo para niquintitanis se quesqui tacame ma quiiitzquitij.

Huan teipa sequij quiiilhuique para Eliseo itztoya ipan altepet Dotán.

14 Huajca nopa tanahuatijquet quintitanqui tahuel miyaqui soldados, sequij cati cahuyoytipa nemiyayaj huan sequij soldados cati itztoyaj ipan tatehuijca tepos carrojme. Huan quinilhui ma yaca ipan altepet Dotán. Huan nochi ajsitoj ica tayohua, huan quiyahualojque nopa altepet.

15 Huan tonili cualca quisqui itequipanojca Eliseo huan quinitac nopa miyaqui soldados cati quiyahualojtoyaj nopa altepet, sequij cati cahuyoytipa nemiyayaj huan sequinoc ipan tatehuijca tepos carrojme. Huajca yajqui quiiilhuito Eliseo:

—Huan ama tamachtijquet, ¿taya tijchihuase?

16 Huan Eliseo quinanquili:

—¡Amo ximajmahui! Más miyaqui cati itztoque tohuaya que cati itztoque ica injuanti.

17 Huan motatajti Eliseo ica TOTECO, huan quiiyto: “Nimitztajtanía, TOTECO, xijtapohuili iixteyol para yaya ma tachiya.”

Huajca TOTECO quitapohuili iixteyol nopa tequipanojquet huan quinitac ipan nochi tepeme tahuel miyaqui soldados ten senquisa tilelemecti cati quiyahualohuayaj Eliseo, sequij cahuyoytipa nemiyayaj huan sequij ipan tatehuijca tepos carrojme. 18 Huan quema nopa sirios pejqe monechcahuaj campá Eliseo, yaya motatajti ica TOTECO, huan quiiyto: “Nimitztajtanía, TOTECO, xijchihua ma mocahuaca popoyotzitzi ni tacame.”

Huan TOTECO quinchijqui popoyotzitzi san quej quiiilhui Eliseo. 19 Huajca Eliseo quinilhui nopa soldados:

—Ya ni amo nopa ojti, yon amo ya ni nopa altepet cati anquitemohuaj. Techtoquilica huan nimechhuicas hasta campá itztoc nopa tacat cati anquitemohuaj.

Huan quinhuicac hasta altepet Samaria. 20 Huan quema ajsitoj nopona, Eliseo sempa motatajti huan quiiyto: “Ama TOTECO, xiquintapohuili inixteyol para ma huelica tachiyaca.”

Huajca quitaque para itztoque ipan altepet Samaria ten tali Israel.

21 Huan quema nopa tanahuatijquet ten tali Israel quinitac, quitatzintoquili Eliseo:

—¿Notata, tijnequi ma niquinmicti?

22 Huan Eliseo quinanquili:

—¡Amo xiquinmicti! ¿Tiquinmictisquía masehualme cati tiquinitzquía ipan tatehuilisti? Xiquinmaca tacualisti huan xiquinmaca at, huan teipa xiquincahua ma yaca ipan inintal.

23 Huajca quinsencahuili se hueyi tacualisti, huan quema ya tantoyaj tacuaj huan atij, quinmajcajqqui huan tacuepilijque campá ininteco. Huan nopa Siria ehuaní ayecmo hualajque tachtequicoj ipan tali Israel.

Nopa mayanti ipan altepet Samaria

24 Teipa quema panotoya miyac tonali Ben Adad, nopa tanahuatijquet ten tali Siria, quinsentili nochi isoldados huan quiyahualotoj altepet Samaria.

25 Huan oncac se hueyi mayanti ipan Samaria pampa amo hueliyayaj quisaj ten inialtepe pampa nopa sirios quiyahualojtoyaj. Amo teno oncac para tacuase hasta se tzontecomit ten se burro ipati eliyaya 80 plata tomi, huan nechca tajco litro cuitat ten totome ipati eliyaya macuili plata tomi. 26 Huan se tonali nopa hueyi tanahuatijquet ten tali Israel panoyaya ipan nopa

tepamit cati quiyahualojtoya inialtepe, huan se sihuat quinotzqui huan quiilhui:

—¿Techpalehui, Tanahuatijquet!

²⁷ Huan ya quijito:

—Sinta amo mitzpalehuía TOTECO, ¿quenicatza huelis nimitzpalehuis na? Amo nijpiya tacualisti, yon taili para nimitzmacas. ²⁸ Pero techilhui taya cuesoli tijpiya.

Huan nopa sihuat quiilhui:

—Nopa sihuat techilhui ma nijmaca nocone para tijcuase se tonali huan tonili tijcuasquíaj cati ya icone. ²⁹ Huajca tijcacatzoque cati na nocone, huan tijcuajque. Huan ipan seyoc tonali na niquilhui ma techmaca icone para tijcuase, pero quitati.

³⁰ Huan quema quicajqui nopa tanahuatijquet cati nopa sihuat quijitojtoya, quitzayanqui iyoyo para quinextis itequipachol. Huan pampa itztoya ipan nopa tepamit, nochi masehualme quiitaque para itatzintanyoyo cati moquentijtoya eliyaya nopa fiero yoyomit cati quinextía para tahuel mocuesohua huan yeca quitzayanqui. ³¹ Huan nopa tanahuatijquet quijito: “Ma Toteco Dios techatzacuiliti miyac sinta amo nijtzonequilis itzonteco Eliseo ama ni tonali.”

³² Huan Eliseo mosehuijtoya ipan ichaj ica nopa huehue tacame cati quinyacanayayaj israelitame. Huan nopa tanahuatijquet quititanqui se itatitanil ma tayacana huan ma quinotza Eliseo. Pero quema ayemo ajsiyaya nopa soldado, Eliseo quinilhui nopa huehue tacame:

—Xiquitaca nopa temstijquet quititantoc se tacat ma techquechtzontequiqui. Pero quema ajsis xicaltzacuaca huan amo xijcahuilica ma calaqui pampa iica huala iteco.

³³ Huan Eliseo noja camanaltiyaya quema ajsito nopa tacat cati quititantoc, huan iica hualayaya nopa tanahuatijquet huan quiilhui Eliseo:

—Melahuac TOTECO quititantoc nochi ni taijyohuillisti, huajca yaya ayecmo techpalehuis, ¿para ten noja nijchiyas ya?

7

Eliseo tayolmelajqui para oncas tacualisti

¹ Huajca Eliseo quijito:

—Xijtacaquilica nopa camanali cati techmacatoc TOTECO. Quej ni quijitohua TOTECO: ‘Mosta ipan ni horas ipan icalte altepet Samaria masehualme quicohuase chicome litros ten harina san ica se plata tomi huan nojquiya ica san se plata tomi huelise quicohuase caxtoli litros ten cebada.’

² Huan nopa tatequipanojquet cati quipalehuía nopa hueyi tanahuatijquet ma nejnemi quinanquili nopa tajtolpanextijquet huan quiilhui:

—Ya nopa amo mochihuas masque TOTECO Dios quitaposquía ventanas ipan ilhuicacti para ma huetzi tacualisti.

Huan Eliseo quinanquili:

—Ta tiquitas ica moixteyol, pero amo teno ten ya nopa huelis tijcuas.

³ Itztoyaj nahui tacame nechca nopa altepet cati palantoc inintacayo huan inijuanti moilhuijque se ica seyoc:

—¿Para ten timocahuase nica hasta timiquise? ⁴ Sinta ticalaquise ipan altepet, timiquise ica nopa mayanti ipan altepet huan sinta san timocahuase nica, nojquiya timiquise. Huajca ma tiyaca campa mochijtoque nopa Siria soldados huan timotemactilise ica inijuanti. Sinta techcahuilise ma tiitztoaca huan techtamacase, tiitztose. Huan sinta techmictise, huajca san timiquise.

⁵ Huajca quej nopa motanantejque quema ya tapoyahui huan yajque campa mochijtoyaj nopa soldados cati ehuaní tali Siria. Huan quema ajstitoj nechca quiitaque para amo aquí itztoya. ⁶ TOTECO quichijqui ma caquísti quej hualayayaj miyaquí fatehuijca carrojme, huan miyaquí cahuayojme cati motalohuayayaj, huan ma caquísti para yahuij miyaquí soldados. Huajca nopa sirios moilhuijque para nopa tanahuatijquet ten tali Israel quintaxtahuijtoya nopa tanahuatiani ten heteos huan egipcios para ma quinmictiqij. ⁷ Huan yeca motanantejque quema tapoyahui huan quitahuelcajque nochí iniyoyon calhua, inincahuayojhua, ininburrojhua huan nochí cati quipixque, huan mochololtijque pampa amo quinejque miquise. ⁸ Huan quema nopa tacame cati palaniyaya inintacayo ajstitoj iteno campa mochijtoyaj nopa tali Siria ehuaní, calajque ipan se yoyoncali huan tacuajque huan taíque. Huan quicuique tomi ten plata huan ten oro, huan quicuique yoyomit huan yajque quitatitaj. Huan sempa mocuetque huan calajque ipan seyoc yoyoncali huan nozona nojquiya quicuique cati oncayaya huan quitatitaj. ⁹ Huan teipa moilhuijque se ica seyoc:

—Amo tijchihuj cati cuali. Ama ní tonali eltoc para ma titayolmelahuaca se cuali camanali huan amo aquí tiquilhuijtoque. Sinta tijchiyase hasta taneis, temachti techajsis se tamanti fiero. Achi más cuali ma tiyaca altepet Samaria huan ma titayolmelahuatij ipan ichaj nopa tanahuatijquet.

¹⁰ Huajca yajque ipan nopa altepet huan quinnojnótzque cati tamocuitahuaj ipan caltemit huan quinilhuijque:

—Tiyajque campa mochijtoyaj nopa soldados cati ehuaní tali Siria huan amo aquí yon se, yon amo teno caquísti ten se masehualí. San itztoque nopa cahuayojme huan burrojme ilpitoque huan nopa yoyoncalme campa mochijtoyaj nochí quicajtejque.

¹¹ Huan nopa tamocuitahuani ipan icalte nopa tepamit campa calaquij ipan nopa altepet, cuatzajtzi que para quinoyolmelahuase cati itzttoyaj ipan ichaj nopa tanahuatijquet. ¹² Huan nopa tanahuatijquet mijquejqui masque tayohua huan quinilhui itequipanojcahua:

—Nimechilhuis taya quinequij techchihuilise nopa tali Siria ehuaní. Inijuantí quimatij para titaiyohuaj ica mayanti, huan yeca quistoque ten campa mochijtoyaj huan motatitoyque ipan cuatitamit. Moilhuijtoque quema tojuanti tiquisase ipan ní altepet, techitzquise tiyoltoque huan calaquise ipan ní altepet.

¹³ Pero se itequipanojca quijito:

—Se favor, xiquintitani sequij tacame ma quinhuicaca macuiliti ten nopa cahuayojme cati mocahuaj yoltoque ipan ní altepet para quitachilitij taya onca. Sinta ininpantis se tenijqui, amo teno pampa sinta mocahuase nica temachti miquise ica nochí tiisraelitame cati nica timocahuaj.

¹⁴ Huan huajca quincuique ome tepos carrojme ica cahuayojme huan nopa tanahuatijquet quintitanqui para ma yaca hasta campa mochijtoyaj nopa Siria soldados huan quinmacac tanahuatili ma tajtachiyaca cuali.

¹⁵ Huan injuantí yajque campa mochijtoyaj nopa tali Siria ehuaní huan teipa quintoquilijtiyajque hasta campa hueyat Jordán, huan quiitaque para ipan nochí ojti tepejtoc yoyomit huan miyac tamanti cati patiyó cati nopa sirios quitepejtiyajque san pampa nimantzi quinejque mochololtise. Teipa mocuetque nopa tatitanilme huan quipohuilijque nopa tanahuatijquet taya quipantijque.

¹⁶ Huajca nopa israelitame quisque huan moaxcatijque nochí cati oncayaya campa mochijtoyaj nopa Siria ehuaní. Huan san quej quijitoytoya TOTECO, nopa harina monamacac chicome litros para se plata tomi, huan

nopa cebada monamacac caxtoli litro para se plata tomi. ¹⁷ Huan nopa tanahuatijquet quinahuati itequipanojca cati quipalehuía para ma yahui tamocuitahuiti ipan icalte nopa altepet. Pero nopa miyaquí masehualme quicuatopehuayayaj huan itequipanojca huetzqui huan ipan moquejquetzque huan mijqui san quej quijtojtoya nopa tajtolpanextijquet quema yajqui quuitato nopa tanahuatijquet. ¹⁸ Huajca nochi panoc san quej nopa tajtolpanextijquet quihuijtoya nopa tanahuatijquet. Pampa nopa tajtolpanextijquet quihuijtoya para ipan icalte Samaria monamacas chicome litros ten harina o caxtoli litros cebada san ica se plata tomi. ¹⁹ Huan nopa tequipanojquet quinancuiliujtoya para masque TOTECO quitaposcuía ventanas ipan ilhuicacti huan huetziscuía tacualisti amo eliscuía quej nopa. Huan Eliseo quihuijtoya nopa tequipanojquet para quitascuía ica iixteyol, pero amo quicuascuía. ²⁰ Huan quej nopa elqui pampa nopa israelitame ipan moquejquetzque campa icalte itepá altepet Samaria. Huan nopona mijqui.

8

Hualas chicome xihuit ten mayanti

¹ Teipa Eliseo camanaltic ihuaya nopa sihuat cati inana nopa oquichpil cati quichijqui ma moyolcui huan quihui:

—Ximocualtalica huan xiyaca ta huan moteixmatcagua para xiitztotij ipan seyoc tali pampa TOTECO quijtojtoc para oncas se hueyi mayanti ipan ni tali Israel huan huejcahuas chicome xihuit.

² Huan nopa sihuat mocualtali, huan quichijqui cati itequipanojca Toteco Dios quihui huan yajqui inihuaya iteixmatcagua ipan inintal nopa filisteos. Huan nopona mocajque chicome xihuit. ³ Huan quema ya panotoya nopa chicome xihuit, nopa sihuat tacuepili ten nopa tali campa filisteos huan yajqui quuitato nopa tanahuatijquet ten tali Israel para sempa quitajtanis ichaj huan ital. ⁴ Huan quema ajsito, nopa tanahuatijquet camanaltiyaya ihuaya Giezi, itequipanojca Eliseo, cati elqui itequipanojca Toteco Dios. Huan nopa tanahuatijquet quihuiyaya ma quipohuili nochi nopa tanextili cati quichijtoc Eliseo. ⁵ Huan ipan nopa talojtzi quema Giezi quipohuiyaya nopa tanahuatijquet quenicatza quichijtoya ma sempa moyolcui icone se sihuat, ajsitihuetzico nopa sihuat para quitajtanis nopa tanahuatijquet sempa ma quicahuili ichaj huan ital. Huajca Giezi quihui nopa tanahuatijquet:

—Tanahuatijquet, ya ni nopa sihuat huan ya ni icone cati Eliseo quichijqui ma moyolcui.

⁶ Huajca nopa tanahuatijquet quitatzintoquili nopa sihuat huan yaya quipohuili nochi cati ipantitoya. Teipa nopa tanahuatijquet quinahuati se itequichijca huan quihui: “Xijcuepili nochi tamanti cati eliyaya iaxca huan nochi itajca ital ipan nopa xihuit quema amo aquiyaya.”

Hazael tanahuati ipan tali Siria

⁷ Teipa Eliseo yajqui ipan altepet Damasco ten tali Siria. Huan ipan nopa tonali mococohuayaya Ben Adad cati eliyaya tanahuatijquet ten nopa tali. Huan quihuijqui para ajsitoya Eliseo, itequipanojca Toteco Dios. ⁸ Huajca nopa tanahuatijquet quihui Hazael:

—Xijcui se nemacti huan xiquitati itequipanojca Toteco Dios huan xiquihui ma quitajtani TOTECO sinta nimochicahuas ten ni cocolisti.

⁹ Huan Hazael yajqui quuitato nopa tajtolpanextijquet huan quihuiquili se cuali nemacti. Elqui 40 camellos ica inintamamal ten nochi cati cuali oncayaya ipan Damasco. Huan quema ajsito campa itztoya Eliseo, quihui:

—Tanahuatijquet Ben Adad ten ni tali Siria mitzita quej tiitata. Yaya techtitantoc ma nimitztatzintocquilliqui sinta noja mochicahuas ten nopa icocolis cati quipiya o amo.

¹⁰ Huan Eliseo quiilhui:

—Xiya huan xiquilhui para, quena, mochicahuas, masque TOTECO techilhujitoc para temachti miquis.

¹¹ Huan Eliseo mocajqui quitachilijtoc Hazael hasta yaya mopinajqui huan teipa Eliseo pejqqui choca. ¹² Huan Hazael quitatzintocquili:

—¿Para ten tichoca, tate?

Huan Eliseo quiilhui:

—Nichoca pampa nijmati tahuel fiero tiquinchiuilis israelitame. Tiquin-tatis nopa calme cati más temachti ipan inialtepehua, huan tiquinmictis ica macheta inintelpocahua. Huan tiquinmajcahuas ininpilconehua ipan huejhueyi teme, huan tiquintapohuilis iniijti sihuame cati tanemiltfaj.

¹³ Huan Hazael quinanquili:

—Na, nimotequipanojca, amo teno nopati. San quej se nichichi. ¿Queni-catza huelis nijchihuas huejhueyi tamanti quej nopa?

Huan Eliseo quiilhui:

—NoTECO techmatiltijtoc para tielis titanahuatijquet ipan tali Siria.

¹⁴ Huan Hazael quinahuatijtejqqui Eliseo huan yajqui campa itztoya iteco huan yaya quitatzintocquili:

—¿Taya mitzilhuijtoc Eliseo?

Huan ya quiilhui:

—Techilhui para, quena, timochicahuas.

¹⁵ Huan ipan seyoc tonali, Hazael quicuic se taquemit huan quixoloni ipan at, huan ica quicamatajqui Ben Adad hasta ijomijqui. Huan Hazael pejqqui tequiti quej tanahuatijquet.

Joram tanahuati ipan tali Judá

(2 Cr. 21:1-20)

¹⁶ Huan quema yahuiyaya para macuili xihuit tanahuatis Joram, icone Acab, ipan tali Israel; seyoc Joram cati eliyaya icone Josafat, pejqqui tanahuatía ipan tali Judá. ¹⁷ Huan Joram quipixtoya 32 xihuit quema pejqqui itequi quej tanahuatijquet ipan altepet Jerusalén ipan tali Judá. Huan tanahuati chicueyi xihuit. ¹⁸ Pero ni Tanahuatijquet Joram ipan Judá quichijqui cati amo cuali iixpa TOTECO san se quej quichijtoyaj Tanahuatijquet Acab huan nopa sequinoc tanahuatiani cati tanahuatijque ipan tali Israel pampa quichijtoya isihua se iichpoca nopa mijcatzi Tanahuatijquet Acab ten Israel. ¹⁹ Pero TOTECO amo quinejqqui quisosolos nopa tali Judá, pampa quitencahuilijtoya itequipanojca David huejcajqquiya para quinmocuitahuis huan quintaahuilis iixhuhua para nochipa.

²⁰ Pero quema tequitiyaya Joram, nopa tali Edom ehuan mosentanchijque ica tali Judá pampa ayecmo quinejqque ma quinnahuati nopa tanahuatijquet ten tali Judá. Huan quitalijque se edomita tacat para ma quinnahuati san ipan inintal. ²¹ Huajca Tanahuatijquet Joram ten tali Judá yajqui altepet Zair ica itatehuijca carrojhua huan isoldados para quintehuisse cati nopona ehuan. Pero nopa tali Edom ehuan quinyahualojque. Yeca ica tayohua Joram motanantejqqui ihuaya isoldados huan cholojtejqque para ininchajchaj. ²² Huan hasta ama nopa Edom ehuan noja quinejqqui monahuatise iniselti huan amo quincahuilíaj tali Judá ehuan ma quinnahuatica. Nojqquiya altepet Libna moyocaquixti ipan nopa xihuit. ²³ Huan sequinoc tamanti cati quichijqui Tanahuatijquet Joram eltoc ijcuilijtoc ipan nopa amatajcuiloli

cati itoca Cati Quichijque Nopa Tanahuatiani Ipan Tali Judá. ²⁴ Huan quema Tanahuatijquet Joram mijqui, quitalpachojque campa itatahua quintaltojqque ipan Jerusalén ipan nopa barrio cati itoca Ialtepe David. Teipa pejqui tanahuatía icone cati itoca Ocozías.

Ocozías tanahuati ipan tali Judá

(2 Cr. 22:1-6)

²⁵ Quema Tanahuatijquet Joram, icone mijcatzi Acab, yahuiyaya para 12 xihuit tanahuatis ipan tali Israel, pejqui tanahuatía ipan tali Judá nopa Tanahuatijquet Ocozías cati eliyaya icone Joram. ²⁶ Huan Tanahuatijquet Ocozías quipiyayaya 22 xihuit quema pejqui tequti. Huan tanahuati ipan altepet Jerusalén ten tali Judá san se xihuit. Inana itoca eliyaya Atalía huan eliyaya iichpoca Tanahuatijquet Omri cati ehua ipan tali Israel. ²⁷ Ocozías quitoquili iojhui Tanahuatijquet Acab huan quichijqui nochi cati fiero iixpa TOTECO pampa eliyaya imontica nopa Tanahuatijquet Acab.

²⁸ Huan Tanahuatijquet Ocozías mosejcotili ihuaya Tanahuatijquet Joram cati eliyaya icone Acab huan sentic yajque ipan altepet Ramot ten tali Galaad para quitehuitij nopa Tanahuatijquet Hazael ten tali Siria. Huan nopa Siria ehuan quicocojqque Tanahuatijquet Joram, ²⁹ huajca Joram mocuetqui ipan altepet Jezreel para mochicahuas. Huan quema noja itztoya ipan Jezreel, Tanahuatijquet Ocozías cati tanahuati ipan tali Judá yajqui quipaxaloto.

9

Jehú tanahuati ipan tali Israel

¹ Ipan nopa tonali tajtolpanextijquet Eliseo quinotzqui se telpoca tajtolpanextijquet huan quiihui:

—Ximocualtali para tiquisas. Xijcui ni pilxarrojtzi ten aceite huan xiya ipan altepet Ramot ipan Galaad. ² Huan quema tiajsiti nepa, xijtemo Jehú, icone Josafat, cati eliyaya icone Nimsi. Huan xiquiyocaquixtis ten ihuam-poyohua huan xijhuica ipan seyoc cuarto. ³ Huan nozona xijcui nopa pilxarrojtzi ten aceite huan xijtzonalti huan xiquilhui para TOTECO quijjtohua: ‘Na nimitztzonaltía ica aceite para nimitztequimacas tielis titanahuatijquet ipan tali Israel.’ Huan teipa nimantzi xijtapo caltemit huan ximoisihuilti xicholojtehua.

⁴ Huajca nopa telpoca tajtolpanextijquet yajqui nepa altepet Ramot ipan tali Galaad, ⁵ huan quema ajsito nozona, quinmelahuato mosentilijtoque nochi tayacanani ten soldados. Huajca quijjto:

—Nijpiya se tamanti para nimitzilhuis ta titayacanquet.

Huan Jehú quijjto:

—¿Ajquiya tén tojuanti?

Huan nopa telpoca tajtolpanextijquet quijjto:

—Ta, tinotayacanca.

⁶ Huajca Jehú moquetzqui huan calajqui ipan se cuarto. Huan nopa tajtolpanextijquet quitzonalti ica aceite huan quiihui:

—TOTECO Dios ten tiisraelitame quijjtohua: ‘Na nimitztzonaltía ica aceite para nimitztalis quej titanahuatijquet ipan noisraelita masehualhua ten tali Israel. ⁷ Monequi tiquintamimictis nochi iteixmatcahua Acab cati hasta ama eliyaya moteco. Huan quej nopa tiquincuepilis pampa Jezabel quitoyajqui inieso nochi notajtolpanextijcahua huan notequipanojcahua. ⁸ Nochi iteipa ixhuihua Acab monequi xiquintamilti. Xiquinmicti nochi taceame cati iteixmatcahua huan itequipanojcahua masque quincojqui o san tequitij ihuaya. Nochi cati itztoque ica ya campa hueli ipan tali Israel monequi xiquinmictis.

⁹ Nijchihuas ica iteixmatcahua Acab san se quej nijchijqui ica Jeroboam, icone Nabat, huan ica Baasa, icone Ahías. ¹⁰ Huan chichime quicuase itacayo nopa sihua tanahuatijquet Jezabel ipan se milcahuali ipan altepet Jezreel huan amo aqui quitaltocas.

Quej nopa quiyolmelajgui huan teipa nopa telpoca tajtolpanextijquet quitapo caltemit huan cholojtejqui.

¹¹ Huan quema Jehú mocuetqui ipan tasentilisti inihuaya ihuampoyohua, se ihuampó quitatzintoquili:

—¿Taya onca? ¿Para ten hualajqui mitzitaco nopa huihui telpocat?

Huan Jehú quijto:

—Anquixmatij huan anquimatij quenecatza camanalti.

¹² Huan ihuampoyohua quijtojqe:

—Amo techcajcayahua. Techpohuili nochi.

Huajca Jehú quinilhui:

—Techilhui para TOTECO quijtohua para ma techzonaltica ica aceite para ma nieli nitanahuatijquet ipan ni tali Israel.

¹³ Huajca injuanti nimantzi moquixtilijque inintaque huan quitenque iicxita ipan nopa escalones. Teipa quipitzque nopa tapitzali huan cuatza-jtziqe: “¡Jehú ya mochijtoc tanahuatijquet ipan ni tali Israel!”

Jehú quimicti Tanahuatijquet Joram

¹⁴ Teipa Jehú, icone Josafat, huan iixhui Nimsi, mosejcotili ica sequinoc para yase quitehuitij Tanahuatijquet Joram. (Tiquelnamiqui para achtohuiya Tanahuatijquet Joram yajqui ipan altepet Ramot ten Galaad inihuaya iisraelita soldados para quitehuitij Tanahuatijquet Hazael ten tali Siria,

¹⁵ pero mococo ipan tatehuilisti huan yeca mocuetqui hasta altepet Jezreel para mochicahuas.) Huajca Jehú quinilhui ihuampoyohua: “Sinta melahuac anquineqij ma nieli niamotanahuatijca, amo xijcahuaca yon se masehuali ma guisa ten ni altepet para tayolmelahuati ipan altepet Jezreel para ni-mochijtoc nitanahuatijquet.”

¹⁶ Huan teipa Jehú tejcoc ipan itatehuijca carro huan yajqui ipan altepet Jezreel campa Tanahuatijquet Joram itztoya ipan itapech. Ocozías, cati eliyaya tanahuatijquet ipan tali Judá, nojquiya itztoya nozona ihuaya Joram pampa yajqui quipaxaloto.

¹⁷ Huan quema nopa soldados cati tamocuitahuiyayaj ipan nopa huejcapantic torre ipan altepet Jezreel quitaque monechcahuiyaya Jehú ica imasehualhua, chichahuac teyolmelajque:

—¡Hualahui miyaqui tacame!

Huajca Tanahuatijquet Joram quijto:

—Xijtitani se acaya ipan cahuayo ma quinnamiquiti para ma quimatis sinta hualahui ica cuali o amo.

¹⁸ Huajca yajqui se soldado cahuayoxtipa quinnamiquito Jehú, huan quihui:

—Nopa tanahuatijquet technahuatijtoc ma nimitztatzintoquiliqui sinta anhualahuij ica cuali o amo.

Huan Jehú quinanquili:

—¿Taya tijmati ta ten tamanti cati cuali? Xihuala nohuaya noica.

Huajca nopa cati tamocuitahuiyaya ipan nopa torre quihui Tanahuatijquet Joram:

—Yaya cati tijtitanqui quinnamiquito ajsito campa injuanti, pero amo nesi sinta huala.

¹⁹ Huajca nimantzi nopa tanahuatijquet quititanqui seyoc tacat cahuayo-jtipa, huan yaya ajsito campa itztoyaj huan quijto:

—Nopa tanahuatijquet techtitantoc ma nimechtatzintoquiliqui sinta anhualahuij ica cuali o amo.

Huan Jehú quinanquili:

—¿Taya tijmati ta ten tamanti cati cuali? Xihuala nohuaya noica.

²⁰ Huan cati tamocuitahuiyaya ipan nopa torre ipan altepet sempa tay-
olmelajqui ica ompa:

—Nopa seyoc cati tijtitantoc nojquiya ajsito campa itztoque nopa tacame, pero amo nesi sinta huala. Huan na niquita huelis nopa Jehú, iixhui Nimsi, cati quihualica nopa tatehuijca carro, pampa quinejnemiltía quej se cati huihuitic, san quej Jehú ipa nemi.

²¹ Huajca Tanahuatijquet Joram tanahuati:

—¡Nimantzi xijcualtalica nocarro huan nocahuayojhua!

Huajca quicualtalique itatehuijca carro, huan Joram, tanahuatijquet ten tali Israel, huan Ocozías, tanahuatijquet ten tali Judá, quisque ipan inintatehuijca carrojhua para quinamiquitij Jehú. Huan quinamiquitoj campa nopa mili cati achtohuiya elqui ital Nabot ten altepet Jezreel. ²² Huan quema Joram quiitac Jehú, quiihui:

—¿Jehú, tihuala ica cuali o amo?

Huan Jehú quinanquili:

—¿Taya cati cuali huelis onca quema monana, Jezabel, quisehuiquilía quinhueyitalía taixcopincayome cati amo ya Dios huan quisehuiquilía tenahualhuía campa hueli ipan total?

²³ Huajca Tanahuatijquet Joram nimantzi quimacac se huelta ica icahuayojhua huan cholo. Huan quiihuijtejqui Tanahuatijquet Ocozías:

—¡Techmictise, Ocozías!

²⁴ Huan Jehú nimantzi quicuic icuahuitol huan quimotac Joram. Huan nopa cuataminti calajqui ipan icuitapa huan sentapalo ipan iyolo. Huan Tanahuatijquet Joram huetzqui mictoc ipan itatehuijca carro.

²⁵ Huan Jehú quinahuati itequipanojca, Bidcar:

—Xijquixti itacayo Joram ipan icarro huan xijmajcagua ipan imilcahual Nabot cati ehuayaya nica ipan Jezreel. ¿Tiquelnamiqui quema ta huan na san sejc tiquinnemiltiyayaj tocarrojhua iica Tanahuatijquet Acab, yaya cati eliyaya itata ni Joram, huan TOTECO techyolmelajqui ²⁶ para temachti quicuepilis Acab nica ipan ital Nabot pampa quinmicti Nabot huan iconehua?

Huajca xijcui itacayo Tanahuatijquet Joram huan xijmajcagua ipan imilcahual Nabot san quej quiiyto TOTECO.

Jehú quimicti Ocozías ten tali Judá

(2 Cr. 22:7-9)

²⁷ Huan quema Ocozías, nopa tanahuatijquet ten tali Judá, quiitac cati panoc, cholojtejqui ipan ojti cati yahui para altepet Bethagán. Huan Jehú motalo quitepotztocac huan cuatzajtizitijajqui:

—Xijmotaca ya nojquiya.

Huan se itequipanojca quimotac Ocozías ipan itatehuijca carro ipan nopa ojti cati tejco para altepet Gur nechca altepet Ibleam. Huan noja yoltoya hasta ajsito ipan altepet Meguido huan nozona mijqui. ²⁸ Teipa itequipanojcahua quihuicaque itacayo ipan se cuacarro hasta altepet Jerusalén huan quitapachojque inihuaya ihuejcapan tatahua ipan nopa barrio cati itoca Ialtepe David.

²⁹ Huan Tanahuatijquet Ocozías quipehualtijtoya tanahuatía ipan tali Judá quema Tanahuatijquet Joram, icone Acab, yahuiyaya para 11 xihuit tanahuatis ipan tali Israel.

Imiquilis Jezabel

³⁰ Huan quema nopa sihua tanahuatijquet Jezabel cati elqui inana Jotam quimatqui ten panoc huan quimatiyaya hualayaya Jehú para quimictis nojquiya, mopajqui nochi yahualtic ipan iixteyol, huan moyecchihuili itzoncal huan mosehui nechca ventana huan tachixqui. ³¹ Huan quema Jehú ajsito campa caltemit ipan itepa nopa altepet, nopa sihuat quiilhui:

—¿Quenicatza tiitztoc ama, titemictijquet? Ta tiitztoc san se ica Zimri cati no quimicti iteco.

³² Huan Jehú tachixqui ica huejcapa huan quiitac nopa fiero sihuat mosehuijtoya campa ventana huan quintatzintoquili cati itztoyaj inechca:

—¿Ajquiya ten amojuanti anitztoque nohuaya para nielis niamotanahuati-
jca?

Huan ome o eyi tacame cati mocaparojtoyaj para quitequipanose nopa sihua tanahuatijquet itztoyaj inechca ipan nopa caltanahuatili, huan tachixque para tatzinta para quiitase Jehú. ³³ Huan Jehú quinnahuati:

—Xijhualmajcahuaca nopa sihuat nica tatzinta.

Huan injuanti quimajcajque para tatzinta huan se quentzi ieso tzicuingui ipan tepamit huan ipan nopa cahuayojme. Huan Jehú pejqui ipan moquej-
quetza itacayo nopa sihua tanahuatijquet Jezabel ica icahuayojhua. ³⁴ Teipa Jehú calajqui ipan icaltanahuatil nopa tanahuatijquet huan tacuajqui huan atic huan teipa quijito:

—Monequi ma yahui se acajya para quitalpachos nopa sihuat pampa eliyaya iichpoca se tanahuatijquet.

³⁵ Pero quema yajque quitalpachotij, san quipantijque itzoncacahuayo, iicxi huan imax. ³⁶ Huajca mocuetque huan quiyolmelahuacoj Jehú huan Jehú quijito:

—Toteco Dios ya quijitojtoya ica itequipanojca Elías cati ehua altepet Tisbe, para chichime quicuasquíaj itacayo Jezabel talchi ipan altepet Jezreel.

³⁷ Huan itacayo mocahuas pasoltic quej cuitat campa hueli ipan ni altepet hasta amo aquí huelis quijitos: ‘Ya ní se quentzi ten itacayo Jezabel.’

10

Jehú quinmicti nochi iteixmatcahua Acab

¹ Nopa mijcatzi Tanahuatijquet Acab quinpixtoya 70 itelpocahua huan iixhuihua cati itztoyaj ipan altepet Samaria. Huajca Jehú quijicuilo amatajcuiloli huan quintitanili ipan altepet Samaria nopa huejhueyi tacame huan nopa tequichihuani huan inintamocuitahuijcahua iconehua Tanahuatijquet Acab, huan nopa amatajcuiloli quijitohuayaya: ² “Anquinpiyaj amomaco itelpocahua huan iixhuihua amoteco, nopa mijcatzi Tanahuatijquet Acab. Huan anquinpiyaj tatehuijca carrojme huan tacame cati nemij cahuayojtipa, huan anitztoque ipan se altepet tzactoc ica tepamit huan anquinpiyaj teposti para ica antatehuisse. Huajca quema ajsis ni amatajcuiloli amomaco, ³ xijtapejpenica nopa icone Acab cati anquiitaj para elis amotanahuatijca huan xijtalica campa mosehuijtoya itata para tanahuatis. Huan ximocualtica para antatehuisse para cati eliyaya itanahuatilis Acab.” Quej nopa quijito nopa amatajcuiloli.

⁴ Pero nopa masehualme ipan altepet Samaria taniel momajmatijque huan quijtoque: “Sinta omé huejhuéyi tanahuatiani amo huelque quitanque ni Jehú, ¿quenicatza huelis tijtanise tojuanti?”

⁵ Huajca nopa tamocuitahuijquet ten icaltanahuatil nopa tanahuatijquet, huan nopa huejhuéyi tequichihuani ipan altepet Jezreel, huan nopa tayacanani huan injuanti cati quinmocuitahuyayaj iconehua Acab, nochi quiyolmelajque Jehú: “Tojuanti timitztequipanose huan tijchihuase cati technahuatís, pero amo aquí tijtalise quej tanahuatijquet. Xijchihua nica cati achi más mitzpacía.”

⁶ Huan ica ompa Jehú quintajcuilhui huan quinilhui: “Sinta anitztoque ica na huan anquinequij anquinelto case notanahuatil, xiquinquechtzontequica nochi iconehua Acab, yaya cati eliyaya amoteco. Huan mosta ipan ni hora techhualiquilica nica ipan altepet Jezreel.”

Huan nopa tayacanani ipan altepet Samaria quinmocuitahuijtoyaj nopa 70 iconehua huan iixhuihua nopa tanahuatijquet hasta quema pisiltziti huan quiniscaltijtoyaj. ⁷ Pero quema quiselijque nopa amatajcuiloli, quincuique nopa 70 iconehua huan quinmictijque, huan inintzonteco quitajque ipan se quesqui cuachiquihuit huan quintitanilijque nepa ipan altepet Jezreel. ⁸ Huan se tayolmelajquet yajqui quilhuito Jehú para quihualicatoryaj inintzonteco iconehua huan iixhuihua nopa mijcatzi Tanahuatijquet Acab. Huajca Jehú quinilhui:

—Xijchihuaca ome monto campa caltemit ipan itepa ni altepet huan nopona xijcahuaca inintzonteco hasta mosta.

⁹ Huan tonili quisqui Jehú huan moquetzqui huan miyacapa quincamanalhui nochi masehualme cati ehuan ipan nopa altepet. Quijto:

—Amojuanti amo anquiyayaj tajtacoli. Na cati nimoiyocatali ten notanahuatijca huan nijmicti ya, pero ¿ajquiya quinmicti nochi iconehua? Yaya Toteco cati quichijtoc ma quinmictica, ¹⁰ pampa nochi cati TOTECO quijto ica itequipanojca, Elías para ininpantis iteixmatcahua Acab, ya nopa mochijtoc.

¹¹ Huan teipa Jehú quinmicti nochi iteixmatcahua Acab cati noja itztoyaj ipan altepet Jezreel, inihuaya nochi itequiticahua, ihuampoyohua huan itotajtztiti. Amo quicajqui ma itzto yon se cati moixmatiyaya ihuaya, yon cati eliyaya ihuampo. ¹² Teipa Jehú yajqui altepet Samaria. Huan ipan ojti ajsito ipan se cali campa tequitiyayaj cati quinmocuitahuij huan quinximaj borregojme. ¹³ Huan nopona quinpanti iicnihua nopa mijcatzi Tanahuatijquet Ocozías cati elqui tanahuatijquet ipan tali Judá. Huan Jehú quintatzintoquili:

—¿Ajquiya amojuanti?

Huan quilhuijque:

—Tojuanti tiicnihua Ocozías, huan tiyahuij tiquinpaxalotij itelpocahua nopa mijcatzi tanahuatijquet Acab huan nopa sihua tanahuatijquet Jezabel.

¹⁴ Huajca Jehú quinnahuati itatoquilijcahua:

—Xiquinitzquica yoltoque.

Huajca quinitzquijque yoltoque nochi nopa 42 masehualme huan quinhuaque hasta nechca se ameli cati eltoc ipan Bet Equed huan nopona quinquechtzontejque. Huan amo mocajqui yoltoc, yon se.

¹⁵ Quema Jehú quisqui nopona, mopanti ihuaya Jonadab, icone Recab. Huan quitajpalo huan teipa quilhui:

—¿Cuali moyolo ica na, san quej na noyolo cuali ica ta?

Huan Jonadab quilhui:

—Quena.

Huan Jehú quiilhui:

—Huajca techmaca momax.

Huajca Jonadab quimacac imax huan Jehú quichijqui para ma tejco ipan itatehuijca carro, ¹⁶ huan quiilhui:

—Xihuala nohuaya huan tiqitas cati ya nijchijtoc pampa nijtoquilía nochi cati technahuatía noTeco Dios.

Huajca Jonadab yajqui ihuaya. ¹⁷ Huan quema calactiyahuiyaya ipan alpetet Samaria, Jehú quinmicti nochi iteixmatcahua Acab cati mocajtoyaj no-pona. Huajca quintzontamilti nochi iteixmatcahua Acab san quej TOTECO quitencahuilijtoya ica Elías para panos.

Jehú quisosolo nopa teteyot Baal

¹⁸ Teipa Jehú quinsentili nochi alpetet Samaria ehuan huan quinilhui:

—Acab tahuel quentzi quihueyichijqui nopa teteyot Baal, pero na, quena, tahuel nijhueyichihuas. ¹⁹ Huajca nimantzi xiquinnotzaca ma hualaca nochi itajtolpanextijcahua Baal, nochi itequipanojcahua, huan nochi itotajtzitzi. Ma amo mocahua yon se pampa nijpiya se hueyi tacajcahualisti para Baal. Sinta se cati quihueyichihua Baal polihuis, monequi miquis.

Pero Jehú quisencajtoya nopa tacajcahualisti para tecajcayahuas. Quej nopa, ica sempa, huelis quintamiltis nochi cati nozona ehuan cati quihueyichihua Baal. ²⁰ Huajca tanahuati Jehú ma onca se hueyi tanechicoli huan ilhuit para Baal huan quej nopa quichijque. ²¹ Huan quintitanqui tayolmelahuani ipan nochi tali Israel para quinnotzase cati quitoquiliyayaj Baal. Huan nochi hualajque huan tahuel temic itiopa Baal ten se lado hasta seyoc. ²² Huan Jehú quiilhui nopa tacat cati quiajocui nopa yoyomit para itequipanojcahua Baal para ma quiapiya cuidado para senquisa nochi nopa masehualme ma moquentica nopa yoyomit cati monequi para quihueyitalise Baal. ²³ Huan teipa calajqui Jehú ipan nopa tiopamit ten Baal ihuaya Jonadab, icone Recab, huan quinilhui nochi itequipanojcahua Baal:

—Xijpiyaca cuidado para ma amo itzto yon se campa amojuanti cati quihueyichihua TOTECO, san monequi ma itztoca cati quihueyichihua Baal.

²⁴ Huajca nochi cati quihueyichihua yajaj Baal calajque ipan nopa tiopamit para quimacase nopa tacajcahualisti. Huan Jehú quintali 80 tacame ica calteno, huan quinilhui:

—Cati quicahuas ma cholo se masehuali cati niquintemactilijtoc amomaco, monequi miquis.

²⁵ Huan teipa quema tanque temacaj tacajcahualisti, Jehú quinnahuati nopa tamocuitahuiani huan nopa tayacanani ten isoldados:

—Xicalaquica huan xiquinmictica nochi nopa masehualme. ¡Ma amo aqui cholo!

Huan quinmictijque nochi ica macheta, huan quinquixtijque inintacayohua calteno ipan nopa tiopamit. Huan teipa calajque campa más calijtic huan campa quiitayayaj para más tatzejtelolitic ipan tiopamit. ²⁶ Huan quinquixtijque nopa teteyome ten Baal huan quintatijque. ²⁷ Nojquiya quintamitapanque nopa taixcopincayome huan nochi itiopa Baal. Huan nozona quichijque ma elis cuitacalme para ma quitequihuica nochi alpetet ehuan. Huan quej nopa eltoc hasta ama.

²⁸ Quej nopa Jehú quitzontamilti Baal ica nochi nopa masehualme cati quitoquiliyayaj ten tali Israel. ²⁹ Pero amo quintapanqui nopa pilhua-caxtzitzi ten oro cati eltoya ipan alpeteme Betel huan Dan. Nopa pilhua-caxtzitzi elqui nopa hueyi tajtacoli cati mijcatzi Tanahuatijquet Jeroboam, icone Nabat, quinnextilijtoya Israel ehuan ma quichihuaca. Quinilhui ma

quihueyichihuaca TOTECO, pero ica nopa tetyome ten pilhuacaxtzitzi ten oro. ³⁰ Pero masque Jehú amo quinijcueni nopa pilhuacaxtzitzi, TOTECO quihui: “Tijchijtoc cati cuali pampa tiquinmicti nochi iteixmatcahua Acab. Huan huajca mocone, huan moixhui huan icone moixhui elise tanahuatiani ipan tali Israel huan mosehuise ipan mosiya yejyectzi para tanahuatise.”

³¹ Pero Jehú amo quitoquili itanahuatilhua TOTECO Dios ten tiisraelitame ica nochi iyolo. Amo quicajqui nopa tajtacoli para quihueyitalise TOTECO ica tetyome. Ya nopa elqui nopa tajtacoli cati Tanahuatijquet Jeroboam quinnextili israelitame.

³² Huajca ipan nopa tonali TOTECO pejqui quincuilía inintal nopa israelitame. Nopa Tanahuatijquet Hazael quincuilijiyajqui inintal campa hueli ³³ ipan seyoc lado ten nopa hueyat Jordán campa hualquisa tonati huan nojquiya campa hueli ten tali Galaad, Gad, Rubén huan Manasés. Tanahuatijquet Hazael quitanqui nopa tali ten altepet Aroer inechca nopa ataji Arnón hasta tali Galaad huan Basán para norte.

Joacaz tanahuati ipan tali Israel

³⁴ Nopa seqij tamanti cati panoc ipan itanahuatilis Jehú huan nochi cati quichijqui eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel. ³⁵ Huan quema mijqui Jehú, quitapchojque ipan altepet Samaria. Huan pejqui tanahuatía icone cati itoca eliyaya Joacaz. ³⁶ Huan Jehú elqui tanahuatijquet ten tali Israel para 28 xihuit huan mosehui ipan altepet Samaria para tequitis.

11

Atalía mochijqui quej tanahuatijquet (2 Cr. 22:10–23:21)

¹ Huan ipan tali Judá, quema Atalía, inana Tanahuatijquet Ocozías quimatqui para ya mictoc icone, yajqui huan quintamimicti nochi iconehua pampa quinequiyaya tanahuatis iseltitzi. ² Pero nopa sihuat Josaba, cati eliyaya iichpoca Tanahuatijquet Joram huan isihua icni nopa mijcatzi Tanahuatijquet Ocozías, quiiyocatali se ipilcone Ocozías cati itoca eliyaya Joás ten nochi iconehua cati quinmictiyaya. Huan quitali nopa piloquichpiltzi ihuaya itamocuitahuijca cati quiiiscaltiyaya ipan se cuarto campa cochij huan quej nopa quitati ten nopa sihuat Atalía huan amo huelqui quimicti. ³ Huan Joás huan itamocuitahuijca motatijque ipan itioipa TOTECO para chicuase xihuit. Huan nopa sihuat Atalía elqui sihua tanahuatijquet ten tali Judá nochi nopa xihuit.

Joás tanahuati ipan tali Judá

⁴ Pero quema nopa sihuat Atalía yahuiyaya para chicome xihuit tanahuatis, nopa totajtzi Joiada tatitanguí ma quinnotzatij nopa tayacanani ten israelita soldados, huan nopa soldados ten seyoc tali cati tequitiyayaj por se taxtahuili huan nopa tamocuitahuiani ipan tiopamit. Quinilhui ma mosentilica ipan itioipa TOTECO campa ya itztoya. Huan quinnextili nopa oquichpil cati eliyaya icone nopa mijcatzi tanahuatijquet. Huan nopona quichijqui ma tatestigojquetzaca para quitequipanose san ya quej tanahuatijquet. ⁵ Huan nopa totajtzi Joiada quinilhui: “Ya ni cati anquichihuase. Amosoldados cati quipiyaj inintequi para tamocuitahuaj ipan sábado quema timosiyajquetzaj, ma quichihuaca eyi grupos. Se grupo tamocuitahuise ipan icaltanahuatil nopa tanahuatijquet. ⁶ Seyoc grupo tamocuitahuise campa nopa caltemit ipan Sur cati calaquí ipan itepa ni altepet, huan nopa

seyoc grupo tamocuitahuisse campa caltemit cati eltoc ica iica nopa cuartel. Quej nopa anquimocuitahuisse nopa cali ten tanahuatijquet. ⁷ Huan nopa ome grupos ten soldados cati quisaj ten inintequi quema pehua sábado, ma quimocuitahuica nopa cone tanahuatijquet ipan itiopa TOTECO. ⁸ Ma quiyahualoca nopa cone tanahuatijquet huan sesen quipiyas itepos imaco. Huan sinta se acajya quinequis calaquis afuerza campa motecpantoque, ma quimictica. Ma moca huaca ihuaya nopa cone tanahuatijquet campa hueli yaya yas.”

⁹ Huajca nopa tayacanani ten soldados quichijque senquisa quej quinahuati nopa totajtzi Joiada. Nopa tayacanca soldados quinsentili nopa soldados cati calaquiyayaj para tamocuitahuisse ipan sábado huan nojquiya cati quisayayaj ten inintequi, huan quinixnextijque campa nopa totajtzi Joiada. ¹⁰ Huan nopa totajtzi quinmacac sesen ten injuanti se cuachoso huan se tepos yolixtzajcayot cati achtohui eliyaya iaxca mijcatzi Tanahuatijquet David huan isoldados huan eltoya ipan nopa tiopamit ten TOTECO. ¹¹ Huan nochi nopa soldados motecpanque yahualtic campa itztoya nopa tanahuatijquet huan sesen quipixtoya icuachoso imaco. Motecpanque ten lado sur ipan nopa tiopamit hasta nopa lado norte huan nojquiya quiyahualojque nopa taixpamit.

¹² Huan nopa totajtzi Joiada quiquixti nopa oquichpil cati elqui icone nopa mijcatzi tanahuatijquet, huan quitilili nopa corona ipan itzonteco huan quimacac se taixcopinali ten itanahuatilhua TOTECO. Huan teipa quitzonalti ica aceite huan quichijqui tanahuatijquet. Teipa nochi momatajtzinijque huan cuatzajtzi que: “¡Ma huejcahua itztos totanahuatijca!”

¹³ Huan quema nopa sihua tanahuatijquet Atalía quicajqui tahuejchihuaj nopa soldados huan masehualme, moisi huiliti yajqui campa itiopa TOTECO campa nochi itztoyaj. ¹⁴ Huan quiitac nozona nopa cone tanahuatijquet ijcatoc campa onca tequiticayot nechca nopa hueyi taquetzali quej nochipa quichihuaj quema calaqui se yancuic tanahuatijquet ipan itequi. Huan ica inejmat huan iarraves nopa conet itztoyaj nopa tayacanca tácame, huan nopa tapitzani, huan nopa sequinoc masehualme cati paquiyayaj huan cati nojquiya tapitzayayaj. Huajca Atalía quitzayanqui iyoyo huan quiiito chicahuac:

—Antechcualancaitaj huan anquitalijtoque seyoc amotanahuatijca quej nopataca.

¹⁵ Huajca nopa totajtzi Joiada quinnahuati nopa tayacanani ten nopa soldados:

—¡Xijquixtica nopa sihuat ten ni tiopamit huan xijmictica! Nojquiya xiquimictica nochi cati quisase para quipalehuise. Pero amo xijmictica nica tiopan calijtic.

¹⁶ Huajca quiitzquijque huan quiquixtijque huan quimictijque hasta campa calaquij soldados cati nemij cahuayoajtapa ipan caltemit icalixpa ichaj nopa tanahuatijquet.

¹⁷ Teipa Joiada quichijqui se camanal sencahuali ica TOTECO huan ica nopa yancuic cone tanahuatijquet huan nochi masehualme. Nopa camanali quiiito para injuanti nelía elise imasehualhua TOTECO. Nojquiya quichijqui se camanal sencahuali ica nopa cone tanahuatijquet huan nopa masehualme ten taya quichihuase. ¹⁸ Teipa nochi nopa masehualme yajque ipan itiopa Baal huan quitahuisojque. Quixitinijque itaixpahua, huan quinchijque cuehtic nochi taixcopincayome, huan Matán, cati eliyaya itotajtzi Baal quimictijque iixmelac nopa taixpamit.

Huan teipa nopa totajtzi Joiada quintali soldados para tamocuitahuise ipan itiopa TOTECO. ¹⁹ Huan quincuc nopa tayacanani ten soldados huan nopa soldados cati ehuan i pan sequinoc talme, huan nopa tamocuitahuiani ten tiopamit, huan nochi masehualme ten tali Judá, huan sentic quihuicaque nopa cone tanahuatijquet ten campa itiopa TOTECO hasta icaltanahuatil nopa tanahuatijquet. Huan calajque campa eltoya nopa caltemit para tamocuitahuiani huan quisehuique Joás i pan nopa yejyetzzi siyaj para nopa hueyi tanahuatijquet. ²⁰ Huan nochi nopa masehualme pajque miyac. Huan nochi altepet Jerusalén quipixqui tasehuilisti pampa quimictijque nopa sihua tanahuatijquet Atalía ica macheta i pan nopa caltanahuatili. ²¹ Huan Joás quipiyaya chicome xihuit quema pejqui tanahuatía.

12

Joás tanahuati i pan tali Judá

(2 Cr. 24:1-7)

¹ Huan nopa cone tanahuatijquet Joás pejqui tanahuatía i pan tali Judá i pan sur quema Tanahuatijquet Jehú yahuiyaya para chicome xihuit tanahuatis i pan tali Israel i pan norte. Huan Joás mosehui para tequitis i pan altepet Jerusalén huan elqui tanahuatijquet para 40 xihuit. Inana itoca eliyaya Sibia ten altepet Beerseba. ² Huan Tanahuatijquet Joás quichijqui cati cuali iixpa TOTECO nochi tonali quema nopa totajtzi Joiada noja itztoya para quiconsejomacas. ³ Pero teipa Joás quicahuili ma elto nopa piltiocaltziti ica taixpame para taixcopincayome campa nopa masehualme tacajcahuayayaj huan quitatiyayaj copali.

⁴ Huan se tonali quema ayemo miquiyaya nopa totajtzi Joiada, Joás quinil-hui nopa totajztziti:

—Xisenticlica nochi tomi cati masehualme quihualicatoque para TOTECO Dios. Xisenticlica nopa impuestos cati taxtahua sesen tacat, huan nochi nopa tomi cati masehualme quihualicaj i pan ichaj TOTECO quema quitencahuilíaj TOTECO taya quichihuase ihuaya nochi ofrendas cati san quimacaj TOTECO ica iniyolo. ⁵ Nochi ni tomi ma mocahua inimaco totajztziti para quicualchijchihuase itiopa TOTECO campa sosolijtoc.

⁶ Pero panoc 23 xihuit i pan itequi Joás huan nopa totajztziti ayemo teno quicualtalijtoyaj i pan itiopa TOTECO. ⁷ Huajca Tanahuatijquet Joás quinoftzqui nopa totajtzi Joiada huan nopa sequinoc totajztziti huan quinil-hui:

—¿Para ten amo anquicualtalijtoque nopa tiopamit? Amojuanti ayecmo anquipiyase amomaco nopa tomi cati masehualme temacaj para anquite-quihuise. Nochi nopa tomi elis para ma quicualtalica nopa tiopamit campa sosolijtoc.

⁸ Huajca nopa totajztziti quijtojque para cuali ayecmo quiselise más tomi ten masehualme huan ayecmo elis inincuenta para quicualchijchihuase nopa tiopamit.

Quicualchijchijque itiopa TOTECO cati sosolijtoya

(2 Cr. 24:8-14)

⁹ Huajca nopa totajtzi Joiada quicuc se pilcuacajontzi huan quicoyoni i pan itentzajca huan qutali ica inejmat nopa taixpamit campa masehualme calaquij i pan nopa tiopamit. Huan nopa totajztziti cati tamocuitahuilíaj campa nochi calaquij i pan tiopamit quitaliyayaj nochi iniofrendas i pan nopa pilcuacajontzi. ¹⁰ Huan quema quitatayayaj para nopa pilcuacajontzi quipixtoc miyac tomi, itajcuilojca nopa tanahuatijquet, ihuaya nopa totajtzi

quipohuayayaj cati ajsitoya ipan itiopa TOTECO huan quitaliyayaj ipan bolsas. ¹¹ Huan teipa quinmacayayaj nopa tayacanca tanahuatiani cati quitachiliyayaj inintequi huan quintaxtahuiyayaj ¹² nopa tepanchihuani, cuatequini, tapalehuiani huan cati quicualchijchihuayayaj tet para quicualtalise nopa tiopamit. Nojquiya quitequihuijque nopa tomi para quicohuase cuame huan teme cati monequiyaya ipan nopa tequit huan nochi sequinoc gastos cati quichihuayayaj ipan nopa cali. ¹³ Pero nopa tomi cati quihuicayayaj ipan ichaj TOTECO amo quitequihuiyayaj para quicohuase tazas ten plata, yon pilcucharajtzitzi para quisehuse taahuili, yon para ajpasti, tapitzali huan sequinoc tamanti cati motequihuía tiopan calijtic ten oro o plata. ¹⁴ Nochi nopa tomi quitequihuiyayaj senquisa para taxtahuase para quicualchijchihuase nopa tiopan cali. ¹⁵ Huan amo quintajtaniyayaj cuenta nopa tacame cati quitequihuiyayaj nopa tomi pampa nochi cati tequitiyayaj eliyayaj temachme huan quichihuayayaj san cati xitahuac. ¹⁶ Pero nopa tomi cati masehualme temacaque pampa tajtacolejque iixpa TOTECO o pampa tajtacolchijtoyaj, amo quihuicayayaj tiopan calijtic. Nopa tomi quinmacayayaj totajtzitzi ma quitequihuica.

¹⁷ Ipan nopa tonali Tanahuatijquet Hazael ten tali Siria quitehui altepet Gat huan moaxcati. Huan teipa quinejqui nojquiya moaxcatis altepet Jerusalén. ¹⁸ Pero Tanahuatijquet Joás ipan Judá cati mosehui para tequtis ipan Jerusalén quicuic nochi tamanti cati patiyo huan yejectzi cati yaya huan ihueyi tatahua quimacatoyaj TOTECO itiopa. Ihueyi tatahua elque nopa tanahuatiani ipan tali Judá cati inintoca Josafat, Joram huan Ocozías. Nojquiya Joás quicuic nochi nopa tomi ten oro cati iaxca tiopamit, huan iaxca nopa icaltanahuatil huan quititanili Tanahuatijquet Hazael ipan tali Siria para amo ma huala quitehuiqui Jerusalén. Huan quena, Tanahuatijquet Hazael quiseli huan quicajte Jerusalén huan yajqui.

¹⁹ Nochi cati panoc ipan itequi Joás huan nochi cati quichijqui eltoc ijcuilitoc ipan nopa amatapohuali cati itoca Cati Quichijque Nopa Tanahuatiani Ipan Tali Judá. ²⁰ Pero teipa itequipanojcahua motananque ica ya huan quisencajque quenicatza quimictise ipan nopa ompa cali ten tanahuatijquet ipan Milo cati mocahua ipan nopa taixtemolis ipan ojti para Sila.

²¹ Huan inintoca cati quimictijque Joás eliyaya Josacar, icone Simeat, huan Jozabad, icone Somer, huan eliyayaj itequipanojcahua cati más nechca cati ipan motemachiyaya. Huan quema mijqui Joás, quitalpachojque ipan Jerusalén ipan nopa barrio cati itoca Ialtepe David. Huan teipa icone cati itoca eliyaya Amasías pejqui tanahuatia ipan tali Judá.

13

Joacaz tanahuati ipan tali Israel

¹ Quema Tanahuatijquet Joás yahuiyaya para 23 xihuit ipan itanahuatilis ipan tali Judá, pejqui tanahuatia Tanahuatijquet Joacaz, icone Jehú, ipan tali Israel. Mosehui para tequtis ipan altepet Samaria huan tanahuati 17 xihuit. ² Pero quichijqui cati amo cuali iixpa TOTECO pampa quichijqui san se tajtacoli quej quichijqui Tanahuatijquet Jeroboam, icone Nabat, cati quinnextili israelitame ma quihueyichihuaca TOTECO ica teteyome. Huan Joacaz amo quicajqui ni tajtacoli. ³ Huan tahuel cualanqui TOTECO ica nopa masehualme ten tali Israel, huan quintemactili imaco Tanahuatijquet Hazael ten tali Siria huan imaco Ben Adad cati eliyaya icone.

⁴ Huajca Tanahuatijquet Joacaz motatajti ica TOTECO para ma quipalehui. Huan TOTECO quitacaquili cati quitajtani pampa TOTECO quitaac quenicatza nopa Tanahuatijquet ten tali Siria quintajyohuiltiyaya israelítame. ⁵ Huan TOTECO quinmacac nopa tali Israel ehuan se temaquixtijquet huan quej nopa, nopa israelítame momaquixtijque inimaco nopa Siria ehuan. Huan teipa nopa tali Israel ehuan itztoyaj ica cuali ipan inintal quej achtohuiya eliyaya. ⁶ Pero nopa tali Israel ehuan quisehuiquilijque tajtacolchijque pampa quitoquillijque nopa fiero ojti ten Tanahuatijquet Jeroboam cati tenextilijtoya ma quinpiyaca taixcopincayome ten pilhuacaxtzitzi para ica quihueyitalise TOTECO. Huan tali Israel ehuan tahuel tajtacolchijque huan quiquetzque se fiero taquetzali ten nopa teteyot Asera ipan altepet Samaria. ⁷ Huan teipa Tanahuatijquet Joacaz san quinpixtoya 50 isoldados cati nejnemij cahuayojtipa, 10 tatehuijca carrojme ica cahuayojme huan 10 mil soldados cati san iniicxipa nemij pampa nopa tanahuatijquet ten tali Siria quinmictijtoya nochi sequinoc huan quinchijtoya quej taltepocti cati ipan nejnemiyaya.

Mijqui Tanahuatijquet Joacaz

⁸ Nochi cati panoc ipan itequi Tanahuatijquet Joacaz huan nochi cati quichijqui huan quenicatza mosemacac ipan tatehuilisti eltoc ijcuilijtoc ipan nopa amatapohuali ten itoca Cati Quichijque Nopa Tanahuatiani Ipan Tali Israel. ⁹ Huan mijqui Tanahuatijquet Joacaz huan quitalpachojque ica itatahua ipan altepet Samaria. Huan pejqui tanahuatía Joás cati eliyaya icone.

Seyoc Joás tanahuati ipan tali Israel

¹⁰ Quema Tanahuatijquet Joás, icone mijcatzi Tanahuatijquet Ocozías, yahuiyaya para 37 xihuit ipan itequi ipan tali Judá, pejqui tanahuatía seyoc cati nojquiya itoca Joás, pero elqui icone Joacaz, ipan tali Israel. Huan ni Joás mosehui para tanahuatis ipan altepet Samaria huan tanahuati 16 xihuit. ¹¹ Pero ni Joás ipan tali Israel quichijqui cati amo cuali iixpa TOTECO. Amo quinejqqui quicahuas nopa tajtacoli para quihueyichihuase TOTECO ica tefeyome cati nopa mijcatzi Tanahuatijquet Jeroboam, icone Nabat, quinnextilijtoya tali Israel ehuan ma quichihuaca. ¹² Huan nochi cati panoc ipan itequi Tanahuatijquet Joás huan nochi cati quichijqui, huan quenicatza tatehui ica Amasías, nopa tanahuatijquet ten tali Judá, nochi eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel. ¹³ Huan quema mijqui Tanahuatijquet Joás, quitalpachojque ipan altepet Samaria ihuaya ihuejcapan tatahua cati eliyayaj tanahuatiani ipan tali Israel. Huan pejqui tanahuatía icone cati itoca eliyaya nopa ompa Jeroboam.

Joás quipaxaloco Eliseo quema mococohua

¹⁴ Quema tamoyaya ifuerza Eliseo huan motahueltiyaya para miquis, yajqui quipaxaloto nopa Tanahuatijquet Joás ten tali Israel. Huan Joás chocac huan quiquechnahuajqui Eliseo huan quiilhui:

—¡Notata, notata, ta tiitztoya ichicahualis ni tali Israel! Más techpalehui que tatehuijca carrojme huan soldados cati quinnemiltaj.

¹⁵ Huan Eliseo quiilhui:

—Xijcuiti se cuahuitoli huan sequij cuataminti.

Huan nopa tanahuatijquet quicuic se cuahuitoli huan sequij cuataminti,

¹⁶ huan Eliseo quiilhui nopa tanahuatijquet ipan Israel:

—Xijtali momax ipan nopa cuahuitoli.

Huan quitali imax ipan nopa cuahuitoli. Huajca Eliseo quitali imax ipan imax nopa tanahuatijquet, ¹⁷ huan quiilhui:

—Xijtapo nopa ventana cati tachixtoc ica campa hualquisa tonati.

Huan nopa tanahuatijquet quitapo, huan Eliseo quinahuati:

—Ama xijmajcahua.

Huajca nopa tanahuatijquet tamotac ica icuahuitol huan Eliseo quiiyto:

—Ya ni elfoya icuatamin TOTECO cati mitzchihuas xiquintani nopa tali Siria ehuan ipan altepet Afec.

¹⁸ Teipa Eliseo quiilhui nopa tanahuatijquet:

—Xijcui nopa cuataminti huan xijhuitequi nopa tali.

Huan nopa tanahuatijquet quihuitejqui eyi huelta huan motilquetzqui.

¹⁹ Huan nopa tajtolpanextijquet cualanqui huan quiilhui:

—¿Para ten san expa tijhuitejqui? Sinta tijhuitectosquía nopa tali macuili o chicuase huelta, tiquintanisquía nopa Siria ehuan hasta amo aqui tijcajt-squía itztoc, pero ama san eyi huelta tiquintanis nopa Siria ehuan.

²⁰ Huan teipa mijqui Eliseo huan quitalpachojque.

Sesen xihuit quema moseliltiaj cuame miyac fiero tachtequini ten tali Moab hualayayaj ipan tali Israel para tachtequise. ²¹ Huan se tonali masehualme quitalpachohuayayaj se mijcatzi. Huan quinitaque tahuel miyac tachtequini hualahui. Huajca nimantzi quicuamajcajtejque nopa mijcatzi ipan iosto Eliseo huan cholojtejque ten nopa tachtequini. Huan nopa mijcatzi quiajsito Eliseo iomiyo, huan nimantzi moyolcuic huan moquetzqui.

²² Nopa Tanahuatijquet Hazael ten tali Siria quintaijyohuiltijtoya Israel ehuan nochi tonali quema tanahuatiyaya Tanahuatijquet Joacaz. ²³ Pero TOTECO quipixqui hueyi iyolo ica Israel ehuan huan amo quicahuili quint-zontamiltis nochi. TOTECO quintasojtac pampa quichijtoya se camanal sencahuali ica Abraham, Isaac huan Jacob, inihueyi tatahua. Huan hasta ama TOTECO amo quinequi quintamipolos nopa Israel ehuan, yon amo quinequi quinhuejcamajcahuas ten iixpa.

²⁴ Huan teipa Tanahuatijquet Hazael ten tali Siria mijqui huan icone, Ben Adad, mochijqui tanahuatijquet. ²⁵ Huajca nopa Tanahuatijquet Joás ipan tali Israel cati elqui icone Joacaz, yaya tatanqui huan quicuili Ben Adad nopa altepeme cati itata Ben Adad quicuilijtoya ten ya itata. Huan Joás quitanqui Ben Adad eyi huelta huan quiaxcati sempa nopa altepeme ipan tali Israel cati quincuilijtoya.

14

Amasías tanahuati ipan tali Judá (2 Cr. 25:1-28)

¹ Quema Tanahuatijquet Joás, icone Joacaz, yahuiyaya para ome xihuit tanahuatis ipan tali Israel, pejqui tanahuatía Amasías, icone seyoc tacat cati itoca Joás, ipan tali Judá. ² Huan Amasías quipiyayaya 25 xihuit quema pejqui tanahuatía huan tanahuati ipan altepet Jerusalén 29 xihuit. Huan inana itoca eliyaya Joadán ten altepet Jerusalén. ³ Huan Tanahuatijquet Amasías quichijqui cati xitahuac iixpa TOTECO, pero amo nelcuali quej ihuejcapan tata, David, quichijtoya. Quichijqui san quej quichijtoya itata, Tanahuatijquet Joás. ⁴ Pampa Tanahuatijquet Amasías amo quinsolo nopa piltiocaltzitzi ica taixpamit campa masehualme quinhueyichi-huayayaj taixcopincayome, huan tacajcahuayayaj huan quitatijayaj copali. ⁵ Huan quema Tanahuatijquet Amasías cuali calactoya ipan itequi huan quipixqui temachili, quinmicti nopa tequipanohuani cati quimictijque itata

cati eliyaya tanahuatijquet achtohuiya. ⁶ Pero amo quinmicti ininconeuhua nopa temictiani pampa quinejqui quineltoacas cati ijcuilijtoc ipan nopa amatajcuiloli ten Moisés campa TOTECO quijto: “Amo xiquinmictica tetatme por inintajtacolhua ininconeuhua, yon amo xiquinmictica coneme por cati quichijtoque inintatahua. Cati monequi miquis, ma miqui por san ten ya itajtacol.”

⁷ Huan Tanahuatijquet Amasías nojquiya quinmicti majtacti mil tali Edom ehuani ipan nopa tamayamit cati itoca Istat. Huan mocuili nopa pilaltepzi Sela huan quipatili itoca. Quitocaxti Jocteel huan hasta ama quej nopa itoca.

Motehuijque Israel ica Judá ehuani

⁸ Huajca Tanahuatijquet Amasías tatitanqui campa Tanahuatijquet Joás ipan tali Israel, yaya cati elqui icone Joacaz huan iixhui Jehú para ma quihuitij: “Xihuala technamiqiqui huan timotehuise.”

⁹ Pero Tanahuatijquet Joás ten tali Israel amo quinejqui huan quititanili se camanali cati quijto: “Se huitzcuahuit tatitanqui ma quihuitij se tiocuahuit ipan Líbano para ma quimaca iichpoca para ma eli isihua icone, pero se tecuani panoc nozona, huan ipan moquetzqui nopa huiczi huan tanqui camanali. ¹⁰ Melahuac ta tijtantoc nopa tali Edom huan ica ya nopa timomachilía tahuel tihueyi, pero achi cuali xiitzto ipan mochaj. ¿Para ten tijnequi timotehuis nohuaya huan tijchihuas para mosemantos nochi tali Judá huan nochi motal ehuani?”

¹¹ Pero Tanahuatijquet Amasías ipan tali Judá amo quitacaquili icamanal. Huajca Tanahuatijquet Joás ten tali Israel yajqui ica isoldados para motehuis ihuaya Tanahuatijquet Amasías. Huan moixnamijque ipan altepet Bet Semes ten tali Judá. ¹² Huan nopa Israel ehuani quintanque tali Judá ehuani. Huan sesen ten nopa Judá ehuani cholojtejqui huan yajqui ichaj. ¹³ Huan huajca Tanahuatijquet Joás ten tali Israel quitzqui Tanahuatijquet Amasías ten tali Judá ipan altepet Bet Semes. Huan teipa yajqui ica isoldados hasta altepet Jerusalén. Huan nozona Tanahuatijquet Joás quisosolo nopa tepamit cati ica moyahualojtoya Jerusalén huan quicajqui tapojtoc ten nopa caltemit cati itoca Efraín hasta campa nopa caltemit cati itoca Esquina. Elqui nechca 180 metros ten nopa tepamit cati quisosolo. ¹⁴ Huan nojquiya moaxcati nochi oro, plata huan tamanti cati quitequihúaj ipan ichaj TOTECO huan quihuicac nochi tomi cati oncayaya ipan tequicali cati iaxca nopa tanahuatijquet. Teipa quinitzqui masehualme huan quihuicac ilpitoque ihuaya huan sempa mocuetqui ipan ita, Israel, hasta altepet Samaria.

¹⁵ Huan nochi ten panoc ipan itequi Tanahuatijquet Joás huan nochi cati quichijqui, huan hasta canque quipixqui tequiticayot huan nochi nopa tatehuilisti ica Tanahuatijquet Amasías ten tali Judá, eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel. ¹⁶ Huan quema mijqui Tanahuatijquet Joás, quitaltojqe ipan altepet Samaria inihuaya ihuejcapan tatahua, nopa tanahuatiani ten tali Israel. Huan pejqui tanahuatía ipan tali Israel icone cati itoca eliyaya nopa ompa Tanahuatijquet Jeroboam.

¹⁷ Huan Tanahuatijquet Amasías, icone seyoc Joás, cati elqui tanahuatijquet ipan tali Judá, noja itztoya ipan itequi seyoc 15 xihuit quema ya mictoya Tanahuatijquet Joás, icone Joacaz, ten tali Israel. ¹⁸ Huan nochi sequinoc tamanti cati panoc ipan itequi Tanahuatijquet Amasías ipan tali Judá eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Judá. ¹⁹ Huan ipan altepet Jerusalén motananque sequij

masehualme cati quicualancaitayayaj Tanahuatijquet Amasías huan yaya cholo huan yajqui ipan se pilaltepetzí cati itoca Laquis. Pero icualancaitacahua quitopotztocaque hasta Laquis, huan nozona quimictijque. ²⁰ Huan teipa quihualicacque itacayo ipan se cahuayo huan quitalpachojque ihuaya itahua ipan altepet Jerusalén ipan nopa barrio cati itoca Ialtepe David.

Azarías tanahuati ipan tali Judá

²¹ Teipa nopa masehualme ten tali Judá quitapejpenijque Azarías * cati san quipiyayaya 16 xihuit huan quichijque tanahuatijquet ipan inintal. ²² Huan quema quítac para ya mictoya itata, sempa quicualtali nopa pilaltepetzí cati itoca Elat huan quichijqui ma eli iaxca tali Judá.

Nopa ompa Jeroboam tanahuati ipan tali Israel

²³ Quema Tanahuatijquet Amasías, icone Joás, yahuiyaya para 15 xihuit tanahuatis ipan tali Judá, pejqui tanahuatía ipan tali Israel nopa ompa tacat cati itoca Jeroboam cati eliyaya icone Joás. Huan nopa ompa Jeroboam mosehui ipan altepet Samaria para tanahuatis huan tanahuati 41 xihuit. ²⁴ Huan quichijqui cati amo cuali iixpa TOTECO pampa amo quicajqui nopa tajtacoli cati nopa achtohui Tanahuatijquet Jeroboam cati eliyaya icone Nabat quichijqui huan cati quinnextili israelitame nojquiya ma quichihuaca, pampa quínnextili ma quínpiyaca teteyome. ²⁵ Pero nopa ompa Tanahuatijquet Jeroboam sempa moaxcati nopa tali cati achtohui eliyaya iaxca tali Israel tajtajo ten altepet Hamat huan nopa hueyi at cati itoca Mictoc. Huan ya ni elqui senquisa quej quijtojtaya TOTECO toDios tiisraelitame para quichihuasquia. Quijtojtaya ica nopa tajtolpanextijquet Jonás, icone Amitai, ten altepet Gat Hefer. ²⁶ Pampa TOTECO quiitac quenicatza tahuel tajyohuiyayaj nopa tali Israel ehuan huan amo aqui quinpalehuiyaya. ²⁷ Huajca TOTECO quinmanahui ten nopa ompa Tanahuatijquet Jeroboam, cati icone Joás, pampa TOTECO amo quema quijto para senquisa quínmiltisquia cati ehuan ipan tali Israel.

²⁸ Huan nochi ten panoc ipan itequi nopa ompa Tanahuatijquet Jeroboam huan nochi cati quichijqui, huan quenicatza mosemacac huan tatehui huan sempa quintanqui nopa altepeme Damasco huan Hamat cati moaxcatijtoya tali Judá, nochi eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel. ²⁹ Huan mijqui nopa ompa Tanahuatijquet Jeroboam huan quitalpachojque ihuaya ihuejcapan tathua cati nojquiya elque tanahuatiani ipan tali Israel. Huan icone cati itoca Zacarías mochijqui tanahuatijquet.

15

Azarías tanahuati ipan tali Judá

(2 Cr. 26:3-5, 16-23)

¹ Quema nopa ompa Tanahuatijquet Jeroboam yahuiyaya para 27 xihuit ipan itequi ipan tali Israel, Tanahuatijquet Azarías, icone Amasías, pejqui tequiti ipan tali Judá. ² Huan Azarías quipiyayaya 16 xihuit quema pejqui tanahuatía. Huan mosehui para tanahuatis ipan altepet Jerusalén huan tanahuati 52 xihuit. Inana itoca eliyaya Jecolías ten altepet Jerusalén. ³ Huan Tanahuatijquet Azarías quichijqui cati xitahuac iixpa TOTECO san quej quichijtoya Tanahuatijquet Amasías cati eliyaya itata. ⁴ Pero amo quínjcueni nopa piltiocaltiztet campá masehualme tacajcahuayayaj huan

* 14:21 14:21 Azarías nojquiya itoca Usías.

quitatipayaj copali. ⁵ Huajca TOTECO quitatzacuulti Tanahuatijquet Azarías ica se tacayo palanca cocolisti huan quej nopa mocajqui hasta mijqui. Huan monejqui itztos iyoca ipan nopa cali iseltitzi. Huajca quiteqitalijque icone cati itoca eliyaya Jotam para ma quiyiya tequiticayot ipan nopa tequicali. Huan nelía elqui yaya cati tequitic quej tanahuatijquet ipan nopa caltanahuatili huan quinnahuati nopa masehualme ipan tali Judá.

Mijqui Tanahuatijquet Azarías

⁶ Huan ten panoc ipan itequi Tanahuatijquet Azarías huan nochi cati quichijqui eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Judá. ⁷ Huan quema mijqui Tanahuatijquet Azarías, quitalpachojque ihuaya itatahua ipan altepet Jerusalén ipan nopa barrio cati itoca Italpe David. Huan teipa Jotam, cati eliyaya icone, pejqui tanahuatía.

Zacarías tanahuati ipan tali Israel

⁸ Quema Azarías * yahuiyaya para 38 xihuit tanahuatía ipan tali Judá, pejqui tanahuatía Zacarías, icone nopa ompa Tanahuatijquet Jeroboam, ipan tali Israel. Huan Tanahuatijquet Zacarías tanahuati chucuase metzti. ⁹ Huan quichijqui cati amo cuali iixpa TOTECO san quej quichijtoyaj itatahua. Amo quinejqui quicahusa nopa tajtacoli cati Tanahuatijquet Jeroboam, icone Nabat, quinnextilijtoya nopa Israel ehuan ma quichihuaca.

¹⁰ Teipa motananqui Salum, icone Jabes, huan quimicti Tanahuatijquet Zacarías miyacapa, huan pejqui tanahuatía. ¹¹ Huan nopa sequinoc tamanti cati panoc ipan itequi Tanahuatijquet Zacarías huan nochi cati quichijqui eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel. ¹² Huajca ica Zacarías quisqui melahuac icamanal TOTECO cati yaya quilhuijtoya Jehú. Quilhuijtoya para icone, iixhui, icone iixhui, huan hasta iixhui iixhui mosehuisquíaj ipan nopa jejectzi siyaj para tanahuatise ipan tali Israel. Huan quej nopa elqui.

Mijqui Tanahuatijquet Salum

¹³ Quema Tanahuatijquet Uzías yahuiyaya para 39 xihuit tanahuatis ipan tali Judá, pejqui tanahuatía Tanahuatijquet Salum, icone Jabes, ipan tali Israel. Huan mosehui para teqitis ipan altepet Samaria, pero tequitic san se metzti. ¹⁴ Pampa ajsico Manahem, icone Gadi, ten altepet Tirsa huan yajqui ipan altepet Samaria, huan quimicti Tanahuatijquet Salum. Huan Manahem mochijqui tanahuatijquet ipan tali Israel. ¹⁵ Huan sequinoc tamanti cati panoc ipan itequi Tanahuatijquet Salum huan quenicatza motanunque icalancaitacahua eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel.

Manahem tanahuati ipan tali Israel

¹⁶ Huan Tanahuatijquet Manahem quisosolo altepet Tapúa huan nopa pilalpetetzitzi cati quiyahualojtoque hasta campa altepet Tirsa. Huan moaxcati nochi cati oncayaya ipan nopa altepeme pampa cati nozona ehuan amo quinequiyayaj para ya ma eli inintanahuatijca. Tanahuatijquet Manahem quinnicti nochi masehualme nozona huan hasta quintapohuilli iniijti sihuame cati tanemiltiyayaj.

¹⁷ Huajca Tanahuatijquet Manahem, icone Gadi, pejqui tanahuatía ipan tali Israel quema Tanahuatijquet Azarías yahuiyaya para 39 xihuit tanahuatis ipan tali Judá. Huan Manahem mosehui para tanahuatis ipan altepet

* 15:8 15:8 Azarías nojquiya itoca Uzías.

Samaria huan tanahuati majtacti xihuit. ¹⁸ Pero quichijqui cati amo cuali iixpa TOTECO. Nochi tonali ipan itequi, yon quentzi amo moiycatali ten nopa tajtacoli cati Jeroboam, icone Nabat, quinnextilijtoya tali Israel ehuan para ma quinqiyaca teteyome. ¹⁹ Huan teipa hualajqui Tanahuatijquet Pul † ten tali Asiria, huan calajqui ipan tali Israel huan pejqui moaxcatía. Huan Tanahuatijquet Manahem quimacac Tanahuatijquet Pul 33 toneladas ten plata tomi para ma amo quicuatotoni. Huajca nopa Tanahuatijquet quiseli nopa tomi huan sempa mocuetqui campa hualajqui ipan tali Asiria. ²⁰ Tanahuatijquet Manahem quinquixtili nopa tomi nochi tominpiyani ipan tali Israel pampa sesen quichijqui ma taxtahua tajco kilo ten plata tomi quej se impuesto para quimacase nopa tanahuatijquet ten tali Asiria. Huan quena, quej nopa quisqui ipan tali Israel huan yajqui. ²¹ Huan nochi sequinoc tamanti cati panoc ipan itequi Tanahuatijquet Manahem huan nochi cati quichijqui, eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel. ²² Huan quema mijqui Tanahuatijquet Manahem, quitalpachojque ihuaya itatahua, huan pejqui tanahuatía Pekaía cati eliyaya icone.

Pekaía tanahuati ipan tali Israel

²³ Quema Azarías yahuiyaya para 50 xihuit tanahuatis ipan tali Judá, Tanahuatijquet Pekaía, icone Manahem, mochijqui tanahuatijquet ipan tali Israel ipan altepet Samaria huan tanahuati ome xihuit. ²⁴ Huan Tanahuatijquet Pekaía quichijqui cati amo cuali iixpa TOTECO. Amo quinejqui quicahuas nopa tajtacoli cati Tanahuatijquet Jeroboam, icone Nabat, quinnextili tali Israel ehuan ma quichihuaca. ²⁵ Huan Peka, icone Remalías, cati quinyacanqui isoldados Pekaía moiycatali ten ya. Huan Peka huan 50 tacame ten tali Galaad, quimictijque Tanahuatijquet Pekaía huan Argob huan Arie ipan nopa caltanahuatili ipan Samaria. Huan teipa Peka pejqui tanahuatía ipan tali Israel. ²⁶ Huan nochi cati panoc ipan itequi Tanahuatijquet Pekaía huan nochi cati quichijqui eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel.

Peka tanahuati ipan tali Israel

²⁷ Quema Tanahuatijquet Azarías yahuiyaya para 52 xihuit tanahuatis ipan tali Judá, Tanahuatijquet Peka, icone Remalías, pejqui tanahuatía ipan tali Israel. Huan mosehui para tanahuatis ipan altepet Samaria huan tanahuati 20 xihuit. ²⁸ Huan Peka quichijqui cati amo cuali iixpa TOTECO pampa amo quinejqui quicahuas nopa tajtacoli cati Tanahuatijquet Jeroboam, icone Nabat, quinnextilijtoya tali Israel ehuan ma quichihuaca para ma quihueyitalica TOTECO ica teteyome.

²⁹ Huan quema tanahuatiyaya Tanahuatijquet Peka ipan tali Israel, hualajqui Tanahuatijquet Tiglat Pileser ten tali Asiria huan moaxcati nopa altepeme Ijón, Abel Bet Maaca, Janoa, Cedec huan Hazor. Huan nojquiya moaxcati nopa talme Galaad, Galilea huan nochi tali Neftalí. Huan nochi masehualme cati itztoyaj ipan nopa pilaltepetzitzitzi huan talme quinquicac ilpitoque hasta tali Asiria. ³⁰ Huajca Oseas, icone Ela, motananqui ica Tanahuatijquet Peka, icone Remalías, huan quimicti. Huan Tanahuatijquet Oseas pejqui tanahuatía ipan tali Israel. Huan quema Oseas calajqui ipan itequi, Tanahuatijquet Jotam, icone Uzías‡, yahuiyaya para 20 xihuit tanahuatis ipan tali Judá. ³¹ Huan nochi sequinoc tamanti cati panoc ipan itequi

† 15:19 15:19 Pul nojquiya itoca Tiglat Pileser. ‡ 15:30 15:30 Uzías nojquiya itoca Azarías.

Tanahuatijquet Peka huan nochi cati quichijqui eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel.

Jotam tanahuati ipan tali Judá

(2 Cr. 27:1-9)

³² Pejqui tequiti Tanahuatijquet Jotam, icone Uzías, ipan tali Judá quema Peka, icone Remalías, yahuiyaya para ome xihuit tanahuatis ipan tali Israel. ³³ Huan Tanahuatijquet Jotam quiپیayaya 25 xihuit quema pejqui tanahuatía ipan altepet Jerusalén huan tanahuati 16 xihuit. Inana itoca eliyaya Jerusa huan yaya elqui icone Sadoc. ³⁴ Huan Tanahuatijquet Jotam quichijqui cati xitahuac iixpa TOTECO san quej quichijtoya itata cati itoca eliyaya Uzías. ³⁵ Pero amo quinijcueni nopa pliticoaltzitzitzi campa masehualme tacajcahuayayaj huan quitatiyayaj copali. Pero yaya sempa quicualchijchijqui cuali nopa caltemit ica norte ipan ichaj TOTECO. ³⁶ Huan nochi nopa sequinoc tamanti cati panoc ipan itequi Tanahuatijquet Jotam huan nochi cati quichijqui eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Judá. ³⁷ Huan ipan nopa tonali TOTECO pejqui quititani nopa Tanahuatijquet Rezín ten tali Siria huan Tanahuatijquet Peka, icone Remalías, ten tali Israel para quitehuitij tali Judá. ³⁸ Huan quema mijqui Tanahuatijquet Jotam, quitalpachojque inihuaya itatahua ipan altepet Jerusalén ipan nopa barrio cati itoca Ialtepe David. Huan teipa pejqui tanahuatía Acaz cati eliyaya icone.

16

Acaz tanahuati ipan tali Judá

(2 Cr. 28:1-27)

¹ Quema Tanahuatijquet Peka, icone Remalías, yahuiyaya para 17 xihuit tanahuatis ipan tali Israel, pejqui tanahuatía Tanahuatijquet Acaz, icone Jotam, ipan tali Judá. ² Huan Acaz quiپیayaya 20 xihuit quema pejqui tanahuatía huan tanahuati 17 xihuit ipan Jerusalén. Pero amo quichijqui cati xitahuac iixpa TOTECO iDios quej ihuejcapan tata, David, quichijtoya. ³ Yaya qutoquilli inifero ojhui nopa tanahuatiani ipan tali Israel huan hasta temacac icone ipan tit quej se tacajcualisti para se taixcopincayot san quej quichihuayayaj nopa sequinoc masehualme cati amo quixmatiyayaj TOTECO cati itztoyaj ipan nopa tali achtohuiya huan TOTECO quinquixtijtoya iniixpa israelitame. ⁴ Huan nojquiya Tanahuatijquet Acaz tacajcahuayaya ipan taixpame cati amo para TOTECO campa hueli ipan nochi tepeme huan itzinta nochi cuame. Nojquiya quitatiyaya copali campa hueli para taixcopincayome huan teteyome.

⁵ Huan se tonali Tanahuatijquet Rezín ten tali Siria, ihuaya Tanahuatijquet Peka, icone Remalías, ten tali Israel, yajque sentic ipan altepet Jerusalén para quitehuisse Tanahuatijquet Acaz. Huan quiyahualojque nopa altepet, pero amo huelque quitanque. ⁶ Nojquiya ipan nopa tonali, nopa tanahuatijquet ipan tali Edom sempa moaxcati nopa altepet Elat para elis iaxca tali Edom. Yaya quinquixti nopa tali Judá ehuan cati calactoyaj nozona huan quintitanqui más edomitame ten ital para nozona itztose huan quej nopa eltoc hasta ama.

⁷ Huajca Tanahuatijquet Acaz quititanqui se ma quillhuiti Tanahuatijquet Tiglat Pileser ipan tali Asiria para yaya motemacas huan mochihuas itequipanojca sinta hualas nimantzi quimanahuiqui inimaco nopa tanahuatiani ten tali Siria huan tali Israel pampa ya quiyahualojtoyaj. ⁸ Nojquiya Tanahuatijquet Acaz quicuic nopa plata huan nopa oro cati eltoya ipan

ichaj TOTECO huan nochi tomi cati eltoya ipan nopa caltanahuatili, huan quititanili Tanahuatijquet Tiglat Pileser quej se nemacti.

Tiglat Pileser quintzqui Damasco ehuan

⁹ Huajca quitacaquili Tanahuatijquet Tiglat Pileser ipan tali Asiria huan yajqui ihuaya isoldados huan calajqui ipan altepet Damasco ipan tali Siria. Huan quinhuicaque ilpitoque nochi masehualme cati nozona ehuan para tequipanose san tapic ipan altepet Kir. Huan nojquiya quimictijque Tanahuatijquet Rezín ten tali Siria.

¹⁰ Huajca Tanahuatijquet Acaz ten tali Judá yajqui altepet Damasco quinamiquito Tanahuatijquet Tiglat Pileser ten tali Asiria para quitascatilis pampa quimanahuijtoya. Huan quema Acaz itztoya nozona, quitiac se taixpamit ten nopa masehualme cati amo quineltocaj TOTECO huan quixtocac. Huajca quixcopinqui ipan se amat ica nochi ipiltamantzitzi huan quititanili nopa totajtzi Urias ten tali Judá para ma quichihua. ¹¹ Huan nopa totajtzi Urias quichijchijqui se taixpamit senquisa quej nopa taixcopinti cati Tanahuatijquet Acaz quititanilijtoya ten altepet Damasco. Huan nopa taixpamit elqui tasencahuali quema Tanahuatijquet Acaz mocuetqui ten Damasco huan sempa ajsico ichaj. ¹² Huan nimantzi quema Tanahuatijquet Acaz ajsico, quitachili nopa taixpamit huan pejqui tacajcahua ipani. ¹³ Quicajcahuayaya nozona tacajcahualisti tatatili, huan ten harina, huan ten taili cati monequi quitoyahuas iixpa TOTECO para quimacas. Nojquiya quitzejtelo ieso nopa tacajcahualisti cati quinmictijque para moyoltalise ica TOTECO. ¹⁴ Huan teipa Tanahuatijquet Acaz motemacac huan quiquixti nopa taixpamit ten bronce cati eltoya iixmelac itiopa TOTECO huan quitali ielchiquitipa ica norte ten nopa yancuic taixpamit. Huan ama mocajqui nopa yancuic taixpamit tatajco ipan itiopa TOTECO. ¹⁵ Huan Tanahuatijquet Acaz quinahuati nopa totajtzi Urias ma quitali ipan nopa yancuic taixpamit nopa tacajcahualisti tatatili cati mojmosta monejqui ica ijalnoc para TOTECO huan nopa tacajcahualisti ten harina cati monejqui ica tiotac. Nojquiya quinahuati para nozona ma quimaca tacajcahualisti cati tatatili huan tacajcahualisti ten harina cati yaya huan nopa masehualme temacayayaj ihuaya nojquiya nopa tacajcahualisti cati monejqui quitoyahuase. Nojquiya quihuihui Urias ma quiajtzelhui nopa esti ten nopa tacajcahualisti ipan nopa yancuic taixpamit. Huan nopa taixpamit ten bronce cati ipa eltoya ipan tiopamit mocajqui san para Tanahuatijquet Acaz ma quitequihuis iseltitzi. ¹⁶ Huajca nopa totajtzi Urias quichijqui nochi cati quinahuatijtoya Tanahuatijquet Acaz.

¹⁷ Teipa Tanahuatijquet Acaz quisosolo inielchiqui cati yejyetzzi nopa carretillas huan quinquixtili nopa conme para at. Huan quijcueni nopa hueyi paila cati quitocaxtiyayaj nopa “hueyi at” cati mosehuijtoya inin-cuitapa nopa torojme ten bronce, huan san quitali ipan tet. ¹⁸ Huan para ma paqui nopa tanahuatijquet ten Asiria, quijcueni nopa hueyi cortina cati quicuapilojtoya huejcapa ipan icaltanahuatil para yaya quitequihuis ipan nopa tonali quema mosiyajquetza. Nojquiya quitzajqui nopa ojti cati pano ichaj nopa tanahuatijquet huan yahui xitahuac ipan ihueyi tiopa TOTECO.

¹⁹ Huan nochi sequinoc tamanti cati panoc ipan itequi Tanahuatijquet Acaz huan nochi cati quichijqui eltoc ijculijtoc ipan nopa amatapohuali cati itoca Cati Quichijque Nopa Tanahuatiani Ipan Tali Judá. ²⁰ Huan quema mijqui Acaz, quitalpachojque campa quintaltoctoyaj ihuejcapan tatahua ipan Jerusalén ipan nopa barrio cati itoca Ialtepe David. Huan teipa icone cati itoca eliyaya Ezequías pejqqui tanahuatia.

17

Oseas tanahuati ipan tali Israel

¹ Quema Tanahuatijquet Acaz yahuiyaya para 12 xihuit tanahuatis ipan tali Judá, pejqui tanahuatía Tanahuatijquet Oseas, icone Ela, ipan tali Israel. Huan Oseas mosehui para tequitis ipan altepet Samaria huan tanahuati para chicnahui xihuit. ² Huan Oseas quichijqui cati amo cuali iixpa TOTECO, pero amo nel tahuel fiero quej sequinoc tanahuatiani ipan tali Israel quichijque cati achtohui tanahuatijque. ³ Huan Tanahuatijquet Salmanasar ten tali Asiria quitehui Tanahuatijquet Oseas ten tali Israel huan quitanqui. Huajca tali Israel monejqui pehuas taxtahuas miyac tomi huan quititanis quej impuestos sese xihuit ipan tali Asiria. ⁴ Pero Tanahuatijquet Oseas ten Israel amo quinejqui quej nopa ma mocahua. Yeca quitajtani Tanahuatijquet So ten tali Egipto ma quipalehui momaquixtis imaco nopa tanahuatijquet ten tali Asiria para ayecmo taxtahuas impuestos sesen xihuit. Pero nopa tanahuatijquet ten tali Asiria quimatqui, ⁵ huan hualajqui ipan tali Israel huan pejqui quitehuía. Huan para eyi xihuit quiyahualo altepet Samaria campa mosehujtoya Tanahuatijquet Oseas. ⁶ Huan quema Tanahuatijquet Oseas yahuiyaya para 9 xihuit tanahuatis, quitanque altepet Samaria huan quitzquijque Oseas huan quitzajque. Huan quinhucaque tali Israel ehuanilpitoque hasta tali Asiria para itzose ipan nopa altepet Halah, huan campa hueli iteno nopa hueyat Habor ipan Gozán, huan ipan nopa altepeme cati iniaxchua nopa medo masehualme.

⁷ Nochi ya ni ininpantic nopa Israel ehuan pampa tajtacolchijque ica TOTECO ininDios cati quinquixti ipan tali Egipto, imaco Faraón cati elqui tanahuatijquet nopona huan tahuel chicahuac quintequipanoltiyaya. Injuanti quinhueyichijque teteyome. ⁸ Quitoquilijque inifiero ojhui nopa masehualme cati TOTECO quinquixtijtoya iniixpa. Nojquiya quitoquilijque nopa tajtocoli cati nopa tanahuatiani ten tali Israel quinnextilijque ma quichihuaca.

⁹ Huan israelitame ixtacatzí quichihuayayaj miyac tamanti cati fiero iixpa TOTECO ininDios. Quinchijque taixcopincayome huan taixpame campa tacajcahuase ipan nochi inialtepehua, ten altepeme pisiltzitzí cati huejca mocahuaj hasta altepeme cati huejhueyi huan quipiyaj tepamit cati quinyahualojtoc; nochi quipixque campa tacajcahuase para taixcopincayome. ¹⁰ Huan quinquetzque taixcopincayome huan taquetzalme para nopa fiero taixcopincayot Asera ipan nochi tepeme huan inintzinta nochi cuame. ¹¹ Huan israelitame quitatijque copali ipan sesen piltiocaltzi cati quichijtoyaj para taixcopincayome san quej quichihuayayaj nopa sequinoc masehualme cati TOTECO quinquixtijtoya iniixpa. Huajca quichijque tamanti cati fiero iixpa TOTECO para quicalancamacase. ¹² Quena, quinhueyichijque nopa taixcopincayome huan teteyome masque TOTECO quinnilhuijtijayajqui ma amo quichihuaca.

¹³ Huan miyac huelta TOTECO quintacahualtijtoya nopa israelitame ipan talme Israel huan Judá ica itajtolpanextijcahua huan itachixcahua para san ma quitoquilica itanahuatilhua. Quinilhuiyaya: “Xijcajtehuaca amoojhui cati fiero. Xijtaquilica notanahuatilhua huan noleyes cati niquinnahuati amohuejcapan tatahua ma quitoquilica huan nimechpanoltili ica notequipanojcahua, nopa tajtolpanextiani.”

¹⁴ Pero nopa israelitame amo quitacaquilijque TOTECO. Moyoltetilijque más huan amo quej inintatahua huan amo quinejqque motemachise ipan

TOTECO ininDios. ¹⁵ Quihuejcamajcajque itanahuatilhua huan nopa camanal sencahuali cati quichijqui ihuaya inintatahua. Amo quichihuilijque cuenta quema quinejqui quintalnamictis ica cati fiero huala. San quejipa quinhueyichijque nopa taixcopincayome cati amo teno ininpati huan yeca nopa israelitame nojquiya elque masehualme cati amo teno ininpati. Quintoquilijque nopa masehualme ipan sequinoc talme cati TOTECO quinilhui-toya ma amo quintoquilica, pero amo quinejque quitacaquilise TOTECO. ¹⁶ Quitahuelcajque nochi tanahuatilme cati TOTECO ininDios quinmacatoya huan quimolonijque oro huan mochiuilijque ome pilhuacaxtzitzi. Nojquiya quichijque fiero taquetzalme ica ten hueli ipani para nopa taixcopincayot Asera. Huan quihueyichijque nopa taixcopincayot Baal huan nochi nopa sitalime huan tamanti cati eltoque ipan ilhuicacti. ¹⁷ Hasta nojquiya quintatijque ininconehua ipan taixpamit para nopa teteyome. Quintatzintquilijque tenahualhuani huan tetonalitani, huan motemacaque ica nochi tamanti cati fiero. Huan yeca nopa israelitame tahuel quicualancomaque TOTECO.

¹⁸ Huan pampa tahuel cualanqui TOTECO ica nopa israelitame, quinquixti ten iixpa, huan san nopa israelitame cati eliyayaj ifeipa ixhuihua nopa hueyi tata Judá mocajque ipan inintal. ¹⁹ Pero iteipa ixhuihua Judá nojquiya amo quinejque quineitocase itanahuatilhua TOTECO ininDios. Quitoquilijque san se fiero ojti cati nopa israelitame ten tali Israel quitoquilijque.

²⁰ Huajca TOTECO quintahuelcajqui nochi iixhuihua Israel. Huan quintatzacuiliti por inintajtacolhua huan quintemactili inimaco inincualan-caitacahua para ma quinmictica. ²¹ Huan quema TOTECO quinquixti nopa talme ica norte ten icone Tanahuatijquet David para yaya ayecmo quipiyas tanahuatili nozona, nopa israelitame nozona ica norte quitalijque Jeroboam, icone Nabat, para ma eli inintanahuatijca. Huan Jeroboam quinquixti nopa Israel ehuan ten iojhui TOTECO huan quinchijqui ma tajnacochihuaca miyac. ²² Huan nopa israelitame cati itztoyaj ipan tali Israel quisenhuiquilijque quichihuaip nopa tajtacoli para quinhueyichihuase teteyome cati Jeroboam quinnextilijtoya ma quichihuaca. ²³ Huajca teipa TOTECO quinquixti nopa tali Israel ehuan ten iixpa san quej quijtojtoya ica itajtolpanextijcahua para panos. Huan inincualancaitacahua quinitzquijque nopa israelitame ten tali Israel huan quinhuaicque hasta tali Asiria huan nozona quinpixtoque hasta ama.

Sempa quintali masehualme ipan altepet Samaria

²⁴ Teipa nopa tanahuatijquet ten tali Asiria quinhualiac miyac tamanti masehualme cati ehuan altepeme Cuta, Ava, Hamat huan Sefarvaim ten tali Babilonia huan quincajqui ipan altepet Samaria quej ininpataca nopa israelitame cati achtohuiya itztoyaj. Huan quej nopa, nopa tali Asiria masehualme mochantijque ipan nochi altepeme ipan tali Samaria huan ipan nochi altepeme ten tali Israel. ²⁵ Pero quema pejqque mochantiaj nozona, nopa Asiria ehuan amo quimatque quihueyichihuase TOTECO, huan huajca TOTECO quintitanqui leones para ma quinmictica.

²⁶ Huajca quititanilijque se camanali nopa tanahuatijquet ipan tali Asiria cati quijto: "Nopa tacame cati tiquinhuicatoc ipan altepeme ipan tali Israel para ma itztotij nozona, amo quixmatij itanahuatilhua Toteco Dios quej nopa israelitame cati achtohui itztoyaj ipan nopa tali. Huan yaya quintantoc tecuanime para quinmictise cati ama itztoque pampa amo quimatij quenicatza quihueyichihuase Toteco Dios cati iaxca nopa tali."

²⁷ Huajca nopa tanahuatijquet ten tali Asiria tanahuati ma quihuicaca se israelita totajtzi cati quihualicatoya ten Samaria hasta tali Asiria para

ma mocuepa huan ma quinmacti nopa masehualme ma quihueyichihuaca Toteco Dios cati iaxca tali Israel. ²⁸ Huajca mocuetqui se totajtzi cati quihuicatoya ilpitoc ten Samaria huan mocajqui para itztos ipan altepet Betel. Huan yaya quinnextili nopa tali Asiria ehuan cati ajsitoyaj nopona quenicatza quihueyichihuase TOTECO.

²⁹ Pero itztoyaj miyac tamanti masehualme cati ajsitoyaj huan sesen tamanti masehualme noja quihueyichihuayaj inintaixcopincayohua. Huan campa hueli ipan inialtepe huan huejcapa ipan tepeme, quitallique inintaixcopincayohua campa nopa israelitame cati achtohuiya itztoyaj quinchijchitoyaj piltiocaltziti para inintaixcopincayohua. ³⁰ Cati hualajque ten altepet Babilonia quihueyichijque se taixcopincayot cati itoca Sucot Benot. Huan cati hualajque ten altepet Cuta quihueyichijque se taixcopincayot cati itoca Nergal. Huan cati hualajque ten altepet Hamat quihueyichijque se cati itoca Asima. ³¹ Huan cati hualajque ten altepet Ava quihueyichijque se cati itoca Nibhaz huan seyoc cati itoca Tartac. Huan cati hualajque ten altepet Sefarvaim quintatiyayaj ininconeuhua quej tacajcahualisti para inintaixcopincayohua Adramelec huan Anamelec.

³² Huan nopa yancuic masehualme nojquiya quihueyichijque TOTECO, pero quintalijque ten hueli tamanti tacame para ma elica totajtzitzi huan tacajcahuase ipan nopa taixpamit cati eltoya campa tepeme. ³³ Huan masque quijtohuayayaj quihueyichihuaj TOTECO, quisenhuiquillijque quinhueyichihuaj inintaixcopincayohua ten inintal campa hualajque.

³⁴ Huan hasta ama quejipa quitoquilíaj cati ipa quimatiyayaj. Amo nelía quitepanitaj TOTECO, yon amo quichihuaj itanahuatilhua huan itamachtilhua cati TOTECO quinnahuati ma quichihuaca iixhuihua Jacob, yaya cati TOTECO teipa quitocaxtali Israel.

³⁵ Pampa TOTECO quichijqui se camanali ica iteipa ixhuihua Israel huan quinilhui: “Amo xijtepanitaca seyoc quej elisquía amoTECO, san na. Amo aqui seyoc ximotancuaquetzaca, yon amo ximohuijtzomaca iixpa. Yon amo aqui xijtequipanoca, yon amo aqui xijmacaca tacajcahualisti. ³⁶ San na niamoTECO cati nimechquixti ten tali Egipto ica huejhueyi tiochicahualnescayot huan ica nohueyi chichualis, san na techimacasica huan techtepanitaca. San na noixpa ximotancuaquetzaca huan san na techmacaca tacajcahualisti. ³⁷ Ximomocuitahuica para xijchihuaca nochi notanahuatilhua huan notamachtilhua huan nochi cati nimechnahuatijtloc huan nochi cati niqijcuilojtoc. Amo xiquinhueyitepanitaca taixcopincayome, yon teteyome quej elisquía Dios. ³⁸ Huajca amo xiquelcahuaca nopa camanali cati nijhijtloc ica amojuanti huan amo xiquinimacasica huan amo xiquintepanitaca cati sequinoc quintocaxtíaj dioses. ³⁹ San techimacasica na cati niamoTECO Dios huan na nimechmanahuis inimaco nochi amocualan-caitacahua.”

⁴⁰ Pero nopa israelitame amo quitacaquillijque. San quisenhuiquillijque quinhueyichijque sequinoc dioses quej achtohuiya quichihuayayaj.

⁴¹ Huajca nojquiya nopa yancuic masehualme san se quichijque. Quihueyichijque TOTECO huan nojquiya quinhueyichihuayaj inintaixcopincayohua. Huan ininconeuhua huan iniixhuihua hasta ama quej nopa quichihuaj.

¹ Quema Tanahuatijquet Oseas, icone Ela, yahuiyaya para eyi xihuit tanahuatis ipan tali Israel, Ezequías, icone Acaz, pejqui tanahuatía ipan tali Judá. ² Huan Tanahuatijquet Ezequías quipiyayaya 25 xihuit quema mosehui para tanahuatis ipan altepet Jerusalén huan tanahuati nozona ipan tali Judá para 29 xihuit. Inana itoca eliyaya Abi huan eliyaya iichpoca Zacarías. ³ Huan Tanahuatijquet Ezequías quichijqui cati cuali iixpa TOTECO, senquisa quej quichijtoya ihuejcapan tata, David. ⁴ Quinjcueni nochi nopa piltiocaltzitzitzi cati eltoya huejcapa ipan tepeme, huan quinsosolo nochi taixpame huan fiero taquetzalme ten Asera. Nojquiya quichijqui cuechtic nopa cohuat ten bronze cati Moisés quichijqui huejcajquiya pampa ama nopa israelitame pejtoyaj quihueyichihuaj huan quitatiliyayaj copali quej elisquía se dios. Huan nopa tepos cohuat quitocaxtiyayaj Nehustán.

⁵ Huan Tanahuatijquet Ezequías motemachi ipan TOTECO toDios tiisraelitame. Amo quema oncatoya seyoc tanahuatijquet ipan tali Judá cati nelía cuali quej Ezequías, yon amo quema oncac teipa. ⁶ Tanahuatijquet Ezequías quitoquili TOTECO ipan nochi tamanti. Momocuitahui para quineltocas senquisa nochi itanahuatilhua TOTECO cati quimacatoya Moisés ma quijcuilo. ⁷ Huan yeca TOTECO itztoya ihuaya huan quichijqui para nochi tamanti cati Ezequías quichijqui ma quisa cuali. Huan Tanahuatijquet Ezequías motananqui ica nopa tanahuatijquet ten tali Asiria huan quihui ayecmo quitaxtahuisquía impuestos. ⁸ Huan nojquiya quintanqui nochi nopa filisteo altepeme hasta campa altepet Gaza. Quintanqui nopa filisteos ipan pialtepetzitzitzi huan ipan huejhueyi altepeme cati quipiyayayaj tepame cati huejcapanque.

Huetzqui Samaria inimaco Asiria ehuan

⁹ Huan quema Tanahuatijquet Ezequías yahuiyaya para nahui xihuit tanahuatis ipan tali Judá huan Tanahuatijquet Oseas, icone Ela, yahuiyaya para chicome xihuit tanahuatis ipan tali Israel, Tanahuatijquet Salmanasar hualajqui ten tali Asiria. Huan quiyahualo altepet Samaria ipan tali Israel huan quintehui. ¹⁰ Huan quej nopa elqui para eyi xihuit, pero quema yahuiyaya para chicuase xihuit tequitis Tanahuatijquet Ezequías ipan tali Judá, huan Tanahuatijquet Oseas yahuiyaya para chichnahui xihuit tanahuatis ipan tali Israel, Samaria huetzqui imaco nopa tanahuatijquet ten Asiria. ¹¹ Huan nopa tanahuatijquet quinhucac israelitame ilpitoque ten Samaria hasta tali Asiria. Nozona quincajqui ipan Halah, huan nechca nopa hueyat Habor ipan tali Gozán, huan ipan inialtepehua nopa medos masehualme. ¹² Nochi ya ni panoc pampa amo quitacaquiliytoyaj cati TOTECO inDios quihuijtoya. San quitahuelcajtoyaj nochi camanal senchahual cati TOTECO quichijtoya inihuaya, huan quihuejcamaajque nochi nopa tanahuatilme cati TOTECO quinmacac ica itequipanojca, Moisés.

Senaquerib calajqui ipan tali Judá (2 Cr. 32:1-19; Is. 36:1-22)

¹³ Huan quema Tanahuatijquet Ezequías yahuiyaya para 14 xihuit tanahuatis ipan tali Judá, hualajqui Tanahuatijquet Senaquerib ten tali Asiria huan quintehui nochi altepeme ipan Judá cati quipixque huejhueyi tepamit para quinmanahuis huan quintanqui. ¹⁴ Huajca Tanahuatijquet Ezequías tatitanqui ipan altepet Laquis para ma quihuijti Senaquerib ten tali Asiria ni camanali: “Nitajfcolchijtoc ica ta. Xiquisa ipan ni notal huan nimitztaxtahuis nochi impuesto cati techtajtanis.”

Huajca Senaquerib ten tali Asiria quinanqui Tanahuatijquet Ezequías nechca 10 toneladas ten plata tomi huan nechca se tonelada ten oro tomi. ¹⁵ Huan para taxtahuan, Tanahuatijquet Ezequías quimactili nochi nopa plata cati eltoya ipan itiopa TOTEÇO, huan nochi cati quiajoctoyaj ipan icaltanahuatil. ¹⁶ Nojquiya Ezequías monejqui quicopehuas nopa oro ipan nochi caltemit ipan ichaj TOTEÇO huan nojquiya cati eltoya ipan nopa taquetzalme cati yaya qualtijtoya ica oro. Huan nochi nopa oro quimacac nopa tanahuatijquet ten tali Asiria.

¹⁷ Pero masque ya quimacatoya nochi ya nopa, nopa Tanahuatijquet ten tali Asiria quintanqui ten altepet Laquis eyi huejhueyi tequichihuani cati inintoca Tartán, Rabsaris huan Rabsaces, inihuaya miyac isoldados para quinamiquise Ezequías ipan altepet Jerusalén. Huan quema ajsicoj nechca altepet Jerusalén, mochijque campa nopa huejcapantic aojti cati quihualica at ipan nopa mantoc at campa quichicueníaj yoyomit huan quichipahuatíaj. ¹⁸ Teipa nopa soldados quinzque Tanahuatijquet Ezequías ma huala, pero amo hualajqui. San quintanqui itapalehuijcahua cati inintoca: Eliaquim, icone Hilcías, cati imaco eltoya nopa caltanahuatili; Sebna, cati quiijcuilohuayaya nochi amame cati quisayaya ipan tequicali, huan Joa, icone Asaf, cati quiijcuilohuayaya ipan se amatapohuali nochi cati panoyaya mojmosta ipan itequi nopa tanahuatijquet. Huan nopa tacame yajque quincamanalhuitoj nopa soldados huan inintayacanca.

¹⁹ Huan itemach nopa tanahuatijquet ten tali Asiria quititanqui ni camanali para Tanahuatijquet Ezequías:

—Ya ni cati quiijtohua nopa tanahuatijquet ten tali Asiria: ‘¿Para ten timoilhuía para huelis timomanahuis nomaco? ²⁰ ¿Huelis timoilhuía techtanis san ica se camanali huan amo monequis tahuel miyac soldados, cahuayojme huan teposti? ¿Ipan ajquiya timotemachijtoc para mitzmanahuis nomaco? ²¹ ¿Huelis timotemachía ipan nopa tanahuatijquet ten tali Egipto? Pero tiquitas para ichicahualis Egipto eltoc quej se ohuat cati san senquisa ohuapachti. Sinta se acaya ipan momatazquilis, postequis huan quítequis ipan imax. Quej nopa elis nopa Faraón cati tanahuatía ipan tali Egipto huan cati motemachía ipan ya. ²² O huelis antechilhuisse anmotemachíaj ipan amoTEÇO Dios. Pero ¿amo yaya cati ta tiEzequías tijcualancamacac quema tiquijcueni nochi itaixpa huan piltiocaltzitzi campa masehualme quihueyitepanitayaj huan titanahuati para monequi nochi masehualme ten tali Judá ma yaca san ipan altepet Jerusalén para quihueyitepanitase? ²³ Xiquita, nijchihuas ya ni. Sinta hueli tiquinpantis ome mil soldados ipan tali Judá cati quimatij tejcoj cahuayojtipa huajca na nimitzmacas ome mil cahuayojme para ipan tejcase. ²⁴ Ta amo tiquinpiya soldados para tiquintanis nopa pamit ten isoldados noteco cati más pisiltzi. Huan masque nochi cati tejcoj cahuayojtipa ten tali Egipto mitzpalehuisquíaj, amo anquitanisquíaj. ²⁵ Nojquiya, ¿amo tijmachilía para tojuanti titequitij imaco TOTEÇO para tihualajtoque timechtehuiquij nica ipan ni tali? Yaya TOTEÇO technahuatijtoc ma timechtehuiquij huan ma timechmictiquij ipan amotal.’

²⁶ Huan Eliaquim, Sebna huan Joa quiihujque:

—Se favor, techcamanalhuica ica camanali arameo pampa cuali tijmachilíaj. Amo techcamanalhuica ica hebreo camanali pampa quicaquise huan quimachilise nopa masehualme cati itztoque ipan ni tepamit.

²⁷ Pero Rabsaces ten tali Asiria quiijto:

—Pero noteco amo techtitantoc ma timechilhuiquij san ta huan moteco ni camanali. Yaya techtitantoc para nojquiya ne masehualme cati itztoque

ipan ne tepamit ma quicaquica. Pampa sinta amo anmotemactilise ica tojuanti, inijuanti san quej amojuanti nochi anmayanase hasta monequis anquicase amocuit huan anquise amoaxix.

²⁸ Huan teipa nopa Rabsaces moquetzqui huan tzajtzc chicahuac ica camanali hebreo para ma quicaquica cati itztoque ipan tepamit, quiijto:

—Xijtaquilica cati amechilhúa nopa tanahuatijquet ten tali Asiria:
²⁹ ‘Amo xijcahuilica ma amechcaycayahua amotanahuatijca Ezequías. Yaya amo huelis amechmaquixtis tomaco. ³⁰ Sinta Tanahuatijquet Ezequías quinequi amechilhuis ximotemachica ipan amoTECO, huan amechilhuis para amoTECO amechpalehuis huan amo quicahuas ma huetzi nomaco ni altepet, ³¹ amo xijtaquilica.’ Ya ni cati quiijtohua nopa tanahuatijquet ten tali Asiria para monequi xijchihuaca: Ximotemactilica ica na. Xijtapoca nochi caltemit ipan itepa amoaltepe huan xiquisaca. Huan nijcahuilis sesen ten amojuanti ma quicua ten ixocomecamil, huan ten imil huan ma ati ipan ten ya iamel. ³² Quej nopa elis hasta quema na sempa nihualas huan nimechhuicas ipan seyoc tali cati eltoc quej ni amotal. Nopa tali quiipiya miyac trigo mili huan xocomeca mili. Onca miyac pantzi, xocomecat iayo, sayol necti huan miyac cuame ten olivo cati temaca aceite. Tohuaya anitztose huan amo anmiquise. Amo xijtaquilica amotanahuatijca Ezequías pampa amechcaycayahuas sinta amechilhuis amoTECO huelis amechmaquixtis. ³³ Ximoilhauca, amo onca yon se tali cati ininteco yajati quimaquixtía nomaco na cati nitanahuatijquet ipan tali Asiria. ³⁴ ¿Anquielnamiquij cati ininpantic nopa dioses ten tali Hamat, Arfad, Sefarvaim, Hena huan Iva ten tali Samaria? Amo huelque quimaquixtijque altepet Samaria nomaco. ³⁵ ¿Canque itztoc se dios cati quimanhujtoc ital ten nomax? ¡Amo aqui! Huajca amo ximoilhauca para amoTECO amechmaquixtis nomaco amojuanti cati anehuani ipan altepet Jerusalén.

³⁶ Pero nopa masehualme ipan tepamit amo tananquilijque pampa Tanahuatijquet Ezequías quinilhujtoya ma amo molinica. ³⁷ Huajca Eliaquim cati eltoya imaco nopa caltanahuatili, huan Sebna cati quiijcuilohuayaya nochi amame cati quisayaya tequicalco, huan Joa cati quiijcuilohuayaya ipan se amatapohuali cati panoyaya mojmosta, nochi mocuetque campa itztoya Tanahuatijquet Ezequías. Huan quitzayanque iniyoyo huan quipohuilijque nochi camanali cati quiijtojtoya Rabsaces, itemach nopa hueyi tanahuatijquet ten tali Asiria.

19

Ezequías quitemo TOTECO (2 Cr. 32:20-23; Is. 37:1-38)

¹ Quema Tanahuatijquet Ezequías quicajqui cati itapalehuicahua quipohuilijque, quitzayanqui iyoyo huan motalili se yoyomit cati fiero cati quinextía para nelía tahuel hueyi itequipachol. Teipa calaquito ipan ichaj TOTECO para motatajtis. ² Huan quintitanqui itapalehuicahua, Eliaquim, Sebna huan Joa ihuaya nopa tayacanca totajtzitzi para ma quitatij nopa tajtolpanextijquet Isaías, icone Amoz. Huan inijuanti yajque nojquiya moyoyontijtoque ica nopa fiero yoyomit cati quinextía tahuel mocuesohuaj. ³ Huan quiilhujque Isaías nopa camanali cati Tanahuatijquet Ezequías quinilhujtoya. Quiijtoque: “Ama se tonali ten tajyohuilisti. Eltoc san quej se sihuat cati nechca quiipiyas icone huan ayecmo quiipiya fuerza para quitacatiltis. ⁴ Huelis TOTECO moDios quitacaquilijtoc cati fiero quiijto nopa tequitijquet cati quititanqui nopa Tanahuatijquet ten tali Asiria pampa

tahuel quiixpanoc huan quihuejcamajcajqui moTECO Dios cati itztoc. Ximotatajti para huelis noja quitatzacuilitis. Huan ximotatajti por tojuanti cati noja timocajtoque cati nopa tanahuatijquet ayemo techtantoc.”

⁵ Huajca itapalehujcahua Ezequías tanque camanaltij ica tajtolpanextijquet Isaías, ⁶ huan Isaías quinilhui: “Xiquilhuitij amoteco para TOTECO quilhúia ni camanali: ‘Amo ximajmahui por nopa camanali cati tijcactoc. Itequipanojcahua nopa tanahuatijquet ten tali Asiria techtajilhuijtoque na. ⁷ Huan xiquita, na noseltitzi nimoquetzas iixpa huan nijchihuas ma ajsiti ipan ya se camanali ten ital para monequi nimantzi ma tacuepilis ichaj. Huan nijtalis ipan ya cati quilhuis ma yahui. Huan quema sempa ajsis ipan ital, nijchihuas ma quimictica nozona.’ ” Quej nopa Isaías quinilhui itapalehujcahua Tanahuatijquet Ezequías.

⁸ Huan ipan nopa tonali quema camanaltique ica Isaías, Rabsaces cati elqui itemach Tanahuatijquet Senaquerib ten tali Asiria, quisqui Jerusalén huan yajqui quicamanalhuito iteco ipan altepet Libna. Pero iteco, yaya nopa Tanahuatijquet Senaquerib, ya quistoya ipan Laquis campa tatehuyaya huan yajtoya ipan altepet Libna para tatehuiti huan yeca quipantito nepa.

⁹ Huan amo huejcajqui nopa Tanahuatijquet Senaquerib quicajqui para nopa Tanahuatijquet Tirhaca ten tali Etiopía ya quistoya ica isoldados para quitehuse. Huajca nimantzi monejqui quisas ten campa itztoya. Pero achtohui sempa quintintanqui sequij tacame ma quitatij Tanahuatijquet Ezequías ipan altepet Jerusalén huan ma quilhuitij:

¹⁰ “Ya ni se camanali para Tanahuatijquet Ezequías ten tali Judá, xitacaqui: Ma amo mitzcaycahua moTeco Dios cati ipan timotemachijtoc. Amo ximoilhui para na cati nitanahuatijquet ten tali Asiria amo nijtan altepet Jerusalén pampa quena, ya nopa nijchihuas. ¹¹ Ta ya tijcactoc cati sequinoc huejhueyi tanahuatiani ten notal Asiria quichijtoque campa hueli campa yajtoque. Nochi campa hueli tijtantoque. Huan ta ¿quenicatza timochololtis? ¹² Amo teno quinpalehujque inindioses nopa masehualme cati notatahua quintzontamiltijque ipan talme Gozán, Harán huan Resef, huan nopa masehualme ten Edén cati itztoyaj ipan altepet Telasar. ¹³ ¿Tiquelnamiqui ten panoc ica nopa tanahuatiani ipan Hamat huan Arfad huan ten panoc ica nopa tanahuatiani ipan altepeme Sefarvaim, Hena huan Iva? ¡Nochi mijque!”

Nopa tanahuatijquet ten tali Asiria quej nopa quilhui Tanahuatijquet Ezequías.

Inetatajtíl Ezequías

¹⁴ Huan quiseli Tanahuatijquet Ezequías nopa amatajcuiloli huan quipojqui. Teipa yajqui ipan ichaj TOTECO huan quiixtapo nopa amatajcuiloli iixpa TOTECO. ¹⁵ Huan pejqui motatajtía iixpa TOTECO huan quijto: “TOTECO Dios ta cati tiToteco tiisraelitame. Ta cati más tijpiya chichualisti huan tiitztoc tatajco ten moilhucac ejcahua cati inintoca querubines. San ta cati melahuac tiDios ipan nochi talme ipan ni taltipacti. Ta ica moselti tijchijqui ilhucacti huan taltipacti. ¹⁶ Techtecaquili noTECO. Xijtapo moixteyol, noTECO huan xiquita. Xijtaquili nopa camanali cati Senaquerib techilhúia ipan ni amat pampa nochi cati quijtohua mitzxipano, ta tiToteco Dios, ta cati nelia tiitztoc.

¹⁷ “Quena, melahuac, noTECO, nopa huejhueyi tanahuatiani ten tali Asiria quinmictijtoque miyac masehualme huan quintamisosolojque miyac talme. ¹⁸ Huan quintatiltijque inindioses pampa melahuac amo nelia dios. Inijuanti yajatque quinpolojque pampa san eliyayaj tamanti cati quinmachijchijtoyaj

masehualme ten cuahuit o ten tet. ¹⁹ Pero ama, tiTOTECO Dios, se favor, techmanahui ten inimaco. Quej nopa nochi tanahuatiani huan inimasehualhua campa hueli ipan ni taltipacti quimatise para san ta, cati tiTOTECO, nelía melahuac ta tiDios.” Quej nopa motatajti Ezequías.

TOTECO quinanquili Ezequías

²⁰ Huajca Isaías, icone Amoz, tatitanqui ma quuilhuitij Tanahuatijquet Ezequías: “Quej ni quiijtohua TOTECO toDios tiisraelitame: ‘Nijcactoc cati ta techtajtanijtoc por cati quiijtoc Tanahuatijquet Senaquerib ten tali Asiria.’ ” ²¹ Huan ya ni nopa camanali cati TOTECO quuilhuía Senaquerib:

“Quema ticholojtehuas ten Jerusalén,
nopa altepet ehuan mitzpacaitase quej se ichpocat
cati amo tiyajatqui tijtani.
San mitzhuihuiitase huan quiolinise inintzonteco
para mitzpinajtise.

²² ¿Ajquiya timoilhuía para tiquixpanotoc
quema ten hueli tiquijtohua?

¿Ajquiya tijtaijilhuía?

¿Ajquiya tijhuihuiitoc?

Nochi tijchijtoc ica na, niDios,
cati nitatzejtzeloltic.

Na cati niininTECO nopa israelitame.

²³ Ica motapalehuijcahua techixpanotoc na, niDios.
Tiquijtojtoc:

‘Ica miyac notatehuijca carrojhua nitejcotoc
hasta inintzompac huejhueyi tepeme,
Nitejcotoc hasta campa más ohui taixtejcolis
ipan tali Líbano para nitatanis.

Nijzontejqui tiocuame

cati más huejcapantique ipan Líbano,

huan nopa pino cuame nozona cati más jejectziti.

Niajsitoc hasta talme campa más huejca,

huan nicalactoc hasta campa más nejnechca nopa cuame ipan cuatitamit.

²⁴ Nijxajtoc amelme ipan campa hueli talme
huan niqúic ten nopa at.

Hasta nijtajqui huan nijhuatzqui nochi hueyame ipan tali Egipto
para huelis niqúicotonas san noicxipa ica nosoldados.’

Quej nopa tiquijtojtoc.

²⁵ Pero amo tijmachilía para elqui na, niDios,
cati niqúictonas taya oncas.

Huejcajquiya nijtali para ma pano nochi nopa tamanti.

Quena, na nijsencajqui huejcajquiya

cati ama na nijchihua ma panotiniemi ipan monemilis.

Na nijchijqui para tiquinsosolos altepeme cati cuajcuali tasencahuali inin-
tepa,

huan tiquincahuas san quej teme cati montonijtoc.

²⁶ Huan na nijsencajqui huejcajquiya para masehualme ipan ni talme
ma amo quiapiyaca chichahualisti huan ta nimantzi hueli tiqúintanis.

Nopa masehualme itztoque quej sacapetat cati xoxohue ipan mila cati
amo hueli quijyohuaj quema se ipan moquejquetzas.

Itztoque quej sacat cati pehua moscaltía calcuitapa se cali cati quiapiya tejas
huan tonati nimantzi quihuatza.

²⁷ Na nimitzixmati cuali. Nijmati quema tiquisa huan canque tiya huan nochi cati tijchihua. Huan nijmati quenicatza ticualanca camanaltitoc ten na.

²⁸ Huan por nochi mocamanal cati nijcactoc, huan pampa tahuel timohueyimajtoc ica na, huajca na nimitztalilis se tepos anillo ipan moyacatzol quej titoro o se tepos camachali ipan mocamac quej ticahuayo. Huan tijchihuas san cati na nijnequi. Huan nimitzchihuas ximocuepa ipan nopa ojti ica campa tihualajqui.”

Quej nopa Isaías quimacac camanali ten cati ipantis Tanahuatijquet Senaquerib.

²⁹ Nojquiya tajtolpanextijquet Isaías quilhui Tanahuatijquet Ezequías ni camanali ten Toteco: “Ama nimitzmacas se tanextili para na nimoTECO nijmanahuis altepet Jerusalén ten Tanahuatijquet Senaquerib. Ni xihuit anquicuase nopa trigo cati eli iselti. Huan ne seyoc xihuit anquicuase cati eli ten ya iyol, pero ipan eyi xihuit anquitocase trigo huan anquixcase. Anquimocuitahuise amoxocomeca milhua huan anquicuase inintajca. ³⁰ Huan amojuanti cati noja anmochahuase para anitztose ipan tali Judá, huan ya anmochololtijtose imaco nopa tanahuatijquet, sempa anmotatzquilise ipan amotal. Huan sempa anpehuase anquipiyase chichahualisti. Huan anmoscaltise huan anmomiyaquilise. ³¹ Pampa nopa quentzi israelitame cati mochahuase itztoque ipan Jerusalén huan ipan tepet Sion momahuase, huan tahuel momiyaquilise. Na, niamoTECO Cati Niquinyacana Nochi Noilhuicac Ehuani Ma Tatanitij, niqijtojtoc para panos nochi ya ni.

³² “Huan ya ni cati TOTECO quijtohua ten nopa hueyi tanahuatijquet ten tali Asiria: ‘Soldados amo calaquise ipan altepet Jerusalén, yon amo quimajcahuilise yon se cuataminti. Amo quinechcahuise ica iniyolixtajcahua para quitehuise, yon amo quitaltémise para quichihuase nopa taixtejcolis para ajsise huejcapa ipan nopa tepamit cati ica moyahualtzactoc nopa altepet. ³³ Nopa tanahuatijquet mocuepas ipan ital ipan san se ojti cati ipan hualajqui, pero amo calaquis ipan ni altepet. Na, niamoTECO, niqijtohua. ³⁴ Na nijmocuitahuis ni altepet Jerusalén huan nijmaquixtis para ma techtepanitaca, huan pampa niquicnelía notequipanojca David.’ ”

³⁵ Huajca nopa tayohua iilhuicac ejca TOTECO yajqui campa mochijtoyaj nopa Asiria ehuani huan quinmicti 185 mil soldados. Huan quema ne sequinoc soldados cati amo mijque isaque, san mijcattizti quinpantijque campa hueli. ³⁶ Huajca Tanahuatijquet Senaquerib ten tali Asiria motanantejqui huan yajqui ichaj ipan altepet Nínive. ³⁷ Huan se tonali quema quihueyichihuayaya itiotzi Nisroc ipan itiopa, yajque itelpocahua cati inin-toca Adramelec huan Sarezer huan quimictijque. Teipa cholojtejqe huan yajque hasta nopa tali cati itoca Ararat. Teipa pejqui tanahuatía itelpoca cati itoca Esarhadón ipan ilugar.

20

Icocolis Ezequías
(2 Cr. 32:24-26; Is. 38:1-22)

¹ Ipan nopa tonali Tanahuatijquet Ezequías huetzqui ipan se cocolisti huan motahueliyaya. Huan tajtolpanextijquet Isaías, icone Amoz, yajqui quiiatato huan quilhui:

—TOTECO quijtohua: ‘Xiquinconsejomaca mochaj ehuaní huan xijchíhua nochi catí monequi pampa timiquis. Ayecmo timochicahuas ten mocolis.’

² Huan Tanahuatijquet Ezequías mocuetqui huan quitali ixayac campa tapepeholi huan motatajti ica TOTECO huan quijto: ³ “Na nimitztajtanía noTECO, xiquelnamiqui quenicatza ninejntoc xitahuac moixpa. Nimitztequipanojtoc ica nochi noyolo huan nijchijtoc cati mitzpectía.” Huan tahuel chocac Ezequías.

⁴ Huan quema ayemo ajsiyaya Isaías tatajco ipan nopa calixpamit para yas ichaj, ajsico se camanali ten TOTECO ipan ya huan nopa camanali elqui: ⁵ “Xitacuepili huan xiquilhui Ezequías, yaya cati inintanahuatijca nomasehualhua para quej ni niquijtohua, niiTECO, huan na cati niiDios ihuejcan tata, David: ‘Na nijcactoc monetatajtil huan niqiztzcoc moixayo. Nimitzchicahuas ten mocolis huan ica eyi tonati tiyas ipan nohueyi tiopa nimoTECO. ⁶ Nimitzchahuilis xiitztos seyoc 15 xihuit. Nimitzmaquixtis ta huan ni altepet Jerusalén imaco nopa tanahuatijquet ten tali Asiria. Huan nijchihuas para masehualme ma techtepanitaca pampa niquicnelía notequipanojca David.’ ”

⁷ Huajca Isaías tanahuati ma quisencahuaca se tatixti ten higos huan ma quitallilica campa nopa cocot. Huan quichijque huan nopa cocot pachijqui.

⁸ Huan Ezequías quitatzintoquili Isaías:

—¿Taya tanextili TOTECO techmacas sinta nelía nimochicahuas huan huelis niyas ipan ichaj TOTECO ipan eyi tonati?

⁹ Huan Isaías quihui:

—TOTECO quichihuas se tanextili ica torelor para mitznextilis melahuac timochicahuas quej mitzilhuijtoc. ¿Tijnequi para nopa tonati iecahuilo ipan torelor ma nejnemi majtacti pasos iixmelac o ma mocuepa majtacti pasos ica iica?

¹⁰ Huan Ezequías quijto:

—Nochípa nopa tonati iecahuilo ipan torelor nejnemi pasos iixmelac huajca ya nopa amo más ohui. Más elis tanextili sinta nopa tonati iecahuilo mocuepas ica iica majtacti pasos. Ya nopa ohui.

¹¹ Huajca nopa tajtolpanextijquet Isaías quihui TOTECO taya tanextili quinequiyaya. Huan TOTECO quichijqui para nopa tonati iecahuilo ma mocuepa majtacti pasos cati ya nejntoyá ipan nopa reloj ten Acáz.

Ezequías quinseli nopa Babilonia ehuaní

(2 Cr. 32:27-31; Is. 39:1-8)

¹² Quema panoc tonali, itelpoca Tanahuatijquet Baladán ten tali Babilonia cati itoma Merodac Baladán quimatqui para mococohua Tanahuatijquet Ezequías ipan tali Judá. Huajca quintitanqui sequij masehualme cati quihualicaque amatajcuiloli huan se nemacti cati quititaniyaya nopa tanahuatijquet ten tali Babilonia. ¹³ Huan Ezequías quinseli nopa tatitanilme huan quinnextili nochi cati patiyó quipixtoya ipan ichaj. Quinnextili nochi itomi ten plata huan ten oro, huan nochi tacualpajti huan nochi taajhuiyacayot. Quinnextili campa quiajocui nochi itepos para tatehuis huan senquisá nochi cati patiyó campa taajocui. Nochi quinnextili. Amo teno oncac ipan nopa hueyi caltanahuatili, yon ipan nochi itanahuatilis cati amo quiiataque. ¹⁴ Huan teipa nopa tajtolpanextijquet Isaías yajqui quiiato Tanahuatijquet Ezequías huan quitatzintoquili:

—¿Canque ehuaní nopa masehualme huan taya mitzilhuijque?

Huan Tanahuatijquet Ezequías quijto:

—Inijuanti huejca ehuaní. Hualajque ten tali Babilonia.

¹⁵ Huan tajtolpanextijquet Isaías quitatzintoquili:

—¿Huan taya quíitaque ipan mochaj?

Huan Tanahuatijquet Ezequías quíilhui:

—Quíitaque nochí cati onca nica. Niquínnextili nochí campa nitaajocui.

¹⁶ Huajca Isaías quíilhui Ezequías:

—Xijcaqui ní camanali cati mitzilhuía TOTECO: ¹⁷ ‘Hualas se tonali quema nochí cati onca ipan mochaj quíhuicase ipan tali Babilonia. Quíhuicase nochí cati quísentilijque mohuejcapan tafahua huan cati ta tíjsentilijtoc hasta ama. Amo teno mocahuas nica. ¹⁸ Huan hasta nojquiya moteixmatcahua quínhuicase nepa ipan tali Babilonia. Huan quíncaparose huan quíntalise quej tequípanohuani ipan ícaltanahuatil nopa tanahuatijquet.’

¹⁹ Teipa Tanahuatijquet Ezequías quíilhui Isaías:

—Nopa camanali ten TOTECO Dios cati tíquijtojtoc, cualtitoc.

Quíijto ní pampa moílhuiyaya: “Ipan nochí tonali quema noja níitzos oncas tasehuílisti huan tíitdose temachtí, huan nopa taohuíjcyot panos teipa.”

Imíquilis Ezequías

(2 Cr. 32:32-33)

²⁰ Nopa sequínoc tamanti cati panoc ipan ítequi Ezequías huan nochí cati quíchijqui eltoc íjcuílijtoc ipan nopa amatapohuali cati itoca Cati Quíchijque Nopa Tanahuatiani Ipan Tali Judá. Nojquiya quíijtohua quénicatza quípíxqui míyac íchícahualis huan quénicatza quíchijqui nopa hueyi píla, huan nopa hueyi aojti para ipan calaquís at ipan nopa alpetet. ²¹ Huan quema míjqui Tanahuatijquet Ezequías, ícone cati itoca Manasés pejqui tanahuatía.

21

Manasés tanahuati ipan tali Judá

(2 Cr. 33:1-20)

¹ Manasés quípíyayaya 12 xihuit quema pejqui tanahuatía ipan tali Judá huan mosehú para tanahuatis ipan alpetet Jerusalén huan tanahuati 55 xihuit. Huan inana itoca eliyaya Hepsiba. ² Pero Tanahuatijquet Manasés quíchijqui cati amo cuali íixpa TOTECO pampa quítoquili ínífiero ojhui nopa sequínoc masehualme cati amo quíixmatij TOTECO cati TOTECO quínquixtíjtoya ten nopa tali íníixpa ísraelitame. ³ Huan ipan campa huéli tepeme Manasés sempa quínchíjchijqui nopa píltícaltízti para taíxcopíncayome cati itata, Tanahuatijquet Ezequías, quínsosolójtoya. Nojquiya campa huéli quínchíjchijqui taíxpame para nopa teteyot Baal. Huan quíquetzqui se fíero taquetzali para nopa taíxcopíncayot Asera quej quíchíjtoya Tanahuatijquet Acab ipan tali Ísrael. Nojquiya Manasés quínhueyíchíjqui sítalime huan nochí tamanti cati onca ipan ílhuícasti. ⁴ Nojquiya quíchíjchijqui se taíxpamít para teteyome ipan nopa hueyi tíopamít ten TOTECO campa TOTECO quíijtojtoya para quípíyas itoca huan campa quínámíqui para masehualme ma quíhueyímatica. ⁵ Huan ipan nochí ome calíxpamít nopa hueyi tíopamít ten TOTECO, Tanahuatijquet Manasés quíchíjqui taíxpame para sítalime huan nochí cati onca ipan ílhuícasti. ⁶ Nojquiya quítati ícone ipan tí quej se tacajcahualísti para se teteyot. Momatqui tenahualhuía huan tamati. Quíntajtani consejo cati quíncamanalhuíyayaj ajacame huan míjcatzítzi huan cati tetonalítayayaj. Tahuel míyac tamanti cati amo cuali quíchíjqui íixpa TOTECO para quícuíalancamacas. ⁷ Hasta quíhuíac nopa

fiero taquetzali para Asera cati quichijtoya huan quitali ipan itiopa TOTECO campa TOTECO quiilhijtoya David huan icone, Salomón, nopa cali para nochipa quihuicas itoca pampa TOTECO quitapejpeni Jerusalén ten nochi altepeme ten israelitame para nopa masehualme quihueyimatisé. ⁸ Huan TOTECO no quijto: “Sinta israelitame quinelto case cati quijtohua nochi notanahuatilhua cati niquinmacac ica notequipanojca, Moisés, amo niqini-jcuenis ipan ni tali cati niquinmacac inintatahua.” ⁹ Pero israelitame amo quichijque cuenta icamanal. Huan Tanahuatijquet Manasés quinnextili israelitame ma quichihuaca cati noja más fiero que nopa masehualme cati TOTECO quinpola iniixpa nopa israelitame quema calajque ipan nopa tali.

¹⁰ Huajca TOTECO teyolmelajqui icamanal ica itajtolpanextijcahua huan quijto: ¹¹ “Manasés nopa tanahuatijquet ipan tali Judá quichijtoc miyac tamanti cati tahuel fiero. Quichijtoc más fiero que nopa amorreo masehualme cati achtohuiya itztoyaj ipan ni tali. Quinnextilijtoc israelitame ipan tali Judá ma tajtacolchihuaca huan ma quinhueyimatica taixcopincayome cati amo Dios. ¹² Huajca ya ni cati quijtohua TOTECO cati toDios tiisraelitame: ‘Na nijchihuas ma hualaca masehualme ipan tali Judá huan ipan altepet Jerusalén para quisosolose nochi. Tahuel miyac taijyohuise israelitame hasta quinyolcocos nochi cati quicaquise. ¹³ Niqintamachihuas altepet Jerusalén ehuan ica san se tatamachihuali cati nijtequihui ica altepet Samaria ehuan ica iteixmatcahua Tanahuatijquet Acab. Na niqinquixtis masehualme ipan Jerusalén hasta amo aquí moca huas. Elis quej se plato cati se quipajpactoc cuali huan teipa quixtapachohua para ma huaqui. ¹⁴ Huan nopa quentzi masehualme cati moca huase itztoque, niqintemactilis inimaco inincualancaitacahua para ma quintacuijcuilica huan ma quintaijyohuiltica. ¹⁵ Pampa nopa israelitame quichijque cati amo cuali noixpa huan techcualancamacatoque hasta huejcajquiya ipan nopa tonali quema niqinquixti inihuejcapan tatahua ipan tali Egipto huan hasta ama noja quichihuaj.’”

¹⁶ Huan Tanahuatijquet Manasés nojquiya quinmicti miyac masehualme cati amo teno quichijtoyaj hasta elqui quej quitemiti altepet Jerusalén ten ni nali hasta ne seyoc nali ica esti cati amo quitoyajtosquía. Huan ya ni elqui iyoca ten nopa hueyi tajtocoli cati quichijqui pampa quinnextili israelitame ma quinhueyichihuaca taixcopincayome cati tahuel fierojtique iixpa TOTECO.

¹⁷ Nopa sequinoc tamanti cati panoc ipan itequi Tanahuatijquet Manasés, huan nopa tequit cati quichijqui, huan nopa tajtocoli cati quichijqui, nochi eltoc ijcuilijtoc ipan nopa amatapohuali cati itoca “Cati Quichijque Nopa Tanahuatiani Ipan Tali Judá”. ¹⁸ Huan quema mijqui Manasés quitalpachojque ipan nopa xochimili nechca ichaj cati itoca ixochimil Uza. Teipa itelpoca cati itoca Amón pejqui tanahuatía.

Amón tanahuati ipan tali Judá

(2 Cr. 33:21-25)

¹⁹ Huan Tanahuatijquet Amón quipiyayaya 22 xihuit quema pejqui tanahuatía huan tanahuati ipan altepet Jerusalén ome xihuit. Inana itoca eliyaya Mesulemet huan yaya eliyaya iichpoca Haruz cati ehua altepet Jotba. ²⁰ Pero Amón quichijqui cati amo cuali iixpa TOTECO quej quichijtoya itata, Manasés. ²¹ Quitoquili ifieroj ojhui itata huan quinhueyichijqui nopa

taixcopincayome cati itata quinhueyichijtoya. ²² Huan quej nopa quihuejca-majcajqui TOTECO, yaya cati ininDíos ihuejcapan tatahua huan amo quine-jqui quitoquilis iojhui. ²³ Huan itequipanojcahua Tanahuatijquet Amón motananque ica ya huan quisencajque quenicatza quimictise ipan ichaj. ²⁴ Pero teipa nopa tali Judá ehuan quimictijque nopa tequipanohuani cati quimictijque Amón. Huan quichijque Josías, icone Amón, ma eli tanahuatij-quet.

²⁵ Nopa sequinoc tamanti cati panoc ipan itequi Tanahuatijquet Amón huan nochí cati quichijqui eltoc ijcuilijtoc ipan nopa amatajcuiloli cati itoca Cati Quichijque Nopa Tanahuatiani Ipan Tali Judá. ²⁶ Huan quitalpachojque Amón ipan se panteón ipan ixochimil Uza. Teipa pejqui tanahuatía icone cati itoca Josías.

22

Josías tanahuati ipan tali Judá (2 Cr. 34:1-2)

¹ Huan Josías quipiyayaya 8 xihuit quema pejqui tanahuatía huan tanahuati ipan altepet Jerusalén 31 xihuit. Inana itoca eliyaya Jedida huan eliyaya iichpoca Adaía ten altepet Boscat. ² Huan Tanahuatijquet Josías quichijqui cati xitahuac iixpa TOTECO pampa quitoquili nochí nopa cuali ojti cati ipan nentoya ihuejcapan tata David huan amo moiyocatali ten iojhui yon quentzi.

Josías quichijhijqui itiopa Toteco (2 Cr. 34:8-33)

³ Quema Tanahuatijquet Josías yahuiyaya para 18 xihuit ipan itequi, quititanqui Safán ipan itiopa TOTECO. Huan Safán elqui itajcuilojca huan eliyaya icone Azalías huan iixhui Mesulam. Huan quihlhi:

⁴ —Xiya xiquitati nopa hueyi totajtzi Hilcías huan xiquilhui ma quipo-hua nopa tomi cati nopa tamocuitahuiani ipan icalte itiopa TOTECO quiselijoque cati masehualme quihualiquiliyayaj TOTECO. ⁵ Ma quinmaca nopa tomi nopa tacame cati quiyacanase nopa tequit para quicualchijhihuase itiopa TOTECO. Quitequihuisse para quintaxtahuise cati tequitij para quicualchijhihuase campa sosolijtoc itiopa TOTECO. ⁶ Monequi quin-taxtahuise cuaximani, tepanchihuani huan cati quiyacanase nopa tequit. Nojquiya monequi ma quicohuaca cuahuit huan teme cati cuajcuali para quicualtalise nopa tiopamit. ⁷ Huan amo monejqui quintajtanise cuenta ipan taya tamanti quitequihijque nopa tomi pampa injuanti elque tacame cati xitahuague.

⁸ Huan nopa hueyi totajtzi Hilcías quihlhi nopa tajcuilojquet Safán: “Nipantijtoc ipan itiopa TOTECO nopa amatapohuali ten huejcajquiya cati quipiya nopa tanahuatilme.” Huan Hilcías quimacac nopa amatapohuali Safán huan yaya quipojqui. ⁹ Huan Safán mocuetqui campa nopa tanahu-atijquet huan quihlhi:

—Motequipanojcahua quisentilijoque nopa tomi cati masehualme quimacatoque TOTECO huan quinmacatoque cati tayacanaj ipan nopa tequit ipan tiopamit.

¹⁰ Huan nopa tajcuilojquet Safán nojquiya quihlhi Tanahuatijquet Josías para nopa totajtzi Hilcías quimacatoya se amatapohuali. Huan Safán quipo-jqui iixpa nopa tanahuatijquet.

¹¹ Huan quema Tanahuatijquet Josías quicajqui cati quiihtoayaya nopa amatapohuali cati quipixtoya itanahuatilhua TOTECO, quitzayanqui iyoyo

ica hueyi tequipacholi. ¹² Huan teipa quinahuati nopa hueyi totajtzi Hilcías, huan Ahicam, icone Safán, huan Acbor, icone Micaías, huan Safán, nopa tajcuilojquet, huan Asaía, ihueyi tapalehuija, huan quinihui:

¹³ —Xiyaca huan xijtatintotquilica TOTECO taya nopantis na, huan taya inipantis ni altepet ehuani, huan nochi ni tali Judá ehuani pampa amo tijtoquilijtoque nopa camanali cati eltoc ipan ni amatapohuali cati quipantijtoque. Nijmati TOTECO tahuel cualantoc tohuaya pampa totatahua amo quineltocatoque ni tanahuatilme. Amo tijchijihualajque cati eltoc ijcuilijtoc ipan ni amatapohuali.

¹⁴ Huajca yajqui nopa totajtzi Hilcías, ihuaya Ahicam, Acbor, Safán huan Asaía hasta nopa yancuic colonia ipan Jerusalén huan quiitatoj nopa sihua tajtolpanextijquet Hulda. Yaya eliyaya isihua Salum, huan Salum eliyaya icone Ticva huan iixhui Harhas. Huan Harhas eliyaya nopa tacat cati quiajocui nopa yoyome para totajtzitzi ipan tiopamit. ¹⁵ Huan Hulda nimantzi quinihui:

—Xiquilhuica nopa tacat cati amechtitantoc para TOTECO cati toDios tiisraelitame quej ni quijtohua: ¹⁶ ‘Na nijsosolos ni altepet huan nochi cati itztoque nica quej eltoc ijcuilijtoc ipan nopa amatapohuali cati tijpojtoc ta cati titanahuatijquet ten tali Judá. ¹⁷ Nijsosolos pampa nomasehualhua techtahuelcajtoque huan quintatiliijtoque copali nopa taixcopincayome huan teteyome cati amo Dios. Yeca tahuel techcualancamacatoque ni masehualme huan amo tamis nocualancayo hasta niquintatzacuiltis. ¹⁸ Pero xiyaca campa nopa tanahuatijquet ten tali Judá cati amechtitantoc para anquimatise cati na niiTECO nijchihuas. ¹⁹ Huan xiquilhui: ‘Nijmati ta tijchijqui yamanic moyolo quema tijcajqui para eltoc ijcuilijtoc ipan nopa amatapohuali para nijsosolos ni altepet huan nochi cati itztoque nica. Huan timoechcapantali quema tijcajqui para ni altepet elis tatechihuali huan tatzitizcatoc. Nojquiya tijtzayanqui moyoyo huan tichocac noixpa. Huajca na, cati nimoTECO, nojquiya ya nimitzactoc. ²⁰ Huan amo niquintitanis cati quisosolose ni altepet huan imasehualhua hasta ya timictos huan ya tantos mitztlapachojtose. Nimitzcahuilis timiquis huan mitztlapachose quema amo onca tatehuilisti. Huan ta amo tiquitas cati fiero ipantis ni altepet.’

Quej nopa TOTECO quinihui Tanahuatijquet Josías ica itatitanilhua ica nopa sihuat. Huan teipa nopa tacame mocuetque huan quiyolmelahuatoj Tanahuatijquet Josías cati quinihuijtoya nopa sihua tajtolpanextijquet.

23

Quipojque icamanal TOTECO miyacapa

¹ Huajca Tanahuatijquet Josías tanahuati ma mosentilica nochi huehue tacame cati tayacanayayaj ipan tali Judá huan ipan altepet Jerusalén. ² Huan yajqui nopa tanahuatijquet ipan ichaj TOTECO ica nochi masehualme ten Jerusalén huan tali Judá, huan inihuaya nochi totajtzitzi huan nochi tajtolpanextiani. Yajque nochi masehualme ten cati más huehuentzitzi hasta cati más pisiltzitzi. Huan iniixpa nochi, nopa tanahuatijquet quipojqui nochi nopa amatapohuali cati quipantijtoya tiopan calijtic cati quipixtoya nopa camanal sencahuali cati TOTECO quichijtoya ica israelitame. Huan nochi quitacaquilijtojaj.

³ Huan teipa nopa tanahuatijquet moquetzqui nechca nopa hueyi taqueztlali campa moquetza se tanahuatijquet para quichihuas se tanahuatili huan sempa quichijqui nopa camanal sencahuali ica TOTECO. Motemacac iixpa TOTECO para ica nochi iyolo huan ica nochi ialma quineltoocas nochi

itanahuatilhua TOTECO, huan quitamichihuas nochi itamachtilhua huan nochi cati quijitohua nopa camanal sencahuali. Huan nochi masehualme nojquiya motemacaque quichihuase nochi tanahuatilme ipan nopa camanal sencahuali.

*Josías quichijqui cuali tequit
(2 Cr. 34:3-7)*

⁴ Huajca Tanahuatijquet Josías quinahuatij nopa hueyi totajtzi Hilcías, huan nopa totajtziti cati quihuicayayaj nopa ompa tequiticayot huan nopa totajtziti cati tamocuitahuáaj ipan caltemit para ma quiquixtica ipan itiopa TOTECO nochi tamanti cati quitequihuiyayaj para quihueyichihuase Baal, Asera, sitalime huan nochi tamanti cati onca ipan ilhuicacti. Huan quintatijque huejca ten Jerusalén ipan nopa cuatitamt cati itoca Cedrón. Huan teipa quihuicaque nopa cuajnexti hasta ipan Betel. ⁵ Huan Tanahuatijquet Josías quinjcueni nopa totajtziti cati quinhueyichihuayayaj taixcopincayome. Quintequitalijtoyaj nopa totajtziti nopa achtohui tanahuatiani ten tali Judá para ma quitatica copali ipan inintaixpa nopa teteyome campa hueli ipan tali Judá huan ipan Jerusalén. Quitatiliyayaj copali Baal, tonati, metzti huan nochi sitalime huan cati onca ipan ilhuicacti. ⁶ Nojquiya Josías quiquixti nopa fiero taquetzali ten nopa taixcopincayot Asera cati eltoya ipan itiopa TOTECO huan quihuicaque ten altepet Jerusalén hasta nopa tamayamit cati itoca Cedrón huan quitatijque. Teipa quitisqui cati mocajqui hasta san elqui taltepotci. Huan teipa quiseamanqui ipan campo santo campa quintocayayaj mijcatziti teicneltziti. ⁷ Huan nojquiya quinsosolo nopa calme para se itztoyaj nopa tacame cati quichihuayayaj tamanti ica sequinoc tacame para se taxtahuili ipan ichaj TOTECO huan quijitohuayayaj elqui para quihueyitalise. Huan quisosolo nopa yoyoncalme cati ahuilnenca sihuame quiniytzontoyaj para ipan quihueyitalise Asera ica nopa tacame cati quinseliyayaj para se taxtahuili.

⁸ Teipa Tanahuatijquet Josías tanahuati ma hualaca nochi TOTECO itotajtziti cati itztoyaj ipan altepeme campa hueli ipan tali Judá. Huan Josías quinsosolo nochi taixpame ten altepet Geba ica norte hasta Beerseba ica sur campa itotajtziti TOTECO quitatiyayaj copali. Pampa san oncayaya caquihuili ma onca taixpamit ipan altepet Jerusalén. Huan Josías quitahuiso nopa taixpamit cati eltoya icalteno ichaj nopa hueyi tequitiquet Josué. Nojquiya quitahuiso nopa taixpamit cati eltoya ipan iarraves nopa caltemit campa nochi calaquij ipan altepet Jerusalén. ⁹ Pero nopa totajtziti cati tacajcaytoyaj ipan nopa taixpame cati eltoya campa hueli ipan tepeme ayecmo quinchahuili ma quinechcahuica itaixpa TOTECO ipan altepet Jerusalén. Pero quena, quinchahuiliyayaj ma quicuaca nopa pantzi cati amo quipiyayaya tasonejcyot inihuaya iniicnihua cati totajtziti.

¹⁰ Josías nojquiya quisosolo nopa taixpamit para nopa teteyot Tofet cati eltoya ipan nopa tacomoli cati itoca Benhinom para ayecmo quema aqui huelis quitatis ioquichpil o isihuapil nozona quej se nemacti para nopa teteyot Moloc. ¹¹ Nojquiya quinjcueni nopa cahuayojme cati nopa achtohui tanahuatiani ten tali Judá quitencahuiliyttoyaj. Nopa cahuayojme itztoyaj nechca campa nochi calaquij ipan itiopa TOTECO. Itztoyaj nechca icuarto se tequitiquet itoca Natánmelec cati imaco eltoya nopa cali. Nojquiya quintatijque nopa tatehuijca carrojme cati quimactilijtoyaj ne tonati para quihueyimatisé quej elisquía se dios.

¹² Huan nojquiya Tanahuatijquet Josías quintahuiso nopa taixpame cati nopa tanahuatiani ten tali Judá quinchijchijtoyaj icalcuitapa nopa tanahuatijquet campa yahuiyaya para mosiyajquetzas campa itoca icuarto Acáz. Nojquiya Josías quinsosolo nopa taixpame cati Tanahuatijquet Manasés quinchijchijqui ipan nopa ome calixpamit ten itiopa. Quinchijqui cuechtic huan nochi nopa taltepocti cati mocajqui quitepehuatoj ipan nopa hueyat Cedrón. ¹³ Nojquiya Tanahuatijquet Josías quinsosolo nopa taixpame cati eltoya ipan nopa seyoc lado ten altepet Jerusalén ica campa hualquisa tonati huan ica sur ten campa itoca Tepet Ten Tasosololisti. Nopa taixpame elqui cati Salomón, tanahuatijquet ten tali Israel huejcajquiya, quinchijchijqui para Astoret, nopa fiero taixcopincayot cati nopa sidonios quihueyimatiyayaj, huan para Quemos nopa fiero taixcopincayot ten nopa moabitame, huan para Milcom nopa fiero taixcopincayot ten nopa amonitame. ¹⁴ Huan quinchijqui cuechtic nopa teteyome ten tet huan quinsosolo nopa fiero taquetzalme ten nopa teteyot Asera, huan campa moquetzttoyaj nopa taixpame qitemiti ica inioymiyo mijcatzitzi para amo aqui mosemacas para quinnehcahuis.

¹⁵ Huan nojquiya Josías quisosolo nopa taixpamit huejcapa nepa ipan Betel cati Tanahuatijquet Jeroboam, icone Nabat, quichijqui quema quinxentiliyaya israelitame ma tajtacolchihuaca huan ma quihueyichihuaca TOTECO ica teteyome. Quinchijqui cuechtic nopa teteyome huan quintati nopa fiero taquetzalme para Asera. ¹⁶ Huan quema Josías tachiyayaya campa hueli, quiitac sequij mijcaostome nozona ipan nopa taixtemolis. Huan tanahuati ma quiquixtica nochi omit cati oncayaya ipan nopa mijcaostome huan ma quitatica ipan nopa taixpamit ipan Betel para ma quimahuispoloca nopa taixpamit. Quej nopa panoc cati Toteco Dios quijtojtoya ica itajtolpanextijcahua para panosquí huejcajquiya quema itztoya Tanahuatijquet Jeroboam. ¹⁷ Huan Tanahuatijquet Josías quijito:

—¿Taya tamanti tet ijcatoc nepa huan taya quijtohua itajcuilol?

Huan nopa masehualme ipan nopa altepet quinanquilijqque:

—Quijtohua para nepa campa quitojqque nopa tajtolpanextijquet cati hualajqui ten tali Judá huan tayolmelahuaco para teipa quitatisquíaj mijcaomiti ipan ni taixpamit nica ipan Betel, senquisa quej ta tijchijtoc ama.

¹⁸ Huajca Tanahuatijquet Josías tanahuati:

—Xijcahuaca. Ma amo aqui quiolini iomiyo.

Huan quej nopa quitepanitaque iomiyo huan nojquiya iomiyo nopa huehue tajtolpanextijquet cati hualajqui ten tali Samaria.

¹⁹ Teipa quej quichijtoya ipan Betel, Tanahuatijquet Josías quisosolo nochi nopa piltiocaltzitzi para taixcopincayome huan nopa taixpame huejcapa cati oncayaya ipan nochi nopa altepeme cati altepet Samaria quinnahuatía. Nopa piltiocaltzitzi quinchijchijque miyac huejhueyi tanahuatiani ipan tali Israel huan yeca tahuel quicualancamacaque TOTECO. ²⁰ Huan teipa Tanahuatijquet Josías quinnmicti nozona campa inintaixpa nochi nopa totajzitzi cati tacajcajttoyaj ipan nopa taixpame. Nojquiya quitatijque inioymiyo mijcatzitzi ipan nopa taixpame para quinnahuispolójque. Teipa Josías sempa mocuetqui ipan altepet Jerusalén.

Josías quielnamijqui nopa Pascua Ilhuit

(2 Cr. 35:1-19)

²¹ Teipa Tanahuatijquet Josías quichijqui se tanahuatili cati quijito: “Monequi nochi masehualme ma quielnamiquica nopa Pascua Ilhuit para

TOTECO Dios quej eltoc ijcuilijtoc ipan nopa amatapohuali ten nopa cananal sencahuali ica TOTECO.”

²² Amo quema quielnamictoyaj se Pascua Ilhuit quej ni ipan nochi xihuit quema itztoyaj nopa huejhueyi tanahuatiani ipan nopa tali Israel huan ipan tali Judá huan yon hasta huejcajquiya quema jueces tanahuatijayaj ipan tali Israel. ²³ Elqui quema Tanahuatijquet Josías yahuiyaya para 18 xihuit tanahuatis quema quielnamijque nopa Pascua Ilhuit iixpa TOTECO ipan altepet Jerusalén.

Josías quiquixti cati amo cuali

²⁴ Huan Tanahuatijquet Josías nojquiya quinmicti nochi tenahualhuiani huan tamatini. Quintamisosolo nochi taixcopincayome huan teteyome ipan techaj huan cati masehualme quinhueyichihuayayaj campá hueli ipan altepet Jerusalén huan ipan nochi tali Judá. Quichijqui ya ni para quitamichihuas nochi nopa tanahuatilme cati eltoc ijcuilijtoc ipan nopa amatapohuali cati quiajsitoya Hilcías, nopa hueyi totajtzi, ipan itiopa TOTECO. ²⁵ Amo quema oncatoya seyoc tanahuatijquet quej Josías cati moyolcuetqui, huan quitoquili TOTECO ica nochi iyolo, huan ica nochi itonal huan ica nochi ichicahualis. Huan quineltocac nochi itanahuatilhua Moisés. Yon teipa amo quema oncac seyoc quej ya.

²⁶ Huan masque Josías quichijqui nochi cati cuali, TOTECO noja quisenhuiquili cualani ica tali Judá ehuan por nochi cati fiero quichijqui Tanahuatijquet Manasés achtohuiya cati tahuel ica quicualancamacac. ²⁷ Huan yeca quijto TOTECO para quitahuelcahuas tali Judá quej quitahuelcajtoya tali Israel. Huan quitahuelcahuas altepet Jerusalén cati quitapejpenijtoya huan nopa tiopamiñ campá quijtojtoya para masehualme nopona ma quitapanitaca.

Imiquilis Josías (2 Cr. 35:20-27)

²⁸ Huan nopa sequinoc tamanti cati panoc ipan itequi Tanahuatijquet Josías huan nochi cati quichijqui eltoc ijcuilijtoc ipan nopa amatapohuali cati itoca Cati Quichijque Tanahuatiani Ipan Tali Judá. ²⁹ Ipan nopa tonali quema tequitiyaya Josías, nopa Tanahuatijquet Neco cati eliyaya Faraón ipan tali Egipto yajqui hasta nopa hueyat Eufrates para quipalehuiti nopa tanahuatijquet ten tali Asiria. Huan Tanahuatijquet Josías yajqui inihuaya soldados para quintehuiti, pero Tanahuatijquet Neco quimicti Josías quema monamijque ipan Meguido. ³⁰ Huan itequipanojcahua Josías quitelijque itacayo ipan se tatehuijca carro huan quihuicaque ten Meguido hasta altepet Jerusalén. Huan quitaltojque campá quicualtalijtoyaj para ya. Huajca nopa masehualme quitzonaltijque ica aceite Joacaz, icone Josías, huan quichijque tanahuatijquet.

Joacaz tanahuati eyi metzti ipan Judá (2 Cr. 36:1-4)

³¹ Huan Tanahuatijquet Joacaz quipiyayaya 23 xihuit quema pejqui tanahuatía ipan altepet Jerusalén huan tanahuati eyi metzti. Inana itoca eliyaya Hamutal iichpoca Jeremías ten altepet Libna. ³² Pero Tanahuatijquet Joacaz quichijqui cati amo cuali iixpa TOTECO quej ihuejcapan tatahua quichijque. ³³ Huan Tanahuatijquet Neco, cati eliyaya Faraón ipan tali Egipto, quitzajqui Joacaz ipan altepet Ribla ipan tali Hamat para ayecmo huelis tanahuatis ipan Jerusalén. Nojquiya Neco quinchihualti tali Judá

ehuani ma taxtahuaca 33 kilos ten plata huan 33 kilos ten oro quej impuesto. ³⁴ Huan nopa Faraón Necao quitali Eliaquim, seyoc icone Josías, para elis tanahuatijquet. Pero Necao quitocaxpatac Eliaquim huan quitocaxti Joacim. Huan Joacac cati Necao quipixtoya tzactoc, quihuicac hasta tali Egipto huan nopona mijqui. ³⁵ Huan Joacim quintajtani nopa masehualme ipan Judá ma taxtahuaca impuestos quej imiyaca nopa ricojyot cati sesen quipiyayaya. Teipa quimacac nopa plata huan oro Faraón Necao huan quej nopa huelqui quitaxtahui nopa impuesto cati quintajtaniytoya.

Joacim tanahuati ipan tali Judá
(2 Cr. 36:5-8)

³⁶ Huan Tanahuatijquet Joacim quipiyayaya 25 xihuit quema pejqui tanahuatía huan tanahuati ipan altepet Jerusalén 11 xihuit. Huan inana itoca eliyaya Zebuda huan yaya eliyaya iichpoca Pedafías ten altepet Ruma. ³⁷ Pero Joacim quichijqui cati amo cuali iixpa TOTECO senquisu quej ihuej-capan tatahua quichijtoyaj.

24

Joacim monejqui quitaxtahuís tomi Nabucodonosor

¹ Ipan nopa tonali quema tanahuatiyaya Joacim ipan tali Judá, Tanahuatijquet Nabucodonosor ten tali Babilonia hualajqui ica isoldados huan calajque ipan tali Judá. Huan Joacim motemactili ica ya. Huaajca elqui itequipanojca huan quichijqui nochi cati quinahuati para eyi xihuit. Pero teipa Tanahuatijquet Joacim mosentanchijqui ica Nabucodonosor para tali Judá ma ayecmo elto imaco. ² Pero TOTECO quintitanqui ipan tali Judá miyaqui soldados cati caldeos, sirios, moabitame huan amonitame para tachtequise huan para quisosolose tali Judá quej tayolmelajqui ica itajtolpanextijcahua * para panos. ³ Melahuac nochi ya ni ipantic tali Judá pampa TOTECO tanahuatijtoyaya para quej ni ma pano, pampa quinequiyaya quitahuelcahuas tali Judá por itajtacolhua Tanahuatijquet Manasés. ⁴ Pampa Manasés quinmicti miyaqui masehualme cati amo teno quichijtoyaj huan elqui quej quitemiti altepet Jerusalén ica esti iixpa TOTECO. Huan yeca TOTECO ayecmo quinejqui quintapojpolhuis Judá ehuaní.

Imiquilis Joacim

⁵ Nopa sequinoc tamanti cati panoc ipan itequi Tanahuatijquet Joacim huan nochi cati quichijqui eltoc ijcuilijtoc ipan nopa amatapohualí cati itoca Cati Quichijque Nopa Tanahuatiani Ipan Tali Judá. ⁶ Huan quema mijqui Joacim, pejqui tanahuatia icone cati itoca eliyaya Joaquín. ⁷ Huan teipa ayecmo quema mocuetqui nopa tanahuatijquet ten tali Egipto ipan tali Judá. Pampa ama nopa Tanahuatijquet ten tali Babilonia moaxcatijtoya nopa tali ten nopa atajti ten tali Egipto hasta nopa hueyat cati itoca Eufrates.

Joaquín tanahuati ipan tali Judá
(2 Cr. 36:9-10)

⁸ Huan Tanahuatijquet Joaquín quipiyayaya 18 xihuit quema pejqui tanahuatía huan tanahuati ipan altepet Jerusalén eyi metzti. Inana itoca eliyaya Nehusta iichpoca Elnatán ten Jerusalén. ⁹ Huan Joaquín quichijqui cati amo cuali iixpa TOTECO quej quichijtoya itata.

* 24:2 24:2 Isaías, Miqueas, Habacuc huan Jeremías tayolmelajtoyaj para panos ni tamanti.

¹⁰ Ipan itequi Tanahuatijquet Joaquín ten tali Judá, isoldados Tanahuatijquet Nabucodonosor ten tali Babilonia ajsicoj huan quiyahualojque altepet Jerusalén huan pejqe quitehuáj. ¹¹ Huan quema quitehuiyayaj nopa altepet, ajsitihuetzico Tanahuatijquet Nabucodonosor. ¹² Huajca Tanahuatijquet Joaquín ipan Jerusalén quisqui ten nopa altepet ihuaya inana, itequipanojcahua, huan nochi itapalehuijcahua para quínamiquse nopa tanahuatijquet ten tali Babilonia huan motemacfilise ica ya. Huan Tanahuatijquet Nabucodonosor quinitzqui huan quinilpi. Tanahuatijquet Nabucodonosor yahuiyaya para chicueyi xihuit tanahuatía ipan Babilonia quema quiitzqui Tanahuatijquet Joaquín. ¹³ Huan quej TOTECO quiijtojtoya para mochihuas, Nabucodonosor quiquixti nochi cati yejyetzti huan patiyó ipan itiopa TOTECO huan ipan ichaj nopa tanahuatijquet huan quihuicac ipan ital. Huan nopa huejhueyi tamanti ten oro cati huejcajquiya Salomón, nopa tanahuatijquet ten nochi israelitame, quichijchijtoya ipan tiopamit monejqui quintejtejqe para huelque quínhuicaque. ¹⁴ Huan Tanahuatijquet Nabucodonosor quínhuicac 10 mil masehualme ilpitoque ten altepet Jerusalén. Inihuaya itztoyaj nochi tayacanani ipan nopa tali, huan nochi tayacanca soldados, calchihuani huan teposchihuani. Huajca san mocajque ipan tali Judá nopa masehualme cati más teicneltziti, huan cati amo teno quimatij quichihuase.

¹⁵ Huajca nopa Tanahuatijquet Nabucodonosor quínhuicac ilpitoque Tanahuatijquet Joaquín, ihuaya inana, isihuahua, itapalehuijcahua huan nopa masehualme cati más tayacanayayaj ipan nopa tali Judá hasta ital cati itoca Babilonia. ¹⁶ Para nochi quínhuicac 7 mil soldados cati más yajatij huan mil calchihuani huan teposchihuani cati más quimatiyayaj, huan nochi masehualme cati más tetique para yase ipan tatehuilisti. ¹⁷ Teipa Tanahuatijquet Nabucodonosor ten tali Babilonia quitequimacac Matanías para elis tanahuatijquet ipan tali Judá huan quitocaxpatac huan quitocaxti Sedequías. Tanahuatijquet Matanías o Sedequías eliyaya itío Tanahuatijquet Joaquín cati Nabucodonosor quihuicac ilpitoc ipan Babilonia.

Sedequías tanahuati ipan tali Judá
(2 Cr 36:11-16; Jer 52:1-3)

¹⁸ Sedequías quipiyayaya 21 xihuit quema pejqui tanahuatía, huan tanahuati ipan altepet Jerusalén 11 xihuit. Inana itoca eliyaya Hamutal iichpoca Jeremías ten altepet Libna. ¹⁹ Pero Tanahuatijquet Sedequías quichijqui cati amo cuali iixpa TOTECO quej quichijtoya ihueyi tata, Joacim. ²⁰ Huajca ica ni tamanti fiero cati quichijtoya, cualanqui TOTECO ica altepet Jerusalén huan tali Judá ehuan huan quiijo quintahuelcahuas huan ya nopa quichijqui.

Teipa Tanahuatijquet Sedequías mosisini ica nopa Tanahuatijquet Nabucodonosor ten tali Babilonia para ayecmo quitequipanos.

25

Huetzqui Jerusalén imaco Nabucodonosor
(Jer 39:1-7; 52:3-11)

¹ Huajca ipan 10 itequi nopa metzti majtacti ipan toisraelita calendario*, quema Tanahuatijquet Sedequías yahuiyaya para chichnahui xihuit ipan itequi, Tanahuatijquet Nabucodonosor ten Babilonia hualajqui ica nochi

* 25:1 25:1 Ipan 15 itequi enero ipan tocalendario ten ama.

isoldados para quitehuis altepet Jerusalén. Huan quiyahualojque nopa altepet huan pejqque quitemaj tali iixmelac nopa tepamit para quichijchi-huase se taixtejcolis para huelis panose iixco nopa huejcapantic tepamit cati quiyahualojtoyta nopa altepet. ² Huan nopona mocajque isoldados quiyahualojtoyaj itepa nopa altepet hasta quema Tanahuatijquet Sedequías yahuiyaya para 11 xihuit tanahuatis huan cati tzactoyaj nozona amo quincahuayayaj ma quicalaquica tacualisti. ³ Huan ipan 9 itequi nopa nahui metzti ipan toisraelita calendario[†], nochi masehualme ya apismiquiyayaj ipan nopa altepet pampa ya tantoya nochi tacualisti. ⁴ Huajca nopa Jerusalén ehuan quicoyonijque nopa tepamit huan masque nopa soldados quiyahualojtoyaj nopa altepet, nopa tanahuatijquet ten Jerusalén huan nochi isoldados cholojque ten nopa altepet ica tayohua para amo apismiquise. Huan quisque ipan nopa caltemit cati eltoya tatajco ten nopa ome tepamit iica ixochimil nopa tanahuatijquet, huan cholojtejqque. Huan quixcotonque nopa mila huan yajque ipan ojti para nopa hueyat Jordán. ⁵ Pero nopa soldados ten Babilonia quintoquilijque huan quiajsitoj Tanahuatijquet Sedequías ipan nopa tamayamit ten Jericó. Huan nochi isoldados ya quitahuelcajttoyaj huan mosemantoyaj campa hueli. ⁶ Huan nopa Babilonia soldados quiitzquijque Sedequías huan quihuicaque campa itztoya Tanahuatijquet Nabucodonosor ten Babilonia ipan altepet Ribla. Nopona Nabucodonosor quinpo huili taya tatzacuiliti quiselisquía Sedequías. ⁷ Huan nopa Tanahuatijquet Nabucodonosor tanahuati ma quinmictica nochi iconehua Sedequías iixpa para Sedequías ma quiita. Huan teipa quiijto ma quiquixtilica iixteyolhua Sedequías huan ma quuilpica ica tepos cadena para ma nejnemi hasta tali Babilonia.

Quisosolojqque itiopa TOTECO
(2 Cr. 36:17-21; Jer. 39:8-10; 52:12-30)

⁸ Ipan 7 itequi nopa macuili metzti ipan toisraelita calendario[‡], quema Tanahuatijquet Nabucodonosor yahuiyaya para 19 xihuit tanahuatis, ajsico Nabuzaradán ipan altepet Jerusalén. Yaya eliyaya itemach cati más hueyi nopa tanahuatijquet ten Babilonia huan itayacanca soldado. ⁹ Huan yaya quitati ihueyi tiopa TOTECO huan icaltanahuatil nopa tanahuatijquet huan nochi calme cati oncayaya nozona. Nochi cati cuali quitati. ¹⁰ Huan nopa hueyi tayacanquet Nabuzaradán quinyacanque nochi soldados ten Babilonia para quitahuisojque nopa tepamit cati ica moyahualojtoyta altepet Jerusalén. ¹¹ Teipa Nabuzaradán itemach nopa tanahuatijquet quinhuicac ilpitoque nochi masehualme cati noja mocajttoyaj ipan altepet, ihuaya nochi sequinoc masehualme huan soldados cati ya motemacatoyaj para quitequipanose nopa tanahuatijquet ten Babilonia. ¹² Pero nopa tequitijquet, Nabuzaradán, quincahuili sequij cati tahuel teicneltziti ma mocahuaca ipan tali Judá para ma tequitica ipan nopa mili huan xocomeca mili ipan nopa tali.

¹³ Huan nopa Babilonia ehuan quinpostejque nopa huejhueyi taquetzalme ten bronce cati eltoya ipan ichaj TOTECO, ihuaya nopa carretillas ica llantas ten bronce. Nojquiya quinpostejque nopa hueyi paila cati itoca “hueyi at” cati quichijtoyaj ica bronce. Huan nochi bronce quihuicaque para tali Babilonia. ¹⁴ Huan nojquiya quihuicaque nopa teposti cati ipan quitemaj cuajnexti, huan nopa palas, huan nopa hueyi tepos cucharas cati

[†] 25:3 25:3 Ipan 14 itequi agosto ipan tocalendario ten ama. [‡] 25:8 25:8 Ipan 14 itequi agosto ipan tocalendario ten ama.

ica quisehuiyayaj taahuili, huan trastes huan nochi sequinoc tamanti ten bronce cati quitequihuiyayaj quema quimacayayaj tacajcahualisti TOTECO. ¹⁵ Huan nojquiya nopa tayacanquet ten soldados quihuicac nochi teposti para ticoli huan copali cati quichijtoyaj ica oro o ica plata.

¹⁶ Nopa ome taquetzalme, huan hueyi paila cati itoca nopa Hueyi At, huan nopa carretillas ica llantas para quihualicase at, amo huelque quintamachihuase inietica pampa tachel nelpano etic. Nochi ni tamanti Tanahuatijquet Salomón quichijchijtoya para ichaj TOTECO. ¹⁷ Ihuejcapanca sesen taquetzali eliyaya quipano chicueyi metro. Huan quipiyayaya iyejyejca cati nojquiya elqui senquisa bronce. Huan iyejyejca cati quipixtoya huejcapa yahualtic nopa taquetzali quipanoyaya ome metro ihuejcapanca. Huan ipan iyejyejca quipixqui granadas cati quichijchijtoya ten bronce huan nojquiya quej nopa eliyaya nopa seyoc taquetzali.

Itanahuatilis Seraías

¹⁸ Huan nopa tayacanquet ten isoldados Nabucodonosor nojquiya quihuicac nopa hueyi totajtzi Seraías, huan nopa teipa totajtzi cati itoca Sofonías, huan nopa eyi tacame cati más huejhueyi cati quimocuitahuiyayaj icalte nopa tiopamit. ¹⁹ Huan ten nopa masehualme cati noja motatiyayaj ipan altepet, quipanti se tayacanquet ten soldados huan macuiliti masehualme cati quiconsejomacayayaj nopa tanahuatijquet. Nojquiya quipanti nopa tayacanca tajcuilojquet ten soldados cati quinijcuilohuayaya nochi tacame quema mochihuayayaj soldados ipan nopa tali huan inihuaya quinpanti seyoc 60 masehualme. ²⁰ Nabuzaradán, nopa tayacanquet ten soldados, quihuicac nochi ipan altepet Ribla ipan tali Hamat campa itztoya Tanahuatijquet Nabucodonosor ten tali Babilonia. ²¹ Huan yaya quintamicoco hasta quinmicti nozona ipan Ribla ten tali Hamat. Quej nopa elqui quema quinquixtijque Judá ehuan ten inintal huan quinquicaque ilpitoque para Babilonia.

Miyaqui israelitame cholojteque hasta Egipto (Jer. 40:7-10; 41:1-3, 16-18)

²² Huan Nabucodonosor nopa tanahuatijquet ten Babilonia quitali Gedalías cati eliyaya icone Ahicam huan iixhui Safán para ma eli inigobernador nopa quentzi masehualme cati quincajqui ipan tali Judá. ²³ Huan quema nopa tayacanani huan inisoldados cati mosemantoyaj huan motatijtoyaj campa hueli ipan tali Judá quicajque para Gedalías eliyaya gobernador, yajque ipan altepet Mizpa para ihuaya camanaltise. Nojquiya itztoya inihuaya Ismael, icone Netanías; Johanán, icone Carea; Seraías, icone Tanhumet ten altepet Netofa; huan Jaazanías, icone se tacat ten altepet ipan Maaca. Huan inihuaya itztoyaj miyac inisoldados. ²⁴ Huajca Gedalías tatestigojquetzqui huan quinilhui sinta motemacasquía; ica nopa Babilonia ehuan huan quichihuasquía; nochi cati quinilhuisquía; huajca nochi elisquía cuali huan quincahuilisquía; ma moca huaca ipan inintal.

Quimictijque Gedalías

²⁵ Pero ipan metzti chicome ipan toisraelita calendario[§], yajqui altepet Mizpa nopa tacat cati itoca Ismael, icone Netanías huan iixhui Elisama, huan cati eliyaya se ininteixmatca nopa tanahuatiani cati achtohuiya itztoyaj.

§ 25:25 25:25 Ipan octubre o noviembre ipan tocalendario ten ama.

Huan Ismael quinhuicac majtacti ihuampoyohua huan quimictijque gobernador Gedalías huan nochi tacame cati itzttoyaj ihuaya masque tali Judá ehuani o tali Babilonia ehuani.

²⁶ Huajca cholojtejqe nochi nopa tali Judá ehuani cati noja mocajque, masque cati más teicneltzitzí o cati más huejhueyi. Huan no cholojtejqe nopa tayacanani ten soldados cati mocajque. Huan nochi yajque ipan tali Egipto pampa tahuel quinimacasiyayaj nopa Babilonia ehuani.

*Quicahuili Joaquín ma itzto majcajtoc ipan tali Babilonia
(Jer. 52:31-34)*

²⁷ Huan quema Tanahuatijquet Joaquín yahuiyaya para 37 xihuit para quihuicatoyaj hasta tali Babilonia, pejqú teqúiti ipan Babilonia se yancuic tanahuatijquet cati itoca Evil Merodac. Huan yaya quitasojtac Tanahuatijquet Joaquín huan quiquixti ipan tatzacti huan quicajqui majcajtoc ipan 27 itequi nopa metzti doce ipan toisraelita calendario*. ²⁸ Huan quicamanalhui ica yejyetzí, huan quicahuili ma mosehui campa quipiyayaya más tatepanitacayot que nopa sequinoc tanahuatiani cati quintantoyaj huan quihuicatoyaj tali Babilonia. ²⁹ Huan quimacac iyoyo cati yancuic quej ipataca cati quitequihuiyaya ipan tatzacti. Huan quicahuili ma tacua ihuaya mojmosta para nochi inemilis. ³⁰ Nojqúiya nopa tanahuatijquet quimacayaya tacualisti huan cati monequi para mopanolitis hasta mijqui.

* **25:27** 25:27 Ipan 2 itequi abril ipan tocalendario ten ama.

1 Crónicas

Quenicatzta tacajtiyajque masehualme ten Adán hasta Noé
(Gn. 5:1-32)

- ¹ Nopa achtohui tacat cati itztoya, itoca eliyaya Adán.
Huan teipa quipixqui icone cati itoca Set.
Huan Set teipa quipixqui icone cati itoca Enós.
Huan Enós teipa quipixqui icone cati itoca Cainán.
² Huan Cainán teipa quipixqui icone cati itoca Mahalaleel.
Huan Mahalaleel teipa quipixqui icone cati itoca Jared.
Huan Jared teipa quipixqui icone cati itoca Enoc.
³ Huan Enoc teipa quipixqui icone cati itoca Matusalén.
Huan Matusalén teipa quipixqui icone cati itoca Lamec.
Huan Lamec teipa quipixqui icone cati itoca Noé.

Iconehua Noé
(Gn. 10:1-32)

- ⁴ Huan Noé quinpixqui iconehua cati quintocaxtiyajaj: Sem, Cam huan Jafet.

Iconehua huan iixhuihua Jafet

- ⁵ Huan Jafet quinpixqui iconehua cati quintocaxtiyajaj: Gomer, Magog, Madai, Javán, Tubal, Mesec huan Tiras.
⁶ Huan Gomer quinpixqui iconehua cati quintocaxtiyajaj: Askenaz, Rifat huan Togarma.
⁷ Huan Javán quinpixqui iconehua cati quintocaxtiyajaj: Elisa, Tarsis, Quitim huan Dodanim.

Iconehua huan iixhuihua Cam

- ⁸ Huan Cam quinpixqui iconehua cati quintocaxtiyajaj: Cus, Mizraim, Canaán huan Fut.
⁹ Huan Cus quinpixqui iconehua cati quintocaxtiyajaj: Seba, Havila, Sabta, Raama huan Sabteca.
Huan Raama quinpixqui iconehua cati quintocaxtiyajaj Seba huan Dedán.
¹⁰ Nojquiya Cus quipixqui seyoc icone cati itoca Nimrod. Nochi campa hueli ipan taltipacti quiixmatiyajaj Nimrod quej se tacat ica miyac chichahualisti.
¹¹ Huan ten Mizraim hualajque ipan nopa xinachti masehualme cati quintocaxtiyajaj: ludimeos, anameos, lehabeos, naftureos, ¹² patruseos, caftoreos huan caslueos. Huan teipa ten inixhuihua nopa caslueos hualajque nopa filisteos.
¹³ Huan Canaán quinpixqui iconehua cati quintocaxtiyajaj Sidón huan Het. ¹⁴ Huan Canaán nojquiya elqui inihuejcapan tata nopa tamanti masehualme cati quintocaxtiyajaj: jebuseos, amorreos, gergeseos, ¹⁵ heveos, araceos, sineos, ¹⁶ arvadeos, zemareos huan nopa hama-teos.

Iconehua huan iixhuihua Sem

- ¹⁷ Huan Sem quinpixqui iconehua cati quintocaxtiyajaj: Elam, Asur, Arfaxad, Lud, Aram, Uz, Hul, Geter huan Mesec.
¹⁸ Huan Arfaxad quipixqui se icone cati itoca Sela. Huan Sela quipixqui icone cati itoca Heber.

- 19 Huan Heber quinpixqui ome iconehua. Se itoca eliyaya Peleg huan seyoc Joctán. Quitocaxti icone Peleg (Peleg quinequi quijitos Motajcox-elotoc.) pampa ipan nopa tonali quema itztoyaj, moxelo taltipacti.
 20 Joctán quinpixqui iconehua cati quintocaxtiyayaj: Almodad, Selef, Hazar Mavet, Jera, 21 Adoram, Uzal, Dicla, 22 Ebal, Abimael, Seba, 23 Ofir, Havila huan Jobab. Nochi ni tacame eliyayaj iconehua Joctán.

Iixhuihua Sem
 (Gn. 11:10-26)

- 24 Huan Sem, icone Adán, quipixqui se icone cati quitocaxtiyayaj Arfaxad. Huan Arfaxad quipixqui icone cati quitocaxtiyayaj Sela. Huan Sela quipixqui icone cati quitocaxtiyayaj Heber.
 25 Huan Heber quipixqui icone cati quitocaxtiyayaj Peleg. Huan Peleg quipixqui icone cati quitocaxtiyayaj Reu. Huan Reu quipixqui icone cati quitocaxtiyayaj Serug.
 26 Huan Serug quipixqui icone cati quitocaxtiyayaj Nacor. Huan Nacor quipixqui icone cati quitocaxtiyayaj Taré.
 27 Huan Taré quipixqui icone cati quitocaxtiyayaj Abram cati teipa quitocaxtijque Abraham.

Icanehua Abraham
 (Gn. 25:1-6, 12-18)

- 28 Huan Abraham quinpixqui iconehua cati quintocaxtiyayaj Isaac huan Ismael.

Iixhuihua Abraham ica Ismael

- 29 Huan Ismael quinpixqui iconehua cati quintocaxtiyayaj: Nebaiot cati elqui achtohui ejquet, huan teipa Cedar, Adbeel, Mibsam, 30 Misma, Duma, Massa, Hadad, Tema, 31 Jetur, Nafis huan Cedema. Ni tacame eliyayaj iconehua Ismael.

Iixhuihua Abraham ica Cetura

- 32 Huan Abraham teipa quinpixqui más iconehua ica isihua tequipanojca, Cetura. Huan quintocaxtiyayaj iconehua: Zimram, Jocsán, Medán, Madián, Isbac huan Súa.
 Huan Jocsán quinpixqui iconehua cati quintocaxtiyayaj Seba huan Dedán.
 33 Huan Madián quinpixqui iconehua cati quintocaxtiyayaj: Efa, Efer, Hanoc, Abida huan Elda. Nochi ya ni elque iixhuihua Cetura ihuaya Abraham.

Iixhuihua Abraham ica Sara
 (Gn. 36:1-43)

- 34 Abraham quipixqui se icone cati itoca eliyaya Isaac. Huan Isaac quinpixqui ome iconehua cati inintoca eliyayaj Esaú huan Israel.

Icanehua huan iixhuihua Esaú

- 35 Huan Esaú quinpixqui iconehua cati inintoca eliyayaj: Elifaz, Reuel, Jeús, Jaalam huan Coré.
 36 Huan Elifaz quinpixqui iconehua cati inintoca eliyayaj: Temán, Omar, Zefo, Gatam, Cenaz, Timna huan Amalec.
 37 Huan Reuel quinpixqui iconehua cati inintoca eliyayaj: Nahat, Zera, Sama huan Miza.
 38 Huan Esaú cati nojquiya itoca Seir iyoca quinpixqui sequinoc iconehua cati inintoca eliyayaj: Lotán, Sobal, Zibeón, Aná, Disón, Ezer huan Disán.

- 39 Huan Lotán icone Esaú quinpixqui iconehua: Hori huan Homan. Huan Lotán quipixqui isihua icni cati itoca Timna.
- 40 Huan Sobal quinpixqui iconehua cati inintoca eliyayaj: Alván, Manahat, Ebal, Sefo huan Onam.
- Huan Zibeón quinpixqui iconehua cati inintoca eliyayaj Aja huan Aná.
- 41 Huan Aná quipixqui se icone cati itoca eliyaya Disón.
- Huan Disón quinpixqui iconehua cati inintoca eliyayaj: Amram, Esbán, Itrán huan Querán.
- 42 Huan Ezer quinpixqui iconehua cati inintoca eliyayaj: Billhán, Zaaván huan Jaacán.
- Huan Disán quinpixqui iconehua cati inintoca eliyayaj Uz huan Arán.

Nopa tanahuatiani ipan tali Edom

(Gn. 36:1-43)

- 43 Nica eltoc inintoca nopa tanahuatiani cati tanahuatijque ipan tali Edom quema nopa israelitame ayemo quipixtoyaj inintanahuatijca.
- Nopa achtohui tanahuatijquet elqui Bela, icone Beor. Yaya tanahuati ipan altepet Dinaba.
- 44 Quema Bela mijqui, pejqui tanahuatía Jobab, icone Zera, cati ehuyaya ipan altepet Bosra.
- 45 Huan quema mijqui Jobab, pejqui tanahuatía Husam cati hualayaya ten inintal nopa temanita masehualme.
- 46 Huan quema mijqui Husam, pejqui tanahuatía Hadad * cati elqui icone Bedad. Hadad quintzontamilti nopa soldados ten Madián nopona ipan tali Moab. Hadad mosehui para tanahuatis ipan altepet Avit.
- 47 Quema Hadad † mijqui, pejqui tanahuatía Samla cati ehuyaya ipan altepet Masreca.
- 48 Quema Samla mijqui, pejqui tanahuatía Saúl cati ehuyaya ipan altepet Rehobot cati eltoc nechca nopa hueyat Eufrates.
- 49 Huan quema mijqui Saúl, pejqui tanahuatía Baal Hanán cati elqui icone Achor.
- 50 Huan quema mijqui Baal Hanán, pejqui tanahuatía Hadad‡. Hadad mosehui para tanahuatis ipan altepet Pai huan quipixqui isihua cati itoca Mehetabel iichpoca Matred huan iixhui Mazaab.
- 51 Huan quema Hadad § mijqui, pejqui tanahuatijtiyahuij ipan tali Edom nopa tayacanani cati inintoca eliyayaj: Timna, Alva, Jetet, 52 Aholibama, Ela, Pinón, 53 Cenaz, Temán, Mibzar, 54 Magdiel huan Iram. Nochi ni tacame elque tanahuatiani ipan tali Edom.

2

Iconehua Israel

(Gn. 35:22-26)

- 1 Huejcajquiya Israel quinpixqui iconehua cati inintoca eliyayaj: Rubén, Simeón, Leví, Judá, Isacar, Zabulón, 2 Dan, José, Benjamín, Neftalí, Gad huan Aser.

Iixhuihua Judá

- 3 Huan Judá mosihuajti ica Betsúa cati elqui iichpoca Súa ten tali Canaán. Huan Judá huan Betsúa quinpixque inintelpocahua cati inintoca

* 1:46 1:46 Hadad I ten Edom. † 1:47 1:47 Hadad I. ‡ 1:50 1:50 Hadad II. § 1:51 1:51 Hadad II.

elijayaj: Er, Onán huan Sela. Pero Er, cati achtohui ejquet, quichijqui cati fiero iixpa Toteco huan yeca TOTECO quimicti. ⁴ Huan miyac xihuit teipa Tamar, isihua cahual Er, quiconemacac iyextat, Judá. Huan quintacatilti cuateme cati inintoca eliyayaj Fares huan Zera. Huajca para nochi, Judá quinpixqui macuilti iconehua.

⁵ Huan Fares quinpixqui iconehua cati inintoca eliyayaj Hezrón huan Hamul.

⁶ Huan Zera quinpixqui macuilti iconehua cati inintoca eliyayaj: Zimri, Etán, Hemán, Calcol huan Dara.

⁷ Zera quipixqui se iixhui itoca Carmi. Huan Carmi quipixqui icone cati quitocaxtiyayaj Acán cati quichijqui ma huala tatzacuilitli ipan nochi israelitame pampa moaxcati tamanti cati Toteco tanahuatijtoya ma quitamisosoloca.

⁸ Etán quipixqui icone cati itoca eliyaya Azarías.

⁹ Huan Hezrón quinpixqui iconehua cati inintoca eliyayaj Jerameel, Ram huan Quelubai.

Iconehua Ram icone Hezrón

¹⁰ Huan Ram quipixqui icone cati itoca Aminadab. Huan Aminadab quipixqui icone cati itoca Naasón cati elqui inintoyacanca nochi iixhuihua Judá.

¹¹ Huan Naasón quipixqui se icone cati itoca Salmón. Huan Salmón quipixqui se icone cati itoca Booz.

¹² Huan Booz quipixqui icone cati itoca Obed. Huan Obed quipixqui se icone itoca Isaí.

Itelpocahua Isaí

¹³ Huan Isaí quipixqui iachtohui telpoca cati itoca eliyaya Eliab. Huan teipa tacajtijayque iconehua cati inintoca Abinadab, Simea, ¹⁴ Natanael, Radai, ¹⁵ Ozem huan teipa David. ¹⁶ Huan ten san se isihua, Isaí nojquiya quinpixqui ome iichpocahua cati inintoca eliyayaj Sarvia huan Abigail. Huan nopa ichpocat, Sarvia, quinpixqui eyí iconehua cati inintoca eliyayaj: Abisai, Joab huan Asael. ¹⁷ Huan Abigail mocuili Jeter cati elqui se iixhui Ismael huan quipixque se inintelpoca cati itoca eliyaya Amasa.

Itelpocahua Caleb icone Hezrón

¹⁸ Huan Caleb quinpixqui ome isihuajhua; se itoca Azuba huan nopa seyoc itoca Jeriot. Huan Caleb ihuaya Azuba quinpixque inintelpocahua cati inintoca eliyayaj: Jeser, Sobab huan Ardón. ¹⁹ Teipa quema Azuba mijqui, Caleb mocuili Efrata. Huan Efrata quipixqui icone cati itoca Hur.

²⁰ Huan Hur quipixqui se icone cati itoca Uri.

Huan Uri quipixqui icone cati itoca Bezaleel.

²¹ Quema Hezrón quipiyayaya 60 xihuit, mocuili iichpoca se tacat cati itoca Maquir, huan quipixqui se icone cati itoca Segub. Nopa tacat Maquir nojquiya quipixqui se icone cati itoca Galaad. ²² Segub quipixqui se icone cati itoca Jair cati quinnahuati 23 altepeme ipan tali Galaad. ²³ Pero Gesur huan Aram moaxcatijque nochi ialtepehua Jair. Huan nojquiya, moaxcatijque nopa altepet Kenat ihuaya 60 ipilaltepehua cati quiyahualojtoyaj. Nochi ya ni elque iconehua Maquir cati itata Galaad.

24 Quema Hezrón, itata Caleb, ya mictoya ipan altepet Caleb ipan tali Efrata, isihua Hezrón cati quitocaxtiyayaj Abías quitacatiltili se oquichpil cati itoca Asur. Huan quema motacachijqui Asur quipixqui se icone cati itoca Tecoa.

Itelpocahua Jerameel

25 Jerameel iachtohui cone Hezrón quinpixqui iconehua cati inintoca eliyaya: Ram iachtohui ejca, teipa Buna, Orén, Ozem huan Ahías.

26 Nojquiya Jerameel quipixqui seyoc isihua cati itoca Atara, huan Atara quipixqui icone cati itoca Onam.

27 Ram icone Hezrón quinpixqui iconehua cati inintoca eliyaya: Maaz, Jamín huan Eguer.

28 Onam, iixhui Hezrón, quinpixqui iconehua cati inintoca eliyaya Samai huan Jada.

Huan Samai quinpixqui iconehua cati inintoca eliyaya Nadab huan Abisur.

29 Abisur huan isihua Abihail quinpixque ininconeua cati inintoca eliyayaj Ahbán huan Molid.

30 Nadab quinpixqui iconehua cati inintoca eliyaya Seled huan Apaim. Seled mijqui, yon amo quinpixqui iconehua.

31 Huan Apaim quipixqui se icone cati itoca Isi. Huan Isi quipixqui icone cati itoca Sesán. Huan Sesán quipixqui se icone cati itoca Ahlai.

32 Jada, iicni Samai, quinpixqui ome iconehua cati inintoca eliyaya Jeter huan Jonatán. Huan Jeter mijqui, yon amo quinpixqui iconehua.

33 Pero Jonatán, quena, quinpixqui ome iconehua.

Se itoca Pelet huan nopa seyoc itoca Zaza.

Ya ni elque iconehua Jerameel.

34 Sesán amo quinpixqui telpocame, san quinpixqui ichpocame. Nojquiya quipixqui se itelpoca tequipanojca cati itoca Jarha ten tali Egipto.

35 Huan Sesán quimacac se iichpoca para ma eli isihua Jarha huan injuanti quipixque se inincone cati itoca Atai.

36 Huan Atai quipixqui se icone cati itoca Natán.

Huan Natán quipixqui se icone cati itoca Zabad.

37 Huan Zabad quipixqui icone cati itoca Eflal.

Huan Eflal quipixqui icone cati itoca Obed.

38 Huan Obed quipixqui se icone cati itoca Jehú.

Huan Jehú quipixqui se icone cati itoca Azarías.

39 Huan Azarías quipixqui icone cati itoca Heles.

Huan Heles quipixqui icone cati itoca Elasa.

40 Huan Elasa quipixqui icone cati itoca Sismai.

Huan Sismai quipixqui icone cati itoca Salum.

41 Huan Salum quipixqui icone cati itoca Jecamías.

Huan Jecamías quipixqui icone cati itoca Elisama.

Familias ipan iixhuihua Caleb

42 Caleb, iicni Jerameel, quipixqui icone cati itoca eliyaya Mesa cati achtohui ejquet huan quipixqui seyoc icone cati itoca eliyaya Maresa cati teipa ejquet. Huan Mesa teipa elqui itata Hebrón.

43 Huan Hebrón quinpixqui iconehua cati inintoca eliyaya: Coré, Tapúa, Requem huan Sema.

44 Sema quipixqui icone cati itoca Raham.

Huan Raham quipixqui se icone cati itoca Jorcoam. Huan Requem quipixqui icone cati itoca Samai.

- ⁴⁵ Huan Samai quipixqui se icone cati itoca Maón.
Huan Maón quipixqui icone cati itoca Bet Sur.
- ⁴⁶ Huan Efa, isihua tequipanojca Caleb, quinpixqui iconehua cati inintoca eliyayaj Harán, Mosa huan Gazez. Huan Harán quipixqui icone cati nojquiya itoca Gazez.
- ⁴⁷ Huan Jahdai quinpixqui iconehua cati inintoca eliyaya: Regem, Jotam, Gesam, Pelet, Efa huan Saaf.
- ⁴⁸ Huan Caleb quipixqui seyoc isihua tequipanojca cati itoca Maaca, huan yaya quinpixqui iconehua cati inintoca eliyayaj Seber, Tirhana,
⁴⁹ Saaf, cati elqui itata Madmana, Seva, cati elqui inintata Macbena huan Gibeá. Huan Caleb nojquiya quipixqui se iichpoca cati itoca Acsa.
- ⁵⁰ Inijuanti elque iixhuihua Caleb. Hur eliyaya iachtohui ejca Caleb ihuaya isihua Efrata.
- Huan Hur quinpixqui iconehua cati inintoca eliyaya Sobal, cati teipa elqui itata Quiriat Jearim; ⁵¹ Salma, cati teipa quinpixqui iconehua cati inintoca eliyaya Belén huan Haref cati teipa quipixqui icone cati itoca Bet Gader.
- ⁵² Sobal, cati elqui itata Quiriat Jearim, nojquiya quipixqui icone cati itoca Haroe. Huan iixhuihua Sobal elque nopa masehualme cati quintocaxtiaj manahetitime. ⁵³ Huan nopa familias cati hualajque ten Quiriat Jearim elqui nopa itritame, futitame, sumatitame huan nopa misraitame. Huan ten ni familias teipa hualajque nopa masehualme zoratitame huan estaolitame.
- ⁵⁴ Salma quipixqui iteipa ixhui cati itoca eliyaya Belén. Huan ten Salma hualajque nopa masehualme netofatitame, Atrot Bet Joab, huan nopa seyoc tajco ten nopa manahetitime huan nopa zoraitame. ⁵⁵ Huan ipan iixhuihua nojquiya itztoyaj nopa tajcuilohuani cati itztoyaj ipan altepet Jabes, nopa masehualme tirateos, simeateos huan sucateos. Nochi ya ni eliyayaj nopa ceneos cati hualajque ten Hamat itata nopa familia cati itoca Recab.

3

Iixhuihua David

(2 S. 3:2-5; 5:13-16; 1 Cr. 14:3-7)

- ¹ Itelpocahua Tanahuatijquet David cati tacatque ipan altepet Hebrón elqui: Iachtohui telpoca, Amnón, cati quitacatilti Ahinoam, isihua cati ehuyaya altepet Jezreel.
- Iompa telpoca David itoca eliyaya Daniel huan quitacatilti isihua Abigail, cati ehuyaya altepet Carmel.
- ² Teipa tacatqui icone David cati itoca Absalón cati quitacatilti isihua, Maaca, cati eliyaya iichpoca nopa Tanahuatijquet Talmai ten altepet Gesur. Teipa tacatqui icone David cati itoca Adonías cati quitacatilti isihua, Haguit.
- ³ Teipa tacatqui icone David cati itoca Sefatías cati quitacatilti isihua, Abital. Huan teipa tacatqui icone David cati itoca eliyaya Iream cati quitacatilti isihua, Eglá.
- ⁴ Nochi ni chिकासeme iconehua David tacatque ipan altepet Hebrón ipan tali Judá campá David mosehui para tanahuatis para chicome xihuit huan tajco. Teipa quisqui huan yajqui ipan altepet Jerusalén huan nozona tanahuati 33 xihuit ipan tali Israel. ⁵ Huan quema itztoya ipan Jerusalén, isihua Bet Súa, cati eliyaya iichpoca Amiel, quinpixqui

nahui iconehua cati inintoca eliyaya: Simea, Sobab, Natán huan Salomón. ⁶ Nojquiya David quinpixqui seyoc chicnahui itelpocahua cati inintoca eliyaya: Ibhar, Elisama, Elifelet, ⁷ Noga, Nefeg, Jafia, ⁸ Elisama, Eliada huan Elifelet. ⁹ Huajca nica eltoc inintoca iconehua David huan nojquiya David quipixqui se iichpoca cati itoca Tamar. Pero nica amo onca inintoca iconehua David cati quinpixqui inihuaya isihua tequipanojcahua.

Tanahuatiani cati iixhuihua Salomón

- ¹⁰ Tanahuatijquet Salomón quinpixqui ni iixhuihua cati tanahuatijtiyajque. Inintoca eliyaya: Roboam, teipa Abías, teipa Asa, Josafat, ¹¹ Joram, Ocozías, Joás, ¹² Amasías, Azarías, Jotam, ¹³ Acaz, Ezequías, Manasés, ¹⁴ Amón huan Josías.
- ¹⁵ Huan Josías quinpixqui iixhuihua: Achtohui Johanán huan teipa Joacim, teipa Sedequías huan teipa Salum.
- ¹⁶ Joacim teipa quipixqui icone cati itoca eliyaya Jeconías. Huan Jeconías quipixqui icone cati itoca Sedequías.
- ¹⁷ Huan Tanahuatijquet Jeconías quihuicaque seyoc tali huan yaya quipixqui icone cati itoca eliyaya: Asir, huan quipixqui iixhui Salatiel, ¹⁸ huan iteipa ixhuihua Malquiram, Pedaías, Senazar, Jecamías, Hosama huan Nedabías.
- ¹⁹ Huan Pedaías quinpixqui iconehua cati inintoca eliyaya Zorobabel huan Simei. Huan Zorobabel quinpixqui iconehua cati inintoca eliyaya: Mesulam, Hananías huan se ichpocat itoca Selomit.
- ²⁰ Huan Mesulam quinpixqui macuilti iconehua cati inintoca eliyaya Hasubá, Ohel, Berequías, Hasadías huan Jusab Hesed.
- ²¹ Hananías quinpixqui iconehua cati inintoca eliyaya Pelatías huan Jesaías. Huan Jesaías quipixqui icone cati itoca Refaías. Huan Refaías quipixqui icone cati itoca Arnán. Huan Arnán quipixqui icone cati itoca Adbías. Huan Adbías quipixqui se icone cati itoca Secanías.
- ²² Huan Secanías quipixqui icone cati itoca Semaías. Huan Semaías quinpixqui chिकासeme iconehua huan inintoca eliyaya: Hatús, Igal, Barías, Nearías huan Safat.
- ²³ Nearías quinpixqui eyi iconehua huan inintoca eliyaya: Elioenai, Ezequías huan Azricam.
- ²⁴ Huan Elioenai quinpixqui iconehua cati inintoca eliyayaj Hodavías, Elia-sib, Pelaías, Acub, Johanán, Dalaías huan Anani.

4

Iixhuihua Judá ica Caleb, icone Hur

- ¹ Huan Judá quipixqui icone cati itoca Fares, huan quipixqui iixhui Hezrón, huan iteipa ixhuihua, Carmi, Hur huan Sobal.
- ² Huan Sobal quipixqui icone cati itoca Reaía. Huan Reaía quipixqui icone cati itoca Jahat cati teipa elqui itata Ahumai huan Lahad. Nochi ni tacame mochijque nopa masehualme cati quintocaxtijque zoratitame.
- ³ Huan ya ni iconehua Hur cati elqui itata Etam, Jezreel, Isma, Ibdas huan se inisihua icni cati itoca Haze Lelponi. ⁴ Huan Hur nojquiya elqui

itata Penuel cati teipa elqui itata Gedor, huan Ezer cati teipa elqui itata Husa. Nochi ya ni elque iteipa ixhuihua Hur, iachtohui cone Efrata cati ica pejqui nopa altepet Belén.

Itelpocahua Asur

- ⁵ Asur cati elqui itata Tecoa quinpixqui ome isihujhua. Se cati itoca Hela huan nopa seyoc cati itoca Naara. ⁶ Huan isihua Naara quintacatilti iconehua cati inintoca eliyaya: Ahuzam, Hefer, Temeni huan Ahas-tari. Ni tacame hualajque ten nopa sihuat Naara.
- ⁷ Huan isihua cati itoca Hela quitacatilti Zeret, Jezoar huan Etnán,
- ⁸ huan Cos cati elqui itata Anub huan Zobeba. Nojquiya Cos elqui inihuej-capan tata nopa familias cati hualajque teipa ipan Aharhel, icone Harum.
- ⁹ Jabes elqui achi más talnamiqui ten nochi sequinoc iicnihua. Huan inana quitocaxti Jabes (Jabes quijjtosnequi Tacuajcualoli), pampa quijjto: “Nijtacatilti ica miyac tacuajcualoli”. ¹⁰ Huan Jabes motatajti ica Toteco Dios cati toTeco tiisraelitame huan quihui: “Nimitztajtania para techtiochihua miyac huan xijhueyili notal. Techpalehui ipan nochi cati nijchihua. Tech-manahui ten nochi tamanti cati amo cuali para amo teno techcocos.” Quej nopa motatajti Jabes, huan Toteco quicajqui huan quimacac cati quitajtani.
- ¹¹ Quelub cati elqui iicni Súa, elqui itata Mehír. Huan Mehír teipa quipixqui icone cati itoca Estón. ¹² Huan Estón teipa elqui itata Bet Rafa, Paseah huan Tehina. Huan Tehina teipa quipehualti nopa altepet cati itoca Nahas. Nochi ya ni elque nopa tacame ten Reca.
- ¹³ Cenaz quinpixqui iconehua cati inintoca eliyaya Otoniel huan Seraías. Huan Otoniel quinpixqui iconehua cati inintoca eliyaya Hatat huan Meonotai. ¹⁴ Huan Meonotai quipixqui se icone cati itoca Ofra.
- Huan Seraías quipixqui se icone cati itoca Joab, cati elqui inihuej-capan tata nopa masehualme cati teipa itztoyaj ipan nopa tamayamit cati itoca Carisim. Carisim quinequi quijjtos Tasencahuani. Quena, quej nopa quitocaxtiyayaj pampa nozona itztoyaj masehualme cati quimatiyayaj quichihuase nochi tamanti cati jejyetzitzi.
- ¹⁵ Huan Caleb cati elqui icone Jefone quinpixqui iconehua cati inintoca eliyaya Iru, Ela huan Naam. Huan Ela elqui itata Cenaz.
- ¹⁶ Jehalelel quinpixqui iconehua cati inintoca eliyaya: Zif, Zifa, Tirías huan Asareel.
- ¹⁷ Esdras quinpixqui iconehua cati inintoca eliyaya: Jeter, Mered, Efer huan Jalón. Huan Mered mocuili Bitia, iichpoca Faraón cati tanahuati ipan tali Egipto. Huan inincone-hua elque María, Samai huan Isba. Huan Isba quipixqui se icone cati itoca Estemoa. ¹⁸ Nojquiya Mered quipiyayaya seyoc isihua cati hualayaya ipan nopa hueyi familia Judá. Nopa sihuat itoca eliyaya Jehudaía. Huan Jehudaía quitacatilti Jered, Heber huan Jecutiel. Huan teipa Jered quipixqui icone cati itoca Gedor. Huan teipa Heber quipixqui icone cati itoca Soco huan Jecutiel quipixqui icone cati quitocaxti Zanoa.
- ¹⁹ Hodías quipixqui isihua cati elqui isihua icni Naham. Huan yaya quinta-catilti ome iconehua. Se itoca Keila cati mochijqui se garmita tacat. Huan nopa seyoc icone itoca eliyaya Estemoa huan yaya mochijqui se maacateo tacat.
- ²⁰ Simón quinpixqui iconehua cati inintoca eliyaya: Amnón, Rina, Ben Hanán huan Tilón.
- Huan Isi quinpixqui iconehua cati inintoca eliyaya Zohet huan Ben Zohet.

Iixhuihua Sela, icone Judá

- 21 Sela, icone Judá, quinpixqui iconehua cati inintoca eliyaya Er huan Laada. Huan ten Sela hualajque nopa familias cati tequitiyayaj ica lino yoyomit ipan tali Bet Asbea.
 Huan Er quipixqui icone cati itoca Leca.
 Huan Laada quipixqui icone cati itoca Maresa. 22 Huan Sela quipixqui iteipan ixhui cati itoca, Joacim. Huan iteipan ixhuihua Sela ifztoyaj ipan altepet Cozeba. Huan Sela nojquiya quinpixqui iconehua cati inintoca Joás huan Saraf.
 Huan Saraf mosihuahti ica se sihuat ten tali Moab huan mochijqui se tequiti-quet ipan nopa tali. Teipa mocuetque ipan altepet Lehem*. Quicuique inintoca nochi cati nica ijcuilijtoc ten miyac amatajcuilolme cati quiiijcuilojque taniel huejcajquiya.
 23 Nochi ni masehualme quimatiyayaj quichiuase miyac tamanti ica soquit. Itztoyaj ipan nopa altepeme Netaín huan Guederá. Nojquiya, quimatiyayaj quenicatza quitocase xochit huan quiyectalise xochi mili. Huan nochi injuanti quitequipanohuayayaj nopa tanahuatij-quet.

Iixhuihua huan ialtepehua Simeón

- 24 Simeón quinpixqui iconehua cati inintoca eliyaya: Nemuel, Jamín, Jarib, Zera huan Saúl.
 25 Huan Saúl quipixqui se icone cati itoca Salum.
 Huan Salum teipa quipixqui se icone cati itoca Mibsam.
 Huan Mibsam quipixqui icone cati itoca Misma.
 26 Misma quipixqui icone cati quitocaxtiyayaj Hamuel.
 Huan Hamuel quipixqui icone cati itoca Zacur.
 Zacur quipixqui se icone cati itoca Simei. 27 Simei quinpixqui 16 iconehua huan 6 iichpocahua. Pero nopa telpocame amo quinpixque miyac iniconehua huan yeca ininfamilias amo momiyaquilijqque quej iteipa ixhuihua Judá. 28 Huan Simei quinpixqui iixhuihua cati itztoyaj ipan nopa altepeme cati inintoca eliyaya: Beer Seba, Molada, Hazar Sual, 29 Bilha, Ezem, Tolad, 30 Betuel, Horma, Siclag, 31 Bet Marcabot, Hazar Susim, Bet Birai huan Saaram. Quena, nochi ni altepeme eltoya iniaxca iixhuihua Simeón hasta quema David pejqui tanahuatía. 32 Huan nojquiya itztoyaj ipan seyoc macuili altepeme cati inintoca: Etam, Aín, Rimón, Toquén huan Asán. 33 Huan nojquiya itztoyaj ipan pilaltepetitzitzi cati quiyahualojtoyaj huejca hasta altepet Baal. Quena, ni iixhuihua Simeón itztoyaj ipan ni altepeme huan mo- cajqui ijcuilijtoc inintoca ipan amat huan quenicatza tacajtihualajque iniixhuihua.
 34 Sequinoc iteipa ixhuihua eliyayaj Mesobab, Jamlec, Josías cati elqui icone Amasías, 35 huan Joel. Nojquiya Simeón quipixqui se iixhui, Jehú, cati elqui icone Josibías, cati elqui icone Seraías, cati elqui icone Asiel; 36 huan quinpixqui iixhuihua cati inintoca eliyayaj Elioenai, Jaacoba, Jesohaía, Asaías, Adiel, Jesimiel, Benaía, 37 huan Ziza cati elqui icone Sifi, cati elqui icone Alón, cati elqui icone Jedaías, cati elqui icone Simri, cati elqui icone Semaías.

38 Cati nica ijcuilijtoc inintoca eliyayaj tayacanani ipan ininfamilias. Huan pampa ininfamilias monelmiyaquilijqque, 39 injuanti quisque huan yajque

* 4:22 4:22 O Belén.

hasta Gedor ipan seyoc lado ten nopa tamayamit para campa hualquisa tonati. Yajque para quitemose sacat para inintapiyalhua. ⁴⁰ Huan quipan-tijque miyac sacat cati cuali. Huan oncayaya miyac paquilisti huan tase-huulisti ipan nopa tali pampa achtohuiya iixhuihua Cam itztoyaj nozona.

⁴¹ Huan ni tayacanani ipan iixhuihua Simeón cati quipiyaj inintoca ijcuil-ijtoc nica, calajque ipan nopa tamayamit ipan nopa tonali quema Tanahu-atijquet Ezequías tanahuatiyaya ipan tali Judá. Huan mocuilijque nopa tali huan quisosolojque nochi iniyoyoncalhua huan inimilhua cati eliyaya iniaxca iixhuihua Cam. Quintzontamiltijque nopa masehualme nozona huan moaxcatijque nopa tali huan nozona mocajque para itztoze pampa quipixqui yejyetzzi sacat para inintapiyalhua.

⁴² Huan seyoc 500 ten ni tacame cati eliyayaj iixhuihua Simeón cati cala-jeque ipan nopa tali teipa yajque ipan nopa tepet cati itoca Seir. Huan nopa tayacanani cati yajque nozona eliyayaj: Pelatías, Nearías, Refaías huan Uziel. Nochi ya ni eliyayaj iconehua Isi. ⁴³ Huan injuanti quintzontamiltijque nochi nopa amalecita masehualme cati noja mocajtoyaj yoltoque. Quej nopa iixhuihua Simeón moaxcatijque nopa altepet huan nozona itztoque hasta ama.

5

Iixhuihua Rubén iachtohui cone Israel (Gn. 35:22)

¹ Rubén eliyaya iachtohui cone Israel, pero quipolo nopa tanahuatili cati quipixqui huan quipolo nopa tamanti cati quiselijtosquía quej achtohui ejquet pampa mofejqui ihuaya isihua tequipanojca itata. Yeca nochi tamanti cati yaya quiselijtosquía, quiselijque iconehua José cati eliyaya seyoc icone Israel. Huajca Rubén ayecmo quitayayaj quej achtohui ejquet. ² Judá cati quitoquili Rubén quema tacatqui, quipixqui más chicalhualisti que iicnihua huan ipan iixhuihua ya hualajqui se Tanahuatijquet, pero amo quiseli nopa tanahuatili ten achtohui ejquet. Elqui José cati mocajqui ica nopa tanahuatili quej achtohui ejquet. ³ Rubén quinpixqui iconehua cati inintoca eliyaya: Hanoc, Falú, Hezrón huan Carmi.

⁴ Huan Joel, se iixhui Rubén, quipixqui icone cati itoca Semaías.

Huan Semaías quipixqui icone cati itoca Gog.

Huan Gog quipixqui se icone cati itoca Simei. ⁵ Simei quipixqui icone cati itoca Micaía.

Huan Micaía quipixqui icone cati itoca Reaía.

Huan Reaía quipixqui se icone cati itoca Baal. ⁶ Baal quipixqui icone cati itoca Beera. Beera elqui tayacanquet ipan iixhuihua Rubén quema huetzqui imaco nopa tanahuatijquet ten tali Asiria cati itoca Tiglat Pileser huan quihuicaque ilpitoc para tetequipanoti.

⁷ Huan iicnihua Beera mochijque huejhueyi familias. Huan nica eltoc inintoca nopa tayacanani ipan sesen familia: Jeiel, Zacarías, ⁸ Bela elqui icone Azaz, cati elqui icone Sema, cati elqui icone Joel. Iixhuihua Rubén cati nica ijcuilijtoc inintoca, itztoyaj ipan nopa tali cati yajqui ten Aroer hasta tepet Nebo huan hasta Baal Meón. ⁹ Huan tahuel momiyaquilijque ihuacaxhua Joel ipan tali Galaad, huan yeca yajqui más ica campa hualquisa tonati para quintamacas. Teipa yajqui hasta nechca nopa huactoc tali huan hasta campa nopa hueyay Eufartes.

¹⁰ Huan ipan nopa tonali quema Tanahuatijquet Saúl tanahuatiyaya, iteipa iixhuihua Rubén yajque huan quintehuijque iteipa iixhuihua

Hagar huan quintanque. Teipa mocajque para itztose ipan iniyoyoncalhua nopona campa hualquisa tonati ipan tali Galaad.

Ixhuihua Gad

- ¹¹ Huan iixhuihua Gad itztoyaj ipan tali Basán hasta altepet Salca cati mocahua iniixmelac iixhuihua Rubén. ¹² Huan Joel elqui nopa achtohui tayacanquet ipan tali Basán, huan nopa ompa tayacanquet elqui Safán, teipa Jaanai huan teipa Safat. ¹³ Huan nopa tacame quinpixque ininteixmatcahua cati inintoca eliyaya: Micael, Mesulam, Seba, Jorai, Jacán, Zia huan Heber. Para nochi eliyayaj chicome.
- ¹⁴ Nochi ni chicome tacame elque iteipa ixhuihua Abihail cati elqui icone Huri, cati elqui icone Jaroa, cati elqui icone Galaad, cati elqui icone Micael, cati elqui icone Jesai, cati elqui icone Jahod, cati elqui icone Buz. ¹⁵ Huan Ahí, icone Abdiel huan iixhui Guni, elqui nopa tayacanquet ipan ininfamilias. ¹⁶ Huan nochi ni cati eliyayaj iteipa ixhuihua Gad itztoyaj ipan Galaad ipan tali Basán huan ininpilaltepehua. Nojquiya itztoyaj campa hueli ipan potreros ipan tali Sarón. ¹⁷ Nochi inijuanti quiiicuilojque inintoca ipan nopa amame ipan nopa tonali quema Jotam tanahuatiyaya ipan tali Judá ica tatzinta huan quema Jeroboam tanahuatiyaya ipan tali Israel ica norte.

Nopa ome huan tajco huejhueyi familias

- ¹⁸ Itelpocahua Rubén huan Gad huan nopa tajco familia ten Manasés eliyayaj tacame cati tahuel mosemacayayaj. Quinpixque 44 mil 760 soldados cati quihualicayayaj yolixtzajcayot, machetas huan cuahuitoli cati huejhueyi. Inijuanti tahuel quixmatiyayaj quenicatza tatehuse. ¹⁹ Ni tacame quintehuijque iteipa ixhuihua Hagar inihuaya nopa jeturitame, afisitame huan nopa nodabitame. ²⁰ Huan iixhuihua Rubén, Gad huan Manasés quitzajtzilijque Toteco Dios para ma quinmaca chicahualisti ipan nopa tatehuilisti, huan yaya, quena, quinmacac pampa motemachiyayaj ipan ya. Huan yeca quintzontamiltijque nochi iteipan ixhuihua Hagar nopa ihuaya nochi cati quinpalehuiyayaj. ²¹ Huan quema ya quintantoyaj quihuicaque cati eliyaya iniaxca huan elqui: 50 mil camellos, 200 mil borregojme, 2 mil burrojme huan 100 mil masehualme. ²² Huan mijque miyac iteipa ixhuihua Hagar pampa Toteco Dios quintehuiyaya. Huan quej nopa iixhuihua Rubén mocajque ipan inintal iteipa ixhuihua Hagar huan nopona itztoyaj hasta ipan nopa tonali quema quinquixtijque huan quihuicaque ipan seyoc tali.

Tajco ten nopa hueyi familia Manasés

- ²³ Nopa tajco familia ten Manasés tahuel momiyaquili. Huan itztoyaj ten altepet Basán hasta Baal Hermón, huan Senir hasta nopa tepet Hermón.
- ²⁴ Huan nopa tayacanani ipan ininfamilias ten iniixhuihua Manasés eliyayaj: Efer, Isi, Eliel, Azriel, Jeremías, Hodavías huan Jahdiel. Sesen ten ni tacame nelia mosemacayayaj huan quipiyayayaj miyac chicahualisti para tatehuse huan nochi quinixmatiyayaj. Huan eliyayaj tayacanani ipan ininfamilias. ²⁵ Pero inijuanti mosisinijque ica Toteco Dios cati elqui ininTeco inihuejcapan tatahua huan quixpanoque nopa camanali cati quichijqui inihuaya. Quinhueyichijque teteyome huan taixcopincayome cati quinhueyichihuayayaj nopa masehualme cati Toteco Dios quinquixti inixpa inihuejcapan tatahua. ²⁶ Yeca Toteco Dios quicahuili Tanahuatijquet Pul ten tali Asiria cati nojquiya quitocaxtiyayaj Tiglat Pileser, para ma moaxcati nopa tali huan ma quinquixti iconehua Rubén, Gad huan nopa tajco familia ten Manasés. Huan Pul quihuicac ipan talme cati inintoca eliyayaj Halah,

Habor huan Hara huan hasta nopa hueyat Gozán huan nozona itztoque hasta ama.

6

Iixhuihua Leví cati mochijque totajtzitzi

¹ Leví quinpixqui iconehua cati inintoca eliyaya: Gersón, Coat huan Merari.

² Coat teipa quinpixqui iconehua cati inintoca eliyaya: Amram, Izhar, Hebrón huan Uziel.

³ Amram teipa quinpixqui iconehua cati inintoca eliyaya: Aarón, Moisés huan María.

Huan Aarón teipa quinpixqui iconehua cati inintoca eliyaya: Nadab, Abiú, Eleazar huan Itamar.

⁴ Eleazar quipixqui icone cati itoca Finees.

Huan Finees quipixqui icone cati itoca Abisúa.

⁵ Huan Abisúa quipixqui icone cati itoca Buqui.

Huan Buqui quipixqui icone cati itoca Uzi.

⁶ Huan Uzi quipixqui icone cati itoca Zeraías.

Huan Zeraías quipixqui icone cati itoca Meraiot.

⁷ Huan Meraiot quipixqui icone cati itoca Amariás.

Huan Amariás quipixqui icone cati itoca Ahitob.

⁸ Huan Ahitob quipixqui icone cati itoca Sadoc.

Huan Sadoc quipixqui icone cati itoca Ahimaas.

⁹ Ahimaas quipixqui icone cati itoca Azariás.

Huan Azariás quipixqui icone cati itoca Johanán.

¹⁰ Huan Johanán quipixqui icone cati itoca Azariás.

Huan Azariás elqui se totajtzí ipan nopa hueyi tiopamit cati Salomón quichi-
jqui ipan altepet Jerusalén.

¹¹ Azariás quipixqui icone cati itoca Amariás.

Huan Amariás quipixqui icone cati itoca Ahitob.

¹² Huan Ahitob quipixqui icone cati itoca Sadoc.

Huan Sadoc quipixqui icone cati itoca Salum.

¹³ Huan Salum quipixqui icone cati itoca Hilcías.

Huan Hilcías quipixqui icone cati itoca Azariás.

¹⁴ Huan Azariás quipixqui icone cati itoca Seraías.

Huan Seraías quipixqui icone cati itoca Josadoc.

¹⁵ Huan Nabucodonosor quihuicac Josadoc quema Toteco quitequihui ya para quinquixtis israelitame ten tali Judá huan altepet Jerusalén para quihuicase tetequipanotij.

Sequinoc iixhuihua Leví cati amo totajtzitzi

¹⁶ Leví quinpixqui iconehua cati inintoca eliyaya: Gersón, Coat huan Merari.

¹⁷ Gersón teipa quinpixqui iconehua cati inintoca eliyaya Libni huan Simeí.

¹⁸ Coat teipa quinpixqui iconehua cati inintoca eliyaya: Amram, Izhar, Hebrón huan Uziel.

¹⁹ Merari teipa quinpixqui iconehua cati inintoca eliyaya Mahli huan Musi.

Ya ni elque iteipa iixhuihua Leví cati huejcajquiya itztoya.

²⁰ Huan nica eltoc inintoca iteipa iixhuihua Gersón cati mochijque familias. Inijuanti inintoca eliyaya: Libni cati elqui itata Jahat, cati elqui itata Zima, ²¹ cati elqui itata Joa, cati elqui itata Iddo, cati elqui itata Zera, cati elqui itata Jeatrai.

- 22 Huan iteipa ixhuihua Coat cati mochijque familias inintoca eliyaya: Aminadab cati teipa elqui itata Coré, cati teipa elqui itata Asir, 23 cati teipa elqui itata Elcana, cati teipa elqui itata Ebiasaf, cati teipa elqui itata Asir, 24 cati teipa elqui itata Tahat, cati teipa elqui itata Uriel, cati teipa elqui itata Uzías cati teipa elqui itata Saúl.
- 25 Elcana quinpixqui iconehua cati inintoca eliyaya Amasai huan Ahimot, 26 Elcana, Zofai, Nahat, 27 Eliab, Jeroham huan Elcana.
- 28 Huan Samuel quinpixqui iconehua cati inintoca Vasni cati achtohui ejquet huan Abías cati teipa tacatqui.
- 29 Merari quinpixqui iconehua cati inintoca eliyaya: Mahli, Libni, Simei, Uza, 30 Simea, Haguía huan Asaías.

Levitame cati huicani ipan tiopamit

- 31 Nica eltoc inintoca nopa huicani cati Tanahuatijquet David quintapejpeni para huicase huan para tayacanase para quihueyichihuase Toteco.
- 32 Inijuanti tequipanojque ipan nopa yoyon tiopamit quema ya quitajtoyaj nopa caxa nozona hasta quema Salomón quichijchijqui nopa tiopamit ipan altepet Jerusalén. Teipa nopa huicani pejque tequipanohuaj nozona.
- 33 Ni tacame huan ininconeuhua huicaque huan nochi eliyayaj iteipa ixhuihua Coat ten huejcajquiya: Hemán tayacanqui huan nojquiya huicaque Joel cati elqui icone Samuel.
- 34 Samuel elqui icone Elcana * cati elqui icone Jeroham. Huan Jeroham elqui icone Eliel, cati elqui icone Toa.
- 35 Toa elqui icone Zuf, cati elqui icone seyoc tacat cati itoca Elcana †. Huan ni Elcana elqui icone Mahat, cati elqui icone Amasai.
- 36 Amasai elqui icone seyoc tacat cati itoca Elcana ‡ cati elqui icone Joel. Huan Joel elqui icone Azarías, cati elqui icone Sofonías.
- 37 Sofonías elqui icone Tahat, cati elqui icone Asir. Huan Asir elqui icone Ebiasaf, cati elqui icone Coré.
- 38 Coré elqui icone Izhar, cati elqui icone Coat. Huan Coat elqui icone Leví, cati elqui icone Israel.
- 39 Huan Hemán quipixqui itapalehuijca cati itoca Asaf cati itztoya ipan inejmat. Huan Asaf elqui icone Berequías, cati icone Simea, 40 cati icone Micael, cati icone Baasías, cati icone Malquías, 41 cati icone Etni, cati icone Zera, cati icone Adaía, 42 cati icone Etán, cati icone Zima, cati icone Simei, 43 cati icone Jahat, cati icone Gersón cati icone Leví.
- 44 Huan ten iteipa ixhuihua Merari, itapalehuijca Hemán cati moquetzayaya ipan iarraves elqui Etán cati elqui icone Quisi, cati icone Abdi, cati icone Maluc, 45 cati icone Hasabías, cati icone Amasías, cati icone Hilcías, 46 cati icone Amsi, cati icone Bani, cati icone Semer, 47 cati icone Mahli, cati icone Musi, cati icone Merari cati elqui icone Leví.
- 48 Huan sequinoc iteixmatcahua cati nojquiya eliyayaj levitame o iixhuihua Leví, quiselijque sequinoc tamanti tequit para ma quichihuaca ipan itiopa Toteco. 49 Pero cati hualajque ipan Aarón huan iteipa ixhuihua elque totajtizi. Inintequi eliyaya para quitencahuase tacajcahualisti tatatili, quitatize copali huan para quichihuase sequinoc tamanti tequit ipan nopa

* 6:34 6:34 Elcana III. † 6:35 6:35 Elcana II. ‡ 6:36 6:36 Elcana I.

cuarto cati Más Tatzejtzelotlic. Nojquiya quipixque inintequi para quiixtza-
cuase tetajtacolhua sesen xihuit quej quijtohuayaya nopa fanahuatlme cati
Toteco quimacac itequipanojca, Moisés.

Iixhuihua Aarón

⁵⁰ Aarón quipixqui icone cati itoca Eleazar, cati quipixqui icone Finees, cati
quipixqui icone Abisúa, ⁵¹ cati quipixqui icone Buqui, cati quipixqui
icone Uzi, cati quipixqui icone Zeraías, ⁵² cati quipixqui icone Meraiot,
cati quipixqui icone Amariás, cati quipixqui icone Ahitob, ⁵³ cati
quipixqui icone Sadoc, cati quipixqui icone Ahimaas.

Inialtepehua nopa levitame (Jos. 21:1-42)

⁵⁴ Ya ni inintoca nopa altepeme huan talme cati quiselijque iixhuihua
Aarón quej cati quintocaró ica rifa.

Aarón cati quisqui ten se ihuejcapan tata cati itoca Coat quipixqui iteipan
conehua cati quiselijque ni talme: ⁵⁵ Hebrón ipan tali Judá huan nochi
nopa potrerós cati quiyahualojtoyaj. ⁵⁶ Caleb, icone Jefone quiseli nopa
mili huan cuatitamit nechca Hebrón. ⁵⁷ Huajca iixhuihua Aarón quiselijque
ni altepeme ica nochi nopa potrerós cati quinyahualojtoyaj. Quiselijque:
Hebrón, se altepet para ipan momanahuse, Libna, Jatir, Estemoa, ⁵⁸ Hilén,
Debir, ⁵⁹ Asán huan Bet Semes ica nochi nopa potrerós cati quiyahualojtoyaj
sesen ten ni altepeme. ⁶⁰ Nojquiya ipan inintal Benjamín quiselijque: Geba,
Alemet huan Anatot ihuaya nopa potrerós cati quinyahualojtoyaj. Huajca
para nochi, iixhuihua Aarón quiselijque 13 altepeme ica ininpotrerós.

⁶¹ Nojquiya nopa sequinoc iteipa ixhuihua Coat cati amo iixhuihua Aarón
ica rifa quiselijque 10 altepeme ten inintal nopa tajco ifamilia Manasés.

⁶² Huan iteipa ixhuihua Gersón, cati icone Leví huejcajquiya, quiselijque
13 altepeme ten nopa huejhueyi familias Isacar, Aser, Neftalí huan nopa tajco
ifamilia Manasés cati itztoyaj ipan tali Basán.

⁶³ Huan iteipa ixhuihua Merari, icone Leví huejcajquiya, quiselijque ica
rifa 12 altepeme ipan inintal nopa huejhueyi familias Rubén, Gad huan
Zabulón.

⁶⁴ Huan israelitame quinmacaque nopa levitame nochi ni altepeme ica
ininpotrerós. ⁶⁵ Quena, ica rifa israelitame cati ininteipa ixhuihua Judá,
Simeón huan Benjamín quinmacaque levitame ni altepeme cati nimitzilhui-
jtoc huejcapa ten inintalhua.

⁶⁶ Sequij iixhuihua Coat quiselijque altepeme ten inintal nopa hueyi
familia Efraín ica nochi nopa potrerós cati quinyahualojtoyaj. ⁶⁷ Huan nopa
hueyi familia Efraín nojquiya quinmacaque nopa altepet Siquem cati elqui
se altepet ten tamanahuili cati mopantía ipan nopa cuatitamit ipan tali
Efraín. Nojquiya quinmacaque altepeme: Gezer, ⁶⁸ Jocmeam, Bet Horón,
⁶⁹ Ajalón, Gat Rimón ihuaya nochi potrerós cati quiyahualojtoyaj sesen alte-
pet. ⁷⁰ Huan ten inintal, nopa tajco familia ten Manasés quinmacaque iteipa
ixhuihua Coat nopa altepeme Aner huan Bileam ica nochi ininpotrerós.

⁷¹ Huan ten inintal, nopa tajco familia ten Manasés nojquiya quinmacaque
iteipa ixhuihua Gersón nopa altepet Golán ipan tali Basán ica ipotrerós huan
nopa altepet Astarot.

⁷² Huan ten inintal, nopa hueyi familia Isacar quinmacaque iteipa ix-
huihua Gersón nopa altepeme cati inintoca: Cedés, Dabérat, ⁷³ Ramot
huan Anem ica nochi nopa potrerós cati quinyahualojtoyaj. ⁷⁴ Huan ten

inintal, nopa hueyi familia Aser quinmacaque iteipa ixhuihua Gersón nopa altepeme cati inintoca: Abdón, Masal, ⁷⁵ Hucoc huan Rehob ica nochi nopa potreros cati quinyahualojtoyaj. ⁷⁶ Huan nopa hueyi familia Neftalí quinmacac iteipa ixhuihua Gersón altepet Cedec cati mopantía ipan tali Galilea, huan altepet Hamón huan altepet Quiriataim. Nojquiya quinmacaque nochi nopa potreros cati quinyahualojtoyaj.

⁷⁷ Huan ten inintal, nopa hueyi familia Zabulón, quinmacaque cati mo-cajqui ten iteipa ixhuihua Merari nopa altepeme Rimón huan Tabor ica ininpotreros. ⁷⁸ Huan ten inintal, nopa hueyi familia Rubén quinmacaque iteipa ixhuihua Merari ni altepeme cati mopantíaj ipan nopa seyoc nali ten nopa hueyat Jordán, iixmelac altepet Jericó. Huan ni altepet cati itoca Beser ipan huactoc tali huan nojquiya quinmacaque Jaza, ⁷⁹ Cademet huan Mefaat ihuaya nochi nopa potreros cati quinyahualojtoyaj. ⁸⁰ Huan ten inintal, nopa hueyi familia Gad quinmactilijque iteipa ixhuihua Merari nopa altepet Ramot ipan tali Galaad. Nojquiya quinmactilijque Mahanaim, ⁸¹ Hesbón huan Jazer ica nochi nopa potreros cati quinyahualojtoyaj.

7

Ixhuihua Isacar

¹ Isacar quinpixqui iconehua cati inintoca eliyaya: Tola, Fúa, Jasub huan Simrón.

² Tola quinpixqui iconehua cati mochijque tayacanani ipan ininfamilias huan inintoca eliyaya: Uzi, Refaías, Jeriel, Jahmai, Jibsam huan Semuel. Huan ipan nopa tonali quema tanahuatiyaya David, quinpójque quesqui tacame itztoyaj ipan ni familia cati huelij tatehuáaj. Huan para nochi eliyayaj 22 mil 600 tacame cati huelij tatehuáaj.

³ Uzi quipixqui se icone cati itoca Israhías.

Huan Israhías quinpixqui iconehua cati inintoca eliyayaj: Micael, Obadías, Joel huan Isías. Nochi ni macuulti tacame mochijque tayacanani ipan ininfamilias. ⁴ Huan nochi ni macuulti tayacanani quinpixque tahuel miyac inisihujhua huan tahuel miyac ininconeua. Quej nopa panoc para miyac xihuit hasta nopa lista campa ijcuilijtoc inintoca masehualme huan quenicatza tacajtiyajque quijtohua para elque 36 mil soldados cati nelía motemacayayaj para tatehuse. ⁵ Huan ipan nochi nopa hueyi familia Isacar itztoyaj 87 mil soldados cati tahuel mosemacayayaj ipan tatehuilisti. Nochi inijuanti mopantíaj ipan nopa lista ten quenicatza tacajtiyajque masehualme.

Ixhuihua Benjamín

⁶ Huan Benjamín quinpixqui iconehua cati inintoca eliyaya Bela, Bequer huan Jediael.

⁷ Huan Bela quinpixqui iconehua cati inintoca eliyaya: Ezbón, Uzi, Uziel, Jerimot huan Iri. Nochi inijuanti eliyayaj tayacanani ipan ininfamilias. Nojquiya eliyayaj tatehuani cati tahuel mosemacayayaj ipan tatehuilisti. Huan nochi soldados cati eliyayaj iteipa ixhuihua Bela elque 20 mil 34 tacame. Nochi inijuanti mocajque ijcuilijtoque ipan nopa lista cati quipiya quenicatza tacajtiyajque masehualme.

⁸ Huan Bequer quinpixqui iconehua cati inintoca eliyaya: Zemira, Joás, Eliezer, Elioenai, Omri, Jerimot, Abías, Anatot huan Alamet. ⁹ Huan ipan nopa tonali quema David tanahuatiyaya, quinpójque 20 mil 200 tacame cati elque iixhuihua Bequer cati tahuel mosemacayayaj.

Huan iyoca quinpixque macuilti tacame cati eliyayaj tayacanani ipan ininfamilias.

¹⁰ Huan Jediael quipixqui icone cati itoca Bilhán.

Huan Bilhán quinpixqui iconehua cati inintoca eliyaya: Jeús, Benjamín, Aod, Quenaana, Zetán, Tarsis huan Ahisahar. ¹¹ Nochi ya ni eliyayaj tayacanani ipan nopa familias cati hualahuij ipan Jediael. Huan ipan nopa tonali quema tanahuatiyaya David quinpójqui masehualme, huan iteipa ixhuihua Jediael cati hueliyayaj tatehuisse mochijque 17 mil 200 tacame.

¹² Huan Supim huan Hupim elque iconehua Hir.

Huan Husim elqui icone Aher.

Ixhuihua Neftalí

¹³ Neftalí quinpixqui iconehua cati inintoca eliyaya: Jahzeel, Guni, Jezer huan Salum. Nochi injuanti hualajque ten Bilha cati elqui se isihua Jacob huejcajquiya.

Ixhuihua Manasés

¹⁴ Manasés quinpixqui ome iconehua cati quintacilti itequipanojca ten tali Siria huan nopa coneme inintoca eliyaya Asriel huan Maquir.

Huan Maquir teipa quipixqui icone cati itoca Galaad.

¹⁵ Maquir mocuili Maaca. Maaca elqui inisihua icni Hupim huan Supim.

Huan teipa Maquir quipixqui se iixhui cati itoca Zelofehad. Huan Zelofehad san quinpixqui ichpócame.

¹⁶ Maaca, isihua Maquir, quipixqui se icone cati quitocaxti Peres. Teipa quitacilti seyoc icone huan quitocaxti Seres.

Huan Seres quinpixqui iconehua cati inintoca eliyayaj Ulam huan Requem.

¹⁷ Huan Ulam quipixqui icone cati itoca Bedán.

Nochi ni tacame eliyayaj iconehua Galaad, cati icone Maquir, cati ica huejcajquiya eliyaya icone Manasés. ¹⁸ Isihua icni Maquir cati itoca Hamolequet quitacilti Isod, Abiezer huan Mahala.

¹⁹ Huan Semida quinpixqui iconehua cati inintoca eliyaya: Ahián, Siquem, Likhi huan Aniam.

Ixhuihua Efraín

²⁰ Efraín quipixqui icone cati itoca Sutela. Huan Sutela quipixqui icone cati itoca Bered.

Bered quipixqui icone cati itoca Tahat, cati quipixqui icone cati itoca Elada.

Elada quipixqui icone cati itoca Tahat. ²¹ Tahat quipixqui icone cati itoca Zabad.

Zabad quipixqui icone cati itoca Sutela, cati quipixqui icone cati itoca Ezer, cati teipa quipixqui icone cati itoca Elad.

Huan huejcajquiya ipan nopa tonali quema noja itztoya Efraín, yaya quinpixqui ome iconehua cati inintoca eliyaya Elad huan Ezer. Ni ome iconehua quichijque campeca para quinichtequise tapiyalme ipan tali Gad, pero nopa Gad ehuaní quínictijque. ²² Huan inintata, Efraín, quínchoquili tahuel miyac tonali. Huan hualajque iconehua huan nochi iteixmatcahua para quiyolchicahuase. ²³ Huan teipa Efraín ihuaya itztoya isihua huan yaya conecuc huan quitacilti se oquichpil cati quitocaxtijque Bería*. Quej nopa quitocaxti pampa tahuel mocuesohuayaya ica cati ininpantic iconehua.

²⁴ Huan Bería nojquiya quipixqui se iichpoca cati itoca Seera. Huan iichpoca quínchijchijqui nopa altepeme Bet Horón Cati Huejcapa huan Bet

* 7:23 7:23 Bería caquistic quej “tequipacholi” ipan inincamanal.

Horón Cati Tatzinta. Nojquiya iichpoca quichijchijqui nopa altepet Uzen Seera.

²⁵ Huajca Bería quinpixqui iixhuihua cati pejqui ica icone cati itoca Refa.

Huan Refa teipa quipixqui icone cati itoca Resef.

Huan Resef teipa quipixqui icone cati itoca Telah.

Huan Telah teipa quipixqui icone cati itoca Tahán.

Huan Tahán teipa quipixqui icone cati itoca Laadán.

²⁶ Huan Laadán teipa quipixqui icone cati itoca Amiud.

Huan Amiud teipa quipixqui icone cati itoca Elisama.

Huan Elisama teipa quipixqui icone, ²⁷ cati itoca Nun.

Huan Nun teipa quipixqui icone cati itoca Josué.

²⁸ Huan nochi ni masehualme cati eliyayaj iteipa ixhuihua Efraín itztoyaj ipan altepet Betel huan ipilaltepehua ica sur. Huan para campa hualquisa tonati monepantiyaya inintal ica altepet Naarán. Ica campa calaqui tonati monepantiyaya ica altepet Gezer. Huan ica norte hasta altepet Siquem ica ipilaltepehua huan ajsiyaya hasta altepet Gaza huan ipilaltepehua. ²⁹ Huan campa monepantiyayaj Efraín ica inintal nopa hueyi familia Manasés, on-cayayaj altepeme cati inintoca eliyaya: Bet Seán, Taanac, Meguido huan Dor ica nochi nopa pilaltepetzitzi cati quiyahualojtoyaj sese altepet. Ipan ni altepeme itztoyaj iteipa ixhuihua José cati elqui icone Israel ten huejcajquiya.

Itelpocahua Aser

³⁰ Aser quinpixqui iconehua cati inintoca eliyaya: Imna, Isúa, Isúi, Bería huan se inisihua icni cati itoca Sera.

³¹ Huan Bería quinpixqui iconehua cati inintoca eliyaya Heber huan Malquiel.

Huan Malquiel teipa quipixqui icone cati itoca Birzavit.

³² Huan Heber quinpixqui iconehua cati inintoca eliyaya Jaflet, Semer huan Hotam. Huan se inisihua icni cati itoca Súa.

³³ Huan Jaflet quinpixqui iconehua cati inintoca eliyaya Pasac, Bimhal huan Asvat.

³⁴ Huan Somer quinpixqui iconehua cati inintoca eliyaya: Ahí, Rohga, Jehúba huan Aram.

³⁵ Huan Helem cati elqui iicni Somer, quinpixqui iconehua cati inintoca eliyaya: Zofa, Imna, Seles huan Amal.

³⁶ Huan Zofa quinpixqui iconehua cati inintoca eliyaya: Súl, Harnefer, Súl, Beri, Imra, ³⁷ Beser, Hod, Sama, Silsa, Itrán, huan Beera.

³⁸ Huan Jeter quinpixqui iconehua cati inintoca eliyaya Jefone, Pispa huan Ara.

³⁹ Huan se iixhui Aser cati itoca Ula quinpixqui iconehua cati inintoca eliyaya: Ara, Haniel huan Rezia.

⁴⁰ Nochi ya ni elque iixhuihua Aser huan sesen ten injuanti elqui se tayacanquet ten nopa familias cati hualajque ipan ya. Huan ya ni eliyayaj tacame tapepenilme cati cuali quiixmatiyayaj para tatehuse. Ijcuijtoc nochi inintoca ipan nopa lista cati quiipiya quenicatza tacajtijayajque masehualme. Huan ipan nopa familia Aser oncayaya 26 mil soldados.

8

Ixhuihua Benjamín

¹ Benjamín quinpixqui iachtohui cone cati quitocaxtiyayaj Bela. Iompa cone quitocaxtiyayaj Asbel. Iexpa cone quitocaxtiyayaj Ahara.

- 2 Inajpa cone quitocaxtiyayaj Noha, huan imacuilpa cone quitocaxtiyayaj Rafa.
- 3 Huan Bela quinpixqui iconehua cati quintocaxtiyayaj: Adar, Gera, Abiud, ⁴ Abisúa, Naamán, Ahoa, ⁵ Gera, Sefufán huan Hiram.
- 6 Huan Aod quinpixqui iconehua cati mochijque tayacanani ipan ininfamilias huan itztoyaj ipan altepet Geba. Huan masehualme nozona quinquixtijque ten Geba huan injuanti yajque hasta altepet Manahat.
- ⁷ Huan ininconeuhua Aod inintoca eliyaya Naamán, Ahías huan Gera. Huan Gera teipa elqui itata Uza huan Ahiud. Gera yaya quinyacanqui quema yajque ipan seyoc altepet.
- 8 Saharaim quincajqui isihuahua cati inintoca Husim huan Baara, pero teipa ipan tali Moab quinpixqui iconehua ica iyancuic sihua cati itoca Hodes. ⁹ Huan ininconeuhua quintocaxtiyayaj: Jobab, Sibia, Mesa, Malcam, ¹⁰ Jeúz, Saquías huan Mirma. Nochi ya ni teipa elque tayacanani ipan ininfamilias.
- 11 Huan iachtohui sihua Saharaim cati itoca Husim, cati Saharaim quicajqui ya ipa quintacatiltijtoya iconehua cati inintoca Abitob huan Elpaal.
- 12 Huan Elpaal quinpixqui iconehua cati inintoca eliyaya Heber, Misam huan Samed, cati quipehualtijque altepeme Ono huan Lod huan nochi ininpilaltepehua. ¹³ Nojquiya Elpaal quinpixqui sequinoc iconehua cati inintoca eliyaya Bería huan Sema. Ni Bería huan Sema mochijque tayacanani ten ifamilias cati itztoyaj ipan altepet Ajalón. Huan Bería huan Sema quinquixtijque nopa masehualme cati itztoyaj ipan altepet Gat.
- 14 Huan Elpaal nojquiya quinpixqui sequinoc iconehua cati inintoca eliyaya Ahío, Sasac huan Jeremot. ¹⁵ Bería quinpixqui iconehua cati inintoca eliyaya: Zebadías, Arad, Ader, ¹⁶ Micael, Ispa huan Joha.
- 17 Huan Elpaal nojquiya quinpixqui iconehua cati inintoca eliyaya: Zebadías, Mesulam, Hizqui, Heber, ¹⁸ Ismerai, Jezlías huan Jobab.
- 19 Huan Simeí quinpixqui iconehua cati inintoca eliyaya: Jaquim, Zicri, Zabdi, ²⁰ Elienai, Ziletai, Eliel, ²¹ Adaías, Beraías huan Simrat.
- 22 Huan Sasac quinpixqui itelpocahua cati inintoca eliyaya: Ispán, Heber, Eliel, ²³ Abdón, Zicri, Hanán, ²⁴ Hananías, Elam, Anatotías, ²⁵ Ifdaías huan Peniel.
- 26 Huan Jeroham quinpixqui iconehua cati inintoca eliyaya: Samserai, Seharías, Atalías, ²⁷ Jaresías, Elías huan Zicri. ²⁸ Nochi ni tacame elque tayacanani ipan nopa familias ten masehualme cati teipa tacajtiyajque huan itztoyaj ipan altepet Jerusalén.

Ifamilia Tanahuatijquet Saúl
(1 Cr. 9:35-44)

- 29 Huan ipan altepet Gabaón itztoya Jehiel * ihuaya isihua cati itoca Maaca. ³⁰ Huan iniachtohui cone quitocaxtiyayaj Abdón. Huan sequinoc ininconeuhua inintoca eliyaya: Zur, Cis, Baal, Nadab, ³¹ Gedor, Ahío, Zequer, ³² huan Miclot. Huan teipa Miclot quipixqui icone cati quitocaxti Simea. Nochi ni familias quipixque ininchaj nejnechca ipan altepet Jerusalén.
- 33 Huan Ner quipixqui icone cati quitocaxti Cis. Huan Cis quipixqui se icone cati quitocaxti Saúl.

* 8:29 8:29 O Abigabaón.

Huan Saúl quinpixqui iconehua cati quintocaxti: Jonatán, Malquisúa, Abinadab huan És Baal.

³⁴ Jonatán quipixqui icone cati quitocaxti Merib Baal†.

Huan Merib Baal quipixqui icone cati quitocaxti Micaía.

³⁵ Micaía quinpixqui iconehua cati quintocaxti: Pitón, Melec, Tarea huan Acaz.

³⁶ Acaz quipixqui icone cati quitocaxti Joada.

Huan Joada quinpixqui iconehua cati quintocaxtiyayaj Alemet, Azmavet huan Zimri.

Huan Zimri quipixqui se icone cati quitocaxti Mosa.

³⁷ Huan Mosa quipixqui icone cati quitocaxti Bina.

Huan Bina quipixqui icone cati quitocaxti Rafa.

Huan Rafa quipixqui icone cati quitocaxti Elasa.

Huan Elasa quipixqui icone cati quitocaxti Azel.

³⁸ Huan Azel quinpixqui chucaseme iconehua cati quintocaxtiyayaj: Azricam, Bocru, Ismael, Searías, Obadías huan Hanán.

³⁹ Huan Azel quipixqui se iicni cati quitocaxtiyayaj Esec.

Huan Esec quipixqui iachtohui cone cati quitocaxti Ulam.

Huan iompaca cone quitocaxti Jehús huan iexpa cone quitocaxti Elifelet.

⁴⁰ Huan nochi iconehua Ulam tahuel mosemacayayaj ipan tatehuilisti huan tahuel quipixque fuerza. Tahuel quixmatiyayaj quenicatza quitequihuse cuataminti huan huejhueyi cuahuitoli. Huan iconehua Ulam quinpixque miyac iniconehua huan iniixhuihua. Ica nochi ajsique 150.

Nochi injuanti eliyayaj iteipa ixhuihua Benjamín.

9

¹ Huan nochi israelitame ipan tali Israel huan taya familia ipan hualajque mocajque ijculijitoque ipan nopa amatapohuali ten nopa Tanahuatiani Ten Tali Israel.

Masehualme cati mocuetque ten tali Babilonia (Neh. 11:1-24)

Huan TOTECO quincahuili inincualancaitacahua ma quinquixtica israelitame ipan tali Judá huan quinhuicase huejca ipan tali Babilonia pampa quinhueyichijque teteyome huan taixcopincayome.

² Huan quema panotoya miyac xihuit, nopa masehualme cati achtohui hualajque para sempa itztoquij ipan inintal huan ipan inialtepehua campa quisque eliyayaj ten hueli israelitame. Nojquiya inihuaya hualajque sequij totajtizti, levitame huan tequipanohuani ipan tiopamit. ³ Israelitame ten nopa huejhueyi familias Judá, Benjamín, Efraín huan Manasés ajsicoj huan mochantijque ipan altepet Jerusalén.

⁴ Ten nopa familia Judá ajsicoj: Utai cati elqui icone Amiud, cati elqui icone Omri, cati elqui icone Imri, cati elqui icone Bani, cati elqui icone * Fares. Huan Fares elqui icone Judá.

† **8:34** 8:34 Merib Baal nojquiya quitocaxtiyayaj Mefiboset. * **9:4** 9:4 Cati nica tijpatatoque ica náhuat ica “icone” quemantica quinequi quiijtos “icone”, quemantica “iixhui” huan quemantica quinequi quiijtos iteipan ixhui (o descendiente) cati tacatqui tahuel miyac xihuit teipa ica yaya ieso. Ten nopa tonali quema itztoya Judá huejcajquiya hasta mocuetqui Utai, panotoya quipano mil xihuit.

- ⁵ Huan nojquiya mocuetque ipan inintal nopa israelitame cati eliyayaj iteipa ixhuihua Silón. Mocuetqui Asaías nopa achtohui ejquet inihuaya iconehua.
- ⁶ Huan ipan nopa familia ten iteipa ixhuihua Zera, mocuetqui Jewel ihuaya iteixmatcahua. Huajca ica nochi, eliyayaj 690 cati mocuetque ipan inintal cati eliyayaj iteipa ixhuihua Judá.
- ⁷ Huan ten nopa hueyi familia Benjamín, mocuetque: Salú cati elqui icone Mesulam, cati elqui icone Hodavías, cati elqui icone Asenúa.
- ⁸ Nojquiya mocuetqui Ibneías cati elqui icone Jeroham, cati elqui icone Ela, cati elqui icone Uzi, cati elqui icone Micri.
- Huan nojquiya mocuetqui Mesulam, cati elqui icone Sefatías, cati elqui icone Reuel, cati elqui icone Ibnías.
- ⁹ Nochi injuanti eliyayaj tayacanani ipan familias. Huajca ten nopa hueyi familia Benjamín mocuetque 956 tacame.

Totajtitzti cati mocuetque

- ¹⁰ Huan ten nopa totajtitzti cati mocuetque eliyayaj: Jedaías, Joiarib, Jaquín,
¹¹ Azarías cati elqui icone Hilcías, cati elqui icone Mesulam, cati elqui icone Sadoc, cati elqui icone Meraiot, cati elqui icone Ahitob. Azarías elqui tayacanquet ipan itiopa Toteco Dios. ¹² Nojquiya mocuetqui se totajtzi cati itoca: Adaía cati elqui icone Jeroham, cati elqui icone Pasur, cati elqui icone Malquías. Huan mocuetqui Masai cati elqui icone Adiel, cati elqui icone Jazera, cati elqui icone Mesulam, cati elqui icone Mesilemit cati elqui icone Imer. ¹³ Huan mocuetque sequinoc totajtitzti cati eliyayaj ininteixmatcahua. Huajca para nochi mocuetque mil 760 totajtitzti cati tahuel quimatque quichihuaj nochi tequit cati monejqui ipan ichaj Toteco Dios.

Levitame cati mocuetque

- ¹⁴ Huan ten nopa levitame, mocuetque: Semaías cati elqui icone Hasub, cati elqui icone Azricam, cati elqui icone Hasabías, cati elqui iteipa iixhui Merari.
- ¹⁵ Nojquiya mocuetque levitame cati inintoca eliyaya: Bachacar, Heres huan Galal.
 Nojquiya mocuetqui Matanías, cati elqui icone Micaía, cati elqui icone Zicri, cati elqui icone Asaf.
- ¹⁶ Huan mocuetque Obadías, cati elqui icone Semaías, cati elqui icone Galal, cati elqui icone Jedutún. Huan mocuetqui Berequías, cati elqui icone Asa, cati elqui icone Elcana, yaya cati itztoya nechca Netofa.
- ¹⁷ Nopa tamocuitahuiani campa tiopan caltemit cati mocuetque inintoca eliyayaj: Salum, Acub, Talmón huan Ahimán ihuaya iteixmatcahua. Huan Salum elqui inintayacanca. ¹⁸ Achtohuiya ni levitame quimocuitahuayayaj nopa caltemit ipan tiopamit cati mocahua ica campa hualquisa tonati campa calaquiyaya nopa tanahuatijquet. Ipan ni levitame nojquiya quisque injuanti cati quimocuitahuayayaj caltemit campa mocahuayayaj nopa levitame para itztose. ¹⁹ Huan Salum elqui icone Coré huan elqui se iteipa ixhui Ebiasaf, cati ehua ipan nopa familia ten iteipa ixhuihua Coré cati huejcajquiya itztoya. Salum huan iteixmatcahua quipiyayaj inintequi para tamocuitahuise campa icalte nopa tiopamit quej inihuejcapan tatahua huejcajquiya tamocuitahuijque campa icalte nopa yoyon tiopamit cati iaxca TOTECO. ²⁰ Huejcajquiya, Finees, icone Eleazar, elqui nopa

achtohui tayacanquet ten caltemit tamocuitahuiani. Huan Toteco itztoya ihuaya. ²¹ Huan teipa Zacarías icone Meselemías quiپیayaya itequi para quimocuitahuis icalte nopa yoyon tiopamit.

²² Huan ipan nopa tonali itztoyaj 212 tamocuitahuiani cati ijcuilijtoc inintoca ipan nopa lista huan nojquiya ijcuilijtoc taya inialtepe. Elqui David huan nopa tajtolpanextijquet Samuel cati achtohui quintapejpenijque inihuejcapan tatahua ni tacame huan quintequimacaque para ma elica caltemit tamocuitahuiani pampa quiitaque para nopa tacame eliyayaj temachme. ²³ Quej nopa nopa nopa caltemit tamocuitahuiani huan ininteipa ixhuhua quiپیayayaj nopa tequit para mopatiyase para tamocuitahuisse campa nopa caltemit ipan ichaj TOTECO, cati achtohui eliyaya se yoyon tiopamit. ²⁴ Huan quintequitalijque nopa tamocuitahuiani para tamocuitahuisse nochi nahui lados ten nopa tiopamit. Tamocuitahuijque ica campa hualquisa tonati, ica campa calaqi tonati, ica norte huan ica tatzinta. ²⁵ Huan ininteixmatcahua cati itztoyaj ipan pilaltepertzitzi, hualayayaj quemantica para chicueyi tonati para quinpalehuise.

²⁶ Pero nopa nahui levitame cati elque nopa tayacanca tamocuitahuiani ipan caltemit más quiپیayayaj tanahuatili. Inijuanti quiپیayayaj nopa tequit para quimocuitahuisse nopa cuartos campa quiajocuiyayaj nochi tamanti cati miyac ipati cati eltoya ipan ichaj Toteco Dios. ²⁷ Huan inijuanti tamocuitahuiyayaj sesen tayohua campa ichaj Toteco Dios pampa ya nopa elqui inintequi. Huan nojquiya elqui inintequi para mojmosta quitapose nopa caltemit ica ijnaloc.

Inintequi sequij levitame

²⁸ Sequij ten nopa tamocuitahuiani quipixque inintequi para quimocuitahuisse nochi tamanti cati quitequihuía quema quitencahuaj tacajcahualisti o quema quihueyichihuaj TOTECO. Quitachiliyayaj cuali quema quiquixtiyayaj nopa tamantzitzi huan quema quicalaquiyayaj para amo quipolose yon se tamanti. ²⁹ Huan sequinoc quiپیayayaj inintequi para quimocuitahuisse sequinoc tamanti quej platos huan tazas, huan nochi sequinoc tamantzitzi cati motequihuía ipan ichaj TOTECO. Nojquiya quimocuitahuiyayaj nopa harina cati más cuali, huan nopa xocomecat iayo, aceite, copali huan taajhuiyacayot. ³⁰ Huan elqui inintequi sequij totajtzitzi para quisencahuase nopa taajhuiyacayot.

³¹ Se levita cati itoca Matatías cati hualajqui ipan nopa familia Coat huan elqui iachtohui cone Salum, quiپیayaya itequi para quichijchihuas pantzi cati quitequihuía ipan ofrendas. ³² Sequij ipan nopa familia ten iixhuhua Coat quiپیayayaj inintequi para quichijchihuase nopa pantzi cati taiyocatalili para TOTECO cati quitecpanayayaj ipan mesa ipan sesen tonali para mosiyajquetzase.

³³ Nojquiya itztoyaj levitame cati eliyayaj huicani huan amo monequiyaya quichihuase yon se tamanti tequit, san huicase. Nochi huicani mocahuayayaj ipan cuartos ipan nopa tiopamit ipan Jerusalén pampa monequiyaya tequipanose para quihueyichihuase TOTECO tayohua huan tonaya ica huicat.

³⁴ Nochi ni tacame eliyayaj tayacanani ipan nopa familia ten levitame huan ijcuilijtoc quej yajtiya inintoca ipan nopa lista huan mocajque para itztose ipan altepet Jerusalén.

Thuejcapan tatahua Saúl (1 Cr. 8:29-40)

- ³⁵ Jehiel itztoya ipan altepet Gabaón cati yaya quipehualti. Isihua itoca eliyaya Maaca. Huan iniachtohui cone itoca eliyaya Abdón. ³⁶ Huan sequinoc iconehua Jehiel inintoca eliyaya: Zur, Cis, Baal, Ner, Nadab, ³⁷ Gedor, Ahío, Zacarías huan Miclot. ³⁸ Huan teipa Miclot quipixqui icone cati itoca Simeam. Nochi ni tacame itztoyaj ipan altepet Jerusalén ipan calme cati nejnechca.
- ³⁹ Huan Ner quipixqui icone cati itoca Cis.
Huan Cis quipixqui icone cati itoca Saúl.
Huan Saúl quinpixqui iconehua cati inintoca eliyaya: Jonatán, Malquisúa, Abinadab huan Es Baal.
- ⁴⁰ Jonatán quipixqui icone cati itoca Merib Baal†.
Huan Merib Baal quipixqui icone cati quitocaxti Micaía,
- ⁴¹ Micaía quinpixqui iconehua cati inintoca eliyaya: Pitón, Melec, Tarea huan Acaz.
- ⁴² Huan Acaz quipixqui icone cati quitocaxti Jara.
Huan Jara quinpixqui iconehua cati quintocaxti: Alemet, Azmavet huan Zimri.
Huan Zimri quipixqui icone cati itoca Mosa.
- ⁴³ Huan Mosa quipixqui icone cati itoca Bina.
Huan Bina quipixqui icone cati itoca Refaías.
Huan Refaías quipixqui icone cati itoca Elasa.
Huan Elasa quipixqui icone cati itoca Azel.
- ⁴⁴ Azel quinpixqui chिकासeme iconehua cati inintoca eliyaya: Azricam, Bocru, Ismael, Searías, Obadías huan Hanán.

10

Imiquilis Saúl huan iconehua (1 S. 31:1-13)

¹ Nopa filisteos quintehuijque nopa israelitame huan cholojtejque nopa israelitame. Huan nopa filisteos quinmictijque miyac israelitame ipan nopa tepet Gilboa. ² Huan nopa filisteos quitoquilijque Saúl huan iconehua, huan quinmictijque iconehua cati inintoca eliyaya: Jonatán, Abinadab huan Malquisúa. ³ Teipa nochi nopa filisteos quimajcahuayayaj cuataminti campaa Saúl huan quiajsique huan tahuel quicocojque. ⁴ Teipa Saúl quitzajtzili itemach huan quiilhui: “Xijquixti momacheta huan techmicti nimantzi pampa hueli hualase nopa filisteos huan techchihuilise miyac tamanti para techpinahualtise.”

Pero itapalehuijca majmahuiyaya huan amo quinequiyaya quimictis. Huajca Saúl quicuic imacheta huan mosentapalhuili ipan itacayo huan mijqui. ⁵ Huan quema itemach quuitac para Saúl ya momicti, yaya nojquiya momicti ica imacheta. ⁶ Huan ijquiyampa ipan san setzi tonali mijqui Saúl huan eyi iconehua. Huan nopona tanqui nochi cati eliyaya ten ixinacho cati mochijtosquáj tanahuatiani teipa ten ya.

⁷ Quema quimatque nopa israelitame cati itztoyaj ipan nopa tamayamit para cholojtoyaj inisoldados huan para Saúl huan eyi iconehua ya mijque, quicajtejque inialtepehua huan nojquiya cholojque. Huajca nopa filisteos moxcatijque nopa altepeme huan mocajque nopona.

⁸ Huan hualmosta nopa filisteos mocuetque para quicuisse nochi tamanti teposti cati quicajque nopa israelita soldados cati mijque ipan tatehuilisti.

Huan quema quipejpentiyahuiyayaj nopa tamanti, quipantijque itacayo Saúl huan iconehua ipan tepet Gilboa. ⁹ Huajca quicuique iyolixtzajca Saúl ten itacayo huan quitzontequilijque itzonteco. Huan nimantzi quintitanque tayolmelahuani ipan nochi inintal para ma quinyolmelahuaca masehualme huan ininteteyohua para ya mijqui Tanahuatijquet Saúl. ¹⁰ Teipa quintalijque iteposhua Saúl ipan itapepecholhua nopa tiopamit ten ininteteyohua. Huan itzonteco quicuapilojque ipan nopa tiopamit ten nopa inindios cati itoca Dagón.

¹¹ Huan nopa israelitame ipan altepet Jabes ipan tali Galaad quimatque nochi cati nopa filisteos quichihuilijtoyaj Saúl. ¹² Huajca nochi nopa tacame cati tahuel mosemacayaj motananque huan quicuijtoq cati mocajqui ten itacayo Saúl huan inintacayo iconehua. Huan quinhualicaque huan nozona quintalpachojque iniomiyohua itzinta se ahua cuahuit ipan Jabes. Huan mosajque para chicome tonati para quinnextilise tatepanitacayot.

¹³ Huajca quej nopa mijqui Saúl pampa amo quitepanitac TOTECO huan mosisini ica ya. ¹⁴ Nojquiya mijqui pampa amo quitajtani TOTECO ma quiconsejomaca, pero yajqui campa nopa sihuat cati quincamanalhuia mijcatzitzí. Yeca TOTECO quintzontamilti huan nopa tanahuatiliti cati quipiyayaya, quimactili David cati elqui icone Isaí.

11

David quitalijque tanahuatijquet ten nochi israelitame

(2 S. 5:1-5)

¹ Huajca nochi israelitame moşentilijque ipan altepet Hebrón campa itztoya David para quicamanalhuise. Huan quihuilijque: “Tojuanti timoteixmatcahua. ² Masque Saúl eliyaya tanahuatijquet, elqui ta cati tiquinyacanayaya isoldados para tatanise ipan tatehuilisti. Huan TOTECO Dios cati moTeco ya mitzilhuijtoc para ta tielis totamocuitahuicja tiisraelitame huan ta tielis titotanahuatijca.” ³ Huan ajsicoj campa David itztoya ipan altepet Hebrón nochi nopa huehue tacame cati quihuicayayaj tequit ipan tali Israel. Huan iixpa TOTECO, David quichijqui se camanali inihuaya. Huan quitequillijque aceite ipan itzonteco David para quitequimacase ma eli inintanahuatijca israelitame. Huan nochi mochijqui san quej TOTECO quihuilijtoya Samuel.

David quitanqui Jerusalén

(2 S. 5:6-10)

⁴ Teipa David huan nochi nopa israelitame yajque ipan altepet Jerusalén cati quitocaxtiyayaj Jebús pampa ipan nopa tonali itztoyaj nozona masehualme cati inintoca eliyaya jebuseos. ⁵ Huan nopa jebuseos quihuilijque David para amo hueli calaquis nozona. Huajca David pejqui quintehuía huan moaxcati nopa cali cati más cuali tasencahuali ipan nopa colonia cati itoca Sion cati ama quitocaxtiaj Ialtepe David. ⁶ Huan David quihuilisti isoldados: “Cati hueli ten amojuantí cati tayacanas ipan nopa tatehuilisti ica nopa jebuseos, nijchihuas ma eli tayacanquet ten nochi nosoldados.”

Huan Joab, icone Sarvia, tayacantiyajqui ipan tatehuilisti huan David quitequitali para ma quinyacana isoldados. ⁷ Huan David mocajqui para itztoya ipan nopa cali cati más tetic huan más temachtí huan yeca quito-caxtiyayaj nopa colonia Ialtepe David. ⁸ Huan David quichijqui para nopa altepet ma quiyahualo nopa cali cati temachtí. Quipehualti campa itoca Milo huan quicuaitali hasta campa nopa tepamit. Huan Joab quincualchijchijqui

nochi sequinoc lugares ipan altepet Jerusalén. ⁹ Huan pampa TOTECO Cati Quinyacana Iilhuicac Ejchua Ma Tatanitij itztoya ica David, yaya mochijqui más chichahuac ipan itequi quej tanahuatijquet huan mochijqui más hueyi iniixpa masehualme pampa nochi quitepanitayayaj.

Isoldados David cati tahuel mosemacaque

(2 S. 23:8-39)

¹⁰ Huan nica eltoc inintoca nopa soldados cati tahuel mosemacayayaj ipan tatehuilisti. Elque injuanti cati quinyolchicajque nopa tayacanca israelitame para ma quitálica David quej inintanahuatijca senquisu quej TOTECO quinnahuatijtoya. ¹¹ Nopa achtohui soldado cati tahuel mosemacac ipan tatehuilisti elqui Jasobeam icone Hacmoni. Yaya eliyaya inintayacanca nopa Eyi cati más mosemacayayaj ten nochi sequinoc. Se tonali Jasobeam quinmicti 300 tacame ica icuatamin cati huehueyac. ¹² Nopa ompa soldado ten nopa Eyi cati tahuel mosemacayayaj eliyaya Eleazar icone Dodo huan iixhui Ahoh. ¹³ Quema David quintehuiyaya nopa filisteos ipan tali Pasdamim, Eleazar itztoya nopona ihuaya. Nopa tatehuilisti elqui ipan se cebada mili huan nopa israelita soldados cholojteque iniixpa nopa filisteos. ¹⁴ Pero Eleazar huan David tatehuijque chichahuac ipan nopa cebada mili huan quintanque nopa filisteos pampa TOTECO quinpalehui huan quinchijqui ma tatanica.

¹⁵ Se tonali quema Tanahuatijquet David motatijtoya ipan nopa ostot ipan tali Adulam hualajque nopa Eyi soldados. Nopa Eyi cati mosemacayayaj itztoyaj ipan nopa 30 soldados cati tahuel mosemacayayaj. Nopa Eyi yajque quinamiquitoj David campa nopa hueyi tet huan nochi nopa filisteo soldados mochijtoyaj nechca ipan nopa tamayamit ipan tali Refaim. ¹⁶ Huan ipan nopa tonali David itztoya ipan nopa lugar cati temachti quema nopa filisteos ya moaxcatijtoyaj altepet Belén. ¹⁷ Huajca David tahuel amiquiyaya huan amo moilhui cati quijtohuayaya. San quijto: “Nelía cuali elisquía para niquisquía se quentzi at cati huala ipan nopa pileta campa icalte altepet Belén.”

¹⁸ Huajca nimantzi nopa Eyi soldados cati tahuel mosemacaj quisque huan ixtacatzí panotiyajque campa nopa filisteo soldados huan quiquixtijque at ipan nopa pileta cati eltoc campa icalte altepet Belén huan quihualiquilijque David. Pero nelía moyolcoco ica cati quijtojttoya huan amo quinejqui quisi nopa at. San quitoyajqui talchi para ma eli quej se tacajcualisti para TOTECO. ¹⁹ Huan yaya quijto: “Toteco Dios, moixpa nitatestigojquetza para amo niquis ni at. ¿Quenicatza niquisquía ni at cati tahuel ipati? Huelis quitoyajtosquía inieso ni tacame quema quicuitoj. Elisquía quej san nichahuilmati ininemilis ni tacame huan hueltosquía quinmictijosquía. Yeca amo quinamiqui para niquis.” Huan nelía amo quic.

Quej nopa quichijque nopa Eyi soldados cati tahuel mosemacaj.

²⁰ Abisai, iicni Joab, elqui inintayacanca nopa 30 soldados cati mosemacaj. Se tonali yaya quinmicti 300 tacame ica icuatamin cati huehueyac huan mochijqui cati nelía hueyi huan nochi quitepanitayayaj quej quintepanitayayaj nopa Eyi. ²¹ Huajca nochi quitepanitayayaj más Abisai que nopa 30 soldados. Huan Abisai eliyaya inintayacanca nopa 30 cati mosemacayayaj, pero yaya amo mosemacayaya quej nopa Eyi cati más mosemacaj.

²² Nojquiya itztoya Benaía, icone Joiada, cati ehuyaya ipan altepet Cabseel. Yaya cuali quixmatiyaya quenicatza tatehuis huan quichijqui miyac huejhueyi tamanti. Se tonali quinmicti huejhueyi tacame ten altepet Moab cati eliyayaj quej tecuanime. Seyoc tonali quema tasehuetziyaya, Benaía

motalojtiyayqui huan quitoquili se tecuani cati mahuilili hasta ipan se ostot. Huan masque taalahuayaya campa hueli, quiajsic nopa tecuani huan quimicti. ²³ Seyoc huelta ica se cuahuit imaco quimicti se Egipto ejquet cati quiptiyayaya nechca ome metro huan tajco ihuejcapanca masque nopa Egipto ejquet quihualicayaya se cuataminti cati huehueyac huan tahuel patahuac huan Benaía san quihuicayaya se cuatopili. Quinechcahui nopa Egipto ejquet huan quicuili nopa hueyi cuataminti cati huehueyac cati quihuicayaya imaco huan ica quimicti. ²⁴ Quej ni quichijqui Benaía para nochi quixmatise quej nojquiya quinixmatiyayaj nopa Eyi cati tahuel mosemacayaj. ²⁵ Yeca Benaía quiseliyaya más tatepanitacayot ten nopa 30 soldados, pero amo eliyaya quej nopa Eyi cati tahuel mosemacayaj. Huan David quitapejpeni Benaía ma eli itemach o itamocuitahuijca.

²⁶ Nica eltoc inintoca nopa sequinoc tatehuiani cati eliyayaj isoldados David:

Asael, iicni Joab;

Elhanan, icone Dodo, cati ehuyayaya ipan altepet Belén;

²⁷ Samot cati ehuyayaya tali Harod;

Heles cati hualayaya ten altepet Pelón;

²⁸ Ira, icone Iques, cati huala ten altepet Tecoa;

Abiezer cati ehuyayaya ipan altepet Anatot;

²⁹ Sibecai cati ehuyayaya altepet Husat;

Hai cati ehuyayaya altepet Ahoh;

³⁰ Maharai cati ehuyayaya altepet Netofa;

Heled, icone Baana, cati ehuyayaya altepet Netofa;

³¹ Itai, icone Ribai, ten altepet Gabaa ipan tali Benjamín;

Benaía cati ehuyayaya altepet Piratón;

³² Hurai cati ehuyayaya nechca hueyat Gaas;

Abiel cati ehuyayaya altepet Arbat;

³³ Azmavet cati eliyaya se Barhumita tacat;

Eliaba cati ehuyayaya altepet Saalbon;

³⁴ Iconehua Hasem cati ehuyayaj altepet Gizón;

Jonatán, icone Sage, cati ehuyayaya altepet Arar;

³⁵ Ahíam, icone Sacar, cati nojquiya ehuyayaya altepet Arar;

Elifal, icone Ur;

³⁶ Hefer cati ehuyayaya altepet Mequerat;

Ahías cati ehuyayaya altepet Pelón;

³⁷ Hezro cati ehuyayaya altepet Carmelo;

Naarai, icone Ezbai;

³⁸ Joel, iicni Natán;

Mibhar, icone Hagrai;

³⁹ Selec cati ehuyayaya altepet Amón;

Naharai cati ehuyayaya altepet Beerot huan quihuicayaya iyolixtzajca Joab cati eliyaya icone Sarvia.

⁴⁰ Ira cati ehuyayaya altepet Itra;

Gareb cati nojquiya ehuyayaya altepet Itra;

⁴¹ Urías cati eliyaya se heteo tacat;

Zabad, icone Ahlai;

⁴² Adina, icone Siza, se iixhui Rubén cati quinyacanayaya 30 tacame cati nojquiya hualajque ipan nopa hueyi familia ten Rubén;

⁴³ Hanán, icone Maaca;

Josafat, cati ehuyayaya altepet Mitna;

⁴⁴ Uzías, cati ehuyaya altepet Astarot;
 Sama huan Jehiel, iconehua Hotam, cati ehuan altepet Aroer;
⁴⁵ Jediael, icone Simri;
 huan Joha, iicni, cati ehuyaya altepet Tiza;
⁴⁶ Eliel cati ehuyaya altepet Mahavi;
 Jerebai huan Josavía, iconehua Elnaam;
 Itma cati ehuyaya altepet Moab;
⁴⁷ huan Eliel, Obed huan Jaasiel cati ehuyayaj altepet Mesoba.

12

Soldados cati mosejcotilijque ica David

¹ Ama nimechilhuis inintoca sequij soldados cati tahuel mosemacayayaj cati mosentilijque ica David ipan Siclag quema motatijtinemiyaya ten Tanahuatijquet Saúl icone Cis. Ni tacame, ica nopa sequinoc soldados cati ya itztoyaj ihuaya David, eliyayaj cati moquetzque más nechca David huan tatehujque. ² Nochi ni tacame cuali quiixmatiyayaj quenecatza quitequihuse nopa cuahuitoli, cuataminti huan tehuizatzi. Nochi injuanti huelyiyayaj quimajcahuaj tet o cuataminti ica inimanejmat huan ica inimaaraves. Huan nochi eliyayaj iteixmatcahua Tanahuatijquet Saúl huan hualayayaj ten nopa hueyi familia Benjamín.

³ Iniachtohui tayacanca itoca eliyaya Ahiezer. Ininteipa tayacanca elqui Joás, iicni Ahiezer. Inijuanti eliyayaj iconehua Semaa cati ehuyaya altepet Gabaa. Nopa soldados cati ni tacame quinyacanayayaj inintoca eliyaya: Jeziel huan Pelet, iconehua Azmavet;
 Beraca huan Jehú cati ehuyayaj altepet Anatot;

⁴ Ismaías cati ehuyaya altepet Gabaón, se tatehujquet cati nochi quiixmatiyayaj huan se tayacanquet ten nopa 30 soldados cati tahuel mosemacayayaj;

Jeremías, Jahaziel, Johanán, Jozabad cati ehuyaya altepet Gedera;

⁵ Eluzai, Jerimot, Bealías, Semarías huan Sefatías cati ehuyayaj altepet Haruf;

⁶ Elcana, Isías, Azareel, Joezer huan Jasobeam cati eliyayaj iteipa ixhuihua Coré;

⁷ huan Joela huan Zebadías, iconehua Jeroham, cati ehuyayaj altepet Gedor.

⁸ Nojquiya sequij soldados ipan nopa hueyi familia Gad cati tahuel quiixmatiyayaj tatehuaj nojquiya motemacaque ica David quema itztoya ipan nopa lugar temacht ipan huactoc tali. Inijuanti quipiyayaya tahuel miyac yajatilí para tatehuse ica yoixtazjayot huan cuataminti cati huehucayac. Tahuel tetique ni tacame. Nesiyyaya para quipiyaj fuerza hasta quipiyayayaj inixayac quej tecuanime huan motalohuayayaj chichahuac quej masame ipan cuatitamit. ⁹ Inijuanti inintoca eliyaya: Ezer inintayacanca, Obadías in-iompa tayacanca, teipa Eliab, ¹⁰ Mismana, Jeremías, ¹¹ Atai, Eliel, ¹² Johanán, Elzabad, ¹³ Jeremías huan Macbanai. ¹⁴ Ni tacame ten nopa hueyi familia Gad nelía eliyayaj soldados cati tetique. Cati amo más quipixqui fuerza ten injuanti ipati eliyaya quej 100 soldados ipan se tatehuilisti. Huan cati más quipixqui chichualisti ipati eliyaya quej 1000 soldados. ¹⁵ Huan ipan nopa achtohui metzti ipan inixihui, quema nopa hueyat Jordán mochijtoya huejcata, nopa tacame quiixcotonque huan quinqixtijque nochi nopa masehualme cati itztoyaj ipan nopa tamayamit itejteno nopa hueyat ica campa hualquisa tonati huan ipan nica nali ipan nopa tamayamit ica campa calaquí tonati.

¹⁶ Nojquiya yajque campa motatijtoya David sequinoc tacame ten nopa huejhueyi familias ten Benjamín huan Judá. ¹⁷ Huan David quinnamiquico huan quinihui:

—Sinta anhualajtoque ica cuali para antechpalehuise, nimechselía ica nochi noyolo huan timohuampoqchihuase. Pero sinta anhualajtoque para antechcayahuase huan para antechtemactilise inimaco nocualancaitacahua masque amo nijchijtoc yon se tamanti cati amo cuali, huajca Toteco Dios cati elqui ininTeco tohuejcapan tatahua ma amechtatzacuulti.

¹⁸ Huan Itonal Toteco hualajqui ipan Amasai, yaya cati teipa mochijqui tayacanquet ten nopa 30 soldados. Huan Itonal Toteco quimacac icamanal huan quej ni quihui David icone Isaí:

“David, tojuanti timoaxcahua. Tiitztose monechca.

Tihualajtoque ica tasehuilisti ica ta huan inihuaya motapalehuijcahua, Toteco moDios ma mitzpalehui.”

Huan David quinseli huan quinchijqui ma elica tayacanani ten isoldados.

¹⁹ Nojquiya sequij soldados cati hualajque ten nopa hueyi familia Manasés, nojquiya quicajtejque Tanahuatijquet Saúl huan motemacaque ica David quema yaya yahuiyaya para quinpalehuis nopa filisteos para quitehuise Saúl. Pero quema David ajsito nozona, inintayacancahua nopa filisteos amo quinejque para David huan imasehualhua ma tatehuitij inihuaya. Moilhuijque más cuali para sempa quincuepaltise. Moilhuiyayaj huelis David huan imasehualhua sempa moyoltalisquíaj ihuaya Tanahuatijquet Saúl huan mosejcotilise sempa ihuaya huan san sejco Saúl huan nopa israelitame quinmictisquíaj nopa filisteos. ²⁰ Huan nica eltoc inintoca nopa tacame ten nopa hueyi familia Manasés cati motemacaque ica David quema yaya yajqui ipan altepet Siclag: Adnas, Jozabad, Jediael, Micael, Jozabad, Eliú huan Ziletai. Sesen ten injuanti eliyaya nopa hueyi tayacanquet ten se mil soldados ten nopa hueyi familia Manasés. ²¹ Ni tacame huan inisoldados quipalehuijque David ma quinixti nopa tachtequini cati campa hueli nemiyayaj. Ni tacame nelía mosemacayayaj ipan tatehuilisti. Huan David quinchijqui ma elica tayacanani ipan isoldados. ²² Huan mojmosta tahalayaj más tacame huan motemacayayaj ica David hasta quinpixqui hual elmiyac isoldados. Injuanti elque quej inimiyaca iilhuicac ejcahua Toteco Dios.

Cati mosejcotilijque ica David ipan Hebrón

²³ Nica ijcuilijtoc inintoca nopa soldados cati motemacaque ica David ipan altepet Hebrón. Ni tacame tahuel quinequiyayaj para David ma eli inintanahuatijca huan amo Saúl senquisa quej Toteco quijtojtoya para panos.

²⁴ Ten nopa hueyi familia Judá itztoyaj 6 mil 800 soldados cati mocualtalijtoyaj ica tepos yolixtzajcayot para quimanahuise inintacayo ten cuataminti.

²⁵ Ten nopa hueyi familia Simeón itztoyaj 7 mil 100 soldados cati tahuel mosemacaj huan cati tahuel quipiyayaj teteli.

²⁶ Ten nopa hueyi familia Leví itztoyaj 4 mil 600. ²⁷ Huan ipan ni tacame itztoya Joiada cati quinyacanqui 3 mil 700 soldados cati eliyayaj iteipa ixhuihua Aarón. ²⁸ Se ten injuanti quitocaxtiyayaj Sadoc. Sadoc elqui se telpacat cati tahuel mosemacayaya huan quinnahuatiyaya 22 ten ihueyi familia cati tatehuiyayaj huan nochi 22 nojquiya eliyayaj tayacanani.

- 29 Ten nopa hueyi familia Benjamín cati eliyayaj huicalme ica Saúl, san itztoyaj 3 mil soldados cati quipalehuijque David. Hasta ipan ni tonali, miyac ten nopa familia Benjamín noja quitoquiliyayaj Tanahuatijquet Saúl.
- 30 Ten nopa hueyi familia Efraín, itztoyaj 20 mil 800 soldados cati tahuel quipiyayayaj tetili. Huan sese ten injuanti quiseliyaya miyac tatepan-itacayot ipan ifamilia.
- 31 Nopa tajco hueyi familia Manasés quintitanqui 18 mil soldados para quitatalitj David ma eli tanahuatijquet.
- 32 Ten nopa hueyi familia Isacar, itztoyaj 200 tayacanani ica ininteixmatc-ahua. Nochi injuanti eliyayaj nelia talnamiquini huan quimatiyayaj quenicatza eltoya tamanti ipan inintal huan taya monequiyaya quichihuase nopa israelitame para monejnemiltise xitahuac. Huan nochi ininteixmatc-ahua quitoquiliyayaj senquisa cati ni 200 tacame quiijtohuayayaj.
- 33 Ten nopa hueyi familia Zabulón, itztoyaj 50 mil soldados cati tahuel mosemacayayaj para tatehuse. Huan injuanti itztoyaj cuali tacualtalilme para quipalehuse David.
- 34 Ten nopa hueyi familia Neftalí, itztoyaj se mil tayacanani huan 37 mil soldados cati mocualtalijtoyaj para tatehuse huan quihuicayayaj iniyolixtajcayohua huan inincuataminhua cati huejhuehueyac.
- 35 Ten nopa hueyi familia Dan, itztoyaj 28 mil 600 soldados cati cuali mocualtalijtoyaj para tatehuse.
- 36 Ipan nopa hueyi familia Aser, itztoyaj 40 mil soldados cati mocualtalijtoyaj para tatehuse ica miyac tamanti teposti.
- 37 Huan nojquiya ipan nopa seyoc nali ten hueyat Jordán ica campa hualquisa tonati, itztoyaj 120 mil soldados cati hualajque ipan nopa hueyi familia Rubén, Gad huan nopa tajco familia Manasés. Nochi injuanti mocualtalijtoyaj para tatehuse ica miyac tamanti teposti.
- 38 Nochi ni tatehuijca tacame cati tahuel mosemacayayaj, ajsicoj ipan altepet Hebrón ica nochi iniyolo para quitalise David quej inintanahuatijca para nochi tali Israel. 39 Huan quichijque se hueyi ilhuit para eyi tonati. Huan tacuajque ihuaya David pampa ininteixmatc-ahua quicualtalijtoyaj se hueyi tacualisti para quema injuanti ajsisquíaj. 40 Huan nopa masehualme cati huejca ehuan quej cati hualajque ten nopa familias ten Isacar, Zabulón huan Neftalí quihualicatoyaj tacualisti ipan burrojme, camellos, mulas huan huacaxme. Nochi ni tapiyalme quinmamaltijtoyaj miyac tacualisti. Ipan ni ilhuit quihualicague nochi tamanti tacualisti, quej itajca nopa higo cuahuit, xócomecat itajca cati huacoc, xócomecat iayo, huacaxme huan borregojme pampa nochi masehualme ipan nochi tali Israel tahuel paquiyayaj para quitalise David quej tanahuatijquet.

13

David quihualicac icaxa Toteco ipan Jerusalén

1 Huajca David quintajtani consejo nochi nopa tayacanani ten isoldados huan teipa quema nochi tali Israel ehuan mosentilijtoyaj, 2 quinilhui: “Sinta anquilitaj cuali huan sinta ipaquilis Toteco, ma tiquintitanica tayolmelahuani campa itztoque nochi masehualme campa hueli ipan tali Israel. Nojquiya ma tiquiniyolmelahuatij nopa totajtzitzi huan levitame cati itztoque ipan inialtepehua huan ininpotreros para ma hualaca mosentiliquij

tohuaya. ³ Huan quej nopa, san sejco tiyase tijcuitij icaxa Toteco Dios pampa amo tijchihuilijque cuenta ipan nopa tonali quema Saúl tanahuatiyaya.”

⁴ Huan nochi nopa miyac masehualme moilhuijque para cuali huan quijtojque para ijquiyampa ma mochihua.

⁵ Huajca David quinsentili nochi nopa masehualme cati itztoyaj ten se lado ital nechca altepet Sihor cati monepantía ihuaya tali Egipto huan hasta seyoc lado campa eltoya icalte altepet Hamat. Quinilhui ma hualaca para quicuitij icaxa Toteco Dios cati eltoya ipan altepet Quiriat Jearim. ⁶ Teipa David huan nochi nopa israelitame, yajque ipan altepet Quiriat Jearim cati nojquiya itoca Baala, cati mopantía ipan tali Judá. Huan quicuitoj icaxa Toteco Dios cati itztoe más huejcapa campa itztoque seyoc tamanti ilhuicac ehuan cati inintoca querubines. ⁷ Huan quicuitejque nopa caxa ipan ichaj Abinadab huan quitelijque ipan se carro cati yancuic. Huan Uza huan Ahío quitilanayayaj nopa carro ica ome huacaxme. ⁸ Huan David huan nochi nopa israelitame huitontiyahuiyayaj ica miyac paquillisti iixpa Toteco Dios ica nochi ininchichualis. Huan nojquiya huicatihuiyayaj huan tatzotzontiyahuiyayaj ica arpas, cítaras, panderos, címbalos huan ica tapitzali.

⁹ Pero quema ajsitoj ipan nopa lugar campa quiyolquixtíaj trigo ipan tali Quidón, nopa huacaxme motepotanjque. Huan Uza quixitajqui imax para quitzacuilis nopa caxa para ma amo motepexihui. ¹⁰ Huajca TOTECO tahuel cualanqui ica Uza pampa quitali imax ipan nopa caxa. Huan quitzontamilti huan nozona mijqui iixpa Toteco Dios.

¹¹ Huan David mocueso miyac pampa TOTECO quimicti Uza. Huan nopa lugar campa mijqui, David quitocaxti Pérez Uza, cati quinequi quijtos Campa Mijqui Uza. Huan quej nopa itoca hasta ama.

¹² Huan ipan nopa tonali, David pejqui tahuel quimacasi Toteco Dios huan moilhui: “Sinta quej nopa mahuilili se quinechcahuis icaxa Toteco Dios, ¿quenicatza huelis nijhuicas hasta Jerusalén?” ¹³ Huajca amo quihuicaque nopa caxa hasta Ialtepe David. David tanahuati ma quihuicaca ipan ichaj se tacat cati itoca Obed Edom ten altepet Gat. ¹⁴ Huan icaxa Toteco Dios mocajqui ipan ichaj Obed Edom para eyi metzti, huan TOTECO tahuel quitiochijqui nopa tacat huan ifamilia.

14

Hiram quintitanqui calchihuani ma quipalehuitij David (2 S. 5:11-12)

¹ Hiram, cati eliyaya tanahuatijquet ipan altepet Tiro, quititanili David sequij tacame cati quixmatiyayaj quenicatza quichijchihuase se cali. Sequij quixmatij quitecpichose tet huan sequij eliyayaj cuaximani. Nojquiya quititanqui miyac tiocuahuit para ica quichihuase huapali. ² David quimachili para TOTECO quinicneliyaya imasehualhua, huan yeca quichijtoya ma eli tanahuatijquet ipan tali Israel huan quichijtoya para itanahuatijcayo ma eli nelía hueyi.

Sequinoc iconehua David (2 S. 5:13-16; 1 Cr. 3:5-9)

³ Huan teipa David mocuetqui ipan altepet Jerusalén huan nozona mocuili noja más isihuajhua. Huan quinpixqui miyac oquichpilme huan sihuapilme. ⁴ Huan nica eltoc inintoca nopa oquichpilme cati quinpixqui

ipan altepet Jerusalén: Samúa, Sobab, Natán, Salomón,⁵ Ibhar, Elisúa, Elpelet,⁶ Noga, Nefeg, Jafía,⁷ Elisama, Beeliada huan Elifelet.

David quintanqui nopa filisteos
(2 S. 5:17-25)

⁸ Huan teipa nopa filisteos quimatque para David eliyaya nopa yancuic tanahuatijquet. Huajca quincualtalijque inisoldados para quuitzquise. Pero quema David quimatqui para hualayayaj ipan ojti, nimantzi quinsentili isoldados huan yajqui quinnamiquito para motehuis inihuaya. ⁹ Huan nopa filisteos hualajque huan mochijque ipan nopa tamayamit cati itoca Refaim.

¹⁰ Huajca David quitajtani consejo Toteco Dios huan quiihlui:

—¿Tijnequi ma niya niquintehuiti nopa filisteos? ¿Techpalehuis para niquintanis?

Huan TOTECO quinanquili huan quiihlui:

—Quena, xiya xiquintehuiti huan na niquintemactilis momaco.

¹¹ Huan David yajqui ipan Baal Perazim huan nozona quintanqui nopa filisteos. Huan ica miyac paquilisti, quiiyto: “Toteco Dios quichijtoc ya ni. Quintzontamilti nocualancaitacahua quej at cati yahui chichahuac huan quitapohua se aojti.” Yeca nopa lugar quitocaxtíaj Baal Perazim. (Baal Perazim quinequi quiiytos Toteco Ojtapohua.) ¹² Nopa filisteo soldados quincajteque ininteteyohua, huan David quinnahuati isoldados ma quinsentilica huan ma quintatica.

¹³ Quema panotoya miyac tonali nopa filisteos sempa hualajque huan mochijque ipan nopa tamayamit cati itoca Refaim. ¹⁴ Huan David sempa quitatzintzoquili Toteco Dios taya monequiyaya quichihuas, huan Toteco Dios quiihlui:

—Amo xiquintehui ica iniixpa. Ama xiya xiquinyahualoti hasta iniica campa eltoc nopa bálsamo cuahuit huan ten nozona xiquintehui. ¹⁵ Huan quema tijaquis sasahuacaj inixihuiyo nopa bálsamo cuame quej miyac soldados cati nejnentyahuij, nimantzi xijpehualti xiquintehui. Ya nopa elis se tanextili para na niya amoixpa para niquintzontamiltis nopa filisteo soldados.

¹⁶ Huajca David quichijqui nochi senquisa quej Toteco Dios quinnahuati-toya, huan quintzontamilti nochi nopa filisteo soldados. Quena, quintzontamilti quema cholojtyahuiyayaj ten Gabaón hasta Gezer. ¹⁷ Huan nochi masehualme campa hueli quimatque ten quichijqui David, huan TOTECO quichijqui para masehualme ipan nochi talme ipan taltipacti ma quimacásica David.

15

David quihualicac icaxa Toteco ipan Jerusalén
(2 S. 6:12-23)

¹ Huan David mochijchihuili miyac calme ipan nopa colonia cati itoca Ialtepe David. Nojquiya quicualtali se yoyon cali para ipan quitalis icaxa Toteco Dios. ² Huan temacac ni tanahuatili:

—Quema tijhuicase icaxa Toteco Dios, san levitame hueli quihuicase. TOTECO quintapejpenijtoc inijuanti para quihuicase icaxa huan para nochipa motequihuisse nozona iixpa.

³ Teipa David quinsentili nochi israelitame ipan altepet Jerusalén para quihualicase icaxa TOTECO ten campa eltoya hasta nopa yancuic yoyon cali cati yaya quicualtalilijtoya. ⁴ Huan David quinsentili miyac totajtztizti huan levitame.

⁵ Ten ifamilia Coat hualajque 120, huan Uriel eliyaya inintayacanca.

⁶ Ten ifamilia Merari hualajque 200, huan Asaías eliyaya inintayacanca.

⁷ Ten ifamilia Gersón hualajque 130, huan Joel eliyaya inintayacanca.

⁸ Ten ifamilia Elizafán hualajque 200, huan Semaías eliyaya inintayacanca.

⁹ Ten ifamilia Hebrón hualajque 80, huan Eliel eliyaya inintayacanca.

¹⁰ Ten ifamilia Uziel hualajque 112, huan Aminadab eliyaya inintayacanca.

¹¹ Huan David quinotzqui Sadoc huan Abiatar cati eliyayaj tayacanani ten totajtzitzi. Huan quinnotzqui nopa levita tayacanani: Uriel, Asaías, Joel, Semaías, Eliel huan Aminadab.

¹² Huan quinilhui: “Amojuanti aninintayacancahua nochi familias ten levitame, yeca monequi ximotapajpacchihuaca huan ma motapajpacchihuaca nochi amoicnihua. Quej nopa huelis anquihualicase icaxa TOTECO Dios cati toTeco tiisraelitame huan anquitalise ipan nopa yoyon cali cati nijchijchihuilijtoc. ¹³ Achtohuiya amo anquihuicayayaj nopa caxa quej quinamiqui huan TOTECO cualanqui ica tojuanti. Amo tijtemojque ipan itanahuatilhua quenicatza yaya quijtohua para ma tijhuicaca.”

¹⁴ Huajca nochi nopa totajtzitzi huan nopa levitame motapajpacchijque para huelise quicuitij icaxa TOTECO Dios cati toTeco tiisraelitame. ¹⁵ Huajca nopa levitame quihuicaque nopa caxa ipan iniajcol ica nopa ome huehueyac cuahuit cati quitilijtoyaj para ica quihuicase pampa quej nopa TOTECO quinahuatijtoya Moisés ma quichihuaca.

¹⁶ Nojquiya David quinilhui nopa levita tayacanani para ma quintequimacaca levitame cati huicani huan cati quimatij tatzotzonase para huicase ica miyac paquilisti inihuaya cati tatzotzonase ica salterios, arpas huan címbalos. ¹⁷ Huan nopa levitame quintequimacaque: Hemán, icone Joel, Asaf, icone Berequías huan Etán, icone Cusaías. Nochi injuanti hualahuij ipan nopa familia Merari. ¹⁸ Huan sequinoc tacame cati tapalehuijque inintoca eliyaya: Zacarías, Jaaziel, Semiramot, Jehiel, Uni, Eliab, Benaía, Maasías, Matatías, Elifelehu huan Micnías. Nojquiya tapalehuijque Obed Edom huan Jeiel cati quipixque inintequi quej tamocuitahuiani ipan caltemit.

¹⁹ Huan Hemán, Asaf huan Etán cati eliyayaj huicani, quintequitalijque para quitzotzonase nopa tepostatzotzonal cati itoca címbalo cati tachijchihuali ica bronce. ²⁰ Huan Zacarías, Aziel, Semiramot, Jehiel, Uni, Eliab, Maasías huan Benaía quintequimacaque para tatzotzonase ica salterios.

²¹ Huan Matatías, Elifelehu, Micnías, Obed Edom, Jeiel huan Azazías quintequimacaque para tatzotzonase ica arpas. ²² Huan Quenanías cati eliyaya se tayacanquet ten levitame huan eliyaya neltalnamiqum para tatzotzonas huan huicas, quitequitali para quinyacanas nochi cati huicayayaj. ²³ Huan Berequías huan Elcana quintequimacaque para quimocuitahuise nopa caxa.

²⁴ Huan nopa totajtzitzi Sebanías, Josafat, Natanael, Amasai, Zacarías, Benaía huan Eliezer quintequitalijque para quiyacanase icaxa Toteco Dios huan tapitztiyase. Huan nojquiya Obed Edom huan Jehías quintequitalijque para quimocuitahuise nopa caxa.

²⁵ Huajca David huan nopa huehue tacame ten tali Israel huan nopa tayacanani ten soldados, yajque ipan ichaj Obed Edom para quihualicase icaxa TOTECO ipan altepet Jerusalén ica miyac paquilisti. ²⁶ Huan pampa Toteco Dios quinpalehuiyaya nopa levitame cati quihuicatihuyiyayaj nopa caxa, quitencahuilijque chicome torojme huan chicome oquich chivojme quej tacajchualisti. ²⁷ Huan David moquentijtoya iyoyo cati huehueyac

cati tachijchihuali ica lino cati más cuali. Huan nojquiya san se moquentijtoyaj nopa levitame cati quihualicayayaj nopa caxa, huan nopa tacame cati huicayayaj huan Quenanías cati tayacanayaya ipan huicat. Nojquiya David quihucayaya se pantzajcayot cati itoca efod cati tachijchihuali ica lino. ²⁸ Huan quej nopa, nopa israelita tayacanani quihualicayaya nopa caxa ica paquillisti para quicahuaquij ipan altepet Jerusalén. Quipitziyajque cuacuajti huan tepos tapitzali. Nojquiya tatzotzontiyajque ica címbalos, arpas huan cítaras.

²⁹ Pero quema ajsicoj ica nopa caxa ipan altepet Jerusalén, isihua David cati itoca Mical iichpoca Tanahuatijquet Saúl, tachixqui ipan ventana, huan quuitac para Tanahuatijquet David huitontihualayaya huan moilhui ne-siyaya quej se tacat cati tzontapolohua, huajca pejqui quicualancaita.

16

¹ Huajca quej nopa quihualicayaya nopa caxa huan quitelijque ipan nopa yoyon cali cati David quicuallilijtoya. Huan iixpa Toteco Dios, nopa israelita tayacanani quitencajque tacajcahualisti tatatili huan tacajcahualisti para tayoltalili ica Toteco Dios. ² Huan teipa quema David tanqui quitencahua nopa tacajcahualisti tatatili huan nopa tacajcahualisti para tayoltalili ica Toteco, quincamanalhui nopa masehualme huan quinilhui: “Ma TOTECO amechtiochihua.” ³ Teipa quimacac tactualisti sesen tacat huan sesen sihuat. Nochi israelitame quiselijque se hueyi pantzi huan se quentzi nacat huan se torta ten xocomecat itajca cati huactoc.

⁴ Huan David quintapejpeni sequij levitame para tayacanase para quihueyitalise TOTECO iixpa icaxa. Huan inijuanti mocajque nozona quitasamatiliyayaj huan quihueyichihuayayaj TOTECO Dios cati toTeco tiisraelitame. Huan quitajtaniyayaj para ma quintiochihua imasehualhua. Huan nica eltoc inintoca inijuanti cati quintapejpeni: ⁵ Asaf yaya elqui nopa tayacanquet ten ni tahueyichihuali huan yaya tatzotzonayaya ica címbalo. Huan itapalehuicahua eliyayaj: Zacarías cati elqui nopa ompa tayacanquet. Teipa Jeiel, Semiramot, Jehiel, Matatías, Eliab, Benaía, Obed Edom huan Jeiel. Nochi ni tacame quitzotzonayayaj arpas huan cítaras. ⁶ Huan nopa totajtzitzi Benaía huan Jahaziel quisehuiuquiliyayaj tapitzaj iixpa icaxa Toteco Dios.

Se salmo cati David quijcuilo para quitascamatis Toteco

(Sal. 105:1-15; 96:1-13; 106:47-48)

⁷ Ipan nopa tonali David quimacac Asaf huan iteixmatcahua ni huicat huan quinilhui ma huicaca para quitascamatilise TOTECO. Huan quej ni huicayayaj:

⁸ “Xijtasamatilica TOTECO. Xitepohuilica ten ihueyitalise.

Xiquinilhuica nochi ipan ni taltipacti nochi tamanti cati yaya quichijtoc.

⁹ Xijhuicatica. Xihuicaca para anquihueyitalise.

Xitepohuilica ten nopa huejhueyi tiochicahualnescayot cati quichihua.

¹⁰ Xijpiyaca hueyi paquillisti pampa yaya tahuel tatzetzeloltic.

Xipaquica amojuanti cati anquitemohuaj TOTECO.

¹¹ Xijtemoca TOTECO huan ichicahualis.

Quena, nochipa xijtemoca para nelia cuali anquixmatise.

¹² Xiquelnamiquica nopa huejhueyi tiochicahualnescayot cati tahuel temajmati cati yaya quichijtoc.

Huan xiquelnamiquica quenicatza tetajtolsenajtoc xitahuac.

¹³ Anixhuihua Israel cati elqui itequipanojca TOTECO.

Amojuanti cati TOTECO amechtapejpenijtoc.

14 Yaya TOTECO Dios. Yaya toTeco tojuanti.

Yaya quipiya tanahuatili cati ajsi hasta campa hueli ipan ni taltipacti.

15 Xiquelnamiquica nopa camanali cati quichijqui.

Masque masehualme tacajtiyase para 30 mil xihuit, yaya amo quielcahuas cati techtencahuilijtoc ipan nopa camanali cati quichijqui ica tojuanti.

16 Quielnamiquis nopa camanali cati quichijqui ihuaya Abraham, nopa cati quifestigojquetzqui ica Isaac para quichihuilis.

17 Teipa sempa quiilhui Jacob nopa camanali para ma eli quej se tanahuatili. Quinilhui israelitame para elis se camanal sencahuali cati huejcahuas para nochipa.

18 TOTECO quiiyto:

‘Nimitzmacas para ma eli moaxca ni tali Canaán.

Huan tijselis huan timoaxcatis.’

19 Yaya quiiyto ya ni quema nopa israelitame ayemo eliyayaj miyaqui, huan san eltoyaj quej seyoc tali ehuan i pan Canaán.

20 Israelitame campa hueli nejnenque ten se tali hasta seyoc para mochanti-jtiyase.

Quemantica itztoyaj ipan se tali itanahuatilis, huan quemantica ipan seyoc.

21 Pero TOTECO amo quincahuili para sequinoc ma quintajyohuiltica imasehualhua.

Huan pampa quinicneliyaya imasehualhua, quintemajmati tanahuatiani para ma quintepanitaca.

22 Quinilhui: ‘Amo xiquincuatotonica nomasehualhua cati niquintapejpeni-jtoc,

yon amo ten hueli xiquinchihuilica notajtolpanextijcahua.’

23 Nochi anmasehualme cati anitztoque ipan ni taltipacti, xihuicaca para TOTECO.

Mojmosta xiteilhua para yaya TOTECO temaquixtía.

24 Xiteilhua ihueyitilis ipan nochi talme.

Huan xiquinphuilica nochi masehualme nopa huejhueyi tamanti cati yaya quichihua.

25 Pampa TOTECO nelía hueyi huan quinamiqui tijhueyichihuase miyac.

Monequi san ya tijhueyitepanitase ten nochi sequinoc teteyome.

26 Nochi sequinoc masehualme quinhueyichihuaj taixcopincayome huan teteyome cati amo nelía Dios.

Pero TOTECO quichijchijqui ilhuicacti.

27 Campa yaya itztoc onca tatepanitacayot huan tequiticayot.

Nopona monextía chichahualisti huan hueyi paquilisti.

28 Nochi anmasehualme cati anitztoque ipan nochi talme, xiquixmatica ajquiya TOTECO.

Xijmatica para yaya quipiya tahuel miyac ihueyitilis huan miyac ichichahualis.

29 Xijmacaca TOTECO nopa tatepanitacayot cati quinamiqui quiselis.

Xijhualicaca ofrendas huan xihualaca xijhueyichihuaquij.

Ximotancuaquetzaca iixpa TOTECO pampa yaya tatzetzeloltic huan nopa tatanexti campa itztoc tahuel pano yejectzi.

30 Nochi masehualme ipan nochi taltipacti ma huihuipicaca iixpa. TOTECO quichijqui ni taltipacti temachtí para amo mojmolinis.

31 Nochi ipan ilhuicacti huan taltipacti, xipaquica miyac.

Xiquinilhua nochi masehualme ipan nochi talme para TOTECO tanahuatía.

32 Ma ajcahuaca chichahuac nopa hueyi at huan ma tzajtza nochi cati ipan itztoc.

Ma paquica nochi xinachti cati quitoctoque ipan mili. Ma ixhua sese ica paquilisti.

³³ Nochi cuame cati mopantíaj ipan cuatitamit, ma sasahuacaca ica paquilisti para quihuicatise TOTECO.

Pampa yaya hualas para quintajtolsencahuas nochi masehualme cati itztoque ipan ni taltipacti.

³⁴ Xijtascomatolica TOTECO pampa yaya nelía cuali.

Yaya techtasojtas para nochipa.

³⁵ Xiquilhuica: “Techmaquixti, Toteco Dios, pampa ta titotemaquixtijca.

Techsejcotili ten nochi sequinoc talme huan techhualica hasta total ica miyac cuali.

Huan timitztascomatilise, ta cati titatzejtzeloltic, huan ica miyac paquilisti timitzpaquilismacase.’

³⁶ Ma tijhueyichihuaca TOTECO Dios, yaya cati toTeco tiisraelitame. Yaya nochipa itztoya huan para nochipa itztos.”

Huan nochi nopa masehualme quiijtojque: “¡Quej nopa ma eli!” Huan quipaquilismacaque TOTECO.

³⁷ Huan David quitequimacac Asaf huan ihuampoyohua cati nojquiya eliyayaj levitame para ma motequihuica mojmosta iixpa icaxa TOTECO ica sesen tamanti tequit cati monequi quichihuase ipan nopa tonali. ³⁸ Cati nozona mocajque para tequitise quej tamocuitahuiani ipan caltemit elqui: Obed Edom icone Jedutún, Hosa huan 78 ininteixmatcahua. ³⁹ Huan David quitequimacac Sadoc ihuaya iteixmatcahua cati nojquiya eliyayaj totajtzitzi para ma tequitica ipan nopa seyoc yoyon tiopamit ten TOTECO cati eltoya huejcapa ipan se tepet nechca altepet Gabaón. ⁴⁰ Mojmosta ica ijnaloc huan tiotac quitencahuiliyayaj TOTECO tacajcahualisti tatatili ipan se taixpamit nozona cati quicualtalijtoque para ya nopa. Huan quineltoayayaj nochi cati ijcuilijtoc ipan nopa tanahuatili cati TOTECO quinmacatoya israelitame ten quenicatza monequi temacase tacajcahualisti. ⁴¹ Nojquiya David quitequimacac Hemán huan Jedutún huan sequinoc cati quintapejpenijtoya para ma huicaca talojtzitzi iixpa TOTECO: “Ma tijtascomatolica Toteco pampa yaya tetasojtas para nochipa.” ⁴² Huan Hemán huan Jedutún tapitzayayaj huan tatzotzonayayaj, ica címbalos huan sequinoc tatzotzonali para quinpalehuse injuanti cati huicayayaj para Toteco Dios. Huan iconehua Jedutún quitequimacaque para ma tamocuitahuica ipan caltemit.

⁴³ Huan tanqui nopa tonali ten ilhuit quema quihualicaque nopa caxa. Yeca nochi nopa masehualme mocuetque ininchajchaj huan David mocuetqui ichaj huan quitiochijqui ifamilia.

17

Nopa camanali cati Toteco quichijqui ica David

(2 S. 7:1-29)

¹ Teipa David mijcueni huan pejqui itztoc ipan nopa yancuic caltanahuatili. Huan se tonali quinqotzqui nopa tajtolpanextijquet Natán huan quihui:

—Xiquita ama na niiztoc nica ipan ni cali yejectzi cati quiqiya itapepecholhua ica huapalme ten tiocuahuit, huan nopa caxa cati quiqiya nopa camanali cati TOTECO quichijtoc ica tojuanti eltoc ipan se yoyon cali.

² Huan Natán quihui:

—Xijchihua nochi cati ipan moyolo timoilhuía cuali para tijchihuas pampa Toteco Dios itztos mohuaya.

³ Pero ipan nopa tayohua, Toteco Dios monexti ica Natán huan quihlhu:

⁴ “Xiya campa notequipanojca David huan xiquilhuiti para quej niininTECO niqulijtohua: ‘Amo ta cati techchijchihuilis notiopa para ipan niitztos.

⁵ Hasta huejcajquiya quema niqinquixti israelitame ipan tali Egipto huan hasta ama, amo quema niitztoc ipan se cali o se tiopamit. Nochipa niitztinemiyaya ipan se yoyon cali o seyoc cati quihuicayayaj ten se lugar hasta seyoc. ⁶ Ipan nochi nopa tonali quema niitztoya inihuaya nopa israelitame amo quema niqinilhui nopa tayacanani cati na niquntequimacac para ma quinyacanaca nopa israelitame huan niqinilhui: “¿Para ten amo antechsencahuilijtoque se yejyetzti cali ten tiocuahuit? Quej nopa xiquilhui.”’

⁷ “Nojquiya xiquilhui notequipanojca David para na niiteCO Cati Niqinyacana Noilhuicac Ejcahua Ma Tatanitij huan niqulijtohua: ‘Nim-itzquixti ten campa tiqinmocuithuiyaya borregojme huan nim-itzchijqui xieli tiintanahuatijca noisraelita masehualhua. ⁸ Huan na ninemiyaya mohuaya campa hueli campa tiyajqui. Huan nochi mocualancaitacahua niqintzontamilti moixpa. Ama nim-itzhueyitalis huan nijchihuas para nochi campa hueli ipan taltipacti quicaquise ten ta. ⁹ Nojquiya nijcualtalijtoc se tali para israelitame campa itztose temachme huan campa sequinoc amo huelise quincuatotonise. Nopa tali elis iniaxca huan ayecmo quintajiyohuiltise fiero tacame quej quinchihuilijayaj achtohuaya ¹⁰ ten nopa tonali quema niqintali jueces para quinyacanase nomasehualhua. Huan niqintzontamiltis nochi mocualancaitacahua.

“ ‘Huan ica ta nijchihuas ma pehua se familia ten tanahuatiani pampa tacame cati hualase ipan ta elise tanahuatiani ipan tali Israel quej ta. ¹¹ Huan quema ya ajritos nopa tonali para timiquis huan tiyas campa motatahua, nijchihuas para se mocone ma eli fanahuatijquet. Huan itanahuatilis nijchihuas ma eli nelchicahuac. ¹² Yaya elis cati techchijchihuilis se tiopamit. Huan ica ya huan iixhuihua pehuas se tanahuatili cati elis para nochipa. ¹³ Na nielis niitata huan yaya elis nocone. Nochipa niqicnelis quej nijchijqui ica Tanahuatijquet Saúl. ¹⁴ Nijchihuas mocone para tayacanas ipan se cali ten tanahuatiani cati tacajtiyase huan cati quisase ipan ta para tanahuatise ipan notanahuatilis para nochipa.’ ”

Quej nopa TOTECO quihlhu Natán ma quipohuili David.

¹⁵ Huajca Natán yajqui huan quipohuili Tanahuatijquet David nochi cati quilitac ipan nopa tanextili huan nochi cati TOTECO quihlhuijtaya.

¹⁶ Huan David calajqui huan mosehui iixpa TOTECO huan quijito:

“¿Taya nopati na huan taya ipati nofamilia para techmacatoc nochi ni tatiocihuali? ¹⁷ Huan amo san ya ni techchihuilijtoc, pero ama, Toteco Dios, techtajtolcahuilijtoc para tijchihuas para se noixhui elis tanahuatijquet para nochipa. Ta ticamanalti ama ten miyac tonali teipa huan para se noteipa ixhui elis tanahuatijquet. TOTECO Dios, ta techchihua quej nielisquía se masehuali cati tahuel nicuali. ¹⁸ Amo nijmati taya niqijtos pampa tahuel techtepanitztoc. Cualitijmati para na amo teno nopati. ¹⁹ TOTECO, pampa tijpiya hueyi moyolo, techtajtolcahuilijtoc nochi ni tamanti cati tahuel huejhueyi huan tijnequi nojquiya ma nitenextilis mohueyitilis. ²⁰ Amo aqui seyoc quej ta, TOTECO. Amo quema aqui quicactoc ten seyoc Dios iyoca ten ta. ²¹ Nojquiya ipan nochi taltipacti amo onca seyoc xinacht masehualme quej tiisraelitame, tojuanti cati timomasehualhua. Amo onca

seyoc xinachti masehualme cati ininTeco Dios quinmanahuijtoc quej ta tijchijtoc ica tojuanti. Quema techquixti tiisraelitame ten tali Egipto ica miyac huejhueyi tiochicahualnescayot, nochi mitzixmatque para tahuel tihueyi. Huan teipa nopa sequinoc masehualme cati itzfoyaj ipan ni tali tiquinixti toixpa timomasehualhua. ²²Ta techtapejpenijtoc tiisraelitame para ma tielica moaxcahua para nochipa. Huan ta TOTECO timochijtoc titoTeco.

²³ “Huajca ama, TOTECO, nijselia huan nijneltoca mocamanal cati tiquijtojtoc para na huan cati teipa tacajtiyase ica na noeso tanahuatise para nochipa ipan ni tali. Ma eli temachti mocamanal huan ma mochihua san quej ta tiquijtojtoc. ²⁴Ma mitzhueyitalica para nochipa nochi masehualme. Quena, nochi ipan taltpacti campa hueli ma quijtojca: ‘TOTECO Cati Quinyacana Iilhuicac Ejcahua Ma Tatanitij, yaya ininTeco nopa israelitame.’ Huajca xijchihua para temachti tanahuatis se nocone o se noixhui para nochipa.

²⁵ “Toteco Dios, ta techmachiltijtoc para tiquinchihuas noixhuihua ma elica tanahuatiani, huan huajca na cati nimotequipanojca, nimotemacatoc ama para nimotatajtis quej ni moixpa. ²⁶TOTECO, ta tiDios huan techtajtolcahuilijtoc para techchihuilis miyac tamanti cati cuali. ²⁷Huajca ama TOTECO nimitztajtanía techtiochihua huan xiquintiochihua noteipa ixhuihua para injuanti huelise tanahuatisé para nochipa moixpa. Pampa quema ta, TOTECO, titetiochihua, elij tati-ochihualme para nochipa.”

18

Más mohueyili itanahuatilis David (2 S. 8:1-14)

¹ Teipa quema ya panotoya tonali, David quintanqui nopa filisteos huan quinechcapantali. Quincuili nopa altepet cati itoca Gat ica nochi ipilaltepetziti cati eltoya iniaxca. ²Nojquiya David quintanqui nopa tali Moab ehuan huan quinchijqui itequipanojcahua. Huan quinchihualti ma quitaxtahuica impuesto sesen xihuit.

³Nojquiya ipan altepet Hamat ipan tali Soba, David quitanqui Hadad Ezer cati eliyaya tanahuatijquet ten nopa tali quema Hadad Ezer yahuiyaya para quichihuas más temachti ital cati eltoc nechca hueyat Eufrates. ⁴Huan David moaxcati se mil tatehuijca carrojme, huan quinitzqui chicome mil tacame cati quiixmatiyayaj tatehuiaj ipan cahuayojme huan 20 mil soldados cati san iniicxipa tatehuiyayaj. Nojquiya quintequili inincotztalo nopa cahuayojme cati quintilanayayaj nopa tatehuijca carrojme para amo huelque motalojque. San se cien ten nopa cahuayojme, amo quincoco para huelis quintequihuis.

⁵Huan ajsicoj nopa sirios cati ehuyayaj tali Damasco para quipalehuise Tanahuatijquet Hadad Ezer ten Soba, huan David quinmicti 22 mil ten injuanti. ⁶Teipa David quintali soldados para ma tamocuitahuica ipan altepet Damasco ipan tali Siria. Huan nochi nopa sirio masehualme mochijque itequipanojcahua David huan quitaxtahuiyayaj impuesto sesen xihuit. Huan campa hueli campa David yahuiyaya, TOTECO quipalehuiyaya para ma tatani.

⁷Huan David quincuili nochi iniyolixtzajcayohua ten oro cati nochi itayacanca soldados Hadad Ezer quitequihuiyayaj para ica quimanahuise inintacayo; huan David quinhualiac ipan altepet Jerusalén. ⁸Huan ipan ialtepehua Hadad Ezer cati inintoca eliyaya Tibhat huan Cun, David quicuic

tahuel miyac ten nopa teposti cati itoca bronce. Huan ica miyac xihuit teipa, Salomón quitequihui nopa teposti ipan nopa tiopamit. Ica nopa bronce quichijqui nopa hueyi paila cati quitocaxtiyayaj nopa hueyi at, huan nopa huejhueyi taquetzalme huan miyac sequinoc tamantzitzi cati monequiyaya.

⁹ Huan Tanahuatijquet Toi cati tanahuatiyaya ipan tali Hamat quimatqui para David quintzontamiltijtoya isoldados Hadad Ezer, ¹⁰ huan nimantzi quititanqui icone cati itoca Adoram para quitajpalos David pampa tatan-toya. Nojquiya quititanli nemacti ten oro, plata huan bronce. Quichijqui nochi ya ni pampa quitemohuayaya quenicatza mohuampojchihuas ihuaya David. Nojquiya Tanahuatijquet Toi quipiyayaya miyac cualanti ica Tanahuatijquet Hadad Ezer huan miyac huelta motehuijtoyaj huan yeca paquiyaya para David quitantoya. ¹¹ Huan Tanahuatijquet David quimactili TOTECO nochi nopa nemacti ihuaya nopa tamanti ten plata huan oro cati quicuic ipan tali Edom, Moab, Amón, Amalec huan Filistea.

¹² Huan Abisai, icone Sarvia, quintzontamilti 18 mil soldados ten tali Edom ipan nopa tamayamit cati itoca Istat. ¹³ Teipa David quintali miyac pamit ten isoldados para tamocuitahuise ipan tali Edom huan quinchihualti Edom ehuan ma elica itequipanojcahua huan ma quitaxtahuica impuestos sesen xihuit. Ya ni eliyaya seyoc huelta para nochi masehualme ma quitaca quenicatza TOTECO quipalehuiyaya David para ma tatani campa hueli campa yaya yahuiyaya.

Itayacancahua David
(2 S. 8:15-18; 20:23-26)

¹⁴ Huan Tanahuatijquet David quipixqui tanahuatili ipan nochi tali Israel huan quichijqui cati xitahuac ica imasehualhua sesen huelta quema mon-ejqui tetajtolsencahuas. ¹⁵ Huan Joab, icone Sarvia, eliyaya tayacanquet ten nochi isoldados David. Huan Josafat, icone Ahilud, quipixqui nopa tequit para quijcuilos nochi cati mochijtiyajqui mojmota ipan itanahuatilis. ¹⁶ Huan Sadoc icone Ahitob, huan Abimelec icone Abiatar, eliyayaj totajtitzitzi. Savsa, elqui nopa tajcuilojquet cati quijcuilo amatapohuali para nopa tanahuatijquet. ¹⁷ Huan Benaía, icone Joiada eliyaya inintayacanca nopa soldados cati quipiyayayaj inintequi para quimocuitahuise inemilis nopa tanahuatijquet. Huan iconehua David eliyayaj itapalehuijcahua cati más quipixque tanahuatili.

19

David quintanqui nopa amonitame huan sirios
(2 S. 10:1-19)

¹ Miyac tonali teipa mijqui Tanahuatijquet Nahas ten tali Amón, huan icone cati itoca Hanún quipatac quej yancuic tanahuatijquet. ² Huan David quijto: “Nimohuampojchihuas ihuaya Hanún pampa itata nochipa techchihuili cati cuali.” Huan David quintitanqui itayolmelajcahua para ma quiyolchicahuaca Tanahuatijquet Hanún pampa mijqui itata.

Pero quema nopa tayolmelahuani cati David quintitantoya ajsitoj ipan tali Amón, nopa tacame cati quiconsejomacayayaj nopa yancuic tanahuatijquet, ³ quihuijque: “¿Tijneltoca para David nelía quintitantoc ni tayolmelahuani para mitzyolchicahuase pampa mijqui motata huan para quitepanitase? ¡Amo neli! Inijuanit ajsitogue nica para tachiyase huan quitachilise quenicatza huelsi hualase teipa huan moaxcatise total.”

⁴ Huajca Hanún quinixpanoc nopa tayolmelahuani cati Tanahuatijquet David quintitantoya. Tanahuati ma quintejtequilica inintentzo huan ma

quintejtequilica iniyoyo cati huehueyac hasta inintzinpa. Teipa quinchihualti ma mocuepaca campa David ica hueyi pinahualisti.

⁵ Huan quema David quimatqui ten panotoya ica itayolmelajcahua cati quintitantoya, tanahuati ma yaca quinselitij huan ma quinilhuitij ma mocahuaca ipan altepet Jericó huan ma amo mocuepaca ipan ininchajchaj hasta quema sempa moscaltis inintentzo.

⁶ Huan quema nopa masehualme ipan tali Amón huan Tanahuatijquet Hanún quimachilijque para nelía fiero ten quichihuilijtoyaj David, quititanque 33 toneladas ten plata ipan talme Mesopotamia, Siria, Maaca huan Soba para quintaxtahuis para ma quintitanica insoldados huan inintatehuijca carrojhua huan cahuayojme para quinpalehuiquij para quitehuisse David. ⁷ Huan por nopa taxtahuili, hualajque 32 mil tahuilanca tacame huan Tanahuatijquet Maaca ica isoldados para quipalehuisse. Huan nochi nopa soldados mochijque nechca Medeba huan teipa ajsitoj nopona Tanahuatijquet Hanún ica nopa soldados ten tali Amón cati quinsentilijtoya ipan altepeme ipan ital. ⁸ Huan quema David quimatqui para nochi inijuanti mosentilijtoyaj, nimantzi quititanqui Joab huan nochi isoldados cati más quipiyaj fuerza ten tali Israel para quintehuitij. ⁹ Huan nochi nopa soldados ten tali Amón quisque para monamiquise inihuaya nopa israelitame nopona campa icalte altepet Medeba. Huan nopa sequinoc tanahuatiani huan insoldados cati quintanejtoyaj huan quintaxtahuijtoyaj mochijque campa mili.

¹⁰ Huan quema Joab quimatqui para icualancaitacahua mochijtoyaj ica iixpa huan ica iica, quintajcoxelo isoldados. Quej nopa, tajco isoldados quintitanqui ma motehuitij inihuaya nopa sirios. ¹¹ Huan nopa seyoc tajco cati quinyacanayaya Abisai, iicni Joab, yajque para motehuitij inihuaya nopa amonita tacame. ¹² Huan Joab quillhui iicni:

—Sinta nopa sirios quinequise techtanise, huajca xihualas techpalehuiqui, huan sinta nopa amonitame quinequise mitztanise, huajca na nimitzpalehuis. ¹³ Ximoyoltetili huan ximosemaca huan xitatehui chichahuac para tiquinmanahuisse tomasehualhua, total huan toaltepehua cati iaxca Toteco Dios. Huan TOTECO ma quichihua ica tojuanti cati yaya quiita para cuali.

¹⁴ Huajca Joab huan isoldados monechcahuijque para quitehuisse nopa sirios, huan nopa sirios cholojque iixpa Joab. ¹⁵ Huan quema nopa amonitame quiitaque para nopa sirios ya cholojtoyaj, inijuanti nojquiya motalojtejque para quitalcahuisse Abisai huan isoldados huan yajque motatitoy ipan se altepet. Huajca teipa Joab huan isoldados mocuetque ipan altepet Jerusalén.

¹⁶ Nopa sirios quiitaque para nopa israelitame quintantoyaj huan yeca quintitanque tayolmelahuani campa nopa sequinoc sirios cati itztoyaj ipan nopa seyoc nali ten hueyat Eufrates. Huan quinchihualtijque ma hualaca quinpalehuiquij. Huan nopa sequinoc Sirios ajsicoj huan quinyacanayaya Sofac, cati quinyacantoya isoldados Tanahuatijquet Hadad Ezer. ¹⁷ Huan David quicajqui para ajsitoyaj, huajca quintananqui nochi israelita soldados. Quiixcotonque nopa hueyat Jordán, huan motali iniixpa icualancaitacahua huan pejqui quintehuía. ¹⁸ Huan nopa sirios sempa cholojque iniixpa nopa israelitame. Huan David quinmicti 7 mil sirio tacame cati tejcotoyaj ipan tatehuijca carrojme. Huan quinmicti 40 mil soldados cati tatehuiyayaj san talchipa. Nojquiya quimicti Sofac cati eliyaya tayacanquet ten nopa sirio soldados. ¹⁹ Huan isoldados Tanahuatijquet Hadad Ezer motemactilijque ica Tanahuatijquet David huan mochijque itequipanojcahua. Huan quej

nopa, nopa sirios ayecmo quinpalehujque nopa amonita masehualme para tatehuse.

20

David quitehui altepet Rabá (2 S. 12:26-31)

¹ Ipan nopa tonali quema moseliltíaj cuame huan quema monequi para tanahuatiani ma quisaca para tatehuitij, Joab quinyacanqui isoldados Tanahuatijquet David huan quintamisosolojque nochi talme cati iniaxca nopa amonita masehualme. Huan teipa quema ya quintzontamiltijtoya, quiyahualo altepet Rabá ica isoldados huan moaxcati. Pero David mo-cajtoya ipan altepet Jerusalén. ² Huan teipa quema David ajsito ipan Rabá, quicuique nopa corona cati eltoya ipan itzonteco Tanahuatijquet Mil-com cati tanahuatiyaya ipan altepet Rabá huan quitelijque ipan itzonteco Tanahuatijquet David. Huan quipiyayaya 35 kilos ietica. Eliyaya tachi-jchihuali ica senquisa oro huan quipiyayaya miyac piltetzitzi cati tael pajpatiyo cati ica quiyeyecchijtoyaj. Huan nojquiya David quicuic miyac tamanti cati patiyo ipan nopa altepet. ³ Huan nopa masehualme ten nopa altepet quintequimacac ma tequítica ica sierra, tepspicos huan hachas quej quichijqui ica nopa masehualme ipan nochi altepeme ten amonitame cati moaxcatijtoya. Huan teipa David mocuetqui ipan altepet Jerusalén ica isoldados.

Quinmictijque tacame huejcapantique (2 S. 21:18-20)

⁴ Teipa quema ya panotoya tonali, nopa israelitame sempa quipixque tatehuilisti ica nopa filisteos ipan tali Gezer. Huan ipan nopa tatehuilisti, Sibecai, se husatita tacat, quimicti Sipai cati eliyaya se iniixhui nopa huejcapantique tacame. Huan quej nopa, nopa israelitame quinechcapantalijque nopa filisteos.

⁵ Ipan seyoc tatehuilisti ica nopa filisteos, Elhanán, icone Jair, quimicti Lahmi, iicni nopa huejcapantic tacat cati itoca Goliat. Huan Lahmi quihualicayaya se cuataminti cati huehueyac ica imax cati tael tomahuac.

⁶ Seyoc huelta quema nopa israelitame quintehuyayaj nopa filisteo tacame ipan tali Gat, ajsico se inisoldado cati huejcapantic huan cati quipiyayaya chicuase imacpilhua huan chicuase ixocpilhua. Yaya eliyaya se iniixhui nopa huejcapantique tacame ten huejcajquiya. ⁷ Huan quema ajsico nopa hueyi tacat, pejqui quinhuetzquilia huan quinpinahualtia nopa israelitame, pero Jonatán quimicti. Jonatán eliyaya icone Simea cati elqui iicni David.

⁸ Ni huejhueyi filisteo tacame eliyayaj iniixhuihua nopa huejcapantique tacame cati achtohuiya itztoyaj ipan tali Gat, pero David huan isoldados quinmictijque.

21

David quinijcuilo nopa masehualme (2 S. 24:1-17)

¹ Huajca Amocualtacat motananqui ica nopa israelitame huan quichihualti David ma quinijcuilo huan ma quinpohua nopa israelitame. ² Huan David quinquahua Joab huan nopa tayacanani ten nopa masehualme:

—Xiyaca huan xiquinijcuiloca israelitame ten altepet Beerseba ica tatzinta hasta Dan ica norte. Huan techhualiquilica cati anquipantise para nijmatis quesqui soldados itztoque.

³ Huan Joab quiilhui:

—Ma mitziotchihua TOTECO huan ma quinmियाquili mosoldados 100 huelas más, pero amo xiquinpohua quesqui itztoque. ¿Para ten tijchihuas? Nochi injuanti moaxcahua huan motequipanojcahua. Amo xijchihua ya ni cati quihualicas tajtacoli topani tiisraelitame.

⁴ Pero David ya motemacatoya mocahuas ica nopa tanahuatili cati quichijqui huan amo quicajqui icamanal Joab. Huajca Joab quistejqui, huan nejnenqui ipan nochi tali Israel para tepohuase. Huan teipa mocuetqui ipan altepet Jerusalén. ⁵ Huan Joab quimactili David cati quipantijtoya ipan nopa censo. Huan para nochi tacame cati itztoyaj ipan tali Israel ica norte eliyayaj se millón 100 mil tacame cati temachme para tatehuse. Huan ipan tali Judá ica sur itztoyaj 470 mil tacame. ⁶ Pero Joab amo quinijcuilo nopa tacame ipan nopa huejhueyi familias ten Leví huan Benjamín pampa quimatqui para tahuel fiero cati David quichihualti ma quichihua huan nelía quitequipacholmacac. ⁷ Huan nopa censo cati David quitananqui quicualancamacac Toteco Dios huan yeca quintatzacuiliti nochi israelitame.

⁸ Huajca David quiilhui Toteco Dios:

—Nelía nijchijqui se hueyi tajtacoli pampa niquinpojqui ni tacame. Pero nimitztajtanía techtapojpolhui, na nimotequipanojca, ni tajtacoli cati nijchitoc. Nijchitoc se tamanti cati tahuel huihuític.

⁹ Huajca Toteco quinojnotzqui Gad cati eliyaya itajtlopanextijca huan quitequipanohuayaya David huan quiilhui: ¹⁰ “Xiya campa David huan xiquilhui para monequi quitapejpenis se ten ni eyi tamanti tatzacuiliti catijqui quinequi ma nijchihuilí.”

¹¹ Huan Gad yajqui campa David, huan quiilhui:

—Quej ni quijtohua TOTECO: ¹² ‘Xijtapejpeni catijqui tijnequi. ¿Tijnequi ma onca mayanti para eyi xihuit ipan motal? o ¿tijnequi ma amechtehuica amocualancaitacahua huan ma amechtanica para eyi metzti? o ¿tijnequi ma huala noilhuicac ejca nimoTECO huan quinmictis israelitame campa hueli ipan ni tali para eyi tonati ica se cocolisti cati tahuel fiero?’ Quej nopa techilhui. Huajca ximoilhui taya tatzacuilitilisti tijnequi huan techyolmelahua para na nojquiya nijyolmelahuati cati techhualtitanqui.

¹³ Huajca David quiilhui Gad:

—Nimopantía ipan se tequipacholi cati tahuel pano hueyi. Pero más cuali para ma nihuetzi imaco TOTECO para techtatzacuilitis pampa nelía hueyi iyolo. Ma amo tihuetzica inimaco masehualme.

¹⁴ Huan TOTECO quititanqui se hueyi cocolisti ipan tali Israel huan mijque 70 mil tacame. ¹⁵ Huan TOTECO nojquiya quititanqui iilhuicac ejca para quisosolos altepet Jerusalén. Pero quema pejqui tasosolohua, TOTECO quitiac huan quiyoloco miyac, huan quiilhui iilhuicac ejca ma ayecmo tasosolo. Quiilhui: “San ya nopa.”

Ipan nopa talojtzi, iilhuicac ejca TOTECO ijcatoya iteno nopa tamayamit campa nopa jebuseo tacat, Ornán, quiyolquixtiyaya trigo.

¹⁶ Huan quema David ajcotachixqui, quitiac iilhuicac ejca TOTECO ijcatoya ajacatipa tatajco ilhuicacti huan taltipacti. Huan imaco quipiyayaya se macheta cati quixitajtoya ica altepet Jerusalén. Huajca David huan nopa huehue tacame cati moquentijtoyaj nopa yoyomit cati quinextiyaya para

mocuesohuaj, motancuaquetzque iixpa TOTECO huan quiajsique tali ica inixayac. ¹⁷ Huan David quiilhui Toteco Dios:

—Na cati nitanahuati ma quinpohuaca nopa tacame. Na cati nitajtolchitoc, pero amo teno quichijtoque ni masehualme. Toteco Dios, techtzontamilti na huan nofamilia, pero amo xiquintzontamilti momasehualhua.

David quiquetzqui se taixpamit

(2 S. 24:18-25)

¹⁸ Huan iilhuicac ejca TOTECO quicamanalhui Gad huan quinquahuati ma quiilhui David para ma quichijchihua se taixpamit para TOTECO ipan nopa tamayamit campa nopa jebuseo tacat, Ornán, quiyolquixtiyaya trigo.

¹⁹ Huajca David yajqui quej Toteco quiilhui Gad para ma quichihua huan quicamanalhui Ornán. ²⁰ Huan Ornán quiyolquixtiyaya trigo,

huan moicancuetqui huan quiitac iilhuicac ejca TOTECO. Huan nopa nahui iconehua motalotjeque huan motatitot. ²¹ Huan quema David hualajqui teipa campa Ornán, Ornán quiitac nopa tanahuatijquet hualayaya huan quisqui ten campa quiyolquixtiyaya trigo huan motancuaquetzqui iixpa Tanahuatijquet David. ²² Huan David quiilhui Ornán:

—Techcahuili ni tali campa tijyolquixtia trigo, huan na nimitztxatahuus quej quinamiqui. Nijnequi para nozona nijchijchihuas se taixpamit para TOTECO para quej nopa huelis quijcuenis nopa fiero cocolisti cati quinajsitoc masehualme.

²³ Huan Ornán quinanquili David:

—Noteco, ximoaxcati ni tali huan ica xijchihua cati ta tiquita para cuali. Nojquiya xiquincui ni huacaxme para nopa tacajcahualisti. Huan nochi tamantzitzi ten cuahuit cati ica nijyolquixtia trigo, xijtequihui para tijchihuas tit. Huan nopa trigo xijtequihui para nopa tacajcahualisti ten harina. Quena, nochi nimitzmaca, pero san nimitzmaca.

²⁴ Pero Tanahuatijquet David quej ni quinanquili:

—¡Amo! Na nimitzcohuilis huan nimitzixtahuilis quej quinamiqui. Amo hueli nijcuis cati moaxca huan nijmacas TOTECO. Yon amo nijtencahuas iixpa TOTECO se tacajcahualisti cati san tapic nijseli.

²⁵ Huajca David quicohuili Ornán nopa lugar ica 600 tomi ten oro. ²⁶ Huan nozona quichijchijqui se taixpamit para TOTECO. Huan quitencajqui tacajcahualisti tatatili huan tacajcahualisti para tayoltalili ica TOTECO. Huan David motatajti ica TOTECO huan TOTECO quinanquili ica se tit cati quihualtitanqui ten iilhuicac. Huan nopa tit quitati nochi nopa tacajcahualisti cati eltoya ipan nopa taixpamit.

²⁷ Huajca TOTECO quinojnotzqui iilhuicac ejca huan yaya quiajojqui imacheta ipan icuetaxo. ²⁸ Huan quema David quiitac para TOTECO quitacaquilijtoya, sempa quitencahuili tacajcahualisti. ²⁹ Huan ipan nopa tonali, nopa yoyon tiopamif ten TOTECO eltoya ipan tepet Gabaón ihuaya nopa taixpamit para tacajcahualisti tatatili cati Moisés quichijchijqui ipan huactoc tali.

³⁰ Huan David ayecmo huelqui yahui nepa para quitajtanis Toteco Dios taya quichihuas pampa tahuel momajmatijtoya ica nopa macheta xolot cati iilhuicac ejca TOTECO quipixtoya imaco huan moilhui para nica elqui campa TOTECO temachtit quitapejpenijtoya para ma quihueyichihua.

22

¹ Huajca David quijito: “Nica campa Ornán quiyolquixtiyaya trigo elis campa nijchijchihuas itioipa TOTECO Dios huan itaixpa. Nica israelitame huelise quitencahuase tacajcahualisti tatatili.”

Quicualtali para nopa hueyi israelita tiopamit

² Teipa David tanahuati ma quinsentilica nochi sequinoc tali ehuan cati itztotaj ipan tali Israel. Huan quintapejpeni sequij ten inijuanti para quintejtequise huejhueyi teme para ica quichijchihuase ichaj Toteco Dios.

³ Huan David quinnacac tahuel miyac teposti cati itoca hierro para ica quichijque miyac lavos huan cati monequi para ica quitatzquiltise nochi tamanti caltemit. Nojquiya quimolonijque miyac teposti cati itoca bronce hasta amo huelque quipohuase quesqui ietica. ⁴ Nojquiya David quinnacac miyac cuame ten tiocuahuit pampa nopa tacame cati ehuan ipan altepet Tiro huan Sidón quihualiquilijtojaj tahuel miyac cuame cati yajmaxtic.

⁵ Huajca quema ayemo miquiyaya David, yaya quijto: “Nocone Salomón noja telpocat huan ayemo motantoc. Huan monequi itiopa TOTECO elis tahuel hueyi, huan tahuel yejectzi huan elis cati más taixmatili ipan nochi taltpacti. Huajca ama nijpehualtis para nijcualtis tamantzitzi para nopa tiopamit.”

Huan quema ayemo miquiyaya, David pejqui quisentilía tahuel miyac tamanti cati monequisquía motequihuis ipan nopa tiopamit.

⁶ Huan David quinzotzqui itelpoca, Salomón, huan quitequimacac ma quichijchihua se tiopamit para TOTECO Dios cati ininTeco israelitame.

⁷ Huan David quej ni quillhui Salomón: “Nocone, ipan noyolo tahuel nijnequiyaya para nijchijchihuas se tiopamit para TOTECO Dios cati noTeco.

⁸ Pero yaya technoijnotzqui huan techilhui para amo na nijchijchihuas nopa tiopamit pampa niqinmictijtoc miyac masehualme ipan miyac tatehuilisti. Huan pampa lixa nijtojajtoc miyac esti ipan ni tali, amo quinamiqui para na nielis cati quichijchihuas nopa tiopamit. ⁹ Pero techilhui nijpiyas se nooquichpil huan yaya mochiuas se tacat cati tayoltalía huan quema yaya tanahuatis, amo oncas tatehuilisti. TOTECO quijto quichihuas para nochi icualancaitacahua campa hueli ma moyoltalica ihuaya. Quijto para itoca

elis Salomón * pampa mitzixnextiyaya ta, nocone. Huan quijto para ipan nopa tonali quema ta titanahuatis, yaya quichihuas para oncas tasehuilisti huan paquilisti ipan tali Israel. ¹⁰ Toteco quijto ta tielis cati quichijchihuilis nopa tiopamit. Yaya quijto ta tielis quej tiicone huan yaya elis quej motata. Huan quichihuas para moconehua huan moteipa ixhuihua ma tanahuatica ipan mosiya ipan tali Israel para nochipa. Quej nopa techilhui TOTECO.

¹¹ “Huajca ama, tinocone, TOTECO ma itzto mohuaya quej yaya quijto para itztoquía. Quej nopa quisas nelía cuali motequi para tijchijchihuas ichaj TOTECO Dios cati moTeco ta, senquisa quej yaya quinequi ma eli. ¹² Huan quema tielis titanahuatijquet ipan nochi israelitame, ma TOTECO mitzmaca talnamiquilisti huan tamachiltili para senquisa tijtoquilis itanahuatilhua. ¹³ Pampa sinta ica miyac cuidado tijtoquilis nopa tanahuatilme huan camanali cati Toteco quimacac Moisés para tiisraelitame, temachti quisas cuali cati tijchihuas. Huajca ximoyoltetili huan ximosemaca. Amo ximajmahui, yon amo ximotzinquixti.

¹⁴ “Ica miyac tequit nijsentilijtoc miyac tamanti para ichaj TOTECO. Nijsentilijtoc 300 toneladas ten oro, 3 mil 300 toneladas ten plata huan tahuel miyac bronce huan hierro hasta amo aqui hueli quimatis quesqui ietica pampa tahuel miyac. Nojquiya nijcualtalijtoc tahuel miyac huapali huan huejhueyi teme. ¹⁵ Ta tiquinpiya miyac tacame cati cuali huelij quitecpichohuaj tet. Nojquiya tiquinpiya cuaximani cati quimatij miyac huan tacame cati hueli quichihuaq miyac tamanti tequit. ¹⁶ Itztoque tacame cati quimatij cuali

* 22:9 22:9 Salomón caquistic quej tayoltalijquet ipan inincamanal.

para quitejtejtzonase nopa tamanti teposti cati itoca oro, plata, bronce huan hierro. Huajca ximotanana huan xitequiti, huan ma TOTECO itzto mohuaya.”

¹⁷ Huan teipa David nojquiya quinnotzqui nochi tayacanani ten tali Israel huan quinnahuati ma quipalehuica icone Salomón ipan nopa tequit para quichihuase nopa tiopamit. ¹⁸ Quej ni quinilhui: “TOTECO Dios cati amoTeco itztos amohuaya. Yaya amechchijtoc xijpiyaca tasehuilisti ica nochi tocualancaitacahua cati itztoyaj campa hueli pampa quintemactilijtoc nomaco na huan ama injuanti motemacatoque ica TOTECO huan imasehualhua. ¹⁹ Huajca ama ica nochi amoyolo huan ica nochi amoalma, xijtemoca TOTECO Dios cati amoTeco. Huan ximotananaca huan xipehuaca xijchijchihuaca nopa tiopamit para TOTECO Dios. Teipa xijhualicaca nopa caxa cati quiypiya nopa camanali cati TOTECO quichijqui tohuaya. Nojquiya xiquinhuica nochi nopa tamantzitzi cati tatzejtelolitic huan taiyocatalili para Toteco Dios huan xijcahuaca ipan nopa tiopamit cati anquichijchijtose para ipan anquihueyitepanitase TOTECO.”

23

Nopa levitame huan inintequi

¹ Huan teipa quema David ya quipixqui miyac xihuit huan eliyaya huehuentzi, quijto para icone, Salomón, elis nopa yancuic tanahuatijquet ipan tali Israel. ² Huan quinsentili nochi tayacanani ten tali Israel, huan nochi totajtzitzi huan levitame. ³ Huan quinpójque nopa levitame cati quiپیayayaj 30 xihuit para huejcapa. Huan para nochi eliyayaj 38 mil tacame. ⁴ Huan David quintapejpeni 24 mil levitame para quintequitachilise cati quichijchihuase nopa tiopamit. Huan 6 mil levitame quintapejpeni para mochihuase tayacanani huan jueces. ⁵ Huan quintali 4 mil levitame para tamocuitahuse campa caltemit huan seyoc 4 mil para quihueyichihuase TOTECO ica nopa tatzotzonalme cati David tanahuatijtoya ma quichijchihuaca para ica quihueyichihuase TOTECO.

⁶ Teipa David quinxelo nopa levitame ica eyi grupos huan sesen grupo quihuicayaya itoca inihuejcapan tata sinta eliyayaj Gersón, Coat o Merari cati eliyayaj ieyi cone Hua Leví huejcajquiya.

Iteipa ixhuihua Gersón

⁷ Teipa David quinxelo nopa grupo ten iconehua Gersón ica ome grupos cati quihuicayaya inintoca nopa ome iconehua Gersón: Laadán huan Simeí.

⁸ Huan teipa quinxelo nopa grupo ten iteipa ixhuihua Laadán ica eyi grupos cati quihuicayaya inintoca nopa eyi iconehua Laadán. Inintoca eliyaya: Jehiel, Zetam huan Joel. Huan Jehiel elqui tayacanquet ipan ininfamilia.

⁹ Ya ni elqui nopa tayacanani ipan nopa familia Laadán. Huan nojquiya quinxelo nopa grupo ten iteipa ixhuihua Simeí ica eyi grupos. Huan sesen grupo quihuicayaya itoca se icone Simeí. Inintoca eliyaya Selomit, Haziel huan Harán.

¹⁰ Huan seyoc nahui iteipa ixhuihua Simeí quipixque inintoca: Jahat, Zina, Jesús huan Bería. ¹¹ Jahat elqui itayacanca nopa familia huan teipa Zina. Pero quinitaque Jesús huan Bería quej san setzi familia pampa amo quinpixque miyac iniconehua.

Iteipa ixhuihua Coat

- 12 Huan ipan iteipa ixhuihua Coat, itztoyaj nahui tacame cati mochijque tayanani. Se iteipa ixhui itoca eliyaya Amram. Huan Amram quipixqui iteipa ixhui cati itoca Izhar. Huan Izhar quipixqui iteipa ixhui cati itoca Hebrón. Huan Hebrón quipixqui iteipa ixhui cati itoca Uziel*.
- 13 Huejcajquiya Amram quinpixqui itelpocahua cati inintoca eliyaya Aarón huan Moisés. Huan quiniyocatalijque Aarón huan iconehua para nochipa para quitencahuilise TOTECO nopa tacajcualisti tatzejtzeloltic cati quihualicayayaj masehualme. Nojquiya quintequimacaque para quitatise copali iixpa huan para tetiochihuase ica itequiticayo. 14 Huan Moisés cati elqui itequipanojca Toteco Dios quinpixqui ome iconehua huan quinijsuilojque ipan nopa hueyi familia ten Leví.
- 15 Huan iconehua Moisés inintoca eliyaya Gersón huan Eliezer.
- 16 Huan Gersón quipixqui se icone cati itoca Sebuél cati tayanancu ipan ifamilia huejcajquiya.
- 17 Huan Eliezer quipixqui setzi icone cati itoca Rehabías. Huan Rehabías eliyaya tayanancu ipan ifamilia cati teipa tacatqui pampa quiniyayaya miyac iconehua.
- 18 Huan Izhar quinpixqui miyac iteipa ixhuihua huan Selomit eliyaya inintayanca.
- 19 Huan Hebrón quinpixqui miyac iteipa ixhuihua. Huan iniachtohui tayananca itoca eliyaya Jerías. Nopa ompa tayanancu elqui Amarías, huan teipa Jahaziel huan teipa Jecamán.
- 20 Huan Uziel quinpixqui miyac iteipa ixhuihua. Huan Micaía elqui inintayanca. Huan iniompa tayananca itoca eliyaya Isías.

Nopa familia ten ixhuihua Merari

- 21 Merari huejcajquiya quinpixqui iconehua cati inintoca eliyaya Mahli huan Musi.
Huan Mahli huejcajquiya quinpixqui iconehua cati inintoca eliyaya Eleazar huan Cis.
- 22 Eleazar mijqui, yon amo quinpixtejqitelpocame. Pero quinpixqui iichpocahua, huan injuanti monactijque inihuaya inimachcnehua cati eliyayaj iconehua Cis.
- 23 Musi huejcajquiya quinpixqui iconehua cati inintoca eliyaya Mahli, Edar huan Jeremot.
- 24 Huajca nica eltoc inintoca nopa telpocame cati iteipa ixhuihua Leví cati quinijsuilojque ipan nopa censo para elque tayanani ten ininfamilias. Huan monequiyaya para quipiyase 20 xihuit para huejcapa para tequipanose ipan nopa tiopamit. 25 David quej ni quijtojtoya: “TOTECO, ta cati titoTeco tiisraelifame, techmacatoc tasehuilisti ica tocualancaitacahua. Huan yaya itztos ipan altepet Jerusalén para nochipa. 26 Huajca ama levitame ayecmo monequis quihuicase nopa yoyon tiopamit huan nochitamantizti ten se lugar hasta seyc.”
- 27 Huan ipan sequij itamiya camanal, David quinilhui israelitame para ma quinijsuilocatiteipa ixhuihua Leví cati quipiyayayaj 20 xihuit para huejcapa.

* 23:12 23:12 Coat, inelcone Leví, yajqui Egipto quema José quipiyayaya se hueyi tequit nozona huan oncac se hueyi mayanti. Huan teipa nopa israelitame mocajque ipan tali Egipto 400 xihuit. Ipan nopa itamiya tonali nozona, itztoya Amram cati elqui ineltata Moisés. Huajca quema nica camanalti ten iteipa ixhui se tacat, camanalti ten se ica ieso cati itztoya taniel miyac xihuit teipa.

²⁸ Huan nopa levitame quipixque inintequi para quinpalehuise iixhuihua Aarón, nopa totajtitzti, ipan ten hueli tamanti tequit cati quinnahuatitayayaj ma quichihuaca ipan ichaj TOTECO. Nojquiya inon levitame quimocuitahuilque nochi nopa tamapamit huan nochi cuartos huan quinpalehuijque quema tapajpacchihuayayaj huan ipan sequinoc tequit ipan ichaj Toteco Dios. ²⁹ Nojquiya eliyaya inintequi levitame para quicualtalise nopa pantzi cati taiyocatalili para TOTECO huan nopa harina cati quitequihuiyayaj ipan tacajcahualisti, huan nopa pantzi canactzitzti cati amo quipiya tasonejcaoyot, huan nopa pantzi cati tachijchihuali ipan sartén ica aceite ten olivo huan nopa sequinoc tamanti pantzi cati monequi quichijchihuase. Nojquiya eliyaya inintequi para quitachilise nochi tamanti tatamachihuali. ³⁰ Huan mojmosta ica inaloc huan ica tiotac elqui inintequi para moquetzase iixpa TOTECO huan huicase huicat cati ica quitascamatilise huan quihueyichihuase TOTECO. ³¹ Huan nojquiya nopa levitame quipixque inintequi para tapalehuise para quitencahuase tacajcahualisti tatatili para TOTECO ipan nopa tonali para mosiyajquetzase sesen samano, huan ipan nopa tonali quema pehua seyoc yancuic metzti huan ipan nochi ilhuime cati quichihuaj ipan sesen xihuit. Huan sesen huelta quema monequiyaya quichihuase se tequit, huan levitame hualayayaj ica inimiya quej monequiyaya para quichihuase nopa tequit iixpa TOTECO. ³² Nojquiya inimaco nopa totajtitzti, nopa levitame quipixque inintequi para quimocuitahuise nopa yoyon tiopamit campa achtohuiya mopantiyayaj ica TOTECO huan nopa cuartos cati eltoyaj tiopan calijtic. Huan ica temachili nopa levitame quinpalehuiyayaj nopa totajtitzti ipan nochi tamanti tequit cati monequiyaya quichihuase.

24

Inintequi nopa totajtitzti

¹ Huan quej ni quinxejlojque ica pamit nopa totajtitzti, inijuanti cati eliyayaj iteipa ixhuihua Aarón. Huejcajquiya Aarón quinpixqui iconehua cati inintoca eliyayaj Nadab, Abiú, Eleazar huan Itamar. ² Pero Nadab huan Abiú mijque achtohui quema ayemo miquiyaya inintata. Yeca teipa san mocajqui Eleazar huan Itamar para tequitise quej totajtitzti. Huan ten inijuanti pejqui ome pamit ten iixhuihua Aarón.

³ Huan tahuel miyac xihuit teipa, quema nechca para miquis David, yaya quitajtani itapalehuil Sadoc huan Abimelec para quinxelose nopa totajtitzti ica miyac pamit huan sese quipiyas itequi. Sadoc elqui iteipa ixhui Eleazar ten huejcajquiya huan Ahimelec elqui iteipa ixhui Itamar. ⁴ Huan nochi iteipa ixhuihua Eleazar cati eliyayaj totajtitzti, quinxeloque ica 16 pamit pampa itztoyaj 16 tatame cati eliyayaj tayacanani ipan ininfamilias. Huan iteipa ixhuihua Itamar cati eliyayaj totajtitzti quinxeloque ica 8 pamit pampa san quinpixqui 8 tayacanani ipan ininfamilias. ⁵ Sesen tequit cati monequiyaya quichihuas se pamit ten totajtitzti temacaque ica rifa o ica nopa dados tatzejtelolitic. Amo quinequiyayaj para quinchicoicnelise sequj huan sequinoc amo. Ipan iteipa ixhuihua Eleazar huan ipan iteipa ixhuihua Itamar itztoyaj miyac cuajcuali tayacanani ica miyac yajatili para quitequipanose Toteco Dios ipan tiopamit. ⁶ Huan Semaías, icone Natanael cati elqui se levita, tequitiyaya quej tajcuilolquet para quijcuilos inintoca cati itztoyaj ipan sesen pamit huan taya elisquía itequi sesen tacat para quichihuas. Huan Semaías tajcuilo iixpa Tanahuatijquet David huan inixpa Sadoc, cati elqui hueyi totajtzi, huan iixpa Ahimelec cati icone Abiatar, huan inixpa totajtitzti cati eliyayaj tanahuatiani ipan ininfamilias huan

iniixpa nopa tayacanca levitame. Huan quema monequiyaya quiquixtise nopa dados ipan caxit, achtohui quinquixti se cati iteipa ixhui Eleazar huan teipa quiquixti se cati iteipa ixhui Itamar. Quej nopa quitapejpeniyayaj sese pamit ten totajtzitzi ica suertes.

⁷ Quema quintequimacayayaj nopa pamit ica rifa, quej ni yajtiyajqui inintoca ten nopa pamit cati achtohui tequitic hasta nopa pamit cati tequitic tateipa.

Nopa pamit cati achtohui tequitis itoca elqui Joiarib. Teipa tequitis Jedaías, ⁸ teipa Harim, teipa Seorim,

⁹ teipa Malquías, teipa Mijamín,

¹⁰ teipa Cos, teipa Abías,

¹¹ teipa Jesúa, teipa Secanías,

¹² teipa Eliasib, teipa Jaquim,

¹³ teipa Hupa, teipa Jesebeab,

¹⁴ teipa Bilga, teipa Imer,

¹⁵ teipa Hezir, teipa Afses,

¹⁶ teipa Petaías, teipa Hezequiel,

¹⁷ teipa Jaquín, teipa Gamul,

¹⁸ teipa Delaía huan teipa Maazías.

¹⁹ Nochi tacame ipan sesen pamit quinilhujque ma hualaca para tequipanose ipan nopa tiopamit quema quintocarohua quichihuase. Huan nochi monequi tequitise quej TOTECO Dios cati ininTeco israelitame achtohui quiilhui inihuejcapan tata Aarón ma quichihua.

Tayacanca tacame ipan nopa familia Leví

²⁰ Nica eltoc inintoca nopa sequinoc tayacanca tacame cati hualajque ipan nopa hueyi familia Leví:*

Subael elqui inintayacanca iteipa ixhuihua Amram, Jehedías elqui inintayacanca iteipa ixhuihua Subael.

²¹ Isías elqui inintayacanca iteipa ixhuihua Rehabías.

²² Selomot huan icone, Jahat, elque inintayacancahua iteipa ixhuihua nopa izharita tacame.

²³ Jerías elqui inintayacanca iteipa ixhuihua Hebrón. Huan Amarías eliyaya nopa iniompa tayacanca, huan teipa Jahaziel nopa expa tayacanquet huan Jecamán nopa teipa tayacanquet.

²⁴ Micaía elqui inintayacanca iteipa ixhuihua Uziel.

Samir elqui inintayacanca iteipa ixhuihua Micaía. ²⁵ Isías, iicni Samir, nojquiya elqui tayacanquet ipan iteipa ixhuihua Micaía.

Zacarías elqui inintayacanca iteipa ixhuihua Isías.

²⁶ Mahli huan Musi elque inintayacancahua iteipa ixhuihua Merari.

Beno elqui inintayacanca iteipa ixhuihua Jaazías.

²⁷ Beno, Soham, Zacur huan Ibri elque inintayacancahua iteipa ixhuihua Merari cati nojquiya elqui iixhui Jaazías.

²⁸ Eleazar elqui inintayacanca iteipa ixhuihua Mahli, pero Eleazar amo quinpixqui itelpocahua.

²⁹ Jerameel elqui inintayacanca iteipa ixhuihua Cis.

* **24:20** 24:20 Pero amo hualajque ipan Aarón cati elqui se iteipa ixhui Leví. Ni tayacanani eliyayaj iixhuihua Leví ten huejcajquiya ipan nopa tonali ten Jacob ipan itamiya Génesis, pero amo hualajque ipan Aarón nopa iteipa ixhui Leví cati itztoya 400 xihuit teipa quema pejqui nopa amatapohuali ten Éxodo.

³⁰ Mahli, Edar huan Jerimot elque inintayacancahua iteipa ixhuihua Musi. Nochi ni tacame eliyayaj iteipa ixhuihua Leví ten huejcajquiya huan eliyayaj tayacanani ipan ininfamilias. ³¹ Levitame quiselijque inintequi ica rifa quej nojquiya quichijque iixhuihua Aarón cati eliyayaj totajtzitzi. Amo quitachiliyaya quesqui xihuit quipiyayaya se tacat o taya tanahuatili quipiya. Huan nopa rifa quichijque iixpa nopa Tanahuatijquet David, Sadoc, Ahimelec huan nopa sequinoc huejhueyi totajtzitzi huan levitame.

25

Inintequi tatzotzonani huan huicani

¹ David huan nopa israelita tayacanani quintequimacaque huicani ten nopa familias ten Asaf, Hemán huan Jedutún. Elqui inintequi para teyolmelahuase ica huicac cati panos teipa. Huan sequinoc quintequimacaque para tatzotzonase ica cítaras, arpas huan címbalos quema nopa huicani huicayayaj. Huan nica eltoc inintoca nopa tacame huan taya elqui inintequi:

² Zacur, José, Netanías huan Asarela eliyayaj iconehua Asaf huan huicayayaj huan tatzotzonayayaj imaco inintata, Asaf. Asaf nojquiya elqui se tajtolpanextijquet huan quiseliyaya camanali ten TOTECO. Huan Tanahuatijquet David quinahuati ma teyolmelahua ica huicac nopa camanali cati TOTECO quimacayaya.

³ Huan Jedutún quinpixqui chिकासeme itelpocahua: Gedalías, Zeri, Jesaías, Hasabías, Matatías huan Simei. Inijuanti tequitiyayaj imaco inintata para quitascamatise huan quihueyichihuase Toteco. Huan Jedutún elqui se tajtolpanextijquet huan nopa camanali cati quiseliyaya ten TOTECO teyolmelahuayaya quema seyoc tatzotzonayaya ica arpa.

⁴ Huan Hemán quinpixqui iconehua cati inintoca eliyaya: Buquías, Matanías, Uziel, Sebuél, Jeremot, Hananías, Hanani, Eliata, Gidalti, Romanti Ezer, Josbecasa, Maloti, Hotir huan Mahaziot. ⁵ Hemán elqui nopa tajtolpanextijquet cati quitequipanohuayaya Tanahuatijquet David huan quema quinequiyaya quimatis se tamanti, yaya cati quitaj-taniyaya Toteco Dios. Huan Toteco Dios quitiochijtoya Hemán miyac pampa quimacac 14 itelpocahua huan eyi iichpocahua.

⁶ Nochi ni tacame tequitiyayaj ipan ichaj TOTECO inintempa inintatahua. Inintequi elqui para huicase huan tatzotzonase ica címbalos, arpas huan cítaras.

Huan Asaf, Hemán huan Jedutún quimacayayaj cuenta nopa tanahuatijquet. ⁷ Inijuanti huan ininteixmatcahua momachtijtoyaj cuali quenicatza huicase para quihueyichihuase TOTECO. Para nochi eliyayaj 288 tacame huan nochi cuali quiyecohuayayaj tatzotzonaj.

⁸ Huan ica rifa quijtohuayayaj quema tequitisquía sesen grupo ten nopa huicani. Huan quema quintocaró ma huicaca huan ma tatzotzonaca, amo quitachiliyayaj quesqui xihuit quipiya se tacat. Masque huehuentzi o telpocat, huan masque tamachtijquet ten huicac huan tatzotzonalisti o san momachtijquet, sesen grupo quiseli itequi ica rifa.

⁹ Quema mahuiltijque iixpa TOTECO, quimatque taya tayacanquet huan igrupo achtohui tequitise huan ajquiya yas itepotzco. Huan sesen tayacanquet quinyacanqui itelpocahua huan iteixmatcahua huan san sejco mochijque se grupo ten 12 tacame. Huan quej ni yajtiyajqui inintocax nopa tayacanani ten sesen grupo ipan nopa lista para quenicatza tequipanojtiyase.

Achtohui tequitis José cati hualajqui ipan ifamilia Asaf ica igrupo.

Teipa tequitis Gedalías ica igrupo.

¹⁰ Teipa Zacur.

¹¹ Teipa Izri.

¹² Teipa Netanías.

¹³ Teipa Buquías.

¹⁴ Teipa Jesarela.

¹⁵ Teipa Jesahías.

¹⁶ Teipa Matanías.

¹⁷ Teipa Simeï.

¹⁸ Teipa Azareel.

¹⁹ Teipa Hasabías.

²⁰ Teipa Subael.

²¹ Teipa Matatías.

²² Teipa Jeremot.

²³ Teipa Hananías.

²⁴ Teipa Josbecasa.

²⁵ Teipa Hanani.

²⁶ Teipa Maloti.

²⁷ Teipa Eliata.

²⁸ Teipa Hotir.

²⁹ Teipa Gidalti.

³⁰ Teipa Mahaziot.

³¹ Huan teipa Romanti Ezer.

26

Tamocuitahuiani ipan caltemit

¹ Quej ni quinxelojque nopa tamocuitahuiani ipan caltemit ica grupos: Meselemías elqui itayacanca nopa achtohui grupo. Meselemías elqui icone Coré, cati elqui icone Asaf, cati elqui se iteipa ixhui nopa seyoc Coré ten huejcajquiya.

² Huan itelpocahua Meselemías inintoca eliyaya: Zacarías nopa achtohui ejquet, teipa Jediael, Zebadías, Jatniel, ³ Elam, Johanán huan Elioenai.

⁴ Huan Obed Edom elqui inintayacanca seyoc grupo ten caltemit tamocuitahuiani. Huan iachtohui telpoca quitocaxtiyayaj Semaías huan itelpocahua cati teipa tacajtiyajque elque: Jozabad, Joa, Sacar, Natanael, ⁵ Amiel, Isacar huan Peultai. Huan Toteco Dios miyac quitiochijqui Obed Edom huan quimacac miyac iconehua.

⁶ Semaías iachtohui cone Obed Edom, quinpixqui itelpocahua cati tahuel mosemacayayaj huan eliyayaj tayacanani ipan ininfamilia. ⁷ Huan itelpocahua Semaías inintoca eliyaya: Otni, Rafael, Obed, Elzabad huan iteixmatcahua Eliú huan Samaquías. Nochi ni tacame tahuel mosemacayayaj. ⁸ Ica nochi elque 62 iconehua huan iixhuihua Obed Edom. Huan nochi eliyayaj tacame cati tahuel yolchicajtoque para quichihuase inintequi.

⁹ Huan Meselemías huan 18 iconehua huan iteixmatcahua elqui se grupo ten tacame cati nojquiya tahuel mosemacayayaj.

¹⁰ Huan Hosa cati itztoya ipan nopa hueyi familia ten iixhuihua Merari, quitapejpeni Simri para ma quinyacana iconehua masque yaya amo achtohui ejquet. ¹¹ Nopa sequinoc iconehua inintoca eliyaya: Hilcias

cati iompa telpoca huan teipa Tebalías huan Zacarías cati nelteipan ejquet. Huan para nochi iconehua huan iicnihua Hosa eliyayaj 13.

12 Quej ni quinxeloque nopa tamocuitahuiani para tequitise ipan tiopamit. Huan sesen grupo quihuicayaya itoca itayacanca huan injuanti quipixque inintequi para tequipanose ipan ichaj Toteco quej nopa sequinoc levitame. 13 Quintequimacaque ma tamocuitahuica ipan sesen caltemit ica rifa. Huan amo quitachiliyayaj taya tanahuatili quipiya sesen, yon quesqui xihuit quipiya. Quintequimacaque quej cati quiselijque ipan nopa rifa.

14 Selemías * huan igrupo quintocaro quimocuitahuse nopa caltemit cati mocahua ica campa hualquisa tonati. Huan ica nopa rifa quitocaro Zacarías icone Meselemías para quimocuitahuis nopa caltemit cati mocahua ica norte. Yaya eliyaya se tacat cati tahuel talnamiqui. 15 Huan quitocaro Obed EDOM para quimocuitahuis nopa caltemit ica tatzinta. Huan iconehua quintocaro para quimocuitahuse nopa cuartos campa quiajocuij nochi tamanti cati iaxca nopa tiopamit. 16 Huan quitocaro Supim ihuaya Hosa para quimocuitahuse nopa caltemit campa calaqui tonati cati itoca Salequet campa eltoc nopa ojti cati ixtejco.

17 Mojmosta quinqtequitaliyayaj chicuaseme para quimocuitahuse nopa caltemit cati mocahua ica campa hualquisa tonati. Nahui para quimocuitahuse nopa caltemit cati mocahua ica norte. Nahui para nopa caltemit cati mocahua ica tatzinta huan ome para quimocuitahuse sesen ten nopa cuarto campa quiajocuij tamanti cati motequihuía ipan nopa tiopamit. 18 Nojquiya quinqtequitaliyayaj chicuaseme levitame para quimocuitahuse nopa caltemit campa calaqui tonati, nahui para tamocuitahuse ipan nopa caltemit ica norte huan nahui para campa nopa ojti cati yahui para calaquis tiopamit huan ome para quimocuitahuse nopa tamapamit.

19 Huajca nica eltoc quenicatza quinxeloque nopa tamocuitahuiani cati quimocuitahuiaj caltemit ipan nopa tiopamit cati hualajque ipan ifamilia Coré huan ifamilia Merari.

Cati quimocuitahuiyayaj nopa tomi

20 Nojquiya Ahías quinyacanayaya sequinoc levitame cati quipiyayayaj inintequi para quiselise nochi tamanti cati nopa masehualme quihualicayayaj quej nemacti para Toteco Dios. 21 Huan Jehiel elqui tayacanquet ten nopa tacame cati hualajque ipan nopa familia Laadán huan nopa huejcapan tata Gersón. 22 Huan Jehiel quinpixqui ome itelpocahua cati inintoca eliyaya Zetam huan Joel. Huan injuanti quipixque inimaco nopa tomi cati iaxca tiopamit.

23 Ama nimechilhuis catijqui tayacanani hualajque ten nopa familias Amram, Izhar, Hebrón huan Uziel.

24 Nopa achtohui tayacanquet para quimocuitahuis itomi nopa tiopamit elqui Sebucl cati hualajqui ten nopa familia ten Gersón, cati elqui icone Moisés. 25 Iteixmatcahua cati quipixque ieso Eliezer inintoca eliyaya Rehabías, Jesaías, Joram, Zicri huan Selomit.

26 Selomit huan iicnihua quipixque inimaco nochi tamanti cati patiyó huan nochi tamanti cati taiyocatalili para TOTECO cati quimacatojay Tanahuatijquet David, nopa tayacanani ipan huejhueyi familias, nopa tayacanani ten tatehujca tacame huan nopa soldados. 27 Ni tacame quimacatojay sequij ten nopa tamanti cati moaxcatijtoyaj

* 26:14 26:14 O Meselemías. Xijtachili versículo 2 Cr. 26:2.

huan quicuitoj ipan tatehuilisti para ica quicualtalise nopa tiopamit. ²⁸ Nojquiya Selomit huan iicnihua quiqiyayayaj nopa tequit para quimocuitahuisse sequinoc tamanti cati taiyocatalili para Toteco. Ni tamanti quiiyocatalijtoya nopa tajtolpanextiani Samuel, Saúl, icone Cis; Abner, icone Ner; huan Joab, icone Sarvia. Huan nojquiya quimocuitahuijque nochi tamanti cati ten hueli masehuali quiiyocataliyaya para TOTECO.

²⁹ Quenanías cati hualajqui ipan iteipa ixhuhua Izhar elqui se tayacanquet. Huan yaya huan iconehua elque quej tequichihuani para tetajtojsencahuase campa hueli ipan tali Israel.

³⁰ Hasabías huan mil 700 iteixmatcahua eliyayaj iteipa ixhuhua Hebrón huan quinqtequitalijque para quiqiyase tanahuatili ipan tali Israel ipan nopa tali cati mocahua nechca hueyat Jordán ica campa calaqui tonati. Nojquiya quiqixque inintequi para quitachilise quenicatza masehualme nopona tequipanohuaj ipan itequi TOTECO huan ipan itequi nopa tanahuatijquet. ³¹ Huan Jerías elqui tayacanquet ten iteipa ixhuhua Hebrón. Quema Tanahuatijquet David yahuiyaya para 40 xihuit tanahuatis, quitemojque ipan nopa lista huan quipantijque para itztoyaj miyac tacame ten nopa familia Hebrón ipan altepet Jazer ipan tali Galaad cati tahuel quiqiyayayaj chichahualisti huan cati tahuel mosemacayayaj. ³² Eliyayaj ome mil 700 tacame cati mosemacayayaj huan Jerías elqui inintayacanca. Huan Tanahuatijquet David quintitanqui ipan nopa tali ipan seyoc nali hueyat Jordán para campa hualquisa tonati. Huan quiqixque inintequi para quitachilise nopa huejhueyi familias ten Rubén, Gad huan nopa tajco familia ten Manasés para quintachilise quenicatza quitequipanohuaj Toteco Dios huan nopa tanahuatijquet.

27

Nopa pamit ten soldados

¹ Ama nimitzilhuis ajquiya injuanti nopa huejhueyi tayacanani ten israelita soldados huan huejhueyi familias. Quinxelojtoyaj nochi nopa soldados ica 12 huejhueyi pamit huan sese tayacanquet quiyacanayaya se pamit. Ipan sesen hueyi pamit oncayaya 24 mil soldados. Sequij tayacanani quinyacunque mil soldados huan sequij 100 soldados. Huan sesen pamit tequipano se metzti ipan se xihuit. Huajca se pamit calaquiayaya huan seyoc quisayaya sese metzti. Huan nica eltoc nopa lista ten nopa tayacanani ipan sesen pamit:

² Jasobeam, cati elqui icone Zabdiel huan iteipa ixhui Fares, elqui tayacanquet ten nopa achtohui hueyi pamit ten soldados huan injuanti tequitique nopa achtohui metzti ipan sesen xihuit. ³ Huan ipan nopa achtohui metzti Jasobeam quiqixqui tanahuatili ica nochi tayacanani ten soldados huan nochi nopa 24 mil soldados cati itztoyaj ipan nopa pamit.

⁴ Dodai, cati iteipa ixhui Ahohi, elqui tayacanquet ten nopa ompa hueyi pamit ten soldados huan injuanti tequitique ipan metzti ome ipan sesen xihuit. Huan nopa pamit quinqiyayaya 24 mil soldados huan Miclot elqui nopa tayacanquet cati más hueyi.

⁵ Benaía, icone nopa hueyi totajtzi Joiada, elqui tayacanquet ten nopa expa hueyi pamit huan injuanti tequitique ipan metzti eyi ipan sesen xihuit. Huan nopa pamit quinqiyayaya 24 mil soldados. ⁶ Huan ni

Benaía nojquiya eliyaya inintayacanca nopa 30 huejhueyi soldados cati más mosemacayayaj ten nochi isoldados nopa tanahuatijquet. Huan icone Benaía cati itoca Amisabad eliyaya nopa tayacanquet cati más hueyi ipan ni hueyi pamit.

⁷ Asael, iicni Joab, elqui tayacanquet ten nopa hueyi pamit nahui huan injuanti tequitique ipan metzti nahui ipan sesen xihuit. Huan nopa pamit quinpiyayaya 24 mil soldados. Huan Zebadías icone Asael mochijqui tayacanquet quema mijqui itata.

⁸ Samhut, nopa izraíta tacat, elqui tayacanquet ten nopa hueyi pamit macuili huan injuanti tequitique ipan metzti macuili ipan sesen xihuit. Huan nopa pamit quinpiyayaya 24 mil soldados.

⁹ Ira, cati icone Iques ten altepet Tecoa, elqui tayacanquet ten nopa hueyi pamit chicuase huan injuanti tequitique ipan metzti chicuase ipan sesen xihuit. Huan nopa pamit quinpiyayaya 24 mil soldados.

¹⁰ Heles, cati hualajqui ipan nopa hueyi familia Efraín huan ehuyaya ipan altepet Pelona, elqui nopa tayacanquet ten nopa hueyi pamit chicome huan injuanti tequitique ipan metzti chicome. Huan nopa pamit quinpiyayaya 24 mil soldados.

¹¹ Sibecai, nopa husatita tacat cati eliyaya iteipa ixhui Zera, elqui tayacanquet ten nopa hueyi pamit chicueyi huan injuanti tequitique ipan metzti chicueyi ipan sesen xihuit. Huan nopa pamit quinpiyayaya 24 mil soldados.

¹² Abiezer, cati ehuyaya altepet Anatot huan hualajqui ipan nopa hueyi familia Benjamín, elqui tayacanquet ten nopa hueyi pamit chicnahui huan injuanti tequitique ipan metzti chicnahui ipan sesen xihuit. Huan nopa pamit quinpiyayaya 24 mil soldados.

¹³ Maharai, se iteipa ixhui Zera cati ehuyaya altepet Netofa, elqui tayacanquet ten nopa hueyi pamit majtacti huan injuanti tequitique ipan metzti majtacti ipan sesen xihuit. Nopa pamit quinpiyayaya 24 mil soldados.

¹⁴ Benaía cati ehuyaya altepet Piratón ipan tali Efraín elqui tayacanquet ten nopa hueyi pamit majtacti huan se huan injuanti tequitique ipan metzti majtacti huan se ipan sesen xihuit. Nopa pamit quinpiyayaya 24 mil soldados.

¹⁵ Heldai, cati iteipa ixhui Otoniel huan ehuyaya tali Netofa, elqui tayacanquet ten nopa hueyi pamit majtacti huan ome huan injuanti tequitique ipan metzti majtacti huan ome ipan sesen xihuit. Nopa pamit quinpiyayaya 24 mil soldados.

Nopa tayacanani ipan sesen hueyi familia

¹⁶⁻²² Nica techilhuía nopa huejhueyi familias ten israelitame huan ajquiya inintayacanca.

Hueyi familia, Tayacanquet
 Rubén, Eliezer, icone Zicri
 Simeón, Sefatías, icone Maaca
 Leví, Hasabías, icone Kemuel
 Aarón (nopa totajtzi), Sadoc
 Judá, Eliú, iicni David
 Isacar, Omri, icone Micael
 Zabulón, Ismaías, icone Abdías
 Neftalí, Jerimot, icone Azriel
 Efraín, Oseas, icone Azazías

Manasés, Joel, icone Pedafías
 Manasés (Galaad), Iddo, icone Zacarías
 Benjamín, Jaasiel, icone Abner
 Dan, Azareel, icone Jeroham

Ya ni eliyayaj nopa tayacanani ten nopa huejhueyi familias ten israelitame.

²³ Quema David quitananki se censo, amo quinpojqui nopa telpocame cati ayemo quiپیayayaj 20 xihuit pampa TOTECO quintajtolcahuilijtoya quinmiyaquilis nopa israelitame hasta itztosquíaj quej imiyaca nopa sitalime cati onca ipan ilhuicacti. ²⁴ Huan masque Joab quipehualti quitanana nopa censo, amo quitamilti pampa hualajqui nopa hueyi tatzacuilti ipan israelitame. Huajca amo quema quitalijsue inintoca nopa tacame huan quesqui inimiyaca ipan nopa amatapohuali campa ijcuilijtoc nochí cati oncac ipan itequi Tanahuatijquet David.

Tequichihuani ipan itanahuatilis David

²⁵ Azmavet, icone Adiel, eliyaya nopa tequichijquet cati imaco eltoya nopa cuartos campa quiajocuiyayaj itomi nopa caltanahuatili.

Jonatán, icone Uzías, eliyaya nopa tayacanquet cati imaco eltoya nopa cuartos campa quiajocuiyayaj inintomi pilaltepertziti, altepeme huan nopa calme cati cuali tasencahuali cati iaxca nopa tanahuatijquet cati campa hueli mopantiyaya.

²⁶ Ezri, icone Quelub, eliyaya nopa tequichijquet cati quintachili nopa tacame cati miltequitiyayaj para nopa tanahuatijquet.

²⁷ Simei, ten altepet Ramat, eliyaya nopa tequichijquet cati imaco itztoyaj nopa tacame cati quimocuitahuiyayaj ixcomeca milhua nopa tanahuatijquet.

Zabdi, cati ehuayaya altepet Sifma elqui tequichijquet cati quitachiliyaya inintequi cati quimocuitahuiyayaj nopa xocomecat itajca huan cati quichijchihuayayaj nopa xocomecat at para ma onca para nochí ipan nopa caltanahuatili.

²⁸ Baal Hanán ten altepet Gedera quiپیayaya itequi para quimocuitahuis iolivo milhua nopa tanahuatijquet huan campa quiquixtiyayaj nopa aceite. Nojquiya quimocuitahui nochí icuamilhua ica cuame ten higos. Nochí ya nopa mopantiyayaj ipan nopa tamayamit cati tatzinta.

Huan Joás quiپیayaya nopa tequit para quimocuitahuis nopa calme campa quiajocuiyayaj aceite ten olivo.

²⁹ Sitrai, cati ehuayaya Sarón, quiپیayaya nopa tequit para quimocuitahuis nopa huacaxme cati quicuayayaj sacat nozona ipan nopa tamayamit Sarón.

Huan Safat, icone Adlai, quinmocuitahui nopa huacaxme cati quicuayayaj sacat ipan miyac tamayamit campa hueli.

³⁰ Obil cati elqui se iteipa ixhui Ismael, eliyaya itequi para quinmocuitahuis nochí icamellos nopa tanahuatijquet.

Jehedías cati ehuayaya altepet Meronot, quinmocuitahuiyaya nochí iburrojhua nopa tanahuatijquet.

³¹ Jaziz, se iteipa ixhui Hagar, quinmocuitahuiyaya iborregojhua nopa tanahuatijquet.

Huajca nochí ni tequichihuani motequihuiyayaj para quimocuitahuse nochí tamanti cati iaxca Tanahuatijquet David.

³² Jonatán, cati eliyaya itfo Tanahuatijquet David, elqui se tacat cati tahuel talnamiqui huan tahuel tamachiliyaya. Yaya quiconsejomacayaya David. Jehiel, icone Hacmoni, quipixqui itequi para quinmachtis iconehua David.

³³ Ahitofel elqui nopa tacat cati más tayacantoc para quimacas consejos nopa tanahuatijquet. Husai nopa arquita tacat eliyaya inelhuampo nopa tanahuatijquet.

³⁴ Joiada, icone Benaía huan Abiatar, quiselijque itequi Ahitofel quema mijqui. Joab eliyaya tayacanquet ten nochi israelita soldados.

28

Salomón quipatas David

¹ Teipa Tanahuatijquet David quinsentili ipan altepet Jerusalén nochi nopa huejhueyi israelita tayacanani. Quinsentili nopa tayacanani ten huejhueyi familias, nopa tayacanani ten nopa 12 huejhueyi pamt ten soldados, nopa sequinoc huejhueyi tayacanani ten soldados, nopa tayacanani ten nochi imilhua huan itapiyahlua, huan icaltanahuatil nopa tanahuatijquet huan nochi sequinoc tacame cati quipiyayayaj tequiticayot ipan itanahuatilis.

² Huan Tanahuatijquet David moquetzqui, huan quijto: “Noicnihua huan nomasehualhua, na tahuel nijnequiyaya nijchihuas se tiopamt campa huelisquía tijtalise nopa caxa cati quipixtoc nopa camanali cati TOTECO quichijqui ica tojuanti. Elisquía campa Toteco Dios huelisquía mocahuas para tanahuatis. Huan yeca nijcuatli nochi tamanti cati monequisquía motequihuis ipan nopa tiopamt. ³ Pero Toteco Dios techilhui para amo elis na cati nijchijchihuilis nopa tiopamt campa masehualme quihueyitalise pampa na nieliyaya se nitatehujquet huan ipan tatehuilisti niquinmictjtoc miyac tacame.

⁴ “Pero TOTECO Dios cati toTeco tiisraelitame, techtapejpenijtoya ten nochi iteixmatcahua notata para techchihuas nitanahuatijquet ipan tali Israel huan para teipa nocone huan noixhuihua elise tanahuatiani. Achtohui TOTECO quitapejpeni Judá cati huejcajquiya itztoya; huan teipa ten iteipa ixhuihua Judá, quitapejpeni ifamilia notata; huan teipa ten iconehua notata, elqui ipaquilis para techchihuas na ma nieli nitanahuatijquet ipan tali Israel pampa nelía hueyi iyolo ica na. ⁵ Huan TOTECO techmacatoc miyac notelpocahua huan ten nochi injuanti, quitapejpenijtoc Salomón para techpatas para elis tanahuatijquet ipan ni tali Israel. ⁶ Huan TOTECO quej ni techilhui: ‘Mocone Salomón yaya quichijchihuas notiopa ica nochi tamapamt pampa nijtapejpenijtoc quej elisquía nocone, huan na nielis niitata. ⁷ Huan sinta yaya quisehuiquilis quitepanitas notanahuatilhua quej quichijtoc hasta ama ni tonal, huajca nijchihuas para itanahuatilis ma huejcahua para nochipa.’ ”

⁸ Huajca David mocuetqui campa Salomón huan quihlhui: “Ama, iniixpa nochi ni israelitame cati imasehualhua TOTECO, huan iixpa Toteco Dios, nimitznahuatía para xijtoquilijtinemis ica miyac cuidado nochi itanahuatilhua TOTECO Dios cati toTeco. Huan quej nopa tihuelis tijsenhuiquilis titanahuatis ipan ni yejyectzi tali huan teipa tijcajtehuas para moconehua ma quinahuatica para nochipa.

⁹ “Tinocone Salomón, xijchihua campeca para cuali tiquixmatis Toteco Dios cati nimitata niquixmati. Xijtequipano ica moyolo tapajpactic huan ica se notalnamiquilis cati quinequis quichihuas ipaquilis. Pampa TOTECO mojmosta quitachilía nochi masehualme iniyolo. Yaya quiximati taya moilhuía sese huan nochi cati quicuatalía ipan italnamiquilis para quichihuas. Sinta tijtemos, tijpantis, pero sinta tijtahuelcahuas, yaya mitziyocacahuas

para nochipa. ¹⁰ Huajca ximomocuitahui miyac pampa TOTECO mitztapejpenijtoc para tijchijchihuilis nopa tiopamit cati elis senquisa taiyocatalili para ya. Ximoyoltetili huan xijchihua nopa tequit.”

¹¹ Teipa David quimactili Salomón nochi nopa taixcopinali cati quinextía quenicatza ma quichihua nopa tiopamit huan nochi tamapamit cati quiyahualos, ihuaya nochi nopa cuartos cati huejcapa huan campa quiajocuisse tomi huan nopa cuartos calijtic, huan nopa cuarto cati más calijtic para ipan quitalise nopa caxa campa quixtzacuase tetajtacolhua.

¹² Nojquiya quimacac Salomón nopa taixcopinalme cati quinexti quenicatza moilhuyaya elis cuali para nopa tamapamit calteno ipan ichaj TOTECO, nopa cuartos para tomi huan tamanti cati más patiyó; huan nopa cuartos campa quiajocuisse tamanti taiyocatalilme para Toteco Dios. Nochi ni taixcopinalme Itonal TOTECO quinextilijtoya David. ¹³ Nojquiya nopa tanahuatijquet quimactili Salomón nochi nopa tanahuatilme ten quenicatza tequitise nopa totajtzitzi huan nopa levitame. Quilhui quenicatza quinxeloytoya ica pamit huan nochi nopa tequit cati monequi quichihuase tiopan calijtic. Nojquiya quilhui quenicatza monequi quitequihuisse nochi tamantzitzi ipan nopa tiopamit para quihueyichihuase TOTECO huan para quimacase tacajchahualisti.

¹⁴ David nojquiya quimacac nopa oro huan plata para ica quichijchihuas tamantzitzi cati quitequihuisse ipan nopa tiopamit ipan sesen tequit cati monequis nozona. ¹⁵ Huan quilhui quesqui teposti ten oro o ten plata monequiyaya para quichijchihuas nopa taahuil quetzali huan taahuilme.

¹⁶ Quilhui quesqui oro monequiyaya para quichihuas nopa mesa para ipan quitalise nopa pantzi huan quitamachijqui nopa oro huan quimacac para nopa mesa. Nojquiya quitamachijqui nopa oro para quicualtalis sesen nopa sequinoc mesas cati tachijchihuali ica oro, huan quimacac Salomón.

¹⁷ Nojquiya quitamachijqui nopa oro para quichijchihuas cuachijcolme para quicuapilose nopa nacat ten nopa tacajchahualisti huan quilhui Salomón quesqui oro monequiyaya. Nojquiya san se quichijqui ica nopa oro para ticome, tazas, platos huan nopa hueyi ajpasti cati tachijchihuali ica oro. Sesen tamanti quilhui quesqui oro ma quitequihuis huan quimacac nopa oro. Huan san se quichijqui ica nopa plata para quitequihuisse para quichihuase tamantzitzi. ¹⁸ Nojquiya quilhui quesqui oro monequiyaya para quichijchihuase nopa taixpamit para copali huan quitamachijqui nopa oro huan quimacac. Huan quilhui quesqui oro monequiyaya para quichihuas nopa taixcopincayome ten nopa ome iilhucac ejaehua TOTECO cati inintoca querubines. Inijuanti quipiyase inieltapal patajtoque itzompac icaxa Toteco cati quipixtoc nopa camanali cati TOTECO quichijqui ica israelitame.

¹⁹ Teipa David quej ni quilhui Salomón: “Sesen tamanti ipan ni taixcopinalme cati nica ijcuilijtoc, techmacac TOTECO ica imax. Huan yaya techchijqui ma nijmachili cuali quenicatza monequi quichihuase nopa tequit.”

²⁰ Huan David quilhui: “Ximoyoltetili ximosemaca huan xijchihua nopa tequit. Amo ximajmahui, yon amo ximotzinquixti pampa tahuel hueyi ni tequit. TOTECO Dios cati noTeco na, yaya itztoque mohuaya para mitzphalehuis. Yaya yon se talojti amo mitzcajtehuas huan amo quema mitzhuejcama-jahuas. Huan yaya quichihuas para nochi ni tequit xijtamilti ica miyac paquilisti. ²¹ Huan nica itztoque nochi nopa totajtzitzi huan levitame ipan sesen inigrupo para tequipanose ipan nopa tiopamit. Huan nopa sequinoc talnamiquini ica miyac tamanti yajatili tequipanose san ica ininpaquilis. Huan nochi tayacanani ipan ni israelita masehualme itztoque moixpa para tiqinnahuatis para xijtamiltica nopa tiopamit.”

29

Ofrendas para nopa tiopamit

¹ Teipa David quej ni quinihui nochi nopa israelitame cati mosentilijtoyaj: “Nocone Salomón cati Toteco Dios quitapejpenijtoc para elis nopa yancuic tanahuatijquet ipan ni tali Israel noja telpocat huan amo quiptiya miyac xihui. Huan ni tequit cati monequi quichihuas elis tahuel nelhueyi. Amo quichijchihuas se cali para se tacat. Quichijchihuas se cali para TOTECO Dios. ² Na ica nochi nochichualis nijcualtalijtoc para ichaj Noteco Dios miyac oro, plata, bronce, hierro huan cuahuit. Nojquiya nijcualtalijtoc miyac tet cati inintoca ónice huan sequinoc teme cati tahuel pajpatiyo; tet cati yayahuic huan sequinoc teme cati tapalme ica Toteco ichichualis. Nojquiya nijcualtalijtoc miyac tet cati itoca mármol. ³ Huan ama pampa tahuel nipaqui para quichijchihuase itiopa Toteco Dios, amo san nitemactilis nopa oro huan plata cati ya nitemacatoc, pero nojquiya nitemactilia nopa oro huan plata cati na noaxca para ma quitequihuica ipan nopa tiopamit. ⁴ Ica nochi 100 toneladas ten oro ten tali Ofir huan 230 toneladas ten plata para quialaxose cuali itapepecholhua nopa tiopamit, ⁵ huan nochi nopa tamantzitzi ten oro huan plata. Nopa tamantzitzi quichijchihuase nopa tacame cati quiixmatij nopa tequit. Huajca ama, ¿ajquiya quinequi nojquiya temacas iofrendas para ichaj TOTECO quej na nijchijtoc?”

⁶ Huajca temacaque ofrendas para itiopa TOTECO ica nochi iniyolo nopa tayacanani ten familias, huan ten huejhueyi familias, ten soldados huan ten nopa tacame cati tequipanohuaj ipan itequi nopa tanahuatijquet. ⁷ Temactilijque 165 toneladas ten oro, 10 mil tomi ten oro, 330 toneladas ten plata, huan nechca 600 toneladas ten bronce huan 3 mil 300 toneladas ten hierro. ⁸ Nojquiya masehualme cati quiptiyayayaj piltetzitzi cati yejyetzitzi temacaque, huan quiajojque ipan nopa lugar campa quiajocuij tomi ipan nopa tiopamit imaco Jehiel, iixhui Gersón, yaya cati quitocarohua para quimocuitahuis. ⁹ Huan nopa masehualme tahuel yolpajque ica nopa ofrendas pampa quimacatoyaj TOTECO nochi tamantzitzi ica nochi iniyolo.

¹⁰ Huan Tanahuatijquet David nojquiya paquiyaya miyac huan quihueyichijqui TOTECO iniixpa nochi nopa masehualme cati nozona mosentilijtoyaj, huan quijto: “TOTECO Dios, ta tiiteco tohuejcapan tata Israel. ¡Ma nochi mitzhueyichihuaca para nochipa!

¹¹ Ta tijpiya nochi hueyitilisti huan chichahualisti. Ta titatani huan quinamiqui tijselis tatepanitacayot. Pampa nochi tamanti cati onca ipan ilhuicacti huan ipan taltipacti, nochi moaxca ta.

Ta tijpiya nochi tanahuatili. Timitzhueyichihuaj pampa tijnahuatía nochi tamanti cati onca.

¹² Nochi ricojyot huan tatepanitacayot huala ten ta, pampa ta tijpiya tanahuatili ica nochi cati onca huan ica nochi masehualme. Ta ipan momax tijpiya nochi chichahualisti huan tanahuatili. Ica mopaquilis tiquinhueyitalía masehualme cati tijnequi huan tiquinmaca chichahualisti.

¹³ Huajca ama, tiToteco Dios, timitztascamatilíaj huan timitzhueyitalíaj pampa tahuel tihueyi.

¹⁴ “Pero ¿niajquiya na? huan ¿ajquiya injuanti ni nomasehualhua para techcahuilis ma timitzmacaca tamantzitzi? Nochi ta moaxca huan san timitzmacaj tamanti cati ta techmacatoc. ¹⁵ Eltoc quej tojuanti san tipaxalohuaj

ipan ni taltipacti huan moixpa ta, tielij quej seyoc tali ehuaní. Quena, amo huejca tiitzose nica ipan ni taltipacti. Tielise san se quej tohuejcapan tatahua pampa tonemilis ipan ni taltipacti eli quej se ecahuili cati xpolihui ica se talojtzi. ¹⁶ Ay TOTECO Dios, nochi ni tamanti cati tijsentilijtoque para ica tijchijchiuase se tiopamit para ta cati titatzejtzeloitc, nochi ta moaxca. ¹⁷ Noteco Dios, nijmachilía para ta tiquiniyoltachilía masehualme, huan quema tijpantía cati quinequij quichihuase san cati xitahuac, nelía mitzpacría. Huajca ta tijmati para na ica paquilisti nimitzmacatoc nochi ya ni ica noyolo xitahuac moixpa. Huan ama niquitztoc quenicatza ni masehualhua quihualicatoque tamanti para mitzmacase ica nochi iniyolo nojquiya.

¹⁸ “TOTECO, ta tieliyaya tiininTeco tohuejcapan tatahua, Abraham, Isaac huan Israel. Xijchihua para momasehualhua nochipa ma quipiyaca paquilisti para mitztepanitase. Xiquinchihua para nochipa ma mitzicnelica ica nochi iniyolo. ¹⁹ Nojquiya ica nocone, Salomón, xijchihua para ica nochi iyolo ma quinequis quitepanitas cati quijtohua motanahuatilhua, mocamanalhua huan nochi cati tiquijtojtoc. Huan xijchihua para huelis quichijchihuas nopa tiopamit ica nochi ni tamanti cati nijsentilijtoc.”

²⁰ Teipa David quincamanalhui nochi nopa masehualme huan quinilhui: “¡Xijhueyichihuaca amoTECO Dios!” Huan ijquiyampa nochi inijuanti quihueyichijque TOTECO Dios cati ininTeco inintatahua. Quena, mohuijtzonque huan motancuaquetzque iixpa TOTECO huan nopa tanahuatijquet.

Quichijque Salomón tanahuatijquet

²¹ Huan hualmosta, quinhualicaque se mil becerros, se mil oquich borrejoyme huan se mil pilborrejojtziti huan quintencajque iixpa TOTECO quej tacajcahalisti tatatili. Nojquiya quitencajque tacajcahalisti tatoyahuali huan miyac sequinoc tamanti tacajcahalisti cati quihualicaque nopa israelitame. ²² Huan ipan nopa tonali ilhuichijque huan quipixque se hueyi tacualisti huan tacuajque huan taique iixpa TOTECO ica miyac paquilisti.

Huan seyoc huelta quitalijque Salomón, icone Tanahuatijquet David, ma eli nopa yancuic tanahuatijquet. Huan quitequilijque aceite ipan itzonteco iixpa Toteco para quicalaquise ipan itequi quej tanahuatijquet. Huan sempa quitequilijque aceite ipan itzonteco Sadoc para ma eli nopa hueyi totajtzi.

²³ Huan quej nopa Salomón quiseli nopa tanahuatili cati quipixtoya David huan mosehui ipan isiya. Huan TOTECO quitiochijqui huan Salomón mochi-jqui tahuel hueyi huan nochi israelitame quitepanitayayaj. ²⁴ Huan nochi cati quihuicayayaj tequiticayot ipan tali Israel, huan nochi tayacanani ten soldados huan nochi iconehua Tanahuatijquet David motemacaque para quitepanitase huan quipalehuise Tanahuatijquet Salomón.

²⁵ Huan TOTECO tahuel quihueyitali Salomón iniixpa nochi israelitame. Huan quichijqui noja más ma moricojchihua. Huan quiseli más tatepanitacayot que nochi sequinoc cati tanahuatijque achtohuíya ipan tali Israel.

Imiquilis David (2 S. 5:1-5; 1 R. 2:10-12)

²⁶ Huan quej nopa David, icone Isaí, tanahuati ipan tali Israel 40 xihuit. ²⁷ Tanahuati 7 xihuit ipan altepet Hebrón ipan tali Judá huan 33 xihuit tanahuati ipan altepet Jerusalén ipan nochi tali Israel. ²⁸ Huan David mijqui ica paquilisti quema quipixqui miyac xihuit. David quipixqui miyac tomi huan quiseli miyac tatepanitacayot. Huan Salomón, icone David, quipatac David quej tanahuatijquet.

²⁹ Ipan iamatapohual nopa tajtolpanextijquet Samuel*, eltoc ijcuilijtoc nochí cati panoc ipan inemilis Tanahuatijquet David. Nojquiya eltoc ijcuilijtoc ipan nopa amatapohuali cati quijcuilo tajtolpanextijquet Natán huan cati quijcuilo nopa tajtolpanextijquet Gad†. ³⁰ Nopa tajcuiloli tepohuilía ten itanahuatilis David huan ichicahualis. Nojquiya tepohuilía cati panoc ipan inemilis, huan cati panoc ipan tali Israel huan cati panoc ica nopa tanahuatiani ten nopa talme cati eltoyaj inechca.

* **29:29** 29:29 Camanalti ten 1 S. 1 — 24. quijcuilo Natán huan Gad.

† **29:29** 29:29 Moilhuáj para 1 S. 25 — 2 S. 24 eltoc cati

2 Crónicas

Salomón tanahuati ipan nochi tali Israel

(1 R. 3:3-15)

¹ Salomón, icone David, mochijqui chichahuac ipan itequi quej tanahuatijquet ipan tali Israel pampa Toteco Dios cati elqui iTeco itztoya ihuaya huan quichijqui ma eli nelia hueyi.

Salomón quimacac tacajchualisti TOTECO

² Huan Salomón quinnotzqui ma mosentilica nochi israelitame. Quinnotzqui soldados cati eliyayaj tayacanani ten se mil soldados, huan ten cien soldados, huan nochi jueces, huan nochi tequichihuani huan nochi cati quiyacanayayaj se hueyi israelita familia. ³ Huan sentic Salomón huan nochi nopa tayacanani cati mosentilijtoyaj yajque huejcapa ipan tepet Gabaón pampa nozona eltoya nopa yoyon tiopamit campa mopantiyayaj ihuaya Toteco Dios. Moisés, itequipanojca TOTECO, quichijqui nopa yoyon tiopamit huejcajquiya ipan nopa huactoc tali. ⁴ David ya quihualicatoya icaxa Toteco Dios ten Quiriát Jearim huan quitallijtoya ipan se yoyon cali ipan altepet Jerusalén cati quichijqui nozona para nopa caxa. ⁵ Huan Bezaleel, cati elqui icone Uri huan iixhui Hur, quichijtoya se taixpamit ten bronce. Pero nopa taixpamit noja mocajqui nepa ipan altepet Gabaón iixmelac nopa yoyon tiopamit ten TOTECO. Huajca monejqui Salomón huan nochi cati mosentilijtoyaj ma yaca nozona para quihueyichihuati TOTECO.

⁶ Huan Salomón tejoc iixpa TOTECO campa eltoya nopa taixpamit ten bronce iixmelac nopa yoyon tiopamit campa mopantiyayaj ihuaya TOTECO. Huan nozona quimacatili se mil tacajchualisti tatatili.

Salomón quitajtani TOTECO talnamiqulisti

⁷ Huan ipan nopa yohuali Toteco Dios quimonextili Salomón huan quihui: “Techtajtani nochi cati tijnequi ma nimitzmaca.”

⁸ Huan Salomón quihui Toteco Dios: “Nelia tijpixqui hueyi moyolo ica notata David huan ama techtalijtoc na para nielis nitanahuatijquet. ⁹ Huajca ama TOTECO Dios, xijtamichihua ica na nochi cati tijtencahuili David notata para tijchihuas pampa techchijtoc ma nieli niinintanahuatijca ni israelitame cati tahuel pano miyaqui masehualme. Itztoque san quej taltepociti imiyaca.

¹⁰ Huajca nimitztajtania techmaca talnamiquili huan tamachili para huelis niquinacanas xitahuac nochi ni masehualme. Pampa momasehualhua itztoque tahuel pano miyaqui huan amo aqui yajatis para quinyacanas san ica iseltitzi.”

¹¹ Huajca Toteco Dios quihui Salomón: “Nelcuali cati titajtantoc. Amo titajtantoc tomi, yon miyac tamanti, yon hueyi tatepanitacayot, yon amo titajtantoc ma niquinmicti mocualancaitacahua. Amo techtajtani se hueyi nemilisti. San tijnequi talnamiquili huan tamachili para huelis tiquinacanas nomasehualhua cati nimitztalijtoc para tielis tiinintanahuatijca.

¹² Huajca ama nimitzmacas talnamiquili huan tamachili. Huan nojquiya nimitzmacas miyac tamanti ricojyot huan tahuel miyac tamanti cati cuali huan miyac tatepanitacayot. Nijchihuas para más mitztepanitase huan tijpiyas más moricojyo que nochi tanahuatiani cati itztoque ipan taltipacti hasta ama huan nochi cati teipa itztose.”

¹³ Huan teipa Salomón quisqui altepet Gabaón campa eltoya nopa yoyon tiopamit campa mopantiyayaj ihuaya TOTECO huan mocuetqui Jerusalén huan quichijqui itequi ten hueyi tanahuatijquet ipan nochi tali Israel.

Salomón quincojqui huan quinnamacac carrojme

(1 R. 10:26-29; 2 Cr. 9:25-28)

¹⁴ Huan teipa Salomón quinsentili miyaqui tatehujca carrojme huan cahuayojme. Quipixqui 1 mil 400 tatehujca carrojme huan 12 mil tacame cati tejcoyayaj cahuajtipa. Huan nopa tacame cati momachtijtoyaj tatehuisse quintali ipan altepeme campa oncayaya nopa tatehujca carrojme huan ipan altepet Jerusalén campa yaya itztoya. ¹⁵ Huan Salomón quisentili miyac plata huan oro. Quema yaya tanahuatiyaya, quipixqui plata huan oro ipan altepet Jerusalén quej imiyaca teme. Huan quipixque tamanti ten tiocuahuít campa hueli nozona hasta eliyaya quej nopa cuahuít ten higuera cati onca campa hueli huan amo más ipati eliyaya. ¹⁶ Huan itacojcahua Salomón quincuhuayayaj icahuayojhua ten tali Egipto huan ten tali Cilicia campa hualayayaj cahuayojme cati más cuajcualme. ¹⁷ Huan quincuhuayayaj tatehujca carrojme ten tali Egipto ica 600 plata tomi huan cahuayojme quincuhuayayaj ica 150 plata tomi. Huan nojquiya Salomón quinpixqui cahuayojme huan tatehujca carrojme para quinnamaquiltis nopa tanahuatiani ten nopa heteo masehualme huan sirio masehualme.

2

Salomón mocualtali para quichihuas itiopa TOTECO

(1 R. 5:1-18; 7:13-14)

¹ Teipa Salomón moilhui para ya ajsic tonali para quichihuas se tiopamit para TOTECO huan nojquiya se caltanahuatili para ipan itzto ya. ² Huan quintequimacac 70 mil tacame para tamamase, 80 mil tacame para tetapanase huan 3 mil 600 tacame para elise tayacanani ten nopa tequipanohuani.

³ Teipa Salomón quititanili se amatajcuiloli Hiram, nopa tanahuatijquet ten altepet Tiro, huan quilhui:

“Techtitanili cuame ten tiocuahuít quej tijtitaniliyaya notata David quema mochihuiliyaya icaltanahuatili para ipan itzto. ⁴ Ama nijnequi nijchihuas se tiopamit para TOTECO Dios, yaya cati noTeco. Nijnequi niqiyocatalis para ya para nozona quitatise copali cati ajhuiyac iixpa para tijhueyitepanitase huan nozona quitalise nopa pantzi cati tatzejtzeloltic. Nozona tijmacase TOTECO tacajcahualisti tatatili mojmosta ica ijnaloc huan ica tiotac. Huan tijmacase ipan nopa tonali para timosiyajquetzase, huan ipan yancuic metzti huan ipan nochi ilhuime cati TOTECO Dios techilhujtoc tiisraelitame ma tiquelnamiquica para nochipa.

⁵ “Nopa tiopamit cati nijchihuas monequi elis hueyi pampa Toteco Dios cati ipan timotemachaj itzto más hueyi que nochi sequinoc cati quintocaxtíaj dioses. ⁶ ¿Ajquiya yajatis ica iselti para quichihuilis se cali? Yon ilhuicacti ica nochi ihueyitilis amo hueli quiaxilía. Huan na ¿quenicatza hueli nijchihuilis se cali para ipan itzto? ¡Amo nihueli! San nijchihuilis itiopa campa huelis tijmactilise tacajcahualisti tatatili para tijhueyitalise.

⁷ “Huajca techtitanili se tacat cati tahuel quimati tequiti ica teposti ten oro, plata, bronce huan hierro. Monequi se cati quimati quipas icpat cati yejyetzti para cortinas cati elis moradojtic, chichiltic huan azul-tic. Techtitanili se cati quimati quitejtequi cuahuít para quichihuas

ten hueli tamanti. Yaya huelis tequitis inihuaya nopa tacame nica cati quimatij quitejtequij tet, pampa itztoque tatejtequini cati notata David quintequimacac nica ipan tali Judá huan altepet Jerusalén.

- 8 “Nojquiya techhualiquili cuame ten tiocuahuit, ciprés huan sándalo cati onca ipan Líbano pampa nijmati para motequipanojcahua tahuel quimatij cuatequij. Huajca ma yaca inihuaya notequipanojcahua para quinpalehuise cuatequise. 9 Monequis miyac cuame para nopa tiopamit. Monequi elis hueyi huan yejectzi nopa tiopamit para nochi masehualme san quitachilise. 10 Huan na niquinmacas motequipanojcahua cati cuatequise 4 millón 400 mil litros ten trigo huan nojquiya san se niquinmacas ten cebada. Huan niquinmacas 440 mil litros ten xocomecat iayo huan niquinmacas 440 mil litros ten aceite.”

11 Huajca Tanahuatijquet Hiram ten Tiro quinanquili nopa amatajcuiloli cati Salomón quititanilijtoya huan quilhui:

“TOTECO nelía quinicnelía imasehualhua huan yeca mitzchijtoc tiinintanahuatijca. 12 Ma tijhueyichihuaca TOTECO Dios cati amoTeco anisraelitame, yaya cati quichijqui ilhuicacti huan taltipacti. Yaya quimacac motata David se icone cati talnamiqui huan tamachilía para quichihuas itiopa TOTECO huan nojquiya móchihuulis se icaltanahuatil.

- 13 “Na nimitztitanilis Hiram Abi. Yaya se tacat cati nelía talnamiqui huan nelía quimati quichihua ten hueli tamanti ica oro huan plata. 14 Yaya icone se sihuat ten nopa hueyi familia Dan, pero itata ehua nica ipan Tiro. Hiram tahuel quimati tequitis ica oro, plata, bronce, hierro, tet, cuahuit huan quimati quipa huan quichihua yoyomit cati moradojtic, chichiltic, azultic. Huan quimati tequiti ica lino cati tahuel canactzi para quichihuas yoyomit. Quimati quiixcopinas ten hueli tamanti cati tiquilhuis. Yaya tequitis cuali inihuaya nopa tacame cati ta tiquinpiya cati quimatij tayejecchihuase huan inihuaya nopa tacame cati motata David quintequimacatoc.

- 15 “Huajca ama techchihuili se favor huan techtitanili nopa trigo, cebada, aceite huan xocomecat iayo cati tiquijtojtoc. 16 Huan tojuanti tijpehualtise ticuatequise ipan Líbano hasta tijtequise nochi cuame cati tijnequis. Huan timitztitanilise nopa cuahuit aixco ipan hueyi at hasta ajsiti ipan altepet Jope. Ten nozona ta huelis tijhuicas hasta altepet Jerusalén.”

17 Huan teipa Salomón quichijqui se censo quej nopa censo cati David quipehualti huan quinpojqui nochi nopa masehualme cati ehuan ipan sequinoc talme cati ama itztoyaj ipan tali Israel. Huan eliyayaj 153 mil 600 tacame. 18 Huan Salomón quintapejpeni ten inijuanti 70 mil para tesacase, 80 mil para tetapanase huan 3 mil 600 cati elise tayacanani ten nopa tequipanohuani.

3

Salomón pejqui quichihua nopa tiopamit (1 R. 6:1-38)

1 Huan Salomón pejqui quichihua nopa tiopamit para TOTECO ipan altepet Jerusalén ipan tepet Moriah campá TOTECO quimonextilijtoya David. Quichijqui ipan ital Ornán, nopa tacat jebuseo, cati David quipanti quiyolquixtiyaya itrigo huan quicohuili nopa tali para itiopa TOTECO. 2 Huan Salomón pejqui quichihua nopa tiopamit ipan 2 itequi nopa ompa metzti

ipan toisraelita calendario * Quipehuaiti nopa tiopamit quema yahuiyaya para nahui xihuit ipan itequi quej tanahuatijquet.

³ Huan Salomón quichijqui se tzinpehuaitili para ichaj Toteco Dios cati eliyaya 27 metros ihuehuyaca, huan 9 metros ipatajca. ⁴ Huan iixpa nopa tiopamit quichijque se tamapamit campa achtohui ticalaquis huan ihuehuyaca, ipatajca huan huejcapanca quipiyayaya 9 metros. Huan nochi calijtic quixaltijque ica oro. ⁵ Huan nochi nopa tiopamit quipixqui huapalme ten ciprés huejcapa huan nochi calijtic. Huan nochi quixaltijque ica senquisa oro huan ipan quixcopinque apachij cuame huan cadenas para quizeyecchihuase. ⁶ Huan nojquiya quizecchijqui nopa tiopamit ica piltetzitzi cati yejectzitzitzi huan pajpatiyo, huan ica oro cati más cuajcualtzi cati quihualicatoyaj ten tali Parvaim. ⁷ Huan quej nopa quixalti ica oro nochi calijtic ipan nopa tiopamit. Nochi taquetzalme, caltepamit, cuatetomit huan nochi icaltehua quitajque ica oro huan ipan nochi caltepamit quinixcopinque sequij iilhuicac ejaehua TOTECA cati inintoca querubines.

⁸ Huan nojquiya quichijque nopa cuarto Campa Más Tatzejtzeloltic. Ihuehuyaca huan ipatajca nopa cuarto quipiyayaya 9 metros quej ipatajca nopa tiopamit. Huan quixaltijque ica 21 toneladas ten oro. ⁹ Huan ietca sesen clavo ten oro eliyaya quipano tajco kilo. Huan nojquiya quixaltijque huejcapa ica oro.

¹⁰ Huan Salomón tanahuati ma quinchihuaca ome querubines ica cuahuit huan ma quinxaltica ica oro. Huan quintalijque ipan nopa cuarto Campa Más Tatzejtzeloltic. ¹¹ Huan inieltapal nopa ilhuicac ehuan quipiyayaya 9 metros ihuehuyaca. Huan nopa achtohui ilhuicac ejetet ieltapal quipiyayaya nechca 2 metros huan tajco ipatajca huan quiajsiyaya caltepamit ipan nopa cuarto ipan se lado huan nopa seyoc ieltapal nojquiya quipiyayaya san se ihuehuyaca huan quiajsiyaya nopa seyoc caltepamit. ¹² Huan quej nopa nojquiya elqui nopa seyoc querubín. San se ihuehuyaca inieltapal. Huan ica se ieltapal quiajsiyaya nopa caltepamit huan nopa seyoc ilhuicac ejetet ieltapal quiajsiyaya nopa seyoc caltepamit. ¹³ Huan ni querubines ijcatoyaj huan quixitajtoyaj inieltapal cati quipiyayaya 9 metros huan tachixtoyaj para calijtic campa tatzejtzeloltic. ¹⁴ Huan nojquiya Salomón quichijqui nopa cortinas cati moradojtic, azultic huan chichiltic. Quichijqui ica nopa lino yoyomit cati más yejectziti huan quizeyecchijqui ica inixcopinca querubín ilhuicac ehuan ica icpat ipan nopa yoyomit.

Nopa ome taquetzalme (1 R. 7:15-22)

¹⁵ Salomón quinchijqui ome tomahuac taquetzalme cati quipiyayayaj nechca 16 metros inihuejcapanca. Huan huejcapa campa quinyeyecchijqui quipiyayayaj sese inincorona cati ica tatzquitoyaj nopa taquetzalme huejcapa huan nopa coronas quipiyayayaj quipano ome metro ihuejcapanca. ¹⁶ Nojquiya quichijqui cadenas ica oro quej se costi huan quintali itzonatipa nopa taquetzali huan nojquiya quichijqui cien granadas huan quitali ipan nopa cadenas para ma nesi yejectzi. ¹⁷ Huan quinquetzqui nopa taquetzalme iixpa nopa tiopamit; se ica inejmat huan se ica iarraves. Huan cati mocajqui ica inejmat quitocaxti Jaquín. Huan cati mocajqui ica iarraves quitocaxti Boaz.

* 3:2 3:2 Ipan abril o mayo ipan tocalendario ten ama.

4

*Salomón quichijqui se taixpamit ten bronce
(1 R. 7:23-51)*

¹ Teipa Salomón quichijqui se taixpamit ten bronce cati quipixqui 9 metros ihuehueyaca huan ipatajca, huan 4 metros huan tajco ihuejcapanca. ²Nojquiya quichijqui se hueyi pileta ica bronce para ipan quitecas at. Eltoya yahualtic quej se xicali huan quiپیayaya 4 metros huan tajco ten se lado hasta seyoc. Huan ihuejcapanca quiپیayaya 2 metros huan 25 centímetros. Huan yahualtic iteno quiپیayaya 13 metros huan tajco. ³Huan itzinta nopa hueyi pileta quiپیayaya ome pamit ten torojme ten teposti. Sesen toro ijcatoya quej 4 o 5 centímetros ten ne seyoc. Nopa pileta huan nopa torojme quinchijchitoyaj ten san se teposti. ⁴Huan nopa pileta mosehujtoya ipan nopa 12 torojme ten bronce. Huan 3 torojme tachixtoyaj ica norte, 3 ica sur, 3 ica campa hualquisa tonati huan 3 ica campa oncalaqui. Huan inin-cuitapilhua eltoya ica calijtic. ⁵Huan nopa pileta quiپیayaya 8 centímetros itilajca. Huan iteno nopa pileta eliyaya mimiltic quej nopa lirio xochit, huan quicuiyaya 66 mil litros at.

⁶Nojquiya Salomón quichijqui sequinoc 10 piletas ten bronce. Huan 5 piletas mocajqui ica inejmat huan 5 ica iarraves nopa hueyi pileta. Ya ni quitequihuiyayaj para ipan quipajpacase nochi tacajcahualisti cati quimacayayaj TOTECO, pero ipan nopa hueyi pileta san mopajpacayayaj totajtztzi.

⁷Nojquiya quichijqui 10 taahuil quetzalme ten oro quej monequiyaya para nopa tiopan calijtic. Huan quitali 5 nechca nopa tepamit ica norte huan 5 nechca nopa tepamit ica sur. ⁸Huan nojquiya quichijqui 10 mesas huan quintali ipan tiopamit. Quitali 5 tiopan calijtic ica norte huan 5 ica sur huan nojquiya quichijqui cien huejhueyi tazas ten oro.

⁹Huan nojquiya quichijqui ome tamapamit icalixpa nopa tiopamit; se para totajtztzi huan se campa mosentilise nochi israelitame. Huan quiix-altijque nopa caltemit ten nopa tamapamit ica bronce. ¹⁰Huan nopa hueyi pileta quitali ipan inejmat nopa tiopamit nechca nopa esquina ica sur huan ica campa hualquisa tonati.

¹¹Huan nojquiya Hiram quichijqui xarros, palas huan caxit para tacajcahualisti.

Huan quej nopa tanqui quichihua nochi tamantzitzi cati Salomón quinahuatijtoya quichihuas para ichaj Toteco Dios. Para nochi quichijqui:

¹²nopa 2 taquetzalme,
nopa 2 coronas cati tolontique cati quintalili inintzonixco nopa taquetzalme,
nopa 2 matat cati ica quieyjecchijque nopa coronas,

¹³nopa 400 granadas cati quihuijconque ipan sesen matat ica 2 pamit,

¹⁴itaquetzalhua sesen pileta,

¹⁵nopa hueyi pileta huan nopa 12 torojme cati ipan mosehui,

¹⁶nopa xarros, palas huan teposchijcolme para nacat.

Nochi ni tamanti Hiram Abi quichijqui ica bronce cati más patriyo pampa quej nopa quinahuati Salomón ma quichihua para itiopa TOTECO. ¹⁷Huan Tanahuatijquet Salomón tanahuati ma quaitilitij nochi nopa bronce ipan nopa tamayamit nechca hueyaj Jordán tatajco altepeme Sucot huan Sere-data. ¹⁸Huan Salomón quichijqui tahuel miyac tamanti ica bronce hasta amo aqui huelqui quitamachihua nopa bronce para quimatise quesqui iet-ica. ¹⁹Huan Salomón quichijqui nochi huejhueyi tamanti cati motequihuis ipan ichaj Toteco Dios. Quichijqui:

nopa taixpamit ten oro,
 nopa mesas campa quitalse nopa pantzi cati tatzejtzeltolitic,
²⁰ nopa taahuil quetzalme ten oro, nopa sequinoc taahuilme ten oro cati quijito tanahuatili para monequi quitatise iixpa nopa cuarto Campa Más Tatzejtzeltolitic quej quijitohua tanahuatili,
²¹ nopa tamanti xochime cati quichijque para tayejecchiuase, nopa taahuilme huan huejhueyi pinzas cati quichijque ica cati senquisá oro,
²² nopa tamanti para quitejtequise pabilos, nopa huejhueyi caxit, cucharas huan ticome huan nochí quichijtoyaj ica oro,
 nopa caltemit para calaquise tiopan calijtic, huan Campa Más Tatzejtzeltolitic, huan nopa achtohui cuarto ipan tiopamit. Huan nochí quixalti ica oro.

5

Quicalaquijque icaxa TOTECO tiopan calijtic (1 R. 8:1-11)

¹ Huan quema tanqui nochí tequit cati Salomón tanahuati ma quichihuaca ipan ichaj TOTECO, Salomón quihuicac nochí tamanti ten oro huan plata cati itata, David, quiyocatalijtoya para Toteco Dios huan quiajojqui ipan nopa cuarto cati quichijtoyaj ipan itiopa para tamanti cati patiyo.

² Huan teipa Salomón quinnotzqui ma mosentilica ipan altepet Jerusalén nochí nopa huehue tacame ten israelitame, huan nochí cati eliyayaj tayanani ten sesen huejhueyi familia, huan nochí cati quihuicayayaj tequit para quicuitij icaxa TOTECO cati eltoya ipan Ialtepe David cati nojquiya itoca Sion. ³ Huan ipan nopa ilhuit quema quichihuaj pilxajcaltziti ipan nopa chicome metzti ipan toisraelita calendario*, mosentilijque nochí israelitame ihuaya Tanahuatijquet Salomón. ⁴ Huan hualajque nochí huehue tacame huan nopa levitame huan quiquixtijque icaxa TOTECO. ⁵ Huan nopa totajtziti huan levitame quihuicaque nopa caxa huan nojquiya nopa yoyon tiopamit campa mopantiyayaj ihuaya TOTECO huan nochí tamantziti cati tatzejtzeltolitic cati eltoyaj nozona. ⁶ Huan Tanahuatijquet Salomón huan nochí israelitame cati mosentilijtoyaj itztoyaj iixpa nopa caxa. Huan quinmictiyayaj huan quintatiyayaj borregojme huan torojme quej tacajcahualisti para TOTECO. Huan nelía temacaque miyac borregojme huan torojme hasta amo aquí huelqui quinpojqui quesqui eliyayaj pampa nelía miyaquí. ⁷ Huan nopa totajtziti quicalaquijque icaxa TOTECO ipan nopa cuarto Campa Más Tatzejtzeltolitic. Huan quitallijque inieltapaltzala nopa ome querubín ilhuicac ehuaní. ⁸ Huan nopa querubín ilhuicac ehuaní quipatajtoyaj inieltapal iixco icaxa TOTECO huan quitzactoyaj nochí nopa caxa huan nopa cuame cati ica quiquechpanohuayayaj nopa caxa. ⁹ Huan nopa cuame cati ica quiquechpanohuayayaj nopa caxa eliyayaj nelía huehueyac hasta nesiyayaj campa nopa cuarto Campa Tatzejtzeltolitic cati mocahuayaya iixmelac nopa cuarto Campa Más Tatzejtzeltolitic. Pero ica calixpa ayecmo nesiyaya. Huan quej nopa eltoc nochí nopa tamanti ipan itiopa TOTECO hasta ama. ¹⁰ Huan ipan icaxa TOTECO san eltoya nopa ome tepacti cati Moisés quicalaquí nozona quema itztoyaj ipan tepet Horeb quema TOTECO quichijqui se camanali ica nopa israelitame quema ya quistoyaj ipan tali Egipto.

* 5:3 Ipan octubre ipan tocalendario ten ama.

¹¹ Huan nochi nopa totajtzitzi quisque ipan nopa cuarto Campa Tatzeloltic. Huan masque elqui se tonal para tequitise o amo, achtohui nopa totajtzitzi cati itzttoyaj nozona motapajpacchijque quej monequiyaya para tequitise tiopan calijtic. ¹² Huan moquetztoyaj ica campa hualquisa tonati ten nopa taixpamit nochi nopa levitame cati huicayayaj quej Asaf, Hemán, Jedutún huan nochi ininconeua huan iniicnihua. Huan nochi inijuanti moquentijtoyaj iniyoyo ten lino huan tatzotzonayayaj ica platillos, salterios huan arpas. Huan inihuaya itzttoyaj 120 totajtzitzi cati quipitzayayaj tapitzali.

¹³ Huan sentic pejque quihueyichihuaq TOTECO ica tapitzali, ica huicat, huan ica platillos huan nopa sequinoc tatzotzonali. Huan quitascamatilijque TOTECO ica ni huicat. Quiijtojque:

“Xihueyichihuaca TOTECO

pampa yaya nelía cuali.

Yaya quiipiya hueyi iyolo ica tojuanti para nochipa.”

Huan ipan nopa talojtzi quema inijuanti quihueyichihuayayaj, itiopa TOTECO temic ica mixti. ¹⁴ Huan nopa totajtzitzi ayecmo huelque mocahuaj tiopan calijtic para quichihuase inintequi pampa itatanex TOTECO quitemiyaya ichaj Toteco Dios.

6

Salomón quintiochijqui israelitame huan quihueyichijqui TOTECO (1 R. 8:12-66)

¹ Huajca Salomón quiijto: “TOTECO, ta tiquijtojtoc para tiitztoc ipan tzintayohuilot. ² Pero na nimitzchihuilijtoc se tiopamit campa tiitztos para nochipa.”

³ Teipa Salomón moxayaccuetqui campa moquetztoyaj nochi nopa israelitame huan quintiochijqui. ⁴ Huan Salomón quiijto: “Ma tijtascamatica TOTECO Dios, yaya cati toTeco tiisraelitame pampa yaya quichijtoc quej mocajtoya ica notata David para quichihuas. Quiilhui notata: ⁵ ‘Hasta ipan nopa tonali quema niquinquixti noisraelita masehualhua ipan tali Egipto, amo quema nijtapejpenijtoc se altepet ten nochi israelita altepeme para ipan ma techchihuilca se tiopamit para nozona techhueyimatise. Huan amo quema nijtapejpenijtoc se tanahuatijquet para quinyacanas noisraelita masehualhua. ⁶ Pero ama nijtapejpenijtoc altepet Jerusalén para nozona techhueyichihuase huan nimitztapejpenijtoc, tiDavid, para tiquinyacanas noisraelita masehualhua.’

⁷ “Notata David quipixqui ipan iyolo para quichihuas se tiopamit campa quihueyichihuasquía TOTECO Dios cati toTeco tiisraelitame. ⁸ Pero TOTECO quiilhui notata David para elqui nelía cuali para yaya moilhuijtoya quichihuilis se tiopamit. ⁹ Pero quiilhui para amo ya cati quichihuilisquía. Quiilhui para se icone cati hualasquía ten ya, yaya quichihuasquía. Quiijto para elisquía icone cati quichihuasquía nopa tiopamit campa masehualme quihueyimatise.

¹⁰ “Huan ama TOTECO quitamichijtoc cati quitajtolcahuali notata para quichihuas. Techtalijtoc na niicone ma nieli nitanahuatijquet. Huan nimosehuía ipan isiya para nitanahuatis ipan Israel. Huan na nijchijtoc se tiopamit para TOTECO Dios cati toTeco tiisraelitame. ¹¹ Huan nozona nijtalijtoc nopa caxa cati quiipiya nopa ome tepatacti ten nopa camanal sencahuali cati TOTECO quichijqui ica israelita masehualme.”

Salomón motatajti

¹² Teipa Salomón moquetzqui campa nopa taixpamit para TOTECO huan momatananqui iniixpa nochi israelitame. ¹³ Salomón ya tejcotoya ipan se hueyi tapechti ten bronce cati quichijtoya huan quitalijtoya tahuejcapanco tatajco nopa calixpamit. Huan nopa tapechti quipiyayaya 2 metros huan 25 centímetros ihuehuyeyaca huan ipatajca. Huan ihuejcapanca quipiyayaya 1 metro huan 35 centímetros. Teipa Salomón motancaquetzqui iniixpa nochi israelitame huan momatananqui, ¹⁴ huan quijito: “TOTECO Dios, ta cati titoTeco tiisraelitame. Amo aquí seyoc Dios quej ta nozona ilhuicac, yon nica ipan taltipacti. Ta tijtamichihua nochi cati tiquijtohua. Tiquinicnelía nochi masehualme cati mitzneltocaj ica nochi iniyolo. ¹⁵ Ta tijchijtoc quej timocajtoya ica notata David para tijchihuasquía. Tijtajtolmacac ica mocamac huan ama tijtamilti nopa tequit ica momax quej tiquitaj ama ni tonal. ¹⁶ Huajca ama, TOTECO Dios, ta cati titoTeco tiisraelitame, xijtamichihua nojquiya nopa seyoc camanali cati tiquilhui notata David. Ta tiquilhui, sinta iixhuihua monejnemiltisquíaj xitahuac huan quichihuasquíaj motanahuatil quej yaya quichijqui, se iixhui tanahuatis para nochipa campa israelitame. ¹⁷ Huajca ama, TOTECO Dios, ta cati titoTeco tiisraelitame, xijtamichihua nojquiya ni cati tijtajtolcahuilijtoc notata David, yaya cati elqui motequipanojca.

¹⁸ “Pero ¿huelis nelía ta cati tiToteco Dios tiitztoqui ipan ni tali tohuaya timasehualme? Yon ilhuicacti ica nochi ihueyitilis amo hueli mitzaxilía, huajca ¿quenicatza huelis tiitztoqui ipan ni tiopamit cati na nijchijtoc? ¹⁹ Pero, TOTECO Dios, ta cati tinoTeco, xijcaqui nonetatajtíl cati na nijchihua huan xijtacaquili nochi cati na, nimotequipanojca, nimitztajtania. ²⁰ Xitachixto motiopa tonaya huan tayohua. Amo xiquelcahua ni mochaj cati tatzejtelolitic cati ta tijtapejpeni para nica timitzhueyichihuase. Techtacaquili quema na nimotatajtía nica. ²¹ Quena, quema na o moisraelita masehualhua timotatajtise ipan ni motiopa, techtacaquili hasta nepa ilhuicac campa tiitztoc huan techtapolhui totajtacolhua.

²² “Huan quema se acajya quixpanos ihuampo huan monequi quihualicase nica campa ni taixpamit ipan ni tiopamit para tatestigjoquetzas sinta amo teno quichijtoc, ²³ huajca xiquintacaquili TOTECO. Quena, ta cati tiitztoc nepa ilhuicac, xiquintacaquili huan xiquintajtolsencahua motequipanojcahua. Xijtatzaquilti quej quinamiqui yaya cati quipiya tajtacoli. Huan xijtajtolsencahua xitahuac huan xijmanahui cati amo teno quichijtoc.

²⁴ “Huan sinta ininculancaitacahua moisraelita masehualhua quintanise pampa momasehualhua mitzixpanotoque, huan sinta teipa momasehualhua moyolcuepase ica ta huan quicahuase inintajtacolhua, huan motatajtise huan mitzhueyichihuase ipan ni motiopa, ²⁵ huajca xiquintacaquili ten ilhuicac huan xiquintapolhui inintajtacolhua. Xiquinhualica sempa ipan inintal cati tiquinmacac inihuejcapan tatahua.

²⁶ “Huan quema oncas ahuacuisti huan amo huetzís at pampa momasehualhua tajtacolchijtoque ica ta, sinta teipa inijuanti motatajtise ipan ni tiopamit huan mitzhueyimatise huan moyolcuepase huan quicahuase inintajtacolhua pampa tiquintajyohuiltijtoc, ²⁷ huajca xiquintacaquilis hasta nepa ilhuicac huan xiquintapolhui inintajtacolhua. Pampa tojuanti timotequipanojcahua huan timomasehualhua. Technextili se cuali ojti para tijtoquilisé huan xijchihuas ma taquiyahui ipan ni motal cati ta techmacatoc timomasehualhua.

²⁸ “Huan quema ipan ni tali oncas mayanti, o se fiero cocolisti, o huaquis tomil, o chapolime o oculime calaquisé campa tomilhua, techtacaquili. Sinta tocualancaitacahua hualase techtehuicij ipan total, o sinta hualas ten

hueli tatzacuiliti o taohuijgayot,²⁹ huajca xiquintacaquili moisraelita masehualhua cati quimachilíaj tacuajcualoli huan cati momatananase campa ni tiopamit huan mitztajtánise motapalehuil.³⁰ Quena, xiquintacaquili hasta nepa ilhuicac campa tiitztoc huan xiquintapojpolhui huan xiquintaxtahui sese inijuanti quej cati cuali quichijtoque. Pampa san ta tiquixmati inintalnamiqulis huan iniyolo nochi masehualme.³¹ Quej nopa mitzimacasise huan mitztepanitase huan quichihuase motanahuatilhua nochipa ipan ni tali cati tiquinmacatoc tohujcapan tatahua.

³² “Huan nojquiya sinta hualase masehualme ten sequinoc talme pampa quicacoque ten mohueyitilis huan mochichualis, huan sinta mitzhueyichihuase huan motatajtise ipan ni motiopa,³³ xiquintacaquili huan xiquinmaca nochi cati mitztajtánise. Quej nopa nochi altepeme ipan sequinoc talme ipan ni taltipacti mitzixmatise. Huan nojquiya mitzimacasise huan mitztepanitase quej quichihuaj moisraelita masehualhua. Huan quej nopa nochi masehualme quimachilise para nelía moaxca ni tiopamit cati na nijchijtoc.

³⁴ “Huan quema yahuij moisraelita masehualhua para quintehuitij incinculancaitacahua campa hueli campa ta tiquintitanis, sinta motatajtise huan tachixtose ica campa ni altepet cati ta tijtapejpenijtoc huan ipan ni tiopamit cati na nijchijtoc,³⁵ huajca xiquintacaquili hasta nepa ilhuicac huan xiquinpalehui huan xiquinmanahui ten incinculancaitacahua.

³⁶ “Huan sinta inijuanti tajtacolchihuase moixpa, pampa amo aquí yon se cati amo quema tajtacolchihua, huelis ticalanis inihuaya huan tiquintemactilis ica incinculancaitacahua para ma quinhucaca ipan seyoc tali cati huejca o nechca.³⁷ Pero sinta ipan nopa tali campa tetequipanohuaj moyolcuepase huan motatajtise huan quijitose: ‘Titajtacolchijtoque huan timitzixpanotoque miyac. Nelía tijchijtoque cati tahuel fiero moixpa,’ huajca xiquintapojpolhui.³⁸ Quena, sinta nelía ica nochi iniyolo huan ica nochi inintalon inijuanti moyolcuepase huan quicahuase nochi inintajtacolhua, xiquintapojpolhui. Sinta motatajtise tachixtoque ica campa ni tali cati tiquinmacatoc inihuejcapan tatahua huan ipan ni altepet cati tijtapejpenijtoc campa moquetzas ni motiopa cati na nimitzchihuilijtoc,³⁹ huajca ta, TOTECO, xiquintacaquili ten ilhuicac campa tiitztoc huan xiquinpalehui huan xiquintapojpolhui nochi inintajtacolhua.

⁴⁰ “Quena, Toteco Dios xiquintachilijto nochi cati motatajtise ipan ni tiopamit huan xiquintacaquili.

⁴¹ “Huan ama, TOTECO Dios, ximotanana, huan xicalaquí ipan ni tiopamit campa timosiyajquetzas. Nica eltoc nopa caxa cati quiptiya chichahualisti. Mototajtzitzi nica ma tenextilica para tiquinmaquixtijtoc. Nica motatzejtelolijca masehualhua paquise ica nochi motatiochihual cati tiquinmacatoc.

⁴² TOTECO Dios, amo techtahuelcahua pampa na cati techtapejpenijtoc para nielis nitanahuatijquet.

Xiquelnamiqí quenicatza tiquicnelijtoc David, motequipanojca.”

7

TOTECO quititanqui tit huan quitati nopa tacajcahualisti

¹ Huan quema Salomón tanqui motatajtía, nimantzi huetzqui tit ten ilhuicac huan quitati nochi nopa tacajcahualisti. Huan nopa tiopamit temic ica itatanex TOTECO.² Huan yeca nopa totajtzitzi ayecmo huelque calaquij tiopan calijtic para quichihuase inintequi pampa itatanex TOTECO temitoya

tiopan calijtic. ³ Huan quema nochi nopa israelitame quitaque nopa tit cati huetzqui huan itatanex TOTECO ipan itiopa, huajca nochi mohuijtzonque hasta talchi huan quihueyitalijque TOTECO. Huan quitascamatilijque huan quijtojqque:

“Nelía cuali Toteco.

Yaya quipiyas hueyi iyolo ica tojuanti para nochipa.”

⁴ Teipa nochi israelitame huan Tanahuatijquet Salomón quimacaque más tacajcahualisti TOTECO. ⁵ Huan Salomón temacac para tacajcahualisti 22 mil torojme huan 120 mil borregojme.

Huan quej nopa Salomón huan nochi israelitame quiiyocatalijque nopa tiopamit san para Toteco Dios.

⁶ Huan nopa totajtzitzi moquetzttoyaj campa quintocarohuayaya. Huan nopa levitame quitzotzonayayaj nopa tatzotzonal cati David quichijtoya para ica quihueyichihuase TOTECO huan injuanti huicayayaj: “Itaicnell Toteco huejcahuas para nochipa.” Huan nopa totajtzitzi moquetzttoyaj iniixmelac nopa levitame huan chicahuac quipitzayayaj tapitzalme. Huan nochi israelitame moquetzttoyaj.

⁷ Huan nojquiya Salomón quiiyocatali para TOTECO nopa tamapamit cati eltoya iixpa tiopamit para nozona nojquiya quitatise tacajcahualisti huan ichiyajca nopa nacamit cati eliyaya tacajcahualisti para tasehuilisti ica TOTECO pampa nopa taixpamit ten bronce cati quichijtoya amo quicuiyaya nochi nopa tapiyalme huan ininchiyajca huan nopa tacajcahualisti ten harina cati quitatiyayaj.

⁸ Huajca Salomón ilhuichijqui chicome tonati para quiiyocatalis nopa tiopamit. Huan moquetzttoyaj nozona tahuel miyac masehualme. Hualajque nochi israelitame cati itzttoyaj campa hueli ipan tali Israel. Ajsicoj ten inepa nopa tali Hamat campa hualquisa tonati hasta campa nopa hueyat ten tali Egipto campa oncalaqi. ⁹ Huan hualhuicta, quichijque se tasentili tatzetzelolitic para moiycatalise sempa ica TOTECO. Para chicome tonati ilhuichijque para quiiyocatalise nopa tiopamit para TOTECO huan teipa chicome tonati quichijque nopa ilhuit quema quichihuaj Pilxajcaltitzi.

¹⁰ Huan ipan 23 itequi ten nopa chicome metzti ipan toisraelita calendario*, Tanahuatijquet Salomón quintitanqui nochi israelitame ma yaca ninchajchaj. Huan injuanti yajque tahuel yolpactoque ica nochi cati quitztoyaj. Pampa nelía cuali nochi cati TOTECO quichijtoya ica David huan ica Salomón huan ica nochi israelitame.

Toteco quimonextili Salomón

(1 R. 9:1-9)

¹¹ Huajca Salomón tanqui quichijchihua ichaj TOTECO. Nojquiya quitamilti icaltanahuatil huan nochi tamantzitzi cati moilhui para quitalis ipan sesen cali. ¹² Huan TOTECO quimonextili ica tayohua huan quiihui: “Na nijtacaquilijtoc quej timotatajijjtoc huan nijtapejpenijjtoc ni altepet para notiopa campa techmacase tacajcahualisti. ¹³ Huajca sinta nijtzacuas ilhuicacti para amo huetzic at, o sinta niquintitanis chapolime para quicuase cati anquitojqque, o sinta nimechtitanilis se cocolisti cati chicahuac, ¹⁴ huan sinta anmoicnonequise, amojuanti cati nochi quimatij para anoaxcahua, huan anmotatajtise, huan anmotemachise ipan na, huan anquicahuase amotajtacolhua, huajca na nimechtacaquilis ten nepa ilhuicac campa niitztoc huan nimechtapajpolhuis amotajtacolhua huan niquijcuenis nochi cati fiero ipan amotal. ¹⁵ Ama huan para nochipa nitachixtos ipan ni tiopamit huan

* **7:10** 7:10 Eltoc ipan itamiya septiembre o ipejya octubre ipan tocalendario ten ama.

niquintacaquilis nochi cati motatajtise nica. ¹⁶ Pampa na nijtapejpenijtoc ni tiopamit huan niqiyocatalijtoc para nica masehualme techhueyichihuae huan nica elis nochaj para nochipa. Nochipa nijmocuitahuis huan niqicnelis.

¹⁷ “Huan Salomón, sinta timonejnemiltis xitahuac quej quichijqui motata David huan tijchihuas nochi notanahuatilhua, ¹⁸ huajca amo nijcahuilis yon se ma mitzquixtilis motanahuatilis. Quej nopa nojquiya nijtajtolcahuili motata David quema niqilhui para amo quema polihuis se icone o iixhui para itztos ipan ni caltanahuatili para quinnahuatis israelitame.

¹⁹ “Pero sinta amojuanti anmohuejcatalise huan amo anquichihuae notanahuatilhua huan nochi tamachtli cati na nimechmacatoc huan sinta anquintemose teteyome para anquinhueyitalise quej amodios, ²⁰ huajca na nimechquixtis ten ni tali cati nimechmacatoc. Huan nijhuejcamajcahuas ni tiopamit masque taiyocatalili para na. Huan masehualme ipan nochi talme ipan taltipacti amechpinajtise huan amechmahuispolose. ²¹ Huan ni tiopamit cati pano yejectzi ama teipa sosolihuis hasta quinmajmatis nochi cati panose nica. Huan san quitachilise huan quijjtose: ‘¿Para ten quichijqui TOTECO nochi ni tamanti cati nelía fiero ica ni ital huan ni ichaj?’ ²² Huan quinnanquilise: ‘Pampa quitahuacajque TOTECO Dios cati elqui ininTeco inihuejcapan tatahua, yaya cati quinquixti ipan tali Egipto. Inijuanti quinhueyitalijque huan quintequipanojqúe teteyome huan yeca ama yaya quintatzacuiltjtoc.’ ”

8

Sequinoc tamanti cati quichijqui Salomón (1 R. 9:10-28)

¹ Teipa panoc 20 xihuit para tanahuatiyaya Tanahuatijquet Salomón. Ipan nopa miyac xihuit quichijqui ichaj TOTECO huan se caltanahuatili para yaya ipan itztos. ² Huan quincualtalili inintepa nopa altepeme cati quimactilijtoya Hiram, huan nopona quincajqui israelitame ma mochantica.

³ Teipa Salomón yajqui quitehuito altepet Hamat ipan tali Soba huan moaxcati. ⁴ Nojquiya quicualtali altepet Tadmor ipan huactoc tali. Huan quinchijqui miyac altepeme nechca altepet Hamat para ipan quiajocuis nochi tamanti cati monequiyaya ipan itanahuatilis. ⁵ Huan teipa quicualtali nopa altepet cati itoca Bet Horón cati huejcapa huan Bet Horón cati tatzinta. Huan quinyahualo ica tepamit huan quintalili inincaltenhua huan teposti cati ica quitzacuase inincaltenhua. ⁶ Huan nojquiya quicualtali altepet Baalat huan sequinoc altepeme campa quiajocuis nochi tamanti tacualisti. Salomón quinchijqui miyac altepeme campa mocahuase itatehuijca carrojhua huan nochi icahuayojhua. Salomón quichijqui nochi tamanti cati quinequiyaya ipan altepet Jerusalén huan ipan tali Libano huan campa hueli ipan nochi itanahuatilis. ⁷ Noja itztoyaj masehualme ipan nopa tali cati amo eliyayaj israelitame quej cati heteos, amorreos, ferezeos, heveos huan jebuseos. ⁸ Inijuanti eliyayaj iniixhuihua nopa masehualme cati nopa israelitame amo quintzontamiltijque quema moaxcatiyayaj nopa tali huejcajquiya, huajca Salomón quinchijqui itequipanojcahua huan quinmacac miyac comun tequit. Huan quej nopa noja tequitij hasta ama. ⁹ Pero Salomón amo quichijqui itequipanojca yon se cati eliyaya israelita. Israelitame quintequimacac para elise soldados, tequichihuani huan tayacanani cati quinhuicayayaj itatehuijca carrojhua huan cahuyojme. ¹⁰ Huan Salomón

quintequimacac 250 tayacanca tequipanohuani cati quinyacanayayaj itequipanojcahua ipan nochi inintequi.

¹¹ Huan Salomón quiquixti isihua cati eliyaya iichpoca Faraón ten Ialtepe David huan quihuicac ipan nopa yancuic cali cati yaya quichijtoya. Moilhui para isihua amo quinamiqui itztos ipan icaltanahuatil David cati elqui Tanahuatijquet ten tali Israel pampa huejcajquiya quicalaqui icaxa TOTECO ipan icaltanahuatil huan Salomón moilhui para nopa lugar campa eltoya mocuetqui tatzejtzeltic.

¹² Huan Salomón quitati tacajcahualisti para TOTECO ipan nopa taixpamit cati yaya quichijtoya calixpa campa calaquij tiopan calijtic. ¹³ Huan sesen tonali mopatac imiyaca nopa tacajcahualisti cati temacayayaj pampa quichijqui quej imiyaca cati quijto itanahuatilhua Moisés para monequi ipan sese tonal. Quimacaque más tacajcahualisti TOTECO ipan sábado, nopa tonali para mosiyajquetzase, huan ipan yancuic metzti. Nojquiya temacaque miyac ipan nopa eyi ilhuime cati quichihuayayaj sesen xihuit; nopa ilhuit quema quicuayayaj nopa pantzi cati amo quiypiya tasonejcaoyot, nopa ilhuit ten pixquisti cati huejcahuayaya se semana huan nopa ilhuit ten Pilxajcaltziti.

¹⁴ Huan quema Salomón quintequimacac nopa totajtztizi huan quisencajqqui quenicatza mopatatiyase, quitoquili nopa tanahuatili cati David quichijtoya. Nojquiya quintali nopa levitame para ma quinyacanaca nopa masehualme para quihueyichihuase TOTECO huan para quinpalehuise nopa totajtztizi ipan nochi cati monequiyaya. Huan quintali levitame cati mopatatiyajque para quimocuitahuise caltemit pampa quej nopa tanahuatijtoya David cati elqui itequipanojca Toteco Dios. ¹⁵ Huan quej nopa Salomón amo quiixpanoc yon se tanahuatili cati itata, Tanahuatijquet David, quichijtoya ica totajtztizi, levitame huan cati quiajocuiyayaj itomi nopa tiopamit. Nochi mocajqui quej David tanahuatijtoya.

¹⁶ Huan sesen tequit cati Salomón tanahuati ma quichihuaca ten quema quitaliyque itzinpehuatil nopa tiopamit hasta quema quitamiltijque nochi, yaya quítac para nopa masehualme quichijtoya quej monequiyaya. Huajca ica yejyectzi Salomón quichijqui ichaj TOTECO.

¹⁷ Teipa Salomón yajqui Ezión Geber huan Elot cati eltoya iteno nopa hueyi at ipan tali Edom. ¹⁸ Pampa nozona Hiram quititanili cuaacalme ica itequipanojcahua cati quiixmatiyayaj quenicatza quinejnemiltise cuaacalme ipan hueyi at. Huan injuanti yajque inihuaya itequipanojcahua Salomón hasta tali Ofir. Huan ten nozona quihualiquilijque Tanahuatijquet Salomón nechca 15 toneladas ten oro.

9

Nopa sihua tanahuatijquet ten Sabá (1 R. 10:1-13)

¹ Huan quema nopa sihua tanahuatijquet ten tali Sabá quicajqui cati nochi quijtohuayayaj ten Salomón, yajqui quipaxaloto ipan altepet Jerusalén para quitatzintoculis miyac tamanti cati ohui para quuitas sinta hueli quixtomilis. Huan nopa sihuat ajsico moyoyontijtoc nelía yejyectzi huan quihuicayaya miyac tamanti para quixnxfis para pano miyac iricojyo. Quinhualicayaya miyac itequipanojcahua huan tahuel miyac camellos cati quimamayayaj tahuel miyac tamanti taajhuicayayot, oro huan piltetzitzi cati yejyectziti huan pajpatiyo. Huan quema ajsico iixpa Salomón, quitatzintoculi nochi cati ohui cati moilhuiyaya. ² Huan Salomón quinanquili nochi huan amo onca yon se tatzintoculi cati Salomón amo huelqui

quinanquili. ³ Huan quema nopa sihua tanahuatijquet quuitac ten nochi italanamiquilis Salomón huan quema quuitac nopa hueyi caltanahuatili cati yaya quichijtoya, amo hueliyaya quineltoaca. ⁴ Quuitac nochi nopa tacualisti ipan imesa huan iyejyejca nochi nopa cuartos campa mocahuayayaj itequiticahua. Huan quuitac nochi itequiticahua moquentijtoyaj cati tahuel yejyetzzi yoyomit huan tequitiyayaj nelía cuali. Huan quuitac moyoyontijtoque ica cati nelía cuali cati quicualtaliyayaj itailis nopa tanahuatijquet, huan quuitac nopa escalera cati pano yejyetzzi campa Tanahuatijquet Salomón huelqui tejco xitahuac ipan ichaj TOTECO. Huan nopa sihua tanahuatijquet san quitachili. ⁵ Huan quilhui Salomón: “Nelía melahuac cati nijcaquiyaya nepa notal ten nochi cati tijchijtoc huan ten nochi motalanamiquilis, ⁶ pero na amo nijnelto cayaya. Pero ama, quena, nijneltoaca pampa nihualajtoc huan niqiztoc ica noixteyol. Motalanamiquilis nelía hueyi hasta conpano cati nijcajqui. Nelía amo techilhuijque ten yon tajco motalanamiquilis, yon amo techilhuijque yon tajco nopa ricojyot cati tijpiya. ⁷ Nelía se hueyi paquilisti quipiayaj momasehualhua huan motequipanojcahua cati itztoque mohuaya nochipa huan quicaquij motalanamiquilis. ⁸ Ma nochi quitascamatilica TOTECO Dios cati moTeco pampa yaya mitztalijtoc tielis tiinintanahuatijca israelitame. Nesi para moTeco Dios nelía quinicnelía nochi israelitame huan yeca mitztalijtoc pampa quimatiyaya tiquintajtolsencahuas xitahuac huan tiqinycanas ipan se ojtí cati cuali.”

⁹ Huan nopa sihua tanahuatijquet quimactili Salomón nechca nahui toneladas ten oro, huan miyac tamanti taajhuiyacayot huan miyac piltetzitzi cati yejyetzitzi huan pajpatiyo. Huan amo quema ajsitoya taajhuiyacayot nelcuali para Salomón quej nopa taajhuiyacayot cati nopa sihua tanahuatijquet ten Sabá quimacac.

¹⁰ Huan quema nopa tacame cati eliyayaj itequipanojcahua Hiram huan itequipanojcahua Salomón achtohuiya quihualicaque oro ten tali Ofir, nojquiya quihualicaque, huapalme ten nopa cuahuit cati itoca sándalo. Huan quihualicaque miyac piltetzitzi cati yejyetzitzi huan pajpatiyo. ¹¹ Huan ica nopa cuahuit ten sándalo Salomón quichijqui escaleras para campa monequi tejcose ipan ichaj TOTECO huan ipan icaltanahuatili. Huan nojquiya ica san se nopa cuahuit quichijqui arpas huan salterios para nopa tatzotzonani huan huicani. Amo quema quipixtoyaj ipan tali Judá cuahuit quej nopa para ica quichihuase miyac tamanti.

¹² Huan Tanahuatijquet Salomón quimacac nopa sihua tanahuatijquet ten tali Sabá nochi cati yaya quinejqui huan nochi cati quitajtani hasta quipano quimacac más tamanti que cati nopa sihuat quihualiquilijtoya. Huan teipa nopa sihua tanahuatijquet mocuetqui ipan ital inihuaya itequipanojcahua.

Salomón más moricojchijqui huan mohueyichijqui
(1 R. 10:14-29; 2 Cr. 1:14-17)

¹³ Huan Salomón quiseliyaya sesen xihuit nechca 23 toneladas ten oro. ¹⁴ Pero ya ni eltoya iyoca ten nopa oro huan plata cati quihualicayayaj nopa tanahuatiani ten tali Arabia huan iyoca ten cati nopa tanamacani huan gobernadores ipan ital quihualiquiliyayaj. ¹⁵ Huan Tanahuatijquet Salomón tanahuati ma quichihuilica 200 huejhueyi yolixtzajcayot ten oro tatejtzontí. Huan sesen yolixtzajcayot quipiyayaya 6 kilos ietica. ¹⁶ Huan tanahuati ma quichihuaca seyoc 300 yolixtzajcayot ten oro pero amo más huejhueyi. Huan sesen quipiyayaya 3 kilos ietica. Huan nochi nopa yolixtzajcayot Salomón quintali ipan nopa caltanahuatili campa itoca Cuatitamit ten

Libano. ¹⁷ Huan nojquiya Salomón tanahuati ma quichihuaca se siyaj para ipan mosehuis para tanahuatis huan ma quichihuaca ica nopa yejyetzti tet cati itoca marfil huan ma quixaltica ica senquisa oro. ¹⁸ Huan para ajsis campa isiya quichijque 6 escalones ten oro huan ten oro quichijqui se pilmesajtzi campa quitalisquá iicxihua. Ipan isiya quichihuillijque campa quitalis imax. Huan ica oro quinchijque ome taixcopincayome ten león huan quinquetzque nechca isiya ipan sesen lado. ¹⁹ Huan quinchijque seyoc 12 taixcopincayome ten leones. Huan quinquetzque 6 ten nopa leones ipan nopa escalones ipan se lado ten isiya huan sequinoc 6 ipan nopa seyoc lado. Huan nochi quinchijque ica oro. Ipan nochi taltipacti amo quema oncac seyoc isiya se tanahuatijquet cati yejyetzti quej iaxca Salomón. ²⁰ Huan nochi itazas huan ivasos Salomón eliyaya senquisa oro. Nojquiya nochi cati quitequihuiyayaj ipan icaltanahuatil cati itoca Cuatitamit ten Libano, eliyaya senquisa oro pampa quema itztoya Salomón huejcajquiya nopa plata amo quipatiitayayaj. ²¹ Huan Salomón quinpixqui miyac huejhueyi cuaacalme cati itequipanojcahua Hiram quinnejnemiltiyayaj huejca ipan hueyi at. Huan ica ejeyi xihuit mocuepayayaj nopa cuaacalme ten altepet Tarsis ica oro, plata, marfil, monos huan nopa totome cati inintoca pavos reales.

²² Huan Tanahuatijquet Salomón más moricojchijqui huan más mochijqui talnamiquí que nochi sequinoc tanahuatiani ipan nochi talme. ²³ Huan tanahuatiani ten campa hueli talme hualayayaj quipaxalohuaj Salomón pampa quinequiyayaj quiitase huan quinequiyayaj quicaquise nochi talnamiquilisti cati Toteco Dios quimacatoya. ²⁴ Huan nochi cati quipaxalohuayayaj quihualiquiliyayaj tamanti ten plata, oro, yoyomit, teposti para ica tatehuise isoldados, taajhuiyacayot, cahuayojme huan mulas.

Itequi Salomón ica tatehuijca carrojme huan cahuayojme

(1 R. 10:26-29; 2 Cr. 1:14-17)

²⁵ Huan Salomón quipixqui 4 mil calme para icahuayojhua huan itatehuijca carrojhua. Huan quinpixtoya 12 mil soldados cati quimatiyayaj quinhuicaj itatehuijca carrojhua o quimatiyayaj tejcoj ipan cahuayojme. Huan quintali nopa tacame ipan nopa altepeme cati quimpiyayayaj cahuayojme huan itatehuijca carrojhua. Nojquiya quintali sequij nechca ya para quimocuitahuse ya huan icaltanahuatil ipan altepet Jerusalén. ²⁶ Huan Salomón quinnahuatiyaya nochi nopa tanahuatiani cati itztoyaj ten iteno nopa hueyat Eufrates campa hualquisa tonati huan hasta campa inintal filisteos huan hasta inepa tali Egipto campa temo tonati. Nochi eltoya ipan itanahuatilis. ²⁷ Huan Salomón quipixqui pano miyac plata hasta elqui quej imiyaca teme ipan altepet Jerusalén. Huan tiocuahuil cati eliyaya patiyajo quipixqui pano miyac quej imiyaca higo cuame cati campa hueli onca cuatita. ²⁸ Huan Salomón quinhualicayaya icahuayojhua ten Egipto huan ten miyac sequinoc talme.

Mijqui Salomón

(1 R. 11:41-43)

²⁹ Huan nochi sequinoc tamanti cati quichijqui Salomón eltoc ijcuilijtoc ipan nopa amame ten Natán nopa tajtolpanextijquet, huan Ahías ten altepet Silo, huan nojquiya ipan nopa Tanextili Catí Quifac Tajtolpanextijquet Iddo cati tayolmelajqui taya ipantis Jeroboam, icone Nabat. ³⁰ Huan Salomón tanahuati ipan nochi tali Israel 40 xihuit. ³¹ Teipa mijqui huan quitalpachojque ipan Ialtepe David. Huan icone, Roboam, mochijqui tanahuatijquet.

10

Motajcoxelojque israelitame
(1 R. 12:1-24)

¹ Roboam yajqui altepet Siquem campa nochi israelitame mosentilijtoyaj para quichihuase inintanahuatijca. ² Pero Jeroboam, icone Nabat, ya mocuetoya ten tali Egipto campa yajqui para momanahuito quema Salomón quinequiyaya quimictis. Hualajqui pampa quicajqui para ya mijqui Salomón. ³ Huajca Jeroboam nojquiya itztoya nozona ipan Siquem campa quitequimacascuaj Roboam quej tanahuatijquet, huan yaya huan nochi israelitame ten nopa tali ica norte * quihuhijque Roboam:

⁴ —Motata tahuel chicahuac techtequipanolti tojuanti, pero ta xijpiya hueyi moyolo ica tojuanti. Amo techtequipanolti tahuel chicahuac quej quichijqui motata huan timitztequipanose ica cuali.

⁵ Huan Tanahuatijquet Roboam quinilhui ma mocuepaca sempa ica eyi tonati para quimatise quenicatza quinnanquilis. Huan nochi israelitame yajque ininchajchaj. ⁶ Huan yaya quintatzintoquili nopa huehue tacame cati quitalnamictiyayaj Salomón, huan quinilhui:

—¿Quenicatza ni quinnanquilis ni tacame?

⁷ Huajca injuanti quihuhijque:

—Sinta tiquinnojnortzas ica yejyectzi, huan tiquintepanitas ni tacame huan tiquinilhuis para san tiquintequipanoltis quej quinamiqui, huajca mitztequipanose nochipa.

⁸ Pero Roboam amo quitacaquili cati quihuhijque nopa huehue tacame. Yajqui quintatzintoquilito nopa telpocame cati moscaltijque ihuaya huan ama eliyayaj itapalehuhijcahua. ⁹ Huan quinilhui:

—¿Quenicatza ni quinnanquilis ni tacame cati techilhuhijtoque ma amo ni quintequipanoltis pano chicahuac quej quichijqui notata?

¹⁰ Huan nopa telpocame cati moscaltijque ihuaya quihuhijque:

—Quej ni xiquinnanquili cati moilhuijaj para motata quintequipanolti chicahuac. Xiquinilhui: ‘Sinta notata amechtequipanolti chicahuac, na achi más chicahuac nimechtequipanoltis. ¹¹ Sinta yaya amechmacac tanahuatili cati chicahuac, na achi más chicahuac nijchihuas nopa tanahuatili. Sinta yaya amechmaquiliyaya ica cuahuasasti para más antequitise, na nimechmaquilis ica se cuarta ica piltepostzitzi iyecapa huan quipiyaj inintencococa quej colome.’

¹² Huan ipan eyi tonati sempa mosentilijque Jeroboam huan nochi israelitame ten nopa talme ica huejcapa pampa Tanahuatijquet Roboam quinilhuhijtoya para quej nopa ma mocuepaca. ¹³ Huan Roboam quinnanquili chicahuac pampa amo quinejqui quitacaquilis cati nopa huehue tacame quihuhijque. ¹⁴ Huan quinnanquili quej quihuhijque nopa telpocame. Quinilhui: “Sinta notata amechtequipanolti nelía chicahuac, na achi más chicahuac nimechtequipanoltis. Yaya amechmaquili ica cuahuasasti para más antequitise chicahuac, pero na nimechmaquilis ica se cuarta ica piltepostzitzi iyecapa huan quipiyaj inintencococa quej colome.” ¹⁵ Huan

* **10:3** 10:3 Ten nica huan teipa ipan ni amatapohuali, miyac huelta quintocaxtía “israelitame” nopa israelitame ten nopa majtacti huejhueyi familias cati quiselijque inintal ica norte. Huan quitocaxtía inintal “Israel”. Huan nopa israelitame ipan nopa ome huejhueyi familias ten Benjamín huan Judá cati quiselijque inintal ica sur quitocaxtijque inintal “Judá”. Pero nelía nochi nopa masehualme ipan nochi 12 huejhueyi familias elque iixhuihua Israel o Jacob ten huejcayquiya huan yeca nelía nochi eliyayaj israelitame.

quej nopa Tanahuatijquet Roboam amo quicajqui cati nopa masehualme quitajtaniyayaj pampa quej nopa Toteco Dios quisencajtoya para ya ma quichihua. Yeca ica ya ni quisqui melahuac nopa camanali cati TOTECO quilhuijtoya nopa tajtolpanextijquet Ahías ten altepet Silo para quiyolmelahuas Jeroboam, icone Nabat quema quilhuiyaya cati panosquia teipa.

¹⁶ Huan nochi israelitame cati ehuan ica norte quiitaque para Roboam amo quitacaquiliyaya cati quilhuiyayaj, huajca quiijtojque: “Ma tijtahuelcahuaca itanahuatilis David huan ni tanahuatijquet cati icone. Amo teno tijpiyay ica ni cati iixhui Isaí. Ma tijtemoca seyoc totanahuatijca. Ni Tanahuatijquet Roboam ma quinnahuati cati ya ifamilia huan tojuanti tijtemose seyoc totanahuatijca. Israelitame, ma iyacajya tochajchaj.”

Huan quej nopa nochi israelitame cati ehuyayaj ica norte mocuetque ininchajchaj. ¹⁷ Pero Tanahuatijquet Roboam quisenhuiquilli quinnahuati nopa israelitame cati itztoyaj ipan altepeme ipan tali Judá ica tatzinta. Quena, san injuanti quinnahuatiyaya. ¹⁸ Teipa Roboam quititanqui Adoram cati eliyaya itayacanca ten comun tequit. Quilhui ma yahui ipan nopa tali ica norte para quintachiliti sinta nopa israelitame tequitij chichahuac. Pero nopa israelitame ica norte quitepachojque Adoram hasta quimictijque. Huan Roboam quimatqui ten panoc huan nimantzi tejcoc ipan icarro huan cholo hasta altepet Jerusalén. ¹⁹ Huan quej nopa nochi israelitame ten nopa huejhueyi familias ica norte mohuejcatelijque ten David huan ichaj ehuan huan hasta ama amo quinequij ma quinnahuati se cati iixhui David.

11

Roboam ajsic altepet Jerusalén

¹ Huan quema Roboam ajsito ipan altepet Jerusalén, quinsentili nochi cati ehuan ipan tali Judá huan tali Benjamín. Huan para nochi mochijque 180 mil soldados cati tapepenilme para tatehuisse. Huan Roboam quinequiyaya quintehuis nopa israelitame ica norte para quintanis huan sempa quiipiyas tanahuatili ica injuanti. ² Pero TOTECO quinojnotzqui Semaías cati elqui se itajtolpanextijca huan quilhui: ³ “Xijcamanahui Roboam, icone Salomón, cati ama eli tanahuatijquet ten tali Judá. Xiquilhui ya huan nochi nopa israelitame ipan tali Judá huan Benjamín, ⁴ para quej ni niininTECO niqijtohua: ‘Amo xiquintehuitij amoicnihua ica norte. Más cuali ximocuepaca amochajchaj pampa elqui na nopaquillis para quej nopa ma eli.’”

Huajca Roboam huan imasehualhua quicajque cati Toteco quinhui ica nopa tajtolpanextijquet huan amo yajque quitehuitoj Jeroboam.

⁵ Huan Tanahuatijquet Roboam mocajqui ipan altepet Jerusalén huan quichijqui tepamit para miyac altepeme ipan tali Judá. ⁶ Quicualtali altepet Belén, Etam, Tecoa, ⁷ Betsur, Soco, Adulam. ⁸ Gat, Maresa, Zif, ⁹ Adoraim, Laquis, Azeca, ¹⁰ Zora, Ajalón huan Hebrón. Nochi ni altepeme ipan tali Judá huan Benjamín quinchijchijqui ica tepamit cati tilahuac campa hueli monahuisse ten inincualancaitacahua. ¹¹ Huan nojquiya Roboam quincualtali calme cati tilahuac para nozona masehualme itztose ica temachili. Huan nozona nojquiya quiajojqui miyac tamanti tacualisti huan aceite huan xocomecat iayo. Nojquiya quintali soldados para tamocuitahuisse. ¹² Huan nojquiya ipan nochi altepeme quinmacac masehualme iniyolixtzajcahua huan inincuatamin cati huehueyac para tatequihuisse sinta monequi. Quej nopa quinchijqui temachme nochi nopa masehualme ipan tali Judá huan Benjamín pampa san injuanti mocajque ihuaya Tanahuatijquet Roboam.

Jeroboam amo quihueyichijqui Toteco

¹³ Huan hualajque ipan Judá nochi totajtzitzi huan levitame cati itzttoyaj ipan altepeme campa nopa sequinoc israelitame ica norte. Huan mosej-cotilijque ihuaya Tanahuatijquet Roboam. ¹⁴ Huan masque nopa totajtzitzi huan levitame quipolojque inintal huan nochi cati quipiyayaj, yajque tali Judá huan altepet Jerusalén pampa Tanahuatijquet Jeroboam huan iconehua ayecmo quincahuilijque ma quitequipanoca TOTECO. ¹⁵ Jeroboam quinquimacac tacame cati yaya quintapejpeni ma elica totajtzitzi para quinhueyitalise teteyome ipan tepeme, huan para quinhueyitalise iajacahua Amocualtacat huan para quintatilise tacajchualisti nopa becerros cati yaya quinchijtoya huan quintocaxtiyaya dioses. ¹⁶ Huan nochi cati nelía quinequiyaj ica nochi iniyolo para quitoquilise TOTECO Dios cati elqui ininteco inihuejcapan tatahua, yajque ipan altepet Jerusalén para quimacase tacajchualisti. ¹⁷ Nochi cati yahuiyayaj quimacayaj chicahualisti itanahuatilis Roboam, icone Salomón, cati tanahuatiyaya ipan tali Judá * huan quej nopa elqui para eyi xihuit. Huan ipan nopa eyi xihuit nochi cati yahuiyayaj nozona quichijque campeca para quihueyitepanitase Toteco quej quichijqui David huan Salomón.

¹⁸ Huan Roboam mocuili imachicni cati itoca Mahalat. Mahalat eliyaya iichpoca Jerimot, se icone David ica isihua Abihail cati eliyaya iichpoca Eliab. Eliab elqui iicni David huan yaya ihuaya David eliyayaj iconehua Isaí. ¹⁹ Huan iconehua Roboam huan Mahalat eliyayaj: Jehús, Semarías huan Zaham. ²⁰ Teipa Roboam mocuili seyoc sihuat cati imachicni cati itoca eliyaya Maaca huan Maaca eliyaya iichpoca Absalón. Huan Maaca quinpixqui iconehua cati inintoca eliyaya: Abías, Atai, Ziza huan Selomit. ²¹ Huan Roboam quinpixqui 18 isihujhua huan 60 isihua tequipanojchua, pero achi más quicneli Maaca. Huan Roboam quinpixqui 28 itelpocahua huan 60 iichpocahua.

²² Huan Roboam qutali itelpoca, Abías, cati elqui icone Maaca, para ma eli inintayacanca iicnihua pampa quinequiyaya para teipa, quema yaya miqisquía, Abías ma elis tanahuatijquet. ²³ Huan ica miyac talnamiquilisti quinquitali sequinoc itelpocahua campa hueli ipan nopa altepeme cati quipiyayaya tepamit ipan nochi tali Judá huan ipan tali Benjamín. Huan quinquimacac miyac tacualisti huan quintemohuili miyac inisihujhua.

12

Roboam quichijqui cati fiero

(1 R. 14:21-31)

¹ Huan quema Roboam mohueyichijqui huan eltoya ya temachti ipan itequiticayo quej tanahuatijquet, quitahuelcajqqui itanahuatilhua TOTECO huan nochi israelitame quitoquilijque ipan itajtacol. ² Huan pampa mosinijtoya ica TOTECO, Sisac tanahuatijquet ten tali Egipto yajqui quinhuito israelitame ipan altepet Jerusalén quema Roboam yahuiyaya para macuili xihuit ipan itequi quej tanahuatijquet. ³ Huan Sisac hualajqui ica mil 200 tatehujca carrojme, 60 mil soldados cati yahuiyayaj ipan cahuyajome huan iyoca tachel miyac soldados cati icxinejnemiyayaj. Nojquiya quinhualiac más miyac masehualme cati inintoca libios, suquienos huan etiópes. ⁴ Huan Sisac huan isoldados calajque ipan nopa altepeme cati

* **11:17** 11:17 Miyac huelta quema quijtohua Judá, camanalti ten nopa ome talme, Judá huan Benjamín.

quixtoyaj tepamit ipan tali Judá huan quintanque huan teipa ajsitoj hasta altepet Jerusalén.

⁵ Huan nopa tajtolpanextijquet Semaías yajqui quiitato Tanahuatijquet Roboam huan nopa tayacanani ten Judá pampa nochi injuanti mosentil-ijtoyaj ipan altepet Jerusalén para momanahuisse ten Sisac. Huan Semaías quinilhui nopa camanali cati TOTECO quimacatoya. Quinilhui:

—Amojuanti anquithuelcajtoque TOTECO huan yeca yaya quijtohua para nojquiya amechthuelcahuas huan amechtemactilis imaco Sisac.

⁶ Huajca nochi nopa tayacanani ten israelitame huan Tanahuatijquet Roboam moicnonejque huan quijtojque:

—Nelia xitahuac TOTECO para quej ni techchihuilía.

⁷ Huan quema TOTECO quiitac para nelia moyolcuetoyaj, quilhui nopa tajtolpanextijquet Semaías: “Pampa moicnonectoque, amo nijcahuilis para Sisac ma quintzontamilti nochi. Ica se quentzi tonali niquinmanahuis. Huan amo nijtequihuis Sisac para niquinextilis nochi nocualancayo. ⁸ Pero injuanti quitequipanose Sisac para quiitase para más cuali techtequipanose na, huan amo quitequipanose nopa tanahuatiani ipan sequinoc talme.”

⁹ Huan Sisac, tanahuatijquet ten tali Egipto, calajqui ipan altepet Jerusalén huan quicuic nochi tamanti ten oro huan nochi tamanti cati pajpatiyó cati eltoya ipan ichaj TOTECO huan cati eltoya ipan nopa caltanahuatili. Nojquiya quihuicac nochi nopa yolixtzajcayot ten oro cati quichijtoya Salomón. ¹⁰ Huan teipa Roboam, tanahuatijquet ten tali Judá quichijqui sequinoc yolixtzajcayot ten bronce huan quinmactili nopa tayacanani ten soldados cati tamocuitahuiyayaj ipan icaltehua nopa caltanahuatili. ¹¹ Huan nochipa quema nopa tanahuatijquet yahuiyaya ichaj TOTECO, nopa soldados yahuiyayaj ihuaya huan quinhuicayayaj nopa yolixtzajcayome ten bronce. Huan teipa quema mocuepayaya sempa quinhuicayayaj nopa yolixtzajcayome huan quinajocuiyayaj ipan nopa cuarto campa quinajocuij nochi inintatehujca teposhua. ¹² Huan pampa nopa tanahuatijquet nelia moicnonejqui TOTECO ayecmo cualanqui ica ya huan amo senquisa quintzontamilti. Huan teipa masque miyac tamanti cati fiero ininpantic cati itztoyaj ipan Judá, sempa oncac tamanti cati cuali nozona.

Mijqui Roboam

¹³ Huan Tanahuatijquet Roboam sempa mohueyichijqui huan quichijqui temachti itequi quej tanahuatijquet ipan altepet Jerusalén. Roboam quixtoyaj 41 xihuit quema pejqui itequi quej tanahuatijquet huan tanahuati 17 xihuit ipan Jerusalén, nopa altepet cati TOTECO quitapejpeni ten nochi altepeme ten nopa huejhueyi familias ten israelitame para nozona nochi ma quihueyichihuaca para nochipa. Huan inana Roboam itoca eliyaya Naama ten tali Amón. ¹⁴ Pero Roboam elqui se tanahuatijquet cati amo cuali pampa amo motemacac para quitoquilis TOTECO ica nochi iyolo.

¹⁵ Huan nochi cati quichijqui Roboam ten ipejya huan hasta quema mijqui eltoc ijcuilijtoc ipan nopa amame cati quijcuilo tajtolpanextijquet Semaías, huan cati quijcuilo tajtolpanextijquet Iddo huan campa eltoc ijcuilijtoc quenicatza masehualme tacajthualajque. Huan ipan nochi xihuit ten itequi Roboam oncac miyac tatehuilisti ica Tanahuatijquet Jeroboam ica norte. ¹⁶ Huajca mijqui Roboam huan mosiyajquetzqui ica ihueyitahua. Huan quitalpachojque ipan Ialtepe David. Huan Abías cati eliyaya icone, mochijqui tanahuatijquet.

13

*Abías pejqui tanahuatía ipan Judá
(1 R. 15:1-7)*

¹ Abías, icone Roboam, pejqui tanahuatía ipan tali Judá quema Jeroboam yahuiyaya para 18 xihuit ipan itequi quej tanahuatijquet ipan tali Israel ica norte. ² Huan Abías san tanahuati ipan altepet Jerusalén eyi xihuit. Inana itoca eliyaya Micaías huan yaya eliyaya iichpoca Uriel ten tali Gabaa.

Huan quema tanahuatiyaya, oncac se tatehuilisti ica Tanahuatijquet Abías huan Tanahuatijquet Jeroboam. ³ Huan Abías mocualtali ica 400 mil soldados tapejpenilme ten tali Judá. Huan Jeroboam mocualtali ica 800 mil soldados cati eliyayaj tapejpenilme huan yolchicahuaque. ⁴ Huan Tanahuatijquet Abías huan nochi isoldados ten tali Judá ajsitoj ipan nopa tepet cati itoca eliyaya Zemaraim campa onca tepeme ipan tali Efraín. Huan Abías quijto: “Tanahuatijquet Jeroboam huan nochi anisraelitame techta-caquilica. ⁵ ¿Amo anquimatij para TOTECO Dios cati toTeco tiisraelitame quichijqui se camanalí ihuaya David para se icone o se iixhui para nochipa elisquia tanahuatijquet ipan nochi tali Israel? ⁶ Pero ta Jeroboam, cati tiicone Nabat, huan cati tieliyaya tiitequipanojca Salomón icone David, ta timosisini ica Salomón. ⁷ Huan teipa mosejcotilijque mohuaya ta tahuel miyac amo cuajcualme cati amo teno ininpati. Huan anmosisinijque ica Roboam, itelpoca Salomón, quema yaya noja eliyaya telpocat huan ayemo quipiyayaya fuerza ipan itequi. Huan yeca Roboam amo huelqui amechtani.

⁸ “Huan ama amojuanti anquinequij antechtontamiltise cati niixhui David, cati TOTECO techtalijtoc ma nieli nitanahuatijquet. Anmoilhuíaj antechtanise pampa más anmiyaqui huan pampa anquinpiyaj nopa becerros ten oro cati ta tiJeroboam tiquinchiuilijtoc quej amodioses. ⁹ Ya tiquintequicuiliijtoc itotajtzitzi TOTECO cati elij iixhuihua Aarón huan nopa levitame. Huan tiquintequimacac ten hueli masehualme para elise totajtzitzi quej quichihuaj masehualme ipan sequinoc talme cati amo quixmatij TOTECO. Amojuanti anquiselíaj quej totajtzi cati hueli cati quihualica se becerro huan chicome oquich chivojme para tacajcahalisti para quinhuey-italis amoteteyohua cati amo nelía Dios. ¹⁰ Pero tojuanti ipan Judá amo tijcajtoque TOTECO Dios, yaya cati toTeco. Huan nopa totajtzitzi cati quitatíaj tacajcahalisti para TOTECO ipan total elij iixhuihua Aarón. Huan injuanti cati quinpalehuíaj nopa totajtzitzi elij levitame quej quijtohua tanahuatili. ¹¹ Inijuanti quitatíaj tacajcahalisti mojmosta iixpa TOTECO ica ijnaloc huan ica tiotac. Nojquia mojmosta quitatíaj copali huan quitatíaj nopa pantzi cati tatzejtelolitic ipan nopa mesa iixpa. Inijuanti cati quitatíaj nopa taahuilme ten nopa taahuil quetzali ten oro ica tayohua. Tojuanti tijchihuaj senquisa cati quijtohuaj itanahuatilhua Toteco Dios, pero amojuanti amo. Ya anquihuelcajtoque. ¹² Huajca xijmatica cuali para Toteco Dios itztoc tohuaya quej totayacanca. Huan nopa totajtzitzi quipixtoque tacualtalili inintapitzal para tapitzase quema monequis tijpehualtise ni tatehuilisti ica amojuanti. Pero amojuanti cati antoisraelita icnihua, amo ximotehuica ihuaya TOTECO Dios yaya cati elqui ininTECO tohuejcapan tatahua pampa amo antatanise.”

¹³ Pero quema quincamanalhuiyaya, Tanahuatijquet Jeroboam quintitan-qui isoldados para ma quinyahualotij nopa Judá ehuaní ica iniica huan ica iniixpa. ¹⁴ Huan quema quitaque nopa Judá ehuaní para quinyahualojtoyaj huan monequi quintehuisse cati iniixpa huan iniica, chicahuac quitzajtzilij-que TOTECO ma quinpalehui huan ma quinmanahui ten nopa israelitame

ten ica norte. Huan nopa totajtzitzi quipitzque nopa tapitzali. ¹⁵ Huan nochi Judá ehuanit tzejtzi que chichahuac para pehuase quintehuse nopa israelitame. Huan quema tzejtzi que, Toteco Dios pejqú quipasolohua nopa israelitame huan Tanahuatijquet Jeroboam iixpa Abías huan iniixpa nochi Judá ehuanit. ¹⁶ Huan nochi nopa israelitame ten ica norte cholojtzejqe, pampa Toteco Dios quintemactili inimaco nopa israelitame cati tali Judá ehuanit. ¹⁷ Huan Tanahuatijquet Abías tahuel quincoco ipan nopa tonal. Quinmictijque 500 mil israelita soldados cati más tapejpenilme. ¹⁸ Huan quej nopa, nopa Judá ehuanit quintanque nopa israelitame ica norte pampa motatzquilijtoyaj ipan TOTECO Dios cati elqui ininTeco inihuejcapan tatahua. ¹⁹ Huan Abías huan insoldados quitoquilijque Jeroboam huan quicuili sequij ialtepehua. Quicuili altepet Betel ica ipilaltepehua huan Jesana ica ipilaltepehua huan altepet Efraín ica nochi ipilaltepehua.

Mijqui Jeroboam

²⁰ Huan Tanahuatijquet Jeroboam ayecmo teno huelqui quichihua ipan Israel quema Tanahuatijquet Abías eliyaya tanahuatijquet ipan tali Judá. Huan teipa TOTECO quicoco Jeroboam huan mijqui. ²¹ Pero Abías quipixtiyajqui más chichahualisti hasta nelía elqui hueyi. Nojquiya quinpixqui 14 isihuajhua, 22 itelpocahua huan 16 iichpocahua. ²² Huan nochi sequinoc tamanti cati panoc ipan itanahuatilis Abías huan nochi cati quichijqui ipan inemilis huan nochi cati quijito eltoc ijcuilijtoc ipan nopa Amatapohuali ten Nopa Tajtolpanextijquet Iddo.

14

Asa pejqú tanahuatía ipan tali Judá

(1 R. 15:8-12)

¹ Huan mijqui Abías huan quitalpachojque ica ihueyi tatahua ipan Ialtepe David. Huan icone cati itoca Asa pejqú tanahuatía ipan tali Judá. Huan oncac tasehuilisti ipan nopa achtohui 12 xihuit ten itequi quej tanahuatijquet.

² Huan Tanahuatijquet Asa quichijqui nochi cati xitahuac iixpa TOTECO Dios cati elqui iTeco. ³ Quinjcueni nochi nopa taixpame campa quintatiliyayaj tacajchahualisti nopa taixcopincayome ipan tepeme. Quintapanqui nochi nopa teteyome huan nojquiya nochi tamanti cati teelnamiquiltiyaya ten nopa teteyot Asera. ⁴ Huan nojquiya quinnahuati nochi Judá ehuanit ma motemachica ipan TOTECO Dios cati eliyaya ininTeco inihuejcapan tatahua. Huan quinilhui ma quichihuaca nochi itanahuatilhua TOTECO huan nochi cati techilhuijtoya. ⁵ Huan ipan nochi altepeme ipan tali Judá, quinijcueni nochi pilcaltziti para teteyome huan nochi taixpame campa quintatiliyaj copali. Huan oncac tasehuilisti para miyac xihuit quepama Asa tanahuati.

⁶ Huan quema oncayaya tasehuilisti huan inincualancaitacahua amo quintehuiyayaj, Tanahuatijquet Asa quicualchijchijqui nochi inintepa altepeme ipan Judá pampa TOTECO quinmacatoya tasehuilisti. ⁷ Tanahuatijquet Asa quinilhui nopa Judá ehuanit: “Ma tiquincualtalica nochi ni altepeme huan ma tiquinyahualoca ica tepamit. Ma tiquinchihuilica torres huan ma tiquintalilica caltemit cati motzacuas cuali ica teposti. Timotemachijtoque ipan Toteco Dios huan ama yaya techmacatoc tasehuilisti ica tocualancaitacahua ten campa hueli talme.”

Nopa Judá ehuanit quichijque nochi nopa tequit cati moilhuijque quichihuse huan nochi quisqui cuali.

⁸ Huan Asa quinpixqui 300 mil soldados ten tali Judá huan nochi quipiyayay iniyolixtzajcahua huan inincuataminhua cati huehueyac ten teposti. Nojquiya quipixtoya seyoc pamit ten 280 mil soldados cati ehuan tali Benjamín huan nochi quihuicayay iniyolixtzajcahua huan inincuahuitolhua. Huan nochi ome pamit eliyayaj tacame cati tahuel yolchicahuaque.

Asa tatanqui ipan tatehuilisti

⁹ Se tonali hualajqui se tacat ten tali Etiopía cati itoca Zera huan quinhualiac se millón soldados huan 300 tatehuijca carrojme. Huan injuanti ajsicoj hasta altepet Maresa para quintehuse nopa tali Judá ehuan huan Tanahuatijquet Asa. ¹⁰ Pero quema Asa quimatqui para ajsicoj, mocualtali huan quisqui ica nochi isoldados para quinnamiquiti. Huan mochijque ipan nopa tamayamit Sefata nechca Maresa. ¹¹ Huan Asa motatajti ica TOTECO Dios cati elqui iTeco huan quihlhu: “TOTECO, san ta hueli tiquinpalehuía cati amo quipiyaj chicahualisti para monamiquise ica cati nelía chicahuac. Huajca techpalehui TOTECO Dios, ta cati titoTeco, pampa tojuanti timosiya-jquetzaj ipan ta. Ica motequiticayo ta tiyahuij tiquintehuitj ni miyaqui soldados pampa ipan ta timotemachijtoque. TOTECO Dios, ta titoTeco. Amo xiquincahuili para cati itztoque san masehualme mitztanise.”

¹² Huajca TOTECO pejqui quinmictía nopa Etiopía ehuan iixpa Asa huan iixpa nochi Judá ehuan. Huan nopa Etiopía ehuan cholojque. ¹³ Pero Asa huan isoldados quintoquilijque hasta altepet Gerar huan quinmictijque tahuel miyac injuanti hasta ayecmo huelque tatehuijque pampa TOTECO huan isoldados quintzontamiltijque. Huan nopa Judá ehuan quincuiliijque miyac tamanti cati nelcuali. ¹⁴ Huan teipa Asa huan isoldados nojquiya calajque ipan nochi nopa altepeme cati eltoyaj nechca Gerar huan quiquixtijque miyac tamanti pampa TOTECO quichijqui para nochi masehualme nopona tahuel ma momajmatica por cati TOTECO quichijtoya. ¹⁵ Nojquiya nopa Judá ehuan calajque campa quinpixtoyaj inihuacaxhua huan quinhuicaque miyac borregoyme huan camellos huan mocuetque ipan altepet Jerusalén ica nochi cati quitantoyaj.

15

Judá ehuan quichijque se camanali ica TOTECO (1 R. 15:13-15)

¹ Huan Itonal Toteco Dios hualajqui ipan Azarías, se tajtolpanextijquet cati elqui icone Obed huan TOTECO quimacac se camanali para Tanahuatijquet Asa. ² Huajca yaya quisqui huan yajqui quinamiquito Asa quema mocuepayaya ten nopa tatehuilisti huan quihlhu: “Techtaquili, Tanahuatijquet Asa huan nochi cati anehuani ipan tali Judá huan Benjamín, TOTECO quijitohua para mocahuas amohuaya sinta anmocahuase ica ya. Huan quema anquitemose, anquipantise. Pero sinta anquitahuelcahuase, huajca yaya nojquiya amechtahuclahuas. ³ Ya panotoc miyac tonali huan israelitame ica norte amo motemachiyayaj ipan Toteco Dios para quihueyitalise. Amo quipixtoque yon se totajtzi cati nelía quinmachtisquía cati melahuac huan amo quiixmajtoque itanahuatilhua Toteco. ⁴ Pero sesen huelta quema anisraelitame anmopantiyayaj ipan se tatzacuiltili huan anmotemachiyayaj ipan TOTECO Dios cati amoTeco, yaya amechpalehui. ⁵ Huan ipan nopa tonali quema israelitame tahuel mosisiniyayaj ica TOTECO, amo oncayaya tasehuilisti ipan inintal. Amo aqui huelqui nemi ica temachili para yas campa quinequi pampa sequinoc talme ehuan teajsiyayaj campa hueli.

⁶ Motehuiyayaj se tali ehuani ica seyoc tali ehuani. Huan nochi israelitame taijyohuiyayaj pampa Toteco Dios quintatzacuiltiyaya ica miyac tamanti cati fiero. ⁷ Pero ma amo eli quej nopa ica amojuanti. Amojuanti ximoyolchicahuaca huan amo ximajmahuica pampa TOTECO amechtatahais por nochi nopa cuali tamanti cati anquichihua.⁸

⁸ Huan nelía moyolchicajqui Tanahuatijquet Asa quema quicajqui ni camanali ten Toteco cati quimacac nopa tajtolpanextijquet Azarias cati elqui icone Obed. Yeca teipa quinijcueni nochi nopa taixcopincayome ipan nochi tali Judá, huan ipan nochi tali Benjamín huan ipan nochi nopa altepeme cati mocuiljtoya campa tepeme ipan tali Efraín. Huan quicualtali nopa taixpamit cati eltoya icalixpa itiopa TOTECO.

⁹ Huan teipa Tanahuatijquet Asa quinnotzqui ma mosentilica nochi masehualme cati ehuani ipan tali Judá huan Benjamín huan nojquiya nochi ten tali Efraín, Manasés huan Simeón cati hualajtoyaj para mocahuase ipan Judá. Inijuanti hualajtoyaj pampa quitaque para TOTECO Dios cati elqui iTeco Tanahuatijquet Asa itztoya ihuaya.

¹⁰ Huan nochi nopa masehualme mosentilijque ipan altepet Jerusalén ipan metzti eyi ipan toisraelita calendario*, quema Asa yahuiyaya para 15 xihuit ipan itequi quej tanahuatijquet. ¹¹ Huan ipan nopa tonali quincuique 700 torojme huan 7 mil borregojme cati quincuilijtoyaj inincualancaitacahua ipan tatehuilisti huan temacaque quej tacajcahualisti para TOTECO. ¹² Teipa tatestigjquetzque iixpa TOTECO para ica nochi iniyolo quitoquilise san TOTECO Dios cati ininTeco inihuejcapan tatahua. Quijtojque ayecmo quinhueyitalise sequinoc tamanti cati amo TOTECO. ¹³ Huan nojquiya quichijque se camanali ica TOTECO para sinta se acajya amo quitoquilisquía TOTECO Dios cati ininTeco israelitame quej mocajqui quichihuas, monequi miquis; masque huehuentzi o telpocat, tacat o sihuat. ¹⁴ Huan nochi nopa masehualme cati mosentilijtoyaj camanaltique chicahuac huan tatestigjquetzque iixpa TOTECO para quitoquilise san ya. Huan ica paquilisti quipitzque tapitzali huan nochi nopa cuacuajti. ¹⁵ Huan nochi Judá ehuani nelía yolpaquiyayaj por nopa camanali cati quichijtoyaj ica Toteco Dios pampa sese ten injuanti quichijqui ica nochi iyolo. Ica miyac paquilisti quitemojttoyaj taya ipaquilis TOTECO huan nelía quipantijque. Huan TOTECO quinmacac tasehuilisti ica nochi inincualancaitacahua campa hueli.

¹⁶ Huan Tanahuatijquet Asa quiquixtili isiya Maaca cati eliyaya ihueyi nana huan ayecmo quicahuili ma eli tenan sihua tanahuatijquet pampa nopa sihuat quichijqui se taquetzali para nopa teteyot Asera. Huan Tanahuatijquet Asa quitapanqui nopa taquetzali huan quitati nechca nopa hueyat Cedrón. ¹⁷ Huan masque amo quinsosolojque senquisa nochi nopa pilcaltzitzitzi ica teteyome ipan nochi tali Israel, Tanahuatijquet Asa monejnemilti xitahuac huan nelnechca ten TOTECO ipan nochi inemilis. ¹⁸ Huan yaya quihuicac ipan itiopa Toteco Dios nochi tamanti ten oro huan plata cati yaya huan itata quiiyocacajtoyaj para TOTECO. ¹⁹ Huan quej nopa ayecmo oncac seyoc tatehuilisti hasta quema Asa yahuiyaya para 35 xihuit ipan itequi quej tanahuatijquet.

16

*Asa mohuampojchijqui ihuaya Benadad
(1 R. 15:16-22)*

* 15:10 15:10 Elis ipan mayo o junio ipan tocalendario ten ama.

¹ Quema Asa yahuiyaya para 36 xihuit ipan itequi, Tanahuatijquet Baasa ten tali Israel ica norte hualajqui ica isoldados huan calajqui ipan tali Judá. Huan quitzajqui nopa ojti ten altepet Ramá huan quitalijque tepamit nozona para ayecmo huelis panose Judá ehuan huan Tanahuatijquet Asa.

² Huajca Asa quiquixti nochi nopa tamanti ten oro huan plata cati eltoya ipan itiopa TOTECO huan ipan icaltanahuatil. Huan nochi quititanili Tanahuatijquet Benadad ipan tali Siria cati mosehuijtoya para tanahuatis ipan altepet Damasco huan quititanili ni amatajcuiloli cati quej ni quijito:

³ “Ma tijchihuaca se yancuic camanali quej nopa cati quichijque motata huan notata. Xiquita nimitztitanilia ni nemacti ten plata huan oro. Xijosolo nopa camanali cati tijchijqui ica Tanahuatijquet Baasa ten tali Israel para quej nopa yaya quicahuas techtehuis.”

⁴ Huan Tanahuatijquet Benadad quipacti cati Asa quiilhui huan quintanqui isoldados para ma calaquica ipan inintal israelitame ica norte huan quintehuse. Huan moaxcatijque nopa altepeme Ijón, Dan, Abelmaim huan nochi nopa altepeme ten tali Neftalí campa quiajocuiyayaj tacualisti huan nochi tamanti cati motequihuiyayaj. ⁵ Huan quema quimatqui Tanahuatijquet Baasa ten Israel, taya panoyaya ipan ital, quicajqui cati quichihuayaya huan yajqui ital. Ayecmo quitamilti nopa tepamit cati quitalliyaya altepet Ramá. ⁶ Teipa Tanahuatijquet Asa quinnotzqui nochi Judá ehuan ma yaca Ramá huan ma quicuitj nochi nopa teme huan cuame cati Baasa quitequihuiyaya para quichihuilis itepa Ramá. Huan Asa quitequihui nochi para quintalilis inintepa nopa altepeme Geba huan Mizpa.

Nopa tajtolpanextijquet Hanani quiajhuac Asa

⁷ Huan nopa tajtolpanextijquet Hanani hualajqui quipaxaloco Tanahuatijquet Asa huan quiilhui: “Pampa timotemachi ipan nopa tanahuatijquet ten tali Siria para mitzpalehuis huan amo ipan TOTECO Dios cati moTeco, ama tijpologtoc nopa tonali para tijtanis yaya huan nochi isoldados. ⁸ ¿Amo tiquelnamiqui taya TOTECO quichijqui ica nopa tali Etiopa ehuan huan nopa tali Libía ehuan quema quinequiyayaj amechtehuse ica miyac tatehuijca carrojme huan cahuayojme? Timotemachi ipan TOTECO huan yaya quintemactili amomaco. ⁹ TOTECO quintachilijtoc nochi masehualme campa hueli ipan taltipacti para quinnextilis ihueyi chichualis injuanti cati motemachiaj ipan ya ica nochi iniyolo. Nelía se huilhuyot cati tijchijtoc huan yeca ama huan teipa tijpiyas más tatehuilisti ica mocualancaitacahua.”

¹⁰ Huan Tanahuatijquet Asa nelía cualanqui ica nopa tajtolpanextijquet Hanani huan quitali ipan tatzacti. Huan ten nopa tonal, Asa pejqui quintajyohuiltia sequij imasehualhua.

Mijqui Asa (1 R. 15:23-24)

¹¹ Huan nochi cati quichijqui Asa ipan itequi quej tanahuatijquet ten ipeya hasta itamiya quema mijqui, eltoc ijcuilijtoc ipan Nopa Amatapohuali Ten Nochi Tanahuatiani ipan Tali Judá huan Tali Israel. ¹² Huan quema Asa yahuiyaya para 39 xihuit ipan itequi quej tanahuatijquet quipixqui se cocolisti chichahuac ipan iicxi huan amo quitemo itapalehuil Toteco. San quintemo tepajtiani. ¹³ Huan mijqui Asa quema yahuiyaya para 41 xihuit ipan itequi quej tanahuatijquet. ¹⁴ Huan quitalpachojque ipan nopa ostot cati yaya tanahuatitoya ma quichihuilica ipan Ialtepe David. Huan quitallijque ipan cuatapechti cati quipiyayaya miyac tamanti taajhuiyacayot cati quichijtoya se taajhuiyacachijquet cati más quimati. Huan quichijque

se hueyi tit huan nozona quiatilise nochi nopa taajhuyacayot huan quipolojqe itacayo.

17

Josafat pejqui tanahuatía ipan tali Judá

¹ Huan Josafat, icone Asa, mochijqui tanahuatijquet ipan tali Judá huan yaya mocualtali para quintehuis nopa israelitame ica norte. ² Huan quintitanqui isoldados para tamocuitahuisse ipan nochi altepeme ipan tali Judá cati quipiyayaya tepamit. Huan nojquiya quintali más soldados campa hueli ipan tali Judá huan ipan nochi nopa altepeme ten tali Efraín cati itata Asa moaxcatijtoya.

³ Huan TOTECO itztoya ihuaya Josafat pampa monejnemilti xitahuac iixpa quej ihuejcapan tata David quichijqui achtohuiya. Amo quinhueyitali nopa teteyome ten Baal. ⁴ Tanahuatijquet Josafat motemachi ipan Toteco Dios cati elqui iTeco itata. Quichijqui nochi itanahuatilhua huan amo quinhueyichijqui teteyome quej quichijque nopa israelitame ica norte.

⁵ Huajca TOTECO quichijqui temachti itanahuatilis Josafat ipan tali Judá. Huan nochi Judá ehuaní quihualiquiliyayaj miyac tamanti nemacti huan quitaxtahuiyayaj iniimpuestos. Huan nelía moricojchijqui Tanahuatijquet Josafat, huan mohueyichijqui pampa nochi quitepanitayayaj. ⁶ Huan achi más moyolchicajqui Josafat para senquisa quitoquilis iojhui TOTECO. Yeca ipan nochi Judá quiniycueni nochi nopa taixpame cati quinchijtoyaj ipan tepeme huan nochi nopa taquetzalme para quitepanifase nopa teteyot Asera.

⁷ Huan quema Josafat yahuiyaya para eyi xihuit ipan itequi quej tanahuatijquet, quintitanqui itayacanhua ma tamachtica campa hueli ipan altepeme ipan tali Judá. Huan inintoca itayacanhua cati yajque elque: Benhail, Abdías, Zacarías, Natanael huan Micaías. ⁸ Huan nojquiya quintitanqui nopa levitame cati inintoca: Semaías, Netanías, Zebadías, Asael, Semiramot, Jonatán, Adonías, Tobías huan Tobadonías. Huan nojquiya yajque inihuaya nopa totajtzitzi cati inintoca: Elisama huan Joram. ⁹ Huan quihuicaque copias ten Icamanal TOTECO campa eltoya ijcuilijtoc nochi itanahuatilhua huan nejnneque campa hueli ipan nopa tali, quinqmactiyayaj nochi Judá ehuaní.

¹⁰ Huan TOTECO quichijqui para nochi sequinoc talme cati eltoyaj nechca tali Judá ma quimacacica huan yon se amo motemacac para pehuas quitehuis Tanahuatijquet Josafat. ¹¹ Hasta nopa filisteos nojquiya quihualiquiliyayaj nemacti Tanahuatijquet Josafat huan quitaxtahuiyayaj nopa impuestos cati monequiyaya para inintal ica plata tomi. Huan nopa árabes nojquiya quihuiquilijqe Josafat 7 mil 700 oquich borregojme huan 7 mil 700 oquich chivojme.

¹² Huajca quej nopa Josafat más moricojchijqui huan tahuel más quipixtiyayaj fuerza. Huan quinchijqui calme cati huejcapantique cati más cuali tasencahuali huan altepeme ica tepamit para ipan taajocuis ipan nochi tali Judá. ¹³ Huan Josafat quiajojqui tacualisti huan nochi tamanti cati quitequihuiyayaj ipan miyac altepeme ipan tali Judá. Huan quinpixqui miyac soldados yolchicahuaque ipan altepet Jerusalén campa eltoya icaltanahuatil.

Soldados cati Judá ehuaní

¹⁴ Huan isoldados Josafat mocajque ijcuilijtoque quej itoca nopa hueyi familia cati ipan hualajque.

Ten nopa hueyi familia Judá, itztoyaj 300 mil soldados. Mocajque iyoca ica miyac pamit ica 1000 soldados ipan sesen pamit. Huan Adnas elqui tayacanquet ten nochi nopa 300 mil.

¹⁵ Huan nopa ompa tayacanquet Johanán quinyacanayaya 280 mil soldados.

¹⁶ Huan nopa teipa tayacanquet Amasías, cati elqui icone Zicri, quinyacanayaya 200 mil soldados. Amasías motemactilijtoya ica ipaquilis para quitequipanos TOTECO. Nochi ni tacame ehuan tali Judá.

¹⁷ Ten nopa hueyi familia Benjamín, itztoyaj 200 mil soldados.

Eliada eliyaya inintayacanca huan eliyaya se tacat cati tahuel yolchicahuac. Huan nochi nopa soldados quihuicayayaj inincuahuitolhua huan iniyolixtzajcahua.

¹⁸ Huan nopa ompa tayacanquet itoca Jozabad huan yaya quinyacanayaya 180 mil soldados cati quiپیayayaj inintepos huan inintalaníquilis para tatehuse.

¹⁹ Huan ya ni elque nochi nopa soldados cati quitequipanohuayayaj Tanahuatijquet Josafat ipan Jerusalén. Pero nica amo quiپیya ten quesqui soldados nopa tanahuatijquet quintalijtoya ipan altepeme campa hueli ipan tali Judá para tamocuitahuse.

18

Josafat mochijqui ihuampo Acab (1 R. 22:1-40)

¹ Huajca Josafat nelía quipixqui miyac ricojyot huan nochi masehualme campa hueli tahuel quitepanitayayaj. Huan quichijqui para itelpoca ma mosihuajti ica iichpoca Tanahuatijquet Acab ten tali Israel. ² Teipa ica se ome xihuit Josafat yajqui ipan altepet Samaria quipaxaloto Acab. Huan Acab quiilhuichihui huan quinnicti miyac borregojme huan torojme para Josafat huan nochi cati hualajtoyaj ihuaya. Huan teipa Acab quicajcayajqui huan quitajtani Josafat se favor. Quiilhui ma yahui ihuaya huan quintehuitij nopa masehualme ipan altepet Ramot ipan tali Galaad. ³ Huan Tanahuatijquet Acab ten tali Israel quej ni quiilhui Tanahuatijquet Josafat ten tali Judá: —¿Tijnequi tiyas nohuaya para tiquintehuitij cati itztoque ipan altepet Ramot ipan tali Galaad?

Huan Josafat quiilhui:

—Quena, na huan nochi nosoldados tiitztoque mohuaya para tiyase inihuaya mosoldados para titatehuitij. ⁴ Pero achtohui xijtatztintoquili se tajtolpanextijquet sinta quej nopa quinequi TOTECO.

⁵ Huajca nopa tanahuatijquet ten tali Israel quinsentili 400 tajtolpanextiani huan quinilhui:

—¿Cuali para tiyase tiquintehuitij nopa masehualme ipan altepet Ramot ten tali Galaad o amo?

Huan nochi inijuanti quiilhuijque:

—Quena, xiya xiquintehuiti pampa Toteco Dios quintemactilis amomaco.

⁶ Pero Josafat quiilhui nopa tanahuatijquet ten tali Israel:

—¿Amo aquí nica se itajtolpanextijca TOTECO para nojquiya tijtatanise ya?

⁷ Huan nopa tanahuatijquet quinanquili Josafat huan quiilhui:

—Quena, itztoc Micaías, icone Imla, cati hueli quitatzintoquilía TOTECO, pero amo nijnequi niquitas pampa amo quema techilhuía para panos cati cuali. Nochipa techilhuía para panos cati amo cuali.

Pero Josafat quiilhui:

—Amo xiquijto quej nopa.

⁸ Huajca nopa tanahuatijquet ten tali Israel quinoztzqui se itequipanojca huan quiilhui:

—Xijnotzatiq nimantzi Micaías, icone Imla.

Micaías quinilhui nopa tanahuatiani cati melahuac

⁹ Huan nopa tanahuatijquet ten tali Israel huan nopa tanahuatijquet ten tali Judá moquentijtoyaj iniyoyo cati más cuajcualtzi huan mosehujtoyaj ipan inisiyas ipan nopa plaza iteno nopa caltemit campa calaquij ipan altepet Samaría. Huan nochi nopa tajtolpanextiani ten Acab tahuejchi-huayayaj huan quiconsejomacayayaj para ma yaca tatehuitij. ¹⁰ Huan Sedequías, icone Quenaana, quichijtoya sequij cuacuajti ten teposti huan quijtohuayaya chichahuac: “Quej ni quijto TOTECO: ‘Ica ni cuacuajme anquinxahuase nopa sirios hasta anquintzontamiltise.’”

¹¹ Huan quej nopa nojquiya quiconsejomacayayaj nochi nopa tajtolpanextiani. Quiijtohuayayaj: “Xiya xiquintehuiti cati itztoque ipan altepet Ramot ten tali Galaad pampa TOTECO quintemactilis momaco, Tanahuatijquet, huan nochi tiquintzontamiltis.”

¹² Huan nopa tacat cati yajtoya quinoztzati tajtolpanextijquet Micaías quiilhui:

—Nochi nopa sequinoc tajtolpanextiani quiilhuijtoque tanahuatijquet para ma yahui tatehuiti huan quisas cuali. Huajca nimitzilhuía para ta nojquiya xiquijto quej inijuanti quiilhuijtoque.

¹³ Pero Micaías quinanquili:

—Iixpa TOTECO nimitzilhuía cati melahuac nijchihuas. Na niqijtos san cati Toteco Dios technahuatis ma niqijto.

¹⁴ Huan quema Micaías ajsito, nopa tanahuatijquet quiilhui:

—¿Cuali tiyase tiquintehuitij cati itztoque ipan altepet Ramot ten tali Galaad, o amo?

Huan Micaías quinanquili:

—Xiyaca huan antatanise huan TOTECO quintemactilis amomaco.

¹⁵ Pero nopa tanahuatijquet quiilhui Micaías:

—Hasta quesqui huelta monequi nimitzilhuis para amo techcaycayahua quema ticamanalti camanali ten TOTECO. San techyolmelahua cati melahuac TOTECO quijtohua.

¹⁶ Huajca Micaías quijto:

—Na niquintztoc nochi israelitame ten motanahuatilis motamiseman-toque ipan cuatitamit. Itztoyaj quej borregojme cati amo quipiyaj inintamocuitahuijca. Huan TOTECO quijto: ‘Inijuanti amo quipiyaj ininteco, huajca ma mocuepa sesen ipan ichaj.’

¹⁷ Huan Tanahuatijquet Acab ten tali Israel quiilhui Josafat:

—¿Amo nimitzilhuijtoc para ni tacat amo quema quijtohua se tamanti cati cuali? Yaya nochipa quijtohua cati fiero.

¹⁸ Huan nojquiya quijto Micaías:

—Xijtaquilica ni camanali cati TOTECO techmacac. Na niquintztoc TOTECO mosehujtoya ipan isiya nepa ilhuicac huan iilhuicac ecahua moquetzttoyaj inechca. Sequij ica inejmat huan sequij ica iarraves. ¹⁹ Huan TOTECO quintatzintoquili: ‘¿Ajquiya quiyoltacaniti Acab, tanahuatijquet ten

tali Israel para ma yahui quintehuiti cati itztoque ipan Ramot ten tali Galaad para ma miq̄i nopona?¹⁹ Huan sequij quijtohuayayaj se tamanti huan sequinoc seyoc tamanti. ²⁰ Pero teipa monexti iixpa TOTECO se ajacat huan quilhui para yaya quicajcayahuasquía nopa tanahuatijquet ten tali Israel huan quichihuas ma yahui ipan altepet Ramot ten tali Galaad. Huan TOTECO quilhui: ‘¿Quenicatza tijchihuas?’

²¹ “Huan nopa ajacat quinanquili: ‘Na niyas huan nielis se ajacat cati niistacatis huan nijchihuas para nochi itajtolpanextijcahua nopa tanahuatijquet ma quuistacahuica.’ Huajca TOTECO quilhui: ‘Xijchihuati quej tijuijtoctoc.’ ²² Huajca ama xijmati cuali para TOTECO quichijtoc ma istacatica nochi ni motajtolpanextijcahua pampa TOTECO quisenajtoc cati fiero mopantis ipan nopa tatehuilisti huan amo elis quej mitzilhuijtoque ni tacame.”

²³ Huajca Sedequías, icone Quenaana, monechcahui campa itztoya Micaías huan quimaquili ipan ixayac. Huan quilhui:

—Nelia se tiistacaticatocat. ¿Quemaya quisqui Itonal TOTECO ipan na huan yajqui ipan ta para mitznojnotzas?

²⁴ Huan Micaías quinanquili:

—Tijmatis quema timotatijtinemis campa hueli ipan calme.

²⁵ Huan teipa nopa Tanahuatijquet Acab temacac se tanahuatili huan quijto:

—Xiquitzquica Micaías huan xijhuicaca iixpa Amón cati eli gobernador ipan ni altepet huan iixpa Joás, nocone. ²⁶ Huan nojq̄uiya quinhui ma quitzacuaca Micaías ipan tatzacti huan ma quimacaca san se quentzi pantzi huan at mojmota hasta mocuepas ica cuali ten nopa tatehuilisti para ma taijyohui.

²⁷ Huan Micaías quilhui nopa tanahuatijquet:

—Sinta timocuepas ica cuali, huajca amo elqui TOTECO cati techmacatoc ni camanali.

Nojq̄uiya Micaías quinhui:

—Ximomaca cuenta ten ni camanali cati amantzi niq̄uijtoctoc.

Tanahuatijquet Acab mijqui ipan tatehuilisti

²⁸ Huajca quej nopa, Tanahuatijquet Acab ten tali Israel huan Tanahuatijquet Josafat ten tali Judá yajque ipan altepet Ramot ten tali Galaad para quitehuitij. ²⁹ Huan Acab quilhui Josafat:

—Na nimopatas huan nimotalilis seyoc iyoyo huan nimochihuas quej se cati hueli para amo techixmatise, pero ta xicalaqui ipan tatehuilisti ica moyoyo cati cuali.

Huan quej nopa quichijque. ³⁰ Huan nopa tanahuatijquet ten tali Siria ya quinhuijtoya nopa tayacanani ten soldados cati quihuicayayaj itatehuicajca carrojhua ya ni: “Amo xijtehuica san cati hueli cati pisiltzi o cati hueyi, xijtehuica nopa tanahuatijquet ten tali Israel cati itoca Acab.” ³¹ Huan quema itayacanhua cati quinhucayayaj tatehuicajca carrojme quitaque Josafat, moilhuijque para yaya eliyaya nopa tanahuatijquet ten tali Israel huan quiyahualojque para quimictise. Pero Tanahuatijquet Josafat quitzajtzili TOTECO ma quipalehui, huan quipalehui pampa Toteco Dios quincuetqui cati tatehuiyayaj para ma yaca sejcayoc. ³² Nopa tayacanani quitaque para yaya amo eliyaya nopa tanahuatijquet ten tali Israel, huan quicajque huan ayecmo qitoquilijque. ³³ Pero se soldado quimajcajq̄ui se cuataminti campa yahuiyayaj nopa israelita soldados huan quiajsic Tanahuatijquet

Acab. Huan calajqui nopa cuataminti campa mosalojtoya iteposyolixtzajca. Huan Acab quihlhuí nopa tacat cati quinemiltiyaya nopa tatehuijca carro:

—Techquixti ten ni tatehuilisti pampa tahuel nicocojtoc.

³⁴ Huan nelía chichahuac elqui nopa tatehuilisti nochi nopa tonali. Huan moquetzqui Tanahuatijquet Acab ipan itatehuijca carro para huelqui quinixnamijqui nopa sirios hasta quema tiotaquixqui. Huan mijqui quema motali tonati.

19

Tajtolpanextijquet Jehú quiajhuac Josafat

¹ Huan Tanahuatijquet Josafat ten tali Judá mocuetqui ica cuali hasta icaltanahuatil ipan altepet Jerusalén. ² Pero quinamiquito nopa tajtolpanextijquet Jehú, cati elqui icone Hanani, huan quihlhuí: “¿Para ten tijpalehuía se cati fiero huan timohuampojchijtoc ica se cati icualancaitaca TOTECO? TOTECO tahuel cualantoc ica ta por cati tijchijtoc. ³ Pero ipan motequi tijchijtoc sequij tamanti cati cuali pampa tiquinijcuenijtoc nochi nopa taqueztalme para nopa teteyot Asera ten ni tali. Huan timotemactilijtoc para timotemachis ipan Toteco Dios ica nochi moyolo.”

Josafat quintali jueces ipan nochi Judá

⁴ Tanahuatijquet Josafat mocajqui para itztos ipan altepet Jerusalén, pero momajtoya quísa quinpaxalohua sequinoc altepeme ten altepet Beerseba huan hasta ipan tali Efraín. Huan quinyolchichahuayaya para ma mocuepaca huan ma motemachica san ipan TOTECO Dios cati inínTeco inihuejcapan tatahua. ⁵ Huan Tanahuatijquet Josafat quintali jueces ipan nochi altepeme ten tali Judá, ⁶ huan quihlhuí: “Xijpiyaca miyac cuidado quema antetajtolsencahuase. Amo xifetajtolsencahuaca para anquinpactise masehualme, xitetajtolsencahuaca para anquipactise TOTECO huan yaya itztos amohuaya sesen huelta quema anquichihuase amotequi. ⁷ Huajca xijtepanitaca TOTECO huan xiquimacásica. Ximotatzquilica ipan itanahuatilhua pampa TOTECO Dios cati tojuanti toTeco amo quipactía jueces cati amo quichihuaj cati xitahuac, o cati techicoicnelíaj o quiselíaj se tenijqui para tetajtolsencahuase.”

⁸ Huan nojquiya Tanahuatijquet Josafat quintali ipan altepet Jerusalén sequij levitame, sequij totajtzitzi huan sequij cati eliyayaj tayacanani ten israelita familias. Huan quinqtequimacac para tetajtolsencahuase ica itequiticayo TOTECO huan quisencahuase cuesoli ica tamanti ipan tiopamit huan nojquiya para quisencahuase nochi tamanti cualanti huan tequipacholi cati masehualme ten altepet Jerusalén quipiyayaj se ica seyoc. ⁹ Huan Tanahuatijquet Josafat quinmacti nopa tacame quenicatza quichihuase nopa tequit. Quihlhuí: “Monequi xiquincamanalhua masehualme ica melahuac huan ica amoyolo xitahuac iixpa TOTECO pampa anquitepanitaj. ¹⁰ Quemantica hualas se tamanti cualanti ten sequinoc altepeme cati amo hueli quisencahuaj injuanti. Amechhualiquilise para xijsencahuaca. Huelis se quimictijtoc seyoc o se quixpanotoc se ifanahuatil TOTECO. Huajca xiquinnotzaca nopa jueces ma quipiyaca cuidado para ma amo quixpanoca TOTECO, pampa sinta quixpanose TOTECO quinajsis icualancayo injuanti huan nojquiya amechajsis amojuanti. Sinta anquichihuase nelía xitahuac, huajca amo anhuetzise ipan tajtocoli. ¹¹ Huan nopa hueyi totajtzi Amariás amechyacas ipan nochi tamanti ten TOTECO. Huan Zebadías, icone Ismael, cati se tayacanquet ten nopa hueyi familia Judá, yaya quisencahuas nochi inintaixpanol masehualme ica nopa tanahuatijquet.

Huan nopa levitame amechpalehuisse nochi amojuanti. Huajca ximoy-olchichahuaca huan xitequitica cuali. Huan TOTECO Dios ma itzto ica nochi amojuanti cati anquichihuaj cati xitahuac.”

20

Tatehuilisti ica Moab, Amón huan Edom ehuaní

¹ Teipa quema ya panotoya miyac tonali, nopa soldados ten tali Moab huan ten tali Amón calajque ipan tali Judá para quitehuisse Tanahuatijquet Josafat. ² Huan sequij yajque quiyolmelahuatoj Josafat huan quiilhuijque: “Hualahuij miyac soldados ten seyoc nali nopa Hueyi At Cati Poyec huan ten tali Siria. Inijuanti ya ajsicoj ipan altepet Hazezon Tamar cati nojquiya itoca Engadi.”

Josafat motatajti

³ Huajca Josafat nelía momajmati huan motemacac quitemos TOTECO itapalehuil para quimatis taya quichihuas. Huan tanahuati para nochi Judá ehuaní ma mosahuaca nojquiya. ⁴ Huan nochi tali Judá ehuaní ten campa hueli altepeme mosentilijque para quitajtanise TOTECO itapalehuil.

⁵ Huan Tanahuatijquet Josafat moqetzqui inixpa nopa masehualme cati mosentilijtoyaj ipan nopa yancuic tamapamit ten nopa tiopamit. ⁶ Huan quiijto: “TOTECO Dios, ta tieliyaya tiinTeco tohuejcapan tatahua. San ta tiDios cati tiitztoc ilhuicac. Ta cati tiquinnahuatía tanahuatiani huan inintanahuatilis ipan nochi talme ipan ni taltipacti. Ta tijpiya nochi chichahualisti huan tanahuatili. Amo aqui hueli mitztzacuilía. ⁷ Toteco Dios, tiquinquixti nopa masehualme cati achtohuiya itztoyaj ipan ni tali inixpa momasehualhua cati eliyayaj tohuejcapan tatahua. Huan para nochipa tiquinmacac ni tali iconehua Abraham cati itztoc mohuampo para nochipa.

⁸ Huan teipa moisraelita masehualhua mochantijque nica huan mitzchi-huilijque ni tiopamit. Huan momasehualhua quiijtojque: ⁹ ‘Quema hualas ten hueli tatzacuilti, o tatehuilisti, o cocolisti o mayanti, tojuanti hueli timosentilise ipan ni tiopamit moixpa, pampa ta tiitztoc nica. Quena, ipan totaijyohuilis, huelis timitzajtjanise motapalehuil, huan ta techtacaquilis huan techmanahuis.’ ¹⁰ Huajca ama xiquita cati quichihuaj nopa soldados ten Amón, Moab huan nopa tepet Seir. Quema tohuejcapan tatahua quisayayaj ten tali Egipto, amó tiquincahuili ma calaquica ipan inintal ni masehualme. Yeca totatahua quimacaque huelta para amó quisosolose inintal huan inintatohua ni masehualme. ¹¹ Huan ama inijuanti quej ni techtaxtahuáj. Ama quinequij techquixtise ten ni tali cati moaxca ta huan cati ta techmacatoc tojuanti para ma timoaxcatica. ¹² Huajca ama Toteco Dios, xiquintatzacuilti. Tojuanti amó tihuelij tiquintanise pampa inijuanti tahuel miyaqui. Amo tijmatij taya tijchihuase. Pero ipan ta timotemachíaj para temachti techpalehuis.”

¹³ Huan nochi tacame ten tali Judá moqetztoyaj iixpa TOTECO ica inisi-huajhua huan ininconeua.

Itonal Toteco calajqui ipan Jahaziel

¹⁴ Huan nojquiya itztoya nozona Jahaziel, se levita cati eliyaya se iteipa ixhui Asaf. Jahaziel elqui icono Zacarías, cati icono Benaía, cati icono Jeiel, cati icono Matanías, cati eliyaya se iixhui Asaf. Huan Itonal TOTECO hualajqui ipan Jahaziel, ¹⁵ huan yaya quiijto: “Techtacaquili tiTanahuatijquet Josafat huan amojuanti cati anehuaní ipan tali Judá huan altepet Jerusalén. TOTECO quej ni amechilhuía: ‘Amo xiquinimacastica, yon amo

ximomajmatica iniixpa ni masehualme cati tahuel pano miyaqui. Pampa ni tatehuilisti amo elfoc para amojuanti antatehuisse. Elis Toteco Dios cati quintehuis. ¹⁶ Mosta xiyaca para anquinnamiqutij. Anquinpantise ixtej-cotihualahui ipan nopa tepet Sis campá nopa atajti cati eltoc nechca nopa huactoc tali Jeruel. ¹⁷ Pero amo monequi para amojuanti antatehuisse ipan ni tatehuilisti. San ximoquetzaca huan amo ximolinica huan anquiuatase quenicatza amechmaquixfis TOTECO. Huajca amo ximajmahuica, yon amo ximotzinquixtica, nochi cati anehuani Jerusalén huan Judá. Xiyaca mosta para anquinnamiqutij pampa TOTECO itztos amohuaya.’ ”

¹⁸ Huajca Tanahuatijquet Josafat motancauquetzqui talchi para quihueyitalis TOTECO. Huan san se quichijque nochi masehualme ten Judá huan Jerusalén. ¹⁹ Huan moquetzque nopa levitame cati iteipa ixhuihua Coat huan cati iteipa ixhuihua Coré huan chichahuac pejque quihueyichihuaq TOTECO Dios cati ininTeco israelitame.

²⁰ Huan tonili nelía ijnaltzi nopa soldados ten tali Judá quistejque para yase ipan nopa huactoc tali cati itoca Tecoa. Huan ipan ojti Josafat moquetzqui huan quinilhui: “Techtaquilica amojuanti cati anehuani Jerusalén huan Judá. Xijneltocaca TOTECO Dios cati amoTECO huan anitztose temachtí. Xiquinneltocaca itajtolpanextijcahua huan nochi cati anquichihuase quisas cuali.”

²¹ Huan teipa nopa Tanahuatijquet Josafat quincamanalhui nopa tayanani huan quisencajque san sejco para quintalise sequij huicani para tayacanase moyoyontijtoque ica iniyoyo cati fatzejtzeltolitic huan huicatiyase para quihueyichijtiyase TOTECO. Huajca nopa huicani huicatiyajque nopa huicat cati quijito: “Xihueyitalica TOTECO pampa yaya quipiyas hueyi iyolo ica tojuanti para nochipa.”

²² Huan ipan nopa talojtzi quema injuanti pejque huicaj ica paquilisti para quihueyichihuase TOTECO, TOTECO pejqui quintehuína nopa soldados ten tali Moab, Amón huan tepet Seir cati hualayayaj para quinmictise nopa tali Judá ehuaní, huan quinchijqui san injuanti ma mocualanica se ica seyoc. ²³ TOTECO quichijqui ma motananaca nopa soldados huan ma quinmictica cati ehuaní Moab, huan Amón huan ten tepet Seir. Huan quema ya senquisá quintzontamiltijtoyaj cati hualajtoyaj ten tepet Seir, nopa tacame ten Moab huan Amón pejque momictíaj huan motzontamiltíaj se ica seyoc hasta nochi momictijque.

²⁴ Huan teipa quema ajsticoj nopa soldados ten tali Judá iatipa nopa tepet campá nopa torre ipan nopa huactoc tali, tachixque campá itztoyaj inincualancaitacahua huan quitaque inintacayohua nopa mijcatzitzitzi tepejttoyaj campá hueli. Yon se amo momanahui. ²⁵ Huajca Josafat huan nochi soldados yajque huan quicuique nochi tamanti cati eltoya ipan nopa mijcatzitzitzi. Quipantijque tomí, yoyomit huan miyac tamanti cati pajpatiyó. Nelía miyac tamanti éliyaya hasta amo hueliyayaj quihuicaj. Huan huejcajque eyi tonati para quisentilijque nochi nopa tamanti.

²⁶ Huan ipan nahui tonati mosentilijque ipan nopa tamayamit Beraca huan noxona quitascamatilijque huan quihueyichijque TOTECO. Huan yeca quitocaxtijque nopa lugar Beraca cati quinequi quijitos: Tamayamit Ten Tahueyichihualisti huan hasta ama quej nopa itoca. ²⁷ Teipa Tanahuatijquet Josafat quinyacanqui nochi nopa soldados ten Judá huan Jerusalén huan mocuetque altepet Jerusalén ica miyac paquilisti pampa TOTECO quinmaquixtijtoya ten inincualancaitacahua. ²⁸ Huan quema ajsticoj ipan altepet

Jerusalén, yajque ipan ichaj TOTECO huan tatzotzontiyajque ica salterios, arpas huan tapitzali.

²⁹ Huan quema quimatque nochi masehualme ten campa hueli talme para TOTECO quintehui inincualancaitacahua israelitame, huajca nelía momajmatijque huan quimacacque Toteco Dios. ³⁰ Huan quej nopa campa hueli ipan ital Tanahuatijquet Josafat oncac tasehuilisti pampa Toteco Dios quinmacac tasehuilisti huan quichijqui para amo aqui ipan yon se tali ma quincuatotoni.

Itanahuatilis Josafat
(1 R. 22:41-50)

³¹ Tanahuatijquet Josafat pejqui tanahuatía quema quipiyayaya 35 xihuit huan tanahuati ten isiya ipan altepet Jerusalén para 25 xihuit. Inana itoca eliyaya Azuba iichpoca Silhi.

³² Huan Josafat mojejnemilti xitahuac iixpa TOTECO quej quichijqui itata, Asa. Huan TOTECO quipacti pampa quichijqui cati cuali. ³³ Pero yaya amo quiniycueni nochi nopa taixpame cati eltoyaj ipan tepeme. Huan nopa israelitame amo nelía motemacaque ica nochi iniyolo para quitoquilise Toteco Dios cati elqui ininTeco inihuejcapan tatahua.

³⁴ Huan nochi cati Josafat quichijqui hasta quema pejqui ipan itequi huan hasta mijqui, eltoc ijcuilijtoc ipan nopa Amatapohuali Cati Quiijcuilo Jehú, icone Hanani huan nojquiya eltoc ipan Nopa Amatapohuali ten Nopa Tanahuatiani ten Tali Israel.

³⁵ Teipa ipan itamiya inemilis, Josafat cati elqui nopa tanahuatijquet ten tali Judá mohuampojchijqui ica Ocozías cati elqui tanahuatijquet ten tali Israel ica norte, huan nelía fiero eliyaya inemilis Ocozías. ³⁶ Huan sentic Josafat huan Ocozías quichijque miyac huejhueyi cuaacalme ipan altepet Ezión Geber cati mocahua iteno hueyi at. Quichijque nopa huejhueyi cuaacalme para yase tacohuatij ipan altepet Tarsis cati huejca mocajqui pero nojquiya elqui iteno hueyi at. ³⁷ Pero nopa tajtolpanextijquet Eliezer ten altepet Maresa cati elqui icone Dodava quiyolmelajqui Josafat ten nopa camanali cati TOTECO quimacatoya para quihuis, quijto: “Pampa timohuampojchijtoc ica Ocozías, TOTECO quinhuejhuelos nopa miyac cuaacalme cati anquichijtoque.” Huan quena, nopa miyac cuaacalme tajcotapanque huan amo quema ajsitoy ipan altepet Tarsis.

21

Mijqui Josafat
(2 R. 8:16-24)

¹ Huan mijqui Josafat huan quitalpachojque ipan Ialtepe David. Huan mocajqui icone, cati itoca Joram, para tanahuatis. ² Huan iicnihua Joram inintoca eliyaya: Azarías, Jehiel, Zacarías, Azarías, Micael huan Sefatias. Nochi injuanti nojquiya eliyayaj iconehua Josafat cati elqui tanahuatijquet ipan tali Judá. ³ Huan inintata, Josafat, quinmacatoya sen ten injuanti ricojyot ten oro, plata huan tamanti cati pajpatiyo. Nojquiya quinmacac altepeme cati quipiyayayaj tepamit para iniaxcahua. Pero quichijqui itelpoca, Joram, ma eli tanahuatijquet pampa yaya eliyaya achtohui ejquet. ⁴ Pero quema Joram mochijqui temacti ipan itequi quej tanahuatijquet, yaya quinmicti nochi iicnihua huan nojquiya quinmicti sequinoc tacame cati eliyayaj tayacanani ten israelitame. ⁵ Huan Tanahuatijquet Joram pejqui tanahuatía quema quipiyayaya 32 xihuit huan san tanahuati 8 xihuit ipan altepet

Jerusalén. ⁶ Pero yaya quichijqui cati nelía fiero quej quichihuayayaj nopa tanahuatiani ten tali Israel ica norte. Quipixqui se nemilisti cati fiero quej Tanahuatijquet Acab ten tali Israel pampa mosihuajtijtoya ihuaya iichpoca Acab. Huan yeca nochipa cati quichijqui elqui amo cuali iixpa TOTECO. ⁷ Pero TOTECO amo quinejqui quitzontamiltis Joram pampa eliyaya se iixhui David huan quitajtolcahuilijtoya David para nochipa se iixhui mosehuis ipan icaltanahuatil para tanahuatis.

⁸ Huan quema Joram eliyaya tanahuatijquet, nopa Edom ehuan i mosisinijque huan ayecmo quinejque ma quinnahuati Joram. Huan motemo-huilijque se inintanahuatijca para quinnahuatis huan quisehujique ipan itequi. ⁹ Huan Joram yajqui ica tayohua ica nochi isoldados huan ica nochi itatehujica carrojhua para quintehuiti nopa masehualme ten tali Edom. Huan nopa Edom ehuan quinyahualojque huan Joram quintehui huan quintanqui. ¹⁰ Pero nopa Edom ehuan amo mocajque para sempa quinchihuase inintequipanojcahua nopa Judá ehuan. Huan hasta ama inijuanti amo quincahuilíaj nopa tanahuatiani ten sequinoc talme ma quinnahuatica. Huan ipan nopa tonali nojquiya nopa masehualme ten altepet Libna mosisinijque ica Tanahuatijquet Joram huan moyocatalijque ten ya pampa Joram quitahuelcajtoya TOTECO Dios cati elqui ininTeco ihuejcapan tатаhua. ¹¹ Huan Tanahuatijquet Joram nojquiya quichijqui taixpame ipan tepeme ipan tali Judá huan quinnahuati nochi masehualme ten altepet Jerusalén huan campa hueli ipan Judá ma quinhueyitalica teteyome huan amo TOTECO. Quej nopa quinchihualti ma tajtacolchihuaca.

Elías quitajcuilhui Joram

¹² Huan nopa tajtolpanextijquet Elías quititanili se amatajcuiloli Tanahuatijquet Joram cati quej ni quijto:

“TOTECO Dios cati iTeco mohuejcapan tata David mitzilhuía ya ni: ‘Ta amo timonejnemiltijtoc xitahuac noixpa na quej quichijqui motata Josafat huan mohueyi tata Asa cati elque tanahuatiani ipan tali Judá. ¹³ Ta tijchijtoc quej quichijque nopa tanahuatiani ten tali Israel ica norte huan tijchijtoc para masehualme cati ehuan ipan altepet Jerusalén huan ipan nochi tali Judá ma tajtacolchihuaca huan ma quinhueyichihuaca teteyome quej quichijque ichan ehuan Tanahuatijquet Acab ica norte. Huan nojquiya tiquinmictijtoc moicnihua cati monejnemiltiyayaj más xitahuac que ta. ¹⁴ Huajca ama na cati niamoTECO nijtitanis se tazacuilitili ipan momasehualhua, moconehua, mosihuahua huan nochi cati tijpiya. ¹⁵ Huan nimitzmacas ta se cocolisti ipan moijti cati nelía fiero huan hasta quisas nochi mocuitaxcol.’ ”

Quej nopa quijtohua TOTECO.

Árabes huan filisteos calajque ipan tali Judá

¹⁶ Huan TOTECO quinyoltacani nopa filisteo tacame huan nopa árabes cati itztoyaj nechca tali Etiopía para ma quitehuitij Tanahuatijquet Joram. ¹⁷ Huan inijuanti yajque huan calajque ipan tali Judá huan quicuique nochi tamanti cati oncayaya ipan icaltanahuatil nopa tanahuatijquet. Nojquiya quinhucaque isihuahua nopa tanahuatijquet huan nochi iconehua. San mochololti icone cati itoca Joacaz, cati elqui teipa ejquet.

¹⁸ Huan teipa TOTECO quimacac Tanahuatijquet Joram se cocolisti cati tahuel fiero ipan iijti cati amo quipixqui pajti. ¹⁹ Taijyohui miyac tonali huan quema ajsic ome xihuit nochi icuetaxcol panquisqui huan tahuel taijyohui miyac hasta mijqui. Huan yon se ten imasehualhua amo quichoquili Joram,

yon amo quitallilique taajhuiyacayome para quitepanitase quej quichijque ica itatahua. ²⁰ Joram quipixqui 32 xihuit quema pejqui itequi ten tanahuatijquet huan san tanahuati 5 xihuit ipan altepet Jerusalén. Huan amo aqui quichoquili quema mijqui. Huan quitalpachojque ipan Ialtepe David, pero amo campa motalpachojtoyaj nopa sequinoc tanahuatiani.

22

Ocozías mochijqui tanahuatijquet ipan tali Judá (2 R. 8:25-29)

¹ Huajca nopa masehualme ten altepet Jerusalén quichijque Ocozías, icone Joram cati teipan ejquet, ma eli inintanahuatijca ipan tali Judá. San yaya mocajqui yoltoc quema nopa árabes cati san nejnemiyayaj campa hueli hualajque huan quinmictijque nochi iicnihua cati achtohui ehuani. Huajca Ocozías, icone Joram, elqui tanahuatijquet ipan tali Judá. ² Huan Ocozías quipiyayaya 22 xihuit quema pejqui tanahuatía huan san tanahuati se xihuit ipan altepet Jerusalén. Inana itoca eliyaya Atalía huan eliyaya iixhui Tanahuatijquet Omri ten tali Israel. ³ Huan Ocozías quichijqui cati fiero quej Tanahuatijquet Acab quichijtoya pampa inana quitalnamicthi ma quichihua cati fiero. ⁴ Quena, Ocozías quichijqui cati fiero iixpa TOTECO quej quichijqui Tanahuatijquet Acab pampa quema mijqui itata Ocozías, injuanti cati ichan ehuan Acab quiconsejomacayayaj para ma quichihua cati fiero. Huan quihuicaque ipan se ojti cati amo cuali.

Ocozías quipalehui Joram ipan tatehuilisti

⁵ Huan Ocozías quintacaquili ichan ehuan Acab huan mosejcotili ihuaya Tanahuatijquet Joram ten tali Israel cati elqui icone Acab. Huan yajque quitehuitoj Hazael. Hazael elqui tanahuatijquet ten tali Siria huan itztoya ipan altepet Ramot ipan tali Galaad. Pero nopa Siria tacame tahuel quicocojque Tanahuatijquet Joram ipan nopa tatehuilisti. ⁶ Huan Tanahuatijquet Joram mocuetqui ipan altepet Jezreel para mopajtis pampa tahuel quicocojque ipan nopa tatehuilisti cati oncac ipan Ramot ica nopa tanahuatijquet ten tali Siria. Huan Tanahuatijquet Ocozías yajqui ipan altepet Jezreel para quipaxaloti Joram.

Jehú quimicti Ocozías (2 R. 9:27-29)

⁷ Pero Toteco Dios ya quisencajtoya ma miqui Tanahuatijquet Ocozías quema yasquía quipaxaloti Tanahuatijquet Joram. Huan quema ajsito Ocozías nozona pampa Joram, nimantzi quisqui ihuaya para quitehuitj Jehú, icone Nimsi. Pero TOTECO ya quitapejpenijtoya Jehú para quintzontamiltis nochi iixhuihua nopa mijcatzi Tanahuatijquet Acab para amo aqui mocahuas yon se ica ieso para tanahuatis. ⁸ Huajca Jehú quintemojtinemiyaya nochi iixhuihua Acab para quinmictis. Huan quinpanti nopa tayacanani ten tali Judá inihuaya sequij iteixmatcahua Tanahuatijquet Ocozías, pampa nojquiya yajtoyaj ihuaya ipan nopa tatehuilisti. Huajca Jehú nochi quinmicti. ⁹ Huan Jehú quinilhui isoldados ma quitemotij Tanahuatijquet Ocozías ten tali Judá. Huan quipantitoy motatijtoc ipan altepet Samaria. Huajca quiiizquijque huan quihuicaque iixpa Jehú huan yaya quimicti. Huan quitalpachoto Tanahuatijquet Ocozías ipan Ialtepe David pampa quintalpachojtoyaj sequinoc tanahuatiani pampa yaya elqui iixhui Tanahuatijquet Josafat cati ica nochi iyolo motemachi ipan TOTECO.

Huan amo aquí cati mocajqui ten iteixmatca Ocozías quipixqui tetili para mochihuas tanahuatijquet ipan tali Judá.

Atalía quinnmicti nochi Judá ehuaní
(2 R. 11:1-21)

¹⁰ Huan quema Atalía, inana Tanahuatijquet Ocozías, quimatqui para ya mijqui, quinejqui quintzontamiltis nochi iconehua cati quipiyayayaj tanahuatili para teipa huelis tanahuatise ipan tali Judá. ¹¹ Pero Josabet cati eliyaya iichpoca Tanahuatijquet Joram quicuito Joás, ipilcone Ocozías, huan quiiyocatali ten nopa iconehua Tanahuatijquet Ocozías cati inana quinnmictiyaya. Huan quitati nopa pilconetzi ihuaya se sihua tequipanojquet ipan se cuarto. Huan quej nopa quimanahuijque Joás huan amo quimictijque. Josabet eliyaya iichpoca mijcatzi Tanahuatijquet Joram huan iicni Ocozías, huan eliyaya isihua nopa totajtzi Joiada. ¹² Huan quej nopa quitatijque Joás ipan se cuarto ipan itiopa Toteco Dios para chicuase xihuit ipan nochi nopa tonali quema nopa sihuat Atalía tanahuatiyaya ipan tali Judá.

23

Quichijque Joás tanahuatijquet

¹ Huan quema Atalía yahuiyaya para chicome xihuit tanahuatis, nopa totajtzi Joiada moyolchicajqui huan quincamanalhui nopa tayacanani cati inintoca: Azarías, icone Jeroham; Ismael, icone Johanán; Azarías, icone Obed; Maasías, icone Adaía huan Elisafat, icone Zicri. ² Huan Joiada quintitanqui nochi ma yaca ixtacatzí ipan nochi tali Judá para quinsentilise nopa levitame ten nochi altepeme ipan tali Judá. Nojquiya quinilhui ma hualaca nopa tayacanani ten israelita familias. Huan nochi injuanti mosentilijque ipan Jerusalén. ³ Huan nochi mosentilijque campa ichaj Toteco Dios para quichihuase se camanali ica nopa oquichpil Joás cati quitocarohua para elis tanahuatijquet.

Huan nopa totajtzi Joiada quinilhui: “Nica anquipixtoque icone nopa mijcatzi tanahuatijquet. Ya ajsic hora para elis amotanahuatijca pampa TOTECO quijito para elisquía se iixhui David cati monequi tanahuatis. ⁴ Huan ama ya ni cati monequi anquichihuase. Nochi antotajtzitzi huan anlevitame, anmoxelose ica eyi pamit. Huan nopa pamit cati calaquise ipan tiopamit para quitequipanose Toteco ipan sábado, mochahuase para tamocuitahuse campa caltemit. ⁵ Huan seyoc pamit ten amujuanti mochahuase para tamocuitahuse ipan nopa caltanahuatili. Huan ne se pamit mochahuas ipan nopa caltemit campa itzinpehualtil ni tiopamit. Huan nochi nopa masehualme ten tali Judá itztose calixpa ten ni tiopamit. ⁶ San xiquincahuilica ma calaquica ipan itiopa TOTECO cati totajtzitzi huan levitame pampa injuanti cati tayocatalilme para quitequipanose TOTECO. Huan nochi nopa sequinoc masehualme itztose calixpa. ⁷ Huan anlevitame, anitztose yahualtic ten ni tanahuatijquet huan sese quihuicas itepos imaco. Huan sinta quinequis calaquica se acajya cati amo quipiya tequiticayot para calaquis ipan itiopa TOTECO, xijmictica. Amo xijtahuelcahuase ni tanahuatijquet. Monequi anitztose ihuaya nochi tonali huan anyase ihuaya campa hueli campa yas.”

⁸ Huan quej nopa quichijque. Nochi levitame huan tali Judá ehuaní mucualtalijque senquisá quej quinnahuatijtoya nopa totajtzi Joiada. Huan nopa tayacanquet ten totajtzitzi quinsentili nochi totajtzitzi huan levitame cati ajsiyayaj para calaquise ipan inintequi ipan sábado. Huan nojquiya

quinsentili cati quintocarohuayaya quisase ipan inintequi huan amo quincajqui yase. ⁹ Huan Joiada quinmacac nochi tayacanani inincuatamin ten huehueyac huan iniyolixtzajca ten teposti cati eliyaya iaxca David huan mocajtoya ipan itiopa Toteco Dios. ¹⁰ Huan Joiada nimantzi quintali nopa tamocuitahuani ma moquetzaca ica inintepos huan quiyahualose nopa tanahuatijquet. Huan injuanti motecpanque ten nopa lado sur ipan nopa tiopamit huan quimacaque se huelta hasta nopa lado norte ten nopa tiopamit huan teipa nochi nopa fila quiyahualo nopa taixpamit cati mopantia calixpa. Nochi nopa tacame quihuicayayaj inincuatamin cati huehueyac para quimanahuisse nopa tanahuatijquet. ¹¹ Huan huajca totajtzi Joiada huan iconehua quiquixtijque nopa oquichpil cati elqui icone nopa mijcatzi tanahuatijquet huan quitallilijque se corona ipan itzonteco huan quimactilijque se copia ten itanahuatilhua TOTECO. Huan quej nopa, quichijque ma eli tanahuatijquet. Huan Joiada huan iconehua quitequilijque aceite ipan itzonteco para quitequimacase huan teipa nochi tzajtzi que chicahuac huan quiijtojqe: “Ma itzto miyac tonali totanahuatijca.”

Imiquilis Atalía

¹² Huan quema Atalía, nopa sihuat cati tanahuatiyaya, quicajqui nopa tahuejchihualisti ten nopa masehualme cati quihueyitaliyayaj nopa tanahuatijquet, nimantzi yajqui ichaj TOTECO campa mosentilijtoyaj nopa masehualme. ¹³ Huan quema ajsito, quiitac nopa tanahuatijquet ijcatoya campa nopa lugar cati más quipiya tatepanitacayot nechca nopa taquetzali campa calaquij ipan tiopamit. Huan quititac para quiyahualojtoyaj nopa tayacanani huan tapitzani huan nochi masehualme campa hueli paquiyayaj huan tapitzayayaj. Huan nojquiya itztoyaj huicani ica tatzotzonali huan quinyacanayayaj nopa masehualme para huicase chicahuac para quihueyichihuae TOTECO. Huajca Atalía quitzayanqui iyoyo huan quiijto:

—Amo nimechmaca tanahuatili para anquichihuase ya ni.

¹⁴ Huajca nopa totajtzi Joiada quinnahuati nopa tayacanani ten soldados ma quiquixtica nopa sihuat para amo quimictise tiopan calijtic. Nojquiya tanahuati sinta cati quinequis quimanahuis nopa sihuat, ma quimictica nojquiya. ¹⁵ Huan nimantzi quiitzquijque huan quiquixtijque ipan nopa caltemit campa cahuayojme calaquij ipan icaltanahuatil nopa tanahuatijquet huan nopona quimictijque.

Joiada motemacac quitoquilis Toteco Dios

¹⁶ Teipa Joiada quichijqui se camanali inihuaya nochi tali Judá ehuan huan nopa yancuic tanahuatijquet para yaya huan nochi injuanti elise iaxcahua san TOTECO, huan san ya quihueyitalise. ¹⁷ Teipa nochi nopa masehualme ten tali Judá yajque ipan nopa tiopa campa quihueyichihuaj nopa taixcopincayot Baal huan quisosolojqe ica nochi taixpamit nopona. Nojquiya quimictijque Matán iniixpa nopa taixpame pampa yaya eliyaya se itotajtzi Baal. ¹⁸ Huan nopa totajtzi Joiada quinquimacac levitame ma quimocuitahuica nopa tiopamit. Ya ni elqui nopa levitame cati David quintalijtoya tiopan calijtic para quipalehuisse temacase tacajchahualisti. Huan quinilhui nopa totajtzitzi huan levitame ma moyocatalica ica pamit para mopatatiyase ipan inintequi quej David quinnahuati ma quichihuaca. Huan quinnahuati ma sempa quimacaca tacajchahualisti TOTECO senquisa quej ijcuilijtoc ipan itanahuatilhua Moisés huan para huicase huan quipaquilismacase TOTECO quej David quinilhuijtoya huejcajquiya. ¹⁹ Huan nojquiya quintali tacame para tamocuitahuisse ipan caltemit ipan ichaj TOTECO para quimocuitahuisse para amo calaquis yon se masehuali cati amo tapajpactic

quej quijto tanahuatili para tequitis tiopan calijtic. ²⁰ Teipa nopa hueyi totajtzi Joiada quinnotzqui ma mosentilica nochi nopa tayacanani ten soldados, tequichihuani, gobernadores huan nochi nopa masehualme ten tali Judá. Huan injuanti quisque ihuaya nopa tanahuatijquet ten itiopa TOTECO huan quipanoque nopa caltemit cati más huejcapa. Huan nozona calajque ipan nopa caltanahuatili huan quisehuijque nopa tanahuatijquet ipan isiya para tanahuatis. ²¹ Huan nochi nopa masehualme ten nochi nopa tali tahuel yolpaquiyayaj. Huan oncac tasehuilisti ipan nopa altepet pampa nopa sihua tanahuatijquet Atalía ya mictoya.

24

Itanahuatil Joás (2 R. 12:1-21)

¹ Huan Tanahuatijquet Joás quipiyayaya chicome xihuit quema pejqui tanahuatía. Huan tanahuati 40 xihuit ipan altepet Jerusalén. Inana itoca eliyaya Sibia ten altepet Beerseba. ² Huan Joás quichijqui nochi cati xitahuac iixpa TOTECO ipan nochi nopa xihuit quema noja itztoya nopa totajtzi Joiada para quiconsejomacas. ³ Huan teipa nopa totajtzi Joiada quitemohuili Joás ome isihuajhua. Huan Joás quinpixqui iconehua oquichpilme huan sihuapilme.

⁴ Huan teipa Joás quipixqui ipan iyolo para quisencahuas cati monequiyaya ipan ichaj TOTECO. ⁵ Huan quinnotzqui nochi nopa totajtzitzi huan levitame huan quinnilhui:

—Xiyaca nimantzi ipan nochi altepeme ten tali Judá huan xijsentilica nopa tomi cati nochi israelitame monequi temacase sesen xihuit para ichaj Toteco Dios huan ica tijcualchijchihuase itiopa.

Pero nopa levitame amo quichijque nimantzi. ⁶ Huajca yaya quinnotzqui nopa hueyi totajtzi Joiada huan quinnilhui:

—¿Para ten amo tiquinnahuatijtoc nopa levitame para ma yaca ipan nochi altepeme ipan tali Judá huan ipan altepet Jerusalén para tajtanitij nopa tomi para tiopamit? Quijtohua itanahuatilhua Moisés para nochi monequi temacase nopa tomi para ma mochahua cuali itiopa TOTECO cati quipiya icaxa ica nopa camanal sencahuali.

⁷ Quema tanahuatiyaya nopa fiero sihuat Atalía, nochi cati quitoquiliyayaj quisosolohuayayaj nopa tiopamit. Quiquixtijque nochi tamanti tatzejtzeloltic cati taiyocatalili san para quitequihuisquía ipan ichaj Toteco Dios huan quihuicaque ipan itiopa Baal para quihueyichihuatij nopa teteyot.

⁸ Huan Tanahuatijquet Joás tanahuati ma quichihuaca se cuacajo huan quitalise nechca nopa caltemit campa calaquij ipan tiopamit. ⁹ Huan nimantzi tayolmelajque ipan nochi Judá huan ipan Jerusalén para ma quihuicaca para Toteco Dios nopa ofrenda cati monequis ipan tiopamit. Moisés itequipanojca Toteco quinnahuatijtoya nochi israelitame ma quimacaca TOTECO nopa tomi quej se impuesto quema itztoyaj ipan nopa huactoc tali. ¹⁰ Huajca nochi tayacanani huan nochi israelitame hualayayaj ica miyac paquulisti huan quitaliyayaj inintomi ipan nopa cuacajo. Huan nopa cuacajo temic ica tomi. ¹¹ Huan quema quiitaque para quipixtoya miyac tomi nopa cuacajo, nopa levitame quihuicaque iixpa itajcuilojca nopa tanahuatijquet para ma quita. Huan nozona se itapalehuijca nopa hueyi totajtzi quipojqui nopa tomi huan teipa sempa quitali nopa cuacajo nechca nopa caltemit campa calaquij ipan tiopamit. Huan quej nopa quichijque mojmosta huan nelia quisentilijque miyac tomi. ¹² Huan Tanahuatijquet

Joás huan nopa totajtzi Joiada quihuicaque nopa tomi huan quinmactilijque nopa tacame cati quiyacanayayaj nopa tequit ipan itiopa Toteco. Huan injuanti quintemojque calchihuani huan cuaximani para quicualtalise itiopa Toteco, huan nojquiya quintemojque tacame para tequitise ica hierro huan bronce. ¹³ Huan nopa tacame cati tayacanayayaj ipan nopa tequit para quicualchijchihuase tiopamit nelía tequitique chichahuac huan cuali quisqui inintequi. Huan quicualtalijque itiopa Toteco Dios quej achtohuiya eltoya huan nelía mocajqui yejectzi. ¹⁴ Quema quisencajque nochi nopa tequit ipan itiopa Toteco, nopa tacame quihuicaque nopa tomi cati mocajqui huan quimacatoj Tanahuatijquet Joás huan totajtzi Joiada. Huan injuanti tanahuatijque ma sempa quichihuaca nochi tamantzitzi cati motequihuía ipan itiopa TOTECO para quihueyichihuase huan nojquiya cati monejqui para temacase tacajchualisti quej huejhueyi cucharas huan tazas huan más miyac tamanti ten oro huan ten plata. Huan ipan nochi inemilis nopa totajtzi Joiada, mojmosta quimacayaya TOTECO nochi tacajchualisti cati monequiyaya.

¹⁵ Pero teipa nopa hueyi totajtzi Joiada huehuetixqui huan mijqui quema quipiyayaya 130 xihuit. ¹⁶ Huan quitalpachojque ipan Ialtepe David campa quitalpachojtoyaj tanahuatiani pampa nelía quichijtoya cati cuali ica israelitame, huan ica Toteco Dios huan itiopa.

¹⁷ Teipa quema mijqui nopa totajtzi Joiada, hualajque nopa tayacanani ten tali Judá huan motancuaquetzque iixpa Tanahuatijquet Joás para quinextise tatepanitali. Quichijque ya nopa para ma quincaquili cati quinequiyayaj huan ma quincahuili quicahuase TOTECO. ¹⁸ Huajca nimantzi Joás huan Judá ehuan quitahuelcajque TOTECO Dios cati elqui ininTeco inihuejcapan tatahua, huan quitahuelcajque itiopa. Huan pejque quinhueyitalíaj nopa tahaetzalme para Asera huan sequinoc teteyome. Huajca nelía cualanqui Toteco Dios ica nochi masehualme ten Judá huan altepet Jerusalén. ¹⁹ Huan TOTECO quintitanili tajtolpanextiani para quinilhuitij ma mocuepaca ica ya, pero nopa masehualme amo quintacaquilijque.

²⁰ Huan se tonali hualajqui Itonal Toteco Dios ipan nopa tajtolpanextijquet Zacarías cati elqui icone nopa mijcatzi totajtzi Joiada. Huan Zacarías moquetzqui campa más tahuejcapa huan quinilhui nochi nopa masehualme cati itztoyaj ipan nopa tasentilisti: “Quej ni quijtohua Toteco Dios: ‘¿Para ten anquixpanoj cati quijtohua notanahuatil, ni amoTECO? Cati anquichihuaj quisas fiero para amojuanti. Huajca ama pampa antechahuelcajtoque na nojquiya nimechtahuelcahuas amojuanti.’ Quej nopa quijto Toteco Dios.”

²¹ Huan nochi nopa masehualme tahuel cualanque huan quisencajque quenicatza quimictise Zacarías. Huan elqui yaya Tanahuatijquet Joás cati tanahuati ma quitapachoca Zacarías hasta miquis. Huajca nochi nopa masehualme quimaquilijque ica tet huan quimictijque ipan nopa calixpamit ten nopa tiopamit. ²² Quej nopa Tanahuatijquet Joás quicuepili nopa mijcatzi totajtzi Joiada cati elqui itata Zacarías por nochi iteicnelijcayo huan nochi itapalehuil. Quimicti icone. Huan quema Zacarías miquiyaya, quijto: “TOTECO xiquita cati techchihuilíaj huan xiquintaxtahui quej quinamiqui.”

Nopa Siria ehuaní calajque ipan tali Judá

²³ Huan quema xihuitic, sempa hualajque tali Siria ehuaní huan calajque ipan tali Judá huan Jerusalén. Huan quinmictijque nochi nopa tayacanani ten tali Judá huan quincuilijque miyac ricojyot huan quititanilijque nopa tanahuatijquet ten altepet Damasco. ²⁴ Huan nopa sirios nelía tatanque

masque amo miyaqui eliyayaj pampa TOTECO quinpalehui huan quin-temactili nopa Judá ehuaní inimaco nopa soldados ten tali Siria. Huan masque nopa Judá ehuaní nelía miyaqui eliyayaj, amo teno huelque quichi-huaj pampa quitahuelcajtoyaj TOTECO Dios cati elqui ininTeco inihuejcapan tatahua. Huan quej nopa TOTECO quitatzacuiliti nopa Tanahuatijquet Joás.

²⁵ Huan quema nopa sirio masehualme mocuetque inintal, mocajqui Joás tahuel cocojtoc ten nopa tatehuilisti. Huan pampa quimictijtoya Zacarías, icone Joiada, itequipanojcahua Joás quisencajque para quimictise. Huan quimictijque ipan itapech huan quitalpachojque ipan Ialtepe David. Pero amo quitalpachojque campa quintalpachojtoyaj sequinoq tanahuatiani.

²⁶ Huan ya ni inintoca nopa tacame cati quimictijque Joás: Zabad, icone Simeat nopa amonita tacat, huan Jozabad, icone Simrit ten tali Moab.

²⁷ Nochi cati panoc ica itelpocahua Joás huan nochi tamanti cati amo cuali cati nopa tajtolpanextiani quiiijtoque quiajsisquía Joás, huan quenicatza quicualtali nopa tiopamit, nochi eltoc ijcuilijtoc ipan Nopa Amatapohuali ten Nopa Tanahuatiani. Huan quema Joás mijqui, itelpoca cati itoca Amasías pejqui tequiti quej tanahuatijquet.

25

Amasías pejqui tanahuatía ipan tali Judá

(2 R. 14:1-22)

¹ Amasías quipiyayaya 25 xihuit quema pejqui tanahuatía huan tanahuati ipan altepet Jerusalén 29 xihuit. Inana itoca eliyaya Joadán huan ehua altepet Jerusalén. ² Huan Amasías quichijqui cati cuali iixpa TOTECO, masque amo nelía quitequipano ica nochi iyolo.

³ Quema Amasías ya quipixqui temachili ipan itequi quej tanahuatijquet, quinmicti nochi nopa tacame cati quimictijque itata, Joás. ⁴ Pero amo quinmicti ininconeua pampa quitepanitac cati ijcuilijtoc ipan iley Moisés campa quiiijtohua: “Amo xiquinmictica tetatme por inintajtacolhua ininconeua, yon coneme por inintajtacolhua inintatahua. Quema monequi anquimictise se masehuali, xijmictica por cati yaya itajtacolhua.”

⁵ Teipa Amasías quinsentili nochi isoldados ten tali Judá huan Benjamín huan quintali ica pamit ica inihueyi tata. Huan ipan iixhuihua sese familia, quitali se inintayacanca. Nojquiya quichijqui se censo ten nochi cati quipiyayayaj 20 xihuit para huejcapa. Huan quilitac para eliyayaj 300 mil soldados. Nochi injuanti eliyayaj tapejpenilme para yase ipan tatehuilisti huan nochi quimatiyayaj quitequihuía cuataminti huan yolixtzajcayot ten teposti. ⁶ Huan nojquiya quintemo 100 mil soldados ten tali Israel ica norte huan quintaxtahui ica 3 mil 400 kilos ten plata para mochihuase isoldados.

⁷ Pero hualajqui se itajtolpanextijca Toteco Dios huan quiiilhui:

—Tanahuatijquet Amasías, amo xiquinhuica ipan tatehuilisti nopa soldados ten tali Israel ica norte pampa TOTECO amo itztoc inihuaya cati hualahui ten tali Israel, yon cati hualahui ten Efraín. ⁸ Huan sinta tiquinhuicas mohuaya para mitzpalehuise ipan nopa tatehuilisti, Toteco Dios quichihuas ma amechtzentamiltica amocualancaitacahua pampa yaya quipiya chichahualisti para mitzpalehuis o para mitztzontamiltis.

⁹ Pero Amasías quej ni quiiilhui nopa itajtolpanextijca Toteco Dios:

—¿Huan taya nijchihuas ama ica nopa 3 mil 400 kilos ten plata cati ya niqinmacatoc nopa soldados ten tali Israel?

Huan nopa tajtolpanextijquet quinanquili:

—TOTECO quipiya chichahualisti para mitzmacas noja más miyac.

¹⁰ Huajca Amasías quincuepalti nopa soldados cati hualajtoyaj ten Efraín ipan tali Israel ica norte para amo yase ipan nopa tatehuilisti. Huan injuanti tahuel cualanque ica nopa tacame ten tali Judá pampa quincuepaltijque huan yajque ininchajchaj tahuel cualantoque.

¹¹ Huan Amasías moyolchicajqui huan quinhuicac isoldados para tatehuse ipan nopa tamayamit cati itoca Istat. Huan nozona quinmictijque 10 mil edomita tacame ten tali Seir. ¹² Huan nojquiya nopa soldados ten tali Judá quinitzquijque yoltoque seyoc 10 mil tacame ten Seir huan quinhuicaque campa se tepexit huan nozona quincuatepexihuijque. Huan nochi mijque ipan nopa teme nozona tatzinta.

¹³ Huan nopa soldados cati ehuan Efraín ipan tali Israel ica norte cati Amasías quincuepaltijtoya ininchajchaj huan amo quincajqui yase ihuaya ipan nopa tatehuilisti, injuanti calajque ipan altepeme ipan tali Judá huan ipan tali Samaria hasta altepet Bet Horón. Huan quinmictijque 3 mil masehualme huan quinichtequilijque miyac tamanti.

¹⁴ Huan quema Amasías mocuetqui ten nopa tatehuilisti ica nopa edomitame, quihualicac ininteteyohua nopa tali Seir ehuan. Huan quinquetzqui para elise ya iteteyohua huan quinhueyitali huan quintatili copali. ¹⁵ Huan ni tamanti cati Tanahuatijquet Amasías quichijqui nelía quicualancamacac TOTECO, huan yeca quititanili se tajtolpanextijquet para ma quilhuiti ni camanali:

—¿Para ten tiquinhueyitalía ininteteyohua nopa masehualme ten sequinoc talme? Ta tiquitac para nopa teteyome amo huelque quinmanahuáj nomaco.

¹⁶ Pero nopa tanahuatijquet quilhui:

—¿Ajquiya mitztalijtoc ta para techconsejomacas na cati nitanahuatijquet? Más cuali amo teno más xiquijto para amo nimitzmictis.

Pero nopa tajtolpanextijquet quilhui:

—Na nijmati para Toteco Dios ya quisencajtoc mitztzontamiltis pampa tiquinhueyichijtoc teteyome huan amo techtacaquilijtoc.

Judá ehuan motehuijque inihuaya tali Israel ehuan

¹⁷ Huan teipa Tanahuatijquet Amasías quincamanalhui cati quiconsejomacayayaj huan quintacaquili. Huan quititanqui se amatajcuiloli ipan Israel ica norte para Tanahuatijquet Joás cati eliyaya icone Joacaz huan iixhui Jehú. Huan quej ni quilhui: “Xihuala huan timoixnamiquise para motehuse.” ¹⁸ Pero Tanahuatijquet Joás quinanquili Amasías ica ni huicalot, quilhui: “Ipan nopa cuatitamit Líbano nopa tejtzonquilit quilhui nopa tiocuahuit: ‘Xijmaca nocone moichpoca para quichihuas isihua.’ Pero panoc nozona se fiero tapiyali huan moquetzqui ipan nopa tejtzonquilit huan quixacualo. ¹⁹ Ta tiAmasías tahuel timohueyimati pampa tiquintzontamilti nopa Edom ehuan, pero na nimitzilhuía para más cuali ximocahua mochaj. Amo xijchihua campeca para techtehúis pampa amo quisas cuali para ta huan nochi Judá ehuan.”

²⁰ Pero Amasías amo quitacaquili pampa Toteco Dios ya quisencajtoya para quitemactilis inimaco nopa israelitame ica norte huan imaco Joás inintanahuatijca pampa Amasías quinhueyitalijtoya ininteteyohua nopa Edom ehuan. ²¹ Huajca Tanahuatijquet Joás ten tali Israel ica norte nocualtali, huan yajqui ipan altepet Bet Semes ipan tali Judá huan nozona moixnamijque huan motehuijque ihuaya Amasías nopa tanahuatijquet ten tali Judá. ²² Huan tali Israel ehuan quintanque nopa Judá ehuan ipan

tatehuilisti. Huan miyac soldados ten Judá cholojtejqe. ²³ Huan Joás quiitzqui Amasías, tanahuatijquet ten tali Judá ipan altepet Bet Semes huan quihuicac ipan Jerusalén. Huan quisosolojqe 180 metros ten nopa tepamit cati qiyahualojtoya nopa altepet Jerusalén. Quisosolojqe ten nopa caltemit cati itoca Efraín hasta nopa caltemit cati itoca Angulo. ²⁴ Huan nojquiya quincuilijque nochi tamanti ten oro huan plata cati eltoya ipan itiopa Toteco Dios, cati quimocuitahuiyaya Obed Edom, huan nochi cati eltoya ipan nopa caltanahuatili. Nojquiya quihuicaque miyac tacame, huan nojquiya quihuicaque Obed Edom. Huan mocuetque ipan altepet Samaria.

²⁵ Pero Tanahuatijquet Amasías cati eliyaya icone nopa Tanahuatijquet Joás ten tali Judá noja itztoya seyoc 15 xihuit quema ya mijqui Tanahuatijquet Joás cati elqui icone Tanahuatijquet Joacaz ten tali Israel. ²⁶ Huan nochi cati quichijqui Amasías ten quema pejqui tanahuatía huan hasta mijqui eltoc ijcuilijtoc ipan Nopa Amatapohuali ten Nopa Tanahuatiani ten Tali Judá huan ten Tali Israel. ²⁷ Ten nopa tonali quema Amasías quitahuelcajqui TOTECO, nochi Jerusalén ehuan mosisinuyayaj ica ya. Teipa quisencajque para quimictise. Huajca yaya mochololti hasta altepet Laquis. Pero quitoquilijqe huan nopona quimictioj. ²⁸ Teipa quitailijque itacayo mictoc ipan carro cati quitilanayayaj cahuayojme huan quihualicaque hasta Jerusalén. Huan nopona quitalpachojque ipan nopa colonia cati itoca Ialtepe David campa quintalpachojtoyaj ihuejcapan tatahua.

26

Uzías mochijqui tanahuatijquet ipan tali Judá (2 R. 14:21-22; 15:1-7)

¹ Huan nochi nopa masehualme ten tali Judá, mosentilijque huan quichijque tanahuatijquet Uzías, icone Amasías cati quipiyayaya 16 xihuit. ² Huan quema ya mijqui itata, Tanahuatijquet Uzías quicualtali altepet Elot huan sempa quinmactili para elis iaxca tali Judá.

³ Tanahuatijquet Uzías quipiyayaya 16 xihuit quema pejqui tanahuatía huan tanahuati ipan altepet Jerusalén 52 xihuit. Inana itoca eliyaya Jecolías ten Jerusalén.

⁴ Huan quichijqui cati cuali iixpa TOTECO quej quichijqui itata, Amasías. ⁵ Huan ipan nochi nopa tonali quema Zacarías noja itztoya, Uzías monejnemilti xitahuac huan quitemo itapalehuil Toteco Dios. Zacarías eliyaya se tajtolpanextijquet cati quinextili Uzías ma quitepanita TOTECO. Huan ipan nopa tonali quema Uzías quitepanitayaya TOTECO, TOTECO nelía quitiochiuyayaya huan quipalehui para ma quisa cuali ipan nochi tamanti cati quichijqui.

⁶ Huan Tanahuatijquet Uzías ihuaya isoldados yajque quintehuitoj nopa filisteo masehualme. Huan quisosolojqe inintepa nopa altepeme Gat, Jabnia huan Asdod. Huan quinchijqui sequij yancuic altepeme nechca altepet Asdod huan ipan sequinoc partes ten inintal nopa filisteo masehualme. ⁷ Huan Toteco Dios quipalehui Uzías quema quintehuiyaya nopa filisteos huan nopa árabes cati itztoyaj ipan Gur Baal huan nojquiya quema quintehuiyaya nopa tali Amón ehuan. ⁸ Huan nopa amonita masehualme quitaxtahuiyayaj Uzías impuestos ten inintal senen xihuit. Huan nelía mohueyichijqui Tanahuatijquet Uzías pampa nopa talme ipan itanahuatilis ajsic hasta tali Egipto.

⁹ Huan nojquiya Uzías quichijqui torres cati nelía cuali tasenchuali ipan Jerusalén nechca nopa caltemit cati itoca Angulo, Tamayamit huan Esquina. Huan quinyahualo nopa torres ica tepamit. ¹⁰ Huan nojquiya Tanahuatijquet Uzías quichijqui torres ipan nopa huactoc tali para ipan tamocuitahuise. Huan quinchijqui miyac amelme pampa quinpixtoya miyac huacaxme ipan cuatitamit huan ipan tamayamit. Huan quipactiyaya tatojtocas huan quinpiyayaya miyac tacame cati quimocuitahuiyayaj imilhua huan ixocomeca milhua ipan cuali tali.

¹¹ Huan Tanahuatijquet Uzías nojquiya quinpixtoya miyac soldados cati tahuel quimatiyayaj tatehuíaj. Huan quema totequi para quisase, yahuiyayaj ica tatehuíaj pamt. Elqui Jeiel, nopa tajcuilolquet huan Amasías cati eliyaya gobernador cati quinxelotoya ica miyac pamt. Huan Hananías cati eliyaya se ihueyi tequitica nopa tanahuatijquet quinyacanqui nochi nopa soldados. ¹² Huan 2 mil 600 tayacanani ten familias cati tahuel quimatiyayaj tatehuíaj quinahuatiyayaj sesen pamt ten inisoldados cati yolchicahuaque. ¹³ Huan inimaco ni tayacanani itztoyaj 307 mil 500 soldados cati nelía quipiyayayaj tetili huan hueliyayaj quipalehuíaj nopa tanahuatijquet para quítehuis cati hueli icualancaítaca cati quicuatotonisquía. ¹⁴ Huan Tanahuatijquet Uzías quinmacac nochi nopa soldados nochi cati monequiyaya quitequihuse para momanahuise. Quinmacac iniyolixtzajca ten teposti, inincuatamin cati huehueyac, inincuatatzajca ten teposti huan se tepostzajcayot para motalilise quej iniyoyo para amo quinajsis ipan inintacayo nopa cuataminti cati lementoque. Huan quinmacaque cuahuitoli huan tatehuitatzti para tatehuse. ¹⁵ Huan nojquiya quinnahuati nopa tacame ten altepet Jerusalén cati nelía talnamiquij para ma quichihuilica huejhueyi teposme para ica tatehuse. Huan nopa teposme quitallijque campa más huejcapa ipan tepamit huan ipan torres. Huan ica nopa teposme quimajcahuayayaj cuataminti huan teme cati huejhueyi. Huan nelía mohueyichijqui Tanahuatijquet Uzías huan campa hueli talme nochi quimatque ten ihueyitilis pampa Toteco tahuel quipalehui ica nochi tamanti huan teipa quipixqui miyac chicahualisti.

Uzías tajtacolchijqui huan Toteco quitatzacuiliti

¹⁶ Pero quema Tanahuatijquet Uzías ya quipixtoya miyac chicahualisti, pejqui tahuel mohueyimati huan yeca huetzqui. Uzías tahuel quiixpanoc TOTECO Dios cati elqui iteco pampa calajqui ipan itiopa TOTECO huan quitati copali ipan nopa taixpamt para copali. ¹⁷ Pero iica calajqui nopa totajtzi Azarías inihuaya 80 totajtziti ten TOTECO huan nochi eliyayaj tacame cati yolchicahuaque. ¹⁸ Huan inijuanti quilhuijque: “Tanahuatijquet Uzías, ta amo motequi para tijtatis copali para TOTECO. Ni totequi titotajtziti cati tiiteipa ixhuhua Aarón, pampa Toteco techiyocatalijtoc para tijchihuase ni tequit. Huajca xiquisa pampa tiquixpanotoc TOTECO huan yaya mitztatzacuilitis por cati tijchijtoc.”

¹⁹ Huan Tanahuatijquet Uzías tahuel cualanqui ica nopa totajtziti huan amo quinejqui quicajtehuas nopa ticomit cati quipixtoya imaco para quitatis copali. Huan quema noja ijcatoya iniixpa nopa totajtziti nechca nopa taixpamt para copali ipan ichaj TOTECO, pejqui yoli icuaixco nopa cocolisti cati itoca lepra. ²⁰ Huan quema nopa hueyi totajtzi Azarías huan nochi nopa sequinoc totajtziti nozona quitaque para quipixtoc lepra, nimantzi quiquixtjque ten nopa tiopamt. Huan yaya nojquiya quinequiyaya quisas nimantzi pampa TOTECO quitatzacuiliti yaya.

²¹ Huan quej nopa, Tanahuatijquet Uzías quipixqui nopa cocolisti fiero cati itoca lepra hasta quema mijqui. Huan monejqui mocahuas iseltitzi ipan se cali cati eltoya huejca ten sequinoc. Ayecmo huelqui calaqui ipan ichaj TOTECO, yon ipan caltanahuatíl. Huan yeca quitalijque itelpoca cati itoca Jotam ma quiyiya tequiticayot huan pejqui tequiti ipan nopa caltanahuatili. Huan Jotam tanahuati ipan tali Judá.

²² Huan nochi cati quichijqui Tanahuatijquet Uzías ten quema pejqui tanahuatía huan hasta mijqui, eltoc ijcuilijtoc ipan nopa Amatapohuali Cati Quiijcuilo Tajtolpanextijquet Isaías cati icone Amoz. ²³ Huajca quema mijqui Uzías quitalpachojque iyoca ipan se campo santo cati iniaxca nopa tanahuatiani pampa quipixqui nopa cocolisti lepra. Huan mocajqui icone Jotam para tanahuatis ipan Judá.

27

Tanahuatijquet Jotam (2 R. 15:32-38)

¹ Huan Jotam quipiyayaya 25 xihuit quema pejqui tanahuatía huan tanahuati ipan alpetep Jerusalén 16 xihuit. Inana itoca eliyaya Jerusa huan elqui iichpoca Sadoc.

² Huan Jotam quichijqui cati cuali iixpa TOTECO quej quichijtoya itata, Uzías, pero yaya amo calajqui ipan itiopa TOTECO quej eliyaya se totajtzi quej quichijqui itata. Pero masque Jotam monejnemilti xitahuac, nopa masehualme ten nopa tali Judá quisenhuiquilijque quichijque cati fiero.

³ Huan Tanahuatijquet Jotam quicualtali nopa caltemit cati más huejcapa para calaquise ipan ichaj TOTECO, huan nojquiya quicualtali miyac ipan nopa tepamit campa nopa tepet Ofel. ⁴ Nojquiya quinchijchijqui altepeme ipan nopa tepeme ten tali Judá huan quichijqui tepamit ica torres campa hueli campa cuatitamit para ipan momanahuise masehualme. ⁵ Huan Jotam quintehui nopa amonita masehualme huan quintanqui. Huan sesen xihuit para eyi xihuit nopa amonitame quitaxtahuijque Jotam impuestos ten inintal ica nechca eyi toneladas huan tajco ten plata, se millón 200 mil litros ten trigo huan se millón 200 mil litros ten cebada.

⁶ Huan Tanahuatijquet Jotam nelía mohueyichijqui pampa ica miyac cuidado monejnemilti xitahuac iixpa TOTECO Dios cati elqui iTeco. ⁷ Huan nochi cati quichijqui Jotam huan nochi tatehuilisti huan sequinoc tamanti cati quichijqui eltoc ijcuilijtoc ipan Nopa Amatapohuali ten nopa Tanahuatiani ten Tali Judá huan Tali Israel.

⁸ Huan Jotam quipiyayaya 25 xihuit quema pejqui tanahuatía huan tanahuati ipan alpetep Jerusalén 16 xihuit. ⁹ Huan quema mijqui, quitalpachojque ipan Ialtepe David campa quintalpachojtoyaj ihuejcapan tatahua. Huan itelpoca, cati itoca Acaz, pejqui tanahuatía ipan Judá.

28

Acaz pejqui tanahuatía ipan tali Judá (2 R. 16:1-20)

¹ Acaz quipiyayaya 20 xihuit quema pejqui tanahuatía huan san tanahuati 16 xihuit ipan alpetep Jerusalén. Pero yaya amo quichijqui cati cuali iixpa TOTECO quej ihuejcapan tata David. ² Tanahuatijquet Acaz quichijqui cati fiero quej nopa tanahuatiani ten tali Israel quichijque. Nojquiya quiatili oro huan quinchijchijqui teteyome ten Baal para quinhueyitepanitase. ³ Huan

yajqui ipan nopa tamayamit cati itoca Ben Hinom huan quintatili copali nopa tetyome ten Baal. Huan amo san ya nopa quichijqui. Nojquiya quitati icone quej se tacajcahalisti quej quichihuayayaj nopa sequinoc tali ehuanu cati amo quiixmatiyayaj TOTECO. Inijuanti itztoyaj nopa masehualme cati nelia fiero cati Toteco quinquixti ipan ni tali inixpa nopa israelitame huejcayquiya. ⁴ Huan nojquiya Tanahuatijquet Acaz quitati tacajcahalisti huan copali ipan nopa taixpame cati eltoyaj ipan tepeme huan itzinta noch cuame.

⁵ Huan yeca TOTECO Dios cati elqui iTeco quitemactili Acaz huan imasehualhua inimaco nopa Siria ehuanu. Huan nopa Siria ehuanu quintanque huan quinhuaque miyaqui Judá ehuanu hasta altepet Damasco para tetequipanose. Nojquiya Toteco quitemactili Tanahuatijquet Acaz huan imasehualhua imaco nopa tanahuatijquet ten tali Israel. Huan quinnictijque nelia miyaqui soldados ten tali Judá. ⁶ Huan Tanahuatijquet Peka, icone Remalías, cati eliyaya tanahuatijquet ipan tali Israel ica norte hualajqui huan ipan san se tonal, quinnicti 120 mil soldados ten tali Judá. Nochi inijuanti eliyayaj tacame cati tahuel yolchicahuaque, pero amo teno huelque quichijque pampa quitahuelcajtoyaj TOTECO Dios cati elqui ininTeco inihuejcapan tatahua. ⁷ Huan Zicri, cati ehua tali Efraín huan eliyaya nelia yolchicahuac, quimicti Maasías cati elqui icone Tanahuatijquet Acaz. Nojquiya Zicri quimicti Azricam, itequitica Acaz cati más hueyi ipan icaltanahuatil, huan nojquiya quimicti Elcana iompa tequitica.

⁸ Huan nopa soldados ten tali Israel quinitzquijque 200 mil sihuame, sihuapilme huan oquichpilme ten tali Judá, huan quinhuaque ipan altepet Samaria para tetequipanotij. Huan nojquiya quinculijque miyac tamanti ricojyot huan quihuaque Samaria.

⁹ Pero ipan altepet Samaria ipan tali Israel, itztoya se itajtolpanextijca TOTECO cati itoca Obed. Yaya quinnamiquico nopa israelita soldados quema mocuepayayaj ten tali Judá huan quinnihui:

—TOTECO Dios cati elqui ininTeco tohuejcapan tatahua nelia cualanqui ica nopa Judá ehuanu huan yeca quicahuili xiquintanica. Pero ama amajuanti pano anquichijque cati fiero huan cati amo quinnamiqui. Amo anquintasojtaque yon quentzi huan anquinnictijque ica miyac amocualancayo. Huajca ama TOTECO cati itztoc ipan ilhuicac cualani ica amajuanti. ¹⁰ Amo san anquinnictijque, nojquiya anquinhualicatoque ni sihuame huan coneme ten Judá huan ten Jerusalén para anquinchihuase amotequipanocahua. Huajca ama amajuanti antajtacolchijtoque nojquiya iixpa TOTECO Dios cati amoTeco. ¹¹ Huajca techtacaquilica. Sempa xiquinhuaque ni sihuame huan coneme cati anquinhualicatoque para amechtequipanose huan xiquincahuatij ipan ininchajchaj pampa inijuanti amoicnhua. TOTECO nelia cualantoc ica amajuanti por cati anquichijtoque.

¹² Huan moquetzque sequij tayacanani ten tali Efraín cati inintoca Azarías, icone Johanán; Berequías, icone Mesilemot; Ezequías, icone Salum, huan Amasa, icone Hadlai, huan san se quinnihuijque nopa soldados cati mocuepayaj ipan nopa tatehuilisti. ¹³ Quinnihuijque:

—Amo xiquinhualicaca nica nopa sihuame huan coneme ten tali Judá pampa techtatacuiltis miyac TOTECO. San anquinequij achi más anquimiyaquilise totajtacolhua cati ya miyac. Huan Toteco tahuel cualanis icaajuanti.

¹⁴ Huajca nopa soldados quinmalacaniyque nopa sihuame huan coneme cati quinhualicatoyaj. Huan quicajque nochi nopa tamanti cati quincuillijtoyaj iniixpa nopa tayacanani huan nopa masehualme nozona. ¹⁵ Huajca nopa nahui tayacanani cati huejcapa eltoc inintoca, moquetzque huan quinquimacaque iniyoyo nopa sihuame huan coneme cati quinhualicatoyaj pampa itztoyaj xolome. Nojquiya quintalilijque inihuarachi, quintamacaque, quinquimacaque at huan quinpajtijque ica aceite ten olivo cati cocojtoyaj. Teipa quintalijque nochi cati tahuel siyajtoyaj ipan burrojme huan quinquimacaque, quinquahuatoj hasta altepet Jericó, cati nojquiya quitocaxtiaj nopa Altepet Ten Apachij Cuame cati eltoya nechca ininchajchaj nopa tacame. Huan nopa tayacanani ten tali Israel sempa mocuetque ica norte hasta altepet Samaria.

¹⁶ Huan ipan nopa tonal Tanahuatijquet Acaz ten tali Judá quitajtani nopa tanahuatijquet ten tali Asiria ma quipalehui. ¹⁷ Nopa tali Edom ehuan sempa calactoyaj ipan tali Judá huan quinquimacatoyaj miyaqui masehualme para quinchihuase inintequipanojcahua. ¹⁸ Huan nojquiya nopa flisteos calactoyaj ipan nopa altepeme cati eltoyaj campa tachiquili huan campa nopa Neguev huan moaxcatijtoyaj nopa altepeme Bet Semes, Ajalón huan Gederot. Nojquiya calactoyaj ipan altepeme Soco, Timna huan Gimzo ica nochi ininpilaltepehua huan nozona mochantalijtoyaj. ¹⁹ TOTECO quinicnotaliyaya Judá ehuan por itajtacol Tanahuatijquet Acaz pampa quinyolchicahuayaya Judá ehuan ma quixpanoca huan ma quitahuelcahuaca.

²⁰ Huan quema ajsico Tanahuatijquet Tiglat Pileser ten tali Asiria para quipalehuisquia Acaz, quitaijyohuili miyac. ²¹ Masque Acaz quiquixti nochi tamanti cati pajpatiyoy ipan itiopa TOTECO, huan ipan icaltanahuatil huan ipan ininchajchaj nopa tayacanani, huan quimacac nopa tanahuatijquet ten tali Asiria para quitaxtahuis para itapalehuil; amo quipalehui yon quentzi.

²² Huan quema Tanahuatijquet Acaz itztoya ipan se hueyi tequipacholi, yaya achi más tajtacolchijqui iixpa TOTECO. ²³ Quintatili tacajcahualisti nopa teteyome ten altepet Damasco pampa moilhui para nopa teteyome quipalehuijtoyaj nopa tanahuatijquet ten tali Asiria quema quitanqui ya huan sinta yaya quinquimacac tacajcahualisti, temachtí nopa teteyome quipalehuisquiaj nojquiya. Pero nopa teteyome amo teno quipalehuijque masque quintatili tacajcahualisti. San achi más huetzqui ya huan nochi imasehualhua. ²⁴ Teipa Tanahuatijquet Acaz quiquixti nochi nopa vasos ten oro huan nochi tamanti cati eltoya ipan ichaj Toteco Dios huan quinquimacac. Huan quitzajqui itiopa TOTECO para ayecmo aqui huelis calaquis. Huan tanahuati ma quichihuilica taixpame para teteyome campa hueli ipan altepet Jerusalén. ²⁵ Huan nojquiya quichijqui pilcaltziti ipan nochi altepeme ten tali Judá para nozona quintatilise copali nopa teteyome. Huan yeca ica ya nopa achi más quicualancamacac TOTECO Dios cati ininTeco ihuejcapan tatahua.

Mijqui Tanahuatijquet Acaz

²⁶ Huan nochi sequinoc tamanti cati quichijqui Tanahuatijquet Acaz ten quema pejqui itequi huan hasta mijqui, nochi eltoc ijcuillijtoc ipan Nopa Amatapohuali ten Nopa Tanahuatiani ten Tali Judá huan Tali Israel. ²⁷ Huan quema mijqui Acaz, quitalpachojque ipan Jerusalén. Pero amo quitalpachojque campa quitalpachojtoyaj nopa tanahuatiani ten nochi tali Israel. Huan pejqui tanahuatia itelpoca cati itoca Ezequías ipan tali Judá.

29

*Ezequías pejqui tanahuatía ipan tali Judá
(2 R. 18:1-3)*

¹ Ezequías quipiyayaya 25 xihuit quema pejqui tanahuatía huan tanahuati 29 xihuit ipan altepet Jerusalén. Inana itoca Abías huan eliyaya iichpoca Zacarías. ² Huan Ezequías quichijqui cati cuali iixpa TOTECO quej quichijtoya ihuejcapan tata, David.

³ Ipan nopa achtohui metzti ipan nopa achtohui xihuit ten itequi quej tanahuatijquet, quincualchijchijqui nopa caltemit campa calaquij ipan nopa tiopamit huan quintapo. ⁴ Nojquiya quinnotzqui nochi nopa totajtztitzi huan levitame ma mösentilica campa nopa piso cati eltoya iguespa tiopamit ica campa hualquisa tonati. ⁵ Huan quinihui: “Techtacaquilica amojuanti cati anlevitame. Ximopajpacaca iixpa TOTECO Dios cati elqui ininTeco tohuejcapan tatahua para huelis anquitequipanose. Nojquiya xijpajpacaca ni tiopamit cati iaxca huan xijquixtica nochi cati fiero cati eltoc calijtic.

⁶ Totatahua tahuel mosisinijque iixpa TOTECO Dios cati toTeco huan nelía quichijque cati fiero iixpa. Quitahuelcajque TOTECO huan moicancuetque ten itiopa huan ayecmo quinejque quihueyitepanitase. ⁷ Quitzajque nopa caltemit ten ni tiopamit itamapa huan quinsehuijque nopa taahuilme. Ayecmo quitatijque copali huan ayecmo quimacaque Toteco Dios cati toTeco tiisraelitame nopa tacajcahualisti tatatili ipan taixpamit. ⁸ Huan yeca ama TOTECO techtatzacuiltijtoc nochi tojuanti cati tiehuani ipan tali Judá huan altepet Jerusalén. Quichijtoc para ma titaijyohuica huan ma tipinahuaca. Quichijtoc para nochi talme ma techijiyaca huan ma techitajilhuica quej anquijtaj ama. ⁹ Yeca totatahua mijque ipan tatehuilisti, huan totelpocahua, toichpocahua huan tosihuajhua quinhuicaque ipan sequinoc talme para tequipanose. ¹⁰ Pero ama na nijchihuas se yancuic camanali ihuaya TOTECO Dios cati toTeco tiisraelitame para yaya ayecmo ma techtatzacuilti. ¹¹ Noicnihua, amo xiquelcahuaca yon se tequit cati monequi anquichihuase pampa antotajtztitzi. TOTECO amechtapejpenijtoc para anquitequipanose nochipa huan para anquitatilise copali.”

¹² Huajca nimantzi pejque tequitij ni levitame cati nozona itztoyaj:
Ten nopa huejcapan tata Coat tequitique:

Mahat, icone Amasai, huan Joel, icone Azarías.

Ten nopa huejcapan tata Merari tequitique:

Cis, icone Abdi, huan Azarías, icone Jehalelel.

Ten nopa huejcapan tata Gersón tequitique:

Joa, icone Zima, huan Edén, icone Joa.

¹³ Ten nopa huejcapan tata Elizafán tequitique:

Simri huan Jeiel.

Ten nopa huejcapan tata Asaf tequitique:

Zacarías huan Matanías.

¹⁴ Ten nopa huejcapan tata Hemán tequitique:

Jehiel huan Simeí.

Ten nopa huejcapan tata Jedutún tequitique:

Semaías huan Uziel.

¹⁵ Ni tacame achtohui quinsentilijque iniicnihua cati eliyayaj levitame huan totajtztitzi huan mopajpacque iixpa TOTECO. Teipa calajque ipan itiopa para quipajpacase quej TOTECO quinnahuatijtoya ica nopa tanahuatijquet.

¹⁶ Huan nopa totajtztitzi pejque tapajpacaj campa más calijtic ipan nopa tiopamit huan quiquixtijque nochi tamanti cati amo cuali cati quipantijque

calijtic huan quiquixtijque hasta itamapa nopa tiopamit. Huan nopona levitame quisentilijque nopa tamanti huan quihuicaque quitatitoy ipan se tamayamit nechca hueyat Cedrón. ¹⁷ Pejque quichihuaj nochi nopa tequit ipan nopa achtohui tonali ten nopa achtohui metzti*, huan ica chicueyi tonati ya tapajpactoyaj hasta itamapa nopa tiopamit. Huan tequitique seyoc chicueyi tonati para quitamipajpacase nochi nopa tiopamit campa hueli. Huajca ipan 16 itequi nopa achtohui metzti ya quitamiltijtoyaj quipajpacaj nochi itiopa Toteco. ¹⁸ Teipa yajque quiitator Tanahuatijquet Ezequías huan quiilhuijque: “Ya eltoc tapajpacti nochi cati eltoc ipan itiopa TOTECO, huan nopa taixpamit huan nochi tamanti cati motequiuhúa nopona. Nopa mesa campa quitalise nopa pantzi cati tatzejtelolitic huan nochi cati monequi nopona nojquiya eltoc tapajpactic. ¹⁹ Huan nochi nopa vasos cati Tanahuatijquet Acáz quiquixti ipan itiopa Toteco nojquiya tiquinsentilijtoque huan ya tiquinpajpactoque. Ama ya eltoc ipan itiopa TOTECO nechca nopa taixpamit.”

Sempa quichihuaj tasentili ipan itiopa Toteco

²⁰ Huan tonili Tanahuatijquet Ezequías mijquejqei nelijnaltzi huan quinsentili nochi tequichihuani ipan nopa altepet huan sentic yajque ipan itiopa TOTECO. ²¹ Huan quinhuicaque 7 becerros, 7 oquich chivojme, 7 borregojme huan 7 chivojme para quitencahuase quej tacajcahalisti para tajtacoli para quinpajpacas nopa tanahuatiani, nopa tiopamit huan nochi Judá ehuan. Huan Tanahuatijquet Ezequías quinnahuati nopa totajtzitzi cati eliyayaj iixhuihua Aarón ma quimacaca nopa tapiyalme TOTECO ipan itaixpa quej se tacajcahalisti tatatili. ²² Huajca nopa totajtzitzi quinmictijque nopa becerros huan nopa totajtzitzi quiselijque inieso huan quiijtzelojque ipan taixpamit. Teipa quinmictijque nopa oquich chivojme huan quichijque san se. Huan teipa quinmictijque nopa borregojme huan san se quichijque.

²³ Huan teipa quinhualicaque nopa oquich chivojme cati elque quej tacajcahalisti para tajtacoli huan quintalijque iixpa nopa tanahuatijquet huan nochi itequiticahua huan inijuanti quitelijque inimax ininpani. ²⁴ Huan huajca nopa totajtzitzi quinmictijque nopa chivojme quej se tacajcahalisti para tajtacoli. Huan quitoyajque inieso ipan taixpamit para quiixtzacuilise TOTECO inintajtacolhua israelitame. Tanahuatijquet Ezequías temacatoya tanahuatili para nopa oquich chivojme ma elica se tacajcahalisti para tajtacoli para nochi israelitame.

²⁵ Huan Ezequías nojquiya quintali levitame ipan itiopa Toteco para quihueyichihuase Toteco ica tatzotzonal, quej platillos, salterios huan arpas. Quitamichijqui nochi nopa tanahuatili cati TOTECO quimacatoya David huejcajquiya ica nopa tachixquet Gad huan nopa tajtolpanextijquet Natán.

²⁶ Huan nopa levitame ijcatoyaj ica tatzotzonal cati David quichijtoya huan totajtzitzi ijcatoyaj ica tapitzali inimaco. ²⁷ Huajca Ezequías tanahuati ma quitencahuaca nopa tacajcahalisti para quitatise ipan nopa taixpamit. Huan quema pejqe quitatij nopa tacajcahalisti pejqe nojquiya quihueyichihuaj TOTECO ica huicat huan ica tapitzali huan ica nochi nopa tatzotzonal cati David quichijtoya. ²⁸ Huan nochi nopa miyac masehualme cati mosentilijtoyaj, quihueyimatiyayaj TOTECO. Huan nopa huicani quihueyichihuayaj Toteco ica huicat huan nopa totajtzitzi quipitzayayaj inintapitzal. Huan quej nopa quichijque hasta tanqui tata nochi nopa tacajcahalisti. ²⁹ Teipa quema tanqui tata nochi nopa miyac tacajcahalisti,

* 29:17 29:17 Quema moseliltía cuame ipan toxihui cati ama.

nopa tanahuatijquet huan nochi nopa masehualme cati itztoyaj nozona motancuaquetzque huan quihueyichijque TOTECO.³⁰ Teipa Tanahuatijquet Ezequías huan nochi nopa tequichihuani quinnahuatijque nopa levitame ma quihueyichihuaca Toteco ica nopa camanali cati quicuatali David huan nopa tajtolpanextijquet Asaf. Huan nopa levitame quipaquilismacaque TOTECO ica nochi iniyolo huan teipa motancuaquetzque huan quihueyichijque.

³¹ Huan Ezequías quinilhui nochi nopa tacame cati mosentilijtoyaj: “Nochi amojuanti anmijyocatalijtoque para TOTECO. Huajca ama ximonechcahuica huan xijhualicaca tacajcahualisti huan ofrendas para anquitascamatilise Toteco.”

Huajca nochi nopa masehualme cati mosentilijtoyaj quihualicaque tacajcahualisti o ofrendas para quitascamatilise Toteco. Huan nojquiya nochi cati quipixque paquili ipan iniyolo para temacase tacajcahualisti tatatili iixpa TOTECO, quihualicaque.³² Huajca nopa masehualme quimacaque Toteco quej tacajcahualisti tatatili: 70 torojme, 100 oquich chivojme huan 200 pilborregoijtzi, huan nochi ni tapiyalme elque tacajcahualisti tatatili para Toteco.³³ Huan cati temacaque quej ofrendas para quitascamatise TOTECO elque 600 torojme huan 3 mil borregoyme.³⁴ Pero nopa totajtztzi amo miyaqui eliyayaj huan yeca amo huelyayaj quitamichihuaj nochi nopa tequit cati monequi para quinmictise nopa tapiyalme cati elque para tacajcahualisti tatatili quej quijto tanahuatili. Huajca iniicnihua, nopa levitame, quinpalehuijque ipan nopa tequit hasta tanque. Huan sequinoc totajtztzi nojquiya mopajpajque para huelise tequitise iixpa TOTECO. Pampa nopa levitame quipixque más cuali iniyolo para mocuepase ica TOTECO huan nimantzi motemacaque para mopajpacase para sempa huelise quitequipanose, pero nopa totajtztzi amo.³⁵ Huan nelia oncayaya tahuel miyac tapiyalme para tacajcahualisti tatatili huan iyoca oncayaya nopa tacajcahualisti ten xocomecat iayo cati monequi quitoyahuase sentic ica sese tacajcahualisti tatatili. Huan nojquiya oncayaya tahuel miyac ininchiyajca nopa sequinoc tapiyalme cati elque para se tacajcahualisti para tasehuilisti.

Huajca quej ni elqui quema sempa quitapojque itiopa TOTECO, huan sempa pejqque quimactilíaj TOTECO tacajcahualisti nozona.³⁶ Huan nelia pajqui Tanahuatijquet Ezequías huan nochi nopa masehualme pampa Toteco Dios quinpalehuijtoya para sempa quipehualtise itequi nopa tiopamit, huan nochi quisencajtoyaj ica se talojtzi.

30

Ezequías quichijqui nopa Ilhuit Pascua

¹ Teipa Ezequías teyolmelajqui ipan nochi tali Israel huan tali Judá huan quititanqui amatajcuiloli para nochi ipan tali Efraín huan Manasés para ma hualaca ipan itiopa TOTECO ipan altepet Jerusalén para quichihuase nopa Pascua Ilhuit.² Huan nopa tanahuatijquet huan nochi itayacancahua huan nochi nopa masehualme quisencajque para quichihuase nopa ilhuit ipan nopa ompa metzti ipan inicalendario*.³ Amo huelque quichihuaj nopa ilhuit ipan nopa achtohui metzti ipan inicalendario quej quijto tanahuatili pampa ayemo miyac totajtztzi mopajpactoyaj iixpa TOTECO para huelis quitequipanose. Nojquiya ayemo quimatiyayaj nochi masehualme ten campa hueli altepeme para mosentilise ipan Jerusalén. Yeca quisencajque para quichihuase nopa ilhuit ipan nopa ompa metzti ipan

* 30:2 30:2 Ipan abril o mayo ipan tocalendario ten ama.

toisraelita calendario. ⁴ Huan nopa tanahuatijquet huan nochi masehualme quinpacti para quisencahuase quichihuase nopa ilhuit ipan ne seyoc metzti. ⁵ Huan quintitanque tayolmelahuani ten altepet Beer Seba ica sur hasta Dan ica norte. Huan quinnotzque israelitame ma hualaca ipan altepet Jerusalén para quichihuase nopa Pascua Ilhuit para TOTECO Dios cati ininTeco israelitame pampa ya huejcajtoya amo hualayayaj miyac israelitame para quielnamiquise nopa ilhuit quej eltoya ijcuilijtoc ipan tanahuatili para nochi quichihuase.

⁶ Huajca Tanahuatijquet Ezequías tanahuati ma yaca tayolmelahuani ipan nochi tali Israel huan tali Judá huan quihuicase se amatajcuiloli cati quiijto: “Anisraelitame, ximocuepaca sempa ica TOTECO Dios cati ininTeco tohuejcapan tatahua Abraham, Isaac huan Israel. Huan yaya mocuepas ica tojuanti masque nelía pilquentzi timocahuaj cati tiyoltoque cati timomanahuijtoque inimaco nopa tanahuatiani ten tali Asiria. ⁷ Amo ximochihuaca quej amotatahua huan amoicnihua cati mosisinijque ica TOTECO Dios cati ininTeco tohuejcapan tatahua. Inijuantijya cati quimahuispolojque TOTECO, huan yeca quintemactili inimaco sequinoc masehualme para ma quinpinahualtica huan ma quintzontamiltica quej ama anquiiitaj. ⁸ Huajca ama amo ximoyoltetilica quej amotatahua moyoltetilijque. Ximotemacaca ica TOTECO huan xihualaca nica ipan itioipa cati yaya quiyocatalijtoc para elis tatzejtzeloltic para nóchipa. Xihualaca huan xijhueyichihuaquij TOTECO Dios cati amoTeco huan yaya ayecmo tahuel cualanis ica tojuanti. ⁹ Pampa sinta amojuanti amocuepase sempa para anquitoquilise TOTECO, yaya quichihuas para quintasojtase huan quincahuilise ma mocuepaca sempa ipan inintal nochi amoicnihua huan amoconehua cati quinhuicatoque amocualancaitacahua ipan sequinoc talme para tequipanose. Pampa hueyi iyolo TOTECO Dios cati toTeco huan nelía amechicnelía. Sinta amocuepase huan anquitoquilise ica nochi amoyolo, yaya amo moicancuepas ica amojuanti.”

Quielnamijque nopa Pascua Ilhuit

¹⁰ Huajca nopa tayolmelahuani quisque huan yajque ipan nochi tali Efraín huan Manasés para quinnotzase masehualme. Panoque ipan nochi altepeme hasta ajsitaj ipan tali Zabulón. Pero nechca nochi masehualme ten nopa altepeme san quinhuetzquiliyayaj huan san quinpinajtiyayaj nopa tayolmelahuani. ¹¹ Pero sequij masehualme ten nopa huejhueyi familias Aser, Manasés huan Zabulón moicnonejque iixpa Toteco huan yajque ipan altepet Jerusalén. ¹² Nojquiya Toteco Dios quinmacayaya masehualme ipan tali Judá san se iniyolo huan quinyoltacaniyaya para quinequise quitepanitase nopa tanahuatili cati temacayaya nopa tanahuatijquet huan nochi tequichihuani.

¹³ Huan tahuel miyac masehualme mosentilijque ipan Jerusalén ipan nopa ompa metzti ipan inixihui para quichihuase nopa Pascua Ilhuit quema quicuaaj nopa pantzi cati amo quiypiya tasonejcajot. ¹⁴ Huan teipa pejque quinsolohuaj nopa inintaixpahua teteyome ipan Jerusalén. Nojquiya quinquixtijque nopa taixpame campa quintatiliyayaj copali huan nochi quitepejque ipan nopa tamayamit nechca hueyat Cedrón. ¹⁵ Huan ipan 14 itequi nopa ome metzti ipan toisraelita calendario[†], quinmictijque nopa

[†] 30:15 30:15 Ipan itamiya abril o ipejya mayo ipan tocalendario ten ama.

pilborregoitzitzi para nopa Pascua Ilhuit. Huan nopa totajtzitzi huan levitame cati amo mopajpactoyaj para sempa huelise tequipanose tiopan calijtic tahuel mopinajque, huan nimantzi motapajpacchijque huan quihuicaque tacajcahualisti tatatili ipan itiopa TOTECO. ¹⁶ Huan teipa pejque quichihuaq cati elqui itequi para quichihua ipan itiopa TOTECO quej quijto itanahuatilhua Moisés, yaya cati elqui itequipanojca Toteco Dios. Huan nopa levitame quinhualiquiliyayaj nopa totajtzitzi inieso nopa tapiyalme huan nopa totajtzitzi quijtzelo huayayaj ipan nopa taixpamit. ¹⁷ Huan pampa nelía miyac israelitame hualajtoyaj ten huejca cati amo mopajpactoyaj iixpa TOTECO, monejqui nopa levitame quimictise nopa pilborregoitzitzi ten Pascua Ilhuit para injuanti huan quintapajpacchihuase huan quiniyocatalise para Toteco. Huan pampa nelía miyaqui, amo quinaxili tonali para quinpajpacase nochi masehualme. ¹⁸ Nechca nochi ten nopa masehualme cati hualajque ten nopa huejhueyi familias Efraín, Manasés, Isacar huan Zabulón amo mopajpactoyaj. Pero Tanahuatijquet Ezequías motatajti para injuanti huan quincahuilijque ma quicuaca nopa Pascua tacualisti masque amo senquisa quej ijcuilijtoc para ajquiya hueli quicuase. Tanahuatijquet Ezequías motatajti huan quijto: “TOTECO, cati tijpiya hueyi moyolo, xiquintapojpolhui nochi ni masehualme cati quinequij mitztoquilise ica se iniyolo cati cuali moixpa huan quinequij quicuase nopa Pascua tacualisti. ¹⁹ Quena, TOTECO Dios, ta cati tielqui ininTeco tohuejcapan tatahua, xiquintapojpolhui masque amo motapajpacchijtoque quej quijtohua nopa tanahuatili cati ta tijmacac Moisés para motapajpacchihuase cati quielnamiquire ni Pascua.”

²⁰ Huan TOTECO quitacaquili Ezequías quema yaya motatajti huan quintapojpolhui nopa masehualme. ²¹ Huaica nochi nopa israelitame cati itzttoyaj ipan altepet Jerusalén para quielnamiquire nopa Pascua Ilhuit, ilhuichijque ica miyac paquilisti. Huan nopa ilhuit huejcayqui chicome tonati. Huan mojmosta nochi nopa levitame huan totajtzitzi quihueyitaliyayaj TOTECO huan quihuicatiyayaj ica nochi iniyolo huan tatzotzonayayaj ica miyac tatzotzonalí para quipaquilismacase. ²² Huan Tanahuatijquet Ezequías quintascamatili nochi nopa levitame huan quinyolchicajqui ipan inintequi pampa tahuel hueliyayaj huicaj huan tatzotzonaj huan nochi caquis-tiyaya yejyectzi. Huan quitequipanohuayayaj TOTECO ica nochi iniyolo.

Huan quichijque nopa Pascua Ilhuit para chicome tonati huan quitencajque tacajcahualisti para moyoltalise ica TOTECO huan para quitascamatilise yaya cati elqui ininTeco inihuejcapan tatahua. ²³ Huan nochi nopa masehualme sentic moilhijque cuali para quichihuase nopa ilhuit seyoc chicome tonati. Huaica ilhuichijque seyoc chicome tonati ica miyac paquilisti. ²⁴ Huan Ezequías, nopa tanahuatijquet ten tali Judá, quinmacac nopa masehualme se mil becerros huan 7 mil borregoime. Nojquiya nopa tayacanani quinmacaque nopa masehualme 1000 becerros huan 10 mil borregoime para quinmacase TOTECO. Huan mojmosta más totajtzitzi mopajpacayayaj para sempa huelis calaquise ipan inintequi. ²⁵ Huan nelía yolpajque nochi masehualme ten tali Judá. Huan nojquiya tahuel pajque nopa totajtzitzi, levitame huan nochi masehualme cati hualajtoyaj ten tali Israel, inihuaya nopa masehualme cati amo israelitame cati nojquiya hualajque ten tali Israel ica norte. ²⁶ Huan nelía oncac miyac paquilisti ipan altepet Jerusalén pampa amo quichijtoyaj se ilhuit quej nopa hasta huejcayquiya quema Salomón, icone David, eliyaya tanahuatijquet. ²⁷ Huan teipa nochi totajtzitzi huan levitame moquetzque huan quintiochijque nopa

masehualme cati mosentilijtoyaj ipan nopa ilhuit. Huan TOTECO quinta-quaili ipan ilhuicac campa itztoc ipan ichaj cati tatzejtzeltoc.

31

¹ Huan quema tanqui nochi nopa ilhuit, nopa israelitame cati hualajtoyaj yajque campa hueli ipan nochi altepeme ipan talme Judá, Benjamín, Efraín huan Manasés, huan quintapanque nochi nopa teteyome ten cati hueli dios huan nopa taquetzalme para quitepanitase nopa teteyot Asera. Nojquiya quisolójque nochi pilcaltziti huan taixpame cati eltoyaj huejcapa ipan tepeme. Huan teipa nochi israelitame mocuetque ininchajchaj ipan inialtepe.

² Huan teipa Ezequías quitali nopa totajtzi huan levitame para ma itztoca ipan miyac pamt cati mopatatiyase ipan inintequi para quichihuase nopa tamanti tequit cati quipixque tanahuatili para quichihuase. Nopa totajtzi quiptiyayaj inintequi para quimacase Toteco nopa tacajchualisti tatatili, huan quitencahuase nopa tacajchualisti para masehualme ma moyoltalica ica TOTECO huan para quitascamtilise. Levitame quipixque inintequi para moquetzase campa caltemit ipan nopa tiopamt huan para quipaquilismacase TOTECO. Nojquiya monejqui quitequipanose ica ten hueli tequit cati quintocaros quichihuase. ³ Huan nojquiya Tanahuatijquet Ezequías quinmacac tapiyalme cati yaya iaxcahua para quitencahuase mojmosta ica injaloc huan ica tiotac quej tacajchualisti tatatili. Nojquiya quinmacac cati quitencahuasquáj ipan sábado, nopa tonali para mosiyaj-quetzase israelitame, huan ipan metzti yancuic huan ipan nochi ilhuime cati oncayaya ipan se xihuit quej ijcuilijtoc ipan itanahuatilhua TOTECO. ⁴ Huan nojquiya nopa tanahuatijquet quinilhui nochi Jerusalén ehuan para ma quinmacaca nopa totajtzi huan levitame nopa parte ten ininpixquilis cati quintocarohuayaya para amo monequis nopa levitame ma motequihuica ipan seyoc tequit para quinpanoltise ininfamilias. Quej nopa mojmosta hueli motequihuise ipan itequi TOTECO senquisa quej eltoc ijcuilijtoc ipan itanahuatilhua TOTECO. ⁵ Huajca quema nopa israelitame campa hueli quimatque nopa tanahuatili cati temacatoya nopa tanahuatijquet, nimantzi ica miyac paquilisti temacaque nopa achtohui pixquisti ten trigo, xocomecat iayo, aceite, necti huan nochi tamanti cati quieliltiyaj ipan mili. Quena, quihualicaque majtacti por ciento ten nochi tamanti cati quipixtoyaj.

⁶ Huan nopa masehualme ten tali Israel cati hualajtoyaj para mocahuase ipan tali Judá huan nojquiya nopa masehualme cati ipa ehuan ipan nochi altepeme ten tali Judá quihualicaque majtacti por ciento ten inihuacaxhua huan ininborregojhua, huan ten nochi tamanti cati tatzejtzeltoc cati quiyocacajtoyaj para TOTECO Dios cati ininTeco. Huan quema quihualicaque nopa tamanti, quitenque ica tamontomit cati huejhueyi. ⁷ Ipan nopa metzti eyi ipan toisraelita calendario*, pejque quisentilíaj nochi tamanti cati quihualicayaj nopa masehualme. Huan ipan nopa metzti chicome ipan inixihui†, ayemo tantoyaj quiajocuij pampa noja ajsiyaya más miyac tamanti. ⁸ Huan quema Ezequías huan nopa tequichihuani quiiataj para tahuel miyac tamanti montonijtoya, nelía quihueyichijque TOTECO huan quintascamatilijque nopa israelitame cati quihualicatoyaj. ⁹ Huan nopa tanahuatijquet quintatzintoquili nopa totajtzi huan levitame quenicatza quisentilijtoyaj nochi nopa tamanti pampa nelía miyac eliyaya. ¹⁰ Huajca nopa hueyi totajtzi Azarías cati elqui se iixhui Sadoc quinanquili huan

* **31:7** 31:7 Elis ipan mayo o junio ipan tocalendario ten ama. † **31:7** 31:7 Ipan septiembre o octubre ipan tocalendario ten ama.

quihlui: “Ten nopa tonali quema masehualme pejqe quihualicaj nochi ni tamanti ipan itioipa Toteco, tojuanti tijpixoque miyac totacualis huan hasta mocajtoc tahuel miyac pampa TOTECO quintiochijtoc imasehualhua ica miyac tamanti.”

¹¹ Huajca Ezequías tanahuati ma quichihuaca cuartos ipan itioipa TOTECO para quiajocuisse nozona nochi tamanti cati quisentilijtoyaj. Huan quej nopa quichijque. ¹² Huan quema ya quichijtoyaj nopa cuartos, quiajojque nozona nochi nopa achtohui pixquisti cati masehualme quihualicaque, nopa majtacti por ciento ten nochi tamanti huan nochi nopa tamanti cati quiiyocacajtoyaj para TOTECO. Huan quitequimacaque Conanías, se levita, ma eli tayacanquet para ma quimocuitahuis nochi nopa tamanti. Huan quitequitali iicni Simeí para ma eli itapalehuijca. ¹³ Huan nojquiya quitequimacaque Jehiel, Azazías, Nahat, Asael, Jerimot, Jozabad, Eliel, Ismaquías, Mahat huan Benaía para ma quipalehui Conanías huan iicni, Simeí. Quej nopa quitequimacac Tanahuatijquet Ezequías huan Azarías nopa hueyi tayacanquet ipan itioipa Toteco Dios. ¹⁴ Huan Coré, se levita tacat cati icone Imna, quipixtoya nopa tequit para quimocuitahuis nopa caltemit campa calaquij ipan tiopamit ten campa hualquisa tonati. Huan quimacaque nopa tequit para quimocuitahuis nochi ofrendas cati temacayayaj masehualme san ica ininpaquilis para Toteco Dios. Amo elqui se impuesto o se tamanti cati TOTECO quinnahuatijtoya ma quimacaca. Nojquiya Coré quipixqui nopa tequit para quinmajmacas totajtztizi huan levitame ininparte ten nopa ofrendas tatzejtzeltic cati masehualme quiiyocatalijtoyaj para TOTECO. ¹⁵ Huan nojquiya quitequimacaque: Edén, Miniamín, Jesús, Semaías, Amarías huan Secanías para quipalehuise Coré. Huan nochi inijuanti nojquiya quinmajmacayayaj nopa totajtztizi cati itzttoyaj ipan inialtepehua totajtztizi. Huan quinmajmacaque cati eliyayaj totajtztizi ipan sesen pamit huan ipan sesen familia. Sese quiseli iparte quej quitocarohuayaya masque huehue tacat o pisiltzi. ¹⁶ Huan inijuanti nojquiya quinmacaque nochi nopa tacame huan oquichpilme cati quipiyayayaj eyi xihuit para huejcapa cati hualayayaj mojmosta para quitequipanose TOTECO ipan itioipa. Quiseliyayaj ininparte ten nopa tacajcualisti sinta quiijuilojtoyaj inintoca ipan nopa pamit cati quitocarohuayaya ma hualaca para quitequipanose TOTECO. ¹⁷ Quinmajmacaque nopa tacualisti nopa totajtztizi cati moijcuilojtoyaj ipan nopa amat ica nochi cati ipan inifamilias. Huan nojquiya quinmacaque nopa levitame cati ya quipixtoyaj 20 xihuit para huejcapa ica inifamilias sinta moijcuilojtoyaj ica taya pamit tequitique huan taya eliyaya inintequi. ¹⁸ Nojquiya quinmacaque nochi ininconeua huan inisihuahua, inintelhocahua huan iniichhocahua cati moijcuilojtoyaj ipan amat. Pampa nochi tacame ipan nopa tequit motemacatoyaj quitequipanose Toteco ica temachili ica nochi nopa tamanti tatzejtzeltic. ¹⁹ Nojquiya nopa totajtztizi cati eliyayaj itepa ixhuihua Aarón huan itzttoyaj ipan pilaltepertzizi nechca altepeme, quitequimacaque tacame para quihuiquulise tacualisti sesen tacat o oquichpil cati itztoya ipan sesen cali. Nojquiya quinmajmacaque tacualisti nochi levitame. San monejqui moijcuilose nochi totajtztizi huan levitame ipan nopa amat.

²⁰ Huan quej nopa quichijqui Tanahuatijquet Ezequías para quinmajmacas tacualisti nochi totajtztizi huan levitame ipan nochi tali Judá. Quichijqui nochi cati cuali, huan monejnemilti xitahuac huan itztoya temachti iixpa TOTECO Dios cati elqui iTeco. ²¹ Huan quitemo taya eliyaya ipaquilis TOTECO ipan nochi cati quichijqui para itioipa Toteco Dios huan nochi cati

quichijqui para quitoquilis nopa tanahuatilme. Huan nochi quichijqui ica nochi iyolo huan yeca nochi cati quichijqui quisqui cuali.

32

Senaquerib quitehuico tali Judá (2 R. 18:13–19:37; Is. 36–37)

¹ Teipa quema ya panotoya se quesqui xihuit quema Tanahuatijquet Ezequías quichihuayaya miyac tamanti cati cuali, hualajqui Senaquerib, nopa tanahuatijquet ten tali Asiria. Huan calajqui ipan tali Judá para quitehuis. Huan quinyahualo nopa altepeme cati quipiyayayaj tepamit huan quinnahuati isoldados ma quitapanaca nopa tepame huan calaquise ipan nopa altepeme para moaxcatise.

² Huan quema Tanahuatijquet Ezequías quimatqui para Senaquerib quinequiyaya calaquis nojquiya ipan Jerusalén, ³ quinnotzqui itayacanc-ahua ipan icaltanahuatil huan nopa tacame cati quinyacanayayaj isoldados huan sentic nochi moilhuijque para cuali quitzacuase nochi amelme cati eltoyaj iteno itepa nopa altepet. ⁴ Huan mosentilijque tahuel miyaqui tacame para tequitise, huan quintzajque nochi nopa amelme huan nojquiya nopa pilatajtzi cati eltoya tatzinta ten inintal. Quichijque pampa amo quinequiyayaj para nopa tanahuatiani ten tali Asiria quipantisquíaj miyac at quema hualasquíaj. ⁵ Huan Tanahuatijquet Ezequías nojquiya quichijqui más chichahuac nopa tepamit cati quiyahualojtoya Jerusalén pampa quicualtali campa sosolijtoya huan quichijqui torres para ipan tamocuitahuisse huan quichijque seyoc tepamit calteno ten nopa tepamit cati ya eltoya. Nojquiya quicualtali itzintepayo cati quipalehuiyaya nopa tepamit cati quiyahualojtoya laltepe David para amo huetzis. Quicualtali tahuel miyac teposti para ica tatehuisse huan quichijqui miyac yolixtzajcayot ten teposti.

⁶ Huan quintali tayacanani ten soldados para ma quinnahuatica israelitame cati amo soldados. Quinsentili nochi nopa masehualme iteno icalte nopa altepet campa oncayaya se piso huan quinilhui: ⁷ “Ximoyoltelica huan ximoyolchichahuaca. Amo xiquimacastica nopa tanahuatijquet ten tali Asiria, yon amo ximomajmatica por nopa miyac soldados cati ihuaya hualahui. Pampa ica tojuanti itztoc se cati más quiypiya tetili que nopa tanahuatijquet.

⁸ Masque nopa tanahuatijquet quinpiya miyac isoldados, inijuanti san masehualme. TOTECO itztoc ica tojuanti. Yaya toDios huan yaya techpalehuis huan tatehuis por tojuanti.” Huan quema nopa israelitame quicajque icamanal nopa tanahuatijquet, nelía moyolchicajque.

⁹ Teipa quema nopa Tanahuatijquet Senaquerib ten tali Asiria noja quiyahualojtoya nopa altepet Laquis, quintitanqui itequipanojcahua ipan Jerusalén para ma quihuiti Tanahuatijquet Ezequías huan nochi masehualme ten tali Judá cati itztoyaj ipan altepet Jerusalén, ni camanali:

¹⁰ “Quej ni quijtohua Senaquerib, tanahuatijquet ten tali Asiria: ‘¿Para ten anmoilhuij huelis anquijyohuisse ipan altepet Jerusalén quema timechyahualose? ¹¹ Sinta Ezequías amechilhuía para amoTECO amechmanahuis ten nomaco, amechcaycahua. Yaya san quinequi amechpixtos nozona para ximayancamiquica huan xiathuacmiquica. ¹² ¿Amo anquimatij para Tanahuatijquet Ezequías yaya quintapanqui nochi itaixpahua cati eltoyaj ipan tepeme huan amechilhujtoc nochi antali Judá ehuan huan analtepet Jerusalén ehuan para huelis anquihueyitalise amoTECO ipan san setzi taixpamit huan san nozona hueli anquitalilise copali?’

13 “¿Amo anquimatij cati na huan notatahua tijchijtoque ipan sequinoc altepeme ten sequinoc talme? Inindioses amo huelque quinmanahuáaj ten nochicahualis. Huelis amo anquimachiliaj para yon se ten injuanti amo quema techtantoc yon se huelta. 14 San xiquijtoca catijqui dios ten nochi talme cati notatahua quintzontamiltijtoque huelqui quimanahuá ital tomaco. Amo oncatoc yon se dios cati hueltoc quinmanahuá imasehualhua. Huajca ¿para ten amoilhuáaj para amoTeco Dios huelis amechmanahuis ten nochicahualis? 15 Huajca ma amo amechcayayahua Ezequías. Amo xijneltocaca. Ya nimechilhujtoc para yon se teteyot ten sequinoc talme amo hueltoc quinmanahuá imasehualhua ten nochicahualis huan ten ichicahualis notatahua. Huajca ¿quenicatza amoilhuáaj para amoTeco Dios huelis amechmanahuis?”

16 Huan itequipanojcahua Senaquerib cati quihualicaque nopa amatajcuiloli nojquiya tahuel quimahuispolohuayayaj TOTECO Dios huan Tanahuatijquet Ezequías cati itequipanojca.

Senaquerib quimahuipolo TOTECO

17 Huan nojquiya Senaquerib quiiicuilo sequinoc amatajcuiloli campa quitajilhuyaya TOTECO Dios cati toTeco tiisraelitame huan quiiijtohuayaya quej ni: “Quej ininteteyohua nopa masehualme ipan sequinoc talme amo huelque quinmanahuijque ten nochicahualis, quej nopa nojquiya yaya cati iTeco o iDios Ezequías amo huelis quinmanahuis imasehualhua ten na nochicahualis.”

18 Huan itequipanojcahua Senaquerib cati quihualicayayaj nopa amatajcuiloli, tzajtzique chichahuac nochi ya ni ipan camanali hebreo para quinmajmatise nopa israelitame cati itztoyaj iatipa nopa tepamit cati qiyahualojtoya altepet Jerusalén para huelis nimantzi quincuilise nopa altepet. 19 Huan itequipanojcahua quitajilhuijque Toteco Dios cati iaxca altepet Jerusalén quej elisquía se taixcopincayot ten nopa sequinoc talme cati quinmachijchijtoque masehualme.

20 Pero Tanahuatijquet Ezequías huan nopa tajtolpanextijquet Isaías, cati icone Amoz, motatajtijque huan quitajtanijque TOTECO ipan ilhuicac ma quinpalehui. 21 Huajca TOTECO quititanqui se iilhuicac ejca cati quinmítico nochi nopa soldados ten tali Asiria ica inintayacancahua huan nochi inintequichijcahua. Quej nopa Senaquerib mocuetqui ipan ital ica miyac pinahualisti. Huan quema ajsito huan calajqui ipan itiopa idios, nozona iconehua quimictijque ica macheta.

22 Huajca quej nopa TOTECO quimanahui Ezequías huan nochi Jerusalén ehuan ten ichicahualis Senaquerib, tanahuatijquet ten tali Asiria. Huan quinmanahui ten nochi nopa tacame cati hualajtoyaj ihuaya para quintehuse. Huan TOTECO quimacac tasehuilisti Ezequías huan imasehualhua huan yon se icualancaitaca amo quicuatotoni. 23 Huan teipa nochi masehualme ten nochi talme nozona nechca tahuel quitepanitaque Tanahuatijquet Ezequías. Huan miyac masehualme ten campa hueli quihuicaque taca-jahualisti para TOTECO ipan Jerusalén. Huan nojquiya quihuiquiliyayaj Ezequías miyac tamanti cati patiyó.

Ezequías mococo huan mochicajqui

(2 R. 20:1-11; Is. 38:1-22)

24 Teipa pejqui tahuel mococohua Ezequías ica se cocolisti cati nelía fiero huan ya itztoya para miquis. Pero yaya motatajti huan quitajtani TOTECO ma quichicahua huan TOTECO quitacaquili. Quichicajqui huan nojquiya

quej se tanextili para nelía mochicahuas, quichihuili se hueyi tiochicahual nextili. ²⁵ Pero masque quiseli cati cuali, Ezequías amo quitascamatili TOTECO yon amo moicnonejqui iixpa TOTECO. Yaya tahuel mohueyimatqui ipan iyolo. Huajca Toteco nelía cualanqui ihuaya Ezequías huan ica nochi cati ehuaní ipan tali Judá huan ipan Jerusalén.

²⁶ Huan teipa Ezequías moicnonejqui iixpa TOTECO huan ayecmo mohueyimatqui. Nojquiya moicnonejque nopa Jerusalén ehuaní huan yeca TOTECO quijto para amo quintatzacuilitis quema Ezequías noja itztoya.

Ezequías tahuel tapijpixqui

²⁷ Huan Tanahuatijquet Ezequías nelía moricojchijqui huan nochi masehualme campa hueli quitepanitayayaj. Quipixqui miyac tamanti ten plata, oro huan miyac piltetzitzi cati pajpatiyó. Nojquiya quipixqui miyac taajhuiyacayome huan yolixtzajcayot ten teposti huan miyac sequinoc tamanti cati tahuel pajpatiyó. ²⁸ Huan nojquiya quichijqui miyac calme para ipan quiajocuis trigo, xocomecat iayo huan aceite. Huan quichijqui nojquiya miyac calme para nochi itapiyálhua huan miyac corralme para iborregojhua huan ichivojhua. ²⁹ Huan nojquiya quichijqui miyac altepeme huan quipixqui miyac huacaxme, huan borregojme pampa Toteco Dios nelía quitióchijqui miyac.

³⁰ Huan elqui Ezequías cati quitzajqui nopa at cati quisayaya ipan Gihón huan quiojti taltita ipan se tubo para quisas iquespa Ialtepe David para campa calaquí tonati. Huan quej nopa nochi cati Ezequías quichijqui, quisqui cuali.

Ezequías quinseli nopa Babilonia ehuaní

(2 R. 20:12-19; Is 39:1-8)

³¹ Pero quema nopa tacame ten tali Babilonia hualajque quipaxalocoj para quimatise quenicatza panotoya nochi nopa huejhueyi tamanti ipan ital, Toteco Dios quicahuili ma quichihua cati quipinahualtis para quieyjecos Ezequías huan quinextis taya eltoc ipan iyolo.

Mijqui Ezequías

(2 R. 20:20-21)

³² Huan nochi sequinoc tamanti cati quichijqui Ezequías eltoc ijcuilijtoc ipan Nopa Amatapohuali Cati Quiijcuilo Nopa Tajtolpanextijquet Isaías, icone Amoz, huan ipan Nopa Amat ten Tanahuatiani ten Tali Judá huan ten Tali Israel. ³³ Huan quema mijqui Ezequías quitalpachojque campa quinalpachojtoyaj itatahua cati tanahuatiani. Huan quitalpachojque campa más nesiyaya ipan campo santo. Huan nochi masehualme ten Judá huan Jerusalén quinextilijque Ezequías miyac tatepanitacayot quema mijqui. Huan icone cati itoca Manasés pejqui tanahuatía ipan tali Judá.

33

Pejqui tanahuatía Manasés

(2 R. 21:1-18)

¹ Huan Manasés quipiyayaya 12 xihuit quema pejqui tanahuatía huan tanahuati ipan altepet Jerusalén 55 xihuit. ² Yaya quichijqui cati fiero iixpa TOTECO Dios pampa quintoquili inifiero ojhui nopa masehualme ipan nopa sequinoc talme cati TOTECO quinquixtijtoya ipan nopa tali quema ajsiyayaj israelitame. ³ Manasés sempa quicualtali nopa taixpame ipan tepeme cati itata, Ezequías, quinsosolojtoya. Huan quincualchijchijqui nopa taixpame

campa quinpixtoyaj nopa taixcopincayome ten Baal, huan quinchijchijqui taquetzalme para quitepanitase nopa teteyot Asera. Huan nojquiya Manasés quinhueyitali nochi tamanti cati oncayaya ipan ilhuicac quej tonati, metzti huan sitalime. ⁴ Huan nojquiya quinchijchijqui taixpame para teteyome ipan itiopa TOTECO masque TOTECO quijtojtoya para nozona san yaya quihueyitalisquáaj masehualme para nochipa. ⁵ Huan nojquiya quinchijchijqui taixpame para nopa sitalime ipan ilhuicac ipan nopa ome tamapamit ten nopa tiopamit.

⁶ Nojquiya Manasés quintati iconehua quej tacajchahualisti para teteyome ipan nopa tamayamit Ben Hinom. Nojquiya Manasés quintequihui cati quinnojnotzaj mijcatzitzí, cati tetonalitani huan cati momachtiyayaj magia. Tahuel miyac tamanti quichijqui Manasés cati elqui fiero iixpa TOTECO huan yeca tahuel quicualancamacac. ⁷ Nojquiya Manasés quichijqui se teteyot huan quitali ipan tiopamit masque Toteco Dios quilhuitoyá David huan Salomón ni camanali: “Ipan ni tiopamit huan ipan ni altepet Jerusalén antechhueyichihúase para nochipa pampa na nijtapejpenijtoc ni altepet ten nochi sequinoc altepeme ipan tali Israel para nica ma techhueyitepanitaca. ⁸ Huan sinta anisraelitame anquichihúase nochi notanahuatilhua huan nochi tamachtili cati nijmacac Moisés para ma amechmachi, amo quema nimechquixtí ten ni tali Israel cati niquinmacatoc amohuejcapán tatahua.” Quej nopa TOTECO quilhui David huan Salomón huejcajquiya.

⁹ Pero Tanahuatijquet Manasés quichijqui para Judá huan Jerusalén ehuaní ma quichihúaca tamanti cati noja más fiero que quichihúayayaj nopa masehualme cati TOTECO quintzontamilti quema huejcajquiya ajsiyayaj israelitame ipan nopa tali.

¹⁰ Huan TOTECO quinojnotzqui Manasés huan nochi imasehualhua, pero injuanti amo quitacaquillijque. ¹¹ Huajca TOTECO quichijqui para nopa tayacanani ten isoldados nopa tanahuatijquet ten tali Asiria ma yaca Jerusalén. Huan injuanti quiitzquijque Manasés huan quitallilijque cuachijcolme para quitlanase huan quillipijque imetz huan imax ica cadenas ten bronce huan quihúicaque ipan tali Babilonia.

¹² Pero teipa quema tahuel taijyohuíyaya, Manasés moicnonejqui huan motatajti ica nochi iyolo iixpa TOTECO Dios cati elqui ininTeco ihuejcapán tatahua. ¹³ Huan quema motatajti, Toteco Dios quitacaquili huan quicahuili ma sempa mocuepa ipan altepet Jerusalén ipan itanahuatilis. Huan huajca Manasés quimachili para san yaya TOTECO nelía eli Dios.

¹⁴ Teipa Manasés quicualtali nopa tepamit cati más calteno ipan Ialtepe David. Quicualtali nopa tepamit ten campa sosolijtoya campa calaqui tonati ten tamayamit Gihón nechca nopa hueyat Cedrón hasta nopa caltemit ipan nopa tepamit cati itoca Michi Caltemit. Nojquiya quicualtali campa nopa tepamit quiyahualohua nopa tachiquili Ofel huan nozona quichijqui nopa tepamit tahuel huejcapantíc. Huan quintali itayacanca soldados ipan nochi altepeme ipan Judá cati moyahualojtoyaj ica tepamit. ¹⁵ Huan nojquiya quinjcueni nopa taixcopincayome huan nopa teteyot cati quitallijtoya ipan itiopa TOTECO. Huan quinjcueni nochi taixpame cati quichijtoyaj ipan nopa tepet ipan altepet Jerusalén campa eltoya itiopa TOTECO huan quinquixti ten nopa altepet huan quintepejqui ipan tasoli cati eltoya huejca ten nopa altepet. ¹⁶ Teipa sempa quicualtali itaixpa TOTECO huan nozona quitati tacajchahualisti para moyoltalis ica TOTECO huan tacajchahualisti para quitas-camatis. Huan quinnahuati nochi Judá ehuaní ma quihueyitalica TOTECO Dios cati elqui ininTeco israelitame. ¹⁷ Nopa masehualme ten tali Judá noja

quitatiyayaj tacajchualisti ipan nopa taixpame cati eltoyaj ipan tepeme, pero quitatiyayaj senquisa para TOTECO Dios.

¹⁸ Huan nochi sequinoc tamanti cati quichijqui Manasés huan inetatajtil, huan nopa camanali cati TOTECO Dios cati ininTeco israelitame quinmaca nopa tajtolpanextiani para quilhuisse, nochi eltoc ijcuilijtoc ipan Nopa Amat ten nopa Tanahuatiani ipan Tali Israel. ¹⁹ Huan inetatajtil Manasés huan quenicatza TOTECO quinanquili huan quipalehui, huan nochi cati fiero quichijqui quema mosisiniyaya ica TOTECO, nochi eltoc ijcuilijtoc ipan Nopa Amatapohuali ten Nopa Tajtolpanextiani. Nopa amatapohuali nojquiya quipiya nochi lugares campa yaya quichijqui taixpame para teteyome huan campa quintali taquetzalme para Asera huan teteyome quema ayemo moy-olcuctoya iixpa TOTECO. ²⁰ Huan quema mijqui Manasés quitalpachojque ipan icaltanahuatil. Huan itelpoca cati itoca Amón pejqui tanahuatía ipan tali Judá.

Pejqui tanahuatía Amón
(2 R. 21:19-26)

²¹ Amón quipiyayaya 22 xihuit quema pejqui tanahuatía huan tanahuati ipan altepet Jerusalén ome xihuit. ²² Huan quichijqui cati nelía fiero iixpa TOTECO quej itata Manasés quichijqui achtohuiya. Quinmacac tacajchualisti nochi tamanti teteyome cati itata Manasés quichijtoya huan quinhueyitali. ²³ Pero Tanahuatijquet Amón amo quema moicnonejqui iixpa TOTECO quej quichijqui itata, Manasés. Amón san achi más quimiyaquili itajtacolhua.

²⁴ Huan teipa itequipanojchua quisencajqe quenicatza huelis quimictise huan quimictijque ipan icaltanahuatil. ²⁵ Pero sequinoc masehualme ipan nopa tali cati quichihuayayaj cati xitahuac, quinmictijque itequipanojchua Amón cati quimictijtoyaj. Huan injuanti quichijque icone Josías ma eli tanahuatijquet.

34

Pejqui tanahuatía Josías
(2 R. 22:1-2)

¹ Josías quipiyayaya 8 xihuit quema pejqui tanahuatía huan tanahuati ipan altepet Jerusalén 31 xihuit. ² Huan yaya quichijqui cati xitahuac iixpa TOTECO huan monejnemilti ipan iojhui ihuejcapan tata, David. Huan amo quema mohuejcatali ten nopa cuali ojti.

³ Quema Tanahuatijquet Josías yahuiyaya para chicueyi xihuit ipan itequi quej tanahuatijquet, pejqui quitoquilía Toteco Dios cati elqui iTeco ihuejcapan tata, David. Huan masque noja eliyaya se telpocat, quema yahuiyaya para 12 xihuit ipan itequi, yaya pejqui quiniycuenía nochi nopa taixpame cati eltoyaj huejcapa ipan tepeme ipan tali Judá huan altepet Jerusalén. Nojquiya quinsosolo nochi nopa taquetzalme ten Asera, nochi teteyome huan nochi teteyome cati quinchijque ica teposti cati quiatilijtoyaj. ⁴ Huan iixpa Josías itequipanojchua quisosolojqe nopa taixpame ica miyac tamanti inintaixcopincayohua ten Baal. Huan quintapanqui campa quitatiyayaj copali. Nojquiya tanahuati ma quintapanaca nochi nopa taixcopincayome ten Asera. Huan quintapanqui nopa teteyome cati quintejtectoayaj ipan cuahuit huan cati quinchijtoyaj ica teposti cati quiatilijtoyaj huan nochi nopa tamanti quinhuejhuelojque huan mocajqui san cuajnexti. Huan nopa inincujnaxo quijtzelojqe campa quintalpachojtoyaj nopa totajtzitzi cati quiatilijtoyaj

tacajchualisti nopa teteyome. ⁵ Nojquiya quitati iniomiyohua nopa totajtztzi para teteyome ipan nopa taixpame campa quintatiliyayaj tacajchualisti. Huan quej nopa Tanahuatijquet Josías quitapajpacchijqui nochi tali Judá huan altepet Jerusalén. ⁶ Huan quej nopa nojquiya quichijqui ipan altepeme ipan inintal nopa huejhueyi familias ten Manasés, Efraín, Simeón huan hasta ipan nopa tali Neftalí nojquiya. ⁷ Huan quema ya quinchijtoya tatixtic nochi nopa taixpame ten teteyome, huan nochi taixcopincayome ten Asera huan quintapantoya nochi nopa teteyome huan taixcopincayome ipan nochi tali Israel ica norte, mocuetqui Tanahuatijquet Josías ipan altepet Jerusalén.

Josías quicualtali itiopa TOTECO

(2 R. 22:3–23:3)

⁸ Quema Josías yahuiyaya 18 xihuit para tanahuatis huan ya quipajpactoya nochi nopa tali huan itiopa TOTECO ten teteyome, yaya quinequiyaya sempa quicualtalis itiopa TOTECO. Huajca quintequimacac Safán, icone Azalía; huan Maasías cati eliyaya gobernador ipan Jerusalén huan Joa, icone Joacaz cati eliyaya se tajcuilojquet, para ma quicualtalitij itiopa TOTECO Dios cati elqui iTeco. ⁹ Huajca injuanti yajque quiiatoj nopa hueyi israelita totajtzi cati itoca Hicías huan quimacague nopa tomi cati nopa levitame cati quimocuitahuiyayaj caltemit ipan itiopa TOTECO quisentilijtoyaj. Nopa tomi quihualicatoyaj masehualme cati ininteipa ixhuihua Manasés huan Efraín huan masehualme cati noja mocajtoyaj ipan sequinoc altepeme ipan tali Israel ica norte. Nojquiya quihualicatoyaj nopa tomi nopa masehualme cati ininteipa ixhuihua Judá huan Benjamín huan cati itztoyaj ipan altepet Jerusalén. ¹⁰ Huan yaya quinmactili nopa tomi nopa tayacanca tequipanohuani ipan itiopa TOTECO huan injuanti quintaxtahuiyayaj cati quicualtaliyayaj itiopa TOTECO. ¹¹ Huajca injuanti quintequimacayayaj cuaximani huan calchihuani. Huan quicojqque teme cati ya tatejtecti huan cuahuit para taxitanili huan apechme. Huan quicualtalijque itiopa TOTECO cati nopa tanahuatiani ten tali Judá quicahuilijtoyaj ma sosolihui.

¹² Huan nopa tacame tequitiyayaj ica nochi iniyolo huan cuali quichi-huayayaj inintequi. Huan inintayacanhua ipan nopa tequit inintoca eliyaya Jahat huan Abdías cati eliyayaj levitame cati iteipa ixhuihua Merari ten huejcajquiya. Huan sequinoc inintayacanhua ipan nopa tequit inintoca eliyaya Zacarías huan Mesulam cati eliyayaj levitame cati iteipa ixhuihua Coat ten huejcajquiya. Ya ni nopa tacame cati más tayacanque ipan nopa tequit. Nojquiya itztoyaj sequinoc levitame huan nochi cuali hueliyayaj tatzotzonaj. ¹³ Injuanti quintalijque para quinmocuitahuse nopa tequipanohuani cati quisacayayaj nochi tamanti cati motequihuiyaya para quicualtalise itiopa TOTECO. Sequinoc levitame quipiyayaj inintequi para quichihuase cuentas, sequinoc eliyayaj gobernadores huan sequinoc eliyayaj tamocuitahuani ipan caltemit.

Quipantijque itanahuatilhua Moisés

¹⁴ Huan se tonali quema nopa hueyi totajtzi Hicías quiiucuilohuayaya quesqui tomi quihualicayayaj nopa masehualme ipan itiopa TOTECO, quipanti nopa amatapohuali cati quipixtoya nopa tanahuatilme cati TOTECO quinmacac israelitame ica Moisés. ¹⁵ Teipa Hicías quiihual Safán itajcuilojca nopa tanahuatijquet:

—Xiquita, nijpanti ipan itiopa TOTECO ni amatapohuali cati quipiya itanahuatilhua TOTECO.

Huan quimactili Safán. ¹⁶ Huan Safán quihuiquili nopa tanahuatijquet huan quillhui:

—Nochi motequipanojcahua quichihuj nopa tequit senquisa quej tiquin-nahuatijtoc. ¹⁷ Nopa tomi cati eltoya ipan tiopamit cati masehualme temacayayaj, ya tiquinmactilijtoque cati quiyacanaj nopa tequit huan cati tequichihuani.

Nopa tanahuatili quipanaxtía tajtacoli

¹⁸ Huan nojquiya Safán quillhui nopa tanahuatijquet:

—Huan nojquiya nopa hueyi totajtzi Hilcías techmacac ni amatapohuali cati quipanti.

Huan Safán pejqui quipohua iixpa nopa tanahuatijquet. ¹⁹ Huan quema nopa tanahuatijquet quicajqui cati quiiytohuayayaj nopa tanahuatilme, quitzayanqui iyoyo. ²⁰ Huan nimantzi quinzotzqui Hilcías; huan Ahicam, icone Safán; huan Abdón, icone Micaías; huan Safán itajcuilojca; huan Asaías cati eliyaya itequipanojca huan quinilhui:

²¹ —Xiyaca ipan itiopa TOTECO huan xijtajtanica TOTECO por na huan por nopa pilquentzi imiyaca masehualme cati noja mocaahuaj ipan tali Israel huan Judá cati ayemo quinquicatoque tetequipanotij. Xijtatizintoquilica ten ni amatapohuali cati anquipantijtoque. Niquita para TOTECO tahuel cualantoc ica tojuanti pampa totatahua amo quichijtoque ni tanahuatilme cati TOTECO quijcuilo ipan ni amatapohuali para ma tijchihuaca.

²² Huajca Hilcías huan nochi nopa sequinoc tacame cati quinzotzqui nopa tanahuatijquet, yajque quiiatoj nopa sihua tajtolpanextijquet cati itoca Hulda cati elqui isihua Salum huan Salum elqui icone Ticva huan iixhui Harhas. Salum quipixqui itequi para quimocuitahuis iniyoyo nopa totajtziti. Huan Hulda itztoya ipan nopa yancuic colonia ten altepet Jerusalén. Huan quema nopa tacame ajsitoj, quipohuilijque nochi cati nopa tanahuatijquet quinilhui.

²³ Huan Hulda quinilhui:

—TOTECO Dios cati toTeco tiisraelitame quijtohua para quej ni xiquilhuica nopa tacat cati amechtiantoc techitaquij. ²⁴ Quej ni quijtohua TOTECO: ‘Quena, temachtí nijosolos ni altepet Jerusalén huan niqintzon-tamiltis nochi masehualme cati nopona itztoque. Nijtitanis ipani nochi nopa tatechihuali cati eltoc ijcuilijtoc ipan nopa amatapohuali cati anquipojtoque iixpa nopa tanahuatijquet ten tali Judá. ²⁵ Nijchihuas pampa amojuanti antechtahuelpajtoque huan anquinmacatoque tacajcualisti teteyome cati amo melahuac. Huan yeca nelía niculantoc ica amojuanti por nochi cati fiero cati anquichijtoque. Huan yeca nimechtitanilis tatzacuiliti ica nochi nocualanlancayo huan amo teno techzacuilis.’

²⁶ “Pero xiquilhuica nopa tanahuatijquet ten tali Judá cati amechtiantoc ma nijtatizintoquili TOTECO ten ni tamanti, para quej ni quijtohua TOTECO Dios cati toTeco tiisraelitame: ‘Pampa tijchijqui cuenta cati tijcajqui ipan ni amatapohuali, ²⁷ huan pampa timoyolcuectoc huan timoicnnectoc noixpa nimoTeco Dios, nimitztacaquilijtoc. Quena, pampa tijcajqui cati nopa tanahuatilme quiiytohuayayaj para nijchihuasquía ipan ni altepet huan ica nochi masehualme cati itztoque nica huan tijtzayanqui moyoyo, huan tichocac noixpa, huajca na nojquiya nimitztacaquilijtoc huan ya ni nimitzilhuis. ²⁸ Amo nijtitanis nopa tatzacuiliti cati niqijtojtoya ipan ni altepet huan cati itztoque nica hasta quema ya timictos. Ta timiquis quema noja oncas tasehuilisti huan timosentiliti inihuaya mohuejcapán tatahua. Huajca amo tiquitas nopa fiero tamanti cati oncas ipan ni altepet teipa.’ ”

Huan teipa nopa tacame mocuetque campa Tanahuatijquet Josías huan quiyolmelajque quej quinilhujitoyá nopa síhua tajtolpanextijquet.

²⁹ Huajca nopa tanahuatijquet quinnotzqui nochi huehue tacame ten tali Judá huan ten altepet Jerusalén para ma mosentilica ipan Jerusalén. ³⁰ Huan nimantzi mosentilijque nochi Judá ehuan huan Jerusalén ehuaní. Mosentilijque totajtitzí, levítame huan nochi masehualme ten cati más huehuentzítzi hasta ten más písiltzítzi. Huan nopa Tanahuatijquet Josías yajqui ipan itiopa TOTECO ica nochi ni masehualme. Huan nozona nopa tanahuatijquet quipojqui chichahuac nochi nopa camanali cati eltoya ipan nopa amatapohuali cati quiajsitoyaj ipan itiopa TOTECO. ³¹ Teipa nopa tanahuatijquet moquetzqui campa quínamiqui para cati itztoc tanahuatijquet ma moquetza huan nozona motemacac ica TOTECO ica nochi iyolo. Huan quichijqui se camanali ica TOTECO para nemis ipan iohui huan quitouquilis ipan nochi tamanti. Quiilhui para quitepanitas huan quitamichihuas nochi itanahuatilhua huan ica nochi iyolo huan ica nochi ialma quichihuas nochi cati quijitoyá. Quiijto para quichihuasquía nochi nopa tanahuatili cati eltoya ijcuilijtoc ipan nopa amatapohuali. ³² Huan teipa nojquiya Josías quichijqui para nochi Jerusalén ehuan huan nochi tali Benjamín ehuaní ma nojquiya motemacaca ica Toteco Dios. Huajca quej nopa nochi Jerusalén ehuaní nojquiya quichijque nopa camanali ihuaya Toteco Dios cati elqui ininTeco inintatahua. ³³ Huan Josías quínijcueni nochi tamanti teteyome huan taixcopincayome cati quinchijtoyaj ipan nochi tali Israel. Huan quinnahuati nochi cati itztoyaj ipan tali Israel ma quihueyitepanitaca san TOTECO Dios cati elqui iTeco. Huan quena, nochi nopa israelitame pejqe quihueyitepanitaj TOTECO huan amo quicajque TOTECO Dios cati elqui ininTeco inihuejcapan tatahua ipan nochi nopa tonali quema noja itztoya Tanahuatijquet Josías.

35

Josías quielnamijqui Pascua Ilhuit (2 R. 23:21-33)

¹ Huan Josías temacac tanahuatili para quichihuas nopa Pascua Ilhuit ipan altepet Jerusalén. Monequi quinmictise nopa pilborregojtitzí quema temo tonati ipan 14 itequi nopa achtohui metzti ipan nopa israelita xihuit * quej quijto tanahuatili. ² Huan Josías nojquiya quintali nopa totajtitzí ipan inintequi campa quintocarosquía huan quinyolchicajqui para sempa ma quitequipanoca TOTECO ipan itiopa. ³ Huan nojquiya nopa levítame cati tamachiyayaj ipan nochi tali Israel huan cati moiycatalijtoyaj para TOTECO, quínilhui: “Pampa nopa caxa cati tatzejtzeltolc ya eltoc ipan itiopa TOTECO hasta quema Salomón, icone David, quichijqui se tiopamit, ayecmo monequi anquimamajtinemise quej huejcajquiya levítame quichihuayayaj. Ama amojuaní ximotemacaca para anquitequipanose TOTECO Dios cati amoTeco huan anquintequipanose iisraelita masehualhua. ⁴ Ximoxexeloca ica pamit quej quichihuayayaj amohuejcapan tatahua quej quijcuilijtejqe David huan icone, Salomón. ⁵ Teipa ximoquetzaca campa monequi anmoquetzase nechca taixpamit huan ximoquetzaca ica nochi sequinoc ipan nopa pamit cati moaxca. Huan xiquinpalehuica nopa familia cati elis

* **35:1** 35:1 Ni tonali quemantica huetzi ipan itamiya abril huan quemantica ipan ipejya mayo ipan tocalendario ten ama.

amotequi para anquipalehuise quema hualase para quimacase tacajc ahualisti TOTECO. Sesen pamit quipalehuis se familia. ⁶ Xijmictica nopa pilborrejojtzi ten Pascua, huan ximopajpacaca quej monequi huan ximocualtalica para anquinpalehuise nochi nopa israelitame cati hualase. Xijchihuaca nochi senquisa quej TOTECO technahuati ica Moisés.”

⁷ Huan Tanahuatijquet Josías quinmacac cati yaya iaxca 30 mil borrejojme huan chivojme para ininPascua tacualis nochi masehualme cati mopantijtoyaj nopona. Huan nojquiya temacac 3 mil torojme. ⁸ Huan itequipanojcahua nopa tanahuatijquet nojquiya temacaque ica miyac paquilisti para nochi nopa masehualme, totajtzitzi huan levitame. Nojquiya Hilcías, Zacarías huan Jehiel cati quimocuitahuiyayaj itiopa Toteco Dios, temacaque 2 mil 600 borrejojme huan 300 torojme para ma elica tacajc ahualisti para Pascua. ⁹ Huan nopa tayacanani ten levitame cati inintoca eliyaya Hasabías, Jehiel, Josabad huan Conanías huan icnihua Semaiás huan Natanael, quinmacaque levitame 5 mil borrejojme huan chivojme huan 500 torojme para inintacajc ahualis ten Pascua.

¹⁰ Quema ya quisencajtoyaj nochi para nopa Pascua Ilhuit, nopa totajtzitzi moquetzque campa monequiyaya quichihuase inintequi. Huan nopa levitame nojquiya moquetzque ica pamit quej nopa tanahuatijquet quinmacatoya tanahuatili ma quichihuaca. ¹¹ Huan nopa levitame quinmictijque nopa pilborrejojtzitzi ten Pascua, huan inieso quinmactilijque nopa totajtzitzi para quijitzelose ipan taixpamit. ¹² Teipa sesen familia quimacayaj se tapiyalí para se tacajc ahualisti tatatili. Huan injuanti quitencahuayayaj iixpa TOTECO senquisa quej quijitohuayaya iamatapohual Moisés. Huan quej nopa nojquiya quinmajmacaque nopa torojme nopa masehualme cati itztoyaj nopona. ¹³ Huan teipa quincacatzojque nopa pilborrejojtzitzi ten Pascua quej quijitohuayayaj itanahuatilhua Moisés. Huan nopa nacat cati eliyaya tatejtzeltic quimolonijque ipan chachapalme, huan ipan pailas huan ipan sartenes para ma quicxitica nimantzi huan ma quiquixtica huan ma quinmajmacaca nochi cati mosentilijtoyaj para ma quicuaca. ¹⁴ Teipa nopa levitame quicualtalijque se tacualisti ten Pascua para injuanti iniselti huan nojquiya para nopa totajtzitzi. Pampa nochi nopa totajtzitzi cati iteipa ixhuhua Aarón tavel tequitiyayaj hasta tayohua pampa quitatiyayaj nopa tacajc ahualisti tatatili huan nojquiya ininchiyajca nopa borrejojme cati quinmictijtoyaj para sequinoc tacajc ahualisti. Huajca nopa levitame quicualtalijque nopa tacualisti para nopa totajtzitzi nojquiya.

¹⁵ Nochi nopa levitame cati eliyayaj huicani cati iconehua Asaf injuanti quihueyichihuayayaj TOTECO semilhuit, quej tanahuati David, Asaf, Hemán huan Jedutún cati eliyayaj itajtlopanextijcahua David. Huan nopa levitame cati tamocuitahuiyayaj ipan calfemit amo monequiyayaj mijcuenise para quicualtalitij inintacualis pampa sequinoc levitame quicualtalilijayaj inintacualis huan quinhuiquiliyayaj hasta campa itztoyaj.

¹⁶ Huan quej nopa quitamencajque nochi nopa tequit ipan nopa tonali para Pascua. Quej nopa huelque quitatijque nochi tacajc ahualisti tatatili ipan itaixpa TOTECO quej tanahuati Tanahuatijquet Josías. ¹⁷ Huan nochi nopa israelitame cati itztoyaj ipan Jerusalén, para chicome tonati quielnamijque nopa Pascua Ilhuit huan nopa ilhuit ten pantzi cati amo quipiya tasonejayot. ¹⁸ Yon se tanahuatijquet amo quema quichijtoya se Pascua Ilhuit quej quichijqui Tanahuatijquet Josías. Amo quema oncac se Pascua quej nopa, yon hasta huejcajquiya quema itztoya nopa tajtolpanextijquet Samuel huan ayemo itztoyaj tanahuatiani ipan Israel. Pampa Tanahuatijquet Josías

quichijqui nopa Pascua ica nochi totajtzitzi, levitame, Judá ehuan, Israel ehuan huan nochi ehuan ten altepet Jerusalén sentic. ¹⁹Nopa Pascua Ilhuit quichijque quema Josías yahuiyaya para 18 xihuit para tanahuatis.

Mijqui Josías
(2 R. 23:28-30)

²⁰ Teipa quema Josías ya quitamicualchijchijtoya itiopa TOTECO, yajqui nopa Tanahuatijquet Necao ten tali Egipto inihuaya isoldados para quintehuitij nopa masehualme cati itztoyaj ipan altepet Carquemis nechca hueyat Eufates. Huan Tanahuatijquet Josías quisqui inihuaya isoldados para quintehuis. ²¹ Huan Tanahuatijquet Necao quintitanqui tacame para ma quilhuitij Josías ni camanali:

“Na amo nihualajtoc para nimitztchuis ta cati titanahuatijquet ipan tali Judá. Na nihualajtoc para niquintehuis injuanti cati ten huejcajquiya itztoyaj nocualancaitacahua. Huajca amo techtzacuili pampa Toteco Dios techilhuitoc ma nimoisihuiti. Amo xijtzacuili cati quinequi Toteco Dios pampa yaya itzoc nohuaya. Sinta techtehuis, huajca yaya mitztzontamiltis.”

²² Pero Josías amo quitacaquili cati Tanahuatijquet Necao quijto. Josías quincualtali isoldados huan moquixtili iyoyo cati cuali huan moyoyonti quej se soldado para amo quiixmatisquía icualancaitaca. Amo quuitac para melahuac elqui TOTECO cati quinojnotztoya Necao para ma tatehuiti. Huan yeca Josías yajqui hasta ipan nopa tamayamit ten Meguido huan nozona quintehui. ²³ Huan nopa soldados ten tali Egipto quimajcajque inincuatam-inhua ipan Tanahuatijquet Josías huan tahuel quicocojque. Huajca Josías quinilhui itequipanojcahua ma quiquixtica ten nopa tatehuilisti pampa tahuel cocojtoya. ²⁴ Huan itequipanojcahua quiquixtijque ipan nopa tatehujca carro huan quitelijque ipan seyc carro. Huan quihualicaque hasta Jerusalén huan nozona mijqui. Huan quitalpachojque campa quintalpachojtoyaj nopa sequinoc tanahuatiani. Huan nochi tali Judá ehuan huan nochi cati ehuan altepet Jerusalén tahuel quichoquilijque Josías quema mijqui. ²⁵ Huan nopa tajtolpanextijquet Jeremías quicualtali se huicat cati nelía tetequipacho huan quihuicatijque Josías quema mijqui. Huan hasta ama nopa huicani cati quihuicatij se mijcatzi nojquiya quielnamiquij Josías ipan inihuica. Huan nopa huicat mocajqui ijcuilijtoc ipan nopa amatapohuali cati itoca Huicat ten Tequipacholi.

²⁶ Huan ipan nopa amatapohuali eltoc ijcuilijtoc nochi sequinoc cuali tamanti cati quichijqui Josías. Ijcuilijtoc quenicatza monejnemilti xitahuac ipan itanahuatilhua TOTECO huan quenicatza quipantijque nopa amatapohuali ica itanahuatilhua TOTECO. ²⁷ Quena, nochi cati quichijqui ten quema pejqui tanahuatia huan hasta quema mijqui eltoc ijcuilijtoc ipan Nopa Amat ten Nopa Tanahuatiani ten Tali Israel huan ten Tali Judá.

36

Joacaz pejqui tanahuatia ipan Judá
(2 R. 23:31-35)

¹ Huajca nopa masehualme ten nopa tali quitapejpenijque Joacaz cati elqui itelpoca Josías huan quichijque tanahuatijquet ipan altepet Jerusalén. ² Joacaz quipiyayaya 23 xihuit quema pejqui tanahuatia ipan altepet

Jerusalén huan san huejcajqui eyi metzti ipan itequi. ³ Huan teipa hualajqui nopa tanahuatijquet ten tali Egipto huan quijjueni Joacaz ipan icaltanahuatil ipan altepet Jerusalén huan quinchihualti nopa Judá ehuani ma quitaxtahuica ten inintal sesen xihuit se 3 mil 300 kilos ten plata huan 33 kilos ten oro. ⁴ Huan nojquiya nopa tanahuatijquet ten Egipto quitali quej tanahuatijquet ipan tali Judá huan Jerusalén, Eliaquim cati elqui icni Joacaz. Huan quipataque itoca huan quitocaxtalijque Eliaquim ica Joacim. Huan Joacaz cati achtohuiya eliyaya tanahuatijquet quihuicaque ilpitoc hasta tali Egipto.

Itanahuatilis Joacim ipan Judá
(2 R. 23:36–24:7)

⁵ Joacim quiپیayaya 25 xihuit quema pejqui tanahuatía huan tanahuati 11 xihuit ipan altepet Jerusalén. Pero yaya nelía quichijqui cati fiero iixpa TOTECO Dios cati elqui iTeco. ⁶ Huan teipa hualajqui Tanahuatijquet Nabucodonosor ten tali Babilonia huan calajqui ipan altepet Jerusalén. Huan quiilpijque Joacim ica tepos cadenas huan quihuicaque hasta tali Babilonia. ⁷ Nojquiya Nabucodonosor quihuicac tamanti cati eltoya ipan itiopa TOTECO huan quitalito ipan itiopa iteteyo ipan tali Babilonia.

⁸ Huan nochi sequinoc fiero tamanti cati quichijqui Joacim, huan nochi cati ica quitatelhuiyayaj teipa, nochi eltoc ijcuilijtoc ipan Nopa Amat ten Tanahuatiani ten Tali Judá huan ten Tali Israel. Huan teipa pejqui tanahuatía itelpoca cati itoca Joaquín.

Joaquín quihuicaque ipan tali Babilonia
(2 R. 24:8-17)

⁹ Huan Joaquín quiپیayaya 18 xihuit quema pejqui tanahuatía huan san huejcajqui ipan itequi eyi metzti huan majtacti tonali ipan altepet Jerusalén. Pero yaya nelía quichijqui cati fiero iixpa TOTECO. ¹⁰ Huan ipan ne seyoc xihuit quema moseliltiyaya cuame Tanahuatijquet Nabucodonosor tanahuati ma quihuicaca nopa Tanahuatijquet Joaquín hasta tali Babilonia. Nojquiya quinnahuati itequipanojcahua ma quihuicaca inihuaya nochi tamanti cati más cuajcuali cati eltoya ipan itiopa TOTECO. Huan Nabucodonosor quitequitali Sedequías, se iteixmatca Joaquín, para ma eli tanahuatijquet ipan tali Judá huan ipan altepet Jerusalén.

Itequi Sedequías quej tanahuatijquet

¹¹ Huan Sedequías quiپیayaya 21 xihuit quema pejqui tanahuatía huan tanahuati 11 xihuit ipan Jerusalén. ¹² Pero yaya quichijqui cati fiero iixpa TOTECO Dios cati elqui iTeco huan amo moicnonejqui quema hualajqui tajtolpanextijquet Jeremías para quimacas camanali ten TOTECO para ya. ¹³ Huan nojquiya Sedequías mosisini ica Nabucodonosor masque motestigojquetztzoya iixpa Toteo Dios para quitepanitasquía. Sedequías nelía tahuel yolteti eliyaya huan tahuel mohueyimatiyaya, huan amo quinejqui yon quentzi moyolcuepas ica TOTECO Dios cati ininTeco israelitime. ¹⁴ Huajca nojquiya nopa tayacanca totajtzitzi huan nopa masehualme ten nopa tali pejque tahuel mosiniáj ica TOTECO huan quinhueyitalijque ten hueli teteyome cati nopa sequinoc talme quinhueyitaliyayaj. Huan pampa ayecmo quitepanitayayaj nopa tatzejtzololitic tiopamit ten TOTECO ipan Jerusalén, tahuel quichijque nopa tiopamit fiero iixpa TOTECO huan mocajqui tahuel amo tapajpactic ica ten hueli tamanti fiero cati quitalijque nopona. ¹⁵ Huan TOTECO Dios cati elqui ininTeco inihuejcapan tatahua, talojtzitzi quintitaniliyaya tajtolpanextiani para ma quincamanalhuica para ma quicahuaca

cati fiero, pampa TOTECO nelía quinicneliyaya iisraelita masehualhua huan itiopa nojquiya. ¹⁶ Pero nochi nopa masehualme ten tali Judá huan ten altepet Jerusalén san quinhuetzquiliyayaj nopa tajtolpanextiani huan amo quitacaquiliyayaj cati injuanti quinihuiyayaj. San quinpinajtiyayaj huan yeca TOTECO nelía cualanqui ica imasehualhua huan ayecmo oncac pajti.

Quisosolojque nopa tiopamit
(2 R. 25:8-21; Jer. 39:8-10; 52:12-30)

¹⁷ Huan TOTECO quichijqui para nopa Tanahuatijquet ten tali Babilonia ma huala huan ma quintehuiqui nopa tali Judá ehuan. Huan ma quinmictiqij inintelpocahua ipan itiopa TOTECO. Amo aquí quitasojtaque, yon telpocame, yon huehuentziti, yon coneme. Nochi quinmictijque pampa TOTECO quintemactili nochi imasehualhua inimaco nopa Babilonia ehuan.

¹⁸ Huan nojquiya quihuicaque nochi tamanti cati eltoya ipan itiopa Toteco Dios cati huejhueyi tamanti huan cati pisiltziti hasta tali Babilonia. Nochi cati ipati ten nopa tiopamit o ten nopa caltanahuatili quihuicaque. Nojquiya quihuicaque hasta tali Babilonia nochi inintelpocahua nopa tayacanani huan tanahuatiani. ¹⁹ Huan teipa isoldados Nabucodonosor quitatijque ichaj Toteco Dios huan quisosolojque nopa tepamit cati quiyahualojtoya altepet Jerusalén. Nojquiya quitatijque nopa caltanahuatili huan quisosolojque nochi tamantziti cati cuali cati oncayaya nopona.

²⁰ Huan nopa quentzi masehualme cati amo quinmictijque, quihuicaque Babilonia para ma quitequipanoca nopa tanahuatijquet huan iconehua. Huan quej nopa elqui hasta teipa quema nopa tanahuatijquet ten tali Persia quipixqui chichahualisti huan moaxcati Babilonia. ²¹ Huajca nochi ya ni panoc para motamichihuas cati TOTECO quintajtolcahuilijtoya para panos ica itajtolpanextijca Jeremías. Quiijto para mosiyajquetzasquía 70 xihuit nopa tali Israel huan amo aquí itzto para quitequihuis. Huan quena, nopa tali mosiyajquetzqui 70 xihuit quema nochi elqui tasosolijtoc.

Sempa quichihuase itiopa TOTECO
(Esd. 1:1-14)

²² Huan nojquiya para ma motamichihua cati TOTECO quiilhui itajtolpanextijca Jeremías, miyac xihuit teipa TOTECO quiyoltacani Tanahuatijquet Ciro ten tali Persia ipan nopa achtohui xihuit ipan itequi quej tanahuatijquet para ma quichihua ni tanahuatili. Huan yaya quijcuilo ni tanahuatili quej TOTECO quiilhui huan quititanqui para nopa israelitame cati mopantiyayaj ipan nochi talme ipan itanahuatilis campa quihuicatoyaj ma tequipanotij. Huan nopa tanahuatili quej ni quijto:

²³ Na niCiro nitanahuatijquet ten tali Persia, ni quijtohua ya ni: “TOTECO, nopa Dios cati quichijqui ilhuicacti techmactilijtoc nomaco nochi talme ipan taltipacti para ni quinnahuatis. Huan yaya technahuatijtoc ma nijchihuili se tiopamit ipan altepet Jerusalén ipan Judá. Huajca nochi amojuanti cati animasehualhua TOTECO, xiyaca Jerusalén huan xijchihuaca itiopa. Huan ma itzto ica amojuanti TOTECO Dios, yaya cati amoTeco.”

Esdras

Nopa tanahuatili cati Tanahuatijquet Ciro quijcuilo (2 Cr. 36:22-23)

¹ Ipan nopa xihuit quema Tanahuatijquet Ciro sanoc pejtoya tanahuatía ipan tali Persia, TOTECO quiyoltacani para ma quititani ni tanahuatili campa hueli ipan nochi altepeme ipan nochi talme ipan itanahuatilis. TOTECO quichijqui ni para ma quitamilti nopa camanali cati teyolmelajtoya achtohuiya ica tajtolpanextijca Jeremías para teipa panos. ² Huan nica eltoc cati Ciro quijto ipan nopa tajcuiloli:

“Na niTanahuatijquet Ciro ipan tali Persia, nimechilhuía para TOTECO Dios cati quichijqui ilhuicacti techmactilijtoc nomaco nochi talme ipan taltipacti para ma niqunnahuati. Huan ama techtequimacatoc sempa ma nijchihuili itiopa ipan altepet Jerusalén ipan tali Judá.

³ “Ma Toteco Dios amechtiochihua nochi anisraelitame cati campa hueli anitztoque ipan talme cati noaxcahua ipan notanahuatilis. Nimechyolmelahua para nochi amojuanti cati anquinequij hueli anmocuepase ipan altepet Jerusalén para anquichihuatij itiopa amoTECO Dios anisraelitame, yaya cati iaxca Jerusalén. ⁴ Huan nochi anmasehualme cati anmopantíaj nechca nopa israelitame cati yase para quichihuatij nopa tiopamit, monequi xiquinpalehuica. Xiquinmacaca oro, plata, huacaxme huan tamantzitzi cati patiyó. Huan nojquiya monequi xiquinmacaca tomi quej cati ipan amoyolo quisa para quitequihuse ica cati monequis ipan itiopa Toteco Dios ipan altepet Jerusalén.”

Quej nopa quijto nopa tajcuiloli.

Nopa israelitame tacuepilijque ipan Jerusalén

⁵ Huan Toteco Dios quinyoltacani ma yaca miyac tayacanca israelita tatame cati hualajque ipan nopa huejhueyi familias Judá huan Benjamín. Huan nojquiya yajque miyac totajtzitzi huan levitame. Huajca nochi cati TOTECO quinyoltacani ma quichijchihuatij sempa itiopa ipan altepet Jerusalén, mocualtalijque para yase. ⁶ Huan nochi inincalnechcahua quin-palehujque ica miyac tamanti ten oro, plata, huacaxme huan ica tamantzitzi cati patiyó. Nojquiya iyoca quinmacaque tomi quej cati iniyolo quisqui para temacase para itiopa TOTECO. ⁷ Quipixtoya miyac xihuit para nopa Tanahuatijquet Nabucodonosor quichtequili miyac tamanti itiopa TOTECO ipan Jerusalén huan quihualiac ipan altepet Babilonia huan quicalaquijtoya ipan inintiopa iteteyohua. ⁸ Huan ama Tanahuatijquet Ciro, cati tanahuatía quej ipataca ipan tali Persia, quiquixti nochi nopa tamanti cati pajpatiyó. Huan quinahuati Mitrídates cati quimocuitahuiyaya itomi itanahuatilis para ma quipohua nopa tamanti huan ma quimactili Sesbasar cati quitequimacac ma quinyacana masehualme cati sempa mocuetque ipan tali Judá.

⁹⁻¹⁰ Huan ya ni cati quimacac para ma quihuica:

tazas ten oro, 30

platos ten plata, 1,000

ticomit, 29

platos ten oro, 30

tazas ten plata, 410

sequinoc tamanti, 1,000

¹¹ Ica nochi elqui 5,400 tamanti ten oro huan plata cati quimacaque Sesbasar para ma quihuica ipan altepet Jerusalén.

2

*Nopa israelitame cati tacuepilijque ipan Jerusalén
(Neh. 7:5-73)*

¹ Nica eltoc inintoca nopa israelitame cati quistejque tali Babilonia huan sempa yajque altepet Jerusalén huan campa hueli ipan tali Judá campa ehuyayaj inihueyi tatahua. Tanahuatijquet Nabucodonosor huejcajquiya quinhuicatoya inihuejcapan tatahua ilpitoque hasta Babilonia para tefe-quipanose. Nojquiya nica eltoc quesqui tacame tacuepilijque cati hualajque ipan sesen inihuejcapan tata cati quipehualti sesen familia. ²⁻²⁰ Nopa tayacanca tacame cati tacuepilijque ica Zorobabel elque: Jesúa, Nehemías, Seraías, Reelaías, Mardoqueo, Bilsán, Mispar, Bigvai, Rehum huan Baana. Huan nica techilhuía quesqui sequinoc israelita tacame yajque ihuaya Zorobabel huan ajquiya inihueyi tata. Yajque tacame cati eliyayaj iteipa ixhuihua ni hueyi tatame huan nica techilhuía quesqui ininteipa ixhuihua yajque:

Hueyi tata, Quesqui
Paros, 2,172
Sefatías, 372
Ara, 775
Pahat Moab ten Jesúa huan Joab, 2,812
Elam, 1,254
Zatu, 945
Zacai, 760
Bani, 642
Bebai, 623
Azgad, 1,222
Adonicam, 666
Bigvai, 2,056
Adín, 454
Ater iixhui Ezequías, 98
Bezai, 323
Jora, 112
Hasum, 223
Gibar, 95

²¹⁻³⁵ Nojquiya yajque ihuaya Zorobabel tacame ten ni altepeme huan nica techilhuía quesqui yajque ten sese altepet:

Altepet, Quesqui
Belén, 123
Netofa, 56
Anatot, 128
Bet Azmavet, 42
Quiriat Jearim, Cafira huan Beerot, 743
Ramá huan Geba, 621
Micmas, 122
Betel huan Hai, 223
Nebo, 52
iteipa ixhuihua Magbis, 156

Elam, 1,254
 Harim, 320
 Lod, Hadid, Ono, 725
 Jericó, 345
 Senaa, 3,630

Totajtzitzi cati tacuepilijque

³⁶⁻³⁹ Nopa israelita totajtzitzi cati tacuepilijque elque iniixhuihua ni familias huan nica techilhuía quesqui yajque:

Familia, Qesqui
 Jedaías huan icone Jesúa, 973
 Imer, 1,052
 Pasur, 1,247
 Harim, 1,017

Levitame cati amo totajtzitzi cati tacuepilijque

⁴⁰ Nopa levitame cati amo totajtzitzi cati tacuepilijque elque 74 ten nopa familias Jesúa huan Cadmiel cati elque iixhuihua Hodavías.

⁴¹ Mocuetque 128 huicani ten nopa familia Asaf.

⁴² Mocuetque 139 tamocuitahuiani ipan icalteyo tiopamit ten ifamilias: Salum, Ater, Talmón, Acub, Hatita huan Sobai.

⁴³ Huan ni tequipanohuani cati tequitique tiopan calijtic quipixque iniixhuihua cati tacuepilijque ten nopa talme campa quinhuicatoyaj:

Ziha, Hasufa, Tabaot,

⁴⁴ Queros, Siaha, Padón,

⁴⁵ Lebana, Hagaba, Acub,

⁴⁶ Hagab, Salmal, Hanán,

⁴⁷ Gidel, Gahar, Reaía,

⁴⁸ Rezin, Necoda, Gazam,

⁴⁹ Uza, Paseah, Besai,

⁵⁰ Asenat, Meunim, Nefusím,

⁵¹ Bacbuc, Hacufa, Harhur,

⁵² Bazlut, Mehída, Harsa,

⁵³ Barcos, Sísara, Tema,

⁵⁴ Neziá huan Hatifa.

⁵⁵ Huan ni tacame cati huejcajquiya eliyayaj itequiticahua Salomón quinxque ininteipa ixhuihua cati tacuepilijque ten nopa talme campa quinhuicatoyaj:

Sotai, Soferet, Peruda,

⁵⁶ Jaala, Darcón, Gidel,

⁵⁷ Sefatías, Hatil, Poqueret Hazebaim huan Ami.

⁵⁸ Huajca san sejco nochi tequipanohuani ipan tiopamit huan nochi cati eliyayaj ininteipa ixhuihua itequiticahua Salomón mochijque 392.

⁵⁹ Sequinoc masehualme nojquiya tacuepilijque ipan Jerusalén cati quisque ipan tali Persia ten altepeme Tel Mela, Tel Harsa, Querub, Addán huan Imer. Pero amo huelque quinextíaj sinta nelía israelitame pampa amo quipantijque inintoca, yon inintoca inintatahua ipan nopa lista campa eltoyaj nochi israelitame cati quinhuicaque Babilonia achtohuiya. ⁶⁰ Elque 652 tacame cati elque iteipa ixhuihua Delaía, Tobías huan Necoda.

⁶¹ Huan nojquiya ipan ininteipa ixhuihua nopa totajtzitzi itztoyaj sequij cati amo quipantijque inintoca. Eliyayaj ininteipa ixhuihua Habaía, Cos huan Barzilai. Barzilai quiseli nopa itoca pampa mosihuajti ihuaya iichpoca

se tacat cati itoca Barzilai ten ehua tali Galaad huan quiseli itoca ifamilia isihua. ⁶²Nojquiya amo quipantijque inintoca ipan amatapohuali huan yeca nochi quinitaque para amo tapajpactique iixpa TOTECO para tequipanose quej totajtzitzi. ⁶³Huan nopa tanahuatijquet quinilhui para ma amo quicuaca inintacualis totajtzitzi hasta se totajtzi quitatzintoquilis TOTECO ica nopa piltetzitzi cati itoca Urim huan Tumim, nopa dados tatzetzeltolitic ten TOTECO, para quimatis sinta nelia eliyayaj totajtzitzi o amo.

⁶⁴Quema mosentilijque san sejco para tacuepilise eliyayaj 42,360 masehualme, ⁶⁵huan iyoca 7,337 inintequipanojcahua, sihuame huan tacame. Huan nojquiya itztoyaj 200 huicani, sihuame huan tacame. ⁶⁶Huan quinpique 736 cahuyojme, 245 mulas, ⁶⁷435 camellos huan 6,720 burrojme.

⁶⁸Huan quema ajscoj ipan altepet Jerusalén campa eltoya itioipa TOTECO, sequij ten nopa tayacanca tatame temacaque tomi quej ipan iniyolo quisqui para tapalehuise para quicualtalise nopa tiopamit. ⁶⁹Sese ten injuanti temacaque cati huelque huan quej quipixque paquilisti temacase. Huan quisentilijque 61,000 oro tomi, 3,000 kilos ten plata huan 100 iniyoyo totajtzitzi.

⁷⁰Huan nochi injuanti cati eliyayaj totajtzitzi o levitame mocajque ipan altepet Jerusalén huan nopona mochantijque. Pero nopa huicani huan cati quimocuitahuise tiopamit icalteyo, huan cati tequitise tiopan calijtic huan nochi sequinoc israelitame yajque mochantitoj ipan altepeme campa hualajtoyaj inintatahua campa hueli ipan tali Judá.

3

Israelitame quichijque se taixpamit

¹Huan quema pejqui nopa metzti chicome ipan toisraelita calendario*, nochi nopa israelitame cati mocuectoyaj ya mochantijtoyaj ipan inialtepe, hualajque mosentilicoj ica san se iniyolo ipan Jerusalén. ²Huan teipa Jesúa, icone Josadac, huan iicnihua cati eliyayaj totajtzitzi, huan Zorobabel, icone Salatiel, ihuaya iicnihua pejque quichihuj se taixpamit para ipan quitatise tacajcahualisti para Toteco Dios. Huan quichijque nopa taixpamit quej quijto itanahuatil Moisés, yaya cati eliyaya itequipanojca Toteco Dios. ³Huan quiquetzque cuali nopa taixpamit campa eltoya achtohuiya huan pejque quitatíaj tacajcahualisti ica ijnaloc huan ica tiotac para TOTECO, masque tael quinimacasiyayaj nopa masehualme cati itztoyaj ipan nopa tali. ⁴Huan nojquiya quema ajsic nopa ilhuit ten pilxajcaltzitzi, ilhuichijque quej quijto itanahuatil Moisés. Huan mojmosta quitatíyayaj tacajcahualisti quej imiyaca nopa tanahuatili quijto monequiyaya ipan senen tonal. ⁵Huan nojquiya quitatíyayaj nochi tacajcahualisti ipan nopa tonali quema pehuayaya yancuic metzti, huan ipan nochi ilhuime tatzetzeltolitic para TOTECO cati monejqui quichihuase sesen xihuit. Huan iyoca nopa masehualme quihualicayayaj nopa tacajcahualisti para quimacase TOTECO cati ipan iniyolo quisqui. ⁶Huan pejque quitatíaj nopa tacajcahualisti para TOTECO ipan nopa tonali 15 itequi septiembre. Pero ayemo quipehualtijtoyaj quicualtalíaj itzinpehualtil nopa tiopamit. ⁷Teipa quintaxtahuijque tepanchihuani huan cuaximani para ma tequitica. Huan nojquiya quinmacaque tacualisti, taili huan aceite nopa talme Sidón huan Tiro ehuan para quihualicase nopa

* 3:1 3:1 Pehua ipan itamiya septiembre, o ipan octubre o ipan ipejya noviembre ipan tocalendario ten ama.

tiocuame ten tali Libano ipan hueyi at hasta altepet Jope quej Tanahuatijquet
Ciro ten tali Persia tanahuati ma quichihuaca.

Quipehualtisque quicualtalaj nopa tiopamit

⁸ Huan pejque quicualchijchihuaj itiopa Toteco Dios ipan nopa ome met-
zti ipan toisraelita calendario † quema yahuiyaya para ome xihuit nopa
israelitame ajsitoyaj sempa ipan Jerusalén. Huan pejque tequitij nochi
cati mocuectoyaj ten tali Babilonia campa quinhuicatoyaj inihuejcapan
tatahua. Huan quinyacanayaya Zorobabel, icone Salatiel, huan Jesús, icone
Josadac, inihuaya iniicnihua cati totajtzitzi huan nochi levitame. Huan
quintequimacaque nopa levitame cati quipixque 20 xihuit o más para ma
quitachilijtiyase nopa tequit para sempa quiquetzase itiopa TOTECO. ⁹ Nopa
huejhueyi tayacanani elque Jesús ihuaya iconehua huan iteixmatcahua:
Cadmiel, iixhui Judá huan iconehua, huan Henadad huan iconehua. Nochi
ya ni eliyayaj levitame. Huan nochi inijuanti mosentilijque para quinya-
canase cati tequitiyayaj ipan nopa tiopamit.

¹⁰ Huan quema nopa tequipanohuani quitallijque itzinpehualtil nopa
tiopamit, hualajque nopa totajtzitzi huan motallijtoyaj iniyoyo cati quite-
quihuaj ipan itiopa TOTECO. Huan pejque quipitzaj tapitzali huan nopa
levitame cati iteipa ixhuihua Asaf moquetzque ica inincímbalos para tat-
zotzonase huan quihueyichihuase TOTECO quej Tanahuatijquet David qui-
ijcuilo ma mochihua. ¹¹ Huan huicaque huan quitascamatque TOTECO ica
ni huicat:

“Xijtascamatilica TOTECO pampa yaya nelía cuali.
Hueyi itaicnelil ica israelitame para nochipa.”

Huan nochi nopa masehualme tzajtzique ica paquilisti huan quihueyichi-
jqe TOTECO pampa quitalliyayaj itzinpehualtil nopa tiopamit. ¹² Huan
miyac totajtzitzi huan levitame cati eliyayaj huehuentzitzitzi huan quiitz-
toyaj nopa achtohui tiopamit, chocayayaj chicahuac pampa quitayayaj
quenicatza quipehualtijttoyaj quicualtalaj sempa. Huan tzajtziiyayaj ica
paquilisti. ¹³ Huan tahuejchihuayayaj huan huejca caquistiyaya. Pero amo
aquí hueliyaya quimati ajquiya inijuanti chocayayaj huan ajquiya inijuanti
paquiyayaj pampa tahuel chicahuac tahuejchihuayayaj.

4

Sequinoc quitzacuilijque nopa tequit

¹ Huan quema nopa masehualme cati mocahuayayaj ipan tali Judá
huan Benjamín quimatque para inincualancaitacahua nopa israelitame
cati mocuectoyaj ten tali Babilonia, sempa quiquetzayayaj itiopa TOTECO
Dios, ² yajque quiitator Zorobabel huan nopa sequinoc tayacanani huan
quinillhuijqe:

—Techcahuilica titequitise amohuaya pampa tijtemohuaj amoTeco Dios
quej amojuanti. Huan tijmacatoque tacajcahualisti hasta quema Tanahuati-
jqet Esar Hadón ten tali Asiria techhualic nica.

³ Huan Zorobabel, Jesús huan nopa tayacanca israelitame quinnanquili-
jqe:

—¡Amo! Amo quinamiqui para antehpalehuise ipan ni tequit pampa amo
teno anquipiayaj ica tojuanti. Tojuanti toselitzitzi tijcualtalise itiopa TOTECO
Dios pampa quej nopa technahuatijtoc Tanahuatijquet Ciró ten tali Persia.

† 3:8 3:8 Elqui huejcajquiya ipan se abril o mayo ipan tocalendario ten ama.

⁴ Pero teipa nopa masehualme cati nozona ehuayayaj quitemojqque queni-catza huélis quintzinquixtise para ayecmo ma tequitica ipan nopa tiopamit. ⁵ Huan quintitanque sequinoc para quinistacahuise iixpa Tanahuatijquet Ciro ipan tali Persia. Nojqquiya san se quichijtiyajque hasta miyac xihuit teipa quema pejqqui tanahuatía Tanahuatijquet Darío nozona.

Ininculancaitacahua quitajcuilhuijqque Artajerjes

⁶ Quema mijqui Ciro huan pejqqui tanahuatía Asuero ipan Persia sempa quitajcuilhuijqque huan quintatelhuijqque nopa israelitame cati mocuetoyaj ipan tali Judá huan ipan altepet Jerusalén. ⁷ Huan nojqquiya sempa quichijjqque teipa quema tanahuatiyaya Artajerjes ipan tali Persia. Ipan nopa tonali Bislam, Mitrídates, Tabeel huan inihuampoyohua quitajcuilhuijqque ica camanali huan tajcuiloli arameo. ⁸⁻⁹ Nojqquiya Rehum cati eliyaya gobernador huan Simsai cati eliyaya tajcuilojqquet inihuaya inihuampoyohua quitajcuilhuijqque Tanahuatijquet Artajerjes para quintatelhuise nopa israelitame cati tacualtiyayaj ipan Jerusalén. Nojqquiya inihuaya itztoyaj ipan nopa tajcuiloli sequij juecés, huan tequichihuani, huan sequij gobernadores cati ehuayayaj tali Babilonia huan nopa elamita masehualme ipan altepet Erec huan Susa. ¹⁰ Huan inihuaya itztoyaj ipan tajcuiloli miyac sequinoc masehualme cati quinhualicatoya nopa hueyi tanahuatijquet Asnapar ten inintal huan quinsehujtoya ipan altepet Samaria huan campa huéli ipan nochi nopa talme cati eltoc ipan ni nali hueyat Eufrates campa temo tonati.

¹¹ Huan ya ni se iixcopinca ten nopa amatajcuiloli cati nochi quititanilijque Tanahuatijquet Artajerjes. Quej ni quijjtohua:

“Tanahuatijquet Artajerjes,

Tojuanti timotequipanojqchua ipan ni nali hueyat Eufrates campa temo tonati, timitzajpalohuaj.

¹² “Timitzmachiltíaj para nopa israelitame cati quisque campa tiitztoc ipan tali Babilonia huan mocuetoque hasta altepet Jerusalén, quicualtaliáj nopa altepet cati nochi quimatij eliyaya se altepet tahuel fiero ica masehualme cati mosisiníaj. Huan ya quipehualtijoque quicualtaliáj nopa tepamit huan quitallíaj itzinpehualtil nopa tiopamit.

¹³ “Huan nojqquiya timitzmachiltíaj sinta ni altepet quicualtalise, amo mitz-taxtahuisse finca, yon impuestos, yon cati huéli tomi cati quinamiqui huan tijpolos miyac tomi. ¹⁴ Huan pampa ta tahuel techpalehuijq-toc, tijnequij timitzitanilise ya ni para timitzilhuisse taya quichihuaj ni israelitame. Amo aquí tijcahuilise ma mitzixpano o amo ma mitztepanita. ¹⁵ Huajca timitzilhúaj para xijtemo ipan nopa amame cati tohuejcapan tatahua quiajoctoque. Nozona tiquitas para ni altepet tahuel fiero huan mahuilili para tanahuatiani. Huan masehualme cati nozona ehuayayaj mosisiníjqque, huan motananque huan yeca monejqqui quisosolose. ¹⁶ Nojqquiya sinta ni altepet quicualtalise, xijmati para ayecmo teno elis moaxca ipan ni nali hueyat Eufrates para campa temo tonati.”

Nopa tanahuatili cati Tanahuatijquet Artajerjes quijjcuilo

¹⁷ Huajca Tanahuatijquet Artajerjes quintitanili se tajcuiloli para quin-nanquilis huan quijjto quej ni:

“Gobernador Rehum,

huan nopa tajcuilojquet Simsai huan nochi amohuampoyohua cati anitztoque ipan altepet Samaria huan cati anitztoque ipan cati hueli tali ipan ne seyoc nali Eufrates, nimechtajpalohua.

18 “Nopa amatajcuiloli cati antechtitanilijque quipataque ica na nocamanal para huelqui nijmachili huan techpohuilijtoque. 19 Huan nitanahuati para ma quitemoca ipan amame ten tohujcapan tatahua huan tijpantijque campa quijtohua para nopa Jerusalén masehualme tahuel fierojtique, huan nozona amo quintepanitaj tanahuatiani huan miyac huelta nozona mosisinijque huan motananque. 20 Huan nojquiya tijpantijtoque para ipan Jerusalén achtohuiya itztoyaj tanahuatiani cati tahuel tetique huan quipixtoyaj ipan inintanahuatilis nochi nopa tali ipan ne seyoc nali hueyat Eufrates. Huan nopa tanahuatiani ipan Jerusalén quiseliyayaj nochi nopa fincas huan impuestos ten nopa talme. 21 Huajca ama nitanahuatía para xijtilquetzaca nopa tequit huan xiquinilhuica nopa masehualme para ma amo tequitica hasta quema na nitanahuatis ma sempa pehua. 22 Amo xitatzihuica ipan ni tamanti. Nimantzi xiquinilquetzaca para ma amo mohueyili cati fiero ipan notanahuatilis.”

23 Huan quema Rehum Gobernador huan Simsai huan inihuampoyohua quiselijque ni tanahuatili ten Tanahuatijquet Artajerjes, nimantzi yajque Jerusalén huan ica ininchichualis quintilquetzque nopa israelitame cati tequitiyayaj. 24 Huan quej nopa motilquetzqui nopa tequit ipan itiopa Toteco Dios huan quej nopa mocajqui hasta quema Tanahuatijquet Darío pejqqui tanahuatía ipan tali Persia huan teipa sempa pejqqui quema yahuiyaya para ome xihuit tanahuatis.

5

Sempa quicualchijchijque nopa tiopamit

1 Teipa nopa tajtolpanextijquet Hageo huan Zacarías, icone Iddo, quinilhijque nopa israelitame cati itztoyaj ipan altepet Jerusalén huan ipan tali Judá para Toteco Dios cati quinyacana quijtojtoya para ma tequitica huan ma quicualchijchihuaca itiopa ipan Jerusalén. 2 Huajca Zorobabel, icone Salatiel, huan Jesús, icone Josadac, sempa pejqque tequitij huan itajtolpanextijca Toteco Dios itztoyaj inihuaya para quinpalehuise. 3 Pero nimantzi ajsico ipan altepet Jerusalén Tatnai cati eliyaya gobernador ipan ni nali Eufrates campa calaqui tonati, inihuaya Setar Boznai huan inihuampoyohua. Huan inijuanti quinilhijque: “¿Ajquiya amechnahuatijtoc para sempa xijcualchijchihuaca ni tiopamit huan ni tepamit ipan ni altepet? 4 Huan ¿taya inintoca nopa tacame cati quichihujaj ni tequit?”

5 Pero Toteco Dios itztoya inihuaya nopa israelita tayacanani huan amo monejqqui quitilquetzase nopa tequit. Quincahuilijque noja ma tequitica nochi nopa tonali cati monequiyaya para quitajcuilhise Tanahuatijquet Darío huan teipa para yaya ma quintitanilis se amat para quinmarchitlaya ipaquilis.

6 Huan ya ni nopa amatajcuiloli cati Gobernador Tatnai, huan Setar Boznai, huan inihuampoyohua ten sequinoc talme quititanilijque Tanahuatijquet Darío. 7 Quej ni quijto:

“Tanahuatijquet Darío:
Timitztajpalohujaj.

- 8 “Tijnequij timitzilhuisse tiyajque tipaxalotoj ipan tali Judá huan campa nopa itiopa Dios cati hueyi. Tijnequij xijmati para quicualtalíaj íca huejhueyi tet, huan quitalijtoque huejhueyi cuatetomit ipan nopa tepamit. Tequitij chicahuac huan quisa cuali nochi cati quichihuj.
- 9 “Huan tiquintajtanilijque nopa tayacanani ajquiya quinnahuatijtoya para ma quicualtica nopa tiopamit,¹⁰ huan nojquiya tiquintajtanilijque inintoca cati quiyacanayayaj nopa tequit para tiqijcuilose inintoca huan timitztitanilise.
- 11 “Huan technanquilijque íca ni camanali. Quiijtoque: ‘Tijtequipanohuaj Toteco Dios cati quichijqui ilhuicacti huan taltipacti. Tijcualchijchihuaj itiopa cati huejcajquiya quichijchijqui se hueyi tanahuatijquet ipan tali Israel. ¹² Pero tohuejcapan tatahua tahuel tajtacolchijque iixpa Toteco Dios huan yeca techtahuelcajqui huan techtemacatili imaco Nabucodonosor, nopa tanahuatijquet ipan tali Babilonia. Huan yaya quisosolo ni tiopamit huan quinquixti nochi israelitame ten inialtepehua huan quinhuicac hasta tali Babilonia. ¹³ Pero teipa quema pejqui tanahuatía Tanahuatijquet Ciro ipan Babilonia huan ya yahuyaya para se xihuit ipan itequi, yaya quichijqui se tanahuatili para ma tijcualchijchihuaca ni tiopamit. ¹⁴ Huan nojquiya nochi nopa tamanti ten oro huan ten plata cati Nabucodonosor achtohuiya quiquixti ipan itiopa Toteco Dios nica ipan alpetet Jerusalén, huan quihuicatoyaj huan quitalijtoyaj ipan inintiopahua teteyome ipan Babilonia, Tanahuatijquet Ciro quiquixti huan quimacatili Sesbasar. Huan quinnahuati ma quihualica nica Jerusalén. Nojquiya Tanahuatijquet Ciro quitequimacac Sesbasar ma eli gobernador nica. ¹⁵ Quiilhui ma quihualica nochi ni tamanti para itiopa Toteco Dios nica ipan Jerusalén huan ma mocuepaca nica para quichijchihuaquij nopa tiopamit campa achtohui eltoya. ¹⁶ Huajca hualajqui Sesbasar huan quitalili itzinpehualtil itiopa Toteco Dios, huan hasta ama ni tonali quicualchijchijtiyahuj huan ayemo tantoque.’ Quej nopa technanquili.
- 17 “Huajca ama timitztajtanilíaj sinta mitzpacatía, xijtemo ipan nopa amame cati quiajoctoque sinta nelía Tanahuatijquet Ciro temacatoya ni tanahuatili para ma quicualchijchihuaca ni tiopamit. Huan sinta, quena, huajca techmachilti cati timoilhuía ta ipan ni tamanti.”

6

Darío tanahuati ma quicualtica nopa tiopamit

¹ Huajca Tanahuatijquet Darío tanahuati para ma quitemoca campa quiajocuiyayaj nochi nopa amame ten tali Babilonia. ² Huan ipan se cali cati cuali tasencahuali ipan alpetet Acmeta ipan nopa municipio Media, quiajsique se amatajcuiloli huan quej ni quijtohuayaya nopa amatajcuiloli:

³ “Ipan nopa achtohui xihuit quema Tanahuatijquet Ciro pejqui tanahuatía, temacac ni tanahuatili:

“Monequi sempa xijcualtica itiopa Toteco Dios campa eltoya ipan alpetet Jerusalén. Nojquiya xijcualtica nopa taixpamit campa quimacayayaj tacajcahualisti. Xijsencahuaca quej eltoya íca ihuejcapanca 27 metros huan ipatajca nojquiya 27 metros. ⁴ Huan quipiyas eyi pamit ten tet huejhueyi ipan itzinpehualtil huan se pamit ten cuahuit yancuic. Huan nochi cati motequihuis moixtahuas íca nopa

tomi cati huala quej impuestos ipan notanahuatilis na. ⁵ Huan nojquiya ma quicuepaca nochi tamanti ten oro huan ten plata cati Nabucodonosor quiquixti ipan tiopamit ipan Jerusalén huan quihualicac nica Babilonia. Huan ma quihuica sempa ipan altepet Jerusalén para qitalise ipan itiopa Toteco Dios.”

Quej nopa quiijto nopa tanahuatili.

⁶ Huajca Tanahuatijquet Darío quititanqui ni camanali:

“Tequichijquet Tatnai, ta cati tigobernador ipan ne seyoc nali hueyat Eufrates huan Setar Boznai huan mohuampoyohua cati nojquiya itztoyaj nopona, nimechmaca ni tanahuatili:

“Nochi xiquisaca ipan Jerusalén. ⁷ Xiquincahuaca nopa israelitame cati tequitij ipan itiopa Toteco Dios. Amo xiquincuatotónica. Huan xijcahuilica inigobernador nopa israelitame huan nopa tayacanani sempa ma quisencahuaca itiopa Toteco Dios campá eltoya achtohuiya.

⁸ “Huan nojquiya na nimechnahuatía para xiquinpalehuica ica notomi cati tijselaj ipan notanahuatilis quema masehualme taxtahuaj iniimpuestos ipan nopa talme campá tütztoc. Nochi ten monequi nopa israelitame xitaxtahuaca para ma quitamisencahuaca nopa tiopamit huan ma amo quitajcocaahuaca. ⁹ Huan nojquiya xiquinmacaca nopa totajtztizi nochi cati mojmosta monequis para tacajcahualisti quej torojme, oquich borregojme, piloquich borregojtztizi, trigo, istat, xocomecat iayo huan aceite. ¹⁰ Xiquinilhui ma quimacaca tacajcahualisti Toteco Dios quej yaya quipactía. Huan ma quitajtanica Toteco Dios por na huan por nochi noconeua.

¹¹ “Huan na nojquiya niquijtohua sinta acajya quiixpanos ni tanahuatili, monequi quiijcuenilise se cuahuit ten ichaj huan nopona quicuapilose hasta miquis. Huan teipa quisosolhuilise ichaj pampa amo quitepanitac notanahuatil. ¹² Toteco Dios cati quitapejpenijtoc Jerusalén para quihuicas itoca ma quinzontamilti nochi tanahuatiani huan altepeme cati amo quinequij para ma mochihua itiopa.

“Na niDarío nitanahuatijquet nitemaca ni tanahuatili para ma mochihua quej nitanahuatijtoc.”

Quisehuiquilijque tequitique hasta tanqui inintequi

¹³ Huajca Gobernador Tatnai huan Setar Boznai, huan inihuampoyohua moisihuiltijque para quichihuase quej Tanahuatijquet Darío tanahuatijtoya.

¹⁴ Huan nopa inintayacanca nopa israelitame quisehuiquilijque tequitij huan cuali quisqui inintequi pampa nopa tajtolpanextiani Hageo huan Zacarías, icone Iddo, quisehuiquilijque quinilhuíaj icamanal Toteco Dios. Huan quitamisencajque nopa tiopamit quej quinnahuati Toteco Dios huan nojquiya quej tanahuatijque Ciro, Darío huan Artajerjes, nopa tanahuatiani ipan tali Persia. ¹⁵ Huan quitamiltijque inintequi ipan itiopa Toteco Dios ipan tonali 3 ten metzti Adar ipan toisraelita calendario*, quema Tanahuatijquet Darío yahuyaya para chicueyi xihuit tanahuatis.

¹⁶ Huan nopa totajtztizi, huan levitame huan nochi israelitame cati sempa hualajtoyaj ipan inintal quiilhuichihuilijque itiopa Toteco Dios ica miyac paquilisti pampa ya quitamisencajtoyaj. ¹⁷ Huan quimacaque Toteco Dios para tacajcahualisti 100 torojme, 200 oquich borregojme huan 400 pilborregojtztizi. Huan para inintajacolhua nochi nopa israelitame, quitencajque

* 6:15 6:15 Elqui huejcaquiya ipan se 12 itequi marzo ipan tocalendario ten ama.

12 oquich chivojme, se para sese icone inihuejcapan tata Israel cati huejcajquiya itztoya. ¹⁸ Huan quinmacaque sesen pamit nopa totajtztizi huan levitame nopa tequit cati Moisés quijcuilo para monequi ma quichihuaca.

¹⁹ Huan nojquiya nopa israelitame cati mocuetoyaj hasta altepet Jerusalén quichijque nopa ilhuit Pascua ipan tonali 14 itequi nopa achtohui metzti ipan toisraelita calendario†. ²⁰ Pero achtohuiya nochi totajtztizi huan levitame ya motapajpacchijtoyaj iixpa Toteco Dios quej tanahuati ma quichihuaca. Huan nopa levitame itztoyaj yoltapajpactique iixpa Toteco Dios huan quimictijque nopa Pascua pilborregoitz para nochi cati mocuetoyaj ten tali Babilonia. Quichijque para iniicnihua nopa totajtztizi huan nojquiya para injuanti iniselti. ²¹ Huan nochi israelitame cati mocuetoyaj ten tali Babilonia quicujque nopa Pascua tacualisti. Nojquiya quicujque nochi masehualme cati itztoyaj ipan tali Judá cati mosentilijtoyaj inihuaya para quitemose ininTECO Dios nopa israelitame. Nochi nopa masehualme cati quicujque moyocatalijtoyaj ten nopa tajtacoli cati ininteixmatcagua quichijque, huan masque amo eliyayaj israelitame, quicujque nopa Pascua tacualisti. ²² Huan para chicome tonati ica miyac paquilisti, nochi quichijque nopa ilhuit ica pantzi cati amo quiptiya tasonejcyot huan TOTECO quinpauilismacac. Paquiyayaj pampa Toteco Dios quiyoltacanjtoya nopa tanahuatijquet ten tali Persia para ma quicualtica nopa tiopamit. Huan nojquiya paquiyayaj pampa Toteco Dios quichijqui para nopa gobernador ten tali Asiria ma quiptiya hueyi iyolo para quinpalehuis más huan quinyolchicajqui para quicualtalise nopa itiopa Toteco Dios cati tiisraelitame tijtequipanohuaj.

7

Esdras huan sequinoc ihuampoyohua ajsicoy ipan altepet Jerusalén

¹ Miyac xihuit teipa * nozona ipan tali Persia na niEsdras ya nimotacachijtoya huan Tanahuatijquet Artajerjes ya pejtoya tanahuatía. Huan na niEsdras nieliyaya icone Seraías cati eliyaya icone Azarías, icone Hilcías. ² Huan Hilcías eliyaya icone Salum, cati eliyaya icone Sadoc, cati eliyaya icone Ahitob. ³ Huan Ahitob eliyaya icone Amarías, cati eliyaya icone Azarías, cati eliyaya icone Meraiot, ⁴ cati eliyaya icone Zeraías, cati eliyaya icone Uzi, cati eliyaya icone Buqui, ⁵ cati eliyaya icone Abisúa, cati eliyaya icone Finees, cati eliyaya icone Eleazar, cati eliyaya icone Aarón nopa achtohui totajtzi. ⁶ Huan na niEsdras niquisqui Babilonia huan niixtecotiyajqui para nimocuepas ipan altepet Jerusalén. Na nieliyaya se tamachtijquet cati nimomachtijtoya miyac itanahuatilhua Moisés cati TOTECO Dios cati toDios tiisraelitame techmacatoya. Huan quema niquistejqui para niyas Jerusalén, Tanahuatijquet Artajerjes techmacac nochi cati nijtajtani pampa TOTECO Dios itztoya nohuaya. ⁷ Huan quema Artajerjes yahuiyaya para chicome xihuit tanahuatis, niquistejqui huan sequinoc israelitame nojquiya quisque nohuaya. Mocuetque sequij israelitame cati totajtztizi, huan cati levitame, cati huicani, huan cati quiptiyayaj inintequi para tamocuitahuse ipan tiopamit icalteyo huan para tequitise ipan tiopamit. ⁸ Huan na huan nochi cati mocuepayayaj nohuaya tiquisque Babilonia ipan nopa achtohui tonali

† **6:19** 6:19 Elqui huejcajquiya ipan se 21 itequi abril ipan tocalendario ten ama. * **7:1** 7:1 Huelis nechca 60 xihuit teipa.

ipan nopa achtohui metzti ipan toisraelita calendario † quema Artajerjes yahuiyaya para chicome xihuit tanahuatis.

⁹ Huan tiajsicoj altepet Jerusalén ipan nopa achtohui tonali ipan metzti macuili ipan toisraelita calendario‡, pampa Toteco Dios techtiochijqui miyac ipan ojti. ¹⁰ TOTECO techtiochijqui miyac pampa nimotemacatoya para nimomachtis itanahuatilhua huan nijchihuas cati quijitohua. Nojquiya nimotemacatoya para niquinmachtis sequinoc israelitame cati quijitohua.

Nopa tanahuatijquet quitajcuilhui Esdras

¹¹ Ya ni iixcopinca nopa tanahuatili cati Tanahuatijquet Artajerjes techmacac na niEsdras, nitotajtzi huan nitamachtijquet cati nimomachtijtoc itanahuatilhua TOTECO huan niquinmachtia sequinoc israelitame:

¹² “Esdras titotajtzi huan titamachtijquet ten itanahuatilhua Toteco Dios cati quichijqui ilhuicacti,

“NiTanahuatijquet Artajerjes nimitztajpalohua.

¹³ “Na nijchijtoc se tanahuatili para ma yaca mohuaya nochi israelitame, huan inintotajtztzi huan levitame cati itztoque ipan notanahuatilis huan quinequij yase. ¹⁴ Pampa na huan chicome notetalnamictijcahua timitztitanij para xiquinpaxaloti cati itztoque ipan tali Judá huan ipan altepet Jerusalén huan techyolmelahua quenicatza eltoc nopona. Huan xijhuica itanahuatilhua moTeco Dios ihuaya para titamachtis. ¹⁵ Huan nojquiya xijhuica ni plata huan oro cati na huan notapalehuijcahua titemacaj ica nochi toyolo para amoTeco Dios anisraelitame cati mochantijtoc ipan Jerusalén.

¹⁶ “Huan xijhuica nochi plata huan oro cati tijselis ten campa hueli ipan tali Babilonia, ihuaya nopa nemacti ten tomi cati nopa masehualme huan totajtztzi ica iniyolo quinequij mitzmacase para itiopa ininTeco Dios ipan Jerusalén. ¹⁷ Huan ica ni tomi tiquincohuas torojme, huan oquich borregojme huan pilborregojtztzi ihuaya nopa tacajcahualisti ten harina, huan nopa tacajcahualisti cati monequi tijtoyahuas ihuaya. Nochi xijmaca moTeco Dios ipan Jerusalén ipan nopa taixpamit ipan itiopa moTeco Dios ipan Jerusalén.

¹⁸ “Huan nochi oro huan plata cati mocahuas xijchihua cati ta huan mohuampoyohua anmoilhuaj para quipactis amoTeco Dios. ¹⁹ Huan nochi tamantzitzi ten oro cati timitzmactilijtoque, xijhuicaca para motequihuis ipan itiopa moTeco Dios ipan Jerusalén. ²⁰ Huan sinta anquinequise más tomi, o se tenijqui, huajca xiquintajtanica notequipanojcahua cati tomiajocuij ipan nopa talme cati noaxcahua ipan nopa seyoc nali ten nopa hueyat.

²¹ “Huan na niTanahuatijquet Artajerjes, niquinmaca ni tanahuatili nochi cati tomiajocuij ipan nochi altepeme cati eltoc ipan nopa seyoc nali hueyat Eufrates campa temo tonati: Nochi cati amechtajanis ni totajtzi Esdras, nimanntzi xijmacaca pampa yaya se tamachtijquet ten itanahuatilhua Toteco Dios cati quichijqui ilhuicacti. ²² Xijmacaca hasta 3 mil 400 kilos ten plata, huan hasta 22,000 litros ten trigo, huan hasta 2,200 litros ten xocomecat iayo, huan hasta 2,200 litros aceite, huan xijmacaca nochi istat cati amechtajanis.

† 7:8 7:8 Elqui huejcajquiya ipan se 8 itequi abril ipan tocalendario ten ama. ‡ 7:9 7:9 Elqui huejcajquiya ipan se 4 itequi agosto ipan tocalendario ten ama.

- 23 “Nochi cati Toteco Dios quintajtanía ipan itanahuatilhua para itiopa, xiquinmacaca nimantzi para amo cualanis ica na notanahuatilis, yon ica noconeua. 24 Huan nojquiya xijmatica para amo hueli anquintajtanise impuestos yon se cati totajtzi, yon levitame, yon huicani, yon cati tamocuitahuaj campá caltemit, o cati tequipanohuj tiopa calijtic ipan ichaj Toteco Dios.
- 25 “Huan ta, Esdras, cati tiquixmati itanahuatilhua Toteco Dios huan cati Toteco Dios mitzmacatoc motalnamiqullis, ta xiquintali jueces huan tequichihuani para quintajtolsencahuase nochi nopa masehualme cati itztoque ipan ne nali hueyat Eufates. Huan cati amo quiixmatij itanahuatilhua Toteco Dios, xiquinnextili. 26 Huan sinta se acayja amo quichihuas cati quijtohua moTeco Dios itanahuatilhua huan cati quijtohua na notanahuatil, xijtatzacuilti nimantzi. Hueli tijmictis, o tijquixtis ten motal, o tijquixtilis nochi cati iaxca o tijtzacuas.”
- Quej nopa nopa quijto nopa tanahuatili cati nopa tanahuatijquet quimacac Esdras.

Esdras quitascamatqui Toteco

- 27 Huan na niEsdras nijpojqui nopa amat huan nimotatajti ica TOTECO huan niqijto: “Tascamati, TOTECO Dios, ta cati nojquiya tiinTECO tohuejcapan tatahua. Ta tijyoltacani ni tanahuatijquet para quej ni ma quitepanita motiopa cati eltoc ipan Jerusalén. 28 Timitztascamatij, Toteco Dios, pampa techicnelía huan tijchijtoc para ma techicnelica ni tanahuatijquet huan itetalnamiqtijcahua ihuaya nochi itequitacahua cati quipiyaj tanahuatili.”
- Huan pampa TOTECO Dios techpalehui huan niitztoc ica cuali ica nopa tanahuatijquet, nijpixqui chichualisti para niquinsentilis nopa tayacanca israelitame para sempa ma hualaca nohuaya hasta nica Jerusalén.

8

Inintoca cati tacuepilijque ipan altepet Jerusalén ihuaya Esdras

- 1 Ya ni inintoca inihuejcapan tatahua nopa tayacanca tacame cati quisque Babilonia nohuaya na niEsdras para tacuepilise ipan Jerusalén quema tanahuatiyaya Tanahuatijquet Artajerjes:
- 2 Gersón cati eliyaya iixhui Finees.
Daniel cati eliyaya iixhui Itamar.
Hatús, icone Secanías, cati eliyaya iixhui David.
- 3 Zacarías iixhui Paros.
Yajqui Zacarías ihuaya 150 iteixmatcahua cati quipixque inintoca ipan nopa lista.
- 4 Nojquiya yajqui Elioenai, icone Zeraías, cati eliyaya se iixhui Pahat Moab.
Huan ihuaya Elioenai yajque 200 tacame.
- 5 Nojquiya yajqui icone Secanías cati eliyaya iixhui Jahaziel. Huan ihuaya yajque 300 tacame.
- 6 Huan nojquiya yajqui Ebed, icone Jonatán, huan iixhui Adín. Huan ihuaya yajque 50 tacame.
- 7 Huan yajqui Jesaías, icone Atalías huan iixhui Elam. Huan ihuaya yajque 70 tacame.
- 8 Nojquiya yajqui Zebadías, icone Micael huan iixhui Sefatías. Huan ihuaya yajque 80 tacame.
- 9 Huan yajqui Obadías, icone Jehiel huan iixhui Joab. Huan ihuaya yajque 218 tacame.

- ¹⁰ Huan nojquiya yajqui Selomit, icone Josiffas cati eliyaya iixhui Bani. Huan ihuaya yajque 160 tacame.
- ¹¹ Huan nojquiya yajqui Zacarías, icone Bebai huan iixhui seyoc cati itoca Bebai. Huan ihuaya yajque 28 tacame.
- ¹² Huan nojquiya yajqui Johanán, icone Hacamán huan iixhui Azgad. Huan ihuaya Johanán yajque 110 tacame.
- ¹³ Huan nojquiya yajque teipa Elifelet, Jeiel huan Semaías cati eliyayaj iteipa ixhuihua Adonicam. Huan inihuaya yajque 60 tacame.
- ¹⁴ Huan yajque Utai huan Zabud cati eliyaya iteipa ixhuihua Bigvai. Huan inihuaya yajque 70 tacame.

Inintoca cati tequitique ipan tiopamit

¹⁵ Huan na, niEsdras, niquinsentili nechca nopa hueyat cati yahui para altepet Ahava huan timocajque nozona eyi tonati. Huan nijtemo ipan nopa lista para nijmatis catijqui israelitame huan catijqui totajtzitzi ajstitihualayayaj, huan niqitac para yon se levita amo hualajtoya. ¹⁶ Huajca niqinnotzqui ma hualaca Eliezer, Ariel, Semaías, Elnatán, Jarib, Elnatán, Natán, Zacarías huan Mesulam cati eliyayaj tayacanca tacame, huan Joarib huan Elnatán cati eliyayaj tamachtiani. ¹⁷ Huan niquinahuati ma quipaxalotij Iddo, se tequitiquet ipan israelitame ipan altepet Casifia. Niqinilhui ma quihuitij Iddo huan iicnihua cati tequipanohuayayaj ipan tiopamit ipan Casifia para ma techtitanilica tacame para tequitise tiopan calijtic ipan itiopa Toteco Dios ipan altepet Jerusalén. ¹⁸ Huan tijtascamatilíaj Toteco Dios pampa techtitanilijque se tacat cati talnamiqui cati itoca Serebías, ihuaya itelpocahua, huan iicnihua. Huajca mochijque 18 tacame. Huan Serebías eliyaya icone Mahli huan iixhui Leví cati huejcajquiya. ¹⁹ Huan nojquiya hualajque Hasabías huan Jesaías cati eliyayaj iteipa ixhuihua Merari. Huan nojquiya hualajque iconehua huan iicnihua Hasabías. Huajca para nochi eliyayaj 20 tacame.

²⁰ Huan nojquiya hualajque 220 tacame cati quimatiyayaj tequitij tiopan calijtic, pero amo levitame. Huejcajquiya David huan itequiticahua quichijque se lista huan quinquimacatoyaj ni tacame inintatahua para ma quinpalehuica levitame tiopan calijtic.

²¹ Huan teipa nochi mosentilijque campa nopa hueyat Ahava. Huan nozona niqinvolmelajqui para timosahuase huan timotancuaquetzase iixpa Toteco Dios huan tijtajtanise ma techmocuitahui tojuanti, huan toconeua, huan nochi cati tijhuicayayaj para amo teno topantis ipan toojhui. ²² Na nipinajqui nijtajtanis nopa tanahuatijquet para isoldados huan tacame ipan cahuayoyme ma techmanahuica ten tocalancaitacahua ipan ojti. Ya niqinilhui itoyaya para Toteco Dios quimocuitahuía cati quitepanitaj. Niqinilhui ichicahualis huan icualancayo Toteco Dios san quinajsis cati quitahuelcahuaj. ²³ Huajca amo nijtajtani ma techmocuitahui, san timosajque huan tijtajtanijque itapalehuil Toteco Dios, huan yaya techtacaquili.

²⁴ Teipa niqiniyocatali 12 tayacanca totajtzitzi, huan nojquiya Serebías, Hasabías, huan majtacti iniicnihua. ²⁵ Huan niquinmactili inimaco nochi tamanti ten plata, huan ten oro, huan nochi nopa tamantzitzi cati tijpixtoyaj, nopa tamantzitzi cati nopa tanahuatijquet, itetalanamictijcahua, itequiticahua huan nochi cati nopa israelitame techmacatoyaj para itiopa Toteco Dios. ²⁶ Huajca nijtamachijqui nochi ipan balanza huan etixqui: 21,450 kilos ten plata, 100 tamanti ten plata para motequihuse cati quipixqui 3,600 kilos 3,300 kilos ten oro,

²⁷ 20 caxit ten oro cati ica nochi etixqui quej 8 kilos huan tajco 2 vasos cati tahuel yeyectzitzitzi ten bronce cati tahuel quipojpojttoyaj huan pajpatiyo eliyaya quej oro. Huajca nochi ni tamanti nijtali inimaco.

²⁸ Huan niquinilhui: “Antaiyocatalilme para TOTECO huan nojquiya taiyocatalili huan tatzejtzeloltic para ya nochi ni tamantzitzitzi ten plata huan oro cati masehualme temacatoque ica nochi iniyolo para TOTECO Dios cati totatahua nojquiya quihueyichijque. ²⁹ Xijpiyaca miyac cuidado huan xicajocuica cuali hasta quema anajsitij altepet Jerusalén huan sempa anquitamachihuase iniixpa nopa tayacanca totajtzitzitzi, nopa levitame, huan nopa huehue israelita tacame. Huan teipa anquinmactilise, huan inijuanti quiajocuise ipan itiopa TOTECO.” ³⁰ Huajca nopa totajtzitzitzi huan levitame quiselijque nopa plata, oro huan tamantzitzitzi, huan quineltoaque para eliyaya xitahuac ietica quej quitamachijtoyaj. Huan quihuicaque Jerusalén para ichaj Toteco Dios.

³¹ Huan tiquisque campa nopa hueyat Ahava ipan 12 itequi nopa achtohui metzti ipan toisraelita calendario * para tiyase altepet Jerusalén. Huan Toteco Dios techmocuithahui ica imax huan techmanahui ten nochi tocualancaitacahua huan nopa tachtequini ipan ojti. ³² Huan quema tiajsitoy Jerusalén, timosiyajquetzque eyi tonati.

Quihuicaque nopa tamantzitzitzi itiopa TOTECO

³³ Huan ipan tonali nahui tijhuicaque nochi plata, oro huan tamantzitzitzi ipan itiopa Toteco Dios. Huan nopa totajtzitzitzi Meremot, icone Uriás, huan Eleazar, icone Finees, huan nopa levitame, Jozabad, icone Jesúa, huan Noadías, icone Binúi, quitamachijque nochi nopa tamanti. ³⁴ Quipojque sesen tamanti huan quitelijque ipan balanza para quimatise quesqui ietica, huan quijcuiloyque quesqui tamantzitzitzi huan quesqui ietica ipan se amat para nochi quimatise cati quiselijtoyaj.

³⁵ Huan nojquiya nopa israelitame cati mocuetojaj nohuaya na, niEsdras, quimacaque Toteco Dios tacajcahualisti tatatili. Quintencajque 12 torojme, se para sese icone Israel cati itztoyaj huejcajquiya. Huan quintencajque 96 oquich borregojme, 77 pilborregojtzitzitzi huan 12 oquich chivojme. Huan nochi quitatijque iixpa TOTECO.

Quinmactilijque nopa amatanahuatili nopa tequichihuani

³⁶ Huan tiquinhuilijijque nopa gobernadores huan tequichihuani ipan itanahuatilis ipan ni nali hueyat Eufrates nopa amat cati nopa tanahuatijquet quititantojya. Huan huajca techpalehuijque tiisraelitame ica cati monejqui ipan itiopa Toteco Dios.

9

Inintajtacolhua nopa israelitame cati achtohui tacuepilijque

¹ Teipa quema ya tantoya nochi nopa tequit, hualajque nopa tayacanca israelitame para techitaquij huan techilhuijque para miyac israelitame, hasta nojquiya nopa totajtzitzitzi huan levitame, amo moiycatalijtoyaj ten nopa fiero cananeos, heteos, ferezeos, jebuseos, amonitame, moabitame, egiptome huan amorreos cati nica itztoque. Ya quichijtoyaj cati fiero iixpa Toteco Dios. ² Quincahuilijtoyaj nopa masehualme ma mosihujtica ica iniichpocahua huan nojquiya quintemojtoque ichpocame ten ehuan

* **8:31** 8:31 Elqui huejcajquiya ipan se 19 itequi abril ipan tocalendario ten ama.

sequinoc altepeme para inintelpocahua ma mosihuajtica. Huajca toxinacho tiisraelitame cati Toteco Dios techtapejpenijtoc para tiaxcahua quimanelojtoque ica ni masehualme ipan ni talme cati amo israelitame huan cati amo taneltocani. Huan techilhuijque para elqui toisraelita tayacancahua huan tanahuatiani ten achtohui quichijque ni tajtacoli.

³ Huan quema nijcajqui nochi ya ni, nijtzayanqui noyoyo, huan nihuihuitac sequij notzoncal huan notentzo para ma nesi nijpixtoya hueyi tequipacholi. Huan teipa nimosehui talchi. ⁴ Huan miyac israelitame cati quiimacasiyayaj itatzacuilit Toteco Dios por nopa tajtacoli cati mochi-huayaya, mosentilijque nohuaya. Pero amo aqui nijnojntzqui, yon amo nimoquetzqui hasta quema ajsic hora para tijtatis tacajcahualisti para Toteco Dios ica tiotac. ⁵ Teipa nimoquetzqui ica noyoyo tzayantoc huan ica miyac tequipacholi huan niyajqui nimotancuaquetzato iixpa TOTECO noDios. Nopona nimomatananqui iixpa huan pejqui nimotatajtía, ⁶ huan niqilhui:

“Noteco Dios, tahuel nipinahua para nimoxayactananas moixpa pampa tahuel miyac titajtacolchijtoque moixpa. Huan nopa tajtacoli cati tijhuicaj moixpa onajsitoc hasta ilhuicac. ⁷ Hasta quema itztoyaj tohejcapan tatahua huan hasta ama, tiisraelitame tijsenhuiquilijtoque ipan tajtacoli. Huan yeca techcajtoc tojuanti, totanahuatijcahua huan totajtzitzi, inimaco tanahuatiani ipan sequinoc talme. Huan techquixtijque ipan total, techcocojque, techachtequilijque huan techpinahualtijtoque. Huan quej nopa techpixtoque hasta ama.

⁸ “Huan ama, TOTECO Dios, techtasojtatoc para se talojtzi, huan techcahuilijtoc para se quesqui tojuanti ma timocuepaca nica ipan altepet Jerusalén huan para nica tijpiyase se pilquentzi motequi ipan motiopa cati tatzetzeloltic. Tijchijtoc ma tipaquica para se talojtzi huan techmacatoc yancuic nemilisti huan para ma caxani ietica totequi cati tahuel ohui eliyaya. ⁹ Pampa tieliyayaj titequipanohuani cati iniaxcahua totecohua, pero ta amo quema techtahuelcajqui. Techicnelijtoc huan tiquinyoltacani tanahuatiani ipan tali Persia para inijuanti nojquiya techicnelijque. Huan pampa nopa tanahuatiani mitzimacasij ta, techpalehuijtoque para tijcaltalijque motiopa cati quisosolojtoyaj. Huan techchijtoque para ma tiitztoaca temachti nica ipan ni tali Judá huan ipan ni altepet Jerusalén.

¹⁰ “Huan ama Toteco Dios, ¿taya huelis tiquijtose? Sempa timitzixpanotoque huan tijcajtoque motanahuatilhua, ¹¹ cati techmacac ica motajtolpanextijcahua huejcajquiya. Pampa achtohuiya techilhui para nopa cuali tali cati tijselisquíaj para toxca eltoc tahuel fiero moixpa por tajtacoli. Tahuel amo tapajpactic eltoya moixpa ten campa pehua hasta campa ontami pampa nopa masehualme cati itztoque quisoquihuijtoque ica inintajtacolhua cati amo tijnequi tiqitas. ¹² Techilhui nojquiya para ma amo tiuincahuilica para toichpocahua ma motalnamicica ica inintelpocahua, yon totelpocahua ica inichpocahua. Techilhuijtoc para ma amo timohuampojchihuaca inihuaya, yon ma amo tiquinpalehuica para quiipiyase cati cuali. Techilhui sinta tijchijtosquíaj quej tiquijto huajca tijpiyasquíaj chichahualisti, huan total quiipiyasquía tahuel miyac itajca. Huan elisquía temachti total para tiuincahuilijtehuasquíaj toconehua, pero amo tijcajque.

¹³ “Huan teipa ta tahuel techatzacuilit por nochi cati fiero tijchijtoque. Nelía ayemo techatzacuilitía quej quinamiqui por nochi nopa tajtacoli cati tijhuicaj moixpa. Pero masque ya nopa, techicnelijtoc huan tijchijtoc

ma timocuepaca sempa nica ipan ni altepet Jerusalén. ¹⁴ Pero masque nochí ya nopa techchihuilijtoc, sempa tiquixpanotoque motanahuatilhua, huan timosejcotilijtoque inihuaya ni masehualme nica cati tahuel fiero quichihuj. Huelis ama temachti ticaluanis, huan techt-zontamiltis nochí tojuanti huan amo mocahuas yon se.

¹⁵ “¡Ay TOTECO Dios! Ta cati titoTECO tiisraelitame. Ta tixitahuac huan yeca techtatzacuilitjtoc hasta san se ome ten tojuanti noja tiitztoque hasta ama. Huan ama tahuel titajacolchijtoque sempa. ¿Quenicatza huelis timoquetzase moixpa?”

10

Nopa israelitame sempa moyocatalijque para Toteco Dios

¹ Huan nimocajqui nimotancuaquetztoc iixpa Toteco Dios huan niquilhuiyaya totajacolhua ipan itiopa huan nichocayaya chicahuac. Huan quemana noja nimotatajtijyaya, ajsicoj miyaqui tacame, sihuame huan coneme cati chocaque chicahuac nohuaya. ² Teipa Secanías, icone Jehiel, cati ichaj ehuaní Elam techilhui: “Tijmatij para titajacolchijtoque ica Toteco Dios pampa timocuilijtoque sihuame cati seyoc tali ehuaní, pero noja huelis Toteco Dios techtasojtas tiisraelitame. ³ Huajca ma tijchihuaca se camanal sencahuali iixpa Toteco Dios huan tiquincahuase nochí tosihuajhua huan toconehua cati amo israelitame. Huan tijchihuase nochí cati ta huan injuanti cati quitepanitaj Toteco Dios technahuatáj. Tijchihuase nochí quej quijjtohua itanahuatilhua Toteco Dios. ⁴ Huajca ama ximoquetza huan techilhui taya monequi tijchihuase pampa ta nopa tequit. Ximoyolchicahua huan tojuanti tiitztose mohuaya.”

⁵ Huajca na, niEsdras, nimoquetzqui huan niquinilhui nopa tayacanca totajtzitzi huan levitame huan nochí israelitame para ma quijjtoaca sinta quichihuasquáj quej Secanías quijjtojtoya. Huan quijjtojque para, quena. ⁶ Teipa na niEsdras nicalajqui ipan itiopa Toteco Dios ipan icuarto Johanán, icone Eliasib, huan amo nitacuajqui, yon amo teno niquic pampa tahuel nimocuesojtoya ica inintajacolhua masehualme cati mocuetoyaj ipan altepet Jerusalén ten tali Babilonia.

⁷ Huan quinyolmelajque nochí israelitame cati mocuetoyaj huan itztoyaj ipan tali Judá para ma mosentilica ipan Jerusalén. ⁸ Huan sinta acayja amo moixnextisquá ipan Jerusalén ica eyi tonati quej quijjtojtoyaj nopa tayacanani huan huehue tacame, huajca quicuilisquáj ital, huan nochí cati iaxca, huan quiquixtisquáj huan ayecmo moixmatise para israelitame.

⁹ Huan ipan 20 ten nopa chicnahui metzti ipan toisraelita calendario*, nochí tacame cati itztoyaj ipan tali Judá huan tali Benjamín moixnextijque ipan altepet Jerusalén huan mosehujque ipan nopa hueyi plaza iixmelac itiopa Toteco Dios. Huan hasta huihuipicayayaj pampa quimatiyayaj para se hueyi tamanti cati ica quinnotztoyaj. Huan nojquiya huihuipicayayaj pampa tahuel chicahuac huetziyaya at. ¹⁰ Huajca na nimoquetzqui, niEsdras, nitotajtzi huan niquinilhui:

—Antajacolchijtoque pampa anmosihuajtijtoque inihuaya sihuame cati amo israelitame. Yeca anquihueyilijtoque totajacolhua tiisraelitame huan nopa tatzacuilitilisti cati tijselne. ¹¹ Huajca ama xijpohuaca amotajacolhua iixpa TOTECO Dios, yaya cati ininTECO tohuejcapan tatahua. Xijchihuaca

* **10:9** 10:9 Elqui huejcajquiya ipan se 19 itequi diciembre ipan tocalendario ten ama.

cati ya ipaquilis huan ximohuej catalica ten nopa masehualme cati ehuani ipan ni tali huan xiquincahuaca amosihuajhua cati amo israelitame.

¹² Huan nochi nopa tacame cati mosentilijtoyaj nozona tananquillijque chichahuac:

—Cualtitoc, tijchihuase nochi cati tiquijtojtoc. ¹³ Huan nojquiya quijtoyque: Ama huetzqui at chichahuac huan amo huelis tihuejcahuase timocahuase calteno ipan ni tonali quema mojmosta huetzi at. Huan ni tamanti amo mosencahuas ipan se tonal pampa tahuel timiyaqui tojuanti cati titajtacolchijtoque. ¹⁴ ¿Amo hueli san mocahuase nica totayacanhua quej topatacahua tojuanti huan quixquetzase nopa tonali quema techtajtolsencahuase sesen tojuanti? Huan teipa quema techilhuisse taya tonali ma tihualaca, timoixnextiquij nica tojuanti cati timocuilijtoque sihuame cati amo israelitame. Tihualase inihuaya nopa huehue tacame huan jueces ten toaltepehua cati quimatij cati melahuac. Huan tijscencahuase nochi ni tamanti cuali iixpa Toteco Dios quej quinamiqui hasta quiyolpactis huan ayecmo toca cualanis.

¹⁵ Huan nochi quijtoyque para cuali quej quijtoytoyaj. San Jonatán, icone Asael, huan Jahazías, icone Ticva, inijuanti amo quinpacti, yon amo quipacti Mesulam, huan Sabetai cati eliyaya se levita. ¹⁶ Pero masque amo quinpactiyaya, ya nopa tijchijque. Huan techtapejpenijque na, niEsdras nitotajtzi, huan sequinoc tacame cati eliyayaj tayacanani ipan nopa huejhueyi familias ten inintatahua. Huan techilhuijque ma titetajtolsencahuaca ipan ni tamanti. Huan teipa timosentilijque huan tipejque titequitij ipan nopa achtohui tonali ipan metzti majtacti ipan toisraelita calendario†. ¹⁷ Huan amo titanque tiquincamanalsencahuaj nochi cati mosihuajtijtoyaj ica cati amo israelitame hasta ipan nopa achtohui tonali ipan nopa achtohui metzti ipan toxihui‡.

Inixhuihua totajtzitzi cati mocuilijtoyaj sihuame cati seyoc tali ehuani

¹⁸ Ya ni inintoca inixhuihua totajtzitzi cati mocuilijtoyaj sihuame cati amo israelitame:

Ten iteipa ixhuihua Jesúa cati eliyaya icone Josadac, huan nochi iicnihua:

Maasías, Eliezer, Jarib huan Gedalías. ¹⁹ Huan quej quitencahuilijtoyaj Toteco Dios, nochi quincaque inisihuajhua huan moyolcuetque ten inintajtacolhua huan quimacaque Toteco Dios se oquich borrego quej se tacajcahualisti para inintajtacolhua.

²⁰ Huan ten iteipa ixhuihua Imer:

Hanani huan Zebadías.

²¹ Huan ten iteipa ixhuihua Harim:

Maasías, Elías, Semafías, Jehiel huan Uzías.

²² Huan ten iteipa ixhuihua Pasur:

Elioenai, Maasías, Ismael, Natanael, Jozabad huan Elasa.

Levitame cati mocuilijtoyaj sihuame cati seyoc tali ehuani

²³ Ya ni inintoca levitame cati quichijtoyaj:

Jozabad, Simei, Kelaía (cati nojquiya itoca Kelita), Petaías, Judá huan Eliezer.

²⁴ Ya ni itoca nopa huicaquet cati quichijtoyaj:

Eliasib.

Ya ni inintoca cati tamocuitahuiyayaj ipan tiopa icalteyo cati quichijtoyaj:

† **10:16** 10:16 Elqui huejcajquiya ipan se 29 itequi diciembre ipan tocalendario ten ama. ‡ **10:17** 10:17 Elqui huejcajquiya ipan 27 itequi marzo ipan tocalendario ten ama.

Salum, Telem, huan Uri.

²⁵ Ya ni inintoca sequinoc israelitame cati mocuilijtoyaj sihuame cati amo israelitame:

Ten iteipa ixhuihua Paros:

Ramía, Jezías, Malquías, Mijamín, Eleazar, Malquías huan Benaía.

²⁶ Ten iteipa ixhuihua Elam:

Matanías, Zacarías, Jehiel, Abdi, Jeremot huan Elías.

²⁷ Ten iteipa ixhuihua Zatu:

Elioenai, Eliasib, Matanías, Jeremot, Zabad huan Aziza.

²⁸ Ten iteipa ixhuihua Bebai:

Johanán, Hananías, Zabai huan Atai.

²⁹ Ten iteipa ixhuihua Bani:

Mesulam, Maluc, Adaía, Jasub, Seal huan Ramot.

³⁰ Ten iteipa ixhuihua Pahat Moab:

Adna, Quelal, Benaía, Maasías, Matanías, Bezaleel, Binúi huan Manasés.

³¹ Ten iteipa ixhuihua Harim:

Eliezer, Isaías, Malquías, Semaías, Simeón, ³² Benjamín, Maluc huan Semarías.

³³ Ten iteipa ixhuihua Hasum:

Matenai, Matata, Zabad, Elifelet, Jeremai, Manasés huan Simei.

³⁴ Ten iteipa ixhuihua Bani:

Madaí, Amram, Uel, ³⁵ Benaía, Bedías, Quelúhi, ³⁶ Vanías, Meremot, Eliasib, ³⁷ Matanías, Matenai huan Jaasai.

³⁸ Ten iteipa ixhuihua Binúi:

Simei, ³⁹ Selemías, Natán, Adaía, ⁴⁰ Macnadebai, Sasai, Sarai, ⁴¹ Azareel, Selemías, Semarías, ⁴² Salum, Amarías huan José.

⁴³ Huan ten iteipa ixhuihua Nebo:

Jeiel, Matatías, Zabad, Zebina, Jadau, Joel huan Benaía.

⁴⁴ Nochi ni tacame cati nica eltoc inintoca mocuilijtoyaj sihuame cati amo israelitame huan sequij ten nopa sihuame ya quinmacatoyaj ininconeua.

Nehemías

Nehemías motatajti por israelitame

1 Ya ni nopa camanali cati na, niNehemías, niicone Hacialías, niqijcuilohua.

Ipan metzti Quisleu ipan toisraelita calendario*, quema Tanahuatijquet Artajerjes yahuiyaya para 20 xihuit tanahuatis ipan tali Persia, na niNehemías niitztoya ipan nopa hueyi altepet Susa ipan icaltanahuatil pampa nijtequipanohuayaya nopa tanahuatijquet. 2 Huan techpaxaloco se noisraelita icni cati itoca Hanani, huan ihuaya hualajque sequinoc israelita tacame ten tali Judá. Huan niquintatzintoquili quenicatza eltoya ica nopa israelitame cati achtohui quinhuicaque ilpitoque hasta nozona Babilonia, huan teipa sempa quincahuilijque ma tacuepilica ipan altepet Jerusalén. 3 Huan injuanti technanquilijque: “Se hueyi pinahualisti quej itztoque nopa israelitame cati sempa mocuetoque Jerusalén. Nelía taijyohuij miyac. Sosolijtoc altepet Jerusalén, huan nopa tepamit huetztoc huan icaltehua nochí tatatoc.”

4 Huan quema na nijcayqui nochí ya ni, nimosehui huan nichocac. Para miyac tonali nimocueso, huan nimosajqui, huan nimotatajti ica Toteco Dios cati itztoc ipan ilhuicac. 5 Huan niquilhui:

“TOTECO, ta tiDios cati tiitztoc ilhuicac, nimitztajtania chicahuac techta-caquili. Ta tahuel tihueyi hasta titemajmati. Ta tijchihua nochí cati tijtencahua tiquinchihuilis moconehua. Tahuel tiquinicnelia nochí cati quichihuj motanahuatil. 6 Pero techta-caquili na, nimotequipanojca, cati tayohua huan tonaya nimitztajtania por tiisraelitame cati timotequipanojcahua. Nimoixmati para na huan nochí tiisraelitame tahuel titajtacolchijtoque moixpa. 7 Tahuel timotzontochonchijtoque ica ta, huan amo tijneltocatoque motanahuatilhua, yon moleyes, yon sequinoc tamachtli cati techmacac huejcayquiya ica motequipanojca Moisés.

8 “Xiquelnamiqui cati ta tiquilhui Moisés. Tiquijto sinta tiisraelitame titajtacolchihuasquij, huajca techsemanasquia huan techcahuasquia campa hueli ipan nochí taltipacti. 9 Pero sinta timoyolcuepasquij sempa huan tijneltocasquij motanahuatilhua, huajca masque timopantisquij huejca, techhualicasquia huan techsejcotilisquia sempa ipan Jerusalén, nopa altepet cati ta tijtapejpenijtoc para elis moaxca.

10 “Tojuanti timotequipanojcahua cati techmanahuijtoc huan techchijtoc timoaxcahua ica mohueyi chicahualis. 11 Huan nimitztajtania TOTECO para xijtacaquili cati nimitztajtania huan xiquintacaquili moconehua cati mitzhueyichihuj ica paquilisti. Techpalehui para nopa tanahuatijquet ma quiita para cuali cati niqijtohua huan ma techtasojta quema niyas niquilhui ni tamanti.

“Quej nopa na niNehemías niquilhui TOTECO. Na cati nijtequipanohuayaya nopa tanahuatijquet. Nijpixqui nopa tequit para nijyecos nochí itailis quema ayemo quiyaya para nijmatis sinta se quitallijtoya se pajti para quimictis.”

* 1:1 Elqui ipan se metzti diciembre ipan tocalendario ten ama.

2

Artajerjes quicahuili Nehemías ma yahui Jerusalén

¹ Teipa quema ya panotoya nahui metzti huan eliyaya ipan metzti Nisán ipan toisraelita calendario*, na nijhuiquili ixocomeca iayo nopa tanahuatijquet huan nimantzi yaya techitac para nimocuesohua pampa amo quema techitztoya quej nopa. ² Huajca techtatzintoquili:

—¿Para ten timocuesohua? Amo nesi sinta timococohua. Techilhui taya cuesoli tijpiya.

Huajca masque tahuel nimajmahuiyaya, ³ nijnanquili:

—Tanahuatijquet, xiitzo para nochipa. ¿Para ten amo nimocuesos quema quitahuelcajtoque nopa altepet Jerusalén campa motalpachojque nohuejcapan tatahua? Nochi sosolijtoc huan icaltehua tatatoc.

⁴ Huan nopa tanahuatijquet techtatzintoquili:

—¿Taya tijnequi ma nijchihua?

Huajca na nimotatajti ica Toteco Dios para ma techpalehui, ⁵ huan niquilhui:

—Sinta tiquita para cuali huan sinta hueyi moyolo ica na, huajca techtitani ipan tali Judá campa motalpachojque notatahua para huelis nijcualchijchi-huati nopa altepet.

⁶ Huan nopa sihua tanahuatijquet mosehuiytoya ihuaya nopa tanahuatijquet quema nicamanaltic. Huan nopa tanahuatijquet techilhui:

—Huan ¿quesqui tonali monequis timocahuas? ¿Quema timocuepasquía?

Huajca na niquilhui quema niyas huan niquixquetzqui se tonali quema nimocuepasquía. Huan yaya quipacti huan techtitanqui. ⁷ Huan nojquiya niquilhui: “Sinta mitzpacría, techmaca amatajcuiloli para nopa gobernadores ipan seyoc nali hueyat Eufrates para nechcahuase niquixcotonas ipan inintal para huelis niajsiti ipan tali Judá. ⁸ Huan nojquiya techmaca seyoc amatajcuiloli para Asaf cati quinmocuitahuía nochi cuamili cati moaxca para ma techmaca cuahuit cati monequi para taquetzalme, huan para caltemit ten nopa cali cati nelchicahuac inacasta nopa hueyi israelita tiopamit. Huan nojquiya ma techmaca cuahuit para caltemit ipan itepa nopa altepet huan para se cali para na.” Quej nopa niquilhui. Huan nochi ya nopa techmacac nopa tanahuatijquet pampa na nimotemachijtoya ipan Toteco Dios.

⁹ Huan teipa quema niajsito iniixpa nopa tanahuatiani ten seyoc nali hueyat Eufrates, niquinmactili nopa amatajcuiloli cati techmacatoya Tanahuatijquet Artajerjes. Huan itztoyaj nohuaya miyaqui tayacanani ten soldados cati nopa tanahuatijquet quintitantoya para ma techmocuitahuica. Sequij yahuiyayaj cahuayojtipa huan sequij san icxinejnemiyayaj. ¹⁰ Pero quema quimatque nochi ya ni, Sanbalat ten Horón huan Tobías ten Amón, tahuel cualanque pampa ajsitoya se cati motemacatoya para quinpalehuis israelitame.

Nehemías ajsic ipan altepet Jerusalén

¹¹ Huan niajsic ipan altepet Jerusalén huan quema ya niitztoya eyi tonati nopona, ¹² niquisqui ica tayohua huan niquinhuicac se quesqui tacame nohuaya. Huan amo aqui niquilhui cati Toteco Dios quitajitoya ipan noyolo para nijchihuasquía ipan altepet Jerusalén. Huan niyahuiyaya ipan se burro huan nopa tacame techtoquiliyaya iniicxipa. ¹³ Huan ipan nopa yohuali tiquisque ipan nopa altepet campa itoca nopa Tamayamit Caltemit, huan

* 2:1 2:1 Elqui se tonali ipan abril o mayo ipan tocalendarío ten ama.

tiyajque campa nopa ameli cati itoca Dragón huan sempa tiyajque campa seyoc caltemit cati itoca Tasoli Caltemit. Huan niquitac nochi nopa tepamit cati huetztoya huan nochi nopa caltemit cati tatatoya. ¹⁴ Huan teipa tiyajque campa nopa caltemit cati itoca Ameli Caltemit, huan teipa tiajsitoj ipan nopa ameli ten nopa tanahuatijquet. Huan nozona amo huelqui panoc noburro pampa tahuel tafiero. ¹⁵ Teipa nopa tayohua ninejntiyajqui hasta campa nopa huactoc atajti huan quej nopa nijyahualo nochi nopa altepet. Huan niquitac nochi quenicatza eltoya huan nimocuetqui sempa campa nopa caltemit campa niquistejqui.

¹⁶ Huan nopa tequichihuani amo quimatque canque niyajtoya huan taya nijchihuayaya pampa ayemo teno niquinilhuijtoya ten cati nimoilhuijtoya para nijchihuasquia. Amo teno niquinilhuijtoya noisraelita icnihua, yon nopa totajtzitzi, yon tequichihuani, yon tayacanani, yon nopa sequinoc tacame cati teipa quichihuasquiaj nopa tequit.

Nehemías quinyolchicajqui masehualme para tequitise

¹⁷ Pero teipa niquinnotzqui nochi nopa israelitame huan niquinilhui:

—Amojuanti cuali anquimatij para tahuel tafiero quej tiitztoque nica ipan ni altepet pampa nochi tamisosolijtoc. Huetztoc nochi tepamit huan icaltehua tafatoque. Huajca ama ma tijpehualtica titequitise huan tijcualchijchihuase nochi para ayecmo aqui hueli techpinajtis.

¹⁸ Huan teipa niquinilhui quenicatza Toteco Dios techpalehuijtoya pampa hueyi iyolo. Niquinilhui nochi cati techilhuijtoya nopa tanahuatijquet huan quenicatza nechcajqui ma nihuala hasta Jerusalén para nijchihuas nopa tequit cati nimoilhuijtoya para nijchihuas. Huajca nochi injuanti tananquillijque:

—Cualtitoc, ma titequitica.

Huan nochi pejque tequitij ica miyac paquilisti. ¹⁹ Pero quema quimatque Sanbalat ten altepet Horón, huan Tobías cati elqui se amonita tacat, huan Gesem nopa árabe tacat, injuanti techpinajtijque huan techcualancaitaque. Techilhuijque:

—¿Taya anquichihuj amojuanti? San anmosentanchihuj ica nopa tanahuatijquet huan anquixpanoj.

²⁰ Huan na niquinnanquili:

—Ica itapalehuil Toteco Dios cati quichijqui ilhuicacti, tojuanti, tiitequipanojcahua, tijcualchijchihuase ni altepet. Pero amojuanti amo teno anquipiyaj ica tojuanti huan amo huelis anmocalaquise ipan ni tamanti.

3

Intoca cati quicualchijchijque tepamit

¹ Huajca nopa totajtzitzi Eliasib huan iicnihua cati eliyayaj totajtzitzi pejque quicualchijchihuj nopa tepamit campa itoca nopa Borrego Caltemit. Quiyocatalijque nopa caltemit para Toteco huan quiquetzque. Huan nojuiya quicualchijchijque nopa tepamit hasta nopa huejcapantic tetzociti cati itoca Torre Hananeel cati elqui para se tamocuitahuijquet. ² Ten nozona, quicualchijchijque nopa tepamit nopa tacame ten altepet Jericó. Huan ininacasta quicualchijchijqui Zacur, icone Imri.

³ Huan iconehua Senaa quiquetzque itaquetzalhua nopa Michi Caltemit, huan quitalijque nopa caltemit ica nochi nopa huejhueyi lavos huan nopa teposbarra cati monequi para motzacas cuali. ⁴ Huan ininacasta quicualchijchijqui tepamit Meremot, icone Urías huan iixhui Cos. Huan inacasta quicualchijchijqui Mesulam, icone Berequías huan iixhui

Mesezabeel. Huan iquespa quicualchijchijqui nopa tepamit Sadoc, icone Baana. ⁵ Huan inacasta tequitique nopa tacame cati ehuaní altepet Tecoa, pero cati tayacanani ipan Tecoa amo quinejque quinpalehuise. ⁶ Huan Joiada, icone Paseah, huan Mesulam, icone Besodías, quicualchijchijque nopa Caltemit Sosoltic. Quiquejquetzque itaquetzalhua huan quitalijque nopa caltemit ica nochi nopa huejhueyi lavos huan teposbarras. ⁷ Huan campa tanqui inintequi ipan tepamit, quicualchijchijqui Melatías cati ehua altepet Gabaón, huan Jadón ten altepet Meronot, inihuaya nopa tacame cati ehuaní ipan altepet Gabaón huan Mizpa. Nopa altepeme mocajqui ipan itanahuatilis nopa tanahuatijquet ipan ne se nali hueyat Eufraates. ⁸ Huan ininacasta quicualchijchijqui nopa tepamit Uziel, icone Harhaías, nopa oro teposchijquet. Huan inacasta quicualchijchijqui tepamit Hanahías cati quimatiyaya quichijchihua nochi tamanti taajhuíyacayot. Huan quej nopa quicualchijchijtiyajque itepa altepet Jerusalén hasta campa itoca nopa Tepamit Patahuac. ⁹ Ininacasta quicualchijchijqui Refaías, icone Hur. Refaías elqui gobernador ipan tajco altepet Jerusalén. ¹⁰ Huan inacasta tequitic Jedaías, icone Harumaf cati tequitiyaya iixmelac ichaj. Huan inacasta quicualchijchijqui tepamit Hatús, icone Hasabnías.

¹¹ Huan inacasta quicualchijchijqui Malquías, icone Harim, huan Hasub, icone Pahat Moab. Quicualchijchijque campa nopa huejcapantic tetzotci cati itoca Torre Horno campa mocahuas se tamocuifahuíjquet para tachiyas.

¹² Huan ininacasta quicualchijchijque Salum, icone Halohe, inihuaya iich-pacahua. Salum eliyaya gobernador ipan ne seyoc tajco altepet Jerusalén.

¹³ Huan Hanún huan nopa masehualme cati ehuaní ipan altepet Zanoa quicualchijchijque nopa Tamayamit Caltemit. Quiquejquetzque itaquetzalhua huan quitalijque nopa caltemit ica nopa huejhueyi lavos huan nopa teposbarras. Nojquiya quicualchijchijque 450 metros ten tepamit huan tamitoj nechca campa nopa Tasoli Caltemit. ¹⁴ Huan nopa Tasoli Caltemit quicualchijchijqui Malquías, icone Recab. Malquías elqui gobernador ipan nopa municipio cati itoca Bet Haquerem. Quinquetzqui taquetzalme huan quitali nopa caltemit ica nopa huejhueyi lavos huan nopa teposbarra.

¹⁵ Huan Salum, icone Colhoze, cati elqui gobernador ipan nopa municipio Mizpa quicualchijchijqui nopa Ameli Caltemit. Cualí quisencajqui ica taquetzalme huan quitzontzajqui. Teipa quitali icaltehua ica huejhueyi lavos huan nopa tepos barra. Huan yaya nojquiya quicualchijchijqui nopa tepamit hasta nopa Ameli Siloé huan tamito campa huejcajquiya eltoya ixochimil Tanahuatijquet David huan hasta campa temo nopa escalones ten Ialpe David. ¹⁶ Teipa campa yaya tanqui itequi, quicualchijchijqui Nehemías, icone Azbuc, cati eliyaya gobernador ipan tajco nopa municipio Bet Sur. Huan yaya quicualchijchijqui hasta iixmelac campa motalpaccho David, huan hasta campa eltoya nopa ameli. Huan tamito itequi hasta campa achtohuiya eltoya ininchaj Nopa Soldados Cati Más Motemacaj.

¹⁷ Huan inacasta quicualchijchijque nopa tepamit nopa levitame cati tequitiyayaj imaco Rehum, icone Bani. Huan ininacasta, Hasabías nopa gobernador ipan tajco nopa municipio Keila tequitic para imunicipio. ¹⁸ Huan inacasta, quicualchijchijque nopa tepamit ihuampoyohua cati tequitiyayaj imaco Bavai, icone Henadad, cati elqui gobernador ipan ne seyoc tajco nopa municipio Keila. ¹⁹ Huan ininacasta quicualchijchijqui nopa tepamit Ezer, icone Jesús, cati elqui gobernador ipan tajco nopa municipio Mizpa. Yaya tequitic iixmelac nopa taixtemolis campa nopa cali campa quiajtoctoyaj nochi teposti para ica tatehuise nozona nopa moixnamiquiyaya nopa

tepamit. ²⁰ Huan inacasta Baruc, icone Zabai, pejqui quicualchijchihua seyoc achi ipan nopa tepamit ten campa moixnamijqui hasta icalte ichaj Eliasib, nopa hueyi totajtzi. ²¹ Huan inacasta, tequitic Meremot, icone Urias huan iixhui Cos. Yaya quicualchijchijqui nopa tepamit ten icalte totajtzi Eliasib hasta campa itamiya ichaj.

²² Huan inacasta quicualchijchijque nopa tepamit nopa totajztziti cati ehuyayaj ipan nopa tamayamit nechca hueyat Jordán. ²³ Huan ininacasta tequitic Benjamín huan Hasub. Inijuanti quicualchijchijque nopa tepamit cati mocahuayaya inincalixpa. Huan ininacasta tequitic Azarías, icone Maazías huan iixhui Ananías. Yaya quicualchijchijqui cati nechca ichaj. ²⁴ Huan ininacasta tequitic Binúi, icone Henadad. Yaya quicualchijchijqui nopa tepamit ten ichaj Azarías hasta campa monamijqui nopa tepamit ipan esquina. ²⁵ Huan Palal, icone Uzai, quicualchijchijqui nopa tepamit iixmelac nopa esquina huan ipan nopa huejcapantic tetzociti para se tamocuitahuijquet. Nopa tetzociti quisa ipan ichaj nopa tanahuatijquet huan mocahua inacasta icalixpa nopa tatzacti. Huan inacasta tequitic Pedaías, icone Faros. ²⁶ Huan inacasta, quicualchijchijque nopa tepamit nopa tiopa tequipanohuani cati ehuyayaj ipan nopa tepet Ofel. Inijuanti quisencajqe nopa tepamit hasta nopa At Caltemit cati mocajqui campa hualquisa tonati ten nopa huejcapantic tetzociti para se tamocuitahuijquet cati quisqui ipan tepamit. ²⁷ Huan ininacasta tequitique tacame ten altepet Tecoa. Inijuanti quicualtalijque seyoc quentzi nopa tepamit ten iixmelac nopa tetzociti cati huejcapantic hasta nopa tepamit campa nopa municipio Ofel.

²⁸ Huan ininacasta tequitique nopa totajztziti. Inijuanti quicualchijchijque nopa tepamit cati elqui ica huejcapa ten nopa Cahuayo Caltemit huan sesen tequitic iixmelac ichaj. ²⁹ Huan ininacasta tequitic Sadoc, icone Imer. Yaya quicualchijchijqui iixmelac ichaj. Huan inacasta tequitic Semaías, icone Secanías, cati nojquiya quimocuitahui nopa Caltemit Campa Hualquisa Tonati. ³⁰ Huan ininacasta tequitique Hananías, icone Selemías, huan Hanún, ichicuasempa cone Salaf. Huan nechca ya tequitic Mesulam, icone Berequías. Yaya quicualchijchijqui nopa tepamit iixmelac ichaj. ³¹ Huan inacasta tequitic nopa oro teposchijquet Malquías. Yaya quicualchijchijqui nopa tepamit hasta nopa cali campa mocahuayayaj tanamacani huan cati tequipanojqe tiopan calijtic. Malquías tequitic iixmelac nopa Caltemit Campa Tetajtolxitahuaj huan hasta nopa cuarto cati huejcapa nechca campa moixnamiquiyaya nopa tepamit. ³² Huan nopa sequinoc tacame cati eliyayaj oro teposchihuani huan tanamacani quicualchijchijque nopa tepamit ten nopa cuarto cati huejcapa hasta nopa Borrego Caltemit.

4

Inincualancaitacahua quinpinajtijque cati tequitiyayaj

¹ Huan quema quimatqui Sanbalat para tijcualchijchihuayayaj nopa tepamit cati quiyahualojtoya nopa altepet, tahuel cualanqui. Huan pejqui techpinajtía tiisraelitame. ² Huan miyacapa iniixpa ihuampoyohua huan nopa tayacanca tacame ten tali Samaria, Sanbalat quijjito: “Pilteicneltziti ni israelitame. Huelis moilhuáj para nimantzi tamise quicualchijchihuase inialtepe. ¿Huelis moilhuáj sempa huelise quitatise tacajchualisti nica? Xiquitaca quenecatza quiquixtiaj tet cati ya tatatoc huan sempa quitequihuáj.”

³ Huan inechca itztoya Tobías nopa amonita tacat cati quijito: “Xiquitaca quenicatza nelyamanic nopa tepamit cati quicualchijchihuaj. Sinta tejcos se cayochi ipani, quitamihuelonis.”

Nehemías motatajti

⁴ Huajca na nimotatajti huan niqijito: “Toteco Dios, xijcaqui quenicatza techpinajtíaj. Xijchihua para nochi cati inijuanti techilhuíaj ma eli para inijuanti. Ma huetzica inimaco ininculancaitacahua huan ma quinhuicaca ilpitoque para tetequipanose ipan sequinoc talme. ⁵ Amo xiquintapojpolhui inintajtacolhua huan amo xiquelcahua cati quichijtoque pampa quintzinquixtíaj ni tacame cati tequitij.”

Ininculancaitacahua quinmajmatijque

⁶ Huan tijsenhuiquilijque tijcualchijchijque nopa tepamit hasta eltoya tacualchijchihuali hasta tajco ihuejcapanca cati quipixqui achtohuiya. Nopa masehualme tequitiyayaj ica miyac paquilisti. ⁷ Pero Sanbalat, Tobías huan nopa sequinoc árabe huan amonita tacame inihuaya nopa tacame ten altepet Asdod quimatque taya tijchihuayayaj. Quimatque para tijsenhuiquilijtoyaj tijcualchijchihuaj nopa tepamit huan tijtemitiyayaj campa sosolijtoc, huan yeca tahuel cualanque. ⁸ Huan sentic quisencajque para ajise ipan altepet Jerusalén ica soldados para techtehuiquij huan quisosolose totequi. ⁹ Huajca tojuanti timotatajtijque ica Toteco Dios, huan tiquintalijque tamocuitahuani para techmocuitahuise tayohua huan tonaya para timomanahuise ten inijuanti. ¹⁰ Teipa nopa israelitame ten tali Judá pejque quijitohuaj para ya siyajtoque nochi cati tequitiyayaj ipan nopa tepamit huan noja polihuiyaya miyac tequit. Huan quijitoque para amo tiyajatise para tijcualchijchihuase nochi nopa tepamit.

¹¹ Huan tocualancaitacahua quijitohuayayaj para calaquisquíaj ipan toaltepe ixtacatzi quema amo tiquinchiyayayaj huan techmictise. Quej nopa quijitoque, quitilquetzasquíaj totequi. ¹² Huan nopa israelitame cati itztoyaj ininechca hualajque techilhuicoj miyac huelta para tocualancaitacahua hualayajaj ten campa hueli para techtehuiquij. ¹³ Huajca niquintali masehualme ica inifamilias ma tamocuitahuica ica nopa tepamit campa más echcapantzi huan campa tacoyontoya. Huan quihuicayayaj inimacheta, inincuatamin cati huehueyac huan inincuahuitól para ica momanahuise. ¹⁴ Teipa quema niqitac quenicatza nochi momajmatiyayaj, nimoquetzqui huan niqincamanalhui nopa tayacanani, teguichihuani huan nochi nopa masehualme, huan niqinilhui: “Amo xiquinimacasic. Xiquelnamiquica para Toteco nelhueyi huan temajmati. Huajca xitatehuica por amoicnihua, huan amoconehua, huan amosihuajhua huan amochajchaj.” Quej nopa niqinilhui.

¹⁵ Huan quema tocualancaitacahua quimatque para Toteco Dios technextilijtoya taya quichihuasnequiyayaj huan tijmachiliyayaj, ayecmo huelque calajque pampa tiquinchiyayaj. Huajca ayecmo teno techchihuilijque huan nochi tojuanti timocuetque sempa ipan totequi. ¹⁶ Huan ten nopa tonal, san tajco tacame tequitiyayaj, huan tajco famocuitahuuyaj ica machetas, cuataminti cati huejhuehueyac, cuahuitoli huan cuataminti. Huan inijuanti moquentiyayaj inintepos yolixtajcahua. Huan nopa tayacanca soldados moquetzque iniica nopa israelitame ten tali Judá ¹⁷ cati quicualchijchihuayaj nopa tepamit. Huan nopa tacame cati tamamayayaj tequitiyayaj ica se inimax huan ipan seyoc quihuicayayaj inintepos. ¹⁸ Huan nochi cati tepanchihuani tequitiyayaj ica inimacheta motzinquechilpitoque. Huan yaya cati quimatqui quipitza tapitzali itztoya nonacasta.

¹⁹ Huan niquinilhui nopa tayacanani, tequichihuani huan nochi nopa sequinoc masehualme: “Tahuel hueyi ni tequit huan timoxelojtoque huan timopantíaj huejca campa titequitij, ²⁰ huajca campa anquicaquise nopa tapitzali, nopona xiyaca para ximosejcotilitij nohuaya para tiquintehuitij toctualancaitacahua huan Toteco Dios tatehuis por tojuanti.”

²¹ Tipehuayayaj titequitij quema tanesiyaya huan tijsenhuiquiliyayaj hasta quema ya tayohua huan quema monexiyayaj sitalime. Huan tajco ten tojuanti titamocuitahuyayaj ica teposti. ²² Huan nojquiya niquinilhui nopa masehualme ten ehuaní ipan sequinoc altepeme para inijuanti huan inintequipanojcahua ma mocahuaca ipan altepet Jerusalén para cochise para nojquiya ma techpalehuica timopatatiyase titamocuitahuisse ica tayohua huan quema tonaya titequitise. ²³ Huan yon na, yon noicnihua, yon notequipanojcahua huan yon cati itztoyaj nohuaya amo timoquixtiliyayaj toyoyo huan nochipa tijpixque toteposhua nechca tomax.

5

Quintzacuilijque inincualancaitacahua cati yoltetique

¹ Teipa miyaqui tacame huan sihuame pejque quintatelhuáj sequij israelita tacame cati tominpiyayaj pampa quintajtaniyayaj miyac tomi iniisraelita icnihua. ² Quiijtohuayayaj: “Tojuanti tahuel timiyaquij ica nochi toconehua huan yeca monequi timotanehuisse trigo san para ica timopanl-tise.” ³ Sequinoc quiijtohuayayaj: “Ya tijtaminamacatoque total, tomil, toxocomecamil huan tochajchaj ica ni tacame cati tominpiyaj para ma techtanejtica tomi para amo timayancamiqoise ipan ni hueyi mayanti.” ⁴ Huan sequinoc quiijtohuayayaj: “Monejqui timotanejque tomi para tijtaxtahuise ne tanahuatijquet nopa impuestos cati tajtaniy por tomil huan toxocomecamil. ⁵ Huan masque tojuanti nochi tiisraelitame huan tiicnime ica san se toeso huan toconehua san se quej ininconehua, monequi tojuanti tiquinnamaquiltíaj toconehua para ma quintequipanoca para inijuanti techtanejtise tomi. Sequij toichpocahua ya tiquinnamacatoque para quintequipanose san tapic huan ayecmo hueli titaxtahuase para tiquincuilise pampa total huan nochi cati tijpixtoyaj ayecmo toaxca.”

⁶ Huan quema na nijcayqui nochi cati techilhuijtoyaj, tahuel nicualanqui.

⁷ Teipa nimoyolilhui quenicatza nijchihuas. Huan niyajqui huan niquina-jhuac nopa tequichihuani huan nopa tominpiyani huan niquinilhui: “¿Para ten quej ni anquinchihuilíaj amoisraelita icnihua? Amo xitahuac para antainamaj itanca tomi huan anquincuilíaj inintal.” Nojquiya niteyolmelajqui para tijchihuase se hueyi tasentilisti para tijsencahuase ni tamanti. ⁸ Huan nojquiya niquinilhui para hasta campa tihuelque sempa tiquincojtoyaj toisraelita icnihua cati monamacatoyaj para elis tetequipanohuani cati teaxca ipan sequinoc talme. Huan ama sempa anquinnamacaj amoicnihua para ma tetequipanoca san tapic. Huajca sempa monequi tiquincohuase para tiquinmanahuise.

Huan amo aqui technanquili pampa amo quimatque taya quiijtose.

⁹ Huan na niquinilhui: “Amo cuali cati anquichihuaj. ¿Para ten amo anquitepanitaj Toteco Dios? ¿Para ten anquichihuaj cati ica toctualancaitacahua techpinajtise? ¹⁰ Na huan nochaj ehuaní nojquiya titetanejtijtoque tomi huan trigo, pero amo tiquintajtaniáj itanca. Huajca amojuanti ayecmo xiquininamaca israelitame itanca quema anquintanejtíaj tomi. ¹¹ Huan

nojquiya nimechtajtania para nimantzi xiquincuepilica inimilhua, inixcomeca milhua, iniolivo milhua, ininchajchaj huan nochi itanca tomi cati anquinamayayaj por cati anquintanejtijtojaj.”

¹² Huan nochi injuanti tananquiliqque: “Tiquincuepilise nochi cati inixca huan amo teno tiquinamase. Nochi cati tiqijtojtoc, tijchihuase.”

Huajca na niquinnotzqui nopa totajtztzi para ma hualaca huan para injuanti ma mofestigojquetzaca iniixpa para, quena, quichihuase quej quijtojque. ¹³ Teipa nijtzejtelo noyoyo huan niqijto: “Quej ni ma quichihua Toteco Dios nopa tacat cati amo quinequis quichihuas cati quijtojtoc para quichihuas.”

Huan nochi tananquiliqque: “Quej nopa ma eli.” Huan quihueyichijque TOTECO huan quena, quichijque quej quijtojttojaj.

Nehemías quinpalehui imasehualhua

¹⁴ Na nipejqwi nitequti quej gobernador quema Artajerjes yahuiyaya para 20 xihuit tanahuatis huan techtitanqui para nielis gobernador nica ipan tali Judá. Huan nitequitic 12 xihuit hasta quema Artajerjes yahuiyaya para 32 xihuit tanahuatis. Huan ipan nochi nopa xihuit quema niitztoya quej gobernador amo quema, yon na, yon noicnihua amo tijselijque nopa taxtahuili cati techtocarohuayaya por totacualis o por totequi. ¹⁵ Pero cati elque gobernadores achtohuiya, quena, tahuel quininanque israelitame huan quinnahuatiyayaj ma quinhualiquilica inintacualis huan inixcomeca iayo mojmosta. Nojquiya quinnahuatiyayaj ma quinnacaca nechca tajco kilo ten plata. Huan hasta inintequipanojcahua nopa gobernadores nojquiya quinnamayayaj. Pero na amo quema nijchijqui quej nopa pampa nijtepanita Toteco Dios. ¹⁶ Huan nojquiya na nitequitic chichahuac para nijcualchichihuas nopa tepamit campá techmacaque ma nijchihua. Amo nijcojqwi tali huan nochi notequipanojcahua mosentilijque para tequitise mojmosta. ¹⁷ Huan mojmosta ipan nomesa niquintamacayaya 150 israelitame huan tequichihuani. Huan iyoca ajsiyayaj techpaxalohuaj tequichihuani cati hualayayaj ipan sequinoc talme cati monejqwi niquintamacas. ¹⁸ Huan mojmosta quisencahuayayaj para totacualis se hueyi toro, chicuase borrejojme cati tomahuague huan miyac patoxme huan huejhueyi totome. Huan sesen majtacti tonati titemacaque xocomecat iayo hasta mocahuayaya, pero amo quema niquinilhui masehualme ma techtaxtahuica pampa nigobernador pampa nijmatiyaya para nelía ohui para panoj. ¹⁹ Huan nimotatajti: “NoTeco Dios, xiquelnamiqwi nochi cati cuali nijchijtojtoc ica ni masehualme huan techmaca motatiochihualis.”

6

Tacame quicualancaitaque Nehemías

¹ Quema Sanbalat, Tobías, huan Gesem, nopa árabe tacat, huan sequinoc tocualancaitacahua quimatque para ya titantoyaj tijcualchijchihuaj nopa tepamit huan amo teno más polihuiyaya, san monequiyaya caltemit tijtatzquiltise, nelía cualanque. ² Huan Sanbalat huan Gesem techtitanilijque se amatajcuiloli. Techilhuijqque ma nimosentili inihuaya ipan se pilaltepétzi ipan nopa tamayamit cati itoca Ono. Pero na nijmachili para quinequiyayaj techmictise, ³ huajca na niquintitanili tayolmelahuani para quininlhuise: “Na nimotequihuía ipan se hueyi tequit huan amo hueli nijcajtehuas. ¿Para ten moneqwi motilquetzas ni tequit para niquisas huan nitemos campá amojuanti?” ⁴ Huan injuanti quej nopa techtitanilijque camanali nahui huelta huan na san se niquinnanquiliyaya.

⁵ Teipa ica macuili huelta Sanbalat quititanqui itequipanojca ma techhualiquili seyoc amatajcuiloli tapojtoc ipan imax, ⁶ huan ya ni quiiyto: “Campa hueli nochi quimatij para ta huan nochi israelitame antasencahuaj para anmosentanchihuase ica totanahuatijca huan yeca anquicaltallaj nopa tepamit. San se nojquiya quiiytohua Gesem. Nojquiya quiiytohuaj para timochihuas tiinintanahuatijca. ⁷ Huan quiiytohuaj para ya tiquintalijtoc tajtolpanextiani para ma quiiytoca ipan altepet Jerusalén para ta titanahuatijquet. Temachti quimatis Tanahuatijquet Artajerjes nochi ni camanali cati nemi. Huajca más cuali xihuala huan ticamanaltise san tojuanti.”

⁸ Huajca na nijcuepalti se amatajcuiloli cati quiiyto: “Amo teno melahuac cati tiquijtojtoc. San tiistacati.”

⁹ Inijuanti san quinequiyayaj techmajmatise para ayecmo tijchihuase nopa tequit, pero na achi más nimoyolchicajqui. ¹⁰ Teipa niyajqui nijpaxaloto Semaías, icone Delaía huan iixhui Mehetabel. Yaya senitztoya ipan ichaj huan amo huelqui quisa. Yaya quiiyto para Toteco Dios quinojnotztoya para ma techilhui ma timosentilica ipan tiopa calijtic huan ma tijtzacuaca cuali nopa caltemit huan ma timotatica. Quiiyto para hualayayaj tacame nopa tayohua para techmictiqij. ¹¹ Huan na nijnanquili: “Tacame quej na amo cholohuaj. Amo nitotajtzi para nicalaquis tiopan calijtic, yon para nijmanahuis nonemilis, huajca amo niyas.”

¹² Huan na nijmatqui para Toteco Dios amo quinojnotztoya. San quiiytoya nopa camanali ten nopantis quej elisquía se tajtolpanextijquet pampa Sanbalat huan Tobías quitaxtahuijtoyaj. ¹³ Quitaxtahuiyayaj para ma techmajmati para ma nijchihua cati amo monequi huan ma nitajtacolchihua. Quej nopa quipiyasquía se camanali amo cuali ten na para techatelhuse. ¹⁴ Huajca nimotatajti huan niqiiyto: “NoTeco Dios, xiquelnamiqui cati amo cuali quichijtoc Sanbalat huan Tobías. Nojquiya xiquelnamiqui cati fiero quichijtoc nopa sihua tajtolpanextijquet, Noadías, huan nochi nopa sequinoc tajtolpanextiani cati quinequij techmajmatise.” Quej nopa nimotatajti.

Quitamiltijque nopa tepamit

¹⁵ Huan tijtamiltijque tijcualchijchihuaj nopa tepamit ipan 25 itequi metzti Elul ipan toisraelita xihui*. Huajca ten ipejya totequi hasta tijtamiltijque tijcualchijchijque nopa tepamit elqui 52 tonati. ¹⁶ Huan quema quimatque tocalancaitacahua huan nopa masehualme ipan nochi talme cati quiyahualojtoque altepet Jerusalén para tijtamiltijtoyaj nopa tequit, tahuel momajmatijque pampa quimachilijque para san ica ichichualis Toteco Dios tijtamiltijtoyaj nopa tequit.

¹⁷ Huan ipan nopa 52 tonati nopa tayacanca tacame ipan tali Judá quititanliyayaj miyac amatajcuiloli Tobías, huan nimantzi quincuepaltiyaya. ¹⁸ Quej nopa quichijque pampa miyac tacame ten tali Judá motemacatoyaj ihuaya Tobías pampa imontaj eliyaya Secanías, icone Ara. Nojquiya icone Tobías cati itoca Johanán mosihuajtijtoya ica ichpoca Mesulam, icone Berequías. ¹⁹ Talojtzi nopa tayacanca tacame hualayayaj huan techpohuilayayaj para nelía se cuali tacat Tobías huan sempa yahuiyayaj quipohuilayayaj Tobías nochi cati na niqiiytohuayaya. Huan Tobías nojquiya techtitanliyaya miyac amatajcuiloli para techmajmatis.

* **6:15** 6:15 Elqui ipan se 2 itequi octubre ipan tocalendario ten ama.

7

Hanani huan Hananías quimocuitahuijque Jerusalén

¹ Quema ya tijsencajtoyaj nopa tepamit cati quiyahualo altepet Jerusalén huan nochi icaltehua ya tijtatzquiltijtoyaj, tiquitequimacaque caltemit tamocuitahuiani, huicani huan levitame para tamocuitahuise. ² Huan nijtequimacac ma quipiya tanahuatili ipan nopa altepet noicni Hanani huan Hananías cati eliyaya capitán ten soldados ipan nopa cuartel cati eltoya nopona. Hananías eliyaya se tacat cati nelía temachtí huan tahuel quitepanitayaya Toteco Dios huan amo quej sequinoc. ³ Huan na niquinilhui: “Amo xijtapoca caltemit ten Jerusalén hasta quema ya quistos cuali tonati huan sempa xijtzacuaca nopa caltemit quema noja itztose tamocuitahuiani. Huan xijtzacuaca nopa caltemit cuali huan xijtalica nopa hueyi teposbarra. Huan nojquiya xiquitequimacaca tacame cati Jerusalén ehuaní para ma tamocuitahuica. Sese ma quipiya itequi campa ta tijtalis o nechca ichaj.”

*Inintoca cati tacuepilijque ten tali Babilonia
(Esd. 2:1-70)*

⁴ Niquilhui ya nopa pampa nopa altepet eliyaya tahuel hueyi huan pilquentzi masehualme itztóyaj nopona pampa ayemo oncayaya calme tasencahuali. ⁵ Huan Toteco Dios techyoltacani para ma niquinsentili nochi tayacanca tacame, nochi tequichihuani, huan nochi masehualme para ma moiycuiloca por familias. Ya nijpanti se amatapohuali ica inintoca cati achtohuiya mocuetoyaj huan ya ni cati ijcuilijtoc ipani:

⁶ “Nica eltoc inintoca nopa israelitame cati ehuaní ipan altepet Jerusalén huan campa huéli ipan tali Judá cati Nabucodonosor quinhucac ipan tali Babilonia para tetequipanotij huan teipa sempa mocuetque ipan Jerusalén huan ipan nopa sequinoc pilaltepertzitzi campa ehuyayaj. ⁷⁻²⁵ Tacuepilijque inihuaya nopa tayacanani cati inintoca eliyaya Zorobabel, Jesús, Nehemías, Azarías, Raamías, Nahamani, Mardoqueo, Bilsán, Misperet, Bigvai, Nehum huan Baana. Nica techilhuía ipan taya familia hualajque nopa tacame huan quesqui ten injuanti mocuetque ten nopa familia.

Familia, Quesqui

Paros, 2,172

Sefatías, 372

Ara, 652

Pahat Moab por Jesús huan Joab, 2,818

Elam, 1,254

Zatu, 845

Zacai, 760

Binúi, 648

Bebai, 628

Azgad, 2,622

Adonicam, 667

Bigvai, 2,067

Adín, 655

Ezequías por icone Ater, 98

Hasum, 328

Bezai, 324

Harif, 112

Gabaón, 95

26-38 “Huan nica techilhuía inialtepe campá hualajque nopa tacame huan quesqui inijuanti mocuetque ten nopa altepet.

Altepet, Qesqui
 Belén huan Netofa, 188
 Anatot, 128
 Bet Azmavet, 42
 Quiriat Jearim, Cafira huan Beerot, 743
 Ramá huan Geba, 621
 Micmas, 122
 Betel huan Hai, 123
 nopa seyoc altepet Nebo, 52
 nopa seyoc altepet Elam, 1,254
 Harim, 320
 Jericó, 345
 Lod, Hadid huan Ono, 721
 Senaa, 3,930

Totajtzitzi cati mocuetque

39-42 “Huan nica techilhuía quesqui totajtzitzi tacuepilijque ten tali Babilonia huan ipan catijqui familia hualajque.

Familia, Qesqui
 Jedaiás, 973
 Imer, 1,052
 Pasur, 1,247
 Harim, 1,017

Levitame cati tacuepilijque

43 Tacuepilijque 74 levitame cati itztoyaj iixhuihua Josué por Jesús huan Cadmiel.

44 Tacuepilijque 148 huicani cati itztoya iixhuihua Asaf.

45 Tacuepilijque 138 tiopan caltemit tamocuitahuiani cati itztoyaj iniixhuihua Salum, Ater, Talmón, Acub, Hatita huan Sobai.

46 Huan tacuepilijque tiopan calijtic tequipanohuani cati itztoyaj iniixhuihua:

Ziha, Hasufa, Tabaot,
 47 Queros, Siaha, Padón,
 48 Lebana, Hagaba, Salmá,
 49 Hanán, Gidel, Gahar,
 50 Reaía, Rezín, Necoda,
 51 Gazam, Uza, Paseah,
 52 Besai, Mehunim, Nefisesim,
 53 Bacbuc, Hacufa, Harhur,
 54 Bazlut, Mehída, Harsa,
 55 Barcos, Sísara, Tema,
 56 Nezia huan Hatifa.

57 “Huan tacuepilijque ininteipa ixhuihua itequipanojcahua Salomón cati inintoca eliyayaj:

Sotai, Soferet, Perida,
 58 Jaala, Darcón, Gidel,
 59 Sefatías, Hatil, Poqueret Hazebaim huan Amón.

⁶⁰ Huajca para nochi tacuepilijque 392 cati eliyayaj iniixhuihua nopa tequipanohuani cati tequitiyayaj tiopan calijtic huan cati eliyayaj iniixhuihua itequipanojcahua Salomón.

⁶¹ “Huan ipan nopa tonali nojquiya tacuepilijque sequinoc tacame ten altepet Tel Mela, Tel Harsa, Querub, Adón huan Imer ipan tali Persia, pero amo quipantijque inintoca ipan nopa amatapohuali huan amo huelque quixnextijque ajquiya inintata, yon inihueyi tata, yon sinta nelía eliyayaj israelitame. ⁶² Elque 642 ten ni tacame huan elque iixhuihua:

Delaía, Tobías huan Necoda.

⁶³ “Huan tacuepilijque nopa totajtzitzi cati eliyayaj iixhuihua Habáía, Cos huan Barzilai cati motalnamicti ihuaya se iichpoca Barzilai ten tali Galaad huan quicuili itoca isihua.

⁶⁴ “Nochi ni totajtzitzi quintemojque inintoca ipan nopa amatapohuali huan amo quipantijque. Huajca amo quinquimacaque quej totajtzitzi pampa amo quimatque sinta tapajpactique o amo. ⁶⁵ Huan na nigobernador niquinilhui ma amo quicuaca tacualisti cati tatzejtelolciti para totajtzitzi hasta quema quitajtanise TOTECO ica nopa piltetzitzi cati itoca Urim huan Tumim, nopa dados tatzejtelolciti, para quimatise sinta eliyayaj totajtzitzi o amo.

⁶⁶ “Huajca ica nochi cati tacuepilijque ipan tali Judá elque 42,360 masehualme. ⁶⁷ Huan nojquiya tacuepilijque 7,337 inintequipanojcahua, tacame huan sihuame. Huan tacuepilijque 245 huicani, tacame huan sihuame.

⁶⁸ Huan quinhualicatoyaj inihuaya 736 cahuayojme, 245 mulas, ⁶⁹ 435 camellos huan 6,720 burrojme.

⁷⁰ “Huan sequij tayacanani ipan familias tapalehuijque ica tomi para nopa tequit. Huan na cati nigobernador nitamacac 8 kilos huan tajco ten oro, 50 tazas huan 530 iniyoyo totajtzitzi. ⁷¹ Huan sequij tetatme ipan familias temacaque 170 kilos ten oro huan 1,210 kilos ten plata. ⁷² Huan nochi sequinoc cati itztoyaj ipan nopa altepet temacaque 170 kilos ten oro, huan se mil cien kilos ten plata, huan 67 iniyoyo totajtzitzi.

⁷³ “Huan teipa nochi totajtzitzi, levitame, caltemit tamocuitahuiani, huicani huan cati tequipanohuayayaj ipan tiopamit, huan nochi sequinoc israelitame tacuepilijque ipan inialtepe campa ehuan huan mochantijque.”

Esdras tepohuili itanahuatilhua Moisés

Huan quema ajsic nopa metzti chicome ipan toisraelita xihui*, nochi nopa israelitame ya quipixtoyaj ininchajchaj para ipan itztose ipan inialtepe.

8

¹ Huan ipan nopa achtohui tonali ten nopa metzti chicome*, nochi nopa masehualme quej san se tacat mosentilijque campa quichihuaq tianquis ipan Jerusalén iixmelac nopa At Caltemit. Huan quihuijque tamachtijquet Esdras ma quihualica nopa amatapohuali cati quipixqui nopa tanahuatilme cati huejcajquiya TOTECO quinmacatoya israelitame ica Moisés para quipo-huas iniixpa. ² Huajca nopa totajtzi Esdras quihualiac nopa amatapohuali iniixpa nopa tasentili ipan nopa achtohui tonali ipan nopa metzti. Nopona itztoyaj nochi tacame, sihuame huan coneme cati hueliyayaj tamachilaj.

* 7:73 7:73 Elqui ipan octubre o noviembre ipan tocalendario ten ama.

* 8:1 8:1 Elqui

huejcajquiya ipan se 8 itequi octubre ipan tocalendario ten ama.

³ Huan Esdras pejqui quipohua nopa amatapohuali ica ijnaloc huan quipojqui hasta tajco tona ipan nopa plaza cati eltoya iixmelac nopa At Caltemit iniixpa nopa tacame, sihuame huan nochi coneme cati hueliyayaj quimachilíaj.

Huan nochi nopa masehualme tacactoyaj para quimachilise cuali nopa tanahuatilme cati TOTECO quinmacatoya. ⁴ Huan Esdras moquetztoya taixpa huejcapa ipan se tapechti cati quicualchijchijtoyaj ica huapali para ipan ma moquetza para nochi huelise quiitase. Huan ipan nopa tapechti ipan inejmat moquetztoya Matatías, Sema, Anías, Urías, Hilcías huan Maasías. Huan iarravesco moquetztoya Pedaías, Misael, Malquías, Hasum, Hasbadana, Zacarías huan Mesulam. ⁵ Huan Esdras quitapo nopa amatapohuali huan nochi hueliyayaj quiitaj pampa itztoya huejcapa. Huan quema pejqui tapohua, nochi nopa masehualme moquetzque. ⁶ Huan Esdras quipaquilismacac TOTECO, nopa Dios cati tahuel hueyi huan nochi quinanguilijque icamanal ica: “Quej nopa melahuac.” Huan momatananque para ilhuicac. Teipa motancuaquetzque huan mohuijtzonque hasta talchi huan quihueyichijque TOTECO.

⁷ Huan nopa levitame: Jesús, Bani, Serebías, Jamín, Acub, Sabetai, Hodías, Maasías, Kelita, Azarías, Jozabed, Hanán huan Pelaía; quiixtomayayaj nopa tanahuatilme cati quipohuayaya para nochi huelque quimachilíaj. ⁸ Huan inijuant quipojque chichahuac para nochi quicaquise huan teipa nopa levitame quinmachtijque masehualme taya quinequi quiijtos sesen tamachtili para ma quimachilica cuali huan nochi huelque quimachilijque.

⁹ Huan nochi nopa masehualme chocayayaj quema quicaquiyayaj itanahuatilhua TOTECO. Huajca na niNehemías nigobernador, huan Esdras nopa tamachtijquet huan nopa levitame tiquinilhuijque ma amo chocaca huan para nopa tonali eliyaya tatzejtzolotc para TOTECO toDIOS huan para ma amo mocuesoca yon ma amo chocaca. ¹⁰ Huan nojquiya Esdras quinilhui: “Xiyaca xiyolpactoca. Xijcuatij tacualisti cati más cuali huan xiquitij xocomecat iayo cati más tzopelic. Nojquiya xiquintitanilica tacualisti cati teicneltzitz huan amo teno quipiayaj para quicualtalise. Ama ni tonal eltoc tatzejtzolotc huan taiyocatalili para Tóteco. Amo ximocuesoca pampa nopa paquilisti cati tijpiyaj ipan TOTECO techmaca chichahualisti.”

¹¹ Huan nopa levitame nojquiya quinyoltaliyayaj nopa masehualme huan quinilhuiyayaj: “Amo ximocuesoca pampa tatzejtzolotc ni tonal para TOTECO.” ¹² Huajca nochi nopa masehualme yajque para quicuatij huan quitij cati más cuali huan quititanque tacualisti para cati teicneltzitz. Huan nochi mopaquilismacaque huan ilhuichijque pampa quicactoyaj icamanal TOTECO cati quinpoihilijtoyaj huan quinmachtijtoyaj.

Quichijque nopa Ilhuit ten Pilxajcaltzitz

¹³ Huan tonili nochi cati tayacanca tetatme, nopa totajtzitz huan nopa levitame mosentilijque ihuaya nopa tamachtijquet Esdras para quipohuase ica más tamocuitahuili nopa amatapohuali para noja más quimachilise. ¹⁴ Huan quipantijque nopa tanahuatili campa TOTECO quinahuatijtoya Moisés para nochi israelitame ma quichi huaca pilxajcaltzitz sesen xihuit huan ipan itztose ipan nopa Ilhuit ten Pilxajcaltzitz. ¹⁵ Huajca quintitanque tayolmelahuani campa hueli ipan nochi altepeme huan ipan Jerusalén para teyolmelahuase. Quinilhuijque nochi israelitame ma quisaca quemotij imacuayohua olivo cuame, apachij cuame, higo cuame o ten hueli cuahuit cati quipiya miyac ixihuiyo cati taecahuilía para ica mochantise

quej TOTECO tanahuatijtoya. ¹⁶ Huajca nochi israelitame yajque cuatita quitemotoj cati ica moxajcaltise. Huan nochi quichijque pilxajcaltizti huejcapa ten ininchajchaj, o ipan inincalixpa, o icalixpa tiopamit, o ipan nopa plazas iniixmelac nopa At Caltemit huan Efraín Caltemit. ¹⁷ Huajca nochi israelitame cati mocuetoyaj ten campa quinhuicatoyaj tetequipanotij mocajque ipan nopa pilxajcaltizti cati quichijtoyaj para 7 tonati. Huan nochi tahuel yolpajque para sempa quitoquilise nopa tanahuatili cati amo nochi quitoquilijtoyaj hasta quema Josué, icone Nun, huejcajquiya quinyacanayaya israelitame. ¹⁸ Huan ipan sesen ten nopa chicome tonati ipan nopa ilhuit Esdras quipojqui nopa amatapohuali cati quipixtoya itanahuatilhua Toteco Dios. Huan ipan tonali chicueyi quipixque se hueyi tasentili para quihueyichihuase Toteco quej quijto nopa tanahuatili ma quichihuaca.

9

Israelitame mosajque huan quipohuilijque TOTECO inintajtacolhua

¹ Huan teipa ipan 24 itequi nopa chicome metzti ipan toisraelita xihui*, mosentilijque nochi israelitame para mosahuase. Huan mosajque huan moquentijque yoyomit cati fiero huan motemilijque tali ipan inintzonteco para quinextise inintequipachol por inintajtacolhua. ² Huan moiycatalijque ica masehualme cati amo israelitame huan nochi moquetzque huan iixpa TOTECO quitenpojque inintajtacolhua huan inintajtacolhua inintatahua. ³ Huan para eyi horas mojmosta inijuanti mochahuayaj ijcatoque huan se quipohuilijaya ten nopa amatapohuali ica itanahuatilhua TOTECO Dios. Huan para seyoc eyi horas mojmosta quipohuilijayaj TOTECO Dios inintajtacolhua huan quihueyichihuayaj. ⁴ Huan tahuejcapa ipan nopa escalones moquetzayayaj nopa levitame: Jesúa, Bani, Cadmiel, Sebanías, Bani, Serebías, Bani huan Quenani. Huan chichahuac quinojnotzayayaj TOTECO Dios. ⁵ Huan teipa nopa tayacanca levitame, Jesúa, Cadmiel, Bani, Hasabnías, Serebías, Hodías, Sebanías huan Petaías quinilhuijque nopa masehualme: “Ximoquetzaca huan xijhueyichihuaca TOTECO Dios cati ipa itztoya para nochipa huan para nochipa itztos.” Huan quijtojqque:

“Nochi ma timitzhueyichihuaca huan ma timitzpaquilismacaca, TOTECO Dios, pampa ta tahuel tihueyi huan tahuel ticuajcualtzi. ⁶ TOTECO, san ta tiyojtzti tiDios huan amo aqui seyoc. Ta tijchijqui ilhuicacti campa tiitztoc huan nopa ilhuicacti campa sitalime. San ta tijchijchijqui taltipacti huan nochi cati onca ipani. San ta tijchijchijqui nochi huejhueyi at huan nochi cati nopona itztoque. Ta tiquinmaca nemilisti nochi cati itztoque. Nochi ilhuicac ehuan ipan ilhuicacti motancuaquetzaj moixpa ta.

⁷ “Ta tiTOTECO Dios cati tijtapejpeni Abram huan tijquixti ipan tali Ur, inintal nopa caldeos huan tijtocaxtali Abraham. ⁸ Tiquitac para temachtí iyolo moixpa. Huan ihuaya tijchijqui se camanal sencahuali para tiquinmacasquía iixhuhua nopa talme cati iniaxahua nopa cananeos, heteos, amorreos, ferezeos, jebuseos, huan gergeseos. Huan tijtamichijtoc nochi cati tijtencajqqui pampa nelía tixitahuac.

⁹ “Ta tiquitac quenicatza taijyohuiyayaj tohuejcapan tatahua ipan tali Egipto. Tijcajqqui quema mitztajtanjijque tapalehuili iteno nopa Hueyi At Chichiltic. ¹⁰ Huan tijchijqui huejhueyi tanextili huan tiochicahualnescayo iixpa Faraón, huan nochi itequipanojcahua huan nochi ten tali Egipto ehuan. Tiquinmanahui israelitame inimaco pampa tiquitac quenicatza

* 9:1 9:1 Elqui ipan 31 itequi octubre ipan tocalendario ten ama.

mohueyimatiyayaj Egipto ehuan huan quenicitza quinchihuiliyayaj cati fiero. Huajca tijchijqui para nochi masehualme ma mitzixmatica huan hasta ama nochi mitzixmatij para tahuel hueyi mochicahualis. ¹¹ Tijxelo nopa hueyi at iniixpa huan nochi israelitame panoque tatajco hueyi at ipan tali huactoc. Huan nochi inculanlaitacahua tiqunmajcajqui campa más huejcata quej quisisahuaj se tet huan yahui hasta atzinta huan nopona mochicahua. ¹² Tonaya tiqunyacanqui ipan ojti ica se hueyi mixti huan tayohua ica se hueyi tilelemecti para taahuijtiyas campa nejnentiayahuiyayaj.

¹³ “Ta tihualtemoc ipan nopa tepet Sinaí, huan ticamanaltic inihuaya israelitame huan tiqunmacac cuali tamachtilme huan tanahuatilme cati xitahuac, huan cati melahuac huan cati cuali. ¹⁴ Tiqunmacac tanahuatilme ten quenicitza ma mosiyajquetzase ipan sábado nopa tonal cati taiyocatalili para ta. Quena, ica motequipanojca Moisés tiqunmacac tanahuatilme huan tamachtilme para ma quichihuaca. ¹⁵ Tiqunmacac pantzi cati huetzqui ten ilhuicac quema mayanayayaj. Huan quema amiquiyayaj, ta tijchijqui ma quisa at ipan se hueyi tet. Huan tiqunilhui ma calaquica huan ma moaxcatica nopa tali cati tiquintencahuili tiqunmacasquía.

¹⁶ “Pero tohuejcapan tatahua tahuel mohueyimatque huan moyoltetilijque huan amo quitepanitaque motanahuatil. ¹⁷ Amo quinejque mitztacaquilise. Amo quelnamijque nochi nopa tiochicahualnescayot cati ta tijchijqui iniixpa. Huajca motzontochonchijque huan quitalijque se tayacanquet para sempa quinhuicasquía ipan tali Egipto campa tetequipanohuayayaj san tapic. Pero ta, tiToteco Dios titetapojpolhuía huan tijpiya hueyi moyolo. Ta amo nimantzi ticalani. Titetasojta huan hueyi motaicnelil, yeca amo tiquntahuelcajqui.

¹⁸ “Masque quichijque se becerro ten oro, huan masque quijtojqque para ya nopa elqui inindios cati quinquixti ipan tali Egipto, huan tahuel hueyi mitzmahuispolojque, ¹⁹ ta cati tahuel hueyi motaicnelil, amo tiquincajtejqui ipan huactoc tali campa amo teno onca. Amo tiquinquixtili nopa hueyi mixti cati quinyacanqui tonaya, yon nopa tilelemecti cati quintaahuili tayohua para ma quimatica catijqui ojti ipan yase. ²⁰ Huan tiqunmacac moTonaltzi cati cuali para quinmachtis. Amo tiquinquixtili nopa maná cati eliyaya inintacualis. Yon amo tiquinquixtili at quema amiquiyaya. ²¹ Para 40 xihuit tiqunmacayaya nochi cati monejqui ipan nopa huactoc tali huan amo teno quinpolo. Iniyoyo amo sosolijqui huan iniicxi amo sesemacac.

²² “Tiqunpalehui para quintanque miyac tanahuatiani huan talme ica miyac inimasehualhua. Tiqunmacac talme hasta nopa nepamit cati más huejca. Moaxcatijque Heshbón cati eliyaya ital Tanahuatijquet Sehón huan moaxcatijque Basán cati eliyaya ital Tanahuatijquet Og. ²³ Huan tiqunmiyaquilil ininconeua quej elisquíaj sitalime ipan ilhuicac. Huan tiqunhualicac ipan ni tali cati tiqunilhuijtoya inintatahua ma calaquica huan ma moaxcatica. ²⁴ Huajca elque ininconeua cati hualajque ipan ni tali huan moaxcatijque. Iniixpa tiquintanque nopa cananeos cati achtohuiya itztoyaj nica. Tiqunmactili israelitame inintanahuatijcahua cananeos inihuaya inimasehualhua para ma quinchihuilica cati injuanti quinequisquíaj. ²⁵ Huan injuanti calajque campa altepeme cati más cuali tasencahuali, huan ipan talme cati más cuali. Moaxcatijque calme cati tejtemitoya ica nochi tamanti cati más cuali huan amelme cati ya taxahuali. Moaxcatijque xocomeca milme, huan olivo milme huan milme ica nochi tamanti cuame cati ya

quippiyayayaj inintajca hasta mocahua. Huan quicujque hasta cuali ixhúique, huan hasta motomajque huan tahuel pajque ica nochi cati cuali tiquinchiuilijtoya.

²⁶ “Pero masque quej nopa tiquintiochijqui, amo mitztepanitaque. San motzontochonajque huan amo quinejque quitiase motanahuatilhua. Quinmictijque motajtolpanextijcahua cati quinnojnótzayayaj chichahuac para ma moyolcuepaca ica ta. Tahuel mitzixpanoque. ²⁷ Huajca yeca tiquintemactili inimaco inincualancaitacahua para ma quintajyohuiltica. Huan quema taijyohuyayaj, mitztajtanijqe xiquinpalehui, huan ta ica mohueyi faicnelilis, tiquntacaquili huan tiquinmacac tamanahuiani para ma quinmaquixtica inimaco inincualancaitacahua.

²⁸ “Pero quema ya oncayaya se quentzi tasehuilisti, inijuanti sempa quichihuayayaj cati fiero moixpa huan yeca tiquincajqm ma huetzica inimaco inincualancaitacahua para inijuanti ma quintanica. Huan yeca sempa mitztajtanijqe motapalehuil huan ta, ten ilhuicac, tiquntacaquili huan pampa tiquintasojtac, tiquinmanahui ten inincualancaitacahua. Huan quej nopa panoc miyac huelta.

²⁹ “Tiquinilhuyaya sempa ma quichihuaca cati quijtohua motanahuatilhua, pero inijuanti tahuel motepanitayayaj huan amo quicajque cati tiquinnahuati. Noja más quiixpanoque motanahuatilhua cati quichihua para masehualme ma itztoca ica cuali sinta quitoquiláj. Pero inijuanti más motzontochonchijque, huan moyoltetilijque huan amo mitztacaquilijque.

³⁰ Huan para miyac xihuit tijpixqui hueyi moyolo ica inijuanti. Huan ica moTonal tijnequiyaya tiquntalnamiquiltis pampa tiquinmacac motajtolpanextijca mocamanal para quinihuisse taya inintajtacolhua, pero inijuanti amo quintacaquilijque. Huajca yeca tiquintemactili sempa inimaco inincualancaitacahua ipan ni tali para ma quintatzacuilitica. ³¹ Pero pampa ta tahuel titetasojta, amo tiquintzontamilti, yon amo tiquntahuelcajqm pampa ta tiToteco Dios cati hueyi moyolo huan tahuel titeicnelía.

³² “Toteco Dios, ta cati tihueyi huan tijpiya hueyi mochicahualis. Ta cati titemajmati huan tijtamichihua nochi cati tijtencahua para tijchihuas, ama na nimitztajtania amo xiquelcahua totaijyohuilis. Amo xiquelcahua quenicatza taijyohuijtoque totanahuatijcahua, totayacancahua, totajtzitzi, totajtolpanextijca, tohuejcapan tatahua huan nochi momasehualhua ten quema nopa Asiria tanahuatiani techtanque huan hasta ama ni tonali.

³³ Ta amo motajtacol nochi cati techpanotihualajtoc pampa ta tijchijtoc cati xitahuac huan tojuanti tahuel titajtacolchijtoque. ³⁴ Totanahuatijcahua, totayacancahua, totajtzitzi huan tohuejcapan tatahua amo quitoquilijque motanahuatilhua. Amo quitacaquilijque cati tiquinilhuyaya ma quichihuaca. ³⁵ Quema ajsitoj ipan inintal huan quipixque inintanahuatijcahua pampa tiquintiochijqui miyac, amo mitzhueyitalijque. Masque tiquinmacac hueyi tali cati miyac itajca, amo quicajque inintajtacolhua.

³⁶ “Huan ama timocuectoque titetequipanohuani ipan ni cuali tali cati tiquinmacac tohuejcapan tatahua para ma quicuaca nochi cati cuali quipiya. ³⁷ Pero ama nochi cuatacti cati onca mocahua para tanahuatiani cati ta tiquntalijtoc para technahuatise por totajtacolhua. Nojquiya tojuanti totacayohua huan totapiyahlua tiitztoque inimaco para ma techchihuilica cati quineqij huan yeca miyac titaijyohuáj.

Inintoca cati motemacaque para quitequipanose TOTECO

³⁸ “Pero masque nochi ni tamanti panotoc, ama tojuanti tijchihuaj ni tajcuiloli campa tojuanti, totayacancahua, tolevitajhua huan tototajtzitzi

timotemacaj para temachti tijtoquilise motanahuatilhua huan yeca nochi tojuanti tijtalíaj totoca ipan ni tajcuiloli.”

10

¹ Huan nica eltoc totoca tojuanti cati timotocaxtalijque ipan amat: Na niNehemías, niicone Hacialías, cati nigobernador:

Huan totajtztizi cati motocaxtalijque elque Sedequías, ² Seraías, Azarías, Jeremías,

³ Pasur, Amariás, Malquías.

⁴ Hatús, Sebanías, Maluc,

⁵ Harim, Meremot, Obadías,

⁶ Daniel, Ginetón, Baruc,

⁷ Mesulam, Abías, Mijamín,

⁸ Maazías, Bilgai huan Semaías.

⁹ Huan levitame cati motocaxtalijque elque:

Jesúa, icone Azanías, Binúi cati se iixhui Henadad huan Cadmiel,

¹⁰ ihuaya inilevita icnihua: Sebanías,

Hodías, Kelita, Pelaías, Hanán,

¹¹ Micaía, Rehob, Hasabías,

¹² Zacur, Serebías, Sebanías,

¹³ Hodías, Bani huan Beninu.

¹⁴ Huan motocaxtalijque tayacanani ipan nopa masehualme:

Paros, Pahat Moab, Elam, Zatu, Bani,

¹⁵ Buni, Azgad, Bebai,

¹⁶ Adonías, Bigvai, Adín,

¹⁷ Ater, Ezequías, Azur,

¹⁸ Hodías, Hasum, Bezai,

¹⁹ Harif, Anatot, Nebai,

²⁰ Magpías, Mesulam, Hezir,

²¹ Mesezabeel, Sadoc, Jadúa,

²² Pelatías, Hanán, Anaías,

²³ Oseas, Hananías, Hasub,

²⁴ Halohe, Pilha, Sobec,

²⁵ Rehum, Hasabna, Maasías,

²⁶ Ahías, Hanán, Anán,

²⁷ Maluc, Harim huan Baana.

Israelitame quitestigojquetzque Toteco nochi cati quichihuasquíaj

²⁸ “Huan nochi sequinoc masehualme, nopa sequinoc totajtztizi, levitame, caltemit tamocuitahuiani, huicani, tiopa tequipanohuani huan nochi sequinoc cati moyocatalijque ten masehualme cati amo quiixmatij Toteco Dios cati nozona itztoyaj, nochi motemacaque para quitequipanose Toteco Dios inihuaya inisihuaqhua huan ininonehua cati ya hueliyayaj tamachilíaj, ²⁹ nochi mosentilijque huan sentic inihuaya iniicnihua huan inintayacanc-ahua tatestigojquetzque para quitamichiuase nochi itanahuatilhua Toteco Dios cati quinmacatoya ica itequipanojca Moisés. Nojquiya tatestigoj-quetzque para quichihuase nochi camanali, tamachtilme huan leyes cati TOTECO quinilhuijtoc. Huan sinta amo, huajca inijuanti quiseliskuíaq nochi nopa tatechihualisti cati quinamiqui quinajsis.

³⁰ “Huan nochi nopa masehualme quijtojque: ‘Tijcahuaj tocamanal para amo tiquincahuilise toichpocahua ma monamictica inihuaya tacame cati

amo israelitame, huan yon totelpocahua inihuaya ichpocame cati amo israelitame.

³¹ “Sinta masehualme cati amo israelitame quihualicase tamanti para quinamacase ipan sábado quema timosiyajquetzaj o ipan ten hueli tonali cati tatzejtzeltoc para TOTECO, amo tiquintacohuilise. Nojquiya quema ajsi nopa chicome xihuit tijcahuilise ma mosiyajquetza nopa tali huan amo teno tijtocase huan tiquintapojpolhuise nochi israelitame cati techtahuiquilíaj.

³² “Nojquiya tiquijtohuaj para sesen xihuit titemacase nahui gramos ten plata tomi para itiopa Toteco Dios huan nochi itequi. ³³ Elis para nopa pantzi cati quinextíaj iixpa, huan para nopa tacajcahualisti ten harina, huan nopa tacajcahualisti tatatili cati talojtzitzi monequi, huan nopa tacajcahualisti ipan tonali para ma timosiyajquetzaca, huan quema yancuic metzti, huan nochi nopa ilhuime cati yaya quitalijtoc. Nojquiya elis para titaxtahuase ica tamanti tatzejzeloltique, huan nopa tacajcahualisti para tajtacoli para quiixzacuas totajtacolhua tiisraelitame iixpa, huan nochi sequinoc tamantzitzi cati monequi motequihuis ipan itiopa Toteco Dios.

³⁴ “Nojquiya timahuiltijtoque ica nopa piltetzitzi para tijmatise catijqui familia ten totajtzitzi, tolevita icnihua o sequinoc tiisraelitame techtocarohua para ma tijhuicaca cuahuit huan ipan catijqui tonali ipan sesen xihuit monequi tijhuicase nopa cuahuit para quitatise ipan itaixpa Toteco Dios quej yaya tanahuati ma tijchihuaca ipan itanahuatilhua.

³⁵ “Nojquiya sesen xihuit titatestigojquetzaj para tijhuicase ipan itiopa TOTECO itajca cati achtohui quisa ten cati tijtojqe huan inintajca cati achtohui temacaj nochi cuame cati tijpiyaj.

³⁶ “Nojquiya tiquijtohuaj para tijhuicase ipan itiopa Toteco Dios toachtohui cone, huan iniachtohui conehua tohuacaxhua huan toborregojhua. Huan tiquinmacase nopa totajtzitzi cati quitequipanohuaj Toteco Dios quej quuijtohua nopa tanahuatilme.

³⁷ “Nojquiya tijhuicase para nopa totajtzitzi nopa achtohui harina, nopa achtohui cuactacti ten sesen cuahuit, nopa achtohui xocomecat iayo huan nopa achtohui aceite hasta campa quiajocuisse ipan tiopamit. Huan para nopa levitame, tijhuicase se chiquihuit ipan sesen majtacti chiquihuit ten nochi cati temaca total huan ya nopa elis todiezmo. Huan nopa levitame quiselise huan quisentilise ipan nochi topilaltepehua pampa quej nopa inintequi.

³⁸ “Huan nozona inihuaya nopa levitame cati quiselíaj diezmos itzto se totajtzi cati se iixhui Aarón. Huan se chiquihuit ten sesen majtacti chiquihume cati quiselise para diezmos ten tucualisti, nopa levitame quiajocuisse ipan nopa cuarto ipan itiopa Toteco Dios campa taajocuij. ³⁹ Pampa israelitame inihuaya nopa levitame quinquimacatoc Toteco Dios para quiajocuisse nopa tacajcahualisti ten trigo, xocomecat iayo huan aceite ipan nopa cali campa quinajocuij nopa tamanti tatzejzeloltic para quitequihuisse totajtzitzi huan caltemit tamocuitahuiani huan huicani.

“Huajca nica tijcahuaj tocamanal para amo tijcahuase tijmacase itiopa Toteco Dios cati monequi nozona.”

11

Nopa yancuic ehuaní ipan altepet Jerusalén

(1 Cr. 9:1-34)

¹ Nopa tayacanani ten israelitame ya mocahuayayaj para itztose ipan altepet Jerusalén. Pero nochi sequinoc israelitame monejqui mahuiltise ica piltetzitzi para quitatise ajquiya más itztoqui nozona pampa monequi

se ipan sesen majtacti tacame mochantis para mocahuas ipan altepet Jerusalén, nopa altepet tatzetzeltolc para TOTECO. Huan nopa seyoc chichnahui yasquiaj itztotij ipan sequinoc altepeme. ² Huan sequij tacame ica ininpaquilis motemacaque para mocahuase ipan altepet Jerusalén. Huan nochi israelitame quintiochijque pampa quej nopa monequiyaya.

³ Huan ya ni nintoca nopa tayacanani ipan sequinoc estados cati mocahuacoj ipan Jerusalén. Nechca nochi masehualme, totajtztizi, levitame, tiopa tequipanohuani huan iniixhuihua Salomón inintequipanojcahua noja mocajque ipan ininchajchaj ipan miyac pilaltepetztizi ipan tali Judá. Pero sequij masehualme ten tali Judá hualajque huan mochantijque ipan altepet Jerusalén.

⁴ Sequij masehualme ten nopa huejhueyi familias Judá huan Benjamín hualajque para mocahuase ipan altepet Jerusalén.

Ten iixhuihua Judá mocajque ipan Jerusalén:

Ataías, icone Uzías, cati elqui icone Zacarías, cati elqui icone Amarías, cati elqui icone Sefatías, cati elqui icone Mahalaleel, cati elqui se ipan ifamilia Fares. ⁵ Nojquiya hualajqui Maasías, icone Baruc, cati elqui icone Colhoze, cati elqui icone Hazaias, cati elqui icone Adaias, cati elqui icone Joiarib, icone Zacarías, cati elqui icone Siloni.

⁶ Huajca para nochi sequinoc cati iixhuihua Fares cati mocajque ipan altepet Jerusalén elque 468 tacame cati tetique para tatehuise.

⁷ Ten iixhuihua Benjamín mocajque ipan Jerusalén:

Salú, icone Mesulam, cati elqui icone Joed, cati icone Pedaías, cati icone Colaías, cati icone Maasías, cati icone Itiel, cati elqui icone Jesaías.

⁸ Huan ica Salú mocajque Gabai huan Salai huan sequinoc cati para nochi mochijque 928. ⁹ Huan inintayacanca ipan nopa altepet elqui Joel, icone Zicri, huan iniompa tayacanca elqui Judá, icone Senúa.

¹⁰ Ten nopa totajtztizi mocajque ipan Jerusalén:

Jedaías, icone Joiarib, Jaquín, ¹¹ huan Seraías, icone Hilcías, cati elqui icone Mesulam, cati icone Sadoc, cati icone Meraiot, cati icone Ahitob, cati elqui se tayacanquet ipan itiopa Toteco Dios. ¹² Huan injuanti inihuaya cati tequitiyayaj ipan tiopamit eliyayaj 822. Nojquiya hualajqui para mocahuas Adaias, icone Jeroham, cati elqui icone Pelalías, cati icone Amsi, cati icone Zacarías, cati icone Pasur, cati icone Malquías, ¹³ huan inihuaya nochi iteixmatcahua cati tayacanani ten ininchaj ehuan mochihuayayaj 242. Nojquiya hualajqui para mocahuas Amasai, icone Azareel, cati elqui icone Azai, cati icone Mesilemot, cati elqui icone Imer. ¹⁴ Huan ihuaya hualajque 128 ihuampoyohua cati quinyacanayaj ininchaj ehuan huan eliyayaj tacame cati tahuel tetique. Huan quinyacanayaya Zabdiel, icone Gedolim.

¹⁵ Ten nopa levitame mocajque ipan Jerusalén:

Semaías, icone Hasub, cati elqui icone Azricam, cati icone Hasabías, cati elqui icone Buni. ¹⁶ Huan mocajque Sabetai huan Jozabad cati eliyayaj tayacanca levitame, cati quinquimacatoyaj para quiyacanase nochi tequit calteno ipan itiopa Toteco Dios. ¹⁷ Huan mocajqui ipan Jerusalén Matanías, icone Micaía, cati elqui icone Zabdi, cati icone Asaf. Yaya cati motatajtiyaya quema quipehualtiyayaj sesen culto para quitascamatise Toteco Dios. Nojquiya mocajqui Bacbuquías cati nopa ompa para tayacanas huan teipa Abda, icone Samúa, cati elqui

icone Galal, cati elqui icone Jedutún. ¹⁸ Huajca nochi ni levitame cati mocajque ipan altepet Jerusalén mochijque 284.

¹⁹ Ten nopa caltemit tamocuitahuiani mocajque ipan Jerusalén:

Acub, Talmón huan iniicnihua cati nojquiya quimocuitahuiyayaj caltemit. Huan para nochi mochijque 172.

Nopa masehualme cati itztoyaj ipan sequinoc altepeme

²⁰ Huan nopa sequinoc israelitame, totajtzitzi huan levitame mochantijque ipan sequinoc altepeme ipan tali Judá campá quiselijtoyaj tali ten inihuejcapan tatahua. ²¹ Pero nopa tacame cati tequipanohuayayaj tiopan calijtic mochantijque ipan nopa tepet Ofel nechca Jerusalén. Inintayacancanhua eliyayaj Ziha huan Gispa.

²² Huan nopa tayacanquet ten levitame cati itztoyaj ipan Jerusalén eliyaya Uzi cati elqui icone Bani, cati elqui icone Hasabías, cati icone Matanías, cati icone Micaía, cati elqui se iixhui Asaf. Huan nochi iixhuihua Asaf eliyayaj huicani ipan tiopamit. ²³ Huan nopa huicani mocajque imaco tanahuatili cati hualajqui ten nopa tanahuatijquet ipan tali Persia. Huan nopa tanahuatijquet quinnahuatiyaya taya quichihuase mojmosta.

²⁴ Huan Petaías, icone Mesezabeel, cati elqui se ten iixhuihua Zera, cati elqui icone Judá, yaya elqui itequipanojca nopa tanahuatijquet para quitas nochi tamanti ica israelitame.

Nopa masehualme cati itztoyaj ipan sequinoc pilaltepetzitzi

²⁵ Huan sequij iixhuihua Judá mocajque para itztose ipan altepeme Quiriat Arba, Dibón huan ipilaltepehua, Jecabseel huan ipilaltepehua, ²⁶ Jesús, Molada, Bet Pelet, ²⁷ Hazar Sual, Beerseba huan ipilaltepehua, ²⁸ Siclag, Mecona huan ipilaltepehua, ²⁹ Enrimón, Zora, Jarmut, ³⁰ Zanoa, Adulam huan ininipilaltepehua, Laquis huan imilhua huan Azeca huan ipilaltepehua. Huajca iixhuihua Judá mochantijtoyaj ten altepet Beerseba hasta nopa tamayamit cati itoca Hinom.

³¹ Huan injuanti cati itztoyaj ipan nopa hueyi familia ten iixhuihua Benjamín mochantijque ipan altepeme: Geba, Micmas, Aía, Betel huan ipilaltepehua, ³² Anatot, Nob, Ananías, ³³ Hazor, Ramá, Gitaim, ³⁴ Hadid, Seboim, Nebalat, ³⁵ Lod, Ono huan ipan nochi nopa tamayamit campá itztoyaj nopa tacame cati quiipiyayayaj miyac yajatili para quichihuase miyac tamanti.

³⁶ Huan quintitanque sequij levitame cati itztoyaj ipan tali Judá para ma itztotij ipan inintal iixhuihua Benjamín.

12

Totajtzitzi huan levitame cati tacuepilijque ihuaya Zorobabel

¹ Ya ni techilhuía catijqui totajtzitzi huan levitame tacuepilijque ihuaya Zorobabel, icone Salatiel, huan ihuaya Jesús. Inintoca nopa totajtzitzi elque: Seraías, Jeremías, Esdras,

² Amarías, Maluc, Hatús,

³ Secanías, Rehum, Meremot,

⁴ Iddo, Ginetó, Abías,

⁵ Mijamín, Maadías, Bilga,

⁶ Semaías, Joarib, Jedaías,

⁷ Salú, Amoc, Hilcias huan Jedaías.

Nochi ya ni eliyayaj tayacanani ten totajtzitzi huan inintapalehuijcahua ipan nopa tonali quema tequitiyaya Jesús.

⁸ Huan nopa levitame cati tacuepilijque inihuaya elque: Jesúa, Binúi, Cadmiel, Serebías, Judá huan Matanías cati ica ihuampoyohua tayacanayayaj ipan huicat para quitascamatise TOTECO ipan tasentili. ⁹ Nojquiya iniicnihua Bachuquíás huan Uni moquetzayayaj iniixmelac huan tapalehuiyayaj ipan tasentili.

¹⁰ Nopa hueyi totajtzi Jesúa quipixqui itelpoca cati itoca Joiacim. Joiacim elqui itata Eliasib. Eliasib teipa elqui itata Joiada.

¹¹ Joiada teipa elqui itata Jonatán. Jonatán teipa elqui itata Jadúa.

Totajtzitzi quema Joiacim elqui hueyi totajtzi.

¹² Nica eltoc inintoca nopa tayacanca totajtzitzi cati quinyacanayayaj inihueyi familia ten totajtzitzi huan tequitique imaco Joiacim quema yaya eliyaya hueyi totajtzi:

Meraías quinyacanayaya ichaj ehuan Seraías.

Hananías quinyacanayaya ichaj ehuan Jeremías.

¹³ Mesulam quinyacanayaya ichaj ehuan Esdras.

Johanán quinyacanayaya ichaj ehuan Amariás.

¹⁴ Jonatán quinyacanayaya ichaj ehuan Melicú.

José quinyacanayaya ichaj ehuan Sebanías.

¹⁵ Adna quinyacanayaya ichaj ehuan Harim.

Helcai quinyacanayaya ichaj ehuan Meraiot.

¹⁶ Zacarías quinyacanayaya ichaj ehuan Iddo.

Mesulam quinyacanayaya ichaj ehuan Ginetón.

¹⁷ Zicri quinyacanayaya ichaj ehuan Abías.

Piltai quinyacanayaya ichaj ehuan Miniamín huan Moadías.

¹⁸ Samúa quinyacanayaya ichaj ehuan Bilga.

Jonatán quinyacanayaya ichaj ehuan Semaías.

¹⁹ Matenai quinyacanayaya ichaj ehuan Joiarib.

Uzi quinyacanayaya ichaj ehuan Jedaías.

²⁰ Calai quinyacanayaya ichaj ehuan Salai.

Eber quinyacanayaya ichaj ehuan Amoc.

²¹ Hasabías quinyacanayaya ichaj ehuan Hilcías

huan Natanael quinyacanayaya ichaj ehuan Jedaías.

²² Quema Darío tanahuatiyaya ipan tali Persia quichijque se lista ica inintoca nopa tayacanani ten familias ten levitame huan totajtzitzi. Quichijque ipan nopa tonali quema Eliasib, Joiada, Johanán huan Jadúa eliyayaj huejhueyi totajtzitzi. ²³ Huan nopa tayacanca levitame quijcuilojque inintoca ipan se amatapohuali hasta ipan nopa tonali quema itztoya hueyi totajtzi Johanán, icone Eliasib.

²⁴ Huan nopa levitame cati tayacanani elque: Hasabías, Serebías huan Jesúa, icone Cadmiel. Huan iniicnihua cati san se ininchaj ehuan moquetzayayaj iniixmelac ipan nopa tasentili para quipaquilismacase huan quitascamatise Toteco Dios quema quintocarohua tequitise. Quej nopa tapalehuiyayaj quej huejcajquiya tanahuatijtzya David cati elqui itequipanojca Toteco Dios.

²⁵ Huan Matanías, Bachuquíás, Obadíás, Mesulam, Talmón huan Acub eliyayaj caltemit tamocuitahuiani. ²⁶ Inijuanti tequipanojque quema Joiacim, icone Jesúa huan iixhui Josadac, eliyaya hueyi totajtzi, huan

na niNehemías nieliyaya gobernador, huan Esdras eliyaya totajtzi huan tamachtijquet.

Ilhuichijque pampa ya quisencajque nopa tepamit

²⁷ Quema ajsic tonali para quiyocatalise para TOTECO nopa yancuic tepamit para altepet Jerusalén cati ya quitamicualchijchijtoyaj, huaيجا quin-temojque nochi levitame ipan campa hueli altepeme huan quinhuacique hasta altepet Jerusalén para tapalehuise ipan nopa ilhuit. Quinejque ma quihueyichihuaca TOTECO ica paquilisti, huan ica huicac para quitascamatis, huan ica tatzotzonal ica panderos, arpas huan liras. ²⁸ Huan nojquiya hualajque nopa levita huicani cati itztoyaj ipan pilaltepetzitzitzi nechca Jerusalén huan ipan nopa altepeme ten nopa netofatitame. ²⁹ Huan nojquiya hualajque huicani ten Gilgal, ten nopa mili nechca Geba huan ten Azmavet pampa nochi cati huicani mochantijtoyaj yahualtic altepet Jerusalén. ³⁰ Achtohui nochi nopa totajtzitzi huan levitame motapajpacchijque. Huan nojquiya quintapajpacchijque nochi israelitame, huan nopa caltemit ten nopa altepet huan nopa tepamit.

³¹ Teipa niquinnahuati tequichihuani ipan tali Judá ma tejcoca iixco nopa tepamit. Huan niquintali ome pamit ten huicani. Nopa achtohui pamit nejnenque ica inejmat itzonixco nopa tepamit hasta nopa Tasoli Caltemit. ³² Huan Osaías quintoquili ica tajco nopa tequichihuani ten tali Judá, ³³ inihuaya Azarías, Esdras, Mesulam, ³⁴ Judá, Benjamín, Semaías huan Jeremías. ³⁵ Huan quintoquilijque sequij totajtzitzi cati quipitzayayaj tapitzali. Teipa yajqui Zacarías, icone Jonatán, cati elqui icone Semaías, cati elqui icone Matanías, cati elqui icone Micaías, cati elqui icone Zacur, cati elqui icone Asaf. ³⁶ Huan ininacasta yajque Zacarías iicnihua, Semaías, Azarael, Milalai, Gilalai, Maai, Natanael, Judá huan Hanani cati tatzotzonayayaj ica itatzotzonahua David cati huecayajquiyaya eliyaya itequipanojca Toteco Dios. Huan nopa tamachtijquet Esdras quinyacanayaya. ³⁷ Huan quema ajsitoj campa nopa Ameli Caltemit quisehuiquilijque nejnenque huan tejoque ipan nopa ojti ten escalones cati yahui hasta campa itoca Ialtepe David. Teipa tejoque campa ixtejco nopa tepamit huan panoque ica huejcapa ichaj David hasta nopa At Caltemit ica campa hualquisa tonati.

³⁸ Huan nopa seyoc pamit ten huicani nejnenque ica iarravesco, huan na niNehemías, niyahuiyaya iniica, iixco nopa tepamit ica ne seyoc tajco masehualme. Huan tijpanoque nopa tetzociti cati itoca Horno Torre, huan hasta campa más patahuac nopa tepamit. ³⁹ Huan tijpanoque iixco nopa Efraím Caltemit, nopa Sosolcic Caltemit, nopa Michi Caltemit, nopa tetzociti cati itoca Torre ten Hananeel, huan nopa seyoc tetzociti cati itoca Torre ten Hamea. Teipa tipanoque hasta nopa Borrego Caltemit huan timoquetzatoj campa Tatzacti Caltemit. ⁴⁰ Huan teipa nochi ome pamit ten huicani huan na huan tajco nopa tequichihuani tiyajque hasta itiopa Toteco Dios campa timoquetzatoj.

⁴¹ Tinejnemiyayaj inihuaya nopa totajtzitzi cati tapitzayayaj cati inintoca: Eliacim, Maaseías, Miniamín, Micaías, Elioenai, Zacarías huan Hananías, ⁴² huan nopa huicani cati huicayayaj chichahuac cati inintoca: Maasías, Semaías, Eleazar, Uzi, Johanán, Malquías, Elam huan Ezer. Huan Izrahías quinyacanayaya.

⁴³ Huan ipan nopa tonali quitatijque miyac tacajchualisti para Toteco huan nochi paquiyayaj miyac pampa Toteco Dios quinmacatoya se hueyi paquilisti. Hasta nojquiya silhame huan coneme tahuel paquiyayaj huan

nopa tahuejchihualisti ten paquillisti ipan altepet Jerusalén quicaquiyayaj hasta huejca.

Nehemías quiyancuili nochi itequi nopa tiopamit

⁴⁴ Huan ipan nopa tonali quintalijque tacame para quimocuitahuise nopa cali campa quiajocuisse nopa nemacti, nopa achtohui pixquisti huan nopa diezmos cati quihualicayayaj masehualme. Monequi quisentilise ten nochi milme ipan nochi altepeme cati itanahuatilhua Moisés quijto pampa ya nopa quintocarohua nopa totajtzitzi huan levitame. Huan nopa masehualme ten tali Judá paquiyayaj para temacase pampa nopa totajtzitzi huan levitame quintequipanohuayayaj. ⁴⁵ Huan nopa totajtzitzi, huan levitame, inihuaya nopa huicani, huan caltemit tamocuitahuiani quihueyichijque Toteco Dios huan motapajpacchijque quej quijto nopa tanahuatilme cati David huan Salomón quinmacaque. ⁴⁶ Pampa hasta huejcaquiyaya quema itztoya David huan Asaf, itztoyaj tayacanani cati quinyacanayayaj huicani para quihueyichihuase huan quitascamatilise Toteco Dios.

⁴⁷ Huajca ipan ni tonali quema Zorobabel huan na, niNehemías, titayacanayayaj, nochi israelitame quihualicayayaj nopa tacualisti cati mojmosta monequiyaya para nopa huicani huan nopa caltemit tamocuitahuiani huan nojquiya para nopa levitame. Huan nopa levitame teipa quiiyocataliyayaj se diezmo para iteipa ixhuihua Aarón, cati eliyayaj totajtzitzi para ma quitequihuica.

13

Nopa cuali tamanti cati pejque quichihuaj

¹ Huan ipan nopa tonal quema quipohuayayaj miyacapa iniixpa nopa israelitame iamatapohual Moisés, quipantijque ijcuilijtoc ipan nopa amat para yon se amonita o moabita masehuali amo quema huelis mosentilis inihuaya imasehualhua Toteco Dios. ² Quej nopa elqui pampa amonitame huan moabitame amo quisque para quinnamiquiquij israelitame ica cati quicuase huan cati quise huejcaquiyaya. Quinchihuilijtosquaj israelitame cati cuali, pero amo ya nopa quichijque. Inijuanti quitaxtahuijque Balaam para ma quintelchihua israelitame. Pero Toteco Dios quicuetqui nopa tatechihuali ica tatiochihuali. ³ Huajca quema quicajque ni tanahuatili quiniyocaquixtijque nochi cati amo nelia israelitame.

⁴ Pero quema ayemo quicaquiyayaj ni tanahuatili, nopa hueyi totajtzi Eliasib quipixqui imaco nochi cuartos huan tamanti cati quihualicayayaj ipan itiopa Toteco Dios. Huan yaya moixmatiyaya ica Tobías. ⁵ Huan Eliasib quicualchijchihuilijtoya se hueyi cuarto ipan itiopa Toteco Dios huan quicajqui imaco Tobías para quitequihuis quema quinequi. Nopa cuarto elqui campa achtohuiya quiajocuiyayaj harina para tacajcahualisti, huan copali, huan nochi tepos tamantzitzi cati motequihuiyayaj ipan tiopamit. Nopona quicahuayayaj nopa diezmos ten trigo, xomecat iayo huan aceite quej elqui tanahuatili para quinmacase nopa levitame, huicani, caltemit tamocuitahuiani huan totajtzitzi. ⁶ Quema panoc nochi ya ni, amo niitztoya ipan altepet Jerusalén pampa quema Tanahuatijquet Artajerjes ipan tali Babilonia yahuiyaya para 32 xihuit tanahuatis, na nimocuetqui nopona ipan nopa caltanahuatili para nijtequipanos. Pero teipa nijtajtani ma nechcahua sempa nihualas ipan altepet Jerusalén, ⁷ huan yaya nechcaqui huan nihualajqui ipan altepet Jerusalén. Huan quema niajsico ipan Jerusalén huan nijmatqui para Eliasib quichijtoya cati fiero huan quimacatoya se

cuarto Tobías ipan itiopa Toteco Dios, ⁸ huajca tahuel nicualanqui. Huan nijquixti nochi itamantzitzi Tobías ipan nopa cuarto. ⁹ Huan nitanahuati para ma quitapajpacchihuaca nopa cuarto huan sempa ma quitalica nopona nopa tepos tamantzitzi cati motequihuáaj ipan itiopa Toteco Dios, huan nopa harina para tacajcahualisti huan nopa copali.

¹⁰ Nojquiya niquitac para ayecmo quinmacatoyaj inintacualis levitame huan huicani quej quinamiquiyaya. Yeca nochi injuanti mocuetoyaj ipan sesen inialtepehua para tequitise ipan inimil. ¹¹ Huajca niquinajhuac nopa tequichihuani huan niquinilhui: “¿Para ten anquitahuelcajtoque itiopa Toteco Dios?” Teipa niquinsentili nochi nopa levitame huan huicani, huan sempa niquintali campa quintocarohua para tequipano. ¹² Huajca nochi israelitame ipan tali Judá sempa pejque quihualicaj inindiezmos ten trigo, ten xocomecat iayo huan ten aceite para quiajocuise. ¹³ Huan nijtequimacac nopa totajtzi Selemías, huan nopa tamachtijquet Sadoc, huan nopa levita Pedafas para injuanti ma quimocuitahuica nopa cuartos campa quiajocuij nochi tamanti. Huan nojquiya nijtequitali Hanán, icone Zacur huan iixhui Matanías, para quinpalehuis. Nochi niqunitac para tacame cati temachme. Huan inintequi elqui para quinmajmacase tacialisti inilevita icnihua. Huan nimotatajti: ¹⁴ “NoTeco Dios, xiquelnamiqui ni tamanti cati cuali cati nijchijtoc, huan amo xiquelcahua nopa sequinoc tamanti cati nijchijtoc para motiopa huan nochi tequit cati mochijtoc nopona.”

Quiixpanoque nopa tonali sábado

¹⁵ Ipan nopa tonali nojquiya niquitac para miyaqui masehualme ipan tali Judá tequitiyayaj ipan sábado. Quixacualohuayayaj xocomecat para quiquixtise iayo, huan quihualicayayaj tamamali ten trigo huan quinmaltiyayaj ininburrojhua. Nojquiya ipan sábado quihualicayayaj xocomecat iayo, xocomecat, higos huan nochi cati quipixque ipan altepet Jerusalén para quinmacaquij. Huajca niquinajhuac pampa tanamacayayaj ipan sábado. ¹⁶ Huan nojquiya itztoyaj sequij tacame ten altepet Tiro cati quihualicayayaj michime huan miyac tamantzitzi para quintanamaquiltise israelitame ipan sábado. ¹⁷ Huajca niquinajhuac nopa tequichihuani ten tali Judá huan niquinilhui:

—Tahuel fiero cati anquichihuj pampa anquiixpanoj ni tonali para timosiyajquetzase. ¹⁸ ¿Amo anquimatij para quej nopa quichijque tohuejcapan tatahua huan yeca Toteco Dios quihualicatoc nochi ni tajyohuulisti ipan tojuanti huan toaltepe? Huan ama achi más anquihueyilíaj icualancayo Toteco Dios para tiisraelitame pampa hueyi anquiixpanoj ni tonali sábado.

¹⁹ Huajca na nitanahuati para sesen viernes ica tiotac quema pehuayaya nopa tonali para timosiyajquetzase, ma quitzacuaca nopa huejhueyi caltemit ipan nopa tepamit ten toaltepe. Huan niquinilhui ma amo quitapoca hasta quema panotosa sábado. Huan nojquiya niquintali notequipanojcahua para ma tamocuitahuica huan amo aqui ma quicahuilica calaquis ipan sábado ica itamamal para quinamacas. ²⁰ Huajca se ome huelta nopa tanamacani monejqui tonilise calteno ten itepa altepet Jerusalén. ²¹ Huan na niquinajhuac chichahuac huan niquinilhui: “¿Para ten anmochijtoque nechca itepa ni altepet? Sinta sempa anquichihuase, nimechtzacas.” Huajca ayecmo quema hualajque ipan sábado. ²² Teipa niquinnahuati cati levitame ma motapajpacchihuaca huan ma tamocuitahuica ipan caltemit para amo aqui ma quiixpano nopa sábado para mocahuas tatzetzeloltic nopa tonali

para Toteco Dios. Huan nimotatajti: “NoTeco Dios, xiquelnamiqui nojquiya ni cati nijchijtoc. Techtasojta ica mohueyi taicnelil.”

²³ Ipan nopa tonali nojquiya niquitac para miyaqui israelitame motahuicaltijtoyaj inihuaya sihuame cati amo israelitame cati hualajque ten talme Asdod, Amón huan Moab. ²⁴ Huan quej tajco ininconehea camanaltiyayaj inincamanal masehualme ten Asdod huan amo hueliyayaj camanaltij tocamanal titali Judá ehuan. ²⁵ Huajca niquinixnamijqui huan niquintelchijqui. Huan sequij niquinmaquili huan niquintzoncalhuihuítac. Huan niquinchijqui ma quitestigojquetzaca Toteco Dios para ayecmo motahuicaltise inihuaya, yon ayecmo femacase iniichpocahua para ma monamictica inihuaya cati amo israelitame. ²⁶ Huan nojquiya niquinilhui: “Ya ni nopa tajtacoli cati quichijqui Tanahuatijquet Salomón ten tali Israel. Amo oncayaya seyoc tanahuatijquet quej ya ipan seyoc tali. Huan Toteco Dios tahuel quicneli huan quichijqui tanahuatijquet ipan nochi tali Israel, pero yaya huetzqui ipan tajtacoli por nopa sihuame cati mocuili cati sequinoc tali ehuan. ²⁷ Amo timechcahuilise anquichihuase ni hueyi tajtacoli huan anquixpanose Toteco Dios. Amo hueli anmocuilise cati amo israelitame.” Quej nopa niquinilhui.

²⁸ Huan se icone Joiada cati elqui icone nopa hueyi totajtzi Eliasib mosihuajtijtoya ica iichpoca Sanbalat huan mochijqui imontica Sanbalat nopa horonita tacat. Huajca nijquixti para amo quema huélis technechcahuís sempa. Huan nimotatajti: ²⁹ “NoTeco Dios, xiquinelnamiqui nopa totajtzitzi huan levitame cati tajtacolchijtoque huan quimahuís polojtoque inintequi.”

³⁰ Huan quej nopa niquinquixti nochi cati amo israelitame. Huan niquin-tequimacac totajtzitzi huan levitame sesen ten injuanti campa quintocarohua. ³¹ Huan nojquiya nijmocuitahui nochipa para nochi tacame quihualicase cuahuit para taixpamit quema quintocarosquía. Huan nijmocuitahui para quihualicase iachtohui tajca inimilhua. Huan nimotatajti: “Techelnamiqui ica cuali, NoTeco Dios.”

Ester

Nopa Sihua Tanahuatijquet Vasti

¹⁻² Ama nimitzpohuilis ni tamanti cati panoc quema Tanahuatijquet Asuero tanahuatiyaya. Tanahuatijquet Asuero quipixqui isiya campa mosehui para tanahuatis ipan nopa tequicali ipan altepet Susa, pero amo san nozona quinnahuatiyaya. Nojquiya quinnahuatiyaya 127 talme cati pehuayaya ipan tali India huan ontamiyaya ipan tali Etiopía.

³ Huan quema yahuiyaya para eyi xihuit tanahuatis ipan nopa talme, quichijqui se hueyi ilhuit huan quinnotzqui nochi cati quihucayayaj tequiticayot ipan itanahuatilis. Quinnotzqui nochi cati quipalehuiyayaj para tanahuatis, nochi tayacanani ten soldados huan nochi gobernadores ipan nochi talme. Huan nochi hualajque ten campa hueli ipan talme Media huan Persia. ⁴ Huan quichijqui nopa hueyi ilhuit para tenextilis tahuel tapijpiya huan nopa ilhuit huejcajqui tajco xihuit. Huan elqui nelpano cuajcualtzi. Huan quinnextiliyaya ihueyitilis itanahuatilis huan para tahuel ompano cuajcualtzi huan yejyetzzi nochi cati quipixtoya. Huan quinnextili para tahuel miyac chichahualisti huan tequiticayot quipixtoya.

⁵ Huan quema ya tantoya nopa tajco xihuit, quichijqui seyoc ilhuit ica se hueyi tacualisti cati huejcajqui se samano. Huan quinnotzqui nochi masehualme ten altepet Susa cati quitequipanohuayayaj ipan tequicali huan ipan ichaj. Quinnotzqui cati más tapijpiy huan hasta cati más teicneltziti, huan nochi hualajque. Huan ni ilhuit quichijqui ipan nopa hueyi caltanahuatili ipan se xochimili cati quipixtoya ipan ihueyi calixpa.

⁶ Huan quichijqui tahuel yejyetzzi nopa xochimili ica huejhueyi banderas ten yoyomit pajpatiyot cati itoca lino cati quipajtoya chipahuac huan azulitic. Huan ipan nopa xochimili quipixqui huejhueyi taquetzalme ten nopa yejyetzzi tet cati itoca mármol quej tanahuatiani momatij quipiyaj. Huan ipan nopa taquetzalme quisencajqui huejhueyi anillos ten plata. Huan quicuapilojque nopa huejhueyi banderas ipan nopa anillos ica lazos cati yejyetzitzi huan pajpatiyot cati chipahuac huan moradojtichihuali ica lino. Huan nopa huehueyac siyas cati ipan mosehuijtoyaj para tacuase quej quichijque ipan nopa tonali elqui ten oro huan ten plata. Huan talchi campa eltoya piso ipan nopa xochimili, quichijtoyaj ica teme cati yejyetzitzi huan cuajcualtzitzi cati inintoca pórfido, mármol, alabastro huan jacinto. Huan nochi nopa teme eliyayaj nelía tahuel pajpatiyot. ⁷ Huan nochi nopa tazas cati ipan tetailtiyayaj ica xocomecat iayo eltoya ten oro. Huan sesen taza quipixqui seyoc tamanti itachiyalis cati quitejtejtzontoyaj ten oro huan tahuel pajpatiyot eliyaya. Huan oncayaya taili cati cuali hasta mocahuayaya pampa nopa tanahuatijquet quipixqui hueyi iyolo para temajmacas. ⁸ Huan quichijqui se tanahuatili para amo aquí tefuerzajhuis ma taica sinta amo quinequij taise. Pero sesen ten nopa tanotzalme huélise quise nochi cati quinequise, masque miyac.

⁹ Nojquiya ipan nopa samano nopa Sihua Tanahuatijquet Vasti cati eliyaya isihua Tanahuatijquet Asuero quichijqui se hueyi tacualisti ipan ichaj para inisihuahua nopa tanotzalme.

¹⁰⁻¹¹ Huan quema ajsic chicome tonati ipan nopa ilhuit, nopa hueyi tanahuatijquet Asuero nelía paquiyaya huan mohueyimatiyaya inixpa itanotzalhua pampa miyac taitoya. Huan moilhui quinqotas Vasti para quinnextilis itanotzalhua para nelía yejyetzzi isihua. Huajca quintitanqui

ma quinzotzati Vasti chicome tacame cati quincaparojtoyaj para mochi huase itequipanojcahua cati más temachme nopa tanahuatijquet. Huajca Mehumán, Bizta, Harbona, Bigta, Abagta, Zetar huan Carcas yajque quinzotzatoj nopa Sihua Tanahuatijquet Vasti ica icorona yejyectzi ipan itzonteco para nopa huejhueyi tacame huan nochi cati ehuyayaj Susa ma quitachilica iyeyejca, pampa eliyaya tahuel yejyectzi. ¹² Pero quema quilhuitoj para nopa tanahuatijquet tanahuatijtoya ma huala, nopa Sihua Tanahuatijquet Vasti quinilhui para amo yas. Huajca nopa tanahuatijquet tahuel cualanqui miyac.

¹³ Huan ipan nopa tonali quema monequiyaya quimatis se tenijqui, momajtoya quinzatzi quihua talnamijca tacame. Huajca nopa tanahuatijquet quinzatzi quihua seguij itapalehuicahua cati inintequi para quiconsejocase pampa cuali quimatiyayaj nochi tanahuatilme huan taya monequiyaya ipan itanahuatilis para quichihuase. ¹⁴ Inintoca eliyaya Carsena, Setar, Admata, Tarsis, Meres, Marsena huan Memucán huan inijuanti tequitiyayaj nelnechca nopa tanahuatijquet. Huan nopa tanahuatijquet motemachiyaya ipan inijuanti huan yeca mosehujtoyaj inechca. ¹⁵ Huajca quinzatzi quihua taya huelisquía quichihuas. Quinilhui:

—¿Quenicatza quijtohua ipan totanahuatilhua? ¿Taya monequi tijchihuase ica nopa Sihua Tanahuatijquet Vasti pampa amo quintelocac notanahuatil quema nitatitanqui ma quinzotzati?

¹⁶ Huan Memucán quinanquili nopa tanahuatijquet iniixpa nopa sequinoc tayacanani huan quilhui:

—Totanahuatijca Asuero, nopa sihua tanahuatijquet amo san quichijtoc se tamanti fiero ica ta, nojquiya quichijtoc ica nochi titayacanani huan ica nochi tacame ipan nochi talme ipan motanahuatilis. ¹⁷ Cati yaya quichijtoc quimatis nochi sihuame huan nojquiya ayecmo quinzatzi inihuehujhua. Pampa quijtose: ‘Tanahuatijquet Asuero tatitanqui ma quinzotzati nopa sihua tanahuatijquet huan yaya amo yajqui pampa amo quinejqui.’

¹⁸ Huan ama ni tonali nochi inisihua hua tacame cati quihuicaj tanahuatili ipan tali Media huan Persia quimatis ten quichijtoc nopa Sihua Tanahuatijquet. Huan nimantzi nojquiya pehuase quinchihuilise inihuehujhua san se. Huan ayecmo quinzatzi inihuehujhua huan oncas hueyi cualanti.

¹⁹ Huajca sinta tiquita para cuali, totanahuatijca, xiquijcuilo se tanahuatili ica motequiticayó quej nopa sequinoc tanahuatilme ipan tali Media huan Persia cati amo aguí hueli quipatas. Huan nopa tajcuiloli quijto para Vasti ayecmo quema huelis hualas moixpa. Huan teipa, Tanahuatijquet Asuero, xitapejpeni seyoc sihuat cati más cuali que ya para elis mosihua tanahuatijca. ²⁰ Huajca quema nochi quicaquise nopa tanahuatili cati tijchijtoc campa hueli ipan nochi talme campa titanahuatía, nochi sihuame, masque tapijpiyaj o teicneltziti, quinzatzi inihuehujhua.

²¹ Huan cati quijto Memucán quipacti nopa tanahuatijquet huan nopa sequinoc tacame cati nozona itztoyaj. Huajca quichijqui nopa tajcuiloli quej Memucán quijto. ²² Huan quititanqui nopa amacamanali ipan nochi talme campa yaya quipixqui tequiticayot. Huan quijcuiloquej nopa amacamanali ipan sesen tali inincamanal huan ica sesen tali inintajcuilol. Huan nopa tanahuatili quijto para tacame ma quipiyaca tanahuatili ipan ininchajchaj huan ica inisihua hua.

2

¹ Teipa quema ya panotoya nochi ni tamanti, nopa Tanahuatijquet Asuero moyolfali, huan pejqui quitemohua Vasti. Pero quielnamijqui cati Vasti quichihuilijtoya huan nopa amacamanali cati quiijcuilojtoya. ² Huan itequipojcahua cati quipalehuyayaj para tanahuatis quiilhuijque:

—Techcahuili tiqintemose ichpocame cati yejyetzitzi para tijtapejpenis se para elis sihua tanahuatijquet. ³ Ma tiquintequimacaca tacame ipan nochi talme campa titanahuatía para ma quinhualicaca nochi ichpocame cati yejyetzitzi nica ipan ni altepet Susa. Moca huase nica ipan mochaj yejyetzitzi campa nopa calme para sihuame. Itztose imaco motemach Hegai cati quinmocuitahuía nopa sequinoc sihuame. Huan yaya pehuas quinyejyecchi huas mojmosta ica nochi cati onca para elise nelía nelyejyetzitzi. ⁴ Huan teipa, ta tiTanahuatijquet, nopa ichpocat cati más mitzpactis, xijchihua sihua tanahuatijquet ipataca Vasti.

Huan ni tamanti quipacti nopa tanahuatijquet, huan quej nopa quichijqui.

⁵ Huan ipan altepet Susa itztoya se israelita tacat itoca Mardoqueo cati tacatqui ipan nopa hueyi familia ten iteipan ixhuhua Benjamín. Mardoqueo eliyaya icone Jair, cati eliyaya icone Simei, cati eliyaya icone Cis. ⁶ Huejcajquiya Tanahuatijquet Nabucodonosor ten tali Babilonia quitanqui altepet Jerusalén ipan tali Judá huan quihualicac Cis ilpitoc ihuaya miyac más masehualme, huan ihuaya Jeconías cati eliyaya tanahuatijquet ipan tali Judá. ⁷ Huan nopa israelita tacat Mardoqueo quipiyaya se imachicni, icnotzi. Amo quipixqui yon itata, yon inana. Huan quema mijque itatahua, Mardoqueo quiseli huan quiscalti quej icone. Nopa ichpocat eliyaya nelía nelyejyetzitzi huan senquisa cuali itacayo. Huan itoca eliyaya Hadasa o Ester.

⁸ Huan nochi quimatque nopa tanahuatili cati quichijtoya nopa tanahuatijquet para ma quinhualicaca ichpocame. Huajca ichpocame ten campa hueli talme ajsicof ipan altepet Susa campa icaltanahuatil nopa tanahuatijquet. Huan cati quinhualicayayaj quincahuayayaj imaco Hegai, itemach nopa tanahuatijquet, cati quinmocuitahuyaya sihuame ipan nopa hueyi ichaj. Huajca Mardoqueo nojquiya quihuicac imachicni Ester huan quicajqui imaco Hegai. ⁹ Huan Hegai más quipacti Ester para quiyeyecchi huilis nopa tanahuatijquet. Huajca nimantzi pejqui quimaca nochi cati monequiyaya para ma paqui huan para ma mocualchijchihua. Quimacac Ester chicome ichpocame ipan nopa cali para ma quitequipanoca. Huan quimacac itacualis cati más cuali huan nochi tamanti xihuipajti huan nochi tamanti cremas cati monejqui quitequihuis para elis noja más yejyetzitzi. Nojquiya quimacac nopa cuarto cati más yejyetzitzi para ipan moca huas inihuaya itequipojcahua ipan nopa hueyi cali cati iaxca nopa tanahuatijquet. Pero nopa sequinoc ichpocame amo quinmacac san se.

¹⁰ Pero Ester amo aqui quiilhui para yaya se israelita. Yon amo quiijto ajquiya injuanti iteixmatcahua pampa Mardoqueo quinahuatijtoya ma amo aqui quiilhui. ¹¹ Huan mojmosta Mardoqueo hualayaya calixpa campa mocahuayayaj nopa ichpocame para quimatis sinta cuali itztoya Ester huan taya ipantic.

¹² Nochi nopa ichpocame monequiyaya moyejyecchi huase huan moajhuiyaltise para se xihuit quej sihuame ipan nopa tonali momatque quichihua. Nopa achtohui tajco xihuit mopolohuayayaj ipan nochi inintacayo aceite ten mirra, huan nopa seyoc tajco xihuit mopolohuayayaj miyac taajhuiyacayot huan cremas. Quej nopa, nopa sihuame quipajpacayayaj inincuetaxo para nesise nelía cuali. Huan quema tanqui nopa xihuit para mocualtalise, sese ten injuanti monequiyaya yas iselti ica Tanahuatijquet Asuero. ¹³ Huan quema ajsic hora para sese ichpocat calaquis campa nopa

tanahuatijquet, quimacayaya sesen tamanti cati quinequiyaya para ma nesi más yejectzi huan ma quipacti más. ¹⁴ Sesen yajqui campa itztoya nopa tanahuatijquet quema ya tzintayohuayaya, huan ica ijnaloc quihuicayayaj ipan seyoc cali campa mocahuayayaj sihuame cati ya ihuaya itztoyaj. Nopona nopa sihuame mocahuayayaj imaco Saasgaz, seyoc itemach nopa tanahuatijquet. Huan amo quema quiitasquíaj nopa tanahuatijquet sempa. San quema nopa tanahuatijquet quielnamiquisquí se ichpocat cati itztoya ihuaya huan quipactiyaya huajca, quena, conotzasquí sempa.

¹⁵ Huan teipa ajsic nopa tonali para ma calaqui Ester. Ester elqui icone mijcatzi Abihail itío Mardoqueo. Huan Mardoqueo quiseli Ester huan quiscalti quej ichpoca. Huan quema Ester calajqui campa nopa tanahuatijquet, amo moilhui quitajtani cati yaya iseltitzi quinequiyaya para quihuicas. San quicajqui nochi imaco Hegai huan moyoyonti huan mocuالتالي san ica cati quinahuati Hegai cati quinmocuithahuyaya sihuame. Huan nochi cati quitaque Ester san quitachilijque por iyejeje ca huan tahuel quinpacti.

¹⁶ Huan Ester quihuicaque campa itztoya nopa Tanahuatijquet Asuero ipan metzti Tebet, nopa majtacti metzti ipan nopa israelita calendario * quema Tanahuatijquet Asuero yahuiyaya chicome xihuit para tanahuatis. ¹⁷ Huan nimantzi Asuero tahuel quicneli Ester. Amo quema quicnelijtoya yon se sihuat quej nopa. Más quipactiyaya que nochi sequinoc ichpocame. Huajca quitalili nopa corona ipan itzonteco huan quichijqui sihua tanahuatijquet huan yaya mocajqui ipataca Vasti. ¹⁸ Huan pampa tahuel paquiyaya nopa tanahuatijquet, quichijqui se hueyi ilhuit para Ester. Huan quinnotzqui nochi masehualme cati quipiyayayaj tequiticayot ipan itanahuatilis huan nochi cati quitequipanohuayayaj. Huan quinmacac miyac nemacti quej quinamiqui se tanahuatijquet temacas. Huan quintemohuilli iniimpuestos cati monequiyaya taxtahuase nopa talme pampa nelía paquiyaya.

Mardoqueo quimaquixti nopa tanahuatijquet

¹⁹ Teipa quema sempa quinsentili nochi nopa ichpocame ipan nopa seyoc cali, Mardoqueo ya quipixtoya miyac tequiticayot ica nopa tanahuatijquet huan monequiyaya mosehuis icalteno nopa caltanahuatili campa quipixqui miyac tatepanitacayot. ²⁰ Huan Ester noja amo aqui quihuijtoya ajquiya inijuanti iteixmatcahua huan para yaya se israelita pampa Mardoqueo quihuijtoya ma amo quichihua.

²¹ Pero ipan nopa tonali quema Mardoqueo mosehuijtoya icalteno caltanahuatili, Bigtán huan Teres, ome itemachhua nopa Tanahuatijquet Asuero cati quimocuitahuyayaj nopa caltemit, quisencahuayayaj quenicatza quimictise ininteco pampa ica cualaniyayaj. ²² Huan Mardoqueo quicajqui cati quisencahuayayaj huan quipohuilito nopa Sihua Tanahuatijquet Ester huan Ester quihui Tanahuatijquet Asuero, huan Ester quimachilti para elqui Mardoqueo cati quihuijtoya. ²³ Huan nopa tanahuatijquet pejqui tatzintoca sinta nelía, huan quimatqui para, quena. Huajca tanahuati ma quincuapiloca nopa ome itemachhua cati quinequiyayaj quimictise. Huan nochi ya ni mocajqui ijcuilijtoc ipan nopa amat cati quipixqui ten panoyaya sesen tonali ipan inemilis nopa tanahuatijquet ipan inintal.

3

Amán quisencajqui quenicatza quintzontamiltis israelitame

* 2:16 2:16 Elqui nechca ipeya enero ipan tocalendario ten ama.

¹ Teipa nopa tanahuatijquet quimacac se tacat se tequit cati más hueyi. Yaya itoca Amán huan eliyaya icone Hamedata ten altepet Agag. Quitali Amán para ma eli gobernador cati más hueyi ipan ital. Huajca Amán quipixqui más tequiticayot que nochi sequinoc itequiticahua Tanahuatijquet Asuero. ² Huan nochi sequinoc itapalehuijcahua nopa tanahuatijquet motancaquetzayayaj huan quitepanitayayaj Amán quema panoyayaj o quema itztoyaj iixpa, pampa quej nopa tanahuatijtoya nopa tanahuatijquet. Pero Mardoqueo amo quinejqui motancaquetzas iixpa huan yeca amo quichijqui.

³ Huajca itequipanojcahua nopa tanahuatijquet mojmosta quitatzintoquiliyayaj Mardoqueo para ten amo quitepanitayaya itanahuatil nopa tanahuatijquet. ⁴ Huan Mardoqueo quinilhui para yaya se israelita tacat cati amo ya nopa quichihua. Huajca nopa sequinoc tacame yajque quipohuiltoy Amán para quuitase sinta quijyohuisquía para Mardoqueo amo motancaquetzas iixpa pampa yaya se israelita.

⁵ Huan quema Amán quiitac para Mardoqueo amo motancaquetzayaya iixpa, yon amo quitepanitayaya, nelía cualanqui. ⁶ Huan pampa teilhuijtoya yaya se israelita, Amán moilhui amo san ya quitatzacuiltisquía, nojquiya quintzontamiltisquía nochi israelitame pampa imasehualhua Mardoqueo. Huajca quitemo quenicatza huelis quinmictis nochi israelitame cati campa hueli itztoyaj ipan itanahuatilis Asuero.

Nopa amat cati Amán quichijqui

⁷ Huajca para quimatis catijqui tonali más cuali para huelis quinmictise nochi israelitame, Amán quinotzqui se cati quimatiyaya quiahuiltía nopa piltetzitzi cati inintoca “Pur” para suertes. Huan ipan nopa achtohui metzti ipan toisraelita calendario, nopa metzti cati itoca Nisán*, quema Asuero yahuiyaya para 12 xihuit tanahuatis, hualajqui se tacat cati mahuiltico iixpa Amán.

Huan quema mahuiltiyaya, quitatzintoquiliyaya ipan sesen metzti sinta nopa metzti huan nopa tonali elqui cati más cuali para quinmictise israelitame. Huan quinextili para más cuali se tonali ipan seyoc xihuit cati elis 13 itequi nopa metzti doce ipan toisraelita calendario†. Nopa metzti itoca Adar.

⁸ Huan teipa Amán quihuito Tanahuatijquet Asuero:

—Campa hueli ipan nochi nopa talme cati tijnahuatía itztoque se tamanti masehualme cati quipiyaj seyoc inintanahuatilhua cati amo san se ica nochi sequinoc momasehualhua. Injuanti amo quineltocaj motanahuatilhua, huan amo quinamiqui para injuanti noja ma itztoca. ⁹ Yeca, notanahuatijca, sinta cuali tiqúita, xijchihua se tanahuatili huan xitanahuati para ma quintzontamiltica. Huan na niquixtahuas nopa 330 toneladas ten plata cati motanahuatil quisosolos para ma quinmictica.

¹⁰ Huajca nopa tanahuatijquet moquixtili ianillo cati quipixtoya isello huan quimacac Amán, icone Hamedata ten altepet Agag, yaya cati quincualancaitayaya israelitame. ¹¹ Huan quihui:

—Amo monequi titaxtahuas ta. Pero huelis xiquinchihuili nopa masehualme cati tiqúita para cuali.

¹² Huajca ipan 13 itequi nopa achtohui metzti ipan toisraelita calendario‡, Amán quinnotzqui itajcuilojcahua nopa tanahuatijquet, huan quijcuilojque

* 3:7 3:7 Ipan abril ipan tocalendario ten ama. † 3:7 3:7 Ipan 7 itequi marzo ipan tocalendario ten ama. ‡ 3:12 3:12 Ipan 17 itequi abril ipan tocalendario ten ama.

ni tanahuatili cati Amán tanahuatijtoya para quintitanilise nochi gobernadores, tequichihuani huan tanahuatiani ipan nochi talme ipan itanahuatilis Asuero. Huan ni tanahuatili quiijuicojqque ipan miyac camanali para ma ajsi ipan sese altepet ica cati nopona inincamanal. Huan quitalijque itoca Tanahuatijquet Asuero huan quisellojhuijqque ica isello ipan ianillo. ¹³Teipa quintitanqui tayolmelahuani ica nopa amat ipan nochi talme huan pilaltepztitzi ipan itanahuatilis. Huan ipan nopa amat quinilhui ma quinmictica nochi israelitame, masque ichpocame, telpocame, huehuentzitzi, coneme o sihuame. Huan quixquetzque 13 itequi nopa metzti doce ipan toisraelita calendario^S, ipan seyoc xihuit. Huan ipan nopa tonali quiiito monequi ma quinmictica nochi israelitame. Huan quinnahuati ma moaxcatica nochi cati eliyaya iniaxca. ¹⁴Huan ni tanahuatili elqui para masehualme ten nochi talme ma quineltocaca huan para ma mocualchijchijtoya para nopa tonali.

¹⁵Huan nopa tayolmelahuani cati quihuicaque nopa amatajuiciloli quistejqque nimantzi para teyolmelahuase cati quiiito nopa tanahuatili. Huan nojqquiya teilhuijqque ipan nopa altepet Susa. Huan Tanahuatijquet Asuero ihuaya Amán mosehuijqque huan pejqque tai pampa pajque ica cati quichijtoyaj. Pero altepet Susa ehuan quicajque nopa tanahuatili huan tahuel mocuesojque huan motatzintocquiliyayaj para ten quisencajtoyaj nopa amat para quinmictise israelitame.

4

Mocuesojque israelitame ica nopa amatanahuatili

¹Quema Mardoqueo quimatqui nochi cati panoyaya, quitzayanqui iyoyo huan moyoyonti ica yoyomit cati fiero huan motzoncuajnexhui quej se tanextili para tahuel mocuesohuayaya. Huan pejqqui nejnentinemi campa hueli ipan altepeme, huan chocayaya huan tahuejchijtinemiyaya ica tequipacholi. ²Huan ajsito icalteno Tanahuatijquet Asuero, huan nopona mochixqui pampa amo aquí quicahuiliyayaj ma calaqui cati fiero nesiyaya quej nopa. ³Huan nojqquiya ipan sesen pilaltepztitzi campa ajsiyaya nopa amacamanali ica itanahuatili nopa tanahuatijquet, nochi mocuesohuayayaj. Huan nochi israelitame mosahuayayaj, huan moquentiyayaj yoyomit cati fiero huan motzoncuajnexhuiyayaj. Huan sequij motejqque ipan cuajnexti huan chocayayaj.

Ester motajcoquetzqui por nochi israelitame

⁴Huan nopa sihua tequipanohuani cati quipalehuiyayaj nopa Sihua Tanahuatijquet Ester, huan nopa tacame cati quimocuitahuiliyayaj, quiyolmelajque para Mardoqueo tahuel mocuesohuayaya. Huajca Ester nojqquiya tahuel mocueso. Huan quititanqui yoyomit para ma mopata Mardoqueo, pero ya amo quinejqqui quiselis. ⁵Huajca Ester quinoztzqui Hatac cati quinyacanayaya nopa tamocuitahuiani ipan ichaj nopa hueyi tanahuatijquet, huan quinahuati ma quiiitati Mardoqueo huan ma quitatzintocquiliti taya panotoya huan para ten tachihuayaya quej nopa. ⁶Huajca Hatac yajqui quicamanalhuito Mardoqueo cati itztoyaya ipan tianquis iixmelac nopa caltemit ipan ichaj nopa hueyi tanahuatijquet. ⁷Huan Mardoqueo quipo-huili nochi cati panoyaya huan quesqui plata tomi quitencajtoyaya Amán para taxtahuas para amo quisosolos itomi nopa tanahuatijquet para nochi israelitame ma quinixpolihuiltica. ⁸Nojqquiya quimactili se iixcopinca nopa amacamanali ica nopa tanahuatili cati ajsitoya ipan altepet Susa para ma

quintamimictica nochi israelitame. Huan quiilhui ma quinextili Ester huan ma quiilhui nochi ten onca. Quiilhui ma quinahuati Ester ma calaqui iixpa nopa hueyi tanahuatijquet huan ma quitajtani se hueyi favor para imasehualhua nopa israelitame.

⁹ Huan Hatac mocuetqui campa Ester huan quipohuilto cati Mardoqueo quiilhuajtaya. ¹⁰ Huajca Ester sempa quititanqui Hatac ma quiilhuiti Mardoqueo ni camanali: ¹¹ “Nochi itequipanojcahua nopa hueyi Tanahuatijquet Asuero huan nochi cati itztoque ipan ten hueli altepeme campa yaya tanahuatía quimatij para onca se tanahuatili para miquis cati calaquis icalijtic sinta amo quinotzoc. Masque se sicut o se tacat calaquis campa itzoc nopa tanahuatijquet huan yaya amo quinotzoc achtohui, monequi miquis. San itzto sinta nopa tanahuatijquet quixitahuilis icuatopil ten oro quej se tanextili para quiselía huan quej nopa quimanahuis para amo miquis. Huan ya quipiya 30 tonali amo technotzoc na.”

¹² Huajca Hatac yajqui quiilhuito Mardoqueo cati Ester quiijto. ¹³ Huan Mardoqueo quititanili Ester ni camanali: “Amo ximoilhui amo timiquis pampa tiztoc ipan ichaj nopa tanahuatijquet. Sinta timiquise nochi ti-israelitame, ta nojquiya timiquis. ¹⁴ Sinta ama amo teno tiquijtohua ta, TOTECO quititanis seyoc para techmaquixtis tiisraelitame, pero ta ihuaya nochi ifamilia motata miquise. Huelis Toteco mitztalijtoc tisihua tanahuatijquet san para techpalehuis ipan ni hora.”

¹⁵ Huajca Ester quititanili Mardoqueo ni camanali: ¹⁶ “Xiya huan xiquinsentili nochi israelitame ipan ni hueyi altepet Susa, huan ximosahuaca huan xijtajtanica TOTECO por na. Ma amo tacuaca, yon ma amo quica teno para eyi tonati huan eyi yohuali. Nojquiya na huan nosihua tequipanojcahua san se tijchihuase. Huan teipa nyas niqitani nopa tanahuatijquet masque niqixpanos nopa tanahuatili, huan sinta techmictis, ma techmicti.”

¹⁷ Huajca Mardoqueo yajqui huan quichihuato nochi cati Ester quinahuatijtoya.

5

Ester monexti iixpa nopa tanahuatijquet

¹ Huan ipan eyi tonati, Ester moquenti iyoyo yejectzi cati quitequihuiáj sihua tanahuatiani huan calajqui icalixpa nopa caltanahuatili campa itztoya nopa tanahuatijquet. Huan moquetzqui iixmelac campa mosehujtoya para tanahuatis ipan isiya yejectzi. ² Huan quema nopa tanahuatijquet quitac nopa Sihua Tanahuatijquet Ester ijcatoya calixpa, pajqui, huan quixitahuili icuatopil ten oro cati quipiyayaya imaco. Huajca Ester monechcahui huan quitali imax ipan nopa cuatopili quej monequiyaya para quinextis tatepanitacayot. ³ Huan nopa tanahuatijquet quitatzintozquili:

—¿Taya tijpiya ipan moyolo Ester, nosihua tanahuatijca? ¿Taya tijnequi? ¡Tachtajtani cati tijnequi huan nimitzmacas masque techtajtanisquía tajco nopa talme ipan notanahuatilis!

⁴ Huan Ester quinanquili:

—Sinta tiquita cuali, nijnequi techchihuili se favor, xihuala nochaj ama para se tacualisti cati nimitzcualtalilijtoc huan nojquiya xijhualica Amán.

⁵ Huajca nopa tanahuatijquet quinnahuati itequipanojcahua:

—Nimantzi xijnotzati Amán huan tijchihuase cati quiijtojtoc nosihua tanahuatijca Ester.

Huajca nopa tanahuatijquet ihuaya Amán yajque ipan nopa tacualisti cati Ester quisencajtoya. ⁶ Quema tacuayayaj huan taiyayaj, nopa tanahuatijquet sempa quilhui Ester:

—¡Techtajtani cati tijnequi, huan nimitzmacas, masque tajco ten nijpiya!

⁷ Huan Ester quinanquili:

—Na san ya ni nijnequi nimitztajtanis: ⁸ Sinta techicnelía, notanahuatijca, huan tijnequi techyolpaquilismacas, sempa xihuala mosta ihuaya Amán para seyoc tacualisti cati nimechsencahuilijtos, huan huajca, quena, nimitzilhuis cati nijnequi nimitztajtanis.

Amán quisencajqui campa quicuapilos Mardoqueo

⁹ Huan quema Amán quisqui ipan nopa tonali ten nopa tacualisti, tahuel yolpactoya. Pero teipa quitac Mardoqueo mosehuijtoya icalteno nopa tanahuatijquet huan amo moquetzqui iixpa, yon amo mijcueni para ma pano; huan nelía mocueso Amán. ¹⁰ Pero masque ya nopa, quijyohui ipan nopa talojtzi huan amo quinexti sinta cualaniyaya. Huan Amán yajqui ichaj huan tatitanqui ma quinnotzatij ihuampoyohua ihuaya isihua, Zeres.

¹¹ Huan pejqui mohueyimati iniixpa. Quinpohuili quenicatza moricojchijtoya huan quenicatza momiyaquilijtoyaj iconehua. Nojquiya quinpohuili ten sesen huelta quema nopa tanahuatijquet quihueyichijtoya huan quinilhui para ama quihueyitalijtoc más que nochí sequinoc itequipanojcahua huan itapalehuijcahua. ¹² Huan nojquiya quijito:

—Huan ama nopa Sihua Tanahuatijquet Ester amo aqui más quinotzqui para ma tacuati ihuaya Tanahuatijquet Asuero, san na technotzqui. Huan mosta sempa technotztoc para seyoc tacualisti cati techmacas. ¹³ Pero amo hueli nipaqui ica nochí ya ni quema niquita nopa israelita Mardoqueo noja itztoc huan mosehuijtoc icalteno nopa tanahuatijquet.

¹⁴ Huajca isihua, Zeres, huan nochí ihuampoyohua quilhuijque:

—Xitanahuati ma quiquetzaca se huehueyac cuahuit para ipan ma quicuapiloca. Xijchihua 22 metros ihuejcapanca. Huan mosta ica ijnaloc xijtajtani nopa tanahuatijquet ma tanahuati para nozona ma quicuapiloca Mardoqueo. Quej nopa huelis tiyas ipan nopa tacualisti ica paquilisti.

Huan cati quijtojque quipacti Amán huan tanahuati ma quisencahuaca nopa cuahuit para ipan quicuapilosquía.

6

Amán monejqui quihueyichihuas Mardoqueo

¹ Huan ipan nopa tayohua, Tanahuatijquet Asuero amo hueliyaya cochi, huajca tatitanqui ma quicuilitij nopa amatapohuali campa quijcuilijtoyaj nochí cati panotoya ipan itanahuatilis. Huan quihualicaque huan quipohuilijque. ² Huan nozona quipantijque ijcuilijtoc campa Mardoqueo hualajtoya huan quipohuilico cati panoc quema Bigtán huan Teres, nopa ome itemachhua cati achtohui tamocuitahuiyayaj ipan icalte, tasencahuayayaj para quimictise. ³ Huajca nopa tanahuatijquet tatzintocac:

—¿Taya tijmacatoque Mardoqueo por ni cuali tamanti cati quichijtoc? ¿Quenicatza tijhueyitalijtoque?

Huan itequipanojcahua tananquilijque:

—Amo teno mochijtoc.

⁴ Huan ipan nopa talojtzi ajsico Amán calteno ten icaltanahuatil nopa tanahuatijquet. Hualajqui quitajtanico para ma quicuapiloca Mardoqueo ipan nopa huelyi cuahuit cati quisencajtoya. Huajca nopa tanahuatijquet tatzintocac:

—¿Ajquiya nemi calteno?

⁵ Huan itequipanojcahua quilhuijque:

—Yaya Amán.

Huajca nopa tanahuatijquet quinilhui:

—Xijcahuilica ma pano.

⁶ Huajca Amán calajqui huan nopa tanahuatijquet quilhui:

—¿Taya timoilhuía para cuali tijchihuase ica se tacat cati nijnequi ni-hueyichihuas?

Huan Amán moilhui: “¿Ajquiya seyoc quinequi quihueyichihuas ni tanahuatijquet sinta amo na?” ⁷ Huajca tananquili:

—Notanahuatijca, para ne tacat cati tijnequi tijhueyichihuas, ⁸ monequi ma quihualicaca mopantzajca cati huehueyac huan nopa yejyetzca cahuayo cati ta tijtequihuía cati quihuica icorona ipan itzonteco. ⁹ Huan xijmaca mopantzajca cati huehueyac huan mocahuayo se tequitiquet cati más quipiya tanahuatili ipan motanahuatilis para yaya ma quiyoyonti nopa tacat cati tijnequi tijhueyichihuas. Huan quisehuis cahuayoxtipa. Huan yaya ma quihuica campá hueli ipan calles ipan ni hueyi altepet. Huan iixpa ma tahuejchijtiyas: ‘¡Quej ni tijchihuaj se tacat cati nopa tanahuatijquet quinequi quihueyichihuas!’

¹⁰ Huajca nopa tanahuatijquet quilhui Amán:

—Cualtitoc, xiisihui huan xijcui nopantzajca cati huehueyac huan nocahuayo quej tiquijtojtoc, huan nochi ya nopa xijchihua ica nopa israelita Mardoqueo cati mosehuía nocalteno. Amo xiquelcahua yon se tamanti cati tiquijtojtoc.

¹¹ Huajca Amán quicuic nopa pantzajcayot cati huehueyac ihuaya nopa cahuayo, huan quiyoyonti Mardoqueo huan quisehui cahuayoxtipa huan quitayacanaltijtiyajqui campá hueli ipan calles. Huan tzajtziyahuiyaya: “¡Quej ni tijchihuaj se tacat cati nopa tanahuatijquet quinequi quihueyichihuas!”

¹² Huan quema ya tantoya quinejnemiltía, Mardoqueo sempa yajqui icalteno nopa tanahuatijquet campá tetequipanohuayaya. Huan Amán moisihuilti yajqui ichaj mopinajtoc ica ixayac tzactoc. ¹³ Huan nopona quipohuili isihua, Zeres, huan ihuampoyohua nochi ten quipanotoya, huan injuanti quilhuijque:

—Sinta Mardoqueo se israelita tacat, huan ya pejtoc titatzinta huetzi iixpa, huajca amo huélis tijchihuilis cati fiero tijeñcajtoc. Huan sinta tijchihuas, timiquis.

¹⁴ Huan quema noja camanaltiyayaj, ajsicoj itequipanojcahua nopa tanahuatijquet para nimantzi quihuicase Amán ipan nopa tacualisti cati Ester quisencajtoya.

7

Quicuapilojque Amán

¹ Huajca Tanahuatijquet Asuero ihuaya Amán yajque ichaj nopa Sihua Tanahuatijquet Ester para nopa tacualisti. ² Huan quema tacuayayaj, nopa tanahuatijquet sempa quilhui Ester:

—Techtajtani cati tijnequi huan nimitzmacas, masque techtajtanisquía tajco ten nochi cati nijpiya.

³ Huan Ester quinanquili:

—Totanahuatijca, sinta techicnelía huan tiquita cuali, san ya ni cati nimitztajtani. Techmaquixti para amo techmictise. Huan xiquinmaquixtili

ininemilis nojquiya nochi nomasehualhua. ⁴ Pampa se technamacatoc nochi tiisraelitame para techmictise. Quinequi ma techtzontamiltica nochi tojuanti. Sinta san technamacatosquía para titetequipanose, huelis amo nimolinijosquía. Pero sinta techmictise nochi tojuanti, quicocos nochi motanahuatilis pampa miyac tijpolos.

⁵ Huajca Asuero quitatzintoquili Ester:

—¿Ajquiya nopa tacat cati moyolilhujtoc para quichihuas ni tamanti?
¿Canque itztoc?

⁶ Huan Ester tananquili:

—¡Ni tacat Amán! ¡Yaya cati techcualancaita!

Huajca quema Amán quicajqui ni camanali, taniel momajmati iixpa nopa tanahuatijquet ihuaya isihua. ⁷ Huan Asuero moquetztiquisqui ica cualanti, huan quisqui ten campa momesatalijtoya para facuas huan yajqui campa ixochimil. Huan Amán quiitac para nopa tanahuatijquet moilhujtoya para quimictis, huajca monechcahui campa itztoya Ester huan chichahuac quitajfaniyaya nopa sihua tanahuatijquet ma quimaquixti para amo miquis.

⁸ Huan quema nopa tanahuatijquet mocuetqui ten ixochimil huan sempa calajqui campa tacuayayaj, quuitac Amán motancuaquetzttoya campa mosehujtoya Ester, huan noja más cualanqui huan quijto:

—¿Huelis nojquiya tijnequi tijpinahualtis Ester noixpa ipan nochaj?

Huan nimantzi quema ne tanahuatijquet quitamijto ni camanali, ajsico seqij soldados huan quuilpijque Amán para quihuicase quimictitij. ⁹ Huan Harbona, se itapalehujca nopa tanahuatijquet, quijto:

—Tanahuati Amán para ma quicualtica se cuahuit para ipan quicuapilosquía Mardoqueo nopa tacat cati mitzmaquixtili monemilis. Cati quisencajtoc eltoc icalteno huan quiapiya 22 metros ihuejcapanca.

Huajca nopa tanahuatijquet quijto:

—¡Huajca nozona xijcuahuiyonica Amán!

¹⁰ Huajca quicuapilojque Amán ipan nopa huejcapantic cuahuit cati yaya quisencajtoya para Mardoqueo. Huan ica ya nopa moyoltali nopa tanahuatijquet huan ayecmo cualanqui.

8

Nopa yancuic tanahuatili cati ica momanahuijque israelitame

¹ Huan ipan nopa tonal Tanahuatijquet Asuero quimactili nopa Sihua Tanahuatijquet Ester ichaj Amán, yaya cati inincualancaitaca israelitame. Nojquiya quimacac nochi cati quipixtoya. Huan quihualicaque Mardoqueo iixpa nopa tanahuatijquet para quihueyitalis pampa Ester ya quilhujtoya para Mardoqueo eliyaya imachicni cati quiscaltijtoya huan elqui quej itata.

² Huan nopa tanahuatijquet moquixtili ianillo cati quipixtoya isello cati achtohui quimacatoya Amán huan quimactili Mardoqueo para elis itapalehujca cati más hueyi. Huan Ester quitali Mardoqueo para ma tayacana ipan nopa cali huan ipan nochi cati eliyaya iaxca Amán.

³ Teipa Ester sempa yajqui quicamanalhuito nopa tanahuatijquet huan motancuaquetztqui iicxita chocayaya. Quitajtani ma quitamilti nopa tanahuatili cati quichijtoya nopa fiero tacat Amán para amo teno ma quinchihuilica israelitame. ⁴ Huan nopa tanahuatijquet sempa quixitajqui icuatopil ten oro campa itztoya Ester huan Ester moquetztqui iixpa. ⁵ Huan quilhui:

—Totanahuatijca, sinta techicnelía huan tiquita cuali, ma moijcuilo seyoc tanahuatili cati quijtos para ma amo mochihua cati tanahuatijtoc Amán. Ma amo quinmictica nochi israelitame cati itztoque campa hueli ipan altepeme campa tijnahuatía. ⁶ Pampa ¿quenicatza huelis níquijyohuis nopa taijyohuilisti cati nechca para quinajsis nochi nomasehualhua? Amo huelis níquijyohuis para ma quintzontamiltica.

⁷ Huajca Tanahuatijquet Asuero quinanquili Ester huan Mardoqueo, nopa israelita tacat:

—Xiquita ya nijmacatoc Ester ichaj Amán huan nochi cati quipixtoya. Huan nitanahuati ma quicuapiloca pampa quinequiyaya quinmictis nochi israelitame. ⁸ Pero amo hueli mopata se tanahuatili cati ijcuilijtoc ica notequiticayo huan quisellojhuijtoque ica noanillo. San huelis xiquijcuiloca seyoc tanahuatili para nopa israelitame ipan nochi altepeme. Ica notequiticayo xiquinilhuica nopa camanali cati anquinequij huan cati anmoilhujaj para camtiyas huan quinpalehuis amomasehualhua. Huan cati anquijcuilose xisellojhuica ica noanillo huan xiquintitanilica nopa israelitame, pampa se amacamanali cati quipiya noanillo isello, amo aquí hueli quitamiltis.

⁹ Huajca nimantzi ipan 23 itequi nopa metzti eyi ipan toisraelita calendario, nopa metzti Siván*, quinnotzque nopa tajcuilohuani cati quitequipanohuayayaj nopa tanahuatijquet. Huan Mardoqueo quinihuijtiyajqui nochi cati monejqui quijcuilose para quinnahuatise israelitame. Huan quijcuilojque para quintitanilise nochi gobernadores, presidentes huan tequichihuani ipan nochi municipios ipan nopa 127 talme cati pejqui hasta nozona ipan tali India huan ontami ipan tali Etiopía. Huan quijcuilojque sese ica inincamanal cati camanaltiyayaj huan nojquiya quijcuilojque sese ica nopa tajcuiloli cati momatque tajcuilohuaj para nochi quimachilise. Nojquiya nopa israelitame quintajcuilhui ica inincamanal huan ica inintajcuilol. ¹⁰ Huan Mardoqueo quifirmaro sese amacamanali ica itequiticayo Tanahuatijquet Asuero huan quisellojhui ica nopa sello ipan ianillo. Teipa quintitanqui tacame cati yajque cahuayojtipa ipan cuajcuali cahuayojme cati tahuel quimatque motalohuaj. Nopa cahuayojme eliyayaj iconehua icahuayo nopa tanahuatijquet cati más huelqui motalohua. ¹¹ Huan ipan nopa amacamanali nopa tanahuatijquet quinnahuatiyaya israelitame ipan campa hueli altepeme ipan nochi municipios ipan nochi talme ma mosentilica para momanahuise. Quincahuili ma quinmictica huan ma quintzontamiltica nochi cati quinequiyayaj quintehuis masque tacame, sihuame o coneme. Nojquiya quinnahuati ma quicuica nochi cati eliyaya iniaxca cati quintehuisnequiyayaj. ¹² Nochi ya ni monequi quichihuase ipan san se tonali ipan nochi ialtepehua Tanahuatijquet Asuero. Huan nopa tonali cati quixquetztoya elqui ipan 13 itequi nopa metzti doce, nopa metzti Adar ipan toisraelita calendario † ipan ne seyoc xihuit. ¹³ Huan se iixcopinca nopa amatajcuiloli monejqui ma tenexilica ipan campa hueli municipio huan ma teilhuica ipan nochi pilaltepetzitzi para quej nopa onca tanahuatili. Huan quinnahuati israelitame ma mocualfalica para nopa tonal para momacuepase ica inincualncaitacahua cati quinequiyayaj quinchihuilise cati amo cuali. ¹⁴ Huajca moisihuiltijque nopa tayolmelahuani cati quihuicaque nopa amatajcuiloli huan tejcotoyaj ipan cahuayojme cati nelía cuajcualtazitzi cati iaxca nopa tanahuatijquet. Huan nojquiya sequinoc tacame teilhuijque nopa tanahuatili ipan nopa hueyi altepet Susa.

* **8:9** 8:9 Elqui ipan 25 itequi junio ipan tocalendario ten ama. † **8:12** 8:12 Elqui ipan 7 itequi marzo ipan tocalendario ten ama.

¹⁵ Huan Mardoqueo moquenti nopa yoyomit azultic huan chipahuac cati quitequihua nopa tanahuatijquet huan moicpahuilti se hueyi corona ten oro huan quihuicayaya iajcoltipa se itaque ten moradojtci cati tasencahualli ica nopa cuali yoyomit cati itoca lino. Huan quej nopa quisqui iixpa nopa tanahuatijquet huan yajqui ipan calle huan nochi cati ehuyayaj ipan altepet Susa, nopa altepet cati tayacantoc ipan inintal, nochi tzajtzi que ica paquilisti. ¹⁶ Huan nochi israelitame paquiyayaj. Elqui quej monextijtoya se hueyi taahuili campa injuanti, huan yeca nochi sequinoc masehualme tahuel quitepanitayayaj. ¹⁷ Huan ipan sese altepet, ipan sese municipio, ipan nochi nopa talme campa ajsiyaya nopa amacamalani ica itanahuatil nopa tanahuatijquet, nopa israelitame nelía yolpaquiyayaj. Mopaquilismacayayaj, huan quichihuayayaj huejhueyi tacualisti huan il-huichihuayayaj. Nojquiya miyac cati amo eliyayaj israelitame mochijque israelitame pampa nochi nelía quinimacasiyayaj israelitame.

9

Nopa israelitame quintzontamiltijque inincualancaitacahua

¹ Huan quema ajsic 13 itequi nopa metzti doce, nopa metzti Adar ipan calendario israelita*, nopa tonali cati quiixquetzttoyaj para quintzontamiltise nochi israelitame quej quijto nopa achtohui tanahuatili ten nopa tanahuatijquet, amo ya nopa ten panoc. Masque inincualancaitacahua moilhuijque ipan nopa tonali quintanisquaj, elqui nopa israelitame cati quintanque inincualancaitacahua. ² Pampa campa hueli ipan sese altepet ipan itanahuatilis Tanahuatijquet Asuero, nopa israelitame mosentilijque para moixnamiquise inihuaya cati quinequiyayaj quintehuse. Huan amo aqui momatananqui para quintehuis pampa nochi quinimacasiyayaj ipan nochi altepeme. ³ Huan nojquiya nochi gobernadores, tequichihuani huan cati quihuicayayaj tequiticayot campa hueli ipan ten hueli altepeme quinpalehuiyayaj israelitame pampa quimacasiyayaj itequiticayo Mardoqueo pampa quimatque para yaya se israelita huan quicactoyaj nochi ten panoc ica ya. ⁴ Huan nelía Mardoqueo eliyaya se hueyi tacat ipan icaltanahuatil Tanahuatijquet Asuero huan campa hueli nochi quicaquiyayaj ten nopa chicahualisti cati quipixqui. Huan mojmosta quipiyayaya más chicahualisti huan tequiticayot. Huan momoyahuayaya camanali ten ihueyi tequiticayo hasta campa hueli techaj.

⁵ Huan ipan nopa tonali nopa israelitame quinmictijque nochi inincualancaitacahua ica macheta. Quintzontamiltijque nochi cati quincualancaitayayaj. ⁶ Huan san ipan nopa hueyi altepet Susa, nopa altepet cati tayacantoc ipan inintal, quinmictijque 500 masehualme. ⁷ Nojquiya quimictijque Parsandata, Dalfón, Aspata, ⁸ Porata, Adalía, Aridata, ⁹ Parmasta, Arisai, Aridai huan Vaizata, ¹⁰ cati eliyayaj nopa majtacti iconehua Amán inincualancaitaca israelitame. Pero masque quinmictijque, amo mocuilijque teno cati eliyaya iniaxca.

¹¹ Ipan nopa tonali ica tiotac quiilhuijque nopa tanahuatijquet quesqui imiyaca mictoyaj ipan altepet Susa. ¹² Huan huajca nopa tanahuatijquet quilhuito iSihua Tanahuatijca Ester:

—Nopa israelitame quinmictijtoque 500 inincualancaitacahua san ipan ni altepet Susa huan nojquiya quinmictijtoque nopa majtacti iconehua Amán. Sinta quej nopa quichijtoque nica, ¿taya más quichijtose ipan ne sequinoc

* 9:1 9:1 Elqui ipan 7 itequi marzo ipan tocalendario ten ama.

altepeme? Huajca ama techilhui taya más tijnequi. San techilhui taya tijnequi mochihuas, huan na nijchihuas.

¹³ Huan Ester tananquili:

—Notanahuatijca, sínta tiquita cuali, xiquincahuilica nopa israelitame cati itztoque ipan ni altepet Susa ma quichihuaca nojquiya mosta cati quijtohua nopa tanahuatili. Huan nojquiya ma quincuapiloca nopa majtacti mijcatziti iconehua Amán.

¹⁴ Huajca nopa tanahuatijquet tanahuati para ma quichihuaca cati Ester quijtojtoya, huan quej nopa quichijque. Huan nojquiya inintacayohua nopa majtacti iconehua Amán quincuapilojque.

¹⁵ Huajca tonili ipan 14 itequi nopa metzti Adar[†], sempa mosentilijque nochi nopa israelitame cati itztoyaj ipan altepet Susa huan nozona quinmictijque seyoc 300 masehualme. Pero masque quinmictijque, amo mocuilijque teno cati eliyaya iniaxca.

¹⁶⁻¹⁷ Huan ipan nochi sequinoc altepeme ipan itanahuatilis Asuero, nopa israelitame mosentilijque ipan 13 itequi Adar ipan toisraelita calendario[‡], para momaquixtise huan quintzontamiltise inincualancaitacahua. Huan quinmictijque 75 mil ten inincualancaitacahua. Pero masque quinmictijque, amo mocuilijque teno cati eliyaya iniaxca. Huan ipan nopa seyoc tonali ipan 14 itequi Adar, mosiyajquetzque huan nelía paquiyayaj huan quichijque se hueyi tacualisti.

¹⁸ Pero ipan altepet Susa nopa israelitame mosentilijque ipan 13 itequi Adar huan nojquiya ipan 14 itequi para tatehuse. Huan feipa ipan 15 itequi nopa metzti mosiyajquetzque huan yolpaquiyayaj huan quichijque se hueyi tacualisti. ¹⁹ Huajca ama nopa israelitame cati itztoque ipan sequinoc altepeme ilhuichihuaj sesen xihuit ipan 14 itequi Adar ipan toisraelita calendario[§]. Ipan nopa tonali yolpaquij huan quichihuaj se hueyi tacualisti huan momajmacaj tamantzitzi se ica seyoc.

Nopa ilhuit ten Purim

²⁰ Huajca Mardoqueo quijcuilo nochi ni tamanti cati panotoya huan quitanqui amacamanali ica nochi nopa israelitame cati itztoyaj ipan altepeme campa hueli cati quinahuatiyaya Asuero. Quinajsic nochi altepeme, masque huejca o nechca. ²¹ Huan ipan nopa amat quinnahuati para sesen xihuit ma ilhuichihuaca ipan 14 huan ipan 15 itequi metzti Adar. ²² Pampa ipan nopa tonali nopa israelitame momanahuijque ten inincualancaitacahua. Huan masque eltosquía se metzti ten tequipacholi huan tahuejchihuali, mocuetqui se metzti ten paquilisti huan ten se hueyi ilhuit. Huan quijcuilo para ma quiyocatalica nopa tonali para ilhuichihuase huan quipiyase se hueyi tacualisti huan paquise. Nojquiya quinilhui ma motamajmacaca se ica seyoc huan ma quintamajmacaca cati teicneltziti.

²³ Huajca nopa israelitame pejqe quichijtinemij ni ilhuit ipan sesen xihuit quej Mardoqueo quinijcuilhuijtoya ma quichihuaca. ²⁴ Quena, Amán, icone Hamedata, cati ehua ipan Agag cati eliyaya inincualancaitaca israelitame, moilhuijtoya para quintzontamiltis. Huan yaya mahuilti ica piltetzitzi cati itoca Pur para quitasquía quema más cuali quinmictisquía huan quintamiixpolihuiltisquía nochi israelitame. ²⁵ Pero masque quej nopa quichijqui Amán, quema Ester quihuito nopa tanahuatijquet, yaya

[†] 9:15 9:15 Elqui ipan 8 itequi marzo ipan tocalendario ten ama. [‡] 9:16-17 9:16-17 Elqui ipan 7 itequi marzo ipan tocalendario ten ama. [§] 9:19 9:19 O nechca ipejya marzo ipan tocalendario ten ama.

tanahuati para nochi cati fiero cati Amán quinequiyaya ma eli para israelitame, ma huetzi ipan ya. Huan quincupiloljque Amán ihuaya iconehua. ²⁶ Huajca ni ilhuit quitocaxtalijque Purim pampa nopa piltetzitzi cati ica mahuiltijque itoca Pur.

Huajca por cati Mardoqueo quintajcuilhujtoya huan nochi nopa tamanti cati quitztoyaj, ²⁷ nochi israelitame campa hueli san sejco quiixquetzque ni ome tonati para ma ilhuichihuaca para nochipa. Huan momatque ilhuichihuaj ipan ni tonali huan nojquiya quinnextilijque iniconehua ma quichihuaca. ²⁸ Huajca ni ome tonati mocajqui para se ilhuit para nochipa huan sesen xihuit monequi quielnamiquise huan ilhuichihuase ipan sesen cali ipan nochi altepeme ipan nochi talme para iniixhuihua amo quema quielcahuase nochi ten panoc.

²⁹ Huan nojquiya nopa Sihua Tanahuatijquet Ester, yaya cati elqui iich-poca mijcatzi Abihail huan teipa Mardoqueo quiseli huan quiscalti, yaya quiijcuilo seyoc amacamanali. Huan ni amacamanali más quimacac tetili itanahuatil Mardoqueo para ma pehua nopa ilhuit Purim huan amo quema quicahuase. ³⁰ Huan quintitanili amacamanali nochi israelitame cati itztoyaj ipan 127 talme ipan itanahuatilis Asuero. Nojquiya quintajpalo ica yejyetzzi huan quinnacac tetili ica camanali cati melahuac. ³¹ Huan quinnahuati ma quichihuaca nopa ilhuit cati itoca Purim ipan nopa tonali cati quiixquetztoyaj Mardoqueo huan nopa Sihua Tanahuatijquet Ester. Huan quinilhui nojquiya ma quinnachtica iniixhuihua para quichihuase. Nojquiya quinnachtu ipan nopa amacamanali sequij tanahuatili cati mon-equiyaya quitocuilise quema mosahuase huan ipan nopa tonali quema chocase huan tahuejchihuase. ³² Huan itanahuatil Ester quiixquetzqui ni tonali para nochipa. Huan nochi ya ni quiijcuiloljque ipan nopa amatapohuali cati quipixqui nochi ten panoc ipan itanahuatilis.

10

Ihueyitilis Mardoqueo

¹ Teipa Tanahuatijquet Asuero tanahuati ma taxtahuaca impuestos nochi masehualme cati itztoyaj ipan itanahuatilis huan nojquiya nochi masehualme cati itztoyaj ipan piltaltzitzitzi tatajco hueyi at nechca itanahuatilis.

² Huan nochi nopa huejhueyi tamanti cati quichijqui huan nopa hueyi chichahualisti huan tequiticayot cati quipixqui, nochi mocajqui ijcuiljtoc ipan nopa amatapohuali cati itoca Nochi Cati Panoc Ipan Inintanahuatilis Tanahuatiani Ten Talme Media huan Persia. Nopona nojquiya quijtohua quenicatza quihueyichijqui Mardoqueo hasta quipixqui nopa hueyi tequiticayot. ³ Nopa israelita Mardoqueo eliyaya nopa teipa hueyi tacat cati quitoquili Tanahuatijquet Asuero. Huan Mardoqueo elqui nelia hueyi ica nopa israelitame. Huan nochi israelitame quicnelijque pampa iniicni huan pampa Mardoqueo nochipa quitemohuayaya cati cuali para israelitame.

Yaya tatehui para ma itztoca cuali.

Job

Job se tacat cati xitahuac

¹ Tahuel huejcajquiya ipan tali Uz, itztoya se tacat cati itoca Job. Yaya eltoya se tacat cati xitahuac huan cati amo aqui huelqui quitelhuic. Qui-macasiyaya huan quitepanitayaya Toteco Dios huan mohuejcataliyaya ten nochi cati amo cuali. ² Job quinpixtoya chicome itelpocahua huan eyi iichpocahua. ³ Nojquiya quinpiyayaya chicome mil borrejojme, eyi mil camellos, 500 pares huacaxme cati quimatiyayaj tapoxoníaj, 500 sihua bur-rojme huan miyac tequipanohuani. Job más tapijpixtoya que nochi sequinoc masehualme cati itztoyaj ipan nopa tali campa hualquisa tonati.

⁴ Huan sesen xihuit quema sese icone Job quiaxitiyaya ixihui, ilhuichi-huayaya ipan ichaj. Huan nochipa quinnotzayaya itaca icnihua huan nopa eyi isihua icnihua para sentic tacuase. ⁵ Quemantica nopa ilhuime huejcahuayaya miyac tonali. Huan quema tamiyaya sesen ilhuit, Job nochipa quintapajpacchihuayaya iconehua iixpa Toteco Dios. Ica iñaloc mijquehuayaya nelcualca huan quientcahuayaya se tacajcualisti tatatili iixpa Toteco Dios por sese icone. Job quichihuayaya ya ni pampa moilhuiyaya: “Huelis noconehua tajtacolchijtoque huan quitelchijtoque Toteco Dios ipan iniyolo.” Huan Job quej nopa quichihuayaya nochipa.

⁶ Se tonali iilhuica ejcagua Toteco * hualajque para moixnextise iixpa TOTECO, huan inihuaya nojquiya hualajqui Amocualtatcat.

⁷ Huan TOTECO quitatzintoquili Amocualtatcat:

—¿Canque tihuala?

Huan Amocualtatcat quiilhui:

—Na ninejnentihuala iixco taltipacti campa nijtachilijtiya nochi ten pano.

⁸ Huajca TOTECO quitatzintoquili Amocualtatcat:

—¿Tiquitzotc notequipanojca Job? Ipan nochi taltipacti amo aqui seyoc quej ya. Amo aqui hueli quiejelnamiqui ica yon se tamanti cati amo cuali. Quichihua nochi cati xitahuac. Yaya techimacasi huan techtepanita huan mohuejcatalía ten nochi tamanti cati amo cuali.

⁹ Pero nopa Amocualtatcat quiilhui:

—¿Ta tiquita Job mitztepanita san pampa quinequi? ¹⁰ ¡Amo neli! Yaya san mitztepanita pampa nochipa tijmocuitahuijtoc inemilis, ifamilia huan nochi cati quiipiya. Amó tijcahuilijtoc ma quiajsi yon se tequipacholi. Tijchijtoc ma quisa cuali nochi tamanti cati quichihua huan tahuel tijricojchijtoc. Yeca mitzhueyimati. ¹¹ Pero xijquixtili nochi cati yaya quiipiya huan tiquitas sinta amo mitztelchihuas moixpa.

¹² Huajca TOTECO quiilhui Amocualtatcat:

—Nimitzmaca caqui huili xijchihua cati ta tijnequis ica nochi cati Job quiipiya, pero amo teno xijchihuili itacayo.

Huajca nopa Amocualtatcat quisqui iixpa TOTECO huan yajqui.

* **1:6** 1:6 Ni camanali ipan hebreo quijtohua “itelpocahua Toteco”. Quinequi quijtos ilhuicac ehuan. Hueli elis ilhuicac ehuan cati quitoquillía Toteco cati tatzetzeloltique o nopa ilhuicac ehuan cati huejcajquiya tajtacolchijque huan mochijque ajacame. Nica quijtohua para Amocualtatcat hualajqui inihuaya. Xiquita ipan Gn 6:2; Jb 2:1, 38:7 huan Dn 3:25 campa camanalti ten “itelpocahua Toteco”.

¹³ Huan se tonali quema nochi itelpocahua huan iichpocahua Job tacuayayaj ipan ichaj nopa iachtohui ejquet, panoc se hueyi tequipacholi.

¹⁴ Huan ajsitihuetzico se tayolmelajquet ipan ichaj Job huan quiilhui:

—Nochi mohuacaxhua tapoxoniyayaj huan nopa burrojme tacuajtine-miyayaj nopona ininechca. ¹⁵ Huan hualajque nopa sabeo tacame huan quinichtejque. Quinhuicaque nochi nopa tapiyalme huan quinmictijque nochi motequipanojcahua. Huan san na nimochololti para nimitzyolmelahuaqui.

¹⁶ Huan quema noja camanaltiyaya nopa tacat, ajsico seyoc tayolmelajquet huan quiilhui Job:

—Ipan nopa lugar campa tiquinmocuitahuuyayaj moborregojhua, huetzqui tit ten Toteco Dios huan quintati nochi nopa tamocuitahuiani huan nochi moborregojhua. San na nimochololti para nimitzyolmelahuaqui.

¹⁷ Huan quema noja camanaltiyaya ni tacat, ajsico seyoc tayolmelajquet huan quiilhui Job:

—Hualajque eyi pamit ten caldeo soldados huan quinichtejque nochi mocamellos. Quinmictijque motequipanojcahua ica macheta huan san na nimochololti para nimitzyolmelahuaqui.

¹⁸ Huan quema noja camanaltiyaya ni tacat, ajsico seyoc cati quiilhui Job:

—Motelpocahua huan moichpocahua ilhuichihuayayaj ipan ichaj mocone cati achtohui ehua, ¹⁹ huan hualajqui se ajacat cati tahuel chichahuac ten nopa huactoc tali huan quitzohuitejqui nopa cali. Huan itzontzajca nopa cali huetzqui ipan moconehua huan nochi mijque. San na nimochololti para nimitzyolmelahuaqui.

²⁰ Huajca Job moquetzqui huan quitzayanqui iyoyo huan quinxinqui itzonteco para quinextis tahuel mocuesohua. Huan motancuaquetzqui huan quihueyichijqui Toteco. ²¹ Huan teipa quijito:

—Nixolotic nitacatqui ipan ni taltipacti huan nixolot niyas quema nimiquis. TOTECO techmacatoya nochi cati nijpixtoya. Huan ama yaya techquixtilijtoc. Nijhueyichihua itoca TOTECO.

²² Ipan nochi ni tamanti, Job amo quichijqui yon se tajtacoli yon amo quitatelhui TOTECO quej quichijosquía se tamanti cati amo cuali.

2

Amocualtatcat sempa quiyejyeco Job

¹ Seyoc tonali quema iilhuicac eicahua TOTECO * sempa hualajque para moixnextise iixpa, Amocualtatcat nojquiya hualajqui para moixnextis iixpa.

² Huan TOTECO quiilhui Amocualtatcat:

—¿Canque tihuala?

Huan Amocualtatcat quiilhui:

—Na ninejmentihuala iixco taltipacti campa nijtachiliyaya nochi ten pano.

³ Huajca TOTECO quiilhui:

—¿Tiquitztoc notequipanojca Job? Ipan nochi taltipacti amo aqui seyoc quej ya. Amo aqui hueli quitelhuis ica yon se tamanti cati amo cuali. Quichihua nochi cati xitahuac. Yaya techimacasi huan techtepanita, huan mohuejcatalia ten nochi tamanti cati amo cuali. Yaya quisenhuiquilla quichihua cati cuali masque ta techchihualti para tijtatzacuiltis quema amo teno quichijtoya.

⁴ Huan Amocualtatcat quiilhui:

* 2:1 2:1 Xiquita Job 1:6.

—Se masehuali quichihuas miyac tamanti para quimanahuis inemilis. Mitzhueyitalía san pampa tijmocuitahujitoc itacayo. ⁵ Pero sinta nijmacas se cocolisti cati chichahuac, yaya mitztelchihuas moixpa.

⁶ Huan TOTECO quiihui Amocualtatcat:

—Cualtitoc, xijchihua ta cati tijnequi ica itacayo, pero amo xijmicti.

⁷ Huajca Amocualtatcat quisqui iixpa TOTECO huan quicoco Job ten itzon-teco hasta iicxi ica se sahua cocolisti cati tahuel fiero. ⁸ Huajca Job mosehui ipan cuajnexti huan quicuic se tepalcat para ica mohuahuanas. ⁹ Huan hualajqui isihua huan quiihui:

—¿Noja timotemachía ipan Toteco Dios masque tiquitztoc nochi ya ni cati mitzchihuilijtoc? ¡Xijtelchihua Toteco Dios para yaya ma mitzmicti!

¹⁰ Pero Job quiihui:

—Ticamanaltitoc quej se sihuat cati huihuitic. ¿Timoilhuía tijselise cati cuali ten Toteco Dios huan amo tijselise cati amo cuali?

Huan ipan nochi ni tamanti Job amo tajtacolchijqui, yon amo quitelchijqui Toteco Dios.

Ihuampoyohua Job quipaxalocoj

¹¹ Huan Job quinpixtoya eyi ihuampoyohua, huan quema injuanti quica-que para Job quiajsitoya se hueyi taijyohuilisti, mocamanalhujique para san sejco yase quiyoltalitij huan quiyolchichahuatij. Injuanti inintoca eliyaya: Elifaz cati ehuyaya Temán, Bildad cati ehuyaya Súa, huan Zofar cati ehuyaya Naamat. ¹² Huan ica huejca quitachilijque Job, pero amo quixmatque sinta eliyaya Job pampa tahuel mopatatoya itachiyalis ica nopa cocolisti. Huajca ihuampoyohua pejque chocaj huan quitzayanque iniyoyo. Quiajcomajcajque taltepocti ipan ajacat huan motemilijque tali ipan inint-zonteco para quinextise tahuel mocuesohuaj. ¹³ Teipa mosehuijque talchi ihuaya Job para chicome tonati huan chicome yohuali. Huan yon se ten injuanti amo quiihui yon se camanali pampa quitaque para tahuel hueyi itaijyohuilis.

3

Job quitelchijqui nopa tonali quema tacatqui

¹ Teipa Job quitelchijqui nopa tonali quema yaya tacatqui. ² Quiijto:

³ “Tatelchihuali ma eli nopa tonali quema nitacatqui huan nopa yohuali quema tayolmelajque para tacajtaya se oquichpil. ⁴ Más cuali amo pan-tosquía nopa tonali. Nochi ma quielcahuaca nopa tonali para nochipa. Huan Toteco Dios ma quixpolihuilti. Ma quixtzacua nopa tonali ipan tzintayohuilot para nochipa. ⁵ Quena, ma Toteco Dios quitali tzintayohuilot quej miquilsti ipan nopa tonali huan ma quixtzacua se hueyi mixti cati tahuel yayahuic quej elisquía amo quema oncac nopa tonali. ⁶ Nipaquisquía sinta hueyi quixpolojtosquía nopa tonali ipan calendario, huan ma amo monextis ipan yon se xihuit o ipan yon se metzti. ⁷ Más cuali eltosquía nopa yohuali sinta yon se conet amo tacajtosquía. Más cuali sinta amo oncatosquía paquilsti ipan nopa tayohua pampa tacatqui se oquichpil. ⁸ Masehualme cati más quimatij tatechihuaj ma quitelchihuaca nopa tonali. Ma quitelchihuaca nopa chichahuac que tacame cati mosemaja para quixi-tise nopa hueyi tapiyali cati temajmati cati itoca levitán. ⁹ Achi cuali sinta tzintayohuilijtosquía sitalime ipan nopa yohuali quema nitacatqui. Más cuali sinta nochi quichixtosquía taahuili ipan nopa tonali, pero nopa tonali amo quema hualajtosquía. Sintá amo oncatosquía nopa tonali huan nopa

taahuili amo taahuijtosquía ica ijnaloc, amo nitacajtosquía. ¹⁰ ¿Para ten Toteco Dios amo quitzajqui iijti nonana para amo nitacajtosquía? ¿Para ten techcahuili ma nitacati para ma niqijyohui nochi ni tamanti cati ama techpano?

¹¹ “¿Para ten amo nimijqui iijtico nonana o quema sanoc nitacajtoya? ¹² ¿Para ten nopa partera techcahuili ma niitzto? ¿Para ten techchichiti nonana? ¹³ Sinta nimictosquía quema nitacatqui, huajca amantzi niitztosquía cuali. Niitztosquía nicohtoc huan nimosiyajquetztoc. ¹⁴ Ama niitztosquía nimictoc inihuaya tanahuatiani huan tetalnamiciani cati mochi-jchihuillijque inincaltanahuatilhua cati ama ya sosolijtoque. ¹⁵ Niitztosquía inihuaya tayacanani cati quipixque miyac oro huan quipixtoyaj ininchaj temitoc ica plata. ¹⁶ ¿Para ten amo techtalpachojtosquíaj quej se conet cati tacatqui mictoc? Quej nopa amo niquitztosquía tatanexti. ¹⁷ Masehualme cati fiero ininemilis ayecmo tecualancamacase nozona campa mijcatzitzi huan nochi masehualme cati siyajtoque mosiyajquetzase. ¹⁸ Nozona cati itztoyaj ipan tatzacti ipan taltipacti itztoque ica cuali pampa amo aqui se tetzajquet para quintaiyohuiltis. ¹⁹ Itztoque san sejco cati teicneltzitzi huan cati tominpiyani. Nozona tequipanohuani itztoque majcajtoque ten inintecohua.

²⁰ “¿Para ten Toteco Dios quinmaca taahuili huan nemilisti masehualme quej na cati titaiyyohuíaj huan timocuesohuaj? ²¹ ¿Para ten techcahuilía ma tiitztoca tojuanti cati tahuel tijnequij timiguise huan nopa miqullisti amo ajsi? Huan tijtemohuaj miqullisti quej sequinoc quitemohuaj tacualisti o tomi, pero amo hueli tijpantíaj. ²² ¿Para ten quinmaca nemilisti masehualme cati san yolpaquij quema ajsi nopa tonali para miquise huan quintalpachose? ²³ ¿Para ten Toteco Dios quicahuilía ma tacati se tacat huan teipa quitzacua ipan se nemilisti campa onca taiyyohuiltis huan tequipacholi? ²⁴ Ni tacuajualocayot amo nechcahuilía ma nitacua. Nochoquilis motalohua quej se hueyat. ²⁵ Techajsitoc nopa tamanti cati nochipa niquimacasiyaya huan cati más nijmahuilíyaya. ²⁶ Amo nijpiya tasehuilisti ipan noyolo. Noijti mojmolinía. Amo hueli nimosiyajquetza. San nijmati tequipacholi.”

4

Elifaz quiilhui Job san taiyyohuíaj amo cuajcualme

¹ Huajca Elifaz cati ehuyaya Temán quiilhui Job:

² “Techcahuili ma nicamanalti se quentzi. Amo hueli san nimitztacaquiltos huan amo nimitzilhuis yon se camanali.

³ “Xiquita, achtohuiya ta tiquintalnamicíyaya miyac masehualme cati quipiyayaj tequipacholi para ma motemachica ipan Toteco Dios. Nojquiya tiquinyolchicajqui cati amo quipiyayayaj fuerza.

⁴ Tiquinyolchicajqui cati huetzttoyaj ipan tajtacoli huan cati quinyoltlanayaya cati amo cuali. ⁵ Pero ama, ta moseltitzi timocuesohua huan timotzinquixtía por ni taiyyohuiltis cati mitzajsitoc. ⁶ ¿Para ten amo timotemachía más ipan Toteco Dios ipan ni taiyyohuiltis? Tijmati Toteco Dios quinmocuitahuía masehualme cati xitahuacque.

⁷ “Ximoyolilhui ten ya ni: Toteco Dios amo quitatzacuilitía huan amo quitzontamiltía yon se tacat cati xitahuac huan cati amo teno quichijtoc. ⁸ Quej na niquitztoc, masehualme cati quichihuaj cati fiero, injuanti quiselíaj cati fiero. ⁹ Pampa quema Toteco Dios cualani, yaya quintzontamiltía ica

iiyyoyo. ¹⁰ Nimantzi ajsi icualancayo huan ayecmo itztoque nopa masehualme. Masque nopa fiero masehualme cualanisquíaq o mosisinisquíaq quej huejhueyi tecuanime, Toteco Dios quitzacuas inincamac huan quintzontamiltis. ¹¹ Masque inijuanti quipiyaj chichahualisti, miqoise ica mayanti huan ininconeua motamisemanase.

¹² “Se techmacac ni tamachtili ixtacatzi. Elqui quej se techichtacailhui ipan nonacas. ¹³ Niquitac se tanextili se tayohua quema nochi masehualme cochtoyaj. ¹⁴ Ipan se talojtzi techitzqui majmajti huan pejqui nihuihuipica hasta mojmoliniyaya noomiyohua. ¹⁵ Se ajacat panoc noixpa, huan moquejquetzqui notzoyo ipan nochi notacayo. ¹⁶ Teipa nijmachili para nopa ajacat moquetzqui nonechca huan huejcajqoi, pero amo huelqui niquitac. Teipa nijcajqoi itoscac cati techichtacailhui: ¹⁷ “¿Huelis se masehuali itztoque xitahuac iixpa Toteco Dios? ¿Huelis elis tapajpactic iixpa yaya cati quichijchijqui?”

¹⁸ “Xiquita, sinta Toteco Dios amo hueli motemachía ipan iilhuicac ejcagua huan quintatelhui iilhuicac ejcagua cati tajtacolchijtoque, quenicatza huelis motemachis ipan masehualme cati tachijchihualme san ica soquit. ¹⁹ Amo hueli yon quentzi motemachis ipan tojuanti cati tijpiyaj totatzinpehualtil ipan taltepecti huan amo ohui para yaya moquejquetzas topáni huan techmictis quej tipapalome. ²⁰ Masehualme itztoque ipan ni taltipacti san se talojtzi. Eltoc quej ica ijnaloc yoltoque huan ica tiotac miquij. Huan sequinoc nimantzi quinelcahuaj. Polihuij para nochipa. ²¹ Masque yejectzi se masehuali, tami inemilis huan amo aqui mocuesos por ya. San mictehuaj huan amo quipixtehuaj talnamiquilisti.

5

¹ “Job, xijtzajtzili se ma mitzpalehui sinta tijnequi, pero amo aqui mitznanquilis. Huelis tiquinnotzas iilhuicac ejcagua Toteco Dios cati tatzejtzolotique, pero amo mitzpalehuise. ² Se cati huihuitic quej ta miqui pampa cualani huan pampa quiixtoca cati sequinoc quipiyaj. ³ Niquinitztoque cati huihuitique quema tataniy para se talojtzi, pero teipa quicahuaj Toteco Dios huan nimantzi huala tatzacuiltili huan quipolohuaj nochi. ⁴ Mahuilili para ininconeua. Quincualancaitaj ipan tequicali quema moquetzaj iixpa se juez, huan amo aqui quinmanahuá. ⁵ Cati quipiya se tacat cati huihuitic ipan imila quichtequílíaj masehualme cati mayancamictinemij masque quipantíaj huistzala. Huan nochi itomi sequinoc quiixtocaj huan quicuílíaj. ⁶ Masque taohuijcajot huan tequipacholi amo moscaltíaj iniselti quej huitzti moscaltía iniselti ipan tali, ⁷ pero nochi masehualme quipantíaj taijyohuilisti ten quema tacatij. Temachtí quinajsi tequipacholi quej temachtí se timoyot cati quisa campa tit patanis ajacatipa.

⁸ “Huajca Job, nimitzilhuía: Xijtemo Toteco Dios huan xiquilhui motajtacolhua. ⁹ Pampa Toteco quichihua huejhueyi tamanti cati amo aqui hueli quimachilía. Quichihua tahuel miyac tanextili hasta amo aqui hueli quinpohua. ¹⁰ Quichihua ma huetzi at ipan taltipacti para quiatequis nochi mili huan nochi cuatitamit. ¹¹ Yaya quinhueyitalía masehualme cati moechcapanohuaj iixpa huan quinmatilana cati mocuesohuaj. ¹² Quinenpolo inintalnamiqulis nopa tacajcayahuani para amo huelis quichihuase cati fiero moyolilhuijtoque quichihuase. ¹³ Toteco Dios quinchihua ma huetzica tacame cati mohueyimatij ipan nopa taquetzti cati inijuantijya quichijtoque. Ica cati moitaj para tahuel talnamiquij, quinmasiltia ipan nopa tamanti

fiero cati quisencajtoque para quichihuase. ¹⁴ Tonaya motepotaniaj tacajcayahuani quej elisquiaj popoyotzitzitzi. Huan masque tajcotona, amo hueli tachiyaj. Para tacajcayahuani tajcotona eltoc quej elisquia tzintayohua.

¹⁵ “Toteco Dios quinmanahuia cati teicneltzitzitzi ten tacame cati quiپیay chicahualisti. Quinquixtia inimaco fiero masehualme cati tetaijyohuilitiaj. ¹⁶ Huajca cati teicneltzitzitzi hueli mochiyase ipan ya pampa Toteco quincamatzacuas nopa fiero tacame cati quinequij quintamiltise.

¹⁷ “Pero se tacat cati Toteco Dios quixitahua quiپیya hueyi paquilisti. Huajca quema titajtacolchijtoc, amo ximocueso sinta mitztatzacuilitia Toteco Cati Quiپیya Nochi Chicahualisti. ¹⁸ Masque yaya mitzcocos, teipa mitzpajtis huan mitzchicahuas. ¹⁹ Huan yaya mitzmanahuis miyacapa para yon se tamanti cati amo cuali amo huelis mitzajsis. ²⁰ Ipan nopa tonali quema oncas mayanti, yaya mitzmanahuis para amo timayancamiqis. Ipan tatehuilisti mitzmanahuis para amo mitzcocos macheta. ²¹ Toteco mitzmanahuis ten cati mitzistacahuiaj. Huan amo monequi tiquimacasis ten panos teipa quema hualase cati tasosolose. ²² Quema oncas mayanti huan nochi quisosolose, ta san tiquinhuetzquilis. Huan yon se tecuani amo tiquimacasis. ²³ Nopa teme ayecmo mitztzacuilise quema titequitis ipan momila. Huan nopa tecuanime cati nemij cuatita ayecmo mitzcua-tononise. ²⁴ Mofamilia itztos temachti huan amo timocuesos por injuanti quema huejca tinemis. Quema tiquinpaxalos motapiyalhua, yon se amo mitztachtequilijtos. ²⁵ Tiquinpiyas miyac moconehua, huan moixhuihua momiyaquilijtiyase quej xihuit. ²⁶ Tiitztos miyac xihuit huan noja tijpiyas chicahualisti quema timiquis. Amo quipixcaj trigo quema ayemo ipohual, huan ta amo timiquis quema ayemo tihuehuentzi.

²⁷ “Nochi ya ni nimoyolilhujtoc ica cuidado huan nijmati para melahuac. Huajca xijtacaquili, huan xijchihua cati quinamiqui huan mitzpalehuis miyac.”

6

Job quinanquili Elifaz quej yaya eliyaya nelxitahuac

¹ Huajca Job quiihui:

² “Cuali elisquia sinta se quitamachihuasquia nochi notaijyohuilis ipan balanza para quuitase quesqui niquijyohujtoc. ³ Notaijyohuilis eltoc más etic que nopa xali cati onca campa hueyat. Yeca nimantzi nicamanaltitoc chicahuac. ⁴ Toteco Cati Quiپیya Nochi Chicahualisti techtahuisojtoc ica cuataminti. Eltoc quej itencococa nopa cuataminti ajsitoc ipan noyolo huan ipan nochi notacayo. Eltoc quej Toteco Dios techtehuia ica nochi ni hueyi taijyohuulisti cati techajsitoc. ⁵ Quinamiqui para na nijnextis notequipachol. Tzajtzi se burro sinta amo quiپیya tacualisti. Tzajtzi se huacax quema amo quipantia sacat para amoc quicuas. ⁶ Taejlnamiqui se tacat sinta se tacualisti amo cuali poyec. Nochi cualanisquiaj sinta monequisquia quicuase iistaca se tec-sisti pampa amo quiپیya iajhuiyaca, san asejsec. ⁷ Quema nijtachilia iistaca se tec-sisti, nimantzi nijmati ayecmo nimayana huan pehua nimisotasnequi. Huan ama notequipachol eltoc noja más fiero.

⁸ “Cuali elisquia sinta Toteco Dios techmacasquia cati nijnequi huan cati nijchiya. ⁹ Quena, cuali elisquia sinta techmictisquia para ayecmo nitaijyohujtos imaco. ¹⁰ Quej nopa noja nijpiyasquia ni paquilisti: Amo nijtaijilhujtoc icamanal Toteco Dios cati Tatzejtzetzelolitic masque nijpanotoc nochi ni tacuajcualocayot cati amo nechcahua. ¹¹ Ayecmo nihueli niquijyohua ni

cocolisti pampa amo teno cati cuali nijchiya. ¿Quenicatza huelis niquijyohuis hasta nimiquis? ¹² ¿Timoilhuía nijpiya fuerza quej se tet? ¿O timoilhuía nonacayo mochijtoc quej nopa teposti bronce? ¹³ ¡Amo! Ayecmo nijpiya chichahualisti para nimopalehuis. Ayecmo teno hueli nijchihuas para quisas cuali.

¹⁴ “Quinamiqui para se masehuali quicnelis ihuampo cati itztoc ipan taijyohuilsti, pero ta tahuel techtelhuijtoc. Yon amo tiquimacastoc Toteco Cati Quipiya Nochi Chichahualisti. ¹⁵ Pero tinoicni, timonextijtoc para amo titemachti. Tiitztoc quej se atajti cati temi ica at quema taselia cuame, ¹⁶ pampa temitoc ica set huan sital set cati ya atiya. ¹⁷ Pero ipan nopa tonali quema tahuel tatotoniya, nopa atajti ayecmo quipiyas at huan nimantzi huaquis. ¹⁸ Miyac masehualme cati nemij san sejco ica inintapiyalhua panoj nozona nechca nopa atajti. Quicahuaj iniojhui huan yahuij para moseseltisquaj, pero amo quipantíaj at para atise. San miqij ica amiquisti ipan nopa huactoc tali. ¹⁹ Quema hualahui nopa miyac paxalohuani cati sentic nemij ten tali Temán huan Sabá huan moquetzaj nozona para atise, ²⁰ quinechcahuaj nopa atajti huan pinahuaj pampa amo quipantijque cati tahuel quichiyayaj. San quipantíaj cati huactoc. ²¹ Huan quej nopa nojquiya ta tiitztoc ica na. Amo techpalehuijtoc quej nijchiyayaya. San tiqiztoc nococolis huan timohuejcatelijtoc ten na. ²² ¿Para ten? ¿Timoilhuía nimitztajtani techchihuili se favor? ¿Timoilhuía nimitztajtani se nemacti ten tomi? ¡Amo! ¡Amo quema nijchijtoc! ²³ Amo quema nimitztajtani se tapalehuili para techmanahuis ten nocualancaitacahua o para techmanahuis inimaco tachtequini.

²⁴ “San nijnequi technanquili xitahuac huan teipa na ayecmo nimolinis. Techilhui taya amo cuali nijchijtoc. ²⁵ Masque camanali cati melahuac achtohui tecocohua, teipa tepalehuía. Pero ta mocamanal amo quijtohua cati melahuac. ²⁶ ¿Timoilhuía techejelnamiquis san pampa nitzajtzic chichahuac por notaijyohuilis? ²⁷ Eltoc quej tijtaijyohuilstisquía se conet cati icnotzi, o quej tijcayahuasquía huan tijnamacasquía se mohuampo. ²⁸ ¡Techtachili! ¿Anmoilhuaj timoilhuía quinamiqui nimitzistacahuis moixpa? ²⁹ Amo xijchihua cati amo cuali. Amo xiquijto para nijhuica tajtacoli. Xiquita para nise tacat cati nixitahuac. ³⁰ ¿Timoilhuía niistacati? ¿Timoilhuía amo niqixmati cati cuali huan cati amo cuali? Sinta nitajtacolchijtosquía, ¿timoilhuía amo nijmatisquía?

7

Job quinejqui miqis para ayecmo taijyohuis

¹ “Tahuel ohui inemilis se masehuali ipan ni taltipacti. Quipano miyac taohuijcaoyot. Quipiya inemilis cati ohui quej inemilis se cati tetequipanohua chichahuac mojmota. ² Niitztoc quej se tetequipanojquet cati tahuel quinequi ma ajsi hora para mosiyajquetzas o tahuel quinequi nimantzi ma tami nopa samano huan quiselis itaxtahuil. ³ Quej nopa nojquiya na nitaijyohuijtoc miyac metzti quema amo teno oncaiyaya temachti. Huan sesen yohuali nijpanotoc miyac tacuajcualocayot. ⁴ Quema nimoteca, nimoilhuía: Cuali elisquía para nimantzi tanesisquía. Sesen yohuali nijmachilía nelhueyi. Huan san nimocuejcuepa talojtitzti ipan notapech pampa tahuel nicuati. Huan quej nopa nijchihua hasta tanesi. ⁵ Nochi nocuetaxo oculiojtoc huan yayahuic. Nococohua talojtitzti tzayanij huan temalquisaj.

⁶“Nonemilis nimantzi tantiya. Mojmosta moishuilitía para monechcahuis nopa tonali quema nimiquis. Ayecmo nijchiyas para nimochicahuas.

⁷“Toteco Dios, xiquelnamiqúi para nonemilis eltoc quej se ajacat cati panotehua. Amo quema sempa niqúitas cati cuali. Ayecmo quema nijpiyas paquilisti. ⁸Huan masque amantzi techtachilijtoc, ica se quentzi tonali, techitas nimictoc. ⁹Pampa quej se mixti cati ica se talojtzi ixpolihui huan ayecmo nesi, quej nopa nojqúiya ixpolihui para nochipa se cati miqui huan yahui campa mijcatzitzí. Ayecmo quema mocuepa nica. ¹⁰Ayecmo quema tacuepilis ichaj, yon ichaj ehuaní ayecmo quema quitase pampa ayecmo quema monextis.

¹¹“Huajca monequi ama nijsenhuiquilis nicamanaltis ten notaijyohuilis pampa tahuel hueyi ni tacuajcualocayot. ¹²¡NoTeco Dios! ¿Ta techita para na nieli se hueyi at cati quichihua san cati quinequi? ¿O huelis techita para nieli nopa hueyi tapiyali cati temajmati ipan hueyi at huan yeca techtzacua? ¹³Ica tayohua quema nimoteca ipan notapech para nicochis, nijchihua campeca para niquelcahuas notaijyohuilis, ¹⁴pero ta techmajmatía ica temicti cati temajmati. ¹⁵Más cuali techilpisquía noquehta para ayecmo nitaijyohuijtos huan quej nopa nimiquis. ¹⁶Nelía niqúijíya nonemilis pampa amo teno ipati. Huajca NoTeco Dios, techcahuili ma nijpiya tasehuilisti ni se ome tonatí cati noja polihui para niütztos.

¹⁷“¿Taya ipati se tacat para timocuatotonis huan timocuesos miyac por ya? ¹⁸¿Para ten tijpaxalohua mojmosta ica ijnaloc? ¿Para ten tijjejyecohua talojtztí? ¹⁹¿Para ten tahuel techcuatotonía huan amo techcahuilía se talojtzi masque san para nijtolos nochajchac? ²⁰Sinta nitajtaacolchijtoc, ¿taya nimitzchihuilijtoc, ta cati tiqúintachilía nochi masehualme? ¿Para ten techmelaitztoc na ica mocuatamin? ¿Nonemilis eltoc se tamamali cati tahuel etic para ta? ²¹¿Para ten amo techtapojpolhuía notajtaacolhua huan xiquixpolo nochi cati nijchijtoc? Pampa nechcatitoc para nimotecas ipan taltepocti huan nimiquis, huan quema techtemos, ayecmo techpantis.”

8

Bildad quillhui Job para yaya amo neli motemachía ipan Toteco Dios

¹Bildad, cati ehua ipan Súa, quillhui Job:

²“¿Job, hasta quema tijcahuas ticamanaltis? Mocamanal eltoc quej se ajacat cati chichahuac huala. ³Tijmati para Toteco Cati Quipiya Nochi Chichahualisti amo quihuijcolohua cati xitahuac huan melahuac. ⁴Temachti moconehua tajtaacolchijque ica ya huan yeca quintatzacuiliti quej quinamiqúi. ⁵Pero sinta ta tijtemos Toteco Cati Quipiya Nochi Chichahualisti huan timotatajtis ica ya, mitztacaquilis. ⁶Sinta tiütztoc senquisá cuali huan tijchihua san cati xitahuac, yaya temachti mitznauquilis quema timotatajtis. Yaya mitztiochihuas miyac huan mitzmacas paquilisti ipan mochaj. ⁷Huan nochi cati tijpiyayaya achtohuiya tiqúitas para eliyaya pilquentzi, pampa teipa tijpiyas más miyac.

⁸“Ximoyolilhui ten nochi cati panotoc hasta huejcajqúiya huan xijtachili taya tamanti ininpantí nopa masehualme. ⁹Xijtachili pampa tojuanti sanoc yalohua titacatque huan pilquentzi tijmatij. Huan tonemilis ipan ni taltipacti san huejcahuas quej se ecahuilot. ¹⁰Inijuanti cati achtohuiya itztoyaj mitzmachtise miyac tamanti huan mitztalnamictise ica camanali cati temachti.

11 “Nochi cati quielcahuaj Toteco Dios, ayecmo teno hueli quichiyase. Itztoque quej acat cati amo quipiya tali campa inelhuayo, o quej se xihuit cati amo quipiya at para xoxohuixtos. 12 Nimantzi pehua pilini huan huaqui quema noja ayemo quintzontequij. 13 Quej nopa pano ica cati quielcahua Toteco Dios. Se masehuali cati amo quineltocha Toteco eltoc quej motemachía ipan se tocatzahuali. 14 Pero nochi nopa tamanti cati yaya ipan motemachía, huetzis hasta talchi. 15 Huan quej nopa nojquiya itztoque se tacat cati motemachía ipan ichaj. Mocajcayahua pampa nopa cali amo moquetztos para nochipa. Nimantzi tamis. 16 Nojquiya nopa masehuali itztoque quej se cuahuit cati xoxohuic cati ica ijnaloc monextía para tahuel quipiya chichahualisti huan tetic. Huan imacuayohua yahuij campa hueli ipan nopa xochi mili. 17 Inelhuayohua motatzquilía campa onca miyac at inintzala teme. 18 Pero quema se acajya quihuihuíta, tami ixpolihui. Ayecmo aqui quipantis campa eltoya pampa ya tanqui. 19 Ayecmo hueli tijchiyas itajca nopa cuahuit, huan seyoc cuahuit ixhuas campa eltoya.

20 “Pero xiquita. Toteco Dios amo quihuejcamajcahua se masehuali cati xitahuac, yon amo quipalehuía cati tajtacolchihua. 21 Toteco Dios noja mitzchihuas xihuetzca huan xitzajtzi ica paquilisti. 22 Huan nochi mocualancaitacahua mopinahualtise. Huan Toteco quintzontamiltis nochi tajtacolchihuani.”

9

Job quiijto para amo aqui huelis momanahuis iixpa Toteco

1 Job quiilhui Bildad:

2 “Na nijmati para melahuac Toteco amo quihuejcamajcahua cati xitahuac. Pero ¿quenicatza huelis se masehuali mochihuas xitahuac iixpa Toteco Dios? 3 Sinta se masehuali quinequisquía monajnanquilis ihuaya Toteco, amo hueli quinanquilis se huelta ipan se mil itatzintoquilihcahua. 4 Pampa Toteco Dios tahuel talnamiqui huan tahuel quipiya chichahualisti. ¿Ajquiya motehui ihuaya huan tatanqui?”

5 “Ica ihueyi cualancayo Toteco quiniycuenía tepeme. Quinixcuepa ipan se talojtzi huan amo aqui momaca cuenta. 6 Quiojolinía ni taltipacti hasta campa itzinpehualtil. Quichihua ma tahuel mojmolinicaj itaquetzalhua. 7 Sinta Toteco quimaca tanahuatili, tonati amo cahuanis, huan sitalime amo taahuse. 8 Toteco iseltitzi quipatajqui ilhuicacti. Yaya nejnemi ipan hueyi at para quitamachihuas ihuexca. 9 Toteco quinchijchijqui nochi sitalime hasta injuanti cati nejnemij motzquitoque huan inintoca Osa Mayor, Orión huan nopa Pléyades. Nojquiya quinchijchijqui nopa miyaqui sitalime cati motzquitoque san sejco ica tatzinta ipan ilhuicacti. 10 Toteco quichihua huejhueyi tamanti cati amo aqui huelis quimachilis. Quichihua tahuel miyac tiochicahualnescayot hasta amo aqui huelis quipohuas.

11 “Pero quema yaya pano noixpa, amo niquita. Quema yaya nentinemi nonechca, amo nijmachilía. 12 Quema Toteco quititani miquilisti para quiiitzquis se masehuali, ¿ajquiya hueli quitzacuulis para ma amo quichihua? O ¿ajquiya mosemacas para quitatzintoquilis: ‘taya tijchihua?’ 13 Toteco Dios amo quitzacuillía icualancayo. Iixpa ya moehcapanose nochi cati mohueyimatij.

14 “Huajca ¿ajquiya na para nimonajnanquilis ihuaya Toteco Cati Quiipiya Nochi Chichahualisti? ¿Ica taya camanali huelis nimomanahuis iixpa?”

¹⁵ Masque amo teno nijchijtoc, amo hueli nimomanahuis ica miyac camanali. San nijtajtanisquía ma techtasojta huan ma quipiya hueyi iyolo ica na, pampa yaya Juez. ¹⁶ Masque nijnojnnotzasquía huan yaya technanquilisquía, amo nijneltoca para nelía techtacaquilisquía. ¹⁷ Yaya quimiyaquilisquía notaijyohuilis huan techtzontamiltisquía, masque amo teno nijchijtoc. ¹⁸ Yaya amo techcahuilía ma nitaijyotilana. San pano techtaijyohuilitía. ¹⁹ Sinta ticamanalti ten fuerza, Toteco Dios yaya cati más quipiya fuerza. Sinta ticamanaltisquía ten ajquiya más xitahuac, yaya tatanis. Amo aqui hueli quitelhuis ica yon se tamanti. ²⁰ Masque na niquijtosquía amo nijhuica tajtacoli, ica nocamac nimotelhuisquía. Huan masque niquijtosquía para amo aqui huelis techtelhuis, Toteco Dios techilhuisquía para senquisa nitajtacolchijquet.

²¹ “Masque amo teno nijchijtoc, niquita para amo teno ipati. ¡Niquijiya nonemilis! ²² Toteco quinita cati xitahuac huan cati tajtacolchihuaj quej san se. Yeca niquijtohua para san se quitzontamiltía cati cuali huan cati amo cuali. ²³ Quema huala se fiero cocolisti ipan masehualme cati amo teno quichijtoque, yaya san huetzca. ²⁴ Quema se tali huetzi inimaco tacame cati mosisiníaj, Toteco Dios quinixtzacua nopa tetajtolsencahuani huan quincagua ma quichihuaca cati amo xitahuac. Sinta amo ya Toteco Dios cati quincagua ma quichihuaca cati amo xitahuac, huajca, ¿ajquiya quichihua?

²⁵ “Nonemilis panotiya chicahuac quej se motalojquet. Quena, nimantzi pano huan amo niquita se talojtzi ten paquilisti. ²⁶ Quej se pilcuaacaltzi yahui chicahuac ipan at huan se cuatojti chicahuac patani para quitzquis se piyo, quej nopa nojquiya nimantzi panotiya nonemilis. ²⁷ Masque nijchihuilita campeca para niquelcahuas notaijyohuilis huan nijcahuasquía notequipachol huan nijchihuasquía campeca para niyolpactos, amo techpalehuisquía.

²⁸ “Ta Toteco noja más taijyohuiliti techtitanilisquía. Pampa nijmati ta, tiToteco Dios, techita para amo nixitahuac moixpa. ²⁹ Masque nijchihua cati cuali o cati amo cuali, ta temachtí techtatzacuilitis. Huajca ¿para ten nijchihuas campeca? ³⁰ Masque nimaltisquía ica at huan nimomajtequisquía ica nopa xapo cati más tapajpaca, ³¹ ta techcalaquisquía ipan se soqui ostot huan techchihuasquía nelía nisoquiyo hasta noyoyo nojquiya techijiyasquía.

³² “Toteco amo ya se tacat quej na para huelis nimonajnanquilis ihuaya. Amo hueli nijhuicas iixpa se juez para nijtelhuis. ³³ Nipaquisquía sinta itztosquía se cati huelisquía motajcoquetzas tatajco ten na huan Toteco Dios para techyoltalisquía, pero amo aquí. ³⁴ Sinta itztosquía se cati motajcoquetzasquía, quichihuasquía para Toteco Dios na ayecmo techtaijyohluiti, huan ayecmo niquimacasisquía itatzacuilitis. ³⁵ Huajca nihuelisquía nijcamanalhuisquía Toteco huan amo niquimacasisquía. Pero amo hueli nijchihuas san ica na nochicahuilis.

10

¹ “Ya niclesijqui niitztoc. Yeca nijnequi techcahuilica para nicamanaltis. Niitztoc ipan tacuajcualocayot huan ipan hueyi tequipacholi. ² Huan niquilhuisquía Toteco Dios: ‘Amo techtatzacuiliti san pampa tijnequi. Más cuali techilhui para ten techtatzacuilitía. ³ ¿Ta tiquita cuali para techtaijyohluitis huan techcualancaitas na cati techchijchijqui ica momax? ¿Para ten tiquinpaquilismaca fiero masehualme huan tiquinpalehuía ma quisaca cuali? ⁴ ¿Ta tiquita tamanti san quej tojuanti timasehualme tiquitaj? ⁵ ¿Ta

monemilis nojquiya amo huejcahua quej tonemilis? ⁶ ¿Huelis yeca tijtemohua taixpanoli huan tajtacoli masque tijmati amo teno nijchijtoc? ⁷ ¿Ta techtatzacuiltia quema amo teno nijchijtoc pampa tijmati para amo aqui hueli techmanahuis momaco?

⁸ “Ta techchijchijqui ica momax, pero ama timoyolpatatoc huan techt-zontamiltia. ⁹ Xiquelnamiqui para ta techchijchijqui ica soquit, huan ¿ama sempa techchihuas ma nimocuepa taltepocti? ¹⁰ Ten ipejya nonemilis ta tiitztoya nopona techcualchijchihuayaya iijtico nonana. ¹¹ Ta techpijqui ica nocuetaxo huan ica nonacayo. Tiquinmotzquilti noomiyohua huan notalohua. ¹² Ta techmacac nemilisti huan tahuel techicnelijtoc. Pampa ta techmocuitahujtoc, yeca niyoltoc.

¹³ “Pero nijmati para nochipa ta techtachilijtoc ixtacatzí para tiqitas sinta nitajtacolchihuas, ¹⁴ para huelis techtatzacuiltis huan amo techtapolpohuis notajtacolhua. ¹⁵ Huan teicnelti na sinta nitajtacolchijtoc. Huan sinta amo teno nijchijtoc, amo teno ipati. ¡Amo techpalehuía! San tahuel nimopinahuajtijtoc huan nitaijyohujtoc. ¹⁶ Huan sinta nijchihuasquía campeca para nimotananas, ta tihuitonisquía ipan na quej se hueyi tecuani huan technextilis mohueyi chichualis para techcocos. ¹⁷ Eltoc quej talojtzitzi tiquinhualica más testigos para techtelhuise huan para más technextilis mohueyi cualancayo. Eltoc quej techtitanilía más soldados talojtzitzi para techtaijyohuiltise.

¹⁸ “¿Huajca para ten techquixti iijtico nonana? Más cuali nimictosquía quema san niontacatqui huan amo aqui techitztosquía. ¹⁹ Quej nopa amo quema niitztosquía, yon amo nijpanosquía ni taijyohuilisti. Más cuali san nipanosquía ten iijti nonana hasta campa techtalpachojtosquíaj. ²⁰ Ama san pilquentzi tonali mocahua para noja niitztos, huajca techtalcahui para nimoyoltalis se quentzi. ²¹ Nimantzi niyas ipan nopa tali ten miqulisti campa onca tzintayohuilot huan ayecmo quema nitacuepilis. ²² Ipan nopa tali onca se tzintayohuilot cati más yayahuic huan amo aqui quimati taya quichihuas. Nopona cati quiiitaj para taahuili nojquiya eltoc senquisa tzintayohuilot.”

11

Zofar quihui Job para Toteco quita nochi taixpanoli

¹ Zofar, cati ehua Naamat, quihui Job:

² “Monequi na nimitznanquilis ica nochi cati tiqijtojtoc huan nimitztilquetzas. ¿Timoilhuía icamanal se tacat cati camanalti miyac quinextía para más quimati? ³ Amo teno huelis niqijtos quema ta ticamanalti tahuel miyac. Monequi para se acajya mitzpinahualtis pampa tijpinajtía Toteco Dios. ⁴ Ta tiqijtojtoc para motamachtíl nelxitahuac huan para timoilhuía tiitztoc xitahuac iixpa Toteco. ⁵ Cualí elisquía sinta Toteco Dios camanaltisquía huan mitzilhuiscuía nochi cati yaya moilhuía ica ta. ⁶ Cualí elisquía sinta mitzchihuascuía titalnamictoc pampa san yaya quimachilía sesen tamanti ixtacatzí ten talnamiquilisti. Tahuel ohui para se masehuali quipiyas talnamiquilisti. Xijtaquili ni: Toteco Dios mitztatzacuiltijtoc nelpilquentzi huan amo quej quinaimiqui por motajtacolhua.

⁷ “¿Tiquixmati nochi cati ixtacatzí ten Toteco? ¿Tijmachilía nochi iyajatil Toteco Cati Quipiya Nochi Chichualisti huan hasta canque ontami cati yaya hueli quichihua? ¡Ta amo tijmati! ⁸ Eltoc pano hueyi nochi cati ixtacatzí ten

Toteco huan itamachiltis. Eltoc nelhuejcapa quej ilhuicacti. Pero ¿ajquiya ta para tijmachilis nochi ten italnamiqulis? Italnamiqulis Toteco eltoc tahuel iyoca ten nochi sequinoc talnamiqulisti. Nojquiya italnamiqulis Toteco yahui tahuel huejcata hasta campá más tatzinta. Amo teno huelis tijmachilis quej yaya tamachilía. ⁹ Huan italnamiqulis eltoc más hueyi que ni taltipacti huan más patahuac que hueyi at. ¹⁰ Sinta Toteco Dios huala para quitzacuas se acajya ipan tatzacti o sinta quinoztas se masehuali iixpa se juez para quitelhuis, ta amo tihuelis tijtzacuilis para ma amo quichihua. ¹¹ Yaya quinyolixmati cati tacajcayahuaj. Quiita nochi tajtacoli huan sesen quichihuilía cuenta. ¹² Se huihui tacat amo hueli mochiuas se talnamijquet, yon hueli se burro quitacatilis se masehuali.

¹³ “Xijnextili Toteco Dios cati eltoc ipan moyolo. Xijxitahua momax iixpa huan ximotatajti ica ya. ¹⁴ Xijcahua nochi motajtacolhua huan ximoquixtili nochi tamanti cati amo cuali ipan moyolo. ¹⁵ Huajca quena, tiixhuetzcas pampa tiitztos cuali iixpa Toteco huan ayecmo tijmahuilis. Tijpiyas fuerza iixpa huan ayecmo tipinahuas. Ayecmo tijpiyas yon se motajtacol cati mitzsoquihuisquía iixpa. ¹⁶ Quej nopa tiquelcahuas nochi mitajyohuilis. Huan sinta tiquelnamiquis, tiquitas para san taloch panoc quej elisquía at cati san panotiquisa moixpa. ¹⁷ Nochi monemilis elis cuali. Cahuanis monemilis quej tonati ipan tajcotona. Cati teipa timoilhuis para tzintayohuilot, elis quej ama quema tanestihuala pampa nochi monemilis elis quej tatanexti. ¹⁸ Huan ta tiitztos temachti pampa timotemachía ipan Toteco Dios, huan yaya mitzmocuitahujtos. Tijtachilis cati yahualtic, huan tiquitas para eltoc cuali. Ticochis ica paquilisti. ¹⁹ Quema timotecas, amo teno mitzmajmatis. Huan miyac masehualme quitemojtihualase motapalehuil. ²⁰ Pero fiero tacame amo huelise momanahuise yon amo huelise mochololtise. Inijuanti san hueli mochiyase para miquise.”

12

Job quiilhui Zofar para inemilis se tacat eltoc imaco Toteco

¹ Huan Job quiilhui Zofar:

² “Temachti amojuanti anquimatij nochi. Huan quema anmiqueise, ayecmo itztos yon se masehuali cati talnamiqui. ³ Pero na nijpiya talnamiqulisti nojquiya. Amojuanti amo más ancujcualme que na. ¿Ajquiya amo quimati nochi cati antechilhuijtihualajtoque? ⁴ Achtohuiya nimotatajtiyaya ica Toteco Dios huan yaya techmacayaya cati nijtajtaniyaya. Pero ama nochi nocalnechcahua san techhuetzquilíaj. Masque na se nitacat cati nixitahuac, ama nochi techpinajtíaj. ⁵ Tacame cati nochi quiipiyaj quinpinajtíaj masehualme cati taijyohuíaj. Amo quinequij quinitase cati motepotaníaj. ⁶ Toteco quincahua tachtequini ica tasehuilisti, huan cati quicalancamacaj itztoque ica temachili. Nochi cati inijuanti quiipiyaj Toteco quitaltijtoc inimaco.

⁷ “Nochi quimatij para TOTECO quichijchijqui nochi tamanti. Xiquintatzintoquili nopa tapiyalme cati más huihuitique huan inijuanti mitzilhuise. Inijuanti quimatij para melahuac TOTECO quinchijchijqui. Xiquintatzintoquili nopa totome cati patantinemij. Inijuanti quimatij. ⁸ Nojquiya mitznextilis ni taltipacti o nopa michime cati itztoque ipan hueyi at. ⁹ Nochi quimatij para TOTECO quinchijchijtoc. ¹⁰ Ininemilis nochi masehualme huan nochi tamanti cati yoltoque eltoque imaco TOTECO. Yaya huelis quinquixtilis iniijyoyo quema ya quinequi. ¹¹ Quej tocamac quimachilía iajhuiyaca sesen

tamanti tacualisti, totacaquilis hueli quicaqui huan quimachilía catijqui camanali eltoc cuali. ¹² Huan huehuentzitzí quiپیای talnamiquilisti huan quimachilíaj miyac tamanti.

¹³ “Pero san yaya Toteco Dios quiپیای nopa talnamiquilisti huan chicahualisti cati nelía melahuac. San yaya hueli techmaca consejo cati quinamiqui. San yaya quimachilía nochi tamanti.

¹⁴ “Cati Toteco Dios quimosolohua, amo aquí hueli quicualtalis sempa. Huan sinta yaya quitzacuas se tacat, amo aquí huelis quiquixtis. ¹⁵ Quema Toteco quichihua ma amo huetzi at, huajca nochi huaquí huan mocahua quej se huactoc tali. Huan quema yaya quichihua ma huetzi at chicahuac, nochi tatemi huan tahueloni.

¹⁶ “Yaya quiپیای nochi chicahualisti huan talnamiquilisti. Quiپیای tanahuatili ica nochi cati tacajcayahuaj huan ica nochi cati quincajcayajtoque. ¹⁷ Toteco quinquixtilía inintalnamiquilistis cati tetalnamictíaj para ma quichihuaca tamanti cati amo quinamiqui. Quinhuihuítílía jueces. ¹⁸ Yaya quinquixtilía inintanahuatíl tanahuatiani huan quichihua ma quinhucica ilpitoque ica lazos ipan inintzinquehta para ma tetequipanotij. ¹⁹ Toteco quinquixti ten inintequi totajztitzí huan quichijqui ma quinhucaca para tetequipanotij san tapic. Quintahuiso nopa masehualme cati tahuel chicahuaque. ²⁰ Yaya quinchihua ma ayecmo camanaltica cati talnamiquij. Quincuítílía inintalnamiquilistis nopa huejhueyi tacame para ayecmo teconsejocase. ²¹ Yaya quinpinahualtía tanahuatiani. Quinquixtilía inintepos injuanti cati quiپیای chicahualisti.

²² “Yaya quitamiltía tzintayohuilot huan miqulisti ica itaahuil. ²³ Toteco Dios quinchihua sequij talme ma mochihuaca tahuel chicahuaque, huan Toteco Dios quintzontamiltía nopa talme cati quinequi. Quinhueyílía sequij talme, huan sequij quinsosolohua huan quintahuelcahua. ²⁴ Yaya quinquixtilía inintalnamiquilistis tanahuatiani ipan taltipacti huan quinchihua ma mocuapolojtinemica ipan se huactoc tali campa amo onca ojti. ²⁵ Quinchihua ma nejnemica ipan tzintayohuilot campa amo onca yon se taahuili. Quinchihua ma mocuapoloca quej ihuintini.

13

Job quitajtani Toteco para ayecmo ma quitaijyohuilti

¹ “Xiquita, nochi cati amojuanti anquijtohuaj ya niqiztoc ica noixteyol, huan ya nijcactoc ica nonacas. Nochi ya nopa nijmachilía. ² Nochi cati anquimatij, na nojquiya nijmati. Amo ximoilhuica se nihuihui tacat. Amo más anquimatij que na. ³ Pero na tahuel nijnequisquía nicamanaltis ihuaya Toteco Cati Quiپیای Nochi Chicahualisti. Nijnequi niqixnextis nochi ni tamanti para nimomanahuis. ⁴ Pero amojuanti san antechtaijilhuíaj ica istacatili. Anitztoque quej antepajtiani cati amo hueli anquichicahuaj yon se masehuali. ⁵ Cualí elisquía sinta amo teno anquijtosquíaj huan quej nopa nelía annessisquíaj antalnamiquij. ⁶ Ama techtacaquilica se quentzi. Xijtacaquilica cati niqijtos para nimomanahuis.

⁷ “¿Anquisenhuiquillise ancamanaltise quej elisquía anquipiay itequiticayo Toteco Dios? Yaya amo amechilhuitoc yon se camanali. Nochi cati anquijtohuaj san istacatili huan tacajcayahualisti. ⁸ ¿Timoilhuía Toteco Dios quinequi xiistacatica huan para quej nopa anmonajnanquillise ipan ya itoca? Monequi amo aquí anquichicoicnelise, yon ya, yon na. ⁹ Ximomocuitahuica para Toteco ma amo quiita nochi cati anquichihuj. ¿Anmoilhuíaj anhuelise

anquicajcayahuase Toteco quej antecajcayahuaj? ¹⁰ ¡Amo! Yaya amechtatza-cuultis chicahuac sinta anquichicoicnelíaj ya huan amo anquichihuaj san cati xitahuac. ¹¹ ¿Amo amechmajmatía ihueyitilis Toteco Dios? ¿Para ten amo anquiimacasij? ¹² Nochi nopa camanali cati antechilhuijtoque amo teno ipati. Eltoc quej taltepocti. Huan nochi cati anmoilhúaj para ica anquimanahuisse eltoc quej se soqui comit.

¹³ “Hujca ayecmo ximolinica. Techcahuilica ma nicamanalti na. Ya nimocualtalijtoc para niquijyohuis ten hueli taijyohuulisti cati hualas teipa.

¹⁴ Nicamanaltis masque na nijmati por nocamanal Toteco hueli techmictis.

¹⁵ Pero masque Toteco Dios techmictisquía, noja nimotemachisquía ipan ya huan nimomanahuisquía iixpa. ¹⁶ Huan ya ni huelis techpalehuis para nijnextis amo teno nijchijtoc, pampa se tacat cati amo cuali amo monechahuis iixpa Toteco Dios.

¹⁷ “Xijtacaquilica cuali nochi cati niquijtos. Quena, techtacaquilica.

¹⁸ Xiquitaca, na nimocualtalijtoc ica taya nimomanahuis pampa nijmati para huelis nijnextilis para amo teno nijchijtoc. ¹⁹ ¿Ajquiya hueli techtelhuis ica se tamanti cati amo cuali cati nijchijtoc? Sinta amojuanti antechnextilisquíaj para melahuac nijchijtoc cati amo cuali, ayecmo sempa nimomanahuisquía hasta nimitiquis.

²⁰ “Toteco Dios, chicahuac nimitztajtania para ayecmo techchihuili ni ome tamanti para huelis nicamanaltis mohuaya: ²¹ Ayecmo más techtaijyohuulti. Huan nojquiya amo techmajmati quema niitztoc moixpa huan nijmachilía mohueyi chichualis. ²² Hujca technotza huan techtatzintoquili huan na nimitznanquilis. O sinta tijequei, na nimitzcamanalhuis achtohui huan ta technanquilis. ²³ ¿Se favor, san techilhui taya tamanti cati amo cuali nijchijtoc? Technextili notaixpanolhua huan notajtacolhua. ²⁴ ¿Para ten timohuejcatalía ten na? ¿Para ten techita quej nielisquía nimocualancaitaca? ²⁵ ¿Tijtajiyo huultisquía se xihuit cati huetzqui ten se cuahuit huan quipatanaltía ajacat? ¿Tijtepotztocas itasolo trigo cati quihuica ajacat huan amo teno ipati? Hujca ¿para ten techtepotztoca na cati amo teno nopati?

²⁶ “Eltoc quej tiquijcuilojtoc miyac fiero tamanti para ica techtelhuis. Eltoc quej techelnamiquiltía nochi notajtacolhua cati nijchijqui quema nieliyaya nitelpocat. ²⁷ Eltoc quej tijcuapistatoc noicxi ipan cuahuit para amo nicholos. Techtachilijtinemi campa ninejnemi. Tijtalijtoc sellos tatzinta ten noicxi para campa hueli ninemis nijsellojhuis nopa tali huan tijmatis para na. ²⁸ Na nieltoc quej se cuahuit cati huetztoc huan más palani mojmosta. Niitztoc quej se yoyomit cati mejtolime ya quitamicuajtoque.

14

Job quiijto para nimantzi tami inemilis se masehuali

¹ “Amo huejcahua inemilis yon se masehuali. Temitoc sesen tonali ten inemilis ica taijyohuulisti. ² Timasehualme tiitztoque quej se xochit cati cahuani se talojtzi huan teipa pilini. O tiitztoque quej iecahuil se mixti cati san pano huan nimantzi ixpolihui.

³ “Toteco Dios, ¿para ten tijtatzquiltijtoc moixteyol ipan na para techtajtanis cuenta? ⁴ Amo aqui huelis quipantis cati tapajpactic ipan se tacat quej na cati nitacatqui ica tajtacoli. ⁵ Toteco, ta tiquixquetztoc quesqui tonati sesen masehuali itztos huan nelcototzi tonemilis. Quena, ta tiquixquetztoc quesqui metzti sesen ten tojuanti tiitztose huan amo aqui hueli quitailis

yon se tonati más. ⁶ Huajca techcahuili nochi timasehualme se quentzi tonali para ma timosiyajquetzaca. Xiquijcueni mohueyi cualancayo se talojtzi para ma caxani. Tiitztoque quej titetequiapanohuani. Techcahuili ma tijtamiltica nopa tequit cati techmacac ma tijchihua.

⁷ “Quema tacame quitzontequij se cuahuit, noja onca pajti para chamanis huan sempa quiipiyas imacuayohua cati selic. ⁸ Huan masque inelhuayohua nopa cuahuit huehuejtiyasquíaaj tatzinta tali huan icuatsonyo palanisquía, ⁹ quema quiajsisquía at, sempa chamanisquía. Quena, quema inelhuayohua moxoxohuilisquíaaj elisquía quej yancuic ixhuatos.

¹⁰ “Pero quema se tacat miqui, ayecmo onca chicahualisti ipan ya. San tami taijyotilana huan ayecmo itztoc. ¹¹ Quej apocti tejco ten hueyi at huan amo mocuepa, huan quej se hueyat huaqui huan san polihui, ¹² quej nopa nojquiya tami se masehuali cati miqui. Ayecmo motanas hasta quema ayecmo oncas ilhuicacti, yon ayecmo isas.

¹³ “Toteco, cuali elisquía sinta techtatisquía ipan nopa hueyi ostot campa itztoque mijcatziti huan techelcahuasquía hasta tamisquía mohueyi cualancayo. Pero xiquixquetza se tonali quema sempa techelnamiquis.

¹⁴ Sinta se masehuali miquis, ¿sempa moyolcuís? Sinta quena, nelía techpactisquía miyac. Huan mojmosta ipan nonemilis nimochiyas hasta ta techmalacanis ten ni taijyohuilisti para ma nimiqui. ¹⁵ Sinta ta technotzasquía, na niyasquía. Huan ta techselisquía ica miyac taicnelijcayot pampa techchijchijqui ica momax. ¹⁶ Huan ta tijpohuasquía sesen huelta canque nijtali noicxi, huan amo tijpohuasquía notajtacolhua. ¹⁷ Tijtatisquía nochi notaixpanolhua ipan se coxtali. Huan tiquixpolosquía nochi notajtacolhua.

¹⁸ “Ta tijtamiltía cati quichiya se masehuali quej tepeme huelonij huan mochihuaq cuehtic huan nopa teme tepehuij ten se tepexit.

¹⁹ “Tijtamiltía nochi cati quichiyaj masehualme quej miyac at quichihua nopa teme ma mocuepaca xali, huan miyac at cati huetzi quichihua ma mohuahuatatza miyac tali. ²⁰ Nochipa tiquintani masehualme huan teipa san ixpolijtehuaj. Tiquinchihua masehualme ma huehuejtiyaca huan ma ixcuijcuilichijtiyaca huan teipa miquij. ²¹ Huan quema ya mictoc se masehuali, ayecmo quema quimatis sinta iconehua moscaltise huan quiselise tatepanitacayot o pinahualisti. ²² Yaya san quimachilía tacuajcualocayot ipan itacayo huan mocuesohua ica nopa taijyohuilisti.”

15

Elifaz quiajhuac Job

¹ Huajca, Elifaz cati ehua Temán, quiilhui Job:

² “Amo quinamiqui para se talnamijca tacat quej ta, camanaltis quej nopa. Nochi camanali cati tiquijtojtoc san eltoc quej ajacat. ³ Amo cuali para se masehuali camanaltis huihuiyot. Mocamanal amo cuali huan amo mitzpalehuía. ⁴ ¿Amo tiquimacasi Toteco Dios? ¿Amo tijtepanita? ⁵ Motajtacol mitzchihua xicamanalti quej nopa. Quena, ticamanaltic quej se tacajcayajca tacat. ⁶ Huajca amo monequi na nimitztelhuis. ¡Amo! Mocamac ta, ya nopa mitztelhuijtoc.

⁷ “¿Timoilhuía para ta tiachtohui tacat ipan ni taltipacti? ¿Titacatqui hasta quema ayemo oncayaya tepeme? ⁸ ¿Huelis ta tijcayqui nochi tamanti cati ixtacatzi cati Toteco moilhui quichihuas? ¿Huelis san ta tijpiya nochi talnamiquilisti? ⁹ ¿Taya tijmati cati tojuanti amo tijmatij? ¿Taya más tijmachilía

cati tojuanti amo tijmachilíaj? ¹⁰ Tatajco ten tojuanti itztoque huehue tacame cati tzonchipahuaque huan quipiyaj más xihuit que motata.

¹¹ ¿Timoilhuía tiquita para amo teno ipati para Toteco Dios mitzyoltalis ica nochi ni yejyectzi camanali cati tojuanti timitzmacaj? ¹² ¿Para ten timoyolpatatoc huan ticalancatachiya? ¹³ ¿Para ten tijcualancaita Toteco Dios huan tijtajilhuía ica camanali cati fiero? ¹⁴ ¿Quenicatza huelis se masehuali mochihuas tapajpactic iixpa Toteco? ¿Huelis se cati tacatqui ten se sihuat mochihuas xitahuac quej ta tiquijtohua? ¹⁵ ¡Xiquita! Toteco Dios amo motemachía ipan iilhuicac ejcagua. Yon ilhuicacti amo eltoc senquisa tapajpactic iixpa. ¹⁶ Sinta quej nopa eltoc, ¿quenicatza huelis yaya motemachis ipan se tacat quej ta cati mosisinía huan senquisa tajtacolchihua huan quinequi quichihuas miyac tamanti cati amo cuali?

¹⁷ “Sinta techtacaquilis, nimitzpohuilis cati nijmati huan cati niquitztoc. ¹⁸ Nimitzpohuilis nopa tamachtili cati talnamijca tacame quiselijque ten inihuejapan tatahua. ¹⁹ Inintatahua elque cati quiselijque nopa tali huejcajuiya quema ayemo ajsiyayaj tacame ten sequinoc talme para mosejcotilise inihuaya.

²⁰ “Se tacat cati amo cuali huan cati tahuel mosisinía quipantía taijyohuilisti ipan nochi inemilis. ²¹ Quema quicaqui tahuejchihualisti, momajmatía. Quema nochi eltoc cuali, hualahui tachtequini huan quitachtequilíaj. ²² Majmahui para quisas ica tayohua. Moilhuía tacame quimictise. ²³ San motajtanijtinemij tucalisti. Quiijtohuaj ¿canque onca pantzi? Fiero tacame quimatij nechcatitoc para tamis inemilis. ²⁴ Itztoque ipan majmaji huan tahuel mocoesohuaj quej se tanahuatijquet cati mocualtía para quintehuis icualancaitacahua. ²⁵ Fiero tacame quitananaj inimax iixpa Toteco Dios para quimacase. Quej nopa quiixpanoj Toteco Cati Quipiya Nochi Chicahualisti. ²⁶ Motzacuaj ica iniyolixtepostzajca cati tilahuac para quinmanahuis huan motalohuaj campa ya.

²⁷ “Nopa fiero tacame motomajtoque huan moricojchijtoque, ²⁸ pero monequi itztose ipan altepeme huan calme cati tami sosolijtoque campa amo aquijme pampa nochi quintamimictijque. ²⁹ Nopa tacame amo elise tominpiyani para nochipa, yon amo quisenhuiquilise moaxcatise tamantzitzi para mochihuase huejhueyi ipan iníntal.

³⁰ “Fiero tacame mocahuase ipan tzintayohuilot para nochipa huan amo hueli cholose. Se tit quintzontamiltis huan Toteco ica iijyoyo quintamiltis. ³¹ Huajca se tacat cati amo cuali ma ayecmo motemachi ipan iricojyo pampa amo huejcahuas. Yon ayecmo más ma mocajcayahua, pampa ica nopa tomi amo hueli mocohuis cati yaya quiyoltemohua. Huan teipa iyolo elis cactoc. ³² Fiero tacame miquij quema ayemo ajsi tonali huan tamis nochi tamanti cati ipan motemachiyajaj. ³³ Inijuanti elise quej se xomecat cati quitequilijque itajca quema ayemo icsiyaya. O elise quej se olivo cuahuit quema huetzi ixochiyo huan ayecmo hueli temaca itajca. ³⁴ Ininonehua amo cuajcualme amo momiyaquilíaj. Nopa tacame san quinpectía quiselise tomi itxatcatzi huan quitemitíaj ininchaj ica miyac tamanti. Huajca Toteco quintzontamiltis ica tit. ³⁵ Inijuanti san huelij quiyoliltíaj tajtacoli huan tequipacholi. Ipan iniyolo san moilhuíaj quenicatza hueli tacajcayahuase.”

16

Job quiilhui Elifaz para ya quipiya Itatempalehuijca

¹ Huajca Job quiilhui Elifaz:

² “Na nijcactoc miyac huelta nochi ya nopa. Amojuanti amo nelía antechyoltalíaj. San achi más antechtaijyohuilitíaj. ³ ¿Amo quema anmoquetzase ancamanaltise? ¿Para ten tahuel anhuejcahuaj ica camanali cati amo teno ipati? ⁴ Na nojquiya nihuelisquía nicamanaltis quej amojuanti sinta amojuanti anmopantisquíaaj ipan taijyohuiliti. Nimechtaijilhuisquía huan nicolinisquía notzonteco huan nimechpinajtisquía. ⁵ Pero amo ya nopa nijchihuas. Nimechcamanalhuisquía para nimechpalehúis huan nimechyoltalis. Nijchihuasquía campeca para xiquelcahuaca amotaijyohuilis. ⁶ Pero na nijsenhuiquilitía nitaijyohuía masque nicamanaltisquía para nimomanahuis o amo nicamanaltisquía.

⁷ “Toteco Dios, ta techtaijyohuilitjotoc huan techquixtilijotoc nofamilia. ⁸ Techchijotoc nicocoxquetzi huan niteicneltzi, huan ni tacame quijtohuaj para ni tatzacuilti san techajsi por notajtacolhua.

⁹ “Toteco tahuel techcualancaita. Yaya quitzayanqui nonacayo. Motanhuehuechotza ica cualanti huan chicahuac techtachilía. ¹⁰ Nochi masehualme cati hualahui para techyoltalise techhuetzquilitíaj huan san techmaquilíaj ipan noxayac. Nocualancaitacahua mosentilíaj para techpinajtise. ¹¹ Huan Toteco Dios techtemactilijotoc inimaco tajtacolchihuani huan inimaco tacame cati fiero ininemis.

¹² “Na niitztoya cuali huan ica paquilisti huan Toteco Dios pejqui techtaijyohuilitia. Techitzqui noquechta huan techmajcajqui talchi huan quichijqui cuehtic nochi notacayo. Teipa techcuahuyoni huejcapa para techmelaitas ica cuataminti. ¹³ Isoldados techyahualojque huan techmajcahuilitijque cuataminti. Quitamicocojtoque notacayo huan ni tali xolonqui ica noeso. Yon quentzi amo techtasojtaque. ¹⁴ Talojtzitzi Toteco quisenhuiquilitía techmaquilía. Techtepotztoca quej se tatehujquet. ¹⁵ Nica nimosehujotoc huan nimoquentjotoc nopa fiero yoyomit cati quinextía notequipachol. Ipan notzonteco nijtemilía cuajnexti. Ya nimotemacatoc iixpa. ¹⁶ Noixteyolhua nochi chichilitic pampa tahuel nichocatoc. Semajot huan yayahuic noixten-cuetaxo hasta nesi para nimiquisnequi. ¹⁷ Quej nopa nopantitoc, masque amo quema nimosisinijotoc. Huan nochi cati niquilhui Toteco Dios quema nimomajtohua * ica ya elqui cuali.

¹⁸ “Monequi se quitajtolsencahuas xitahuac para na. Ni tali ma amo qui noeso para amo aqui quiitas. Xijcahua noeso ma huejchihua para quinextis notaijyohuilis. ¹⁹ Pero yaya cati noTestigo huan noTatempalehuicja itzto huejcapa ipan ilhuicac. Yaya Toteco techita huan quimati para amo nijhuica tajtacoli. ²⁰ Nohuampoyohua techpinajtíaj, pero na nimochoquilía iixpa Toteco. ²¹ Cuali elisquía sinta itztoquía se cati motajcoquetzasquía ica Toteco Dios huan ica na quej quichihua se tacat cati motajcoquetza ica ome ihuampoyohua. ²² Pampa amo huejcahuas para nimiquis huan niyas ipan nopa ojti campa ayecmo quema nitacuepilis.

17

¹ “Noyoltzi techcocohua huan tahuel nimocuesohua hasta nijmati para nimiquis. Nopa ostot eltoc tasencahuali para ipan techtalpachose. ² Techyahualojtoque miyac masehualme cati techpinajtíaj. Campa hueli itztoque cati techhuetzquilitíaj.

³ “¡Ay Toteco Dios! Monequi ta techpalehúis huan tijnextis para amo nijhijotoc cati amo cuali pampa amo aqui más hueli techpalehúis. ⁴ Ta

* 16:17 16:17 Nimotatajtía.

tijtactoc inintalnamiqulis ni tacame para ma amo quimachilica, pero amo xiquincahuili ma techtanica. ⁵ Fiero tacame cati quiselíaj tomi para quin-telhuise inihuampoyohua quipantise para taijyohuise inincone-hua huan mocahuase popoyotzitzi.

⁶ “Yaya Toteco Dios techpinahualtijtoc miyacapa. Quichijtoc para ma techhuetzquilica huan techixchajchaj nochi masehualme. ⁷ Nitachiya quej tamixtentoc pampa tahuel nichocatoc. Nonemilis tantiya quej se ecahuili. ⁸ Cuajcualme momajmatíaj quema techitaj.

“Huan se tonali injuanti motananase huan quintanise nopa masehualme cati amo teno quitepanitaj. ⁹ Quena, masehualme cati xitahuaque quisen-huiquilise nejnemise ipan iniojhui cati yahui huejcapa. Cati yoltapajpac-tique elise nopa más tetique huan quipiyase más chichahualisti.

¹⁰ “Pero xihualaca nochi amojuanti huan anquilitase para amo itztos yon se talnamijquet campa amojuanti. ¹¹ Pero ya panotoc nochi tonali cati cuali para na. Ixpolijfoc nochi cati nijchiyayaya. Nochi cati nimoilhujtoya nijchihuas, tanqui. ¹² Huan amojuanti tahuel amo anquinequij anquilitase ica cati melahuac. Anquijtohuaj para yohuali eltoc tonaya huan tonaya eltoc yohuali. ¹³ San nimochiya para nimiquis huan nimotecati campa tzintayohuilot. ¹⁴ Huan nipaquis ipan nopa ostot huan nijtocaxtis notata. Huan niquinselis nopa ocuillime ica paquillisti. Elis quej niquintocaxtis nonana huan nosihua icnihua. ¹⁵ Huajca ¿taya paquillisti techchiya? Amo aqui huelis quipantis se tamanti cati nijchiya. ¹⁶ Nochi cati nijchiyayaya yas nohuaya ipan noosto. San sejco timosiyajquetzati ipan taltepotci.”

18

Bildad sempa quiilhui Job

¹ Huajca Bildad cati ehua Súa quiilhui Job:

² “¿Hasta quema timoquetzas ticamanaltis? Xicamanalti ica camanali cati mitznexstis para titalnamiqui sinta tijnequi ma timitznanquilica. ³ ¿Para ten techita quej titapiyalme cati huilhuitique? ⁴ Ta tahuel timocualancamaca huan tijtzayana moyoyo. ¿Timoilhuía para ica ya nopa pehuas mojmolinis ni tali huan mijcuenise nochi teme?

⁵ “Se masehuali cati fiero inemilis quej ta, miquis huan itaahuil se-huis. Ayecmo tatas iti ipan icalijtic. ⁶ Teipa oncas tzintayohuilot ipan nochi calme campa onca tajtacolot, huan sehuisse nopa taahuilme cati eltoc ininechca. ⁷ Amo cuajcualme mohueyimati huan moilhuíaj para huelis tecajcayahuase, pero huetzise ipan taquetzti cati injuanti iniseltitzitzi quichijchijtoque.

⁸ “Campa amo cuajcualme nejnemij, quinpantiáj se matat. Huan ilpitoque ipan nopa matat huetzij ipan se ostot. ⁹ Eltoc quej se taquetzti quitzquía iniicxi huan se lazo quintamiilpía. ¹⁰ Campa nejnentiayahuij amo cuajcualme quinchiya se taquetzti para quinmasiltis. Pero injuanti amo quiitaj sinta eltoc taltita.

¹¹ “Tahuel majmahuij nopa amo cuajcualme campa hueli campa yahuij pampa quimatij cati fiero yahui inintepotzco. ¹² Ininchichahualis amo cuaj-cualme tantiya ica mayanti. Nochi masehualme quichiyaj para ma huetzica ipan tajtacoli. ¹³ Cocolisti quipalanaltía inincuetaxo amo cuajcualme. Huan miquillisti quitamiltía inintacayo. ¹⁴ Masque achtohuiya itztoyaj temachti ipan inintacayo, miquillisti quinquixtis ipan inintacayo huan quintemohuis

ipan nopa hueyi ostot campa itztoc nopa tanahuatijquet cati más temajmatía. ¹⁵ Masehualme quitatise ichaj se fiero tacat ica azufre huan tamis nochí cati quipiya. ¹⁶ Se fiero tacat elis quej se cuahuit cati huaqui inelhuayo taltita, huan teipa huaqui imacuayohua huejcapa. ¹⁷ Tamis nochí cati tajta-colchihuan quichijque ipan ni taltipacti huan ayecmo aquí quinelnamiquis. ¹⁸ Toteco Dios quinquixtis ten campa onca taahuili huan quinnajcahuas campa tzintayohuilot. Quinquixtis ten ni taltipacti. ¹⁹ Huan ayecmo mocahuas yon se inincone, yon se iniixhui huan yon se ininteixmatca ipan nopa tali campa itztoyaj. ²⁰ Masehualme cati itztoque campa hualquisa tonati hasta campa oncalaqui, momajmatíaj por cati ininpantis nopa fiero masehualme. ²¹ Quiijtose: ‘Ya ni elqui ichaj se cati quihuejcamajcajqui Toteco Dios huan amo quinejqui quixmatis.’”

19

Job quiijtohua para quipiya iTamanahujca

¹ Job quiihui Bildad:

² “¿Hasta quema anquicahuase antechtaijyohuiltise? ¿Hasta quema anquicahuase antechcocose ica amocamanal? ³ Majtacti huelta antechtelhuijtoque para nitaijyohuía por na notajacol. ¿Amo anpinahuaj antechilhuisse quej nopa? ⁴ Sinta melahuac nitajacolchijtosquía, huajca monequiyaya antechnextilise canque nimocuapolojtoc. ⁵ Anmoilhuíaj tahuel anhuejhueyi huan antechpinahualtíaj pampa techicnotalijtoque. ⁶ Pero cuali xijmatica ya ni. Eltoc Toteco Dios cati techchihuilijtoc cati amo cuali. Yaya cati techmasiltijtoc ipan imata.

⁷ “Na nitajzti chichahuac para yaya techchihuilijtoc cati amo cuali, pero amo aquí technanquillía para techpalehuis. Masque nichoca, amo aquí techchihuilía cati xitahuac. ⁸ Toteco Dios quitzactoc noojhui para amo hueli nipanos. Huan campa ninejnemi quicuctoc notaahuil ica tzintayohuilot. ⁹ Yaya techcuili nochí cati nijpixtoya huan quichijtoc para ayecmo aquí ma techtepanita. ¹⁰ Techtaijyohuiltijtoc campa hueli huan yeca ya nitantinemi. Quitamilti nochí cati cuali nijchiyayaya. ¹¹ Yaya tahuel cualani ica na huan techita quej se niicualcaitaca. ¹² Quintitanqui isoldados para ma techtehuica. Inijuanti mocualtalíaj para techitzquise huan para quiyahualose nochaj.

¹³ “Noteixmatcahua techhuejcatalijtoque huan nochí noicnihua quichihua quej amo techixmatij. ¹⁴ Nochi nocalnechcahua huan nohuampoyohua cati más nechca techtahuelcajtoque. ¹⁵ Nochi cati itztoque ipan nochaj huan notequipanojcahua, techitaj quej niehua seyoc tali. ¹⁶ Quema nijnotza notequipanojca, yaya amo technanquillía huan amo huala masque nijsenhuiquillía nijnotza. ¹⁷ Nosihua quiijiya noiyyoyo. Noicnihua amo quinequij techitase. ¹⁸ Hasta cati coneme nojquiya techcualancaitaj. Quema nimoquetza injuanti techhuihuiitaj. ¹⁹ Cati eliyayaj nocualhuampoyohua ama techijiyaj. Huan nochí cati tahuel niquinicnelía moicancuctoque ica na. ²⁰ San niomim nimocajtoc. Nechcatitoc niitztoc para nimiquis.

²¹ “Annohuampoyohua, techtasojtaca pampa yaya Toteco Dios cati techmacatoc. ²² ¿Para ten antechoquilitinemi quej Toteco Dios quichihua? ¿Amo anquiiatj para tahuel nitaijyohuía?

²³ “Cuali elisquía para se acayja quiijcuilosquía nochí nocamanal para amo aquí quielcahuasquía. ²⁴ Quitejtequisquía sesen camanali ipan se hueyi

tet ica se cincel huan quixtemitiscuía ica plomo para amo ixpolihuis para nochipa.

²⁵ “Na nijmati para itztoc noTamanahujca, huan ipan itamiya tonali yaya moquetzas ipan ni taltpacti. ²⁶ Huan masque palanis ni notacayo, teipa ica notacayo niquitas Toteco. ²⁷ Huan por na noselti niquitas. Quena, niquitas ica na noixteyol. Ica nochi noyolo nijnequiscuía nimantzi ma ajsi nopa tonali.

²⁸ “¿Quenicatza anmotemacaj para antechtaijyohuiltijtinemise? Anquichihuj quej eliscuía anquimatij para elqui na notajtacol, pero amo cana. ²⁹ Huajca nimechilhúa, ximomocuitahui pampa amoselti anmotemohuilíaj tatzacuilti por cati anquichihuj. Huan se tonali anquimatise para temacht Toteco Dios tetajtolsencahua.”

20

Zofar quinanquili Job huan quiajhuac

¹ Huajca Zofar, cati ehua Naamat, quillhui Job:

² “Na nimoisihuiltía para nimitznanquilis pampa nelía nicualani. Amo hueli niquijyohúa mocamanal, huan ama nimoilhuijtoc quenicatza nimitznanquilis. ³ Ica nochi cati tiquijtojtoc techpinahualtjtoc pampa timitzilhuijtoque para tijchjtoc cati amo cuali, pero ama notalnamiquilis techchihualtía ma nimitznanquili.

⁴ “¿Amo tijmati para hasta quema Toteco Dios quintali masehualme ipan ni taltpacti huejcajquiya, ⁵ amo huejcahua ipaquilis se tacat cati amo cuali? Se fiero tacat san hueli tatani para se talojtzi. ⁶ Masque se tacat cati amo quitepanita Toteco Dios tahuel mohueyimati huan quimati itzonteco quiajssicuía ne mixti, ⁷ yaya tamis para nochipa. Huan masehualme quimajcahuase itacayo quej eliscuía cuitat. Huan nochi cati quixmatque motatzintoquilise ¿canque itztoc? ⁸ Ixpolihuis quej se temicti, o quej se tanextili cati monextía ica tayohua huan ayecmo aquí huelis quipantis. ⁹ Yon ifamilia, yon ihuampoyohua nopa tacat cati amo quitepanitac Toteco, ayecmo quema quiiatase. ¹⁰ Huan iconehua quitajtanise tapalehuili cati hueli masehuali masque teicneltziti. Sequinoc quinchihualtise ma tequitica nelchicahuac para quicuepase cati inintata quiichtejqui. ¹¹ Huan nopa fiero tacat cati san eltoya se tellocat huan eltoya fetic, ama mictoc huan iomiyohua mocuetoc taltepocti.

¹² “Tahuel quipacti nopa fiero tacat para quichihuas cati amo cuali hasta quimachili quej eliscuía ajhuyiac ipan icamac. ¹³ Quiajocuiyaya icamajiti huan ica yolic quitolohuayaya para amo tamis nimantzi. ¹⁴ Pero ica se talojtzi, eltos quej nochi nopa tamanti cati quicujtoc, xocoyas ipan iijti. Mochihuas quej inintencococa cohame iijtico. ¹⁵ Huan quiiotas nochi nopa ricojyot cati quiihtectoc pampa Toteco Dios amo quicahuilis ma quixixto. ¹⁶ Eltoc quej se fiero tacat quichichina inintencococa cohame huan se cohaut quitzacanis huan quimictis. ¹⁷ Yaya quiihtejqui tahuel miyac aceite, sayol necti huan queso, pero ama ayecmo quema quicuas. ¹⁸ Nopa tequit cati quichihuyaya para tachtequis elis san tapic. Cati quicuitoc monequi quicuepas. Amo teno mocahuas para ica mopaquilismacas. ¹⁹ Yaya quintaijyohuilti cati teicneltziti huan moaxcati calmé cati yaya amo quichijqui. Amo teno mocajqui inimaco nopa teicneltziti. ²⁰ Nochipa nopa fiero tacat quinequiyaya más tamanti. Pero masque tahuel quipacti moaxcatis tamanti cati amo iaxca, ama amo teno quipiya. Huan ica nochi cati quinejqui

quipiyas, amo huelis momaquixtis ama. ²¹ Masque quitamicuajqui nochi tamanti, cati quipiya amo huejcahuas.

²² “Quema tahuel moricojchijtoc nopa fiero tacat, quipantis miyac tao-huijcajot, cati quitzontamiltis. ²³ Quema nechcatitoc para temis iijti ica nochi cati cuali, Toteco Dios quititanis ihueyi cualancayo ipan ya. ²⁴ Sinta quinequis mochololtis ten Toteco, Toteco quitepotztocas huan quiajssis ica icuatamin. ²⁵ Quiquixtis nopa cuataminti cati sentapalo ipan itacayo huan iyecapa quipixtos ichichica. Se hueyi majmajti quiiitzi quia huan yaya miqui.

²⁶ “Nochi iricojyo tami quema yaya miqui huan yahui ipan nopa hueyi ostot campa tahuel tzintayohua. Se hueyi tit quitamitatis ya huan nochi cati quicajtejtoc ipan ichaj. ²⁷ Toteco Dios quipanextis itajtacolhua nopa masehuali. Huan masehualme cati itztoque ipan ni taltipacti motananase para quitelhuise. ²⁸ Elis quej hualas miyac at huan quihuicas ichaj huan nochi iricojyo pampa Toteco Dios tahuel cualantoc ihuaya. ²⁹ Ya ni cati ininpantis amo cuajcualme pampa ya ni cati Toteco Dios quinajocuilijtoc.”

21

Job quinanquili Zofar quenicatza yaya cualani ica Toteco Dios

¹ Huaica Job quiihui:

² “Xijtacaquilica cuali cati nimechilhuis huan san ya nopa techyoltalis.

³ Nimechtajtanía techcauilica nicamanaltis huan quema nitamis, xijsen-huiquilica techpinajtica sinta anquinequi.

⁴ “Na amo nicualani ica yon se masehuali. Yaya Toteco Dios cati nijnequi nijtatzintoquilis huan yeca notonaltzi tahuel taijyohua. ⁵ Techtachilica huan ximomajmatica quenicatza nieltoc, masque monequi xijtzacuaca amocamac ica amomax ten quenicatza ninesi. ⁶ Quema nimoilhua cati nijnequi niqijtos, techitzquia se hueyi majmajti huan nihuihuipica.

⁷ “Na niquita para amo cuajcualme itztoque hasta huehuejtijay huan mori-cojchihua. ⁸ Quinitaj ininconeua moscaltiaj huan iniixhuihua nojquiya.

⁹ Ininchajchaj amo cuajcualme eltoque temachtí, huan amo quinajsi yon se majmajti. Yon Toteco Dios amo quintatzacuilitia. ¹⁰ Nochi inihuacaxhua momiyaquilíaj huan cuali quintacatiltiaj ininconeua. Amo quintahuiso-hua. ¹¹ Ininconeua senquisa pactoque. Motalojtinemij huan huitontine-mij quej pilborregojtizti. ¹² Amo cuajcualme mojmota huicatinemij huan mjtotijtjinemij ica arpas, tambores huan flautas. Amo teno quinpolohua pampa tahuel tominpiyani. ¹³ Ica se talojtzi miqij yon amo taijyohua. Ica paquilisti yahuij ipan nopa hueyi ostot campa mijcatziti. ¹⁴ Inijuanti quitahuelcahuaj Toteco Dios huan quiihujaj: ‘Techtalcahui. Amo teno tijnequij tijmatise ten ta, yon amo tijnequij tijchihuase cati tijnequi.’ ¹⁵ Huan amo cuajcualme quiiytohuaj: ‘¿Ajquiya yaya cati quipiya nochi chichahualisti? ¿Para ten monequi tijtepanitase huan tijtequipanose? ¿Taya tijtanise sinta timotatajtise ica ya?’ ¹⁶ Pero masque quej ni quiiytohuaj huan nochi quisa cuali para amo cuajcualme, amo inijuanti cati nelía quipiyaj tanahuatili para quiiytose taya panos. Itztoque huejca ten Toteco Dios huan yeca na niqinhuejcamajcahua huan amo nijcaqui cati techilhua.

¹⁷ “Pero niquita para niquentzi quipanoj taijyohuiliti amo cuajcualme. Huan Toteco Dios ica ihueyi cualancayo san quemantica quintitanilia tacua-jcualocajot huan miquilisti. ¹⁸ Amo cuajcualme quemantica itztoque quej trigo itasolo cati ajacat quihuica. Itztoque quej sacat huactoc cati patani.

¹⁹ “Miyac quijitohuaj: ‘Toteco Dios quintatzacuultis iconehua se tacat cati tajtacolchijtoc.’ Pero na niqijitohua más cuali para Toteco Dios ma quitatzacuultis nopa tetaj cati tajtacolchijtoc huan amo iconehua. Huan quitatzacuultis quía ipan itacayo para quimatis taya quinamiqui por inintajtacolhua. ²⁰ Quena, ma quitzontamilti nopa masehuali por ya itajtacolhua. Nopa masehuali ma quitamimachili nochi ihueyi cualancayo Toteco Cati Quipiya Nochi Chicahualisti. ²¹ Pampa quema se masehuali mictojca, amo quimatis taya ipantis isihua huan iconehua huan sinta quiselise tatzacuultilisti.

²² “Pero ¿ajquiya huelis quimachtis o quitacahualtis Toteco, yaya cati itzotc nopa Tetajtolsencajquet cati más hueyi? ²³ Toteco quicahuilía se tacat ma miqúi masque quiپیya fuerza huan tominپیya huan nochi yahui cuali para ya. ²⁴ Miqúi masque quiپیya nochi cati cuali para quicuas, huan tomahuac huan senquisu yolpactoc. ²⁵ Huan san se Toteco quicahuilía seyoc tacat ma miqúi cati taijyohuía huan amo quema quipixtoya yon se tamanti cati cuali. ²⁶ Cati tapiپیya huan cati teicnelzi miqúij huan quintalpachohuaj ipan san se taltepocit huan san se tamanti oculilime quicuaj inintacayo.

²⁷ “Na cuali nijmati taya amoyolilhúaj huan quenicatza anquinequij antechixpanose. ²⁸ Talojtzitzi antechilhúaj ten nopa tominپیyani huan amo cuajcualme cati quiselijque tatzacuultilisti por inintajtacolhua huan ama senquisu sosolijtoque ininchajchaj. ²⁹ Pero na nimechilhúaj: Xiquintatzintoquílca cati huéli cati miyac quimatij, huan cati miyac paxalojtoque huan inijuanti amechilhúise cati melahuac. ³⁰ Amo cuajcualme nochipa momanahuaj quema huala taohuijca yot huan cholohuaj quema Toteco Dios quinxetia icalancayo. ³¹ Amo aquí quinajhua miyacapa, yon amo aquí quintatzacuultía por cati quichijtoque. ³² Ica tatepanitacayot quihuicaj inintacayo campa ostot huan nozona mocahua se tacat para tamocuitahuis. ³³ Quema quinhúicaj para quintalpachotij, yahuij tahuel miyac masehualme. Sequij tayacana huan sequij yahuij inintepotzco para quintalpachotij ipan talí cati yamanic.

³⁴ “Huajca ¿quenicatza huelis amujuanti antechyoltalise ica camanali cati amo teno ipati? Quema antechnanquílaj, amo melahuac cati anquijtohuaj.”

22

Elifaz quinanquili Job ica expa

¹ Huajca Elifaz, cati ehua Temán, quiilhui Job:

² “¿Timoilhúaj para se masehuali huelis quichihuas se tenijqui para quipalehuis Toteco Dios? Masque se tacat itzotc nelía talnamiqui ¿quenicatza huéli quipalehuis Dios? ³ Sinta tielisquía tixitahuac, ¿para ten quipactisquía Toteco Cati Quiپیya Nochi Chicahualisti? ¿Taya quitanis Toteco por ta sinta timochihuas se masehuali cati cuali? ⁴ ¿O timoilhúaj para yaya mitzajhua huan mitztelhuía ama pampa tixitahuac? ⁵ ¡Amo! Yaya mitztatzacuultijtoc por nochi tamanti cati amo cuali cati tijchijtoc. Tijپیya tahuel miyac motajtacolhua hasta amo aquí huéli quipohua.

⁶ “Masque tieliyaya tirico, huelis timocajqui ica inintaque nopa teicneltzitzi cati tiquintanejtiyaya tomi. Quena, huelis quema hualayayaj para mitztanehuilijqui tomi, tiquinilhuiyaya ma mitzcafihuaca se iniyoyo huan tiquinchijqui ma mocahuaca xolome. ⁷ O huelis amo tiquinamacac cati amiquiyayaj, o amo tiquintamacac cati mayanayayaj. ⁸ Masque ta tijpixqui chicahualisti huan miyac tali, huelis timoilhui para nochi elqui san para

ta. ⁹ Huelis amo tiquinpalehui cahual sihuame huan tiquincuepalti san quiaja. O huelis icnotzitzitzi tiquinpostequili iniajcol ica tamamali. ¹⁰ Yeca ama miyac taquetzti mitzyahualojtoc para mitzmasiltis huan onca miyac tamanti cati tahuel mitzmajmatía. ¹¹ Tzintayohuilot mitzyahualojtoc para ayecmo titachiyas huan eltoc quej hualajtoc miyac at huan mitzatzonepolihuiltjtoc.

¹² “Toteco Dios itztoc nelía hueyi. Itztoc más huejcapa que ilhuicacti huan más huejcapa que nopa sitalime cati más huejca. ¹³ Huan ta tiquijtohua para yeca Toteco Dios amo hueli quiita cati tijchihua. Tiquijtohua para amo huelis mitztajtolsencahuas Toteco Dios pampa quitzacuilia se mixti cati nelyayahuic. ¹⁴ Pampa miyac mixti cati tahuel yayahuic quiyahualohua Toteco Dios, huan yeca amo hueli techita. Yaya itztoc huejca huan san nentinemi nepa ilhuicac. Quej nopa timoilhuía.

¹⁵ “¿Ta tijtoquilis nopa ojti ten tajtacoli cati nochi amo cuajcualme quitoquiliaj? ¹⁶ Cati quitoquiliaj nopa ojti miqij quema noja telpocame huan ininemis ixpolihui para nochipa quej elisquía huala miyac at huan quinhua. ¹⁷ Inijuanti quiihuijque Toteco Dios: ‘Techtalcahui huan xiya.’ Quiijtojque: ‘¿Taya hueli quichihuas por tojuanti Toteco Cati Quipiya Nochi Chicahualisti?’ ¹⁸ Pero quielcajtoque para elqui Toteco Dios cati quintiochijqui huan quinricojchijqui. Toteco ma techpalehui para niquinhuejcamajcahuas cati quej nopa moilhuiaj.

¹⁹ “Masehualme cati xitahuaque quiitase nopa tatzacuiliti cati quinajsis nopa tajtacolchihuani huan paquise. Nochi cuajcualme huetzcase huan quinpinahualtise. ²⁰ Huan quiijtose: ‘Toteco Dios quinzontamiltjtoc nochi toculancaitacahua huan quitamitatjtoc nochi iniricojo.’

²¹ “Huajca Job, ximotemaca ica Toteco Dios. Ximoyoltali ica ya huan tijpiyas tasehuilisti huan nochi cati cuali. ²² Xijtacaquili nochi icamanal huan xicajocui ipan moyolo. ²³ Sinta titacuepilis ica Toteco Cati Quipiya Nochi Chicahualisti huan tijcahuas nochi cati amo cuali, yaya sempa mitztananas. ²⁴ Ayecmo xiquixtocas tomi huan xijtepehuas nochi mooro campa teme ipan atajti, ²⁵ huajca Toteco Cati Quipiya Nochi Chicahualisti elis cati más ipati ipan monemilis. Tiquitas para más ipati que oro o plata tomi cati más jejyectzi.

²⁶ “Huan tijpantis paquilisti ipan Toteco Cati Quipiya Nochi Chicahualisti huan san ipan ya timotemachis. ²⁷ Timotatajtis ica ya huan yaya mitztacaquilis. Huan tijtamichihuas nochi cati tijtajtolcahuilis para tijchihuas. ²⁸ Huan nochi cati tijnequis tijchihuas, tijtamichihuas huan quisas cuali. Huan nopa taahuili ten ilhuicac mitztaahuilis ipan moojhui campa tinej-nentiyas. ²⁹ Pampa Toteco Dios queiehcapanalía cati mohueyimati huan quimanahuía cati moehcapanohua. ³⁰ Huan yaya mitzmaquixtis sinta amo tijhuica tajtacoli huan sinta tiiztoc titapajpacti iixpa.”

23

Job quiihui Elifaz para iTajtolsencajca quimanahuis

¹ Pero Job quiihui:

² “Ama sempa nicamanalitis ica tequipacholi pampa Toteco nelchicahuac techatzacuilitía ica imax huan amo quej quinamiqui, masque tahuel niaxti. ³ Nijnequisquía nijmatis canque hueli nijpantis Toteco Dios. Nijnequisquía niyas campa mosehuía huan nijcamanalhuis. ⁴ Nijpohuilisquía nochi notequipachol huan teipa nijcaquisquía taya techilhuis. ⁵ Huan nijmachilisquía taya quinequi ma nijchihua. ⁶ Toteco Dios amo technanquilisquía ica

cualanti masque quipiya hueyi chichahualisti. Yaya techtacaquilisquía huan amo techtelhuisquía. ⁷ Tacame cati xitahuaque huelisquía monajnanquilise ihuaya para techmanahuise, huan yaya cati noTetajtolsencajca quijitosquía amo nijhuica tajtacoli.

⁸ “Sinta nijtemohua Toteco Dios ica campa hualquisa tonati o campa oncalaqui, amo nijpantía. ⁹ Sinta yaya quichihua huejhueyi tequit ica norte, amo niquita. Huan sinta nitacuepilis ica sur campa yaya motatía, amo hueli nijpantía. ¹⁰ Pero yaya cuali quiixmati noojhui huan sesen tamanti cati techpano. Huan quema tamis techyejyecos, yaya quijtos para nixitahuac huan nitapajpactic quej oro.

¹¹ “Nochiba nijtoquilijtoc iojhui Toteco Dios huan ninejntoc iicxita. Amo quema nimoiyocatalijtoc. ¹² Amo nijcajtejtoc itanahuatilhua cati quisqui ipan icamac. Achi más nimopaquilismaca ipan icamanal huan amo quej ipan notacualis cati nijcua mojmota. ¹³ Pero sinta yaya moilhuijtoc para quichihuas se tenijqui, amo aquí huelis quiyolpatas. Nochi cati yaya quinequi, ya nopa quichihua. ¹⁴ Huajca nochi cati yaya moilhuijtoc para quichihuas ica na, ya nopa quichihuas. Huan noja quichihuas ica na más tamanti cati moilhuijtoc. ¹⁵ Huan yeca nimajmahui iixpa. Quema niquel-namiqui cati yaya hueli quichihua, nihuihuipica. ¹⁶ Toteco quiquixtilijtoc ichichahualis noyolo. Quena, Toteco Cati Quipiya Nochi Chichahualisti quichijtoc tahuel ma nimajmahui. ¹⁷ Pero masque san tzintayohuilot niquita, nopa tzintayohuilot cati techixtactoc ayemo techtzontamiltijtoc.

24

Job quijto para Toteco amo nochi quintajtolsencahua

¹ “¿Para ten Toteco Cati Quipiya Nochi Chichahualisti amo quiixquetza se tonali para quintajtolsencahuas masehualme? ¿Para ten monequi masehualme cati xitahuaque ma quichiyaca mojmota huan nopa tonali amo quema ajsi? ² Pampa onca miyac tamanti cati amo cuali. Sequij masehualme quijcueníaj nepamit huan quincuilíaj inintal sequinoc. Quinmocuitahuíaj borregojme cati teichtequilijtoque campa cuali sacat. ³ Quinichtequilíaj in-inburrojhua masehualme cati teicneltzitzitzi huan cati icnotzitzitzi. Huan quema cahual sihuame quinequij motanehuise tomi, quintajtaníaj ma quincahuilijtehuaca inintapiyal cati iyojtzi. ⁴ Quinquixtíaj masehualme cati teicneltzitzitzi ten iojhui. Teicneltzitzitzi monequi motatise quema inijuanti monechcahuíaj. ⁵ Teicneltzitzitzi itztoque quej burrojme ipan se huactoc tali cati mojmota quitemojtinemij quentzi tacualisti para inijuanti huan inincone-hua para ica mopanoltise. ⁶ Quicuaj ten hueli tamanti cati quipantíaj cuatita huan quitejtemohuaj cati mocajtoc ipan inixocomecamil masehualme cati mosisiníaj. ⁷ Tayohua nopa teicneltzitzitzi itztoque xolotique ipan nopa tasesecayot pampa amo quipiyaj iniyoyo, yon inintaque, para ica mopiquise. ⁸ Nopa at cati huetzi ipan tepeme quinxolonía. Inijuanti quinnajnahuj nopa huejhueyi teme cati quentzi totonic pampa taseseya huan amo quipiyaj ininchaj.

⁹ “Mosisinijca tacame quiichtequij se cahual sihuat icone cati noja chichi. Quichihuj para nopa tetatme cati teicneltzitzitzi ma quincajtehuaca inincone-hua para quintanejtise tomi. ¹⁰ Teicneltzitzitzi nemij xolotique pampa amo quipiyaj iniyoyo. Amo cuajcualme quinchihualtíaj ma quimamaca trigo masque inijuanti mayancamictinemij. ¹¹ Quinchihualtíaj cati teicneltzitzitzi

ma quipatzcaca olivos ipan molino para quiquixtise aceite pero amo quincahuilíaj quiyecose se quentzi. Ipan moquejquetzaj xocomecat itajca para quiquixtise iayo, pero masque tahuel anmictoque, amo quincahuilíaj quiise yon quentzi iayo. ¹² Tzajtzi chichahuac nopa masehualme cati miquisnequij ipan nopa altepet. Cati mococojtoque tajtanij tapalehuili, pero Toteco Dios mochihua quej amo quincagui, yon amo quinpalehua.

¹³ “Mosisinijca masehualme quicualancaitaj taahuili. Amo quiixmatij cati xitahuac. San nemij ipan iniojhui cati fiero. ¹⁴ Temictiani mijquehuaj cualca para quimictise se cati teicneltzi cati amo teno quiipya. Ica tayohua tachtequij. ¹⁵ Cati sihuanemij quichiyaj para más ma tzintayohuiya pampa quiijtohuaj: ‘Amo aqui techifas.’ Quitzacuaj inixayac ica se yoyomit para amo aqui huelis quinixmatis. ¹⁶ Tachtequini ica tayohua calaquij ipan techaj. Tonaya cochij pampa amo quinpactía tatanexti. ¹⁷ Inijuanti quiitaj yohuali quej elisquía ijnaloc. Ica tayohua mosentilíaj para temajmatise.

¹⁸ “Pero amo cuajcualme taloch ixpolihuij ipan ni taltipacti quej tasoli cati quihuica se hueyat. Nochi cati quiipyaj amo cuajcualme eltoc tatechihuali. Amo aqui tequitis ipan inixomeca milhua. ¹⁹ Miquilisti quintzontamiltía tajtacolchihuani quej tatotonilot quiatilía tasesecayot. ²⁰ Hasta inana se tajtacolchijquet quielcahuas. Ocuilime quicuase inacayo huan tahuel ajhuiyac quimatis. Toteco Dios quintzontamiltis tajtacolchihuani quej huetzi se cuahuit quema taajaca chichahuac, huan ayecmo aqui quinelnamiquis. ²¹ Nopa fiero tacame ten hueli quinchiuilijtoque sihuame cati amo quiipyaj yon se conet para quinmanahuis. Amo quintasojtaque cahual sihuame cati taijyohuíaj.

²² “Pero Toteco Dios ica ihueyi chichualis quinhuilana tapijpiyani huan quinquixtía ten ni taltipacti. Masque inijuanti mochihuaj huejhueyi, taloch miqoise. ²³ Masque Toteco quincagua ma itztoca ica temachili ama huan quinmaca chichualisti, quintachilía talojtzi. ²⁴ Masque ama amo cuajcualme tahuel mohueyichijtoque, ajsis se tonali quema Toteco Dios quinehcapanos. Ica se talojtzi quintamiixpolos san se quej panos ica sequinoc. Quintzontequis quej quitzontequij itajca nopa trigo.

²⁵ “¿Hueli se acajya quiijtos para ya ni amo melahuac? ¿Ajquiya hueli quiijtos para san niistacati huan nimocuapolojtoc?”

25

Bildad quiijto para amo aqui huelis mochihuas xitahuac iixpa Toteco

¹ Huajca Bildad, cati ehua altepet Súa, quiilhui Job:

² “Hueyi ichichualis Toteco Dios huan tahuel temajmati. Yaya quichihua ma onca tasehuilisti ipan ilhuicacti. ³ Quinpiya tahuel miyac iilhuicac ecahua hasta amo aqui hueli quinpohua. Itaahuil ajsi ipan senquisa nochi ni taltipacti. ⁴ ¿Quenicatza hueli se masehuali moquetzas huan quiijtos para itztoc xitahuac iixpa Toteco Dios? Amo aqui ipan nochi taltipacti itztoc senquisa tapajpactic. ⁵ Toteco Dios itztoc nelpano cuajcualtzi hasta eltoc quej nopa metzti huan sitalime amo quiipyaj iniyejyecja huan amo teno ininpati iixpa ya. ⁶ Huajca se masehuali amo hueli quiipya yon quentzi ipati iixpa. Pampa iixpa Toteco Dios, se masehuali nesi san quej se pilocuiltzi.”

26

Job quiilhui Bildad para Toteco nelía hueyi huan temajmati

¹ Huajca Job quiilhui Bildad:

2 “Yon quentzi amo quema tijpalehujtoc cati taijyohuía. Amo tijmaquixtijtoc se masehuali cati amo quiپیya fuerza. 3 ¿Tiquita para nelía techtalmictijtoc na cati nihuihuitic? ¿Taya cati cuali tiquijtojtoc? 4 ¿Canque tijpantijtoc ni camanali huan ni talnamiquilisti cati ica ticamanalti? ¿Ajquiya iaxca nopa tonaltzi cati mitzpalehuía para ticamanalti quej ni?

5 “Mijcatzitz huihuipicaj ica majmajti. Cati itztoque tatzinta huan ipan hueyi at majmahuij. 6 Toteco Dios quintachilía nochi inijuanti huan quinixmati. Amo hueli motatíaj iixpa ya. 7 Toteco quipatajqui ilhuicacti campa amo teno oncayaya huan ni taltipacti quicuapilo san ajacatipa. 8 Yaya quitzacua at ica mixti huan nopa mixti amo tzayani masque tahuel etic nopa at. 9 Quitzacua isiya ica mixti. 10 Yaya quitallijtoc inepa nopa hueyi at cati nesi hasta campa hueli tiquitaj. Quiixquetzoc nopa lugar campa quisas tonati ica ijnaloc huan campa calaquis ica tiotac. 11 Itzinpehualtil ilhuicacti huihuipica quema Toteco Dios cualani. 12-13 Ica ihueyi chichualis quinahuatía nopa hueyi at taya ma quichihua. Ica iyajatil quitzonpechi nopa hueyi cohuat cati nozona itztoya. Quena, ica imax quitzontamilti nopa cohuat cati chichahuac motalohuayaya. Ica iijyoyo quiyeyecchijqui ilhuicacti.

14 “Nopa elqui itequi cati más pisiltzitz cati yaya quichijtoc. Nelquentzi quinextijtoc ichichualis. Huajca ¿ajquiya huelis quiijyohuis quema Toteco Dios quichihuas ma monexti nochi ihueyi chichualis huan ichichualis chichahuac tatomonis?”

27

Nopa tatzacuiliti cati quiselise amo cuajcualme

1 Job quisenhuiquili camanaltic huan quiijto:

2 “Nitatestigojquetza iixpa Toteco Dios cati techquixtilijtoc nopa tanahuatili cati quinamiqui para sesen tacat ma quiپیya. Quena, nijtestigojquetza Toteco Cati Quiپیya Nochi Chichualisti cati tahuel techyolcocojtoc. 3 Niquijtohua para nochi tonali quema noja niitztos huan Toteco Dios techmacas nemilisti, 4 amo niquijtos cati amo cuali, yon amo niistacatis. 5 Amo quema niquijtos para xitahuac cati anquijtohuaj hasta nimiquis. Nijsenhuiquilis niquijtos amo teno nijchijtoc. 6 Quena, talojtzitz niquijtos para amo teno nijchijtoc cati amo cuali. Huan noyolo elis tapajpactic huan amo techtelhuis nochi tonali quema noja niitztos.

7 “Nochi nocualancaitacahua ma quiselica nopa tatzacuiliti cati quinamiqui para amo cuajcualme. 8 ¿Taya noja hueli quichiyas se fiero tacat quema Toteco Dios quiquixtilis inemilis huan quitzontamiltis? 9 O masque noja yoltose huan iftose ipan taijyohuilisti, Toteco Dios amo quintacaquilis quema quitajtanise ma quinpalehui. 10 Pampa nopa fiero tacat amo mopaquilismacac ipan Toteco Cati Quiپیya Nochi Chichualisti huan san quielnamictoc Toteco Dios quema itzoc ipan taohuijcajot.

11 “Na nimechmachtis ten ichichualis Toteco Dios. Amo nimechtatilis yon se tamanti ten Toteco Cati Quiپیya Nochi Chichualisti huan cati yaya moilhujtoc para quichihuas. 12 Masque amo monequi nimechmachtis ten ni tamanti pampa ya cuali anquimatij ten ya san quej na. Pero masque ya anquimatij, ten Toteco, antechpohuilíaj nochi ni camanali cati amo teno ipati.

13 “Ya ni cati Toteco Dios quisencajtoc para quinchiyas nochi amo cuajcualme. Nochi ya ni quiselise fiero tacame ten Toteco Cati Quiپیya Nochi

Chicahualisti. ¹⁴ Sinta amo cuajcualme quinpiyaj miyaqui ininconeua, nochi injuanti miqúise ipan tatehuilisti o ica mayanti. ¹⁵ Ininconeua cati noja mocahuase miqúise ica se hueyi cocolisti huan amo aqui quinchoquilis. Yon inisihuahua cati mocahuase amo quinchoquilise.

¹⁶ “Se tacat cati amo cuali hueli quisentilis tomi quej imiyaca taltepociti huan quipiyas tahuel miyac iyoyo. ¹⁷ Pero nochi cati quiipiya quitequihuse masehualme cati xitahuague iixpa Toteco Dios. Cati amo quichijtoque cati fiero moxelhuilise itomi. ¹⁸ Huan nopa cali cati quichijchijqui se fiero tacat eltos quej se tocatzahuali cati amo quiipiya fuerza. Tatapacatoc ichaj quej se pilxajcaltzi cati quichihuaaj ipan mila.

¹⁹ “Masque se fiero tacat moteca para cochis tapijixtoc, quema isas, quuitas para ayecmo teno quiipiya. ²⁰ Hualas ipan ya se hueyi majmajti. Huan se ajacat cati tahuel chicahuac quicuitiquisaqui ica tayohua. ²¹ Nopa ajacat cati huala ica campa hualquisa tonati quihuicas nopa fiero tacat huan quiixpolihuiltis. Quihuicas ipan se lugar campa itztoti para nochipa. ²² Toteco Dios quiitzquis chicahuac huan amo quitasojtas masque nopa tacat quinequisquía mochololtis imaco. ²³ Masehualme tzajtise ica paquilisti huan momatatzinise quema miquis nopa fiero tacat. Quipinajtise quema Toteco quimajcahuas para yas ipan se lugar campa itztoti para nochipa.

28

Nopa talnamiquilisti cati melahuac

¹ “Masehualme quimatij quenicatza quiquixtise nopa plata teposti ten iojhui taltita. Huelij quimoloníaj oro para quichihuase se oro cati senquisa tapajpactic. ² Quiquixtíaj nopa hierro teposti ten taltita huan quimoloníaj teme para ma quisa cati senquisa cobre. ³ Tacame quimatij quitaahuilise nopa tzintayohuilot huan tacoyonise hasta tahuel huejcata. Nopona quiquixtíaj teposti huan quitajtachilíaj huan quuitaj nochi tamanti cati onca nepa talijtic. Quena, yahuij huejca campa amo aquí nemi. ⁴ Quicoyoníaj se ostot cati tahuel huejcata huejca ten techaj. Moilpíaj ica lazo huan mohuiyonijtiyahuij hasta más tatzinta ipan nopa ostot masque tahuel mahuilili huan huelis miqúise. ⁵ Ni taltipacti iixco techmaca trigo para pantzi, pero nopona tatzinta huan taltita eltoc quej panotoc se tit cati nochi quiatilljtoc.

⁶ “Nopona mopantíaj jejectzitzitzi piltetzitzi cati itoca zafiro, huan quipantíaj oro cati maneltic ica taltepociti. ⁷ Nelhuejcata quipantíaj tamanti cati pajpatiyot cati yon se tzojpilot o cuatojti amo quema quiitztoc masque nelía hueli tachiya huejca. ⁸ Yon se tapiyali cati nemi cuatita amo quema nejnentoc ipan nopa tamanti cati pajpatiyot nepa. Yon se león amo quema moquetztoc ininpani. ⁹ Tacame ica inimax quitapanaj nopa teme cati inintoca pedernal cati ica huelis tijjoliltis tif. Quimatij quihuelonise inintzinpehualtil nopa tepeme. ¹⁰ Quicoyoníaj miyac ojti ipan nopa tet nopona tatzinta. Nopona quiapanextíaj nopa piltetzitzi cati tahuel pajpatiyot. ¹¹ Quitzacuaj campa pehua hueyame nopona tatzinta huan nochi cati motatijtoc nopona quiquixtíaj hasta talpani campa tatanexti.

¹² “Pero masque tacame huelij quichihuaaj nochi ni tamanti, amo quimatij canque quipantise talnamiquilisti huan tamachilisti. ¹³ Masehualme amo quimatij para tahuel ipati talnamiquilisti huan amo mopantía ipan ni

taltipacti. ¹⁴ Nopa ostot cati tahuel huejcata quijtohua: ‘Nica amo onca talnamiquilisti.’ Huan nopa hueyi at quijtohua: ‘Yon nica amo onca.’

¹⁵ “Amo aqui huelis quicohuas talnamiquilisti ica miyac tomi ten oro o ten plata. ¹⁶ Yon amo huelis mocohuis talnamiquilisti ica miyac oro ten Ofir, yon ica miyac teme cati pajpatiyo quej ónice huan zafiro. ¹⁷ Talnamiquilisti tahuel ipati huan amo quej oro o quej se diamante cati más patiyó. Yon amo huelis tijcohuas ica teme patiyó cati quiquetztoque ipan cati senquisa oro. ¹⁸ Nopa teme cati itoca coral huan jaspe masque tahuel yejyetzitzi amo quiaxilíaj para ica quixtahuase talnamiquilisti pampa talnamiquilisti más ipati que nopa piltetzitzi cati más patiyó. ¹⁹ Nopa teme cati itoca topacio cati tahuel pajpatiyo huan quihualicaj ten tali Etiopía amo ininpati quej talnamiquilisti. Huan yon amo huelis tijcohuas ica senquisa oro.

²⁰ “Huajca ¿taya hueli tijchihuase timasehualme para tijpiyase talnamiquilisti? Huan ¿canque tijpantise tamachilisti? ²¹ Amo aqui hueli quipantía pampa eltoc ixtacatzi. Yon totome cati patantinemij ajacatipa amo huelij quíitaj. ²² Eltoc quej micta huan miqulisti quijtohua: ‘Tojuanti tijcactoque se quentzi ten talnamiquilisti huan canque hueli mopantis.’

²³ “Pero nimitzilhuía Toteco Dios quimati canque mopantía talnamiquilisti. Yaya quimati quenicatza tijcuis, ²⁴ pampa yaya tachiya hasta campá tami taltipacti huan quiita nochi cati onca ipan ilhuicacti. ²⁵ Yaya quichihua ma taajaca ica miyac o quentzi chichahualisti san quej yaya quinahuatía. Quitamachihua nochi at ipan hueyi at. ²⁶ Yaya quimacac tanahuatili nopa at para taquiyahuis huan quinextili nopa tapétanilot nopa ojti para quitoquilis. ²⁷ Huan Toteco teipa quitachili talnamiquilisti huan quieyjecó ica cuidado. Huan quijto para talnamiquilisti eltoc más ipati. ²⁸ Huajca Toteco Dios quej ni quinyolmelahua nochi masehualme: ‘Quema se masehuali techimacasi huan techtepanita na, ni amo Tecó Dios, quinextía nopa talnamiquilisti cati nelía melahuac. Huan quema se quicahua nochi tamanti cati amo cuali, quinextía tamachilisti cati nelía xitahuac.’ ”

29

Job quielnamijqui nopa tonali quema itztoya cuali

¹ Job quisenhuiquili camanaltic huan quijto:

² “Nelcuali elisquía sinta sempa huelisquía nimocuepas ipan nopa tonali quema Toteco Dios techmocuitahuiyaya. ³ Achtohuiya yaya techtaahuiliyaya ipan noojhui. Huan ica itaahuil ninejnemiyaya temacti ipan tzintayohuilot. ⁴ Quema nieliyaya nitelpocat, Toteco Dios quitiochihuayaya nochi ipan nohaj huan yaya elqui quej nonelhuampo. ⁵ Nelcuali elisquía sinta sempa huelisquía nimocuepas ipan nopa tonali quema Toteco Cati Quipiya Nochi Chichahualisti noja itztoya nohuaya huan noconehua techyahualojtoyaj, ⁶ huan nochi yahuiyaya cuali. Nohuacaxhua quipixtoyaj miyac lechi huan nochi cuame ten olivo ipan nocuamil quipixtoyaj miyac aceite.

⁷ “Niyahuiyaya campá nopa caltemit ten toaltepe campá mosentiliyayaj para tasencahuase. Nimosehuijtoya inihuaya nopa tacame cati más quipixque tatepanitacayot. ⁸ Quema telpocame techitayayaj, moiyoacquetzayayaj para ma nipano. Huehue tacame nojquya moquetzayayaj ica tatepanitacayot quema niaysiyaya. ⁹ Huan nopa tayacanca telpocame amo moliniyayaj quema niaysiyaya. San quitaliyayaj inimax ipan inincamac para mocamatzacuase hasta na nicamanaltisquía. ¹⁰ Huan nopa tayacanani

cati itztoyaj ipan nopa altepet amo moliniyayaj. San quichiyayaj nocamanal.

¹¹ “Nochi masehualme cati quicaquiyayaj nocamanal techhueyitaliyayaj. Nochi cati techitayayaj camanaltiyayaj cuali ten na.

¹² “Na niquinpalehuiyaya cati teicneltziti ica cati quinpolehuayaya. Niquinpalehuiyaya icnotziti cati amo quipiyayaj inintamanahuijca.

¹³ Na niquinpalehuiyaya cati nechca itztoya para miquise, huan injuanti techtiochihuayayaj. Cahualsihuame cati icnotziti niquinpalehuiyaya huan

niquinchiuayaya ma yolpaquica. ¹⁴ Nochi cati nijchihuayaya eliyaya xitahuac huan cuali. Nonemilis elqui xitahuac. Amo teno nijnequiyaya ica

cati amo cuali. ¹⁵ Na nieliyaya quej niiniixteyol cati popoyotziti huan quej niiniicxi cati amo hueliyayaj nejnemij. ¹⁶ Na nielqui quej niinintata cati

teicneltziti huan niquinmanahui nochi cati ehuan ipan sequinoc talme. ¹⁷ Niquintehuiyaya nochi fiero tacame cati tetajyohuiltiyayaj huan nitemanahuiyaya inimaco. Elqui quej niquinpostequiliyaya iniomioyo nopa fiero

tacame quej se quipostequi itancoch se tecuan cati quiitzquitoc itapiyal.

¹⁸ “Huan na nimoilhuiyaya: ‘Temachti nihuehuejtiyas huan nimiquis ica paquilisti ipan nochaj. Nijpiyas tahuel miyac xihuit huan se cuali nemilisti.

¹⁹ Pampa cati nijchihua quisa cuali. Niitztoc quej se hueyi cuahuit cati quipiya inelhuayo campa onca miyac at huan sesen yohuali huetzi ajhuechti ipan imacuayohua para quiatequis. ²⁰ Mojmosta más nijselía tatepanitacayot huan talojtztiti nochicahualis moyancuilía.’

²¹ “Ipan nopa tonali, tacame quicaquiyayaj nocamanal huan quichihuiyayaj cuenta. Yon se ten injuanti amo moliniyaya hasta niquinconsejomacac. ²² Huan teipa quema ya nitamiyaya nicamanalti, injuanti amo technajanquiliyayaj pampa tahuel quinpactiyaya nocamanal. ²³ Quej masehualme ica nochi iniyolo quinequij ma huetzi at quema tahuel tatotoniya, nochi tacame tahuel quichiyayaj nocamanal. ²⁴ Quema tacame motzinquixtiyayaj, niquinyolchicahuayaya. Quema niquinixhuetzquiliyaya, quinfuerzajmacayaya ipan inintonal. ²⁵ Niquinilhuiyaya cati monequi quichihuase. Niqinxitahuayaya quej nielisquía niinintayacanca. Nijchihuayaya quej se tanahuatijquet cati quintalnamictía isoldados. Niquinyolchicahuayaya cati mocuesohuayayaj.

30

Job quiijto para fiero inemilis

¹ “Pero ama telpocame cati amo quipiyaj xihuit quej na techpinajtíaj. Inintatahua ni telpocame amo quinamiqui para tequitise inihuaya nochichihua cati quinmocuitahuíaj noborregojhua. ² Amo teno ininpati nopa tetatme para na masque quipiyaj inimax cati chichahuac. Ayecmo quipiyaj fuerza para quichihuase yon se tequit huan tahuel huihuitique. ³ Injuanti cuahuactoque ica mayanti. Ica tayohua yahuij iniselti ipan huactoc tali

campa amo teno onca. ⁴ Nopona quicuaaj inixihuiyo cuame huan quitatíaj ininelhuayo xihuitzonti para mototonilise. ⁵ Quinquixtijtoque ten

campa itztoque masehualme. Huan quema quinquixtijque, quintzajtzilijtiyajque ica iniica quej elisquía tachtequini. ⁶ Huan ama nopa huihui tacame itztoque

campa tacamolco, campa huejhueyi ostot huan campa teme. ⁷ Tzajtzinemij quej tapiyalme cati nemij cuatita, huan mosentilijtinemij itzinta se tejtzonquilit para momanahuise. ⁸ Huan yeca ininconeua nojquiya itztoque

huihuitique huan amo taixmatilme. Huan yeca quinquixtijoque ipan altepeme.

⁹ “Pero ama ininconeua techpinajtíaj ica huicat huan techtaijilhuíaj ica miyac tamanti para motahuetzquiltise. ¹⁰ Techcualancaitaj huan amo quinequij technechcahuse. Quej quinequij, techchajchaj ipan noxayac. ¹¹ Toteco Dios quitailjtoc nonemilis campa mahuilili huan techchecapan-talijtoc. Ama injuanti amo techtepanitaj huan techchihuilíaj cati injuanti quinequij. ¹² Mosisinjica tacame motananaj para techchihuilise miyac tamanti cati amo cuali huan quitailaj taquetzti campa noicxi para ma nihuetzi. Techtehuíaj chicahuac. ¹³ Ipan noojhui quitailaj miyac tatzacuilitli huan quichihuaq nochi cati huelij para ma techajsi cati fiero, masque ya quimatij para amo nijpiya yon se cati huelisquia techpalehuis. ¹⁴ Hualahui ica campa hueli para techchihuilise cati fiero. Huan nimantzi huitonij ipan na quema nihuetztoc. ¹⁵ Huajca ama techitzquitoc se hueyi majmajti. Nochi techcualancaitaj huan nochi noricojyo huan nohueyitilis ixpolijtoc quej se mixti cati ixpolihui quema taajaca chicahuac. ¹⁶ Tahuel hueyi tequipacholi techtzonpechi ipan noyolo. Ayecmo nijnequi niitztos. ¹⁷ Nochi yohuali nicuajcualo chicahuac. Nijmati quej se tenijqui quicua noomiy-ohua. ¹⁸ Toteco quiitzquía chicahuac noyoyo ipan noquechta huan eltoc quej techijyomictía. ¹⁹ Toteco techtahuisojtoc ipan soquit. Huan ama niitztoc quej nielisquia taltepocti huan cuajnexti.

²⁰ “Na nimitztzajtíla ta, tinoTeco Dios, para techpalehui, pero amo tech-nanquílía. Nojquiya nihuala moixpa, pero ta amo techchihuilía cuenta, yon amo tijnequi techtachilis. ²¹ Ta timosisinijtoc ica na huan techtepotztoca ica nochi mochicahualis. Techtehuía ica nochi moyajatil. ²² Ta techtahuisojtoc ipan nopa ajcomalacat huan techtaijyohuiltijtoc ica se hueyi ajacat. ²³ Na nijmati para tijnequi ma nimiqui huan techhuicas ipan nopa lugar campa mosentíaj nochi mijcatziti.

²⁴ “Nimoilhuiyaya para se acajya techpalehuisquía para ma amo nihuetzi, quej se cati quitanana imax o tzajtzi chicahuac para tajtanis tapalehuili quema se huetzi ipan se taijyohuiliti.

²⁵ “Quej nopa na nijchijqui. Nichocac por injuanti cati taijyohuiyayaj. Nimocueso por injuanti cati teicneltziti huan amo teno quipiyayayaj. ²⁶ Yeca na nijchiyayaya cati cuali, pero hualajqui cati amo cuali. Nojquiya nijchiyayaya paquilisti huan taahuili, pero hualajqui tequipacholi huan tzintayohuilot. ²⁷ Noyolo mocuesohua chicahuac huan amo hueli mosiya-jquetza. Taijyohuiliti techitzquitoc para miyac tonali. ²⁸ Notacayo ya tami yayahuixqui, pero amo ica tonati. Huan nimoquetza para nitetajtanis tapalehuili, pero san tapic. San nijpolohua tonali huan nijpolohua noiyyoyo, ²⁹ pampa nochi masehualme techitaj quej niinični nopa tepechichime huan quej niinihuampo nopa avestruz totome. ³⁰ Nochi nocuetaxo ya yayahuixqui huan huetzisquequi. Huan noomiyohua tiquisaj ica tatotonilot. ³¹ Nochi nopa paquilisti huan huetzquisti cati nijpiyayaya, ama mocuetoc tequipacholi.

31

Job quiijto para yaya xitahuac iixpa Toteco

¹ “Na nijchijqui se camanali ica noixteyol para amo nijtachilis se ichpcocat para niquixtocas huan nijchihuas miyac tamanti ihuaya. ² Pampa na nijmati cati temaca Toteco Cati Quipiya Nochi Chicahualisti. Yaya cati itztoc

nepa huejcapa quintiochihua masehualme cati nejnemij xitahuac. ³ Huan quintatzacuilitía cati quichihuj cati fiero. ⁴ Huan Toteco quiita nochi cati nijchihua huan quenecatza nimonejnemiltía.

⁵ “Na amo niistacatitoc, yon amo nitacajcayajtoc. ⁶ Ma Toteco techtajtolsencahua sinta amo melahuac. Yaya quimati cuali para melahuac amo nijchijtoc cati amo cuali. ⁷ Amo nimocuapolojtoc huan amo nijcajtejtoc iojhui Toteco. Amo nitajtacolchijqui ipan noyolo por cati niquitac. Huan sinta nijhuica tajtacoli ipan ni tamanti o ipan sequinoc tamanti, ⁸ ma quipixcaca sequinoc cati nijtoctoc huan cati ya quipiya itajca. Huan sequinoc ma quihuihuitaca nochi cati yancuic nijtoctoc.

⁹ “Sinta se sihuat techyoltilantoc ma nitajtacolchihua, o sinta nijnequiyaya niiztos ihuaya isihua nocalnechca, ¹⁰ huajca ma nimiqui huan nosihua ma yahui sejcayoc huan ma mocuili seyoc tacat. ¹¹ Pampa se hueyi tajtacoli para tiquixtocas seyoc sihuat. Sinta se tacat quichihuas nopa faixpanoli, quinamiqui quitatzacuilitise tetajtolsencahuani. ¹² Taixtoquilisti eltoc quej se tit cati techtamitafia huan techmajcagua hasta micta. Nojquiya quitamiltía nochi cati nijpiya.

¹³ “Sinta amo niquinchihuilitjosquía cati xitahuac nochi notequipanojcahua huan amo niquintacaquilijtosquía, ¹⁴ ¿quenecatza nimoixnextisquía iixpa Toteco? ¿Quenecatza nijnanquilsiquía quema techtajtanisquía cuenta? ¹⁵ Pampa yaya Toteco Dios cati techchijchijqui na huan yaya nojquiya quichijchijqui notequipanojca. Nochi tiome yaya techchijchijqui.

¹⁶ “Amo quema niquinchihuili cati fiero nopa teicneltziti, yon amo quema niquintequipacholmacac sihuame cati icnotziti. ¹⁷ Na nochipa niquintamacac cati icnotziti. Amo quema nielqui niiztcuimit. ¹⁸ Hasta quema nieliyaya nitelpocat, na niquinmocuitahui icnotziti ipan nochaj huan niquinitayaya quej elisquía noconehua. Huan niquinconsejomacac cahual sihuame. ¹⁹ Niquinyoyonti cati secmiquiyayaj huan niquinmacayaya yoyomit, ²⁰ o taquemit ten iniijhuiyo noborregojhua para ica ma mopiquica. Huan injuanti techtascamatiliyayaj. ²¹ Amo quema nijcocojtoc se cati icnotzi san pampa nimoilhui amo aqui techtajtanis cuenta. ²² Sinta nijchijtoc se ten nochi ni tamanti, ma postequi noajcol campa tatzquitoc huan ma huetzi talchi nomax. ²³ Pero na tahuel niquimacasiyaya itatzacuilit Toteco. Sinta yaya cualanisquía ica na ica nochi ichicahualis, ¿taya nijchihuasquía?

²⁴ “Amo nimotemachijtoc ipan notomi, yon amo niquixtocatoc oro. ²⁵ Amo quema nimopaquilismacac ipan notomi o nimoilhui para noja más nimoricojchihuas. ²⁶ Amo nijtachilijtoc ne tonati cati taahuía ipan ilhuicac o nopa metzti cati yahui ipan iojhui yejectzi, ²⁷ huan ixtacatzti niquinhueyichijqui ipan noyolo. Amo quema niquintitanili tatzoponijcayot ica nomax ica huejca. ²⁸ Ya nopa elisquía se hueyi tajtacoli huan quinamiquisquía nijselis tatzacuiliti. Amo teno ten ni tamanti nijchijtoc. Amo niquixpanotoc Toteco cati itzoc ilhuicac.

²⁹ “Na amo nipajqui quema nohuampo mopantiyaya ipan taijyohuiliti huan taohuijca. ³⁰ Amo quema nijtelchijqui se masehuali yon amo nimomacuetqui ica nocualancaitacagua. ³¹ Yon se notequipanojca amo nijcajqui ma quipano mayanti. ³² Nochipa niquincahuili seyoc tali ehuan ma cochica nocalijtic. Nochipa nijtapohuayaya nocalte para cati hueli nejnenquet. ³³ Amo nijchijtoc campeca para nijtatis notajtacolhua ixtacatzti quej quichijqui Adán. ³⁴ Amo quema niquinimacacqui masehualme huan

nimotatiyaya calijtic. Amo quema niquinimacasqui nochaj ehuan cati techcualancaitaj. Nochipa nimocuatotoni para nijpalehuis se nohuampo.

³⁵ “Cuali elisquía para se acajya techtacaquilisquía huan quimachilisquía taya nijmatis ipan noyolo. Na nijnequi nimomanahuis ipan ni tamanti huan nijtalis nofirma ipan nocamanal. Nijnequisquía para Toteco Cati Quipiya Nochi Chicahualisti ma technextili sinta melahuac nimocuaapolojtoc. Yaya ma quijto sinta melahuac cati quijtohuaj nocualancaitacahua. Ma quijcuiloca cati ica techtelhuía notatelchijca. ³⁶ Techpactisquía para nijmatis taya ica techtelhuía. Nijpatiitasquía quej se yejyectzi corona pampa tahuel nijnequi nijmatis. ³⁷ Na niquilhuisquía notatelchijca nochi cati nijchijtoc huan para ten nijchijqui. Huan iixpa ya nijchihuasquía campeca para nimomanahuis quej nimonextisquía iixpa se tequichijquet.

³⁸ “Quinamiqui ma techtatzacuiliti sinta nomilhua techtelhuisquía huan elisquía ipan tequipacholi, ³⁹ huan quijtosquía para niquichtequilijtosquía itajca o niquinmictijtosquía nopa masehualme cati iniaxca nopa tali huan cati techtanejtiyayaj. ⁴⁰ Sinta quej nopa nijchijtoc ma temaca huitzi notal huan amo trigo. Ma temaca xihuit cati amo cuali huan amo cebada.”

Hasta nica tanqui camanalti Job.

32

Eliú quilhui Job para Toteco quinextía tajtocoli

¹ Nopa eyi tacame ayecmo quinanquilijque Job pampa Job noja quinilhuiyaya para amo quihuaica tajtocoli.

² Huajca Eliú cualanqui ica Job. Eliú elqui icone Baraquel huan iixhui Buz; huan hualayaya ipan ihueyi familia Ram. Cualanqui pampa Job amo quinequiyaya quijtos para melahuac tajtacolchijtoya. Yon amo quijtohuayaya para quinamiqui nopa tatzacuiliti cati Toteco quititanilijtoya.

³ Huan nojquiya Eliú cualanqui ica nopa eyi ihuampoyohua Job pampa amo quimatiyayaj quenicatza quinanquilise huan san achi más quitelhuiyayaj.

⁴ Eliú quinchixtoya nopa eyi para tamise camanaltij pampa eliyayaj más huehuentziti que ya. ⁵ Pero quema quinitac para inijuanti ayecmo huelij quinanquilíaj, camanaltic ica cualanti, ⁶ huan quinilhui:

“Na noja nitelpocat huan amojuanti ya anhuehuentziti, yeca nimochixtoc pampa amo nimotemacayaya niqijtos cati nimoilhuiyaya. ⁷ Nochi quijtohuaj para cati huehuentziti más talnamiquij, yeca ma camanaltica achtohui. ⁸ Pero masehualme itztoque talnamiquij pampa quipiyaj itonaltzi Toteco ipan iniyolo. Quipiyaj iijyoyo Toteco Cati Quipiya Nochi Chicahualisti. ⁹ Amo cana talnamiquij san pampa quipiyaj miyac xihuit. Huan cati huehuentziti amo nochipa quimachilíaj cati xitahuac. ¹⁰ Huajca nimechilhuía, techtacaquilica se talojtzi huan techcahuilica ma niqijto cati nimoilhijtoc.

¹¹ “Nimochixtoc huan ica miyac cuidado nijtacaquilijtoc nochi amocamanal hasta quema pejqui ancamanaltij. ¹² Huan ipan nochi cati nijtacaquilijtoc, yon se ten amojuanti amo anquixcoilhijque Job para melahuac yaya se tajtacolchijquet. Yon amo aquí quinanquilijtoc itatzintoquil quej quinamiqui. ¹³ Huan amo techilhuica para Job itatoc más talnamiqui que amojuanti o para san Toteco huelis quinextilis se tajtacolchijca tacat para tajtacolchijtoc. ¹⁴ Sinta Job monajnanquilijtosquía nohuaya, na amo nijnanquilisquía quej amojuanti anquinanquilijtoque.

¹⁵ “Job, ni eyi mohuampoyohua momajmatijtoque huan ayecmo quimatij taya quijitose. ¹⁶ Na niquinchixtoc ma camanaltica, pero inijuanti ayecmo moliníaj huan ayecmo mitznanquilíaj. ¹⁷ Huajca na nojquiya niqijitos cati nimoilhuijtoc, ¹⁸ pampa nijpiya miyac camanali cati monequi niqijitos, huan notonaltzi techchihualtía ma nicamanalti. ¹⁹ Niitztoc quej se yancuic cuetaxti cati temitoc ica xocomecat iayo huan ya quinequi tzayanis. Huan quej nopa nojquiya na nitemitoc ica camanali hasta tzayanisnequi noyolo. ²⁰ Monequi nicamanaltis para nicaxanis se quentzi. Huajca techcahuilica ma nicamanalti. ²¹ Amo aqui nijchicoicnelis, yon ta, yon ne eyi. Yon amo aqui nijyeyectalis ica nocamanal. ²² Pampa sinta nijhueyimati se huan seyoc amo, Toteco cati techchijqui techchihuasquía nihuetzis nimictoc.

33

Eliú quitelhui Job

¹ “Job, na nimitztajtania xijtacaquili cati nimitzilhuis. ² Na nipejtoc nicananalti, huajca techcahuili ma nijsenhuiquili. ³ Huan niqijitos nochi cati senquisa xitahuac huan cati melahuac. ⁴ Itonal Toteco yaya techchijchijqui. Quena, taijyocuili Toteco Cati Quipiya Nochi Chichahualisti huan techmacac nemilisti ica iijyoyo. ⁵ Ximocualtali huan technanquili nimantzi sinta ti-hueli.

⁶ “Na nojquiya niitztoc san se quej ta iixpa Toteco. Na nojquiya nitachijchihuali ica soquit quej ta. ⁷ Huajca amo techimacasi na pampa na amo nieli se masehuali cati quiapiya hueyi tequiticayot para ica nimitzmajmatis o nimitzchihuas xihuihuipica.

⁸ “Na nimitztacaquilijtoya quema tiqijito, ⁹ para titapajpactic huan amo teno amo cuali tijchijtoc. Tiquijtojtoc tixitahuac huan amo tijpiya tajtacoli. ¹⁰ Tiquijtohua para Toteco san quitemohua quenicatza huelis quipantis se tajtacoli para mitzitas quej tiicualancaitaca. ¹¹ Nojquiya tiqijtojtoc para Toteco quicalaquijtoc moicxi ipan cuahuit para quintetzopas, huan mitztachilía sesen huelta quema timolinía.

¹² “Xiquita, ya ni cati na nimitzilhuía. Melahuac titajtacolchijtoc pampa amo xitahuac ticamanaltitoc ten Toteco. Toteco Dios itztoc más hueyi que se masehuali. ¹³ Huajca ¿para ten tijtelhuía ica cati amo cuali pampa amo mitzyolmelahua para ten mitztatzacuilitía?

¹⁴ “Toteco Dios technojnotza talojtitzti, pero tojuanti amo tijmachilíaj. ¹⁵ Quemantica technojnotza ipan se temicti, o ipan se tanextili ica tayohua quema masehualme tahuel cochtoque ipan inintapech. ¹⁶ Toteco tecamanalhuía para teconsejomacas huan para quinmajmatis ica cati panos teipa. ¹⁷ Quinnojnotza masehualme para quinyolcuepas ten inintajacolhua huan para ma amo mohueyimatica. ¹⁸ Nojquiya quimanahúa ininemilis para amo huetzise imaco cati amo cuali huan para amo yase micta.

¹⁹ “Pero nojquiya quemantica Toteco quixitahua se masehuali ica cocolisti huan tacuajcualocayot ipan nochi itacayo, masque amo quipostequi yon se iomiyo. ²⁰ Huan nopa cocoxquet ayecmo teno quiixtocas para quicuas masque tahuel ajhuiyac nopa tacualisti pampa ayecmo mayanas. ²¹ Quej nopa, nopa masehuali mocahuas tahuel cuahuactoc huan san omit, ²² huan monechcahuis nopa tonali para miquis huan quitalpachose.

²³ “Pero sinta itztosquía se tayolmelajquet ten ilhuicac cati motatajtisquía ica Toteco huan quinextisquía para nopa tacat itztoc xitahuac, ²⁴ huajca

Toteco quitasojtasquía huan quihuisquía itequipanojca: ‘Xijmajcahua ma yahui nopa masehuali. Amo xijchihuaca ma miqui pampa nijpantijtoc seyoc cati taxtahuas por inemilis.’ ²⁵ Huan huajca itacayo nopa masehuali mochicahuas quej se conet itacayo. Quipiyas chichahualisti quej se telpocat. ²⁶ Huan quema motatajtis, Toteco quitacaquilis huan quicnelis. Huan yaya moixtachilis ica Toteco huan huicas ica miyac paquillisti. Huan Toteco sempa quijitos para xitahuac huan quitiochihuas miyac. ²⁷ Huan nopa masehuali quinilhuis ihuampoyohua: ‘Nitajtacolchijtoc huan nitaixpanotoc, pero Toteco amo techmacac cati quinamiqui. ²⁸ Toteco techmanahui ten miquilisti huajca noja niitztos ipan ni taltipacti ipan taahuili.’

²⁹ “Quena, Toteco quichihua ya ni miyac huelta para quinojnotzas se masehuali. ³⁰ Yaya quimanahuía ialma ten miquilisti para huelis itztos inihuaya cati yoltoque nica campa taahuili. ³¹ Xijtacaquili cati niqijtohua, Job. Techacaquili huan noja techcahuili ma niqijto se ome camanali. ³² Pero sinta ta tijnequi tiqijtos se camanali, huajca xiqijto. Huan na nijtacaquilis huan nimitzilhuis sinta xitahuac o amo. ³³ Huan sinta amo teno tijnequi tiqijtos, huajca techacaquili. Amo ximolini huan na nimitzmachtis para titalnamiquis.”

34

Eliú quijto Job mohueyimati

¹ Teipa Eliú sempa camanaltic huan quijto:

² “Techacaquilica antacame cati antalnamiquij huan cati antaixmatilme.

³ Hueli tijtapejpenise taya cuali para tijtacaquilise ica tonacas, quej ica tocamac hueli tijtapejpenise taya tacualisti eltoc ajhuiyac. ⁴ Huan quej nopa nojquiya monequi tijtapejpenise catijqui ojti eltoc xitahuac para ipan tinejnemise. Ma timomachtica san sejco cati eltoc cuali. ⁵ Pampa Job quijtojtoc para itztoc xitahuac, pero Toteco Dios amo quitajtolsencahua quej elisquía xitahuac. ⁶ Quijtohua para masque amo teno quichijtoc, Toteco quitocaxtia se istacatiqet. Quijtohua para masque amo tajtacolchijtoc, Toteco quitatzacuilitia nelchicahuac.

⁷ “¿Canque itztoc seyoc tacat cati mohueyimati quej Job? San quinequi quijtos cati amo teno ipati. ⁸ Yaya nemi ica tacame cati quichihuj cati fiero. Quintemohua amo cuajcualme para quinchihuas ihuampoyohua. ⁹ Job quijtojtoc para san tapic para se masehuali quichihuas campeca para quipaquillismacas Toteco.

¹⁰ “Huajca amojuanti cati antalnamiquij, techacaquilica. Nochi anquimatij para Toteco Cati Quipiya Nochi Chichahualisti amo tajtacolchihua, yon amo taixpano. ¹¹ Yaya quintaxtahuía nochi masehualme quej quinamiqui ica cati amo cuali quichijtoque huan quej nopa ojti cati ipan nemij. ¹² Huan tijmatij melahuac para Toteco amo quema quichihua cati amo cuali. Nochipa Toteco Cati Quipiya Nochi Chichahualisti tetajtolsencahua quej quinamiqui. ¹³ Amo aqui quimacac Toteco tequiticayot ica ni taltipacti pampa elqui yaya cati quichijchijqui ni taltipacti. ¹⁴ Huan sinta Toteco Dios quiquixtisquía Itonaltzi ipan taltipacti, huan ayemo techmacasquía iijyoyo para ma titaijyotilanaca, ¹⁵ nochi masehualme miquisquíaj huan mocuepasquíaj taltepocti.

¹⁶ “Huajca techacaquili huan xijchihua campeca para tijmachilis cati nimitzilhuis. ¹⁷ ¿Huelis tanahuatis Toteco sinta yaya amo quinequi quichihuas cati xitahuac? ¿Huelis ta tijtelchihuas nopa Tetajtolsencajquet Cati

Quipiya Nochi Chicahualisti? ¹⁸ Yaya Toteco Dios cati quinilhuía nopa tanahuatiani huan tayacanani: 'Fiero amonemilis huan amo anquichihuaq cati xitahuac.' ¹⁹ Yaya amo quinchicoicnelía masehualme. Ihuical quinchihuilía cati huejhueyi, cati tominpiyani huan cati teicneltzitzí pampa yaya quinchijqui nochi masehualme. ²⁰ Nochi masehualme san itztoque para se talojtzi huan nimantzi miquij. Tajco yohual huihuipicaj huan taloch miquij. Nojquiya taloch miquij nopa masehualme cati quiapiya chicahualisti masque amo aqui quitajitoc imax.

²¹ "Toteco Dios ica miyac cuidado quitachilía nochi cati masehualme quichihuaq ipan ni taltipacti. Yaya quinita nochi. ²² Amo onca se tzintayohuilot masque cati más yayahuic campá masehualme cati quichihuaq cati amo cuali hueli motatise iixpa Toteco Dios. ²³ Amo itequi se tacat para quijitos quema yaya yas iixpa Toteco para yaya ma quitajtolsencahua. ²⁴ Huan Toteco Dios amo aqui monequi quitajtanis caquihuili para quitzontamiltis se tequichijquet huan quitalis seyoc ipan ilugar. ²⁵ Yaya quitachilía nochi cati quichihuaq huan ipan san se yohual quintepexihuía huan quitzontamiltía. ²⁶ Quemantica quitzontamiltía fiero tacame tonaya iniixpa nochi masehualme, ²⁷ pampa quitahuelcajtoque Toteco Dios huan ayecmo nejnemij ipan iojhui. ²⁸ Huelis injuanti quintajyohuiltijtoque cati teicneltzitzí, pero cati teicneltzitzí quitzajtzilijque Toteco Dios, huan yaya quincajqui. Toteco quipactía quintacaquilía cati tajyohuía. ²⁹ Pero sinta Toteco amo quinequi camanaltis, ¿ajquiya huelisquía quitelhuis ya? ¿Sinta yaya moixtatis, ajquiya huelis quipantis? Yaya itztoque cati quitzacuilia se fiero tacat, ³⁰ para ma amo tanahuati ipan se tali huan ma amo hueli quitali se taquetzi para imasehualhua.

³¹ "¿Para ten se masehuali quej ta amo quihuilía Toteco Dios: 'Nitajtacolchijtoc, pero ayecmo nijchihuas'? ³² O quihuilis: 'Technextili nopa taixpanoli cati nijchijtoc pampa amo nijmati. Sinta nitajtacolchijtoc, techilhui quenicatza huan ayecmo nijchihuas.'

³³ "¿Timoilhuía para monequi Toteco Dios ma mitztxtahui quej ta mitz-pactía quema noja amo tijnequi timoyolcuepas ten motajtacolhua? Ta huan amo na cati monequi tijtapejpenis taya tijchihuas huan monequi timoyolcuepas. Huajca techilhui taya timoilhuía. ³⁴ Tacame cati talnamiquij huan masehualme cati miyac quimachilíaj techilhuise, ³⁵ para ta tiJob, amo tijmati taya tiquijtohua pampa amo titamachilía. ³⁶ Quinamiquiyaya tijselis se tatzacuiliti cati hueyi pampa ticamanaltic ten Toteco Dios quej quichihuasquía se fiero tacat. ³⁷ Huajca ama amo san tijhuica tajtacoli ica cati tijchijqui achtohuiya, pero nojquiya timohueyimajtoc huan tijtajijlhujitoc Toteco Dios ica miyac tamanti."

35

Eliú quiijto para amo hueli tijtajijlhuise Toteco

¹ Eliú quisenhuiquili camanalti huan quihilhui Job:

² "¿Timoilhuía para xitahuac quema tiquijtohua para tiitztoc cuali iixpa Toteco Dios? ³ Huan teipa nojquiya tiquijtohua: '¿Taya techpalehujitoc para amo nitajtacolchihua?'

⁴ "Na nimitznanquilis ta huan nochi mohuampoyohua huan nimitzilhuis para ten más cuali se amo tajtacolchihuas. ⁵ Xijtachili ilhuicacti huan mixti huan tiquitas para tahuel más huejcapa que ta. ⁶ Sinta titajtacolchihua, ¿taya tijchihuilis Toteco? Masque titajtacolchihuasquía talojtitzí, motajtacol amo

quitanahuisquía Toteco Dios. ⁷ Huan sinta timonejnemiltis xitahuac, yaya amo teno quitani por ta. ¿Taya nemacti hueli tijmacas ta? ⁸ Motajtacolhua quintanahui sequinoc masehualme quej ta, huan quema tijchihua cati cuali, elis sequinoc masehualme cati tiquinpalehuis.

⁹ “Teicneltzitzitzi tzajtzij quema taijyohuáj inimaco masehualme cati quipiyaj más chichualisti. Quitemohuaj se acajya ma quinmanahui. ¹⁰ Pero amo quitzajtzilíaj Toteco Dios huan quiijtohuaj: ‘¿Canque itztoc Toteco Dios cati techchijchijqui huan cati temaca paquilisti ipan taohuijcyayot? ¹¹ ¿Canque itztoc yaya cati techchihua achi más ma tijpiyaca talnamiquilisti que tapiyalme huan totome?’

¹² “Huan quemantica masehualme quitzajtzilíaj Toteco Dios huan yaya amo quinnanquilía, pampa injuanti tahuel mohueyimatij o quichihuaq cati fiero. ¹³ Pero amo quinamiqui sinta tiqijitose para Toteco Cati Quipiya Nochi Chichualisti amo quintacaquilía huan amo quinchihuilía cuenta cati talojtitzitzi quitzajtzilíaj. ¹⁴ Huan amo melahuac nojquiya sinta tiqijitose para Toteco Dios amo quiita nochi cati pano. Toteco quimati taya tijchijtoc huan mitzchihuilis cati xitahuac sinta timochiyas ipan ya. ¹⁵ ¿Ticualani ica ya san pampa amo mitznanquilía nimantzi huan amo quincualancaita nochi fiero tacame? ¹⁶ Job, ticamanaltitoc quej se cati huihuitic. Ticamanaltitoc miyac pero amo tijmati taya tiqijtohua.”

36

¹ Eliú quisenhuiquili camanaltic huan quiijto:

² “Xijpiya moyolo huan techcahuili ma nimitzcamanalhui seyoc talojtzi para nimitznextilis cati melahuac. Noja nijpiya se ome camanali para nijtenpalehuis Toteco Dios. ³ Nijtequihuis nochi notalnamiquilis huan nimitzmacas se tamachtli cati mitznextilis para Toteco Dios cati techchijqui nelía quichihua cati xitahuac. ⁴ Na nimitzilhuía nochi cati melahuac pampa nijpiya miyac talnamiquilisti cati tahuel cuali.

⁵ “Nelía hueyi Toteco Dios, pero amo aqui quihuejcamajcahua. Yaya quipiya nochi chichualisti huan nochi tamachilisti. ⁶ Yaya amo quincahuilía ma itztoca masehualme cati fiero ininemilis, pero quinmaca teicneltzitzitzi cati xitahuac. ⁷ Toteco Dios nochipa quinmocuitahuía cati xitahuaque iixpa. Yaya quinhueyitalía huan quinsehuía inihuaya tanahuatiani para tanahuatise para nochipa. ⁸ Huan sinta hualas ininpani taohuijcyayot huan taijyohuilisti, ⁹ Toteco Dios quinnextilía nopa tajtacoli cati quichijque huan quenecatza mohueyimajtoque. ¹⁰ Quinpalehuía para ma quitacaquilica icamanal para ma moxitahuaca. Quinnahuatía ma moyolcuepaca huan ma quicahuaca inintajtacolhua.

¹¹ “Sinta injuanti quitacaquilise huan quitepanitase cati quiijtohua, Toteco Dios quintiochihuas huan injuanti quiipiayase paquilisti ipan nochi ininemilis huan nochi cati quichihuase quisas cuali. ¹² Pero sinta injuanti amo quitacaquilise, miquise ica macheta pampa amo quipixque talnamiquilisti. ¹³ Pampa fiero tacame quicualancaitaj Toteco Dios. Amo mocuepaj ica ya, yon amo quinotzaj ma quinpalehui quema yaya quintatza-cuiltía. ¹⁴ Fiero tacame miqij quema noja telpocame pampa quichihuaq ten hueli ica sequinoc tacame nópona campa quinhueyichihuaq teteyome. ¹⁵ Por inintaijyohuilis Toteco quinmaquixtis masehualme. Quinchihua ma quitacaquilica huan ma moyolcuepaca ten inintajtacolhua.

16 “Toteco nojquiya quinequi mitzmanahuis huan mitziyocatalis ten nochi tamanti cati mahuilili. Quinequi mitzhuicas ipan se hueyi tamayamit campa mitzhueyitalis ipan mochaj ica nochi tacualisti cati más cuali. 17 Pero ta tahuel ticalantoc ica cati tajtacolchihuaj, huan tiquijtohua monequi Toteco quintatzacuiltis. Huajca xijmati para quinamiqúi Toteco Dios mitztatzacuiltis nojquiya. 18 Pero ximomocuitahui para amo aqui mitzyoltlanas ica tomi para tijchihuas cati fiero. Amo xijcahuili se taxtahuili ma mitzchihua titajtacolchihuas. 19 ¿Timoilhuía para motomi huan mochicahualis mitzmanahuis para amo tijselis taijyohuulisti ten Toteco?

20 “Amo xijnequi ma eli tayohua quema tacame quinhuilanaj masehualme ten ininchaj para quinchihuilise miyac tamanti cati fiero. 21 Ximoiyocatali ten nochi tamanti cati amo cuali. Toteco quititanqui ni taijyohuulisti ipan ta para mitzcuepaltis ten se nemilisti cati fiero.

Eliú quiijo Toteco quipiya nochi chichahualisti

22 “Toteco Dios quipiya nochi chichahualisti. Amo aqui seyoc tamachtijquet cati tamachtía quej ya. 23 Amo aqui huelis quiilhuis Toteco Dios taya ojti ma qutoquili. Amo aqui huelis quiilhuis para amo cuali cati quichihua. 24 Más cuali xijhueyichihua por nochi huejhueyi tamanti cati yaya quichijtoc ica ichicahualis. Xijhueyichihua ica huicat. 25 Nochi masehualme huelij quiitaj nopa huejhueyi tamanti cati yaya quichijtoc, masque san quiitaj itequi Toteco ica huejca.

26 “Toteco Dios nelía hueyi huan yeca tojuanti amo tiyajatij tijtamiixmatij. Yon amo aqui hueli quipohua quesqui xihuit quiipiya. 27 Toteco quichihua ma tejo nopa apocti huan teipa quichihua ma huetzi at ipan taltipacti. 28 Ten nopa mixti, Toteco quichihua ma huetzi at cati cuali para ma atica nochi masehualme. 29 ¿Hueli se masehuali quimachilis quenicatza momoyahua mixti huan quenicatza hualtemos nopa tatomonilot? 30 Xiquita quenicatza Toteco quisemanqui tapetanilot para quiyahualos campa itztoc. Xiquita quenicatza quintaahuilía hasta tatzinta ipan hueyi at. 31 Ica ihueyi chichahualis, quinahuatía ni taltipacti huan temaca tacualisti hasta mocahua. 32 Ipan imax quipixtoc miyac tapetanilot huan quinmajcahua campa yaya quinequi. 33 Quema tatomoni, techyolmelahua para huala miyac at cati huetzis chichahuac. Huan nopa chichahualisti technextilía icualancayo Toteco huan quinyolmelahua tajtacolchihuani para ma moyolcuepaca.

37

1 “Huan quema nimoilhuía ten ya ni, techmajmatía huan quichihua ma huihuipica noyolo. 2 Xijtacaquilica itoscac Toteco Dios cati eltoc quej tatomonilot. 3 Itoscac ajsi campa hueli ipan ilhuicacti, huan itapetanilo ajsi ica chichahualisti campa hueli ipan taltipacti. 4 Teipa huala nopa tatomonilot cati technextilía Toteco Dios ihueyitilis. Quema yaya camanalti, quichihua ica nochi ichicahualis. 5 Nelía yejyectzi tijcaquij itoscac quema tatomoni. Yaya quichihua huejhueyi tamanti cati tojuanti amo tijmachilíaj.

6 “Yaya quinahuatía nopa sital set ma huetzi ipan taltipacti. Quiilhúa at cati huetzi chichahuac. 7 Nochi masehualme quicahuaj inintequi huan san mocahuaj ipan ininchaj para quixmatise ihueyi chichahualis. 8 Tapiyalme cati nemij ipan cuatitamit motatíaj campa teme huan campa inintepasol. 9 Huala at chichahuac ten ilhuicac huan nopa ajacat quihualica se tasesecayot cati chichahuac. 10 Iijyoyo Toteco Dios quititani tasesecayot huan set.

Quichihua miyac at ma mochihua hielu. ¹¹ Yaya quitemitía nochi mixti ica at huan ten nopa mixti quititani nopa tapetanilot campa hueli. ¹² Toteco Dios quimajcajqui nopa fiero tapetanilot ica imax. Huan quinhualtitani ipan nochi ni taltipacti para ma quichihuaca cati yaya quinequi. ¹³ Quemantica Toteco Dios quititani nopa miyac at para ica quintazacuultis masehualme, o huelis para ica quintiochihuas, o huelis san para quiatequis italtipac.

¹⁴ “Job, xijtacaquili ya ni. Xijchiya se talojtzi huan ximoyolilhui ten nopa huejhueyi tiochicahualnescayot cati Toteco Dios quichihua. ¹⁵ ¿Tijmati quenicatza Toteco Dios quinahuatía nochi at ma huetzi chicahuac huan quenicatza quichihua ma tapetani ten mixti? ¹⁶ ¿Tijmati quenicatza ne mixti eltoc san ajacatipa huan amo huetzi hasta talchi? Tojuanti san tijtachilíaj por nochi italnamiqulil. ¹⁷ ¿Tijmati ta para ten tipatzmiqui ica tajcotona quema tailpitza nopa ajacat cati huala ica tatzinta? ¹⁸ ¿Ta tijpalehui Toteco para quipatahuas ilhuicacti quej se hueyi tescat cati cahuani?”

¹⁹ “Ta cati tiquijtohua tijmati nochi, technextili quenicatza timonechahuse ica Toteco Dios, pampa tojuanti amo tijmatij. Eltoc quej tiitztoque ipan tzintayohuilot. ²⁰ ¿Timoilhuía niquilhuis para na nijnequi nijcamanalhuis? Pero ¿ajquiya quinequisquía quicamanalhuis se quej ya cati huelis quitolos noja yoltoc? ²¹ Quema nopa ajacat quihuica nopa mixti, tojuanti yon amo tihuelij tijtachilíaj tonati pampa tahuel cahuantoc. ²² Toteco Dios huala ten norte huan yahualtic quipixtoc itatanex cati tahuel cahuani. Toteco huala ica nochi ihueyitilis cati tahuel temajmatía. ²³ Amo hueli tijmachilíaj iyajatil Toteco Cati Quipiya Nochi Chicahualisti, pero yaya nelía xitahuac huan techtasojta, huan yeca amo techzontamiltía. ²⁴ Yeca nochi masehualme campa hueli, quiimacasij. Yaya amo quiita para ipati yon se cati moilhuía para quiapiya miyac talnamiquilisti.”

38

TOTECO quinxextili Job para nelquentzi quimati

¹ Huajca TOTECO quinojnotzqui Job ten se ajcomalacat huan quihlhu:

² “¿Para ten ta cati amo teno tijmati tiquijtohua amo cuali cati na ica nochi notalnamiqulil nijchihua? ³ Ximoquetza cuali huan ximocualtali para technanquilis pampa na nijpiya sequij tatzintoquili para ta.

⁴ “¿Canque tiitztoya ta quema nijtaliyaya itzinpehualtil ni taltipacti? Sinta nelía titalnamiqui, techilhui. ⁵ ¿Tijmati quenicatza nijcualtali ihuexca huan nijtamachijqui quesqui metros quipiyasquía? ⁶ ¿Tijmati ipan taya motatzquilijtoc nopa taquetzalme ipan itzinpehualtil? ¿Ajquiya quitali nopa achtohui tet cati más monequi huan cati yahui calesquina? ⁷ ¿Canque tiitztoya quema nochi nopa sitalime huicayayaj ica paquillisti ica ijalnoc huan noilhuicac ejahua * tzajtzizayaj ica paquillisti para techhueyichihuase?

⁸ “Na cati nijtalili inepa nopa huetzi at quema topontiquisqui ica nochi ichicahualis ten campa nijchijqui, ⁹ huan nijtali mixti huan tzintayohuilot iixco quej elisquía iyoyo. ¹⁰ ¿Tijmati quenicatza nijtzajqui nopa hueyi at quej se quitzacua se caltemit para ayecmo quisas ten itejteno? ¹¹ Huan niquilhui hueyi at: ‘Hasta nica huelis tjajsis pero amo huelis tipanos más. Nica tamis campa hueli ajsis moa cati mohujhuisojtihuala talojtzi.’”

* **38:7** 38:7 Ipan hebreo quijtohua ‘itelpocahua Toteco’. Xijtachili nojquiya Gn 6:2; Job 1:6, 2:1 huan Dn 3:25. Camanalti ten ilhuicac ehuani o ilhuicac ejahua Toteco.

12 “¿Timoilhuía quemantica ta tijnahuatijtoc tonali ma tanesi ica ijnaloc huan ma taahui nopa tonati? 13 ¿Timoilhuía tijnahuatijtoc nopa tonali ma tatanexti hasta campa hueli campa itamiya taltipacti para masehualme ayecmo ma quichihuaca más tajtacoli ica tayohua? 14 ¿Tijchijtoc ma taahui cuali nopa chichiltic taahuili cati monextía ica ijnaloc? ¿Ta tijchijtoc para iixco taltipacti ma nesi quej quiipiya iyoyo cati chichiltic? 15 ¿Tijpanextijtoc campa motatíaj nopa tajtacolchihuani? ¿Tijtzacuili cati quitanantoya iajcol para tecocos?

16 “¿Tiquitztoc canque meya nopa at ipan hueyi at? ¿Ticalactoc ipan nopa hueyi ostot ten hueyi at huan tinejntoc hasta tatzinta? 17 ¿Mitznextilijtoque campa eltoc nopa caltemit ten miquilisti huan micta? 18 ¿Tijmati quesqui ipatajca ni taltipacti? Techilhui sinta tijmati nochi ya ni.

19 “¿Tijmati nopa ojti cati ipan huala taahuili? ¿Huelis techilhuis canque yahui nopa tzintayohuilot? 20 ¿Huelis tijhuicas taahuili hasta ichaj? ¿Tijmati nopa ojti hasta campa pejqui? 21 Ta, quena, timoilhuía tijmati nochi ya ni pampa timoilhuía titacatqui quema ayemo nijchijchihuayaya nochi ni tamanti. Temachtí timoilhuía tijmati miyac pampa tijpiya tahuel miyac xihuit. Pero amo melahuac ten timoilhuía.

22 “¿Tiyajtoc campa nicajoctoc nopa sital set? ¿Tiyajtoc campa nijchijchihua nopa tesihuit huan nicajocui? 23 Nochi ya nopa nicajoctoc para nijtequihuis ipan nopa tonali ten taohuijcauyot huan ipan tatehuilisti. 24 ¿Tijmati nopa ojti cati yahui campa pehua itaahuil tonati? ¿Tijmati canque pejtoc nopa ajacat cati huala ica campa hualquisa tonati huan yahui ipan nochi taltipacti? Na nijmati.

25 “¿Ta tijmati ajquiya quichijchijqui aojti ipan tamayamit para ipan ma motalo nopa at cati huetzi huan ajquiya quinextili iojhui nopa tapetanilot? 26 ¿Tijmati ajquiya quichihua ma huetzi at ipan huactoc tali campa amo teno eli? 27 ¿Tijmati ajquiya quixolonía nopa tali cati tahuel amiqui huan quichihua ma ixhua xihuit cati selic? Na, quena, nijchijqui.

28 “¿Quiipiya itata nopa at cati huetzi? ¿Canque huala nopa ajhuechti? 29 ¿Ajquiya inana nopa tasesecayot? ¿Canque huala nopa tasesecayot cati huetzi ica ijnaloc? Na nijtitani. 30 At mocuepa tasesecayot campa mantoc at huan ipan hueyame huan mochihua tetic quej tet pampa na nijchihua.

31 “¿Huelis ta tiquintzacuilis nopa sitalime Pléyades para ma ayecmo ne-nemica? ¿O huelis tiquintojtomos nopa sitalime cati inintoca Orión para ayecmo ma mocahuaca tatzquitoque? 32 ¿Timoilhuía ta tiquinilhúa nopa sitalime cati sentic nemij quema inihora para monextise ipan ilhuicacti? ¿Ta cati tiquinyacana ipan iniojhui nopa sitalime cati sentic yahuij cati inintoca Osa Mayor huan Osa Menor? 33 ¿Tiquinixmati nopa tanahuatilme cati quitoquilíaj nochi tamanti ipan ilhuicacti huan ipan ni taltipacti?

34 “¿Huelis ta tijtaztízilis chichahuac ne mixti huan tijchihuas ma taquiyahui? 35 ¿Hueli tijnahuatís ma quisa miyac tapetanilot huan ma huetzítij campa ta tijnequi? Na nihueli. 36 Na nitemaca talnamiquilisti huan taixmatilisti. 37 ¿Ajquiya quiipiya miyac talnamiquilisti para quiijtos quesqui mixti onca? ¿Ajquiya hueli quichihuas ma huetzi miyac at quema tahuactoc, 38 huan nochi tali mocuectoc taltepocti huan taltojtolomit?

39 “¿Tihueli tijtemos tacualisti para se sihua león para quintamacas iconehua, 40 cati mochixtoque ipan iniosto o ipan cuatitamit? Na nihueli.

⁴¹ Na nihueli niquintemohuilía inintacualis nopa cacalome quema inincone-hua techtzajtzilíaj, niininTeco, huan nentinemij ipan inintepasol pampa mayanaj.

39

¹ “Job, ¿ta tijmati quema taconehuíaj nopa chivojme cati itztoque ipan cuatitamit? ¿Ta tiquitztoc quenicatza se síhua masat quitacatiltia icone? ² ¿Tijmati quesqui metzti monequi tanemiltise nopa tenan chivojme, ³ hasta mohuitolose para quintacatiltise inincone-hua para tamis inintacuaajcualol? ⁴ Nopa pilchivojtzitzi moscaltíaj nopona ipan cuatitamit huan teipa yahuij huejca para motamacase iniselti huan ayecmo mocuepaj campá inintatahua.

⁵ “¿Ta tijmati ajquiya quinchijtoc nopa cuatita burrojme para teimacasisse huan nejnemise huejca ipan cuatita? ¿Tijmati ajquiya quinchijtoc majcajtoque para ma yahui campá quinequij? ⁶ Na nijchijqui. Na cati niquintali cuatita huan niquinmacac nopa tamayamit campá onca istat para nopona ma itztoca. ⁷ Nopa burrojme amo quinequij quicaquise nopa tahuejchihualisti ipan altepeme, yon amo quinequij nopa burrohuicani ma quintzajtzilica. ⁸ Injuanti paquij motalojtinemij ipan cuatitamit para quipantise inintacualis. Nopona quicuaajtinemij nochí tamanti xihuit cati selic.

⁹ “¿Timoilhuíaj huelis tijmaxojtilis nopa hueyi búfalo cati nemi cuatita? ¿Timoilhuía para quinequis mocahuas calijtic campá tacuaj motapiyalhua? ¹⁰ ¿Huelis ta tijtalis se cuahuit iquechta huan tijtequihuis nopa hueyi búfalo para tijpoxonis motal? ¿Timoilhuía para quinequis tapoxonis ica se teposti ipan motal? ¹¹ ¿Huelis timotemachis ipan nopa tapiyali pampa hueyi huan quipiya miyac chichahualisti? ¿Huelis tijcajtehúas huan tijmatis para quichihúas nopa tequit cati tijnegui ma quichihua? ¹² ¿Huelis tijtitanis para ma quimama motrigo huan quihualicas hasta mochaj?

¹³ “Nopa síhua totot cati itoca avestruz, quihuihuipitza o quipatahua ieltapal, pero amo hueli patani quej nopa cigüeña. ¹⁴ Nopa avestruz quicajtehúa itecsis xalixco para ma mototonili. ¹⁵ Amo moilhuía para se acajya hueli moquetzas ininpani o se tapiyali hueli quinpitzinis. ¹⁶ Yaya tahuel mosisinía ica iconehua quej elisquía amo iaxcahua huan yon amo quinchihuilía cuenta sinta miquij, ¹⁷ pampa na, niamoTeco, amo nijmacac talnamiquilisti huan tamachilisti. ¹⁸ Pero quema nopa avestruz motanana huan motalohua, chichahuac yahui huan quintani nochí cahuayojme huan nochí cati ininpa tejcotoque.

¹⁹ “¿Ta cati tiquinmacac ininchicahualis cahuayojme huan tijyecchijqui ininquechta ica inintzoncal cati huehueyac? ²⁰ ¿Ta tiquinmacac cahuayojme yajatili para huítonise quej chapolime? Se cahuayo quipactia tzajtzi chichahuac huan mohueyimati huan temajmatía. ²¹ Quitejtzona tali ica iisti huan paqui pampa quipiya miyac chichahualisti. Huan ipan tatehuilisti se cahuayo, ²² amo majmahui huan amo cholojtehúa. ²³ Masque cuataminti quiajsi ipan ielchiqui o quiajsij ica cuachoso o machetas cati tatequi, se cahuayo noja quichihua itequi. ²⁴ Ica nochí iyolo quitejtzona tali chichahuac ica iisti huan paquí quema quicaquí tapitzali. Nimanntzi quinequi yas ipan nopa tatehuilisti. ²⁵ Quema se tapitza, se cahuayo taijnequí hasta huejca para quimatis canque eltoc nopa tatehuilisti huan tahuel paquí quema quicaquí

tzajtzi cati motehuáj o quicaqui se tayacanquet ten soldados cati temaca tanahuatili.

²⁶ “¿O huelis ta tijmacatoc talnamiquilisti nopa cuatojti para motananas huan quipatahuas ieltapal ica tatzinta huan patantehuas? ²⁷ ¿Huelis ica ta motanahuatili motanana nopa cuatojti cati más hueyi huan yahui campa tepexit para quichihuas itepasol huejcapa? ²⁸ Nopona nopa cuatojti mocahua para itzfos ipan nopa tepexit huan nopona quichihua itepasol. Cochi campa teme cati más huejcapa. ²⁹ Huan ten nopona quitajtachilía huejca hasta quiita se tapiyali para quiitzquis. ³⁰ O yahui campa huetztoc itacayo se tapiyali cati mictoc para quihualicas huan quintamacas ipilcnehua ica esti.”

40

¹ TOTECO nojquiya quiilhui Job:

² “¿Noja tijnequi timonajnanquilis nohuaya na, nimoTeco Cati Nijpiya Nochi Chicahualisti? Ta cati techtajilhuiyaya ¿tijpiya camanali para technanquilis?”

Job quinanguili Toteco

³ Huajca Job quiilhui TOTECO:

⁴ “Na amo teno nopati. Amo hueli nimitznanguilis. Más cuali nijtalis nomax ipan nocamac huan ayecmo nimolins. ⁵ Ya nicamanaltic miyac huan ayecmo nijpiya camanali para niqijtos.”

Toteco sempa quiixcoilhui Job

⁶ Huan TOTECO sempa quinojnotzqui Job ten tatajco nopa ajcomalacat huan quiilhui:

⁷ “Ximoquetza quej se tacat huan ximocualtali para technanquilis cati nimitztatzintanguilis. ⁸ ¿Tiquijtohua para na amo nixitahuac huan ta tixitahuac? ⁹ ¿Tijpiya chicahualisti quej na, nimoTeco Dios, nijpiya? ¿Ta tihueli tijchihua ma tatomoni motoscac nelchicahuac quej na nihueli nijchihua? ¹⁰ Huajca sinta nelía tihueyi quej na, ximoquenti nopa tatanexti huan technextili mohueyitilis. Technextili motequiticayo huan nopa tatepanitacayot cati quinamiqui tijselis. ¹¹ Xijnnexti mohueyi cualancayo. Xiquintachili cati mohueyimatij huan xiquinehcapantali. ¹² Xiquinpinahualti nochi cati motepanitaj san ica motachiyalis. Ximoquejquetza ininpani nopa masehualme cati fiero ininemilis. ¹³ Xiquintalpacho nochi injuanti ipan tali huan xiquinmajcahua ipan nopa tzintayohuilot ten miquilisti. ¹⁴ Sinta huelis tijchihuas nochi ya nopa, huajca na nojquiya nimitzitas para tihueyi pampa melahuac tihuelqui timomaquixti ica mochicahualis.

¹⁵ “Xiquita, nopa hueyi tapiyali Behemot. Nojquiya na nijchijchijqui ya san se quej nimitzchijqui ta. Quicua sacat quej se huacax. ¹⁶ Xijtachili quenicatza quiipiya miyac chicahualisti ipan imetztomahuia huan ipan nopa huejhueyi músculo ipan iijti. ¹⁷ Quiipiya icuitapil cati mohuijhuishohua quej se tiocuahuit. Huan ipan iquescuayo quiipiya italo cati cuali moijilpitoc ica italiicho san sejco. ¹⁸ Iomiyohua xitahuaque huan tetique quej nopa teposti bronze. Huan imetzhua tetique quej se barra ten teposti. ¹⁹ Nopa Behemot itzto nopa tayacanca ejemplo ten noyajatil ten nochi tapiyalme cati na, niamoTeco niqinchihtoc. San cati nijchijqui huelis nijnechahuas ica nocuitapa huan yaya amo teno techchihuilis. ²⁰ Nopa cuatitamit campa miyac cuatitan tapiyalme mahuiltijtinemij temaca nopa xihuit cati más cuali para nopa Behemot ma quicua. ²¹ Yaya moteca itantita iniecahuil nopa

xihuime cati onca ipan at huan motatía ipan inincuayo cati más xolontoc. ²² Nopa lotos cuame cati onca atenti quimacaj iniecahuil campa nopa álamo cuame cati moscaltíaj atenti. ²³ Nopa Behemot amo momajmatía masque mosisinisquía nopa at. Amo mocuesohua sinta temi nopa hueyat Jordán huan quiajssis ipan icamac. ²⁴ Amo aqui huelis quiitzquis, o quimasiltis o quitalilis anillos ipan iyacatzol para quihuicas ilpitoc.

41

¹ “¿O huelis tinelhueyi hasta tihuelis tiquitzquis nopa leviatán tapiyali ica se teposchijcoli? ¿Huelis tiquilpis ica se lazo ipan icamac quej na nihueli? ² ¿Huelis tiquilpis ta ica se lazo ipan iyacatzol o tijcoyonis ipan icamachal para tijpanoltis se teposchijcoli? ³ ¿Huelis timoilhuía para yaya mitztajtanis miyac huelta para xijcahua, o mitztacahualtis ica camanali cati yejyectzitzí? ⁴ ¿Timoilhuía para quichihuas se camanal sencahuali mohuaya para elis motequipanojca para nochipa? ⁵ ¿Ta tihuelis tijmaxojtilis huan tijpixtos ipan mochaj quej elisquía se totot huan tiquinmacas mosihuapilhua ma quiahuiltica? ⁶ ¿Tiquita nopa michtajtamani huelise quihuicase ipan tianquis para quinamacase inacayo? ⁷ ¿Tihuelis tijcoyonis icuetaxo ica miyac cuataminti o tijcoyonis itzonteco ica huejhueyi teposchijcolme? ⁸ Sinta tiquitzquisquía, yaya mitztzehuisquía. Huan amo quema tiquelcahuasquía nopa tatehuilisti ihuaya. Ayecmo quema tijnequis tiquitzquis sempa.

⁹ “San tapic para tijnequis tiquitzquis para tiquilpis pampa amo tihuelis. Itachiyalis tahuel mitzmajmatis. ¹⁰ Huajca amo aquí mosemaca quiixitis nopa leviatán, yon quiitzquis. Huan sinta amo aquí motemaca itztos iixpa ya cati na nijchjtoc, ¿ajquiya huelis itztos noixpa na cati niamoTeco? ¹¹ Na amo aquí nijtahuiquilía. Nochi cati onca tatzinta ilhuicacti na noaxca.

¹² “Nojquiya nicamanaltis ten nopa chicahualisti cati nopa leviatán quiipiya ipan sesen imetz huan ipan nochi itacayo huan quenecatza yejyectzi hueli ajqui. ¹³ Amo aquí hueli quicoyonilis icuetaxo. Amo aquí motemaca moquetzas nehca icamac para quitalilis se tepos camachali. ¹⁴ Amo aquí hueli quitapohuilis icamac pampa quiipiya itancoch cati tahuel temajmati. ¹⁵ Nopa cacahuayot cati moquetzoc icuitapa cuali tatzquitoc huan tahuel tetic quej tet. ¹⁶ Amo quicahuilía panos ajacat huan yon se tamanti amo hueli quicoyonis. ¹⁷ Tatzquitoc inacayo san sejco huan amo aquí hueli quiniyocatalis.

¹⁸ “Quema nopa leviatán miltzomía, quisa cati eltoc quej tapetanilot. Huan iixteyolhua nesij chichiltic quej tanestihuala. ¹⁹ Ipan icamac quisa miyac tit huan timoyot. ²⁰ Ipan iyacatzol quisa pocti quej quema quimoloníaj se tacuali ipan se tit ten acat. ²¹ Ica iijyoyo quilemenaltía ticoli huan ipan icamac quisa tilelemecti.

²² “Quiipiya miyac chicahualisti ipan iquechta. Huan campa hueli campa yahui, quinmajmatía nochi cati quinpantía. ²³ Campa mocuilpachojtoc icuetaxo tahuel motzquitoc. Neltetic huan amo mojmolinía icuetaxo campa hueli ipan itacayo. ²⁴ Quiipiya iyolix neltetic quej se tet. Quena, tahuel tetic quej se metat. ²⁵ Quema nopa leviatán moquetza, quinmajmatía nochi cati itztoque iixpa hasta cati más yoltetique. Nochi cholohuaj pampa yaya tahuel mosisinía. ²⁶ Yon se macheta, cuataminti o teposchoso hueli quicocos. ²⁷ Nopa leviatán quiita teposti quej elisquía sacat. Nopa teposti bronce quichihua quej elisquía se cuahuit cati palantoc. ²⁸ Yaya amo

cholohua quema quimajcahuilíaj cuataminti. Huan quema quimajcahuilíaj tet ica tatehuitatzti, yaya quiita quej quimajcahuilisquíaj tasoli. ²⁹ Masque quimaquilíaj ica cuahuit yaya amo quichihuilía cuenta huan san quinhuetzquilía quema quimajcahuilíaj se cuachoso ten teposti. ³⁰ Tatzinta iijti quiipiya icacahuayo cati tetic huan cati tatequi. Huan quema mohuahuatza, tahuel quipoxonía tali.

³¹ “Nopa leviatán quimolnaltía nopa at quema quiolinía. Eltoc quej quichihua ma mojmolini nopa at hasta campá más tatzinta. ³² Huan quema yahui aixco, quiposonaltijti nopa at. Quema tijtachilis nopa hueyi at cati posoni, nesi chipahuac quej elisquía itzoncal se huehuentzi. ³³ Ipan nochi taltipacti amo onca yon se tapiyali quej nopa leviatán cati amo teno quiimacasi. ³⁴ Ten huejcapa, yaya quintachilía nochi cati mohueyimatij. Yaya inintanahuatijca nochi cati mohueyimatij.”

42

Job moyolcuetqui iixpa TOTECO

¹ Huan Job quiilhui TOTECO:

² “Na nijmati para ta nochi tihueli tijchihua. Amo aquí huelis mitztzacuilis para amo tijchihuas yon se tamanti cati timoilhuijtoc para tijchihuas. ³ Ta titatzintocayaya ¿ajquiya nopa masehuali cati quijtohuayaya amo cuali cati tijchihuayaya? Na nieli nopa tacat. Nicamanaltiyaya ten miyac huejhueyi tamanti cati amo nijmatiyaya huan amo nijmachiliyaya.

⁴ “Ta techilhui ma nijtacaquili, pampa tijnequiyaya ticamanaltis nohuaya. Tiquijtohuayaya ta techtatzintoquilis huan nimitznanquilis sinta melahuac nijpiya talnamiquilisti.

⁵ “Pero TOTECO nimitzilhuía. Na nijcactoya ten ta, pero ama nimitzitztoc.

⁶ Huan yeca nimoiijiya huan nimoyolcuepa moixpa. Nimotemilía taltepociti ipan notzonteco huan nimosehuía ipan cuajnexti para nochi ma quimatica nimoyolcuetoc.”

TOTECO cualanqui inihuaya nopa eyi ihuampoyohua Job

⁷ Teipa quema Toteco tanqui camanalti ihuaya Job, quicamanalhui Elifaz cati ehua Temán, huan quiilhui:

“Na tahuel nicualani ica ta huan ica nopa ome mohuampoyohua pampa amo ancamanaltique xitahuac ten na quej notequipanojca Job. ⁸ Huajca ama xiquincuica chimececerros huan chimecece oquich chivojme, huan xiyaca campá notequipanojca Job. Huan nopona xiquintencahuaca quej se tacajcahualisti tatatili para anquiixtzacuase amotajacolhua. Huan notequipanojca Job motatajtis por amojuanti huan na nijtacaquilis. Quej nopa amo nimechtzontamiltis quej quinamiqui nimechchihuilis por amotajacolhua. Pampa amojuanti amo ancamanaltique xitahuac ten na quej notequipanojca Job.”

⁹ Huajca Elifaz cati ehua Temán, Bildad cati ehuyaya Súa huan Zofar cati ehuyaya Naamán, yajque huan quichihuatoj senquisá quej Toteco quinnahuatijtoya. Huan TOTECO quitacaquili Job quema motatajti por injuanti.

TOTECO tahuel miyac quitiochijqui Job

¹⁰ Teipa quema Job motatajti por ihuampoyohua, Toteco Dios quiquixtili itaijyohuilis huan quicuepili nochi iricojyo. Huan quimacac ome huelta imiyaca cati quipixtoya achtohuiya.

¹¹ Huan hualajque campa ya nochi isihua icnihua, itaca icnihua huan ihuampoyohua cati quixmatque achtohuiya huan ilhuichijque ihuaya ipan ichaj. Huan quiyoltalijque huan quiyolchicajque por nochi nopa taijy-ohuulisti cati TOTECO quititanilijtoya. Huan sesen ten injuanti quihualiquili Job se nemacti ten tomi huan se anillo ten oro.

¹² Huan TOTECO quitiochijqui Job noja más que achtohuiya. Pampa ama quinpixqui 14 mil borregojme, chicuase mil camellos, mil pares huacaxme cati tapoxoníaj huan mil sihua burrojme.

¹³ Nojquiya TOTECO quimacac seyoc chicome itelpocahua huan seyoc eyi iichpocahua. ¹⁴ Nopa achtohui ichpocat itoca eliyaya Jemima, nopa ompa ichpocat itoca eliyaya Cesia huan nopa expa ichpocat itoca eliyaya Keren Hapuc. ¹⁵ Huan ipan nochi taltipacti amo oncayaya ichpocame cati tahuel yejyetzitzi quej iichpocahua Job. Huan Job quinmacac iichpocahua inintal huan ininparte ipan nochi cati quipixqui san se quej quinmacac itelpocahua.

¹⁶ Huan teipa Job noja itztoya 140 xihuit. Huan quinitac iconehua, iixhuihua, iniixhuihua ininconeuhua huan iniixhuihua ininconeuhua ininconeuhua.

¹⁷ Teipa mijqui Job quema eliyaya nelhuehuentzi.

Salmos

1

Tajtacolchihuani huan cati itztoque xitahuaque iixpa Toteco

- ¹ Paquí nopa masehuali cati amo quitacaquilía inincamanal amo cuajcualme, yon amo quintoquilía tajtacolchihuani. Yon amo mohuica inihuaya cati ica paquij TOTECO.
- ² Nopa masehuali quipantía hueyi paquilisti pampa quichijtinemi cati quij-tohuaj itanahuatilhua TOTECO, huan ipan nopa tanahuatilme moyolilhuijtinemi tonaya huan tayohua.
- ³ Nopa masehuali itztoc quej se cuahuit cati moscaltía nechca atenti, huan temaca itajca quema ipohual huan amo quema xihuiyo tepehui. Nochi cati quichihua quisa cuali.
- ⁴ Pero amo quej nopa ica masehualme cati amo cuajcualme, pampa injuanti itztoque quej tasoli cati quihuica ajacat.
- ⁵ Yeca quema TOTECO tetajtolsencahuas, nopa amo cuajcualme amo huelise quijyohuise, pampa yaya tahuel chichahuac quintatzacuilitis. Quena, ipan nopa tonali tajtacolchihuani ayecmo huelis itztose inihuaya masehualme cati itztoque xitahuaque iixpa.
- ⁶ Pampa TOTECO quixmati nopa ojti cati qutoquilíaj masehualme cati itztoque xitahuaque, pero masehualme cati quichihuaj cati amo cuali, polihuise.

2

Quema tanahuatis Icone TOTECO

- ¹ Se huihuiyot para tanahuatiani huan inimasehualhua cati amo quixmatij TOTECO motananase iixpa. San tapic para mocualtalise quichihuase ten fiero.
- ² Tanahuatiani huan tayacanca tequichihuani ipan taltipacti mosisinise, huan mocamanalhuise taya huelis quichihuilise TOTECO huan nopa Tanahuatijquet Cati Yaya Quitapejpenijtoc.
- ³ Tahuejchihuase huan moilhuise:
 “Ma timoquixtilica nopa tepos cadena cati ica techilpitoc.
 Ma timomanahuica para ayecmo huelis technahuatis TOTECO.”
- ⁴ Pero Toteco cati itztoc nopa ilhuicac huan quinahuatía nochi, san quinhuetzquilis. Quena, san ininca paquis, pampa iixpa ya amo teno ipati cati injuanti quipilsencahuase.
- ⁵ Teipa quema quiyolaxitise TOTECO, melahuac quinixcoilhuis. Huan ica miyac cualanti quinmajmatis huan quijjtos:
- ⁶ “Ya nijtalijtoc notanahuatijca para tanahuatis ipan altepet Jerusalén. Yaya mosehuis ipan isiyaj cuajcualtzi nopa ipan notepe tatzejzeloltic cati itoca Sion.”
- ⁷ Huan cati TOTECO quitapejpenijtoc para itanahuatijca quijjtos: Nitayolmelahuas cati TOTECO nechilhuijtoc huan ya ni cati quijjto: “Ta tiTanahuatijquet, tiNocone.

Ama nitayolmelahua miyacapa para na nimoTata.

⁸ Techtajtani huan nimitzmacas nochi talme huan inimasehualhua para moaxcahua.

Quena, tijselis hasta nochi taltipacti para moaxca.

⁹ Xiquinnahuati chichahuac quej se tanahuatijquet cati tanahuatía ica teposti imaco para ica tetatzacuilitis.

Quena, xiquinomiyojpostequi mosisinijca masehualme quej elisquáj so-
qui chachapalme.”

(Quej nopa TOTECO quitequimacac itanahuatijca ma quichihua.)

¹⁰ Yeca, antanahuatiani huan antequichihuani ipan taltipacti,
ximotalnamictica huan ximomocuitahuica ica cati anquichihuaj.

Ama xijtacaquilica cati nimechilhuía quema noja anhuelij.

¹¹ Xijtequipanoca TOTECO pero nojquiya xiquimacastica huan xijtepanitaca
pampa anmomacaj cuenta ajquiya ya.

Xijhueyichihuaca TOTECO ica paquilisti huan xiquimacastica anquichihuase
cati amo quinamiqui.

¹² Ximotancuaquetzaca iixpa Icone TOTECO ica majmajti huan xijtzoponica.
Sinta amo, antalochmiquise pampa nimantzi cualani.

Pero nelía paquij masehualme cati motemachíaj ipan ya para ma quinpale-
hui.

3

Se netatajtili para Toteco Dios ma quipalehui

¹ TOTECO, nelía momiyaquilíaj nocualancaitacahua.

Quena, nelmiyaqui motananaj para techtehuise.

² Miyaqui quijtohuaj para ta amo quema techpalehuis.

³ Pero TOTECO, ta techyahualohua para techmanahuis.

Ta cati techhueyitalía huan san ta cati tihueli techyolchicahua.

⁴ Chichahuac nimitztzajtzi, TOTECO,

para techpalehuis.

Huan ta technanquili hasta campa tionitztoc nepa ipan motepe cati tatze-
jtzeloltic.

⁵ Yeca nimotejqui huan cuali nicochqui.

Huan quema nñisac,

amo teno nopantitoya pampa ta, TOTECO, techmocuitahuía.

⁶ Ama ayecmo nechmajmatise masque majtacti mil nocualancaitacahua
nechyahualose para nechtehuise.

⁷ Ximotanana, TOTECO.

Techmaquixti, ta tinoTeco Dios.

Chichahuac xiquinmaquili nochi nocualancaitacahua ipan inixayac.

Xiquintanpojpostequi nopa mosisinijca masehualme,
para tamis nochi ininchichualis huan amo teno huelis nechchihuilise.

⁸ San ta, TOTECO, hueli titemaquixtía.

Hueyi paquilisti quipiyaj nochi momasehualhua.

4

Monequi timotemachise ipan Toteco Dios

¹ Toteco Dios, ta techchijtoc nixitahuac moixpa,

Se favor technanquili quema nimitznojntza.

Ta cati nochipa techpalehuía quema nitaijyohuía,

ama sempa techtasojta huan xijcaqui quema nimotatajtía.

2 “Anmasehualme, xijtacaquilica ya ni:

¿Hasta quema tamis para anpaquise ica na cati más quinamiqui nijselis tatepanitacayot?

¿Hasta quema noja anquinhueyichihuase taixcopincayome cati amo neli Dios?

¿Hasta quema noja anmochahuase ma amechajcayahuaca?”

3 Anmasehualme, xijmatica ya ni.

TOTECO techiyocatalijtoc para tiiacahua nochi tojuanti cati techcojtoc.

Huan yaya nechtaquilía quema nijnojnotza huan nechchihuilía cati nijtajtania.

4 Masque anhuihuipicaj ica cualanti, amo xitajtacolchihuaca.

Quema anmotectose ipan amotapech huan amo teno molinia, ximoyolilhuica cati eltoc ipan amoyolo.

5 Xijchihuaca cati quinequi TOTECO huan ya nopa elis quej anquimacasquíaj se tacajcahalisti cati quipactia.

Quena, ximotemachica ipan ya.

6 Miyac quiijtohuaj:

“Amo aquí huelis techpalehuis.”

Pero ta fihueli, TOTECO.

Techcualita huan techtiochihua.

7 Ta tijtalijtoc ipan noyolo más paquilisti,

huan amo quej cati quipiyaj masehualme cati quipixcay miyac trigo,

o quipiyaj miyac xocomecat iayo.

8 Yeca na nimotecas ica paquilisti ipan noyolo huan ica cuali nicochis,

pampa nijmati san ta, TOTECO, techmanahuía huan amo teno huelis se masehuali nechchihuilis.

5

David motatajtiyaya cualca mojmosta

1 TOTECO, xijtacaquili nocamanal.

Xijchihuilí cuenta quema niaxti.

2 Ta tinoTeco Dios cati tiitztoc tinotanahuatijca, techtacaquili quema nimitztajtania techpalehui,

pampa amo aquí seyc nijtajtania.

San nimotatajtía ica ta.

3 Sese ijnaloc nelcualca nimitzpohuilía cati nopanti, TOTECO.

Mojmosta nimitztajtania cati monequi, huan san nimochiya para technanquilis.

4 Ta tiTotec Dios cati amo mitzactia cati amo cuali.

Yeca amo tiquincahuilía amo cuajcualme ma itztoca mohuaya.

5 Cati mohueymatij amo hueli moquetzase moixpa.

Tiquincualancaita nochi cati quichihuj cati amo cuali.

6 Tiquintzontamiltía masehualme cati istacatij.

Quena, TOTECO, amo tijnequi tiquinatas cati tacajcayahuaj huan temictíaj.

7 Pero na, pampa hueyi motaicnelijcayo,

huelis nicalaquis mochaj.

Quena, huelis nimitzhueyichihuas ipan motatzejtzeltotijca tiopa, pampa nimitztepanita huan nimajmahui para nimitzixpanos.

⁸ TOTECO, techyacana quej nohuaya timocajtoc tijchihuas,
pampa itztoque nocualancaitacahua.
Technextili moojhui cati xitahuac.

⁹ Nocualancaitacahua amo quema quijtohuaj cati melahuac.
Amo aqui hueli motemachía ipan inincamanal.

Ipan iniyolo san quinequij tetzontamiltise.

Inincamac eltoc fiero quej quema quitapohuaj se mijca ostot.

Tecamanalhuíaj ica camanali cati cuajcualtzi san para tacajcayahuase.

¹⁰ Xiquintatzacuilti, noTeco Dios.

Xiquinmasilti ica cati amo cuali moilhuijtoque quinchihuilise sequinoc.

Xiquinhuejcamajcahua pampa miyac inintajtacolhua.

Quena, xiquinhuejcamajcahua pampa mohuejcatilijtoque ten ta.

¹¹ Pero ma paquica nochi cati motemachíaj ipan ta para xiquinpalehui.

Nochipa ma huicaca ica paquillisti pampa ta tiquinmanahuía.

Cati mitzicnelíaj paquij ipan ta.

¹² Pampa ta, TOTECO, tiquintiochihua cati quichihuaj cati xitahuac moixpa.
Motaicnelijcayo quinyahualohua quej se tepos tzajcayot cati
quinmocuitahuía.

6

Quenicatza ma timotatajtica quema timotequipachohuaj

¹ TOTECO, amo techajhua quema ticalani.

Amo techtatzacuilti quema tahuel ticalantoc.

² Techtasojta, pampa nimococohua.

TOTECO, techchicahua, pampa tahuel nechcocohua nochi notacayo.

³ Nihuihuipica ica majmajti huan amo nijmati taya nijchihuas.

Huan ta TÓTECO, ¿hasta quema tihualas para techtananas?

⁴ Xihuala, TOTECO, techmanahuiqui para amo nimiquis.

Techmaquixti pampa tahuel techicnelía.

⁵ Amo aqui cati mictoc huelis mitzelnamiquis.

¿Ajquiya huelis mitzhueyichihuas sinta mictoc huan ya quitalpachojtoque?

⁶ Ya tanqui nofuerza ica choquisti.

Sese tayohua nichoca miyac hasta nijtamixolonía notzonteto.

⁷ Nichocatoc miyac hasta nechcocohua noixteyol huan ayecmo hueli ni-
tachiya.

Quena, nichoca quema nimoilhuía cati nocualancaitacahua nechchihuilij-
toque.

⁸ Techतालcahuica, tajtacolchijca masehualme,
pampa TOTECO quíactoc quenicatza nichoca.

⁹ Yaya quíactoc cati nijtajtanijtoc,
huan quiselijtoc nonetatajtis.

¹⁰ Nochi nocualancaitacahua pinahuase huan huetzise.
Ica se talojtzi TOTECO quintahuisos ipan pinahualisti.

7

TOTECO tetajtolsencahua xitahuac

¹ TOTECO, ta cati tinoDios,
ipán ta nimotemachía para techmanahuis.

Techmaquixti inimaco nochi cati nechtoquijtinemij.

² Nocualancaitacahua itztoque quej tecuanime huan sinta ta amo techmanahuis,
nechcocotzase huan amo aqui nechmaquixtis.

³ TOTECO, sinta nelía nijhuicasquía tajtacoli,
quinamiqui ma nechcualancaifaca.

⁴ Sintá nijcuepilijtosquía ica cati amo cuali se nohuampo cati cuali itztoya nohuaya,
huajca quena.

⁵ Sintá quej nopa nijchijtosquía,
huajca ma nechtepotztoca nocualancaitaca.
Ma nechajsiti huan ma nechhuilana,
huan ma nechpinahualti,
pero amo aquí quej nopa nijchihuilitoc.

⁶ Ximotanana, TOTECO, ica cualanti.

Xicualani miyac ica nocualancaitacahua quej inijuanti nechcualancaitaj.
Ximoquetza iniixpa nocualancaitacahua cati tahuel cualantoque.
Xiquinfuerzajhui ma nechchihuilica cati xitahuac.

⁷ Se tonali masehualme ten nochi talme mitzyahualojtose,
huan ta tiquintajtolsencahuas campa timosehuijtoc ipan mosiyaj cuajcualtzi napa ilhuicac.

⁸ Quena, TOTECO tiquintajtolsencahuas nochi masehualme ipan nochi talme.

Huajca nojquiya techajtolsencahua na, TOTECO, ica cati cuali nijchijtinencotoc.

Ta cati más tihueyi,
technextijtoc iniixpa nochi masehualme para amo nijpiya tajtacoli.

⁹ Ta, ti Toteco Dios, cati titetajtolsencahua xitahuac.

Xijtachili inintalnamiqulis masehualme huan xijyejyeco cati quiapiyaj ipan iniyolo.

Xijtamilti cati quichihua nopa amo cuajcualme,
pero techchihua tielise titemachme tojuanti cati timonejnemiltíaj cuali moixpa.

¹⁰ Toteco Dios nechyahualojtoc para nechmanahuis.

Quinmaquixtia cati quiapiyaj iniyolo xitahuac iixpa.

¹¹ Toteco Dios yaya se juez cati tetajtolsencahua xitahuac.

Mojmosta cualani ica amo cuajcualme.

¹² Sintá se masehuali amo moyolcuepas,
Toteco Dios quitentis imacheta para quitzontamiltis.

Huan quicualtalis icuahuitol cati ica quimictis.

¹³ Ya quicualtalijtoc itatehuijca teposhua huan quinhualica imaco para femictis.

Quipixtoc miyac cuataminti cati lementoque para tetzontamiltis sinta amo moyolcuepaj.

¹⁴ Se masehuali cati amo cuali san quinequi tecocos,
huan san moilhuía cati fiero hueli quichihuas huan teipa icamaco quisa san istacatili.

¹⁵ Se cati quichihua se ostot para quimasiltis seyoc,
teipa ya huetzis campa taxajqui.

¹⁶ Pampa nochi tamanti cati amo cuali cati se masehuali quinchihuilía sequinoc,
teipa mocuepas ipan ya.

¹⁷ Pero na nijtascamatis TOTECO pampa yaya xitahuac.
Nihuicas tiohuicat para nijhueyichihuas TOTECO, Yaya Cati Más Hueyi.

8

Masehualme huan ihueyitilis Toteco Dios

¹ ¡TOTECO, ta Cati Tijpiya Nochi Tanahuatili!
Mohueyitilis quitemitía nochi taltipacti.
Huan motatanex quipano ilhuicacti.
Nochi quimatij ta tahuel tihueyi.

² Tiquinnextilijtoc coneme huan pilconetzitzi cati noja chichij ma mitzpaquilismacaca.
Mocualancaitacahua quuitase huan momacase cuenta para tahuel pano hueyi mochichualis huan yeca ayecmo molinise.

³ Quema niquita ilhuicacti cati tajsencajqui,
huan nopa metzti huan sitalime cati tijchijchijqui,

⁴ nimoyolilhuía:

¿Ajquiya tojuanti timasehualme para ta timocuatotonía huan timoilhuía ten tojuanti?

Nelquentzi topati timasehualme para ta techmocuitahuis.

⁵ Techchijtoc timasehualme más tihuejhueyi moixpa que nochi sequinoc.
Techmacatoc tohueyitilis moixpa huan tijchijtoc para nochi cati tijchijchijtoc ma techtepanitaca.

San ta, TOTECO, tieltoc más tihueyi huan techtani ica mohueyitilis.

⁶ Techmacatoc timasehualme tanahuatili ica nochi tapiyalme cati tiquinchijtoc.

Quena, techmacatoc timasehualme para ma tijpiyaca tequiticayot ica nochi tamanti.

⁷ Tiquinnahuatíaj nochi borregojme, huacaxme huan nochi tecuanime cati mosisiníaj.

⁸ Tijpiyaj tequiticayot ica nochi tamanti totome huan michime, huan ica nochi cati itztoque ipan hueyi at.

⁹ ¡TOTECO, ta Cati Tijpiya Nochi Tanahuatili!

Nochi masehualme campa hueli ipan nochi taltipacti quimatij ta tahuel tihueyi.

9

Timitzpaquilismacase Toteco Dios por nochi cati cuajcualtzi tijchijtoc

¹ Nimitzpaquilismacas, TOTECO, ica nochi noyolo.

Nitepohuilis nochi cati cuali tijchijtoc.

² Nijpiya hueyi paquilisti por ta,
huan yeca nihuicas huan nimitzpaquilismacas, Toteco, ta Cati Más tiHueyi.

³ Nocualancaitacahua cholojtehuase.

Huetzise mictoque moixpa.

⁴ Pampa ta tiquinpanextilijtoc masehualme para niitztoc xitahuac moixpa.
Titenextilijtoc para nijchijtoc cati cuali.

Timosehujtoc ipan mosiyaj cati cuajcualtzi huan titetajtolsencahua xitahuac.

⁵ Tiquinajhuas nochi masehualme ipan nochi talme cati amo mitzneltocaj.

Tiquintzontamiltis nochi inijuanti cati amo cuajcualme.

Tiquixpolos inintoca para nochipa.

⁶ Nocualancaitacahua miquise,

huan inihuaya polihuisse nochi inialtepehua.
Pampa ta tiquintamitasosolos huan amo teno mocahuas.
Amo aqui quinelnamiquis.

⁷ Pero TOTECO tanahuatis para nochipa.
Yaya mosehuía ipan isiyaj cati cuajcualtzi nepa ilhuicac huan tetajtolsenc-
ahua.

Cati yaya quichihua, ya nopa xitahuac.

⁸ Toteco quintajtolsencahuas xitahuac nochi talme ipan taltipacti huan
inimasehualhua.

Yaya quintatzacuilitis sese inijuanti quej quinamiqui por nopa tajtacoli cati
quichijtoque.

⁹ Nochi cati pilteicneltziti huelis motemachise ipan TOTECO huan yaya
quinmocuitahuis.

Huelis motatise ipan ya quema taijyohuíaj.

¹⁰ Quena, TOTECO, nochi cati mitzixmatij motemachise ipan ta para tiquin-
palehuis,
pampa amo quema tiquintahuelcahuas cati mitztemohuaj.

¹¹ Xi huicaca huan xijpaquilismacaca TOTECO,
cati mosehuía ipan isiyaj cuajcualtzi nepa ipan Jerusalén huan nochi
quinahuatía.

Xiquinpohuilica nochi masehualme ipan taltipacti cati yaya quichijtoc.

¹² TOTECO quintzontamilitis cati temictíaj pampa quej nopa quinamiqui
quincuepilis.

Quinelnamiqui cati motequipachohuaj,
quintacaquilía quema masehualme cati taijyohuíaj quitzajtzilíaj para ma
quinpalehui.

¹³ Techtasojta, TOTECO.

Xiquita quenecatza nitaijyohuía inimaco cati amo quinequij nechitase.

Techmanahui pampa quinequij nechmictise,

¹⁴ huan na nimitzpaquilismacas iniixpa nochi masehualme.

Niquinpohuilis nochi cati mosentilíaj ipan altepet Jerusalén cati techchihuil-
ijtoc.

Nelía nipaquis pampa techmaquixtijos.

¹⁵ Mosisinjica masehualme ten nochi talme huetzise ipan nopa ostot cati
inijuantijya quichijtoque.

Quitatijtoque se taquetzti para ma masica sequinoc,
pero inijuanti masise.

¹⁶ TOTECO quichijtoc para nochi ma quimatica para yaya xitahuac tetaj-
tolsencahua.

Yaya quichihua para ma huetzica ipan taquetzti cati ica inimax

¹⁷ Nochi amo cuajcualme yase micta.

Quena, nepa ajsitij nochi masehualme cati amo quielnamiquij Toteco Dios.

¹⁸ Pero Toteco amo quinelcahuas cati teicneltziti.

Yaya nochipa quinmacas cati quichiyaj para quiselise.

¹⁹ Ximotanana, TOTECO.

Amo xiquincahuili masehualme más ma quiipyaca chicahualisti.

Xiquintajtolsencahua huan xiquintatzacuiliti nochi masehualme cati amo mitzixmatij.

²⁰ Xijchihua ma majmahuica, TOTECO.

Ma momacaca cuenta nochi masehualme ipan nochi talme para injuanti san panoni.

10

Se netatajtili para quitajtanis TOTECO ma quipalehuiqui

¹ TOTECO, ¿para ten huejca tiitztoc huan timotatía quema na nijpiya tequipacholi?

² ¡Xiquita, TOTECO!

Amo cuajcualme tahuel mohueyimatij huan quintepotztocatinemij cati teicneltziti para quincocose.

Ma masica ipan nopa taquetzti cati injuanti quisencajtoque para sequinoc.

³ Nopa amo cuajcualme mohueyimatij ica nochi cati fiero quinequij quichihuase.

Huan masehualme cati quinequij san injuanti quipiyase nochi tamanti, quintelchihuaaj nochi sequinoc hasta ta, TOTECO, mitztelchihuaaj nojquiya.

⁴ Nopa amo cuajcualme nel mohueyimatij huan amo mitztemohuaaj, Toteco Dios.

Amo quema mitzelnamiquij pampa moilhuaj amo tiaqui para tiquintatzintocuilis taya quichihuaaj.

⁵ Ama quisa cuali nochi cati amo cuajcualme quichihuaaj,

huan yeca san mohueyimatij,

huan motanahuatilhua amo quintepanitaj.

San quinhuetzquiliaj nochi inincualancaitacahua.

⁶ Huan moilhuaj:

“Amo quema topantis se tenijqui.

Nochipa tipactose huan amo quema techajsis tequipacholi.”

⁷ ¡Xitacaqui, TOTECO!

Quema camanaltij masehualme cati amo cuajcualme,

san quisa tatelchihuali, istacatili huan nochi cati ica tacajcayahuaaj.

¡Xiquita, TOTECO!

Nochipa tacajcayahuaaj huan quinyolcocohuaaj sequinoc para ma quipiyaca tequipacholi.

⁸ Motatíaj nechca pilaltepetziti para teojchiyase,

huan quema amo aquij quinita,

quimictíaj se cati amo teno quichijtoc.

Quinichtacachiyaj cati teicneltziti huan quinmictíaj san pampa quinequij.

⁹ Quej se tecuani cati motatijtoc campa tacoyontoc,

masehualme cati fiero inintalnamiquilis san quichixtoque para quipantise se cati amo quipiya fuerza para quitzquise.

Teipa quihuilanase nopa teicneltzi campa amo aquí huelis quipalehuis.

¹⁰ Cati quinitzquijque quipiyaj miyac chicahualisti.

Yeca cati teicneltziti nimantzi huetzij iniixpa.

¹¹ Nopa amo cuajcualme moilhuaj:

“Toteco Dios amo quielnamiqui ten tijchihuaaj.

Yaya moixtactoc huan amo quema quiita teno.”

¹² Ximotanana, TOTECO Dios, ximomatanana.

Amo xiquinelcahua cati teicneltziti huan cati amo quipiyaj chicahualisti.

¹³ Amo xiquincahuili amo cuajcualme ma mitzhuetzquilica.

Amo xiquincahuili ma moilhuica para ta amo tiquintatzacuiltis.

¹⁴ Toteco Dios, tiquitztoc ten quichijtinemij.

Tiquitztoc sesen tamanti cati amo cuali cati inijuanti quisencahuaj.

Xiquinsencahuili nopa tatzacuilti cati quinamiqui.

Cati teicneltziti san motemachiyaj ipan ta para xiquinmanahui.

Ta tiinintapalehuijca nochi cati icnotziti.

¹⁵ Xiquinmapostequi nopa masehualme cati amo cuajcualme.

Xiquintatzacuilti por nochi cati fiero quichijtoque.

Xiquintaxtahui por sesen tamanti cati quichijtoque.

Amo xiquelcahua yon se.

¹⁶ TOTEKO, ta tiTanahuatijquet cati titanahuatis para nochipa huan amo quema tamis.

Tiquintzontamiltis ipan motal nochi masehualme cati amo mitzixmatij, inijuanti san polihuise.

¹⁷ TOTEKO, ta tijtacaquilía cati mitztajtanjaj teicneltziti.

Tiquinfuerzajmaca huan tiquinpalehuía.

Tiquinchihuilía cuenta quema mitztzajtzilíaj.

¹⁸ Ta tiquinmanahuía icnotziti huan cati taijyohuáj.

Quej nopa, masehualme cati san tasencahualme ica soquit ayecmo huelis quintemajmajtise.

11

Ma timotemachica ipan Toteco para techpalehuis

¹ Amo techilhui:

“Ximochololti cuatita huan ximomanahuiti quej se totot.”

Amo monequi nicholos pampa na nimotemachijtoc ipan TOTEKO.

² Nochi quijjtohuaj:

“Xiquita, nopa masehualme cati mosisiníaj quicualtalíaj cuahuitoli huan cuataminti,

huan motatijtoque para quinmaquilise masehualme cati itztoque xitahuague.”

Masque quej nopa quijjtohuaj, amo melahuac.

³ Masque quijjtohuaj:

“Ayecmo oncas leyes huan amo aqui tanahuatis xitahuac,

huan huajca monequi masehualme cati cuali iniyolo ma choloca pampa amo aqui huelis quinmanahuis”, amo melahuac inincamanal.

⁴ Pero TOTEKO itztoc ipan itiopa cati tatzejzeloltic nepa ilhuicac.

Yaya mosehujtoc ipan isiyaj cuajcualtzi nepa ilhuicac huan noja tanahuatía.

Quiita nochi ten quichihuj masehualme.

Quitajtachilía sese inemilis.

⁵ TOTEKO quinyejyecohua cati quichihuj cati cuali,

pero masehualme cati amo cuajcualme huan cati quinpacktía mosisiníaj, amo quinequi quinitas.

⁶ TOTEKO quichihuas ma huetzi ticoli cati xahuantoc ininpani cati quichihuj cati amo cuali.

Quena, quintitanilis azufre cati lementoc para ma huetzi ininpani, huan quintatis ica se ajacat cati tahuel totonic.

⁷ TOTEKO, yaya nelcuali.

Quinicnelía cati nemij xitahuac.

Huan masehualme cati xitahuac iniyolo quititase ixayac,

huan quimatise para Toteco quicualita cati quichihuj.

12

Techpalehui, TOTECO

- ¹ Techpalehui, TOTECO,
pampa ayecmo aquíjme cati nelía mitzneltoquilía.
Ayecmo aquíjme masehualme cati quíijtohuaj cati melahuac.
- ² Se ica seyoc moistacahuíaj.
Quipiyaj ome inixayac huan quipataj inincamanal.
- ³ TOTECO quintzontamiltis nochi cati quipiyaj ome inixayac huan cati mohueyimatij quema camanaltij.
- ⁴ Quintzontamiltis cati quíijtohuaj:
“San ica tocamanal titatanise.
Sinta tijnequij tiistacatise,
tojuanti tijmatij.
Amo aquí huelis technahuatis.”
- ⁵ Pero quej ni quíijtojtoc TOTECO:
“Inijuanti cati teicneltzitzí huan cati amo quipiyaj fuerza nechtzajtzilíaj por
nopa fiero masehualme cati quintajyohuilitíaj.
Yeca ama nimotanas para niquinpalehuis.
Niquinmaquixtis inimaco cati quincualancaitaj.”
- ⁶ Nelía temachti cati quíijtohua TOTECO.
Icamanal senquisa melahuac.
Quena, eltoc quej se cuali plata cati quinelicxitijtoque,
huan quipajpactoque miyac huelta hasta senquisa cuali.
- ⁷ TOTECO, ta techmocuitahuía.
Techmanahuis para nochipa ica masehualme cati amo cuajcualme quej ama itztoque.
- ⁸ Quena, masque mosisinijca masehualme mooquichmajtinemij campa
hueli huan nochi masehualme san quipatiitaj cati amo cuali,
Ta techmocuitahuía.

13

Se netatajtíli para quitajtanis itapalehuil TOTECO

- ¹ TOTECO, ¿hasta quema techelcajtos?
¿Ayecmo quema techelnamiquis?
Nijmati techcuanecatatlía quema nimitztemohua.
- ² ¿Hasta quema nijpiyas tequipacholi ipan noyolo huan noyoltzi taijyohui-
jtinemis?
¿Hasta quema nocualancaitaca noja nechtanis?
- ³ Techtachili huan technanquili, TOTECO.
¡NoTeco Dios!
Techmaca taahuili para nitachiyas ipan ni tzintayohuilot huan amo nim-
iquis.
- ⁴ Amo xijcahuili nocualancaitaca ma quíijto nechtanqui.
Amo techcahuili ma nihuetzi para amo nechhuetzquilise inijuanti cati
nehcualancaitaj.
- ⁵ Na nimotemachijtoc ipan moteicnelijcayo cati huejcahua para nochipa.
Nipaqui ipan noyolo pampa techmaquixtijtoc.
- ⁶ Nihuicas para ta, TOTECO,
pampa miyac cati cuali techchihuilitoc.

14

*Se huihuiyot cati quichihuj tajtacolchijca masehualme
(Salmo 53)*

- ¹ Nelía huihuiytic nopa masehuali cati moilhuía amo aqui Dios.
Nochi cati quej nopa quijtohuaj mocuapolojtoque huan amo cuajcualme.
Nochi inijuanti monenpolojtoque huan ayecmo quichihuj cati cuali.
- ² TOTECO hualtachixtoc ten ilhuicac para quitas sinta huelis quipantis se
masehuali cati nelía talnamiqui,
se cati quitemohua huan quichihuasnequi ipaquilis.
- ³ Pero amo aqui.
Nochi masehualme mocuapolojtoque ipan se ojti cati amo cuali.
Nochi monenpolojtoque.
Amo aqui quichihua cati cuali.
¡Yon se!
- ⁴ Nopa tajtacolchijca masehualme amo quema tamachilise,
pampa amo quema quielnamiquij TOTECO.
San quintzontamiltíaj nomasehualhua quej se masehuali quitamicua se
pantzi.
- ⁵ Pero teipa nochi nopa tajtacolchijca masehualme huihuipicase ica majma-
jti,
pampa Toteco Dios amo itztoc inihuaya.
San itztoc inihuaya cati itztoque xitahuaque iixpa.
- ⁶ TOTECO quinmanahuía teicneltziti pampa motemachíaj ipan ya quema
tajtacolchijca masehualme quintajyohuiltíaj.
- ⁷ Tojuanti tinelpaquisquíaj sinta ya ajsisquía nopa tonali,
quema Totemaquixtijca hualas ten tepet Sion para quinmaquixtis israeli-
tame.
Ma huala nopa tonali quema TOTECO quinhuualicas imasehualhua ten
campa hueli campa inincualancaitacahua quinhuicatoque para tete-
quipanose.
Ipan nopa tonali mopaquilismacase nochi israelitame.
Quena, inijuanti cati iteipan ixhuhua Jacob tahuel paquise.

15

Nopa masehualme cati itztotij ipan itepe tatzejtzolotic Toteco Dios

- ¹ TOTECO, ¿ajquiya huelis calaquis ipan mochaj campa ta timocahua ipan
motepe cati tatzejtzolotic?
¿Ajquiya huelis itztos nepa para tijmocuitahuis?
- ² San calaquis ya cati amo aqui huelis quitelhuís ica yon se tamanti cati amo
cuali.
Quena, san yaya cati quichihua cati cuali.
Huelis yas san cati quijtohua cati melahuac ica nochi iyolo,
- ³ huan amo tetaijilhuía.
Itztoti nepa cati amo quimahuíspolohua cati itztoc icalnechca,
huan cati amo quinequi quinyolcocos sequinoc.
- ⁴ Nepa calaquis cati quihuejcamajcahua nochi cati fiero,
huan quinicnelía cati mitztepanitaj huan quiimacasi mitzixpanose.
TOTECO, ipan mochaj itztose cati quitamichihuj cati mocajtoque quichi-
huase masque nelohui huan quincocohua para quichihuase.
- ⁵ Nepa calaquise cati tainamaj pilquentzi itanca quema tetanejtíaj tomi,
huan amo quinistacahuíaj cati amo taixpanotoque,

masque sequinoc quintencahuilíaj tomi para ma istacatica.
Quena, injuanti cati quichihuaq ni cuali tamanti amo aqui hueli quintanis,
pampa ta tiqinmocuitahuis.

16

Toteco techmacas cati cuali

¹ Techmocuitahui, Toteco Dios,
pampa ipan ta nimotemachijtoc para techmanahuis.

² TOTECO, na nimitzilhuijtoc:

“Ta tinoTeco huan amo aqui seyoc cati huelis nechpalehuis.”

³ Niquinicnelía injuanti cati mitzneltocaj cati itztoque ipan nopa tali.

Injuanti cati nelía cuajcualtzitzi iniyolo.

⁴ Pero mojmosta más motequipachose masehualme cati quintoquiliáj se-
quinoc inintaixcopincayohua.

Na amo quema nijtencahuas se tacajchualisti iniixpa inintaixcopincay-
ohua,

yon amo quema niqintocaxtisquía.

⁵ San ta, TOTECO, nimitzpixtoc,
yeca ayecmo teno nijtemos.

Ta techmaca nochi notacualis huan noa cati nechpolohua para niitztos.

Nonemilis huan nochi cati nijpixtoc eltoc momaco huan nijmati nelía
temachti.

⁶ Nopa lazo cati ica techtatamachihuili campa nijselijtoc huetzqui campa
nelía cuali tali.

Nelía tacuajcualtzi campa techmacatoc.

⁷ Nimitzhueyichihuas, TOTECO,
pampa techconsejomaca.

Tajco yohual techmaca motalnamiquilis huan technextilía ipan noyolo taya
monequi nijchihuas.

⁸ Nochipa nimoilhuía ten ta, TOTECO,
huan pampa tiitztoc nonechca, amo teno nopantis.

⁹ Yeca ipan noyolo nelía nijpiya paquilisti.

Nochi notacayo motemachijtoc ipan ta.

¹⁰ Pampa amo tijcahuas notacayo ipan ostot,
yon amo tijcahuas ma palani itacayo Yaya Cati Tatzejtzeltic.

¹¹ Technextilis catijqui ojti quiapiya nemilisti.

Nijpiyas hueyi paquilisti nepa campa ta tiitztoc.

Quena, oncas hueyi paquilisti para nochipa nepa campa monejmat.

17

Motatajtía para quitajtanis TOTECO ma quimanahui

¹ Techacaquili, TOTECO,

pampa nimitznojnotza.

Nijchijtoc cati xitahuac,

huan amo niistacati.

Xijtacaquili cati nimitztajtanía huan techpalehui.

² Techajtolsencahua iniixpa nochi masehualme.

Xiquinnextili para amo teno nijchijtoc,

pampa nochipa tijmati cati xitahuac.

³ Masque tijhualtachilía noyolo ica tayohua huan techyejyecojtoc,
amo teno amo cuali tijpantijtoc.

Amo niquijtojtoc cati amo monequi,

⁴ quej quichihua ne sequinoc.

Na nimoiyocatalijtoc ten iniojhui amo cuajcualme.

Nijchijtoc senquisa quej quijtohua motanahuatil.

⁵ Nijtoquijtoc moojhui huan amo nihuetzotoc ipan tajtacoli.

⁶ Nimitznojnotza, noTeco Dios, pampa nijmati technanquilis.

Techtacaquili huan techchihuili cuenta.

⁷ Technextili moteicnelijcayo cati cuajcualtzi.

Ta tiquinmaquixtia ica mochicahualis cati motemachiyaj ipan ta.

⁸ Techmocuitahui quej se quimocuitahuia iixsital.

Quej se piyo quintatia ipilconehea ieltapaltzala,

nojquiya quej nopa techmocuitahui.

⁹ Techtati ten nopa amo cuajcualme cati nechyahualojtoque para nechmic-tise.

¹⁰ Nelia mocualnequij huan quema camanaltij,

san mohueyimatij.

¹¹ Nechtoquijlijtinemij campa ninentinemi huan san quichiyaj nopa talojtzi quema huelise nechfahuisose talchi.

¹² Injuanti iztoque quej tecuanime cati tahuel mayanaj huan quinequij tecuase,

huan motatijtoque ostojitic para quitzquise se masehuali quema panos.

¹³ Ximotanana, TOTECO,

xiquinnamiquiti.

Xiquinchihualti ma motancuaquetzaca moixpa.

Ica momacheta, techmanahui ten nopa amo cuajcualme.

¹⁴ Ica mochicahualis, TOTECO,

techmaquixti inimaco injuanti cati san quipiyaj cati eltoc ipan ni taltipacti.

Tijmiyaquijljtoc cati iniaxca nica.

Nojquiya xiquinmaca miyac tatzacuilti hasta mocahuas para ininconehea.

¹⁵ Pero na niutzotoc xitahuac moixpa,

huan se tonali nimitzitas, TOTECO,

huan yeca nipaqui.

Se tonali quema niisas nijpiyas nochi cati nijtemojtinentoc,

pampa niutzos monechca huan ica paquilisti timoixtachilise.

18

David quitascamati TOTECO pampa tatantoc

(2 S. 22:1-51)

¹ Nimitzicnelia, TOTECO.

Na niutzotoc momaco.

² TOTECO, ipan ta nimotatia pampa temachti techmaquixtzi.

Techyahualojtoc para amo huelis nechajsise nocualancaitacahua.

Ta tinotamanahuica.

Ipan ta, noTeco Dios, nimotatia,

pampa na niutzotoc momaco.

Quena, san ipan ta nimotemachia.

Ta techyahualojtoc para techmocuitahuia.

Ta tieli quej se huejcapantic tepancali cati cuali huan temachti.

Ica ta mochicahualis nitatanis.

³ San monequi nijnotzas TOTECO cati quinamiqui para nijhueyichihuas, huan yaya nechmanahuis inimaco nochi nocualancaitacahua.

- 4 Eltoya quej nechpixtoya imaco miqulisti.
Nochi cati fiero cati onca ipan ni taltipacti nechthanisnequiyaya.
- 5 Nopa mijca ostot nechtaquechilijtoya hasta ayecmo nijpixqui fuerza.
San se quentzi más huan nimiquisquía.
- 6 Pero quema más nimotequipachohuayaya,
nijnotzqui TOTECO.
Nijtajtani ma nechpalehui noTeco Dios.
Huan yaya nechtacaquili hasta nepa ipan ilhuicac.
Quena, quichihuili cuenta cati niquilhui.
- 7 Huajca chichahuac mohuiso tali hasta momajmatijque nochi tepeme.
Moojolinijque nopa tepeme hasta campa tatzquitoque,
huan mohuihuixojque pampa Toteco Dios cualanqui.
- 8 Elqui quej quisayaya pocti ipan iyacatzol,
huan ipan icamac quisayaya se tit cati nochi quitamititayaya,
huan nochi quisosolohuayaya.
Quena, quimajcahuayaya ticoli xaxahuacatoc pampa nelcualanqui.
- 9 Pampa Toteco Dios quitapo nopa cortina ten ilhuicac,
huan temoc para nechpalehuis.
Nejnenthualayaya ipan miyac mixti cati nelyayahuic.
- 10 Toteco Dios tejoc ipan ieltapal se iilhuicac ejca cati itoca querubín,
huan patantihualajqui ipan ajacat.
- 11 Yaya motzajqui ica tzintayohuilot,
huan moyahualo ica at para amo aqui quuitas.
- 12 Tapetanilot quiyacantihualajqui quema ajsico yaya cati tahuel cahuani.
Huan nojquiya huetzqui tesihuit huan ticoli xaxahuacatoc.
- 13 TOTECO quichijqui ma quicaquica itoscac quej se tatomonilot cati quisqui
ilhuicac.
Quena, Toteco Cati Más Hueyi tahuejchijqui.
¡Tahuel miyac tesihuit huan ticoli xaxahuacatoc huetzqui!
- 14 Quimajcajqui cuataminti ma quinajsi nochi nocualancaitacahua,
huan inijuanti cholojtejqe.
TOTECO quintzohuitejqei ica se hueyi tapetanilot huan quintzontamilti.
- 15 Quema TOTECO tailpitzqui,
nochi nopa at ipan hueyi at san sejco momanqui hasta nesqui nochi nopa
tali cati mocahua atatzinta campa más tahuejcata.
Ica icamanal TOTECO mopanexti itzinpehualtil taltipacti, pampa yaya
cualanqui.
- 16 Huan TOTECO quicalaqui imax hasta campa más huejcata,
huan nechquixti ten nopa hueyi at.
- 17 Nechmaquixti inimaco nocualancaitacahua cati quipiyayayaj miyac chic-
ahualisti.
Quena, nechmanahui ten nocualancaitacahua cati más quipiyayayaj chic-
ahualisti que na.
- 18 Inijuanti nechthanque ica na quema amo nijpixqui fuerza,
pero TOTECO nechthananqui.
- 19 Nechquixti huan nechsehui campa amo mahuilili.
Nechmanahui pampa nechicnelía.
- 20 TOTECO nechmacatoc cati quinamiqui pampa nijchijtoc cati xitahuac.
Nechtaxahuijtoc pampa cuali nonemilis.
- 21 Nijtoquilijtoc iojhui TOTECO huan amo nimoiyocajajtoc ten ya.
- 22 Niquelnamictoc nochi icamanal huan amo quema nijcajtejtoc itanahuatil.
- 23 Xitahuac niitztoc iixpa.

Nimoiyocatalijtoc ten nochi cati fiero.

²⁴ Huan TOTECO nechtaxtahuijtoc quej quinamiqui ica cati cuali nijchijtoc, pampa quizztoc para cuali nonemilis iixpa.

²⁵ TOTECO, tiquinicnelía huan tiitztoc temachti ica cati teicnelíaj huan cati temachme.

Tiitztoc cuali ica cati quihuejcaahua tajtacoli.

²⁶ Tiqintiochihua cati tetiochihuj, pero timochihua titetic ica injuanti cati mosisiníaj.

²⁷ Tiqinmaquixtía cati moechcapanohuj, pero tiquinpinahualtía cati mohueyimatij.

²⁸ TOTECO, ta cati tinoDios, ta techmaca taahuili.

Ta tijcuetoc nopa tzintayohuilot campa niitztoc ica taahuili.

²⁹ Ica mochicahualis, noTeco Dios, niquintehuis nocualancaitacahua, huan nipanós iixco nopa tepamit cati ica quitzactoque inialtepe.

³⁰ Iojhui Toteco Dios nelía xitahuac.

Huan icamanal cati quitencahua, cuali para ipan timotemachise.

TOTECO quinmanahuía nochi cati ipan ya motemachíaj.

³¹ Amo cana aquí seyoc Dios quej TOTECO.

Amo aquí seyoc cati huelis ipan timotemachise huan techmanahuis.

³² Toteco Dios nechmaca chicahualisti, huan nechchihualtía ma ninejnemi xitahuac.

³³ Yaya nechfuerzajmaca para amo ma nihuetzi.

Noicxihua mochihuj temachti quej iicxihua se chivo quema moquetzaj campa tahuejcapa huan talxixitaca.

³⁴ Toteco Dios nechmachtía taya ma nijchihuas quema onca tatehuilisti.

Nechfuerzajmaca para cuali ma niqitzqui nopa tetic tepos huitoli cati quichijtoque ica bronce.

³⁵ Toteco Dios, ta techmanahuía huan techmaquixtía.

Techitzqui ica monejmat.

Ica mohueyi teicnelijcayo techhueyichijtoc.

³⁶ Tijchijtoc noojhui más patahuac para ma amo nihuetzis.

³⁷ Niqintepotztocac nocualancaitacahua huan niqinajsito.

Huan amo nimocuetqui hasta quema niquintzontamiltijtoya.

³⁸ Niqinhuejhuelo huan ayecmo quema motananase.

Huetzque noicxita.

³⁹ Toteco Dios, ta techfuerzajmacac ipan nopa tatehuilisti huan tijchijqui para nocualancaitacahua ma motancuaquetzaquij noixpa.

⁴⁰ Miyagui moicancuetque para cholojtehuase huan quej nopa huelqui niquintzontamilti.

⁴¹ Inijuanti tetzajtzilijque para ma quinpalehuiquij,

pero amo aquí huelqui quinpalehui.

Quinotzque TOTECO,

pero yaya amo quinnanquili.

⁴² Quej se quitisi talcuajnexti huan quihuica ajacat,

na quej nopa niqinchijqui.

Huan ininpa nimoquejquetzqui quej soquit ipan ojti.

⁴³ TOTECO nechmanahujtóc ten nopa sequinoc altepet ehuani cati mosis-
iníaj huan quinequiyayaj nechtehuise.

Yaya nechchijtóc ma nieli niintayacanca masehualme cati campa hueli
ehuani.

Masehualme cati amo niquinixmatiyaya hualahuj para nechtequipanose.

⁴⁴ Quema quicaquij nocamanal,
inijuanti nechneltoquilíaj.

Cati ehuani ipan sequinoc altepeme huihuipicaj noixpa.

⁴⁵ Nochi motemacaj noixpa huan huihuipicatihuj quema quisaj campa
motatijtoque.

⁴⁶ Itztóc TOTECO.

Nijpaquilismacas yaya cati nechmocuitahuía.

Ma tijhueyitalica Toteco Dios,
notemaquixtijca.

⁴⁷ Yaya nopa Dios cati momacuepa ica cati fiero inijuanti cati nechcocoj-
toque.

Quintalijtóc masehualme ipan miyac tali nomaco para ma niquinnahuati.

⁴⁸ Yaya nechmanahuía ten nocualancaitacahua huan nechhueyitalía iniixpa
cati nechcualancaitaj.

TOTECO, ta techmaquixtijtóc inimaco nopa tatehujca masehualme,

⁴⁹ yeca nitepohuilis ten ta campa hueli.

Nihuicas huan nijhueyitalis motoca.

⁵⁰ Miyac huelta tijchijtóc para ma nitatani, na niDavid,

ninopa nitanahuatijquet cati techtapejpenijtóc.

Tijpiya hueyi moyolo ica na cati techtalijtóc ma nitanahuati.

Quena, hueyi moyolo ica na huan tijpiyas hueyi moyolo para nochipa ica
noixhuihua.

19

Hueyitilis Toteco monextía ipan nochi cati quichijtóc

¹ Ilhuicacti tepohuilía ihueyitilis Toteco Dios.

Tanemijya technextilía cati pano cuajcualtzi yaya hueli quisencahua.

² Quena, tonaya huan tayohua ilhuicacti quisenhuiquilía tepohuilía para
tahuel hueyi italnamiqulís.

³ Masque amo teno caquisti huan amo tijcaquij yon se camanali,
nochi masehualme campa hueli quiitaj iyejyejca ilhuicacti huan
quimachilíaj cati techpohuilía.

⁴ Eltóc quej ilhuicacti quiipiya itoscac cati ajsi hasta campa ontantóc talti-
pacti,

huan teyolmelahua para itztóc Toteco Dios.

Ipan ilhuicacti yaya quiquetzqui ichaj tonati.

⁵ Huan tonati quisa mojmosta huan yahui ipan iojhui ica paquilisti quej se
telpocat quisa ipan ichaj para mosihuatiti.

Quena, nopa tonati mochihua quej se motalojquet cati paqui motalohua
pampa quimati quintanis ne sequinoc.

⁶ Tonati quisa ilhuicacti inacasta huan quimaca huelta hasta ne seyoc
inacasta.

Amo aquí huelis motatis para amo quitonalmictis.

⁷ Ileyes TOTECO eltóc senquisa cuali,
huan temaca yancuic nemilisti.

Huelis timotemachise ipan icamanal,
pampa ya nopa quichihua ma talnamiqui se masehuali cati moechca-
panohua.

⁸ Itanahuatilhua TOTECO eltoc melahuac huan xitahuac.

Quinmaca paquilisti masehualme ipan iniyolo.

Quena, sesen tamanti cati TOTECO techilhujitoc ma tijchihuaca eltoc quej se
taahuili cati chichahuac.

Quitaahuilía toojhui para tiqitase.

⁹ Senquisa cuali para ma tijtepanitaca TOTECO huan ma tiquimacastica para
tiqixpanose.

Elis cuali para nochipa.

Cati TOTECO quijtojtoc para ma tijchihuaca,

ya nopa melahuac.

Quena, ya nopa temachti.

¹⁰ Noja más nijpatiita que oro.

Quena, noja más cuali que miyac oro cati senquisa cuali.

Quema se masehuali quiselía Icamanal Toteco ipan iyolo,

eltoc más tzopelic que se sayolnecti cati yancuic quipatzcatoque.

¹¹ Nopa tanahuatilme nechmacaj talnamiquilisti, na niitequipanojca,
para amo ma nitajtacolchihua.

Cati quintoquilía itanahuatilhua TOTECO hueyi quitanis.

¹² Amo aqui momaca cuenta ten itaixpanolhua sese huelta quema quichihua
cati amo cuali.

TOTECO, techtapojpolhui notajtacolhua cati amo nijmatiyaya sinta nijchij-
toya.

¹³ Huan techpalehui para amo nimohueyimatis,

huan para amo quema ma nitajtacolchihua ica nopaquilis.

¡Amo! Amo xijcahua tajtocoli ma nechnhuati.

Quej nopa nielis se masehuali cati amo aqui huelis nechtelhuis ica yon se
tamanti.

Huan niitztos nitatzejtzeltic.

¹⁴ Ma mitzfacti cati niqijtohua huan cati nimoilhúa, TOTECO,
ta tinotamanahujca huan tinotemaquixtijca.

20

David quitajtania Toteco ma quipalehui quintanis icualancaitacahua

¹ Ma TOTECO mitztaquili quema timotequipachohua.

Ma mitzmanahui nopa Dios cati huejcajqüya quimanahui Jacob.

² Hasta campa yaya itztoc ipan ichaj,

ma quititani tapalehuili cati quisa ten altepet Jerusalén.

³ Ma quielnamiqui nochi motacajcahualis cati tijmacatoc.

Ma moilhui ten nopa tacajcahualisti cati tijtati iixpa huan cati yaya quiseli
ica paquilisti.

⁴ Ma mitzmaca nopa cati moyolo quinequi.

Ma quichihua ma quisa cuali nochi cati timoilhujitoc tijchihuas.

⁵ Quej nopa tojuanti titzajtise ica paquilisti pampa ta titatantoc,
huan tijtananasé banderas ica itoca Toteco Dios pampa mitzpalehujitoc.

Quena, TOTECO ma mitzmaca nochi cati tijtajtanijitoc.

⁶ Cuali nijmati para TOTECO nechmaquixtía niitanahuatijca cati nechtape-
jpenijitoc.

Hasta ten nepa ilhuicac campa nelía tatzejtzeltic nechhualpalehujitoc,

huan nechchihua ma nitatani ica ichicahualis.

⁷ Masehualme ipan sequinoc talme motemachíaj ipan inincarros huan inincahuayojhua para momaquixtise quema onca tatehuilisti.

Pero tojuanti timotemachíaj ipan TOTECO toDios.

⁸ Inijuanti taijyohuise huan huetzise, pero tojuanti timotananase huan noja tijpiyase fuerza.

⁹ Toteco Dios, xijchihua ma nitatani, na nimotanhuatijca. Technanquili quema timitznojnotzaj.

21

Se huicat pampa tatantoya

¹ ¡TOTECO! Na nitanahuatijquet, nipaqui pampa techfuerzajmacatoc.

Nelía nipaqui pampa tijchijtoc ma nitatani.

² Techmacatoc cati noyolo quinequiyaya.

Quena, techmactili cati nimitztajtaniyaya.

³ Techmacatoc miyac tatiocchihualisti, huan techicpahuiltijtoc se corona cati senquisa oro.

⁴ Nimitztajtani techcahuili ma huejcahuas niitztos, huan nelía techmacatoc se nemilisti cati huejcahuas para nochipa.

⁵ Techpalehujtoc ma nitatani miyac ica mohueyi chichahualis.

Huan yeca por ta, nochi nechhueyitepanitaj, na nitanahuatijquet, huan nechhueyitalíaj.

⁶ Techtiochijtoc ica cati huejcahuas para nochipa, huan nelhueyi nopa paquilisti cati nijpiya pampa tiitztoc nohuaya.

⁷ Na nitanahuatijquet nimotemachía ipan ta, TOTECO.

Quena, nimotemachía ipan mohueyi teicnelilis ta Cati Más tiHueyi, yeca amo aqui huelis nechtanis.

⁸ TOTECO, ica mochicahualis tiquinajsiti nochi mocualancaitacahua. Ica monejmat tiquinitzquis nochi cati mitzcualancaitaj.

⁹ Quema timonextis, inijuanti tatase moixpa quej itztosquíaj ipan se horno cati xahuantoc.

TOTECO, quema tiquintajtolsecahuas, mocualancayo quintamitatis.

¹⁰ Tiquintzontamiltis hasta ininconehea huan iniixhuihua.

¹¹ Masque masehualme cati amo cuajcualme mitzcualancaitaj huan quisencahuaj cati amo cuali mitzchihuilise, amo quisas cuali cati moilhuijtoque.

¹² Inijuanti moicancuepase para cholojtehuase quema quiitase para tiquinmelaita ica mocuahuitol para tiquintehuis.

¹³ Timitzhueyimatij, TOTECO, pampa hueyi mochicahualis.

Huan timitzhueyichihuase ica huicat pampa nelía tijpiya nochi chichahualisti.

22

Se tacat quitzajtzilía Toteco huan teipa quipaquilismaca

¹ ¡NoTeco Dios! ¡NoTeco Dios!

¿Para ten techtahuelpajtoc?

¿Para ten timohuejcatelijtoc huan amo tihualajtoc para techmanahuiqui?
Amo tijtacaquilía quema nimitztajtzilía.

²NoTeco, tonaya huan tayohua amo nimosiyajquetza nimitznotza,
pero amo technanquilía.

³Huan masque quej nopa eltoc,
ta quejipa titatzejtzeloltic.

Nochi tohuejcapan tatahua tiisraelitame mitzyahualojque huan
mitzhueyichijque.

⁴Totatahua mochixque ipan ta.

Quena, motemachijque ipan ta huan ta tiquinmanahui.

⁵Mitznójnotzque quema taijyohuiyayaj huan tiquinmaquixti.
Ipan ta motemachijque huan amo tiquinpinahuaiti.

⁶Pero na nimomati quej se pilocuiltzi huan amo nise masehuali.
Sequij san nechhuetzquilíaj huan sequinoc nechcualancaitaj.

⁷Nochi cati nechitaj san noca paquij,
huan nechhuihuiitaj huan motzonojoliníaj,

⁸huan quijtohuaj:

“Yaya motemachía ipan TOTECO,
huajca ma tiquitaca sinta quimaquixtis.

Sinta nelía quiicnelía,
ma quimanahuiqui.”

Quej nopa quijtohuaj masehualme.

⁹Pero TOTECO, na nijmami para techpalehuijtoc.
Techquixti iijtico nonana.

Techmocuitahuíjtoc hasta ten quema noja nichichiyaya.

¹⁰Huan quema nitacatqui ya ipa nimotemachijtoc ipan ta.
Nochi tonali tieltihualajtoc tinoTeco Dios.

¹¹Amo techtalcahui san pampa hualajtoc ni tequipacholi huan amo aqui
seyoc cati hueli nechpalehuis.

¹²Miyaqui nocualancaitacahua nechyahualojtoque quej torojme cati mosis-
iníaj.

Quena, nesij quej nopa huejhueyi torojme cati itztoque ipan tali Basán.

¹³Nanalcaj quej tecuanime cati mosisiníaj.

Camachalohuaj huan nechmelaitaj.

¹⁴Na nimomati quej at cati mopatzcatoc huan campa hueli toyajtoc.

Nochi noomiyo lelecuecatoc.

Noyolo eltoc quej cera cati atiya.

¹⁵Tantoc nochi nochicahualis.

Nijpiya nocamac huactoc quej se chachapal tepalcat,

huan nonenepil tatzquitoc ica nocholec.

Techtalijtoc campa tahuactoc huan campa onca miquilisti.

¹⁶Masehualme cati amo cuajcualme nechyahualojtoque quej chichime.
Quicocoyotztoque nomax huan noicxihua.

¹⁷Hasta hueli nijpohuas noomiyohua,
pampa sese nechcocoehua.

Nocualancaitacahua nechtachilijtoque huan san noca paquij.

¹⁸Momajmacaj cati nimoquentiyaya.

Quena, mahuiltíaj ica piltetzitzi para quitase ajquiya quitocaros sesen
noyoyo.

¹⁹Pero ta, TOTECO, amo techtalcahui,

pampa na niitztoc momaco.
Xihuala nimantzi techpalehuiqui.

²⁰ Techmanahui ten inimacheta ni mosisinijca masehualme cati itztoque quej chichime.

Amo xiquincahuili ma nechmictica.

²¹ Eltoc quej niitztoc inincamaco tecuanime, huajca techmaquixti. Nopa masehualme itztoque quej torojme, amo ma nechtopojhuica.

²² Huan na niquinpohuilis noicnihua ten ta, TOTECO, huan quema oncas tasentilisti, nimitzhueyichihuas iniixpa nochi.

²³ TOTECO, tojuanti cati timitztapanitaj huan tiquimacasij timitzixpanose timitzpaquilismacaj.

Nochi tiiteipan ixhuhua Israel, timitzhueyichihuaj.

Quena, timitzhueyimatij nochi tiisraelitame.

²⁴ Pampa amo techelcajtoc quema titaijyohuaj,

yon amo techhuejcamajcajtoc.

Amo cana techcuanecatatlía.

¡Amo! Ta techtacaquilía quema timitztajtaníaj techpalehuiqui.

²⁵ Huajca, TOTECO, ipan nopa hueyi tasentilisti nimitzpaquilismacas iniixpa nochi momasehualhua,

pampa ta titemachti.

Iniixpa cati mitztapanitaj huan quiimacasij mitzixpanose, na nijchihuas cati nimitztencahuilijtoc para nijchihuas.

²⁶ Huajca nochi cati teicnetzitzi tacuase huan ixhuisse.

Nochi cati quitemohuaj TOTECO quipantise huan quipaquilismacase.

Quena, paquise para nochipa.

²⁷ Masehualme ten nochi talme campa hueli ipan taltipacti motepotztocase huan quielnamiquise TOTECO.

Inijuanti pehuase quihueyimatise huan motancuaquetzase iixpa.

²⁸ Pampa TOTECO, yaya nopa tanahuatijquet cati quinnahuatía nochi talme.

²⁹ Nochi cati quipiyaj tomi huan nochi cati teicneltzitzitzi ipan ni taltipacti motancuaquetzase iixpa.

Quena, nochi taltipac ehuaní cati teipa miquise, quihueyimatise.

³⁰ Nojquiya noteipan ixhuhua quihueyimatise TOTECO huan tepohuilise ten ya nochi ininemis.

³¹ Quema toteipan ixhuhua tacactiyase,

tephuilise para xitahuac TOTECO huan nochi nopa huejhueyi tamanti cati techchihuilijtoc.

23

TOTECO techmocuitahuía

¹ Quej se tamocuitahuijquet quinmocuitahuía pilborregoijtzi, TOTECO techmocuitahuía.

Huan yeca amo teno techpolohua.

² Yaya techsijajquetza campa onca cuajcualtzi sacat cati xoxohuic.

Techhuica campa onca cuali at cati amo mahuilili.

³ Quema ayecmo hueli nimoquetza, techmaca yancuic chichahualisti.

Yaya techyacana ipan ojti xitahuac para nijchijtinemis cati cuali,

huan quej nopa nochi quihueyitalise.

⁴ Masque ninemis ipan tzintayohuilot nechca miquilisti, amo teno niquimacasis, pampa ta, TOTECO, tiitztoc nohuaya.

Ica mocuatopil techmanahuía ten cati amo cuali.

Huan ica mocuachicol ten huehueyac, techtilana quema seyoc ojti nijtoquilisnequi.

⁵ Techsencahuilía se cuali tacualisti iniixpa nocualancaitacahua.

Ica aceite techtzonaltía.

Techtiochijtoc hasta mocahua.

⁶ Nijmati para ta, TOTECO, techyacanas nochi nonemilis ica motaicnelijcayo, pampa tijpiya hueyi moyolo ica na.

Huan teipa nimocahuas mohuaya ipan mochaj nepa ilhuicac para nochipa.

24

Nopa hueyi tanahuatijquet ipan nochi taltipacti huan ilhuicacti

¹ TOTECO iaxca ni taltipacti huan nochi cati eltoc ipani.

Nochi cati iztoque ipan ilhuicacti huan taltipacti iaxca.

² Pampa yaya quitatzquilti cuali huan quiquetzqui ni taltipacti tatzinta ipan nopa at cati tachel huejcata.

³ ¿Ajquiya huelis tejcos ipan itepe TOTECO?

¿Ajquiya huelis itztos ipan itiopa cati tatzetzelolitic?

⁴ Huelis itztose nepa san cati quipiyaj inimax huan iniyolo tapajpacti iixpa, pampa yaya quintapojpolhuijtoc inintajtacolhua.

San yase nepa cati amo quihueyichihua se taixcopincayot huan cati amo istacatij quema quitestigojquetzaj TOTECO.

⁵ Quena, quinmaquixtis TOTECO,

huan quintiochihuas huan quijtos para inijuanti iztoque cuali iixpa.

⁶ Cati quej nopa quemohuaj Toteco Dios,

huelise moquetzase iixpa huan quihueyichihuase Toteco Dios cati Jacob huejcäjquiya quitoquili.

⁷ Ma motapoca cuali nopa huejhueyi caltemit cati ipa eltoya huan nochipa eltos ipan altepet Sion,

pampa calaquiqui nopa hueyi tanahuatijquet cati quinahuatía nochi taltipacti huan ilhuicacti.

⁸ ¿Ta tijmati ajquiya nopa hueyi tanahuatijquet cati quinahuatía nochi ilhuicacti huan taltipacti?

Yaya TOTECO cati quipiya fuerza huan hueyi ichicahualis.

Yaya TOTECO cati tatantinemi ipan nochi tatehuilisti.

⁹ Ma motapoca cuali nopa caltemit cati ipa eltoya huan para nochipa eltos ipan altepet Sion,

huan calaquis nopa hueyi tanahuatijquet cati quinahuatía nochi taltipacti huan ilhuicacti.

¹⁰ ¿Ta tijmati ajquiya nopa hueyi tanahuatijquet cati quinahuatía nochi taltipacti huan ilhuicacti?

Yaya TOTECO.

Yaya nopa hueyi tanahuatijquet cati quinahuatía nochi taltipacti huan ilhuicacti.

25

David quinejqui quimatis nopa ojti cati más xitahuac

¹ Ipan ta, TOTECO, nimotatajtía ica nochi noyolo.

² Ipan ta, noTeco Dios, nimotemachía.

Amo techcahuili ma nimopinahualti.

Amo xiquincahuili nocualancaitacahua ma nechhuetzquilica.

³ Amo quema mopinahualtijtoc se cati ipan ta motemachijtoc.
Ma pinahuaca inijuanti cati nimantzi quinequij mitzixpanose.

⁴ TOTECO, technextili moojhui.

Quena, technextili nopa pilojtzi campa tijnequi ma ninejnemi.

⁵ Techyacana ipan moojhui cati xitahuac huan techmacthi,
pampa ta tinoTeco Dios huan tinotemaquixtijca.

Ipan ta nimotemachía ipan ten hueli hora.

⁶ TOTECO, xiquelnamiqui moteicnelilis cati tijpixtoc para nochipa,
cati hasta ten huejcajquiya titenextilijtoc,
huan yeca techtasojta.

⁷ Amo xiquelnamiqui notajtacolhua cati nijchijqui quema nitelpocatixtoya.
Xiquelcahua quema nimotepanitayaya moixpa.

TOTECO, techelnamiqui ica motaicnelilis pampa hueyi moyolo icana.

⁸ TOTECO, ta nelía ticuali huan tixitahuac.

Yeca tiquinnextilía tajtacolchihuani nopa cuali ojti cati ipan ma nejnemica.

⁹ Tiquinyacana cati moechapanohuaj ipan nopa ojti cati más xitahuac.

Quena, tiquinmacthía inijuanti cati quitemohuaj taya mopaquilis.

¹⁰ Quema se masehuali quitoquilía motanahuatil, TOTECO,
nochi ojti cati ipan tijhuica quinextilía motaicnelilis,
huan quinextilía para ta tiitztoc tixitahuac.

¹¹ ¡TOTECO! Techtapojpolhui notajtacol masque nelía hueyi.

Techtapojpolhui pampa quej nopa tiquijtojtoc tijchihuas.

¹² TOTECO, ica masehualme cati quiimacasij mitzixpanose,
tiquinnextilis nopa cuali ojti cati tijtapejpenijtoc para inijuanti.

¹³ Tiquintiochihuas miyac,

huan ininconehea quiselise nopa tali cati tiquinmacas.

¹⁴ TOTECO tiqipohuilía cati eltoc ipan moyolo inijuanti cati mitztepanitaj
huan quiimacasij mitzixpanose.

Quena, tiquinnextilía nochi cati inihuaya timocajtoc masehualme.

¹⁵ Nochipa nimitztemohua TOTECO,

huan nijchiya para techpalehuiqui,

pampa san ta tihuelis techmanahuis ten ni taquetzti.

¹⁶ Techtachili, TOTECO,

huan xijpiya hueyi moyolo ica na,

pampa niitztoc noselti huan nimoyoltequipachohua.

¹⁷ Nimoyoltequipachohua ica tahuel miyac tamanti cati ohui.

Techmanahui ten nopa tequipacholi.

¹⁸ Xijtachili nopa tequipacholi cati nechcuatetzopa huan nechtaijyohuiltía.

Huan techtapojpolhui nochi notajtacolhua.

¹⁹ Xiquita quesqui nocualancaitacahua niquinpiya huan quenecatza tahuel
nechcualancaitaj.

²⁰ Techmocuitahui huan techmaquixti para amo nechcocose.

Amo xijcahua ma nechpinahualtica,

pampa ipan ta nimotemachijtoc.

²¹ Techmanahui pampa nitemacthi huan nijchihua cati xitahuac,

huan nimotemachijtoc ipan ta.

²² NoTeco Dios, techmaquixti tiisraelitame ten nochi totequipachol, pampa timomasehualhua.

26

Nopa nemilisti cati tahuel tapajpacti

¹ TOTECO, techtajtolsencahua.

Xiteyolmelahua para amo teno cati fiero nijchijtoc.

Nimotemachijtoc san ipan ta huan amo quema nimoilhujitoc nimitzcahuas.

² Techyoltachili, TOTECO,

huan techyejyeco.

Xijtachili cuali noyolo huan notalnamiquilis cati más noyolijtic eltoc.

³ Pampa na nijpatiita motaicnelilis, huan nochipa nijtoquillía mocamanal cati melahuac.

⁴ Amo quema ninejntoc inihuaya masehualme cati tacajcayahua, yon amo nimohuicacot inihuaya cati quipiyaj ome inixayac.

⁵ Nijcualancaita inintasentilis amo cuajcualme.

Amo quema nimosentilijtoc inihuaya cati fiero quichihua.

⁶ Tapajpacti nomax ten nochi tajtacoli,

huan san quej nopa nimonechcahuis motaixpa, TOTECO.

⁷ Nepa nihuicas huicat para nimitzhueyitalis huan niteyolmelahuas nochi cati cuajcualtzi cati ta tijchijtoc.

⁸ Tahuel niquicnelía mochaj campá tiitztoc, TOTECO,

campá monextía motatanex.

⁹ Amo techchihuili quej tiquinchihuillía tajtacolchihuani huan temictiani.

¹⁰ Inijuantí quisencahuaj quenicatza huelis tetacuijcuillise.

Quipiyaj inimax temitoc ica tomi cati ichtaca tainantoque.

¹¹ Pero na ninemi xitahuac.

Xijpiya hueyi moyolo ica na,

huan techmaquixti.

¹² TOTECO, nimitzhueyichihua miyacapa.

Ica ta, cuali nijcatoc,

huan amo techcahuilijtoc ma nihuetzi.

27

TOTECO nechtaahuillía huan nechmaquixtía

¹ TOTECO nechtaahuillía huan nechmaquixtía.

¿Ajquiya niquimacasis?

TOTECO yaya nochichualis,

huan na niitztoc imaco.

Amo aquí niquimacasis.

² Quema amo cuajcualme quinequise nechtehuise huan quinequise nechmictise,

motepotánise huan huetzise.

³ Masque nochi isoldados se hueyi tali motananase noixpa, amo niyolmajmahuis.

Masque nechtehuise,

na nimotemachijtos ipan TOTECO pampa yaya itztoc nohuaya.

⁴ San se tamanti nijtajtanjitoc TOTECO.

San se tamanti nijnequi.

Nijnequi niitztos ipan ichaj TOTECO nochi tonali.

Nijnequi nijhueyichihuas nepa huan nimopaquilismacas ica nochi ihueyitilis huan itatanex.

Quena, ipan ichaj nijtemos cati ya ipaquilis.

⁵ Quema ajsis tonali cati amo cuali,

TOTECO nechmocuitahuis.

Nechtatis ipan itiopa campa más tatzejzeloltic, huan teipa nechquetzas ipan se hueyi tet para nechhueyitalis.

⁶ Quena, nechhueyitalis iniixpa nocualancaitacahua.

Yeca na nijtencahuas tacajcahualisti ipan itiopa, huan nicuatzejtzis ica paquilisti.

Nihuicas huan nitatzotzonas para nijpaquilismacas TOTECO.

⁷ TOTECO, techtacaquili pampa nimitznojnotza.

Xijpiya hueyi moyolo ica na,

huan technanquili.

⁸ TOTECO, quema techilhuía:

“Techcamanalhuiqui”,

na nimitznanquilia:

“Nimitzcamanalhuiti”.

⁹ ¡Amo techcuanecatati!

¡Amo techhuejcamajcahua pampa ticualantoc ica na!

San ta cati techpalehuía,

noTeco Dios, ta cati tinotemaquixtijca.

Amo techiyocacahua, yon amo techcajtehua noselti.

¹⁰ Masque notata huan nonana nechtahuelcahuase, TOTECO, ta nochipa techmocuitahuis.

¹¹ TOTECO, technextili cati tijnequi ma nijchihua.

Techyacana san ipan nopa ojti cati cuali campa tijnequi ma ninejnemi, pampa nocualancaitacahua nechyahualojtoque.

¹² Amo techtemactili inimaco quej injuanti quinequij,

pampa ica na motanantoque masehualme cati istacatij huan san quimatij cati más fiero nechchihuilise.

¹³ Pero na cuali nijmati TOTECO nechmanahuis,

huan sempa niqitas quenicatza cuali iyolo ica na ipan ni taltipacti campa niitztoc.

¹⁴ Ximochiya ipan TOTECO.

Ximosemaca huan ximoyolchicahua huan amo ximomajmati.

Quena, ximotemachi ipan TOTECO.

28

Toteco quitacaquilia quema timotatajtiaj

¹ TOTECO, tinotamanahujca.

San ica ta nimotatia.

Ta cati nimitztzajtzilía techpalehuiqui.

Amo ximohuexnequi para technanquilis,

pampa sinta amo technanquilis,

san nimotemacas para ma nechmictica.

² Xijcaqui nocamanal quema nimitztajtania tapalehuili.

Techchihuilili cuenta quema nimomatanana huan nitachía imelac motiopa cati tahuel tatzejzeloltic.

³ Amo techtatzacuulti inihuaya masehualme cati amo cuajcualme cati san quichihuj cati amo monequi.

Inijuanti camanaltij cuajcualtzi ica sequinoc, pero quipiyaj nochi cati amo cuali ipan iniyolo.

⁴ Xiquincuepili nochi cati amo cuali quichijtoque ica cati amo cuali nojquiya. Xiquintaxtahui ica cati fiero san se quej fiero quinchihuilitoque sequinoc.

⁵ TOTECO, injuanti amo quichihuilíaj cuenta nochi cati tijchijtoc, huajca tiquintzontamiltis huan amo quema tiquintananas sempa.

⁶ TOTECO, nimitzpaquilismacas pampa tijtacaquilijtoc cati nimitztajtanijtoc.

⁷ TOTECO, yaya nochicahualis huan notamanahujca ten nochi cati mahuilili.

Ipan ya nimoneltemachijtoc huan nechpalehuijtoc,

yeca ipan noyolo nijpiya miyac paquilisti.

Nihuicas huan nimitztascamatis, TOTECO.

⁸ TOTECO, ta tiquinixtoc momaco nochi momasehualhua.

Yeca san ipan ta motemachía motanahuatijca cati tijtapejpenijtoc.

⁹ Xijmaquixti moaltepe, TOTECO.

Huan xiquintiochihua injuanti cati moaxcahua.

Techmocuitahui quej se quinmocuitahuía ipilborregojuhua.

Techhuica momaco para nochipa.

29

Se huicat ten ihueyitilis TOTECO

¹ Xijhueyichihuaca TOTECO, amajuanti aniilhuicac ejcahua.

Xijhueyichihuaca TOTECO cati quipiya hueyi ichicahualis huan itatanex.

² Xijhueyichihuaca TOTECO por ihueyitilis, pampa ya nopa quinamiqui para yaya cati tahuel hueyi.

Xijhueyichiuatij TOTECO cati itztoc campa tahuel tacuajcualtzi huan tatzetzeloltic.

³ Quema TOTECO camanalti, caquisti quej tatomonilot cati chicahuac ipan hueyi at.

Itoscac Toteco Dios cati itztoc ipan ilhuicac caquisti quej tatomonilot ipan ilhuicac tahuel chicahuac.

Quena, TOTECO itoscac monanquilía iixpa nopa hueyi at ica nochi ihueyitilis.

⁴ Itoscac TOTECO quipiya chicahualisti.

Quena, itoscac quipiya tahuel miyac chicahualisti.

⁵ Itoscac tahuel temajmati huan quema TOTECO camanalti, quichihua para ma ixtzayanica tiocuame.

Quena, Toteco quintapana nochi tiocuame ipan tali Líbano.

⁶ Quichihua ma huihuipicaca nochi cuatitamit ipan talme Líbano huan Sirión.

Quinchihualtía nopa cuame ma mojmolinica quej piltorojtzitzi huan pilhua-caxtzitzi cati huitontehuj.

⁷ Quema TOTECO camanalti, quimajcahua tilelemecti.

⁸ Quema TOTECO camanalti, huihuipica nochi huactoc tali.

Quena, hasta quichihua para ma huihuipica nopa huactoc tali Cades.

⁹ Quema TOTECO quijjtohua para oncas tatomonilot,

huajca quichihua ma ixtzayanica nopa ahuacuame huan quicahua tapepestic ipan cuatitamit.

Ipan ichaj nepa ilhuicac nochi quihueyichihuj huan quijtohuaj: "Tahuel cuajcualtzi mohueyitilis."

¹⁰ TOTECO tanahuatiyaya quema oncac nopa tahuel miyac at cati momanqui ipan nochi taltipacti.

Huan TOTECO noja tanahuatía huan tanahuatis para nochipa.

¹¹ TOTECO quinmaca chicahualisti nochi imasehualhua.

Quena, TOTECO quintiochihua huan quinmaca tasehuilisti ipan iniyolo.

30

Se huicat para quitascamati TOTECO

¹ TOTECO, nimitzhueyitalía pampa techtananqui ten más tatzinta. Amo tiquincahuilijtoc nocualancaitacahua ma noca paquica.

² TOTECO, nimitztajtani motapalehuil para techchicahua quema nimococo-huayaya,

huan ta techchicajqui.

³ TOTECO, techmanahuj quema ya niitztoya para nimiquis. Techmacac nonemilis sempa, huan yeca amo niitztoc ostojtic.

⁴ TOTECO, nochi moaxcahua ma huicaca tiohuicat moixpa. Ma mitzhueyichihuaca ta cati titatzejtzeltic.

⁵ TOTECO, quema ticualani, san huejcahua se talojtzi,

pero ipan nochi tonemilis technextilía para tijpiya hueyi moyolo ica tojuanti. Masque tojuanti quemantica tichocaj ica tayohua, ica ijnaloc tijpiyaj paquilisti ipan ta.

⁶ Quema cuali niitztoya huan amo teno nechpolohuayaya, nimoilhui amo aqui huelis nechtanis.

⁷ TOTECO, ica motaicnelil techquetztoya cuali quej se hueyi tepet cati amo aqui hueli quiolinis.

Pero teipa, techcuanecatitili huan nimajmajca miquiyaya.

⁸ Huan nimitznotzqui, TOTECO.

Nimitztajtzi para techtasojta.

⁹ Pampa, TOTECO, sinta techcahuilisquía ma nimiqui, taya tijtanicquía.

Ayecmo huelisquía nimitzhueyichihuasquía iniixpa nohuampoyohua.

Toteco, sinta nimiquis, nimocuepas tali, huan tali amo huelis mitzhueyichihuas. ¿Amo que?

¿Mijcatzitzitzi amo huelise tepohuilise para ta nelía itemachti?

¹⁰ Huajca, TOTECO, techtacaquili huan xijpiya hueyi moyolo ica na. TOTECO, ta xieli tinotapalehuijca.

¹¹ Techtacaquilijtoc huan techquixtilijtoc nopa tequipacholi.

Techmacatoc hueyi paquilisti.

Techquixtilijtoc nopa yoyomit cati nimoquentijtoya pampa nimotequipachohuayaya.

Huan techquentijtoc se cuali yoyomit cati tenextilía para nijpiya paquilisti.

¹² Yeca TOTECO, amo hueli nimocamatzacuas.

Nimitzhueyichihuas ica tiohuicat huan nochipa nimitztascamatis.

31

Ma timotemachica miyac ipan Toteco

¹ TOTECO, ipan ta nimotemachijtoc.

Amo quema xiquincahuili sequinoc ma nechpinahualtica.
Techmanahui ta cati nochipa tijchihua cati xitahuac.

² TOTECO, ximoechcapano para techtaaquilis.
Techmanahuiqui nimantzi.

Techcahuili ma nimotati ipan ta.

Na niitztos momaco para techmanahuis.

³ Ipan ta nimotemachía para techpalehuis.

Quena, ipan ta niitztoc ica temachili.

Techyacantiyas para nochi ma mizhueyitalica más.

⁴ Ta tinotamocuitahuijca,

techmaquixti ten ni taquetzti cati nocualancaitacahua quitatijtoque ipan
noojhui para nechmasiltise.

⁵ Nimitzmactilía notonal momaco.

Techmanahui, TOTECO, ta tiDios cati titemachti.

⁶ Niquincalancaita nochi cati quinhueyichihuaq teteyome,
pampa teteyome amo teno hueli quichihuaq.

Peró na nimotemachijtoc ipan ta, TOTECO.

⁷ Nijpiya miyac paquilisti pampa techicnelía.

Ta tiquitztoc nochi notequipachol,

tiquitztoc nochi cati nopantitoc.

⁸ Amo techtemactili inimaco nocualancaitacahua.

¡Amo! Campa techquetzqui tacualca huan temachti.

David taijyohuiyaya ica cocolisti huan ica icualancaitacahua

⁹ TOTECO, techtasojta pampa niitztoc ipan tequipacholi.

Nisenchocotoc hasta nijmati tantiyahuij noixteyolhua.

Ipan noyolo huan notacayo nijmati nitamitaijyohuijtoc ica tequipacholi.

¹⁰ Ni tacuajcualoli nechtzontamiltía pampa san tequipacholi nijpano.

Sese xihuit cati pano san niaxti.

Ya tantinemi nochicahualis por notajtacolhua hasta ya nitacayohuactinemi.

¹¹ Nocualancaitacahua huan hasta nocalnechcahua nechijiyaj.

Cati nechixmatij nechimacasij.

Cati nechitaj ojtípa nechtalcahuíaj.

¹² Nochi masehualme nechelcajtoque quej ya nimictosquía.

Nechtahuelcajtoque quej se chachapal tepalcat ipan tasoli.

¹³ Nijcaqui quenenicatza nocualancaitacahua nechistacahuíaj.

Yeca nechitzquitoc se hueyi majmajti huan nechmajmatía.

Inijuanti san sejco moijilhúaj quenenicatza huelise nechmictise.

¹⁴ Pero TOTECO, na nimotemachía ipan ta huan niquijtohua: “¡Ta tinoDios!”

¹⁵ Sesen tonali cati niitztoc momaco eltoc.

Techmanahui inimaco nocualancaitacahua cati nechtaijyohuiltijtinemij.

¹⁶ TOTECO, ma monexti moteicnelijcayo ipan moxayac quema techtachilía
na,

nimotequipanojca.

Techmaquixti pampa ta techsenicnelijtoc.

¹⁷ TOTECO, na nimitztemojtoc.

Amo xiquincahuili ma nechpinahualtica.

Xiquinpinahualti masehualme cati amo cuajcualme.

Quena, inijuanti mocamatzacuase quema tiquintzontamiltis.

18 TOTECO, ayecmo molinis ininenepil inijuanti cati istacatij quema ya mictose.

Ayecmo itztose inijuanti cati mohueyimatij quema camanaltij para techtaijilhuisse tojuanti cati tinemij xitahuac moixpa.

Quena, xiquinmicti cati mohueyitaliaj huan techmahuispolohuaj.

19 Pero ta, nelía hueyi moyolo ica inijuanti cati mitztepanitaj huan tiquinmocuitahuía.

Nelía cuali motaicnelilis cati ticajoctoc para tojuanti cati timotemachijtoque ipan ta,

tojuanti cati miyacapa titematiltijtoque para san ta tihueli techmanahuis.

20 TOTECO, ta techtatía campa ixtacatzí tojuanti cati timitztepanitaj, huan nepa ta timocahua tohuaya.

Yeca fiero masehualme amo hueli techajsise ica cati quisencajtoque.

Quena, momaco techtatía huan amo aqui cati techmahuispolohua hueli techajsis.

21 Nimitztascamati, TOTECO, pampa tijchijqui huejhueyi tamanti para technextilis moteicnelijcayo.

Íca temachili techyahualojtoc para techmanahuis ten nocualancaitacahua.

22 TOTECO, nimoilhuijtiquisqui para techtahuelcajtoya.

¡Pero amo cana!

Tijcajqui quema nimitztzajtzili techpalehuiqui, huan technanquili.

23 Nochi amojuanti cati aniaxcahua TOTECO,

xiquicnelica pampa yaya quinmocuitahuía cati itztoque temachme.

Pero ica masehualme cati mohueyimatij,

TOTECO quintaxtahuía hasta ica itanca nochi cati amo cuali quichijtoque.

24 Nochi amojuanti cati anmotemachíaj ipan TOTECO,

xipaquica huan ximosemacaca.

32

Nelía paquí nopa masehuali cati TOTECO quitapojpolhuijtoc

1 Nelía paquí nopa masehuali cati TOTECO quitapojpolhuijtoc itajtacolhua huan quiixpolojtoc nochi itaixpanolhua.

2 Quipiya paquilisti cati ya quipohuilijtoc TOTECO itajtacolhua, huan ayecmo quitajtacoltía ica yon se tamanti.

Ipan iyolo ayecmo mocajcayahua quej amo teno quichijtoc.

3 Quema ayemo nijpohuilijtoya TOTECO quenecatza nitajtacolchijtoya, semilhuit niaxtiyaya hasta nijmatqui para tantoya nochicahualis.

4 Techatzacuultiyaya tonaya huan tayohua.

Techatzacuultij hasta nijmatiyaya nicuahuaquiyaya quej soquiat huaqui quema chichahuac tatotoniya.

5 Pero teipa nimitzpuhuili nochi notajtacolhua huan yon se amo nijtati.

Nimotemacac nimitzpohuilis nochi notaixpanolhua huan ta, TOTECO, nochi techapojpolhui,

huan techquixtili nopa taeticayot.

6 Monequi para nochi cati moaxcahua mitztemose quema itztoque ipan tequipacholi.

Monequi motemachise ipan ta,

huan masque tequipacholi momiyaquilis quej se atajti cati chichahuac mixcampa,

amo quinajsis.

⁷ TOTECO, ipan ta nimotemachía quema onca tequipacholi, huan ta techmocuitahuía.
Tijchijtoc para sequinoc ma nechyahualoca, huan inijuanti huicaj chichahuac para mitzhueyichihuase pampa techmanahuijtoc.

⁸ TOTECO quuijtohua:

“Na nimitztalnamictis huan nimitznexilis nopa ojti cati más cuali, cati monequi ipan timonejнемiltis.
Na nimitzconsejomacas huan nimitztachilijtos.

⁹ Amo ximochihua quej se cahuayo, o se mula cati amo quiapiya talnamiquilisti, cati monequi tijtalilis se tepos camachali ica se lazo huan tijtilanas para mitzneltocas.”

¹⁰ Amo cuajcualme quipantise miyac taijyohuilisti, pero tojuanti cati timotemachíaj ipan TOTECO, yaya techyahualojtoc ica itaicnelilis.

¹¹ Xipaquica ipan TOTECO, amujuanti cati anitztoque xitahuaque iixpa. Amujuanti cati anquineltoquillíaj, xitzajtzica ica paquilisti por cati TOTECO quichijtoc.

33

Se huicat para quihueyichihuase TOTECO

¹ Xihuicaca ica paquilisti para TOTECO amujuanti cati anitztoque xitahuac iixpa.

Nelía cuajcualtzi para nochi tojuanti cati tijchijtinemij cati cuali ma tijhueyichihuaca.

² Xitatzotzonaca ica arpa para xijhueyichihuaca, TOTECO. Xihuicaca iixpa huan xijpaquilismacaca ica tatzotzonali cati nesi quej guitarra.

³ Xisencahuaca se huicat cati yancuic, huan xijhuicatica TOTECO. Xitatzotzonaca cuali, huan xitzajtzica ica paquilisti.

⁴ Pampa nelía xitahuac nochi cati quuijtohua TOTECO. Nochi cati quichihua tenexilía para temachti.

⁵ TOTECO quipactía nochi cati xitahuac huan cati melahuac. Nochi cati itztoque ipan taltipacti quiselíaj itaicnelilis TOTECO.

⁶ TOTECO tanahuati ma onca ilhuicacti huan mochijqui. San camanaltic huan mochijqui metzti, tonati huan nochi sitalime.

⁷ Yaya guisejcotili nochi at cati eltoc ipan hueyi at. Quiajojqui nopa at campa más tahuejcata.

⁸ Nochi antaltipac ehuaní xijhueyitepanitaca TOTECO. Quena, nochi cati anitztoque ipan ni taltipacti xiquimacacica.

⁹ Pampa nochi cati yaya quuijto, ya nopa mochijqui. Huan cati yaya tanahuati ma eli, ya nopa monexti.

- 10 TOTECO quinsosolhuilía inintalnamiquilis masehualme ipan campá hueli talme para amo ma quichihuaca cati fiero moilhuijtoque.
San tailpitzas huan quincuapolos talme para amo huelise quichihuase cati fiero quisencajtoque quichihuase.
- 11 Pero cati TOTECO moilhuijtoc quichihuas amo quema mopatas.
Cati ya quinequi,
ya nopa elis para nochipa.
- 12 Paquij masehualme ipan nopa tali cati motemachíaj ipan TOTECO.
Quena, nelía paquij nopa masehualme cati TOTECO quintapejpenijtoc para iaxcahua.
- 13 TOTECO cati itztoc nepa ilhuicac techhualtachilijtoc nochi timasehualme.
- 14 Hasta nepa ipan ilhuicac TOTECO techtachilijtoc cati tiitztoque ipan ni taltipacti.
- 15 Yaya TOTECO cati quichijchijqui toyolo nochi titaltipac ehuani huan quitachilía nochi cati tijchijtinemij.
- 16 Se hueyi tanahuatijquet amo tatani pampa quinpiya miyac isoldados.
Yon se soldado cati motemaca amo tatani pampa quipiya miyac fuerza.
- 17 Amo ximotemachi ipan se cahuayo para mitzmanahuis masque nelía tetic.
San ica ifuerza amo hueli temanahuía.
- 18 Pero TOTECO, quena, yaya nochipa techtachilijtoc tojuanti cati tiquimacasiq tiquixpanose.
Techmocuitahuía cati timochiyaj ipan itaicnelilis.
- 19 Techmanahuía quema tiitztoque nechca miqulisti.
Huan techtamacas quema oncas mayanti para noja ma tiitztoqa.
- 20 Tojuanti ipan toyolo timotemachíaj ipan TOTECO.
Yaya techpalehuía huan techmanahuía ten cati amo cuali.
- 21 Yeca ma tiyolpaquica ipan TOTECO,
pampa timoneltemachijtoque ipan yaya cati nelía tatzejtzeltoc.
- 22 TOTECO, xijpiya moyolo ica tojuanti,
pampa san ipan ta timochiyaj.

34

TOTECO techmocuitahuía huan techmanahuía

- 1 Nijtascamatis TOTECO talojtzitzi huan nochipa nijsenpaquilismacatos.
- 2 Nijhueyitalis huan niqunilhuis nochi masehualme cati yaya nechchihuilijtoc.
Inijuanti cati teicneltziti quicaquise huan paquise.
- 3 Ma tijhueyichihuaca huan ma tijhueyitalica TOTECO san sejco.
- 4 Nijtzajtzili TOTECO ma nechpalehuiqui,
huan yaya nehtacaquili huan nechmanahui ten nochi cati nechmajmatiyaya.
- 5 Sequinoc cati motemachíaj ipan Toteco ixcahuanij ica paquilisti nojquiya,
por cati yaya quinchihuilijtoc.
Amo quema pinahuase.
- 6 Masque nipilteicneltzi,
nijtzajtzili TOTECO,
huan yaya nechmaquixti ten nochi tamanti cati nechtequipachohuayaya.
- 7 Ilhuicac ejca TOTECO quinmocuitahuía nochi cati quiimacasiq TOTECO,
huan yaya quinmanahuía.

⁸ Xijyejyecoca TOTECO huan anquiitase para melahuac cuali iyolo ica tojuanti.

Hueyi paquilisti quipiyaj nochi masehualme cati ipan ya motemachíaj.

⁹ Nochi amojuanti cati aniaxchua TOTECO, xiquimacastica, pampa nochi cati quitepanitaj amo teno quinpolohua.

¹⁰ Nopa tecuanime cati más quipiyaj chichualisti quemantica mayantine-mij huan amo quipantíaj ten quicuase, pero masehualme cati quitemohuaj TOTECO quipiyase nochi cati cuali.

¹¹ Xihualaca noconehua, huan techtacaquilica, huan nimechmachtis quenicatza monequi anquitepanitase TOTECO, huan anquiimacastise anquiixpanose.

¹² ¿Tijnequi tiitztos ica cuajcualtzi?
¿Tijnequi tihuejcahuas ipan ni taltipacti,
huan tiquitas cati cuali?

¹³ Monequi xijmocuitahuis monenepil para amo tiquinmahuispolos sequinoc ica istacatili.

¹⁴ Ximoiyocatali ica cati amo cuali, huan xijchihua san cati xitahuac. Xijchihuaca cati anhuelij para ma onca tasehuilisti inihuaya nochi masehualme.

Quena, ya nopa xijtemoca ica nochi amoyolo.

¹⁵ TOTECO quintachilía cati nemij xitahuac iixpa, huan san quichiya para quinmacas cati quitajtanise.

¹⁶ Pero TOTECO sencualantoc ica injuanti cati quichihuaj cati fiero. Quintzontamiltis para ayecmo aqui quinelnamiquis ipan ni taltipacti.

¹⁷ Quema masehualme cati itztoque xitahuaque iixpa TOTECO quitzajtzilíaj, yaya quintacaquilía.

Huan quinmanahuía ten nochi inincuesolhua.

¹⁸ TOTECO itztoc ininechca masehualme cati motequipachohuaj.

Huan quinmaquixtía cati motequipachohuaj ica inintajtacolhua.

¹⁹ Se masehuali cati itztoc xitahuac iixpa TOTECO quipiya miyac tequipacholi, pero TOTECO quimanahuía ica nochi cati ipanti.

²⁰ Pampa TOTECO quimocuitahuía para amo postequis yon se iomiyo.

²¹ Se masehuali cati fiero inemilis miquis por nopa tamanti fiero cati quichihua.

Quena, TOTECO quintalilis tatzacuiltili cati quicualancaitaj cati cuali.

²² TOTECO quinmaquixtía itequipanojchua.

Quena, quintapojpolhuía imasehualhua cati motemachíaj ipan ya.

35

Se netatajtili para TOTECO ma quimaquixti inimaco icualancaitacahua

¹ TOTECO, xiquincamajixnamiqui cati noca cualanij. Xiquintehui cati quinequij nechtehuise.

² Xijcui nochi motatehujca teposhua, huan ximotanana para techmanahuiqui.

³ Xijquixti mohacha cati ica titatehui, huan xiquinojtzacua cati nechtepotzcatihualahuij. Huan techilhui:

“Na nimitzmaquixtis.”

4 Ma pinahuaca huan ma mocuapoloca cati nechtemohuaj para nechmictise. Ma mocuepaca ininchaj ica pinahualisti cati quinequij nechchihuilise cati fiero.

5 Quej se ajacat quihuica tasoli, ilhuicac ejca TOTECO ma quintojtocatiya cati nechcualancaitaj.

6 Ma onca tzintayohuilot ipan iniojhui. Ma talxixitaca campa nemij para ma huetzica, huan nopa ilhuicac ejquet ma quintepotztocatiyas para quinmictis.

7 Pampa masque amo teno nijchijtoya, quitalijque se taquetzti para nechmasiltise. Quixajque se ostot para ipan ma nihuetzi.

8 Ma quintalochajsi se hueyi tequipacholi. Ma masica ipan nopa taquetzti cati inijuanti quitalijque huan ma motzon-tamiltica.

9 Huajca quena, na nipaquis ipan TOTECO. Nijpiyas paquilisti pampa TOTECO nechmaquixtijtos.

10 Ica nochi noyolo niqijtos:

“Amo aqui seyoc quej ta, TOTECO.

Tiquinmocuitahuía cati amo quipiyaj fuerza para masehualme cati tetique amo teno huelis quinchihuilise.

Quena, tiquinmanahuía cati teicneltziti huan cati amo quipiyaj cati quinpolohua.

Tiquinmanahuía inimaco cati quinequij quintacuicuilise.”

11 Motananaj masehualme cati amo cuajcualme huan nechcualancaitaj.

Inijuanti quitestigojquetzaj cati amo melahuac, huan nechtaijilhuíaj ica tamanti cati amo nijmati.

12 Nechtaxtahuíaj ica cati amo cuali, masque nelcuali niquinchihuilijtoc. San quinequij nechtequipacholmacase.

13 Pero quema inijuanti mococojque, nimotequipacho inihuaya huan nimoyoyonti ica nopa fiero yoyomit para nochi quimatise nimotequipachohuayaya inihuaya.

Hasta nimosajqui por inijuanti para nijtajanis TOTECO ma quinchicahua. Pero TOTECO amo quicajqui cati niqilhui.

14 Nimotequipachojtinemiyaya quej se tamanti fiero ipantitosquía se nohuampo o se noicni.

Nimotequipacho huan nichocatinemiyaya quej mictosquía nonana.

15 Pero quema na nechajsic tequipacholi, inijuanti pajque.

Quema nimotepotani huan nihuetzqui, inijuanti mosentilijque huan nechhuetzquilijque.

Masehualme cati amo cuajcualme huan cati nechxmatiyayaj nechejel-namiquiyayaj huan nechmaquiliyayaj masque amo teno nijchijtoya.

16 Quej masehualme cati amo cuajcualme quihuetzquilíaj ten hueli, inijuanti noca pajque huan motancochhuehuetzque noixpa ica cualanti.

17 TOTECO, ¿hasta quema noja san tijtachilijtos nochi ni tamanti?

Techmanahui para amo nechmictise, pampa san setzi nonemilis.

Techmaquixti ten ni masehualme cati mochihuaj quej tecuanime cati quinequij nechhuejhuelose.

18 Huan nimitztascamatis miyacapa ipan tasentilisti.

Inixpa nochi nopa miyaqui momasehualhua nimitzpaquilismacas.

19 Amo xiquincahuili nocualancaitacahua cati istacatij ma noca paquica.
Amo xiquincahuili cati nechcualancaitaj ma moixijcopilica ica paquilisti
noixpa por notequipachol.

20 Inijuanti amo quitemohuaj tasehuilisti.

San moilhuíaj quenicatza huelis quincajcayahuase masehualme cati itz-
toque ica cuajcualtzi ipan ni tali.

21 Nechtajjilhuíaj huan quijtohuaj:

“¡Xiquitaca tijnelitztoque cati fiero quichijqui!”

22 TOTECO, ta tiquitztoc cati quichihuj.

Amo san xiitzto huan amo teno tijchihuas.

¡Amo techtahuelcahua!

23 Ximotanana huan techchihuili cati xitahuac huan melahuac.

Quena, TOTECO, xiisihui huan techmanahuiqui.

24 TinoTeco Dios, ta cati ipa titetajtolsencahua xitahuac,
xitenextili para amo teno nijchijtoc.

Amo xiquincahuili nocualancaitacahua ma noca huetzcaca.

25 Ma amo nopanti cati inijuanti quinequij.

Ma amo quijjoca nechixpolojtoque.

Amo xiquincahuili ma moilhuica para inijuanti nechtantoque.

26 Kijchihua para inijuanti cati noca paquij por notequipachol ma
mocuapologa huan ma ayecmo quimatica taya quichihuase.

Quena, xijcahua para inijuanti cati moilhuíaj para más huejhueyi que na ma
mopinahualtica huan ayecmo aqui ma quintepanita.

27 Pero ma huicaca ica paquilisti inijuanti cati nechpalehuíaj.

Ma paquica inijuanti cati quijtaj para nijchihua cati xitahuac.

Huan nochipa ma quijjoca:

“Nelía hueyi TOTECO cati quipactía quipalehuis David,
pampa yaya quitequipanohua.”

28 Quena, xijtacaquili cati nimitztajtanía,

huan teipa nitepohuilis para nelía xitahuac cati tijchihua.

Quena, semilhuít nimitzpaquilismacas.

36

Inintajtacol masehualme huan iteicnelilis TOTECO

1 Nijpixtoc ipan noyolo cati nijnequi niteyolmelahuas ten inintajtacol amo
cuajcualme.

Amo cuajcualme quielcahuaj Toteco Dios huan amo quimacasij.

2 Mohueyimatij ica iniselti hasta moilhuíaj para yaya amo quichihuilía
cuenta nochi cati fiero quichijtinemij,

huan yeca amo quintatzacuiltis.

3 Quisa inincamaco senquisa cati fiero huan cati amo melahuac.

Quipolojtoque inintalnamiquilis,
huan ayecmo quichihuj cati cuali.

4 Quema motecaj ipan inintapech para cochise,
san moilhuíaj taya tajtocoli quichihuase.

Moneltatzquijjitoque ipan iniojhui cati fiero huan san cati amo cuali
quinequij.

5 TOTECO, motasojtacayo quinajsi nochi masehualme huan onajsi hasta
ilhuicac huan hasta campa mixti.

Nelía titemachti.

⁶ Tiitztoc tihuel tixitahuac huan amo quema timopata.

Tiitztoc temachti quej nopa huejhueyi tepeme campá tahuel tahuejcapa. Nelxitahuac titetajtolsencahua,

huan amo hueli tijmachilíaj motalnamiqulis, pampa eltoc quej nopa hueyi at cati tahuel huejcata.

¡TOTEKO! Ta san se tiquinmocuitahuía quej masehualme huan tecuanime.

⁷ Toteco Dios, nelía cuajcualtzi moteicnelilis cati amo quema techcahua.

Yeca masehualme cati quiipiyaj tanahuatili huan cati teicneltzitzitzi monechcahuíaaj campá ta para xiquinmanahui.

Quena, mochihuaj quej pilpiyotzitzitzi cati calaquij ieltapaltzala ininana.

⁸ Masehualme cati mitztemohuaj ixhuij cuali ica nopa tatiochihualisti cati tiquinmaca nepa mochaj.

Eltoc quej se hueyi tacualisti cati techtencahuilía toixpa.

Techcahuilía ma tiatica ipan nopa atajti cati temaca ajhuiyac at.

Quena, nochi cati tijtajtaníaj techmaca.

⁹ Pampa ta techmaca nemilisti nochi cati tiitztoque, huan pampa techmaca taahuili, tojuanti tihuelij titachiyaj.

¹⁰ Nimitztajtanía para mojmosta techicneli tojuanti cati timitzixmatij.

Nochipa techchihuilía cati xitahuac nochi tojuanti cati ipan toyolo tijnequij tijchihuase cati cuali.

¹¹ Amo xijcahua para ma moquejquetzaca nopani inijuanti cati mohueyimatij.

Yon amo xiquincahuili ma nechquixtica amo cuajcualme.

¹² Se tonali niqijitos:

“¡Xiqitaca quenicatza ama huetztoque nochi tajtacolchijca masehualme cati mosisiníaj!

Toteco Dios quintahuisojtoc para ayecmo huelise motananase.”

37

Iniojhui cuajcualme huan amo cuajcualme

¹ Amo ximotequipacho ica amo cuajcualme.

Yon amo xiquixtoca cati quiipiyaj masehualme cati quichihuaj cati amo monequi.

² Pampa nimanzi pilinise quej sacat quema quitzontequij.

Huan polihuisse quej xihuit cati huaquí.

³ Ximotemachi ipan TOTEKO huan xijchihua cati cuali.

Quej nopa tipajcaitztos ipan motal huan amo teno mitzpolos.

⁴ Ximohuampojchihua ihuaya TOTEKO,

huan yaya mitzmacas cati moyolo quinequi.

⁵ Xijcahuili TOTEKO ma mitznextili campá tinemis.

Ximotemachi ipan ya, huan yaya quichihuas.

⁶ Quipanextis cati xitahuac tijchihua.

Quena, quichihuas para nochi ma quiitaca motalnamiqulis quej nochi quiitaj quema taahuía tonati ipan tajcotona.

⁷ Xijpiya moyolo quema tiitztoc iixpa TOTEKO.

Amo ximolini.

Xijchiya para yaya quichihuas cati quinequi.

Amo xicualani inihuaya cati quiipiyaj nochi cati quinequij ama.

Amo xiquinchihuili cuenta injuanti cati quichijtinemij sesen tamanti cati fiero moilhuijtoque quichihuase.

⁸ Amo ximocualancamaca.

Xijtalcahui cualanti,

pampa cualanti noja más hueyi mochihuas huan mitzcocos.

⁹ TOTECO quintzontamiltis cati mosisiníaj,

pero cati motemachíaj ipan ya quintiochihuas huan moaxcatise nopa tali.

¹⁰ Ayecmo huejcahuase itztose amo cuajcualme,

teipa masque titachiyas campa itztoyaj amo quema sempa tiquinpantis.

¹¹ Pero masehualme cati moechcapanohuaj iixpa Toteco itztose ipan nopa cuali tali huan taniel paquise,

pampa yaya quintiochihuas hasta mocahuas.

¹² Masehualme cati quicualancaitaj Toteco mosenilhuijtoque taya fiero tamanti huelis quinchihuilise injuanti cati xitahuac nemij.

Quintachilíaj ica cualanti huan motanhuehuehotzaj iniixpa.

¹³ Pero Toteco quinhuetzquilía nopa masehualme,

pampa quimati para monechcahuía nopa hora quema quintzontamiltis.

¹⁴ Masehualme cati quicualancaitaj Toteco quicopinaj inimacheta para quinmajcahuilise cati teicneltziti.

Quihuitolohuaj inincuahuitol huan quinmelaitaj cati moechcapanohuaj iixpa Toteco.

Quena, quinchiyaj para quinmictise cati xitahuac monejnemiltíaj.

¹⁵ Pero cati injuanti inimacheta calaquis ipan iniyolo,

huan inincuahuitolhua pojpostequis huan cuechtic elis.

¹⁶ Más cuali nopa quentzi cati quiپیya se cuali masehuali huan amo miyac tamanti pajpatiyo cati quiپیyaj tajtacolchihuani.

¹⁷ Pampa TOTECO quinquixtilis ininchicahualis cati amo itztoque tapajpacme iixpa,

pero quinforzajmacas cati monejnemiltíaj cuali iixpa.

¹⁸ Mojmosta TOTECO quitachilía cati quichihuaj masehualme cati itztoque xitahuaque iixpa,

huan nopa tali cati quinmacas para iniaxca huejcahuas para nochipa.

¹⁹ Quema ajsis tonali cati amo cuali,

quinmocuithahuis para amo más taijyohuise.

Quema oncas mayanti, quinmacas ten quicuase hasta mocahuas.

²⁰ Pero amo cuajcualme miquise.

Quena, quej huaquij nopa cuajcualtzitzi xochime sacapetaixco huan ayecmo nesi iniyejejeja,

nojquiya polihuise icualancaitacahua TOTECO.

Quena, polihuise quej pocti cati quisa huan ayecmo nesi.

²¹ Se masehuali cati amo cuali iyolo motanehui se tamanti huan ayecmo quicuepa.

Pero masehualme cati cuajcualme quiپیyaj hueyi iniyolo huan temacaj hasta mocahua.

²² Cati TOTECO quintiochihua quiselise nopa tali cati yaya quinmacas,

pero cati TOTECO quintelchihua quintzontamiltis.

²³ TOTECO quichihua ma eli temachtí sese paso ipan inemilis se cuali masehuali,

huan nopa masehuali paqui miyac pampa nemi cuali.

²⁴ Masque huetzis nopa cuali masehuali, amo mocahuas huetztoc, pampa TOTECO quitananas ica imax.

25 Na nojquiya nitelpocatixtoya huan ama ya nihuehuentzi,
pero amo quema niqitac TOTECO quitahuelcahua se masehuali cati itztoc
xitahuac iixpa.

Yon iconehua se cuali masehuali amo niquintztoc sinta motaejehuáaj para
ica panose.

26 Mojmosta se cuali masehuali quintasojta sequinoc huan quintanejtía cati
monequi.

Iconehua se cuali tacat tepalehuáaj.

27 Huajca sinta tijnequi tiitztos para nochipa,
xijtalcahui tajtacoli huan xijchihua san cati cuali.

28 Pampa TOTECO quipactía cati xitahuac huan amo quema quinhuejcama-
jcahuas iaxcahua cati itztoque temachme.

¡Amo! Techmocuitahuis para nochipa.
Pero quintzontamiltis nochi masehualme cati amo cuajcualme,
huan amo quincahuilis yon se iniixhui.

29 Masehualme cati itztoque xitahuaque iixpa TOTECO moaxcatise nopa tali
cati yaya quinmacas,
huan nepa itztose para nochipa.

30 Se masehuali cati itztoc cuali iixpa Toteco camanalti ica talnamiquilisti
huan quijtohua cati xitahuac.

31 Quipiya Icamanal Toteco Dios ipan iyolo,
huan yeca amo huetzis ipan tajtacoli.

32 Masehualme cati quicualancaitaj Toteco Dios quintachilíaj masehualme
cati monejnmiltíaj xitahuac.

Quitemohuaj quenicatza huelis quintelhuse para ma quinmictica.

33 Pero TOTECO amo quincahuas para cuali masehualme ma mocahuaca
inimaco inincualancaitacahua.

Quema ajsise iixpa se juez,
amo quincahuas ma quintatzacuilitica cati cuajcualme ica se tamanti cati
amo quichijtoque.

34 Ximotemachi ipan TOTECO huan xijchihua cati yaya quinequi,
pampa yaya mitzhuejcapantalis huan mitzmacas nopa tali.
Huan tiqitas quenicatza quintzontamiltis cati quinpackía tajtacolchihuase.

35 Pampa na niquintztoc masehualme cati quicualancaitaj Toteco,
inijuanti mohueymatíaj huan temajmatíaj.

Pampa quiپیay chichahualisti quej se cuahuit cati hueyi huan xajcaltic.

36 Pero panoc se ome tonali tantiyajque huan ayecmo niqunitac campa
itztoyaj.

Huan masque niquintemo, ayecmo niqunpanti.

37 Pero xijtachili quenicatza monejnmiltía se masehuali cati itztoc xitahuac
iixpa TOTECO,

yaya cati amo aqui hueli quitelhuis ica se tamanti cati amo monequi.

Nopa masehuali quiپیyas tasehuilisti huan itztos ica cuajcualtzi para
nochipa.

38 Pero TOTECO ica se huelta quintamitzontamiltis inijuanti cati amo
quitepanitaj.

Huan amo quicajtehuase yon se iniixhui.

39 TOTECO quinmaquixtía cati itztoque xitahuaque iixpa.

Quinfuerzajmaca quema huala taohuijcyot.

40 TOTECO quinpalehuá huan quinmanahuá cati cuajcualme.

Quinmanahuía inimaco masehualme cati quicualancaitaj huan
quinmaquixtía,
pampa injuanti mochixtoque ipan ya.

38

Inetatajtíl David quema tajtacolchijtoya

- 1 TOTECO, amo techtaijyohuiliti quema ticualani.
Huan amo techtatzacuiliti ica mohueyicualancayo.
- 2 Miyac nechcocohua cati amo cuali nijchijtoc.
Eltoc quej nochi mocuataminhua calactoc ipan na.
Quena, eltoc quej techajsitoc,
pampa nijmati ticualani ica na.
- 3 Huan pampa ticualani pampa nitajtacolchijtoc,
nijmati quenicatza nochi notacayo mococohua.
Yon se noomiyo amo cuali eltoc.
- 4 Nochi notajtacolhua huetztoc nopani.
Eltoc quej nimisahuisquía campa miyac at.
Notajtacolhua eltoc quej se tamamali tahuel etic cati amo hueli niquijyohuía.
- 5 Palani notacayo pampa nijchijqui se huihuiyot.
Mijyotíaj nococohua.
- 6 Nicuitapanhuitoltic huan amo hueli nijtanana notzonteco.
Semilhuit nichocatinemi por cati nijchijtoc.
- 7 Nochi notacayo tiquisa.
Huan ya tantinemi nochicahualis por notajtacol.
- 8 Nimomati quej nitatejtejtzonti.
Yon quentzi fuerza amo nijpiya.
Nelía niaxti ipan noyolo.
- 9 NoTeco, ta tijmati quenicatza nijnequi sempa niitztos cuali moixpa.
Nochi cati nimoilhuía tanemijya nesi moixpa.
Amo teno hueli nimitztatílía.
- 10 Noyolo nelhuihuipica,
huan ya tantinemi nochicahualis.
Ayecmo hueli nitachiya cuali.
- 11 Nonelhuampoyohua huan noteixmatcahua san nechhuejcaitaj, pampa
quijiyaj nococohua.
- 12 Injuanti cati quinequij nechmictise quisencahuaj taquetzti para nech-
masiltise.
Cati quinequij nechcocose talojtzitzi nechilhuíaj quenicatza nechtzontamil-
tise.
Semilhuit quitemohuaj quenicatza nechcajcahuase.
- 13 Pero na nimochihua quej amo nijcaqui cati quijtohuaj.
Nimochihua quej se cati amo hueli camanalti huan amo nijtapohua noca-
mac para niquinnanquilis.
- 14 Quena, na nimochihua quej amo nijcaqui inincamanal,
huan amo teno niquijtohua para ica nimomanahuis.
- 15 Pampa san ipan ta nimochiya, TOTECO, tinoDios.
Na nijcajtoc momaco para xiquinnanquili huan techmanahui.
- 16 San nimitztajtania para amo xiquincahuili ma noca huetzcaca.
Amo xiquincahuili ma mohueyitalica noixpa pampa nihuetzqui.
- 17 Nijmati nimiquis pampa tacuajcualoli amo nechcahua yon se talojtzi.
- 18 TOTECO, nijnequi nimitzpanexilis nochi notajtacolhua,

pampa nelía nimotequipachohua ica cati nijchijtoc.

¹⁹ Nocualancaitacahua momiyaquilijtoque huan moyoltetilijtoque.
Miyac nechcualancaitaj, masque amo teno niquinchiuilijtoc.

²⁰ Masque cati cuali niquinchiuilijtoc, nechcuepiliijtoque ica cati fiero.
Nechcualancaitaj pampa nijtoquilía cati cuali.

²¹ NoTeco Dios, amo techcajtehua noselti.
Amo ximoiyocatali ten na.

²² ¡Toteco! Xihuala nimantzi techpalehuiqui, ta tinotemaquixtijca.

39

Amo huejcahuas tonemilis

¹ Nimoilhuijtoya para nimomocuitahuisquía miyac para amo nijchihuasquía
cati amo cuali.

Niquijtojtoya para nijmocuitahuisquía nonenepil huan nocamanal para
amo nitajtolchihuas ica cati niquijtohua.

Quena, amo teno niquijtos quema niitztos iniixpa amo cuajcualme.

² Huajca nimochijqui quej se cati amo hueli camanalti.

Amo teno niquijtohuayaya,
yon cati cuali, yon cati amo cuali.

Huan pampa nicajectoaya nochí cati nijmatiyaya ipan noyolo,
noja más nitaijyohuiyaya.

³ Hasta nijmatiyaya quej noyolo tatayaya.

Huan quema san ya nopa nimosenilhuijtoya,
nijmatiyaya quej se tit lemeniyaya ipan noyolo.

Huajca ayecmo niquijyohui huan nicamanaltic chicahuac,
huan niquilhui TOTECO:

⁴ “TOTECO, technextili quesqui tonali niitztos huan quema nimiquis.
Nijmati nelquentzi tonali niyoltos nica.

⁵ Techmacatoc se nemilisti cati nelquentzi xihuit.

Huan nochí xihuit cati niyoltos elis san se talojtzi moixpa,
pampa ta nochipa tiitztoc.

Nochi masehualme polijtehuaj nimantzi san quej ixpolihui iniijyoyo quema
taijyotilanaj.

⁶ Nochi masehualme panotehuaj quej se ecahuili.

San tapic nochí inintequi.

Masque quimiyaquilíaj tamanti cati ipati,
amo quimatij ajquiya íaxca elis teipa.

⁷ Huajca, noTeco, amo teno onca cati ipan huelis nimotemachis.
Nimochiyas san ipan ta.

⁸ Techmaquixti ten notajtolhua.

Amo xiquincahuili masehualme cati huihuitique ma noca paquica ica cati
nijchijtoc.

⁹ Nimocamatzacuas moixpa huan ayecmo nimolinis por cati nopanti, pampa
ta techtatzacuiltía.

¹⁰ Pero noTeco, ayecmo techtatzacuilti.

Nijmati nimiquis pampa techtejtzontoc ica momax.

¹¹ Quema se masehuali tajtolchihua, ta tijtatzacuiltía.

Nopa tamanti cati más quicnelía,

tiquixpolihuiltía quej mejtolime quitamicualoltíaj se yoyomit.

Yon se masehuali amo quiapiya chichahualisti.

Nochi itztoque san quej se ajacat cati ica se talojtzi panotehuaj.

¹² NoTeco, xijtacaquili quema nimotatajtis.
 Techtacaquili quema nimitztzajtzilía.
 Amo san xitachixto quema nimochoquilia, techpalehuiqui.
 Quej nochi nohuejcapan tatahua, san niitztos nica se talojtzi.
 Quej elisquía niehua seyoc altepet huan san nipano,
 amo nihuejcahuas nica.

¹³ Ayecmo techtatzacuilti.

Techcahuili sempa ma nijpiya fuerza huan se quentzi paquilisti pampa se tonali nimitzquis huan ayecmo niitztos nica.”

40

*David quipaquilismaca TOTECO pampa quimanahui
 (Salmo 70)*

¹ Nijpixqui noyolo huan nimochixqui para TOTECO ma nechpalehuiqui.
 Huan yaya, quena, moechcapano huan nechtacaquili quema nijnojnnotzaya.

² TOTECO nechtananqui quema nijmatiyaya niitztoya ipan se ostot campa mahuilili.

Eltoya quej nimisahuijtinemiyaya ipan soqui atoli cati huejcata,
 huan ayecmo nijmatiyaya taya nijchihuas.

Pero TOTECO nechmaquixti ten nopa tequipacholi.
 Quena, nechquetzqui ipan se hueyi tet campa temachtí.
 Huan teipa nechyacanqui ipan se cuali ojti.

³ Huan teipa noTeco Dios nechmacac se huicat yancuic,
 se huicat cati ica ma nijpaquilismacas.

Miyac cati quicaquise nochi cati TOTECO nechchihuilijtoc, motemachise ipan ya.

⁴ Paqui nopa masehuali cati motemachía ipan TOTECO,
 huan amo motemachía ipan cati mohueyimatij,
 yon ininpan cati quinhueyichihua j teteyome.

⁵ TOTECO noDios, ta techchihuilijtoc miyac tamanti cati huejhueyi.

Amo aquí quiaxilis mohueyi chichahuilis.
 Ta nochipa techpixtoc ipan motalnamiquilis.

Quena, tahuel miyac tamanti cati cuajcualtzi tajsencajtoc techchihuilis.
 Sinta nijnequisquía niteyolmelahuas sesen tamanti cati techchihuilijtoc,
 amo nihuelisquía.

Pampa nochi cati cuali techchihuilijtoc quipano cati hueli nijpohua.

⁶ Ya nijmati nopa cati más tijnequi para timasehualme ma timitzmacaca.
 Amo hueyi ipati moixpa nopa tapiyalme huan sequinoc tamanti tacajcahualisti cati masehualme mitzmacaj.

Amo hueyi ipati moixpa nopa tacajcahualisti cati tijtatíaj moixpa por totajtacolhua.

Techtapohuilijtoc notalnamiquilis para hueli nijmachilía cati más tijnequi ten tojuanti.

Tijnequi ma timotemacaca ica ta.

Ya nopa, quena, hueyi ipati moixpa.

⁷ Yeca nimitzilhuijtoc:

“Nica niitztoc.

Ya nihuala quej ijcuilijtoc ipan mocamanal para nijchihuasquía.

⁸ ¡NoTeco Dios!

Nechpactía nijchihuas mopaquilis,

huan motamachtil nijhuica ipan noyolo.”

⁹ Miyacapa iniixpa momasehualhua niteyolmelajtoc para ta, TOTECO, tiquinchihua masehualme xitahuaque moixpa. Cualí tijmati para amo san nicajoctoc cati nijmati.

¹⁰ Amo nijtatijtoc nopa cualí camanali ipan noyolo para amo aquí niquilhuis. Nochi masehualme niqinyolmelahua para ta tiquinmaquixtis.

Nochipa nitematiltis para ta nelía titemachti huan titepalehuía. Nepa miyacapa nitepohuilis para titetasojta huan amo timoyolpata.

¹¹ TOTECO, nijmati amo quema tijcahuas techtasojtas.

Nimochiya ipan moteicnelijcayo, pampa ta nochipa techmocuitahuis.

¹² Miyac tequipacholi nijpiya campa hueli.

Amo hueli nijpohua nochi.

Notajtacolhua nechtantoc huan nichoca hasta amo hueli nitachiya.

Notajtacolhua nelmiyac hasta quipano imiyaca notzoncal.

Tantinemi noyolo huan nochicahualis.

¹³ TOTECO, techmanahuiqui.

Quena TOTECO, ximoisihuilti huan techpalehuiqui.

¹⁴ Ma mopinahualtica huan ma mocuapologa cati quinequij nechtzontamil-tise.

Xiquinquixti cati nechcualancaitaj huan tahuel xiquinpinahualti.

¹⁵ Nochi cati noca paquij ma huetzica.

Xiquincuepa san ica inimax.

¹⁶ Pero ma paquica miyac nochi cati mitztemohuaj.

Quena, paquij cati mitzicnelíaj pampa tiquinmaquixtijtoc.

Nochipa quijtohuaj:

“Nelía hueyi TOTECO.”

¹⁷ Masque nimotequipachojtoc huan nechpolohua ten ica nipanos, nijmati para ta TOTECO techelnamiqui.

Ta tinoTeco Dios, techpalehuis huan techmanahuis.

NoTeco Dios, amo xihuejcahua quema nimitznotza.

Nimantzi techpalehuiqui.

41

David cati mococohua quitajtanía Toteco ma quichicahua

¹ Paquí nopa masehuali cati motequipachohua pampa quinicnelía cati teic-neltziti,

pampa TOTECO quipalehuis quema hualas taohuijcaoyot.

² TOTECO quimocuitahuis para amo aquí quimictis.

Huan TOTECO quitiochihuas miyacapa ipan tali Israel.

Yaya amo quicajtehuas,

yon amo quicahuas inimaco icualancaitacahua para ma quichihuilica cati injuanti quinequise.

³ Quema huetztos ipan taijyohuilisti,

TOTECO quitananas ipan itapech huan quijcuenilis nopa cocolisti.

⁴ Na niquilhui TOTECO:

“TOTECO, na nitajtacolchijtoc ica ta.

Techtasojta huan techchicahua.”

⁵ Nocualancaitacahua quinequij ma nechajsi cati fiero.

Camanaltij fiero ten na huan quinequij ma nimitz huan ayecmo aquí nechelnamiquis.

- ⁶ Quema nechpaxalohuaj, mochihuaj quej nohuampoyohua, pero amo melahuac ten quijtohuaj.
Quema iztoque nohuaya san quitacaquilíaj taya onca para huelis quipatase ica cati más fiero,
huan teipa quisase huan teyolmelajtinemise ten na.
- ⁷ Quena, nocualancaitacahua mosentilíaj huan noca camanaltij.
Tepohuilíaj para ayecmo onca pajti para na huan nimantzi nimitzquis.
- ⁸ Quijtohuaj:
“Nopa cocolisti cati yaya quipixtoc nelfiero.
Ayecmo motananas ten itapech pampa nimantzi miquis.”
Quej nopa quijtohuaj ten na.
- ⁹ Nojquiya nechcajtejtoc cati eliyaya nonelhuampo.
Yaya cati ipan nimotemachiyaya huan cati tacuayaya nohuaya, ama nech-tahuelcajtoc.
- ¹⁰ Pero ta TOTECO, techtasojta.
Techtanana ten notapech huan niqincuepilis quej nechchihuilijtoque.
- ¹¹ Nijmati techicnelía pampa amo tiqincahuilijtoc nocualancaitacahua ma nechtanica.
- ¹² Techpalehui pampa nijchihua cati xitahuac huan techmacatoc tequit-icayot ma niitzto nepa moixpa para nochipa.
- ¹³ Ma tijhueyichihuaca TOTECO,
yaya cati iTeco tohuejcapan tata, Israel.
Quena, ma tijhueyichihuaca ama huan nochipa. Quej nopa ma eli.

42

Israelitame cati quinhuicatoque seyoc tali quielnamiquij inintal

- ¹ Quej se masat cati tahuel amiqui quitemojtinemi se atajti para atis,
quej nopa na nimitzyoltemohua, noTeco Dios.
- ² Quena, quej se cati tahuel amiqui,
na ipan noyolo nimitznequi Toteco,
ta cati nelnelía tiitztoc.
¿Hasta quema huelis niyas huan nimonextis moixpa?
- ³ Tayohua huan tonaya nichoca huan amo nitacua.
Nocualancaitacahua talojtzitzi nechtatztintoquilíaj:
“¿Canque itztoc moDios?
¿Para ten amo mitzpalehuía?”
Quej nopa nechilhuíaj.
- ⁴ Quema niquelnamiqui quenicatza eliyaya achtohuiya nepa ipan notal,
eltoc quej atiya noyolo.
Niyahuiyaya inihuaya miyaqui masehualme hasta ichaj Toteco Dios.
Na niqinycanayaya nochi hasta ichaj ipan nopa hueyi ilhuit.
Titzajtiziyahuiyayaj ica paquilisti,
huan tijtascamatiyayaj Toteco Dios pampa para ya tiilhuichihuayayaj.
- ⁵ Huajca nimoilhuía:
“Amo monequi nimotequipachos.
Na nimotemachijtoc ipan noTeco Dios,
huan sempa nijpaquilismacas,
pampa yaya noDios huan notemaquixtijca.”

6 Pero noTeco, nelía nimotequipachohua nica campa niitztoc ipan ni tali cati huejca.

Yeca nimitzelnamiquis,
huan niquelnamiquis quenicatza tijpixqui hueyi moyolo ica tojuanti cati tiehuani ipan motal.

Niquelnamiqui nopa tali cuajcualtzi cati pehua campa motalohua nopa atajti Jordán,

huan ontami hasta campa motanantoc nopa tepeme Hermón huan Mizar.

7 Ama ta techtitanilijtoc tequipacholi cati nechijyomictía.

Quena, miyac tequipacholi nechajsitoc quej imiyaca at cati huetzi ten tepeixco hasta ipan na.

Caquisti quej miyac at cati ajcahuacatoc,

huan nochi nopa at nopan panotoc.

8 Pero ica ijnaloc TOTECO nechtitanilis itaicnelilis.

Huan ica tayohua yaya nechmacas se huicat para nijhueyichihuas,

huan nimotatajtis ica ya.

Quena, nijnojtza NoTeco cati mojmosta nechmaca nemilisti.

9 Niquilhuis Toteco Dios:

“Ipan ta nimotatía huan amo aqui hueli nechajsis.

¿Para ten techelcajtoc?

Na san nimotequipachojtinemi,

pampa nocualancaitacahua nechtaijyohuiltíaj.

10 Cati nocualancaitacahua nechchihuilíaj nechcocohua hasta ajsi ipan noomiyohua,

pampa nechtaijilhuíaj huan nechtatzintoquilíaj talojtztzi:

‘¿Canque itztoc moDios?

¿Para ten amo mitzpalehuía?’ ”

11 Pero amo monequi nimocuesihuilmacas,

yon nimotequipachos.

Na nimotemachijtoc ipan noTeco Dios,

huan teipa sempa nijpaquilismacas pampa yaya noDios huan noTemaquix-tijca.

43

Se netatajtili para quitajtanis Toteco ma quihuica ipan inintal

1 NoTeco Dios, techtajtolsencahua xitahuac huan xitenextili para amo teno nijchijtoc.

Techmanahui ten ni istacatica masehualme huan amo cuajcualme cati nechtelhuíaj.

2 Pampa san ta tinoTeco huan tinoDios huan notamanahujca na.

¿Para ten techtahuelcajtoc?

Nimotequipachojtinemi huan más nechtaijyohuiltíaj nocualancaitacahua, huan amo teno tijchihua.

3 Toteco Dios, techyacana ica motaahuil huan technextili cati melahuac.

Quej nopa, quena, huelis niyas ipan motal huan campa motepe cati tatzejtzeloltic campa ta tiitztoc ipan motiopa.

4 Quena, noTeco Dios, nicalaquis huan niajsiti hasta motaixpa campa masehualme mitzhueyichihua.

Nepa nimitzpaquilismacas ica arpa, ta cati techmaca paquilisti, pampa ta tinoTeco Dios.

5 San tapic nimotequipachos.

Na nimotemachijtoc ipan ta, noTeco Dios, huan sempa nimitzpaquilismacas, pampa, ta tinoDios, huan tinotemaquixtija.

44

Se tacat quitajtanía Toteco ma quimocuitahui

¹ Toteco Dios, tijcactoque taya techpohuilijtoque tohuejcapan tatahua ten ta, huan nochi nopa tamanti cati tiquinchiuili huejcajquia.

² Quena, Toteco Dios, ica mohueyi chicahualis ta tiquinquixti nopa fiero masehualme cati quinhueyichihuayaj teteyome ipan nopa tali, huan nopa tali tiquinmacac totatahua.

Quena, tiquintzacuilti ne sequinoc huan tiquinpalehui tohuejcapan tatahua para ma momiyaquilica, huan ma moaxcataca.

³ Tohuejcapan tatahua amo quitanque nopa tali ica inimacheta, yon ica ininchahualis.

Tatanque ica nopa hueyi chicahualisti cati ta tijpiya ipan monejmat, huan pampa hueyi moyolo ica injuanti, huan achi más tiquinicnelía.

⁴ Ta tinotanáhuatijca huan tinoTeco Dios.

Ta tiquinmanahuía huan tijchihua ma tatanica momasehualhua.

⁵ Quena, ica motapalehuil tiquintanise toculancaitacahua.

Huan ica mochichahualis ininpan timoquejquetzase cati techtehuíaj.

⁶ Pampa amo timotemachíaj ipan tocuahuitol huan tomacheta para techmanahuisse huan titatanise.

⁷ Eltoc ta, Toteco, cati tijchihua ma tiquintanica toculancaitacahua.

Ta tiquinpinahualtijtoc nochi cati techcualancaitaj.

⁸ Mojmosta timitzpaquilismacase tinoTeco Dios.

Huan timitzhueyichihuase ica huicat para nochipa.

⁹ Pero amantzi eltoc quej techtahuelcajtoc huan techpinahualtijtoc.

Yon ayecmo tinemi inihuaya tosoldados quema tiontatehuíaj.

¹⁰ Tijchijqui ma ticholoca iniixpa toculancaitacahua.

Quena, injuanti cati techcualancaitaj techachtequilíaj huan quihuicaj nochi cati quinequij.

¹¹ Techtemactilijtoc quej tipilborregoijtzi cati san quichiyaj para quinhucase campa quinmictise.

Huan techsemantoc campa hueli ipan sequinoc talme campa quinhueyichihuaj teteyome.

¹² Technamacatoc timomasehualhua ica nelquentzi quej elisquía amo teno topati.

¹³ Nochi masehualme ipan nopa talme cati itztoque tonechca quiitaque cati techchihuilijtoc.

Yeca techtaijilhuíaj huan toca paquij.

¹⁴ Tijchijtoc para injuanti cati quinhueyichihuaj taixcopincayome ma toca huetzcaca.

Nochi quema techitaj, motzonojoliníaj.

¹⁵ Mojmosta toixpa eltoc nopa pinahualisti hasta tijnequisquíaj timoixtza-cuase,

¹⁶ pampa techtaijilhuíaj huan techhuetzquilíaj nopa motacuepilijca masehualme.

Quena, techpinahualtíaj toculancaitacahua.

¹⁷ Nochi ni tamanti topantitoc,

masque amo timitzelcajtoque,
yon amo timoiyocacajtoque ten nopa camanal sencahuali cati tijchijqui
inihuaya tohuejcapan tatahua.

¹⁸ Amo timoiyocatalijtoque ten ta,
yon amo tijcajtejtoque moojhui.

¹⁹ Pero techtahuelcajtoc campa amo aqui itzotc,
campa san itztoque tapiyalme cati mosisiníaj.
Techcajtoc ipan se tzintayohuilot cati eltoc quej miquilisti.

²⁰ Toteco Dios, sinta timitzelcajtosquíaj,
o tijhueyichijtosquíaj se totaixcopincayo,

²¹ ta tijmajtosquíaj,
pampa ta tijmati nochi cati ixtacatzi eltoc ipan iyolo se masehuali.
Pero amo tijchijtoque, Toteco.

²² Pero masque amo teno tijchijtoque,
por ta tiitztoque nechca miquilisti.
Techchihuaj quej tipilborregoitzitzi cati san quichiyaj ajquiya quinmictis
pampa timoaxcahua.

²³ ¡Toteco ximotanana!

¡Amo xicochi!

Amo ximoiyocatali ten tojuanti para nochipa.

²⁴ ¿Para ten timoixtatía?

Eltoc quej tiquelcajtoc para tojuanti titaijyohuíaj huan miyac techcualan-
caitaj.

²⁵ Techtahuisojtoque hasta talchi.

Toxayac eltoc ipan taltepocti huan amo hueli timotananase.

²⁶ ¡Ximotanana, Toteco!

Techpalehuiqui.

Techmaquixti pampa tahuel techicnelía.

45

Se huicat para ma huicaca quema nopa tanahuatijquet mosihuajtía

¹ Notalnamiquilis temitoc ica camanali cati cuajcualtzitzi.

Niquijcuilos ni huicat para ma tijhuicatica totanahuatijca.

Tahuel nijnequi nitepohuilis ni huicat cati nijsencajtoc, huan ya ni quijto-
hua:

² Ta más ticuajcualtzi ten nochi sequinoc telpocame,

huan cuajcualtzi cati tiquijtohua,
pampa Toteco Dios mitztiochijtoc para nochipa.

³ Ximocualtalili momacheta para titatehuis,

ta cati nelía amo timajmahui.

Nelía tinesi ticuajcualtzi pampa ta titanahuatijquet cati más hueyi.

⁴ Xitejco ipan cahuayo huan xitataniti ica nochi mohueyitilis.

Ta tiquinmanahuía cati teicneltzitzi huan cati quichihuaj cati melahuac.

Titetajtolsencahua xitahuac.

Nelía huejhueyi tamanti tijchihua.

⁵ Tatentili nopa cuataminti cati tijhuica,

huan quinajsis iniyoltipa mocualancaitacahua quema tiquinmelaitas,

huan tiquinmajcahuilis.

Ma huetzica moicxita nochi ten campa hueli talme campa quintepanitaj
teteyome.

⁶ Toteco Dios, titanahuatis para nochipa huan amo quema tamis.

Quena, motanahuatilis elis senquisa xitahuac.

⁷Ti quicnelía cati melahuac huan tijcualancaita cati amo cuali.
Yecā Toteco Dios, yaya cati moTeco mitztequitalijtoc titanahuatijquet,
huan mitzmacatoc más paquillisti huan más tatepanitacayot,
que nochi sequinoc tanahuatiani.

⁸Nochi moyoyo mijyotía ica nopa taajhuiyacayot mirra, áloe huan canela.
Huan mitzpaquillismacaj ica tatzotzonalí nepa ipan mochaj campa quiye-
jyectalijtoque nochi tapepecholí ica tamanti cati tahuel cuajcualtitzí
huan pajpatiyó.

⁹Iníichpocahua sequinoc tanahuatiani quipiyaj nopa hueyi tatepanitacayot
para mitztequipanose.
Huan ica monejmat mosehuijtoc nopa ichpoca tanahuatijquet cati elis mosi-
hua cati quiyectalijtoque ica oro cati onca ipan tali Ofir.

¹⁰Xijtacaquili ichpocat.

Quena, xijtacaquili cuali, nocone,
cati nimitzilhuís:

Ayecmo xiquintoquili motatahua,
moicnihua huan nochi cati timomajtoya tijchihua.

¹¹Nopa tanahuatijquet tahuel mitznequi,
huan nelía paquí ica moyejyejca.

Huajca monequi tijneltocas pampa ama ya moTeco.

¹²Hualase mitzpaxaloquij iichpocahua nopa tanahuatijquet ten altepet Tiro.
Quena, cati más tominpixtoque ipan nopa altepet hualase huan mitztamaj-
macaquij.

Ya ni quichihuase pampa quinequise ximohuampoichihua inihuaya.

¹³Nopa ichpoca monamictijquet mocualtalía ipan ichaj ica tamanti cati más
cuajcualtzi.

Yaya iichpoca se tanahuatijquet huan ama mocuilis ne tanahuatijquet cati
hueyi.

Tahuel cuajcualtzi nopa ichpocat ica iyoyo cati nelcuajcualtzi cati tajtzontí
ica oro.

¹⁴Quena, cuajcualtzi quiyoyontijtoque ica iyoyo tajtzontí huan ama qui-
huicase iixpa nopa tanahuatijquet cati ihuaya monamictis.

Itepotzco yase iichpocapoyohua cati quinnotztoc.

¹⁵Ica hueyi paquillisti calactiyahuij ipan nopa hueyi cali campa ichaj nopa
tanahuatijquet.

¹⁶Tanahuatijquet, se tonali tiquinpiyas moconehua,
huan tiquinmacas tequiticayot para tanahuatise quej mohuejcapan tatahua
mitzmacaque.

Quena, teipa tiquinpiyas motelpocahua cati mitzpalehuise.

Huan tijchihuas ma tanahuatica hasta campa huéli techaj ipan nochi motal.

¹⁷Huan na ica ni huicat cati niquijcuilojtoc para ta,
Toteco Dios, quichihuas para masehualme ma mitzelnamiyuica sese xihuit
cati panotiyas.

Quena, masehualme ipan ten huéli tali camanaltise para nochipa ten nopa
huejhueyi tamanti cati ta tijchijqui.

¹ Toteco Dios ya totamanahuijca huan tochicahualis.

Nimantzi techpalehuía quema onca taohuicayot.

² Yeca amo timajmahuise masque ni taltipacti tamosolihuis, huan masque misahuise tepeme hasta tatzinta ten nopa hueyi at.

³ Masque ajcahuacatos nopa hueyi at huan posonis miyac, huan masque mojmolinise tepeme, amo nechmajmatis.

⁴ Oncas se atajti cati quinmacas paquilisti inijuanti cati itztose ipan ialtepe Toteco.

Huan nopa campa más tatzejtzeltolitic itztoc Toteco Cati Más Hueyi.

⁵ Toteco Dios itztoc ipan nopa altepet, huan amo aqui huelis quisosolos.

Quema hualase icualancaitacahua,

Toteco Dios amo huejcahuas, nimantzi quipalehuis ialtepe.

⁶ Masque tahuejchihuaj masehualme ipan campa hueli talme cati amo quiixmatij Toteco,

huan masque tanahuatiani huan inimasehualhua tzajtzij ica cualanti, amo teno hueli quichihuase.

Quema Toteco Dios camanaltis,

quicaquise itoscac cati caquisti quej tatomoni,

huan inijuanti motancuaquetzase iixpa ica majmajti.

Huan ica icamanal ni taltipacti atiyas.

⁷ Toteco Dios cati quinyacana nopa miyac millones iilhuicac ejcahua para tatehuitij itztoc tohuaya.

Yaya cati techmocuitahuía ama,

yaya iTeco tohuejcapan tata Jacob cati huejcajquiya itztoya.

⁸ Xihualaca xiquitaquij nochi nopa huejhueyi tamanti cati TOTECO quichij-toc.

Quitamisolojtoc taltipacti huan ama tatzitzicatoc mocajqui.

⁹ Yaya quitamiltía nochi tatehuilisti hasta campa ontantoc nochi taltipacti.

Quipostectoc nochi cuahuitoli huan quisosolojtoc nochi tamanti cati ica tatehuisquiaj masehualme.

Huan quintatijtoc nochi tatehujca carros.

¹⁰ Huan yaya quiijtouha:

“Ayecmo ximolinica.

Ximomacaca cuenta para na niamoTeco Dios.

Na niquinnahuatía nochi masehualme ipan campa hueli tali.

Nochi cati itztoque ipan ni taltipacti nechhueyitalise.”

¹¹ Itztoc tohuaya TOTECO cati quinyacana nopa miyac millones iilhuicac ejcahua para tatehuitij.

Yaya cati iTeco tohuejcapan tata Jacob cati huejcajquiya itztoya, yaya cati techmocuitahuía ama.

47

Toteco Dios yaya nopa Tanahuatijquet ten nochi ni taltipacti

¹ Nochi anmasehualme ximomatajtatzinica.

Xijpaquilismacaca Toteco Dios huan xihucaca chicahuac.

² Pampa TOTECO yaya cati más hueyi huan temajmati.

Yaya nopa hueyi tanahuatijquet cati quinahuatía nochi ni taltipacti.

³ Quintzontamilti pilaltepertzitzi toixpa huan quitalijtoc nochi talme tomaco para tiquinnahuatise.

Yeca tojuanti tahuel tipaquij.

⁴ Yaya quitapejpenijtoc ni tali para techaxcatis.

Techmaca cati más cuali pampa techicnelía tojuanti tiimasehualhua.

⁵ Toteco Dios tejcotoc campá tanahuatía.

Nochi tzajtziyayaj ica paquilisti huan tapitzayayaj ica tapitzali quema TOTECO calajqui.

⁶ Xihuicaca tihuicat para tijaquilismacase Toteco Dios.

Xijhuicaticá pampa yaya totanahuatijca.

⁷ Toteco Dios, yaya nopa tanahuatijquet cati quinahuatía nochi ni taltipacti.

Xijcualtalica se huicat cati cuajcualtzi huan xijhuicaticá.

⁸ Toteco Dios mosehuijtoc ipan isiyaj tatzejzeloltic,

huan tanahuatía ipan nochi talme.

⁹ Nopa huejhueyi masehualme cati quipiyaj tanahuatili ipan campá hueli tali ipan ni taltipacti mosejcotilíaj tohuaya.

Quinequij para san sejco tijhueyichihuase Toteco Dios,

yaya cati iteco Abraham cati huejcajquiya itztoya.

¹⁰ Iaxca ya nochi tanahuatiani huan inisoldados campá hueli ipan taltipacti, huan injuanti quihueyitepanitaj.

48

Sion, ialtepe TOTECO

¹ ¡Tahuel hueyi TOTECO!

Quena, quinamiqui para tijaquilismacase Toteco Dios cati itztoc ipan ialtepe huan ipan itepe cati tatzejzeloltic.

² Nelía cuajcualtzi nopa tepet Sion huan ijcatoc tahuejcapa ipan nopa altepet. Nopona mosehuía Jerusalén, ialtepe Toteco Dios, nopa hueyi tanahuatijquet.

³ Toteco Dios iselti itztoc ipan nopa huejcapantic cali campá monequi moquetzas cati tachixtoc para quimanahuis altepet Jerusalén.

Tenextilijtoc para yaya cati quimanahuía huan quimocuitahuía.

⁴ Tanahuatiani ten campá hueli itztoque ipan ni taltipacti mosentilijque para san sejco quitehuise nopa altepet.

⁵ Pero quema quiitaj ajquiya quimocuitahuía nopa altepet huan para nelía hueyi ichichualis, momajmatíaj.

Huan nimantzi cholojtehuaj huan mocuepaj campá hualajtoque.

⁶ Quena, quinitzquía se majmajti huan nelía taijyohuíaj,

quej se sihuat quema conepiya,

⁷ o quej se ajacat chichahuac cati quinsosolohua nopa huejhueyi barcos cati hualahuij tali Tarsis.

⁸ Ipa tijcactoque quenicatza TOTECO quimocuitahuía ialtepe,

huan ama tiquitztoque.

Quena, TOTECO yaya cati quinyacana nochi nopa miyac millones iilhuicac ejcagua para tatehuitij.

Quitilijtoc para ialtepe Jerusalén ma huejcahuas para nochipa.

⁹ Toteco Dios, quema tiitztoque ipan motiopa,

tiquelnamiquij huan timoyolilhuíaj quenicatza techicnelía.

¹⁰ Toteco, campá hueli masehualme mitzpaquilismacaj,

pampa quicactoque quenicatza mohueyitilis.

Quicactoque hasta campá ontami taltipacti.

Huan quimatij para ica mohueyi chichualis titetajtolsencagua xitahuac.

¹¹ Huajca ma paquica nopa masehualme ipan tepet Sion.

Ma huitonica ica paquilsti nochi cati ehuani ipan altepeme ten tali Judá pampa cuali huan xitahuac titetajtolsencahua.

¹² Nochi amojuanti cati animasehualhua Toteco Dios,

xiyaca xijyahualotij nopa altepet Jerusalén,

huan xijpohuaca quesqui tepancali huejhueyi quipiya campa soldados tamocuitahuaj.

¹³ Xijtachilitij nopa hueyi ichaj nopa tanahuatijquet,

huan xiquitaca quenicatza tatzajtactoque huan quiyetalijtoque,

para quej nopa huelis anquinpohuilijtiyase amoteipan ixhuihua.

¹⁴ Pampa ni Toteco Dios, yaya elis toDios para nochipa,

huan amo quema tamis ichicahualis.

Yaya techyacanas mojmosta hasta más nepa quema ya timictose.

49

Quichihuj se huihuiyot cati motemachíaj ipan inintomi

¹ Cuali xijtacaquilica ya ni,

amojuanti cati campa hueli anitztoque ipan ni taltipacti.

² Nocamanal elis para nochi.

Elis para cati tominpixtoque huan para cati teicneltziti.

Elis para cati quipiyaj tequiticayot huan para cati amo quipiyaj tequiticayot.

Huajca xijtacaquilica.

³ Nicamanaltis ica talnamiquilisti.

Nimechpohuilis nochi cati nimoyolihuijtoc ipan noyolo.

⁴ Achtohui nimechilhuis se tatzintoquili cati totalnamijca huejcapan tatahua quijijtoque,

huan nitatzotzonas ica se arpa huan nihuicas para nimechmatiltis taya quinequi quijitos:

⁵ ¿Para ten monequi nimomajmatis quema hualas taohuijca,

huan quema nopa tajtacolchijca masehualme cati nechcualancaitaj hualase nechyahualoquij?

⁶ Inijuanti motemachiyaj ipan inintomi,

huan mohueyimatij pampa quipiyaj miyac tamanti cati pajpatiyo.

⁷ Pero yon se ten inijuanti amo huelis momaquixtis ten itajtacolhua,

yon amo huelis quimaquixtise se iniicni.

Amo aqui huelis quitaxtahuis Toteco Dios para ma quimaquixti.

⁸ Pampa tonemilis eltoc se tamanti cati miyac ipati.

Amo onca yon se tomi ipan nochi taltipacti cati ica huelis moixtahuas.

⁹ ¡Amo! Amo aqui huelis quicohuas inemilis para itztos para nochipa huan para amo quema miquis.

¹⁰ Nochi masehualme miquise.

Cati talnamiquij huan cati mohueyimatij,

huan nojquiya nochi cati huilhuitique,

san se ininpantis.

Mictehuaaj huan quicajtehuaaj nochi cati pajpatiyo quipiyayayaj.

Huan sequinoc moaxcatise.

¹¹ Inijuanti moilhuj itztose para nochipa,

yeca quicualtalíaj ininchajchaj huan quitálíaj inintoca ipan inintal,

quej elisquía iniaxca para nochipa.

¹² Pero se masehuali amo huejcahuas masque nelía tominpixtoc,

pampa nojquiya miqui san se quej se cuatitan tapiyali.

¹³ Nochi masehualme cati motemachijtoque san ipan inijuanti iniselti,

quipantise miqulisti.

Huan nojquiya miquise nopa masehualme cati quintoquilíaj huan quihueyitalíaj inincamanal.

¹⁴ Nopa masehualme miquise quej miquij borregoyme.

Quena, miqulisti quinchíya nochi.

Pero se tonali nopa masehualme cati itztoque xitahuaque iixpa Toteco Dios quinnahuatise masehualme cati amo cuajcualme.

Quej nopa elis quema ya palantose inintacayohua nopa masehualme ostoi-jtíc.

Huajca quena, ipan nopa tonali nopa tominpiyani quicajtejtose huejca ininchajchaj cati cuajcualtzi.

¹⁵ Pero Toteco Dios nechmaquixtis ten ichicahualis miqulisti huan nechhuicas ihuaya.

¹⁶ Amo ximotequipacho sinta se masehuali moricojchihua, huan mojmosta más quiyecchijchihua ichaj.

¹⁷ Pampa quema miquis amo teno huelis quihuicas.

¡Amo! Quema quitemohuise itacayo ostoi-jtíc, yon quentzi cati cuajcualtzi quipixqui amo huelis quihuicas.

¹⁸ Masque se masehuali itztos ica paquilisti quema noja yoltoc, huan sequinoc quitepanitase pampa moricojchijtoc,

¹⁹ ajsis se tonali quema miquis quej ihuejcapan tatahua, huan ayecmo quema quiitas taahuili.

²⁰ Se masehuali cati moricojchijtoc, pero amo quielnamiqúi para amo huejcahuas inemilis ipan ni taltipacti, mictehuas san se quej se cuatitan tapiyali.

50

Toteco Dios techilhuía quenicatza ma tijhueyichihuaca

¹ Yaya TOTECO Cati Más Quipiya Chichahualisti que nochi cati quintocaxtíaj dioses,

quinnotztoc nochi masehualme cati itztoque campa hueli ipan ni taltipacti. Quinnotza cati itztoque hasta campa quisa tonati huan hasta campa oncalaqui.

² Toteco Dios ica iyejeyca petani huan taahuía ten Sion, nopa tepet campa ijcatoc itiopa cati senquisa cuajcualtzi.

³ Toteco Dios hualas ica chichahualisti, huan iixpa hualas se hueyi tit cati quisosolojtihualas nochi cati quipantis. Tatomonilot huan tapetanilot quiyahualohua.

⁴ Toteco Dios quinnotza nochi cati itztoque ipan ilhuicacti huan ipan taltipacti,

para ma contachilica quenicatza quintajtolsencahuas imasehualhua. Quiijtohua:

⁵ “Xiquinsentilica nomasehualhua cati moyocacajtoque ten na. Quena, ma hualaca nochi inijuanti cati quichijtoque se camanali nohuaya, quema nechmacaque tacajchahualisti huan quiijtoque para nechtoquilisquíaj.”

⁶ Nochi ilhuicacti tepohuilía para Toteco Dios itztoc xitahuac. Huan para yaya nopa juez cati tetajtolsencahuas.

⁷ “Xijtacaquilica nochi annomasehualhua, xijcaquica nochi cati niqijtos. Nimechtelhuis miyacapa ica nochi tamanti cati anquichijtoque,

pampa na niDios huan niamoTeco.

⁸ Amo nimechajhuas pampa amo antechmacaj tacajcahualisti, yon pampa amo anquinmictiaj tapiyalme huan anquintatiaj noixpa, pampa quena, ya nopa anquichihuaaj.

⁹ Pero amo ya nopa cati nijnequi.

Amo monequi techmacaca tacajcahualisti, quej becerros huan oquich chivojme cati hualahuij ten amopotrero.

¹⁰ Pampa na noaxcahua nochi tapiyalme ipan cuatitamit huan nochi huacaxme cati tacuajtinemij ipan nochi fachiquilme.

¹¹ Niquinixmati nochi totome campa hueli huan nochi tapiyalme cati nemij cuatita, pampa noaxcahua.

¹² Sinta nimayanasquia, amo nimechtajtanisquia techtamacaca, pampa ni taltipacti huan nochi cati eltoc ipani noaxca.

¹³ ¿Anmoilhuiaj nimotacualtia ica torojme ininacayo, huan niqui inieso oquich chivojme?

¡Amo!

¹⁴ Nijnequi techtascamatilica ica nochi cati nimechchihuilia huan ya nopa niquitas quej se tacajcahualisti.

Xijtamicihuaaca nochi cati anquijtojtoque para anquichihuase.

¹⁵ Huan technoynotzaca quema anmotequipachohuaaj, huan na nimechmanahuis huan amojuanti antechnextilise miyac tatepanitacayot.”

¹⁶ Pero Toteco quinilhuia masehualme cati amo cuajcualme:

“Amo anquipiayaj tequiticayot para ancamanaltise ten nopa camanal senc-

ahuali, cati quijtohua cati nimechmacas, yon amo hueli antepohuilise notanahuatilhua.

¹⁷ Pampa amo anquicaquij quema nimechtacahualtia, yon amo anquichihuiliaj cuenta nocamanal.

¹⁸ Quema anquijaj se tachtejquet,

anmohuampochihuaaj ihuaya, huan nojquiya anmohuicaj inihuaya cati quichijtinemij ten hueli ica cati amo inintahuical.

¹⁹ San campa hueli anquicalaquijtinemij amonenepil para anquijtose cati fero.

Nimantzi anistacatij.

²⁰ Anmosehuiaj huan anquitelhuiaj se cati amonelicni.

Quena, yaya cati nojquiya icone amonana huan san sejco anmoscaltijque, anquitajjilhuiaj.

²¹ Nochi ya ni anquichijtoque, huan na amo teno niquijtojtoc.

Huajca anmoilhuijtoque para na nieli san se quej amojuanti.

Pero ama nimechxcoilhuis nochi cati anquichijtoque, huan nimechpannextilis nochi.

²² Xijtacaquilica ya ni, amojuanti cati antechelcahuaaj na, niamoTeco Dios.

Sinta amo antechelnamiquij, nimechhuejhuelos huan amo aqui huelis amechmanahuis nomaco.

²³ Pero quema antechtascamatij ica nochi cati nimechchihuilia, eltoc quej se tacajcahualisti cati nechnextilia antechtepanitaj. Huan nopa masehuali cati momaca cuenta para mocuapolojtoc, huan mocuepa ipan nojhui cati xitahuac,

na nijmaquixtis.”

51

Se netatajtli para Toteco ma quitapojpolhui

- 1 ¡Ta, tinoTeco Dios cati techicnelía,
nimitztajtanía xijpiya hueyi moyolo ica na!
¡Techtasoja ta cati tijpiya miyac motaicnelilis huan techtapojpolhui nochi
notaixpanolhua!
- 2 ¡Techpajpaca huan techquixtili ni notajtacol para sempa nielis nitapajpactic!
3 Pampa ya nimomacac cuenta para nelía nitajtacolchijtoc moixpa.
Huan san ya nopa nimosenilhujitoc nochipa.
- 4 San ica ta nitajtacolchijtoc.
Quena, san ica ta nijchijtoc ni hueyi tajtacoli cati ta amo tijnequi tiquitas.
Ta tiquitac nochi cati nijchijqui huan xitahuac techajtolsencajtoc.
- 5 Pero na ipa nitajtacolchijquet hasta quema nitacatqui.
Quena, ipa nitajtacolchijca masehuali hasta quema pejqqui nimoscaltía iijtico
nonana.
- 6 Ta tijnequi se masehuali ma mitztepanita ipan iyolo;
tijnequi ma tijchihuaca san cati melahuac.
Techchihua na ma nijmati motalnamiquilis hasta campa más tatzinta ipan
noyolo.
- 7 Xiquitzelo nopani nopa esti cati tetapajpacchihua,
huan quej nopa nimocahuas nitapajpactic.
Quena, techpajpaca, huan nimocahuas tahuel nichipahuac moixpa.
- 8 Huan teipa quema ya techtatzacuiltjitos,
xijchihuas para sempa ma niyolpaqui.
Huan elis quej sempa moyancuilise noomiyohua cati tijtatixchijtoc.
- 9 Amo xijsenhuiquili xijtachilijto notajtacolhua.
Xiquixpolo ten moixpa nochi cati amo cuali nijchijtoc.
- 10 NoTeco Dios, xijchihua para noyolo ma eli yancuic huan tapajpactic.
Xijchihua para ma nimoyolihui san ipan tamanti cati cuali,
huan ma nijnequi nijchihuas san cati xitahuac.
- 11 Amo techiyocacahua ten ta moixpa,
yon amo techquixtili moTonaltzi cati tatzejzeloltic.
- 12 Xijchihua para sempa ma nijmati nopa paquilisti cati nijpixqui pampa ta
techmaquixti.
Ica moTonaltzi techchihua para nochipa ma nijnequi nimitztepanitas.
- 13 Huan huajca niquinnextilis moojhui sequinoc tajtacolchihuani cati taix-
panotoque quej na.
Huan tajtacolchihuani moyolcuepase huan hualase campa ta.
- 14 Toteco Dios, ta cati techmaquixtía,
techmanahui ten ni taeticayot cati nijpiya pampa nitemicti.
Huan quej nopa nihuicas tiohuicat para niteyolmelahuas para ta tijchihua
cati senquisa xitahuac.
- 15 Toteco, xijchihua para sempa ma nihuica,
huan nitepohuilis nochi cati techchihuulijtoc huan na nimitzpaquilismacas.
- 16 Pampa ta amo tijnequi ma nimitzmaca tacajcualisti para techtapojpol-
huís.
Sinta quej nopa elisquía,
huajca ica paquilisti nijchihuasquía.

Pero amo mitzpacña ma niquintali tapiyalme ipan taixpamit para niquintatis moixpa,

quej se tacajcualisti tatatili.

¹⁷ Ta tijnequi ma nimoyolcoco,

huan ma nimotequipacho ica nochi cati amo cuali nijchijtoc,

huan ma nimoyolcuepa.

Quena, nopa masehuali cati moechcapantalia huan moyolcuepa,

ta tinoTeco Dios, temachti tijtacaquila huan amo tijhuejcamajcahua.

¹⁸ Huan, Toteco, amo xijtatzacuilti altepet Sion por notajtacolhua.

Ta xiquinpalehui momasehualhua huan xijmocuitahui moaltepe Jerusalén.

¹⁹ Huan quema noyolo ya eltos xitahuac moixpa,

tipaquis ica cati cuali nijchihuas.

Huan tijselis nochi tacajcualisti quema niqinhuicas torojme para niqinmictis,

huan nimitzmacas ipan motaixpa.

52

Toteco tetasoja huan tetajtolsencahua

¹ ¡Xijtacaquili ta cati timoilhuía para tahuel tihueyi!

¿Para ten timohueyimati ica cati fiero tiqinchiuili imasehualhua Toteco Dios?

Toteco Dios quipixtoc itaicnelilis para nochipa.

² Pero ta nochipa timoyolilhuía san cati fiero tiqinchiuilis sequinoc.

Huan nochi istacatili cati quisa mocamaco eli quej se cuchillo cati tahuel tatequi.

³ Achi más mitzpacña tijchihuas ten fiero huan amo cati cuali.

Huan nojquiya achi más mitzpacña istacatili huan amo cati melahuac.

⁴ Mitzpacña titeistacahuis.

Huan mitzpacña tiqijtos camanali cati tecocohua.

¡Tiistacatica tacat!

⁵ Yeca Toteco Dios mitztzontamiltis para nochipa.

Mitzhuilanas para mitzquixtis ten mochaj, huan ayecmo tiitztos ipan ni taltipacti campa itztoque masehualme.

⁶ Nochi masehualme cati quitepanitaj Toteco,

quiiase cati yaya quichiuilis nopa fiero masehuali, huan momajmatise.

Huajca injuanti quihuetzquilise huan quiijtose:

⁷ “Xiquitaca cati ipantec ne masehuali cati amo quitepanita Toteco Dios.

San motemachi ipan itomi huan nochi tamanti pajpatiyo cati yaya quipiya, huan quichijntinenqui cati amo cuali.”

⁸ Pero na cuali niijcatoc quej se olivo cuahuit,

huan Toteco nechyahualohua para nechmocuitahuis.

Na nimotemachia ipan Toteco para yaya ma nechtasoja nochipa.

⁹ NoTeco Dios, na nochipa nimitztascamatis por nochi nopa cuali tamanti cati tijchijtoc.

Huan san ipan ta nimochiyas para techtasojtas,

pampa nochi quimatij para ta nella tijpiya hueyi moyolo ica cati moaxcahua.

53

Masehualme cati huihuitique
(Salmo 14:1-7)

¹ San se masehuali cati tahuel huihuitic moilhuía ipan iyolo para amo onca Dios.

¿Para ten quej nopa quiiijtohua?

Eltoc pampa iyolo tahuel fiero huan san quichihua cati amo cuali.

Amo aquí se masehuali cati quichihua cati nelxitaahuac.

² Toteco Dios hasta nepa ilhuicac quinhualtachilía masehualme, para quitas sinta onca se cati nelía quitemohua huan quichihua cati cuali.

³ ¡Pero amo!

Nochi masehualme mocuetoque ipan tajtacolat.

Quena, nochi tajtacolchijtoque huan mochijtoque amo tapajpactique.

Amo aquí quichihua cati senquisa cuali,

yon se.

⁴ ¿Huelis amo quiipiyaj inintalnamiqulis nopa tajtacolchijca masehualme?

Inijuantí quintzontamiltíaj momasehualhua quej elisquíaj pantzi cati quicuaj huan amo quinequij quitemose Toteco Dios.

⁵ Pero ajsis tonali quema Toteco Dios quinpinahualtis huan quintatzacuiltis nopa masehualme.

Quena, quintzontamiltis huan inintacayohua mocahuase tepejtoque campa huéli.

Amo aquí quintalpachos pampa yaya quintahuelcajtoc.

⁶ ¡Cuali elisquía sinta Toteco hualasquía ten altepét Jerusalén huan quinmaquixtis nochi israelitame!

Israelitame san huelis itztose ica paquilisti quema Toteco Dios quichihuas para injuanti cati imasehualhua ma tatanica.

54

Se netatajtíli para Toteco ma quimanahui ten icualancaitacahua

¹ ¡NoTeco Dios, xihuala techmaquixtíqui pampa nochi quimatíj ta tihueyi!

¡Techmanahuiqui ica mohueyi chichahualis!

² Techtacaquili quema nimotatajtía ica ta.

Quena, xijtacaquili cati nimitzpozhuilía,

³ pampa tatehuijca masehualme motanantoque ica na.

Quena, masehualme cati amo quema mitzelnamiqíj nechtemohuaj para nechmictise.

⁴ Pero Toteco Dios nochipa nechpalehuía,

huan amo quincahuilis ma nechmictica.

⁵ Toteco quincuepilis nocualancaitacahua nochi nopa tamanti amo cuali cati injuanti quisencajtoque nechchihuilise.

Quena, TOTECO, ta cati nelía titemachti, xijchihua senquisa quej techtencahuilíjtoc,

huan xiquintzontamilti nochi nocualancaitacahua.

⁶ Ica paquilisti nimitzmacas notacajchahualis.

Nimitzhueyimatis pampa ta nelía ticuali,

⁷ pampa ta techmanahuijtoc ten nochi taohuijcajtoc,

huan niqíjzotoc quenicatza tiqíjzotoc nochi nocualancaitacahua.

55

Se netatajtli ten se masehuali cati quicajcayajqui ihuampo

1 NoTeco Dios, techtacaquili quema nimotatajtía ica ta.

Amo ximotati quema nimitztajtzilía.

2 Techtacaquili huan technanquili,
pampa tahuel nimotequipachohua huan nichoca pampa nitaijyohuíá.

3 Nocualancaitacahua nechztajtzilíaj chicahuac huan quinequij nechmic-
tise.

Tahuel nechcualancaitaj huan ica nochi inincualancayo nechtepotztocati-
hualahuij para nechztontamiltise.

4 Nelía nechcocohua noyolo pampa nechitzquíá se hueyi majmajti.

5 Quena, tahuel nimajmahui huan nihuihuipica.

6 ¡Cuali elisquíá sinta nijpiyasquíá noeltapal quej quipiya se paloma para
huelisquíá nipatantehuas huan nimosiyajquetzati!

7 Quena, nicholosquíá hasta nepa campa huactoc talme cati mopantíaj
huejca huan nepa nimocahuasquíá.

8 Nimoisihuiltisquíá para nicholos huan nimotatis ten nochi ni taijyohuili
cati hualajtoc nopani.

Eltoc quej se hueyi ajacat hualajtoc cati tamitasosolohua.

9 Toteco, xiquintzontamilti nocualancaitacahua.

Xijchihua ma mocuapoloca injuanti iniselti quema camanaltij.

Na niqiztroc para nochi tatehuíaj campa hueli ipan ni moaltepe.

10 Tayohua huan tonaya masque itztoque cati quiyahualojtinemij ni altepet
ipan itepa para quimocuitahuse ten tocualancaitacahua,

injuanti cati nica ehuan iniselti motehuíaj se ica seyoc ipan ni altepet.

11 Tatajco nopa altepet quichihuj miyac tamanti cati amo cuali,
huan amo onca tatepanitacayot.

Ipan tianquis huan campa hueli momictíaj,
tachtequij huan tacajcayahuj.

12 Amo elqui se nocualancaitaca cati nechcajcayajqui,
pampa sinta quej nopa eltosquíá, huajca niqijyohuijtosquíá.

O hueltosquíá nicholos huan nimotatis.

13 Pero elqui se cati nemiyaya nohuaya,
se cati nechyacanayaya huan cati nonelhuampo.

14 Quena, elqui yaya cati sentic timopohuiiyayaj nopa tamanti cati tijpix-
toyaj ipan toyolo,

huan cuajcualtzi timocamanalhuiyayaj quema san sejco tiyahuiyayaj ipan
mochaj, Toteco Dios.

15 Ma talochmiquica nochi nocualancaitacahua huan ma yaca hasta micta
quema nója yoltoque,

pampa ipan ininchaj huan ipan iniyolo san onca tajtacolot.

16 Pero na san nijtjajtzilis Toteco Dios para ma nechmaquixti.

Huan quena, temachtí yaya nechmaquixtis.

17 Na nimotatajtis ica ijnaloc, ica tajco tona huan ica tiotac.

Huan yaya nechtaquilis huan nechnanquilis.

18 Ipan tatehuilisti yaya nechmanahuis,
masque tahuel miyac nocualancaitacahua nechtehuise chicahuac.

19 Toteco Dios cati ipa itztoc huan tanahuatijtroc hasta ten huejajquiya,
yaya nechtaquilis huan quintzontamiltis.

Pampa nocualancaitacahua amo quipataj ininemilis cati fiero,
yon amo quitepanitaj itanahuatil.

²⁰ Nopa masehualme cati amo cuajcualme momatananaj para quintehuíaj
hasta inihuampoyohua.

Quiixpanoj nopa camanali cati quichihuaaj inihuaya sequinoc.

²¹ Quitequihuíaj camanali cati nelcuajcualtzi huan yamanic quej mantequi-
lla,

pero ipan iniyolo san moilhuíaj quenicatza tatehuse.

Nochi cati quijitohuaj eltoc alaxtic quej aceite,

pero ixtacatzí taylorcocoahuaj ica camanali quej quema timotzontequis ica
macheta.

²² Nochi motequipachol xijcahua imaco TOTECO huan yaya mitzmacas
temachili.

TOTECO amo quicahuas ma huetzi se cati quitepanita.

²³ Pero ta tinoTeco Dios,

tiquintitanis nocualancaitacahua ipan nopa ostot cati tahuel huejcata.

Nopa temictiani huan istacatini amo itztose yon tajco ten ininemilis,

pampa amo huejcahuase itztose ipan ni taltipacti.

Pero na nochipa nimotemachis ipan ta para techmaquixtis.

56

David motatajtía ica Toteco

¹ NoTeco Dios, techtasojta,
pampa nocualancaitacahua semilhuit nechtepotztocatinemij.

Nochi se tonal nechtaijyohuilitáj.

² Nochi se tonal nechcuatetzopaj huan noca paquij.

Tahuel miyaqui itztoque cati quinequij nechtamiltise.

³ Pero quema nijmati nimajmahui, na nimotemachía ipan ta.

⁴ Nijhueyichihua Toteco Dios huan nimotemachía ipan ya para nech-
manahuis quej techtajtolcahuilitoc quichihuas ipan icamanal.

Huajca pampa nimotemachía ipan ya,
¿taya huelis nechchihuilis se masehuali?

⁵ Talojtitzti quipataj nocamanal huan san moilhuíaj quenicatza huelis
nechchihuilise cati amo cuali.

⁶ Mosentilíaj huan quisencahuaj taya nechchihuilise.

Teipa motatíaj ojtentí huan nechchiyaj ma nipano para nechmictise.

⁷ Toteco Dios, xijtachili nochi inintaixpanolhua huan xiquintatzacuiliti.

Ica mohueyi cualancayo, xiquintahuiso hasta talchi.

⁸ Ta techitztoc quesqui hueltas nimochololtijtoc huan nimochoquilijtoc.

Nochi noixayo tijsentilijtoc huan ticajoc toc ipan se frasco.

Huan ipan moamatapohual tiquijcuilojtoc quesqui imiyaca.

⁹ NoTeco Dios, quema nimitztajtzilía para techpalehui,

nochi nocualancaitacahua nimantzi cholohuaj.

Quej nopa eli pampa cuali nijmati para ta tiitztoc nohuaya para techpale-
huis.

¹⁰ Na nimotemachía ipan Toteco Dios.

Quena, nimopaquilismacas ipan TOTECO icamanal,

por nochi cati nechtajtoltcahuilijtoc nechchihuilis.

¹¹ Quena, nimotemachía ipan Toteco Dios huan amo nimajmahui.
¿Taya huelis nechchihuilis se masehualí?

¹² NoTeco Dios, nochi cati nimitztajtoltcahuilijtoc, nijtamichihuas.
Nimitztascamatis ica tiohuicat pampa techpalehuijtoc miyac.

¹³ Ta Toteco Dios techmanahuijtoc para amo nimiquis,
huan amo techcahuilijtoc ma nihuetzi ipan tamanti cati amo cuali.
Yeca ama noja hueli ninentinemi moixpa nica ipan ni taltipacti ica masehualme cati itztoque.

57

Se netatajtili para Toteco ma quipalehui (Salmo 108:1-5)

¹ Techtasojta, noTeco Dios, xijnexiti motaicnelilis ica na,
pampa san ipan ta nimotemachía para techmanahui.
Quej se pilpiyotzi motatía ieltapaltzala inana,
na nojquiya nimotatía ipan ta hasta panos ni hueyi taohuijcyot cati eltoc
quej se hueyi ajacat.

² Nijztajtzilis Toteco Dios Cati Más Hueyi.
Quena, nijnojnotzas Toteco Dios cati nochipa nechpalehuía ipan nochi
tamanti.

³ Ten ilhuicac nechtitanilía itapalehuil para nechmaquixtis.
Yaya nechchololitis inimaco nocualancaitacahua cati ica miyac cualanti
nechtepotztocatinemij,
huan quinequij nechtzontamiltise.
Pampa yaya Toteco Dios temachtí huan tahuel nechicnelía.

⁴ Nechyahualojtoque masehualme cati mosisinaj quej tecuanime.
Inincamanal eltoc quej tit cati quisa inincamaco.
Inintancoch tajtatequi quej cuataminti huan ininenepl tatequi quej ma-
cheta.

⁵ NoTeco Dios, nochi ma mitzhueyichihuaca ipan nochi ilhuicacti.
Mohueyitilis ma quitemiti ni taltipacti.

⁶ Nocualancaitacahua quitaliytoque se taquetzti para ma nimasi,
yeca tahuel nimajmahui.
Nojquiya quichijque se ostot ipan ojti para ma nimoostohui,
pero xiquita injuanti huetzque nozona.

⁷ NoTeco Dios, ipan noyolo nipaqui huan nijpiya tasehuilisti.
Huan yeca nimocualtalijtoc para nihuicas huan nijsencahuas tiohuicat para
ta.

⁸ Na nimocualtalía para nijztotzonas noarpa huan noguitarra.
Cualca nijjsa para nimitztatzotzonilis.

⁹ Na nimitztascamatis iniixpa masehualme pampa ta, Toteco, techchihuilij-
toc miyac tamanti cati cuajcualtzi.

Huan nihuicas para nimitzhueyimatis iniixpa masehualme ten nochi talme.
¹⁰ Motaicnelijcayo nelhueyi quej ipatajca ilhuicacti huan huejcapantic hasta
quipano mixti.

Ta tahuel titemachtí.

¹¹ Toteco Dios, nochi ma mitzhueyichihuaca ipan nochi ilhuicacti.
Mohueyitilis ma quitemiti ni taltipacti.

58

Se netatajttili para Toteco ma quintatzacuulti cati amo tatepanitaj

¹ ¡Amojuanti anmasehualme cati anquikipiyaj tequiticayot para antetajtolseñcahuaj!

¿Nelía xitahuac anquintajtolseñcahuaj?

² ¡Amo! San anmoilhúaj cati fiero huelis anquichihuase.

Anquichijtoque para noja más ma onca tatehuilisti ipan amotal.

³ Nopa masehualme cati amo quitepanitaj Toteco pejque moyocacahuaj hasta quema tacatque.

Huan ipa istacatij hasta quema pejque huelij camanaltij.

⁴ Inijuanti tencocoque quej cohuame cati temictíaj ica inintencococa.

Huan itztoque quej nopa cohuame cati momatij quicaquij inintoscac inintecohua,

pero ayecmo quinequij quinneltocase.

⁵ Monacastzacuaj huan ayecmo quichihuilíaj cuenta,

masque inintecohua quintatzotzonilíaj cuajcualtzi para ma quinneltocaca.

Huan nimantzi tetzacaníaj.

Quej nopa itztoque ni fiero masehualme.

⁶ NoTeco Dios, xiquintamilti ininchicahualis.

Quena, xiquinquixtili ininchicahualis nopa masehualme cati mosisiníaj, quej tiquinqixtilisquía inintancoch huan inintacuayo nopa tecuanime.

⁷ Ma ixpolihuica quej ixpolihui nopa at cati toyahui ipan huactoc tali.

Huan nopa teposti cati quipixtoque inimaco para ica tatehuíaj, ma eli quej amo teno ipati.

⁸ Ma elica quej nopa tenaquisti cati atiya quema noja nentinemi.

O ma elica quej se pilconetzi cati tacatqui mictoc huan cati amo quema quiitac tatanexti.

⁹ Toteco Dios quinxpolihuiltis cati huehuentzitzi huan cati telpocame.

Quintzontamiltis nelnimantzi quej se chachapali cati nimantzi totoniya ica nopa tit cati lementoc ica huitzcuahuit.

¹⁰ Pero cati itztoque xitahuaque iixpa Toteco,

paquise quema quiitase para Toteco ya momacuetoc ica nopa masehualme cati amo teno quitepanitaj,

huan moicxipajpacase ica inieso nopa masehualme.

¹¹ Huan huajca nochi masehualme quijitose:

“Nelía quiselíaj se cuali taxtahuili nopa masehualme cati itztoque xitahuaque,

pampa melahuac itztoc se Dios cati tetajtolseñcahua xitahuac ipan ni taltipacti.”

59

Se netatajttili para Toteco ma quimanahui David

¹ ¡NoTeco Dios, techmanahui inimaco nocualancaitacahua!

¡Techmocuitahui ten injuanti cati hualajtoque para nechtzontamiltise!

² ¡Techmanahui inimaco tajtacolchijca masehualme, injuanti cati temictíaj!

³ Nechtachilíaj para quiitase quenicatza nechmictise.

Masehualme cati quipiyaj chichualisti nechchixtoque yahualtic.

Pero amo pampa niqinchihuilijtoc se tamanti cati amo cuali o pampa niqinixpanotoc.

⁴ ¡Amo! Amo teno cati fiero niqinchihuilijtoc, pero injuanti mocualtaláj para nechmictise.

¡TOTECO, xiisa!

¡Xihuala techpalehuiqui!

⁵ TOTECO, Ta Cati Tijpiya Nochi Chicahualisti, ta cati titoDios tiisraelitame,

ximotanana huan xiquintatzacuiliti nopa talme campa itztoque masehualme cati amo israelitame, pampa techyahualojtoque.

Amo xiquintapojpolhui nopa masehualme cati mosisináj huan nimantzi taixpanoj.

⁶ Mojmosta ica tapoyahui hualahuij para quitachilise quenecatza huelis techtanise.

Tzajtztinemij quej chichime cati quiyahualojtinemij ni altepet.

⁷ Nijcaqui camanaltij fiero hasta camaposition, huan mitzelchihuaj Toteco,

pampa injuanti quijtohuaj:

“Amo aqui techcaquí.”

⁸ Pero ta TOTECO, san xiquinhuetzquili,

huan xiquinpinahualti ni masehualme ten sequinoc talme cati nechyahualojtoque.

⁹ NoTeco Dios, pampa nocualancaitacahua quipiyaj chicahualisti, ipan ta nimotemachís,

pampa ta cati techmanahuía.

¹⁰ NoTeco Dios, ta nochipa techicnelijtoc miyac,

yeca nijmati para temachtitechyacantiyas.

Tijchihuas ma niqita cati tahuel nijnectoc ma ininpanti nocualancaitacahua.

¹¹ NoTeco, ta cati techmanahuía,

amo xiquinmicti nimantzi ni nocualancaitacahua,

pampa huelis ni nomasehualhua nimantzi quielcahuase cati ininpantis nopa mosisinijca masehualme.

Más cuali san xiquinsemana ica mohueyi chicahualis huan xiquinehcapan-tali.

¹² Quena, xiquintatzacuiliti pampa nochi injuanti tahuel istacatij, mohueyimatij huan tatechihuaj.

¹³ Xiquintzontamilti ica mohueyi cualancayo,

huan xiquintamiixpolihuilti.

Huan quej nopa nochi masehualme quimatise para ta, Toteco Dios,

titanahuatía ipan tali Israel,

huan ipan nochi taltipacti.

¹⁴ Nocualancaitacahua mocuepaj ica tiotac huan tzajtzij quej chichime,

huan quiyahualojtinemij ni altepet.

¹⁵ Nentinemij campa hueli para quitemojtinemise inintacualis.

Huan quema amo ixhuij,

tzajtzij seyohual quej chichime.

¹⁶ Pero na sese ijnaloc nihuicas ica nopa chicahualisti cati techmaca.

Huan nimitzhueyimatis pampa techtasojta miyac.

San ta techmanahuía huan san ipan ta nimotemachía,

quema huala taohuijcyot.

17 Toteco Dios, momaco ta niitztoc temachti,
yeca nimitzhueyimatis huan nihuicas para ta,
pampa san ta techmocuitahuía huan techicnelía.

60

*Se netatajtili para Toteco ma quimanahui David
(Salmo 108:6-13)*

1 Toteco Dios, ta techhuejcamajcajtoc huan ayecmo tijmatij taya tijchihuase.
Ticualantoc ica tojuanti huan techtahuelcajtoc.

Ama timitztajtaniaj para sempa ximoyoltali ica tojuanti huan sempa tech-
fuerzajmaca.

2 Ni tali tijchijqui ma huihuipica ica majmajti.
Tahuel tijtaiyohuiltijtoc.

Huajca ama, noTeco Dios, sempa xijcualtali total cati tamitatapacatoc.

3 Tijchijtoc para tojuanti timomasehualhua ma tijpanoca huejhueyi taijy-
ohuulisti.

Huan ica ni taijyohuulisti techchijtoc ma timomimilojtinemica quej elisquía
tihuintitoque.

4 Pero ama techmacatoc nochi tojuanti cati timitzimacasij huan timitztepan-
itaj quej se bandera campá timosentilise.

Huan quena, nochi tojuanti cati tijchihuaj cati melahuac timosentilise no-
pona,
para timomanahuisse quema tocualancaitacahua techmajcahuilise cuatam-
inti.

5 Technanquili huan techmanahui nochi tojuanti cati techicnelía.
Xijtequihui mohueyi chichualis para techmanahuis.

6 Toteco Dios, yaya cati itztoc ipan ichaj nepa ilhuicac quijijtojtoc:

“Ica paquilisti nijxelos tali Siquem,
huan nijtamachihuas nopa tamayamit cati itoca Sucot,
para nijmacas aquí nijnequis pampa nopa talme noaxcahua.

7 Huan nopa tali Galaad huan Manasés nojquiya noaxcahua.

Ipan tali Efraín hualase nosoldados cati nechmanahuisse quej notzontajca,
huan ipan tali Judá hualase notanahuatijcahua.

8 Cati itztose ipan tali Moab elise notequipanojcahua cati teicneltizti.

Cati itztoque ipan tali Edom nechtequipanose.

Huan nitahuejchihuas chichahuac quema ya niquintantos nopa filisteos.”
Quej nopa quijijtohua Toteco.

9 ¿Ajquiya nechchihuas ma nicalaquí ipan nopa altepeme cati moyahualtzac-
toque ica tepamit ipan tali Edom?

¿Ajquiya nechchihuas ma niquintani sinta amo ta?

10 San ta techyacanas ipan tatehuulisti, noTeco Dios.

Amo techtahuelcahua.

Sinta ta amo tiyas ihuaya tosoldados para tatehuisse, Toteco,
amo aquí techpalehuis.

11 Quena, Toteco Dios, techpalehuis para tiquintanise tocualancaitacahua,
pampa inintapalehuil masehualme, amo teno ipati.

12 Ica itapalehuil Toteco Dios tijchihuase huejhueyi tamanti.
Yaya iselti quintzontamiltis nochi tocualancaitacahua.

61

David quinequi itztos ipan itiopa Toteco

¹ NoTeco Dios, techtacaquili quema nimitztzajtzilía.

Techtacaquili quema nimotatajtía.

² Masque niitztosquía campa hueli o hasta campa ontantoc taltipacti,

na nimitztzajtzilisquía para nimitztajtánis motapalehuil.

Quema nimajmahui o nimotequipachohua,

techyacana huan techtatía ipan se huejcapantic tet,
campa amo teno huelis nechajsis.

³ Pampa san ipan ta nimotemachía para amo teno nopantis.

Ta tiitztoc quej se huejcapantic cali cati nechmanahuía,

para amo huelis nechajsis nocualancaitacahua.

⁴ Nijnequi niitztos para nochipa ipan motiopa para techmocuitahuis.

Nopona niitztos temachti quej se pilpiyotzi cati itztoc ieltapaltzala inana.

⁵ Ta tinoTeco Dios, tijcactoc cati nimitztajtoltcahuilijtoc para nijchihuas.

Huan techmacatoc nopa tatiochihualisti cati ticajoctoc para tiquinmacas
masehualme cati mitzimacasij huan mitztepanitaj.

⁶ Xijchihuas para na nitanahuatijquet ma niitzto miyac xihuit,
huan para nonemilis ma eli cuajcualtzi.

⁷ Techcahuili ma nitanahuatis moixpa para nochipa.

Techmanahui huan techmocuitahui ica motaicnelijcayo.

⁸ Quej nopa nimitzhuicatis huan nimitzpaquilismacas mojmosta.

Quena, sesen tonal nijtamichihuas cati nimitztencahuilijtoc para nijchihuas
para ta.

62

David motemachi san ipan Toteco

¹ Na san ipan Toteco Dios nimochiya para yaya ma nechmanahui,

pampa san ya hueli temaquixtía.

² Nimotatía ipan ya para amo teno nechajsis.

San yaya nechmaquixtía huan nechmocuitahuía quema huala taohuijcyot.

Amo teno hueli nechpanos.

³ Pero ¿hasta quema tamis nocualancaitacahua nechtehuise?

Ayecmo nijpiya más chicalhualisti quej tanahuatijquet ipan notanahuatilis.

Nocualancaitacahua quisencahuaj quenicatza huelis nechtahuisose.

Nechitaj quej se tapepecholi o tepamit cati huetzisnequía.

⁴ Quena, san moilhuíaj san sejco quenicatza huelis nechtzontamiltise.

Quinpactía quitacaquilise istacatili huan tacajcayahualisti.

Ica inincamac nechcamanalhuíaj cuajcualtzi,

pero ipan iniyolo nechtelchihuaj.

⁵ Pero na san nimochiya ipan Toteco Dios,

san nimochiya para yaya ma nechmanahui,

pampa san ya hueli temaquixtía.

⁶ Nimotatía ipan ya para amo teno nechajsis.

San yaya nechmaquixtía huan nechmocuitahuía quema huala taohuijcyot,

yeca san ipan ya nimotemachía.

⁷ San Toteco Dios hueli nechmaquixtis huan sempa nechhueyitalis iniixpa
sequinoc.

Yaya nechtatía huan nechfuerzajmaca.

Nechmocuitahuía para amo ma nechajsi cati fiero.

⁸ ¡Annomasehualhua, nochipa ximotemachica ipan Toteco Dios!
Xijpohuilica nochi cati eltoc ipan amoyolo,
pampa san yaya hueli techmocuitahuis ica cati amo cuali.

⁹ Amo teno nelía ininpati masehualme iixpa Toteco,
masque cati tominpiyaj o cati teicneltziti.
Sinta se quintalisquía ipan balanza para quintamachihuas sinta etique quej
se tamanti cati tahuel ipati,
momacas cuenta para melahuac amo etique pampa masehualme itztoque
san quej ajacat.

¹⁰ Masehualme, amo ximoilhuica para antatehuse para anquitanise más
tomi.

Amo ximoilhuica antachtequise para anmoricojchihuase.
Huan sinta anmochihuase anricos,
amo ximohueyimatica, yon amo ximotemachica ipan amotomi.

¹¹ Nijmati ya ni, pampa miyac huelta Toteco Dios nechilhuijtoc:
san yaya quipiya nochi chichahualisti.

¹² San ta, Toteco, titeicnelía mojmosta.

Huan tijtaxtahuía sese masehuali quej quinamiqui ica cati quichijtoc.

63

Nijtemohua noTeco

¹ ¡Toteco Dios, ta tinoDios!

¡Nelía tahuel nimitztemohua!

¡Quej se masehuali cati tahuel amiqui ipan huactoc tali campa amo onca at,
na ica nochi noyolo huan ica nochi noalma nijnequi nimitzpantis!

² Nijnequi niquitas mochichahualis huan mohueyitilis quej niquitac ipan
motiopa.

³ Pampa motaicnelijcayo más hueyi ipati huan amo nonemilis.

¡Tahuel nimitzhueyimati!

⁴ Huan nochi tonali quema noja niitztos, nimitztiochihuas.

Huan moixpa nimomatananas huan nimotatajtis ica ta.

⁵ Huan huajca, quena, nijmatis quej elisquía ya niixhuic ica se tacualisti cati
ajhuiyac.

Huan nimitzhueyimatis ica miyac paquilisti.

⁶ Nochi yohuali quema nimoteca ipan notapech huan amo hueli nicochi,
nimoilhuía ten ta.

Quena, nimoyolilhuía ten ta sese hora.

⁷ Nimoilhuía quenicatza techpalehuijtoc huan yeca sese tayohua tahuel
nipaqui.

Quej se piyo quintatía iconehua ieltapaltzala,
quej nopa ta techtatía na para amo teno nechajsis.

⁸ Nimotatzquilijtoc ipan ta pampa san ta techmocuitahuía ica mohueyi
chichahualis.

⁹ Nochi cati quinequij nechmictise yase micta.

¹⁰ Pampa ya eltoc tasencahuali para miquise,
huan para sequinoc quintzontamiltise ica macheta.

Huan inintacayohua elis tacualisti para nopa tepechichime.

¹¹ Pero na nitanahuatijquet nimopaquilismacas ipan ta, Toteco Dios.

Huan nojquiya paquise nochi sequinoc cati senquisa motemachíaj ipan ta.
Pero nochi cati ístacati,

ta, Toteco, tiquincamatzacuas.

64

Se netatajtli para Toteco ma quimocuitahui

- ¹ NoTeco Dios, xijtachili notequipachol.
 ¡Xijmanahui nonemilis ten nocualancaitacahua cati quinequij nechmictise!
- ² Techtati ten ni amo cuajcualme cati ixtacatzi quisencahuaj para nechchi-huilise cati fiero.
- ³ Nochi inincamanal ajsi ipan noyolo,
 huan tahuel nechcocohua quej elisquía se cuataminti.
- ⁴ Inijuanti amo majmahuij para nechtatzacuiltise.
 Motatíaj campa amo aqui hueli quinita,
 huan quinmajcahuilíaj cuataminti masehualme cati amo teno quichijtoque.
 Yon quentzi amo majmahuij ica cati fiero quichihuaaj.
- ⁵ Se ica seyoc mofuerzajmacaj para quichihuase más cati fiero.
 Ixtacatzi mosentilíaj para quitalise taquetzti.
 Huan quiiijtohuaj: “Nica tijtalise ni taquetzti campa amo aqui huelis quitas.”
- ⁶ Ica miyac cuidado quisencahuaj quenicatza quichihuase para temictise.
 Ica yolic quitemohuaj quenicatza quichihuase cati fiero quisencajtoque
 quichihuase para ma quisa cuáli.
 Iyolo huan italnamiqulis se masehuali tahuel quimati quisencahuas cati
 fiero para quichihuas.
- ⁷ Pero Toteco Dios yaya iselti quintamicocos.
 Elis quej quinmajcahuilis cuataminti quema amo quichiyaj,
 huan nimantzi quintanis.
- ⁸ Quena, huetzise huan motzontamiltise,
 por nopa camanali cati quiiijtojtoque.
 Huan nochi cati quinitase momajmatise.
- ⁹ Huajca nochi masehualme quitepanitase Toteco Dios huan quiimacasis
 quiixpanose.
 Tepohuilise nochi cati yaya quichijtoc.
 Huan huajca quimachilise para san ya quichihua huejhueyi tamanti.
- ¹⁰ Huan nochi masehualme cati itztoque xitahuaque quipaquilismacase
 TOTECO,
 huan más motemachise ipan ya huan quihueyimatise.

65

David quihueyimati Toteco

- ¹ Toteco Dios, san ta quinamiqui ma timitzhueyimatca,
 ta cati tiitztoc ipan altepet Jerusalén.
 Huan quinamiqui ma timitzmacaca nochi cati timitztajtoltcahuilijtoque tim-
 itzmacase.
- ² Ta technanquiliá quema timotatajtíaj huan techmaca cati timitztajtaníaj,
 huajca nochi masehualme ipan taltipacti ma hualaca campa ta.
- ³ Masque toyolo temitoc ica tajtacoli huan techtantoc,
 ta techtapojpolhuía nochi totaixpanolhua.
- ⁴ ¡Nelía tipaquij miyac tojuanti cati techtapejpenijtoc para ma tihualaca,
 huan ma tiitztoquij mohuaya ipan motiopa cati tatzejtzeloltic!
 ¡Ta techmacas hueyi paquilisti huan nochi cati cuali cati onca nozona!

- ⁵ Quema timitztajtáníaj se tamanti,
ta technanquílíaj ica huejhueyi tamanti.
Toteco Dios, nochi masehualme ipan taltipacti motemachíaj ipan ta.
Quena, masque itztoque hasta campa ontantoc hueyi at,
nochi motemachíaj para ta tiquinpalehuis.
- ⁶ Ta ica mohueyi chicalualis tiquinchijchijqui nopa tepeme huan tiquin-
tatzquilti campa eltoque.
- ⁷ Ta tijtacahualtía nopa hueyi at quema mosisinía.
Huan tiquinoyoltalía masehualme campa huéli quema quinequij motehuisse.
- ⁸ ¡Yeca nochi masehualme cati itztoque hasta campa ontantoc taltipacti,
mitztepanitaj huan mitzimacasij para mitzixpanose quema quítaj nopa
huejhueyi tamanti cati tijchihua!
Tijchihua para masehualme ma paquica ten quema tanesi huan hasta
quema tayohuíya.
- ⁹ Ta ticateguía ni taltipacti para ma taelilti.
Nopa hueyame cati ta moaxca amo quema huaquij.
Ta tijcualtía ni tali para momasehualhua ma quitocaca inixinach,
huan teipa tijchihua para ma onca se hueyi pixquisti.
- ¹⁰ Ta tijxolonía ica miyac at nopa surcos ipan mila.
Tijchihua ma huetzi at para ma yamaniya nopa tali huan ma poxoni nopa
taltojtolomit.
Huan tijchihua para ma ixhua nochi tamanti tatocti ipan nochi taltipacti.
- ¹¹ Teipa sese xihuit tijtamiltía ica se pixquisti cati nelía cuajcualtzi.
Huan nopa mixti tijchihua ma quihuetzilti miyac at.
- ¹² Onca sacat ipan huactoc tali,
huan campa taixtemolis moscaltíaj cuajcuali xihuit,
huan temacaj inixochiyo.
Nesi quej moscaltíaj ica miyac paquilisti.
- ¹³ Ta tijchijtoc para nochi potreros ma temica ica borregojme para quicuase
nopa sacat.
Huan ipan nochi nopa tamayamit motanantoc trigo mili.
Eltoc quej nochi cati ta tijchijtoc ipan taltipacti tzajtzi ica paquilisti huan
huicaj.

66

Se huicat para quitascamatis Toteco

- ¹ ¡Nochi anmasehualme ipan taltipacti,
xihuicaca ica paquilisti para Toteco Dios!
- ² ¡Xihuicaca tiohuicat cati tepohuilía para tahuel hueyi ya!
¡Xijhueyimatica por nochi cati quichijtoc!
- ³ Xiquilhuica Toteco Dios:
“¡Nelía cuajcualtzi huan temajmati nochi cati tijchijtoc!
¡Tahuel hueyi mochicalualis!
Yeca nochi mocualancaitacahua motemactilíaj ica ta pampa tahuel temaj-
mati cati tijchihua.
- ⁴ Nochi masehualme ipan taltipacti mitzhueyichihuase.
Injuanti huicase para mitzhueyimatise,
huan tepohuilise ten mohueyitilis.”
- ⁵ Xihualaca huan xiquitaquij nochi nopa huejhueyi tamanti cati Toteco Dios
quichijtoc.
¡Quinchihuilitoc masehualme huejhueyi tiochicalhualnescayot!

6 Quihuatzqui nopa at huan tatajco nopa hueyi at quitapo se ojti huactoc
 campa panoque tohuejcapan tatahua.

¡Nochi israelitame quipixque se hueyi paquilisti ipan nopa tonali!

7 Toteco ica ichicahualis tanahuatía para nochipa.

Yaya quitachilía sesen tamanti cati masehualme quichihuj ipan nochi
 talme ipan taltipacti.

Cati amo quitepanitaj huan cati mohueyimati,
 yaya quinechcapantalis.

8 Nochi anmasehualme xijtascamatica Toteco Dios huan xijhueyimatica,
 por nochi cati quichijtoc,

9 pampa sesen ten tojuanti tonemilis eltoc imaco.

Quena, yaya techmocuitahujtoc huan techyacantoc xitahuac ipan toojhui.

10 Pampa ta, tiToteco Dios, techyeyecojtoc huan techtapajpacchijtoc,
 quej nopa tepos plata cati quimoloníaj ipan tit cati tahuel totonic,
 para san mocahuas cati senquisa cuali.

11 Ta techmasilti ipan momata huan tijtali tocuitapa tamamali cati tahuel
 etic.

12 Tijchijqui para nopa masehualme ten sequinoc talme ma moquejquetzaca
 topani ica cahuayojme.

Tipanoque ipan at huan ipan tit.

Pero ama techtiochijtoc huan techmacatoc nochi cati cuali.

13 Ama nihualajtoc ipan motiopa para nimitzmacas tacajcahualisti tatatili.
 Huan quej nopa nijtamichihuas cati nimitztajtoltcahuilijtoc para nijchihuas.

14 Pampa quema niitztoya ipan taohujcayot, nimitztajtoltcahuili ica noca-
 mac,

para nimitzmacas miyac tacajcahualisti.

15 Yeca ama nimitzhualiquilía ni oquich borregojme, chivojme huan becer-
 ros cati tomahuaque.

Huan ininpcoyo tejcos hasta ajsis moixpa.

16 Nochi amojuanti cati anquitepanitaj Toteco Dios huan anquimacasi
 anquixpanose,

xihualaca xijtacaquiliquij,
 huan nimechpohuilis nochi cati yaya nechchihuilijtoc.

17 Chicahuac na nijtazjtzili para ma nechpalehui,
 huan quema nijcamanalhuiyaya, nijhueyimatiyaya.

18 Pero sinta na nijpiyasquía tajtocoli ipan noyolo,
 huajca amo nechtacaquilijtosquía.

19 Pero pampa niquilhui Toteco Dios ma nechtapojpolhui,
 yaya nechtacaquili huan quichijqui cati niquilhui.

20 Xijpaquilismacaca Toteco Dios,

pampa yaya nechtacaquili huan amo quihuejcamajcajqui nocamanal
 quema nimotatajtí.

Nechtasojtac huan nechicneli.

67

Se huicat para quitascamatis Toteco

1 Toteco Dios, xijpiya hueyi moyolo ica tojuanti huan techtiochihua.

Ma petani moxayac pampa tipaqui ica tojuanti quema techhualtachilía
 hasta ten nepa ilhuicac.

2 Nochi masehualme ipan taltipacti ma quixmática moojhui.

Masehualme ipan nochi talme ma quimatica para ta titemaquixtía.

³NoTeco Dios, ma mitzpaquilismacaca nochi masehualme ipan taltipacti. Quena, nochi masehualme ma mitzhueyimatica.

⁴¡Ma paquica nochi masehualme ipan nochi talme huan ma huicaca pampa ta, tiinintanahuatijca!

Ta tiquintajtolsencahuas quej quinamiqui, huan nochi talme tiquinyacanas xitahuac.

⁵¡NoTeco Dios, ma mitzpaquilismacaca nochi ipan taltipacti!

¡Quena, nochi masehualme ma mitzhueyimatica!

⁶Ni tali temacatoc miyac pixquisti, pampa ta, Toteco Dios, cati titoDios tojuanti, tahuel techtiochijtoc.

⁷Quena, noja más techtiochihuas, Toteco Dios, huan masehualme campá huéli ipan ni taltipacti mitztepanitase huan mitzimacasise mitzixpanose.

68

Toteco Dios tatantoc

¹¡Ximotanana, Toteco Dios, huan xiquinsemana nochi mocualancaitacahua! Xiquinchihua ma choloca moixpa nochi cati amo quinequij mitzitase.

²Xiquinixpolo quej pocti xpolihui ipan ajacat. Xiquintamilti quej nopa cantela cati atiya ipan tit. Quej nopa ma ininpanti moixpa nochi amo cuajcualme.

³Pero nochi masehualme cati itztoque xitahuaque ma paquica iixpa Toteco Dios huan ma huitonica ica paquilisti.

⁴Xijhuicatica Toteco huan xijpaquilismacaca. Xijhueyitalica yaya cati nejnemi iixco mixti, yaya cati itoca TOTECO. Xipaquica miyac iixpa ya.

⁵Toteco Dios yaya inintata cati icnotzitzi. Yaya quinchihuilía cati xitahuac nopa sihuame icnotzitzi, pampa yaya tatzejzeloltic.

⁶Toteco Dios quinmaca se familia cati itztoque iniselti.

Huan quinchololtía cati quintzactoque.

Pero cati motepanitaj quintitanilía mayanti huan taijyohuilisti.

⁷NoTeco Dios, quema tiquinyacantiyajqui momasehualhua ten tali Egipto huan tiquinhuicac ipan nopa huactoc tali,

⁸nopa tali mohuiso huan huetzqui at ten ilhuicacti moixpa.

Nopa tepet Sinaí mohuiso moixpa ta cati titoTeco tiisraelitame.

⁹Toteco Dios, ta tijchijqui ma huetzi miyac at ipan ni tali cati tiquinmacac momasehualhua.

Quena, ica nopa at tiquinfuerzajmacac cati moaxcahua quema tahuel siyajtoyaj.

¹⁰Yeca momasehualhua mocajque nica ipan ni tali.

Huan ta ica motaicnelijcayo tiquinmacac nopa teicneltitzi nochi cati mon-equiyaya para ica mopanoltise.

¹¹Toteco quiijto para ya tatantoya, huan miyac masehualme tzajtzique chichahuac para tepohuilise ten panotoc. Quiijtojqque:

¹²“Cholojtejqque nopa soldados cati hualajtoyaj para techtzontamiltise.”

Quena, ama nopa israelita sihuame momajmacaj nochi tamanti cati quica-
jtejque nopa soldados.

¹³ Xiquitaca, masque quinmocuitahuiyayaj borregojme,
ama nopa sihuame hasta petanij ica oro huan plata.

Nochi inintacayo quitamitzactoque ica tamantzitzi cati cuajcualtzitzi quej se
paloma quitamitzacua itacayo ica ieltapal.

¹⁴ Toteco Dios Cati Quipiya Nochi Chichahualisti quinsemanqui icualancaitac-
ahua quej nopa tasesecayot cati huetzi ipan tepet Salmón.

¹⁵ Nochi nopa tepeme cati huejcapantique cati mopantíaj ipan tali Basán
iaxachua Toteco huan nelía cuajcualtzi inintzonatipa,

¹⁶ pero ma amo mochicoitaca ica nopa Tepet Sion cati TOTECO quitapejpeni-
jtoc para ipan itztos para nochipa.

¹⁷ Toteco Dios quisqui ipan tepet Sinaí ica millones icuacarrojhua huan
iilhuica ejcagua.

Yaya yajqui ipan itiopa cati tatzejtzeloltic ipan tepet Sion.

¹⁸ Quema Toteco tejcoc ilhuicac campá más huejcapa,
quichihuayaya quej se tatanquet cati mocuepa ipan se tatehuilisti,
huan quinhuicac ilpitoque nopa masehualme cati quintantoya para iaxc-
ahua.

Huan nopa tonali Toteco quiseli nemacti ten nochi masehualme,
hasta nojquiya ten masehualme cati amo quinequiyayaj quitepanitase.
Huan ama TOTECO temacti itztos ica tojuanti.

¹⁹ Ma tijpaquilismacaca Toteco,
pampa yaya mojmosta techmaca itatiochihualis.

Yaya Toteco cati techpalehuía huan techmaquixtía.

²⁰ Toteco Dios, yaya cati techchololtía inimaco tocualancaitacahua.

Huan yaya Toteco cati techmanahuía para amo timiquise.

²¹ Temacti Toteco quintzontamiltis nochi icualancaitacahua,
pampa injuanti tahuel yoltetique huan amo quinequij quicahuase inintaj-
tacolhua.

²² Toteco quinilhuijtoc imasehualhua:

“Na niquinhualicas nochi amocualancaitacahua.

Niquincuiti masque motatijtose ipan nopa huejcapantic tepet cati itoca
Basán,

o masque motatijtose hasta tatzinta ten nopa hueyi at.

²³ Niquinhualicas pampa monequi nochi anquintzontamiltise.

Iniesó quixolonise amoicxihua huan amochichihua quipipitose.”

²⁴ NoTeco Dios, tinotanahuatijca,
niquinita miyac masehualme mitztoquilíaj para yase ipan motiopa.

²⁵ Inijuanti cati huicaj tayacantiyahuij.

Tatajco yahuij nopa ichpocame cati quitzilinijtiyahuij panderos.
Tatepotzco yahuij cati tatzotzonaj.

²⁶ Huan quej ni huicaj:

“Nochi anisraelitame, xijhueyimatíca Toteco Dios.

Xijpaquilismacaca Toteco cati techmacatoc nemilisti nochi tojuanti.”

²⁷ Tayacantiyahuij iixhuihua Benjamín.

Huan tatepotzco hualahuij nopa tayacanani huan huehue tacame ten iixhui-
hua Judá,

huan nopa tayacanani cati iixhuihua Zabulón huan Neftalí.

²⁸ Toteco Dios, ica mohueyi chichahualis xijchihua nochi cati techilhuijtoc.

Quena, xijnexi mohueyi chichualis para sequinoc ma quuitaca nopa huejhueyi tamanti cati ta techchihuilitoc.

²⁹ Nopa tanahuatiani ten nochi talme quihualicaj iniofrendas ipan motiopa cati eltoc ipan altepet Jerusalén.

³⁰ Toteco Dios, xiquinajhua tocualancaitacahua.

Xiquinechcapantali nopa tacame cati mosisiniáj quej torojme,

huan xiquinchihua ma motemactilica ica ta.

Ma mitzhualiquilica inintepos plata quej se nemacti.

Xiquinsemana nopa mosisinijca masehualme cati tahuel quinpackía tatehuse.

³¹ Nopa Egipto ehuan quinhuualicase inintelpocahua huan nochi tamanti ininteposhua cati cuajcualtitziti huan pajpatiyo.

Huan nopa Etiopía ehuan momatananase moixpa para mitzhueyichihuase.

³² Nochi antanahuatiani ipan nochi ni taltipacti, xijhuicatica Toteco Dios.

Xihuicaca huan xijpaquilismacaca Toteco.

³³ Yaya cati nentinemi ipan nopa ilhuicacti cati hasta huejcajquiya eltoc.

Xijcaquica itoscac cati chichahuac caquisti quej quema tatomoni.

³⁴ Xiquinpohuilica nochi masehualme quenecatza hueyi ichichualis Toteco Dios.

Huan itatanex ajsi ipan nochi israelitame.

Quena, nelía tahuel hueyi ichichualis nepa ilhuicac.

³⁵ Ma tijhueyitepanitaca Toteco Dios pampa temajmati ihueyitilis nozona ipan itiopa.

ToDios tiisraelitame quinmaca tetili huan chichualisti nochi imasehualhua.

¡Ma tijpaquilismacaca Toteco Dios!

69

David quinotza Toteco ma quipalehuiqui

¹ NoTeco Dios, techmaquixti,

pampa ni taohuijcayot tahuel mochijtoc hueyi hasta nijmachilía nimitiquis.

Eltoc quej at cati nechatzonpolihuultisnequi,

huan ya ajsic hasta noquechta.

² Eltoc quej nimasitoc ipan soquit cati huejcata huan amo hueli niquisa.

O quej nechyahualosquía tahuel miyac at huan huejcata.

³ Tahuel nichocatoc hasta nisyajtoc.

Nimitztzajtzilijtoc, Toteco Dios, hasta nechcocohua noquechta huan ayecmo hueli nicamanalti.

Nochi noixteyol semajtoc ica choquisti.

Ya niixcuatic pampa campa hueli nitachixtoc para niquitas sinta tihuala, Toteco Dios, para techpalehuis.

⁴ Tahuel miyaqui nopa masehualme cati nechcualancaitaj masque amo teno niquinchihuilitoc.

Nelía quipiyaj miyac chichualisti nocualancaitacahua cati quinequij nechmictise.

Pero na amo niquinixpanotoc.

Quinequij nechttazacuultise ica se tamanti cati amo nijchijtoc.

⁵ NoTeco Dios, ta tijmati para nelía nihuihuitic,

huan tiquixmati nochi notajtolhua.

- 6 TOTECO, ta tiDios Cati Tijpiya Nochi Chicahualisti, amo xiquincahuili ma huetzica ipan tajtacoli por na notajtacol, nopa masehualme cati motemachíaj ipan ta. Ta cati titoTeco tiisraelitame, amo xiquincahuili ma pinahuaca sequinoc israelitame ica cati nijchijtoc na.
- 7 Pampa nimitzicnelía, niqijyohuijtoc pinahualisti, huan nechhuetzquilijtoque hasta amo nijmatqui taya nijchihuas.
- 8 Hasta noicnihua nechchihuaj quej amo nechixmatij huan nechitaj, quej elisquía niehua ipan niseyoc altepet.
- 9 Quena, niqicnelía motiopa ica nochi noyolo hasta nimotemaca nimiquis por ya. Huan cati mitztaijilhuíaj ta, nojquiya nechtaijilhuíaj na pampa nimitztequipanohua.
- 10 ¡Quena, tahuel nechhuetzquilíaj huan nechpinajtíaj, quema nichoca huan nimosahua iixpa Toteco!
- 11 ¡Tahuel fiero camanaltij ten na quema nimoquentía yoyomit cati sosoltic para nijnextis nimotequipachohua por notajtacolhua!
- 12 Nopa tayacanca tequichihuani cati mosehuíaj campá icalte nopa altepet, noca motahuetzquiltíaj. Huan nopa ihuintini noca huicatinemij.
- 13 Pero TOTECO na nijsenhuiquilía nimitztemohua huan nimotatajtía ipan ta, pampa nijmati ajsis tonali para techtacaquilis. Toteco Dios, ica mohueyi taicnelilis technanquili, pampa ta nochipa techicnelijtoc. Huajca technanquili quema nimotatajtía huan techmanahui.
- 14 Techquixti ten ni soquit cati huejcata campá nimasitoc. Amo techcahuili para niatzonpolihuis. Techmanahui inimaco cati nechcualancaitaj. Techquixti ten ni hueyi at cati nechyahualojtoc.
- 15 Amo xijcahuili ma nechtaijyohuilti ni hueyat, yon amo xijcahuili nopa at ma nechtoloc. Techmanahui para amo nimasís ipan nopa ostot cati tahuel huejcata.
- 16 TOTECO, technanquili quema nimitztzajtzilía pampa ta nelía ticuali. Ta techicnelía miyac huan tijpiya hueyi moyolo ica na.
- 17 ¡Amo ximotati quema nimitztemohua pampa tahuel nitaijyohuíaj! Ximoisihuilti, xihuala huan techmaquixtiqiu.
- 18 Xihuala, noTeco Dios huan techmanahuiqui. Techmaquixti inimaco nocualancaitacahua.
- 19 Ta tijmati quenicatza camanaltij fiero ten na huan quenicatza nechpinahualtijtoque. Quichijtoque para ayecmo aquí ma nechtepanita. Ta tiquinixmati nochi nocualancaitacahua huan tijmati taya quijijtoque sese inijuanti.
- 20 Inijuanti tahuel nechyolcocojtoque huan nechtequipacholmacatoque. Nijtemojtoc ajquiya nechtasojtasquía huan nechyoltalisquía, pero yon se amo nijpanti.
- 21 Quema nimayanayaya nechmacaque pajti cati temictía para ma nijcua. Huan quema niamiquiyaya nechmacaque ma niqiu vinagre.
- 22 Nopa paquilisti cati inijuanti quipiyaj ma mocuepa tequipacholi. Huan nopa tasehuilisti cati quipiyaj ica inihuampoyohua,

ma mocuepa cualancayot.

²³ Ma huala ininpani tzintayohuilot huan ma huihuipicaca, ma ayecmo quipiyaca más fuerza.

Ma elica popoyotzitzi huan ma tami nochi ininchicahualis.

²⁴ Xiquinnextili mohueyi cualancayo huan xiquintzontamilti.

²⁵ Inintequicalhua ma mocahua sosoltic, huan ipan ininchajchaj ma tatzitxicato.

Ayecmo aqui ma itzto.

²⁶ Pampa inijuanti más quitaijyohuiltíaj cati ta tijcocojtoc, huan quipinajtíaj cati ta tijtequipacholmacatoc.

²⁷ Xiquijcuilo nochi inintajtacolhua huan amo xiquintapojpolhui.

²⁸ ¡Xiquixpolo inintoca ipan moama campa eltoc inintoca inijuanti cati yoltoque!

¡Ma amo quipiyaca tasehuilisti quej quipiyaj nopa masehualme cati itztoque xitahuaque moixpa!

²⁹ Pero na cati nitaijyohuía huan niteicneltzi, techmaquixti huan techtanana.

Quena, Toteco Dios, techтали campa ta tiquitas quinamiqui.

³⁰ Huan huajca nihuicas huan nijpaquilismacas Toteco Dios.

Quena, nijhueyimatis huan nijtascamatis.

³¹ Huan TOTECO achi más quipactis ya nopa,

huan amo quej sinta nijmacasquía se toro o se becerro cati tacuacuajhuía huan quipiya iistihua.

³² Inijuanti cati teicneltzitzi quiiatase Toteco Dios quema quinmacas itapalehuil,

huan yeca tahuel paquise.

Huan nochi cati quitemohuaj Toteco Dios itztose ica paquilisti.

³³ Pampa TOTECO quintacaquilía cati teicneltzitzi,

huan amo quintahuelcahua inijuanti cati itztoque ipan tatzacti.

³⁴ ¡Xijpaquilismacaca TOTECO nochi amojuanti cati anitztoque ipan ilhuicacti huan taltipacti!

¡Ma quihueyichihuaca nochi cati itztoque ipan hueyi at!

³⁵ Pampa Toteco Dios quimaquixtis ialtepe, Jerusalén,

huan sempa quincualtalis nopa altepeme ipan tali Judá.

Huan imasehualhua mochantise nopona huan moaxcatise nopa tali.

³⁶ Huan teipa ininconehua nojquiya moaxcatise nopa tali.

Huan nochi cati quitequipanohuaj huan quiicnelíaj Toteco itztose nopona temachme.

70

Se netatajtili para Toteco ma quipalehuiqui

¹ ¡NoTeco Dios, xihuala techmanahuíqui inimaco nocualancaitacahua!

¡Quena, ximoisihuilti, Toteco Dios!

¡Xihuala techpalehuiqui!

² Inijuanti nentinemij notepotzco huan paquij quema nechtaijyohuiltíaj.

Yeca nimitztajtania xiquinpinahuaiti,

huan xiquincuepalti para ayecmo ma nechchihuilica cati amo cuali.

³ Xiquincuepa ica pinahuilisti huan ayecmo xiquincahuilí ma nechpinajtica.

⁴ Pero nochi masehualme cati mitztemohuaj,

xiquinmaca miyac paquilisti.

Nochi cati paquij pampa tiquinmaquixtijtoc, ma quiijtoca:
 “Ma tijhueyitalica Toteco Dios.”

⁵ Pero na cati tahuel nitaijyohuía,

nimitztajtania xihuala nimantzi huan techmanahuiqui,
 pampa san ta hueli techpalehuis huan techmaquixtis.

¡NoTeco Dios, amo xihuejcahua!

71

Netatajtli ten se huehue tacat cati itztoc xitahuac iixpa Toteco

¹ ¡TOTEKO, na san ipan ta nimotemachijtoc!

¡Amo quema techpinahualti!

² ¡Techmanahui ten nocualancaitacahua,

pampa ta tixitahuac!

¡Techchololti inimaco!

Ximohuijtzoma quentzi para techtacaquilis huan techmaquixti.

³ Nochipa san nimotatijtoc huan nimotemachijtoc ipan ta para amo nechaj-
 sise nocualancaitacahua.

Nijmati para ta titanahuatijtoc ma nechmaquixtica pampa san ipan ta huelis
 nimomanahuis.

⁴ NoTeco Dios, techmanahui inimaco ni mosisinijca tacame huan temictiani.

⁵ TOTEKO, ta cati titoTeco, san ipan ta nimotatzquilijtoc,

huan san ipan ta nimotemachijtoc hasta ten quema niconetzi.

Huan quej nopa nitelpocatixqui.

⁶ Ta nochipa tiitzoc nohuaya hasta quema noja niitztoya iijtico nonana.

Quena, ten iijtico nonana ta techquixti huan nochipa techpalehuijtoc.

¡Yeca tahuel nijnequi nimitzpaquilismacas para nochipa!

⁷ Miyac san nechtachilíaj pampa quiiyaj quenicatza techmocuitahuía.

⁸ Semilhuit nimitzpaquilismacas huan nimitzhueyimatis por nochi cati
 techchihuilijtoc.

⁹ Amo techtahuelcahua ama quema ya nihuehuentzi huan ayecmo nijpiya
 fuerza.

¹⁰ Pampa nocualancaitacahua nechejelnamiquij,

huan san sejo mosentilijque inihuaya sequinoc cati quinequij nechmictise.

¹¹ Huan quiijtohuaj:

“¡Ma tijtepotztocaca para tiquitzquise pampa ¡Dios ya quitahuelcajtoc,
 huan amo aqui huelis quimanahuis!”

¹² ¡Toteco Dios, amo ximohuejcahuhua ten na!

¡NoTeco, xihuala nimantzi techpalehuiqui!

¹³ Xiquinpinahualti huan xiquintzontamilti nopa nocualancaitacahua cati
 quinequij nechchihuilise cati fiero.

Quena, ma ayecmo quimatica taya quichihuase.

¹⁴ Pero na más nimotemachis ipan ta para techpalehuis.

Huan noja más nimitzpaquilismacas.

¹⁵ Nochi masehualme niquinilhuis para san ta ticuali huan niquinpohuilis
 quenicatza techmanahuijtoc,

huan techmocuitahuijtoc mojmosta.

Amo hueli nijpohuas quesqui huelta techmanahuijtoc ica cati amo cuali
 pampa tahuel miyac.

¹⁶ Nochi tonali ninejnemi ica nopa chichahualisti cati techmaca, TOTEKO, ta
 cati tinoDios.

Huan nochi masehualme niquinilhúa para san ta tixitahuac huan ticuali.

- 17 ¡Toteco Dios, ta techpalehuijtoc hasta quema noja nieliyaya niconetzi!
Hasta ama noja niquinpohuilijtinemi sequinoc ten nopa huejhueyi tamanti
cati tijchijtoc.
- 18 ¡Toteco Dios, ama quema ya nihuehuentzi huan nitzonchipahuac,
amo techtahuelcahua!
Noja techmaca nemilisti para niquinpohuilis ten mohueyi chicahualis ni
masehualme cati itztoque ama huan cati teipa tacatise.
- 19 Toteco Dios, mochicahualis huan cati xitahuac tijchihua onajsi hasta
ilhuicac.
Ta tijchijtoc huejhueyi tamanti.
Amo onca seyoc Dios quej ta.
- 20 Ta techcahuilijtoc ma nijpano huejhueyi taohuijca yot huan tequipacholi.
Pero nijmati para teipa, sempa techtananas ten campa nopa ostot,
huan tijchihuas ma nimoyolcui.
Huan sempa nijpiyas nemilisti.
- 21 Huan huajca achi más techhueyitalis huan sempa techyoltalis.
- 22 Huan na nimitzpaquilismacas ica tatzotzonalis ten arpa huan guitarra.
NoTeco Dios, nihuicas tiohuicat cati tepohuilía para tijchihua nochi cati
tiqijtohua.
- Ta titoTeco tiisraelitame huan titatzejtzeltic huan nelía titemachti.
- 23 Ica paquilisti nitzajtzi huan nihuicas para niteilhuis quenicatza tech-
maquixtijtoc.
- 24 Semilhuit nitepohuilis para ta tijchihua cati xitahuac,
pampa nochi cati quinequiyayaj nechmictise tiquinpinahualti huan
tiquinechcapantali.

72

Itanahuatilis nopa tanahuatijquet cati itztoque xitahuac iixpa Toteco

- 1 NoTeco Dios, techmaca motamachtil huan techpalehui na cati nitanahuati-
ijquet,
para ma nitetajtolescahua xitahuac quej ta titetajtolescahua.
Huan xijpalehui nocone para ma monejnemilti xitahuac teipa.
- 2 Xijpalehui para quintajtolescahuas xitahuac nochi momasehualhua,
huan cati teicneltziti nojquiya.
- 3 Xijchihua para nochi ipan ni tali ma paquica pampa nopa tanahuatijquet
quichihua cati xitahuac,
hasta eltoc quej nochi cuame cati onca ipan tepeme huan ipan tachiquilme
nojquiya paquij huan temacaj cuali inintajca.
- 4 Yaya quinmanahuis cati itztoque ipan tequipacholi huan cati amo teno
quipiyaj.
Nojquiya ma quintatzacuiliti nopa masehualme cati tetajyohuiltiaj.
- 5 Huan cati teicneltziti huan amo teno quipiyaj mitzimacasise mitzixpanose
nochi tonali quema noja eltos tonati huan metzti.
¡Quena, ma mitzhueyimatca para nochipa!
- 6 Huan nochi altepeme ipan itanahuatilis nocone ma eli cuajcualtzi huan
temachti,
quej nopa at cati huetzi para ma chamanica cuame,
o quej nopa ajhuechti cati quixolonía nopa tali.
- 7 Huan nochi masehualme cati itztoque xitahuaque huan cuajcualme,
ma itztoca ica cuajcualtzi quema yaya tanahuatis.
Quema yaya tanahuatis, oncas miyac tasehuilisti hasta itamiya tonali.

8 Itanahuatilis nocone ma ajsi hasta campa pehua huan hasta campa ontami nopa hueyi at.

Ma ajsi ten campa nopa hueyi at Eufrates hasta campa ontantoc taltipacti.

9 Nochi masehualme cati itztose ipan huactoc tali mohuijtzomase iixpa, huan icualancaitacahua motancuaquetzase iixpa hasta quipipitzose taltepocli.

10 Nochi nopa tanahuatiani cati itztoque itejteno nopa hueyi at cati itoca Mediterráneo,

huan nopa tanahuatiani ten tali Tarsis huan nopa tanahuatiani ten tali Sabá huan Seba quihualiquilise miyac nemacti.

11 ¡Quena, nochi tanahuatiani ten campa hueli talme quitamajmacase!

¡Huan nochi injuanti motancuaquetzase iixpa huan quitequipanose!

12 Yaya quinmanahuis nopa teicneltzitzo huan cati amo teno quipiyaj quema quitajtanise tapalehuili.

Pampa injuanti amo quipiyaj ajquiya quinpalehuis.

13 Yaya quintasojtas cati amo quipiyaj chichahualisti huan cati teicneltzitzo, huan quinmanahuis.

14 Quinmanahuis para amo quintajyohuiltise huan para amo quintehuisse.

Pampa quitas para ininemilis tahuel miyac ipati iixpa.

15 Huan quema noja itztos nopa tanahuatijquet,

quimacase miyac oro cati onca ipan tali Sabá.

Huan imasehualhua quisenhuiquiljtzose motatajtjtzose ica Toteco huan mojmosta quitascamatise.

16 Ma oncas miyac trigo ipan nochi nopa tali,

huan hasta nopa cuame cati onca ipan tepeme ma temacase inintajca quej temacaj nopa cuame cati onca ipan tali Líbano.

Huan ma onca miyac masehualme ipan altepeme, quej imiyaca nopa xihuime cati onca ipan cuatitamit.

17 Nochi ma quihueyimatica nopa tanahuatijquet para nochipa, huan itequiticayo ma huejcahua quej huejcahuas tonati.

Nochi ma quiselica tatiochihualisti por ya.

Huan masehualme ipan nochi talme ma quipaquilismacaca, huan ma quijjtoca para Toteco quintiochijtoc.

18 Ma tijhueyichihuaca TOTECO Dios cati toDios tiisraelitame, pampa san yaya hueli quichihua huejhueyi tamanti.

19 Nochipa ma tijpaquilismacaca Toteco.

¡Nochi taltipacti ma temi ica ihueyitilis!

¡Quej nopa ma eli!

20 Nica tami motatajtía David, icone Isaí.

73

Itaicnelijcayo Toteco Dios

1 Toteco Dios nelía cuali iyolo ica israelitame.

Quena, quinicnelía nochi cati quipiyaj tapajpactic iniyolo.

2 San quentzi polihuiyaya para nihuetzotsquía.

Noicxi moxitaniyaya huan nechcatitoya para nimomimilos tepexitipa.

3 Quej nopa nielqui pampa an niquijyohui para amo niquixtocas quema niqitac quenicatza tapijpiyayayaj nopa masehualme cati mohueyimatij huan cati taixpanoj.

4 Itztoque cuali ipan nochi ininemilis, huan amo mococohuj.

⁵ Amo quinajsi taohuijcyot yon tequipacholi, quej sequinoc quipiyaj.

⁶ Yeca quema mohueyimatij, quiitaj para cuajcualtzi quej se costi cati tachi-jchihuali ica piltetzitzi cati pajpatiyo.

Huan quema quichihujaj cati amo cuali, quiitaj quej iniyoyo cati cuajcualtzi.

⁷ Nopa taixpanoca masehualme ya quijquisa iniixteyol pampa tahuel motomajtoque,

huan ya quipixtoque nochi cati iniyolo quinequi.

⁸ Inijuanti san quihuetzquilíaj Toteco huan quintemajmajtíaj imasehualhua. Mohueyimatij quema camanaltij.

⁹ Fiero quitaijilhuíaj Toteco Dios cati itztoc ipan ilhuicacti.

Huan quintelchihujaj cati itztoque ipan ni taltipacti.

¹⁰ Yeca Toteco Dios quinhualicas sempa nochi imasehualhua ipan ni inial-tepe,

huan quipiyase miyac at nochi inijuanti.

¹¹ Huan quiijtose:

“¿Anmoilhuíaj Toteco quimatis taya onca?

¿Anmoilhuíaj Yaya Cati Más Hueyi quichihuilía cuenta cati pano nica?”

¹² Xiquitaca, ni masehualme cati amo teno quineltocaj amo teno ininpati.

Quipiyaj se cuajcualtzi nemilisti huan talojtztizti quimiyaquilíaj más inin-tomi.

¹³ ¡Amo teno nechpalehuía para nijpiya noyolo tapajpacti,

huan san tapic nimocuatotónia para amo nijchihuas tajtacoli!

¹⁴ Pampa nochi se tonali nechtatzacuilitíaj huan nechtaijyohuiltíaj sese ij-naloc.

¹⁵ Sinta nicamanaltitosquía quej inijuanti,

huajca niquincajcajatosquía nochi momasehualhua.

¹⁶ Quema nijnejqui nijmatis para ten itztoque cuali nopa masehualme cati quicualancaitaj Toteco,

elqui tahuel ohui para nijmachilis.

¹⁷ Pero se tonali nicalajqui ipan motiopa, Toteco Dios, para nimoyolilhuis ten nopa tamanti,

huan huajca nijmachili taya quinchiya.

¹⁸ Tiquintalijtoc ipan se ojti cati tahuel alaxtic.

Quema tiquincauopehuas,

huajca nimantzi huetzise ipan se hueyi ostot huan nozona tzontamise.

¹⁹ Quena, ica se talojtzi tamis nochi ininpaquilis.

Huan itztose ipan majmajti para nochipa.

²⁰ ¡Nochi ininemilis eltoc quej se temicti!

Quena, quej quema se cochtoc huan isatiquisa,

Toteco, quej nopa quema timotananas huan tiquinhuejcamajcahuas.

²¹ Quema niquitac ya ni,

nelía tahuel nicualanqui huan hasta nechcocohuayaya noyolo.

²² Pampa niquitac para tahuel nihuihuitic nieltoya.

¡Hasta ninesiyaya moixpa quej se nitapiyali cati amo quipiya italnamiquilis!

²³ Pero masque ya ni nopantic, nochipa niitztoc mohuaya ta, Toteco,

huan techitzquitoc ipan nomanejmat.

24 Huan nijmati para motamachtil quisenhuiquilis nechyacanas ipan nochi nonemilis.

Huan teipa, quema nimiquis, techselis nepa mochaj campa tacuajcualtzi.

25 Amo aqui seyoc nijpiya nepa ilhuicac.

¡San ta, tinoTeco Dios!

¡Huan san ta nimitznequi ipan ni taltipacti huan amo aqui más!

26 Quemantica nimococohua huan nimotequipachohua.

¡Pero Toteco Dios yaya mocahua para nochipa!

Yaya quifuerzajmaca noyolo huan san yaya noaxca para nochipa.

27 Pero Toteco quintzontamiltis nochi cati amo quinequij quihueyichihuase.

Quena, yaya quintzontamiltía nochi cati quitahuelcahuaj.

28 Pero na achi más nimonechcahuis campa Toteco Dios,

pampa ya nopa cati más cuali para na.

San ipan TOTECO nimotemachijtoc pampa yaya noTeco.

Huan niquinphuilis nochi masehualme nochi nopa cuajcualtzi tamanti cati yaya nechchihuilía.

74

Ma tijtemoca Toteco quema tocualancaitacahua techtatzacuiltíaj

1 Toteco Dios, ¿para ten techtahuelcajtoc para nochipa?

¿Para ten tahuel ticualani ica tojuanti cati tiitztoque quej timopilborrego-jhua?

2 Xiquelnamiqui para tojuanti timomasehualhua cati timocohui huejca-jquiya quema titetequipanohuayayaj san tapic.

Quena, techtapejpeni para techchihuas timoaxcahua.

Nojquiya tijtapejpeni nopa altepet Jerusalén para tijchihuas quej elisquía mochaj ipan ni taltipacti.

3 Xihuala xiquitaqui quenícatza quitamisosolojtoque nopa altepet, huan xijtachili quenícatza tocualancaitacahua quisosolojtoque motiopa.

4 Nozona tzajtzi que mocualancaitacahua ica paquilisti quema tasesolojque. Teipa san techhuetzquilijque huan quinquetzque ininteteyohua para quinextise ya techtantoyaj.

5 Hualajque ica inihachas huan huejhueyi martillos hasta nesiyaya quej cuajcuahuini tatajco cuatitamit.

6 Huan ama ica ininteposhua quitapanque huan quisosolojtoque nochi tamanti cati ica tayejyecchijtoyaj motiopa.

7 Quena, motiopa quitatijque, huan quimahuispolojque moyoyoncal cati quihuicayaya motoca, huan quitahuisojque talchi.

8 Huan quijtojque ipan iniyolo:

“Ma tijtamisosoloca nochi cati onca ipan ni tali.”

Huan yajque campa hueli huan quitatijque nochi israelita tiopame, campa tímosenitliyayaj para timitzhueyichihuase, Toteco Dios.

9 Ayecmo onca yon se tamanti cati quinextía para timomasehualhua.

Ayecmo onca tajtolpanextiani.

Ayecmo aqui huélis techilhuis hasta quema tamis nochi ya ni.

10 Toteco Dios, ¿hasta quema tamis mitzmahuispolohuaj mocualancaitacahua?

¿Amo quema tiquintatzacuiltis?

11 ¿Para ten tihuejcahua para techpalehuis?

¿Para ten amo tijnextía mohueyi chichahualis huan techpalehuía?

¹² Hasta ten huejcajquiya Toteco Dios eliyaya notanahuatijca.

Yaya nechpalehuijtoc ipan ni taltipacti huan campa hueli campa niyajtoc.

¹³ Ica mochicahualis tijxelo hueyi at.

Huan tiqintzontamilti huejhueyi tapiyalme cati temajmatijque cati itztoyaj ipan at.

¹⁴ Tijtzonxamani nopa hueyi tapiyali cati itoca Leviatán,

huan inacayo tiqinmacac ma quicuaca nopa tecuanime cati itztoyaj ipan huactoc tali.

¹⁵ Tijchijqui ma meya at ipan huejhueyi amelme huan para hueyame ma quipiyaca at.

Nojquiya tiqinhuatzqui hueyame cati amo quema huactoyaj.

¹⁶ Ta moaxca tonali huan yohuali.

Ta tijchijchijqui metzti huan tonati.

¹⁷ Ta tijtamachijqui hasta canque tamis taltipacti.

Nojquiya ta tijchihua ma tatotoniya huan ma taseseya.

¹⁸ TOTECO, xiquita quenicatza mitzmahuispolohuaj mocualancaitacahua, huan quenicatza mitztaijilhuáj nopa masehualme cati mohueyimatij.

¹⁹ ¡TOTECO, amo techtahuelcahua!

Xijmanahui mopaloma imaco nopa cuatojti.

Quena, xiquinmanahui momasehualhua inimaco nopa masehualme cati itztoque quej tecuanime.

²⁰ ¡Xiquelnamiqui nopa camanal sencahuali cati tijchijtoc ica tojuanti!

Pampa ni tali temitoc ica tzintayohuilot huan ica masehualme cati mosisiníaj.

²¹ Amo xijcahua para talojtzitzi ma techmahuispoloca tojuanti cati tijpanotoque miyac taohuijayot.

Xiquinpaléhui cati teicneltitzi huan amo teno quipiyaj para huelis mitzpaquilismacase.

²² Toteco Dios, ximotanana huan ximomanahui ica cati quijtohuaj mocualancaitacahua.

Xiquelnamiqui nochi nopa camanali cati ica mitztaijilhuijtoque nochi se tonal.

²³ Amo xiquelcahua quenicatza mitztelchijtoque mocualancaitacahua, pampa injuanti noja más mitztaijilhuáj.

75

Toteco quinehcapantalis sequij huan quinhueyitalis sequinoc

¹ ¡Timitztascamatij, Toteco Dios, pampa tiitztoc tonechca!

Pampa masehualme tepohuilíaj nochi huejhueyi tamanti cati tijchijtoc.

² Huan Toteco Dios quijtohua:

“Quena, quema ya nimocualtalijtos, na niquixquetzas se tonali.

¡Huan niquintatzacuiltis quej quinamiqui nochi nopa taixpanoca masehualme!

³ Masque ni taltipacti mohuisos huan nochi masehualme huihuipicase, itaquetzalhua amo huetzise pampa na niquinquetztoc cuali ipan inilugar.”

⁴ Niquinilhui masehualme cati mohueyimatij ma amo mohuihuinequica.

Huan niquinilhui taixpanoca masehualme ma amo mohueyimatica.

⁵ Niquinilhuijtoc cati quipiyaj chichahualisti ma amo tetamiihilhuica.

Huan quema ancamanaltij, amo ximoyacaquetzaca para anmohueyimatise.

⁶ Pampa san Toteco hueli tehueyitalía.

Amo aquí cati huala ten campa quisa tonati, o ica campa oncalaqui,

o campa huactoc tali huelis quihueyitalis se masehuali. ¡Amo!

⁷ San Toteco Dios itztoc Juez.

San yaya nopa tetajtolsencajquet cati hueli tehueyitalía huan temaca chichahualisti.

Huan sequij masehualme quinhueyitalía huan sequij quinehcapantalía.

⁸ Toteco quipixtoc imaco se caxit cati temitoc ica tailisti cati nelía cococ.

Huan ya nopa eltoc nopa tatzacuultili cati quintitanilis taixpanoca masehualme ipan ni taltipacti.

Huan monequis quiise hasta quitamise ica nochi itetejtzo.

⁹ Pero na para nochipa nitepohuilis nochi cati quichijtoc Toteco Dios, yaya cati iTeco Jacob.

¹⁰ Yaya quiijtouha: “Na nijtamiltis ininchichahualis nopa fiero masehualme, pero cati itztoque xitahuaque noja niquinmacas más chichahualisti.”

76

Se huicat cati huicaque quema ya tatanque

¹ Ipan tali Judá huan hasta nochi tali Israel nochi masehualme quixmatij Toteco Dios para nelía hueyi.

² Itiopa eltoc ipan altepet Jerusalén.

Quena, ipan tepet Sion eltoc ichaj.

³ Nopona quipojpostejqui nochi tamanti ininteposhua tocualancaitacahua.

⁴ ¡Nopa tepeme cati eltoque ten huejcajquiya amo quipiyaj inijejejeja quej tepet Sion quipiya!

⁵ Nopa tocualancaitacahua cati más quipiyayayaj chichahualisti, quintamitacuicuilijque.

Toixpa tepejtoque mictoque.

Yon se ten injuanti ayecmo hueli quitananas imax para techtehuis.

⁶ Quema ta tiToteco, cati tiDios Jacob, tiquinajhuac nopa cahuayojme huan cati tejcotoyaj ininpani, nochi huetzque hasta talchi.

⁷ ¡Yeca nochi quiitaj para tahuel titemajmati!

Huan amo aquí huelis quiiyohuis ijcatos moixpa quema tahuel ticualantoc.

⁸ Hasta nepa ilhuicac titayolmelahua para titetatzacuultis.

Huan ni taltipacti majmajqui huan amo molini moixpa,

⁹ quema timotananqui, Toteco Dios, para tiquintatzacuultis cati quichihuaj cati amo cuali,

huan para tiquinmanahuis nochi cati moechcapanohuaj ipan ni taltipacti.

¹⁰ Ta tijtequihuíá inincualancayo masehualme para sequinoc ma mitzhueyimatica.

Huan tijtequihuis para más monextis moyejejeja.

¹¹ Xijchihuaca nochi cati anquijtolcahuilijtoque TOTECO para anquichihuase.

Sese ma quihualica nopa tamanti cati quitencahuilijtoc para quimacas Toteco Dios.

Monequi ma tijhueyitepanitaca huan ma tiquimacascica,

¹² pampa yaya quintamiltíla ininemilis nopa huejhueyi tayacanani.

Quichihuas para nochi tanahuatiani ipan taltipacti ma quimacascica.

77

Monejnehuili David ten cati Toteco quichijqui huejcajquiya

¹ Chicahuac nijtzajtzilía Toteco Dios para ma nechpalehui.
Quena, nijnojnotza pampa nijnequi ma nechtacaquili.

² Quema nechajsic miyac taijyohuilisti nimantzi nijtemo noTeco.
Seyohual nimomatanantoya huan nimotatajtiyaya,
huan amo nijcahuili yon se talojtzi.

Amo nipaquis hasta yaya monextis huan nechcaquis.

³ Nimoyolilhuía ten Toteco Dios huan niyolpitzahuía huan nichoca.
Nimotequipachohua pampa tami nochicahualis,
yeca tahuel nijnequi ma nechpalehui.

⁴ Toteco, ta amo techcahuilía ma nicochi.

Hasta amo hueli nicamanalti pampa tahuel hueyi ni notequipachol.

⁵ Talojtzi niyolilhuía ten nopa cuajcualtzi tonali huan xihuime cati
panoque huejcajquiya.

⁶ Niquelnamiqui nopa yohualme quema nihuicayaya ica paquilisti.

Quena, nimotajtachilía huan niquita para ama nochi tamanti tahuel
mopatato.

⁷ ¿Huelis Toteco nechtahuelcajtoc para nochipa?

¿Huelis ayecmo quema nechpalehuis?

⁸ ¿Huelis ya tanqui itaicnelilis ica na?

¿Huelis ya tanqui cati achtohuiya techtajtolcahuili techmacas?

⁹ ¿Huelis Toteco Dios ya quielcajqui para monequi nechchihuilis cati cuali na
cati niitztoc ipan tequipacholi?

¿Huelis tahuel cualantoc huan yeca ayecmo quinequi nechtasojtas?

¹⁰ Huan ipan nohueyi tequipachol nimoilhui:

“Toteco Cati Más Hueyi mopatato.

Achtohui niitztoya inejmat huan nechtiochihuayaya miyac,
pero ama nechcualancaita.

¹¹ Más cuali niquelnamiquis nochi nopa huejhueyi tiochicahualnescayot cati
TOTECO nechchihuili huejcajquiya.”

¹² Quena, mojmosta nimoilhuis ten nopa huejhueyi tamanti para nochipa.

Amo hueli nijcahuas nimoyolilhuis ten yaya quichijtoc.

¹³ ¡NoTeco Dios, nelía tatzejtzeloltic nochi moojhui!

Amo aquí seyoc dios cati más quiapiya chicahualisti que ta, titoTeco.

¹⁴ ¡Ta tiDios cati tijchihua huejhueyi tiochicahualnescayot huan miyac
tamanti cati masehualme quitachilíaj!

Huan hasta ama quejipa tijnextía mohueyi chicahualis.

¹⁵ Ica mohueyi chicahualis techmanahui,

timomasehualhua cati tiiconehua Jacob huan José.

¹⁶ Toteco Dios, nopa hueyi at cati itoca Chichiltic momajmati quema mitzitic.

Huan huihuipicac hasta tatzinta campa más huejcata.

¹⁷ Nopa mixti quichijqui ma huetzi at chicahuac.

Huan tatomonqui nepa ilhuicac.

Huan nojquiya tapetanqui ten se lado hasta seyoc.

¹⁸ Caquistic tatomonilot ipan nopa hueyi ajcomalacat.

Huan nopa tapetancayot quitaahuili nochi taltipacti,
huan ni taltipacti huihuipicac.

¹⁹ Tijchijqui se ojti quema tiquixcotonqui nopa hueyi at, pero amo aqui quipanti campa tijquetztijayqui moicxi.

²⁰ Huan ipan ni ojti tiquinyacanqui momasehualhua quej elisquía pilborre-
gojztitzi inimaco Moisés huan Aarón.

78

Cati huejcajquiya panoc ipan tali Israel

¹ Nomasehualhua, xijtacaquílca notamachtil huan nochi cati niqijtohua,
² pampa nimechnextilis tamanti cati amo aqui más quimati cati panoc
huejcajquiya.

³ Tamanti cati tijcactoque huan tijmajtoque pampa totatahua techpohuili-
jqe.

⁴ Quena, nimechmatiltis para anhuelise anquinpohuilise amoconehua
nochi nopa cuajcualtztizi huan huejhueyi tamanti,
cati TOTECO quichijqui ica ihueyi chichualis.

⁵ Toteco Dios quimacac miyac tanahuatilme Jacob ipan tali Israel para ma
monejnemiltica xitahuac,

huan quinnahuati tohuejcapan tatahua ma quinnextilica ininconeua,
⁶ huan iniixhuihua cati tacatise teipa.

Huan quej nopa nochi masehualme quinixmatise itanahuatilhua Toteco.

⁷ Yeca hasta ama miyac masehualme quintepanitaj itanahuatilhua Toteco
Dios,

huan motemachíaj ipan ya para quinmocuitahuis.

Huan amo ma quielcahuaca nochi nopa huejhueyi tamanti cati quichijtoc
Toteco.

Monequi ma qitoquilijtinemica nochi itanahuatilhua.

⁸ Pampa amo quinamiqui para elise quej inihuejcapan tatahua cati moy-
oltetilijque huan amo tatepanitaque.

Inijuanti amo elque temachme ica Toteco Dios,
yon amo quimactilijque iniyolo, yon ininemilis.

⁹ Nopa masehualme ten tali Efraín mocuepatoj huan cholojqe ipan nopa
tonali quema yahuiyayaj tatehuitij.

Quena, cholojqe masque quipiyayayaj miyac teposti para tatehuisse.

¹⁰ Amo quintepanitaque itanahuatilhua Toteco Dios,
huan amo quinejqe nejnemise ipan iojhui.

¹¹ Quielcajqe nochi tamanti cati yaya hueli quichihua.

Amo quielnamijque nopa cuajcualtzi tiochichualnescajot cati quichijqui
Toteco.

¹² Quena, Toteco Dios quichijqui miyac tamanti iniixpa inihuejcapan
tatahua ipan tali Egipto campa itoca Zoán.

¹³ Quitajcoxelo nopa hueyi at huan quichijqui ma panoca.

Ipan ome lados nopa at moquetzqui quej tepamit.

¹⁴ Tonaya quinyacanqui ica se mixti para quinecahuilis,
huan ica tayohua ica se mixti cati taahuiyaya quej tit.

¹⁵ Ipan huactoc tali quitapo nopa hueyi tet huan quisqui miyac at para atique
hasta aixhuique.

¹⁶ ¡Quena, ipan tet quisqui miyac at cati motalo quej se hueyat!

¹⁷ Pero injuanti quisenhuiquilijque amo quitepanitaque.

Huan nepa campa huactoc tali tajtacolchijque ica Toteco Cati Más Hueyi.

¹⁸ Pampa quieyjecojque Toteco Dios huan quitajtanijqe tacualisti cati
iniyolo quinequiyaya.

- 19 Hasta cualanque ica Toteco huan quijtojqque:
 “¿Huelis Toteco Dios techtamacas ipan ni huactoc tali?”
- 20 Xiquitaca, Toteco Dios quitapo nopa hueyi tet huan quisqui miyac at quej
 elisquía se hueyat hasta atzonpoli tali,
 pero ¿huelis nojquiya hueli techmacas tacualisti?
 ¿Huelis techtamacas tiimasehualhua ica nacat?”
- 21 Huan quema TOTECO quicajqui ni tamanti, tahuel cualanqui.
 Huan ipan icualancayo quisqui tit ica israelitame, inijuanti cati iixhuihua
 Israel,
- 22 pampa inijuanti amo quineltocaque Toteco Dios,
 yon amo motemachijque ipan ya para quiapiya chichahualisti para quin-
 maquixtis.
- 23 Pero masque quej nopa quichijque,
 Toteco Dios quinahuati nopa mixti huan quitapo ilhuicacti.
- 24 Huan quichijqui ma huetzi nopa tacualisti cati itoca maná para ma
 quicuaca quej quema huetzi at.
 Quinmacac tacualisti cati hualajqui ten ilhuicac.
- 25 Masehualme quicujque cati elqui inintacualis ilhuicac ehuaní.
 Quena, quintamacac hasta cuali ixhuique huan hasta mocajqui nopa tacual-
 isti.
- 26 Ica ihueyi chichahualis quihualiacac nopa ajacat cati huala campa quisa
 tonati huan cati huala ica tani para ma taajaca campa ilhuicacti.
- 27 Quichijqui ma hualaca miyaqui totome quej imiyaca taltepocti.
 Quena, hualajque totome quej mixti huan quej imiyaca xali cati onca iteno
 hueyat.
- 28 Huan Toteco quichijqui para nopa totome ma huetzica tatajco campa
 quichijtoyaj iniyoyonal.
- 29 Huan nopa masehualme tacujque hasta ixhuique.
 Toteco quinmacac nacat quej iniyolo quinequiyaya.
- 30 Pero quema sanoc tantoyaj tacuj,
 huan hasta noja quipixtoyaj nacat ipan inincamac,
- 31 Toteco Dios motananqui ica ihueyi cualancayo,
 huan quintzontamilti nochi nopa telpocame cati más tapejpenilme ipan tali
 Israel.
- 32 Pero masque Toteco quinchihuii ya nopa,
 nopa masehualme quisenhuiquilijque tajtacolchijque,
 huan amo quineltocaque nopa huejhueyi tiochichahualnescayot cati yaya
 quichijqui inixpa.
- 33 Yeca Toteco quintajyohuilti ipan nochi ininemis huan quintzontamilti
 san ica se talojtzi.
- 34 Pero teipa, quema ya quintzontamiltijtoya sequij,
 huajca quena, ne sequinoc quitemojqque Toteco Dios.
 ¡Quena, nimantzi mocuetque huan quitoquilijque!
- 35 Huan quielnamijque para yaya Toteco Dios cati quinmocuitahuiyaya para
 amo quinajsis cati amo cuali.
 Huan quielnamijque para Toteco Cati Más Hueyi san yaya inintemaquixti-
 jca.
- 36 Pero nopa israelitame amo quitoquiliyayaj ica nochi iniyolo.
 ¡Amo! Quitoquiliyayaj san ica inincamac.
- 37 Pampa iniyolo eltoya huejca ten Toteco.
 Huan amo quichihuayayaj cati quitajtolcahuilijtoyaj Toteco para quichi-
 huase.

- 38 Pero Toteco quipixqui hueyi iyolo ica inijuanti.
 Quintapojpolhuiyaya inintajtacolhua huan amo quintzontamiltiyaya.
 Miyac huelta quitilquetzqui icualancayo para amo quintatzacuiltis.
- 39 Pampa Toteco quielnamijqui para inijuanti san elij masehualme cati
 ininemilis xpolihui san ica se talojtzi,
 huan amo quema mocuepaj sempa.
- 40 Nepa ipan huactoc tali,
 tahuel miyac huelta amo tatepanitaque ica Toteco Dios huan quiyolcoco-
 que.
- 41 Talojtzitzi quiyejyecojque,
 huan ica ya nopa quichihualtiyayaj para Toteco ma quintzontamilti.
 Yon amo quicahuilijque para Toteco ma quintiochihua,
 yaya cati ininDios israelitame huan cati Tatzejteloltic.
- 42 Quielcajque ihueyi chichualis huan iteicnelijcayo.
 Huan quielcajque quenicatza quinmanahui inimaco inincualancaitacahua.
- 43 Quielcajque quenicatza Toteco quititanqui tatzacuiltili ipan Zoán ipan tali
 Egipto.
- 44 Quielcajque quenicatza quicuetqui esti nopa at huan ayecmo aqui huelqui
 quiic.
- 45 Quielcajque quenicatza quintitanqui tahuel miyac sayolime hasta
 quitemitijque nopa tali.
 Quielcajque quenicatza nopa temasolime quitemitijque nopa tali Egipto.
- 46 Toteco quintitanqui ocuilime huan chapolime para ma quicuaca ininta-
 tochui huan ininpixquilis.
- 47 Ica tesihuit quitzontamilti inixocomecamil huan inihiguera mil.
- 48 Inihuacaxhua mijque ipan potrero pampa Toteco Dios quinmajcahuili
 tesihuit cati tahuel huejhueyi.
 Huan ininborregojhua mijque ica tapetancayot.
- 49 Quena, Toteco tahuel cualanqui ica inijuanti,
 huan yeca quintitanili tacuajcualocayot huan taohuijcaoyot.
 Huan quintitanili se grupo ten ilhuicac ehuan cati tetzontamiltiáj.
- 50 Cualanqui nelchicahuac huan amo quimanahui yon se Egipto ejquet.
 Senquisa quintitanili tatzacuiltili huan huejhueyiocolisti.
- 51 Teipa Toteco quinmicti nopa achtohui ehuan ipan sese familia ten tali
 Egipto.
 Quena, quinmicti cati elqui ininachtohui fuerza quema pejque quinpiyaj
 conene.
- 52 Pero quinquixti imasehualhua quej elisquiáj pilborregojtzitzi,
 huan quinyacanqui ica cuajcualtzi ipan nopa huactoc tali.
- 53 Quinyacanqui ica miyac temachili para ma amo majmahuica.
 Pero nopa hueyi at quinatzonpolihuilti inincualancaitacahua.
- 54 Huan quinhuicac hasta campá inepa nopa tali cati tatzejteloltic.
 Nopa tali cati quipiya miyac tepeme cati Toteco quintanili para inijuanti.
- 55 Iniiixa quinquixti nopa masehualme cati itztoyaj ipan nopa tali.
 Teipa quitamachijqui huan quinmajmacac nopa huejhueyi familias ten
 israelitame para iniaxca.
 Huan nozona quincájqui ma itzoca.
- 56 Pero masque quinchihuili ya nopa,
 inijuanti quisenhuilijque quiyejyecohuaj huan quicualancamacaj
 Toteco Cati Más Hueyi.
 Huan amo quinejque quitepanitase icamanal.

- 57 Yeca mocuetque para amo calaquise ipan nopa tali tatencahuali huan quicamajixnamijque san se quej inintatahua quichijque.
Huan quej se cuataminti cati huijcoltic amo yahui xitahuac quema quimajc-
ahuaj,
inijuanti nojquiya amo yajque xitahuac para quichihuase ipaquilis Toteco.
- 58 Quicualancamacaque Toteco pampa mochijchihuilijque teteyome huan taixpamit para quinhueyichihuase ininteteyohua.
- 59 Pero quema Toteco Dios quiitac ya ni,
tahuel cualanqui huan pejqui quincualancaita.
- 60 Huan quitahuelcajqui itiopa cati eltoya ipan altepet Silo,
nopa yoyon cali campa itztoya inihuaya imasehualhua.
- 61 Huan Toteco quincahuili inincualancaitacahua ma quihuicaca iCaxa cati quinpixtoya itanahuatilhua.
Elqui quej quincuilijque ininchicahualis huan iniyejejeja.
- 62 Nojquiya quintemactili imasehualhua inimaco inincualancaitacahua para ma quinmictica ica macheta,
pampa yaya tahuel cualantoya inihuaya.
- 63 Inintelpocahua quintatijque,
huan inichpocahua quintzontamiltijque,
yon amo quiaxilijque para monamictise huan huicase ipan nenamictili.
- 64 Quintzontamiltijque nopa totajtzitzi ica macheta huan inisihuajhua no-
jquiya mijque nimantzi,
yon amo quinchoquulijque inihuehuejhua.
- 65 Huajca Toteco motananqui quej quema se acajya cochi huan mijquehua,
o quej se tetica tacat cati tahuel tzajtzi chichahuac pampa ihuintitoc.
- 66 Huan Toteco quinichtacahui quema quintehui icualancaitacahua.
Quena, quinhuejcamajcajqui huan quintitanqui ipan se lugar campa quipanose pinahualisti para nochipa.
- 67 Pero Toteco quintahuelcajqui nopa huejhueyi familias cati hualajqui ten José huan Efraín.
- 68 San quintapejpeni ihueyi familia Judá,
huan nopa tepet Sion cati yaya tahuel quicneliyaya.
- 69 Huan nozona quichijchijqui itiopa cati cuajcualtzi huan temachtí,
huan cati huejcahuasquía para nochipa quej huejcahua ilhuicacti huan taltipacti.
- 70 Quitapejpeni itequipanojca, David,
quema quinmocuitahuiyaya borregojme,
- 71 quema yahuiyaya inintepotzco nopa tena borregojme cati quinpiyayaj inincone-
hua,
huan quinhualicayaya para ma quinmocuitahui.
Huan Toteco quichijqui David ma quinyacana imasehualhua,
nopa israelitame cati quintapejpenijtoya para iaxcahua.
- 72 Huan quena, David quinmocuitahui imasehualhua Toteco ica nochi ichic-
ahualis huan ica nochi iyolo.

79

Tequipacholi pampa masehualme quisosolojque Jerusalén

- 1 ¡NoTeco Dios, masehualme ten sequinoc talme hualajque huan moaxcati-
jqe motal!
Motiopa quichijque amo tapajpactic huan altepet Jerusalén quitamisosolo-
jqe.

2 Nochi inintacayo momasehualhua quinmajcajtoque para ma quincuaca totome.

Hasta quinmajcajtoque ininacayo mototajtztzi,
nopa tatzejtzeloitque tacame cati moquetzque moixpa,
para ma quincuaca tecuanime.

3 Quena, tocualancaitacahua quintzontamiltijque nochi nopa masehualme ipan altepet Jerusalén.

Huan inieso cati toyajqui motalo quej hueyat,
huan amo mocajqui yon se para quintalpachos.

4 Huan ama nochi talme cati techyahualojtoque techpinajtíaj huan techhuetzquilíaj.

5 Toteco Dios, ¿hasta quema tamis ticalantos ica tojuanti?

¿Huelis para nochipa mocualancayo eltos quej tit?

6 Xijtítani mohueyi cualancayo ipan nopa talme campa amo mitzixmatij,
huan ipan altepeme campa amo aquí mitzhueyimati,
pero amo xijtítani ipan tojuanti.

7 Pampa inijuanti quintzontamiltijque nochi moisraelita masehualhua huan quinsosolojque nochi calme.

8 ¡Amo xiquelnamiqúi huan amo techtatzacuiliti por inintajtacolhua tohuejcapan tatahua,

cati inijuanti quichijque huejcajquiya!

Más cuali nimantzi techtasojta pampa ayecmo tijpiyaj fuerza.

9 Toteco Dios, titotemaquixtijca, techpalehui,

para quej nopa nochi mitzhueyitepanitase.

¡Techmaquixti huan techtapojpolhui totajtacolhua ica mohueyi taicnelilis!

10 Pampa sinta amo techpalehuis,

huajca nopa masehualme cati amo mitzneltocaj quijjtose:

“¿Canque itztoc ininTeco Dios?”

Huajca xiquintatzacuiliti, Toteco, iniixpa nochi masehualme, pampa quinmictijque momasehualhua.

11 Xijtacaquili inintequipachol nopa masehualme cati tzactoque,

huan ica mohueyitilis huan mohueyi chichualis,

xiquinmanahui cati quinixquetztoque para quinmictise.

Xiquinmaquixti para nochi ma quiitaca mohueyi chichualis.

12 TOTEKO, xiquincuepili chicome huelta cati mitzchihuilijque quema mitzpinahualtijque nopa talme cati san mitzhuetzquilíaj.

13 Huan huajca tojuanti, timomasehualhua cati tiitztoque quej timoborregojhua,

timitzhueyichihuase para nochi tonali huan timitzpaquilismacase ica huicat para nochipa.

80

Netatajtiti para Toteco ma quicualtali tali Israel huan imasehualhua

1 ¡Ta cati tinintamocuitahuijca israelitame huan techyacana quej tielisquíaj timoborregojhua,

techtacaquili!

Ta cati timosehuijtoc tatajco nopa ilhuicac ehuan cati inintoca querubines ilhuicac ehuan,

ximohuijtzoma quentzi huan techtacaquili quema timotatajtíaj.

Xijnexiti mohueyi chichualis huan mohueyitilis cati petani.

2 Xijchihua para nochi tiisraelitame,

hasta nojquiya iniixhuihua Efraín, Benjamín huan Manasés,
ma tiquitaca quenicatza timotanas huan techmanahuis ica mohueyi chic-
ahualis.

³ Toteco Dios, techchihua ma timocuepaca ica ta.
Techtachili ica se moxayac cati senpactoc.
Techicneli huan techmaquixti.

⁴ TOTECO, ta tiDios Cati Tijpiya Nochi Chicahualisti,
¿hasta quema tamis ticalantos ica tojuanti huan amo tijtacaquilis quema
timotatajtíaj?

⁵ Techmacatoc ma tijcuaca pantzi ica choquisti, huan ma tiquica toixayo.

⁶ Tijcajtoc ma techpinahualtica nopa talme cati techyahualohuj huan ma
techhuetzquilica tocualancaitacahua.

⁷ Toteco Dios, ta tiDios Cati Tijpiya Nochi Chicahualisti, xijchihua ma timo-
cuepaca ica ta.

Techtachili ica moxayac cati senpactoc.
Techicneli huan techmaquixti.

⁸ Techhualiac ten tali Egipto quej tielisquíaj se xocomeca tzonti cati selic.
Tiquinquixti nopa sequinoc masehualme cati amo mitzixmatque huan no-
pona techtojqui.

⁹ Tijcualtali nopa tali huan elqui quej tijpixque miyac tonelhuayohua.
Huan tijtemitijque nopa tali.

¹⁰ Nopa tepeme tiquintamitzajque ica toecahuil.

Huan tielque quej tiocuame cati huejcapantique cati moaxcagua, Toteco.

¹¹ Tichamanque huan moscaltijque tomacuayohua.

Huan toecahuil tiisraelitame ajsic hasta campa nopa hueyi at cati itoca
Mediterráneo huan hasta campa nopa hueyat Éufrates.

¹² Huajca ¿para ten ayecmo techmocuitahuía?

Eltoc quej tijtamisosolo itepanyo moxocomeca mil huan tijcagua ma quita-
micuaca nochi ojpayani.

¹³ Inijuanti itztoque quej cuapitzome cati hualahuij huan tapoxoníaj
yahualtic ten tojuanti,

huan eltoc quej nopa tecuanime ya techtamicuaj.

¹⁴ Yeca Toteco Dios Cati Tijpiya Nochi Chicahualisti timitztajtaníaj,
ximocuepa huan techtiochihua.

Techhualtachili ten nopona ilhuicac,
xiquita quenicatza tiitztoque huan xijmocuitahui ni moxocomecamil.

¹⁵ Quena, xijmocuitahui cati ta tijtojqui huan nopa ichamanca cati cuali
tijtatztquiltijtoc.

¹⁶ Pampa tocualancaitacahua techhuejhuelojtoque huan techtatijtoque.
¡Xiquintzontamilti ica mohueyi cualancayo!

¹⁷ Xijmzaca chicahualisti nopa telpocat cati tiquicnelía huan tijtapejpenijtoc
para tanahuatis.

¹⁸ Quej nopa ayecmo quema timitztahuelcahuase.

Techmaca yancuic nemilisti huan sempa timitznotzase huan timotatajtise
moixpa ta.

¹⁹ Techchihua ma timocuepaca sempa ica ta, TOTECO,
ta tiDios Cati Tijpiya Nochi Chicahualisti.

Sempa techtachili ica se moxayac cati senpactoc.

San ica ta motapalehuil timomaquixtise ten tocualancaitacahua.

81

Toteco quipiya hueyi iyolo ica nopa taixpanoca israelitame

¹ ¡Xihuicaca ica paquilisti para Toteco Dios,
pampa yaya techpíxtoc imaco!

¡Ma tijpaquilismacaca!

¡Ma tihuicaca para Toteco Dios yaya cati iTeco Jacob!

² Ma tihuicaca huan ma tijtziytzilínica pandero.

Nojquiya ma tijtztotzonaca nopa arpa huan guitarra.

³ Ma tijpitza tapitzali quema yancuic metzti,
quema temitoc metzti,

huan ipan sequinoc tonali quema tiilhuichihuj,

⁴ pampa Toteco Dios cati eli iTeco tohuejcapan tata Israel techmacatoc nopa
tonali para ma tipaquiica miyac.

Huan nojquiya eltoc ijcuilijtoc ipan itanahuatilhua para ma tijchihuaca.

⁵ Huan techmacac para ma tiquelnamiquica cati quichijqui ica José,
huan quenicatza motehui inihuaya nopa masehualme ten tali Egipto,
campa titetequipanojqe san tapic.

Nijcájqui camanaltic se cati amo niquixmatqui huan quiiyto:

⁶ “Ama nimechquixtilis nopa tamamali cati anquihuicaj amoajcoltipa,
huan ayecmo anquitananase ica amomax tamanti cati taniel etic.”

⁷ Nojquiya quiiyto:

“Amojuanti antechtaztziijque quema anitztoyaj ipan taohuijcyot huan na
nimechmaquixti.

Nimechnanquili hasta ten nepa tepet Sion campa motatía nopa tatomonilot.
Nojquiya ipan tali Meriba nimechyejyecohuili amotaneltoquilis quema an-
motequipachohuayayaj pampa amo oncayaya at.

⁸ Yeca annoisraelita masehualhua,
techtacaquilica quema chichahuac nimechtacahualtía.

⁹ Amo quema xijhueyichihuaca seyoc cati quitocaxtíaj ‘dios’.

Yon amo xiquinpiyaca taixcopincayome ipan amocalijtic.

¹⁰ Pampa elqui na, niamoTECO huan niamoDios,
cati nimechquixti ipan tali Egipto.

Xijtapoca amocamac huan anquuitase sinta amo nimechixhuitis.

Quena, anquiselise nochi tamanti tatiocihualisti cati amechpolohua.

¹¹ ¡Pero amo! Nomasehualhua amo quinejqe nechtacaquilise.

Israelitame amo quinejqe ma niitzo tatajco injuanti.

¹² Yeca niquintahuelcajqui para ma huihuiyaca huan ma elica quej popoy-
otzítzi.

Huan niquincahuili ma quichihuaca cati injuanti quinequiyayaj.

¹³ Pero sinta noisraelita masehualhua nechtacaquilijtosquíaj huan quito-
quilijtosquíaj noojhui,

¹⁴ huajca na san ipan se talojtzi niquinehcapantalijtosquía inincualan-
caitacahua huan niquintzontamiltijtosquía.”

¹⁵ Quena, nochi cati quicualancaitaj TOTECO,
nimantzi moehcapanojtosquíaj iixpa.

Huan itztosquíaj ipan tatzacuilitli para nochipa.

¹⁶ Pero Toteco Dios amechtamacasquía ica tacualisti cati más cuali.

Huan amechmacasquía sayolnecti huan nochi cati más anquinequij para
amechixhuitisquía.

82

Toteco quinajhuac nopa jueces cati amo tetajtolsencahuaj xitahuac

- ¹ Toteco Dios itztoc ipan se hueyi tasentilisti nepa ilhuicac.
Huan nopona tayolmelahua quenicatza quintatzacuilitis nopa jueces huan quinilhuía:
- ² “¿Hasta quema tamis antacajcayahuj quema antetajtolsencahuaj?
¿Hasta quema tamis anquinchicoicnelise amo cuajcualme cati fiero quichihuj?”
- ³ Xiquintenpalehuica cati ayemo quiipiyaj tetili huan cati icnotzitzí.
Xiquintajtolsencahuaca cati taijyohuíaj huan cati amo teno quiipiyaj.
- ⁴ Xiquinmaquixtica cati ayecmo quiipiyaj chicalhualisti huan quinquilohua ten ica panose.
- Quena, xiquinmanahuica inimaco nopa masehualme cati amo aqui quitepanitaj.
- ⁵ Amojuanti cati anquintajyohuilitaj amo teno anquimatij huan amo teno anquimachilitaj.
Annemij ipan tzintayohuilot huan nochi itzinpehualtil taltipacti huihuipica.
- ⁶ Quena, na nimechtocaxtijtoc ‘andioses’ huan ‘annoconehua niDios Cati Más Hueyi’,
⁷ pero quema hualas miquilisti, nimantzi anmiquise pampa amojuanti san anmasehualme.
Amopantis quej ipanti cati hueli masehuali cati quiipiya tequiticayot,
pampa nochi miquise.”
Quej nopa quiijto Toteco.

- ⁸ ¡Toteco Dios, ximotanana huan xijtajtolsencahua ni taltipacti,
pampa nochi moaxca!
Nochi talme huan tanahuatiani eltoque momaco.

83

Toteco, xiquintatzacuiliti cati quicualancaitaj Israel

- ¹ ¡Toteco Dios, amo san xitacacto,
yon amo san xitachixto quema timotatajtíaj!
Monequi technanquili huan techmanahui,
² pampa mocualancaitacahua tahuejchihuaj hasta quej nanalcaj huan mohueyimatij ica ta.
- ³ Inijuanti tahuel quimatij quenicatza quitalise taquetzti ica momasehualhua.
Huan quisencahuaj quenicatza quichihuase para quinmictise cati tiquin-tapejpenijtoc.
- ⁴ Huan quiijtohuaj:
“Ma tiyaca tiquinixpolotij nochi nopa israelitame para ayecmo ma elica se tali ica imasehualhua.
Huan ayecmo aquí quielnamiquis itoca Israel.”
- ⁵ Ya nopa cati quisencajque san sejco quema mosentilijque para mocamanalhuise.
Quena, san sejco quichijque se camanali para fiero mitzchihuulise.
- ⁶ Nopa masehualme elque iixhuihua Edom, Ismael, Agar huan Moab.
- ⁷ Nojquiya inijuanti hualajque ten nopa talme Gebal, Amón, Amalec, Filistea huan Tiro.
- ⁸ Huan nopa masehualme ten tali Asiria nojquiya mosejcotilijque inihuaya.

Nojquiya iixhuihua Lot.

⁹ Xiquinchihuili san se quej tiquinchihuili tali Madián ehuani, o quej tijchihuili Sísara huan Jabín ehuani ipan hueyat Cisón.

¹⁰ O xiquinchihuili quej tijchijqui ica mocualancaitacahua ipan tali Endor. Inijuanti inintacayohua mocajque tepejtoque talchi huan elque quej abono para tali.

¹¹ Xijchihua para nopa tacame cati tahuel tejteique ma miquica quej Oreb huan Zeeb quinmictijque.

Huan nojquiya xijchihua para inintayacancahua ma miquica quej nopa tanahuatiani Zeba huan Zalmuna.

¹² Pampa inijuanti quijtoque:
“Ma timoaxcatica nopa tali cati iaxca Dios.”

¹³ NoTeco Dios, xiquinsemana ica moijyoyo quej elisquíaj taltepocti, o quej tasoli cati quihuica ajacat,

¹⁴ o quej se hueyi tit cati quitamitatía se cuatitamit.

¹⁵ Xiquinquixti ica huejhueyi tit, ica tatomonilot, huan ica huejhueyi ajcomalacat.

¹⁶ TOTECO, xiquinpinahualti nochi hasta mitzixmatise ta huan mohueyi chichahualis.

¹⁷ Ayecmo ma quimatica taya quichihuase. Ma mopinahualtica huan ma huetzica ipan majmajti.

¹⁸ Quena, xiquinchihuili ya nopa hasta quimachilise para san ta tiTOTECO, huan para ta tiDios Cati Más Hueyi huan para san ta tijnahuatía nochi taltipacti.

84

Masehualme tahuel quinejque itztose ipan itiopa Toteco

¹ TOTECO, ta tiDios Cati Tijpiya Nochi Chicahualisti, tahuel cuajcualtzi motiopa.

² Nelía tahuel nijnequi nicalaquis ipan icalixpa nopa tiopamit, para nimonechcahuis huan nihuícas ica nochi noyolo para ta, Toteco Dios, cati tiitztoc.

³ TOTECO, ta tiDios Cati Tijpiya Nochi Chicahualisti. Ta tinotahuatijca huan tinoTeco.

Campa motaixpa ipan mochaj nochi quipantíaj ininchaj, hasta nopa cochome huan tiopan tachpanani cati nozona motepasoltíaj, para nozona quintacatiltíaj ininconehua.

⁴ ¡Nelía paquij nopa masehualme cati itztoque ipan motiopa huan quisenhuiquilíaj mitzpaquilismacaj!

⁵ Cualí ininpanti nopa masehualme cati itztoque momaco, Toteco, huan quitoquilíaj moojhui huan yahuij Jerusalén para mitzhueyimatise.

⁶ Quema panose campa ohui huan ipan nopa tamayamit ten Choquisti, quipatase para elis quej se cuajcualtzi ameli cati temitos ica at quema huetzi at,

pampa nozona quipantise miyac tatiochihualisti.

⁷ Huan quej nopa nejnentiyase mojmosta ica más chichahualisti, huan ajsise ipan Jerusalén para nozona monextise moixpa, Toteco.

⁸ TOTECO Dios, ta tiDios Cati Tijpiya Nochi Chicahualisti, techtacaquili quema nimotatajtía.

Quena, techtacaquili ta tiiTeco Israel.

⁹ Toteco, ta cati techmanahuía.

Xijcualita huan xijtiochihua nopa tanahuatijquet cati ticaltijtoc para tanahuatis ipan Israel.

¹⁰ Achi más cuali ma niyolto se tonal huan ma niitzto ipan motiopa, Toteco, huan amo niyoltos se mil tonali huan san ninentinemis campá huéli.

Quena, achi más cuali san nimoquetzasquía campá icalte motiopa, Toteco, huan amo niitztos ipan se hueyi cali campá onca tajtacoli.

¹¹ Pampa ta, Toteco Dios, techtaahuilía huan techmanahuía.

Ta techicnelía huan techhueyitalía.

Huan nochi cati monejnemiltíaj xitahuac ipan moojhui, ta tiquinmacas nochi tamanti cuajcuali cati inijuanti quinequij.

¹² Toteco Dios, ta tiDios Cati Tijpiya Nochi Chicahualisti, nelía paquij nopa masehualme cati motemachíaj ipan ta para tiquinmocuitahuis.

85

Netatajtili para Toteco ma quintasojta nopa israelitame

¹ TOTEKO, ta techtitanilijtoc miyac tatiochihualisti cati cuajcualtzitzi ipan ni tali,

pampa sempa tiquinhualicac nica iixhuihua Jacob cati itztoyaj ipan sequinoc talme.

² Tiquinquixtili inintaixpanolhua nochi momasehualhua.

Quena, tijtalpacho nochi inintajtacolhua.

³ Timoyoltali ica tojuanti huan ayecmo tahuel ticalantoc.

⁴ NoTeco Dios, ta cati titemaquixtía,

ama xijchihua para sempa ma timitzicnelica para ayecmo quema techajsis mohueyi cualancayo.

⁵ ¿O huelis tijsenhuiquilis ticalantos ica tojuanti para nochipa?

¿O huelis tijhueyilis mohueyi cualancayo para nochi xihuit?

⁶ Toteco Dios, sempa techtanana,

huan tojuanti timomasehualhua sempa timopaquilismacase ipan ta.

⁷ TOTEKO, technextili mohueyi taicnelilis,

huan techmaquixti.

⁸ Na nijtacaquilijtoc nochi cati quijtohua TOTEKO Dios,

pampa yaya quincamanalhuis itatzetzeloltica masehualhua cati quintapejpenijtoc.

Huan cati quijtos quinmacas tasehuilisti ipan iniyolo,

para inijuanti ma ayecmo mocuepaca ipan nopa ojti ten huihuiyot campá nemiyayaj ipan tajtacoli.

⁹ Melahuac Toteco Dios itztoc nechca para quinmaquixtis masehualme cati quitepanitaj huan quiimacasiq quiixpanose.

Se tonali ihueyitilis Toteco quitemitis total.

¹⁰ Campa huéli oncas taicnelijcayot huan cati melahuac.

Campa huéli nochi quimatise para quichihuase nochi cati xitahuac huan quej nopa oncas tasehuilisti campá huéli.

¹¹ Cati melahuac elis campá huéli ipan taltipacti,

huan yaya cati senquisa xitahuac hualtachixtos ten nepa ilhuicac huan paquis ica cati quiitas.

¹² Quena, TOTEKO quititanis itatiochihual ipan ni total, huan nochi cati tijtocase temacas itajca.

¹³ Campa huéli campá yas Toteco oncas cati melahuac,

huan nochipa iojhui elis xitahuac.

86

Netatajtili para Toteco ma quipalehui

¹ TOTECO, ximohuijtzoma quentzi huan techtacaquili quema nimotatajtía. Technanquili pampa niteicneltzi huan niitztoc ipan tequipacholi huan taohuijcaýot.

² NoTeco Dios, techmanahui pampa na nijchihua campeca para nijchihuas cati quijtohuaj motanahuatilhua.

Techmaquixti pampa na nimitztequipanohua huan san ipan ta nimotemachía para techmocuitahuis.

³ TOTECO, xijpiya hueyi moyolo ica na pampa nochi se tonal nimitztzajtzi-
jtoc,

huan ipan ta nimochiya para techpalehuis.

⁴ Toteco, techmaca paquilisti pampa na san ta nimitzhueyichihua.

⁵ Toteco, ta nelía ticuali huan timoquetztoc timocualtalijtoc para titetapojpol-
huis.

Tiquininelía huan nimantzi tiquintasoja nochi cati mitztajtaníaj motapale-
huil.

⁶ TOTECO, techtacaquili quema nimotatajtía.

Quena, techtacaquili quema nimitztzajtzilía.

⁷ Nimitztzajtzilís ipan nopa tonali quema nechajsis taohuijcaýot, pampa san ta technanquiliía huan techpalehuía.

⁸ Ipan nochi sequinoc cati quintocaxtiaj “dioses”,
amo onca seyoc quej ta, Toteco.

Huan amo aquí hueli quichihua huejhueyi tamanti quej ta tijchihua.

⁹ Elqui ta cati tiquinchijchijqui nochi talme ica inimasehualhua.

Yeca hualase huan mitzhueyichihuase, Toteco.

Huan mitzhueyitalise ta cati titatzejzeloltic,

¹⁰ pampa ta tahuel tihueyi huan tijchihua huejhueyi tamanti.

¡San ta nelía tiDios!

¹¹ TOTECO, technextili moojhui huan nijtoquilis pampa san ya nopa
temachti.

Xijchihua para noyolo ma mitzhueyitepanita,
huan ma quiimacasi mitzixpanos nochi nonemilis.

¹² TOTECO Dios, nimitzpaquilismacas ica nochi noyolo huan nimitzhueyi-
talis para nochipa,

¹³ pampa tahuel hueyi motaicnelilis ica na,
huan amo quema tami.

Ta techmanahuijtoc para amo niyas micta campa tanahuatía miquilisti.

¹⁴ Toteco Dios, miyac masehualme cati mohueyimatij huan cati mosisiníaj
motanantoque para nechtehuise.

Huan miyac tatehuijca masehualme huan taixpanoni quinequij nechmic-
tise,

huan amo moyolilhuíaj ten ta.

¹⁵ Pero ta Toteco nelía titetasojta huan hueyi moyolo.

Amo nimantzi ticualani.

San ta titeicnelía huan san ta timelahuac.

¹⁶ Techtachili ica miyac taicnelijcaýot huan techmaca chichualisti na ni-
motequipanojca.

Huan xijmanahui icone mosihua tequipanojca.

17 Xijnnexti se tanextili para ta techcualita.
Quej nopa quuitase nocualancaitacahua,
huan pinahuase pampa momacase cuenta para ta, TOTECO,
tahuel techpalehuía huan techyoltalía.

87

Nelía elis se hueyi paquilisti para cati ehuaní altepet Jerusalén

- 1 Altepet Jerusalén eltoc ípan nopa tepet tatzetzeloltic cati íaxca Toteco.
- 2 Huan TOTECO quíicnelía Jerusalén achi más que nopa sequinoc pilaltep-zitzi ípan talí Israel.
- 3 Quena, Jerusalén eltoc íaltepe Toteco Dios, huan quema masehualme quíelnamiqúij, camanaltij nelcuajcualtzi ten nopa altepet.
- 4 Quema tatajco nohuampoyohua níquintocaxtía nopa talme cati ínintoca Egipto, Babilonia, Filístea, Tiro huan Etiopía, ítztsos se cati mohueyimatis pampa tacatqui ípan se ten nopa talme.
- 5 Pero ajsis tonalí quema masehualme quíselise más hueyi tatepanitacayot pampa tacatque ípan altepet Jerusalén, pampa Toteco Cati Más Hueyi quítiochihuas ní altepet.
- 6 Huan TOTECO quíijcuilos ínintoca nochi cati ítztoque ípan nopa altepet. Huan nochi cati tacatque nozona quíntalílis se tanextili campá íjcuíljitos ínintoca.
- 7 Huan quema ílhuichihuase ínijuanti, huicase íca paquilisti huan quíijtose: “Nochi noyolo níjtaljtoc ípan Jerusalén.”

88

Netatajtíli para Toteco ma químanahuí ímaco míquílísti

- 1 TOTECO, ta cati tínoDios huan tínotemaquíxtijca. Tonaya huan tayohua nímitztajtzilíjtoc para techpalehuí.
- 2 Techacaquílí quema nímotatajtía huan quema nímitztajtzilía,
- 3 pampa níjmatí nísiyajtoc íca nochi cati amo cualí hasta níjmatí ya nechcatí-toc para nímiqúis.
- 4 Míyac quíijtohuaj para ya tantínemí nonemílís huan para ayecmo níjpiya chícahualísti.
- 5 Masehualme nechtahuelcajtoque para ma nímiqúí. Níitztoc quej se cati ya míjquí ípan tatehuílísti huan nochi quíelcahuaj sínta ítztoya.
- Huan eltoc quej ta techelcajquí huan ayecmo techmocuítahuía.
- 6 Ta techmajajtoc ípan nopa ostot cati más huejcata campá onca tzintay-ohuílot cati más yayahuí.
- 7 Mocualanayo nechtaíjyohuíltía chícahuac huan talojtzitzi nechtaztintan-huetziltía más.
- 8 Tíjchíjtoc para notéixmatcahua ma nechtahuelcahuaca huan ma nechjíjy-aca.
- Eltoc quej níitztoc ípan se tazactí huan amo huélí níquísa.
- 9 Ayecmo huélí nítachíya pampa tahuel nímochoquílíjtoc. Mójmosta nímitztajtanía motapalehuíl, huan nímotatanana quema nímotatajtía íca ta, TOTECO, para techtasojta.
- 10 Pero níjmachílía para, quena, nímiqúis nímantzi,

huan ¿taya ipati elis para na nopa tiochicahualnescayot cati tijchihuas
quema ya nimictoc?

¡Amo teno! ¿Huelis nimitzpaquilismacas quema ya nimictos?

¹¹ Se mijcatzi cati ya quitalpachojtoque amo huelis tepohuilis para tijpiya
hueyi taicnelili.

Amo huelis tepohuilis para titemachti.

¹² Nepa campa tzintayohua amo huelise tepohuilise nopa huejhueyi tiochic-
ahualnescayot cati tijchihua.

Mijcatzitzi itztoque ipan se tali campa ayecmo teno quielnamiqij,
huan amo huelis mitzelnamiqise para san ta tixitahuac.

¹³ Pero na nimitztzajtzilijtoc ta TOTECO,

huan sese ijnaloc nochi cati niqijtohua quema nimotatajtía ica ta ajsi hasta
moixpa.

¹⁴ TOTECO, ¿para ten tijhuejcamajcajtoc nonemilis?

¿Para ten tiqijcuenía moxayac huan titachiya sejcayoc?

¹⁵ Na niitztoc ipan taijyohuili huan tequipacholi hasta quema noja niitztoya
nitelpocat.

Majmajti huan miqulisti cati ta techtitanilijtoc nechtoquiliijtinemi,
huan ama ayecmo nihueli más niqijyohuía.

¹⁶ Miyac huelta hualajtoc ipan na mohueyi cualancayo,

huan nopa majmajti cati techtitanilijtoc tahuel nechtaijyohuiltía.

¹⁷ Quena, nochi nopa tamanti nechyahualojtoc quej at.

¹⁸ Nochi cati niquinicnelía huan cati eliyayaj nohuampoyohua tiquinchijtoc
ma nechtahuelcahuaca,
ayecmo nechchihuiliáj cuenta.

Huan noteixmatcahua tiquintalijtoc ipan tzintayohuilot.

89

Nopa camanal sencahuali cati Toteco quichijqui ihuaya David

¹ Nimitzhuicatis, TOTECO, para nochipa pampa tahuel hueyi moyolo ica na.
Quena, nochi telpocame huan huehuentzitzí niquinpohuilis para ta nelía
titemachti.

² Na niqijto: “Ta titetasojtas para nochipa.

Huan nochipa tiitztos titemachti san quej para nochipa huejcahuas il-
huicacti campa tiitztoc.”

³ Ta tiqijtojtoc para tijchijqui se camanal sencahuali ica motequipanojca
David cati tijtapejpenijtoc.

Titatestigojquetzqui ten taya tijchihuulis.

⁴ Tiqilhui para se iixhui mosehuis ipan isiyaj campa yaya tanahuatía,
huan nopoña tanahuatis para nochipa.

⁵ TOTECO, cati itztoque ipan ilhuicac mitzpaquilismacaj por nochi nopa
tiochicahualnescayot cati tijchihua.

Huan miyac millones moilhuicac ejcahua mitzhueyimatise pampa
titemachti.

⁶ Pampa ipan nochi ilhuicac amo aqui seyoc cati san se quej ta, Toteco Dios.
Huan yon se ilhuicac ejquet amo quiapiya chicahualisti quej cati tijpiya ta,
Toteco.

⁷ Toteco Dios, ta nelía tihueyi huan titemajmati.

Nochi motatzejtzeltitjca ilhuicac ehuaní mitztepanitaj.

Quena, nochi cati mitzyahualojtoque, majmahuij quema moquetzaj
moixpa.

8 TOTECO, ta tiDios Cati Tijpiya Nochi Chicahualisti,
 ¿ajquiya seyoc tahuel quipiya chicahualisti quej ta?

¡Amo aquí seyoc! San ta TOTECO tahuel tijpiya chicahualisti.
 San ta nelía titemachti.

9 San ta tihueli tijtacahualtía nopa hueyi at quema mosisinía huan mocox-
 onía chicahuac.

Tijtacahualtía huan quichihua cati tiquilhuía.

10 Ta tijzontamilti nopa cati temajmatiyaya ipan hueyi at.
 Ica mohueyi chicahualis tiquinsemanqui mocualancaitacahua.

11 Ta moaxca ilhuicacti, taltipacti huan nochi cati onca,
 pampa nochi tijchijchijqui ta.

12 Tijchijchijqui nopa norte huan sur.

Nopa tepeme Tabor huan Hermón paquij pampa ta tiquinchijchijqui.

13 Moajcol tahuel quipiya chicahualisti.

Huan monejmat quipiya tetili huan miyac yajatili para tatanis.

14 Motanahuatilis motatzquilijtoc ipan ome tamanti:
 Titetajtolsencahua xitahuac huan tijchihua cati cuali.

Titeicnelía huan tiquijtohua cati melahuac.

15 Nelía paquij nopa masehualme cati quicaquij nopa tapitzali cati quinnotza
 ma mitzhueyichihuaca, TOTECO.

Inijuanti nemise nelía monechca huan ta tiquintaahuilis.

16 Semilhuit mopaquilismacase ipan ta pampa tahuel tihueyi huan tixi-
 tahuac.

17 Pampa san ta tijpiya mohueyitilis huan tiquin fuerzajmaca.

Timasehualme tijpiyaj chicahualisti pampa ta techpalehuía.

18 Quena, Toteco Dios, ta cati titatzejtzeloctic techmocuitahuía tojuanti ipan
 tali Israel.

Ta titotanahuatijca.

19 Ipan se tanextili tijcamanalhui motatzejtzeloctic profeta huan tiquilhui:
 “Ten nochi masehualme nijtapepenijtoc se cuajcualtzi tellocat cati tahuel
 motemaca,

huan nijtequitali ma eli tanahuatijquet para na.

20 Quena, nijpantijtoc notequipanojca David huan nicaltijtoc ica nopa aceite
 cati ica niteiyocatalía para ma nechtequipanoca.

21 Nijchihuas ma eli temachti huan nijmacas chicahualisti.

22 Amo quiechcapantalise icualancaitacahua,
 yon amo quitanise taixpanoca masehualme.

23 Iixpa nijquintzontamiltis icualancaitacahua huan nochi cati quicualan-
 caitaj.

24 Na cati nitemachti nijmocuitahuis huan nijtiochihuas talojtzitzi,
 huan tahuel miyac niquicnelis.

Ica na notapalehuil yaya elis tahuel hueyi.

25 Na nijchihuas para itanahuatilis pehuas campa hueyat Eufrates,
 huan tamis hasta campa hueyi at cati itoca Mediterráneo.

26 Huan yaya nechtzajtzilis huan nechilhuis:

‘¡Ta tinoTafa, ta tinoTeco Dios!

Ta cati techmaquixtía huan techtatía para amo teno nechajsis.’

27 Na niquitas nopa tanahuatijquet quej noachtohui cone.

Nijchihuas para yaya ma eli nopa tanahuatijquet cati más hueyi ipan nochi
 taltipacti.

28 Niquicnelis para nochipa huan para nochipa nijchihuilis cati cuali.

Huan nopa camanal sencahuali cati nijchijtoc ihuaya, amo quema tamis.

²⁹ Na nijtequimacas se iixhui para ma tanahuatis campa yaya tanahu-
atiyaya.

Itanahuatilis huejcahuas para nochipa quej huejcahuas ilhuicacti.

³⁰ Pero sinta iconehua quitahuelcahuase noley huan amo monejnemiltise
quej quijtohua notamachtil,

³¹ o sinta quixpanose cati niquinnahuatijtoc ma quichihuaca ipan inine-
milis huan amo quintepanitase notanahuatilhua,

³² huajca niquintatzacuilitis pampa ya nopa quinextis para amo nechnelto-
catoque huan tajtacolchihua.

³³ Pero amo nijcahuas niquinicnelis,
yon amo nijtamiltis nopa camanali cati nijchijtoc inihuaya.

³⁴ Amo niquelcahuas cati ica nimocajtoc David huan amo nijpatas noca-
manal.

³⁵ Pampa na nitatestigojquetzqui para nijchihuilis David nochi cati nijtaj-
tolcahuilijtoc.

Huan na niDios cati nitatzetzceloltic amo hueli niistacatis.

³⁶ Iixhui mosehuis huan tanahuatis para nochipa campa ya mosehui.

Itanahuatilis huejcahuas san quej imiyaca tonali taahuijtos tonati.

³⁷ Quena, itanahuatilis tahuel huejcahuas quej huejcahuas metzti,
o quej huejcahuas nochi cati eltoc ipan ilhuicac cati eltoque quej notestigos.”
Quena, quej nopa tiqijto, Toteco.

³⁸ ¿Huajca para ten techtahuelcahua huan techhuejcamajcahua?

¿Para ten tahuel ticalani ica yaya cati tijtapejpenijtoc para elis tanahuatij-
quet?

³⁹ ¿Tijsoolojtoc nopa camanali cati tijchijqui ihuaya?

Pampa eltoc quej tijtahuiso icorona hasta talchi.

⁴⁰ Tiquincahuili tocualancaitacahua ma quihuelonica nopa tepamit cati
yahualtic quitzacuayaya toaltepe.

Huan quitamisosoljque nopa calme cati huejcapantique campa timo-
manahuiyaya.

⁴¹ Nochi cati panoj nozona quichtequij cati injuanti quinequij.

Huan nopa masehualme cati itztoque tonechca san techhuetzquilíaj.

⁴² Tiquinfuerzajmacatoc tocualancaitacahua,
huan tiqinchijtoc ma paquica pampa techtantoque.

⁴³ Tijquixtili itatequiyo tomacheta cati ica titatehuiyaya,
huan amo tijnejqui techpalehuis para ma titatanica.

⁴⁴ Techquixtili noyejejeica huan tijtahuisojtoc hasta talchi notanahuatilis.

⁴⁵ Techchijtoc ma nitalochhuehuejtiya huan techpinahualtijtoc iniixpa
nochi masehualme.

⁴⁶ TOTECO, ¿hasta quema tamis ticalantos?

¿Hasta quema noja timotatijtos ten tojuanti?

¿Mohueyi cualancayo eltos quej tit para nochipa?

⁴⁷ ¡Toteco, xiquelnamiqui para tonemilis amo huejcahuas ipan ni taltipacti!

¿Huelis timoilhuía amo teno ipati nopa nemilisti cati tiquinmacatoc nochi
masehualme?

⁴⁸ Yon se masehuali amo huelis itztos para nochipa. ¡Nochi miquise!

¿Ajquiya huelis quimanahuis inemilis imaco miquilisti?

⁴⁹ NoTeco Dios, ¿canque eltoc motaicnelilis ten huejcaquiya?

¿Para ten ayecmo tijpiya hueyi moyolo ica tojuanti?

Ta tiToteco cati titemachtí, tijtajtolcahuili David para melahuac amo quema
techtahuelcahuas.

- 50 TOTECO, xijtachili quenicatza nochi masehualme techcualancaitaj tojuanti timomasehualhua.
- 51 Mocualancaitacahua quipinahualtiaj yaya cati tijtapejpenijtoc para elis tanahuatijquet.
- 52 Ma tijpaquilismacaca TOTECO para nochipa. Quej nopa ma eli.

90

Masehualme amo huejcahuaj

- 1 Toteco, ta nochipa techmocuitahuijtinencot, hasta ten ipejya nochi xihuit huan para nochi tonali.
- 2 Hasta quema ayemo tiquinchijchihuayaya tepeme huan taltipacti, ta ipa tiitztoc.
- Pampa ta, tiToteco Dios, amo quema tijpixqui mopejya, huan amo quema tijpiyas motamiya.
- 3 Ta tijchihua para nochi masehualme ma mocuepaca tali. Quena, ticamanalti huan tiquijtohua: “Ximiquica anmasehualme.”
- 4 Pampa mil xihuit ta tiquita quej se tonal cati panoc yalohua, o quej elisquia se eyi hora quema se tamocuitahuyaya tayohua.
- 5 Tonemilis motalojti quej at cati hualtemo chichahuac ipan se atajti. Huan ica se talojtzi tiixpolijtehuaj quej se temicti. Nojquiya tiitztoque quej se xihui cuahuit.
- 6 Ica ijnaloc moscaltia huan cahuani, huan ica tiotac quitzontequij huan huaqui.
- 7 Pampa ica mohueyi cualancayo techtaijyohuiltia huan techtzontamiltia.
- 8 Totajtacolhua huan totaixpanolhua tanemijya nestoc moixpa.
- 9 Yeca nochi tonali huan nochi xihuit tijpanoj huejhueyi taohuijcajot, cati ta techtitanilia ica mohueyi cualancayo.
- 10 San techcahuilia timasehualme ma tiitztoaca setenta xihuit. Huan cati quentzi más tejteique san tiquincahuilia ma itztoca ochenta xihuit.
- Pero ipan nochi nopa xihuit san tijpanoj taohuijcajot huan tequipacholi, pampa nochi nopa xihuit san panotiquisa huan tojuanti san tiixpolijtehuaj.
- 11 ¿Ajquiya quimachilia nochi cati tihueli tijchihuas quema ticualani? ¿Ajquiya ten tojuanti mitzimacasi quej quinamiqui?
- 12 Amo miyac tonali tijpiyaj, huajca technextili quenicatza ma tijchihuaca para amo timotonalpolose, huan para ma tijpiyaca talnamiquilisti ipan toyolo nochi tonali.
- 13 TOTECO, xihuala huan techtiochihua. ¿Hasta quema tamis ticualantos? Techtasojta tojuanti timotequipanojcahua.
- 14 Mojmosta ica ijnaloc technextili motaicnelilis, huan nochi tonemilis timitzhuicatise huan tiyolpactose.
- 15 Toteco, techmaca paquilisti quej ipataca nopa taohuijcajot cati tijpanoque.
- Huan techcahuili ma tiitztoaca ica cuajcualtzi para miyac xihuit, quej imiyaca nopa xihuit quema tijpanoque tamanti cati fiero.
- 16 Xijchihua para sempa ma tiquitaca nopa huejhueyi tiochichualnescayot cati tijchihua.

Huan toconehua ma quitaca nochi nopa cuajcualtzitzi tamanti san se quej tijchihuayaya achtohuiya.

¹⁷ TOTECO, ta titoDios,

techtaahuilía ica motatanex huan technextilía para techcualita.

Techpalehui para nochi cati tijchihuase ma quisa cuali huan ma huejcahuas. Quena, Toteco, ma cualquisa nochi cati toma quichihuas pampa ta techfuerzajmaca.

91

Ma timotatzquilijtocha ipan Toteco

¹ Cati motatzquilijtoc ipan Toteco Dios Cati Más Hueyi itztos temachti imaco, pampa mocahuas ica Toteco Cati Quipiya Nochi Chicahualisti.

² Huan na niqijtos ten TOTECO para yaya nechmocuitahuía ica ihueyi chicahualis.

Yaya noTeco Dios huan san ipan ya nimotemachía.

³ Pampa san yaya hueli mitzmanahuis ten nochi taquetzti cati sequinoc quitatise para mitzmasiltise.

Mitzmocuitahuis para amo mitzajsis nopa cocolisti cati tetzontamiltía.

⁴ Quej se tenampiyo quintatía ipilconehua ieltapaltzala,

Toteco quej nopa nojquiya mitzmocuitahuía.

Temachti mitzchihuilis nochi cati mitztajtolcahuilijtoc, pampa timotemachijtoc ipan ya para mitzmanahuis.

⁵ Huajca ama ayecmo ximajmahui ica tayohua, yon amo xiquimacasi cati hueli panos ipan tonaya.

⁶ Amo xiquimacasi nopa taijyohuilisti cati huala ipan tzintayohuilot, yon nopa miqulisti cati ajsi ica tajcotona.

⁷ Masque monechca miquise mil o majtacti mil masehualme, ta amo mitzajsis.

⁸ Ica moixteyol tiquitas quenicatza quiselise tatzacuiliti nopa taixpanoca tacame.

⁹ Sinta timotemachijtoc ipan TOTECO para mitzmocuitahuis, huan timochiya ipan Toteco Cati Más Hueyi para mitzpalehuis,

¹⁰ huajca amo mitzajsis yon se tamanti cati amo cuali,

yon amo quiajsis mochaj.

¹¹ Pampa Toteco quintitanis ilhuicac ehuan para ma mitzmocuitahuica, huan mitzmocuitahuijtinemise campá hueli campá tiyas.

¹² Huan ilhuicac ehuan mitztananase ica inimax para amo timotepotanis ipan ojti.

¹³ Yon amo timajmahuis masque tijquetzas moicxi ipan se león o se cohuat cati temictía.

Quena, amo teno mopantis masque timoquejquetzas ininpani.

¹⁴ Pampa Toteco Dios quiijtohua:

“Na nijmanahuis pampa nechicnelía.

Nijhueyitalis pampa motemachía ipan na.

¹⁵ Quema nechztajtzilis, na nijnanquilis.

Nojquiya niitstos ihuaya quema quiipiyas tequipacholi.

Nijmanahuis huan nijhueyitalis.

¹⁶ Nijchihuas ma itzto tahuel miyac xihuit huan nijmaquixtis.”

92

Xijpaquilismacaca Toteco

- 1 Nelía cuali para timitzhueyichihuase, TOTECO,
ta nopa Dios Cati Más tiHueyi.
Cuali ma timitzpaquilismacaca ica huicat.
- 2 Ica ijnaloc ma titepohuilica motaicnelilis pampa hueyi moyolo,
huan ica tapoyahui ma tipaquica miyac pampa nelía titemachti.
- 3 Ma tihuicaca huan ma titatzotzonaca ica nopa tatzotzonali cati itoca arpa,
guitarra huan lira.
- 4 NoTeco Dios, ta nelía techchihuilijtoc miyac tamanti cati cuali,
huan techchijtoc ma nipaqui.
Yeca nihuica ica miyac paquilisti.
- 5 ¡TOTECO, ta tijchihua huejhueyi tiochicahualnescayot!
¡Huan motalnamiqulis amo aqui hueli quimachilía!
- 6 Nopa masehualme cati huihuitique amo quimatij yon amo quimachilíaj.
- 7 Masehualme cati fiero ininemis motananaj huan mohueyichihuj ica
tamanti cati amo cuali,
pero amo quimatij para teipa quintzontamiltise huan ayecmo quema
motananase.
- 8 Pero ta tiTOTECO, mitzhueyitalijtose para nochipa pampa ta tiDios Cati Más
Hueyi.
- 9 Xiquita nica itztoque mocualancaitacahua, pero nojquiya nica tiquintzon-
tamiltis.
Quena, TOTECO, nochi masehualme cati quichihuj cati amo cuali, ta tiquin-
semanas.
- 10 Pero na techmacas chicahualisti quej se toro cati nemi cuatita.
Huan sempa techaltis ica moaceite cati temaca yancuic chicahualisti.
- 11 Niquitas quenicatza huetzise nocualancaitacahua.
Huan nijcaquis quenicatza quintzontamiltise nopa taixpanoca tacame cati
motanantoque ica na.
- 12 Pero cati itztoque xitahuacque iixpa Toteco quipiyase chicahualisti.
Elise cuajcualtzitzi quej ixochiyo apachijcuahuit.
Mohueyichihuase quej nopa tiocuame cati onca ipan tali Líbano.
- 13 Masehualme cati cuajcualme quipiyase chicahualisti quej cuame cati
quintoctoque ipan ichaj TOTECO,
huan Toteco Dios yaya quinmocuitahuis.
- 14 Huan quema nopa cuajcualme huehuejtijyase, noja quipiyase fuerza.
Itztose quej cuame cati temacase inintajca,
huan nochipa xoxohuixtose.
- 15 Huan ya nopa quinextis para TOTECO cati nechmocuitahuía quichihua
cati melahuac.
Nochipa yaya xitahuac tetajtolsencahua.

93

Toteco tahuel hueyi

- 1 ¡TOTECO tanahuatía!
Yaya tahuel hueyi hasta quipiya itatanex cati tahuel cuajcualtzi.
Quitatzquilti nelcuali ni taltipacti,
huan amo hueli mojmolinis ten itatzinpehualtil.

² Nochipa hasta ten huejcajquiya ta tijpixtoc tanahuatili,
huan nochi cati itztoque ipan motanahuatilis itztoque temachme.
San ta tiitztoc para nochipa.

³ TOTECO, nopa hueyame caquisti para mitzpaquilismacaj quema mocoxoníaj.

⁴ Pero ta, TOTECO, cati tiitztoc hasta huejcapa tijpiya más chichahualisti,
huan amo quej nopa at cati mocoxonía ipan nochi huejhueyi at ipan taltipacti.

⁵ Motanahuatilhua amo quema mopataj.

TOTECO, para nochi xihuit huan para nochi tonali motequiticayo eltoc senquisa tatzejzelolitic.

94

Netatajtili para Toteco ma quincuepili tocualancaitacahua

¹ TOTECO, ximonexti.

Ta tiDios cati tijpiya motequi para tiquincuepilis cati amo cuali techchihuilijtoque tocualancaitacahua.

² Ximotanana huan xijtatzacuulti ni tali.

Nochi cati mohueyimatij xiquintatzacuulti quej quinamiqui.

³ TOTECO, ¿hasta quema tamis tatanise huan mopaquilismacase nopa masehualme cati amo aquí quitepanitaj?

⁴ ¿Hasta quema tamis tetajilhuisse huan mohueyimatise nopa tajtacolchijca masehualme?

⁵ TOTECO, inijuanti tahuel quintajyohuiltíaj huan quinqequipacholmacaj momasehualhua cati tiquinicnelía.

⁶ Inijuanti quinmictíaj sihuame icnotzitzi cati ehuan ipan sequinoc altepeme huan cati icnotzitzi.

⁷ Huan quijjtohuaj para ta, TOTECO, amo tiquita,
yon amo timomaca cuenta.

Quej nopa quijjtohuaj ten ta cati tiTeco tohuejcapan tata Jacob.

⁸ Amojuanti cati anhuhuitique ten ni masehualme, xijmachilica.

¿Hasta quema anquitequihuisse amotalnamiquilis para antamachilise?

⁹ Toteco quichijchijqui tonacashua,
huajca ¿anmoilhuíaj para amo quicaquis cati anquijjtohuaj?

Yaya quichijchijqui toixteyol,

huajca ¿anmoilhuíaj para amo quiita cati anquichihua?

¹⁰ Yaya quintatzacuultía masehualme ipan nochi talme,

¿anmoilhuíaj amo amechtatzacuultis nojquiya?

Yaya quimati nochi cati pano,

huan ¿anmoilhuíaj amo quimati taya anquichihua?

¹¹ TOTECO quiximati initalnamiquilis masehualme huan quimati para san moilhuíaj tamanti cati amo cuali.

¹² Pero cuali ininpanti nopa masehualme cati ta, TOTECO,
tiquintatzacuultía para tiquintalnamictis.

Ya nopa quinpalehuía para quitoquilise moojhui,
huan para monejnemiltise xitahuac ipan motanahuatilhua.

¹³ Huan para itztose ica paquilisti quema ajsis nopa tonali cati fiero.

Pero nopa masehualme cati amo quitepanitaj TOTECO mochihuiliáj se ostot para ipan momasiltise huan motzontamiltise.

14 Pampa TOTECO amo quintahuelcahuas imasehualhua pampa inijuanti iaxcahua.

15 Se tonali Toteco tetajtolsencahuas xitahuac, huan nochi cati itztoque ica ininemilis xitahuac, inijuanti paquise miyac.

16 ¿Ajquiya nechmanahuis inimaco nopa mosisinijca masehualme?

¿Ajquiya nechmocuitahuis ten nopa taixpanoca masehualme?

17 Sinta Toteco amo nechpalehuijtosquía, huajca noyolo ya eltosquía campa tatzitzicatoc pampa ya nimictosquía.

18 Na nitzajtzc huan niqijto:

“TOTECO, moxitanía noicxihua.”

Huan yaya nechtasojtac huan nechmaquixti.

19 NoTeco, quema san nimoyolilhuía ten miyac tequipacholi huan san ya nopa nijmati,

ta techyoltalía.

Techchihua ma nimotemachi ipan ta huan techmaca paquilisti.

20 Se tanahuatijquet cati amo quichihua cati xitahuac, amo tijcahuas para mosentilis ica ta.

Yon amo itztoz mohuaya cati quichihua se tanahuatili cati amo xitahuac.

21 Pero tanahuatiani cati quej nopa tachihuaj, mosentilíaj huan mocamanalhuáj para quenicatza quimictise se cati amo teno quichijtoc, o se cati cuali monejnemiltía.

22 Pero TOTECO yaya nechmocuitahuía pampa tahuel miyac chicahualisti quiipiya.

Ipan noTeco Dios nimotatía huan amo teno huelis nechajsis pampa yaya nechmanahuía.

23 Huan Toteco Dios quichijtoc para ma huetzi ininpani nopa mosisinijca masehualme nochi nopa tamanti cati amo cuali quichijtoque.

Yaya quintzontamiltis senquisa quej quisencajtoyaj quinchihuilise sequinoc.

Quena, TOTECO toDios yaya quintzontamiltis.

95

Se huicat para tijpaquilismacase huan tijhueyichihuase Toteco

1 ¡Xihualaca, ma tihuicaca para TOTECO!

Quena, ma tihuicaca ica paquilisti para tijhueyimatise Toteco cati techmaquixtía huan techtatía para amo teno techajsis.

2 Ma tiyaca iixpa Toteco para tijtascamatise ica nochi toyolo.

Ma tijpaquilismacaca ica huicat.

3 Pampa TOTECO yaya se Dios Cati Tahuel Hueyi.

Yaya nopa Hueyi Tanahuatijquet huan amo quej nochi sequinoc taixcopincayome cati masehualme quinhueyichihuaj.

4 Imaco eltoc nochi nopa ostot cati más huejcata huan nopa tepeme cati más huejcapantique.

Nochi iaxca ya.

5 Yaya iaxca nopa hueyi at huan taltipacti, pampa yaya quichijchijqui.

6 Xihualaca, ma tijhueyichihuaca huan ma timoixtapachoca iixpa TOTECO, yaya cati techchijchijqui.

7 Pampa yaya toDios huan tojuanti tiimasehualhua.

Tiitztoque quej tiiborregojhua cati yaya quinmocuitahuá.

Xijtacaquilica ama cati quijtohua Toteco:

8 “Amo ximoyoltelica quej israelitame quichijque huejcajquiya ipan nopa huactoc tali cati itoca Meriba huan Masah.

9 Nopona amohuejcapán tatahua necheyejecojque para quuitase taya nijchihuas.

Huan quichijque ya ni masque ipa ya quitztoyaj nopa huejhueyi tiochicahualnescayot cati na nijchijtoya inixpa.

10 Para cuarenta xihuit nicualantoya inihuaya,

pampa iniyolo huan inintalnamiqullis eltoya huejca ten na.

Huan hasta ama amo motemacatoque qitoquilise notanahuatilhua.

11 Yeca ica nohueyi cualancayo nitatestigojquetzqui para amo quema calaquise campa nijsencajtoya ma mosiyajquetzaca.”

96

Huicat para tijpaquilismacase Toteco

1 Nochi cati anitztoque ipan taltipacti, xihuicaca para TOTECO.

Quena, xihuicaca se huicat yancuic.

2 Ma tijhuicatica TOTECO por nochi cati quichijtoc.

Ma tijpaquilismacaca huan ma tijtascamatica por nochi cati techchihuilijtoc.

Huan mojmosta ma titepohuilica para yaya temaquixtía.

3 Ipan nochi taltipacti ma titepohuilica ihueyitilis huan nochi tamanti cuajcualtzi cati quichijtoc.

Huan nochi masehualme ma tiqinpohuilica nopa huejhueyi tamanti cati yaya quichihua.

4 Pampa TOTECO nelía taniel hueyi huan quinamiqui ma tijhueyimatica.

San yaya nelía temajmati huan ne sequinoc cati masehualme quintocaxtíaj dioses, amo.

5 Pampa nochi nopa dioses cati quinhueyichihuaj ipan sequinoc talme, amo teno ininpati.

Inijuanti san elij teteyome cati masehualme quinchijchijtoque.

Pero TOTECO yaya quichijchijqui ilhuicacti.

6 Campa itztoc Toteco senquisa onca itatanex huan temitoc ica ihueyitilis.

Huan ipan itioya onca ichicahualis huan iyejeyca.

7 Nochi anmasehualme ten nochi taltipacti, xitepohuilica para san TOTECO quiapiya chicahualisti huan san yaya hueyi.

8 Xijtepanitaca TOTECO quej quinamiqui.

Xijhualiquilica tacajcahualisti huan xiyaca icalixpa itioya.

9 Xihualaca huan xijhueyichihuaca TOTECO.

Quena, xijhueyichihuaca ica se amonemilis cati cuajcualtzi huan tatzejtzeloltic.

Huan nochi taltipacti ma huihuipica iixpa.

10 Xiquinpohuilica nochi talme para Toteco tanahuatía.

Taltipacti qitalijtoc cuali huan amo quema mijcuenis campa quitatzquiltijtoc.

Huan Toteco Dios xitahuac quintajtolsencahuas nochi altepeme.

11 ¡Ma paqui ilhuicacti huan nochi taltipacti!
 ¡Nochi huejhueyi at ma mocoxonica iixpa Toteco ica paquilisti!
 12 ¡Ma paqui nopa cuatitamit huan nochi cati onca,
 pampa nochi cuame quinextíaj para Toteco tahuel hueyi!
 Quena, ma tzajtza nopa cuame para quipaquilismacase TOTECO,
 13 pampa yaya huala.
 Quena, yaya hualas para quintajtolsencahuas cati itztoque ipan ni taltipacti.
 Quena, quintajtolsencahuas masehualme ipan nochi altepeme quej
 quinamiqui.
 Quena, quema tetajtolsencahuas,
 nochi quimatise para quichihua cati melahuac.

97

Toteco nochi quinahuatía

1 ¡Nochi taltipacti ma paqui pampa TOTECO tanahuatía!
 Huan nochi nopa pilaltepertzitzi cati mopantíaj tatajco hueyi at,
 xiquinilhuica nojquiya ma paquica.
 2 Mixti huan tzintayohuilot quiyahualojtoc Toteco.
 Huan itanahuatilis pejtoc ipan cati melahuac huan cati xitahuac.
 3 Iixpa tayacanti se tit cati quintzontamiltía icualancaitacahua.
 4 Nopa tapetanilot cati yaya quititani quitaahuilía nochi taltipacti.
 Huan ni taltipacti huihuipica quema quiita.
 5 Nochi tepeme atiyaj quej cera iixpa TOTECO cati iaxca nochi taltipacti.
 6 Ilhuicacti tayolmelahua para Toteco xitahuac tetajtolsencahua.
 Huan nochi taltipacti quiita ihueyitilis.
 7 Ma pinahuaca nochi cati quinhueyichihua teteyome,
 huan nochi cati mohueymatij ica inintaixcopincayohua cati amo teno
 ininpati.
 Nochi sequinoc ten amojuanti cati masehualme amechtocaxtía “andioses”
 ximotancuaquetzaca iixpa Toteco.
 8 TOTECO, nopa altepet Jerusalén huan nochi altepeme ipan tali Judá
 quipiyaj paquilisti ica motamachtíl.
 9 Pampa ta, tiTOTECO, tijnahuatía nochi taltipacti,
 huan más tihueyi que nochi sequinoc dioses.
 10 TOTECO quinicnelía nochi cati quicualancaitaj cati amo cuali.
 Quinmocuitahuía imasehualhua huan quinchololtía inimaco taixpanoca
 masehualme.
 11 Cati xitahuac ininemilis nemij ipan itaahuil Toteco,
 huan cati cuali iniyolo quipantíaj paquilisti.
 12 Xipaquica ipan TOTECO nochi amojuanti cati anitztoque xitahuac iixpa.
 Xijhueyichihua huan nochipa xiquelnamictoca para Toteco yaya senquisa
 tatzejtzelolitic.

98

Ma tijpaquilismacaca Toteco pampa yaya xitahuac tetajtolsencahua

1 Ma tihuicaca para TOTECO se huicat yancuic,
 pampa yaya quichijtoc nochi nopa huejhueyi tiochicahualnescayot.
 Yaya ya tatantoc ica ihueyi chichualis huan ica imax cati tatzejtzelolitic.
 2 TOTECO quipanextijtoc ipan nochi taltipacti para san yaya temaquixtía.
 Quinextijtoc iniixpa sequinoc talme para xitahuac tetajtolsencahua.

- 3 Yaya quielnamictoc cati techtencahuilijtoc pampa techicneli tojuanti tiisraelitame.
Huan ama ipan nochi taltipacti quiitztoque quenecatza Toteco Dios techmaquixtijtoc tiimasehualhua.
- 4 Yeca ipan nochi taltipacti xijpaquilismacaca TOTECO huan xihuicaca ica miyac paquilisti.
- 5 Xijhuicatica TOTECO.
Xijhueyimatica huan xitatzotzonaca ica arpa.
- 6 Xijpitzaca nochi tamanti tapitzali huan xihuicaca ica cuajcualtzi iixpa TOTECO,
yaya cati Tanahuatijquet.
- 7 ¡Ma ajcahuaca chichahuac nochi nopa hueyi at huan ma quipaquilismaca Toteco!
Nochi taltipacti huan cati itztoque ipani ma tzajtzcica huan ma quijitoca:
“Tijhueyitalise Toteco.”
- 8 Nopa hueyame ma paquica,
huan masehualme ma momatatzinica,
huan nochi tepeme ma huicaca ica paquilisti
- 9 iixpa TOTECO,
pampa yaya huala para quintajtolsencahuaqui xitahuac nochi masehualme cati itztoque ipan ni taltipacti.

99

Toteco yaya tatzejzeloltic

- 1 ¡TOTECO tanahuatia!
Nochi masehualme ipan nochi talme ma huihuipicaca ica majmajti.
Isiyaj campa mosehuía para tanahuatis quiapiya más tanahuatili huan eltoc más huejcapa que nopa ilhuicac ehuan cati inintoca querubines.
Nochi cati onca huan nochi cati itztoque ipan taltipacti,
ma moyolpitzahuilica.
- 2 Ipan Tepet Sion nochi quimatij para TOTECO nelía hueyi.
Yaya más hueyi ten nochi sequinoc tanahuatiani ipan taltipacti.
- 3 Nochi ma quihueyichihuaca Toteco, yaya cati hueyi huan temajmati.
San ya nelía tatzejzeloltic.
- 4 Toteco yaya se tanahuatijquet cati quiapiya nochi chichahualisti,
huan quipactía tetajtolsencahuas xitahuac.
Nochi cati quichihua senquisua cuali.
Yaya quinchihuilijtoc cati xitahuac nochi israelitame.
- 5 ¡Ma tijhueyitalica TOTECO, yaya toDios,
yaya cati tatzejzeloltic!
Ma timotancuaquetzaca huan ma timoixtapachoca hasta talchi iicxita,
pampa san yaya tatzejzeloltic.
- 6 Quema nopa totajtzitzi Moisés huan Aarón, huan nopa tajtolpanextijquet Samuel,
quitzajtziliyayaj TOTECO para quitajtanise itapalehuil,
yaya quinnanquiliyaya.
- 7 Toteco quincamanalhui ipan se mixti,
huan injuanti quichijque nochi cati quijto icamanal huan itanahuatilhua.
Quena, injuanti quichijque nochi cati quinilhui ma quichihuaca.
- 8 Quena, TOTECO, ta titoDios, ta tiquinnanquili.
Ta tieli se Dios cati tiquintapojpolhuía inintajtacolhua masehualme.

Pero nojquiya tiquintatzacuiltía quema quichihuj tamanti cati amo cuali.

⁹Ma tijhueyitalica TOTECO huan ma tijhueyichihuaca.
Ma timoixtapachoca iixpa ipan nopa tepet tatzejtzeltic cati itoca Sion.

100

Ma tijtascamatica Toteco

¹Xihuicaca ica paquilisti para TOTECO,
nochi anmasehualme cati anitztoque ipan ni taltipacti.

²Xijtequipanoca TOTECO ica paquilisti.
Huan quema anhualahuij iixpa, xihuicatihualaca.

³Xijmatica cuali para TOTECO, yaya Toteco Dios.
Yaya techchijchijqui.

Amo timochijchijtoque tojuanti.

Tojuanti tiimasehualhua huan tiitztoque quej tiiborregojhua cati techpixtoc
ipan ipotrero para techmocuitahuis.

⁴Quema ticalaquij ipan itiopa, ma tijtascamatica miyac.
Huan quema tinemij icalixpa, ma tihuicaca.

Quena, ma tijtascamatica huan ma tijpaquilismacaca.

⁵Pampa TOTECO yaya nelía cuali.

Nochipa teicnelía huan tetasoja.

Yaya itzos temachtí para nochipa ica nochi masehualme cati tacajti-
hualahuij.

101

Toteco, tijnequij tiitztose tixitahuaque

¹Na nijnequi nihuicas para ta,
TOTECO, pampa ta techicnelía huan techchihuilía cati xitahuac.
Quena, nimitzpaquilismacas ica huicat.

²Nijnequi xitahuac nimonejnemiltis ipan moojhui,
huan quema tihualas techitaqui,
amo techpantilis yon se tamanti cati amo cuali.
Nojquiya nimonejnemiltis xitahuac ipan nochaj.

³Amo nijnequi tamanti cati nenpolihui huan cati amo teno ipati.
Amo nijchihuas tamanti cati amo xitahuac.

⁴Nijhuejcamajcahuas nochi talnamiquilisti cati nechchihuasnequi ma ni-
jchihua cati fiero.

Amo nijnechcahuis tamanti cati amo cuali.

⁵Amo niquijyohuis cati quiichtacaejelnamiqui ihuampo.
Huan amo aqúi nijcahuilis ma mohueyimati huan moyacaquetzas.

⁶Niquinmocuitahuis nopa masehualme cati temachme ipan notal,
huan niquinnotzas para ma itztoca nohuaya ipan nochaj.

Huan san cati nelía monejnemiltíaj xitahuac,
niquincahuilis ma nechtequipanoca.

⁷Pero amo niquincahuilis ma itztoca ipan nochaj cati tacajcayahuj huan
istacati.

⁸Mojmosta ica ijnaloc niquintzontamiltis nochi cati amo teno quitepanitaj.
Huan quej nopa niquintamiltis nochi cati quichihuj cati fiero ipan ialtepe
TOTECO.

102

Inetatajtil se cati motequipachohua

1 ¡TOTEÇO, techtacaquili quema nimotatajtía!

Xijchihuili cuenta nocamanal quema nimitztzajtzilía para techpalehui.

2 Amo ximohuejcatali ten na ipan nopa hora quema nitaijyohuía.

¡Ximohuijtzoma para techtacaquilis huan nimantzi technanquili quema nimitznotza!

3 Pampa mojmosta nonemilis tantiya quej pocti.

Huan noomiyohua nijmachilía quej tatasquía.

4 Tahuel nimococohua ipan noyolo.

Ayecmo nijpiya chichahualisti.

Niitztoc quej se xihuit cati pilintoc.

Ayecmo nimayana huan niquelcahua para nitacuas.

5 Huan pampa tahuel niaxtitoc,
tamicuahuaqui nocuetaxo ipan noomiyo.

6 Nijmati quej nielisquía nopa tzojppilot cati nemi ipan nopa tali campá amo teno eli,

o quej cuamojmojti cati iselti itztoc ipan huactoc tali.

7 Nochi yohuali ayecmo nicochi.

Niitztoc quej nopa totot cati nemi iselti huan mosehuía itzonco se cali.

8 Nocualancaitacahua mojmosta nechpinajtíaj huan nechtelchihuaj.

9 Ayecmo nijcua pantzi.

Ama nijcua cuajnexti huan cati niqui momanelohua ica noixayo,

10 pampa tahuel ticualantoc ica na.

Na nijmati techtananqui huan teipa techmajcajtoc huejca ten ta.

11 Nonemilis panoti chichahuac quej tayohuilot.

Huan notacayo pilinti quej xihuit.

12 Pero ta TOTEÇO, tiitstos para nochipa,

huan nochi cati tacactiyase para nochipa mitzelnamictose.

13 Na nijmati para ta timotananas huan tihualas para tijtasojtaqui altepet Jerusalén.

Huan ama ya ajsic tonali para tijtasojtas huan tijpalehuis quej tijtajtolcajtoc.

14 Pampa momasehualhua tahuel quinicnelíaj nopa teme ten itepa Jerusalén,
huan hasta quitasojtaj nopa taltepocti cati onca ipan icalles ni altepet pampa nochi moaxca ta.

15 Huajca nochi talme huan inintanahuatijcahua ma huihuipicaca iixpa TOTEÇO.

Quena, huihuipicase quema quiitase ihueyitilis.

16 Pampa TOTEÇO sempa quicualtalis altepet Jerusalén.

Huan nopona yaya monextis ica nochi ihueyitilis.

17 Yaya quintacaquilis nopa teicneltzitzu quema motatajtise,
pampa yaya nochipa mochixtoc para quintacaquilis huan quinmacas cati quitajtaniáj.

18 Niqijcuilohua ya ni para nochi cati tacactiyase teipa ma nojquiya qui-hueyichihuase TOTEÇO por nochi cati quichijtoc.

19 Pampa TOTEÇO quihualtachili taltipacti ten nepa ilhuicac campá eltoc itiopa.

Quena, ten ilhuicac quitachili cati onca ipan taltipacti.

20 Huan quintacaquili quema axtiyayaj imasehualhua cati tete-quipanohuayayaj ipan sequinoc talme.

Huan quinmanahui imaco miquilisti.

²¹ Huaica miyac masehualme sempa hualase ipan altepet Jerusalén para quipaquilismacase TOTECO.

Quena, quipaquilismacase ipan nochi ni altepet.

²² Huan miyac tanahuatiani ten ni taltipacti hualase para quitequipanose huan quihueyichihuase TOTECO.

²³ Yaya nechquixtili nochicahualis quema noja polihuiyaya tajco para nimiquis,

huan nonemilis quichijqui más cototzi.

²⁴ Pero nijtazjtzili huan niquilhui:

“NoTeco Dios, ta tiitztoc para nochipa.

Amo techcahuili nimiquis quema noja nechpolohua tajco imiyaca tonali para niitztos.

²⁵ Hasta ipejya tonali ta tijtali itzinpehualtil ni taltipacti,

huan ica momax tijsencajqui ilhuicacti.

²⁶ Masque nochi cati tijsencajqui se tonali tamis,

ta tiitztos para nochipa.

Quena, nochi cati tijchijtoc sosolihuse quej se yoyomit,

huan ta tiquinpatas quej se tacat mopata huan moquentía se iyoyo cati yancuic,

huan nopa cati sosoltic quitahuisohua.

²⁷ Pero ta amo quema tihuehuejtiyas.

Nochipa san se tiitztos.

Tiitztos para nochipa huan monemilis amo quema tamis.

²⁸ Pero tojuanti cati timotequipanojcahua,

hasta toixhuihua, itztose ica temachili,

huan hasta iniixhuihua cati tacactiyase itztose cuali moixpa.”

103

Ma tijpaquilismacaca Toteco por nochi itatiochihual cati techmacatoc

¹ Ica nochi noyolo nijpaquilismacas TOTECO yaya cati tatzejtzeltoc.

² Quena, nijpaquilismacas TOTECO ica nochi noyolo, huan amo niquelcahuas nopa huejhueyi tamanti cati nechchihuilijtoc.

³ Yaya nechtapojpolhuía nochi notajtacolhua.

Huan nechchicahua quema nimococohua.

⁴ Quimanahuía nonemilis miquilisti.

Nechyahualohua ica itaicnelijcayo huan ica nochi nopa tamanti cati nechchihuilía,

pampa nechtasojta.

⁵ Quitemitía nonemilis ica tamanti cati cuali.

Huan mojmosta más nijpiya chicahualisti hasta nijpiya tetili quej se hueyi cuatojti.

⁶ TOTECO quinchihuilía cati cuali huan quintajtolsencahua xitahuac nochi masehualme cati taijyohuáj inimaco sequinoc.

⁷ Toteco quinnextili Moisés quenicatza eltoc,

huan quinnextili iisraelita masehualhua nopa huejhueyi tamanti cati quichihua ica ihueyi chicahualis.

⁸ TOTECO tetasojta miyac huan quiapiya hueyi iyolo.

Yaya tahuel huejcahua para pehuas cualanis.

Amo quema tami itaicnelijcayo.

⁹ Amo techajhua talojtzitzi,

yon amo huejcahua cualantoc.

¹⁰Yaya amo techtatzacuilitjtoc quej quinamiqui,
por nochi totajtacolhua,

¹¹pampa yaya quipiya nelhueyi iyolo ica nochi cati quiimacasij huan
quitepanitaj.

Quena, itaicnelijcayo nelhueyi quej ihuexca ilhuicacti.

¹²Toteco techquixtili totajtacolhua huan quitali huejca ten tojuanti.

Quena, quitali quej ihuejcaca campa quisa tonati huan hasta campa on-
calaqui.

¹³Quej se tetaj quintasojta iconehua,
quej nopa TOTECO quintasojta cati quiimacasij huan quitepanitaj.

¹⁴Pampa Toteco quimati para tojuanti san tielij taltepecti,

¹⁵huan tonemilis san panotiquisa huan amo huejcahua.

Tonemilis eltoc quej se xihuit o quej se xochit.

¹⁶Quema quiilpitza ajacat,

ixpolihui tonemilis huan ayecmo cati hueli quimati sinta nelía tiitztoyaj.

¹⁷Pero TOTECO mojmosta quinicnelía nochi cati quiimacasij huan quitepan-
itaj.

Huan quinchihuilis cati xitahuac nochi masehualme cati itztoque ama huan
nojquiya ininconeua cati tacactiyase teipa.

¹⁸Quena, yaya quinchihuilis cati cuali injuanti cati quichihuaaj cati ica
mocajtoque quichihuase,

huan injuanti cati quichihua cati quijtohuaj itanahuatilhua.

¹⁹TOTECO quitalljtoc isiyaj nepa ilhuicac huan nozona mosehuía para
tanahuatis.

Yaya quipiya tanahuatili ica nochi cati onca.

²⁰Xijpaquilismacaca TOTECO nochi amojuanti anilhuicac ehuan cati tahuel
antejtetique.

Quena, amojuanti cati anquitacaquilíaj cati amechnahuatía huan nimantzi
anquichihuaaj,

xijpaquilismacaca.

²¹Quena, xijhueyimatica TOTECO nochi amojuanti anilhuicac ehuan cati
anitztoque quej isoldados.

Xijhueyimatica amojuanti cati anquitequipanohuaaj huan anquichihuaaj cati
yaya quinequi.

²²¡Nochi masehualme huan nochi tamanti cati mopantíaj campa hueli ipan
nochi itanahuatilis,

nochi ma quipaquilismacaca TOTECO!

Na nojquiya tahuel nijpaquilismaca.

104

Toteco quimocuitahuía cati quisencajtoc

¹¡Na nimitzpaquilismacas, TOTECO!

¡TOTECO Dios, nelía tihueyi!

Campa ta tiitztoc nochi tacuajcualtzi huan cuajcualtzi.

²Mitzyahualojtoc taahuili cati tahuel cuajcualtzi.

Ta tijpatajqui nopa ilhuicacti quej se masehuali quipatajtosquía se yoyomit.

³Eltoc quej quema timochanti,

tijtali nopa cuatetomit ipan at cati huejcapa,

huan tijsencajqui nopa mixti para elisquía mocarros.

Ta tihueli tinejnemi san ajacatipa.

- 4 Tiquintequihuía moilhuicac ejcagua quej motatitanilhua huan tiquinchihua ma elica quej tilelemecti.
- 5 Ta cuali tijtatzquilti ni taltipacti para amo mijcuenis ten campa eltoc.
- 6 Tijchijqui ma huetzi miyac at cati quixtzajqui taltipacti quej elisquía iyoyo. Quena, tijchijqui at ma tejco hasta quixtzajqui nochi tepeme.
- 7 Pero quema ta ticamanaltic huan ticajhuac nopa at ipan hueyi at, nopa at motalojtejqui huan mosejcotilito.
- 8 Tejcoque tepeme huan nopa tamayame temoque ipan inilugar campa ta titanahuati ma motalica.
- 9 Teipa tiquintalili ininepa nopa huejhueyi at para ayecmo quema ma quixtzacuaca tali.
- 10 Ta tijchijqui at ma motalo ipan atajti campa tepeme, huan ma temotihuala hasta quitemitis campa más tatzinta nopa tamayame campa hueli.
- 11 Ica nopa at tiquinamaca nochi tapiyalme para ma atica. Ipan nopa atajti aixhuj nopa burrojme cati nemij cuatita.
- 12 Nopa totome quichihuj inintepasol iteno nopa atajti, huan huicaj quema itztoque ipan inimacuayo nopa cuame.
- 13 Ta tijchihua ma huetzi at ipan tepeme, huan tijchihua ma taelilti nopa tali.
- 14 Quena, ta Toteco tijchihua ma moscaltí sacat para ma tacuaca tapiyalme. Huan tijchihua ma onca quilít, cuatajcajot huan cuayoli cati masehualme quitocaj para ma ica mopanolitica.
- 15 Nojquiya tiquinmaca xocomecat iayo para ma ica yolpactoca, huan aceite para ma mopoloca ipan inixayac, huan nojquiya tiquinmaca tacualisti para ma quipiyaca fuerza.
- 16 Ica nopa at moscaltíaj nopa tiocuame cati ta, TOTECO, tijtojqui ipan tali Líbano. Nopa cuame tahuel huejcapantique huan quipiyaj miyac inixochiyo.
- 17 Ipan nopa cuame motepasoltíaj nochi tamanti totome.
- 18 Huan ipan nopa ciprés cuahuit motepasoltía nopa totot cati itoca cigüeña.
- 19 Inintzonixco nopa huejhueyi tepeme onca sacat para nopa chivojme cati nemij cuatita. Huan campa cocoyocatoc nopa teme, mochantijtoque nopa pesojme.
- 20 Toteco, ta tijchijqui metzti para quinextis ipan taya metzti itztoque masehualme. Huan nopa tonati tijchijqui para tenextilis sesen tonal.
- 21 Ta tijtitani nopa tzintayohuilot huan mochihua yohuali, huan quema tayohua, quisaj nochi tecuanime cati itztoque ipan cuatitamit.
- 22 Nopa leones cati noja conetzitzi nanalcaj pampa mayanaj. Huan quitemohuaj nopa tacualisti cati ta, Toteco Dios, tiquinmacas.
- 23 Quema quisas tonati sempa onmotatíaj ipan iniosto.
- 24 Huan masehualme quisaj para tequititij, huan tequitij chicahuac hasta tiotac.
- 25 ;TOTECO, nelía tijchijtoc miyac tamanti! Huan nochi tamanti tijsencajtoc ica miyac talnamiquilisti. Yajmaxtic taltipacti temitoc ica miyac tamanti cuajcualtitzti cati ta tijchijtoc.
- 26 Xiquitaca nopa hueyi at cati tahuel patahuac huan huetzi. Nopona itztoque miyac tamanti tapiyalme pisiltitzti huan huejhueyi.
- 27 Nopona nemij nopa huejhueyi cuaacalme,

huan nopona itztoc nopa hueyi tapiyali itoca leviatán cati temajmati cati ta tijchijqui para ma mahuilti ipan hueyi at.

²⁷Nochi ni tapiyalme mochiyaj ipan ta para xiquintamaca quema monequi.

²⁸Huan quema tiquinmaca inintacualis, inijuanti quiselaj.

Ta tijtapohua ica motaicnelilis huan tiquintamaca hasta ixhuij ica ten más cuali.

²⁹Pero sinta tiquintahuelcahua, inijuanti motequipachohuaj.

Huan sinta tiquinquixtilía ininemilis, miquij huan mocuepaj taltepocti.

³⁰Huan quema ta tijtitani moTonaltzi cati temaca nemilisti,

tacatij sempayano para sempa ma momiyaquilica huan tacualnesis ipan ni taltipacti.

³¹¡Ma tijhueyitalica TOTECO pampa ihueyitilis amo tjuema tamis!

¡Ma quipanti paquilisti TOTECO ipan nochi cati quichijtoc!

³²Quema Toteco quitachilía taltipacti, ni taltipacti huihuipica.

Huan quema quinajsi tepeme, inijuanti lemenij.

³³Nijhuicatis TOTECO nochi tonali cati niitztos ipan ni tali.

Quena, nijpaquilismacas Toteco Dios ica tiohuicat hasta tamis nitaijyotilanas.

³⁴Ma quipacti TOTECO nochi cati nimoyolilhuía ten ya,

huan na nimopaquilismaca ipan ya.

³⁵Ma miquica nochi cati quinpectía tajtacolchihuaj ipan ni taltipacti.

Quena, ma ayecmo itztoca cati amo quineqij quitepanitase TOTECO. Pero na nijpaquilismacas ica nochi moyolo.

¡Paquilisti!

105

Nopa huejhueyi tamanti cati Toteco quinchihuili israelitame

(1 Cr 16:8-22)

¹Xijtascamatica TOTECO por nochi nopa huejhueyi tamanti cati yaya quichihua.

Xitepohuilica ipan nochi taltipacti cati yaya quichijtoc.

²¡Xijhuicatica!

Quena, xijhuicatica tiohuicat.

Xitepohuilica ten nopa huejhueyi tiochicahualnescayot cati yaya quichijtoc.

³¡Ximopaquilismacaca ipan Toteco!

¡Quena, xipaquica nochi amojuanti cati anquihueyichihuaj TOTECO!

⁴Xijtemoca TOTECO huan ichicahualis.

Quena, nochipa xijtemoca para anquixmatise más.

⁵Xiquelnamiquica nopa tiochicahualnescayot cati yaya quichijqui por amojuanti.

Xiquelnamiquica itamachtil huan cati yaya quijtojtoc.

⁶Aniixhuihua Abraham cati itequipanojca Toteco,

huan amojuanti aniconehua Jacob cati Toteco quitapejpeni, xiquelnamiquica.

⁷Yaya TOTECO huan yaya toDios.

Cati yaya tanahuatijtoc para mochihuas, ya nopa monextía ipan nochi taltipacti.

⁸Yaya amo quema quielcahuas nopa camanal sencahuali cati quichijqui, masque tacactiyase masehualme huan ininconeua huan mil hueltas tacatise ininteipan ixhuihua,

yaya amo quielcahuas.

⁹ Noja eltoc nopa camanal sencahuali cati quichijqui ica Abraham huan Isaac.

¹⁰ Teipa quiompahui nopa camanal sencahuali ica Jacob para ma pano ica nochi israelitame, huan elis para inijuanti para nochipa.

¹¹ Huan Toteco quiiyto:

“Na nimechmacas nopa tali Canaán para elis amoaxca para nochipa.”

¹² Quinilhui ya ni quema inijuanti noja ayemo eliyayaj miyaqui, huan san itztoyaj quej paxalohuani ipan tali Canaán.

¹³ Teipa san panotinenque ten se tali hasta seyoc tali, huan ten se tanahuatlisti hasta seyoc tanahuatlisti.

¹⁴ Pero ipan nochi nopa tamanti Toteco amo quincahuili ma quinajsi se tamanti cati amo cuali.

Huan tanahuatiani cati quichijque campeca para quinchihuilise cati fiero, Toteco quintatzacuilti.

¹⁵ Toteco Dios quinilhui:

“Amo xiquincuatotonica nomasehualhua cati niquintapejpenijtoc, yon amo teno xiquinchihuilica notajtolpanextijcahua.”

¹⁶ Toteco quititanqui se hueyi mayanti ipan tali Canaán, huan quinquixtili nochi tamanti tacualisti cati ica mopanoltiyayaj.

¹⁷ Pero teipa Toteco quititanqui se tacat ma quinyacana para quinmanahuis imasehualhua ten nopa mayanti.

Quena, elqui José cati quinamacatoyaj para ma tequipanoti san tapic ipan tali Egipto.

¹⁸ Huan nepa ipan tatzacti quimetzcocojque quema quimetzilpijque ica tepos cadena,

huan quiilpilijque se teposti iquechta.

¹⁹ Nopona itztoya José hasta ajsic nopa tonali cati TOTECO quiixquetztoya.

Quena, Toteco quiyejyeco José para quitas sinta cuali elqui iyolo.

²⁰ Huajca Faraón cati eliyaya hueyi tanahuatijquet, tanahuati ma quiquixtica.

Huan quicajqui ma yahui majcajtoc.

²¹ Teipa nopa tanahuatijquet quitali ma quinyacana nochi itequipanojcahua,

huan ma quimocuitahui nochi cati quipixtoya.

²² Elqui ya icuenta para quintatzacuiltis itequipanojcahua cati más huejhueyi,

huan para ma quintalnamicti cati huehuentzitzitzi.

²³ Teipa Israel ajsico ipan tali Egipto,

huan itztoya nopona ihuaya iconehua ipan tali Cam.

²⁴ Huan Toteco tahuel quinmiyaquili iixhuihua Jacob,

huan quipixque más chicalualisti,

huan amo quej inincualancaitacahua cati quinnahuatiyayaj.

²⁵ Teipa Toteco quinyolpatac nopa egiptome,

huan quinchijqui ma quincualancaitaca nopa israelitame.

Quena, quincualancaitaque huan quinchihualtijque ma tetequipanoca san tapic.

²⁶ Pero teipa Toteco quititanqui itequipanojca, Moisés,

huan Aarón cati yaya quintapejpenijtoya.

27 Huan injuanti quichijque huejhueyi tanextili huan tiochicahualnescayot ipan tali Egipto.

28 Quena, Toteco quititanqui tzintayohuilot ipan nochi nopa tali, pampa amo quitacaquilijque itanahuatil para ma quincahuaca imasehualhua ma yaca majcajtoque.

29 Teipa quicuetqui esti nochi at cati oncayaya ipan nopa tali. Huan nopa michime mijque.

30 Teipa quintitanqui tahuel miyac temasolime ipan nochi nopa tali, huan calajque hasta ipan nopa cuarto campá cochiyaya nopa tanahuatijquet.

31 Teipa quema Moisés camanaltic, hualajque miyac sayolime.

Huan atime quipolcajhuicoj nopa tali.

32 Nojquiya quintitanili huejhueyi tesihuit huan amo at.

Huan tapetaniyaya campá hueli ipan nochi nopa tali.

33 Huan nopa tesihuit quinenpolo nochi xocomeca mili, huan higuera cuame,

huan quitami pojpostejqui nopa huejhueyi cuame.

34 Teipa Toteco camanaltic huan ajsicoj tahuel miyac chapolime, hasta amo aquí hueliyaya quinpohua.

35 Huan quicujque nochi tamanti xihuime cati oncayaya ipan nopa tali, huan nojquiya quitamicujque nochi tamanti pixquisti.

36 Teipa quinmicti nopa coneme cati achtohui tacatque ipan sese familia ten tali Egipto.

Quinmicti masque nopa tetatme tahuel paquiyayaj huan motepanitayayaj por nopa iniachtohui cone.

37 Huan Toteco quinquixti imasehualhua ica temachili, huan quihuicaque miyac oro huan plata.

Huan ipan nopa tonali amo mococo yon se imasehual Toteco.

38 Huajca nopa egiptome nelia pajque quema quisque nopa israelitame, pampa nochi injuanti tahuel quinimacasiyayaj.

39 Toteco quipatajqui inintzonta se mixti para quinecahuilis huan amo quintatis tonati.

Huan ica tayohua quitaliyaya se tilelemecti inintzonta para ma quintaahuili.

40 Quitajtanijqque ma quinmaca nacat para quicuase, huan quintitanili solime.

Nojquiya quinmacac nopa tacualisti cati itoca “maná” cati huetzqui ten ihuicac para ica ma ixhuica.

41 Toteco quitapo se tet huan quisqui at hasta mochijqui quej se hueyat, cati motalo ipan nopa huactoc tali campá amo teno eliyaya.

42 Pampa yaya quielnamijqui cati ica mocajtoya itequipanojca Abraham.

43 Huajca ica miyac paquillisti Toteco Dios quinquixti imasehualhua cati quitapejpenijtoc ipan tali Egipto.

44 Huan quinmacac imasehualhua nopa talme cati elqui iniaxca masehualme cati amo israelitame.

Huan moaxcatijque ica nochi nopa pixquisti cati nozona oncayaya.

Quicuajqque cuatacti cati sequinoc quitocoyaj.

45 Nochi ya ni quichijqui para ma quichijtinemica cati quinilhujtoya huan ma quintoquilijtinemica itanahuatilhua.

¡Paquilisti!

106

Iniyolteticayo israelitame

¹ ¡Paquilisti!

¡Ma tijtascamatica TOTECO pampa yaya nelia cuali iyolo huan itaicnelijcayo amo quema tamis ica tojuanti!

² ¿Ajquiya huelis quitamijcuilis nopa cuajcualtzitzi tiochichualnescayot cati TOTECO quichihua?

¿Ajquiya huelis tepohuilis nochi cati quichijtoc Toteco?

³ Quipiyaj paquilisti nopa masehualme cati nochipa quichijtinemij cati cuali huan cati xitahuac.

⁴ TOTECO, techelnamiquis na quema tiquintiochihuas huan tiquinmaquixtis momasehualhua.

⁵ Techcahuili ma niqitas cati cuajcualtzi tiqinchihuilis momasehualhua cati tiquintapejpenijtoc.

Xijcahuili para nojquiya ma nipaquis inihuaya.

Xijcahua ma nimopaquilismacas ica injuanti cati moaxcahua.

⁶ Tojuanti nojquiya titajtacolchijtoque san se quej tohuejcapan tatahua.

Titaixpanoque huan tijchijtoque cati fiero.

⁷ Tohuejcapan tatahua amo quimachilijque nopa huejhueyi tiochichualnescayot cati Toteco quichijqui ipan tali Egipto.

Yon amo quielnamijque para quipixqui hueyi iyolo ica injuanti.

Injuanti moyoltetilijque ica Toteco nepa campa nopa hueyi at cati itoca Chichiltic.

⁸ Pero Toteco quinmaquixti para ma quitepanitaca, huan tenextili ihueyi chichualis ipan nochi taltipacti.

⁹ Quiajhuac nopa hueyi at cati itoca Chichiltic huan quinahuati ma motajcoxelo.

Huan quej nopa quitapo se ojti huactoc quej elisquia huactoc tali, huan quinchihualti tohuejcapan tatahua ma ipan panoca.

¹⁰ Quej nopa quinmaquixti huan quinchololti inimaco inincualancaitacahua.

¹¹ Huan nopa at quinzonpolihuilti inincualancaitacahua hasta amo moca-jqui yon se cati amo mijqui.

¹² Huan huajca tohuejcapan tatahua quineltocaque icamanal cati Toteco quinilhuijtoya.

Huan teipa huicaque huan quipaquilismacaque.

¹³ Pero sempa nimantzi quielcajque nochi cati Toteco quichijtoya.

Huan amo mochixque para Toteco ma quinmaca consejos.

¹⁴ ¡Amo! Nepa ipan huactoc tali quieyeyecojque Toteco Dios ica cati tahuel quinequiyayaj ma quinmaca.

Quena, quifuerzajhijque ma quinmaca nopa tacualisti cati injuanti quinequiyayaj.

¹⁵ Huajca Toteco quinmacac cati quitajtaniyque, pero nojquiya quintitanili cocolisti cati ica mijque miyac nopa masehualme.

¹⁶ Huan nozona campa quiquejquetztoyaj iniyoyoncal,

quichicoitaque Moisés,

huan quichicoitaque Aarón cati TOTECO quiyocatalijtoya para ma eli itotajtzi.

¹⁷ Huajca motapo tali huan quintolo Datán, Abiram huan nochi cati quintoquiliyayaj.

18 Huan Toteco quititanqui tit ten ilhuicac,
huan quintamitati nopa taixpanoca tacame.

19 Nepa ipan tepet Horeb mochihuilijqe se becerro ten oro huan ya nopa
quihueyichijque.

20 Quitahuelcajqe Toteco huan ihueyi chichualis,
huan pejqe quihueyimati se becerro ten oro,
iixcopinca se tapiyali cati quicua xihuit.

21 Huan quej nopa quielcajqe ininTeco Dios cati quinmaquixtijtoya,
yaya cati quichijtoya huejhueyi tamanti ipan tali Egipto,

22 huan ipan nopa hueyi at cati itoca Chichiltic.

23 Huajca Toteco quijto para quintzontamiltisquía,
pero Moisés cati Toteco quitapejpenijtoya motajcoquetzqui,
huan quitajtani Toteco para amo ma quintzontamilti ica ihueyi cualancayo.

24 Teipa nopa israelitame amo quinejqe calaquise ipan nopa tali cati nelía
cuali,

pampa amo quineltocaque para Toteco quinmocuitahuisquía.

25 Huan ipan ininchajchaj pejqe quiejelnamiqij TOTECO huan amo
quitacaquilijque cati quinilhuyaya ma quichihuaca.

26 Yeca Toteco Dios momatananqui huan tatestigojqetzqui para quintzon-
tamiltisquía ipan nopa huactoc tali.

27 Quijto para ininconeua quinsemanasquía huan quintitanisquía,
ipan sequinoc talme para ma itztotij quej sejcoyoc ehuani altepet ehuani.

28 Nojquiya ipan tali Peor tohuejcapan tatahua mosejcotilijque inihuaya cati
quihueyichihuayayaj Baal,

huan hasta quinmacaque tacajchualisti mijcatziti.

29 Huan ica ya ni quicualancamacaque Toteco.

Yeca Toteco quititanqui se hueyi cocolisti ininpani huan miyac mijque.

30 Huan Finees mosemacac huan motananqui,
huan quinmicti nopa masehualme cati ica inintajtacolhua quichijtoyaj ma
huala nopa cocolisti.

Huan ica ya nopa motilquetzqui nopa cocolisti.

31 Huan ni cuali tamanti quichijqui para Finees ma quielnamictoca para
nochipa quej se tacat cati cuali.

32 Nojquiya campa at Meriba,
nopa israelitame quicualancamacaque Toteco.

Quena, por injuanti, Toteco cualanqui ica Moisés.

33 Pampa quichijque ma cualani Moisés,
huan ma camanalitiquisa ica cati amo monequiyaya.

34 Huan nojquiya nopa israelitame amo quintzontamiltijque nochí nopa
altepeme,

ipan nopa talme cati TOTECO quinnahuatijtoya ma quisosoloca.

35 San achi más mosejcotilijque inihuaya cati amo quitepanitayayaj Toteco,
huan nojquiya quichijque cati injuanti momajtoyaj quichihuaj.

36 Quinhueyimatque ininteteyohua,

huan mohuejcatilijque ten Toteco,

huan ica ya nopa mocuapolojqe.

37 Hasta quinmictijque ininconeua quej se tacajchualisti para iajacahua
Amocualtacat.

38 Huan pampa quinmictijque ininconeua cati amo teno quichijtoyaj para
quinmacase nopa teteyome ten tali Canaán,

quinenpolojque nopa tali ica inieso.

39 Huan inijuanti nojquiya monenpolojque ica nochi tamanti fiero cati quichijque.

Pampa quema quinhueyichihuayayaj teteyome,
Toteco Dios quinitayaya quej elisquía momecatiyayaj ica seyoc cati amo inintahuical.

40 Yeca TOTECO tahuel cualanqui ica imasehualhua,
huan ayecmo quinejqui quinitas.

41 Huan quintemactili inimaco inincualancaitacahua cati ehuyayaj ipan nopa talme cati amo quitepanitayayaj Toteco,
para nopa masehualme ma quinnahuatica.

42 Huan quena, inincualancaitacahua quintaijyohuiltijque
huan tahuel quincocojque pampa itztoyaj inimaco.

43 Miyac huelta Toteco quinmanahui,
pero inijuanti quisenhuiquiliyayaj moyoltelíaj ica ya.
Yeca teipa quicahuili ma tzontamica por inintajtacolhua.

44 Pero masque ya nopa quichihuayayaj,
Toteco quintacaquiliyaya quema quitzajtziyayaj,
huan quinpalehuiyaya quema masehualme quintaijyohuiltiyayaj.

45 Quena, quielnamiquiyaya nochi cati quintajtolcahuilijtoya para quinchihuilis.

Yeca quintasojtac huan moyolcuetqui pampa tahuel quinicneliyaya.

46 Huan hasta quichijqui para inincualancaitacahua cati quintaijyohuiltiyayaj,
ma nojquiya quintasojtaca.

47 ¡TOTECO Dios, techmaquixti ten tocualancaitacahua!
Sempa techsentili ten campa hueli talme para tihuelise timitztascamatise ta cati titatzejtzeltolic,
huan para huelis tipaquise huan timitzhueyimatise.

48 Ma tijaquilismacaca TOTECO Dios para nochipa,
yaya cati toTeco tiisraelitame.
Nochi imasehualhua ma quijitoca:
“¡Quej nopa ma eli! ¡Paquilisti!”

107

Toteco quinmanahuía masehualme

1 ¡Xijtascamatica TOTECO pampa yaya nelía cuali!

¡Itaicnelilis amo quema tamis!

2 Nochi amojuanti cati TOTECO amechmanahuijtoc, xitepohuilica.

Quena, xitepohuilica para yaya amechmaquixtijtoc inimaco amocualancaitacahua.

3 Yaya ya quinsentilijtoc nochi nopa masehualme cati itztoyaj campa hueli ipan taltipacti.

Quinsentili cati itztoyaj ica norte, ica sur,
ica campa quisa tonati huan ica campa calaqui.

4 Sequij nentinenque ipan huactoc tali,
yon amo quipiyayayaj ininchaj,
yon amo quipixque se altepet para ipan itztose.

5 Amictinemiayaj huan mayantinemiayaj,
hasta quimachiliyayaj para miquisquíaj pampa ayecmo quipiyayayaj chichahualisti.

⁶ Huajca quitzajtzilijque TOTECO para ma quinpalehui, huan yaya quinpalehui.

⁷ Quinyacanqui xitahuac ipan se ojti cati temachti. Huan quinhuicac ipan se altepet para nopona ma itztotij.

⁸ Xijhueyimatica TOTECO pampa yaya tahuel tetasoja, huan quichihua huejhueyi tamanti cati nochi san quitachilíaj.

⁹ Pampa Toteco quitamaca cati teicneltzi huan mayantinemi. Quiaixhuitis cati amictinemi.

¹⁰ Sequij injuanti itztoyaj ipan tzintayohuilot ipan tatzacti huan nechca para miquise.

Itztoyaj ilpitoque ica tepos cadenas.

¹¹ Ya nopa ininpantic pampa injuanti moyoltetilijque ica cati TOTECO quinnahuatijtoya,

huan amo quitacaquilijque Toteco Cati Más Hueyi.

¹² Yeca Toteco quincajqui ma taijyohuica ipan nopa tequit cati tahuel tet-icayo.

Quena, huetzque huan amo aqui quinpalehui para sempa motananase.

¹³ Huajca quema ayecmo quimatiyayaj taya quichihuase ica nopa taijy-ohuilisti,

quitzajtzilijque TOTECO, huan yaya quinmanahui ten nopa taijyohuilisti

¹⁴ Quinquixti ipan nopa tzintayohuilot huan quinmanahui para amo miquise.

Huan quicotonqui nopa tepos cadena cati ica quinilpitoyaj.

¹⁵ Xijhueyimatica TOTECO pampa yaya tahuel tetasoja huan quichihua huejhueyi tamanti cati ica masehualme san quitachilíaj.

¹⁶ Pampa yaya quitapanqui nopa miyac caltemit ten bronce ipan tatzacme, huan quihuejhuelo nopa teposme cati ica quintzacuayayaj nopa caltemit.

¹⁷ Sequij masehualme tahuel mohualiquilijque taohuicayot, pampa moyoltetilijque ica Toteco huan quixpanoque.

¹⁸ Huan ipan nopa taijyohuilisti ayecmo mayanayayaj por inincocolis huan pampa itztoyaj nechca para miquise.

¹⁹ Pero quema ayecmo quimatiyayaj taya quichihuase ica nopa taijy-ohuilisti,

quitzajtzilijque TOTECO huan yaya quinmanahui.

²⁰ Toteco camanaltic huan mochicajque.

Huan quej nopa quinmaquixti para amo miquise.

²¹ Xijhueyimatica TOTECO pampa yaya tahuel tetasoja huan quichihua huejhueyi tamanti cati nochi quitachilíaj.

²² Xijpaquilismacaca Toteco huan yaya quiitas quej elisquía se tacajcual-isti.

Huan xihuicaca huan xitepohuilica nochi cati yaya quichijtoc.

²³ Nopa masehualme cati nemij ica inincuaacalhua ipan hueyi at, huan yahuij ipan nochi taltipacti para tanamacase huan tacohuase,

²⁴ nojquiya quiitztoque nopa cuajcualtitziti tamanti cati TOTECO quichijtoc ipan at.

²⁵ Quiitztoque quema TOTECO camanaltic huan quichijqui ma motanana se ajacat cati chichahuac,

huan quitananqui nopa at.

²⁶ Nopa cuaacalme motananayayaj huan sempa huetziyayaj atatzinta.

Huan nopa masehualme cati itzttoyaj ipan nopa cuaacalme pejque huihuipicaj huan majmahuj.

27 Inijuanti huihuipicaque huan momimilojque quej ihuintini, huan ayecmo quimatque taya quichihuase.

28 Huajca quema itzttoyaj ipan taohuicayot, quitzajtzilijque TOTECO, huan yaya quinmaquixti ten cati quintequipacholmacayaya.

29 Quema huetziyaya at huan taajacayaya chichahuac, yaya quitacahualti nopa hueyi at para ma ayecmo molini, huan mochijqui icamanal.

30 Huan injuanti pajque miyac quema quitaque ya moquetzqui nopa at. Huan quej nopa Toteco quinyacanqui ica cuali hasta atenti campa monequi ajsise ica inincuaacalhua.

31 Ma quihueyimatica TOTECO pampa yaya tahuel tetasoja, huan quichihua huejhueyi tamanti cati nochi quitachilij.

32 Ma quipaquilismacaca Toteco miyacapa iniixpa nochi masehualme huan iniixpa nopa huehue tacame cati tayacanaj ipan nopa tali.

33 Toteco quinhuatztoc hueyame huan quinchijtoc quej huactoc tali. Nojquiya hueli quinhuatza campa meya at.

34 Nopa cuali tali cati tahuel taeliltia quichijtoc ma ayecmo taelilti. Huan ya ni quichijqui por inintajtacolhua nopa masehualme cati itzttoyaj nozona.

35 Pero nojquiya nopa huactoc tali campa amo teno eli quichijqui ma taelilti. Nojquiya quichijqui ma quipiya miyac at cati meya campa hueli.

36 Huan quinhuicac nopa masehualme cati mayantinemiyayaj para ma itztoca nozona, huan ma quichihuaca inialtepe.

37 Nojquiya quichijqui para ma tocaca ipan mila, huan ma quichihuaca xocomeca mili, huan ma quipixcaca tahuel miyac inintajca.

38 TOTECO tahuel quintiochijqui. Nojquiya momiyaquilijque huan quinpixque miyac inihuacaxhua.

39 Teipa pejqui caxani inimiyaca nopa masehualme, huan nochi mocajque teicneltiziti, pampa quinajsic taohuicayot, tequipacholi huan taijyohuulisti.

40 Huan yaya quinehcapantali nopa tayacanani cati mohueyimatiyayaj, huan quinchijqui ma mocuapoloca campa amo oncac oji huan yeca ayecmo quimatque canque yahuiyayaj.

41 Pero yaya quinmanahui nopa teicneltiziti. Quinmiyaquili ininonehua quej elisquaj pilborregohtiziti hasta mochijque tahuel miyac.

42 Ma quuitaca nochi cati quichijtoc TOTECO nochi cati nemij xitahuac iixpa, huan ma paquica.

Pero nochi nopa fiero masehualme ma mocamatzacuaca.

43 Masehualme cati talnamiquini quimachilise nochi ni tamanti cati Toteco quichijtoc,

huan quiaajocuisse ipan iniyolo. Inijuanti moyolilhuise quenecatza TOTECO quintasojtatihualajtoc imasehualhua.

108

*David quitajtani Toteco itapalehuil
(Salmos 57:7-11; 60:5-12)*

- ¹ ¡NoTeco Dios, noyolo mocualtalijtoc para nimitzhueyimatis!
Nipaquis huan nihuicas tiohuicat moixpa ica nochi noyolo.
- ² ¡Quena, na nihuicas huan nitatzotzonas ipan noguitarra huan noarpa!
Ica paquilisti na nihuicas ijnaltzi quema ayemo tanesi.
- ³ Nimitzpaquilismacas, TOTECO,
campa hueli iniixpa masehualme ten nochi altepeme,
huan nimitzhueyimatis iniixpa masehualme ten nochi talme.
- ⁴ Pampa ta tahuel titemachti huan nelpano miyac motaicnelijcayo,
hasta conajsi ihuejcapanca ilhuicacti.
- ⁵ Ma nochi mitzhueyimatica nepa ilhuicac, Toteco Dios.
Huan ipan nochi taltipacti ma quitachilica masehualme mohueyitilis.
- ⁶ Xitacaquili quenicatza mitztzajtzilíaj moconehua cati tiquinicnelía.
Xihuala ica miyac chicahualisti huan techmanahuiqui.
- ⁷ Toteco Dios camanaltic ipan itiopa huan quuijto:
“Ica paquilisti nijxelos tali Siquem huan nopa tamayamit cati itoca Sucot.
- ⁸ Pampa na noaxca tali Galaad huan Manasés.
Nosoldados hualase ipan tali Efraín.
Huan notanahuatijcahua hualase ipan tali Judá.
- ⁹ Pero cati itztoque ipan tali Moab huan Edom nechtequipanose,
huan nitzajtzis ica paquilisti quema niquintantos nopa filisteos.”
- ¹⁰ ¿Ajquiya nechmacas chicahualisti para niquintanis nopa altepeme cati
moyahualtzactoque ica tepamit?
¿Ajquiya nechyacanas para nicalaquis ipan tali Edom?
- ¹¹ ¿Atac techtahuelcajtoc? ¿Amo elis ta, tiToteco Dios, cati techyacanas?
Techyacana huan xiya ica nosoldados para titatehuitij, Toteco.
- ¹² Techpalehui para tiquintanise tocualancaitacahua pampa san motapale-
huil ipati.
Amo ipati masque miyac masehualme techpalehuisquíaj sinta ta, amo tech-
palehuía.
- ¹³ Pero ica ta motapalehuil tijchihuase huejhueyi tamanti.
Pampa san ica ta hueli ipan timoquejquetzase tocualancaitacahua.

109

David motataji para Toteco ma quintatzacuilti icualancaitacahua

- ¹ NoTeco Dios cati nimitzhueyitalía,
technanquili quema nimotatajtía ica ta,
amo san xitacacto.
- ² Pampa nopa tajtacolchijca masehualme nechejelnamiqij huan nechistac-
ahuíaj.
- ³ Inijuanti nechcualancaitaj huan nechyahualohuj para nechilhuisse ca-
manali cati amo monequi.
Nechtehuíaj masque amo teno niquinchihuilijtoc.
- ⁴ Na niquinicnelía huan nimotatajtía para tiquintiochihuas.
Pero masque ya nopa nijchihua,
noja más quichihuj campeca para nechtzontamiltise.

5 Na niqinchihuilía cati cuali,
pero injuanti nechtaxtahuáaj ica cati amo cuali.
Masque niquinicnelía, injuanti nechcualancaitaj.

6 NoTeco, xiquintali imaco se cati fiero.
Se cati quimati tetatelhuía ma quinhuica iixpa se juez cati fiero para ma
quintajtolsencahua.

7 Huan quema ya quintajtolsencajtose, xijchihua para nochi quimatise para
quihuicaj tajtacoli.

Huan quema motatajtíaj, xiquita quej elisquía tajtacolchihuj.

8 Nimitztajtanía para inemilis nocualancaitaca ma amo huejcahua ipan ni
taltipacti.

Huan seyoc tacat ma quichihua nopa tequit cati yaya quichihuayaya.

9 Iconehua ma mocahuaca icnotzitzi huan isihua ma mocahua icnotzi.

10 Iconehua ma monejnencaquixtica huan ma motaejehuijtinemica.

Ma quitemoca tacualisti huejca ten ininchaj cati ya tamisosolijtoc.

11 Ma quitamitacuijcuilica cati quitatanejtijayaj,

huan cati seyoc tali ehuan ma quiquixtilica nochi cati quitantoc ica itequi.

12 Amo aqui ma quipalehui ica yon se tamanti huan amo aqui ma quintasojta
iconehua cati icnotzitzi.

13 Ma miquica nochi iconehua.

Ma tamiixpolihuica huan ayecmo aqui ma quielnamiqui inintoca.

14 TOTECO, amo xiquelcahua nochi inintajtacolhua itatahua huan inanahua.
Huan amo xiquintapojpolhui.

15 Ma mocahua inintajtacolhua moixpa, TOTECO,

pero ayecmo aqui ma quielnamiqui nopa masehualme ipan ni taltipacti.

16 Pampa injuanti amo quinejque quipalehuise inihuampo.

Nojquiya quinquixtijque cati teicneltzitzi huan quinnmictijque cati mote-
quipachohuayayaj.

17 Quinpactiyaya quintelchihuase inihuampo.

Huajca ama ta nojquiya xiquintelchihua.

Amo quema quintiochijque sequinoc,

huajca ama nojquiya amo xiquintiochihua.

18 Nopa tatelchihualisti tahuel quinpactía pampa eltoc ipan nochi cati quichi-
huaj.

Tatelchihujaj mojmosta quej mojmosta moquentíaj iniyoyo,

o quij at o quicuj se tacualisti cati ajhuiyac.

19 Huajca ama ipani ma huetzi nopa tatelchihualisti,

quej elisquía se yoyomit cati quinpantzacuas o quej inintzinquetilpica.

20 Quej nopa, TOTECO, xiquintaxtahui nopa nocualancaitacahua cati nechis-
tacahuáaj,

huan cati quinequij nechmictise.

21 Pero TOTECO, ta cati tinoTeco,

techita na quej elisquía nimocono cati nijhuica motzonquisca.

Yeca techchololti imaco nocualancaitaca pampa ta titemachti huan tinel-
cuali.

22 Na nitaiyohuía huan tahuel monequi motapalehuil,

Tahuel nechcocohua noyolo.

23 Niyajtinemi para nimiquis huan nitaiyohuía quej se chapoli cati
quitahuiso se masehuali.

24 Notancia ayecmo quipiya chichahualisti pampa tahuel nimosajtoc.

Huan notacayo ayecmo nacayo.

²⁵ Nochi masehualme ipan taltipacti nechhuetzquilíaj.

Yeca nochi cati nechitaj quiojoliníaj inintzonteco huan nechpinajtíaj.

²⁶ ¡TOTEKO Dios, techpalehui!

¡Techmaquixti pampa ta tahuel titetasojta!

²⁷ Techmaquixti miyacapa,

para nochi ma quimatica para ta cati tijchijtoc, TOTEKO.

²⁸ Huan teipa sinta nechtelchihuaaj, amo teno ipati,

pampa ta techtiochihuas.

Sinta motananase ica na,

pinahuase,

huan na nijsenhuiquilis nimopaquilismacas,

pampa na nimotequipanojca.

²⁹ Ma mopinahualtica miyacapa inijuanti cati nechistacahuíaj.

Quena, xiquinpinahualti.

³⁰ Pero na talojtzitzi nijtascamatis TOTEKO,

huan nijpaquilismacas iniixpa nochi masehualme.

³¹ Pampa yaya itztoc inihuaya cati teicneltzitzi para quinmanahuis inimaco inincualancaitacahua.

110

Toteco quimaca tequiticayot nopa tanahuatijquet

¹ TOTEKO quiilhui nohueyiTeco:

“Ximosehui nica ica nonejmat hasta nimitzmactilis mocualancaitacahua para xiquinnahuati.”

² TOTEKO quichihuas para titanahuatis ten altepet Jerusalén, huan tiquinnahuatis mocualancaitacahua cati campa hueli itztoque.

³ Huan ipan nopa tonali quema titatehuis huan monextis mochichualis, momasehualhua hualase campa ta huan mitztajtanise caquihuili para tatehuise para ta ica miyac paquilisti.

Moyoyontitose ica iniyoyo cati tatzejtzeltolitic para mitztequipanose, huan ta tijpiyas yancuic chichahualisti mojmosta, quej huetzi nopa yancuic ajhuechti ica ijnaloc.

⁴ TOTEKO tatestigojquetzqui huan amo moyolpatas ica cati quiijtojtoc quichihuas.

Quena, yaya quiijtojtoc para ta tielis titotajtzi para nochipa quej Melquisedec.

⁵ Toteco itztoc campa monejmat para mitzmocuitahuis.

Ipan nopa tonali quema yaya tahuel cualanis, quintzontamiltis miyac tanahuatiani.

⁶ Quintatzacuilitis miyac masehualme ipan nochi talme, huan quintemitis nopa talme ica mijcatzitzi.

Miyac masehualme quintzonzamanis ipan miyac talme.

⁷ Pero ipan ojti yaya atis ipan miyac atajme,

huan nopa at quifuerzajmacas huan quiseseltis.

111

Toteco quinmocuitahuá imasehualhua

¹ ¡Paquilisti!

Ica nochi noyolo nijnequi nijtascamatis TOTEKO,

campa mosentilíaj masehualme cati itztoque xitahuacque.

² Huejhueyi tamanti quichijtoc TOTECO.

Nochi cati quicnelíaj ma moyolilhuica ten nochi ni tamanti cati quichijtoc.

³ Pampa tahuel cuajcualtzi nochi nopa huejhueyi tiochicahualnescayot cati quichihua.

Huan technextilía ihueyitilis huan para yaya nochipa quichihua cati xitahuac.

⁴ TOTECO quichijtoc huejhueyi tamanti cati amo huelis tiquelcahuase.

Quichijtoc tamanti cati technextilía para techicnelía huan para yaya quiapiya hueyi iyolo ica tojuanti.

⁵ Yaya quinmaca tactualisti nochi cati motemachíaj ipan ya.

Huan amo quema quielcahuas cati techtajtolcahuilijtoc techchihuilis.

⁶ Toteco quinextijtoc ihueyi chichualis ica imasehualhua pampa yaya quinmacac nopa tali Israel,

masque achtohuiya eliyaya iniaxca sequinoc tamanti masehualme.

⁷ Nochi cati Toteco quichihua eltoc senquisa xitahuac huan cuali.

Huan nochi itanahuatilhua nelía temachtí.

⁸ Para nochipa technextilía cati melahuac huan cati xitahuac, huan monequi tijchihuase cati melahuac huan tijneltocase.

⁹ TOTECO ya taxtajtoc nochi para quinmanahuis imasehualhua.

Huan quinilhujtoc imasehualhua para quichihuas nochi cati quintencahuili ipan nopa camanal sencahuali.

¡Toteco nelía tatzejtzeltolc huan temajmati!

¹⁰ Para tipehuase tijpiyase talnamiquilisti, achtohui monequi tiquimacasise huan tijtepanitase Toteco Dios.

Mochihuaj nelía talnamiquini nopa masehualme cati quintepanitaj itanahuatilhua.

Ma tijpaquilismacaca para nochipa.

112

Toteco quinhueyitalía cati quihueyitepanitaj

¹ ¡Miyac paquilisti quiapiya nopa masehuali cati quiimacasi TOTECO!

Quena, nochi cati quinpacktía quichijtinemise cati quijtohuaj itanahuatilhua Toteco tahuel paquij.

² Inixhuihua ni masehualme quipantise tatepanitacayot campá huéli,

Pampa Toteco quintiochihua hasta iixhuihua se cati monejnmiltía xitahuac iixpa.

³ Ipan ichaj se masehuali cati quintepanita itanahuatilhua Toteco,

onca ricojyot huan miyac tamanti cati cuali, pampa yaya quichihua cati xitahuac huan cati cuali, amo quema quielcahuase.

⁴ Ni masehuali itztoc quej se taahuili cati taahuía ipan tzintayohuilot.

Yaya tetasoja huan teicnelía huan techihuilía cati xitahuac.

⁵ Se tacat cati cuali iyolo tetasoja huan tetanejtía cati quiapiya.

Nochi cati quichihua quisa cuali, huan quiyacana xitahuac nochi tamanti cati eltoc imaco.

⁶ Se tacat cati quej ni quichihua, amo huetzis quema hualas taohujcayot. Masehualme cati cuajcualme quielnamiquise para nochipa.

⁷ Yaya amo majmahui masque quiyolmelahuaj se camanali cati temajmatía, pampa yaya senquisá motemachijtoc ipan TOTECO para quimocuitahuis.

⁸ Yaya quipiya temachili ipan iyolo huan amo majmahui.

Senquisá mosemacá huan motehuis chicahuac ica icualancaitacahua.

⁹ Yaya quinpalehuía miyac cati teicneltziti huan cati amo teno quipiyaj.

Por nochi nopa tamanti cuali cati quichihua,

amo quema quielcahuase masehualme.

Nochi quicualitase huan quitepanitase.

¹⁰ Quema nopa fiero masehualme quuitase ni cuali tacat huan quenicatza masehualme quitepanitaj,

cualanise chicahuac hasta tanhuehuechocase pampa quichicoitase.

Pero teipa mopinahualtise pampa quuitase para ayecmo teno hueli quichihuase.

113

Toteco quitanana se cati teicneltzi

¹ ¡Xijpaquilismacaca TOTECO!

¡Quena, nochi amojuanti cati anitequipanojcahua TOTECO, xijhueyimatica!

² Ma tijhueyimatica TOTECO ama huan para nochipa.

³ Quena, nochi masehualme ten campa quisa tonati hasta campa oncalaqui ma quihueyimatica TOTECO.

⁴ TOTECO quipiya tanahuatili ica nochi cati itztoque ipan nochi talme.

Huan ihueyitilis conpano ilhuicacti.

⁵ ¿Ajquiya seyoc más hueyi quej TOTECO toDios cati mosehuía nepa huejcapa para tanahuatis?

⁶ Tatzinta ten ya eltoc ilhuicacti huan taltipacti.

Huan yaya mohuijtzoma para tachiyas ipan ni taltipacti.

⁷ Huan quitanana nopa teicneltzi cati eltoc quej masitoc ipan soquit cati huejcata.

Huan cati huetztoc campa quitepehuaj tasoli quitanana huan quisehuía campa cuali.

⁸ Quena, quitanana huan quisehuía inihuaya huejhueyi tacame cati quinyacanj inialtepet ehuaní.

⁹ Yaya quichihua para nopa sihuat cati amo quema conepixqui

ma quimpiya iconehua huan ichaj.

Quena, quichihua ma eli se tenanti cati senpactoc.

¡Paquilisti!

114

Cati Toteco quinchihuili nopa israelitame ipan tali Egipto

¹ Huejcajquiya quema nopa israelitame quisque ipan tali Egipto, campa nopa masehualme camanaltij seyoc camanali,

² hualajque huan quichijque itiopa Toteco ipan tali Judá para nozona ma mocahua inihuaya,

huan nochi tali Israel eltoya ital campa nojquiya yaya tanahuati.

³ Quema nopa Hueyi At Chichiltic quinitac hualahuij nopa israelitame,

nimantzi moisihiulti huan motapo para ma panoca campa tahuactoc.

Nojquiya nopa hueyat Jordán motapo para ma panoca.

⁴ Nochi paquiyayaj hasta elqui quej nopa tepeme huitonque ica paquilisti quej chivojme,

huan nopa taixtemolis huitonque quej pilborregoitziti.

⁵ ¿Taya panoc ica nopa Hueyi At Chichiltic?

¿Para ten motajcoxelo?

Huan nopa hueyat Jordán, ¿para ten motilquetzqui?

⁶ Huan nopa tepeme, ¿para ten huitonque quej chivojme?

Huan nochi taixtemolista,

¿para ten huitonque quej pilborregoitzitzi?

Elqui pampa nochi tahuel quitepanitaj Toteco.

⁷ Nochi taltipacti huihuipica iixpa TOTECO,
yaya cati iTeco Jacob,

⁸ pampa yaya quichijqui para ipan nopa tet ma meya at.

Quena, yaya quiquixti at ipan nopa tet huan mochijqui quej se hueyat.

115

Toteco huan teteyome

¹ ¡TOTECO, amo techhueyitali tojuanti!

¡Ximohueyitali ta!

Xijchihua para nochi ma mitzpaquilismacaca pampa ta tahuel titetasojta
huan tijchihua cati nelía melahuac.

² Amo xiquincahuili para nopa masehualme ipan sequinoc talme ma quijj-
toca:

“¿Canque itztoc ininDios?”

³ Ta toTeco Dios, tiitztoc nepa ilhuicac,
huan nochi cati tijnequi tijchihuas, ta tijchihua.

⁴ Pero nopa masehualme quinitaj quej inintecohua nopa teteyome cati
quinchijchijtoque ica oro huan plata.

⁵ Quipiyaj inincamac, pero amo camanaltij.

Quipiyaj iniixteyolhua, pero amo tachiya.

⁶ Quipiyaj ininacas, pero amo tacaquij.

Quipiyaj iniyacatzol, pero amo taijyotilanaj.

⁷ Quipiyaj inimax, pero amo hueli quiiitzquíaj yon se tamanti.

Quipiyaj inimetz, pero amo nejnemij.

Amo huelij camanaltij.

⁸ Huan nochi masehualme cati quinchijchijtoque nopa teteyome nelía hui-
huitique quej nopa teteyome,
huan nojquiya san se huihuitique cati quinhueyichihua.

⁹ ¡Anisraelitame, ximotemachica ipan TOTECO,

pampa san yaya amechpalehuía huan amechmanahuía
ten nochi tamanti cati amo cuali!

¹⁰ Antotajtzitzi cati aniixhuihua Aarón huan aniaxcahua TOTECO,
ximotemachica ipan ya,

pampa san yaya amechpalehuía huan amechmanahuía ten nochi tamanti
cati amo cuali.

¹¹ Nochi amojuanti cati anquiimacasij huan anquitepanitaj TOTECO xi-
motemachica ipan ya,

pampa san yaya amechpalehuía huan amechmanahuía ten nochi tamanti
cati amo cuali.

¹² TOTECO talojtzitzi techelnamiqi huan yeca temachti techtiochihuas.

Techtiochihuas tiisraelita masehualhua.

Quintiochihuas nopa totajtzitzi cati iixhuihua Aarón.

¹³ Quena, Toteco quintiochihuas nochi cati quiimacasij huan quitepanitaj.
Quintiochihuas cati huejhueyi huan cati pilquentzitzi.

¹⁴ Tahuel miyac TOTECO ma amechtiochihua amojuanti huan amoconehua.

¹⁵ Quena, TOTECO cati quichijqui ilhuicacti huan taltipacti, yaya cati amechtiochihuas.

¹⁶ Nochi ilhuicacti iaxca TOTECO, pero ni taltipacti quinmacatoc masehualme.

¹⁷ Cati mictoque amo huicaj huan quihueyimatij TOTECO. Inijuantí ayecmo huéli moliníaj.

¹⁸ Pero tojuanti, quena, tojuanti tijhueyimatise TOTECO ama huan para nochípa.

¡Xijhueyimatíca TOTECO!

¡Paquilísti!

116

Tascamatili pampa Toteco quimanahui ten miquilisti

¹ Nelía niquicnelía TOTECO pampa yaya nechtacaquilía quema nimotatajtía huan nechnanquilía.

² Huan pampa mohuijtzoma huan nechnanquilía, nimotatajtis ica ya nochi tonali quema niyolfos.

³ Nechyahualojtoya miquilisti.

Nijmachiliyaya quej niitztosquía ipan ostot, pampa nechajsic miyac cuesoli huan tequipacholi.

⁴ Huajca nijtzajtzili TOTECO huan niquilhui: “TOTECO, techmanahui.”

⁵ ¡TOTECO nelía cuali iyolo!

¡Yaya senquisá xitahuac!

¡Toteco tahuel tetasoja!

⁶ TOTECO quinmocuitahuía cati moechcapanohuaj huan itztoque quej coneme.

Na ya nimictinemiyaya huan yaya nechmanahui.

⁷ Ama huélis nimosiyajquetzas pampa TOTECO nechchihuilijtoc cati cuali.

⁸ Nechmanahuijtoc imaco miquilisti,

quihuatztoc noixayo huan nechpalehuijtoc para ma amo nihuetzi ipan tajtacoli.

⁹ Ipan ni taltipacti campa itztoque masehualme, nimonejnemiltis xitahuac iixpa TOTECO.

¹⁰ Na nijneltocayaya Toteco, huajca niqijto:

“Nitaijyohuíá miyac, Toteco.”

¹¹ Huan quema ayecmo nijmatiyaya taya nijchihuas, niqijto:

“Nochi masehualme san istacatij.”

¹² Huan ama ya niitztoc cuali.

¿Quenicatza huélis nijtaxtahuis TOTECO por nochi cati nechchihuilijtoc?

¹³ Nijhualiquilis xocomecat iayo quej se tacajcahualisti, huan nijhueyimatis TOTECO pampa nechmaquixtijtoc.

¹⁴ Miyacapa nijhualiquilis TOTECO nopa tacajcahualisti cati nijtajtolcahuili nijmacas.

¹⁵ TOTECO quiita para tahuel ipati ininemilis imasehualhua cati quinicnelía, huan amo quincahuilía miquise san quej huéli.

¹⁶ TOTECO, na nimotequipanojca, quena, niicone se nonana cati nojquiya mitztequipano. Huan techmanahuijtoc ten campa niilpitoya.

- 17 Nimitzpaquilismacas huan nimitztascamatis huan ta tiquitas quej elisquía se tacajcahualisti.
- 18 Miyacapa nijhualiquilis TOTECO nopa tacajcahualisti cati nijtajtolcahuili nijmacas.
- 19 Quena, nijmacas TOTECO nozona ipan icalixpa ichaj cati eltoc ipan altepet Jerusalén.
¡Paquilisti!

117

Ma tijhueyichihuaca Toteco

- 1 Xijpaquilismacaca TOTECO nochi anmasehualme ipan nochi talme, xijhueyimatica nochi amojuanti ipan nochi altepeme.
- 2 Pampa yaya techicnelía ica se hueyi taicnelijcayot cati amo quema tamis. Yaya temachtí huan elis temachtí para nochipa.
¡Paquilisti!

118

Ma tijtascamatica Toteco

- 1 ¡Xijpaquilismacaca TOTECO pampa yaya nelía cuali!
Itaicnelijcayo amo quema tamis.
- 2 Nochi anisraelitame xijhueyimatica Toteco huan xiquijtocha: “Itaicnelijcayo Toteco amo quema tamis.”
- 3 Nochi antotajtzitzi cati aniixhuihua Aarón nojquiya xiquijtocha: “TOTECO itaicnelijcayo amo quema tamis.”
- 4 Nochi amojuanti cati anquitepanitaj TOTECO xiquijtocha: “TOTECO itaicnelijcayo amo quema tamis.”
- 5 Quema nimotequipachohuayaya, nijtaztzi TOTECO,
huan yaya nechnanquili huan nechmanahui.
- 6 TOTECO itztoc nohuaya para nechpalehuis,
yeca ayecmo nimajmahui,
yon amo niqumacasi cati huelis nechchihuilise masehualme.
- 7 TOTECO itztoc nonechca.
Yaya nechpalehuis.
¡Huan temachtí niquitas cati nijnequi ma ininpanti nocualancaitacahua!
- 8 Más cuali nimotemachis ipan TOTECO huan amo ipan se tacat.
- 9 Más cuali nimomanahuis ipan TOTECO huan amo ipan se hueyi tanahuati-
jquet.
- 10 Masque nochi masehualme ten nochi talme ma nechyahualoca para nechtehuise,
na niqintzontamiltis ica ichicahualis TOTECO.
- 11 Quena, masque nechyahualose huan nechtehuise,
na niqintanis pampa nijhuica itequiticayo TOTECO.
- 12 Nocualancaitacahua hualajque ipan na quej sayolime,
huan cualanque chichahuac quej tit cati quitatía nochi huitzi.
Pero na niqintzontamilti ica itequiticayo TOTECO.
- 13 Nocualancaitacahua quichijque campeca para nechmictise,
pero TOTECO yaya nechpalehui.
- 14 TOTECO nechpixtoc imaco,
huan yeca nihuica para ya pampa nechchijtoc ma nitatani.

15 Ipan ininchajchaj cati monejnmiltíaj xitahuac iixpa TOTECO tahuejchi-huaj huan huicaj ica paquilisti,

pampa TOTECO quinmaquixtía huan quichihua huejhueyi tamanti.

16 Ichicahualis TOTECO nelía hueyi huan quichihua huejhueyi tamanti.

17 Amo nimiquis.

Pero niitzos para nitepohuilis nochi cati TOTECO quichijtoc.

18 Toteco nechtatzacuilti chichahuac, pero amo nechtemactili para ma nimiqui.

19 Xijtapoca icaltenyo itiopa TOTECO, pampa nijnequi nicalaquis para nijtascamatis TOTECO.

20 Ipan ni caltemit calaquij para yahuij hasta iixpa TOTECO, huan nopona calaquise nochi cati tatzejtzeltolique iixpa.

21 Nijhueyimatis noTeco Dios, huan nijtascamatis miyac, pampa nechtacaquili huan nechmaquixti ten nocualancaitacahua.

22 Calchihuani quicuamajcayque se hueyi tet cati amo quinejque quitequi-huise,

pero ama nopa hueyi tet eltoc cati más monequi para yas calesquina huan ipan quiquetzase nopa cali.

23 Nochi ya ni quichijtoc TOTECO huan cuajcualtzi nesi.

24 Inin nopa tonali cati TOTECO quichijqui.

Ma tipactoca ipan ni tonali.

25 Nijtajtanía TOTECO ama ma techmaquixti tojuanti ten tocualancaitacahua.

Techpalehui ama para tiquisase cuali.

26 ¡Ma TOTECO mitztiochihua ta cati tihuala ipan itoca*!
Timitztiochihuaj hasta campá ichaj TOTECO.

27 TOTECO yaya Dios, huan yaya techtaahuilía.

Nijhualiquilis notacajcahualis huan nijtalis ipan itaixpa para nijmacas.

28 Pampa yaya noTeco Dios, yeca nijtascamati huan nijhueyimati.

29 ¡Xijtascamatica TOTECO pampa yaya nelía cuali!

Itaicnelijcayo amo quema tamis.

119

Toteco itanahuatilhua nelía cuali

1 Nelía paquij nochi cati monejnmiltíaj xitahuac, huan cati senquisa quichijtinemij cati quijtohua iley TOTECO.

2 Paquij nopa masehualme cati quitemohuaj TOTECO ica nochi iniyolo huan quichijtinemij cati yaya quijtohua.

3 Pampa injuanti amo quichihuaj cati amo cuali.

Monejnmiltíaj senquisa ipan iojhui TOTECO.

4 Ta techmacatoc motanahuatilhua para ma tijchihuaca cati quijtohuaj.

5 ¡Tahuel nijnequisquía nijchijtinemis senquisa cati techyolmelajtoc ma tijchihuaca!

6 Quej nopa amo nipinahuasquía sinta niquinchijtinemis nochi motanahuatilhua.

7 Na nimitztascamatis ica nochi noyolo quema ya nijmachilis nochi motamachtilhua cati xitahuac.

* 118:26 118:26 O ica itequiticayo.

8 Na nijchihuas nochi cati techyolmelajtoc ma tijchihuaca ipan tonemilis. Yeca amo techtahuelcahua.

9 ¿Taya monequi quichihuas se telpocat para itztos tapajpactic moixpa, TOTECO?

Monequi quipohuas mocamanal huan quichihuas cati quijtohua.

10 Na ica nochi noyolo nimitztemojtoc, Toteco.

Amo techcahuili nimoiyocacahuas ten motanahuatilhua.

11 Ipan noyolo nicajoctoc nochi cati tiquijtojtoc, para amo nitajtacolchihuas ica ta.

12 TOTECO, ta cati nochi mitzhueyimatij, technextili quenicatza nijchihuas nochi cati techyolmelajtoc.

13 Na nitepohuilijtoc nochi motamachtilhua cati ta techmacatoc.

14 Más nimopaquilismacatoc pampa ninemi ipan moojhui huan nijchihua cati ta tiquijtojtoc, huan amo ipan ricojyot.

15 Nimoyolilhuis ten motanahuatilhua huan ninemis ipan nopa ojti campa quijtohuaj ma ninejnemi.

16 Nimopaquilismacas ica cati techyolmelajtoc, huan amo quema niquelcahuas mocamanal.

17 Na nimotequipanojca, techchihuili cati cuali.

Techcahuili ma niitzto miyac tonali para nijsenhuiquilis nijtepanitas mocamanal.

18 Techixtapo para niqitas nopa huejhueyi tamachtilisti cati quipiya moley.

19 Na san nipaxalohua ipan ni taltipacti.

Amo xijtati motanahuatilhua ten na pampa monequi ma nechyacana.

20 Ipan noyolo tahuel nijnequi nijchihuas nochi cati xitahuac quej quijtohua motamachtil.

21 Ta tiquinajhua nopa taixpanoca masehualme cati mohueyimatij.

Inijuanti itztoque quej tatechihualme pampa quinhuejcamajcahuaj motanahuatilhua.

22 Amo xiquincahuili ma nechpinahualtica pampa na nijtepanita nochi cati ta tiquijtohua.

23 Hasta nopa huejhueyi tacame cati quipiyaj tequiticayot mosehuijque para nechejelnamiqise,

pero na nimotequipanojca,

senquisa nimoyolilhuía ten nochi cati ta techyolmelajtoc.

24 Pampa motajtol nechtaahuilía huan nechconsejomaca.

25 Nelía nimotequipachohua hasta nihuetztoct ipan taltepocti.

Xijyancuili nonemilis ica mocamanal.

26 Na nimitzpohuili nochi cati nijsencajtoc nijchihuas huan ta techtacaquili.

Ama technextili quenicatza nijchihuas nochi cati techyolmelajtoc.

27 Techchihua ma nijmachili nopa ojti cati ipan ninemis para niquintoquilis nochi motanahuatilhua.

Huan na nimoyolilhuis ipan nochi nopa huejhueyi tamanti cati tijchihua.

28 Nichoca pampa tahuel nitaijyohuía.

Techyolchicahua ica mocamanal.

29 Techpalehui mojmosta para amo niistacatis.

Huan pampa techicnelía, techpalehui ma nijmati nochi moley.

30 Na nijtapejpenijtoc nopa ojti cati melahuac,

huan san nimoilhuía ten motamachtil.

31 Na nimotatzquilijtoc ipan motajtol huan nijchihuas cati quijtohua.

¡TOTECO, amo techcahuili nihuetzis ipan pinahualisti!

³² Sinta techmacas noyolo cati cuali moixpa, huaajca na achi más nijchijtinemis cati quiijtouhaj motanahuatilhua.

³³ TOTECO, technextili quenicatza nijchihuas nochi cati techyolmelajtoc. Huan nijchijtinemis nochi tonali hasta nimiquis.

³⁴ Techmaca talnamiquilisti huan nijchijtinemis nochi cati quiijtouhua moley. Quena, nijchijtinemis ica nochi noyolo.

³⁵ Techyacana ipan nopa ojti cati technextilía motanahuatilhua, pampa san ya nopa nijnequi nijchihuas.

³⁶ Xijchihua para más ma nijnequi motajtol huan amo tomi.

³⁷ Techhuejcatali ten nochi tamanti cati amo cuali para amo niquixtocas.

Más cuali talojtzitzi techyolchicahua para senquisa ninemis ipan moojhui.

³⁸ Techmatilti na, nimotequipanojca, para temachtí techmacas cati techtajtolcahuilijtoc,

pampa san ta nimitzimacasi huan nimitztepanita.

³⁹ Amo techcahuili ma niquinimacasi cati nechpinahualtíaj pampa nimitztepanita,

pampa motamachtíl senquisa cuali huan xitahuac.

⁴⁰ TOTECO, na tahuel nijnequi nijchihuas cati quiijtouhaj motanahuatilhua. Xijyancuili nonemilis pampa ta senquisa tixitahuac.

⁴¹ TOTECO, techtasojta huan techmaquixti ten nocualancaitacahua, san quej tiquijtojtoc tijchihuas.

⁴² Quej nopa huelis niquinnanquilis injuanti cati nechpinahualtíaj, huan niquinmachiltis para san nimotemachía ipan mocamanal.

⁴³ Amo techquixtili mocamanal cati melahuac huan amo techcahuili ma niquelcahua,

pampa san ipan motamachtíl na nimotemachía.

⁴⁴ Na nijtepanitas moley mojmosta.

Quena, para nochipa nijtepanitas moley huan amo quema tamis.

⁴⁵ Ninemis nimajcajtoc pampa niquintemohua motanahuatilhua para nijchihuas cati quiijtouhaj.

⁴⁶ Na niquinpohuilis motajtol tanahuatiani, huan amo nipinahuas.

⁴⁷ Na nimopaquilismacas ipan motanahuatilhua pampa tahuel niquinicnelía.

⁴⁸ Nimomatananas para nijnextis notatepanitacayo por motanahuatilhua, huan san nimoyolilhuijtinemis ten nochi cati techyolmelajtoc ma tijchihuaca ipan tonemilis.

⁴⁹ Amo quema xiquelcahua cati techtajtolcahuilijtoc techchihuilis na, nimotequipanojca, pampa san ya nopa nijchixtoc.

⁵⁰ Cati techtencahuilijtoc techchihuilis nechyoltalía quema nimopantía ipan taijyohuilisti.

Quena, nochi cati tiquijtojtoc nechmaca yancuic chicahualisti ipan none-milis.

⁵¹ Nopa masehualme cati mohueyimatij nechpinajtíaj pampa nimitztepanita, Toteco,

pero masque ya nopa, na amo nimohuejcatalis ten moley.

⁵² TOTECO, na niquelnamiqui motamachtíl cati huejcajquiya techmacac.

Huan motamachtíl nochipa nechyoltalía.

53 Nelía tahuel nicualani ica nopa taixpanoca masehualme cati quitahuelc-
ahuaj moleý.

54 Nochi cati techyolmelajtoc nechhualiquilijtoc paquillisti,
huan nechchijtoc ma nihuica campa hueli campa niitztinentoc quej niseyoc
tali ejquet.

55 Ica tayohua nimitzelnamiqui, TOTECO,
huan nijnequi nijchihuas cati quijtohua moleý.

56 Nijseli tahuel miyac tatiochihualisti pampa nijchijqui cati quijtohuaj
motanahuatilhua.

57 ¡TOTECO, san ta tinoaxca!

Na niquijtojtoc para nijtepanitas cati quijtohua mocamanal.

58 Ica nochi noyolo nijnequi motatiochihualis.

Techtasojta senquisa quej techtajtolcahuilijtoc para tijchihuas.

59 Nimotachili quenicatza nimonejnemiltiyaya

huan nimantzi nimocuetqui para nijchihuas cati quijtohua motajto.

60 Quena, nimoisihuiltía para nijchihuas cati quijtohuaj motanahuatilhua.

61 Miyac taixpanoca masehualme nechyahualojtoque para ma nitajtacolchi-
hua inihuaya,

pero na amo niquelcajtoc moleý.

62 Tajco yohual nimijquehua para nimitztascamatis por motamachtil cati
senquisa xitahuac.

63 Na niquinita quej nohuampoyohua nochi cati mitzimacasij huan
mitztepanitaj,

huan nochi cati quichihuaj cati quijtohuaj motanahuatilhua.

64 ¡TOTECO, nochi taltipacti temitoc ica motaicnelijcayo!

Technextili nochi cati techyolmelajtoc ma nijchihua ipan nonemilis.

65 ¡TOTECO, tahuel techchihuilijtoc cati cuali na, nimotequipanojca!

Techtiochijtoc senquisa quej tiquijtojtoc para tijchihuas.

66 NoTeco, techchihua ma nijmachili cati cuali huan techmaca
talnamiquilisti,

pampa na niquinneltocatoc motanahuatilhua.

67 Achtohuiya quema ayemo techehcapantalijtoya para techatzacuilitis,
san nimocuapolojtinenqui.

Pero ama senquisa nijchihua cati quijtohua mocamanal.

68 Ta nelía ticuali huan tijchihua san cati cuali.

Huajca techmachi quenicatza ma nijchihua cati techyolmelajtoc para ni-
jchihuas.

69 Nopa masehualme cati mohueymatij nechistacahuijtoque,
pero na ica nochi noyolo nijchijtinemis cati quijtohuaj motanahuatilhua.

70 Inijuanti huihuitique huan tzactoc inintalnamiquilis,

pero na nochipa nimopaquilismaca ipan moleý.

71 Nelía cuali para techehcapantali,

pampa technextili para ma nijchihua nochi cati techyolmelajtoc ma tijchi-
huaca ipan tonemilis.

72 Para na más ipati moles huan amo millones ten oro huan plata.

73 TOTECO, ta ica momax tijsencajqui notacayo.

Huajca ama techpalehui ma niquinmachili motanahuatilhua huan niquint-
zontecomatis.

74 Nochi cati mitztepanitaj huan motemachíaj ipan ta,
paquise quema nechitase,

pampa na nimotemachía ipan mocamanal.

75 TOTECO, na nijmati para motamachtil senquisa xitahuac.

Huan nopa tatzacuiliti cati techmacatoc nojquiya xitahuac,
huan nechhualiquilis tamanti cati cuali.

⁷⁶ Huajca ama techyoltali ica moteicnelijcayo,
senquisa quej techilhuitoc na, nimotequipanojca, para tijchihuas.

⁷⁷ Techyahualo ica motaicnelijcayo para ma niyolto,
pampa san ipan moley nijpantia paquilisti.

⁷⁸ Ma huetzica ipan pinahualisti nopa masehualme cati mohueyimatij,
pampa tahuel nechcocojtoque ica iniistacaticayo.

Pero na san nimoyolilhuijtinemis cati quijtohuaj motanahuatilhua.

⁷⁹ Ma sempa mesentilica nohuaya nopa masehualme cati mitzimacasij huan
mitztepanitaj,

huan cati quixmatij motajtol.

⁸⁰ Xijchihua para noyolo ma monejnemilti xitahuac ipan nochi cati techy-
olmelajtoc.

Huan quej nopa amo quema nimopinahualtis.

⁸¹ Na nitapolosnequi pampa nijchiya para techmaquixtis ten nocualan-
caitacahua,

pampa nimotemachijtoc ipan cati tiqijtojtoc para techchihuilis.

⁸² Noixteyolhua siyahuij pampa quinequij quitase ma pano nochi cati
techtajtolcahuilijtoc para tijchihuas.

¿Hasta quema techyoltalis ica motapalehuil?

⁸³ Ya nihuehuentzi huan nitzocoyolijtoc quej se cuetax bolsa cati quitelij-
toque campá pocti,

pero amo niquelcajtoc cati techyolmelajtoc.

⁸⁴ ¿Quesqui tonali monequi nijchiyas para tiquintatzacuiltis cati nechtoquili-
jtinemij?

⁸⁵ Nopa masehualme cati mohueyimatij huan cati quicualancaitaj moleyes
quichijtoque se hueyi ostot para ma nimasi.

⁸⁶ Techpalehui, pampa motanahuatilhua senquisa xitahuac,
huan nechtepotztocatinemij masque amo teno nijchijtoc.

⁸⁷ San quentzi nechixpolihuiltisquáj,

pero na amo niquinixpanotoc motanahuatilhua yon amo niquincajtoc.

⁸⁸ Pampa hueyi moyolo, techcahuili ma niitzto.

Huan quej nopa nijsenhuiquilis nijchihuas cati quijtohua motajtol.

⁸⁹ TOTECO, mocamanal eltos temachtí para nochipa nepa ilhuicac.

⁹⁰ Mojmosta ta titemachtí huan tiitztos temachtí ica nochi cati tacactiyase
para nochipa.

Cuali ta tijtatzquilti ni tali huan quej nopa eltoc.

⁹¹ Nochi tamanti mocahua campá tiquinnahuati ma eltoqa hasta ama ni
tonal.

Quena, nochi tamanti cati tijchijqui mitzneltocaj huan mitztequipanohuaj.

⁹² Sinta amo nimopaquilismacatosquá ipan moley,
huajca ya nimictosquá ica tequipacholi.

⁹³ Amo quema niqinelcahuas motanahuatilhua,
pampa ica motanahuatilhua techmacatoc yancuic chicahualisti.

⁹⁴ Na nimoaxca, techmaquixti pampa nochipa nijchijtinentoc cati quijto-
huaj motanahuatilhua.

⁹⁵ Masque nopa taixpanoca tacame motatise ipan ojti para nechzontamil-
tise,

na san nimoyolilhuijtos ten motajtol.

⁹⁶ Nochi tamanti cati más cuajcualtzi niqiztoc canque ontami,

pero motanahuatilhua, amo quipiyaj inintamiya.

⁹⁷ ¡Tahuel niquicnelía moleyl!

San ten ya nimoyolilhuijtinemi semil huit.

⁹⁸ Motanahuatilhua nechchijtoque más nitalnamiqui que nocualancaitacahua.

Pampa motanahuatilhua nechyacantiyahuij mojmosta.

⁹⁹ Quena, achi más nitalnamiqui hasta niquintani injuanti cati notamachtijcagua,

pampa na nimoyolilhuijtinemi ten motajtol.

¹⁰⁰ Na más nijmachilía que nopa huehue tacame, pampa nijchihua cati quijtohuaj motanahuatilhua.

¹⁰¹ Amo quema nijnectoc nijtoquilis se ojti cati amo cuali, pampa senquisa nijnequi nijchihuas cati quijtohua mocamanal.

¹⁰² Amo nimohuejcatalijtoc ten motamachtíl, pampa ta technextilía quenicatza ma nimonejnemilti.

¹⁰³ Nijmati nelía ajhuiyac mocamanal.

Achi más tzopelic nijmati que sayolnecti.

¹⁰⁴ Motanahuatilhua nechmacaj talnamiquilisti.

Yeca amo nijnequi niquitas yon se tamanti istacatili.

¹⁰⁵ Mocamanal eltoc quej se taahuili cati quitaahuilía noojhui campa ninejnemi para amo nimotepotanis.

¹⁰⁶ Se huelta nitatestigojquetzqui, huan ama sempa nitatestigojquetzas para nijchihuas cati quijtohuaj motamachtilhua pampa nelía xitahuac.

¹⁰⁷ TOTECO, nechca eltoc para nimiquis inimaco nocualancaitacahua.

Techmaca yancuic chicahualisti quej tiquijtojtoc para tijchihuas.

¹⁰⁸ TOTECO, nimitztajtanía xijseli nopa tascamatili cati nimitzmaca quej se tacajchualisti.

Huan technextili motamachtíl.

¹⁰⁹ Mojmosta nimopantía campa mahuilili para nonemilis, pero amo niquelcajtoc moleyl.

¹¹⁰ Nopa taixpanoca masehualme quitalíaj taquetzti para ma nimasi huan nihuetzis ipan tajtacoli, pero na amo nimoiyocanequis ten motanahuatíl.

¹¹¹ Na san nimoaxcatijtoc motajtol,

pampa san ipan motajtol nijpantía paquilisti.

¹¹² Ica nochi noyolo nijchihuas cati quijtohuaj motanahuatilhua nochipa hasta nimiquis.

¹¹³ Amo nijnequi niqunitas masehualme cati quichihuaj ome inixayac.

Pero na niquicnelía moleyl.

¹¹⁴ Ipan ta nimotatía para amo nechcocose nocualancaitacahua huan ipan ta nimomanahuía.

Pampa nimotemachía san ipan mocamanal.

¹¹⁵ Ma nechtalcahuica nopa masehualme cati fiero initalnamiquilis.

Ma amo nechcuatotonica pampa na nijnequi nijchihuas cati quijtohuaj motanahuatilhua, Toteco Dios.

¹¹⁶ Huajca noTeco, techmaca yancuic fuerza senquisa quej techtajtolcahuili. Huan quej nopa sequinoc amo quema huelis quijtose para san topic nimochixtoc ipan ta.

¹¹⁷ Techfuerzajmaca para nimomaquixtis inimaco nocualancaitacahua, huan nochipa nijpiyas paquilisti para nijchihuas cati techyolmelajtoc.

118 Ta tiquinhuejcamajcajtoc nochi cati quitahuelcahuaj cati techyolmelajtoc.

Inijuanti quiiytohuaj talnamiquij, pero amo cana, san mocajcayahuaj.

119 Nochi masehualme cati quinpactía tajtacolchihuaj ipan ni taltipacti tiqunina quej itetejtzo teposti cati mocahua quema tijmolonia para tijtapajpacchihuas.

Pero na niquicnelía huan nijtepanita motajtol.

120 Nochi notacayo huihuipica pampa mitzimacasi huan mitztepanita, Toteco.

Huan nojquiya niquimacasi motatzacuilitl, huan yeca amo nijnequi nimitzixpanos.

121 Na nijchijtoc cati xitahuac huan cati melahuac moixpa.

Amo techtahuelcahua inimaco nocualancaitacahua.

122 Xitatestigojquetza para techtiochihuas na, nimotequipanojca.

Amo xiquincahuili ma nechtaijyohuiltica nopa masehualme cati mohueyimatij.

123 Campa hueli nitachixtoc pampa nijchixtoc techmaquixtiqini ten nocualancaitacahua,

hasta siyajtoque noixteyolhua.

Nijchixtoc techmanahui senquisa quej tiqiiytojtoc para tijchihuas.

124 TOTECO, ipan motaicnelijcayo techchiuili cati cuali na, nimotequipanojca.

Technextili quenicatza nijchihuas cati techyolmelajtoc ma tijchihuaca.

125 Na nimotequipanojca, techmaca talnamiquilisti,

para niquixmatis motajtol.

126 TOTECO, ya ajsic tonali para timonextis huan tijchihuas cati tiquta para cuali.

Pampa ni taixpanoca masehualme ayecmo quitepanitaj moley.

127 Pero na más niquicnelía motanahuatilhua huan amo quej oro cati senquisa cuali.

128 Pampa nochi motanahuatilhua nelía xitahuac.

Yeca amo nijnequi niqutas yon se tamanti istacatili.

129 Motajtol nelía cuajcualtzi, TOTECO,

yeca nijtoquilijtinemi ica nochi noalma.

130 Quema quixtomaj mocamanal,

tehtaahuilia huan techtalnamictía nochi timasehualme,

hasta nojquiya masehualme cati pilquentzi quimachilíaj.

131 Yeca tahuel nijnequi niquixmatis más cati quiiytohuaj motanahuatilhua, huan ya nopa nijtemohua.

132 Techtachili huan techtasojta,

quej timomajtoc tiquinchiuilia cati mitzicnelíaj.

133 Techyacana ipan se cuali ojti ica mocamanal para amo nechtanis yon se taixpanoli.

134 Techmanahui ten nopa tacame cati mosisiníaj huan quinequij nechtaijyohuiltise.

Huan quej nopa nijchihuas cati quiiytohuaj motanahuatilhua.

135 Ma monexti moteicnelijcayo ipan moxayac quema techtachilía na, nimotequipanojca,

huan techmachti nochi cati techyolmelajtoc para ma tijchihuaca.

136 Tahuel nichoca pampa miyac masehualme amo quitepanitaj moley.

137 TOTECO, ta nelía tixitahuac huan nochi tatzacuilitl cati titemaca nojquiya xitahuac.

138 Nochi motajtol xitahuac huan temacht para ipan ma timotemachica.

139 Nelía nimatequipachohua huan nicualani,
pampa nocualancaitacahua amo quitepanitztoque cati ta tiqijtojtoc.

140 Nochi mole y nijyeyceojtoc huan niquitztoc para nelía tatzejtzeltolitic.
Yeca niquicnelía.

141 Nelía niteicneltzi huan miyac amo quinequij nechitase,
pero na amo niquinelcajtoc motanahuatilhua.

142 Ta tijchihua cati xitahuac para nochipa huan mole y senquisa melahuac.

143 Nopani huetztoc tequipacholi huan taijyohuillisti,
pero motanahuatilhua san ya nopa nechylchicahuaj.

144 Motajtol nochipa xitahuac.

Techmaca talnamiqulisti para nijmachilis huan quej nopa huelis niitztos.

145 Ica nochi noyolo nimitztzajtzilía.

Technanquili noTeco, huan nijchihuas cati techyolmelajtoc.

146 Na nimitztzajtzilía huan nimitzilhuía:
“Techmaquixti ten nocualancaitacahua”,
huan nijchihuas cati quijtohua motajtol.

147 Nimijquehua ica ijnaloc quema ayemo quisa tonati,
huan nimitztzajtzilía, TOTECO, pampa san ipan mocamanal nimotemachía.

148 Ica tayohua amo nicochi pampa san nimoyolilhuía ten nochi cati tiqijto-
jtoc techchihuilis.

149 Techacaquili pampa titetasojta, TOTECO.

Techmaca yancuic chichualisti quej quijtohua motamachtil para tijchi-
huas.

150 Nechca hualahuij nopa tacame cati mosisiníaj huan nechtepotztocatinemij.

Inijuanti mohuejcatilijtoque ten mole y.

151 Pero ta tinoTeco tiitztoc nonechca.

Nochi motanahuatilhua senquisa melahuac.

152 Hasta quema niitztoya nipilquentzi niquixmatqui motajtol,
huan nijmatqui para motajtol amo quema mopatas para nochipa.

153 Xijtachili notaijyohuilis huan techmanahui,
pampa amo niquelcajtoc mole y.

154 Quena, techtenpalehui huan techmanahui quej techtajtolcahuilijtoc ti-
jchihuas.

155 Amo tiqinmaquixtis nopa masehualme cati amo mitztepanitaj.

pampa injuanti amo quitacaquilíaj cati techyolmelajtoc.

156 TOTECO, ta tahuel techtasojta.

Techmaca yancuic chichualisti quej quijtohua motamachtil para tijchi-
huas.

157 Miyac nocualancaitacahua nechtepotztocatinemij huan quichihuaj
campeca para ma nimitzxipano,

pero na amo nijcajtoc motajtol.

158 Na niquincualancaita nopa tacajcayahuaní,
pampa injuanti amo quichihuaj cati quijtohua mocamanal.

159 Xiquita TOTECO, na tahuel niquinicnelía motanahuatilhua.

Techmaca yancuic chichualisti pampa ta nelía ticualí,
huan hueyi moyolo.

160 Nochi mocamanal senquisa melahuac.

Quena, nochi motamachtil senquisa xitahuac huan huejcahuas para
nochipa.

- 161 Tacame cati quipiyaj tequiticayot nemij notepotzco para nechcocose masque amo teno niquinchihuilijtoc, pero ipan noyolo san niquimacasi para niquixpanos mocamanal.
- 162 Na nimopaquilismaca ipan mocamanal quej se cati paqui miyac quema quipantijtoc cati tahuel patiyó.
- 163 Nijcualancaita nochi tamanti istacatili, pero niquicnelía miyac moleý.
- 164 Nimitzhueyimati chicome huelta ipan se tonal, huan nimitztascamati pampa xitahuac motamachtíl.
- 165 Nochi cati quicnelíaj moleý quipiyaj miyac tasehuilisti ipan iniyolo, huan amo huetzise ipan tajtacoli.
- 166 TOTECO, tahuel nimochixtoc para techmaquixtis huan yeca niquintepanita motanahuatilhua.
- 167 Na nijneltoca motajtol huan niquicnelía ica nochi noyolo.
- 168 Na nijchihua cati quijtohuaj motanahuatilhua huan motajtol, pampa ta tiquixmati nochi cati nijchihua.
- 169 TOTECO, xijtacaquili cati nimitztajtanía, techmaca talnamiqulisti senquisa quej tiquijtojtoc para tijchihuas.
- 170 Xijtacaquili cati nimitztajtanía quema nimotatajtía, huan techmanahui quej tiquijtojtoc techchihuilis.
- 171 Na nimitzpaquilismacas, pampa ta technextilijtoc quenicatza nijchihuas nochi cati techyolmelajtoc ma tijchihuaca.
- 172 Nitepohuilis nochi cati tiquijtojtoc, pampa nochi motanahuatilhua senquisa xitahuac.
- 173 Ximocualtali para techmanahuis, pampa na nijtapejpenijtoc nijchihuas cati quijtohuaj motanahuatilhua.
- 174 TOTECO, nijnequi techmaquixtiqui, pampa na san nimopaquilismaca ica moleý.
- 175 Techcahuili ma noja niitzto para nimitzhueyimatis. Xijcahuili para motamachtíl ma nechpalehui.
- 176 Na nimocuapolojtoc quej se pilborregojtzi, yeca xihuala para techtemoqui, pampa na amo niquelcajtoc para niquintepanitas motanahuatilhua.

120

Netatajtili para Toteco ma quimanahui ten nopa istacatini

- 1 Quema niitztoya ipan taijyohuilisti, nijtaztaztizi TOTECO huan yaya nechnanquili. Niquilhui:
- 2 “TOTECO, techmanahui inimaco nopa masehualme, cati nechistacahuíaj huan nechejelnamiquij.”
- 3 Ma moilhuica nopa istacatini taya ininpantis por iniistacaticayo.
- 4 Quintamicocoyotzase ica cuataminti huan quintatise ipan ticoli.
- 5 Nelía niteicneltzi na cati niitztoc inihuaya ni masehualme ten tali Mesec huan Cedar.
- Nelía nitaijyohuíá tatajco ten injuanti, pampa yon se ten injuanti amo mitztepanita, Toteco.
- 6 Ya nisyajqui para niitztoc inihuaya ni masehualme cati amo quinequij ma onca tasehuilisti.
- 7 Quema niquincamanalhuía quenicatza hueli tiitztose ica tasehuilisti,

inijuanti quisencahuaj quenicatza tatehuisse.

121

Toteco yaya mitzmocuitahuis

- ¹ Quema nijtananas noxayac, huan nitachiyas ipan nopa tepeme, nimoilhúa: “¿Canque huala notapalehuil?”
- ² Notapalehuil huala ten TOTECO, yaya cati quichijchijqui ilhuicacti huan taltipacti.
- ³ Yaya amo quema mitzcahuilis para timotepotanis o tihuetzis. Yaya mitzmocuitahuis huan amo quema cochis.
- ⁴ Quena, TOTECO cati quinmocuitahuía israelitame amo ixjicopi, yon amo cochi.
- ⁵ TOTECO yaya mitzmocuitahuía. Yaya itztoc monechca para mitzmanahuis.
- ⁶ Yaya mitzmocuitahuía tonaya huan tayohua.
- ⁷ TOTECO mitzmocuitahuis para amo mitzajsis yon se tamanti cati amo cuali. Quena, yaya quimocuitahuis monemilis.
- ⁸ TOTECO yaya mitzmocuitahuis campa hueli tiyas o tihualas, ama huan para nochipa.

122

Netatajtili para ma onca tasehuilisti ipan altepet Jerusalén

- ¹ Na nipajqui quema nechilhuijque: “Ma tiyacajya ichaj TOTECO.”
- ² Pero ama ya tiitztoque nica ipan altepet Jerusalén. Quena, ya ticalactoque campa icaltehua ni altepe.
- ³ Jerusalén quisencajtoque para nozona nochi ma mosentilica.
- ⁴ Nochi imasehualhua TOTECO ten cati hueli hueyi familia ten israelitame hualahuij nica sese xihuit, para quitascamatise huan quipaquilismacase Toteco senquisa quej quijtohua itajtol.
- ⁵ Pampa nozona mosehuía para tetajtolsencahuas nopa tanahuatijquet cati iixhui David.
- ⁶ Ximotatajtica ica TOTECO para ma onca tasehuilisti ipan altepet Jerusalén. Xijtiocihua Jerusalén ica ni camanali:
- ⁷ “Ma itztoca cuali nochi cati quicnelíaj ni altepet Jerusalén. Ma onca tasehuilisti ica calijtic nopa tepamit cati quiyahualojtoc. Ma itztoca ica paquilisti ipan nochi tequicalme.”
- ⁸ Pampa niquicnelía noicnihua huan nohuampoyohua cati itztoque nica, niqijtohua: “Ma quipiya tasehuilisti ni altepet.
- ⁹ Pampa niquicnelía ichaj TOTECO cati eltoc nica, ma onca tasehuilisti ipan ni altepet.”

123

Netatajtili para Toteco ma quitasojta

- ¹ Na nijtananas noxayac para nimitztachilis ta, TOTECO, cati timosehujtoc ipan ilhuicac.
- ² Tojuanti timitztachilíaj ta,

TOTECO toDios, para ma techtasojta san se quej se tequipanojquet
quitachilía iteco,
o quej se sihua tequipanojquet quitachilía iteco isihua para ma quichihuili
cati cuali.

³ TOTECO, techtasojta.

Quena, xijpiya hueyi moyolo ica tojuanti.

⁴ Ya tisiyajtoque ica nopa masehualme cati techitaj quej amo teno topati.
Inijuanti cati mohueyimatij huan cati tominpiyani tahuel techpinajtíaj,
hasta ya techyolajsic.

124

David quihueyimatqui Toteco pampa quimanahui ten icualancaitacahua

¹ Nochi israelitame ma quiiytoca taya tijchijosquíaj sinta TOTECO amo
itztosquía tohuaya huan amo techpalehuijtosquía.

² Sinta TOTECO amo itztosquía tohuaya quema nopa tacame motananque
para techtehuise,

³ techtolojtosquíaj tiyoltoque huan techtizontamiltijtosquíaj ica inihueyi
cualancayo.

⁴ Inijuanti techhuahuatatztosquíaj quej at tatilana,
huan huajca eltosquía quej hueyat panotosquía topani.

⁵ Quena, eltosquía quej topani panotosquía tahuel miyac at cati tetetztic,
cati tehuahuatatzta huan tiztontantosquíaj.

⁶ Ma tijtascamatica TOTECO pampa amo quincahuili ma techcococa.

⁷ Quej se totot cholohua ten se taquetzti,
quej nopa nojquiya Toteco techchololti inimaco tocualancaitacahua,
cati quinequiyayaj techmasiltise.

Nopa laso cotonqui huan tojuanti timocajque timajcajtoque.

⁸ Tojuanti totapalehuil huala ten TOTECO,
cati quichijhijqui ilhuicacti huan taltipacti.

125

Toteco quinmocuitahuía imasehualhua.

¹ Masehualme cati motemachíaj ipan TOTECO itztoque neltemachme,
quej nopa tepet Sion cati amo mojmolinía,
huan ijcatoc cuali para nochipa.

² Quej Jerusalén quiyahualojtoque miyac tepeme para quimanahuse,
quej nopa nojquiya TOTECO quinyahualojtoc imasehualhua huan quin-
manahuía.

³ Toteco amo quincahuilis ma tanahuatica masehualme cati fiero inintal-
namiquillis,
pampa huélis imasehualhua cati itztoque xitahuaque nojquiya pehuase
quichihuase tamanti cati amo cuali.

⁴ TOTECO, xiquinchihuili cati cuali masehualme cati cuajcualme,
huan cati xitahuac iniyolo moixpa.

⁵ Pero nopa masehualme cati moyocaquixitijtoque ten nopa ojti ten cuali
huan yahuij ipan ojti cati amo cuali, xiquinhuica campa tiquintatza-
cuiltis.

Huan ma onca paquilisti huan tasehuilisti ipan tali Israel.

126

Toteco quicualtalis ital

¹ Quema TOTECO sempa quinhualicas ipan Jerusalén nochi imasehualhua cati tetequipanohuaj ipan sequinoc talme, elis quej tijtemiquij.

² ¡Nelía tihuetzcase huan tihuicase ica paquilisti! Huan nopa masehualme ten sequinoc talme quijitose: “¡Dios quichijtoc huejhueyi tamanti para nopa israelitame!”

³ Quena, nelía melahuac TOTECO techchihuilis huejhueyi tamanti. ¡Ma tipaquica!

⁴ TOTECO, sempa techmaca tamanti cati cuali quej tijpixtoyaj achtohuiya. Quena, quej nopa hueyame cati ajsi ipan nopa huactoc tali huan quiyancuilia, quej nopa xijyancuili tonemilis, TOTECO.

⁵ Cati tocaj ica choquisti, ica paquilisti pixcase.

⁶ Quena, masque chocatiyase quema quitoctiyase inixinach, pero quema pixcatij huicatihualase ica paquilisti pampa ya quihualicase cati quipixcatose.

127

Nochi cati cuali huala ten Toteco

¹ Sinta TOTECO amo quichijchihua se cali cati masehualme quichihuas-nequij, san tapic inintequi cati nopona tequitij.

Sinta TOTECO amo quimocuitahuía se altepet, san tapic inintequi nopa masehualme cati nopona tamocuitahuíaj.

² San tapic anmijquehuase cualca para antequitise chicahuac huan amo anmosiyajquetzase hasta tajco yohual.

San tapic para ica miyac tequipacholi san amotacualis anquitemojtinemise. Pampa Toteco Dios quinequi ximotemachica ipan ya huan xicochica cuali.

Yaya quinmacas nochi cati quinicnelía nochi cati monequi.

³ Toconeua itztoque se nemacti ten TOTECO.

Quena, cati tacatij ten totacayo eltoc quej se tatancaoyot.

⁴ Nopa coneme cati se quinpiya quema noja se telpoca tacat, itztoque quej miyac cuataminti cati quintequihuía se soldado para ica momanahuis ipan tatehuilisti.

⁵ Cuali ipanti se tacat cati quinpiya miyac iconehua.

Nopa tacat amo pinahuas sinta icualancaitacahua quitelhuíaj iixpa se juez, pampa nochi quitepanitase cati quinpiya para ica momanahuis.

128

Cuali ipanti nopa masehuali cati quitepanita Toteco

¹ Nelía paqui nopa masehuali cati quiimacasi huan quitepanita TOTECO. Quena, paqui cati nemi xitahuac ipan iojhui.

² Quiselis itaxtahuil pampa tequiti cuali.

Yaya paquis miyac huan nochi cati quichihuas quisas cuali.

³ Isihua paquis ipan ichaj.

Yaya elis quej se cuali xocomeca tzonti cati achi más quimocuitahuíaj huan cati temaca miyac itajca.

Quinpiyas miyac ininconeuhua cati mosehuise campa imesa huan quipiyase miyac chicahualisti.

Quena, itztose quej olivo cuame cati nelía cuali.

⁴ Quej nopa TOTECO quitiochihuas nopa tacat cati quiimacasi huan quitepanita.

⁵ TOTECO quitiochihuas ten altepet Sion.

Quicahuilis ma quita para nochi eltoc cuali ipan Jerusalén nochi tonali ten inemilis.

⁶ Quicahuilis para itztos hasta quinitas iixhuihua.

¡Toteco quimacas tasehuilisti nopa tali Israel!

129

Ma huetzica cati quincualancaitaj israelitame huan altepet Jerusalén

¹ Nochi israelitame hueli quiijtose para hasta quema pejqui itztose israelitame,

huan pejqui timochihuaj se altepet ten san se toeso timasehualme, tocualancaitacahua techtepotzocatinentoque.

² Techcuesolmacatoque hasta quema tiisraelita masehualme tipejque timoscaltíaj quej se telpocat.

Pero amo quema hueltoque techtzontamiltíaj.

³ Tocuitapa techamicocojque quema techmaquiliyayaj hasta huejcajquiya.

⁴ Pero TOTECO yaya nelía xitahuac, quicotonqui nopa tepos cadenas cati ica techtatacatzohuayayaj nopa masehualme cati amo quitepanitaj TOTECO.

⁵ Ma huetzica ipan se hueyi pinahualisti nochi cati quicualancaitaj altepet Jerusalén.

⁶ Ma elica quej nopa xihuit cati nimantzi pilini huan huaqui pampa ixhuatoc ipan tali cati amo huejcata.

⁷ Quena, ma elica quej nopa xihuit cati amo aquí quimehua, yon amo aquí quipixca itajca pampa amo teno ipati.

⁸ Nimitztajtania para yon se cati pano campa nopa fiero masehualme ma amo quintiochihua.

Amo aquí ma quiiyto:

“Ma TOTECO amechtiochihua.”

Yon ma amo quiijtoca:

“Tojuanti timechtiochihuaj ica itequiticayo TOTECO.”

130

Ximotemachica ipan Toteco para amechmanahuis

¹ TOTECO, quema nimopantía ipan se hueyi taohuijca yot, na nimitztajtazilía para techtitanili motapalehuil.

² Toteco, techtacaquili quema nimitznojnotza.

Xijchihuili cuenta cati nimitztajtania huan techpalehui.

³ TOTECO, sinta tiquelnamiquisquía nochi totajtacolhua, amo aquí huelisquía moquetzas moixpa.

⁴ Pero ta nelía titetapojpolhuía, para nochi masehualme ma mitztepanitaca.

⁵ Na nimochiya ipan ta, TOTECO, para techpalehuis,

Quena, ica nochi noyolo nimotemachía ipan nopa cati techtajtolcahuilijtoc ipan mocamanal.

⁶ Ipan noalma senquisa nitachixtoc para ta, TOTECO, xitequiti.
Nitachixtoc para techpalehuis,
quej nopa tamocuitahuiani quichiyaj ma tanesi.
Quena, más nitachixtoc huan amo quej tamocuitahuiani cati tahuel
quinequij ma tanesi.

⁷ Nochi anisraelitame, ximotemachica ipan TOTECO,
pampa san yaya quipiya hueyi iyolo huan san yaya temaquixtía talojtitzi.
⁸ Yaya quinmaquixtis israelitame ten nochi inintajtacolhua.

131

Ximotemachica ipan Toteco

¹ TOTECO, na amo nimohueyimati,
yon amo nimotepanita.
Na amo nimoilhuía para achi más nicuali,
yon amo nimoilhuía para más nijmati que sequinoc.
² Na amo nimolinía iixpa Toteco.
Nimochijtoc quej se piloquichpiltzi cati sanoc quicajtoc chichi huan mose-
huía imetzco inana.
Quena, ayecmo teno nimitztajtaniytoc.
³ Huajca anisraelitame ten ama huan para nochipa,
san ximotemachica ipan TOTECO.

132

Netatajtli para Toteco ma quitiochihua nopa tiopamit

¹ TOTECO, xiquelnamiqui David huan quenecatza taijyohui.
² Xiquelnamiqui quenecatza David tatestigojquetzqui ica ta, TOTECO,
cati tiTeco Jacob, Cati Tijpiya Nochi Chicahualisti.
³ Quiijto:
“Amo nicalaquis nocalijtic,
yon amo nimotecas ipan notapech para nicochis.
⁴ Amo niixjcopis, yon amo nicochis yon se talojtzi,
⁵ hasta nijpantis se lugar campa huelis nijchihuas ichaj TOTECO para ipan
ma itzto,
yaya cati iTeco Jacob, Cati Quipiya Nochi Chicahualisti.”
⁶ Tijcajque camanaltij ipan tali Efrata para iCaxa TOTECO eltoya nozona,
huan teipa tijpantijque huejca ten altepeme ipan cuatitamit.
⁷ Huajca ama ma tiyaca ipan itiopa Toteco.
Ma tiyaca timotancuaquetzatij iixpa para tijhueyichihuase.
⁸ TOTECO, ximotanana huan xicalaqui ipan nopa tiopamit campa eltoc
moCaxa,
cati quiixnextia mochicahualis.
⁹ Nopa totajtitziti cati tiquintapejpenijtoc ma moquentica iniyoyo chipahuac
cati quinixnextia para tatzeltzeloltique,
huan nochi masehualme cati tiquiniyocatalijtoc ma tzajtzica ica paquillisti.
¹⁰ NoTeco, pampa tiquicnelía motequipanojca David,
amo ximoicancuepa ten nopa tanahuatijquet cati ta tijtapejpeni,
para quinnahuatis momasehualhua.
¹¹ Pampa ta, TOTECO, tijtajtolcahuili David,

huan amo quema tiquelcahua tijtamichihuas cati tijtajtolcahua tijchihuas. Huan ta tiquilhui para teipa tiquintalis iixhuihua ipan isiyaj para tanahuatise.

¹² Huan sinta iixhuihua quichihuase cati quijtohua nopa camanal senc-ahuali cati tijchijqui ica David huan sinta quitepanitase motajtol, huajca injuanti nojquiya mosehuise ipan isiyaj para tanahuatise para nochipa.

¹³ Pampa ta TOTECO, tijtapejpenijtoc altepet Jerusalén para tiitztos nozona.

¹⁴ Tiquijto:

“Ya ni elis nochaj campa niitztos para nochipa. Nozona nimocahuas pampa ya nopa cati nijnequi.

¹⁵ Nijtiocihuas miyac ni altepet huan niquintamacas imasehualhua cati teicneltziti.

¹⁶ Niqinmaquixtis itotajtzitzi ten nochi cati quinequij quincocose, huan itatzejzeloltica masehualhua tzajtzise ica paquilisti.

¹⁷ Nopa chicahualisti cati David quipixqui sempa nijchihuas para monextis ipan icone,

huan yaya cati nicaltijtoc para nijtequimacas quej tanahuatijquet elis quej se taahuili para imasehualhua.

¹⁸ Icalancaitacahua niquintahuisos ipan se hueyi pinahualisti, pero yaya cati tanahuatijquet tanahuatis cuali huan monextis nochi ihueyitlis.”

133

Nelia cuajcualtzi nesi quema timosentilaj inihuaya toicnihua

¹ Xiquitaca, nelia cuali huan cuajcualtzi nesi para icnime ma itztoca sentic ica san se iniyolo.

² Quema san se iniyolo masehualme, eltoc cuajcualtzi quej nopa aceite cati quitequiliyque Aarón ipan itzonteco, huan temoc ipan itentzo huan yajqui hasta iteno iyoyo.

³ Eltoc cuajcualtzi huan nesi quej nopa ajhuehti cati huetzi ipan tepet Hermón huan moxixitohua ipan tepet Sion.

Pampa campa itztoque sentic ica san se iniyolo masehualme, TOTECO nozona quititani tatiocihualisti huan nemilisti para nochipa.

134

Ma quitascamatica Toteco sesen tiotac

¹ Ama xijhueyimatica TOTECO, nochi amojuanti anitequipanojcahua.

Xijhueyimatica nochi amojuanti cati sesen tayohua antamocuitahuíaj ipan ichaj.

² Ximomatananaca huan xijtascamatica TOTECO.

³ Ma amechtiochihua TOTECO ten nozona ipan altepet Sion, Quena, ma amechtiochihua Toteco cati quichijchijqui ilhuicacti huan taltipacti.

135

Toteco nelia hueyi, pero teteyome amo teno ininpati

¹ ¡Xijpaquilismacaca TOTECO!

Quena, xijpaquilismacaca nochi amojuanti anitequipanojcahua.

² Xijpaquilismacaca nochi amojuanti cati anitztoque ipan ichaj TOTECO huan cati annentinemij icalixpa.

³ Xijpaquilismacaca TOTECO pampa yaya nelía cuali. Xijhuicatica ica tiohuicat pampa yaya hueyi iyolo.

⁴ Pampa TOTECO quitapejpenijtoc Jacob para quicnelis. Quintapejpeni nochi iixhuihua ma elica iaxcahua.

⁵ Na nijmati para TOTECO tahuel hueyi.

Nijmati para yaya tahuel más hueyi que nochi cati quintocaxtiaj “dioses”.

⁶ TOTECO quichihua nochi cati quinequi quichihuas ipan ilhuicacti, taltipacti,

huan ipan hueyi at huan campa más huejcata.

⁷ Quichihua para ipan nochi taltipacti ma motanana mixti, huan nojquiya quititani tapetanilot huan quichihua ma huetzi at. Yaya quinahuatía ma quisa nopa ajacat campa moajocot.

⁸ Quichijqui ma miqui nopa achtohui ejquet ipan sese familia ten tali Egipto, huan nopa achtohui ejquet ten inintapiyalhua.

⁹ Quichijqui huejhueyi tiochicahualnescayot ipan tali Egipto iixpa Faraón huan itequipanojcahua.

¹⁰ Quintzontamilti miyac masehualme ipan miyac talme.

Quinmicti tanahuatiani cati quipiyayayaj miyac chichahualisti.

¹¹ Quimicti Sehón cati eliyaya inintanahuatijca nopa amorreos.

Nojquiya quimicti Og tanahuatijquet ten tali Basán huan nochi nopa tanahuatiani ipan tali Canaán.

¹² Huan nochi nopa tali cati quinahuatiyayaj nopa tanahuatiani quincuili, huan quinmacac nopa talme nopa israelitame quej elisquía se tamanti cati inintata quinchahuilijtejqüi.

¹³ TOTECO, masehualme mitzelnamictose para nochipa.

Nochi masehualme cati tacactiyase mitzixmajtose para tahuel tihueyi.

¹⁴ Pampa TOTECO quintajtolsencahuas xitahuac nochi imasehualhua, huan yaya quintasojtas itequipanojcahua.

¹⁵ Nopa masehualme cati itztoque ipan talme cati amo quiixmatij Toteco, quinhueyichihuaq teteyome ten oro huan plata cati quinchijchijtoque ica inimax.

¹⁶ Nopa teteyome quipiyaj inincamac, pero amo camanaltij, quipiyaj inixteyol, pero amo tachiyaj.

¹⁷ Quipiyaj ininacas, pero amo tacaquij, huan nojquiya amo hueli taijyotilanaj.

¹⁸ Nopa masehualme cati quinchijchihuaq nopa teteyome san se huihuitique quej nopa teteyome,

huan nojquiya san se huihuitique cati ininpan motemachíaj.

¹⁹ ¡Anisraelitame, xijpaquilismacaca, TOTECO!

Amojuanti antotajtzitzi cati aniixhuihua Aarón, xijpaquilismacaca TOTECO.

²⁰ Aniixhuihua Leví, xijpaquilismacaca TOTECO.

Huan nochi amojuanti cati anquiimacasiq huan anquitepanitaj TOTECO, xijpaquilismacaca.

²¹ Nochi masehualme ipan altepet Jerusalén ma quipaquilismacaca TOTECO pampa yaya itztoc nica ipan altepet Jerusalén.

¡Paquilisti!

136

Ma tijtascamatica Toteco

- ¹ Xijtascamatica TOTECO pampa yaya nelía cuali,
pampa itaicnelijcayo amo quema tami.
- ² Xijtascamatica Toteco Dios cati más hueyi ten nochi sequinoc “dioses”,
pampa itaicnelijcayo amo quema tami.
- ³ Xijtascamatica Toteco Dios cati ininTeco nochi tetecome,
pampa itaicnelijcayo amo quema tami.
- ⁴ Xijtascamatica TOTECO pampa san ya hueli quichihua huejhueyi tamanti,
pampa itaicnelijcayo amo quema tami.
- ⁵ Xijtascamatica yaya cati quichijchijqui ilhuicacti ica miyac talnamiquilisti,
pampa itaicnelijcayo amo quema tami.
- ⁶ Xijtascamatica yaya cati quitali ni tali ipani at,
pampa itaicnelijcayo amo quema tami.
- ⁷ Xijtascamatica yaya cati quinchijchijqui nopa taahuilme cati onca nepa
ilhuicac,
pampa itaicnelijcayo amo quema tami.
- ⁸ Quichijchijqui nopa tonati para ma taahui tonaya,
pampa itaicnelijcayo amo quema tami.
- ⁹ Huan quichijchijqui metzti huan sitalime para ma taahuica tayohua,
pampa itaicnelijcayo amo quema tami.
- ¹⁰ Xijtascamatica TOTECO cati quintzontamilti nopa achtohui ehuan ten tali
Egipto,
pampa itaicnelijcayo amo quema tami.
- ¹¹ Xijtascamatica cati quinquixti israelitame ipan inintal nopa egiptome,
pampa itaicnelijcayo amo quema tami.
- ¹² Quena, quinquixti ica ihueyi chichahualis huan ica inejmat quinpalehui,
pampa itaicnelijcayo amo quema tami.
- ¹³ Xijtascamatica yaya cati quixelo nopa Hueyi At Chichiltic para ma panoca
imasehualhua,
pampa itaicnelijcayo amo quema tami.
- ¹⁴ Huan quinpanolti nopa israelitame ipan tali huactoc tatajco nopa hueyi
at,
pampa itaicnelijcayo amo quema tami.
- ¹⁵ Pero quinzontopolihuilti Faraón huan isoldados ipan nopa hueyi at,
pampa itaicnelijcayo amo quema tami.
- ¹⁶ Xijtascamatica Toteco cati quinyacanqui imasehualhua ipan nopa huactoc
tali,
pampa itaicnelijcayo amo quema tami.
- ¹⁷ Xijtascamatica yaya cati quinmanahui imasehualhua inimaco tanahua-
tiani cati quipixque miyac chichahualisti,
pampa itaicnelijcayo amo quema tami.
- ¹⁸ Yaya quintzontamilti huejhueyi tanahuatiani cati tahuel quipiyayayaj
chichahualisti,
pampa itaicnelijcayo amo quema tami.
- ¹⁹ Quitzontamilti Sehón, inintanahuatijca nopa amorreos,
pampa itaicnelijcayo amo quema tami.
- ²⁰ Nojquiya quimicti Og, tanahuatijquet ten tali Basán,
pampa itaicnelijcayo amo quema tami.
- ²¹ Huan inintal nopa tanahuatiani,

Toteco quinmacac imasehualhua quej se tamanti cati inintata quincahuili-
jtejqui,
pampa itaicnelijcayo amo quema tami.

²² Quena, quimacac itequipanojca Israel para ma moaxcati nopa tali para
nochipa,

pampa itaicnelijcayo amo quema tami.

²³ Yaya cati techelnamijqui tiisraelitame quema ayecmo tijpiyayayaj chic-
ahualisti,

pampa itaicnelijcayo amo quema tami.

²⁴ Yaya techmanahui inimaco tocualncaitacahua,
pampa itaicnelijcayo amo quema tami.

²⁵ Yaya quinmaca tacualisti nochi tamanti cati yoltoque,
pampa itaicnelijcayo amo quema tami.

²⁶ Xijtascamatica Toteco Dios cati quinquahuatía ilhuicacti,
pampa itaicnelijcayo amo quema tami.

137

Inintequipachol israelitame cati itztoque ipan tali Babilonia

¹ Ipan tali Babilonia timosehuiyayaj iteno hueyat,
huan timochoquuliyayaj,

pampa tiquelnamiquiyayaj altepet Jerusalén,
huan quenicatza nelía cuali eliyaya.

² Tiquintahuelcajtoyaj toarpas huan tiquincuapilojtoyaj ipan inimacuayo
nopa cuame.

³ Amo hueliyaya tihuicaj.

Pero injuanti cati techhualicaque ica fuerza ipan inintal,
techtajtanijqe ma tihuicaca ica paquilisti nopa cuajcualtzitzi huicat cati
tihuicayayaj quema tiitztoyaj ipan altepet Jerusalén.

⁴ Pero amo tihuelque.

Amo hueli tihuicase se huicat para Toteco ipan seyoc tali ica masehualme
cati amo tiquinixmatij.

⁵ Sinta niquelcahuasquía altepet Jerusalén,
ma quipolo ichicahualis nonejmat,
huan ma ayecmo huelis quitzotzonas nopa arpa.

⁶ Sinta ayecmo niquicnelisquía Jerusalén cati techpaquilismaca,
xijcahua nonenepil ma tatzqui ipan nocamachal para ayecmo nihuicas.

⁷ TOTECO, amo xiquelcahua cati nopa tali Edom ehuani quiijtojqe,
quema nopa soldados ten tali Babilonia quisosolohuayayaj altepet
Jerusalén.

Injuanti quiijtohuayayaj:

“Xijsosoloca nopa altepet hasta campa tatzquitoc.”

⁸ Teicneltzi ni tali Babilonia,

pampa nojquiya quisosolose.

Nelía paquis nopa tacat cati quitamisosolos huan quintzontamiltis imase-
hualhua.

⁹ ¡Tahuel paquis nopa tacat cati quintzquis coneme ten Babilonia huan
quinxaxamatzas ipan tet,

por cati fiero quichijtoque inintatahua ipan altepet Jerusalén!

138

Tascamatili por itapalehuil Toteco

- ¹ Ica nochi noyolo nimitztascamatis, TOTECO, huan nihuicas para ta iniixpa moillhuicac ejcahua.
- ² Nimotancuaquetza iixmelac motiopa cati tatzejzeloltic, huan nimitztascamatis pampa nelía titetasojta huan titemachti. Nochi cati techtajtolcahuilijtoc para tijchihuas, tijtamichihuas pampa mocamanal nelía temachti quej ta titemachti.
- ³ Quema nimitztajztzilía, ta technanquilía huan techfuerzajmaca.
- ⁴ TOTECO, nochi tanahuatiani cati itztoque ipan ni taltipacti mitztascamatis, pampa nochi injuanti quicaquise cati tijtajtolcajtoc.
- ⁵ Quena, huicase por nochi nopa huejhueyi tamanti cati quichijtoc TOTECO, pampa ihueyitilis nelhueyi.
- ⁶ Masque TOTECO tahuel hueyi, yaya quintacaquilía cati moehcapanohuaj. Pero cati mohueyimatij, monequi moquetzase huejca ten Toteco, pampa yaya amo quinequi quinitas.
- ⁷ Sinta niitztoc ipan taijyohuillisti, ta TOTECO, techmanahuía huan techmaquixtía. Huan quema nechtehuíaj nocualancaitacahua, ta tijxitahua momax huan techmaquixtía ica mohueyi chicachualis.
- ⁸ TOTECO, ta tijchihuas nochi cati timoilhuijtoc para tijchihuas ipan na nonemilis. Pampa nopa taicnelijcayot cati tijpiya ica na, TOTECO, amo quema tami. Amo techtahuelcahua pampa ta techchijchijqui.

139

Toteco itztoc campa hueli

- ¹ TOTECO, ta techyoltachilijtoc huan tijmati nochi ten na.
- ² Ta cuali tijmati sinta nimosehuía o nimoquetza. Huan quema niitztoc huejca, ta tijmati taya nijpixtoc ipan notalnamiqulis.
- ³ Ta technextilía nopa ojti cati monequi nijtoquilis, huan techilhuía canque nicalaquis huan canque nimosiyajquetzas. Sesen talojtzi ta tijmati canque niitztoc.
- ⁴ Ta TOTECO, tijmati taya niqijtos hasta quema ayemo nicamanalti.
- ⁵ Ta techyahualojtoc pampa tiya ica noixpa huan ica noica, huan nopani tijtalía momax para techtiochihuas.
- ⁶ Nochi ni tamanti cati ta tijmati nelía cuajcualtzi, huan ohui para nijneltocas.
- ⁷ Amo cana hueli nimotatis ten moTonaltzi. Amo cana huelis nimotatis huan amo tiitztos nopona.
- ⁸ Sinta nitejcos hasta ilhuicac para nimotatis, ta nopona tiitztoc.

Huan sinta niyasquía ipan nopa hueyi ostot campa itztoque mijcatzitzí, ta nepa tiitztoc.

⁹ Sinta nijpiyasquía noeltapal huan nipatanisquía, huan niquixcotonasquía nopa hueyi at,

¹⁰ hasta nepa techyacanasquía ica mohueyi chicahualis.

¹¹ Sinta nijchihuasquía campeca para nimotatis ipan tzintayohuilot, nopa tzintayohuilot mocuepasquía taahuili yahualtic ten na, pampa ta tiitztos nopona.

¹² Pampa yon nopa tzintayohuilot amo hueli techtatis moixpa, Toteco.

Pampa para ta nopa yohuali taahuía quej elisquía tonaya.

Nopa tzintayohuilot huan taahuili ta tiquita san se.

¹³ Ta tijsenajqui sesen tamanti cati onca ijtíc notacayo.

Huan quema niitztoya ijtico nonana, tijmotzquilti sesen tamanti cati nijpiya.

¹⁴ Nimitztascamati pampa techsenajqui ma nieli se tamanti cati nelía cuajcualtzi.

Quena, nopa tequit cati tijchijqui quema techsenajqui nel pano yejyectzi, San nijtetzaita para nimoilhuis ten nochi cati ta tijchijtoc ipan notacayo.

¹⁵ Ta techtachilijtoya quema na nipejqui nimoscaltía nel nimotatijtoya ten nochi sequinoc ipan ijtico nonana.

Quema amo aquí más quitachilijtoya, ta techchijchijqui ica mohueyi yajatil, quej se cati cuali quimati taxinepalohua.

¹⁶ Ta techitac quema ayemo nitacatiyaya.

Huan quema ayemo nitaijyotilanayaya, tiquixquetzqui quesqui tonali niitztosquía.

Huan sesen tonali cati niitztosquía huan taya nopantis, ta tiquijcuilo ipan moamatapohual.

¹⁷ Toteco Dios, nijmachilía nelía cuajcualtzi quema nimomaca cuenta para ta tijsenhuiquilía timoyolilhuía ten na.

¹⁸ Hasta amo hueli nijpohua quesqui huelta timoyolilhuía ten na ipan se tonal.

Huan ica ijnaloc quema niisa, ta noja timoyolilhujtoc ten na.

¹⁹ Toteco Dios, nelía elisquía cuali sinta tiqintzontamiltisquía nochi masehualme cati amo mitztepanitaj.

Xijchihua ma nechtalcahuica nopa temictiani,

²⁰ pampa inijuanti mitztaijilhuíaj, huan san quiahuilmatij motoca.

²¹ TOTECO, ¿amo quinamiqui para niquincualancaitas inijuanti cati mitzcualancaitaj?

¿Amo quinamiqui nicualanis ica mocualancaitacahua?

²² Quena, tahuel niquincualancaita,

pampa niquninta quej nojquiya elisquíaj nocualancaitacahua na.

²³ NoTeco Dios, xijtachili noyolo huan xiquita nochi cati eltoc nopona.

Huan xijyejyeco notalnamiqulís para tiquitas sinta xitahuac cati nimoilhúa.

²⁴ Technextili sinta ipan notalnamiqulís onca se talnamiqulísti cati amo mitzpacía,

huan techyacantiya ipan nopa ojti cati tehuica campa onca nemilísti para nochipa.

140

Toteco techmanahui inimaco amo cuajcualme

¹ TOTECO, techmanahui inimaco nopa taixpanoca masehualme. Techmocuitahui para tatehuijca tacame amo huelis nechcocose.

² Inijuanti nochi se tonal quisencahuaj quenicatza quichihuase tamanti cati amo cuali.

Talojtztzi quinequij quipehualtise cualanti.

³ Inincamanal tecocohua quej itencococa se cohuat o se colot.

⁴ TOTECO, techmocuitahui para amo nihuetzis inimaco masehualme cati amo cuajcualme,

huan cati tetajilhuáj,

pampa inijuanti moilhuijtoque quenicatza nechhuihuiitase.

⁵ Nopa masehualme cati mohueyimatij quitajlijtoque se taquetzti para ma nimasi.

Quitajlijtoque se lazo para ica nechcuapilose para nimohuisos ajacatipa.

Nechchiyaj ica se matat para nechmasiltise.

⁶ Na nimitzilhuijtoc, TOTECO, para ta tinoDios.

Tehtacaquili quema nimitztajtzilía.

⁷ Ta tiTOTECO Dios, tinotemaquixtijca,

ta tijpiya nochi chichahualisti para techmaquixtis.

Ta techmocuitahuía quema onca tatehuilisti.

⁸ TOTECO, amo xiquincahua ma tatanica nopa masehualme cati amo mitztepanitaj.

Amo xiquinpalehui para quisas cuali cati quinequij quichihuase para ma amo mohueyimatica.

⁹ Xijchihua para nochi tamanti cati moilhuijtoque quichihuase ma huetzi ininpani.

Ma tzontamica senquisa quej quisencajtoyaj nechtzontamiltise na.

¹⁰ Ipan inintzonteco ma huetzi ticoli,

o xiquinmajcahua ipan tit,

o ipan ostot cati tahuel huejcata campa ayecmo huelise quisase.

¹¹ Amo xiquincahuili ma tatanica ipan total nopa masehualme cati quin-pactía istacatise.

Más cuali nimantzi xiquintatzacuiliti.

¹² Pero na cuali nijmati para ta, TOTECO,

tiquinpalehuis nopa teicneltziti cati inijuanti quintepotztocatinemij.

Ta tiquinpalehuis cati teicneltziti para ma quisa cuali para inijuanti quej quinamiqui.

¹³ Huan masehualme cati itztoque xitahuaque mitztascamatise,

pampa quimatij para temachtit itztotij moixpa.

141

Netatajtli para Toteco ma quimanahui

¹ TOTECO, na nimitznotza.

Ximoisihuilti techpalehuiqui.

Tehtacaquili quema nimotatajtía ica ta.

² Xijseli nonetatajtis quej elisquía copali cati quitatíaj moixpa,

huan quema nimomatanana para nimitzhueyimati,

xiquita quej se tacajcahualisti cati nimitzmactilía ica tiotac.

³ TOTECO, techmocuitahui para ma amo nicamanalti quej hueli.

Techpalehui para nimocamatzacuas.

⁴ Amo techcahuili nijnequis tamanti cati amo cuali.

Amo techcahuili ma niquinpalehui taixpanoca masehualme ica cati quichihuj.

Ma amo niquixtoca nijcuas nopa cuali tamanti cati quipiyaj.

⁵ Quema monequi se nechtalnamichtis,

xijchihua para cati monejnemiltíaj xitahuac moixpa ma nechtatzacuiltica.

Ya nopa niquitas quej se cuali tamanti cati nechchihuilíaj.

Sinta masehualme cati cuajcualme nechtacahualtise,

elis quej se pajti para na.

Amo techcahuili para nijhuejcamajcahuas ya nopa.

Pero na talojtitziti nimotatajtía para ma quiselica tatzacuiltili taixpanoca masehualme.

⁶ Quema nijchihuas para mocuamimilose inintayacancahua ipan tepet,

quicaquise nocamanal huan quipantise para nelcuali.

⁷ Nopa fiero masehualme quiselise tatzacuiltili huan iniomiyohua quitepehuase ipan campa hueli tali.

⁸ TOTECO, ta cati titoTeco, na san nimitzchiya para techpalehuis.

Ipan ta nimotemachía para techmocuitahuis.

Amo xiquincahuili ma nechmictica.

⁹ Techpalehui para amo nimasis ipan nopa taquetzti cati quitaliytoque nopa fiero masehualme.

¹⁰ Xijchihua para nopa amo cuajcualme iniselti ma momasiltica ipan nopa taquetzti cati quisencajtoque para sequinoc.

Pero na ma nipano nimajcajtoc huan amo teno ma nopanti.

142

David tajtanqui tapalehuili quema itztoya ipan taohuijcaoyot

¹ Chicahuac nijtzajtzilis TOTECO huan nijtajtanis ma nechtasojta.

² Iixpa ya nijpohuilía nochi cati nechtequipacholmaca.

³ Quema eltoc quej nimisahuía ipan taohuijcaoyot,

huan ayecmo nijmati taya nijchihuas, nijnojnotza.

San ya quimati taya ojti monequi nijtoquilis para nimomanahuis ten nopa taquetzti,

cati quitaliytoque nocualancaitacahua.

Quena, campa hueli quitatijtoque taquetzti ipan noojhui.

⁴ Nijtachili campa hueli huan niquitac.

Amo aqui moyolilhuía ten na.

Amo aqui quinequi nechpalehuis.

Amo aqui nechmocuitahuía, yon amo aqui quichihuilía cuenta nonemilis.

⁵ Huajca na nimitztzajtzili, TOTECO, huan nimitzilhui:

“TOTECO, san ipan ta nimotemachía para techmocuitahuis.

San ta hueli techmanahuis para amo teno nopantis.

⁶ Xijtacaquili cati nimitztajtanía,

pampa tahuel nechtaijyohuilíaj masehualme.

Techmanahui inimaco cati nechtepztocatinemij,

pampa injuanti achi más quipiyaj chicahualisti que na.

⁷ Techquixti ipan ni tatzacti campa niitztoc para nihuelis nimitztascamatis.

Huan huajca nopa masehualme cati itztoque xitahuaque,

nechyahualose huan paquise pampa tijpiyas hueyi moyolo ica na para nochipa.”

143

Netatajtili para Toteco ma quimanahui huan ma quiyacana

- 1 ¹TOTECO, xijtacaquili cati nimotatajtía ica ta!
 Technanquili pampa ta titemachti huan san cati cuali tijchihua.
- 2 Amo ximochihua quej se juez huan techtajtolsencahua,
 pampa moixpa ta amo aqui se masehuali cati itztoc xitahuac.
- 3 Nocualancaitacahua nechtepoptztocatoque huan nechitzquijque.
 Nechtahuisojque huan nechchihualtíaj ma niitztó ipan tzintayohuilot quej
 cati ya mictoque.
- 4 Nelía senquisá nimoyoltequipachohua,
 hasta ayecmo nijmati taya nijchihuas.
- 5 Niquelnamiqui quenicatza eltoya ipan nopa tonali cati panoc.
 Nimoyolilhuía ten nochi huejhueyi tamanti cati tijchijqui.
- 6 Yeca nimomatanana moixpa huan nimitztemohua.
 Ipan noyolo tahuel nimitznequi quej se tali cati huactoc quinequi at.
- 7 TOTECO, nimantzi technanquili pampa tahuel nitaijyohuía ipan noyolo.
 Amo ximoicancuepa ten na para amo nimiquis.
- 8 Ica ijnaloc, technextili motaicnelijcayo,
 pampa ipan ta nimotemachijtoc para techmocuitahuis.
 Technextili nopa ojti cati monequi nijtoquilis,
 pampa san ta nimitzilhuía cati eltoc ipan noyolo.
- 9 TOTECO, techmanahui ten nocualancaitacahua,
 pampa ipan ta nimotemachía para amo teno nopantis.
- 10 Techmachtí ma nijchihua cati ta tijnequi pampa ta tinoTeco Dios.
 MoTonaltzi ma nechyacana campa cuali ojti.
- 11 TOTECO, techmaquixti para ma monexti mohueyitilis.
 Techquixti ten ni taijyohuilisti pampa ta tijchihua cati xitahuac.
- 12 Pampa ta techicnelía, xiquinhuejhuelo nochi nocualancaitacahua.
 Xiquintzontamilti nochi cati quinequij nechchihuilise cati amo cuali,
 pampa nimotequipanojca.

144

Netatajtili para Toteco ma quipalehui para tatanis

- 1 Ma nochi quipaquilismacaca TOTECO cati nechtatía para amo nechajsise
 nocualancaitacahua.
 Yaya nechyacana huan nechnextilía quenicatza nitatehuis.
- 2 Yaya nechtasojta huan yaya nechpixtoc campa temachti.
 Yaya nechpixtoc imaco huan nechchololtis ten nocualancaitacahua.
 Yaya notamanahuijca huan ipan ya nimotemachijtoc.
 Yaya quintalijtoc nomaco miyac talme ica inimasehualhua para ma niquin-
 nahuati.
- 3 TOTECO, ¿taya topati timasehualme para toca timocuatotonía?
 ¿Taya topati para tahuel ta techpatiita?
- 4 Pampa tonemilis san panotehua quej se ajacat huan quej se ecahuili.
- 5 TOTECO, xijcuilpacho nopa ilhuicacti huan xitemo techpaxaloqui.
 Sinta tiquinajsis nopa tepeme, popocase.
- 6 Xijtitani tapetanilot quej elisquía cuataminti,

huan xiquinsemana nochi mocualancaitacahua huan ma ayecmo quimatica taya quichihuase.

⁷ Hasta ten nepa ilhuicac xijxitahua momax huan techmaquixti. Techchololti inimaco ni nocualancaitacahua cati ehuaní ipan sequinoc talme huan tahuel quiپیay chicahualisti.

Na nijmati quej nimisahuisquía ipan se at cati tahuel huejcata.

⁸ Inijuanti san quinpactía istacatise.

Tatestigojquetzaj para quiijtose cati melahuac, huan nimantzi istacatij.

⁹ NoTeco Dios, na nihuicas huicat cati yancuic, huan nitatzotzonas ipan noarpa cati quiپیa majtacti cuerdas.

¹⁰ Pampa ta cati tiquinchihua ma tatanica tanahuatiani.

Ta cati techmaquixti na nimotequipanojca, David, para ma amo nechmictica ica macheta.

¹¹ Nojquiya techmaquixti huan techmanahui inimaco nocualancaitacahua, pampa inijuanti san teistacahuíaj huan tacajcayahuj.

¹² Xijchihua para totelpocahua ma elica tejtetique huan huejcapantique quej cuame cati cuajcualtzi moscaltíaj.

Huan toichpocahua ma elica cuajcualtzitzi, quej nopa taquetzalme cati quinyejyecchijtoque, huan quinquetztoque ipan ininchajchaj tanahuatiani.

¹³ Xijchihua para tocoxtalhua ma temica ica miyac tamanti pixquisti.

Huan toborregojuhua ma momiyaquilica hasta ma mochihuaca miles huan millones ipan topotrero.

¹⁴ Xijchihua totorojhua ma quiپیyaca miyac chicahualisti para tequitise.

Amo xijcahuili yon se toculancaitaca ma quiyahualo toaltepe.

Techmaca tasehuilisti campa hueli.

Amo xijcahua para se ten tomasehualhua monequis tetzajtzilis para ma quinpalehuica pampa quipanti cati fiero ipan tocalles.

¹⁵ Quena, nelía paquij nopa masehualme ipan se altepet cati quej ni eltoc, huan amo quiپیa cati fiero.

Quena, nelía paquij cuali masehualme cati quiپیay TOTECO quej ininDios, huan ipan ya motemachíaj.

145

Toteco nelía cuali huan quiپیa nochi chicahualisti

¹ Nochi nonemilis huan para nochipa nimitzhueyimatis tinoTeco huan tinotanhuatijca.

² Mojmosta nimitzhueyichihuas.

Quena, ama huan para nochipa nimitzpaquilismacas.

³ Nelía tihueyi, TOTECO, huan quinamiqui ma timitzhueyimatica nochi timasehualme.

Amo aqui quitamimachilía nochi mohueyitilis.

⁴ Nochi coneme cati moscaltijtiyase quielnamiqaise cati tijchihua, huan tepohuilis nopa tamanti cati tijchijtihualajtoc ica mohueyi chicahualis.

⁵ Na san nimoyolilhuis ten moyejyejca huan mohueyitilis,

huan nopa tatanexti cati mitzyahualojtoc.

Nimoilhuis ten nopa huejhueyi tiochicahualnescayot cati tijchijtoc.

⁶ Masehualme camanaltise ten nopa huejhueyi tamanti cati tijchijtoc.

Huan na nitepohuilis ten mohueyitilis.

- 7 Nochi masehualme ipan taltipacti camanaltise para nelía ticuali huan hueyi moyolo.
 Quiijtose para tijchihua san cati xitahuac.
- 8 TOTECO, hueyi moyolo huan tahuel titetasojta.
 Amo nimantzi ticualani huan titeicnelía miyac.
- 9 TOTECO ta cuali moyolo ica nochi masehualme huan motaicnelijcayo monextía ipan sesen tamanti cati tijsencajtoc.
- 10 TOTECO, nochi tojuanti cati ta techchijchijtoc timitztascamatij.
 Quena, nochi tojuanti cati timitztoquillíaj timitzpaquilismacase.
- 11 Tojuanti sentic timocamanalhuse ten ihueyitilis motanahuatilis campa ta titanahuatía,
 huan ticamanaltise quenicatza tijpiya hueyi chichahualisti.
- 12 Titepohuilise ten nopa huejhueyi tiochichahualnescayot cati tijchijtoc,
 huan ten moyejejeja huan ten ihueyitilis motanahuatilis campa ta titanahuatía.
- 13 Pampa motanahuatilis amo quema tamis.
 Ta tijpiyas tanahuatili ica nochi masehualme cati tacactiyase para nochipa.
- 14 Ta TOTECO tiquintanana nochi cati huetzij,
 huan tiquinfuerzajmaca cati itztoque ipan tequipacholi.
- 15 Nochi masehualme ipan taltipacti mitztemohuaj,
 huan mitzchiyaj para xiquinpalehui.
 Ta tiquinmaca inintacualis quej quinpolojtihuala.
- 16 Ta ica momax tiquintiochihua nochi cati yoltoque,
 pampa tiquinmaca cati quicuase huan cati quiise.
- 17 TOTECO quichihua san cati xitahuac,
 huan quinextía para hueyi iyolo ipan nochi cati quichihua.
- 18 TOTECO itztoc ininechca nochi cati quitzajtzilíaj.
 Quena, itztoc ininechca nochi cati quitemohuaj ica nochi iniyolo.
- 19 Yaya quinmaca cati quinequij nochi masehualme cati quiimacasij huan quitepanitaj.
 Quintacaquilía quema quitzajtzilíaj ma quinpalehui huan quinmaquixtía ten cati amo cuali.
- 20 TOTECO quinmocuitahuía nochi cati quicnelíaj,
 pero nochi cati amo quitepanitaj,
 Toteco quintzontamiltis.
- 21 Nijpaquilismacas TOTECO ica nocamac.
 Nochi masehualme cati itztoque campa hueli quipaquilismacase para nochipa huan amo quema tamis.

146

San ma timotemachica ipan Toteco

- 1 Na nijhueyimatis TOTECO ica nochi noyolo.
 2 Nochi tonali ipan nonemilis nijpaquilismacas TOTECO.
 Nihuicas tiohuicat para noTeco Dios hasta nimiquis.
- 3 Amo ximotemachica ipan huejhueyi tacame cati quipiyaj tequiticayot,
 yon ipan se ten hueli tacat pampa yon se masehuali amo huelis mitzmaquixtis.
- 4 Pampa se tonali miquise nochi masehualme huan mocuepase tali.
 Quena, tamis inijjyoyo huan ininemilis,
 huan ica se talojtzi tamis nochi cati moilhuijtoyaj quichihuase.

⁵ Pero nelía paqui nopa masehuali cati quipixtoc quej itapalehuijca yaya cati iTeco Jacob,

huan san ipan TOTECO iDios motemachía para quimocuitahuis.

⁶ Yaya cati quichijchijqui ilhuicacti, taltipacti, hueyi at huan nochi cati itztoque nopona.

Yaya cati quichihua nochi cati quitajtolcajtoc para quichihuas.

⁷ TOTECO quinchihuilía cati xitahuac nochi teicneltzitzi cati sequinoc quintaijyohuiltíaj.

Huan quintamaca cati mayanaj.

Quinchihua ma yaca majcajtoque cati tzactoque masque amo teno quichijtoque.

⁸ TOTECO quintachiyaltía popoyotzitzi.

Quintanana cati nechca itztoque para huetzise.

Huan quinicnelía cati monejnemiltíaj xitahuac iixpa.

⁹ TOTECO quinmocuitahuía nopa seyoc tali ehuaní.

Yaya quinmocuitahuía cati icnotzitzi huan cati sihuame icnotzitzi.

Pero yaya quisosolohua cati quisencahuaj masehualme cati amo quitepanitaj.

¹⁰ TOTECO tanahuatis para nochipa.

Amojuanti ipan altepet Jerusalén,

amoTeco Dios elis nopa Tanahuatijquet,

cati quinnahuatis nochi masehualme cati tacactiyase para nochipa.

¡Paquilisti!

147

Ma tijpaquilismacaca Toteco pampa quipalehuijtoc altepet Jerusalén

¹ Xijpaquilismacaca TOTECO pampa nelía cuali para tihuicase tiohuicat para ya.

¡Nelía cuajcualtzi huan quinamiqui!

² TOTECO sempa quicualtalis altepet Jerusalén,

huan quinsentilis nopa israelitame cati quinsemanqui,

huan itztoque ipan sequinoc talme quej seyoc tali ehuaní.

³ Yaya quinyolchicahua cati quipiyaj yoltequipacholi huan quinpajtía campa mococojtoque.

⁴ Yaya quimati quesqui imiyaca sitalime onca huan sesen quintocaxtalijtoc.

⁵ Toteco nelía hueyi huan quipiya miyac chicahualisti.

Italnamiquilis amo aqui hueli quitamimachilía.

⁶ TOTECO quinhueyitalía cati moechcapanohuaj,

pero nochí amo cuajcualme quintahuisos talchí.

⁷ Xihuicaca para anquitascamatise TOTECO.

Xihuicaca por nochí cati quichijtoc toDios huan xitatzotzonaca ica arpa.

⁸ Toteco yaya quitzacua ne ilhuicacti ica mixti.

Yaya taahuetziltía ipan taltipacti.

Quichihua ma moscalti xihuit ipan cuatitamit.

⁹ Yaya quintamaca nopa tecuanime cati nemij cuatita.

Ininpilcanehua nopa cacalot quintamaca,

quemá pehuaj chocaj pampa mayanaj.

¹⁰ Quemá Toteco quiita se cahuayo cati motalohua chicahuac,

o quemá quiita se tacat cati quipiya miyac fuerza,

amo paqui por ininchichualis.

11 Pero TOTECO quipantía miyac paquilisti ipan masehualme cati quitepan-itaj.

Quipantía miyac paquilisti ipan cati mochiyaj ipan ya iteicnelilis.

12 Nochi amojuanti ipan ni altepet Jerusalén, xijhueyimatica TOTECO.

Quena, nochi cati itztoque ipan tepet Sion, xijpaquilismacaca amoDios.

13 Pampa yaya cuali quitzactoc icaltehua amoaltepe para amo hueli quitapos yon se amocualancaitaca.

Huan yaya tahuel quintiochijtoc amonehua.

14 Yaya quititanis tasehuilisti ipan nochi amotal, huan amechmacas trigo cati más cuali para ica ximopanoltica.

15 Yaya quintitanis itanahuatilhua ipan nochi taltipacti.

Huan quema yaya camanaltis, icamanal nimantzi ajsis hasta campá hueli techaj.

16 Yaya quichihuas ma huetzi sital set cati chipahuac quej nexti.

Huan quijtzeloehua tasesecayot ipan tali hasta campá hueli.

17 ¿Ajquiya hueli quijyohuis nopa tasesecayot?

18 Pero teipa yaya quinahuatis ma huala tatotonilot huan atiyas nopa tasesecayot.

Quichihuas ma pehua taajacas huan nopa at cati mochijqui tasesecayot ipan atajti sempa motalos.

19 Yaya quinmacac israelitame itanahuatilhua, huan quinilhuijtoc nochi cati cuali ma quichihuaca ipan inialtepe, para tetajtolsencahuase xitahuac.

20 TOTECO amo quinchihuilijtoc ni tamanti masehualme ipan sequinoc talme.

Inijuanti ayemo quixmatij itanahuatilhua, pero tojuanti, quena.

¡Paquilisti!

148

Ma quihueyimatica Toteco nochi tamanti cati yaya quichijchijtoc

1 ¡Ma quipaquilismacaca TOTECO nochi cati itztoque ipan ilhuicacti! Quena, ten ajacatipa xijpaquilismacaca TOTECO.

2 Nochi amojuanti anilhuicac ehuan, xijpaquilismacaca TOTECO.

Quena, xijpaquilismacaca nochi amojuanti cati anquitequipanohuaj nepa ilhuicac.

3 Ma quipaquilismacaca tonati huan metzti.

Ma quipaquilismacaca nochi nopa sitalime cati cuajcualtzi taahuíaj.

4 Ma quipaquilismacaca nopa ilhuicacti cati eltoc más huejcapa, huan nopa apocti cati mopantía ajacatipa.

5 Xijpaquilismacaca TOTECO pampa yaya camanaltic huan mochijqui cati ama onca.

6 Yaya quinchijqui para eltose para nochipa, huan quinmacac se tanahuatili cati amo quema mopatas.

7 Ma quipaquilismacaca TOTECO nochi cati itztoque ipan ni taltipacti.

Ma quipaquilismacaca nopa huejhueyi tapiyalme cati itztoque tatzinta hueyi at.

8 Ma quipaquilismacaca nopa tit, tesihuit, tasesecayot, apocti, huan nopa ajacat cati quichihua ipaquilis.

⁹ Ma quipaquilismacaca nochi tepeme, tachiquilme, huan nochi cuame cati temacaj inintajca huan nochi tiocuame.

¹⁰ Ma quipaquilismacaca TOTECO nochi tamanti tapiyalme, huan nochi tecuanime, cohume, huan totome.

¹¹ Ma quipaquilismacaca nochi tanahuatiani cati itztoque ipan taltipacti, huan nochi jueces, huan nochi masehualme ipan nochi talme.

¹² Ma quipaquilismacaca telpocame, ichpocame, huehuentzitzu huan coneme.

¹³ Ma quipaquilismacaca TOTECO pampa san yaya quinamiqui tijhueyimatise.

Ihueyitilis nelhueyi hasta quipano ilhuicacti huan taltipacti.

¹⁴ Yaya quinfuerzajmacatoc imasehualhua.

Ma quipaquilismacaca TOTECO nochi itatzejtzeltolica masehualhua, nochi tojuanti cati tiisraelitame cati yaya techiyocatalijtoc para ma tiitzoca más inechca.

¡Xijpaquilismacaca TOTECO!

149

Nochi ma quipaquilismacaca Toteco

¹ Xijpaquilismacaca TOTECO.

Xihuicaca para TOTECO se huicat yancuic.

Nochi amojuanti animasehualhua, xijhuicatica Toteco por nochi cati quichijtoc.

² Anisraelitame, ximopaquilismacaca ipan Toteco pampa yaya amechchijchiqui.

Anmasehualme ipan altepet Jerusalén, ximopaquilismacaca ipan amotanahuatijca.

³ Xijpaquilismacaca TOTECO ica mijtotilisti.

Huan xihuicaca ica pandero huan ica arpa.

⁴ Pampa Toteco quipantía paquilisti ipan imasehualhua,

huan quinmaquixtía cati moechapanohuaj iixpa.

⁵ Nochi cati iaxcahua TOTECO ma paquica pampa yaya tahuel hueyi ihueyitilis.

Huan hasta quema ya motectoque ipan inintapech noja ma quihuicatica.

⁶ Ma quihueyitalica TOTECO nochi imasehualhua.

Quipixtoc ipan imax se macheta cati oncac tatequi,

⁷ para ica quincuepilis nopa sequinoc talme cati quinchihuillijque cati amocual,

huan para ica quintatzacuiltis.

⁸ Ma quinilpica inintanahuatijcahua huan inintayacancahua ica tepos cadena,

⁹ para quiselise nopa tatzacuiltis cati eltojca tasencahualli.

Huan ica ya ni TOTECO quinhueyitalis nochi itatzejtzeltolica masehualhua.

¡Ma nochi quipaquilismacaca TOTECO!

150

Xijpaquilismacaca Toteco ica miyac tamanti tepos tatzotzonali

¹ ¡Xijpaquilismacaca TOTECO!

Xijpaquilismacaca TOTECO ipan itiopa.

Xijpaquilismacaca nepa ipan ilhuicac cati yaya quichijchijqui ica ihueyi
chicahualis.

² Xijpaquilismacaca por nochi nopa huejhueyi tamanti cati yaya quichihua.
Xijpaquilismacaca pampa tahuel hueyi ichicahualis.

³ Xijpaquilismacaca ica tapitzali,
Xijpaquilismacaca ica guitarra huan ica arpa.

⁴ Xijpaquilismacaca ica panderos huan ximijtotica.
Xijpaquilismacaca ica nochi tamanti tatzotzonalis cati quipiyaj cuerdas,
huan ica acatapitzali.

⁵ Xijpaquilismacaca ica platillos cati cuajcualtzi tzilini.

⁶ Nochi cati yoltoque ma quipaquilismacaca TOTECO.
¡Xijpaquilismacaca!

Proverbios

Italnamijsca camanal Salomón

¹ Na niSalomón. Nitanahuatijquet ipan tali Israel huan niicone David. Huan ya ni nopa talnamijsca camanali cati nijnequi nitemacas. ² Nicajotoc ni camanali para quinmactis masehualme quenicatza ma motalnamijsca. Quinilhuis taya ma quichihuaca para itztose cuali. ³ Nijnequi masehualme ma quiselica se talnamijsca camanali cati quinamiqiu para motalnamijsca. Quej nopa huelis quipiyase se nemilisti cati cuali huan quichihuase cati melahuac, huan cati xitahuac, huan cati nelcuali. ⁴ Ni talnamijsca camanali quinpalehuis cati huihuitique para motalnamijsca. Quinpalehuis telpocame huan ichpocame para ma quipiyaca se talnamiqulisti cati cuali para amo quichihuase se huihuiyot.

⁵ Masehualme cati ya talnamiqiu ma quitacaquilica cati nica eltoc huan achi más ma motalnamijsca. ⁶ Nochi masehualme ma quitemoca taya quinequi quijtos sesen ten ni talnamijsca camanali, huan ni tatenpohuilisti, huan ni cuali camanali cati quijtojqtoque talnamiqini nica para huelis quimachilise nochi.

⁷ Quema se masehuali pehua quiimacasi huan quitepanita TOTECO, ya pejtoc para mochihuas talnamiqiu. Pero cati huihuitique amo quinequij quicaquise camanali cati quipiya talnamiqulisti huan tamachtili.

Tamachtili para telpocame Pr. 1:8—9:18

⁸ Tinotelpoca, xijtacaquili cati motata huan monana mitzmachtíaj, huan amo xijhuejcamajcahua inincamanal. ⁹ Pampa nochi cati mitzmachtíaj, mitzhualiquilis tatepanitacayot. Elis nelcuali para ta quej se yejyetzzi costi ipan moquechcuayo huan quej se corona ipan motzonteco.

¹⁰ Notelpoca, sinta hualahuij taixpanoca tacame huan quinequij mitzcayahuase, amo xiquincahuili. ¹¹ Huelis injuanti mitzilhuise: “Xihuala tohuaya, ma timotatica huan tijmictise se acayja masque amo teno techchi-huilijtoc. ¹² Tiquinmictise cati tetic inintacayo. Nimantzi miquise huan yase ipan ostot. ¹³ Tijpantise miyac tamanti cati ipati. Tijtemitise tochajchaj ica nochi cati tiquichtequise. ¹⁴ Xihuala huan techpalehui. Tijpiyase san setzi bolsa huan teipa san se timomajmacase nochi cati tomaco ajsis.”

¹⁵ Pero notelpoca, na nimitzilhuía amo xiya inihuaya, yon amo xijtoquili iniojhui. San xiquintalcahui. ¹⁶ Pampa injuanti san tahuel quinequij quichihuase cati fiero, huan quinequij temictise. ¹⁷ Quema se totot quiita para masehualme quitallaj se taquetzi ica campa yahui, nopa totot amo monechcahuía nopona. ¹⁸ Pero nopa masehualme cati huihuitique, amo. Injuanti ica iniselti motaquechilíaj para miquise. Eltoc quej motalilíaj se lazo iniselti para mocuapilose ica cati amo cuali quichihuaj. ¹⁹ Quena, quej nopa tamimiquise nochi masehualme cati quinequij moaxcatise miyac tamanti cati sequinoc quipiyaj. Quipantise se miquilisti cati fiero pampa tahuel itzcuime.

Se cati quipiya talnamiqulisti teconsejomaca

²⁰ Pero itztoc se cati quipiya talnamiquilisti cati technotza. Eltoc quej moquetza ipan hueyi ojti huan ipan tianquis, huan quinojnotza nochi masehualme para ma quitacaquilica huan ma motalnamictica. ²¹ Quena, quinnotza nochi masehualme campa momatij mosentilíaj. Quinnotza tequichi-huani cati quipiay inintequi para tetajtolsencahuase campa tequicali ipan altepet. ²² Huan yaya cati quipiya talnamiquilisti quinilhuía: “Amojuanti cati amo teno anquimatij, ¿hasta quema quej nopa anmocahuase? Huan amojuanti cati san anquinhuihuiitaj nochi masehualme cati talnamiquij, ¿hasta quema tamis anquinhuihuiitase? Huan ¿hasta quema anquicalancaitase tamachilisti? ²³ Xihualaca, techtacaquilijuij, huan na nimechmacas miyac talnamiquilisti. Quena, cati nimechilhuis amechtalnamiquiltis.

²⁴ “Ya nimechnotztoc miyac huelta, pero amo anquinctoque antechta-caquilise. Talotztizti nimechmacac nomax huan amo antechchihuilijtoque cuenta. ²⁵ Quena, amojuanti anquihuejcamajcajtoque nopa consejos cati quipiay talnamiquilisti. Amo antechtacaquilijque quema tijnequiyayaj timechtacahualtise. ²⁶ Pero ajsis se tonali quema anitztose ipan miyac taohuijcajot, huan cati quipiay talnamiquilisti san amechhuetzquilise. Quena, cati quipiay talnamiquilisti amechpinajtise quema amechajsis nopa cati achi más anquimacasij. ²⁷ Quena, amechhuetzquilise quema hualas amopani miyac taohuijcajot cati amechnenpolos quej se chichahuac ajacat cati nochi quisosolohua. Masehualme cati quipiay talnamiquilisti ayecmo huelise amechpalehuise, ipan nopa hora quema hualas amopani tequipacholi, choquisti, huan taijyohuilisti.

²⁸ “Cati quipiay talnamiquilisti ayecmo amechnanquilise quema anquinojnotzase. Antechtemose para ma timechpalehuica, pero amo antechpantise. ²⁹ Pampa amojuanti amo anquinejque anquipiyase talnamiquilisti. Amo anquinejque anquitepanitase TOTECO huan anmotemachise ipan ya. ³⁰ San anquihuejcamajcajque inincamanal cati quipiay talnamiquilisti quema amechconsejomacayaj. Amo antechchihuilijque cuenta quema timechtacahualtiyayaj. ³¹ Huajca yeca antaijyohuise pampa anquiselise amotaxtahuil por cati fiero anquichijtoque. Anquitapejpenijtoque nopa fiero ojti para anquitoquilise, campa anquipantise nochi majmajti cati nopona onca. ³² Pampa masehualme cati amo teno quimatij huan cati quihuejcamajcahuaj camanali cati quipiay talnamiquilisti, quipantise miquilisti. Cati huihuitique mocuapolose pampa amo quipiay cuidado ica tamanti cati monequi. ³³ Pero nochi masehualme cati techtacaquilise tojuanti cati tijpiyay talnamiquilisti, itztose ica temachili huan tasehuilisti. Itztose ica paquilisti huan amo teno quimacasis.”

2

Hueyi ipati talnamiquilisti

¹ Tinotelpoca, xijseli cati nimitzilhuía, huan xicajocui notanahuatil ipan moyolo. ² Cualí xijtacaquili nocamanal cati quipiya talnamiquilisti. Quena, ica nochi moyolo ximotali para nelcuali tijmachilis nochi. ³ Xijtemo talnamiquilisti. Quena, ica nochi moyolo ximomachti para más tijmachilis tamanti. ⁴ Xijtemo ni talnamiquilisti huan taixmatili ica nochi moyolo quej tijtemosquía miyac tomi cati motatijtoc, o quej tijtemosquía se tamanti cati nelpatiyo cati tijpoltotya. ⁵ Huan huajca quena, tijmachilis para tahuel monequi tijtepanitas huan tiquimacasis TOTECO, huan teipa tiquixmatis ya. ⁶ Pampa san yaya TOTECO temaca talnamiquilisti, huan ten ya huala nochi tamatilisti huan tamachilisti. ⁷ Quena, TOTECO quinmaca se cuali

talnamiquilisti nochi masehualme cati itztoque xitahuaque. Quinmanahuía cati nemij cuali iixpa. ⁸ Yaya TOTECO cati quinmocuitahuía nochi cati monemiltíaj cuali. Quena, quinmocuitahuía itatzetzeltolteca masehualhua ipan iniojhui.

⁹ Quema TOTECO quimaca se masehuali talnamiquilisti, yaya quimatis tetajtolsencahuas xitahuac, huan quimatis cati melahuac, huan cati nelía cuali para quichihuas. Quena, tijmatis quenicatza huelis tijtapejpenis nopa ojti cati más cuali. ¹⁰ Quema tijpiyas miyac talnamiquilisti huan tijmatis miyac tamanti cati melahuac, tijmachilis miyac paquilisti ipan moyolo. ¹¹ Huan pampa tielis titalnamiqui huan tijmatis miyac, motalnamiquilis mitzmocuitahuis. Quena, cati tijmatis mitzchihuas para tiitztos ica temachili.

¹² Motalnamiquilis huan nopa cati tijmatis mitzmanahuse para amo tiyas ipan ojti cati amo cuali. Quena, mitzmaquixtis inimaco masehualme cati tahuel fiero camanaltij. ¹³ Motalnamiquilis mitzmaquixtis ten masehualme cati quitahuelcahuaj iojhui TOTECO, huan quitoquilíaj se ojti cati quiyiya tzintayohuilot. ¹⁴ Quena, nopa amo cuajcualme tahuel mopaquilismacaj quema quinchihuilíaj masehualme cati amo cuali. Ilhuichihuaj quema tahuel tecocojtoque huan fiero techihuilijtoque. ¹⁵ Nopa masehualme nemij ipan se ojti cati huijcoltic, huan yon se tamanti cati quichihuaj amo eltoc cuali pampa mocuapolojtoque.

¹⁶ Nojquiya quema tijpiyas talnamiquilisti, mitzmanahuis para amo timocajcayahuas inihuaya sihuame cati amo cuali ininemilis. Nopa sihuame quinpactía momecatíaj huan quimatij quenicatza tecajcayahuaj ica camanali cati yejectzi. ¹⁷ Sihuame cati quej nopa quichihuaj, ya quincajtejtoque inihuehuejhua cati inihuaya monamictijque quema ichpocame, huan quitahuelcajtoque itanahuatilhua TOTECO. ¹⁸ Sinta tiyas ipan nopa ojti cati yahui hasta ininchaj nopa sihuame cati quej nopa quichihuaj, tijpantis miquilisti. Elis quej tiquitizquis se ojti cati yahui micta. ¹⁹ Pampa cati mocajcayahuaj inihuaya inon sihuame, ayecmo mocualtilíaj. Ayecmo monejnemiltíaj sempa ipan ojti xitahuac campa onca se cuali nemilisti.

²⁰ Pero ta, tinotelpoca, ximonejnemilti ipan nopa ojti campa nemij cuajcuali masehualme. Quena, xijtoquili nopa ojti cati ipan nemij cati itztoque xitahuaque. ²¹ Pampa masehualme cati itztoque xitahuaque, itztose ica temachili ipan nopa cuali tali. Quena, nopona mocahuase cati senquisa cuali. ²² Pero TOTECO quinquixtis masehualme cati amo quitepanitaj ipan nopa tali. Quena, masehualme cati temajmatíaj TOTECO quintzontamiltis.

3

Cati monequi quichihuase masehualme para quiyiyase talnamiquilisti

¹ Notelpoca, amo xiquelcahua cati nimitzmachtía nica. Xicajocui notanahuatil ipan moyolo. ² Pampa sinta tijchihuas cati nimitzilhuía, tiitztos para miyac xihuit huan tijpiyas tasehuilisti huan paquilisti ipan moyolo. ³ Amo quema xijcahua xitetasojta huan xiquijto cati melahuac. Ma quitaca nochi masehualme ni cuali tamanti cati tijchihua quej quiitasquíaj se costi ipan moquechta. Ma nesi tanemijya para ipan moyolo tijtoquilía tanahuatili cati xitahuac. ⁴ Huan TOTECO huan masehualme quicualitase cati tijchihua. Quena, mitztepanitase huan camanaltise cuali ten ta.

⁵ Ximotemachi ipan TOTECO ica nochi moyolo. Amo xijtoquili san cati motalnamiquilis mitzilhuía. ⁶ Ximoilhui taya ipaquilis TOTECO ipan nochi

tamanti cati tijchihuasnequi, huan yaya mitzyacanas ipan se ojti cati xi-tahuac.

⁷ Amo ximohueyimatí pampa timoilhuía nelía titalnamiqui. Más cuali xiquimacasi huan xijtepanita TOTECO huan ximoiyocatali ica nochi cati amo cuali. ⁸ Quena, ni tamanti elis quej cuali pajti cati quichicahuas campa timococohua, huan quimacas chichahualisti motacayo huan moomiyohua.

⁹ Xijmaca TOTECO cati iaxca ten nochi cati tijpiya para tijnextis tijtepanita TOTECO. Xijmaca TOTECO nopa achtohui pixquisti cati tijcuis ipan momila.

¹⁰ Huan TOTECO mitztiochihuas huan quitemitis mocuacalhua ica tacualisti hasta quitzontis huan ayecmo huelis quicuis más. Yaya amechmacas xomecá at cati yancuic hasta mocahuas para tiquis.

¹¹ Notelpoca, amo xicholo ten TOTECO quema mitztalnamictía, yon amo xicualani quema yaya mitztacahualtía. ¹² Pampa cati TOTECO quicnelía, quitalnamictía quej se tetat quixitahua icone cati tahuel quicnelía.

¹³ Hueyi paquilisti quipiya se tacat cati quipantía talnamiquilisti huan mochihua talnamiqui. ¹⁴ Pampa talnamiquilisti tepalehuía miyac. Más ipati que plata huan oro cati nelía cuali. ¹⁵ Talnamiquilisti más ipati que nopa piltetzitzi cati tahuel pajpatiyo. Yon se tamanti cati tijnequisquía, amo hueli quiaxilís quej ipati nopa talnamiquilisti. ¹⁶ Masehualme cati quipiay talnamiquilisti huejcahuase itztose. Nojquiya quipantise tatiochihualisti huan tatepanitacayot. ¹⁷ Masehualme cati talnamiquij quitoquilíaj se ojti cati quipiya paquilisti. Quena, nopa ojti mitzmacas tasehuilisti ipan moyolo.

¹⁸ Talnamiquilisti eltoc quej se cuali cuahuit cati temaca se nemilisti cati nelía yejyetzí. Sinta timochihuas titalnamiqui huan amo tiquiyocacahuas motalnamiquilís, tijpiyas miyac paquilisti ipan monemilís.

¹⁹ Ica talnamiquilisti huan tamachilisti, TOTECO quichijchiqui ilhuicacti huan taltipacti. ²⁰ Pampa yaya nochi quimati, quichijqui para ma moxelo nopa hueyi at, huan quichijqui para ten ilhuicac mā hualtemo at para huetzís ipan taltipacti.

²¹ Huajca notelpoca, xijpiya cuali talnamiquilisti huan xijtacaquili ni talnamijca camanali, amo quema xiquelcahua, ²² pampa nochi ni talnamiquilisti huan tamachiltíli mitzmacas se cuali nemilisti. Quena, quiyeyecchihuas monemilís quej se costí quiyeyecchihua se masehualí ipan iquechcuayo. ²³ Sinta tijpiyas talnamiquilisti huan ya nopa tijtoquilís, mitzpalehús para tinejnemis ica temachili, huan amo timotepotanis ipan moojhui. ²⁴ Quema timotecas para ticochís, amo timajmahús. Timotecas huan ticochís nelía cuali. Quena, ticochís ica temachili. ²⁵ Amo monequi tiquimacasis para ipan ten hueli talojtzi hualas cati fiero mopani quej quinajsi amo cuajcualme, ²⁶ pampa TOTECO mitzmacas temachili. Yaya amo aquí quicahuilís ma mitzmasilti ipan tajtacolot.

²⁷ Quema quinamiqui tijpalehús se masehualí huan tihueli tijchihuas, amo xiquilhui para amo. ²⁸ Amo xiquilhui: “Xihuala mosta huan nimitzmacas”, sinta tijpixtoc momaco para tijmacasquía ama.

²⁹ Amo ximoyolilhui cati amo cuali cati huelis tijchihuilís seyoc cati motemachía ipan ta. ³⁰ Amo xijtelhui seyoc san molhui sinta yaya amo teno mitzchihuilíjtoc.

³¹ Amo xiquixtoca inemilís se masehualí cati amo quitepanita TOTECO. Amo xijtoquili yon se iojhui. ³² Pampa TOTECO quicualancaita nopa masehualí cati huíjcoltíc iojhui, pero quinicnelía cati itztoque xitahuaque iixpa.

³³ Quena, TOTECO quintelchihua cati itztoque ipan ininchaj masehualme cati amo quitepanitaj, pero cati itztoque ipan ininchaj masehualme cati xitahuaque iixpa quintiochihua.

³⁴ TOTECO quinpinahualtía cati tehuihuiitaj, pero hueyi iyolo TOTECO ica masehualme cati moehcapanohuaj.

³⁵ Cati talnamiqij quiselise miyac tatepanitacayot, pero cati huihuitique TOTECO quinpinahualtis.

4

Salomón teyolchicahua ma monejnemiltica xitahuac

¹ Amojuanti antelpocame, xijtacaquilica cati nimechmachtía quej anquitacaquilisquíaj amotata. Xijmachilica cati nimechilhuía para nelía anmochihuase antalnamiquini. ² Pampa nica nimechmaca se tamachtili cati cuali. Huajca amo quema xijcahuaca cati nimechilhuía. ³ Na nojquiya nielqui se conet huan nijpixqui notata. Tahuel nechicneliyaya nonana pampa nieliyaya niyojtzi cone.

⁴ Huan notata nechmacti huan nechilhui: “Amo quema xiquelcahuas ni tamachtili, xijchihua cati nimitznahuatía ica nochi moyolo huan tiitztos ica cuali. ⁵ Xijtemo talnamiquilisti huan tamachilisti cati TOTECO temaca. Amo xiquelcahua nocamanal, yon amo quema ximoiyocaquixti ten cati niqijtohua. ⁶ Amo xijcahua italnamiquilis. Xiquicneli nopa talnamiquilisti cati yaya temaca, huan mitzmocuitahuis huan mitzmanahuis ica nochi cati amo cuali. ⁷ Cati más ipati ipan monemilis elis para tijtemo talnamiquilisti huan tamachilisti ica nochi tamanti cati tijchihuas. ⁸ Xiquita quenicatza tahuel hueyi ipati talnamiquilisti. Quena, xijhueyitali talnamiquilisti huan quema tijpiyas, masehualme mitzhueyitalise huan mitztepanitase. ⁹ Huan tijselis miyac xochi coronas ipan motzonteco. Quena, tijselis coronas cati yejyectzitzi quema masehualme mitznexutilise tatepanitacayot pampa tijpiya talnamiquilisti.”

¹⁰ Notelpoca, techtacaquili huan xijchihua cati nimitzilhuía. Sinta quej nopa tijchihuas, tiitztos miyac xihuit ipan monemilis. ¹¹ Na nimitznejnemiltijtoc ipan ojti cati xitahuac huan campa onca talnamiquilisti. ¹² Huan sinta timonejnemiltis ica talnamiquilisti, amo teno quitzacuilis moojhui. Huan sinta timotalos, amo timotepotanis. ¹³ Xijchijtinemi cati nimitzmachtía huan amo xijcahua. Mojmota xijhuica ipan moyolo cati nimitzilhuijtoc huan tijpiyas se nemilisti nelyejyectzi.

¹⁴ Amo xicalaqui ipan iniojhui masehualme cati amo quitepanitaj TOTECO, yon amo xijchihua cati quichihuaj. ¹⁵ Xijtalcahui campa inijuanti itztoque. Amo xipano nopona. Xicholo ten campa inijuanti yahuij huan xiya ipan seyoc ojti. ¹⁶ Pampa inijuanti amo cochij sinta amo quichijtoque cati amo cuali. Amo quinequij mosiyajquetzase sinta amo quichijtoque seyoc para ma huetzi ipan tajtacoli. ¹⁷ Quena, fiero tacame quitemohuaj se para quimictise o para quitachtequilise, quej sequinoc quitemohuaj tacualisti huan ten quiise.

¹⁸ Pero iniojhui masehualme cati itztoque xitahuaque eltoc yejyectzi quej quema tanestihuala ica ijaloc. Huan ininemilis mochihua más yejyectzi mojmota hasta nesis quej tonati cati taahuía ica nochi itatanex quema tajcotona. ¹⁹ Pero iniojhui masehualme cati amo quitepanitaj TOTECO eltoc quej tzintayohuilot, yon amo quimatij ipan taya motepotaniáj.

²⁰ Pero ta tinotelpoca, xijchihuili cuenta nocamanal. Xijtacaquili nochi cati nimitzilhuía. ²¹ Amo xiquelcahua cati niquijtojtoc. Xicajocui cati nimitzilhuía ipan moyolo para nimantzi tijtoquilis. ²² Pampa cati nimitzilhuía para tijchihuas mitzmacas se nemilisti yejyectzi. Elis quej se cuali pajti cati quimacas chicalualisti nochi motacayo.

²³ Cati más ipati para tijchihuas eltoc para xijmocuitahui moyolo, pampa nopona pehua nochi monemilis.

²⁴ Amo quema xicamanalti ica camanali cati fiero, yon amo xiquijto camanali cati tacajcayahua.

²⁵ Nochipa xijtachili para tijchihuas san cati xitahuac. Quena, xijtachili taya eltoc campa tiya. ²⁶ Xijtapejpeni se cuali ojti para tijtoquilis. Quena, xijtoquili se ojti xitahuac huan nochi elis cuali para ta. ²⁷ Amo ximoiyocatali ten nopa ojti cati xitahuac, yon ica monejmat, yon ica moarraves.

5

Cati mocalaquis ica se sihuat cati amo itahuical, mocuapolos

¹ Notelpoca, xijchihuili cuenta nopa talnamiqulisti cati nijpiya. Quena, ximonacasquetza para tijmachilis nocamanal pampa nijmati taya niquijtohua. ² Huan quej nopa timochihuas titalnamiqui. Huan ticajoctiyas más tamanti cati tijmatis.

³ Icamanal se ahuilnenca sihuat eltoc tzopelic quej necti. Huan cati quijtohua nelía yejyectzi, pampa tahuel quimati quenicatza tacajcayahuas. ⁴ Pero teipa cati yahui ihuaya quipantis cati chichic quej se tamanti pajyo cati temictia. Quimachilis tacuajcualoli quej quiajsisquia ipan iyolo se macheta cati oncac tatequi. ⁵ Nopa ahuilnenca sihuat quihuicas se tacat campa onca miqulisti. Quena, quiyacanas hasta quiaxititi micta. ⁶ Huijcoltic iojhui nopa sihuat, pero yon amo quimati sinta fiero campa yahui. Yaya amo quichihuilia cuenta nopa ojti xitahuac cati yahui campa onca se cuali nemilisti.

⁷ Huajca amojuanti antelpocame, xijtacaquilica cati nimechilhuía, huan amo quema xiquelcahuaca nocamanal. ⁸ Xijtalcahuica se ahuilnenca sihuat, yon amo ximonechcahuica campa ichaj. ⁹ Pampa notelpoca, sinta tijpaxalos, ayecmo aqui mitztepanitas. Huan cati tijtantoc ica miyac xihuit ten tequit, tiquinmacas masehualme cati amo quitepanitaj TOTECO huan cati amo tiquinixmati. ¹⁰ Amo xiquincahuili seyoc altepel ehuan ma moricojchi-huaca ica cati timotanilijtoc. Ma amo moaxcatica cati tijpanti ica miyac taijyohuilisti huan taohuijcyot. ¹¹ Teipa san timochoquilis por nochi cati fiero tijchijtoc ihuaya nopa sihuat. Huan titaijyohuis quema nopaocolisti cati tijpanti ihuaya ica yolic mitztzontamiltijtyas. ¹² Huan huajca tiquijos: “Más cuali nijchihuilijsotquia cuenta nopa consejo cati nijcajqui. ¿Para ten amo nijtacaquili quema nechtacahualtiyayaj? ¿Para ten nijchijqui san cati nechpacti? ¹³ ¿Para ten amo nijnejqui niquintacaquilis cati nechconsejmacayayaj? ¿Para ten amo niquinchihuili cuenta quema nechmachtayayaj cati cuali? ¹⁴ Ama por notajtacol niitztoc nechca se taixtemolis cati nechtzontamiltis. Nihuetztoc ipan se hueyi pinahualisti iniixpa nochi masehualme.”

¹⁵ Huajca notelpoca, quema tiamiqui, ximoaixhuiti ica at cati meya ipan ten ta moamel. Amo xijnechcahui se sihuat cati amo mosihua, pampa ica mosihua tijpantis paquilisti quej se at cati más ajhuiyac. ¹⁶ ¿Para ten tiquinconemacas sihuame cati san nentinemij ipan calles? ¿Para ten tijtoyahuas

moxinach ipan tianquis? ¹⁷ Cati moaxca ma eli san para ta. Amo xiquinmaca sihuame cati amo tiquinixmati.

¹⁸ Ma TOTECO quitiochihua nopa chichahualisti cati mitzmacatoc pampa titacat. Huan ximopaquilismaca miyac ica nopa sihuat cati timoculi quema tieliyaya titelpocat. ¹⁹ Ximoilhui ten mosihua quej se sihuatzi masat cati neliya jejectzi nejnemi. San xiyolpaqui ica ya cati mitznelia miyac. Tahuel xipaqui quema yaya mitznajnahua ipan ten hueli talojtzi. Nochipa ximoixhuiti ica ya itaicnelilis. ²⁰ Huajca notelpoca, ¿para ten tinejnemis quej se popoyotzi ica se ahuilnenca sihuat?

Amo quinamiqui tijnajnahuas o tiquitzi quis ichichihual se sihuat cati amo mosihua.

²¹ Pampa TOTECO mitztachilia huan quiita sesen tamanti cati tijchihua. Quitachilia campa tiya huan sesen pilojtzi cati ipan tinemi. ²² Masehualme cati amo quitepanitaj TOTECO momasiltise ipan inintajtacolhua. Quena, inintaixpanolhua quinitzquis huan quinilpis quej elisquia se lazo. ²³ Nopa masehualme miquire pampa amo quinejqe quiselise icamanal cati quintacahualtiyaya. Pampa tahuel quinequij tajtacolchihuase, inihuihuiyo quichihuas para ma mocuapoloca para nochipa.

6

Amo xijpalehui seyoc para motanehuis tomi

¹ Ta tinotelpoca, sinta tijtalijtoc mofirma para tijpalehuis mohuampo para quitanejtise se tenijqui, o sinta titemacatoc mocamanal para tijtaxtahuis cati quitanejtia sinta ya amo hueli ya tacuepas, ya timocalaquijtoc ipan se hueyi tequipacholi. ² Ica moselti timoilpitoc ica mocamanal. Quena, ica cati tiqijto timomasiltijtoc ipan se tatzacti. ³ Huajca notelpoca, nimantzi xijchihua cati nimitzilhuia para timomanahuis. Ya tiitztoc imaco mohuampo. Huajca xiquitati huan ximoehcapantali iixpa huan xijtajtani mohuampo chichahuac para ma quixpojpola motoca campa nesi titatzquitoc ihuaya. ⁴ Amo xicochi, yon amo ximosiyajquetza. Amo xijcahua para seyoc tonali. Xijsencahua ni tamanti nimantzi. ⁵ Xijchihua nochi cati tihueli para timomanahuis quej quichihua se masat cati motalohua para mochololtia quema quiita se tajejqet, o se totot cati quimasiltijtoya ipan taquetzti huan teipa momanahuia.

⁶ Ta cati titatzihui, xiquintachili nopa tzitzime quenicatza tequitij. Ximomachti cati quichihua para timotalnamictis. ⁷ Masque injuanti amo quipiyaj se tanahuatijquet, yon se tayacanquet cati quinahuatia taya monequi quichihuase, ⁸ injuanti tequitij chichahuac quema tatotoniya, huan quisentilaj inintacualis para quipiyase ten quicuase quema taseseyas. ⁹ Pero ta cati titatzihui, san tijnequi ticochis. ¿Hasta quema timijquehuas? Xijmachili ya ni. ¹⁰ Sinta tiqijtos: “Noja se quentzi más niixochis, huan san se talojtzi más nimomanajnahuas para nimosiyajquetzas”, ¹¹ ica se talojtzi ajsis mopani se hueyi mayanti quej nimantzi huala se tachtejqet quema amo tijchiya. Huan nimantzi timochihuas se cati teicneltzi pampa amo titequitic.

Cati quichihua amo cuajcualme

¹² Amo cuajcualme huan cati amo quitepanitaj TOTECO san istacatitine-
mij. ¹³ Quinijcopilaj inihuampoyohua para mocamanalhuise. Monextilaj

ica iniicxi campa yahuij. Momanextilíaj se ica seyoc cati quinequij quichihuase. ¹⁴ Temitoc iniyolo amo cuajcualme ica tajtacoli huan mojmosta moilhujtinemij cati fiero hueli quichihuase. Quixelohuaj masehualme huan quinchihuaj para ma mocualanica. ¹⁵ Yeca ica se talojtzi quema nopa amo cuajcualme amo quichiyaj, ininpantis cati fiero. Quinomiyopojpostequis hasta ayecmo oncas pajti. Quena, quintzontamiltis.

Tamanti cati TOTECO amo quinequi quiitas

¹⁶ Onca chicuase tamanti huan hasta chicome cati TOTECO amo quinequi quiitas. Cati más quicualancamaca eltoc ya ni:

¹⁷ se cati mohueyimati;

se cati teistacahuía;

se cati quimictía seyoc cati amo teno quichihuilijtoc;

¹⁸ se cati moilhujtinemi cati fiero hueli quichihuas;

se cati nimantzi yahui para quichihuas cati amo cuali pampa tahuel quipactía;

¹⁹ se cati moquetza quej se testigo huan quiistacahuía cati amo teno quichijtoc;

se cati quipehualtía cualanti ica icnime. Nochi ya ni TOTECO amo quinequi quiitas.

Taya ipantis se tacat cati momecatía

²⁰ Notelpoca, xijtepanita cati motata huan monana mitzilhuijtoque. Amo xijcagua cati mitzmachtijtoque. ²¹ Ipan moyolo nochipa xijpixto inincamanal. Ximoilhujtinemi cati quiijttoque quej timoilpilisquía inintamachtitil ipan moquechta. ²² Pampa inintamachtitil mitzyacanas campa hueli tiyas huan sinta tijtoquilis cati mitzilhuijtoque, ticochis cuali huan ica temachili. Ica ijnaloc quema tiisas tijcaquis inincamanal cati mitzconsejomas. ²³ Pampa inincamanal motatahua eltos quej se taahuili cati quitaahuilis moojhui. Quema se acajya mitztacahualtía o mitztalnamictía, yaya mitznextilía se ojti campa onca se cuali nemilisti.

²⁴ Quena, sinta tijneltocas inintamachtitil motatahua, mitzmanahuis ten ahuilnenca sihuame. Cati mitzilhuijtoque mitzpalehuis para amo tiqintacaquilis nopa fiero sihuame cati tahuel quimatij camanaltise yejyetzzi.

²⁵ Amo xiquixtoca iyejejeja se sihuat cati quej nopa, yon amo xijcahuili ma mitztani quema mitzijcopilía ica iixteyol cati yejyetzzi.

²⁶ Pampa se ahuilnenca sihuat quichihua para se tacat ma quinenpolo itomi hasta ayecmo quiipiyas yon para se pantzi. Quena, se momecatijca sihuat huélis quicuulis inemilis se tacat. ²⁷ ¿Huélis se tacat moquechilis se ticuahuit iyolixco huan amo motatis? ¡Amo! Temachtitil motatis. ²⁸ Sinta se tacat nejnemis ipan ticoli, temachtitil icxi atomocas. ²⁹ Quej nopa ipantis se tacat cati momecatía ihuaya se sihuat cati quiipiya ihuehue. Quiselise san se tatzacuiliti quej nochi tacame cati quiitzquíaj isihua seyoc tacat.

³⁰ Amo aquí quicualancaita se tachtejquet cati tachtequi para amo miquis ica mayanti, ³¹ pero quema tequichihuani quiitzquise, monequi quiixtahuas chicome huelta imiyaca cati quichtectoc, masque monequisquía quina-macas nochi cati eltoc ipan icalijtic para taxtahuas.

³² Pero pano huihuitic se masehuali cati momecatía. Amo quiipiya talnamiquilisti, pampa ica iselti quinenpolos inemilis. ³³ Nopa tacat tahuel taijyohuis huan masehualme ayecmo quitepanitase. Huan amo quema

huelis quiixpajpolos nopa pinahualisti. ³⁴ Pampa temachti ihuehue quitasomatis nopa sihuat huan tahuel cualanis. Amo quitapojpolhuis nopa tacat quema ajsis tonali para quicuepilis cati yaya quichihuilijtoc. ³⁵ Ihuehue amo quiselis se taxtahuili para moyoltalis. Amo quitapojpolhuis masque quimacahuia miyac tamanti cati ipati.

7

Xiquintahuelcahua momecatijca sihuame

¹ Notelpoca, xijneltoca noconsejos huan xicajocui nocamanal ipan moyolo. ² Sinta tijchihuas cati nimitznahuatía, cuali tiitztos. Xijtacaquili nopa tanahuatili cati nimitzmachtía pampa pano ipati. ³ Amo quema xiquelcahua cati nimitzilhuía. Xijtatziquilti ipan moyolo para mocahuas mohuaya.

⁴ Xiquicneli talnamiquilisti huan tamachilisti quej tiquicnelía mosihua icni. Xiquinchihua quej elisquaj mocualhuampoyohua. ⁵ Injuanti mitz-manahuse para amo tijpaxaloti se momecatijca sihuat. Sinta tijpiya talnamiquilisti huan titamachilía, mitzpalehuis para amo tijtacaquilis quema se sihuat mitzcamanalhuis ica yejectzi camanali para mitzcaycayahuas.

⁶ Se tonali na niontachixtoya ipan noventana, ⁷ huan ten miyac telpocame niquitac se telpocat cati huihuitic. ⁸ Yaya nejnemiyaya ipan nopa calle nechca se esquina campa itzoc se ahuilnenca sihuat, huan quitzqui nopa ojti cati yahui ichaj. ⁹ Ya calactoya tonati huan ya peytoya taixtatayohuiya. ¹⁰ Nimantzi quisqui nopa sihuat para quinamiquiqui. Cuali mochijchijtoya para quincaycayahuas tacame pampa tahuel quimati quenicatza quichihuas. ¹¹ Eliyaya se sihuat cati camanalti chicahuac huan yon quentzi amo pinahua. Amo quema quinequi itztos ichaj. ¹² Quemantica itzoc callejtipa huan quemantica itzoc ipan tianquis. Tachixtinemi para quinpantis tacame cati huelis quincaycayahuas.

¹³ Quinechcahui nopa telpocat huan quinajnahujqui huan quitzoponi. Tahuel mosemacac. Yon se quentzi amo pinajqui para quillhuis: ¹⁴ “Ya nitamacac notacajcahualis para tasehuilisti huan nijtamichijtoc nochi cati nijtajtolcajqui nijchihuasquía, huan nijhualica nopa nacat para se cuali tacualisti. ¹⁵ Yeca nimitztemohuayaya pampa san ta nijnequiyaya nimitzitas, huan ama nimitzpantijtoc. ¹⁶ Notapech nijyejecchijtoc ica ipantzajca cati yejectzi. Nijcualtalijtoc notapech ica yoyomit cati más cuali cati huala ipan tali Egipto. ¹⁷ Huan nicajhuilalijtoc campa timotecase ica taajhuiyacayot ten mirra, áloe huan canela. ¹⁸ Xihuala, ma timopaquilismacaca hasta tanesis. Ma tijchihuaca ten hueli para timonextilise para nelía timonequij. ¹⁹ Pampa nohuehue amo aqui nica, yajtoc paxaloto huejca. ²⁰ Quihuicacot miyac tomi, huan quijtojtejqui huejcahuas nepa. Amo mocuepas hasta chicahuayas metzti.”

²¹ Quej nopa, nopa sihuat quiyolyamanili nopa telpocat ica icamanal cati yejectzi. Quiyoltanqui san ica iistacaticayo. ²² Huan nima nopa telpocat quitoquillijtiyajqui quej se huacax quema quihuicaj para quimictij, huan quej se cati huihuitic cati amo quimati yahui ipan tatzacti campa quiselis itatzacuiltis. ²³ Nopa telpocat eltoc quej nopa totot cati patanti xitahuac para campa eltoc taquetzti. Yon amo quimati sinta miquis hasta quimajcahuilise se cuataminti cati ajsis iyolixco.

²⁴ Huaaja amojuanti cati antelpocame techtacaquilica. Xijchihuaca cati nimechilhuía. ²⁵ Amo quema xijcahuili motanequilis ma mitzcuaipolo para tijtoquilis se ahuilnenca sihuat. Amo xijnechcahui nopa ojti cati yahui

ichaj para amo tihuetzis ipan tajtacoli. ²⁶ Pampa sihuame cati quej nopa quichihuaj quincajcayajtoque miyac telpocame. Quena, miyac tacame quintzontamiltijtoque. ²⁷ Sinta timonejnemiltía ipan nopa ojti para tiyas ichaj, huajca tiqitzquitoc nopa ojti cati yahui campa miqulisti.

8

Cati quipiya talnamiquilisti quipantis cati cuali

¹ ¡Xijtacaquilica! Eltoc quej se cati quipiya talnamiquilisti huan tamachilisti mitznójnotza chicahuac para xijchihuili cuenta icamanal huan timochihuas titalnamiqui. ² ¿Amo tijcactoc yaya cati quinequi mitztalnamictis? Eltoc quej moquetza ipan se tepet huejcapantic huan mitztzajtzilía. O eltoc quej moquetza campa momaxalohua ojti, ³ huan campa icalte nopa altepet huan mitznójnotza, huan quej ni quijtohua: ⁴ “Nochi amojuanti anmasehualme, xijtacaquilica cati nimechilhuía. ⁵ Amojuanti cati amo anquimatij quenicatza anmonejnemiltise huan anhuihuitique, ximomachtica quenicatza anquiyase se cuali talnamiquilisti. ⁶ Xijtacaquilica cuali cati nimechilhuis pampa nocamanal nelía miyac ipati. Nochi notamachtil eltoc xitahuac. ⁷ Na niquijtohua cati melahuac. Amo quema niistacati huan amo quema nitacajcayahua. ⁸ Quena, nelía cuali nocamanal huan tepalehuía miyac. Yon se tamanti cati niqijtos elis amo cuali o necuilti. ⁹ Nochi cati niqijtohua nesi nelía xitahuac para masehualme cati quimachilíaj tamanti. Quena, cati talnamiquij quimatij nocamanal, huan quinpalehuía para quimatise más.

¹⁰ “Huajca xijselica cati nimechmachtía huan cati na nijmati, pampa achi más ipati que plata huan oro cati senquisa cuali. ¹¹ Más cuali tijpiyas talnamiquilisti huan amo nopa piltetzitzi cati más patiyo. Yon se tamanti cati tijnequi, amo eli san se ica ya.

¹² “Cati quipiya talnamiquilisti nojquiya quimati cuali para quinextilis sequinoc para quichihuase cati xitahuac ipan ininemilis. Talnamiquilisti mitzpalehuis para tijpiyas cuajcuali taixmatili huan tamachilisti. ¹³ Se cati quiimacasi huan quitepanita TOTECO, quijpiyas nochi cati amo cuali. Amo quinequis quinitas masehualme cati mohueyimatij huan cati mohueyitepanitaj. Amo quinechcahuis cati fiero ininemilis huan cati istacatij. ¹⁴ Se cati quipiya talnamiquilisti hueli temaca cuali consejos. Yaya quimati para tetajtolsencahuas xitahuac. Quimachilía miyac tamanti huan quipiya miyac chicahualisti. ¹⁵ Tanahuatiani mochihuaj talnamiquini para tanahuatise pampa quipiyaj talnamiquilisti huan quitacaquilíaj consejos. Cati quipiyaj tequiticayot hueli quichihuaj tanahuatilme cati xitahuac pampa quipiyaj talnamiquilisti. ¹⁶ Nochi tequichihuani hueli tayacanaj huan tetajtolsencahuaj xitahuac pampa quipiyaj talnamiquilisti.

¹⁷ “Masehualme cati quicnelíaj talnamiquilisti huan quitemohuaj, quipantise huan mochihuase talnamiquini. Huan cati nelnelía quitemohuaj talnamiquilisti, quipantise. ¹⁸ Masehualme cati mochihuaj talnamiquij nojquiya quipantise ricojyot huan tatepanitacayot. Quena, quipantise se ricojyot cati huejcahuas huan mochihuase masehualme cati nelxítahuaque. ¹⁹ Masehualme cati mochihuaj talnamiquij temacase tamanti cati más cuali que oro huan plata cati pano cuali. ²⁰ Pampa talnamiquilisti quichihua para se masehuali ma monejnemilti ipan se ojti cati xitahuac huan nelcuali. ²¹ Masehualme cati quicnelíaj talnamiquilisti, quiyase tamanti para

ininconehua. Quena, pampa talnamiquij, quitemitise ininchajchaj ica tamanti cati nelía ipati.

²² “TOTECO quipixtoya talnamiquilisti ipan ipejya nochi cati onca. Quema ayemo teno quichihuayaya. ²³ Quena, TOTECO ya ipa quipixtoya talnamiquilisti huejcajquiya quema ayemo oncayaya taltipacti. ²⁴ Ya quipixqui talnamiquilisti quema ayemo oncayaya hueyi at ipan taltipacti, yon quema ayemo oncayaya amelme ica nochi inia. ²⁵ TOTECO ya ipa quipixtoya talnamiquilisti quema ayemo quinchihuayaya tepeme huan nochi tachiquilme. ²⁶ Quena, ipa quipixtoya talnamiquilisti quema ayemo quichihuayaya taltipacti, mili huan quema ayemo oncayaya yon se quentzi ten nopa taltepociti cati ama onca.

²⁷ “TOTECO ya ipa quipixtoya talnamiquilisti quema quichijchijqui nochi cati onca ipan ilhuicacti, huan quema quichijchijqui nopa huejhueyi ostot para campa ma mocahua huejhueyi at. ²⁸ Yaya ipa quipixtoya talnamiquilisti quema quitali mixti ma mocahua ipan ilhuicacti, huan quinilhui nochi huejhueyi hueyame hasta canque tamisquíaj. ²⁹ TOTECO ya ipa quipixtoya talnamiquilisti quema quinmacac nopa huejhueyi at ininpa huan quinmacac tanahuatili para amo hueli quipanose. Yaya ya quipixtoya talnamiquilisti quema quitalili itzinpehualtil ni taltipacti. ³⁰ Huan TOTECO quitequihui italnamiqulisti ipan nochi itequi, huan nochi cati quichijqui quinextía para tahuel miyac talnamiquilisti quipiya. TOTECO amo quema moyocacahua ten nopa hueyi talnamiquilisti cati quipiya. ³¹ TOTECO nelía paqui para quitequihua italnamiqulisti, huan paqui ica nochi cati quichijchijqui. Quena, pampa quichijqui nochi ica ihueyi talnamiquilisti, ama paqui ica ni taltipacti huan nochi masehualme cati quinchijchijqui.

³² “Huajca antelpocame, xijtacaquilica quema se cati quipiya talnamiquilisti amechamanalhua. Quej nopa anquipantise miyac paquilisti huan tatiochihualisti. ³³ Xijtacaquilica cuali quema se cati talnamiqui amechmaca consejos ten quenicaatza anmotalnamictise. Amo xijhuejcamajcahuaca.

³⁴ “Hueyi paquilisti quipantis nopa tacat cati quitacaquilis se cati quipiya talnamiquilisti huan mojmosta quinequis más, masque inon tacat monequi quichiyas campa ichaj nopa tetalnamiqulictijquet para ma quitalnamiqulisti achi más. ³⁵ Pampa cati quipantía talnamiquilisti, quipiyas se nemilisti cati nelía cuali, huan TOTECO quitachilis ica miyac paquilisti. ³⁶ Pero cati amo quinequi quitacaquilis nopa tetalnamiqulictijquet para quichihuas huan quitahuelcahuas, mococos ica ya iselti. Cati amo quinequij mochihuase talnamiquini quitemohuaj miqulisti.”

9

Amo san se talnamiquilisti huan huihuiyot

¹ Yaya cati nelía quipiya talnamiquilisti quichijqui se yejyectzi cali ica chicome taquetzalme iixpa. ² Quicualtalijtoc se hueyi tacualisti, huan quichijchijtoc se taili cati más cuali. Ya quisencajtoc nopa cuamesa ica miyac tamanti tacuali. ³ Quintitanqui itequipanojcahua para ma yaca huan ma quinoztaca nochi masehualme para ma hualaca huan ma mochihuaca talnamiquini. Eltoc quej yaya cati quipiya talnamiquilisti moquetza campa más tahuejcapa nechca nopa altepet pampa tahuel quinequi tetalnamiqulisti. Huan cati quipiya talnamiquilisti quijtohua: ⁴ “Xihualaca nochaj amojuant

cati anhuihuitique huan cati amo anquimachilíaj cati cuali para anquichihuase. ⁵ Xihualaca, xijcuaqui notacualis huan xiquiquij tailisti cati cuali cati nijsencajtoc. ⁶ Xijcajtehuaca nochi huihuiyot, huan nimechnextilis quenicatza huelis anquipiayase se nemilisti cati yejectzi. Xinejnemica ipan nopa ojti cati nimechnextilis huan ximotalnamictica.”

⁷ Sinta tijchihuas campeca para tijtalnamictis se tacat cati quinhuihuiita sequinoc o se cati fiero inemilis, yaya san mitzpinahuaitis huan chicahuac mitznajnanquilis. ⁸ Huajca amo xijtacahualti se cati tehuihuiita pampa san mitzcualancaitas. Pero sinta tijxitahuas se masehuali cati talnamiqui, yaya más mitzicnelis. ⁹ Xijmacthi se masehuali cati talnamiqui, huan achi más mochihuas talnamiqui. Huan sinta tijmacthis se cati xitahuac monejnemiltia, achi más quimatis cati cuali para quichihuas.

¹⁰ Pampa talnamiquilisti pehua quema se acajya quiimacasi huan quitepanita TOTECO. Huan sinta se acajya quiixmatis TOTECO cati tatzejtzelotic, quichihuas para quimachilis miyac tamanti.

¹¹ Huan talnamiquilisti mitzchihuas xiitzo miyac tonali. Quena, quimiyaquilis nopa xihuit ipan monemilis. ¹² Sinta timochihuas titalnamiqui, tiquisas cuali. Pero sinta tijhuihuiitas talnamiquilisti, huajca ica moselti timochihuulis cati fiero.

¹³ Se sihuat cati huihuitic teyolcocohua pampa amo teno cati cuali quimati. Chicahuac camanalti huan senquisa huihuitic. ¹⁴ Yaya mosehuía ipan cuasiyaj icalteno campa achi más tahuejcapa ipan nopa altepet. ¹⁵ Huan quinotza tacame cati panoj, masque injuanti san quitoquilijtiyahuij se ojti cati xitahuac. ¹⁶ Pero nopa sihuat amo quincahua ma panoca, quinotza huan quinilhuía: “Xihualaca nochaj.” Huan nopa telpocame cati amo teno quimachilíaj quitacaquilíaj icamanal quema quinilhuía: ¹⁷ “Xihualaca nohuaya huan nimechmacas cati nelía cuali.” Quena, cati itztoc ihuaya se sihuat quej nopa quiipiya paquilisti se talojtzi quej se at cati tactecti eltoc más tzopelic, o quej se tacualisti cati se quichtequi huan quicua ixtacatzi ihuaya seyoc quimachilía más ajhuiyac, ¹⁸ pero cati yahuij campa ichaj nopa sihuat amo quimatij sinta nopa tacame cati achtohuiya quipaxalojque, ama itztoque micta.

10

Nopa achtohui amatajcuiloli ten talnamijca camanali ten Salomón Pr 10:1—22:16

¹ Ya ni nopa talnamijca camanali cati Salomón quiijcuilo. Se telpocat cati talnamiqui quipaquilismaca itata huan inana, pero se cati quej hueli nemi, quinmaca miyac tequipacholi.

² Tamanti cati tactecti amo temaca paquilisti, yon amo huejcahua. Pero nochi masehualme cati nemij xitahuac iixpa TOTECO momanahuise ten se miquilisti cati fiero.

³ TOTECO amo quicahuas para se masehuali cati nemi xitahuac ma mayancamiqui, yon amo quicahuulis se masehuali cati amo quitepanita TOTECO ma ixhuis. Nochipa quinequis más.

⁴ Se cati tatzhui nimantzi mochihuas se cati teicneltzi, pero se cati tequiti chicahuac, moricojchihuas.

⁵ Talnamiqui nopa tacat cati quisentilía itacualis ipan nopa tonali quema noja tatotoniya. Pero cati cochi ipan nopa hora para pixcas, pinahuas quema amo quiaxilís itacualis.

⁶ TOTECO quimacas miyac tatiochihualisti se tacat cati nemi xitahuac iixpa, pero amo cuajcualme quipantíaj miyac tamanti tatehuilisti por cati fiero quichihuj.

⁷ Quema miqúi se tacat cati xitahuac, nochi quielnamiqúij ica cuali. Pero quema miqúij cati amo cuajcualme, teipa ayecmo aquí quinelnamiqúij pampa quinitaj quej se tamanti cati pojyajtoc.

⁸ Se cati talnamiqúij quiselía tanahuatili ica paquilsti, pero se cati huihuitic camanalti miyac huan nima huetzi ica ixayac ipan tequipacholi.

⁹ Se cati monejnemiltía xitahuac quipiya temachili ipan inemilis. Pero se cati nemi ipan ojti cati huijcoltic motepotanis huan tahuel mococos.

¹⁰ Masehualme cati amo teno quichihuj quema se tacat quixpano seyoc, tahuel temacaj tequipacholi. Pero cati quinajhuaj chichahuac cati fiero quichihuj quisehuíaj cualanti.

¹¹ Quema camanalti se tacat cati itztoc xitahuac eltoc quej se ameli cati temaca se nemilisti cati cuali. Pero ipan inincamac amo cuajcualme quisa cati quipehualtía cualanti.

¹² Se cati quincualancaita sequinoc quipehualtía cualanti. Pero cati teicnelía quintapojpolhuía cati quixpanoj.

¹³ Quema se masehuali cati talnamiqúij camanalti, nochi cati quicaquij momacaj cuenta para quimachilía miyac tamanti. Pero quema se cati huihuitic camanalti, nochi momacaj cuenta para monequi se acajya quihuitequis ica se cuahuit.

¹⁴ Masehualme cati talnamiqúini nochipa quinequij quimatise más tamanti. Pero se cati huihuitic camanalti quej hueli huan san motanilía tequipacholi.

¹⁵ Se cati tominpiya huelis momanahuis ica itomi para itztos ica temachili. Pero se cati teicneltzí motequipachohua pampa amo teno quiapiya para ica mopalehuis.

¹⁶ Nochi cati quitani se masehuali cati itztoc xitahuac quipalehuía para quiapiyas cati cuali ipan inemilis. Pero amo cuajcualme san quinenpolohuj inintomi ipan tajtacoli.

¹⁷ Se masehuali cati quitacaquilía quema seyoc quixitahua nemi ipan nopa ojti cati yahui campa onca nemilisti. Pero se cati amo quitacaquilía cati quinequi quitalnamiqúis, mocuapolos.

¹⁸ Se cati tecualancaita huan mochihua quej teicnelía, yaya se istacatiquet. Huan se cati tetajilhuía nelía huihuitic.

¹⁹ Se cati tahuel camanalti amo polihui para quiijtos se camanali cati ica taixpanos. Pero se cati talnamiqúij quiapiya miyac cuidado ica cati quiijtohua.

²⁰ Quema se tacat cati itztoc xitahuac iixpa TOTECO camanalti, monequi tijtacaquilis pampa icamanal ipati quej plata cati más cuali. Pero inincamanal amo cuajcualme amo teno ipati.

²¹ Masehualme cati nemij xitahuac iixpa TOTECO hueli temacaj cuali consejos. Pero cati huihuitique miquise pampa amo quiapiyaj talnamiqúilisti para monejnemiltise cuali.

²² Quema TOTECO quitiochihua se masehuali, yaya moricojchihua ica cati nelía ipati. Huan TOTECO quimaca miyac paquilsti.

²³ Se tacat cati huihuitic paqui para quichihua cati fiero. Pero se cati talnamiqúij paqui para quiapiyas más talnamiqúilisti.

²⁴ Nopa tamanti cati amo cuali cati tahuel quiimacasi se masehuali, ya nopa cati ipantis. Pero masehualme cati itztoque xitahuaque iixpa TOTECO, yaya quinmacas nopa tamanti cati quinequij.

²⁵ Quena, quej se hueyi ajcomalacat san hualpanotiquisa, quej nopa nojquiya itztoque masehualme cati amo quitepanitaj TOTECO pampa amo huejcahuaj para itztose. Pero masehualme cati itztoque xitahuac iixpa TOTECO huejcahuase pampa moquetztoque ipan se tatzinpehualtili cati temachti.

²⁶ Se tetequipanojquet cati tatzihui tahuel quicuesolmaca iteco quej pocti cati calaquí ipan iixteyol, o quej vinagre cati quiajsi itancoch hasta cuajcualo.

²⁷ Quema se masehuali quimacasi huan quitepanita TOTECO, TOTECO quichihuas ma itzto miyac xihuit. Pero TOTECO quincotonilis inixihui cati amo cuajcualme.

²⁸ Cati itztoque xitahuaque iixpa TOTECO quichiyaj tamanti cati temaca paquilisti. Pero masehualme cati amo quitepanitaj TOTECO quichiyaj tamanti cati san tapic.

²⁹ TOTECO quinmocuitahuía cati nemij xitahuaque iixpa, pero quintzon-tamiltía masehualme cati quichihuaj cati amo cuali.

³⁰ TOTECO quintiochihuas cati itztoque xitahuaque iixpa huan amo quema tatzintahuetzise. Pero quinquixtis masehualme cati amo quitepanitaj ipan ni tali, pampa amo quincahuilis ma huejcahuaca itztose.

³¹ Quema camanalti se masehuali cati itztoc xitahuac iixpa TOTECO, tetalanictía. Pero se tecajcayajquet, TOTECO quitzontamiltis para ayecmo huelis camanaltis.

³² Quema camanalti se cuali tacat, icamanal tepalehuía. Pero amo cuajcualme quijjtohuaj camanali cati tacajcayahua.

11

¹ TOTECO tahuel quicualancaita cati tecajcayahua huan amo ajsitoc tata-machihua. Quinequi xitamachihua xitahuac pampa ya nopa quimaca paquilisti.

² Quema se masehuali pehua mohueyimati, sequinoc ayecmo quitepanitase. Pero cati moechcapantalíaj quipantise talnamiquilisti.

³ Masehualme cati monejnemiltíaj xitahuac quiپیay se iniyolo cati cuali cati quinyacana huan quinilhuía taya ma quichihuaca. Pero masehualme cati quinpactía tajtacolchihuase motzontamiltise pampa tacajcayajtnemij.

⁴ Ipan nopa tonali quema TOTECO tetajtolsencahuas, itomi se tominpix-quet amo quipalehuis. Pero masehualme cati itztoque xitahuaque iixpa TOTECO momanahuise ten miquilisti.

⁵ Nochi cati cuali quichihua se masehuali cati itztoc xitahuac quipalehuía para ma quiپیay se ojti cati alaxtic. Pero masehualme cati amo cuajcualme huetzise por inintajtacolhua.

⁶ Nopa tamanti cati cuali cati cuajcualme quichihuaj quinmanahuis ten miyac taquetzti, pero cati fiero quichihuaj tajtacolchijca masehualme quin-masiltis.

⁷ Quema miqui se tacat cati amo cuali, tami nochi cati yaya quichiyayaya quichihuas. Masque yaya se tacat tetic, nenpolihuis nochi cati mochiyayaya para quichihuas.

⁸ TOTECO quinmanahuis cati itztoque xitahuaque iixpa ten taijyohuulisti. Pero masehualme cati amo quitepanitaj, TOTECO quincahuilis ma quinajsi.

⁹ Se tacat cati quiپیay ome ixayac quinyolcocohua ihuampoyohua ica icamanal cati fiero. Pero cati itztoc xitahuac iixpa TOTECO mochololtía ten taohuijcyot por nopa cuali talnamiquilisti cati quiپیay.

¹⁰ Ipan se altepet nochi masehualme paquij quema nochi quisa cuali para se cuali tacat. Pero se altepet ilhuichihua quema miquij amo cuajcualme.

¹¹ Nopa miyac tatiochihualisti cati quiselíaj masehualme cati itztoque xitahuaque quihueyitalía inialtepe. Pero amo cuajcualme quinenpolohuaj inialtepe ica cati fiero quijtohuaj.

¹² Se cati amo cuali italnamiqulis camanalti fiero ten seyoc cati itztoque icalnechca. Pero se tacat cati talnamiquí amo molinía.

¹³ Se cati teejelnamictinemi amo quema hueli quimati se camanali cati ixtacatzi huan amo teyolmelahuas. Pero se tacat cati temachti quimati miyac tamanti cati amo tematiltía.

¹⁴ Campa amo onca teguichihuani cati talnamiquij para tayacanase, tatzintahuetzise nopa masehualme. Pero quema masehualme ipan se altepet quinqeitalíaj miyac masehualme cati quinmacaj cuali consejos, itztose ica temachili.

¹⁵ Quipantis tequipacholi cati quitális ifirma para taxtahuas por seyoc sinta yaya amo taxtahuas. Pero se cati amo quitális ifirma para seyoc, itztos ica temachili.

¹⁶ Se sihuat cati quiptiya iyolo ica sequinoc, quipantis tatepanitacayot. Pero tacame cati amo quitepanitaj TOTECO san quinequij quipantise tomi.

¹⁷ Se tacat cati tetasoja mochiuilía cati cuali pampa moyolpactía, pero se tacat cati tecocohua motanahuía pampa moyolcocohua.

¹⁸ Se tacat cati amo cuali italnamiqulis tacajcayahua huan nopa tomi cati quitantoc ica tacajcayahualisti san eltoc para se talojtzi. Pero se tacat cati quichihua cati xitahuac iixpa TOTECO quiselis se itaxtahuil cati nelía ipati.

¹⁹ Se cati quichihua cati xitahuac, yas campá onca nemilisti. Pero se cati quitoquilía cati fiero, quipantis miqulisti.

²⁰ TOTECO quincualancaita cati moilhuíaj quenicatza hueli tacajcayahuase. Pero quincualita cati nemij nelcuali huan amo aquí hueli quintelhuía.

²¹ Temachti se tonali TOTECO quintatzacuilitis masehualme cati amo quitepanitaj. Pero ininconeuhua masehualme cati itztoque xitahuaque iixpa, TOTECO quinmanahuis ten taohuijcajot.

²² Se sihuat cati yejectzi pero amo quiptiya talnamiqulisti, eltoc huihuitic san se quej se pitzo cati quihuica ipan iyacatzol se anillo ten oro.

²³ Cati cuali quinchia masehualme cati quichihua cati cuali. Pero icalancayo TOTECO quinchia amo cuajcualme.

²⁴ Cati quinpactía temajmacase cati quiptiyaj, achi más moricojchihuase. Pero cati itzcuime huan amo quinequij temajmacase sequinoc cati iniaxca, teipa mochihuase teicneltziti.

²⁵ Quena, se masehuali cati hueyi iyolo huan miyac quinmaca sequinoc ten cati quiptiya, moricojchihuas más. Huan cati quinpalehuía sequinoc, TOTECO quitiocihuas huan quiptiyas nochi cati monequí.

²⁶ Se cati amo quinemaquiltía itrigo quema sequinoc quitemohuaj pampa moilhuía patiyohuas, ialtepe ejcahua quitelchihuase. Pero cati quinemaquiltía sequinoc quema amo quiptiyaj, TOTECO quitiocihuas.

²⁷ Sinta tijtemohua cati cuali para tijchihuas, TOTECO mitzcuailitas, pero sinta tijtemohua cati amo cuali para tijchihuas, ya nopa tijpantis.

²⁸ Cati motemachía ipan itomi huetzic quej se xihuit cati huacoc. Pero masehualme cati quichihua cati cuali quiptiyase tetili quej imacuayohua se cuahuit cati nochipa xoxohuixtoc.

²⁹ Se huihui telpocat cati quihualica taohuijcaoyot ipan ifamilia amo teno quiselis teipa cati itatahua quicahuilijtehuase. Huan yaya cati huihuitic teipa monequis quitequipanos seyoc cati talnamiqui.

³⁰ Pero se masehuali cati itztoc xitahuac iixpa TOTECO tepalehuía quej se cuahuit cati temaca cuali nemilisti. Huan cati quinotza sequinoc ma quitoquilica TOTECO, yaya nelía talnamiqui.

³¹ Sinta cati itztoque xitahuaque quiselíaj inintaxtahuil nica ipan ni taltipacti por cati quichijtoque, huajca más temachti cati amo cuajcualme huan cati tajtacolchihuaj quiselise cati quinamiqui.

12

Masehualme cati xitahuaque huan inijuanti cati amo quitepanitaj TOTECO

¹ Se cati quipactía quiselía tamachtili cati quixitahua quipiya talnamiquilisti cati cuali. Pero se cati amo quinequi quitacaquilis cati quixitahua nelía huihuitic.

² TOTECO quicualita se masehuali cati cuali. Pero TOTECO quitalis tatza-cuilitilisti ipan nopa tacat cati moilhuía cati fiero huelis quichihuas.

³ Se masehuali amo quipantis temachili ipan inemilis por cati fiero quichihua. Pero masehualme cati quichihuaj cati cuali, quena, quipiyaj ininelhuayo cati calaqui huejcata huan amo teno quinolinis.

⁴ Se sihuat cati nelcuali quihualiquilía ihuehue tatepanitacayot pampa masehualme quuitaj quej se tanahuatijquet ica se corona ipan itzonteco. Pero se sihuat cati quihualiquilía ihuehue pinahualisti quicocohua ihuehue quej se cocolista cati quicua iomiyohua.

⁵ Se cuali masehuali moilhuía quichihuas cati xitahuac, pero amo cuajcualme moilhuíaj quenicatza hueli tacajcayahuase.

⁶ Inincamanal masehualme cati amo quitepanitaj TOTECO tecocohua hasta temictía. Pero inincamanal masehualme cati itztoque xitahuaque temanahuía ten miqulisti.

⁷ TOTECO quintzontamiltis amo cuajcualme, pero ininteipan ixhuihua masehualme cati quichihuaj cati cuali itztoze temachti para nochipa.

⁸ Masehualme quitepanitaj se tacat cati quipiya cuali italnamiqulils, pero se cati huihuitic quuitaj para amo teno ipati.

⁹ Más cuali se cati tequiti chichahuac huan mosoquihuía ipan itequi para quitani cati yaya huan itequipanojchahua quicuase, huan amo se masehuali cati mohueyimati huan amo quinequi motequihuis para quipiyas ten quicuas.

¹⁰ Se cuali masehuali motequipachohua por itapiyálhua pampa amo quinequi ma taijyohuica. Pero se masehuali cati amo quitepanita TOTECO amo teno moyolilhuía para quitasojtas itapiyal.

¹¹ Se masehuali cati tequiti chichahuac ipan imila nochipa quipiyas miyac tacualisti. Pero se cati huihuitic quinenpolohua itonal pampa tatzihui.

¹² Tachtequini cualanij quema quuitaj para inintequixpo quiichtectoque tamanti cati más hueyi ipati que ya. Pero cuajcualme quitanij ica inintequi para huelis quinpalehuise sequinoc.

¹³ Amo cuajcualme istacatij huan inincamanal quinmasiltía pampa nima nesi para amo melahuac. Pero cuajcualme amo istacatij huan momanahuíaj ten miyac tamanti taohuijcaoyot.

14 Se tacat cati quijtohua cati melahuac quipantis miyac tamanti cati cuali huan cati quitemitis inemilis ica paquilisti. Huan yaya cati tequiti cuali ica imax quiselis se taxtahuili cati cuali.

15 Se cati huihuitic moilhuía para nemi ipan se ojti xitahuac huan amo quinequi consejos. Pero se masehuali cati talnamiqui quintacaquilia cati quiconsejomacaj para ma monejnemilti más cuali.

16 Se cati huihuitic nimantzi cualani quema sequinoc quitajilhuíaj. Pero se cati talnamiqui quipiya iyolo quema quitajilhuíaj, huan amo quinextía cualanti.

17 Se testigo cati quijtohua nochi cati senquisa melahuac, quichihua cati xitahuac. Pero se testigo cati istacati quichihua pampa quinequi tacajcayahuas.

18 Itztoque sequij tacame cati tecocohuaj ica inincamanal quej elisquía se macheta cati tatequi. Pero inincamanal talnamiquini eltoc quej se pajti cati teyolchicahua huan teyoltalía.

19 Icamanal se testigo cati quijtohua nochi cati senquisa melahuac huejcahuas pampa nochi quuitase para xitahuac. Pero icamanal se testigo cati istacati amo huejcahuas pampa nima monextis para amo melahuac.

20 Nochi cati moilhuíaj quichihuase cati amo cuali, quisencahuaj ipan iniyolo quenicatza huelis tacajcayahuase. Pero cati itztoque xitahuaque quipiyaj paquilisti ipan iniyolo pampa moyolilhuíaj cati cuali huelis quichihuase.

21 Amo quipantise tatzacuiliti cati monejnemiltíaj xitahuac, pero miyac taohujcayot quipantise ipan ininemilis amo cuajcualme.

22 TOTECO quincualancaita masehualme cati istacatij. Pero nochi cati quijtohuaj cati melahuac, TOTECO quincualita.

23 Se cati talnamiqui amo mohueyimati, yon amo quinextilía sequinoc nochi cati quimati. Pero cati huihuítique tahuel mohueyimatij huan quijtohuaj miyac tamanti huihuiyot.

24 Xitequiti chichahuac huan tielis se tayacanquet, pero sinta timochihuas titatzihui tielis itequipanojca seyoc masehuali.

25 Se masehuali cati moyoltequipachohua nelía taijyohuía, pero se cuali camanali quimacas paquilisti ipan iyolo.

26 Se masehuali cati monejnemiltía xitahuac quinyacana ihuampoyohua ipan se cuali ojti, pero amo cuajcualme quinhuicaj sequinoc ipan se ojti campa mocuapolose.

27 Se masehuali cati tatzihui amo quinequi quitemos yon cuahuit para quiixitis cati quipejtoc, san xoxohuic quicuas, pero se cati quipactía tequitis quitanis cati nel cuali.

28 Masehualme cati quichihuaj cati cuali quitoquilíaj nopa ojti cati tehuica campa onca nemilisti. Iniojhui amo yahui campa onca miquilisti.

13

1 Se telpocat cati talnamiqui quiselía cati itata quijtohua quema quitalamictía, pero se cati tahuihuiita amo quitacaquilia cati quitacahuáltía.

2 Se masehuali cati camanalti cuajcuali tamanti quipantis cati cuali ipan inemilis, pero masehualme cati amo quitepanitaj TOTECO san quipantise tatehuilisti.

3 Se cati quipiya miyac cuidado ica cati quijtohua huan amo quej hueli camanalti, quimocuitahuía inemilis. Pero se cati quej hueli ontananquilij-tiquisa quipantía taohujcayot.

⁴ Se tacat cati tatzihui quinequi miyac tamanti, pero amo quinpantía por itatzcayo. Pero se cati tequiti chicahuac, moricojchihuas.

⁵ Se masehuali cati itztoc xitahuac iixpa TOTECO amo quinequi quiitas istacatili, pero nopa masehualme cati amo quitepanitaj TOTECO teijistacahujtinemij, huan huetzij ipan pinahualisti.

⁶ Nopa cuali tamanti cati quichihuaj cuajcualme quinmanahuía mojmosta ipan ininemilis. Pero cati fiero quichihuaj tajtacolchijca masehualme quint-zontamiltía.

⁷ Itztoque sequij masehualme cati pilteicneltziti, pero mohueyimati huan monextíaj quej tominpiyani. Huan itztoque sequinoc cati nelía tominpiyani, pero moechcapantalíaj huan mochihuaj quej teicneltziti.

⁸ Quema quichtequij se masehuali cati tominpiya huan quihuicaj huejca, quitajtaníaj ma taxtahua miyac tomi para quimanahuis inemilis. Pero se cati teicneltzi amo monequi quiimacasis ajquiya quiitzquis huan tajtanis tomi.

⁹ Inemilis se cuali masehuali eltoc quej se taahuili cati tatanextía campa hueli. Pero ininemilis tajtacolchihuani eltoc quej se taahuili cati talojtzi sehui.

¹⁰ Se masehuali cati motepanita quipantis tanajnanquilisti. Pero cati moechapanohua huan quitacaquilía consejos, quipiyas talnamiquilisti.

¹¹ Cati moilhuía quitanis miyac tomi ipan se talojtzi mocajcayajtoc. Pero cati quisentilía tomi sesentziti huan ica miyac tequit, quipiyas tomi cati momiyaquilis.

¹² Quema se masehuali mojmosta quichiya para quiselis se tenijqui huan amo ajsi imaco, nelía quiyolcocohua. Pero quema se quinequi se tamanti huan teipa quiselía, nelía yolpaqui.

¹³ Se masehuali cati amo quinequi quiitas itanahuatilhua TOTECO, mocuapolos pampa amo quintoquilía. Pero cati quintepanitas tanahuatilme, TOTECO quitiocihuas.

¹⁴ Itamachtil se cati talnamiqui eltoc quej se ameli campa temaca se cuali nemilisti. Huan cati quitacaquilíaj icamanal se cati talnamiqui momanahuíaj ten nopa taquetzti cati quimictisquía.

¹⁵ Se masehuali cati talnamiqui quimachilía miyac tamanti huan sequinoc quicualitaj. Pero iniojhui tacajcayahuani tahuel ohui pampa quiselise tatzacuilti por inintajtacolhua.

¹⁶ Nochi tacame cati talnamiquij moyolilhuíaj achtohui sinta cuali para quichihuase se tamanti o amo. Pero cati huihuitique amo moyolilhuíaj achtohui. Nimantzi quichihuaj ten hueli tamanti huan quinextíaj inihuihuiyo.

¹⁷ Se tayolmelajquet cati amo quitepanita TOTECO quichihua ma onca cualanti. Pero se tayolmelajquet cati temachti teyolchicahua.

¹⁸ Quema se masehuali amo quinequi quitacaquilis cati quiconsejomaca, mochihuas teicneltzi huan teipa tahuel pinahuas. Pero se cati quitacaquilía cati quinequi quixitahuas teipa quiselis tatepanitacayot.

¹⁹ Se paquilisti quema mochihua se cuali tamanti quej se quinequiyaya ma mochihua. Pero cati huihuitique amo quinequij quicahuase ten fiero quichihuaj para quipantise cati cuali.

²⁰ Se masehuali cati nemi inihuaya cati talnamiquij mochihuas talnamiqui. Pero cati nemi inihuaya cati huihuitique, quipantis ajquiya quipojpostequis iomiyohua.

²¹ Tamanti cati amo cuali quintoquilijtinemi tajtacolchihuani. Pero cati quichihuaq cati cuali quipantise miyac tatiochihualisti.

²² Quema miqúi se cuali masehuali, quicajtehua miyac tamanti cati cuali para iconehua huan hasta para iixhuihua. Pero quema miqúi se cati tajtacolchijtinemi, iricojyo panos ica se cati quichihua cati cuali.

²³ Se masehuali cati teicneltzi huelis quipiyas imil cati taeliltía huan quimaca miyac tacualisti. Pero sinta amo onca tanahuatilme cati xitahuac ipan ialtepe, fiero masehualme huelis quiichtequilise nochi.

²⁴ Se masehuali cati amo quitacahualtía icone quema quichihua tamanti cati amo cuali, quinextía para amo quiicnelía. Pero cati nelía quiicnelía icone, pehua quixitahua quema noja pisiltzi.

²⁵ Se masehuali cati quichihua cati cuali quipiya miyac tacualisti para huelis tacuas hasta ixhuis. Pero amo cuajcualme mayancamictinemij pampa amo tequitij.

14

¹ Se sihuat cati talnamiqui mojmota quisencahua ichaj para ma eli más cuali, pero se cati huihuitic quisosolohua ichaj ica cati quichihua.

² Cati monejnemiltía ipan nopa ojti cati xitahuac quiimacasi huan quitepanita TOTECO. Pero se cati necuiltic nemi amo quinequi quitas.

³ Icamanal se huihui masehuali quihualiquilía tatzacuiliti. Pero inincamanal talnamiquini quinmocuitahua ten cati amo cuali.

⁴ Quema amo onca torojme para taxahuase, amo oncas trigo ipan cuacali para pantzi. Pero quema onca torojme cati tequitij ica nochi ininchicahualis, momiyaquilis pixquisti.

⁵ Se testigo cati temachtí amo quema istacati, pero se testigo cati quipactía tacajcayahua, mojmota istacati.

⁶ Se cati tehuihuiíta amo quema quipantis talnamiquilisti masque quijtohua quitemohua. Pero se cati quimachilía miyac tamanti, yaya amo ohui quipantía talnamiquilisti.

⁷ Ximohuejcatali ica ten quichihua se masehuali cati huihuitic, pampa yaya amo mitznexilis yon se tamanti cati cuali.

⁸ Se cati talnamiqui yaya moilhuía cati imelac huala ipan iojhui. Pero se cati huihuitic mocajcayahua ica iselti ica ihuihuiyo.

⁹ Cati huihuitique san huetzcaj quema tajtacolchihuaq. Pero masehualme cati xitahuac nemij moilhuíaj ipan iniyolo para monejnemiltise noja más xitahuac.

¹⁰ Sese masehuali quimati nopa tequipacholi o nopa paquilisti cati quipiya ipan iyolo. Huan amo aqui huelis quimachilis senquisá cati seyoc quimati.

¹¹ Nopa yejectzi calí cati amo cuajcualme quipiyaj sosolihuis. Pero masque masehualme cati xitahuac san quipiyaj ininchaj cati teicneltzi nochi elis cuali para cati nozona itztoque.

¹² Onca ojti cati masehualme moilhuíaj para xitahuac, pero amo cana; pampa cati yahuij ipan nopa ojti quipantíaj miquilisti.

¹³ Masque se masehuali huetzca, hueli onca tamanti cati quitequipachohua miyac. Huan quema tami huetzca, noja quimachilía nopa tequipacholi.

¹⁴ Amo cuajcualme mocahuaj cuesijtoque ica nochi cati fiero quichihuaq. Pero nochi cati quichihua se cuali masehuali quitemitía iyolo ica paquilisti.

15 Se cati huihuitic nimantzi quineltocha nochi cati ihuampoyohua quiilhuáj ma quichihua, pero se masehuali cati talnamiqui achtohui moillhuá sinta cuali para quichihuas se tamanti o amo.

16 Se cati talnamiqui quiimacasi cati amo cuali huan mohuejcatalía. Pero se cati huihuitic mochihua quej amo teno quiimacasi huan momajcahua san quej hueli campa tamanti mahuilili.

17 Se tacat cati yolquentzi nimantzi cualani huan quichihua tamanti cati amo quinamiqui. Huan nochi masehualme quicualancaitaj se cati moyolilhuá quenicatza huelis tecocos o tacajcayahuas.

18 Cati huihuitique san quipiyaj huihuiyot ipan inintzonteco, pero cati talnamiquij inijuanti quipiyaj talnamiquilisti quej se yejectzi corona cati quihuicaj ipan inintzonteco.

19 Fiero masehualme mohuijtzomase iniixpa cuajcualme. Quena, motancaquetzase iniixpa cati quichihuj cati xitahuac huan quintajtanise tapalehuil.

20 Ica masehualme cati teicneltziti hasta ininteixmatcahua amo quinequij quinitase. Pero tominpiyani quipiyaj miyac inihuampoyohua.

21 Tajtacolchihua cati amo quinequi quitas se cati icalnechca. Pero hueyi ipaquilis se tacat cati quintasojta cati teicneltziti huan quinpalehuá.

22 Cati moyolilhuáj para quichihuase san cati amo cuali, mocuapolose; pero cati moyolilhuáj para quichihuase san cati cuali quipantise teicnelijcayot huan cati melahuac.

23 Cati tequitij cuali quiselise inintaxtahuil. Pero cati san camanaltij huan amo quichihuj inintequi mocahuase teicneltziti.

24 Nopa ricojyot cati masehualme cati talnamiquij quitani quinhuilquilia miyac tatepanitacayot. Pero cati huihuitique san quitani más huihuiyot.

25 Se testigo cati quiijtohua cati melahuac quimanahuá ininemilis masehualme cati amo teno quichijtoque. Pero se testigo cati tacajcayahua san istacati.

26 Masehualme cati quiimacasi huan quitepanitaj TOTECO itztoque ica temachili, huan ininconeua nojquiya momanahuise ipan TOTECO.

27 Quema se masehuali quiimacasi huan quitepanita TOTECO eltoc quej se ameli cati temaca se cuali nemilisti, huan quimanahuá cati eltoc nechca miqulisti.

28 Quema tahuel momiyaquilíaj masehualme ipan se tali, inintanahuatijca mohueyichihua. Pero quema mocahuaj san se quesqui masehualme ipan ital se tayacanquet, tantiyas itequitcayo.

29 Se masehuali cati amo cualani nimantzi, quinextía para talnamiqui. Pero se cati nimantzi cualani quinextía ihuihuiyo.

30 Quema se masehuali quipiya tasehuilisti ipan iyolo, nopa tasehuilisti quimaca se nemilisti cati huejcahuas ipan ni taltipacti. Pero sinta tiquixtocas cati sequinoc quipiyaj, quicuas moomiyo quej se cocolisti huan amo tihuejcahuas.

31 Cati quitaijyohuiltía se cati teicneltzi quixpano TOTECO Dios cati quichijchiqui. Pero cati quintasojta cati teicneltziti quinextilía TOTECO tatepanitacayot.

32 Masehualme cati amo quitepanitaj TOTECO motzontamiltise ica inintajtacolhua. Pero cati itztoque xitahuaque iixpa TOTECO motemachíaj ipan ya cati hueli quinmanahuis ten miqulisti.

33 Talnamiquilisti onca ipan iniyolo masehualme cati talnamiquij. Pero amo onca talnamiquilisti ipan iniyolo cati huihuitique.

³⁴ Quema nochi masehualme ipan se tali monejnemiltíaj xitahuac, se-quinoc quihueyitalíaj inintal. Pero quema masehualme tajtacolchijtnemij, quihualiquilíaj pinahualisti.

³⁵ Se tanahuatijquet yolpaqui ica itequipanojcahua cati talnamiqij huan quimatij taya quichihuase. Pero sinta se itequipanojca quihualica pinahualisti, quiajsis icualancayo nopa tayacanquet.

15

¹ Quema se acajya quinanquilía ica cuali, se cati cualantoc, nimantzi quiyoltalía. Pero sinta quinanquilis chicahuac, achi más quicualancamacas.

² Se cati talnamiqí quicualtalía icamanal para ma quiyolilti paquilisti. Pero se cati huihuític san camanalti huihuiyot cati amo teno ipati.

³ TOTECO itztoc campa huéli huan quitachilía taya quichihuaj nochi masehualme. Quintachilía cati quichihuaj masehualme cati amo quitepanitaj TOTECO huan taya quichihuaj cuajcualme.

⁴ Se masehuali cati camanalti ica camanali cati yamanic temaca se nemilisti cati cuali. Pero cati quíijtohua camanali cati tecajcayahua nelía taylorcoghua.

⁵ Se telpocat cati huihuític amo quinequi quitacaquilis itata quema quitacahualtía. Pero se cati talnamiqí, yaya quena. Quicaqui huan quichihua cati itata quillhuía.

⁶ Ipan ichaj se masehuali cati itztoc xitahuac onca miyac ten ica panos. Pero se masehuali cati amo quitepanita TOTECO san quitani taohuijcaoyot.

⁷ Inincamanal talnamiqíni temaca talnamiqúlisti. Pero masehualme cati amo quitepanitaj TOTECO amo quipiyaj talnamiqúlisti para temacase.

⁸ TOTECO amo quinequi quiitas nopa tacajcahualisti cati fiero masehualme quimacaj. Pero quimaca miyac paquilisti quema motatajtíaj masehualme cati itztoque xitahuaque iixpa.

⁹ TOTECO amo quinequi quiitas nopa ojti cati quitoquilíaj amo cuajcualme. Pero yaya quíicnelía cati quinequij quitoquilise cati nelxitahuac ipan nochi cati quichihuase.

¹⁰ TOTECO quintatzacuiltis chicahuac cati quicajtehuaj iojhui TOTECO para sempa quichihuase cati fiero. Pero sinta se amo quinequis quicualtalis inemilis quema TOTECO quixitahua, TOTECO quintzontamiltis.

¹¹ TOTECO quimati nochi cati pano ica cati itztoque ipan ostot huan campa micta, huajca noja más quimati sesen piltamantzitzi cati eltoc ipan iniyolo masehualme.

¹² Se cati tehuihuíta amo quíicnelía cati quitacahualtía huan quinequi quixitahuas. Amo quinequi quinechcahuis cati talnamiqij pampa amo quinequi ma quíixcoilhuica para amo cuali cati quichihua.

¹³ Se cati yolpactoc, tenextilía ipaquilis pampa huetzca, huan se cati moyoltequipachojtoc, nimantzi quinextía ipan ixayac.

¹⁴ Iyolo se masehuali cati talnamiqí tavel quinequi quimachilis más tamanti. Pero se cati huihuític san moixhuitía ica más huihuiyot.

¹⁵ Se masehuali cati yolcuesihui quiita nochi tonali para nel fiero, pero se cati yolpactoc, mojmosta quiita quej elisquía ilhuit.

¹⁶ Más cuali para se masehuali elis teicneltzi huan quiimacasis huan quitepanitas TOTECO, huan amo para quipiyas miyac tomi ica tequipacholi.

¹⁷ Achi más cuali se quicuas san quilít ipan se cali campa onca taicnelijcaoyot, huan amo quicuas toro nacat campa onca cualanti.

18 Se masehuali cati nimantzi cualani quintatehuiltía sequinoc, pero se cati quiipiya iyolo, yaya quinyoltalía.

19 Se cati tatzihui quiohuijmati nochi tamanti ipan ni nemilisti huan quiita nochi tamanti quej huitzti cati ohui para quipanos, pero masehualme cati quichihuj cati xitahuac quiitaj para amo ohui nopa tamanti cati quinixnamictihuala. Ininemilis eltoc quej se ojti cati patahuac.

20 Se telpocat cati talnamiqui quinmaca miyac paquilisti itatahua, pero se cati huihuitic quincualancaita.

21 Se cati amo talnamiqui mopaquilismaca ica nochi huihuiyot cati quichihua, pero se cati quimachilía miyac tamanti quichihua campeca para moxihuas huan quitoquilis nopa ojti cati cuali.

22 Quema se acajya quinequi quichihuas se tamanti pero amo motatzintoquilía quenicatza quichihuas o sinta cuali para quichihuas, amo quisa cuali itequi. Pero quema se motajtania miyac consejos ica talnamiquini, nochi cati quichihua quisa cuali.

23 Nochi masehualme quinpacía quema se tananquilía cuali huan quinpalehuía sequinoc ma quimachilise más. Nelía cuali quema se acajya quimati quenicatza quicamanalhuis se masehuali huan quihuis cati quinamiqui ipan nopa talojtzi quema monequi.

24 Masehualme cati talnamiquij quitoquilíaj nopa ojti ica huejcapa cati tehuica ilhuicac campa onca nemilisti. Inijuanti quihuejcajtoque nopa ojti cati tehuica micta.

25 TOTECO quisosolos ininchaj masehualme cati mohueyimati huan nochi tamanti cati quiipiyaj, pero yaya quimocuitahuía nochi cati iniaxca sihuame icnotziti.

26 TOTECO amo quinequi quitas cati fiero moyolilhuíaj amo cuajcualme, pero quiipiya paquilisti ica cati quiijtohuaj masehualme cati yoltapajpac-tique pampa cuali inincamanal.

27 Se masehuali cati quinequi tacajcayahuas huan moaxcatis cati seyoc iaxca quihualicas taohuijcajot ipan ihuicalhua, pero cati amo quiselis tomi cati amo quitantoc itztos ica cuali.

28 Se masehuali cati itztoc xitahuac iixpa TOTECO moyolilhuía quenicatza tananquilis quej quinamiqui, pero se masehuali cati amo quitepanita TOTECO ontananquilijti quisa nimantzi ica camanali cati amo cuali.

29 TOTECO mohuejcatiljtoc ten masehualme cati fiero ininemilis, pero quintaquilía quema motatajtíaj o momaijtohuaj masehualme cati xitahuaque iixpa.

30 Quema se acajya iixpaqui, quinchihua sequinoc ma quiipiyase paquilisti ipan iniyolo, huan quema se quihualica se camanali cati cuali, quinmaca masehualme chichualisti hasta ipan iniomiyo.

31 Nopa masehuali cati quichihuilía cuenta quema seyoc quimaca consejo para quimanahuis inemilis, teipa itztos inihuaya cati nelía talnamiquij.

32 Cati amo quichihuilía cuenta cati quinequi quitalamictis, ica iselti mochihuilía cati fiero. Pero se cati quitacaquilía quema seyoc quixitahuas-nequi, quimachilis miyac tamanti.

33 Sinta tiquimacasi huan tijtepanita TOTECO mitzchihuas tielis titalnamiqui. Huan cati moechcapantalía iixpa ya, teipa quipantis tatepanita-cayot.

16

¹ Tojuanti hueli tijcualtalise ipan toyolo taya tijchihuase, pero TOTECO quijjtos sinta cuali o amo para tijchihuase cati timoilhuijtoque.

² Se masehuali quuita nochi tamanti cati quichihua para cuali, pero TOTECO quitachilía iyolo huan quuita para ten quichijqui cati quichijtoc.

³ Nochi cati ta timoilhúa para tijchihuas xijcahuili imaco TOTECO para mitzyacanas, huan yaya mitzpalehuís para quisas cuali cati timoilhuijtoc.

⁴ TOTECO quichijchijqui nochi tamanti para se tamanti. Quinchijchijtoc fiero masehualme para ma quiselica inintaijyohuilis ipan nopa tonali cati amo cuali.

⁵ TOTECO quincualancaita nochi masehualme cati mohueyimatij, huan temachti quiselise inintatzacuilitis.

⁶ Para se quixitahuas cati tajtacolchihua monequi miyac teicnelijcayot huan camanali cati melahuac. Huan quema yaya pehuás quiimacasis huan quitepanitas TOTECO, moiyocatalis ica tamanti cati amo cuali.

⁷ Quema iojhui se masehuali quipactía TOTECO, hasta icualancaitacahua nojquiya moyoltalise ica nopa masehuali.

⁸ Más paqui se masehuali cati quipiya pilquentzi tomi, pero monejnemiltía xitahuac, que se cati quitantoc miyac tomi ica tacajcayahualisti.

⁹ Tojuanti hueli timoyolilhúaj canque cuali tiyase, pero yaya TOTECO cati quijjtohua sinta nozona tiyase o amo.

¹⁰ TOTECO quipalehuía se tanahuatijquet para quijjtos cati xitahuac quema tetajtolsencahua, huajca amo quinamiqui para istacatis huan mocuapolos.

¹¹ TOTECO quinequi para nochi tamanti tatamachihuali cati motequihuía ma eli xitahuac. Yaya TOTECO cati quichihua nochi tanahuatili huan nochi masehualme monequi quichihuase cati yaya quijjtojtoc.

¹² TOTECO amo quinequi quuitas se tanahuatijquet cati quichihua cati amo cuali, pampa se cati quipiya tequiticayot monequi itztos xitahuac para itanahuatilhua quipiyas chicahualisti.

¹³ Tanahuatiani yolpaquij quema inimasehualhua quijjtohuaj cati xitahuac. Quinicnelíaj cati quinyolmelahuaj senquisa cati melahuac.

¹⁴ Icuancayo se tanahuatijquet huélis quichihuas para ma miqui se masehuali, pero se cati talnamiqui quiyoltalis.

¹⁵ Masehualme cati quichihua cati quipactía se tanahuatijquet quiselíaj miyac tamanti cati cuali. Inijuanti paquij quej quema se quuita para huala mixti quema amo huetztoc at para miyac tonali.

¹⁶ Nelía más cuali sinta tijtemos talnamiquilisti huan tijmachilis miyac tamanti, huan amo oro o plata.

¹⁷ Iniojhui cati itztoque xitahuaque moiyocatalía ten campa onca cati amo cuali. Cati momocuitahuía para amo quichihuas cati amo cuali quimocuitahuía inemilis.

¹⁸ Cati achtohui mohueyimati, teipa motepotanis, huan cati achtohui motepanita teipa huetzis huan tahuel mococos.

¹⁹ Más cuali timoechcapantalis huan tiitztos inihuaya teicneltzitzti, huan amo timochihuas titominpiya ica tamanti tachtecti inihuaya cati mohueyimatij.

²⁰ Se masehuali cati quitacaquilía tamachtili quipantis cati cuali. Huan TOTECO quintiochihuas cati ipan ya motemachíaj.

²¹ Talnamiquini moixmatij pampa quimachilíaj miyac tamanti. Huan cati quitequihuíaaj cuajcuali camanali quema camanaltij achi más mochihuaj talnamiquini.

²² Sinta tijpiya tamachilisti para timonejnemiltis nelía cuali, eltoc quej se ameli moyoltipa cati temaca se nemilisti cati yejyectzi. Pero nojquiya huihuitique cati quichihuaj campeca quinxitahuase cati huihuitique.

²³ Pampa cuali itzonteco se masehuali cati talnamiqui, momocuitahuía ica cati quuijtohua. Cuali quimati para teyoltalis huan teyolpitzahuas ica icamanal quej quinamiqui.

²⁴ Camanali cati yamanic eltoc quej necti. Quichihuas más tzopelic mone-milis huan eltoc quej se pajti cati temaca chichahualisti.

²⁵ Onca se ojti cati masehualme quuitaj para cuali huan xitahuac, pero nopa ojti quinhucas xitahuac campa micta.

²⁶ Quema mayana se tequipanojquet, quipalehuía. Quichihua nopa tequipanojquet ma tequti cuali para quipiyas itacualis.

²⁷ Se masehuali cati amo quitepanita TOTECO quitemohua cati amo cuali cati sequinoc quichijtoque para quipanextis. Icamac eltoc quej se tilelemecti cati quitatía nochi.

²⁸ Se tacat cati amo quitepanita TOTECO quiyoliltía cualanti. Huan se cati tetajilhúa quinxelohua cati monelhuampochijtoque.

²⁹ Se masehuali cati fiero inemilis quicajcayahua hasta inelhuampo. Quihuica ipan ojti cati amo cuali.

³⁰ Ijcopi iixteyol quema moyolilhúa para quichihuas cati amo cuali. Motanatzua para quinequisquía ma mochihua cati fiero moilhúa.

³¹ Nopa cuaichti eli quej se xochi corona para se masehuali cati ya huehuejtixtoc, huan mopantía campa masehualme cati monejnemiltíaj xitahuac.

³² Más cuali cati quipiya iyolo huan amo cualani que cati tahuel tetic. Más cuali cati monahuatía ica iselti para amo quichihuas cati fiero, que se cati quitani se altepet.

³³ Se masehuali huelis quimajcahuas nopa piltetzitzi para quitemos isuerte, pero eltoc TOTECO cati quuijtohua taya panos ipan inemilis.

17

¹ Más cuali para quipiyase san tochoj para quicuase ipan se cali campa onca tasehuilisti, huan amo para quipiyase miyac tacualisti ipan se cali campa nochi mocualaníaj.

² Se tequipanojquet cati talnamiqui quipiyas tequiticayot para quinahuatis itelpōca iteco cati amo tatepanita. Nopa cuali tequipanojquet quixelos inihuaya nopa icnime cati iteco quicajtehuas.

³ Ica tit quipajpacaj plata huan oro para ma mocahua senquisua cuali, pero yaya TOTECO quieyjecohua huan quipajpaca toyolo.

⁴ Amo cuajcualme huan istacatini quitacaquilíaj camanali cati fiero. Quichihuilíaj cuenta inincamanal masehualme cati quinequij quintzon-tamiltise sequinoc.

⁵ Cati quipinajtía cati teicneltzi quixpano TOTECO. Huan nochi cati quihuetzquilíaj se cati taijyohúa, TOTECO temachtí quintatzacuilitis.

⁶ Se huehue tacat yolpaqui por iixhuihua. Coneme yolpaquij por inintatahua.

⁷ Se huihuitacat amo quinamiqui camanaltis ica miyac talnamiquilisti. Huan se tanahuatijquet amo quinamiqui istacatis.

⁸ Se cati quitaxtahuía se tequichijquet ixtacatzí para ma quipalehui moilhuía para quiپیya suerte. Moilhuía para nochi quisas cualí para ya campa hueli yahui.

⁹ Cati amo tenextilía itajtacol ihuampo cati quiixpano quiپیya teicnelijcayot, pero cati talojtitzí tematiltía quihuejcatalía ihuampo.

¹⁰ Se cati talnamiqui más nimantzi moxítahua quema seyoc san se quentzi quitacahualtía, huan amo quej moxítahua se cati huihuitic masque quimaquillise cien hueltas icuitapa.

¹¹ Masehualme cati amo tatepanitaj quitemohuaj cati amo cuali para quichihuase, pero TOTECO quintitanilís itayolmelajca cati temajmati para quintatzacuultís chichahuac.

¹² Más cuali elisquía sinta timonamiquisquía ica se tena osa cati quiichtequillijtoque ipilconeuhua, huan amo ica se cati huihuitic cati quinextijtóc ihuihuiyo iniixpa miyac masehualme.

¹³ Cati quicuepilis ica cati amo cuali se cati quichihuilijtoc cati cuali, nochipa quiپیyas tatechihualisti ipan ichaj.

¹⁴ Se cati quipehualtía se cualanti eltoc quej se cati quitzintapohua se hueyat para ma pano ipan ichaj, elis ohui teipa para quitlquetzas. Huajca achi cuali xijchahua cualancayot huan amo xijpehualti para ximonajnanquili ica seyoc.

¹⁵ TOTECO quincualancaita cati quitapojpolhuíaj se cati melahuac quihuica tajtacolí, huan nojquiya quincualancaita cati quitatzacuultíaj se cati amo teno quichijtoc.

¹⁶ San tapic para titaxtahuas para ma momachtis más se cati huihuitic, cati ipan iyolo yon quentzi amo quiپیya o amo quinequi talnamiquilisti.

¹⁷ Se tocualhuampo temachtí techicnelía nochipa. Quema onca taohuij-cayot techpalehuía quej elisquía se toicni.

¹⁸ Amo quiپیya talnamiquilisti cati quijtohua quiixtahuas cati ihuampo tahuica. Huihuitic cati mocuiltía quixtahuas cati seyoc tahuica, o temacas ifirma para seyoc.

¹⁹ Cati quipactía tanajnanquilis quipactía tajtacolchihua. Cati mohueyimatí ica iseltí motemohuila taohuij-cayot.

²⁰ Se cati fiero iyolo amo quema quipantis cati cuali, huan se cati tacajcayatinemi ica cati quijtohua quipantis cati amo cuali.

²¹ Nelía se hueyi tequipacholi quipantis itata se telpocat cati tahuel huihuitic. Amo quema yolpaquis itata se cati amo tatepanita.

²² Yolpaquilisti tepalehuía quej elisquía se cuali pajti. Pero quema se masehuali moyolcuesohua quitamiltía ichichualis quej se cocolisti cati quihuatza iomiyó.

²³ Tequichihuani cati amo cuajcualme quiselíaj taxtahuili ixtacatzí, huan yeca tatajtolsencahuaj amo xitahuac.

²⁴ Masehualme cati talnamiquij senquisá quitachilíaj talnamiquilisti pampa quinequij quiپیyase más, pero cati huihuitique campa hueli tachix-tiyahuij pampa amo quimatij taya quinequij.

²⁵ Se telpocat cati amo quitepanita TOTECO quincuesolmaca itatahua. Quichihua ininemilís ma elí ohui.

²⁶ Amo quinamiqui para se quitaililís tatzacuultilí se cati amo taixpanotoc. Yon amo quinamiqui quihuitequise se cati nemi xitahuac.

²⁷ Se cati quimocuitahuía icamac para amo camanaltis miyac, yaya quipiya talnamiquilisti. Se masehuali cati quimachilía miyac tamanti amo nimantzi cualani.

²⁸ Masque huihuitic, se masehuali nesi para talnamiqui quema amo molinía. Quema se quitzacua icamac nesi quej tamachilía.

18

¹ Se cati itzcuimit moyocacahua ten sequinoc masehualme pampa san moilhuía cati yaya iselti quinequi. Monajnanquilía ica nochí cati cuali inintalnamiqulilis.

² Masehualme cati huihuitique amo teno quinequij quiyecose, san quinequij tepohuiliytinemise cati eltoc ipan iniyolo.

³ Se tacat cati fiero inemilis quimati tehuihuiita. Nimantzi pehua tepinahualtía huan tanajnanquilía pampa ayecmo teno quitepanita.

⁴ Icamanal se tacat cati talnamiqui eltoc quej hueyat cati tahuel huejcata ica se at cati temaca se cuali nemilisti. Quej meya miyac at ipan se ameli, icamanal tepalehuía huan temaca talnamiquilisti.

⁵ Tajtacoli sinta se juez quipalehuis se cati amo cuali quichihua. Nojquiya amo cuali sinta se juez quitatzacuultis se cati amo teno quichijtoc.

⁶ Cati huihuitique quiiytohuaj camanali cati talojtztizi quipehualtía tanajnanquilsti. Inincamanal quihualica miyac tatehuilisti.

⁷ Ica icamac se cati huihuitic monenpolos. Ica cati quiiytohua moijilpía ipan taohuijgayot.

⁸ Icamanal se cati ixtacatzí mitzilhuis se camanali cati ica quiejelnamiqui seyoc, eltoc quej se tamanti ajhuiyac ipan mocamac, pero cati quiejelnamiqui, calaqui hasta más ipan iyolijtic para quicocos.

⁹ Se masehuali cati tatzihui ipan itequi eltoc san se ica se cati san quinempolohua tamanti cati iaxca iteco.

¹⁰ TOTECO eltoc quej se huejcapantic tepancali campa masehualme hueli momanahuise. Cuajcualme yahuij campa TOTECO huan ayecmo aqui hueli quincocos.

¹¹ Cati tominpiyaj moilhuíaj para inintomi temachti huelis quinmanahuis ica miqulilisti. Ipan inintalnamiqulilis inintomi quinmaca temachili quej se hueyi altepet cati cuali tzactoc ica se tepamit cati tilahuac, pero mocajgayajtoque.

¹² Quema se masehuali mohueyimati, huetzis ipan pinahualisti, pero quema se moechcapantallía, quihualiquilía tatepanitacayot.

¹³ Nelía se huihuiyot huan se pinahualisti sinta titananquilis quema noja ayemo tijcactoc nochí cati quichihua campeca para mitzilhuise.

¹⁴ Se masehuali hueli quiiyyohuis se cocolista ipan itacayo, pero sinta se tahuel quiyolcocos, nelía ohui quiiyyohuis.

¹⁵ Se masehuali cati talnamiqui nochipa quinequi quimachilis tamanti yancuic. Nochipa tactoc para quicaquis más talnamiquilisti.

¹⁶ Se masehuali cati temaca nemacti quitapohua miyac caltepanit para ipan calaquis. Huan huelis ajsis hasta inixpa huejhuéyi masehualme.

¹⁷ Nesi xitahuac cati quiiytohua nopa achtohui masehuali cati monextía iixpa se juez para momanahuis, pero teipa hualas seyoc huan tenextilis para nelía taixpanotoc.

¹⁸ Nopa tequichihuani hueli quiquixtise suertes para quimatise quenicatza quisencahuase se cualanti cati ohui. Ica suertes tamis camanali.

19 Nelía ohui para sempa timohuampojchihuas ihuaya se moicni cati tiquixpanotoc, huelis más amo ohui para tijtanis se altepet cati yahualtic tzactoc ica tepamit. Cualanti quixelohua cati mohuampojchijtoque quej se caltemit ica candado quixelohua cati calijtic huan calteno.

20 Se cati quinpalehuía sequinoc huan temaca cuali tamachtili, quitemitía ten ya iyolo quej se tacualisti cati quixhuitía iijti. Quema se masehuali quijtohua cati quinamiqui, momaca miyac paquilisti.

21 Se huelis quipantis miquilisti o se cuali nemilisti por cati quijtohua. Huan se cati tahuel quinequi camanaltis quiselis cati quitantoc ica icamanal masque cuali o amo.

22 Se tacat cati mociuía se sihuat quipantía se tamanti cati cuali. Nopa sihuat eltoc se tatiochihualisti cati TOTECO quititanilía.

23 Se teicneltzi motajtanía tapalehuili ica cuali, pero nopa masehuali cati tominpiya quinanguilía chichahuac.

24 Se masehuali cati quinequi quinpiyas ihuampoyohua, monequi quin-palehuis sequinoc quej mochihuaj masehualme cati mohuampojchijtoque. Pero itztoque tohuampoyohua cati más techicnelíaj que toicnihua.

19

1 Más cuali se masehuali teicneltzi cati monejnemiltía xitahuac huan amo se huihui masehuali cati amo quitepanita TOTECO.

2 Mahuilili sinta se acajya nimantzi quinequi quichihuas se tamanti cati amo quimati. Huelis nima huetzis ipan tajtacoli.

3 Se masehuali ica ihuihuiyo quicuapolohua iojhui cati cuali, huan teipa quitajtacoltía TOTECO ica cati quipanotoc.

4 Se masehuali cati tominpiya quinpiya miyac ihuampoyohua, pero se cati teicneltzi hasta ihuampoyohua quitahuelcahuaj.

5 Se testigo cati san tacajcayahua quiselis itzacuultilis, huan cati istacatij iixpa se juez amo huelise momanahuse.

6 Miyac masehualme quitemohuaj se cati hueyi iyolo ica cati teicneltz-itzi para ma quinchihuilí se favor. Nochi quinequij mohuampojchihuase ihuaya.

7 Sinta hasta iicnihua se teicneltzi quitahuelcahuaj, huajca achi más ihuampoyohua amo quinequise quiitase. Cati teicneltzi quintemohua huan quinojnotza ihuampoyohua, pero injuanti amo quichihuilíaj cuenta.

8 Se cati mochijtoc talnamiqui moicnelía. Huan se masehuali cati quichihua campeca para mojmosta quimachilis más, quisas cuali ipan nochi cati quichihua.

9 Se testigo cati quijtohua cati amo melahuac iixpa se juez quiselis se tazacuultili. Huan cati istacati mocuapolos para nochipa.

10 Amo cuali nesi para se cati huihuitic mohueyichihuas huan quipiyas miyac ricojyot. Yon amo nesi cuali para se tequipanojquet quinahuatis tanahuatiani taya ma quichihuaca.

11 Se masehuali cati quimachilía amo yolquentzi. Masehualme quitepani-taj pampa amo quichihuilía cuenta quema sequinoc quiixpanoj.

12 Icalancayo se tanahuatijquet nelmahuilili quej tijcaqui nanalca se león nonechca. Pero quema se tanahuatijquet quipiya hueyi iyolo huan quinequi tepalehuis temaca paquilisti quej ajhuechti cati huetzi ipan sacapatat.

¹³ Se telpocat cati huihuític quimaca itata miyac tacuajcualoli. Huan se sihuat cati mojmosta quinajnanquílía ihuehue itztoc quej se tacuajcualoli cati amo huéli caxani.

¹⁴ Se tetaj huéli quiaxcatis icone se cali huan nochi tamanti cati ica moricojchihuas, pero san TOTECO huéli quimaca se tacat isihua cati cuali italnamiqúilis.

¹⁵ Nopa masehuali cati tatzihui tahuel cochi, pero teipa tahuel mayana pampa amo tequític.

¹⁶ Cati quintepanita itanahuatilhua TOTECO quimocuitahuía inemilis, pero cati quintahuelcahua itanahuatilhua miqúis.

¹⁷ Quema se quipalehuía se cati teicneltzi eltoc quej quitanejtía TOTECO. Huan yaya mitztaxtahuis por nochi cati cuali tijchjtoc.

¹⁸ Xiquinxitahua moconehua quema noja onca pajti huan quema ayemo quipiyaj miyac xihuit. Sinta amo tiquintalnamiqtía eltoc quej tijnequi ma miquica.

¹⁹ Se masehuali cati sencualantoc quiselis nopa tatzacuítli cati quinamiqui, huan sinta tijmanahuis para ma amo quiseli tatzacuítli, huajca noja más fiero quichihuas.

²⁰ Xijtacaquili nochi consejos huan xixseli inincamanal cati mitztacahualtíaj, huan tijpiyas miyac talnamiqúilisti cati huejcahuas nochi monemilis.

²¹ Se masehuali huéli moyolilhuía miyac tamanti para quichihuas, pero cati TOTECO quijtojtoc para oncas, ya nopa cati oncas.

²² Masehualme cati tetasojtaj quipiyaj yolpaquíilisti. Más cuali tielis se teicneltzi huan amo se istacatiquet.

²³ Cati quiimacasi huan quitepanita TOTECO quipantis nemilisti. Nojquiya quipiyas temachili huan momanahuis ten cati amo cuali.

²⁴ Itztoque sequij cati tahuel tatzihuij hasta amo quinequij momatananase para tacuase.

²⁵ Quema se juez quihuítequi se cati tehuihuíta, sequinoc cati nojquiya tehuihuítaj quichihuilise cuenta huan moxitahuase. Huan sinta quitacahualtis se cati talnamiqui, yaya noja más talnamiqúis.

²⁶ Telpocame cati quinmaquílíaj inintatahua o quinquixtíaj ininanhua, nelía mopinahualtíaj iniixpa nochi sequinoc huan quinpinahualtíaj inintahua.

²⁷ Notelpoca, sinta ayecmo tijtacaquíilis cati mitztalnamiqtía, huajca timohuejcatális ten nopa cuali talnamiqúilisti.

²⁸ Nopa testigo cati istacati iixpa se juez quinhuetzquílía cati quinequij tetajtolsencahuase xitahuac. Nochi cati quijtohuaj amo cuajcualme eltoc fiero.

²⁹ Tatzacuítlilisti quinchiya cati quinhuihuítaj sequinoc. Huan cati huihuitique quinhuitequise inincuitapa miyac huelta.

20

Tamachtili para amo taise

¹ Cati quii vino huan tailisti cati chichahuac mochihua se cati tehuihuíta huan tatehuía. Cati moihuintía ica tailisti nelía huihuític.

² Se tanahuatijquet cati tahuel cualani hasta moisinía eli quej nanalca se león. Huan cati quicualancama, quipolohua inemilis.

³ Masehualme quitepanitaj se cati moiycacahua ten tanajnanquíilisti, pero se cati huihuític talojtitziti quinequi quipehualtis cualanti.

⁴ Se masehuali cati tatzihui amo momiltía quema ipohual, huan amo teno quipiya quema ajsi tonali para pixquisti.

⁵ Masque tahuel huejcata ipan iyolo se masehuali eltoc nopa tamanti cati cuali cati yaya quinequi quichihuas, se cati talnamiqui quimati quenicatza quipalehuis para quipanextis.

⁶ Miyac masehualme mitzilhuise para huelis timotemachis ipan inijuanti para elise monelhuampoyohua ipan ten hueli talojtzi, pero nelía ohui tijpan-
tis se cati hueli ipan timotemachis.

⁷ Masehualme cati cuajcualme monejnemiltíaj xitahuac, huan TOTECO quintiochihuas ininconehua.

⁸ Quema se tanahuatijquet mosehuía ipan caltanahuatili para tetajtolsenc-
ahuas, quitachilía ica miyac cuidado sesen tamanti cati masehualme quuil-
huíaj para huelis quitamiltis cati amo cuali.

⁹ Amo aquí ica iselti huelis quiijtos: “Nimoyolpajpactoc huan ama amo nijpiya yon se notajtacol.”

¹⁰ TOTECO amo quinequi quiitas yon se tatamachihuali cati amo ajsitoc. Quicualancaita cati quitequihuía ome hilos para quitamachihuas tali o ome tamanti teme para amo temacas se kilo ajsitoc.

¹¹ Sinta cuali quichijtinemi se masehuali, masque yaya se conet, nochi quii-
taj para itztoc xitahuac. Nochi quii-
taj sinta monejnemiltía quej monequi huan sinta tapajpactic iyolo iixpa TOTECO.

¹² TOTECO techmacatoc tonacas para titacaquise huan toixteyol para titachiyase. Nochi ome quisencajtoc TOTECO.

¹³ Amo xisencocho para amo timochihuas titeicneltzi. Más cuali xiisa cualca huan xitequiti chichahuac para tijpiyas nochi cati tijnequi para tijcuas.

¹⁴ Se tacojquet quema tacohua quiijtohua: “Inin amo cuali” para ma quitemohuilise ipati, pero quema ya quicojtoc se tamanti, camanalti cuali pampa quipantijtoc cati nelcuali.

¹⁵ Onca oro huan piltetzitzi cati yejyetzitzi cati nelía patiyo ipan ni talti-
pacti, pero achi más ipati se masehuali cati talnamiqui huan cati camanalti ica camanalti cati senquisua cuali.

¹⁶ Sinta se masehuali mocuiltía para taxtahuas por seyoc masque amo quixmati o se huejca ejquet, xijpiya miyac cuidado ica ya. Achi cuali xijcuili itaque o cati ipati cati iaxca hasta mitztamitaxtahuas.

¹⁷ Cati istacati para quicuis o quichtequis se pantzi nelía quiajhuiyacmati, pero teipa ipan icamac mocuepa quej cuajnexi.

¹⁸ Amo xijchihua cati timoilhuijtoc tijchihuas hasta quema ya timotatz-
intoquilis ica sequinoc sinta cuali cati timoilhuía. Amo xicalaquí ipan se tatehuilisti hasta tiquintajtanilijtosa sequinoc para ma mitzconsejomacaca.

¹⁹ Se cati quipactía teejelnamiqui amo hueli quiajocui se camanalti cati tijpohuilis ixtacatzí, huajca más cuali amo ximohuampo-
jchihua ihuaya.

²⁰ Se masehuali cati quitelchihua itata o inana miquis ipan tzintayohuilot
campa más temajmati.

²¹ Se cati quitani miyac tamanti ipan se talojtzi quema sanoc telpoca
tacat, amo cana se tatiochihualisti pampa ayemo quimati quenicatza
quimocuitahuas.

²² Amo ximoilhui para timomacuepas ica cati mitzchihuilíaj ten fiero. Más cuali xijcahuili imaco TOTECO huan yaya quisencahuas cuali huan mitzmanahuas.

²³ TOTECO amo quinequi quiitas tatamachihuali cati amo ajsi. Amo cuali cati quitamachihua se tamanti huan tacajcayhua.

²⁴ San TOTECO quiijtohua taya tijpantise ipan toojhui, huajca ¿quenicatza hueli timasehualme tijmachilise cati techpano ipan tonemilis?

²⁵ Mahuilili sinta se acajya quitencahuas iixpa TOTECO para quimacas se tamanti, huan teipa motatzintoquilía sinta quena o amo quichihuas quema ya moijilpitoc para quichihuas.

²⁶ Se tanahuatijquet cati talnamiqi quinitzquis amo cuajcualme huan quintatzacuilitis chicahuac.

²⁷ TOTECO techmacatoc totonal cati quimati nochi cati timoilhuíaj ipan toyolo. Eltoc quej se taahuili cati quitemojtinemi nochi cati eltoc ipan tojuanti.

²⁸ Se tanahuatijquet cati quinicnelía imasehualhua huan quinchihuilía cati xitahuac, quiyiya tequiticayot ipan se itanahuatilis cati nelía temachti.

²⁹ Telpocame mohueyimatij pampa quiyiyaj tetili, huan cati huehuentziti paquij pampa ya quiaxitiyque miyac xihuit huan cuaichyoltoque.

³⁰ Se tatzacuiliti cati nelía chicahuac ipan itacayo se masehuali cati amo cuali inemilis eltoc quej se pajti huan quichihua para ma moyolpata. Eltoc quej nopa tatzacuiliti quipajpaca hasta ipan iyolo.

21

¹ Quej se milchijquet cati quiatequía imil quihuica nopa aoji campa quinequi ma yahui, quej nopa TOTECO quiyolpata se tanahuatijquet para quiyacanas campa ya quinequi.

² Sese masehuali quiita para xitahuac cati quichihua, pero TOTECO quitachilia sesen toyolo para quiitas para ten tijchihuaj cati tijchihuaj.

³ Más quipactía TOTECO quema tijchihuaj cati xitahuac huan cati cuali, huan amo nopa tacajchualisti cati tijmacaj.

⁴ Cati mohueyimati huan motepanita, huan nopa amo cuajcualme cati san moilhuíaj cati fiero hueli quichihuase, nochi tajtacolchihuaj.

⁵ Cati achtohui moilhuía ica miyac cuidado quenicatza quichihuas se tamanti quiitas para quisas cuali itequi huan mōricojchihuas. Pero nopa masehuali cati momajchua nimantzi huan quej hueli quichihua se tequit amo quicualtilis huan yaya mochihuas se teicneltzi.

⁶ Nopa tomi cati se istacatiyquet quitani ica iistacaticayo amo huejcahuas. Nochi cati quej nopa quitani inintomi quitemohuaj miqilisti.

⁷ Nopa fiero tamanti cati quichihuaj amo cuajcualme quintzontamiltis, pampa inijuanti amo quinequij quichihuase cati xitahuac.

⁸ Masehualme cati amo quitepanitaj TOTECO nemij ipan se oji cati huijcoltic, pero masehualme cati cuajcualme mojmosta quichijtinemij cati xitahuac.

⁹ Más cuali para tiitztos ipan se tapamit moselti, huan amo ipan se cali yejyectzi ica se sihuat cati sencualantoc.

¹⁰ Ipan iyolo se masehuali cati amo quitepanita TOTECO quinequi quichihuilis cati icalnechca ten fiero. Amo quema moilhuía para quitasojtas.

¹¹ Se cati huihuitic san motalnamictía quema quinita quintatzacuilitaj cati tehuihuítaj. Pero quema se quitacahualtía se cati talnamiqi, nimantzi achi más mochihua talnamiqi.

¹² TOTECO cati itzotc xitahuac quimati cati fiero quichihuaj amo cuajcualme ipan ininchajchaj huan quichihuas para nenpolihuise.

¹³ Se cati amo quichihuilía cuenta se cati teicneltzi quema quitajtanía se tapalehuili, amo quiipantis tapalehuili quema yaya tahuel quitemos.

¹⁴ Se masehuali huelis quiyoltalis cati tahuel cualantoc ica se nemacti ixtacatzí. Huan masque se quinextijtóc miyac icualancayo, se taxtahuilí ixtacatzí quitamiltis.

¹⁵ Masehualme cati cuajcualme paquij quema tequichihuani tetajtolsenc-ahuañ xitahuac. Pero quinchihuañ ma momajmatica miyac masehualme cati amo quitepanitaj TOTECO.

¹⁶ Se cati quitahuelcahua italnamiqulis huan yahui ipan se ojti cati amo cuali, quipantis miqulisti.

¹⁷ Cati san quinenpolohua itomi ica ten hueli tamanti cati quipactía teipa elis se teicneltzi. Huan cati san mocoñuía tailisti huan taajhuiyacoyot para ica quiajhuiyaltis itacayo amo quema elis se tominpixquet.

¹⁸ Quemantica se masehuali cati amo cuali o cati amo quitepanita TOTECO quiselía tatzacuiltli quej ipataca se cati cuali o cati itztóc xitahuac.

¹⁹ Más cuali para tiitztos moselti ipan se huactoc tali, huan amo ihuaya se sihuat cati sencualantoc huan tatechihua.

²⁰ Se masehuali cati talnamiqúi quiajocui itomi huan cati patiyo quipiya, pero se cati huihuític nimantzi quinenpolohua nochi cati quipiya.

²¹ Cati quichihua campeca para quichihuas cati nelxitahuac huan para tetasoñtas, quipiyas nemilisti, ricojyot huan tatepanitacayot.

²² Soldados cati talnamiqúini hueli quitanise se altepet masque quipiya imasehualhua cati tahuel tejtetique. Quena, masque inijuanti motemachiañ ipan itepa nopa altepet para quinmanahuis, talnamiqúini hueli quitamisolose.

²³ Se cati quipiya miyac cuidado ica cati quijtohua, momanahuis para amo mocalaquis ipan cuesoli.

²⁴ Masehualme cati pano motepanitaj, nojquiya tepinañtíañ huan tehuihui-ñtaj pampa mohueyimatiñ. Inintoca teechcapantaliani.

²⁵ Se masehuali cati tatzihui tahuel quixtoca miyac tamanti huan yeca huetzi tatzinta. Pero amo quinequi tequitis ica imax huan quipiyas se nemilisti cati cuali.

²⁶ Cati tatzihui nochipa itztóc itzcuimit huan quinequi sequinoc ma quimacaca tamanti. Pero masehualme cati itztoque xitahuaque quipiyaj hueyi iniyolo huan temajmacaj miyac tamanti.

²⁷ TOTECO amo quinequi quiitas nopa tacajhualisti cati amo cuajcualme quihualicaj. Pero achi más quincualancaita quema mochihuañ quej cuali iniyolo, pero san moijixpatañ.

²⁸ Se testigo cati istacati iixpa se juez quinamiqúi miquis. Pero se testigo cati quitacaquilia cuali ten quitatzintoquiliañ huejcahuas itztos pampa quijtohua cati xitahuac.

²⁹ Se masehuali cati amo quitepanita TOTECO san quijtohua para nochi eltoc cuali masque amo cana, pero se masehuali cati itztóc xitahuac quichihua se tamanti ma eli cuali pampa moneñnemiltía cuali.

³⁰ Yon se masehuali amo huelis quitanis TOTECO. Amo ipati sinta tahuel talnamiqúi, o quimachilia miyac tamanti o tahuel quicaqui consejos.

³¹ Ica miyac cuidado se masehuali hueli quicuáltalis nochi cati monequi para quihuicas ipan se tatehuilisti, pero yaya TOTECO cati quichihuas para tatanis.

22

¹ Más cuali para masehualme mitztepanitase pampa tijchihua cati cuali huan amo para tijpiyas miyac tomi. Más cuali mitzcualitase para tiitztóc xitahuac huan amo para tijpiyas oro huan plata hasta mocañua.

² Cati tominpixtoque huan cati teicneltzitzi san se itztoque iixpa TOTECO. Yaya TOTECO quinchijchijqui nochi ome.

³ Se masehuali cati talnamiqui nimantzi momaca cuenta sinta mahuilili campa yahui huan amo pano, pero se cati huihuitic amo quichihua cuenta huan quipantía cati amo cuali.

⁴ TOTECO quitaxtahuis cati moechcapantalia, huan quiimacasi huan quitepanita. Quichihuas ma moricojchihua, huan ma itzto miyac xihuit huan para nochi masehualme ma quitepanitaca.

⁵ Onca miyac taijyohuulisti huan tamanti cati mahuilili ipan iojhui se masehuali cati amo quitepanita TOTECO, pero se cati talnamiqui huan quinequi itztos miyac xihuit, mohuejcatalis ten nochi cati amo cuali.

⁶ Xijnextili mocone quema noja pisiltzi para ma yahui ipan nopa ojti cati TOTECO quisencajtoc para ya. Huan quema yaya huehuejtiyas noja nopona monejnemiltis.

⁷ Se tominpixquet quipiya tanahuatili ica cati teicneltzitzi. Huan masehualme cati quitahuiquilíaj tomi elise itequipanojcahua.

⁸ Se tanahuatijquet cati fiero inemilis quipantis tatzacuiliti por cati quichihua, huan tamis itequiticayo cati ica temajmatiyaya.

⁹ TOTECO quitiochihuas cati quintasojta cati teicneltzitzi, pampa quinmaca tacualisti para quicuase.

¹⁰ Quema se quinquixtia cati tehuihuiitaj, ayecmo oncas tatehuulisti, yon cualanti, huan ayecmo itztose cati tetajilhuiíaj.

¹¹ Se tanahuatijquet mohuampojchihua inihuaya cati cuali iniyolo. Quicualita cati camanalti ica cuali camanali pampa camanalti quej quinamiqui.

¹² TOTECO quinmocuitahuía masehualme cati quipiyaj talnamiquilisti, pero yaya quinsosolhuilía cati quisencajtoque masehualme cati amo quitepanitaj TOTECO huan mocualtalíaj para quichihuase cati fiero.

¹³ Se masehuali cati tatzihui motejtechtia ica miyac tamanti para amo yas tequititi. Quiijtohua: “Amo niyas nitequititi pampa huelis nijnamiquis se león cati nechmictis ipan ojti.”

¹⁴ Nelía mahuilili icamanal se momecatijca sihuat. Eltoc quej se ostot cati tahuel huejcata. Nopona huetzise tacame cati TOTECO quintelchijtoc.

¹⁵ Se oquichpil quichihua miyac tamanti huihuiyot por nopa huihuiyot cati eltoc ipan iyolo, pero cati quitalnamicitia ica se cuapipitzi quiquixtilis ihuihuiyo.

¹⁶ Cati moricojchihua pampa quintaijyohuulítia cati teicneltzitzi o pampa quinmaca nemacti cati ya tominpiyaj, mochihuas teicneltzi.

Nopa treinta talnamijca camanali cati nopa talnamiquini quiijtojque Pr. 22:17—24:22

¹⁷ Xijtaquili ni talnamijca camanali cati nimitzilhuía. Huan xijtali ipan moyolo nochi cati nimitzmachtía. ¹⁸ Pampa elis nelía yejectzi para ta sinta ticajocus ipan moyolo. Quena, xijtzontecomati para nimantzi tiquelnamiquis huan huelis tijtenquixtis. ¹⁹ Pampa na nijnequi ximotemachi ipan TOTECO, yeca ama nimitzilhuijtoc nochi ni tamanti para ta tijmatis.

²⁰ Ya nimitzijcuilhuijtoc miyac tamachtili para nimitzconsejomacas huan nimitzpalehuis xijmati miyac tamanti cati cuali. ²¹ Pampa nijnequi xijmati para temacht nopa camanali cati melahuac para huelis tiquinhuiquilis camanali cati xitahuac cati mitztitanque para tijpantis cati melahuac.

²² Amo xiquintachtequili cati teicneltzitzi pampa amo quipiyaj tomi para se inintatempalehuijca. Yon amo xiquinchihuili cati amo xitahuac iixpa se

juez. ²³ Pampa TOTECO quinmanahuis cati teicneltzitzí huan quichihuas para nochi quisas xitahuac para injuanti. Huan TOTECO tahuel quitatza-cuiltis cati quincocohuaj.

²⁴ Ximohuejcatili ten masehualme cati mosisiníaj. Amo xinemi ica se cati sencualantoc. ²⁵ Amo nijnequi para nojquiya tijchihuas quej injuanti quichihuj. Hueli timocuapolos ipan tajtacoli huan timiquis.

²⁶ Amo quema ximocuilti para titaxtahuas cati seyoc masehuali tahuica. Yon amo xitemaca cati moaxca para seyoc quipixtos hasta taxtahuas cati tahuica. ²⁷ Pampa quema tamis nochi cati tijpiya para titaxtahuas seyoc icuenta, nojquiya hualase huan mitzcuilise motapech.

²⁸ Amo xiquijcueni nopa nepamit cati huejcajquiya quitalijque mohuejca-pan tatahua.

²⁹ Se masehuali cati cuali quimati itequi huan quichihua ica nochi iyolo, yaya quintequipanos tanahuatiani. Amo quintequipanos san ten hueli masehualme.

23

¹ Quema titacua ihuaya se tanahuatijquet, xijtachili cuali taya eltoc moixpa. ² Huan masque nelía timayana, amo tahuel xiixhui. Amo xineltacua masque nochi elis cuali huan ajhuiyac. ³ Amo tahuel xijnequi sesen tamanti cati ajhuiyac cati mitzmaca, pampa huelis ica mitzcajcayahuas.

⁴ Amo tahuel xijchihua campeca para titominpiyas. Amo ximotonalpolo ipan ya nopa. ⁵ Pampa sinta san tomi tijtachilis, amo teno tijpiyas. Quena, nopa tomi quej eltapalyolis huan patanis eltoc quej se cuatojti.

⁶ Amo xitacua ihuaya se cati itzcuimit, pampa mocuesos pampa mitzta-maca. Amo xiquixtoca itacualis o itapalehuil se masehuali cati quej nopa.

⁷ Pampa yaya huelis mitzilhuis: "Xitacua huan xitai", pero ipan iyolo amo paqui mohuaya. San mocuesos ica quesqui ipati cati tijcuajqui. ⁸ Teipa tiquisotas nochi cati tijcuajqui. San tapic elis para tijtascamatilijtoc ica yejyetzí.

⁹ Amo ximotonalpolo para tiquilhuis se cati huihuitic se consejo, pampa san tapic. Yaya amo quiselis mocamanal masque nelía eli se cuali tamachtili para ya.

¹⁰ Amo xiquijcueni nopa nepamit campa ya eltoya ten huejcajquiya, yon amo xiquinichtequili inintal cati icnotzitzí. ¹¹ Pampa yaya TOTECO inintamanahujica huan quipiya nochi chicalualisti. Yaya mitztelhuis huan mitztajtanis cuenta por injuanti.

¹² Ica nochi moyolo xijchihuili cuenta cuali tamachtili. Xijtacaquili ca-manali cati mitzmacas miyac talnamiquilisti.

¹³ Amo xijcahua para tijtacahualtis huan tijxatahuas mocone. Masque tijmaquilis ica se cuapipitzti, amo miquis. ¹⁴ Sintá tijxatahuas cuali, masque monequi tijmaquilis ica cuapipitzti, tijmanahuis para amo yas micta.

¹⁵ Nocone, sinta ipan moyolo timochihuas titalnamiqui, na nojquiya nelía niyolpaquis. ¹⁶ Quena, ica nochi noyolo nipaquis quema nimitzcaquis ticamanalti cati melahuac huan cati xitahuac.

¹⁷ Amo quema xiquixtoca tijchihuas cati quichihuj tajtacolchihuani. Nochipa xiquimacasi huan xijtepanita TOTECO. ¹⁸ Huan tiquitas nochi quisa cuali para ta. Temachti tijselis nochi cati tijchiya.

¹⁹ Techacaquili, tinotelpoca, huan xieli titalnamiqui. Ximoxitahua ipan moyolo para xijtoquili iojhui TOTECO. ²⁰ Amo ximosejcotili inihuaya cati quij miyac xocomecat iayo, yon ica cati san quinpectía tacuajtose masque

ayecmo mayanaj. ²¹ Pampa ihuintini huan cati amo quicahuaj tacuaj quema ya ixhuitoque moteicnelchihuj. Huan cati tatzihuij san quipiyase iniyoyo cati tzayantoc para ica moyoyontise.

²² Xijtacaquili cati mitzilhuíaj motatahua cati mitziscaltijque. Amo xiquin-huejcamajcahua masque ya huehuentzitzí. ²³ Xijtequihui motomi para xijtemo cati melahuac, huan para tijpiyas talnamiquilisti, huan para tijcaquis tamachtili. Quej nopa tijpiyas se motalnamiquilis cati nelcuáli. Amo quema xijcahua. Xijpixto ni talnamiquilisti huan amo xijcahua para se acayja mitzquixtili. ²⁴ Itata se telpocat cati monejnemiltía xitahuac nelía yolpaqui. Nelía se paquilsti para tijmati quihuica ta moeso. ²⁵ Huajca xiquinpaquilismaca motatahua cati mitziscaltijque. Ma tahuel paqui monana cati mitztacatili.

²⁶ Notelpoca, ica nochi moyolo xijtoquili notamachtil cati mitzmaca talnamiquilisti. Huan xijtachili ica miyac cuidado para timonejnemiltis ipan se ojti xitahuac. ²⁷ Ximohuejcatili ten se ahuilnenca sihuat pampa itztoc quej se ostot cati mahuilili. Quena, se momecatijca sihuat eltoc quej se ostot cati tahuel huejcata huan tzocopiltic campa huetzij tacame huan ayecmo huelij momanahuíaj. ²⁸ Se sihuat quej nopa itztoc quej se tachtejquet cati motatía huan quichixtoc ajquiya huelis quicajcayahuas. Quitemohua seyoc tacat para ma quixpano isihua.

²⁹ ¿Ajquiya taijyohuía? ¿Ajquiya quipiya tacuajcualoli? ¿Ajquiya talojtztizi tatehuía huan quihuicaj iniixpa tequichihuani? ¿Ajquiya nochipa tetaijilhuía? ¿Ajquiya quipiya campa mococojtoc san topic? ¿Ajquiya quipiya iixteyol hasta yayahuic? ³⁰ Inijuanti cati quiiij miyac tailisti huan san quitemojtine-mij para quipantise se yancuic tailisti cati achi más cococ. ³¹ Amo xiqui se taili cati cococ. Amo xijnechcahui tailisti cati tiquita nesi para ajhuiyac o cati ya posoni pampa chichahuac. ³² Pampa teipa nopa tailisti mitzcocos quej se cohuat mahuilili cati tetanquechía. Elis quej nopa colot cati más temaca tacuajcualoli quema tecua. ³³ Quema tiihuintitoc, mitzchihualtis para tiquitas miyac tamanti cati amo melahuac. Mitzchihualtis para xicamanalti cati fiero huan quej se tacat cati quipolojtoc italnamiquilis. ³⁴ Huan mitzchihualtis para xinejnemi campa hueli quej tiitztosquía tatajco hueyi at, o quej timotatzquilijtos ipan imacuayo se hueyi cuahuit campa san timohuisohua pampa amo tijmati canque tiitztoc. ³⁵ Huan teipa tiquijtos: “Nechhuitejque huan nechcocojque, pero amo nimomacac cuenta, yon amo nijmachili sinta cococ. Huajca quema niisas se quentzi, sempa niyas huan nijtemoti más tailisti para niquis.”

24

¹ Amo xiquixtoca cati quichihuaj amo cuajcualme, yon amo xijnequi tiitztos inihuaya. ² Pampa inijuanti mojmota san moilhuíaj taya hueli quiichtequise. Quema camanaltij, san cati fiero quiiijtohuaj.

³ Pero talnamiquini ica inintalnamiquilis quichijchihuaj se cali, huan ica inintaixmatilis quimatij quitailise itzinpehualtil para elis nelía cuali.

⁴ Pampa inijuanti quimatij quichihuaj miyac tamanti, quicualchijchihuaj sese cuarto ipan ininchajchaj, huan quintemitía ica miyac tamanti yejyetz-tizi huan cati patiyó.

⁵ Se tacat cati talnamiqui quitanis se cati quipiya tetili. Achi más ipati talnamiquilisti huan amo fuerza. ⁶ Se cati talnamiqui huelis tatanis ipan tatehuilisti pampa quintajtania talnamiquini miyac consejo.

⁷ Pero se tacat cati huihuitic amo hueli quipantía talnamiqulisti, yon amo quimati taya quijitos quema quihuicaj ipan tequicali para quitajtolsencahuase.

⁸ Se cati san moyolilhuía quenicatza quichihuas cati amo cuali, sequinoc quijitaj para eli se masehuali cati fiero italnamiqulis. ⁹ Nochi cati moilhuaj para quichihuase cati huihuitique eltoc se tajtacoli. Huan sequinoc masehualme amo quinequij quinitase cati tehuihuítaj pampa mohueyimatij.

¹⁰ Sinta timotatzcanequis tonaya ipan motequi, noja más caxantiyas motetilis para tijtamiltis.

¹¹ Xiquinmanahui nopa masehualme cati quinhuicaj para quinmictise masque amo teno quichijtoque. Xiquinmaquixti cati quinhuilantiyahuij para quinmictise. ¹² Amo huelis timotechtis huan tiquijtos para amo tijmatiyaya yon teno. ¿Amo tijmati para TOTECO cati quixmati iniyolo nochi masehualme quixmati moyolo ta, huan yaya quimati para tijmatiyaya?

Huan yaya techtaxhais sese tojuanti quej quinamiqui ica cati tijchijtoque.

¹³ Notelpoca, xijcua sayolnecti pampa nelía cuali huan tijmatis para tzopelic. ¹⁴ Quej nopa nojquiya moalma quimatis para nopa talnamiqulisti eltoc nelcuali. Sinta tijpantis talnamiqulisti, nochi quisas cuali para ta. Huan nochi cati cuali timochiyaya para tijpantis, quena tijpantis.

¹⁵ ¡Anmasehualme cati amo anquitepanitaj TOTECO! Ayecmo ximochiyaca icalteno se masehuali cati xitahuac para anquichihuilise cati fiero. Amo xiquichtequilica cati quipiya ipan ichaj. ¹⁶ ¿Amo anquimatij para se cuali masehuali masque anquitajyohuiltise chicome hueltas, nochipa sempa motananas? Pero quema san setzi tajyohuilisti amechajsis anamo cuacualme, elis cuali para amechtzentamiltis.

¹⁷ Amo xiyolpaqui quema mocualancaitaca huetzi ipan taohuicayot. Amo xijhuetzquili quema yaya quipiya tequipacholi, ¹⁸ pampa TOTECO amo quipactis cati tijchihuas. Huelis cualanis ica ta huan ayecmo quitatzacuiltis ya.

¹⁹ Amo ximotequipacho pampa amo tiitztoc quej amo cuajcualme, yon amo xiquixtoca inintomi. ²⁰ Pampa amo teno cati cuali quipantise teipa. Ininemilis amo cuajcualme sehuis san quej se taahuili.

²¹ Notelpoca, xiquimacasi huan xijtepanita TOTECO huan nopa tanahuatijquet. Amo ximomanelo inihuaya masehualme cati amo tatepanitaj.

²² Sinta tiquintoquilía, timomacas cuenta para timotzontamiltijtoc inihuaya, pampa ¿ajquiya quimati hasta canque TOTECO huan nopa tanahuatijquet quintajyohuiltis?

Sequinoc talnamijca camanali ten talnamiquini Pr. 24:23-34

²³ Nica eltoc talnamijca camanali cati quijitajque masehualme cati talnamiqij. Amo cuali para se tetajtolsencajquet techicoicnelis quema tetajtolsencahua. ²⁴ Sinta quilhuis cati taixpanotoc: “Amo tijpiya tajtacoli”, nochi masehualme quicalancaitase huan quitelchihuase. ²⁵ Pero se juez cati tetajtolsencahuas xitahuac huan quintatzacuiltis cati nelía taixpanotoque, quiselis tatiochihualisti.

²⁶ Se masehuali quinextilía miyac tatepanitacayot nopa masehuali cati quinanquilía xitahuac quema quitatzintoquilía se tamanti.

²⁷ Achtohui xijnti nopa tomi cati monequi para ica timopanoltis, teipa ximocualtalili momil huan hasta teipa xijpehualti xijchijchihua mochaj.

²⁸ Amo ximochihua se testigo para tiquijtos cati amo melahuac ten mocalnechca cati xitahuac nemi. Amo xitacajcayahua huan xiistacati ten seyoc.

²⁹ Amo quema xiquijto: “Quej yaya nechchihuili, na nojquiya nijchihuilis. Nijcuepilis nochi cati fiero nechchihuilijtoc.”

³⁰ Na nipanoc imila se masehuali cati tatzihui. Quena, nipanoc ipan ixocomeca mil se cati huihuitic. ³¹ Huan niquitac para tahuel cuatita eltoya ica huitzi huan xihuit. Huan ya huetztoya nopa tepamit cati ica quitzactoya yahualtic. ³² Huajca quema niquitac nochi ya nopa, nijztontecontali huan nimoyolihui quej ni. ³³ Sinta se moilhuía: “Noja se quentzi más nicochis huan nimosiyajquetzas. San se talojtzi más nimomanajnahuas huan amo titequitis.” ³⁴ Cati ya nopa quijtohua ica se talojtzi mochihuas se teicneltz. Nimantzi itaijyohuilis hualas ipani quej se tachtejquet huala ipan se talojtzi quema amo quichiya.

25

Nopa ompa amatajcuiloli ica italnamijsa camanal Salomón Pr. 25:1—29:27

¹ Ya ni nojquiya eltoc italnamijsa camanal Tanahuatijquet Salomón. Tacame cati quitequipanohuayayaj Ezequías, tanahuatijquet ipan tali Judá, quijcuiloque ni camanali quema ya mictoya Salomón.

² TOTECO quinextía ihueyitilis ica nochi tamanti cati ixtacatz huan amo tihuelij tijmachilíaj. Pero nopa tanahuatiani quinextíaj inihueyitilis para momachtíaj huan quitemohuaj quimachilise nochi cati huelij.

³ Amo aqui hueli quimachilía quesqui ihuejcapanca ilhuicacti, yon quesqui ihuejcatanca huelis se taxahuas ipan taltipacti. Nojquiya amo aqui hueli quimatis nochi cati moilhuía se tanahuatijquet ipan italnamiqulis.

⁴ Quema se quipanoltía plata teposti ipan tit, quisa nochi isoquiyio huan mocahua senquisa tapajpactic. Huajca quena, nopa teposchijquet hueli ica quichijchihuas se tamanti cati tahuel patiyio. ⁵ Huan quej nopa nojquiya xiquinquixtica nochi nopa amo cuajcualme ipan icaltanahuatil se tanahuatijquet, huan itanahuatilis elis temachti huan nochi itequichijcahua tetajtolsencahuase xitahuac.

⁶ Amo xiquilhui se tanahuatijquet ma mitznextili tatepanitacayot, yon amo ximocalaquí campa huejhueyi tacame quej tielisquía san se inihuaya.

⁷ Más cuali para timochiyas huan huelis teipa yaya mitznotzas para ximosehuiti campa achi cuali. Pampa sinta ticalaquis nechca nopa tanahuatijquet, yaya mitzilhuis xiya tatzinta, huan quej nopa mitzpinahualtis miyacapa.

Masque ipa tiquitztoc cati quichihua, ⁸ amo nimantzi xiya ipan teguicali para tijtelhuis mocualancaitaca, pampa amo tijmati canque mitzhuicas huan huelis teipa mitzpinahualtis pampa amo tijmatis taya tiqijtois.

⁹ Achtohui xijchihua campeca timoxitahuas ica cati quichijtoc para san ta huan ya anquimatise. Amo aqui seyoc xijpohuili ten panotoc. ¹⁰ Pampa seyoc cati mitzcaquis huelis mitztatelhuis quej se titeejelnamijquet, huan quej nopa nochi moilhuisse ten ta para nochipa.

¹¹ Quema se mitzilhuis se camanali cati quinamiqui cati mitzpalehuis ipan nopa talojtzi, nelía miyac ipati. Eltoc quej se manzana ten oro cati eltoc ipan se chiquihuit cati quichijchijtoque ica plata.

¹² Se cati tacaquí quiselía icamanal se talnamijquet cati quitacahualtía quema monequí. Quena, quita iconsejo quej elisquía se anillo o se costi ten senquisa oro.

¹³ Se tayolmelajquet cati temachti huan quijtohua nochi cati melahuac eli quej ya ajsitoc tonali para taseseyas quema huejcajtoc para tahuel tatofoniya. Quena, quimacas iteco cati quititantoc tasehuilisti ipan iyolo

pampa quimati para temachti itatitanil tepohuilis senquisa nopa camanali cati quinequi.

¹⁴ Cati quitencahua temacas se tamanti huan amo temaca, eli quej nopa mixti huan ajacat cati amo quihualica at.

¹⁵ Xijpiya moyolo huan xicamanalti ica yamanic huan se tanahuatijquet mitzcaquilis mocamanal, huan tijyoltalis se cati tahuel cualantoc.

¹⁶ Sinta tijpantis sayolnecti, amo xijcua miyac masque tahuel ajhuiyac, pampa sinta pano miyac tijcuas, teipa tiquisotas.

¹⁷ Se cati mocalnechca, amo xijpaxalo neltalojtizti, pampa huelis tijcuesihuiltis huan teipa amo quinequis mitzitas.

¹⁸ Se cati quiiatacahuía seyoc masehuali nelía quitaiyohuiltía. Quicocohua quej se martillo, o se cuchillo o se macheta cati tahuel tatequi.

¹⁹ Quema se acajya ipan taohuijca yot motemachía ipan se masehuali cati tacajcayahua, eli quej tacuasquía ica itancoch cati cualotoc o quej nejnemisquía ica se iicxi cocojtoc.

²⁰ Sinta timonextis tiyolpactoc iixpa se cati tahuel moyoltequipachohua, elis quej tiquichtequilisquía iyoyo quema taseseya, o quej tijtalilisquía vina-gre o istat campa icocohua.

²¹ Sinta se mocualancaitaca mayana, xijtamaca. Sinta amiqui, xicamaca. ²² Huan ya nopa quichihualtis ma moixpinahua, huan TOTECO mitztax-tahuis ica cuali.

²³ Temachti se ajacat cati huala ica norte quihualica at, huan nojquiya temachti se cati camanalti fiero quiyoliltía cualanti.

²⁴ Más cuali para tiitztos moselti ipan se pilcaltzi cati sosoltic, huan amo ipan se hueyi cali cati yejyectzi ihuaya se sihuat cati sencualantoc.

²⁵ Se cuali camanali cati ajsi ten moteixmatca cati huejca itztoc ipan seyoc tali, eli cuali quej nopa at sesec cati quii se masehuali cati tahuel amiqui.

²⁶ Sinta se cuali masehuali motemaca para quichihuas cati fiero inihuaya amo cuajcualme, eltoc quej se cati quisoquihuía o quitetetzohua se ameli.

²⁷ Amo cuali para se quicuas miyac sayolnecti. Nojquiya amo cuali para se masehuali moilhuis ten nopa tatepanifacayot cati huelis quinamiqui para quiselis.

²⁸ Se masehuali cati amo hueli motzacuilía para amo cualanis huan quichi-huas cati amo quinamiqui, nelía mahuilili quej se altepet cati amo quipiya tepamit yahualtic para quimanahuis.

26

¹ Amo quinamiqui para tasesecayot huetzis ipan nopa tonali quema tahuel tatotoniya, yon para huetzis at quema onca pixquisti. Nojquiya amo quinamiqui para se cati huihuitic quiselis tatepanifacayot.

² Quej nopa totot soquipali cati mocuapolojtoc huan quej nopa totome golondrinas cati san patantinemij, nojquiya se tatechihualisti amo quiajsis se acajya sinta amo quipiya itajtacol.

³ Se masehuali huelis quinejnemiltis se cahuayo ica se cuetaxti imaco. Huelis quinejnemiltis se burro sinta quiquechilpis, huan huelis quinej-nemiltis se cati huihuitic sinta quipiya se cuapipitzi imaco para icuitapa.

⁴ Quema timonajnanquilía ihuaya se cati huihuitic, amo xijnanquili nopa huihuiyot cati quiijtohua quej elisquía camanali cati quinamiqui pampa ta tinesis tihuihuitic nojquiya.

⁵ Pero quema timonajnanquilía ihuaya se cati huihuitic, xijcuepili para tijpanextis para nelía huihuitic nopa masehuali, para yaya amo mohueyimatis huan moilhuis para yaya más talnamiqui.

⁶ Cati motemachía ipan se masehuali cati huihuitic para ma quihuica se camanali para quiyolmelahuas seyoc, amo quipiya talnamiquilisti. Yaya eli quej se cati moicxitzontequi o quiitzquia se tamanti pajyo cati temictía.

⁷ Se cati metzhuapactic, iicxihua san huiyontoque huan yon quentzi amo quipalehuía para nejnemis. Nojquiya ni talnamijca tamachtili yon quentzi amo quipalehuía se cati huihuitic.

⁸ Sinta tijtepanitas se cati huihuitic, huajca tijchihua se huihuiyot quej se huihui tacat cati quuilpía se tet ipan tatehuitatzti para amo cana yas.

⁹ Se ihuintiquet amo quimachilía sinta cococ quema mochajcohua ica se huitzti, huan se cati huihuitic amo hueli quimachilía ni talnamijca consejos.

¹⁰ Sinta se teteco quiselis se tequipanojquet cati huihuitic o se cati moquetza ipan tianquis, nopa teteco amo quimati taya ipantis. Eltoc quej se soldado cati campa hueli tamota huan amo quimati ajquiya quicocos.

¹¹ Quej se chichi mocuepa huan quicua sempa cati quisiotatoc, nojquiya se cati huihuitic sempa quichihua nopa huihuiyot cati sanoc quicajtoc.

¹² Pero más amo ohui para tijmachtis se cati huihuitic ma eli talnamiqui, huan amo se cati mohueyimati.

¹³ Para amo yas tequititi se tacat cati tatzihui quijtohua: “Huelis itztos se tecuani ipan ojtí o ipan tianquis, huajca mahuilili para niquisas.”

¹⁴ Huan quej nopa caltemit cati momalacachohua ipan nopa teposti campa motatzquilijtoc, quej nopa se tacat cati tatzihui talojtitziti mocuepa huan moteca ipan itapech.

¹⁵ Sequij masehualme itztoque nel tatzihuij hasta quiohuijmatij para tacuase.

¹⁶ Cati tatzihuij motepanitaj huan moitaj para nelía talnamiquij. Moilhúaj para inintalnamiquilis quipano cati quipiyaj chicome talnamijca masehualme cati tahuel quimatij teconsejomacaj.

¹⁷ Se cati mocalaquía ipan se cualanti campa amo icuenta mocalaquía ipan se tamanti cati mahuilili. Huan eltoc san se ica se cati quitanana se chichi ipan inacas.

¹⁸ Quej se cati locojti quimajcahua ticuahuit lementoc huan cuataminti campa hueli huan amo quichihuilía cuenta sinta temictis, ¹⁹ quej nopa nojquiya se cati quicajcayahua ihuampo huan teipa quijtohua para san ahuilcamanaltiyaya.

²⁰ Se tit sehuis quema amo quipiya cuahuit, huan nojquiya tamis cualanti campa amo aqui se cati teejelnamiqui.

²¹ Cati quipiya ticoli cati xahuantoc o cati quipiya tit nimantzi hueli quiticuiltis cuahuit, huan se masehuali cati quipactía tanajnanquilía nimantzi quipehualtía cualanti.

²² Icamanal se cati itacatzti mitzilhuis se camanali para quiejelnamiquis seyoc, eltoc quej se tamanti ajhuiyac ipan mocamac, pero para cati quitajilhuía, calaqui hasta más iyolijtic para quicocos.

²³ Se soqui chachapali cati quialtijtoque ica plata tecajcayahua quej se masehuali cati pano fiero iyolo pero quitatía ica camanali cati caquisti para cuali.

²⁴ Se masehuali cati ipan iyolo tecualancaita quemantica quitatía icualancayo ica miyac camanali cati yejectzi, pero amo xijneltoquili pampa san quichihua para mitzcajcayahuas. ²⁵ Masque mitzcamanalhuis quej se cuali

masehuali, amo xijneltoquili, pampa italnamiqulis tahuel temitoc ica nochi cati fiero. ²⁶ Huan masque ipan nopa talojtzi amo mitznexilis cualanti para mitzcaycayahuas, teipa mopanextis icualancayo miyacapa huan nochi quuitase.

²⁷ Sinta tijchihua se ostot quej se taquetzti para nozona ma huetzi mohuampo, nozona timotaquechilía. Huan sinta tijcuamimilos se hueyi tet para ma quitzonpechiti seyoc, mocuepati nopa tet huan mitztzonpechiqui ta.

²⁸ Se cati quinistacahuía sequinoc quinextía para quincualancaita huan quincocohua. Huan se cati camanalti cuajcualtzi camanali para quiejyec-talis seyoc huan quicajcayahuas, tahuel tasesolohua.

27

¹ Amo ximohueyimati ica cati timoilhuía para tijchihuas mosta, pampa amo tijmati taya panos ipan nopa seyoc tonali.

² Amo xicamanalti para timohueyimatis ica moselti, achi cuali xiquinc-ahuili para sequinoc ma mitzhueyichihuaca.

³ Se tet nelía etic huan nojquiya etic xali, pero achi más etic quema se cati huihuitic tahuel mitzcualancaita.

⁴ Achi más mahuilili se cati quiixtoaca cati sequinoc quiqipaj huan amo cati mosisinía huan tecualancaita.

⁵ Más cuali se cati mitztacahualtis chichahuac quema monequi, huan amo se cati mitzilhuis ixtacatzí para mitzicnelía pero amo quema mitznexilía.

⁶ Achi más temachti tohuampo cati techcocohua quema monequi techaj-juhuas, huan amo se tocualancaitaca cati techzoponia san para techcay-cayahuas.

⁷ Se cati ixhuitoc hasta sayolnecti amo quinequi quuitas, pero se cati mayancamictinemi quicua nochi cati quiajsi masque chichic.

⁸ Se totot cati patantehua huejca ten itepasol, eltoc quej se masehuali cati quicajtehua campa tacatqui para huejca yas.

⁹ Se aceite o se taajhuiyacayot cati ticajhuiyacmatij techyolpactía. Huan se cuali consejo cati se tohuampo techilhuía techmaca paquilisti hasta campa hueli topáni.

¹⁰ Amo quema xiquintahuelcahua mohuampoyohua, yon motata ihuam-poyohua. Huan quema tijpiyas se cuesoli, amo xijtemoti moicni cati itztoc huejca, pampa más cuali se mohuampo cati itztoc nechca huan amo se moicni cati itztoc huejca.

¹¹ Xieli titalnamiqi, tinotelpoca, huan techmacas miyac paquilisti. Sinta tielis se talnamijquet, huelis niquinanquilis cati nechtaijilhuijaj.

¹² Se cati talnamiqi nimantzi momaca cuenta quema imelac huala cati mahuilili huan momanahuía. Pero cati huihuitique amo momacaj cuenta huan quinajsi cati quincocohua.

¹³ Xijcuili se tamanti cati iaxca nopa masehuali cati mocuiltía para mitz-taxtahuis cati seyoc mitztahuiquilía cati yaya amo cuali quiixmati. Huan no-jquiya xicajocuili miyac tamanti cati iaxca cati mocuiltía para mitztaxtahuis cati mitztahuiquilía se momecatijca sihuat.

¹⁴ Sinta neljalnoc tijcuatzajtzilis mohuampo para tijtajpalos, yaya quuitas para tijtelchihua.

¹⁵ Se sihuat cati talojtzitzi mosisinía huan sencualantoc, eli san se ica nopa at cati talojtzitzi chichipica huan mitzcuatotonía miyac quema tami huetzi at. ¹⁶ Cati mochihua quej quitilquetza icualancayo, eltoc quej quichihua

campeca para quitzacuilis nopa ajacat o quicuis aceite ipan imax para quihuicas.

¹⁷ Monequi se tamanti teposti para quitentis seyoc teposti. Huan se masehuali cati talnamiqui quipalehuía ihuampo más motalnamictis.

¹⁸ Cati quimocuitahuía itatochua, quicuas itajca. Nojquiya se tequipanojquet cati quimocuitahuía cati iaxca iteco quiselis tatepanitacayot.

¹⁹ Se masehuali hueli moita ipan at huan quita quenicatza nesi ixayac. Nojquiya cati se masehuali quichihua ica nochi iyolo quinextilía sequinoc sinta yaya itztoc cuali o amo cuali.

²⁰ Nochipa miqulisti quinequi quinpantis más masehualme para quincuilis ininemilis, huan micta amo quema temi ica mijcatzitzí. Huan se masehuali cati quita tamanti cati yancuic amo quema yolpaqui ica cati ya quipixtoc, noja quinequi más.

²¹ Monequi tit para quieyjecose oro huan plata para quitase sinta nelía cuali. Però quieyjecohuaj se masehuali quema sequinoc quihueyimatij. Quej yaya quiselía inincamanal cati quijtojqtoque quinextía sinta cuali iyolo o amo.

²² Se cati huihuitic amo quicahuas ihuihuiyo, masque tijtalisquía ipan se hueyi chilcaxit huan tahuel tijtejtzonas para tiqiniyocacahuas.

²³ Mojmosta cuali xiquintachili quenicatza itztoque moborregojhua huan mohuacaxhua cati ica timoaxilijtoc. ²⁴ Pampa masque tahuel titapijpiya, cati tijpiya amo huejcahuas para nochipa sinta amo tijmocuitahuis. Masque se mochijtoc tanahuatijquet amo mocahuas nopa tequiticayot para iconehua huan iixhuihua sinta amo quimocuitahuía cati pano ipan nopa caltanahuatili ica miyac cuidado. ²⁵ Quema tijtzontequis nopa sacat cati chicajtoc, huan chamanis nopa xihuit cati xoxohuic. huan teipa huelis tijpixcas nopa sequinoc xihuime ipan cuatita. ²⁶ Moborregojhua mitzmacase inijhuiyo para tijtequihuis para timochijchihuilis moyoyo para quema taseseya. Huelis tiqinnamacas mochivojhua huan ica timocohuis se mili. ²⁷ Ica inilechi mosihua chivojhua huelis timopanoltis inihuaya moteixmatcahua huan motequipanojcahua.

28

¹ Se masehuali cati amo quitepanita TOTECO cholohua masque amo aqui quiquixtia, pero se cati monejnemiltía xitahuac mosemaca quej se León.

² Quema tahuel tajtacolchihuaj imasehualhua se tali, momiyaquilíaj inintanahuatijcahua huan inintal huelis huetzis tatzinta. Però quema tanahuatía se masehuali cati itztoc xitahuac huan talnamiqui, onca temachili ipan se tali.

³ Quema se tacat cati teicneltzi quintachtequilía cati más teicneltzitzí que ya, eltoc quej pano chichahuac huetzi at huan quitaminenpolohua nochi mili huan amo quicahua sinti para oncas taxcali.

⁴ Masehualme cati amo quitepanitaj tanahuatili quinyolchicahuaj cati amo cuajcualme, pero cati quichihuaj cati quijtohua tanahuatili quincualancatij nopa amo cuajcualme.

⁵ Amo cuajcualme amo quimachilíaj quenicatza huelis mochihuas cati xitahuac ipan se tali, pero cati quitemohuaj TOTECO huan quichihuaj cati ipaquilis quimachilíaj nochi tamanti.

⁶ Más cuali tielis se teicneltzi cati monejnemiltía xitahuac, huan amo se tominpixquet cati fiero iojhui.

7 Se talnamijca tellocat quintepanita itanahuatlhua TOTECO, pero se tellocat cati nemi inihuaya cati amo tequitij huan nochi se tonal san tacua quipinahuatlía itata.

8 Se cati quintanejtía itomi pilteicneltziti huan quininama itanca para más huelis moricojchihuas, quipolos iricojyo. Itomi ajsis imaco seyoc cati hueyi iyolo ica cati teicneltziti.

9 Sinta se masehuali amo quitepanita itanahuatlhua TOTECO, TOTECO amo quitacaquilis quema motatajtía.

10 Se masehuali cati quihuica seyoc cati itztoe xitahuac ipan se ojti cati amo cuali, huetzis ipan nopa ostot cati quisencahuayaya para seyoc. Pero cati quinyolchicahua cuajcualme para más ma quichihuaca cati xitahuac, quiselis itaxtahuil.

11 Se tominpixquet motepanita huan moilhuía para talnamiqui, pero se teicneltzi cati talnamiqui nimantzi quimati para amo cana.

12 Quema cuajcualme tatani, nochi masehualme yolpaquij. Pero quema tatani masehualme cati fiero inintalnamiquilis, nochi momajmatíaj huan motatíaj.

13 Cati quitatía itajtacolhua amo quisas cuali, pero cati quipohuílía TOTECO nochi itajtacolhua huan quicahua, TOTECO quitapojpolhuís.

14 TOTECO quitiocihuas nopa masehuali cati yamanic iyolo huan quitepanita TOTECO, pero se masehuali cati yoltetic huan amo quichihuílía cuenta TOTECO huetzis ipan cati amo cuali.

15 Sinta se tanahuatijquet cati amo quitepanita TOTECO quipiya tequiticayot ica masehualme cati teicneltziti, nelía mahuilili. Yaya quintzajtzilts quej se león cati mayana o se oso cati mosisiní huan nanalca pampa ayemo tacuajtoc.

16 Se tanahuatijquet cati huihuitic quintajyohuítía imasehualhua, pero se cati quintepanita imasehualhua huan amo quixtoca quitanis tomi cati amo quimamiqui, huejcahuas inemilis para tanahuatis.

17 Se temictijquet cati quimachilía para amo cuali ten quichijqui quema temicti nochipa cholojtinemis ten nopa tajtocoli cati quihuica hasta nopa tonali quema miquis. Ma amo aquí quichihua campeca para quitzacuilis itacuajcualol.

18 Cati monejnemiltía xitahuac amo teno ipantis, pero cati quichihua cati amo xitahuac nimantzi huetzis.

19 Cati tequiti chicahuac ipan imila quipiyas itacualis hasta mocahuas, pero cati san motonalpolohuaj ica tamanti cati amo teno ipati, elise teicneltziti.

20 Se masehuali cati itztoe temacht quiselis miyac tatiochihualisti, pero cati quinequi moricojchihuas ica se talojtzi mohualiquilis taohuijcaoyot.

21 Amo cuali para se acajya quichicoicnelis se masehuali huan seyoc, amo. Monequi ma quinchihuili nochi masehualme quej quijtohua tanahuatili. Pero sequij tajtacolchihuaj huan techicoicnelíaj por se taxtahuili cati san ipati quej se pantzi.

22 Se masehuali cati nochi tamanti quixtoca quinequisquía moricojchihuas san ica se talojtzi. Pero amo quimati quej nopa más mochihuas teicneltzi.

23 Se cati quitacahuatlía ihuampo quema monequi elis más inelhuampo teipa, que seyoc cati san quieyjectalía ica icamanal pampa amo quinequi quihuis cati xitahuac.

²⁴ Cati quitachtequilía itata o inana huan quuijtohua para ya nopa amo tajtacoli, eli san se ica se temictijquet.

²⁵ Cati quixtoca moaxcatis cati seyoc iaxca nimantzi quiyoliltía cualanti, pero cati motemachía ipan TOTECO quipiyas nochi cati cuali.

²⁶ Cati motemachía ipan yaya iselti nelía huihuitic, pero cati motemachía ipan nopa talnamiquilisti cati TOTECO temaca, momanahuis ten taohuij-cayot.

²⁷ Cati quinpalehuía cati teicneltzitzí amo quema quipolos cati ica panos, pero cati moixtzacua huan moyoltetilia para amo quinpalehuis cati teicneltzi quipantis miyac tatechihualisti.

²⁸ Quema amo cuajcualme quitzquíaj tequiticayot para tanahuatise, masehualme motatíaj ica majmaji. Pero quema nopa amo cuali tequichihuan mopantíaj ica miqulisti, momiyaquilíaj masehualme cati itztoque xitahuaque.

29

¹ Cati moyoltetilia huan amo quichihuilía cuenta quema sequinoc quitacahualtíaj, talochmiquis huan ayecmo oncas pajti para momanahuis.

² Quema tanahuatíaj nopa masehualme cati xitahuaque, nochi masehualme yolpaquij, pero quema tanahuatíaj nopa masehualme cati fiero inintalnamiquilis, nopa altepet ehuani taijyohuíaj.

³ Se tellocat cati mojmosta quinequi elis más talnamiqui quipaquilismacas itata, pero cati nemi campa momecatijca sihuame quipinahualtía itata huan quipolos nochi cati quiselijtoc.

⁴ Se tanahuatijquet cati tetajtolsencahua xitahuac quichihua para nochi ipan ital ma eli temachti. Pero se tequitiquet cati quiselis tomi ixtacatzi para quichihuas cati amo xitahuac quitatzintahuetziltía ital.

⁵ Se cati quihueyimati seyoc ica miyac camanali cati yejyetzti para quicajyahuas, eltoc quej quitalilía se taquetzti iojtípa para ma ipan huetzi.

⁶ Se tacat cati amo cuali moijilpía ipan itajtacolhua, pero cati nemi xitahuac, amo. Yaya huicatinemi huan nelía paqui.

⁷ Cuajcualme tamocuitahuíaj para cati teicneltzitzí ma quipiyaca nochi caquihuilí cati nopa tanahuatili quuijtohua para quipiyaj, pero se masehuali cati amo quitepanita TOTECO amo quema mocuesohua por cati teicneltzitzí.

⁸ Cati tehuihuiitaj hueli quichihuj cualanti ica nochi masehualme ipan se altepet, pero masehualme cati talnamiquij quichihuj campeca para quisehuíaj cualanti.

⁹ Quema se cati talnamiqui quihuica se cati huihuitic iixpa se juez, nopa huihui tacat san quihuihuiitas huan quihuetzquilis. Amo teno quisencahuas para moyoltalise.

¹⁰ Tacame cati temictíaj quincualancaitaj cati monejnemiltíaj xitahuac, pero cuajcualme quitemohuaj cati elis cuali para nochi, masque amo cuajcualme.

¹¹ Se cati huihuitic cuatzajtzí huan quinextía nochi icualancayo, pero se cati talnamiqui moijyohuíá huan moyoltalía.

¹² Sinta se tanahuatijquet quinchihuilía cuenta masehualme cati istacatij, nochi itequipanojcahua mocuepase amo cuajcualme.

¹³ Se teicneltzi cati quitaijyohuiltíaj huan se cati tetaijyohuiltía nochi ome quipiyaj se tamanti cati san se. Itztoque yaya TOTECO cati quinmacatoc nochi ome nemilisti huan tachiyalisti.

¹⁴ Nopa tanahuatijquet cati quintajtolsencahua xitahuac cati teicneltziti quichihuas para itequiticayo ma huejcahuas para miyac xihuit.

¹⁵ Se conet cati quitacahualtíaj huan quihuitequij ica cuapipitzti quema quinamiqui, teipa elis talnamiqui. Pero se conet cati san quicahuilíaj ma quichihua cati quinequi, quinpinahualtis itatahua.

¹⁶ Quema quipiyaj tequiticayot miyac taixpanoca masehualme, momiyaquilía tajtacoli, pero masehualme cati monejnemiltíaj xitahuac mocahuase para quinitase quema tamis initequiticayo.

¹⁷ Xijxitahua mocone huan huelis timosiyajquetzas huan amo timoyolte-quipachos por ya. Quena, yaya quichihuas para nelía tiyolpaquis.

¹⁸ Ipan se tali campa amo aqui quixmati TOTECO, yon amo aqui tematiltía icamanal, nopa masehualme quichihuj miyac tamanti cati fiero. Pero ipan se tali campa masehualme quixmatij huan quitepanitaj itanahuatilhua TOTECO, onca hueyi paquilisti.

¹⁹ Se tequipanojquet cati amo quitacaquilía san camanali, monequi tijtal-namictis huan tijtatzacuiltis se quentzi. Masque quimachilía icamanal iteco, quemantica amo quichihuilía cuenta cati quinahuatía.

²⁰ ¿Tiquitzoc se masehualí cati camanali miyac huan amo quichihuilía cuenta cati quijtohua? Más cuali quisas se tacat cati huihuitic huan amo ya.

²¹ Sinta tahuel tiquicnelis se motequipanojca hasta quema noja se conetzi, teipa elis quej motelpoca cati quiselis cati tijcajtehuas.

²² Se cati yolquentzi quipehualtia cualanti huan quichihua miyac tamanti tajtacoli.

²³ Se masehualí cati mohueyimati quipantis se acajya cati quiehcapan-talis, pero cati moehcapanohuj quipantise tatepanitacayot.

²⁴ Se masehualí cati quipalehuía se tachtejquet para tachtequis amo quipatiita inemilis. Quicaquí quema nopa juez quihuilía para ma tatestigoj-quetza para quijtos cati xitahuac huan amo quimati sinta quisas más cuali para quijtos cati xitahuac o noja quitatis cati quichijqui.

²⁵ Cati más quinimacasi masehualme huan amo TOTECO mocalaquíaj ipan se taquetzti, pero cati motemachíaj ipan TOTECO itztose ica temachili.

²⁶ Miyac masehualme quitajtaniáj nopa tanahuatijquet ma quinchihuili se favor para ma quinpalehui quema monequi quintajtolsencahuas, pero más cuali quitemose TOTECO pampa yaya nochipa tajtajtolsencahua xitahuac.

²⁷ Masehualme cati monejnemiltíaj xitahuac amo quinequij quinitase amo cuajcualme. Huan amo cuajcualme nojquiya quincualancaitaj masehualme cati nemij ipan se ojti cati xitahuac.

30

Ya ni nopa talnamijca camanali ten Agur Pr. 30:1-33

¹ Ya ni nopa talnamijca camanali cati quijto Agur icone Jaqué cati ejqui Masá. Agur quijcuilo ya ni para Itiel huan Ucal: ² Tahuel más nihuihuitic que sequinoc masehualme. Amo nijmachilía tamanti cati onca quej sequinoc tamachilíaj. ³ Na amo nijpantijtoc talnamiquilisti cati eltoc ipan ni taltipacti, ¿quenicatza huelis ni quixmatis TOTECO cati tatzejzeloltic?

⁴ San yaya TOTECO tejtocot hasta ilhuicac huan sempa hualtemoc. San ya quitzacuilia ajacat ica imax huan quihuilía hueyi at ipan ipayo. San yaya quichijchijqui taltipacti huan nochi cati onca. ¿Tijmati taya itoca huan taya itoca icone?

⁵ Nochi cati TOTECO quiijtojtoc para quichihuas, mochihuas pampa temachti nochi icamanal. Yaya quinmanahuía nochi cati motemachíaj ipan ya. ⁶ Amo xijpihuili cati yaya quiijtojtoc. Yaya huelis mitztacahualtis chicahuac huan tenextilis para tiistacatiquet. ⁷ NoTeco, nimitztajtaniía ome tamanti quema noja niitztoc. Se favor technanquili huan techchihuili cati niqiijtohua. ⁸ Achtohui techpalehui para amo nimohueyimatis, yon amo niistacatis. Nojquiya amo techricojtíli, yon amo techpobrejchihuá. San techmaca ten ica nipanotos mojmosta. ⁹ Pampa sinta nimoricojchihuas, huelis teipa nimohueyimatis huan nimoilhuis para amo monequi nimotemachis ipan ta TOTECO. Huan sinta nimochihuas tahuel niteicneltzi, huelis nitachtequis huan nimitzixpanos.

¹⁰ Amo quema xijtaijlhui se tequipanojquet iixpa iteco, pampa huelis mitztelchihuas huan mitztaijyohuiltis.

¹¹ Itztoque sequij masehualme cati quintelchihuaj inintatahua. Amo quema quintascamatíaj. ¹² Inijuanti moitaj para tahuel cuajcualme huan para quichihuaj nochi cati tapajpactic, pero nelía itztoque soquiyoyque iixpa TOTECO huan miyac inintajtacolhua. ¹³ Nopa masehualme tahuel mohueyimati huan motepanitaj hasta quinitaj sequinoc quej amo teno ininpati. ¹⁴ Masehualme quej nopa quihuicaj machetas quej imiyaca totancochhua para ica quintzontamiltise teicneltzitzí. Quena, nochi cati teicneltzitzí huan cati amo teno quipiyaj quinequij quinmictise.

¹⁵ Onca miyac tamanti quej nopa talcuitaxcoli cati quinequi tapijpiyas más mojmosta. Quena, nimitznexilis nahui tamanti cati amo quema tami ixhuij, huan amo quema quiijtohuaj: “Ya cuali”. ¹⁶ Micta nochipa quinselía más mijcatzitzí. Se sihuat cati amo hueli conepiya, nochipa quinequi se conet. Huactoc tali nochipa quinequi más at, huan tit nochipa quitemohua más tamanti para quitatis.

¹⁷ Cati quincualancaita o quinhuetzquilía itatahua, nopa tzojopilome huan cuatojme quiquixtilise iixteyolhua huan quincuase.

¹⁸ Huan onca nahui tamanti cati na amo hueli nijmachilía, huan cati san nijtachilía:

¹⁹ se cuatojti cati patani ipan ajacat, se cohuat cati mohuahuatatzti ipan huejhueyi tet, nopa barco cati yahui aixco ipan hueyi at cati huejcata, huan quenicatza se tacat mojmosta más quicnelía nopa ichpocat cati quiix-toca.

²⁰ Nojquiya amo hueli nijmachilía quenicatza se sihuat hueli quinamaca itacayo, huan teipa tacua huan motenpojpohua, huan quiijtohua: “Amo teno cati amo cuali nijchijtoc.”

²¹ Huan itztoque nahui tamanti cati quichihuaj ma momajmatica masehualme, huan cati injuanti quichihuaj amo hueli quiijyohuíaj:

²² se tequipanojquet cati mochihua se tanahuatijquet, se masehuali huihuitic cati quipiya nochi cati quinequi hasta mocahua cati iaxca huan nelmohueyimati,

²³ se sihuat cati nochi quicualancaitaj huan teipa monamictía, huan se sihua tequipanojquet cati quicuillía ihuehue nopa sihuat cati quitequipanohuayaya.

²⁴ Itztoque nahui piltapiyaltzitzí ipan taltipacti cati pisiltzitzí, pero tahuel talnamiquij hasta quinpanoj talnamiquini ica inintalnamijcayo.

²⁵ Talnamiquij tzitzime pampa masque amo quipiyaj miyac chicahualisti, quisentilíaj inintacualis quema tatotoniya.

26 Talnamiquij cuatochime cati itztoque campa tet, pampa masque amo quiپیay tetili, quichihuj inintepasol campa tetzala.

27 Talnamiquij pilchapoltziti pampa masque amo quiپیay inintayanca, nejnemij nochi ica se pamit campa yahuij.

28 Talnamiquij nopa tocame pampa masque amo ohui para tiquitzquis ica momax, itztoque campa hueli hasta ipan itequical se tanahuatijquet.

29 Itztoque nahui tamanti cati nelía mosemacaj huan monemiltíaj quej se hueyi tanahuatijquet:

30 se león cati más tetic que sequinoc tapiyalme, yaya amo cholohua pampa amo teno quimajmatía;

31 se cuapele cati tomahuac imetz, se oquich chivo,

huan se hueyi tanahuatijquet quema quinyacana isoldados.

32 Sinta ica mohuihuiyo timohueyimajtoc huan timoyolilhujitoc para tichihuas cati amo cuali, xipinhua ica cati timoilhujitoc huan xijtali momax ipan mocamac, amo xijchihua yon se tamanti cati amo cuali.

33 Sinta tijmanelos chicahuac nopa lechi, temachtí tichihuas mantequilla. Huan sinta tijtepachos chicahuac se masehuali iyacatzol, temachtí quisas esti. Huan sinta tijcualancamacas seyoc, temachtí anmotehuse.

31

Talnamijca camanali para Lemuel Pr. 31:1-9

1 Ya ni nopa talnamijca camanali cati inana Tanahuatijquet Lemuel ipan Masá quimachtí huan cati yaya quiijuilo.

2 Ta, tintelpoca, cati tiquisquí ipan notacayo. Ta cati nijmactili TOTECO, xijtaqaquí noconsejo. 3 Amo xiquinmaca sihuame mochicahualis. Amo xinemi ipan nopa ojti campa miyac tanahuatiani mocuapolojtoque.

4 Lemuel, amo cuali para tanahuatiani huan tayacanani quiiise xocomecat iayo, o sequinoc tamanti taili cati cococ. 5 Pampa sinta taíse, quielcahuase cati quiiitohua tanahuatili, huan quema quintajtolsencahuase cati teicneltzítzi huan cati taijyohuíaj miyac, huelis quichihuase cati amo xitahuac huan quinixpanose. 6 Xijcahua nopa taili para ma quíica cati taijyohuíaj huan ya miqisnequij, huan para sequinoc cati taijyohuíaj ipan iniyolo ica miyac cuesoli. 7 Inijuanti hueli quíise huan quielcahuase para nelía teicneltzítzi, huan ayecmo quielnamiquise inintaijyohuilis.

8 Pero ta xiquintenpalehui cati amo hueli camanaltij cuali para manahuse. Xijmocuitahui para tequichihuani quintajtolsencahuase xitahuac nopa masehualme cati teicneltzítzi. 9 Quena, xiquintenpalehui cati teicneltzítzi huan cati taijyohuíaj. Xiquintajtolsencahua xitahuac quej quínamiqui.

Se sihuat cati nelía cuali Pr. 31:10-31

10 Tahuel ohui para tijpantis se sihuat cati cuali iyolo huan neltalnamiqui. Se sihuat quej nopa achi más ipati huan amo quej nopa piltetzítzi cati más pajpatiyo. 11 Ihuehue hueli motemachía ipan ya ica nochi iyolo. Huan nopa sihuat quichihuas para ihuehue ma quiپیya se nemilisti cati nelcuali.

12 Mojmosta quichihuilis ihuehue cati cuali huan quipalehuis.

13 Quitemos yoyomít ten lino huan ten borregoime iniijhuiyo, huan tequitis chicahuac para quíjtzomas cati moquentis ifamilia. 14 Yaya itztoquej se barco ipan hueyi at. Amo majmahui para yas huejca para quitemos nopa tacualisti cati más cuali para cati itztoque ipan ichaj. 15 Se sihuat

cati cuali, mijquehua quema ayemo tanesi para quisencahuas tacualisti para ifamilia, huan para quinilhuis itequipanojcahua taya tequit ma quichihua. ¹⁶ Nopa sihuat quitachiliti se tali huan quicohuas. Nopona quitocas se xocomeca mili ica cati quitantoc.

¹⁷ Nopa sihuat quiapiya imetz huan imax cati tetic, huan quinelpectia tequitis. ¹⁸ Quimocuitahuia nopa tomi cati imaco eltoc para quitequihuis cuali huan ica talnamiquilisti. Yaya tequiti hasta tahuel tayohua. ¹⁹ Quimalina borrego ichcat huan quichihua hilera.

²⁰ Nochipa quinpalehuia cati teicneltzitzitzi ica cati quichijtoc ica imax huan quintemohua cati taijyohuiaj para quinpalehuis.

²¹ Amo motequipachohua masque tasehuetzi pampa quinchihuilijtoc nochi ifamilia iniyoyo cati tilahuac huan totonic. ²² Yaya quichijchihua taquemit cati yejyetzitzi para itapech. Moyoyontia ica iyoyo ten moradojtci huan lino cati más patiyoy cati yaya mochijchihuilijtoc.

²³ Nochi masehualme quixmatij ihuehue pampa quitajijtoque se tequitiquet ipan tequicali ica ne sequinoc tayacanani. Campa hueli nochi quitepanitaj.

²⁴ Nopa cuali sihuat quichijchihua yoyomit huan tzinquechilpicayot cati más cuali, huan quinemaquilitia tanamacani.

²⁵ Nochi quimatij para nopa sihuat quiapiya miyac chichahualisti huan nochi quitepanitaj. Yaya amo momajmatia para elis nanatzi. ²⁶ Se cuali sihuat camanalti ica miyac talnamiquilisti, huan tamachtia ica miyac taicnelijcayot.

²⁷ Ica miyac cuidado quitachilia sesen piltamantzitzi cati quimonequilía ifamilia. Amo quema tatzihui.

²⁸ Iconehua huan ihuehue quitascamatilaj. Inijuanti camanaltij cuali ten ya huan quiilhuiaj: ²⁹ “Miyac sihuame ipan ni taltipacti quichihuaaj cati cuali huan quiapiyaj miyac yajatili, pero ta tiquinpano nochi sequinoc.”

³⁰ Quena, iyejyejca se sihuat amo huejcahuas huan icualnesca huели mitz-cajcayahuas, pero se sihuat cati quitepanita TOTECO, nochi masehualme quihueyichihuase ipan nochi inemilis. ³¹ Ma quiseli tatepanitacayot nopa cuali sihuat por nochi cati cuali cati quichihua. Huan ma quitascamatilica nochi cati quihuicaj tequiticayot ipan ialtepe por itequi cati nelcuali.

Ecclasiastés

Nochi san tapic

¹ Ya ni cati quijcuilo Tamachtijquet Salomón, icone David, cati elqui tanahuatijquet ipan altepet Jerusalén. ² Na niquitztoc para nochi tamanti san tapic huan amo teno nelía huejcahua huan ipati para nochipa. Quej nopa niqijtohua na cati nitacamanalhuijquet.

³ ¿Taya quitani se tacat ica nochi itequi cati ohui cati quichihua ipan ni taltipacti? ⁴ Nochi masehualme cati ama itztoque miquise huan sequinoc tacatise. Teipa inijuanti nojquiya miquise. Pero ni taltipacti, quena, ya nopa nochipa mocahua. ⁵ Quisa tonati ica ijnaloc huan oncalaqui ica tiotac. Teipa nimantzi sempa pehua motalohua hasta ajsi campa quistehua para sempa quisas. ⁶ Nopa ajacat tailpitza ica tatzinta huan mocuepa huan tailpitza ica huejcapa huan sempa quichihua seyoc huelta nica huan neca. Amo cana ajsiti para nopona mocahuas. ⁷ Nochi hueyame motalojtiyahuij hasta nopa hueyi at, pero nopa hueyi at amo quema temi. Huan nopa at ipan hueyi at sempa tejco para huetzis huan ajsis ipan nopa hueyame campa hualajqui huan sempa motalohuaj para ajsitij ipan hueyi at. ⁸ Nojquiya san se ica masehualme. Nochi tamanti san techchihua tahuel ma tisiyahuica huan ma timocuesihuiltica. Toixteyolhua amo quema siyahuij ica cati quinequij quiiatase. Huan tonacashua amo quema ixhuij ica cati quicaquij. Nochipa tachixtoque huan tacactoque para más tachiyase huan tacaquise.

⁹ Nochi tamanti cati panoque achtohuiya, sempa panose teipa. Nochi cati ama pano, ya panotoc achtohuiya. Amo onca yon se tamanti cati yancuic ipan ni taltipacti. ¹⁰ ¿Taya tamanti hueli tiqijitose para yancuic? ¡Yon se! Nochi tamanti cati amantzi pano, nojquiya san se panotoc achtohuiya. ¹¹ Amo aqui quinelnamiqui nopa tacame cati huejcajquiya itztotaj huan taya panoc ipan ininemilis. Huan nojquiya nochi masehualme cati teipa tacajiyase huan cati quichihuase nojquiya amo quielnamiquise nopa masehualme cati tacatise teipa quema inijuanti ya mictose.

Inemilis Salomón

¹² Na cati nicamanalti nieltoya nitanahuatijquet ipan tali Israel huan niitztotya ipan altepet Jerusalén. ¹³ Huan nimotemacac para ica miyac talnamiquilisti nimomachtis huan nijmachilis nochi tamanti cati masehualme quichihuaj ipan ni taltipacti. Huan niquitac para nopa tequit cati Toteco quinmacatoc masehualme para ipan ma timotequiuhua, nelohui. ¹⁴ Quena, cuali nijtachili nochi tamanti tequit cati quichihuaj masehualme ipan ni taltipacti huan niquitac para nochi eliyaya san tapic. San quihualica siyahuilisti huan tequipacholi pampa san tapic quej san tapic sinta se quinequi quiiqtzquis nopa ajacat cati tailpitztoc.

¹⁵ Se tamanti cati huijcoltic amo hueli tijchihuas xitahuac. Huan se tamanti cati amo onca, amo huelis tijpohuas.

¹⁶⁻¹⁷ Huajca nimoyolilhui: “Xiquita, nica niitztoc cati más nijpiya notalnamiqulilis que nochi sequinoc nopa tanahuatiani cati tanahuatijque achtohuiya ipan altepet Jerusalén. Más nimochijtoc hueyi huan nochi nimomachtijtoc huan más nijmati que nochi sequinoc tacame. Nojquiya nijchijqui miyac tequit para nijmachilis huihuiyot huan cati san tapic. Huan masque nijchijtoc nochi ya ni, ¿taya ipati cati nijchijtoc?” Huan niquitac nochi cati nijchijtoya para san techsiyahuiltijtoya huan amo teno

cati cuali quisqui ten nochi notequi. Elqui quej nimotalohuayaya para niq-uitzquisquía nopa ajacat cati tailpitzayaya. ¹⁸ Pampa quema se masehuali más mochihua talnamiqui, más mohueyilía itequipachol. Huan quema se más quimati, más mohueyilía itacuaicualol.

2

San tapic nochi tamanti paquilisti

¹ Ipan noyolo nimoilhui: “Nijyejeco paquilisti sinta ya nopa cati ipati. Huajca nimoilhui nimopaquilismacas hasta niixhuis. Huelis ya nopa cati ipati ipan ni nemilisti.” Pero niquitac paquilisti nojquiya elqui san tapic.

² Nelía se huihuiyot para tihuetzcas nochi tonali pampa paquilisti amo teno mitzpalehuis. ³ Teipa nimoyolilhui miyac huan nimoilhui para nijyejecos para nimopaquilismacas ica tallisti huan noja nijtemos talnamiquilisti. Huan quema ya nopa nijchihuayaya niquitac para nojquiya eliyaya se huihuiyot. Nimoilhuyaya huelis ica xocomecat at cati cococ nijpantisquía nopa tasehuilisti cati nochi masehualme quitemohuaj ipan ininemilis, pero amo.

⁴ Teipa nimoilhui para nijtemos paquilisti ica huejhueyi tequit cati nijchihuasquía. Huan nimochijchihuili huejhueyi calme huan nojquiya niquin-tojqui xocomeca milme. ⁵ Huan niquintojqui cuamilme huan xochimilme, huan nozona niquintojqui nochi tamanti cuame cati temacaj inintajca.

⁶ Huan nojquiya niqinchiqijqui huejhueyi piletas para quicuis miyac at para nicatequis nopa miyaqui cuame cati niquintojqui. ⁷ Teipa niquincojqui taca tequipanohuani huan sihua tequipanohuani huan nojquiya miyac notequipanojcahua ipan nochaj quintacatiltijque coneme para elise noaxcahua. Nojquiya niqinpixqui tahuel miyac huacaxme huan borregojme hasta quipanoc inimiyaca cati quinpixtoyaj nochi sequinoc tanahuatiani cati tanahuatijque achtohui ten na ipan altepet Jerusalén. ⁸ Huan nijsentili miyac plata tomi huan oro tomi cati ica techtaxtahuyayaj impuesto miyac tanahuatiani huan tequichihuani ten campa hueli talme. Nojquiya niqin-pixqui miyac huicani huan tatzotzonani cati tacame huan sihuame. Huan nijpixqui nochi tamanti tepos tatzotzonali.

⁹ Huajca nelía nimohueyichijqui ipan nochi tamanti hasta niitztoya más nihueyi que nochi nopa tanahuatiani cati achtohuiya tanahuatijque ipan altepet Jerusalén. Pero ipan nochi tamanti cati nijchijqui noja ninemiyaya ica miyac talnamiquilisti. ¹⁰ Nimoaxcatiyaya nochi tamanti cati niqix-toxayaya. Huan ten hueli tamanti cati elqui quentzi se paquilisti huan nijnequiyaya nijchihuas, huajca nijchijqui. ¹¹ Huan nijpanti paquilisti ipan notequi masque nelía elqui ohui. Nopa paquilisti cati nijseli ten notequi elqui notaxtahuil por nochi nopa miyac tequit cati nijchijqui. ¹² Teipa nijtachili nochi nopa huejhueyi tamanti tequit cati nijchijtoya huan niquitac para nochi eliyaya san tapic huan san techsiyahuiltijtoya. Amo teno cati nijchijtoya ipan ni taltipacti nelía ipati huan huejcahuasquía.

¹² Huajca pejqui nijtajtachilía nopa talnamiquilisti huan nopa huihuiyot para nijmatis catijqui más ipati. Huan cati hueli tanahuatijquet cati hualas teipa amo teno huelis quichihuas cati yancuic, que cati ya eltoc. ¹³ Quena, quijtos para nopa talnamiquilisti achi más ipati huan amo huihuiyot. San se quej nopa taahuili achi más cuali que nopa tzintayohuilot.

¹⁴ Pampa se masehuali cati talnamiqui tachiya campa nejnemi. Pero nopa huihui tacat, yaya nejnemi quej elisquía campa tzintayohua. Pero nojquiya niquitac para onca se tamanti cati quinajsi nochi ome. ¹⁵ Quena, se huihui

tacat miquis huan na nojquiya nimiquis. Huajca ¿para ten nitequititoc nelchicahuac hasta ama para noja más nimochihuas nitalnamiqui? Huajca nimomacac cuenta para nopa talnamiquilisti nojquiya amo nelía ipati. ¹⁶ Pampa se cati talnamiqui miquis huan se cati huihuitic nojquiya miquis. Huan teipa ica miyac tonali ayecmo aqui quinelnamiquis.

¹⁷ Yeca nelía niquijixqui ni nemilisti, pampa nochi tamanti tequit cati nijchijtoya ipan ni taltipacti san techsiyahuiltijtoya huan techtequipacholmacac. San tapic notequi quej san tapic sinta se quinequisquía quiitzquis nopa ajacat cati tailpitztoc. ¹⁸ Nojquiya niquijixqui nochi notequi cati nijchijtoya ipan ni taltipacti pampa teipa hualas seyoc huan yaya moaxcatis nochi cati nijpixtoc. ¹⁹ Huan ¿ajquiya huelis quimatis sinta elis talnamiqui o huihuitic? Pero masque mochihuas talnamiqui o huihuitic, yaya quiselis nochi cati nijtantoc ica nochi notequi cati nijchijtoc ica miyac talnamiquilisti ipan ni taltipacti. Huajca niquitac san tapic nochi notequi.

²⁰ Huajca pejqui nimocuesohua ica nochi nopa huejhueyi tequit cati nijchijtoya. Pampa nelía tahuel nimosiyahuiltijtoya ica nochi nopa tamanti cati nijchijtoya ica miyac notalnamiquilis. ²¹ Pero masque ipan nochi none-milis nijtemojtoc para nijchihuas notequi ica talnamiquilisti, taixmatilisti huan yajatili, teipa monequi nijcajtehuas imaco se cati amo mosiyahuiltijtoc yon quentzi ipan nopa tequit. Huajca ya nopa se tamanti cati amo cuali huan nelía se hueyi huihuiyot.

²² Sintá quej nopa, huajca ¿taya quitani se tacat ten nochi itequi ipan ni taltipacti cati moisihuiltia quichihua huan ica cati mosiyahuiltia miyac? ²³ Pampa mojmosta ipan itequi quipano tacuajcualoli huan tequipacholi huan hasta tayohua nojquiya amo cochi pampa moilhuía ten itequi. Pero nochi ya nopa san tapic eltoc.

²⁴ Huajca niquitac para amo onca teno más cuali huan ipati para se tacat, san ma quicua ten quinequi huan ma quii cati quipactia huan ma quichihua nopa tequit cati más quipaquilismaca pampa nopa paquilisti huala ten Toteco. ²⁵ Huan sinta Toteco amo techmaca itapalehuil, ¿ajquiya huelisquía tacuas huan quiipiyas paquilisti? ²⁶ Sintá se masehuali quichihua cati quipactia Toteco, Toteco quimacas talnamiquilisti, taixmatilisti huan paquilisti. Pero ica se tajtacolchijquet Toteco quitequimacas para tequitis miyac huan moricojchihuas para quimactilis nopa ricojyot se cati quichihua cati quipactia Toteco. Nochi ya nopa nojquiya san tapic huan san quihualica tequipacholi. San tapic eltoc quej san tapic sintá se quinequisquía quiitzquis nopa ajacat cati tailpitztoc.

3

Nochi tamanti quiyiya quema ipohual para mochihuas

¹ Toteco quitallijtoc se cuali tonali para sesen tamanti.

Nochi tamanti cati monequi tijchihuase quiyiya tonali quema mochihua.

² Onca se tonali para titacatis huan onca se tonali para timiquis.

Onca tonali para titatojtocas huan onca tonali para tijhuihuaitas cati tijtoctoc.

³ Onca tonali para titamocis huan onca tonali para titapajtis.

Onca tonali para titasolos huan onca tonali para titacualchijchihuas.

⁴ Onca tonali para tichocas huan onca tonali para tihuetzcas.

Onca tonali para timocuesos huan onca tonali para timijtotis.

⁵ Onca tonali para tiquinsemanas teme huan onca tonali para tiquinsementilis.

Onca tonali para tijcuanajnahuas se masehuali huan onca tonali para amo tijchihuas.

⁶ Onca tonali para tijtemos huan tijpantis tamanti huan onca tonali para tijpolos.

Onca tonali para titaajocuis huan onca tonali para tijtepehuas cati ticajoctoc.

⁷ Onca tonali para tijtzayanas se tijniqui huan onca tonali para tiquijtzomas cati tzayantoc.

Onca tonali para timocamatzacuas huan onca tonali para ticamanaltis.

⁸ Onca tonali para titeicnelis huan onca tonali para titecualancaitas.

Onca tonali para tatehuilisti huan onca tonali para tasehuilisti.

⁹ Huajca ¿taya quitani se tacat ten nochi itequi cati ohui cati ica mosiyahuiltía? ¹⁰ Na nimoilhujtoc miyac ten nochi nopa miyac tamanti tequit cati Toteco quinmacatoc masehualme para ipan ma motequihuica. Huan ya ni cati niquita. ¹¹ Toteco quichijtoc para sesen tamanti ma eli cuali huan ma mochihua ipan nopa tonali cati quinamiqui. Nojquiya quitalijtoc ipan iyolo sesen masehuali para ma quimati para amo quema miquis. Nojquiya quimati para nopa tamanti cati nelía ipati ipan ni taltipacti huejcahuas para nochipa. Pero yon se masehuali amo yajati quimachilía nochi italnamiqulis huan itequi Toteco cati yaya quichijtihualajtoc ten ipejya huan nochi cati quichijtiyas hasta itamiya. ¹² Huajca amo onca seyoc tamanti cati achi cuali para masehualme. San monequi paquise huan quichihuase cati cuali quema noja yoltoque. ¹³ Cuali para quipantise paquilisti ica cati quicuase huan cati quise, huan ica nopa tequit cati quichihuase. Pampa ni paquilisti eltoc quej se nemacti cati Toteco techmacatoc.

¹⁴ Nijmati para nochi cati quichihua Toteco, huejcahuas para nochipa. Ipan nochi cati quichijtoc amo teno hueli más tijhueyilise, yon amo teno hueli tijquixtilise. Toteco quichihua ya nopa para ma quihueyitepanitaca huan ma quiimacasica nochi masehualme. ¹⁵ Nochi cati onca ama, ya oncac huejcajquiya. Huan nochi cati oncas teipa, nojquiya ya oncatoc. Toteco quichihua para sempa ma onca cati huejcajquiya oncac huan ixpolijqui.

Tamanti cati amo xitahuac ipan ni nemilisti

¹⁶ Nojquiya huelqui niquitac ipan nochi taltipacti para onca ten fiero huan onca tajtacolot campa quinamiqui oncas cati xitahuac. Quena, jueces cati in-tequi para tetajtolsencahuase xitahuac mocuapolojtoque huan quichihuaj cati fiero. ¹⁷ Huan nimoyolilhui: “Ipan nopa tonali cati Toteco quitalijtoc, yaya quintajtolsencahuas nochi masehualme masque cuajcualme huan amo cuajcualme.”

¹⁸ Huan huajca niquitac para Toteco quincahuilía masehualme ma quito-quilica nopa fiero ojti cati inequij para quinyeyecos. Quej nopa ini-juanti quítase para ihuical inipantis quej tapiyalme pampa nochi ome miquise. ¹⁹ Pampa nochi masehualme huan tapiyalme quijiyotilanaj san se ajacat huan nochi ome miquij. Huajca tiquitaj para masehualme amo más huejhueyi que tapiyalme. Yon se amo huejcahuas. San topic itztoque. ²⁰ Nochi ome yahuij ipan san se lugar. Nochi ome hualajque ten taltepocti huan sempa mocuepase taltepocti. ²¹ Pampa ¿ajquiya hueli quinextilis ica temachili sinta itonal se masehuali yahui huejcapa huan itonal se tapiyali yahui tatzinta? ²² Huajca nijmachili para monequi se masehuali ma paqui ica itequi ipan ni taltipacti pampa ya nopa itaxtahuil. Amo onca seyoc tamanti cati achi cuali para quichihuas. Pampa quema yaya ya mictos, amo

aqui huelis sempa quimacas nemilisti seyoc huelta para ma mopaquilismaca ica cati oncas teipa ten imiquilis. Yeca sesen tacat ma mopaquilismaca ama.

4

¹ Sempa niquitac nochi nopa taijyohuilsti, tequipacholi huan taohuicayot cati onca ipan ni taltipacti. Niqunitac masehualme cati chocaj pampa sequinoc quintaijyohuiltiaj huan amo teno hueli quichihua para momanahuisse. Amo aqui quinyoltalia, yon amo aqui quinpalehua pampa cati quintaijyohuiltiaj quipiay miyac chichahualisti. ² Huajca nijmachili para más cuali itztoque nopa masehualme cati ya mijque huan amo aqui noja yoltoque. ³ Huan noja más cuali injuanti cati amo quema tacajtoque pampa amo quema quiitztoque nochi cati amo cuali cati onca ipan ni taltipacti.

⁴ Huan niquitac quema se masehuali quichihua huejhueyi tequit huan nochi cati quichihua quisa cuali, teipa sequinoc masehualme pehuaj quicualancataj. Huajca nochi itequi quisa san tapic huan san quihualica tequipacholi.

⁵ Masehualme cati huihuitique amo quinequij tequitise huan yeca itztoque ica mayanti. ⁶ Injuanti moilhuaj para más cuali motatzcanequise huan amo tequitise. Amo quinequij tequitise pampa moilhuaj nochi tequit quisas san tapic huan san quinsiyahuilistis.

Teqpalehuaj tohuampoyohua

⁷ Nojquia niquitzoc seyoc tamanti cati san tapic ipan ni taltipacti. ⁸ Niquta se tacat cati itzoc iseltitzi. Amo quinpiya iconehua, yon iic-nihua, pero mojmosta tequti chichahuac pampa, masque miyac tomi quipiya, quinequi noja más moricojchihuas. Huan amo motatzintoquilla: “¿Ajquiya nijcahuilijtehuas noricojyo quema nimiquis? ¿Para ten tahuel nimosiyahuiltia huan amo nimopaquilismaca ica nochi cati nijpiya?” San tapic nochi cati quichihua nopa tacat huan tahuel ohui inemilis.

⁹ Achi más cuali quema ome masehualme tequitij san sejco huan amo tequti setzi iseltitzi. Más quitanise san sejco que quitanisquia sinta tequitisquia iyoca. ¹⁰ Sinta se huetzis, huajca ne se quitananas. Pero teicnelti nopa masehuali cati itzoc iseltitzi. Pampa sinta huetzis, amo aqui quipiyas para quitananas. ¹¹ Huan nojquia quema taseseya, sinta ome motecase san sejco ica se taquemit, huajca momacase tatotonilot huan amo sesecuisse. Pero se masehuali cati itzoc iseltitzi ¿quenicatza huelis mototonilis? ¹² Huan quema se masehuali itzoc iselti, sequinoc huelis quitehuisse huan quitanise. Pero sinta itztoque ome, huajca amo quintanise. Huan noja más cuali sinta itztoque eyi. Onca se camanali cati quijtohua para se lazo cati quixinepalojtoque ica eyi pilazojtitzti, amo nimantzi cotonis.

Más ipati talnamiquilisti huan amo tomi

¹³ Más cuali se telpocat cati teicneltzi huan talnamiqui que se rico tanahuatijquet cati huehuentzi huan huihuitic, huan ayecmo quinequi quicaquis consejos. ¹⁴ Se telpocat cati talnamiqui huelis quisas ten se tatzacti huan quipantis se nemilisti cati nelcuali. Huelis elis tanahuatijquet masque tacatqui nelteicneltzi ipan nopa tali. ¹⁵ Huan miyac masehualme ipan ni taltipacti quipiyasquaj paquilisti para quipalehuisse se telpocat quej nopa, hasta quipalehuisquaj mochihuas tanahuatijquet. ¹⁶ Se telpocat cati quej nopa talnamiqui huelis quinyacanas tahuel miyac masehualme, huan nochi quicnelise. Pero teipa quema tacatijyase sequinoc masehualme, injuanti

quihuejcamajcahuase. Yeca cati quichihuasquía elisquía san tapic quej san tapic para se cati quinequisquía quiitzquis nopa ajacat cati tailpitzot.

5

Xijtamichihua cati tijtencahuilía Toteco para tijchihuas

¹ Quema tiya ipan ichaj Toteco, cuali xitacaqui huan amo nimantzi xicamanalti. Amo xijmaca nopa tacajcahualisti cati huihui tacame quimacaj. Pampa huihui tacame nimantzi quitencahuilíaj Toteco para quichihuase miyac tamanti masque amo quema quichihuase. Yon amo moilhuíaj sinta elqui se tajtacoli cati quijtojque.

² Huajca amo xicamanalti nimantzi, yon amo nimantzi xijtencahuilí Toteco para tijchihuas se tenijqui. Pampa Toteco itztoc nepa ilhuicac huan ta tiitztoc ipan ni taltipacti. Huajca amo xicamanalti miyac iixpa.

³ Quema se tahuel motequihuía ica miyac tamanti tequit, pehua quiapiya temicti. Nojquiya se tacat cati quipactía camanaltis miyac, teipa mocuepas se huihui tacat.

⁴ Huajca quema tijtencahuilía Toteco cati tijchihuas, nimantzi xijchihua cati tiquilhujtoc. Pampa Toteco amo quincualita cati huihuitique. Monequi xijchihua nochi cati tijtencajtoc para tijchihuas. ⁵ Más cuali para amo quema tijtencahuas para tijchihuas se tenijqui que para tijtencahuas huan amo tijchihuas.

⁶ Quema tijtencahua se tamanti huan amo tijchihua, nelía elqui mocamac cati mitzchihualti titajtacolchihuas. Nojquiya amo xiquilhui itayolmelajca Toteco cati tequiti nozona ipan tiopamit para timocuapolo quema tijtencahuilí cati tijchihuasquía. Sinta quej nopa tiquijtos, tijcualancamacas Toteco huan yaya hueli quitamisosolos nochi cati tijchijtoc.

⁷ Sinta se quitemiqui miyac tamanti cati quinequi quichihuas pero amo teno quichihua, san huihuitic. Sinta camanalti miyac huan amo teno quichihua, san tapic. Más cuali xijtepanitaca huan xiquimacastica Toteco.

Cati amo ipati ipan tonemilis

⁸ Sinta ipan se estado ipan ni tali tiquitas para se rico quitaijyohuiltía se cati teicneltzi huan amo quichihuilía cati xitahuac, amo teno ximoilhui. Sesen tequitiquet quiapiya seyoc cati quinahuatía, huan cati quinahuatía ya nojquiya quiapiya seyoc cati quitachilía. Huan itztoc seyoc más huejcapa ten nopa ome huan teipa itztoc nopa hueyi tanahuatijquet. Huan pampa nochi moixmatij, tahuel ohui para quixitahuase cati tetaijyohuiltía. ⁹ Nopa tali huan cati quieliltía pano ipan inimax nochi cati quiapiyaj tanahuatili. Hasta nopa tanahuatijquet quiselía cati temaca nopa tali masque nelía amo xitahuac quej quichihua.

¹⁰ Pero masque se tacat tahuel quinequi quiapiyas tomi, amo quema quiapiyas hasta ayecmo quinequis. Huan cati quinequi elis rico, amo quema moilhuía para ya quiapiya miyac ricojyot. ¹¹ Pampa quema se masehuali quimiyaquilía itomi, nojquiya momiyaquilíaj cati quitequihuíaj huan quitamiltíaj. Huajca ¿taya mitzpalehuis nopa ricojyot sinta san talochtamis moixpa?

¹² Se tacat cati tequiti chichahuac, cochi cuali masque quiapiya miyac itacualis o pilquentzi. Pero se tacat cati rico tahuel mocuesohua huan amo cochi pampa quimacasi quipolos nochi cati quiapiya.

¹³ Seyoc tamanti cati nojquiya san tapic cati niquitztoc ipan ni taltipacti eltoc para se masehuali quiajocuis itomi huan teipa quitequihuis ipan

tamanti cati amo cuali para ya. ¹⁴ Nojquiya hueli quitalis itomi ipan tamanti cati amo quisa cuali huan quitamis ifomi. Quej nopa amo teno mocahuas para quiselise iconehua teipa. ¹⁵ Sesen masehuali tacati xolot huan quej nopa sempa mocuepas quema miquis. Amo aqui huelis quihuicas yon se tamanti cati ica mosiyahuiltjtoc nica.

¹⁶ Ya nopa nelía se hueyi tequipacholi pampa san tapic itequi se masehuali. Quistehuas ten ipan ni taltipacti san se quej ajsico. Nochi itequi san quihuicac ajacat. ¹⁷ Huan nochi tonali ipan inemilis, eltoc quej yaya nemi ipan tzintayohuilot huan miyac tamanti quitzacuilía. Mocuesohua huan taijyohuía miyac.

¹⁸ San ni tamanti cati cuali para se masehuali. Monequi ma tacua cuali, huan ma quii se xocomecat at cati ajhuiyac huan ma mopaquilismaca ipan itequi nochi tonali cati Toteco quimaca para ma itzto. ¹⁹ Huan nelía cuali sinta se tacat quiselijtoc ten Toteco ricojyot huan chicahualisti. Huan sinta quej nopa Toteco quimacatoc, ma mopaquilismaca ica cati quiselijtoc. Sinta se masehuali paqui ipan itequi huan ica nopa tamanti cati quipantía ipan inemilis, huajca nelía cuali. Ipaquilis cati quipiya eltoc quej se nemacti ten Toteco. ²⁰ Se masehuali cati quej nopa paqui ipan inemilis, amo mocuesohua por cati panotoc ipan inemilis, pampa Toteco quitemitía iyolo ica paquilisti.

6

¹ Onca seyoc tamanti cati amo cuali cati na niqiztoc ipan nochi taltipacti. ² Toteco quinmacatoc sequij masehualme huejhueyi ricojyot huan tatepan-itacayot cati quinpalehuisquía quipiyase nochi cati injuanti quinequij, pero amo quinmacatoc chicahualisti para itztose para quiteguihuise cuali. Miquij nimantzi huan nochi cati quipiyaj moaxcatise sequinoc. Ya nopa nelía san tapic huan amo cuali.

³ Masque se tacat quinpiyas 100 itelpocahua huan miyac iichpocahua huan huejcahuas itztos hasta elis huehuentzi, sinta amo quipantía paquilisti ipan inemilis huan quema miquis amo quicajtehuas se quentzi tomì para ica quitapachose, na niqijtohua para nopa tacat más cuali tacajtosquía mictoc. ⁴ Sinta tacajtosquía mictoc huan amo quiitztosquía tatanexti, amo quipiyasquía yon itoca. ⁵ Amo quiitztosquía tonati, yon amo teno quimajtosquía sinta onca se tonati. Pero ya nopa noja más cuali huan amo tielis se huehuentzi cati amo quema quimatqui paquilisti. ⁶ Huan masque nopa tacat itztosquía ome mil xihuit, sinta amo quipantía paquilisti, huajca san tapic para itztoc. Yaya san miquis quej miquise nochi sequinoc.

⁷ Nochi tacame ipan taltipacti tahuel mosiyahuiltíaj ipan inintequi para quitanise ten quicuase, pero masque ya nopa, amo quema ixhuij ica cati quinequij quichihuase. ⁸ Sinta timoilhuía ten ya nopa, masque se talnamijca tacat huan se cati huihuitic quipanoj san se tamanti, más cuali inemilis yaya cati talnamiqui, pampa yaya más tamachilía. Amo nimantzi quichihua ten hueli tamanti cati quinequi quichihuas. Huan masque se itztoc teicneltzi, más cuali eltoc sinta yaya talnamiqui.

⁹ Ximopaquilismaca ica cati tijpiya. Amo xijnequi tamanti cati amo quinamiqui para tijpiyas. Para tijnequis tamanti cati amo hueli tijpiyas eli san tapic quej tijnequisquía tiqiztzquis ajacat cati tailpiztoc.

Amo tijmatij taya hualas teipa

¹⁰ Nochi cati ama pano eltoc pampa huejcajquiya quej nopa quisencajqui Toteco para ma pano. Huan hasta huejcajquiya Toteco ipa quimatiyaya taya

quichihuasquía sesen tacat. Yeca san tapic para timonajnanquilis ihuaya Toteco, pampa yaya más hueyi que ta.

¹¹ Sinta se tacat camanalti miyac, nel quentzi ipati cati quiijtohua. Huajca, amo más xihuejchihua.

¹² Tonemilis eltoc quej se ecahuili cati amo huejcahua huan cati amo teno ipati. Amo aquí huelis techilhuis quenicatza ma tiitztocha ica yejyectzi ipan nopa tonali cati tijpiyaj nica. Huan amo aquí huelis techilhuis taya panos teipa nica ipan ni taltipacti quema ya tiixpolijtose.

7

Talnamiqulisti huan huihuiyot

¹ Más ipati sinta nochi mitzixmatij para se ticuali masehuali huan amo para tijhuicas nopa taajhuiyacayot cati más patriyo. Más ipati nopa tonali quema timiquise huan amo nopa tonali quema titacatque.

² Más ipati para tiyas campa mijqui se masehuali huan amo para tiyas campa ilhuichihua. Pampa ta nojquiya mitzchiya miqulisti huan cuali para timoyolilhuis ten momiquilis nochi tonali cati noja polihui ipan monemilis.

³ Más cuali tijpiyas taohuijca yot huan amo huetzquisti pampa nopa tao-huijca yot mitzpalehuis para tielis titatzejtelolitic.

⁴ Se cati talnamiqul monejnehuilía miyac ten miqulisti cati quinajsi nochi masehualme. Pero se cati huihuitic san monejnehuilía quenicatza mopaquilismacas ama.

⁵ Más cuali para tijcaquis quema se cati talnamiqul mitztacahuilía huan amo quema se cati huihuitic mitzyejyectalis ica icamanal. ⁶ Pampa quej nimantzi tamis huitzi ipan tit, quej nopa nimantzi tamis nopa yejyectzi camanali cati mitzilhuijtoc nopa huihui tacat. Huan amo teno mitzpalehuis.

⁷ Talnamijca tacame cati quiselíaj se taxtahuili para quichihuase cati amo xitahuac mocuepase huihui tacame. Quena, nopa taxtahuili quinsosolhuilis inintalnamiqulilis.

⁸ Más yejyectzi quema tijtamiltis se tequit huan amo quema tijpehualtis. Más cuali tijpiyas hueyi moyolo huan amo timohueyimatis.

⁹ Amo xicalani nimantzi, pampa ya nopa cati quichihua huihui tacame.

¹⁰ Amo quema xiquijto: ¿para ten nopa tonali cati huejcajquiya panoque elque más cuali que ama? Amo tijmati sinta nopa tonali elque más cuali huan sinta titalnamiqul amo ya nopa tiquijtos.

¹¹ Sinta titalnamiqul, nelía cuali quej nojquiya cuali para tijselis tomi quema miqulij motatahua. Quena, talnamiqulisti huan tomi mitzpalehuis miyac ipan ni taltipacti. ¹² Talnamiqulisti nelía tepalehuía ipan miyac tamantí san se quej tomi. Pero nopa talnamiqulisti noja más tepalehuía pampa se cati talnamiqul huelis quimanahuis inemilis.

¹³ Ximomaca cuenta quenicatza Toteco teguiti huan ximohuica cuali ihuaya. Pampa sinta Toteco quichihua huijcoltic moojhui, amo aquí hueli quichihuas xitahuac.

¹⁴ Xipaqui nochipa quema tihueli. Xipaqui ipan nopa tonali quema nochi eltoc cuali. Huan quema ajsi nopa tonali cati fiero, ximomaca cuenta para nochi ome tamantí tonali, huala ten Toteco. Huan quej nopa nochi masehualme momacase cuenta para amo tojuanti cati titanahuatíaj quenicatza elis tonemilis.

Amo tijmachilíaj nochi tamanti

¹⁵ Ipan ni nonemilis cati amo ipati, niquitztoc miyac tamanti. Niquitztoc para sequij masehualme cati quichihua j cati xitahuac iixpa Toteco miquij quema noja tellocame. Huan sequij masehualme cati fiero ininemilis huejcahuaj itztoque. ¹⁶ Huajca amo ximochihua neltahuel tixitahuac, yon neltahuel titalnamiqui. ¿Para ten tijnequi timotzontamiltis? ¹⁷ Nojquiya amo ximochihua tahuel tifiero. Huan amo ximochihua tihuihuitic. ¿Para ten monegui timiquis quema noja ayemo ajsi tonali? ¹⁸ Xijchihua san nopa tequit cati mitztocarohua tijchihuas huan amo xiquisa ipan ni lado, yon ipan ne se lado. Sinta tijchihuas ya nopa huan tiquimacasis Toteco, yaya mitztiochihuas huan nochi cati tijchihuas, quisas cuali.

¹⁹ Se talnamijca tacat qui piya más chicalualisti que majtacti tequichihuan i pan se altepet.

²⁰ Huan ipan nochi ni taltipacti amo onca yon se tacat cati nochipa quichihua cati cuali huan amo quema tajtacolchihua.

²¹ Nojquiya amo xijchihuili cuenta nochi camanali cati masehualme quijtohuaj. Pampa huelis tijcaquis motequipanojca mitzejelnamiqui. ²² Huan cuali tijmati para ta nojquiya miyac huelta tiquinejelnamictoc sequinoc mohuampoyohua.

Xijtemo talnamiquilisti

²³ Nochipa nijchijtoc campeca hasta campa nihueltoc para nielis nitalnamiqui. Niquijto: “Na nijnequi nielis nitalnamiqui”, pero san tapic. ²⁴ Nelía huejca huan ohui para tijpantis talnamiquilisti. ²⁵ Nijtemo campa hueli para nijpantis nopa talnamiquilisti huan para nijmachilis para ten onca nochi tamanti. Nijnequiyaya nijnextis para nelía huihuitic cati tajtacolchihua. Huan locojtic cati mohuihuichihua.

²⁶ Huan nijpanti para más chichic que miqulisti itztoc se sihuat cati ahuilnemi. Yaya itztoc quej se lazo cati teilpia huan quej se matat cati temasiltía. Aquí quichihua cati quipactía Toteco momanahuis imaco nopa sihuat. Pero tajtacolchihuan mocahuaj ilpitoque ipan imata.

²⁷ NiTamachtijquet niquijtohua: “San ya ni nijpanti quema nijtemojtinentoc huan nitatzintocatinentoc campa hueli para niquixmatis para ten onca sesen tamanti cati onca. ²⁸ Masque ayemo nijpantía cati nijtemohuayaya, ya ni nijpantijtoc. Ipan se mil tacame itztoc san setzi cati talnamiqui, pero ten nochi sihuame campa hueli, yon se cati talnamiqui amo nijpantijtoc. ²⁹ Huan ya ni cati nijpantijtoc. Nochi masehualme Toteco quinchijchijqui xitahuaque, pero sese masehuali quitapejpenijtoc quitoquilis se ojti cati amo cuali huan cati yahui tatzinta.”

8

¹ ¡Nelía yejectzi tielis titalnamiqui! Cati talnamiqui huelis quintajtachilis tamanti huan quinmachilis. Huelis quinixtomas tamanti cati ohui para quimachilise sequinoc. Nopa talnamiquilisti quichihua para se tacat ma paqui huan ma moyolyamanili.

Xijneltoca nopa tanahuatijquet

² Xijtepanita itanahuatil nopa tanahuatijquet pampa quej nopa tijtestigojquetzoc ica Toteco para tijchihuas. ³ Amo ximoisihuilti para tiquisas ten iixpa nopa tanahuatijquet. Yon quentzi amo xijpalehui se tamanti cati amo cuali cati sequij quinequij quichihuase, pampa nopa tanahuatijquet quintatzacuultis cati amo quittepanitaj.

⁴ Nopa tanahuatijquet quipiya chichahualisti para tefuerzajhuis para quinelfocase itanahuatil. Amo aqui hueli quinajnanguilis o quuilhuis: “¿Para ten tijchihua?”

⁵ Aqui quichihuas cati quiijtouhua itanahuatil nopa tanahuatijquet, amo quiselis tatzacuiltli. Huan se cati talnamiqui quimati quenicatza huan quema hueli quitamichihuas nochi cati yaya tanahuatía. ⁶ Quena, sesen masehuali hueli quipantis quema huan quenicatza monequi quichihuas sesen tamanti masque itzoc ipan huejhueyi taohuijcyot.

⁷ Pero amo aqui quimati taya panos teipa. Yon amo aqui huelis quiyolmelahuas se masehuali taya ipantis.

Amo aqui momanahuis ica miquilisti

⁸ Yon se masehuali amo quipiya chichahualisti para quitzacuilis itonal para ma amo guisa ipan itacayo quema ya eltoc para miquis. Yon amo aqui quiapiya chichahualisti para quitzacuilis miquilisti para amo quiajsis. Amo onca yon se tamanti cati huelis tijtequihuis para tijtzacuilis miquilisti. Huan ipan nopa tonali quema amo cuajcualme itztoquejya para miqise, yon se ten nopa tamanti amo cuali cati quichijtoque huelis quinpalehuis.

⁹ Nochi ya ni cati niqitztoc quema nimotemacac para nimoyolilhuis miyac ten nochi tamanti cati pano ipan ni taltipacti. Niqita para masehualme tahuel quiapiyaj chichahualisti para mochihuilise cati amo cuali se ica seyoc.

Tamanti cuali huan amo cuali

¹⁰ Niqitztoc para quema miqi se masehuali cati tahuel fiero inemilis huan cati mocajtoc huejca ten campa tatzejtzeltic, nimantzi ayecmo moilhuaj masehualme ten cati fiero quichijqui. Ipan nopa altepet campa quichijqui ten fiero quitalpachohuaj ica tatepanitacayot huan mocuepaj ininchaj huan quielcahuaj nochi cati fiero quichijqui. ¡Ya nopa nelía se hueyi huihuiyot!

¹¹ Quema se tacat quichihua cati amo cuali huan amo nimantzi quiselía se tatzacuiltlisti, sequinoc moilhuaj para amo teno ininpantis sinta nojquiya quichihuase fiero tamanti.

¹² Pero masque se masehuali tajtacolchihuas 100 huelta huan noja huejcahuas para itztos miyac xihuit ipan ni taltipacti, na nijmati para nochi yas más cuali para masehualme cati quiimacasij Toteco. ¹³ Amo nelía quisas cuali para tajtacolchihuani pampa amo quiipiyase ininemilis cati cuali huan cati huejcahuas. Ininemilis elis quej se ecahuili, pampa amo quitepanitaj huan quiimacasij Toteco.

¹⁴ Onca sequinoc tamanti cati pano ipan ni taltipacti cati amo nelía xitahuac. Quemantica masehualme cati xitahuaque quipantíaj cati amo cuali quej elisquía tajtacolchihuani. Huan sequij tajtacolchihuani quipantíaj tamanti cati cuali quej elisquía xitahuaque. Ya ni nojquiya se hueyi tamanti cati amo cuali.

¹⁵ Huajca nijtapejpeni nijtequihuis nonemilis para nimopaquilismacas pampa nimoilhui para ipan ni taltipacti, amo onca seyoc tamanti cati más cuali para nijchihuas. San nitacuas, nitaís huan nipaquis. San paquilisti mocahuas ten nochi nopa tequit cati ohui cati Toteco techmacatoc ma tijchihuaca ipan ni taltipacti.

¹⁶ Quema senquisa nijtemohuayaya talnamiquilisti, niqitac nochi tamanti cati panoyaya ipan ni taltipacti. Huan niqitac para mojmosta campa hueli onca tahuel miyac tequit cati mochihua tayohua huan tonaya huan amo motilquetza. ¹⁷ Huan nimomacac cuenta yon se masehuali,

masque talnamiqúi, amo hueli quimachilía nochi cati Toteco quichihua, yon nochi cati mochihua ipan ni taltipacti. Huan sinta se quijtohua quimachilía nochi, amo melahuac icamanal. San Toteco hueli quíita nochi tamanti huan quimati nochi cati onca.

9

Nemilisti huan miqúilisti

¹ Nimoyolilhujtoc ten nochi ni tamanti huan nijmati para nochi masehualme cati xitahuac huan talnamiquini huan nochi tamanti cati quichihua jeltoc imaco Toteco. Amo aquí quimati ajquiya quicnelise, yon ajquiya quiculancaítase pampa amo aquí quimati taya hualas teipa. ² San se tamanti inipanti nochi masehualme pampa nochi miqúise. San se ipanti cati xitahuac huan cati amo xitahuac, cati cuali inemilis huan cati amo cuali inemilis, cati tapajpactic huan cati amo tapajpactic iixpa Toteco, cati temaca tacajcahalísti huan cati amo temaca, cati tatepanita huan cati tajtacolchihua, cati tatestigojquetza huan cati amo tatestigojquetza. ¡Nochi miqúise!

³ Nesi para amo xitahuac para san se miqúise nochi masehualme cati itztoque ipan ni taltipacti. Yeca sequij masehualme senquisa quichihua j tamanti cati amo cuali. San quitapejpeníaj nopa ojti cati más fiero pampa moilhuíaj para san miqúilisti quinchíya. ⁴ San cati yoltoque noja hueli mochiyase para quiselise tamanti cati cuali. Huajca quijtohua j: “Más cuali se chichi cati yoltoque huan amo se león cati mictoc.”

⁵ Cati yoltoque quimatij para se tonali miqúise. Pero cati mictoque ayecmo teno quimatij. Nojqúiya amo quichíyaj para quiselise se taxtahuili teipa. Huan ayecmo cati quinelnamiqui. ⁶ Nochi cati quichijque nica ipan taltipacti, sinta teicnelijque, teculancaítaque, quitasomatque se tenijqui o quixtoaque se tamanti, nochi ya nopa ya tanqui. Ayecmo quipiyaj iniparte ipan yon se tamanti cati pano ipan ni taltipacti.

⁷ Huajca xiya xitacuati huan xiquiti moxocomeca at ica paquilisti ipan moyolo pampa Toteco quita ni para cuali. ⁸ Nochipa ximoquenti yoyomit cati cuali huan ximotalili se quentzi taajhuiyacayot ipan motzonteco.

⁹ Xipaqui ihuaya nopa sihuat cati tiquicnelía. Quena, ipan ni nemilisti ipan ni taltipacti cati amo teno ipati, xipaqui pampa noja tiyoltoc sesen tonali cati Toteco mitzcahuilijtoc xiitzto. Pampa nopa mosihua cati Toteco mitzmacatoc ya nopa nopa taxtahuili cati más cuali por nochi nopa ohui tequit cati tijchijtoc ipan ni taltipacti. ¹⁰ Nochi tamanti cati ajsi momaco para tijchihuas, xijchihua ica nochi nopa chicalualísti cati tijpiya. Pampa ipan nopa mijcaostot campa nechcatitoc para tiyas, ayecmo huelis tijchihuas yon se tequit, ayecmo huelis timoyolilhuis quenicatza tijchihuas se tamanti cati cuali. Ayecmo teno tiquixmatis, yon ayecmo tijpiyas talnamiquilisti.

Tamanti nica cati amo xitahuac

¹¹ Nojqúiya niquitztoc ipan nochi taltipacti para amo nochipa tatani yaya cati motalohua chichuac. Huan ipan tatehuilísti amo nochipa tatani yaya cati más quipiya fuerza. Cati nelía talnamiquini amo nochipa quipiyaj ten quicúase. Cati miyac inintalnamiquilis amo nochipa quipiyaj miyac tomi. Ten hueli talojtzi ten hueli tamanti amo cuali hueli quipantis cati hueli masehuali quema amo quichíya.

¹² Yon se masehuali amo quimati quema ajsis tonali para taijyohuis. Quej se michi cati majsi ipan matat o quej se totot cati mocahua ilpitoc ipan se lazo, ten hueli talojtzi, hueli techajsis cati amo cuali.

Talnamiquilisti huan huihuiyot

¹³ Nojquiya niqiztoc seyoc tamanti cati pano ipan ni taltipacti. ¹⁴ Oncayaya se pilaltepsetzi campa amo itztoya miyac masehualme. Huan ajsico se hueyi tanahuatijquet huan quiyahualo huan pejqui quitehuía. ¹⁵ Pero ipan nopa pilaltepsetzi itztoya se tacat teicneltzi cati nelía talnamiqi, huan yaya quimatqui taya quichihuas para quimanahuis nopa altepet. Huan quena, ica italnamiquilis quimanahui nopa pilaltepsetzi. Pero teipa ayecmo aquí quielnamiqqui nopa teicneltzi.

¹⁶ Huajca niqijto: “Masque talnamiquilisti más ipati que chicahualisti, sinta cati talnamiqi itztc nel teicneltzi, amo huejcahuas quitacaquilise icamanal. Huan teipa nochi quicualancaitase.” ¹⁷ Pero más cuali tijta-caquilise icualcamanal nopa tacat cati talnamiqi huan amo tijtacaquilise quema camanalti inintanahuatijca huihui tacame. ¹⁸ Más cuali se quipiyas talnamiquilisti que teposti cati ica tatehuis. Pero se fiero masehuali hueli quisosolos miyac tamanti cati cuali.

10*Talnamiquilisti tehualiquilía cati ipati*

¹ Miyac sayolime cati mictoque huan lochontoque mijyotía tavel fiero hasta hueli quinenpolos iajhuiyaca se cuali taajhuiyacayot. Ica masehualme nojquiya. Sinta se talnamijca masehuali mocuapolos huan quichihuas se pilitaixpanoltzi, sequinoc quiitase para nopa piltamantzi quitamiixpolos nochi nopa cuali tamanti cati quichijtoya ica miyac italnamiquilis huan ica miyac tatepanitacayot.

² Iyolo se talnamijca tacat quichihualtía ma quichihua cati cuali. Pero iyolo se huihui tacat quichihualtía ma quichihua tamanti cati amo cuali.

³ Quema se huihui tacat san nejnemi ipan se ojti quinnextilía sequinoc para quipolohua italnamiquilis. Quena, masehualme quiitaj quenicatza nemi huan nimantzi quiixmatij para huihuitic. ⁴ Sinta moteco cualanis mohuaya, amo xijcahua motequi. San ximoicnonequi huan ximomaxojtili. Ya nopa mitzpalehuis para tijsehuis icualancayo moteco huan para amo tiquixpanos.

⁵ Niqiztoc seyoc tamanti cati amo cuali cati pano ipan ni taltipacti; se tamanti cati pano ica tanahuatiani. ⁶ Fiero eltoc sinta se tanahuatijquet quincahuilis ma tanahuatica tacame cati huihuitique huan quintalis tacame cati ya quinextijtoque inintalnamiquilis ipan se tequit cati amo aquí quitepanita. ⁷ Nojquiya niquintztc tequipanohuani cati yahujcahuayojtipa huan inintayacancahua nejnemij iniicxipa quej elisquía tequipanohuani.

⁸ Talnamiquini quimatij onca tamanti mahuilili huan tequitij ica miyac cuidado. Cati quixahuas se ostot para ameli, huelis iseltitzi huetzis nozona. Cati quisosolos se tepamit, huelis nozona quipantis se cohuat cati quitzacanis. ⁹ Aquí quiquixtía tet ipan tepexit para quitejtequis, huelis quihuelonis teme cati ica motepachos. Huan cati quitapana cuahuit, huelis mococos iseltitzi ica nopa hacha o ica nopa cuahuit. Huajca cati talnamiqi tequití cuidado.

¹⁰ Sinta nopa hacha ayecmo tatequi huan se masehuali amo quitentis, monequi más chicahuac tatzontequis para quitapanas cuahuit. Huajca cati nelía talnamiqi quientía ihacha para quisas cuali itequi.

¹¹ Amo ipati para tijtemos se tamaxojtilijquet para quimaxojtilis se cohuat sinta ya mitz Zacanijtoc.

¹² Se talnamijca tacat camanalti ica yejectzi pampa hueyi iyolo ica sequinoc. Pero icamanal se huihui tacat quichihua ma motaicancahua ica iseltitzi.

¹³ Quema pehua camanalti se huihui tacat quijtohua cati moillhuía huan ya nopa huihuitic. Pero quema ontami ica nochi tamanti cati moyolihuitoc, itzoc quej se loco tacat huan teilhuía nochi cati amo cuali cati quinequi quichihuas.

¹⁴ Se huihui tacat camanalti miyac quej elisquía quimati nochi cati panos teipa huan quinequi tepohuilis nochi. Pero amo aquí. Amo aquí quimati taya panos teipa.

¹⁵ Quema se huihui tacat tequiti, mosiyahuiltía hasta ayecmo quimati quenicatza ajsiti ichaj.

¹⁶ Fiero elis para nopa tali cati quiptiya quej itanahuatijca se cati ayemo motalnamictijtoc. Teicnelti nopa tali sinta itayacancahua pehuaj moi-huintíaj hasta quema tanesi. ¹⁷ Pero se paquilisti para nopa tali cati quiptiya se cuali tacat quej itanahuatijca, huan quinpiya itayacancahua cati san quicuj cati monequi para huelise tequitise chicahuac. Amo tahuel tacuj huan moi-huintíaj.

¹⁸ Se tacat cati tatzihui amo quitatamanía ichaj campa pano at, huan yeca palani apechme. Teipa postequi nopa apechme huan huetzi ichaj.

¹⁹ Para mopaquilismacase masehualme quichihuj se ilhuit. Huan nopona xocomeca at temaca paquilisti. Pero monequi tomi para nochi cati mochihua.

²⁰ Yon ixtacatzi ipan moyolo, amo quema xijtelchihua se tanahuatijquet o se rico, pampa huelis se totot quicaquis huan quipohuiliti.

11

Xitemajmaca miyac

¹ Xitemajmaca miyac pampa teipa, ica miyac tonali, sempa ajsiqui momaco. ² Xiquinmajmaca cati tijpiya miyac masehualme, pampa amo tijmati taya hualas mosta huan sinta ta nojquiya tijtemos ten mitzmonequílía.

³ Quema nopa mixti quihualica miyac at, nopa at huetzi quema quinequi ipan tali. Huan sinta se cuahuit huetzis, campa quinequis huetzis masque ica huejcapa o ica tatzinta, nopona mocahuas.

⁴ Sinta tijchiyas ma mijcueni nochi ajacat huan ma ayecmo huetzi at para tijchihuas se tequit, huelis amo quema tijchihuas.

⁵ Quej se masehuali amo quimati canque huala nopa ajacat huan amo quimati quenicatza moscaltía se pilconetzi ipan iijti inana, quej nopa nojquiya se masehuali amo hueli quimatis quenicatza tequiti Toteco, yaya cati quichihua nochi tamanti.

⁶ Xijsenhuiquili xijtoca moxinach ica ijnaloc huan nojquiya xijtoca ica tiotac. Pampa amo tijmati catijqui xinachtí ixhuas huan quisas más cuali. Huelis más íxhuas cati tijtojqui ica ijnaloc, o huelis cati tijtojqui ica tiotac o huelis nochi ome san se quipiyase inintajca cati cuali.

Xiquelnamiqi Toteco ama

⁷ Tahuel yejectzi taahuili. Nelía cuali para tiitztos huan tiquitas tonati.

⁸ Masque se masehuali itztos miyac xihuit ipan ni taltipacti, sesen tonali ma quiptiya paquilisti. Huan nojquiya ma quielnamiqi para teipa hualas tonali ten tzintayohuilot quema ya mictos. Pampa nochi tamanti cati hualas elis san topic.

Camanali para telpocame

⁹ Huajca ta cati titelpocat, ximopaquilismaca amantzi quema noja titelpoca tacat. Xiyolpaqui ama. Xijchihua nochi cati cuali cati moyolo quinequi quichihuas. Xijyeco nochi cati onca. Pero xijmati ya ni; ajsis se tonali quema timoquetzas iixpa Toteco para tijmacas cuenta ten nochi cati tijchijtoc. ¹⁰ Huajca xijhuejcamajcahua cualanti, tequipacholi huan nochi cati amo cuali cati hueli mitzcocos. Masque ama tiitztoc titelpocat quema monemilis eltoc tahuel yejectzi, ni tonali amo huejcahuas huan tiqitas para ni xihuit nojquiya panos quej amo teno eliyaya.

12

¹ Xiquelnamiqui Toteco cati mitzchijchijqui quema noja tiitztoc titelpocat. Xijhueyitepanita amantzi quema tiitztoc titelpocat huan ayemo huala nopa tonali quema ayecmo tijpiyas paquilisti para tiitztos. ² Pampa teipa ayecmo huelis titachiyas cuali huan tiqunitas tonati, metzti huan sitalime quej ya tzintayohuilijque. Huan masque ya tanqui taquiyahui, motalnamiqulis mochahuas quej tamixtentoc. ³ Hualas tonali quema nopa huehuejyot mitzchihuas tihuihuipicas huan mometzhua cati quipixque miyac chicahualisti, ayecmo quipiyase. Ayecmo tijpiyas nochi motancoch para tijcuajcuas cuali huan elis quej titachiya ipan ventanas cati soquiyo. ⁴ Huan quema ya tiquinpolojfos motancochhua, monequis timotentetzopas chicahuac para huelis tijchichicuetzas motacualis. Teipa ajsis tonali quema timijquehuas cualca quema ayemo tzajtzij cuapeleme pampa amo huelis ticochis. Pero ta ayecmo titacaquis cuali huan mocamanal ayecmo caquistis cuali. ⁵ Teipa ta tiquimacasis titejcos campa tahuejcapa huan tiquimacasis tihuetzis quema tinejnemis. Tielis se huehuentzi tzonchipahuac. Huan tijhuahuatatzas motacayo. Ayecmo tinequis tipaquis ihuaya mosihua. Tiitztos nechca miqulisti. Quena, timiquis huan tiyas ipan cati elis mochaj para nochipa. Huan nopa masehualme cati mitzchoquulise itztose ipan calle.

⁶ Xiquelnamiqui Toteco ama quema titelpocat huan noja titetic. Xijtequipano ama quema motzonteco noja quinahuatia moyolo ma huitoni huan moeso noja nemi ipan motacayo. Amo xijchiya hasta ayecmo huelis titaijyotilanas huan motalnamiqulis ayecmo teno quimatis. ⁷ Xijchihua ama quema motacayo ayemo mocuepa taltepocti quej achtohui eltoya huan motonal ayemo mocuepa ica Toteco cati quihualtitanqui.

⁸ “Nochi san tapic huan amo teno ipati.” Quej nopa niqijtohua na cati niTamachtijquet. ¡Quena, nochi san tapic!

Cati más monequi tijchihuase

⁹ Huan na cati niTamachtijquet nielqui tahuel nitalnamiqui huan nojquiya nijsenhuiquili niqinmacti masehualme nochi cati nijmatiyaya. Nojquiya niqijcuilo miyac camanali cati inintoca proverbios. ¹⁰ Huan niTamachtijquet nijtemo camanali cati yejectzi para ica nitamachtis. Huan nojquiya niqijcuilohuayaya camanali cati senquisa melahuac.

¹¹ Icamanal se talnamijca tacat quin fuerzajhua sequinoc ma quichihuaca cati cuali. Quinnextilia sequinoc nopa tamanti cati achi más ipati. Icamanal se talnamijca tacat teyacana ipan se cuali ojti quej se tamocuitahuijquet quichihua.

¹² Pero ta tinocone, nimitzilhuía amo quema tamis masehualme para quijcuilose más amatapohuali. Huan cati momactia miyac mosiyahuilitia miyac.

¹³ Ten nochi camanali cati niqijtojtoc huan cati anquicactoque, ya ni cati más ipati para nimitzilhuis: “Xiquimacasi Toteco huan xijchihua cati

quiijtohua itanahuatilhua. San ya nopa cati monequi quichihuase nochi masehualme. ¹⁴ Pampa Toteco Dios techtajtolsencahuas por nochi cati tijchihuaaj, masque tijchihuaaj tanemijya o ixtacatzí, huan masque cuali o amo cuali.”

Cantares

¹ Ya ni nopa huicat cati más yejectzi cati quicualtali Salomón.

Nopa achtohui huicat

- ² * “Techtazonisquía ica mocamac pampa más cuali motaicnelil que xocomecat iayo. ³ Nelía ajhuiyac motaajhuiyacayo. Motoca nojquiya ajhuiyac quej se taajhuiyacayot pampa nochi quimatij tijchijtihualajtoc cati senquisa cuali. Yeca tahuel mitzicnelíaj nochi sihuame. ⁴ Tanahuatijquet, techhuicasquía mohuaya. Techhuicasquía ipan mochaj.”
- † “Tipaquij miyac para totanahuatijca. Itaicnelilis eltoc más cuali que xocomecat iayo. Yeca tahuel quicicnelíaj nochi sihuame ipan icaltanahuatil.”
- ⁵ † “Ansihuame ten altepet Jerusalén, na niyaya huic, pero niyejectzi. Nelía niyaya huic quej iniyoyoncalhua iixhuihua Cedar, pero niyejectzi quej icortinas Salomón.
- ⁶ “Amo techcualancaitaca pampa niyaya huic pampa techtatijtoc tonati. Noicnihua cualanque ica na huan techtalijque para ma niquinmocuitahui xocomeca milme huan yeca amo huelqui nimomocuitahui na.”
- ⁷ § “Techilhuisquía ta cati nimitzicnelía, ¿canque tiquinmocuitahuía moborregojhua? ¿Canque tiquinsiyajquetza ica tajcotona? Pampa amo quinamiqui nimocuapolojtinemis quej se nitacanenca sihuat huan fiero ninesis quema niajsis campa inintapiyalhua mohuamoyohua.”
- ⁸ * “Sinta amo tijmati canque itztoc, ta cati más tiyejectzi ten nochi yejectzitzi sihuame, xiquintoquili iniicxihua nopa borregojme hasta campa itztoque nopa sequinoc tamocuitahuiani. Nozona xiquinmocuitahui moborregojhua campa quichijchijtoque inixajcal para tijmatis canque itztoc yaya cati tiquicnelía.”
- ⁹ † “Ta cati nimitzicnelía, nimitzita para tahuel tiyejectzi. Tiitztoc cati más yejectzi ten nochi ichpocame quej icahuayo Faraón eltoc más cuali ten nochi cahuayojme huan quitlanaj icarro. ¹⁰ Nelía yejectzi mocampa. Huan mopijpilol achi más quinextía moyejca. Moquechcuayo nesi yejectzi ica nopa costi cati timotalilijtoc ica nopa piltetzitzi cati nelcuajcualtzi. ¹¹ Timitzchihuilise pijpiloli cati tahuel yejectzi ica oro huan campa hueli tijtatzquiltitilise plata para timotalilis.”
- ¹² † “Quema nopa tanahuatijquet noja mosehuijtaya campa imesa, no-taajhuiyacayo ten nardo mijyotiyaya yejectzi huan tamahuayaya campa hueli. ¹³ Para na, yaya cati niquicnelía eltoc quej se quechti ten nopa taajhuiyacayot mirra cati nochipa huiyontoc noyolixco. ¹⁴ Itztoc quej se tzonti nopa xochit ten alheña ten nopa xochimili ipan altepet En Gadi.”

* **1:2** Nopa ichpocat huica: † **1:4** Sihuame ten Jerusalén huicaj: † **1:5** Nopa ichpocat quinilhuía nopa sihuame: § **1:7** Nopa ichpocat quicamanalhuía nopa telpocat masque yaya huejca itztoc:

* **1:8** Sihuame ten Jerusalén huicaj para nopa ichpocat: † **1:9** Quema quipantijque nopa ichpocat, nopa telpocat quijitohua: † **1:12** Nopa ichpocat moilhuía ten nopa tanahuatijquet huan quijitohua:

- 15 § “Tahuel tipilyeyectzi, ta cati nimitzicnelía. Quena, tahuel tiyejyectzi. Moixteyolhua nesi quej ome pilpalomajtzitzi.”
- 16 * “Nelía tiyejyectzi ta cati na nimitzicnelía. Quena, nelía ticuali.”
- † “Yejyectzi campa timotecaj para timosiyajquetzaj ipan ni sacapetat cati xoxohuic. 17 Ni tiocuame eltoc quej nopa cuatetomit ten tochaj huan nopa tapamit eltoc ni cuame ten ciprés.”

2

- 1 * “Na niitztoc quej se xochit ten Sarón. Quena, niitztoc quej nopa xochit lirio cati onca ipan tamayamit.”
- 2 † “Quema ta cati nimitzicnelía timopantía inihuaya sequinoc ichpocame, tiitztoc quej se xochit lirio cati mopantía campa huitzti.”
- 3 ‡ “Quema ta cati nimitzicnelía timopantía tatajco sequinoc tacame, tiitztoc quej se manzana cuahuit cati mopantía inihuaya sequinoc cuame. Nelía techpactía nimosehuis itantita nopa manzana cuahuit para ma techcahuili. Huan nelía tzopelic nijmachilía itajca. 4 Ta techhuicac ipan mochaj cati yejyectzi campa onca nochi cati cuali para ma nijcua hasta niixhuis. Nopona techtachili ica motaicnelijcayo para nochi quimatise techicnelía. 5 Techfuerzajmaca ica tortas ten xocomecat itajca cati huactoc huan techtamaca ica manzanas pampa tahuel nijnequi motaicnelilis. 6 Xijтали momaarraves tatzinta ten notzonteco huan ica momanejmat technajnahua.”
- 7 § “Ansihuame ten altepet Jerusalén, xiquintestigojquetzaca nopa masame huan cuachacaltziti cati nemij cuatita para amo anquicochsosolose nopa ichpocat cati niquicnelía. Xijcahuaca ma cochi hasta quema yaya quinequis isas.”

Nopa ompa huicat

- 8 * “Ya huala yaya cati niquicnelía. Xiquitaca, ya huala. Nijcaqui para huitontihuala ipan cuatitamit huan campa tepeme. 9 Yaya cati niquicnelía itztoc quej se oquich masat o se oquich cuachacaltzi. Xiquitaca, ya ajsico huan moquetztoc nocalixpa. Hualtachixtoc ipan noventana.
- 10 “Huan yaya techilhui: ‘Ximijquehua ta cati nimitzicnelía, ta cati tipilyeyectzi huan ma tiyaca. 11 Ya panoc tonali quema tahuel taseseya huan ayecmo taquiyahui. 12 Nochi xochime ya cahuanij ipan cuatitamit. Ya ajsic tonali para huicase pilpalomajtzitzi. Quena, ya ajsic tonali para tatotoniyas. 13 Nopa higuera cuahuit ya quipixtoc itajca huan nopa xocomeca milme ya xochiyohuaj huan ajhuiyac mijyotíaj. Huajca ximijquehua ta cati nimitzicnelía, ta cati tahuel tiyejyectzi huan ma tiyaca.’”
- 14 † “Tinopaloma cati timotatía ipan nopa teme cati huejhueyi huan campa mahuilili. Techcahuili ma niquita moxayac. Techcahuili ma nijcaqui motoscac cati eltoc quej nijcuasquía se tatzopelcayot. Quena, tahuel techpactía nijcaquis motoscac huan niquitas moxayac.”

§ 1:15 Nopa telpocat quijjtohua: * 1:16 Nopa ichpocat quijjtohua: † 1:16 Nopa telpocat quijjtohua: * 2:1 Nopa ichpocat quijjtohua: † 2:2 Nopa telpocat quijjtohua: ‡ 2:3 Nopa ichpocat quijjtohua: § 2:7 Nopa telpocat quincamanalhuía nopa sihuame ipan ichaj: * 2:8 Nopa ichpocat huica para cati quijjtantoc: † 2:14 Nopa telpocat quijjtohua:

- 15 † “Xiquinmasiltica nopa cayochime cati pisiltziti cati quisosolohuaj tox-
ocomecamil pampa toxocomecamil ya xochiyohua. Ma amo teno
quisosolo totaicnelijcayo se ica seycoc.”
- 16 § “Nijmati yaya cati niquicnelía noaxca huan na niaxca ya. Yaya
quinmocuitahuía iborregojhua campa onca miyac xochit ten lirios.
17 Xihuala ta cati nimitzicnelía huan ximocahua hasta tanesis huan
mijcuenis tzintayahuilot, xihuala ta cati nimitzicnelía. Xiitzto quej se
oquich masat o se oquich cuachacaltzi cati motalohua ipan tepeme.”

3

- 1 * “Ica tayohua nijtemo ipan notapech yaya cati techicnelía. Nijtemo, pero
amo nijpanti. 2 Huajca nijmatqui nimijquejqui huan nijtemojtiyajqui
ipan nochi nopa altepet. Nijtemo yaya cati niquicnelía ipan nochi
calles huan campa tianquis. Nijtemo, pero amo nijpanti. 3 Huajca
niquntatzintoquili nopa tacame cati quimocuitahuíaj nopa altepet
huan niquinilhui: ‘¿Amo anquitztoque yaya cati niquicnelía?’ 4 Huan
sanoc nipanotoya campa nopa tamocuitahuiani huan nijpanti yaya
cati niquicnelía. Huajca niqitzqui ipan imax huan ayecmo nijmala-
cani huan nijcalaquifo ipan ichaj nonana.
- 5 “Ansihuame ten altepet Jerusalén, xiquintestigojquetzaca nopa masame
huan cuachacaltziti cati nemij cuatita para amo anquicochsolose
nopa telpocat cati niquicnelía. Xijcahuaca ma cochi hasta quema yaya
quinequis isas.”

Nopa expa huicat

- 6 † “¿Ajquiya ne cati huala ipan huactoc tali cati nejnentihuala tatajco
pociti cati moquetzoc? Motalilijtoc miyac tamanti taajhuiyacayot
ihuaya mirra huan copali. 7 Xiquitaca. Ya ne icuacarro Salomón.
Quiyahualojtihualahui 60 soldados cati más yolchicahuaje huan
más tapejpenilme ten tali Israel. 8 Quinmachtijtoque nochi injuanti
cati quihualicaj machetas quenicatza tatehuise. Sesen ten injuanti
motzinguetchilpitoc imacheta para momanahuise ica tayohua quema
mahuilili.
- 9 “Nopa Tanahuatijquet Salomón mochihuili nopa cuacarro ica nopa cuame
cati más cuajcualtzi ten tali Líbano. 10 Nopa taquetzalme ipan
icuacarro quichijchijqui ten plata huan icuitapantetonijca ica oro.
Campa mosehuía quitali yoyomit cati moradojtic. Huan nochi calijtic
ipan nopa cuacarro quiyiya se yoyomit tahuel yejectzi cati nopa
sihuame ten altepet Jerusalén quichihuili que ica inintaicnelijcayo.”
- 11 † “Ansihuame ten altepet Jerusalén §, xipanquisaca huan xijtachilijqui ne
Tanahuatijquet Salomón. Yaya quihuica ipan itzonteco nopa corona
cati inana quichijchihuili para ma quitequihuis ipan ni tonali quema
mosihuajtis. Ni tonali elis quema más quiyias paquilisti.”

† 2:15 Nopa telpocat huan nopa ichpocat huicaj: § 2:16 Nopa ichpocat quijitohua: * 3:1 Nopa
ichpocat temiqui para quitemohua nopa telpocat: † 3:6 Sihame ten Jerusalén huicaj: † 3:11
Nopa ichpocat quijitohua: § 3:11 3:11 O Sion.

4

- 1* “Nelia tiyejyectzi ta cati nimitzicnelía. Tahuel tiyejyectzi. Moixteyolhua nesi quej ome palomajme cati motatijtoque iica moixtzajca. Motzoncal eltoc yejyectzi quej chivojme cati mahuiltíaj ipan nopa cuatitamit ten tali Galaad. 2 Motancochhua eltoc nelchiphahuac quej iniijhuiyo nopa borregoyme cati yancuic quinxintoque huan quipajpactoque. Eltoc senquisa cuali huan ajsitoc. Sesen ten inijuanti quipiya iixnamic huan yon se amo mopantía iseltitzi. 3 Motenxipal nelía chichiltic quej icpat cati chichiltic. Mocamac tahuel yejyectzi. Mocampa nesi quej quitajcotejque se granada huan quitaliytoque ipan sesen lado para motatise iica moixtzajca. 4 Moquechcuayo eltoc quej nopa huejcapantic torre cati nelía cuali quichijchijqui David para ipan quiajocuisse tatehuijca teposme. Nozona quicuapilojtoque mil tepostzajcayome cati iniaxca itequipanojcahua cati más mosemacayayaj tatehuise. 5 Nopa ome mochichijhua eltoc quej ome cuachacaltzitzi cati cuateme cati tacuajtinemij campá onca nopa xochit lirio. 6 Na niixtejcos ipan nopa tepet campá onca mirra huan nopa tachiquili campá onca copali hasta tanesis cuali huan ya panotos tzintayohuilot. 7 Nelia tiyejyectzi, ta cati nimitzicnelía. Tiyejyectzi ten moicxihua hasta ipan motzonteco. Huan amo onca yon se tamanti cati amo cuali ipan ta.
- 8 “Xihuala nohuaya, tinosihua. Xihuala nohuaya ten tali Líbano. Xitemo ten nopa tepet Amana huan tepet Senir huan tepet Hermón. Xitemo ten nopa cuatitamit campá onca leones huan leopardos. Xihuala nohuaya. 9 Techichtequili noyolo, tinosihua, ta cati nimitzicnelía. Techichtequili san ica motachiyalis huan ica nopa costi cati timotalilijtoc moquechta. 10 Nelia techpactía motaicnelijcayo, tinosihua, ta cati nimitzicnelía. Nelia tzopelic motaicnelijcayo hasta quipano nopa xocomecat iayo. Motaajhuiyacayo noja más ajhuiyac que nochi sequinoc taajhuiyacayome. 11 Tinosihua, motenxipal nelía tzopelic quej necti. Huan tatzinta ten monenepil quisa necti huan lechi. Huan moyoyo mijyotía ajhuiyac quej nopa cuatitamit huan tiocuame ten tali Líbano.
- 12 “Tinosihua, tiitztoc quej se xochimili cati cuali tatzacti san para na. Tiitztoc quej se ameli cati cuali tzactoc huan quej se ameyalot cati san na noaxca. 13 Tiitztoc quej se yejyectzi xochimili campá chamani nopa granada huan temaca itajca cati ajhuiyac para ma nijcua. Tiitztoc quej se cuamili ten alheña huan sequinoc tatzopelcayot cati más ajhuiyac, 14 quej nardo huan azafrán, ohuat cati mijyotía ajhuiyac huan canela, huan nochi tamanti cuame cati temaca copali, mirra huan áloes. Nochi cati más ajhuiyac nijpantía ipan ta. 15 Ta tiitztoc quej se ameli campá meya tahuel miyac at para quiatequis nopa xochimili. Tiitztoc quej se ameli cati temaca at cati cuali huan quimaca yancuic nemilisti cati quíis. Techseseltía quej nopa at ten nopa pilatajtzitzi cati meya ipan tali Líbano.”
- 16 † “Ma pehua ajaca nopa ajacat cati huala ica ajco huan nopa ajacat cati huala ica tatzinta. Ma tailpitzaquij ipan noxochimil. Ma quichihuaca ma momoyahua iajhuiyaca notacayo para quinotzas yaya cati níquicnelía ma huala huan ma quicua cati más tzopelic ten itajca.”

* 4:1 Nopa telpocat quijtohua: † 4:16 Nopa ichpocat quijtohua:

5

1 * “Nica niitztoc. Nosihua, na niquita motacayo quej noxochimil cati san para na. Ta cati más niquicnelía huan nijpatiita. Se paquilista para nijcuis notaajhuiyacayo ten mirra huan ten nochi sequinoc taajhuiyacayome cati nica nijpantía. Nijyecohua nopa necti ten na nosayolhua, huan niqui nopa xocomecat iayo huan nopa lechi cati noaxca.” †
 “Antohuampoyohua cati anmoicnelíaj, xitacuaca huan xiquica nochi cati anquinequij se ica seyoc.”

Nopa najpa huicat

- 2 † “Se tayohua na nicochtoya, pero noyolo amo cochtoya. Huan nijcochcajqui para yaya cati niquicnelía techtazjtziliyaya ipan caltemit, huan techilhuiyaya: ‘Techcaltapo, ta cati nimitzicnelía, tinopaloma cati más yejyectzi, ta cati más niquicnelía huan nijpatiita. Notzonteco huan notzonal xolontoc ica nopa ajhuechti cati huetzi tayohua.’”
- 3 “Pero na niquilhui: ‘Na ya nimoquixtili noyoyo, huajca monequis sempa nimoyoyontis. Ya nimoicxipajpajqui, huajca ¿tijniqui ma niquinsiquihui sempa?’”
- 4 “Pero yaya cati techicnelía quicalaquí imax para caltapos huan ya nopa tahuel techyoltacani. ⁵ Huajca nimoquetzqui para nijcaltapos yaya cati niquicnelía. Huan ipan nomax huan nomacpilhua chipiniyaya taajhuiyacayot ten mirra hasta motalo ipan nopa teposti cati ica tijtzacuaj nopa caltemit. ⁶ Huan quema nijcaltapo cati niquicnelía, yaya ayecmo itztoya. Huajca nijmachili para nimiquis. Teipa nijtemo, pero amo nijpanti. Nijtzajtzi, pero amo technanquili. ⁷ Huan techpantijque nopa tacame cati quimocuitahuíaj nopa altepet huan techhuitejque huan techcocojque pampa amo quimachilijque para ten ninemiyaya tayohua. Huan nopa tacame cati quimocuitahuiyayaj nopa caltemit techcuilijque noyoyo cati ica nimopictoya.”
- 8 § “Ansihuame ten altepet Jerusalén, sinta anquipantíaj yaya cati niquicnelía, xiquilhuiaca para nijmati nimococohua pampa tahuel nijnequi itaicnelil.”
- 9 * “Ta tishuat cati más tinelyejyectzi ten nochi sihuame, techilhui ¿taya más quiyiya yaya cati tiquicnelía cati sequinoc amo quiyiyaj para techilhuiya ya ni?”
- 10 † “Cati niquicnelía yaya chipactic huan san yaya cati más yejyectzi ten majtacti mil tacame. ¹¹ Itzonteco nesi quej senquisa oro, huan itzonal ijilacatztic huan yayahuic quej iijhuiyo nopa cacalot. ¹² Iixteyol nesi quej ome pilpalomajtzitzi cati moquetztoque iteno se hueyat huan maltíaj ipan lechi. Tahuel yejyectzi iixteyol quej piltetzitzi cati quinquetztoque ipan itencuayo. ¹³ Icampa eltoque quej xochime cati ajhuiyac mijyotíaj, huan itenxipal nesi quej se xochit lirio campa quisa taajhuiyacayot ten mirra. ¹⁴ Iajcolhua eltoque quej teposti ten oro cati quiyejyecchijtoque ica piltetzitzi cati itoca topacio. Huan itacayo eltoc quej marfil cati quicualchijchijtoque ica zafiros. ¹⁵ Imetz eltoc quej nopa taquetzali ten mármol cati moquetztoc ipan senquisa

* 5:1 Nopa telpocat quijtohua: † 5:1 Nopa sihuame ten Jerusalén quijtohua: † 5:2 Nopa ichpocat huica ten itemic: § 5:8 Nopa ichpocat quinilhuiya nopa sihuame: * 5:9 Sihuame ten Jerusalén quijtohua: † 5:10 Nopa ichpocat quihueyitalía ihuehue, quijtohua:

oro. Quipiya fuerza quej nopa cuatitamit ten tali Libano. Amo aqui seyoc quej ya. ¹⁶ Nelía tzopelic icamac. Nochi ten ya senquisu cuali. Ansihuame ten altepet Jerusalén, quej nopa yaya cati niquicnelía. Yaya cati nohuampo.”

6

- ¹ * “Ta cati más tiyejyetzzi ten nochi sihuame, ¿canque yajqui yaya cati tiquicnelía? ¿Canque mocajqui yaya cati tiquicnelía? Tojuanti tiyase mohuaya tijtemotij.”
- ² † “Yaya cati niquicnelía yajtoc campa ixochimil campa nochi taajhuiyaxtoc. Yajqui quintamacato iborregojhua huan quitequito xochit. ³ Na niiaxca ya cati techicnelía huan yaya noaxca na. Yaya quintamaca iborregojhua campa nopa xochimili ten lirios.”

Nopa macuilpa huicat

- ⁴ ‡ “Ta cati nimitzicnelía, nelía tiyejyetzzi quej nopa altepet Tirsa. Quena, tinelyejyetzzi quej altepet Jerusalén. Tahuel techyolttilana para ma nimitzsentachilijto quej soldados cati yahuij para tatehuitij. ⁵ Ayecmo techtachili pampa moixteyolhua techtantoque. Motzoncal eltoc quej nopa chivojme cati mahuiltiaj ipan nopa cuatitamit ten tali Galaad. ⁶ Motancochhua nochi eltoc cuali. Sesen motancoch quiapiya ihuical huan yon se amo polihui. Eltoque chipahuaque quej nopa borregojme cati ya maltijtoque huan yahuij para quinximase. ⁷ Mocampa chichiltic quej se granada cati motajcoitztoc. Quena, nelía ajhuiyac mocampa cati tijtatijtoc itantita moixtajca. ⁸ Masque niहुielisquía nijtapejpenisquía ten 60 sihua tanahuatiani, o 80 noompa sihuajhua o tahuel miyac ichpocame, ⁹ san ta nimitztapejpenisquía, ta tinopaloma. San ta tiyojtzzi ten nochi sihuame nijnequisquía, ta cati tieltoc quej tiyojtzzi cone monana. Quema mitzifaque nopa ichpocame ten altepet Jerusalén san mitztachilijque. Nojquiya nopa sihua tanahuatiani huan nopa ompa sihuame mitzhueyimatque. Quijtojque: ¹⁰ ‘¿Ajquiya ne cati monextía quej nopa tonati cati pejtoc quisa ica ijnaloc? Nelía yejyetzzi quej nopa metzti cati noja monextía ipan ilhuicac. Teipa hualpetani quej itaahuil ne tonati. Tahuel techyolttilana para ma nijsentachilijto quej soldados cati yahuij para tatehuitij.’
- ¹¹ “Na niyahqui campa nopa cuamili ten nueces para niquitas sinta taxoxohuiya ipan nopa tamayamit. Nijnejqui niquinitas sinta chamaniyayaj nopa xocomeca milme huan sinta ya quistoc ixochiyo nopa granadas. ¹² Teipa ayecmo nijmatqui taya panoc huan nimomacac cuenta para niyahuiyaya ipan notepos cahuyo cati nomasehualhua quipixtoyaj para niinintanahuatijca.”
- ¹³ § “Ximocuepa, tisulamita ichpocat, ximocuepa. Ximocuepa pampa ti-nequij timitzitase.”
- * “¿Para ten anquinequij anquuitase ne sulamita?”
- † “Tijnequij tiquitase quenicatza yejyetzzi mijtotía.”

* **6:1** Sihuame ten Jerusalén quiijtohuaj: † **6:2** Nopa ichpocat huica: ‡ **6:4** Nopa telpocat quiijtohua: § **6:13** Sihuame ten Jerusalén quiijtohuaj: * **6:13** Nopa telpocat quiijtohua: † **6:13** Sihuame ten Jerusalén quiijtohuaj:

7

- 1 * “Nelía yejyectzi nesi moicxihua ipan motecac, ta tiichpocat cati nimitzicnelía. Quinamiqui tiitztos ipan ichaj se tanahuatijquet. Motzinquechta nesi quej se tacualnescayot cati quichijchijtoque ica cati senquisa oro. Nesi quej quicualtali se cati nelía quimati. ² Moxic nesi quej se taza cati nochipa temitoc ica xocomecat iayo. Moijti nesi quej se tamontomit ten trigo cati quiyahualojtoque ica xochit. ³ Mochichijhua nesij quej ome cuachalcaltziti cati cuateme. ⁴ Moquechcuayo nesi quej se torre huejcapantic ten marfil. Moixteyolhua cahuanij quej nopa ome piletas cati eltoc ipan altepet Hesbón, nechca nopa caltemit Bat Rabim. Moyacatzol eltoc quej nopa torre huejcapantic ipan tali Líbano cati tachixtoc ica campa altepet Damasco. ⁵ Motzonteco nesi yejyectzi quej nopa tepet Carmelo. Motzoncal nesi quej icpat cati chichiltic. Ica motzoncal cati tijxinepalojtoc techmasilitjtoc na, nitanahuatijquet.
- 6 “Ta cati nimitzicnelía, nelía tiyejyectzi huan nelía techpactía motaicnelil. ⁷ Timoquetza yejyectzi quej se epachi cuahuit huan mochichijhua eltoque quej ome quechti ten itajca xocomecat. ⁸ Na nimoillhui: ‘Nitejcos ipan ne apachij cuahuit huan nimoaxcatis itajca. Huajca mochichijhua elise quej itajca apachi cuahuit huan moijyoyo mijyotis quej manzanas cati ajhuiyac. ⁹ Mocamac nelía tzopelic quej nopa xocomecat iayo cati más ajhuiyac cati hualtemo ipan motenxipal huan motancoch.’ ”
- 10 † “Na niiaxca yaya cati techicnelía, huan yaya tahuel quinequi itztos nohuaya. ¹¹ Xihuala nohuaya ta cati nimitzicnelía. Ma tiyaca campa cuatitamit. Ma titonilitij campa onca miyac xochit ten alheña. ¹² Ica ijnaloc tiyase campa toxocomeca milhua para tiquitase sinta ya quipixtoc itajca. Tiquitase sinta ya xochiyohua nopa granada. Huan nopona na nimitzmacas notaicnelijcayo. ¹³ Nopa mandrágoras mijyotía yejyectzi huan techfuerzajmacase. Huelis tijchihuase ten hueli tamanti cati tijnequise pampa miyac tamanti cuatacti mochiya. Huelis tijchihuase cati yancuic o cati ya ipa tijchijtoque. Nochi cati cuali nicajoctoc para ta cati nimitzicnelía.”

8

- 1 * “Nelía cuali sinta tieltosquía tinoicni cati quichichitjtosquía nonana. Quej nopa, quema nimitzpantisquía campa hueli nimitztzoponisquía huan amo aqui techpinajtisquía. ² Huan na nimitzhuicasquía huan nimitzcalaquisquía ichaj nonana huan ta techmachtisquía. Huan na nimitzmacasquía nopa xocomecat iayo cati quipiya taajhuiyacayot. Huan nimitzmacasquía iayo nogranadas cati más tzopelic. ³ Huan mo-maarraves tijtalisquía tatzinta ten notzonteco huan ica momanejmat technajnahuasquía.”
- 4 † “Ansihuame ten altepet Jerusalén, nimechilhuía amo xijcochsoloca cati niqicnelía. Xijcahuaca ma cochi hasta quema yaya quinequis isas.”

Nopa chicusasempa huicat

- 5 † “¿Ajquiya ne cati motatzquillijtihuala iaajcoltipa yaya cati quicicnelía?”

* 7:1 Nopa telpocat quijjtohua: † 7:10 Nopa ichpocat quijjtohua: * 8:1 Nopa ichpocat quijjtohua: † 8:4 Nopa ichpocat quincamanalhuía nopa sihuame: † 8:5 Nopa sihuame ten Jerusalén quijjtohuaj:

- § “Na nimitzixiti itzala se manzana cuahuit campa monana quipixqui tacua-
 jcualocayot quema mitztacilti. ⁶ Techtatzquilti ipan moyolo quej
 se sello huan techhuica nochipa ipan moajcol quej se tanextilijcayot
 para techicnelía. Pampa nelía chichahuac nopa taicnelijcayot cati
 nijmachilía huan eltoc quej miquilisti pampa amo hueli nijzacuilis.
 Tahuel nimitznequi huan nopa taicnelijcayot eltoc quej se tit cati
 cahuani ixochiyo pampa tahuel tata. ⁷ Masque quitequilisquíaj tahuel
 miyac at amo huelis quisehuisse nopa tilelemecti ten taicnelijcayot.
 Yon amo huelis quisehuisse masque hualasquíaj ipani nochi pilata-
 jtzitzi. Huan sinta se tacat quinequisquía quicohuas nopa taicnelij-
 cayot cati nijmachilía huan techtaxtahuisquía ica nochi iricojyo cati
 quipiya, amo quiaxilisqueía huan san nijpinahualtisquía.”
- 8 * “Tijpiyaj se toshua icni cati noja pisiltzi. Ayemo chichihualquisa.
 Huajca ¿taya tijchihuase sinta hualase quijjtaniquij? ⁹ Sinta yaya
 momocuitahuía ica telpocame, huajca tijfuerzajmacase. Sinta yaya
 quinselía telpocame, tijyahualose ica huapalme ten tiocuahuit para
 amo huelis quiajsise.”
- 10 † “Na nimomocuitahuijtoc huan ama nijpiya nochichijhua quej torres cati
 huejcapantique. Huan yeca yaya cati techicnelía paqui ica na.
- 11 “Salomón, tijpixqui se xocomeca mili ipan Baal Hamón cati tiquincahuili
 sequinoc ma quimocuitahuica ica se taxtahuili. Huan quema ajsiyaya
 tonali para quitequise itajca, sesen ten injuanti mitzmacaj mil plata
 tomi. ¹² Pero ica nopa xocomeca mili cati noaxca na, nica eltoc ni mil
 plata tomi cati nijpiya, nochi eltoc para ta Salomón. Huan nopa 200
 plata tomi ya niqunmacac nopa tacame cati quimocuitahuiyayaj.”
- 13 ‡ “Ta cati nimitzicnelía, ta cati tiitztoc ipan xocomeca milme, nochi
 mohuampoyohua quipajcacaquij motoscac pampa tahuel yejectzi.
 Huan na nojquiya techcahuili ma nijcaqui.”
- 14 § “Ximoisihuilti ta cati nimitzicnelía. Ximotalojtihuala quej se hueyi
 masat o quej se cuachacaltzi ipan nopa cuatitamit cati temitoc ica
 taajhuiyacayot.”

§ 8:5 Nopa ichpocat quijjtohua: * 8:8 Iicnihua nopa ichpocat quijjtohua: † 8:10 Nopa ichpocat
 quijjtohua: ‡ 8:13 Nopa telpocat quijjtohua: § 8:14 Nopa ichpocat quijjtohua:

Isaías

Judá ehuaní quitahuelcajque TOTECO

¹ Ya ni nopa miyac tanextili cati na, nilsaías niicone Amoz, niqitac ipan nopa tonali quema Uzías, Jotam, Acáz huan Ezequías tanahuatiyayaj ipan tali Judá. Ipan ni tanextili TOTECO technextili taya panos teipa ica tali Judá huan altepet Jerusalén.

² Nochi cati itztoque ipan ilhuicacti huan ipan taltipacti, xijtacaquilica cati quiihtohua TOTECO: “Eltoc quej na niquiniscalti coneme huan niquin-mocuitahui ica miyac taicnelijcayot hasta motacachijque, pero ama ini-juanti ayecmo quitacaquilíaj cati niquinahuatía. ³ Nopa burrojme huan nopa torojme cati tapoxoníaj quinixmatij inintecohua huan quintascamatilíaj por inintaicnelijcayo. Pero annoisraelita masehualhua amo antechixmatij, yon amo annotascamatij por noteicnelijcayo. Amojuanti amo teno anquimachilíaj.”

⁴ Ay antajtacolhijca masehualme, temachti hualas tatzacuiliti amopani. Anquimamajtinemij miyac tajtacoli hasta annesij anhuijcoltique pampa nelía etic. Anquichihuaaj cati amo cuali quej quichijque amohuejcapan tatahua. Inijuanti mohuejcatalijque ten TOTECO, huan ayecmo quitacaquil-ijtoque ininDios cati Tatzejtzeloltic cati itztoc inihuaya. Iniselti quitahuelca-jqe itapalehuil.

⁵ Annomasehualhua, ¿amo anquiselijtoque tatzacuiliti cati nelhuejhueyi? Huajca ¿para ten antechchihualtíaj noja ma nimechtatzacuiliti talojtzitzi? ¿Anquisenhuiquilise amo antechtacaquilise para nochipa? Ten amotzonteco hasta ipan amoicxihua nochi amotacayo cocojtoc. Nochi amojuanti ayecmo anquipiyaj chicahualisti ipan amoyolo huan hasta sequij ten amojuanti ya anquinequij anmiquise. ⁶ Por amotajtacolhua nochi amotacayohua cocojtoque. Amotzonteco semajtoc huan palantoc. Amo aquí amechpajtilijtoc, yon amo aquí quipictoc campa ancócojtoque, yon amo aquí quipoltojtoc aceite para quiquixtis nopa tacuajcualoli. ⁷ Amotal quitamisosolojtoque huan amoaltepehua quintamitatijtoque. Huan quema antachixtoyaj, nopa sequinoc tali ehuaní quisosolojque amotal. Quiichtequij huan quicujaj nochi cati onca ipan amomilhua. Nochi mocajtoc senquisa tasosolijtoc huan tatzizcatoc. ⁸ Huan anJerusalén ehuaní*, anitztoque nozona amoselti, yon amo anhuelij anmomanahuíaj. Amechtahuelcajtoque quej quitahuelc-ahuaaj ipilxajcaltzi se tamocuitahuíjquet ipan se xocomeca mili quema tami pixquisti. Yon quentzi huelis anmomanahuise. Anitztoque quej se altepet cati quiyahualojtoque icualancaitacahua.

⁹ Sinta TOTECO Cati Quinyacana Iilhuicac Ejcahua Ma Tatanitij amo techmaquixtijtosquía se quesqui ten tojuanti, techtzontamiltijtosquíaj quej quichijqui ica nopa masehualme huejcajquiya ipan altepeme Sodoma huan Gomorra.

TOTECO quinequi masehualme ma itztoca tapajpactique iixpa

¹⁰ Xijtacaquilica icamanal TOTECO, antayacanani ten tali Israel. Eltoc quej antayacanaj ipan altepeme Sodoma huan Gomorra pampa san se fiero amomasehualhua. Xijtacaquilica taya Toteco Dios amechnahuatía

* **1:8** 1:8 Zion eltoc seyoc itoca Jerusalén. “Iichpochahua Zion” camanalti ten cati ehuaní ipan nopa altepet.

xijchihuaca. ¹¹ Quej ni quijtohua TOTECO: “Ya techyolajsic ica nochi nopa tacajcahualisti cati talojtztizi techhualiquilíaj. Amo nijnequi tacajcahualisti ten oquich borregoyme, yon amo nijnequi ininchiyajca tapiyalme cati tomahuaque. Amo nijnequi niqitas inieso nopa torojme, pilborregoijtztizi huan oquich chivojme. ¹² ¿Para ten anquihualicaj nochi ya ni noixpa quema anhualahuij antechhueyichihuaquij? ¿Ajquiya amechtajtani xiquinnejnemiltiquij tapiyalme para ma moquejquetzaquij notamapa? ¹³ Amo ipati nopa ofrendas cati antechhualiquilíaj pampa amo anmotequipachohuaj por amotajtacolhua. Ayecmo más techhualiquilica. Ayecmo nijnequi niqitas nopa copali cati antechtencahuilíaj. Ayecmo hueli niquijyohuía nochi nopa ilhuime cati anquichihuaj quema pehua yancuic metzi o ipan nopa tonali quema anmosiyajquetzaj huan ipan nopa tonali quema anmosahuaj huan anmosentilíaj san sejco. Tahuel antechixpanoj ica nopa ilhuime cati anquichihuaj. ¹⁴ Ayecmo nijnequi niqitas nopa ilhuime cati anquichihuaj quema yancuic metzi huan ipan tonali cati tatzejtzeltic. Eltoc quej se tamamali cati tahuel techsiyahuiltijtoc huan ayecmo hueli niquijyohuía. ¹⁵ Huajca quema anquitananase amomax para anmotatajtise, na amo nimechtachilis, yon amo nimechtacaquillis. Huan masque anmotatajtise miyac huelta, na amo nimechtacaquillis pampa amomax eltoc espoltic ica inieso masehualme cati anquinmictijque masque amo teno quichijtoyaj.

¹⁶ “Huajca ximotapajpacchihuaca. Ayecmo xijchihuaca yon se tamanti cati amo cuali noixpa na. Nochi tamanti cati amo cuali anquichihuayayaj xijcahuaca. ¹⁷ Ximomachtica anquichihuase cati cuali. Xitequitica para nochi ma quiselica cati xitahuac. Xiquinpalehuica nopa masehualme cati sequinoc quintajyohuiltíaj. Xiquinmacaca cati xitahuac coneme cati icnotzitzitzi huan xiquinmanahuica cahual sihuame.”

¹⁸ TOTECO quijtohua: “Xihualaca nimantzi huan ma tijsencahuaca tocuentas. Masque tahuel miyac amotajtacolhua hasta nesij chichiltic, na nijchihuas ma eli chipahuac quej nexti. Masque fiero motajtacolhua quej se yoyomit espoltic, na nimechchihuas quej iniijhuiyo borregoyme cati nelpano chipahuac. ¹⁹ Sinta anmotemacase para anquinelto case cati nimechilhuía, anquicuase nopa cuali tamanti cati nijchihuas amomila ma temaca. ²⁰ Pero sinta amojuanti amo anquinequise antechtepanitase huan anquisenhuiquillise amo anquichihuase cati nimechnahuatía, anhuetzise inimaco amocualancaitacahua huan amechhuejhuelose ica inimacheta.” Quej nopa niamoTECO niquijtohua.

TOTECO quipajpacas Jerusalén

²¹ Amojuanti anJerusalén ehuaní, aneliyayaj nelía antemachme, pero ama anmocuetoque quej se momecatijca sihuat cati quicajtoc ihuehue. Anquicajtejtoque TOTECO para anquintoquilíaj sequinoc teteyome cati amo teno ininpati. Achtohui Jerusalén eltoya se altepet campa itztoyaj masehualme cati quichihuayayaj nochi cati xitahuac, pero ama temitoc nopa altepet ica temictiani. ²² Achtohui altepet Jerusalén eliyaya quej nopa tepos plata cati senquisa cuali, pero ama amojuanti cati nozona anehuani, anitztoque quej itefejtzo nopa teposti. Achtohui aneliyayaj quej nopa xocomecat iayo cati senquisa cuali, pero ama anitztoque quej nopa se xocomecat iayo cati tamaneloli ica at. ²³ Nochi amotayacanhua mosisinijtoque huan mochijtoque inihuampoyohua tachtequini. Quinpactía quiselise tomi ten fiero tacame para ma amo quichihuaca cati xitahuac. Amo quinpalehuíaj coneme cati icnotzitzitzi, yon amo quinpalehuíaj cahual sihuame. ²⁴ Yeca

TOTECO quintatzacuultis cati mohueyimatij

⁶ TOTECO, techtahuelcajtoc timoisraelita masehualhua cati tiiixhuihua Jacob. Total temitoc ica tamanti cati quichihuaq masehualme cati ehuaní campa hualquisa tonati. Ama israelítame tenahualhuáj huan tetonalitaj quej quichihuaq nopa filisteos. Huan quichihuaq camanal sencahuali ica masehualme ten sequinoc talme.

⁷ Nojquiya total tiisraelítame temitoc ica miyac tomi ten plata huan oro huan tamanti cati pajpatiyo. Quinpiya tahuel miyac cahuayojme huan carrojme para quintequihuse ípan tatehuillisti. ⁸ Huan ni tali temitoc ica teteyome. Ni masehualme motancuaquetzaj huan quinhueyichihuaq tamanti cati injuanti quinmachijchijtoque. ⁹ Nochi masehualme moechcapanojtoque huan mopinahualtijtoque huan quinhueyichijtoque teteyome, huajca amo xiquintapojpolhui, TOTECO.

¹⁰ Huajca anisraelítame, xicholoca hasta campa onca tepexit huan ximotatica ten TOTECO cati tahuel temajmatis quema hualas ica nochi itatanex huan ihueyitilis. ¹¹ Pampa TOTECO quinechcapantalis nochi masehualme cati mohueyimatij huan nochi amojuanti amechpinahualtis. Ípan nopa tonali, san TOTECO anquihueyitalise. ¹² Pampa ípan nopa tonali, TOTECO Dios Cati Quinyacana Iilhuicac Ejcahua Ma Tatanitij hualas para quintatzacuultis nochi cati mohueyimatij huan cati motepanitaj huan cati mohueyichihuaq. Huan TOTECO quinechcapantalis hasta talchi. ¹³ Quintzontequis nochi nopa huejcapantique tiocuame ten tali Libano huan nopa ahua cuame cati tejtetique ten tali Basán. ¹⁴ Quinechcapantalis nochi tepeme huejcapantique huan nochi tachiquilme. ¹⁵ Quinechcapantalis nochi calme cati huejcapantique para ípan tamocuitahuise huan quisosolos nochi tepamit cati tahuel tilahuac. ¹⁶ Quena, quinsosolos nopa huejhuéyi barcos ten altepet Tarsis cati quihualicaj tamanti para tanamacase. Huan quinsosolos nopa barcos cati tahuel yejyetzitzi cati eltoque atenti. ¹⁷ Inihueyitilis nochi masehualme, tamis. Huan nochi cati mohueyimatiyayaj huetzise hasta talchi. Huan san yaya TOTECO quihueyitalise israelítame ípan nopa tonali. ¹⁸ Huan nochi teteyome huan taixcopincayome quintamiixpolihultis.

¹⁹ TOTECO motananas ten isiya para quiojolinis ni taltipacti huan quintatzacuultis nochi cati itztoque ípani. Huan nochi icualancaitacahua cholose ica majmaji para motatitij tetzala huan ípan ostot, pampa tahuel quiimacase TOTECO ica ihueyitilis huan itatanex. ²⁰ Huan ípan nopa tonali, nochi masehualme quintepehuase ininteteyohua ten oro huan plata cati injuanti quinmachijchijque para quinhueyichihuse. Quinmajcahuase campa itztoque quimichime huan tzotzome. ²¹ Huan quema hualas para quiojolinis ni taltipacti, masehualme motalose hasta campa onca tepexit para motatise ípan ostot huan tetzala iixpa TOTECO pampa tahuel quinmajmatis quema yaya hualas ica nochi itatanex huan ihueyitilis. ²² Huajca ayecmo ximotemachica ípan se masehuali pampa yaya amo teno ipati. Inemilis talochpolihuis quej se ijyoyot.

3

TOTECO quintatzacuultis Jerusalén huan Judá ehuaní

¹ Xijcaquica, TOTECO Dios Cati Quinyacana Iilhuicac Ejcahua Ma Tatanitij quiijcuenis ten altepet Jerusalén huan tali Judá, nochi tapalehuili huan nochi tamanti cati ica mopanolítaj; quinquixtilis inintacualis huan nochi at.

² Quintzontamiltis nochi soldados hasta cati más mosemacá ipan tatehuilisti. Quinquixtilis nochi jueces, tajtolpanextiani, tetonalitani huan huehue tacame. ³ Quintzontamiltis nopa tayacanani ten soldados, tapijpiyani, tetalnamiciani huan cati quimatij quisencahuaj ten hueli tequit huan quinnictis nochi tenahualhuani. ⁴ Huan quintalis telpocame para ma tayacanaca ipan tali Israel huan coneme para ma tanahuatica. ⁵ Huan elis más fiero que achtohuiya quema amo aquí tanahuatiyaya. Pampa tacame motehuise inihuaya sequinoc tacame cati itztoque inincalnehca. Telpocame motananase huan quintehuse huehuentzitzí. Huan nochi masehualme cati ayecmo aquí quinequiyaya inihuaya mohuicas, san quinhuetzquilise nopa masehualme cati quinamiquiyayaj quintepanitase.

⁶ Huan ipan nopa tonali masehualme ipan san se familia quitapejpenise se ten ininteixmatachua huan quihilhuise: “Ta tijpiya se tamanti para timoquentis, huajca xieli titotanuhatijca huan xijsencahua nochi ni tamanti cati tami sosolijtoque.”

⁷ Pero nopa masehuali quinanquilis huan quihilhuise: “¡Amo! Amo hueli nimechpalehuis pampa ipan nochaj amo nijpiya más tacualisti, yon amo nijpiya más yoyomit, huajca amo techtalica quej niamotanahuatijca.”

⁸ Quena, altepet Jerusalén huan tali Judá mocahuas tamitasosolijtoc pampa nochi nopa israelitame ica inincamac san quijtohuaj tamanti cati amo cuali ten TOTECO. Huan san quichihuaj tamanti cati TOTECO amo quinequi quitas. San quinequij quicualancamacase TOTECO cati más quiyiya itequiticayo. ⁹ Hasta inixayac quintelhuía huan quipanextía para quihuicaj tajtacoli. Tajtacolchihuaj miyacapa huan motepanitaj ica cati quichihuaj quej altepet Sodoma ehuan quichihuayayaj. ¡Amo pinahuaj yon se pilquentzi! Nella teicneltique pampa hualas se hueyi tatzacuiliti ininpani cati injuanti iniselti motemohuilijtoque.

¹⁰ Pero nochi elis cuali para se masehuali cati xitahuac. Xiquilhuica: “Por nochi motequi cati cuali, tijselis se yejectzi taxtahuili.” ¹¹ Pero nopa masehuali cati fiero inemilis xiquilhuica: “Titeicnelti pampa amo teno quisa cuali para ta. TOTECO mitztatzacuilitis chichahuac. Motaxtahuil elis quej cati quinamiqui tijselis ica nochi cati fiero cati tijchijtoc.”

¹² Teicneltique nomasehualhua pampa cati quintaijyohuiltiaj itztoque quej coneme cati huihuitique. Huan sihuame mochijtoque inintanahuatijchahua. Nella teicneltique nomasehualhua pampa inintayacancahua quincajcayahuaj, quinyacanaj ipan se ojti cati nesi yejectzi, pero amo cuali.

¹³ TOTECO ya ijcatoc para quintatelhuís imasehualhua. Ya mocualtali-jtoc para quintajtolsencahuas. ¹⁴ TOTECO achtohui quintatzacuilitis nopa huehue tacame huan tayacanani. Quintatelhuís miyacapa huan quihilhuís: “Amojuanti anquisosolijtoque noisraelita masehualhua cati eliyayaj quej noxocomecamil. Huan eltoc quej anquitamicuajtoque cati eliyaya noaxca. Anmoaxcatijtoque nopa trigo cati eliyaya iniaxca teicneltzitzí. Temitoc amochajchaj ica miyac tamanti cati anquinichtequilijtoque.

¹⁵ “¿Ajquiya amechmacac caquihuili para anquintaijyohuiltise nomasehualhua quej anquinchihuaj?” Quej nopa niquijtohua niDIOS Cati Niquinyacana Noilhuicac Ejchahua Ma Tatanitij.

Inintatzacuiliti sihuame ipan altepet Jerusalén

¹⁶ Nojquiya TOTECO quijtohua: “Niquintatzacuilitis nopa sihuame ten altepet Jerusalén pampa tahuel mohueyimatij huan nejnemij ajcotachix-tiyahuj ipan nochi lados. Iniixteyolhua quichijtoque nelyejectzitzí para

quinyoltilanase tacame. Huan quema nejnemij quichihuaq quej mijtoti-jtiahuij pampa quinequij para ma caquisti cati ica moyectalijtoque iniicxiquechta. ¹⁷ Huajca na niquinmacas nopa sihuame ten Jerusalén se sahua cocolisti ipan inintzonteco. Huan quinchihuas ma mocahuaca tzonpepestique para ma pinahuaca iniixpa nochi masehualme.”

¹⁸ Ipan nopa tonali TOTECO quinquixtilis nochi iniyejyejca cati tzilintinemi quema nejnemij. Quinquixtilis nochi ipan iniicxiquechta, huan cati ica quitacanaltíaj inintzonal huan nopa tepos tajco metzti cati ica moyejyectalíaj. ¹⁹ Quinquixtilis nochi quehcosti, maquehcosti huan nopa yoyomit para ica quitzacuaj inixayac. ²⁰ Huajca tamis nochi tzontzajcayot, tzinquechilpicayot, taajhuiyacayot, pijpiloli huan piltepos mecatzitzti cati motalilíaj ipan iniicxiquechta. ²¹ Nojquiya nopa anillos para inimacpil huan iniyacatzol. ²² Nojquiya tamis nochi yejyectzitzti yoyomit cati moquentíaj quema ilhuichihuaq huan nopa yoyomit cati moquentíaj quema itztoque ipan inincaliytic. Nojquiya tamis iniyoyo cati san ica mopiquij huan nopa piltzoncachuiltzitzti huan nopa pilcuetax bolsajtzitzti cati ipan quihuicaq inintomi o tamantzitzti cati ica moyejyectalíaj. ²³ Nojquiya tamis nopa tescat cati ipan motachilíaj, huan inintatzintayoyo cati tachijchihuali ica lino cati nelía canactzi, huan nopa yejyectzi yoyomit cati ica motzontzacuaj huan nopa taquemit para ica mopiquise. ²⁴ Ama ayecmo mijyotise quej se taajhuiyacayot cati neltzopelic. Ama quiyase tapotexcayot. Huan quej inintzinquechilpica quitequihuse se ten hueli lazo. Inintzonteco cati quiyectaliyaya ica inintzonal ama pepestic. Moquentise yoyomit cati fiero huan ayecmo aqui yejyectzitzti. Nochi iniyejyejca tamis huan itztose ipan se hueyi pinahualisti. ²⁵ Nopa tacame cati nozona ehuani cati más motemacayayaj miquise ica macheta ipan tatehuilisti. ²⁶ Huan nochi cati ehuani ipan nopa altepet quinchoquilié huan nopa altepet mocahuas iseltitzti. Elis quej se sihuat cati xolot mosehujtoc talchi huan choca iseltitzti.

4

¹ Ipan nopa tonali san mocahuase se quesqui tacame cati noja yoltoque, huan yeca chicome sihuame motehuse por se tacat huan quilhuse: “Tijnequij timonamictise mohuaya. Tojuanti tijtemose totacualis huan timochuise toyoyo. San techcahuili timonamictise mohuaya para amo techpinajtise sequinoc pampa amo tijpiyaj tohuehue.”

Tanextili ten cati cuali panos teipa

² Ipan nopa tonali, nopa ichamanca cati TOTECO quichihuas ma onca elis hueyi huan tahuel yejyectzi. Huan nopa israelitame cati noja mocahuase tahuel paquise ica nochi nopa pixquisti huan cuatacti cati temacas nopa tali. ³ Huan nochi nopa masehualme cati ijcuilijtoc inintoca pampa mocajque yoltoque ipan altepet Jerusalén, quintocaxtise “tatzejtzeloltique para TOTECO”. ⁴ Huan TOTECO quintajtolsencahuas huan quintatzacuultis nopa masehualme ten Jerusalén. Huan quinapajpacas ten nochi nopa esti cati quitoyajtoque huan nochi tamanti cati amo cuali quichijtoque. ⁵ Huan TOTECO iseltitzti quiecahuilis altepet Jerusalén ipan sesen cali huan ipan nochi lugares campa mosentilíaj masehualme. Tonaya quitalis se mixti yayahuic quej pocti para quinecahuilis huan ica tayohua quitalis se mixti quej se tit cati taahuis ipan nochi nopa altepet. Huan huejcapa iixpa nochi itatanex elis quej se lona cati quiecahuilis. ⁶ Huan ni mixti quiecahuilis nopa masehualme ten nopa tatotonilot huan quinpalehuis quema huetzis at huan quema taajacas chicahuac.

5

Huicalot ten ixocomecamil TOTECO

¹ Na nihuicas para nohuampo cati más niquicnelía se huicat ten ixocomecamil.

Nohuampo quipiya se xocomeca mili ipan se taixtejcolis, campa cuali taeli.

² Achtohui tapoxoni huan quiniycueni nochi teme.

Quintapejpeni sequij xocomeca cuame cati más cuajcualtzitzi huan yejyetzitzi,

huan ya nopa quintojqui.

Nojquiya quichijqui se tepamit yahualtic.

Teipa quichijchijqui se cali huejcapantic para nopa tamocuitahuijquet.

Huan quicoyoni se lugar campa quipatzcas itajca nopa xocomeca mili.

Huan ica nochi iyolo quichixqui ma temaca itajca cati cuajcuali para quitequuis.

Pero nopa xocomeca cuame temacaque inintajca cati tahuel xococ,

huan amo tzopelic quej ya quinequiyaya.

³ Huajca ama anmasehualme ten altepet Jerusalén huan tali Judá, xihualaca huan xitatajtolsencahuaca ica na huan noxocomecamil para tiquitase ajquiya quipiya tajtacoli.

⁴ ¿Huelis monequiyaya nijchihuilijtosquía noxocomecamil seyoc tamanti huan amo nijchijqui?

Na nijchiyayaya ma temacas itajca cati tzojtzopelic.

¿Para ten huajca techmacac itajca cati xococ?

⁵ Ama nimechilhuis taya nijchihuilis noxocomecamil:

Nijsosolos nochi nopa tepamit cati quiyahualohua.

Nijcahuas para nopa huacaxme huan borregojme ma quitamicuaca huan ma ipan moquejquetzaca.

⁶ Nijchihuas noxocomecamil ma eli quej huactoc tali.

Amo nijtzontequilis imacuayohua cati amo taqui, yon amo nijtamehuilis.

San nijcahuilis ma moscalti huitzti huan sahua mecat para ma quitzontamilti.

Nijnahuatis ne mixti para ma amo quihualica at nopona.

⁷ Nopa xocomeca mili quinnextia israelitame,

huan inijuanti iaxcahua TOTECO Cati Quinyacana Iilhuicac Ejcahua Ma Tatanitij.

Tali Judá huan altepet Jerusalén eltoc nopa yejyetzitzi talme cati iaxca TOTECO.

Huan nopa masehualme eltoc nopa xocomeca tzonti cati nelía cuajcualtzi.

Quichiyayaya nopa masehualme ten nopa talme ma quichihuaca cati xitahuac huan cuali,

pero quicajqui tzajtziyayaj chichahuac nopa masehualme cati quintaityohuiltiyayaj.

Huan quinitac para senquisa temictiyayaj.

Temachtí TOTECO quinsosolos Israelitame cati amo cuajcualme

⁸ Nelía teicneltique nopa masehualme cati quicohuaj miyac calme huan miyac talme hasta quinequij moaxcatise nochi para sequinoc ma ayecmo quipantica campa itztose. Temachtí hualas tatzacuilti ininpani. Quinequij itztose iniselti tatajco ten ni tali. ⁹ Pero TOTECO Cati Quinyacana Iilhuicac Ejcahua Ma Tatanitij quijtojtoc para panos se tamanti cati tahuel temajmati ica inijuanti. Nijcajqui quema yaya quijto: “Miyac calme cati huejhueyi huan más yejyetzitzi mocahuase sosoltique pampa miquise cati eliyaya

inixca. ¹⁰ Masque quichihuase se xomeca mili ipan eyi hectáreas tali, amo quiquixtise se lata fen iayo. Huan sinta quitocase 10 coxtali ten trigo, amo quiqixcase yon se coxtali.”

¹¹ Teicneltique nopa masehualme cati mijquehuaj cualca para yase quite-motij taili huan quisenhuiquilise moiuintise hasta tayohua. Temachtí hualas tatzacuiliti ininpani. ¹² Ipan nopa huejhueyi ilhuit cati injuanti quichihua, onca miyac xomecat iayo cati nelcococ. Onca tatzotzonalí cati yejectzi quema quitzotzonaj nopa arpas, salterios, panderos huan flautas. Pero injuanti amo moilhuáj ten TOTECO huan ten nochi tamanti cati yaya quichijoc. Huan yon quentzi amo quiitaj cati yaya ama quichihua. ¹³ Yeca temachtí hualase tacame huan quinhucase nomasehualhua ipan sequinoc talme pampa injuanti ayecmo techixmatij. Miquise ica mayanti nochi nopa huejhueyi masehualme campa nomasehualhua cati injuanti taniel quinhueyitepanitayayaj huan cati san masehualtitzitzi miquise ica amiquisti.

¹⁴ Yeca micta quihueyilia icamac quej se hueyi tecuajquet para quintolos nochi nopa masehualme ten Jerusalén cati más tapijpixtoque. Huan inihuaya quintolos nochi itayacancahua. Nozona nojquiya yase nochi nopa masehualme cati quinactia ilhuichihua huan moiuintiaj. ¹⁵ Ipan nopa tonali nochi masehualme cati motepanitayayaj huetzise hasta talchi. Huan teipa cati mohueymatij, TOTECO quinechcapantalis. Huan teipa cati taniel mohueymatiyayaj ayecmo ajcotachixtinemise. ¹⁶ San quihueyitalise TOTECO Cati Quinyacana ilhuicac Ejcahua Ma Tatanitij pampa quuitase yaya tetajtolsencahuas xitahuac. Nochi tamanti cati quichihua TOTECO quinextis para yaya Tatzejtelolitic huan quichihua cati senquisu cuali. ¹⁷ Huan ipan nopa tonali borregojme huan chivojme tacuajtinemise ipan nopa altepeme cati mocahuaj sosololitic huan campa eltoya ininchajchaj tominpiyani.

¹⁸ Teicneltique nopa masehualme cati amo quinequij quicahuase inintajtacolhua pampa temachtí hualas tatzacuiliti ininpani. Quitlantiyahuij inintajtacolhua quej quihuicasquáj se carro iniica ica lazo. ¹⁹ Injuanti quijtohuaj: “Ma moisihuilti Dios, ma quichihua nimantzi cati quijtojoc quichihuas para tiquitase. Ma monechahui huan ma techtatzacuiliti nimantzi toDios cati Tatzejtelolitic cati itzoc tohuaya tiisraelitame. Quej nopa nelia tiquixmatise.”

²⁰ Teicneltique nopa masehualme cati quihuaaj cuali cati amo cuali, huan cati amo cuali quihuaaj cuali. Tzintayohuilot quihuaaj taahuili, huan taahuili quihuaaj tzintayohuilot. Cati tzopelic quihuaaj chichic, huan cati chichic quihuaaj tzopelic. Temachtí hualas tatzacuiliti ininpani.

²¹ Teicneltique nopa masehualme cati moilhuáj neltanamiqij huan moilhuáj quimachilaj nochi tamanti. Temachtí hualas tatzacuiliti ininpani. ²² Teicneltique nopa masehualme cati taniel yajatij taise miyac huan quijtohuaj amo aguí huili quintanis. Quijtohuaj quipiyaj miyac chichahualisti para quimanelose huan quise ten huili taili. Temachtí hualas tatzacuiliti ininpani. ²³ Por se taxtahuili injuanti quitocaxtiaj xitahuac nopa cati fiero quichihua se tacat cati amo cuali para ma amo quiseli tatzacuiliti. Huan injuanti quicahuaj majcajtoc cati taixpanotoc huan quitatzacuilitiaj cati amo teno quichijoc. ²⁴ Pero injuanti tamiixpolihuse quej tasoli huan sacat cati tamitata ica tit. Itzose quej se tzonti cati palani inelhuayohua, huan ixochiyohua mosemanase quej taltepecti. Quej nopa panos pampa injuanti quitahuelcajtoque itanahuatilhua TOTECO, Yaya Cati Quinyacana ilhuicac Ejcahua Ma Tatanitij. Amo quitacaquilijque icamanal nopa Dios

cati Tatzejtzeloctic cati Toteco tiisraelitame. ²⁵ Yeca TOTECO tahuel cualani ica imasehualhua huan ya quitanantoc imax para quintatzacuiltis. Nochi tachiquilme huihuipicase huan inintacayohua nopa mijcatzitzi mocahuase tepejtoque ipan calles quej tasoli. Pero ica nochi ya nopa, noja amo tamis icualancayo huan yeca quejpa quixitajtos imax para más quintatzacuiltis.

²⁶ Huan TOTECO quitananas se bandera para ma quiitaca nopa masehualme ten nopa talme cati mopantíaj huejca para quinmatiltis ma hualaca. Huan ica se tapitzali quinnotzas cati itztoque campa hueli hasta campa ontami taltipacti. Huan injuanti moisihiultise para hualase ipan altepet Jerusalén. ²⁷ Amo aquí ten injuanti siyahuis, yon motepotanis, yon cochmiquis, yon cochhuetzise. Quihuicase inintzinquenchilpica cuali ilpitoc huan motalilise tecacti cati amo nimantzi cotoni. ²⁸ Quihualicase cuataminti cati tahuel tatequi iyecapa huan inincuahuitol cati cuali quitetzilojtoque. Huan nopa cahuayoyme iniisti eltose tetique hasta quiyoliltise timoyot quema motalojtihualase. Huan quema motalojtihualase inincarrojhua, iniruedas caquistis quej se ajcomalacat. ²⁹ Nopa masehualme tahuejchi-huase quej nanalca se tecuajquet. Huan quej se tecuajquet huitoni ipan cati quitzquia huan quihuica huejca para quicuas, injuanti quinitzquise nomasehualhua huan quinhuicase ipan seyoc tali campa amo aquí huelis quinmanahuis. ³⁰ Huan ipan nopa tonali nopa masehualme cati hualase tahuejchijtihualase campa nomasehualhua quej mocojcoxonijtihuala nopa hueyi at quema mosisinía. Huan ni tali temis ica se mixti cati tahuel yaya huic huan nopa israelitame quipiyase miyac tequipacholi. Huan nopa mixti quitamitzacuas nopa taahulme ten ilhuicac.

6

TOTECO quinotza Isaías ma eli se tajtolpanextijquet

¹ Ipan nopa xihuit quema mijqui Tanahuatijquet Uzías, na niquitac TOTECO mosehujtoya ipan isiya yejyectzi nelhuejcapa nepa ilhuicac huan quipixtoya tahuel huehueyac iyoyo quej moquentía se tanahuatijquet huan iteno iyoyo huehueyac quitemitijtoya nopa tiopamit. ² Huan itzompac itztoyaj ilhuicac ejcahua TOTECO cati inintoca serafines huan sese ten injuanti quipiyayaya chicuase ieltapal. Ica ome inieltapal quitzacuayayaj inixayac, ica nopa seyoc ome quitzacuayayaj iniicxi huan ica seyoc ome pataniyayaj. ³ Huan nochi injuanti san sejco huicayayaj ni huicat: “Tatzejtzeloctic, Tatzejtzeloctic, Tatzejtzeloctic, TOTECO Cati Quinyacana Ilhuicac Ejcahua Ma Tatanitij. Nochi taltipacti temitoc ica ihueyitilis.”

⁴ Inintoscac cati huicayayaj elqui nelchicahuac hasta quichijqui ma mormolini nopa tiopamit hasta itzinpehualtil. Huan nopa tiopamit temic ica pocti.

⁵ Huajca na niquijto: “Nelia niteicneltzi pampa na se nitajtacolchijca tacat. Amo tapajpactic nopa camanali cati niquijtohua huan nütztoc tatajco ten masehualme cati nojquiya fiero camanaltij. Temachtli hualas tatzacuilti ipan na pampa ama niquitztoc nopa Tanahuatijquet, yaya TOTECO Cati Quinyacana Ilhuicac Ejcahua Ma Tatanitij.”

⁶ Huajca se ten nopa serafines patanqui huan yajqui campa nopa taixpamit. Huan ica se teposti quiquixti se ticoli xahuantoc huan teipa hualajqui campa na. ⁷ Huan ica nopa ticoli xahuantoc quitoxonqui notenxipal huan techilhui: “Xiquita, ni ticoli quitoxontoc motenxipal huan ayecmo tijhuica tajtacoli. Huan TOTECO mitzfaqojpolhuijtoc nochi motajtacolhua.”

⁸ Teipa nijcajqui itoscac TOTECO cati quuijtohuayaya: “¿Ajquiya nijtitanis quej se tayolmelajquet campa nomasehualhua? ¿Ajquiya yas por tojuanti?”

Huan na niquijto: “Na niyas. Na techtitani.”

⁹ Huajca yaya techilhui: “¡Cualtitoc! Xiya ta huan quej ni xiquinilhuiti nomasehualhua: ‘Anquicaquise nocamanal, pero amo anquinequise anquimachilise. Anquiiitase quema nijchihuas fanextili, pero amo anquinequise anquimachilise taya quuijtosnequi.’ ¹⁰ Huajca xiquinchihua ni masehualme yoltetique. Xijzacua ininacas huan iniixteyol para ma amo tachiyaca, yon ma amo tacaquica, yon ma amo quimachilica, yon ma amo mocuepaca ica na para ma niqinchicahua.”

¹¹ Huajca na niquijto: “TOTECO Dios, ¿hasta quesqui tonali quej nopa nijchihuas?”

Huan yaya techilhui: “Tijchihuas hasta quitamisosolose inialtepehua huan ayecmo mocahuas yon se masehuali nopona. Tijchihuas hasta tatzitzi-cas ipan nochí calme huan nochí nopa tali mocahuas tasosololi. ¹² Tijchihuas hasta nimoTECO niquintamititanis nochí nomasehualhua ipan sequinoc talme huan tali Israel mocahuas senquisa quej huactoc tali. ¹³ Huan sinta ipan 100 tacame, noja mocahuase yoltoque se 10 ipan nopa tali; nopa masehualme sempa hualase quintzontamiltiquij. Israelitame elis quej icuatzonzo se ahua cuahuit cati quitzontectoque, pero elis se cuatzomit ica ixinacho cati tatzejzeloltic huan sempa chamanis.”

7

Icamanal TOTECO para Acaz

¹ Quema quihuicayaya tequit ipan tali Judá nopa Tanahuatijquet Acaz cati elqui icone Jotam huan iixhui Uzías, hualajque tanahuatiani para quitehuise. Hualajque Tanahuatijquet Rezín ten tali Siria huan Tanahuatijquet Peka, icone Remalías ten tali Israel huan pejque quitehuíaj altepet Jerusalén, pero amo huelque quitanque. ² Huan nopa camanal ajjsico hasta campa ichaj nopa tanahuatijquet cati iixhui David huan quinilhuicoj: “Nopa Siria ehuaní mosejcotilijtoque inihuaya nopa tali Israel * ehuaní para techtehuise.” Quej nopa quinilhuicoj. Huan quema nopa tanahuatijquet huan nopa masehualme quicajque ya nopa, pejque huihuipicaj ica majmajti quej mojmoliníaj nopa cuame quema taajaca. ³ Huajca TOTECO techilhui na nilsaías: “Xiya ihuaya mocone Sear Jasub para xijnamiquiti Tanahuatijquet Acaz. Yaya tijpantiti campa ontami nopa ajoiti cati quisa ten huejcapa campa meya nopa at. Itztoz nechca nopa ojti cati yahui hasta imila nopa Tachicuenijquet. ⁴ Huan quej ni xiquilhui Tanahuatijquet Acaz: ‘Amo ximocueso, yon amo xiquimacasi icualancayo Rezín huan nopa Siria ehuaní, yon amo xiquimacasi Peka, icone Remalías pampa amo tatanise. Inijuanti itztoque quej ticuame cati san popocatoque. ⁵ Quena, ni tanahuatiani ten tali Siria huan Israel quisencajtoque san sejco para mitztehuise. ⁶ Quiijtohuaj para moaxcatise tali Judá huan amechtemajmatise nochí cati anitztoque nopona. Teipa moillhuíaj tatehuijtiyase hasta ajstitij ipan altepet Jerusalén huan nopona quitalise icone Tabeel quej inintanahuatijca.

⁷ “Pero na niamoTECO niquijtohua para amo quema panos. Amo hueli quichihuase cati inijuanti moilhuijtoque quichihuase, yon amo tatanise.

⁸ Pampa Tanahuatijquet Rezín san tanahuatía ipan altepet Damasco huan nopa tali Siria. Amo quema quinnahuatis sequinoc talme. Huan nopa tali

* 7:2 7:2 Tali Israel, cati mopantiyaya ica norte, nojquiya quitocaxtiyayaj Efraín.

Israel † san huejcahuas 65 xihuit. Teipa quitamisosolose huan ayecmo elis se tali ica se itanahuatijca. ⁹ Altepet Samaria san quinahuatía tali Israel, huan Peka, icone Remalías, san quinahuatía altepet Samaria. Techneltoquilica cati nimechilhúa para amo tatanise sinta anquinequij ma nimechmanahui. Monequi anquinelto case cati niquijtohua.’ ”

Nopa tanextili para tacatis Emanuel

¹⁰ Nojquiya TOTECO quititanqui ni seyoc camanali para Isaías ma quiihui Tanahuatijquet Acaz huan Isaías quiihui: ¹¹ “Acaz, TOTECO moDios quijtohua para xijtajtani ma mitzchihuili se tanextili para tijmatis temachti panos quej mitzilhuijtoc. Xijtajtani ten hueli tanextili cati tijnequi ma panos tatzinta ipan ni taltipacti o hasta huejcapa ipan ilhuicati.”

¹² Pero Acaz quinanquili: “¡Amo! Amo teno nitajtanis huan amo nijyejyecos TOTECO.”

¹³ Huajca Isaías quijto: “Xijtacaquili ta cati tiiixhui David. Tahuel techyolaxitia. Pero amo san na cati techyolaxitia, nojquiya tijyolaxitia TOTECO Dios. ¹⁴ Yeca ama TOTECO iseltitzi amechmacas se tanextili. Quena, se ichpocat cati ama quixmajtoc se tacat, conecuis huan quitacatiltis se oquichpil huan quitocaxtis Emanuel. (Emanuel quinequi quijtos: TOTECO Itztoc Tohuaya.) ¹⁵ Yaya quicuas lechi ololtic huan sayol necti huan moscaltis ipan tonali ten taohuijcyot hasta quimatis quihuejcamajcahuas cati amo cuali huan quichihuas cati cuali. ¹⁶ Huan quema nopa conet noja ayemo quimati quenicatza quihuejcamajcahuas cati amo cuali huan quitapejpenis cati cuali, nopa ome tanahuatiani cati tahuel tiquinimacasi, ya mictose.

¹⁷ “TOTECO quihualicas tonali ten taohuijcyot ipan ta, ipan momasehualhua huan ipan mofamilia. Amo oncatoc tonali quej nopa ohui hasta quema tali Israel moiycatali ten tali Judá. Hualas amopani nopa tanahuatijquet ten tali Asiria ica nochi isoldados.” ¹⁸ Ipan nopa tonali, TOTECO quichihuas para ma hualaca quej sayolime nopa soldados ten campa ontami nopa hueyat ipan tali Egipto. Huan quinnotzas ma hualaca nopa soldados ten tali Asiria cati mosisínaj quej cuajneeme. ¹⁹ Huan nopa soldados senyajtoc hualase hasta quitemitise nochi tamayamit ipan huactoc tali, huan nochi ostot ipan tet, huan ipan cuatitamit campa onca huitzti huan ipan nopa tali cati tahuel taeliltia. ²⁰ Ipan nopa tonali TOTECO quintequihuis nopa asirios cati anquintaxtahuijtoque para amechmanahuse para amechtatzacuiltise. Inijuantí elise quej se cuchillo cati amechhuatanise ipan amotzonteco, ipan amoicxihua huan ipan amotentzo pampa amechquixtilise nochi cati anquipiyaj. Amechquixtilise amotal huan cati anquitocque huan amomasehualhua.

²¹ Ipan nopa tonali, sinta se tacat san mocahuas ica se huacax huan ome chivojme para quintomahuas, ²² temacase tahuel miyac lechi. Yeca nochi nopa masehualme cati noja mocahuase ipan nopa tali mopanoltise ica lechi cati ololtic huan sayol necti quej quichihua j teicneltizti. ²³ Huan nojquiya ipan nopa tonali, san moscaltis huitzti huan sahua mecat campa achtohuiya oncayaya tahuel miyac xocomeca tzonti cati yejyetzitzi huan ipati eliyaya tahuel miyac tomi.

²⁴ Nochi tali Judá san quipiyas huitzti huan sahua mecat. Elis se tali campa tapehuani calaquise para tapehuase ica cuahuitoli huan cuataminti.

²⁵ Huan ayecmo aqui huelis yas ipan nopa tepeme campa achtohuiya tapoxoniayaj ica azadón pampa quimacasisse nopa huitzti huan sahua mecat cati oncas nopona. San huacaxme, borregojme huan chivojme tacuase nopona.

† 7:8 7:8 Quemantica quitocaxtia tali Israel, Efraín.

8

Icone Isaías elis nopa tanextili

¹ TOTECO sempa nechcamanalhui huan techilhui: “Xijcui se hueyi huapali huan ipan xitajcuilo para titeyolmelahuas itacatilis nopa conet cati nimitzmacas. Xitajcuilo ica huejhueyi tajcuiloli. Itoca elis Maher Salal Hasbaz. (Maher Salal Hasbaz quinequi quijtos Nimantzi Xiquintamitachtequilica Huan Xiquintzontamiltica.) Quej nopa elis itoca nopa conet pampa quej nopa, nopa tanahuatijquet cati hualas quinnahuatis isoldados ma quichi-huaca.”

² Nijnotzqui Urías, nopa totajtzi, huan Zacarías, icone Jeberequías, cati nochi quinixmatiyayaj para tacame cati itztoyaj xitahuac. Niquinnotzqui quej testigos para quiitase niqijcuilohuayaya nopa camanali ten itoca nocone huan taya itoca quinextis para teipa panos. Huan injuanti hualaque huan quiitague niqijcuilo nochi quema nosihua noja ayemo quine-miltiyaya nopa conet.

³ Huajca na nicochqui ihuaya nosihua cati nojquiya eliyaya se sihua tajtolpanextijquet. Huan yaya conecuic huan quitacatilti se piloquichpiltzi. Huan TOTECO techilhui: “Xijtocaxtali ‘Maher Salal Hasbaz’.” ⁴ Nopa tocayot teyolmelahua para quema nopa conet noja ayemo huelis quijtos ‘papá’ o ‘mamá’, nopa tanahuatijquet ten tali Asiria calaquis ipan tali Damasco huan Samaria huan quinichtequilis nochi iniricojoy.”

Nopa tanahuatijquet ten Asiria huala

⁵ Teipa TOTECO sempa nechcamanalhui huan techilhui: ⁶ “Pampa nopa masehualme amo paquij ica nopa yejyectzi at cati niquinmacac ipan Siloé campa oncac tasehuilisti, huan tahuel quinequij quitajtanise tapalehuili nopa tanahuatijquet Rezin huan Peka cati icone Remalías, ⁷ huajca ama niininTeco niquintaijyohuiltis quej elisquía ica nopa at cati tahuel mosisinía ten nopa hueyat Éufrates. Elis quej quema tahuel tatemí huan nopa at quitemitía nochi aojme huan pano campa hueli. Quena, quej at cati tahuel mosisinijtihuala, hualas nopa tanahuatijquet ten tali Asiria ihuaya isoldados cati tahuel quiipiyaj chichahualisti huan nochi quintzontamiltise.

⁸ Huan nopa tanahuatijquet huan isoldados hualase quej miyac at huan ajsis ipan ni masehualme ten tali Judá. Huan nica ajsis nopa at hasta ininquechta. Huan nopa soldados mosemanase campa hueli quej at cati mosemana huan quitzacuas nochi. O nopa at elis quej se hueyi cuatojti cati quipatahua ieltapal ipan nochi. Huan quitamisosolose Judá, notal na niEmanuel.

⁹ “Huan nopa tali Asiria ehuaní quiijtose: ‘Xijtacaquilica nochi amojuanti ipan talme cati anmopantíaj huejca. Ximosentilica para antatehuisse pero san tapic pampa antzontamise. Ximocualtica para anmomanahuise, pero san tapic pampa amechtamihuejhuelose. Ximosemacaca ipan nopa tatehuilisti, pero san tapic pampa amechtamiixpolihuiltise. ¹⁰ Xiquinsentilica cati amechtalanamictise quenicatza monequi antatehuisse, pero san tapic pampa ininconsejo tamosolihuis. Xiquixquetzaca nopa tonali quema antechtandise, pero amo huelis anquichihuase pampa Dios itztoc tohuaya.’”

San TOTECO ma tijhueyimatica

¹¹ TOTECO nechcamanalhui chichahuac huan techilhui: “Amo xijtoquilica iniojhui Judá ehuaní ipan yon se tamanti. ¹² Amo ximosentilica inihuaya quema quisencahuaj quenicatza tacajcayahuase. Yon amo xiquimacasic nopa tamanti cati injuanti quiimacasij. ¹³ San techimacasic na,

niamoTECO Cati Niqunyacana Noilhucac Ejcahua Ma Tatanitij. San na techitaca para nitatzejtzeltic huan san noixpa na ximomajmatica. ¹⁴ Na nielis quej se cali campa anitztose temachti. Pero para tali Israel huan tali Judá ehuan nielis quej se tet cati ipan motepotamise o quej se hueyi tet cati ipan huetzise. Huan para nopa masehualme ten altepet Jerusalén nielis quej se laso o quej se matat cati temasiltía. ¹⁵ Miyac ten injuanti motepotamise, huan huetzise huan miquise. Sequinoc momasiltise huan mocahuase ilpitoque.”

Amo xiquintemoca cati quinnoyotzaj mijcatzitzí

¹⁶ Huajca amojuanti annomomachtijcahua, xijtzacuaca cuali nochí nopa camanali cati TOTECO techmacatoc huan niqijcuilojtoc, pampa elis para nopa masehualme cati itztose teipa.

¹⁷ Na nimochiyas san ipan TOTECO para techpalehuis. Masque ama moicancuetoc ica tiisraelitame * san ipan ya nimotemachis. ¹⁸ Xiquitaca, nica niitztoc na inihuaya noconehua cati TOTECO techmacatoc. Tojuanti tiitztoque quej se tanextili pampa totoca quinextía cati TOTECO quichihuas ica imasehualhua. Tiitayolmelajcahua TOTECO cati itztoc ipan tepet Sion[†], Yaya TOTECO Cati Quinyacana Iilhucac Ejcahua Ma Tatanitij. ¹⁹ Pero masehualme amechilhuse: “Xiyaca campa tetonalitani huan cati quincamanal-huaj ajacame cati ichtaca camanaltij huan camaleletij.” Huan monequi quej ni xiquinilhucac: “¿Quenicatza huelis mijcatzitzí tayolmelahuase taya panos teipa ica masehualme cati yoltoque? ¿Amo quinamiqui para masehualme ma yaca ica ininTeco Dios para quitatzintoquillise ya?”

²⁰ “Xijtachilica inincamanal nopa tetonalitani sinta eltoc san se ica no-tanahuatil huan nocamanal niamoTECO. Sinta amo eltoc san se, huajca amo ya nocamanal. Pampa inincamanal amo quipiya taahuili yon amo melahuac.”

Nopa tonali ten taohujcayot cati huala

²¹ Quinhuicase ni masehualme ipan seyoc tali huan nozona quintajyohuiltise, quinsiyahuiltise huan quinmayanaltise. Huan injuanti cualanise huan quitananase inimax ica cualanti huan quitelchihuase inintanahuatijca huan ininDios. ²² Huan masque tachiyase ica huejcapa o ipan ni taltipacti, san quipantise tajyohuillisti, tequipacholi huan tzintayohuilot. Huan teipa quinmajcahuase campa tzintayohua huan nopa tzintayohuilot quintolos.

9

Itacatilis nopa tanahuatijquet ten tasehuillisti

¹ Pero amo oncas tzintayohuilot huan tajyohuillisti para nochipa. Achtohui TOTECO Dios quiehcapanalis huan quitatzacuiltis tali Zabulón huan Neftalí, pero teipa ica miyac tonali, ni talme quipiyase tatiocihuali. Temis ica ihueyitilis TOTECO nopa tali ten hueyi at Mediterráneo ica campa oncalaqui tonati hasta nopa tali ipan seyoc lado ten nopa hueyat Jordán para campa hualquisa tonati huan hasta tali Galilea ica norte campa itztoque masehualme cati amo israelitame. ² Nopa masehualme cati nemiyayaj ipan tzintayohuilot quiitase se hueyi taahuili. Quena, se taahuili quintaahuilis nochí nopa masehualme cati ya miquisnequiyayaj. ³ Pampa ta, TOTECO,

* **8:17** 8:17 O tiixhuihua Jacob. † **8:18** 8:18 Se tepet ipan Jerusalén campa huejcaquiya mosehuiyaya icaltanahuatil Tanahuatijquet David.

tijchihuas para nochi ni tali Israel sempa ma eli hueyi huan para israelitame sempa quipiyase miyac paquilisti. Paquise quej paquij pixcani quema onca miyac pixquisti huan quej paquij soldados cati tatantoque quema moxelhuiñaj nopa tamanti cati quipantijtoque. ⁴ Pampa ta, TOTECO, tijtamiltis nochi tepos cadenas cati ica quinilpitoque momasehualhua. Huan tijpostequis nopa cuahuasasti cati ica quinmaquiliyayaj. Titatanis san se quej tiquintanqui nopa soldados ten tali Madián ica Gedeón huan se quesqui ihuampoyohua. ⁵ Ipan nopa tonali ten tasehuilisti, nochi tecacti cati nopa tatehuiani quitequihuiyayaj ipan tatehuilisti huan nochi yoyomit cati espoltic, quinmajcahuase ipan tit para ma tataka quej sacat tata ipan tit.

⁶ Pampa ya tacactoc se piloquichpiltzi para tojuanti. TOTECO techmacatoc se conef. Yaya quipiyas nochi tequiticayot para tanahuatis. Huan quitocaxtise: Tasentachiyaltijquet, Tetalnamicijquet, TOTECO Cati Más Quipiya Chicahualisti, Totata Cati Itzotc Para Nochipa, Tanahuatijquet Cati Temaca Tasehuilisti. ⁷ Itanahuatilis moscaltijtiyas hasta ajsis campa hueli. Huan campa yaya tanahuatis oncas tasehuilisti cati amo quema tamis. Yaya mosehuis ipan ihueyi siyaj ihuejcapan tata David huan tanahuatis para nochipa. Huan nochi tamanti cati mochihuas ipan itanahuatijcayo elis xitahuac huan cuali. Quej nopa elis pampa TOTECO Cati Quinyacana Iilhuicac Ejcagua Ma Tatanitij, ya motemacac para quej nopa mochihuas.

Icualancayo TOTECO ica israelitame ama

⁸ TOTECO ya quiijtojtoc taya ininpantis israelitame huan icamanal ya ajsito campa hueli ipan ni tali. ⁹ Huan quicaquise nochi israelitame ten tali Israel*, cati tahuel mohueyimatij huan quiijtohuaj: ¹⁰ “Masque quitamisolose total huan tamitepehuis nopa soqui tabiques, tojuanti sempa tijcualtalise ica tet. Masque quitamitzontequise nopa apechti ten cuahuit ten cabrahigos, tojuanti sempa tijcualtalise ica tiocuame.” ¹¹ Pero san tapic quichihuase pampa TOTECO quinmacas chicahualisti icualancaitacahua Rezín huan quinyoltacanis para ma hualaca ma quitehuiquij Rezín huan nopa tali Israel ehuan. ¹² Ica campa hualquisa tonati hualase nopa sirios huan campa oncalaqui tonati hualase nopa filisteos para quintehuisse tali Israel ehuan. Pero TOTECO noja amo moyoltalis ica ya nopa. Yaya noja quixitajtos imax para quintatzacuiltis. ¹³ Pero masque TOTECO tahuel quintatzacuiltis, israelitame cati itztoque nozona noja amo moyolcuepase ten inintajtacolhua, yon amo quitemose TOTECO Cati Quinyacana Iilhuicac Ejcagua Ma Tatanitij. ¹⁴ Yeca TOTECO san ipan se tonal quintzontamiltis nochi nopa masehualme ipan nochi tali Israel masque tominpiyani o teicneltzitzí. ¹⁵ Quintzontamiltis nopa huehue tacame cati nochi quinhueyitepanitaj huan nojquiya quintzontamiltis nopa istacatica tajtolpanextiani. ¹⁶ Pampa nopa tayacanani tahuel quincajcayajtoque huan quincuapolojtoque masehualme cati quitemohuayayaj se para quinyacanas.

¹⁷ Yeca TOTECO amo quincahuas ma choloca nopa telpocame. Yon amo quintasojtas nopa coneme cati icnotzitzí, yon cahual sihuame pampa nochi inijuanti senquisa tajtacolchihuaj. Nochi inijuanti itztoque amo cuajcualme huan fiero ininemilis. Nochi cati quisa ten inincamac israelitame nozona eltoc fiero. Pero masque quej ni TOTECO quintatzacuiltis, noja amo moyoltalis ica inijuanti huan quejpa quixitajtos imax para más quintatzacuiltis. ¹⁸ Ten fiero inijuanti quichihuaj tatas quej se tit cati quitatía huitzti huan sahua mecat. Huan nopa tit cati quisas nozona lemenis quej se tit cati

* 9:9 9:9 Efraín huan Samaria elque sequinoc itoca tali Israel ica norte quema eltoya iyoca ten tali Judá ica sur.

quitatis se hueyi cuatitamit huan se hueyi pocti tejcos nozona quej se ajcomalacat. ¹⁹ Ica icualancayo TOTECO Cati Quinyacana Iilhuicac Ejchahua Ma Tatanitij quichihua ma tzintayohuili nopa tali ica nopa pocti cati quisas ten nopa hueyi tit. Nopa tit lemenis ica nopa masehualme huan yon se ten nopa fiero masehualme amo quitasojtas iicni. ²⁰ Masehualme mayanase hasta sesen masehuali quichitequilis itacualis iicni cati itztos ica inejmat o iarraves. Pero masque quichihuas ya nopa, amo ixhuis. Yeca teipa quincuase hasta ininconehua. ²¹ Huan nopa hueyi familia ten Manasés quitehuis nopa hueyi familia ten iixhuihua Efraín. Huan iixhuihua Efraín quitehuis iixhuihua Manasés. Huan iixhuihua nopa ome huejhueyi familias ica norte quitehuis iixhuihua Judá ica sur. Pero masque TOTECO quej nopa quintatzacuultis, noja amo tamis ihueyi cualancayo. Yaya quejipa quixitajtos imax para más quintatzacuultis.

10

¹ Teicneltique nopa tequichihuani cati quitallíaj tanahuatili cati amo xitahuac huan tanahuatili cati ica tetaijyohuiltise. Temachtí hualas tatzacuultili ininpani. ² Amo quinequij quichihuase cati xitahuac ica masehualme cati teicneltizti. Quinchihuilíaj fiero nopa masehualme cati taijyohuíaj huan quintachtequilíaj cahual sihuame huan coneme cati icnotziti.

³ Huan ¿taya anquichihuase ipan nopa tonali quema TOTECO amechtatzacuultis? ¿Ajquiya anquihuisse ma amechpalehui quema nopa seyoc tali ehuaní quitamisosoloquij amotal? Huan ¿canque anquicahuase nochí cati anquipiyaj para anquimanahuise? ⁴ TOTECO amo amechpalehuis. Huajca san anmoechapanose huan amechhuicase ipan sequinoc talme. O huelis anmiquise huan amotacayohua huetzise tatajco ten nopa mijcatziti. Pero masque ya nopa, TOTECO noja ayemo moyoltalis ica amojuaní huan quejipa quixitajtos imax para amechtatzacuultis.

TOTECO quitequihuis nopa tanahuatijquet ten Asiria

⁵ Huan TOTECO quijito: “Nopa tanahuatijquet ten tali Asiria eltoc quej nocuatopil cati nijtequihuía para niquintatzacuultis cati tahuel nicualantoc inihuaya. Nochi nohueyi cualancayo nijtalijtoc imaco. ⁶ Nijtitani nopa tanahuatijquet huan insoldados ipan se tali cati quimpiyaj masehualme cati tahuel fiero inenemilis huan cati tahuel techualancamacaj. Niquintitanis ma quintachtequilica, ma quintacuijcuilica huan ininpa ma moquejquetzaca quej soquit ipan calles. ⁷ Pero nopa tanahuatijquet ten tali Asiria amo quimatis, yon amo quimachilis sinta na nijtitani. Yaya moilhuis quitehuía nomasehualhua san pampa quinequij quintanis miyac talme ipan taltipacti. ⁸ Pampa yaya quijitos: ‘Nochi notayacancahua ten nosoldados se tonali elise tanahuatiani ipan sese tali cati tijtanise. ⁹ Tijsosolose altepet Calno san se quej tijsosolojque altepet Carquemis. Huan Hamat huetziz toixpa quej huetzqui Arfad. Huan Samaria tijsosolose quej tijsosolojque Damasco. ¹⁰ Quena, ya tiqinixpolihuiltijque miyac tanahuatilme campa quimpiyayaj más miyac teteyome cati huejhueyi que altepet Jerusalén huan Samaria. ¹¹ Huajca quej tijsosolojque Samaria huan iteteyohua, quej nopa nojquiya tijtamisosolose altepet Jerusalén huan iteteyohua.’ ”

¹² Pero teipa, quema TOTECO ya quitequihuijtos nopa tanahuatijquet ten tali Asiria para quintatzacuultis altepet Jerusalén ehuaní, nojquiya quitzacuultis nopa tanahuatijquet pampa yaya tahuel mohueyimati huan

motepanita. ¹³ Nopa tanahuatijquet ten Asiria quijtojtoc: “Nochi tatehulisti nijtantoc ica nochichualis huan notalnamiqulis pampa tahuel nitalnamiqi. Ica nochichualis nijhueloni tepamit huan niquninsosolo altepeme huan niquntamitachtequili. ¹⁴ Ica nochichualis, nijcalaquijtoc nomax campa quiajtoctoyaj nochi iniricojyo nopa altepeme huan niqunichtequili nochi cati quipiyayayaj. Quej se acajya quisentilía tecsisti ipan se tepasoli, niquninsentilijtoc miyac talme para noaxcahua. Huan amo aqui huelqui quiolinía imacpil o quitapos icamac huan techtacahualtis ica cati nijchihua.”

¹⁵ Pero ¿Huelis nopa hacha moilhuis quipiya más chichualisti que nopa masehuali cati quitequihuía nopa hacha para cuatzontequis? ¿Huelis se sierra más ipati que nopa masehuali cati cuatequi? ¿Huelis nopa cuahuasasti tehuitequis iseltitzi? O ¿huelis nopa cuatopili nejnemis iseltitzi?

¹⁶ Huajca xijtacaquili, titanahuatijquet ipan Asiria. Pampa tahuel timohueyimajtoc, TOTECO Cati Quinyacana Iilhuicac Ejcahua Ma Tatanitij quititanis se hueyi cocolisti ipan nochi mosoldados cati tahuel tejtetique. Nopa cocolisti elis quej tit cati tahuel quincocos huan tahuel tiquisas. ¹⁷ TOTECO cati itztoc quej inintaahuil nopa israelitame mochihuas quej se tit. Quena, yaya cati Tatzejtzololitic huan Toteco tiisraelitame elis quej se hueyi tit cati amechtontamiltis antali Asiria ehuaní. San ipan se yohuali amechtamtatis anasirios quej huitzti huan sahua mecat nimantzi tata. ¹⁸ Nopa soldados ten tali Asiria itztoque quej se yejectzi cuatitamit, pero san tapic pampa nochi tzontamise. TOTECO quitzontamiltis inintacayo huan iníalma quej se cocoxquet cati quipiya se cocolisti cati temictia huan tantiya ichichualis masque noja yoltoc. ¹⁹ Ten nopa miyac soldados san mocahuase se quentzi, hasta se conet huelis quinpohuas.

San se quesqui masehualme tacuepilise

²⁰ Huan ipan nopa tonali, nochi cati noja mocahuase ipan tali Israel huan ipan tali Judá ayecmo motemachise ipan nopa Asiria ehuaní cati quinequiyayaj quintzontamiltise. San motemachise ipan ininTECO cati Tatzejtzololitic huan cati itztoc inihuaya. ²¹ San se pilquentzi ten injuanti noja itztose para tacuepilise ica Toteco Dios Cati Quipiya Chichualisti.

²² Huan masque nopa israelitame momiyaquiliytoque hasta itztoque quej imiyaca nopa xali iteno hueyi at, san se pilquentzi ten injuanti tacuepilise ipan inintal ipan nopa tonali. TOTECO Dios ya quisencajtoc quintzontamiltis imasehualhua quej quinamiqi por inintajtacolhua. ²³ Quena, campa hueli ipan ni tali quintamiixpolihuiltis imasehualhua pampa quej nopa quijtojtoc TOTECO Cati Quinyacana Iilhuicac Ejcahua Ma Tatanitij.

TOTECO quitatzacuiltis Asiria

²⁴ Huajca TOTECO Cati Quinyacana Iilhuicac Ejcahua Ma Tatanitij quijtohua: “Annomasehualhua cati anitztoque ipan altepet Jerusalén, amo xiquinimacasica nopa tali Asiria ehuaní quema amechtaijyohuiltíaj san se quej nopa egiptome amechchihuilijque huejcajquiya. ²⁵ Pampa ayecmo huejcahuas. Tamis nocualancayo ica amojuanti huan teipa nijtitanis nocualancayo ipan injuanti huan niquntzontamiltis.

²⁶ “Huan niamoTECO Cati Niquinyacana Noilhuicac Ejcahua Ma Tatanitij nimotananas huan niqunihuitequis ica nocuahuasas quej nijchijqui quema Gedeón quintanqui tali Madián ehuaní ipan nopa tepexit cati itoca Oreb. O nijchihuas quej nijchijqui quema nijtanangui nocuatopil para nijsejcotilis nopa hueyi at huan niqunatzonpolihuilti nopa soldados ten tali Egipto.

²⁷ Huan ipan nopa tonali niamoTECO nijtamiltis nochi nopa tequipanojcyot

ten nomasehualhua nozona ipan sequinoc talme. Niqunquixtilis nochi inintamamal cati etic, huan nijtamiltis nochi nopa tanahuatilme cati ohui cati ipan ilpitoque.”

Pehuaj tatehuaj Asiria ehuan

²⁸ ¡Xiquitaca! ¡Ya hualahuij nopa soldados ten tali Asiria! Ya itztoque ipan altepet Ajat huan ama ya ajsicoj ipan Migrón. Nojquiya ya quicualtalíaj inintepos ipan Micmas. ²⁹ Quiixcotonaj nopa atajti huan ni tayohua mosiyajquetzaj se quentzi ipan Geba. Ama ajsitij ipan altepet Ramá. Onca se hueyi majmajti ipan altepet Gabaa, ialtepe Saúl, huan nochi nopa masehualme cholohuaj para momanahuisse. ³⁰ Anmasehualme ten altepet Galim, xitzajtzica ica majmajti para nojquiya ma amechcaquica cati itztoque ipan altepet Lais. Xitzajtzica pampa monechcahuaj miyac soldados cati tahuel quiipiyaj tetili. Huan teicneltique amojuanti cati anehuan altepet Anatot, nelía fiero cati amopantis. ³¹ ¡Xiquitaca nopa masehualme ten altepet Madmena san cholojtinemij huan nopa masehualme ten altepet Gebim nojquiya mocualtalíaj para cholose! ³² Ama nopa soldados moquetztoque ipan altepet Nob. Huan nopa tanahuatijquet ten Asiria momahuihuixohua ica tepet Sion ipan Jerusalén pampa san tonilis quitzquis.

³³ Pero xiquitaca, TOTECO Cati Quinyacana ilhuicac Ejchahua Ma Tatanitij huala quitzontamiltiqui nopa tanahuatijquet quej se quitzontectihuala cuame cati más huejcapantic. TOTECO quintamiltijtihuala nochi nopa miyac soldados. Nopa tayacanani huetzise ica pinahualisti. ³⁴ TOTECO Cati Quinyacana ilhuicac Ejchahua Ma Tatanitij quintzontequis icualancaitacahua quej se hacha imaco se cuatzontejquet quintzontequi cuame ipan tali Líbano.

11

Tanahuatijquet ten Tasehuilisti elis se iixhui David

¹ Se tonali nopa tanahuatiani ten ifamilia Isaí*, nesis quej tantoc. Eltoc quej san mocahua icuatsonyo se cuahuit cati quitzontectoyaj. Pero ipan nopa cuatzomit yolqui se ichamanca cati yancuic cati quisa ten inelhuayo nopa cuatzomit cati eltoya hasta huejcajquiya. ² Huan quema tacatis nopa yancuic tanahuatijquet, Itonal TOTECO motalis ipan ya. Huan nopa Tonaltzi quimacas tamachilisti, talnamiquilisti huan quichihuas ma eli se cuali tetalnamictijquet. Por nopa Tonaltzi quiipiyas chicalhualisti huan taixmatili para tanahuatis huan tahuel quitepanitas TOTECO. ³ Ica paquilisti quinel-focas TOTECO. Amo tetajtolsencahuas san quej nesi para melahuac, pero amo melahuac. Huan amo tetajtolsencahuas quej ten hueli camanali cati nemi ipan tecamac. ⁴ Yaya quintajtolsencahuas xitahuac cati teicneltzitzi huan quinmanahuis cati sempajantzitzi ipan nopa tali. Quema tanahuatis ica icuatopil imaco, quintatzacuiltis amo cuajcualme huan quinmictis ica iijyoyo. ⁵ Pampa quema yaya tanahuatis, quichihuas senquisa cati xitahuac huan nochipa itzfos temachtí.

⁶ Ipan nopa tonali, se tepechichi itzfos ica paquilisti ica se pilborregojtzi. Se tecuajquet motecas para cochis ica se pilchivojtzi. Se becerro, se león huan se pilborregojtzi nemise san sejco huan se oquichpil quinyacantinemis para quintamacas. ⁷ Se oso huan se huacac tacuajtinemise san sejco huan ininconeua mosiyajquetzase san sejco. Huan leones quicuase sacat quej

* **11:1** 11:1 Isai elqui itata David cati elqui tanahuatijquet. Huajca nica camanalti ten ininteipa ixhuihua David huan itata Isai, cati tacajtijajque huan elque se familia ten tanahuatiani ipan Jerusalén.

huacaxme. ⁸ Pilconetzitzi cati noja chichij huelise nejnemise ica temachili tatajco ten nopa cohuame cati quiipiyaj ininpajyo. Huan se conet cati quicalaquis imax campa iosto se cohuat, amo teno ipantis. ⁹ Amo oncas yon se tamanti cati mahuilili o cati tetanahuía ipan notanahuatijcayo † cati tatzejtzeloltic, pampa quej at quitemitía nopa hueyi at, nopa tali temitos ica masehualme cati quiixmatij TOTECO.

Tacuepilise cati quinhuicatoque ipan sequinoc talmé

¹⁰ Ipan nopa tonali, nopa yancuic tanahuatijquet cati iteipa ixhui David ‡ elis quej se bandera cati quinilhuis masehualme ten nochi taltipacti canque ma mosentilica sinta quinequise ma quinmaquixti. Huan masehualme ten campa hueli talmé ipan taltipacti hualase campa ya. Huan nopa tali campa yaya itzto elis tahuel yejyetzzi. ¹¹ Huan ipan nopa tonali, TOTECO sempa quitequihuis ichicahualis huan quichihuas ma tacuepilica ipan tali Israel nopa se quesqui imasehualhua cati noja mocajtose ipan tali Asiria, Egipto, Patros, Etiopía, Elam, Babilonia huan Hamat. Huan quichihuas ma tacuepilica cati itztoque huejca ipan nopa talmé ipan hueyi at huan iteno hueyi at. ¹² Huan TOTECO quitananas se bandera para quinnextilis masehualme ten nochi talmé para quinsentilía imasehualhua cati quinquixtijtoque ipan tali Israel huan tali Judá. Huan quinsentilis masehualhua cati itztoque campa hueli ipan nochi taltipacti. ¹³ Huan nopa tali Israel § ica norte ayecmo cualanis ica tali Judá ica sur, yon tali Judá ehuan ayecmo elise icualancaitacahua tali Israel ehuan. ¹⁴ Huan san sejco quintehuse nopa filisteos campa calaqui tonati huan calaquise ipan inintal nopa masehualme campa hualquisa tonati huan quintanise. Moaxcatise nopa talmé ten Edom huan Moab huan nopa masehualme ten Amón quinneltocase.

¹⁵ Huan TOTECO quihuatzas campa nesi para inenepil nopa hueyi at ten tali Egipto para nozona huelis quiixcotonase masehualme cati tacuepilíaj. Nojquiya quitananas imax ica nopa hueyat Eufartes huan quititanis se ajacat cati chichahuac para ma quixelo ica chicome pilhueyatzitzi cati amo ohui quiixcotonase se masehualí masque san iicxipa. ¹⁶ TOTECO quichijchihuas se hueyi ojti ten tali Asiria cati ipan hualase nopa se quesqui imasehualhua cati noja mocajtose nozona san se quej quichijqui ica nopa israelitame quema quisque ten tali Egipto huejcajquiya.

12

Huicat ten tascamatili para TOTECO

¹ Hualas se tonali quema masehualme huicase:

“Nimitzhueyitalía, TOTECO.

Masque tahuel ticualaniyaya ica na, ama timoyoltalijtoc huan techtasojtatoc.

² Xiquitaca anmasehualme, Toteco Dios yaya notemaquixtijca.

Huajca nimotemachis ipan ya huan ayecmo nimajmahuis.

TOTECO itztoc cati techmaca nochicahualis huan yeca san para ya nihuicas. San yaya notemaquixtijca.

³ Quej se ajhuyiac at quinnmaca paquillisti cati amiquij,

quej nopa tipaquij tojuanti, tiimasehualhua TOTECO cati yaya techmaquixtijtoc.”

⁴ Huan ipan nopa tonali quijjtose:

† 11:9 11:9 Xiquita Ez 2:2. ‡ 11:10 11:10 O Isá cati elqui itata David. § 11:13 11:13 O nojquiya quitocaxtía Efrain.

“¡Xijtascamatica TOTECO!

¡Xijhueyitalica ya!

¡Xitepohuilica ipan nochi talme nopa huejhueyi tamanti cati yaya quichijtoc!

¡Xiteilhuica para TOTECO yaya nelía hueyi!

⁵ Xihuicaca tiohuicat para TOTECO pampa yaya quichijtoc huejhueyi tamanti.

Ma quimatica taya quichijtoc nochi ipan taltipacti.

⁶ Huan ma huicaca huan ma tzajtza ica paquillisti,

nochi cati itztoque ipan altepet Jerusalén.

Pampa tatajco ten tojuanti itztoc TOTECO cati nelía hueyi,

Quena, yaya nopa Dios cati Tatzejzeloltic huan itztoc tohuaya tiisraelitame.”

13

TOTECO teyolmelajqui para quitatzacuultis Babilonia

¹ Ya ni nopa tanextili cati TOTECO technextili na, niIsaías niicone Amoz. Huan ipan ni tanextili tayolmelajqui taya panos teipa ica altepet Babilonia:

² “Xijtalica banderas ipan se huejcapantic tepexit para ma mojmolinica quema pehuas tatehuilisti. Xiquintzajtzilica chicahuac nopa soldados. Xijtanana amomax para xiquinilhuica ma yaca quintehuitij altepet Babilonia huan quisosolose cati iniaxchahua inijuanti cati tahuel huejhueyi huan tahuel tapijpixtoque. ³ Na niDios niquintequimacatoc nosoldados cati taiyocatalilme para na para quintehuisse Babilonia ehuan. Niquinnotztoc inijuanti cati más moneltalíaj ipan tatehuilisti para ica inijuanti niquintatzacuultis ica nohueyi cualancayo. Huan inijuanti tahuel paquise quema nitatanis huan nochi techhueyitalise.” ⁴ ¡Xijcaquica! ¡Nelía tacaquisti ipan cuatitamit! Caquisti quej mosentilíaj tahuel miyac masehualme. Tahuejchijtihualahuij miyac soldados cati ehuan ipan miyac talme. TOTECO Cati Quinyacana ilhuicac Ejchahua Ma Tatanitij quinsentilía huan quincualtalía isoldados para tatehuisse. ⁵ Isoldados hualahuij ten talme cati mopantíaj huejca hasta campa ontami taltipacti. TOTECO quintequihuis nopa soldados para senquisa quisosolos altepet Babilonia pampa yaya tahuel cualantoc inihuaya cati nozona ehuan.

⁶ Xitzajtza ica majmajti pampa ya monechcahuijtoc nopa tonali ten TOTECO quema yaya tetatzacuultis. Ya ajsic tonali para TOTECO Cati Quipiya Nochi Chicahualisti tetzontamiltis. ⁷ Ayecmo quipiyase chicahualisti yon se masehuali. Inimax san cuapilijtos quej mictoque. Huan cati tahuel eliyayaj yoltetique, yolpitzahuiyase. ⁸ Nochi masehualme majmahuisse huan quinitzquis tajyohuilisti huan tacuajcualoli. Cuajcualose hasta momimilose quej se sihuat cati quitacatiltía icone. Huan quema nopa altepet noja lementos huan nopa tit noja quinixtaahuilijtos, san motachilise se ica seyoc pampa amo teno hueyhise quichihuase para momanahuise.

⁹ Xiquitaca. Monechcahuía nopa tonali ten TOTECO quema yaya tetatzacuultis. Nopa tonali elis tahuel fiero pampa TOTECO quititanis ihueyi cualancayo para quitamisosolos nopa tali huan quintzontamiltis nochi tajtacolchihuan cati itztoque nozona. ¹⁰ Tzintayohuiyas nepa ilhuicac huan ayecmo taahuise sitalime yon sequinoc tamanti nozona. Tonati tzintayohuilis nimantzi quema quisas huan nopa metzti ayecmo tatanextis.

¹¹ TOTECO quijtohua: “Nijtzacuultis ni taltipacti por nochi tamanti cati amo cuali, huan niquintatzacuultis masehualme por nochi inintajtacolhua.

Niquintzontamiltis masehualme cati mohueyimatij huan niquintamiltis cati tahuel motepanitaj huan cati quipiyaj miyac chicahualisti.

¹² “Huan quema tamis nitetatzacuiltia, san mocahuase yoltoque se quesqui masehualme. Nopa masehualme cati mocahuase elise tahuel ininipati quej nopa cuali oro ten tali Ofir. ¹³ Pampa ipan nopa tonali, nijchihuas ma mojmolini ilhuicacti, huan ni taltipacti nijchihuas ma mijcueni ten campa ipa eltoc. Quej nopa elis ipan nopa tonali quema nijnextis nocualan-cayo, na niDIOS Cati Niquinyacana Noilhuicac Ejcahua Ma Tatantij.

¹⁴ “Huan nopa masehualme cati itztose ipan altepet Babilonia ten sequinoc talme cholose quej masame hasta ajsitij ipan inintal. Huan san nentinemise campa hueli quej nopa borreojme cati amo quipiyaj inintamocuitahuijca. ¹⁵ Huan nochí cati amo cholose huan quinpanitise, quinmictise ica cuataminti. Huan cati quinitzquise, quinmictise ica macheta.

¹⁶ Iniixpa tatejtzonase talchi ininconeua para quinmictise. Nopa soldados cati hualahuij quinichiquilise nochí cati quipiyaj huan quicahuase cactoc ininchajchaj. Ten hueli quinchiuilise inisihuahjua cati nozona ehuani.

¹⁷ Pampa na niquinyoltacanis nopa soldados ten tali Media para ma quitehuitij altepet Babilonia. Huan amo aquí huélis quintzacuilis para amo quichihuase más, masque quintaxtahuisquía ica miyac tomi ten plata huan oro. ¹⁸ Nopa miyac soldados cati hualahuij amo quitasojtase yon se cati itztoc ipan altepet Babilonia. Ica inincuahuitol quinmictise nochí tellocame huan coneme huan pilconetzitzi amo quintasojtase.

¹⁹ “Huan huajca Babilonia, nopa tanahuatijcayot cati eliyaya más yejyetzti ten nochí sequinoc huan cati eliyaya quej inixochiyo nopa caldeo masehualme, mocahuas tasosololi san se quej ininipantit altepete Sodoma huan Gomorra quema niamoTeco Dios nijtitanqui tit ten ilhuicac para niquintzontamiltis. ²⁰ Huan altepet Babilonia ayecmo quema motananas. Masque panos tahuel miyac xihuit huan ipan sequinoc talme masehualme tacajtíyase, ayecmo aquí mochantisoc ipan altepet Babilonia, yon amo aquí itzto nozona. Nozona ayecmo quiqetzase iniyoyoncalhua nopa árabes cati san panotiyahuij, yon ayecmo tonilise nozona nopa masehualme cati quinmocuitahuaj borreojme. ²¹ Pero tecuanime cati itztoque ipan huactoc tali nozona calaquisse campa quisosolojtoque nopa altepet. Huan nopa calme cati masehualme quincajtehuase nozona, temise ica cuamojmojme cati tzajtíj ica tequipacholi. Huan nozona motepasoltise nopa avestruces. Huan cuatitan chivojme hualase nozona para huitontinemise. ²² Quena, cuatitan chichime tzajtíse ipan cati eliyaya se caltanahuatili huan ipan calme cati achtohuiya elque cati más yejyetzitzi cochise tepechichime. Pampa ya tanti itonal altepet Babilonia huan monechcahuía nopa tonali para huetzis.”

14

Israelitame tacuepase ten sequinoc talme

¹ Pero TOTECO quintasojtas nopa israelitame huan noja quintapejpenis para iaxcahua. Quinhucas sempa ipan inintal para sempa ma quitemitica. Huan miyac masehualme cati ehuani ipan miyac talme hualase huan mosej-cotilise inihuaya. ² Masehualme ipan miyac talme ten ni taltipacti quinpal-huise israelitame para ma tacuepilica ipan inintal. Huan masehualme cati ehuani ipan sequinoc talme cati itztoquij ipan tali Israel quintequipanose israelitame. Huan israelitame quintequihuse masehualme cati achtohuiya quintequihuijque. Huan israelitame quinnahuatise ininculancaitacahua.

Itanahuatijca Babilonia quema itztos campa mijcatzitzí

³ Huan ipan nopa tonali quema TOTECO quinsiyajquetzas israelitame, amo oncas taijyohuilisti, amo oncas majmajti huan ayecmo eltose iniaxchahua sequinoc masehualme cati quinchihuaj ma tequipanoca tahuel chichahuac. ⁴ Quema quej nopa quichihuas TOTECO, israelitame quipinajitse nopa tanahuatijquet ten tali Babilonia huan quihuilise: “¡Xiquitaca nopa hueyi tanahuatijquet cati tahuel tetaijyohuiltiyaya! ¡Ya quitzontamiltijtoque! ⁵ TOTECO ya quitamiltijtoc ichicahualis nopa fiero tanahuatijquet cati quichihuayaya miyac tamanti cati amo cuali. Nojquiya quitamiltijtoc itanahuatilis. ⁶ Yaya tetatzacuiltiyaya huan talojtzitzi quinmaquiliyaya chichahuac hasta quintamicocohuayaya. Huan ica ihueyi cualancayo quinnahuatiyaya miyac talme cati eltoyaj imaco. Quintaijyohuiltiyaya masehualme tahuel miyac huan amo quintasojtayaya. ⁷ Pero ama nochi taltipacti ya quipiya tasehuilisti huan nochi masehualme hueli mosiyajquetzaj huan huicaj ica paquillisti. ⁸ Hasta eltoc quej nopa pino cuame huan tiocume ten tali Líbano nojquiya yolpaquij pampa huetztoc nopa hueyi tanahuatijquet. Huan eltoc quej nopa cuame quijtohuaj: ‘Ya tanqui ichicahualis. Huajca ama ayecmo aqui techcuatotonis yon techtzontequis. Ama ya tijpiyaj tasehuilisti.’

⁹ “Nopa mijcatzitzí cati itztoque nepa micta momajmatíaj para quiselise nopa tanahuatijquet quema calaquiti nepa. Isaj cati cochtoyaj pampa ajsi. Nopa mijcatzitzí cati elque tayacanani hualaj pampa quinequij quinamiquiquij. Cati eliyayaj tanahuatiani moquetzaj ten inisiyas para quiselise. ¹⁰ Huan sentic tzajtzise huan quihuilise: ‘¡Ama ta nojquiya tiitztoc quej tojuanti huan ayecmo tijpiya yon quentzi chichahualisti! ¹¹ Tanqui nochi mohueyitilis huan mochicahualis. Nochi ya nopa yajque ipan ostot quema mitztalpachoque. Mitztepanitayayaj ipan nopa tequicali campa titanahuatiyaya ica huicat cati yejyetzitzi cati quichihuayayaj ica arpas. Huan ama motapech eltoc ten talocuilime huan mótaque eltoc pilocuiltzitzí.’

Quenicatza huetzqui nopa hueyi sitali

¹² “Quenicatza tihuetzqui ten ilhuicac ta tiLucero. Tieliyaya quej nopa sitali cati más quipiya chichahualisti cati cahuaniyaya ica ijnaloc quema noja ayemo quisa tonati. Mitzmajcajtoque talchi, ta cati tijpiyayaya tahuel miyac chichahualisti huan tiquinsosolohuayaya miyac talme. ¹³ Ta timoilhuiyaya ipan moyolo quej ni: ‘Nitejcos ilhuicac huan nijtalis nosiya más huejcapa que nopa sitalime ten Dios. Nepa nijtalis nosiya huan nitanahuatis ipan nopa tepet ica norte campa mosentilíaj nochi teteyome. ¹⁴ Nitejcos más huejcapa que nopa mixti huan nielis san se quej Toteco Cati Más Hueyi.’ ¹⁵ Quej nopa tiquijto, pero san tapic pampa tias hasta campa más tatzinta ipan nopa ostot cati más huejcata campa mocahuaj mijcatzitzí. ¹⁶ Huan nozona nochi san mitztachilise huan quijitose: ‘¿Yaya ni cati quichihuayaya ma huihuipica taltipacti huan nochi tanahuatijcayot nozona? ¹⁷ ¿Ya ni cati quisosolo taltipacti huan quicajqui quej se huactoc tali? ¿Yaya cati quintanqui ialtepehua huan amo quema quinquixti nopa masehualme cati quintzactoyaj ipan tatzacti para huelis yase ininchajchaj?’

¹⁸ “Tanahuatiani ten sequinoc talme quintalpachojtoque ica yejyetzitzi huan ica miyac tatepanitacayot. Sese ten injuanti quipiya iosto cati nelcuali. ¹⁹ Pero ta motacayo quicuamajcahuase ten moosto quej se cuamacuayot cati nochi quijiyaj. Huetztos motacayo quej inintacayohua mijcatzitzí cati mijque ica macheta huan teipa ipan moquejquetzque nopa cahuayojme. San quicuamajcahuase motacayo ipan iteyo nopa ostot cati tahuel huejcata

huan mopani tepejtose nochi inintacayohua nopa masehualme cati mijque ipan tatehuilisti. ²⁰ Ta amo tijpiyas se ostot cati nelcuali quej injuanti pampa moseltitzi tijsosolo motal huan tiquinmicti momasehualhua. Huan yon se mocone amo mosehua ipan nopa siyaj campa ta titanahuatiyaya para quiselis motequi quema timiquis. Iconehua se tacat cati fiero quej ta amo huejcahuase. ²¹ Quena, xiquinmictica iconehua ni tajtacolchijca tacat. Amo xiquincahuilica motananase para quintanise talme. Yon amo xiquincahuilica ma momiyaquilica para sempa quicualtalise huan quitemitise nopa altepeme ipan nochi faltipacti.”

TOTECO quintzontamiltis Babilonia ehuaní

²² TOTECO Cati Quinyacana Iilhuicac Ejcahua Ma Tatanitij. Quiijtohua ya ni: “Na noseltitzi nimotanantoc para nijtehuis nopa tanahuatijquet ten Babilonia huan niquixpolos itoca para nochipa. Niquinhuejhuelos iconehua huan iixhuihua para amo aquí ten injuanti tanahuatis ipan isiya.” Quej nopa quiijtohua TOTECO. ²³ “Huan nijsosolo tali Babilonia huan nijchihuas para elis campa nemise nopa xonpime tapiyalme. Nojquiya nijchihuas ma momana miyac at huan soquit campa hueli ipan Babilonia huan nijtamisosolos nopa tali.” Quej nopa quiijtohua TOTECO Cati Quinyacana Iilhuicac Ejcahua Ma Tatanitij.

TOTECO quintzacuiltis Asiria ehuaní

²⁴ TOTECO Cati Quinyacana Iilhuicac Ejcahua Ma Tatanitij ya tatestigoquetzotoc para tetatzacuiltis. Quej ni quiijto: “Temachtí nitetatzacuiltis senquisa quej nimoilhujtoc. ²⁵ Niquintzontamiltis nochi nopa soldados ten tali Asiria quema itztose ipan tali Israel. Ininpa nimoquejquetzas para niquintamixpolihuiltis ipan notepe. Huan quej nopa niqunquixtilis nopa taohuijcatoyot nomasehualhua para ayecmo quinqeipapanose Asiria ehuaní. ²⁶ Huan nijsenajtoc nojquiya para nitetatzacuiltis ipan nochi faltipacti. Huan nijchihuas ica nohueyi chichualis cati ajsi ipan nochi talme.” ²⁷ Ya nopa quiijtojtoc TOTECO Cati Quinyacana Iilhuicac Ejcahua Ma Tatanitij. Huan ¿ajquiya huelis quitacahualtis TOTECO para ma amo quichihua cati quinequi? Quema quiolinía imax para tetatzacuiltis, amo aquí huelis quitzacuiltis. Nochipa quichihuas cati quisenajtoc para quichihuas.

TOTECO quintzontamiltis nopa filisteos

²⁸ Ipan nopa xihuit quema mijqui Tanahuatijquet Acáz, na niIsaías nijseli ni camanalí:

²⁹ Amo xipaquica anfilisteos pampa mijqui nopa tanahuatijquet cati amechtehuiqui. Melahuac ya postejqui nopa cuatopili cati yaya quitequihui, pero icone noja más fiero amechchihuilis que itata. Ten nopa tanahuatijquet cati eltoya quej se cohuat tacatis seyoc cohuat ica ipajyo cati elis quej se tit, huan yaya amechzontamiltis. ³⁰ Quej se tamocuitahuijquet, na niquintamacas nomasehualhua cati teicneltzitzi ipan na nopotrero. Huan cati amo quipiyaj ten ica panose, cochise ica paquilisti. Pero anfilisteos, nimechtzontamiltis ica mayanti huan ica tatehuilisti. ³¹ Huajca nochi amajuanti ipan altepeme ten tali Filistea, xitzajtzica huan xichocaca ica majmajti pampa ya nijsenajtoc ajquiya amechixpolihuiltis amajuanti huan nochi amotal. Hualase amechtehuiquij soldados ten nopa talme cati mocahuaj ica norte. Tahuel mosemacaj ipan tatehuilisti huan itztose tahuel miyac ten injuanti hasta nesise quej taltepocti. ³² Huan ¿taya tiquinilhuisse nopa tayolmelahuani ten nopa tali? Xiquinilhuaica para na niDIOS nijtalijtoc altepet Jerusalén *

* 14:32 14:32 O Sion.

huan niqijtojtoc para nopona momanahuise nomasehualhua cati teicneltz-itzi.

15

TOTECO quinyolmelahua Moab ehuan taya ininpantis

¹ Ya ni nopa camanali cati nijseli ten taya ipantis tali Moab:

Ipan se yohuali quisosolose altepet Ar huan altepet Kir huan mocahuas tasosolijtoc ipan nopa tali Moab. ² Nopa moabita masehualme ipan altepet Dibón yase inintiopa ica miyac tequipacholi para mochoquilitij por cati ipantis altepet Nebo huan Medeba. Nojquiya moximase huan qui-huatanise inintentzo para quinextise tahuel mocuesohuaj. ³ Moquentise iniyoyo ten tequipacholi huan nejnentiyase ipan calles. Inincalcuitapa huan ipan lugares campa mosentilíaj masehualme caquistis cati tahuel chocase. ⁴ Tzajtzise chicahuac nopa masehualme ten altepet Hesbón huan Eleale hasta caquistis huejca ipan altepet Jahaza. Huan nopa tatehuiani cati más motemacaj ten tali Moab chocase ica majmajti.

⁵ Ipan noyolo nichoca por tali Moab. Nochi imasehualhua cholohuaj hasta altepet Zoar huan Eglat. Huan ixtejcoj ipan altepet Luhit huan chocatiahuij. Caquisti choquisti hasta ipan nopa ojti cati ajsi ipan altepet Horonaim. ⁶ Onca taijyohuillisti hasta huactoc nopa hueyat Nimrim. Atenti campa oncayaya xihuít cati xoxohuic, ama nochi san mocahua quej tatatoc.

⁷ Nopa masehualme cati cholohuaj quihuicaj nochi iniricojyo cati huelij huan quiixcotonaj nopa hueyat campa onca nopa álamo cuame. ⁸ Nochi Moab ehuan chocaj ten altepet Eglaim hasta Beer Elim. ⁹ Nopa hueyat ten Dimón eltoc chichiltic ica esti. Huan amo san nopa tatzacuilitli quiselis Dimón. Elis quej TOTECO quintitanis leones para ma quincuaca nochi nopa masehualme cati quinequiyayaj cholojtehuase huan nojquiya inijuanti cati mocajtoque nopona huan noja yoltoque.

16

Moab ehuan momanahuise ipan Judá

¹ Masehualme cati cholohuaj ten tali Moab huan momanahuijtoque ipan altepet Sela ipan nopa huactoc tali, quititanilíaj borregojme nopa tanahuatijquet ipan nopa tepet ipan Jerusalén para quinextise motemacaj ica ya. ² Huan nopa sihuame cati cholohuaj ten tali Moab itztoque ipan hueyat Arnón quej totome cati quimajmatijtoque huan quinquixtijtoque ten inintepasol. ³ Quej ni Moab ehuani quinilhuíaj nopa tali Judá ehuan, quijtohuaj: “¡Techilhui cati huelis tijchihuase! ¡Techmanahuica huan techmocuitahuica! Techatica huan amo techcahuilica ma tihuetzica inimaco tocualancaitacahua. ⁴ Xiquincahuilica ma mocahuaca amohuaya nochi cati quinquixtijtoque ipan tali Moab. Xiquintatica para amo quinpantise tocualancaitacahua.”

Huan quema panotosa ni hueyi majmajti huan ya tamis nopa tasosololisti huan nochi tocualancaitacahua tacuepilijtose ipan inintal, ⁵ huajca TOTECO ica iteicnelijcayo quitananas sempa itanahuatilis David. Huan quichihuas ma mosehui nopona se tanahuatijquet cati temachti huan cati tetajtolsencahuas xitahuac huan cuali.

⁶ Tijcactoque cuali para cati ehuan ipan tali Moab tahuel mohueyimatiyayaj, motepanitayayaj huan eliyayaj itzcuime, pero ama nochi ya nopa tanqui. ⁷ Huan nochi ipan tali Moab tahuel chocaj huan mocuesohuaj pampa ayecmo quicuase xocomecat huactoc ten altepet Kir Hareset.

⁸ Nojquiya chocaj por nopa huejhueyi talme cati quintahuelcajtoque nechca altepet Hesbón huan por nopa xocomeca milme cati eltoyaj nechca altepet Sibma. Nopa tacame ten miyac talme quintzontectoque nopa xocomeca cuame cati quipixtoyaj inimecayo cati ajsitoj hasta altepet Jazer ipan nopa huactoc tali huan hasta nopa Mictoc Hueyi At. ⁹ Yeca na niIsaías, nojquiya nichoca por nopa xocomeca cuame ten Jazer huan por nopa xocomeca milme nechca altepet Sibma. Huan nojquiya nichoca por altepet Hesbón huan Eleale ehuaní pampa nopa tatzacuiltli ajsic ipan nochi pixquisti huan ayecmo onca nopa tatzopelcayot nopona. ¹⁰ Tanqui nochi huetzquisti huan paquilisti cati oncayaya quema pixcayayaj. Nojquiya ayecmo caquistis nopa yejyectzitzí huicat cati huicayayaj ipan nopa xocomeca milme. Ayecmo quema quipatzcase itajca nopa xocomecat para quichihuase iayo. Pampa na niJtamilti nochi nopa paquilisti cati oncayaya quema pixcayayaj.

¹¹ Nelía nimocuesohua por tali Moab huan nijpiya miyac tequipacholi por altepet Kir Hareset. ¹² Nopa masehualme ten tali Moab yase campa nopa tepeme huan ica miyac tequipacholi motatajtise ica ininteteyohua hasta siyahuisse, pero san tapic pampa amo quinpalehuise. Nojquiya yase ipan inintiopa nopa teteyome huan quintzajtzilise, pero nopa teteyome amo hualase quinmaquixtiqij. ¹³ Nochi ya ni eltoc cati TOTECO quijto huejcayuiya para panosquía ipan tali Moab. ¹⁴ Pero ama TOTECO quej ni quijtohua: “Ica eyi xihuit tamis nochi ihueyitilis tali Moab. Huan masque itztoque miyac masehualme, san mocahuase yoltoque se ome cati ayecmo quipiyase chichahualisti.”

17

TOTECO tayolmelajqui taya ipantis altepet Damasco

¹ Ya ni nopa camanali cati nijseli ten TOTECO ica taya ipantis altepet Damasco, quijto:

“Xiquitaca, altepet Damasco ayecmo elis se altepet. Ya tamiixpolihuis huan elis san se tamontomit ten tasoli. ² Mocahuase quintahuelcajtoque nopa altepeme ten tali Siria para nochipa. Nopona tacuase huan cochise borregojme ica paquilisti huan amo aqui quinmajmatis. ³ Quinsosolose nopa huejhueyi altepeme ipan tali Israel * cati quinpiyaj tepame cati quinyahualojtoque. Huan quitamiltise ichichahualis altepet Damasco. Nopa masehualme cati noja mocahuase ipan tali Siria ayecmo elis se tanahuatij-cayot. Tamis inintanahuatilis quej tami ihueyitilis Israel.” Quej nopa quijto TOTECO Cati Quinyacana Iilhuicac Ejchahua Ma Tatanitij.

Taya ipantis tali Israel

⁴ “Ipan nopa tonali ihueyitilis Israel † tantiyas huan mochihuas se tali cati nelteicneltzi. ⁵ Amo teno mocahuas ten tali Israel. Quej quintahuelcahuaj trigo milme cati ya quinpixcatoque ipan nopa tamayamit cati itoca Refaim, quej nopa quitaheulcahuase tali Israel. ⁶ Elis quej quema quitequij itajca se olivo cuahuit huan noja mocahua ome o eyi olivos campa más huejcapa. Huan quemantica mocahuas nahui o macuili ipan iyecapa imacuayohua cati más taquiyaya. Quej nopa nojquiya san mocahuas se pilquentiz imasehualhua tali Israel.” Quej nopa quijto TOTECO cati ininDios tali Israel ehuaní.

⁷ Huan huajca ipan nopa tonali, nopa israelitame pehuase moyolilhuise ten TOTECO Cati Quinchijchijqui. Quena, quitepanitase nopa Dios cati

* 17:3 17:3 Tali Israel ica norte nojquiya quitocaxtíaj Efraín. † 17:4 17:4 O Jacob.

Tatzejtzeloltic huan cati itztoc inihuaya israelitame. ⁸ Ayecmo motemachise ipan nopa teteyome huan taixpame cati quinmachijchijque. Ayecmo motancuaquetzase iixpa nopa taixcopincayot ten tonati o ten nopa teteyot Asera cati quinchijtoque.

⁹ Ipan nopa tonali, nochi israelita altepeme cati achtohuiya moyahualojtoyaj ica tepamit mocahuase tamisosolijtoque huan quintahuelcajtoque. Nesise quej nopa altepeme huejcajquiya cati quintahuelcajque nopa amorreos quema israelitame ajsicoj huan quinquixtijque. ¹⁰ Pero ¿para ten quej nopa elis? Elis pampa israelitame quitahuelcajtoque Toteco Dios cati quinmaquixtia, yaya cati eltoc quej se Tet cati quinmanahuiyaya. Hua-jca masque quichihuase cuajcuali mili huan quintoquilise tzonti cati más cualtzi, ¹¹ huan masque yejyetzzi ixhuasquíaj huan xochiyohuasquíaj, ica mosta nelía nimechilhuía amo quipixcase yon se xocomecat. San quipantise pinahualisti huan taijyohuulisti cati amo quipiya pajti.

TOTECO quintanis Inincualancaitacahua israelitame

¹² Xijcaquica quenicatza tacaquisti hualahui nopa soldados para quinte-huiguj cati itztoque ipan ital TOTECO. Chicahuac hualahuij hasta caquisti quej nopa hueyi at cati nochipa mocojcoxonía. ¹³ Pero masque tahuejchihua-j chicahuac nopa masehualme quej quema mojmolinía hueyi at, Toteco Dios quintatzacuilitis para ayecmo molinise. Cholose nopa soldados quej mosemana tasoli quema taajaca chicahuac o quej taltepotci mosemana quema huala se ajcomalacat. ¹⁴ Ica tapoyahui israelitame momajmatise por inincualancaitacahua, pero tonilis quema tanesis nochi inincualancaitacahua ya mictose. Inon eltoc nopa taxtahuili cati quiselise nochi cati quintachtequilíaj huan quintzontamiltíaj imasehualhua TOTECO.

18

TOTECO quintatzacuilitis tali Etiopía ehuaní

¹ Nelía teicneltique nopa tali Etiopía ehuaní cati itztoque ica campa pehua nopa hueyat Nilo pampa temachtí TOTECO quintatzacuilitis. Nopona caquisti quej miyac sayoltzitzí cati patantinemij pampa motalohuaj inincuaacalhua cati quipiyaj yoyomit quej inieltpal cati huejhueyi cati patajtoque para ma quincuatopehua ajacat. ² Nopa tali quintitanqui itayacancahua cati quisencahuaj camanali para ma yaca ipan nopa hueyat Nilo ipan cuaacalme cati motalohuaj chicahuac. Pero xiyaca amochaj, antayacanani cati annejnemij chicahuac. Xiyaca ipan amotal huan nopona xijhuicaca se camanali ten cati amopantis. Xijhuicaca nopa camanali para amomasehualhua cati huejcapantique huan cati quipiyaj inincuetaxo nel yejyetzitzí. Amotal motajcoitztoc ica hueyame huan quimacasij miyac masehualme campa hueli. Quiimacasij amotal pampa tahuel antatantoque huan antasolojtoque pero amo quej nopa elis teipa. ³ Quema se quitananas nopa bandera ipan nopa tepet para pehuas tatehuilisti, ma quitachilica nochi masehualme cati itztoque ipan nochi taltipacti. Quema molinis tapitzali, nochi ma quitacaquilica. ⁴ Pampa TOTECO quej ni techilhui: “Ten campa niitztoc ipan ilhuicac, nitachixtos tatzinta ipan taltipacti huan amo nimólinis yon quentzi. Nochi elis tatzitzicatoc quej quema huetziyaya at huan sempa pehua tona o elis tatzitzicatoc quej quema huetzi ajhuechti ica ijnaloc ipan tonali ten pixquisti. ⁵ Pero quema ayemo pehuaj tatehuíaj huan nochi sanoc quisencahuaj ten quichihuase, niDIOS niquintzontequis cati motehuisnequij quej se quintzontequilía inimacuayohua xocomecat cati amo taquij. ⁶ Nochi amosoldados cati tahuel tejtetique, miquise campa

hueli ipan mila para ma quincuaca nopa totome huan nopa tecuanime cati mosisiníaj. Tzojopilome quicuase ininacayo nopa mijcatzitzitzi nochi tonali quema tatotoniya. Huan teipa tecuanime quicuajcuase nopa omit ipan nochi nopa tonali quema taseseya.”⁷ Pero ajsis se tonali quema TOTECO Cati Quinyacana Iilhuicac Ejcahua Ma Tatanitij quiselis ofrendas ten nopa masehualme cati huejcapantíque huan yejyectzitzitzi inincuetaxo. Yase ipan altepet Sion injuanti ten tali Etiopía cati quinmajmatiyayaj nochi talme pampa taniel tataniyayaj huan tasosolohuayayaj. Quena, nopa masehualme ten Etiopía cati quipiyaj miyac pilhueyatzitzitzi ipan inintal quihueyichihuase TOTECO Cati Quinyacana Iilhuicac Ejcahua Ma Tatanitij.

19

TOTECO quintatzacuultis tali Egipto ehuani

¹ Ya ni nopa camanali cati TOTECO techmacac ten taya ininpantis tali Egipto ehuani:

Xiquitaca, TOTECO huala ipan se mixti para quintatzacuultis cati itztoque ipan tali Egipto. Nopa tetyome ten Egipto huihuipicase iixpa ya huan nochi Egipto ehuani taniel majmahuise ipan iniyolo.² TOTECO quijtohua: “Na niqinchihuas ma motehuica se tali Egipto ejquet ica seyoc Egipto ejquet. Se masehuali motehuis ihuaya iicni huan seyoc motehuis ihuaya cati icalnechca. Se altepet motehuis ihuaya seyoc altepet huan cati tayacana ipan se piltaltzi motehuis ihuaya cati tayacana ipan seyoc piltaltzi.³ Huan niqinchihuas tali Egipto ehuani ma quipoloca inintalnamiqullis huan amo aquí quinconsejomacas taya ma quichihuaca. Yeca yase quintatzintoquilitij ininteteyohua, huan nopa masehualme cati quincamanalhuíaj mijcatzitzitzi, huan tenahualhuiani huan tetonalitani para quimatise taya quichihuase, pero na nijsosolos nochi tamanti cati quinequise quichihuase.

⁴ “Na nitemactilis tali Egipto imaco se teteco cati yoltetic. Yaya elis se tanahuatijquet cati tanahuatis chicahuac huan yon quentzi amo tetasojtas.” Quej nopa quijtohua TOTECO Cati Quinyacana Iilhuicac Ejcahua Ma Tatanitij.

⁵ Nopa at ten nopa hueyat Nilo tantiyas hasta elis huactoc huan nochi nopa pilhueyatzitzitzi tamihuaquise.⁶ Huan nopa at cati onca ipan aojti mijyotis ica nopa ohuat huan acat cati lochoni.⁷ Pilinis nochi tamanti xihuit cati xoxohuixtoc iteno nopa hueyat Nilo huan quihuicas ajacat. Huan nochi mili huaquis huan nochi tapiyalme miquise.⁸ Nochi michtajtamani chocase pampa amo onca tequit. Quena, injuanti cati tajtamayayaj ica anzuelo huan cati tajtamayayaj ica matat mocuesose pampa ayecmo quimatise taya quichihuase.⁹ Nopa tajtzomanij ayecmo quipiyase icpat ten lino, yon ichcat, pampa amo oncas pixquisti.¹⁰ Nochi yoyonchihuani mocuesose, huan nochi tequipanohuani ayecmo quimatise taya quichihuase.

¹¹ Nelía huihuitique nopa tayacanani cati itztoque ipan altepet Zoán ipan Egipto. Nopa tetalnamiciani cati quitalnamicitijque nopa tanahuatijquet ten tali Egipto, quimacac tayacanani ipan Zoán consejos cati huihuitic huan amo cuali. ¿Quenicatza huelis mohueyimatise huan quillhuise Faraón: “Tojuanti tiininconehua huan tiiniixhuihua talnamiquni huan tanahuatiani cati itztotayaj huejcajquiya?”¹² ¿Canque itztoque nopa tacame cati mitztalnamicitiyayaj, Faraón? ¿Canque yajqui inintalnamiqullis? Sinta nelía talnamiqunij huajca huelis mitzilhuise taya quichihuas TOTECO ica tali Egipto, yaya Cati Quinyacana Iilhuicac Ejcahua Ma Tatanitij.¹³ Nopa tayacanani ten altepet Zoán nelía huihuitique. Huan nopa tayacanani ten altepet

Menfis mocajcayajtoque. Inijuanti eliyayaj cati más cuajcualme, pero ama quisosolojtoque tali Egipto pampa temacaque camanali cati amo xitahuac. ¹⁴ TOTECO quintitanili se ajacat cati quinchijqui ma elica huihuitique para quej nopa nochi tamanti cati inijuanti quijitose ma mochihua, ayecmo quisas cuali. Yeca ama quicuapolojtoque Egipto huan quichihua ma ixya-canejnemi quej se ihuintiquet cati huetzi ipan iisotal. ¹⁵ Huan ama amo aqui ipan tali Egipto huelis quipalehuis, yon cati tapijpiya, yon cati teicneltzi, yon cati hueyi tacat cati nochi quiixmati, yon cati más pisiltzi iniixpa sequinoc. Amo aqui hueli quinextilía Egipto se cuali ojti.

Tali Egipto ehuan quihueyichihuase TOTECO

¹⁶ Ajsis se tonali quema egiptome elise quej sihuame cati amo quipiyaj yon quentzi chicalualisti. Quiitase para TOTECO Cati Quinyacana Iilhuicac Ejcahua Ma Tatanitij ya momatanantoc para quintzontamiltis, huan huihuipicase iixpa. ¹⁷ Huan sinta san quicaquise se quitocaxtía nopa tali Judá, nochi egiptome taniel majmahuise. Momajmatise por nopa tamanti cati TOTECO Cati Quinyacana Iilhuicac Ejcahua Ma Tatanitij quijtojtoc para quichihuas ica inijuanti.

¹⁸ Ipan nopa tonali, macuili altepeme ten tali Egipto tatestigojquetzase para quitoquilise TOTECO Cati Quinyacana Iilhuicac Ejcahua Ma Tatanitij. Huan pehuase camanaltise ica hebreo camanali. Se ten nopa altepeme elis Herez. (Herez quinequi quijtos Atepet Ten Tonati.) ¹⁹ Huan ipan nopa tonali oncas se taixpamit para TOTECO tatajco ten tali Egipto. Huan nojquiya campa inepa tali Egipto quiquetzas se hueyi tet para quinelnamiquiltis TOTECO. ²⁰ Huan ya ni eltos quej se tanextili cati tenextilis para TOTECO Cati Quinyacana Iilhuicac Ejcahua Ma Tatanitij itztoc ipan tali Egipto. Huan quema masehualme quintaiyohuiltise, Egipto ehuan quitzajtzilise TOTECO, huan yaya quintitanilis se temaquixtijquet; se cati itztoc hueyi para quinmanahuis.

²¹ Huan ipan nopa tonali TOTECO mopanextis ica nopa egiptome. Huan quinixmatis huan inijuanti nojquiya quiixmatise. Huan quihueyichihuase TOTECO huan quimacase tacajchualisti huan ofrendas. Nojquiya tatestigojquetzase para quichihuase tamanti para TOTECO, huan quena, quichihuase. ²² Achtohui TOTECO quicocos tali Egipto, pero teipa sempa quichichahuas. Huan nopa egiptome tacuepilise ica TOTECO huan yaya quinta-caquilis quema motatajtise ica ya huan quinchichahuas.

²³ Ipan nopa tonali oncas se ojti cati patahuac cati quisas tali Egipto huan ajsis hasta tali Asiria. Huan nopa Egipto ehuan ica paquilisti yase ipan tali Asiria huan nopa Asiria ehuan yase ica paquilisti ipan tali Egipto. Huan sentic quihueyichihuase TOTECO.

²⁴ Ipan nopa tonali quema Asiria huan Egipto cuali mohuicase, Israel mohuampojchihuas inihuaya nojquiya. Huan ipan nopa tonali Israel cuali mohuicas ica Asiria huan Egipto elis se tatiocihualisti tatajco ni taltipacti.

²⁵ Huan TOTECO Cati Quinyacana Iilhuicac Ejcahua Ma Tatanitij quintiochihuas huan quijitos: “Ma elica tatiocihualme Egipto ehuan pampa nomasehualhua. Ma elica tatiocihualme nopa asirios pampa na niquinchijchijqui. Huan ma elica tatiocihualme israelitame pampa noaxcahua.”

20

Asiria quitanis tali Egipto huan Etiopía

¹ Se xihuit Tanahuatijquet Sargón ten tali Asiria quititanqui nopa tayanquet ten isoldados para ma yaca ipan Asdod, se inialtepe nopa filisteos.

Huan yajqui quitehuito huan moaxcatito. ² Huan ipan san se nopa xihuit, TOTECO quinojnotzqui Isaías, icone Amoz, huan quiilhui: “Xiya ximoquixtiliti moyoyo ten tequipacholi huan ximoquixtiliti motecac. Huan xinentinemi tixolot huan san moixcipa.” Huan na nijchijqui senquisa quej TOTECO tech-nahuati. ³ Huajca teipa TOTECO quiijto: “Notequipanojca Isaías nentinentoc iicxipa huan xolot para eyi xihuit. Ya ni eltoc se tanextili ten nopa hueyi taijyohuillisti cati hualas ipan tali Egipto huan ipan tali Etiopía. ⁴ Pampa nopa tanahuatijquet ten tali Asiria hualas huan quinhuicas ilpitoque nochi nopa masehualme cati quinzquis ipan tali Egipto huan tali Etiopía. Quinchihualtis nochi ma nejnemica iniicxipa huan xolome masque telpacame o huehuentzitz. Huan tanemijya nesis nochi inintzinpa para ma pinahuaca nopa egiptome. ⁵ Huan huajca nopa filisteos cati motemachiyayaj ipan ichichualis tali Etiopía huan ipan itapalehuil tali Egipto, tahuel mocuesose huan pinahuase. ⁶ Quema panos ya nopa, nochi filisteos cati itztoque iteno hueyi at quiijtose: ‘Xiquitaca taya ininpantitoc nopa talme Egipto huan Etiopía cati ipan timotemachiyayaj para techmanahuisquíaj ten nopa tanahuatijquet ten tali Asiria. Huajca ¿taya tijchihuase tojuanti? ¿Quenicatza timomanahuisse tojuanti?’ ”

21

Huetzis tali Babilonia

¹ Ya ni nopa camanali cati TOTECO techmacac ten cati ipantis tali Babilonia cati eltoc ipan nopa huactoc tali nechca hueyi at:

Quej se ajcomalacat cati tachpantihuala ten nopa Neguev, hualas ipan Babilonia ten nopa huactoc tali se tamanti cati tahuel fiero. ² Quena, niquita se tanextili cati tahuel temajmati huan fiero. Ipan ni tanextili Toteco Dios technextilia taya panos ica nopa tali Babilonia. Niquitac quenicatza hualajque tacame cati quintachtequillijque huan quintzontamiltijque. Huajca xiyaca xitatehuitij ansoldados ten tali Elam huan tali Media. Quena, huetzis Babilonia huan ayecmo chocase cati ehuan nochi nopa talme cati Babilonia quintaijyohuilliyaya. ³ Noihti tahuel techcocohua huan tahuel tiquisa. Nimomimilohua ica tacuajcualoli cati quiitzquitoc notacayo quej se sihuat quema conepiya. Quema nijcaqui nochi cati TOTECO quiijtojtoc quichihuas, nijnequi nitapolos. Tahuel nimomajmatía hasta nopa taijyohuillisti techchihualtia ma nipopoyotiya. ⁴ Na ayecmo nijmatí taya nijchihuas. Techitzquitoc se hueyi majmajti huan noyolo huifoni. Nochi nopa yejyetzitzi yohuali quema nimosiyajquetzayaya ica paquilisti, ya tanqui. Ama masque nimoteca ipan notapech, amo hueli nicochi. San nitachixtoc seyhual huan nihuihuipica.

⁵ ¡Xiquitaca! Quicualtalíaj mesas para se hueyi ilhuit. Quicualtalíaj campa mosehuisse nopa masehualme para tacuase. Ya pehua tacuaj huan taij. Huajca nimantzi ximoquetzaca, antayacanani, huan xiyaca nimantzi. Xijcuica amoteposyolixtzajca huan ximocualtica para antatehuise.

⁶ Huan TOTECO nojquiya quej ni techilhui ipan nopa tanextili: “Xijtali se tamocuitahuijquet ipan nopa tepamit cati quiyahualohua nopa altepet Babilonia para ma tayolmelahuas cati quiitas. ⁷ Sinta quintas hualahuij tacame ipan miyac tafehuijca carrojme cati quintilanaj ojome cahuayojme o sinta hualahuij soldados cati tejcotoque ipan burros huan camellos, ma tachixto cuali.”

⁸ Huajca na nijtali se tamocuitahuijquet ipan nopa tepamit huan teipa ajsic hora quema yaya tzajtzc quej se león huan quiijto: “NoTeco, tonaya huan

tayohua niitztoc ipan ni tepamit campa techtalijtoque ma nitamocuitahui huan niitztoc nitachixtoc. ⁹ Huan ama, quena, niquita, nica hualahuij tacame ipan se tatehuijca carro ica ome cahuayojme cati quitlanaj.” Huajca nopa tamocuitahuijquet quijto: “Ya huetzqui, ya huetzqui tali Babilonia. Huan nochi nopa teyeyome ten tali Babilonia huetzque hasta talchi huan nochi tapanque.”

¹⁰ Annomasehualhua cati ininpa moquejquetztoque Babilonia ehuani huan amechhujcamajajque, na nimechilhuijtoc nochi cati techilhuijtoc TOTECO Cati Quinyacana filhuicac Ejchahua Ma Tatanitij, yaya cati toDios tiisraelitame.

Taya ipantis tali Edom

¹¹ Ya ni nopa camanali cati TOTECO techmacac ten taya ipantis tali Edom*:

Se ten amojuanti ipan altepet Seir techtazjtzilía talojtitzti huan techilhuía: “Tamocuitahuijquet, ¿taya horas amantzi ipan ni tayohua? Tamocuitahuijquet, ¿taya horas amantzi ipan ni tayohua? ¿Quesqui horas polihui para tanesis?”

¹² Pero nopa tamocuitahuijquet quihui: “Tanestihuala pero amo huejcahuas tonaya, sempa hualas tayohua huan taohuijcaoyot. Pero sinta ipan amoyolo anquinequij anquimatise cati cuali, xijtemoca TOTECO. Ximoyolcuetpaca huan xihualaca campa ya para huelis amechtapojpolhuis.”

Taya ipantis tali Arabia

¹³ Ya ni nopa camanali cati TOTECO techmacac ten taya ipantis tali Arabia:

Teicneltique nopa masehualme ten altepet Dedán cati nejnemij campa hueli ipan nopa huactoc tali ten tali Arabia. Itztoque ipan pilojtitzti campa amo aquí nemi para momanahuse ten nopa taijyohuilsti cati huala ininpani. ¹⁴ Anmasehualme ten tali Tema, quema ajsis nopa tonali; xiquinhuiquilica tacualisti huan at nopa masehualme cati mochololtíaj huan siyajtoque. ¹⁵ Nopa Arabia ehuani mochololtíaj ten inimacheta inincualancaitacahua cati ya quinequij quinmictise. Cholohuaj para momanahuse ten nopa cuahuitoli huan ten nochi nopa taijyohuilsti cati onca ipan tatehuilsti. ¹⁶ Pero TOTECO quej ni quijto: “Ica san se xihuit ya tantos nochi ihueyitilis huan ichicahualis tali Cedar ipan Arabia. ¹⁷ San mochahuase se ome isoldados cati tahuel motemacayayaj para tatehuse ica cuataminti.” Quej nopa quijto TOTECO cati toDios tiisraelitame.

22

Taya ipantis altepet Jerusalén

¹ Ya ni nopa camanali cati TOTECO techmacac ten taya ipantis altepet Jerusalén:

¿Taya amechpano ama? ¿Para ten ancholohuaj huan anyahuij amocalcuitapa? ² Ipan nopa altepet onca miyac tahuejchihualisti. ¿Taya ipanti nopa altepet cati sen pacto? Niquita campa hueli tepejtoque mijcatzitzti. Pero amo nochi inijuanti mijque ica macheta o ipan tatehuilsti. Sequij mijque ica cocolisti huan mayanti. ³ Nochi motayacanhua cholosnequiyayaj, pero san motemactilijque ica inincualancaitacahua para ma amo quinmictica ica cuataminti, yon amo tatehuijque. Nochi momasehualhua quinequiyayaj cholose nojquiya, pero quinitzquijque. ⁴ Techcalcahuica huan techcahuaca ma nichoca. Amo xijchihuaca campeca para antechyoltalise. Techcahuaca ma nichoca por nomasehualhua cati quintzontamiltíaj. ⁵ Pampa ya ni elis

* 21:11 21:11 O Duma.

se tonali ten taijyohuilisti huan tequipacholi. TOTECO Cati Quinyacana Iilhuicac Ejcahua Ma Tatanitij quititantoc ipan Jerusalén se tonali cati nelía ohui huan mahuilili. Quihuelonise nopa tepamit cati quiyahualohua Jerusalén, huan ipan ni lugar ten tanextili, caquistis tzajtzi nopa masehualme cati quinmictíaj.

⁶ Nopa masehualme ten tali Elam quihualicase cuataminti huan hualase tejcoctoque ipan tatehujca carrojme huan ipan cahuyojme. Nopa Kir ehuan quipixtose inimaco iniyolixtzajcayo. ⁷ Inijuanti quitemitise nochi nopa tamayame cati más yejyectzitzí ipan amotal ica carrojme para tatehúise. Huan campa icalte Jerusalén moquetztose miyac soldados cati tejcoctose cahuyojtipa para tatehúise.

⁸ Amechquixtilise antali Judá ehuan nochi cati anquipixtoyaj para ica anmomanahúise. Amojuanti anmotalose para anquitemotij teposme ipan nopa cali ipan cuatitamit campa anquiajocuij tatehujca teposme. ⁹ Anquitemose campa coyontoc nopa tepamit cati quiyahualohua ialtepe David huan anquicualchijchihuase. Anquitemitíaj nopa pileta cati tatzinta ica at para anquipiyase at ipan se tatehulisti. ¹⁰ Nojquiya anquinijitaque nopa calme cati mocahuayayaj ipan Jerusalén, huan sequij calme anquinosolojque para anquisencajque nopa tepamit ica nopa tet. ¹¹ Pero nochi cati anquichuaj amo teno ipati elis pampa amo anquítajtanjitoque itapalehuil TOTECO cati quititanqui ni hueyi tatzacuiltíli amopani. Elqui yaya cati quisencajqui huejcajquiya para quej ni panosquía. ¹² Toteco Dios, yaya cati TOTECO Cati Quinyacana Iilhuicac Ejcahua Ma Tatanitij amechnotzqui para ximoyolcuepaca huan ximochoquilica. Amechilhui para xijhuatanica amotzontoc huan para ximoquentica yoyomit ten tequipacholi para ma nesi anmotequipachohuaj por amotajtacolhua huan anmoyolpatatoque. ¹³ Pero amojuanti amo anquichuaj ya nopa. Amojuanti noja más anhuicaj ica paquilisti, anmijtotíaj huan anmahuiltíaj. Anquinmictíaj huacaxme huan borregoje cati elqui para tacajcahualisti. Huan anquicuj ininacayo huan antaj. Huan masque anquimatij huala tatzacuiltíli, amo anmoyolpataj. San anquijtohuaj: “Ma titacuaca huan ma titaica pampa mosta timiquise.” ¹⁴ Yeca TOTECO Cati Quinyacana Iilhuicac Ejcahua Ma Tatanitij techilhui: “Ni tajtacoli amo niquintapojpolhuis hasta miqúise.” Quej nopa quijtohua TOTECO Cati Quinyacana Iilhuicac Ejcahua Ma Tatanitij.

¹⁵ Nojquiya TOTECO Cati Quinyacana Iilhuicac Ejcahua Ma Tatanitij techilhui ya ni: “Xiya xiquitati Sebna nopa tayacanca tequipanojquet ipan caltanahuatili huan xiquilhuiti: ¹⁶ ‘¿Para ten timochijchihuilía nopa yejyectzi ostot para ipan mitztalpacose ipan nopa tepexit? ¿Ajquiya mitzmacatoc nopa tequiticayot? ¹⁷ Xiquita, TOTECO monechahuía para mitzitzquis, mitzixtzacuas huan mitzmajcahuas huejca. Seyoc tali ehuan mitzhúicase para tiquintequipanos ipan inintal. ¡Quej nopa mopantis ta, tihueyi tacat! ¹⁸ Quena, imaco TOTECO tielis quej se pelota huan mitzmajcahuas huejca ipan se tali cati hueyi. Nepa timíquis nechca nopa tatehujca carrojme cati ica timohueyimatiyaya. Tielis se pinahualisti para motal huan moteco. ¹⁹ Quena, na nimitzquixtis ten motequi huan ten molugar cati hueyi campa amantzi tiiztoc.

²⁰ “ Huan ipan nopa tonali nimantzi nijnotzas notequipanojca Eliaquim, icone Hilcías, para tequitis ipan molugar. ²¹ Nimitzquixtilis moyoyo huan yaya nijtalilis. Nojquiya nijtalilis motzínquechilpica huan motequiticayo, huan yaya elis quej inintata nochi nopa masehualme ten altepet Jerusalén

huan tali Judá. ²² Nijmacas tequiticayot quej Tanahuatijquet David quipixqui para ma quinnahuati nomasehualhua. Yaya nijmacas nochi tequiticayot huan nochi llaves. Quitapos puertas huan amo aqui huelis quitzacuas. Huan quema yaya quitzacuas puertas, amo aqui huelis quintapos. ²³ Nijtalís quej se estaca cati cuali ijcatoc. Huan nijchihuas ma eli temachti huan por ya, nochi quintepanitase ifamilia, iteipa ixhuhua David. ²⁴ Pero nochi ifamilia ten cati más hueyi hasta cati más pisiltzi motatzquilise ipan ya para mopanoltise huan elis se tamamali cati tahuel etic para ya.”

²⁵ Huan nojquiya TOTECO Cati Quinyacana Iilhuicac Ejcahua Ma Tatanitij quijitohua: “Ipan nopa tonali na nijhuihuítas nopa tacat cati itztoq quej se estaca cati cuali tatzquitoc huan huetzis hasta talchi. Huan nojquiya huetzis talchi nochi nopa tamamali cati quihucayaya, quinequi quijitos nochi cati motatzquiliyayaj ipan ya.” Quej nopa quijitotoc TOTECO.

23

Taya ipantis altepet Tiro

¹ Ya ni nopa camanali cati TOTECO techmacac ten taya ipantic altepet Tiro:

Amojuanti cati anquinnemiltíaj nopa huejhueyi barcos ten altepet Tiro huan anyahuij ipan talme cati mocahuaj huejca, xichocaca pampa Tiro nopa piltaltzi campa anajsiyayaj ya ixpolijtoc. Ya ixpolijtoc nochi calme cati nozona eltoya huan amo teno mocahua campa huelis mosehuis amohueyi barco. Nochi camanali cati anquicajque ipan tali Chipre elqui melahuac. ² Amo ximolinica, amojuanti cati anitztoque iteno nopa hueyi at huan antanamacani ten altepet Sidón cati campa hueli anquixcotonayayaj ipan hueyi at para antacohuase huan antanamacase. Nopa tequipacholi cati amechajsitoc eltoc nelpano hueyi hasta ayecmo aqui hueli choca. ³ Achtohuiya nopa huejhueyi barcos ten tali Sidón amechhualiquiliyayaj, anTiro ehuaní, miyac tamanti ten nopa talme ipan seyoc lado nopa hueyi at. Quihualicayayaj miyac tamanti cati temaca tali Egipto cati eltoc iteno nopa hueyat Nilo. Amoaltepe Tiro elqui se tianquis campa tanamacayayaj masehualme ten nochi talme, pero ama nochi tanqui. ⁴ Xipinahuaca amojuanti cati anehuani altepet Sidón nopa altepet nelnechca altepet Tiro. Ta cati nelía tijpiyaya chichualisti nozona iteno nopa hueyi at. Ama eltoc quej ayecmo aqui amechnequi. Eltoc quej nopa hueyi at quijitos: “Nimocahua noseltitzi. Nimoiyocajtoc ten nochi altepeme. Nopa altepet Tiro cati elqui quej noichpoca ayecmo oncas huan amo onca seyoc cati niquita quej nocone. Nochi nopa tacame cati Tiro ehuaní cati quinnemiltiyayaj barcos polijtoque huan nojquiya polijtoque nopa yancuic colonias cati elque iaxcahua nopa altepet.”

⁵ Quema tali Egipto ehuaní quimatise cati ipantitoc altepet Tiro, tahuel mocuesose huan quijitose: ⁶ “Xichocaca nochi amojuanti cati anitztoyaj nechca altepet Tiro huan xicholoca hasta altepet Tarsis.” ⁷ Quenicatza ni altepet Tiro cati ama tamisosolijtoc, ¿Amo ya ni nopa altepet cati achtohuiya san pactoya huan ipa eltoya hasta huejcajquiya? Imasehualhua nopa altepet tetitaniyayaj ipan talme campa hueli talme para mochantise nozona nojquiya.

⁸ ¿Ajquiya quihualicac ni tatzacuilti ipan ni altepet Tiro? Ni altepet quintaliyaya tanahuatiani campa hueli huan eliyaya inintanahuatijca nochi tanamacani ipan talpacti. ⁹ Elqui yaya TOTECO Cati Quinyacana Iilhuicac

Ejcahua Ma Tatanitij cati quititanqui ni tatzacuiliti. Yaya queiehcapan-talis ihueyitilis nopa altepet huan para quinicnotalis nochi cati mohueyi-matiyayaj ipan nochi taltipacti. ¹⁰Tiro ayecmo quipiyas yon quentzi fuerza. Huajca amá analtepet Tarsis ehuan hueli anquintaniquij Tiro ehuan huan anquintamisosolose quej nopa hueyat Nilo tejco huan moapachohua miyac tali. ¹¹TOTECO quixitajtoc imax ipan nochi huejhueyi at campa hueli. Quinchihua ma huihuipicaca nochi tanahuatiani ipan taltipacti. Huan yaya cati quijtojtoc quisosolos nochi nopa chichahuac altepet campa tanamacaj huan tacohuaj.

¹² TOTECO quej ni quijtohua: “Nopa paquilisti cati masehualme quiptiyayaj ipan altepet Sidón ya tamis huan amantzi cati hualase seyoc tali quintajyohuiltise. Masque cholose huan yase hasta tali Chipre, amo quipantise campa mosiyajquetzase.”

¹³ Xijtachilica ni tali campa achtohuiya ajsiyayaj huejhueyi barcos. Nopa Babilonia ehuan quinchijchijque huejcapantique calme para quitanise huan quinosololque nopa yejyetzitzi calme nozona huan quicajtejque quej se tamontomit ten tasoli. Elqui Babilonia ehuan amo tali Asiria ehuan cati quitanque. ¹⁴ Huajca ximochocuilica amojuanti cati annemij ipan barcos ten altepet Tarsis ipan nopa hueyi at pampa ya ixpolijtoc nopa piltaltzi Tiro cati ipan anmotemachiyayaj para anajsitij.

¹⁵ Huan ipan nopa tonali nochi quielcahuase altepet Tiro para 70 xihuit, quej imiyaca nopa xihuit cati itztos se tanahuatijquet. Pero teipa quema tanahuatijtos seyoc tanahuatijquet, nopa altepet sempa motanas. Pero quema tamis nopa 70 xihuit, ipan Tiro elis san se quej cati quihuicatía se momecatijca sihuat. Quijtose: ¹⁶ “Ta timomecatijca sihuat cati mitzelcaj-toque momecahua, xijcui moarpa huan xijyahualo nopa altepet. Xijzotzona nopa huicat cati más yejyetzitzi huan xihuica miyac huicat para sempa ma mitzelnamiquica.” ¹⁷ Huan quema ya tantos nopa 70 xihuit, TOTECO sempa quicahuilis ma motanas altepet Tiro. Pero nopa altepet amo quipatas inemilis. Sempa monamacas ica cati ehuan ten hueli tali ipan taltipacti. ¹⁸ Pero ica miyac tonali, nochi cati nopa tacohuani huan tanamacani quitaniyayaj quiyocatalise para TOTECO, amo san quiajocuisse para inijuanti. Huan se tonali itanca motequihuis para quicohuase tacialisti huan yoyomit cati cuali para nopa totajtzitzi cati quitequipanose TOTECO.

24

Tatzacuiliti ipan nochi taltipacti

¹ ¡Xiquitaca! TOTECO ya itztoc para quisosolos ni taltipacti huan quichihuas ma eli cactoc huan tasosololi. Yaya quinquixtis imasehualhua huan quintitanis ipan campa hueli talme. ² Quinquixtis nochi totajtzitzi huan nochi cati amo totajtzitzi. Quinquixtis taca tequipanohuani huan sihua tequipanohuani, taca tetecome huan sihua tetecome, tanamacani huan tacohuani, cati tetanejtuyayaj se tenijqui huan cati motanehuiyayaj, cati quintahuquiliyayaj huan cati tahuicayayaj. Huan yon se ten injuanti, amo momanahuis. ³ Nochi nopa tali mochahuas cactoc huan tasosololi pampa quej nopa quijtojtoc TOTECO. ⁴ Nopa tali tamihuaquis huan mochahuas sosolijtoc pampa amo huetzis at huan inintochui nochi huaquis. ⁵ Taijyohuis nopa tali por nochi nopa tajtacoli cati quichijque imasehualhua. Nopa masehualme quicuectoque itanahuatilhua TOTECO para ma quijtocta seyoc tamanti. Quipatoque nopa tamachtli cati quinmacac huan quixpanotoque nopa camanal sencahuali cati quichijqui para huejcahuasquia para nochipa. ⁶ Yeca ama TOTECO quititantoc se tatechihualisti ipan taltipacti

por inintajtacol masehualme. Masehualme taijyohuáj por cati quichijtoque. Huan san se quesqui ten injuanti noja mocahuase yoltoque.

⁷ Xocomecat iayo tamis huan xocomeca milme pilinise. Nochi cati paquiyayaj, ama mocuesose huan chocase. ⁸ Nojquiya ayecmo mocaquis más nopa yejyetzitzi huicat cati quichihuaj ica arpas huan pandero, pampa nochi nopa paquilisti cati oncayaya mojmosta, tanqui. ⁹ Nojquiya ayecmo huicase quema taise. Huan nopa taili quimachilise chichic ipan inincamac.

¹⁰ Ipan altepet amo aqui quimatis taya quichihuas. Mopantise ipan se hueyí tequipacholi por nochi tamanti cati amo cuali. Nochi calme quintzacose cuali para amo aqui calaquis para tachtequis. ¹¹ Tacame mosejcotilise ipan calles huan tzajtztinemise pampa amo onca taili. Nochi paquilisti tamis ipan nopa tali. ¹² Nopa altepet mocahuas sosolijtoc huan icaltehua nochi quitahuisojtoque talchi. ¹³ Ya ni panos ipan nochi talme ipan ni taltipacti. San mocahuase se ome masehualme cati yoltoque. Elis san se quej quema quitamitequij itajca se olivo cuahuit huan san mocahuase se ome nica huan neca. O elis quej quema quitamitequij itajca nopa xocomecat huan san mocahua se ome. San se quesqui masehualme mocahuase yoltoque.

¹⁴ Huan nopa se ome masehualme cati noja mocahuase, tzajtztise huan huicase ica paquilisti. Cati itztoque nechca nopa hueyi at ica campa oncalaqui tonati quihueyichihuase TOTECO por ihueyitilis. ¹⁵ Nojquiya nochi cati itztoque ica campa hualquisa tonati hasta cati itztoque iteno hueyi at quihueyichihuase TOTECO cati ininDios israelitame. ¹⁶ Xijtacaquilica quenicatza huicaj nopa masehualme cati itztoque campa ontantoc taltipacti ten se lado hasta seyoc huan quijtohuaj: “Xijhueyitalica yaya cati xitahuac.”

Pero na niquijtohua: ¡Niteicnelti na! Nijpiya se hueyi tequipacholi ipan noyolo pampa campa hueli noja tatani cati amo cuali huan campa hueli masehualme quisenhuiquilíaj tacajcayahuaj. ¹⁷ Nochi masehualme cati itztoque ipan ni taltipacti quipantise majmajti, taquetzti huan ostome cati huejcata para ipan huetzise. ¹⁸ Huan quej nopa nochi cati momanahuse ten nopa hueyi majmajti huetzise ipan taquetzti. Huan nochi cati momanahuse ten nopa taquetzti huetzise ipan nopa hueyi ostome. Pampa elis quej TOTECO quitapos nopa ventanas ipan ilhuicac huan huetzis nelpano miyac tasosololisti. Huan nochi taltipacti tahuel mojmolinis hasta campa tatzquitoc. ¹⁹ Nochi taltipacti tamihuehuelocas, tamitatapacas huan tami mojmolinis. ²⁰ Huan ni taltipacti ixtapalojtinemis quej se ihuintiquet huan mohuisos quej se xajcali quema taajaca chichahuac. Quihuicas iefica nochi masehualme inintajtacolhua huan huetzis huan ayecmo quema motanas.

²¹ Ipan nopa tonali TOTECO quintatzacuultis nochi iilhuicac ejcahua cati itztoyaj ipan ilhuicac huan huetzque ipan tajtacoli. Huan ipan ni taltipacti quintatzacuultis nochi nopa amo cuajcualme cati tanahuatitayaj campa hueli ipan nochi talme. ²² Huan nochi nopa ilhuicac ehuan cati amo cuajcualme quinmontonos ipan se hueyi ostof cati eltoc taltita huan nozona quintzacuas. Huan nozona itztose miyac tonali hasta ajsis tonali para quintajtolsenahuas huan quintatzacuultis. ²³ Huan huajca TOTECO Cati Quinyacana Iilhuicac Ejcahua Ma Tatanitij mosehuis ipan isiya ipan tepet Sion. Huan tanahuatis ipan altepet Jerusalén iniixpa nopa huehue tacame cati quinyacana imasehualhua. Huan cahuanis itatanex hasta nesis quej tonati huan metzti tzintayohuiljtose.

¹ TOTECO, na nimitzpaquilismacas huan nimitzhueyitalis pampa ta tinodios. Ta tijchihua huejhueyi tamanti. Cati huejcajquiya tjsencajqui para tijchihuas, ama melahuac tijchijtoc senquisa quej tiquijto. ² Masque huejhueyi altepeme ta tihueli tiquintamisosolohua huan tiquinchihua quej se tamontomit ten tasoli. Masque quipiyaj tepamit cati tilahuac, ta tijhuelonia huan tijchihua quej tasoli. Tiquinsosolohua nopa yejectziti caltanahuatilme cati onca ipan campa hueli talme huan ayecmo quema quincualtalise. ³ Yeca masehualme ipan talme cati tahuel quipiyaj chichahualisti mitzhueyitalise. Huan nopa talme ica masehualme cati mosisiníaj ama, teipa mitzimacasisse huan mitztepanitase.

⁴ Pero ica cati teicneltziti, ta tiquinmanahuía quema quinajsi taijyohuilisti. Tiquinecahuilía quema tona huan quema tahuel huetzi at. Huan tiquinmanahuía ten mosisinijca tacame pampa inincualancayo eltoc quej se ajcomalacat cati quihuelonia tepamit. ⁵ Tetaijyohuiltíaj quej nopa tatotonilot ipan se huactoc tali. Pero ta tiquintamiltis nopa mosisinijca tacame cati mohueyimati huan cati hualahuaj ipan talme campa hueli. Cati tahuejchihuaj tiquinehcapantalis huan elis quej se mixti huala huan quiseseltia nochi nopa tali cati eltoc itantita.

⁶ Quena, ipan nopa tonali, TOTECO Cati Quinyacana Ilhuicac Ejcahua Ma Tatanitij quichihuas se hueyi tacualisti ipan Jerusalén para nochi masehualme ipan taltipacti. Huan oncas miyac tamanti tacualisti cati tahuel ajhuiyac. Oncas huacax nacat cati más tapejpenili huan oncas miyac xocomecat iayo cati más cuali. ⁷ Huan ipan nopa tepet TOTECO quiijcuenis nopa taecahuilot ten tequipacholi cati eltoc ipan nochi masehualme. Quiijcuenis nopa ecahuili ten miqulisti cati eltoc inintzonta nochi masehualme ipan nochi taltipacti. ⁸ Huan yaya TOTECO Cati Más Quipiya Tanahuatili quitamiltis miqulisti para nochipa huan quihuachilis inixayo nochi masehualme. Nojquiya quitamiltis para nochipa nochi taijyohuilisti huan pinahualisti cati quiajsiyaya ital huan imasehualhua. Quej nopa quiijtojtoc TOTECO para quichihuas.

⁹ Huan ipan nopa tonali masehualme quiijtose: “Yaya ni toDios. Ipan ya timotemachijque huan techmaquixtijtoc. Timochixque ipan ya, huajca ama ma tipaquica pampa techmaquixti.” ¹⁰ Pampa TOTECO quitalis imax ipan altepet Jerusalén huan itanahuatijcayo para quitiocihuas. Pero tali Moab ipan moquejquetzas quej elisquía tasoli. ¹¹ TOTECO quixitahuas imax para quincuatopehuas tali Moab ehuan para tatzinta, quej se tacat cati ajqui quicuatopehua nopa at. Quinehcapantalis masehualme ten Moab para ayecmo mohueyimatise. Quitamiltis nochi tamanti cati amo cuali quichihuaj. ¹² Huan nopa tepamit cati huejcapantic huan tilahuac cati quipiya Moab, TOTECO quihuelonis huan quisosolos hasta quichihuas tatixtic.

26

Israelitame quihuicatisse TOTECO

¹ Ipan nopa tonali nochi ipan tali Judá huicase ni huicat: “Ama tijpiyaj se altepet cati cuali huan quipiya chichahualisti. TOTECO cati techmaquixtijtoc, techyahualojtoc quej se hueyi tepamit para techmocuitahuas.

² Xiquintapoca nochi nopa caltemit para ma calaquica nochi nopa masehualme cati itztoque xitahuaque.

Xiquincahuaca ma calaquica nochi cati temachme.

³ TOTECO, mojmosta tiquinmacas yoltasehuilisti nopa masehualme cati motemachíaj ipan ta, nochi cati quisenhuiquilíaj mitztemohuaj.

⁴ Tayohua tonaya ximotemachica ipan TOTECO pampa san yaya TOTECO Cati Más Quipiya Tanahuatili huelis amechmanahuis para nochipa.

⁵ Yaya quinechcapantalía nopa masehualme cati mohueyimatij.

Quintepexihuía nopa altepeme cati ipan itztoyaj.

Quintahuisohua hasta talchi huan quihuelonia inintepa.

⁶ Ama nopa teicneltzitzí cati quintajyohuiltiyayaj ipan moquejquetzaj cati mocahua ten inialtepe.”

⁷ TOTECO ta tijchihua para nopa ojti cati quitoquilíaj cati xitahuaque moixpa amo cana fiero, yon amo ixtejcolis.

Pampa ta, TOTECO, amo titemaca se ojti cati fiero o cati amo cuali. Ta tijxitahua nopa ojti huan tijchihua yejyectzi.

⁸ TOTECO, tojuanti tijtoquilíaj moojhui cati xitahuac huan timochiyaj san ipan ta.

Techpactía miyac tijchihuase cati ta tijnequi.

Ipan toyolo san tijnequij timitzhueyichihuase.

⁹ Seyohual nimitztemohua ica nochi noyolo.

Huan quema niisa ica ijnaloc noja nimitztemohua.

Pampa fiero masehualme amo quicahuase quichihuase cati amo cuali huan quipehualtise quichihuase cati xitahuac,

hasta quema ta tihualas para tiquintajtolsencahuaqui huan tiquintatzacuilitiqui cati itztoque ipan ni tali.

¹⁰ Pero masque tiquinnextilía teicnelijcayot nopa masehualme cati fiero ininemilis, amo moxitahuaj.

Quisehuiquilíaj quichihuaj tamanti cati amo cuali ipan nopa tali campa sequinoc quichihuaj cati xitahuac.

Huan amo quichihuilise cuenta mohueyitilis, TOTECO.

¹¹ Inijuanti amo mitztacaquilíaj quema tiquintacahuáltía.

Huan quema tijtanana momax para tiquintatzacuilitis, injuanti amo quiitaj, yon amo quichihuilíaj cuenta.

Pero xiquinnextili quenicatza tiquinicnelía momasehualhua, huan pinahuase.

Huan nopa tit cati ticajoctoc para mocualancaitacahua ya eltoc para quintzontamiltis.

¹² TOTECO, ta cati techmaca tasehuilisti.

Nochi cati quisa cuali cati tojuanti tijchihuaj eltoc pampa ta tijchijtoc nopa tequit ipan tojuanti.

¹³ TOTECO ta cati titoDios, quipiya miyac tonali technahuatiyayaj sequinoc tetecome,

pero ama san ta timitzhueyitepanitase.

¹⁴ Nochi injuanti cati tiquintequipanojqe, ama ya mictoque huan ayecmo hualase sempa,

ixpolijque huan ayecmo quema motananase.

Pampa ta tiquintatzacuiliti huan tiquintamiixpolihuilti.

Ama ayecmo aqui quinelnamiqui.

¹⁵ TOTECO, ta tiquinmiyaquilijtoc momasehualhua ipan total.

Tijchijqui para más ma monexti mohueyitilis.

Huan tijchijtoc total nojquiya ma eli más hueyi.

¹⁶ TOTECO, quema israelitame taijyohuiyayaj, timitztemojque.

Quena, quema ta techtatzacuiliti, timotatajtijque ica ta.

¹⁷ Tiitztoyaj moixpa quej se sihuat cati momimilohua ica tacuajcualoli quema quitacatiltia icone.

¹⁸ Tojuanti tiitztoyaj ica tacuajcualoli huan tichocayayaj quej se sihuat, pero san tapic titaijyohuijque pampa amo teno tijtacatiltijque.

Amo tihuelque titatanise para total huan amo teno quisqui ten totaijyohuilis. Amo aqui tacatqui para mochihuase más masehualme ipan ni taltipacti.

¹⁹ Pero tijpiyaj ni camanali cati temachti:

Nochi cati ya mictoque cati moaxcahua TOTECO, sempa moyolcuise

Huan inintacayohua sempa motananase campa quintalpachojtoque.

Quena, nochi cati itztoque ipan ostot sempa isase huan huicase ica paquilisti.

Itaahuil TOTECO cati temaca nemilisti motalis ipan injuanti quej elisquía ajhuechti.

Tatzacuiliti huan tayancuiliti

²⁰ Annomasehualhua, xiyaca amochajchaj huan xijtzacuaca amocaltehua campa anitztose temachti.

Ximotatica se talojtzi hasta quema ya panotos icualancayo TOTECO huan ya quintzontamiltijtos nochi icualancaitacahua.

²¹ TOTECO quisas ten ichaj huan hualas ipan ni taltipacti para quintatzacuilitiqui nochi masehualme por inintajtacolhua.

Huan monextis ajquiya temictijtoc ipan ni taltipacti huan ayecmo huelis motatis.

Mopanextise nochi cati quihuicaj tajtacoli.

27

Israelitame elise majcajtoque

¹ Ipan nopa tonali TOTECO quicuis imacheta cati temajmati, hueyi huan tatequi, huan quitatzacuilitis nopa hueyi tapiyali cati itoca Leviatán; nopa cohuat cati nemi chichahuac huan motepayolohua. Huan quimictis nopa hueyi tapiyali cati itoca dragón cati itztoc ipan hueyi at.

² Ipan nopa tonali TOTECO huicas ten nopa xomeca mili cati tahuel quicnelía. Quej ni quijjtos: ³ “Israelitame itztoque noxocomecamil. Na niquinmocuitahuía. Talojtzitzi nijtequilía at noxocomecamil, huan nijmanahuía tonaya huan tayohua para amo teno quichihuilise nocualancaitacahua. ⁴ Na ayecmo nicualani inihuaya. Huan sinta niquitas quinpiyaj inincualancaitacahua cati quincuatotoníaj quej huitzti huan sahua mecat, huajca na niquinhuihuitas huan niquintatis. ⁵ Huan san huelis momanahuisse inincualancaitacahua sinta moyoltalise nohuaya huan techtajanise ma nimoyoltali inihuaya.”

⁶ Ajsis tonali quema israelitame * sempa quipiyase ininelhuayo huan chamanise huan xochiyohuas quej se cuahuit quichihua. Nochi taltipacti temis ica itajca. ⁷ TOTECO amo quintatzacuilitijtoc israelitame quej quintatzacuiliti inincualancaitacahua, yon amo quinmictijtoc israelitame quej quinmicti sequinoc cati temictijtoque. ⁸ Pampa TOTECO san quintatzacuilitijtoc pilquentzi. San quinquinixti ten inintal huan quintitanqui ipan sequinoc talme. Eltoc quej quinhuicac nopa hueyi ajacat cati huala ica campa hualquisa tonati. ⁹ Huan ¿taya nonequi quichihuase israelitame para quiselise tapojpolhuili ten inintajtacolhua? San se tamanti nonequi

* 27:6 27:6 O iixhuihua Jacob.

quichihuase: Ma quichihuaca tatixtic nochi nopa teme cati quintequihuijtoque para taixpamit, ma quintamiixpolihuiltica nopa teteyome ten Asera huan nopa taixcopincayome ten tonati. Huan quej nopa ayecmo quema quinhueyichihuase. ¹⁰ Pampa nochi ialtepehua cati moyahualojtoque ica tepamit mocahuase cactoque quej huactoc tali. Nochi calme quintahuelcalhuase huan nochi nopa calles temis ica miyac tamanti xihuit. Huan nopona mosiyajquetzase huan tacuajtinemise huacaxme. Huan quitamicuase inimacuayohua nochi cuame.

¹¹ Nomasehualhua itztoque quej se cuahuit imacuayohua cati huactoque. Huan yeca postequij huan nopa sihuame hualahuij huan quinhuicaj para quintatise. Nomasehualhua tahuel huihuitique huan amo talnamiquij pampa mohuejcatelijque ten TOTECO Cati Quinchijchijqui. Yeca TOTECO amo quintapojpolhus, yon amo quintasojtas.

¹² Pero ajsis tonali quema TOTECO quinsentilis sese ten inijuanti quej quichihua se masehuali quema quitapejpenía et ipan imax. Quintapejpenis sesen ten inijuanti campa hueli ipan nopa imil cati pehua campa hueyat Eufrates huan ontami campa inepa tali Egipto. ¹³ Ipan nopa tonali quipitzase nopa hueyi tapitzali, huan nochi inijuanti cati itztose ipan tali Asiria huan cati quinhuicatose tali Egipto, hualase quihueyimatiquij TOTECO ipan nopa tepet cati tatzejtelolitic cati eltoc ipan altepet Jerusalén.

28

TOTECO quitatzacuiltis altepet Samaria huan Jerusalén

¹ ¡Teicneltique altepet Samaria ehuan pampa hualahuij cati quisosolose inialtepe! Nochi ihuintini ten tali Israel * mohueyimatij por nopa altepet huan quimatij quipixtosquíaj se inincorona pampa tahuel yejyectzi nopa tamayamit cati quiyahualojtoc. Pero nimantzi pilinis iyejyejca nopa altepet cati quiyiya imasehualhua cati ihuintitoque huan tepejtoque ipan nochi calles. ² Nelía teicneltzi pampa TOTECO quintitanis miyac soldados cati tahuel quiyiyaj chichahualisti para quitehuise. Hualase ipani quej tesihuit, o quej se hueyi ajacat o quej at cati huetzi chichahuac. O hualase ipani quej se hueyat cati temitoc ica at huan nochi quitahuisohua hasta talchi. ³ Altepet Samaria elqui se altepet cati tahuel ica mohueyimatiyayaj ihuintini ten tali Israel huan quitayayaj quej se corona. Pero icualancaitacahua nopa altepet quimajcahuase hasta talchi huan ipan moquejquetzase. ⁴ Samaria elqui se altepet cati tahuel yejyectzi huan moyahualojtoc ica se tamayamit, pero ama tanqui nochi iyejyejca. Ixpolihuis ipan se talojtzi quej nopa higo cati icsi achtohui, huan quema se acayja quiita, nimantzi quitequi huan quicua.

⁵ Huan ipan nopa tonali, mohueyimatise israelitame ica TOTECO Cati Quinyacana Iilhuicac Ejcahua Ma Tatanitij. Elis yaya cati quinpaquilismacas imasehualhua cati noja mocahuase. ⁶ Yaya quinmacas nopa tetajtolsencahuani se iniyolo cati cuali para ma tetajtolsencahuaca xitahuac. Huan quichihuas para nopa soldados cati tamocuitahuíaj campa icalte nopa altepet ma motemacaca para quintzontamiltise nochi inincualancaitacahua.

Tatiochihuali para Jerusalén

⁷ Pero ama ihuintini quinahuatíaj nopa tali. Hasta nochi nopa totajtitziti huan tajtolpanextiani mocuapolojtoque ica taili cati nelchichic huan ixycanejnemij pampa ihuintitoque. Tahuel mohuihuichijtoque ipan inintequi, mocuapolojtoque huan quichijtinemij miyac tamanti cati amo cuali. ⁸ Nochi

* 28:1 28:1 Efrain.

inimesas temitoc ica iniisotal hasta ayecmo onca yon se lugar cati tapaj-pactic.

⁹ Pero nopa totajtzitzi huan tajtolpanextiani quiijtohuaj ten na niIsaías: “¿Ajquiya ni tacat para techilhuis ni tamanti? Amo monequi tijtacaquilise itamachtil. ¿Yaya moilhuía tiitztoque quej conetzitzi cati ayemo huelij camanaltij huan cati sanoc quicajtoque chichij?” ¹⁰ Pampa nochipa techilhúa san se tamanti. Techmachtía ica camanali cati amo ohui. Eltoc quej quinmachtisquía coneme cati pehua tapohuj: ba be bi bo bu.”

¹¹ ¡Cualtitoc! Pampa ni tacame amo quinequij quitacaquilise cati na niIsaías niquinilhuía, TOTECO quincamanalhuis ica camanali cati ohui para quimachilise ica seyoc tali ehuan cati quintaijyohuiltise, pampa TOTECO quintitanilis sequinoc tali ehuan para quintazacuiltise. ¹² Eltoc quej TOTECO achtohuiya quinilhui: “Sinta antechtepanitase huan anquipiyase se cuali nemilisti, huajca nica ipan amotal anquipiyase tasehuilisti huan tasiyajquetzalisti.” Pero injuanti amo quinejqe quitacaquilise. ¹³ Huajca TOTECO quincamanalhuis talojtzitzi ica camanali cati amo ohui. Huan talojtzitzi quiompahuis icamanal para quimachilise. Pero injuanti noja amo quimachilise nopa camanali cati amo ohui huan elis quej motepotanise, huan ajquetzhuetzise huan tahuel mococose. Quinmasiltise huan quinitzquise huan quinhuicase seyoc tali.

¹⁴ Huajca nochí antetaijilhuijca tacame cati anquinahuatíaj altepet Jerusalén, xijtacaquilica icamanal TOTECO. ¹⁵ Eltoc quej amojuanti anquijtohuaj: “Tojuanti tijsencajtoque se camanali para amo aqui techmictis huan amo tuyase campa mijcatzitzi. Timonamacatoque ica cati techmanahuisse inimaco nopa tali Asiria ehuan. Huajca amo teno huelise techchihuiltise pampa timotemachijtoque ipan cati tacajcayahua huan ipan istacatili.”

¹⁶ Pero TOTECO Cati Más Quipiya Tanahuatili quiijtohua: “Xiquitaca, na nijtalia se tet senquisa campa monequi ipan altepet Sion † para se tatzinpehualtili. Tetic nopa tet huan cuali tatapejpenili. Tahuel miyac ipati. Yaya eltoc temachtí para ipan moquetzas nopa hueyi cali. Cati quineltocas ya, itztos temachtí huan amo teno quimajmatis. ¹⁷ Quej se quitamachihua se cali ica se lazo ten tatamachihuali, na niquijitas sinta nomasehualhua quichihuj cati xitahuac. Huan quej cati quitequihúa se nivel para quiitas sinta cuali eltoc nochí nopa itzinpehualtil, niquijitas sinta quichihuj cati cuali. Cati ipan anmotemachíaj nesi yejyectzi, pero amo quiipiya chichahualisti. Sinta ipani huetzis tesihuit, nimanntzi huelonis pampa san istacatili. Huan quej miyac at cati pano quitahuisohua nochí talchi, amocualancaitacahua amechquixitise.” ¹⁸ Na nijtamiltis nopa camanali cati anquichijtoque ica miquilisti para amo amechmictise huan anyase campa mijcatzitzi. Huan yeca quema hualase amocualancaitacahua quej se hueyat, anhuetzise huan amopani moquejquetzase. ¹⁹ Huan amocualancaitacahua itztose quej se hueyat cati hualase mojmosta; tayohua huan tonaya amechtizontamiltiquij hasta ajsis tonali para amechhuicase ipan seyoc tali. Huan san para quicacuisse nopa camanali cati ajsitihuala, amechchihuas xihuihuipicaca.

²⁰ Amo cana huelis anotatise pampa amo amechpalehuis cati ipan anmotemachijtoque. Eltoc quej nopa tapechti cati anquichijchijque para ipan ancochise pisiltzi huan amo amechaxilía. Huan amotaque nojquiya cototzi huan yeca amo amechaxilía para anmopiquise. ²¹ TOTECO hualas ica ihueyi cualancayo ipan se talojtzi quema amo anquichiyaj huan amechtehuis quej hualajqui huejcajquiya ininpa nopa filisteos ipan tepet Perazim

† 28:16 28:16 O Jerusalén.

huan nopa amonitame ipan tepet Gabaón. Yaya hualas para quichihuaqui se hueyi tamanti cati amo quema quitztoque para pano. Huan amo quema quicactoque pampa yaya quintzontamiltis ten ya imasehualhua. ²² Huajca ayecmo más xitetajilhuica para amo anquiselise se tatzacuiltli cati noja más hueyi, pampa TOTECO Cati Quinyacana Iilhuicac Ejchahua Ma Tatanitij techyolmelajtoc para yaya quisencajtoc amechtzentamiltis.

Italnamiqulis TOTECO

²³ ¡Xijtacaquilica nocamanal! Quena, cuali xijtacaquilica cati nimechilhuis: ²⁴ Se miltequipanojquet amo quisenhuiquilia quipoxonijtinemi ital huan amo quema tátojtocá. Amo nochipa tamehua huan amo quema quitoca ixinach. ²⁵ Quema ya quicualtalijtoc ital, yaya yahui huan quitoca iyol nopa eneldo huan comino. Nojquiya ica surcos quitoca trigo, cebada huan avena. Huan sesen tamanti iyol quitoca ipan nopa lugar campá quinquamiqú. ²⁶ Yaya quimati taya quichihuas huan quenicatza quitocas pampa Toteco Dios quimacatoc talnamiquilsti. ²⁷ Yaya quimati para sese tamanti monequi quiyolquixtis quej quinquamiquí. Nopa eneldo amo quiyolquixtia ica se cuahuit cati etc. Huan nopa comino amo quipanoltis ipani se carro para quiyolquixtis pampa eneldo huan comino monequi quihuitequise melajtzi ica se acat para quiyolquixtise. ²⁸ Monequi quitejtejtzonas trigo para quiyolquixtis, pero amo huéli quisenhuiquilis quitejtejtzonas. Huéllis quipanoltia ipani se carro, pero amo huéli quicahuilis ma eli tatixtic. ²⁹ Pampa TOTECO Cati Quinyacana Iilhuicac Ejchahua Ma Tatanitij, yaya itztoc se yejyectzi tamachtijquet huan temaca se cuali talnamiquilsti.

29

TOTECO quiyolmelahua altepet Jerusalén

¹ ¡Teicneltique cati ehuaní altepet Jerusalén*, nopa Altepet ten David! Sesen xihuit antemacaj miyac tamanti tacajchualisti nozona. ² Pero na nijtitanis ininpa Jerusalén ehuaní se hueyi tatzacuiltli huan oncas miyac choquisti huan tacuajcualoli. Altepet Jerusalén quipiyas miyac esti. Elis quej nopa seyoc lado cati itoca Ariel. (Ariel quinequi quijjtos: Taixpamit Campa Toyajtoc Miyac Esti.) ³ Na niéllis niicualancaitaca nopa altepet huan nijyahualos ica miyac soldados para nijtehuis. Huan niquinchijchihuas huejcapantique calme para ipan tejcose para quitanise nopa altepet. ⁴ Huan Jerusalén elis quej se animajtzi cati quinequi camanaltis ten nozona taltita campá quitalpachojtoque, huan itoscac caquistis quej se cati ichtaca camanaltis.

⁵ Pero san ipan se talojtzi niquinquixtis nochi nopa miyac icualancaitacahua Jerusalén cati tahuel temajmatijque huan injuanti ixpolihuisse quej taltepociti. Icualancaitacahua Jerusalén elise quej itasolo trigo cati quihuica ajacat pampa niquinajsis ipan se talojtzi quema amo anquichiyaj. ⁶ Quena, na, niamoTECO Cati Niquinyacana Noilhuicac Ejchahua Ma Tatanitij, niquinajsis ica tatomonilot cati nelchicahuac para nimechmanahuis anJerusalén ehuaní. Huan nijchihuas ma mojmolini tali huan caquistis nelia chicahuac. Huan nijtitanis se hueyi ajcomalacat huan se tit cati nochi quitatis. ⁷ Huan nochi masehualme cati ehuaní sequinoc talme cati quitehuisse altepet Jerusalén huan icalhua cati cuali tasencahuili, nochi ixpolihuisse ipan se talojtzi quej elisquía se temicti cati tiquita ipan motalnamiquilsti

* **29:1** 29:1 Quijtohua Ariel cati quinequi quijjtos 'taixpamit'. Ya ni eltoya seyoc itoca Jerusalén por nopa taixpamit cati nozona oncas.

ica tayohua. ⁸ Se tacat cati tahuel mayana quitemiqui para tacua, pero quema isa amo teno quipiya ijtico huan noja mayana. Huan se tacat cati tahuel amiqui quitemiqui para ati, pero quema isa quimati noja yamaniya huan siyajtoc pampa amiqui. Ijquiyampa nopa masehualme ten sequinoc talme cati quitehuise altepet Jerusalén † quitemiquise tatani, pero san tapic pampa amo tatanise.

⁹ Huelis sequij anJerusalén ehuan amo anquinelto caj cati ni quijtohua. ¡Huajca, cualtitoc! San xijsenhuiquilica xijchihuaca cati fiero. Noja xixtactoca para amo teno huelis anquitiase. Xihuetztinemica quej ihuintini masque amo anihuintitoque. Xiixacanejntenemica masque amo anquitoque xomeca iayo cati nelchichic. ¹⁰ TOTECO quititancoc amonani se hueyi cochisti. Quitzajqui iniixteyolhua amotajtolpanextijcahua huan quitzajqui inixayac amotachixcahua. ¹¹ Para injuanti nochi ni tanextili huan cati quijitosnequi ica cati panos teipa elis quej se amatajcuiloli cati cuali tzactoc. Huan masque quimactilise nopa amatapohuali se cati hueli tapohua huan quilhuisse: “Xijpohua ni amat.” Yaya quijitos: “Amo nihueli nijpohuas pampa nopa amatajcuiloli cuali tzactoc.” ¹² Huan sinta quimactilise seyoc cati amo hueli tapohua huan quilhuisse: “Xijpohua ni amat.” Yaya quinnanquilis: “Amo nihueli nitapohua.” Pampa nochi itztoque quej popoyotziti.

¹³ Huajca TOTECO quijtohua: “Ni masehualme quijtohuaj para noaxcahua huan injuanti techhueyimati ica inincamac, pero iniyolo eltoc huejca ten na. Huan quema techhueyichihuaj san quitequihuaj tanahuatilme huan camanali cati masehualme quinmactijtoque. ¹⁴ Huajca yeca, na nijchihuas huejhueyi tamanti iniixpa nochi ni masehualme cati quichihuaj ome inixayac huan injuanti tahuel san motachilise. Huan ni quinhuihuichihuas talnamiquini huan nijnextis para inintamactil masehualme amo teno ipati.”

¹⁵ Nelía teicneltique nopa masehualme cati quisencahuaj quichihuase cati fiero huan quichihuaj campeca quitatise ten TOTECO, pampa temacti TOTECO quintatzacuiltis. Quichihuaj miyac tamanti ipan tzintayohuilot huan quijtohuaj: “TOTECO amo huelis techitas huan amo quimati taya panonica.”

¹⁶ Nelía hueyi mocuapolojtoque injuanti cati quijtohuaj ya nopa. TOTECO yaya amechchijchijqui. Yaya itztoque quej se chachapalchijquet cati más hueyi que amojuanti cati anitztoque quej soqui chachapalme cati quinchijchijqui. Se soqui chachapali amo quilhuis iteco: “Amo ta cati techchijchijqui.” Se comit amo huelis quilhuis cati quichijchijqui: “Amo tijmati tijchihua comit.”

TOTECO quinmaquixtis israelitame

¹⁷ Ayecmo miyac tonali polihui para nopa huactoc tali Líbano mochihuas se hueyi mila cati yejyectzi huan cati temaca miyac itajca. Huan nozona elis cuatitamit cati xoxohuic huan yejyectziti. ¹⁸ Ipan nopa tonali masehualme cati amo hueli tacaquij quicaquise nopa camanali quema quinpohuilise ten nopa amatajcuiloli. Huan nopa popoyotziti cati itztoque ipan tequipacholi huan ipan tzintayohuilot quitiase. ¹⁹ Nochi cati moicnonequij sempa quipiyase nopa hueyi paquillisti cati huala ten TOTECO. Huan cati teicneltzitzi paquise ipan TOTECO cati Tatzejzeloltic huan cati itztoque inihuaya israelitame. ²⁰ Pampa ayecmo itztose injuanti cati mosisinaj huan tetajilhuaj. Tzontamise nochi injuanti cati senquisa quinequij quichihuase cati amo cuali. ²¹ Tamise nochi amo cuajcualme cati quitajtacoltíaj se masehuali cati

† 29:8 29:8 O Sion.

amo teno quichijtoc. Ayecmo itztose amo cuajcualme cati tacajcayahuaq huan quitzacuilíaj se juez para amo quintatzacuiliti tacame cati quichihuaq cati fiero. Tamise nochi cati istacatij para se juez amo hueli quichihuas cati xitahuac ica se masehuali cati amo taixpanotoc.

²² Yeca TOTECO, cati quimanahui Abraham, quej ni quinilhuía israelitame†: “Ayecmo ixchipahuyase israelitame sempa ica majmajti, yon amo aquí quinpinahualtis. ²³ Pampa quema quuitase quenecatza nijchihuas tahuel ma momiyaquilica, quuitase notatzejtzololhui na cati niTatzejtzololitic huan niitztoc inihuaya israelitame. Huan techimacasise huan techtepanitase. ²⁴ Huan huajca nochi cati mocuapolojtoque quinelto case cati melahuac, huan nochi cati mosisiníaj motemacase para ma quimachtica.”

30

Amo cuali nopa camanal sencahuali ica Egipto

¹ TOTECO quijtohua: “Nelía teicneltique noisraelita masehualhua pampa temachtí niquintatzacuilitis. Tahuel mosisiníaj. Cati hueli quiiilhuíaj ma quintalnamicti, pero na amo teno techilhuíaj para ma niquintalnamicti. Huan quisencahuaq quenecatza quichihuase miyac tamanti cati na amo niquinilhui ma quichihuaca. Mosejcotilíaj huan quichihuaq camanal sencahuali ica sequinoc cati noTonal amo quinequi ma quichihuaca. Huan quej nopa inintajtacolhua noja más momiyaquilica. ² Inijuanti yajque ipan tali Egipto para tajtanitij tapalehuili, pero amo techtajtanijque caquihuili para yase. Ama inijuanti motemachíaj ipan Faraón para ma quinmanahui. ³ Pero Faraón amo huelis quinmanahuis masque quintajtolcahuilijtoc para quichihuas. Huan pampa motemachijtoque ipan Faraón, teipa mopinahualtise huan amo quimatise taya quichihuase. ⁴ Huan masque ichicahualis Faraón yas hasta altepet Zoán huan ajsis hasta altepet Hanes, ⁵ yon se pilquentzi amo huelis quinpalehuis nopa israelitame. San quinhualiquilis pinahualisti huan taijyohuiliti pampa motemachijque ipan ya.”

⁶ Ya ni nopa camanali cati TOTECO quititani ten nopa tapiyalme cati mopantíaj ipan tali Neguev. Israelita tayacanani yahuij ipan tali Egipto ica burrojme huan camellos cati quimamajtiyahuij miyac tamanti cati patiyo para quintaxtahuitij tali Egipto ehuan por itapalehuil. Quiixcotonaj nopa huactoc talme campa tahuel mahuilili pampa nopona itztoque leones cati mosisiníaj huan cohuame cati temictíaj huan motalohuaq chicahuac. Pero nochi cati quichihuaq eltoc san tapic, pampa Egipto amo teno huelis quinchihuilis. ⁷ Nochi itapalehuil tali Egipto amo teno ipati. Yeca na nijtocaxtia Egipto: “Nopa hueyi cohuat cati amo teno hueli quichihua.”

⁸ Xiya huan xiquicuilo ipan se huapali nochi camanali cati niqijtohua ten tali Egipto. Ma mocahua hasta nopa tayacapan tonali para quintelhuis nopa israelitame pampa amo quinelto case TOTECO. ⁹ Pampa israelitame tahuel mosisiníaj. Nochipa istacatij huan amo quinequij quitacaquilise icamanal TOTECO. ¹⁰ Quinilhuíaj nopa tachiyani: “Ayecmo xiquitaca yon se tanextili.” Huan nopa tajtolpanextiani quinilhuíaj: “Ayecmo techilhuica cati melahuac. Techpohuilica camanali cati techpactis. Techpohuilica istacatili. ¹¹ Xijcahuaca nopa ojti cati xitahuac. Ayecmo techcuatotonica ica tequipacholi cati techilhuia para ajsise. Techyolajsitoc miyac camanali ten TOTECO cati Tatzejtzololitic cati itztoc tohuaya tiisraelitame.”

† 29:22 29:22 Iixhuihua Jacob.

¹² Huajca TOTECO cati Tatzejtzeltolitic cati itztoc inihuaya israelitame quiijtohua: “Pampa anquihuejcamajcajtoque nocamanal huan anmotemachíaj ipan tatehuilisti huan ipan tamanti cati amo cuali, huan amo anquinequij anmoyolcuepase; ¹³ taloch hualas amopani se hueyi tatzacuilti quema amo anquichiyaj. Anelise quej se tepamit cati ya pejtoc moxolehua huan teipa huelonis ica se talojtzi. ¹⁴ Quej se quitapanas se soqui comit, TOTECO moquejquetzas amopani huan amechchihuas tatixtic, yon amo amechtasojtas. Huan amo mocahuas yon quentzi cati huelis quitequihuse para ipan quihuicase ticoli o para quiquixtise at ipan se ameli.” ¹⁵ TOTECO Cati Más Quipiya Tanahuatili cati Tatzejtzeltolitic huan cati itztoc inihuaya israelitame quiijtohua: “Sinta anmoyolcuepase ica na huan anmosiyajquetzase, na nimechmaquixtis. Sinta anmotemachise ipan na huan amo anmolínise, anquipiyase chicahualisti. Pero amo anquinequij anquichihuase.”

¹⁶ Huan anquiijtohuaj: “¡Amo tijneltojac mocamanal! Tali Egipto techpalehuis. Nopa egiptome techmacase cahuayojme cati motalohuaj chicahuac para titatehuise.”

Pero nimechilhuía, achi más motalose chicahuac amocualancaitacahua cati amechquixtise. ¹⁷ Se amocualancaitaca quinquixtis se mil ten amojuanti. Huan macuilti ten injuanti amechquixtise nochí hasta amo mocahuase ome san sejco. Huan anmocahuase amoseltitzitzi quej se icuayo bandera cati ijcatoc iseltitzi ipan se tepet cati mocahuaj huejca.

TOTECO quintiochihuas imasehualhua

¹⁸ Pero TOTECO amechchiya xijtemoca para huelis amechnextilis iteicnelicayo. Yaya quinequi amechtasojtas quej quiijtojtoque, pampa TOTECO, yaya se Dios cati senquisa quichihua cati xitahuac. Huajca ma paquica nochí masehualme cati motemachiyaj ipan ya para ma quinpalehui.

¹⁹ Annomasehualhua cati anitztoque ipan altepet Jerusalén, ajsis tonali quema ayecmo anchocase. Ipan nopa tonali, quema TOTECO quicaquis anquitzajtzilise para ma amechpalehui, amechtasojtas miyac huan nimantzi amechnanguilis. ²⁰ Huan masque TOTECO mojmosta amechmacatoc taijyohuilisti huan tequipacholi, yaya itztos amohuaya para amechmachtis. Yaya cati amotamachtijca ayecmo motatis huan ica amoixteyol anquiiatase. ²¹ Huan sinta amojuanti anquicahuase iojhui TOTECO huan anmocuaapolose, huajca ica amoica anquicaquise se itoscac cati quiijtos: “Amo ya ni nopa ojti. Huajca ximocuepaca huan xijtoquilica ne ojti.”

²² Huan huajca anquintapanase amoteteyohua ten plata huan nopa taixcopincayome ten oro. Huan anquintepehuase quej se yoyomit cati tahuel fiero cati amechtaijyaltía quema anquinechcahuíaj. Huan anquinilhuse nopa teteyome: “Xiquisaca pampa ayecmo timechnequij.”

²³ Huan huajca TOTECO amechtiochihuas huan quichihuas ma huetzí at ipan nopa tonali quema anquitocase amoxinach. Nojquiya quichihuas ma onca miyac pixquisti. Huan quimiyaquilis nopa sacat campa facuajtinemise amohuacaxhua. ²⁴ Huan nopa torojme huan pilburrojtzitzi cati quipoxoníaj nopa tali, quicuase trigo cati tapajpacti, cati ya quieyeyectijtoque ica pala huan nopa ajacat quihuicac itasolo huan san mocajqui iyol. ²⁵ Ipan nopa hueyi tonati ten miquilisti quema TOTECO quintzontamiltis icualancaitacahua huan quintahuisos nochí torres huan calme cati más cuali tasencahuali, TOTECO quichihuas ma onca miyac at cati quintemitis miyac pilatajtzitzi huan hueyame cati temose ten nochí tepeme huan tachiquilme. ²⁶ Huan ne metzti taahuis quej tonati, huan ne tonati taahuis chicome huelta

más chicahuac quej elisquía chicome tonati. Quej nopa elis quema TOTECO pehuas quinchichuvas imasehualhua huan quinpajtis campa quincocojtoc.

TOTECO quintatzacuilitis Asiria ehuan

²⁷ Xiquitaca, ya huala TOTECO ten huejca ica nochi ichichualis huan yaya tahuel cualani. Yahualtic ten ya tejco miyac pocti. Icamac temitoc ica miyac cualanti huan icamanal tetzontamiltía quej tit. ²⁸ Iijyoyo hualas ipan icualancaitacahua quej se hueyat para quintzontamiltis. Nochi masehualme cati mohueyimatij ipan nochi talme quintzejtzelos. Quena, ica ihueyi cualancayo quintzejtzelos quej masehualme quichihuaj ica trigo para quiquixtilise itasolo. Quintalilis tepos camachali nochi nopa talme ehuan huan quinquicas ipan nopa lugar campa quintzontamiltis.

²⁹ Pero amojuanti cati animasehualhua TOTECO anpaquise huan anhuicase quej anhuicaj tayohua ipan nopa ilhuime cati tatzejtzeltique. Quena, anpaquise miyac ipan amoyolo quej paqui se tacat cati tapitza quema quinyacana paxalohuani para ma yaca Jerusalén campa eltoc itiopa TOTECO, nopa tamanahuijquet ten israelitame. ³⁰ Huan TOTECO quichihuvas para nochi masehualme ma quicaquica itoscac cati quiptiya tequiticayot huan nochi quimachilise icualancayo. Huan ica imax quintatzacuilitis icualancaitacahua. Huan ica icualancayo hualas tit cati tahuel totonic, huan huejhueyi ajcomalacat, huan tatomonilot huan tesihuit. ³¹ Quema quicaquise TOTECO itoscac huan quiselise inintatzacuilit cati nelía chicahuac, tahuel momajmatise nopa Asiria ehuan. ³² Huan sese huelta quema TOTECO quinmaquili nopa Asiria ehuan, israelitame más paquise ica tatzotzonali ten panderos, arpas huan ica huicat. ³³ Hasta huejcajquiya TOTECO quisencajqui se lugar para se hueyi tilelemecti cati quitatis nopa tanahuatijquet ten Asiria. Nopa ostot eltoc tahuel huejcata huan patahuac huan ya quiptiya tahuel miyac cuahuit para nopa tit. Huan TOTECO iijyoyo quipehualtis nopa tit cati tatas tahuel totonic quej tata se hueyi tepet.

31

Amo quisa cuali itapalehuil Egipto

¹ Nelía teicneltique nopa masehualme cati yahuij ipan tali Egipto para quitemose tapalehuili huan motemachíaj ipan nopa cahuayojme huan carrojme ten nozona. Temachtí TOTECO quintatzacuilitis pampa amo motemachíaj ipan yaya cati Tatzejtzeltic cati itztoc inihuaya israelitame, yon amo quitemohuaj para ma quinpalehui. ² Pero TOTECO ica ihueyi talnamiquilis quititanis huejhueyi taohuijcajot huan amo moyolcuepas. Motananas para quintatzacuilitis israelitame por nochi tamantí cati amo cuali cati quichijtoque huan nojquiya quintatzacuilitis nopa sequinoc tali ehuan cati inihuaya mopalehuíaj. ³ Pampa nopa egiptome san masehualme huan amo injuanti dioses. Inincahuayojhua san nacat cati amo teno ipati. Nopa cahuayojme amo neli tonaltzitzí cati quiptiyaj chicahualisti. Huajca quema TOTECO quitananas imax iniixpa, nochi injuanti huetzise. Huetzise cati quitemohuayaj tapalehuili huan cati tepalehuisquíaj. Nochi ome huetzise san sejco.

⁴ Pero TOTECO techilhuijtoc ya ni: “Quema se león masque noja conetzi quitzontamiltía se borrego, amo momajmatía masque quitzajtzilía nopa tamocuitahuíjquet. Huan quisenhuiquilia quintzontamiltía nopa borregojme.

Quej nopa nojquiya elis quema na niamoTECO Cati Niquinyacana Noilhuicac Ejchahua Ma Tatanitij nihualas para niqinmanahuis nomasehualhua ipan Jerusalén*. Amo aquí huelis techtilquetzas. ⁵ Na nipatantinemis itzonta altepet Jerusalén quej se totot patantinemi yahualtic itepasol. Teipa nitemos ipan nopa altepet huan nijmocuitahuis, nijmanahuis, nijmaquixtis huan nijchololtis.”

⁶ Yeca anisraelitame, masque tahuel anmosisiníaj huan fiero amoyolo, xihualaca huan xitacuepilica ica TOTECO. ⁷ Ajsis se tonali quema sese ten amojuanti anquinmajcahuase amoteteyohua ten plata o oro cati amojuanti antajtacolchijca tacame anquinmachijchijtoque. ⁸ Huan motzontamiltise nochi nopa asirios. Pero amo miquise ica macheta cati quitequihuíaj masehualme, pero elis TOTECO cati quinmictis. Huan nopa asirios amo quimatis taya quichihuase. Tahuel momajmatise huan cholojtehuase. Huan quinhuicase nopa tellocame asirios cati tahuel quipiyaj chichahualisti para tetequipanotij san tapic. ⁹ Huan hasta nopa tayacanca soldados cati más quipiyaj tanahuatili huihuipicase ica majmaji huan cholojtehuase. Huan nopa soldados quicajtehuase ininbanderas para cholose. Quej nopa quijtohua TOTECO yaya cati quipiyas iti lementoc ipan itaixpa ipan Jerusalén huan ihorno para ipan tetatzacuiltis.

32

Se tanahuatijcayot cati xitahuac

¹ ¡Xiquitaca! Se tonali hualas se tanahuatijquet cati tanahuatis xitahuac. Huan ihuaya hualase itayacancahua cati nojquiya tanahuatise xitahuac huan quichihuase cati senquisa cuali. ² Huan nopa tanahuatijquet quimanahuis tali Israel ten nopa taohuijcyot cati hualas quej se hueyi aja-cat o quej at cati huetzi nelchicahuac. Huan quinseseltis israelitame quej se atajti teseseltia ipan se huactoc tali. Quinpalehuis quej iecahuilo se hueyi tet ipan se huactoc tali cati tahuel totonic. ³ Huan huajca israelitame tapohuis iniixteyol para quitase TOTECO huan tapohuis ininacas para quitacaquilise itoscac. ⁴ Ipan nopa tonali hasta nopa masehualme cati mosisiníaj nojquiya quimachilise itamachtli TOTECO huan talnamiquise. Huan masehualme cati amo nelia huelij tatenquixtíaj, camanaltise cuali.

⁵ Ipan nopa tonali israelitame ayecmo quinhuejcamajcahuase masehualme cati huihuitique huan amo quineltocaj TOTECO. Huan ayecmo quintocaxtise cuajcualme nopa tominpiyani cati itzcuime, yon ayecmo quintitase para huejhueyi. ⁶ Masehualme quinixmatise huihuitique tacame. Quimatis para quichihuaj cati amo cuali. Ipan iniyolo san quisencahuaj cati fiero huelis quichihuase. Quichihuaj ome inixayac para tacajcayahuase huan quiiistacahuíaj TOTECO. Se masehuali quej nopa quinquixtilia inintacualis cati mayanaj huan quinquixtilia at cati teicneltzitzi huan amiquij. ⁷ Tacame cati quej nopa huihuitique huan tacajcayahuaj mopanextise ipan nopa tonali. Nojquiya mopanextis nochi iniistacaticayo cati ica quinequiyayaj quintaijyohuiltise nopa teicneltzitzi quema itztoque iniixpa tequichihuani. ⁸ Pero cuajcualme ipan nopa tonali moyolilhuisse quenicatza huelis quinpalehuisse sequinoc huan TOTECO quintiochihuas.

Camanali para sihuame

* 31:4 31:4 O tepet Sion.

⁹ Techtacaquilica ansihuame cati antatzihuij. Xijtaquilica cati nimechilhuis ica cati hualas amopani. ¹⁰ Techtacaquilica amojuanti cati ama anemachme. Ipan ne seyoc xihuit hualas se hueyi tequipacholi amopani ipan se talojtzi quema amo anquichiyaj pampa amo oncas yon quentzi cuatajcyot, yon pixquisti. ¹¹ Huaaja xihuihuipicaca ansihuame cati ama amo anquipyaj yon se tequipacholi. Ximocuesoca amojuanti cati amo anitztoque ica temachili. Ximoquixtilica amoyoyo cati yejyectzi huan ximoquentica nopa fiero yoyomit cati quinextis anmotequipachohuaj por taijyohuulisti. ¹² Ximoyoltejtejtzonaca ica tequipacholi por nopa huejhueyi tali cati tahuel taeliltoyaya cati anquipixque huan ama tасosololme. Huan nochi nopa xocomeca milme cati temacaj miyac inintajca tamis. ¹³ San huitzti huan sahua mecat moscaltis ipan nopa tali cati iniaxca nomasehualhua. Tamiixpolihuisse nopa calme huan altepeme cati ama quipyaj paquilisti. ¹⁴ Ipan nopa caltanahuatili, yon se amo aqui itztos. Nopa altepeme cati temitoyaj ica masehualme mocahuase cactoque. Huan nochi calme mocahuase tatzitzicatoc. Amo aqui itztos ipan nopa huejcapantique calme ipan tachiquili campa tachiyyayaj para tamocuitahuise. Nopona san tacuase nopa burrojme huan huacaxme. ¹⁵ Huan quej nopa eltos hasta quema TOTECO quititanis ltonal cati itztoc ilhuicac para motalis ipan tojuanti ica nochi ichicahualis. Huan huajca sempa oncas pixquisti hasta mocahuas. Huan nopa huactoc tali mochihuas se mila cati temacas tahuel miyac pixquisti huan campa achtohuiya elqui mila, mochihuas cuamili ica cuame cati tahuel temacaj inintajca. ¹⁶ Huan ipan nochi nopa tali campa hueli quichihuase cati senquisa cuali huan xitahuac. ¹⁷ Huan pampa nochi quichihuase cati xitahuac, oncas tasehuilisti huan nochi itztose ica temachili para nochipa.

¹⁸ Huan quej nopa nochi nomasehualhua itztose ica cuali huan itztose campa onca tasehuilisti. Nochi itztose temachme huan campa hueli mosiyajquetzase. ¹⁹ Quema huetzis tesihuit, elis ipan cuatitamit, pero ipan altepet Jerusalén amo. ²⁰ TOTECO miyac quintiochihuas imasehualhua. Campa hueli tatojtocase, quiselise miyac pixquisti. Huan nochi inintapiyalhua huan ininborregojhua tacuase campa onca miyac sacat cati xoxohuic.

33

Cati mochiyaj ipan TOTECO

¹ ¡Anteicnelteque anasirios! Temachtí TOTECO amechtatzacuilitis. Campa hueli antasosolojtoque masque amo aqui yajtoc ipan amotal para quisosolos. Anquintaijyohuilitaj sequinoc masque amo aqui amechtaijyohuilitjtoc. Anquinchihualtiaj sequinoc ma quichihuaca cati amechtajtcolcahuilitaj, pero amojuanti amo anquichihuaj. Pero ama ya ajsic tonali para nojquiya amechcayahuase huan amechtzentamiltise, quej amojuanti anquichijtoque.

² ¡Ay TOTECO! Techicneli huan techtasojta tojuanti timomasehualhua pampa san ipan ta timochiyaj. Xieli tochicahualis mojmosta huan techpalehui quema huala se hueyi taohuijcyot. ³ Nochi mocualancaitacahua cholohuaj quema quicaquij motoscac. Huan quema ta timotanana, nochi cati ehuan sequinoc talme moxelojuaj huan mosemanaj. ⁴ Quej chapolime quiehtequij nopa pixquisti huan itajca xocomecat, quej nopa Jerusalén ehuani quintanise huan quintachtequilitse nopa soldados ten tali Asiria.

⁵ TOTECO tahuel hueyi huan itztoc nepa ilhuicac. Yaya quichihuas para altepet Jerusalén ma eli se lugar campa senquisa quichihuase cati xitahuac huan cati cuali. ⁶ Yaya nochipa itztos nopona para talojtitzti huclis

techmaquixtis tiisraelitame. Techmacas talnamiquilisti huan taixmatilisti. Huan cati israelitame quitase para más ipati elis para ma quihueyitepanitaca TOTECO.

⁷ Pero amantzi nochi inintatitanilhua israelitame tzajtzij ipan calles huan nochi inintayolmelajcahua cati quitemohuaj tasehuilisti, chocaj ica miyac tequipacholi. ⁸ Nochi ojti ipan tali Israel tamisosolijtoc. Paxalohuani quitoquilíaj ojti campa tatzitcaya. Nopa Asiria ehuan quixpanotoque nopa camanali cati quichijque para quipiyase tasehuilisti. Amo quichihuaj yon se tamanti cati quitajtolcajque iniixpa testigos para quichihuasquíaj. Inijuanti ayecmo aqui quitepanitaj. ⁹ Quichijtoque ma onca taijyohuilisti ipan tali Israel. Quitamisolojtoque tali Líbano. Nopa tamayamit Sarón quicajtejtoque quej se huactoc tali. Huan quintamitachtequilijtoque tali Basán huan tepet Carmelo.

¹⁰ Pero ama TOTECO quej ni quijtohua: “Ama nimotanas huan ni-nnextis nochicahualis huan noyajatil. Ama, quena, techhueyimatise huan techhueyitalise. ¹¹ Anasirios, amo teno anquitanise masque anquichihuase campeca ica nochi amochicahualis. Nochi cati anmoilhuijtoque anquichihuase elis quej tasoli huan noijyoyo amechtzentamiltis quej se tit. ¹² Amosoldados anasirios tatase huan mochihuase quej cuajnexti. Inijuanti elise quej huitzti cati quitzontequij huan quimajcahuaj ipan tit para ma tata.

¹³ “Huaica nochi amojuanti cati anmopantíaj ipan talme cati huejca, xijta-caquilica nochi nopa tamanti cati na nijhijtoc. Amojuanti cati anmopantíaj nechca, xiquixmatica nochicahualis.” ¹⁴ Nochi nopa tajtacolchihuani huan cati quichihuaj ome inixayac cati itztoque ipan altepet Jerusalén * huihuipicaj ica majmajti. Quijtohua: “¿Ajquiya ten tojuanti huelis quijyohuis moquetzots iixpa TOTECO? Yaya quej se tit cati tetzontamiltía huan cati amo quema sehui.”

¹⁵ Huelis itztose nica iixpa cati quijjose huan quichihuase cati senquisa xitahuac, cati amo quinequij quitanise tomi ica tacajcayahualisti huan amo monamacaj por se taxtahuili. Itztose iixpa cati amo quintacaquilíaj cati quisencahuaj quenicatza huelis temictise. Huelis itztose iixpa cati quitzacuj iniixteyol para amo quitachilise tamanti cati quinyoltilanasquía para tajtacolchihuase. ¹⁶ Cati quej nopa quichihuase temachtit itztose nepa huejcapa. Huan momanahuise ipan nopa huejhueyi teme cati onca ipan cuatitamit. Quinmacase inintacualis huan inia, para amo teno quinpolos.

¹⁷ Ica amoixteyol anquiritase amotanahuatijca ica nochi iyejyejca ipan itanahuatilis huan anquiritase nopa tali cati yahui hasta huejca. ¹⁸ Huan anquielnamiquise nopa tonali quema anmajmahuiyayaj huan anquipanoque miyac taohuijcaoyot. Huan anmoilhuisse: “¿Canque itztoque ama nopa Asiria ehuan cati techinamayayaj impuestos huan cati quipohuayayaj quesqui cali huejcapantincayaya para quitzize? ¿Canque itztoque ama tocalanacaitacahua cati calaquiyayaj ipan toaltepe para techtachtequilise?”

¹⁹ Nimechilhúa para ajsis se tonali quema ayecmo anquinitase nopa Asiria ehuan cati tahuel mohueyimatij. Ayecmo anquinitase nopa masehualme cati fierojtique, huan cati tahuel mosisiníaj huan cati camanaltiyayaj camanali cati amo hueli anquimachilise. Inijuanti tamiixpolihuisse ipan se talajtzi. Huan ayecmo quema anquinitase.

²⁰ Pero anquiritase altepet Jerusalén. Huan anquiritase para se altepet campa nochi quihueyitepanitaj TOTECO huan ilhuichihuaj para ya. Huan anquiritase para se altepet cati quipiya tasehuilisti huan se altepet cati cuali

*

huan temachti. Elis quej se yoyoncali cati amo aqui huelis quihuihuitas iestacas, yon amo aqui quicotonas nopa lazo cati ica quuilpitoque pampa tahuel temachti. ²¹ Pampa TOTECO itztos nozona tohuaya, huan ihueyitilis monextis. Huan yaya techmanahujtos quej se atajti cati patahuac. Huan yon se tocualancaitaca amo huelis panos nozona. ²² Pampa TOTECO yaya tojuez, yaya cati temacas nochi tanahuatili huan yaya totanahuatijca. Yaya iseltitzi techmocuitahuis huan techmanahuis. ²³ Nochi inincuaacalhua tocualancaitacahua tamisosolijque. Nopa lazo cati ica quuilpitoyaj cottonqui huan nochi icuayohua postejqui. Huan nopa huejhueyi yoyomit cati quihuicayayaj, huetzqui. Huajca masehualhua TOTECO moaxcatise nochi cati eliyaya iniaxca huan moxelhuilise. Huan hasta cati amo hueli nemij nojquiya quintocaros ininparte. ²⁴ Huan nopa israelitame cati itztoque nozona ayecmo quijitose para mococohuj pampa Toteco Dios quintapojpolhuis inintajtacolhua.

34

Tatzacuilti para tali Edom ehuan

¹ Nochi amojuanti cati anitztoque ipan nochi talme, xihualaca techtaquiliquij. Ximonechcahuica nochi anmasehualme ipan ni taltipacti. Xihualaca huan xijtacaquilica nocamanal. ² Pampa TOTECO tahuel cualantoc ica cati itztoque ipan nochi talme huan ica nochi inintayacancahua huan inisoldados. Yaya iseltitzi quintamiixpolihuiltis huan quintemactilis ipan se hueyi miquilisti. ³ Huan inimijcahua mocahuase tepejtoque talchi, yon amo quintalpachose. Ni tali temis ica tapotexcayot cati quisas ten inintacayohua cati lochontos. Huan nochi cuatitamit nesise chichiltic ica inieso. ⁴ Ipan nopa tonali elis quej nochi tamanti nepa ilhuicacti momimilos huan ayecmo nesis. Nopa sitalime tepehuisse quej tepehui ixihuiyo xocomecat o nopa higuera cuahuit.

⁵ Huan quema nomacheta tamis itequi nepa ilhuicac, ximomocuitahuica pampa nopa macheta ajsis ipan tali Edom para nijtajtolsencahuas. Edom eltoc se tali cati niqiyocatalijtoc para nijtatzacuiltis huan niqinmictis cati nozona ehuan. ⁶ Imacheta TOTECO eltoc espoltic huan quiyiya miyac ininchiyajca cati quinmicti. Eltoc quej quinquechtzontectosquia borregojme huan oquich chivojme para tajaajahualisti nozona ipan altepet Bosra pampa TOTECO nelia quichihuas se hueyi miquilisti ipan tali Edom. ⁷ Huan masehualme nozona miquise masque tahuel quiyiyaj chicahualisti. Miquise nopa telpocame huan huehuentzitzti. Nopa tali tamixolonis ica esti huan nopa taltepecti mocahuas chiyahuac ica tachiyajcayot. ⁸ Pampa ya nopa elis se tonali quema TOTECO momacuepas ica nopa Edom ehuan por nochi cati fiero quinchihuilijque israelitame. ⁹ Nochi pilatajtitzti ten tali Edom temise ica chapopojti cati lementos huan nopa tali temis ica tit.

¹⁰ Nopa tit ten tatzacuilti ipan tali Edom lementos tayohua huan tonaya huan amo quema sehuis. Huan nopa pocti tejcos para nochipa. Nopa tali elis quej se huactoc tali huan quej nopa mocahuas iniixpa nochi cati tacatise teipa. Huan ayecmo aqui sempa mochantis ipan nopa tali. ¹¹ Huan nozona senquisia itztose cuamojmojme huan xonpime. Nojquiya itztose cacalome. TOTECO quiitas nopa tali huan yeca quilas para quinamiqui quisosolos. ¹² Ipan tali Edom ayecmo oncas tanahuatiani cati teyolmelahuase cati melahuac pampa nochi inintayacancahua tamiixpolihuisse nimantzi. ¹³ Ipan inincaltanahuatil moscaltis huitzti. Huan ipan caltetzocme moscaltis tejtzonquilit huan sahua mecat. Huan nopa tali elis se tali campa mochantise

tecuanime huan nopa totome avestruces. ¹⁴ Huan nozona momanelose nopa tecuanime cati itztoque ipan huactoc tali ica nopa cuatitan tapiyalme cati inintoca hienas huan lobos. Huan nopa tapiyalme tzajtize seyohual. Huan nopa huejhueyi tapiyalme cati temajmatijque huan fierojtique cati nemij tayohua motzajtzilise se ica seyoc. Cuatitan chivojme cati quiipiyaj iajacahua Amocualtacat nozona moca huase huan mosiyajquetzase. ¹⁵ Nozona quichihuas itepasol nopa hueyi cuamojmojtí. Nozona quitális itecsis, huan tacatise iconehua huan quinmocuitahuis ieltapaltzala. Nojquiya nozona mosentilise tzojpilome huan sesen oquichti quiipiyas se cati sihuatzi.

¹⁶ Xijtemoca iamatapohual TOTECO huan xijpohuaca nochi tamanti cati yaya quiijtojtoc quichihuas. Amo polihuis yon se tamanti cati ijcuilijtoc nozona. Nojquiya amo polihuis yon se tapiyali huan nochi cati oquichme quiipiyase inisihuahua pampa TOTECO quiijtojtoc para quichihuas huan Itonal quichihuas nochi ma pano quej quiijtojtoc. ¹⁷ Yaya quitamachijtoc huan quixelojtoc nopa tali Edom, huan quinmactilijtoc nopa tapiyalme cati taijyohuáj. Huan injuanti moaxcatise nopa tali para nochipa.

35

Israelitame sempa tacuepilise Jerusalén

¹ Ipan nopa tonali elis quej paquis nopa huactoc tali huan campa tatzitzica pampa xochiyohuase quej se yejyetzí xochit. ² Oncas miyac xochit campa hueli, huan oncas huicat huan miyac paquillisti. Nochi huactoc talme xoxohuyase quej nopa cuatitamit cati onca ipan tali Líbano. Nesise yejyetzitzi quej nopa sacat cati onca ipan tepet Carmelo huan quej nopa sacapetat cati onca ipan nopa tamayamit ten Sarón. Huan nochi quiitase ihueyítilis huan iyejyejca TOTECO yaya cati toDios.

³ Huajca ica ni camanali xiquinyolchicahua cati siyajtoque huan cati tancahuihuipicaj ica majmajti. ⁴ Xiquinilhui cati moyoltequipachohuaj: “¡Ximoyoltetilica! Amo ximajmahuica pampa amoDios hualas para momacuepas ica amocualancaitacahua huan quintzontamiltis. Yaya iseltitzi hualas huan amechmaquixtis.” ⁵ Huan quema yaya hualas, nopa popoyotzitzí tachiyase, huan cati amo tacaquij, quinchihuas ma tacaquica. ⁶ Cati amo hueli nemij huitonise quej masame, huan cati nonotzitzí tzajtize huan huicase. Huan ipan nopa huactoc tali oncas miyac pilhueyatitzí cati quiipiyase at. ⁷ Ipan huactoc tali momanas at. Huan campa más tahuactoc meyas at cati mochihuas miyac atajti. Huan campa achfohuiya oncac iniostohua nopa tepchichime, oncas acat.

⁸ Huan nozona ipan nopa huactoc tali oncas se hueyi ojti huan quitocaxtise: “ojti ten tatzéjzelollicayot.” Huan yon se masehuali cati amo yoltapajpactic iixpa TOTECO amo huelis nejnemis ipan nopa ojti pampa nozona nejnemis cati quichihua ipaquillis TOTECO. Huan nojquiya cati huihuitic amo nemis nozona. ⁹ Ipan nopa ojti amo oncas tecuanime para tecuase, yon amo oncas yon se tamanti cati mahuilili. Ipan nopa ojti tacuepilise ininchaj nopa masehualme cati TOTECO quinmaquixtijtoc ten campa hueli itztoyaj ipan sequinoc talme. ¹⁰ Nopa masehualme cati TOTECO quinmaquixtijtoc huicatiyase huan tzajtziyase; huan ajsise altepet Jerusalén*, ica miyac paquillisti. Ayecmo quema quiipiyase taijyohuillisti, yon tequipacholi pampa nozona senquisu oncas paquillisti.

* 35:10 35:10 O Sion.

36

Senaquerib quitehui Judá
(2 R. 18:13-37; 2 Cr. 32:1-19)

¹ Quema Tanahuatijquet Ezequías yahuiyaya para 14 xihuit para tanahuatis, hualajqui Senaquerib, nopa tanahuatijquet ten tali Asiria para quitehui nopa altepeme ipan tali Judá cati moyahualojtoque ica tepamit. Huan yaya quintanqui. ² Huan teipa quema nopa tanahuatijquet ten tali Asiria ehuaní mopantiyaya ipan altepet Laquis, quititanqui itayacanca ten tatehuilisti ica miyac isoldados ipan altepet Jerusalén para ma quicamanalhuiti Tanahuatijquet Ezequías. Huan nopa asirios moquetzque nechca nopa aojti ten nopa pileta cati eltoc ica huejcaca, ipan nopa ojti cati yahui ipan nopa mila ten nopa Tachicuenijquet.

³ Huajca quisqui Eliaquim, icone Hilcías, cati eliyaya se tayacanca tequitiquet ipan icaltanahuatil Ezequías, huan quisqui itajcuilojca Ezequías cati itoca Sebna, huan quisqui Joa, icone Asaf, cati quiijcuilohuayaya ten panoyaya mojmosta ipan itanahuatilis. ⁴ Huan nopa tayacanquet ten soldados ten tali Asiria quimacac ni camanali para ma quiiilhuitij Tanahuatijquet Ezequías:

—Ya ni cati quiijtohua nopa tanahuatijquet cati tahuel quiipya chichahualisti ten tali Asiria: ¿Para ten tijmachilía para tihueli techtanis tiasirios? ¿Ipan ajquiya timotemachijtoc? ⁵ ¿Timoilhuía para nopa yejectzi camanali cati mitzilhuijtoc nopa tali Egipto ejquet mitzpalehuis quej soldados cati quiipiyaj tetili huan cuali quimatij quenicatza tatehuise? Icamanal amo teno ipati. Huajca, ¿ipan taya timotemachía para mitzpalehuis para timosisinis ica na? ⁶ Niquita para tahuel timotemachía ipan nopa tayacanquet ten tali Egipto para mitzpalehuis, pero yaya eltoc quej se acat cati tapanis quema se ipan motatzquilis. Huan amo san tapanis nopa acat, nojquiya quixahuas imax cati ipan motatzquili. Quej nopa, Faraón cati tanahuatía ipan tali Egipto quinchihuilis nochi cati motemachía ipan ya.

⁷ “Pero huelis tiquijtos para amojuanti anmotemachíaj ipan amoTECO Dios. Pero ¿amo anquimatij para Tanahuatijquet Ezequías quicualancamacac amoTECO quema quisosolo nochi nopa ticalme huan taixpame cati oncayaya ipan tepeme. Yaya quinchihualti nochi Judá ehuaní ma quihueyichihuaca san ipan nopa taixpame cati eltoc ipan altepet Jerusalén?”

⁸ “Huajca más cuali xijchihua se camanali ica noteco, yaya cati tanahuatía ipan tali Asiria. Amo teno tijpiya. Sinta tiquinpantis ome mil momasehualhua cati huelij nemij cahuayojtipa, noteco mitzmacasquía ome mil cahuayojme para ipan tejcase, pero amo tihueli. ⁹ Mosoldados amo teno ininpati, ¿huajca quenicatza huelis timotehuis ihuaya se itequipanojca noteco masque nelquentzi soldados quinpiya? Pampa nopa tanahuatijquet ten tali Egipto amo mitzmacas yon se tapalehuili. Amo mitzmacas carrojme para tatehuise, yon amo mitzmacas cahuayojme. ¹⁰ Huan ¿timoilhuía para na nihualajtoc nica san pampa nijnequi nijtehuis ni tali? ¡Amo melahuac! Na nihualajtoc pampa amoTECO techtitanqui. Yaya cati techilhuijtoc: ‘Xiya huan xijsosolo nopa tali.’”

¹¹ Huajca Eliaquim, Sebna huan Joa quiiilhuijque nopa tayacanquet ten soldados ten Asiria:

—Se favor, tojuanti timotequipanojcahua timitztajtaníaj techcamanalhui ica arameo camanali pampa tojuanti tijmachilíaj cuali. Amo techcamanalhui ica hebreo camanali pampa tacactoque nochi ne israelitame cati itztoque campa tepamit.

¹² Pero nopa tayacanquet ten soldados quiiyto:

—Noteco quinequi ma quicaquica ni camanali nochi cati itztoque ipan nopa tepamit huan nochi Jerusalén ehuan; amo san amojuanti. Quinequi xijmatica sinta amo anmotemacase ica tojuanti, tijyahualose ni altepet huan amo tijcahuilise teno ma calaqui hasta nochi masehualme mayanase huan amiquire hasta quicuase inincuit huan quiise iniaxix.

¹³ Huajca nopa tayacanquet ten soldados moquetzqui huan quintzajtzili chicahuac nopa israelitame cati moquetztoyaj campa tepamit. Huan quin-camanalhui ica hebreo camanali huan quinilhui:

—Xijcaquica cuali nopa camanali cati amechilhuía nopa hueyi tanahuatijquet ten tali Asiria. ¹⁴ Quej ni quiiytohua nopa tanahuatijquet: ‘Ma amo amechajcayahua Tanahuatijquet Ezequías pampa yaya amo huelis amechmanahuis. ¹⁵ Yon amo xijcahuilica para Ezequías amechchihualtis ximotemachica ipan amoTECO. Amechilhuía para temachti amoTECO amechmanahuis huan amo quicahuilis nopa tanahuatijquet ten tali Asiria moaxcatis amoaltepe, pero amo neli.’

¹⁶ “Amo xijtacaquilica Ezequías pampa nopa tanahuatijquet ten tali Asiria amechilhuía para ximotemacaca ica tojuanti huan xijsencahuaca camanali ica tojuanti para anquiiyase tasehuilisti. Xijtapoca amocaltehua huan xiquisaca. Huan nijchihuas para sese ten amojuanti mocahuas ica cati iaxca. Quicuas itajca ixocomecamil huan ihigueramil, huan quiis nopa at ipan iamel. ¹⁷ Teipa quema nochi ya nijsencajtos niyas huan nimechhuicas ipan se tali cati tahuel cuali quej cuali amotal. Nimechhuicas ipan se tali cati tahuel quieliltía trigo huan xocomecat para anquichihuase pantzi huan tailli.

¹⁸ Ma amo amechajcayahua Tanahuatijquet Ezequías huan amechilhuis para amoTECO huelis amechmanahuis tomaco. Yon se teteyot cati onca ipan nochi nopa talme campa tinejntoque amo hueltoq quimanahuía ital ten nopa tanahuatijquet ten tali Asiria. ¹⁹ ¿Amo anquielnamiquij taya tiquinchi-huilijque nopa altepeme Hamat huan Arfad? ¿Quinmanahui inindios? ¡Amo quinmanahui! Huan ¿taya panoc ipan altepet Sefarvaim huan Samaria? ¿Canque itztoque ama inindioses? Yon se amo huelqui quinmanahui imasehualhua nomaco. ²⁰ Huajca ten nochi dioses cati onca ipan ni talme ¿catijqui quimanahuijtoc ital ten na nomaco? ¡Yon se! Huajca ¿anmoilhuíaj amoTECO huelis quimanahuis altepet Jerusalén nomaco?”

²¹ Pero nopa masehualme amo quinanquiliijque ica yon se camanali pampa Tanahuatijquet Ezequías quinilhuijtuya para amo teno ma quinanquilica. ²² Huajca Eliaquim icone Hircías, cati eliyaya nopa tayacanca tequitiquet ipan icaltanahuatil Ezequías, huan Sebna cati elqui itajcuiljoica, huan Joa, icone Asaf, cati quiijcuilohuayaya ten panoyaya mojmosta ipan itanahuatilis, quitzayanque iniyoyo huan yajque campa Tanahuatijquet Ezequías. Quipohuilijque nochi cati quinilhuijtuya nopa tayacanquet ten soldados ten tali Asiria.

37

Ezequías quitemo TOTECO
(2 R. 19:1-37; 2 Cr. 32:20-23)

¹ Huan quema Ezequías quicajqui nochi ya ni, quitzayanqui iyoyo huan moquenti seyoc yoyomit cati quinextía para mocuesohua huan yajqui ipan itioipa TOTECO para motatajtis. ² Huajca quitapejpeni Eliaquim nopa tayacanca tequitiquet ipan icaltanahuatil, huan itajcuiljoica, Sebna, huan nochi totajtzitzi cati más huehuentziti, huan quintitanqui para ma techitajti

na, nitajtolpanextijquet Isaías, cati niicone Amoz. Huan nochi injuanti moquentijtoyaj fiero yoyomit para quinextise mocuesohuaj. ³ Huan techilhuijque: “Quej ni quijitohua Tanahuatijquet Ezequías: ‘Ni tonali eltoc se tonali ten taijyohuulisti, tatzacuiltilisti huan tatechihualisti. Eltoc se tonali cati tahuel ohui, tiitztoque quej se sihuat cati quajcalo pampa ya ajsic hora para conepiyas, pero amo quipiya fuerza para quitacatiltis icone. Huan yeca nopa conetzi amo hueli tacati. ⁴ Pero huelis TOTECO cati moDios quicactoc nochi nopa fiero camanali cati quijito nopa tayacanquet ten soldados, cati quititanqui nopa tanahuatijquet ten tali Asiria para quimahuissolos huan quitelchihuas nopa Dios cati itztoc. Nimochiya para TOTECO ma quitatzacuilti por nochi nopa camanali cati ica quitelchijqui. Huajca ta tilsaias, ximotatajti por tojuanti cati noja timocajtoque.’ ”

⁵ Huan quema itequipanojcahua Tanahuatijquet Ezequías ajsitoya campa na nilsaias niitztoya, techpohuilijque nochi cati Ezequías quinilhuijtoya. ⁶ Huan niquinilhui: “Xiquilhuica amoteco Ezequías para TOTECO quijitohua ya ni: ‘Amo ximocueso, yon amo ximajmahui por nochi nopa camanali cati ica techmahuispolojtoque itequipanojcahua nopa tanahuatijquet ten tali Asiria. ⁷ Xiquitaca, na nijchihuas para tacame ma hualaca ten tali Asiria huan quiyolmelahuaj nopa tanahuatijquet para nimantzi ma mocuepa ipan ital pampa tahuel nonequi nepa. Pero quema ajsiti ipan ital, nepa quimictise ica macheta.’ ”

⁸ Huan ipan san se tonali quema nopa tayacanquet ten soldados yajqui para quicamanalhuis nopa tanahuatijquet ten tali Asiria, quiiitac para ya quisqui ipan altepet Laquis huan ama quitehuiyaya altepet Libna. ⁹ Pero nozona, nopa tanahuatijquet ten tali Asiria quiiilhuijque: “Tanahuatijquet Tirhaca ten tali Etiopía huala ica isoldados para mitztehuiqui.” Huajca quema quicajqui ya nopa, sempa quintitanili se amatajcuiloli ipan altepet Jerusalén campa Tanahuatijquet Ezequías para ma quiiilhuitij ni camanali:

¹⁰ “¡Ma amo mitzcajaycahua moDios cati ipan timotemachía! Ma amo mitzilhui para nopa tanahuatijquet ten tali Asiria amo moaxcatis altepet Jerusalén. ¹¹ Xiquelnamiqui nochi cati quichijtoque nopa tanahuatiani ten tali Asiria ipan campa hueli talme campa tatehuijtoque. Nochi talme cati mosisinijque ica tali Asiria, quintzontamilti. Huajca, ¿anmoilhuíaj anmomanahuse? ¹² ¿Amo anquimatij para yon se dios amo huelqui quinmanahui nochi nopa altepeme cati nohujcapan tatahua quintzontamiltijque? Nopa altepet Gozán, Harán, Resef huan nochi nopa masehualme cati itztoyaj ipan altepet Edén ipan tali Telasar, nochi quintamitanque nopa tanahuatiani ten tali Asiria. ¹³ Nojquiya xiquelnamiqui taya ininpantic nopa tanahuatiani ten tali Hamat huan tali Arfad. Ximoilhui cati panoc ica tanahuatiani ipan altepet Sefarvaim, Hena huan Iva. ¿Canque itztoque ama?”

Ezequías motatajti ica TOTECO

¹⁴ Huajca Ezequías quiseli nopa amatajcuiloli cati quihuiquiliyayaj nopa tayolmelahuani huan quipojqui. Huan teipa yajqui itiopa TOTECO huan quipatajqui nopa amat iixpa TOTECO, ¹⁵ huan motatajti ica ya. Quej ni quijito: ¹⁶ “¡TOTECO Cati Tiquinyacana Moilhuicac Ejcahua Ma Tatanitij, ta titoDios tiisraelitame! Ta tiitztoc tatajoc nopa ilhuicac ehuan ipan ilhuicac cati inintoca querubines. San ta tiitztoc Dios ten nochi talme huan nochi tanahuatiani ipan ni taltipacti. Ta cati tiquinchijchijqui nochi ilhuicacti huan taltipacti. ¹⁷ Techtacaquili TOTECO huan techtachili nica campa

nimotatajtía ica ta. Xijtachili ni amatajcuiloli cati techtitanili Tanahuatijquet Senaquerib para mitzmahuispolos ta, nopa tiDios cati tiitztoc. ¹⁸ TOTECO, nelía melahuac nopa tanahuatiani ten tali Asiria quinsosolojtoque miyac talme huan inialtepehua. Panotoc senquisa quej quijjtohua ni amatajcuiloli. ¹⁹ Nojquiya quinmajcahuilijque ininteteyohua ipan tit para ma tataca. Pero panoc pampa nopa teteyome amo nelía eliyayaj Dios. Nochi injuanti san eliyayaj teteyome ten cuahuit huan tet cati masehualme quinmachijchijtoyaj huan yeca nopa Asiria ehuaní huelque quintzontamiltijque. ²⁰ Huajca ama, TOTECO, ta cati titoDios, techmanahui ten nopa tanahuatijquet ten tali Asiria para quej nopa nochi talme huan tanahuatiani quimatise para san ta tiTOTECO tiitztoc tiDios huan amo aquí seyc.”

TOTECO quinanquili Ezequías

²¹ Huajca na niIsaias, niicene Amoz, nitatitanqui ma quihuitij Tanahuatijquet Ezequías para quej ni quijjtohua TOTECO cati toDios tiisraelitame para quinanquilis. TOTECO quijjtohua: “Na nijcactoc quej timotatajtijtoc por cati quichijtoc Senaquerib, nopa tanahuatijquet ten tali Asiria huan nijpiya ni camanali para ya.”

²² Tanahuatijquet ten tali Asiria: “Noaltepe Jerusalén * huan cati itztoque nozona mitzpinajtíaj, mitzhuhuiitaj huan quiojoliníaj inintzonteco ica moica. ²³ ¿Ajquiya timoilhuía para tijpinajtijtoc huan tijmahuispolojtoc? Techtelchijtoc huan techtajijlhuijtoc na cati niTatzetzeltoc cati niinTeco israelitame. Noixpa na timosisinijtoc huan timohueyimajtoc.

²⁴ Tiquintitanqui motayolmelajcahua para ma techmahuispoloca na. Por injuanti tiquijtojtoc para mosoldados huan miyac mocarrojhua para tatehuise titejcotoc ipan nopa tepeme cati más huejcapantique. Quena tiajsitoc hasta nepa ipan nopa cuatitamit ten Líbano. Huan tiquintzontejqui nopa tiocuame cati más huejcapantique huan nopa cipreses cati más tapejpenilme.

²⁵ Tiquijtohua para ipan miyac talme tijchijtoc amelme huan mitzmacac fuerza quema tiquic nopa at. Huan ta tijchijtoc ma huaquica nopa hueyame ipan tali Egipto para huelis panose mosoldados. Quej nopa tiquijtojtoc.

²⁶ ¿Pero noja amo tijmachilijtoc para nochi ya ni na, niDIOS, nijsenajqui huejcajquiya para quej nopa ma panos? Quena, na nijchijqui para nochi tamanti ma pano senquisa quej nijtalijtoc. Na cati nimitzmacac chichahualisti para ta tiquintzontamiltisquía miyac talme cati moyahualojtoque ica tepamit huan tiquincahuasquía quej se tamontomit tasoli. ²⁷ Por na, nopa masehualme cati itztoyaj ipan nopa talme itztoyaj quej sacat cati amo quipiyaj chichahualisti huan mitzimacac huan yeca nimantzi tihuelqui tiquintzontamilti. Nochi momajmatijque huan mopinajque moixpa. Injuanti itztoyaj quej xihuit cati mosohua calcuitapa cati quiajsi tonati huan nimantzi huaqui. ²⁸ Pero na nimitzixmati cuali huan nijmati taya timoilhuía. Nijmati quesqui hueltas tihualajtoc huan tiyajtoc, huan nijmati nochi cati tijchijtoc. Nojquiya nijmati quenicatza tahuel tihualantoc ica na. ²⁹ Huajca pampa tahuel tihualanqui ica na huan timohueyimatqui noixpa, ama na nimitzatalis se tepos chijcoli ipan moyacatzol huan se tepos camachali mocamaco. Huan nimitzchihualtis xitacuepili sempa ipan motal ipan nopa ojtí campá tihualajqui.”

Nopa tanextili para Ezequías

³⁰ Huajca na, niIsaias niquihui Ezequías ni camanali ten TOTECO quijjto: “Ya ni elis nopa tanextili cati amechnextilis para na nijmanahuía ni altepet

* 37:22 37:22 O Sion.

ten nopa tanahuatijquet ten tali Asiria. Ipan ni xihuit huan ipan ne seyoc xihuit anquicuase nopa trigo cati ixhuas iseltitzi. Huan ipan nopa expa xihuit antatojtocase huan anpixcase. Anquitocase xocomecat huan anquicuase itajca. ³¹ Huan nochi nopa masehualme cati noja mocahuase ipan tali Judá sempa itztose ica cuali huan momiyaquilise quej se tzonti cati quipiyas inelhuayo huan ixochiyo huan taquis miyac. ³² Pampa ipan altepet Jerusalén mocahuase se quesqui masehualme cati TOTECO quinmaquixtis. Huan injuanti sempa quitemitise inintal. Ichicahualis TOTECO Cati Quinyacana lillhuicac Ejcahua Ma Tatanitij quichihuas ma pano ya nopa.

³³ “Huan ya ni cati TOTECO quijtohua ten nopa tanahuatijquet ten tali Asiria:

“ ‘Soldados nopa tanahuatijquet ten tali Asiria amo calaquise ipan altepet Jerusalén, yon amo quimajcahuilise inincuataminhua. Amo nejnemise calteno itepa, yon amo quitatemise nechca nopa tepamit para tejcose. ³⁴ Nopa tanahuatijquet mocuepas ipan ital ipan nopa ojti ica campa hualajqui. Huan amo quema calaquis ipan altepet Jerusalén. Quej nopa quijtohua TOTECO. ³⁵ Pampa na nijmanahuis ni altepet huan nijmaquixtis. Huan ya nopa nijchihuas para masehualme ma techtepanitaca huan pampa niqicnelía notequipanojca David.’ ”

³⁶ Huan ipan nopa tayohua lillhuicac ejca TOTECO quisqui huan yajqui ipan nopa lugar campa mochijtoyaj nopa soldados ten tali Asiria huan quinmictito 185 mil soldados. Huan tonili ijnaloc quema nopa sequinoc mijquejque cati noja mocajtoyaj, quiitaque para iniixpa tepejtoque fahuel miyac mijcatziti. ³⁷ Huajca Senaquerib, nopa tanahuatijquet ten tali Asiria tacuepili ichaj ipan nopa hueyi altepet Nínive ipan ital. ³⁸ Huan se tonali quema yaya motatajtiyaya ipan itiopa nopa teteyot cati itoca Nisroc cati yaya quihueyimatiyaya, calajque ome itelpocahua cati inintoca Adramelec huan Sarezet, huan quimictijque ica macheta. Teipa injuanti cholojque hasta tali Ararat. Huan icone cati itoca Esarhadón mochijqui tanahuatijquet ipan tali Asiria.

38

Isocolis Ezequías huan quenicatza mochicajqui (2 R. 20:1-11; 2 Cr. 32:24-26)

¹ Huan ipan nopa tonali, Ezequías quipixqui se cocolisti cati chichahuac huan ya itztoya para miquis. Huan na nitajtolpanextijquet Isaías, niicone Amoz, niyajqui nijpaxaloto huan niquilhui:

—Quej ni quijtohua TOTECO: ‘Xijcualtali nochi tamanti ipan mochaj pampa amo timochicahuas ten ni cocolisti.’

² Huajca Ezequías mixijcueni huan tachixqui ica campa tapepecholi huan motatajti ica TOTECO, ³ huan quijto: “TOTECO, na nimitztajtanía xiquelnamiqui quenicatza nelía nimitztequipanojtoc ica temachili huan nimonejnmiltijtoc ica noyolo xitahuac huan nochipa nijchijntinentoc cati mitzpactía.”

Teipa Ezequías mochoquili ica miyac tequipacholi.

⁴ Huajca TOTECO sempa technojnotzqui niIsaías huan techilhui, ⁵ ma niya huan ma niquilhui Ezequías quej ni: “TOTECO cati iTeco mohuejcapan tata David, quijtohua ya ni: ‘Na nijcajqui quenicatza timotatajti huan niqiztoc quenicatza timochoquili. Huajca na nimitzmacas seyoc 15 xihuit para noja xiitzto. ⁶ Huan ta huan ni altepet nimechmanahuis ten nopa tanahuatijquet ten tali Asiria huan na nitatehuis por ni altepet.’ ”

⁷ Huan na niIsaías niqijto:

—Ya ni nopa tanextili cati mitzmachiltis TOTECO para mitznextilis melahuac quichihuas cati mitzilhuijtoc. ⁸ Quichihuas para iecahuilo tonati ma tacuepili majtacti pasos ipan ireloj Tanahuatijquet Acaz.

Huan ne tonati tacuepili majtacti pasos cati ya panotoya.

⁹ Teipa quema Tanahuatijquet Ezequías mochicajqui ten icocolis, qui-jcuilo ni huicat ten nochi cati quipanoc:

¹⁰ San ninejnentoc tajco ten nochi nopa tonali ten nonemilis huan ama monequi nijcajtehuas pampa nimiquis.

Ayecmo huelis nicaxitis noxihui quej monequiyaya.

Ama ya monequi niyas ipan nopa tali ten miqulisti.

¹¹ Niqijto: “Ayecmo quema niqitas TOTECO ipan ni tali campa itztoque cati yoltoque.

Ayecmo quema niqunitas nohuampoyohua cati itztoque ipan ni taltipacti.”

¹² Nopa ajacat ya quihuahuatatzqui nonemilis quej se ajacat quihuica iyoy-oncal se tamocuitahuijquet ten tapiyalme.

Huan quej nopa tajtzonquet quitequi se icpat, quej nopa nojquiya ni cocolisti quitequis nonemilis.

Techtaijyohuilitía tayohua huan tonaya.

¹³ Nitzajtziyaya seyohual por nopa tacuajcualoli ipan notacayo.

Hasta nijmachiliyaya quej elisquía se león techpojpostequilitía noomiyohua.

San se yohuali huan se tonal huan nimiquis.

¹⁴ Niayijtiyaya quej nopa totot grulla huan quej nopa totot golondrina.

Nitaijyohuiyaya quej se paloma.

Noixteyohua techcocoahuayaj pampa senquisa nitachixtoya nepa ilhuicac para nijchiyas itapalehuil TOTECO.

Niqijtohuayaya: “¡NoTECO Dios, techpalehui!

Niitztoc ipan se hueyi taijyohuiliti.”

¹⁵ ¿Pero taya huelis niqijtos?

TOTECO iseltitzi techmacac ni cocolisti.

Na ayecmo nimohueyimatis sempa por nochi nonemilis,

pampa ipan noyolo taniel nitaijyohuijtoc.

¹⁶ NoTECO Dios, nelía cuali nopa tatzacuiliti cati techmacatoc,

pampa techyacana ipan se nemilisti xitahuac ica ta,

huan techhualiquilitía chichahualisti.

Ama techchicajtoc huan techchijtoc noja ma niitzto.

¹⁷ Quena, ni taijyohuiliti cati hualajqui ipan na, ama nijmachilitía para nelía cuali,

pampa ica ya nopa ta techmanahui ten miqulisti,

huan ama ayecmo tijtachiliya notajtacolhua.

¹⁸ Masehualme cati ya mictoque huan ya quintalpachojtoque, ayecmo hueli mitzhueyichihuase.

Ayecmo quichiyaj para ta cati titemachti tiquinpalehuis.

¹⁹ San quichiyaj injuanti cati itztoque.

Quena, san injuanti hueli mitzhueyichihuaj quej na nijchihua ama ni tonali.

Huan nochi tatame quinpoihilise ininconeua para ta nelía titemachti.

²⁰ TOTECO yaya techchicajqui.

Huajca ama mojmosta nihuicas ipan itiopa TOTECO miyac huicat para nijhueyichihuas.

²¹ Achtohuiya na niIsaías niquinilhuijtaya itequipanojcahua Ezequías: “Xijtistica higos huan nopa higo tatixti xijpepechoca ipan icocohua Ezequías huan ica ya nopa mochicahuas.”

²² Nojquiya achtohuiya Ezequías tatzintocatoya taya tanextili quimacas TOTECO para quinextilis temachti quichichahuasquía huan sempa huelis yas ipan itiopa.

39

Ezequías quinseli Babilonia ehuaní
(2 R. 20:12-19; 2 Cr. 32:27-31)

¹ Teipa quema panotoya tonali, nopa tanahuatijquet ten tali Babilonia cati itoca Merodac Baladán, cati icone Baladán, quititanili Ezequías se nemacti huan nojquiya contajpalo. Quimatqui para mococohuayaya huan ama ya mochicajtoya. ² Huan Ezequías quinseli nopa tacame cati hualajtoyaj ica paquilisti. Teipa quinhuicac ipan icaltanahuatil huan quinnextili nochi tamanti cati quipiyayaya. Quinnextili nopa plata, oro, tacualpajme huan nochi tamanti taajhuuyacayot. Nojquiya quinhuicac ipan ichaj campá quiajocui teposti para ica tatehuse para ma quiitaca huan nojquiya quinnextili campá oncayaya nochi tamanti cati miyac ipati. Huan yon se tamanti amo quintatili.

³ Huajca na, nitajtolpanextijquet Isaías, nihualajqui campá itztoya Tanahuatijquet Ezequías huan quihlui:

—¿Taya mitzilhuijque nopa tacame? Huan ¿canque hualahuij?

Huan Ezequías quihlui:

—Hualahuij huejca ipan nopa tali Babilonia.

⁴ Huajca niquihlui:

—¿Taya quiiitaque ipan mocaltanahuatil?

Huan Ezequías quihlui:

—Niquinnextili nochi tamanti cati tachel pajpatiyó cati nijpiya ipan nocaltanahuatil. Huan yon se teno amo niquintatili. Nochi quiiitaque.

⁵ Huajca na, niIsaías niquihlui Ezequías:

—Xijtacaquili taya quiijtóhua TOTECO Cati Quinyacana iilhuicac Ejcahua Ma Tatanitij: ⁶ ‘Ajsis tonali quema nochi cati tijpiya ipan mocaltanahuatil huan nochi tamanti cati pajpatiyó cati mohuejapan tatahua quiajocoyaj hasta ama, mitzcuilquij huan quihuicase ipan tali Babilonia huan yon se tamanti amo mocahuas nica. ⁷ Huan hasta sequij moconehua huan moixhuihua quinhuicase ipan tali Babilonia. Huan nozona quincaparose para tequipanose ipan icaltanahuatil nopa tanahuatijquet ten tali Babilonia.’

⁸ Huan Ezequías techilhui niIsaías:

—Cualtitoc nochi cati TOTECO quiijtojtoc.

Quiijto ya ni pampa quimachili para oncasquía tasehuilisti nochi inemilis.

40

TOTECO quinyolchichahuas Jerusalén ehuaní

¹ “Xiquinyolchichahuaca, quena, xiquinyolchichahuaca nomasehualhua”, quej nopa quiijtóhua ininTeco Dios. ² Ica yejyectzi xiquincamanalhuica altepet Jerusalén ehuaní huan xiquinilhuica para nopa tonali ten inintajyohuilis ya tanqui pampa TOTECO ya quinquixtilijtoc inintajtacolhua. Ya quintamitatzacuilitijtoc quej quinamiqui por nochi inintajtacolhua.

³ Anquicaquise itoscac se cati camanalti chichahuac ipan nopa huactoc tali huan quiijtóhua: “Xijcualtalica se ojti para TOTECO para ipan nemis ipan nopa huactoc tali. Xijchihuaca para Teco Dios se ojti cati xitahuac huan tamayantic ipan huactoc tali. ⁴ Xijtemitica nochi tamayamit huan xijsepanoca nochi tachiquili. Xijxitahuaca nochi ojhuijhuijcoli huan xijtaltemica

nochi tacomoli. ⁵ Huan huajca monextis ihueyitilis TOTECO, huan nochi masehualme ipan taltipacti sentic quuitase. TOTECO iseltitzi quuijtojtoc para quej nopa panos.”

⁶ Huan nijcajqui itoscac se cati techilhuyiaya: “Xitzajtzi chicahuac.” Hua-jca na niqulhui: “Huan ¿taya niquijtos?” Huan ya techilhui: “Xitzajtzi chicahuac huan xiquinilhui para nochi masehualme ipan ni taltipacti itz-toque quej sacat cati amo huejcahua huan iniyejeyca eltoc quej xochit cati nimantzi pilini. ⁷ Nochi sacat huaqui huan nochi xochit pilini huan huetzi pampa iijyoyo TOTECO quuilpitzaco. Masehualme nojquiya itztoque quej nopa sacat. ⁸ Nopa sacat huaqui huan nopa xochit pilini, pero Icamanal Toteco Dios mocahua para nochipa.”

⁹ Ta cati tijhualica ni cuali camanali por cati itztoque ipan altepet Jerusalén*, xitejco hasta iixco ne tepet huan xiquintzajtzili. Xiquintzajtzili chicahuac huan amo ximajmahui. Xiquinilhui nopa altepeme ten tali Judá: “¡Xiquitaca, ya huala amoTeco Dios!” ¹⁰ TOTECO Cati Más Quipiya Tanahuatili huala ica ihueyi chichualis huan tanahuatis ica nochi tequiticayot. Huan quihualicas miyac taxtahuii para ica quitaxtahuis sese masehuali quej quinamiqui ica cati quichijtoc. ¹¹ Huan quinmocuitahuis imasehualhua quej se tamocuitahuijquet quinmocuitahuía iborregojhua. Ipan imax quinhua nopa pilborregojtzitzi nechca iyolixco. Huan ica yejyectzi quinyancas nopa síhua borregojme cati sanoc quintacatiltijtose ininconehea.

Ihueyitilis Toteco

¹² San ya quitamachijqui nopa huejhueyi at ica imacomol huan ica mistit quitamachijqui ilhuicacti. San ya quitamachijqui quesqui ietica ni taltipacti, tepeme huan cuatitamit. ¹³ Yon se amo hueli quiconsejomaca ltonal TOTECO. Yon se amo huelis quimachtis cati cuali o cati amo cuali para quichihuas. Amo aqui hueli quitalnamicitis. ¹⁴ TOTECO amo quema quitemo se acajya para ma quiconsejomaca. Amo aqui quimachtis ya para ma quichihua cati xitahuac. Amo aqui huelis quitalnamicitis. ¹⁵ Pampa yaya quinita nochi talme quej amo teno ininpati. San elij quej se tachipinti at o quej taltepocti cati quitallaj ipan balanza huan amo teno ietica. Yaya quichihua ma xpolihuica tepeme quej elisquía tasoli. ¹⁶ Nochi tapiyalme cati itztoque ipan nopa cuatitamit ten tali Líbano, amo quiaxilis para se tacajcahalisti para quitencahuillise ipan taixpamit. Yon nochi nopa cuame nozona amo quiaxilis para quichihuas nopa tit. ¹⁷ Nochi talme quinita quej amo teno ininpati. Iixpa ya nesij quej tasoli.

¹⁸ ¿Ica ajquiya huelis anquihuicalotise Toteco Dios? ¿Quenicatza huelis titey-olmelahuas quenicatza itztoc? Amo itztoc quej se taixcopincayot. ¹⁹ Yaya amo quej se teteyot cati san quimachijchijtoc se masehuali. Xiquitaca, se tacat quichijchihua se teteyot huan nopa teposchijquet quiyectalía itejteno ica oro huan iyolixco quitallilía pilteposmecatzitzi ten plata. ²⁰ Pero sinta se tacat cati tahuel teicneltzi amo hueli quicohua ni yejyectzi teteyot, yaya quitemohua se cuali cuahuit cati amo palani. Huan quema quipantía, quitanehui se tacat cati tahuel talnamiqui para ma quichijchihui se teteyot. Huan ten nopa cuahuit quichihua se idios cati amo hueli moojolinía.

²¹ ¿Amo tijmati? ¿Amo aqui mitzilhuijtoc quenicatza pejqui ni taltipacti? ¿Huelis hasta ipejya amo aqui mitzmachtijtoc ajquiya quichijqui? ²² Quichijqui TOTECO cati mosehuijtoc ipan isiya cati eltoc iixco ni taltipacti cati tolontic, huan nochi masehualme cati itztoque nica quinita quej

* 40:9 40:9 O Sion.

elisquíaj chapolime. Yaya quipatahua ilhuicacti quej elisquía se hueyi cortina. Quena, ica ilhuicacti quichihua cati eltoc quej se iyoyoncal. ²³ Yaya quinquixtilia ininchahualis huejhueyi masehualme huan quinehcapan-talia cati quinahuatíaj ni taltipacti. ²⁴ Inijuanti elise quej tzonti cati sanoc quintoctoque huan pejtoque motatzquilíaj o sanoc pejtoque monelhuayotíaj ipan tali pero ayemo quipiyaj chichahualisti. Huan Toteco Dios quinilpizas huan quipilinaltis nochi inintequi cati injuanti quichijtoque. Huan quihuicas ajacat quej elisquía tasoli.

²⁵ “Huaajca ¿ica ajquiya antechhuicalotise? ¿Ajquiya itztoc san se quej na?” Quej nopa tatzintoca Toteco Dios cati Tatzejtzelolitic.

²⁶ ¿Xiajcotachiyaca nepa ilhuicac! ¿Ajquiya quinchijchijqui nochi ne sitalime? Yaya quinyacana nopa sitalime quej elisquía iilhuicac ecahua para tatehuse. Yaya quimati quesqui sitalime eltoque huan sesen quintonza ica itoca. TOTECO quiPIYA nochi yajatili huan chichahualisti huan yeca amo quema polijtoc yon se.

²⁷ Huaajca anisraelitame cati aniixhuihua Israel, ¿para ten anquijjtohuaj para TOTECO amo amechita quema anitztoque ipan taijyohuulisti? Huan ¿para ten anquijjtose para TOTECO amo quicaqui quema sequinoc amechihuilíaj cati amo xitahuac? ²⁸ ¿Amo anquimachilíaj? ¿Amo anquicactoque para TOTECO yaya nopa Dios cati itztoc para nochipa? Yaya cati quichijqui nochi cati onca hasta campa itejteno ni taltipacti. Yaya amo quema caxani ichichahualis, yon amo quema siyahui. Italnamiqulilis eltoc nelhueyi hasta amo aqui hueli quitamimachilía. ²⁹ Yaya quinfuerzajmaca cati siyahuij huan quinmaca yancuic chichahualisti cati cuatij. ³⁰ Hasta telpocame quemantica siyahuij, huan nopa tacame cati sanoc moscaltíaj cuatij huan huetzij. ³¹ Pero cati motemachíaj ipan TOTECO para quinpalehuis, mojmosta quiPIYASE fuerza. Ixtejcose chichahuac quej quipixtosquíaj ieltapal se cuatojti. Motalose chichahuac huan amo cuatise. Nejnemise huejca huan amo siyahuse.

41

Toteco quimocuitahuá Israel

¹ TOTECO quijjtohua: “Nochi anmasehualme ipan nochi talme cati anopantíaj iteno hueyi at, techtacaquíllica huan amo ximolinica noixpa. Xisencahuaca taya anquijjtose noixpa. Ximonechahuica huan xijpehualtica xicamanalítica noixpa. Nopa tetajtolsencahuani ya mocualtalijtoque para quicaquise mocamanal para tijpantise ajquiya quichihua cati xitahuac.

² “¿Ajquiya ammoilhuíaj quiyoltacanjtoc nopa tacat cati nochipa tatani huan quichijtoc ma huala ten campa hualquisa tonati para quichihuas cati xitahuac quej nijtequimaca ma quichihua? Na niDIOS, na nijyoltacanjtoc. Na cati nijchijtoc ma quintani miyac talme, huan nijchijtoc ipan ma moquejquetza miyac tanahuatiani. Na nijchijtoc para ma quintzontamilti miyac soldados ica imacheta hasta quinchihuas cuechtic quej taltepociti huan quinquisemanas quej tasoli cati quinmictía ica icuahuitol. ³ Quema yaya quinquixtilia icualancaitacahua, amo teno quimacasi ipan ojti. Yahui chichahuac huan ica temachti masque ipan se ojti campa amo quema nejnentoc. ⁴ ¿Ajquiya ammoilhuíaj quinnahuatía tanahuatiani ma quichihua cati quichihua? ¿Ajquiya quinyacana nochi masehualme cati tacajtihualajtoque ica cati quichihua ten ipejya ni taltipacti? Na niDIOS nijchihua. Na cati niipejya huan niitamíya. San na.

⁵ “Nochi nopa talme cati mopantíaj iteno hueyi at quititase huan momajmatise, huan mochiyaj para quicaquise taya yancuic tamanti quichihuas. Nochi talme cati mopantíaj huejca huihuipicase huan mocualtalise sentic para tatehuise.”

⁶ “Sesen tacat quiyolchicahuas ihuampo cati itztoc icalnechca huan quiilhuis: “¡Amo ximoyoltetili!”

⁷ Nopa cuaxinquet cati quichihua yancuic teteyome ica cuahuit quiyolchicahuas nopa tacat cati quinalaxos ica oro. Huan nopa tepostejetztzonquet quiisihuiltis nopa tacat cati quimolonis nopa teposti. Quiilhuis: “Nelía quisas cuali totequi.” Huan ica miyac cuidado quitatzquiltíaj iajcolhua huan iicxihua. Teipa quitatzquiltíaj nopa teteyot ica lavos para amo mojmolinis, yon amo huetzis.

⁸ “Pero amojuanti anisraelitame, annotequipanojcahua. Annomasehualhua, aniixhuihua Jacob cati nimechtapejpenijtoc huan aniteipan cone-hua Abraham cati nonelhuampo. ⁹ Na nimechquixitjtoc ten campa hueli hasta campa ontami ni taltipacti huan nimechilhujtoc: ‘Amojuanti annotequipanojcahua. San na techtequipanoca.’ Na nimechtapejpenijtoc huan amo quema nimechtahuelcahuas. ¹⁰ Amo ximajmahuica pampa na niitztoc amohuaya. Amo ximocuesoca pampa na niamoTECO. Nimechfuerzajmacas. Nimechpalehuis huan nimechmaitzquitos ica nonejmat cati ica nitatani.

¹¹ “Xiquita, nochi cati mitzcualancaitaj mopinahualtise huan ayecmo quimatise taya quichihuase. Huan nochi cati quinequise mitztéhuisse, miquise. ¹² San tapic anquintemose cati amechcualancaitayayaj, pampa ayecmo anquinpantise. Nochi injuanti elise quej se tamanti cati amo quema itztoya. ¹³ Pampa na niDios huan niamoTECO, nimechitzquitoc ica momanejmat huan nimechilhúa: ‘Amo ximajmahuica. Nica niitztoc para nimechpalehuis.’”

¹⁴ Huan TOTECO quiijtos: “Amo ximajmahuica anisraelitame*, masque anpilsiltizti huan amo anquipiyaj fuerza, na nimechpalehuis. Na niamoTECO cati nimechcojqui para annoaxcahua. Na cati niTatzejtzeltoc huan niitztoc amohuaya anisraelitame. ¹⁵ Na nimechtalijtoc quej se yancuic cuahuit ica itancoch cati quitequihuía para quiyolquixitise trigo. Anquintzontamiltise nochi amocualancaitacahua. Anquintanise nochi. Elise quej se cati quichihua tatixtic tepeme huan tachiquilme ¹⁶ Quej se quimajcahua ajacatipa trigo para nopa ajacat ma quihuica itasolo, quej nopa elis quej anquinmajcahuase ajacatipa nochi amocualancaitacahua huan se hueyi ajcomalacat quintamisemanas. Pero amojuanti tahuel anmopaquilismacase ipan na, niamoTECO cati niTatzejtzeltoc huan niitztoc amohuaya anisraelitame.

¹⁷ “Quema teicneltizti huan cati amo teno quipiyaj, quitemose at, pero amo quipantise, huan inincamac huactos huan ininenepl pepechijos ipan inincamachal, niquinanquilis na niDIOS cati niamoTECO anisraelitame. Quema techtzajtzilise para ma niquinpalehui, amo quema niquintahuelcahuas. ¹⁸ Nijtapos hueyame ipan nopa tepeme cati huejcapantique. Nijchihuas ma meya at ipan nopa tamayamit. Ipan nopa huactoc tali oncas ameli cati quipixtos miyac at. Huan ipan nopa talme campa amo teno onca huan campa amo huetzi at, oncas miyac pilatajtizti cati quisase campa mantoc at o campa meya at. ¹⁹ Ipan nopa huactoc tali niquintocas miyac cuame. Niquintocas miyac cuame ten tiocuahuit, acacia, arrayanes, olivo, cipreces, pino huan abeto. ²⁰ Huan nochi masehualme quititase ni hueyi tamanti huan

* 41:14 41:14 Aniixhuihua Jacob.

quimachilise para na nijchijqui, na niDIOS, niamoTECO cati niTatzejtzeloltic huan niitztoc amohuaya anisraelitame.

TOTECO quintatzintantalis teteyome

²¹ “¡Anteteyome, technextilica sinta huelis anquichihuase ni huejhueyi tamanti! Sinta anteteyome anhuelisquíaj anquichihuaj se tenijqui, xihualaca huan technextilica.” Quej nopa niquijtohua, na niDIOS, cati nitanahuatijquet ten tali Israel. ²² “¿Huelis anteteyome antechilhuisse taya panoc huejcajquiya huan taya panos teipa? Sinta huelis antechilhuisse, huajca timechtacaquillise. ²³ Sinta nelía andioses, huajca techilhucica taya panos teipa. O xijchihuaca se hueyi tamanti cati cuali o cati amo cuali, cati techchihuas ma timomajmatica huan techchihuas ma timechimacacica. ²⁴ Pero anteteyome amo teno anmpatij huan amo teno hueli anquichihuaj. Huan ten hueli masehuali cati quitapejpenía se teteyot para quihueyimatise mochihuas quej se tamanti cati niquijiya quej nopa teteyot niquijiya.

²⁵ “Pero na nijyoltacanjtoc nopa tacat cati hualas ten norte huan ten campa hualquisa tonati. Yaya quintehuiqui nochi talme huan techtocaxtise na. Huan na nijchihuas para ma quintani nochi tanahuatiani huan taya-canani. Yaya moquejquetzas ininpani quej se chachapalchijquet moquej-quetza ipan nopa soquit cati quisencahua ica iicxihua.

²⁶ “Amo aquí seyoc amechilhui huejcajquiya para melahuac panosquíya ya ni para huelis ama anquiilhuisse para xitahuac cati quijto. Amo aquí seyoc quijto yon se camanali ten ya ni. ²⁷ ¡San na! Na cati niachtohui niqunvolmelajqui Jerusalén ehuaní. Nijtitanqui se tayolmelajquet cati quinihni nopa cuali camanali para nimantzi mocuepase amomasehualhua.

²⁸ “Yon se teteyot amo amechilhui ya ni. Huan yon se amo tananquili quema tatzintocaque. ²⁹ Pampa nochi nopa teteyome amo teno hueli quichihuaj. Amo quinamiqui quinhueyimatise. Nopa teteyome amo teno ininpati, san quej ajacat.

42

Yaya cati itequipanojca TOTECO

¹ “Xiquitaca notequipanojca cati nijfuerzajmaca. Yaya cati nijtapejpeni-jtoc huan nijpiya miyac paquilisti ica ya. Ipan ya nijtalijtoc noTonal. Yaya quichihuas para ipan nochi talme ipan taltipacti ma quinchihuilica masehualme cati xitahuac. ² Yaya cuali iyolo. Amo tzajtzi, yon amo camanalti chicahuac. Amo quicaquise itoscac miyacapa ipan calles. ³ Amo quitajyohuiltis cati ayecmo quipiyaj fuerza huan cati ya quinequi miquis. ¡Quiyolchicahuas! Amo quisehuis se tit cati pilquentzi lementoc. Yaya tatajtolsencahuas xitahuac para nochi masehualme cati sequinoc quintajyohuiltijtoque. ⁴ Yaya amo siyahuis hasta quema campa hueli ipan ni taltipacti nochi ya quichijtose cati senquisa xitahuac. Amo mosiyajquetzas hasta quema nopa talme cati mopantíaj hasta más huejca huan hasta iteno hueyi at ya quichiyaj itamachtíl.”

⁵ TOTECO Dios quichijqui ilhuicacti huan quipatajqui nepa huejcapa. Yaya cati quichijqui taltipacti huan nochi cati onca ipani. Yaya cati quinmaca nemilisti huan inintonal nochi masehualme ipan taltipacti huan quej ni TOTECO quiilhúa itequipanojca: ⁶ “Na niDIOS nimoTECO, nimitznotztoc para titenextilis para na nixitahuac huan nijchihua cati cuali. Na nimitzmaitzquitos huan nimitzmocuitahuis. Nimitzmactilijtoc nomasehualhua para ma quimatica para melahuac nijchijtoc se camanal sencahuali ica

inijuanti. Nojquiya tielis quej se taahuili cati tiquinyacanas masehualme ten nochi talme para ma hualaca campa na. ⁷ Tiquinchihuas ma tachiyaca cati popoyotzitzi. Tiquinquixtis cati tzactoque ipan tatzacti. Huan tiquintoj-tomas cati ilpitoque ipan tzintayohuilot.

⁸ “Na niDIOS, niamoTECO. Ya nopa notoca huan amo aqui seyoc nijcahuilis ma quipiya nohueyitilis. Yon amo nimechcahuilis antechhueyimatise na inihuaya teteyome cati quinmachijchijtoque masehualme. ⁹ Xiquitaca para melahuac panotoc nochi cati nitayolmelajqui achtohuiya para panosquia. Huan ama seyoc huelta nitayolmelahuas yancuic tamanti cati panos teipa. Huan nochi nopa tamanti panos.”

Se huicat para TOTECO

¹⁰ Xihuicaca para TOTECO se huicat yancuic.

Nochi amojuanti cati anitztoque ipan nopa talme cati más huejca ipan ni taltipacti,

xihuicaca para TOTECO por nochi tamanti cati quichijtoc.

¡Xihuicaca nochi amojuanti cati anitztoque ipan hueyi at!

¡Xihuicaca nochi cati anitztoque ipan nopa talme cati mopantíaj iteno hueyi at!

¹¹ Ma huicaca cati itztoque campa hueli ipan nopa huactoc tali. Cati anehuani nopa pilaltepertzitzi ipan Cedar, xijhuicatica.

Nopa masehualme ten Sela ma huicaca.

Nochi xihuicaca ica miyac paquillisti.

Huan nojquiya xihuicaca nochi amojuanti cati anitztoque itzonco nopa tepeme.

¹² Nochi nopa talme cati mopantíaj iteno hueyi at ica campa oncalaqui tonati ma quihueyitalica TOTECO,

huan ma quihuicatica por nochi ichichualis.

¹³ TOTECO hualas quej se hueyi tatehujquet cati tahuel quipiya chichualisti.

Hualas ica ihueyi cualancayo para quintzontamiltis icualancaitacahua.

Tzajtzis chichahuac para teyolmelahuas ya pehuas tatehuilisti.

Quinextis ichichualis ipan icualancaitacahua.

¹⁴ TOTECO quijtohua: “Ya quipiya tonali amo nimolinijtoc huan nimotzacuilijtoc para amo teno nijchihuas.

Pero ama, quena, nijnextis nohueyi cualancayo.

Nitzajtzis quej se sihuat cati quitacatiltia icone.

¹⁵ Nijhuelonis tepeme huan tachiquilme.

Nijhuatzas nopa sacat huan cuame.

Niquincuepas hueyame huan amelme ica huactoc tali.

Nijhuatzas campa momanayaya at.

¹⁶ Huan nomasehualhua cati popoyotzitzi, niquinyacanas ipan se ojti cati amo quema quíiztoque.

Huan iniixpa nijchihuas para nopa tzintayohuilot ma mocuepa taahuili.

Nijchihuas nopa ojti cati elqui fiero ma elis sepantic huan xitahuac iniixpa,

huan amo quema niquintahuelcahuas.

¹⁷ Pero mopinahualtise nochi cati motemachíaj ipan teteyome huan taixcopincayome huan quinilhuíaj: ‘Amojuanti antodioses.’

Masehualme quej nopa ayecmo quimatise taya quichihuase.”

Israelitame amo quitacaquilíaj TOTECO

18 TOTECO quinilhuía israelitame: “¡Xitacaquica anmonacastzactoque! ¡Techtachilica anpopoyotziti para huelis anquuitase! 19 Ipan nochi taltipacti ¿ajquiya itztoc cati tahuel popoyotic quej annomasehualhua cati nimechtapejpenijtoc para antechtequipanose? Huan ¿ajquiya tahuel amo tacaqui quej annomasehualhua cati nimechita para annotayolmelajcahua cati nimechtitancoc para anteyolmelahuase cati melahuac? Amojuanti cati annotequipanojcahua huan nimechiyocatalijtoc tahuel anpopoyotique. 20 Amojuanti anisraelitame anquitztoque miyac tamanti cati anquimatij para xitahuac, pero amo anquichihuilíaj cuenta. Anquicactoque cati niquijtohua, pero anquicahuaj se lado.

21 “Ica itanahuatilhua TOTECO quisencajtoya para anquinnextilise nochi masehualme para yaya nelía senquisa xitahuac. Huajca quihueyitalijtoc itanahuatilhua huan quinchijtoc tahuel yejectzi. 22 Pero ama animasehualhua anitztoque se hueyi pinahualisti pampa amojuanti cati amechtapejpenijtoc para antenextilise ihueyitilis ica itanahuatilhua, anhuetztoque ipan se hueyi huihuiyot. Nochi amojuanti amechtachtequilijque huan amechhuicaque ipan sequinoc talme para antetequipanotij san tapic. Amechmasiltijque ipan ostot, amechcalaquijque ipan tatzacti huan amechcuilijque nochi cati anquipiyayaj. Huan amo aquí huelqui amechmanahuis, yon amo aquí quinilhui amocualancaitacahua ma amechcuepilica cati amechchachtequilijtoyaj.”

23 ¿Amo aquí yon se campa amojuanti cati nelía quitacaquilisquía ni tamanti cati panoc huejcajquiya huan quimachilia nochi nopa fiero tamanti cati amechajsis teipa? 24 ¿Ajquiya amechtemactili anisraelitame para ma amechtachtequilica huan ma amechchihuilica miyac tamanti? Elqui TOTECO cati amojuanti anquixpanotoyaj pampa amo anquinejque anyase campa amechtitaniyaya, yon amo anquinejque anquineltoquilise itanahuatilhua. 25 Yeca TOTECO quititanqui ihueyi cualancayo ipan amojuanti animasehualhua huan quintzontamilti miyac ten amojuanti ipan tatehuilisti. Pero masque israelitame huetzque ipan tit huan tatayaya imintacayo, noja amo quimachilijque para ten Toteco quej nopa quinchihuiliyaya. Elqui pampa yaya tahuel quinequiyaya ma moyolcuepaca, pero nopa israelitame amo quichihuilijque cuenta.

43

San TOTECO quinmanahuis israelitame

1 Pero ama, israelitame, quej ni amechilhua TOTECO cati amechchijchi: “Amo ximajmahuica pampa na nimechcojqui para nimechtojtomas ten tetequipanojcajot. Nimechnotzqui sesen ten amojuanti ica amotoca. Annoaxcahua. 2 Quema anpanose ipan tequipacholi quej se at cati huejcata, na niitztos amohuaya. Quema anquipanose taohuijcajot cati eltoc quej hueyame, amo amechatzonpolihuiltis. Huan quema anpanose ipan se taijyohuilisti quej se tit, amo amechtatis. 3 Pampa na niamoTECO huan niamoDios. Na niamotemaquixtijca. Na cati niTatzetzceloltic cati niitztoc amohuaya anisraelitame. Nijtemactili nopa tali Egipto, Etiopía huan Seba quej amopataca para nimechmanahuis huan nimechmaquixtis. 4 Niquintemactili masehualme ipan sequinoc talme ma miquica quej amopataca para nijmanahuis amonemilis pampa nimechita para nelía miyac amopati. Nimechtepanita huan miyac nimechicnelía.

5 “Amo ximajmahuica pampa na niitztoc amohuaya. Na niquincuiti amoixhuihua cati itztoque campa hueli ten campa hualquisa tonati hasta

campa oncalaqui, huan sempa niquinsejcotilis. ⁶ Niqincuiti cati itztoque ica norte huan ica sur. Quena, niqincuiti noisraelita telpocahua huan ichpocahua cati itztoque hasta campá ontami ni taltipacti huan sempa niqinhualicas ipan ni tali Israel. ⁷ Niqinhualicas nochi cati techtocaxtise para niininTECO pampa niqinchijchijqui para ma techhueyitalica. ⁸ Ma hualaca nopa masehualme cati quipiyaj iniixteyol, pero amo tachiyaj; huan cati quipiyaj inintacaquilis, pero amo tacaquij.

⁹ “Ma mosentilica nochi tali huan altepet ehuani. Yon se altepet o tali iteteyo tayolmelajqui para panosquía nochi cati ama pano. Yon se teteyot huelisquía teyolmelahuas taya panos teipa. Sinta se teteyot quijitojtoc se hueliqui, ma hualaca testigos huan technextilis cati quicajque. Ma technextilica para quisqui melahuac cati quijitojque para panos, pero amo teno huelis teyolmelahuase teteyome.”

¹⁰ Huan TOTECO quijitohua: “Pero na niqinpiya testigos para niteyolmelahua cati panos teipa, pampa amojuanti anisraelitame annotestigos. Annotequipanojcahua. Na nimechtapejpeni para antechixmatise, antech-neltocase huan para anquimachilise para san na niDios huan amo onca seyoc. Amo quema itztoya seyoc Dios huan amo quema itztos seyoc. ¹¹ San na niamoTECO huan amo onca seyoc cati hueli temaquixtis iyoca ten na. ¹² Na niteyolmelajqui achtohui para nimechmaquixtis, huan teipa nimechmaquixti. Amo onca seyoc tali cati idios amechyolmelajqui achtohui cati quichihuas. Huan antestigos para ya ni melahuac. ¹³ Hasta quema ayemo oncayaya tatanexti, na ipa niutzotc. Amo aqui hueli momanahuis ten nochicalualis. Yon amo aqui hueli quitzacuilis cati na nijchihua.”

¹⁴ NiamoTECO cati nimechcoqui para annoaxcahua. Na cati niTatzelzteloltic huan niutzotc amohuaya anisraelitame. Niqijitohua: “Pampa tahuel nimechicnelía, niqintitanis ipan tali Babilonia miyac soldados para ma quintehuica. Huan nopa Babilonia tayacanani monequis cholose ipan nopa huejhueyi barcos cati ica mohueyimatiyayaj. ¹⁵ Na niamoTECO cati niTatzelzteloltic. Na nimechchijchijqui, anisraelitame, huan niamotanahuatijca. ¹⁶ Na niamoTECO cati nijtapohua se ojti ipan nopa hueyi at. Quena, nijchijqui se ojti tatajco nopa at cati más mosisinyaya. ¹⁷ Na niqinnotzqui nopa miyac soldados cati tahuel quipiyayaj chichahualisti ten tali Egipto para ma monechcahuica nochi inincarrojhua huan inincahuayojhua. Huan niqinchijqui ma atzonpolihuaica huan ma miquica. Ininemilis tanqui quej tami imechajyo se cantela.

¹⁸ “Pero xiquelcahuaca nochi cati nijchijtoc cati panoc huejcajquiya. Ayecmo xiquelnamiquica pampa cati nijchihuas ama elis más hueyi que cati nijchijqui huejcajquiya. ¹⁹ Ama nijchihuas se tamanti cati senquisa yancuic. ¡Xiquitaca, ya pejtoc nijchihua! ¿Amo anquijitaj? Na nijtapos se ojti ipan nopa huactoc tali para ipan ma tacuepilica nomasehualhua hasta inintal, huan nijchihuas ma onca miyac atajti campá amo quema oncatoc. ²⁰ Huan paquise nochi nopa cuatitan tapiyalme cati nopona nemij. Quena, nochi nopa tepechichime huan avestruces techtascatmise huan techhueyitepanitase quema ya niqinmacatos at ipan nopa huactoc tali. Na nijchihuas ma meya at ipan nopa huactoc tali para atise huan moyoltalise noisraelita masehualhua cati niqintapejpenijtoc. ²¹ Niqinchijchijtoc israelitame para elise noaxcahua huan se tonali techhueyitalise iniixpa nochi ipan taltipacti.

²² “Pero ama, annoisraelita masehualhua, amo anquinequij antechtajanise notapalehuil. Tahuel nimantzi ansiyajtoque ica na. ²³ Amo antechhualiquilijtoque borregojme para antechmacase quej se tacajchualisti tatatili nopona campá amechhuicatoque. Yon amo antechhueyitepan-

itztoque ica amotapiyalhua cati anquinmictijtoque para na. Pero amo nimechchihualtijtoc techhualiquilica nopa tacajcahualisti, yon cati tatoyahual noixpa, yon copali. ²⁴ Amo antechhualiquilijtoque taahuiyaycayot, yon amo anquitatijtoque ininchiyajca tapiyalme cati na niquijnecui ajhuyiac. San antechhualiquilijtoque amotajtacolhua huan anquitalijque nopani hasta nijmati ya nisyajqui pampa talojtzitzi antechixpanoj.

²⁵ “Pero na noselti niitztoc cati niquixpolohua amotajtacolhua pampa tahuel nimechicnelia huan ayecmo quema niquinelnamiquis amotajtacolhua. ²⁶ Pero masque niquinelcahua amotajtacolhua, monequi nimechtatzacuiltis. Huajca techelnamiquiltica para nimechtajtolcahuilijtoc nimechtapojpolhuis. Ma tijchihuaca quej anmonextíaj iixpa se juez. Xicamanaltica para ximomanahuica huan anquipantise tapojpolhuili sinta anhuelise. Huan na nicamanaltis nojquiya quej niquita para xitahuac. ²⁷ Hasta ipejya amohuejcapan tatahua tajtacolchijque noixpa. Huan teipa nochi amomachtijcahua nojquiya quixpanoque notanahuatilhua. ²⁸ Yeca niquinquinixtili nopa totajtzitzi cati tayacanayayaj ipan tiopamit, huan nijchijqui sequinoc ehuan ma amechpinahualtica anisraelitame huan ma quisosoloca amotal.”

44

San TOTECO yaya Dios

¹ “Tectacaquilia anisraelitame cati annotequipanojcahua cati na nimechtapejpenijtoc. ² NiamoTECO cati nimechchijchijqui iniijitico amonana. Na cati nochipa nimechpalehuis huan na niquijtohua. Anisraelitame, annotequipanojcahua, amo ximajmahuica. Amojuanti cati nimechtapejpenijtoc, amo teno xiquimacasica. ³ Na nijchihuas ma onca miyac at para amo anamiquise huan para quixolonis amotalhua campa tahuel tahuactoc. Huan nijtitanis noTonal huan notatichihual ipan amoconeuhua. ⁴ Huan injuanti moscaltise cuali quej xihuime cati motatzquilijtoque campa onca miyac at huan quej nopa sauces cuame cati mopantíaj iteno hueyi at. ⁵ Huan sequij amoixhuihua quijitose ica miyac paquilisti: ‘Tojuanti tiiaxcahua TOTECO,’ huan teipa sequinoc quijitose: ‘Tojuanti tiiteipa ixhuihua Israel.’ Huan teipa sequinoc quijicuilose notoca na, niamoTECO, ipan inimax huan noja teipa sequinoc quijicuilose itoca Israel.”

⁶ TOTECO, nopa tanahuatijquet ipan tali Israel huan yaya cati quincojqui israelitame quema itztoyaj ipan tatequipanojcahayot, quej ni quijitohua: “Na niipejya huan niitamia. Huan iyoca ten na, amo onca seyoc Dios. ⁷ Amo aqui seyoc quej na. Amo aqui más hueli tayolmelahuas cati panos teipa huan teipa quitechpanas sesen tamanti campa monequi para nochi panos quej niquijtojtoc. Sinta itztoc se cati hueli, ma huala huan ma techillhui taya hualas teipa huan tiquitase sinta mochihuas para quej nopa quinnextilis ichicahualis. Quej nopa nijchijtoc na hasta huejcajquiya quema niquintali israelitame para ma elica nomasehualhua. ⁸ Amo ximajmahuica, yon amo xihuihuipicaca pampa na hasta huejcajquiya nimechyolmelajtoc nochi cati panos huan amojuanti antestigos. Amo onca seyoc Dios iyoca ten na. San na niDios. Amo onca seyoc cati quipiya chicahualisti. ¡Amo! Yon se amo niquixmati.”

Huihuitique cati quinhueyichihuaaj teteyome

⁹ Nelía amo teno ininpati nopa masehualme cati quinchijchihuaaj teteyome huan taixcopincayome huan quijitohuaaj para ya nopa inindioses. San

tapic pampa masque motemachiyaj ipan ininteteyohua, amo teno hueli quichihuase para quinpalehuise. Nopa masehualme iztoque testigos ten ya ni, pampa quimatij para ininteteyohua amo tacaquij, yon amo tachiyaj. Yeca nelía quipantíaj pinahualisti nopa masehualme cati quinhueymatij. ¹⁰ Amo aquí quichijchitoc se taixcopincayot o se teteyot huan quitocaxitjoc idios huan teipa ya nopa cati quimachijchijqui quipalehuijtoc ica se tenijqui, masque se tamanti pisiltzi. ¹¹ Nochi cati quinhueyichihuaj taixcopincayome pinahuase quema moquetzati iixpa Toteco para quimacase cuenta. Nojquiya pinahuase nochi cuaximani huan teposchihuani cati quinchijchitoque huan quijtohuaj para quichijchitoque se dios. Pampa injuanti san masehualme, ¿quenicatza quichihuase se dios? Quena, injuanti tahuel pinahuase huan momajmatise iixpa TOTECO. ¹² Xiquitaca, nopa teposchijquet quitálía se teposti ipan tit huan quema ya totonixtoc, quicui se martillo huan quitejtejtzona ica nochi ichichualis para quisencahuas se teteyot. Huan por itequi nopa tacat mayanas huan amiquis, huan itacayo yamaniyas huan siyahuis huan amo teno quipalehuis nopa teteyot. ¹³ Nojquiya san se ica se cuaxinquet cati quicui se hacha huan quitequihuía para quisencahuas se teteyot. Achtohui quicui se cuahuit, huan teipa quitamachihua huan ipan quixcopina se masehuali. Teipa quitejtequi huan quialaxohua ica se cepillo huan quej nopa quisencahua se yejyetzti teteyot huan quitálía ipan ichaj. Huan nopa teteyot yon amo hueli mijcuenía ten campá eltoc. ¹⁴ Huelis nopa cuaxinquet quintzontequi tiocuame para quitequihuis, o huelis quitapepenía se ten nopa ciprés huan ahua cuame cati moscaltía inihuaya ipan cuatitamit. Huelis nojquiya quitoca se cuahuit ten pino huan quichiya para ma moscaltis quema huetzi at. ¹⁵ Huan quema ya mochijt tomahuac, quitzontequis. Se quentzi ten nopa cuahuit quitequihuis para tipitzas para mototonis huan para quiicxitis ipantzi. Teipa quicui nopa tatecti cati mocajqui ten nopa cuahuit huan mochijchihuilía se teteyot para quihueyichihuas huan para motancuaquetzas iixpa quej elisquía se dios. ¹⁶ Quena, se quentzi ten nopa cuahuit quitequihuía san para quitatis. Quicacatzos inaca huan tacuas hasta cuali ixhuis. Teipa quema ya ixhuitoc, nopa tit quitequihuía para moscohua huan quijtohua: “Nelía techpactía niitztos nechca ni tit pampa techotonilía.” ¹⁷ Huan ica nopa cuahuit cati noja mocahua mochijchihuilía se teteyot cati quiita quej elisquía idios. Teipa motancuaquetza iixpa, quihueymati huan quihuía: “Techmanahui, pampa ta tinodios.”

¹⁸ Nelía huihuitique cati quej nopa quichihuaj huan amo teno quimatij. Quitzacuai inixteyol para amo tachiyase huan amo quiitase cati melahuac. Inintalnamiquilis nojquiya tzactoc para ma amo quimachilica taya quichihuaj. ¹⁹ Nopa tacat cati quinchijchihua teteyome amo monejnehuilía ipan italnamiquilis: “Se quentzi ten nopa cuahuit nijtequihui para nimoscas, para niqicxitis nopantzi, nonaca huan nijcuajqui. Huajca ¿quenicatza nijchijchihuas se dios ica nopa cuahuit cati mocajqui? ¿Quinamiqui nimotancuaquetzas iixpa se tacotonti ten cuahuit?” ²⁰ Pero nopa huihui tacat nelía hueyi mocuapolojtoc. Motemachía ipan se tamanti cati amo quema huelis quipalehuis ipan yon se tamanti. Eltoc quej motamaca ica cuajnexti cati amo teno ipati. Pero masque ya nopa, nopa huihui tacat noja amo monejnehuilía huan quijtohua para nelía hueyi mocuapolojtoc pampa melahuac amo teno ipati ni teteyot cati quipixtoc imaco. San se istacatili.

²¹ “Huajca techtacaquilica ica miyac cuidado anisraelitame pampa anotequipanojcahua. Na nimechchijchijqui amojuanti para annoaxcahua huan amo quema nimechelcahuas. ²² Na niquixpolo nochi amotajtacolhua quej ixpolihui nopa mixti cati motalía ica ijnaloc. Huajca xitacuepilica ica na pampa na nitaxtajqui por amojuanti para nimechtojtomas ten tequipano-listi.”⁵

²³ Xihuicaca amojuanti ipan ilhuicacti. Xihuicaca pampa TOTECO quichijtoc ni hueyi tamanti. Huan amojuanti cati anitztoque ipan ni taltipacti, xitzajtza ica paquillisti. Nochi xihuicaca hasta eltoc quej tepeme, cuatitame huan cuame paquij huan huicaj ica nochi ininchicahualis pampa TOTECO quinciojtoc israelitame huan quinquixtijtoc ten inintatequipanalis. Quichijqui para quinmaquixtis iixhuihua Jacob huan para quinextis ihueyitilis campa hueli campa inijuanti mopantíaj.

²⁴ “Na cati niamoTECO nimechtojtongui ten amotatequipanojcayo. Na nimechchijchijqui ipan iniijtico amonana. Nochi tamanti cati onca, na nijchijchijqui. Na noseltitzi nijpatajqui ne ilhuicacti huan na ica noseltitzi nijchijchijqui ni taltipacti.

²⁵ “Na cati niquinpanextía tetonalitani para istacatini huan amo nijcahua ma mochihua cati quijtohuaj para mochihuas. Na niquinpinahualtia. Na nijchihua para talnamijca tacame amo ma tetalnamictica xitahuac huan niquinhuihuitila. ²⁶ Pero nochi cati na notajtolpanextijcahua tayolmelahuaj para panos, nijchihua ma pano senquisa quej inijuanti quijtohuaj. Quema inijuanti quijtohuaj para altepet Jerusalén momanahuis huan nochi altepeme ten tali Judá sempa temise ica masehualme huan sempa quicualtalise nopa calme cati sosolijtoque, melahuac quej nopa elis. ²⁷ Huan quema niquincamanalhuis nopa hueyame huan niquinilhuis: ‘¡Xihuaquica!’, huajca melahuac huaquise. ²⁸ Huan quema nicamanalti ten Ciro huan niquijtohua: ‘Ta cati titanahuatis para na, huan temachtí tijchihuas senquisa cati na nimitznahuatis. Huan yaya tanahuatis para sempa ma quicualfalica altepet Jerusalén huan para quisencahuase itzinpehualtil nopa tiopamit.’ ”

45

TOTECO quitapejpeni Ciro para quitequipanos

¹ TOTECO quej ni quilhuia Ciro cati yaya quitapejpenijtoc huan quitequimacatoc para quintanis cati ehuaní ipan miyac talme. TOTECO quimaitzquis huan quimacas miyac chichahualisti huan iixpa ya nopa tanahuatiani cati tahuel quipixque chichahualisti tapolose. TOTECO quichihua ma motapoca nochi nopa caltemit ten tali Babilonia iixpa huan amo aqui huelis quitzacuas para ma amo calaqui. TOTECO quijto: ² “Ciro, na nimitzycantiyas huan nijxitahuas nochi ojti cati huiccolfic campa tipanos. Nijpostequis nopa tepos caltemit huan nopa tepos barras cati ica quitzacuaj nopa caltemit. ³ Huan nimitzmacas miyac tamanti cati patiyó cati ama motatijtoc campa tzintayohuilot. Nimitzmacas miyac ricojyot cati eltoc ixtacatzi. Huan quej nopa, ta tijmatis para na niDIOS, cati niininTECO israelitame huan nimitznotza ica motoca.

⁴ “Huan ¿para ten nimitznotzqui, ta tiCiro, para tijchihuas ni hueyi tequit? Nimitznotzqui pampa tahuel niquinicnelia israelitame, notequipanojcahua cati iteipa ixhuihua Israel ten huejcajquiya nijtapejpeni. Na nimitznotzqui ica motoca masque amo techixmatiyaya. ⁵ Na niDIOS huan amo aqui seyoc. Iyoca ten na amo onca seyoc Dios. Huan na nimitzmacas chichahualisti huan nimitztitanis para xitatániti masque amo techixmajtoc. ⁶ Huan quej nopa, nopa talme cati mopantíaj huejca campa hualquisa tonati huan hasta campa

oncalaqui tonati quimatise para melahuac amo onca seyoc Dios iyoca ten na. San na niDIOS huan amo aqui seyoc. ⁷ Na nijchihua taahuili huan tzintayohuilot. Na nijchihua ma onca tasehuilisti huan taohuijcaoyot. Na niDIOS cati nijchihua nochi ni tamanti. ⁸ Elis quej motapos ne ilhuicacti huan ten nepa huejcapa nijchihuas titatanis. Huan ni taltipacti quiselis nochi cati panos quema titatanis quej elisquía quiselisquíaaj at cati huetzis ten ilhuicacti. Huan elis quej nochi ixhuas huan elis yejyetzzi pampa ta tiquintojtonqui israelitame cati ilpitoque huan por ta mochihuas cati xitahuac campa hueli. Huan na niDIOS nijchijtoc para nochi quej nopa ma pano.”

TOTECO itztoc más hueyi que nochi

⁹ Tahuel amo quinamiqui para se tacat ma motehui ihuaya cati quichijchitoc. ¿Huelis nopa comit quitatelhuis cati quichijchijqui huan quihulis amo quisencajqui cuali? O ¿huelis nopa soquit quitaajilhúa se chachapalchijquet cati quichijchihua huan quihluía: “¿Taya tijchihua?” O “¡Nelía tihuihuitic!” O “Hueyi timocuapolojtoc.” ¹⁰ Nelía fiero elisquía sinta se conet quitzajtzilía itata huan inana huan quinilhúa: “¿Para ten antechtacatilijque? ¿Amo anquimatij quenicatza anquichihuase cuali se tamanti?”

¹¹ Quej ni niquijtohua, na niamoTECO cati niTatzeltzoltic. Na cati niitztoc amohuaya anisraelitame huan na nimechchijchijqui huan niquijtohua: “¿Taya amotequi amojuanti para antechtatzintocquise por nochi cati panos teipa ica noconehua? Amó quinamiqui technahuatise taya tamanti nijchihuas ica nomax. ¹² Na nijchijqui ni taltipacti huan niquinchijchijqui masehualme para ipan itztose. Ica nomax nijpatajqui ne ilhuicacti huan niquinnahuati ma monexica nochi nopa miyac millones ten sitalime cati nopona mopantíaj. ¹³ Na nijyoltacanis Tanahuatijquet Ciro para ma quisencahuas tamanti para ma elica xitahuac. Nijcualtalis iojhui iixpa huan nijyacanas ipan cati quichihuas. Yaya quintojtomax nomasehualhua ten campa ilpitoque ipan sequinoc talme huan quicualtalis noaltepe Jerusalén. Huan amo monequis se faxtahuili o nemacti para quichihuas.” Quej nopa quijtohua TOTECO Cati Quinyacana Iilhuicac Ejcahua Ma Tatantij.

¹⁴ Huan TOTECO quinilhúa israelitame: “Nopa masehualme ten tali Egipto, Etiopía huan nochi nopa sabeos cati tahuel huejcapantique motemactilise ica amojuanti. Quihualicase campa amojuanti nochi inintamantzitzi cati quinamacaj, huan nochi ya nopa elis amoaxca. Nopa masehualme elise amoaxcahua huan anquinnahuatise. Inijuanti yase amotepotzco quej tetequipanohuani cati ilpitoque ica tepos cadenas. Motancaquetzase amoixpa, huan quijtohua: ‘Melahuac Dios itztoc amohuaya. Huan san yaya Dios. Iyoca ten ya amo aqui seyoc.’ ”

¹⁵ Ta tiToteco, melahuac san ta tiDios huan ta timotatía. Ta tiToteco Dios ten tiisraelitame huan ta titotemaquixtijca. ¹⁶ Nochi cati quinchijchihua huan quinhueyichihua teteyome mopinahuatise huan quixtase para nelía mocuapolojtoque. ¹⁷ Pero TOTECO quinmaquixtis israelitame, huan quinmaquixtis para nochipa. Ayecmo aquí quinpinahuatise, yon ayecmo aquí quinehcapantalis para nochipa. ¹⁸ Pampa TOTECO cati quichijchijqui ilhuicacti huan taltipacti, yaya DIOS. Huan sesen tamanti quitali campa quinamiqui. Huan ni taltipacti amo quichijchijqui para eltos cactoc. Quichijchijqui huan quicualtali para ipan ma itztoca masehualme. Yaya cati quijto: “Na niDIOS huan amo onca seyoc. ¹⁹ Na nicamanalti miyacapa quema nijtencahua se tamanti cati nijchihuas. Amo nicamanalti ixtacatzí o ipan se lugar campa tzintayohua para amo aquí ma quimati cati niquijtohua. Amo

niquinilhui israelitame ma techtemoca huan teipa amo niquinnanquiliá, pampa na niDIOS niininTECO, niquijtohua cati senquisa xitahuac huan melahuac.

TOTECO huan nopa teteyome ten Babilonia

²⁰ “Ximosentilica huan xihualaca noixpa nochi amojuanti cati anehuani ipan talme cati ancholohuaj imaco Ciro. Nelía huihuitique nochi masehualme cati motemachíaj ipan se teteyot ten cuahuit huan motatajtíaj iixpa se dios cati amo hueli temaquixtía. ²¹ Ximocualtalica huan xiquixnextica taya tamanti cuali huelis anquijjtose ten amoteteyohua. Technextilica taya tamanti quichijtoque nopa teteyome para melahuac quinamiqui ma xiquinhueyichihua. Huan ximoilhica sinta amechilhujtoque tamanti achtohuiya cati panos teipa quej na nijchijtoc. San na niDIOS nitayolmelahua tamanti achtohui cati teipa panos. Amo aquí seyoc Dios iyoca ten na. San na niDios huan nixitahuac huan nitemaquixtía. Amo aquí seyoc.

²² “Xihualaca campa na nochi anmasehualme cati anitztoque ipan ni taltipacti huan na nimechmaquixtis. Pampa san na niDios huan amo aquí seyoc. ²³ Na noseltitzi nimotestigojquetza para se tamanti panos huan amo nimoyolcuepas pampa nocamanal senquisa melahuac. Huan na niquijtojtoc ya ni: Nochi masehualme ipan ni taltipacti motancuaquetzase noixpa huan techhueyimatise. ²⁴ Huan quijjtose: ‘San TOTECO hueli techchihuas tixitahuac huan san ipan ya tijpantise chicahualisti para titatanise.’ Huan nochi cati quicualancatíaj TOTECO, tahuel pinahuase. ²⁵ Pero ipan TOTECO nochi israelitame mochihuase xitahuac huan por ya mohueyitalise.”

46

TOTECO quipiya chicahualisti, pero nopa teteyome amo

¹⁻² “¡Xiquitaca, ya tantoc Bel huan Nebo, nopa teteyome ten tali Babilonia! Quintalíaj ipan cahuayojme. Huan nopa teteyome etique huan quichihuaj para nopa cahuayojme ma siyahuica huan ixyacayajtiyaca. Motepotaníaj nopa cahuayojme na inintamamal momimilohua. Nochi nopa teteyome onhuetzj hasta talchi huan tapanij. Amo huelij momanahuíaj iniselti para amo huetzise. Melahuac amo huelise huan quinquicase nochi injuanti para yase tetequipanotij.

³ “Techtacaquilica nochi amojuanti cati noja anmocajtoque ipan tali Israel pampa na nimechchijchijqui huan na nimechmocuítahujtoc hasta quema noja anitztoyaj ipan ijtico amonana. ⁴ Na nielis niamotoTeco ipan nochi amonemilis hasta quema ya anhuehuentzitzitzi huan ya chipahuixtos nochi amotzoncal. Na nimechchijchijqui huan na nimechhuicas. Nimechmocuítahuis huan nimechmaquixtis.

⁵ “¿Ica ajquiya antechhuicalotise huan antechitase quej tisanse? ⁶ Masehualme quiquixtíaj oro huan plata ipan ininbolsas huan quitamachihuaj ipan se balanza para quuitase quesqui ietica. Teipa quitemohuaj se teposchijquet para ma quinchijchihuili se dios. Huan quema ya quisencajtoc, motancuaquetzaj iixpa nopa teteyot huan quihueyichihuaj.

⁷ Huan para quihuicase sejcoyoc, monequi quiquechpanose. Huan quema quiquetzaj talchi, san nopona mocahua pampa amo hueli mojmolinía, yon amo hueli mijcuenía iselti. Quema masehualme quitzajtzilíaj chicahuac para ma quinpalehui, amo quinnanquiliá, yon amo hueli quinmanahuía quema huala se taohujcayot.

⁸ “Xiquelnamiquica nochi ya ni, antajtacolchihuani, huan ximoyolilhuica para teteyome amo hueli amechpalehuise. Amo xiquelcahuaca. ⁹ Xiquelnamiquica nochi nopa tamanti cati nijchijqui huejcajquiya. Xijmatica para san na niDios. Huan amo onca seyoc quej na. ¹⁰ Na nitayolmelajtoc ten ipejya taya panos teipa. San na nimechyolmelahua para huala se tamanti quema noja ayemo pano, huan teipa melahuac panos. Huan nochi tamanti cati na niqijtohua mochihuas, melahuac mochihua pampa na nijchihua ma pano nochi cati nijnequi.

¹¹ “Ten nepa campa hualquisa tonati nijnotzas se tacat ma huala. Huan yaya elis quej se cuatojti cati patantihualas chichahuac huan temos nimantzi para quinitzquis cati quinequis huan tetzontamiltis. Yaya hualas ten huejca huan quichihuas cati na nijnahuatis ma quichihua. Na nimechilhujtoc ten ya huan temachtí yaya hualas. Na nijsencajtoc para quej nopa panos, huan melahuac quej nopa elis. ¹² Techtacaquilica anmasehualme cati anyoltetique huan anmoilhuaj para huejcahuas para nijsencahuas tamanti para ma elica xitahuac. ¹³ Ya niitztoc para nijsencahuas tamanti huan amo huejcahuas nopa tonali. Amo ximoilhuica para hasta teipa ica miyac tonali nijchihuas. Na nimocualtalijtoc para nimechmanahuis nimantzi. Ama nijmaquixtis altepet Sion huan nijyectalis tali Israel.”

47

Inintatzacuiltl tali Babilonia ehuani

¹ TOTECO quijtohua: “Amojuanti cati anehuani tali Babilonia nochi antataniyayaj, pero ama ayecmo antatanise. Xihualaca ximosehuiquij talchi ipan nopa taltepocli pampa ya tanqui nopa tonali para antanahuatise. Tanqui nochi amohueyitilis huan ayecmo aqui amechitas quej iichpoca nopa tanahuatijquet ten nopa caldeo masehualme cati yejyectzi huan selic. ² Ama monequi anmasehualme ten Babilonia xitacuepilica antequipanohuani cati sequinoc aniniacahua. Xiquitzquica nopa metat huan xijtisica nopa trigo. Ximoquixtilica amoyejyectzi itzajcahua huan xijquixtica amoyoyo cati neleyejyectzi. Xijnextica amoquescuayohua quema antequitij huan xinejnemica quej elisquía anquixcotonaj se hueyat pampa ama antequipanohuani. ³ Nochi quuitase amotacayohua xolot huan anhuetzise ipan pinahualisti. Na nimechcuelilis ica cati anquinchihuilijtoque noisraelita masehualhua huan amo aqui techtzacuilis.”

⁴ Quej nopa quijtohua TOTECO Cati Quinyacana Iilhuicac Ejcahua Ma Tatantij, yaya cati techcojtoc para techtojtomas ten tetequipanolisti. Yaya cati Tatzetzolotlic huan itzoc tohuaya tiisraelitame. TOTECO quillhuía Babilonia:

⁵ “AnBabilonia ehuani, ximosehuica ipan tzintayohuilot huan ayecmo ximolinica pampa ayecmo quema amechtocaxtise: ‘nopa sihua tanahuatijquet cati quinnahuatía miyac talme.’ ⁶ Nicualanqui ica noisraelita masehualhua huan yeca niquintemactili amomaco anBabilonia ehuani para xiquintatzacuiltica. Pero amojuanti amo anquintasojtaque yon se quentzi. Hasta nomasehualhua cati huehuentzitzit anquinchihualtijque ma quihucaca tamamali cati tahuel etic. ⁷ Anmoilhuyayaj para amotanahuatilis amo quema tamisquía. Anquijtohuayaj: ‘Nochipa titanahuatise huan tiquinnahuatise nochi talme ipan taltipacti.’ Amo anmonejnehuilijque ten nomasehualhua, yon amo anmotatzintoquilijque taya ininpan-tisquía nochi cati quinhuihuítasquaj nomasehualhua.

⁸ “Huajca ama techtacaquilica, anBabilonia ehuani cati aneliyayaj quej se sihua tanahuatijquet. Tahuel anmopaquilismacayayaj huan anmoilhuyayaj para anitztoyaj antemachme. Tahuel anmohueyimatiyayaj huan anquijtohuayayaj para san amotal más hueyi ten nochi talme. Huajca xijta-caquilica taya tatzacuiltili anquiselise por nochi amotajtacolhua. Amojuanti anquijtojque: ‘Tojuanti cati más tihuejhueyij. Tiitztoque quej dios. Amo aquí seyoc quej tojuanti. Amo aquí techchcapantalis. Amo quema tiitztose quej se cahuali, yon amo quema tiitztose quej se cati quinpulos iconehua.’

⁹ ¡Cualtitoc! Pero na nimechilhuía para ni ome tamanti hualas amopani san ipan se talojtzi. Huan hualas ica miyac chichahualisti. Ipan se tonal anBabilonia ehuani anmocahuase quej se cahuali huan anitztose quej se cati quinpolojtoc nochi iconehua. Quej nopa anmopantis masque anquinpiyaj miyac tenahualhuani huan tetonalitani cati ipan anmotemachiyayaj.

¹⁰ “Masque miyac tajtacoli anquichihuayayaj, anquimachiliyayaj para anitztoyaj temachti. Huan anmoilhuyayaj para amo aquí quiita cati fiero anquichihuayayaj. Amotalnamiquilis huan nochi tamanti cati anquix-matiyayaj, amechcuapolojque. Huan yeca ipan amoyolo anquijtohuayayaj: ‘Tojuanti tiDios huan amo aquí seyoc Dios iyoca ten tojuanti.’ ¹¹ Yeca hualas amopani se hueyi tatzacuiltili. Huan amo anquimatise canque quisqui, yon amo huelis anquitzacuilise. Huan hualas ipan se talojtzi quema amo anquimatij.

¹² “Huajca xijsenhuiquilica xiquintzajtzilica iajacahua Amocualtat cati anquinhueyichijtihualajtoque hasta quema anitztoyaj se tanahuatijcayot cati pilsiltzi. Xiquintajtjanica ma amechpalehuica para noja anhuelise anquinmajmatise masehualme ten miyac talme. ¹³ Pero san topic pampa amo aquí hueli amechpalehuis. Masque anquinpiyaj tahuel miyac tetalnamic-tiani. Pero xiquinnotzaca nopa masehualme cati quintachilíaj sitalime para amechmaquixtise ten taya monechcahuía para amechajsis. Pero masque quinixcopinaj nopa sitalime ipan ilhuicacti huan sesen metzti amechilhuíaj taya panos, amo teno huelis amechpalehuise. ¹⁴ Inijuanti amo teno ininpati pampa itztoque quej nopa tasoli cati nimantzi tata ipan tit. Inijuanti yon amo huelise quimanahuise ininemilis ipan nopa tit cati hualas. Huajca yon quentzi amo huelis amechpalehuise, pampa nopa tit cati hualas amo elis se piltitzi campá hueli anmosehuise para anmototonise. ¹⁵ Quej nopa ininpantis nopa tenahualhuiani cati inihuaya antajtacolchijtoque hasta huejcajquiya. Sesen ten inijuanti xipolihuis huan amo aquí huelis amech-maquixtis.

48

TOTECO quinajhuac israelitame

¹ “Techtacaquilica, annomasehualhua. Amojuanti anisraelitame cati iteipa ixhuihua Israel*. Anquihuicaj itoca Israel huan anhualahuij ten amohuejcapan tata Judá. Antatestigojquetzaj ica notoca niamoTECO quej elisquía antechtepanitaj, pero amo cana. Anquijtohuaj para anmotatajtíaj ica na cati niiDios Jacob, pero amo anquichihuaj cati melahuac, yon cati xitahuac. ² Anmohueyimatiy huan anquijtohuaj anitztoque ipan nopa altepet cati tatzejzelolitic. Anmotepanitaj miyac huan anquijtohuaj para anmotemachíaj ipan na, niamoTECO, na cati niamoDIOS anisraelitame, na cati notoca DIOS Cati Niquinyacana Noilhuicac Ejcahua Ma Tatanitij. Pero

* 48:1 48:1 O Jacob.

amo cana anmotemachíaj ipan na. ³ Hasta huejcajquiya talojtzitzi nimechy-
 olmelahuayaya nochi cati panos teipa. Huan teipa nimantzi nijchijqui
 ma pano. ⁴ Na ipa nijmatiyaya para amojuanti tahuel anyoltetique huan
 antzontochontique. Nopa amoquechcuayo amo hueli mocuelpachohua
 pampa tetic quej teposti. Huan amotzonteco nelletic quej nopa teposti
 bronce. ⁵ Yeca na nimechyolmelajqui huejcajquiya ten nochi tamanti cati
 teipa nijchihuasquía para amo anquijitose para amoteteyo quichijqui ma
 pano nopa tamanti, o amoteles taixcopincayohua tanahuatijque ma eli.
⁶ Amojuanti anquicajque nochi cati nitayolmelajqui para panosquía, huan
 teipa anquitztoque para melahuac panotoc senquisá quej niqijito; pero
 amojuanti amo anquinequij anquinellocase sinta melahuac na nijchijtoc.
 Pero ama nimechilhuis sequij tamanti cati yancuic cati panose cati amo
 quema nimechilhujtoc. Nimechilhuis tamanti cati eltoya ixtacatzí hasta
 ama huan cati amo quema anquicactoque. ⁷ San ama niquinchihua ma
 pano. Huan quej nopa amo huelis anquijitose para ya anquimatiyayaj para
 panosquía.

⁸ “Quena, nimechilhuis tamanti cati senquisá yancuic pampa cuali nijmati
 para amojuanti tahuel antacajcayahuaj huan anmosisínaj hasta quema
 antacatque. ⁹ Pero pampa nochi ya quimatij na nihueyi, nijquetzas nohueyi
 cualancayo huan amo nimechtzontamiltis para masehualme ma techtepan-
 itaca. ¹⁰ Quitapajpacchihuaq plata ipan se horno para quiquixtilise itasolo.
 Huan na nimechtapajpacchijqui ipan miyac tajyohuillisti, pero eltoc quej
 amo oncac tepos plata cati mocajqui ipan nopa chachapali, pampa amo teno
 cati cuali nijpantijtoc ipan amojuanti. ¹¹ Pero pampa nimotepanita, nimech-
 manahuis huan amo nimechtzontamiltis. Amo aquí nijnequi ma moillhui
 para nopa dioses ipan sequinoc tali techtanteque. Amo cati nijcahuilis ma
 techquixtili nohueyitilis.

Toteco quicnelía Ciro

¹² “Techtacaquilica annoisraelita masehualhua cati nimechtapejpenijtoc.
 San na niDios. Na niipeya huan na niitamiya nochi tamanti. ¹³ Ica
 nomax nijtali itzinpehualtil ni taltipacti huan ica nomanejmat nijpatajqui
 ne ilhuicacti. Quema nicamanaltic, taltipacti huan ilhuicacti monextijque.

¹⁴ “Xihualaca huan xijtacaquilijqui nochi amojuanti. Ten nochi amotetey-
 ohua, ¿catijqui amechyolmelajqui para panosquía nochi cati nimechilhujtoc
 para huala? ¿Catijqui teteyot amechilhui para niamoTECO niquicnelisquía
 Ciro, huan nijtequihuisquía para quitamiltis nopa tanahuatillisti ipan tali
 Babilonia, huan yaya quintzontamiltis nochi nopa soldados caldeos? Yon
 se ten amoteteyohua amo amechilhui ya nopa. ¹⁵ San na niqijito. Huan na
 nijnotzot Ciro huan nijhualicatoc para quichihuas cati na nijnequi. Huan
 nijchihuas ma tatani campa hueli campa yaya yas.

¹⁶ “Ximonechcahuica achi más huan techtacaquilica. Na amo quema
 nicamanaltic ixtacatzí. Nochipa nimechyolmelajtoc xitahuac cati panos
 para xijmachilica cuali.”

Ama TOTECO Cati Más Quipiya Tanahuatili huan Itonaltzi techhualti-
 tanteque ica ni camanali para ma nimechilhuiqui: ¹⁷ “Quej ni niqijito-
 hua na, niDIOS, niamotamanahuijca, na cati niTatzetzeloltic huan niitzotc
 amohuaya anisraelitime: Na niDIOS niamoTECO cati nimechmachtía para
 anquimatise cati cuali para anquichihuase. Huan nimechyacanas ipan nopa
 ojti cati quinamiqui anquitoquilise.

¹⁸ “Nelía cuali eltosquía sinta anquichijtosquíaj cati quijitohua notanahu-
 atilhua, pampa quej nopa anquipiyasquíaj tasehuillisti para nochipa quej

se yejyetzti hueyat cati amo quema huaqui. Huan nojquiya nochipa anquichijihualasquíaj tamanti cati xitahuac huan nopa tamanti cati cuali anquichihuasquíaj amo tamisquía. ¹⁹ Huan amojuanti anisraelitame anel-tosquíaj tahuel anmiyaqui quej imiyaca nopa xali cati onca iteno hueyi at, huan amo aqúi huelisquía amechpohuasquía. Huan amo monectosquía niquintzontamiltijtosquía miyac ten amojuanti.”

²⁰ Pero ama, xiquisaca anisraelitame ipan tali Babilonia. Xicholoca ten nopa caldeo masehualme. Xihuicatihualaca ipan ojti ica paquilisti. Xitayolmelahua hasta huelis amechcaquise campa ontami ni taltipacti. Xitzajtzica quej ni: “TOTECO techmanahuijtoc tiisraelita masehualhua.”

²¹ Quema TOTECO quinyacanqui imasehualhua ipan nopa huactoc tali, amo quipanoque amiquisti pampa yaya quichijqui ma quisa at ipan nopa hueyi tet para ma atica.

²² Pero TOTECO quijtohua: “Masehualme cati quichihuaj cati amo cuali amo quema quipiyase tasehuilisti.”

49

Itequipanojca TOTECO elis quej se taahuili

¹ ¡Tectacaquilica nochi anmasehualme cati anitztoque ipan talme cati mopantíaj huejca! TOTECO technotzqui hasta quema ayemo nitacatiyaya. Technotzqui ica notoca hasta quema noja niitztoya ijtico nonana. ² Nochi nocamanal TOTECO quichijtoc ma eli quej se macheta cati tahuel tatequi. Yaya techtatijtoc ipan imax huan techajotoc para quitequihuis quema monequi. Niitztoc quej se cuataminti cati pitzactzi iyecapa huan hueli tetzontamiltía. ³ Huan techilhui: “Ta tiIsrael*, tinotequipanojca. Por ta masehualme techhueyitalise.”

⁴ Pero na niquilhui: “Niquita para san topic nopa tequit cati nijchijtoc. San topic nimosiyahuilijtoc, pero nochi notequi nijtalia momaco ta tinoTECO, ta cati titoDios. Nijchiya para ta techtaxtahuí quej tiquita cuali.”

⁵ Huajca ama camanalti TOTECO cati techchijchijqui para ma nieli nitequipanojca hasta quema noja niitztoya ijtico nonana. Yaya cati techtequimacac para niquincuepas nochi iisraelita masehualhua ten campa itztoque huan para ma niquinhualica campa ya. Techmacac chichahualisti para nijchihuas ni tequit huan techhueyitepanitztoc pampa nijchijtoc cati yaya quinequi. ⁶ Yaya techilhui: “Amo san techtequipanos para tiquincuepas campa na nopa quentzi cati mocahuaj ten noisraelita masehualhua huan tiquinhueyichihuas, nojquiya nijchihuas xieli quej se taahuili para tiquintaahuilis nochi masehualme ipan taltipacti cati amo israelitame para injuanti nojquiya hualase campa na para momaquixtise.”

⁷ Camanalti TOTECO cati quincojqui israelitame para quintojtomas ten tetequipanolisti. Yaya DIOS cati Tatzejtzeloltic huan cati íftzoc inihuaya israelitame quej ni quinilhuía cati quihuejcamajcahuaj huan quicualancaitaj nochi talme: “Quema mitzitase nopa tanahuatiani huan nopa huejhueyi tayacanani, injuanti motancuaquetzase moixpa huan mitzhueyitepanitase pampa na, nimoTECO, cati niTatzejtzeloltic huan niitztoc inihuaya israelitame, nimitztapejpenijtoc huan na nitemachtí.”

TOTECO sempa quicualtis Jerusalén

⁸ Quej ni TOTECO quinilhuía imasehualhua: “Quema ajsis nopa tonali cati cuali, na nimechtacuilis. Huan ipan nopa tonali, nimechpalehuis.

* 49:3 49:3 Nica TOTECO quitocaxtia nopa temaquixtijquet cati hualas teipa, Israel.

Huajca nimechmaquixtis ten nochi tamanti cati amo cuali cati quinequis amechajsis huan nimechmocuitahuis. Huan por amojuanti anisraelitame nijchihuas se camanal sencahuila ica nochi masehualme. Temachti nijcualtali tali Israel sempa huan sempa nimechmactilis annoisraelita masehualhua. ⁹Huan niquinilhuis nochi cati tzactoque ipan tzintayohuilot: ‘Xiquisaca huan xihualaca nica campa onca taahuili pampa na nimechtojtomas ten campa anilpitoque para anelise anmajcajtoque!’ Huan injuanti elise quej noborregojuhua cati tacuase ipan nopa potrerros campa onca sacat cati xoxo-huic huan ipan yejyetzitzi tachiquilme. ¹⁰Amo quema quipanose mayanti, yon amiquisti. Huan amo quema quintatis tonati, yon quinjaisis nopa tatonilot ten nopa totonic ajacat cati huala ica campa hualquisa tonati. Pampa TOTECO cati tahuel quintasojta quinyacanas hasta campa onca miyac at. ¹¹Huan niqinchihuilis se ojti cati tamayantic ipan nopa tepeme para ipan nejnemise. Huan nijtejcoltis campa tatzinta ipan nopa tamayamit para nopa ojti elis sepantic. ¹²¡Xiquitaca! Hualase nomasehualhua cati itztoque huejca ipan sequinoc talme. Tacuepilise cati itztoque ica norte, ica campa oncalaqui tonati huan cati itztoque ica Sur ipan nopa tali Sinim.”

¹³¡Nochi ipan ilhuicacti ma huicaca ica paquilisti! ¡Nochi ipan taltipacti xipaquica miyac! Elis quej nochi tepeme huicase ica paquilisti pampa TOTECO quinyolchicajtoc imasehualhua huan quintasojtac cati tahuel taijohuiyayaj.

¹⁴Pero masehualme ten altepet Jerusalén ama quiijtohuaj: “TOTECO techtahuelcajtoc huan techelcajtoc.”

¹⁵“¿Huelis se tenantzi hueli quitahuelcahuas ipilcone? ¿Amo quitasojta cati quitacatilti? Masque se tenantzi huelisquía quielcahuasquía icone, na amo quema niqielcahuas altepet Jerusalén, yon amojuanti cati anehuani nopona. ¹⁶Xiquitaca, na niqijcuiltojtoc amotoca ipan nomax. Huan noixpa niquita talojtzitzi itepa Jerusalén cati huelontoc. ¹⁷Pero amo huejcahuas para hualase amoisraelita icnihua ten huejca para quicualtalise nopa tepamit huan quinquixtise nochi cati quinpactía tasesolohuaj. ¹⁸Xijtanana amoxayac, anisraelitame, huan xitachiyaca para mosej-cotilaj amomasehualhua huan hualahuij ininchaj. NiamoTECO nitatestigojquetztoc para nochi amojuanti san sejco anelise se tamanti masehualme cati yejyetzitzi. Anelise quej nopa piltetzitzi cati más pajpatiyo cati ica moyectalía se ichpocat cati monamictía.

¹⁹“Pampa nochi motal cati eltoya tasesololi quej se huactoc tali temis ica masehualme hasta hualahuij ten campa hueli. Huan nochi mocualancaitacahua cati mitztaijyohuiltijque itztose huejca. ²⁰Huan nochi nopa masehualme cati tacatque ipan nopa sequinoc talme, hualase huan quiijtose: ‘Ni tali tahuel pisiltzi para tojuanti huan tahuel timotetzopaj. Monequi tijpiyase más tali para techcuis.’ ²¹Huan huajca amojuanti annoilhuise: ‘¿Ajquiya techmacatoc nochi ni noconehua? Quinmictijque noconehua huan nopa se ome cati mocajque quinhucaque ipan sequinoc talme. Huan nechcajtéjque noseltitzi. Huajca ¿ajquiya quintacatilti nochi ni coneme para na? Huan ¿ajquiya quinmocuitahui para ma moscaltica?’ ”

²²Quej ni quiijtohua TOTECO Cati Más Quipiya Tanahuatili: “Xiquita, na niqinmacas se tanextili nopa masehualme cati amo israelitame huan inixpa nijtananas se bandera. Huan amechhualiquilise amooquichpilhua huan amosihuapilhua ipan inimax huan ipan iniajcol. ²³Huan amechtequipanose tanahuatiani huan sihua tanahuatiani. Injuanti quinmocuitahuisse amoconehua huan quinpalehuise ipan nochi tamanti. Huan amoixpa mohuijtzomase hasta quiajsise tali ica inixayac, huan quipipitose

nopa taltepocti cati eltos ipan amoicxi. Huan huajca anquimatise para melahuac na niamoTECO. Huan nochi cati motemachíaj ipan na, amo quema mopinahualtise.”

²⁴ Amo aqui huelis quicuillis se tatehуйquet cati yaya moaxcatijtoc ipan tatehuilisti. Yon amo aqui huelis quichihualtis se hueyi tanahuatijquet ma quincagua ma yaca majcajtoque cati quinzquitoc ipan tatehuilisti. ²⁵ Pero niamoTECO niquijtohua: “Ya nopa cati panos. Quicuillise nopa tatehуйquet cati moaxcatijtoc huan quincagahuase cati quinzquitoque nopa tanahuatiani cati más quipiyaj chichahualisti huan temajmatiyayaj. Pampa na niquintehuis cati amechtehuíaj huan niqunmanahuis nochi amoconehua. ²⁶ Huan nijchihuas para nochi mocualancaitacahua ma quicuaca ininacayo huan ma moihuintica ica inieso quej elisquía tailisti. Huan quej nopa nochi masehualme ipan taltipacti quimatise para na niamoTECO, na nitemauixtijca, na cati nimechcojqui para nimechtojtomas huan anelise amajcajtoque. NiamoTeco Anisraelitame Na Cati Más Nijpiya Chichahualisti.”

50

Itequipanojca Toteco moicnonequis

¹ TOTECO quej ni quintatzintoquílía imasehualhua: “¿Anmoilhuíaj para na nimoamaxolejqui ica amonana san pampa amo nijnequi huan yeca nijquixti ipan nohaj? ¿Anmoilhuíaj para niquintemactilis annoconehua inimaco cati niqintahuiquiliyaya huan yeca monejqui anyase antequipanotij? ¡Amo! ¡Amo quej nopa! Amojuanti anyajque antequipanotoj por amotajtacolhua. Huan amonana quihuicaque quej se taxtahuili por nochi cati fiero anquichijtoyaj. ² Amojuanti amoicancuetque ica na huan yeca amo aqui tananquili quema niyajqui campa amojuanti. ¿Anmoilhуйque amo nijpixqui chichahualisti para nimechmanahuis? ¡Amo quej nopa! Na nihueli nicajhuas nopa hueyi at huan huaquis. Hueli niquninchihuas nochi hueyame ma mocuepaca se huactoc tali. Huan nochi michime miquise huan lochonise pampa ayecmo oncas at. ³ Na cati niqixtzacua ilhuicacti ica tzintayohuilot para mocahuas yayahuic quej elisquía ipan tequipacholi.”

Itequipanojca TOTECO taneltoaca

⁴ TOTECO Cati Más Quipiya Tanahuatili techchijtoc nitalnamijquet para nijmachilis taya camanali niqunilhuis nochi cati siyajtoque. Mojmosta ica ijnaloc techixitía huan quitapohua notacaquilis para ma nijmatís taya quinequi ma nijchihua. ⁵ TOTECO Cati Más Quipiya Tanahuatili quitapojtoc notacaquilis huan na nijtacaquilía cati techilhúa. Amo nimosisinía ica ya, yon amo nimohuejcatalía. ⁶ Na nitemactilis nocuitapa para ma techmaquilica. Huan nitemactilis noxayac para ma quihuhuitaca notentzo. Huan amo nijtatis noxayac quema techtajilhuisse huan techixchajchase.

⁷ TOTECO Cati Más Quipiya Tanahuatili techpalehuis huan yeca amo nipinahuis ica cati techchihuilise. Noxayac nijtalijtoc para san nijchihuas cati yaya quinequi. Huan nijmati amo aqui techpinahualtis. ⁸ Pampa itztoc nonechca cati techmanahuis. ¿Canque itztoque nocualancaitacahua? Ma monechcahuica huan timonextise san sejco iixpa nopa juez. ¿Ajquiya moilhuía quipiya tanahuatili para techatelhuis iixpa ya? ⁹ TOTECO Cati Más Quipiya Tanahuatili techpalehuis. Huajca ¿ajquiya huelis techatelhuis o quijijos para nijhuica tajtocoli? ¡Amo aqui huelis! Nochi nocualancaitacahua ixpolihuisse quej se yoyomit cati sosoltic huan cualotoc.

¹⁰ Amojuanti cati anquitepanitaj huan anquimacasiy TOTECO huan anquinetocaj itequipanojca, sinta ama annejnemij ipan taohuijgayot huan tzintayohuilot huan amo quipiyaj yon se quentzi taahuili, ximotemachica ipan TOTECO moDios huan ximotalica imaco. ¹¹ Pero ximomocuitahuica miyac nochi amojuanti cati anquinequij anquinsolosose sequinoc ica tit cati anquilemenaltíaj amoselti. Anquicualtaliáj cuataminti para ica anquinmaquilise sequinoc, pero anhuetzise ipan nopa tit cati anquipehualtijtoque. Ya ni nopa taxtahuili cati anquiselise ten na. Anmopantise ipan se hueyi taijyohuulisti hasta anmiquise huan amechtalphose.

51

TOTECO quinyolchicahua nopa israelitame

¹ TOTECO quijtohua: “Tectacaquilica nochi amojuanti cati anquinequij anquichihuase cati xitahuac huan anmotemachiyaj ipan na, niamoTECO, para ma nimechmanahui. Xijtachelica campa anhualajque. Xiquitaca para hueyi ipati cati nimechchiuili quema nimechquixti. ² Ximoilhueca ten amohuejcapan tata Abraham huan isihua Sara cati eliyayaj amohuejcapan tatahua. Abraham amo quipixtoya yon se icone quema na nijnotzqui, pero quema na nijtiochijqui, yaya quinpixqui miyac iconehua hasta mochijque tahuel miyac masehualme cati quitemitijque nopa tali. ³ Huan TOTECO sempa quitiuchihas tali Israel. Huan ipan nopa talme cati sosoltique, oncas xihuime. Nopa huactoc talme elise nelyejyectzitzitzi quej ixochímil TOTECO cati itoca eliyaya Edén. Huan nozona senquisa oncas huetzquisti huan paquilisti. Nojquiya oncas tascamatli para TOTECO huan huicat cati yejyectzitzitzi.

⁴ ¡Tectacaquilica annoisraelita masehualhua! Xijtacaquilica cati niqijtohua pampa niquinmacas notanahuatilhua masehualme ipan nochi talme huan niquinmachtis ma quichihuaca cati xitahuac. Huan elis quej se taahuili cati quintaahuilis. ⁵ Ayecmo más huejcahuas para nimechchiuulis cati xitahuac. Monechcahuía nopa tonali quema nimechmaquixtis. Huan na niqinnahuatis nochi talme. Inijuanti techchixtoque pampa tahuel quinequij ma nijnexti nochichualis.

⁶ “Xitachiyaca huejcapa campa ilhuicacti huan xitachiyaca tatzinta campa taltipacti. Pampa ne ilhuicacti xpolihuis quej pocti, huan ni taltipacti sosolihuis quej se yoyomit cati tahuel moquentijtoque. Nochi masehualme cati itztoque ipan ni taltipacti miquise quej sayolime. Pero na nitemaquixtis para nochipa huan quema nitanahuatis, notanahuatilis elis xitahuac huan amo quema tamis.

⁷ “Tectacaquilica nochi amojuanti cati anquixmatij cati xitahuac huan cati ipan amoyolo anquicnelíaj notanahuatilhua: ‘Amo ximajmahuica masque masehualme amechpinajtíaj huan amechhuetzquillíaj. ⁸ Pampa nopa masehualme tamise quej se yoyomit cati quicuajtoque mejtolime, huan quincuase ocuillime quej quicuaj ijhuyiyo se borrego. Pero na nimechchiuulis cati xitahuac para nochi tonali huan nimechmaquixtis para nochipa.’ ”

⁹ ¡Xiisa TOTECO! ¡Ximoquetza huan ximocualtali ica mochichualis! Ximotanana quej huejcajquiya quema tijsosolo tali Egipto huan tijmicti nopa hueyi tapiyali cati itztoya nozona ipan nopa hueyat Nilo. ¹⁰ Ta ica mohueyi chichualis tijchijqui ma huaqui nopa hueyi at, huan tatajoc tijtapa se ojti para panoque momasehualhua cati tiquinmanahuiyaya ten tali Egipto. ¹¹ Ajsis tonali quema nochi nopa masehualme cati ta, tiTOTECO tiquincojtoc para moaxcahua sempa tacuepilise ipan inintal. Huan huicatihualase

quema calaquise ipan altepet Jerusalén. Quena, huetzcatihualase huan pactihualase ica se paquillisti cati amo tamis. Huan ayecmo oncas taohuij-cayot, yon tequipacholi.

¹² TOTECO quiihtohua: “Na cati nimechylchicahua huan nimech-maca paquillisti. Huajca ¿para ten anquinimacasiy nopa masehualme cati san panoni huan miqúij quej sacat huan teipa ayecmo aquiyme?

¹³ Antechelcajtoque niamoTECO cati nimechchijchijqui. Na cati niquintali nopa sitalime nepa ilhuicac huan nijchijchijqui ni taltipacti. ¿Para ten anquinimacastose nopa masehualme cati amechtaijyohuiltíaj? ¿Mojmosta anquinimacastose inincualancayo nopa tacame cati quinequij amechtazon-tamiltise? ¹⁴ Ayecmo huejcahuas huan nochi cati ama ilpitoque mocahuase majcajtoque ten campa tetequipanohuaj san tapic. Amo anmiquise ipan tatzacti, yon ayecmo quema anquipantise mayanti.

¹⁵ “Pampa na niamoTECO huan niamoDios. Na cati nijtacahualti nopa at cati mosisinía para ma amo mojmolini. Na notoca nopa DIOS Cati Quinyacana ilhuicac Ejcahua Ma Tatanitij. ¹⁶ Na nijtalijtoc nocamanal ipan amocamac huan nimechtzactoc ica nomax. Na niquintali ne sitalime ipan inilugar huan nijcualtali ni taltipacti. Huan na cati nimechilhúa anisraelitime: ‘Amojuanti annomasehualhua.’”

¹⁷ ¡Xiisaca, xiisaca, anmasehualme ten altepet Jerusalén! Anquiiyohuij-toque icualancayo TOTECO. Pero ama ayecmo más onca. Eltoc quej quema se acajya quii se taili huan quitamía hasta itetejtzo. ¹⁸ Huan masque anquintacatiltijtoque miyaqui amoconehua, yon se ten injuanti amo mocajqui yoltoc para amechpalehuis o para amechilhuis taya monequi anquichihuase. ¹⁹ Amechajsc ni ome tamanti: “Tatehuilisti quisosoljtoc amotal huan por nopa tatehuilisti nechca nochi amomasehualhua mictoque ica mayanti.” Huan amo aqui noja mocajtoc para amechtasojtas. ¿Ajquiya amechylchicahuas? ²⁰ Ipan nochi calles amoconehua tapolojtoque huan tepejtoque. Itztoque quej se masat cati masitoc ipan se matat. Anquimachilijtoque ihueyi cualancayo amoTECO DIOS. ²¹ Pero ama techtacaquilica nochi amojuanti cati antaijyohuijtoque huan anixyacanejnentinemij quej se ihuintiquet masque amo antaitoque. ²² Quej ni niquijtohua niamoTECO huan niamoDios cati niamotamanahuijca: “Xiquitaca, na nimechquixtilis anmotaijyohuilis huan ayecmo más amechajsis nohueyi cualancayo pampa ayecmo nicualanis amohuaya. ²³ Huan ama nohueyi cualancayo quinajsis injuanti cati amechtaijyohuiltiyayaj huan cati amechilhuiyayaj: ‘Ximotecaca talchi para ma tipanoca amopani.’ Huan amojuanti anquitalijque amocuitapa quej elisquía tali o quej elisquía ojtí para amopani ma moquejquetzaca.”

52

Totecu quimanahuis altepet Jerusalén

¹ ¡Xiisaca, xiisaca, analtepet Jerusalén ehuaní! ¡Xiquitaca! TOTECO quimacas amoaltepe miyac chicaluallisti. TOTECO quichihuas Jerusalén*, nopa altepet cati tatzejtzelolitic para ma eli se altepet cati nelpano yejyectzi. Huan ayecmo quema calaquise nozona masehualme cati fiero ininemilis huan cati amo quitepanitaj TOTECO. ² ¡Ximoquetzaca anJerusalén ehuaní cati anitztoyaj ipan tequipacholi! Ximotzejtzeloca para ma tepehui nopa taltepocti cati eltoc ipan amotzonteco. Amojuanti cati amechhuicatoyaj ipan seyoc tali para antetequipanose san tapic, ximotojtomilica nopa lazo cati ica amechilpitoque ipan amoquechta. ³ TOTECO quiihtohua: “Quema nimechtemactili

* 52:1 52:1 O Sion.

para ma amechhuicaca ipan seyoc tali, na amo nijseli yon se tomi quej notaxtahuil. Huajca ama nojquiya nimechcuiti campa anitztoque huan amo niquinmacas yon se tomi, huajca amo teno monequi antechcuepilica na.”

⁴ Pampa TOTECO Cati Más Quipiya Tanahuatili quiijtouha: “Huejcajquiya nomasehualhua yajque ipan tali Egipto para itztotij nozona miyac xihuit quej seyoc tali ehuaní. Huan ama eltoc nopa Asiria ehuaní cati quintaijy-ohuiltijque masque amo teno quichijtoque.”

⁵ “Huan ama, ¿taya panotoc? ¿Para ten nomasehualhua sempa quihuicatoque para tetequipanotij huan quintaijyohuiltitij chichahuac masque amo teno quichijtoque? Nopa tanahuatiani cati quinnahuatíaj tzajtzij íca paquilisti huan mojmosta techtaijilhuíaj. ⁶ Huajca ajsis se tonali quema nomasehualhua techixmatise pampa nimonextis inihuaya. Inijuanti quuitase nochicahualis huan quimachilise para eli na cati niquincomanalhuía.”

⁷ Nelía yejyectzitzí iniixcixhua cati motalojtihualahuij ipan tepeme para teyolmelahuaquij nopa cuali camanali para ya onca fasehuilisti huan para TOTECO ya temaquixtijtoc. Quinyolmelahuaquij Jerusalén † ehuaní: “AmoTeco Dios itztoc Tanahuatijquet.” ⁸ Nochi nopa tamocuitahuiani ipan huejcapantique calme tzajtzise huan huicase íca paquilisti pampa íca iniixteyol quuitaj para TOTECO mocuepa huan quinhualicatihuala imasehualhua ipan altepet Jerusalén. ⁹ Nochi ma huicaca íca paquilisti ipan Jerusalén masque sosolijtoc amoaltepe pampa Toteco Dios quintasojtatoc imasehualhua huan quimanahuijtoc inialtepe. ¹⁰ TOTECO quinnextilis ichicahualis iniixpa nochi talme. Huan quinmaquixtis imasehualhua huan nochi masehualme cati itztoque hasta itamiya taltipacti quuitase.

¹¹ Huajca xiquisaca ten tali Babilonia huan xijcahuaca nochi cati amo cuali nozona. Ximohuejcatalica ten nopa tali huan amo xiquitzquica tamanti cati amo tapajpacti nozona. Huan ximotapajpacchihuaca nochi amojuanti cati anquihualicaj nopa tamantzitzí tatzetzeloltic cati íaxca TOTECO para amotal huan xiquisaca ten nozona. ¹² Pero quema anquisase, amo monequi anmotalojtihualse quej se cati cholohua para quimanahuis inemilis, pampa TOTECO cati toDIOS tiisraelitame amechyacantihualas huan amechmocuitahuijtihualse.

Itequipanojca Toteco taijyohuis

¹³ Xiquita, notequipanojca nemis íca miyac talnamiquilisti huan tahuel quihueyitalise. ¹⁴ Pero miyac san quitetzaitase quema quuitase pampa íxayac nesis fiero campa quimaquilijtoque hasta ayecmo quixmatise sinta eliyaya íxayac se masehuali. Huan itacayo eltos espoltic pampa tahuel quihuitequise. ¹⁵ Huan yaya quinmajmatis masehualme ten miyac talme. Huan tanahuatiani san quitachilise huan íxpa amo molinise. Quuitase huan quimachilise tamanti cati amo quema quicactoque.

53

¹ Pero ¿quesqui masehualme quineltoque ni camanali cati ama titayolmelahua? ¿Ajquiya TOTECO quinnextilis ichicahualis para temaquixtis?

² TOTECO quichijqui para itequipanojca ma moscaltí íxpa quej ichamacyo se cuanelhuat cati panquisa campa huactoc tali. Pero yaya amo nesis yejyectzi, yon amo nesis itachiyalis sinta se hueyi tacat. Ipan ya amo oncas yon se tamanti cati techchihuas ma tiquixtocaca. ³ Masehualme quihuejcamajcahuase huan quuitase para amo teno ipati. Yaya quipanos miyac tacuajcualoli huan tahuel taijyohuis. Huan quema panos toixpa,

tiquijcuenise toxayac pampa amo tijnequise tijtachilise. Nochi masehualme quiiyjase huan amo timocuesose por cati taijyohuía.

⁴ Pero yaya quihuicac ipani nochi tocolis * huan quiiyjohui nochi nopa tacuajcualoli cati quinamiquiyaya tiquijyohuijtosquiaj tojuanti. Pero tojuanti timoilhuyayaj para Toteco Dios quitatzacuiltiyaya por ya itajtacolhua. ⁵ ¡Pero amo! Yaya quicocojque por tojuanti totajtacolhua. Quitaijyohuiltijque por totaixpanolhua. Quitatzacuiltijque ya para tojuanti huelis tijpiyase tasehuilisti ica TOTECO. Huan pampa quicocojque ya, tojuanti timochicajque. ⁶ Nochi tojuanti timocuapolojtoque quej borregojme. Sesen ten tojuanti timoiyocaquixitijtoque ten Toteco huan tijtoquilíaj nopa ojti cati tijnequij, pero TOTECO quimamalti ya nochi totajtacolhua.

⁷ Yaya quitatzacuiltijque huan quitaijyohuiltijque, pero amo quinilhui yon se camanali. Quihuicaque quej quihuicaj se pilborregojtzi para quimictitij. Huan quej se borrego amo tzajtzi iniixpa nopa masehualme cati quiximaj, yaya amo teno quiiyto para momanahuis iniixpa cati quitaijyohuiltiyayaj. ⁸ Huan teipa quema ya quiquixitijtoyaj ipan tatzacti huan ten campa quitajolsencahuayayaj, quihuicaque para quimictitij. Pero yon se ten nopa masehualme nozona, amo quimachilijque para yaya miquiyaya por injuanti inintajtacolhua, huan quiiyjohuiyaya nopa tatzacuiliti cati injuanti quinamiquiyaya quiselise. ⁹ Yaya amo quema quichijqui yon se tamanti cati amo cuali, yon amo quema istacatqui. Quitalpachojque quej se taixpanoquet, pero quitailijque ipan ipanteón se tacat cati tapijpiya.

¹⁰ Pero elqui ipaquilis TOTECO para quitatzacuiltis huan quitaijyohuiltis. Huan quema quitemactilis itacayo quej se tacajcualisti por nochi totajtacolhua, quintas miyac iconehua. Huan yaya itzto para nochipa huan por ya, TOTECO paquis, pampa quisas senquisa cuali nochi cati TOTECO quisencajtoc para panos. ¹¹ Huan teipa quema ya taijyohuijtos miyac ipan ialma, yaya quiitas para nelía quistoc cuali nochi cati quichijtoc huan paquis tahuel miyac. Huan por nopa taijyohuiltis cati quipanoc notequipanojca cati xitahuac, yaya quichihuas para miyac masehualme ma elica xitahuacque iixpa TOTECO pampa yaya quihuicas nochi inintajtacolhua. ¹² Yeca na nijmacas tatepanitacayot quej quinamiqui se cati quiipya hueyi tequiticayot huan cati quiipya miyac chichualisti. Yaya motemacac hasta mijqui pero nochi quiitayayaj quej elisquia se tajtacolchijquet. Pero yaya quihuicac ipani inintajtacolhua miyac tajtacolchijca masehualme huan motatajti ica TOTECO para ma quintapojpolhui.

54

Toteco quinicnelía israelitame

¹ Jerusalén eltoya iselti quej se sihuat cati amo huelqui conepiya huan xihuehue quicajtejqui. Pero ama ayecmo. Huajca xihuicaca chichahuac huan xipaquica miyac anJerusalén ehuaní. Pampa masque achtohuiya Jerusalén eliyaya quej se sihuat cati amo quema cuajcualojtoc para quitacatiltis se icone, “Ama quinpiyas más miyac iconehua, que nopa sequinoc sihuame.” Quej nopa quiiytohua TOTECO. ² Huajca xijhueyili mochaj campa anitztoque anJerusalén ehuaní huan xijchijchihuaca sequinoc cuartos. Xijchihuaca más huehueyac nopa lazos cati ica anquiilpiáj nopa yoyoncali. Xijquetzaca cuali nopa estacas ten amoyoyoncalhua para mocahuas tetziltic nopa lazo. ³ Nimantzi anmohueyilise ica amonejmat huan ica amoaraves. Huan

* 53:4 53:4 O nopa taijyohuiltis cati elisquia para tojuanti.

amoconeuhua quitemitise altepeme hasta yase ipan inintalhua cati amo israelitame huan moaxcatise nopa altepeme tasosololme huan nopa talme.

⁴ Amo ximajmahuica pampa ayecmo anitztose ipan pinahualisti. Huan ayecmo anquielnamiquise nopa pinahualisti cati anquipanoque huejcajquiya quema san anonpejtoyaj quej se altepet ten masehualme, huan nopa taijyohuulisti cati anquipanoque quema anitztoyaj amoseltitzitzi quej se cahualtzi. Nochi ya nopa anquiela huase. ⁵ Pampa TOTECO cati amechchijchiqui, anisraelitame, yaya elis quej amohuehue huan amechmocuitahuis. Yaya itoca TOTECO Cati Quinyacana Ilhuicac Ejchua Ma Tatanitij. Yaya amotemaquixtija cati amechcojqui para anelise iaxchua. Yaya nopa Dios cati Tatzejzelolitic cati itztoc amohuaya anisraelitame. Yaya Dios cati quinahuatia nochi taltipacti. ⁶ Masque aneliyayaj quej se ichpocat cati ihuehue quitahuelcajtoc, huan anitztoyaj amoseltitzi, ama TOTECO amechnotztoc para xijcajtehuaca amotaijyohuilis. ⁷ Quena, yaya quijtohua: “Na nimechtahuelcajqui para se talojtzi, pero ica miyac taicnelijcayot sempa nimechculti. ⁸ Para se talojtzi na nicualanqui amohuaya huan nijtati noxayac para ayecmo nimechitas, pero ama nimechtasojtas huan nimechicnelis para nochipa.” Quej nopa quijtohua TOTECO cati amechcojtoc para aniaxchua. ⁹ “Quej ipan nopa tonali quema itztoya Noé, nitatestigojquetzqui huan niqijto para ayecmo quema sempa nijtitanis miyac at cati quiazonpolihuiltis nochi taltipacti huan quintzontamiltis nochi masehualme, quej nopa nojquiya ama nitatestigojquetza para ayecmo quema nimechtatzacuiltis ica nohueyi cualancayo quej nijchijqui ipan nopa tonali quema anitztoyaj ipan seyoc tali. ¹⁰ Masque nopa tepeme mijcuenise huan nopa tachiquilme ixpolihuisse, amo quema mijcuenis notaicnelil cati nijpiya ica amojuanti. Huan nojquiya amo quema tamis nopa camanal sencahuali cati nijchijtoc amohuaya para nimechmacas tasehuulisti.” Quej nopa quijtohua TOTECO cati amechtasojta.

Nopa yanquic altepet Jerusalén

¹¹ “Teicnelitque anJerusalén ehuan, amojuanti huan amoaltepe anitztoque quej se cuahuit cati quitzohuitectoc miyac ajacat cati chichahuac. Anquipanotoque miyac taijyohuulisti huan amo aquí amechyolchicajtoc. Pero na sempa nijsencahuas Jerusalén huan nijchijchihuilis itzinpehualti huan itepayo nopa altepet ica tet cati tahuel pajpatiyoy huan yejyectziti. ¹² Nochi nopa huejcapantique calme para ipan antachiyase niquinchijchihuas ica nopa rubio teme cati yejyectziti. Huan icaltehua altepet Jerusalén nijchijchihuas ica carbunclo teme huan itepa cati quiyahualtzacuas nopa altepet nijchijchihuas ica teme cati tahuel pajpatiyoy. ¹³ Huan na niamoteco nielis niamotamachtijca huan niquinmáchtis nochi amomasehualhua. Huan nochi amoconeuhua quipiyase miyac tasehuulisti huan itztose ica cuali. ¹⁴ Amechnahuatis se tanahuatijquet cati xitahuac huan cati quichihua nochi cati cuali. Nochi amocualancaitacahua itztose huejca huan senquis anquiyase tasehuulisti. Ayecmo anmajmahuisse pampa amo aquí quinequis amechtemajmatis. ¹⁵ Huan sinta se acajya hualas amechtehuiqui, amo ximoilhua para na nijtitanoc ma amechtatzacuiltiqui. Amo nijtitanoc huan yaya amo tatanis, pero Jerusalén tatanis pampa nozona na niitztos amohuaya.

¹⁶ “Xiquita, na nijchijchijtoc nopa teposchijquet cati quitejtejtzona nopa teposti hasta xahuantoc huan quisa timoyot, huan ica ya nopa quinchijchihua nopa teposme cati ica tatehuaj. Huan nojquiya na niquinchijchijqui nopa soldados cati tetzontamiltaj. ¹⁷ Pero ipan nopa tonali cati hualaj, yon se teposti cati quichijchijtoque masehualme amo huelis amechtazontamiltis.

Huan anquincamatzacuase nochi cati amechtatelhuise ica se istacatili ini-ixpa teguichihuani. Nochi ya ni anquipantise cati annotequipanojcahua niamoTECO.” Quej nopa na niamoTECO niqijtojtoc.

55

Tapojpolhuili para ten hueli masehuali

1 “Nochi amojuanti cati anamiquij ipan amoyolo: Xihualaca campa na xiatiqij, pampa na nijsehuis amoamiquilis. Masque amo anquipiyaj tomi, xihualaca cati anmayanaj ipan amoyolo, xijcohuaquij cuali tacualisti para anquicuase. Xihualaca xijcohuaquij xocomecat iayo o lechi pero amo mon-equi se taxtahuili. 2 ¿Para ten anquitamiltíaj amotomi para anquicohuase tamanti cati amo ya tacualisti huan amo amechmaca chichualisti? ¿Para ten antequitij huan teipa anquitequihuíaj amotaxtahuil ica tamanti cati noja amechcahua anmayantoque? Más cuali techtacaquilica. Na nimechilhuis canque huelis anquipantise nopa tacualisti cati achi cuali ten nochi sequinoc para amoalma huan ayecmo anmayanase.

3 “Xihualaca campa na huan techtacaquilica. Quena, techtacaquilica huan quej nopa temachti anquipiyase nemilisti ipan amoalma. Huan na nijchihuas amohuaya se camanali cati amo quema tamis. Huan nopona nimechtajtolcahuilis para temachti nimechtasojtas huan nimechtiocihuas senquisa quej nijtajtolcahuili Tanahuatijquet David huejcajquiya. 4 Na nijtali ya quej notayolmelajca huan quinmachiltis nochi talme ten na. Huan nijtalis quej se tayacanquet huan quej se tamachtijquet ipan nochi altepeme. 5 Huan ama amojuanti nojquiya anquinnahuatise masehualme cati amo anquinxmatiyayaj. Huan nopa masehualme motalojtihualase campa amojuanti para mosejcotilise amohuaya pampa niamoTECO cati ni-Tatzejtzolotic niitztoc amohuaya anisraelitame, huan nimechmacas miyac tatepanitacayot huan nimechchihuas tahuel anhuejhueyi.

6 “Techtemoca na niamoTECO amantzi quema noja huels antechpantise. Techztajtzilica amantzi quema noja niitztoc amonechca. 7 Nochi tajtacolchijca masehualme ma quicahuaca nopa fiero ojti cati quitoquilíaj huan ipan inintalnamiqulis ma quiquixtica nochi tamanti cati amo cuali cati injuanti moilhuíaj, huan ma tacuepilica ica na niDIOS niamoTECO. Huan na temachti niquintasojtas huan niquintapojpolhuis. 8 Pampa notalnamiqulis amo eltoc san se ica amojuanti amotalnamiqulis. Huan nopa ojti cati na nijtoquilá, amo eltoc san se ica nopa ojti cati anquitoquilíaj.” Quej nopa niqijtohua na niamoTECO. 9 “Pampa quej ilhuicacti eltoc más huejcapa que ni taltipacti, quej nopa nojquiya noojhui huan notalnamiqulis eltoc más huejcapa que amojuanti amoojhui huan amotalnamiqulis.

10 “At huan nopa chipahuac sehuali hualtemo ten ilhuicac huan mocahua ipan ni taltipacti para quixolonis. Quichihua ma ixhua nochi tatocti huan ma temaca iyol para quitochase huan tacualisti para quicuase. 11 Quej nopa nojquiya ica nocamanal cati quisa ipan nocamac, amo mocuepa san tapic, nochipa quiapiya itajca. Quichihuas senquisa nochi cati na nijnequi quichihuas, huan quiapiyas itajca campa hueli na nijtitanis.

12 “Anitztose ica paquillisti huan anquipiyase tasehuilisti. Huan elis quej nochi tepeme huan tachiquilme cati anquipanotiyase, tahuel paquise huan huicase amoi-xpa, huan nochi cuame momatatzinise. 13 Huan campa on-cayaya huitzti, ama oncas cuame ten ciprés. Huan campa moscaltiyayaj sahua mecat, ama ixhuase cuame ten arrayán. Huan nochi ni tamanti

yejyectzitzitzi quichihuase para masehualme ma quihueyitalica TOTECO. Elis se tanextili para nochipa cati tenextilis ichichualis huan iteicnelil TOTECO.”

56

TOTECO quiinselis masehualme ten nochi talme

¹ TOTECO quiijtohua: “Xijchihuaca cati xitahuac huan cati cuali pampa monechcahuia nopa tonali quema nihualas para nimechmaquixtis huan monextis para nijchihua cati xitahuac. ² Masehualme cati quitepanitase nopa tonali para mosiyajquetzase huan amo tequitise para amo quiixpanose nopa tonali quipantise se hueyi paquilisti. Huan paquise cati motacahualtíaj para amo quichihuase yon se tamanti cati amo cuali.

³ “Masehualme cati amo israelitame cati ica ininpaquilis motemactilijtoque ica na, niininTECO, ma amo quema quiijtoca para niquinchicoicnelia israelitame huan amo san se niquintiochihua. Huan nojquiya niquinsejcotilis ica nomasehualhua nopa tacame cati quincaparojtoque. Huajca injuanti ma amo quiijtoca: ‘Tojuanti tiitztoque quej cuame cati huactoque.’ ”

⁴ Pampa TOTECO quiijtohua: “Sinta nopa tacame cati quincaparojtoque amo tequitise ipan nopa tonali para mosiyajquetzase, huan sinta quichihuase nopaquilis, huan quitepanitase cati quiijtohua nopa camanali cati nijchijtoc inihuaya, huajca niquintiochihuas. ⁵ Huan niquinmacas cati más cuali que coneme. Niquinmacas se tocyot cati más hueyi que nopa tatepanitacayot cati quiselisquíaj sinta quinpiyasquíaj inintelpocahua huan iniichpocahua. Pampa calijtic ipan nochaj, nijchihuas para nochi ma quinelnamiquise para nochipa huan amo quema ixpolihuis inintoca.

⁶ “Huan niquintiochihuas nochi nopa sequinoc tali ehuan cati motemactilijtoque para mochihuase nomasehualhua huan techtequipanose huan techicnelise na, niininTECO. Huan sinta injuanti amo tequitise ipan nopa tonali para mosiyajquetzase huan sinta quitepanitase nopa camanali cati nijchijtoc inihuaya, ⁷ niquinhualicas injuanti nojquiya ipan nopepe cati tatzejzeloltic. Huan nijtemitis iniyolo ica paquilisti nepa ipan nochaj campa motatajtíaj. Huan nochi tacajchualisti tatatili huan nochi tapiyalme cati injuanti quinhualicase huan quintalise ipan taixpamit, na nijselis. Pampa masehualme quitocaxtise nochaj: ‘nopa cali campa masehualme ten nochi talme motatajtíaj.’ ”

⁸ Pampa TOTECO Cati Más Quipiya Tanahuatili, cati quinsentilis nopa israelitame cati quinquixtijtoque ipan inintal quiijtohua: “Nojquiya niquinhualicas sequinoc masehualme cati amo israelitame huan niquinsentilis san sejo ica nomasehualhua.”

Tatzacuiltilisti para tayacanani

⁹ Huajca ma hualaca nochi tapiyalme huan tecuanime cati nemij cuatita, ma quincuaquij nomasehualhua. ¹⁰ Pampa itztoque quej popoyotzitzitzi nopa tayacanani ten nomasehualhua cati eliyayaj inintamocuitahuijcahua. Amo quiitaj yon se tamanti cati mahuilili. Itztoque quej chichime cati amo taajhuaj, san quinpackia motecase, cochise huan tatemiquise. ¹¹ Nochi inintayacancahua israelitame itztoque quej chichime cati tahuel quinpackia tacuase, pero amo quema ixhuij. Masque itztoque tamocuitahuiani cati amo teno quimachilíaj, huan san huilhuitique, sese ten injuanti quichihua cati ya quinequi huan san mocuatotonia para quipiyas más tamanti.

¹² Injuanti quiijtohuaj: “Ma tiyaca tijtemotij taili huan ma timoihuintica. Huan mosta san se tijchihuase huan elis noja más cuali que ama.”

57

Israelitame cati quintepanitaj teteyome

¹ Masehualme cati itztoque xitahuac huan cati cuajcualme quemantica miquij quema ayemo ajsi tonali para miquise. Pero amo aqui motatzintocuilía para ten miquij. Amo quimachilíaj para Toteco Dios quinequi quini-cuenis cati itztoque xitahuac para quinmanahuis ten nochi taohuijcyot cati panos teipa. ² Pampa cuajcualme cati miquij huan cati nejntoque ica Toteco Dios quipantise tasehuilisti huan mosiyajquetzase ica cuali.

³ Pero amojuanti cati anininconehua tenahualhuiani, huan anininix-huihua sihuanemini huan tacanemini, xihualaca nica para nimechtaj-tolsencahuas. ⁴ ¿Ajquiya anquipinajtíaj huan anquihuetzquilíaj? ¿Ajquiya anquinenepilquixtilíaj? Amojuanti san anininconehua tajtacolchihuani huan istacatini. ⁵ Anquinhueyichihuj teteyome ica nochi amochicahualis inintantita ahua cuame huan nochi sequinoc cuame cati quipiyaj miyac inimacuayohua. Nopona ten hueli anquichihuj ica amotacayohua. An-quinmictíaj amoconehua quej tacajchualisti ipan nopa tamayamit itzinta tepexit.

⁶ “Anisraelitame, anquinoxtilíaj teme cati alaxtique ipan atajti ipan tamayamit huan anquijaj quej amodioses. Huan anquitoyahuaj taili iniixpa para anquinhueyichihuae, huan anquinmacaj tacajchualisti ten trigo. Huajca ¿anmoilhuíaj nipaqui ica cati anquichihuj huan amo nimechtatzacuiltis? ⁷ Nepa inintzonco tepeme anquinhueyichijque teteyome huan anmochihuj quej se momecatijca sihuat cati quicajtejtoc ihuehue. ⁸ Anquintalijque amoteteyohua ipan amochajchaj iniica caltemit cati tzactoque. Quej se momecatijca sihuat cati calaqui ipan tapehti ica cati yaya quitaxtahujtoc para itztos ihuaya, ten hueli anquichihuj ica cati hueli quema anquintachilíaj amoteteyohua.

⁹ “Huan anquihuicaque aceite ten oliva huan miyac taajhuiyacayot quej se tacajchualisti para nopa teteyot, Moloc. Anquintitanque amotatitanilhua huejca huan hasta campa mijcatizti para anquintemotij sequinoc teteyome para anquinicelise. ¹⁰ Masque tavel ansiyajtoque pampa annejnenque ipan miyac ojti ten huejca, amo anmomacatoque cuenta para nochi amoojhuí eliyaya san tapic. Huajca ica yolic anquipixtiyajque fuerza huan sempa anquisenhuiquilijque anquitemose seyoc dios. ¹¹ ¿Para ten más anquini-macasij nopa teteyome huan amo na? ¿Para ten achi más anquinneltocaj que na? Ayecmo antechelnamiquij, yon amo anmoilhuíaj ten na. ¿Huelis amo antechimacasij pampa amo nimechtatzacuiltijtoc hasta huejcajquiya?

¹² “Na nihuelis niteyolmelahuas cati anquichijtoque cati anquijtohuaj para elqui xitahuac huan senquisa cuali. Pero amo amechpalehuis pampa yon se tamanti cati anquichijtoque amo amechpalehuis para anmomaquixtise. ¹³ Huan quema anquintajtzilise amoteteyohua para antajtanise tapalehuili, tiqúitase sinta amechpalehuise. Amo hueli pampa nochi ini-juanti amo teno ininpati huan amo quipiyaj chicahualisti. Quema hualas se ajacat, quinhuicas huan tamixpolihuisse san ipan se talojtzi. Pero nochi cati motemachíaj ipan na, moaxcatise nopa tali huan quipiyase ininparte ipan nopepe cati tatzejtzeltolic.”

¹⁴ Huan na niqijtos: “¡Xijcualtica nopa ojti huan xijchihuaca nelsepantic! ¡Xiqijcuenica nochi huejhueyi tet huan piltetzitzi cati tatzacuilía! Xijsenc-ahuaca se yejectzi ojti campa ipan hualase nomasehualhua cati tacuepilíaj ten nopa talme campa onitztoyaj.”

¹⁵ Pampa niamoTeco Cati Más niHueyi, Na Cati Niitztoc Huejcapa, na cati niitztoc para nochipa huan cati notoca Tatzejtzeloctic niquijtohua ya ni: “Na niitztoc nepa huejcapa campa tatzejtzeloctic huan campa itztoque nochi cati moyolcuetoque huan cati moechcapanohuaj. Na niquinyoltalía cati moechcapanohuaj huan niquinmoca yancuic chichahualisti nochi nopa masehualme cati moyolcuetoque huan quicajteytoque tajtacoli. ¹⁶ Amo nimotehuis amohuaya annoisraelita masehualhua para nochipa, yon amo para nochipa nicualantos. Sinta nochipa nicualantos amohuaya, huajca nochi masehualme cati niquinchijchijqui tzontamisquíaj. ¹⁷ Na nicualanqui amohuaya anisraelitame huan nimechtatzacuilti pampa tahuel anquixtocayayaj miyac tamanti. Nimoicancuetqui ica amojuanti, pero amojuanti anquisenhuiquilijque antajtacolchijque quej anquinequiyayaj anquichihuase ipan amoyolo. ¹⁸ Na niquitztoc nochi cati amojuanti anquichihuaj, pero na nimechchichahuas. Na nimechmocuitahuis huan nimechyolchichahuas huan nimechyoltalis cati anmotequipachohuaj. ¹⁹ ‘Huan na niquinmocas israelitame tasehuilisti masque itztoque huejca huan itztoque néchca, pampa niquinchichahuas nochi nomasehualhua.’” Quej nopa quijtohua TOTECO. ²⁰ “Pero nochi tajtacolchihuani itztose quej nopa hueyi at cati mojmolinía huan amo hueli motalochquetza huan san eltoc. San talojtzitzi quimajcagua soquit huan tasoli para nochipa. ²¹ Amo onca tasehuilisti para amo cuacualme.” Quej nopa quijtohua noTeco Dios.

58

Quenicatza monequi mosahuase israelitame

¹ TOTECO techilhui: “¡Xitzajtzi chichahuac quej se tapitzali huan xiquintelhu noisraelita masehualhua * por nochi inintajtacolhua! ² Pero nochi injuanti mochihuaj quej elisquí cuajcualme masehualme. Mojmosta techtemohuaj huan quijtohuaj quinequij quixmatise nojhui. Mochihuaj quej masehualme cati nelía quichihuaj cati xitahuac o quej amo quema quitahuelcajtosquíaj notanahuatilhua niininTeco Dios. Quijtohuaj quinpactía techhueyimatise niininTeco, huan quinpactía tequipanose ipan tiopamit.

³ “Pero injuanti techilhuíaj: ‘Moixpa timosajtoque, pero ta amo techchihuilía cuenta. ¿Para ten timotaijyohuiltise sinta ta amo techita?’

“Nimechilhuis anisraelitame para ten amo nimechchihuilía cuenta. Eltoc pampa quema anmosahuaj, san anquitemohuaj cati amojuanti amechpolhua huan anquisenhuiquilíaj anquintaijyohuiltíaj amotequipanojcahua.

⁴ Quema anmosahuaj, anmotaijilhuíaj huan anmocualaníaj huan anmo maquilíaj. Amo quema nimechtacaquilis nepa huejcapa quema anmotatjtise sinta quej ni anquichihuaj quema anmosahuaj. ⁵ ¿Anmoilhuíaj quej nopa nijnequi? Quema anmosahuaj, anmotaijyohuiltíaj, anmotancuaquetzaj quej acat cati mocuilpachohua, o anmoquentíaj yoyomit ten tequipacholi huan anmotemilíaj cuajnexti ipan amotzonteco. ¿Huelis quej nopa anquilitaj cuali para mosahuase masehualme? ¿Anmoilhuíaj ya nopa ‘se tonal yejyectzi para na, niamoTeco’?”

⁶ “¿Amo anquimatij taya nijnequi xijchihuaca quema anmosahuaj? Na nijnequi xiquintojtomaca cati ilpitoque huan amo teno quichijtoque. Ayecmo xiquintaijyohuiltica amotequipanojcahua. Xiquinchihuilica cati xitahuac huan xiquinmacaca inintaxtahuil. ⁷ Nijnequi xiquintamacaca cati mayanaj

* 58:1 O iixhuihua Jacob.

huan xiquinselica ipan amochaj nejnemini cati amo quipiyaj ininchaj. Xiquiyoyontica cati amo quipiyaj iniyoyo huan amo ximotatica quema amoteixnatacagua amechtemohuaj para xiquinpalehuica. ⁸ Sinta anquichihuase nochi ya ni, huajca na nimechtitanilis notaahuil amopani huan elis yejyectzi quej quema tanesi. Huan amococohua mochicahuase nimantzi huan nochi quimatise para anquichihuaj cati xitahuac. Huan na niitztos amohuaya para nimechmaquixtis huan ica nohueyitilis nimechmocuitahuis amoica. ⁹ Huan quema antechtzaiztilise na, niamoTECO, para ma nimechpalehui, na nimantzi nimechnanquilis huan nimechilhuis: 'Nica niitztoc.'

"Pero monequi ayecmo xiquintajyohuiltica cati teicneltziti, ayecmo xiteejelnamiquica huan ayecmo xijmoyahuaca camanali cati fiero. ¹⁰ Xiquintamacaca cati mayanaj huan xiquinpalehuica cati mopantíaj ipan taohuicayot. Huan quej nopa anitztose quej se taahuili cati tatanextis campa tzintayohua huan yeca nopa tzintayohuilot cati quiyahualojtoc, tatanextis quej elisquía tonaya. ¹¹ Huan na, niamoTECO, nimechyacanas nochipa huan nimechixhuitis ica miyac tamanti cati cuali. Nochipa nimechmacas chicalhualisti ipan amotacayo huan amouanti anelise quej se xochi mili cati nochipa quietequijtoque o quej se ameli cati amo quema huaqui. ¹² Huan amoconehua quicualtalise nopa altepeme cati hasta huejcajquiya quinsosolojque. Huan quintocaxtise 'nopa masehualme cati quicualtalíaj inintepa huan inialtepehua.'

Nopa tonali ten tasiyajquetzalisti

¹³ "Xijtepanitaca nopa tonali ten tasiyajquetzalisti huan amo xijchihuaca cati san amopaquilis ipan nopa tonali cati tatzejtzelolitic. Xipaquica ipan nopa tonali huan nochipa xicamanaltica ten nopa tonali ica miyac paquillisti. Techtepanitaca niamoTECO ipan nochi cati anquichihuaj ipan nopa tonali huan amo xiquinchihuaca amotamantziti. Ipan nopa tonali amo xijtoquilitica amotequi, yon amo ximocamanalhuica camanali cati amo teno ipati. Sinta quej ni anquichihuase, ¹⁴ temachtí anpaquise ipan TOTECO. Huan na nimechchihuas xitatanica ipan cati anquichihuaj. Huan nimechmacas nochi nopa tatiocihualisti cati nijtajtolcahuili amohuejcapan tata Jacob." Quej nopa niqijtohua na, niamoTECO.

59

Ayecmo ma tajtacolchihuaca

¹ ¡Xiquitaca! TOTECO amo quipolojtoc ichichualis para amechmaquixtis, yon amo quipolojtoc itacaquilis para amo huelis amechtacaquilis. ² Pero amotaixpanolhua amechhuejcatalijtoc ten amoTeco Dios. Huan amotajtacolhua quichijtoc para ma quitati ixayac para ayecmo amechtacaquilis. ³ Pampa amouanti anquipiyaj amomax cati espoltic huan anquichijtoque miyac tajtocoli. Anistacati, anteejelnamiquij huan anquicalancaitaj cati cuali. ⁴ Amo aquí mocuesohua para elis xitahuac huan temachtí. Anquinhuicaj masehualme iniixpa jueces para anquintelhuise ica istacatili. Nochi tonali anmonejnehuilíaj cati amo cuali huelis anquichihuase. Teipa anquichihuaj cati anmonejnehuilijtoque. ⁵ Anquipolohuaj miyac tonali huan chicalhualisti para anmonejnehuilise miyac tamanti cati fiero. Teipa antemicíaj. ⁶ Anquincajyahuaj huan anquintachtequillíaj nochi masehualme. Amo teno cati cuali huala ten amouanti. Nochi cati anquichihuaj eltoc senquisa amo cuali. Cati huili masehuali nimantzi amechixmati ica cati anquichihuaj pampa anquichihuaj tamanti cati senquisa fiero.

⁷ Anmotalojtياهوij para anquichihuatiq cati amo cuali huan para anquinmictitij masehualme, masque amo teno quichijtoque. Amotalnamiquilis nelia fiero pampa san anmonejnehuilíaj anquichihuase tamanti cati amo cuali. Huan campa hueli campa anyahuij, san antasosolohuaj huan anemictíaj. ⁸ Amo anquixmatij nopa ojti cati temaca tasehuilisti, yon amo anquimatij quenicatza anquichihuase cati xitahuac huan cati cuali. Anquitoquilíaj se ojti cati huijcoltic, huan nochi cati yahuij amotepotzco nojquiya amo quema quipiyase tasehuilisti.

⁹ Huan nopa israelitame quijjtohuaj: “Pampa miyac titajtacolchijtoque, yeca TOTECO amo quintajtolsencahua cati techtaijyohuilitíaj huan amo techmanahuijtoc. Tojuanti tijchiyayaj taahuili, pero hualajqui tzintayohuilot. Nojquiya tijchiyayaj tatanexti, pero tinejnemij ipan tzintayohuilot. ¹⁰ Yeca timotatzquilitinemij ipan tapepecholi huan timoalajtياهوij quej elisquía tipopoyotzitzí. Masque tajcotona timotepotaniaj quej elisquía tayohua. Tinesij quej mijcatzitzí cati itztoque ipan tzintayohuilot huan amo quej telpocame cati tejtetique. ¹¹ Tojuanti tinanalcaj quej osome cati ya mayancamictinemij. Huan tiactij quej palomajme. Tijtemohuaj Toteco para ma techmanahuí huan ma techmaquixti, pero yaya amo techmanahuía, yon amo techmaquixtía. Eltoc pampa yaya ayecmo techchihuilia cuenta.

¹² “Pampa, ta TOTECO, totajtacolhua más momiyaquilía moixpa ta cati titzotc tixitahuac. Totajtacolhua techtelhuíaj moixpa. Quena, tojuanti tijmatij para nelia titajtacolchihuani.” ¹³ Tijmatij para timojisinjtoque ica TOTECO, huan tijtahuelcajtoque. Tijmatij para timohuejcataljtoque ten TOTECO cati titoDios huan amo timonejnemiltijtoque xitahuac. Titeejelnamictoque, timosisinjtoque huan timoyolihuijtoque istacatili para tiquincajyahhuase sequinoc. ¹⁴ Nochi totequiticahua quincualancaitaj cati itztoque xitahuac. Amo quinequij tetajtolsencahuase quej quinamiqui. Ipan nochi calles amo aqui quijjtohua cati melahuac huan amo aqui quichihua cati xitahuac.

¹⁵ Amo aqui quichihua cati cuali. Huan cati hueli cati quichihua campeca para quicahuas tamanti cati amo cuali, quicalaquíaj ipan tatzacti. Huan TOTECO quuitac ni tamanti huan amo quipacti pampa quuitac para amo aqui quichihua cati xitahuac.

Huan TOTECO quijjto: ¹⁶ “Huan niamoTECO san nijtachili para amo aqui quinejqui quinpalehuis nopa masehualme cati sequinoc quintaijyohuilitiyaj. Yeca na noseltitzí nimotananqui para niquinmaquixtis ica nochi nochicahualis huan niqinchihuili cati xitahuac. ¹⁷ Pampa na nixitahuac huan nijpiya chicahualisti para nitemaquixtis, niitzotc nimocualtalijtoc para tatehuilisti quej se soldado cati mocualtalía ica iyolixtzajcayo ten teposti huan ipan itzonteco quitalía itepostzontzajca. Na niamoTECO tahuel nijnequi nijsencahuas nochi xitahuac huan nijnequi nimomacuepas ica nocualancaitacahua ica nohueyi cualancayo. ¹⁸ Niquintaxtahuis nocualancaitacahua quej quinamiqui por nochi cati quichijtoque. Huan yeca nohueyi cualancayo quinajsis nocualancaitacahua cati mopantíaj ipan talme hasta cati más huejca. ¹⁹ Huan quema quuitase nohueyitilis, nochi cati mopantíaj campa hueli ipan ni taltipacti techimacasise huan techhueyitepanitase. Na nihualas chicahuac quej se hueyat cati motalohua chicahuac cati noTonal niamoTECO quicuatopejtihuala. ²⁰ Quena, na cati nimechcojqui, niajsis ipan Jerusalén * huan nimechcohuas para noaxcahua anisraelitame cati anmoyolcuctoque ten amotajtacolhua.” Quej nopa quijjtohua TOTECO.

* 59:20 59:20 O altepet Sion.

²¹ Huan TOTECO quiijtouhua: “Ya ni elis nopa camanali cati nijchihuas ica amojuanti cati annoaxcahua. Huan nimechtajtolcahuilis para noTonal cati itztoc ipan amojuanti huan nocamanal cati nimechmacatoc, amo quema amechtahuclcahuas. Yon amo anquielcahuase ni camanali cati nimechmacatoc. Huan ni camanali eltos ipan inineneopil amoconehua huan amoixhuihua huan iniixhuihua cati tacajtiyase para nochipa.”

60

Thueyitilis nopa yancuic Jerusalén

¹ Altep Jerusalem motananas. Jerusalem elis yejyetzti huan quiipiyas taahuili quej tonati para nochi masehualme ipan nochi talme ma quiitaca pampa ihueyitilis TOTECO quitaahuilis. ² Masque oncas tzintayohuilot ipan nochi talme ipan taltipacti, pero ihueyitilis TOTECO tatanextis ipan Jerusalem. ³ Masehualme ten nochi talme hualase Jerusalem campa itaahuil. Tanahuatiani huan masehualme cati quiipiyaj miyac chicahualisti hualase Jerusalem para quitachiliquij ihueyitilis TOTECO.

⁴ Xitachiyaca campa hueli, anJerusalem ehuan, pampa nochi amotelpocahua huan amoichpocahua cati onitztoyaj huejca ipan sequinoc talme, hualahuij ininchaj. ⁵ Huan quema anquinitase para hualaj, amoixteyolhua petanise ica paquillisti huan tahuel anyolpaquise, pampa injuanti amechhualiquilijtose iniricojo nopa talme nechca hueyi at huan nopa talme cati campa hueli mopantiaj ipan taltipacti. ⁶ Motecpantihualase miyac camellos ipan Jerusalem. Hualase camellos ten nopa talme Madián, Sabá huan Efa huan nochi quimamajtihualase oro huan copali para ica quihueyimatisse TOTECO. ⁷ Amechmacase borregojme ten tali Cedar huan oquich borregojme ten tali Nebaiot para anquintencahuase ipan itaixpa TOTECO quej tacajchualisti tatatili cati ajhuayac mijyotía. Huan ipan nopa tonali TOTECO más quieyjecchihuas itiopa.

⁸ ¿Ajquiya injuanti eltoc quej patantihualahuij quej mixti huan ajsise ipan tali Israel? Patantihualahuij quej palomajme cati yahuij campa inintepasol.

⁹ Ya nopa, nopa barcos cati más cuajcualme ten tali Tarsis. Na niquinajoctoc nopa barcos para quinhualicase ininchaj ipan tali Israel amoconehua cati itzttoyaj huejca ipan sequinoc talme. Nochi injuanti quihualicase oro huan plata para quihueyimatisse TOTECO cati amoDios cati Tatzejtzeltoc huan cati itztoc amohuaya anisraelitame. Huan yaya quinextis ihueyitilis ipan Jerusalem huan quichihuas tahuel yejyetzti.

¹⁰ TOTECO quinilhuía Jerusalem ehuan: “Miyac masehualme ten sequinoc talme hualase huan quicualtaliquij amoaltepehua. Huan inintanahuatijcahua amechtitanilise inintapalehuil. Pampa masque nijsosolo nopa altep quema nicualantoya amohuaya, ama sempa nimechtasojtas anisraelitame pampa hueyi noyolo ica amojuanti. ¹¹ Nochi icaltehua altep Jerusalem mocahuas tapojtoc tayohua huan tonaya para huelis calaquise tanahuatiani ten miyac talme para amechhualiquilise iniricojo. ¹² Pero nochi talme huan nochi tanahuatiani cati amoquinequise mosentilise amohuaya para amechtequipanose, tamiixpolihuise. ¹³ Nochi iyejyecca nopa cuatitamit ipan Líbano elis amoaxca. Huan nopa cuame ten pino, cipreses huan abetos anquintequihuise para anquieyjecchihuase notiopa campa nijtalis noicxihua para mosiyajquetzas.

¹⁴ “Huan nochi ininonehua amocualancaitacahua cati amechtaijyohuiltiyayaj hualase motancuaquetzaquij amoicxipa huan quitzoponise amoicxihua. Huan quitocaxtise altep Jerusalem ‘Ialtepe TOTECO.’ Huan

quitocaxtise ‘Sion, nopa Altepet ten TOTECO cati Tatzejtzeloltic cati itztoc inihuaya israelitame.’¹⁵ Masque achtohuiya nochi quitajilhuiyayaj altepet Jerusalén huan amo quinequiyayaj quuitase, yon amo quinequiyayaj nejnemise ipan icalles, ama nopa altepet elis yejyetzti para nochipa. Huan para nochipa Jerusalén elis se hueyi paquillisti para nochi cati yahuij nopona.¹⁶ Tanahuatiani huan masehualme ten miyac talme cati quiپیay chicahualisti amechhualiquilise nopa tacualisti cati más cuali para huelis anquiyayase cati anquinequij. Huan huajca anquimatise para melahuac, na niamoTECO, nieli niamotemaquixtijca, huan nieli na cati nimechcojqui para nimechtojtomas ten tequipanolisti. NiamoTeco Anisraelitame Na Cati Más Nijpiya Chicahualisti.

¹⁷ “Huan nimechmacas oro ipataca bronce, huan nimechmacas plata ipataca hierro. Huan nimechmacas bronce ipataca cuahuit huan nimechmacas hierro ipataca teme. Huan amotayacancahua ayecmo amechtaijyohuiltise. Tanahuatise xitahuac huan oncas tasehuilisti.¹⁸ Ayecmo quicaquise ipan amoaltepe nopa tahuejchihualisti ten tatehuilisti. Ayecmo aqui tachtequis, yon ayecmo tasosolose. Na nimechmocuitahuis huan nimechyahualos para nimechmanahuis quej se tepamit. Nochi cati calaquise ipan amocaltehua techhueyichihuase na niamoTECO cati nimechmaquixtijtōc.

¹⁹ “Ayecmo monequis ne tonati para amechtaahuilis ipan tonaya, yon ne metzti ayecmo amechtaahuilis ica tayohua, pampa na, niamoTECO nimechtaahuilis para nochipa, huan itaahuil nohueyitilis amechtaahuilis.²⁰ Elis quej nopa tonati huan metzti amo quema calaquise pampa niamoTECO nimechtaahuilijtos para nochipa. Huan ayecmo quema anmotequipachose.²¹ Huan nochi amomasehualhua elise xitahuaque, huan amotal elis amoaxca para nochipa pampa nopona nimechtalis ica nomax. Huan nochi amojuanti anquinextise nohueyitilis.²² Nopa familias cati más pisiltziti, niquinmiyaquilis hasta mochihuase se mil masehualme. Huan nopa masehualme cati ayecmo miyaqui mocajtoque, niquinchihuas ma quitemitica se tali huan tahuel quiپیayase chicahualisti. Na niamoTECO nijchihuas ma pano nochi ya ni ipan nopa tonali cati na niquixquetztoc.”

61

TOTECO quimaquixtis altepet Jerusalén

¹ Itonal TOTECO Cati Más Quiپیya Tanahuatili itztoc ipan na. Tech-tapejpenijtoc para ma niquinyolmelahuahui teicneltziti nopa cuali camanali. Techtitantoc para ma niquinyolchicahuahui cati tahuel moyoltequipachohuaj huan para nitayolmelahuas para nochi cati ilpitoque huan cati tzactoque huelise quisase.² Techtitantoc ma niquinilhuiqui nopa masehualme cati chocaj para ya ajsic hora para TOTECO quintasojtas. Huan techtitantoc ma niquinyolmelahuahui para ya ajsic nopa tonali para Toteco Dios momacuepas ica icualacancaitacahua por nochi cati quinchiuhlijtoque imasehualhua.³ Techtitantoc para nochi cati mocuesohuaj ipan altepet Jerusalén* ma quinquixtilica nopa cuajnexti ipan inintzonteco huan ma quinicpahuiltica se yejyetzti corona. Ma quinquixtilica inintequipachol huan ma quiپیyaca paquillisti. Quinequi ma niquinquixtili nopa fiero yoyomit cati quinextia inintequipachol huan niquinmacas yoyomit cati quinextia para tahuel yolpaquij. Huan injuanti itztose quej cuame cati quiپیayaj chicahualisti cati TOTECO quitococ huan cati quinextise ihueyitilis.

* 61:3 61:3 O Sion.

⁴ Huan sempa quicualtalise nochi cati sosolijtoque. Quincualtalise calme quej eltoyaj achtohuiya huan sempa quintananase altepeme cati para miyac xihuit mocajtoque sosolijtoque. ⁵ Huan sequinoc tali ehuaní amechte-quipanose, anomasehualhua. Quinmocuitahuse huan quintamacase amoborregojuha. Quimehuase amotal huan quimocuitahuse amoxcomeca milhua. ⁶ Huan amehtocaxtise anitotajtzitzi TOTECO huan itequipanojcahua Toteco Dios. Huan anmopanoltise ica iniricojyo nochi talme huan anmohueyichihuase ica nochi tamanti cati pajpatiyo cati injuanti ica mohueyichihuayayaj. ⁷ Amehtajiyohuiltijtoque huan amechpinahuaitjque pano miyac huan ama anquiselise tahuel miyac tatepanitacayot huan paqulisti cati huejcahuas para nochipa.

⁸ Huan TOTECO quijitohua: “Pampa niamoTECO tahuel niquicnelía cati monejnemiltía xitahuac. Pero amo nijnequi niquinitas cati tachtequij huan quichihuj miyac tamanti cati amo cuali. Yeca na niquintaxtahuis nomasehualhua quej quinamiqui por nochi inintajiyohuilis. Huan inihuaya nijchihuas se camanal sencahuali cati huejcahuas para nochipa.” ⁹ Ipan nochi taltipacti quixmatise iniixhuihua imasehualhua TOTECO huan quinhueyitepanitase. Huan nochi quinitase para nopa masehualme TOTECO quintiochijtoc.

Tascamtili para TOTECO

¹⁰ Tahuel nimopaquilismaca ipan TOTECO. Nipacui miyac por noTeco Dios pampa yaya techmaquixti huan techchijqui nixitahuac iixpa. Techmacatoc nochi cati cuali. Ama niitztoc quej se telpcocat cati quientijtoque cuali iyoyo pampa mocualtalijtoc para mosihujtis. O niitztoc quej se ichpcocat cati quieyjecchijtoque ica miyac tamanti para monamictis. ¹¹ TOTECO Cati Más Quipiya Tanahuatili quinextilis nochi talme para ta nelía tixitahuac, huan nochi injuanti quihueyimatisé. Huan nopa tamanti cati xitahuac cati yaya quichihuas quipiyas ichamanca. Elis quej se cuahuit cati yejectzi chamanis o quej se tali cati quichihuas ma ixhua nopa cuayoli hasta temis campá huéli.

62

Quicualtalía para quema hualas nopa temaquixtijquet

¹ Pampa tahuel niquicnelía tepet Sion huan nijnequi niquitas nochi altepet Jerusalén quema eltos yejectzi, na amo nijcahuas nimotatajtis iixpa TOTECO. Nimotatajtis hasta nochi nozona elis xitahuac huan nopa altepet nesis quej se taahuili para nochi sequinoc. Nimotatajtis hasta quema TOTECO quimaquixtis huan ihueyitilis nesis quej se ticuahuit cati xahuantoc huan tahuel taahuía. ² Nochi talme quiitase Jerusalén para se altepet campá nochi mochihua xitahuac, huan tanahuatiani quiitase itatanex hasta nopa taahuili quinixmictis. Huan TOTECO quimacas nopa altepet seyoc itoca cati yancuic. ³ Huan Jerusalén elis quej se yejectzi corona para se tanahuatijquet. Huan cahuanis ica itatanex TOTECO, huan TOTECO amoDios quitananas ica imax para nochi huelis quiitase. ⁴ Ayecmo quema quitocaxtise Jerusalén “Altepet Cati Quitahuelcajtoque”, yon amo quitocaxtise nopa tali “Tali Cati Sosolijtoc.” Teipa quitocaxtise Jerusalén “Nopa Altepet Cati Quichihua Cati Quipactía TOTECO” huan “Nopa Altepet Cati TOTECO Más Quicnelía” pampa mopaquilismacas TOTECO ipan Jerusalén tayolmelahuas para iaxca ya. ⁵ Pampa quej se telpcocat ica miyac paquili mocuili se ichpcocat, quej nopa nojquiya paqui TOTECO ica Jerusalén huan quicualtalis huan moaxcatis.

6 TOTECO quijtohua: “Niquintalijtoc tamocuitahuiani ipan itepa Jerusalén cati motatajtise tayohua huan tonaya para techelnamiquiltise niamoTECO para nijchihuas nochi cati niqijtojtoc para nijchihuas. Amo mosiyajquetzase para technojoztase niamoTECO, 7 yon amo mocahuilise ma mosiyajquetzaca hasta nijcualtalis altepet Jerusalén. Huan nijchihuas para nochi ma quitepanitaca huan nochi ipan taltipacti san ma quitachilica. 8 NiamoTECO nitatestigojquetzqui para ayecmo quema nijtemactilis Jerusalén huan imasehualhua inimaco inincualancaitacahua, yon ayecmo quema hualase soldados cati ehuan ipan sequinoc talme para quinchtequiliquij inintrigo o inixocomeca iayo cati inijuanti tequipanojtoque chichahuac para quitocase. 9 Huajca israelitame quipixcase cati quitoctoque huan quicuase. Huan techhueyimatise niininteco por inintajca. Quena, quise inixocomeca iayo ipan itamapa notiopa.” 10 ¡Xipanquisaca anmasehualme ipan Jerusalén! ¡Xipanquisaca! Xijsencahuaca se ojti para ipan hualase amomasehualhua cati tacuepilise ten sequinoc talme. Xijhijchihuaca ojti, xijquixtica nochi teme. Xijtananaca nopa bandera cati quixnextis tali Israel para nochi ma quuitaca.

11 TOTECO quintitantoc itayolmelajcahua ipan nochi taltipacti ica ni camanali, quijtohua: “Xiquinilhua israelitame: ‘Xiquitaca, ya huala amoTemaquixtjca huan quihualica miyac nemacti cati ica amechtax-tahuis.’”

12 Huan amechtocaxtise anisraelitame “Masehualme Cati Tatzetzolol-tique” huan “Masehualme Cati TOTECO Quincojtoc para Iaxcahua.” Huan altepet Jerusalén quitocaxtise “Altepet Cati Nochi Quixtocaj” huan “Altepet Cati Ayecmo Quema Elis Quitahuelcajtoque.”

63

Toteco quintatzacuiltis icualancaitacahua

1 —¿Ajquiya ya cati huala ten altepet Bosra ipan tali Edom ica iyoyo chichiltic huan yejyectzi? ¿Ajquiya ya cati moyoyontijtoc quej tanahuatijquet huan huala ica tahuel miyac chichahualisti? Huan se quinanquilía: ‘Na niDios cati nicamanalti xitahuac. Na niDios cati nijpiya nochi chichahualisti para nitemaquixtis.’

Huan yaya quinanquilía:

2—Pero ¿para ten moyoyo eltoc nelchichiltic quej elisquía xocomecat iayo cati ipan timoquejquetztoc?

3—Eltoc pampa na noseltitzi nitetatzacuiltijtoc. Quej se cati iseltitzi moquejquetzqui ipan nopa xocomecat itajca, huan amo aquí quipalehui, nimoquejquetzqui noseltitzi ipan nocualancaitacahua para niquintatzacuiltis ica nohueyi cualancayo. Huan inieso techtzitzicuitzqui ipan nochi noyoyo huan yeca eltoc chichiltic. 4 Pampa ya ajsic tonali para niquincuepilis nocualancaitacahua por nochi cati quinchihuilijque nomasehualhua huan para niquinmanahuis ten nopa talme cati quintaijyohuiltij. 5 Na nitachixqui campa hueli, pero amo nijpanti yon se cati quinpalehuisquía nomasehualhua. Huan san nimotachili pampa amo aquí techpalehui. Huajca na noseltitzi nisomacuetqui ica inincualancaitacahua nomasehualhua pampa tahuel niquincualancaitayaya huan nitatanqui ica nochicahualis. 6 Quena, ica nohueyi cualancayo nimoquejquetzqui ininpani nopa masehualme ten miyac talme cati amo quineltocaj Toteco huan niquintzontamilti. Huan nijhijqui ma momimiloca huan ma huetzica talchi huan ma toyahui inieso.

Itaicnelil Toteco para israelitame

⁷ Na nicamanaltis ten itecnelijcayo TOTECO. Nijhueyimatis por nochi nopa huejhuelyi tamanti cati techchihuilijtoc tiisraelitame. Tahuel miyac techtiochijtoc. Techchihuilijtoc tiisraelitame cati cuali pampa yaya techtasojta miyac huan techicnelía. ⁸ Pampa yaya quijito: “Israelitame nelía noconehua. Temachti ayecmo nechcajcahuase.”

Huan quej nopa yaya mochijqui inintemaquixtijca. ⁹ Ipan nochi inintaijyohuilis yaya nojquiya taijyohui, huan yaya iseltitzi quinmaquixti quej elisquía ilhuicac ejca TOTECO. Quinmanahui pampa quinicnelía miyac huan quintasojta, taxtajqui para quincohuas ten campá quinpixtoyaj ilpitoque. Yaya quintanantoc israelitame ipan imax huan quincuechpanojtihualajtoc mojmosta quej ipa quichijtihualajtoc hasta huejcajquiya.

¹⁰ Pero israelitame sempa mosisinijque huan quicualancamacaque Itonal Cati Tatzejtzeltoc. Huan yeca yaya mochijqui inincualancaitaca huan iseltitzi quintatzacuiliti. ¹¹ Huaqca inijuanti quielnamijque nopa tonali cati huejcajquiya quema Moisés cati eliyaya itequipanojca TOTECO, quinquixti israelitame ipan tali Egipto, huan yeca nopa israelitame ama quijitoahuaj: “¿Canque itztoc ama TOTECO cati huejcajquiya quinquixti israelitame huan quinpanolti ipan hueyi at huan quitequihui Moisés quej elisquía inintamocuitahuajca? ¿Canque itztoc ama TOTECO cati quihualitanqui Itonal Cati Tatzejtzeltoc para ma itztoqui tatajco imasehualhua? ¹² ¿Canque itztoc ama TOTECO cati ica nochi ichicahualis quitapo nopa hueyi at inixpa tohuejcapan tatahua quema Moisés momatananqui huan ica ya nopa mohueyichijqui para nochipa? ¹³ ¿Canque itztoc ama TOTECO cati quinpanolti tohuejcapan tatahua ipan nopa ojti cati eltoya tatzinta hueyi at? Huan pampa TOTECO quinyacanayaya, amo motepotanjque, yon amo huetzque. Itztoyaj quej cahuayojme cati motalohuaj chicahuac ipan huactoc tali huan amo motepotanjaj. ¹⁴ Itonal TOTECO quinsiyajcuili imasehualhua quej huacaxme cati tacuajtinemij ipan tamayamit.” Quena, quej nopa TOTECO quinyacanqui imasehualhua huan quichijqui para nochi masehualme ma quihueyitepanitaca.

Se netatajtili para tapalehuili

¹⁵ TOTECO, techhualtachili ten nozona ilhuicac campá tiitztoc, campá tijpixtoc mochaj cati yejyetzti huan tatzejtzeltoc. ¿Canque eltoc motaicnelil para tojuanti? Huan ¿canque eltoc mochicahualis? ¿Huelis ayecmo techicnelía huan ayecmo tijpiya hueyi moyolo ica tojuanti? ¹⁶ Pero melahuac ta tiTotata para nochipa, huan masque Abraham huan Jacob amo techitasquíaj quej tiininconehua, ta tiTOTECO, quena, tiitztosquía tiTotata. Ta cati hasta huejcajquiya techcojqui para techtojtomas campá titetequipanohuayayaj san tapic. ¹⁷ TOTECO, ¿para ten techcahuilijtoc ma tijcahuaca moojhui? ¿Para ten techcahuilijtoc tijpiyase tetic toyolo para ma amo timitzimacásica? Xihuala sempa huan techpalehuiqui pampa nochi tojuanti cati timotequipanojcahua huan timoaxcahua, tahuel timitztemohuaj. ¹⁸ ¡Tahuel pilquenzti tonali tojuanti cati timoaxcahua timoaxcatijtoyaj altepet Jerusalén! Huan ama tocualancaitacahua techcuilijque huan quitamisosolojque. ¹⁹ ¿Para ten techchihua quej elisquía amo timomasehualhua? ¿Para ten techchihua quej elisquía timasehualme ten seyoc tali cati amo quema timitztocaxtijque titoTeco?

64

¹ ¡Cuali elisquía sinta tijtaposquía nopa ilhuicacti huan titemosquía! ¡Nochi tepeme temachti huihuipicasquíaj moixpa! ² Huan mohueyitilis hualasquía

quej se tit cati tahuel totonic. Quintatisquía nochi tepeme huan quinmolonaltisquía nochi huejhueyi hueyame hasta huaquisquíaj. Moixpa ta huihuipicasquíaj nochi talme, huan huajca nochi mocualancaitacahua mitzxmatisquíaj para nelía tihueyi.

³ Huejcaiquiya quema itemoc, tijchijqui huejhueyi tamanti cati temajmati cati tojuanti amo tijchiyayaj. Huan nochi tepeme mojmolinijque nelchicahuac. ⁴ Pampa hasta quema pejqui ni taltipacti, amo quema tijcactoque, yon amo quema tiqúitztoque sinta onca seyoc Dios iyoca ten ta. San ta cati timopanextia para tiquinpalehuis nochi cati motemachíaj ipan ta. ⁵ Ta tiquinselia nochi nopa masehualme cati ica paquilsti quichihuaq cati xitahuac huan cati quitoquilíaj moojhui cati tatzejtzololtic.

Pero ta ticalanqui tohuaya pampa tojuanti amo titatzejtzololtique. Nochi tojuanti senquisa titajtacolchihuani huan tijchijthualajtoque tajtacoli ipan nochi tonemilis. ¿Huelis noja momaquixtise masehualme quej tojuanti?

⁶ Nochi tojuanti tahuel tinempolijtoque ica tajtacoli. Huan nochi tamanti cati tojuanti tijchihuaq cati timoilhuíaj xitahuac, nesi quej se yoyomit cati soquiyu huan fiero moixpa hasta tiqúijiya. Nochi tojuanti tiitztoque quej xihuime cati pilinij huan huetzij. Huan nochi totajtacolhua techhuilana quej elisquía se ajacat cati techhuica huejca. ⁷ Pero ama amo aqui quitzajtzilía motoca, yon amo aqui mitztajtania tapojpolhuili. Yeca ta timohuejcatilijtoc ten tojuanti huan techtemactilijtoc ipan tajtacolot.

⁸ Pero TOTECO, ta tiitztoc tiTotata. Tojuanti tiitztoque quej soquit huan ta se tichachapalchijquet. Ta techchijchijqui nochi tojuanti ica momax.

⁹ TOTECO, amo tahuel xicualani tohuaya, yon amo xiquelnamicto totajtacolhua para nochipa. Techtachili huan xiquelnamiqui para nochi tojuanti timomasehualhua huan timoaxcahua.

¹⁰ Moaltepehua cati tatzejtzololtic ama quintamisosolojtoque. Jerusalén mocajtoc quej huactoc tali. ¹¹ Nopa tiopamit cati yejectzi huan tatzejtzololtic campa mitzhueyimatiyayaj tohuejcapan tatahua, quitamitatijque. Huan nochi nopa tamantzitzi yejectzitzitzi cati tahuel techpactiyaya, quinsosolojtoque. ¹² Huan teipa ten nochi ya ni, TOTECO, ¿noja amo teno tijchihuas? ¿Techtahuelcahuas para nochipa huan tijsenhuiquilis techtaijyohuiltis?

65

TOTECO quintatzacuiltis cati mosisiníaj

¹ TOTECO quiiijtohua: “Masehualme cati amo quema tatzintocayayaj por na, ama techtemohuaq. Huan cati itztoque ipan talme cati achtohuiya amo techtemohuayaj, ama techtemohuaq. Huan na niquinilhuía nopa masehualme cati technojoztaj: ‘Xiquitaca, nica niitztoc.’

² “Nijxitajtoc nomax semilhuit para niquinselis nomasehualhua, pero injuanti tahuel mosisinijtoque ica na. Quitoquilíaj nopa amo cuali oji cati injuanti quinpackia. Quichihuaq ten hueli tamanti cati amo cuali cati injuanti monejnehuilíaj ipan inintalnamiquillis. ³ Semilhuit noixpa techixpanoj pampa mojmosta quinhueyichihuaq teteyome huan quinnojoztaj cati mictoque ipan inixochi milhua huan nozona temacaj tacajcahualisti. Quitatíaj copali inincalcuitapa. ⁴ Huan ica tayohua yahuij campa campo santo huan campa ostop para quinhueyichihuatij ajacame. Nojquiya quicuaj pitzo nacat huan sequinoc tamanti tucalisti cati niininTeco amo niquincahuilía quicuase. ⁵ Huan moilhuíaj se ica seyoc: ‘Ximocahua campa tiitztoc, amo technechcahui más, pampa techchihuas amo nitapajpactic, pampa na

más nitatzejtzelolitic que ta.' Pero nelía na ayecmo niquinijyohuía pampa mojmosta techchihuaj ma nicualani más. Itztoque quej tit cati semil huit lementoc huan ipocyo calaquí ipan noyacatzol.

⁶ “Pero ya nijsencajqui taya tatzacuilitli niquinmacas. Eltoc ijcuilijtoc noixpa huan yeca amo nijcahuas san quíaja. Na niquintaxtahuis sese inijuanti quej quínamiquí por nochi cati amo cuali quichijtoque. ⁷ Niquintatzacuilitis por inijuanti inintajtacolhua huan por nochi tajtacoli cati quichijque inihuejcapan tatahua. Inijuanti quitatijtoque copali para tetyeome ipan nochi tepeme huan tachiquilme para techixpanose. Yeca niquintaxtahuis por nochi cati quichijtoque.” Quej nopa quíijto TOTECHO.

⁸ Huan nojqúia TOTECHO quíijtohua: “Quema masehualme quitequij se quechti xocomecat itajca, huan quíitaj para quípiya se ome cati cuajcuali, huajca quíijtohuaj: ‘Amo xijtahuisoca nochi pampa quípiya se ome cati cuajcuali.’ Quej nopa nojqúia nijchihuas ica nomasehualhua pampa tahuel niquínicnelía. Amo niquintzontamilitis nochi israelítame pampa nopona inihuaya itztoque sequij cati temachti techtequipanohuaj huan niquinmaquixtis. ⁹ Na nijchihuas ma mocahuaca itztoque se quesqui israelítame * para ma moaxcatica nopa tali Israel. Quena, moaxcatisé inijuanti cati na niquintapejpenijtoc huan nopona techtequipanose. ¹⁰ Huan nochi nomasehualhua cati techtemojtoque, sempa quínpiyase inintapiyalhua. Sempa quitemitise nopa tamayamit Sarón ica borregoime. Huan nopa tamayamit Acór elis se lugar campa quintzacuase inihuacaxhua.

¹¹ “Pero miyac amojuanti antechtahuelcajtoque na, niamoTECHO huan anquítahuelcajtoque notepe cati tatzejtzelolitic, huan anquítalijtoque mesa para anquínhueyichihuaj sequinoc tetyeome quej cati inintoca Gad huan Mení. ¹² Huajca na nimechtemactilis para anmíquise ica macheta. Anmotancuaquetzase para amechquechtzontequise pampa quema nimechnojnotzqui, amo antechnanquilijque, huan quema nimechcamanalhui, amo anquínejque antechtacaquilise. San anquichihuayayaj miyac tamanti cati amo cuali masque nimechtachilijtoc. Huan anquítapejpeniyayaj anquichihuase tamanti cati anquimatiyayaj para na tahuel techcualancamaca.”

¹³ Yeca ama niamoTECHO Cati Más Nijpiya Tanahuatili quej ni niquíjtohua: “Amojuanti anmíquise ica mayanti, pero notequipanojcahua quípiyase inintacualis hasta mocahuas. Nojqúia quípiyase miyac at para quíise, pero amojuanti anamíquise huan amo anquípantise at. Amojuanti anquípiyase tequipacholi huan pinahualisti, pero inijuanti quípiyase paquilisti. ¹⁴ Nojqúia notequipanojcahua huicase ica paquilisti, pero amojuanti anchocase huan tahuel anmotequipachose pampa ayecmo teno huelis anquichihuase. ¹⁵ Huan ica amotoca tetelchihuase nepa campa nomasehualhua pampa na niamoTECHO Cati Más Nijpiya Tanahuatili nimechmictis, pero notequipanojcahua cati temachme niquínmacas seyoc inintocaj.

¹⁶ “Huan ipan nopa tonali quema masehualme quínequise quitajtanise se tatióchihualisti para químacase seyoc, techtajtanise niamoTeco Dios cati nitemachti. O quema quínequise quítestigojquetzase se tamanti, tates-tigojquetzase ica na notoca pampa na ayecmo nicualanis inihuaya. Huan níquelcahuas nochi nopa tajtacoli huan taixpanoli cati quichijque achtohuía.

Tatióchihuali para israelítame teipa

* 65:9 65:9 O iixhuihua Jacob.

¹⁷ “Xiquitaca, na nijchijchihuas se yancuic ilhuicacti huan se yancuic taltipacti. Elise tahuel yejyetzitzi hasta amo aqui moilhuis ten nopa ilhuicacti huan taltipacti cati eltoya. ¹⁸ Huajca ximopaquilismacaca huan xiyoipaquica para nochipa por cati nijchihuas, pampa na sempa nijchijchihuas altepet Jerusalén huan sempa elis se lugar campá senquisa oncas paquilisti huan nopa masehualme senquisa yolpaquise. ¹⁹ Huan na nojquiya nimopaquilismacas ipan altepet Jerusalén huan ipan nomasehualhua. Huan ayecmo quema oncas choquisti, yon taijyohuilisti.

²⁰ “Nozona ayecmo quema miqoise conetzitzi cati sanoc ontacatij. Huan nochi cati quiaxitiytose cien xihuit, ayecmo quinitase quej huehuentzitzitzi. Pero inijuanti cati tajtacolchihuaj, quena, inijuanti miqoise quema ayemo quipiyaj miyac xihuit, pampa elise tatechihualme. ²¹ Ipan nopa tonali, quema se tacat quichijchihuas ichaj, yaya itztos ipan ichaj para nochipa, pampa ayecmo hualase soldados cati tasojsolohuaj quej achtohuiya. Nojquiya nomasehualhua quitocase xomeca mili, huan inijuanti quicuase itajca. ²² Ayecmo quichijchihuase ininchaj para ipan itztos seyoc, yon ayecmo quifocase xomecat para sequinoc quicuase. Ayecmo hualase inincualancaitacahua para quintacuijcuilise. Pampa nochi nomasehualhua quipiyase se nemilisti cati tahuel huehuyac quej nopa cuame cati más quipiyaj chicalualisti. Huan inijuanti quipiyase nopa paquilisti para quitequihuse nochi cati quipiyaj por inintequi. ²³ Amo tequitise para tacuase inincualancaitacahua. Huan ininconeua ayecmo tacatise para sequinoc tali ehuan quinmictise. Pampa na niininTECO niquintiochihuas nochi nopa masehualme. Huan ininconeua nojquiya elise tatiochihualme. ²⁴ Huan na niqunnanquilis nomasehualhua hasta quema noja ayemo techzajtziñaj. Huan quema inijuanti noja techpohuilñaj cati ten ica panose, na ya niqunmacatos cati techajtaniñaj. ²⁵ Huan nopa tepechichime huan nopa pilborregojtitzitzi tacuase san sejco. Huan leones quicuase sacat quej se huacax. Huan cohame quicuase taltepocti huan ayecmo tecocose. Huan ipan nopa tonali ayecmo teno oncas cati tecocos o tasolos ipan notepe cati tatzejtzeltic.” Quej ni niquijtohua na niamoTECO.

66

Thueyitilis TOTECO

¹ Quej ni quijtohua TOTECO: “Ilhuicacti eltoc quej nosiya campá nimosehua para nitanahuatis, huan ni taltipacti eltoc campá niqunsiyajquetza noicxihua. Huajca ¿quenicatza huelis antechihuilise se tiopamit para ipan niitztos huan nimosiyajquetza cati cuali quej nopa? ² Ica nomax nijchijchijqui nochi taltipacti huan ilhuicacti huan inijuanti noaxcahua. Quej nopa niamoTECO niquijtohua.

“Niquintasoja nopa masehualme cati moechapantaliñaj huan amo mohueyimatiñaj ipan iniyolo, huan cati huihuipicaj quema quicaquij nocamanal.

³ “Pero nelia teicneltique nochi cati quitoquilñaj nopa ojti cati inijuanti quinpactia huan mopaquilismacaj ica tajtocoli pampa inijuanti tatechihualme. Amo nijselis inintacajchualis. Quema tajtacolchijca masehualme quimictiñaj se toro ipan notaixpa niamoTECO, techcualancamaca quej quimictisquiñaj se masehuali. Quema quimictiñaj se borrego o quihualicaj se tacajchualisti ten harina, techcualancamaca quej quimictisquiñaj se chichi o quitencahuasquiñaj ieso se pitzot ipan notaixpa. Huan quema quitatiñaj copali, niquita para eltoc fiero quej quihueyichihuasquiñaj se teteyot. ⁴ Huajca na niquntitanilis miyac tamanti taijyohuilisti. Quena, niquntitanilis nochi

cati injuanti quimacasiyayaj. Pampa quema niqinnojnnotzqui, amo technanquilijque. Huan quema niquincamanahui, amo quinejque techta-caquilise. San noixpa quisenhuiquilijque quichijque cati amo cuali. Quena, ica ininpaquilis quitapejpenijque quichihuase miyac tamanti cati na amo nijnequi niqitas.”

TOTECO quincuepaltis imasehualhua ipan inintal

⁵ Nochi amojuanti cati anquimacasiy huan anquitepanitaj icamanal TOTECO, xijtacaquilica cati yaya quijtohua: “Masque amoicnihua amechcualancaitaj huan amechhuejcamajcahuaj pampa antechneltoaj, teipa injuanti pinahuase. Masque tahuel amechhuihuiitaj huan quijtohua: ‘Anhuihuitique pampa anquihueyichihuaq TOTECO huan anmopaquilismacaj ipan ya,’ teipa nochi injuanti itztose ipan pinahualisti.

⁶ ¿Taya onca nopa cati caquisti ipan ni altepet Jerusalén? ¿Ajquiya itoscac nopa tosti cati temajmatia cati quisa ipan tiopamit? Ya nopa notoscac niamoTECO cati nimomacuepa ica nocualancaitacahua huan niquintaxtahúa quej quinamiqui ica nochi cati fiero quichijtoque.

⁷ “San se talojtzi más taijyohuise Jerusalén ehuan. Eltoc quej ipilcone se sihuat nimantzi tacati quema ayemo pehua chicahuac nopa tacuajcualoli.

⁸ ¿Ajquiya quicactoc se hueyi tamanti quej ni? ¿Ajquiya quiitztoc se tamanti quej ni? ¿Anmoilhuiaj para san ipan se tonali pejtoc se hueyi tanahuatijcayot ipan se tali ica ten ya itanahuatijca? Pero quena, quej nopa elis. Quema Jerusalén sanoc pehuas taijyohuis, ipan san se talojtzi mochihuas se hueyi tanahuatijcayot nozona ipan tali Israel ica miyac imasehualhua cati quitepanitase san se inintanahuatijca. ⁹ ¿Anmoilhuiaj para na niquincual-talisquía miyac masehualme para mochihuase se hueyi tanahuatijcayot ica inintal huan se inintanahuatijca, huan teipa amo nijcahuilis ma elica? ¡Amo, amo nijchihuas! Quej ni quijtohua TOTECO cati nimoDios.

¹⁰ “Xiyolpaquica inihuaya Jerusalén ehuan nochi amojuanti cati anquicneliaj nopa altepet. Xipaquica ihuaya nochi amojuanti cati achtohuiya anmotequipachohuayayaj por ya. ¹¹ Ximopaquilismacaca ipan Jerusalén. Xipaquica por ya quej se acajya paqui por se conet cati noja chichi hasta cuali ixhuis. ¹² Na nijchihuas para cati itztoque ipan altepet Jerusalén ma quipiyaca miyac tasehuilisti. Elis quej se hueyat. Huan iniricojyo nopa masehualme cati amo israelitame ajsis ipan nopa altepet quej miyac at cati huetzi chicahuac huan amo moquetza. Huan nijmocuitahuis Jerusalén huan imasehualhua quej se sihuat cati quichichitia icone, quitalia imaco huan quinajnahua pampa tahuel quicnelia. ¹³ Huan nozona ipan altepet Jerusalén niqinyoltalis nomasehualhua quej se tenantzi quiyoltalia ipilcone.”

¹⁴ Huan quema anquiritase para nochi ni tamanti pano ipan altepet Jerusalén, tahuel anpaquise ipan amoyolo. Huan amotacayohua quipiyase yancuic chicahualisti. Huan nochi masehualme quiritase para TOTECO quinpalehua imasehualhua ica miyac chicahualisti. Huan nojquiya quiritase ihueyi cualancayo cati quinextis ica icualancaitacahua.

¹⁵ Xiquitaca, TOTECO hualas ica tit huan ica tatehuijca carrojme cati motalohuaj chicahuac para tetatzacuiltiqui. Quihualicas tatzacuiltili huan tit cati quinajsis masehualme ica nochi icualancayo. ¹⁶ Nochi masehualme cati quihuicaj tajtacoli iixpa, TOTECO quintatzacuiltiqui ica tit huan ica macheta, huan miyac miqoise imaco.

¹⁷ TOTECO quijtohua: “Pero niquintamiixpolihuiltis ica san se huelta nopa masehualme cati quijtohua motapajpacchihuaq pero quichihuaq para

quinhueyichihuase teteyome iica cuame ipan xochi mili. Huan quicuj ini-nacayo pitzome, quimichime huan nochi tamanti nacat cati amo tapajpactic noixpa.” Quej nopa quijjtohua TOTECO.

¹⁸ Huan TOTECO quijjtohua: “Pampa na niqiztoc nochi cati injuanti quichihuaq huan nijmati nochi cati monejnehuilaj. Yeca na nihualas para niqinsentilis nopa masehualme ten nochi talme huan cati camanaltij nochi tamanti camanali. Huan niqinhualicas para ma quitehuica altepet Jerusalén, huan nozona quitase nohueyitilis huan nohueyi chicahualis.

¹⁹ Na niqinmacas masehualme se tanextili huan cati teipa noja mocahuase yoltoque niqintitanis quej notayolmelajcahua ipan talme campa hueli ipan taltipacti. Yase hasta Tarsis, Fut huan Lidia campa itztoque nopa masehualme cati tahuel quiixmatij quitequihuaj cuahuitoli. Nojquiya niqintitanis ipan Tubal, Javán, huan ipan nopa talme cati mopantaj huejca campa amo quema quicactoque ten na huan campa amo quema quiiztoque nohueyitilis. Huan injuanti yase ipan nochi talme para tepohuiltij ten na nohueyitilis huan nochichualis. ²⁰ Huan injuanti quinhualicase nochi amoicnihua cati itztoque ipan campa hueli talme huan quinhualicase quej se nemacti para na niamoteco. Quinhualicase ipan cahuyos, ipan carros, ipan tapechti, ipan mulas huan ipan camellos hasta quinaxitiquij ipan notepe tatzejtzeltic cati eltoc ipan altepet Jerusalén. Huan injuanti elise quej se tacajchualisti ten harina cati israelitame quihualicaj ipan notiopa niamoteco ipan vasos cati tatzejtzeltique.” Quej nopa niamoteco niqijtohua. ²¹ “Huan seqij ten injuanti cati tacuepilise, niqintequitalis quej totajtzitzi huan levitame. Quej nopa niinoteco niqijtohua.”

²² Nojquiya quijjto: “Huan quej nopa yancuic ilhuicacti huan taltipacti cati nijchijchihuas mocahuas para nochipa, quej nopa nojquiya para nochipa anmocahuase annomasehualhua amojuanti huan amoixhuihua. Huan nochi amechixmatise para nochipa. ²³ Huan masehualme ten nochi talme hualase ipan sese tonali para mosiyajquetzase huan ipan sese ilhuit para yancuic metzi huan motancaquetzase noixpa huan techhueyichihuase. Quej nopa niamoteco niqijtohua. ²⁴ Huan quema quisase noaltepe quiitase inintacayohua nopa masehualme cati mosisinijque ica na. Huan nopa oculilime cati quicuae inintacayohua amo quema miquise. Huan nopa tit cati quintatis amo quema sehuis. Huan nelia quintaijiyaltise nochi masehualme ipan nochi taltipacti.”

Jeremías

Cati quiپییا ni amatapohuali

¹ Ni amatapohuali quiپییا nopa camanali ten Jeremías, icone Hilcías. Jeremías elqui se ten nopa totajtzitzi ipan altepet Anatot ipan tali Benjamín. ² TOTECO achtohui quinojnotzqui Jeremías huan quimacac icamanal para tayolmelahuas quema Josías, icone Amón, yahuiyaya para majtacti huan eyi xihuit para tanahuatis ipan tali Judá. ³ Huan teipa TOTECO quisehuiuili quimacac camanali miyac huelta quema Joacim, icone Josías, elqui tanahuatijquet ipan tali Judá huan hasta quema Sedequías, cati nojquiya icone Josías, quiaxiti itamiya nopa majtacti huan se xihuit ipan itequi quej tanahuatijquet. Elqui ipan nopa xihuit quema ajsicoj tocalanacaitacahua ipan nopa metzti macuili ipan tocalendario israelita* huan quiyahualojque altepet Jerusalén huan quinhuicaque Jerusalén ehuan ilpitoque para tetequipanotij ipan seycot tali.

TOTECO quitequimacac Jeremías

⁴ TOTECO technojnotzqui huan techmacac ni camanali, techilhui: ⁵ “Na nimitzximatqui hasta quema ayemo nimitzchijchijtoya ipan iijti monana. Huan quema ayemo titacatiyaya, nimitztapejpeni huan nimitziyocatali para titayolmelahuas ten na ica masehualme cati ehuan nochi talme ipan nochi taltipacti.”

⁶ Huan na nijnanquili: “¡Ay, TOTECO ta Cati Más Tijpiya Tanahuatili, amo huelis nicamanaltis para ta pampa tahuel niconetelpocat!”

⁷ Pero TOTECO techilhui: “Amo xiqujto para sanoc tieli se titelpocat, pampa ta tiyas campa na nimitztitanis huan tiquijtos nochi cati na nimitznahuatis. ⁸ Amo xiquinimacasi nopa masehualme pampa na, nimoTECO, niitstos mohuaya para nimitzmanahuis.”

⁹ Huajca TOTECO quixitajqui imax huan quiajsic nocamac huan techilhui: “Xiquita, na nimitztalilijtoc nocamanal ipan mocamac. ¹⁰ Huan ama nimitztequimacatoc para tijpiyas tanahuatili ica tanahuatiani huan inintanahuatijcayo para tiquijtos taya ininpantis. Sequij tiquinqixtis ten campa itztoque huan tiquintzontamiltis. Sequij tanahuatijcayot tiquinsosolos huan tiquintahuisos. Huan sequij tiquintananas huan tijchihuas ma mohueyichihuaca.”

¹¹ Teipa TOTECO sempa technojnotzqui huan techilhui: “Jeremías, ¿taya tiquita?”

Huan na niquilhui: “Niquita se imacuayo nopa cuahuit cati itoca almen-dro.”

¹² Huan TOTECO techilhui: “Quena, ya nopa quinegui quuijtos para nitachixtoc huan melahuac nitetatzacuultis senquisa quej niquijtohua.”

¹³ Teipa TOTECO ica ompa techtatzintoquili: “¿Taya tiquita ama?”

Huan na niquilhui: “Niquita se chachapali ica at cati molontoc huan motalijtoc ten norte para toyahuis ica tani.”

¹⁴ Huan TOTECO techilhui: “Nimantzi quisas cati fiero huan tahuel temajmati ten nopa talme ica norte huan quinajsis nochi masehualme cati itztoque ipan ni tali Judá. ¹⁵ Quena, na niquinnotzas nochi nopa tanahuatiani huan inisoldados ten nopa talme cati mocahuaj ica norfe para ma

* 1:3 1:3 Ipan agosto o septiembre 586 a.C. ipan tocalendario ten ama.

hualaca. Mosehuiquij ipan inisiyas yejyetzzi para tanahuatise campa nopa caltemit ipan nopa tepamit cati quiyahualohua altepet Jerusalén huan ma quitehuica. Nopa soldados ma quiyahualoquij itepa ni altepet huan ma pehua quicoyonica. Nojquiya ma quintehuica nochi nopa sequinoc altepeme ten tali Judá. ¹⁶ Quej nopa niquintazacuiltis nomasehualhua pampa techtahucajqe. Quinhueyichijque huan quinmacaque tacajchualisti nopa teteyome cati inijuanti quinchijchijque ica inimax. ¹⁷ Pero ta, Jeremías, ximoquetza, ximocualtali huan xiya xiquinilhuiti masehualme nochi cati na nimitznahuatis. Amo xiquinimacasi, pampa sinta timajmahuis, huajca na nimitzpinahualtis iniixpa. ¹⁸ Xiquita, ama ni tonali na nimitzchihuas titetic para amo aqui huelis mitztanis. Nimitzchihuas titemachti quej se altepet cati moyahualojtoc ica tepamit cati tilahuac huan yeca amo aqui hueli quitzquía. O nimitzchihuas quej se taquetzali o se tepamit ten nopa teposti bronze cati amo aqui hueli quixitinis, pampa amo aqui huelis mitzchihuilis se tamanti cati fiero. Huan amo huelis mitztanis yon se ten nopa tanahuatiani ten tali Judá, yon inintayacanhua, yon inintotajtzitzi, yon inimasehualhua. ¹⁹ Inijuanti mitztehuise, pero amo huelise mitztanise pampa na niitztos mohuaya para nimitzmanahuis. Quej nopa na nimoTECO niqijtohua.”

2

Israelitame ipan Judá quitahucajqe TOTECO

¹ Huan TOTECO sempa nechcamanalhui huan techilhui: ² “Xiya huan xitayolmelahuati chichahuac ni camanali ipan calles ipan altepet Jerusalén para nochi ma quicaquica. Xiquinilhuiti israelitame: ‘Ya ni cati niamoTECO niqijtohua: Na niquelnamiqí para huecajquiya amojuanti tahuel anquinequiyayaj antechpaquilismacase quej se ichpocat quinequi quipaquilismacas nopa telpocat cati quicuitoc. Nojquiya niquelnamiqí quenicatza antechicneliyayaj huan antechtoquiliyayaj ipan nopa huactoc tali campa amo teno eli.’ ³ Ipan nopa tonali israelitame eliyayaj tatzejtzelotique huan taiyocatalilme san para na. Quej se achtohui ejquet cati más quiselis tatiochihualisti ten itata, israelitame itztoque nopa masehualme cati más niquinmacatoc tatiochihualisti ten sequinoc tali ehuaní. Huan nochi cati quintaijyohuiltiyayaj israelitame, niqunitayaya para quihuicayayaj tajtocoli huan niquintazacuiltiyaya chichahuac. Na niamoTECO nimechilhúa ya ni.”

⁴ Xijtacaquilica cati TOTECO quijtohua, nochi amojuanti anisraelita masehualme*. ⁵ TOTECO quijtohua: “¿Taya tajtocoli quipantijque ipan na amohuejcapan tatahua cati quinchihualti ma techtahucahuaca? ¿Para ten tahuel huejca nechcajqe? Inijuanti quinhueyichijque teteyome cati amo teno ininpati, cati san masehualme huilhuitique quinhueyichihua. Huan yeca mohuihuichijque iniselti. ⁶ Inijuanti amo techtemojque. Amo quijtojqe: ‘¿Canque itztoq TOTECO cati techquixti ipan tali Egipto ica cuali huan techyacanqui ipan nopa huactoc tali campa amo teno eli? Techyacanqui campa tepexonqui campa amo onca at huan campa tahuel tafiero huan mahuilili. Nopona campa amo aquí itztoya huan campa amo aquí pano, techyacanqui huan tipanoque cuali.’

⁷ “Quena, na niquinhualicac amohuejcapan tatahua nochi nopa ojti hasta niquincalaqui ipan se tali cati tahuel taeliltía para ma quicuaca nochi cati nopona eli. Pero inijuanti hualajque huan quisoquihuijqe notal ica

* 2:4 2:4 O ichaj Jacob.

nochi tamanti tajtacoli. Huan quej nopa quichijque notal amo tapajpactic noixpa. ⁸ Hasta nopa totajtzitzi nojquiya amo mocuesojque por na, yon amo techtemojque. Nopa tamachtiani ten notanahuatilhua quichijque quej amo techixmatiyayaj. Nopa tayacanani mosisinijque ica na. Huan nopa tajtolpanextiani quihueyichijque nopa teteyot Baal, huan tayolmelajque ipan ya itoca ten tamanti moilhuyayaj para hualas teipa. San motonalpolojque ica teteyome cati amo aqui quinpalahuaj.

⁹ “Yeca na niquixnextis amotajtacolhua iniixpa nochi huan nijsenhuiquilis nimechtatelhuis. Nimechtatelhuis amojuanti, huan amoconehua huan amoixhuihua cati tacatiyase teipa pampa antechtahuclajtoque quej amohuejcapan tatahua. ¹⁰ Xitachiyaca yahualtic huan xiquitaca sinta anquipantise se tamanti quej ni. Masque se tachiyas hasta occidental campa nopa piltaltzitzitzi cati mopantiaj ipan hueyi at o masque anquititanise se para yas hasta tali Cedar, amo oncas yon se lugar quej ni. ¹¹ Xiquitaca sinta onca seyoc tali campa quinpatatoque inindioses cati quinixmatiyayaj hasta huejcajquiya ica sequinoc cati yancuigue. Amo aqui quinpata idioses masque nopa teteyome amo teno ininpati. Pero nomasehualhua techtahuclajtoque na niiniDios cati nieliyaya niiniyejca para quinhueyichihuase teteyome cati amo teno ininpati. ¹² Cati itztoque ipan ilhuicac momajmatijque por ni hueyi tamanti. Pejque huihuipicaj ica majmajti quema quitaque. Quej nopa na, niamoTECO, niqijtohua.

¹³ “Nomasehualhua quichijtoque ome tamanti cati amo cuali. Achtohui techtahuclajque na cati niitztoc quej at cati temaca nemilisti. Huan teipa inijuanti mochijchihuilijque piletas cati amo huelis quitequihuse para quejcase at pampa cocoyocatoc.

¹⁴ “¿Para ten anisraelitame anmocuetoque antetequipanohuani? Quema anquipehualtijque anmochihuaj se hueyi altepet ten masehualme, amo antetequipanohuayayaj. Huajca, ¿para ten amechilpise huan amechhuicase huejca ipan seyoc tali para antetequipanotij san topic? ¹⁵ Na niquinita miyac soldados cati hualahui para quitehuse altepet Jerusalén. Nanalcatihualahui quej leones para quintamitahuisose huan quintamisosolose nochi nopa altepeme ipan tali Judá. Nojquiya quintatise huan ayecmo aqui mocahuas nozona. ¹⁶ Niquita motananaj nopa soldados ten tali Egipto para quitehuse Jerusalén. Nochi cati ehuan nozona ipan altepet Menfis huan Tafnes hualahui para quixpolihuiltise amohueyitilis huan amochicahualis anisraelitame. ¹⁷ Pero nochi ya ni panos pampa antechtahuclajque na, niamoTECO Dios, quema nijnequiyaya nimechyacanas huan nimechnextilis noojhui. ¹⁸ ¿Taya anquitantoque ica nopa camanali cati anquisenajque ica nopa egiptome huan nopa asirios? ¹⁹ Amotajtacolhua quichihuas para xijselica tatzacuilti. Huan huajca anquimachilise para nelia elqui fiero para anmosisinijque ica na niamoTECO Dios huan antechtahuclajque. Amojuanti yon amo antechimacasque. Quej nopa niqijtohua, niamoTECO Cati Niquinyacana Noilhucac Ejcahua Ma Tatanitij.

Israelitame mosisinijque ica TOTECO

²⁰ “Huejcajquiya quema antetequipanohuayayaj ipan tali Egipto, nimechmaquixti huan nimechcotonili nopa cadenas cati ica amechilpitoyaj, pero amojuanti anmosisinijque ica na huan antechhuejcamajajque. Anquijtoque: ‘Amo tijtequipanose TOTECO.’ Huan amo anquinejque antechtepanitase. Huan ipan nochi tepeme huan tatzinta ten sesen cuahuit anmotancuaquetzque iniixpa teteyome huan anquinhueyichijque. Anitztoque quej se ahuilnenca sihuat cati quicahua ihuehue para itztos ica cati huclitacat.

21 ¿Para ten panoc ya ni? ¿Quenicatza elqui? Quema nimechchijqui para anelise se altepet ten masehualme, nijchijqui quej se cati quitoca se xomeca mili. Nijtapejpeni nopa xinacti cati más cuajcualtzi. Pero ama anmochijtoque masehualme cati tahuel fierojtique. 22 Huan masque anmopajpacasquía ica xapo cati nelía cuali, amo quema ixpolihuis nopa mancha ten amotajacolhua. Pampa anquihuicaj tajtacoli cati amo quema huelis ixpolihuis. Quena, eltos noixpa para nochipa. Quej nopa niqijtohua niDIOS Cati Más Nijpiya Tanahuatili. 23 Huajca ¿quenicatza huelis anquijitose para amo anmosoquihuijtoque huan amo anquinhueyichijtoque teteyome? Xiyaca huan xiquitatij nochí nopa tamayamit campa hueli. Ipan sesen nopa tamayamit anquichijtoque tajtacoli cati tahuel huejhueyi. Anitztoque quej se sihua camello cati motalojtinemi campa hueli para quipantis se camello cati oquichti. 24 Anitztoque quej se sihua burro cati nemi cuatita huan taijnectinemi pampa quimonequilía para quipantis se oquich burro. ¿Ajquiya huelis amechtacuulis para amo xijchihuaca ten hueli? Ten hueli oquich burro cati quinequis nopa sihua burro, amo monequi quitemojtinemis, pampa ya iseltitzi yas campa ya itztoc. Quej nopa anitztoque huan quej nopa anquintemohuaj amoteteyohua.

25 “¿Para ten amo anquintahuelcahuaj nopa teteyome? Inijuanti amo amechpalehuise. Pero anisraelitame anquijitohuaj: ‘Amo teno tijnequij techilhuis pampa tojuanti tahuel tiquinixtocaj huan tiquinicnelíaj ininteteyohua nopa sequinoc talme. Huajca amo hueli tiquintahuelcahuase.’

Israelitame quinamiqui quiselise tatzacuiliti

26 “Quej se tachtejquet pinahua quema quipantíaj quichitectoc se tenijqui, quej nopa nojquiya anpinahuase anisraelitame. Huan nojquiya pinahuase nochí israelita tanahuatiani, tayacanani, totajtzitzi huan tajtolpanextiani. 27 Anquillhuíaj se teteyot cati tachijchihuali ica cuahuit: ‘Ta tinotata.’ Huan se teteyot ten tet anquillhuíaj: ‘Ta tinonana.’ Pero quema huala amopani se taijyohuulisti, nimantzi antechtaztzilíaj na para ma nimechmanahui. 28 Nimechtajtani quema huala cati ohui, ¿para ten amo anquintaztzilíaj nopa teteyome cati amojuanti anquichijchijtoque para ma amechmanahuica sinta huelij? Amojuanti anquinpiyaj teteyome quej imiyaca nopa altepeme cati onca ipan ni tali Judá. 29 ¿Para ten antechtajilhúaj na? Elque amojuanti cati tahuel anmosisijque noixpa. Quej nopa niqijtohua na niDIOS. 30 Na niqintatzacuiliti amoconehua, pero san tapic pampa amo quinpalehui para moxitahuase. Quejipa amo quinequij tatepanitase. Huan amojuanti anquinmictijtoque amotajtolpanextijcahua cati nimechtitanili. Anquinchihuilijque quej se león cati quimictía seyoc tapiyali para quicuas.

31 “Ay annomasehualhua cati ama anitztoque, xijtacaquilica nocamanal niDIOS. ¿Amo nimechchihuilijtoc cati xitahuac? ¿Antechitaj nieltoc quej se tali campa amo teno eli, o se tali campa san onca tzintayohuilot? Huajca, ¿para ten annomasehualhua anquijitohuaj: ‘Tojuanti ayecmo tiitzoque imaco TOTECO huan ayecmo quema timocuepase ica ya?’ 32 ¿Para ten quej nopa anquichihuaj ica na? ¿Huelis se ichpocat quielcahuas nopa cati ica moyectalia quema monamictía? O ¿quielcahuas canque quitali iyoyo? Pero ica nomasehualhua, quena. Para miyac xihuit antechelcajtoque na cati más ipati para amojuanti.

33 “Anisraelitame, tahuel anquixmatij ica taya anquinyoltilanase amomecagua. Hasta nopa ahuilnenca sihuame cati más talnamiquij noja huelij quiyecohuaj miyac tamanti ten amojuanti pampa amojuanti más

anquimatij. ³⁴ Nochi amoyoyo anquisoquihuijtoque ica inieso masehualme cati teicneltzitz huan cati amo teno quichijtoque. Anquinmictijque masque amo amechixpanoque. ³⁵ Pero masque anquichijtoque cati fiero, amojuanti anquijtohuaj: ‘Tojuanti amo teno tijchijtoque. TOTECO amo huelis cualantos ica tojuanti ica yon se tamanti.’ Huan anquijtohuaj: ‘Amo titajtacolchijtoque yon quentzi.’ Huajca pampa anquijtohuaj amo antajtacolchijque, nimechtatelhuis huan nimechtatzacuiltis chicahuac.

³⁶ “Amojuanti san anنتينemij nica huan neca para campa hueli anquitemojtinemij ajquiya amechpalehuis, pero san tapic. Nopa tali Egipto ehuan amechtahuelcahuase huan amechpinahualtise san se quej achtohuiya amechchihuilijque nopa tali Asiria ehuan. ³⁷ Huan ten tali Egipto anhualase ica pinahualisti huan ica amomax ipan amoxayac quema sequinoc amehyacantiyase ipan seyoc tali para antetequipantij. Pampa niqinhuejcamajajtoc nopa Egipto ehuan cati ipan anmotemachiyayaj huan amo quisas cuali para amojuanti masque inijuanti amechpalehuisquiáj.”

3

Israelitame tahuel quiixpanotoque TOTECO

¹ TOTECO quiijtohua: “Onca se tanahuatili cati quiijtohua sinta se tacat quicahua isihua huan nopa sihuat monamictis ihuaya seyoc tacat, huajca teipa nopa sihuat ayecmo huelis mosejcotilis ica cati achtohui ihuehue pampa ya nopa se hueyi taixpanoli. Pero masque anisraelitame cati aneliyayaj quej nosihua antechtahuelcajtoque huan anmosejcotilijtoque ica miyac amomecahua, na nimechtajtanijtoc miyac huelta para ximocuepaca ica na. Quej nopa niamoTECO niqijtohua.

² “Ximotajtachilica huan xiquitaca sinta anquipantise ipan nochi amoojhui se lugar campa amo antechixpanotoque huan anquinhueyichijtoque teteyome. Anquintemohuaj teteyome para anquinhueyichihuase quej se ahuilnenca sihuat ten tali Arabia mosehua ipan ojti ipan nopa huactoc tali huan quitemohua ajquiya ihuaya itzto. Anquichijtoque cati fiero iniixpa teteyome campa hueli huan anquinenpolojtoque nochi ni tali. ³ Huan yeca ayecmo huetzis at quema antatojtocase pampa anquichijtoque quej se ahuilnenca sihuat cati amo pinahua huan tahuel antechixpanotoque. ⁴ Pero masque anquichihuaj ya nopa, antechilhuáj: ‘Ta tiTotata. Nochipa timochijtoc titonelhuampo huan techyacantoc hasta huejcajquiya. ⁵ Huajca temacht amo ticualantos ica tojuanti. Huan nojquiya timotemachíaj para tiquelcahuas totajtacolhua.’ Ya nopa anquijtohuaj pero anquisehuiquilíaj anquichihuaj tamanti cati amo cuali.”

TOTECO quinilhuía israelitame ma moyolcuepaca

⁶ TOTECO technojnotzqui quema tanahuatiyaya Josías huan techilhui: “¿Tiquitztoc taya quichihuaj nopa israelitame ipan tali Israel ica norte? Quej se ahuilnenca sihuat talojtitziti motemactilia ica seyoc tacat, quej nopa israelitame quinhueyichijtinence teteyome ipan campa hueli tepeme huan itantita sesen cuahuit. ⁷ Nimoilhui para teipa quema ya quichijtoyaj nochi ya nopa, nopa israelitame sempa mocuetosquiáj ica na huan sempa eltosquiáj noaxcahua, pero amo. Huan iniisraelita icnihua cati itztoque ipan tali Judá quiitaque nochi cati quichijque, pero amo mocuetque ica na. ⁸ Inijuanti quiitaque quenecatza niqintahuelcajqui nopa israelitame ipan tali Israel. Nijchijqui quej se tacat moamasosolo ihuaya isihua cati momecatía. Pero masque israelitame ipan tali Judá quiitaque nochi ya nopa, amo moyolilhuijque, yon amo quichihuilijque cuenta. Huan ama nopa

israelitame ipan tali Judá nojquiya techtahuclajtoque para quintoquilise teteyome. Motemactilijtoque para quinhueyichihuase teteyome quej se sihuat motemactilia ipan ahuilnencayot. ⁹ Israelitame ipan tali Israel moilhujque amo teno quichihuilía sinta quinhueyichihuase teteyome ten tet huan cuahuit. Huan yeca nopa tali mocajqui nempolijtoc huan mahuispolijtoc. ¹⁰ Pero masque israelitame ipan tali Judá quitaque taya panoc ica iniicnihua ipan tali Israel ica norte, quichijque quej amo quitaayaya. Huan Judá ehuan amo nelía moyolcuetque ica nochi iniyolo, san nechcayajque. Quej nopa niininTECO niqijtohua.”

¹¹ Huan TOTECO techilhui: “Huan ama nesi para nopa israelitame ipan tali Israel ica norte cati techtahuclajque, quipiyaj pilquenzi tajtacoli, pero israelitame cati tali Judá ehuan, huejhueyi tajtacoli quichijtoque pampa mochijque quej noaxcahua, pero san nechcayahuayaya. ¹² Huajca ama xiya huan quej ni xiquinyolmelahuati nopa israelitame ipan tali Israel ica norte. Xiquinilhuiti: ‘Antajacolchijca israelitame cati ayecmo antechneltoaj, ximocuepaca ica na, pampa na tahuel nitetasojta. Amo nicualanis ica amojuanti para nochipa. Quej nopa niamoTECO niqijtohua. ¹³ Ximoilhuaica ten nochi nopa tajtacoli cati anquihuicaj noixpa na niamoTECO Dios huan techpohuilica nochi nopa tajtacoli cati anquichijtoque. Xiquijtoja para melahuac antechixpanoque huan anquinhueyichijtoque teteyome itantita sesen cuahuit. Nojquiya techilhuaica xitahuac quenicatza amo anquinequiyaya antechtoquilise, yon amo anquichihuayaya cati nimechnahuati xijchihuaca. Quej ni niamoTECO niqijtohua.’ ”

¹⁴ Huan TOTECO quijto: “Huajca amojuanti, annoconehua cati anmosisinaj ximoyolcuepaca, pampa na niamoTeco. Se ten amojuanti nijcuis nica huan ome neca hasta nimechtamiquixtis ten nochi talme campa nimechsemanoc. ¹⁵ Huan nimechmacas tayacanani cati amechmocuitahuise quej na techyolpactia huan amechyacanase ica miyac talnamiquilisti huan ica cuali.

¹⁶ “Huan quema amotal sempa temitos ica masehualme, ayecmo anmotequipachose por nopa cuali tonali cati panoque huejcajquiya quema anquixtoyaj nocaxa niamoTECO cati quipiyaya notanahuatilhua. Ayecmo anquinequise nopa tonali, yon ayecmo anquielnamiquise. Huan amo monquis quichijchihuase seyoc caxa pampa na noseltitzi niitztos amohuaya. ¹⁷ Huan ipan nopa tonali quitocaxtise altepet Jerusalén: ‘Altepet Campa Mosehuía TOTECO Para Tanahuatís.’ Huan masehualme cati ehuan nochi talme hualase ipan Jerusalén huan ayecmo quichihuase cati inifero yolo quipactia ma quichihuaca.

¹⁸ “Huan ipan nopa tonali nopa masehualme ten tali Judá huan tali Israel mocuepase sentic ten nopa tali ica norte campa tetequipanohuayaya. Huan hualase ipan ni tali cati na niquinmacac inihuejcapan tatahua para ma moaxcatia para nochipa.

Inintajacol israelitame

¹⁹ “Niquelnamiqui quema nimoilhuyaya para nelía cuajcualtzi elis para nimechpixtos quej noconehua. Nijnequiyaya nimechmacas ni tali cati más cuali huan más cuajcualtzi ten nochi taltipacti. Huan nimochiyaya ica paquilisti para antechtocaxtisquía: Totata. Huan nimoilhuyaya para amo quema antechtahuclahuasquía. ²⁰ Pero anisraelitame, anquichijque quej se ahuilnenca sihuat cati quicajtehua ihuehue. Antechtahuclajque huan anmotemactilijque ica sequinoc dioses. Quej nopa niamoTECO niqijtohua.

21 “Na nijcajqui cati chocayayaj huan tzajtziyayaj ipan nopa tepeme campa amo onca cuame. Eliyayaj israelitame cati techelcajtoyaj huan mohuej-caquixitjtoyaj ten noojhui niininTECO Dios. 22 ¡Ay anisraelitame, annocone-hua cati asentamique! Xihualaca campa na huan na nimechchicahuas ipan amoyolo cati anquinequij tajtacolchihuase. Quej nopa niamoTECO niqijtohua.”

Huan amojuanti anquijtohuaj: “Quena, timocuepase ica ta, pampa ta tiTOTECO. 23 Ya ticiesijque tiquinhueyichihuj teteyome ipan tepeme huan ten hueli tijchihuj inixpa. Nochi ya nopa san tapic. Pampa san TOTECO toDios hueli techpalehuis huan techmaquixtis nochi tojuanti tiisraelitame. 24 Hasta quema tielijayaj ticoneme tojuanti tiquitaque para tantiyajqui nochi cati totatahua tequitique para quipiyase. Quinpiyayaj borregoyme, huacaxme, telpocame huan ichpocame, pero nochi ya nopa quinpolojque pampa quintamimacaque nopa totajzitzi huan teteyome. 25 Huan yeca ama timopantiaj ipan tequipacholi huan ipan pinahualisti pampa hasta quema ticonetzitzi titajtacolchijque inihuaya totatahua huan timitzixpanotoque TOTECO Dios. Amo quema timitztepanitztoque quej monequi.”

4

1 Huan TOTECO quijtohua: “Israelitame, sinta anquinequij amocuepase, ximocuepaca ica na. Xiquintahuelcahuaca amoteteyohua huan ayecmo ximocuapoloca ipan seyoc ojtí. 2 Xitatestigojquetzaca san ica na notoca, niamoTECO huan xijpiyaca se nemilisti cati cuali, xitahuac huan tapajpactic. Anelise se tatiochihualisti para nochi talme ipan taltipacti huan injuanti hualase Jerusalén huan techhueyichihuase na.”

Soldados hualase para moaxcatise tali Judá

3 TOTECO quej ni quinilhuía nopa masehualme ten tali Judá huan ten altepet Jerusalén: “Xijyamanilica amoyolo cati tahuel tetique para huelis anquicaquise nocamanal. Pampa sinta amo, elis quej ni camanali huetzis ipan se tali campa onca huitzi huan amo hueli quipiya itajca huan amechpalehuis. 4 AnJerusalén huan anJudá ehuaní, xijtapajpacchihuaca amotalnamiquilis huan amoyolo noixpa na, niamoTECO. Pampa sinta amo, huajca nohueyi cualancayo amechtizontamiltis nochi amojuanti por nochi cati amo cuali anquichijtoque. Nocualancayo eltoc quej se hueyi tit cati amo aqui huelis quisehuis.

5 “Xiquintzajtzilica Jerusalén huan Judá ehuaní, huan xitayolmelahuaca ica tapitzali ipan nochi nopa tali. Xiquitoca: ‘Xicholoca para anmo-manahuise pampa hualahui amocualancaitacahua. Ximotatitij ipan nopa altepeme cati quipiay tepamit cati quinyahualojtoc.’ 6 Xijtananaca se bandera ipan altepet Jerusalén huan xiquinilhuica: ‘¡Xicholoca, ayecmo ximochiyaca! Pampa na, niamoTECO, nijhualicas campa amojuanti nopa tasosolojquet cati más fiero. Hualas ten nopa tali cati mocahua ica norte.’ 7 Yaya cati hualas ten nopa tali nelmosisinía quej se león huan cuali quimati quenicatza quinsosolos talme. Quisqui ipan ilugar huan huala ica nochi ichicahualis para quisosolos amotal. Huan amoaltepehua mocahuase sosolijtoque huan tatzitcatoc. 8 Huajca ama ximotalilica amoyoyo cati sosoltic para ma nesi anmotequipachohuj. Huan ximochoquílca por nopa taijyohuilsti pampa nohueyi cualancayo niamoTECO ya ajsitihuala ipan amojuanti huan amo amechcahuas. 9 NiamoTECO niqijtohua para ipan nopa tonali quema ajsis nocualancayo, nopa tanahuatijquet huan

nopa tayacanani huihuipicase ica majmajti. Huan nopa totajtztzi huan tajtolpanextiani, majmahuise chicahuac.”

¹⁰ Huajca na niJeremías niqijto: “¡Ay, noTECO Dios! Nelía teicneltique ni masehualme cati tali Judá huan altepet Jerusalén ehuan pampa eltoc quej san tiquincajcajqui ica cati tiquinilhui. Ta tiquintajtolcahuili tiquinmacas tasehuilisti, pero ama nopa macheta ya eltoc tacualtalili para quintzon-tamiltis.”

¹¹ Ya huala se tonali quema TOTECO quinilhuis nopa masehualme ipan Jerusalén: “Se ajacat cati totonic hualas campa huactoc tali. Huan amo elis se pilajacatzi para amehseselis cati ajhuiyac anquimachilise o se ajacat cati cuali quema anquijcomajcahuaj iyol trigo, ¹² pero elis se hueyi ajacat cati na nijitanis. Huan hualas ica nochí ichichualis para ica nimechtajtolsenc-ahuas huan nimechtatzacuiltis.”

Ininculancaitacahua israelitame quinyahualose

¹³ Huan nopa israelitame quijtohuaj: “Xiquitaca, tocualancaitacahua hualahui topani quej se hueyi ajacat cati tasosolohua. Inincarrojhua motalohuaj chicahuac quej se ajcomalacat, huan inincahuayojhua motalohuaj más chicahuac huan amo quej patani se cuatojti. ¡Nelía titeicneltique pampa ya tiitztoque para techtatzacuiltise!”

¹⁴ Huan TOTECO quijtohua: “¡Ay anJerusalén ehuan! Ximoyolpajpacaca ten nochi cati amo cuali anquichihuaj para noja hueli anmomaquixtise. Ayecmo xijpiyaca se amotalnamiquilis cati fiero. ¹⁵ Pampa hasta nepa ipan tali Dan huan hasta ipan nopa tepeme ten tali Efraín caquisti para nechcatitoc amotatzacuiltis.

¹⁶ “Xiquinyolmelahuaca inimasehualhua nochi talme cati mocahuaj nechca huan nojquiya xiquinilhuica Jerusalén ehuan para nopa tatehuiani ya hualahuij ten nopa talme cati mopantíaj huejca. Huan tzajtztzihualahuij para quitehuij altepet Jerusalén huan nochi altepeme ten tali Judá. ¹⁷ Inijuanti quiyahualoquij altepet Jerusalén quej elisquíaj tamocuitahuiani cati quinyahualohuaj tapiyalme ipan se cuatitamit para quinmocuitahuise. Huala inintatzacuilti ininpani pampa nomasehualhua mosisinijtoque ica na. Quej nopa niininTECO niqijtohua.

¹⁸ “Nochi ni taijyohuulisti hualajtoc por amotajtacolhua huan pampa anquitoquijtoque se fiero ojti huan anquinhueyichijtoque teteyome. Huan ni tatzacuiltistis elis quej se pajti cati tahuel chichic huan ajsis quej se cuchillo cati calaquis ipan amoyolo, pero quej nopa quinamiqui.”

Jeremías moyoltequipacho por Judá ehuan

¹⁹ Nelía nitaijyohuía ipan noyolo huan nimomimilohua ica tacuajcualoli. Noyolo huihuitoca chicahuac huan amo hueli nimocahua san quej niitztoc pampa nijcactoc inintapitzal tocualancaitacahua. Quena, tzajtztzihualahuij nopa tatehuiani. ²⁰ Niqunita hualahui tahuel miyac tatehuiani ipan ni tali para quitamisosolose, huan teipa hualahui tahuel miyac. Huan quema sempa nitachiya, niqunita noja más cati hualahui. San ipan se talojtzi mocahuase tasosololme nochi calme huan nopa yoyoncalme campa masehualme chocaj. ²¹ ¿Quesqui tonali huejcahuas ya ni? ¿Hasta quema noja niq-uitas motanantoc nopa bandera huan noja nijcaquis nopa tapitzali pampa noja onca tahuilancayot? ¿Hasta quema tamis ni miqulistis?

²² TOTECO quijto: “Tiquitas ni taijyohuulisti hasta quema nomasehualhua quicahuase inihuihuio, pampa inijuanti huihuiftique huan amo quinequij techtacaquilise. Inijuanti tahuel tzontochontique huan amo teno

quimachilíaj. Inijuanti cuali quimatij para quichihuase cati fiero, pero amo quiپیay talnamiquilisti para quichihuase cati cuali.”

Jeremías quiitac nopa tatzacuultilisti cati quiajsis Jerusalén

²³ Na nitachixqui ipan nochi ni tali hasta campa hueli, pero nochi moca-
jqui tasosololi huan cactoc. Huan niquitac ilhuicacti huan amo quiپیayaya
taahuili. ²⁴ Nitachixqui ipan nopa tepeme huan niquitac huihuipicayayaj
huan mohuisohuayayaj. ²⁵ Nitachixqui huan ayecmo niquitac yon se mase-
huali ipan nochi ni tali. Huan nochi totome ya cholojtoyaj. ²⁶ Nitachixqui
ipan nochi nopa tamayame cati tahuel taeliltiyayaj, pero mocajque quej
huactoc tali huan nopa altepeme mocajque tasosololme pampa TOTECO
quintahuiso ica ihueyi cualancayo.

²⁷ Ya ni cati quiijto TOTECO: “Nochi ni tali mocahuas tasosololi, pero amo
nijtamisosolos. ²⁸ Elis quej nochi ni tali chocas huan elis quej ipan ilhuicacti
nochi elis yayahuic pampa quiپیas tequipacholi por nomasehualhua huan
por nopa camanali cati niquijtojtoc. Niquijtojtoc para niquintatzacuultis
huan amo nimoyolcuepas ten cati niquijtojtoc nijchihuas. ²⁹ Quema mase-
hualme cati itztoque ipan altepeme quicaquise nopa tahuejchihualisti ten
nopa soldados cati hualahui, cholose huan motatise campa cuatitamit huan
campa tepeme. Nochi altepeme mocahuase tatzitzicatoc, pampa nochi
masehualme cholose ica majmajti.

³⁰ “Masque anJerusalén ehuan anmoquentise amoyoyo cati más cuali
huan anmotalilise nochi tamantzitzi cati yejyectziti huan anquipase
amoixteyolhua para anquinnotzase nopa soldados cati hualahui para
amechtasojtase, san tapic. Pampa cati anquintemohuaj para elise amo-
mecahua amechcualancaitaj huan mocualtalíaj para amechmictise. ³¹ Na
nijcaqui se choquisti quej tzajtzi se sihuat quema quiپیa iachtohui cone.
Pero nopa tzajtzisti eltoc ininchoquilis nomasehualhua. Quiijtohuaj: ‘¡Ay
techpalehuica pampa ya techmictise ni temictiani!’ ”

5

Intajtacolhua Jerusalén huan Judá ehuan

¹ TOTECO quiijtohua: “Xiyaca ipan nochi calles ipan altepet Jerusalén
huan xijtemoca campa hueli sinta anquipantise se tacat cati itztoc xitahuac
huan cati tatepanita. Xijtemoca ipan nochi tianquis, huan sinta anquipan-
tise se, huajca nijtapojpolhuis nopa altepet huan amo nijsosolos. ² Pampa
itztoque miyac cati techtestigojtalíaj, pero amo quichihuaj cati quiijtohuaj.
San istacatij huan tacajcayahuaj ica inincamanal.”

³ NoTECO, ta tiquintemohua masehualme cati temachme. Tiquintatza-
cuiltijtoc momasehualhua pampa tijnequiyaya ma tatepanitaca, pero in-
ijuanti amo quipataque ininemilis. Nojquiya tiquinechcapantalijtoc mo-
masehualhua pero amo quicajtoque inintajtacolhua. Quiپیay inixayac tetic
quej se tet. Huan yeca amo quinequij moyolcuepase ten inintajtacolhua.

⁴ Pero teipa na niquijto: Ni masehualme itztoque teicnelitque. Monejne-
miltíaj fiero pampa cati más huihuitique. Amo quiixmatij iojhui TOTECO
huan cati xitahuac huan yeca amo tatepanitaj. ⁵ Huajca ama niyas campa
itztoque nopa tayacanani cati más huejhueyi huan niquincamanalhuis
pampa inijuanti, quena, quiixmatij iojhui TOTECO huan quimatij para nochi
tamanti tajtacoli quihualica tatzacuilti.

Pero san tapic pampa inijuanti nojquiya quitahuelcajtoque ininTECO.

⁶ Yeca TOTECO quichihuas para nopa leones cati itztoque cuatita huan nopa
tepechichime cati itztoque ipan huactoc tali ama quintzontamiltiquij nopa

masehualme campa cholojtejoque. Huan nopa huejhueyi tecuanime cati inintoca leopardos quinyahualojtinemise ni altepeme. Huan quej nopa, cati hueli cati quisas calixpa ten nopa altepeme, miquis imaco nopa tapiyali. Pampa inintajtacolhua ni masehualme tahuel miyac huan tahuel miyac mosisinijtoque nohuaya.

⁷ TOTECO quijtohua: “¿Quenicatza nimechtapojpolhuis nochi ya ni? Pampa hasta amoconehua nojquiya techtahuelcajtoque huan quinhueyitaliaj teteyome cati amo nelia Dios. Na niquinmacac miyac tacualisti, pero inijuanti amo motascamatque. Inijuanti motemactilijque ica ahuilnencayot. Huan ilhuichijtinengue ipan nochi calme cati onca ipan nopa altepet campa ten hueli quichihuayayaj ica inintacayo iniixpa teteyome.

⁸ Inijuanti itztoque quej cahuayojme cati tomahuaque cati quitemojtine-mij se yehua. Sesen inijuanti quitoquilijtinemi ihuampo isihua. ⁹ ¿Amo quinamiqui niquintzacuiltis por nochi inintajtacol? Quena, quinamiqui niqincuepilis ni masehualme ten ni tali por nochi cati techchihuilijtoque.

¹⁰ Inincualancaitacahua tejcose ipan inintepa huan quisosolose inialtepehua. Quichihuase quej se cati quinempolohua imacuayohua se xocomeca mili, pero quicahua se ome tzonti. Quej nopa quichihuas pampa nopa xocomeca mili cati quinnexitia noisraelita masehualhua ayecmo noaxcahua.

¹¹ Nopa masehualme ten tali Israel huan Judá tahuel nechcajcajtoque. Quej nopa niininTECO niqijtohua.

Tayolmelahua ten tatzacuilitisti

¹² “Inijuanti istacatique ten na pampa quijtojqque: ‘TOTECO amo techtaijyohuiltis. Amo hualas topani yon se tamanti cati amo cuali. Amo tijpantise mayanti yon tatehuilisti.’ ¹³ Nojquiya quijtohua: ‘Nopa itajtolpanextijcahua TOTECO san quinpacitia tahuejchihua, pampa TOTECO amo quinnojnottoc. Nopa tatzacuiliti cati inijuanti quijtohua para hualas topani, huetzis ipan inijuanti. Pero amo huetzis topani.’ Quej nopa quijtohua nopa Judá huan Jerusalén ehuani.

¹⁴ “Huajca nimoTECO Cati Niqinyacana Noilhuicac Ejcahua Ma Tatanitij, quej ni nimitzilhuia, tiJeremías: ‘Pampa quijtojqque ya nopa ten notajtolpanextijcahua, na nijtalis nocamanal ipan mocamac. Huan nocamanal elis quej tit huan nopa masehualme elise quej cuahuit. Huan nopa tit quintamitatis.’”

¹⁵ Huan TOTECO quijto: “Xiquitaca anisraelitame, na niqinhualicas campa amojuanti miyac masehualme ten se tali cati mopantia huejca. Se tali cati tahuel quiyia chichahualisti huan cati ten huejcajquiya eltoc. Se tali cati amo anquimachilise inincamanal. ¹⁶ Nochi inijuanti tahuel mosemacaj tatehuse huan quihualicaj teposti cati tetzontamilitia. ¹⁷ Inijuanti quicuaquij nochi cati anquitoctoque cati eltoc para inintacualis amoconehua, amoborregojhua huan amohuacaxhua. Quicuae amohigos huan itajca amoxocomeca milhua. Huan nojquiya quitamisosolose nopa altepeme cati moyahualojtoque ica tepamit cati ipan anmotemachiaj.

¹⁸ “Pero masque quej nopa nijchihuas, amo nimechtzontamiltis nochi anisraelitame. Quej nopa niamoTECO niqijtohua. ¹⁹ Huan, Jeremías, quema nopa masehualme mitztatzintoquilise: ‘¿Para ten TOTECO Dios techchihuilia nochi ni tamanti cati fiero?’ huajca ta xiquinnanquili quej ni: ‘Amojuanti anquitahuelcajqque TOTECO huan anmotemactilijque ica sequinoc teteyome ipan amotal. Huajca ama anquintequipanose seyoc tali ehuani ipan inintal.’”

²⁰ “Nojquiya xiquinilhui nopa masehualme ten tali Judá huan Israel quej ni: ²¹ ‘Xijtacaquilica, anmasehualme cati anhuihuitique cati anquipiyaj amoixteyolhua, pero amo antachiyaj. Huan anquipiyaj amonacas, pero amo antacaquij. ²² Na niamoTECO nimechtatzintoquilá: ¿Para ten amo antechtepanitaj yon se pilquentzi? ¿Para ten amo anhuihuipicaj yon se quentzi noixpa? Na cati huejcajquiya niqunnnextili nochi hueyi ame cati onca ipan nochi taltipacti hasta canque tamise huan nozona nijtali xali. Huan hasta ama injuanti amo hueli quixpanoj ininepa masque tahuel mosisiníaj o tahuel mojmoliníaj. Huajca, ¿amo quinamiqui antechimacacise huan antechhueyichihuase?’ ²³ Pero amo, ni masehualme tahuel yoltetique huan tahuel mosisiníaj, pampa mohuejcatilijtoque ten na huan yajque quinhueyichihuatoj teteyome. ²⁴ Huan yon quentzi amo moyolilhuijtoque: ‘Ma tiquimacacisa TOTECO Dios pampa yaya cati techmaca nopa at quema ipohual titocaj huan tipixcaj huan quichihua ma onca pixquisti.’ ²⁵ Huan pampa anisraelitame amo antechtepanitaj, nimechquixtilijtoc nopa huejhueyi tatiochihualisti cati nimechmacatosquía. Amotajtacolhua quichijtoc para ma nimechquixtili nochi tamanti cati cuali. ²⁶ Campa nomasehualhua, itztoque tacame cati fiero ininemilis, cati tachiyaj ixtacatzí quej se tapejquet. Quitallaj taquetzi para quinmasiltise sequinoc masehualme. ²⁷ Huan quej se caja temitoc ica piyome, quej nopa nojquiya ininchaj temitoc ica tamanti cati quiichtectoque. Huan yeca injuanti mohueyichijtoque huan moricocjchijtoque. ²⁸ Motomajtoque huan moyejyecchijtoque, huan tahuel miyac tamanti cati fiero quisehuiquilíaj quichihua. Amo quintajtolsencahuaj xitahuac cati icnotzitzí, yon amo quinpalehuíaj cati teicneltzitzí para ma quiselica cati quinamiqui. ²⁹ ¿Amo anquítaj para quinamiqui niqincuepillis masehualme cati quej nopa quichihua huan niqunmactilis inintatzacuiltil? Quena, quinamiqui. Quej nopa niamoTECO niqijtohua.

³⁰ “Ipan ni tali panotoc se hueyi tamanti cati tahuel fiero huan temajmati. ³¹ Nopa tajtolpanextiani istacatij ica cati tayolmelahuaj para panos huan nopa totajtzitzi tanahuatíaj chichahuac ica san cati injuanti inintequiticayo. Huan quej nopa quinpactía nomasehualhua. Pero ¿taya quichihuase quema ajsis nopa tonali ten tatzacuiltil?”

6

Inincualancaitacahua israelitame quiyahualohuaj Jerusalén

¹ “Ximochololtica aniconehua Benjamín! ¡Xijchihuaca campeca para anomaquixtise nochi cati anhuelise! ¡Xiquisaca ipan altepet Jerusalén huan xicholoca! Xijpitzaca tapitzali ipan altepet Técoa huan xijchihuaca pocti para ma quiitaca ipan altepet Bet Haquerem. Quena, xiquinyolmelahuaca nochi masehualme para hualahui miyac soldados ten nopa tali cati mopantía ica norte para quisosolose ni tali. ² Nijchihuas para ma quisosoloca altepet Jerusalén huan imasehualhua masque tahuel yejyetzí quej se ichpocat. ³ Hualase tamocuitahuiani cati amocualancaitacahua cati mochantise yahualtic ten nopa altepet huan moaxcatise. Quitajcoitase nopa potreros para quintamacase ininborregojhua. ⁴ Huan amocualancaitacahua quijtose: ‘Ximocualtica para titatehuse ica tajcotona. Pero teipa quítase para ya tiotac para pehuas se tatehuilisti. ⁵ Huan nopa tatehuiani quijtohuaj: Ma tiyaca tiquintachtequilij ica tayohua huan ma tijsosolotij inincaltanahuatil huan quej nopa nochipa majmahuse.’ ”

⁶ Pampa TOTECO Cati Quinyacana Iilhuicac Ejcahua Ma Tatanitij quej ni quinilhuitoc: “Xijtzoneguica cuame para ica anquicojcoyonise itepa altepet Jerusalén para ancalaquise. Ya ni nopa altepet cati monequi anquitzacuilitise por nochi itajtacolhua. ⁷ Quej se ameli amo quema huaqui, quej nopa nojquiya ipan altepet Jerusalén quisehuiquilijtoque quichijtinemij tajtacoli huan nochi tamanti cati amo cuali. Amo teno cati cuali caquisti ipan nopa altepet. San caquisti tatehuilisti huan tachtequisti. Mojmosta nijtachilijtoc inincocolis huan inintacuajcualol cati huala ten itajtacolhua. ⁸ Ximoxitahuaca, analtepet Jerusalén ehuan, para amo nimechtahuelcahuas huan nimechsosoloi huan nijchihuas amoaltepe quej se huactoc tali campa amo aqui itzto.”

Ya nechca nopa tatzacuiliti

⁹ TOTECO Cati Quinyacana Iilhuicac Ejcahua Ma Tatanitij quijtohua: “Amocualancaitacahua quichihuase quej se tacat cati quitequi xocomecat itajca huan quiompahuía quitemohua cati noja mocajtoc hasta amo mocahuas yon se. Quej nopa nojquiya quitemose sesen israelita campa annotatise hasta amo aqui mocahuas. Huan amo mocahuas yon se.”

¹⁰ Huan niJeremías niqijto: “Pero, ¿ajquiya techtacaquilis quema niqinyolmelahuas ten nochi cati panos? Nochi injuanti quipixtoque inintacaquilis tzactoc huan amo quinequij techtacaquilise. Quema niquinpohuilía mocamanal, TOTECO, injuanti cualanij. Amo quinpackía, yon se pilquentzi. ¹¹ Yeca nitemitoc ica mocualanayo. Nelohui para nijpiya noyolo inihuaya huan amo niquintatzacuilitis pampa tahuel nicualani.”

Huan TOTECO quijto: “Na nijmajcahuas nocualanayo ipan nochi Jerusalén ehuan. Huan nijchihuas ma huetzi ipan coneme cati mahuiltijtinemij ipan calles, ipan telpocame cati nemij san sejco para quichihuase cati amo cuali, ipan tacame cati mosihuajtijtoque, ipan sihuame cati monamictijtoque huan ipan huehuentziti. ¹² Huan nopa seyoc tali ehuan moaxcatise ininchajchaj, inimilhua huan inisihuajhua, pampa na nimomatanas para niquintatzacuilitis nochi masehualme cati itztoque ipan ni tali. Quej nopa nimoTECO niqijtohua.”

¹³ “Pampa nochi nopa masehualme quej cati más pisiltziti hasta cati huejhueyi, quixtocaj moaxcatise cati seyoc iaxca huan quitachtequilij. Huan ten nopa tajtolpanextiani hasta nopa totajtziti, nochi tahuel tacajcayahuaj. ¹⁴ Injuanti quincajcayahuaj nomasehualhua pampa quinilhuijaj para onca tasehuilisti huan para nochi eltos cuali quema senquisa oncas tatehuilisti. ¹⁵ ¿Anquiiitaj para pinahuayaj nomasehualhua quema quinhueychihuayaj tetyome? ¡Amo neli! Amo mopinajque yon se quentzi, yon amo ixchichilijque, yeca temachtu huetzise mictoque quema niquintatzacuilitis. Quej nopa nimoTECO niqijtohua.”

Quihuejcacajtoque iojhui TOTECO

¹⁶ Huajca TOTECO quinilhui imasehualhua: “Ximoquetzaca campa anitztoque huan xitetatzintoquilica quenecatza elqui nopa ojti cati huefcajquiya anquitoquiliyayaj huan sempa xijpantica nopa ojti cati cuali o nopa ojti cati tatzetzeltoc cati anquitoquiliyayaj achtohuiya. Xijtoquilica nopa ojti cati cuali huan anquipantise tasiyajquetzalisti para amotonaltziti. Pero amojuanti anquijtoque: ‘Amo tijtoquilese nopa ojti pampa amo techpackía.’ ¹⁷ Huajca niquintali tamocuitahuiani ipan nopa altepet cati teyolmelahuasquaj quej ni: ‘Xijtacaquilica quema molinis nopa tapitzali pampa ya

nopa amechyolmelahuas para monechcahuía tatehuilisti.’ Pero injuanti quiijtoque: ‘¡Amo tijtacaquilise!’

¹⁸ “Huajca nimechilhuía xijtacaquilica anmasehualme ipan nopa talme cati mopantíaj huejca. Xijmachilica taya ininpantis nomasehualhua ipan altepet Jerusalén. ¹⁹ ¡Xijtacaquilica anmasehualme ipan nochi taltipacti! Na nijhualcas se tamanti cati nelía fiero ipan nomasehualhua quej quinamiqui por inintajtacolhua. Niquintatzacuilitis pampa amo quinequij quitacaquilise nocamanal huan quihuejcamajcahuaj notanahuatil. ²⁰ ¿Paraten noja antechhualiquilíaj nopa copali ten tali Sabá huan nochi taajhuiyacoyot cati patiyó cati anquihualicaj ten huejca ipan sequinoc talme? Ayecmo nijselis amotacajcualis cati anquitatiyayaj noixpa huan cati ajhuiyac nijmatiyaya.”

²¹ Huan nojquiya TOTECO quiijto: “Xiquitaca, na nijtalis tatzacuiliti ipan iniojhui nomasehualhua. Huan nochi sentic motepotanise. Motepotanise tetajme, ininconehea, inincalnehcahua huan inihuampoyohua. Nochi huetzise sentic huan tzontamise.”

²² Huan nojquiya TOTECO quiijto: “Xiquintachilica nopa soldados cati hualahui ten nopa tali cati mopantía ica norte. Motanantoque isoldados se hueyi tali cati eltoc huejca para amechtehuiquij. ²³ Mocualtalijtoque ica inincuahuitolhua huan ica inincuataminhua para tatehuise. Injuanti quipiyaj ininemilis cati tahuel fiero huan amo tetasojtaj. Quema inisoldados nejnentihualahui cahuayoxtipa, caquisti chicahuac quej molinía nopa hueyi at. Tahuel quinequij amechtehuiquij anJerusalén ehuaní.”

²⁴ Huan nopa Jerusalén ehuaní quiijtose se ica seyoc: “Tojuanti tijcactoque para nopa soldados cati hualahui techtehuiquij nelía temajmatíaj. Yeca tahuel timajmahuij huan ayecmo tijpiyaj fuerza. Timajmahuij huan titaijyohuíaj quej se sihuat cati ya ajsic hora para conepiyas. ²⁵ Huajca amo xiyaca cuatita, yon amo xinejnemica ipan ojti pampa tocalancaitacahua itztoque campa hueli. Mocualtalijtoque ica inintepos para techmictise. Yeca onca majmajti campa hueli.”

²⁶ ¡Ay anJerusalén ehuaní! Ximoquentica amoyoyo ten tequipacholi huan ximosehuica ipan cuajnexti huan ximochoquilica quej mictosquía amocone cati iyojtzi pampa nimantzi hualase soldados campa amojuanti para amechtzentamiltise.

²⁷ Huan TOTECO quiijto: “Jeremías nimitztalijtoc quej se tacat cati quimolonía teposti para quiijtos sinta cuali o amo cuali. Xiquinyejyeco nomasehualhua huan xiquintachili sinta cuali cati quichihuj huan sinta cuali nopa ojti cati quitoquilíaj o amo.”

²⁸ TOTECO, nochi injuanti sentamique huan tahuel mitztaijilhuíaj campa hueli. Nelía yoltetique. Quipiyaj iniyolo tetic quej nopa teposti bronce huan hierro. Nelía amo cuajcualme. ²⁹ Masque nopa tepos cilindro cati quipiya ajacat tailpitzasquía chicahuac ipan nopa teposti, huan nopa tit lemenisquía tahuel para quimolonaltis nopa teposti ten iniyolo, san tapic. Amo onca cati tapajpactic ipan iniyolo para tijpantise. San onca cati soquiyo. ³⁰ Cuali niquintocaxtalis: “Masehualme cati TOTECO quinmajcajtoc ipan tasoli quej teposplata cati amo teno ipati.”

7

Jeremías tayolmelahua ipan tiopamit

¹ Sempa TOTECO technojoztzqui na, niJeremías, huan techilhui: ² “Xiya campa ícalte notiopa huan xiquinpohuililiti nopa masehualme nocamanal.

Xiquinilhuiti ni camanali: ‘Antali Judá ehuaní, xijtacaquilica icamanal TOTECO. Quena, xijtacaquilica amojuanti cati ancalactoque nica para anquihueyichihuase TOTECO. ³ Quej ni quijtohua TOTECO Cati Quinyacana Ilhuicac Ejcahua Ma Tatanitij, yaya cati Toteco tiisraelitame: Ximonejnemiltica xitahuac huan xijchihuaca cati cuali, huan quej nopa, nimechcahuilis anitztose ipan amotal. ⁴ Ma amo amechcajcahuahuaca cati quijtohuaj para na amo nijcahuas ma quisosoloca altepet Jerusalén pampa nica eltoc notiopa.

⁵ “ ‘San nimechtasojtas sinta anquicahuase nopa talnamiquilisti cati amo cuali huan nochi amotajtacolhua, huan anquinchiuilise cati xitahuac nochi sequinoc. ⁶ Monequi ayecmo anquintajyohuiltise cati seyoc tali ehuaní, huan icnotzitzi huan cahual sihuame. Monequi ayecmo anquimictise cati amo teno quichijtoque huan ayecmo anquinhueyichihuase teteyome pampa tahuel amechchihuiliaj cati amo cuali. ⁷ Sinta quej nopa anquichihuase, huajca na nimechcahuilis anitztose ipan ni tali cati niquinmacac amohuejcapan tatahua para nochipa.

⁸ “ ‘¿Anmoilhúaj amo quema antajyohuise pampa nica eltoc notiopa niamoTECO? Amo ximocajcahuahuaca ica se istacatili. ⁹ ¿Anmoilhúaj cuali cati anquichihuaj? Antachtequij, antemictíaj, anmomecatíaj, anistacatij, anquihueyichihuaj nopa teteyot Baal huan nochi nopa sequinoc teteyome cati yancuique. ¹⁰ Teipa anhualahuij nica para anmoquetzase noixpa ipan notiopa para antechhueyichihuase huan anquijtohuaj: Tojuanti timomanahuijtoque ten tatzacuiliti. Teipa sempa anyahuij para anquichihuase tamanti cati amo cuali. ¹¹ ¿Anmoilhúaj para tachtequini hueli mosentiliaj ipan ni tiopamit cati quichijque para techtepanitase? Na niqiztloc nochi ni tamanti cati amo cuali cati nica anquichihuaj. Quej nopa niamoTECO niqijtohua. ¹² Xiyaca ipan Silo, nopa altepet cati achtohuiya quipixqui nopa tiopamit para techhueyitepanitase. Xijtachilica taya nijchihuli nopa altepet por inintajtacolhua noisraelita masehualhua. ¹³ Huan quema amohuejcapan tatahua quichihuayayaj nochi nopa tajtocoli, na nijsenhuiquiliyaya niqinnojtazayaya para ma moyolcúepaca, pero injuanti amo techtaquilijque, yon amo technanquilijque.’ ”

¹⁴ Huajca TOTECO quijtohua: “Na nijsosolo Silo quej nojquiya nijchihuas ica ni tiopamit nica cati anquichijque para ma quihuica notoca. Quena, nijsosolos ni tiopamit cati ipan anmotemachíaj para anquiselise tapalehuili huan cati nimechmacac amajuanti huan amotatahua. Nijchihuas san se quej nijchijqui ipan altepet Silo. ¹⁵ Huan nimechtitanis xitetequipanotij ipan sequinoc talme quej nijchijqui ica amoisraelita icnihua cati itztotaj ica norte ipan tali Israel*.”

Taixpanotoque israelitame

¹⁶ “Huajca, ta tiJeremías, ayecmo ximotatajti por ni masehualme. Amo xichoca por injuanti, yon amo techtajtani ma niquinpalehui pampa amo nimitztacaquilis. ¹⁷ ¿Amo tiquita taya fiero quichijtinemij ipan nochi nopa altepeme ten tali Judá huan ipan nochi calles ten altepet Jerusalén? ¹⁸ Nopa coneme quisentiliaj cuahuit, huan nopa tetajme tipitzaj para ipan temacase tacajcahualisti. Inisihuahua quixacualohuaj harina huan quichihuaj pantzi para quitencahuilise nopa sihua tanahuatijquet ten ilhuicac. Nojquiya quinmacaj tacajcahualisti tatoyahuali sequinoc teteyome ten sequinoc talme para techcualancamacase. ¹⁹ Pero amo na cati nihuetzis ipan

* 7:15 7:15 O campá mocajque iixhuihua Efraín.

pinahualisti. Eltoc inijuanti cati más mosoquihuisse huan mopinahualtise. ²⁰ Huajca ama nijtitanis nohueyi cualancayo ipan ni lugar. Huan nochi masehualme, tapiyalme, cuame huan xihuime tamitatase ica nocualancayo. Huan nopa tit amo sehuis.” Quej nopa quijto TOTECO Cati Más Quipiya Tanahuatili.

²¹ Huan TOTECO Cati Quinyacana Iilhuicac Ejcahua Ma Tatanitij, yaya cati ininTeco israelitame nojquiya quijtohua: “Xijtalica nopa tacajcahualisti tatatili cati antechmacaj ica nopa tacajcahualisti para amoteteyohua huan xiquincuaca amoselti. ²² Pampa ipan nopa tonali quema niqunquixti amohuejcapan tatahua ipan tali Egipto, amo niqunmacac tanahuatili ten tacajcahualisti o tapiyalme tatatilme, ²³ pero niqunilhui: ‘Xijtaqaquilica nocamanal huan na nielis niamoteco huan amojuanti anelise annomasehualhua. Xijchihuaca senquisa cati na nimechnahuatía, huan quej nopa, nochi cati anquichihuase, quisas cuali.’ ²⁴ Pero inijuanti amo quinejque techtacaquilise. Huan quisehuiquilijque quichijque cati inijuanti quinpactiyaya. Quittoquilijque inintalnamiqulil pampa tahuel tetic iniyolo huan tahuel fiero. Huajca inijuanti moicancuetque huan más quichijque cati amo cuali, huan amo techtoquilijque. ²⁵ Hasta ipan nopa tonali quema amohuejcapan tatahua quisque ipan tali Egipto huan hasta ama, na mojmota nijsenhuiquilijtoc nimechtitanilijtoc notajtolpanextijcahua. ²⁶ Pero amojuanti amo anquinejque anquintacaquilise. San más anmoyoltetilijque, anmotzontetilijque huan anmosisiníaj que amohuejcapan tatahua.

²⁷ “Huajca, ta tijeremías, xiquinilhui nochi cati na nimitzilhuijtoc, pero inijuanti amo mitztacaquilise. Chichahuac xiquinilhui ten taya ininpantis, pero inijuanti amo mitznancquilise. ²⁸ Huajca xiquinilhui: ‘Amojuanti anitztoque masehualme cati amo anquinequij anmoxitahuase. San anquisehuiquilíaj anquitoquilíaj nopa ojti cati amo cuali. ²⁹ ¡Ay analtepet Jerusalén ehuan! Anitztoque ipan pinahualisti. Ximoximaca huan xijtepehuaca amotzoncal ica tequipacholi. Xiyaca ximochoquilij amoselti ipan nopa tepeme pampa TOTECO amechtahuelcajtoc. Améchhuejcamajcajtoc nochi amojuanti cati anitztoque ama pampa tahuel anquicalancamacatoque.’”

³⁰ Huan TOTECO quijto: “Nicalantoc pampa nopa masehualme ten tali Judá tajtacolchijtoque noixpa. Quintalijtoque ininteteyohua ipan notiopa campa masehualme techhueyitaliyayaj huan quej nopa quichijtoque tahuel amo tapajpactic noixpa. ³¹ Nojquiya quicualtalijque se taixpamit ten nopa teteyot Moloc † ipan nopa tamayamit Ben Hinom. Huan nopona quintatiyayaj inioquichipilhua huan inisihuapilhua huan quimacayayaj ininteteyo Moloc quej se tacajcahualisti tatatili. Nelía fiero para quimacase se masehuali quej se tacajcahualisti. Amo aqui niquilhui ma quichihuaca se tamanti fiero quej nopa, yon amo quema nimoilhuijtoc para huelis nijchihuase se tanahuatili quej nopa fiero. ³² Pero ajsis tonali quema nopa taixpamit ten Moloc huan nopa tamayamit cati itoca Ben Hinom ayecmo quintocaxtise quej nopa. Teipa quintocaxtise Tamayamit Campa Temictíaj pampa nopona nopa soldados quinmictise tahuel miyac masehualme. Huan nopona quintalpachose hasta ayecmo oncas lugar campa hueli quintocase. ³³ Huan inintacayo nopa mijcatzitzí mocahuase para quincuase nopa tocome huan tecuanime cati nemij cuatita. Huan amo mocahuas yon se masehuali para quinmajmatis nopa tapiyalme para ma amo quincuaca.

† 7:31 7:31 O Tofet cati elqui seyc itoca Moloc.

³⁴ Nijtamiltis nochi yejyectzi huicat huan huetzquisti ipan nochi calles ten altepet Jerusalén huan ipan nochi altepeme ten tali Judá. Nojquiya ayecmo caquistis inintoscac nopa telpocame cati mocualtalijtoque para mosihuajtise huan nopa ichpocame cati mocualtalijtoque para monamictise, pampa quisosolos nochi nopa tali.”

8

¹ Huan TOTECO quijtohua: “Ipan nopa tonali nopa tatehuiani cati hualahui quitapose nochi mijca ostome campa quintalpachojtoque tanahuatiani huan tayacanani ten tali Judá huan quiquixtise iniomiyohua. Nojquiya quiquixtise iniomiyohua totajtztzi, tajtolpanextiani huan cati hueli masehualme cati itztoyaj ipan Jerusalén huan Judá. ² Huan quipatahuase iniomiyohua talchi iixpa tonati, metzti huan sitalime cati nomasehualhua quinicnelijque huan quinhueyimatque quej elisquíaq díoses. Huan iniomiyohua ayecmo quinpepenase, yon ayecmo quintalpachose. San quincahuase ma tepejtoca talchi quej cuitat. ³ Huan quema tamis inintequí nopa tatehuiani, nopa israelitame cati noja mocahuase yoltoque ipan ni fiero tali, quinequise miquise para amo yase ipan nopa talme campa niquintitanis para tetequipanotij. Quej nopa niqijtojtoc para panos niamoTECO Cati Niqinyacana Noilhucac Ejchahua Ma Tatanitij.

Tahuel fiero inintalnamiqulis israelitame

⁴ “Nojquiya Jeremías, xiquinilhui para quej ni niininTECO niqijtohua: ‘Quema se acajya huetzi, nimantzi mijquehua huan moquetza. Huan quema se acajya mocuapolohua ipan ojti, sempa mocuepa hasta quipantis nopa ojti cati xitahuac. ⁵ Pero ni masehualme ten Jerusalén amo taneltocaj. Quisehuiquilíaj quitoquilíaj nopa ojti cati amo cuali. Quinequij itztose mocuapolojtoque masque talojtztzi niqunilhuía ma mocuepaca. ⁶ Na nijactoc taya quijtohuaj ni masehualme, pero amo nijactoc yon se cati mocuesohua por itajtacolhua. Amo aquí moyolcuepa huan quijtohua nelía fiero cati quichijtoc. Nochi motalojtiyahuij para quichihuahuij más tajtacoli quej se cahuayo motalohua para tatehuiti. ⁷ Nopa totot cigüeña quimati quema ajsi tonali para mocuepas ital pampa tantoc tasesecayot. Nojquiya nopa pichón, huan nopa golondrina huan sequinoc totome quimatij quema mocuepase, pero nomasehualhua amo quej nopa. Inijuanti amo quimatij quenicatza na niininTECO niquintajtolsencahuas huan niquintatzacuilitis por inintajtacolhua.

⁸ “ ‘Huajca, ¿para ten anquijtohuaj: Tojuanti titalnamiqulij huan tippyaj itanahuatilhua TOTECO? Amo anquimatij notanahuatilhua pampa amoistacatica tajcuilohua ica inintajcuilol quipatatoque cati quijtohua notanahuatilhua. Huan ama cati quijtohua nelía se istacatili. ⁹ Pero por inintajtacol niqunpinahualtis nopa istacatica tajcuilohuani cati quijtohuaj talnamiqulij. Niquintemactilis para ma quintajyohuilitica huan ma quinilpica pampa inijuanti quiahuelcajtoque nocamanal niininTECO. Huajca quimachilise para melahuac amo talnamiqulij. ¹⁰ Yeca nochi inisihuahua huan inimilhua, nijtemactilis inimaco cati quintanise para ma moaxcatica. Pampa nochi inijuanti, masque pisiltztzi ó huejhueyi, tajtolpanextiani ó totajtztzi, nochi mojmosta quinequij moaxcatise tamanti cati sequinoc iniaxca. Inijuanti tahuel tacajcayahuj. ¹¹ Eltoc quej nomasehualhua quippyaj se hueyi cocot, pero nopa tayacanani san quintalilíaj se pilpajtzi cati amo teno ipati. Ya huala tajyohuiliti ipan nomasehualhua, pero quinihuíaj para nochi eltoc cuali huan oncas tasehuiliti. ¹² ¿Pinahuaj quema quichihuahuj

tamanti quej ni? ¡Amo! Amo pinahuaj yon se quentzi. Yeca huetzis inintacayohua inihuaya nopa sequinoc cati miquise quema niquintatzacuiltis nomasehualhua. Quej nopa niamoTECO niquijtohua.’ ”

¹³ Huan TOTECO quijtohua: “Nochi inixocomecamil huan inihigo mil, tamiixpolihuisse. Nochi cuame cati temacaj inintajca, huaquise. Huan nochi tamanti cati cuali cati na nijsencajtoya para inijuanti, nimantzi ixpolihuis.”

¹⁴ Huan huajca nopa masehualme quijtose: “¿Para ten timochiyase para timiquise nica? Más cuali ma tiyaca ipan nopa altepeme cati moyahualojtoque ica tepamit huan ma timiquica nozona. Pampa TOTECO toDios techtemactilijtoc para ma techmictica. Eltoc quej techmacatoc ma toquica at cati quiyiya pajti cati temictía pampa tahuel titajtacolchijtoque iixpa.

¹⁵ Tojuanti timochiyayayaj para tijpiyase tasehuilisti, pero amo tijpique. Nojquiya timochiyayayaj para timochicahuase ten campa timococojtoyaj, pero san tijpantijque más taijyohuilisti. ¹⁶ Caquisti para ya hualahui focalancaitacahua ten nepa Dan ica norte. Nochi hualahui ipan chahuayojme cati chichahuac moquiquinatzaj huan yeca ni tali huihuipica. Monechahuaj nopa soldados cati tahuel temajmatíaj. Inijuanti quintzontamiltise nochi cati quipantise. Quintamisosolose altepeme huan nochi tamanti nozona huan techzontamiltise nochi timasehualme.”

¹⁷ Huan TOTECO quijto: “Na niquintitanis ni soldados campa amojuanti quej elisquíaj cohuame cati tencocoque cati amo teno huelis anquinchihuilise. Inijuanti amechtzacanise huan anniquise.”

Moyoltequipacho Jeremías por imasehualhua

¹⁸ Amo onca pajti para nimoyoltalis ten notaijyohuilis. Tahuel techyolcocohua huan nimocuesohua. ¹⁹ Xijtaquilica quenicatza chocaj nomasehualhua ipan nochi nopa tali. Quijtohua: “¿Canque itztoc TOTECO? ¿Amo aquí ipan altepet Jerusalén? ¿Huelis ya techtahuelcajqui yaya cati Totanahuatijca?” Huan TOTECO quej ni quinilhúa: “¿Para ten antechchijtoque ma nicalani ica amoteteyohua huan amoteteyohua cati hualahui ipan sequinoc talme? ¿Para ten monequi nimechtemactilis inimaco sequinoc para nimechtatzacuiltis?”

²⁰ Huan nopa masehualme chocaj huan quijtohua: “Panoc nopa tonali quema tatotonía huan ama ya panotoc pixquisti huan ayemo aquí hualajtoc para techmaquixtis.”

Jeremías tahuel mocuesohua

²¹ Na nichoca por inintaijyohuilis nomasehualhua. Tahuel nimomajmatijtoc huan amo hueli nijneltocha hasta amo nimolinía. Niitztoc quej se huihuitzi por nochi nopa tacuajcualoli cati niquita. ²² ¿Amo onca se pajti ipan tali Galaad? ¿Amo onca nozona se tepajtijquef cati hueli quinpajtis inincocohua nomasehualhua? ¿Amo aquí cati hueli quinpalehuis nomasehualhua?

9

¹ Cualis elisquía sinta ipan notzonteco mochihuasquía se piletá ten at para nijpiyasquía noixayo para nichocas noja más. Quej nopa na nichocasquía para nochipa. Quena, nichocasquía tonaya huan tayohua por nomasehualhua cati mictoque. ² Cualis elisquía sinta nihuelisquía niqincajtehuasquía huan niyasquía niitztoti ipan huactoc tali ipan se cali para nejnemini. Quej nopa niqinelcahuasquía nomasehualhua pampa nochi inijuanti tahuel momecatíaj huan quichihuaj cati tahuel fiero.

3 TOTECO quijtohua: “Ni masehualme nochipa moilhuáj quenicatza istacatise. Quej se cuahuitoli quimajcahua cuataminti, inincamac quiquixtia senquisa istacatili. Amo quinequij quijtose cati xitahuac. Más quichihuj cati fiero mojmosta. Huan ayecmo techtepanitaj niininTECO.

4 “Sese monequi momocuitahuis ten nopa masehuali cati itzot icalnechca pampa amo hueli ipan motemachis. Monequi sese momocuitahuis ten iicni pampa amo hueli quineeltocas. Amo xiquinpohuili taya mitzpano pampa injuanti hueli mitzistacahuise huan mitzejelnamiguise. 5 Sese israelita quimati cuali quenicatza tacajcayahuas huan tehuihuiitas. Injuanti senquisa quichihuj tajtacoli. 6 Mojmosta quimyaquilíaj inintajtacol huan iniistacaticayo. Amo quinequij techixmatise na.” Quej nopa quijto TOTECO.

7 Huaíca ama TOTECO Cati Quinyacana Iilhuicac Ejcahua Ma Tatanitij, quej ni quijtohua: “Na niquinpanoltis ipan se taijyohuiliisti cati elis quej tit para niquintapajpacchihuas. Niquireyeyecos huan niquintatzejtelolchihuas quej quichihuj ica nopa teposplata. ¿Taya seyoc tamanti hueli nijchihuas ica nomasehualhua? 8 Ica ininenepil quimajcahuaj istacatili cati tecocohua quej se cuataminti. Huan inihuampo quicamanalhuíaj ica yejectiz, pero ipan iniyolo moilhuáj quenicatza quitzontamiltise seyoc. 9 ¿Amo quinamiqui niquintatzacuilitis por nochi ni tamanti cati quichihuj? ¿Amo quinamiqui nimomacuepas por cati techchihuiliytoque ni masehualme ten ni tali?” Quej nopa quijto TOTECO.

10 “Huan nichocas por nopa tepeme huan nochi nopa cuatitamit huan potrores pampa ama nochi quintatijtoque huan ayecmo aqui itzot nopona. Ayecmo aqui me huacaxme, yon totome, yon nopa tecuanime cati nemij cuatita pampa nochi chololque.

11 “Huan altepet Jerusalén nijchihuas ma eli quej se tamontomit tet. Huan nopona quichihuase iniesto nopa tepechichime. Huan nopa altepeme ten tali Judá mocahuase quej se huactoc tali. Ayecmo aqui itzots nopona.”

12 ¿Ajquiya quiyiya miyac talnamiquilisti para quimachilis nochi ni tamanti cati panotoc? ¿Canque itztoque nopa tacajcayajca tajtolpanextiani para ma quixtomaca ya ni? Ma techilhuica para ten ni tali mocajtoc quej huactoc tali hasta ayecmo aqui motemaca nejnemis nica.

13 Pero TOTECO quijtohua: “Nochi ya ni panoc pampa nomasehualhua quitahuelcajque notanahuatilhua cati niquinmacac. Amo quitepanitaque nocamanal huan amo nejnénque quej niquinilhui. 14 San quichijtinenque cati injuanti quinactiyaya huan quinhueyimatque nopa teteyome ten Baal quej inintatahua quinnextilijque. 15 Yeca na niDIOS Cati Niquinyacana Noilhuicac Ejcahua Ma Tatanitij huan cati niininTeco israelítame, niqijtohua: ‘Xiquitaca, quej se quinmacas masehualme ma quicuaca se tamanti cati chichic, na niquinmacas nomasehualhua taijyohuiliisti huan niquinchihuas ma quiica at cati quiyiya pajti cati temictía. 16 Huan quej se quijtzeloehua xinachtí, niquintitanis campa hueli ipan nochi taltipacti ipan talme cati injuanti huan inihuejcapan tatahua amo quixmatque. Huan nopona nojquiya quintehuise ica macheta hasta quintamimictise.’ ”

Tahuel chocase ipan Jerusalén

17 Nojquiya TOTECO Cati Quinyacana Iilhuicac Ejcahua Ma Tatanitij quijtohua: “¡Xiquinnotzatij nopa sihuame cati chocaj quema miqui se acayja! Xiquintemoca injuanti cati cuali quimatij quichihuj inintequi. 18 Ma hualaca nimantzi huan ma chocaca por israelítame. Ma quisa miyac iniixayo ipan iniixteyol. 19 Nochi nopa masehualme ten altepet Jerusalén

chocase ica tequipacholi huan ayecmo quimatise taya quichihuase. Quiijtose: ‘Tahuel tifeicneltique pampa techtamisosolojque huan techpinahualti-
jtoque. Ama monequi tijcajtehuase total huan tochaj pampa quitamisosolo-
jque.’ ”

²⁰ Ansihuame cati anchocaj, xijtaquilica icamanal TOTECO huan xiquin-
machtica amoichpocahua huan amocalnechcahua nojquiya ma chocaca.
²¹ “Miquilisti ajsitoc ica nochi ichicahualis huan calactoc ipan amochajchaj
huan ipan amocaltanahuatil huan quintzontamiltijtoc nochi masehualme.
Quintzontamilti coneme cati mahuiltiyayaj ipan calles huan telpocame cati
mosentiliyayaj ipan tianquis. ²² Huan xiquinilhuica para quej ni niininTECO
niquijtohua: ‘Inintacayohua nopa mijcatzitzit mocahuase tepejtoque quej
cuítat ipan cuatitamit. Eltos quej trigo cati mocahua campa ya pixcatoque
huan ayecmo aqui quinsentilía. Quej nopa nojquiya amo aqui quintalpachos
nopa mijcatzitzit.’ ” Quej nopa quiijtohua TOTECO.

²³ TOTECO quiijtohua: “Cati talnamiqui ma amo mohueyimati ica ital-
namiquilis. Cati quiipya fuerza ma amo mohueyimati ica ichicahualis.
Huan cati tominpiya ma amo mohueyimati ica itomi. ²⁴ Pero sinta se acajya
quinequi mohueyimatís, ma mohueyimati pampa cuali techixmati huan
quimati para san na niDIOS. Na nitetasojta. Na niitztoc cuali huan nijchihua
cati xitahuac. Huan quej ni niitztoc pampa quej nopa techpactía.” Quej nopa
TOTECO quiijtohua.

²⁵ Huan nojquiya TOTECO quiijto: “Ajsis tonali quema san se niquintatza-
cuiltis nochi israelitame cati motequilijtoque nopa machiyot circuncisión
ipan inintacayo huan nochi tacame ten campa hueli tali cati amo quichij-
toque. ²⁶ Niquintatzaucuiltis egiptome, edomitame, amonitame, moabitame,
Arabia ehuaní huan nojquiya amojuanti cati anehuani tali Judá. Pampa
masque antacame ten tali Judá anmotequilijtoque nopa machiyot para
anquipajpacase amotacayo, amo anquipajpactoque amoyolo noixpa.”

10

Cati quinhueyitalíaj teteyome monequi taijyohuise

¹ Anisraelitame, xijtaquilica icamanal TOTECO. ² Quej ni yaya quiijto-
hua: “Amo xijtoquilica iniojhui nopa masehualme ipan seyoc talme cati
motemachíaj ipan sitalime ipan ilhuicac para quimatise taya ininpantis.
Amo xiquinimacastica nopa sitalime quej sequinoc quichihuaj. ³ Amo teno
ipati cati injuanti quichihuaj, san huilhuitique. Injuanti quitzontequij
se cuahuit huan ica quichijchihuaj se teteyot. ⁴ Teipa quiyeyecchihuaj
itejteno ica plata o ica oro. Teipa quiquetzaj campa quinequij huan ica se
martillo quilavosminaj para amo huetzis ten ilugar. ⁵ Huan nopa teteyot
nopena mocahua san moquetztoc xitahuac quej se cuatamajmatili cati
quiquetztoque ipan mila para quinmajmatis totome. Nopa teteyot amo hueli
camanalti huan monequi quiquechpanose para quihuicase ten se lugar
hasta seyoc lugar pampa amo hueli nejnemi. Huajca amo xiquinimaca-
stica nopa teteyome pampa amo teno hueli amechchihuilise. Amo hueli
amechchihuilise cati fiero, yon amo hueli amechchihuilise cati cuali.”

⁶ ¡NoTECO, amo onca seyoc Dios quej ta! Pampa ta nelía tihueyi huan
tijpiya nochi chichahualisti. ⁷ ¿Ajquiya amo mitzimacasis ta cati titanahuati-
jjet ten nochi talme? San ta quinamiqui mitzimacasis pampa ten nochi
talnamiquini huan tanahuatiani cati itztoque ipan ni taltipacti, amo aquí
seyoc quej ta.

⁸Nochi masehualme cati quinhueyimatij teteyome nelía huihuitique huan amo teno quimatij, pampa se pedazo cuahuit amo teno hueli mitznexilis. ⁹Injuanti nojquiya quihualicaj plata cati quitejtzontoque ten tali Tarsis huan oro ten tali Ufaz. Huan quinmacaj nopa teposchihuani para ma quinchijchihuaca teteyome. Teipa nopa teteyome quinquentíaj yoyomit cati azultic huan moradojtíc quej se tanahuatijquet cati quijjtzontoque cati más quimatij yoyonchihuase. ¹⁰Pero TOTECO, san yaya nopa Dios cati melahuac huan cati itzotc. San yaya nopa Tanahuatijquet cati itzotc para nochipa. Quema yaya cualani, nochi masehualme ipan talme huihuipicaj. Quimatij para amo hueli quijyohuíaj itatzacuiltis.

¹¹Anisraelitame, xiquinilhuica injuanti cati quinhueyimatij teteyome: “Nopa teteyome amo nelía dioses huan amo quichijchijque ne ilhuicacti huan taltipacti. Injuanti tamiixpolihuise.”

*Huicat para quihueyichihuase TOTECO
(Jer. 51:15-19)*

¹²Pero cati tojuanti TOTECO, yaya, quena, quichijchijqui ni taltipacti ica ichichualis. Huan ica italnamiqulis quitali sesen tamanti campa monequi. Nojquiya ica italnamiqulis quipatajqui ne ilhuicacti. ¹³Quema caquisti itoscac TOTECO, mocojcoxonía nopa at ipan ilhuicacti huan tatomoni. Huan quichihua para ipan ni tali ma motanana mixti. Quititani nopa tapetanilot ma huala quema quichihua ma huetzi at. Quiquixtía nopa ajacac campa quiajotoc huan quichihua ma taajaca.

¹⁴Quema tijhuicalotis masehualme ica TOTECO, nochi masehualme nesij huihuitique huan amo teno quimachilíaj. Quinchijchihuaj teteyome, pero nopa teteyome quinpinahualtise cati quinchijchijque. San se istacatili para nopa teteyome quipiyaj chichahualisti pampa amo quipiyaj nemilisti, yon amo taijyotilanaj. ¹⁵San tapic nopa teteyome huan taixcopincayome, pampa amo teno ininpati. Huan ajsis tonali quema TOTECO quinixpolihuilitis. ¹⁶Pero Dios cati iTeco Jacob * amo quej se teteyot. Yaya nopa Tachijchijquet cati quichijqui nochi cati onca. Huan yaya quintapejpeni israelitame para iaxcahua. Yaya itoca TOTECO Cati Quinyacana Iilhuicac Ejcahua Ma Tatani-tij.

¹⁷Huan TOTECO nojquiya quijjtohua: “Xijcualtica amotamantzitzi para anquitzquise amoojhui pampa nimantzi hualase para quiyahualose ni altepet. ¹⁸Ica se talojtzi na nimechquixtis ten ni tali huan nimechtitanilis huejhueyi taijyohuilisti. Huan quej nopa anquiyecose nohueyi cualancayo.” Quej nopa quijjtohua TOTECO.

¹⁹Niteicnelti, pampa nelía temajmati nopa cocot cati nijpiya pampa techcoco. Tahuel techcocohua huan hueyi notaijyohuilis. Nococolis amo quipiya pajti para caxanis, huajca monequi ni quijyohuis. ²⁰Nochaj ixpolijqui huan amo teno nijpiya para nijsencahuas. Quinhuicaque noconeua huan ama injuanti tamimijque. Amo mocajqui yon se cati techpalehuisquía para sempa nijcualtalis nochaj ten yoyomit huan nijtalis icortinas. ²¹Nopa tamocuitahuiani ten israelitame nelía huihuitique. Ayecmo quitemohuaj TOTECO huan yeca amo quisas cuali para injuanti. Ama nochi ininborregojhua mosemantoque campa hueli. ²²Xijtacaquilica cuali nopa tahuejchihualisti cati hualahui. Nopa soldados cati temajmatijque ten nopa tali ica norte hualahui para quisosoloquij nochi altepeme ten ni tali Judá.

* 10:16 10:16 O Israel.

Nopa altepeme mocahuase quej se huactoc tali campa quichihuase iniosto tecuanime.

²³ Jeremías quijtohua: “NoTECO, na nijmati para se tacat amo iaxca inemilis, yon amo yaya cati quinahuatis cati panos ipan iojhui. ²⁴ Yeca techtatzacuilti para ma nimoxitahua. Pero noTECO, nimitztajtanía amo techtatzacuilti chichahuac. Amo techtatzacuilti ica mocualancayo pampa huelis nimiquis. ²⁵ Más cuali xijmajcahua mohueyi cualancayo ipan nopa talme cati amo mitzixmatij huan cati amo mitzhueyimatij, pampa injuanti quitzontamiltijtoque moisraelita masehualhua huan quichijtoc inintal quej se huactoc tali.”

11

Quiixpanoque nopa camanali ica TOTECO

¹ Teipa TOTECO technoynotzqui na, niJeremías, huan techilhui: ² “Xiquinelnamiquilti nopa masehualme ten tali Judá huan altepet Jerusalén cati quijtohua nopa camanali cati nijchijqui ica inihuejcapan tatahua. ³ Huan xiquinilhui para quej ni niqijtohua, niDios cati niininTeco israelitame: ¡Tatelchihuali ma eli nopa masehuali cati amo quitepanitas nopa camanali! ⁴ Pampa quema niqunquixti ipan tali Egipto campa tetequipanohuayayaj san tapic, niqunilhui: Xijtacaquilica nocamanal huan xijchihuaca nochi cati nimechnahuatía. Huan sinta quej nopa antechneltocase nochi amojuanti, anelise annoaxcahua huan na nielis niamoTeco Dios. ⁵ Huan sinta antechneltocase, nijtamichihuas ica amojuanti cati niquintajtolcahuili huan nijchijqui ica amohuejcapan tatahua huan nimechmacas para ximocahuaca ipan ni tali cati temaca nochi tamanti cati cuali, ni tali campa anitztoque hasta ama.”

Huajca na, ni Jeremías, nijnanquili huan niquilhui: “¡Quej nopa ma eli TOTECO!”

⁶ Huajca TOTECO techilhui: “Xiya xitepohuiliti ni camanali ipan nochi calles ten altepet Jerusalén huan ipan nochi altepeme ten tali Judá. Xiquinilhuiti ni camanali: ‘Xijtacaquilica cati quijtohua nopa camanali ipan nopa camanal sencahuali cati TOTECO quichijqui ica tohuejcapan tatahua huan nochi xijtamichihuaca. ⁷ Pampa hasta quema niqunquixti amohuejcapan tatahua ipan tali Egipto huan hasta ama, na nijsenhuiquilijtoc nimechilhuitihualajtoc anisraelitame para xijtacaquilica cati nimechilhua. ⁸ Pero amohuejcapan tatahua amo techtacaquilijque. Yon quentzi amo quichijque campeca para nechcaquise. Sesen ten injuanti quitoquili nopa amo cuali ojti cati quiyolpactiyaya. Huan pampa amo quinejque techtepanitase, na nijhualicac ininpani nochi nopa huejhueyi tatzacuilti cati na nijtalijtoya ipan nopa camanal sencahuali.’”

⁹ Teipa TOTECO sempa technoynotzqui huan techilhui: “Nopa masehualme ten tali Judá huan altepet Jerusalén, mosencajtoque san sejco para mosisinise ica na. ¹⁰ Injuanti nojquiya tajtacolchihuaj san se quej inihuejcapan tatahua. Amo quinequij quicaquise nocamanal huan quinhueyichihuaj teteyome. Quena, nopa israelitame ten tali Israel huan nojquiya ten tali Judá quiixpanotoque nopa camanali cati nijchijqui inihuaya inihuejcapan tatahua. ¹¹ Huajca niamoTECO niqijtohua para ama niquintitanilis huejhueyi taijyohuiliti huan amo momanahuis yon se. Huan masque techtzilzilise miyac hueltas para ma niquintasojta, na amo niquintacaquilis. ¹² Huan nochi tali Judá ehuan huan altepet Jerusalén ehuani quintzajtzilise ininteteyohua huan quintatilise copali, pero nopa teteyome amo huelise

quinmaquixtise ipan inintequipachol huan inintajyohuilis. ¹³ Pampa anisraelitame ten tali Judá, anquinpiyaj miyac teteyome quej imiyaca amoaltepehua. Huan amojuanti ipan altepet Jerusalén anquintalijtoque miyac taixpame cati se pinahualisti. Anquipiyaj taixpame para nopa teteyot Baal quej imiyaca amocalles huan nopona anquitatilíaj copali.

¹⁴ “Huajca, Jeremías, amo ximotatajti por ni masehualme, yon amo xichoca por injuanti. Pampa na amo niquintacaquilis quema itztose ipan tajyohuilisti huan techtzajtzilise. ¹⁵ ¿Quipiyaj caquihuili nomasehualhua cati niquinicnelia para noja hualase ipan ni tiopamit quema quichijtoque cati amo nijnequi niquitas huan quinhueyichijtinentoque teteyome? ¿Moilhuáj amo niquintatzacuiltis pampa techtencahuilijtoque miyac nacat ten taca-jahualisti? ¡Amo! Amo niquinmacas paquilisti sempa, yon amo niquinc-ahuilis ma itztoca.

¹⁶ “NiamoTECO niqunitayaya nomasehualhua quej se yejectzi Olivo cuahuit cati temaca miyac itajca. Pero ama niquintitancoc miyac soldados para ma quintatica hasta mocahuase san cuajnexti huan san popocatose. ¹⁷ Na, niamoTECO Cati Niquinyacana Noilhuicac Ejcahua Ma Tatanitij nijchihuas quej se tacat cati quitoca se Olivo cuahuit huan teipa tanahuatis para ma quitati. Na niqinchijchijqui noisraelita masehualhua huan ama nitanahuatijtoc para sequinoc ma quintzontamiltica. Quej nopa elis pampa nomasehualhua ten tali Israel huan Judá quintencahuilijtoque copali nopa teteyome ten Baal huan taniel techcualancamacatoque.”

Quinequij quimictise Jeremías

¹⁸ Huan TOTECO techilhui para nocualancaitacahua quinequiyaj techchihuilise cati fiero. Huan technextili nochi nopa tamanti cati quisencajtoyaj para techchihuilise. ¹⁹ Pero na niitztoya quej se borrego cati amo quimati quema quihuicaj para quimictitij, amo nijmatiyaya sinta injuanti quichihuayaj campeca para techmictise. Injuanti quijtohuayajaj: “Ma tijtzontamiltica ni tacat huan quej nopa ayecmo tacamanalhuis. Ma tijmictica para ayecmo aquí quielnamiquis.”

²⁰ Pero ta tiTOTECO Cati Tiquinyacana Moilhuicac Ejcahua Ma Tatanitij, ta titetajtolsencahua xitahuac. Ta tijtachili iniyolo huan inintalnamiquilis ni masehualme. Techcahuili ma niquita quenicatza tiquintatzacuiltis por nochi cati moilhuijtoque techchihuilise. San ipan ta nimotemachía para tijchihuas cati xitahuac.

²¹ Huajca TOTECO quijto: “Xiquita quenicatza niquintatzacuiltis nopa masehualme ten altepet Anatot cati quinequij mitzmictise. Injuanti mitzilhuíaj: ‘Amo xitacamanalhui ten TOTECO para amo timitzmictise.’ ²² Pero por ya nopa, nimoTECO Cati Niquinyacana Noilhuicac Ejcahua Ma Tatanitij niqijtohua para miquise inintelpocahua ipan tatehuilisti. Huan inioquichpilhua huan inisihuapilhua miquise ica mayanti. ²³ Huan yon se masehuali ten nopona amo momanahuís. Pampa na nijtitanis ipan nopa tacame ten altepet Anatot se tatzacuilti cati taniel temajmati quema ajsis hora para nitetatzacuiltis.”

12

Jeremías quicamanalhuía TOTECO

¹ TOTECO, ta nochipa tiitztoc tixitahuac quema niya moixpa para nimitztajtanis se tamanti. Huajca ama techcahuili ma nimitzilhui ni tamanti cati techtequipachohua: ¿Para ten mohueyichihua nopa masehualme cati fiero ininemilis? Huan ¿para ten itztoc ica paquilisti nopa masehualme

cati mosisiniáj? ² Quej se cati quintoca cuame cati nimantzi monelhuayotíaj, moscaltíaj huan temacaj inintajca, ta tiquinchijqui nopa masehualme huan tiquintiochijtoc huan quisque cuali. Huan inijuanti quijtohuaj para mitztascamati por cati tiquinchihuilijtoc, pero ipan iniyolo amo mitzelnamiqij. ³ Pero ica na amo quej nopa. Pampa ta tiquixmati huan tijeyyecohua noyolo huan tijmati para miyac nimitzicnelía. Huajca xiquinhuica ni masehualme quej borregojme cati quinhuicaj para quinmictitij. Xiquiniyocatali para ma miqúica ipan nopa tonali ten miqúilisti.

⁴ ¿Hasta quema elis huactoc ni tali huan pilintoc nopa sacat? Pampa por nochi cati fiero ni masehualme quichijtoque ayecmo onca tapiyalme, yon totome. Pero ni masehualme noja quijtohuaj: “Toteco Dios amo techtatzacuiltis pampa amo quiita cati tijchihuaj.”

TOTECO quinanquilía Jeremías

⁵ Huajca TOTECO technanquili huan techilhui: “Sinta tisiyahui quema timotalohua inihuaya tacame cati san iniicxipa yahuij, ¿quenicatza huelis tiquijyohuis timotalos ica cati yahuij cahujtipa? Sinta campa tamaya timotepotania huan tihuetzi, ¿taya tijchihuas quema tiitztos ipan nopa cuatitamit nechca hueyat Jordán campa tahuel tafiero? ⁶ Hasta mofamilia huan moicnihu mochijtoque mocualancaitacahua. Inijuanti quichihuaj campeca para quinyoltilanase nochi nopa masehualme para ma mitzchihuilica cati fiero. Huajca amo ximotemachi ipan inijuanti, yon amo xiquineltoquili inincamanal masque mitzcamanalhuise ica yejectzi.”

TOTECO mocuesohua por imasehualhua

⁷ Teipa TOTECO quijto: “Na niquintahuelcajtoc nomasehualhua cati eliyayaj noaxcahua. Huan niquintemactilijtoc inimaco inincualancaitacahua masque tahuel niquinicneliyaya. ⁸ Pampa nomasehualhua cati niquintapejpeni, cualanque nohuaya quej se león cati cualantinemi cuatita. Huan yeca ama niqinchihuilía quej niqincualancaitasquía. ⁹ Nomasehualhua itztoque quej se totot ica iijhuiyo cati yejectzi, pero nopa tzojpilome quinequij quicuase. Na niqijtos: Xihualaca antzojpilome huan antecuanime cati annemij cuatita para ma quicuacuj ininacayo nopa mijcatziti ten nomasehualhua.

¹⁰ “Miyac tanahuatiani ten sequinoc talme hualase para quintzontamiltise nomasehualhua cati itztoyaj quej noxocomecamil. Ipan moquejquetzque nomil cati eliyaya nelyejectzi. Quichihuase quej se huactoc tali campa amo teno eli. ¹¹ Quitamisosolose nochi huan eltos quej mochoquilia nopa tali huan mocuesohua pampa amo aqui monejnehuli ten taya cati tatzacuiliti hualayaya ipan ni tali. ¹² Ipan nochi tepeme hualase soldados cati tasoosolose pampa nopa macheta cati TOTECO quipixtoc imaco, quintzontamiltis nochi masehualme cati itztoque ipan nopa tali. Huan quintzontamiltis ten se lado hasta seyoc lado huan amo aqui momanahuis. ¹³ Eltoc quej nomasehualhua quitojque trigo, pero quipixcase huitzti. Tequipanojtoque chichahuac, pero san tapic, pampa amo quieliltise cati quitojque. San quipantise pinahualisti pampa ihueyi cualancayo TOTECO motalijtoc ininpani.”

Camanali para talme nechca Judá

¹⁴ Huan quej ni quijto TOTECO ten nochi nopa amo cual masehualme cati itztoque ipan nopa talme cati quiyahualohuj ni tali cati TOTECO quinmacac israelitame: “Na nimechquixtis ten amotalhua san se quej nijchihuas ica nopa masehualme ten tali Judá. ¹⁵ Pero teipa sempa nimocuepas huan

nimechtasojtas nochi amojuanti. Huan sempa nimechhualicas ipan amotal quej nojquiya niqinhualicas tali Judá ehuan ipan inintal. ¹⁶ Huan sinta amojuanti nimantzi anquitoquilise nopa ojti cati quitoquillaj nomasehualhua huan antechitase huan antechhueyimatisa quej niamoTECO quej anquinnextilijque nomasehualhua ma quihueyimatica Baal, huajca anquipiyase se cuali lugar tatajco nomasehualhua huan nochi elis cuali para amojuanti. ¹⁷ Pero nopa masehualme ten nochi talme cati amo quinequise techtepanitase, sempa niqiniquixtis huan niqinixpolihuiltis.” Quej nopa quijto TOTECO.

13

Tanextili ten nopa tzinquechilpicayot

¹ Huan TOTECO techilhui: “Xiya ximocohuiti se motzinquechilpica cati tachijchihuali ica hilo ten lino, huan ximotzinquechilpi, pero amo xijpaj-paca nopa tzinquechilpicayot, yon amo xijcalaqui ipan at.” ² Huajca na nijcohuato nopa tzinquechilpicayot senquisa quej TOTECO technahuatijtoya huan nimotzinquechilpi. ³ Teipa TOTECO sempa nechcamanalhui huan techilhui: ⁴ “Xijcui nopa motzinquechilpica cati tijcojqui huan xiya campa nopa hueyat Eufrates huan xijtati ipan se ostot ipan nopa tepexit.”

⁵ Huajca na niyajqui campa nopa hueyat Eufrates huan nijtati nozona senquisa quej TOTECO technahuatijtoya. ⁶ Teipa quema ya panotoya miyac tonali TOTECO techilhui: “Xiya sempa ipan nopa hueyat Eufrates huan xijcui nopa tzinquechilpicayot cati nimitznahuati xijtatiti nepa.” ⁷ Huajca na niyajqui campa nopa hueyat Eufrates huan nijquixti nopa tzinquechilpicayot ipan nopa ostot campa nijtatijtoya. Pero niqitac para ya tamipalantoya huan ayecmo huelisquía nijtequihuis ipan yon se tamanti. Ayecmo teno ipati eliyaya.

⁸ Huajca TOTECO technojoztzqui huan techilhui: ⁹ “Ya ni quinextía para quej nopa nijosolos huan nijtamiltis inihueyimatilis nopa tali Judá huan Jerusalén ehuan. ¹⁰ Pampa nopa masehualme amo cualme huan amo quinequij techtacaquilise. Quichihuaq senquisa cati fiero cati injuanti quin-pactía huan motancuaquetzaj iniixpa teteyome cati hualahui ipan sequinoc talme huan quinhueyimatij. Huajca injuanti nojquiya elise quej nopa tzinquechilpicayot cati amo teno ipati. ¹¹ Pampa quej se tacat moilpía ica itzinquechilpica itzinquechta, quej nopa nojquiya niqinchijqui nopa israelitame ipan tali Israel huan tali Judá para ma technechcahuica huan ma motatzquilica ipan na para elise nomasehualhua huan para techhueyitepanitase. Huan nojquiya para elise quej nohueyitilis huan noyejeyeca. Pero injuanti amo quinejque techtacaquilise huan mocuapolojqe. Quej nopa niamoTECO niqijtohua.

¹² “Huajca xiquinilhui: ‘Quej ni quijtohua TOTECO cati ininDios israelitame: Nochi amocuetaxhua temise ica xocomecat iayo. Huan injuanti mitzilhuise: Quena, tojuanti tijmatij para melahuac tocuetaxhua temise ica tailisti huan tielise titominpiyani.’ ¹³ Huajca xiquinilhui: ‘Quej ni quijtohua TOTECO: Amojuanti amo anquimachilaj taya quijtosnequi ya nopa. Ya nopa quijtosnequi para na niqinihuintis nochi cati itztoque ipan nopa tali. Niqihuintis nopa tanahuatijquet cati mosehuijtoq campa tanahuatiyaya David, huan nojquiya nopa totajtitzí, tajtolpanextiani huan nochi nopa masehualme ten altepet Jerusalén. ¹⁴ Quej se quitacanía se vaso ica seyoc para quichihuas cuechtic, na nijchihuas ica tetajme huan ininconeua.

Amo niquintasojtas, yon amo niquintapojpolhuis. Yon se tamanti amo techtzacuilis para ma amo niquintatzaculti.’ ” Quej nopa quiiyto TOTECO.

Amo ximohueyimatica

¹⁵ Israelitame, xijtacaquilica pampa camanaltitoc TOTECO. Amo ximohueyimatica. ¹⁶ Xijhueyichihuaca amoTECO Dios amantzi quema noja onca tonali. Pero sinta amo anquitepanitase, yaya amechhualiquilis tzintayohuilot para ximotepotanica huan xihuetzica ipan nopa tepeme. Anquite-mose taahuili, pero san anquipantise tzintayohuilot. ¹⁷ Pero sinta amo anquitacaquilise icamanal TOTECO, nimochoquilis noseltitzi ica tequipacholi pampa amojuanti tahuel anmohueymatij. Chicahuac quisas noixayo ipan noixteyolhua pampa amechhuicase amojuanti cati animasehualhua TOTECO ipan sequinoc talme para antetequipanotij san tapic.

Camanali para nopa tanahuatijquet

¹⁸ Xiquilhui nopa tanahuatijquet huan nopa sihua tanahuatijquet: “Xite-moca ten amosiyas yejyetzzi corona huan ximosehuica talchi campa taltepotci pampa nopa yejyetzzi corona cati anquipixtoque nimantzi huetziz ten amotzonteco. ¹⁹ Nochi nopa altepeme cati mocahuaj ipan Neguev ica tani quitzacuase inincaltenhua huan amo aqui huelis calaquis nozona. Pero quinhuicase nochi masehualme ten tali Judá ipan sequinoc talme para tetequipanotij san tapic.

²⁰ “Xiquintachilica nopa soldados cati hualahui ten nopa tali cati mocahua ica norte. Analtepet Jerusalén ehuan, ¿canque itztoque nopa yejyetzitzi borregojme cati na nimechmacac para xiquinmocuitahuica? ²¹ ¿Quenicatza anquimachilise quema niquintalis quej amotanahuatijcahua cati eliyayaj amohuampoyohua? Temachtí anmomimilose ica tacuajcualoli quej se sihuat cati teshoc ihora para quitacatilis icone. ²² Huan huelis timoilhuis: ‘¿Para ten techpano nochi ya ni?’ Nochi ya nopa mitzpanos por amotajtacolhua. Yeca ama amechpinahualtise huan amechtehuise nopa soldados cati hualahui.

²³ “¿Hueli mochihuase chipahuaque nopa masehualme ten tali Etiopía cati quipiyaj inincuetaxo yayahuic? ¿O hueli nopa tigre quiixpolos nopa muchas cati quipiya ipan iijhuiyo? ¡Amo! ¡Amo hueli! Quej nopa nojquiya amojuanti cati ya anmomajtoque antajtacolchihuaj amo hueli anquipehualtise para anquichihuase cati cuali.” ²⁴ Nojquiya TOTECO quiiyto: “Antechelcajqe huan anmotemachijque ipan teteyome cati amo nelía Dios, yeca ama na nimechpasolos quej trigo itasolo cati mosemana ica nopa ajacat cati huala ten campa huactoc tali. ²⁵ Pampa ya nopa cati amechtocarohua. Ya nopa cati na nijtamachijtoc para nimechmacas amojuanti. ²⁶ Na noseltitzi nimechpinahualtis quej quema quicuextanana se sihuat huan nelía pinahua. Tanemijya nesis amonemilis cati fiero. ²⁷ Na niqiztoc quenicatza antechtahuelcajqtoque huan antechixpanotoque quej se sihuat quicahua ihuehue para yas ica seyoc tacat. Anquinhueyichijtoque teteyome ipan campa hueli mila huan campa hueli tepeme. Antecnelitque amojuanti cati analtepet Jerusalén ehuan. ¿Hasta quema anmotapajpacchihuase ten amotajtacolhua?”

14

Nopa hueyi tahuaquisti

¹ TOTECO technojnotzqui na, niJeremías, huan techpohuili para ten amo taahuetzizyaya. Quiijto:

² “Xiquita, nochi Judá ehuani chocaj, huan nopa tanamacani caltzaoque. Nochi masehualme nozona motancuaquetzaj talchi huan nochi altepet Jerusalén ehuani tzajtzi chicahuac. ³ Nopa masehualme cati tominpiyani quintitani inintequipanojcahua campa ameli para ma quicuitij at, pero quema ajsitoj, amo quipantijque pampa ya tamihuactoya. Huajca mocuepaj ica pinahualisti huan ica tequipacholi pampa nochi ininco cactoc huan amo quimatij taya quichihuase. Yeca quitzacuaj inintzonteco ica se yoyomit para quinextíaj mocuesohuaj. ⁴ Nopa tali tahuel huactoc huan tatapacatoc pampa ayecmo huetzi at. Nochi tacame cati miltequitij quitzacuaj inintzonteco ica tequipacholi. ⁵ Nopa tenan masat quitahuelcahua icone pampa amo onca sacat para quicuas. ⁶ Huan nopa burrojme cati nemij ipan cuatitamt moquetzaj ipan tepeme campa tahuactoc huan quijyotilanaj ajacat quej nopa tepechichime. Inixteyol hasta quincocohua pampa quitemojtinemij xihuit para quicuase, pero amo quipantíaj.”

Jeremías quinotza TOTECO por nopa israelitame

⁷ TOTECO, nelía titajacolchijtoque miyac huan cati tijchijtoque techtelhuía moixpa, pero timitzajtaniaj techpalehui para amo aquí mitzmahuispolos por cati fiero tijchijtoque. Tahuel titajacolchijtoque ica ta. ⁸ ¡Ay tiTOTECO! Tiisraelitame ipan ta timotemachíaj. Ta titotamanahuijca quema tiitztoque ipan taohuijca. ¿Para ten techchihuía quej amo techixmati? Timochihua quej se tise sejoyoc ejquet ipan ni tali o quej se tinejnenquet cati mocahua san para se yohuali nica tohuaya. ⁹ ¿Huelis nojquiya acaya mitzmajmati ta huan amo tijmati taya tijchihuas? Ta tijpiya miyac chicahualisti, ¿amo huelis techmaquixtis? TOTECO, ta tiitztoc tatajco ten tojuanti huan nochi quimatij para tojuanti timoaxcahua huan timitzhueyimatij. Huajca TOTECO, amo techtahuelcahua.

¹⁰ Ya ni cati TOTECO quijtohua ten nopa masehualme: “Quinpacki Judá ehuani para mohuejcatilise ten na. Ayecmo quitoquilíaj noojhui huan ayecmo niqunselis quej nomasehualhua. Yeca amo techpactía cati quichihuaj. Huajca san niquelnamiquis nochi tamanti cati amo cuali cati injuanti quichijtoque huan niquintatzacuiltis por inintajacolhua.”

¹¹ Teipa TOTECO sempa techilhui: “Amo techajtani ma niqunpalehui ni masehualme. Amo nimotatajti por injuanti. ¹² Quema mosahuase noixpa, na amo nijtachilis. Huan quema injuanti techhualiquilise tacajcahualisti tatatili huan ofrendas, amo nijselis. San niquintzontamiltis ica tatehuilisti, mayanti huan huejhueyi cocolisti.”

¹³ Huajca na niquijto: “¡Ay TOTECO Cati Más Tijpiya Tanahuatili! Inintajtolpanextijcahua ni masehualme quinilhuíaj para nochi eltos cuali. Quinilhuíaj para amo oncas tatehuilisti, yon mayanti. Tayolmelahuaj para tiqintitanilis tasehuilisti cati huejcahuas.”

¹⁴ Huan TOTECO techilhui: “Nopa tajtolpanextiani san tayolmelahuaj istacatili huan quijtohuaj ya nopa niquijtojtoc. Amo niquintantoc, yon amo niqunimacac nopa camanali cati quijtohuaj huala ten na. Amo niqunilhuijtoc yon se camanali. Tepohuilíaj ten tanextili cati amo quitztoque, yon amo quicactoque. Tepohuilíaj huihuiyot cati san injuanti quiquixtíaj ipan iniyolo.” ¹⁵ Huan nojquiya ama TOTECO quijto: “Huajca niquintatzacuiltis nopa istacatica tajtolpanextiani cati tayolmelahuaj para hualas tamanti cati san istacatili. Camanaltij quej elisquía niquintequimacatoc, pero amo niquintantoc. Quijtohuaj para amo oncas tatehuilisti, yon mayanti. Huajca nopa tajtolpanextiani iniselti miquise ipan tatehuilisti huan ica mayanti. ¹⁶ Huan nopa masehualme cati nopa tajtolpanextiani

quinyolmelajtoque, inintacayohua quintepehuase ipan nopa calles ten altepet Jerusalén pampa miquise ica mayanti huan ipan tatehuilisti. Huan amo aquí itzots para quintalpachos. Inisihuaajhua, inintelpocahua huan iniichpocahua tamiixpolihualse, pampa nijtitanis ipan inijuanti se hueyi tatzacuilti por inintajacolhua.

¹⁷ “Huaajca, Jeremías, ama xiquinilhui nomasehualhua quej ni: ‘Tahuel nichocas tayohua huan tonaya quema ajsis amotatzacuilti. Amo huelis nimoyoltalis pampa nomasehualhua ya quintzontamiltijtose ica macheta huan tepejtose talchi. ¹⁸ Quema niyas cuatita, nopona nojquiya niqitas tepejtoc inintacayo cati quintzontamiltijque ica macheta. Huan quema niyas ipan icalles nopa altepet, nopona niqitas masehualme cati miqij ica mayanti huan cocolisti. Huan nopa tajtolpanextiani huan totajtzitzi yahuij campaa hueli ipan nopa tali huan teilhuaj para nochi eltos cuali, pero amo quimatij taya quichihua.’ ”

Jeremías motatajtia por israelitame

¹⁹ ¡TOTECHO! ¿Tiquintahuelcajqui nochi masehualme ipan tali Judá? ¿Ticucalancaita altepet Jerusalén? ¿Para ten techcocojtoc hasta amo onca pajti? Tojuanti timoilhuyiyaj para hualas tasehuilisti huan para ama, quena, TOTECHO techchicahuas huan techpajtis campaa ticocojtoque. Pero ama campaa hueli onca taijyohuilisti huan majmajti. ²⁰ TOTECHO, tojuanti tijmatij para melahuac tahuel tijatcolchijtoque ica ta huan tohuejcapan tatahua nojquiya mitzixpanotoque ²¹ TOTECHO, amo techtahuelcahua pampa sinta ya nopa tijchihuas nochi mitztajilhuisse huan ayecmo mitztepanitase, yon ayecmo quitepanitase nopa siyaj campaa titanahuatía. Amo techelcahua. Amo xijtamilti nopa camanali cati tijchijqui tohuaya para techtiochihuas. ²² ¿Ten nochi teteyome cati quinhueyichihua ipan nochi talme, yon se amo hueli quichihua ma taquiyahui? ¡Yon se! Amo aquí hueli quitalis at ipan mixti para ma huetzi, pampa amo aquí seyoc Dios. San ta tiTOTECHO huan toDios. Huan tojuanti timotemachijtoque ipan ta pampa ta tihueli tijchihua ni tamanti.

15

Tayolmelahualisti ten nopa tatzacuilti

¹ Huan TOTECHO techilhui: “Masque Moisés huan Samuel hualasquíaj huan moquetzasquíaj noixpa para techtajtanise por ni masehualme, amo niqin-palehuisquíaa. ¡Xiquinquixti ni masehualme noixpa! ¡Ma quisaca! ² Huan sinta israelitame mitzilhuisse: ‘¿Canque tiyase?’, huaajca xiquinilhui para quej ni niininTECO niqijtohua: ‘Cati niquintalijtoc para miquise ica cocolisti, ma miquica ica cocolisti. Cati niquintalijtoc para miquise ipan tatehuilisti, ma miquica ipan tatehuilisti. Cati niquintalijtoc para miquise ica mayanti, ma miquica ica mayanti huan cati niquintalijtoc para quinhucase ipan sequinoc talme para tetequipanotij san tapic, ma quinhucaca ipan seyoc tali.’ ³ Pampa ya nijsencajqui para niquintitanilis nahui tamanti cati fiero para niquintatzacuiltis; niquintitanilis nopa macheta cati temictía, chichime cati quihuilanase inintacayohua nopa mijcatzitzitzi para quinhuejhuelose; tzojopilome para quincuase huan tecuanime cati quitamiltise cati noja mocahuaj ten inintacayohua. ⁴ Niquintatzacuiltis chicahuac nochi nomasehualhua por nochi nopa tajtocoli cati Manasés, icone Zequías, quichijqui ipan altepet Jerusalén quema yaya elqui tanahuatijquet ipan tali Judá. Huan tahuel momajmatise nochi masehualme ten nochi talme ipan taltipacti cati quitachilise cati niqinchiuilijtoc nomasehualhua.

⁵ “Amo aquí amechtasojtas, analtepet Jerusalén ehuaní. Amo aquí chocas por amojuanti quema hualas amofaohuijcayo. Amo aquí tatzintocas por amojuanti para quimatis quenicatza anitztoque. ⁶ Amojuanti antechtahucajtoque huan antechajque ica amoica. Huajca ama na nimomatanas para nimechtzontamiltis. Nimechmacatoc miyac tonali para ximoyolcuepaca hasta ya nisijajqui. Pero amo anmoyolcuctoque. Quej nopa niqijtohua ni amoTECO. ⁷ Na nimechquixti ipan inincaltenhua amoaltepehua huan nimechmajcajtoc ipan ajacat quej se cati quitzejtzeloehua trigo quimajcahua itasolo ajacatipa. Nimechquixtilis nochi cati anquipiyaj masque tahuel miyac ipati. Nimechtzontamiltis nochi annomasehualhua pampa amo anquinequiyayaj anquicahuase nopa nemilisti cati fiero para anmocuepase ica na. ⁸ Oncas más miyac cahual sihuame ipan amotal que xali cati onca iteno hueyi at. Teipa nijchihuas ma miquica nopa telpocame quema más quipiyaj fuerza inihuaya ininanahua nojquiya. Ica se talojtzi nijchihuas ma huala ipan nopa altepet tequipacholi huan majmajti. ⁹ Se sihuat cati quinpiyayaya chicome iconehua tapolos pampa quimictilijque nochi iconehua. Elis quej tamis inemilis quema ayemo ajsi ihora. Huan nopa tenantzi pinahuas pampa elis quej amo quema quinpixqui iconehua pampa nochi iconehua quinmictise. Quej nopa niininTECO niqijtohua.”

Jeremías camanalti

¹⁰ ¡Nelía niteicnelti! ¡Mamá, más cuali nimictosquía quema nitacatqui! Campa hueli niya nochi techcualancaitaj. Na amo aquí techtahuiquilía, yon na amo aquí nijtahuiquilía, pero nochi techtelchihujaj. ¹¹ TOTECO, sinta amo nijhijtoc cati cuali moixpa, ma quisa melahuac cati quijtojtoque nopa tacame cati techtelchihujaj. Hasta nimotatajtijtoc moixpa por nocualancaitacahua quema onca tequipacholi huan taohuijcaoyot.

TOTECO quintatzacuiltis israelitame

¹² “Amo aquí hueltis quipostequis nopa teposti hierro huan nopa teposti bronce cati huala ten norte. ¹³ Quej nopa nojquiya ica israelitame. Iniyolo tetic quej teposti. Yeca ama nochi iniricojyo huan nochi cati quipixtoque niquinmactilis inincualancaitacahua por nochi nopa tajtacoli cati quichijtoque. ¹⁴ Huan nijchihuas inincualancaitacahua ma quinhuicaca para tetequipanotij ipan se tali cati amo quiixmatij huan campa amo quema itztoyaj, pampa tahuel nicualani. Huan nocualancayo eltoc quej se tit cati temachtí quintamitatis.”

Jeremías quinanquili TOTECO

¹⁵ TOTECO, techelnamiquí huan techpalehui. Xiquincuepili nocualancaitacahua por na. Amo xiquincahuili ma techmictica. Ta tijmati para na nitaijyohuía pampa nimitzicnelía. ¹⁶ Quema ta techcamanalhui, nijcajqui mocamanal huan nijseli. Huan mocamanal techmacac fuerza quej elisquía se tacualisti para notonal. Tahuel nipaqui pampa mocamanal techmacac paquilisti ipan noyolo pampa na nimóaxca, ta tiTOTECO Cati Tiquinyacana Moilhuicac Ejcahua Ma Tatanitij. ¹⁷ Na amo quema nimosehujtoc inihuaya nopa fiero masehualme cati tehuetzquilíaj huan san moilhuíaj quichihuase cati fiero. Pampa ta technojnotzayaya, na nimocajtoc noseltitzi huan tahuel nicualanqui inihuaya nopa masehualme por inintajcolhua. ¹⁸ ¿Para ten noja nitaijyohuía? ¿Para ten amo hueli pachihui nococohua? ¿Amo quema tamis techcose? Motapalehuil eltoc quej se atajti cati quemantica quipiya miyac at huan quemantica mopantía huactoc.

TOTECO quinanquili Jeremías

¹⁹ Huajca TOTECO technanquili huan techilhui: “Sinta timocuepas ica na, nimitzchicahuas para huelis techtequipanos. Sinta ayecmo ticamanaltis cati amo teno ipati, huan ticamanaltis nocamanal cati hueyi ipati, huajca noja tielis tinotayolmelajca. Huan israelitame mocuepase ica ta. Amo monequi para ta tiyas campa inijuanti. ²⁰ Na nimitzchihuas quej se tepamit ten bronce cati tetic huan ohui para cati quicoyonis. Masehualme mitztehuisse, pero amo mitztanise pampa na niitztoc mohuaya para nimitzmocuitahuis huan nimitzmanahuis, quej nopa nimoTECO niqijtohua. ²¹ Na nimitzmanahuis ten nopa fiero masehualme cati tahuel mosisiníaj. Nimitzmaquixtis masque tiitztos inimaco.”

16

TOTECO quitequihui Jeremías quej se tanextili

¹ Teipa TOTECO sempa technojnitzqui huan techilhui: ² “Jeremías, ta amo hueli timosihuajtis, yon amo hueli tiquinpiyas moconehua ipan ni lugar. ³ NimoTECO nimitzilhuis ya ni cati nijtalijtoc para ininpantis nopa coneme cati tacatise ipan ni altepet ihuaya nochi ininanhua huan inintatahua. ⁴ Nochi miquse. Sequij miquse ica huejhueyiocolisti cati tahuel quincocos. Huan amo aquí mocahuas para chocas por inijuanti, yon amo aquí quintalpachos. Inintacayohua mocahuase tepejtoque talchi quej cuitat para ma lochonica. Sequinoc miquse ipan tatehuillisti huan ica mayanti. Huan inintacayohua quincocototzase nopa tzojopilome huan tecuanime.

⁵ “Pero ta amo xicalaquí ipan se cali campa quichoquillíaj se cati mijqui, yon amo ximocueso por inijuanti, yon amo xiquinolchicahua. Pampa na ayecmo niqinmanahuis, yon ayecmo niqinmacas notasehuilis. Huan nojquiya ya niqinquixtilijtoc noteicnelijcayo huan notasojtacayo. Quej nopa nimoTECO niqijtohua. ⁶ Quej cati huejhueyi huan cati pisiltzitzi miquse ipan ni tali, huan amo aquí quintalpachos, yon amo aquí quichoquilis. Inihuampoyohua amo mococose ipan inintacayo, yon amo aquí moximas quej momajtoque quichihujaj para quinextise mocuesohujaj. ⁷ Amo aquí quihuicas tacualisti para quinyoltalíse cati mocajtose yoltoque, masque mijqui ininana o inintata. Yon amo aquí quintitanilíse se quentzi xocomecat iayo para quinyolchicahuas.

⁸ “Huajca Jeremías, amo xiya ipan nopa pililhuitzitzti cati quichihujaj pampa quimatij huala cati ohui. Amo ximosehui inihuaya para titacuas o titais. ⁹ Pampa na, nimoTECO Cati Niqinyacana Noilhucac Ejcahua Ma Tatanitij huan na cati niiniDios israelitame niqijtohua: Xiquita, ipan monemilis na nijtamiltis campa amojuanti nochi huetzquisti cati onca ipan ni tali huan nochi yejectzi huicat. Ayecmo aquí quicaquis itoscac se mosihuajtijquet, yon amo quicaquise nopa ichpocat cati quichiya para yas ihuaya ipan se nenamictili.

¹⁰ “Quema tiqunyolmelahuas israelitame ten nochi ni tamanti, inijuanti mitztantzotquile quej ni: ‘¿Para ten TOTECO techyolmelahua para techitanilis ni huejhueyi taijyohuillisti? ¿Taya tamanti cati amo cuali tijchijtoque? ¿Taya tajtacoli tijpiyaj iixpa TOTECO Dios?’ ¹¹ Huajca ta xiquinilhui para nininTECO nijchijtoc pampa inintatahua techtahuelcajque huan quinhueyichijque teteyome ten sequinoc talme. Nojquiya quintequipanojque huan mofancuaquetzque iniixpa. Huan inijuanti techelcajque huan amo quitepanitaque notanahuatilhua. ¹² Huan amojuanti noja más fiero anquichijtoque que amohuejcapan tatahua. Nelía anyoltetique huan antochontique. Anquichihujaj ten hueli cati fiero cati amo amoyolo quinequi quichihuas. Amo anquinequij antechtacaquillise. ¹³ Huajca nimechquixtis

ten ni tali huan nimechtitanis ipan seyoc tali campa amo quema anitztoyaj amojuanti, yon amotatahua. Huan nozona anquinhueyimatiseteteyome tayohua huan tonaya quej anquinequij huan na ayecmo nimechtasojtas yon nimechpalehuis. Quej nopa xiquinilhuiti.

¹⁴ “Pero ajsis tonali quema masehualme cati tatestigojquetzaj ayecmo quijjose: ‘Nijtestigojquetza TOTECO cati quinquixti israelitame ipan tali Egipto’, ¹⁵ pero quijjose: ‘Nijtestigojquetza TOTECO cati quinquixti israelitame ipan nopa tali ica norte huan ipan nochi sequinoc talme campa quintitantoya huan sempa quinhualicac ipan inintal cati quinmacac inintatahua.’

¹⁶ “Pero ama xiquitaca, na niquintitanis miyac tacame para ma quinzitquica israelitame ten campa motatijtoque. Huan niquintitanis miyac tapehuani para ma quintepotztocaca campa motatijtoque ipan tepexit para cholose ten nopa tatzacuiliti cati hualas. ¹⁷ Pampa na nijtachilijtoc nochi cati injuanti quichihuj huan niqiztoc nochi inintajacolhua. Amo hueli quitatise cati amo cuali quichihuj ten noixteyol. ¹⁸ Huan niquintatzacuilitis ome huela imiyaca por nochi inintajacolhua pampa quisquihuijtoque notal ica ininteteyohua cati na niqinijiya huan quitemitijtoque ica inintajacolhua.”

Jeremías camanalti

¹⁹ TOTECO, ta tinochicahualis huan tinotamanahujca. Techpalehuía quema niitztoc ipan taijyohuiliti. Hualase masehualme ten miyac talme huan quijjose: “Totatahua elque tahuel huihuitique pampa quinhueyichijque teteyome cati amo teno ininpati. ²⁰ Masehualme amo hueli mochijchihuilis díoses para quinhueyichihuae injuanti, pampa nopa tamanti cati quichihuj amo nelía Dios.”

²¹ Huan TOTECO quijjose: “Yeca niqinnexilis noyajatil huan nochicahualis, huan quej nopa quimatise para san na niDIOS.”

17

Inintajacol tali Judá ehuaní

¹ “Masehualme ten tali Judá quisehuiquijjitoque tajtacolchihuj. Huan inintajacol eltoc quej se tanahuatili cati monequi quichihuae huan yeca quinjcuilijtoque ica cincel ipan iniyolo para amo quielcahuase quichihuae. Eltoc quej ijcuilijtoc nopa tajtocoli cati quichihuae campa hueli hasta ipan icuacua nopa taixpamit. ² Amoconehua amo quielcahuase tajtacolchihuae. Injuanti monechcahuíaj ipan sesen taixpamit para quinhueyichihuae teteyome huan quinechcahuíaj sesen cuahuit cati anquizeztoque ica nopa taixcopincayot para nopa fiero díos, Asera, cati eltoc campa hueli ipan tepeme huan tamayamit. ³ Huajca nochi amoricoyjo niqinmactilis amocualancaitacahua por nochi nopa tajtocoli cati anquichijtoque. ⁴ Huan anquipolose nopa yejyetzzi tali cati na nimechmacatoya. Huan nimechchihualtis anquicahuase amotal. Huan nimechtitanis para anquintequipanotij amocualancaitacahua ipan sequinoc talme, pampa tahuel antechcualancamacatoque huan nohueyi cualancayo elis quej se tif cati amo sehuis.”

Miyac camanali

⁵ Huan TOTECO nojquiya quej ni quijjose: “Tatelchihuali nopa tacat cati motemachía ipan se masehuali huan mohuejcatalía ten na niTECO. ⁶ Yaya elis quej xihuí tzonti cati amo hueli moscaltía cuali pampa eltoc ipan nopa huactoc tali campa nopa tali quipiya miyac istat. Amo aquí itzoc para quinpalehuis.”

7 “Pero nijtiochihuas nopa tacat cati motemachía ipan na, niiTECO huan san ipan na mochiya huan san na techneltoca. 8 Yaya elis quej se cuahuit cati eltoc iteno hueyat huan inelhuayohua yahuij nelhuejcata hasta quipantíaj at. Nopa cuahuit amo momajmatía quema tatotonía, yon amo mocuesohua masque tahuaguisquía para miyac metzti. Ixihuiyo nochipa moxoxohuilijtoc huan nochi tonali temaca itajca.

9 “Iniyolo masehualme más tacajcayahuaj huan mosisiníaj que nochi tamanti. Amo aqui yajati para quixmatis nochi tamanti cati amo cuali cati quinequi quichihuas iniyolo masehualme. 10 Pero na nimoTECO ni quixmati. Na ni quijita iniyolo huan inintalnamiqulis nochi masehualme para niquintaxtahúis quej quinamiqui ica cati quichijtoque ipan nochi ininimilis.”

11 Se tacat cati moricojchihua ica tamanti cati san quichitectoc eltoc quej se totot cati quipachohua itecsis seyoc tamanti totot. Teipa nopa tacat quipolos nochi cati quichitectoc huan mocahuas iseltitzi quej cati hueli huehuentzi cati huihuific.

12 Pero tojuanti timitzhueyichihuaj nozona campa timosehuía para titanahuatis ipan mosiya. Motanahuatil eltoc tahuel cuajcualtzi huan tahuel hueyi, huan eltos para nochipa. 13 ¡Ay TOTECO! Ta cati titotemach tiisraelitame. Nochi cati mitztahuelcahuaj mopinahualtise huan amo quipiyase yon quentzi tatepanitacayot. Inijuanti polihuse quej se tajcuiloli ipan xali, pampa mitztahuelcajtoque ta, tiTOTECO. Ta tiitztoc quej se ameli campa meya at cati temaca nemilisti.

14 Techchicahua TOTECO huan nimochicahuas. Techmaquixti huan nielis tamaquixtili, pampa san ta nimitzhueyitalía. 15 Xiquinita nopa masehualme cati techpinajtíaj huan techilhuíaj: “¿Taya ipati icamanal TOTECO cati talojtzi titayolmelahua? Sinta nochi nopa camanal ten fiero tamanti nelía huala ten TOTECO, ma quichihua ma pano nimantzi.”

16 Pero masque techpinajtíaj israelitame, na amo quema nimitztajtanijtoc para xiquintatzacuiliti, pampa na amo nijnequi ma tzontamica ica tamanti cati fiero. San ta tijmati taya tijchihuas, na amo nijmati. San na ni quinpohuía senquisu cati ta mocamanal, quej ta tijmati. 17 Amo techtahuelcahua, TOTECO. San ipan ta nimotemachía para techmanahuis quema nitaijyohuía. 18 Xiquinpinahualti huan xiquintaijyohuiliti nochi cati techquixtíaj. Pero na techmaca tasehuilisti. Xiquintatzacuiliti nelchicahuac huan xiquintzon-tamiliti.

Nopa tonali para mosiyajquetzase

19 Huajca TOTECO techilhui: “Xiya huan ximoquetzati campa nopa caltemit ipan altepet Jerusalén campa nochi masehualme calaquij huan campa calaquí huan quisa nopa tanahuatijquet ten tali Judá. Teipa ximoquetzati ipan sesen ten nopa sequinoc caltemit. 20 Huan xiquinilhui nopa tanahuatiani huan masehualme ten tali Judá huan nochi masehualme ten altepet Jerusalén para ma quitacaquilica nocamanal. 21 Xiquinilhui sinta quinequij itzose, ma amo quichihuaca ten hueli tequit ipan sábado nopa tonali para mosiyajquetzase. Yon ma amo quipanoltica tamamali campa icaltenyo ni altepet. 22 Nojquiya ma amo quiquixtica tamanti cati etic ten ininchaj ipan sábado. Monequi quitepanitase nopa tonali pampa ni quiyocatalijtoc para elis tatzejzeloltic. Ni tanahuatili ni quinmacac amohuejcapan tatahua, 23 pero inijuanti amo techchihuilijque cuenta, yon amo techtepanitaque.

Inijuanti tachel moyoltelijque huan amo quinejque techtacaquilise, yon amo quinejque ma niquinxitahua.”

²⁴ TOTECO quijtohua: “Pero sinta injuanti techneltoquilise cati na, nininTECO, niquijtohua huan amo quihuicase tamamali ipan sábado, nopa tonali para mosiyajquetzase, huan quitepanitase nopa tonali pampa tatzejtzeloltic huan iyoca ten sequinoc tonali. Huan sinta amo quichihuase yon se tequit, huajca injuanti mocahuase para nochipa. ²⁵ Huan sinta quej nopa quichihuase, se iteipan ixhui Tanahuatijquet David mosehuis ipan ihueyi siyaj huan tanahuatijtiyas para nochipa nica ipan altepet Jerusalén. Huan nochipa quiipiyase se tanahuatijquet huan tayacanani cati tejcose ipan cahuayojme huan nentinemise ica yejyetzzi huan ica paquilisti ipan nopa miyac caltemit huan tatajco ten ni masehualme. Huan ni altepet eltos para nochipa. ²⁶ Huan masehualme hualase ten nopa altepeme cati quiyahualohuaj Jerusalén huan ten nopa altepeme ten tali Judá. Hualase ten tali Benjamín huan ten nopa tachiquilme huan tepeme huan nopa tali ica tatzinta ten tali Judá. Huan quihualicase inintacajcahualis cati tatatili, huan ten harina huan ten copali. Huan quihualicase inintacajcahualis ipan notiopa para techtasamatise por nochi cati cuali niquinchihuilijtoc. ²⁷ Pero sinta injuanti amo techtacaquilise, yon amo quiyocahuase nopa tonali tatzejtzeloltic, o sinta quicalaquise tamamali ipan icaltehua ni altepet quej elisquía san ten hueli tonali, huajca niquintatis nochi nopa caltemit. Huan nopa tit ajsis hasta ipan nochi tequicalme huan quintamitatis. Huan amo aqui huelis quisehuis nopa tit.”

18

Tanextili ipan ichaj nopa soquichijquet

¹ Huan TOTECO sempa technojnotzqui na, niJeremías, huan techilhui: ² “Xiya ipan nopa cali campa quichijchihuaj comit huan ajpasti huan nopona nimitzcamanhuis.”

³ Huajca na niyajqui ichaj nopa soquichijquet huan nijpantito tequitiyaya. ⁴ Pero nopa comit cati quichihuayaya amo quisqui cuali quej ya quinequiyaya. Huajca quisosolo huan sempa pejqui quichijchihua se cati más cuali.

⁵ Huajca TOTECO technojnotzqui huan techilhui:

⁶ “¿Amo huelis nijchihuas na ica anisraelitame quej nopa soquichijquet quichijqui ica nopa comit? Anisraelitame anitztoque nomaco quej nopa soquit eltoc imaco nopa soquichijquet. ⁷ Ipan se talojtzi hueli niqujtos para quiyahualose se altepet o se tanahuatijcayot, huan quitahuisosé itepa huan quisosolose huan quej nopa elis. ⁸ Pero sinta nopa masehualme ten nopa altepet quicahuase inintajtacolhua, huajca amo nijsosolos quej nimoilhuijtoya. ⁹ Huan sinta nitayolmelahuas para nijtiochihuas se altepet o se tanahuatijcayot, huajca nijmacas chicalhualisti huan nijhueyichihuas. ¹⁰ Pero sinta nopa masehualme pehuase tajtacolchihuase huan amo techtepanitase, huajca na nojquiya nimoyolpatas huan amo niquintiochihuas quej nimoilhuijtoya.

¹¹ “Huajca ama xiya huan xiquinyolmelahuati nochi nopa Judá ehuan huan Jerusalén ehuan. Xiquinilhuiti para nininTECO nijsencajtoc para niquinchihuilis miyac tamanti cati amo cuali. Huajca ma quicahuaca iniojhui cati amo cuali huan ma quichihuaca cati cuali.

¹² “Pero injuanti quijtojque: ‘Amo ximotonalpolo pampa tojuanti amo tijnequij tijchihuase cati TOTECO technahuatía. Tojuanti timonejnemiltise

quej tojuanti techpactía huan tiquintoquilise toteteyohua. Tijchihuase senquisu nochi nopa fiero tamanti cati tijnequij tijchihuase ipan toyolo. Huan amo aqúi techzacuilis para amo tijchihuase.”

¹³ Teipa TOTECO quijito: “Amo aqúi quicactoc ten se tamanti quej ni, yon ipan nopa talme cati amo techneltocaj. Nomasehualhua quichijtoque se fiero tamanti cati amo aqúi quimachilia. ¹⁴ Temachti amo atiya nopa chipahuac sitalset cati huetzi ipan nopa teme cati más huejcapantic ipan tali Libano. Huan temachti amo quema huaqui nopa at cati sesc cati meya ipan tepet Hermón. ¹⁵ Pero nomasehualhua amo temachti quej nopa. Amo aqúi hueli motemachis ipan inijuanti. Inijuanti techtahueltajtoque huan quintoquilíaj tetyome cati amo teno ininpati huan quintatiliáj copali. Quicajtoque nopa ojti cati cuali cati huejcajqúiya quitoquiliyayaj, huan ama yahuij ipan ojti cati fiero campa senquisu onca tajtacolot. ¹⁶ Yeca inintal elis tasoaloli. Huan nochi cati panose nozona san quitachilise huan momajmatise. Quitapose inincamac huan quiojolinise inintzonteco pampa mocahuas tahuel sosolijtoc. ¹⁷ Huan niqúinsemanas nomasehualhua inixpa inincualancaitacahua. Niqúinsemanas quej nopa ajacat cati huala ica campa hualquisu tonati huan quiseamana taltepocti. Huan ipan nopa tonali quema itztose ipan tajyohuulisti, na niqúinnextilis nocuitapa huan amo niqúinpalehuis.”

Quinequij quimictise Jeremías

¹⁸ Huajca nopa masehualme quijitojque: “Ma tiyaca. Ma timocamanalhua ten taya huelis tijchihuase ica Jeremías. Tojuanti tiqúinpiyaj cati tojuanti tototajtziti para techmachtise, huan talnamiqúini para techconsejomacase huan tajtolpanextiani para techilhuisse cati TOTECO quijitohua. Huajca amo monequí más icamanal Jeremías. Ma tijtatelhuica iniixpa tequichihuani para ma quimictica. Ma ayecmo tijtacaquilise icamanal.”

Jeremías motatajti ica TOTECO

¹⁹ ¡Ay NoTECO, techpalehui! Xijtacaquili taya quinequij techchihuilise nocualancaitacahua. ²⁰ ¿Tiquita para quiamiqui techtaxtahuisse ica cati amo cuali quema na niqúinchihuilijtoc cati cuali? Inijuanti quisencajtoque se taquetzti para ipan nihuetzis para techmictise. Pero xiquelnamiqúini na nimitzcamanalhuijtoc cuali ten inijuanti huan nochipa nijchijtoc campeca para niqúinmanahuis ten mocualancayo. ²¹ Huajca ama NoTECO, inincone-hua xiquitemactili para ma miquica ica mayanti huan ma quimictica ica macheta. Huan nopa sihuame ma mocahuaca cahualme huan ma quinploca nochi inincone-hua. Inihuehujhua ma miquica ica cocolisti huan inintelpocahua ma quimictica ipan tatehuilisti. ²² Ma caquisti nopa choquisti cati oncas ipan ininchaj ipan nopa talojtzi quema tiqúintitanilis soldados para ma quintachtequilij, pampa inijuanti quichijque se ostot para ma nihuetzi iijtic huan ixtacatzitaj quitalijtoque taquetzti campa nipano. ²³ NoTECO ta tiquixmati nochi cati inijuanti quisencajtoque quichihuase para techmictise. Huajca amo xiquintapojpolhui yon amo xiquixpolo inintajtacolhua. Más cuali xiquintzontamilti moixpa huan xiquintatzacuilti chicahuac ica mohueyi cualancayo.

19

Nopa comit cati tapantoc

¹ Huan TOTECO techilhui: “Xiya ichaj nopa soquichijquet huan xijcohuati se comit ten soquit. Xiquinhuica mohuaya se ome huehue tacame ten ni

altepēt huan se quesqui totajtzitzi cati ya huehuentzitzī. ² Huan xiquisaca ipan nopa Tepalcat Caltemit ica campa hualq̄uisa tonati huan xiyaca ipan nopa tamayamit Ben Hinom. Nepa xiquinilhuis nochi nopa camanali cati na nimitzmacas. ³ Quej ni xiquinilhui: ‘Xijtacaquilica icamanal TOTECO nochi amojuanti antanahuatiani ten tali Judá huan anmasehualme ten altepēt Jerusalén. TOTECO Cati Quinyacana Iilhuicac Ejcahua Ma Tatanitij huan yaya cati ininTeco israelitame quej ni quijtohua: Na nijtitanis se tamanti cati tahuel fiero ipan ni lugar. Huan nochi cati quicaquise cati nijchihuas tahuel momajmatise hasta amo huelise tacaquise.

⁴ ‘Pampa nochi nopa israelita masehualme techtahuelcaique huan ni tamayamit quitequihuijque para quichihuase tajtocoli huan miyac tamanti cati quihualica pinahualisti. Huan nopa masehualme quintatilaíj copali nopa teteyome cati inijuanti, huan inintatahua huan nopa tanahuatiani ten tali Judá amo quema quinixmatque, yon amo quema quinhueyichijque. Huan ni lugar quitamixolonijque ica inieso nopa coneme cati amo teno quichijtoyaj. ⁵ Nojq̄uiya quichijchihuilijtoque huejhueyi taixpamit nopa teteyot Baal. Huan ipan nopa taixpame quintatilaíj ininconeua quej tacajchualisti para nopa teteyot. Ya nopa eli se tamanti cati na amo quema niq̄innahuati ma quichihuaca, yon amo quema nimoilhui para quej nopa quichihuasquíaíj. ⁶ Yeca niininTECO niq̄uijtohua: Ajsis tonali quema ni tamayamit ayecmo quitocaxtise: Tofet. Yon ayecmo quitocaxtise: Tamayamit ten Ben Hinom. Ama quitocaxtise: Tamayamit Campa Temictíaj. ⁷ Na nijsosolos nochi cati nopa masehualme ten tali Judá huan altepēt Jerusalén quisencajtoque quichihuase ipan nopa tatehuilisti. Huan nijchihuas ma hualaca soldados para ma quinmictiquij nica. Huan inintacayo niq̄unmacas nopa tzojpilome huan tecuanime cati nemij cuatita para ma quincuaca. ⁸ Huan altepēt Jerusalén niq̄ixpolos ten ni tali. Huan quej nopa nochi cati panose nica quitapose inincamac huan momajmatise quema quitase quenicatza nijsosolojtoc. ⁹ Na nijchihuas para inincualancaitacahua ma quiyahualoca nopa altepēt hasta tamis nochi tacualisti. Huan quej nopa, nopa masehualme cati itztose calijtic ten nopa altepēt pehuase quincuase ininconeua huan inihuampoyohua.’ ”

¹⁰ Huan nojq̄uiya TOTECO techilhui “Huan ama, Jeremías, xijtapana nopa comit iniixpa nopa masehualme cati tiq̄inhualicatoc nohuaya, ¹¹ huan xiquinilhui para quej ni niq̄uinilhúa, niininTECO Cati Niquinyacana Noilhuicac Ejcahua Ma Tatanitij: ‘Na niq̄intzontamiltis israelitame huan nochi Jerusalén ehuan quej nijtapanqui nopa comit huan mocajqui payaxtic. Huan quej se comit cati tapani ayecmo hueli quicualchijchihuaíj, quej nopa nojq̄uiya elis ica israelitame huan cati itztoque ipan ni altepēt. Oncas se hueyi miq̄ulisti huan quintalpachose inimijcahua ipan Tofet cati amo tapajpactic noixpa pampa amo quiaxilis campa quintalpachose nica pampa tahuel miyaquí miquise. Huan inintacayohua quinmontonos ipan ni tamayamit. ¹² Altepēt Jerusalén nijtamiltis huan nijcahuas amo tapajpactic quej nijchijqui ica nopa tamayamit Tofet, pampa altepēt Jerusalén nojq̄uiya nijtemitis ica mijcatzitzī. ¹³ Huan na niq̄unsoolos nochi nopa calme ten altepēt Jerusalén huan nojq̄uiya inincaltanahuatil nopa tanahuatiani ten tali Judá. Niq̄unsoolos nochi calme campa quitatijque copali para quinhueyimatis sitalime huan nochi campa quitoyajque tacajchualisti para sequinoc teteyome huan nochi nica mocahuas amo tapajpactic noixpa quej nopa fiero tamayamit ten Tofet.’ ”

¹⁴ Teipa na nijeremías niq̄isqui ten nopa tamayamit Tofet campa TOTECO

techtiantoya ma nitacamanalhuiti icamanal. Huan teipa niyajqui nimoquetzato iixmelac itioipa TOTECO huan quej ni niquinilhui nochi nopa masehualme: ¹⁵ Quej ni quijtohua TOTECO Cati Quinyacana Iilhuicac Ejcahua Ma Tatanitij huan cati toTeco tiisraelitame: “Na nijitanis ipan ni altepet huan ipan nopa altepeme cati mocahuaj nechca nochi nopa tamanti cati amo cuali cati niqijtojtoc nijitanis, pampa inijuanti tahuel moyoltetilijque para amo techtaquilise.”

20

Nopa totajtzi Pasur; icualancaitaca Jeremías

¹ Huan Pasur, icone Imer, cati eliyaya totajtzi huan eliyaya se tayacanquet ipan itioipa TOTECO quicajqui cati na, niJeremías, niqijtohuayaya. ² Huan techitzqui huan tanahuati ma techhuitequica huan ma techmetzcuapachoca ica cuahuit nechca nopa caltemit Benjamín nechca itioipa TOTECO.

³ Huan tonili, Pasur techtojonqui huan niquilhui: “TOTECO quipatatoc motoca huan masehualme ayecmo mitztocaxtise Pasur. Ama mitztocaxtise Magor Misabib cati quijtosnequi: ‘Nopa Tacat Cati Itztoc Ipan Hueyi Majmajti.’ ⁴ Pampa TOTECO quititanis se hueyi majmajti ipan ta huan ipan nochi mohuampoyohua. Huan tiqitas quenicatza nochi inijuanti miquise ica macheta inimaco inincualancaitacahua. Nochi Judá ehuan niqintemactilis imaco nopa tanahuatijquet ten tali Babilonia. Sequij yaya quinhucas ipan ital para quitequipanotij san tapic huan sequij quinmictis nimantzi. ⁵ Huan niqincahuilis para mocualancaitacahua ma quitachtequilica altepet Jerusalén. Nochi tamantzitzi cati patiyó cati quiyiya ni altepet, nochi nopa piltetzitzi cati tahuel pajpatiyó, nopa oro huan nopa plata cati iniaxca nopa tanahuatiani; nochi quihuicase tali Babilonia. ⁶ Huan ta, Pasur, huan mochan ehuan huan nochi moteixmatcahua antequipanotij san tapic ipan tali Babilonia huan nepa anmiquise. Nopona timiquis ta, huan nochi cati tiqincajcajayqui huan tiqinyolmelajqui istacatili para nochi quisasquía cuali.”

Jeremías quitajilhúa TOTECO

⁷ NoTECO, ta techchihualti ma nieli motajtolpanextijca. Huan na nimotemaca para nijchihuas. Tiitztoc más chichahuac que na huan techtani. Pero xiquita, ama nochi masehualme ipan ni altepet san techhuetzquiliáj huan techpinajtíaj. ⁸ Pampa sesen huelta quema nicamanalti, monequi niteyolmelahuas ten tatehuilisti huan tasosololisti. Huan yeca por nopa camanali cati techmacatoc, masehualme techpinajtíaj huan techhuetzquiliáj. Huan nochi quitequihuáj notoca quej se ahuilcamanali. ⁹ Pero amo hueli nijcahuas para nitacamanalhuis mocamanal. Amo hueli niqijtos para ayecmo nicamanaltis nopa camanali cati ta techmaca o ayecmo nimitzelnamiquis pampa mocamanal eltoc ipan noyolo quej se tit cati quitatía noomiyohua. Huan masque nijchihua campeca para niqijyohuis huan amo nitacamanalhuis, amo nihueli.

¹⁰ Campa hueli nijcaqui para masehualme techelijnamiquij huan tahuel onca majmajti campa hueli. Quijtohuaj para techtatelhuise. Hasta nopa masehualme cati eliyayaj nohuampoyohua techtajtachilíaj pampa quinequij quilitase para nijchihua se tenijqui para huélis techtatelhuise. Huan quijtohuaj: “Tiquitase sinta se hueli quicajcahuas huan tiquitzquise huan tijtaacupilise.”

¹¹ Pero ta, TOTECO, tiitztoc nohuaya quej se hueyi tatehuijquet cati amo aqui hueli quitani. Huan moixpa motepotanise nochi cati techtepotztocaj.

Huajca injuanti amo huelis techtanise. Ta tiquinechcapantalis huan tiquinpinahualtis. Quena, itztose ipan pinahualisti para nochipa. ¹² Ay NoTECO Cati Tiquinyacana Moillhuicac Ejcahua Ma Tatanitij, ta tiquinejyeco cati xitahuague moixpa huan tiquixmati inintalnamiquilis huan iniyolo. Techchahuili ma niquita quenicatza tiquincuepilis ni masehualme cati techelnamiquij pampa na nijtalijtoc momaco nochi cati injuanti techchihuilijtoque.

¹³ Nihucas para nijtascamatis TOTECO. Nijhueyichihuas TOTECO pampa na cati niteicneltzi techmanahui inimaco cati techtaijyohuiltiyajaj.

Jeremías mocuesohua

¹⁴ Tatelchihuali ma eli nopa tonali quema nitacatqui. ¹⁵ Tatelchihuali ma eli nopa tacat cati quiyolmelahuato notata para ya tacatqui se ioquichpil. ¹⁶ Ma tzontami nopa tayolmelajquet quej nopa altepeme ten Sodoma huan Gomorra cati huejcajquiya TOTECO quintamisosolo yon amo quintasojtac. Nopa tayolmelajquet semil huit ma quicaqui tzajtzisti ten tatehuilisti, ¹⁷ pampa amo techmicti quema nitacatqui. Más cuali nimictosquía ipan iijti nonana. Quej nopa, iijti nonana eltosquía quej noosto. ¹⁸ ¿Para ten nitacatqui? Pampa ipan nochi nonemilis san nijpantijtoc taijyohuilisti huan tacuajcualoli. Huan tamis nonemilis ica pinahualisti.

21

Quisoso lose Jerusalén

¹ Huajca nopa Tanahuatijquet Sedequías quititanqui Pasur, icone Malquías huan nopa totajtzi Sofonías, icone Maasías para ma techitajqui na, ni-Jeremías, huan para quej ni ma techilhuiquij: ² “Xijtajtani TOTECO para ma techpalehui pampa Tanahuatijquet Nabucodonosor ten tali Babilonia hualajtoc para techtehuis. Huan huelis TOTECO techtasojtas huan quichihuas se tiöchicahualnescayot quej quichijqui huejcajquiya, huan ica ya nopa quichihuas para Nabucodonosor ma quinijcueni isoldados para amo techtehuise.”

³ Huan na niJeremías niquinilhui: “Xiyaca sempa campa Tanahuatijquet Sedequías huan xiquilhuica, ⁴ para quej ni quijtohua TOTECO Dios ten israelitame: ‘Sedequías na nijchihuas para nochi amoteles cati ica antatehuíaj ma elica amo teno ininpati. Huan yeca amo huelis anquinte huise nopa Babilonia ehuan huan nopa caldeos cati amechyahualojtoque. Huan niquinhualicas amocualancaitacahua hasta tatajco ten ni altepet, ⁵ huan na huan injuanti timechtehuise ica nochi nohueyi chicahualis pampa tahuel nicualantoc ica amojuanti. ⁶ Huan niquinmictis nochi cati itztoque ipan ni altepet. Miquise nochi masehualme huan tapiyalme ica se hueyi cololisti cati na nijtitanis.’ ” ⁷ Huan teipa TOTECO quijto: “Nijtemactilis Sedequías cati tanahuatía ipan tali Judá imaco Tanahuatijquet Nabucodonosor ten tali Babilonia. Nojquiya niqintemactilis imaco nochi isoldados Sedequías huan itayacancahua huan nochi nopa masehualme cati noja mocahuase ipan ni altepet huan cati amo mijque ica cololisti, tatehuilisti huan mayanti. Huan Nabucodonosor quintamimictis. Amo quintapojpolhuis, yon amo quintasojtas.

⁸ “Nojquiya xiquinilhui masehualme para quej ni niqijtohua, niininteco: ‘Xiquita ama nijtalijtoc amoixpa nopa ojti para nemilisti huan nopa ojti para miqulisti para anquitapejpenise. ⁹ Pampa nochi cati mocahuase ipan ni altepet miquise ipan tatehuilisti, ica mayanti huan ica cololisti. Pero nochi cati quisase ten ni altepet huan motemacase ica nopa caldeos,

quimanahuisse ininemilis. ¹⁰ Pampa na nijtapejpenijtoc para senquisa nisosolos ni altepet. Na nimochijtoc niicualancaitaca ni altepet huan amo niihuampo. Yeca hualas nopa tanahuatijquet ten tali Babilonia huan quitamitatis.’ ” Quej nopa quijjtohua TOTECO.

Itzacuiltis nopa tanahuatijquet ten Judá

¹¹⁻¹² Nojquiya TOTECO quijjto: “Xiquilhui nopa tanahuatijquet ten tali Judá cati itztoc se iteipan ixhui David quej ni: ‘Xijtaquili icamanal TOTECO. Yaya ya mocualtalijtoc para mifztajtolsencahuas nimantzi por nochi tamanti cati amo cuali cati tijchihua. Huajca mojmosta xiquinchihui cati xitahuac nopa masehualme cati tiquintajtolsencahua. Xijpehualti xijchihua cati xitahuac semilhui. Xijmanahuica cati amo quiptiya fuerza inimaco cati quitajyohuiltiaj para nocualancayo amo huetzis mopani quej se tit cati amo aqui huelis quisehuis.

TOTECO quintatzacuiltis Jerusalén ehuan

¹³ “ Pampa xiquita, analtepet Jerusalén ehuan, na nimochijtoc amocualancaitaca. Nimechtehuis masque amoaltepe eltoc huejcapa huan amohueyimatij huan anquijtohuaj: Tojuanti tiitztoque temacht i pan ni tepet. Nica amo aqui huelis calaquis para techtehuis. ¹⁴ Pero na noseltitzi nimechtatzacuiltis para nimechtzontamiltis por amotajtacolhua. Huan nojquiya nijticuiltis nochi cuatitamit huan quitatis nochi cati nechca. Quej nopa niamoTECO niquijtohua.’ ”

22

Camanal para Tanahuatijquet Sedequías

¹ Teipa TOTECO techilhui: “Xiya ipan ichaj nopa tanahuatijquet ten ni tali Judá cati mosehua ipan isiya David ten huejcajquiya huan xiquilhui: ² Xijtaquili icamanal TOTECO, ta titanahuatijquet ten tali Judá cati timosehujtoc ipan isiya Tanahuatijquet David ten huejcajquiya. Nojquiya ma quitacaquilica nochi motequipanojcahua huan momasehualhua. ³ TOTECO amechilhua: Xijchihuaca nica cati xitahuac huan cati cuali. Xiquinmanahuica masehualme cati taijyohuiaj inimaco cati quintajyohuiltiaj. Amo xiquincajcahuaca yon amo xiquintachtequilica nopa seyoc tali ehuan, yon cati icnotzi o cati cahual sihuame. Xiquinchihuilica cati cuali. Huan ayecmo xiquinmictica masehualme cati amo teno quichijtoque. ⁴ Sinta anquicahuase nochi nopa fiero tamanti cati anquichihua, na nijmanahuis ni tali huan sempa niquintalis tanahuatiani cati mosehuisse ipan isiya Tanahuatijquet David. Huan amotanahuatijcahua calaquise ipan icaltehua ni altepet ipan carros huan ipan cahuayojme inihuaya inintapalehujcahua huan oncas paquilisti para nochi masehualme. ⁵ Pero sinta amojuanti amo anquitacaquilise nocamanal, huajca na nimotestigojquetza noseltitzi huan niquijtohua para ni caltanahuatili mocahuas tasosololi. Quej nopa niamoTeco niquijtohua.’ ”

⁶ Pampa TOTECO quej ni quijjtojtoc ten ni caltanahuatili: “Niquicnelia ni caltanahuatili quej nopa yejyectzi tali Galaad huan quej nopa yejyectzi cuatitamit cati xoxohuic ten tali Libano. Pero nijtamisosolos huan nijcahuas que huactoc tali huan ayecmo aqui itztos ipani. ⁷ Na niqunnotzas masehualme cati tasosolohua para ma hualaca ica inintepos huan ma quisosoloca. Inijuanti quiquixtilise nochi nopa yejyectzitzi cuatetomit ten nopa caltanahuatili huan quintalise ipan tit para ma tataca.

8 “Huan miyac masehualme ten miyac talme panose ipan ni altepet cati tasosololi huan moillhuise se ica seyoc: ‘¿Para ten TOTECO quichijqui ya ni? ¿Para ten quisosolo ni hueyi altepet?’ 9 Huan quinnanquillise quej ni: ‘Quisosolo ni altepet pampa masehualme cati itztoyaj nica quielcajque ininTECO. Quiixpanoque nopa camanali cati TOTECO Dios quichijtoya inihuaya huan quinhueyichijque huan quinquipananojque teteyome ten sequinoc talme.’”

Jeremías camanalti ten Joacaz

10 Amo xichocaca por nopa Tanahuatijquet Josías cati mijqui, yon amo ximocuesoca por ya. Más cuali xichocaca por nopa tanahuatijquet cati quihuicae ipan seyoc tali huan ayecmo quema mocuepas sempa ipan itaI campa tacatqui. 11 Pampa TOTECO camanaltitoc ten Tanahuatijquet Salum*, icone Josías cati pejqui tanahuatía ipan tali Judá quema mijqui itata. Huan quej ni quijito: “Salum ayecmo quema mocuepas nica ipan itaI, 12 pampa miquiti ipan seyoc tali campa quihuicaque para tetequipanoti san tapic.”

TOTECO camanalti ten Joacim

13 “Fiero elis para Tanahuatijquet Joacim pampa quinfuerzajhui ma tequitica chicahuac nopa masehualme cati quichijchihuillijque icaltanahuatíl, pero amo quintaxtahui. Yeca nijtatzacuiltis. 14 Yaya quijito: ‘Nimochijchihuulis se hueyi caltanahuatíli cati quiipiyas miyac cuartos huan nijchijchihuulis miyac ventanas. Nopa tapamif nijchijchihuas ica tiocuahuit huan nijpas ica chichiltic.’

15 “Pero Tanahuatijquet Joacim, amo tielis se cuali tanahuatijquet pampa tijpiya tiocuahuit cati mitzyahualohua ipan se yejectzi caltanahuatili. Motata huejcajqui tanahuati pampa yaya quichijqui cati cuali huan amo techicoicneli. Quichijqui cati xitahuac ipan nochi tamanti huan yeca nijtichijqui. 16 Yaya quinpalehui cati teicneltzitzí cati amo teno quipixque huan quintajtolsencajqui xitahuac. Huan nochi cati motata quichijqui, quisqui cuali. ¿Amo ya nopa cati quinequi quijitos para techixmati? Quej nopa niDIOS niquijtohua.

17 “Pero ta, san timoillhuía quenicatza huelis timoaxcatis tamanti cati sequinoc iniaxca huan san titacajcayahua. Tiquinmictía cati amo teno quichijtoque. Tiquintajyohuiltía cati teicneltzitzí. Huan titanahuatía chicahuac huan ica miyac cualanti.”

18 Huan nojquiya TOTECO quijito ya ni ten nopa tatzacuilti cati quitaniliyaya Joacim, icone Josías, cati pejqui tanahuatía quema mijqui itata. Quijito: “Ma amo aqui chocas por Joacim quema miquis. Ifamilia amo quijitos: ‘¡Ay, panotoc cati fiero huan mijqui toicni!’ Huan imasehualhua ma amo mocuesoca quema quiitase ya mijqui inintanahuatijca. 19 San quitepanitase itacayo quej elisquía se burro. San quihuahuatatzase para quiquixtise calixpa ten altepet Jerusalén. Huan quicahuatij campa quitepehua jtasoli huan cuitat.”

Camanali ten altepet Jerusalén ehuaní

20 AnJerusalén ehuaní, xichocaca pampa ayecmo aquiyme nochi nopa talme cati amechpalehuiyayaj. Xiquintemotij ipan tali Líbano, huan xiquintzajtzilítij chicahuac ipan tali Basán o xiquintemotij campa hueyat

* 22:11 22:11 O Joacim. Itoca eliyaya Joacim, pero quitocaxti Salum pampa quej Salum cati achtohuiya elqui tanahuatijquet, amo huejcajqui tanahuati.

Jordán. Nelía nimechilhúia para ayecmo anquinpantise pampa nochi ya miñque. Huan amo mocajqui yon se para amechpalehuis. ²¹ Quema anitztoyaj cuali na nimechyolmelajqui cati anmpantisquía teipa, pero amojuanti antechnanquilijque: “¡Amo techcuatotoni!” Huan quej nopa anquichijihualajque hasta quema pejqui altepet Jerusalén. Senquisa amo anquinequij antechcaquise. ²² Huan ama nochi amotayacancahua ixpolihuisse. Elis quej quinhuicas se hueyi ajacat huan quinhuicase nochi amohuampoyohua ipan sequinoc talme para tetequipanotij san tapic. Huan huajca quena, anmoilhuisse ten nochi amotajtacolhua huan tahuel anpinahuase. ²³ Ama nopa tanahuatijquet paqui pampa itzoc ipan se yejyetzí caltanahuatili cati tachijchihuali ica nopa tiocuame cati onca ipan tali Líbano. Pero amo miyac tonali polihui para yaya chocas huan taijyohuis quej se sihuat cati ya ajsic hora para quitacatiltis icone.

TOTECO quitajtolsencahuas Jeconías

²⁴ Huan ta tiJeconías † cati tiicone Joacim cati tanahuatijquet ten tali Judá, masque tielisquía nopa anillo ica nosello cati nijhuica ipan nomanejmat, nimitzquixtis. ²⁵ Huan nimitztemactilis inimaco cati tahuel tiquinimacasi cati mitztemohuaj para mitzmictise. Nimitztemactilis imaco nopa Tanahuatijquet Nabucodonosor ten tali Babilonia huan inimaco nopa caldeos. ²⁶ Ta huan monana cati mitzcatilti, nimechquixtis ten ni tali huan nimechti-tanilis ipan se tali cati amo anquixmatij huan nozona anmiquise. ²⁷ Huan masque tahuel anquinequise anmocuepase sempa ipan ni tali campa antacque, amo quema anmocuepase.

²⁸ Pampa ni tacat Jeconías ayecmo teno ipati. Eltoc quej se plato cati tapan-toc huan cati amo aquí quinequi. Yeca ya huan iconehua niquinquixtis huan yase ipan seyoc tali cati mopantíaj huejca para tetequipanotij. ²⁹ ¡Nochi ipan ni tali, xijtacaquili icamanal TOTECO! ³⁰ TOTECO quijtohua: “Xiquijcuilo para ni Jeconías amo quinpixqui iconehua. Quitamipolo nochi tonali ipan inemilis. Huan yon se icone amo quema mosehuis ipan isiya David para tanahuatis ipan tali Judá.”

23

Teipa se ome mocuepase ten nopa seyoc tali

¹ TOTECO quijtohua: “Fiero elis para nopa tayacanani ten israelitame cati inintequi elqui para quinmocuitahuise nomasehualhua cati itztoque quej noborregojhua. Injuanti amo quinmocuitahuijque, san quinsosolajque huan quinsemanque.”

² Huajca ama TOTECO cati toDios tiisraelitame quej ni quinilhúia nopa tacame cati quinmocuitahuíaj imasehualhua: “Quinamiquiyaya anquinhuicasquíaj nomasehualhua ipan se lugar campa itztoquíaj temachme. Pero amojuanti amo ya nopa anquichijque. Anquintahuelcajque huan anquinquixtijque. Huajca ama na nimechtatzacuilitis por nochi tamanti cati amo cuali cati anquinchihuilijque noisraelita masehualhua. ³ Pero se tonali na niquinsentilis noisraelita masehualhua cati noja mocajtoque ipan campa hueli talme campa niquintantoya, huan sempa itztose quej noborregojhua huan niquinhuicas ipan ni corral campa quipiyase miyac tacualisti. Huan nozona nomasehualhua momiyaquilise huan moscaltise. ⁴ Huan na niquin-talis tamocuitahuani cati temachme para ma quinmocuitahuica. Huan quej

nopa ayecmo majmahuise, ayecmo polihuise, yon ayecmo mocuesose. Quej nopa niamoTECO niqijtohua.”

⁵ TOTEKO quijtohua: “Ajsis tonali quema na nijtalis para tanahuatis ipan isiya David se iteipan ixhui cati xitahuac quej David. Yaya elis se tanahuatijquet cati tanahuatis xitahuac huan ica miyac talnamiqulisti. Huan yaya tetajtolsencahuas cuali huan nojquiya quichihuas para nochi sequinoc ipan ital ma quichihuaca cati xitahuac. ⁶ Huan ipan nopa tonali Judá ehuani itztose ica temachili huan tali Israel quiapiyas tasehuilisti. Huan quitocaxtise nopa tanahuatijquet: ‘TOTEKO Cati Techchihua Tixitahuacque fixpa.’”

⁷ Huan TOTEKO quijtohua: “Ipan nopa tonali masehualme ayecmo quijtose: ‘Nijtestigojquetza TOTEKO cati quinquixti israelitame ipan tali Egipto.’”

⁸ Pero quijtose: ‘Nijtestigojquetza TOTEKO cati quinquixti israelitame ten nopa talme campa quinhucatoya huan sempa quinhualiac ipan inintal.’”

Camanali para nopa istacatica tajtolpanextiani

⁹ Na tahuel nimoyoltequipachohua por nopa tacajcayajca tajtolpanextiani pampa inijuanti senquisa istacatij. Nochi noomiyo huihuipica huan nelía nimajmahui hasta nimomimilohua quej se ihuintiquet, pampa tahuel fiero ininpantis nopa tacajcayajca tajtolpanextiani pampa TOTEKO quijtojtoc camanali cati tatzejtzeloltic ten inijuanti huan ten nopa tatzacuilitli cati quinajsis. ¹⁰ Ni tali temitoc ica momecatiani. Quicajtejtoque TOTEKO para quinhueyichihuase teteyome huan yeca TOTEKO quitelchijtoc. Ni tali cactoc huan nochi nopa potrerose huactoc pampa ni masehualme senquisa quinequij quichihuase cati fiero. Huan nopa tacame cati quiapiyaj tanahuatili amo quichihuaj cati xitahuac.

¹¹ “Nopa tajtolpanextiani huan totajtzitzi mosisiníaj huan yon quentzi amo quitepanitaj TOTEKO. Na niquitztoc nochi nopa fiero tamanti cati inijuanti quichihuaj nica ipan notiopa. Quej nopa niamoTECO niqijtohua. ¹² Yeca ama nijchihuas iniojhui ma eli taalaha huan nozona oncas tzintayohuilot. Na niquinquixtis huan motepotanis huan huetzise, ipan nopa tonali quema na niquinñitanilis tatzacuilitli cati quinamiqui por inintajtocolhua. Quej nopa niamoTECO niqijtohua.

¹³ “Na niquinutztoc inintajtocolhua nopa tajtolpanextiani ten tali Samaria cati tahuel amo tatepanitaj. Tacamanalhuyayaj cati panos teipa huan quijtohuayayaj para nopa teteyot Baal quinmacayaya inincamanal. Quej nopa quinchihualtjqe noisraelita masehualhua ma tajtacolchihuaca huan ma quihueyichihuaca Baal. ¹⁴ Pero noja más fiero quichihuaj nopa tajtolpanextiani ten altepet Jerusalén. Tahuel momecatíaj huan mojmosta istacatinemij. Quinyolchicahuaj nopa masehualme cati quichihuaj cati fiero. Amo quinequij yon se ma moyolcuepa huan ma quicahua itajtocolhua. Para na nopa tajtolpanextiani itztoque tahuel fiero quej nopa masehualme huejcajquiya ten altepet Sodoma huan Gomorra.

¹⁵ “Yeca na niamoTECO Cati Niquinyacana Noilhuicac Ejchahua Ma Tatanitij niqijtohua: Na niquinmacas ma quicuaca xihuit cati chichic huan niquinmacas ma quica at cati quiapiya pajti cati temictía. Pampa ten ni tajtolpanextiani ipan Jerusalén momajtoc tajtocoli campa hueli ipan nochi ni tali. Por inijuanti cati quichihuaj ome inixayac, ni tali temic ica tamanti cati tahuel fiero.” ¹⁶ Huajca ama TOTEKO Cati Quinyacana Iilhuicac Ejchahua Ma Tatanitij, quej ni quinilhuía israelitame: “Amo xiquintacaquilica nopa tajtolpanextiani quema amehcamanalhuíaj pampa inincamanal amo teno ipati. San inijuanti quiyoliltíaj cati tacamanalhuíaj. Na amo niquinnojnotztoc.

¹⁷ Inijuanti quinpohuilijtinemij masehualme cati techcualancaitaj: ‘¡Amo teno amopantis!’ Huan nopa masehualme cati san quitoquilíaj cati fiero quinequij quichihuase, quinilhuíaj: ‘¡TOTECO quijitohua para anquipyase tasehuilisti huan amo teno cati amo cuali panos!’ ”

¹⁸ Huan na niqijto: Yon se ten nopa tajtolpanextijquet quiixmati TOTECO, yon cati yaya ixtacatzi moilhuía. Yeca amo huelis quicaquis icamanal. Yon se ten inijuanti amo quichijtoc campeca para quitacaquilis TOTECO.

¹⁹ Xiquitaca, icualancayo TOTECO hualas quej se hueyi ajcomalacat cati quinajsis ipan inintzonteco nopa amo cuajcualme. ²⁰ Icialancayo TOTECO amo tamis hasta quintamitatzacuiltis nopa masehualme cati fiero inine-milis, senquisa quej yaya moilhujtoc para quichihuas. Teipa quema altepet Jerusalén ya huetztos, israelitame sempa quimachilise nochi ya ni.

Icamanal TOTECO para nopa istacatica tajtolpanextiani

²¹ “Na amo niquintantoc nopa tajtolpanextiani, yon amo niqinmacatoc yon se camanali, pero inijuanti quijitohuaj para tayolmelahua na nocamanal. ²² Sinta inijuanti elisquíaj na notajtolpanextijcahua, quimajtosquíaj cati nimoilhuía ixtacatzi ipan noyolo huan quicactosquíaj nocamanal. Nojquiya quinpohuilisquíaj nomasehualhua huan quinyolcuepasquíaj ten inintajtolhua.

²³ “Na amo niDios cati niitoc san ipan se lugar. Na niqita nochi cati anquichihuaj ica huejca. ²⁴ Amo aqui hueli motatis para amo niqitas. Na niitoc campa hueli. Nijtemitía ilhuicacti huan taltipacti. Quej nopa niqijitohua niamoTECO.

²⁵ “Na nijcactoc nopa tajtolpanextiani quijitohuaj: ‘Xijtaquilica ni temicti cati TOTECO technextili ipan ni yohuali.’ Huan teipa tepohuilíaj istacatili huan quijitohuaj na niqinmacac nopa camanali, pero amo. ²⁶ ¿Hasta quema ni tajtolpanextiani tacajcayahuase huan tepohuilise camanali cati san inijuanti quiyoliltíaj ipan iniyolo? ²⁷ Moilhuíaj ica nopa temicti cati inijuanti tepohuilíaj, quichihuase para nomasehualhua ma techtahuelcahuaca quej techtahuelcajque inintatahua para quinhueyichihuase nopa teteyome ten Baal. ²⁸ Pero xiquincagua nopa istacatica tajtolpanextiani ma tepohuilica inintemicti. Huan xiquincagua notayolmelajcahua cati temachme ma tepohuilica xitahuac sesen camanali cati na niqinmaca. Itasolo nopa trigo amo teno ipati, pero iyol nopa trigo, quena, miyac ipati. Quej nopa niamoTECO niqijitohua.” ²⁹ Huan TOTECO quijito: “¿Amo tetatía nocamanal quej tit? Quena, nocamanal quipiya chicalualisti quej se martillo cati quitapana tet.

³⁰ “Xiquitaca nimochijtoc niinincualancaitaca ni tajtolpanextiani cati moichtequilíaj camanali se ica seyoc huan quijitohuaj para na niqinmacatoc nopa camanali. ³¹ Nimotalía niinincualancaitaca nopa tajtolpanextiani cati camanaltij yejectzi para más quincuapolose nomasehualhua huan quijitohuaj: ‘¡TOTECO quijitotoc ni camanali!’ ³² Nojquiya nimochijtoc niinincualancaitaca inijuanti cati tepohuilíaj temicti cati san istacatili pampa san inijuanti quiyoliltíaj. Ica ya nopa quincuapolohuaj nomasehualhua huan quinchihualtíaj ma tajtolchihuaca. Na amo niquintantoc huan amo niqinmacatoc yon se camanali para quinyolmelahuase nomasehualhua. Inijuanti amo quinpalehuíaj nomasehualhua yon quentzi. Quej nopa niamoTECO niqijitohua.”

Quenicatza nitepohuilis icamanal TOTECO

³³ Huan nojquiya TOTECO techilhui: “Huan sinta se masehuali, o se istacatica tajtolpanextijquet, o se totajtzi mitzhuihuiitas huan mitzilhuis: ‘¿Taya camanali o tamamali cati etic tijhualica ama ten TOTECO?’ Huajca xiquinnanquili quej ni: ‘Amojuanti aniztoque nopa tamamali cati etic huan TOTECO amechtepexihuis ten icuitapa.’ Quej nopa xiquinilhui. ³⁴ Sinta se istacatica tajtolpanextijquet, se totajtzi o se masehuali mitzhuihuiitas huan quijitos: ‘Na nijpiya se camanali cati etic ten TOTECO,’ nijtatzacuiltis yaya huan nochi ifamilia. ³⁵ Cualí para anmotatzintoquilise se ica seyoc quej ni: ‘¿Quenicatza mitznanquilijtoc TOTECO? ¿Taya quijijtojtoc?’ ³⁶ Pero ma amo aqui quitequihui nopa camanali cati quijijtohua: ‘Nijpiya se camanali ten TOTECO cati etic o cati quihualica tequipacholi.’ Pampa cati quitequihuis, nijchihualtis ma eli para ya se tamamali cati tahuel etic huan cati quihualica tequipacholi. Pampa nopa masehualme cati mitzhuihuiitaj huan quej nopa quijijtohuaj, teipa quipatase nocamanal, na nimoTeco huan na cati niitoc huan Na Cati Niquinyacana Noilhuicac Ejcahua Ma Tatanitij.

³⁷ “Jeremías, ya ni cati tiquinilhuis nopa tajtolpanextiani: ‘¿Taya quijijtohua TOTECO? ¿Taya mitzilhuijtoc?’ ³⁸ Huan sinta mitzhuihuiitase huan mitznanquilise ‘Tijpiyaj se camanali ten TOTECO cati etic huan cati quihualica tequipacholi’ masque niquinilhuijtoc para amo quijitose nopa camanali, ³⁹ huajca niquinquixtis ten nica noixpa. Huan niquinquixtis ten ni alpetet cati nimehmac amojuanti huan amohuejapan tatahua. ⁴⁰ Huan niquin-talilis pinahualisti huan niquinehcapantalis para nochipa huan nochi quinhuetzquilise para nochipa.”

24

Tanextili ten nopa higos

¹ Tanahuatijquet Nabucodonosor ten tali Babilonia quihucac Jeconías, icone Joacim, cati elqui tanahuatijquet ten tali Judá ipan tali Babilonia inihuaya nochi nopa tayacanani, cuaximani huan teposchihuani. Huan quema ya quinhucatoya, ipan se tanextili TOTECO technextili ome chiquihuit ten higos cati eltoya iixpa nopa tiopamit ipan Jerusalén. ² Se chiquihuit quipiyayaya higos cati cuajcuali, cati sanoc icsitoya. Huan nopa seyoc chiquihuit quipiyayaya higos cati ya lochontoyaj hasta ayemo aqui huelisquía quicuas.

³ Huajca TOTECO techilhui: “¿Taya tiquita, Jeremías?” Huan na niquilhui: “Niquita higos. Sequij tahuel cuajcuali huan sequij tahuel nenpolijtoc hasta amo aqui hueli quicuas.”

⁴ Huan TOTECO technojnotzqui huan techilhui: ⁵ “Quej ni nimoTECO huan niiniDios israelitame niquijtohua: Nopa higos cati cuajcuali quinxnextia nopa masehualme cati niquinquixtijtoc ten tali Judá huan niquintitanqui ipan tali Babilonia campa iztoque nopa caldeo masehualme. Niquinquixtijtoc para niquinchihuilis cati cuali. ⁶ Na niquinmocuitahuis para ma quinchihuilica cati cuali huan sempa niquinhualicas ipan inintal. Niquinpalehuis huan amo niquincos. Elise quej tocti cati nijtocas huan amo nijhuihuaitas. ⁷ Huan na niquinmacas se talnamiquilisti para ma techixmatica para na niDIOS huan ni ininTECO. Inijuanti elise nomasehualhua huan na nielis ni ininTeco pampa mocuepase ica na ica nochi iniyolo.

⁸ “Pero nopa higos cati lochontoque quinxnextia Sedequías, cati ama tanahuatijquet ten tali Judá. Huan quinxnextia nojquiya itequiticahua, huan nochi nopa Jerusalén ehuan cati noja mocajtoque ipan ni tali huan nochi cati yajque ipan tali Egipto. Inijuanti niquitas quej nopa higos

cati lochontoque hasta ayecmo aqui hueli quicuas. ⁹ Na nijchihuas para masehualme ma quiniijiyaca ipan nochi talme. Quinpinajtise huan ten hueli quinilhuse. Campa hueli campa na niquintitanis, nochi masehualme quinitase para tatechihualme. ¹⁰ Huan na niquintitanilis tatehuilisti, mayanti huan cocolisti hasta tamimiquise ipan nopa tali Israel cati niquinmacac injuanti huan inihuejcapan tatahua.”

25

Israelitame tetequipanose 70 xihuit ipan seyoc tali

¹ Ni camanali TOTECO techmacac quema Tanahuatijquet Joacim, icone Josías, yahuiyaya para nahui xihuit tanahuatis. Huan ni camanali eliyaya para nochi masehualme ten tali Judá. Ya ni nojquiya elqui ipan nopa xihuit quema Nabucodonosor pejqui tanahuatía ipan tali Babilonia.

² Huan na nijeremías quej ni niquinilhui nochi nopa masehualme ten tali Judá huan nochi cati itztoyaj ipan altepet Jerusalén: ³ “TOTECO nechcamanhuijtoc para 23 xihuit. Pejqui quema Josías, icone Amón, yahuiyaya para 13 xihuit tanahuatis ipan itanahuatil ipan tali Judá. Huan sesen huelta quema techmacac icamanal, nimechilhuijtoc, pero amojuanti noja amo anquitacaquilijtoque.

⁴ “Ipan nochi nopa tonali, TOTECO talojtitziti amechtitaniliyaya itajtolpanextijcahua, pero amojuanti amo anquitacaquilijque inincamanal. ⁵ Nopa tajtolpanextiani nochipa amechilhuiyayaj quej ni: ‘Xiquisaca ipan nopa fiero ojti cati anquitoquilíaj huan xijcahuaca nochi cati amo cuali anquichihuj. Quej nopa huels anquisehuiquilise anitztose ipan ni tali cati TOTECO amechmacac amojuanti huan amohuejcapan tatahua para ximoaxcata para nochipa. ⁶ Amo xiquinhueyichihuaca teteyome, yon taixcopincayome cati anquinchijtoque ica amomax para amo anquicualancamacase TOTECO. Sinta anquitepanitase TOTECO, amo amechtatzacuiltis.’

⁷ “Huan ama TOTECO quijjtohua: ‘Pero amojuanti amo anquinequij antechtacaquilise. Tahuel anyoltetique. Anquinhueyichihuj teteyome cati amojuanti anquinchijtoque huan ica ya nopa antechchijtoque ma nicualani. Yeca nochi tamanti cati hualajtoc amopani eltoc quej amoseltitziti anmotehulijque.’

⁸ “Huan yeca ama niamoTECO Cati Niquinyacana Noilhuicac Ejcahua Ma Tatanitij, niqijtohua: Pampa amo anquitacaquilijtoque nocamanal, quej ni nijchihuas. ⁹ Niquinsentilis nopa soldados ten nopa tali ica norte cati quinyacana notequipanojca Nabucodonosor, yaya cati itztoc tanahuatijquet ten tali Babilonia. Huan niquinhualicas para ma quitehuaiquij ni tali huan nochi nopa masehualme huan nopa talme cati mopantiáj amonechca. Nimechtzontamiltis nochi amojuanti huan nijcahuas amotal tasosololi huan nochi cati quilitase momajmatise huan quijiyase. Quej nopa niamoTECO niqijtohua. ¹⁰ Na nijtamiltis nochi paquilisti huan huetzquisti cati onca ipan ni tali. Ayecmo quicaquise itoscac se mosihuajtijquet, yon iichpoca ipan se ilhuit ten nenamictili. Nochi tamanti nijtamiltis. Nochi calme mocahuase ipan tzintayohuilot pampa ayecmo oncas aceite para inintaahuil. Ayecmo tequitis molino pampa amo oncas trigo para quichihuase harina para pantzi. ¹¹ Ni tali mocahuas cactoc quej huactoc tali. Huan nochi talme ipan taltipacti momajmatise por cati ipantis ni tali. Huan israelitame huan nochi cati ehuaní ipan sequinoc talme cati quiyahualojtoque, quitequipanose nopa tanahuatijquet ten tali Babilonia para 70 xihuit.

¹² “Teipa quema nopa israelitame ya tequipanojtose 70 xihuit, na nijtatza-cuiltis nopa tanahuatijquet ten tali Babilonia huan nochi imasehualhua por inintajtacolhua. Quena, nijchihuas inintal nopa caldeos para ma elis se huactoc tali para nochipa. ¹³ Huan na nijtitanis ipan inijuanti nochi cati fiero cati nijtencajtoc ipan ni amatapohuali. Niquintitanilis nochi nopa tatzacuiliti cati Jeremías tayolmelajqui para quinajsisquía nochi talme. ¹⁴ Huan niquincuepilis nopa caldeos por nochi cati quinchihuilito que no-masehualhua. Huan miyac talme huan huejhueyi tanahuatiani quichihuase para nopa caldeos ma quinquetiquipanca san tapic.”

Tanextili ten nopa caxit

¹⁵ Huan TOTECO Dios cati toTeco tiisraelitame, techilhui: “Xijcui ni caxit cati eltoc nomaco. Eltoc quej nopa caxit temitoc ica nocualancayo. Huan nijnequi xijchihua para ma quica nochi cati ehuan nopa talme campa na nimitztitanis pampa nijnequi niquintatzacuilitis. ¹⁶ Huan quema inijuanti quiselise notatzacuiliti, tahuel huihuipicase huan momimilose por nopa tatehuilisti cati na niquintitanilis.”

¹⁷ Huajca na nijcuic nopa caxit cati eltoya imaco TOTECO, huan niquin-macac ma quica nochi nopa talme campa TOTECO techititanqui. ¹⁸ Huan nochi cati ehuan altepet Jerusalén huan nochi cati ehuan nopa altepeme ten tali Judá quique ten nopa caxit ten icualancayo TOTECO. Huan nochi inintanahuatijcahua huan inintayacancahua quique. Huan ipan nopa talojtzi pejqui para mocahua tasosololi nopa talme, huan ipan pinahualisti huan tatechihuali. Huan quej nopa mocajtoc hasta ama. ¹⁹ Nojquiya niyajqui ipan tali Egipto. Huan nopa Faraón huan itequipanojcahua, nopa tayacanani huan nopa masehualme, ²⁰ quique ten icualancayo TOTECO inihuaya nopa seyc tali ehuan cati itztoyaj nopona. Nojquiya quique nopa tanahuatiani ten tali Uz huan nopa tanahuatiani ten nopa talme campa itztoque nopa filisteos ipan nopa altepeme Ascalón, Gaza, Ecrón huan nopa masehualme cati noja mocajtoyaj ipan altepet Asdod. ²¹ Huan nojquiya niquinpaxalo nopa talme Edom, Moab huan Amón. ²² Huan nochi nopa tanahuatiani ten tali Tiro huan Sidón huan nojquiya nopa tanahuatiani cati itztoque ipan nopa seyc nali ten nopa hueyi a Mediterráneo. ²³ Nojquiya niyajqui ipan tali Dedán, Tema, Buz huan ipan nopa sequinoc talme cati mopantíaj huejca. ²⁴ Huan nochi nopa tanahuatiani ten tali Arabia huan nopa tanahuatiani ten nopa masehualme cati itztoque maneltic inieso ica sequinoc ipan nopa huactoc tali. ²⁵ Huan nojquiya nopa tanahuatiani ten tali Zimri, Elam huan Media. ²⁶ Huan nochi nopa tanahuatiani cati mopantíaj ica norte, cati huejca huan cati nechca, se huan seyc, huan nochi nopa tanahuatiani cati itztoque ipan nochi taltipacti. Huan teipa ica itamiya, nopa tanahuatijquet ten tali Babilonia nojquiya quic ten icualancayo TOTECO.

²⁷ Teipa TOTECO techilhui: “Xiquinilhui masehualme para nimoTECO Cati Niquinyacana Noilhuicac Ejcahua Ma Tatanitij, huan ni ininTeco israelitame, quej ni niqijtohua: Xiquica nohueyi cualancayo cati eltoc ipan ni caxit hasta anihuintise, anmisotase huan anhuetzise para ayecmo quema anmoquetzase, pampa na nimechtitanilis huejhueyi tatehuilisti. ²⁸ Huan sinta inijuanti amo quinequise quiselise nopa caxit para quise ten nocualancayo nimoTECO Cati Niquinyacana Noilhuicac Ejcahua Ma Tatanitij, huajca xiquinilhui para monequi quise masque quinequij o amo quinequij. ²⁹ Xiquitaca, na nipejtoc niquintatzacuilitía nomasehualhua ipan Jerusalén, nopa altepet cati quihuica notoca. Huan sinta niquintatzacuilitía

ni altepeme, ¿anmoilhuáj ansequinoc tali ehuaní anmomanahuise? ¡Amo! Amo huelis anmomanahuise ten nopa tatzacuiliti. Pampa na nijchihuas ma onca tatehuilisti ipan nochi talme. Quej nopa niqumijtohua nimoTECO Cati Niqumiyacana Noilhuicac Ejcahua Ma Tatanitij.

³⁰ “Huajca ta, tijeremías, xiquinyolmelahua masehualme nochi ni camanali cati na nimitzilhuítoc. Xiquinilhui: ‘Na nicamanaltis ten nepa ilhuicac ipan nochaj cati tatzetzeltolitic para niqumintatelhuis nomasehualhua huan nochi cati itztoque ipan taltipacti. Nitzajtzis chicahuac quej nopa masehualme cati tzajtzij quema moquejquetzaj ipan xocomecat itajca. ³¹ Nitahuejchihuas chicahuac pampa niqumintajtolsechahuas huan niqumintalilis tatzacuiliti nochi masehualme hasta campa ontantoc taltipacti. Quena, nijsencajtoc niqumintatzacuilitis cati ehuaní ipan nochi talme. Huan niqumimictis nochi tajtacolchihuani.’ ” Quej nopa quijto TOTECO.

³² Nojquiya TOTECO Cati Quinyacana Iilhuicac Ejcahua Ma Tatanitij quijto: “Xiquitaca, nopa tatzacuiliti ajsis ipan se tali huan teipa panos hasta ipan seyoc tali. Nohueyi cualancayo motananas quej se hueyi ajcomalacat huan quinajsis nochi talme ipan taltipacti.”

³³ Huan ipan nopa tonali quema TOTECO tetzontamiltis, inintacayohua mocahuase tepejtoque talchi ten se lado hasta seyoc lado ten ni taltipacti. Elise tahuel miyaqui hasta nochi taltipacti temis ica mijcatzitzí. Huan amo aquí quinchoquilis, yon amo aquí quintananas para quintalpachos. Inintacayohua mocahuase tepejtoque talchi quej cuitat.

³⁴ ¡Anfiero tamocuitahuani! Xichocaca huan ximocuesoca. Amojuanti cati anquinyacanañ masehualme ipan nochi taltipacti, ximomimiloca ipan cuajnexti para anquinextise amocuesol pampa ya ajsic hora para amecht-zontamiltise. Anhuetzise quej sihuame cati yamanic inintacayo. ³⁵ Huan yon se tamocuitahuíquet amo huelis motatis, yon amo huelis cholos. ³⁶ Xijtacaquilica quenica tatzajtzij nopa tamocuitahuani huan nopa tayacananí. Ayecmo quimatij taya quichihuase pampa TOTECO quisosolojtoc ininpotrero. ³⁷ Quena, TOTECO ica ihueyi cualancayo quisosolos nochi tamayamit ica yejyectzi sacat. ³⁸ TOTECO quincajtoc imasehualhua quej se león cati quicahua iosto huan yahui quitemoti seyoc tapiyali para quicuas. Inintal imasehualhua mocahuas tamisosolijtoc por nopa soldados cati hualase ipan nopa hueyi tatehuilisti huan ica ihueyi cualancayo TOTECO.

26

Quinequij quimictise Jeremías

¹ Ipan nopa achtohui xihuit quema Joacim, icone Josías sanoc pehuayaya tanahuatis ipan tali Judá, TOTECO technoynotzqui na, nijeremías, huan techilhui: ² “Ximoquetza iixpa notiopa huan xiquincamanalhui nochi nopa masehualme cati ehuaní ipan altepeme ten tali Judá cati hualahui ipan nopa tiopamit para techhuyechihuajquij. Xiquinilhui nochi cati na nimitzilhuíjtoc. Amo xijquixtili yon se camanali cati monequi quitacaquilise. ³ Huelis injuanti mitztacaquilise huan quicahuase nochi nopa fiero ojti cati injuanti quitoquilíaj, huan huajca na nimoyolcuepas huan amo niqumintatzacuilitis por inintajtacolhua quej niqumijtojtaya.

⁴ “Xiquinilhui para na ni ininTECO quej ni niqumijtohua: ‘Sinta amo anquitepanitase nopa tanahuatili cati nimechmacatoc, ⁵ huan amo anquitecaquilise notajtolpanextijcahua cati na niqumintantoc talojtzitzí para ma amechyolmelahuaca ximoyolcuepaca, ⁶ huajca nijsosolos ni tiopamit quej nijsosolo nopa yoyon tiopamit cati eltoya ipan altepet Silo, huan cati

ehuani nochi talme ipan ni taltipacti quitocaxtise altepet Jerusalén quema quinequij quintelchihuase sequinoc.’ ”

⁷ Huan nopa totajtzitzi, nopa tajtolpanextiani huan nochi cati ehuan ipan ni altepet quicajque cati na, niJeremías, niquijto nepa ipan tiopamit cati iaxca TOTECO. ⁸ Huan quema nitantoya nicamanalti nochi nopa camanali cati TOTECO technahuatijtoya ma niquijto, huajca nopa totajtzitzi, tajtolpanextiani huan nochi nopa masehualme cati mosentilijtoyaj ipan nopa tiopamit techitzquijque huan techilhuijque: “¡Timiquis! ⁹ ¿Para ten tiqijtohua para TOTECO quisosolos ni tiopamit quej quichijqui ica nopa yoyon tiopamit cati eltoya ipan altepet Silo? Huan ¿para ten tiqijtohua para altepet Jerusalén mocahuas tasosololi huan nochi timiquise huan amo aqui momanahuis?” Huan nochi masehualme ten nopa altepet pejque quitemajmatiaj Jeremías quema moquetzayaya iniixpa ipan nopa tiopamit.

¹⁰ Huan quema nopa huejhueyi tayacanani ten tali Judá quicajque cati panoyaya, quisque ten nopa caltanahuatili huan mosehuijque san sejco campa nopa yancuic caltemit ten nopa tiopamit para tetajtolsencahuase.

¹¹ Huajca nopa totajtzitzi huan nopa tacajcayajca tajtolpanextiani quinextilijque nopa tayacanani huan nopa masehualme ten nopa altepet ten taya techtatelhuiyayaj. Quiijtojqque: “Ni tacat quinamiqui miqis pampa quiijtojqotc para ni altepet ipantis ten fiero. Amojuanti anquicactoque cati yaya quiijto.”

¹² Huajca na, niJeremías, niquincamanalhui nopa tayacanani huan nochi nopa masehualme ten nopa altepet, huan niquinilhui:

“TOTECO techitanqui para ma nitayolmelahuaqui taya ipantis ni tiopamit huan ni altepet. Huan yaya techmacac nochi nopa camanali cati niquijtojqotc. ¹³ Pero sinta amojuanti anquicahuase amotajtacolhua huan anpehuase anquitepanitase TOTECO cati toDios, huajca yaya amo amechtitanilis nopa tatzacuiltili cati quiijtojtoya quititanis amopani.

¹⁴ Huan ica na, nica niitztoc amomaco. Amo hueli nimomanahuis. Huajca techchihuilica cati amojuanti anquiitaj para xitahuac. ¹⁵ Pero xijmatica cuali ya ni: Sinta antechmictise, huajca amojuanti huan ni altepet huan nochi masehualme anquihuicase tajtacoli pampa anquimictijque se tacat cati amo quiipya tajtacoli. Melahuaac nimechilhuía para yaya TOTECO cati techitanqui ma nimechylmelahuaqui nochi camanali cati anquicajque niquijto.”

¹⁶ Huajca nopa tayacanani huan nopa masehualme ten nopa altepet camanaltique inihuaya nopa totajtzitzi huan nopa tacajcayajca tajtolpanextiani, quinilhuijque: “Ni tacat amo quinamiqui miqis pampa yaya techamanalhuijto ica camanali ten TOTECO Dios.”

¹⁷ Huajca se ten nopa huehue tacame cati quiipiyaya tanahuatili moquetzqui huan quincamanalhui nochi nopa masehualme cati quiyahualojtoyaj, quinilhui: ¹⁸ “Ya ni nelía xitahuac, pampa quema Ezequías eliyaya tanahuatijquet ipan tali Judá, nopa tajtolpanextijquet Miqueas cati ehua Moreset quinyolmelajqui nopa masehualme huan quinilhui para TOTECO Cati Quinyacana lilhucac Ejcahua Ma Tatanitij quiijtohua para quipoxonise ni tepet quej se tali campa quitocaj xinachtí. Huan quiijto ni altepet Jerusalén mocahuas quej se tamontomit ten tet. Huan nopa lugar campa eltoc itiopa TOTECO elis quej se hueyi cuatitamit. Quej nopa quiijto Miqueas.

¹⁹ “Pero Tanahuatijquet Ezequías huan nochi nopa Judá ehuan amo quimictijque Miqueas san pampa quinilhuijtoyaj ya nopa. ¡Amo! Inijuanti

quicajque inintajtacolhua huan motatajtijque iixpa TOTECO. Huan quitaj-tanijque tapojpolhuili ten inintajtacolhua. Huan quena, TOTECO quinta-sojtae huan amo quintatzacuilti quej quinilhuijtoya. Huan sinta tojuanti tijmictise Jeremías san pampa techyolmelahua icamanal TOTECO, huajca TOTECO huélis techchiuilis se tamanti cati noja más fiero.”

²⁰Nojquiya itztoya seyoc tajtolpanextijquet cati itoca Urías, cati elqui icone Semaías ten altepet Quiriat Jearim. Huan yaya nojquiya tayolmelahuayaya cati ipantis ni altepet huan ni tali ipan nopa tonali quema na, niJeremías, nitacamanalhuyaya. Huan yaya nojquiya quijtohuayaya para san se ipantis altepet Jerusalén quej na nojquiya niqijtohuayaya. ²¹Pero quema nopa Tanahuatijquet Joacim huan nopa tayacanani ten soldados huan nochi nopa tequichihuani quicajque cati Urías quijtohuayaya, nopa tanahuatijquet tanahuati ma quimictica. Huan Urías quiiitac para quinequiyayaj quimictise, huajca majmajqui huan mochololti hasta tali Egipto. ²²Pero nopa Tanahuatijquet Joacim quintitanqui Elnatán, icone Acbor huan sequinoc tacame hasta tali Egipto para ma quiiitzquitij Urías. ²³Huan inijuanti quiquixtijque ipan Egipto huan quihuicaque campá Tanahuatijquet Joacim. Huan yaya quimicti ica macheta huan tanahuati ma quitalpachoca ipan se hueyi ostot.

²⁴Pero quema techtatelhuyaya na, niJeremías, techpalehui Ahicam, icone Safán, cati eliyaya itajcuilojca nopa tanahuatijquet. Huajca yaya quincamanalhui nopa tayacanani para ma amo techtemactilica inimaco nopa masehualme para techmictise.

27

Jeremías quihuica se cuamaxali iquechta

¹Ipan nopa achtohui xihuit ten itequi Joacim, icone Josías, quej tanahuatijquet ten tali Judá, TOTECO technojnotzqui na, niJeremías, huan techilhui: ²“Ximochijchihuili se cuamaxali huan xiquilpi moquechta ica cuetaxti quej se tacat quiquechilpía se huacax para ma tapoxoni. ³Teipa xiquintitanili camanali nopa tanahuatiani ten tali Edom, Moab, Amón, Tiro huan Sidón. Nochi nopa tanahuatiani ama quinpiyaj tapalehuiani ipan altepet Jerusalén para quipaxalose Tanahuatijquet Sedequías. Sinta tiquinmacas nopa camanali inintapalehuijcahua huélis quinhuiquilise inintanahuatijcahua quema mocuepase ipan inintal. ⁴Xiquinilhuica amotecohua para TOTECO Cati Quinyacana Ilhuicac Ejcahua Ma Tatanitij, yaya cati ininTeco israelitame, quintitanilía ni camanali: ⁵Ica nohueyi chichualis nijchijchijqui taltipacti, masehualme huan nochi tapiyalme cati itztoque ipan taltipacti. Nochi noaxca huan nijmaca cati na nijnequi. ⁶Huan ama nochi amotalhua na nijmactilijtoc notequipanoc Nabucodonosor, yaya cati tanahuatijquet ipan tali Babilonia. Huan nochi tapiyalme cati nemij cuatita nojquiya nijmactilijtoc para quitequipanose. ⁷Huan nochi masehualme ipan nochi talme quitequipanose Nabucodonosor, icone huan iixhui hasta ajsis tonali quema yaya nojquiya huetzis inimaco sequinoc. Ipan nopa tonali masehualme ten miyac talme huan huejhueyi tanahuatiani moaxcatise ital huan quichihuase ma quitequipanoti. ⁸Huajca ximotemacaca ica Nabucodonosor huan xijtequipanoca. Xijtepanitaca nopa tanahuatili ten tali Babilonia. Pampa nochi talme cati amo quinequise quitequipanose nopa tanahuatijquet ten tali Babilonia, na niquintatzacuiltis ica tatehuilisti, mayanti huan cocolisti hasta motemactilise imaco Nabucodonosor.

⁹ “Yeca nimechilhuía para amo xiquinnetoquilica nopa istacatica tajtolpanextiani, tetonalitani, tatemiquini huan tenahualhuiani cati amechilhuíaj para amo anquitequipanose nopa tanahuatijquet ten tali Babilonia. ¹⁰ Pampa nochi inijuanti san istacatij. Huan sinta amojuanti anquinneltoquilise cati inijuanti quijtohuaj huan amo anquinequise anmotemacase ica nopa tanahuatijquet ten tali Babilonia, huajca na nimechquixtis ipan amotal huan nimechtitanis huejca huan nozona anmiguise. ¹¹ Pero nochi masehualme cati motemacase ica nopa tanahuatijquet ten tali Babilonia, na niqinchahuilis ma itztoca ipan inintal para tapoxonise huan quitocase inixinach quej momajtoque quichihua. Quej nopa niamoTECO niquijtohua.”

¹² Huajca na, niJeremías, nojquiya nijpohuili ya ni nopa tanahuatijquet ten tali Judá cati itoca Sedequías, niqilhui:

“Sinta tijnequi tiitztos, huajca ximotemaca ica nopa tanahuatijquet ten tali Babilonia. ¹³ ¿Para ten timiquis inihuaya nochi momasehualhua ipan tatehuilisti, o ica mayanti huan cocolisti? Pampa TOTECO quijtojtoc quititanilis tatehuilisti, mayanti huan cocolisti ten hueli tali cati amo quinequis motemacal ica nopa tanahuatijquet ten tali Babilonia. ¹⁴ Huajca amo xiquintacaquili nopa tajtolpanextiani cati mitzilhuíaj para amo tijtequipanose nopa tanahuatijquet ten tali Babilonia pampa nochi inijuanti san istacatij. ¹⁵ Na amo niquintantoc nopa tajtolpanextiani masque inijuanti quijtohuaj niqinmacac inincamanal. Huan sinta ta tijsenhuiquilis tiqinnetoquilis, nimitzquixtis ten ni tali huan timiquis ipan seyoc tali sentic ica ni istacatica tajtolpanextiani.”

¹⁶ Nojquiya niqincamanalhui nopa totajtzitzi huan nochi nopa masehualme huan niqinilhui:

“Quej ni quijtohua TOTECO: ‘Amo xiquinnetoquilica nopa istacatica tajtolpanextiani cati amechilhuíaj para nopa tamantzitzi ten oro cati quiquixtijque ipan itiopa TOTECO huan quihuicaque ipan tali Babilonia nimantzi amechcuelilise, pampa nochi ya nopa senquis istacatili. ¹⁷ Amo xiquintacaquilica. Más cuali ximotemacaca para anquitequipanose nopa tanahuatijquet ten tali Babilonia para anitzose. ¿Para ten anquichihuae para ma nijsosolos ni alpetet huan para ma mocahua quej huactoc tali? ¹⁸ Huan sinta nopa tacame nelía itajtolpanextijcagua TOTECO, ma motatajtica ica TOTECO Cati Quinyacana Iilhuicac Ejcagua Ma Tatanitij. Ma quitajtanica para ma amo quinhucaca ipan tali Babilonia nopa tamantzitzi ten oro cati noja mocajtoc ipan ni tiopamit, huan ipan icaltanahuatil nopa tanahuatijquet ten tali Judá huan ipan nopa caltanahuatilme ten alpetet Jerusalén.’

¹⁹ “Pampa TOTECO Cati Quinyacana Iilhuicac Ejcagua Ma Tatanitij quej ni quijto ten nopa taquetzalme ten bronce cati eltoc iixpa nopa tiopamit, huan nopa pileta ten bronce campá quitecaj at cati eltoc calixpa ten nopa tiopamit huan nochi sequinoc tamanti cati mocahua ipan ni alpetet. ²⁰ Nabucodonosor, tanahuatijquet ten tali Babilonia, amo quihuicac ni tamanti quema quihuicac ipan ital nopa Tanahuatijquet Jeconías, icone Joacim, huan nopa tayacanani ten tali Judá huan alpetet Jerusalén. ²¹ Pero TOTECO Cati Quinyacana Iilhuicac Ejcagua Ma Tatanitij, huan cati toTeco tiisraelitame quijtohua ya ni ten nochi nopa tamantzitzi cati mocajque ipan tiopamit huan ipan caltanahuatili ten tali Judá huan alpetet Jerusalén: ²² ‘Quihuicase ipan tali Babilonia nochi ni tamanti cati noja mocajtoc. Huan nepa mocahuase hasta quema na nitanahuatis para sempa ma quinhualicaca ipan alpetet Jerusalén.’ Quej nopa quijtohua TOTECO.”

28

Jeremías huan Hananías

¹ Se tonali ipan metzti macuili ipan toisraelita calendario*, quema Sedequías yahuiyaya para nahui xihuit tanahuatía ipan tali Judá, Hananías, icone Azur, nechcamanahui. Hananías eliyaya se istacatica tajtolpanextijquet ten tali Gabaón huan nechcamanahui miyacapa ipan itiopa TOTECO iniixpa nopa totajtzitzi huan nochi nopa masehualme. Techilhui:

²—TOTECO Cati Quinyacana Iilhuicac Ejcahua Ma Tatanitij huan yaya cati toTeco tiisraelitame quijitohua: ‘Na nimechtojtomas ten nopa tanahuatili cati ica amechilpitoc nopa tanahuatijquet ten tali Babilonia. ³Ten nica para ome xihuit sempa nijhualicas ipan ni notiopa nochi nopa tamantzitzi cati motequihuiyaya nopona cati Tanahuatijquet Nabucodonosor quinhuicac ipan tali Babilonia. ⁴Huan nojquiya sempa nijhualicas Jecónías, icone Joacim, nopa tanahuatijquet ten tali Judá. Huan niqinhualicas nochi nopa sequinoc masehualme cati quinquixtijtoque huan itztoque ipan tali Babilonia. Huan nijtamiltis nochi nopa tanahuatili cati ohui cati ica amechilpitoc nopa tanahuatijquet ten tali Babilonia.’ Quej nopa quijito TOTECO.

⁵ Huajca na, nitajtolpanextijquet Jeremías, nijnanquili nopa istacatica tajtolpanextijquet Hananías iniixpa nopa totajtzitzi huan nochi nopa masehualme cati itztoyaj ipan itiopa TOTECO, huan niqilhui:

⁶—Se paquilisti sinta quej nopa elisquía. Nipaquisquía sinta TOTECO quichihuas quej titayolmelajtoc huan quihualicas nochi nopa tamantzitzi cati eltoya ipan itiopa huan nochi nopa masehualme cati quinhuiatoque ipan tali Babilonia. ⁷Pero ama xijtacaquili ni camanali cati na nimitzilhuis iniixpa nochi ni masehualme: ⁸Nopa tajtolpanextiani cati tayolmelajque huejcayquiya quema ta huan na ayemo titacatiyayaj, inijuanti tayolmelajque para ipan miyac talme san oncas tatehuilisti, mayanti huan cocolisti. ⁹Huajca se tajtolpanextijquet cati tayolmelahua para oncas tasehuilisti monequi quinextis para melahuac TOTECO quititantoc. Quena, sinta hualas tasehuilisti quej quijitotoc, huajca nochi quimatise para icamanal melahuac hualajqui ten TOTECO.

¹⁰ Huajca Hananías, nopa istacatica tajtolpanextijquet, techuili nopa cuamaxali cati nijhuicayaya ipan noquechcuayo huan quipostejqui. ¹¹Huan quej ni quijito iniixpa nopa masehualme cati mosentiljtoyaj nopona:

—Amo panos ome xihuit hasta TOTECO quej ni quipostequis nopa cuamaxali ten tetequipanoyjayot cati Tanahuatijquet Nabucodonosor ten tali Babilonia quitálía ipan ininquechcuayo nochi talme huan nochi quinmanahuis cati amantzi tetequipanohuaj san topic.

Huan ipan nopa talotzi na niquistejqui huan nimohejcatali. ¹²Teipa quema Hananías ya quipostectoya nopa cuamaxali cati nijhuicayaya ipan noquechcuayo, TOTECO technojnotzqui na, niJeremías, huan techilhui:

¹³ “Xiya campa Hananías huan xiquilhui para quej ni niamoTECO niqijitohua: ‘Ta tijpostejqui se cuamaxali ten cuahuit, pero ama ni masehualme quipiyaj se cuamaxali ten teposti ipan ininquechcuayo. ¹⁴Pampa niamoTECO Cati Niqinyacana Noilhuicac Ejcahua Ma Tatanitij niqijitohua: Na niquintalilijtoc ipan ininquechta nochi masehualme ten nochi ni talme se cuamaxali ten teposti. Huan niqinchihualtis ma yaca quitequipanotij Tanahuatijquet Nabucodonosor ten tali Babilonia. Huan ni tanahuatili amo aqi quipatas pampa hasta nochi tapiyalme nojquiya nijmactilijtoc ya.’ ”

* 28:1 28:1 Ni metzti elqui ipan agosto huan septiembre 593 a.C. ipan tocalendario ten ama.

¹⁵ Huajca na, niJeremías, quej ni niquilhui Hananías, nopa istacatica tajtolpanextijquet:

—Xiquita, Hananías, TOTECO amo mitztitantoc. Nelia hueyi tiquincajcaya-toc ni masehualme pampa inijuanti quineltoaj moistacaticayo. ¹⁶ Yeca ama TOTECO quijtohua para ta timiquis. Quena, timiquis ipan ni xihuit pampa ta timosisinjtoc ica TOTECO.

¹⁷ Huan quena, ica ome metzti, Hananías mijqui.

29

Jeremías quintajcuilhui cati ya quinhuicatoque Babilonia

¹ Ya ni nopa camanali cati na, nitajtolpanextijquet Jeremías, niquintajcuilhui nopa huehue tacame, totajtzitzi, tajtolpanextiani huan nochi masehualme ipan altepet Jerusalén cati Tanahuatijquet Nabucodonosor quinhuicatoya ipan tali Babilonia. ² Ya ni panoc teipa quema Tanahuatijquet Nabucodonosor ya quihuicatoya Babilonia Jeconías huan inana cati eliyaya nopa sihua tanahuatijquet, nopa tayacanani ten icaltanahuatil, nopa tayacanani ten sesen familia huan nopa masehualme cati yajatij quichihuase ten hueli tequit. ³ Huan ni amatajcuiloli nijtitanqui ica Elasa, icone Safán, huan ica Gemarías, icone Hilcías, quema Tanahuatijquet Sedequías quintitanqui ipan tali Babilonia para ma quitatij Tanahuatijquet Nabucodonosor. Huan nopa amatajcuiloli quijtohuayaya quej ni:

⁴ TOTECO Cati Quinyacana Iilhuicac Ejcahua Ma Tatanitij, huan yaya cati toTeco tiisraelitame, quintitanlíla ni camanali nochi nopa masehualme cati quinquixti ipan altepet Jerusalén huan quinhuicac tali Babilonia. Quej ni quinilhuía: ⁵ “Ximochihuilica amochajchaj huan ipan xiitzoca. Nojquiya xijtoca xocomecat pampa nozona amocahuase miyac xihuit. ⁶ Ximosihujtica huan xiquinpiyaca amocnehua. Xiquinsihujtica amotelpocahua huan xiquinnamictica amoichpocahua. Huan xiquinpiyaca miyac amoixhuihua. Quena, ximomiyaquilica. ⁷ Xitequitica para panquisas huan quipiyas tasehuilisti nopa tali Babilonia. Ximotatajtica por ya, pampa sinta tali Babilonia quipiyas tasehuilisti, huajca amojuanti nojquiya anquiyase.”

⁸ TOTECO Cati Quinyacana Iilhuicac Ejcahua Ma Tatanitij huan yaya cati toTeco tiisraelitame quijtohua: “Amo xiquincahuilica ma amechcajcahuaca nopa istacatica tajtolpanextiani huan nopa tenahualhuani cati itztoque campá amojuanti. Amo ximoilhuica nopa temicti cati inijuanti quiyoliltiaj, ⁹ pampa inijuanti san tacajcahuaj huan quijtohuaj niquinmacac inincamanal. Pero na amo niquintitantoc.” Quej nopa quijtohua TOTECO. ¹⁰ Huan nojquiya TOTECO quijto: “Anitztose ipan tali Babilonia 70 xihuit. Pero quema ya ajsitos nopa 70 xihuit, na nihualas huan nimechtamichihuilis nochi nopa cuali tamanti cati nimechtajtolcahuilijtoc huan sempa nimechhualicas ipan amotal. ¹¹ Pampa na nijmati cuali nopa tamanti cati nijsencajtoc para amojuanti,” quijtohua TOTECO. “Nijsencajtoc cati cuali huan amo aquí fiero, para nochi quisas cuali para amojuanti teipa huan para anquiselise cati anquichiyaj. ¹² Huan ipan nopa tonali amojuanti anhualase anmotatajtiquij ica na, huan na nimechtacaquilis. ¹³ Huan antechtemose huan antechpantise pampa antechtemose ica nochi amoyolo.

- 14 “Quena, antechpantise, huan na nimechquixtis ipan nopa talme campa nimechtitanqui para xitetequipanotij huan sempa nimechhualicas ipan amochaj huan ipan amotal campa anquisque.
- 15 “Pampa amojuanti anquijtohuaj: TOTECO techhualtitanilijtoc tajtolpanextiani nica ipan tali Babilonia. Ya nopa quinequi quijtos anquintacaquilíaj iniistacatica camanal. 16 Huajca TOTECO Cati Quinyacana Iilhuicac Ejcahua Ma Tatanitij quijtohua: Xijtacaquilica cati niquijtohua ten nopa tanahuatijquet cati mosehuijtoc ipan isiya David ipan Jerusalén huan nochi amoteixmatcahua cati noja mocajtoque ipan altepet Jerusalén huan amo yajque amohuaya para tetequipanotij san tapic.” 17 Huan TOTECO Cati Quinyacana Iilhuicac Ejcahua Ma Tatanitij nojquiya quijtohua: “Niquintitanilis tatehuilisti, mayanti huan cocolisti. Huan niquinchihuas quej nopa higos cati pano icsitoque huan ya lochontoyaj hasta amo aqui hueli quicuas. 18 Niquinquixtis huan niquinsemanas para ma yaca campa hueli ipan taltipacti. Huan nochi masehualme ipan nopa talme campa niquntitanis quintelchihuase, quinpinajtise huan ten hueli quinilhuse. 19 Quej nopa nijchihuas pampa inijuanti amo quinejque techtacaquilise masque talojtitzti niquincamanalhui ica notajtolpanextijcahua cati techtequipanohuaj.” Quej nopa quijtohua TOTECO.
- 20 Huajca, xijtacaquilica icamanal TOTECO nochi amojuanti anisraelitame cati anitztoque ipan tali Babilonia. 21 TOTECO Cati Quinyacana Iilhuicac Ejcahua Ma Tatanitij huan yaya cati toTeco tiisraelitame, quej ni quijtohua ten nopa istacatica tajtolpanextiani cati inintoca Acab, icone Colaías huan Sedequías, icone Maasías cati tepohuilíaj istacatili huan quijtohuaj para na niquntitantoc: “Na niquntimactilis imaco Nabucodonosor para yaya ma quinmicti iniixpa nochi masehualme. 22 Huan quej nopa quema se masehuali ten tali Judá cati itzoc ipan tali Babilonia quinequis quitelchihuas se acajya, quilhuse: Ma TOTECO mitztatis tiyoltoc quej nopa tanahuatijquet ten Babilonia quichijqui ica Sedequías huan Acab. 23 Pampa ni tacame quichijque se tamanti cati tahuel fiero iniixpa noisraelita masehualhua. Inijuanti quinsihuacuilijque nopa tacame cati itztoque inincalnehca. Huan quiyoliltíaj camanali huan istacatili huan quijtojque para na niquinmacayaya nopa camanali. Na nijmati para melahuac quichijtoque ni tamanti pampa niquitzoc huan yeca niquijtohua para melahuac quichijtoque.” Quej nopa quijtohua TOTECO.

Camanali para Semaías

24 Huan nojquiya TOTECO quititanili ni camanali Semaías cati ehua Nehelam. Techilhui ma niquilhui ya ni: 25 “TOTECO Cati Quinyacana Iilhuicac Ejcahua Ma Tatanitij huan yaya cati toTeco tiisraelitame quijtohua: “Ta tijtitanqui se amatajcuiloli ica ta motoca para nopa totajtzi Sofonías cati icone Maasías, huan nochi sequinoc totajtztzi huan nochi masehualme cati itztoque ipan altepet Jerusalén. Huan nopa amatajcuiloli quijto:

26 “Sofonías:

“TOTECO mitztalijtoc quej titotajtzi para tijpatas nopa totajtzi Joiada para titamocuitahuis ipan itioipa TOTECO. Huan motequi ta para tiquitzquis cati hueli loco tacat cati tayolmelahuas huan mochihuas quej se tajtolpanextijquet huan tijzacuas ipan tatzacti cati eltoc tatzinta tali huan tijmetzcuapachos ica cuahuit huan tiqulpis iquechcuayo ica tepos cadenas. 27 Huajca, ¿para ten amo teno tijchihuilijtoc Jeremías

cati ehua Anatot cati teyolmelajtinemi quej se tajtolpanextijquet?
²⁸ Pampa yaya techtajcuilhujtoc nochi tojuanti cati tiitztoque nica ipan tali Babilonia huan quijitohua para huejcahuas titetequipanose nica. Huan nojquiya techilhujtoc para monequi ma timochihuilica tochaj huan ma tijtocaca cuame cati temacaj inintajca, pampa huejcahuas tiitztose nica para tijcuase itajca.’ ”

²⁹ Huan nopa totajtzi Sofonías quihualicac nopa amatajcuiloli campa na, nijeremías, huan techpohuili. ³⁰ Huajca TOTECO technoynotzqui huan techilhui: ³¹ “Xiquintitanili se amatajcuiloli nochi nopa masehualme cati itztoque nopa ipan tali Babilonia huan xiquinilhui para quej ni na, niamoTECO, niqijitohua: ‘Pampa Semaías cati ehua Nehelam amechyolmelajtoc quej se tajtolpanextijquet masque na amo nijtitantoc huan amechchihualti xijneltocaca iistacaticayo, ³² huajca ma quicaqui ni camanali. Nijtatzacuilitis ya huan nochi cati ehuan ipan ya ifamilia. Yon se iixhui amo quitas nopa cuali tamanti cati na nicajoctoc para nomasehualhua pampa yaya amechchijtoc para ayecmo techtepanitaca na.’ ” Quej nopa quijitohua TOTECO.

30

Israelitame sempa mocuepase inintal

¹ TOTECO sempa technoynotzqui na, nijeremías, huan techmacac seyoc camanali, quijito: ² “Quej ni niDIOS huan niamoTECO anisraelitame niqijitohua: Xiquijcuilo ipan se amatapohuali nochi cati nimitzilhujtoc. ³ Pampa ajsi tonali quema sempa niqinhualicas nomasehualhua ipan tali Israel huan Judá cati na niqinmacac inihuejcapan tatahua. Huan injuanti sempa moaxcatise huan itztose ipan inintal para quitequipanolise huan quicuase cati temacas.” Quej nopa quijitohua TOTECO.

⁴ Huan ya ni nopa camanali cati TOTECO techmacac ten tali Israel huan Judá, ⁵ quijito: “Campa hueli nijcaqui tzajtzisti huan majmajti huan masehualme cati huihuipicaj. Amo cana nijcactoc se camanali ten tasehuilisti. ⁶ Campa hueli niqunita nochi tacame istaltique huan quiitzquíaj inintzinquech quej se sihuat cati cuajcualo quema ajsi hora para conepiyas. ⁷ ¡Ay! Monechcahuía se hueyi tonati cati tahuel fiero. Amo quema oncatoc se tonali quej nopa. Elis se tonali ten taijyohuilisti para israelitame*. ¡Pero teipa, TOTECO quinmanahuis!

⁸ “Pampa TOTECO Cati Quinyacana Iilhuicac Ejcahua Ma Tatanitij quijitohua: ‘Ipan nopa tonali, na nijpostequis nopa cuamaxali cati quintalilijtoque ipan ininquechcuayo nopa israelitame huan niquintojtomas ten nopa tanahuatili cati ohui para quitequipanose Nabucodonosor. Huan quej nopa ayecmo quitequipanose masehualme ten sequinoc talme. ⁹ Pampa noisraelita masehualhua techtequipanose na, ni ininTECO, huan niiniDios huan nijtalis David para elis inintanahuatijca.’

TOTECO quinmaquixtis imasehualhua *(Jer. 46:27-28)*

¹⁰ “Huajca amo ximajmahuica amajuanti cati anisraelitame. Na niamoTECO nimechilhuis: ‘Amo ximocuesoca pampa na nimechmaquixtis campa amantzi anitztoque ipan talme cati mopantíaj huejca. Huan amoconehua nojquiya niqinhualicas ten campa nimechtitantoc. Huan nochi amajuanti anmosiyajquetzase huan anquipiyase tasehuilisti ipan amotal

* **30:7** 30:7 O iixhuihua Jacob. Jacob eltoc seyoc itoca Israel cati ica pejque israelitame.

huan amo aqui amechtemajmatis.’ ¹¹ NiamoTECO niqijtohua: ‘Na niitztos amohuaya huan nimechmanahuis. Huan masque niquntamiixpolos nopa talme campa nimechtitancoc, amojuanti amo nimechtzontamiltis. Pero, quena, nimechtatzacuiltis por amotajtacolhua pampa amo hueli nimechcahuas san quiaja huan amo nimechtatzacuiltis.’ ”

¹² TOTECO quijtohua: “Amo onca pajti para amococo. Amotajtacolhua el-toc quej se cocot cati tahuel lochontoc huan amo hueli pachihuis iseli. ¹³ Amo aqui mocuesohuayaya para amechpajtis campa anmococojtoque huan yon se pajti amo quinamiqui para quipachihuiltis amotajtacolhua. ¹⁴ Nochi nopa teteyome cati niqunita quej amomecahua cati amechicneliyayaj, ama amechtahuelcajtoque. Na tahuel nimehcocojtoc quej nielisquía niamocualancaitaca. Yon amo nimechtasojtac pampa amotajtacolhua tahuel miyac huan nelía huejhueyi. ¹⁵ ¿Para ten antzajtzi pampa nimechtatzacuiltía? Amotacuajcualol amo quipixqui pajti. Quinamiquiyaya antaijyohuijtose para nochipa pampa tahuel hueyi antajtacolchijtoque huan yeca nimechtatzacuiltijtoc chichahuac.

¹⁶ “Pero nochi cati amechtaijyohuiltiyayaj nojquiya taijyohuise. Nochi amocualancaitacahua teipa elise tetequipanohuani ipan seyoc tali. Cati amechtachtequilíaj, nojquiya quintachtequilise. Huan cati amechtehuíaj, nojquiya quintehuisse. ¹⁷ Na niamoTECO nimechpajtis campa ancocojtoque por tajtacoli huan nimechchichahuas. Masque masehualme quitocaxtise: ‘Ya ni Jerusalén, nopa altepet cati quitahuelcajtoque huan amo aqui mocuesohua por ya.’ ”

¹⁸ Pero niamoTECO niqijto: “Pero teipa nochi annoisraelita masehualhua cati amechhuicatoque ipan sequinoc talme nimechhualicas sempa ipan amotal huan na nimechtasojtas. Huan sempa quicualtalise altepet Jerusalén. Huan sempa quichijchihuase nopa caltanahuatili quej achtohuiya eliyaya. ¹⁹ Huan ipan nochi nopa altepeme techtascamatilise huan quipiyase miyac paquilisti. Huan na niqunimyaquilis israelitame huan niqunichihuas se hueyi altepet ten masehualme. Nochi israelitame quinitase para miyac ininpati huan nochi quitepanitase inintal. ²⁰ Ininconeuhua itztose cuali quej quema tanahuatiyaya David, huan inintal huan inintanahuatijcayo eltose temachme noixpa. Huan niquntatzacuiltis nochi inincualancaitacahua cati quinequise quintaijyohuiltise. ²¹ Huan se inintanahuatijca motananas campa inijuanti. Huan ayecmo quinnahuatis se seyoc tali ejquet. Huan na nijnotzas para ma techtequipano quej se totajtzi ipan notaixpa, pampa amo motemacasquía technechcahuis sinta amo nijnotza. ²² Huan inijuanti elise nomasehualhua huan na nielis niiniDIOS.” Quej nopa quijtohua TOTECO.

²³ Xiquitaca. Icuallancayo TOTECO huala quej se ajcomalacat huan quinajis nopa masehualme cati mosisiníaj ica ya. ²⁴ Huan TOTECO amo quisehuis icuallancayo hasta quichihuas nochi cati moilhuijtoc quichihuas. Ipan itamiya tonali ni taltipacti anquimachilise nochi ya ni cati ama nimechilhúa.

31

Israelitame sempa mocuepase ipan inintal

¹ TOTECO quijtohua: “Ipan nopa tonali cati hualas, na nielis niiniDIOS nochi familias ten israelitame huan inijuanti elise nomasehualhua. ² Na niqunmocuitahuis cati momanahuijtoc ten miqulisti ica macheta ipan sequinoc talme. Huan niquntasojtas ipan nopa huactoc tali huan quema quitemohuaj canque mosiyajquetzase. ³ Pampa huejcajquiya na nimonexti

ica israelitame nepa campa huactoc tali huan niquinilhui: Nimechicnelía ica se teicnelijcayot cati huejcahuas para nochipa, huan yeca nijsenhuiquillijtoc nimechchihuilía cati cuali. ⁴Noisraelita masehualhua cati nimechicnelía, na sempa nijcualtalis amotal. Sempa anquipiyase tasehuilisti huan anmijtotise ica paquillisti quema antatzotzonase ica panderos. ⁵Sempa anquiotocase xocomecat ipan nopa tepeme ten tali Samaria huan anpaquise quema anquicuase itajca cati anquitocase. ⁶Ajsis tonali quema nopa tamocuitahuiani cati itztoque ipan nopa tepeme ten tali Efraín amechtztajtzilise huan amechilhise: ‘Ma tiyaca ipan altepet Sion * campa itztoc TOTECO Dios.’”

⁷Pampa TOTECO quijtohua: “Xihuicaca ica paquillisti por ni tali Israel pampa Israel eltoc nopa tali ica itanahuatijcayo cati más quiipya tatepan- itajcayot que nochi sequinoc talme. Huan Israel eltos nopa tayacanquet ten nochi sequinoc talme. Xihuicaca chicahuac ica paquillisti. Xiquijtocha: ‘TOTECO quinmaquixitijtoc iisraelita masehualhua cati noja itztoque.’ ⁸Na niquinhualicas ten nopa talme cati mopantíaj ica norte huan ten nopa talme campa hueli hasta campa ontami taltipacti. Hualase cati popoyotzitzí, cati amo hueli nemij. Hualase sihuame cati conehuejque huan cati ya quipixque ininconehea. San sejco mochihuase nelía tahuel miyaqui israelitame cati mocuepase nica. ⁹Chocatihualase ica miyac paquillisti para mocuepase ipan inintal. Huan niquinyacanas ica miyac teicnelijcayot hasta ajsitij ininchaj. Nejnentihualase iteno hueyat cati quiipya miyac at huan ipan se ojti cati xitahuac campa amo motepotanise. Pampa nítztoc ni ininTata israelitame huan niquinitas nopa israelitame cati ehuaní tali Israel † eltoc quej noachtohui cone cati más quiselis notatiochihual.

¹⁰“Xitacaquica antalme, xijtacaquilica icamanal TOTECO huan xitepohuilica campa hueli. Xiteilhua: ‘TOTECO cati quinsemanqui iisraelita masehualhua, sempa quinsentilis huan quinmocuítahuis quej se tamocuitahuijquet quinmocuítahua íborregojhua.’ ¹¹Pampa ni ininTECO niquinmanahuis noisraelita masehualhua inimaco nopa masehualme ipan se tali cati más quiipiyaj chicahualisti que inijuanti.

¹²“Quena, inijuanti sempa hualase ipan inintal huan huicase ica paquillisti ipan nopa tepeme cati más huejcapantique ipan Jerusalén. Mopaquil-ismacase por nochi tamanti cati ni ininTECO ica niquintiochihuas. Na niquinmacas cuajcuali pixquisti, trigo, xocomecat iayo, aceite, borregojme huan huacaxme. Huan ininemilis elis quej se tatocí cati nochipa nicatequía. Huan ayecmo quema taijyohuise. ¹³Huajca nopa ichpocame mijtotise ica paquillisti, huan nojquiya nopa telpocame huan tacame cati huehuentzitzí. Pampa ininchoquillis nijpatas ica paquillisti huan niquinylchicahuas. Huan niquinchihuas para nochi ininpinahualis huan inintaijyohuilis ma mopata ica paquillisti. ¹⁴Huan niquintamacas nopa totajtzitzí ica tahuel miyac tajaçhualisti cati masehualme quinhuiquillise ipan nopa tiopamit para inijuanti huelsi tacuase cuali. Huan nomasehualhua nojquiya niquinmacas miyac tacualisti. Quej nopa niqijtohua ni ininTECO.”

¹⁵TOTECO sempa nechcamanalhui huan techilhui: “Onca se hueyi choquisti ipan altepet Ramá. Raquel ‡ choca por iconehua. Huan amo quinequi moyoltalis pampa nochi ya mictoque.”

¹⁶Pero TOTECO quihluía: “Ayecmo más xichoca. Xijhuatza moixteyol pampa tijselis motaxahuil por nochi motequi. Tiquinitas moconehua

* 31:6 31:6 Jerusalén. † 31:9 31:9 O Efraín. ‡ 31:15 31:15 Raquel elqui se isihua Jacob o Israel huejcajquiya huan elqui inihuejcapán nana miyac israelitame.

sempa mocuepase inintal ten nopa talme campa quinhuicatoque, quej nopa nimoTECO niqijtohua. ¹⁷ Ximochiya ipan na huan moconeuhua mocuepase campa inintal. Quej nopa nimoTECO niqijtohua. ¹⁸ Nojquiya nijcactoc inintequipachol israelitame§. Inijuanti techilhuiaj quej ni: ‘Eltoc quej ta techhuitectoc quej se quihuitequi se toro cati amo quinequi quiselis se cuamaxali para huelis tijtequihuis para tapoxonis. Quena, techtatzacuilti chichahuac para ma timoxitahuaca. Huajca ama techpalehui para timoy-olcuepase huan timitztequipanose pampa san ta titoTECO Dios. ¹⁹ Pampa quema timohuej catalijque ten ta, tihuetzque ipan hueyi tequipacholi. Nelia timomaquilijtoque chichahuac ipan totacayo por tohuihuio. Huan tahuel timopinajque por nochi cati tijchijque quema tieliyayaj se altepet cati yancuic quej se telpocat.’”

²⁰ Huan TOTECO quijto: “Israelitame * itztoque noconeuhua cati yejyetz-titzi. Quena, itztoque quej se tacat ioquichpil cati más quicnelia. Huan noja niquinicnelia israelitame masque niqintatzacuilti. Na tahuel ni-moyoltequipachohua por noconeuhua, huan niquinicnelia, huan temacht niqintasojtas.”

²¹ Huan nojquiya TOTECO quijto: “Israelitame, xijtalica tanextili ipan ojti campa anyajque cati quinnextilis nochi sequinoc quenicatza ma mocuepaca ipan tali Israel. Xijpiyaca miyac cuidado para anquimatise canque anjentoque para amo ohui anquipantise nopa ojti sempa, pampa melahuac sempa anmocuepase ipan amoaltepehua. ²² ¿Hasta quema tamis para san anmocua polojtinemise amojuanti cati anitztoque quej se huihui ichpocat? TOTECO quichihuas ma pano se yancuic tamanti ipan ni tali: Israelitame quicuanajnahuase huan quicnelise ininTECO.”

²³ Huan TOTECO Cati Quinyacana Iilhuicac Ejcahua Ma Tatanitij huan ininTeco israelitame, quijtohua: “Quema sempa niquinhualicas ipan tali Judá huan ialtepehua, nopa masehualme cati quinhuicatoyaj seyoc tali, inijuanti quijtose: ‘¡Ma TOTECO quitiochihua ni tepet cati tatzejtzeloltic campa tanahuatia cati xitahuac!’” ²⁴ Huan nopa masehualme itztose ipan nochi altepeme ten tali Judá. Huan elise miltequitini huan tacame cati quinmocuitahuiaj inintapiyalhua huan quipiyase tasehuilisti. ²⁵ Pampa na niqincahuas ma mosiyajquetzaca nopa masehualme cati siyajtoque. Huan niqinyolchichahuas inijuanti cati mocuesohuayayaj.”

²⁶ Huan ipan nopa talojtzi quema niisac, niqijto: “Nelia cuali nicochqui.”

Nopa yancuic camanal sencahuali

²⁷ Huan TOTECO quijtohua: “Ajsis tonali quema tahuel niqinmियाquilis nopa masehualme huan tapiyalme cati itztose nica ipan tali Israel huan ipan tali Judá. ²⁸ Quej ica miyac cuidado nijhuihuitac, nijsosolo, nijtahuiso huan nijtamisoso ni tali, ama ica miyac cuidado nijtocas huan nijsencahuas.

²⁹ “Huan huajca nopa masehualme ayecmo quijtose para se masehuali taijyohuis por cati seyoc quichijqui. Ayecmo quijtose: ‘Nopa tacame quicua-jque xocomecat itajca cati xococ, huan ininconeuhua fiero quimatque ipan inintancoch.’” ³⁰ Pampa sesen tacat miquis por ya itajacolhua. Huan cati quicuas xocomecat itajca cati xococ, san yaya quimatis fiero ipan itancoch.”

³¹ Huan TOTECO quijtohua: “Ajsis tonali quema na nijchihuas se yancuic camanal sencahuali ica nopa masehualme ten tali Israel huan tali Judá.

§ **31:18** 31:18 O iixhuihua Efraín. Efraín elqui icone José huan iixhui Jacob o Israel. * **31:20** 31:20 Miyac huelas quitequihua Efraín para nochi israelitame ica norte.

³² Pero ni camanal sencahuali amo elis quej cati nijchijqui ica inihuejcapan tatahua, quema niquinmaitzqui huan niquinixti tali Egipto, pampa inihuejcapan tatahua quixpanoque nopa camanali masque niquinicneliyaya quej se mosihuajtijquet quicnelía isihua. ³³ Ya ni elis nopa camanal sencahuali cati nijchihuas inihuaya israelita masehualme: Na niqijcuilos notanahuatil ipan iniyolo para ma techhueyimatica. Huan huajca injuanti nelía elise nomasehualhua huan na nielis niiniDios. ³⁴ Huan ipan nopa tonali ayecmo monequis para se masehuali quimachtis seyoc para ma techxmatica ni ininTECO, pampa sesen ten injuanti cati huejhueyi huan cati coneme, techxmatise cuali. Huan niquintapojpolhuis huan niquelcahuas inintajtacolhua.” Quej nopa quijjto TOTECO.

³⁵ TOTECO yaya quitali tonati para techtaahuilis tonaya huan metzti huan sitalime para taahuse tayohua. Yaya cati quichihua ma moojolini nopa hueyi at huan ma mosisini. Yaya itoca TOTECO Cati Quinyacana Iilhuicac Ejcahua Ma Tatanitij huan yaya quijjtohua:

³⁶ “Quej mocahuas tonati huan metzti huan sitalime para nochipa, quej nopa nochipa noisraelita masehualhua itzose se hueyi altepet ten masehualme ica inintanahuatijcayo para nochipa. ³⁷ Quej masehualme amo hueli quitamachihuase quesqui ihuexca ilhuicacti huan quipantise itzinpehuatil ni taltipacti, quej nopa nojquiya amo hueli niquintahuelcahuas noisraelita masehualhua por inintajtacolhua.”

³⁸ Huan TOTECO quijjtohua: “Ajsis tonali quema nochi nopa altepet Jerusalén sempa quicualtise para na ni ininTECO. Quicualtise ten campa eltoc nopa huejcapantic cali cati itoca nopa Torre ten Hananeel hasta campa nopa caltemit campa esquina ipan itepa. ³⁹ Huan quitilínise se hilo para tatamachihuase ten nopona hasta iixco nopa tepet Gareb huan hasta campa Goa. ⁴⁰ Huan nochi nopa altepet, huan nochi nopa tamayamit campa campo santo huan campa quitepehuaj cuajnexti, elis tatzejtzeltolc huan taiyocatalili para na ni ininTECO. Huan nojquiya elis tatzejtzeltolc para na nochi nopa talme cati eltoque hasta campa nopa hueyat Cedrón. Huan ten nopona hasta campa nopa Caltemit ten Cahuayojme cati mocahua ica campa hualquisa tonati ten nopa altepet. Huan ayecmo aquí quiyahualos nopa altepet para moaxcatis, yon ayecmo aquí quisosolos.”

32

Jeremías quicojqqui se tali

¹ Quema Tanahuatijquet Sedequías ten tali Judá yahuyaya ipan majtacti xihuit ipan itequi ipan itanahuatil, huan Nabucodonosor yahuyaya ipan majtacti huan chicueyi xihuit para tanahuatis ipan ten ya itanahuatil, TOTECO technojoztzqui na niJeremías. ² Ipan nopa tonali nopa soldados ten tali Babilonia quiyahualojtoyaj altepet Jerusalén huan na nitzacotaya ipan nopa tatzacti cati eltoc taltita tatzinta ten nopa caltanahuatili. ³ Tanahuatijquet Sedequías tanahuatijtoya ma techtzacuaca pampa nitayolmelahuayaya para nopa tanahuatijquet ten tali Babilonia quiitzquisquía nopa altepet. ⁴ Huan nojquiya niqijjtohuayaya para quiitzquisquíaj nopa Tanahuatijquet Sedequías huan quihuicasquíaj iixpa nopa tanahuatijquet ten tali Babilonia para quitajtolsecahuase huan quitatzacuiltise. ⁵ Nojquiya talojtzitzi niqilhuyaya Tanahuatijquet Sedequías para TOTECO quijjtojtaya para Nabucodonosor quihuicasquía ipan tali Babilonia huan nepa quitzacuasquía para miyac xihuit hasta miquis. Huan niqilhui Sedequías masque quintehuisquía, amo quintanisquía huan elis más cuali sinta

san motemacas ica ya. Quej nopa niquilhuyaya. ⁶ Teipa TOTECO technonotzqui na, niJeremías, huan techilhui: ⁷ “Xiquita, momachicni Hanameel, icone motío Salum, hualas mitzitaqui para mitztencahuilíqui se tali cati quipixtoc nepa altepet Anatot. Pampa nopa tanahuatili quuijtohua para nopa tali quinamiqui tijcohuas ta amantzi quema ayemo quitencahuilíaj seyoc.”

⁸ Huajca Hanameel, icone notío Salum, hualajqui techpaxaloco campa nopa tatzacti huan techilhui: “Techcohuili nopa tali cati nijpixtoc ipan tali Benjamín pampa totanahuatili quuijtohua para ta mitztocarohua tijcohuas.” Huan quej nopa nijmatqui para nopa camanali cati nijcajqui melahuac huala ten TOTECO.

⁹ Huajca na nijcohuili ital nomachicni Hanameel cati quipixtoya nepa Anatot. Huan nijmacac diecisiete plata tomi. ¹⁰ Teipa iniixpa testigos nijtali nofirma, huan nijtzajqui huan nijtali nosello ipan nopa talamat. Teipa nijtamachijqui nopa plata huan nijtaxtahui. ¹¹ Teipa nijcuic nopa talamat cati tzactoc huan quipixtoya nosello huan quuijtohuayaya quenicatza nijcojqui nopa tali. Huan nojquiya nijcuic nopa iixcopinca cati tapojtoc cati amo nijtzajqui ica nosello, ¹² huan nijmactili Baruc, icone Nerías cati icone Maasias, iixpa nomachicni Hanameel, huan iniixpa nopa testigos cati quifirmarajque nopa talamat huan iniixpa nochi nopa Judá ehuan cati tamocuitahuyayaj calixpa ten nopa tatzacti.

¹³ Huan iniixpa nochi nopa masehualme niquilhui Baruc ni camanali: ¹⁴ “TOTECO Cati Quinyacana Iilhuicac Ejcahua Ma Tatanitij huan yaya cati ininTeco tiisraelitame quuijtohua ya ni: ‘Xijcui nopa talamat cati quiptiya nosello cati quinextia para nijcojqui nopa tali huan xijcui iixcopinca, huan xijtali ipan se comit para huejcahuas eltos. ¹⁵ Pampa TOTECO Cati Quinyacana Iilhuicac Ejcahua Ma Tatanitij huan cati ininTeco israelitame, quuijtohua: Teipa ni amat elis miyac ipati, pampa se tonali nochi ni masehualme sempa moaxcatise talme ipan ni tali huan sempa quicohuase huan quina-macase calme. Nojquiya quicohuase tali huan xocomeca milme.’”

Jeremías motatajti ica TOTECO

¹⁶ “Teipa quema ya nijmactilijtoya Baruc nopa amame, na nimotatajti ica TOTECO huan niquilhui: ¹⁷ ‘NoTECO Dios, ta tijchijqui ilhuicacti huan taltipacti ica momax huan ica mohueyi chicahualis, pampa para ta amo onca yon se tamanti cati ohui. ¹⁸ Ta titeicnelía miyac huan tijpiya hueyi moyolo ica nochi masehualme. Pero nojquiya ta tiquintzacuilitia coneme por inintajtacolhua inintatahua. Nelía tihueyi huan tiDios cati tijpiya nochi chicahualisti. Motoca eltoc: TOTECO Cati Quinyacana Iilhuicac Ejcahua Ma Tatanitij. ¹⁹ Tijpiya miyac talnamiquilisti huan tijchihua huejhueyi tiochicahualnescayot. Tiquita nochi tamanti cati quichihuj masehualme huan tiquintaxtahuía quej quinamiqui ica nochi cati cuali huan amo cuali quichijtoque ipan nochi ininemilis. ²⁰ Tijhijtoc huejhueyi tamanti ipan tali Egipto. Huan nochi cati tijchijqui nozona hasta ama quejipa quielnamiquij. Tijsehuiquilijtoc tijchihua huejhueyi tiochicahualnescayot ipan tali Israel huan ipan nochi taltipacti. Nelía timohueyichijtoc. Hasta ama nochi quicactoque ten motoca.

²¹ “Ta tiquinixti israelitame ipan tali Egipto ica mohueyi chicahualis huan ica huejhueyi tiochicahualnescayot. Huan nochi injuanti mitzimasque por cati tijchijqui. ²² Huan tiquinmacac ni tali cati huejcajquiya tiquintajtolcahuili inihuejcapan tatahua para tiquinmacasquía. Se tali

yejyetzti cati temaca nochi tamanti cati cuali. ²³ Huan quena, tohuejcapan tatahua hualajque moaxcaticoj, pero injuanti amo quinejque mitztepantase, yon amo quichijque cati quijtohua motanahuatil. Amo teno quichijque cati tiquinnahuatiyaya. Huan yeca tiquintitanilijtoc ni hueyi tatzacuiltli.

²⁴ “Huan ama nopa Babilonia ehuan quimontonojtoque tali campa hueli para ixtejose huan quipanose ni tepamit cati quiyahualojtoc ni altepet. Huan ama tijtatzacuiltia ni altepet ica tatehuilisti, mayanti huan cocolisti. Nochi panotoc quej tiquijto. ²⁵ Huan ta technahuatia ma nijcohua nopa tali, huan quena, nijhijtoc iniixpa ni testigos huan niquixtahua, masque ni altepet Jerusalén elis iniixca nopa caldeos.”

TOTECO quinanquili Jeremías

²⁶ Huajca TOTECO technoiznotzqui na, nijJeremías, huan techilhui: ²⁷ “Na niDios, ni iniTeco nochi masehualme ipan ni taltipacti, amo onca se tamanti cati ohui para na. ²⁸ Na nijtemactilis ni altepet imaco Nabucodonosor, tanahuatijquet ten tali Babilonia. ²⁹ Huan nopa Babilonia ehuan calaquise huan quitatise ni altepet Jerusalén. Nojquiya quitatise nochi nopa calme campa quitatiyayaj copali para nopa teteyot Baal, huan campa quitencahuayayaj tacajcahualisti cati san quifoyahuayayaj iixpa huan ica ya nopa tahuel techcualancamacayayaj. ³⁰ Nochi israelitame huan Judá ehuan quichijtoque cati amo cuali hasta quema noja eliyayaj coneme. Huan tahuel techcualancamacatoque ica nochi cati quichihuj. ³¹ Techchijtoque ma nicualani hasta quema pejque quicualtalíaj ni altepet huan hasta ama. Huajca yeca ama niquixpolos ni altepet Jerusalén.

³² “Nochi nopa masehualme ten tali Israel huan tali Judá, huan nopa tanahuatiani, tayacanani, totajtzitzi huan tajtolpanextiani, tahuel tajta-colchijtoque. Huan inintajtacol techchijtoc ma nicualani. ³³ Injuanti moicancuetque ica na huan nechajque huan amo quinejque techtoquilise. Huan na mojmista niquinmactijtoc para ma quimachilica taya cuali huan taya amo cuali, pero amo quinejque techtepanitase, yon amo quinejque ma niquintacahuati. ³⁴ Hasta quichijtoque amo tapajpactic huan quimahuis-polojtoque notiopa pampa nozona quincalaquijque teteyome huan quinhueyichijque. ³⁵ Huan quichijtoque huejhueyi taixpamit para Baal ipan nopa tamayamit Ben Hinom. Nozona quintatíaj ininconeua quej tacajcahualisti para nopa teteyot Moloc. Ya nopa eli se tamanti cati na amo quema niquinnahuati ma quichihuaca, yon amo quema nimoilhui para quej nopa elis. Nelía huejhueyi nopa tajtacoli cati quichijtoque nopa tali Judá ehuan.

³⁶ “Huajca ama na niamoTECO Cati Niquinyacana Noilhucac Ejcagua Ma Tatanitij, huan cati ni iniTeco israelitame quej ni niquijtohua ten ni altepet: Ni altepet nijtemactilis imaco nopa tanahuatijquet ten tali Babilonia huan yaya quitaityohuultis huan quihualiquilis tatehuilisti, mayanti huan cocolisti. ³⁷ Pero na sempa niquinhualicas nomasehualhua ten nopa talme campa niquintitanis ica nohueyi cualancayo. Huan niquinhualicas sempa ipan ni altepet huan niquinchihuas ma itztoca temachme huan ma itztoca ica paquilisti. ³⁸ Huan injuanti elise nomasehualhua huan na nielis ni iniTeco Dios. ³⁹ Huan na niquinmacas se cuali iniyolo huan se cuali talnamiquilisti para ma techimacastica huan ma techtepanitaca para nochipa para quej nopa itztose ica yejyetzti huan iniixhuihua nojquiya.

⁴⁰ “Huan inihuaya nijchihuas se yancuic camalan sencahuati campa ininca nimocahuas para ayecmo quema niquintahuelcahuas, huan san niquinchihuilis cati cuali nochipa. Huan ipan iniyolo nijtalis nopa paquilisti para techhueyichihuase huan para amo techtahuelcahuase. ⁴¹ Huan na

nelía nimopaquilismacas inihuaya. Niquinchihuulis cati cuali huan niquinc-
ahuas ma itztoca ipan ni tali ica yejyetzzi.

⁴² “Huan quej niquintitanili nopa huejhueyi taijyohuulisti huan tatza-
cuiltili, quej nopa nojquiya ama niquinchihuulis cati cuali senquisa quej
niquinilhujtoc. ⁴³ Huan sempa anquincohuase huan anquinnamacase
talme ipan ni tali campa amantzi amo aquijme masehualme, yon tapiyalme
pampa nopa Babilonia ehuan quisosolojtoque. ⁴⁴ Quena, sempa anquin-
cohuase huan anquinnamacase talme. Huan anquitalise amofirma huan
amosello ipan talamame iniixpa testigos campa hueli, pampa se tonali na
nijchihuas ma mocuepaca noisraelita masehualhua huan quicohuase talme
ipan tali Benjamín, ipan ni altepet Jerusalén huan ipan altepeme ten tali
Judá. Quicohuase ipan nochi nopa tali campa onca miyac cuatitamit huan
ipan nopa tamayamit ten tali Filistea huan ipan nopa altepeme ten tali
Neguev. Quej nopa niamoTECO niquijtohua.”

33

Tatiochihualisti cati hualas teipa

¹ Quema na, niJeremías, noja niitzoaya nitzactoc ipan icalixpa nopa
tatzacti, TOTECO technojnotzqui ica ompa huan techmacac más camanali.
² Quena, TOTECO cati quichijchijqui taltipacti huan quitali campa quinejqui
ma elto, technojnotzqui huan techilhui: ³ “Techtazjtzili huan na nimitznan-
quillis huan nimitznextilis tamanti cati huejhueyi huan cati eltoc ixtacatz
cati amo tijmati. ⁴ Pampa ni ininTECO huan niiniDios israelitame niquijto-
hua para cati hualhuai quisosolose nochi calme ipan ni altepet. Quisosolose
icaltanahuatil nopa tanahuatijquet quema quiyahualose ni altepet huan
quitehuse. ⁵ Huan masque sequij israelitame quintehuse nopa caldeos,
nopa caldeo masehualme calaquise huan quinmictise masehualme ten ni
altepet huan quitemitise ni altepet ica inintacayohua mijcatzitzzi. Pampa
na niquintahuelcajtoc cati ehuan nica por inintajtacolhua huan yeca amo
niquintasojtas quema techtajanise tapalehuili.

⁶ “Pero teipa ajsis tonali quema na nijchicahuas altepet Jerusalén huan
nochi imasehualhua itztose ica cuali. Huan nijmacas ni altepet tasehuilisti
huan nijchihuas nochi ma itztoca ica temacht nozona. ⁷ Pampa na sempa
niquinhualicas ipan tali Judá huan ipan tali Israel nochi nopa israelitame
cati itztoque ipan seyoc tali. Huan sempa itztose quej achtohuiya. ⁸ Huan
niquinyolpajpacas ten nochi inintajtacolhua cati ica techixpanoque huan
niquintapojpolhuis. ⁹ Huan elis se hueyi paquillisti para na pampa inijuanti
techhueyitepanitase, techhueyichihuase huan techhueyitalise iniixpa nochi
talme. Huan nochi masehualme ipan taltipacti quuitase nochi nopa tamanti
cati cuali cati niquinchihuilla nomasehualhua huan huihuipicase ica maj-
majti.”

¹⁰ Huan TOTECO quijtohua: “Amojuanti anquijitose para nochi altepeme
ipan tali Judá huan nochi calles ipan Jerusalén san sosolijtoque huan quej
se huactoc tali. Huan anquijitose amo quipiya masehualme, yon tapiyalme.
Huan quena, melahuac cati anquijitose. ¹¹ Pero nimechihuía para teipa
sempa caquistis paquillisti huan huicat nica. Sempa caquistis inintoscac
cati paquij ipan inintahuicallilis nopa telpocame huan ichpocame. Sempa
techpaquilismacase na ni ininTECO Cati Niquinyacana Noilhuicac Ejcahua
Ma Tatanitij pampa na niitztoc cuali huan nochipa nitetasojta. Huan caquis-
tis masehualme cati quihualicase tacajchualisti ipan nohaj para techtas-
camatise pampa niquinhualicatoc nopa masehualme cati quinhualicatoyaj

ipan seyoc tali huan nica itztose quej achtohuiya. Quej nopa niamoTECO niqijtohua.”

¹² Huan nojquiya TOTECO Cati Quinyacana Iilhuicac Ejcahua Ma Tatanitij quijtohua: “Ipan ni tali cati amantzi sosolijtoc huan campa amo aqijme masehualme, yon tapiyalme; sempa oncas tamocuitahuiani cati quintamacatinemise ininborregojhua. ¹³ Huan ininborregojhua sempa momiyaquilise ipan altepeme cati quipiyaj tepeme huan ipan talme cati tatzinta, huan ipan nopa altepeme cati mocahuaj ipan tamayamit. Momiyaquilise ipan tali Benjamín, huan ipan nopa talme cati nechca altepet Jerusalén huan ipan nochi altepeme ten tali Judá. Huan sempa quinitase tamocuitahuiani cati quinmocuitahuíaj huan quinpohuaj inintapiyalhua.”

¹⁴ Huan TOTECO quijto: “Huan ajsis se tonali quema na nijchihuulis tali Israel huan Judá ehuan nochi cati cuali cati niquintajtolcahuili. ¹⁵ Huan ipan nopa tonali nijchihuas para iteipa ixhui David ma mosehui ipan David isiya yejyectzi. Huan yaya tanahuatis xitahuac huan ica miyac tequiticayot huan quichihuas cati cuali. ¹⁶ Huan ipan nopa tonali nopa masehualme ten tali Judá huan altepet Jerusalén itztose temachme huan quijto: ‘TOTECO yaya techchihua tixitahuaque iixpa.’ ¹⁷ Huan nimechilhuía xitahuac: Amo quema polihuis para itztos se iixhui David cati mosehuis ipan isiya para tanahuatis ipan tali Israel. ¹⁸ Huan nochipa itztose levitame cati quitencahuase tacajchualisti tatatili, tacajchualisti ten harina huan nochi tamanti tacajchualisti para na, ni ininTECO.”

¹⁹ Teipa TOTECO technojnotzqui na, niJeremías, huan techilhui: ²⁰⁻²¹ “Quej amo aqui hueli quisosolos nopa camanali cati nijchijqui ica tonali huan yohuali para ma ayecmo tatanesis, yon ayecmo tzintayohuas, nojquiya amo aqui hueli quisosolos nopa camanal sencahuali cati nijchijtoc ica notequipanojca David para nochipa se iixhui tanahuatis ipan ilugar. Nojquiya amo aqui hueli quisosolos nopa camanali cati nijchijtoc ica nopa levitame huan totajtztzi cati techtequipanohuaj. ²² Huan quej amo aqui hueli quinpohua sitalime, yon amo aqui hueli quitamachihua nopa xali cati onca iteno hueyi at, quej nopa niquinmियाquilis iixhuihua David huan nopa levitame cati techtequipanohuaj hasta amo aqui huelis quinpohuas.”

²³ Huan TOTECO sempa technojnotzqui na, niJeremías, huan techilhui: ²⁴ “¿Tijcactoc taya quijtohuaj nopa masehualme cati amo israelitame? Quijtohuaj para niquintapejpeni tali Judá huan Israel ehuan para noaxcahua, pero teipa niqintahuelcajqui. Yeca injuanti quinpinajtíaj nopa israelitame huan quijtohuaj para amo quinamiqui niquitas quej se tali o se tanahuatijcayot. ²⁵ Pero nimoTECO niqijtohua: Quej amo quema nijpatas nopa tanahuatilme cati quinahuatíaj tonali huan yohuali, taltipacti huan ilhuicati, ²⁶ nojquiya amo quema niqintahuelcahuas nopa israelitame, yon amo nijtahuelcahuas notequipanojca David. Yon amo nijpatas nopa camanali cati nijsencajtoc para nijtapejpenis se iixhui David para quinahuatis iixhuihua Abraham, Isaac huan Jacob. Pero sempa niquinhualicas noisraelita masehualhua ipan inintal huan niquintasojtas.”

34

Camanali para Sedequías

¹ Quema Tanahuatijquet Nabucodonosor ten tali Babilonia huan nochi isoldados ten nopa talme cati yaya quinnahuatía quitehuiyayaj altepet Jerusalén huan nopa altepeme ten tali Judá, TOTECO technojnotzqui na, niJeremías, huan techilhui: ² “Xiya campa Tanahuatijquet Sedequías ten tali

Judá, huan xiquilhuiti para quej ni niamoTECO niquijtohua: ‘Na nijtemac-tilis ni altepet imaco nopa tanahuatijquet ten tali Babilonia huan yaya quita-mitatis. ³ Huan ta amo timomanahuis. Mitzitzquise huan mitzhucase iixpa nopa tanahuatijquet ten tali Babilonia huan amoixtachilise huan anmoca-manalhuse. Huan yaya mitzhucas ipan tali Babilonia. ⁴ Pero xijtacaquili ni, Sedequías, cati titanahuatía ipan tali Judá: TOTECO quiijtohua para ta amo timiquis ipan tatehuilisti. ⁵ Ta timiquis campa momasehualhua, huan injuanti quitatise copali para mitzelnamiqoise quej quichijque ica motata. Chocase por ta huan quiijtose: ¡Ay TOTECO, ya mijqui totanahuatijca! Quej nopa elis pampa niamoTECO niquijtohua para quej nopa nijsencajtoc para ma eli.’”

⁶ Huajca na, niJeremías, cati niitajtolpanextijca TOTECO, nijyolmelajqui Tanahuatijquet Sedequías ten tali Judá ten nochi ya ni ipan altepet Jerusalén, ⁷ ipan nopa tonali quemá nopa soldados ten tali Babilonia quiyahualojtoyaj altepet Jerusalén. Nojquiya quiyahualojtoyaj altepeme Laquis huan Azeca. San ni altepeme ipan tali Judá noja quipixtoyaj tepamit cati quinyahualojtoya pampa ayemo teno quinchihuiliytoyaj inincualancaitacahua.

Amo quitepanitaque itanahuatil Sedequías

⁸ Ya ni elqui nopa camanali cati TOTECO techmacac na, niJeremías, quemá Tanahuatijquet Sedequías ten tali Judá ya temacatoya nopa tanahuatili para ya majcajtoque nochi israelita tequipanohuani cati iniaxca se ininteco. ⁹ Tanahuatijquet Sedequías quichijqui se tanahuatili para sesen israelita ma quinmajcahua itequipanojcahua cati quincojtoya, masque tacame o sihuame para ayecmo aquí quipiyas se iisraelita icni para iaxca. Yaya quiijtojtoya para se israelita amo hueli quitequipanoltis seyoc israelita san tapic, pampa nochi tojuanti tiicnime. ¹⁰ Huajca nopa tayacanani huan nochi nopa masehualme cati quiselijtoyaj nopa camanali cati quichijtoya nopa tanahuatijquet, quinmalacanijqe inintequipanojcahua cati eliyayaj iniaxcahua. Pero ya nopa elqui san para se talojtzi. ¹¹ Teipa moyolcuetque huan quin fuerzajhuijqe para sempa ma quintequipanoca san tapic quej achtohuaya.

¹² Yeca TOTECO technojnotzqui na, niJeremías, huan techilhui: ¹³ “Quej ni ni ininTECO huan niiniDios israelitame niquijtohua: Na nijchijqui se camanali inihuaya amohuejcapan tatahua quemá niquinquixti ipan tali Egipto campa tetequipanohuayayaj san tapic. ¹⁴ Huan niquinilhui para cati hueli israelita cati amechtequipanojtos chucuse xihuit, monequi anquimalacanisise quemá onpejtos chicome xihuit, pero injuanti amo quichijque, yon amo techtepanitaque. ¹⁵ Pero ama amojuanti nelía cuali anquichijtoque pampa anquinmalacanijqe amotequipanojcahua senquisá quej nimechnahuati, pampa ipan notiopa anquitajtolcajqe para quej nopa monequi anquichihuase. ¹⁶ Pero ama amojuanti amo anquinequij anquichihuase, huan antechmahuispolojtoque na huan notoca pampa anquixpanoque nopa camanali cati anquichijque. Sempa anquinfuerzajhuijqe amotequipanojcahua cati ya anquinmajcajtoyaj ma amechtequipanoca san tapic quej achtohuaya.

¹⁷ “Huajca ama niamoTECO quej ni niquijtohua: Pampa amo anquinequij antechtepanitase, yon amo anquinequij anquinmalacanisise amoicnihua cati amechtequipanohuaj san tapic, huajca ama nimechtemactilis para anmiquise ipan tatehuilisti, huan ica mayanti huan ica cocolisti. Huan

nochi talme ipan taltipacti amechpinajtise. ¹⁸⁻¹⁹ Huan pampa ama anqui-ixpanotoque nopa camanali cati anquichijque nohuaya quema anquihuejhueloique nopa becerro huan anquijcoitaque huan anpanoque tatajco para anquichihuase temachti nopa camanali, ama san se nijchihuas ica amojuanti quej anquichijque ica nopa becerro. Nochi amojuanti cati antayacanani, antequichihuani, antotajtzitzi huan nochi sequinoc ten amojuanti nimechtemactilis ipan tatehuilisti, pampa anquiixpanoque nopa camanali cati antaquejquetzque para anquitepanitasquíaj. ²⁰ Nimechtemactilis inimaco amocualancaitacahua para ma amechmictica huan amotacayohua niquinmacas nopa tzojpilome huan tecuanime para ma quincuaca. ²¹ Huan Tanahuatijquet Sedequías ten tali Judá huan nochi itapalehujicahua, niquin-temactilis inimaco inincualancaitacahua cati quinequi quinmictise. Quena, niquintemactilis inimaco insoldados nopa tanahuatijquet ten tali Babilonia, masque amantzi mohuejcatiljtoque ten amojuanti san para se talojtzi. ²² Pampa na sempa niquinnotzas nopa soldados ten tali Babilonia para ma quitehуйқij ni altepet. Quiyahualoқij huan quitatiquij. Nojquiya nijchihuas para quintamisosolose nochi altepeme ten tali Judá hasta mocahuas quej se huactoc tali huan amo mocahuas yon se masehuali.”

35

Nopa recabítame cati taneltocaque

¹ Quema Joacim, icone Josías tanahuatiyaya ipan tali Judá, TOTECO technojntzqui na, niJeremías, huan techilhui: ² “Xiya ipan inialtepe nopa recabita masehualme huan xiquinnotza para ma yaca ipan notiopa. Huan quema itztose nozona, xiquinhuica ipan se cuarto cati eltoc calijtic ten nopa tiopamit huan xiquinmaca xocomecat iayo.”

³ Huajca na niyajqui niquitato Jaazanías, icone se tacat cati nojquiya itoca Jeremías, huan iixhui Habasinías. Huan nijhuicac ya huan nochi iicnihua cati eliyayaj ifamilia Recab, ⁴ ipan itiopa TOTECO, ipan nopa cuarto cati quiaxcatijtoyaj nopa tajtolpanextijquet Hanán, icone Igdaías, se tacat cati quitequipano TOTECO. Ni cuarto tatzquitoya ihuaya nopa cuarto cati quitequihuyayaj nopa tayacanani ipan caltanahuatili huan eltoya itzonpac nopa cuarto cati quitequihuyaya Maasías, icone Salum cati tamocuitahuyaya ipan icalte nopa tiopamit.

⁵ Huan iniixpa nopa recabita masehualme nijtali tazas huan xarros cati temitoque ica xocomecat iayo. Huan niquinilhui: “Xiquica ni xocomecat iayo”, ⁶ pero inijuanti amo quinejque huan quijtoque: “¡Amo! Tojuanti amo tiquise xocomecat iayo pampa tohuejcapan tata Jonadab cati elqui icone tohuejcapan tata Recab techilhui ma amo quema tiquica xocomecat iayo, yon tojuanti, yon toconehua. ⁷ Huan nojquiya techilhui ma amo tiquinchihuaca calme, ma amo titocaca tomilhua, yon ma amo tiquintocaca xomeca milme, huan yon ma tijcohuaca talme. Techilhui para san ma tiitztoca ipan yoyon calme. Huan techilhui sinta tijtepanitase cati techilhui, huajca tijiyase se cuali nemilisti huan tihuejcahuase ipan ni taltipacti campa san tipaxalohuaj. Quej nopa techilhui. ⁸ Huan tojuanti tijtepanitztoque ipan nochi ni tamanti. Amo quema tiquitoque xocomecat iayo, tojuanti, yon tosihuajhua, yon totelpocahua, yon toichpocahua. ⁹ Nojquiya amo timochihuiljtoque calme para ipan tiitztose, yon amo tijpiyaj xomeca milme, yon talme campa huelsiquía tijtocase toxinach. ¹⁰ San tiitztoque ipan yoyon cali huan senquisa tijtepanitztoque nochi cati technahuati tohuejcapan tata Jonadab. ¹¹ Pero quema Tanahuatijquet Nabucodonosor ten tali Babilonia,

hualajqui ipan ni tali, tojuanti timomajmatijque huan timoilhuijque para más cuali tihualase tiitztoquij ipan altepet Jerusalén para timomanahuisse. Huan yeca tiitztoque nica.”

¹² Huajca TOTECO technojsotzqui na, niJeremías, huan techilhui: ¹³ “NiamoTECO Cati Niquinyacana Noilhuicac Ejcahua Ma Tatanitij huan na cati ni ininTeco israelitame nimitznahuatía: ‘Xiya xiquincamanalhuiti nopa masehualme ten tali Judá huan ten altepet Jerusalén huan xiquinilhuiti para quej ni niamoTECO niqijtohua: Xijtepanitaca nocamanal quej quichihuaaj nopa masehualme ten ifamilia Recab. ¹⁴ Inijuanti amo quij xocomecat iayo pampa inihuejcapan tata quinmacac tanahuatili ma amo quichihuaaca. Pero na nimechnotzotoc talojtitzti huan amo anquinequij antechtacaquilise, yon amo anquinequij antechtepanitase. ¹⁵ Na nimechtitanilijtoc miyac notajtolpanextijcahua cati amechyolmelajtoque para xijcahua nopa fiero ojti cati anquitoquilaj. Nimechilhuitoc para ayecmo xiquinhueyichihuaaca teteyome huan taixcopincayome para huelis nimechcahuilis anitztose ica paquilisti ipan ni tali cati nimechmacac amojuanti huan amohuejcapan tatahua. Pero amojuanti amo anquinejque antechtacaquilise, yon amo anquinejque antechtepanitase. ¹⁶ Nopa familias ten Recab senquisa quitapanitztoque nopa tanahuatili cati quinmacac inihuejcapan tata, pero amojuanti amo antechtepanitztoque.

¹⁷ “ ‘Huajca ama na niamoTECO Cati Niquinyacana Noilhuicac Ejcahua Ma Tatanitij huan niamoTeco anisraelitame niqijtohua: Pampa amo anquinequij antechtacaquilise, yon amo antechnanquilaj quema nimechnotzotoc, na nijtitanis ipan tali Judá huan Jerusalén nochi nopa tatzacuiliti cati niqijtojtoc nijtitanis.’ ”

¹⁸⁻¹⁹ Huajca na, niJeremías, niqincamanalhui nopa recabita masehualme huan niqinilhui: “Quej ni quijtohua TOTECO Cati Quinyacana Iilhuicac Ejcahua Ma Tatanitij, yaya cati toDios tiisraelitame: ‘Pampa anquitepanitaca amohuejcapan tata Jonadab ipan nochi tamanti, huajca ama se ten amojuanti cati anixhuhua Jonadab nochipa techtequipanose tiopan calijtic.’ ”

36

Joacim quitati cati Baruc quipojqui

¹ Quema Joacim, icone Josías yahuyaya para nahui xihuit tanahuatis ipan tali Judá, TOTECO technojsotzqui na, niJeremías, huan techilhui: ² “Xijcui se amat huan ipan xijijcuilo nochi nopa camanali cati nimitzilhuijtoc ten taya ipantis tali Judá, Israel huan nochi nopa sequinoc talme. Xijijcuilo nochi cati nimitzilhuijthualajtoc hasta quema tanahuatiyaya Josías huan hasta ama. ³ Huan quej nopa quema inijuanti quiitase ijcuilijtoc nochi nopa huejhueyi taijyohuiliti cati nimoilhuijtoc niqinchihuilis, huelis moyolcuepase ten nochi inintajacolhua. Huan huajca na niquintapojpolhuis.”

⁴ Huajca na, niJeremías, nitatitanqui ma quinotzatij Baruc, icone Nerías. Huan quema ajsico, na niqilhuijtiyajqui nochi cati TOTECO techilhuijtoya huan Baruc quijcuilojtiyajqui ipan se amat.

⁵ Quema Baruc tanqui quijcuilohua nochi cati niqilhuiyaya, na quej ni niqilhui: “Na niitztoc nica ipan tatzacti huan amo hueli niya ipan itiopa TOTECO. ⁶ Pero xiya ta ipan nopa tiopamit ipan nopa tonali quema israelitame mosahuaaj huan xiquinpohuiliti ni amatajcuiloli. Ipan nopa tonali nozona mosentilise tahuel miyac masehualme ten tali Judá. ⁷ Huan huelis inijuanti moyolcuepase ten nochi inintajacolhua huan quitajtanise

TOTECO ma quintapojpolhui amantzi quema noja onca tonali. Pampa TOTECO tahuel cualantoc ica inijuanti huan quisencajtoc quintitanilis huejueyui tatzacuiltili.”

⁸ Huan Baruc, icone Nerías, quichijqui quej na nitajtolpanextijquet Jeremías nijnahuatijtoya. Yaya yajqui ipan itiopa TOTECO huan quipojqui miyacapa nopa camanali cati TOTECO techmacatoya huan ama ijcuilijtoya ipan nopa amatapohuali. ⁹ Ya ni panoc ipan nopa tonal quema israelitame mosajque iixpa TOTECO ipan nopa chichnahui metzti ipan toisraelita calendario * quema Joacim, icone Josías, yahuiyaya para macuili xihuit tanahuatis ipan tali Judá. Huan quena, ipan nopa tonali hualajque masehualme ten nochi tali Judá para mosahuase ipan itiopa TOTECO. ¹⁰ Huan Baruc yajqui ipan nopa cuarto ipan itiopa TOTECO campa mocahua Gemarías, icone nopa tajcuilojquet Safán. Ni cuarto mocahuayaya huejcapa ipan nopa tiopamit ipan se lado ten nopa hueyi cuarto campa mosentiliyayaj nochi masehualme nechca nopa Yancuic Caltemit.

¹¹ Huan quema Micaías, icone Gemarías, cati elqui icone Safán, quicajqui nochi icamanal TOTECO, ¹² yajqui ipan icuarto nopa tajcuilojquet ipan ichaj nopa tanahuatijquet. Huan nochi nopa tayacanani mosentilijtoyaj nozona. Nozona itztoya nopa tajcuilojquet Elisama. Nojquiya itztoya Delaía, icone Semaiás; Elnatán, icone Acbor; Gemarías, icone Safán; Sedequías, icone Hananías huan nochi nopa tacame cati quipiyayayaj tequiticayot. ¹³ Huan Micaías quinpohuili nochi nopa camanali cati quicactoyaj ipan nopa amatajcuiloli cati Baruc quipojtoya iniixpa nopa masehualme. ¹⁴ Huajca nopa tayacanani quititanque Jehudí, icone Netanías, cati icone Selemías, cati icone Cusi, para ma quihuhuiti Baruc ma huala huan ma quihualica nopa amatajcuiloli cati quipojtoya iniixpa nopa masehualme. Huajca Baruc quicuic nopa amatajcuiloli huan yajqui quinitato. ¹⁵ Huan inijuanti quihuhijque:

—Ximosehui huan techpohuili nopa amatajcuiloli cati tijpojqui iniixpa nopa masehualme.

Huan Baruc quinpohuili.

¹⁶ Pero ipan nopa talotzti quema quicajque nochi nopa camanali, pejque mosisinaj se ica seyoc huan nochi tahuel momajmatijque. Huajca inijuanti quej ni quihuhijque Baruc:

—Monequi tijpohuilise nochi ya ni nopa tanahuatijquet para ma quimati.

¹⁷ Pero achtohui techilhui quenicatza tiquijcuilo nochi ya ni quema Jeremías camanaltiyaya.

¹⁸ Huan Baruc quinilhui:

—Jeremías techilhuijtijyajqui sesen camanali huan na niqijcuilojtijyajqui ipan ni amat.

¹⁹ Huajca nopa tayacanani quihuhijque Baruc:

—Ta huan Jeremías xiyaca ximotatitij huejca campa amo aqui amechpan-tis. Huan amo aqui xiquihuhica canque anitztoque.

Joacim quitati nopa tajcuiloli

²⁰ Teipa nopa tayacanani quiajojque nopa amatajcuiloli ipan icuarto nopa tajcuilojquet Elisama huan yajque quicamanalhuitoj nopa tanahuatijquet.

²¹ Huan nopa tanahuatijquet quititanqui Jehudí para ma quicuiti nopa amatajcuiloli. Huajca Jehudí quicuico nopa amatajcuiloli ipan icuarto nopa tajcuilojquet Elisama huan quipohuili nopa tanahuatijquet iniixpa nochi

* 36:9 36:9 Ipan noviembre o diciembre ipan 604 a.C. ipan tocalendario ten ama.

nopa tayacanani cati itztoyaj nozona. ²² Huan nopa tanahuatijquet itztoya ipan se cuarto cati huejcapa ipan nopa caltanahuatili cati quitequihuiyaya ipan nopa metzti ten tasesecayot. Huan eliyaya ipan metzti diciembre huan yaya mosehuijtoya iixmelac se tixicti pampa tahuel taseseyayaya. ²³ Huan sesen huelta quema Jehudí tamiyaya quipohua se parte ten nopa tajcuiloli ipan nopa mimiltic amat, nopa tanahuatijquet quitejctiyahuiyaya ica se cuchillo huan quimajcahuayaya ipan tit. Huan quej nopa quichijqui hasta tanqui nochi nopa amatajcuiloli. ²⁴ Pero nopa tanahuatijquet huan nopa tayacanani amo momajmatijque quema quicajque ni camanali. Yon amo aqui mocueso para quilhuis nopa tanahuatijquet ma amo quitati. ²⁵ San Elnatán, Delaía huan Gemarías quilhuijque nopa tanahuatijquet ma amo quitati, pero yaya amo quintacaquili.

²⁶ Huajca nopa tanahuatijquet quinahuati Jerameel icone Hamelec; Seraías, icone Azriel; huan Selemías, icone Abdeel, ma quitzquitij nopa tajcuilojquet Baruc huan na nitajtolpanextijquet Jeremías. Pero TOTECO techtati.

Jeremías quijcuilo seyoc amat

²⁷ Teipa quema nopa tanahuatijquet quitatijtoya nopa amatajcuiloli, TOTECO technojnnotzqui na, nijeremías, huan techilhui: ²⁸ “Xijtemo seyoc amat huan sempa xiquijcuilo nochi quej tiquijcuilojtoya achtohuiya ipan nopa achtohui amat cati quitati Tanahuatijquet Joacim ten tali Judá. ²⁹ Huan xiquilhui nopa tanahuatijquet: ‘Quej ni niDIOS niquijtohua: Ta tijtati nopa amat pampa nozona ijcuilijtoya para nopa tanahuatijquet ten tali Babilonia quisosoloqui ni tali huan quintzontamiltis nochi masehualme huan tapiyalme. ³⁰ Cualtitoc, pero ama niDIOS quej ni nimitzilhuía tiTanahuatijquet Joacim ten tali Judá. Amo tijpiyas yon se mocone cati mosehuis ipan isiya Tanahuatijquet David para tanahuatis quema ta timiquis. Huan mitzmictise ta nojquiya huan motacayo mochahuas huetztoc talchi huan amo aqui quitalpachos. Huan tonaya, tonati tahuel quitatis motacayo huan ica tayohua quiajsis miyac tasesecayot, ³¹ pampa nimitztatzacuiltis ta, mofamilia huan motayancacahua por nochi amotajtacolhua. Na nimechtitanilis nochi nopa huejhueyi tatzacuilti cati nimechtajtolcahuilijtoc nijtitanis. Nojquiya nijtitanis nopa tatzacuiltilisti ipan alpetet Jerusalén huan ipan nochi tali Judá pampa ta tiTanahuatijquet Joacim huan motapalehuijcahua amo anquinejque antechtacaquilise quema nimechcamanalhuiyaya.’ Quej nopa xiquilhui.”

³² Huajca na, nijeremías, nijcuic seyoc amat huan nijmacac notajcuilojca Baruc. Huan yaya quijcuilojtiyajqui nochi cati niquilhuijtiyajqui quej eltoya ipan nopa achtohui amat cati Tanahuatijquet Joacim quitati. Pero nojquiya nijeremías niquilhui más miyac camanali ma quijcuilos.

37

Quitajque Jeremías

¹ Quema mijqui Joacim cati elqui tanahuatijquet ten tali Judá, icone, cati itoca Conías, quitoquijlijtosquia ipan itequi. Pero Tanahuatijquet Nabucodonosor ten tali Babilonia amo quinejqui Conías ma eli tanahuatijquet. Huajca yaya qutapejpeni Sedequías, icone Josías huan qutali quej tanahuatijquet ipan tali Judá. ² Pero Tanahuatijquet Sedequías, itayancacahua huan nopa masehualme cati noja mocajtoyaj ipan nopa tali, amo quitacaquilijque icamanal TOTECO cati na, nijeremías, niinintajtolpanextijca niquinmacac.

³ Pero Tanahuatijquet Sedequías quititanqui Jucal, icone Selemías, huan nopa totajtzi Sofonías, icone Maasías, para techilhuitij ma nimotatajti por injuanti. ⁴ Huan na, niJeremías, ninemiyaya campa hueli pampa noja ayemo techtzacuayayaj.

⁵ Huan ipan nopa tonali isoldados nopa faraón cati itoca Hofra hualajque ten tali Egipto huan monextijque ica tatzinta ten tali Judá para quimanahuisse altepet Jerusalén. Huan huajca nopa soldados ten tali Babilonia mijcuenijque ipan altepet Jerusalén huan yajque quintehuitoj nopa soldados ten tali Egipto.

⁶ Huan TOTECO technojnötzqui na, niJeremías, huan techilhui: ⁷ “Na cati ni ininTECO huan niiniDIOS israelitame niqijtohua: Xijnanquili nopa tanahuatijquet ten tali Judá cati hualajqui para techtajtanis taya panos: ica ni camanali: ‘Nopa Faraón huan isoldados cati hualajtoque nica ten Egipto para mitzpalehuisse, cholose huan mocuepase ipan inintal. ⁸ Huan nopa Babilonia ehuan sempa hualase huan qiyahualoquij ni altepet Jerusalén huan moaxcatise huan quitatise. ⁹ Huajca amo ximocajcayahua, yon amo xiqijto para nopa Babilonia ehuan ya mohuejcatelijque ten ta pampa amo quej nopa elis. ¹⁰ Huan masque tiquintzontamiltisquía nochi nopa soldados ten tali Babilonia huan san mocahuasquía se quesqui cati cocojtoque, injuanti motananasquía ica yolic para mitztanise huan quitatise ni altepet.’ Quej nopa xiquilhuiti.”

¹¹ Huan quema nopa soldados ten tali Babilonia mohuejcatelijque ten altepet Jerusalén para quintehuisse isoldados faraón, ¹² na, niJeremías, ni-jchijqui campeca para niquisas Jerusalén huan niyas ipan tali Benjamín para niquitas nopa tali cati nijcojtoya. ¹³ Pero quema niajsito ipan nopa caltemit ipan nopa tepamit cati itoca Benjamín, niqitac itztoya nozona se tayacanquet ten soldados cati itoca Irías, cati icone Selemías, iixhui Hananías. Huan yaya techitzqui huan techilhui:

—Ta tiyas para timosejcotilis inihuaya nopa Babilonia ehuan.

¹⁴ Huajca na niquilhui:

—¡Amo! Na amo quema nimoilhujtoc para nimosejcotilis inihuaya nopa caldeos.

Pero Irías amo techtacaquili. Yaya techitzqui huan techhuicac iniixpa nopa tayacanani. ¹⁵ Huan nopa tayacanani tahuel cualanque ica na. Yeca tanahuatijque ma techhuitequica miyac. Teipa techtzajque ipan nopa tatzacti cati achtohuiya eliyaya ichaj nopa tajcuilojquet Jonatán, pero ama quitequihuiyayaj quej se tatzacti. ¹⁶ Huan nozona talita campa más fiero techtali ipan cati eliyaya quej se caja huan nozona techpixtoyaj para miyac tonali.

¹⁷ Pero teipa, Tanahuatijquet Sedequías tanahuati ma techquixtica ixtacatzi huan ma techhuicaca ipan icaltanahuatil. Huan yaya techtajtani:

—¿Tijpiya se yancuic camanali ten TOTECO?

Huan na niquilhui:

—Quena, TÓTECO qijijtohua para mitztemactilis imaco nopa tanahuatijquet ten tali Babilonia.

¹⁸ Huan nojquiya na, niJeremías, nijtajtani Tanahuatijquet Sedequías para ten techtzajqui, niquilhui:

—¿Taya taixpanoli nijchijqui ica ta, o ica motayacancahua, o ica nochi masehualme para techtzajqui? ¹⁹ Huan, ¿canque itztoque nopa tajtolpanextiani cati mitzilhuijque para nopa tanahuatijquet ten Babilonia amo hualasquía para amechtehuis? ²⁰ Huajca Tanahuatijquet, xijtacaquili cati

na nimitztajtanic: Techchihuili se hueyi favor, amo techtitani sempa ipan nopa fiero tatzacti cati eltoc ipan ichaj nopa tajcuiljoquet Jonatán para amo nimiquis nopona.

²¹ Huajca Tanahuatijquet Sedequías tanahuati ma techhuicaca ipan nopa tatzacti cati eltoc calixpa ten nopa caltanahuatili, huan tanahuati para mojmosta ma techmacaca se pedazo pantzi cati yancuic quicojtoque campa nopa panchihuani. Huan quej nopa quichijque hasta tanqui nochi pantzi ipan nopa altepet. Quej nopa techpixtoyaj ipan nopa tatzacti cati eltoc calixpa ten nopa caltanahuatili.

38

Quicalaquijque Jeremías ipan se ameli huactoc

¹ Huan Sefatías, icone Matán; Gedalías, icone Pasur; Jucal, icone Selemías, huan Pasur, icone Malquías, quitacaquilijtoyaj nochi cati na, niJeremías, niquijtohuayaya iniixpa nopa masehualme. Niquinilhuyaya ya ni: ² “Quej ni quijtohua TOTECO: ‘Nochi cati mocahuase ipan ni altepet, miquise ipan tatehuilisti, o ica mayanti o ica cocolisti, pero nochi cati motemactilise ica nopa caldeos, momanahuise.’ ³ Pampa TOTECO quijtohua: ‘Ni altepet Jerusalén huetzis inimaco isoldados nopa tanahuatijquet ten tali Babilonia huan yaya moaxcatis.’ ”

⁴ Huajca nopa tayacanani yajque quuitatoj nopa tanahuatijquet huan quilhuijque:

—Ma tijmictica ni tacat pampa yaya quintemajmatía nochi nopa masehualme huan nopa soldados cati noja mocajtoque ipan ni tali. Ni tacat amo quitemohua cati cuali para ni tali; yaya quitemohua cati fiero.

⁵ Huajca Tanahuatijquet Sedequías quilhui:

—¡Cualtitoc! Xijchihuaca cati amojuanti anquinequij ica ya. Na amo huelis nimechtzacuilis.

⁶ Huajca injuanti techquixtijque na, niJeremías, campa niitztoya huan techilpijque ica laso. Huan nechcalaquijque ipan se ameli huactoc cati eltoya calixpa ten nopa caltanahuatili huan elqui iaxca nopa tayacanquet Malquías, icone Hamelec. Nopa ameli amo quipiyayaya at, san quipixtoya miyac soquit huan nicalajqui huan nimasic ipan nopa soquit.

Quisencahuaj taya quinchihuilise Gedalías

⁷ Huan quema Ebed Melec cati eliyaya se hueyi tayacanquet ipan nopa caltanahuatili, quicajqui para na nechcalaquijtoyaj ipan nopa ameli, ⁸ motalojtejqei huan yajqui campa Icalte Benjamín campa mosehujtoya nopa tanahuatijquet, huan quilhui:

⁹ —Tinotanuhatijca, nopa masehualme quichijtoque cati amo cuali, pampa quicalaquijque Jeremías ipan ameli. Huan nopona miqus ica mayanti pampa ayecmo onca pantzi ipan ni altepet.

¹⁰ Huajca nopa tanahuatijquet quinuati Ebed Melec ma quihuica 30 tacame para techquixtiti ipan nopa ameli para amo nimiquis nopona.

¹¹ Huan quena, Ebed Melec quihuicac 30 tacame huan yajqui ipan nopa caltanahuatili huan calajqui ipan nopa cuarto campa taajocuyayaj huan quipanti sequij yoyomit cati ayecmo quitequihuaj. Huan quiquixti nopa yoyomit cati sosoltic huan quihuicac campa nopa ameli. Huan ica se laso quitemohui nopa yoyomit hasta tatzinta campa niitztoya. ¹² Huan Ebed Melec cati ehuyaya tali Etiopía techztajtzili huan techilhui:

—Ximotalili ni yoyomit cati sosoltic moeltantita para amo mitztequis ni laso.

Huajca na nijchijqui quej technahuati. ¹³ Huan techquixtijque ica laso ipan nopa ameli huan nechcajque ipan nopa tatzacti cati eltoc icalixpa nopa caltanahuatili.

Sedequías quinotzqui Jeremías

¹⁴ Se tonali, Tanahuatijquet Sedequías tanahuati ma techhualicaca iixpa para camanaltis nohuaya campa eltoc nopa expa caltemit ten nopa tiopamit. Huan techilhui:

—Nijnequi nimitztatzintoquilis se tamanti. Amo techtatili yon se tamanti. Techilhui cati melahuac.

¹⁵ Huan na niquilhui:

—Sinta nimitzilhuvis nochi cati melahuac, ta titanahuatis ma techmictica. Huan sinta nijnequis nimitztalnamicis para tijmatis taya monequi tijchihuas para timomanahuis, ta amo techtacaquilis.

¹⁶ Huajca Tanahuatijquet Sedequías ixtacatzí quitestigojquetzqui TOTECO huan techilhui:

—Na nijtestigojquetza TOTECO cati techchijchijqui huan cati quiyiya nochi chicahualisti para amo nitanahuatis ma mitzmictica, yon amo nimitztemactilis inimaco cati quinequij mitzmictise.

¹⁷ Huajca na, niJeremías, niquilhui Sedequías:

—TOTECO Cati Quinyacana Iilhuicac Ejcagua Ma Tatanitij, yaya cati toTeco tiisraelitame quej ni quijtohua: ‘Sinta ta huan mofamilia nimantzi anmotemactilise ica nopa tanahuatijquet ten tali Babilonia, huajca anquimanahuise amonemilis huan amo quitatise ni altepet. ¹⁸ Pero sinta amo timotemactilis ica nopa tanahuatijquet, huajca nopa soldados ten tali Babilonia, quitatise ni altepet huan ta amo timomanahuis inimaco.’

¹⁹ Pero Tanahuatijquet Sedequías techilhui:

—Na nimajmahuí para nimotemactilis ica nopa Babilonia ehuani pampa huelis techtemactilise inimaco nopa israelitame cati mosejcotilijtoque inihuaya huan techhuihuilitase huan ten hueli techchihuilise.

²⁰ Huajca na niquilhui:

—Amo mitztemactilise. San xijchihua cati TOTECO quinequi, huan quej nopa tijmanahuis monemilis huan tiquisas cuali. ²¹ Pero sinta ta amo tijnequis timotemactilis, huajca ya ni cati TOTECO quijtohua para panos:

²² Nochi nopa sihuame cati mocahuase ipan mocaltanahuatil, quinquixtise huan quintemactilise inimaco nopa soldados ten tali Babilonia. Huan nopa sihuame mitzpinajtise huan quijtose: ‘Mitzcajcayaajtoque mohuampoyohua. Amo teno ininpati nopa egiptome. Mitzilhuijque mitzpalehuise, pero ya mitzcajtejque.’

Huan nojquiya niquilhui:

²³—Huan nochi mosihuajhua huan moconehua quinquixtise huan quintemactilise inimaco nopa Babilonia ehuani, huan ta nojquiya amo timomanahuis. Nopa tanahuatijquet ten tali Babilonia mitzitzquis huan quitatise ni altepet.

²⁴ Huajca Sedequías techilhui:

—Amo aquí xijpohuili cati techilhuijtoc para amo timiquis. ²⁵ Huan sinta notayacanhua quimatise para nicamanaltitoc mohuaya huan hualase campa ta huan mitzilhuise: ‘Techilhui taya tiquilhui nopa tanahuatijquet. Sinta amo techilhuvis, timitzmictise. Nojquiya techilhui taya mitzilhui nopa tanahuatijquet.’ ²⁶ Sinta quej nopa mitzmajmatise, huajca ta quej ni xiquinilhui: ‘Na nijtajtani nopa tanahuatijquet para ma ayecmo nechcalaqui sempa ipan nopa tatzacti cati eltoc campa ichaj Jonatán para amo nimiquis nopona.’ Quej nopa xiquinilhui.

²⁷ Huan amo panoc miyac tonali quema nochi nopa tayacanani hualajque campa niitztoya, huan techtajtanijque taya camanali niquilhui o techilhui nopa tanahuatijquet quema technotzqui. Huan na niquinnaquili senquis quej nopa tanahuatijquet techilhuijtaya ma niquinnaquili. Huajca injuanti mocuetque, yon amo quimatque cati melahuac, pampa amo aqui techtacaquilijtaya quema nicamanaltic ihuaya nopa tanahuatijquet.

²⁸ Huan na nimocajqui nozona ipan nopa tatzacti ipan icalixpa nopa caltanahuatili hasta ipan nopa tonali quema nopa Babilonia ehuan sempa quiyahualojque altepet Jerusalén.

39

Nabucodonosor quiyahualo Jerusalén

(2 R. 24:20–25:21; 2 Cr. 36:17–21; Jer. 52:3–30)

¹ Ipan metzti majtacti ipan toisraelita calendario * quema Sedequías yahuiyaya para chicnahui xihuit tanahuatis ipan tali Judá, Nabucodonosor tanahuatijquet ten tali Babilonia huan isoldados hualajque ipan altepet Jerusalén huan sempa quiyahualojque para quitehuse. ² Huan ome xihuit huan tajco teipa quema Tanahuatijquet Sedequías yahuiyaya para majtacti huan se xihuit ipan itequi, ipan 9 itequi nopa metzti nahui ipan toisraelita calendario†, quicoyonijque nopa tepamit ten nopa altepet huan calajque, huan quej nopa huetzqui nopa altepet. ³ Huan nochi nopa tayacanani ten soldados ten tali Babilonia, calajque ipan nopa altepet huan mosehuijque campa nopa caltemit cati eltoc tatajco. Huan ya ni inintoca nopa tayacanani: Nergal Sarezter, Samgar Nebo, nopa hueyi tequitique Sarsequín huan nopa seyoc Nergal Sarezter cati eliyaya iachtohui tayacanca nopa tanahuatijquet.

⁴ Huan quema Tanahuatijquet Sedequías huan isoldados quiitaque para ya huetzqui nopa altepet, injuanti quisque ica tayohua ipan icalteyo nopa tepamit cati eltoc iica nopa xochimili, huan cholojque. Yajque ipan nopa ojti cati pano ipan nopa tamayamit cati eltoc nechca hueyat Jordán. ⁵ Pero nopa soldados ten tali Babilonia quitepotztocaque Tanahuatijquet Sedequías huan quitzquitoj ipan tamayamit Jericó. Huan quihuicaque ipan altepet Ribla ipan tali Hamat campa itztoya Nabucodonosor, nopa tanahuatijquet ten tali Babilonia, huan nozona quitajtolsencajqui huan quijto taya elis itatzacuiltl. ⁶ Huan nopa tanahuatijquet ten tali Babilonia, nozona quiquetzqui Sedequías para ma quintachilijto iconehua quema quinquechtzontequise inihuaya nochi nopa tayacanani ten tali Judá. ⁷ Teipa quixteyolquixti Sedequías huan quilpi ica cadenas huan quihuicac ipan tali Babilonia.

⁸ Huan nopa soldados ten tali Babilonia quitatijque nopa caltanahuatili huan nochi calme cati oncayaya ipan altepet Jerusalén huan quihuelonijque nopa tepamit cati quiyahualojtoya. ⁹ Huajca Nabuzaradán, nopa hueyi tayacanquet ten soldados, quihuicac ipan tali Babilonia nochi nopa masehualme cati noja mocajtoyaj ipan nopa altepet huan nochi cati motemactilijtoyaj ica injuanti. ¹⁰ Pero ipan nochi tali Judá san quincajqui se quesqui cati más teicneltziti huan cati amo teno quipiyayayaj. Huan quinquemacac tali huan xocomeca milme para ma quitequipanolica.

Nabucodonosor quimocuitahui Jeremías

* 39:1 39:1 Ipan 15 itequi enero ipan 588 a.C. ipan tocalendario ten ama. Xiquita nojquiya Jer. 52:4.

† 39:2 39:2 Ipan 18 itequi julio, 586 a.C. ipan tocalendario ten ama.

11-12 Huan Tanahuatijquet Nabucodonosor; quinahuatijtoya Nabuzaradán, nopa hueyi tayacanquet ten soldados ma techtemo na, nijeremías. Quiilhuijtoya: “Xijtemo Jeremías huan xijpiya miyac cuidado para amo ipantis cati fiero. Xijmocuitahui cuali huan xijmaca nochi cati mitztajtánis.”

13 Huajca Nabuzaradán nopa hueyi tayacanquet ten soldados, huan Nabusazbán cati inintayacanca nopa tacame cati quincaparojtoque, huan Nergal Sarezzer cati quiconsejomacayaya nopa tanahuatijquet huan nochi nopa tayacanani mocualtalijque para quichihuase senquisa quej quinhahuati nopa tanahuatijquet. 14 Huan quintitanque miyac soldados para ma techquixtica ipan nopa tatzacti huan techtemactilijque imaco Gedalías, icone Ahicam, cati icone Safán, para ma techhuica nochaj. Huan quej nopa na niitztoya tatajco noisraelita masehualhua cati noja mocajtoyaj ipan nopa tali.

Nopa camanali para Ebed Melec

15 Pero quema na, nijeremías, noja niitztoya ipan tatzacti, huan quema ayemo hualayayaj nopa soldados ten tali Babilonia, TOTECO technojoztzqui huan techilhui: 16 “Xitatitani para quej ni ma quiilhuitij Ebed Melec cati ehua Etiopía. Ma quiilhuitij: ‘Quej ni na niqijtohua, nimoTECO, Cati niqinyacana Noilhuicac Ejchua Ma Tatanitij huan na cati ni ininTeco israelítame: Na nijchihuas nochi cati niqijtojtoc nijchihuilis ni altepet. Nijchihuilis cati fiero huan amo aqui cuali. Nijsoles moixpa, 17 pero ta nimitzmanahuis. Amo timiquis inimaco nopa masehualme cati tiquinimacasi. NimoTECO niqijtohua. 18 Na nijmanahuis monemilis huan nimitzmaquixtis. Huan ya ni elis quej motaxtahuil pampa timotemachi ipan na. Quej nopa nimoTECO niqijtohua.’”

40

Jeremías mocajqui ihuaya Gedalías

1 Ya ni nopa camanali cati TOTECO techmacac na, nijeremías, quema ya techmajcajqui ipan altepet Ramá huan nechcajqui ma nimocuepa ipan Jerusalén. Nabuzaradán, nopa hueyi tayacanquet ten soldados, techpanti niilpitoc ica tepos cadenas ica sequinoc israelítame cati quinquixtijtoyaj ipan tali Judá huan ipan altepet Jerusalén huan quinhuicayayaj ipan tali Babilonia.

2 Huan nopa tayacanquet ten soldados technotzqui huan techilhui: “MoTECO Dios tayólmelajqui para quihualicas ni tatzacuiltili ipan ni tali, 3 huan quichijtoc na pano senquisa quej quijto quichihuasquia pampa ni masehualme tahuel tajtacolchijtoque ica moTECO huan amo quitacaquilijque quema quincamanalhuiyaya. Yeca ama hualajtoc nochi ni tamanti.

4 Xiquita, ama ni tonali na nimitzquixtilis nopa tepos cadenas cati ica mitzilpitoque huan nimitzcahuilis xiya. Sinta tijnequi tihualas nohuaya ipan tali Babilonia, huajca xihuala nohuaya huan na nimitzmocuitahuis. Pero sinta amo tijnequi tihualas nohuaya, huajca ximocahua. Huan xiquita, nochi ni tali eltoc moixpa huan huelis tijtapejpenis campa más mitzpacría para tiitztos. 5 Sinta timoilhuía timocahuas, huajca xiya campa itztoc Gedalías, cati Tanahuatijquet Nabucodonosor ten tali Babilonia qutalijtoc quej gobernador ipan ni tali Judá, huan xiitztoti inihuaya nopa masehualme cati yaya quinnahuatía. Ta xijtapejpeni canque tijnequi tiyas. Xiya campa más mitzpacría.”

Huan Nabuzaradán, nopa hueyi tayacanquet ten soldados, techmacac miyac tacualisti huan tomi huan technahuatijtejqui. ⁶ Huajca na, niJeremías, niyajqui campa Gedalías huan niitztoya inihuaya nopa masehualme cati noja mocajtoyaj ipan ni tali.

(2 R. 25:23-24)

⁷ Pero nopa tayacanani ten israelita soldados cati nemiyayaj cuatita, quimatque para nopa tanahuatijquet ten tali Babilonia quitajtoyaj Gedalías quej gobernador ipan ni tali para quinnahuatis nopa teicnelztizti cati noja mocajtoyaj cati amo quinhuicatoyaj Babilonia. ⁸ Yeca yajque quiiatoy Gedalías ipan Mizpa campa quipiyayaya se hueyi cali para soldados. Ya ni inintoca nopa tayacanani cati yajque quiiatoy: Ismael, icone Netanías; Johanán huan Jonatán, iconehua Carea; Seraías, icone Tanhumet; iconehua Efai cati ehuan Netofa; huan Jezanías, icone cati se maacateo tacat. Nochi ni tacame yajque ica inisoldados para quiiatij Gedalías.

⁹ Huan Gedalías tatestigojquetzqui huan quinilhui: “Amo ximomajmatica, ximotemacaca nica para anquitequipanose nopa tanahuatijquet ten tali Babilonia huan anquisase cuali ipan nochi tamanti. ¹⁰ Huan na nimocahuas nica ipan Mizpa huan nicamanaltis por amojuanti quema hualase nopa Babilonia ehuan para quitachilise notequi. Ximochantica ipan cati hueli al-tepet campa amojuanti amechpactía, huan ximopanoltica ica nochi tamanti cati eli ipan ni tali. Xijtequica itajca nopa xomeca milme, huan inintajca cuame, huan aceite, huan xicajocuica ipan amochaj.”

¹¹ Huan teipa nochi tali Judá ehuan cati mochololtijtoyaj ipan tali Moab, Amón huan Edom huan nochi cati itztoyaj ipan sequinoc talme nojquiya quimatque para sequij tali Judá ehuan mocajtoyaj ipan tali Judá, pampa nopa tanahuatijquet ten tali Babilonia amo quinhuicatoya nochi ipan ital. Huan quimatque nojquiya para nopa tanahuatijquet ten tali Babilonia, quitajtoyaj Gedalías quej gobernador. ¹² Huajca injuanti quisque ipan nopa talme campa mochololtijtoyaj huan mocuetque ipan tali Judá. Huan ajsicoj ipan Mizpa campa itztoya Gedalías para camanaltise ihuaya. Teipa yajque ipan nopa huejhueyi xomeca milme huan quitejque miyac itajca para quichihuase xomecat iayo. Huan nojquiya quisentilijque miyac tamanti cuatacti.

¹³ Pero teipa, Johanán, icone Carea, huan nochi nopa sequinoc tayacanani ten soldados, yajque quiiatoy Gedalías ipan Mizpa, ¹⁴ Huan quiihuijque:

—¿Amo tijmati para Baalis cati inintanahuatijca nopa amonitame, quitantoc Ismael, icone Netanías para ma mitzmictiqui?

Quej nopa quiihuijque, pero Gedalías amo quinneltoquili.

¹⁵ Huajca Johanán camanaltic ixtacatzti ihuaya Gedalías, huan quiihui:

—Techcahuili niyas nijmictiti Ismael huan amo aqui quimatis ajquiya quimicti. Amo hueli tijcahuilise para ma mitzmicti. Pampa sinta mitzmictis, huajca nochi nopa tali Judá ehuan cati mosejcotilijtoque ica ta, mopasolose sempa huan quimictise nochi nopa masehualme cati noja mocajtoque nica ipan tali Judá.

¹⁶ Pero Gedalías quiihui:

—Amo xijmicti Ismael pampa san tiquistacahuía.

41

Ismael quimicti Gedalías
(2 R. 25:23-24)

1 Pero ipan nopa metzti chicuase*, Ismael, icone Netanías, cati icone Elisama, cati hualayaya ipan nopa familia ten tanahuatiani huan cati eliyaya se itayacanca nopa tanahuatijquet, hualajqui ipan Mizpa. Huan ihuaya ya hualajque seyoc majtacti tacame. Huan Gedalías quinnotzqui para tacuase sentic. 2 Huan quema tacuayayaj, Ismael huan nopa majtacti tacame cati hualajtoyaj ihuaya, moquetzque huan quiquixtijque inimacheta, huan quimictijque Gedalías, icone Ahicam, cati icone Safán cati nopa tanahuatijquet ten Babilonia quitalijtoya quej gobernador ipan tali Judá. 3 Teipa quisque ten nozona huan quinmictijque nochi nopa tayacanca Judá ehuani huan nochi nopa tayacanani ten soldados caldeos cati itztoyaj ihuaya Gedalías.

4 Huan tonili quema ayemo aqui quimatiyaya para Ismael quimictijtoya Gedalías, 5 quej 80 masehualme cati ehuyayaj ipan altepet Siquem, Silo huan Samaria hualajque ipan Mizpa para quihueyitaliquij TOTECO ipan itiopa. Nochi injuanti quitejtoyoj inintento, quitzayantoyaj iniyoyo, mococojtoyaj ipan inintacayo huan quihualicayayaj tacajchualisti huan copali para quitatisquiáj iixpa TOTECO. 6 Huan Ismael quisqui ipan Mizpa chocatiyajqui. Huan ipan ojtí quinnamiquito nopa masehualme. Huajca Ismael quincajcayajqui huan quinihui:

—jXihualaca huan xiquitaca taya quipanotoc Gedalías, icone Ahicam!

7 Pero quema injuanti ajsicoj ipan altepet Mizpa, Ismael huan isoldados, quinmictijque nopa tacame huan quincalaquijque ipan se ameli cati amo quipiyayaya at. 8 Pero majtacti ten nopa tacame amo quinmicti, pampa injuanti quinihuique Ismael: “Amo techmicti huan timitzhualiquilise trigo, cebada, aceite huan necti cati tijtatiyoque cuatita.” Huajca Ismael amo quinmicti. 9 Nopa ameli cati Ismael quitemiti ica inintacayohua nopa masehualme cati quinmicti eliyaya nopa hueyi ameli cati Tanahuatijquet Asa huejcajquiya quichijchijqui para quinmanahuis nopa masehualme ten altepet Mizpa quema quinteuhuyaya Tanahuatijquet Baasa ten tali Israel.

10 Huan Ismael quinitzqui iichpocahua nopa tacat cati achtohuyi eliyaya tanahuatijquet nozona. Nojquiya quinitzqui nochi nopa masehualme cati Nabuzaradán, nopa hueyi tayacanquet ten soldados quincajtoya imaco Gedalías nopa gobernador para ma quinnahuati. Huan Ismael quinhuicac nochi nopa masehualme quej tetequipanohuani huan inintal nopa amonitame.

11 Huan quema Johanán, icone Carea, huan nochi nopa tayacanani ten soldados cati itztoyaj ihuaya quimatque nochi cati Ismael quichijtoya, 12 quinsentilijque nochi inisoldados huan quitepotztocaque Ismael para quitehuitij. Huan quiajsitoj campa nopa pleta cati eltoc nechca altepet Gabaón. 13 Huan quema nopa masehualme cati quinhuicayaya Ismael quiiitaque Johanán huan nochi nopa tayacanani ten soldados, tahuel yolpajque. 14 Huan mochololtijque huan motalojque quinamiquitoj Jonatán huan pejqque quipalehuáj. 15 Pero Ismael huan chicueyi isoldados, cholojque huan yajque ipan tali Amón.

16 Huajca Johanán huan nochi isoldados quinhuicaque nochi nopa soldados, sihuame huan coneme. Nojquiya quinhuicaque nopa tacame cati quincaparojtoyaj para mochihuase huejhueyi tequichihuani huan cati Ismael quinquixtijtoya ipan altepet Mizpa quema quimicti Gedalías, icone Ahicam. 17 Huan nochi yajque ipan altepet Gerut Quimam, nechca altepet Belén, para mocualtise para yase ipan tali Egipto. 18 Injuanti quiimacasij

* 41:1 41:1 Ipan metzti octubre o noviembre ipan 586 a.C.

ten quichihuasquíaj nopa caldeos quema quicaquisquíaj para Ismael, icone Neganías quimictijtoya Gedalías, icone Ahicam, cati nopa Tanahuatijquet ten Babilonia quitalijtoya quej gobernador ipan tali Judá.

42

Johanán quitemohua Jeremías huan TOTECO

¹ Teipa nochi nopa tayacanani ten soldados huan Johanán, icone Carea, huan Jezanías icone Osaías, huan nochi masehualme cati huejhueyi huan cati pisiltzitzí, nochi hualajque campá na, nijeremías, ² huan techilhuijque:

—Timitztajtaníaj se hueyi favor. Tijnequij ximotatajti ica TOTECO por tojuanti, pampa ta tijmati cuali para achtohuiya tieliyayaj tahuel timiyaquij tiisraelitame, pero ama san tiitztoque se quesqui cati noja tiitztoque ipan ni tali. ³ Xijtajtanili TOTECO ma technextili canque tiyase huan taya tijchi-huase.

⁴ Huajca na niquinilhui:

—Cualtitoc, na nijtajtanis TOTECO por amojuanti huan teipa nimechilhuis nochi cati yaya techilhuis. Amo teno nimechtatilis.

⁵ Huan injuanti techilhuijque:

—Ma TOTECO techtelchihua sinta amo tijchihuase nochi cati technahuatis. ⁶ Sinta techpactis o amo techpactis cati TOTECO technahuatis, tojuanti tijtepanitase huan tijchihuase cati yaya technahuatis. Yeca timitztajtaníaj ximotatajti ica ya por tojuanti, pampa tijmatij cuali, sinta tijtepanitase, huajca nochi cati tijchihuase quisas cuali.

Motatajti Jeremías huan TOTECO quinanquili

⁷ Huan quema ya panotoya majtacti tonali, TOTECO technojnitzqui na, nijeremías huan techmacac cati nijtajtaniyaya. ⁸ Huajca na nijnotzqui Johanán icone Carea, huan nopa tayacanani ten isoldados huan nochi nopa masehualme cati huejhueyi huan cati pisiltzitzí, ⁹ huan niquinilhui: “Amojuanti antechtitanque iixpa TOTECO cati toDios tiisraelitame, para ma nimotatajtiti por amojuanti, huan ama quej ni techilhui ma nimechilhui: ¹⁰ ‘Ximocahuaca ipan ni tali. Sinta anmocahuase, huajca na nimechtiochihuas huan amo aquí amechcuatotonis. Tahuel nimocuesohua por nochi nopa tatzacuiltili cati nimechtitanili. ¹¹ Ayecmo xiquimacásica nopa tanahuatijquet ten tali Babilonia, pampa na niitztos amohuaya para nimechmanahuis imaco. ¹² Huan na nimechtasojtas huan nijchihuas para yaya nojquiya ma amechicneli. Amo amechmictis, yon amo amechchihualtis para xielica antetequipanohuani. Huan amechcahuilis xiitzoca nica ipan amotal.’

¹³ “Pero huelis amojuanti amo anquinequise anquitepanitase TOTECO. Huelis anquijitose: ‘Tojuanti amo timocahuase ipan ni tali. ¹⁴ Tojuanti tiyase ipan tali Egipto pampa nepa amo tiquitase tatehuilisti, yon mayanti, yon amo tijcaquise tapitzali.’ ¹⁵ Huajca sinta quej nopa inquijitose, xijtacaquilica taya TOTECO amechilhúa anquesqui amojuanti cati noja anmocajtoque ipan tali Judá. TOTECO Cati Quinyacana lilhuicac Ejchua Ma Tatanitij huan cati ininDios tiisraelitame quijitohua: ‘Sinta amojuanti anquisehuiquilise anquinequise anyase ipan tali Egipto para anitztotij nepa, ¹⁶ huajca nepa amechajsis tatehuilisti huan mayanti cati amojuanti tahuel anquimahuilíaj. Huan nepa anmiquise. ¹⁷ San ya nopa quinchiya nochi cati quinequij yase ipan tali Egipto. Nopona miquise ipan tatehuilisti, ica mayanti huan ica cocolisti. Yon se amo momanahuis ten nopa tatzacuiltili cati nijtitanis nepa.’

18 “TOTECO Cati Quinyacana Iilhuicac Ejchahua Ma Tatanitij huan yaya cati ininDios israelitame, quijitohua: ‘Quej nijtitanqui nohueyi cualancayo ipan altepet Jerusalén, quej nopa nojquiya nijtitanis amopani quema anyase ipan tali Egipto. Huan amechselise ica tequipacholi huan ica cualanti. Amechtelchihuase huan amechpinajtise. Huan ayecmo quema anquiritase amotal.’ 19 Pampa TOTECO quej ni amechilhuía: Amojuanti cati noja anmocajtoque ipan tali Judá, amo xiyaca ipan tali Egipto. Teipa niquinilhui: ‘Amo quema xiquelcahuaca ni camanali cati nimechilhujtoc ama. 20 Sinta anyase ipan tali Egipto, huajca temachtí anmiquise. Pampa nijmati san anistacatiyayaj quema antechilhujque ma niya nimotatajtiti por amojuanti huan antechilhujque para ma nimechilhui taya quijitohua TOTECO huan amojuanti anquichihuasquíaj pampa amo neli. 21 Huan ama na nimechylolmelajtoc senquisa quej TOTECO technahuati ma nimechilhui. Pero amojuanti amo anquinequij anquitepanitase. 22 Huajca xijmatica cuali para melahuac anmiquise ipan tatehuilisti, ica mayanti huan ica cocolisti ipan tali Egipto campa amojuanti tahuel anquinequij anyase.’ ”

43

Quihuicaque Jeremías ipan Egipto

1 Quema na nitanqui niquinpohuilía nopa masehualme icamanal TOTECO ininDios, 2-3 Azarías, icone Osaiás, huan Johanán, icone Carea, huan nochi nopa sequinoc masehualme cati tahuel mohueyimatij, techilhujigque: “¡Tiistacati! TOTECO Dios amo mitznahuatijtoc para techilhui ma amo tiyaca ipan Egipto. Nochi ya nopa mitzilhui Baruc, icone Nerías, para techilhui pampa yaya quinequi ma timocahuaca nica para ma techmictica nopa caldeos o para ma techhuicaca ipan tali Babilonia para titetequipanotij san topic.”

4 Huan Johanán, huan nopa tayacanani ten soldados huan nochi nopa masehualme, amo quitepanitaque TOTECO, yon amo quinejque mocahuase ipan tali Judá. 5 Yeca Johanán huan nopa tayacanani ten soldados quinsentilijque nochi nopa masehualme cati mocajtoyaj ipan tali Judá, huan nochi cati mocuctoyaj ten sequinoc talme, huan quincuitejque huan yajque ipan tali Egipto. 6 Quinhuicaque tacame, sihuame huan coneme, iichpocahua nopa tanahuatijquet, huan nochi nopa masehualme cati Nabuzaradán, nopa hueyi tayacanquet ten soldados, quincajtoya ipan itanahuatil Gedalías, icone Ahicam, icone Safán. Huan hasta na nitajtolpanextijquet Jeremías huan Baruc, icone Nerías nojquiya techchihualtijque ma tiyaca inihuaya. 7 Huajca nochi tojuanti tiyajque ipan tali Egipto huan tiajsitoj ipan altepet Tafnes pampa injuanti amo quinejque quitepanitase TOTECO.

Tanextili ten nopa tet cati eltoc ixtacatzí

8 Huan ipan altepet Tafnes, TOTECO technojoztzqui huan techilhui: 9 “Xiquinsentili nopa masehualme ten tali Judá, huan inixpa, xijcui se ome tet cati huejhueyi huan xiquintalpacho tatajco ipan nopa piso ten tet campa eltoc icalte icaltanahuatil Faraón nica ipan Tafnes. 10 Huan quej ni niquinilhui nopa tacame ten tali Judá: ‘TOTECO Cati Quinyacana Iilhuicac Ejchahua Ma Tatanitij huan cati ininDios israelitame, quijitohua: Temachtí nijhualicas nica ipan tali Egipto notequipanoyca Nabucodonosor, tanahuatijquet ten tali Babilonia. Huan yaya quitaliqui isiya para tanahuatis campa ni teme cati niquintalpachojtoc. Huan nica quichihuas ichaj. 11 Huan yaya quitamisolozqui ni tali Egipto. Huan quinmictis nochi cati na niqijtos para ma quinmicti, huan quinitzquis cati na niqijtos ma quinitzqui para

quinhuicas ipan tali Babilonia huan miyac miquise ica cocolisti. ¹² Nojquiya quitatis inintioipa nopa teteyome ten tali Egipto, huan quintatis nochi nopa teteyome huan quinhuicas nopa masehualme ilpitoque ipan ital. Yaya quitamitachtequilis tali Egipto, quej se tamocuitahuijquet quinquixtia tecpime ipan iyoyo. Pero amo aqui huelis quichihuilis teno. ¹³ Huan quintapanas nochi nopa huejcapantique teteyome ten Heliópolis, huan quintatis nochi nopa tiopame ten nopa teteyome cati quinhueyimati j ipan tali Egipto.’ ”

44

Tatzacuiltili para israelitame ipan Egipto

¹ TOTECO techmacac icamanal na, nijeremías, para nochi nopa israelitame cati tali Judá ehuan cati itztoyaj ica norte ipan tali Egipto ipan nopa altepeme Migdol, Tafnes, Menfis huan Patros huan ipan nochi altepeme cati mocahuaj ica tatzinta ten tali Egipto, techilhui: ² “TOTECO Cati Quinyacana ilhuicac Ejcahua Ma Tatanitij huan yaya cati toTeco tiisraelitame quej ni amechilhuía: ³ ‘Amojuanti anquiitaque nochi nopa tatzacuiltili cati nijtitanqui ipan altepet Jerusalén ehuan huan cati ehuan nochi nopa altepeme ten tali Judá. Ama nochi inijuanti sosolijtoque por inintajtacolhua huan amo aqui itztoc nozona. Na tahuel nicualanqui ica cati nozona anehuan pampa anquinhueyichijque sequinoc dioses cati amojuanti huan amohuejcapan tatahua amo quema quinixmatque.

⁴ “Na talojtzitzi niquntitanili notajtolpanextijcahua para ma quinilhuica ma amo quichihuaca nopa fiero tamanti cati amo nijnequi niquitas. ⁵ Pero nomasehualhua amo quinejque techtacaquilise, yon amo quicajque nopa ojti cati amo cuali. Quisehuiquilijque quinmacaj tacajcualisti nopa teteyome cati amo teno ininpati. ⁶ Huan yeca nohueyi cualancayo huetzqui quej tit ipan nopa altepeme ten tali Judá huan ipan nochi calles ten altepet Jerusalén. Huan yeca mocahuaj quej huactoc tali hasta ama.

⁷ “ ‘Huan ama niamoTECO Cati Niquinyacana Noilhuicac Ejcahua Ma Tatanitij huan cati ni ininTeco israelitame, quej ni nimechilhuía: ¿Para ten anmotemohuilíaj miqulisti ica amoselti? Pampa melahuac yon se ten amojuanti amo mocahuas yoltoc. Amo momanahuis yon se tacat, yon se sihuat, yon se conet huan yon se conetzi cati noja chichi cati ehuan ipan tali Judá huan hualajtoque nica ipan tali Egipto. ⁸ ¿Para ten anquinchijchihuaj teteyome huan anquintatiliáj copali quej se tacajcualisti huan tahuel antechcualancamacaj? Ica amotajtacolhua antechchihuaj ma nimechtzontamilti huan ma nimechchihua antatelchihualme. Amechhuihuiitase masehualme ipan nochi talme. ⁹ ¿Huelis ya anquielcajque inintajtacolhua amohuejcapan tatahua, huan inintajtacolhua nopa tanahuatiani huan sihua tanahuatiani ten tali Judá? Xiquelnamiquica amotajtacolhua huan inintajtacolhua amosihuajhua cati anquichijque ipan tali Judá huan ipan altepet Jerusalén. ¹⁰ Pampa hasta ama, amo anmoehcapanojtoque, yon amo aqui mocuectoc ica na. Amo aqui ten amojuanti motemacatoc para quitoquillis nopa tanahuatili cati nimechmacac amojuanti huan amohuejcapan tatahua.

¹¹ “ ‘Yeca ama niamoTECO Cati Niquinyacana Noilhuicac Ejcahua Ma Tatanitij huan cati niiniDios israelitame, niquijtohua: Na tahuel nicualantoc huan yeca nijsencajtoc nimechtzontamiltis sesen ten amojuanti cati anehuan ipan tali Judá. ¹² Na nimechtzontamiltis nochi amojuanti cati noja anmocajtoyaj ipan tali Judá quema quinhuicaque huejca nopa sequinoc huan teipa anhualajque nica ipan tali Egipto. Nochi anmiquise nica ipan Egipto ica mayanti huan ica macheta. Anmiquise nochi amojuanti cati

anpilsiltziti hasta cati anhuejhueyi. Huan nochi amojuanti amechcualan-caitase, amechpinajtise, amechtelchihuase huan amechhijyase. ¹³ Pampa na nimechtatzacuilitis ipan tali Egipto quej nimechtatzacuiliti ipan altepet Jerusalén: ica tatehuilisti, ica mayanti huan ica cocolisti. ¹⁴ Huan yon se ten amojuanti amo momanahuis ten nocualancayo. San momanahuse injuanti cati moillhuse para más cuali amo hualajtosquíaj ipan tali Egipto huan cholose para yase sempa ipan inintal.' ”

¹⁵ Huaيجا nochi nopa sihuame cati itztoyaj nopona huan nopa tacame cati quimatiyayaj para inisihuahua quintatiliyayaj copali nopa teteyome huan nochi nopa sequinoc israelitame cati tali Judá ehuan cati mocahuayayaj ica tatzinta ipan tali Egipto, nochi mosentilijtoyaj huan technanquilijqe huan techilhuijqe:

¹⁶ —Tojuanti amo tijtacaquilise cati tiquijtohua pampa cati techilhuijqoc, amo huala ten TOTECO. ¹⁷ Tojuanti tijchihuase cati techpactia. Tijtatilise copali nopa sihua tanahuatijquet ten ilhuicac huan tijtoyahuase tacajcualisti atic iixpa huan tijchihuase cati techpactia. Quej nopa quichihuayayaj tohuejcapan tatahua, totanahuatijcahua huan totayacancahua ten tali Judá ipan nochi calles ten altepet Jerusalén. Huan ipan nopa tonali tijpiyayayaj miyac tacualisti, tipaquiyayaj huan amo techajsic yon se tamanti cati amo cuali. ¹⁸ Pero hasta ipan nopa tonali quema tijcajqe tijtatilíaj copali nopa sihua tanahuatijquet ten ilhuicac huan ayecmo tijhueyichijque, yon ayecmo tijmacaque tacajcualisti cati quitoyahua, hasta huaيجا pejqe para techpolohua nochi tamanti. Huan talojtitziti techajsi taijyohuilisti huan techtzontamiltíaj ica macheta huan ica mayanti.

¹⁹ Huan nojquiya nopa sihuame quijtojqe:

—Tojuanti tijhueyichihuayayaj nopa sihua tanahuatijquet ten ilhuicac. Tijmacayayaj tacajcualisti cati tijtoyahuayayaj. Huan tijchihuayayaj taxcali huan ipani tijchihuayayaj iixcopinca nopa sihua tanahuatijquet. Pero amo quema tijchijque toseltitziti. Tohuejhuejhua quimatiyayaj huan techpalehuayayaj.

²⁰ Huaيجا na niqunnanquili nopa tacame huan sihuame cati quijtojqtoyaj ya nopa huan niqunilhui:

²¹ —¿Anmoillhuíaj para TOTECO amo quimatiyaya para amojuanti, amohuejcapan tatahua, amotanahuatijcahua, amotayacancahua huan nochi nopa sequinoc masehualme anquitatiyayaj copali para teteyome ipan nochi altepeme ten tali Judá huan ipan nochi calles ten altepet Jerusalén? ²² Huan TOTECO ayecmo huelqui quijyohui nochi amotajtacolhua cati anquichihuayayaj, huan yeca quisosolo amotal. Huan quicajqui quej se huactoc tali cati tahuel temajmati. Nojquiya quichijqui ma eli tatechihuali huan yeca ayecmo aqui itztoc nopona hasta ama. ²³ TOTECO amechtitanilijtoc ni huejhueyi tatzacuiliti pampa anquintatilijqe copali nopa teteyome huan antajtacolchijque ica ya huan hasta ama, amo anquinctoque anquitepanitase.

²⁴ Teipa quej ni, niJeremías, niqunilhui nopa sihuame huan nochi nopa masehualme:

—Xijtacaquilica icamanal TOTECO nochi anmasehualme ten tali Judá cati anitztoque ipan tali Egipto. ²⁵ TOTECO Cati Quinyacana ilhuicac Ejcahua Ma Tataniq, huan cati Toteco tiisraelitame, quijtohua: ‘Amojuanti huan amosihuahua anquijtojqtoyaj para amo quema anquithuelcahuase nopa sihua tanahuatijquet ten ilhuicac, yon amo quema anquicahuase anquimacase tacajcualisti, Huan ica cati anquichihua, anquixtíaj para melahuac amo anquithuelcahuase nopa sihua tanahuatijquet. Cualtitoc, xijmacaca

cati anquитайtolcahuilijtoque anquimacase huan nochi cati antaquejquetztoque anquichihuilise. ²⁶ Pero nochi amojuanti anisraelitame cati anehuani tali Judá huan ama anitztoque ipan ni tali Egipto, xijtacaquilica nocamanal niDios: Na nijtestigojquetza ica na notoca, huan niquijtohua para san topic masque noja anquitemose notapalehuil huan notatíochoihual, huan antates-tigojquetzase huan anquijjotose: ¡Na niquijtohua cati temachti quej temachti itztoc TOTECO Cati Más Quipiya Tanahuatili! Pero masque quej nopa antatestigojquetzaj, amo nimechpalehuis, ²⁷ pampa na nimechtachilis para nimechtatzacuilitis huan amo para nimechchihuilis cati cuali. Na nijchihuas ma huala amopani miyac tamanti cati amo cuali huan antzontamise ica tatehuilisti huan ica mayanti.

²⁸ “ ‘San mocuepase se quesqui Judá ehuan cati momanahuisse ten nohueyi cualancayo. Pero nochi cati amo quinequise mocuepase, pero quinequise quisehuiquilise itztose ipan ni tali Egipto, quimachilise ajquiya camanalti xitahuac, sinta na o inijuanti. ²⁹ Huan ya ni elis nopa tanextili cati amechnextilis para melahuac panos quej niquijtojtoc huan para melahuac nimechtatzacuilitis ipan ni tali: ³⁰ Nijtemactilis nopa Faraón cati itoca Hofra, cati itztoc tanahuatijquet ipan tali Egipto inimaco icualancaitacahua cati quinequij quimictise. San se nijchijqui quema nijtemactili Sedequías, tanahuatijquet ten tali Judá, imaco Nabucodonosor, tanahuatijquet ten tali Babilonia para ma quimicti.’ ”

45

Jeremías quiyoltali Baruc

¹ Quema Baruc ya quijcuilojtoya nochi nopa camanali cati achtohuiya niquilhuijtiyajqui, na, niJeremías, sempa nijpohuili Baruc ni sequinoc camanali quema Joacim, icone Josías, yahuiyaya para nahui xihuit para tanahuatis. Niquilhui: ² “Baruc, ya ni cati TOTECO huan toDios tiisraelitame mitzilhuía: ³ ‘Baruc, ta tiquijtohua para nelía titeicnelti pampa TOTECO tahuel mitztaijyohuiltijtoc. Huan ama tiquijtohua para TOTECO noja más taohuijcajot mitzmacas. Tiquijtohua tahuel tisiyajtoc ica tequipacholi huan amo hueli timosiyajquetzas.’ Quej nopa tiquijtohua. ⁴ Pero ama Baruc, TOTECO quijtohua: ‘Na nijsosolos ni tali cati nijchijchijqui huan nijtamiltis nochi cati nijtali. ⁵ ¿Huelis tijtemohua huejhueyi tamanti para ta? ¡Amo quej nopa xijchihua! Pampa masque na nijhualicas huejhueyi tatzacuiliti ipan nochi ni masehualme, ta nimitzmanahuis campa hueli campa tiyas.’ ”

46

Camanali para cati amo israelitame

¹ TOTECO technojnotzqui na, niJeremías, huan techmacac icamanal para nopa talme campa masehualme cati amo israelitame.

Camanali para Egipto

² Ya ni nopa camanali cati TOTECO techmacac na, niJeremías, para tali Egipto ipan nopa xihuit quema Joacim, icone Josías, yahuiyaya para nahui xihuit tanahuatis ipan tali Judá*. Elqui ipan nopa tonali quema oncac tatehuilisti ipan Carquemis, nechca hueyat Jordán. Huan ipan tatehuilisti Nabucodonosor, tanahuatijquet ten Babilonia, quitehui nopa Faraón cati itoca Neco, cati elqui tanahuatijquet ten tali Egipto. Huan Nabucodonosor

* 46:2 46:2 Ipan 605 a.C ipan tocalendario ten ama.

quitzontamilti ya huan isoldados. ³ Huan TOTECO techilhui para quej ni ma niquinilhui Egipto ehuan: “Ximotalilica amoteposhua huan xiyaca ipan nopa tatehuilisti. ⁴ Xiquintalilica siyaj amocahuayojhua huan ximocualtalica para antejcose ininpani. Ximotalilica amotepostzontzajca huan xijtentica amomachetas. Huan ximotalilica se teposti para anmotzacuase amoyolixco. ⁵ ¡Xiquitaca! Nopa soldados ten tali Egipto cholohuaj ica majmajti. Hasta nopa soldados cati tahuel mosemacaj nojquiya motalohuaj, yon amo moicancuepaj. Campa hueli onca majmajti. ⁶ Pero amo aqui momanahuis masque tahuel hueli motalohua o masque tahuel motemaca. Pampa nepa ica norte nechca hueyat Eufates, motepotanise huan huetzise.

⁷ “¿Ajquiya inijuanti ne soldados cati tahuel tetique? Motananaj quej nopa hueyat Nilo quema tatemi huan quitemitíaj nochi nopa tali. ⁸ Ya nopa, nopa soldados ten tali Egipto. Inijuanti motepanitaj pampa moilhuíaj quitemitise ne tali quej at huan quintzontamiltise nochi inincualancaitacahua. ⁹ Huajca ma hualaca nopa cahuyos, carros huan nopa tatehuiani cati tahuel tetique ten tali Egipto. Ma hualaca nochi nopa masehualme ten tali Etiopía huan Libia cati tahuel huelij quitequihuíaj macheta huan cuahuitoli. ¹⁰ Pampa ni tonali eltoc noaxca na niDIOS Cati Niquinyacana Noilhuicac Ejcahua Ma Tatanitij. Ama ni tonali niquintacuepilis nocualancaitacahua. Nopa macheta quinmictis masehualme hasta ayecmo huelis más. Eltoc quej ihuintis ica inieso. Pampa ama na nijselis se tacajcualisti. Oncas se hueyi miquilisti nepa ipan nopa tali cati mocahua ica norte, nechca hueyat Eufates.

¹¹ “Senquisa amechtantoque huan amechcocojtoque anmasehualme ten tali Egipto. Xiyaca ipan tali Galaad xijtemotij nopa pajti ten bálsamo. Pero masque anquitequihuse tahuel miyac pajti, amo amochicahuase. ¹² Nochi talme quicactoque ten amopinahualis. Ipan nochi ni tali caquisti choquisti huan tzajtzisti pampa ya amechtanque. Amosoldados cati tahuel tetique motepotaniáj se ica seyoc huan san sejco huetzij.”

¹³ Huan quema nopa Nabucodonosor, tanahuatijquet ten tali Babilonia hualajqui para quitehuse tali Egipto, TOTECO technoizotzqui na, niJeremías, huan techilhui: ¹⁴ “¡Xitayolmelahua chichahuac ipan tali Egipto! Xitepohuilica taya ininpantis nopa altepeme Migdol, Menfis huan Tafnes. Quej ni xiquinilhui: ‘Ximocualtalica para antatehuse pampa yaya cati huala ica nopa macheta cati tetzontamiltíaj quinmictis nochi masehualme cati itztoque yahualtic Egipto.’ ¹⁵ ¿Para ten cholo ica majmajti modios, Apis, cati tijtohuayaya para tahuel tetic quej se toro? Cholo pampa niDIOS nijtahuiso niixpa icualancaitacahua. ¹⁶ Tahuel miyac masehualme huetzise. Huan huajca nopa israelitame cati tali Judá ehuan quiijtose: ‘Xihuala, ma timocuepaca ipan tali Judá campá titacatque. ¡Ma timochololtica ten ni miquilisti!’

¹⁷ “Xijpataca itoca nopa Faraón cati itoca Hofra huan xijtocaxtica: ‘Nopa tacat cati camanalti hueyi, pero amo quipiya chichahualisti.’

¹⁸ “Na niTanahuatijquet huan niDIOS Cati Niquinyacana Noilhuicac Ejcahua Ma Tatanitij nimechilhúia para temachti hualas ipan tali Egipto, se cati tahuel huejcapantic quej tepet Tabor o quej tepet Carmelo cati eltoc nechca hueyi at. Quej nopa elis amocualancaitaca cati huala. ¹⁹ Xijcualtalica amotamantziti huan ximocualchijchihuaca para anyase ipan seyoc tali, nochi amojuantí cati anehuani ipan tali Egipto. Pampa quitamisosolose altepet Menfis hasta mocahuas cactoc quej huactoc tali huan amo mocahuas yon se masehuali. ²⁰ Egipto nelía eliyaya yejectzi quej se becerra, pero cholos

quema hualas nopa tetzontamiltijquet cati ehua ipan nopa tali cati mopantía ica norte. ²¹ Hasta nopa isoldados ten sequinoc talme cati Egipto quintaxatahuía para tatehuisse, nojquiya cholose ica majmajti quej becerros cati tomahuaque. Tahuel motalose pampa ama eli se tonali ten majmajti para tali Egipto, huan se tonali ten tatzacuilti. ²² Quema calaquiquij ininculancaitacahua para quintzontamiltiquij ica hachas nopa Egipto ehuan cholose ixtacatzi quej se cohuat cati mohuahuatatza. Hualase tahuel miyac soldados hasta amo aquí huelis quinphuas. ²³ Huan injuanti quinhuejhuelose nopa egiptome quej tacame cati quintzontequij cuame ipan cuatitamit. Quipiyaj inimiya quej chapolime. ²⁴ Quinpinahualtise nopa Egipto ehuan huan quintemactilise inimaco nopa masehualme cati hualahui ica norte huan amo huelis momanahuisse.”

²⁵ TOTECO Cati Quinyacana Iilhuica Ejcahua Ma Tatanitij huan yaya cati ininTeco israelitame, quijtohua: “Na nijtatzacuiltis Amón, nopa taixcopincayot cati inindios nopa masehualme ten altepet Tebas huan nochi nopa sequinoc teteyome ipan tali Egipto. Nojquiya nijtatzacuiltis Faraón huan nochi itayacancahua huan nopa masehualme cati motemachíaj ipan ya. ²⁶ Na niquintemactilis imaco Nabucodonosor, tanahuatijquet ten tali Babilonia huan inimaco isoldados. Pero teipa quema ya panotos miyac tonali, Egipto sempa temis ica masehualme quej achtohuiya. Quej nopa niDIOS niqijtohua.

TOTECO quinmaquixtis imasehualhua
(Jer. 30:10-11)

²⁷ “Pero amojuanti annoisraelita masehualhua † amo ximajmahuica. Ximoyolchicahuaca, pampa masque ama anmopantíaj huejca, na nimechmanahuis. Sempa nimechhualicas amojuanti huan amoconehua ipan amotal huan anquipiyase tasehuilisti huan amo teno amechtemajmatís. ²⁸ Amo ximajmahui annoisraelita tequipanojcahua, pampa na niitztoc amohuaya. Na niquintzontamiltis cati ehuan ipan nochi nopa talme campa nimechtitani, pero amojuanti amo nimechtzontamiltis. San nimechtatzacuiltis quej quinamiqui por cati anquichijtoque pampa amo hueli nimechcahuas san quiaja.”

47

Camanali para filisteos

¹ Quema Faraón ayemo quisosolojtoya altepet Gaza, TOTECO techmacac na, niJeremías, ni camanali para niqunyolmelahuas nopa filisteos.

² Yaya quijto: “¡Xiquitaca! Nopona ica norte hualahui miyac soldados cati nesij quej quema temi se hueyat. Nopa at quipachos nopa tali campa itztoque nopa filisteos. Huan nopa at quintzontamiltis nochi cati itztoque ipan nopa altepeme huan nochi tamanti cati moscaltiyayaj nopona. Nopa tacame cati tetique tzajtize ica majmajti. Huan nochi ipan nopa tali chocase ica tahuel miyac tequipacholi. ³ Nochi quicaquise caquisti nopa carros huan caquisti iniistihua nopa cahuayos. Huan huajca nochi nopa tetajme cholose, yon ayecmo quinmocuitahuisse ininpilcanehua.

⁴ “Pampa ya ajsic tonali para TOTECO quintzontamiltis nopa filisteos huan nochi inintapalehujcahua cati ehuan ipan altepet Tiro huan Sidón. Pampa na niquintzontamiltis nochi nopa filisteos cati yajque itztotij ipan nopa pil-talti cati itoca Caftor cati mopantía iteno hueyi at. ⁵ Nijtamisosolos altepet

† 46:27 46:27 Jacob huan Israel eltoc seyoc inintoca israelitame ten tali Israel ica norte.

Gaza huan Ascalón huan mocahuase alaxtique quej se tepexit. Huan nochi iixhuihua Anac quiپییase se hueyi choquisti huan se hueyi tequipacholi.

⁶ “Antzajtise: ¿Hasta quema mosiyajquetzas imacheta TOTECO? ¿Hasta quema sempa mosiyajquetzas huan quicalaquis ipan icuetax? ⁷ Pero, ¿quenicatza huelis nijcalaquis nomacheta quema nijtiantoc para ma quichihuaqui iteqi? Pampa nochi masehualme ten altepet Ascalón huan nochi cati itztoque iteno hueyi at, monequi tzontamise.”

48

Camanali para tali Moab

¹ Ya ni nopa camanali cati TOTECO Cati Quinyacana Ilhuicac Ejchua Ma Tatanitij huan cati ininTeco israelitame techmacac para tali Moab, quijito: “¡Teicneltique nopa altepet Nebo ehuan pampa mocahuas tasosololi inialtepe! Huan nopa altepet Quiriataim nojquiya quiyahualose huan qui-huelonise itepa. ² Ayecmo oncas paquillisti ipan tali Moab, pampa ya tasencahuali para quitzontamiltise. Nepa ipan altepet Hesbón quisencahuase quenicatza quisosolose tali Moab. Quiijtose: ‘Xihuala, huan ma tiquixpoli-huistica nopa tali.’ Huan ipan altepet Madmena, nopa masehualme ayecmo molinise. ³ Teipa ipan altepet Horonaim nojquiya caquistis tahuejchihualisti ten tatehuillisti, ⁴ pampa nochi tali Moab ya mocajtos tasosololi. Huan caquistis para chocase nochi cati pisiltitzi nopona. ⁵ Huan nochi masehualme chocatiyase huan ixtejcose ipan altepet Luhit para momanahuitij, pampa ipan nopa altepet tatzinta campa quisque quicaquise cati tzajtziy ica miyac taijyohuillisti huan hueyi majmajti. ⁶ ¡Ximochololtica nochi cati anhuelij huan ximotatica ipan huactoc tali! ⁷ Pampa anmotemachijque ipan amotomi huan ipan nochi tamanti cati anquippiyayaj, antzontamise. Huan amodios cati itoca Quemos, huan amototajtzitzi huan nochi nopa tayacanani, quinhuicase huejca ipan seyoc tali.

⁸ “Nochi masehualme huan altepeme cati mopantíaj campa taixtejcolis o campa tamayamit, quintamisosolose; pampa quej nopa quijitojtoc TOTECO. ⁹ Nelcuali elisquía sinta tali Moab ehuan quiپییasquíaq inieltapalhua para patanise huan mochololtise, pampa ipan altepeme nopona, amo mocahuas von se masehuali.”

¹⁰ Tatelchihuali ma eli nopa tacat cati amo quinequi quichihuas ica paquillisti nopa tequit cati TOTECO quinquahuatijtoc ma quichihua. Huan tatelchihuali ma eli nopa tacat cati amo quinequis quinmictis ica imacheta cati TOTECO quiillhuía.

¹¹ Tali Moab nochipa eltoc ica tasehuillisti. Amo quema monequiyaya imasehualhua ma choloca hasta sequinoc talme huan mocahuase. Nochipa tali Moab eltoya quej se xocomecat iayo cati san quicahuilijtoyaj ma elto huan amo quema quitectoyaj ipan seyoc cuetaxti huan amo quipolojtoya iajhuiyaca.

¹² Pero TOTECO quijito: “Nimantzi ajsis nopa tonali quema TOTECO quintanilis tetajyohuillitiani cati quinchihuase masehualme ipan Moab ma yaca ipan sequinoc talme. ¹³ Huan huajca tali Moab ehuan pinahuase por inin-teteyo cati itoca Quemos quej nopa israelitame pinajque por nopa becerro ten teposti cati quichijchijque ipan altepet Betel para ipan motemachise.

¹⁴ “¿Amo anquielnamiquij quenicatza anmohueyimatiyayaj huan anquijj-tohuayayaj: ‘Tojuanti tahuel timosemacaj huan tijpiyaj miyac chichahualisti para titatehuise?’ ¹⁵ Pero ama quitamisosolose tali Moab inihuaya nochi ialtepehua, pampa ya huala cati quitzontamiltis. Nochi itelpocahua cati

más tapejpenilme ya eltoque para quinmictise. Quej nopa niquijtohua na nopa niTanahuatijquet cati notoca niDIOS Cati Niquinyacana Noilhucac Ejcahua Ma Tatanitij. ¹⁶ Huan nopa tatzacuiltli chicahuac huala para nimantzi ajsis ipan tali Moab. ¹⁷ Nochi amojuanti cati anitztoque nechca tali Moab, ximocuesoca huan xichocaca por nopa tali. 'Xiquitaca quenicaatza ya tzontanqui tali Moab masque eliyaya tahuel yejyectzi huan tetic.'

¹⁸ "Huan amojuanti anmasehualme ten altepet Dibón, xijcajtehuaca amosiya yejyectzi huan ximosehuica talchi, pampa inijuanti cati quisosolohuaj tali Moab nojquiya quisosolose altepet Dibón huan quinhuelonise nochi nopa calme cati huejcapantique. ¹⁹ Nopa masehualme ten altepet Aroer moquetzaj ojtenti para tachiyase huan quintzajtzilíaj chicahuac nochi nopa masehualme cati cholohuaj ten altepet Moab, quinilhuij: '¿Taya panotoc nopa?' "

²⁰ Huan inijuanti quinnanquílíaj quej ni: "Moab ya tamisosolijtoc. Ximocuesoca huan xichocaca por ni tali. Xiquinphuiltij nopa masehualme cati itztoque iteno hueyat Arnón para tali Moab ya quitamisosolójque."

²¹ Nochi nopa altepeme cati mopantíaj campa taixtejcolis ya tamisosolijtoque pampa nopa tatzacuiltli cati TOTECO quititanqui, huetzqui ipan nopa altepeme: Holón, Jahaza, Mefaat, ²² Dibón, Nebo, Betdiblataim, ²³ Quiriataim, Betgamul, Betmeón, ²⁴ Queriot, Bosra huan nochi sequinoc ialtepehua Moab cati mopantiyayaj huejca huan cati mopantiyayaj nechca.

²⁵ Huan Toteco quijito: "Tanqui ichicahualis tali Moab. Eltoc quej se tacat cati quipostequilijtoque iajcol. Quej ni niamoTECO niquijtohua. ²⁶ Huajca ma huetzi tali Moab huan nochi imasehualhua. Ma momimiloca ipan iniisotal quej ihuintini, pampa inijuanti mosisinijtoque ica na, niDIOS, huan yeca ama nochi cati quinpantise quinpajtise. ²⁷ Pampa Moab ehuanimechpinajtiyayaj anisraelitame huan amechcualancaitayayaj quej elisquía antachtequini. Pero nelía mopinajtiyayaj ica iniselti.

²⁸ "Anmasehualme ten tali Moab, xicholoca ten amoaltepehua huan xitztotij ipan tepexit quej palomajme cati motepasolíaj iteno nopa tepexit. ²⁹ Tojuanti tijcactoque para tali Moab ehuan tahuel mohueyimatiyayaj. Tijmatij motepanitayayaj, itzcuime eliyayaj huan tahuel mosisiníayaj ica na. ³⁰ Na niquinixmati Moab ehuan huan nijmati para tahuel mosisiníaj. Pero san tapic mosisiníaj, pampa masque mohueyimatiy huan quipiyaj miyac chicahualisti, amo teno quinpalehuis. Quej nopa niamoTECO niquijtohua. ³¹ Yeca nichoca por Moab huan nimocuesohua por nopa masehualme ten altepet Kir Hares.

³² "Antacame ten altepet Sibma, amojuanti anquipixque tahuel miyac xocomeca mili. Na más nichoca por amojuanti que nopa masehualme ten altepet Jazer, pampa nopa tetzontamiltijquet quitzontejqui nochi nopa cuamacuayot cati moscaltiyaya huejca huan quitejqui itajca amoxocomeca. Huan nojquiya quitejqui nochi tamanti cuatacti. Huan amechcaique san amomax. ³³ Ayecmo caquisti paquilisti, yon huetzquisti ipan mili ten tali Moab. Nochi xocomecat iayo tanqui huan tanqui nopa tzajtzisti ten paquilisti cati caquistiyaya quema quipatzcayayaj nopa xocomecat itajca. Amantzi onca tzajtzisti huan amo paquilisti. ³⁴ Nochi nopa masehualme cati itztoque ipan nopa tali tzajtzij pampa nochi tahuel taijyohuíaj. Ininchoquilis caquisti ten altepet Hesbón hasta Eleale huan Jahaza, putren ten Zoar hasta Horonaim huan Eglad Selisiya, pampa nochi nopa potrerros ten Nimrim, tamihuactoque."

³⁵ Pampa TOTECO quijtohua: “Na niquintzontamiltis nochi nopa masehualme ten tali Moab cati quintatiliyayaj copali nopa teteyome huan nochi nopa teteyome cati amo teno ininpati cati inijuanti quinhueyimatiyayaj.”

³⁶ Yeca ama na nimocuesohua ipan noyolo por tali Moab ehuan huan nopa masehualme ten altepet Kir Hares, pampa nochi iniricojyo quipolojque.

³⁷ Nochi tacame motamiximaj huan quihuataníaj inintentzo ica tequipacholi. Nojquiya mococojtoque ipan inintacayo huan moquentíaj iniyoyo cati quinextia para mocuesohuj.

³⁸ Ipan nochi calme ten tali Moab huan ipan nochi calles, onca choquisti huan tequipacholi. Pampa na nijmajcahuili nohueyi cualancayo huan yeca nijtapanqui tali Moab quej se comit cati amo teno ipati. ³⁹ ¡Mocajtoc xacualtic tali Moab! Huan ama tahuel mochoquilíaj huan pinahuaj imasehualhua. Huan nochi nopa sequinoc talme cati mopantíaj inechca momajmatíaj huan pinahuaj.

⁴⁰ Huan TOTECO quijtohua: “Icualancaitaca Moab huala quej se cuatojti. Huan yaya quipatahuas ieltapal ipan nochi nopa tali. ⁴¹ Ialtepehua ya huetzque huan nopa huejcapantique calme, ya huetzque inimaco inin-cualancaitacahua. Huan nopa soldados ten tali Moab cati más mosemacaj, huihuipicaj quej se sihuat cati conepeya. ⁴² Huan tali Moab ayecmo quemaelis se país, pampa yaya tahuel mosisinijtoc ica na.”

⁴³ TOTECO quijtohua para anMoab ehuan anquipantise majmajti huan taquetzti cati amechmasiltise. ⁴⁴ Pampa nochi cati cholose, huetzise ipan se taquetzti; huan cati momanahuisse ten nopa taquetzti, huetzise ipan se ofstot. Amo aqui momanahuis pampa ya ajsic tonali para anquiselise tatzacuilitisti. Quej nopa niDIOS niqijtohua.

⁴⁵ “Nochi inijuanti cholose huan yase ipan tali Hesbón pampa amo huelise yase más huejca. Pero ipan tali Hesbón, cati iaxca Tanahuatijquet Seón, quisas se hueyi tit. Huan quitatis nochi nopa tali ten se lado hasta seyoc, inihuaya nochi nopa mosisinijca masehualme.

⁴⁶ “¡Teicneltique tali Moab ehuan! Pampa nopa masehualme cati quihueyimatiyayaj nopa dios cati itoca Quemos, ya tzontanque. Huan quinhucase inintelpocahua huan iniichpocahua ipan seyoc tali para tetequipanotij san tapic. ⁴⁷ Pero teipa, ica miyac tonali, na sempa niquinhualicas nopa Moab ehuan nica.” Quej nopa quijto TOTECO.

Hasta nica tami nopa tatzacuiliti cati quinamiqui para tali Moab.

49

Camanalí para tali Amón ehuaní

¹ TOTECO quej ni quinilhuía tali Amón ehuaní: “¿Taya anquichihuj? ¿Para ten anitztoque ipan nopa altepeme campa itztoque israelitame cati ehuaní tali Judá? ¿Amo anquiitaj para nopa altepeme ya temitoque ica israelitame cati tali Judá ehuaní? Huaica ¿para ten amajuanti cati anquihueyichihuj nopa teteyot Milcom anmoaxcatijtoque tali Gad huan nochi ialtepehua?”

² TOTECO quijto: “Ajssis tonali nimechtatzacuilitis ica cati anquichijtoque huan nijsosolos amoaltepe Rabá. Huan teipa Rabá mocahuas quej se tamontomit ten tet. Huan nochi nopa sequinoc altepeme cati mopantíaj huejca, quintamitatise. Huan huajca nopa israelitame hualase huan sempa moaxcatisse inintal. Quena, nopa israelitame amechtachtequilise pampa amajuanti nojquiya anquintachtequilijque. Quej nopa ni ininTECO niqijtohua.

³ “Anmasehualme ten altepet Hesbón, xichocaca pampa ya quisosolojtoque altepet Hai. Ansihuame ten altepet Rabá, xichocaca. Ximoquentica yoyomit cati quinextis para anmotequiapachohuaj. Xichocaca huan ximotatica campa cuame, pampa quihuicase amoteyo Milcom ipan seyoc tali inihuaya nopa totajtzitzi huan tayacanani. ⁴ Amojuanti tahuel anmohueyimatij por nopa tamayame cati tahuel taeliltíaj, pero nimantzi quintamisosolose. Amojuanti anmotemachiyayaj ipan amotomi huan anmoilhuyayaj para amo aquí amechchihuillisquía cati fiero. ⁵ Pero xiquitaca, na nimechtitanilis hueyi majmajti, quej nopa quijtohua TOTECO Cati Quinyacana Iilhuicac Ejcahua Ma Tatanitij. Huan nochi nopa masehualme cati itztoque amonechca, amechquixtise ten amotal. Huan amo aquí yon se masehuali cati amechpalehuis quema amechquixtis. ⁶ Pero teipa, na sempa nimechhualicas anamonitame ipan amotal. Quej nopa niDIOS niqijtohua.”

Tatzacuilitli para tali Edom

⁷ TOTECO Cati Quinyacana Iilhuicac Ejcahua Ma Tatanitij, quijtohua: “¿Taya ininpantec nopa masehualme cati talnamiquij? ¿Amo mocajqui yon se cati talnamiqui ipan nochi altepet Temán? ⁸ Huan amojuanti anmasehualme ten tali Dedán, xicholoca huan ximotatitij ipan huactoc tali pampa quema niquintatzacuilitis nopa Edom ehuan, nojquiya nimechtatzacuilitis amojuanti. ⁹ Quema quitequij itajca xocomecat, nopa tacame quicahuaj se quesqui para ma quitequica cati teicneltziti. Yon tachtequini amo quihuicaj nochi tamanti quema tachtequij. ¹⁰ Pero amo quej nopa nijchihuas ica nopa tali Edom campa iteipan ixhuihua Esaú. Na nijchuas tali Edom cactoc quej huactoc tali. Huan amo oncas yon se lugar campa huelise motatise. Niquintzontamiltis nochi ininconeua, iniicnihua huan inincalnechcahua. ¹¹ Pero nopa coneme cati icnotziti cati mocahuase, na niqinmocuitahuis. Huan nopa cahual toahuime motemachise ipan na.”

¹² TOTECO quej ni quilhúia tali Edom ehuan: “¿Sinta taijyohuise masehualme cati amo quinamiqui taijyohuise, anmoilhúiaj para anmomanahuise ten tatzacuilitis? ¡Amo! ¡Amo anmomanahuise! Melahuac anquise cati eltoc ipan nopa caxit huan anquiselise nopa tatzacuiliti. ¹³ Pampa noseltitzi nimotestigojquetza huan niqijtohua para nijchihuas tali Bosra quej se tamontomit ten tet. Huan nochi quipinajtise huan quitelchihuase. Huan nochi ialtepehua mocahuase sosolijtoque para nochipa, quej nopa niDIOS niqijtojtoc para panos.”

¹⁴ Huan na, nijeremías, nijseljtoc se camanali ten TOTECO huan yaya techilhujtoc para quitantoc se itayolmelajca ipan nochi talme para quinilhuís ma mosentilica para quitehuise tali Edom huan ma quitamisosoloca. ¹⁵ Na niquehcapantalis tali Edom huan nijchihuas para nochi talme na quipinahualtica, quej nopa niDIOS niqijtohua. ¹⁶ Anmohueyimatij miyac huan anmocajcayajtoque. Anmotepanitaj huan anmoilhúiaj para amo aquí amechtanis pampa anquipiyaj amochaj ipan nopa tepeme cati huejcapantique. Pero masque anifztoque tahuel huejcapa quej nopa cuatojtí, na nimechtemohuis ten nozona, quej nopa na niDIOS niqijtohua.

¹⁷ “Senquisa quisosolose tali Edom hasta nochi cati panose nozona momajmatise huan quitapose inincamac por cati quiitase. ¹⁸ Panos san se ica tali Edom quej panoc ica altepeme Sodoma huan Gomorra huan nopa altepeme cati eltayaj nechca. Edom nojquiya mocahuas cactoc huan amo aquí itzto nozona. Quej nopa niDIOS niqijtohua. ¹⁹ Na niyas campa tali Edom ipan se talojtzi quej quisa se león ipan cuatitamit nechca hueyat Jordán hasta nopa tamayamit cati yejyectzi para quitzquis se pilborregojtzi, quej nopa na ipan

se talojtzi nicalaquis ipan tali Edom huan nijchihuas ma cholojtehuaca ten inintal. Teipa se tanahuatijquet cati na nijtapejpenis tanahuatis nozona. Pampa amo aqui seyoc quej na huan amo aqui huelis technotzas iixpa se juez para techtajtanilis cuentas. Amo aqui quiipiya chichahualisti para moquetzas noixpa para quitzacuulis cati nijnequi nijchihuas.

²⁰ “Huaicja xijcaquica cuali cati niDIOS nijsencajtoc para temachti niquinchiuilis nopa fiero masehualme ten tali Edom huan ialtepe Temán. Hasta nopa piloquichpiltziti nojquiya quinquicase ipan seyoc tali para tequipanotij san tapic huan ininchajchaj mocahuas cactoc. ²¹ Elis quej nochi tali mojmolinis quema huetzis Edom. Nopa masehualme tahuel tzajtze, huan caquistis hasta ipan nopa Hueyi At Cati Chichiltic. ²² Inincualancaitaca patantihualas quej se cuatojti, huan ieltapal quipatahuas ipan altepet Bosra. Huan huajca nopa tatehuani ten tali Edom cati más mosemacaj, huihuipicase quej se sihuat cati conepiya.” Quej nopa quijto TOTECO.

Tatzacuiliti para altepet Damasco

²³ Ya ni nopa camanali cati TOTECO techmacac ten Damasco: “Se hueyi majmaji quinzquis nopa altepeme Hamat huan Arfad, pampa ya quicac-toque para hualas cati quintatzacuilitis. Iniyolo mojmolinis ica majmaji quej mojmolinia nopa at ipan hueyi at quema huala se ajcomalacat. ²⁴ Altepet Damasco ehuan majmahuise hasta tamis ininchicahualis, huan nochi cholose. Tahuel majmahuise, mocuesose huan cuajcalose quej se sihuat cati conepiya. ²⁵ Nopa altepet cati yejyectzi huan cati temacayaya paquilisti, tamisosolihuis huan nochi quitahuelcahuase. ²⁶ Ipan nochi calles tepejtose inintacayohua nopa telpocame huan nopa soldados cati quintzontamiltijtoque san ipan se tonal. Quej nopa na niqijtohua niDIOS Cati Niquinyacana Noilhuicac Ejcahua Ma Tatanitij. ²⁷ Huan na nijchihuas ma yoli se hueyi tit campa inepa altepet Damasco huan ma quitati nochi caltanahuatilme ten Ben Hadad.”

Tatzacuiliti para Cedar huan Hazor

²⁸ Ya ni nopa camanali cati TOTECO techmacac ten nopa hueyi familia Cedar huan fen nopa tanahuatijcayot ten tali Hazor cati Nabucodonosor, tanahuatijquet ten tali Babilonia quintzontamiltis. Yaya quijto para quititanis Nabucodonosor para ma quintzontamilti nochi cati itztoque ica campa hualquisa tonati. ²⁹ Huan quincuilis nochi ininborregojhua, ininchajchaj huan nochi cati quiipiyaj. Quej nopa TOTECO quijto. Huan nojquiya quincuilise inincamellos. Campa hueli oncas tzajtzisti huan masehualme quijto: “Tocualancaitacahua techyahualojtoque huan techchihuilaj cati fiero.”

³⁰ Huan Toteco quijto: “Anmasehualme ten tali Hazor, xipanquisaca nochi amojuanti cati anhuelij huan ximochololtica. Xiyaca ximotatitij ipan huactoc tali, pampa Nabucodonosor, tanahuatijquet ten tali Babilonia, quisencajtoc cati fiero para amojuanti huan mocualtia para amechtztamiltiqui.

³¹ “Pampa na niDIOS niquilhuijtoc Tanahuatijquet Nabucodonosor: Xiya, xiquintehuiti nopa masehualme cati itztoque ica campa hualquisa tonati. Inijuanti itztoque iniselti, yon amo quema quipantij tequipacholi. Nojquiya amo onca sequinoc altepeme ininechca. Itztoque temachme, yon amo moilhuaj sinta monequi tepamit o caltemit. ³² Nochi inincamellos huan inihuacaxhua, elis amoaxhua. Huan nopa masehualme niqintitanis campa hueli ipan nochi taltipacti. Huan campa hueli campa itztotij, quinajsis huejhueyi majmaji cati campa hueli hualas. ³³ Huan tali Hazor elis ininchaj

tepechichime. Ayecmo aqui itztos nozona pampa mocahuas tasesololi para nochipa.”

Tatzacuiltli para tali Elam

³⁴ Quema Sedequías pejqui tanahuatía ipan tali Judá, TOTECO technojnotzqui na, nijeremías, huan techmacac ni camanali para tali Elam ehuan. Techilhui: ³⁵ “Na niDIOS Cati Niquinyacana Noilhucac Ejchahua Ma Tatanitij, niquijtohua: Na niquintzontamiltis nopa soldados ten tali Elam. ³⁶ Huan niquintitanis nopa masehualme ten tali Elam campa hueli. Quena, niquintitanis ipan campa hueli talme ipan nochi taltipacti. ³⁷ NiDIOS niquijtohua para nijchihuas para Elam ehuan ma momajmatica iniixpa inincualanacaitacahua cati quinequise quinmictise. Huan nijchihuas ma quintamiixpolihuiltica nopa Elam ehuan pampa tahuel nicualanani inihuaya huan niquintamiltis. ³⁸ Huan niDIOS niquijtohua para na nijtalis nosiya para nitanahuatis ipan tali Elam. Huan nijtontamiltis inintanahuatijca huan inintayacancahua. ³⁹ Pero teipa ipan tayacapan tonali, sempa niquinhualicas nopa masehualme ten tali Elam ipan inintal. Quej nopa niDIOS niquijtohua.”

50

Tatzacuiltli para tali Babilonia

¹ Ya ni nopa camanali cati TOTECO techmacac na, nijeremías, nijtajtolpanextijca para tali Babilonia, inintal nopa caldeos. Techilhui: ² “Xiquinyolmelahua nochi talme para se tonali huetzis tali Babilonia huan elis tamitasosololi. Inindios cati itoca Marduc huetzis ipan hueyi pinahualisti. ³ Pampa motananase masehualme ten se tali cati eltoc ica norte huan hualase para quintzontamiltiquij Babilonia ehuan hasta amo mocahuas yon se masehuali, o yon se tapiyali, pampa nochi masehualme huan tapiyalme cholose.”

Israelitame mocuepase ipan inintal

⁴ Huan TOTECO quijtohua: “Huan ipan nopa tonali, nopa israelitame cati ehuyayaj tali Israel huan cati ehuyayaj tali Judá mosejcotilise huan mochoquijlithualase, huan sentic techtemose niininTECO Dios. ⁵ Huan israelitame tatzintocase catijqui nopa ojti cati huala para altepet Jerusalén. Huan quema quinnextilijtose nopa ojti, injuanti quitoquijlithualase huan ajsise ipan nopa altepet. Huan quijtose: ‘Ma tiyaca timosentilitij ica TOTECO. Ma tijchihuaca se camanali ihuaya cati huejchahuas para nochipa huan cati ayecmo quema tiquixpanose.’

⁶ “Nomasehualhua itztoque quej borregojme cati mocuapolojtoque. Inintamocuitahuicahua quincuapolojque huan teipa quinhuelcajqque ipan cuatitamit. Huan injuanti más mocuapolojque huan ayecmo quimatque quenicatza mocuepase ipan inincorral. ⁷ Huan campa hueli campa quinpantiyayaj inincualanacaitacahua, quinmictiyayaj huan quijtohuayaj: ‘Tojuanti tijpiyaj tanahuatili para quintehuisse israelitame quej tojuanti techpactía, pampa injuanti tajtacolchijtoque ica ininTECO, yaya cati xitahuac huan cati ipan mochiyayaj inihuejcapan tatahua.’

⁸ “Pero ama nomasehualhua, xicholoca ten tali Babilonia campa itztoque nopa caldeos. Xiquisaca sesen ten amojuanti ipan inintal quej elisquía nopa tayacanquet cati tiquinyacantiya nochi sequinoc. ⁹ Pampa xiquitaca, na niquintananas miyac soldados ten nopa talme cati mocahuaj ica norte huan niquinhualicas para ma quitehuiquij tali Babilonia. Huan nochi injuanti

cuali quixmatij para quitequihuse cuataminti. Huan quema quimajc-ahuase inincuataminhua, nochipa ajsise campa quinequiyayaj. ¹⁰ Huan inincualancaitacahua quitachtequilise tali Babilonia hasta quipiyase nochi cati quinequise. Quej nopa niDIOS niquijtohua.

Tatzacuiliti para tali Babilonia

¹¹ “Ancaldeos cati anquintachtequilijque nomasehualhua, anyolpactoque. Anmotomajque quej huacaxme cati facuaj campa onca cuajcuali sacat, huan antzajtzij ica paquili quej oquich cahuayojme. ¹² Pero amotal campa antacatque huetzis ipan se hueyi pinahualisti, pampa eltoc se país cati más fiero ten nochi sequinoc. Mocahuas cactoc quej huactoc tali campa amo teno eli. ¹³ Tali Babilonia mocahuas quej se huactoc tali por nohueyi cualancayo niDIOS. Nochi masehualme cati panose nopona momajmatise huan quipinajtse por nochi nopa tatzacuiliti cati quiseñi.

¹⁴ “Nochi anmasehualme ipan nopa talme cati mocahuaj yahualtic ten tali Babilonia, ximocualtica para anquitehuse. Huan nochi amojanti cati anhuelij anquitequihuaj nopa cuahuitoli, xiquinmajcahuaca amocuataminhua para ma quiajsi Babilonia huan cati nopona ehuan, pampa tajtacolchijtoque noixpa. ¹⁵ Xitzajtztica chichahuac ten nochi lados huan xiquijtoca: ¡Ya motemactili Babilonia! ¡Ya huetzqui nopa tepamit cati ica moyahualojtoya! TOTECO ya momacuetqui ica ya. Quena, xiquinchihuilica Babilonia ehuan senquisa quej quinchihuilijtoque sequinoc. ¹⁶ Nochi tacame cati tatojtocayayaj huan pixcayayaj ipan mili ipan Babilonia na choloca ten nopa tali. Ma quisaca ipan nopa tali inihuaya nochi sequinoc cati achtohuiya ehuyayaj ipan sequinoc talme, pampa ya monechcahuía nopa tatzacuiliti para nopa masehualme ten tali Babilonia.”

Israelitame mocuetque ipan inintal

¹⁷ TOTECO quijtohua: “Israelitame itztoque quej borregojme cati quintepotzocaj tecuanime hasta quinsemanaj campa hueli. Eltoc quej achtohui nopa tanahuatijquet ten tali Asiria quincuajqui, huan teipa Nabucodonosor, tanahuatijquet ten tali Babilonia, quinpostequili iniomiyohua. ¹⁸ Yeca ama ni ininTECO Cati Niquinyacana Noilhuicac Eñcahua Ma Tatanitij huan cati niininTECO israelitame, niquijtohua: Na nijtatzacuilitis nopa tanahuatijquet ten tali Babilonia huan nochi ipan ital san se quej nijtatzacuiliti nopa tanahuatijquet ten tali Asiria. ¹⁹ Huan sempa niquinhualicas nopa israelitame ipan inintal para ma tacuaca ipan nopa tepet Carmelo huan ipan Basán: huan para sempa ma itztoca ica paquillisti ipan tepet Efraín huan ipan Galaad. ²⁰ Huan ipan nopa tonali, amo aqui huelis quipantis se inintajacol israelitame ipan tali Israel o tali Judá, pampa na niquintapojpolhuis nopa quentzi masehualme cati noja niquincajtso para itztose. Quej nopa niininTECO niquijtohua.

TOTECO quitatzacuilitis Babilonia

²¹ “¡Annotatehujcahua, xiyaca xijtehuitij tali Babilonia * huan nopa masehualme ten Pecod! Quena, xiyaca ipan tali Babilonia campa itztoque nopa masehualme cati mosisinaj. Xiquintatzacuilitica huan xiquintamiix-polihiultica senquisa quej na nimechnahuatijtoc. Quej nopa niamoTECO niquijtohua. ²² Ma caquisti tahuejchihualisti ten tatehuilisti ipan nopa

* **50:21** 50:21 O Merataim cati elqui seyoc itoca Babilonia. Merataim quinequi quijtos ‘Ome huelta quintatzacuilitise.’ † **50:21** 50:21 Se altepet ipan Babilonia. Pecod quinequi quijtos ‘Lugar ten tatzacuiliti.’

tali, huan ma tzajtzcica nopa masehualme cati quiselíaj tatzacuiltili. ²³ Tali Babilonia cati eltoya quej se hueyi martillo cati quintejtzonayaya nochi talme, ama ya huetztoc huan imasehualhua tepejtoque talchi. Tali Babilonia ya sosolijtoc huan eltoc iseltitzi tatajoc ten nochi talme. ²⁴ Na niquintalili se taquetzti nopa Babilonia ehuaní pampa tahuel motehuijque nohuaya na, niDIOS, huan amo quiitaque quema masique.

²⁵ “Na nijtapo nopa cuarto campa nicajocui nochi notepos para ica nitatehuis. Huan por nohueyi cualancayo na nijquixtijtoc noteposhua cati ica nitatehuía pampa na, niDIOS Cati Niquinyacana Noilhuicac Ejcahua Ma Tatanitij, nijpiya tequit para nijchihuas ipan tali Babilonia. ²⁶ Huajca nochi amojuanti cati anitztoque huejca, xihualaca xijtehuiquij. Xijtapoquij nochi nopa calme campa quiajocuij miyac teposme. Xijhueloniquij itepa huan nochi calme ipan ni altepet hasta mocahuas quej se tamontomí ten tet. Huan xiquintamimictica nopa masehualme. Ma amo mocahua yon se. ²⁷ Xiquinmictica nochi inisoldados. Xiquintzontamiltica. Yon se masehuali ten tali Babilonia amo momanahuis. Monequi nochi ma miquica pampa ya ajsic hora para quitamisosolose tali Babilonia.

²⁸ “Xijtacaquilica cati quiijtohuaj nopa masehualme cati cholojtejque ten Babilonia huan momanahuijque. Tepohuilítij quenicatza TOTECO Dios quintatzacuiltijtoc nopa Babilonia ehuaní cati quisosolocoj itiopa.

²⁹ “Xiquinnotzaca nochi cati huelij quitequihuía quahuitoli para quimajcahuase cuataminti huejca. Ma quitehuiquij tali Babilonia. Ma quiyahualoca nopa altepet para amo aquí huelis cholos. Xiquinchihuili Babilonia ehuaní senquisá quej injuanti quinchihuilito que sequinoc. Pampa Babilonia ehuaní tahuel mohueyimatque noixpa na cati nifatzetzeloltic huan ni ininteco israelítame. ³⁰ Huajca nochi inintelpocahua Babilonia huetzise ipan calles huan miquise, huan nochi nopa tatehuiani tamimiquise.”

³¹ Huan niamoteco Cati Niquinyacana Noilhuicac Ejcahua Ma Tatanitij niquijtohua: “Antali Babilonia ehuaní, tahuel anmohueyimatij huan huajca na nimochijtoc niamocualancaitaca. Huan ya ajsic hora para nimechtatzacuiltis. ³² Nochi amojuanti ipan amotal tahuel anmohueyimatij huan temachtí anmotepotanise huan anhuetzise inihuaya nochi amoaltepehua. Amo aquí amechtananas, pampa TOTECO quiticuiltis se hueyi tit ipan tali Babilonia huan quintatis nochi amoaltepehua.”

³³ Quej ni quiijtohua TOTECO Cati Quinyacana Iilhuicac Ejcahua Ma Tatanitij: “Nopa israelítame ten tali Israel huan Judá taijyohuíaj chicahuac pampa inincualancaitacahua quinhuicaque ipan seyoc tali para tetequipanotij san tapic huan amo quinequij quinmalacanise para ma yaca. ³⁴ Pero na, niinintamanahuijca, israelítame nijpiya miyac chicahualisti. Na notoca niDIOS Cati Niquinyacana Noilhuicac Ejcahua Ma Tatanitij. Na niqinpaléhuis huan nijchihuas ma quinmalacanica para hualase huan niqinhualicas ipan tali Israel para ma mosiyajquetzaca. Pero Babilonia ehuaní tahuel majmahuise.”

³⁵ Huan TOTECO quiijtohua: “Nopa tatehuilisti huetzis ipan nochi nopa caldeos huan ipan nochi Babilonia ehuaní. Huan yon se tayacanquet huan talnamijquet amo momanahuis. ³⁶ Nochi nopa istacatica tajtolpanextiani miquise ica macheta. Huan nochi nopa tatehuiani cati más mosemacaj, majmahuise quema ajsice tacame ica macheta para quintzontamiltise. ³⁷ Nopa tatehuilisti quinzontamiltis inincahuayojhua huan inincarrojhua. Huan nopa soldados ten sequinoc talme cati mosentilijtoque ihuaya Babilonia para quipalehuise, elise amo tetique quej sihuame. Huan cati hualase quitehuiquij quinichtequilise nochi cati quipiyaj. ³⁸ Huan hasta nopa at

ipan Babilonia nojquiya tamihuaquis. ¿Para ten quej nopa elis? Quej nopa elis, pampa nochi nopa tali temitoc ica taixcopincayome huan teteyome cati nopa masehualme tahuel quinhueyimatij.

³⁹ “Yeca ni altepet Babilonia elis ininchaj nopa totome cati amo tapajpacti quej avestruces huan nopa tepechichime. Nozona quichihuae ininchaj nochi nopa tecuanime cati itztoque ipan huactoc tali. Ayecmo quema itztoquij masehualme nozona pampa nozona mocahuas tasosololi para nochipa.

⁴⁰ Temachtij nijsosolos Babilonia quej huejcajquiya nijsosolo altepet Sodoma huan Gomorra huan nochi sequinoc altepeme cati eltoyaj nechca. Huan quej ipan nopa altepeme ayecmo aqui itztoq, quej nopa nojquiya elis ica tali Babilonia. Ayecmo aqui itztoq nozona. Quej nopa ni amoTECO ni quijtohua.

⁴¹ “Hualase tahuel miyac soldados ten nopa tali cati mopantía ica norte. Huan inihuaya hualahui miyac tanahuatiani cati ni amoTECO ni quinnotztoc ten campa hueli talme. ⁴² Nochi inijuanti mocualtalijtoque ica inintepos huan hualahui para quichihuaquij se hueyi miqulisti. Inijuanti tahuel mosisiníaj, yon amo tetasojtaj. Inintahuejchihualis caquisti nelchicahuac quej quema molinía nopa hueyi at. Teicneltique tali Babilonia ehuan, pampa nochi inijuanti hualahui ipan inincarrohua para quintehuse. ⁴³ Pero quema nopa tanahuatijquet ten tali Babilonia quimatis ten panos ipan ital, momajmatis huan tamis ichichualis. Huan pehuas taijyohuis quej se sihuat cati conejiya.

⁴⁴ “Na nihualas quej se León cati quisa ipan cuatitamit nechca nopa hueyat Jordán huan talojtzi huitoni ipan nopa borregoyme cati itztoque nozona ipan potrero. Huan ni quinquixtis Babilonia ehuan ten inintal huan nijchihuas ma quinnahuati se tanahuatijquet cati na techpactis. Pampa amo aqui seyoc quej na. Amo aqui hueli technotzas na iixpa se juez para techtajtanis cuenta. Amo aqui se tanahuatijquet cati huélis moquetzas noixpa.

⁴⁵ “Xijtacaquilica taya quisencajtoc TOTECO para tali Babilonia huan nopa caldeo masehualme campa itztoque nozona. Hasta cati noja conetzitzi nojquiya quinhucase ipan seyoc tali. Huan ininchajchaj mocahuas cactoc huan nochi tahuel majmahuse. ⁴⁶ Nochi taltpacti mojmolinis quema huetzis Babilonia. Huan ininchoquilis caquistis hasta ipan nochi sequinoc talme.”

51

Quintzontamiltise Babilonia ehuan

¹ Quej ni quijtohua TOTECO: “Na nijtitanis ipan tali Babilonia se tasosolajquet para ma quintzontamilti nochi nopa caldeo masehualme. ² Hualase masehualme cati ehuan seyoc tali cati quintzejtelose nopa Babilonia ehuan quej quintzejtelohuaj trigo para ma quinhuca ajacat itasolo. Hualase ten campa hueli talme huan motananase para quitehuse ipan nopa tonali ten taijyohuulisti ipan tali Babilonia. ³ Huan ni tatehuiani quintahuisose nopa soldados ten tali Babilonia ica inincuataminhua. Huan yon se Babilonia ejquet amo momanahuis. Miquise huehuentzitz huan telpocame, huan quintamimictise nochi inisoldados. ⁴ Campa hueli ipan nopa tali nochi caldeos mocahuase mictoque. Huan ipan nochi calles tepejtose cati miquise ica cuataminti. ⁵ Pampa amo ni quintahuelcajtoc israelitame ten tali Israel, yon tali Judá. Na noja nieli niiniDios. Na niin-TECO Cati Niqinyacana Noilhuicac Ejcahua Ma Tatanitij. Nopa caldeo masehualme tahuel tajtacolchijtoque ica na cati nitatzejtelolitic huan niin-TECO israelitame.

⁶ “Xiquisaca ipan tali Babilonia huan ximochololtica nochi amojuanti cati anhuelij. ¡Amo ximocahuaca nozona! Sinta anmocahuase, huajca nojquiya antzontamise quema nimomacuepas ica nopa Babilonia ehuan. Pampa na niamoTECO niquintaxtahuis quej quinaimiqui por nochi inintajacolhua. ⁷ Babilonia eliyaya quej se caxit ten oro nomaco niDIOS cati nijtequihui para nochi talme ipan taltipacti ma quica ten nocualancayo huan moihuintise hasta molocojchihuase. ⁸ Pero ama, ipan se talojtzi, huetztoc tali Babilonia huan mochijqui cuechtic. Huajca xijchoquilica. Xijmacaca pajti pampa huelis nopa mochicahuas.” ⁹ Huan nopa masehualme ten sequinoc talme quijtohuaj: “Ya tijpajtijque Babilonia, pero amo hueli mochicahu pampa ayecmo quipiya pajti. Huajca xijcahuaca huan techcahuili sesen ten tojuanti timocuepase ipan total canque tiehuani pampa TOTECO quititanilijtoc tatzacuilti Babilonia huan ajsi hasta nepa ilhuicac. ¹⁰ TOTECO techchihuilijtoc cati xitahuac. Ma tiyaca huan ma titayolmelahuatij ipan altepet Jerusalén nochi cati cuali quichijtoc TOTECO DIOS.”

¹¹ ¡Xijtentic nopa cuataminti! Xiquincualtica amoyolixtzajcahua ten teposti pampa TOTECO quinnojnottzoc nopa tanahuatiani ten tali Media para ma quisosolotij tali Babilonia. TOTECO quincuepilis pampa inijuanti quintajyohuiltijque imasehualhua huan quimahuispolojque itiopa. ¹² Xijtananaca nopa bandera iixco itepa Babilonia. ¡Xiquintalica tamocuitahuiani ipan tepamit! Xiquintalica soldados camp hueli, pampa TOTECO quichihuas nochi cati quijtojtoc quichihuas ica tali Babilonia.

¹³ Babilonia eliyaya se altepet nechca miyac hueyame. Quipixqui miyac ricojyot. Pero ya ajisc hora para tamis. ¹⁴ TOTECO Cati Quinyacana Iilhuicac Ejcahua Ma Tatanitij, motestigojquetzoc iseltitzi huan quijtojtoc: “Ialtepehua Babilonia temis ica ininculancaitacahua quej elisquía se mili cati temitoc ica chapolime. Huan quema ininculancaitacahua ya quintantose, inijuanti tzajtize ica paquilisti. Huan nopa tzajtzisti caquistis hasta ilhuicac.”

*Se huicat para TOTECO
(Jer. 10:12-16)*

¹⁵ TOTECO quichijchijqui ni taltipacti ica ihueyi chichualis. Quiquetzqui camp eltoc ica italnamiqulilis. Huan quipatajqui ilhuicacti ica itaixmatilis. ¹⁶ Quema yaya camanalti, tatomoni nepa ilhuicac. Yaya cati quichihua ma motanana apocti ipan nochi taltipacti huan ma mochihua mixti. Yaya quichihua ma tapetani quema huetzi at huan quiquixtia nopa ajacat ipan icuarto camp quajocui huan quititani camp quinequi. ¹⁷ Quema masehualme quijtaj cati TOTECO hueli quichihua, nochi nesij tahuel huihuitique. Nesi quej tapiyalme cati amo quipiyaj initalnamiqulilis, pampa amo aqui talnamiqumi quej ya. Tacame quinchijchihuaj taixcopincayome huan teteyome, pero cati quinchijtoque tahuel pinahuaj pampa san tacajcayahuaj. Quijtohuaj para nopa teteyome elij dioses, pero amo cana. Amo quipiyaj nemilisti, yon amo quipiyaj yon se chichualisti. ¹⁸ Nopa teteyome amo teno ininpati. Nochi eltoc san istacatili. Huan se tonali TOTECO hualas quinchihui huan quintamisosolos. ¹⁹ Pero TOTECO cati ininDios israelitame, yaya amo se teteyot. Yaya eli Dios cati quichijchijqui nochi cati onca, huan quintapejpeni israelitame para elise iaxcahua cati más quinicneli. Yaya itoca: TOTECO Cati Quinyacana Iilhuicac Ejcahua Ma Tatanitij.

TOTECO quitequihui Babilonia para quintatzacuiltis sequinoc

²⁰ TOTECO camanalti ten Babilonia: “Babilonia eltoc quej se hacha cati ica nitatehuis huan quej nomacheta. Quena, elis quej notepos para ica

niquinsosolos talme huan para niquintzontamiltis tanahuatiani. ²¹ Na nijtequihuis Babilonia para quintzontamiltis soldados, cahuayojme huan tacame cati tejcotoque cahuajtípa. Quinsosolos carrojme huan cati tejcotoque carrojtípa. ²² Huan nojquiya nijtequihuis para niquintzontamiltis masehualme cati huehuentzítzi huan telpocame. Quintzontamiltis coneme huan ichpocame, ²³ tamocuitahuiani huan ininborrejojhua, tacame cati quipoxoníaj tali huan inintororjhua cati tapoxoníaj, tayacanani ten soldados huan tanahuatiani.

Tatzacuiliti para tali Babilonia

²⁴ “Huan teipa amoixpa annoisraelita masehualhua, niquintaxtahuis nopa caldeo masehualme huan nochi Babilonia ehuan por nochi nopa fiero tamanti cati quichihuilijque notiopa ipan Jerusalén. Quej nopa niamoTECO niqijtohua.

²⁵ “¡Ay anBabilonia ehuan! Na niamocualancaitaca. Anitztoque quej se tepet cati tahuel tetic huan anhuelij anquintzontamiltíaj sequinoc talme. Pero na nimomatanas para nimechtatzacuilitis huan nimechtepexihuis ten nopona tahuel huejcapa campa ama anitztoque. Huan nimechchihuas quej se tepet cati tamitatatoc. ²⁶ Amoaltepe mocahuas tasosololi para nochipa. Huan yon se ayecmo quintequihuis nopa teme para calchihuase. Nelia amoaltepe elis quej tasoli para nochipa. Quej nopa niDIOS niqijtohua.

²⁷ “Xijtanana se bandera quej se tanextili para ma mocualtica para quitehuise tali Babilonia. Xijpitza tapitzali para ma pangisaca nopa soldados ten tali Ararat, Mini huan Azkenaz. Xijtalica se tayacanquet para quinyacanas nopa soldados huan xiquinhualicaca tahuel miyac cahuayojme. ²⁸ Xiquintitánica miyac talme inisoldados huan tayacanani para quitehuitij tali Babilonia. Ma yaca inintanahuatijcahua Media ica inisoldados huan inintayacancahua nochi nopa talme cati eltoc inimaco.”

²⁹ Nochi tali Babilonia mojmolinis huan mohuisos ica tacuajcualocayot pampa TOTECO quichihuas senquisa quej quijtojtoc quichihuas. Babilonia mocahuas cactoc quej huactoc tali. Yon se masehuali ayecmo itztos nopona. ³⁰ Nopa soldados ten tali Babilonia cati más mosemacayaj ayecmo tatehuíaj. San mocaltzactoque ipan nopa hueyi cali cati quitequihuíaj soldados. Tanqui ininchicahualis, huan ama majmahuij quej sihuame. Inincualancaitacahua ya quitatijque ininchaj. Huan nochí caltemit ten nopa altepet ya quitapanque. ³¹ Miyac tayolmelahuani hualahui ten campa hueli huan quihuíaj nopa tanahuatijquet ten altepet Babilonia para icalancaitacahua ya quitzquitoque ialtepe. ³² Nochi ojtí campa pano nopa hueyame ya quinzquitoque inincualancaitacahua. Ya quinticuilitoque nopa huejcapantique calme para tajtachiyase. Huan quihuíaj nopa tanahuatijquet para se hueyi majmajti quinzquitoc nopa soldados ten tali Babilonia.

³³ Pampa TOTECO Cati Quinyacana Iilhuicac Ejcahua Ma Tatanitij huan yaya cati ininTeco israelítame quijtohua: “Nechcatitoc para hualase inincualancaitacahua Babilonia ehuan huan quihuitequise quej elisquía trigo para quiquixtilise itasolo.”

³⁴⁻³⁵ Nopa israelítame cati tali Judá ehuan cati itztoque ipan tali Babilonia, quijtohuaj: “Nabucodonosor, tanahuatijquet ten tali Babilonia quitamilti tochicahualis huan techtolojtoc quej se hueyi tapiyali. Yaya mocuili nochi toricojyo huan techquixti ten total. Huajca ama, ma taijyohui tali Babilonia por nochi cati techchihui. Ma quiseli se taxtahuili quej quinamiqui pampa quinmicti toicnihua.”

³⁶ Huan TOTECO quinilhui Jerusalén ehuani: “Na nimechtenpalehuis huan niquincuepilis amocualancaitacahua por nochi cati amechchihuilique. Na nijchihuas ma huaquej inihueyaj huan nochi iniamel campa meya at. ³⁷ Huan tali Babilonia mocahuas quej se tamontomit ten tet campa itztose tepechichime. Nochi cati quiitase tahuel momajmatise huan yon se masehuali ayecmo itztos nopona.

³⁸ “Amantzi nopa Babilonia ehuani tahuel taj ipan inilhuhua huan nanalcaj quej leones huan quej ininpilconeua. ³⁹ Huan quema noja ihuintitose ica talli, na niquincualfalilis seyoc ilhuit. Niquinchihuas ma taica hasta huetzise talchi quej mictoque. Huan cochise para nochipa. Ayecmo quema isase. Quej nopa niDIOS niqijtohua. ⁴⁰ Huan niquinhuicas nopa Babilonia ehuani quej pilborregoijtzi, oquich borregos huan oquich chivos ipan nopa lugar campa quinquechtzontequise.”

⁴¹ Ya huetzqui Babilonia, nopa hueyi altepet cati quihueyimatiyayaj masehualme ten nochi talme. Ama nochi ipan taltipacti momajmatiaj huan amo hueli quinelto caj sinta melahuac ya huetzqui Babilonia. ⁴² Eltoc quej nopa hueyi at motanantoc huan hualajqui quitemitico tali Babilonia. ⁴³ Nochi ialtepehua ya tamisolijtoque. Mocajtoc quej huactoc tali campa amo aqui itztoque huan campa amo panoj paxalohuani.

⁴⁴ “Na nijtajtolsencahuas nopa teteyot Bel, inindios nopa Babilonia ehuani. Huan nijquixtilis nochi cati moaxcatijtoc para iaxca. Huan nochi masehualme ten sequinoc talme ayecmo hualase para quihueyichihuase. Hasta nopa tepamit cati quiyahualojtoc tali Babilonia, nojquiya huetzis.

⁴⁵ “Annomasehualhua, xiquisaca ipan nopa altepet Babilonia. Xicholoca para anmomanahuise ten nohueyi cualancayo quema nitetatzacuiltis nopona. ⁴⁶ Pero amo ximomajmatica quema amechilhuisse para monechcahuaj nopa tatehuiani, pampa sesen xihuit anquicaquise miyac tamanti cati fiero. Teipa nopa gobernadores ten tali Babilonia mocualanise huan motehuisse. ⁴⁷ Huaqca monechcahuia tonali para nijtatzacuiltis nopa hueyi altepet huan nochi iteteyohua. Quena, huetzis ipan se hueyi pinahualisti huan nopa mijcatziti tepejtose ipan calles campa hueli. ⁴⁸ Nochi cati itztoque ipan ilhuicacti huan taltipacti paquise quema nopa soldados ten nopa tali cati mopantia ica norte hualase quitehuiquij tali Babilonia. Quej nopa niamoTECO niqijtohua. ⁴⁹ Quej Babilonia ehuani quinmictijque nopa israelitame huan sequinoc campa hueli ipan ni taltipacti, quej nopa nojquiya miquise injuanti.”

Camanali para Judá ehuani ipan Babilonia

⁵⁰ Nochi amojuanti cati anmomanahuijque ten nopa tatehuilisti, amo ximoquetzaca. Xicholoca amantzi quema noja onca tonali. Xiquelnamiquica TOTECO huan xiquelnamiquica altepet Jerusalén huan ximocuepaca nica. ⁵¹ Amojuanti anquijtohuaj: “Tojuanti tahuel tipinahuaj pampa nopa Babilonia ehuani quimahuispolohuaj itiopa TOTECO.”

⁵² Pero TOTECO quijtohua: “Quena, pero ajsis tonali para niquinsosolos nochi nopa teteyome ten tali Babilonia. Ipan nochi nopa tali caquistis ininchoquilis nopa masehualme cati quincocojtoque. ⁵³ Huan masque Babilonia tejcosquia hasta ilhuicac huan quipiyasquia tahuel miyac chichahualisti, na niquintitanisquia tasesolohuani para ma quitzontamiltica.”

Quisoso lose tali Babilonia

⁵⁴ Xijcaquica quenicatza tzajtzi nopa masehualme cati quintzontamiltiaj ipan tali Babilonia campa itztoque nopa caldeos. ⁵⁵ Pampa amantzi TOTECO

quisosolohua tali Babilonia. Nopa tatehuiani quitemitijtoque nopa tali huan hualahui chicahuac quej at cati mosisinía. ⁵⁶ Nopa soldados ajsij ipan tali Babilonia huan quintzontamiltíaj nochi nopa tacame cati tahuel mosemacaj. Nochi inintepos cati ica momanahuíaj, quinpostequilíaj, pampa TOTECO yaya nopa Dios cati nelía taxtahuac cuali huan quitaxtahuía sesen Babilonia ejquet quej quinamiqui por inintajtacolhua.

⁵⁷ Huan TOTECO quijtohua: “Na niquinihuintis nopa tayacanani, talnamiquini, gobernadores, tayacanani ten soldados huan tatehuiani ten Babilonia. Huan cochise para ayecmo quema isase. Quej nopa niqijtohua na nitanahuatijquet cati notoca: nopa DIOS Cati Quinyacana Ilhuicac Ejcahua Ma Tatanitij.

⁵⁸ “Huan niamoTECO Cati Niqinyacana Noilhuicac Ejcahua Ma Tatanitij niqijtohua: Nopa tepamit cati tilahuac cati quiyahualojtoc tali Babilonia, quitamihuelonise. Huan nojquiya quitatise nopa huejhueyi caltemit. San tapic tequitique nopa masehualme ten sequinoc talme, pampa nochi tamanti cati quichijchijque, tamitatas.”

Quititani icamanal Jeremías ipan tali Babilonia

⁵⁹ Quema Tanahuatijquet Sedequías yahuiyaya para nahui xihuit tanahuatis quipixqui itapalehuijca cati itoca eliyaya Seraías huan elqui icone Nerías, cati elqui icone Maasías. Huan na, niJeremías, niquilhui Seraías taya ma quichihua pampa yaya yahuiyaya tali Babilonia ihuaya nopa Tanahuatijquet Sedequías ten tali Judá. ⁶⁰ Na, niJeremías, niqijcuilojtoya ipan se amat nochi nopa huejhueyi tatzacuilti cati TOTECO quijtojtoya amantzi quititanis ipan tali Babilonia huan nochi sequinoc tamanti ten Babilonia. ⁶¹⁻⁶² Huan na, niJeremías, niquilhui: “Quema tiajsiti ipan tali Babilonia, xijpohuas nochi cati niqijcuilojtoc nica huan xiquijto: ‘TOTECO, ta tiqijtojtoc para tijsosolos altepet Babilonia hasta amo mocahuas yon se masehuali huan yon se tapiyali nica, huan ni tali mocahuas sosolijtoc para nochipa.’ ⁶³ Huan teipa, quema ya tijtamipojtos ni amat, xiquilpili se tet huan xijmajcahua ipan nopa hueyat Eufrates. ⁶⁴ Huan tiqijtos: ‘Quej ni amatapohuali atzonpolihuis, nojquiya tali Babilonia temos hasta tatzinta huan ayecmo quema motanasas sempa por nochi nopa huejhueyi tatzacuilti cati nijhualicas ipan ya.’ ”

Hasta nica tami nopa camanali cati Jeremías quiseli ten TOTECO huan tayolmelajqui.

52

Tanahuatijquet Sedequías (2 R. 24:18-20; 2 Cr. 36:11-16)

¹ Sedequías quipiyayaya 21 xihuit quema pejqui tanahuatía ipan altepet Jerusalén huan tanahuati majtacti huan se xihuit. Inana itoca eliyaya Hamutal huan eliyaya iichpoca Jeremías cati ehua altepet Libna. ² Pero Sedequías quichijqui cati amo cuali iixpa TOTECO quej nojquiya quichijtoya Joacim cati achtohuiya eliyaya tanahuatijquet. ³ Huan TOTECO tahuel cualanqui ica nopa masehualme ten altepet Jerusalén huan tali Judá huan quinquixti ten iixpa. Quichijqui para nopa tanahuatijquet ten Babilonia ma quinquixti ten inintal huan ma quinhuica ipan tali Babilonia. Huan teipa Tanahuatijquet Sedequías mosisini ica nopa tanahuatijquet ten tali Babilonia.

(2 R. 24:20-25:7; Jer. 39:1-7)

⁴ Huan ipan 15 itequi nopa metzti majtacti ipan tocalendario israelita * quema Sedequías yahuiyaya para chicnahui xihuit para tanahuatis, Nabucodonosor, tanahuatijquet ten tali Babilonia, yajqui ica nochi isoldados ipan altepet Jerusalén huan quiyahualotoj nopa altepet huan quichijque tamontomit ten tali hasta iixco nopa tepamit para calaquise ipan nopa altepet. ⁵ Huan quiyahualo Jerusalén para ome xihuit hasta Sedequías yahuiyaya para majtacti huan se xihuit tanahuatis.

⁶ Huan ipan 9 itequi nopa metzti nahui † ten nopa xihuit, senquisa tanqui nochi tacualisti ipan nopa altepet huan oncac se hueyi mayanti. ⁷ Huajca nopa masehualme cati calijit ipan altepet Jerusalén quicoyonijque nopa tepamit. Huan ica tayohua cholojque nochi nopa israelita soldados huan panoque ipan nopa caltemit cati eltoya tatajco nopa ome tepamit nechca nopa xochimili cati iaxca nopa tanahuatijquet. Huan quisque ten nopa altepet masque yahualtic itztoyaj nopa caldeos. Huan motalojtejque para quipanose nopa milme para ajsisquíaj ipan nopa tamayamit nechca hueyat Jordán ‡.

⁸ Pero nopa caldeo soldados quitepotztocaque Tanahuatijquet Sedequías huan quitzquitoj ipan se tamayamit nechca altepet Jericó, pampa nochi isoldados ya quitahuelcajtoyaj. ⁹ Huan quihuicaque Sedequías ipan altepet Ribla ipan tali Hamat campa itztoya Nabucodonosor, tanahuatijquet ten tali Babilonia. Huan nopona quitajtolsencajqui huan quijto taya elis itatza-cuilitl. ¹⁰ Huan nopona ipan altepet Ribla, Nabucodonosor quichijqui para Sedequías ma quintachilijto iconehua quema quinquechtzonteqisquíaj. Huan nojquiya iixpa quinquechtzontejque nochi nopa tayacanani ten tali Judá. ¹¹ Teipa Nabucodonosor tanahuati ma quixteyolquixtica Sedequías. Huan teipa quiiipijque ica tepos cadena huan quihuicaque ipan tali Babilonia. Huan nopona quitzajque hasta mijqui.

Quitatijque tiopamit

(2 R. 25:8-21; 2 Cr. 36:7-21; Jer. 39:8-10)

¹² Huan ipan 10 itequi nopa metzti macuili ipan nopa calendario israelita §, quema Nabucodonosor yahuiyaya para diecinueve xihuit para tanahuatis ipan tali Babilonia, Nabuzaradán, nopa hueyi tayacanquet ten soldados hualajque ipan altepet Jerusalén. ¹³ Huan quitati itiopa TOTECO huan nopa caltanahuatili huan nochi huejhueyi calme. ¹⁴ Huan nopa Nabuzaradán quinnahuati nopa caldeo soldados cati hualayayaj ihuaya ma quihuelonica nochi nopa tepamit cati quiyahualojtoya altepet Jerusalén. ¹⁵ Teipa Nabuzaradán quinhuicac ipan tali Babilonia sequij masehualme cati teicneltziti, huan nochi cati momanahuijque ten nopa tatehuilisti. Nojquiya quinhuicac nochi cati motemactilijtoyaj ica nopa tanahuatijquet ten tali Babilonia huan nochi nopa masehualme cati quimatiyayaj quichihuase ten hueli tequit. ¹⁶ Pero sequij masehualme cati más teicneltziti quincajqui para ma quichihuaca xomeca milme huan ma quipoxonica nopa tali.

¹⁷ Huan nopa soldados ten tali Babilonia quintapanque nopa ome huejhueyi taquetzalme ten bronce cati eltoya campa icalteyo nopa tiopamit. Huan nojquiya quintapanque nopa piletas ten bronce campa quitecayayaj at huan nopa huacaxme ten bronce cati eltoyaj quej inintaquetzalhua huan

* 52:4 52:4 Ipan 15 itequi enero ipan 588 a.C. ipan tocalendario ten ama. † 52:6 52:6 Ipan 18 itequi julio 586 a.C. ipan tocalendario ten ama. ‡ 52:7 52:7 O Arabá. Arabá eltoc seyoc itoca nopa tamayamit nechca hueyat Jordán. § 52:12 52:12 Ipan 17 itequi agosto 586 a.C. ipan tocalendario ten ama.

nochi quihuicaque ipan tali Babilonia. ¹⁸ Nojquiya quihuicaque nochi nopa chachapalme ten bronce, huan nopa palas cati ica quiijcueniyayaj cuajnexti ipan nopa taixpamit; huan nochi cucharas, huejhueyi tazas huan nopa huitzcucharas huan nochi tamanti ten bronce cati quitequihuiyayaj ipan tiopamit quema temacayayaj tacajchualisti. ¹⁹ Huan nojquiya quihuicaque nopa tixicti, taahuil quetzali huan nopa tazas huan platos cati senquisa oro huan plata.

²⁰ Nopa bronce ten nopa ome huejhueyi taquetzalme cati Salomón quinchijchijtoya, huan nopa piletas huan nopa huacaxme cati eltoyaj inintantita eliyayaj tahuel etique hasta amo aqui huelqui quitamachihua quesqui ietica. ²¹ Sesen taquetzali quipiyayaya 9 metros huan 45 centímetros ihuejcapanca. Huan inintomajca eliyaya 6 metros huan 30 centímetros. Nopa taquetzalme eliyayaj ijticacahuaxtique Huan inintilajca quipiyayayaj 8 centímetros. ²² Huan inintzonpac nopa taquetzalme quiyocatalijtoyajqui pano 2 metros. Huan ipan nopa lugar quinixcopintoyaj miyac granadas. ²³ Oncayaya 96 granadas ipan sesen lado huan seyoc 100 granadas quiyahualojtoyaj nopona huejcapa.

Quinhuicaque israelitame campa huactoc tali

²⁴ Huan nopa hueyi tayacanquet ten soldados quihuicac Seraías cati eliyaya nopa hueyi totajtzi huan Sofonías, nopa totajtzi cati eliyaya itapalehuijca, huan eyi tacame cati quimocuitahuiyayaj nopa tiopamit. ²⁵ Huan ten nopa masehualme cati noja motatijtoyaj ipan nopa altepet, quihuicac se hueyi tayacanquet ten soldados, huan chicome tacame cati quitalmictiyayaj nopa tanahuatijquet. Huan quihuicac nojquiya nopa tayacanca tajcuilojquet cati quinnahuatiyaya nopa soldados ten tali Judá huan 60 huejhueyi masehualme cati motatijtoyaj ipan Jerusalén. ²⁶ Huan Nabuzaradán, nopa hueyi tayacanquet ten soldados, quinhuicac nochi injuanti ipan altepet Ribla iixpa nopa tanahuatijquet ten tali Babilonia. ²⁷ Huan nozona, nopa tanahuatijquet tanahuati ma quinhuitequica huan ma quinmictica. Huan quej nopa, quintamiquixitjqe nochi Judá ehuan ten cati injuanti inintal.

²⁸ Huan nopa masehualme ten tali Judá cati quinhuicaque ipan tali Babilonia quema Nabucodonosor yahuiyaya para chicome xihuit para tanahuatis, elque para nochi: 3 mil 23 masehualme. ²⁹ Huan quema yahuiyaya para diecinueve xihuit ipan itanahuatil Nabucodonosor, Nabuzaradán quinhuicac 832 masehualme ten altepet Jerusalén. ³⁰ Huan quema yahuiyaya para 23 xihuit ipan itanahuatil Nabucodonosor*, Nabuzaradán, nopa hueyi tayacanquet ten soldados quinhuicac 745 masehualme. Huajca para nochi cati quinhuicaque ipan tali Babilonia elque 4 mil 600 masehualme ten tali Judá huan altepet Jerusalén.

Quiquixtijque Joaquín ipan tatzacti (2 R. 25:27-30)

³¹ Teipa quema Joaquín, tanahuatijquet ten tali Judá, quihuicayaya 37 xihuit para quihuicatoyaj ipan tali Babilonia, pejqui tanahuatía ipan tali Babilonia, Evil Merodac. Huan ipan 25 itequi nopa metzti doce ipan calendario israelita†, Evil Merodac quitasojtac Joaquín huan quiquixti ipan nopa tatzacti. ³² Huan quichihuili cati cuali huan quichijqui ihuampo huan más quipacti ten nochi nopa sequinoc tanahuatiani cati itztoyaj ihuaya ipan tali

* 52:30 52:30 Ipan nopa xihuit 581 a.C. ipan tocalendario ten ama. † 52:31 52:31 Ipan 31 itequi marzo, 561 a.C. ipan tocalendario ten ama.

Babilonia. ³³Nojquiya quimacac se yoyomit cati yancuic quej quinamiqui para se tanahuatijquet. Huan Joaquín tacuayaya mojmosta ihuaya nopa tanahuatijquet ipan imesa. ³⁴Huan nojquiya mojmosta quimacayaya nochicati quipolohuayaya. Huan quej nopa quichihuili nochipa hasta quema mijqui.

Lamentaciones

Jeremías quichoquili altepet Jerusalén

¹ Tahuel iseltitzi mocajtoc Jerusalén, ayecmo eltoc quej achtohui quema temitoya ica masehualme. Ni altepet cati quinnahuatiyaya miyac pilaltepetzitzi, ama nesi quej se sihuat cati icnotzi. Achtohui ni altepet eliyaya nelía yejyectzi quej iichpoca se tanahuatijquet, pero ama eltoc quej se tequipanojqquet cati quitequipanoltíaj ica tequit cati tahuel ohui.

² Seyohual Jerusalén ehuaní tahuel chocaj quej se ichpocat cati tzajtzi huan temo iixayo. Chocaj quej se ahuilnenca sihuat cati quinpixqui miyac tacame cati quicneliyayaj, pero teipa ayecmo aquí mocahua para quiyoltalis. Quicajtejtoque nochi ihuampoyohua. Quej nopa nojquiya nochi talme cati eliyayaj ihuampoyohua ni altepet Jerusalén. Ama quicajcayajtoque huan mochijtoque icualancaitacahua.

³ Tali Judá ehuaní ama taijyohuíaj campa huéli ipan sequinoc talme. Amo huélij mosiyajquetzaj pampa quintantoque cati quintemojtinemiyayaj. Quena, quinitzquitoque huan quinhuicatoque huan ayecmo quimatij taya quichihuase para momanahuise.

⁴ Tatzitzicatoc nochi ojti cati calaqui ipan ni tepet Sion. Ayecmo aquí itztoc para hualas ipan ilhuit. Ipuertas campa calaqui ipan itepa ni altepet tatzitzicatoc. Nochi totajtzitzi chocaj. Nochi ichpocame quinhuicatoque. Cati mocajtoque ipan Jerusalén tahuel mocuesohuaj.

⁵ Inincualancaitacahua Jerusalén ehuaní ama mochijtoque inintecohua. Moricojchijtoque ica cati quipixtoyaj. Quena, TOTECO quitatzacuilitjtoc ni altepet huan nochi cati ehuaní nica pampa miyac tajtacolchijtoque. TOTECO quincahuilijtoc inincualancaitacahua ma quinhuicaca inincone hua hasta seyoc tali.

⁶ Quisosolojtoque nochi iyejca ni hueyi altepet ipan tepet Sion huan ayecmo nesi. Cati tanahuatiyayaj ipan ni altepet, ama mayantinemij quej masame cati quitemojtinemij sacat. Pano siyajtoque hasta san moicxi-huahuatatzaj quej masame cati ayecmo huéli cholohuaj ten inintapejcahua.

⁷ Masque noja titaijyohuíaj nica huan ayecmo onca tochajchaj, tiqelnamiqij nopa tamanti pajpatiyó cati tijpixtoyaj huejcajquiya. Pero quema tihuetzque inimaco tocualancaitacahua, amo aquí hualajqui techpalehuico. Quema tocualancaitacahua tiJerusalén ehuaní quitaque quenicatza mocajqui ni altepet, san toca huetzcaque.

⁸ Tojuanti cati tiehuani Jerusalén nelía titajtacolchijtoque huan yeca nochi techualancaitaj. Cati quitepanitayayaj ni altepet, ama quihuejcamajcahuaj. Tocualancaitacahua quitztoque ni altepet quej se sihuat xolotic cati choca huan moicancuepa ica pinahualisti.

⁹ Tiitztoque quej se ahuilnenca sihuat cati quiptiya icuex soquiyo ica itajtacol. Quej cati ahuilnemiyayaj, masehualme cati nica ehuyayaj amo moilhuijque taya ininpantisquía. Amo momocuitahuijque huan yeca ama huetztoc foaltepe huan amo aquí itztoc para techyoltalis.

“TOTECO, xiquita quenicatza techpinahuaitjtoque huan quenicatza mohueyimatiq tocualancaitacahua. ¹⁰ Tocualancaitacahua moaxcatijtoque cati tahuel ipati ipan foaltepe. Tiquitztoque quenicatza calaque ipan motiopa. Calactoque seyoc tali ehuaní cati amo mitzixmatij, TOTECO. Calactoque campa ta tiquijto amo huéli calaquise.”

11 “TOTECO, nochi tojuanti cati timocajtoque ipan Jerusalén tichocaj huan tijtemojtinemij tacualisti. Cati ipati cati mocahuayaya tomaco tijpatatoque ica tacualisti para noja huenicis tiitztose. Xijtachili, TOTECO, quenicatza timocajtoque. Xijtachili quenicatza nochi quihuihuiitaj ni moaltepe.”

12 “Amojuanti cati anyohuij ipan ojti, ximoquetzaca huan ximoilhuaica sinta onca seyoc tazacuiliti quej cati tijpixtoque. Nelia chichahuac cati techchihuilijtoc TOTECO. Techütanili ni tajyohuulisti pampa cualanqui tohuaya.

13 “Eltoc quej TOTECO quititanqui ten huejcapa se tatzacuiliti cati eltoc quej se tit cati ajstitoc hasta ipan nochi toomyo. Quisencajqui se taquetzti para toicxihua para ma timocuepaca ten totajtacolhua. Tijmatij techtahuelcajtoc. Titapolohuaj talojtzitzi.

14 “TOTECO quiilpitoc nochi totajtacolhua toquechta. Quichijtoc quej quinchihua nopa torojme cati quinilpilía se cuahuit ininquechta torojme para taxahuase huan quihuica nopa lazo imaco. Quena, TOTECO techtalilijtoc totajtacolhua toquechta quej se tamamali huan quitalijtoc nopa lazo inimaco toculancaitacahua. Quichijtoc para tamis tofuerza. Toteco techtalijtoc inimaco masehualme cati tetique para techtaxahualtise huan amo hueli timotojtomase.

15 “Toteco quintzontamiltijtoc nochi tacame cati más tetique ipan toaltepe. Quichijqui ma hualaca cati quinmictijtoque totepocahua. Toteco ipan moquejquetztoc tijerusalén ehuan quej se ipan moquejquetza xocomecat itajca para quiquixtilis iayo. Achtohuiya nica total Judá nesiyaya quej se yejyetzti ichpocat cati ayemo aqui quinojnotztoc.

16 “Tahuel tichocaj pampa hualajtoc nochi ni fiero tamanti ten topantis. Toixteyol temitoc ica toixayo huan amo aqui techyoltalía. Amo aqui techyolchicahua. Nochi cati timocajtoque ipan toaltepe tiitztoque quej tiicnotziti pampa techtanque toculancaitacahua.”

17 Tojuanti cati tiitztoque ipan altepet Jerusalén timomatananaj para ajquiya techpalehuis, pero amo aqui techyoltalía. TOTECO tanahuatijtoc para nopa talme cati techyahualojtoque ma mochihuaca toculancaitacahua. Quiijtojtoc nochi ma techitaca tijerusalén ehuan quej se tamanti cati quijiyaj.

18 “Pero TOTECO quichihua cati xitahuac pampa tojuanti cati tiehuani nica amo tijchijtoque cati technahuatijtoc. Nochi cati anehuani ipan pilaltepetzitzi techacaquilica, xiquitaca quenicatza titajyohuaj. Totelpocahua huan toichpocahua quinquicaque.

19 “Quej se ahuilnenca sihuat quintemohua nopa tacame cati quicneliyayaj huan amo hueli quinpantía pampa quicajcayajtoque, quej nopa techcayajtoc totajtacolhua. Ama nochi tototajtzitzi huan huehue tacame ya mijque ica mayanti nica ipan altepet. Quitemojtinemiyayaj tacualisti para noja hueltosquaj itzosquaj, pero amo quipantijque.”

20 “TOTECO, xijtachili quenicatza timocuesohuaj. Tijmatij quenicatza toyolo tzayanisnequi. Huihuipica noijti quema nimoilhúa quenicatza timohuejcamajcajtoque. Calteno temictíaj ica macheta. Nica calijtic miqulisti techchiya.

21 “Ne masehualme quicaquij quenicatza titahuejchihuj, pero amo aqui itzotc para techyoltalis. Nochi toculancaitacahua campa hueli quimatij ten topantitoc. Paquij ica cati ta, TOTECO, techchihuilijtoc. Ma huala nopa tonali cati tiquijtojtoc para hualas huan ma ininpanti quej tojuanti topantitoc.

22 “Xijtachili ta nochi nopa tamanti cati fiero inijuanti quichijtoque. Xiquinchihuilli quej quinamiqui por inintajtacolhua nojquiya, quej techchitoc por totajtacolhua. Tahuel tichocaj tijerusalén ehuaní. Tijmatij titapolose.”

2

Toteco cualanqui pampa israelitame tajtacolchijtoque

1 Toteco quipachojtoc Jerusalén ica ihueyi cualancayo cati eltoc quej se hueyi mixti. Quisosolojtoc nopa altepet cati más yejyetzzi ipan tali Israel. Eltoc quej quimajcajtoc Jerusalén ten ilhuicacti hasta talchi. Pampa tahuel cualantoc Toteco, yon amo quitasojtatoc itiopa.

2 Toteco quisosolo nochi tochajchaj tiisraelitame*. Ica se talojtzi ica icualancayo quixitini nochi tepancalme cati más cuali tasencahualti para ipan timomanahuisquíaj. Talchi huetztoc nochi cati eltoya ipan Jerusalén, nopa altepet más yejyetzzi ipan tali Judá. Quitamiltijtoc inintanahuatilhua cati eliyayaj tanahuatiani nica huan quinpinahualtijtoc.

3 Quema tahuel cualanqui Toteco, techquixtili nochi tochicahualis tiisraelitame. Techquixtili imax cati techmocuitahuuyaya ten tocualancaitacahua huan quincahuilijtoc ma techtanica. Icuallancayo quej se hueyi tit hualajtoc para quixitiniqui campa mocahuayayaj totanahuatijcahua ipan tali Israel.

4 Quej se tocualancaitaca cati quicualtali icuahuitol huan techcoco, Toteco quisemantoc nochi cati quiitac yejyetzzi. Quej se tit, icualancayo ajsic hasta localijtic tojuanti cati tiitztoyaj ipan ni yejyetzzi Jerusalén.

5 Toteco quichijqui quej elisquía se tocualancaitaca. Techzontamiltijtoc tiisraelitame. Quisosolojtoc totequicalhua cati eliyayaj cuajcualtzi. Quintahuiso nochi nopa huejcapantique tepancalme cati tasencahuali nelcuali para ipan timomanahuisquíaj. Tahuel quimiyaquilijtoc totequipachol tojuanti cati tiehuani ipan ni altepet cati más yejyetzzi eliyaya ten nochi ipan tali Judá.

6 Quisemantoc ichaj quej se xajcali ipan mili. Quena, quisosolo itiopa campa timosentiliyayaj. TOTECO quichijqui ma tiquelcahuaca nopa ilhuit huan nopa tonali quema timosiyajquetzayayaj para ayecmo ma timoilhuica ten ya nopa. Ica icualancayo quinhuejcamajcajtoc totanahuatijcahua ini-huaya totajtzitzi.

7 Toteco quitahuelcajtoc itaixpa campa tijmacayayaj tacajcahualisti. Amo quinequi quiitas itiopa. Quitemactilijtoc inimaco tocualancaitacahua nopa tepamit cati quitzactoyaya ni altepet. Seyoc tali ehuaní cati amo quitepanitaj TOTECO tahuejchihuaj ipan itiopa. Caquisti quej elisquía tiisraelitame tipaqij para titaixpiyaj ipan se ilhuit, pero amo cana.

8 TOTECO moilhui para quisosolos ni altepet Jerusalén cati eliyaya yejyetzzi. Quisencajqui quenicatza quisosolosquía huan quichijqui. Huan quema hualajque tocualancaitacahua ica ininchicahualis, itepa Jerusalén cati techmanahuuyaya huetzqui tatzinta.

9 Ama ni altepet amo quiptiya puertas ipan itepa huan itepa cati quiyahualojtoya, san tapojtoc mocahua. Tohueyi tanahuatijca huan cati quipalehuuyayaj ipan itequi itztoque ipan sequinoc talme. Nozona amo onca itanahuatilhua TOTECO. Tajtolpanextiani nozona amo quiselíaj cananali ipan tanextili para ma tayolmelahuaca.

* 2:2 2:2 Tiiixhuihua Jacob o Israel.

10 Nopa tayacanani ipan altepet Jerusalén motzontaltemíaj huan moyoyontíaj ica cati fiero para quinextise inintequipachol. Mosehuíaj talchi huan amo moliníaj. Telpocame ten Jerusalén mohuijtzomaj talchi ica pinahualisti.

11 Noixteyol siyajtoc pampa tahuel nichocatoc. Nelía nimocuesohua. Nijmati tzayanis noyolo quema niquita para mocahua semantoc ni yejyetzti altepet. Huan quema niquinita coneme huan pilconetzitzi cati noja chichij apismiquij callejtípa, amo hueli niquijyohúa.

12 Nopa coneme quintatzintoquilíaj ininanahua: “¿Canque eltoc pantzi huan xocomecat iayo para tijcuase?” Teipa huetzij mictoque ojtípa. Imaco ininana mijyocuilíaj huan tamij.

13 ¿Taya huelis nimechilhuis, anJerusalén ehuaní, para anmoyoltalise? Amo quema niquitztoc se tasesololisti quej ni. Techcocojtoque huejcata hasta quej ihuejcatanca nopa hueyi at. ¿Ajquiya huelis quichícahuas toaltepe?

14 Nopa tajtolpanextiani istacatique ica cati quiitayayaj ipan tanextili. Quiijtojque amo teno topantis masque nochí san ten hueli tijchihuase. Amo quiipanextijque tetajtacolhua para quitilquetztosquíaj huan amo monectosquía quinhuicatosquíaj huejca para taijyohuise pampa miyac tajtacolchijtojaj. San teilhuijque tamanti cati amo melahuac huan quinchijque ma quineltocaca para nochí eltoya cuali ica TOTECO.

15 Nochí cati yahuij ipan ojti huan quiitaj Jerusalén, momatatziníaj ica paquilisti para techhuihuiitase. Quiquisij huan motzonojoliníaj huan toca huetzcaj por cati ipanti ni yejyetzti altepet Jerusalén. Quiijtohuaj: “¿Ya ni nopa altepet cati quiijtohuayayaj para cati más yejyetzti ipan nochí taltipacti?”

16 Ama nochí toculancaitacahua toca camanaltij huan quimahuispolohuaj toaltepe pampa sosolijtoc. Motanhuehuehotzaj ica paquilisti. Quiijtohuaj: “Ya ni nopa tonali cati tijchiyayaj. Huan ama, quena, tiquitaque.”

17 TOTECO quichijqui cati moilhuijtoya para quichihuas. Tantoc cati quiijto icamanal cati techilhui hasta huejcajquiya. Quiijtojtoya para techsemanasquía sinta tijtahuelcahuasquíaj, huan quena, tasesolojtoc huan amo techtapojpolhui. Quicahuilijtoc ma toca huetzcaca toculancaitacahua. Quinmacac hueyi chichahualisti.

18 Nochí masehualme ipan ni altepet ma quitajtanica TOTECO para ma techpalehui. “Quena, nochí amojuanti xichocaca tayohua huan tonaya hasta toixayo mochihuas se hueyat iixpa. Ma amo mosiyajquetza toixteyol, ma senchocato.

19 “Ximijquehua ica tayohua huan xitahuejchihuaca. Sesen nahui horas quema mopata nopa tachixquet ipan nopa huejcapantic tepancali, sempa xichocaca quej nochí quichihuayayaj achtohuiya.”

20 “Xijtachili, TOTECO, nochí cati techchihuilijtoc timomasehualhua. ¿Tiquita cuali para tename monequi quincuase ininpilconeua cati noja chichij? ¿Tiquita cuali para quinmictise totajtzitzi huan tajtolpanextiani ipan motiopa?

21 “Xijtachili inintacayo telpocame huan huehuentzitzitzi cati tepejtoque ojojtípa. Totelpocahua huan toichpocahua quinmictijtoque ica macheta. Ipan nopa tonali quema ticalaniyaya ica tojuanti, tiquinmicti. Tiquinmicti huan amo tiquintapojpolhui.

22 “Tijchijtoc ma hualaca tacame cati fiero ten campa hueli, quej hualasquíaj ipan se ilhuit. Ipan nopa tonali quema ticalantoya ica tojuanti,

amo aqui huelqui momanahuis para itztos. Noconehua cati niquiniscalti huan niquinmocuitahui, toculancaitacahua quinmictijque.”

3

Jeremías motemachi ipan Toteco cati temachtí

¹ Na se nitacat cati niqiztzo nopa taijyohuulisti cati huala quema techmaquilljotc TOTECO ica cualanti. ² Techyacantoc TOTECO campa tzintayohuilot. Techchijtoc ma ninejnemi ipan ojti cati amo quiapiya yon quentzi taahuili. ³ Ayecmo techcualita. Tonaya huan tayohua techhuitequiyaya talojtzitzi.

⁴ Hasta quihuehuejtilijtoc nonacayo huan nocuetaxo. Quipojpostectoc noomiyo. ⁵ Quej se tatzacti TOTECO techyahualojtoc ica tequipacholi huan taijyohuulisti. ⁶ Quichijqui ma niitzto ipan tzintayohuilot quej se cati huejcaiquiya mijqui.

⁷ Eltoc quej TOTECO techztajtzajqui ica se tatzacti cati amo quiapiya canque niquisas huan techtatacatzo ica cadenas. ⁸ Masque nijtzajtzilia ma techpalehuiqui, amo techtacaquilia. ⁹ Techojtzajqui ica teme cati amo hueli nipano iixco. Huan quichijtoc ijilacatztic noojhui.

¹⁰ Na niqita para yaya itzto quej se león cati motatijtoc huan quej se oso cati quinequi techitzquis. ¹¹ Techhuahuatatzqui ten nopa ojti huan techcocototzqui huan quichijtoc ma nimajmajcamiqui. ¹² Quihuilpachojtoc icuahuitol huan techmelaitac para techajsis icuatamin.

¹³ Nopa cuataminti cati techquechili TOTECO calajqui nel huejcata ipan noyolo. ¹⁴ Hasta noteixmatcahua noca huetzcaj. Techhuihuiitaj huan huicaj ten na talojtzitzi. ¹⁵ TOTECO techmacatoc miyac tequipacholi. Eltoc quej techmacatoc se tamanti ma niqui cati tahuel chichic.

¹⁶ Techixtapachtahuiso huan nimotancoch tatapatzqui hasta quichijqui ma nijtanquechi cati elqui quej piltetzitzi. ¹⁷ Na ayecmo nijpiya yolpaquili. Niquelcajtoc quenicatza quimati se cati paqui. ¹⁸ Huan niqijto: “Ayecmo temachtí. Tantinemi nochi nochicahualis. Tantinemi para nimotemachis ipan TOTECO.”

¹⁹ Nochipa niquelnamictos notequipachol huan notaijyohuilis cati techchihuili. Noseltitzi nimomati. San cati chichic nijyecohua nocamaco. ²⁰ Amo quema niquelcahuas ni xihuit cati tahuel ohui. Nijmati nimocuesojtinemis para nochipa. ²¹ Pero se tamanti nijnequi niquelnamictos huan ica ni sempa nimotemachis ipan TOTECO.

²² Iteicnelilis TOTECO amo quema tamis. Pampa hueyi iyolo ica tojuanti, amo techtamitzontamiltijtoc. ²³ Se ijnaloc moyancuilia iteicnelilis. Nelía temachtí TOTECO. ²⁴ Pero nimoyolihui: “San TOTECO nijpiya, yeca ipan ya nimotemachis.”

²⁵ Nelía cuali TOTECO quinchihuilia cati ipan motemachíaj. Quena, cuali iyolo ica cati quitemohuaj. ²⁶ Monequi timotemachise huan amo timolinise iixpa. Ma san tijchiyase para ya ma techmaquixti. ²⁷ Quema ayemo motacachijtoc, se telpocat monequi quincahuilis sequinoc para quixitahuase para quichihuas ipaquilis TOTECO.

²⁸ Ma mosehui iseltitzi huan ma amo molini iixpa Toteco Dios. Ma quimati para yaya Dios cati quiapiya tanahuatili ica ya. ²⁹ Ma moicnonequi hasta mohujtzomas talchi huan huelis quej nopa noja quitapojpolhuis. ³⁰ Ma quinextili icampa cati quimacanequi. Ma quiseli cati quijitohuaj nochi cati quinequij quimahuipolose.

³¹ Pampa Toteco Dios amo techtahuilcahuas para nochipa. ³² Masque yaya tetaijyohuiltia, nojquiya quipiyas iyolo ica tojuanti pampa iteicnelilis nelia hueyi. ³³ Melahuac amo inelpaquilis techtaijyohuiltia huan techtequipacholmaca timasehualme.

³⁴ Pero cati eliyayaj totayacanhua fiero quinchihuiluyaj cati tzactoyaj ipan total. ³⁵ Amo quintajtolsencahuayaj xitahuac que monejqui iixpa Toteco Cati Más Hueyi. ³⁶ Amo tecahuiluyaj ma quijitoca iixpa nopa juez cati nelia pano quej Toteco Dios quinmacatoc tanahuatili ma quichihuaca. Huan yaya tahuel amo quipacti cati quichihuayaj huan yeca monejqui quintatzacuilti.

³⁷ Pampa sinta Toteco Dios amo quimacas caquihuil, amo aqui huelis techchihuilis cati fiero moilhujitoc techchihuilis. Cati topanti, pano pampa yaya tanahuatijtoc ma pano. ³⁸ Quena, Toteco Cati Más Hueyi quijitohua ma huala cati cuali quej cati amo cuali. ³⁹ Pero timasehualme pano titajtacolchijtoque, huajca ¿para ten tijtaijllhuaj Toteco quema techajsi cati quinamiqui?

⁴⁰ Ma tiquitaca nopa fiero ojti cati ipan tinejnemij huan ma timoilhuica toyoltipa para ten quej nopa tijchijtoque. Huan sempa ma timocuepaca ica Toteco Dios. ⁴¹ Ma timoyoltananaca huan ma timomatananaca para timotatajtise iixpa Toteco Dios cati itztoc ilhuicac. Ma tijnextilica cati fiero eltoc topanti huan cati fiero tijchijtoque. Xiquilhuica: ⁴² “Tojuanti titajtacolchijtoque huan timosisinijtoque moixpa. Huan ta ayemo techtapojpolhuijtoc.”

⁴³ Eltoc quej Toteco Dios techyahualojtoc ica icualancayo, huan noja techtepotztocatihuala. Noja techmictijtinemi huan amo techtapojpolhuijtoc. ⁴⁴ Hasta nijmati para moyahualojtoc ica se mixti para amo huelis quicaquis cati tijtanjaj. ⁴⁵ Techpinahualijtoc inixpa nochí masehualme.

⁴⁶ Nochi tocualancaitacahua techtaijllhuaj. ⁴⁷ Campa hueli onca majmajti, taquetzti, huan tasosololisti. Toseltitzitzi timomatij tiisraelitame. ⁴⁸ Noixayo temo quej se atajti pampa quisosolojtoque ni altepet cati tiquicneliyajaj.

⁴⁹ Nichoca huan amo hueli nimoyoltalia pampa amo aqui hueli quichihuas sempa quej achtohuiya. ⁵⁰ Amo aqui huelis techpalehuis hasta TOTECO techtachilis ten ilhuicac huan techtacaquilis. ⁵¹ Techcocohua miyac noyolo ica cati niquita ininpanitoc ichpocame ten toaltepe.

⁵² Masque amo teno nijchijtoc, nocualancaitacahua techtemojtinenque huan techtaquechilijque quej se nitotot. ⁵³ Noja niyoltoc techtaltojque ipan se ostot, huan ica se tet quixtzajque. ⁵⁴ Nopa at techatzonpolihuilti huan nimoilhui: “Ya nimiquis.”

⁵⁵ “Huan nimitznotzqui, TOTECO, ten itzinta nopa ostot cati más huejcata. ⁵⁶ Niquijto: ‘Xijtacaquil notoscac. Amo xijtzacua monacas para amo tijcaquis quema nimitztanjaj techpalehuiqui.’ ⁵⁷ Huan ta, Toteco Dios, ipan nopa tonali quema nimitznotzqui, tihualajqui huan techilhui: ‘Amo ximajmahui.’

⁵⁸ “Toteco Dios, ta techmanahuia iniixpa masehualme. Tijmaquixtia none-milis. ⁵⁹ TOTECO, tiquitztoc quenicatza nitaijyohuia pampa amo techchihuilijaj cati xitahuac. Ta tijuez, xitatajtolsencahua xitahuac. ⁶⁰ Tiquitztoc nochí cati nocualancaitacahua quisencahuaj para techchihuilise.

⁶¹ “TOTECO, tijcactoc quenicatza techmahuispolohuj huan quisencahuaj quenicatza huelis techpolose. ⁶² Tijcactoc inincamanal cati talojtitziti quijitohuaj nocualancaitacahua huan quenicatza moichtacacamanalhuaj ten na. ⁶³ Tijmati masque cati hueli tequit quichihuaj, injuanti san noca huetzajaj.

64 “TOTECO, xiquincuepili quej cati amo cuali quichijtoque. 65 Xiquinyoltetili huan xiquintelchihua. 66 Xiquintepotztoca ica miyac cualanti huan xiquintzontamilti. Ma polihuica ten ni taltipacti para ayecmo itztose tatzinta ilhuicac.”

4

Tanqui icualancayo TOTECO ihuaya Jerusalén ehuaní

¹ Campa hueli tepejtoc tepayaxti ten itepa tiopamit cati achtohuiya quip-xiqui miyac oro. Ama nopa oro cati mocahua ya yayahuixtoc huan ayecmo petani.

² Huan toconehua cati tiquinicneliyayaj huan tiquinitayayaj para más ininpati que oro, tocualancaitacahua quinchijtoque quej amo teno ininpati. Quinchihuilijque quej elisquía soqui chachapali cati quichijtoc se soquichij-quet.

³ Hasta coyochichime quinchichitíaj ininconehua, pero tojuanti cati tiitz-toque ipan ni altepet, amo aquí techpalehuía. Tafiero nochi cati niquita. Pano fierojtique cati techtantoque huan teipa techcajtejtoc toselititzitzi. Tiitztoque quej iconehua se cuatotoli, nopa totot cati quinchahua iconehua iniselti ipan huactoc tali campá amo teno eli.

⁴ Ama pilconetzitzi amiquij hasta tatzquitoc ininenepil ipan inincholec, pero ayecmo onca at. Coneme tajtantinemij se quentzi pantzi cati amo aquí huelis quinmacas.

⁵ Masehualme cati achtohuiya quicuayayaj cati nelía cuali, ama apismictinemij ojojtípa. Cati moquentiyayaj iniyoyo cati nelalaxtic ama quite-mojtinemij se tatapatzi yoyon peseli.

⁶ Inintajtacolhua noteixmatcahua ipan ni altepet eltoc más miyac que inin-tajtacolhua altepet Sodoma ehuaní, nopa altepet cati TOTECO huejcajquiya quisosolo ica se talojtzi huan yon se masehuali amo huelqui quinpalehui.

⁷ Cati achtohuiya tanahuatijque nica ipan toaltepe elque nopa tacame cati más cuajcualme ten nochi tomasehualhua. Itztoyaj más chipahuaque que nexti. Quena, más chipahuaque que lechi huan quipixtoyaj inintacayo ica inincampa chichiltic ica miyac fuerza. Huelisquía tijhuicaltisquíaj iniyejye-ja ica nopa tet cati itoca zafiro.

⁸ Pero ama inijuanti nesij más yayahuique que tzintayohuilot. Amo aquí quinixmatisquía sinta quinpantisquía ipan ojti. Inincuetaxo tatzquitoc ipan iníomiyo huan nelhuactoc quej cuatahuejhueloli pampa mayancamictine-mij.

⁹ Achi más cuali elqui para cati mijque ica macheta que cati apismiquij. Más ohui huan más taijyohuáj cati miquij pampa ayecmo oncac yon quentzi tactualisti campá mili.

¹⁰ Hasta ica inimax, sihuame cati quipiyayayaj cuali iniyolo, quinixcitij-toque ininconehua. Quena, ininconehua mochijque inintacualis para noja yoltose quema nopa soldados quisosolohuayayaj ni altepet.

¹¹ TOTECO nelía cualanqui ica tojuanti huan quichijqui ma quisa nochi icualancayo huan ma techájsi tojuanti. Quitati toaltepe nica ipan tepet Sion huan quisosolo ni altepet hasta itzinpehualti.

¹² Amo quineltocaque tanahuatiani huan masehualme cati campá hueli ehuaní ipan taltipacti para tocualancaitacahua huelis calaquisquíaj ipan tocaltehua ipan nopa tepamit nica ipan altepet Jerusalén.

¹³ Huan nochi ya ni panoc pampa tajtacolchijque totajtoltpanextijcahua huan tototajtzitzi. Ipan ni altepet quitoyajque inieso cati eliyayaj cuajualme masehualme cati amo teno quichijtoyaj. ¹⁴ Ama ni tacame san tamajmachijtinemij quej popoyotzitzitzi ipan ojojti ten ni altepet. Espoltic iniyoyo hasta amo aqui quinequi quinitzquis.

¹⁵ Masehualme quintzajtzilijtinemij: “Ximijcuenica, amo antapajpac-tique. Amo techitzquica.” Quej nopa quiijtohuaj para amo ma quin-nechcahuica nopa tacame huan quinchihuase amo tapajpactique nojquiya. Masque nopa tacame cholojtehuaj hasta seyoc tali, nopa seyoc tali ehuani nojquiya quinilhuaj: “Amo hueli anmoca huase para anitztose nica.”

¹⁶ Icuallancayo TOTECO quinsemantoc campa hueli huan yaya ayecmo quintachilía. Amo aqui quintepanita totajtzitzi yon amo quinicnelíaj nopa huehue tacame.

¹⁷ Ya tiixcuatique para titachixtoque ajquiya techpalehuis. San tapic timochiyaj ma hualaca nopa tali ehuani cati timoilhuijque techpalehuisquíaj pampa ayecmo hueli techmaquixtíaj.

¹⁸ Tocualancaitacahua techtemohuaj campa hueli. Amo hueli tiquisaj ipan calle. Nechcatitoc para techztontamiltise. Ayecmo temachtí.

¹⁹ Tocualancaitacahua techtepotztocatinemij huan motalohuaj nelchic-ahuac hasta quinontanij nopa huejhueyi cuatojme cati chichahuac patan-tiyahuij ipan ilhuicac. Masque ticholojtinemij iniixpa hasta cuajcuatita, techpantíaj. Sinta timotatíaj ipan nopa huactoc tali, techtaquechilíaj.

²⁰ Quiitzquitoque totanahuatijca cati quitapepenijtoya TOTECO. Yaya cati tiquicnelijque quej tonemilis, quicuique. Tiquijtojtoyaj para ica totanahu-atijca hueli timomanahuse ica cati hueli tali isoldados, pero amo cana.

²¹ Masque ama anhuetzcaj huan anpaquij anmasehualme ipan tali Edom nechca Uz, nojquiya amechajsis se huéyi tazacuiltili. Quej se taili chichic cati ohui para tiquis, TOTECO amechtaijyohuiltis. Nojquiya anxlome anmoca huase. Huan quej tojuanti, ayecmo teno mocahuas amoaxca.

²² Se tonali TOTECO techilhuis: “Cati anehuani ipan altepet Jerusalén, ya tanqui anmotatzacuiltis. Ayecmo aqui nijcahuilis ma amechhuica ten tepet Sion para antetequipanose ipan seyoc tali. Pero amojuantí cati anehuani ipan tali Edom, sanoc pejtoc nimechtatzacuiltía nochi cati amo cuali anquichijtoque. Nijpanextis senquisa nochi amotajtacolhua.”

5

Jeremías motatajtía para Toteco ma quincuepalti ica ya

¹ TOTECO, xiquelnamiqúi cati topantitoc. Xijtachili quenicatza nochi tech-huetzquílíaj. ² Nochi cati eliyaya toaxca ama eltoc inimaco seyoc tali ehuani. Hasta tochajchaj iniaxca masehualme cati amo tiquinixmatij. ³ Tiitztoque quej tiicnotzitzitzi cati mijque totatahua huan quincájtejqe tonanahua quej cahualme. ⁴ Hasta at cati eliyaya toaxca, ama monequí tijcohuase. Para tocuá monequí tiquixtahuase patiyó. ⁵ Huan noja más chichahuac techtai-jyohuiltíaj injuanti cati techtantoque. Ipan moquejquetzaj toquechta para techmictise. Tisiyajtoque pampa techtepotztocatihualahuíj huan amo hueli timosiyajquetzaj. ⁶ Hasta monequí timotaiejhuilis ica nopa tali Egipto huan talí Ásiria ehuani para tijpantise pantzi para tijcuase.

⁷ Totatahua tajtacolchijque huan mijque quema ayemo hualayaya inin-tatzacuiltis. Ama tojuanti tijselíaj cati quinamiqúi quiselijtosquíaj.

⁸ Ama technahuatíaj tetequipanohuani huan amo aqui para techmaquixtis inimaco. ⁹ Tahuel mahuilili ipan ten hueli hora quema tiquisaj para tijtemojtinemise tacualisti ipan huactoc tali pampa huelis techmictise tocualancaitacahua. ¹⁰ Tata tocuetaxo quej tiitztosquíaj ipan horno pampa timiquij ica mayanti cati techtotoncamaca. ¹¹ Ipan ni altepet Jerusalén, ipan tepet Sion, huan ipan nochi ni tali Judá tocualancaitacahua quinpinahuatíaj tosihuajhua huan toichpocahua. ¹² Totanahuatijca itapalehujicahua quincuahuiyonijque ica inihuemajpil. Amo quintepanitaque tomasehualhua cati huehuentzitzí. ¹³ Masehualme cati tetixtoque, quintixiltíaj, huan telpocame siyahuij pampa quinnelcuajcuahuiltíaj.

¹⁴ Ayecmo aquíjme huehuentzitzí cati mosehuíaj para camanaltise campa nopa caltemit ipan nopa tepamit cati quiyahualo toaltepe. Ayecmo aquíjme quicaquí cati huicaj telpocame. ¹⁵ Ayecmo tijpiyaj paquilisti ipan toyolo. Achtohuiya timijtotiyayaj ica paquilisti, pero ama nochi mocuetoc choquisti. ¹⁶ Ya tantoc iyejca toaltepe huan totanahuatil. Tiitztoque quej se tanahuatijquet cati quiqixtilijtoque icorona huan campa tanahuatiyaya. Teicneltijque tiisraelitame, pampa miyac titajtacolchijtoque. ¹⁷ Yeca tojuanti fiero tijmatij ipan toyolo huan titapolohuj. Ayecmo hueli titachiyaj cuali. ¹⁸ Ni tepet Sion mocajtoc tatzizicatoc. Nochi quistejtoque. Campa eltoya altepet Jerusalén ama nemij cayochime.

¹⁹ Pero ta, TOTECO, para nochipa titanahuatis. Tiitztos ipan mosiya ipan ilhuicac huan tijpiyas nochi tequiticayot hasta toixhuihua quipiyase iniixhuihua huan para nochipa. ²⁰ Amo techelcahua para nochipa. Ya miyac xihuit quipiya para amo techelnamictoc. ²¹ TOTECO, techcuelpalti ten tajtacoli para sempa ma timitztoquilica. Xijyancuili toyolo para sempa ma eli cuali quej achtohuiya. ²² O ¿huelis ta techhujcamajcajtoc? ¿Huelis noja tahuel ticualani ica tojuanti?

Ezequiel

Se tanextili ten itatanex TOTECO

¹⁻³ Quema na, niEzequiel, nijpiyayaya 30 xihuit, niqitac se tanextili ten Toteco Dios. Elqui ipan 5 itequi nopa najpa metzti ipan toisraelita calendario * quema yahuiyaya para macuili xihuit quiquixtijtoyaj Tanahuatijquet Joaquín ipan total huan quihuicatoyaj Babilonia. Na, niEzequiel se niisraelita totajtzi cati niicone Buzi, niitztoya inihuaya nopa sequinoc israelitame cati techquixtijtoyaj ten total huan techhuicaque Babilonia. Huan tiitztoyaj iteno nopa hueyat Quebar ipan nopa tali quema ilhuicacti tapojtihuetzqui, huan niqitac se tanextili ten TOTECO huan nijmatqui TOTECO techitzqui ica imax.

⁴ Ipan ni tanextili, niqitac para taajacayaya ica norte huan nopa hueyi ajacát monechahuiyaya campa na. Huan iixpa hualayaya se hueyi mixti cati petaniyaya huan taahuiyaya quej se hueyi tit. Huan iijtic nopa mixti quipixtoya se tit cati petaniyaya quej quema tata nopa teposti bronce. ⁵ Teipa tatajco ten nopa mixti monextijque nahui cati yoltoque cati nesiyyaj quej se masehuali. ⁶ Sesen ten injuanti quipiyayaya nahui ixayac huan nahui ieltapal. ⁷ Huan inimetz eliyaya xitahuac quej masehualme inimetz. Pero iniicxi quipiyayaya iniisti huan elqui quej iniicxi becerros. Huan iniicxi petaniyaya quej nopa teposti bronce. ⁸ Huan itantita ten sese inieltapal, quipiyayayaj inimax quej masehualme inima. Sesen ten ni cati yoltoque, quipiyayaya nahui ixayac huan nahui ieltapal. ⁹ Nochi nopa nahui cati yoltoque mosajsalohuayayaj ica inieltapal se ica se seyoc. Huan yon se amo monequi moicancuepas para nemise pampa ica nahui inixayac campa hueli yahuiyayaj elqui iixmelac se ixayac. ¹⁰ Sesen ten injuanti quipiyayaya ixayac se tacat. Huan sesen ica inejmat ten itzonteco quipiyayaya ixayac se león. Huan ica iarraves ten itzonteco sesen quipiyayaya ixayac se toro. Huan iica sesen itzonteco quipiyayaya ixayac se cuatojti. ¹¹ Quej nopa elqui inixayac. Huan sesen quipixqui nahui ieltapal. Ome ieltapal quipatahuayaya para ica mosajsalos ica seyoc cati yoltoque ipan sesen ilado. Huan ica nopa seyoc ome inieltapal cati sesen quipiyayaya quitacuayayaj inintacayo. ¹² Huan campa nopa cuali tonaltzi quintitaniyaya, masque ica norte, ica sur, ica campa hualquisa tonati o ica campa oncalaqui, nopona yahuiyayaj san xitahuac ica iniixpa, yon amo monequi moicancuepase.

¹³ Huan inintachiyalis nopa nahui cati yoltoque eliyaya quej ticoli cati xahuantoc o quej ticuahuit. Elqui quej tit quisayaya ten sesen huan yahuiyaya para seyoc tatajco ten injuanti. Huan nopa tit petaniyaya nelchicahuac. Huan tatajco ten nopa tit quisayaya tapetanilot. ¹⁴ Huan nopa nahui cati yoltoque yahuiyayaj canajya huan mocuepayayaj quej tapetanilot.

¹⁵ Quema noja niquintachilijtoya nopa nahui cati yoltoque, niqitac nahui ruedas cati motalijtoyaj talchi huan sesen eltoya nechca se ten nopa nahui cati yoltoque. ¹⁶ Nopa nahui ruedas nesiyyaya san se huan nesiyyaya quej elisquía tachijchihuali ica nopa yejyectzi tet crisólito. Sesen ten nopa ruedas quipixqui seyoc rueda cati calactoya iijtic huan quicruzmacatoya. ¹⁷ Huan hueliyayaj yahuij ica campa hueli ten nopa nahui lados huan amo mon-equiyaya moicancuepase. ¹⁸ Huan yahualtic ten sesen nopa nahui ruedas

* 1:1-3 1:1-3 Elqui 31 itequi julio ipan tocalendario ten ama.

quippiyayayaj inintencuayo inintejtено seyoc rueda cati huejcapantic hasta temajmatí. Huan campa hueli ipan itejteno sesen rueda quippiyayaya miyac itxeyolme.

¹⁹ Huan quema nopa nahui cati yoltoque nemiyayaj, nopa ruedas yahuiyayaj inihuaya. Huan quema motananayayaj ten talchi, nopa ruedas nojquiya motananayayaj. ²⁰ Huan campa nopa cuali tonaltzi yahuiyaya, nopa nahui cati yoltoque yahuiyayaj huan nojquiya yahuiyayaj nopa ruedas. Elqui pampa itonal ten sesen nopa nahui cati yoltoque eltoya ipan nopa ruedas. Huan yeca campa yahuiyaya sesen itonal tzi ipan nopa ruedas, nojquiya yahuiyayaj nopa nahui cati yoltoque. ²¹ Huan quema nopa nahui cati yoltoque mijcueniyayaj, nopa ruedas nojquiya mijcueniyayaj. Huan quema injuanti moquetzayayaj, nopa ruedas nojquiya moquetzayayaj. Huan quema nopa nahui cati yoltoque tejcoyayaj ten ni taltipacti, nojquiya tejcoyayaj nopa ruedas pampa itonal sesen ten nopa cati yoltoc itztoya ipan nopa ruedas. ²² Huan inintzonta injuanti cati yoltoque, nesiyyaya se tamanti quej ilhuicacti. Huan petaniyaya quej nopa yejyetzti tet cristal. Huan nopa tamanti quej ilhuicacti patajtaya inintzonta. ²³ Huan itantita nopa tamanti cati patajtoc quej ilhuicacti, ieltapal sesen nopa nahui cati yoltoque mopatajtaya para ica quiajsis ieltapal nopa seyoc cati itztoya ipan ilado. Huan ica nopa seyoc ome inieltapal, sesen ten injuanti quitzacuayaya ten ya itacayo. ²⁴ Huan quema nopa nahui patantiyahuiyayaj, inieltapal chichahuac caquistiyaya quej quema mocojcoxonía nopa hueyi at ipan xali. O caquistiyaya quej itoscac Toteco Cati Quipiya Nochi Chichahualisti. O caquistiyaya quej tzajtziyayaj miyac soldados cati tahuel quippiyayayaj tetili. Huan quema moquetzayayaj nopa nahui cati yoltoque, quittemohuiyayaj inieltapal. ²⁵ Huan quema moquetzayayaj huan quittemohuiyayaj inieltapal, camanaltiyaya se cati itztoya más huejcapa ten nopa tamanti cati patajtoc quej ilhuicacti inintzonta.

²⁶ Huan más huejcapa ten nopa tamanti cati patajtoc quej ilhuicacti cati eltoya inintzonta, nesiyyaya se yejyetzti siyay quej campa mosehuía se Tanahuatijquet. Huan nesiyyaya quej elisquía tachijchihuali nopa siyay ica nopa yejyetzti tet cati azultic cati itoca zafiro. Huan ipan nopa siyay cati eltoya huejcapa itztoya se cati nesiyyaya quej se tacat. ²⁷ Huan ten itzinquechta para huejcapa nesiyyaya quej nopa teposti bronze cati cahuaniyaya quej tit. Huan ten itzinquechta para tatzinta nesiyyaya quej se tilelemecti cati cahuaniyaya tahuel chichahuac. ²⁸ Huan yahualtic ten ya chichahuac cahuaniyaya se tamanti quej nopa acosamalot cati monextía quema huetzi at. Quej nopa nesiyyaya itatanex TOTECHO. Huan quema niquitac, nihuetzqui talchi ica noxayac huan nijcajqui itoscac cati nechcamanalhuiyaya.

2

TOTECO quinojnotzqui Ezequiel huan quitequimacac

¹ Huan TOTECO techilhui: “Tacat, ximoquetza huan nimitzcamanalhuis.”

² Huan quema noja nechcamanalhuiyaya, itonal calajqui ipan na huan techchijqui ma nimoquetza. Huan nijtacaquili cati nechcamanalhuiyaya.

³ Huan TOTECO techilhui: “Tacat, na nimitztitani campa itztoque nopa israelitame. Injuanti tahuel techixpanotique huan mosisinijtoque ica na. Ten huejcajquiya, inintatahua tajtacolchijque noixpa huan ama hasta ni tonali inixhuihua quisenhuiquiliaj moicancuepaj ten na. ⁴ Injuanti nelía teti inixayac huan tahuel yoltetique. Pero na nimitztitantoc para xiquinpo huiliti nocamanal. Xiquinilhuiti para quej ni na, niDIOS Cati Más

Nijpiya Tanahuatili, niquijtohua, huan teipa xiquinilhui nopa camanali cati nimitzilhuijtoc. ⁵ Huan tijpantis para inijuanti tahuel mosisiníaj, pero masque quitacaquilise o amo quitacaquilise, para nochipa quielnamictose para oncac se tajtolpanextijquet tatajco inijuanti.

⁶ “Tacat, amo xiquinimacasi nopa masehualme, yon amo xiquimacasi inincamanal masque mitzcocosquía quej se huitzti o quej inintencococa colome. Amo xiquimacasi inincamanal yon inincualancayo pampa ya tijmati para tahuel mosisiníaj. ⁷ Monequí tiquinilhuis nocamanal nochi nopa masehualme masque quitacaquilise o amo pampa nelía mosisiníaj. ⁸ Huajca, tacat, xijtacaquili cati nimitzilhuía ama. Amo xipehua ximosisini quej inijuanti. Ta xijtapo mocamac huan xijcua cati nimitzmacas.”

⁹ Huajca nitachixqui huan niquitac se cati quixitajtoya imax campa na huan imaco quipixtoya se amat mimilijtoc. ¹⁰ Huan yaya quitapo nopa amat mimilijtoc huan niquitac para ica iijtic huan ipani ijcuilijtoc miyac mijcahuicat huan camanali cati teyolmelahua ten tequipacholi huan ten tatzacuilti cati huala.

3

¹ Huan yaya techilhui: “Tacat, xijcua cati nimitzmaca. Xijcua ni amat mimilijtoc huan teipa xiya huan xiquinilhuiti israelitame ni camanali.”

² Huajca na nijtapo nocamac huan techchihualti ma nijcua nopa amat mimilijtoc. ³ Huan techilhui: “Tacat, xijcua nochi nopa amat hasta temis nochi moijti huan nochi mocuitaxcol.” Huajca na nijcujqui. Huan ipan nocamac nijmatqui tzopelic quej sayolnecti.

⁴ Huan teipa techilhui: “Tacat, xiya campa nopa israelitame cati inihuaya tiitztoc huan xiquinyolmelahuati nochi nocamanal. ⁵ Na amo nimitztitani ica seyoc tamanti masehualme ipan se tali cati mopantía huejca o campa amo huelis tijmachilis inincamanal. Nimitztitani campa israelitame. ⁶ Yon amo nimitztitani campa miyac tamanti inieso masehualme cati camanaltij camanali cati tahuel ohui. Pero sinta nimitztitanisquía ica masehualme quej nopa, inijuanti, quena, quineltocasquíaj nocamanal. ⁷ Pero nimitztitani campa israelitame, huan inijuanti amo quinequise mitzacaquilise pampa amo quinequij techneltocase. Nelía tetic inixiyac huan tahuel yoltetique. ⁸ Pero xiquita, na nojquiya nijchijtoc moxayac tetic quej inijuanti huan nimitzchijtoc tiyoltetic quej inijuanti. ⁹ Na nimitzchijtoc titetic quej tet. Huajca amo xiquinimacasi. Masque inijuanti nesisquíaj ixcualantoque pampa nelía tahuel mosisiníaj, amo xiquinimacasi.”

¹⁰ Teipa TOTECO techilhui: “Tacat, achtohui xijcahuili para nochi ni nocamanal ma calaquí ipan moyolo. Huan xijtacaquili cuali. ¹¹ Teipa xiya campa moisraelita icnihua nozona cati quinquixtijtoque ipan inintal, huan xiquinilhuiti para quej ni na, niDIOS Cati Más Nijpiya Tanahuatili, niquijtohua. Huan elis ipan inijuanti sinta quitacaquilise o amo.”

¹² Teipa Itonal TOTECO techtanangui huan noica nijcajqui tacaquisti quej quema mojmolinía tali. Huan nopa ten caquistiyaya quijtohuayaya: “Ma tijhueyichihuaca TOTECO huan ihueyitilis nozona campa yaya itztoc.”

¹³ Nojquiya nijcajqui tacaquistiyaya pampa nopa cati yoltoque moajsiyayaj se ica seyoc ica inieltapalhua huan mojmoliníayaj nopa ruedas cati eltoyaj iniixmelac. Huan cati caquistiyaya eliyaya chicahuac quej quema mojmolinía tali.

¹⁴ Huan Itonal TOTECO techtanangui huan techhuicac. Huan niyajqui achi niyolquentzi huan nicualantoc, pero TOTECO techitzquiayaya chicahuac

ica imax. ¹⁵ Huan techhuicac altepet Tel Abib ipan tali Babilonia hasta campa itztotaj nopa israelitame cati quinquixtictotaj ten inintal. Ni altepet mopantiyaya nechca nopa hueyat Quebar. Huan nimosehui campa inijuanti mosehujtoyaj huan nopona nimocajqui chicome tonati. Nimomajmatiyaya huan amo nijmatiyaya taya monequi nijchihuas.

TOTECO quitali Ezequiel quej tamocuitahuiquet para israelitame (Ez 33:1-9)

¹⁶ Huan quema tanqui nopa chicome tonati, TOTECO techilhui: ¹⁷ “Tacat, na nimitztalijtoc quej titamocuitahuiquet ten israelitame. Huajca quema tijtacaquilise se camanali ten na, monequi nimantzi tiquinyolmelahuas por na. ¹⁸ Quema niquinilhuis masehualme cati fiero ininemilis para temachti monechcahuia para miquise; pero ta amo tiquinilhuis nocamanal para ma moyolcuepaca ten inintajtacol para noja itztose, huajca inijuanti miquise por inintajtacolhua, pero elis ta mocahuil quema nimitztajtantis cuenta por inimiquilis. ¹⁹ Pero sinta ta tiquinyolmelahuas para fiero ininpantis sinta amo moyolcuepase huan inijuanti quisenhuiquulise tajtacolchihuase, yon amo quinequise moyolcuepase, huajca temachti miquise por inintajtacol, pero ta tijmanahuis monemilis pampa tijchijqui cati nimitzilhui. ²⁰ Sinta se cuali masehuali pehua quichihua cati fiero, huelis nijtalis se taquetzti para ya para ica ma moyolcuepa. Pero sinta amo tijyolmelahuas, yaya miquis ipan itajtacolhua huan amo aqui quielnamiquis nopa cuali tamanti cati quichijqui achtohuiya. Pero ta nimitztajtantis cuenta por imiquilis pampa amo tijyolmelajqui. ²¹ Pero sinta ta tijyolmelahuas para ma moyolcuepa huan yaya nelia moyolcuepas, huajca yaya quisenhuiquulise itztos huan ta nojquiya tijmanahuis monemilis ten tazacuilitlisti.”

Ezequiel mocajqui se nonotzi

²² Huan teipa TOTECO sempa quitali imax ipan na huan techilhui: “Xiya ipan nopa tamayamit huan nopona nicamanaltis mohuaya.” ²³ Huajca nimoquetzqui huan niyajqui, huan nopona nojquiya niqitac itatanex Toteco. Huan eliyaya san se ica nopa cati achtohuiya niqitac nechca nopa hueyat Quebar. Huan nihuetzqui talchi ica noxayac.

²⁴ Huan Itonal Toteco calajqui ipan na huan techquetzqui. Teipa nechcamanalhui huan techilhui: “Xiya, xicalaquiti ipan mochaj huan ximocaltzacua. ²⁵ Huan na nijchihuas para ma mitzilpica ica lazo huan quej nopa ayecmo huelis tiquisas. ²⁶ Huan nijchihuas para monenepil ma pepechihui ipan mocamachal huan timocahuas quej se cati amo hueli camanalti. Huan amo tihuelis tiquinajhuas ni masehualme pampa tahuel mosisinaj. ²⁷ Pero sesen huelta quema nijnequis nimitzmacas se camanali, nijtojtomas monenepil huan nimitzchihuas xicamanalti, huan tiquinilhuis para na, niDIOS Cati Más Nijpiya Tanahuatili, niqijtohua huan teipa tiquinilhuis nopa camanali cati nimitzmacatoc. Huan cati quinequise quitacaquilise nopa camanali, ma quitacaquilica; huan cati amo quinequise quitacaquilise, ma amo quitacaquilica pampa inijuanti tahuel mosisinaj.

4

Ezequiel tayolmelahuas para qitanise Jerusalén

¹ “Huan ama, tacat, xijcui se hueyi soqui tabique huan xijtali moixpa. Huan ipani xiquixcopina nopa altepet Jerusalén. ² Teipa xiquixcopina soldados quej quiyahualojtoque nopa altepet. Huan xiquixcopina se tamontomit tali cati ipan tejcose nopa tatehuiani para huelis quipanose itepa nopa altepet para calaquise. Huan nojquiya xiquixcopina tomahuac cuahuit

ica lazos para ica quicoyonise nopa tepamit. ³ Teipa xijcui se teposti cati huehueyac, patahuac huan tilahuac huan xijtali tatajco ten ta huan nopa altepet quej elisquia se tepamit. Huan ta ximotali iixmelac huan xijchihua quej elisquia tijtehuía nopa altepet quej quichihuase inincualancaitacahua. Nochi ya nopa eltoc se tanextili para nopa israelitame para quinnextilis ten panos.

⁴ “Teipa ximoteca ica moelchiqui ten moarraves huan xijpixto mopani inintajtacolhua israelitame nochi tonali quema quej nopa tiitztos. ⁵ Huan quej nopa tiitztos huan tijpixtos inintajtacolhua para 390 tonali. Elis se tonali para sesen ten nopa 390 xihuit ten inintajtacolhua. ⁶ Quema ticaxitis, teipa ximotecas ica moelchiqui cati monejmat para 40 tonali para tijnextis quesqui xihuit huejcahuas inintatzacuiltl nopa israelitame cati ehuaní tali Judá. Sesen tonali quiixnextis se xihuit.

⁷ “Huan tijsenhuiquilis tiquixnextis quenicatza quitzquise altepet Jerusalén quema timotectoc ipan monejmat. Xijxolohui moajcol huan momax para quiixnextis para nimantzi hualase cati quitehuise nopa altepet ica miyac chichahualisti. Huan xitayolmelahua taya panos. ⁸ Huan na nimitzilpis ica lazos para amo tihuelis timocuepas ica seyoc lado hasta ya ticaxitijtos nochi nopa tonali cati monequi para titajyohuis.

⁹ “Xiya xijcui trigo, cebada, et huan avena huan nojquiya habas huan nopa siltic et. Huan nochi xijtali san sejco ipan se comit. Huan ipan nopa 390 tonali quema timotectos ica moarraves, xijcua pantzi cati tachijchihuali ica ni tamanti. ¹⁰ Motacualis cati tijcuas monequi elis tatamachihuali huan quipiyas nechca 220 gramos letica para se tonal. Huan tijcuas se quentzi ten nopa tacualisti ipan nopa horas ipan se tonali cati na nimitzilhuis. ¹¹ Huan nopa at cati tiquis nojquiya monequi elis tatamachihuali huan san huelis tiquis se tajco litro at para se tonal. Nojquiya tiquis moa ipan nopa horas ipan se tonali quema na nimitzilhuis. ¹² Mojmosta xijcualtali nopa harina para tijchihuas pantzi ten cebada cati tiquicxitis san ipan cuajnexti. Huan tiquicxitis iniixpa nochi nopa masehualme ipan tit cati tijchihuas ica masehual cuitat cati huactoc. Huan quej nopa tijcuas nopa pantzi.”

¹³ Huan TOTECO quiijto: “Quej nopa tijchihuas para tijnextis quenicatza quicuase pantzi cati nempolijtoc ipan sequinoc talme campa niquintitanis nopa israelitame para ma itztotij quej seyoc tali ehuaní.”

¹⁴ Pero na niquilhui: “¡Ay TOTECO Cati Más Tijpiya Tanahuatili! Amo quinamiqui nijtequihuis masehual cuitat. Ipan nochi nonemilis amo quema nimochijtoc amo nitapajpactic ica tamanti cati soquiy moixpa. Hasta quema niconetzi huan hasta ama ni tonali, amo quema nijcuajtoc se tapiyali cati mijqui ica cocolisti, o cati cocojtoc, o cati quitzontamilti seyoc tapiyali. Huan amo quema nijcuajtoc se tapiyali cati totanahuatil quiijtohua ma amo tijcuaca.”

¹⁵ Huajca TOTECO techilhui: “¡Cualtitoc! Huajca nimitzcahuilis tijtequihuis huacax cuitat huan amo masehual cuitat.”

¹⁶ Huan teipa techilhui: “Tacat, cati tijchihuas quiixnextis para na nijchihuas para amo oncas tacualisti ipan altepet Jerusalén. Huan inintacualis quintamachihuilise ica miyac cuidado huan quicuase ica tequipacholi. Huan nopa at nojquiya quitamachihuase huan quise ica hueyi majmajti pampa tantiyas. ¹⁷ Na nijchihuas para ma amo onca tacualisti, yon at, huan san motachilise se ica seyoc ica majmajti. Huan por inintajacol, inintacayohua nenpolijtiyase masque noja yoltoque.”

5

Se tanextili ten nopa tatzacuiliti cati huala

¹ Huan teipa TOTECO techilhui: “Tacat, ama xijcui se macheta cati nelía tatequi huan xijtequihui quej elisquia se navaja cati quitequihuía se texinquet. Huan ica ya nopa xijtequi motzonal huan motentzo. Teipa xijcui se balanza huan xijtamachihua nopa motzonal ica eyi tamontomit. ² Xijcui se ten nopa eyi tamontomit ten tzoncali huan xijtali tatajco ten nopa mapa campa tiquixcopintoc altepet Jerusalén. Huan quema ya tantos motaijyohuilis, xijtati nopa tzoncali. Huan seyoc ten nopa eyi tamontomit ten tzoncali, xiquijtzelo campa hueli ipan nopa mapa huan teipa xijhuejhuelo ica se macheta. Huan nopa tamontomit ten tzoncali cati mocahua xiquijtzelo ajacatipa, pampa ica nomacheta niqinquixtis nopa masehualme huan niquinsemanas campa hueli. ³ San xicajocui se ome ten nopa tzoncali huan xiquilpi iyecapa moyoyo. ⁴ Teipa xijcui se ome ten nopa tzoncali cati ticajotoc huan xiquinmajcahua ipan nopa tit para ma tataca. Huan ten nopona quisas se hueyi tit cati quintatis nochi israelitame.

⁵ “Huan na, niDIOS Cati Más Nijpiya Tanahuatili, niqijtohua: Nochi ya ni cati tijchihuas quixnextía cati ininpantis nopa masehualme ten altepet Jerusalén. Na nijtalijtoc tali Israel tatajco nochi talme huan niquintali nopa sequinoc talme yahualtic. ⁶ Pero nopa masehualme ipan Jerusalén quitahuelcajtoque notanahuatili huan quichijtoque cati más fiero que nopa masehualme ipan sequinoc altepeme huan talme cati mocahuaq nechca. Amo quinequiyayaj quitepanitase nopa tanahuatilme cati niquinmacac para quichihuase.

⁷ “Huajca xiquinilhuiti para na, niDIOS Cati Más Nijpiya Tanahuatili, niqijtohua: Pampa amo quinequiyayaj quineltoque notanahuatilhua huan noleyas huan quichijtoque cati más fiero que nopa sequinoc masehualme cati itztoque ininechca, ⁸ na niDIOS Cati Más Nijpiya Tanahuatili, nimochihuas niinincualancaitaca. Huan niquintatzacuilitis huan quintachilise nochi nopa masehualme ten nopa sequinoc talme. ⁹ Huan pampa quinhueyichijtoque teteyome, niquintatzacuilitis ica se tatzacuiliti cati tahuel fiero, cati amo quema nijchijtoc ica sequinoc huan amo quema sempa nijchihuas. ¹⁰ Nochi mayanase ipan Jerusalén hasta sequij tetajme quincuase ininconeuhua huan nojquiya sequij coneme quincuase inintatahua. Huan cati mocahuase yoltoque campa injuanti, niquinsemanas huan niquintitanis ipan campa hueli talme para ma itztotij quej seyoc tali ehuaní.

¹¹ “Na niDIOS Cati Más Nijpiya Tanahuatili huan ya ni cati niqijtohua para Jerusalén ehuaní: Nimechtzontamiltis pampa anquichijtoque amo tapajpactic notiopa. Anquincalaquijtoque teteyome huan taixcopincayome nopona huan nopona anquichijtoque miyac tamanti cati fiero. Huajca amo nimechtasojtas, yon amo nimechcahuilis ancholose. ¹² Nimechtalis nochi amojuanti ipan eyi pamit. Cati itztoque ipan nopa achtohui pamit miquise ica mayanti huan icaocolisti. Ipan nopa ompa pamit nochi miquise ipan tatehulisti inimaco inincualancaitacahua. Huan cati itztoque ipan nopa expa pamit na niqinquixtis ica macheta huan niquinsemanas para ma yaca ipan campa hueli talme. ¹³ Huan ica ya nopa tamis nohueyi cualancayome. Huan quema ya nimoyoltalijtos, nochi israelitame nopona quimachilise para na, niDIOS, cati niqincamanalhuyaya huan para melahuac nitetatzacuilitia quej niqijtohua.

14 “Na nijtamisosolos altepet Jerusalén huan nochi amojuanti cati nopona anitztoque. Huan nochi masehualme ipan nochi talme cati amechyahualo-
jtoque huan nochi cati panose nopona quuitase para tamitasosolijtoc huan
amechpinajtise. 15 Huan masehualme ipan nochi talme cati amechyahualo-
jtoque san amechhuetzquilise, amechtaijilhuise huan amechpinajtise. Huan
tahuel nimechtaijyohuiltis para nochi masehualme ma quuitase quenicatza
tahuel chicahuac niquintatzacuiltia masehualme ipan se tali ica nohueyi
cualancayo. Na niDIOS niquijtojtoc.

16 “Nimechtitanilis se mayanti cati elis tahuel chicahuac para amechmic-
tis. Quena, nopa mayanti más mohueyilis hasta ayecmo oncas yon se pan-
payaxti para anquicuase hasta anmiquise. 17 Huan nojquiya nimechtitanilis
tecuanime para quincuase amoconehua. Huan nimechtitanilis cocolisti cati
temictia huan nimechtitanilis amoculancaitacahua cati amechmictise ipan
tatehuilisti. Na niDIOS niquijtojtoc.”

6

TOTECO quisosolos nopa piltiocaltziti ipan tepeme

1 Huan TOTECO sempa nechcamanahui huan techilhui: 2 “Tacat, xi-
tachiya ica campa eltoc nopa tepeme ipan tali Israel huan xiteyolmelahua
taya ininpantis. 3 Huan quej ni xiquijto: ‘Xitacaquilica taya ininpantis
nochi ni tepeme, tachiquilme, hueyame huan tamayame ipan tali Israel.
Ya ni cati na, niDIOS Cati Más Nijpiya Tanahuatili, niquijtohua. Na niDIOS
nijchihuas ma huala tatehuilisti ipan nochi tepeme para nijsosolos nochi
piltiocaltziti. 4 Na niquintamisosolos nochi taixpame ten tacajchualisti
huan nojquiya nopa taixpame campa israelitame quinpopochhuiyayaj inin-
tetyohua huan inintaixcopincayohua. Huan niqinmictis nopona iniixpa
inindioses. 5 Huan niquintalis inintacayohua israelitame iniixpa nopa taix-
copincayome huan teteyome, huan iniomio niqinsemanas yahualtic nopa
taixpame. 6 Ipan campa hueli altepet campa israelitame mocahuase para itz-
tose, niqinsosolos nochi piltiocaltziti huan taixpame huan teteyome huan
taixcopincayome ten tonati huan tamanti cati injuanti quinchijchijtoque
para quihueyichihuase. Nochi niquintamiltis. 7 Huan quema tahuel miyac
israelitame huetzise mictoque amoixpa, anquimachilise para melahuac na
niDIOS.

8 “Pero na nijchihuas para seqij nomasehualhua ma mocahuaca
yoltoque para itztotij ipan campa hueli tali ipan taltipacti. 9 Huan quema
inijuanti ya itztose ipan campa hueli talme quej seyoc tali ehuan, techel-
namiquise. Huan israelitame quuitase quenicatza techcocojtoque quema
quihueyichihuayayaj teteyome huan taixcopincayome huan amo na. Quiel-
namiquise quema nechcajtejque quej se ahuilnenca sihuat quicahua ihue-
hue pampa iixteyol nochipa quitemohua seyoc para ica momecatis. Quej
nopa eltoc iniixteyol israelitame san quintemohuaj teteyome huan taix-
copincayome para nechcahuase na huan inihuaya momecatise. Huan
niqinichihuas para sequinoc ma quinijiyaca huan quinpinahuaca por
nochi nopa fiero tamanti cati quichijtoque. 10 Huan huajca israelitame
quimatise para na niDIOS, huan quimachilise para amo san niqincaj-
cayahuayaya quema niqinymelajqui para niquintitanilis nochi ni taijy-
ohuilisti.”

11 Huan TOTECO Cati Más Quipiya Tanahuatili techilhui: “Xitahuejchihua
ica majmajti huan xitatejtzona ica moicxi talchi huan xitzajtzi ica miyac
tequipacholi por nochi tajtacoli cati quichijtoque israelitame ipan Jerusalén

pampa ama miquise ica tatehuilisti, mayanti huan cocolisti. ¹² Nopa israelitame cati itztose huejca ipan sequinoc talme miquise ica cocolisti. Huan cati mocahuase ipan inintal miquise ipan tatehuilisti. Huan cati noja mocahuase yoltoque miquise ica mayanti. Huan quej nopa tamis nohueyi cualancayo cati nijpiyayaya ica injuanti.

¹³ “Huan quema inimijahua tepejtose tatajco ten ininteteyohua, huan yahualtic inintaixpahua, huan ipan sesen tepet, ipan sesen tachiquili, huan tatzinta ten sesen cuahuit cati xoxohuic huan tatzinta ten sesen ahua cuahuit campa quitencahuayayaj copali para ininteteyohua, huajca quimatise para na niDIOS. ¹⁴ Quena, niquintzontamiltis huan niquninxpolihuiltis nochi nopa altepeme huan nochi lugares campa itztoque israelitame ten campa nopa huactoc tali cati eltoc ica tatzinta hasta tali Diblat cati eltoc ica huejcapa. Huan huajca israelitame quimachilise para na niDIOS.”

7

Monechahuía itamiya amotal

¹ Huan TOTEKO sempa nechcamanalhui huan techilhui: ² “Tacat, na niamoTECO Cati Más Nijpiya Tanahuatili quej ni niqunilhuía tali Israel ehuaní. Ya ajsico itamiya ni tali. Ya ajsic hora para nijtamisosolos. Sinta tijtachilis ica norte o ica sur, o ica campa hualquisa tonati o ica campa oncalaqui tonati, nochi ya eltoc para nijtamisosolos. ³ Ayecmo onca netapojpolhuili. Ama nijnextilis ni tali nochi nohueyi cualancayo. Nimechtajtanis cuenta anisraelitame por nochi nopa fiero tamanti cati anquichijtoque. ⁴ Amo nimechtasojtas, yon amo nimechcahuilis xicholoca. Nimechtatzacuiltis huan senquisa nimechtaxtahuis quej quinamiqui por cati anquichijtoque ica teteyome. Huan huajca anquimatise para san na niDIOS.

⁵ “Na niDIOS niqijtohua para nimechmacas ica se mayit huan teipa ica seyoc hasta amo teno mocahuas. ⁶ Ya monechahuía itamiya ni tali huan hualas amopani miyac tatzacuilti. Monechahuía nopa tonali para miyac tacame amechtamisosolose. ⁷ Monechahuía hora ten tasololisti para amojuanti cati anitztoque ipan nopa tali. Quena, ya ajsitinemi nopa tonali cati tahuel fiero quema antaijyohuise. Elis se tonali ten choquisti huan tahuejchihualisti. Amo oncas paquilsti ipan tepeme. ⁸ Nimantzi nimechtatzacuiltis ica nohueyi cualancayo por nochi tamanti hasta nimoyoltali huan ayecmo nicalantans. Nimechtajtanis cuenta ten quenicatza anmonejnemiltijtoque huan nimechtatzacuiltis por sesen fiero tamanti cati anquichijtoque ica teteyome. ⁹ Amo nimechtasojtas, yon amo nimechcahuilis xicholoca. Nimechtatzacuiltis por nochi cati fiero anquichijtinentoque ica taixcopincayome. Huan huajca anquimachilise para na niDIOS cati nimechtatzacuiltía.

¹⁰ “¡Xiquita, ya ajsico nopa tonali! ¡Ya ajsico nopa hora para amechtamisosolose! Amotajacolhua ya techyolajsitoc. ¹¹ Pampa tahuel anquichijtoque cati fiero, nochi anisraelitame anquiselise cati quinamiqui. Huan amo mocahuas yon se israelita cati fiero inemilis, yon amo mocahuas yon se cati mohueyimati huan cati tacajcayahua. Huan nochi iniricojyo quihuicase inincualancaitacahua.

¹² “Quena, ya ajsico nopa tonali. Huajca yon se tajoquet ayecmo huelis paquis ica cati quicojtoc huan yon se tanamacaquey ayecmo huelis mocuesos pampa quipolo tomi pampa na niquintatzacuiltis senquisa nochi nopa

masehualme ica nocualancayo. ¹³ Huan masque se tanamacaquet mocahuas yoltoc, ayecmo tanamacas sempa pampa na niDIOS niquijtojtoc ten amopantisi huan amo mopatas. Nimechtatzacuiltis nochi amojuanti huan amo aqui cati tajtacolchijtoc huelis quimahanuis inemilis.

¹⁴ "Israelitame quipitzase tapitzali para ma mocualtica inisoldados, pero amo aqui quisas para tatehuis pampa nocualancayo motalijtos ipan nochi injuanti. ¹⁵ Inincualancaitacahua quinmictise ica macheta cati quisase calixpa ten nopa tepamit ten nopa altepet. Cati itztoque ipan inimilhua nojquiya miqwise ipan tatehuilisti. Huan cati mocahuase ipan altepet Jerusalén miqwise ica mayanti huan cocolisti. ¹⁶ Huan nopa quentzi masehualme cati quisase huan yase cuatita para mochololtise, mocahuase iniselti quej se paloma huan sesen injuanti mochoquilis por itajtacolhua. ¹⁷ Yon se israelita masehuali ayecmo quipiyas chichahualisti ipan imax. Huan nochi tancuahuihuipicase ica majmajti. ¹⁸ Israelitame moyoyontise ica yoyomit cati fiero para quixnextise inintequipachol. Nochi inintacayo tahuel huihuipicas. Inixayac elis chichiltic ica pinahualisti huan motamitejtequilise inintzoncal huan motzonhuatanise pampa mocuesose por inintajtacolhua.

¹⁹ "Israelitame quitepehuase inintomi ten plata huan oro ipan calles quej elisquía tasoli. Amo quinpalehuis para momanahuse quema ajsis nohueyi cualancayo niDIOS. Huan nopa tomi amo quintamacas, yon amo quinixhuitis pampa injuanti huetzque ipan tajtocoli por nopa tomi cati quipixque. ²⁰ Israelitame mohueyimatiyayaj ica miyac tamanti ten oro para moyectalise. Huan quitequihuijque inioro para quinchihuase taixcopincayome huan teteyome. Yeca ama, nochi nopa oro nijchihuas para quijiyase huan quiiitase quej tasoli. ²¹ Na niquinmacas nochi inioro nopa masehualme cati sequinoc tali ehuan huan cati fiero ininemilis. Injuanti quichtequise nopa oro huan nopa plata huan quichihuase amo tapajpactic nochi cati tatzejtzeltolitic. ²² Huan na nimohuejcatalis ten notiopa quema hualase nopa tachtequini. Huan niquincahuilis ma quimahuispoloca notiopa calijtic cati más ixtacatzi huan tzejtzeltolitic. Huan quiquixtise nochi tamanti cati pajpatiyoc cati eltoc nozona tiopan calijtic huan quichihuase nochi tiopan calijtic amo tapajpactic noixpa.

²³ "Xijcualtica se tepos cadena para quihuicase nomasehualhua pampa ipan nochi nopa tali tahuel onca esti cati quitoyajtoque miyac temictiani huan ipan altepet Jerusalén onca miyac tatehuilisti. ²⁴ Huajca na niquinhuilicas masehualme cati más mosiniáj ten nochi sequinoc talme ipan taltipacti. Huan injuanti moaxcatise nochi calme ipan altepet Jerusalén. Huan nojquiya quitamisosolose nopa tepamit cati tilahuac cati quiyahualohua nopa altepet cati ica nochi israelitame mohueyimatiyayaj. Huan nopa tacame cati niquintitanis quimahuispolose notiopa. ²⁵ Huan quema hualas nopa tasololisti, israelitame quitemose tasehuilisti, pero amo quipantise. ²⁶ Hualas ininpani israelitame se tequipacholi huan teipa seyoc, huan teipa más miyac tequipacholi. Huan quicaquise para hualahuij ni soldados huan teipa quicaquise para hualahuij sequinoc. Huan quinequise quipantise se tajtolpanextijquet para quipiyas se tanextili ten na niDIOS pero amo quipantise. Totajtzitzi amo huelise quinmachtise pampa ya itztoque huejca ten nopa tanahuatilme. Huan huehue tacame amo huelise quinconsejomacase. ²⁷ Nopa tanahuatijquet huan nopa tayacanani amo huelise quinpalehuise pampa nochi itztose ipan se hueyi tequipacholi por inintajtacolhua. Huan nochi israelitame mochoquilise pampa ayecmo quimathise taya quichihuase. Nochi san huihuipicase ica majmajti. Huan na nijhuilicas ininpani nochi nopa tamanti amo cuali cati quinchihuilijtoque sequinoc. Quena, sesen

inijuanti nijtaxtahuis senquisa quej quinamiqúi ica cati quichijtoc. Huan quej nopa nochi quimatise para na niDIOS.”

8

Quinhueyichihuaq teteyome ipan itiopa TOTECO

¹ Ipan macuili itequi nopa chicusempa metzti ipan toisraelita calendario * quema Tanahuatijquet Joacim yahuiyaya para chicusase xihuit para quiquixtijtoyaj huan quihuicatoyaj seyoc tali, na nimosehujtoya ipan nochaj inihuaya nopa huehue tacame ten tali Judá. Huan nimantzi TOTECO Cati Más Quipiya Tanahuatili techitzqui ica imax. ² Huan nitachixqui huan niqúitac se tamanti cati nesiyaya quej se tacat. Huan ten itzínquehta para tatzinta nesiyaya quej se tilelemecti. Huan ten itzínquehta para huejcapa petaniyaya quej quema quitatíaj nopa teposti cati itoca bronce. ³ Huan yaya quixitajqui se tamanti cati nesiyaya quej imax huan techitzqui ipan notzoncal. Huan Itonal TOTECO techtananqui ajacatipa huan techhuicac ipan se tanextili ten Toteco Dios hasta altepet Jerusalén. Huan techquetzqui campa nopa caltemit ica norte ipan itiopa TOTECO, campa eltoc nopa hueyi teteyot cati TOTECO taniel quicualancaita. ⁴ Huan nimantzi nozona niqúitac itatanex Dios cati Toteco tiisraelitame, huan nopa tanextili eliyaya san se ica nopa tanextili cati achtohuiya niqúitac ipan nopa tamayamit.

⁵ Huan Toteco techilhui: “Tacat, xitachiya ica norte.” Huaqca nitachixqui ica norte huan nozona campa eltoya nopa caltemit para calaquij campa nopa taixpamit niqúitac nopa teteyot cati taniel quicualancamaca TOTECO.

⁶ Huaqca techilhui: “Tacat, ¿tiqúita taya quichihuaq ne israelitame? ¿Amo notita para quichihuaq huejhueyi tajtocoli para na nimohuejcatali ten notiopa? Pero xihuala huan nimitznextilis sequinoc tamanti cati noja más huejhueyi huan más fiero.”

⁷ Teipa techhuicac campa itamapayo nopa tiopamit, huan nozona niqúitac coyontoc nopa tepamit. ⁸ Huan techilhui: “Xijcoyoni achi más ne tepamit.”

Huaqca na nijcoyoni achi más huan nijpanti se caltemit para se cuarto cati motatijtoc. ⁹ Teipa techilhui: “Ama xicalaquí huan tiqúitas tamanti cati pano fiero cati quichihuaq nozona.” ¹⁰ Huaqca na nicalajqui huan niqúitac ipan nochi nopa tepamit calijtic quinixcopintoyaj miyac tamanti cohume huan miyac tamanti tapiyalme cati mohuahuatatzaj talchi huan cati taniel fiero huan amo tapajpactique iixpa TOTECO. Huan nojqúiya quinixcopintoyaj nopa teteyome huan taixcopincayome cati nopa israelitame quinhueyichihuaqayaj. ¹¹ Huan nozona itztoyaj nopa 70 huehue israelita tacame cati quinyacanaj nochi israelitame huan tatajco nopa tacame itztoya Jaazánias, icone Safán. Huan sesen quipixtoya se ticomit imaco huan quinpopochhuiyayaj huan quinhueyichihuaqayaj nopa teteyome. Huan inintzonta nesiyaya quej se hueyi mixti ten poci.

¹² Teipa TOTECO techilhui: “Tacat, ¿tiqúita taya quichihuaq ixtacatzí ipan tzintayohuilot ne huehue tacame cati quinyacanaj israelitame? Nochi quinhueyichihuaq teteyome ipan nopa cuartos ten teteyome huan taixcopincayome. Huan quijjtohuaq: ‘TOTECO amo techita pampa ayecmo aquí nica.’” ¹³ Huan teipa TOTECO techilhui: “Xihuala huan nimitznextilis tajtocoli cati quichihuaq cati noja más huejhueyi.”

* 8:1 8:1 Ipan 17 septiembre 592 a.C. ipan tocalendario ten ama.

¹⁴ Huan techhuicac campa nopa caltemit ica norte para calaquisé ipan itiopa Toteco. Huan nozona niqitac itztoyaj miyac sihuame cati qui-choquiliyayaj nopa teteyot cati itoca Tamuz†.

¹⁵ Huan teipa TOTECO techilhui: “¿Tiquitac ya nopa? Xihuala huan tiqitas tajtacoli cati noja más fiero.”

¹⁶ Huaica techhuicac ipan nopa tamapamit cati eltoc tiopan calijtic. Huan nozona campa caltemit, tatajco ten nopa calixpamit cati más calijtic huan nopa taixpamit ten bronce, itztoyaj quej 25 israelita tacame cati tachixtoyaj ica campa hualquisa tonati. Nopa tiopamit quicajtoyaj ica iniica. Huan moixtapaçhojtoyaj talchi quihueyichihuayayaj ne tonati.

¹⁷ Huan TOTECO techilhui: “Tacat, ¿tiqitac ya ni? Nopa Judá ehuan moilhuiá para amo taixpanoj quema quichihuj ni fiero tajtacoli. Injuanti ayecmo techtacaquilíaj huan yeca techchihuj para noja más ma nicualani huan ma niquintatzacuiliti. ¹⁸ Quena, chichahuac niquintatzacuilitis ica nochi nocualancayo. Amo niquintasojtas, yon amo niqincahuillis cholose. Masque chichahuac techtazajtzilise para niquintasojtas, amo niquintacuilitis.”

9

Nopa tatzacuiliti cati quiselise Jerusalén ehuan

¹ Teipa TOTECO techtazajtzili chichahuac ipan nonacas huan quiijo: “Ya ajstihualahuj nopa tacame cati quintzontamiltise ni altepet ehuan pampa ya niqinmactilijtoc ni altepet inimaco. Huan sesen ten nopa tacame quihualicas imaco nopa teposti cati ica tasosolos.”

² Huan nimantzi niqunitac cati nesiyayaj quej chichuaseme tacame huan hualayayaj campa nopa caltemit cati huejcapa cati eltoc ica norte. Huan sesen ten injuanti quihualicayaya imaco se teposti para ica tasosolos huan tetzontamiltis. Huan tatajco injuanti hualayaya se tacat cati moyoyontijtoya ica nopa yoyomit lino cati más cuali huan ipan itzinqueçta quihualicayaya se tamanti quej cati para ipan quitecaj tinta tajcuilohuani. Huan nochi injuanti calajque ipan nopa tiopamit huan moquetzatoj nechca nopa taixpamit ten bronce. ³ Huan itatanex Toteco Dios yaya cati toTeco tiisraelitame motananqui ten campa eltoya tatajco nopa querubines cati itztoyaj más tiopan calijtic. Huan itatanex motalito campa icalteyo nopa tiopamit.

Huan TOTECO quinotzqui nopa tacat cati quihuicayaya itzinqueçta nopa tamanti quej cati ipan quitecaj tinta tajcuilohuani. ⁴ Huan quilhui: “Xinejnemi ipan nochi calles ipan altepet Jerusalén huan xiquintalili se marca inincuaixco nochi nopa masehualme cati chocaj huan mocuesohuj por nochi tajtacoli cati quiitaj sequinoc quichihuj campa hueli.”

⁵ Teipa nijcaqui TOTECO quinilhui nopa sequinoc cati nesiyayaj para tacame: “Xiyaca itepotzco ne tacat ipan nochi nopa altepet huan xiquinmictica nochi masehualme cati amo quipiyaj nopa marca inincuaixco. Amo xiquintasojtaca yon amo xiquincahuilica ma choloca. ⁶ Xiquinmictica huehuentzitzitzi, telpocame, ichpocame, coneme huan sihuame. Pero cati quipixtoque nopa marca, amo xiquinmictica. Huan xijpehualtica xiquinmictica

† **8:14** 8:14 Masehualme ipan sequinoc talme moilhuyayaj quineltoçayayaj para nopa dios Tamuz miquyaya sesen xihuit quema amo taahuetziyaya huan nochi huaqui. Huan monequiyaya para nochi ma quiçoquilica para moyolcuis. Teipa quema pehuayaya taquiyahui huan moseliltíaj cuame, moilhuyayaj para Tamuz moyolcuitoya. Nojquiya moilhuyayaj para Tamuz quinpalehuá sihuame para coneçiyase.

nica ipan notiopa.” Huajca inijuanti pejque quinmictiaj nopa 70 huehue tacame cati itztoyaj nozona ipan tiopamit.

⁷ Teipa TOTECO quinilhui nopa chucaseme tacame: “Nochi nopa mijcatzitzitzi xiquinmontonoca ipan nopa tamapamit para xijmahuispoloca ni tiopamit. Teipa xiquisaca.”

Huajca inijuanti quisque huan pejque temictiaj ipan nopa altepet.

⁸ Huan quema inijuanti noja temictiyayaj, na niEzequiel nimocajqui noseltitzitzi. Huajca nimotancuaquetzqui huan nimohuijtzonqui ica noxayac hasta talchi huan ica miyac tequipacholi niqijto: “TOTECO, ta Cati Más Tijiya Tanahuatili, ¿ticualantoc ica Jerusalén ehuan hasta tiqintzontamiltis nochi israelitame cati noja mocahuaj?”

⁹ Huan TOTECO techilhui: “Nopa masehualme ten tali Israel huan ten tali Judá quichijtoque tajtacoli cati más fiero. Ipan nochi ni tali tahuel temictijtoque. Huan ipan ni altepet mojmosta quichijtoque tamanti cati amo xitahuac. Quiijtohuaj para na niDIOS nijtahuelcajtoc ni tali huan amo niqita cati quichihua, pero amo cana. ¹⁰ Huajca amo niqintsojtas, yon amo niquincahuilis ma choloca. Chicahuac niqintzatzacuiltis quej quinamiqui ica nopa fiero tamanti cati quichijtoque.”

¹¹ Huan nimantzi nopa tacat cati quipixtoya ipan itzinquechta nopa tamanti quej cati ipan quitecaj tinta tajcuilohuani huan cati moyoyontijtoya ica yoyomit ten lino, ajsico huan quiijto: “Ya nijtamichijtoc nochi cati technahuati ma nijchihua.”

10

Itatanex Toteco Dios quicajtejqui nopa tiopamit

¹ Teipa sempa nitachixqui huan ipan nopa tamanti cati eltoya quej ilhuicacti cati eltoya inintzonta nopa ilhuicac ehuan cati inintoca querubines, niqitac cahuaniyaya se hueyi tet cati yejyetzitzi quej nopa azultic tet cati itoca zafiro. Huan nesiyaya nopa hueyi tet quej elisquía se siyaj para se tanahuatijquet. ² Huan TOTECO quinoztzqui nopa tacat cati moyoyontijtoya ica yoyomit ten lino huan quiilhui: “Xiya huan xicalaqui inintzala nopa ruedas cati momalacachohua, tatzinta ten nopa querubines huan xijcui ica momax se quentzi ticoli cati xahuantoc cati eltoc tatajco ten nopa querubines. Huan xiquijtzelo nopa ticoli ipan nopa altepet.”

Huan quema noja nijtachiliyaya, nopa tacat calajqui huan quichijqui quej TOTECO quinahuatijtoya. ³ Huan quema calajqui nopa tacat, nopa querubines moquetztoyaj ica tatzinta ten nopa tiopamit huan itatanex TOTECO quitemitiyaya nopa tamapamit cati eltoc tiopan calijtic. ⁴ Huajca itatanex TOTECO motananqui ten inintzonta nopa querubines huan motalito itzonpac nopa tiopamit icalte. Huan quej nopa, nopa tiopamit temic ica nopa mixti ten itatanex huan nojquiya nopa tamapamit ten nopa tiopamit cahuaniyaya ica itatanex TOTECO. ⁵ Huan quema nopa querubines quiolinuyaj inieltapal, caquistiyaya hasta campa nopa tamapamit cati mocahua icalixpa tiopamit. Huan caquistiyaya quej itoscac Toteco Cati Quipiya Nochi Chicahualisti camanaltiyaya.

⁶ Quema TOTECO quinahuati nopa tacat cati moyoyontijtoya ica lino yoyomit ma yahui inintzala nopa querubines huan ma quicui nopa ticoli cati eltoc campa nopa ruedas, nopa tacat yajqui huan moquetzato nechca se ten nopa ruedas. ⁷⁻⁸ Huan sesen ten nopa querubines quipixtoya se tamanti quej elisquía imax itantita ieltapal. Huan se ten nopa querubines quixitajqui imax huan quicuic se quentzi ticoli xahuantoc cati eltoya tatajco

ten injuanti huan quitenqui ipan imax nopa tacat cati moyoyontijtoya ica lino yoyomit. Huan yaya quicuic huan yajqui.

⁹ Huan sesen ten nopa nahui querubines quipixtoya se rueda inechca huan nopa ruedas petaniyaya quej nopa yejyetzti tet crisólito. ¹⁰ Huan nochi nopa nahui ruedas cati eltoyaj nechca nopa nahui querubines nesiyayaj san se. Nesiyaya quej sesen nopa ruedas quipiyayaya seyoc rueda ica iijtic cati quicruzmacatoya. ¹¹ Nopa querubines hueliyayaj yahuij ica iniarraves, ininejmat, iniica o iniixpa huan amo monequiyaya moicancuepase para yase ipan seyoc lado pampa nochipa yahuiyayaj iixmelac se ixayac. ¹² Huan nochi nopa querubines huan nopa ruedas quinpiyayayaj ixtexolme campaa hueli. Nopa querubines quinpiyayayaj ixtexolme campaa hueli ipan inintacayo, inincuitapa, ipan iniicxi, ipan inimax huan ipan inieltapal. ¹³ Huan nijcajqui para nopa ruedas quintocaxtiaj “Ruedas cati Momalacachohuaj Chicahuac.” ¹⁴ Huan sesen querubín quipiyayaya nahui ixayac. Cati achtohui eliyaya se toro * ixayac, nopa ompa eliyaya quej se tacat ixayac, nopa expa eliyaya quej se León ixayac huan nopa najpa eliyaya quej se cuatojti ixayac.

¹⁵ Huan teipa nopa querubines motananque. Ni querubines eliyayaj nopa nahui cati yoltoque cati niquinitac achtohuiya nechca nopa hueyat Quebar. ¹⁶ Huan quema nopa querubines quitananque inieltapal para yase ajacatipa, nopa ruedas cati eltoya ininechca nojquiya motananque huan yajque inihuaya. Huan nopa ruedas amo quema mohuejcatalijque ten nopa cati yoltoque. Nochipa nejnemiyayaj san sejco. ¹⁷ Huan quema nopa querubines moquetzque, nopa ruedas nojquiya moquetzque pampa inintonal nopa querubines itztoyaj ipan nopa ruedas.

¹⁸ Huan teipa itatanex TOTECO motananqui ten campaa icalte nopa tiopamit huan yajqui motalito inintzonta nopa querubines. ¹⁹ Huan quema noja nijtachilijtoya, nopa querubines patantejque inihuaya nopa ruedas huan moquetzatoj campaa nopa caltemit cati eltoc ica campaa hualquisa tonati ipan itiopa TOTECO. Huan itatanex Toteco Dios yaya cati toTeco tiisraelitame, motalijtoya inintzonta.

²⁰ Ni nahui tamanti cati yoltoque huan cati eltapalejque eliyayaj injuanti cati achtohuiya niquinitac itantita Toteco Dios cati toTeco tiisraelitame nechca hueyat Quebar. Huajca niquinixmatqui para eliyayaj querubines. ²¹ Sesen ten injuanti quipiyayaya nahui ixayac, huan nahui ieltapal huan se tamanti itantita ieltapal cati nesiyaya quej imax se masehuali. ²² Huan inixayac eliyaya san se ica nopa nahui cati niquinitac nechca hueyat Quebar. Huan injuanti yahuiyayaj san xitahuac iniixmelac ica iniixpa.

11

Tatzacuilti para nopa tayacanani ten altepet Jerusalén

¹ Teipa Itonal TOTECO techtanangui huan techhuicac campaa nopa caltemit cati eltoc ica campaa hualquisa tonati ipan itiopa TOTECO. Huan nozona campaa caltemit niquinitac 25 tacame ten nopa altepet. Ome ten nopa tacame eliyayaj Jaazánias, icone Azur, huan Pelatías, icone Benaía, cati eliyayaj tayacanani ipan nopa altepet. ² Huan TOTECO techilhui: “Tacat, ya ni nopa huehue facame cati quisencahuaj taya tajtacoli quichihuase masehualme ipan ni altepet huan quinconsejomacaj para ma quichihuaca cati fiero. ³ Injuanti quinilhuáj masehualme: ‘Cuali tonali para tiquinchi-chihuase calme pampa nochi eltoc cuali para tojuanti. Toaltepe Jerusalén

* **10:14** 10:14 O querubín ixayac.

eltoc temachti quej se comit ten teposti huan techmanahuis ten nochi tamanti cati mahuililli. Huan tojuanti tuitzose temachti quej nopa nacat ipan nopa tepos comit.' Quej nopa quijtohuaj. ⁴ Huajca xiquincamanalhui nopa tacame ica na notequiticayo huan xiquinyolmelahua taya fiero ininpantis teipa."

⁵ Teipa Itonal TOTECO hualajqui ipan na huan techilhui ma niteyolmelahua ya ni: "Quej ni TOTECO amechilhuía nochi anisraelitame: 'Anmoilhuíaj para anitztoque temachti, pero amo neli. Na niquixmati amotalnamiquilis huan nijmati taya anmoilhuíaj. ⁶ Tahuel antemictijtoque huan nochi nopa calles anquintemijtoque ica mijcatziti. ⁷ Yeca na niDIOS Cati Más Nijpiya Tanahuatili nimechilhuía para nopa cuali tacame cati anquimictijque eltoyaj cati temachme quej nopa nacat ipan nopa comit, pero amojuanti, amo. Pampa na nimechquixtis huan nimechtojtocas ten ni altepet huan injuanti cati hualase amechmictise noixpa. ⁸ Na nimechhualicas ipan amojuanti nopa tatehuilisti cati amojuanti tahuel anquimacasiyayaj. Quej nopa niquijtohua na, niDIOS Cati Más Nijpiya Tanahuatili. ⁹ Nimechquixtis ten altepet Jerusalén huan nimechtemactilis inimaco nopa masehualme cati seyoc tali ehuaní. Injuanti niquintequihuis para nimechtatzacuiltis. ¹⁰ Injuanti amechmictise ica macheta. Huan anmiquise campa inepa tali Israel. Huan huajca anquimachilise para na niDIOS. ¹¹ Ni altepet melahuac amo amechmanahuis quej elisquía se comit ten teposti, yon amojuanti amo huelis anitztose nica ica temachili quej elisquía nacat. Pampa na nimechquixtis huan nimechtatzacuiltis hasta campa inepa tali Israel. ¹² Huan huajca anquimachilise para na niDIOS. Amojuanti amo anquitepanitayayaj notanahuatilhua huan san anquichihuayayaj nopa tajtacoli cati quichihuaj masehualme ipan nopa sequinoc talme cati mocahua nechca.'"

¹³ Quema noja niquincamanalhuiyaya ica itequiticayo Toteco huan niquinyolmelahuayaya cati ininpantis, mijqui Pelatías, icone Benaía. Huajca nimotancuaquetzqui huan nimoixtapacho talchi huan chicahuac nicananaltic huan niquijto: "TOTECO, ta Cati Más Tijpiya Tanahuatili, ¿tiquintzontamiltis nochi nopa quentzi israelitame cati noja mocahuaj?"

TOTECO quijto quichihuas seyoc yanquic camanal sencahuali

¹⁴ Huan TOTECO sempa nechcamanalhui para technextili amo quinsemnas nochi israelitame. Huan techilhui: ¹⁵ "Nopa masehualme cati itztoque ipan altepet Jerusalén camanaltij fiero ten moicnihua cati quinquixtijtoque huan quinhuicatoque ipan seyoc tali. Quijtohuaj para quinquixtijtoque huan itztoque huejca ten na, niiniDIOS, huan yeca niquinmacatoc injuanti cati mocahuaj ni tali. ¹⁶ Pero xiquinilhui para na, niiniDIOS Cati Más Nijpiya Tanahuatili, niquijtohua para masque niquinquixti ten inintal huan niquintitanqui ipan sequinoc talme ten ni taltipacti huan itztoque huejca para se talojtzi, na niitztos inihuaya quej se cali cati eltoc temachti para niquinmocuitahuis huan monequi techhueyimatise nochi tonali quema itztoque nozona. ¹⁷ Huan nojquiya xiquinilhui para niDIOS niquijtohua para sempa niquinhualicas ten nopa talme campa niquinsemantoc huan sempa niquinsejcotilis huan niquinaxcatis nopa tali Israel.

¹⁸ "Quena, injuanti mocuepase ipan inintal huan quinijcuenise nochi teteyome huan taixcopincayome cati achtohuaya quinhueyichihuayayaj nozona. Huan ayecmo teno mocahuas pampa quitamiltise nochi tamanti cati amo cuali. ¹⁹ Huan niquinmacas san se iniyolo huan niquinmacas se

inintonal cati yancuic. Huan iniyolo cati eltoya tetic quej tet, na niquinpatilis huan niquinmacas se iniyolo cati yamanic para ica techicnelise.

²⁰ “Huan injuanti quitepanitase notanahuatilhua huan quichihuase nochi cati niqijtojtoc. Huan quej nopa injuanti nelía elise nomasehualhua huan na nielis niiniDIOS. ²¹ Pero israelitame cati itztoque ipan altepet Jerusalén cati quinhueyichihuaq huan quichihuaj miyac tamanti cati fiero iniixpa teteyome huan taixcopincayome, na niquintaxtahuis quej quinamiqúi por nochi inintajtacolhua cati quichijtoque. Quej nopa na, niDIOS Cati Más Nijpiya Tanahuatili, niqijtohua.”

Itatanex Toteco mohuejcatali ten altepet Jerusalén

²² Huan teipa nopa querubines quipatajqe inieltapal huan motananque ajacatipa, huan nopa ruedas nojquiya yajque inihuaya. Huan itatanex Toteco Dios, yaya cati toTeco tiisraelitame, eltoya inintzonta nopa querubines. ²³ Huan quej nopa teipa itatanex TOTECO motananqui huan quicajte nopa altepet huan moquetzqui ipan nopa tepet cati eltoc quentzi ica campa hualquisa tonati ten nopa altepet.

²⁴ Huan teipa Itonal Toteco Dios techtananqui huan sempa techhuicac ipan tali Babilonia campa itztoyaj nopa sequinoc israelitame cati quin-quixtijtoyaj inintal. Huan ica ya ni tanqui nopa tanextili cati niqitayaya quej nipaxolohuayaya ipan altepet Jerusalén. ²⁵ Huan nochi cati TOTECO technextili, niqinpuhuili nopa israelitame cati quinquixtijtoyaj ten inintal.

12

Ezequiel teyolmelajqui ten taya ininpantis Jerusalén ehuaní

¹ Huan TOTECO techilhui: ² “Tacat, ta tiitztoc tatajco ten masehualme cati mosiníaj huan huelisquíaj quiitase cati melahuac ica iniixteyol sinta quinequisquíaj, pero amo quinequij. Nojquiya huelisquíaj techtacaquilise, pero amo quichihuaj pampa masque quipixtoque ininacas mochihuaj quej amo tacaquij pampa tahuel mosiníaj. ³ Huajca ama xijchihua cati nimitzil-huis para tiquinnextilis Jerusalén ehuaní quenicatza elis para quicajtehuase inintal huan yase huejca ipan seyoc tali. Xijcualtali seyoc moyoyo huan nopa tamantzitzi cati techahuilíaj quihuicase cati tequixtíaj ten inintal. Huan xijcajtéhua mochaj para tiyas sejcoyoc. Huan xiya tonaya para nochi israelitame ma mitzitaca. Quej nopa huelis quimachilise taya quijitosnequi cati tijchihua masque tahuel mosiníaj. ⁴ Nochi tamanti cati tijhuicas xijquixti calixpa ipan tonaya iniixpa nopa israelitame para ma quiitaca. Teipa quema ya tiotac, xijcajtéhua mochaj quej quichihuaj masehualme cati quinquixtíaj ten inintal huan quinchihuaj ma quitzquica iniojhui para yase huejca hasta seyoc tali. ⁵ Huan quema noja mitztachilijtoque, xijcayoni nopa tepamit huan nozona xiquisa. Huan xijquixti nochi nopa tamantzitzi cati tijhuica. ⁶ Quema ya tayohua huan noja mitztachilijtoque, xijtali ipan moajcol cati tijhuica huan xipehua xinejnemi. Xijtzacua moyayac para amo huelis tiquitas nopa tali. Nochi ya ni quinnextilis israelitame ipan Jerusalén cati ininpantis.”

⁷ Huan na nijchijqui senquisa quej TOTECO technahuati huan tonaya nijquixti calixpa se bolsa huan nopa tamantzitzi cati se hueliyaya quihuicas quema quiquixtiyayaj. Huan ica tiotac, nijcayoni nopa tepamit ica nomax. Huan quema ya tayohua nijtali ipan noajcol nochi tamantzitzi cati monejqui nijhuicas huan niqisquiquema nopa masehualme noja techtachilijtoyaj.

⁸ Huan tonili ijnaloc, TOTECO nechcamanalhui huan techilhui: ⁹ “Tacat, nopa mosisinijca tacame ten tali Israel mitztatzintoquilise taya quijjtosnequi nochi ya ni cati tijchihua. ¹⁰ Huajca xiquinilhui para na, niiniDIOS Cati Más Nijpiya Tanahuatili niquijtohua para ya ni quinnextilía cati ipantis nopa tanahuatijquet ten altepet Jerusalén huan nochi israelitame nopona. ¹¹ Xiquinilhui para ta tieli se tanextili para inijuanti huan nochi ni tamanti cati ta tijchijqui, quixnextilía nopa tamanti cati teipa ininpantis Jerusalén ehuan. Quinquixtise ten ininchaj huan quinquicase ipan sequinoc talme campa itztotij quej seyoc tali ehuan.

¹² “Huan nopa tanahuatijquet ipan Jerusalén nojquiya quisas tayohua campa tacoyontoc cati quichihuase ipan nopa tepamit. Huan ipan iajcol quihuicas seyoc iyoyo huan cati monequi para ipan ojti. Huan quitzcaas ixayac para amo huelis quiitas nopa tali. ¹³ Huan na nijmasiltis ica nomata huan nijchihuas ma quihualicase ipan ni tali Babilonia inintal nopa caldeo masehualme, pero amo huelis quiitas ni tali ica iixteyol huan nica miquis. ¹⁴ Huan nochi itequipanojcahua huan itamocuitahuijcahua cati quinequise quimanahuise, na niquinsemanas para ma yaca ipan campa hueli tali. Niinquixtis ica nomacheta. ¹⁵ Huan quema ya itztose ipan campa hueli tali campa niquinsementos, quimachilise para na niDIOS. ¹⁶ Pero se quentzi ten inijuanti niquinmanahuís ten tatehuilisti, mayanti huan cocolisti para quej nopa, quema yase para itztotij ipan sequinoc talme tepohuilise nochi nopa fiero tamanti cati quichihuayaj, huan huajca quimachilise para na niDIOS.”

¹⁷ Teipa Toteco sempa nechcamanalhui huan techilhui: ¹⁸ “Tacat, xihuihuipica quema tijcua mopantzi huan xiqui moa ica majmajti huan tahuel ximocueso. ¹⁹ Huan nochi nopa masehualme cati itztoque ipan altepet Jerusalén huan ipan tali Israel, xiquinilhui para quej ni na, niDIOS Cati Más Nijpiya Tanahuatili, niquijtohua: ‘Anquicase nopa quentzi cati anquipiyase ica majmajti huan anquise nopa pilquentzi at ica miyac tequipacholi pampa nijtamisosolos nochi ni tali por amotajtacol. ²⁰ Nochi altepeme ipan amotal cati temitoque ica masehualme, niquintamisosos huan nochi amotal mocahuas quej huactoc tali. Huan huajca anquimatise para na niDIOS.’”

²¹ Huan TOTECO sempa nechcamanalhui huan techilhui ni camanali: ²² “Tacat, nopa israelitame talojtztiti quijjtohua: ‘Panotoc miyac tonali huan nopa tajtolpanextijquet quijjto para hualayaya ten fiero, pero amo panotoc, huajca san istacati.’ ²³ Huajca xiquinilhui para na, niamoDIOS Cati Más Nijpiya Tanahuatili, nijchihuas ma mochihua nopa camanali cati quijjtohuayaj huan ayecmo quema sempa quitequihuise israelitame. Huan nojquiya xiquinilhui se yancuic camanali cati quijjtose. ‘Ya ajsc tonali para panos nochi cati quijjtojqe nopa tajtolpanextiani para panos.’”

²⁴ “Pampa ayecmo oncas tanextili cati amo melahuac. Ayecmo itztose tachiyani cati tacajcayahuase huan quijjtose para nochi elis cuali ipan tali Israel. ²⁵ Pampa na niDIOS huan na nicamanaltis huan nochi camanali cati na niquijtojqoc, ya nopa panos. Ayecmo más nijchiyas. Nijtamichihuas nochi cati niquijtojqoc ipan amonemilis anmosisinijca israelitame. Quej nopa na, niamoTECO Cati Más Nijpiya Tanahuatili, niquijtohua.”

²⁶ Teipa TOTECO techmacac seyoc camanali huan techilhui: ²⁷ “Tacat, nopa israelitame quijjtohua para nochi nopa tanextili cati tiqiztoc amo panos nimantzi. Quijjtohua para panos hasta teipa ica miyac tonali.

²⁸ Huajca ama xiquinilhui para quej ni na, niDIOS Cati Más Nijpiya Tanahuatili, niquijtohua: ‘Ayecmo más huejcahuas para panos nochi nopa tamanti cati niquijtojtoc. Nijchihuas ma pano nimantzi. Quej nopa na, cati niDIOS Cati Más Nijpiya Tanahuatili, niquijtohua.’ ”

13

Tatzacuilti para tacajcayajca tajtolpanextiani

¹ TOTECO techmacac seyoc camanali huan techilhui: ² “Tacat, xiquinyolmelahua cati ininpantis nopa tacajcayajca tajtolpanextiani ipan tali Israel cati san quijtohuaj camanali cati iniselti quisencajtoque. Xiquinilhui ma quicaquica nopa camanali cati na niinTECO niquijtohua. ³ Quej ni na, niDIOS Cati Más Nijpiya Tanahuatili, niquijtohua. Teicneltique nopa tajtolpanextiani cati quijtohuaj quiztoque tanextili, pero amo. San camanaltij cati quisa ipan iniyolo huan amo quema quiztoque se tanextili ten na.

⁴ “¡Ay anisraelitame! Amotajtolpanextijcahua itztoque quej cayochime cati itztoque campa tafiero o campa huactoc tali. Amo teno ininpati. ⁵ Nopa tajtolpanextiani amo teno quichijtoque para sempa quicualtalise campa huelontoc huan cocoyocatoc nopa tepamit. Amo teno quichijtoque para quimanahuse ni tali huan para quipiyas chicahualisti ipan nopa tonali ten tatehuilisti quema na niDIOS nimechtatzacuiltis. ⁶ Nopa tanextili cati quijtohuaj quijtohuaj huan nopa camanali cati temacaj, san istacatili. Quijtohuaj para teyolmelahuaj camanali cati huala ten na niamoTECO, pero amo niquinmacatoc camanali, yon amo niquintitancoc. Huan masque na amo teno niqunnextilijtoc, inijuanti mochiyaj para ma nijchihua ma pano cati quijtohua inincamanal. ⁷ Amojuanti antajtolpanextiani, nelia hueyi antacajcayajtoque pampa anquijtoque anquiztoque se tanextili ten na, pero na amo teno nimechnextilijtoc. Huan anquijtohuaj para ancamanaltij nocamanal, pero na amo teno nimechilhujtoc.

⁸ “Yeca na, niDIOS Cati Más Nijpiya Tanahuatili, nimechilhua: Na nimechtzontamiltis pampa anistacatij quema anquijtohuaj anquiztoque tanextili ten nimechmacatoc. Huajca nimechcualancaitas huan nimechtehuis.

⁹ Quena, nimomatananas para niquintatzacuiltis nochi nopa tajtolpanextiani cati teyolmelahuaj camanali cati amo melahuac. Ayecmo niquncahuilis ma itztoca inihuaya nopa israelitame campa mosentilij pampa inijuanti nomasehualhua. Huan niqixpolos inintoca ipan nopa listas ten israelitame huan ayecmo quiitase inintal. Huan huajca quimatise para na niDIOS.

¹⁰ “Quena, ni tacajcayajca tajtolpanextiani quincajcayahuaj nomasehualhua huan quinihuaj para ya onca tasehuilisti huan nochi eltoc cuali, pero amo onca tasehuilisti. Eltoc quej masehualme cati quichijchihuaj se tepamit cati amo tatzquitoc cuali nopa teme, huan nopa tajtolpanextiani quixajque nopa tepamit ica nexti para ma amo nesi campa amo cuali. ¹¹ Huajca ama xiquincamanalhui nopa tajtolpanextiani cati istacatij huan xiquinilhui para nopa tepamit nimantzi huetzis. Pampa na nijchihuas ma taquiyahui chicahuac, huan ma huetzi huejhueyi tesihuit huan ma huala se hueyi ajacat. Huan ica ya nopa huetzis nopa tepamit. ¹² Huan quema huetzis nopa tepamit, nopa masehualme amechilhuse: ‘¿Para ten amo antechilhujque sinta huetzisquía? ¿Para ten amo quipalehui cati anqitalilijque?’

¹³ “Yeca na, niDIOS Cati Más Nijpiya Tanahuatili, niquijtohua: Ica nohueyi cualancayo nijchihuas ma huala se hueyi ajacat, huan ma huetzi at chicahuac huan ma huetzi tesihuit huan ica nohueyi cualancayo nijtamisosolos.

¹⁴ Huan quej nopa nijhuelonis nopa tepamit cati amojuanti anquixajque ica nexti huan nijchihuas ma mocahua tanemijya itzinpehualtil. Quena, nijchihuas ma huetzi amopani huan ma amechtontamilti. Huan huajca anquimatise para na niDIOS. ¹⁵ Huan quej nopa, quema ya huetzto nopa tepamit huan ya nimechtontamiltijos antajtolpanextiani cati anquijtojqe para nochi elqui cuali, tamis nohueyi cualancayo. Huan huajca niteilhuis: ‘Nopa tepamit ayecmo onca huan nopa masehualme cati quialaxojque ica nexti, ayecmo aquiyme. ¹⁶ Inijuanti eliyayaj tacajcayajca tajtolpanextiani ipan israelitame cati quijjtohuayayaj quitztoyaj ipan tanextili para altepet Jerusalén quipiyas tasehuillisti, pero amo eliyaya melahuac inincamanal.’ Quej nopa na, niDIOS Cati Más Nijpiya Tanahuatili, niqijtohua.

TOTECO quintatzacuiltis nopa sihua tajtolpanextiani

¹⁷ “Tacat, ama nojquiya xiquincamanalhui nopa sihua tajtolpanextiani cati quijjtohuaj para na niquinmacatoc se tanextili, pero amo, pampa san quijjtohuaj cati quisa ipan inintalnamiqulis. Xiquinyolmelahua ten ininpantis. ¹⁸ Xiquinilhui para quej ni na, niDIOS Cati Más Nijpiya Tanahuatili, niqijtohua: ‘Anteicneltiqe ansihua tajtolpanextiani cati anquinmasiltiaj nomasehualhua cati pisiltiziti huan cati huejhueyi. Anquinmacaj miyac tamanti macosti huan yoyomit cati anquijtohuaj quipiyaj chichahualisti para ica ma motzontzacuaca. ¿Anmoilhuij para huelis anquimasiltise ininemilis nomasehualhua huan amo teno amopantis? ¹⁹ Por se quentzi pantzi o cebada, antechmahuispolohuaj huan antechixpanoj iniixpa nomasehualhua pampa anquinchihualtiaj ma mohuejcalica ten na. Anquinmictijtoque masehualme cati amo quinamiquiyaya miquse. Huan cati quinamiquiyaya miquse anquincahuilijaj ma itztoca. Tahuel hueyi anquincajcayajtoque nomasehualhua cati quinpactia quitacaquilise istacatili.

²⁰ “Yeca na, niDIOS Cati Más Nijpiya Tanahuatili, niqijtohua: Na nicualancaita nochi nopa tamanti cati anquijtohuaj quipiyaj chichahualisti cati anquinchijchijtoque para ica anquinmasiltise nomasehualhua quej se quinmasiltia totome. Pero na nimechquixtilis nomasehualhua amomaco huan niquinchololtis. Quej nopa mocahuase majcaytoque quej totome cati cholohuaj ten campa tzactoque. ²¹ Nojquiya nimechquixtilis nopa yoyomit cati ica anmotzontzacuaj cati anmoilhuij quipiya chichahualisti huan niquinmanahuis nomasehualhua amomaco huan ayecmo anquinchihuilise san cati anquinequise. Huan huajca anquimatise para na niDIOS. ²² Ica amoistacaticayo anquintemajmatijtoque nopa masehualme cati itztoque xitahuac masque na amo nijnequiyaya para ma mocuesoca. Huan nopa masehualme cati tahuel fiero ininemilis anquinyolchicajtoque para huejcahuas itztose masque quisenhuiquilijaj tajtacolchihuaj. ²³ Pero ayecmo más anistacatise huan anquijtoque anquijtoque se tanextili cati amo anquijtoque. Yon ayecmo antacajcayahuase ica nopa tamantzitzi cati anquijtohuaj quipiyaj chichahualisti pampa niquinmanahuis nomasehualhua amomaco huan nimechtontamiltis nochi amojuanti. Huan anquimachilise para na niDIOS.’”

14

Tatzacuilti para cati quinhueyichihuaj teteyome

¹ Teipa sequij huehue tacame ten tali Israel hualajque campa na niiztoya huan mosehuicoj noixpa. Quinequiyayaj ma nijtatzintoquili TOTECO se

tamanti para quimatise taya quijtos. ² Huan quema itztoyaj nozona, TOTECO nechcamanahui huan techilhui: ³ “Tacat, ni tacame ipan iniyolo quinhueyichihua huan quinicnelíaj teteyome. Inijuanti calactoque ipan miyac tamanti cati quinchihua ma tajtacolchihuaca. Huajca pampa quej nopa quichihua, amo quinamiqui niquinchahuilis ma techtatzintoquílca se tamanti. ⁴ Huajca ama xiquincamanahui huan xiquinilhui para quej ni na, niDIOS Cati Más Nijpiya Tanahuatili, niquijtohua: ‘Aqui hueli israelita cati ipan iyolo quinhueyichihua teteyome huan taixcopincayome huan motalijtoc iniixpa tamanti cati quichihua ma huetzi ipan tajtacoli huan teipa hualas campa se notajtolpanextijca para quitemos notapalehuil, na niDIOS noseltitzi nijtatzacuultis quej quinamiqui ica nochi cati quichijtoc. ⁵ Quena, na niquintatzacuultis para quej nopa sempa nijtanis iniyolo huan inintalamiquilis nochi nopa israelitame cati techtahuclajtoque huan quinhueyichijtoque teteyome huan taixcopincayome.’

⁶ “Huajca xiquinilhui nochi israelitame para quej ni na, niDIOS Cati Más Nijpiya Tanahuatili, niquijtohua: ‘Ximoyolcucapaca ten amotajtacolhua. Ximohuejcatalica ten amoteteyohua huan amotaixcopincayohua huan nochi nopa tamanti cati amo cuali anquichihua.’ ⁷ Pampa cati hueli israelita o seyoc tali ejquet cati itztoc tatajco amojuanti cati techtahuclcahuas huan ipan iyolo quintalis teteyome huan taixcopincayome para quinhueyichihuas huan teipa monechcahuis campa se notajtolpanextijca para tech-tajtanis tapalehuili, na niDIOS noseltitzi nijtatzacuultis. ⁸ Na nimoican-cuepas huan niquincualancaitas masehualme cati quej nopa quichihua huan niquintatzacuultis chicachac. Niquintzontamiltis huan ica inijuanti nijchihuas para nochi sequinoc ma quítaca quenicatza nitetatzacuultia. Huan huajca anquimachilise para na niDIOS. ⁹ Huan sinta se ten nopa tacajcayajca tajtolpanextiani mocajcayahuas huan moillhuis quiselijtoc se camanali huan teipa temacas nopa camanali cati amo melahuac, huajca xijmatica para na niDIOS nijcayajqui. Huan icamanal san elis se istacatili pampa amo mochihuas cati yaya quijtohua, pero na nijcualancaitas nopa tajtolpanextijquet huan nijtontamiltis para ayecmo itztos tatajco noisraelita masehualhua. ¹⁰ Quena, niquintatzacuultis nochi ome. Nij-tatzacuultis nopa tacajcayajca tajtolpanextijquet huan nopa masehualme cati quinhueyichihua teteyome huan teipa quitemohua tapalehuili ipan se tajtolpanextijquet. ¹¹ Huan quej nopa, nopa israelitame ayecmo tech-tahuclcahuase, yon ayecmo mojtacose ica tajtacoli. Huan inijuanti elise nomasehualhua huan na nielis niiniDios. Quej nopa na, niininTECO Cati Más Nijpiya Tanahuatili, niquijtohua.”

Quinamiqui para Jerusalén quiselis tatzacuultili

¹² Huan TOTECO sempa techmacac se camanali huan techilhui: ¹³ “Tacat, quema nopa masehualme ipan ni tali tajtacolchihuase ica na huan tahuel techixpanose, huajca na nijtananas nomax huan niquintzontamiltis. Huelis niquinquixtilis inintacualis huan niquintitanilis se mayanti para ma miquica masehualme huan tapiyalme huan amo aqui hueli quinmanahuis. ¹⁴ Masque itztosquíaj nozona Noé, Daniel huan Job, amo quinmanahuisquíaj nopa tajtacolchijca masehualme. San momanahuisquíaj inijuanti pampa itztoque xitahuague noixpa. Pero nochi nopa sequinoc masehualme, niquintzontamiltisquíaj. Quej nopa na, niDIOS Cati Más Nijpiya Tanahuatili, niquijtohua.

¹⁵ “O huelis niquintitanisquíaj miyac tecuanime cati tahuel mosisiníaj para ma quintzontamiltica nochi nopa masehualme ipan ni tali. ¹⁶ Sinta ni eyi

cuajcualme itztoquíaj ipan nopa tali, melahuac nimitzilhuía injuanti amo huelisquíaj quinmanahuse inintelpocahua, yon iniichpocahua, yon nopa sequinoc masehualme. Momanahuisquíaj san injuanti nopa eyi huan nochí sequinoc miquisquíaj huan ni tali mocahuasquía quej huactoc tali.

¹⁷ “O huelis niqinhualicasquía soldados para ma quitehuiquij ni tali ehuaní huan nitanahuatis ma quinmictica nochí nopa masehualme huan tapiyalme. ¹⁸ Masque ni eyi cuajcualme itztoquíaj ipan ni tali, san injuanti momanahuisquíaj. Melahuac niqijtohua injuanti amo huelisquíaj quinmanahuse inintelpocahua, yon iniichpocahua. Quej nopa na, niDIOS Cati Más Nijpiya Tanahuatili, niqijtohua.

¹⁹ “O huelis por nohueyi cualancayo nijtitanisquía ipan ni tali se hueyi cocolisti cati tahuel tamahua huan quichihuas ma miquica masehualme huan tapiyalme. ²⁰ Masque ipan ni tali itztoquíaj Noé, Daniel huan Job, san injuanti momanahuisquíaj pampa itztoque xitahuaque noixpa. Melahuac nimitzilhuía, amo huelisquíaj quinmanahuse inintelpocahua, yon iniichpocahua. Quej nopa na, niDIOS Cati Más Nijpiya Tanahuatili, niqijtohua.

²¹ “Yeca na, niDIOS Cati Más Nijpiya Tanahuatili, niqijtohua: Noja más amo huelis momanahuse nopa israelitame quema na nijtitanis ipan altepet Jerusalén nopa nahui tamanti tatzacuiliti cati más fiero: tatehuilisti, mayanti, tecuanime huan cocolisti cati tahuel tamahua huan quichihuas ma miquica masehualme huan tapiyalme. ²² Pero mocahuase se quesqui ichpocame huan telpocame cati yoltose. Huan injuanti huelise quisase huan hualase mosejcotilij ica amojuanti cati ama anitztoque nica quej seyoc tali ehuaní ipan tali Babilonia. Huan quema hualase, anquiritase quenicatza monejnemiltitjoque nopa masehualme huan taya fiero quichijtoque. Huajca anmoyotalise huan anquimachilise para xitahuac huan quinamiqui para nijtatzacuiliti altepet Jerusalén. ²³ Quena, amojuanti anmoyotalise quema anquiritase quenicatza nelía fiero monejnemiltitjoque nopa masehualme huan fiero cati quichijtoque. Huan huajca anquimachilise para melahuac quinamiqui nijtatzacuiliti altepet Jerusalén huan imasehualhua. Quej nopa na niDIOS Cati Más Nijpiya Tanahuatili niqijtohua.”

15

Tali Israel eltoc quej se xomecat cati amo teno ipati

¹ Teipa TOTECO nechcamanalhui huan techilhui: ² “Tacat, ximoilhui ten nopa cuahuit cati quisa ten se xomeca tzonti. Amo huelis quitequihuse quej quitequihua cuahuit ten sequinoc tamanti cuame pampa injuanti achi más ipati. ³ Nopa xomeca tzonti icuayo amo hueli quitequihuse para yon se tequit. Amo hueli quitequihuse quej se estaca o cuamaxali para ipan quicuapilose se tenijqui. ⁴ San hueli tijtequihuis para tijchihuas tit. Pero hasta para ya nopa nojquiya amo nelía cuali pampa tamitata san ipan se talojtzi. Amo teno huelis ica tijtequihuis. ⁵ Quena, icuayo se xomeca tzonti amo teno ipati quema ayemo tijtatijtoc huan yon quema ya tijtamitatis ipan tit pampa amo quichihua cuali ticoli cati huejchahua. Amo huelis tijtequihuis ipan yon se tamanti.

⁶ “Huan na, niDIOS Cati Más Nijpiya Tanahuatili, niqijtohua para nopa masehualme ten altepet Jerusalén itztoque quej xomeca tzonme cati moscaltíaj ipan cutatamit. Amo teno ininpati. Huajca, quej quitatíaj icuayo se xomeca tzonti, quej nopa nojquiya nijchihuas ica nopa masehualme ten altepet Jerusalén. ⁷ Na nimochihuas niininculancaitaca, huan sinta cholose

huan momanahuisse ten se tilelemecti, nijchihuas para ma huetzitiy ipan seyoc tilelemecti para amo aquí momanahuis. Huan huajca quimachilise para na niDIOS. ⁸ Huan nijtamisosolos inintal hasta mocahuas quej se huactoc tali pampa techixpanoque huan quinhueyichijque teteyomé huan taixcopincayome. Quej nopa na, niDIOS Cati Más Nijpiya Tanahuatili, niqijtohua.”

16

Jerusalén ehuani quicajtejqe TOTECO

¹ Teipa TOTECO sempa nechcamanalhui huan techilhui: ² “Tacat, xiquiny-olmelahua Jerusalén ehuani ten nochi nopa fiero tamanti cati quichijtoque. ³ Xiquinilhui para quej ni na, niDIOS Cati Más Nijpiya Tanahuatili, niqijtohua: Quema ayemo itztoyaj israelitame ipan altepet Jerusalén, cananita masehualme quipehualtiqqe nopa altepet. Eltoya se tacat amorreo huan isihua hetea cati ica pejqui nopa altepet. Huan Jerusalén elqui quej se conet cati amo aquí quinequiyaya. ⁴ Elqui quej quema tacatqui nopa conet, amo aquí quimocuitahui. Amo aquí quitequili ixic, yon amo aquí quipajpajqui. Amo aquí quipolo istat, yon amo aquí quihuijconqui ica yoyomit. ⁵ Ipan nopa tonali quema pejqui nopa hueyi altepet, amo aquí quitasojtac, yon amo aquí mocuatotoni para quichihuillis yon teno. Amo aquí quimocuitahui. Nochi quijixque huan quitahuelcajqe quej quicahuasquaj se pilconetzi cuatita para ma miqi.

⁶ “Pero na nielqui quej se nitacat cati nipanoc nozona campa huetztoya nopa conet. Huan niqitac nelía soquiyó itacayo huan taxopehuayaya espoltic. Huan nijnequiyaya ma itzto huan niquilhui nopa pilaltepetzi ten israelitame: ¡Xiitzo! ⁷ Huan niquinpalehui nopa achtohui israelitame para inialtepe ma moscalti quej se xihuit cati onca cuatita. Huan quej se conet mochihua hueyi, anisraelitame anmomiyaquilijque. Anmohueyichijque huan anmosemanque campa hueli quej mohueyichihua se ichpocat cati tahuel yejectzi ica itacayo huan itzoncal cati moscaltijtoc. Pero noja anisraelitame anitztoyaj quej anxolome.

⁸ “Pero más teipa quema sempa nipanoc nozona, niqunitac israelitame quej se ichpocat cati ya motantoya huan ya quipiya xihuit para monamic-tis. Huajca elqui quej na nijpijqui nopa ichpocat ica noyoyo huan ihuaya nijchijqui se camanal sencahuali. Huan nochi israelitame mochijque noaxcahua quej isihua se tacat mochihua iaxca. Quej nopa na, niDios Cati Más Nijpiya Tanahuatili, niqijtohua. ⁹ Huan quej se ichpocat mopajpaca para monamic-tis, elqui quej na niquinpajpajqui israelitame huan niquinquixtili nopa soquit quej se quiquixtilisquía nopa esti cati quipiya ipan itacayo se conet. Huan elqui quej nijpojojqui icuetaxo nopa ichpocat cati nijtapejpenijtoya para noaxca ica taajhuiyacayot cati más ajhuiyac. ¹⁰ Huan quej se tacat quimaca isihua yoyomit cati yejectzitzitzi tajtzontitzi huan quimaca nopa yoyomit ten lino huan ten seda cati pajpatiyo, huan nopa zapatos cati tachijchihuali ica inincuetaxo pesojme cati más cuali; na nijmacac nopa altepet ten israelitame nochi ten más cuali. ¹¹ Nojquiya niquinmacac israelitame tamantzitzi cati yejectzitzitzi. Elqui quej niquinmacac se macosti para animax huan se costi para ininquechta. ¹² Nojquiya niquinmacac se anillo para quitalise ipan iniyacatzol huan ome pijpiloli para quitalise ipan ininacas huan se yejectziti corona para quitalise ipan inintzonteco. ¹³ Quej nopa, israelita masehualme mocajque yejectzitzitzi ica nochi nopa tamantzitzi ten oro huan plata. Quipixque iniyoyo cati tachijchihuali ica icpat ten lino,

huan ten seda huan ipani quipixqui tajtzonti cati yejyetzitzi. Nojquiya quicuayayaj nopa tacualisti cati más cuali: harina ten trigo, sayol necti huan aceite ten oliva. Huan mojmosta más mochijqui yejyetzzi nopa hueyi altepet ten israelitame hasta elqui quej se sihua tanahuatijquet. ¹⁴ Huan nochi masehualme ipan sequinoc talme quimatque para nopa israelitame eliyayaj se tamanti masehualme cati más eliyaya yejyetzzi. Huan quena, tahuel eliyaya yejyetzzi ica nochi nopa cuali tamantzitzi cati na niquinmacatoya. Quej nopa na, niininTECO Cati Más Nijpiya Tanahuatili, niqijtohua.

¹⁵ “Pero teipa nopa israelitame quichijque quej se sihuat cati motemachía ipan iyejeyca huan mohueymatque. Huan mochijque quej se ahuilnenca sihuat cati quinemaquiltía itacayo cati hueli tacat cati pano inechca. Huan nochi iyejeyca israelita masehualme mochijqui iniaxca sequinoc tacame. ¹⁶ Huan nochi nopa yoyomit yejyetzitzi cati niquinmacatoya, nopa israelitame quitequihuijque para ica quinchiijchiuase tiocalme ipan tepeme para nopona quinhueyichihuase teteyome huan taixcopincayome. Amo quema panotoya se tamanti quej nopa huan amo quema sempa oncas. ¹⁷ Nojquiya nopa tamantzitzi yejyetzitzi ten oro huan plata cati niquinmacatoya israelitame, quincuique huan quitequihuijque para quichijchiuase teteyome huan taixcopincayome cati nesij quej tacame. Huan quinhueyichijque huan inihuaya quichijque cati fiero. Huan quema quinhueyichihuayayaj elqui quej momecatiyayaj inihuaya sequinoc tacame pampa niquinchiytoya nochi israelitame noaxcahua quej se tacat mocuilía isihua para iaxca. ¹⁸ Huan nopa yoyomit cati yejyetzzi tajtzonti cati nimechmacac anisraelitame, anquitequihuijque para ica anquinpiquise nopa teteyome huan taixcopincayome. Huan nopa aceite huan copali cati nimechmacac, anquitequihuijque quej se tacajchualisti para ica anquinheychijque nopa teteyome huan taixcopincayome. ¹⁹ Huan nopa pantzi, harina, aceite huan nopa sayol necti cati na nimechmacatoya para ica ximopanoltica, anquinmacaque quej se tacajchualisti cati ajhuiyac mijyotía iniixpa. Quej nopa na, niamoTECO Cati Más Nijpiya Tanahuatili, niqijtohua.

²⁰ “Nojquiya anquincuique amotelpocahua huan amoichpocahua cati anquintacatiltijque para na huan anquinmictijque huan anquinmacaque nopa teteyome huan taixcopincayome quej tacajchualisti. Huan yeca ama ayecmo aquiyme más. Huelis anquiiyayaj amo ya se hueyi tajtacoli para san anquinamacayayaj amotacayo, ²¹ huan yeca monequiyaya nojquiya anquinmictise noconehua huan anquintatise ipan huejhueyi tit quej tacajchualisti para amoteteyohua huan amotaixcopincayohua. ²² Huan ipan nochi nopa tonali quema anmochihuayayaj quej se ahuilnenca sihuat huan tahuel antajtacolchihuayayaj, amo quema anmoilhuijque ten nopa tonali huejcajquiya quema amo aqui amechnequiyayaj huan anitztoyaj quej se pilconetzi cati xolot, soquiyo huan cati taxopehuayaya ipan ten ya ieso.

²³ “Huajca na, niDIOS Cati Más Nijpiya Tanahuatili, niqijtohua: Nelía anteicnelitque anisraelitame pampa tahuel nimechtatzacuiltis por amotajacolhua. Pero amo san ya nopa anquichijtoque. ²⁴ Nojquiya ipan plaza ipan sesen amoaltepehua anquinchiijchijtoque taixpame para ipan anquinhueyichihuase teteyome huan taixcopincayome. ²⁵ Huan campa monamiqui sesen ojti anquinchiijtoque taixpame para antahueyimatis. Anitztoque quej se ahuilnenca sihuat cati quiselía cati hueli tacat cati pano huan quisoquihuía iyejeyca ihuaya. ²⁶ Nojquiya anisraelitame anmomecatijtoque inihuaya nopa tali Egipto ehuani cati inintal eltoc nechca tali Israel. Tacame ten tali Egipto quipiyaj miyac tetili para ten hueli quichihuase.

Nojquiya anquihueyichijtoque ininteteyohua para más ma momiyaquili amotajtacolhua huan noja más antechcualancamacaj ica amoahuilnencayo.

²⁷ “Yeca na nimomatananqui huan nimechtatzacuiliti anisraelitame. Nimechquixtili nopa tali cati achtohuiya elqui amoaxca huan nimechtemacitili inimaco nopa filisteos cati amechcualancaitaj. Huan inijuanti nojquiya pinahuayayaj por nopa fiero tamanti cati anquichihuayaj. ²⁸ Nojquiya quej se ahuilnenca sihuat antechcajtejoque para anmomecatise inihuaya tali Asiria ehuan huan anquinhueyichihuase ininteteyohua huan inintaixcopincayohua. Nesi amojuanti amo quema ancuatise ica yancuic teteyome huan taixcopincayome, pampa quema ya anmomecatijtojaj ica ininteteyohua Asiria ehuan, noja más anquinequiyayaj. ²⁹ Huajca nojquiya anmomecatijque inihuaya ininteteyohua huan inintaixcopincayohua nopa masehualme ten tali Canaán huan nopa caldeo masehualme ten tali Babilonia campa itztoque miyac tanamacani. Pero masque noja más teteyome anquinpixque, amo anixhuique inihuaya, noja más anquintemohuayayaj.

³⁰ “Yeca na, niDIOS Cati Más Nijpiya Tanahuatili, niqijtohua: Nelía fiero amoyolo anisraelitame huan yeca anquichijtoque nochi nopa fiero tamanti cati quichihua se ahuilnenca sihuat cati amo quema pinahua. ³¹ Pampa campa monamiqui nochi calles, anquichijtoque taixpame para anquinhueyichihuase teteyome huan taixcopincayome. Pero amojuanti amo senquisa anquichihuaj quej quichihua se ahuilnenca sihuat pampa tahuel anquinequij antajtacolchihuase hasta amo antainamaj quema ten hueli anquichihuaj ica seyoc.

³² “Quena, anisraelitame anitztoque quej se ahuilnenca sihuat pampa masque anquixtoyaj amohuehue, anquichijtoque ten hueli inihuaya sequinoc. Amo anquinequij anpaquise san ica na cati nelía niamohuehue. ³³ Nochi ahuilnenca sihuame tainamaj quema momecatijaj huan inimecahua quinmacaj tamantzitzi cati yejyectzitz, pero ica anisraelitame amo quej nopa. Amojuanti hasta anquinmacaj amomecahua cati anquintoquilíaj tamantzitzi cati yejyectzitz para anquintaxtahuise amomecahua para ma hualaca para quichihuase ten hueli amohuaya. ³⁴ Huajca aneltoque neliyoca ten ahuilnenca sihuame. Amo aquí amechtaxtahuía amojuanti pampa amo aquí amechnequi, eltoc anquintaxtahuíaaj para ma hualaca.

³⁵ “Yeca anisraelitame cati nimechita quej se ahuilnenca sihuat, xij-tacaquili nocamanal na niDIOS: ³⁶ Quej ni na, niDIOS Cati Más Nijpiya Tanahuatili, niqijtohua: Pampa ta tijnextjtoc motacayo xolot ica nochi momecahua, huan tiquinhueyichijtoc teteyome huan taixcopincayome, huan tiquinmictijtoc moconehua huan tiquinmacatoc nopa teteyome huan taixcopincayome quej se tacajcahalisti, ³⁷ ya ni cati nijchihuas. Na niqin-sentilis nochi momecahua cati inihuaya titajtacolchijqui. Niqin-sentilis cati tiquinicneli huan cati tiquincualancaitac, huan iniixpa nochi inijuanti nimitzcolohuis para nochi ma quiitaca motacayo para ma quimatica quenicatza tieltoc. ³⁸ Huan nimitztatzacuilitis pampa timomecatijtoc huan titemictijtoc. Nijtoyahuas amoeso anisraelitame ica nochi nocualancayo, pampa nimechtasomatiyaya quej se tacat quitasomati isihua. ³⁹ Teipa nimechtemacitili inimaco momecahua, nopa masehualme cati ehuan ipan miyac talme. Huan inijuanti amechsolose anisraelitame. Huan quisolose amotal huan nopa taixpame campa anquinhueyichihuayayaj teteyome huan taixcopincayome. Huan quisolose nopa calme campa ten hueli anquichihuayayaj. Nojquiya amechichtequilise, anisraelitame, nochi nopa tamanti yejyectzitz ten oro huan plata cati nimechmacatoc. Huan teipa quej quiquixtilíaj iyoyo

se ahuilnenca sihuat, nopa tacame cati hualase quisosolose altepet Jerusalén huan quicahuase senquisa xolot huan tahuel pinahuase nopa israelitame cati nozona itztoque. ⁴⁰ Huan motananase miyac masehualme cati seyoc tali ehuan huan hualase campa israelitame, huan quinmajcahuilise tet huan quinmictise ica inimacheta. ⁴¹ Nochi ininchaj quitamitatilise huan quintatzacuilitise inixpa miyac sihuame. Huan ica ya nopa nijtamiltis iniahuilnencayo israelitame huan ayecmo quintaxtahuise inimecagua para ten hueli ma quichihuaca inihuaya, yon ayecmo quinhueyichihuase tetye-ome huan taixcopincayome. ⁴² Huan huajca tamis nohueyi cualancayo ica israelitame. Ayecmo nimitztasomatis, nimoyoltalis huan nimosiyajquetzas ten ta huan ayecmo más nicualanis. ⁴³ Pero anquielcajtoque nopa tonali quema pequi nopa altepet ten anisraelitame huan anelfoyaj se altepet ten masehualme cati pisiltzi. Huan na nimechicneli quema amo aqui amechicneliyaya. Huan yeca ama antechchijtoque ma nicualani ica nochi nopa fiero tamanti cati anquichijtoque, huan yeca nimechtatzacuilitis quej quinamiqui ica nochi amotajacolhua. Quej nopa na, niDIOS Cati Más Nijpiya Tanahuatili, niqijtohua.

Quej se tenanti quichihua, iichpoca nojquiya ya nopa quichihua

⁴⁴ “Masehualme ten nochi taltpacti cati quinpactia ahuilcamanaltij, camanaltise ten anisraelitame huan quijitose: ‘Quej se tenanti quichihua, iichpoca nojquiya ya nopa quichihua.’ ⁴⁵ Ta nojquiya tiitztoc quej se ahuilnenca sihuat cati quipixqui inana cati quitaquelcajqui ihuehue huan iconehua. Huan moicnihua nojquiya quitaquelcajque inihuehuejhua huan inincone-hua. Huajca melahuac quinextia para amonana anisraelitame elqui se hetea sihuat huan amotata se amorreo tacat cati amo techixmatiyaya na niDIOS.

⁴⁶ “Huan nopa altepet cati elqui quej mosihua icni huan elqui más chichahuac itoca Samaria. Huan yaya inihuaya nopa sequinoc pilaltepertziti nechca mocajque ica norte ten ta. Huan nopa altepet Sodoma cati huejcajquiya elqui huan elqui quej ta amo más chichahuac eliyaya. Huan yaya mocajqui ica tatzinta ten ta ica nopa sequinoc pilaltepertziti cati inechca. ⁴⁷ Huan anisraelitame amo san anquitoquilijque nopa ojti cati injuanti quitoquilijque, yon amo san titajacolchijtoc quej injuanti, pero nochi cati injuanti quichihuayayaj anquitaque quej amo teno. Yeca anquichijque tajtocoli cati noja más huejhueyi huan más fiero que injuanti quichihuayayaj. ⁴⁸ Na, niDIOS Cati Más Nijpiya Tanahuatili, nimitzilhuia melahuac mosihua icni Sodoma huan nopa pilaltepertziti cati nechca amo tahuel mosisinijque nohuaya quej anisraelitame ipan Judá huan Jerusalén huan cati itztoque amohuaya. ⁴⁹ Altepet Sodoma ehuanitajacolchijque pampa mohueyimatiyayaj, huan tahuel tacuayayaj huan tahuel tatzihuiyayaj. Amo quema quinpalahuijque nopa teicneltziti cati itztoyaj ininechca huan quinpolohuayaya ten ica panose. ⁵⁰ Nelia mohueyimatque Sodoma ehuanitajacolchijque miyac tamanti cati na nijcualancaita, yeca na niqintzontamilti quej ama tiquita.

⁵¹ “Huan altepet Samaria ehuanitajacolchijque yon tajco imiyaca amotajacolhua anJerusalén ehuanitajacolchijque tetyeome huan taixcopincayome amojuanti que altepet Samaria ehuanitajacolchijque. Yeca Samaria ehuanitajacolchijque quej mosihua icnihua nesij achi más xitahuague que amojuanti. ⁵² Huajca amo ximocuesoca sinta injuanti quiselaj tatzacuiliti cati amo más chichahuac, pampa amotajacolhua anJerusalén ehuanitajacolchijque noja más fiero que injuanti. Huan yeca injuanti nesij quej achi más

xitahuacque. Huajca anisraelitame, xiquijyohuica amotatzacuilitil huan xipinahuaca pampa quej nopa quinamiqui por amotajtacolhua.

⁵³ “Pero se tonali na sempa nijcualtalis altepet Sodoma huan Samaria huan nochi ininipilaltepehua. Huan teipa nojquiya nijcualtalis altepet Jerusalén huan ipilaltepehua. ⁵⁴ Pero ama monequi anJerusalén ehuani xiquijyohuica amotatzacuilitil huan xijhuicaca amopinahualis por nochi tamanti cati anquichijtoque. Huan ica ya nopa Sodoma huan Samaria moyolchicahuase pampa amotatzacuilitil elis más chicahuac que inijuanti.

⁵⁵ “Huan quema sempa nijcualtalijtosa altepet Sodoma huan altepet Samaria ica nochi inimasehualhua huan ica nochi ininipilaltepehua, nojquiya nijcualtalis Jerusalén ica nochi imasehualhua huan ipilaltepehua. Huan quej nopa nochi eyi altepeme sempa itztose quej achtohuiya eliyayaj. ⁵⁶ Ipan nopa tonali quema anJerusalén ehuani anmohueyimatiyayaj, tahuel anquinpinajtiyayaj altepet Sodoma ehuani por nopa tatzacuilitil cati quiselijque. ⁵⁷ Pero ya nopa anquichijque quema ayemo mocahuayaya tanemijya para más tajtacoli anquichijtoque anJerusalén ehuani que inijuanti. Pero ama nochi ya quimatij amotajtacolhua. Huan yeca nochi nopa edomita huan filisteo masehualme, huan nopa masehualme cati itztoque ininechca amechhuetzquilíaj huan amechpinajtiáj. ⁵⁸ Huajca anJerusalén ehuani, ama xiquijyohuica nopa tatzacuilitil cati quinamiqui anquiselise por nochi nopa fiero tamanti cati anquichijtoque. Quej nopa na, niDIOS, niqijtohua.

⁵⁹ “Huan ama na, niDIOS Cati Más Nijpiya Tanahuatili, niqijtohua: Nimechmacas anJerusalén ehuani cati quinamiqui anquiselise pampa amo anquिताque sinta ipati nopa camanali cati anquichijque nohuaya quema noja aneliyayaj quej se ichpocat. Tahuel anquixpanoque nopa camanali. ⁶⁰ Pero na amo niquelcahuas nopa camanali cati nijchijqui amohuaya quema ayemo aneliyayaj tahuel miyac masehualme ica san se amoeso huan nojquiya nijchihuas amohuaya seyoc camanali cati huejcahuas para nochipa. ⁶¹ Huan teipa anpinahuase quema anquielnamiquise nochi cati amo cuali anquichijtoque. Huan amosihua icnihua, Samaria huan Sodoma, cati amo quipixque parte ipan nopa achtohui camanali elise quej amoconehua. ⁶² Na nijyancuilis nopa camanali cati nijchijqui amohuaya, anisraelitame, huan huajca anquimachilise para na niDIOS. ⁶³ Huan anquielnamiquise nochi amotajtacolhua huan ayecmo huelis teno anquijtose, san anmocatatzacuase pampa anpinahuase quema nimechtapojpolhuis nochi cati anquichijtoque. Quej nopa na niDIOS Cati Más Nijpiya Tanahuatili niqijtohua.”

17

Huicalot ten nopa xocomecat huan ome cuatojme

¹ Teipa TOTECO sempa nechcamanalhui huan techillhui: ² “Tacat, xiquin-pohuili nopa israelitame ni huicalot. ³ Xiquinilhui para quej ni na, niDIOS Cati Más Nijpiya Tanahuatili, niqijtohua: ‘Se hueyi cuatojti ica ieltapal cati nelía patahuac huan quipiya miyac iijhuiyo ica miyac colores, hualajqui ipan tali Libano huan quicotonqui se tiocuahuit imacuayo cati más huejcapa. ⁴ Huan ica itenchapich quipostejqui nopa tiocuahuit ichamacyo cati más selic huan más huejcapa chamantoya. Huan quihuicac ipan se altepet cati temitoya ica tanamacani huan tacohuani huan nozona quitojqui.

⁵ “Nojquiya quicuic ten talchi se cuayoli huan quitocato campa cuali tali iteno se hueyat campa oncayaya miyac at para ma moscalti nimantzi quej

nopa cuahuit cati itoca sauce. ⁶ Huan nopa cuayoli ixhuac huan mochijqui se cuamecat cati amo más huejcapantic pero momajcayqui campa hueli huan quipixqui miyac ixihuiyo. Huan nochi imacuayohua motananque huan moscaltijque para huejcapa imelac nopa cuatojti. Huan nopa cuamecat quipixqui miyac inelhuayohua cati moscaltijque para tatzinta huan cuali motatzquiliijque ipan tali. Huan quej nopa mochijqui se cuamecat cati quipixqui imacuayohua huan ixihuiyohua. ⁷ Pero ajsico seyoc hueyi cuatojti ica ieltapal cati nelía patahuac huan miyac iijhuyio para quinotzas nopa cuamecat ma quitoquili. Huajca nopa cuamecat quitilanqui nochi inelhuayohua huan imacuayohua para ma moscaltica imelac nopa yancuic cuatojti pampa moilhuyiaya quiselis más tapalehuili huan at ten seyoc lado. ⁸ Huan quej nopa quichijqui nopa cuamecat masque ya toctoya campa cuali tali huan campa onca miyac at. Huan ya huelqui moscaltía cuali huan quiapiya imacuayohua huan ixihuiyohua cati más yejyetzitzi para temacas itajca cati más ajhuiyac.

⁹ “Huajca ama na, niDIOS Cati Más Nijpiya Tanahuatili, nimitznahuatía xiquinilhui: ‘¿Anquiiatj para cuali mocahuas ni cuamecat huan quiapiyas cuali itajca? Nimechilhúa para amo. Nopa cuatojti cati achtohui hualas huan quihuihuitas ica nochi inelhuayo. Quichihuas para nochi itajca nopa cuamecat ma tepehui huan ma pilini ixihuyio. Huan amo monequis miyac soldados o miyac chicahualisti para quiquixtise. ¹⁰ Huan masque quitocase nopa cuamecat ipan seyoc tali, ayecmo chamanis. Quema hualas se ajacat ica campa hualquisa tonati huan quiajsis, nimantzi huaquis huan hasta inelhuayo nojquiya huaquis masque motatzquiliijtoc ipan cuali tali.’ ”

¹¹ Huan TOTECO sempa nechcamanahui huan techilhui: ¹² “Quej ni xiquinilhui nopa mosisinijca israelitame: ‘¿Amo anquimachilíaj taya quiijtosnequi ni tamanti huicalot? Na nimechilhuis taya quiijtosnequi. Nopa achtohui cuatojti quiiixnextía nopa tanahuatijquet ten tali Babilonia cati itoca Nabucodonosor. Yaya ajsico altepet Jerusalén huan quitzqui nopa Tanahuatijquet huan quihuicac inihuaya itayacanchua hasta ipan tali Babilonia. ¹³ Huan quej nopa cuatojti quicuic ichamanca nopa cuahuit huan quitojqui ipan cuali tali nechca at, Nabucodonosor quicuic se tacat * ten nopa familia ten tanahuatiani huan quichijqui se camanali ihuaya. Quichihualti ma tatestigojquetza para nochipa quitequipanos. Huan Nabucodonosor quicajtequi quej tanahuatijquet huan quinhuaque nopa masehualme cati más tayacanaj ipan nopa tali. ¹⁴ Quichijqui quej nopa para tali Judá ayecmo quiapiyasquía chicahualisti huan ayecmo huelisquía motanas ica ya. Monequiyaya nopa tanahuatijquet cati quicajqui senquisa ma quitepanitas Nabucodonosor huan nopa camanali cati quichijqui ihuaya para huelis mocahuas ipan ital.

¹⁵ “Pero ni tanahuatijquet mosisini ica Nabucodonosor pampa quintitanqui itayolmelajcagua ipan tali Egipto para tajtanitij miyac cahuayojme huan miyac soldados cati cuali tatehuíaj para quitehuise Nabucodonosor. Huan amojuanti, ¿anmoilhuíaj amo teno ipantis cati mocajqui ipan tali Judá quema quixpanoc nopa camanali cati ica tatestigojquetzqui ica Nabucodonosor para quichihuas? ¹⁶ Na, niDIOS Cati Más Nijpiya Tanahuatili, niquijtohua para temachti miquis nopa tanahuatijquet ten tali Judá cati quixpanoc nopa camanali. Miquis ipan tali Babilonia campa itztoc nopa tanahuatijquet cati quimacac tequicayot para ma tanahuati huan cati quichijqui nopa camanali ihuaya cati yaya quixpanoc. ¹⁷ Huan Tanahuatijquet Faraón ten

* 17:13 17:13 Sedequías.

tali Egipto ica nochi isoldados cati más yajatij tatehuíaj amo huelise quipalehuisse tali Judá quema nopa Tanahuatijquet ten tali Babilonia quiyahualos Jerusalén huan quinmictis miyac masehualme. ¹⁸ Pampa nopa tanahuatijquet quiixpanoc nopa camanal sencahuali masque tatestigojquetztoya para quitepanitasquía Nabucodonosor. Huan yeca amo hueli mochololtis ten nopa tatzacuilti cati ipantis.

¹⁹ “ ‘Na, niDIOS Cati Más Nijpiya Tanahuatili, niquijtohua: Temachti nijtatzacuiltis nopa tanahuatijquet pampa quichijqui se camanali huan tatestigojquetzqui ica na notoca para quitepanitasquía Nabucodonosor para nochipa, pero amo quitepanitac nopa camanali, yon amo quuitac sinta ipati. ²⁰ Huajca na nijmajcahuilis nomata para nijmasiltis. Huan nijhuicas ipan tali Babilonia huan nepa nijtatzacuiltis pampa mosentanchijqui ica na huan techixpanoc. ²¹ Huan nechca nochi nopa israelita soldados cati más tapejpenilme miquise ica macheta. Huan injuanti cati noja mocahuase yoltoque, niquintitanis ipan campa hueli talme para itztotij quej seyoc tali ehuaní. Huan huajca anquimachilise para na niDIOS.

²² “ ‘Huan na, niDIOS Cati Más Nijpiya Tanahuatili, niquijtohua: Na nojquiya nijchihuas quej nopa cuatojti huan nijpostequis ichamanca nopa tiocuahuit cati más huejcapantic, huan nijtocas ipan nopa tepet cati más huejcapantic ipan tali Israel. ²³ Huan nijchihuas ma eli se tiocuahuit cati nelía yejyectzi huan quipiyas imacuayohua huan itajca. Huan nochi tamanti tapiyalme moecahuilise itantita huan nochi totome motepasoltise ipan imacuayohua pampa nopa tanahuatijquet cati na nijtalis elis cati más cuajcualtzi. ²⁴ Huan quej nopa, nochi quimatise para na niDIOS cati nijquixtis se tanahuatijquet cati hueyi huan nijtalis cati nijnequi huan nijchihuas ma moscalti huejcapa. Eltoc quej nijtztintzontequis se cuahuit cati huejcapantic huan nijhuejcapantalis se cuahuit cati eltoya pisiltzi. Nojquiya quimatise para na nihueli nijchihua ma huaqui se cuahuit cati xoxohuic huan na nijchihua ma xoxohuiya se cuahuit cati huactoc. Na niDIOS niquijto para quej nopa nijtalis se tanahuatijquet huan quena, nijtalis.’ ”

18

Miquis cati quichihuas tajtacoli

¹ Teipa TOTECO sempa nechcamanalhui huan techilhui: ² “¿Para ten ipan tali Israel quitequihuíaj nopa camanali cati quijtohua: ‘Nopa tetajme quicuajque xocomecat itajca cati xococ huan quichijtoc para ininconeuhua ma quimatica fiero ipan inintancoch?’ Camanaltij ten quenicatza taijyohuisse israelitame por nopa tajtacoli cati inintatahua quichijque. ³ Temachti nimechilhuiá, nimotestigojquetza na noseltitzi para ayecmo quema más anquitequihuisse ni camanali ipan tali Israel. Pampa amo elis melahuac para quema se tajtacolchihua, icone quiselis tatzacuilti por itajtacolhua. ⁴ Pampa nochi masehualme noaxcahua. Noaxca se tetaj huan noaxca iconehua nojquiya. Huajca cati tajtacolchihuas elis cati miquis por itajtacol.

⁵ “Se tacat itztoc xitahuac sinta quichijtinemi cati cuali huan cati nelxitahuac. ⁶ Amo yahui ipan tepeme para quinilhuchihuilis teteyome huan taixcopincayome, yon amo quema quinhueyichijtoc nopa teteyome ten tali Israel. Amo momecatía, yon amo moteca ihuaya isihua quema esotemo. ⁷ Amo tetajilhuiá. Tetasoja huan sinta tetanejtía tomi huan quiprendajcahuilíaj se tamanti, nimantzi quicuepa. Amo quintachtequilía cati teicneltitzi pero quintamaca huan quinmaca yoyomit cati amo quipiyaj iniyoyo.

⁸ Nopa tacat amo tainama itanca quema tetanejtía itomi. Amo quema techihuilía cati amo cuali. Nochipa tetajtolsencahua xitahuac. ⁹ Yaya quitepanita notanahuatilhua huan ica nochi iyolo quichihua cati quijtohuaj. Ni tacat nelía xitahuac huan temachtí itztos. Amo miquis ipan nopa tonali quema hualas tatzacuilti. Quej nopa na, niamoTECO Cati Más Nijpiya Tanahuatili, niqijtohua.

¹⁰ “Pero huelis ni tacat quiapiya se icone cati motacachihuas huan mochi-huas se tachtejquet. Huelis mochi-huas se temectijquet o se cati nochipa quichihua nochi tamanti cati amo cuali, ¹¹ cati itata amo quichihuayaya. Huelis icone nopa tacat quinilhuichihuilía teteyome ipan tepeme huan quinhueyitepanita. Huelis quisihuacuilía cati elqui ihuampo, ¹² o quitaijy-ohuiltía cati teicneltzi huan cati amo quiapiya cati ica mopanoltis. O huelis quintachtequilía masehualme cati quitanejtijtoc tomi, o ayecmo quicuepa cati sequinoc quiprendajcahuilíaj quema tetanejtía se tamanti. Huelis icone nopa tacat motemachía ipan teteyome huan taixcopincayome huan tainama itanca quema tetanejtía tomi huan quichihua miyac tamanti cati na nijcualancaita. ¹³ Huajca ni fiero tacat amo quinamiqui itztos. Monequi miquis pampa quichijqui miyac tamanti cati amo nijnequi niqitas, huan imiquilis elis por ya itajtacol.

¹⁴ “Pero huelis ni tajtacolchijca tacat nojquiya quiapiyas se icone. Huan huelis icone quitas nochi nopa tajtacoli cati itata quichihua huan nopa icone techimacasis niiTECO huan moilhuis para más cuali amo quichihuas quej itata quichihua. ¹⁵ Ma tijtalica para icone nopa fiero tacat amo yahui ipan tepeme para quinilhuichihuilis teteyome huan taixcopincayome, yon amo quinhueyichihua nopa teteyome ten tali Israel, yon amo momecatía. ¹⁶ Yaya amo quintaijyohuiltía cati teicneltziti pero quicuepa cati quiprendajcahuilíaj quema tetanejtía se tamanti. Amo quema tachtequi huan quintamaca cati amo quiapiyaj inintacualis huan quinyoyontía cati amo quiapiyaj iniyoyo, ¹⁷ Yaya quinpalehuía cati teicneltziti huan amo tainama itanca quema tetanejtía itomi. Yaya quitepanita nochi cati quijtohua notanahuatil. Huajca ni tacat amo miquis por nopa tajtacoli cati quichijqui itata. Ni tacat temachtí itztos.

¹⁸ “Pero nopa tacat cati tetaijyohuilti, tachtejqui huan quichijqui miyac tamanti cati amo cuali pampa imasehualhua, yaya miquis por itajtacolhua.

¹⁹ “Pero amojuanti anquijtohuaj: ‘¿Amo monequi nopa conet miquis por itata itajtacolhua?’ ¡Amo, amo monequi! Sinta se conet quichihua cati cuali huan cati xitahuac, nojquiya quitepanita huan quichihua nochi cati quijtohua notanahuatil, huajca nopa tacat icone temachtí amo quiselis tatzacuilti pero mocahuas yoltoc. ²⁰ San yaya cati tajtacolchihuas miquis por itajtacolhua. Se conet amo miquis por itata itajtacolhua, yon amo miquis se tacat por icone itajtacolhua. Se masehuali cati xitahuac quiselis se taxtahuili pampa cuali inemilis. Huan se masehuali cati fiero inemilis quiselis se tatzacuilti pampa fiero inemilis.

Iojhui TOTECO senquisá xitahuac
(Ez 33:10-20)

²¹ “Huan sinta se masehuali cati fiero inemilis quicahuas nochi itajtacolhua huan pehuas quitepanitas nochi cati quijtohua notanahuatilhua huan quichihuas cati cuali huan cati xitahuac, huajca temachtí itztos ipan nopa tonali ten taijyohuilti. Amo miquis. ²² Huan na ayecmo niquelnamiquilis itajtacolhua cati achtohuiya quichihuayaya. Yeca temachtí itztos pampa quichihua cati xitahuac.

²³ “¿Anmoilhuáj techpactía ma miqúi se masehuali cati fiero inemilis? ¡Amo, amo cana! Na nijnequi ma moyolcuepa ten itajtacolhua huan ma itzto. Quej nopa na, niDIOS Cati Más Nijpiya Tanahuatili, niqúijtohua.

²⁴ “Pero sinta se cuali tacat pehua quichihua miyac tajtacoli quej quichihua seyoc cati tahuel tajtacolchihua, ¿anmoilhuáj quinamiqui noja itztos nopa masehuali? ¡Amo quinamiqui! Yon amo nijtachilis nochí nopa cuali tamanti cati quichijqui achtohuiya. Huan yaya miqúis por itajtacolhua huan itaixpanolhua.

²⁵ “Pero huelis anquijtohuaj para amo quinamiqui cati na nijchihua. Huajca xijtaqaquílca, anisraelítame. ¿Eltoc na cati amo nijchihua cati xitahuac o amojuanti cati amo anquichihuj cati xitahuac? ²⁶ Quema se cuali tacat quicahuas cati cuali quichihuayaya huan quichihuas cati amo cuali, yaya miqúis por itajtacolhua ipan nopa tatzacuiltili cati huala. ²⁷ Pero sinta se tajtacolchijca tacat quicahuas itajtacolhua huan pehuas quitepanitas notanahuatilhua huan quichihuas cati cuali huan cati xitahuac, huajca quimanahuis inemilis ipan nopa tonali. ²⁸ Pampa quíitac itajtacolhua huan moilhui más cuali quicahuas para quipiyas se nemilisti xitahuac, yeca ni tacat temachtí noja itztos huan amo miqúis ipan nopa tonali. ²⁹ Huelis, anisraelítame, anquisenhuiquilise anquijtose para na amo nijchihua cati xitahuac. Pero eltoc amojuanti, anisraelítame, cati amo anquichihuj cati xitahuac, amo na.

³⁰ “Na nimechtajtolsencahuas sesen ten amojuanti, anisraelítame, huan nimechtatzacuiltis quej quinamiqui ica cati anquichijtoque. Quej nopa na, niDIOS Cati Más Nijpiya Tanahuatili, niqúijtohua. Huajca ximoyolcuepaca huan xijcahuaca nochí amotajacolhua. Amo ximiquica ipan nopa tatzacuiltili cati huala por nochí cati anquichijtoque. ³¹ Xijcahuaca nochí tamanti cati amo cuali cati anquichihuayayaj huan ximochihuaca amasehualme cati anquipiayaj amoyolo huan amotonaltzi cati yancuic. ¿Para ten monequi anmiquise, anisraelítame? ³² Na amo techpactía ximiquica. Na niDios Cati Más Nijpiya Tanahuatili niqúijtohua: Ximoyolcuepaca huan xijsenhuiquilica xiitza.”

19

Se mijca huicat para nopa tanahuatiani ten israelítame

¹ “Nojqúiya xihuicaca ni mijca huicat cati amechpohuillá se huicalot ten nopa tanahuatiani ten israelítame. ² Quej ni xihuicaca:

“ Monana elqui se síhua tecuajquet cati itztoya tatajco ten sequinoc tapiyalme cati nojqúiya chichahuac quej tecuanime cati oquichme. Huan nopa síhua tecuajquet, cati quinixnextía nopa israelítame, quichijqui íchaj nopona inihuaya nopa sequinoc talme huan nopona quiniscaalti iconehua.

³ Elqui quej nopa síhua tecuajquet quiiscalti se icone ica miyac tamocuítahuilli,

pampa ten israelítame motananqui se tanahuatijquet. Yaya moscaalti nimantzi huan quipixqui miyac chichahualisti. Quimatqui quenicatza quintzontamiltis sequinoc tapiyalme, huan pejqúí quincua masehualme.

⁴ Huan nopa sequinoc talme quicajque ten ya, huajca injuanti quinnotzque masehualme cati quimatij quenicatza tamasil-tise,

huan quimasiltijque ipan se ostot. Huan quíilpijqúe ica tepos cadenas,

huan quihuicaque hasta tali Egipto.

Quej nopa ipantic nopa tanahuatijquet ten israelitame.

⁵ Huan quema nopa sihua tecuajquet quiitac para cati quinequiyaya ma quichihua nopa achtohui icone ayecmo cuali quisas,

huan ayecmo teno hueli quichihuas,

quicuic seyoc icone huan quinextili quenicatza mochihuas más mosisinía.

⁶ Huan yaya nejnenqui ica sequinoc leones huan mochijqui se cati más tayacanquet para tanahuatis.

Elqui quej quimatqui quenicatza quinmasiltis sequinoc tapiyalme,

huan quenicatza quinzontamiltis masehualme.

⁷ Yaya quinsosolhuili miyac ininchajchaj tanahuatiani ipan campa hueli talme cati mocahuayayaj inechca.

Huan nopa tanahuatijquet ten israelitame quinsosolo iniranchos huan inial-tepehua sequinoc.

Nochi mili quichijqui quej huactoc tali,

huan quitamilti nochi tamanti pixquisti.

Huan quema nanalcayaya nopa tecuajquet, nochi tali huihuipicayaya. Quej nopa elqui nopa tanahuatijquet.

⁸ Huajca nopa soldados ten nochi tali quiyahualojque,

huan quimasiltijque ipan se hueyi ostot huan quitzquijque.

⁹ Huan ica tepos chijcoli quihuahuatatzque huan quicalaquijque ipan se cuacali cati tzactoc quej para se tapiyali.

Huan quihuicaque iixpa nopa tanahuatijquet ten tali Babilonia.

Huan nopona quitzajque para ayecmo mocaquis itoscac nopa tanahuatij-quet ipan nopa tepeme ten inintal israelitame.

¹⁰ O huelis tiquijtose para monana, cati quinnextía nopa israelitame, elqui quej se xocomeca tzonti cati toctoc atenti.

Huan nopa xocomeca tzonti temacac cuali itajca huan quipixqui ixihuiyo cati jejyetzitzi pampa quipixqui miyac at.

¹¹ Ten imacuayohua quisqui cuajcuali cuatopili para tanahuatiani.

Huan mochijqui tahuel huejcapantic nopa xocomeca tzonti cati quinextía inintanahuatijcayo israelitame.

Mochijqui hueyi nopa tzonti hasta nochi hueliyayaj quitase ipan campa hueli tali,

pampa huejcapantic huan quipixqui miyac imacuayohua.

¹² Pero hualajque cati quihuihuitaque nopa xocomecat,

ica miyac cualancayot huan quitahuisojque hasta talchi.

Huan nochi imacuayohua posteque huan huajque,

pampa quinajsic se ajacat cati huala ica campa hualquisa tonati.

Huan itajca quiajsic tit huan tamitatac.

¹³ Huan ama nopa xocomeca tzonti cati quinextía nopa tanahuatijquet oneltoc ipan se huactoc tali ten Babilonia,

campa tahuel tetic nopa tali huan amo onca at.

¹⁴ Huan ipan imacuayohua quisqui se hueyi tit cati quitamitati itajca.

Quej nopa TOTECO quitatzacuilti ni tanahuatijquet cati nopa macuayot quinextía.

Huajca ama nopa israelitame cati nopa xocomeca tzonti quinixnextía ayecmo quipiyas imacuayohua cati tejetic.

Ayecmo quisas ipan imacuayohua cati huelis mochihuase icuatopilhua se tanahuatijquet.”

Ya ni eltoc se mijca huicat huan quej nopa monequi motequihuis quema ajsis hora.

20

Mosisinijtoque israelitame ica TOTECO

¹ Ipan majtacti itequi nopa metzti macuili ipan toisraelita calendario * quema yahuiyaya para chicome xihuit ica quiquixitoyaj Tanahuatijquet Joaquin ipan ital huan quihuicacoyaj, techitacoj sequij huehue tacame ten israelitame para ma nijtajtani TOTECO se tenijqui por injuanti. Huan mosehuijque noixpa para quichiyase taya quijtos TOTECO. ² Huan TOTECO nechcamanahui, na niEzequiel, huan techilhui: ³ “Tacat, xiquincamanahui nopa huehue tacame ten tali Israel huan xiquinilhui para quej ni na, niDIOS Cati Más Nijpiya Tanahuatili, niquijtohua: ‘Amo quinamiqui anhualahuij para antechtajtaniquij notapalehuil. Huan temachti amo teno nimechilhuis.’ ”

⁴ Huan yaya techilhui: “Tacat, monequi xiquintajtolsenhua ni tacame nelía chicahuac huan xiquinpohuili nochi nopa tajtacoli cati quichijtoque ipan inintal hasta ipan nopa tonali quema itztoyaj inihuejcapan tatahua huan hasta ama. ⁵ Xiquinilhui para quej ni na, niDIOS Cati Más Nijpiya Tanahuatili niquijtohua: ‘Quema niquintapejpeni nopa israelita masehualme para elise noaxcahua huan nimonexti ica injuanti ipan tali Egipto, na nitatestigojquetzqui huan niquinilhui para na niDIOS nielisquía niinintECO. ⁶ Huan nitatestigojquetzqui para melahuac niquinixtisquía injuanti huan iniixhuihua ipan tali Egipto huan niquinhuicasquía ipan seyoc tali cati nijpantijtoya huan nijcualtalijtoya para injuanti. Elqui se cuali tali cati temacayaya miyac itajca hasta mocahua. Eliyaya nopa tali cati más jejectzi huan más cuali que nochi sequinoc talme. ⁷ Nojquiya niquinilhui para ma quinixpolihuiltica nochi teteyome huan taixcopincayome cati quinixtoyaj. Niquinilhui ma amo mosoquihuica noixpa ica nopa teteyome huan taixcopincayome ten tali Egipto pampa na niDIOS niamotECO.

⁸ “Pero injuanti mosisinijque ica na huan amo quinejque techtacaquilise. Nojquiya amo mohuejcatalijque ten nopa teteyome huan taixcopincayome ten tali Egipto. Huajca na nimoilhui más cuali niquintatzacuiltis taniel chicahuac ica nohueyi cualancayo quema noja itztoyaj nopona ipan tali Egipto huan quej nopa nimoyoltalis inihuaya.

⁹ “Pero amo nijchijqui pampa amo nijnequiyaya sequinoc ma techhuetzquilica huan para nopa egiptome camanaltisquíaq fiero ten na cati niinintECO israelitame, cati niquintenahuilijtoya para niquinixtis ipan tali Egipto. Amo nijnejqui ma quijtoya para amo nijpaxqui chichahualisti huan amo nihuelqui niquinmanahuis nomasehualhua cati taijyohuiyayaj. ¹⁰ Huajca niquinixti ten nopa tali Egipto, iniixpa nopa egiptome huan niquinhuicac ipan huactoc tali. ¹¹ Huan niquinmacac notanahuatilhua para ma quintoquilica para huelis itztose. ¹² Nojquiya niquinmacac nopa tonali para ipan ma mosiyajquetzaca cati elisquía se tanextili ica injuanti huan na para ma quinelnamiquilti para na niDIOS cati niquiniyocacajtoc para niqinchihuas notantzejzeloltica masehualhua.

¹³ “Pero nopa israelitame mosisinijque ica na nopona ipan nopa huactoc tali huan quitahuelcajque notanahuatilhua. Amo quinejque quitapanitase notanahuatilhua cati quinmacatosquía nemilisti sinta quinneltocatosquíaq. Huan nopa tonali para mosiyajquetzase nojquiya amo quitapanitaque. Huajca niquijto para niquintzontamiltis ica nohueyi cualancayo nopona ipan huactoc tali. ¹⁴ Pero sempa amo nijchijqui pampa amo nijnejqui ma

* 20:1 20:1 Ipan 14 itequi agosto, 591 a.C. ipan tocalendario ten ama.

techpinahualtica sequinoc talme cati quiitaque quema niqunquixti nomasehualhua ipan tali Egipto. Amo nijnejqui ma quijitoca niquntzontamilti nomasehualhua pampa amo nihuelqui niqunmocuitahui.

15 “ Pero nozona ipan huactoc tali nitatestigojquetzqui huan niqunilhui para amo niqunhualicas ipan nopa tali cati nijtapejpenijtoya para inijuanti. Eliyaya se tali cati yejyetzzi huan temaca tahuel miyac itajca huan eltoc nopa tali cati más yejyetzzi ten nochi sequinoc talme. 16 Quej nopa niqunilhui pampa inijuanti amo quitepanitaque notanahuatilhua huan amo quinejque quichihuase cati na nijnequi, huan quiixpanoque nopa tonali para mosiyajquetzase. Ipan iniyolo tahuel quinhueyichihuayayaj teteyome huan taixcopincayome. 17 Pero noja niquntasojtac huan nimotzacuili para amo niquntzontamiltis ipan nopa huactoc tali.

18 “ ‘Huan nozona ipan huactoc tali niquncamanalhui ininconeua huan niqunilhui ma amo quitoquilica iniojhui inintatahua, yon ma amo quinhueyichihuaca nopa teteyome huan taixcopincayome cati inijuanti quinhueyichijque. 19 Niqunilhui: Na niDIOS niamoTECO. Huajca xijtepanitaca notanahuatilhua huan xijchihuaca nochi cati niqunijtohua. 20 Xiquiyacatalica nopa tonali para anmosiyajquetzase pampa ya nopa elis se tanextili para amechelnamiquiltía para na niDIOS niamoTECO.

21 “ ‘Pero ininconeua nojquiya mosisinjque ica na. Quitahuelcajque nochi notanahuatilhua cati quinmacatosquíaj nemilisti sinta quineltochosquíaj. Nojquiya quiixpanoque nopa tonali para mosiyajquetzase. Huajca sempa niqunijto para niquntzontamiltis ica nohueyi cualancayo nozona ipan huactoc tali. 22 Pero sempa niquntasojtac pampa amo nijnejqui sequinoc talme cati quiitaque quema niqunquixti nomasehualhua ipan tali Egipto ma camanaltica fiero ten na. 23 Pero nozona ipan huactoc tali nitatestigojquetzqui huan niqunijto para temachti niqunsemanasquía huan niquntitanisquía ipan campa hueli talme ipan taltipacti, 24 pampa amo quitepanitaque notanahuatilhua huan quitahuelcajque nochi cati niqunilhui ma quichihuaca. Amo quitepanitaque nopa tonali para mosiyajquetzase huan san quinequiyayaj quinhueyichihuase nopa teteyome huan taixcopincayome ten inintatahua. 25 Huan techixpanoque hasta niquncahuili ma quitoquilica tanahuatilme cati amo cuali huan cati amo quinmacasquía nemilisti. 26 Nojquiya niquncahuili ma momahuispoloca huan ma quinhuicaca iniachohui coneua cati na niqunmacatoya huan ma quintatica quej tacajcahualisti para quinmacase nopa teteyome huan taixcopincayome. Nijchijqui ya ni para ma momajmatica huan ma quimachilica para na niDIOS.’

27 “ ‘Huajca, tacat, xiquincamanalhui nopa israelitame huan xiquinilhui para quej ni na, niDIOS Cati Más Nijpiya Tanahuatili, niqunijtohua: ‘Amohuejcapan tatahua quisenhuiquilijque mosisinjaj nohuaya. 28 Huan quisenhuiquilijque techixpanoj quema niqunhualicac ipan nopa tali cati niquntajtolcahuili niqunmacas. Huan ipan nochi tepeme o ininfantita nochi cuame cati quipantijque, nimantzi nozona quitencahuayayaj tacajcahualisti huan copali iuxpa teteyome. Huan tahuel techcualancamaque quema quitencahuayayaj taajhuuyacayot huan copali huan tacajcahualisti cati quitoyahuaj. 29 Huan na niquntazintoquili: ¿Para ten anyahuij ipan nopa lugar para teteyome nozona huejcapa? Yeca nopa lugar quitocaxtijque: Bama. (Bama quinequi quijitos: Lugar Para Teteyome Nozona Huejcapa.) Huan quej nopa quitocaxtijaj hasta ama.’

30 “Huajca xiquincamanalhui nopa israelitame huan xiquinilhui para quej ni na, niDIOS Cati Más Nijpiya Tanahuatili, niqujtohua: ‘¿Para ten anquinequij anmomahuispolose noixpa san se quej amohuejcapan tatahua quichijque? ¿Para ten anquisenhuiquilíaj anquinhueyichihuaq teteyome huan taixcopincayome quej injuanti quichijque? 31 Hasta ama ni tonali anquinmictíaj amoachtohui coneua ipan tit para nopa teteyome huan taixcopincayome huan anmoijtacohuaq noixpa na. Huajca ¿anmoilhuíaj nimechpalehuis, anisraelitame, sinta quej nopa anquichihuaq? Na niDIOS Cati Más Nijpiya Tanahuatili nimechilhuía temachti amo nimechpalehuis masque anhualase campa na.

32 “ ‘Amojuanti anmoilhuíaj para anquinequij anquichihuase quej quichihuaq nopa masehualme ten sequinoc talme cati quinhueyichihuaq teteyome ten cuahuit huan ten tet, pero amo quej nopa elis. 33 Pero na niDIOS Cati Más Nijpiya Tanahuatili nimechilhuía para temachti se tonali nitanahuatis nozona campa amojuanti ica teposti nomaco huan ica nochi nocualancayo huan ica miyac chicahualisti. 34 Quena, ica miyac fuerza huan cualanti nimechhualicas ten nochi sequinoc masehualme huan talme campa nimechsemanqui. 35 Nimechhualicas ipan nopa huactoc tali inintzala masehualme ten miyac talme huan nozona timoixtachilise huan nimechtajtolsencahuas. 36 Huan nozona nimechtajtanis cuenta san se quej nijchijqui ica amohuejcapan tatahua ipan nopa huactoc tali quema niqunquixtijtoya ten tali Egipto. 37 Huan ipan nopa tonali nimechyoltachilis sesen amojuanti quej se tamocuitahuijquet quintachilía sesen ten iborregojhua para quitas sinta iaxca quema panoj itantita itepos cuatopil para calaquij campá quintzacua. Huan niqitas ajquiya ten amojuanti motemacas huan quitoquilis nopa camanali cati nijchijqui amohuaya. 38 Pero nochi nopa sequinoc cati mohuejcatalijtoque ten na huan techixpanotoque, niqunquixtis ipan nopa sequinoc talme campa itztoque amantzi, pero amo huelis calaquise ipan tali Israel. Huan ipan nopa tonali anquimachilise para na niDIOS.

39 “ ‘Huajca anisraelitame, quej ni na niDIOS Cati Más Nijpiya Tanahuatili nimechilhuía: Sinta ama anquinequij anquintoquilise amoteteyohua huan amotaixcopincayohua, huajca xiquintoquilica. Pero amo ximocuepaca teipa huan techmacaca tacajchualisti huan antechmahuispolohuaq na. Pampa na nitatzejtzeloltic huan sinta anquinhueyichihuaq teteyome huan teipa antechmacase tacajchualisti, niqita para soquiyo nopa tacajchualisti huan se pinahualisti para na. 40 Quema ajsis nopa tonali nochi israelitame techhueyichihuase ipan tali Israel ipan nopa tepet cati tatzejtzeloltic huan más huejcapantic. Nozona niqunselis nopa masehualme huan niquntajtanis ma techhualiquilica tacajchualisti huan nopa achtohui pixquisti cati quipixcase ipan inimila huan nochi tamanti cati monequi quiyocatalise para na. Quej nopa na, niDIOS Cati Más Nijpiya Tanahuatili, niqujtohua. 41 Huan quema nimechquixtis, anisraelitame, ten nochi nopa talme campa anitztose huan nimechhualicas sempa, na nimechselis quej elisquía se tacajchualisti ten copali cati más ajhuiyac mijyotía. Huan nimechnextilis para nelía nitatzejtzeloltic huan nochi talme ehuaní quitate.

42 “ ‘Huan quema ya nimechhualicatos ipan nopa tali cati niquntajtolchahuil amohuejcapan tatahua para niqunmacas, huajca anquimachilise para na niDIOS. 43 Huan ipan nopa tonali anquielnamiquise nochi nopa tamanti cati amo cuali cati anquichijque huan amoselti anmoijiyase por nochi nopa fiero tajtacoli cati anquichijtoque. 44 Huan quema nimechta-

sojtas, anquimatise para na niDIOS. Huan nochi sequinoc techtepanitase pampa amo nimechchihuili cati quinamiqui por nochi cati fiero antechchi-huilijtoque. Quej nopa na, niDIOS Cati Más Nijpiya Tanahuatili, niqijtohua.’”

Itatzacuilitl nopa cuatitamit cati mocahua ica tatzinta

⁴⁵ Teipa TOTECO nechcamanalhui huan techilhui: ⁴⁶ “Tacat, xitachiya ica tatzinta huan xitayolmelahua taya ipantis nopa cuatitamit Neguev. ⁴⁷ Xiquijto: ‘Xitacaquili icamanal TOTECO.’ Xiquinilhui para na, niDIOS Cati Más Nijpiya Tanahuatili, niqijtohua para ipan ni cuatitamit, na nijyolitis se hueyì tít huan quintatis nochi cuame cati xoxohuique huan nochi cati huactoque. Ni tít amo sehuis. Quintatis nochi cati itztoque ica huejcapa huan ica tatzinta. ⁴⁸ Huan nochi masehualme ipan taltipacti quimatise para na niDIOS cati nijyoliti nopa tít pampa nopa tít amo sehuis.”

⁴⁹ Huan na, niEzequiel, niqilhui: “Ay TOTECO Cati Más Tijpiya Tanahuatili, ni masehualme quijtohuaj para na san nicamanalti camanali cati amo aqúi hueli quimachilía.”

21

Imacheta TOTECO cati tahuel tatequi

¹ TOTECO sempa nechcamanalhui huan techilhui: ² “Tacat, xitachiya ica campa mocahua altepet Jerusalén huan xitayolmelahua taya ipantis tali Israel huan nopa tiopame cati onca nozona. ³ Xiquinilhui tali Israel ehuan para quej ni na, niDIOS, niqijtohua: ‘Na nimochijtoc niamocualancaitaca. Huajca nijquixtis nomacheta ipan icuetaxo huan niqinmictis momasehualhua, cati itztoque xitahuaque huan cati tajtacolchihuani. ⁴ Quena, nijquixtis nomacheta para niqinmictis cati itztoque xitahuaque huan cati tajtacolchihuani pampa monequi nijtapajpacchihuas notal ten ica tatzinta hasta ica huejcapa. ⁵ Huan nochi masehualme quimatise para na niDIOS ya nijpixtoc nomaco nomacheta huan amo nijcalaquis ipan icuetaxo hasta nitamis nijtequihúa.’”

⁶ “Huajca ta, tacat, xiaxti ica miyac tequipacholi huan xichoca iniixpa nopa masehualme. ⁷ Huan sinta mitztatzintoquilise para ten tichoca, xiquinilhui tiaxti por se camanali cati tahuel temajmati cati na, nimoTECO, nimitzmacatoc. Pampa quema mochihuas cati quijtohua nopa camanali, nochi masehualme momajmatise ica nochi iniyolo hasta cati tahuel mosemacaj. Huihuipicas inimetz huan tamis inifuerza nochi cati tahuel quipiyaj chicahualisti. Huan na niDIOS Cati Más Nijpiya Tanahuatili niqijtohua para ya monechcahuía nopa tonali para mochihuas ni tamanti huan temachtí ajsis.”

⁸ TOTECO sempa nechcamanalhui huan techilhui: ⁹ “Tacat, xiquinca-manalhui nopa israelitame huan xiquinilhui taya ininpantis. Xiquinilhui para na, niDIOS Cati Más Nijpiya Tanahuatili, niqijtohua: ‘Amantzi mocualancaitacahua quientíaj se macheta huan quipojpohuaj nelía cuali, ¹⁰ para quitequihuse para quinmictise miyac israelitame. Quipojpohuaj nopa macheta hasta cahuanis quej se tapetanilot. ¿Ama huelis anhuetzcase? Anisraelitame amo anquitepanitaque icuatopil nopa tanahuatijquet cati na nijtali. Anmoilhuyayaj amo quinamiqui ma amechxitahua huan yeca ama sequinoc hualahuij para amechtizontamiltise. ¹¹ Quena, eltoc quej ya tacualchijchihuali nopa macheta para quitequihuis nopa temictijquet.

12 “Huajca, tacat, xitzajtzi huan xichoca huan ximomaquili ipan moquestomahuyia pampa cati hualase ica macheta quinmictise nomasehualhua huan tayacanani ten tali Israel. Quena, miqoise nochi nopa tayacanani ten israelitame san sejo ica nopa masehualme. 13 Nopa macheta quineyeyecos nochi nopa masehualme. Huajca na niDIOS Cati Más Nijpiya Tanahuatili nitatzintoca: ¿Quenicatza huelis anmomanahuisse?”

14 “Huajca, tacat, xiquinnextili israelitame taya ininpantis. Ximomatatzini chicahuac para tijnextis quenicatza amechmaquilise ica macheta. Teipa xijtilana nopa macheta quej elisquía titemictía. Teipa sempa xijtanana chicahuac. Huan sempa ica expa xijtanana noja más chicahuac para tiqinnextilis israelitame quenicatza injuanti cati hualase quintzontamiltise israelitame ica miyac cualancayot. Pampa quinmictise miyac masehualme campa hueli ica macheta. 15 Huan quichihuase para nochi israelitame tahuel ma momajmatica ipan iniyolo. Huan campa hueli tachiyase, quitase para itztoque tacame para quinquechtzontequise ica machetas cati cahuani quej tapetanilot. Tahuel cuali quitentijtoque nopa machetas para quitequihuise ipan nopa hueyi miqulisti. 16 Ica nopa machetas, amo aqui momanahuis. Cati quinequis cholos ica inejmat, nepa quipantis. Huan cati yas ica iarraves nojquiya quipantis nopona. 17 Huan na nojquiya nimomatatzinis ica cualanti huan niquintzontamiltis israelitame hasta tamis nohueyi cualancayo. Quej nopa niquijtohua na, niDIOS.”

18 Teipa TOTECO sempa nechcamanahui huan techilhui: 19 “Tacat, xijchichihua se mapa huan ipan nopa mapa xiquixcopina se ojti cati quisas ipan tali Babilonia para ipan hualas nopa tanahuatijquet ten Babilonia ica imacheta. Huan teipa nopa ojti momaxalos ica ome ojti. 20 Se ojti yas para altepet Jerusalén nopa altepet cati más cuali moyahualojtoc ten tali Judá huan seyoc para tali Rabá campa itztoque nopa amonitame. Huan campa pehuas nopa ome ojti, xijtali se tajcuiloli ipan huapali quijtos ipan taya altepet yahui nopa ojti. 21 Pampa nopa tanahuatijquet ten tali Babilonia ama moquetztoc campa momaxalohua nopa ojti huan amo quimati catijqui altepet quitehuis achtohui. Huan yaya quinnotza nopa tacame cati tetonalitaj huan injuanti quimajcahuaj inincuatamin para quimatise taya altepet quitehuise. Nojquiya quinmacaj tacajcahualisti ininteteyohua huan quitajtachilíaj nopa tapiyalme inieltapach para quitase catijqui ojti quinextis. 22 Huan ipan inimanemat quisas nopa cuataminti cati quinnextilis para monequi yase ipan altepet Jerusalén para quitehuitij huan pehuase temictise. Tzajtzise huan tahuejchihuase chicahuac quema pehuas nopa tatehuilisti. Huan ica se hueyi cuahuit quimaquilise nopa caltemit ipan itepa nopa altepet hasta quicoyonise huan huelis calaquise para tasosolose. Quimontonose miyac tali iica nopa tepamit para ipan tejcose para calaquise ipan nopa altepet. Huan quichijchihuase torres cati huejcapantique yahualtic ten nopa altepet para ipan tajtachiyase.

23 “Huan nopa Jerusalén ehuan amo quineltocase sinta melahuac quitehuiquij Babilonia ehuan. Injuanti moilhuíaj para amo hueli hualase pampa ya quisencajtoque se camanali ihuaya nopa tanahuatijquet ten Babilonia. Moilhuise para mocajcayajque nopa tetonalitani cati quillhuijque nopa tanahuatijquet para ma huala Jerusalén. Pero nopa tanahuatijquet ten tali Babilonia quinelnamiquiltis quenicatza Jerusalén ehuan quixpanotoque nopa camanali cati quichijque ihuaya huan yeca monequi quitehuis huan quinhuicas ipan ital.

24 “Yeca na, niDIOS Cati Más Nijpiya Tanahuatili, niquijtohua para tane-mijya nesi nochi nopa tajtacoli huan fiero tamanti cati anJerusalén ehuan

anquichijtoque. Yeca temachti nimechtemactilis inimaco nopa tacame cati hualase para amechitzquise huan amechhuicase.

²⁵ “Huan ica ta, tiferio tanahuatijquet ten tali Israel, ya ajsic hora para tijselis motatzacuilitil huan titemacas cuenta ten nochi tamanti cati tijchijtoc. ²⁶ Na, niDIOS Cati Más Nijpiya Tanahuatili, nimitzilhuía xijquixti mocorona cati yejyetzti pampa ayecmo tielis titanahuatijquet. Ama nochi mopatas. Ama cati itztoyaj teicneltzitzi huan más echcapantzitzi mocahuase huejcapa ten nica, huan ta cati tiitztoya más huejcapa timocahuas tatzinta. ²⁷ Nelía temachti na nijsosolos nochi ni tanahuatijcayot huan amo oncas seyoc tanahuatijcayot nica hasta ipan nopa tonali quema hualas nopa tacat cati nelía quinamiqui ma eli tanahuatijquet. Huan na nijtequimacas para ma tanahuati xitahuac.

Tatzacuiliti para nopa amonitame

²⁸ “Huan nojquiya, tacat, xiquinyolmelahua nopa amonitame cati quin-tajilhuíaj israelitame para ma quimatica taya ininpantis. Xiquinilhui para nijquixtijtoc nomacheta ipan icuetaxo huan niquintzontamiltis. Quena, tahuel cuali tatentili nomacheta hasta petani quej tapetanilot. ²⁹ Huan nochi nopa tetonalitani huan nopa tacajcayajca tajtolpanextiani campa amojuanti san istacatij huan quijtohuaj para amo hualas nopa tanahuatij-quet ten Babilonia ica imacheta. Amechilhuíaj anitztose cuali huan amo teno amopantis. Huajca ama nopa tatzacuiliti quinajsis nopa amo cuajcualme campa amojuanti noja más chicahuac quema ajsis tonali para antemacase cuenta.

³⁰ “Amo ximoilhuica nijcalaquis nomacheta ipan icuetaxo quema ayemo nimechtzontamilti pampa amo cana. Achtohui nimechtzontamiltis ipan nopa tali campa antacatque. ³¹ Nijitanis amopani nochi nocualancayo quej elisquía se hueyi tit cati tahuel tetatía. Huan nimechtemactilis inimaco masehualme cati tahuel tecocohuaj huan cati cuali momachtijtoque queni-catza tasosolose. ³² Huan amojuanti anitztose quej sacat cati tamitata ica se talojtzi. Huan nochi amoeso toyahuis ipan nochi amotal huan teipa ayecmo aqúi amechelnamiquis. Quej nopa na, niDIOS niquijtohua.”

22

Inintajtacolhua nopa Jerusalén ehuaní

¹ TOTECO sempa nechcamanalhui huan techilhui: ² “Tacat, xiquinta-tolsencahua altepet Jerusalén ehuaní huan xiquinilhui taya ininpantis pampa inijuanti tahuel temictíaj. Xiquintatelhui por nochi nopa fiero tamanti cati quichijtoque. ³ Xiquinilhui para quej ni na, niDIOS Cati Nijpiya Nochi Tanahuatili, niquijtohua: ‘AnJerusalén ehuaní anmomictíaj huan anquinchijchihuaj teteyome huan taixcopincayome para ica anmomahuis-polose noixpa. Ya monechcahuijtoc nopa tonali para anquiselise amotax-tahuil huan amo huelis ancholose. ⁴ Anquihuicaj miyac tajtacoli pampa tahuel antemictijtoque huan anmomahuispolojtoque noixpa ica nopa tetey-ome cati anquinchijchijtoque. Yeca ama ya ajsic hora para anquiselise tatzacuiliti huan para antamise. Nijchihuas para nochi tali huan altepeme ma amechpinajtica huan ma amechtaijilhuica amojuanti huan amoaltepe. ⁵ Nochi masehualme cati itztoque huejca o nechca amechixmatise por nochi nopa tamanti cati amo cuali cati anquichihuayayaj huan amechpinajtise ica nochi tamanti cati amo cuali cati anquichijtoque.

6 “Nochi nopa tayacanani ten tali Israel cati itztoque ipan Jerusalén taniel quinpacktia temictise ica nochi ininchicahualis. 7 Nopona masehualme amo quintepanitaj inintatahua, yon ininanhua. Ten fiero quinchihuiliaj sequinoc talme ehuan huan amo quinchahuiliaj coneme cati icnotziti huan cahual sihuame ma quiipyaca cati ica panose. 8 Amo quitepanitaj notiopa huan nopa tamantziti cati taiyocatalilme para na, yon amo quitepanitaj nopa tonali para mosiyajquetzase. 9 Miyac tacame quintelhuiaj sequinoc ica istacatili huan quintitanij para ma quinmictica masque amo teno quichijtoque. Yahui ipan nopa ilhuime cati quichihuaj ipan tepeme para quinhueyichihuase teteyome huan taixcopincayome huan nopona ica inintahuey quichihuaj miyac tamanti cati amo cuali. 10 Miyac tacame ten altepet Jerusalén quinsihuacuiliaj inintatahua huan miyac quinechahuiaj inisihua quema esotemo. 11 Itztoque miyac cati momecatijquej ica inisihuajhua inihuampoyohua. Sequij cochij inihuaya iniyex huan hasta sequij ten hueli quichihuaj ihuaya iniicni. 12 Sequij quiseliaj tomi para quimictise se acaya. Sequij tainamaj itanca o seyoc tamanti para tetanejtiaj tomi. Quincajcayahuaj inincalnehcahua para quitanise miyac tomi. Jerusalén ehuan amo techelnamiqumij na, yon amo quinelnamiqumij notanahuatilhua. Quej nopa na, niDIOS Cati Más Nijpiya Tanahuatili, niqumijtohua.

13 “Pero na nelia nicualani pampa anJerusalén ehuan taniel antetaiyohuiliaj para anquitanise más tomi. Huan anquityoajtoque miyac esti ipan calles. 14 Huan quema na nipehuas nimechtatzacuultis, amo huelsi anmotalise nohuaya. Na, niDIOS, niqumijtohua cati nijchihuas huan temachtij nijchihuas nochi cati nimechilhua. 15 Huajca nimechtitanis anJerusalén ehuan ipan campa hueli talme, huan quej nopa nimechquixtilis nochi tamanti cati amo cuali. 16 Huan quema amo aqui ipan nochi tali ipan taltipacti ayecmo aqui amechtepanitas huan taniel anmopinahualtise, huajca anquimachilise para na niDIOS.”

17 Teipa TOTECO sempa nechcamanahui huan techilhui: 18 “Tacat, nopa israelitame amo teno ininpati noixpa. Itztoque quej itetejtzo cati quisa ipan se teposti quej bronce, estaño, hierro huan plomo huan mocahua tatzinta quema quimolonija nopa teposti ipan se horno. 19 Yeca na, niDIOS Cati Más Nijpiya Tanahuatili, niqumijtohua: Xiquinilhui Jerusalén ehuan para mochijtoque quej tasoli cati monequi quiquixtise ten teposti, huan huajca niqumihualicas nomasehualhua tatajco altepet Jerusalén para niqumimolonis. 20 Quej quiatiliaj huan quimolonija teposti ipan se horno cati taniel totonic para quisas itasolo, quej nopa niqumintatzacuultis nomasehualhua ica nochi nocualancayo huan quisas cati amo cuali ipan injuanti. 21 Xiquinilhui israelitame: Nimechsejcotilis tatajco ten nopa altepet huan quej se acaya quuilpitzas se tit, na nimechtaijyohuultis ica miyac cualanti huan nopa hueyi tit amechajsis huan nimechtaijyohuultis. 22 Huan quema antaijyohuise, quisas cati amo cuali ten amojuanti quej quisa itasolo plata quema atiya ipan se horno. Huan quema ya nimechtatzacuultitoc pampa miyac nicualani ica amojuanti anquimachilise para na niDIOS.”

23 Huan TOTECO sempa nechcamanahui huan techilhui: 24 “Tacat, xiquinilhui israelitame ten taya niqumijtohua ten quenecatza eltos nopa tali ipan tali Israel. Xiquijto: ‘Ipan nopa tonali quema nimechtatzacuultis ica nohueyi cualancayo, nopa tali elis quej se tali campa amo aqui tamejtoc huan san onca cuatitamit. O elis quej se huactoc tali campa amo quema huetzi at. 25 Nopa amotajtolpanextijcahua quisencahuaj san sejco ajquiya quincajcayahuase para quichitequilise itomi. Itztoque quej se león cati

quitemojtinemij se tapiyali para quitzontamiltis. Nopa tajtolpanextiani quincuilíaj cati ipati cati eliyaya iniaxca miyac masehualme. Quinmictíaj cati amo teno quichijtoque huan quinchihuaaj ma elica cahualme miyac sihuame. ²⁶ Nochi amototajtzitzi quixpanotoque notanahuatilhua huan quimahuispolojtoque nochi tamantzitzi cati tatzejtzeloltique pampa eltoyaj taiyocatalili para na. Inijuanti amo quimatij catijqui tamanti tatzejtzeloltic huan catijque tamanti amo tatzejtzeloltic. Amo quinnextilíaj nomasehualhua catijque tamanti tapajpactic noixpa para huelis motequihuis para techhueyimatise huan catijque tamanti amo tapajpactic. Amo quitepanitaj nopa tonali cati na nimechmacatoc para ipan ximosiyajquetzaca huan yon quentzi amo techtepanitaj na cati nitatzejtzeloltic. ²⁷ Amotayacancahua, anisraelitame, itztoque quej lobos cati quitzquíaj se tapiyali huan quicocotzaj. Quitoyahuaaj miyac esti huan temictíaj para quitanise tomi cati amo xitahuac. ²⁸ Amotajtolpanextijcahua itztoque quej cati quitailíaj nexti ipan se tepamit cati amo quiipiya cuali mezcla huan ya quinequi huetzis. Quej nopa quitatíaj cati melahuac. Inijuanti quijtohuaj quitztoque tanextili huan quiselijtoque camanali ten na, pero amo cana. San istacatij pampa na, niDIOS Cati Más Nijpiya Tanahuatili, amo teno niquinnextilijtoc, yon amo teno niquinilhujtoc. ²⁹ Huan nojquiya ipan amotal cati hueli masehuali tahuel tatehuía huan tachtequi. Quintaijyohuiltíaj teicneltzitzitzi huan cati amo teno quiipiay; huan ten hueli quinchihuilíaj nopa seyoc tali ehuan cati itztoque tatajco ten amojuanti.

³⁰ “Na nijtemo campa inijuanti se acajya cati motanasquía huan motancaquetzasquía noixpa ipan ojti huan techtajtanisquía ma amo niquintamilti ni masehualme, pero amo nijpanti yon se. ³¹ Yeca na niquintatzacuiltis nopa masehualme ica nohueyi cualancayo huan elis quej quinajsis se hueyi tit huan quintamitatis. Huan quej nopa niquintaxtahuis quej quinamiqui por senquisa nochi inintajtolhua. Quej nopa na, niDIOS Cati Más Nijpiya Tanahuatili, niquijtohua.”

23

Altepeme Samaria huan Jerusalén san se tajtacolchihuaaj

¹ TOTECO nechcamanalhui huan techilhui: ² “Tacat, nimitzpohuilis ten altepeme Samaria huan Jerusalén ehuan. Inijuanti itztoque quej ome sihuame cati eliyayaj icnime pampa quipixque san se ininana. ³ Huan quema noja eliyayaj ichpocame, eltoc quej pejque mochihuaaj ahuilnenca sihuame ipan tali Egipto pampa pejque nechcahuaaj nozona para quintoquilise teteyome. Eltoc quej motemactilijque ica tacame para ten hueli ma quinchihuilica. ⁴ Nopa ichpocat cati achtohui tacatqui itoca eliyaya Ahola huan yaya quixnextía Samaria. Huan nopa iicni itoca eliyaya Aholiba cati quixnextía altepet Jerusalén. Huan eltoc quej na niDIOS nimoculli ni ome para noaxca quej se tacat mocuilía isihua huan quinequi san ya ma quicneli. Huan quena, inijuanti elque noaxcahua. Huan teipa elqui quej quintacatiltijque oquichpilme huan sihuapilme cati elque noaxcahua.

⁵ “Pero teipa Ahola o Samaria pejqui motemachía ipan sequinoc teteyome huan ayecmo technejqui na. Quej se sihuat cati quicahua ihuehue, Samaria quinmactili itacayo huan iyolo nopa Asiria ehuan cati itztoyaj inechca masque melahuac noja eliyaya noaxca na. ⁶ Asiria ehuan moquentiyayaj yoyomit cati moradojtic quej tominpiyani. Hualajque tayacanani ten soldados, huan tanahuatiani huan telpocame cati tahuel yejectzitzitzi. Huan nochi

tejcoyayaj ipan cahuayojme. ⁷ Huan Samaria ehuan quinequiyayaj ma quinnahuatíca nopa Asiria ehuan huan amo na. Quej sihuame tajtacolchi-huaj ica sequinoc tacame huan quipantíaj miyac tequipacholi, Samaria ehuan quinequiyayaj nopa asirios cati más tapejpenilme ma quinnahuatíca. Huan quej se ahuilnenca sihuat ten hueli quichihua inihuaya cati quinicnelía, Samaria tahuel momahuispolo noixpa. ⁸ Nopa Samaria ehuan amo quicajtejque iniahuilnencayo cati pejqui ipan tali Egipto. Quisen-huiquilijque ten hueli quichihuaj iniixpa teteyome quej quichijque ipan tali Egipto quema nopa egiptome quinnextilijque ma tajtacolchihuaca. Huan nopa egiptome ten hueli quichijque inihuaya nopa israelitame quema nopa israelita masehualme noja eliyayaj masehualme cati yancuique quej se ichpocat. Quena, injuanti quinchihualtijque israelitame ma elica quej se ahuilnenca sihuat pampa nechcajtejque para quintequipanose teteyome.

⁹ “Huaajca yeca na niquintemactili nopa Samaria ehuan inimaco nopa Asiria ehuan cati tahuel quinixtocayayaj huan cati ininpan motemachiyayaj huan amo ipan na. ¹⁰ Huan nopa Asiria ehuan quinxolohuijque israelitame, huan quincuiliijque nochi inincone-hua huan quinmictijque ica macheta. Huan sequinoc campa hueli ipan taltipacti quicajque ten panoc ica israelitame huan quimachilijque para elqui quej se tajtacolchijca sihuat cati quiseli nopa tatzacuilitli cati quinamiqui ica cati amo cuali quichijtoya.

¹¹ “Pero quema Aholiba, cati quixnextía Jerusalén, quitiac cati fiero ipan-tic iicni Samaria, yaya amo quichihuili cuenta. Nojquiya Jerusalén ehuan pejque nechcahuaj niininTECO huan quichihuaj cati quinejque. Pejque ahuilnemij ica sequinoc noja más huan amo quej quichijtoya iicni Samaria.

¹² Huan Jerusalén ehuan ayecmo technequiyayaj na. Quintocayayaj nopa asirios cati itztoyaj ininechca pampa nopa asirios eliyayaj telpocame cati yejyetzitzi huan quinixtocayayaj nopa tanahuatiani huan tayacanani ten soldados. Nochi injuanti moquentiyayaj yoyomit cati moradojtíc quej tom-inpiyani huan quipiyayaj cuajcuali teposti para ica tatehuisse huan nochi injuanti tejcotoyaj ipan cahuayojme cati yejyetzitzi. ¹³ Huan niquitac quenicatza Jerusalén ehuan nechcajtehuayaj para momahuispolose ica teteyome quej quichijtoyaj Samaria ehuan.

¹⁴ “Pero Jerusalén ehuan melahuac mochijque cati noja más fiero que Samaria ehuan pampa pejque quinixtocaj nopa taixcopincayome cati tatzquitoyaj ipan tapepecholi ten tali Babilonia tacame cati moquentiyayaj iniyoyo cati chichilitic. Huan Jerusalén ehuan quinequiyayaj nechcahuase na huan quinequiyayaj ma hualaca quinnahuatiquij nopa Babilonia tanahuatiani huan tayacanani cati quinzitoyaj ipan tapepecholi.

¹⁵ Quipiyayaj inintzínquechilpica cati tahuel yejyetzzi huan quihuijcontoyaj inintzonteco ica se yoyomit cati yejyetzzi quipajtoyaj huan ten inintzonteco temoyaya icuitapil nopa yoyomit. ¹⁶ Huan quema nopa Jerusalén ehuan quinitaque nopa taixcopincayome, nelía quinixtocaque. Itztoyaj quej se ahuilnenca sihuat cati tahuel quinequi motemactilis ica imecahua pampa tahuel quinequiyayaj para nopa tacame cati no-pona quinixcopin-toyaj ma quinnahuatiquij. Huaajca quintitanqui itayolmelajcagua ipan tali Babilonia para quinihuitij ma hualaca Jerusalén. ¹⁷ Huan nopa Babilonia ehuan hualajque quej imeca se ahuilnenca sihuat huan ten hueli quinchihuilijque Jerusalén ehuan tahuel quinnahuaispolojque noixpa. Huan por cati quinchihuilijque, Jerusalén ehuan pejque quincualancaitaj Babilonia ehuan huan quitamiltijque nopa camanali cati quichijtoyaj inihuaya.

18 “Huajca na nimoicancuetqui ica Jerusalén ehuani quej nimoicancuettoya ica iicni, Samaria, pampa Jerusalén ehuani tahuel quinnotzayayaj sequinoc miyacapa para ma hualaca huan ten hueli ma quinchihuilica. 19 Pero quema niquincajtejqui, Jerusalén ehuani yon amo quichihuilijque cuenta. Itztoyaj quej se ahuilnenca sihuat cati noja más quinequiyaya ahuilnemis. Israelitame quielnamijque quenicatza quinhueyichijtoyaj sequinoc teteyome ipan tali Egipto quema ayemo miyac israelitame itztoyaj. Mochijqui quej se ahuilnenca sihuat cati quielnamijqui ajquiya achtohui quinextili ma quicahua ihuehue huan ma tacanemi. 20 Huan yaya tahuel quinnequiyaya iEgipto mecahua cati itztoyaj quej oquich burrojme huan cahuyojme. Quej nopa, nopa israelitame quinequiyayaj Egipto ehuani ma hualaca para quinpalehuisse huan amo na. 21 Huajca, anisraelitame, sempa anquintemojque nopa Egipto ehuani quej anquichihuayayaj quema anitztoyaj ipan tali Egipto huan sanoc anpejtoyaj anitztose se hueyi grupo ten masehualme huan anquincahuilijayaj nopa egiptome para ten hueli ma amechchihuilica.

22 “Huajca yeca, tiAholiba cati tijnextia Jerusalén, quej ni na, niDIOS Cati Más Nijpiya Tanahuatili, nimitzilhuia: Nijchihuas para nopa talme cati ama ayecmo tiquinnequi, ma mochihuaca mocualancaitacahua pampa achtohuiya más tiquinnequiyaya ininteteyohua huan más tiquinnequiyaya ma mitznahuatijij. 23 Niqinchihuas ma hualaca nopa tali Babilonia ehuani huan nopa caldeos cati ehuani ipan altepet Pecod, Soa huan Coa. Huan hualase inihuaya nochi nopa asirios. Hualase yejyetzitzi telpoca tacame, tayacanani ten soldados, tatehuiani huan tacame cati yolchicahuaque. Sequij cati hualase elij tanahuatiani, huan nochi tejcotose ipan cahuyojme. 24 Quena, hualase amechtehuilij, anJerusalén ehuani, ica tatehuijca carrojme huan cuacarros ica tahuel miyac soldados cati mocualtalijtose ica inintzontajca huan ica teposme cati ica quitzacuase inintacayo para amo teno hueli quincocos. Huan na niqinmacas tanahuatili para ma amechtatzaucultica. Huan inijuanti amechtatzaucultise chicahuac quej quijjotuhua inintanahuatilhua. 25 Na nimechhuitequis ica nochi nocualan-cayo huan niqincahuilis inijuanti ma amechchihuilica cati amo cuali. Amechtzonequilise amoyacatzol huan amonacas. Huan cati hueli ten amojuanti cati noja anmocahuase anyoltoque anmiquise ipan tatehuilisti. Huan nochi amotelpocahua huan amoichpocahua quinhuicase ipan seyoc tali para tetequipanotij san tapic. Huan nochi cati noja mocahuase yoltoque, quintamitatise. 26 Inijuanti amechichtequilise amoyoyo huan nochi amopijpilol huan amomaquehcoshua cati ica anmoyectaliyayaj. 27 Huan quema niqincahuilis ma amechtatzaucultica quej ni, nijtamiltis amosisinijcayo huan amoahuilnencayo cati anquichijtihualajtoque hasta quema anitztoyaj ipan tali Egipto. Huan ayecmo quema anquinelnamiquise nopa Egipto ehuani, yon ininteteyohua.

28 “Ya ni cati na niDios Cati Más Nijpiya Tanahuatili niqinilhuia Jerusalén ehuani: Nimechtemactilis inimaco nopa talme cati anquincualancaitaj huan cati amo anquinequij anquinitase. 29 Inijuanti amechcualancaitaj huan amechichtequilise nochi cati anquintantoque huan amechquixtilijaj amoyoyo para anmocahuase anxolome. Huan tanemijya nesis amoahuilnencayo huan amotajacolhua para nochi quitase. 30 Nochi ni tatzaucultili ajsis amopani pampa antechcajtejque na huan anmomecatijque huan anquichijtoque cati sequinoc talme ehuani quichihuaj. Anquinequiyayaj sequinoc talme ma amechpalehuica quej nopataca na huan anmomahuispolojque noixpa quema anquinhueyichijque ininteteyohua. 31 Anquitoquilijque

iniojhui nopa Samaria ehuani huan anquinhueyichijque teteyome, huan yeca nimechtatzacuiltis san se quej niquintatzacuiliti injuanti.

³² “Na niDIOS Cati Más Nijpiya Tanahuatili huan niquintohua para nochi nopa huejhueyi tatzacuiliti cati quiselijque Samaria ehuani, nojquiya ya nopa amechajsis anJerusalén ehuani. Huan nochi tali ehuani ipan taltpacti amechpinajtise huan amechtaijilhuisse quema amechajsis nopa fiero taijy-ohuulisti. ³³ Annejnemise quej se ihuintiquet huan tahuel ancuaajcualose por nopa huejhueyi tasololisti cati ajsis amopani huan nopa pinahualisti cati nimechtitanilis. Nimechtatzacuilitis san se quej niquintatzacuiliti Samaria ehuani. ³⁴ Anquiselise nochi amotatzacuilit hasta amo teno mocahuas cati fiero para ica nimechtatzacuilitis huan anmoyolixtejtzonase pampa tahuel antaijyohuijtose pampa quej nopa na, niDIOS Cati Más Nijpiya Tanahuatili, niquintojtoc para panos.

³⁵ “Yeca na, niDIOS Cati Más Nijpiya Tanahuatili, niquintohua para nochi ya ni amechajsis pampa antechelcajtoque huan anmoicancuetoque ica na. Huaajca ama monequi anquijyohuisse nopa tatzacuiliti pampa anquinhueyichijque teteyome huan antechcajtejqe quej se ahuilnenca sihuat quicahua ihuehue.”

³⁶ Huan TOTECO techilhui: “Tacat, monequi xiquintajtolsencahua nochi ipan Jerusalén huan Samaria por nochi nopa fiero tamanti cati quichijtoque. ³⁷ Inijuanti tahuel momecatijtoque huan temictijtoque. Momecatijque pampa quinhueyichijque teteyome huan taixcopincayome huan temictijque pampa quinmictiaj ininconeuhua cati quintacatiltijque para na huan quintalijque ipan taixpamit huan quintatijque quej se tacajcualisti para nopa teteyome. ³⁸ Huan quema ya tantoyaj quichihuaj ni tamanti cati fiero, quimahuépolojque notiopa huan amo quitepanitaque nopa tonali cati na niquinmacatoya para ipan ma mosiyajquetzaca. ³⁹ Quena, ipan nopa tonali quema quinmictijque ininconeuhua inixpa ininteteyohua, calajque ipan notiopa huan quimahuépolojque notiopa huan quichijque amo tapajpactic por inintajtolhua.

⁴⁰ “Pero amo san ya nopa anisraelitame ten Samaria huan Jerusalén anquichijque. Nojquiya anquintitanque tayolmelahuani ipan campa hueli tali para ma quinnotzatij tacame para anquisencahuase se camanali inihuaya para amechpalehuisse injuanti huan amo na. Huan quej ahuilnenca sihuame anmaltijque, anquipajque amoixteyolhua huan anmoyecchijtoque ica tamantzitzi para ma amechixtocaca. ⁴¹ Teipa anmosehuijque san seico ipan se tapechtí cati yejyectzi, huan iniixpa anquitalijque se yejyectzi mesa huan ipani anquitalijque copali huan aceite cati eliyaya tatzejtelolitic huan noaxca na. ⁴² Huan ten nozona campa anitztoyaj inihuaya cati amechpaxalohuayayaj, caquistiyaya quej tahuejchihuayayaj miyac tacame cati taiyayaj, paquiyayaj huan ten hueli quichihuayayaj. Eliyayaj tacame cati ehuyayaj campa huactoc tali huan quichihuayayaj quej tahuel amechnequiyayaj huan amechtaliliyayaj macosti ipan amomax huan se yejyectzi corona ipan amotzonteco. ⁴³ Huaajca na niquinto: ‘Sinta ni tacame nelia quinequij quinquehuisse nopa sihuame cati tahuel motequihuijtoque ipan ahuilnencayot, huaajca ma quichihuaca.’ ⁴⁴ Huan quej nopa quichijque. Nopa tacame ten sequinoc falme calajque quej tellocame inihuaya nopa ahuilnenca sihuame cati quinixnextiaj nopa israelitame ten Jerusalén huan Samaria huan noja más tajtacolchijque inihuaya. ⁴⁵ Pero ajsis tonali quema tacame cati xitahuaque quintajtolsencahuase israelitame ten Samaria huan Jerusalén. Huan quintajtolsencahuase quej nopa tanahuatilme quijtohuaj para ma quintatzacuilitica ahuilnenca sihuame huan temictiani. Huan

nelía Samaria huan Jerusalén ehuani nechcajtejtoque quej quichihua se ahuilnenca sihuat quicahua ihuehue. Nelía itztoque quej temictiani.”

⁴⁶ “Huajca na, niDIOS Cati Más Nijpiya Tanahuatili, niqijtohua: Xiquinnotzaca miyac soldados para ma hualaca huan xiquintemactilica nopa israelitame ten Samaria huan Jerusalén inimaco. Ma quinmajmatica miyac huan ma quintajyohuiltica nelía chichahuac huan ma quinquitilica nochi cati quipiyaj. ⁴⁷ Ma quinmictica nopa israelitame ica tet huan ica macheta. Huan nochi inintelpocahua huan iniichpocahua ma quinhuejhueloca. Huan ma quitatica ininchaj. ⁴⁸ Huan quej nopa ipan nopa tali niquintamiltis nochi cati quintemohuaj teteyomé. Huan tamise nochi cati quintemohuaj sequinoc talme para ma quinpalehuica huan amo na pampa itztoque quej se ahuilnenca sihuat noixpa. Huan sequinoc quitase cati panoc ica masehualme ipan Samaria huan Jerusalén huan momajmatise huan amo quichihuase quej injuanti quichijque. ⁴⁹ Niquintatzacuiltis masehualme ipan ni ome altepeme iniixpa nochi masehualme pampa quinhueyichijque teteyome huan faixcopincayome. Huan quiselise se taxtahuili quej quinamiqui ica nochi cati quichijtoque. Huan huajca amojuanti anquimachilise para na niDIOS Cati Más Nijpiya Tanahuatili.”

24

Nopa huicalot ten nopa chachapali cati tamolonaltía

¹ Se tonali ipan 10 itequi nopa majtacti metzti ipan toisraelita calendario * quema Tanahuatijquet Joaquín yahuiyaya para chichahui xihuit para quiquixtijtoyaj, TOTECO nechcamanalhui huan techilhui: ² “Tacat, xiquicuilo nopa tonali ten ama ni tonali pampa ipan ni tonali nopa tanahuatijquet ten tali Babilonia ya pehua quitehuía altepet Jerusalén. ³ Huan xiquinpoahuili nopa mosisinjca israelitame ni huicalot. Xiquinilhui para quej ni na, niDIOS Cati Más Nijpiya Tanahuatili, niqijtohua: Xijmanaca se chachapali ipan tit huan xijtequilica at. ⁴ Xijtemitica ica inacayo se oquich borrego. Xijtalica inacayo cati más cuajcuali quej iquestomahuia huan ielchiqui. Huan nojquiya xijtalica omit cati más ajhuiyac. ⁵ San xijtequihuica nopa borrego cati más tapejpenili. Huan xijtalica miyac cuahuit ipan nopa tit itantita nopa chachapali para cuali molonis. Xijchihuaca para nopa nacat ma icsi cuali hasta quisas nochi iomiyo.

⁶ “Ma quichihuaca ya nopa pampa na, niDIOS Cati Más Nijpiya Tanahuatili, niqijtohua: Teicneltique nopa altepet Jerusalén ehuani pampa tahuel tajyohuise. Tahuel temictiaj pampa eltoque quej se chachapali cati pojyajtoc huan amo hueli tepehui isoquiyo. Huajca, tacat, xijquixti sesentzitti nopa tatecti ten nacat. Quej nopa xijchihua hasta tijquixtis nochi huan amo xijcahua yon quentzi nacat ipan nopa chachapali ⁷ Pampa nochi quimatij cati amo cuali quichihuaj Jerusalén ehuani. Tahuel temictijtoque huan quitoyajtoque esti ipan tet para ma mocahua tanemijya para nochi quitase. Yon amo quitoyajtoque nopa esti talchi para nopa tali ma quixtzacua inintajtacolhua. ⁸ Huajca na nojquiya nijtalis inieso Jerusalén ehuani ipan nopa teme campa temictiyayaj. Huan amo niqiuincapixtacuas para noja más ma techchihua ma niculani huan ma niqiuincapixti cati quichijtoque.

⁹ “Na, niDIOS Cati Más Nijpiya Tanahuatili, niqijtohua para nelía teicnelti nopa altepet ten temictiani. Na noseltitzi nijtamitatis. ¹⁰ Huajca, tacat,

* **24:1** 24:1 Ipan 15 itequi enero 588 a.C. ipan tocalendario ten ama.

xijtali miyac cuahuit huan chichahuac xijlemenalti nopa tit para quimolon-altis nopa chachapali. Xiquicxiti nopa nacat ica miyac tacualpajyot huan xijcahua ma moloni hasta quitamitatis nopa omit cati nopona mocahua. ¹¹ Teipa xijtali nopa chachapali cactoc ipan tit hasta ma xahuani nopa teposti huan ma tamitata isoquiyo huan ma ixpolihui nochi cati amo cuali cati quipixtoc nopa chachapali. ¹² Pero san tapic pampa nopa chachapali tahuel soquiyo huan isoquiyo amo tami masque quitallaj ipan se hueyi tit. Huan quijito:

¹³ “Ay anJerusalén ehuan, tahuel ansoquiyojque por nochi nopa teteyome cati anquinhueyichijtoque. Na miyac huelta nijnequiyaya nimechtapajpacihuas ten nochi amotajtacolhua cati anquichijtoyaj, pero amo anquinejque anmopajpacase ten amosoquiyo. Huajca ximocahuaca ansoquiyojque hasta nijtitanis amopani nochi nocualancayo. ¹⁴ Na niDIOS niqijtojtoc para nimechtatzacuiltis huan quej nopa elis. Na noseltitzi nijchihuas. Amo nimechtasojtas, yon amo nimoyolcuepas. Nimechtatzacuiltis quej quinamiqui ica nochi cati fiero anquichijtoque. Quej nopa na, niDIOS Cati Más Nijpiya Tanahuatili, niqijtohua.”

Mijqui isihua Ezequiel

¹⁵ TOTECO sempa nechcamanahui huan techilhui: ¹⁶ “Tacat, ipan san se talojtzi na nimitzquixtilis mosihua cati más tiquicnelia. Pero ta amo ximocueso por ya, yon amo xijchoquili, yon amo xijcahua ma quisa moixayo. ¹⁷ Hueli tiaxtis por ya, pero ixtacatz. Amo xijnexiti mocuesol por ya quej nochi quichihuaq quema miqui se acajya. Amo ximoquixtili motzontzajca, yon amo xinemi san moixipa, yon amo xijzacua moxayac para tijnextis timocuesohua. Amo xijca nopa tacualisti cati mitzhualiquilise mohuam-poyohua para mitzoyaltalise.”

¹⁸ Huajca ica ijnaloc na niquinilhui nopa masehualme cati TOTECO techilhuijtoya huan ica tiotac mijqui nosihua. Huan tonili ica ijnaloc nijchijqui senquisa quej TOTECO technahuatijtoya. ¹⁹ Huajca nochi nopa masehualme techilhuijque: “Techilhui taya quinequi quijitos nopa tamanti cati tijchihua.”

²⁰ Huan na niquinilhui: “TOTECO nechcamanahui huan techmacac se camanali para ma niquinilhui israelitame. ²¹ TOTECO techilhui para ma niquinilhui ya ni: ‘Quej ni na, niDIOS Cati Más Nijpiya Tanahuatili, niqijtohua. Na nijmahuispolos notiopa cati amojuanti tahuel anquixtocaj, huan cati ica anmohueyimatiyayaj pampa anmoilhuiyayaj amechpalehuas anquiyase chichahualisti. Huan nochi amoconehua, ichpocame huan telpocame cati anquincajtejque ipan altepet Jerusalén, miquise ica macheta. ²² Huan anquichihuae san se quej Ezequiel quichijtoc. Amo xichocaca, yon amo xijzacuaca amoxayac para anquinextise anmotequipachohuaj, yon amo xijcuaca nopa tacualisti cati amechhualiquilise sequinoc para amechyaltalise. ²³ Amo xijquixtica amotzontzajca, yon amo xinemica amoixipa. Amo ximocuesoca, yon amo xichocaca. Pero, quena, amotacayohua nempolijtiyas huan anaxtise por amotajtacolhua huan anaxtise se ica seyoc por nochi tamanti cati amo cuali cati anquichijtoque. ²⁴ Ezequiel eltoc se tanextili para amojuanti pampa anquichihuae senquisa quej yaya quichijqui. Huan quema panos ya nopa, huajca anquimachilise para na, niDIOS Cati Más Nijpiya Tanahuatili.

²⁵ “Huan, tacat, niquinilhui israelitame para quema niquinquixtilij-tosa notiopa cati elqui ininchichualis, ininpaquilis, inihueyitilis huan cati

tahuel quiixtocayayaj quitachilise, ipan nopa tonali nojquiya niquintzon-tamiltis inisihuahua, iniichpocahua huan inintelpocahua. ²⁶ Huan ipan nopa tonali cholojtehuas se tacat ipan altepet Jerusalén huan hualas nica ipan tali Babilonia para mitzpohuiliqui nochi cati panotoc. ²⁷ Huan ipan nopa talojtzi tapohuis motoscac huan huelis ticamanaltis inihuaya. Huan ta fielis se tanextili para nopa masehualme, huan huajca quimachilise para na niDIOS.’”

25

TOTECO quiijto quintatzacuultis tali Amón ehuan

¹ TOTECO nechcamanalhui huan techilhui: ² “Tacat, xitachiya ica campa nopa tali Amón ehuan huan xiquinyolmelahua taya ininpantis. ³ Xiquinilhui ma quitacaquilica ni camanali cati na, niDIOS Cati Más Nijpiya Tanahuatili, niquinilhuía: ‘Amojuanti anpajque quema seyoc tali ehuan quimahuispolojque notiopa. Huan anpajque quema quisosolojque nopa tali Israel. Huan anpajque quinquixtijque tali Judá ehuan huan quinhucaque seyoc tali. ⁴ Huajca ama na nimechtemactilis inimaco nopa nejnenca masehualme cati ehuan ica campa hualquisa tonati ipan huactoc tali. Inijuanti moaxcatise amotal huan nozona quiquetzase iniyoyoncalhua. Quipíxcase cati anquitoctoque huan quicuase. Huan amechichtequilise amotapiyalhua huan quise inilechi. ⁵ Huan amoaltepe Rabá nijchihuas ma eli quej se potrero campa tacuase camellos. Huan nochi amotal, anamonitame, na nijchihuas ma eli quej se tali campa tacuajtinemise borregojme. Huan huajca anquimachilise para na niDIOS.

⁶ “Na, niDIOS Cati Más Nijpiya Tanahuatili, niquijtohua ya ni: Antali Amón ehuan, anquinhuetzquilijque noisraelita masehualhua quema hualajque tacame cati quisosolojque inintal. Quena, anmomatatzinijque huan anhuitonque ica miyac paquillisti. ⁷ Huajca ama na nimechtatzacuultis chicahuac huan nimechtemactilis inimaco sequinoc tali ehuan para ma amechichtequilica nochi cati anquipiyaj. Na senquisa nimechtzontamiltis huan nimechixpolihuiltis anamonitame para ayecmo aqui amechpantis ipan nochi tali. Huan huajca anquimachilise para nelia na niDIOS.’”

TOTECO quiijto quintatzacuultis tali Moab ehuan

⁸ “Na, niDIOS Cati Más Nijpiya Tanahuatili, niquijtohua ya ni: Tali Moab huan tali Edom ehuan quiijtojque para israelitame ipan tali Judá san se itztoque quej masehualme ipan sequinoc talme huan amo niquintapejpenijtoc para noaxcahua. ⁹ Huajca pampa quiijtohuaj ya nopa, na nijpehualtis ipan inepa tali Moab ica campa hualquisa tonati huan niquintamiixpolos nopa yejyetzitzi altepeme cati mopantíaj nozona. Niqunixpolos nopa altepeme Bet Jesimot, Baal Meón huan Quiriataim cati ica mohueyimati nopa Moab ehuan. ¹⁰ Huan nijchihuas para nopa nejnenca masehualme cati itztoque ica campa hualquisa tonati ma moaxcatiquij tali Moab san se quej quichijque ica tali Amón. Huan quej nopa nochi masehualme quielcahuase tali Moab para nochipa. ¹¹ Quej nopa nijhualicas tatzacuultili ipan tali Moab huan quimachilise para na niDIOS.

TOTECO quiijto quintatzacuultis tali Edom ehuan

¹² “Na, niDIOS Cati Más Nijpiya Tanahuatili, niquijtohua para tali Edom ehuan tahuel tajtacolchijtoque noixpa pampa chicahuac momacuetque ica nomasehualhua ipan tali Judá. ¹³ Huajca na, niDIOS Cati Más Nijpiya Tanahuatili, niquijtohua: Nijtananas nomax para nijtatzacuultis tali Edom

huan niquinixpolos imasehualhua huan ihuacaxhua huan iborregojhua ica macheta. Nochi inintal ten Temán hasta altepet Dedán mocahuas tasosololi huan nochi masehualme nozona miquire. ¹⁴ Quena, niquire-quihuis noisraelita masehualhua para niquiretatzacuiltis tali Edom ehuan huan quintatzacuiltise quej quinamiqui pampa tahuel nicualani inihuaya. Quej nopa Edom ehuan quimatise quenicatza nimomacuepa ica ten hueli masehualme cati quinamiqui. Quej nopa na, niDIOS, niquiretohua.

TOTECO quintatzacuiltis nopa filisteos

¹⁵ “Na, niDIOS Cati Más Nijpiya Tanahuatili, niquiretohua: Nopa filisteos nelchicahuac quintehuijtoque nomasehualhua ipan tali Judá pampa quincualancaitayayaj por se cualanti ten huejcajquiya. Yeca momacuetque ica injuanti ica miyac cualancayot. ¹⁶ Huajca na, niDIOS, niquiretohua: Nijtananas nomax ica nopa tali Filistia huan niquiretatzacuiltis nopa filisteos o cereteos nelía chicahuac. Huan niquinixpolihuiltis inihuaya nochi masehualme cati itztoque nechca hueyi at. ¹⁷ Nimomacuepas ica injuanti ica nochi nocualancayo huan niquiretatzacuiltis tahuel chicahuac. Huan quema ya nimomacuetoc ica injuanti, nopa filisteos quimachilise para na, niDIOS.”

26

TOTECO quijto quintatzacuiltis altepet Tiro ehuan

¹ Ipan nopa achtohui tonali ten nopa metzti 11 ipan toisraelita calendario * quema yahuiyaya para 11 xihuit ica quiquixtijtoyaj Tanahuatijquet Joaquín ten ital huan quihuicatoyaj, TOTECO nechcamanalhui huan techilhui: ² “Tacat, nopa altepet Tiro ehuan tahuel paquiyayaj quema huetzqui altepet Jerusalén huan quijtojque: ‘¡Paquillisti! Ya huetzqui nopa altepet cati quinahuatiyaya nochi ojme ten tanamaquisti ica nochi tali. Huajca ama ya ajsic hora para tojuanti timoricojchihuase ica nopa tanamaquisti. Nochi iniricojo Jerusalén ehuan elis toaxca pampa nopa altepet mocahua tasosololi.’

³ “Huajca na, niDIOS Cati Más Nijpiya Tanahuatili, niquiretohua: Analtepet Tiro ehuan, na nimochijtoc niamocualancaitaca. Nijchihuas ma hualaca miyac soldados ten miyac talme para amechtehuiquij. Quisenhuiquilise hualase miyac soldados cati nelía quipiyaj chicahualisti quej senyajtoc mocojcoxonía hueyi at. ⁴ Huan nopa soldados quitamisosolose nopa tepamit cati quiyahualojtoc amoaltepe huan quihuelonise nochi nopa calme cati huejcapantique para ipan antamocuitahuise. Na niquirecuenis nochi tali ten nopa altepet huan nijcahuas nopa teme ma elica nelía alaxtic quej se tepexit. ⁵ Huan nopa tali ten altepet Tiro cati quiyahualohua hueyi at mocahuas quej se lugar para nozona michtajtamani ma quipatahuaca inimata. Quej nopa na, niDIOS Cati Más Nijpiya Tanahuatili, niquiretohua. Huan hualase sequinoc talme ehuan para amechichtequilise nochi cati anquipiyaj huan para amechtzontamiltise. ⁶ Huan quintamimictise ica macheta nochi inimasehualhua nopa pilalpetetzti cati mopantiaj atenti. Huan huajca Tiro ehuan quimachilise para na, niDIOS.

⁷ “Quena, na, niDIOS Cati Más Nijpiya Tanahuatili, quej ni niquiretohua: Na nijhualicas Nabucodonosor, nopa tanahuatijquet ten tali Babilonia para ma quitehui altepet Tiro. Yaya cati más quipiyaj chicahualisti huan cati

* 26:1 26:1 Huelis ipan 3 itequi febrero 585 a.C. ipan tocalendario ten ama.

inintanahuatijca nopa tanahuatiani cati mopantíaj ica norte. Huan Nabu-codonosor hualas campa altepet Tiro ica miyac soldados ipan cahuayojme huan ica miyac tatehujca carrojme huan tahuel miyac soldados cati san inuicxipa. ⁸ Achtohui quintehuis nochi nopa pilaltepertzitzi cati mocahua atenti. Teipa quichijchihuas quej se puente ica tet para quiixcotonas nopa at cati amo huejcata para quiájsis altepet Tiro cati eltoc tatajco hueyi at. Huan nozona quitemase miyac tamontomit ten tali iteno nopa tepamit cati quiyahualojtoc amoaltepe nozona. Huan quintitanis miyac soldados cati quimanahuise inintacayo ten amocuataminhua ica se inintepostzajca cati quihucase inimaco.

⁹ “Huan quicuatopehuase nopa tepamit cati quiyahualojtoc altepet Tiro ica huejhueyi cuahuit huan quitahuisose. Huan nochi nopa huejcapantique calme para ipan antachiyase nojquiya quintahuisose. ¹⁰ Quema nopa tanahuatijquet ten tali Babilonia calaquis ipan icaltehua altepet Tiro, quipiyas ihuaya tahuel miyac tacame ica cahuayojme hasta quitananase miyac taltepocti cati quitemitis nopa altepet. Nesis quej calaqui ipan se altepet cati tasosololi. Huan pampa tahuel chicahuac molinise nopa cahuayojme huan iniruedas nopa tatehujca carrojme, nopa tepamit cati quiyahualojtoc altepet Tiro huihuipicas. ¹¹ Huan tacame cati tejcotoque ipan cahuayojme ipan nejnemise nochi calles ipan nopa altepet. Huan quintamimictise ica macheta masehualme nozona. Huan nopa taquetzalne yejyetzitzi huan huejcapantique cati nochi quinixtocayayaj, huetzise talchi. ¹² Huan nopa tacame cati hualase amechichtequillise nochi amoricojyo huan nochi tamanti cati anquinamacayayaj. Nojquiya quisosolose nopa tepamit cati quiyahualojtoc amoaltepe para amechmanahuis. Huan quintahuisose nochi amochajchaj cati eliyayaj nelía yejyetzitzi. Huan nochi teme, huan amocuatetohua huan hasta nopa taltepocti nozona quinmajcahuase ipan hueyi at. ¹³ Huan quej nopa ayecmo caquistis ajquiya huica nozona, yon ayecmo aqui tatzotzonas ica arpa pampa nochi nijtamiltis. ¹⁴ Huan nopa tali campa moquetztoya altepet Tiro ica hueyi at yahualtic, nijchihuas quej se tepexit cati alaxtic. Huan nozona michtajtamaní quipatahuase inimata para ma huaquis. Huan ayecmo quema aqui quicualtalís nopa altepet pampa na, niDIOS niquijtojtoc para quej nopa elís. Quej nopa na, niDIOS Cati Más Nijpiya Tanahuatili, niquijtohua.

¹⁵ “Huajca ya ni cati na, niDIOS Cati Más Nijpiya Tanahuatili, niquinilhuía cati itztoque ipan altepet Tiro: Quema huetzis amoaltepe huihuipicase nochi masehualme ipan nopa talme cati mopantíaj iteno hueyi at. Tahuel momajmatise quema quicaquise antzajtzise quema amechcocojtose huan quema amechmictijtose nozona tatajco amoaltepe.

¹⁶ “Huan huajca nochi nopa huejhueyi tanahuatiani cati mopantíaj ipan talme iteno nopa hueyi at, quicajtehuase inisiyas campa mosehuíaj huan moquixtilise iniyoyo cati yejyetzitzi tajtzonti. Huan ica miyac majmajti mosehuse talchi huan huihuipicase por cati amopantis. ¹⁷ Huan inijuanti chocase por anTiro ehuan huan para nopa amoaltepe huan huicase se mijcahuicat cati quijtohua:

‘Ay nopa altepet Tiro cati tahuel eliyaya yejyetzitzi, cati quiyahualojtoya hueyi at.

¿Quenicatza quixitinijque huan quisosolojque nopa tacame?

Quipiyayaya miyac chicahualisti Tiro huan imasehualhua.

Imasehualhua huan icuaacalhua campa huéli yahuiyayaj.

Quichijque ma majmahuica masehualme campa huéli ipan taltpacti.

¹⁸ Ama nochi cati mopantíaj iteno nopa hueyi at,

tahuel huihuipicaj ica majmajti pampa huetzqui.
¡Ama san ixpolijtoc!

¹⁹ “Pampa na, niDIOS Cati Más Nijpiya Tanahuatili, nijchihuas altepet Tiro quej se huactoc tali huan quej se altepet campa amo aquí itztoc. Elis quej hualas ipan nopa altepet miyac at cati quiiisahuas. ²⁰ Tamis nopa altepet huan nochi cati nozona itztoyaj quej miqui se masehuali huan yahui hasta más tatzinta ipan nopa hueyi ostot campa mopantíaj nopa masehualme cati huejcajquiya mijque huan nozona yajque. Ayecmo quema quinpiyas imasehualhua nopa altepet. Ayecmo quema motananas huan quipiayas tatepanitacayot. Nopa altepet ayecmo quema quipiayas iyejyejca ipan ni taltipacti campa itztoque masehualme cati yoltoque. ²¹ Nijchihuas altepet Tiro ma elto quej se tamanti cati temajmatía huan ayecmo quema elis se altepet. Huan masque masehualme tahuel quitemose huan quinequise elise quej achtohuiya, ayecmo quema quipantise. Quej nopa na, niDIOS Cati Más Nijpiya Tanahuatili, niqijtohua.”

27

Mijcahuicat para altepet Tiro

¹ TOTECO sempa nechcamanahui huan techilhui: ² “Tacat, xihuica ni micahuicat para altepet Tiro huan imasehualhua, ³ nopa altepet cati mopantía tatajco hueyi at huan campa masehualme ten nochi tali ipan taltipacti tanamacaj huan tacohuaj. Xiquinilhui para na, niDIOS Cati Más Nijpiya Tanahuatili, niqijtohua: ‘¡Ay altepet Tiro! AnTiro ehuan anquijtohuaj para amoaltepe eliyaya cati más yejyetzti ipan ni taltipacti. ⁴ Yahualtic quipixtoya nopa hueyi at quej se tepamit. Nopa tacame cati quisencajque, tahuel quiyectalijque. ⁵ Quicualtalijtoque Tiro quej se hueyi barco cati tachijchihuali ica ciprés cuahuit cati más cuali onca ipan tepet Senir. Huan amoaltepe elqui quej se barco cati quipixtoc itaquetzalo cati quichijchijtoque ica tiocuahuit cati onca ipan tali Líbano. ⁶ Huan nopa cuame cati ica quinejnemiltíaj nopa barco, quichijchijque ica ahua cuahuit cati huala ipan tali Basán. Huan nopa icaltepayo nopa barco quichijchijque ica nopa cuahuit cati itoca pino cati onca ica tatzinta ten tali Chipre huan quijejyecchijque ica marfil. ⁷ Nopa huejhueyi yoyomit cati quiilpitzas ajacat para quihuicas nopa barco eliyaya tachijchihuali ica linó yoyomit cati más cuali cati huala tali Egipto. Patajtoya nopa yoyomit itzonta nopa barco quej elisquía se bandera cati yejyetzti. Huan nopa barco nojquiya quipixtoc yejyetzti yoyomit patajtoc ipan icaltencuayo para quinecahuilía masehualme ipan nopa barco. Nopa yoyomit eltoc moradojtoc huan azultic huan huala ten nopa tali Elisa cati mocahua nechca hueyi at. Quena, quej nopa yejyetzti barco eliyaya amoaltepe Tiro.

⁸ “Nopa tacame ten tali Sidón huan Arvad quitequihuijque nopa cuahuit cati ica quinejnemiltíaj nopa barco. Huan nopa tacame ten Tiro cati tahuel talnamiqij quimocuitahuijque. ⁹ Nopa huehue tacame ten tali Gebal cati tahuel quimatiyayaj inintequi hualajque huan quipepechojque cuali nopa caltepamit para amo calaquis at. Huan nochi barcos ten campa hueli tali hualayayaj campa Tiro para quintacohuilise huan quintanamaquiltise. ¹⁰ Sequij soldados altepet Tiro eliyayaj tacame ten Persia, Lidia huan Libia. Elque soldados cati más hueliyayaj tatehuaj. Huan, anTiro ehuan, nelía anmohueyimatiyayaj quema nopa soldados quicuapilohuayayaj ipan tapepecholi ipan amoaltepe inintzontzajca huan inintepostzajcayohua cati

ica quimanahuiyayaj inintacayo pampa anmoilhuiyayaj para tahuel nesiyaya yejyetzzi.

¹¹ “ ‘Nopa soldados ten tali Arvad tamocuitahuiyayaj ipan nopa tepamit cati quiyahualojtoc amoaltepe. Huan ipan nopa huejcapantique calme tamocuitahuiyayaj nopa tacame ten tali Gamad. Huan nochi inintepostzajcayohua cati ica quimanahuiyayaj inintacayohua quicuapilohuayayaj ipan nopa tepamit huan ica ya nopa anmoilhuiyayaj para tahuel nesiyaya yejyetzzi moaltepe.

¹² “ ‘Amojuanti cati anehuani altepet Tiro campa hueli antanamacayayaj hasta cati ehuaní nopa hueyi altepet Tarsis amechnamaquiltiyayaj miyac tamanti cati pajpatiyo para xijnamacaca ipan amotianquis. Amechnamaquiltiyayaj plata, hierro, estaño huan plomo. ¹³ Masehualme ten tali Grecia, Tubal huan Mesec nojquiya amechtacoquiltiyayaj, analtepet Tiro ehuaní. Huan amechnamaquiltiyayaj tequipanohuani huan tamantzitzi cati tachijchihuali ica bronce. ¹⁴ Masehualme ten altepet Togarma amechhualiquiltiyayaj cahuayojme cati tequitij, huan cati ininpa huelis antejcose. Huan amechhualiquiltiyayaj mulas. ¹⁵ Nojquiya nopa masehualme ten tali Dedán hualayayaj para amechtacoquiltise huan amechtanamaquiltise. Huan miyac talme cati mopantíaj ipan hueyi at anquintanamauiltiyayaj huan inijuanti amechtatahuiyayaj ica ébano cuahuit huan ica marfil.

¹⁶ “ ‘Masehualme ten tali Edom amechcohuiltiyayaj nochi tamanti cati anquiptiyayayaj. Huan amechhualiquiltiyayaj yejyetzzi tet cati itoca perlas, yoyomit cati morado, yoyomit cati yejyetzzi tajtzonti, lino yoyomit, piltetzitzi cati yejyetzitzi ten coral huan piltetzitzi cati itoca rubí. ¹⁷ Tali Judá huan tali Israel ehuaní nojquiya amechtacoquiltiyayaj, analtepet Tiro ehuaní. Amechpatiliyayaj ica trigo ten altepet Miní; pantzi, sayolneci, aceite huan bálsamo aqúi quihualicayayaj. ¹⁸ Masehualme ten altepet Damasco amechtacoquiltiyayaj huan amechtatahuiyayaj ica xocomecat iayo ten Helbón huan chipahuac yoyomit cati tachijchihuali ica borregoyme inijhuiyo cati amechhualiquiltiyayaj ten Sahar. ¹⁹ Masehualme ten altepet Dan huan Javán amechtacoquiltiyayaj huan amechtatahuiyayaj ica teposti tatejtzonti, canela huan ohuat cati ajhuiyac. ²⁰ Masehualme ten altepet Dedán amechnamaquiltiyayaj pejpechti cati quitalíaj icuitapa se cahuayo.

²¹ “ ‘Tali Arabia ehuaní huan nopa tayacanani cati más tominpiyani ten tali Cedar, amechhualiquiltiyayaj borregoyme, oquich borregoyme huan chivoyme para ica amechtatahuise cati amechtacoquiltiyayaj. ²² Altepet Sabá huan Raama ehuaní amechhualiquiltiyayaj nochi tamanti taajhuiyacoyot, piltetzitzi cati pajpatiyo huan oro para amechpatilise ica ten amechcohuiltiyayaj. ²³ Masehualme cati ehuaní ipan altepeme Harán, Cane, Edén, Sabá, Asiria huan Quilmad nojquiya amechtanamaquiltiyayaj huan amechtacoquiltiyayaj. ²⁴ Itztoyaj tacame cati amechnamaquiltiyayaj ten hueli tamanti: yoyomit cati azultic, yoyomit cati yejyetzzi tajtzonti, taquemit cati quipajtoque ica miyac tamanti tapali cati taxinepaloli ica hilo cati tetic huan nochi quihualicayayaj ipan cajas ten tiocuahuit. ²⁵ Huan nopa huejhueyi barcos ten Tarsis talojtzitzi ajsiyayaj para amechhualiquiltise tamanti para antanamacase. Yeca tahuel anmoricojchijtoque anTiro ehuaní huan amoaltepe.

“ ‘Nelía altepet Tiro elqui se tamanti tahuel yejyetzzi nozona ipan hueyi at. ²⁶ Pero xiquitaca cati panos ica altepet Tiro cati eltoc quej se hueyi barco cati tahuel yejyetzzi. Nopa tayacanani quihuicaj nopa barco ipan nopa at cati más huejcata. Nozona monamiqui ihuaya se ajacat cati tahuel

chicahuac cati huala ica campa hualquisa tonati huan nopa hueyi ajacat quitamisosolohua nopa barco tatajco hueyi at. Quej nopa panos ica altepet Tiro. ²⁷ Nochi polihuis. Polihuis altepet Tiro huan nochi cati ehuan nozona. Polihuis nochi iricojyo, nochi tamanti cati anquinamacayayaj huan cati anquicohuayayaj huan nochi tacame cati campa hueli tequitiyayaj ipan altepet Tiro ipan ten hueli tequit. Nochi Tiro ehuan, nochi ixpolihuse. Elis quej se hueyi barco ipan hueyi at atzonpolihuis ica nochi cati quinnemiltiáj, nochi cati quicualchijchijque, nochi tanamacani huan tacohuani, nochi soldados huan nochi nopa masehualme cati más quixmatij quicualchijchihuaaj nopa barco. Nochi atzonpolihuse ipan nopa tonali quema yas nopa barco atatzinta. Huan quej nopa tamis altepet Tiro quema hualase tacame quej se hueyi at para quitamisosolose nopa altepet.

²⁸ “ ‘Nochi nopa altepeme cati mopantíaj iteno hueyi at nechca Tiro huihuipicase ica majmajti quema quicaquise tzajtzi nopa tacame cati quinnemiltiyayaj barcos huan quimatij nochi tantiya. ²⁹ Nochi cati quinejnemiltíaj nopa barco ipan hueyi at o nochi cati tequitiyayaj ipan nopa altepet cati ni camanali ten se barco quinextía; nochi yase atenti huan moquetzase para quitachilise ica huejca quema motamisosolos amoaltepe por nopa tacame cati hualahuij. ³⁰ Nochi cati quitase cati panos ica Tiro tzajtzi huan chocase ica miyac tequipacholi por amojuanti ten nopa altepet. Nojquiya motemilise taltepocit ipan inintzonteco huan momimilose ipan cuajnexti pampa tahuel fiero elis cati ipantis altepet Tiro. ³¹ Moximase huan moquentise se yoyomit fiero cati ica quinextise inintequipachol huan tahuel chocase por nopa altepet Tiro ica miyac tequipacholi.

³² “ ‘Huan quema quichoquilise nopa altepet huan nochi cati miquise nozona, huicase ni mijca huicat cati quijtohua:

Ipan nochi taltipacti,

¿canque eltoc seyoc altepet yejyetzí quej Tiro, cati mocajqui tasosololi tatajco hueyi at?

³³ Nochi nopa miyac tamantzitzi cati quinamacayayaj, huan quipatiliyayaj ica sequinoc,

quinpalehuiyaya masehualme ipan miyac talme.

Iricojo Tiro huan nochi tamantzitzi cati quinamacayaya, quinricojchijqui miyac tanahuatiani ten ni taltipacti.

³⁴ Pero ama hualajtoque injuanti cati quitamisosolojtoque nopa altepet, huan huetztoc nopa altepet quej se hueyi barco cati atzonpolijtoc, hasta tatzinta ten nopa hueyi at.

Nochi cati tanamacayayaj huan nopa tacame cati nozona tequitiyayaj ya polijtoque nojquiya.

³⁵ Nochi masehualme cati itztoque ipan nopa talme cati mopantíaj iteno nopa hueyi at san quitachilíaj,

hasta amo hueli quineltocaj cati ipantitoc altepet Tiro, huan cati nozona ehuan.

Nochi nopa talme inintanahuatijcahua tahuel momajmatíaj huan ipan inixayac nesi majmajti.

³⁶ Quena, nopa tanamacani ten campa hueli talme momajmatíaj,

pampa tahuel fiero cati amopantitoc,

anTiro ehuan huan amoaltepe.

Ixpolijtoc Tiro para nochipa.

Ayecmo quema monextis.’ ”

28

Tatzacuiltili para nopa tanahuatijquet ten Tiro

¹ Teipa TOTECO sempa nechcamanalhui huan techilhui: ² “Tacat, xijmaca nopa tanahuatijquet ten altepet Tiro ni camanali. Xiquilhui para na, niDIOS Cati Más Nijpiya Tanahuatili, niquijtohua: ‘Ta tahuel timohueyimati ipan moyolo huan tiquijtojtoc, na se niDios huan nimosehua ipan isiya Dios tatajco hueyi at. Quej nopa tiquijtojtoc. Pero ta amo cana tise Dios. Ta san tieli se masehuali masque ipan moyolo tijmachilía para tahuel titalnamiqui quej na, niDios. ³ ¿Huelis timoilhuía titalnamiqui más que Daniel? ¿Huelis timoilhuía tijmati nochi tamanti cati eltoc ixtacatzí? ⁴ Ica motalnamiqulis huan moyajatil tahuel timoricojchijtoc huan ticajoctoc miyac oro huan plata. ⁵ Ta nelía titalnamiqui para titanamacas huan yeca tahuel timoricojchijtoc. Pero nochi moricojo mizchijtoc tahuel ximohueyimati.

⁶ “ ‘Yeca na, niDIOS Cati Más Nijpiya Tanahuatili, niquijtohua: Pampa timoilhuijtoc más titalnamiqui que na niDios, ⁷ na nijchihuas ma hualaca soldados ten sequinoc talme cati más mosisiníaj que nochi sequinoc ipan taltipacti. Inijuanti quiquixtise inimacheta para mitztehuse huan quitamiltise motalnamiqulis, moyejejeja huan mohueyitilis. ⁸ Inijuanti mitzmictise huan tayas ipan nopa ostot cati tahuel huejcata quej sequinoc cati miquij tatajco hueyi at. ⁹ Quema tiitztos iniixpa cati mitztzontamiltise, ¿tjisenhuiqulis tiquijtos para tieli tiDios? ¡Amo neli! Iniixpa inijuanti san tielis se masehuali huan amo tiDios. ¹⁰ Quema mitztanise seyoc tali ehuaní, timiquis inimaco ica pinahualisti pampa quej nopa na, niDIOS Cati Más Nijpiya Tanahuatili, niquijtojtoc.’ ”

Mijca huicat para nopa tanahuatijquet ten altepet Tiro

¹¹ TOTECO nechcamanalhui huan techilhui: ¹² “Tacat, xihuica se mi-cahuicat para nopa tanahuatijquet ten altepet Tiro huan xiquilhui para quej ni na, niDIOS Cati Más Nijpiya Tanahuatili, niquijtohua: ‘Ta tieliyaya cati más senquisa tijpiyayaya talnamiquilisti huan tieliyaya yejectzi ten nochi sequinoc. ¹³ Tiitztoya ipan Edén, ixochimil Toteco Dios. Nochi moyoyo eliyaya tayectalili ica nopa piltetzitzi cati más pajpatiyo huan más yejectzitzi quej cornerina, topacio, jaspe, crisólito, berilo, ónice, zafiro, carbunco huan esmeralda. Huan nochi tacualtalili nelyejectzi huan quitatzquiltijtoque ipan itencuayo ten oro. Nojquiya mitzmacaque nopa tambores huan flautas cati quisencajque para ta hasta ipan nopa tonali quema nimitzchijchijqui. ¹⁴ Na nimitztapejpeni huan nimitzteqitali tielis nopa hueyi querubín cati tamocuitahuía inihuaya inijuanti cati más nonechca. Nimitztali ipan ilhuicac ipan nopa tepet cati tatzejtelolitic huan quipiya nosiya na. Tinejnenqui tatajco nopa teme* cati cahuanij quej tit.

¹⁵ “ ‘Tijchijqui cati senquisa xitahuac noixpa ten quema nimitzchijchijqui hasta nopa tonali quema mopanti tajtacoli ipan ta. ¹⁶ Pampa tahuel timoricojchijtoya, mitzchijqui ximosisini huan yeca titajtacolchijqui. Huan na, niDios, nimitzquixti ten notepe ipan ilhuicac. Quena, nimitzquixti ta, ti-querubín cati titamocuitahuíyaya. Nimitzixpolihuilti ten tatajco nopa teme cati nesij quej tit. ¹⁷ Moyejejeja mitzchijqui tahuel ximohueyimati. Huan mohueyitilis quisosolo motalnamiqulis. Yeca na nimitzmajcagui hasta talchi huan nimitztali iniixpa nopa tanahuatiani para ma mitztachilica huan ma amo quichihuaca quej ta. ¹⁸ Ta tiquinmahuispolo nopa tiopame campata

* 28:14 28:14 O sitalime.

pampa tijchijqui miyac tajtacoli ica nopa tanamaquilisti cati tijchihuayaya. Yeca nijchijqui ma quisa se tit ipan Tiro cati quitamitati. Huan nijcahuili ma tatas hasta mochihuas cuajnexti iniixpa cati quitachilijtoque. ¹⁹ Nochi tali ehuan cati quixmatiyayaj Tiro achtohuiya, tahuel momajmatíaj por cati ipantitoc. Nopa altepet mochijtoc quej se tamanti cati temajmatía. Ixpolijtoc Tiro para nochipa huan ayecmo quema elis.’ ”

TOTECO quitatzacuilitis altepet Sidón

²⁰ TOTECO nechcamanalhui huan techilhui: ²¹ “Tacat, xitachiya ica campa altepet Sidón huan xiquinilhui cati nozona ehuan taya ininpantis. ²² Xiquinilhui para quej ni na, niDIOS Cati Más Nijpiya Tanahuatili, niqijtohua: ‘AnSidón ehuan, na nimochijtoc ni mocualancaitaca. Monexitis nohueyitilis por cati amopantis amojuanti. Huan quema nimechtajtolsencahuas huan nimechtatzacuilitis, nochi quuitase para nitatzejtzelohtic huan nochi cati quitachilijtose quimachilise para na, niDIOS.

²³ “Nimechtitanilis se cocolisti cati tahuel tamahua huan temictía. Huan miyac soldados amechtehuise huan quitoyahuase miyac amoeso ipan calles. Nopa soldados hualse ten nochi lados huan amechmictise amojuanti cati anitztoque nozona. Huan huajca anquimachilise para na, niDIOS.

²⁴ “Huan quej nopa amojuanti huan nopa sequinoc talme ehuan cati mopantíaj nechca tali Israel ayecmo huelis anquincualancaitase israelitame huan anquinhuetzquilise. Ayecmo huelis anquincocose quej huitzti cati talojtzitzi quincuso o quinhuahuatzoehua. Huan huajca anquimachilise para na, niDIOS.’

²⁵ “Na, niDIOS Cati Más Nijpiya Tanahuatili, niqijtohua ya ni: Ajsis tonali quema ni quinsentilis noisraelita masehualhua sempa ten nochi nopa talme campa ni quinsentantoc. Huan injuanti itztose ipan inintal, nopa tali cati nijmacac notequipanojca Jacob cati elqui inihuejcapan tata. Huan nozona ica nomasehualhua, ni quinnexitis nochi masehualme ipan nochi tali para melahuac nitatzejtzelohtic. ²⁶ Huan nomasehualhua itztose ipan tali Israel ica temachili. Huan quichijchihuase ininchaj, huan quitocase xocomecat huan quipiyase tasehuilisti nozona, pampa ya ni quintatzacuilitijos nochi masehualme ipan nopa talme cati mopantíaj nechca huan quincualancaitayaj. Huan nochi quimachilise para na, niDIOS huan niinTECO.”

29

TOTECO quiijto quintatzacuilitis Egipto ehuan

¹ Ipan 12 itequi nopa metzti majtacti ipan toisraelita calendario*, quema yahuyaya para majtacti xihuit quihuicatoyaj Tanahuatijquet Joaquín ipan seyoc tali, TOTECO nechcamanalhui huan techilhui: ² “Tacat, xitachiya ica campa tali Egipto huan xijyolmelahua nopa tanahuatijquet Faraón huan nochi imasehualhua ten nopa tatzacuiliti cati quinajsis. ³ Xiquilhui para quej ni na, niDIOS Cati Más Nijpiya Tanahuatili, niqijtohua: ‘Ta tiFaraón cati titanahuatía ipan tali Egipto, tiitztoc quej se hueyi cocodrilo cati temajmatía huan cati quichiya para tecocos nozona ipan nopa hueyat Nilo. Faraón, na nimochijtoc ni mocualancaitaca pampa tiqijtojtoc: Ni hueyat Nilo na noaxca pampa na nimochijchihuili. Quej nopa tiqijto. ⁴ Yeca na nimitztalilis se tepos chijcoli ipan mocamac huan nimitzhuahuatatzas ten nopa at hasta campa tali inihuaya momasehualhua cati itztose quej

* 29:1 29:1 Ipan 7 de enero, 587 a.C. ipan tocalendario ten ama.

pilmichtzitzi cati itztoque ipan nopa hueyat huan mopepechojtihualase ipan mopetayo. ⁵ Huan nimitzmajcahuas ta huan momasehualhua campa huactoc tali. Huan nimechcahuas para ximiquica nopona huan ta amo aqui mitztananas para mitztalpachos. Motacayo niquinmacas totome huan nopa tapiyalme cati mosisiníaj para ma quicuaca.

⁶ “Huajca nochí amasehualme ipan tali Egipto anquimachilise para na, niDIOS Cati Más Nijpiya Tanahuatili pampa nopa israelitame quitemojque tapalehuili ipan ta, Faraón, huan amo tijpixqui chicahualisti para tiquinpalehuis. ⁷ Tieliyaya quej se acat cati tapanqui quema se ipan motatzquili. Huan amo san tapanqui nopa acat pero nojquiya quicuaxajqui ipan iela cati ipan motatzquili.

⁸ “Yeca na, niDIOS Cati Más Nijpiya Tanahuatili, niqijtohua para nijchihuas ma hualaca ipan motal, Faraón, miyac soldados para mitztehuiquij ica machetas huan quintzontamiltise momasehualhua huan motapiyalhua. ⁹ Huan nopa tali Egipto mocahuas quej se huactoc tali huan nopa egiptome quimachilise para na, niDIOS.

“Ta Faraón, tiqijtojtoc para nopa hueyat Nilo moaxca pampa ta timochijchiuili. ¹⁰ Cualtitoc. Huajca ama na nimochijtoc nimocualancaitaca huan icualancaitaca nopa hueyat cati tiqijtohua para moaxca. Huan nijtamisosolos nopa tali Egipto ten altepet Migdol ica ajco hasta Sevene ica tatzinta huan ten nopona hasta campa inepa tali Etiopía. Nochi elis quej huactoc tali. ¹¹ Huan para 40 xihuit amo aqui itztos nopona. Amo panose nopa masehualme, yon tapiyalme. ¹² Tali Egipto mocahuas tasosololi hasta quipanos nochí sequinoc talme cati nojquiya tasosololme. Huan ialtepehua tali Egipto mocahuase quej huactoc tali para 40 xihuit. Huan nopa masehualme ten tali Egipto niquintitanis ipan campa hueli talme para ma itztotij quej seyoc tali ehuaní.

¹³ “Huan na, niDIOS Cati Más Nijpiya Tanahuatili, niqijtohua: Quema tamis nopa 40 xihuit, niquinquixtis nopa egiptome ten nopa talme campa itztose quej seyoc tali ehuaní huan sempa niquinhuaticas ipan inintal. ¹⁴ Niquinhuaticas ipan tali Patros cati mocahua ica tatzinta ten tali Egipto campa pejque nopa masehualme. Pero Egipto nochipa mocahuas se tanahuatijcayot cati pisiltzi huan amo teno ipati. ¹⁵ Quena, tali Egipto huan itanahuatijcayo elis más teicneltzi ten nochí sequinoc talme. Ayecmo quema mohueyilis hasta huelis quinnahuatis sequinoc talme pampa ayecmo quipiyas chicahualisti.

¹⁶ “Huan israelitame ayecmo quitemose inintapalehuil tali Egipto ehuaní. Nochipa quema quiitase ten panoc ica Egipto, quielnamiquise quenicatza tajtacolchijque achtohuiya quema motemachijque ipan amojuanti, anEgipto ehuaní, huan amechtajtanjque xiquinpalehuica. Huan huajca nopa israelitame quimachilise para san na, niDIOS Cati Más Nijpiya Tanahuatili.”

¹⁷ Ipan nopa achtohui tonali ten nopa achtohui metzti ipan toisraelita calendarío†, quema tanahuatijquet Joaquín yahuiyaya para 27 xihuit quiquixtijtoyaj huan quihuicatoyaj ipan seyoc tali, TOTECO nechcamanalhui huan techilhui: ¹⁸ “Tacat, isoldados Tanahuatijquet Nabucodonosor ten tali Babilonia tahuel quintehuijque chicahuac nopa altepet Tiro ehuaní. Huan nojquiya tahuel chicahuac tequitique quema quimamayaj ten hueli para quichihuase quej se puente para ajsise ipan nopa altepet ica hueyi at

† 29:17 29:17 Ipan 26 itequi abril, 571 a.C. ipan tocalendarío ten ama.

yahualtic. Huan nopa cuaixhuacti cati quitequihuijque quintamitzoncal-tepejque huan mocajque cuapepestique nopa soldados. Huan iniajcolhua tamicochojque ica cati quihuicayayaj para quichihuase nopa puente. Pero Tanahuatijquet Nabucodonosor amo quipanti ricojyot cati ica quintax-tahuisquia nopa soldados por nopa tequit cati quichijque. ¹⁹ Huajca na, niDIOS Cati Más Nijpiya Tanahuatili, niqijtohua ya ni: Huajca nijmactilis Tanahuatijquet Nabucodonosor ten tali Babilonia nopa tali Egipto. Huan Nabucodonosor quiichtequis nochi iricojyo tali Egipto huan nochi cati quipiya para ica quintaxtahuis isoldados. ²⁰ Quena, na nijmacas nopa tanahuatijquet ten tali Babilonia tali Egipto quej se taxtahuili por nopa tequit cati quichijqui ipan altepet Tiro quema quitehui nopa altepet pampa yaya tequitiyaya para na. Quej nopa niqijtohua na, niDIOS Cati Más Nijpiya Tanahuatili.

²¹ “Huan ipan nopa tonali quema panotosa nochi ni tamanti, sempa chamanis ininchicahualis israelitame huan elis quej achtohuiya. Huan ta, tiEzequiel, ticamanaltis miyacapa tatajco ten injuanti huan quitepanitase mocamanal, huan quimachilise para na, niDIOS.”

30

Itatzacuilitl tali Egipto

¹ TOTECO nechcamanalhui huan techilhui: ² “Tacat, xiquinyolmelahua masehualme taya panos huan taya na, niDIOS Cati Más Nijpiya Tanahuatili, niqijtohua. Xiquinilhui: ‘Xichocaca pampa monechcahuía nopa tonali cati tahuel temajmati. ³ Quena, monechcahuía nopa tonali ten TOTECO quema yaya tetatzacuilitis. Elis se tonali cati tahuel tamixtentoc huan tzintayohua. Ipan nopa tonali tahuel mocuesose nochi masehualme ipan nochi tali. ⁴ Oncas se hueyi tatehuilisti ipan tali Egipto huan miquise miyac masehualme hasta nopa nijcatzitzi quitamiixtzacuase nopa tali. Nopa tacame cati hualase quinichtequilise Egipto ehuani nochi iniricojyo huan nochi calme quintamisosolose hasta campá tatzquitoque. Huan tahuel momajmatise Etiopía ehuani. ⁵ Inisoldados Etiopía, Fut, Lud, Arabia, Libia huan nochi sequinoc talme cati san sejco motatzquillitoque ica Egipto ehuani nojquiya miquise ipan nopa tatehuilisti.

⁶ “Pampa TOTECO quijtojtoc: Nojquiya miquise nochi cati quipalehuía j tali Egipto huan tatehuilisti. Miquise ica macheta ten altepet Migdol ica huejcapa hasta Sevene ica tatzinta. Huan tamis nochi nopa chichahualisti cati ica mohueyimatijayaj Egipto ehuani. Quej nopa na, niDIOS Cati Más Nijpiya Tanahuatili, niqijtohua.’ ⁷ Nopa tali Egipto mocahuas tasosololi hasta quipanos sequinoc talme cati mocajtoque tasosololme. Huan nochi ialtepehua Egipto mocahuase más tasosololme que sequinoc altepeme. ⁸ Huan nopa masehualme ipan tali Egipto quimachilise para na, niDIOS quema nijfatis nopa tali huan niqintzontamiltis nochi ten sequinoc talme cati quipalehuiyayaj.

⁹ “Ipan nopa tonali quema nijtatzacuilitis tali Egipto, niqintitanis tayolmelahuani ipan barcos ipan hueyi at para quintemajmatij nopa masehualme ten tali Etiopía cati amo quimatij taya onca huan tahuel momajmatise. Nochi ya ni melahuac mochihuas.

¹⁰ “Quej ni na, niDIOS Cati Más Nijpiya Tanahuatili, niqijtohua: Nijtequihuis Tanahuatijquet Nabucodonosor ten tali Babilonia para nijtamiltis iricojyo tali Egipto. ¹¹ Yaya huan isoldados cati más tahuel mosisiníaj huan temajmatíaj que nochi sequinoc, hualase para quitamisosolose nopa tali.

Inijuanti quitehuse tali Egipto ica macheta huan quitemitise nopa tali ica mijcatzitzitzi. ¹² Na nijchihuas para nopa hueyat Nilo ma huaqui huan niquinmactilis masehualme cati fiero ininemilis nopa tali. Niquintequihuis seyoc tali ehuan para nijtamisosolos nopa tali huan nochi cati onca nopona. Na niDIOS niqijtojtoc.

¹³ “Na, niDIOS Cati Más Nijpiya Tanahuatili, niqijtohua: Niquintapanas nochi nopa teteyome cati quinhueyimatij ipan tali Egipto huan nojquiya niquintamiltis nopa teteyome huan taixcopincayome cati onca ipan altepet Menfis. Ayecmo oncas seyoc Faraón para tanahuatis ipan tali Egipto. Huan nopona ipan Egipto nijchihuas para nochi masehualme ma momajmatise miyac. ¹⁴ Nopa tali Patros cati mocahua ica huejcapa ipan Egipto nijtamisosolos. Nijtamitatis altepet Zoán ica huejcapa huan altepet Tebas senquisa nijtamiltis.

¹⁵ “Altepet Sin cati quipixqui nopa calme más cuajcuali tasencahuali huan temachti ipan tali Egipto, nijnextilis nohueyi cualancayo. Huan nopa masehualme ten altepet Tebas, niquintamiixpolihuiltis. ¹⁶ Quena, tali Egipto nijtatis. Huan altepet Sin ehuan niquinchihuas ma momimiloca ica tacuajcualoli. Nijcoyonis itepa altepet Tebas para nicalaquis huan niquintatzacuiltis. Huan mojmota senquisa momajmatise nopa altepet Menfis ehuan. ¹⁷ Miquise ica macheta ipan tatehuilisti nopa telpocame ten altepet Avén huan Pibeset. Quinhuicase nopa sihuame cati nopona ejque hasta seyoc tali. ¹⁸ Huan quema nijsosolos ichicahualis tali Egipto cati ica mohueyimatiyayaj, nojquiya oncas quej tzintayohuilot ipan altepet Tafnes. Elis quej quixtzacuas nochi tali Egipto se hueyi mixti cati yayahuic. Huan nopa masehualme quinhuicase ilpitoque para seyoc tali. ¹⁹ Quena, chicahuac nijtatzacuiltis tali Egipto huan huajca quimachilise para na, niDIOS.”

²⁰ Ipan 7 itequi nopa achtohui metzti ipan toisraelita calendario*, quema Tanahuatijquet Joaquín yahuiyaya para 11 xihuit quixixtijtoyaj huan quihuicaque seyoc tali, TOTECO nechcamanalhui huan techilhui: ²¹ “Tacat, ya nijtantoc Faraón, nopa tanahuatijquet ten tali Egipto. Eltoc quej nijpostequilijtoc imax, pero amo aqui quipajtijtoc, yon amo quipictoque ica yoyomit campa cocojtoc para pachihuis huan sempa quipiyas chicahualisti para quitananas imacheta. ²² Yeca na, niDIOS Cati Más Nijpiya Tanahuatili, niqijtohua para nimochijtoc niucalancaitaca nopa Faraón cati tanahuatía ipan tali Egipto. Huan nijpostequilis nochi ome imax. Nijpostequilis nopa imax cati noja cuali huan nopa seyoc cati ya cocojtoc. Quej nopa nijchihuas para nopa macheta cati quipixtoc imaco, ma huetzi talchi huan ayecmo huelis tatehuis. ²³ Huan nopa egiptome niquintitanis ipan campa hueli talme para ma itztotij quej seyoc tali ehuan. ²⁴ Huan nijmacas chicahualisti nopa tanahuatijquet ten tali Babilonia huan nijtalis imaco nomacheta. Pero nopa Faraón cati tanahuatía ipan tali Egipto, nijpostequilis nochi ome imax. Huan yaya tahuel chocas iixpa nopa tanahuatijquet ten tali Babilonia quej choca se cati tahuel quicocojtoque hasta miquis. ²⁵ Quena, nijmacas chicahualisti nopa tanahuatijquet ten tali Babilonia, pero nopa Faraón nijpostequilis imax huan ayecmo feno huelis quichihuas. Huan quema nijtalis nomacheta imaco nopa tanahuatijquet ten tali Babilonia para ma quisosolo tali Egipto, nochi quimatise para na, niDIOS. ²⁶ Huan nopa masehualme ten tali Egipto niquintitanis ipan campa hueli talme para ma itztotij quej seyoc tali ehuan, huan huajca quimachilise para na, niDIOS.”

* 30:20 30:20 Ipan 29 itequi abril, 587 a.C. ipan tocalendario ten ama.

31

Tanahuatijquet Faraón eltoc quej se tiocuahuit

1 Ipan nopa achtohui tonali ten metzti eyi ipan toisraelita calendario, quema Tanahuatijquet Joaquín yahuyaya para 11 xihuit quiquixtijtoyaj huan quihuicaque ipan seycot tali, TOTECO nechcamanalhui huan techilhui: ²⁻³ “Tocat, quej ni xiquilhui Tanahuatijquet Faraón ten tali Egipto huan imasehualhua: ‘¿Ica taya huelis timitzhuicalotise ta huan motal Egipto ica nochi amochicahualis? Na nijhuicalotis ica tali Asiria huan quenicatza eliyaya achtohuiya. Quej nopa anquimatise taya amopantis sinta ihuical anquichihuase. Asiria elqui se hueyi tali cati quipixqui miyac chichahualisti. Asiria elqui quej se hueyi tiocuahuit quej cati onca ipan tali Líbano. Quipixqui imacuayohua cati huejhueyi huan yejyectziti huan eliyaya huejcapantic hasta onajsiyaya ilhuicac. ⁴ Nochi inelhuayohua motatzquilijqe cuali ipan tali cati quipiyaya miyac at huan nopa at quipalehui para ma moscalti. Huan campa ijcatoya oncayaya miyac pilhueyatziti cati quinatequiyaya nochi nopa cuame cati quiyahualohuayayaj. ⁵ Nopa cuahuit elqui más huejcapantic que nochi sequinoc cuame. Quipixqui miyac ixihuiyo huan imacuayohua tahuel mohuehuyaquilijque pampa nopa at cati quipixqui ipan inelhuayohua quipalehui miyac. ⁶ Nochi totome quichihuayayaj inintepasol ipan imacuayohua. Huan nopa borregoime huan huacaxme quintacatiltiyayaj ininconehea ipan iecahuilo. Elqui hueyi hasta nochi nopa huejhueyi talme ica inimasehualhua ipan taltipacti mocajque ipan iecahuilo. ⁷ Quipixqui chichahualisti huan elqui yejyectzi pampa nochi inelhuayohua motatzquilijqoyaj nelhuejcata hasta campa onca miyac at. ⁸ Ni cuahuit mochiqúi más huejcapantic ten nochi sequinoc tiocuame cati oncayaya ipan ixochimil Toteco Dios. Yon se ciprés cuahuit amo quipiyayaya imacuayohua quej ya. Yon se castaño cuahuit ipan ixochimil Toteco Dios amo quipiyayaya ixihuiyo quej ya. Yon se ten ni cuame amo quipiyayaya iyejyejca quej ya. ⁹ Na nijchijqui nopa cuahuit ma eli tahuel yejyectzi huan ma quipiya miyac imacuayohua. Huan yeca nochi sequinoc cuame cati oncayayaj ipan Edén, ixochimil Toteco Dios, quiixtocayayaj para nojquiya elisquíaj quej ya.

10 “ Pero ama na, niDIOS Cati Más Nijpiya Tanahuatili nimechilhuis ten panoc ica nopa hueyi cuahuit cati quiixnextia tali Asiria. Elqui quej nopa cuahuit mohueyichijqui huan mohueyimatqui. Motali más huejca que nochi nopa sequinoc cuame huan moscalti hasta onajsiyaya ilhuicac. ¹¹ Huajca na nijtemactili imaco nopa tanahuatijquet cati más quipiya chichahualisti ten nochi sequinoc para ma quitatzacuiliti quej quinamiqui ica cati fiero quichijtoya. ¹² Hualase soldados ten nopa tali cati tahuel mosisiníaj huan temajmatíaj. Inijuanti quitamisosolose nopa tali Asiria quej se quitzintzontequi se cuahuit huan quitahuisohua hasta talchi. Huan elis quej nochi ixihuiyo huan imacuayohua tepehuse ipan campa hueli tepeme. Tepehuse ipan tamayamit huan ipan nopa hueyame cati onca ipan nopa tali. Huan nochi masehualme ten miyac talme cati itztoyaj itantita nopa cuahuit mohuejcatilise huan quicahuase iseltitzi. ¹³ Huan totome hualase para quichihuase inintepasol ipan imacuayohua nopa cuahuit cati huetzotc. Huan tapiyalme cati mosisiníaj cochise itzala imacuayohua. ¹⁴ Huajca ten ama huan teipa yon se cuahuit masque quipiya miyac at amo mochihuas hueyi quej ni hasta moscaltis más huejcapa ten mixti. Nochi tali huan inimasehualhua elise quej ni cuahuit huan miquise huan yase ipan nopa

ostot cati tahuel huejcata inihuaya tacame cati mohueyimatque ten nochi taltipacti.

¹⁵ “Quej ni na, niDIOS Cati Más Nijpiya Tanahuatili, niqijtohua: Ipan nopa tonali quema nijtahuiso talchi nopa cuahuit cati quixnextía tali Asiria, nijchijqui para nochi ma mocuesoca. Nopa huejhueyi hueyame nopona niqinquetzqui huan huajque. Huan por cata ipantic Asiria, nijtazjqui nopa tepet ten Líbano ica tzintayohuilot huan nochi cuame cati onca nopona pilingue. Elqui quej nochi mocuesohuayayaj por Asiria. ¹⁶ Huan quema huetzqui Asiria, quichijqui ma huihuipicaca ica majmajti nochi talme cati eltoyaj inechca. Huan nijtitanqui tatzinta campa tanahuatía miquilisti para mocahuas inihuaya sequinoc cati mictoque. Huan nepa tatzinta campa tanahuatía miquilisti, moyolchicajque nochi nopa sequinoc cuame cati tahuel mohueyimatiyayaj cati eltoyaj ipan Edén. Nopa cuame itztoyaj cati más tapejpenilme huan más cuajcualme ipan tepet Líbano huan cati quipixtoyaj ininelhuayohua motatzquilijtoque huejcata campa onca miyac at. Huan moyolchicajque nopa cuame pampa quiitaque pampa nojquiya ajsitoya nopona campa tanahuatía miquilisti nopa hueyi cuahuit cati más mohueyimatiyaya cati quixnextía Asiria. ¹⁷ Huan nochi nopa talme cati itztoyaj ipan íecahuilo Asiria, quijtosnequi cati quipalehuayaj, nojquiya ya tantoque huan yajtoque nopona campa tanahuatía miquilisti, nopona campa nojquiya itztoque nopa masehualme cati ya mijque ipan tatehuilisti.

¹⁸ “Huajca ta titanahuatijquet ipan Egipto, ¿taya seyoc cuahuit cati hueyi huan tahuel yejyetzzi onca quej ta? Tiquintani sequinoc cuame cati onca ipan ni taltipacti o ipan Edén. Ni quinextía para tahuel timohueyichijtoc tatajco nochi tali, pero san tapic, pampa tiyas hasta tatzinta ten nopa hueyi ostot campa tanahuatía miquilisti inihuaya nochi nopa sequinoc talme. Nopona tiitztoti inihuaya nopa masehualme ten nopa talme cati tiquincualancaita huan amo tiquninta sinta ininpati cati mijque ipan tatehuilisti.

“Huajca quej ni ininpantis imasehualhua tali Egipto huan nopa Tanahuatijquet Faraón cati ni cuahuit quixnextía. Quej nopa na, niDIOS Cati Más Nijpiya Tanahuatili, niqijtohua.”

32

Tanahuatijquet Faraón eltoc quej se león

¹ Ipan nopa achtohui tonali ipan metzti doce ipan toisraelita calendario * quema Tanahuatijquet Joaquín yahuyaya para 12 xihuit ica quiquixtijtoyaj huan quihuicatoyaj seyoc tali, TOTECO nechcamanalhui huan techilhui: ² “Tacat, xihuica ni mijca huicat para nopa Faraón cati tanahuatía ipan tali Egipto huan xiquilhui ni camanali ten na para tijyolmelahuas cati ipantis: “Ta, tiFaraón, timoilhuía tiitztoc quej se león cati sanoc motantoc huan tahuel quipiya chichualisti. Quej nopa timoilhuía para tali Egipto nelía quipiya miyac chichualisti tatajco ten nochi sequinoc talme. Pero ta san tieli quej se hueyi cocodrilo cati itztoc iteno nopa hueyat Nilo huan ica iyacatzol quimomolotza nopa at huan ica iicxihua quichihua tetetzic.

³ “Huajca quej ni na, niDIOS Cati Más Nijpiya Tanahuatili, niqijtohua: Na nihualas ica miyac masehualme ten miyac talme huan nimitzmajcahuilis nomata huan nimitzmasiltis. ⁴ Nimitzquixtis ten nopa at huan nimitztalis ipan huactoc tali para ximiqui. Huan nijchihuas para nochi totome cati patantinemij ajacatipa ma moquetzaca mopani huan nopa tapiyalme cati

* 32:1 32:1 Ipan 3 itequi marzo, 585 a.C. ipan tocalendario ten ama.

nejnemij talchi ma quicuaca monacayo hasta ixhuisse. ⁵ Huan monacayo huan moomiyohua niquijtzelos ipan nochi tepeme huan nochi tamayamit.

⁶ Nijchihuas ma xoloni ica moeso nopa tali campa ta tiitztoc ica momasehualhua. Huan mosemanas amoeso hasta quitemitis hueyame huan ajsis hasta ipan nochi tepeme. ⁷ Huan quema nimitzixpolihuiltis ihuaya motal, niquixtzacuas ilhuicacti para ma amo nesi. Huan nijchihuas para sitalime ma amo taahuica. Huan ne tonati niquixtzacuas ica se mixti huan nijchihuas ne metzti para ma amo taahui. ⁸ Quena, quema nimitztatzacuiltis, nijsehuis nochi tamanti cati más chichahuac taahuiaj ipan ilhuicac. Huan ipan nochi motal, oncas san tzintayohuilot. Quej nopa na, niDIOS Cati Nijpiya Nochi Tanahuatili, niquijtohua.

⁹ “ ‘Huan quema nimitztzontamiltis inihuaya cati itztoque ipan motal, nijhuicas camanali ten cati panoc hasta masehualme ipan campa hueli talme cati amo quema tiquinixmajtoya. Huan injuanti nojquiya, mocuesose ipan iniyolo. ¹⁰ Quena, nijchihuas para se hueyi majmajti ma quinajsi miyac masehualme ipan miyac talme por nochi cati nimechchihuili ipan nopa tonal. Huan inintanahuatijcahua miyac masehualme huihuipicase quema nijquixtis nomacheta cati petani huan nitatzohuitequis iniixpa. Quena, momajmatise miyac por ininemilis ipan nopa tonali quema nimitztzontamiltis inihuaya momasehualhua.

¹¹ “ ‘Pampa na, niDIOS Cati Más Nijpiya Tanahuatili, niquijtohua: Hualas nopa tanahuatijquet ten tali Babilonia para amechtehuis ica macheta. ¹² Nimechtzontamiltis ica nopa soldados ten tali Babilonia cati más quipiyaj chichahualisti huan más mosisinaj ten nochi sequinoc ipan taltipacti. Quitamisolose nochi tamanti cati ica anmohueyimatiyayaj ipan tali Egipto huan quintzontamiltise nochi momasehualhua. ¹³ Niquintzontamiltis nochi amohuacaxhua huan amocahuayojhua cati atij iteno nopa hueyat. Huan yon se tacat o tapiyali ayecmo quichihuas tetetztic nopa at ica iicxi. ¹⁴ Huan huajca nopa at ipan nopa hueyat ipan tali Egipto elis tapajpactic. Oncas tasehuilisti huan nochi hueyame motalose ica yejyetzti huan elise alaxtic quej aceite. Quej nopa na, niDIOS Cati Más Nijpiya Tanahuatili, niquijtohua. ¹⁵ Huan quema nijtamisosolos tali Egipto huan niquixpolihuiltis nochi cati quipiya huan niquinmictis nochi momasehualhua, huajca anquimachilise para na, niDIOS.’”

¹⁶ “Ya ni se mijca huicat huan sihuame ipan nochi taltipacti huicase quema quichoquilise tali Egipto huan imasehualhua. Quej nopa na, niDIOS Cati Más Nijpiya Tanahuatili, niquijtohua.”

Egipto ehuan miquise

¹⁷ Ipan 15 itequi nopa metzti doce ipan toisraelita calendario † quema yahuiyaya para 12 xihuit techhuicatoyaj, TOTECO nechcamanalhui huan techilhui: ¹⁸ “Tacat, xiquinchoquili nopa masehualme ten tali Egipto huan nojquiya nopa masehualme cati ehuan ipan sequinoc talme cati nelia quipiyaj chichahualisti. Na niquintitanis ipan nopa tali cati más tatzinta campa miquilisti tanahuatia huan campa mocahuaj nochi mijcatziti. Xiquinhuicati ni mijca huicat:

¹⁹ ‘¡Ay Egipto ehuan!

Anmoilhuyayaj para más yejyetzti Egipto, que nochi sequinoc talme.

Pero san tapic pampa ama anmiquise huan anyase hasta tatzinta,

† 32:17 32:17 Ipan 17 itequi marzo, 585 a.C. ipan tocalendario ten ama.

ipan nopa ostot ipan nopa tali campa miqulisti tanahuatía.

Nopona anmocahuase inihuaya nopa masehualme cati mijque ica pinahualisti quema sequinoc quintanque ipan tatehuilisti.’

²⁰ “Nopa egiptome huetzise mictoque san se quej nopa miyaqui masehualme cati miqij ipan tatehuilisti. Pampa nopa macheta ya eltoc xolot para quinmictise nochi Egipto ehuaní. ²¹ Huan nopona ipan nopa tali tatzinta, nopa tayacanani cati más quiپیay chicahualisti quinhuihuitase nopa tali Egipto ehuaní huan nochi inintapalehuijcahua huan quijjose: ‘Ya antemotoque para anmocahuase inihuaya tacame cati mijque ica pinahualisti quema sequinoc quintanque ipan tatehuilisti huan masehualme ten miyac talme cati tahuel anquincualancaitayaj.’

²² “Nopona mocahuaj nopa tanahuatiani ten tali Asiria huan yahualtic quintalpachojtoque inisoldados cati mijque ipan tatehuilisti.

²³ Quintalpachojtoque ipan ostot cati eltoc hasta más tatzinta campa tanahuatía miqulisti. Huan yahualtic ten inijuanti quintalpachojtoque nopa masehualme cati quinpalehuiyayaj. Pero nochi inijuanti eliyayaj tacame cati más mosiniáj huan tahuel temajmatíaj ipan taltipacti, pero ama ya mictoque inimaco inincualancaitacahua.

²⁴ “Nojquiya mocahuaj nopona nopa tanahuatiani ten tali Elam. Huan yahualtic mocahuaj inisoldados cati mijque ica pinahualisti quema sequinoc quintanque ipan tatehuilisti. Ama ya ajsitoque nopona campa más huejcata ipan tali pampa quema itztoyaj ipan ni taltipacti quintajyohuilitjque masehualme ipan miyac talme. ²⁵ Pero ama cati ehuaní Elam mocahuaj nopona campa mijcatziti. Huan yahualtic quintalpachojtoque nochi inisoldados cati mijque ica pinahualisti quema sequinoc quintanque ipan tatehuilisti. Quema itztoyaj ipan ni taltipacti, inijuanti quintemajmatijque miyac talme, pero ama huetztoque ica miyac pinahualisti ipan nopa ostot ipan nopa tali ten miqulisti.

²⁶ “Nojquiya mocahuaj nopona nopa tayacanani ten tali Mesec huan Tubal. Huan yahualtic ten inijuanti quintalpachojtoque inisoldados cati mijque ica pinahualisti quema sequinoc quintanque ipan tatehuilisti. Nochi inijuanti tahuel mosiniyayaj huan quintemajmatiyayaj miyac talme quema itztoyaj ipan taltipacti, pero ama nochi mictoque. ²⁷ Amo quintalpachojtoque ica miyac tatepanitacayot quej quichijque ica huejhueyi soldados huejcajquiya cati tahuel mosemacaque huan teipa mijque ica pinahualisti quema sequinoc quintanque ipan tatehuilisti. Inijuanti quintalpachojque ihuaya inintepos. Quipixtoque macheta tatzinta ten inintzonteco huan inintepostzajca cati quinmanahui ipan tatehuilisti ipan inintacayo. Quej nopa quintalpachohuayayaj pampa quema itztoyaj ipan ni taltipacti quintemajmatijque nochi masehualme.

²⁸ “Huan nojquiya amojuanti antali Egipto ehuaní anmocahuase ica amotacayohua postectoque inihuaya nopa sequinoc cati temotoque nopona tatzinta ica nopa sequinoc tacame cati mijque ica pinahualisti quema sequinoc quintanque ipan tatehuilisti.

²⁹ “Nojquiya mocahuaj nopona nopa tayacanani huan tanahuatiani ten tali Edom. Masque quiپیayayaj tahuel miyac chicahualisti, ama nojquiya ya quintalpachojtoque tafajco ten nopa sequinoc cati mijque ica pinahualisti quema sequinoc quintanque ipan tatehuilisti. Huan ya temoque ipan nopa hueyi ostot campa tanahuatía miqulisti.

³⁰ “Nojquiya temotoque nopona nochi nopa tayacanani ten nopa talme cati mocahuaj ica norte huan nochi nopa masehualme ten tali Sidón. Nochi

inijuanti mijque ica pinahualisti quema sequinoc quintanque ipan tatehuilisti. Huan masque quema itztoyaj ipan ni faltipacti tachel mosisiniyayaj huan temajmatiyayaj, ama ya mocahuaj ica hueyi pinahualisti ipan nopa hueyi ostot campa tanahuatí miqulisti inihuaya nopa masehualme cati mijque ipan tatehuilisti.

³¹ “Quema Tanahuatijquet Faraón ajsis nozona huan quintas nochí nopa sequinoc, moyolchicahuas se quentzi pampa amo san yaya cati mijqui ipan tatehuilisti ica nochí isoldados. Quej nopa na, niDIOS Cati Más Nijpiya Tanahuatili, niquijtohua. ³² Huan masque nijchijqui para nopa Faraón ma temajmati ipan ni taltipacti, ama yaya huan nochí isoldados nojquiya mocahuaj tatajco nopa masehualme cati mijque ica pinahualisti quema sequinoc quintanque ipan tatehuilisti. Quej nopa na, niDIOS Cati Más Nijpiya Tanahuatili, niquijtohua.”

33

Itequi se tamocuitahuijquet (Ez 3:16-21)

¹ Sempa TOTECO nechcamanahui huan techilhui: ² “Tacat, xiquinca-manahui momasehualhua huan quej ni xiquinilhui: ‘Quema niqinhualica soldados ipan se tali para ma quitehuica, nopa masehualme cati itztoque ipan nopa tali quitapejpeníaj se ten inijuanti huan quitilíaj para ma tamocuitahui huan ma quitachili canque hualahuij inincualancaitacahua.

³ Huan quema nopa tamocuitahuijquet quiita monechcahuíaj nopa soldados para quitehuse nopa tali, quipitza nopa tapitzali para quinyolmelahuas nopa masehualme ma mocualtalica. ⁴ Huan sinta se acajya quicaquis nopa tapitzali huan amo quichihuilis cuenta huan icualancaitacahua quimictise, huajca amo aquí quihuicas tajtacoli por imiquilis, san elis yaya itajtacol. ⁵ Pampa yaya quicajqui quema quipitzque nopa tapitzali, pero amo quichihuilí cuenta. Huajca melahuac yaya itajtacol para mijqui pampa, sinta quichihuilijosquí cuenta, huelosquí quimanahuijtosquí inemilis.

⁶ Pero sinta nopa tamocuitahuijquet quiitas monechcahuíaj nopa soldados cati icualancaitacahua huan amo quipitzas nopa tapitzali para quinyolmelahuas nopa masehualme ma mocualtalica, huan ajsiquij nopa soldados huan quimictise se acajya, nopa masehuali miquis por ya itajtacolhua, pero na nijtajtanis cuenta nopa tamocuitahuijquet.’

⁷ “Huan quej nopa eltoc ica ta, tacat. Na nimitztalijtoc quej se titamocuitahuijquet campa israelitame. Monequi tijcaquis nochí cati nimitzilhuía huan tiquinyolmelahuas cati niquijtojtoc para quimatise taya inipantis. ⁸ Sinta na niquijtos para temachti se masehuali cati amo cuali miquis, huan ta amo tiquilhuis cati niquijtohua para ma moyolcupea; huajca nopa masehuali cati amo cuali miquis por itajtacol, pero na nimitztajtanis cuenta por imiquilis. ⁹ Pero sinta ta tiquilhuis nopa masehuali cati amo cuali para ma moyolcupea, huan yaya amo moyolcupeas; huajca miquis por itajtacolhua, pero ta tijmanahuis monemilis.

Itequi se masehuali (Ez 18:21-32)

¹⁰ “Huajca ama, tacat, quej ni xiquinilhui nopa israelitame: ‘Amojuanti anquijtohuaj para nochí amotajtacolhua huan amotaixpanolhua eltoc amopani huan yeca ya tantiya amonemilis huan anmotatzintoquilíaj, ¿quenicatza huelis noja timocahuase tiyoltoque? ¹¹ Huajca xiquilhui para na, niDIOS Cati Más Nijpiya Tanahuatili, niquijtohua: Temachti amo nijnequi

ma miqúi yon se masehuali cati amo cuali. Na nijnequi ma quicahua iojhui cati amo cuali huan ma quiپیا nemilisti. Huajca anisraelitame, ximoyolcuepaca huan xijcahuaca amotajacolhua pampa na amo nijnequi ximiquica*.

¹² “Huan ta, titacat nojqúیا xiquinilhui ya ni: ‘Cati cuali quichihua se cuali tacat amo quimanahuis inemilis sinta pehuas tajtacolchihuas. Yon amo quinenpolos se tajtacolchijquet itajacol, sinta yaya quicahuas itajacolhua huan pehuas quichihuas cati xitahuac. ¹³ Sintá niquilhuis se tacat cati quichihua ten xitahuac para temachtí itztos, huan teipa pehuas tajtacolchihuas, ma amo moilhui para nopa ten cuali quichijqui achtohuiya quimanahuis inemilis pampa na ayecmo nijchihuulis cuenta cati achtohuiya quichijqui. Huan yaya miqúis por nopa tajtocoli cati quichijqui teipa. ¹⁴ Huan sinta niquilhuis se masehuali cati quichihua ten amo cuali para temachtí miqúis, pero teipa yaya moyolcuepas ten itajacolhua huan pehuas quichihuas cati cuali huan cati xitahuac, yaya itztos. ¹⁵ Cualí elis sinta yaya sempa quicuepas cati quiprendajcahuilíaj quema tetanejtía se tamanti huan quicuepas cati teichtequilitoc. Cualí elis sinta monejnemiltis senquisa quej quijtohua nopa tanahuatili cati temaca nemilisti huan ayecmo quichihuas cati amo cuali. Huan sinta nopa masehuali quichihuas ni tamanti, huajca temachtí itztos. Amo miqúis†. ¹⁶ Huan amo nijchihuulis cuenta itajacolhua cati achtohuiya quichijqui pampa ama ya quichihua nochi cati cuali huan cati xitahuac. Huajca temachtí itztos. Amo miqúis.’

¹⁷ “Tacat, nopa momasehualhua quijtohuaj para na amo nijchihua cati xitahuac, pero eltoc inijuanti cati amo quichihuaj cati xitahuac. ¹⁸ Huajca seyoc huela nimechilhuis ya ni: Sintá se tacat cati quichihua cati xitahuac pehua tajtacolchihua, huajca miqúis por itajacolhua. ¹⁹ Huan sinta se tacat cati amo cuali moyolcuepas huan quicahuas cati amo cuali quichihuayaya huan pehuas quichihuas cati cuali huan cati xitahuac, huajca temachtí itztos. ²⁰ Anisraelitame, anquisenhuilíaj anquijtohuaj para na niamoTECO amo nijchihua cati xitahuac, pero nimechilhuía, nimechtajtolsencahuas sesen ten amajuanti anisraelitame quej quinamiqui ica cati anquichihuaj.”

Ya huetzqui altepet Jerusalén

²¹ Ipan 5 itequi ten metzti majtacti ipan toisraelita calendario ‡ quema tiyahuiyayaj para 12 xihuit techquixtítoyaj ten total, ajsico campa na se tacat cati cholojtejqúی ipan altepet Jerusalén huan techilhuico: “Tocualan-caitacahua ya quíitzquitoque altepet Jerusalén.” ²² Huan TOTECO quitajtoya imax ipan na ica tiotac ten nopa seyoc tonali quema nopa tacat ayemo ajsiyaya. Huan quema techitzquí quitapo notoscac, pampa nieliyaya ninono§. Techtoscatapo para huelis nicamanaltis ihuaya nopa tacat quema ajsisquía campa na.

Inintajacolhua nopa masehualme

²³ Huan Toteco nechcamanalhui huan techilhui: ²⁴ “Tacat, nopa masehualme cati noja itztoque ipan nopa altepeme cati tasosololme ipan tali Israel quisenhuilíaj quijtohuaj para itztoque quej Abraham cati itztoya iseltitzi huan moaxcati nochi ni tali huan inijuanti itztoque miyaquí, huajca

* **33:11** 33:11 Nica para miqúis quinequi quijtos para miqúis ica macheta o ica tatzacuiltili o quema ayemo huehuejtixtoc. Temachtí nochi masehualme miqúise se tonali masque cuajcualme o amo cuajcualme. † **33:15** 33:15 Xijtachili 33:11. ‡ **33:21** 33:21 Elqui 8 itequi enero, 585 a.C. ipan tocalendario ten ama. § **33:22** 33:22 Xijtachili Ez 3:26, 27 quema Ezequiel pejqúی mochihua nono.

noja más huelise moaxcatise nopa tali seyoc huelta. ²⁵ Huajca ama xiquinilhui nopa israelitame ni camanali cati na, niDIOS Cati Más Nijpiya Tanahuatili, niqijtohua: ‘Amo anmoaxcatise sempa nopa tali pampa tahuel antatcolchihuaaj. Anquicuaaj nacat ihuaya esti, anquinhueyichihuaaj tetyeme huan antemictiaj. Sinta quej nopa anquichihuaaj, ¿anmoilhuaaj anmoaxcatise nopa tali? ²⁶ Nojquiya tahuel antatehuaaj ica macheta, anquinsihuaacuiliaj amohuampoyohua, huan anquichihuaaj miyac tamanti cati na amo nijnequi niqitas. Huajca amo ximoilhuaica para anmoaxcatise nopa tali.’

²⁷ “Nojquiya xiquinilhui para quej ni na, niDIOS Cati Más Nijpiya Tanahuatili, niqijtohua: ‘Temachtí nimechilhuaia para nopa masehualme cati itztoque ipan nopa altepeme cati tasosololme, miqoise ipan tatehuilisti. Huan cati itztoque ipan cuatitamit, quincuase tecuanime. Huan cati motatitjtoque campa tepamit cati tilahuac huan ipan ostot, miqoise ica cocolisti. ²⁸ Huan nopa tali nijchihuas quej se huactoc tali. Huan nopa chichahualisti cati ica mohueyimatiyayaj, nijtamiltis. Huan nochi tepeme ten tali Israel mocahuase tasosololme hasta amo aqui huelis panos nopona. ²⁹ Huan quema ya nijtamisosojojtos nopa tali por inintajtacolhua, huajca injuanti quimachilise para na niDIOS.’

³⁰ “Tacat, momasehualhua camanaltij ten ta ipan ininchaj huan campa icaltejo nopa tepamit. Quiijtohuaaj se ica seyoc: ‘Xihualaca huan ma timopaquiltica. Ma tijtacaquilica nopa camanali cati huala ten TOTECO.’

³¹ Huan quena, injuanti hualahuij quej nelia elisquiaj nomasehualhua huan mosehuaiaj moixpa para quitacaquilise taya tiqijtohua, pero masque quicaquij, amo quichihuaaj cati na niquinilhuaia. Ica inincamac quiijtohuaaj para teicneliaj, pero amo cana. Pampa ipan iniyolo achi más quicneliaj inintomi. ³² Injuanti san quicaquij mocamanal para mopaquiltiaj. Mitzitaj quej tielisquia se tacat cati yejyetzti itoscac para huicas huicat ten teicnelijcayot, o se cati yejyetzti tatzotzona. Quicaquij mocamanal, pero amo quichihuaaj cati tiquinilhuaia ma quichihuaaca. ³³ Pero quema panos nochi nopa tatzacuilti cati tiqinyolmelajtoc, injuanti quimachilise para melahuac oncac se tajtolpanextijquet tatajco ten injuanti.”

34

Tatzacuilti para nopa tamocuitahuiani ten tali Israel

¹ Toteco nechcamanalhui huan techilhui: ² “Tacat, xiquincamanalhui nopa tamocuitahuiani cati tayacanaj ipan tali Israel huan xiquinilhui taya ininpantis teipa. Xiquinilhui para quej ni na, niDIOS Cati Más Nijpiya Tanahuatili, niqijtohua: ‘Nelia anteicneltique, antamocuitahuiani ten tali Israel pampa san anmotamacaj amojuanti, pero amo anquintamacaj amomasehualhua cati itztoque quej borregojme. ³ Eltoc quej anquij nopa lechi, anmochijchihuiliaj yoyomit ica inijhuyio nopa borregojme huan anquinnictiaj nopa borregojme cati más tomahuaque para anquincuase, pero injuanti amo anquintamacaj. ⁴ Amo anquinpalehuaaj cati cocoxquetziti. Amo anquinpajtiaj cati mococohuaaj, amo anquinhuijcomaj ica yoyomit cati quipostectoc imetz. Amo anquinchihuaaj ma mocuepaca cati quitoquilíaj seyoc ojti, yon amo anquitemohuaaj cati mocuapolojtoc. Antamocuitahuiani anmochijtoque tahuel anyoltetique huan anquinyacanaj amomasehualhua ica cualanti huan san anquintajjyohuilíaj. ⁵ Huajca israelitame itztoque quej borregojme cati motamisemanque. Ayecmo quipxque inintamocuitahuijca. Ama sesen ten injuanti ya huetztoque inimaco

nopa tecuanime cati onca ipan cuatitamit. ⁶Nochi noisraelita masehualhua mocuapolojque quej borregojme huan yajtoque ipan campa hueli cuatitamit huan tepeme huan ipan nochi taltipacti. Huan amo oncac yon se cati mocuatotoni por inijuanti para yas quintemoti huan quinmocuitahuis.

⁷ “Huajca ama antamocuitahuiani, xijtacaquilica nocamanal na niDIOS: ⁸ Na, niDIOS Cati Más Nijpiya Tanahuatili, niqijtohua para temacht nimechtatzacuiltis antamocuitahuiani cati anquinfahuelcajtoque noborregojhua. Anquincahuilijtoque para tecuanime ma quintzontamiltica huan ma quincuaca. Amo anquinmocuitahuijtoque quej quinamiqui pampa amo anquintemotjoque cati mocuapolojtoque. Amojuanti nochipa anquicua-jtoque tacualisti cati más cuali, pero noborregojhua anquincajtoque ma mayancamiquica. ⁹ Yeca ama antamocuitahuiani, xijtacaquilica nocamanal na niDIOS: ¹⁰ Na, niDIOS Cati Más Nijpiya Tanahuatili, niqijtohua para nimochitoc niamocualancaitaca, antamocuitahuiani. Huan nimechtajtannis cuenta por nochi cati ininpanti nomasehualhua cati itztoque amomaco quej borregojme. Na nimechquixtilis nopa tequiticayot cati anquipiayaj para anquinmocuitahuise nomasehualhua. Quena, na niquinmanahuis noborregojhua amocamaco huan ayecmo huelis anquincuase.’

Nopa cuali tamocuitahuijquet

¹¹ “Quej ni na, niDIOS Cati Más Nijpiya Tanahuatili, niqijtohua: Na noseltitzi niyas niqintemoti noborregojhua huan niquinixmatis. ¹² Quej se cuali tamocuitahuijquet mocuesohua por iborregojhua quema mocuapolo-huaj huan yahui quintemoti, na niqintemos nomasehualhua cati pampa hueli yajtoque huan mocuapolojtoque. Huan quema niqunpantis, niqunquixtis ten nochi nopa lugares campa mosemantoque ipan nopa tonali quema tamixtentoya huan nopa tonali ten tzintayohuilot. ¹³ Quena, niqunquixtis ten nopa talme huan altepeme campa mopantíaj huan niqunsejcotilis huan niqunhualicas ipan inintal. Huan nopona niquntamacas ipan nopa tepeme ten tali Israel campa onca cuali sacat, huan iteno hueyat huan ipan lugares yejectzitzi campa itztoque miyac masehualme. ¹⁴ Niqunhuicas ma quicuatij nopa cuali sacat cati onca ipan nopa huejcapantique tepeme ipan tali Israel. Huan nopona mosiyajquetzase ica paquilisti huan quicuase nopa sacat cati ajhuiyac cati mopantía nopona. ¹⁵ Na noselti niqunmocuitahuis noborregojhua huan niqunchihuas ma mosiyajquetzaca ica paquilisti. Quej nopa na, niininTECO Cati Más Nijpiya Tanahuatili, niqijtohua: ¹⁶ Niqintemos noborregojhua cati mocuapolojtoque huan sempa niqunhualicas ipan ininchaj huan nopona itztose temachme. Huan nijhuijcomas imetz cati postectoc huan niqunpalehuis cati cocoxquetzitzi. Pero nopa cati itztoque tomahuaque huan nella quipiyaj chichahualisti, niqunmictis. Huan niqunmocuitahuis noborregojhua quej quinamiqui.

¹⁷ “Huan ica amojuanti annoborregojhua na, niamoTECO Cati Más Nijpiya Tanahuatili, niqijtohua: Na nimechtajtolsencahuas. Huan niquniyocatalis ten amojuanti ica cati cuajcualme huan cati amo cuajcualme. Huan nojquiya niquniyocatalis oquich borregojme ica nopa oquich chivojme. ¹⁸ Sequij ten amojuanti amo san anquicuaaj nopa sacat cati más cuali pero anquitamixacualohuaj nopa sacat cati noja mocahua. Nojquiya amo san anquij nopa at cati más tapajpacti, pero nopa cati noja mocahua anquichihuaj tetetzic ica amoicxi. ¹⁹ Huan nopa sacat cati mocahua para noborregojhua ma quicuaca san eltoc nopa sacat cati anquitamixacualojtoque. Huan para atise, san quipiyaj nopa at cati anquichijtoque tetetzic ica amoicxi.

²⁰ “Yeca na, niDIOS Cati Más Nijpiya Tanahuatili, niqijtohua: Na niqin-tajtolsencahuas nopa borregojme cati tomahuaque huan injuanti cati co-coxquetzitzí. ²¹ Pampa anisraelitame cati quiipiyaj chichahualisti, cati an-itztoque quej borregojme tomahuaque quintonpojhuíaj huan quincuatope-huaj nopa borregojme cati mococohuaj huan cati cocoxquetzitzí. Huan anquinchihualtjitoque ma mosemanaca huan ma yaca huejca. ²² Huajca na noseltitzí niqinmanahuis noborregojhua huan quej nopa ayecmo huetzise inimaco tecuanime. Huan ayecmo aquí noja quincocos huan quinichtequis. Huan niqintajtolsencahuas noborregojhua huan niqiyocatalis cati tomahuaque huan mosiniáj huan cati cocoxquetzitzí huan quinchihuíaj cati amo cuali. ²³ Huan nijtalis se tamocuitahuijquet cati elis notequipanojca David para quinmocuitahuis noborregojhua. Yaya quintamacas nomase-hualhua huan elis inintamocuitahuijca. ²⁴ Huan na, niDIOS nielis niininTeco huan nijtalis notequipanojca David para elis inintanahuatijca. Quej nopa na, niDIOS niqijtohua.

²⁵ “Huan nijsencahuas se camanali ica injuanti para quiipiyase tase-huillisti. Huan niqinijcuenis nochi tecuanime ipan nochi nopa tali. Quej nopa nochi nomasehualhua itztose ica temachili ipan nopa tepeme campa amo aquíjme masehualme. Huan cochise ipan nopa cuatitamit huan amo majmahuise.

²⁶ “Huan niquntiochihuas nochi nomasehualhua huan inihuicalhua cati itztose yahualtic notepe cati tatzejtzeltolitic. Huan nijchihuas ma huetzi at quema monequi. Huan nijchihuas ma huetzi tatiochihualisti quej elisquía at ipan nomasehualhua. ²⁷ Huan nochi cuame ipan cuamili temacase inintajca. Huan inimilhua temacase miyac pixquisti. Huan noisraelita masehualhua itztose ica temachili ipan ten injuanti inintal. Huan quema ya niqinmanahuijtos ten inintajyohuilis huan ten inintecohua ipan sequinoc talme cati quinhuihuiitayayaj, quimachilise para na, niDIOS. ²⁸ Ayecmo quimachtequilise cati ehuaní ipan sequinoc talme huan ayecmo huetzise inintaco tecuanime. Itztose temachti huan ayecmo aquí quintemajmatis.

²⁹ “Huan nijchihuas para nochi quiixmatise tali Israel por nopa yejyetzí tzonti cati nozona moscaltía. Huan quej nopa nomasehualhua ayecmo quipanose mayanti, yon ayecmo quinpinahualtise sequinoc talme cati fiero ininemilis. ³⁰ Huan huajca nopa israelitame quimachilise para na niDIOS Cati Más Nijpiya Tanahuatili. Huan quimatise para na niitztoc inihuaya huan injuanti nomasehualhua. Quej nopa na, niininTECO Cati Más Nijpiya Tanahuatili, niqijtohua. ³¹ Quena, amojuanti annorborregojhua cati an-itztoque ipan nopotrero. Annomasehualhua huan na niitztoc niamoTECO. Quej nopa na, niDIOS Cati Más Nijpiya Tanahuatili, niqijtohua.”

35

Tatzacuilitli para altepet Seir

¹ TOTECO nechcamanhui huan techilhui: ² “Tacat, xitachiya ipan tali Edom campa tepet Seir huan xiquinyolmelahua nopa masehualme nozona taya ininpantis. ³ Xiquinilhui para na, niDIOS Cati Más Nijpiya Tanahuatili, niqijtohua: ‘Na nimochijtoc niamocualancaitaca huan nijtananas nomax para nimechtatzacuilitis huan nijcahuas amotal quej se huactoc tali campa amo aquíjme masehualme. ⁴ Niqinsochos nochi amoaltepohua huan nijchihuas amotal ma eli quej se huactoc tali. Huan anquimachilise para na, niDIOS.

⁵ “Pampa anEdom ehuaní, nochípa anquincualancaitztoque israelítame. Huan anquintehuíyayaj quema na níquintatzacuiltiyaya por nochí inintatcolhua huan ayecmo quípiyayaj fuerza. ⁶ Yeca ama na, niDIOS Cati Más Nijpiya Tanahuatili, nimechilhúa para temachti nijtoyahuas amoeso pampa amo anmajmahuíyayaj anquítayahuae inieso sequinoc. Huan ama amechtocaros amojuanti para anmiquise. ⁷ Nochi tepet Seir nijchihuas quej se huactoc tali. Nimechtzontamiltis nochí amojuanti cati nopona anehuani huan níquinmictis nochí cati quinequise panose nopona. ⁸ Nijchihuas ma temica nochí tepeme, tachiquilme, tamayame huan hueyame ipan amotal ica mijcatzítzi cati miquise ica macheta ipan tatehuilisti. ⁹ Huan ayecmo quema motananas amotal. Mocahuas quej se huactoc tali para nochípa. Ayecmo aquí quincualchijchihuas amoaltepehua, yon ayecmo aquí itztos nopona. Huan anquimachilise para na, niDIOS.

¹⁰ “Nijchihuas pampa amojuanti ipan tali Edom anquiijtojque: Nopa tali Israel huan nopa tali Judá elise toaxcahua. Quena, timoaxcatise masque DIOS itztoc nopona. Quej nopa anquiijtojque. ¹¹ Pero na, niDIOS Cati Más Nijpiya Tanahuatili, níquijtohua para temachti nimechcuepilis pampa anquincualancaítaque israelítame huan anquiixtocaque cati quípiyayaj. Huajca anquimatise para nimechtatzacuiltia por cati anquinchihuilijque. ¹² Huan anquimachilise para melahuac na, niDIOS, nijcajqui nochí nopa fiero camanali cati anquiijtojque ten nopa tepeme cati onca ipan tali Israel. Anquiijtojque tásosolijtoc ipan nopa altepeme huan para eltoque quej se tacualisti para anquincuase huan para anmoaxcatise. ¹³ Quena, anmohueyimatque ica amocamac huan antechtáijlhuijtojque ica camanali cati fiero huan na nijcajqui nochí cati anquiijtojque.

¹⁴ “Quej ni na, niDIOS Cati Más Nijpiya Tanahuatili, níquijtohua: Na nijchihuas amotal sósolijtoc huan nochí talme ipan taltipacti paquise quema quíitase cati nimechchihuilis. ¹⁵ Pampa amojuanti anhuetzacaque quema quitamisosolójque inintal nopa israelítame. Pero ama ya ajsic hora para na nojquiya níhuetzcas quema níjtamisosolos nochí amotal. Quena, nimechtamiixpolihuiltis nochí amojuanti ipan altepet Seir huan nochí cati itztoque ipan tali Edom. Huan huajca anquimachilise para na, niDIOS.’

36

Tali Israel sempa motananas teipa

¹ “Tacat, xitachiya ica campa nopa tepeme ten tali Israel huan xiquinyolmelahua israelítame ten ininpantis nopa tepeme. Xiquijto: ‘Xijtacaquilica Icamanal TOTE’CO.’ ² Huan xiquinilhui para na, niinTECO Cati Más Nijpiya Tanahuatili, níquijtohua: Nochi amocualancaitacahua, anisraelítame, mohueyimajtoque huan quíijtojtoque para nochí nopa huejhueyi tepeme cati nochípa eltoyaj, ama iniaxcahua. ³ Huajca tacat, xiquinyolmelahua israelítame ni camanali ica notequiticayo huan xiquinilhui para quej ni na, niinTECO Cati Más Quipiya Tanahuatili, níquijtohua: ‘Quema amocualancaitacahua ipan sequinoc talme hualajque huan quitamisosolójque campa hueli ipan amotal huan amechhuicaque anisraelítame ipan sequinoc talme para xítetequipanotij san tapic, nochí sequinoc talme ehuaní amechpinajtijque huan ten hueli amechilhuijque. ⁴ Huajca xijtacaquilica nocamanal na, niamoTECO Cati Más Nijpiya Tanahuatili. Xijtacaquilica cati níquijtohua ten nochí tepeme, tachiquilme, tepeme, taixtemolis, hueyame, tamayame, talme huan altepeme ipan tali Israel cati quinsosolójque huan cati quinpinahualtijque nopa sequinoc talme. ⁵ Quej ni na, niamoTECO Cati Más

Nijpiya Tanahuatili, niqijtohua: Tahuel nicualantoc ica nochi nopa talme cati amechyahualojtoque, anisraelitame. Pero achi más nicualantoc ica tali Edom ehuaní pampa inijuanti moaxcatijque notal ica nochi ininchichualis huan ica paquilisti para quisosolajque huan quitachtequilijque.’

⁶ “Huajca, tacat, xiquinyolmelahua israelitame por na cati niqijtohua ten nopa tepeme, tachiquire, hueyame huan tamayame ten tali Israel. Xiquinilhui para quej ni na, niamoTECO Cati Más Nijpiya Tanahuatili, niqijtohua: ‘Nelia nicualantoc ica masehualme ten miyac talme pampa tahuel quinpinahualtijoque nopa tepeme. ⁷ Yeca na, niamoTECO Cati Más Nijpiya Tanahuatili, niqijtohua para temachtí nopa talme cati amechyahualohuaj ica nochi cati nepa ehuaní nojquiya huetzise ipan pinahualisti. ⁸ Pero nopa tepeme ten tali Israel sempa quinpiyase miyac cuame ica miyac inimacuayohua. Huan temacase miyac inintajca para ica mopanoltise nomasehualhua pampa nechcatitoc para sempa mocuepase nomasehualhua ipan inintal. ⁹ Na niitztoc para niquinpalehuis nopa tepeme. Huan nijchihuas masehualme ma quicualtica nopa tali, huan tatojtocase huan quimocuitahuise cati quitocotoc nozona. ¹⁰ Huan nijchihuas para tahuel ma momiyaquilica nopa israelitame cati itztoque nozona ipan tali Israel. Nochi nopa altepeme cati tasosololme sempa quincualtalise huan temise ica masehualme. ¹¹ Pero amo san niquinmiyaquilis masehualme. Nojquiya tahuel niquinmiyaquilis nopa borreojme huan huacaxme. Quej nopa, nopa tepeme ten tali Israel sempa temise ica familias huan quiyipase más ricojyot que achtohuia. Huan huajca, anisraelitame, anquimatise para na niamoTECO. ¹² Huan nijchihuas para noisraelita masehualhua sempa ma nejnemica ipan nopa tepeme. Huan nopa tepeme sempa elise iniaxchahua huan nopa tali ayecmo quema quincahuilis iconehua ma mayancamiquica pampa amo quiyia itajca.

¹³ “Na, niamoTECO Cati Más Nijpiya Tanahuatili, niqijtohua: Melahuac achtohui sequinoc talme ehuaní quijtohuayayaj para nopa tali Israel quinchihuayaya ma miquica imasehualhua ica mayanti. ¹⁴ Pero ama nopa tali quiyias itajca cati yejyectzi huan ayecmo quincahuilis imasehualhua ma mayancamiquica, yon quinmictis iconehua pampa amo quiyia itajca. Quej nopa na, niamoTECO Cati Más Nijpiya Tanahuatili, niqijtohua. ¹⁵ Huan ayecmo aquí quicaquis sinta sequinoc talme ehuaní quintajilhuisse israelitame huan quinpinajtise. Ayecmo mocahuas Israel quej se tali cati amo quinpiya iconehua, yon imasehualhua. Quej nopa na, niamoTECO Cati Más Nijpiya Tanahuatili, niqijtohua.’ ”

¹⁶ Teipa TOTECO sempa nechcamanalhui huan techillhui: ¹⁷ “Tacat, quema nopa israelitame itztoyaj ipan inintal, quichijque amo tapajpactic nopa tali noixpa ica miyac tamanti cati amo cuali quichihuayayaj. Nopa tamanti cati inijuanti quichijque niqitayaya para nelfiero quej se yoyomit espoltic cati amo nijnequi niqitas. ¹⁸ Huajca na niquinnextili nopa israelitame nohueyi cualancayo pampa tahuel temictijque ipan inintal huan quinhueyichijque teteyome. ¹⁹ Yeca niquintanqui ipan miyac talme para ma itztotij quej seyoc tali ehuaní. Quej nopa niquintatzacuiliti por nochi nopa fiero tamanti cati inijuanti quichijtoyaj. ²⁰ Pero campa hueli campa ajsique nomasehualhua, nopa tali ehuaní techtaijilhuijque na cati nitatzejtzeloltic, pampa quijtoque: ‘Ya ni imasehualhua DIOS pero monejqui quisase ten inintal pampa amo huelqui quimocuitahui cuali.’ ²¹ Huajca nelia nimocuseo pampa masehualme ipan sesen tali ipan taltipacti campa ajsitoj nomasehualhua techtaijilhuiyayaj na cati nitatzejtzeloltic por inijuanti.

22 “Yeca ama xiquincamanalhui israelitame huan xiquinilhui para quej ni na, niininTECO Cati Más Nijpiya Tanahuatili, niqijtohua: ‘Na sempa nimechhualicas ipan amotal, pero amo nijchihuas por amojuanti. Nijchihuas para ma ayecmo techtajilhuica na cati nitatzejtelolitic. Pampa quema anitztoque ipan sequinoc talme, anquichijtoque ma techtajilhuica masehualme cati nozona itztoque. 23 Na nijnextis para nelía nihueyi huan nitatzejtelolitic masque amojuanti anquichijtoque ma techtajilhuica ipan nochi talme. Huan nochi masehualme ipan taltipacti quimachilise para na, niDIOS quema nimechquixtis ten campa inijuanti huan nijnextis para nitatzejtelolitic por amojuanti. Quej nopa na, niamoTECO Cati Más Nijpiya Tanahuatili, niqijtohua. 24 Pampa na nimechquixtis anisraelitame huan nimechsentilis ten nochi nopa talme huan sempa nimechhualicas ipan amotal.

25 “Huan nimechpajpacas ica at cati senquisa cuali huan nimechpajpacas ten nochi tamanti cati ica anmosoquihuijtoque huan nimechtapajpacchihuas ten nopa teteyome cati anquinhueyichihuayayaj. 26 Huan nimechmacas se amoyolo cati yancuic huan nijtalis ipan amojuanti se tonaltzi cati yancuic. Huan nimechquixtilis amoyolo cati tetic quej se tet cati quipactía tajtacolchihuas huan nimechmacas seyoc amoyolo cati yamanic para techneltocas. 27 Huan nijtalis notonaltzi ipan amojuanti para anquitepanitase notanahuatilhua huan anquichihuase nochi cati na nimechilhuis.

28 “Huan anitztose ipan nopa tali Israel cati na niquinmacac amohuejapan tatahua. Huan amojuanti anelise annomasehualhua huan na nielis niamoTECO. 29 Na nimechmocuitahuis ten nochi tamanti cati huelis amechsoquihuis. Huan nijchihuas nopa trigo para ma temaca miyac pixquisti huan ayecmo nimechcahuilis xijpanoca mayanti. 30 Nojquiya nijchihuas para nopa cuame ma temacase miyac inintajca huan amomilhua ma temacaca miyac pixquisti. Huan cati ehuan ipan nopa tali cati amechyahualojtoque ayecmo huelis amechpinajtise pampa ayecmo anquipanose mayanti. 31 Huan quema anquielnamiquise nochi amotajtacolhua cati anquichijque huejcajquiya, anmoijiyase amoselti por nochi nopa tamanti cati amo cuali cati anquichijque. 32 Pero nochipa xiquelnamiquica para ni tamanti amo nijchihua pampa quinamiqui anquiselise tatiochihualisti. Quinamiqui anisraelitame xipinahuaca por nochi nopa tamanti cati amo cuali cati anquichijtoque. Quej nopa na, niamoTECO Cati Más Nijpiya Tanahuatili, niqijtohua.

33 “Na, niamoTECO Cati Más Nijpiya Tanahuatili, niqijtohua: Quema nimechtapajpacchihuas ten nochi amotajtacolhua, sempa nimechhualicas ipan tali Israel huan nimechcahuilis anitztose ipan amoaltepehua. Huan nochi tamanti cati ama eltoc tasosololi sempa anquincualtalise. 34 Huan nochi mili cati elqui quej huactoc tali huan elqui nelía sosolijtoc hasta cati panoyayaj amo huelque quineltocase, ipan nopa mili sempa antatojtocase. 35 Huan quema sempa niquinhualicas israelitame ipan inintal, nochi sequinoc masehualme quijjtose: Ni tali cati quitahuelcajtoyaj huan mocajtoya quej se huactoc tali, ama mochijtoc quej nopa xochimili Edén. Huan nopa altepeme cati quintamisosolojtoyaj; ama sempa quincualtalijtoque. Huan quinyahualojtoque ica tepamit huan temitoque ica masehualme. 36 Huan huajca nochi nopa talme cati noja mocahuaj yahualtic ten amojuanti, quimatise para na, niamoTECO, nijcualtalía cati eltoya tasosololi. Huan niqintoca cuame ipan nopa tali cati mocajtoya quej huactoc tali. Na niamoTECO nijtencahua para nijchihuas ya ni huan temachi nijchihuas.

37 “Na, niamoTECO, niqijtohua: Ya niitotoc para niquintacaquilis israelitame quema motatajtise huan techtajtanise ma niquinmaca nochi ni tati-

ochihualisti. Quena, ya niitztoc para niquinmacas cati techtajtanise. Huan niquinmiyaquilis israelitame cati itztoque ipan nopa tali quej momiyaquilíaj borregojme. ³⁸ Itztose tachel miyac israelitame ipan altepeme ipan Israel quej quema temi nopa calles ipan Jerusalén ica miyac borregojme para tacajahalisti ipan nopa tonali ten ilhuit. Huan nopa altepeme cati mocajtoyaj tasosolome sempa temise ica masehualme. Huan nochi quimatise para na niamoTECO.’ ”

37

Nopa omime cati huactoque

¹ Huan TOTECO quitali imax ipan na huan Itonal techhuicac huan techtali ipan se tamayamit cati temitoya ica miyac omit cati huactoc. ² Huan yaya techyacanguí para ma nipano tatajco huan niquitac para oncayaya tachel miyac omime ipan nopa tamayamit. Huan nochi nopa omime eliyayaj senquisa huactoque. ³ Huajca yaya techtatzintoquili: “Tacet, ¿timoilhuía para ni omime sempa huelise mocuepase masehualme cati yoltoque?”

Huan na niquilhui: “Toteco, san ta tijmati sinta noja huelise itztose o amo.”

⁴ Huajca Toteco techilhui: “Xiquincamanalhui nopa omime huan xiquinilhui taya ininpantis. Xiquinilhui: ‘Anomime cati anhuactoque, xijtacaquilica icamanal TOTECO.’ ⁵ Xiquinilhui para na, niDIOS Cati Más Nijpiya Tanahuatili, niquinilhuía nopa omime: ‘Na nijchihuas antaijyotilanase huan nijchihuas para sempa anmocuepase anyoltoque. ⁶ Nimechtalilis amotalijcho, huan nijchihuas para sempa anquiyase amonacayo huan sempa nimechtzacuas ica amocuetaxo. Huan nimechtalilis amojijyo para xitaijyotilanaca huan xijpiyaca nemilisti. Huan huajca anquimachilise para niDIOS.’ ”

⁷ Huajca na, niEzequiel, niquincamanalhui nopa omime senquisa quej Toteco technahuatijtoya ma nijchihua. Huan quema noja nicamanaltiyaya, pejqui tacaquisti quej mocacapatzayaya ipan nochi nopa tamayamit. Nochi nopa tali mojmoliniyaya huan nopa omime ten sesen mijcatzi pejque mosejcotilíaj se ica seyoc senquisa quej eliyayaj achtohuiya. ⁸ Huan niquitac para ipan injuanti motaliyaya inintalijcho, ininacayo huan inincuetaxo. Pero noja amo quiipiyayaj nemilisti.

⁹ Huajca TOTECO techilhui: “Xijnotza nopa tonaltzi cati temaca nemilisti huan xiquilhui para na, niDIOS, niqijtohua: ‘Tonaltzi, xihuala ten nopa nahui lados huan xiquinilpitzta ni mijcatzitzta para sempa ma quiipiyaca nemilisti.’ ”

¹⁰ Huajca na nijnotzqui nopa tonaltzi senquisa quej TOTECO technahuatijtoya. Huan nopa tonaltzi hualajqui huan calajqui ipan inintacayo nopa mijcatzitzta. Huan nopa mijcatzitzta mocuetque yoltoque huan moquetzque ica inixihua. Huan elque tachel miyaqui injuanti quej se pamit ten soldados cati tachel hueyi.

¹¹ Teipa TOTECO techpohuili taya quijtosnequi nopa tanextili. Techilhui: “Ni omime quinxnextíaj nopa israelitame. Pampa injuanti quijtohuaj: ‘Nochi tojuanti tiitztoque quej se tamontomit ten omime cati huactoque. Ayecmo temachti para tiitztose huan san tipolijtoque.’ ¹² Huajca ama xiquinilhui para quej ni na, niDIOS Cati Más Nijpiya Tanahuatili, niqijtohua: ‘Annomasehualhua, na nijmati para eltoc quej antalpachijtoque nopona ipan sequinoc talme. Pero nijtapos amoosto, huan nimechquixtis ten nopa talme campaa anitztoque huan sempa nimechhualicas ipan tali Israel. ¹³ Huan quema nijtapos amoosto huan nimechquixtis, huajca anquimachilise para na, niDIOS. ¹⁴ Na nijtalis noTonal ipan amoyolo huan

anquipyase nemilisti huan sempa nimechhuicas ipan amotal. Huan huajca anquimachilise para na, niDIOS. Huan para nochi cati niqijtojtoc para nijchihuas, ya nijchijqui. Quej nopa na, ni amoTECO, niqijtohua.’ ”

Tali Judá huan tali Israel sempa mosejcotilise

¹⁵ Huan TOTECO sempa nechcamanalhui huan techilhui: ¹⁶ “Tacat, xicui se cuahuit quej para tit huan ipani xiquijcuilo ni camanali: ‘Cuahuit cati quiixnextía tali Judá huan nopa familias ten israelitame cati itztoyaj nopona.’ Teipa xijcui seyoc cuahuit huan ipani xiquijcuilo ni camanali: ‘Cuahuit cati quiixnextía nopa hueyi familia ten José, Efraín huan nochi nopa sequinoc familias cati itztoyaj ica norte ipan tali Israel.’ ¹⁷ Teipa ipan momax xiquinsejcotili huan xiquinitzqui quej elisquía san se cuahuit. ¹⁸ Huan quema nopa israelitame mitztatzintoquilise taya quijtosnequi ya nopa, ¹⁹ xiquinilhui para quej ni na, niininTECO Cati Más Nijpiya Tanahu-atili, niqijtohua: ‘Na nijcuis nopa hueyi familia José, Efraín huan nochi nopa sequinoc huejhueyi familias cati itztoque ipan tali Israel ica norte; huan niquinsejcotilis inihuaya nopa familias cati itztoque ipan tali Judá ica sur. Huan inijuanti elise quej setzi cuahuit ipan nomax.’ ²⁰ Pero quema tiquinilhuis ya ni, monequi tijpixtos momaco nopa ome cuame cati ininpani titajcuilojtoc para huelise quítase ten tijchihuas.

²¹ “Teipa xiquinilhui para quej ni na, niininTECO Cati Más Nijpiya Tanahu-atili, niqijtohua: ‘Na niyas huan niquinquixtis israelitame cati itztoque ipan campa hueli talme ipan nochi taltipacti huan niquinhuualicas ipan inintal. ²² Huan nopona niquinsejcotilis para elise setzi tanahuatijcayot ipan nopa tali huan ipan nopa tepeme ten tali Israel. Huan oncas setzi tanahuatijquet cati quinnahuatis nochi inijuanti. Ayecmo quema motajcoxelose para mochihuase ome talme, yon ayecmo oncas ome tanahuatiani. ²³ Nojquiya ayecmo momahuispolose ica teteyome huan taixcopincayome huan ica sequinoc tamanti tajtacoli. Ayecmo moicancuepase ica na pampa na niquinmaquixtis ten nochi ni tamanti cati amo cuali cati ica techixpanoque huan niquintapajpacchihuas. Huan inijuanti elise nomasehualhua huan na nielis niiniDios.

²⁴ “Huan notequipanojca David elis inintanahuatijca huan san quipyase se inintamocuitahujca. Huan inijuanti quitepanitase notanahuatilhua huan quichihuase cati niquinilhúa. ²⁵ Huan nomasehualhua itztose ipan nopa tali campa huejcajquiya itztoyaj inihuejcapan tatahua cati nijmacac notequipanojca Jacob. Huan inijuanti huan ininconeua huan iniixhuihua nopona itztose para nochipa. Huan notequipanojca David elis inintayacanca para nochipa. ²⁶ Huan nijchihuas se camanal sencahuali inihuaya cati quinilhuis para temachtí quipyase tasehuilisti ipan inintal. Huan nopa camanali mocahuas para nochipa. Quena, na niquintalis ipan nopa tali huan niquinmiyaquilis. Huan nijtalis notiopa tatajco inijuanti para nochipa. ²⁷ Huan nopona nimochantis huan niitztos tatajco inijuanti, huan na nielis niiniDios huan inijuanti elise nomasehualhua. ²⁸ Huan quema ya nijtalijtos notiopa tatajco inijuanti para nochipa, nochi tali ehuaní quimachilise para na, niDIOS, niquintapejpenijtoc israelitame huan niquniyocatalijtoc para elise noaxcahua.’ ”

38

TOTECO quitequihuis Gog

¹ TOTECO nechcamanalhui huan techilhui: ² “Tacat, xitachiya ica norte campa tali Magog huan xijcamanalhui Gog cati quinnahuatía Mesec huan

Tubal huan xiquilhui taya ipantis. ³ Ica notequiticayo xiquilhui para quej ni na, niDIOS Cati Más Nijpiya Tanahuatili, niqijtohua: ‘Gog, ta cati tijnahuatía tali Mesec huan Tubal, na nimochijtoc nimocualancaitaca. ⁴ Na nimitzcuepas huan nimitzquixtis ten motal huan nimitztalilis tepos chijcoli ipan mocamachal huan nimitzhualicas ta huan nochi mosoldados, huan nopa cahuayojme cati ininpa tejcotoque. Nochi injuanti quihuicase inimacheta, inintepos para ica tatehuisse huan inintepostzajca cati ica quimanahuisse inintacayo. ⁵ Nojquiya nopa soldados ten tali Persia, Etiopía huan Libia yase mohuaya ica inintepostzajcahua cati ica quimanahuisse inintacayo huan inintepostzontzajca para quimanahuisse inintzonteco. ⁶ Nojquiya yase mohuaya nopa soldados cati tahuel mosisiníaj ten tali Gomer huan nopa soldados ten tali Togarma cati mocahua ica norte. Huan sequinoc talme nojquiya yase mohuaya.

⁷ “ ‘Huajca ximocualtali huan xiquincualtali mosoldados huan nochi inisoldados nopa talme cati mitzyahualojtoque huan ta xiquinyacana. ⁸ Huan quema panos miyac xihuit, nimitznahuatis para xijtehui tali Israel cati nochipa mopantiyaya ipan tatehuilisti, pero ama ya eltoc ica cuali. Tiquintehuis nopa masehualme cati mosemantoyaj ipan miyac talme campa hueli, pero ama sempa mosejcotilijtoque ipan inintal huan itztoque ica paquilisti. Huan tiquintehuis ipan nopa tepeme ten tali Israel. ⁹ Quena, ta tihualas ica nochi nopa miyac soldados cati itztoque mohuaya ten sequinoc talme, soldados cati tahuel mosisiníaj. Huan nochi amjuanti anhualase quej se hueyi ajacat huan anquixtzacuase nopa tali quej se mixti.

¹⁰ “ ‘Na, niDIOS Cati Más Nijpiya Tanahuatili, niqijtohua para ipan nopa tonali, pehuas timoyolilhuis miyac tamanti cati fiero. Huan tijnequis tijchihuas miyac tamanti cati amo cuali. ¹¹ Huan tiquijtos: Israel itztoc se tali cati amo quimati quenicatza momanahuis. Imasehualhua itztoque ica paquilisti huan inialtepehua amo moyahualojtoque ica tepamit. Nochi tapojtoque. Huajca na nijtehuiti huan niquintasosolhuilis nopa masehualme cati itztoque ica temachili. ¹² Niyas ipan nopa altepeme cati achtohuiya eltoyaj tasosololme pero ama sempa quitemitijtoque nopa masehualme cati mocuectoque ten sequinoc talme. Niqinichtequilis miyac tamanti pampa nopa masehualme ama neltahuel moricojchijtoque ica tapiyalme. Huan inintal eltoc tatajco ten nochi tanamacalisti ten ni taltipacti. Quej nopa tiquijtos. ¹³ Pero nopa masehualme ten tali Sabá huan Dedán, huan nochi tanamacani ten Tarsis, mitzilhuise: ¿Para ten titachtequti huan timoaxcatis nopa plata, oro huan tapiyalme cati quipiyaj huan tiquincahuas san inimax? ¿Ajquiya ta para tijchihuas ya nopa?’

¹⁴ “Huajca ama, tacat, xijcamanalhui Gog huan xiquilhui taya ipantis. Xiquilhui para quej ni na, niDIOS Cati Más Nijpiya Tanahuatili, niqijtohua: ‘Ipan nopa tonali quema noisraelita masehualhua itztose ipan tasehuilisti ipan inintal, ta tijmatis huan nimantzi ximocualtali. ¹⁵ Huan nimantzi xiquisa ten campa tiitztoc ipan nopa tali ica norte huan xiquinhualica nochi nopa miyac soldados cati nelía quipiyaj chichahualisti huan nochi nopa cahuayojme. Huan xiquintehuiqui noisraelita masehualhua. ¹⁶ Huan tiquintehuis nomasehualhua quej se hueyi ajacat. Huan nochi nopa miyac soldados cati tahuel quipiyaj chichahualisti quitzacuase nopa tali Israel quej elisquía se hueyi mixti. Pero ya ni amo panos hasta teipa, ipan itamiya tonali. Na nimitzhualicas ipan notal quema nochi masehualme quitachilijtose huan nijnextis notatzejtzeloelui iniixpa nomasehualhua pampa nimitztontamiltis, Gog, ica nochi nochicahualis. Quema panos nochi ya ni,

niquinnexilis nochi tali ehuan para nitatzetzeloltic por cati nijchihua ica ta.

¹⁷ “Na, niDIOS Cati Más Nijpiya Tanahuatili, niquijtohua: Huejcajquiya nicamanaltic ten ta, Gog, ica noisraelita tajtolpanextijcahua. Nitayolme-lajqui para se tonali na nijchihuasquia xihuala xiquintehuiqui noisraelita masehualhua.’

Tatzacuiliti para Gog

¹⁸ “Pero na, niDios Cati Más Nijpiya Tanahuatili, niquijtohua: Quema tihualas, Gog, tihualas para tijtehuis tali Israel, tahuel nicualanis ica ta.

¹⁹ Nimitzilhuus para temacti nicualanis miyac. Huan ipan nopa tonali nijchihuas ma mojmolini tahuel chicahuac nopa tali Israel. ²⁰ Huan nochi nichime cati itztoque ipan hueyi at, nochi totome, tecuanime, cohuaime huan masehualme huihuipicase noixpa ica miyac majmajti. Nochi tepeme huelonise, huan teme ipan tepexit momimilose huan nochi tepamit huelonise hasta talchi. ²¹ Huan na, niDIOS Cati Más Nijpiya Tanahuatili, nijchihuas para campa hueli ipan tali Israel mitztehuise ica macheta. Huan mosoldados pehuase para momictise se ica seyoc ica macheta pampa tahuel momajmatise huan amo quimatise taya onca. ²² Nimitztatzacuilitis ica cocolisti, ta huan nochi mosoldados huan nochi cati amechpalehuaj. Nojquiya tahuel miyac mosoldados miquise ica macheta ipan tatehuilisti. Nijchihuas amopani ma huetzi at cati tahuel chicahuac, huan huetzis tesihuít. Huan huetzis tit huan azufre. ²³ Huan quej nopa nijnextis inixpa miyac talme para nelia nihueyi huan nitatzetzeloltic. Huan nochi tali ipan taltipacti quimatise cati nijchijtoc huan quimachilise para na niininTECO israelitame.

39

TOTECO quitanis Gog huan isoldados

¹ “Huajca, tacat, xijcamanalhui Gog ica na notequiticayo huan xiquilhui para na, niDIOS, niquijtohua: ‘Gog, ta cati tijnahuatia tali Mesec huan Tubal, na nimochijtoc nimocualancaitaca. ² Na nimitzquixtis ten nopa tali cati mochahua ica norte huan nimitzhuicas ipan nopa tepeme ipan tali Israel para xiquintehuiti. ³ Teipa nimitzquixtilis nopa cuahuitoli cati tijhuica ipan momarraves huan nijchihuas ma tepehui nopa cuataminti cati tijhuica ipan momanejmat. ⁴ Huan ta, huan mosoldados huan nochi nopa masehualme cati mitzpalehuaj, miquise ipan nopa tepeme ten tali Israel. Nopona nimechtemactilis ica nopa tzojpilome huan tecuanime para ma amechcuaca. ⁵ Anhuetzise ipan campa hueli cuatitamit pampa amo nimechcahuilis anajsitij ipan nopa altepeme. Quej nopa na, niDIOS Cati Más Nijpiya Tanahuatili, niquijtojtoc. ⁶ Huan nijchihuas ma huetzi tit ipan tali Magog huan ininpa nochi amohuampoyohua cati itztoque cuali ipan nopa talme cati mopantiaj iteno hueyi at. Huan huajca anquimachilise para na, niDIOS.

⁷ “Huan quej nopa, nochi noisraelita masehualhua techixmatise huan quimatise para nitatzetzeloltic. Huan ayecmo niquincahuilis ma techtaijilhuica. Huan nochi nopa sequinoc talme quimatise para na, niDIOS Cati Nitatzetzeloltic huan niitztoc inihuaya israelitame. ⁸ Nochi ya ni melahuac panos pampa monechcahua nopa tonali ten tatzacuiliti cati ya nimitzpo-huilijtoc. Quej nopa na, niDIOS Cati Más Nijpiya Tanahuatili, niquijtohua.’

⁹ “Huan nochi nopa masehualme cati itztoque ipan nopa altepeme ten tali Israel quisase huan quitatise nochi tamanti cati ica tatehuyiyaj, tamanti

cati huejhueyi huan cati pisiltziti cati ica quitzacuayayaj inintacayo. Quitatise cuahuitoli huan cuataminti, huan huejhuehueyac cuataminti para ica tatehuisse huan cototziti. Huan nopa israelitame quipiyase cuahuit hasta mocahua para quitatise ipan ininti para chicome xihuit. ¹⁰ Huan quej nopa ayecmo monequis yase ipan cuatitamit para quicuitij cuahuit para quitatise, yon ayecmo quitzontequise cuame ipan tepeme pampa nochi nopa tamanti cati ica tatehuiyayaj quinpalehuis miyac para quipiyase ten ica tipitzase. Huan quej nopa, nopa israelitame quitequihuisse nopa tamanti cati iniaxca nopa tacame cati hualajque para quintachtequilisquíaj. Quej nopa na, niDIOS Cati Más Nijpiya Tanahuatili, niquijtohua.

Imiquilis Tanahuatijquet Gog

¹¹ “Ipan nopa tonali, na nijmacas Gog se lugar ipan tali Israel campa huelis quintalpachose isoldados huan nojquiya nopona quitalpachose ya. Itoca nopa lugar elis: Nopa Tamayamit Campa Panoj Paxalohuani, huan mocahuas ica campa hualquisa tonati ten nopa Mictoc Hueyi At. Huan nopa campo santo quitzacuas ojti para paxalohuani ayecmo huelis panose nopona. Yeca nopa lugar quipatase itoca huan quitocaxtise: Tamayamit Campa Quintalpachojtoque Itatehuijcahua Pamit Gog. ¹² Nopa israelitame tequitise chicome metzti para quintalpachose nochi nopa mijcatziti huan para quitapajpacchihuase nopa tali. ¹³ Huan nochi israelitame tapalehuisse ipan nopa tequit. Huan ipan nopa tonali quema nijnextis nohueytilis elis se hueyi paquilisti para injuanti pampa ya tatantose. Quej nopa na, niininTECO Cati Más Nijpiya Tanahuatili, niquijtohua. ¹⁴ Huan quema tamis nopa chicome metzti, quintapejpenise tacame huan quintitanise ma yaca ipan nochi nopa tali para quitalpachose iniomiyo nopa mijcatziti cati noja tepejtoque talchi. Huan quej nopa quitapajpacchihuase nopa tali. ¹⁵ Huan quema injuanti quipantise tepejtoc se ome omit, quitalise nopona se tanextili. Huan quej nopa, quema nopa masehualme cati tetalpachohuaj ajsise nopona, quitase nopa tanextili huan quihuicase nopa omit huan quitalpachose ipan nopa Tamayamit Campa Quintalpachojtoque Itatehuijcahua Pamit Gog. ¹⁶ Huan nopona nechca nopa campo santo eltos se altepet cati quitocaxtise: Tatehuani. Huan quej nopa quitapajpacchihuase nopa tali.”

¹⁷ Huan TOTECO techilhui: “Tocat, quej ni na, niDIOS Cati Más Nijpiya Tanahuatili, niquijtohua: Xiquinnotza nochi tamanti totome huan nochi tamanti tecuanime cati itztoque cuatita. Huan xiquinilhui ma mosentilica huan ma hualaca ipan nopa hueyi tacajcahualisti cati nijchihuas para injuanti. Elis se hueyi tactualisti ipan nopa tepeme ten tali Israel. Huan huelis hualase huan quicuaase nacat huan quiise esti. ¹⁸ Ma quicuaquij ininacayo huan ma quiiquij inieso soldados huan huejhueyi tanahuatiani ten ni taltipacti quej elisquia ininacayo oquich borregoyme, pilborregoitziti, oquich chivoyme, huacaxme huan torojme cati tomahuaque quej cati itztoque ipan tali Basán. ¹⁹ Quema niquinmictis nochi nopa masehualme quej tacajcahualisti, nopa totome huan tecuanime ma quicuaquij nacat hasta cuali ixhuisse huan ma quiiquij esti hasta moihuintise. ²⁰ Ma mon-echcahuica campa nopa mesa huan tacuase tahuel miyac ipan ni ilhuit cati nijcualtalijtoc para injuanti. Quicuaquij ininacayo cahuayojme huan cati tejcoj cahuajtipa. Huan quicuaquij ininacayo nopa huejhueyi tatehuani cati más mosemacayayaj. Quej nopa na, niDIOS Cati Más Nijpiya Tanahuatili, niquijtohua.

Tali Israel sempa motanas teipa

21 “Huan quej nopa, nijnextis nohueyitilis iniixpa masehualme cati ehuan ipan nochi talme. Huan nochi injuanti quuitase quenicatza nijtequihui nochicahualis para niquintatzacuiltis masehualme quema ya niquintaj-tolsencajtoya por cati amo cuali quichijque. 22 Huan ipan nopa tonali huan teipa, israelitame quimachilise para na, niDIOS niininTeco. 23 Huan nochi talme ehuan quimachilise para niquinquixti nopa israelitame ten inintal por inintajtacolhua. Quena, tahuel techixpanoyayaj nopa israelitame huan yeca niquintahuelcajqui. Huan niquincahuili inincualancaitacahua ma quintanica huan ma quintzontamiltica ipan tatehuilisti. 24 Na niquintatzacuilti quej quinamiqi pampa fiero inintajtacolhua. Inijuanti mosisinijque ica na huan yeca nimoicancuetqui ica injuanti.

25 “Pero ama na, niininTECO Cati Más Nijpiya Tanahuatili, niquijtohua: Ama niquintasoitas iixhuihua Jacob * huan sempa niquinhualicas noisraelita masehualhua ten campa quinhuicatoque ipan miyac talme. Sempa niquinhualicas ipan inintal pampa nijnequi nochi ma techtepanitaca na cati nitatzejtelolitic. 26 Quema nopa israelitame sempa itztose ipan inintal huan itztose ica yejectzi huan ica temachili, ayecmo teno quinmajmatis. Huan huajca quielcahuase ininpinahualis huan nochi inintajtacolhua cati ica techixpanoque. 27 Quej nopa elis quema na niquinquixtis ten inintal inincualancaitacahua huan sempa niquinhualicas ipan inintal. Huan quema nijchihuas ya nopa, masehualme cati ehuan nochi talme quuitase para nitatzejtelolitic. 28 Huan nomasehualhua quimatise para na, niDIOS niininTeco niquintitanqui ipan sequinoc talme huan na cati niquinsentili sempa ipan inintal. Huan amo nijcajtehuas yon se masehuali ipan nopa talme campa itztoyaj quej seyoc tali ehuan. 29 Huan ayecmo quema nimoicancuepas ica noisraelita masehualhua pampa nijtalis noTonal ipan injuanti. Quej nopa na, niininTECO Cati Más Nijpiya Tanahuatili, niquijtohua.”

40

Tanextili ten nopa tiopamit cati oncas teipa

1 Ipan 10 itequi nopa achtohui metzti ipan toxihui ipan toisraelita calendario * quema yahuiyaya 25 xihuit para quinhuicatojay israelitame ipan sequinoc talme huan quiپیayaya 14 xihuit para quitantoyaj huan moaxcatijtoyaj altepet Jerusalén, TOTECO quitali imax ipan na. 2 Huan ipan se tanextili techhuicac ipan tali Israel huan techquetzqui ipan se huejcapantit tepet. Huan ica tatzinta ten nopa tepet niquitac miyac calme cati nesiyaya quej se hueyi altepet. 3 Huan teipa techhuicac nopona campa nopa altepet huan niquitac se tacat cati petaniyaya ixayac quej nopa teposti cati itoca bronce. Huan nopa tacat moquetztoya campa icalteyo nopa tepamit, huan ipan imax quiپیayaya se lazó cati tachijchihuali ica lino hilo huan se vara cati quitequihuáj para tatamachihuj.

4 Huan nopa tacat techilhui: “Tacat, xitachixto huan xitacacto. Cual xijtachili nochi tamanti cati nimitznextilis pampa TOTECO mitzhualicatoc nica para ma nimitznextili miyac tamanti. Pero teipa monequi sempa timocuepas campa nopa israelitame ipan Babilonia huan tiquinpohuiliti nochi cati tiquitztoc.”

Nopa caltemit ica campa hualquisa tonati

5 Huan nopa tiopamit quiپیxtoya se tepamit cati quiyahualojtoya. Huan nopa teposbarra cati nopa tacat quiپیxtoya imaco quiپیayaya 3 metros

* 39:25 39:25 O Israel. * 40:1 40:1 Ipan 28 itequi abril ipan 573 a.C. ipan tocalendario ten ama.

ihuehueyaca. Huan yaya pejqui quitamachihua nopa tepamit. Huan quipixqui 3 metros itilajca huan 3 metros ihuejcapanca.

⁶ Teipa hualajqui campa nopa caltemit ica campa hualquisa tonati para ticalaquise ipan tiopamit. Huan yaya tejoc ipan nopa escalera cati quipiyayaya 7 escalones para ajsis campa nopa caltemit huan quitamachijqui itamapayo nopa caltemit huan quipixqui 3 metros ipatajca. ⁷ Teipa tinejntiyajque ipan nopa pasillo, huan ipan sesen lado niquitac onca 3 cuartos para tamocuitahuiani. Sesen ten nopa cuarto quipiyayaya 3 metros ihuehueyaca huan 3 metros ipatajca. Huan tatajco ten sesen ome cuarto ipan nopa pasillo eltoya se tapepecholi ten 2 metro huan tajco. Huan ipan itamiya nopa pasillo eltoya seyoc cuarto quej se sala ica se caltemit cati motapohua huan nopa caltemit quipiyayaya 3 metros ihuehueyaca. Nopa caltemit tapojtoya para huelqui niquitac nopa tiopamit. ⁸⁻⁹ Huan yaya nojquiya quitamachijqui nopa sala cati tapojtco huan huelqui niquitac nopa tiopamit. Huan elqui 4 metros huan ya nopa elqui itamiya nopa pasillo para calaquise ipan tiopamit. Huan quipixqui ome itaquetzalhua ica nahui esquinas huan sesen quipixqui 1 metro itilajca. ¹⁰ (Huan quej niqijto achtohuiya, ipan nopa pasillo quipixqui 3 cuartos ipan sesen lado huan nochi elqui san se inihuexca. Huan nopa taquetzalme ica nahui esquinas cati moquetzque ipan sesen lado elqui san se inihuexca.) ¹¹ Huan nopa tacat quitamachijqui campa calaquij ipan nopa caltemit huan quipixqui 5 metros ipatajca huan 6 metros huan tajco ihuehueyaca. ¹² Huan iixmelac sesen ten nopa cuarto para tamocuitahuiani oncayaya se piltepantzi cati quipiyayaya 52 centímetros ihuejcapanca huan 52 centímetros ipatajca. Huan sesen cuarto quipixqui eyi metro ihuehueyaca huan ipatajca.

¹³ Teipa yaya quitamachijqui quesqui metros ipatajca nochi nopa pasillo huan cuartos campa calaquij. Quitamachijqui ten icalteyo campa calaquij ipan nopa cuartos para tamocuitahuiani ipan se lado hasta icalteyo nopa cuartos para tamocuitahuiani ipan seyoc lado huan quipixqui 12 metros huan tajco. ¹⁴ Teipa quitamachijqui nopa sala huan quipixqui 10 metros. Huan nopa sala quipixqui icaltehua cati tapojqui ipan nochi lados para nopa calixpamit cati quiyahualojtoya. ¹⁵ Huan nopa pasillo ten nopa caltemit campa calaquij hasta campa más calijtic quipixqui 25 metros ihuehueyaca. ¹⁶ Huan ipan nochi lados ten nopa cuartos para tamocuitahuiani huan nopa taquetzalme huan ipan nopa tepancalme oncayaya ventanas cati eltoya ipan nopa pasillo. Huan nopa ventanas quipixqui teposbarras para calijtic. Nojquiya oncayaya ventanas ipan sesen lado ten nopa sala ica calijtic. Huan sesen taquetzali ica nahui esquinas quiyetalijtoyaj ica iixcopinca epachi cuahuit.

Nopa calixpamit cati calteno

¹⁷ Teipa nopa tacat techhuicac para tipanose ipan nopa calixpamit cati mocahua calteno ten nopa tiopamit. Huan nozona quipixqui se tesohuali yahualtic nopa calixpamit huan nojquiya niquitac 30 cuartos cati tatzquitocque ipan nopa tepamit huan motapohuayayaj ipan nopa tesohuali. ¹⁸ Ni tesohuali tatzquitoya calijtic ipan nopa tepamit cati más calteno huan elqui más tatzinta ten nopa tiopamit. Huan nopa tesohuali quipixqui san se ipatajca quej ihueyaca nopa pasillos para nopa caltemit. ¹⁹ Teipa nopa tacat quitamachijqui nopa calixpamit ten nopa caltemit ica tatzinta ipan nopa tepamit huan cati más calteno. Huan quitamachijqui hasta nopa caltemit cati calaquij ipan nopa pasillo para nopa calixpamit cati calijtic. Huan quipixqui 50 metros ica norte huan ica campa hualquisa tonati.

Nopa caltemit ica norte

²⁰ Teipa quitamachijqui ipatajca huan ihuehueyaca nopa pasillo campa calaquij ica norte ten nopa calixpamit cati calteno. ²¹ Huan ipan sesen lado ten nopa pasillo nojquiya oncayaya eyi cuartos para tamocuitahuiani huan tapepecholi tatajco ten nopa cuartos. Huan quipixqui se sala ica arcos huan taquetzalme ica nahui esquinas. Huan eliyaya san se inihuexca quej cati oncayaya ipan nopa achtohui pasillo ica nopa caltemit cati eltoya ten campa hualquisa tonati. Huan nopa pasillo quipixqui 25 metros ihuehueyaca huan 12 metros huan tajco ipatajca. ²² Nopa ventanas, nopa sala ica arcos huan nopa taixcopinti ten epachi cuame eliyaya san se ica nopa pasillo ten nopa caltemit ten tiopamit cati mocahua ica campa hualquisa tonati hasta calixpamit cati calteno. Ten calixpamit calteno nojquiya oncayaya se escalera cati quipiyayaya 7 escalones cati ajsiyaya ipan nopa pasillo para calaquis campa nopa calixpamit cati calijtic. Huan nopa sala ica arcos mocajqui campa tanqui nopa pasillo ica más calijtic. ²³ Huan nica ipan ni lado norte quipixqui seyoc caltemit para calaquise ipan nopa calixpamit cati calijtic nechca nopa tiopamit. Huan nopa caltemit elqui iixmelac nopa caltemit cati más calteno. Huan quitamachijqui 50 metros tatajco nopa ome caltemit. Huan san se eliyaya ica nopa caltemit ica campa hualquisa tonati.

Nopa caltemit ica sur

²⁴ Teipa nopa tacat techhuicac ica sur campa nopa pasillo huan nopa caltemit ica sur. Huan quitamachijqui nopa pasillo huan nochi nopa cuartos nopona huan quiitac para quipiyayaj san se inihuejhuexca quej nopa sequinoc. ²⁵ Campa calaquij huan campa sala quipiyayaya ventanas ipan nochi lados huan ipan nochi nopa tapepecholi huan nochi elqui quej cati nopa sequinoc pasillos quipiyayaj. Huan nopa pasillo, quej nopa sequinoc, quipiyayaya 25 metros ihuehueyaca huan 12 metros huan tajco ipatajca. ²⁶ Huan para calaquise ipan ni caltemit huan pasillo monequi tejcosé ipan se escalera cati quipiyayaya 7 escalones. Huan iixmelac campa calaquij quipixqui nopa sala. Huan quipixqui taquetzalme ica nahui esquinas ipan nopa sala huan quinixcopintoyaj epachi cuame. ²⁷ Huan nopa calixpamit cati calijtic nojquiya quipixqui se caltemit huan se pasillo cati tachiyayaya ica sur. Huan nopa tacat quitamachijqui quesqui ihuejcaca quipiya nopa calixpamit ten se caltemit ipan se pasillo hasta seyoc huan quiitac para quipiyayaya 50 metros.

Nopa calixpamit calijtic huan nopa caltemit ica sur

²⁸ Teipa nopa tacat techhuicac campa nopa caltemit ica sur cati panoc campa nopa pasillo hasta nopa calixpamit cati calijtic. Huan quitamachijqui nopa pasillo cati mocajqui ica sur huan quiitac para quipiyayaya san se ihuejhuexca quej nopa sequinoc. ²⁹ Nochi nopa cuartos para tamocuitahuiani, huan nopa tapepecholi tatajco nopa cuartos huan nopa sala ica arcos elque san se inihuejhuexca quej sequinoc pasillos. Huan campa calaquij huan ipan nochi tapepecholi oncayaya ventanas huan nojquiya oncayaya ipan nopa sala ica arcos. Huan quej nopa sequinoc, nopa pasillo quipiyayaya 25 metros ihuehueyaca huan 12 metros huan tajco ipatajca. ³⁰ Huan quitamachijqui nopa sala ica arcos cati tapohuyaya ipan nopa calixpamit cati calijtic huan quipixqui 12 metros ihuehueyaca huan 2 metros huan tajco ipatajca. ³¹ Nopa sala ica arcos tapojtoya hasta nopa calixpamit cati eltoya calteno. Huan nopa sala quipixqui taquetzalme ica nahui esquinas cati quinyectalijtoyaj ica iixcopinca epachi cuame. Huan nopa escalera cati ipan tejcosé para nopa pasillo quipiyayaya 8 escalones.

Nopa calixpamit calijtic huan nopa caltemit campa hualquisa tonati

³² Teipa nopa tacat techhuicac ipan nopa calixpamit cati calijtic huan ticalajque ipan nopa pasillo huan caltemit ica campa hualquisa tonati. Huan quitamachijqui nopa pasillo huan quiitac para quipiyayaya san se ihuexca quej nopa sequinoc. ³³ Nochi icuartos para tamocuitahuiani, huan nopa tapepecholi cati tatajco nopa cuartos huan nopa sala ica arcos eliyaya san se inihuexca quej cati quipixque sequinoc pasillos. Huan nopa caltemit huan sala quipiyayaya ventanas ipan nochi lados quej nopa sequinoc pasillos huan quipiyayaya 25 metros ihuehueyaca huan 12 metros huan tajco ipatajca. ³⁴ Nopa sala ica arcos tapojqui ipan nopa calixpamit cati calteno. Huan sesen lado itaquetzalhua cati quipixque nahui esquinas quinyectalijtoyaj ica iixcopinca epachi cuame. Huan nopa escalera cati ipan tejcose ipan nopa pasillo quipiyayaya 8 escalones.

Nopa calixpamit calijtic huan nopa caltemit ica norte

³⁵ Teipa nopa tacat techhuicac hasta nopa caltemit ica norte ica ipasillo cati yahui ipan nopa calixpamit cati calijtic. Huan quitamachijqui nopa pasillo huan quiitac para quipiyayaya san se ihuexca quej nopa sequinoc. ³⁶ Nojquiya quipixqui nopa cuartos para tamocuitahuiani, huan nopa tapepecholi cati tatajco nopa cuartos huan nopa sala ica arcos. Huan quipixqui ventanas yahualtic nopa cuartos. Huan quitamachijqui huan quipiyayaya 25 metros ihuehueyaca huan 12 metros huan tajco ipatajca. ³⁷ Huan nopa sala ica arcos ipan nopa pasillo tapojqui ipan nopa calixpamit cati calteno. Huan nopa taquetzalme ica nahui esquinas quipiyayayaj epachi cuame ipan sesen lado huan nopa escalera para ipan tejcose para calaquise quipiyayaya 8 escalones.

Nopa calme para quipajpacase tacajcahualisti

³⁸ Huan oncac se cuarto cati tapojqui ipan nopa sala ipan nopa pasillo ipan sesen caltemit. Nozona ipan nopa cuarto quipajpacayayaj nochi nopa nacat ten tapiyalme cati teipa temacayayaj quej tacajcahualisti tatatili. ³⁹ Huan ipan nopa sala ipan sesen caltemit huan pasillo oncayaya nahui mesas. Ome ipan sesen lado. Nozona ipan nopa mesas quinmictiyayaj nopa tapiyalme cati quintencahuayayaj quej tacajcahualisti tatatili, tacajcahualisti para tajtacoli huan tacajcahualisti para cati quimajtoc tajtacoli. ⁴⁰ Nojquiya oncayaya nahui mesas ica calixpa ten nopa sala huan pasillo. Eltoya nozona campa tejcoj para calaquise ipan nopa caltemit ica norte. Oncayaya ome ipan sesen lado ten nopa escaleras cati ipan tejcoj para calaquise ipan nopa pasillo. ⁴¹ Para nochi oncayaya chicueyi mesas; nahui mesas ica calijtic ipan nopa sala huan nahui mesas ipan nopa calixpamit cati calteno. Ni mesas quitequihuiyayaj para ipan quinmictise nopa tapiyalme. ⁴² Para nopa tacajcahualisti tatatili quipixqui nahui mesas cati tachijchihuali ica tet para ipan quinmictise. Ni mesas quipiyayayaj 75 centímetros inihuehueyaca, 75 centímetros inipatajca huan 50 centímetros inihuejcapanca. Huan ipan ni mesas quitaliyayaj nopa cuchillos, huan nochi tamanti cati quitequihuiyayaj para quinmictise nopa tapiyalme para tacajcahualisti tatatili huan sequinoc tamanti tacajcahualisti. ⁴³ Huan calijtic ipan nopa cuarto quipiyayayaj tepos chijcoli cati quipiyayaya 7 centímetros inihuehueyaca tatzquitoque ipan nopa tapepecholi. Huan quitaliyayaj nopa nacat para tacajcahualisti ipan nopa mesas.

⁴⁴ Ipan nopa calixpamit cati mocahua calijtic, pero calteno nopa caltemit para calaquise ipan tiopamit, oncayaya ome cuartos. Se cuarto mocahuayaya ipan se lado ten nopa pasillo para nopa caltemit ica norte huan ni

cuarto tachiyayaya ica sur. Huan nopa seyoc cuarto mocahuayaya ipan se lado ten nopa pasillo para nopa caltemit ica sur huan tachiyayaya ica norte.

⁴⁵ Huan nopa tacat techilhui: “Ni cuarto cati tachiya ica sur elis para nopa totajtztiti cati tequipanohuaj ipan tiopamit. ⁴⁶ Huan nopa cuarto cati tachiya ica norte elis para nopa totajtztiti cati iixhuihua Sadoc cati tequipanose campa nopa taixpamit pampa san injuanti ten nochi nopa levitame quipiyase tanahuatili para monechcahuise campa TOTECO para quitequipanose.”

Nopa calixpamit calijtic huan nopa tiopamit

⁴⁷ Teipa nopa tacat quitamachijqui nopa calixpamit cati mocahua calijtic, huan quipixqui 50 metros ihuehuyaca huan 50 metros ipatajca. Huan ipan nopa calixpamit iixmelac nopa tiopamit oncayaya nopa taixpamit. ⁴⁸ Teipa techhualicac ipan nopa sala campa calaquij ipan nopa tiopamit. Huan quitamachijqui nopa taquetzalme cati nozona onca huan quipanti para quipiyayayaj 2 metros huan tajco inintilajca. Huan ipatajca nopa caltemit campa sala quipiyayaya 7 metros ipatajca huan nopa tepamit cati eltoya ipan sesen lado quipiyayaya se metro huan tajco itilajca. ⁴⁹ Nopa sala campa calaquij quipiyayaya 10 metros ipatajca huan 6 metros ihuehuyaca. Huan quipixtoya se escalera ten nopa calixpamit cati mocahua calijtic hasta nopa sala para calaquise ipan tiopamit huan quipiyayaya 10 escalones. Huan quipixqui se ten nopa taquetzalme ipan sesen lado.

41

¹ Teipa techhuicac ipan nopa cuarto Campa Tatzejtzeltic cati mocahua tatajco ipan tiopamit huan elqui nopa cuarto cati más hueyi. Huan quitamachijqui nochi nopa ome taquetzalme ica 4 esquinas campa calaquij huan ininpatajca huan inintilajca eliyaya 3 metros. ² Nopa campa calaquij quipiyayaya 5 metros ipatajca huan nopa tepamit ipan sesen lado quipiyayaya 2 metros huan tajco ipatajca. Huan nopa cuarto cati más hueyi ipan nopa tiopamit cati itoca Campa Tatzejtzeltic quipixqui 20 metros ihuehuyaca huan 10 metros ipatajca.

³ Teipa nopa tacat iseltitzi yajqui ipan nopa cuarto cati mocahua más calijtic. Huan quitamachijqui nopa taquetzalme campa calaquij. Huan quipixque se metro ininpatajca huan se metro inintilajca. Huan nopa caltemit campa calaquij quipixqui 3 metros ipatajca. Huan nopa tepame ipan sesen lado ten campa calaquij ipan nopa cuarto quipiyayaya 3 metros huan tajco inintilajca. ⁴ Teipa yaya quitamachijqui nopa cuarto más calijtic huan quipiyayaya 10 metros ipatajca huan 10 metros ihuehuyaca. Huan techilhui: “Ya ni Campa Más Tatzejtzeltic.”

Nopa pamit ten cuartos cati quiyahualojtoya tiopamit

⁵ Teipa quitamachijqui nopa tepamit cati quiyahualojtoya tiopamit huan quipiyayaya eyi metros itilajca. Huan ica calijtic ten nopa tepamit oncayaya se pamit ten cuartos cati quiyahualojtoya nopa tiopamit huan sesen quipiyayaya ome metro ihuejaca. ⁶ Ni pilcuartojtztiti motecpantoyaj se ipan seyoc huan mochijque eyi pisos ten pilcuartojtztiti huan oncayaya 30 pilcuartojtztiti ipan sesen piso. Nopa pisos huejcapa ipan nochi lados ten nopa tiopamit mosehuijtoyaj ipan cuatetomit cati mosehuijtoyaj ipan se itencuayo nopa tepamit, pero nopa cuatetomit cati ipan mosehuijtoyaj nopa cuartos amo calaquiyayaj ipan nopa tepamit cati quiyahualojtoya nopa tiopamit. ⁷ Nopa sesen piso cati huejcapa eliyaya achi más patahuac que nopa piso cati mocahua fatzinta. Quej nopa eliyaya pampa nopa piso

achi más mocahuayaya nechca ten nopa tepamit cati quiyahualojtoya nopa tiopamit. Huan nopa tepamit mochijqui más pitzactzi ica sesen piso ten cuartos para nopa cuatetomit ipan ma mosehuis nopa itencuayo tepamit. Huan oncayaya se escalera cati panoc ipan nopa ompa piso hasta nopa expa piso.

⁸ Niqutac para nopa tiopamit motatzquilijtoya ipan se tepejpechti cati tilahuac huan quipiyayaya eyi metro ihuejcapanca, huan elqui patahuac huan nopa pilcuartojtzitzi cati tatzinta nojquiya mosehui ipani. ⁹ Nopa tepamit cati mocahuayaya ica calteno ten ni pilcuartojtzitzi quipiyayaya ome metro huan tajco itilajca. Huan tatajco se lado nopa tiopamit, ¹⁰ huan nopa pilcuartojtzitzi cati quitequihuijque totajtzitzi cati quiyahualojtoya nopa tiopamit mocajque se lugar cati amo teno quipixqui huan eliyaya 10 metros ipatajca cati quiyahualojtoya nopa tiopamit. ¹¹ Huan hueli se calaquis ipan nopa pilcuartojtzitzi ica sur ten nopa lugar cati amo teno quipixqui ipan se caltemit cati mocajqui ica sur ten nopa pilcuartojtzitzi. Huan hueli se calaquis ipan nopa pilcuartojtzitzi ica norte ten nopa lugar cati amo teno quipixqui ipan se caltemit cati mocajqui ica norte ten nopa pilcuartojtzitzi. Huan ipatajca nopa lugar cati amo teno quipixqui cati quiyahualo nopa pilcuartojtzitzi elqui ome metro huan tajco.

Nopa hueyi cali ica campa oncalaqui tonati

¹² Nojquiya oncayaya se hueyi cali ica nopa lado campa oncalaqui tonati huan quipiyayaya 35 metros ipatajca huan 45 metros ihuehueyaca. Nopa tepamit ten nopa cali quipiyayaya 2 metros huan tajco itilajca. Huan nopa cuarto tachiyayaya iica tiopamit huan nopa cuarto quipixqui se calixpamit cati tzactoc.

Ihuexca nochi nopa tiopamit

¹³ Teipa nopa tacat quitamachijqui nopa tiopamit calteno huan quipixqui 50 metros ihuehueyaca. Huan ten iica nopa tiopamit quitamachijqui nopa calixpamit nozona cati tzactoc huan nopa hueyi cuarto ica itepa huan quipixqui seyoc 50 metros ihuehueyaca. ¹⁴ Huan ipatajca campa calaquij ipan tiopamit ica nopa calixpamit ica campa hualquisa tonati cati mocajqui iixpa nopa tiopamit nojquiya quipiyayaya 50 metros. ¹⁵ Huan teipa quitamachijqui ihuehueyaca nopa hueyi cali cati eltoc iica tiopamit ica campa oncalaqui tonati ica nopa galerías ipan sesen lado huan nojquiya quipiyayaya 50 metros.

Huan nopa cuarto Campa Tatzetzeloltic huan nopa seyoc Campa Más Tatzetzeloltic, nochi quincualtalijtoyaj nopa tapepecholi ica huapali. ¹⁶ Nojquiya nopa salas ica arcsos huan ventanas huan nopa pilcuartojtzitzi ica eyi pisos quincualtalijtoyaj ica huapali ten tatzinta hasta huejcapa campa ventanas. ¹⁷ Huan itzonatipa nopa caltemit campa calaquiyayaj tiopan calijtic huan ipan nochi tapepecholi ipan tiopa quitzajque calijtic huan calteno ica huapalme. ¹⁸ Huan ipan nochi nopa huapalme ipan tapepecholi quinixcopintoyaj miyac iillhuicac ejcahua TOTECO cati inintoca querubines huan tatajco ten nochi querubines, quiixcopintoyaj se epachi cuahuit. Huan nopa querubines quipixque ome inixayac. ¹⁹ Ipan se lado quipiyayayaj inixayac quej se tacat ixayac huan quitachiliyayaj nopa epachi cuahuit cati eltoya ipan ni lado. Huan ipan nopa seyoc lado quipiyayayaj inixayac quej se león ixayac huan quitachiliyayaj nopa epachi cuahuit cati eltoya ipan nopa seyoc lado. ²⁰ Huan quinixcopintoyaj nopa querubines ipan nochi tapepecholi calijtic ten nopa piso hasta itzompac nopa caltemit. Nojquiya

quej nopa quichijque ipan nopa tapepecholi calteno ipan nopa cuarto Campa Más Tatzejtzeltolitic.

Nopa taixpamit cati tachijchihuali ica huapalme

²¹ Campa calaquij ipan nopa tiopamit quipixqui ome taquetzalme ica nahui esquinas huan nojquiya iixpa nopa cuarto Cati Tatzejtzeltolitic oncayaya ome taquetzalme cati nesiyaya san se. ²² Huan nozona oncayaya se taixpamit cati tachijchihuali ica huapalme huan quipiyayaya se metro ipatajca huan ihuehueyaca huan se metro huan tajco ihuejcapanca. Nochi iesquinas huan ielchiquitipa huan iicxi eliyaya tachijchihuali ica huapalme. Huan nopa tacat techilhui: “Ya ni nopa mesa cati eltoc iixpa TOTECO.”

Nopa calteme

²³ Nopa cuarto Campa Tatzejtzeltolitic huan nopa cuarto Campa Más Tatzejtzeltolitic quipiyayaya ome caltemit cati monamiquiyayaj para huelis motapose tatajco. ²⁴ Huan sesen caltemit quipiyayaya ome huapali cati mohuilpachojque se ipan seyoc. ²⁵ Huan ipan nopa caltemit campa calaquiyayaj ipan nopa cuarto Campa Más Tatzejtzeltolitic quinixcopintoyaj iilhuicac ejcahua TOTECO cati inintoca querubines huan epachi cuahuit san se quej quichijtoyaj ipan nochi nopa tecalme. Huan campa onca nopa tamapamit campa calaquij ipan tiopamit oncayaya huejcapa se itzontajca cati tachijchihuali ica huapali. ²⁶ Ipan nochi ome lados ten nopa tamapamit oncayaya ventanas cati calactoyaj ipan nopa tepancalme. Huan quinixcopintoyaj nopa tecalme ica apachij cuame. Huan quej nopa nojquiya elqui nopa cuartos huan nopa salas.

42

Nopa calme nechca tiopamit

¹ Teipa nopa tacat techhuicac ten nopa tiopamit ipan nopa pasillo huan caltemit ica norte huan tiyajque ipan nopa calixpamit cati calteno cati quiyahualojtoya nopa tiopamit. Huan tiyajque campa sequij cuartos cati mocahuaj ica nopa lado norte ten nopa tiopamit. Huan nojquiya mocahua ica norte ten nopa calixpamit cati tzactoc cati iixpa nopa hueyi cali cati eltoc iica tiopamit. ² Huan ni lado campa ni cuartos quipiyayaya 50 metros ihuehueyaca huan 25 metros ipatajca. Huan inincaltenhua nopa cuartos motapojque ica norte. ³ Sequij ten nopa cuartos tachiyayaya imelac nopa calixpamit cati quiyahualojtoya tiopamit huan nozona campa iquespa tiopamit quipiyayaya 10 metros ipatajca. Huan nopa sequinoc cuartos tachiyayaya imelac nopa tamapamit ten nopa calixpamit cati más calteno. Nochi nopa ome pamit ten cuartos quipiyayayaj eyi pisos. Huan eltoya ipan sesen lado ten se pasillo ipan nopa pasillo tatzinta. ⁴ Iixpa nopa pilcuartojtztzi, oncayaya se pasillo cati quipiyayaya 5 metros ipatajca huan 50 metros ihuehueyaca. Huan nochi caltemit ipan ni cuartos tachiyayayaj ica norte. ⁵ Nopa cuartos ipan nopa ome pisos cati más huejcapa eliyayaj más pitzahuac quej cati tatzinta pampa monequi quipiyas icaltenteno campa nejnemise para ajsise campa nopa cuartos. ⁶ Pampa nopa pamit ten cuartos quipiyayayaj eyi pisos, pero amo quipiyayayaj taquetzalme huan cuatetomit quej nopa pilcuartojtztzi cati mocahuayayaj campa nopa tamayamit cati calixpa. Yeca nopa pisos cati huejcapa amo eliyayaj pajpatahuac quej nopa pisos cati tatzinta.

⁷⁻⁸ Nopa pamit ten ni cuartos cati mocahuaj más nechca tiopamit quipiyayayaj 50 metros ihuehueyaca. Huan nopa pamit ten cuartos cati más calteno san quipixqui 25 metros ihuehueyaca. Pero oncayaya se tepamit

ten 25 metros ihuehuyaca cati quichijqui más huehuyac nopa lado cati más calteno, huan quiiyocatali campa cuartos huan nopa calixpamit cati mocahua calteno. ⁹ Huan ten nopa calixpamit oncayaya se caltemit para calaquire ipan ni pamit ten cuartos cati más ica campa hualquisa tonati.

¹⁰ Huan ipan nopa seyoc lado ten nopa tiopamit ica sur, oncayaya ome pamit ten cuartos cati elque san se ica cati mocahua ica norte. ¹¹ Nojquiya oncayaya se pasillo iniixpa nopa cuartos huan eliyaya san se ica nopa pasillo cati oncayaya iniixpa nopa cuartos cati mocahuayayaj ica norte. Huan inihuehuyaca, ininpatajca huan inincaltehua, nochi eliyaya san se ica nopa sequinoc. ¹² Huan oncac se caltemit para calaquire ipan nopa cuartos cati tatzinta cati tachiyaya ica sur huan elqui iixpa nopa tepamit cati tachiyaya para campa hualquisa tonati nozona ica iica campa pejqe nopa pasillos.

¹³ Huan nopa tacat techillui: “Nochi nopa cuartos cati mocahuaj ica norte huan ica sur cati nechca nopa tamayamit ipan iquespa nopa tiopamit elij tatzejteloltique. Nopa totajtzitzi cati quitencahuaj tacajchualisti para TOTECO, nozona quicuase nopa tacajchualisti cati tahuel tatzejteloltic. Huan nojquiya nozona quiajocuisse nopa tacajchualisti ten harina, tacajchualisti para tajtacoli, huan tacajchualisti para cati quimajtoc tajtacoli, pampa nopa cuartos eltoque tatzejteloltique. ¹⁴ Quema nopa totajtzitzi quisase ten nopa cuarto Campa Más Tatzejteloltic, amo hueli yase xitahuac ipan nopa calixpamit cati más calteno. Achtohui monequi quipatase iniyoyo cati ica quitequipanohuaj Toteco pampa nopa yoyomif eli tatzejteloltique. Yeca monequi quipatase iniyoyo huan quicahuase cati tatzejteloltic ipan ni cuartos huan moquentise seyoc iniyoyo para huelse yase más calteno ipan nopa calixpamit campa nejnemi cati hueli masehuali.”

¹⁵ Teipa quema nopa tacat ya tantoya tatomachihua ica calijtic ipan nopa tiopamit, techhuicac campa nopa pasillo huan caltemit cati mocahua ica campa hualquisa tonati hasta nopa calixpamit cati más calteno huan pejqe quitamachihua yahualtic nopa tiopamit ica nochi icuartos huan calixpamit huan iteno itepa cati más calteno. ¹⁶ Huan yaya quitamachijqui nopa lado cati más calteno ica campa hualquisa tonati huan quipixqui 250 metros. ¹⁷ Huan ica norte nojquiya quipixqui 250 metros. ¹⁸ Huan ica sur nojquiya quipixqui 250 metros. ¹⁹ Huan ica campa oncalaqui tonati nojquiya quipixqui 250 metros. ²⁰ Huajca quipixqui 250 metros ihuehuyaca huan ipatajca huan se tepamit quiyahualojtoya para quiiyocatalis ni lugar cati tatzejteloltic para TOTECO ica nopa tali cati eltoc para cati hueli masehuali.

43

Itatanex TOTECO sempa motali ipan nopa tiopamit

¹ Teipa nopa tacat sempa techhualicac ipan nopa caltemit huan pasillo cati mocahua ica campa hualquisa tonati. ² Huan niqitac ica campa hualquisa tonati hualayaya itatanex Toteco Dios ten tiisraelitame. Huan caquistiyaya chicahuac quej mocojcoxonía nopa hueyi at, huan nochi nopa tali taahui ica itatanex Toteco. ³ Ni tanextili eliyaya san se ica nopa tanextili cati niqitac quema Toteco hualajqui huan quisosoloco altepet Jerusalén. Huan nojquiya san se ica nopa tanextili cati niqitac iteno hueyat Quebar. Huan nimotancuaquetzqui huan nimixtapacho. ⁴ Huan itatanex TOTECO calajqui ipan nopa tiopamit ipan nopa caltemit cati mocahua ica campa hualquisa tonati.

⁵ Teipa Itonal TOTECO techtananqui huan techhuicac ipan nopa calixpamit cati mocahua calijtic. Huan itafanex TOTECO quitemiti nopa tiopamit. ⁶ Huan nijcajqui se cati techztajtzili calijtic ten nopa tiopamit, huan nopa tacat cati tatamachihuayaya, moquetztoya nohuaya. ⁷ Huan elqui TOTECO cati techztajtzili huan techilhui: “Tacat, ya ni eltoc campa nimosehuis para nitanahuatis. Nica campa nijtalis noicxi para nijsiyajquetzas. Nica niitztos para nochipa inihuaya noisraelita masehualhua. Inijuanti huan inintanahuatijcahua ayecmo quema techmahuispolose na cati nitatzejtzololitic. Pampa nopona ipan nopa tepeme cati más huejcapantique ayecmo quinhueyichihuase tetyeme, yon ayecmo quitepanitase taixcopincayome ten fiero tanahuatiani cati ya mictoque. ⁸ Inijuanti quichijchijque inintaixpa para tetyeme nechca campa na notiopa ica se piltepantzi cati motajcotaliyaya ten na notiopa ica inijuanti inintiopa huan nopona quinhueyichihuayaj tetyeme. Yeca na niqintzontamilti ica nohueyi cualancayo pampa quichijtoque amo tapajpactic notoca, na cati nitatzejtzololitic ica nochi tamanti cati amo cuali. ⁹ Pero ama ma quinhuejcamajcahuaca inintetyehua huan nopa taixcopincayome ten inintanahuatijcahua, huan na niitztos tatajco ten inijuanti para nochipa.

¹⁰ “Huan ta, tacat, xiquinpohuiliti nopa israelitame nochi cati nimitznex-tilijtoc ten quenicatza eli nopa tiopamit. Huan xiquinilhuiti quenicatza itachiyalis huan quenicatza ihuexca para ma pinahuaca por nochi inintajtacolhua. ¹¹ Huan sinta inijuanti nelia pinahuase por nochi cati quichijtoque, huajca teipa xiquinpohuili sesen piltamantzifzi ten quenicatza eltos tachijchihuali nopa tiopamit. Nojquiya xiquinpohuili ten icaltehua huan nopa pasillos campa calaquise huan quisase. Huan xiquinpohuili ten nochi tamanti cati nopona oncas. Huan xiquijcuilo nochi ni tatamachihuali huan nochi nopa camanali huan tanahuatili para quenicatza ma quichihuaca. ¹² Huan ya ni elis nopa tanahuatili cati más hueyi ten nopa tiopamit: ‘Nochi nopa tepet campa eltoc nopa tiopamit elis tatzejtzololitic.’”

Nopa taixpamit

¹³ Huan ya ni nopa taixpamit itamachijca cati technextili. Huan nopa tatamachihuali elqui san se quej quitequihuijtoya ipan nopa taixpamit ten tiopamit. Huan yahualtic itzinpehualtil quipixqui se itencuayo cati quipixqui tajco metro ihuejcapanca. Tatajco mocahuayaya cactoc quej se aojti cati quipiyayaya tajco metro ipatajca huan tajco metro ihuejcatanca. Iteno quipixqui seyoc itencuayo cati quipixqui 25 centímetros. ¹⁴ Huan ten nopa itencuayo hasta más huejcapa campa quipixqui seyoc itencuayo elqui 1 metro pero polihuiyaya tajco metro ipan sesen lado para elis san se ipatajca huan ihuehuyaca quej nopa parte cati mocahua tatzinta. ¹⁵ Huan teipa nopa taixpamit tejcoc 2 metros más huejcapa, pero polihuiyaya tajco metro ipan sesen lado para elis san se ipatajca huan ihuehuyaca quej nopa parte cati itantita. Huan nica iixpa elqui campa quitatise tacajcahualisti huan nopa taixpamit quipixqui se icuacua ipan sesen ten nopa nahui esquinas. ¹⁶ Huan iixpa nopa taixpamit campa quitatise tacajcahualisti elqui nopa parte más huejcapa. Huan quipixqui 6 metros ipatajca huan ihuehuyaca. Huan itencuayo quipixqui se tajco metro ipan nochi lados. ¹⁷ Huan nopa ompa parte cati elqui itantita iixco nopa taixpamit quipixqui 7 metros ipatajca huan ihuehuyaca. Huan itencuayo quipixqui se tajco metro ipan nochi lados. Huan nopa escalera para ipan tejcase para huelis quitatise se tacajcahualisti iixco nopa taixpamit eltoya ica campa hualquisa tonati.

¹⁸ Teipa Toteco techilhui: “Tacat, quej ni na, niamoTECO Cati Más Nijpiya Tanahuatili, niqijtohua: Ipan nopa tonali teipa quema ajsis hora para

quichihuase nopa taixpamit huan para nopona quitatise tacajcahualisti huan quitoyahuase esti, ya ni nopa tanahuatilme cati monequi ma quitoquilica. ¹⁹ San nopa tacame cati iixhuihua Sadoc cati hualajqui ipan nopa hueyi familia ten Leví huejcajquiya huelis elise nototajtzitzi huan monechcahuise campa na para techtequipanose. Quej nopa na, niamoTECO Cati Más Nijpiya Tanahuatili, niqijtohua. Huan ipan nopa tonali quinmacase se becerro para quitencahuase noixpa por inintajtacolhua. ²⁰ Huan tijcuis se quentzi ieso huan tijtalis ipan nopa nahui cuacuajti cati eltoc ipan iesquinas nopa taixpamit. Nojquiya tijtalis ipan iesquinas nopa parte ten nopa taixpamit cati mocahua tatzinta iixco cati huejcapa. Huan nojquiya xijtali ipan itencuayo nopa taixpamit cati quipixtoc yahualtic. Huan ya nopa quitapajpacchihuas huan quitatzejtzeloelchihuas nopa taixpamit. ²¹ Teipa xijcui nopa becerro cati amo teno cati amo cuali quiپیya ipan itacayo huan xijtencahuaca quej se tacajcahualisti para tajtacoli. Huan xijtatiti campa niqijtojtoc ipan icalixpa nopa tiopamit.

²² “Ipan nopa ompa tonali, xijtencahua se pilchivojtzi cati amo teno cati amo cuali quiپیya ipan itacayo quej se tacajcahualisti para tajtacoli. Xijtapajpacchihuas nopa taixpamit ica ieso san se quej quitapajpacchijque ica ieso nopa becerro. ²³ Huan quema titantosa tijtapajpacchihua nopa taixpamit, xijcui se becerro ten campa nopa huacaxme huan se oquich borrego ten campa quintzactoque. Nochi ome monequi amo quiپیyase yon se tamanti cati amo cuali ipan inintacayo. ²⁴ Huan xiquintati noixpa na, niamoTECO. Huan nopa totajtzitzi quitatise istat ininpani huan quitatise quej se tacajcahualisti para na.

²⁵ “Mojmosta para chicome tonati anquitencahuase se oquich chivo, se becerro huan se oquich borrego quej se tacajcahualisti para tajtacoli. Nochi ni tapiyalme monequi amo quiپیyase yon se tamanti cati amo cuali ipan inintacayo. ²⁶ Quena, monequi nopa totajtzitzi quej nopa quichihuase mojmosta para chicome tonati para quitapajpacchihuase huan quitatzejtzeloelchihuase nopa taixpamit. ²⁷ Huan quema ya panotos nopa chicome tonati, nopa totajtzitzi quipehualtise ipan tonali chicueyi para mojmosta quitencahuase nopa tacajcahualisti cati masehualme quihualicaj quej tacajcahualisti tatatili huan nopa tacajcahualisti para tayoltalili. Huan na nimechselis ica miyac paquili. Quej nopa na, niamoTECO Cati Más Nijpiya Tanahuatili, niqijtohua.”

44

Itequi nopa caltemit ica campa hualquisa tonati

¹ Teipa nopa tacat sempa techhualiac campa nopa caltemit ipan nopa tepamit cati más calteno ica campa hualquisa tonati, pero nopa caltemit tzactoya. ² Huan TOTECO techilhui: “Ni caltemit mocahuas tzactoc huan amo quema amo aqui huelis quitapos. Huan yon se masehuali amo huelis calaquis nozona pampa niDIOS cati niamoTECO anisraelitame nicalajqui nozona. Yeca mocahuas tzactoc. ³ San huelis calaquis nopa tanahuatijquet para mosehuis nozona para quicuas tacualisti cati tatzetzeloltic noixpa na, niamoTECO. Pero monequi calaquis ipan nopa pasillo ten nopa calixpamit. Huan calaquis huan quías nozona huan amo quitapos nopa caltemit cati calteno.”

Ajquiya inijuanti huelise calaquise ipan nopa tiopamit

⁴ Teipa techhuicac ipan nopa pasillo huan caltemit cati eltoc ica norte hasta iixpa nopa tiopamit. Huan niquitac nopa tiopamit temitoya ica itatanex TOTECO. Huan nimotancuaquetzqui huan nimixtapacho iixpa.

⁵ Huan TOTECO techilhui: “Tacat, xitachiya cuali huan xijtacaquili ica miyac tamocuitahuili nochi cati nimitzilhuía ten nopa tanahuatlime ten notiopa na, niamoTECO. Quena, xijtacaquili cuali ten ajquiya injuanti quinamiqui calaquise huan ajquiya injuanti amo.

⁶ “Huan xiquinilhui nopa mosisinjica israelitame cati amo quinequij techneltocase para quej ni na, niDIOS Cati Más Nijpiya Tanahuatili, niquijtohua: ‘Ayecmo niquijyohuis nopa fiero tamanti cati anquichihuaj.

⁷ Amojuanti tahuel anquimahuispolojoque notiopa pampa anquinaahuilíaj ma calaquica nopona masehualme cati sequinoc talme ehuaní huan yon quentzi amo techneltocaj na, yon amo moyolpatatoque. Anquinaahuilíjtoque ma calaquica ipan nopa tiopamit quema antechtencahuilíaj nopa pantzi, nopa tachiyajcayot huan nopa esti huan quej nopa anquimahuispolohuayayaj notiopa quema antechmacayayaj tacajchualisti. Huan ica nochi cati anquichijtoque, anquixpanotoque nopa camanali cati nijchijtoc amohuaya. ⁸ Amo anquitepanitztoque nopa tanahuatili cati nimechmacac ten notiopa huan taya monequi anquichihuase nopona ica nochi tamanti cati tatzejtzeloltic. Huan amojuanti anquicajtoque notiopa inimaco sequinoc talme ehuaní para ma tequitica nopona.’

⁹ “Yeca na, niDIOS Cati Más Nijpiya Tanahuatili, niquijtohua: Masque itztoque miyac masehualme cati sequinoc talme ehuaní nopona campa amojuanti, yon se cati seyoc tali ehua amo huelis calaquis ipan notiopa sinta amo motequilijtoc ipan itacayo nopa machiyot circuncisión o amo moyolcuetoque huan techneltoca na. ¹⁰ Huan nopa levitame cati mohuejcatalijque ten na quema nopa israelitame techtahuclajque para quinhueyichihuase teteyome, monequi quiselise tatzacuiliti por inintajtacolhua. ¹¹ Pero levitame, quena, huelise tequipanose quej tamocuitahuiani campa caltemit huan ipan sequinoc tamanti tequit cati monequi ipan nopa tiopamit. Huelis quinmictise nopa tapiyalme cati quintencahuase quej tacajchualisti tatatili cati quinhualicase nopa masehualme. Huan itztose nopona mocualtalijtoque para quinpalehuise masehualme. ¹² Elque levitame cati quintequipanohuayayaj nopa israelitame iniixpa nopa teteyome huan quinmacayayaj nopa teteyome tacajchualisti. Quej nopa quinchihualtijque israelitame ma quichihuaca huejhueyi tajtacoli. Huajca pampa quichijque ya nopa, ama nijtanantoc nomax ica injuanti. Huan na, niDIOS Cati Más Nijpiya Tanahuatili, nitatestigojquetza para melahuac nopa levitame quiselise inintatzacuiliti. ¹³ Ama huan teipa levitame amo huelise monechahuise campa na para tequipanose quej totajtzitzi. Amo huelis quiitzquise tamanti cati tatzejtzeloltic huan yon quentzi amo hueli tequipanose ica cati más tatzejtzeloltic. Quinamiqui para injuanti ma pinahuaca por nochi nopa tajtacoli cati quichijtoque. ¹⁴ Ama iniixhuihua levitame san huelise tamocuitahuise ipan notiopa huan quinpalehuise nopa masehualme ipan nochi piltamantzitzi.

Nopa totajtzitzi

¹⁵ “Pero nopa levitame cati elij totajtzitzi huan eliyayaj iteipa ixhuihua Sadoc quisenhuiquilijque techtequipanojque ipan notiopa quema nochi israelitame techtahuclahuayayaj para quinhueyichihuase teteyome. Huajca san injuanti cati iteipa ixhuihua Sadoc huelis techtequipanose. San injuanti elise totajtzitzi huan hualase noixpa para techtencahuilise nopa

tachiyajcayot huan inieso nopa tapiyalme cati quinmictise para tacajcualisti. Quej nopa na, niamoTECO Cati Más Nijpiya Tanahuatili, niquijtohua. ¹⁶ Inijuanti elise cati calaquise ipan notiopa Campa Tatzejtzeltic huan monechahuise campa nomesa para techtequipanose huan quichihuase cati na nijnequi.

¹⁷ “Quema calaquise ipan nopa calixpamit cati calijtic, monequi moquentijiyase iniyoyo cati tachijchihuali ica lino cati más cuali. Amo hueli quihuicase yon se yoyomit cati tachijchihuali ica borregojme inijhuiyo quema tequipanose ipan nopa calixpamit cati más nechca nopa tiopamit o quema tequipanose calijtic ipan nopa tiopamit. ¹⁸ Monequi quihuicase se tzonyahuali ipan inintzonteco cati tachijchihuali ica lino huan inincalzo nojquiya monequi elis tachijchihuali ica lino. Huan amo hueli quihuicase yon se tamanti cati quinchihuas ma mitonica. ¹⁹ Huan quema nopa totajtzitzi monequis mocuepase ipan nopa calixpamit cati más calteno campa itztoque nopa masehualme, monequi achtohui quiquixtise iniyoyo cati quitequihuijque quema tequipanojque noixpa huan quicajtehuase ipan nopa pilcuartojtzitzi cati tatzejtzeltique. Huan moquentise seyoc iniyoyo cati amo tatzejtzeltic para amo quinmahuase masehualme ica tatzejtzeltijcayot ica iniyoyo huan quitzacuilis ica cati hueli quichihuase.

²⁰ “Totajtzitzi amo hueli quicahuase inintzoncal ma eli huehueyac, pero nojquiya amo hueli quitamihuanise inintzonteco quema moximase. Monequi quicahuase san cuali ihuehueyaca inintzoncal. ²¹ Yon se totajtzi amo huelis quuis xocomecat iayo quema calaquis ipan nopa calixpamit cati calijtic nechca nopa tiopamit. ²² Huan quema mosihuajtise totajtzitzi, monequi mocuilise se israelita ichpocat cati amo quixmajtoc yon se tacat. O nojquiya huelis mocuilise se sihuat cati eliyaya isihua se totajtzi cati mijqui. Amo hueli mocuilise se sihuat cati quicajtoc ihuehue. ²³ Inijuanti quinmachtise nomasehualhua quenicatza quixmatise se tamanti cati tatzejtzeltic huan se tamanti cati amo. Huan quinnextilise taya tapajpactic noixpa huan taya amo.

²⁴ “Nojquiya nopa totajtzitzi tetajtolsencahuase quej jueces huan quixitahuase nochi cualanti cati oncas campa nomasehualhua. Huan tetajtolsencahuase senquisa quej quijtohua notanahuatilhua. Huan nopa totajtzitzi monequi ma quitepanitase notanahuatilhua huan ipan nochi tamanti ilhuit monequi quichihuase senquisa quej quijtohua nopa tanahuatili. Huan nojquiya quichihuase para nopa masehualme ma quitepanitaca nopa tonali para mosiyajquetzase para ma elica tonali cati tatzejtzeltique.

²⁵ “Se totajtzi amo hueli monechahuis campa eltoc itacayo se mijcatzi para amo mochihuas amo tapajpactic noixpa. San quena, hueli monechahuis campa eltoc itacayo itata, inana, itelpoca o iichpoca, itacaicni o se isihuaicni cati amo quipixqui ihuehue. ²⁶ Pero sinta monechahuis campa se cati ihuical, amo huelis tequipanoti ipan notiopa hasta motapajpacchihuas huan mochiyas seyoc chicome tonati. ²⁷ Huan teipa ipan nopa achtohui tonali quema sempa yas para techtequipanos huan calaquis ipan nopa calixpamit cati mocahua calijtic ipan notiopa, monequi quitencahuas se tacajcualisti para itajtacol. Quej nopa na, niDIOS Cati Más Nijpiya Tanahuatili, niquijtohua.

²⁸ “Nopa totajtzitzi amo hueli quipiyase yon se tali para iniaxca ipan tali Israel. Pampa na noseltitzi nielis niiniaxca huan san ya nopa monequi. ²⁹ Inijuanti quicuase nopa tacajcualisti ten harina, nopa tacajcualisti para tajtacoli huan nopa tacajcualisti para cati quimajtoc tajtacoli cati nomasehualhua quihualicase ipan notiopa. Nochi tamanti cati israelitame

quihualicase para techmacase na, niininTECO, elis para nopa totajtztzi.
³⁰ Nojquiya nopa totajtztzi quiselise nochi cati achi cuali cati achtohui quipixcase ipan mila huan nochi tamanti tacajcahualisti cati israelitame techmacase niininTECO. Huan quema israelitame quixacualose harina para quichihuase pantzi, monequi quinmacase quentzi harina cati más cuali. Huan quej nopa niquintiochihuas inihuaya nochi cati itztoque ipan ininchaj. ³¹ Huan nopa totajtztzi amo quema huelise quicuase se tapiyali cati mijqui ica iselti o cati quimictijque sequinoc tapiyalme.

45

Nopa piltaltzi cati iaxca TOTEKO

(Ez 48:9-20)

¹ “Quema sempa tijxelos tali Israel para tiquinmajmacas sesen ten nopa huejhueyi familias ten israelitas cati elis iniaxca, achtohui monequi tiquiyocatalis se quentzi para elis na noaxca, niamoTECO. Monequi quipiyas 12 kilómetros huan tajco ihuehuyaca huan 10 kilómetros ipatajca. Huan nochi ni tali mocuepas tali tatzejtzeltic. ² Huan ten nopa tali cati noaxca na, monequi tiquiyocatalis se quentzi cati quipiyas 250 metros ihuehuyaca huan 250 metros ipatajca para nozona anquichijchiuase nopa tiopamit. Huan yahualtic nopa tiopamit quipiyas quej se calle cati quipiyas 25 metros ipatajca. ³ Nopa tali cati elis na noaxca xijtajoicoita ica ome huan sesen piltaltzi quipiyas 12 kilómetros huan tajco ihuehuyaca huan 5 kilómetros ipatajca. Nopa achtohui pedazo 12 kilómetros huan tajco huan 5 kilómetros ipatajca elis tali tatzejtzeltic huan nozona anquichihuase nopa tiopamit ica nopa cuarto Campa Más Tatzejtzeltic. ⁴ Huan ipan ni tali tatzejtzeltic campa eltoc nopa tiopamit, nopa tali cati mocahuas elis para nopa totajtztzi cati tequipanohuaj noixpa Campa Más Tatzejtzeltic. Huan quitequihuse para quichijchiuase ininchaj.

⁵ “Huan nopa seyoc pedazo cati nojquiya quipiya 12 kilómetros huan tajco ihuehuyaca huan 5 kilómetros ipatajca elis para nopa levitame cati tequipanohuaj ipan nopa tiopamit. Huan quitequihuse para quichijchiuase ininchaj ipan pilaltepertzitzi.

⁶ “Huan nechca ten nopa pedazo cati tatzejtzeltic, tijtamachihuas seyoc piltaltzi cati quipiyas 12 kilómetros huan tajco ihuehuyaca huan 2 kilómetro huan tajco ipatajca. Huan ni tali elis para se alpetpet huan nozona cati hueli israelita cati quinequi huelis hualas huan nozona mochantis.

Nopa tali cati iaxca nopa tanahuatijquet

(Ez 48:21-22)

⁷ “Nojquiya oncas ome pedazos ten tali cati taiyocatalili para nopa tanahuatijquet. Nopa pedazos elis ipan sesen lado ten nopa tali cati tatzejtzeltic huan cati para alpetpet. Huan nopa pedazos yase para campa hualquisa tonati huan campa oncalaqui tonati hasta campa ontami inintal nopa huejhueyi familias ica campa hualquisa tonati huan oncalaqui. Huan nopa pedazo ica campa hualquisa tonati huan ica campa oncalaqui tonati quipiyas san se ininpatajca. ⁸ Huan nopa ome pedazos elis iaxca nopa tanahuatijquet. Huan quej nopa, nopa tanahuatiani ayecmo quintajyohuiltise israelitame, yon ayecmo quinichtequilise noisraelita masehualhua inintal. Huan nochi tali cati mocahua ipan Israel quimacase sesen hueyi familia para ma moaxcatca para inintal.

Tanahuatili para nopa tanahuatijquet

⁹ “Na, niamoTECO, niqijtohua: ¡Antanahuatiani ten tali Israel, ayecmo xiquintaijyohuiltica nomasehualhua! Ayecmo xiquintachtequilica, yon ayecmo xiquinxitica ten ininchaj. Monequi nochipa xitequichihuaca xitahuac huan xitatepanitaca. Quej nopa na, niamoTECO Cati Más Nijpiya Tanahuatili, niqijtohua.

¹⁰ “Xijtequihuica teme cati xitahuac quema antatamachihuaj ipan balanza. Amo aqui xijquixtilica yon se pilquentzi. ¹¹ Nochi tatamachihuali para tamanti cati huactoc quej sinti huan ef huan nopa tatamachihuali para cati atic quej aceite, nochí monequi elise cati xitahuac. Se homer cati xitahuac quipiyas 220 litros para tamanti huactoc. Se bato cati quitequihuaj para quitamachihuaj tamanti cati atic huan nopa efa para cati huactoc quej sinti, monequi quipiyas 22 litros.

¹² “Huan para quitamachihuase tamanti cati etic, monequi elis 20 geras para se siclo cati quipiya 11 gramos ietica huan 60 siclos elis se mina.

¹³ “Ya ni nopa ofrendas cati monequi anquimacase nopa tanahuatijquet para tacajchualisti. Xijtajcoitaca cati anquixcase ten trigo huan cebada ica 60 pamit cati san se huan xijmaca se nopa tanahuatijquet. ¹⁴ Huan ipan se 100 litros ten aceite ten oliva, anquixtilise se litro para anquimacase.

¹⁵ Huan ipan sesen 200 borregoyme, anquimacase se borrego cati tomahuac cati tacuajtinemij ipan potrerros cati más cuajcuali ipan tali Israel. Nochi ya ni imiyaca cati monequi antemacase para tacajchualisti ten harina, tacajchualisti tatatili, tacajchualisti para tayoltalili huan tacajchualisti cati oncas para quixtzacuase inintajacol nopa masehualme cati quihualicase. Quej nopa na, niamoTECO Cati Más Nijpiya Tanahuatili, niqijtohua.

¹⁶ “Nochi israelitame monequi quihualicase ni ofrendas para nopa tanahuatijquet ipan Israel, ¹⁷ pampa elis yaya icuenta para temacas nopa tapiyalme cati quintenahuase noixpa ipan nochi tonali ten ilhuit, huan ipan nopa tonali quema pehua yancuic metzti, huan ipan sesen tonali quema anmosiyajquetzase huan ipan nochi sequinoc tamanti ilhuit. Yaya itequi para ma onca tacajchualisti para tajtacoli, huan tacajchualisti tatatili huan nopa tacajchualisti cati quitoyahuase noixpa, huan nopa tacajchualisti para tayoltalili nohuaya huan para ma onca tapojpolhuili para israelitame.

Nopa Pascua ilhuit

¹⁸ “Quej ni na, niamoTECO Cati Más Nijpiya Tanahuatili, niqijtohua: Ipan nopa tonali quema pehua se yancuic xihuit ipan toisraelita calendario*, anquitenahuase se becero cati amo quipiya yon se tamanti cati amo cuali ipan itacayo para anquitapajpacchihuase nopa tiopamit. ¹⁹ Huan nopa totajtzi quicuís se quentzi ieso ni tapiyali cati quitencajtoque quej se tacajchualisti para tajtacoli, huan quitalis ipan itencuayo nopa caltemit ipan tiopamit. Nojquiya quitalis ipan nopa nahui esquinas ten nopa taixpamit, huan ipan taquetzalme campa caltemit campa calaquij ipan nopa calixpamit cati mocahua calijtic. ²⁰ Huan nojquiya quej nopa anquichihuase ipan tonali chicome ten nopa metzti para nopa masehualme cati quichijque tajtacoli, pero quichijque pampa mocajcayajque o pampa amo quimatiyayaj sinta cati quichijque eliyaya tajtacoli. Huan quej nopa anquitapajpacchihuase nopa tiopamit.

²¹ “Ipan 15 itequi nopa achtohui metzti ipan nopa yancuic xihuit, anquichihuase nopa Pascua ilhuit. Huan nopa ilhuit huejcahuas chicome

* 45:18 45:18 inixihui pehua ipan itamiya marzo o ipan ipejya abril ipan tocalendario ten ama.

tonati. Huan ipan nochi ni tonali san hueli anquicuase pantzi cati amo quiptiya tasonejcaoyot. ²² Huan ipan nopa tonali ten Pascua, nopa tanahuatijquet quinmacas totajtzitzi se becerro para quitencahuase quej se tacajcahualisti para itajtacolhua huan para inintajtacolhua nochi nopa israelita masehualme. ²³ Huan ipan sesen tonali ipan nopa chicome tonati ten Pascua ilhuit, nopa tanahuatijquet monequi temacas chicome becerros huan chicome oquich chivojme cati tapajpactic inintacayo para ma quitencahuaca noixpa niamoteCO quej tacajcahualisti tatatili. Huan nojquiya mojmota quitencahuas se oquich borrego quej se tacajcahualisti para tajtacoli. ²⁴ Ihuaya sesen becerro cati quitencahuase quej tacajcahualisti, monequi temacase ihuaya 20 litros ten harina huan eyi litros huan tajco ten aceite. Huan nojquiya san se quichihuase ica sesen oquich borrego.

Nopa Ilhuit Quema Quichihuase Pilxajcaltzitz

²⁵ “Huan ipan 15 itequi nopa metzti chicome ipan toisraelita calendario†, ajsis nopa Ilhuit Quema Anquichihuase Pilxajcaltzitz huan ipan anitztose para chicome tonati. Huan ipan nopa tonali nopa tanahuatijquet quichihuas quej quichijqui mojmota ipan nopa ilhuit ten Pascua. Yaya quinmacas nopa totajtzitzi san se imiyaca nopa tacajcahualisti para tajtacoli huan nopa tacajcahualisti tatatili huan nopa tacajcahualisti ten harina ica nopa aceite cati monequi huan nopa totajtzitzi quitencahuase noixpa.

46

Inintequi tanahuatiani huan masehualme quema quichihuaj ilhuit

¹ “Na, niamoteCO, niqijtohua: Nopa caltemit ica campa hualquisa tonati ipan nopa calixpamit cati más calijtic mocahuas tzactoc ipan nopa chicuase tonali sesen samano quema masehualme tequitij, pero quitapose ipan nopa tonali quema mosiyajquetzase huan ipan nopa tonali quema pehua sesen yancuic metzti. ² Nopa tanahuatijquet calaquis ipan nopa sala ten nopa caltemit huan pasillo cati pano ten nopa calixpamit cati más calteno hasta nopa calixpamit cati calijtic. Huan quema calaquis, moquetzas campa nopa taquetzali nechca caltemit huan quitachilis nopa calixpamit cati calijtic quema nopa totajtzitzi quitencahuase nopa tacajcahualisti tatatili huan nopa tacajcahualisti para tayoltalili cati quihualiac nopa tanahuatijquet. Huan yaya motancuaquetzas huan techhueyichihuas ipan nopa pasillo iixmelac nopa caltemit. Huan teipa yaya quisas, pero nopa caltemit mocahuas tapojtoc huan amo quitzacuase hasta tiotac. ³ Ipan nopa tonali quema anmosiyajquetzase huan quema pehua yancuic metzti, nopa masehualme nojquiya huelise quihueyichihuase Toteco nozona iixmelac nopa caltemit.

⁴ “Ipan nopa tonali quema mosiyajquetzase, nopa tanahuatijquet quitencahuilis TOTECO chicuase pilborregojtzitzi huan se oquich borrego cati amo quiptiyaj yon se tamanti cati amo cuali ipan inintacayo. ⁵ Huan nopa tanahuatijquet quihualicas 20 litros ten harina ihuaya nopa oquich borrego. Huan quema temacas nopa tacajcahualisti ten pilborregojtzitzi, temacas imiyaca harina cati quinequi temacas. Huan ihuaya nopa tacajcahualisti ten harina quihualicas 3 litros huan tajco ten aceite ten oliva. ⁶ Huan ipan nopa tonali quema pehua yancuic metzti, quitencahuas se becerro, chicuase pilborregojtzitzi huan se oquich borrego. Huan yon se ten ni tapiyalme amo huelis quiptiyas yon se tamanti cati amo cuali ipan inintacayo. ⁷ Huan ica nopa becerro huan ica nopa oquich borrego monequi nojquiya quihualicas 20 litros ten harina quej se tacajcahualisti. Huan ica sesen ten nopa

† 45:25 45:25 Ni ilhuit eltoc ipan itamiya septiembre o ipejya octubre ipan tocalendario ten ama.

pilborregojtzi, quihualicas imiyaca harina cati quinequi temacas. Huan ica sesen 20 litros ten harina cati temacas, quihualicas 3 litros ten aceite.

⁸ “Huan quema nopa tanahuatijquet calaquis, monequi calaquis campa nopa sala ipan nopa pasillo huan nozona sempa quisas. ⁹ Huan ipan tonali ten ilhuit quema nopa masehualme calaquise para quihueyichihuae Toteco, cati calaquise ipan nopa caltemit ica norte, quisase ipan nopa caltemit ica sur. Huan cati calaquise ipan nopa caltemit ica sur, quisase ipan nopa caltemit ica norte. Amo hueli quisase ipan nopa caltemit campa calajque. Monequi quisase ipan nopa seyoc caltemit. ¹⁰ Nopa tanahuatijquet calaquis inihuaya nopa masehualme huan sempa quisas inihuaya ipan nopa tonali.

¹¹ “Ipan sequinoc tamanti ilhuit huan ipan nopa ilhuime cati tatzeltelotique nopa tanahuatijquet temacas 20 litros ten harina ica sesen becerro huan sesen oquich borrego. Huan temacas imiyaca harina cati yaya quinequi temacas ica sesen pilborregojtzi. Huan ica sesen tacajcahualisti ten harina temacas 3 litros huan tajco aceite ten oliva.

¹² “Quema nopa tanahuatijquet ica ipaquilis quinequis techmacas se tacajcahualisti tatatili o se tacajcahualisti para tayoltalili, quitapose nopa caltemit ica campa hualquisa tonati cati pano ten nopa calixpamit calteno hasta nopa calixpamit cati más calijtic para ma calaqui huan ma temaca itacajcahualis san se quej quichihuj ipan nopa tonali quema mosiyajquetzaj. Pero quema quisas nopa tanahuatijquet, sempa quitzacuase nopa caltemit.

Tacajcahualisti cati monequi mojmosta

¹³ “Mojmosta ica ijnaloc techmacase se pilborregojtzi cati quiptiya se xihuit huan cati amo teno cati amo cuali quiptiya ipan itacayo. Huan quitencahuase noixpa, niamoTECO, quej se tacajcahualisti tatatili. ¹⁴ Nojquiya ica nopa pilborregojtzi temacase 7 litros ten harina huan se litro aceite ten oliva para quimanelose ihuaya nopa harina. Ya ni eli se tanahuatili cati monequi quitepanitase para nochipa. ¹⁵ Quena, ni harina huan aceite temacase mojmosta ica ijnaloc ica nopa pilborregojtzi.

Itequi nopa tanahuatijquet ica nopa tali

¹⁶ “Ya ni cati na, niDIOS Cati Más Nijpiya Tanahuatili, niqijtohua: Sinta nopa tanahuatijquet quimacas se icone se quentzi ten nopa tali cati iaxca, huajca nopa tali para nochipa elis iaxca nopa icone huan iixhuihua. ¹⁷ Pero sinta nopa tanahuatijquet quimacas se itequipanojca se quentzi ten nopa tali cati iaxca, huajca san elis iaxca hasta nopa xihuit ten paquillisti cati 50 xihuit. Huan teipa nopa tali sempa elis iaxca nopa tanahuatijquet huan elis para iconehua para nochipa. ¹⁸ Nopa tanahuatijquet amo huelis quicuilis ital yon se masehuali. Sinta quinequis quinmacas iconehua se quentzi tali, monequi quinmacas cati yaya iaxca. Huan quej nopa nomasehualhua amo quipolose inintal.”

Icocinas nopa tiopamti

¹⁹ Teipa nopa tacat techhuicac campa nopa caltemit cati eltoc iqespa nopa pasillo huan nechcalaqui ipan nopa pilcuartojtzi cati tatzeltelotlic huan cati eltoc para nopa totajtzi huan tachiyaj ica norte. Huan campa itamiya nopa pilcuartojtzi eltoya se lugar cati mocahua más ica campa oncalaqui tonati. ²⁰ Huan nopa tacat cati ihuaya niyahuiyaya techilhui: “Ya ni nopa lugar campa nopa totajtzi quicxitise nopa nacat cati quitencajtoque quej se tacajcahualisti para cati quimajtoc tajtacoli huan cati quitencajtoque quej se tacajcahualisti para tajtacoli. Nica quicxitise nopa pantzi cati quichihuj ica nopa tacajcahualisti ten harina. Nica quicxitise nochi nopa

tacajchualisti para amo quihuicase tacajchualisti cati tatzejtzeltolitic ipan nopa calixpamit cati calteno huan quinmahuase nopa masehualme cati amo totajtzitzi ica tatzejtzeltoliticayot huan quintzacuilis masehualme ica cati hueli quichihuase.”

²¹⁻²² Teipa sempa techhualicac ipan nopa calixpamit cati mocahua más calteno. Huan techhuicac ipan sesen ten nopa nahui esquinas calijtic ipan nopa tepamit cati más calteno. Huan ipan sesen esquina niquitac quej se cuarto cati quipixqui 20 metros ihuehueyaca huan 15 metros ipatajca cati tazquitoc ipan iesquinas calijtic ten nopa tepamit. ²³ Huan yahualtic nopa cuartos quipixqui itencuayo nopa tepamit cati patahuac quej se mesa ten tet. Huan tatzinta nopa patahuac tencuayot eltoya se lugar para tit. ²⁴ Huan techilhui: “Ya ni nopa cocinas campa fequipanohuaj ipan tiopamit para quimolonise nopa nacat cati nopa masehualme temacase quej tacajchualisti para tayoltalili.”

47

Nopa at cati quiپیya chicalhualisti

¹ Teipa nopa tacat sempa techhuicac campa caltemit cati calaquí calijtic ipan cati nelia tiopamit. Huan niquitac itantita nopa caltemit ten nopa tiopamit meyayaya at huan nopa at yahuiyaya ica campa hualquisa tonati pampa ica nozona tachixtoya nopa tiopamit. Huan ni at panoyaya ica inejmat nopa tiopamit, huan pano ica sur ten nopa taixpamit. ² Teipa tipanoque ipan nopa pasillo cati yahui ica norte huan yaya techhualicac calteno ten nopa tepamit cati quiyahualohua cati nelia tiopamit. Huan techchijqui ma nijmaca se huelta ica calixpa hasta campa nopa caltemit cati mocahua ica campa hualquisa tonati. Huan nozona niquitac nopa at cati meyayaya pano ica sur ten nopa pasillo cati eltoc ica campa hualquisa tonati. ³ Huan nopa tacat quihuicayaya se lazo imaco cati ica tatamachijtiyahuiyaya huan quisqui ipan nopa caltemit cati eltoc ica campa hualquisa tonati huan quitamachijtoya 500 metros ihuehueyaca nopa hueyat. Huan teipa techchihualti ma niquixcotona nopa at, huan nopa at ajsiyaya hasta noicxiquechta. ⁴ Teipa quitamachijqui seyoc 500 metros ihuehueyaca huan techchihualti ma niquixcotona sempa. Huan nopa at ajsiyaya hasta ipan notancia. Teipa quitamachijqui seyoc 500 metros huan techilhui ma niquixcotona, huan nopa at techajsiyaya hasta notzinquechta. ⁵ Teipa quitamachijqui seyoc 500 metros ten nopa at, pero nozona niquitac para ya eliyaya se hueyat cati tahuel huejcata huan ayecmo nihuelqui niquixcotonqui sinta amo niajqisquía hasta seyoc lado.

⁶ Huan huajca techilhui: “Xiquelnamiqúi nochi cati nimitznexstiljtoc.” Teipa techchihualti ma nimocuepa iteno nopa hueyat. ⁷ Huan niquitac para ipan nochi ome lados oncaiyaya miyac cuame cati moscaltijtoyaj. ⁸ Huan techilhui: “Ni hueyat motalos ica campa hualquisa tonati huan panos campa nopa huactoc tali hasta ajsis campa nopa tamayamit campa nopa hueyat Jordán huan nozona calaquí ipan nopa Mictoc Hueyi At cati tahuel poyec ica norte. Huan quema ajsiti nozona, nopa at ipan nopa Mictoc Hueyi At mocuepas se at cati senquisa cuali huan ajhuiyaca para quiise. ⁹ Huan campa ajsisquía nopa at huélis itztose nochi tamanti michime huan tapiyalme pampa nopa at cati eliyaya nelpoyec ya mochicajtoc. Huan campa huéli yahui ni at ten nopa tiopamit temacas nemilisti. ¹⁰ Huan michtajtamani itztose campa huéli iteno nopa Mictoc Hueyi At. Itztose ten nopa pilaltepetzi En Gadi hasta pilaltepetzi En Eglaim. Huan nozona atenti quipatahuase inimata para ma huaqui. Huan nochi tamanti michime quitemitise nopa

Mictoc Hueyi At quej quitemitíaj nopa Hueyi At Mediterráneo. ¹¹ Pero nopa mantoc at cati mocahua atenti huan quipiya acat huan nopa acomoli, inijuanti amo mochicahuase. Inijuanti quisenhuiquilise quipiyase at cati poyec. ¹² Huan ipan nochi ome lados ten nopa hueyat cati quisa ten tiopamit moscaltise nochi tamanti cuame. Huan nopa cuame inixihuiyo amo quema pilinis, yon amo quema huaquis. Nojquiya temacase inintajca sesen metzti para nochipa pampa ni cuame quiselise nopa at cati meya ipan nopa tiopamit. Huan inintajca ni cuame elis para inintacualis masehualme huan inixihuiyo elis pajti para quinchichahuas cati mococohuaj.

Nopa nepamit ten nopa tali

¹³ “Ya ni cati na, niamoTECO Cati Más Nijpiya Tanahuatili, niquitohua: Xijtoquili ni tanahuatili quema anquixelhuilise nopa tali nopa ¹² huejhueyi familias ten israelitame. Ifamilia José, quiselise ome partes. ¹⁴ Pero nopa sequinoc familias anquinmacase san se parte. Quena, na nitatestigoj-quetzqui huejcajquiya para ni tali niquinmacasquía amohuejcapan tatahua huan ama elis quej anquiselise ten inijuanti.

¹⁵ ‘Ica norte inepa ni tali elis ten nopa Hueyi At Mediterráneo hasta altepet Hetlón campa calaquij ipan altepet Zedad. ¹⁶ Teipa panos Hamat, Berota huan Sibraim cati mocahuaj campa inepa tali Damasco huan tali Hamat. Huan teipa nopa nepamit panos hasta ajsis altepet Hazar Haticón campa inepa tali Haurán. ¹⁷ Huajca nopa nepamit ica norte elis ten nopa Hueyi At hasta altepet Hazar Enán ipan nopa nepamit ica Damasco huan tali Hamat ica norte.’

¹⁸ ‘Huan nopa nepamit ica campa hualquisa tonati, pejtehuas campa altepet Hazar Enán huan yas ica sur hasta campa nopa tepet Haurán huan nozona quimacas huelta huan yas ica campa oncalaquí tonati hasta campa hueyat Jordán campa tami nopa hueyi at Galilea. Huan ten nozona ixtemos ica campa hueyat Jordán huan panos tatajco tali Israel huan tali Galaad, huan panos ipan nopa Mictoc Hueyi At huan ajsis hasta altepet Tamar. Ya ni elis inepa ica campa hualquisa tonati.’

¹⁹ ‘Nopa nepamit ica sur, pehuas campa altepet Tamar huan yas ica campa oncalaquí tonati hasta ajsis campa nopa mantoc at cati itoca Meriba Cades. Huan teipa quitoquilis nopa hueyat ten tali Egipto huan yas hasta nopa Hueyi At Mediterráneo.’

²⁰ ‘Huan nopa nepamit ica campa oncalaquí tonati elis nopa Hueyi At Mediterráneo huan yas ten campa nopa nepamit quiajsic nopa Hueyi At ica sur huan tamis hasta campa pehua nopa nepamit ipan nopa Hueyi At ica norte iixmelac campa calaquí ipan altepet Hamat.’

²¹ ‘Huajca ximoxelhuilica ni tali quej quinamiquí ica nopa ¹² huejhueyi familias israelitas. ²² Xijxeloca nopa tali quej elisquía se nemacti cati amojuanti anquiselijoque ten amotatahua. Elis amoaxca amojuanti huan nopa masehualme ten sequinoc talme cati ama itztoque tatajco ten amojuanti ica inifamilias. Nochi inijuanti monequi anquinmacase quej nojquiya elisquíaj israelitame. Yeca monequi nojquiya anquinmacase cati elis iniaxca. ²³ Nochi nopa sequinoc talme ehuaní monequi quiselise inintal ipan nopa hueyi familia campa ama itztoque. Quej nopa na, niamoTECO, niquitohua.

48

¹ “Nica eltoc inintoca nopa huejhueyi familias huan nopa tali cati quiselis sesen ten inijuanti. Nopa hueyi familia Dan quiselis nopa tali cati más ica norte. Inepa ica norte quitoquilis nopa ojti ten Hetlón hasta Hamat huan

teipa yahui hasta Hazar Enán cati campa monepantía ica tali Hamat ica norte huan Damasco ica sur. Ya ni inepa Dan ica norte ten se lado tali Israel campa Hueyi At Mediterráneo hasta campa tami tali Israel campa hualquisa tonati. ² Nopa hueyi familia Aser teipa quipiyas ital más ica sur ten Dan ten se lado tali Israel hasta seyoc. ³ Teipa nopa hueyi familia Neftalí quipiyas ital más ica sur ten Aser ten se lado tali Israel hasta seyoc. ⁴ Teipa nopa hueyi familia Manasés quipiyas ital más ica sur ten Neftalí ten se lado tali Israel hasta seyoc. ⁵ Teipa nopa hueyi familia Efraín quipiyas ital más ica sur ten Neftalí ten se lado tali Israel hasta seyoc. ⁶ Teipa nopa hueyi familia Rubén quipiyas ital más ica sur ten Efraín ten se lado tali Israel hasta seyoc. ⁷ Teipa nopa hueyi familia Judá quipiyas ital más ica sur ten Rubén ten se lado tali Israel hasta seyoc.

⁸ “Ica sur ten ital Judá, mocahuas nopa tali cati monequi xiquiyocatali para nopa tiopamit, huan nopa altepet huan nopa tanahuatijquet. Huan inepa nopa tali nojquiya pehuas ica campa hualquisa tonati ipan tali Israel huan ajsis campa oncalaqui tonati. Huan ipatajca nochi nopa tali taiyocatalili elis 12 kilómetros huan tajco, huan ihuehueyaca elis san se quej inintal sesen ten nopa huejhueyi familias; elis ten se lado hasta seyoc lado ten tali Israel. Huan nopa tiopamit mocahuas tatajco ten ni tali taiyocatalili.

*Nopa tali cati taiyocatalili para TOTECO
(Ez 45:1-6)*

⁹ “Nopa tali cati monequi anquiyocatalise para na, niamoTECO, monequi quipiyas 12 kilómetros huan tajco ihuehueyaca huan 10 kilómetros ipatajca. ¹⁰ Huan ipan ni tali oncas se pedazo cati elis taiyocatalili para nopa totajtztzi cati quipiyas 12 kilómetros huan tajco ica campa hualquisa tonati hasta campa oncalaqui tonati, huan 5 kilómetros ica norte hasta ica sur. Huan tatajco ten ni tali mocahuas nopa tiopamit. ¹¹ Ya ni elis para nopa totajtztzi cati iixhuihua Sadoc pampa injuanti senquisa techtepanitaque huan amo tajtacolchijque quema techtahuelcajque nopa israelitame huan nopa sequinoc levitame. ¹² Yeca nopa totajtztzi quipiyase inintal ipan nopa tali cati taiyocatalili para na, niamoTECO, cati más tatzejtzololtic. Huan inintal elis nechca inintal nopa levitame. ¹³ Huan inintal nopa levitame elis san se ihuexca quej inintal nopa totajtztzi, quipiyas 12 kilómetros huan tajco ihuehueyaca huan 5 kilómetros ipatajca. Huaajca para nochi, nopa tali cati taiyocatalili quipiyas 12 kilómetros huan tajco ihuehueyaca huan 10 kilómetros ipatajca. ¹⁴ Yon se pedazo ten ni tali amo huelis quinamacase, yon amo huelis quixpatase, yon amo huelis quimacase seyoc masehual pampa ni tali tatzejtzololtic huan noaxca na, niamoTECO.

¹⁵ “Huan onca seyoc pedazo cati mocahua cati quipiya 12 kilómetros ihuehueyaca huan 2 kilómetro huan tajco ipatajca huan mopantis ica sur ten nopa tali para nopa tiopamit. Ni pedazo amo elis tatzejtzololtic, pero elis para nochi nopa masehualme. Nozona masehualme quichijchihuase ininchaj huan ininpotreros para inintapiyallhua. Huan nopa altepet mocahuas tatajco. ¹⁶ Nopa altepet quipiyas 2 kilómetros ihuaya 250 metros ihuehueyaca huan ipatajca. ¹⁷ Huan yahualtic nopa altepet oncas se tali pitzactzi cati quipiyas 125 metros ipatajca. Huan ya nopa quitequihuise para potreros. ¹⁸ Nojquiya mocahuas seyoc piltaltzi calixpa ten nopa altepet, iniixpa nopa talme cati taiyocatalilme para TOTECO. Huan quipiyas 5 kilómetros ica campa hualquisa tonati huan 5 kilómetros ica campa oncalaqui tonati. Huan ipan ni tali quitocase tamanti para ica mopanolitise nopa masehualme cati

tequitij ipan nopa altepet. ¹⁹ Ipan ni tali tatojtocase masehualme cati itztoque ipan ten hueli hueyi familia cati tequiti ipan nopa altepet. ²⁰ Huan nochi ni tali campa eltoc nopa piltaltzi cati taiyocatalili para itiopa TOTECO, huan para nopa levitame, huan para nopa totajtzitzi huan para nopa altepet, nochi san sejco elis quej setzi tali huan quipiyas 12 kilómetros huan tajco ipatajca huan ihuehuyaca.

Ital nopa tanahuatijquet
(Ez 45:7-8)

²¹ “Huan nopa tali cati mocahua ipan se lado ica campa hualquisa tonati huan ipan seyoc lado ica campa oncalaqui tonati ten nopa talme cati tatzejtzeltotique huan cati para altepet, nopa ome pedazos ten tali elis para nopa tanahuatijquet. ²² Huajca nopa tali para nopa tanahuatijquet pehuas ica norte campa monepantalía ihuaya ital nopa hueyi familia Judá huan ica sur campa monepantalía ihuaya nopa hueyi familia Benjamín. Huan ipan se lado ten nopa tali taiyocatalili quipiyas 12 kilómetros huan tajco ipatajca huan yas hasta ica campa oncalaqui tonati. Huan ipan nopa seyoc lado ten nopa tali taiyocatalili nojquiya quipiyas 12 kilómetros huan tajco ipatajca huan yas hasta ica campa hualquisa tonati. Huan nopa tali para nopa levitame huan totajtzitzi, huan nopa altepet, mocahuas tatajco.

Inintal nopa sequinoc huejhueyi familias

²³ “Nopa sequinoc huejhueyi familias, quipiyase inintal ica sur ten ni tali taiyocatalili. Achtohui nopa hueyi familia Benjamín quipiyas ital cati yas ten se lado tali Israel ica campa hualquisa tonati hasta seyoc lado ica campa oncalaqui tonati. ²⁴ Teipa ica sur ten Benjamín, nopa hueyi familia Simeón quipiyas ital cati yas ten se lado tali Israel ica campa hualquisa tonati hasta seyoc lado ica campa oncalaqui tonati. ²⁵ Teipa ica sur ten Simeón, nopa hueyi familia Isacar quipiyas ital cati yas ten se lado tali Israel ica campa hualquisa tonati hasta seyoc lado ica campa oncalaqui tonati. ²⁶ Teipa ica sur ten Isacar, nopa hueyi familia Zabulón quipiyas ital cati yas ten se lado tali Israel ica campa hualquisa tonati hasta seyoc lado ica campa oncalaqui tonati. ²⁷ Huan teipa ica sur ten Zabulón, nopa hueyi familia Gad quipiyas ital cati yas ten se lado tali Israel ica campa hualquisa tonati hasta seyoc lado ica campa oncalaqui tonati.

²⁸ “Pero ica sur ten ital nopa hueyi familia Gad, monepantalís ihuaya tali Tamar huan yas hasta campa nopa mantoc at cati itoca Meriba Cades. Teipa yas campa nopa pilatentzi ten tali Egipto huan quitoquilis hasta ajsis ipan nopa Hueyi At Mediterráneo.

²⁹ “Huajca ya ni eli nopa tali cati quiselise para iniaxca nopa huejhueyi familias ten israelitame. Huan quej nopa monequi anquixelose. Quej nopa na, niamoTECO Cati Más Nijpiya Tanahuatili, niqijtohua.

Icaltehua nopa altepet Jerusalén

³⁰ “Nopa altepet quipiyas se tepamit yahualtic cati quipiyas 2 kilómetros ihuaya 250 metros ipan sesen lado. ³¹ Ipan sesen lado ten nopa tepamit, quipiyas 3 caltemit. Huan sesen ten ni caltemit quihuicas itoca se ten nopa huejhueyi familias ten israelitame. Ica norte mocahuase nopa caltemit cati quinixnextise nopa huejhueyi familias ten Rubén, Judá huan Leví. ³² Nopa caltemit cati mocahuase ica campa hualquisa tonati quihuicase inintoca nopa huejhueyi familias ten José, Benjamín huan Dan. ³³ Huan nopa caltemit cati mocahuase ica sur quihuicase inintoca nopa huejhueyi familias ten

Simeón, Isacar huan Zabulón. ³⁴ Huan nopa caltemit cati mocahuase ica
campa oncalaqui tonati quihuicase inintoca nopa huejhueyi familias ten
Gad, Aser huan Neftali.

³⁵ “Para nochi ihuehueyaca nopa tepamit cati quiyahualos nopa altepet
ipan nochi lados quiapiyas 9 kilómetros. Huan nopa altepet quitocaxtise:
TOTECO ITZTOC NICA.”

Daniel

Babilonia ehuaní quintanque tali Judá ehuaní

¹ Ipan nopa tonali quema Tanahuatijquet Joacim yahuiyaya para eyi xihuit tanahuatis ipan tali Judá, hualajqui Tanahuatijquet Nabucodonosor cati tanahuatiyaya ipan tali Babilonia. Yaya ajsico ipan tali Judá inihuaya isoldados, huan quiyahualojque altepet Jerusalén huan pejqque quitehuíaj.

² Huan Toteco Dios quicahuili Tanahuatijquet Nabucodonosor ma quitani Tanahuatijquet Joacim. Nojquiya Toteco Dios quicahuili ma quiichtequi sequij tamanti cati quitequihuiyayaj ipan ihueyi tiopa. Huan quihuicaque nopa tamantzitzi tatzejtzeloltique huan quitallitoy ipan nopa cali campa eltoyaj inintaixcopincayohua ipan altepet Sinar huan nozona quiajojque ica sequinoc tamantzitzi pajpatiyo cati iniaxca ininteteyohua.

³ Nojquiya Tanahuatijquet Nabucodonosor quiilhui Aspenaz cati quinycanayaya itapalehuijcahua para ma quintapejpenica sequij israelita telpocame cati eliyayaj ininconeua tanahuatiani o tominpiyani huan ma quinhualicaca hasta tali Babilonia. ⁴ Ma quintapejpenica telpocame cati tejtetique huan cuali inintachiyalis huan cati talnamiquij huan momachtijque miyac tamanti. Ma quintapejpenica cati nimantzi huelis quichihuase se tequit huan cati nochi quimachilíaj huan cati quinitase para se tonali huelis quipalehuse nopa tanahuatijquet para tanahuatis. Monquiyaya quinmachtise nopa telpocame nopa camanali caldeo cati quitequihuíaj ipan nopa tali huan ma quinmachtica ipan nochi iniamatapohual. ⁵ Huan Tanahuatijquet Nabucodonosor tanahuati para ma quinmachaca nopa telpocame san se tacualisti huan taili quej cati ya quitequiliyayaj. Quiijto ma quinmachtica para eyi xihuit huan quema quitamiltise nopa eyi xihuit, nopa telpocame quitequipanose.

Daniel huan ihuampoyohua ipan ichaj nopa tanahuatijquet

⁶ Huan ipan nopa israelita telpocame cati quintapejpenijque itztoyaj Daniel, Ananías, Misael huan Azarías cati tacatque ipan nopa hueyi familia Judá. ⁷ Pero nopa tayacanquet cati quinmocuitahuiyaya quinpatili inintoca ica tocayot ten ital Babilonia. Huan Daniel quitocaxtali Beltsasar. Huan Ananías quitallili Sadrac. Huan Misael quitocaxti Mesac huan Azarías quitocaxti Abed Nego.

⁸ Pero Daniel ipan iyolo motemacac para amo quicuas itacualis huan itailis nopa tanahuatijquet pampa nopa tacualisti quichihuas amo tapajpacti iixpa Toteco. Huajca Daniel quitajtani nopa tayacanquet ma quincahuili para amo quicuase nopa tacualisti cati ica quiixpanosquíaj itanahuatil Toteco.

⁹ Huan Toteco Dios quichijqui para Daniel ma mohuica cuali ihuaya nopa tayacanca tapalehuijquet huan yaya quitasojtac Daniel miyac. ¹⁰ Pero pampa yaya eliyaya itapalehuijca nopa tanahuatijquet, quiilhui Daniel:

—Amo nihuelis nimehmacas seyoc tacualisti pampa niqumacasi nopa tanahuatijquet. Yaya cati tanahuatijtoc taya monequi anquicuase huan anquiyase. Huan sintá amo anquicuase, huelis anistalihuse. Huelis ancocoxatiyase huan amo annesise cuali quej ne sequinoc telpocame. Huan elis notajtacol huan nopa tanahuatijquet tanahuatis ma techmictica na.

¹¹ Huajca Daniel quicamanalhui seyoc tacat cati nopa tanahuatijquet nojquiya quitallitoyaya para quimocuitahuis ya huan quinmocuitahuis Ananías, Misael huan Azarías. Huan Daniel quiilhui:

¹²—Nimitztajtanía se favor. Techyejyeco para majtacti tonali. Xitanahuati san ma techmacaca quilit para tijcuase huan para tiquise, san at. ¹³ Huan quema panotosa ni majtacti tonali, xiquita quenicatza tiitztoque huan quenicatza itztoque ne sequij telpocame cati quicuaj itacualis nopa tanahuatijquet. Huan huajca teipa huelis antechtamacase ica cati anquittase para cuali.

¹⁴ Huan nopa tacat quiseli cati quilhui huan para majtacti tonali quintamacac quej quilhuique para quinyejyecos. ¹⁵ Huan quema ya tanto ya tanto para majtacti tonali, injuanti nesiyayaj más cuali huan quipiyayajaj más chichahualisti que ne sequij cati quicuayayaj nopa tanahuatijquet itacualis. ¹⁶ Huajca nopa tacat ayecmo quinmacac nopa tanahuatijquet itacualis huan itailis. San quintequilyaya quilit.

¹⁷ Huan Toteco Dios quinmacac nopa nahui telpocame miyac tamatilisti huan miyac talnamiquilisti. Nochi huelyiyaj quichihuj. Quixmatiyayaj huan quimachiliyayaj nochi tamanti amatapohualme huan nochi tamanti talnamiquilisti. Nojquiya Daniel quimachiliyaya cati quijtosnequi nochi tamanti temicti huan tanextili cati masehualme quijta. ¹⁸ Huan quema ajsic nopa tonali cati nopa tanahuatijquet quixquetztoya para ma monextica nochi nopa telpocame iixpa, nopa tayacanquet ten itapalehuijcahua quinhuicac iixpa. ¹⁹ Huan nopa tanahuatijquet quintatzintoquili taya momachtijtoyaj. Huan ipan nochi nopa telpocame, amo quipanti yon se quej Daniel, Ananías, Misael huan Azarías. Huajca quintequimacac ma quipiyaya tequiticayot ipan itanahuatilis. ²⁰ Huan ipan nochi tamanti cati monequiyaya talnamiquilisti, quintatzintoquili huan quipanti para injuanti tahuel talnamiquij hasta quinpano nochi sequinoc talnamiquini ipan itanahuatilis. Huan quipanti quimatiyayaj hasta majtacti hueltas más que ne talnamijca tacame cati momachtijque sitalime o quincamanalhuyiyaj ajacame. ²¹ Huan Daniel quipixqui tequiticayot ipan nopa tanahuatilis para tahuel miyac xihuit huan tequitic hasta ipan nopa achtohui xihuit ten itanahuatilis Ciro.

2

Nabucodonosor quipixqui se temicti

¹ Quema Tanahuatijquet Nabucodonosor yahuiyaya para ome xihuit tanahuatis, pejqui quitemiqui miyac tamanti huan cati quitemiquiyaya tahuel quitequipacholmacayaya huan teipa ayecmo huelyiyaya cochi. Huan tonaya amo huelyiyaya quielnamiqui itemic. ² Huajca tanahuati ma quinnotzati nopa tacame cati momachtiaj sitalime, huan cati tetonalitaj, huan cati tanahualhuiaj inihuaya nochi talnamijca tacame. Quinejqui quuitas sinta se ten injuanti huelis quixtomilis itemic. Huajca nochi yajque monextitoy iixpa. ³ Huan ne tanahuatijquet quinilhui:

—Nijpixqui se temicti huan nelía nimocuesohua miyac pampa nijnequi nijmachilis. Huelis techilhuía cati techajsis teipa.

⁴ Huan nopa talnamijca tacame quilhuique nopa tanahuatijquet:

—¡Tohueyitanahuatijca! ¡Xitizto miyac tonali! Techpohuili cati tijtemijqui huan tojuanti, timotequipanojcahua, timitzixtomilise taya quinequi quijtos.

⁵ Huan nopa tanahuatijquet quinnanquili:

—Ya niquelcajqui cati nijtemijqui. Pero sinta amo antechilhuiaj taya nijtemijqui huan taya quinequi quijtos, nitanahuatis ma amechhuejhueloca

huan ma quisosoloca amochajchaj. ⁶ Pero sinta antechilhuisse taya nijtemijqui huan taya quinequi quuijtos, nimechmacas miyac nemacti cati cuali. Nojquiya nimechhueyitalis huan anquippiyase más tequiticayot. Huajca techilhuisse taya nijtemijqui huan taya quinequi quuijtos.

⁷ Huan nopa talnamijca tacame sempa quinanquillijque:

—Quena, totanahuatijca, techpohuili taya tijtemijqui, huan timitzilhuise taya quinequi quuijtos.

⁸ Huan nopa tanahuatijquet quinilhui:

—Cuali nijmati anquinequij anquichiyase hasta techajsis nopa cati fiero quuijtosnequi nopa temicti pampa ya anquicactoque cati niquijto. ⁹ Sinta amo antechilhuisse taya nijtemijqui, san se tatzacuultilisti amopantis huan ya nopa miqulisti. Pampa niquita anmoilhuijtoque san sejco quenicatza antechanquillise ica istacatili hasta ajsis nopa tamanti. Huajca techilhuisse nopa temicti huan nijmatis para temacti anhuelij antechixtomilise cati quuijtosnequi.

¹⁰ Huan nopa talnamijca tacame quillhuijque nopa tanahuatijquet:

—Amo aqui ipan ni taltipacti huelis mitzilhuis cati tijnequi tijmatis, titotanahuatijca. Nojquiya amo aqui yon se tanahuatijquet o tayacanquet, masque nelía hueyi itanahuatilis tajtantoc se tamanti quej ni para ma quillhui se cati momachtía sitalime, o cati tetonalitaj o cati talnamiquij.

¹¹ Pampa cati ta techtajtania nelía ohui. Amo aqui ipan taltipacti huelis mitzilhuis. Huelis se dios mitzilhuisquía, pero injuanti amo itztoque campa timasehualme.

¹² Huan quema nopa tanahuatijquet quicajqui ya ni, nelía cualanqui huan tanahuati ma quinmictica nochi talnamijca tacame ipan tali Babilonia.

¹³ Huan quema itayolmelajcahua nopa tanahuatijquet teilhuiyayaj nopa tanahuatili, quitemotoj Daniel inihuaya ihuampoyohua para quinhuicase quinmictij.

Daniel quitajtani Toteco itapalehuil

¹⁴ Huan ajsito campa Daniel nopa tayacanquet ten soldados cati itoca Arioc cati quipixqui itequi para temictis quema nopa tanahuatijquet quinequiyaya. Huan Daniel moilhui quenicatza quichihuasquía huan teipa quicamanalhui Arioc ica miyac talnamiquilisti. ¹⁵ Huan Daniel quitatzintoc quili nopa tayacanquet:

—¿Para ten nopa tanahuatijquet quichijtoc ni tanahuatili cati nelchicahuac?

Huajca Arioc quipohuili Daniel taya onca. ¹⁶ Huan Daniel yajqui nimantzi campa itztoya nopa tanahuatijquet huan quillhui ma quimaca se ome tonati para huelis quipohuilisquía itemic. Huan nopa tanahuatijquet quiseli cati quuijto. ¹⁷ Huan teipa Daniel yajqui ichaj huan quinitato ihuampoyohua, Ananías, Misael huan Azarías. ¹⁸ Quinilhui ma quitajtania Toteco Dios cati itztoc ilhuicac para ma quintasojta huan ma quinnextili ni tamanti cati amo aqui quimati para ma amo quinmictica inihuaya ne sequij talnamijca tacame ipan tali Babilonia. ¹⁹ Huajca ipan nopa tayohua Toteco Dios cati itztoc ilhuicac quimacac Daniel se tanextili huan quinnextili nopa tamanti cati amo aqui quimatiyaya.

Daniel quitascamatqui Toteco

Huan yeca Daniel quitascamatqui Toteco Dios cati itztoc ilhuicac, ²⁰ ica ni camanali:

“Toteco Dios, ma mitzhueyichihuaca nochi masehualme para nochipa, pampa ta tijpiya nochi talnamiquilisti huan chichualisti. ²¹ Ta

tijpata tonali huan xihuit. Tiquinjicuenía huan tiquintalía tanahuatiáni. Ta cati tiquinmaca inintálnamiquilis cati talnamiquij huan cati tamachilíaj. ²² Ta cati titenextilía tamanti cati ohui huan cati motatijtoc para quimachilise. Tijmati cati eltoc ipan tzintayohuilot. Taahuili pehua ipan ta. ²³ Nimitztascamati, ta tiToteco Dios, cati notatahua mitzhueyichijque. Nimitztascamati huan nimitzhueyichihua pampa techmacatoc talnamiquilisti huan chichahualisti. Huan ama techmatiltijtoc cati timitztajtanijqe. Technextilijtoc cati quimacayaya hueyi tequipacholi nopa tanahuatijquet.”

Daniel yajqui iixpa Nabucodonosor

²⁴ Huan teipa Daniel yajqui quiitato Arioc cati nopa tanahuatijquet quitequimacatoya para ma quinnicti nochi talnamijca tacame ipan tali Babilonia. Huan Daniel quiihui:

—Amo xiquinmicti nopa talnamijca tacame. Techhuica iixpa nopa tanahuatijquet huan na níquixtomilis nochi itemic.

²⁵ Huan Arioc moisihuilti para quihuicas iixpa Tanahuatijquet Nabucodonosor huan quiihui:

—Totanahuatijca, ten nopa israelitame cati tiquinhualicaque ten tali Judá, na nijpantijtoc se tacat cati huelis mitzixtomilis taya quiiijosnequi motemic.

²⁶ Huajca nopa tanahuatijquet quinzotzqui Daniel cati nojquiya itoca Beltsasar huan quiijo:

—¿Huelis techilhuis taya nijtemijqui huan taya quinequi quiiijos?

²⁷ Huan Daniel quinanquili:

—Amo aqui yon se cati hueli mitzilhuis motemic cati tijnequiyaya tijmatis masque yaya se talnamijca tacat, o se cati tetonalita, o se cati tenahualhuía, o se cati momachtía sitalime. ²⁸ Pero, quena, itzotc se Dios nepa ilhuicac cati tenextilía tamanti cati masehualme amo quimachilíaj. Huan Tanahuatijquet Nabucodonosor, yaya mitzilhuijtoc cati panos teipa. Huajca ama nimitzpo-huilis nopa temicti cati tijpixqui huan nochi nopa tanextili cati tiquitac quema ticochtoya. ²⁹ Quema timotectoya, pejqui timoiilhuía cati panosquía teipa. Huan yaya cati tematiltía ten motatijtoc mitzmatiltijtoc cati panotiyas teipa. ³⁰ Amo techmachiltijtoc na nopa tamanti pampa más nitalnamiqui que ne sequinoc tacame. Technextilijtoc para huelis nimitzixtomilis taya quiiijosnequi motemic, huan para quej nopa huelis tijmachilis cati timoy-olilhuiyaya.

Nabucodonosor itemic huan cati quiiijosnequi

³¹ “Totanahuatijca, ipan motemic tiquitayaya moquetztoya moixpa se teteyot nelhueyi huan nelía huejcapantic. Huan cahuaniyaya nopa teteyot huan mitzmajmati. ³² Itzonteco nopa teteyot eliyaya shenuisa oro. Huan iyolixco huan imax eliyaya plata. Huan iijti huan imetzto mahuiya eliyaya bronce. ³³ Huan icotzta eliyaya ten hierro. Huan iicxi canactzi eliyaya hierro huan canactzi eliyaya soquit. ³⁴ Huan quema noja tijtachiliyaya, se tet quisqui iselti ten campa eltoya ipan se tepet. Huan hualajqui nopa tet huan quiajsic ipan imetz nopa teteyot campa eliyaya hierro huan soquit, huan quitamisosolo. ³⁵ Huan san ipan se talojtzi huetzqui nochi nopa hierro, soquit, bronce, plata huan oro. Huan mochijqui quej faltepocti quej quema tiquita ipan verano quema se quihuetequi trigo huan se ajacat quihuica itasola. Huan amo teno mocajqui ten nopa teteyot. Pero nopa tet cati quimaquili nopa teteyot, mohueyili hasta mochijqui se hueyi tepet huan quitemiti nochi taltipacti.

Nopa achtohui tanahuatlisti Babilonia

³⁶ “Huaajca ya nopa eliyaya motemic. Huan ama nimitzpohuilis taya quijjosnequi. ³⁷ Ta titotanahuatijca, tiitztoc nopa tanahuatijquet cati más hueyi que nochi tanahuatiani. Toteco Dios cati itztoc ilhuicac mitzmacatoc ni tanahuatlisti huan miyac chicahualisti. Yaya quichijtoc para nochi masehualme ma mitztepanitaca huan mitzmacatoc nochi mohueyitilis. ³⁸ Yaya mitzcahuilijtoc xiquinnahuati talme campa hueli campa itztoque masehualme, tapiyalme huan totome. Yaya cati quintalijtoc momaco nochi para xiquinnahuati. Nopa teteyot itzonteco mitzixnextía ta, totanahuatijca. Ta nopa tizontecomit ten oro.

Nopa ompa tanahuatlisti: Media huan Persia

³⁹ “Huan teipa quema tamis titanahuatis, pehuas seyoc tanahuatlisti cati quixnextía iyolixco ten plata nopa teteyot, pero nopa tanahuatlisti amo quipiyas chicahualisti quej ta tijpiya.

Nopa expa tanahuatlisti: Grecia

“Quema tamis nopa ompa tanahuatlisti, pehuas seyoc tanahuatlisti cati quixnextía nopa bronce cati tiquitac ipan iijti nopa teteyot. Nopa tanahuatijquet nojquiya quipiyas tanahuatili ipan nochi faltipacti.

Nopa najpa tanahuatlisti: Roma

⁴⁰ “Pero teipa pehuas nopa najpa hueyi tanahuatlisti cati quixnextía nopa hierro ipan ne teteyot. Ni tanahuatlisti quipiyas miyac fuerza. San quej hierro hueli tasosolohua, ni tanahuatijquet quitamiltis huan quisosolos nochi sequinoc tanahuatlisti huan quintanis nochi talme. ⁴¹ Nojquiya tiquitac iicxi huan ixocpilhua canactzi eliyaya hierro huan canactzi eliyaya soquit icstitoc. Nopa tanahuatlisti cati quixnextía nopa hierro huan soquit elis se tanahuatlisti cati teipa sosolihuis. Elis tetic huan quipiyas chicahualisti pampa tiquitac canactzi hierro, pero nojquiya tiquitac maneltic ica soquit. ⁴² Huan pampa tiquitac ixocpilhua canactzi hierro huan canactzi san soquit icstitoc, quijjosnequi para canactzi quipiyas chicahualisti, pero nojquiya canactzi amo. Nimantzi mososolos quej tapani se soqui chachapali. ⁴³ Huan cati tayacana ipan nopa najpa tanahuatlisti quinequise quinsejcotilise inimasehualhua para itztose san se. Pero quej hierro amo hueli momanelohua ica soquit, quej nopa amo huelis quinsejcotilise.

Nopa tayacapan tanahuatlisti: Nopa tanahuatlisti ten ilhuicac

(Mt. 3:2)

⁴⁴ “Huan ipan nopa tonali quema tanahuatijtose nopa tanahuatiani cati quixnextía ixocpilhua nopa teteyot, Toteco Dios cati itztoc ilhuicac quiquetzas se tanahuatlisti campa imasehualhua cati amo aqui huelis quisosolos, yon amo aqui huelis quitanis. Huan nopa tanahuatlisti amo aqui huelis quitanis pampa nopa tanahuatijcayot quintamiltis nochi sequinoc tanahuatiani huan inintanahuatijcayo, huan ayecmo teno mocahuas ten ne sequinoc. Nopa tanahuatlisti huan nopa tanahuatijquet cati Toteco qitalijtos huejcahuas para nochipa. ⁴⁵ Ya ni nopa tanahuatlisti cati quixnextía nopa tet cati tiquitac cati quisqui ica iselti huan temoc ten nopa tepet, huan quixacualo huan quichijqui quej taltepociti nopa hierro, bronce huan soquit. Huaajca totanahuatijca, ipan motemic Toteco Dios cati más hueyi mitznextilijtoc cati panos teipa ipan ni faltipacti. Huan ni temicti cati Toteco mitzmacatoc nelía melahuac. Huan nojquiya senquisa temachtí cati nimitzpohuilijtoc cati quijjosnequi.”

Nabucodonosor quihueyitali Daniel

⁴⁶ Huajca Tanahuatijquet Nabucodonosor motancuaquetzqui iixpa Daniel huan mohuitzonqui falchi para quihueyichihuas Daniel. Huan nojquiya quinnahuati imasehualhua ma quimacaca se tacajcualisti huan ma quipopochhuica ica copali cati ajhuiyac. ⁴⁷ Huan Nabucodonosor quihhui Daniel:

—Nelia melahuac moDios itztoc cati más hueyi que nochi sequinoc dioses. Yaya ininTeco nochi tanahuatiani. Yaya hueli tenextilia tamanti cati amo aqui quimati pampa niquta para melahuac mitznextilijtoc ni tamanti cati nijtemijqui.

⁴⁸ Huan teipa nopa tanahuatijquet quihueyitali Daniel huan quitequimacac para ma quihuica más tequiticayot huan quimacac miyac tamanti cati pajpatiyo. Nojquiya quitali ma eli gobernador ipan nopa estado campa mocajqui altepet Babilonia. Huan quitali ma eli nopa tayacanquet cati más hueyi que nochi talnamijca tacame ipan tali Babilonia. ⁴⁹ Nojquiya Daniel quitajtani nopa tanahuatijquet para ma quintequimaca ihuampoyohua, Sadrac, Mesac huan Abed Nego. Huan quinmacac tequiticayot ipan tequicali ipan nopa estado campa eltoya altepet Babilonia, huan Daniel mocajqui ichaj nopa tanahuatijquet ica se tequiticayot cati más hueyi.

3

Nabucodonosor quichijqui se teteyot ten oro

¹ Huan teipa nopa Tanahuatijquet Nabucodonosor tanahuati ma quichijchihuaca se teteyot ten oro cati quipixqui 26 metros ihuejcapanca huan nechca eyi metro itomajca. Huan tanahuati ma quitalica ipan ne tamayamit cati itoca Dura nechca altepet Babilonia. ² Teipa tanahuati ma mosentilica nochi cati quihucayayaj tequiticayot ipan nochi talme ipan itanahuatilis. Quinnotzqui itapalehuujcahua, itaconsejomacacahua, ipresidentes, igobernadores, ijueces huan itayacanca soldados huan cati quimocuitahuiyayaj itomi. Tanahuatijquet Nabucodonosor quinilhui ma hualaca huan quihhuihuilise nopa hueyi teteyot cati quiquetztoya. ³ Huajca ajsicoj nochi huejhueyi masehualme huan mosentilijque iixpa nopa teteyot para quihhuihuilise. ⁴ Huan se tacamanalhuijquet chichahuac camanaltic huan quinilhui nopa masehualme: “Xitacaquilica, nochi anmasehualme cati anhualajtoque campa hueli talme huan cati ancamanaltij ten hueli camanali cati onca. ⁵ Quema anquicaquise tapitzaj nopa tapitzani ica nochi inin-tapitzalhua, nimechnahuatia ximotancuaquetzaca huan xijhueyichihuaca nopa teteyot ten oro cati Tanahuatijquet Nabucodonosor tanahuati ma quisencahuaca. ⁶ Huan sinta acajya amo motancuaquetzas huan amo quihueyichihuas nopa teteyot, nimantzi quimajcahuase ipan se hueyi tilelecti.”

⁷ Huajca quema quicajque tapitzaj nopa miyaqui tapitzani, nochi nopa miyaqui masehualme cati campa hueli hualajtoyaj huan cati camanaltiyayaj ten hueli camanali, nochi motancuaquetzque huan quihueyichijque nopa teteyot ten oro cati Nabucodonosor quichijchijtoya.

Eyi israelita telpocame amo quihueyichijque nopa teteyot

⁸ Huan ipan nopa talojtzi sequij talnamijca tacame hualajque huan quin-telhuicoj nopa israelita telpocame iixpa Tanahuatijquet Nabucodonosor. ⁹ Quiilhuijque:

—Totanahuatijca, ¹⁰ ta titanahuati para nochi ma motancuaquetzaca iixpa ne teteyot ten oro huan nimantzi ma quihueyichihuaca quema quicaquisquij tapitzaj nopa tatzotzonani. ¹¹ Huan tiqijto sinta acajya amo

quichihuas, quimajcahuase iijtic nopa tilelemecti cati xahuantoc. ¹² Pero itztoque sequij israelitame cati tiquintalijtoc para qui piyase hueyi tequiticayot ipan ni altepet Babilonia, huan inijuanti amo mitztepanitaj. Amo quinhueyichihuaj fodioses, yon nopa taixcopincayot ten oro cati tijchijtoc. Inintoca Sadrac, Mesac huan Abed Negro.

¹³ Huajca nelía cualanqui Nabucodonosor huan tanahuati ma quihuiquilica iixpa Sadrac, Mesac huan Abed Negro. Huan quinhualicaque. ¹⁴ Huan Nabucodonosor quintatzintoquili:

—¿Nelía amo anquinhueyichihuaj nodioses, yon nopa taixcopincayot ten oro cati nijchijchijtoc? ¹⁵ Monequi ximocualtalica para anquinhueyichihuase. Huajca amantzi quema tatzotzonase, monequi ximotancuaquetzaca iixpa nopa teteyot cati nijchijchijtoc huan xijhueyichihuaca. Huan sinta anquichihuase, cualtitoc. Pero sinta amo anquinhueyichihuase, nimantzi amechmajcahuase ipan nopa tilelemecti cati xahuantoc. Huan amo aqui se totiecti cati huelis amechmanahuis nopona.

¹⁶ Huajca Sadrac, Mesac huan Abed Negro quinanquilijque nopa tanahuatijquet huan quilhuijque:

—Timitzcamanalhuse xitahuac. Amo timotequipachos ica ten topantis. ¹⁷ Toteco Dios cati tijhueyichihuaj qui piya chichahualisti para techmanahuis ten nopa tilelemecti huan huelis quichihuas. ¹⁸ Pero cuali xijmati ya ni, totanahuatijca, masque amo techmanahuisquía, amo tijhueyichihuase nopa taixcopincayot, yon amo timotancuaquetzase iixpa nopa teteyot ten oro cati tijchijchijtoc.

Toteco quinmanahui nopa telpocame ipan tit

¹⁹ Huan quema Nabucodonosor quicajqui ni camanali, nelía cualanqui hasta moixchichilo ica nopa eyi telpocame. Huan tanahuati ma quitemilica chicomoe hueltas más cuahuit para tahuel más quixahuanaltise huan amo quej achtohui. ²⁰ Teipa quintitanqui sequij soldados cati más qui piyaj tetili para ma quitatacatzoca Sadrac, Mesac huan Abed Negro, huan ma quinmajcahuaca ipan tilelemecti. ²¹ Yon amo quinquixtilijque iniyoyo, inintzontzajca huan inintaque cati moquentijtoyaj. San quintatacatzojque huan quinmajcajque iijtic tilelemecti pampa nopa tanahuatijquet quinequiyaya quinmictis nimantzi. ²² Huan pampa ne tanahuatijquet tanahuatijtoyaj para ma quixahuanaltica tahuel nopa tilelemecti quinajsic huan quinmicti nopa soldados cati quimajcajque Sadrac, Mesac huan Abed Negro. ²³ Huan Sadrac, Mesac huan Abed Negro huetzitoj horno iijtic ilpitoque.

²⁴ Huan nimantzi Nabucodonosor momajmati huan moquetztiquisqui campa mosehuijtoyaj. Huan quintatzintoquili itapalehuijcahua cati más huejhueyi:

—¿Amo tiquinmajcajque eyi telpocame ilpitoque ipan tit?

Huan tananquilijque:

—Quena, totanahuatijca.

²⁵ Huan ne tanahuatijquet quijto:

—Xiquitaca, niquinita nahui tacame majcajtoque huan nemij ipan tajco tit huan amo teno ininpanti. Huan ne najpa tacat nesi quej se dios.

²⁶ Huajca Nabucodonosor monechahui iteno nopa tilelemecti huan chichahuac quintzajtzi huan quijto:

—¡Sadrac, Mesac huan Abed Negro, amojuanti cati anquitequipanohuaj nopa Dios Cati Más Hueyi, xiquisaca huan xihualaca nica!

Huan nopa eyi quisque ten nopa tilelemecti, ²⁷ huan nochi nopa tacame cati nozona itztotaj huan quihuicayaj tequiticayot ipan nopa tali, quin-nechahuijque ni eyi tellocame. Huan quintachilijque huan quitaque para amo quintatijtoya fit ipan inintacayo, yon amo teno quichihuilitoya ipan inintzoncal, yon iniyoyo. Yon amo mijyotiyajaj sinta monechahuijtoyaj campa poci.

Nopa tanahuatili cati Nabucodonosor quichijqui

²⁸ Huajca Nabucodonosor quijto: “¡Ma tijhueyichihuaca Dios, yaya cati ininTeco Sadrac, Mesac huan Abed Nego! Yaya quititanqui iilhuicac eja para ma quinmanahui itequipanojcahua pampa motemachijque ipan ya. Injuanti amo techneltocaque na, nitanahuatijquet huan cati niquinahuati. Hasta motemacaque para miquise para amo motancuaquetzase para quihueyichihuase seyoc cati amo ininTeco Dios. ²⁹ Huajca ama, na nitanahuatía para nochi masehualme ipan nochi talme huan cati camanaltij nochi tamanti camanali ma quimatica para amo aqui hueli quimahuispalos ininTeco ni tellocame. Huan sinta acajya quichihuas, nitanahuatis ma quinhuejhueloca huan ma quisosoloca ininchajchaj huan san mochihuas quej campa quisentilaj tasoli. Pampa amo aqui seyoc totiotzi ipan ni taltipacti cati hueli temaquixtia quej ni.”

³⁰ Huan teipa ne tanahuatijquet quitequimacac Sadrac, Mesac huan Abed Nego ma quipiyaca noja más tequiticayot ipan nopa altepet Babilonia.

4

Tanahuatijquet Nabucodonosor quipixqui seyoc temicti

¹ Teipa Tanahuatijquet Nabucodonosor quintajcuilhui nochi masehualme ipan itanahuatilis ica ni camanali:

“Na, niTanahuatijquet Nabucodonosor, nimechtajpalohua nochi anmasehualme ipan nochi talme ipan ni taltipacti cati ancamanaltij nochi tamanti camanali cati onca. ² Nijnequi xijmatica amojuanti nopa tamanti cati nelyejyectzitzitzi cati Dios Cati Más Hueyi quichijtoc nica noixpa. ³ ¡Nelía huejhueyi tamanti quichijqui huan san tijtachilijtoque! Yaya itanahuatilis huejcahuas para nochipa. Tanahuatis huan quipiyas ihueyi chichualis para nochipa quema noja tacajtiyase iniixhuihua masehualme.

⁴ “Na, niNabucodonosor, niitztoya ica paquilisti ipan nochaj cati hueyi huan nochi cati cuajcualtzi nijpiyayaya. ⁵ Pero se tayohua quema nimotectoya, nijtemijqui miyac tamanti cati nelía techmajmati. ⁶ Huajca nitanahuati ma hualaca techitaquij nochi talnamijca tacame ipan tali Babilonia huan ma techixtomilica taya quijjosnequi notemic. ⁷ Huan hualajque nochi cati tenahualhuiaj, huan cati quincamanalhuiaj ajacame, huan cati momachtiaj sitalime huan cati tetonalitaj, huan niquinpohuili notemic, pero amo huelque techilhuijque taya quinequiyaya quijjos. ⁸ Pero teipa monechahui Daniel cati nojquiya itoca Beltsasar quej itoca nodios. Ipan inemilis Daniel quipiya ichichualis itonal nopa Dios cati tatzejtzelotlic. ⁹ Huan nijpohuili notemic huan niquilhui: ‘Beltsasar, ta cati más titalnamiqui ten nochi talnamijca tacame, na nijmati Itonal Dios itztoc ipan ta. Huan nijmati ta tijmachilía nochi tamanti cati amo aqui hueli quimachilía. Huajca xijtacauili nochi cati niqitac ipan notemic, huan techilhui taya quijjosnequi. ¹⁰ Ya ni notemic cati niqitac quema nicochtoya. Tatajco ipan se tamayamit niqitac se cuahuit nelhuejcapantic. ¹¹ Nopa

cuahuit moscaltijiyajqui huan mochijqui neltomahuac huan huejcapantic hasta conajsiyaya ilhuicacti. Nochi masehualme hueliyayaj quiitaj nopa cuahuit ten campa hueli itztoyaj ipan taltipacti masque nelhuejca. ¹² Nelía eliyaya yejyectzi ixihuiyo huan temacayaya miyac itajca, hasta quiaxiliyaya para quintamacase nochi masehualme campa hueli. Nochi tapiyalme ten cuatita moecahuiliyayaj itantita huan ipan imacuayo motepasolтийayaj totome. Huan nochi tapiyalme huan totome ipan taltipacti quicuayayaj itajca nopa cuahuit.

- 13 “ Teipa ica se talojtzi niqitac se itatzejtzeloltijca ilhuicac eja Dios cati itequi para tamocuitahuis huan yaya temoyaya ten ilhuicac. ¹⁴ Huan chichahuac nopa ilhuicac ejquet quiijto: Xijtzontequica nopa cuahuit huan xijmacuayotzontequica. Xijquixtilica ixihuiyo huan xijsemanaca itajca. Ma choloca nochi tapiyalme cati moecahuiliyayaj itantita huan nochi totome cati itztoque ipan imacuayo. ¹⁵ Pero xijcahuaca icuatsonyo huan inelhuayo. Huan xijtatacatzoca icuatsonyo ica cadenas ten hierro huan bronce. Huan xijcahuaca campa eltoc ica yancuic sacapetat yahualtic. Ma huetzi ajhuechti ipan nopa tacat cati ni cuahuit quiixnextía. Huan nopa tacat ma quiipya inemilis quej nopa tapiyalme cati quicuajtinemij sacat.
- 16 “ Huan xijcahuili para italnamiqulis ayecmo elis quej italnamiqulis se tacat, pero ma huilhuitiyas huan ma mocuepa quej italnamiqulis se tapiyalí. Huan para chícome xihuit quej nopa ma eli.
- 17 “ Ya ni nopa tatzacuiltli cati tanahuatijtoque tatzetzeloltijca ilhuicac ehuaní para yaya ma quiseli. Tayolmelajtoque para quej nopa ma ipanti ni tacat. Quej ni nochi masehualme quimatisé para Dios Cati Más Hueyi quiipya tequiticayot ica nochi tanahuatiani ipan taltipacti huan ica nochi inintanahuatijcayo. Huan Dios quimaca tequiticayot huan se tanahuatilisti cati yaya quinequi. Yaya hueli quichihua tanahuatijquet cati hueli masehualí, masque se cati más moicnonequi.”
- 18 Huan niquihui Beltsasar: “Huajca ya ni nopa temicti cati na, niTanahuatijquet Nabucodonosor, nijpíxqui. Huajca ama techilhui taya quinequi quiijtos pampa yon se talnamijca tacat ipan notanahuatijcayo amo hueli techilhuía. Pero ta, quena, tihueli pampa Itonal nopa Dios cati tatzetzeloltic itztoc ipan ta.”

Daniel quiilhui Nabucodonosor taya quiijtosnequi itemic

¹⁹ Huajca Daniel, cati nojquiya quitocaxtíaj Beltsasar, huejcajqui san tachixtoc pampa quimajmatiyaya cati moilhuiyaya. Pero nopa tanahuatijquet quiilhui:

—Beltsasar, amo ximocueso ica nopa temicti cati nijpíxqui, yon ica cati quinequi quiijtos.

Huajca Beltsasar quinanquili:

—Notanahuatijca, nipaquisquía sinta motemic eltosquía para mocualan-caitacahua ica nochi cati quiijtosnequi, pero amo quej nopa eltoc. ²⁰ Tiquitac se hueyi cuahuit cati moscalti tomahuac huan ajsiyaya hasta ilhuicac huan nochi masehualme campa hueli ipan taltipacti huelque quiitaj. ²¹ Quiipíxqui ixihuiyo cati yejyectzi huan quiipíxqui miyac itajca hasta quiaxiliyaya para quintamacas nochi masehualme. Huan itantita nopa cuahuit moecahuiliyayaj tapiyalme, huan motepasolтийayaj totome. ²² Nopa cuahuit quiixnextía ta, totanahuatijca. Ta tinopa cuahuit. Ta timoscaltijtoc hasta

nelía tihueyi huan miyac chicahualisti tijpiya. Mohueyitilis mohueyichij-toc hasta onajsi nechca ilhuicac huan motanahuatijcayo momoyajtoc ipan noch taltipacti.

²³ “Nojquiya tiquitac para se ilhuicac ejquet cati tamocuitahuía temoc ten ilhuicac huan quijto: Xijzontequica nopa cuahuit huan xijcocotzaca, pero xijcahuaca nopa cuatzomit ica inelhuayo. Huan xijtatacatzoca nopa cuatzomit ica cadenas ten hierro huan bronce, huan xijcahuaca ma elto nozona campa nopa yancuic sacapetat. Ma huetzi ajhuechti ipan nopa tacat cati nopa cuahuit quixnextía. Yaya ma eli quej se tapiyali cati itztoc ipan cuatitamit para chicome xihuit.

²⁴ “Huan ama, Totanahuatijca, nimitzilhuis taya quijtosnequi. Ya ni cati Dios Cati Más Hueyi tanahuatijtoc para mopantis ta. ²⁵ Mitzquixtise para ayecmo tiiztos campa masehualme. Tiiztos inihuaya tapiyalme ten cuatitamit. Tijcuas sacat quej huacaxme, huan nopa ajhuechti cati huetzis ten ilhuicac quixolonis mocuitapa. Quej nopa tiiztos para chicome xihuit hasta tiqutas para yaya Dios Cati Más Hueyi huan cati quipiya tequiticayot ica noch tanahuatlisti cati masehualme quipiyaj ipan ni taltipacti. Huan yaya cati quitalía ma tanahuati nopa masehuali cati ya quinequi ipan sesen tanahuatlisti. ²⁶ Pero nopa tanahuatili para ma quicahuaca nopa cuatzomit ica noch inelhuayo, quinequi quijtos para sempa titanahuatis huan sempa tijpiyas motanahuatijcayo, pero hasta quema tijmatis para nopa Dios cati itztoc ipan ilhuicac quipiya noch tequiticayot. ²⁷ Huajca notanahuatijca, xijtaquili cati nimitzilhuía. Ximoyolcupea huan xijcahua motajtacolhua. Ximoiyocacahua ica cati amo cuali tijchihuayaya. Huan xijchihua cati xitahuac huan xiquinpalehuyi cati teicneltziti. Hueli quej nopa tiiztos ica cuali ica noch cati tijpiya.”

Ilocojo Tanahuatijquet Nabucodonosor

²⁸ Huan noch ni tamanti cati quitemijqui Tanahuatijquet Nabucodonosor, quipanoc. ²⁹ Quema panotoya se xihuit para quipixqui ni temicti, nopa tanahuatijquet nejnemiyaya icalcuitapa ipan altepet Babilonia campa momajtoya mosiyajquetza, ³⁰ huan quijto: “¡Xiquitaca! Na ica nohueyi chicahualis, nijchijtoc ni hueyi altepet campa nimosehuía para nitanahuatis ipan ni nochaj cati yejyetzti. Ihueyitilis ni altepet quixnextía noricojojo huan para nelía hueyi notequiticayo.”

³¹ Pero quema noja camanaltiyaya nopa tanahuatijquet, quicajqui se cati camanalti ten ilhuicac huan quijto:

“Xijcaqui ya ni, Tanahuatijquet Nabucodonosor. Toteco Dios ya mitzquixtilijtoc motanahuatijcayo. ³² Huan momasehualhua mitzquixtise para ayecmo tiiztos campa masehualme. Tiiztos inihuaya nopa tapiyalme campa cuatitamit huan tijcujtinemis sacat para chicome xihuit quej quicuj huacaxme. Quej nopa tielis hasta tiqutas para Toteco Dios Cati Más Hueyi tanahuatía ipan noch taltipacti huan yaya cati quitalía tanahuatiani cati yaya quinequi.”

³³ Huan nimantzi pejqui pano noch nopa tamanti cati quitemijqui. Quiquixtijque para ayecmo ma itzo campa masehualme. Huan pejqui quicua sacat quej huacaxme huan nopa ajhuechti cati huetziyaya quixoloniyaya icuitapa. Itzoncal moscalti huan mochijqui quej iijhuiyo nopa hueyi cuatojti. Huan iisti moscalti quej iniisti totome.

Nabucodonosor mochicajqui

³⁴ Huajca Nabucodonosor quijto:

“Huan quema tanqui nopa chicome xihuit, na niNabucodonosor, ni-tachixqui ilhuicac huan notalnamiqulis mocuetqui quej achtohui eliyaya. Huan nijtascamatqui Toteco Dios Cati Más Hueyi huan nijhueyichijqui huan nijhueyitepanitac yaya cati itzotc para nochipa.

Yaya tanahuatis para nochipa,
huan itanahuatilis amo quema tamis.

³⁵ Iixpa ya amo teno topati tojuanti cati tiitztoque ipan taltipacti.

Quichihua cati yaya ipaquilis nepa ilhuicac,
huan nojquiya nica ipan ni taltipacti.

Amo aqúi cati huelis quitzacuilis cati ya quinequi quichihuas.

Yon amo aqúi huelis quitatzintozuilis:

‘Para ten quichijqui cati ya quichijtoc.’

³⁶ “Huan ipan nopa talojtzi quema mocuetqui notalnamiqulis, nojquiya mocuetqui notanahuatijcayo huan nohueyi chichualis. Huan nopa tacame cati techpalehuiyayaj para nitanahuatis huan cati techcon-sejomacayayaj pejqe techtemohuaj. Huan techtequitalijque sempa ipan notanahuatijcayo huan nijpixqui más tatepanitacayot que achtohuiya. ³⁷ Huajca ama na, niNabucodonosor, nijtepanita, huan nijhueyichihua, huan nijhueyitalía nopa Tanahuatijquet Ten Ilhuicac pampa nochi cati yaya quijtohua melahuac huan nochi cati quichihua xitahuac. Huan yaya quimati quenicatza quinpinahualtis masehualme cati mohueyimajtinemij.”

5

Nopa tajcuiloli ipan tapepecholi

¹ Huan miyac xihuit teipa quema ya tantoya itanahuatilis Nabucodonosor, pejqúi quihuica tequiticayot iixhui cati itoca eliyaya Belsasar. Huan Belsasar quichijqui se hueyi tacualisti huan quinnotzqui ma hualaca se mil masehualme cati huejhueyi cati nojquiya quipixque tequiticayot ipan itanahuatilis. Huan ipan nopa tacualisti Belsasar quiiyaya miyac xocomecat at cati ya xocoxtoya inihuaya itanotzalhua. ² Huan quema taiyayaj, Belsasar tanahuati ma quicuitij nopa tazas ten oro huan ten plata cati ihueyi tata, Nabucodonosor, quihualicatoya ten nopa tiopamit tatzejtzeltolc cati elqui ichaj Toteco Dios ipan alpetep Jerusalén. ³ Huan nopa tazas quihualicaque huan ipan taique Belsasar, itanotzalhua, isihuajhua huan nopa sihuame cati Belsasar quinaxcatijtoya. ⁴ Huan quema taiyayaj ipan nopa tazajme tatzejtzeltolcique, quinhueyichihuayayaj ininteteyohua cati quinchijtoyaj ica oro, plata, bronce, hierro, cuahuit huan tet.

⁵ Huan nimantzi ipan nopa talojtzi nesqui se maxti huan pejqúi tajcuilohua ipan nopa chipahuac tapepecholi ipan ichaj nopa tanahuatijquet iixmelac nopa taahuil quetzali. Huan nopa tanahuatijquet quitac nopa maxti cati tajcuilohuayaya, ⁶ huan ixayac chipahuixqui huan tahuel pejqúi majmahui. Pejqúi motancuatejtzetzone, huan yamanixqui imetzomiyó huan huetzqui. ⁷ Huan Belsasar pejqúi tahuejchihua chichahuac huan quinilhui ma quinnotza nopa tacame cati quincamanalhuáj ajacame, huan cati momachtíaj sitalime huan cati tetonalitaj. Huan quema ajsico, nopa tanahuatijquet quinilhui nopa talnamijca tacame:

—Sinta se ten amojuanti huelis quipohuas ni tajcuiloli huan techixtomilis taya quijtosnequi, nitanahuatis ma quiyoyontica ica yoyomit cati morado para tanahuatis. Huan quicuapilhullise se cadena ten oro ipan iquechta huan quipiyas nopa expa tequiticayot ipan nochi total.

⁸ Huan quema ya ajsitoyaj nochi nopa talnamijca tacame cati quitequipanohuayayaj nopa tanahuatijquet, amo aqui huelqui quipohua cati ijcuilijtoc, yon amo aqui huelyaya quixtomilis taya quijtosnequi. ⁹ Huajca nelía majmajqui Tanahuatijquet Belsasar, huan achi más chipahuixqui ixayac. Huan nochi nopa huejhueyi masehualme cati nozona itzttoyaj motequipachohuayayaj pampa amo quimatiyayaj taya moilhuse. ¹⁰ Pero nopa hueyi sihua tanahuatijquet cati eliyaya inana quicajqui quema tahuejchihuayaya icone inihuaya nopa huejhueyi masehualme cati quinnotztoya. Huajca inana calajqui campa tacuayayaj huan quiilhui:

—¡Totanahuatijca, xiitzto miyac tonali! Amo ximotequipacho, yon amo xiixchipahuia. ¹¹ Ipan motanahuatijcayo itztoc se tacat cati quiipya Itonal nopa Dios cati tatzejtzeltic. Huan quema mohueyi tata eliyaya tanahuatijquet, nopa tacat tenextili para nochi quimatiyaya huan para yaya talnamiqui quej se dios. Yeca mohueyi tata Tanahuatijquet Nabucodonosor quitali Daniel ma eli tacyanquet cati más hueyi que nochi talnamiquini huan nochi cati tetonalitaj huan cati momachtíaj sitalime huan cati tenahualhuíaj. ¹² Quichijqui ya ni pampa ni tacat, Daniel, cati nopa tanahuatijquet quitocaxti Beltsasar, quiitac para neltalnamiqui. Nochi quimati huan nochi quimachilía. Nojquiya hueli teyolmelahua cati quinequi quijtos nochi temicti huan nochi camanali cati ohui cati masehualme moilhuijtoque. Cati amo aqui más hueli quimachilía, yaya hueli. Huajca xijnotza Daniel, huan yaya mitzilhuis taya quijtosnequi cati ijcuilijtoc ipan tapepecholi.

¹³ Huajca quihuicaque Daniel iixpa huan nopa tanahuatijquet quitatzin-toquili:

—¿Ta tiDaniel, se ten nopa israelitame cati nohueyi tata, Nabucodonosor, quinhuilicac ten tali Judá?

Huan Daniel quinanquili:

—Quena, na.

¹⁴ Huan quiilhui:

—Techilhuijtoque para tijpiya Itonal Dios huan tijpiya se cuali talnamiquilisti huan nochi tijmachilía. ¹⁵ Ya techhualiquilijque nopa tacame cati más talnamiquij huan inijuanti cati quincamanalhuíaj ajacame para ma quipohuaca ni camanali huan techilhuisquíaj taya quijtosnequi. Pero yon se amo huelqui. ¹⁶ Pero nijcactoc para ta tihueli tiquixtoma tamanti huan tijmachilía nochi cati ohui. Huajca sinta huelis tijpohuas ni camanali huan techilhuis taya quijtosnequi, nitanahuatis ma mitzyoyontica ica yoyomit morado para titanahuatis, huan mitzcuaipilhuilise se costi ten oro ipan moquechta. Huan tijpiyas nopa expa tequificayot ipan notanahuatijcayo.

Cati quijtosnequi tajcuiloli ipan tapepecholi

¹⁷ Huajca Daniel quiilhui nopa tanahuatijquet:

—Amo teno nijnequi nijselis. Huelis tijmacas seyoc nopa tamanti. Pero quena, nimitzpohuilis nopa camanali cati ijcuilijtoc ipan tapepecholi huan nimitzilhuis cati quijtosnequi. ¹⁸ Nopa Dios Cati Más Hueyi quimacac mohueyi tata Nabucodonosor itanahuatilis cati tahuel hueyi. Amo aqui itztoya más hueyi que ya. Toteco quichijqui rico hasta quinpanoyaya nochi sequinoc huan quichijqui para nochi masehualme ma quitepanitaca. ¹⁹ Huan pampa Toteco quichijtoya ma eli hueyi, nochi masehualme ipan nochi talme huan cati huelyayaj camanaltij nochi camanali quimacasiyayaj hasta huihuipicayayaj iixpa. Yaya quipixqui chichualisti para quinmictis ajquiya quinequiyaya huan quincahuiliyaya ma itztoca

cati ya quinequiyaya. Cati quinequiyaya quinmacas se hueyi tequit, quinmacac huan nojquiya quinpinahuatlí ajquiya quinejqui. ²⁰ Pero quema pejqui mohueyimati huan moyoltetili iixpa Toteco Dios, Toteco quiquixti ten isiya yejyetzí campa tanahuatíyaya huan quiquixti nochi cati cuajcualtzi quipiyayaya. ²¹ Toteco quiquixti ten campa masehualme huan quimacac italnamiqulis se cuatitan tapiyali huan yajqui huan itztoya inihuaya cuatitan tapiyalme. Huajca mohueyi tata Nabucodonosor quicuaajqui sacat quej huacaxme huan quicuitapanxoloni nopa ajhuechti. Huan quej nopa mocajqui hasta quema quimachili para Dios Cati Más Hueyi quipiya tanahuatili ica nochi masehualme huan yaya quitalía ajquiya quinequi para tanahuatis campa ya quinequi. ²² Pero ta, titotanahuatijca Belsasar, masque tiiixhui huan tijmatiyaya taya ipantic, nojquiya amo timoechcapantali. ²³ Pero noja más timohueyimajtoc iixpa Toteco Dios cati itztoc ipan ilhuicac. Pampa titanahuati ma quitalica ipan momesa nopa tazas cati hualajqui ten itiopa Toteco Dios. Huan ta inihuaya motanotzalhua, ica mosihuajhua huan nopa sihuame cati timoaxcatijtoc antaique ipan nopa tazas. Huan ica nopa tazas amomaco anquinhueyichijque amoteteyohua cati anquinchijchijtoque ica oro, plata, bronce, hierro, cuahuit huan tet. Huan amoteteyohua amo tachiyaj, amo tacaquij, yon amo teno quimachilíaj. Huan Toteco Dios cati mitzmaca nemilisti mojmota, huan cati quijtohua canque tiyas quema timiquis, amo tijtepanitac yon se huelta. ²⁴⁻²⁵ Huan yeca Dios quititanqui nopa maxti cati quijcuilo nopa camanali, MENE, MENE, TEKEL, UPARSIN.

²⁶ “Huan ya ni cati quijtosnequi:

MENE: (Cati quijtohua Tapohuali.) Quinequi quijtos para Dios quipojtoc quesqui tonali huejcahuas motanahuatijcayo huan mitzilhuía para nimantzi tamis.

²⁷ TEKEL: (Cati quijtohua Tamachihuali.) Quinequi quijtos Dios mitztamachijtoc, Tanahuatijquet Belsasar, quej se quitamachihua se tamanti ipan balanza para quimatis sinta quiaxilis cati monequi o amo. Huan yaya quipantijtoc para ta mitzpolohua.

²⁸ UPARSIN: (Cati quijtohua Tatajcoitali.) Quinequi quijtos Toteco quitajcoitzoc motanahuatijcayo huan quinmacatoc tali Media huan Persia ehuaní.”

²⁹ Huajca nimantzi nopa Belsasar tanahuati ma quiyoyontica Daniel ica yoyomit cati morado huan ma quitalilica se cadena ten oro ipan iquechta. Huan quichijqui se tanahuatili para ma quimatica nochi para ipan nopa talojtzi Daniel pehuasquía quipiyas tequiticayot huan para san yaya, Tanahuatijquet Belsasar, huan itata quipiyase más tanahuatili que Daniel ipan itanahuatilis.

³⁰ Pero ipan nopa tayohua hualajque tacame ten tali Media huan quimictijque Belsasar cati quinnahuatíyaya nopa caldeojme. ³¹ Huan pejqui tanahuatía Darío cati hualayaya tali Media. Huan Darío quipiyayaya 62 xihuit quema quitzqui nopa tanahuatilisti.

6

Daniel ipan ostot campa tecuanime

¹ Huan Darío moilhui cuali para quitajcoitas nopa talme ipan itanahuatilis ica 120 estados huan ipan sese estado quitalis se gobernador para ma quipiya tanahuatili nopona. ² Huan nojquiya quintalisquía eyi tayanani cati quinahuatisquíaj nochi nopa 120 gobernadores ipan itanahuatilis. Huan nopa gobernadores quinpoihilisquíaj ni eyi tayanani cati

panoyaya ipan iniestado para quimocuitahuisse cuali. Quej ni nopa hueyi tanahuatijquet amo quipolosquía itomi. Huan Daniel eliyaya se ten nopa eyi cati quinnahuatiyayaj nopa gobernadores. ³ Huan nochí masehualme nimantzi quixmatque para Daniel eliyaya más talnamiqui que ne ome cati quihuicayayaj tequit ihuaya. Huan nojquiya eliyaya más talnamiqui que nochí nopa gobernadores pampa quipixqui se itonal cati nelcuali. Huajca nopa tanahuatijquet moilhui para quitálisquía Daniel para quinahuatisquía nochí talme ipan itanahuatilis. ⁴ Pero ne seyoc ome tayacanani ten gobernadores inihuaya nochí nopa gobernadores pejqe quitemohuaj quenicatza quitatelhuise Daniel para amo cuali quichihua itequi ipan nopa tanahuatilisti. Pero Daniel eliyaya se cuali tacat huan temachtí, huan yon se tamanti amo huelque quipantilíaj cati ica quitatelhuisquíaaj. ⁵ Huajca moilhuijqe se ica seyoc: “Amo quema tijpantise se tamanti ipan Daniel para ica tijtatelhuise sinta amo tiquijtose para amo cuali se tamanti cati quichihua pampa quineltoca itanahuatil iDios.”

⁶ Huajca nopa ome tayacanani inihuaya nopa gobernadores quisencajque cati quichihuase huan yajque camanaltitaj ita Tanahuatijquet Darío, huan quihuijqe:

—¡Totanahuatijca, xiitzo miyac tonali! ⁷ Nochi tojuanti titayacanani huan tigobrnadores, huan cati tijhuicaj tequiticayot moixpa ipan motanahuatijcayo huan nochí totapalehuicahua san sejco timoilhuijqe cati cuali tijchihuas. Timoilhuijaj cuali tijchihuas se tanahuatili o se acta para nochí mitzhueyitalise san ta para se metzti. Huan sinta se quihueyitalise o quitajtani tapalehuili seyoc iDios o seyoc tacat ipan ni metzti, monequi ma quimajcahuaca ipan nopa ostot campa itztoque tecuanime. ⁸ Huajca xijchihua nopa acta huan xijtali mofirma huan mosello para mochihuas se tanahuatili cati amo aquí huélis quisosolos quej eltoc nochí totanahuatilhua tiMedia huan tiPersia ehuaní.

⁹ Huajca nopa tanahuatijquet quijcuilo huan quitali itoca ipan nopa acta cati quipixqui nopa tanahuatili.

Daniel motatajtí quej nochipa quichijqui

¹⁰ Huan quema Daniel quimatqui para nopa acta ya quichijtoya, yajqui ichaj ipan nopa cuarto huejcapa campa momatajtí motatajtía ica Toteco Dios. Huan quitapo nopa ventanas para quitachilis iixmelac campa ica huejca ipan seyoc tali mocajqui altepet Jerusalén. Huan nozona quej ipa quichihuayaya, motancuaquetzqui iixpa Toteco Dios expa se tonal; huan motatajtí huan quitascamatqui. ¹¹ Huan nopa tacame mosentilijque huan yajque ichaj para tajtachiyatj. Huan quipantijque Daniel motatajtíyaya iixpa Toteco Dios huan quitajtaniyaya itapalehuil. ¹² Teipa injuanti yajque iixpa nopa tanahuatijquet huan quitatzintiquilijque ten nopa acta cati quichijchijtoya, quihuijqe:

—Totanahuatijca, ¿amo tijtali motoca ipan se amat cati quijtohua para amo aquí huéli motatajtis ica seyoc Dios, yon quitajtani itapalehuil seyoc tacat para se metzti? San nochí ma mitztemoca ta. Huan sinta se tacat amo quitoquilía motanahuatil, huajca quimajcahuase iijtic nopa ostot campa itztoque nopa tecuanime. ¿Amo quej nopa quijtohua nopa acta?

Huan Tanahuatijquet Darío quijto:

—Quena, quej nopa eltoc huan nopa cati ijcuilijtoc amo aquí huélis quipatas pampa quej nopa quijtohua totanahuatilhua tiMedia huan tiPersia ehuaní.

¹³ Huajca nopa tacame quijtojqe:

—Daniel, se ten nopa israelitame cati quinhualicaque ten tali Judá, amo mitztepanita, yon amo quitepanita nopa acta cati tiquijcuilojtoc pampa tiquiztoque noja quitajtania iDios expa se tonal.

¹⁴ Huan quema nopa tanahuatijquet quicajqui ni tamanti nelia mocueso. Huan pejqui quitemohua quenicatza quimanahuisquia Daniel. Huan quichijqui nochi cati huelqui hasta quema tiotaquixqui, pero amo teno huelqui quichijqui. ¹⁵ Huan nopa tacame sempa monextijque iixpa nopa tanahuatijquet huan quihhuijque:

—Totanahuatijca, cuali tijmati para tiMedia huan tiPersia ehuanitijpiyaj se tanahuatili cati quijtohua para amo aqui hueli quixpanos se acta cati quijcuilojtoc se totanahuatijca.

¹⁶ Huajca nopa tanahuatijquet tanahuati ma quinzotatij Daniel para quimajcahuase ipan ostot campa tecuanime. Huan nopa tanahuatijquet quihhui Daniel:

—Ma mitzmaquixti moDios cati mojmosta tijtequipanohua.

¹⁷ Huan quema ya quimajcaytoyaj Daniel ipan nopa ostot, quihualicaque se hueyi tef huan ica quicamatzejque cuali nopa ostot. Huan campa ilpitoc nopa tet, nopa tanahuatijquet quitalili isello huan nojquiya quintalili isello itapalehuicahua para amo aqui hueli quimanahuis. ¹⁸ Teipa nopa tanahuatijquet yajqui ichaj huan amo tacuajqui, yon amo cochqui, yon amo aqui quicahuili ma quitatzotzoniliqui quej momajtoya quichihua.

¹⁹ Huan quema tanesqui, mijquejqui huan nimantzi yajqui campa nopa ostot ica tecuanime. ²⁰ Huan quema monechcahuico nopa tanahuatijquet, quiztajtzi Daniel ica hueyi tequipacholi huan quihhui:

—Daniel, ta tiitequipanojca nopa Dios cati itztoc. ¿MoDios cati tijtequipanohua mojmosta mitzmaquixtijtoc ten nopa tecuanime?

²¹ Huan Daniel quinanquili:

—¡Totanahuatijca, xiiztzo miyac tonali! ²² Quena, noDios quititanqui iilhuicac eja huan quincamatzejqui ni tecuanime para ma amo techcococa pampa quimati para amo nijpiya tajtacoli ica ya huan amo teno amo cuali nijchijtoc ica ta.

²³ Huajca nopa tanahuatijquet nelia pajqui huan tanahuati ma quiquixtica Daniel. Huan quema quiquixtijque, amo cana quipantijque sinta quicocoytoya pampa motemachi ipan iDios. ²⁴ Huajca nopa tanahuatijquet tanahuati ma quincuitij nopa tacame cati quitelhuijtoyaj Daniel, ica inisihuajhua huan ininconeuhua, huan quinmajcajque osto ijtic campa itztoyaj nopa tecuanime. Huan ayemo onajsiyayaj hasta tatzinta quema nopa leones huitonque ininuitapa huan quincujque.

²⁵ Huajca Tanahuatijquet Darío quintajcuilhui nochi masehualme ipan nochi talme cati camanaltiyayaj nochi camanali huan ipan nopa amat quihhui:

¡Xiiztoca ica cuali!

²⁶ Ama na nijchihua se yancuic tanahuatili campa hueli ipan notanahuatijcayo. Nochi ma quitepanitaca huan ma quihueyimatica Daniel iDios. Pampa yaya nopa Dios cati yoltoc huan nochipa itztoc. Huan itanahuatilis amo aqui huelis quitamiltis. Yaya tanahuatis para nochipa.

²⁷ Yaya temaquixtia huan temocuitahuia.

Quichihua huejhueyi tamanti huan tanextili cati yejyetzti ipan ilhuicacti huan ipan taltipacti.

Yaya cati quimaquixtijtoc Daniel ten nopa tecuanime.

Quej nopa quijto nopa ley.

²⁸ Huajca Daniel quisqui nelía cuali ipan nopa hueyi tequit cati quichi-huayaya ipan itanahuatilis Darío, huan nojquiya teipa ipan itanahuatilis nopa Tanahuatijquet Ciro ipan tali Persia.

7

Nopa nahui tecuanime cati Daniel quintemijqui

¹ Ipan nopa achtohui xihuit para tanahuatis Belsasar ipan tali Babilonia, Daniel quipixqui se temicti huan ipan itemic quiitac miyac tamanti cati teipa panosquía. Huan quema isac, quiijcuilo cati quiitac para tepohuilis. ² Huan ya ni cati Daniel quiijcuilo:

“Tayohua ipan notemic niquitac hualajqui ten ilhuicac miyac ajacat cati chichahuac ajacayaya ten nahui lados huan tahuel quitilanayayaj nopa hueyi at. ³ Huan teipa nahui huejhueyi tecuanime quisque ipan hueyi at. Huan sese eliyaya sesen tamanti.

Nopa achtohui tecuani

⁴ “Nopa achtohui tecuani nesiyaya quej se león, pero quipixtoya ieltapalhua quej se hueyi cuatojti. Huan quema noja nijtachiliyaya, quiquixtilijque ieltapalhua para amo patanis. Huan quitananque campa huilantoya talchi huan quichijque ma quitetoni imetz huan ma moquetza ica ome iicxi quej se tacat. Huan quichijque ma quiipiya iyolo quej se tacat.

Nopa ompa tecuani

⁵ “Huan nijtachili nopa ompa tecuani huan nesiyaya quej se oso. Huan motananayaya ipan se ielchiqui más que ne seyoc, huan icamaco quipixtoya eyi elchiquihuit cati quitanquechijtoc. Huan quiilhuijque: ‘Ximoquetza huan xijcua miyac nacat.’

Nopa expa tecuani

⁶ “Huan nijtachili nopa expa tecuani huan nesiyaya quej se tecuani cati itoca leopardo, pero ipan icuitapa quipixqui eyi ieltapalhua quej se totot. Huan nojquiya niquitac para quiipiyaya nahui itzontecnhua huan quimacaque tanahuatili para ma tanahuati.

Nopa najpa tecuani

⁷ “Huan nopa najpa tecuani cati niquitac temajmati huan eliyaya nelfiero, huan quipixqui miyac chichualisti. Huan quiipiyayaya huejhueyi tancochti ten hierro. Huan quinhuejhuelo sequij icualancaitacahua ica itancoch, huan cati mocajque qaintzontamilti, huan ininpa moquejquetzqui ica iicxi. Yaya eliyaya seyoc tamanti tecuani huan amo quej ne sequinoc cati ya niqiztoya pampa quipixqui majtacti icuacua.

Nopa cuacuajti pisiltzi quiixnextía se tacat

⁸ “Huan quema noja nijtachilijtoya icuacua, niquitac para pejqui moscaltía seyoc icuacua cati pisiltzi. Huan nopa icuacua cati pisiltzi moscaltí huan quiquixti nopa eyi icuacua cati achtohui eltoya. Huan nopa cuacuajti pisiltzi cati sanoc quistoya quipixqui iixteyolhua quej se tacat huan se icamac ica cati camanaltiyaya para mohueyimatis.

Itanahuatijcayo Toteco Dios

⁹ “Huan noja nitachixtoya quema pejqui quitaliáj siyas yejectzitzí para ipan mosehuse tanahuatiani. Huan mosehui Yaya Cati Nochipa Itztoc. Huan iyoyo eltoya chipahuac quej nexti,

huan itzoncal nojquiya chipahuac quej borrego iijhuiyo cati tahuel tapaj-pacti.

Huan nopa siyaj campa mosehuijtoya tatayaya quej se tilelemecti, huan iruedas nopa siyaj nojquiya tatayaya.

¹⁰ Huan quisayaya iixpa cati eliyaya quej se hueyat ten tit.

Huan tahuel miyaqui miles ten ilhuicac ehuan ten ilhuicac quitequipanohuayaj.

Huan millones huan millones ten masehualme ijcatoyaj iixpa.

Huan yaya, nopa Juez, pejqui itequi,

huan quitapojque nopa amatapohualme para quitas cati quichijtoya sesen masehuali.

¹¹ “Huan na noja nijtachiliyaya huan nijcajqui mohueyimati camanalti nopa tacat cati elqui nopa cuacuajti pisiltzi. Huan noja nijtachiliyaya quema quimictijque nopa najpa tecuani, huan quihuejhuelojque itacayo huan quimajcajque ipan tit para ma tata. ¹² Huan quinquixtilijque ininchicahualis nopa sequinoc tecuanime, pero quincajque nochi nopa eyi ma noja itztoca se quentzi más tonali quej Toteco quixquetztzoya ma itztoca.

¹³ “Na noja nijtachiliyaya ni tamanti cati niquitayaya. Huan hualayaya ipan mixti se cati nesiyya quej Yaya Cati Mocuetqui Masehuali. Huan yaya yajqui campa itztzoya Yaya Cati Itztoc Nochipa, huan itequipanojcahua quihualicaque ma monextiqui iixpa. ¹⁴ Huan Yaya Cati Itztoc Nochipa quimacac Yaya Cati Mocuetqui Masehuali tequiticayot para tanahuatis huan miyac tatepanitacayot huan chicahualisti. Huan nochi masehualme ipan nochi talme, huan masehualme cati quimatiyayaj nochi camanali ipan taltipacti itztzoyaj ipan itanahuatilis huan quihueyichijque Yaya Cati Mocuetqui Masehuali. Huan itequiticayo para tanahuatis huejcahuas para nochipa, huan itanahuatilis amo quema panotehuas, yon amo aqui huelis quitamiltis.

Cati quinequi quijtos itemic Daniel

¹⁵ “Huan na niDaniel, amo nijmati taya nimoilhuis pampa amo nijmachili cati niquitayaya huan nelía nimocuesohuayaya. ¹⁶ Yeca nijnechcahui se ilhuicac ejca Toteco cati ijcatoya nozona huan niquilhui ma techixtomili nochi nopa tamanti. Huan quej ni techilhui: ¹⁷ ‘Nopa nahui tecuanime quixnextiaj nahui tanahuatiani cati tanahuatise ipan ni taltipacti. ¹⁸ Pero teipa nopa tatzejteloltijca masehualme cati iaxcahua Toteco Cati Más Hueyi quiselise nopa tanahuatilibi cati amo quema tamis huan injuanti tanahuatise para nochipa.’

Majtacti tanahuatiani

¹⁹ “Huan na noja nijnequiyaya nijmatis ten nopa najpa tecuani cati amo quej ne sequinoc huan ajquiya quixnextiyaya pampa tahuel temajmatiyaya. Quipixtoya itancoch ten hierro, huan iisti ten bronce cati ica tatamiltiyaya huan tahuejhuelohuayaya. Huan cati cuechtic mocahuayaya, yaya ipan moquejquetzayaya ica iicxi. ²⁰ Nojquiya nijnequiyaya nijmatis ten nopa majtacti icuacua cati quipixtoya ne tecuani. Huan nijnequiyaya nijmatis ten nopa cuacuajti pisiltzi cati talnamiq pampa quipixtoya ixteyoli huan se camacti cati mohueyimati camanaltiyaya. Teipa nopa icuacua cati pisiltzi nesiyya para más hueyi eliyaya que ne sequinoc huan nopa eyi cuacuajti huetzqui iixpa para quimacase lugar. ²¹ Huan teipa niquitac para nopa cuacuajti cati pejqui pisiltzi tatehuiyaya inihuaya nopa tatzejteloltijca masehualme cati iaxcahua Toteco Cati Más Hueyi. Huan nopa cuacuajti quintaniyaya ²² hasta ajsico Yaya Cati Itztoc Para Nochipa huan quintaj-tolsencahuaco xitahuac por itatzejteloltijca masehualhua Yaya Cati Más

Hueyi. Huan teipa ajsic hora para itatzejtzeloltijca masehualhua quiselise nopa tanahuatilisti huan pehuase tanahuatise.

²³ “Huan iilhuicac ejca Toteco quijto: ‘Nopa najpa tecuani elis nopa najpa tanahuatilisti cati oncas ipan ni taltipacti. Huan amo elis quej ne sequinoc pampa más fiero elis. Quisosolos nochi ipan taltipacti huan ipan moquejquetzas. Nochi quichihuas cuechtic. ²⁴ Nopa majtacti cuacuajti quinixnextía majtacti tanahuatiani cati hualase ten ni najpa tanahuatilisti. Huan teipa quema tamis inintanahuatijcayo nopa majtacti, motananas seyoc tamanti tanahuatijquet cati amo quej injuanti cati achtohui. Huan yaya quinmictis eyi ten nopa majtacti tanahuatiani. ²⁵ Huan nopa tanahuatijquet cati quixnextía nopa pisiltzi cuacuajti, quimahuissolos Toteco Cati Más Hueyi, huan quintajiyohuiltis itatzejtzeloltijca masehualhua. Huan quinequis quipatas inintanahuatilhua huan ipan taya tonali oncas iniilhui. Huan itatzejtzeloltijca masehualhua Toteco, yaya Cati Más Hueyi, itztose imaco nopa tacat para eyi xihuit huan tajco.

²⁶ “ ‘Pero teipa mosehuis Toteco Dios, nopa Juez, huan pehuas tetaj-tolsencahuas. Huan Toteco quiquixtilis itequiticayo nopa fiero tacat cati quixnextía nopa cuacuajti cati pejqui pisiltzi. Huan Toteco quitamisolos ichichualis huan quitamiltis para nochipa.

²⁷ “ ‘Huan teipa nochi tanahuatiani huan nochi talme cati tanahuatíaj ipan ni taltipacti ihuaya nochi inintatepanitacayo huan inihueyitilis quinmactilis nopa tatzejtzeloltijca masehualme cati iaxcahua Toteco Cati Más Hueyi. Huan itanahuatilis elis se tanahuatilisti cati huejcahuas para nochipa. Huan nochi cati tanahuatíaj campa hueli techaj ipan taltipacti quitequipanose huan quineltocase.’

²⁸ “Ni ya nochi cati nijtemijqui. Huan na niDaniel, nelía nimocueso huan nimoixchijpajqui, pero amo aqui niquilhui ten ni tamanti.”

8

Nopa oquich borrego huan nopa oquich chivo

¹ “Huan quema Tanahuatijquet Belsasar yahuiyaya para eyi xihuit tanahuatis, na, niDaniel, nijpajqui seyoc temicti quantzi quej nopa cati achtohuiya. ² Huan quema nitemiQUIYAYA, niQUITAC para niITZTOYA ipan nopa tequicali ipan altepet Susa cati mocahua ipan nopa estado Élam. Huan nijcatoya iteno nopa hueyat Ulai. ³ Huan nijcotachixqui huan niQUITAC se oquich borrego cati itztoya iteno nopa hueyat. Huan nopa oquich borrego quipixtoya ome icuacua cati huehueyac, pero se icuacua pejqui moscaltía teipa huan ya nopa cati mochijqui cati más huehueyac. ⁴ Huan niQUITAC para nopa oquich borrego tatonpojhuuiyaya ica icuacua campa temo tonati, huan ica norte huan ica sur pampa quintehuisneQUIYAYA talme ipan nochi ni lados. Huan yon se amo hueliyaya quitani, yon amo hueliyaya momanahuía quema quiajsiyaya pampa eliyaya nelía chichahuac huan nochi qintaniyaya. Huan quichijqui san cati ya quineQUIYAYA huan mochijqui nelía hueyi itanahuatilis.

⁵ “Huan noja nimoilhuiyaya ten niQUITZTOYA quema niQUITAC para hualayaya se oquich chivo campa temo tonati. Huan nelchichahuac hualayaya hasta iicxi amo ajsiyaya talchi. Huan ni oquich chivo san quipiyayaya setzi hueyi cuacuajti tatajco iixteyol. ⁶ Huan quema ajsito campa nopa oquich borrego cati quipiyayaya ome icuacua cati niQUITZTOYA nechca nopa hueyat, motalo para quitehuis ica nochi icualancayo huan ica nochi itetilis. ⁷ Huan quitapanili nopa ome icuacua nopa oquich

borrego pampa amo quipixqui fuerza para ihuaya motehuis, yon amo aqui hueliyaya químanahuis ten nopa oquich chivo cati tetic hualajqui. Huan nopa chivo quitanqui nopa oquich borrego huan quitahuiso huan ipan moquejquetzqui. ⁸ Huan nopa chivo nelía mohueyimatqui huan mocuili noja más fuerza. Huan quema mochijtoya nelletic, postejqui icuacua cati hueyi huan nozona pampa tatzquitoya, quisqui seyoc nahui cuacuajti cati tanextiyaya najcac pampa ipan nochí inacastá quinequiyaya tatehuiti.

⁹ “Huan ipan se ten nopa cuacuajti quisqui seyoc cuacuajti cati quentzi pisiltzi cati moscaltí huan ontachixtoya para tatehuiti ica sur, huan campa hualquisa tonati huan campa Israel, nopa Tali Yejectzi. ¹⁰ Huan ichicahualis quiajsic ilhuicacti huan yaya inihuaya motehui iilhuicac ejcagua Toteco huan quintahuiso sequij ilhuicac ehuani huan sitalime ten ilhuicac para tatzinta huan ipan moquejquetzqui. ¹¹ Huan mohueyichijqui hasta ica motali nopa Tayacanquet ipan nopa Tali Yejectzi. Huan yaya cati quixnextía nopa cuacuajti ayecmo quinchahuili imasehualhua Toteco ma quimacaca Toteco nopa tacajchualisti cati monequi mojmosta. Huan quichijqui amo tapajpacti nopa tiopan calijtic campa quihueyichihuaj. ¹² Huan mosisinyaya yaya cati quixnextiyaya nopa cuacuajti, huan Toteco quincajqui imasehualhua imaco. Nojquiya quicahuili ma quitilquetza nopa tacajchualisti cati quincacahuayayaj mojmosta. Huan ne tacat cati eliyaya nopa cuacuajti quicuesijcaitac cati melahuac, huan quichijqui san cati yaya quinequiyaya, huan nochí cati quichijqui quisqui cuali para ya.

¹³ “Teipa nijcajqui se iilhuicac ejca Toteco quitatzintoquiliyaya seyoc iilhuicac ejca: ‘¿Quesqui tonali huejchahuas ni tamanti cati ya ni quixnextía? ¿Quesqui tonali motilquetztos nopa tacajchualisti cati quimacaj mojmosta? ¿Quema tamis para quichihuas nopa fiero tajtacoli cati quichihuas amo tapajpacti nopa tiopamit campa quihueyichihuaj Toteco?’ ¿Quesqui tonali ipan moquejquetztos imasehualhua Toteco?’ ¹⁴ Huan ne se iilhuicac ejquet quinanquili: ‘Quitilquetzase nopa tacajchualisti cati monequi temacase se ica ijnaloc huan se ica tiotac hasta oncas 2 mil 300 tacajchualisti cati amo quimacase. Teipa quena, quipajpacase nopa taixpamit huan sempa quiyocatalise para Toteco.’

Cati quinequi quijtos itemic Daniel

¹⁵ “Huan quema na, niDaniel, nijtachiliyaya ni tamanti huan nijnequiyaya nijmachilis yaya quijtosnequi, monexti noixpa se cati nesiyaya quej se tacat.

¹⁶ Huan nijcajqui itoscac se tacat cati hualayaya ten campa nopa hueyat Ulai, huan quijto: ‘Gabriel, xiquilhui ne tacat cati quita.’

¹⁷ “Huan Gabriel technechahui campa nimoquetztoya. Huan nelía nimomajmati, huan nimotancuaquetzqui huan nimohuijtzonqui talchi, pero yaya techilhui: ‘Ta titacat, xijmachili para nochí cati tiquitac quixnextía tamanti cati panos teipa quema hualas itamiya tonali.’

Cati quijtosnequi itemic elis para teipa

¹⁸ “Huan quema nechcamanalhuiyaya, tahuel nicochqui campa nihuetztoya talchi, pero yaya techitzqui, huan quichijqui ma nimoquetza. ¹⁹ Huan techilhui: ‘Niutzoc nica para nimitzilhuis ten panos teipa ipan itamiya tonali quema oncas hueyi taijyohuillisti pampa Toteco Dios tenextilis icualancayo. Cati tiquitac quixnextía tamanti cati panos teipa nechca quema tamis tonali. ²⁰ Nopa oquich borrego cati tiquitac ica ome icuacua quixnextía nopa tanahuatiani ten tali Media huan Persia. ²¹ Huan nopa oquich chivo pachontic, yaya quixnextía itanahuatilis tali Grecia. Huan ihueyi cuacua cati quipixtoya tatajco iixteyolhua quijtosnequi iniachtohui tanahuatijca.

²² Huan nopa nahui cuacuahti cati quisque quema iachtohui cuacua poste-
jqui, quinequi quijtos para ipan ni tali motananase nahui tanahuatiani ipan
nahui tanahuatijcayot, pero amo quipiyase chichahualisti quej nopa achtohui
quixqui.

²³ “Huan teipa quema ya tantiyas inintanahuatijcayo nopa tanahuatiani
ten tali Grecia huan injuanti quichijtose cati pano fiero, motanas se
tanahuatijquet cati ixcialantoc huan nelía talnamiqui para tacajcayahuas.

²⁴ Yaya mochihuas nelía hueyi huan quipiyas miyac chichahualisti, pero
nopa chichahualisti amo elis ya ichichahualis. Quinsolos talme campa hueli
hasta amo teno mocaahas. Huan tatanis ipan nochi cati yaya quinequis
quichihuas. Quintamiltis huejhueyi masehualme huan nojquiya quinmic-
tise miyaqui ten nopa tatzejzeloltijca masehualme cati iaxcagua Toteco.

²⁵ Nopa tanahuatijquet elis se tacajcayajquet, huan yeca cuali quimatis
quenicatza tacajcayahuas huan quintanis miyac masehualme cati ipan
motemachijtose. Yaya tahuel mocualitas huan mohueyimatis hasta pehuas
quitehuis nopa Tanahuatijquet Cati Más Hueyi Que Nochi Tanahuatiani.
Pero nozona Toteco quitahuisos masque yon se tanahuatijquet ipan talti-
pacti amo huelqui quitanis. ²⁶ Ya nimitzilhuijtoc cati tiqitac huan quesqui
tiotac huan ijnaloc amo oncas tacajcchahualisti, huan nochi ya ni melahuac,
pero ama amo aqwi xiquilhui cati tiqiztoc. Xicajocui ipan moyolo pampa
noja polihui miyac tonali para panos.’

²⁷ “Huan teipa na, niDaniel, nijmatqui para techtamiquixtili nochi no-
fuerza, huan nimococohuayaya para se ome tonati. Teipa nimotananqui
huan noja nijpalehuiyaya nopa tanahuatijquet ipan itequi ipan nopa tali.
Pero tahuel nimotequipachohuayaya ica nopa temicti cati nijpixqui pampa
amo nihuelqui nijmachilía.

9

Israelitame itztose 70 xihuit ipan sequinoc talme

¹ “Huan teipa Darío, cati elqui icone Asuero ten tali Media, mochijqui
tanahuatijquet ipan inintanahuatijcayo caldeo masehualme. ² Huan ipan
nopa achtohui xihuit ipan itequi, na niDaniel, nimomachtiyaya Icamanal
Toteco ipan iama Jeremías cati huejcajquiya elqui se itajtolpanextijca Toteco
Dios. Huan nozona nijpanti campa Toteco quinextilijtoya para quiaxitis 70
xihuit para mocaahas semantoc altepet Jerusalén.

Daniel tajtani tapojpolhuili por nochi israelitame

³ “Huan pejqui nimotatajtía ica Toteco Dios ica nochi noyolo huan nijtaj-
taniyaya ma quitamilti nopa tonali ten tatzacuilti. Huan nimosahuayaya,
huan nimoyoyontiyaya ica yoyomit cati fiero huan nimosehuijtaya ipan
cuajnexti.

⁴ “Nijtenpojqui huan nijpanexti iixpa noTECO Dios nochi notajtacolhua
huan nochi nomasehualhua inintajtacolhua. Huan quej ni niquilhui:

“¡Ay Toteco! Ta cati tahuel tihueyi huan tahuel titemajmati. Amo aqwi seyoc
quej ta. Nochipa techicnelía quej timocajtoc para tijchihuas nochi to-
juanti cati timitzicnelíaj huan cati tijchihuj motanahuatilhua. ⁵ Pero
tahuel miyac tijatcolchijtoque moixpa huan tahuel titaixpanotoque
ica ta. Timotzontetilijtoque huan tijtahuelcajtoque motanahuatilhua
huan mocamanal. ⁶ Amo tiqintacaquilijqe motequipanojcahua,
nopa tajtolpanextiani cati ta techtitanili para ma technojnotzaca.
Injuanti talojtitzti hualayayaj huan quinpoquihuiyayaj tohuejcapan

tatahua, totequiticahua huan totanahuatijcagua ten ta. Quena, quinpo huilijtihualayaj nochi israelitame ten ta.

- 7 “Toteco, ta nelía tixitahuac, pero tojuanti tiisraelitame, nelía tiitztoque se pinahualisti pampa titajacolchijtoque. Quena, tipinahuaj tiisraelitame cati tiehuani altepet Jerusalén, huan nochi tali Judá, huan nochi nopa tali Israel. Techpinahualtia nochi cati tijchijtoque nochi tiisraelitame masque tiitztoque nechca total o huejca ipan ten hueli tali campa techhuicatoque por totajacolhua. ⁸ Quena, TOTECO, miyac tipinahuaj moixpa nochi tojuanti hasta totanahuatijcagua, totequificahua huan tohuejcapan tatahua pampa titajacolchijtoque miyac ica ta. ⁹ Pero ta, TOTECO Dios, titetasojta huan titetapojpolhuía masque quichijtoque cati fiero moixpa. ¹⁰ Pero tojuanti amo tijtacaquilijque cati techilhui, TOTECO, yon amo tijtoquilijtoque motamachtil cati techmacac ica motajtolpanextijcagua. ¹¹ Nochi tiisraelitame tiquixpanotoque motanahuatilhua huan timoiyocaquixtijtoque, huan amo timitzneltoquilijque cati techilhui. Yeca huetztoc topáni nopa tatechihualisti cati ijcuilijtoc ipan itanahuatilhua Moisés, motequipanojca, pampa miyac titajacolchijque ica ta. ¹² Huajca ta Toteco, tijchijtoc cati techilhui huan cati tiquinilhui totayacancahua cati technahuatiyayaj para tijchihuasquia. Ta techhualiquili ni tequipacholi cati nelía hueyi, pampa amo quema oncatoya ipan taltipacti seyoc tamanti san se quej ni tatzacuiliti cati huetztoc topáni tijerusalén ehuani. ¹³ Eltoc senquisa quej ijcuilijtoc ipan itanahuatilhua Moisés. Nochi ni taijyohuilisti hualajtoc topáni, pero amo timitztemojtoque para tijchihuase mopaquilis, TOTECO Dios. Amo tijcajtejtoque totajacolhua para tijtemose cati melahuac. ¹⁴ Yeca, TOTECO, ta techsencahuilijtoc ni tatzacuiliti. Huan tijtitantoc topáni pampa ta tixitahuac huan xitahuac nochi cati tijchijtoc. Pero noja amo timitztacaquilijtoque.
- 15 “Toteco Dios, ta huejcajquiya ica mohueyi chichualis tiquinquixti momasehualhua ipan tali Egipto, huan yeca nochi quicactoque ten ta campa hueli. Ama sempa ximonexti huan techpalehui pampa titajacolchijtoque huan tijchijtoque cati fiero. ¹⁶ Yeca, Toteco, quej quinamiqúi ica nochi cati xitahuac tijchijtoc, xijchihua se favor ayecmo xicalani ica moaltepe Jerusalén, yon ayecmo xicalani tohuaya cati nopona tiehuani pampa ya nopa moaltepe tatzetzzeloltic. Huan ama por totajacolhua huan inintajacolhua tohuejcapan tatahua, nochi talme nejnechca ica paquij moaltepe Jerusalén huan toca paquij tojuanti timomasehualhua.
- 17 “Toteco Dios, ama xijtacaquili ni nonetatajtil nimotequipanojca. Xijchihuili cuenta cati nimitztajtanía para masehualme sempa ma mitzhueyimatica. Xijtasojta motiopa pampa mocajqui sosoltic, huan sempa xijcualtali.
- 18 “¡Ay Toteco Dios! Xijtacaquili huan xijchihuili cuenta cati nimitztajtanía. Cual xijtachili ten ipantitoc huan quenicatza quicajtoque nopa altepet cati nochi quimatij para moaxca. Amo timitztajtaníaj techpalehui pampa ticuajcualme, pampa amo cana, pero timitztajtaníaj pampa nelía hueyi moyolo.
- 19 “¡Ay Toteco, techtacaquili! ¡Ay Toteco, techtapojpolhui! ¡Ay Toteco, xijcaqui nocamanal! Xijchihua cati nimitztajtanía huan amo xihuejcahua para techpalehuis. Nochi masehualme sempa ma quitaca mohueyitilis

pampa nochi quimatij para Jerusalén moaltepe huan tiisraelitame timomasehualhua.”

Panos 490 xihuit hasta monextis nopa Mesías

²⁰ Huan nimotatajtiyaya huan iixpa TOTECO Dios nijpanextiyaya notatcolhua huan inintajtacolhua nomasehualhua, nopa israelitame. Huan nijtajtaniyaya Toteco Dios ma techelnamiqui huan ma quielnamiqui ialtepe cati tatzejtzelocti. ²¹ Huan nechca nopa hora ica tiotac quema monequi quimacase itacajcahualis Toteco quema noja nimotatajtiyaya, patantihualajqui ten Toteco nopa ilhuicac ejquet cati itoca Gabriel huan ajsico campa na niitztoya. Yaya cati niqiztzoaya achtohuiya ipan se temicti. ²² Huan Gabriel nechilhui:

“Daniel, ama nihualajtoc para nijchihuas xijmachili cuali cati panos teipa.

²³ Quema tijpehualti timotatajtía, Toteco Dios technahuati taya ma nimitzilhuiqui. Huan na ama nihualajtoc para nimitzilhuis cati Toteco quichihuas ica momasehualhua. Yaya quinequi xijmati pampa tahuel mitzicnelía. Huajca ama, xijtacaquili cuali cati nimitzilhuis para huelis tijmachilis cati oncas teipa ipan itamiya tonali huan cati eltoya ipan nopa temicti.

²⁴ “Toteco tanahuatijtoc para motatzejtzeloctijca altepe huan momasehualhua ma taijyohuica para 490 xihuit más o para ma panoca 7 xihuit 70 hueltas. Ica ya nopa, momasehualhua quicajtehuase inintajtacolhua huan ayecmo quichihuase cati fiero. Huan Toteco quintapojpolhui inintaixpanolhua. Teipa ipan taltipacti pehuas nopa tanahuatilisti campa nochi elis xitahuac huan nopa tanahuatilisti huejcahuas para nochipa. Nopona motamichihuas nochi cati itajtolpanextijcahua Toteco quijijtoque. Huan ipan nopa tonali, quialtis ica aceite para quitequitalis Yaya Cati Tahuel Tatzejtzelocti senquisa quej itajtolpanextijcahua Toteco huejcajquiya quijijtoque para panos.

²⁵ “Huajca xijtacaquili. Sinta se pehuas quipohuas sesen xihuit ten quema temacase nopa tanahuatili para sempa ma quicualchijchihuaca altepet Jerusalén, elis 49 xihuit o 7 xihuit panos 7 hueltas. Huan teipa elis seyoc 434 xihuit o 7 xihuit panos 62 hueltas hasta ajsis nopa Mesías, nopa tanahuatijquet cati Toteco Dios quijijto techtitanilisquía. Huan sempa quicualchijchihuase Jerusalén ica icalles huan tepamit, masque ohui para quichihuase.

²⁶ “Huan teipa quema ya panotos nopa 434 xihuit, nopa Mesías quimictise huan nesis quej amo teno quipiya. Teipa hualase isoldados nopa fiero tanahuatijquet cati tiquitac ajsico para quisosoloquij Jerusalén huan itiopa Toteco. Huan quema hualase, elis quej quema hualas tahuel miyac at cati nochi tasosolojtiquisa. Huan teipa panos cati quijijtoque itajtolpanextijcahua Toteco. Oncas tatehuilisti huan tasosololisti hasta itamiya. ²⁷ Ni fiero tanahuatijquet quisencahuas se camanali ica miyac masehualme para chicome xihuit, pero quema ajsis itajcoyo nopa chicome xihuit, moyolcuepas ica taya quijijto huan tanahuatis para israelitame ma ayecmo temacaca tacajcahualisti para Toteco. Amo quincahuilis quimacase Toteco tacajcahualisti ten tapiyalme, yon ten harina. Huan amo san ya nopa quichihuas, nojquiya quitalis campa taixpamit ipan tiopamit se tamanti cati fiero cati nochi quijiyase. Huan nopa cati quitalise quichihuas nopa tiopamit senquisa amo tapajpacti iixpa Toteco. Pero Toteco ya quijijtoctoc para quitzontamiltis nopa fiero tacat por cati quichihuas ipan itiopa.”

10

Daniel quítac se tacat ica itatanex

¹ Huan quema Tanahuatijquet Ciro yahuiyaya para eyi xihuit tanahuatis ipan tali Persia*, Toteco techmacac na, niDaniel, cati nojquiya notoca Beltsasar, seyoc tanextili quej se temicti. Huan nopa camanali cati nijseli elqui melahuac. Techpohuili ten se hueyi tatehuilisti cati hualas ipan imasehualhua Toteco. Huan nijmachili taya quinequi quijitos.

² Huan quema nijseli nopa tanextili, na niDaniel, nimotequipacho para eyi samano huan nijtemo Toteco. ³ Amo nijcuaajqui pantzi tasasaltili, yon amo nijyeco nacat, yon xocomecat at. Yon amo nimotalili yon se taajhuiyacayot hasta quema panoc nopa eyi samanos.

Hualajqui se ilhuicac ejca Toteco ten ilhuicac

⁴ Huan ica ijnaloc ipan 24 itequi nopa achtohui metzti ipan toisraelita calendario†, niijcatoya iteno nopa hueyi hueyat cati itoca Tigris. ⁵ Huan nitachixqui huan niquitac se tacat cati moyoyontijtoya ica nopa cuali yoyomit cati itoca lino huan quipixtoya itajcoilpica cati senquisa oro cati más cuali. ⁶ Itacayo nopa tacat petaniyaya quej nopa piltetzi cati patiyoy cati itoca topacio. Ixayac petaniyaya quej quema tapetani huan iixteyol nesiya quej tixochit. Imax huan imetz petaniyaya quej bronze cati quitalijtoya ipan tit huan teipa quipojtojtoy miyac hasta nelía cahuani. Huan quema nijcajqui itoscac, eliyaya quej miyac masehualme cati tahuejchihuaj chicahuac.

⁷ Huan san na, niDaniel, niquitac nopa tanextili, pero nopa tacame cati itztoyaj nohuaya amo quitaque, san quinajsic se hueyi majmajti huan motalojteque huan motatitoy. ⁸ Huajca na niitztoya noseltitzi quema niquitac ni hueyi tanextili. Huan quema niquitac, niixchipahuixqui huan niyamanixqui. Nelía nimomajmati huan tanqui nofuerza. ⁹ Huan quema nijcajqui cati camanaltic, nihuetzqui ica noxayac talchi huan tahuel nichochqui.

¹⁰ Huan se techitzqui ica imax huan techtanangui hasta huelqui ni manejenenqui talchi. ¹¹ Huan techilhui: “Daniel, Toteco tahuel mitzicnelía. Ximoquetza huan xijtacaquili cuali cati nimitzilhuis pampa techtitantoc ma nimitzitaqui.”

Para ten huejcajqui nopa ilhuicac ejquet

Huan quema quej nopa techilhui, na nimoquetzqui noja nihuihuipicayaya. ¹² Huan yaya techilhui: “Amo ximajmahui, Daniel, pampa hasta nopa achtohui tonali quema pejqui timosahua huan timoicnonejqui iixpa Toteco Dios quitacaquili monetatajtíl. Huan pampa tijnequiyaya tijmachilis nopa tamanti cati ohui, Toteco Dios techhualtitanqui ma nihuala. ¹³ Pero nopa amo cual ajacat cati quiyiya tanahuatili ipan nopa tanahuatilisti ten Persia techojtzajqui huan techtehui 21 tonali. Pero Miguel, se hueyi tayacanquet ten ilhuicac ejcahua Toteco techpalehuico pampa niitztoya noseltitzi ihuaya nopa amo cual ajacat cati quiyiya tanahuatili ipan tali Persia. ¹⁴ Pero ama niajsitoc para nimitzilhuis cati quinpanos momasehualhua ipan itamiya tonali. Pampa nopa cati tiquitztoc quiixnextia cati polihuiyoc tahuel miyac xihuit para panos.”

Nopa ilhuicac ejquet quifuerzajmacac Daniel

¹⁵ Huan quema nijcajqui cati techilhuiyaya, na nisentachixtoya talchi, yon amo hueliyaya niquijtohua yon se camanali. ¹⁶ Teipa se cati nesiya

* 10:1 10:1 Ipan 536 a.C. † 10:4 10:4 Ipan 23 itequi abril, 536 a.C.

quej se tacat quitoxonqui notencuetaxo. Huajca nihuelqui nicamanaltic huan niquillhui cati itzfoya noixpa: “Nopa cati niquitztoc para quinajsis noisraelita teixmatcahua, nelía techyolcocojtoc hasta ayecmo nijpiya fuerza. ¹⁷ ¿Quenicatza huelis na, nimotequipanojca, nimitzcamanalhuis quema amo nijpiya tetili huan ta nelía tihueyi? Yon amo nihueli nitaijyotilana.”

¹⁸ Huajca yaya cati nesiyaya quej timasehualme sempa techitzqui huan techmacac fuerza. ¹⁹ Huan techilhui: “¡Amo ximajmahui! San ximoyoltali pampa Toteco Dios tahuel mitzicnelía. Ximosemaca huan ximoyoltetili.”

Huan quema noja nechcamanalhuiyaya, nijmatqui para nijpixtiyajqui fuerza, huan niqijto: “Technojnotza ama, tate, pampa ya techfuerzajmacac.”

²⁰⁻²¹ Huajca techilhui: “Nimantzi monequi nimocuepas para nijtehuis nopa amo cual ajacat cati quipiya tanahuatili ipan tali Persia. Huan quema nimotehuiti ihuaya, nojquiya hualas nopa amo cual ajacat cati tanahuatía ipan tali Grecia para quipalehuis. Huan quema nimotehuis inihuaya, san Miguel, nopa ilhuicac ejquet cati quinmocuitahuía israelitame, itzto nozona para techpalehuis. Pero achtohui nimitzilhuis cati ijcuilijtoc ipan nopa Amatajcuiloli Cati Melahuac, pampa yeca nihualajtoc.

11

¹ “Na nojquiya nijfuerzajmacac huan nijpalehui nopa ilhuicac ejquet Miguel ipan nopa achtohui xihui ten itequi Darío quej tanahuatijquet ipan tali Media. ² Huan ama nimitznexilis cati melahuac.

Cati panoc quema tanahuatiyayaj Persia ehuan

“Itzose eyi más tanahuatiani cati tanahuatise ipan tali Persia. Teipa oncas seyoc tanahuatijquet cati ica elis nahui. Huan nopa najpa tanahuatijquet moricojchihuas hasta quinpanos cati quipixque nopa achtohui eyi tanahuatiani. Huan quema mochihuas nelía tetic por itomi, quinajcomanas nochi masehualme ipan itanahuatilis para ma quitehuica tali Grecia.

Cati panoc quema tanahuatiyayaj nopa Grecia ehuan

³ “Pero teipa nozona ipan tali Grecia, motananas se tacat para mochihuas tanahuatijquet huan yaya quipiyas miyac chichahualisti huan quinahuatis tahuel miyac talme. Quichihuas san cati ya quinequis. ⁴ Pero quema ya moaxcatijtos miyac talme, nopa talme ipan itanahuatilis mococotzase. Huan itanahuatilis moxelos ica nahui partes, huan mochihuas nahui tanahuatijcayome; se ica sur, se ica norte, se campa hualquisa tonati huan se campa temo tonati. Huan yon se ten nopa tanahuatilisti amo quipiyas chichahualisti quej quipixqui quema san se eliyaya. Huan amo quiselis tanahuatili yon se icone nopa hueyi tanahuatijquet para tanahuatis ipan se ten nopa nahui talme. Sequinoc nahui tanahuatiani quiselise.

Tanahuatijquet ten tali Egipto

⁵ “Huan se ten nopa nahui, yaya cati tanahuatía ipan Egipto ica sur, mohueyichihuas. Pero teipa se itapalehuijca cati quihuica tequiticayot ihuaya mosentanchihuas ica ya huan mocuilis itanahuatilis. Huan teipa yaya cati mocuili itanahuatilis quipiyas más chichahualisti que cati tanahuati achtohui. ⁶ Teipa ica se ome xihuit, nopa tanahuatijquet ten sur huan nopa tanahuatijquet ica norte quichihuase se camanali. Huan nopa tanahuatijquet ica sur quimacas nopa tanahuatijquet ica norte iichpoca para ma monamicti ihuaya. Moilhuis para quej nopa moyoltalise nopa ome talme. Pero amo quisas cuali quema motahuicaltise. Seyoc quimictis nopa ichpocat ihuaya itequipanojcahua cati ihuaya yajque quema monamicti. Nojquiya

quimictise icone cati nozona tacatis. Huan nojquiya quimictise nopa tanahuatijquet cati ihuaya monamicti huan cati eliyaya itata nopa conet. Yeca amo quisas cati moilhuyaya quichihuas itata nopa ichpocat, yaya cati tanahuatijquet ica sur. Yaya moilhui para se tonali tanahuatis campa norte se iixhui cati quitacatilisquia iichpoca, pero amo. Teipa nojquiya miquis nopa tanahuatijquet ica sur.

⁷“Huan itelpoca nopa tanahuatijquet ica sur, yaya cati iicni nopa ichpocat, mochihuas tanahuatijquet campa itztoya itata. Huan ya inihuaya isoldados quitehuitij yaya cati teipa mochihuas tanahuatijquet ipan norte. Huan iicni nopa ichpocat quiixpanos nopa tepamit cati ica quitzacua nopa tanahuatijquet ica norte, huan yaya tatanis pampa quiipiyas miyac chichahualisti.

⁸ Teipa quinichtequilis ininteteyohua cati quichijtoque ica teposti huan nojquiya quinichtequilis cati pajpatiyo quipixtoque cati quichijtoque ica oro huan plata. Nochi ni tamanti quihualicas quema mocuepas ichaj ipan tali Egipto. Teipa nopa tanahuatijquet ica sur ayecmo sempa quitehuiti nopa tanahuatijquet ica norte hasta panos quentzi xihuit.

Nopa tanahuatijquet ten norte

⁹ “Pero teipa nopa tanahuatijquet ipan norte quinequis quitehuis tali Egipto campa mosehua nopa tanahuatijquet ica sur, pero amo teno huelis quichihuas huan monequis mocuepas sempa campa hualajqui. ¹⁰ Pero itelpocahua nopa tanahuatijquet ica norte quinsentilise miyaqui inisoldados para se tatehuilisti. Huan se itelpoca ica isoldados motanas huan tetzontamiltijthualas quej quichihua quema huala tahuel miyac at. Huan injuanti quinequise quitehuitij nopa tanahuatijquet ica sur hasta icalixpa nopa cali cati quichijchijtoque tahuel tetic.

¹¹ “Huan nopa tanahuatijquet ica sur ipan tali Egipto nelia cualanis huan quisas para quitehuiti icualancaitaca ten norte cati quinamiquiqui ica tahuel miyac soldados. Huan masque nelia miyaqui isoldados hualahui ten norte, yaya ten tali Egipto quintanis. ¹² Huan quema nopa tanahuatijquet ica sur tatanis huan quiitas para miyaqui icualancaitacahua tepejtoque, nelia mohueyimatis huan quinmictise noja más miyac tacame, pero ichichualis amo huejcahuas. ¹³ Huan ica se ome xihuit nopa tanahuatijquet ten norte sempa quincualtis noja más miyaqui isoldados que achtohuiya. Huan quiipiyase teposti cati noja más cuali huan sempa hualas quitehuiqui nopa tanahuatijquet ten sur ipan tali Egipto.

¹⁴ “Quema ya ni panos, sequinoc talme campa itztoque icualancaitacahua ne tanahuatijquet ica sur nojquiya motananase huan quitehuiquij. Hasta sequij israelitame cati fierojtice mosejcotilise ihuaya cati huala ten norte senquisa quej tiquitac ipan nopa tanextili para quitehuisse Egipto ehuan. Pero amo quisas cuali ten quichihuase. ¹⁵ Huan teipa nopa tanahuatijquet ten norte hualas huan quiyahualos huan quitzajzacuas se altepet ipan tali Egipto cati quiipiya se tepamit. Quej nopa quitanis, huan yon isoldados cati más cuali cati iaxca nopa tanahuatijquet ten tali Egipto amo huelise moqetzase iniixpa inincualancaitacahua pampa amo quiipiyase fuerza.

¹⁶ “Huan nopa tanahuatijquet ten norte quichihuas cati ya quinequis, huan amo aquí huelis quitanis. Nojquiya hualas nopa tanahuatijquet ten norte huan mosehuis ipan Israel, nopa Tali Yejectzi, huan quiipiyas chichahualisti para quisosolos. ¹⁷ Pero nopa tanahuatijquet ten norte moilhuis para hualas ica nochi isoldados huan ichichahualis cati quiipiya ipan nochi itanahuatilis huan quichihuas se camanali ihuaya itanahuatijca tali Egipto. Nojquiya quimacas iichpoca para monamictis ihuaya pampa moilhuis ica

itapalehuil iichpoca huelis quitanis huan quisosolos nopa tanahuatlisti ten sur ipan Egipto. Pero nopa ichpocat amo motemacas para quipalehuis itata, yon amo moquetzas ihuaya, huajca amo quisas cati moilhujtoc. ¹⁸ Teipa nopa tanahuatijquet ten norte quintehuiti nopa altepeme iteno nopa hueyi at huan yaya quintanis miyac altepeme. Pero se tayacanquet ten soldados ten seyoc tali hualas para quitilquetzas ten quichihuayaya. Quiquixtis para campa hualajqui huan tahuel quipinahualtis. ¹⁹ Teipa quistehuas para sempa mocuepas ipan ital campa cuali tzactoc, pero ipan lojhui ipantis se tenijqui huan ayecmo aqwi quicaquis ten ya.

²⁰ “Huan seyoc pehuas para tanahuatis ipan nopa tanahuatlisti ipan norte. Huan ni cati yancuic quintitanis tacame ma tainamatij impuesto campa hueli para huelis moricojchihuas yaya huan nochi itanahuatilis. Pero yaya amo huejcahuas tanahuatis. Miquis, pero amo miquis ipan tatehuilisti o ipan se cualanti.

Itanahuatijcayo nopa cuacuajti pisiltzi

²¹ “Teipa pehuas tanahuatis ipan nopa tanahuatlisti ica norte se tacat cati nelía fiero inemilis. Amo quinamiqui nopa tacat para elis tanahuatijquet, yon amo quinamiqui quipiyas nopa tatepanitacayot. Nopa fiero tacat hualas quema amo aqwi quichiya huan mocuilis nopa tanahuatlisti pampa quimati quenicatza tacajcayahuas. ²² Quintamiltis nochi inisoldados icualancaitacahua huan nojquiya quimictis yaya cati itzotc tayacanquet ten nopa camanali sencahuali ica Toteco. ²³ Masque masehualme quichihuase se camanali ihuaya ni fiero tanahuatijquet para ma quipiyaca tasehuilisti, quincajcayahuas huan quintanis, masque amo quinpiyas miyac soldados. ²⁴ Quema amo aqwi quichiya para hualas, nopa fiero tacat ten norte calaquis campa itztoque cati más yolchicajtoque ipan ital. Quichihuas cati amo quichijqui yon se ihuejcapan tata. Quinichtequilis iniricojyo huan quinmoyahuilis itatoquilijcahua. Teipa pehuas quintehuiti altepeme cati quipiyaj inintepa cati tahuel tetic, pero san huejcahuas se talojtzi.

²⁵ “Ni fiero tanahuatijquet motemacas para hualas ica miyac soldados para quitehuiqui nopa tanahuatijquet ica sur ipan tali Egipto. Huan nojquiya nopa tanahuatijquet ten Egipto motananas ica miyac soldados huan pehuas tatehuis, pero amo tatanis yaya ten Egipto. Sequinoc mosencahuase san sejco para quitanise huan quena, quitanise. ²⁶ Elise nopa tacame cati nopa tanahuatijquet ica sur quinnotzas ma tacuatij ihuaya ipan imesa cati quichihuase para ma miqui. Quena, quintanise isoldados huan miyac miquise. ²⁷ Huan masque ni tanahuatijquet ten sur mosehuis para tacuas ihuaya nopa seyoc tayacanquet ipan san se mesa, moistacahuise se ica seyoc huan san moyolilhuisse cati fiero mochihuilise. Pero cati injuanti moilhuaj, amo panos. ²⁸ Huan nopa tanahuatijquet cati huala ten norte quisas para mocuepas ipan ital ica miyac tamanti pajpatiyo cati mocuilis ipan tatehuilisti. Pero achtohui, pampa quicalancaitas nopa camanali tatzejtzeloltic cati Toteco quinmacac israelitame, quipanotiyas tali Israel huan quitamichihuas nozona nochi cati moilhujtoya quichihuas. Teipa mocuepas ipan ital.

²⁹ “Huan quema ajsis tonali, yaya ten norte sempa hualas ica isoldados para quitehuiqui Egipto, nopa tali ica sur, pero ni huelta amo tatanis quej achtohuiya. ³⁰ Pampa hualase soldados ten altepet Roma ipan cuaacalme huan quintehuiquij isoldados. Huan nopa tanahuatijquet ten norte ihuaya inisoldados nelía majmahuise huan cholojtehuase para inital. Pero pampa

pinajtoc huan pampa quicualancaita nopa tatzejtzeltolitic camanali sencahuali cati Toteco quichijtoc ica imasehualhua, nopa tanahuatijquet ten norte calaquis tali Israel para quichihuas cati fiero quinequis. ³¹ Huan isoldados quichihuase amo tapajpacti itiopa Toteco Dios huan itepayo, huan yaya quichihuas se tanahuatili para ma ayecmo quimacaca tacajchualisti Toteco quej nopa tanahuatili quijtohua ma quichihuaca mojmosta. Huan teipa quiquetzas se tamanti tiopan calijtic cati nochi masehualme quijiyaj. Quej ni quichihuase itiopa Toteco senquisa amo tapajpacti iixpa. Huan yaya quintemos nopa fiero israelitame cati quitahuelcajjetose nopa camanali sencahuali ica Toteco huan quinmacas tequiticayot. ³² Huan nopa fiero tanahuatijquet teyejectalis ica icamanal huan quinnotzas nopa israelitame cati quiixpanoj nopa camanal sencahuali huan quinilhuis ma quichihuaca noja más fiero. Pero nopa israelitame cati quiixmatij ininTeco Dios quiipiyase chicahualisti huan motemacase para quichihuase cati cuali.

Israelitame taiyohuijque miyac

³³ “Nopa masehualme cati talnamiquij quinmachtise miyac masehualme cati cuali. Pero fiero masehualme motananase huan quinhuicase sequij ten nopa cuajcualme ilpitoque para ma quintequipanoltica san tapic, huan nopa sequinoc cuajcualme quinichtequilise nochi cati quiipiyaj. Miyac cuajcualme quinmictise o quintatise, pero ni taiyohuilisti amo huejcahuas miyac tonali. ³⁴ Teipa quema miyac masehualme taiyohuijtose, hualase cati quinpalehuse se quentzi. Pero nojquiya sequinoc san mochihuase para mosejcotilise inihuaya para quincajyahua. ³⁵ Sequij ten injuanti cati talnamiquij nojquiya huetzise ipan taiyohuilisti. Quej ni panos para más quinyejyecos cati quitoquilíaj Toteco para ma elica nelía tapajpactique iixpa. Quej nopa elis hasta ajsis nopa tonali cati Toteco quiixquetztoc para tamis.

Nopa cuacuajti pisiltzi monextis ipan tayacapan tonali

³⁶ “Huan teipa ajsis se tanahuatijquet cati quichihuas nochi cati ya quinequis. Nelía mohueyimatis hasta moilhuis para más hueyi que Dios huan nochi tamanti cati masehualme quinítaj quej dioses. Huan tahuel quitajilhuis Toteco Dios cati más hueyi que nochi sequinoc cati quintocaxtíaj dioses. Huan nochi cati nopa fiero tanahuatijquet quichihuas quisas cuali hasta tamis nopa tonali cati Toteco quiixquetztoc para cualanti huan taiyohuilisti. Pampa cati Toteco quijtojtoc para panos, ya nopa monequi panos. ³⁷ Huan ni fiero tanahuatijquet amo quichihuas cuenta inindios ihuejcapan tatahua, yon nopa dios cati sihuame quinequij, pampa amo quitepanitas yon se. Yaya san mohueyimatis huan moilhuis para más hueyi ya que nochi cati masehualme quinítaj quej dioses. ³⁸ Yaya san quitas para ipati ichichualis huan isoldados cati ica hueli moaxcatis cati onca. Para ya idios elis chicahualisti, se dios cati itatahua amo quiixmatque. Huan yaya quisosolos nopa oro, plata, piltetzitzi cati pajpatiyo huan ihueyi ricojyo ipan itesoro para noja más quiipiyas fuerza. ³⁹ Yaya quintheuis talme cati más chicahuaque ica itapalehuijca se dios cati huala sejcayoc. Nojquiya ni fiero tanahuatijquet quinhueyitalis masehualme cati san ya quihueyichihua. Quintalis ma quinahuatíca miyac masehualme huan quinmajmacas tali quej se taxtahulli.

⁴⁰ “Quema ajsis itamiya tonali, nopa tanahuatijquet ica sur quinequis quitehuis ni fiero tanahuatijquet, huan nopa tanahuatijquet ten norte nojquiya hualas huan ihuaya motalis ni cati fiero. Huan yaya ten norte hualas para quitehuis ica tatehuijca carrojme huan ica miyac cahuayojme cati momajtoque nemij ipan tatehuilisti huan ica miyac cuaacalme ipan hueyi

at. Nopa fiero tanahuatijquet calaquis ipan miyac talme huan quintanis quej tasosolojtihuala tahuel miyac at cati nochi quisosolo. ⁴¹ Yaya nojquiya calaquis ipan tali Israel, nopa Tali Yejectzi. Nojquiya quintanis sequinoc talme campa hueli, pero amo teno quinchihuilis masehualme ipan tali Edom huan Moab pampa mochololtise imaco. Nojquiya amo quincocos nopa masehualme ipan pano tajco tali Amón. ⁴² Teipa quintehuis huan moaxcatis miyac talme huan yon Egipto amo momanahuis. ⁴³ Ni fiero tanahuatijquet quitanis nochi ricojyot ipan tali Egipto cati eltoc ten oro huan plata, huan nochi tamanti yejectzi cati quipiya. Huan teipa san se quichi-huas ipan talme Libia huan Etiopía. ⁴⁴ Pero teipa ni fiero tanahuatijquet mocuesos quema quicaquis camanali cati hualas ten talme campa hualquisa tonati huan campa norte. Huajca yaya quisas nelía cualantoc huan tahuel tasosolojtiyas huan temictijtiyas. ⁴⁵ Huan ni fiero tanahuatijquet quiquetzas icaltanahuatil ipan nopa altepet tatzejtzeloltic huan yejectzi, tafajco nopa ome huejhuelyi at. Pero nopona ajsis tonali para miquis huan amo aqui quipalehuis.

12

Nopa hueyi taijyohuilisti cati hualas

¹ “Huan ipan nopa talojtzi Miguel, nopa hueyi ilhuicac ejquet ten ilhuicac cati quinmocuitahuía moisraelita masehualhua motananas para quinpalehuis. Ipan nopa tonali oncas taijyohuilisti cati más hueyi que cati oncas hasta quema pejqui taltipacti. Huan quema ajsis nopa talojtzi, Toteco quinmaquixtis nochi momasehualhua cati quipiyaj inintocaj ijcuilijtoc ipan nopa amatapohuali.

Quenicatza moyolcuise israelitame teipa

² “Huan miyaqui israelitame cati mictoque huan quintalpachojtoque, motananase. Sequij para itztotij para nochipa ipan nopa nemilisti cati amo quema tamis, huan sequinoc para quipantise pinahualisti huan taijyohuilisti cati amo quema tamis. ³ Pero talnamijca masehualme cahuanise chicahuac quej sitalime ipan ilhuicac. Quena, masehualme cati tenextilijque nopa ojti xitahuac cahuanise quej sitalime para nochipa.

Xicajocui ni amatapohuali huan cati quijtohua

⁴ “Pero ta, Daniel, xijtzacua nochi ni camanali ipan moamatapohual huan xijtalili se sello hasta ajsis itamiya tonali. Ipan nopa tonali miyac masehualme nentinemise nica huan neca. Huan momiyaquilis miyac tamatilisti.”

⁵ Huan na, niDaniel, nijtachili nopa tanextili huan niquinitac seyoc ome ilhuicac ehuanijcatoyaj, se ipan ni nali ten nopa hueyat, huan seyoc ipan ne seyoc nali. ⁶ Huan se ten injuanti quitatzintoquili yaya cati moyoyontijtoya ica lino yoyomit cati itztoya iixco nopa hueyat: “¿Quesqui tonali elis para tamis nochi ni tamanti cati temajmati?”

⁷ Huan nijcagui nopa tacat cati moyoyontijtoya ica lino yoyomit quitananqui imax para ilhuicac huan tatestigojquetzqui iixpa Toteco Dios cati yoltoc para nochipa, huan quijto: “Quema ya quinquixtilijtose ininchicahualis imasehualhua Toteco, elis noja eyi xihuit huan tajco.”

⁸ Huan na nijcagui cati quijtohuayaya, pero amo teno nijmachili. Huajca nijtatzintoquili: “Tate, ¿taya panos teipa quema tamis nochi ni tamanti?”

⁹ Huan yaya technanquili: “Xiya ipan moojhui, Daniel, pampa ni tamanti monequi motatijtos hasta ajsis itamiya tonali. ¹⁰ Miyac masehualme panose ipan nopa hueyi taijyohuilisti huan teipa elise tapajpactique, tayejectilme

huan chipahuaque iixpa Toteco. Pero injuanti cati fierojtique noja más fiero quichihuase. Yon se cati fiero amo quimachilis cati quiiijosnequi ni camanali, pero masehualme cati talnamiquij quimachilise nochi. ¹¹ Sinta tipehuas tijpohuas tonali ten quema nopā tanahuatijquet tanahuatis ma ayecmo quimacaca Toteco itacajcahualis huan tanahuatis ma quiquetzaca cati nochi quiiiyase tiopan calijtic, elis seyoc 1290 tonali. ¹² Pero nelía se hueyi paquillisti quipantise cati quichiyase huan noja itztose hasta quema panotosa nochi 1335 tonali. ¹³ Pero ta, tiDaniel, xijtamilti moojhui nica huan teipa timosiyajquetzas, pero quema ajsis itamiya tonali, timijquehuas huan tijselis cati tijtantoc.”

Oseas

Isihua huan iconehua Oseas

¹ Ya ni nopa camanali cati TOTECO techmacac na, niOseas cati niicone Beeri ipan nopa tonali quema Tanahuatijquet Uzías, Tanahuatijquet Jotam, Tanahuatijquet Acaz huan Tanahuatijquet Ezequías quihuicayayaj tequit ipan tali Judá, huan nojquiya quema nopa ompa Jeroboam, cati eliyaya icone Joás, quihuicayaya tequit ipan tali Israel*.

² Quema TOTECO pejqui camanalti por na, niOseas, yaya techilhui: “Xiya huan ximocuili se sihuat cati tacanemis. Huan iconehua cati tacatise elise sequinoc tacame ininconeuhua, huan amo ta moconeuhua. Ya nopa quiixnextis quenicatza ni nomasehualhua techtahucajtoque na cati niininTECO huan quinhueyichijitinemij teteyome san quej se momecatijca sihuat quicahua ihuehue.”

³ Huajca niyajqui huan nimocuili Gomer, iichpoca Diblaim, huan nijchijqui nosihua. Huan Gomer conecuc huan quitacatilti se oquichpil.

⁴ Huan TOTECO techilhui: “Xijtocaxtali ni conet Jezreel†, pampa amo huejcahuas miyac tonali huan na niquintamiixpolihuiltis nochi iixhuihua Tanahuatijquet Jehú. Nijcuepilis por nochi nopa masehualme cati quinnicti ipan nopa tamayamit cati itoca Jezreel. Nijtamiltis itanahuatijcayo tali Israel huan ayecmo itztos se tanahuatijquet nozona. ⁵ Quena, ipan nopa tamayamit cati itoca Jezreel nijpolihuiltis ichicahualis tali Israel para elis se tali cati mocahua iyoca ten tali Judá.”

⁶ Huan Gomer sempa conecuc huan quitacatilti se sihuapil. Huan TOTECO techilhui: “Xijtocaxtali ni conet Lo Ruhama‡, pampa ayecmo niquintasojtas nopa israelitame cati tali Israel ehuan huan ayecmo niquintapojpolhuis. Niquincahuilis sequinoc talme ehuan ma quinhuicaca huan quej nopa ixpolihuisse. ⁷ Pero niquintasojtas nopa israelitame cati itztoque ipan tali Judá huan niquinmaquixtis. Pero amo niquinmaquixtis ica cuahuitoli, yon ica machefa, yon ica tatehuilisti, yon ica cahuayojme huan nopa soldados cati ininpa tejcotoque. Niquinmaquixtis ica na nochicahualis, niininTECO Dios.”

⁸ Teipa quema quichichijcahualti Lo Ruhama, Gomer sempa conecuc huan quitacatilti seyoc oquichpil. ⁹ Huan Toteco Dios techilhui: “Xijtocaxtali ni oquichpil Lo Ammi§, pampa anisraelitame ayecmo anelise annomasehualhua, yon na ayecmo nielis niamoTeco.

TOTECO quinyancuilis imasehualhua se tonali

¹⁰ “Pero ajsis tonali quema israelitame momiyaquilise hasta itztose quej imiyaca nopa xali cati onca iteno hueyi at huan amo aqui huelis quinta-machihuas, yon quinpohuas. Huan huajca ayecmo niqunilhuis: ‘Amojuanti amo annomasehualhua.’ Pero ipan nopa tonali niqunilhuis: ‘Amojuanti

* **1:1** 1:1 Tali Israel, ipan ni tonali quema quiijcuilo ni amatapohuali, quiijtosnequi nopa majtacti huejhueyi familias ten israelitame cati mocajque ica norte. Inijuanti moiycatalijque ten nopa ome huejhueyi familias ten israelitame cati mocajque ica sur cati quintocaxtijque Judá. Tanahuatijquet Jeroboam quinnextili israelitame ipan tali Israel ica norte ma quinhueyichihuaca teteyome. Huajca TOTECO más quintatelhui nopa israelitame ica norte que nopa tali Judá ehuan cati mocajque ica tani.

† **1:4** 1:4 Jezreel nica quinequi quiijtos ‘Semantoc’. ‡ **1:6** 1:6 Lo Ruhama quinequi quiijtos ‘Amo aqui quitasojta’. § **1:9** 1:9 Lo Ammi quinequi quiijtos ‘Amo noaxca’.

annoconehua niamoTeco Dios cati niyolotoc.’¹¹ Huan nochi masehualme ipan tali Judá huan ipan tali Israel sempa mosejcotilise huan quipiyase setzi inintanahuatijca. Tejcose hasta inintal ten nopa talme campa itztose quej seyoc tali ehuaní. Elis nelyejyetzí nopa tonali quema niininTeco sempa niqinhualicas nomasehualhua huan niqintalis ipan inintal quej se quitocas xinachtí ipan cuali tali para ma moscaltí cuali.

2

1 “Ipan nopa tonali amotaca icnihua tiquintocaxtis Ammi * huan amosihua icnihua tiquintocaxtis Ruhama†.

TOTECO quintatelhuía israelítame

2 “Pero para ama ipan ni tonali xiquinixcoillhui tali Israel masehualme, pampa amo niqininita sinta quixnextíaj nosihua, yon na amo niqixnextía niinihuehue pampa injuanti quinhueyichihuaq teteyome. Israel ehuaní itztoque quej se tacanenca sihuat cati quinnotza tacame ica ixayac huan motemactilía ica cati amo ihuehue. Xiquinilhui ma quipataca inixayac huan ma quicahuaca nopa momecatili. ³ Sinta amo techneltocase, niqintatza-cuiltis. Quej se juez tanahuatía ma quixxilica iyoyo se tacanenca sihuat huan mocahua xolot miyacapa para quipinahuatís, na nijquixtilis tali Israel nochi iricojyo huan nijcahuas quej se huactoc tali campa amo aquí mocahuas huan se tali campa amo onca at. Huan imasehualhua niqinchihuas ma miquica ica amiquisti. ⁴ Huan imasehualhua nopa tali amo niqintasojtas quej elisquía noconeagua pampa eltoc quej ininconeagua sequinoc tacame. ⁵ Eltoc quej ininana cati quintacatilti tacanentoc huan quichijqui cati se pinahuatísti quema quijito: ‘Niyas niqintemoti nomecagua para ma techmacaca notacualis, noa, noyoyo, noaceite huan notailis.’ ⁶ Pero xiquitaca, na nijtalis huitzti ipan iojhui para amo panos. Nijyahualtzacuas para amo quipantís iojhui. ⁷ Huan teipa quema tali Israel ehuaní quintepotztocase inimecagua, amo quinajstij. Huan masque quintemose campa hueli amo quinpantise. Huan huajca quijitose quej nopa tacanenca sihuat quijitosquía: ‘Más cuali nimocuepas ica cati achtohuí eliyaya nohuehue pampa achi más cuali niitztoya ihuaya ya que ama niitztoc.’

8 “Pero tali Israel ehuaní amo quimachilíaj para nielqui na cati niqinmacayaya nopa trigo, huan nopa xocomecat iayo huan nopa aceite. Amo quitaque para nielqui na cati nijmiyaquiliyaya inintomi ten plata huan oro cati injuanti quitequihuiyayaj para quinhueyichihuase nopa miyac teteyome ten Baales.

9 “Huajca ama na nimocuepas campa tali Israel ehuaní quema ajsis nopa tonali ten pixquisti huan niqinquixtilis inintrigo huan inixocomeca. Huan nojquiya niqinquixtilis nochi famanti cati niqinmacatoya para ica ma quichihuaca iniyoyo para ma moquentica. ¹⁰ Huan nijxolohuis tali Israel quej elisquía se tacanenca sihuat iniixpa imecagua huan amo aquí huelis quinmanahus ten na nomaco. ¹¹ Nijchihuas ma tami nochi nopa paquillistí cati quipiyayayaj tali Israel ehuaní ipan nochi ilhuime cati quichihuayayaj quema pehuayaya yancuic metzti huan ipan nopa tonali quema mosiyaj-quetzayayaj. Niqinquixtilis nochi ilhuime cati quinelnamiquiyayaj sesen xihuit. ¹² Nijtamixpolos inixocomeca milhua huan inincuamilhua ten higuera cuame cati qunitayayaj quej se taxtahuilí cati nopa teteyome cati eltoc quej inimecagua quinmacayayaj. Huan niqinchihuas ma elica quej

* 2:1 2:1 Ammi quinequi quijitos ‘Nomasehualhua’. † 2:1 2:1 Ruhama quinequi quijitos ‘Toteco quitasojta’.

se milcahuali cati quitamicuase tapiyalme cati nemij cuatita. ¹³ Huan quej nopa niquintatzacuilltis cati ehuan i pan nopa tali por nochi nopa tonali quema quintatilijqe tacajcahualisti nopa miyac tetyome ten Baal. Ipan nochi nopa tonali mocualtaliyayaj ica pijpiloli huan ica tamanti cati yejyectziti huan yahuiyayaj quinonitaj nopa Baales quej eliyayaj inimecahua huan techelcahuayayaj na cati niininTECO.” Quej nopa quijitohua TOTECO.

TOTECO quinicnelia nochi israelitame

¹⁴ “Pero xiquitaca, na sempa niqunyoltlanas israelitame ma techicnelica. Nijchihuas quej se telpocat cati quihuica se ichpocat i pan nopa huactoc tali huan nopona quicamanalhuis ica yejyectzi para quiyolyamanilis. ¹⁵ Huan nojquiya nopona sempa niquinmacas israelitame inixocomeca milhua. Huan nopa taijyohuillisti cati quipiyayayaj nijpatas ica tatiuchiualisti. Huan israelitame sempa huicase quej quema achtohui mochijque noaxcahua quema niquniquixti i pan tali Egipto.

¹⁶ “Huan teipa i pan nopa tonali israelitame techtocaxtise Ishi † huan ayecmo elise quej se tequipanojqet cati quitocaxtia iteco Baali§.” Quej nopa quijitohua TOTECO.

¹⁷ “Huan nijchihuas para anisraelitame anquielcahuase inintoca nopa tetyome ten miyac tamanti Baales huan ayecmo quema anquintzajtzilise para ma amechpalehuica.

¹⁸ “Huan i pan nopa tonali na nijchihuas se camanali ica noisraelita masehualhua, huan ica nopa tapiyalme cati nemij cuatita, huan nopa totome cati patantinemij ajacatipa huan ica cohuame cati mohuahuatatzaj talchi para ma ayecmo tecocopa. Huan nojquiya niqijcuenis nochi cuahuitoli huan machetas ten ni taltipacti huan ayecmo oncas tatehuillisti. Huan nochi cochise ica paquillisti huan ayecmo teno quinmajmatis. ¹⁹ Huan niqunchihuas israelitame ma elica nosihua para nochipa. Nimocuilis para nosihua huan niquinmacas cati cuali huan cati xitahuac, pampa niqunicnelia huan niquintasojta. ²⁰ Niqunchihuas nosihua huan na nielis nitemachti inihuaya. Amo quema niqunicahuas huan techixmatise para niininTECO.

²¹ “Huan i pan nopa tonali na nitananquillis quema ilhuicacti tahuel quinequis mixti. Huan nijtitanis mixti para huelis huetzis at i pan taltipacti quema nopa taltipacti tahuel quinequis at. ²² Huan quema nopa tocti, xocomeca milme huan olivo cuamilme quitemohuaj at i pan tali, nopa tali quipiyas at para quinmacas. Huan nochi sentic huicase: ‘¡Jezree!’ cati quinequi quijitos ‘¡Toteco tatojtoca!’.” ²³ Huan i pan nopa tonali na niqunchihuas noisraelita masehualhua ma elica quej se mili cati nimotoquis i pan ni tali. Huan niquintasojtas cati niquintocaxti Lo Ruhama pampa amo niquintasojtayaya. Huan cati niquintocaxti Lo Ammi pampa amo eliyayaj nomasehualhua. Huan niqunilhuis: ‘Ama amojuanti annomasehualhua.’ Huan injuanti quijitose: ‘Ta tiToteco Dios.’”

3

Oseas sempa mocuili isihua

¹ Huan TOTECO sempa nechcamanalhui, niOseas, huan techilhui: “Xiya huan sempa xijtemoti cati eliyaya mosihua huan xijhualica huan xiquicneli masque yaya momecatia. Quej nopa tiquixnextis quenecatza niamoTECO niqunicnelia israelitame masque quinhueyichihuaq tetyome ten sequinoc

† 2:16 2:16 Ishi quinequi quijitos ‘tinohuehue’. § 2:16 2:16 Baali quinequi quijitos ‘noteco’.

talme huan quinpacktía quicuase nopa tortas ten uvas cati huactoc cati quintencahuilíaj nopa teteyome.”

² Huajca na nijcojqui Gomer ica san 15 plata tomi huan ica 330 litros ten cebada quej cati ipati para quicohuas se tapiyali. ³ Huan niqullhui: “Ta tielis tinoaxca na para miyac tonali. Ayecmo huelis timomecatis, yon ayecmo tijchihuas ten hueli ihuaya seyoc tacat. Huan nojquiya na amo teno nijchihuas mohuaya hasta teipa.”

⁴ Cati nijchijqui quixnextía nopa miyac tonali quema israelitame mocahuase campa quihuicase ilpitoque huan amo quipiyase inintanahuatijca, yon inintayacanca, yon tacajcahualisti, yon nopa piltetzitzi para quimatise ipaquilis TOTECO, yon totajtzitzi, yon teteyome.

⁵ Pero teipa nopa israelitame sempa mocuepase huan quitemose TOTECO ininDios, huan quitemose David, inintanahuatijca. Quena, ipan itamiya tonali israelitame huihuipicatihualase ica miyac tatepanitacayot iixpa TOTECO para nopa tatiochihualisti cati yaya temaca.

4

TOTECO quintatelhuía tali Israel ehuaní

¹ Anisraelitame cati anitztoque ipan tali Israel ica norte, xijcaquica cati Toteco amechilhuía. Toteco amechixcoilhuis cati ica amechtatelhuía. Yaya quijtohua: “Amo aquí ipan nopa tali cati temachi, yon amo aquí cati teicnelía, yon amo aquí quixmati Toteco. ² Senquisa nochi masehualme tatestigojquetzaj cati amo melahuac, teistacahuíaj, temictíaj, tetachtequilíaj huan momecatíaj. Onca tatehuilisti campa hueli huan talojtzitzi momictíaj se ica seyoc.

³ “Yeca ni tali Israel ayecmo taelilitis huan temis ica tequipacholi. Nochi cati itztoque nica pehuase mococose huan miquise. Pehuase miquise nochi tamanti tapiyalme cati nemij cuatita, huan nochi totome cati patantinemij ajacatipa huan nochi tamanti michime cati itztoque ipan hueyi at.”

TOTECO quintatelhui nopa totajtzitzi

⁴ TOTECO quijtohua: “Yon se tacat ma quitajtacolti seyoc pampa nochi amojuanti ipan tali Israel anquihuicaj tajtacoli. Anmasehualme anquichijtoque cati amo cuali quej cati huejcajquiya ica quintatelhuijque nopa totajtzitzi cati nijtequimacac ma mosehui quej se juez*.” ⁵ Huan yeca hasta tonaya nojquiya anmotepotanijtinemise. Amo san ica tayohua. Huan amotajtzitzi huan amotajtolpanextijcahua motepotamise amohuaya. Nojquiya niquintzontamiltis hasta amonanahua pampa nochi antechcajtejtoque. ⁶ Nomasehualhua sosolijque pampa amo techixmatij. Pero ya ni amotajtacol antotajtzitzi. Antotajtzitzi amo anquinequiyayaj antechixmatise, huan yeca ayecmo nimechitas quej annotofajtzitzi. Anquitahuelcajtoque notanahuatilhua huan yeca niquintahuelcahuas amonehua para ayecmo elise totajtzitzi.”

⁷ “Quema más momiyaquiliyayaj totajtzitzi huan más moricojchihuayaya nopa tali, noja más momiyaquili inintajtacolhua. Nechcajtejque niininteco huan techpataque ica teteyome huan taixcopincayome cati pejque quinhueyichihuaj. Huajca na niqunquixtilis nopa totajtzitzi nopa tatepanitacayot cati quipixque huan nijpatas ica pinahualisti. ⁸ Nopa totajtzitzi

* 4:4 4:4 Xijtatchili Dt. 17:12.

motamacaj ica nopa tacajcahualisti cati masehualme quihualicaj por intajtacolhua. Huajca más paquiyayaj quema masehualme tajtacolchi-huayayaj miyac para oncas miyac cuali nacat para quicuase. ⁹ Huajca quej mosisiniáj nopa totajtztzi nojquiya mosisiniáj nopa masehualme. Yeca san se niquintatzacuiltis nopa totajtztzi huan nopa masehualme ica nochi cati fiero quichijtoque. Quena, niquintaxtahuis quej quinamiqui. ¹⁰ Yeca masque nopa totajtztzi tacuase, amo ixhuisse, pampa campa hueli oncas mayanti. Huan masque quinnextilise masehualme ma momecatitica ica tacanenca sihuame campa nopa teteyome para ma onca cuali pixquisti, amo momiyaquilis ininpixquis pampa techtahuelcajtoque na niinTECO. ¹¹ Tali huan ahuilnencayot ica teteyome quichijtoc ma quipoloca inintalniqulils nomasehualhua.

Quenicatza israelitame quinhueyichijque teteyome

¹² “Nomasehualhua quintatzintoquiliáj inintaixcopincayohua ten cuahuit para ma quinilhua taya quichihuase. Moilhuíaj se huapali quinnex-tilis ten panos teipa. Quincuapolojtoc se ajacat cati quinnotza ma quinhueyichihuaca nopa teteyome. Quej se momecatijca sihuat quicahua ihuehue, techtahuelcajque niinTECO para quinquippanose teteyome. ¹³ Nomasehualhua yahuij iniixco tepeme para quinmacatij tacajcahualisti nopa taixcopincayome huan teteyome. Huan yahuij quintatilitij copali tachiquiltipa inintantita ahua cuame, álamo cuame huan olmo cuame cati yejyectzi temacaj ecahuili. Amoichpocahua motemacaj ica nopa sihua nenca tacame cati quitequipanohuaj nopa tiotzi nozona huan amoyexhua inihuaya momecatíaj. ¹⁴ Pero na amo niquintatzacuiltis amoichpocahua quema temactilíaj inintacayo, yon amoyexhua cati momecatíaj pampa amojuanti antacame anyahuij iyoca ica nopa sihuame cati quitequipanohuaj nopa teteyot ica ahuilnencayot para quej nopa anquimacaj tacajcahualisti nopa teteyot. ¡Masehualme cati huihuitique quej amojuanti temacti tan-yase!

Judá ehuan ma amo quintoquilica tali Israel ehuan

¹⁵ “Masque nopa israelitame cati itztoque ipan tali Israel ica norte momecatíaj, amo ximomecatitica anisraelitame ipan tali Judá ica sur. Antali Judá ehuan, amo ximosentilitij inihuaya tali Israel ehuan ipan Gilgal huan ipan Bet Avén†. Huan sinta se yas nozona, ma ayecmo quitequihuis notoca na, niamoTECO, para ica tatestigojquetzas quej elisquía techtepanita pampa amo cana. ¹⁶ Pampa israelitame cati itztoque ica norte mohuejatalij-toque ten na quej se cone huacax cati mosisiniá. Huajca ama niinTECO niquinmajcahuas para ma yaca campa quinequise. Ayecmo niquinchihuas quej se pilborregojtzi cati nijtacuajcualtía nonechca para nijmocuitahuis. ¹⁷ Ximohuejatalica ica tali Israel ‡ ehuan pampa senquisa motemactilij-toque ica teteyome. ¹⁸ Quema nopa tacame ten tali Israel quiitaj para ya tanqui inintailis, yahuij para motemactilise ica ahuilnencayot. Hasta inintayacancahua cati monequi quinyacanasquíaj tahuel quiicnelíaj tamanti cati quihualica pinahualisti. ¹⁹ Pero inintatzacuiltis hualas quej se hueyi ajacat

† 4:15 4:15 Betel o 'Ichaj Toteco' nelía eltoya itoca nopa altepet, pero nica Oseas quitocaxpatac ica Bet Avén 'ininchaj teteyome' pampa san teteyome ama quinhueyichihuayayaj nozona. Ayecmo quinhueyichihuayayaj TOTECO. ‡ 4:17 4:17 Tali Israel nojquiya quitocaxtíaj Efraín pampa nopa hueyi familia Efraín elqui cati más quipixqui chichahualisti ipan nopa majtacti huejhueyi familias cati moiycatalijque nozona ica norte. Huajca Efraín huan tali Israel quinequi quijtos san se tali.

cati quintamicuitiquisaqui. Huan huajca quena, pinahuase por nochi nopa tacajchualisti cati ica quinhueyichihuayayaj nopa teteyome.

5

Itayacancahua tali Israel más tajtacolchijque

1 “Antotajtzitzi, xijtacaquilica ya ni. Quena, nochi anisraelitame ipan tali Israel huan nochi amojuanti cati anfamilias ten nopa tanahuatijquet, xijtacaquilica pampa hualas ni tatzacuiliti amopani. Anquinmasiltijtoque nopa masehualme ica nopa teteyome cati anquintalijtoque ipan Mizpa huan Tabor. 2 Amojuanti cati anmosisinijtoque ica na, anquichijtoque se ostot cati tahuel huejcata para ipan anquintalise nopa masehualme cati anquinmictijtoque. Yeca temachti nimechtatzacuilitis por nochi cati anquichijtoque. 3 Na niquixmati nochi cati amo cuali cati anquichijtoque, antali Israel ehuan. Antechcajtejtoque quej se ahuilnenca sihuat quicajtehua ihuehue. Anyajtoque ica teteyome huan por nopa teteyome tahuel anmosoquihujtoque. 4 Nochi nopa tamanti amo cuali cati anquichijtoque amo amechcahuilía para anmocuepase ica na niamoTECO Dios. Huan amo hueli antechixmatij niamoTECO pampa tatajco amojuanti itztoque se ajacat cati quinequi xiahuilnemica.

5 “Nimechtajtolsencahuas, antali Israel ehuan, pampa tahuel anmohueyimajtoque huan anmosisinijtoque ica na. Huan amojuanti anhuetzise por nochi amotajtacol. Huan hasta tali Judá ehuani nojquiya motepotamise. 6 Pero teipa quema tahuel anmajmahuse, anyase anquitemotij TOTECO ica amoborregojhua huan amohuacaxhua para anquimacase. Pero ayecmo anquipantise pampa yaya ya amechtalcahuajtis. 7 Anisraelitame tahuel antechixpanotoque. Antechchijtoque quej se sihuat cati quicajcayahua ihuehue huan quintacatiltía coneme cati sequinoc tacame ininconeua. Noja más anmotajtacoltíaj por nopa sequinoc tamanti ilhuime cati anquichihuaj para yancuic metzti cati amo quej nimechmacatoc tanahuatili para antechhuyemajise huan amo quisa ten amoyolo. Huan nochi nopa tamantzitzi cati anquisenajtoque ica amotalnamiquilis amechhualiquilis tatzacuilitisi. Quintamiixpolihuiltis amomasehualhua huan nopa pixquisti cati temacaj amomilhua.

Tatzacuiliti para talme Israel huan Judá

8 “Xijpitzaca cuacuajti ipan altepet Gabaa pampa ya ajsiti tatehuilisti campa amojuanti. Xijpitzaca tapitzali ipan altepet Ramá. Ipan Bet Avén * xitayolmelahuaca para hualahui soldados. Anhuihuipicase, antali Benjamín ehuan. 9 Ipan nopa tonali quema nitetatzacuilitis, nopa tali Israel mocahuas tamisosolijtoc. Quena, nochi nopa huejhueyi familias ten tali Israel niquinyolmelahuaca para temachti cati ininpantis elis se tamanti cati fiero.

10 “Nojquiya nopa tayacanani ipan tali Judá itztoque tahuel fiero. Itztoque quej nopa masehualme cati quiijueníaj nopa teme cati quinextía se nepamit. Huajca na niquintatzacuilitis tahuel chichahuac. 11 Tali Israel ehuan itztoque ipan tequipacholi huan tahuel tajyohuse por nopa tatzacuiliti cati niquinmacas, pampa ya motemacatoque quisenhuiquiliise quintequipanose teteyome. 12 Huajca na, niininTECO, nijsosolos tali Israel quej se mejtoli quicualoltía yoyomit huan nojquiya niquinpalanaltis nopa masehualme ten tali Judá quej nopa cuatequini quipalanaltía cuahuit.

* 5:8 5:8 Xijtachili Os. 4:15.

13 “Quema tali Israel ehuani quuitase para tahuel mococohuaj, huan tali Judá ehuani quuitase para quiniyay cocome; Israel ehuani yase ipan tali Asiria huan quinoztatij nopa hueyi Tanahuatijquet Jareb para ma quinchicahua. Pero nopa tanahuatijquet amo huelis quichicahuas inincocolis, yon amo huelis quipajtis inincocohua. 14 Pampa na, niininTECO, niquintami-huejhuelos tali Israel † huan tali Judá ehuani quej quichihua se hueyi león ica se tapiyali cati quiiitzquía. Quena, niquintzquis huan niqinhuejhueloti. Niquinhuicas huejca huan amo aqui huelis quinmanahuis nomaco. 15 Teipa niquintahuelcahuas huan nimocuepas campa niititoya hasta quimachilise para tahuel tajtacolchijtoque huan hualase techtemoquij. Quena, quema tahuel taijyohuijtoseja, techtemose ica nochi iniyolo.”

6

Israel ehuani amo quinequise moyolcuepase

1 “Huan nopa masehualme quiijtose: ‘¡Xihualaca! Ma timocuepaca ica TOTECO pampa yaya cati techcocototzqui huan yaya techchicahuas. Yaya techcoco, pero nojquiya yaya cati sempa techpajtis. 2 Temachtí amo huejcahuas huan sempa techmacas nemilisti yancuic huan techyolcuis para sempa tiititose ica paquilisti iixpa. 3 Huajca ma tiquixmatica TOTECO. Quena, mojmota ma tijchihuaca campeca para noja más tiquixmatise. Huan temachtí yaya monextis ica tojuanti quej tonati monextía ica ijnaloc. Huan temachtí hualas campa tojuanti quej temachtí huetzi at quema ipohual.’

TOTECO quintatelhuía israelitame

4 “¿Taya más huelis nimechchiuilis amojuanti cati anehuani ipan tali Israel huan tali Judá para sempa antechicnelise? Amotaicnelijcayo eltoc quej se mixti cati monextía ica ijnaloc huan nimantzi ixpolihui. O eltoc quej nopa ajhuechti cati huetzi ica ijnaloc huan nimantzi huaqui. 5 Yeca monequi talojtitzti nimechtzacuilitis huan niquintitanis notajtolpanextijcahua para ma amechyolmelahuaca cati hualas. Nimehcocojtoc ica nocamanal pampa nimechylmelahuayaya para nimechtzontamiltisquía. Huan ama notatzacuilitil temachtí amechajsis quej temachtí quisa tonati ica ijnaloc. 6 Na nijnequi techicnelica. Amo nijnequi tacajcualisti. Na nijnequi más techixmatica. Ya nopa más ipati que tacajcualisti tatatili cati antehmacasquíaj.

7 “Pero anisraelitame anitztoque quej Adán huejcajquiya quichijqui. Anquixpanoque nopa camanal sencahuali cati nijchijqui amohuaya huan anmosisinijque ica na. 8 Galaad eltoc se altepet ten tacame cati quichihuaj cati más fiero huan temitoc ica esti. 9 Quej tachtequini ojchijay ajquiya huelis quitachtequilise, quej nopa se pamit ten totajtitzti techiyaj huan temictiaj ipan nopa ojti cati yahui para Siquem. Huan nojquiya nozona quichihuaj sequinoc tamanti tajtocoli cati más fiero. 10 Quena, na niquitzotoc se tamanti cati fiero ipan tali Israel: Tali Israel ehuani tahuel yajtoque ica teteyome quej se momecatijca sihuat cati tahuel mosoquihujtoc.

11 “Huan amojuanti, antali Judá ehuani, nojquiya amechchiya se hueyi tatzacuilitisti.

“Pero na nijnequiyaya nimechmacas annomasehualhua cati cuali quej anquipiyayaj achtohuyia quema ayemo amechhuicayayaj anilpitoque.

† 5:14 5:14 O Efraín. Xijtachili Os. 4:17.

7

1 “Huan nijnequiyaya niquinchicahuas tali Israel ehuan, pero sempa niquitac para tahuel tajtacolchihuayayaj. Hasta ipan inialtepe Samaria quichihuaj cati pano fiero. Tahuel tacajcayahuaj, huan tachtequij ipan techaj huan tetacuijcuilíaj ipan calles. 2 Huan nopa masehualme amo moilhuíaj para na nijtachilijtoc nochi cati quichihuaj huan nochi niquelnamiqi. Inintajtacolhua quinyahualohua huan nochi niquita.

Inintajtacolhua tequichihuani

3 “Nopa tanahuatijquet paqui ica inintajtacolhua imasehualhua, huan nopa tayacanani huetzcaj quema quicaquij quenecatza tacajcayahuaj ica istacatili. 4 Nochi injuanti momecatiani. Inintalnamiquilis eltoc totonic ica nochi cati fiero quinequij quichihuase. Itztoque quej se horno cati nelpano xahuantoc hasta amo monequi más quitotonilise ten quema quitálíaj tasonejayot ipan nopa harina hasta teipa quema mosonejtos huan quicxitise.

5 “Ipan nopa tonali, quema quilhuchijque nopa tanahuatijquet, nopa tayacanani tahuel quitailtijque hasta mococo ica nopa taili. Teipa nopa tanahuatijquet quintahuetzquilti huan taic inihuaya nopa tacame cati quipinajtiyayaj. 6 Tata iniyolo quej se horno xaxahuacatoc para quichihuase tamanti cati amo cuali. Nopa tamanti cati amo cuali cati injuanti quisencahuaj para quichihuase eltoc quej se tit cati sehui ica tayohua, pero ica ijnaloc sempa lemeni. 7 Huan injuanti quinmictíaj sesen inintayacancahua huan miquij nochi inintanahuatijcahua, pero amo aqui techztajtzilía para ma nijpalehui.

Israelitame quicajtejqoe ininTECO

8 “Tali Israel * ehuan momanelojtoque inihuaya sequinoc talme ehuan cati quinhueyichihuaj teteyome. Huan quej nopa mochijtoque amo teno ininpati quej amo teno ipati se taxcali cati san se lado icsitoc huan amo quixcuetque.

9 “Masehualme cati ehuan ipan sequinoc talme quinquixtilijque ininchicahualis, pero amo quimatij. Itztoque quej se tacat cati chipahuía itzoncal, pero yaya amo quiita sinta ya huehuejtiya. 10 Tali Israel ehuan motatelhuíaj pampa tahuel mohueyimatij. Eltoc quej inintajtacol techtajanía ma niquintatzacuiliti. Pero masque quej nopa itztoque tali Israel ehuan amo mocuepaj ica na, yon amo techtemohuaj.

11 “Tali Israel ehuan itztoque quej se paloma cati huihuic huan amo teno quimachilía. Quemantica quitajaníaj tapalehuili tali Egipto huan quemantica tali Asiria. 12 Pero quema quisase para yase nozona, na niquinmachauilis nomata huan niquintemohuis quej se quintepexihuisquía miyac totome cati patantinemij san sejco ajacatipa. Quej nopa niquintatzacuilitis por nochi cati amo cuali quichijtoque.

13 “Tahuel fiero ininpantis pampa mohuejcatilijtoque ten na. Ma miquica pampa mosisinijque ica na. Quema nijnequiyaya niquinmaquixtis, injuanti techistacahuijque. 14 Amo techztajtzilíaj ica iniyolo. San tahuejchihuaj ipan inintapech ica tayohua pampa mocuesohuaj sinta oncas trigo huan xocomecat iayo. Mosentilíaj huan motejtequij ipan inintacayohua para quintajtanise nopa teteyome ma quinmacaca, pero moyocatalijtoque ten na cati niquinmacasquía.

* 7:8 7:8 O Efrain. Xijtachili Os. 4:17.

15 “Na niquinmachi quenicatza ma tatehuica huan niquinmacac chicahualisti, pero inijuanti san moilhuiaj taya amo cuali huelis techchihuilise. 16 Campa hueli tachiyaj para quuitase ajquiya quinpalehui. Pero amo techtemohuaj na cati niininTeco Cati Más niHueyi. Itztoque quej se cuahuitoli cati huijcoltic cati amo aqui hueli quitequihuis para tamelac itas. Mohueyima-
jtoque, huan techtaijilhuijtoque huan yeca inintayacanhua miquise ica macheta. Huan nopa Egipto ehuani san quinhuetzquilise.

8

Israelitame mocuapolojtoque por ininteteyohua

1 “¡Ma quipitzaca nopa tapitzali cati ica tayolmelahua para hualahui inincualancaitacahua! Quej se cuatojti temotiquisa ipan se piyo, inincualancaitacahua nomasehualhua quinhucase pampa quixpanotoque nopa camanal sencahuali cati nijchijtoya inihuaya huan mosisinijtoque ica notanahuatil. 2 Huan ama tali Israel ehuani techtzajtzilaj huan quijtohuaj: ‘Techpalehui pampa timitzixmatij para ta tiToteco Dios.’ 3 Pero amantzi ayecmo huelis pampa israelitame quihuejcamajcajtoque cati cuali. Yeca ama quintepotztocatinemise inincualancaitacahua. 4 Inijuanti quintequitalijque tanahuatiani huan tayacanani, pero amo cati na niquintapejpeniyaya. Huan ica nochí ininplata huan inioro quinchijque teteyome. Huan ica ya nopa motzontamiltijque ica iniselti.

5 “AnSamaria* ehuani, amo quema nimechselis ica nopa becerro teteyome cati anmochijchihuilijtoque pampa tahuel techcualancamacaj. ¿Hasta quema anmotapajpacchihuase ten nopa tajtacoli? 6 Nopa becerro teteyome cati anquinhueyichihuaj amo ya Dios. Ya nopa san quimachijchijtoque tacame. Yeca nopa becerros ipan tali Israel niquinpayaxos.

7 “Inijuanti quichijtoque cati amo cuali huan quiselise cati tahuel fiero. Nopa tocti amo temacas pixquisti huan amo oncas harina. Huan sinta quentzi oncas, sequinoc quicuase.

8 “Quena, tali Israel elis sosoltic. Huan nopa sequinoc talme quuitase quej se comit tatapacatoc cati amo teno ipati. 9 Nopa israelitame yajque ipan tali Asiria para quitemose tapalehuili. Techthuelcajtoque na quej quistehua se cuatitan burro. Pampa ayecmo technequij, mocohuijtoque inimecahua.

10 “Pero masque nopa israelitame quintaxtahuijtoque cati ehuani sequinoc talme para ma elica inimecahua, amo quinpalehuise. Na niquinsentilis huan niquintitanis ipan sequinoc talme campa itztose quej seyoc tali ehuani. Huan taijyohuise imaco se tanahuatijquet huan itapalehuijcahua cati tahuel tejtetique.

11 “Ipan tali Israel † nopa israelitame quinchijchijque miyac taixpame campa moquixtilijtosquiaj inintajtacolhua, pero quincuetque nopa taixpame para ma elica lugares para tajtacolchihuase. 12 Huan masque niquni-
jcuilhuili miyac tanahuatilme, quijtojque para nopa tanahuatilme amo elqui para inijuanti. 13 Inijuanti techtencahuilijque miyac tacajcahualisti san para quicuase ininacayo nopa tapiyalme, pero amo niqunselili pampa na, cati niininTECO, amo techpacti. Huaicca na niquintajtani cuenta por nochí inintajtacolhua cati quichijtoque huan niquintatzacuiltis. Huan sempa yase tetequipanotij san tapic quej quichijque huejcajquiya ipan tali Egipto.

* 8:5 8:5 Samaria eltoya nopa tayacanca altepet ipan tali Israel ica norte huan quemantica quitocaxtíaj nochí tali Israel ica Samaria. † 8:11 8:11 O Efraín. Xijtachili Os. 4:17.

14 “Tali Israel ehuaní mochijchihuilito que huejhueyi caltanahuatilme huan tali Judá ehuaní quinyahualojto que miyac inialtepehua ica tepamit, pero nochi inijuanti san se techelcajto que na, cati niqinchijchijqui. Huajca na nijtitanis tít ipan inincaltanahuatilhua huan niqintatis nopa altepeme cati quinyahualojto que ica tepamit.”

9

Oseas quinilhuía ten inintatzacuilitis

1 Oseas camanalti: AnIsrael ehuaní, amo xipaquica hasta anhuitonise quej masehualme ipan sequinoc talme paquij. Anquihuelcajto que Toteco Dios quej se sihuat cati quipactía nopa taxtahuili huan quicahua ihuehue para tacanemis. Anquinmacato que tacajcahualisti teteyome. Huan anmochihuilito que miyac tamanti cati fiero pampa anmoilhijque quej nopa amoteteyo amechmacas se cuali pixquisti. Pero amo oncas.

2 Ama nopa pixquisti ten trigo ayecmo amechaxilis para anquichihuase pantzi huan san pilquentzi xocomecat oncas para anquiquixtilise iayo para anquise.

3 Antali Israel ehuaní, ayecmo huelis anmoca huase ipan ni tali cati iaxca TOTECO. Ama amechhuicase ipan tali Asiria para antetequipanotij quej huejcajquiya amohuejcapan tatahua tetequipanojque ipan tali Egipto. Huan ipan Asiria anquicuase tacualisti cati amo tapajpactic iixpa TOTECO.

4 Nozona amo amechahuilise anquinelnamiquise nopa ilhuime ten TOTECO, yon amo hueli anquimacase nopa tacajcahualisti cati quitoyahuaj iixpa. Yon se tacajcahualisti cati nozona anquitencahuase amo quipactis TOTECO. Nozona nochi tacajcahualisti elise amo tapajpactic iixpa TOTECO. Elis quej se tamanti cati quiitzquitoc se masehualí cati quichoquilijtoc se mijcatzi huan yeca mochijtoc amo tapajpactic. Huan nochi masehualme cati quicuase nopa tacualisti nojquiya mochihuase amo tapajpactic iixpa TOTECO. Hueli quicuase nopa tacajcahualisti cati amo tapajpactic para ixhuise, pero amo huelis quihuicase ichaj TOTECO para quitencahuilise.

5 Huan ¿taya anquichihuase para anquielnamiquise nopa tonali ten nopa ilhuit cati hueyi quema monequi anmosentilise para anquihueyichihuase TOTECO? 6 Quema amechhuicase nozona, miyac miquise huan motalpa-chose quej quintalpachojque amohuejcapan tatahua ipan altepet Menfis ipan tali Egipto huejcajquiya. Huan ¿ajquiya moaxcatis nochi tamanti cati jejyetzti cati anquicajtejque? Campa anquicajtehuase amoricojyo san moscaltis tejtzonquilil huan sahua mecat.

7 Temachti ajsis nopa tonali para antali Israel ehuaní anquiselise tatzacuiliti. Quena, anisraelitame, cuali anquimatise para ya ajsic nopa tonali para TOTECO amechcuelilis. Anquijtojto que: “Huihuitique nopa tajtolpanextiani cati quiijtohuaj huala tatzacuiliti.” Huan “San mocuapolojto que cati quiijtohuaj quiselíaj camanali ten TOTECO.” Huajca pampa tahuel miyac antajtacolchijto que huan tahuel anquicualancaitaj TOTECO temachti hualas amotatzacuilitis.

8 Toteco Dios techtalijtoc niitajtolpanextijca quej niamotamocuitahuijca, antali Israel ehuaní. Nimechilhuía para hualas cati fiero. Pero campa hueli antechtalilíaj taquetzti. Huan nochi amojuanti cati anitztoyaj quej ifamilia Toteco antechcualancaitaj. 9 Anisraelitame neltahuel antajtacolchijto que hasta huejcajquiya ipan altepet Gabaa. Huan Toteco Dios quielnamiquis nochi cati anquichijto que huan amechtatzacuilitis por amotajacolhua.

Israelitame taijyohuise por inintajtacolhua

¹⁰ TOTECO quiijtouhua: “Quema achtohuiya nimechpanti anisraelitame, elqui quej nijpantijtosquía itajca xocomecat ipan se huactoc tali. Quena, quema niqunitac amohuejcapan tatahua, elqui quej nijpantijtosquía nopa achtohui higos cati más selic ipan nopa higuera cuahuit pampa tahuel techpactiyaya. Pero teipa amotatahua ajstoj campá Baal Peor huan motemactilijque ica nopa teteyot cati pano fiero hasta quichijque tamanti cati eltoya se hueyi pinahualisti. Huan amotatahua mocuetque tahuel fierojtique quej nopa teteyot cati quihueyichihuayayaj. ¹¹ Huajca amojuanti cati anehuani tali Israel * ayecmo anquipayase tatepanitacayot pampa amohueyitilis tamis. Ayecmo tacatise coneme, yon ayecmo tanemiltise sihuame, yon conecuisse. ¹² Huan sinta moscaltise se ome amoconehua, nochi na nimechquixtilis huan amo aquí mocalhuas. Tahuel fiero amopantis quema nimechiyocacahuas huan nimechcajtehuas.

¹³ “Na niqunitac para tali Israel eltoya yejectzi quej nopa altepet Tiro pampa nojquiya eltoya campá tayejectzi. Pero ama monequis nopa tetajme quinquixtise ininconeua para inincualancaitacahua quinmictise.” ¹⁴ ¡Ay TOTECO! Xiquinmaca momasehualhua nopa tatzacuiliti cati tijpiya para tiqinmacas. Xiquinchihua inisihuajhua ma moconetahuisoca huan ma huajhuaqui ininchij.

TOTECO cualanqui ica tali Israel ehuaní

¹⁵ Huan TOTECO quiijtouhua: “Nochi inintajtacolhua pejqui ipan altepet Gilgal huan nozona pejqui niqinqualancaita por cati fiero quichijque nepa. Huajca na niqinquixtis ten notal huan ayecmo niqinicnelis pampa quinhueyichihuaq teteyome huan nochi inintanahuatijcahua senquisá mosisiníaj ica na. ¹⁶ Huajca ama nechca para tali Israel ehuaní quiselise tatzacuiliti. Itztoque quej se tzonti cati huactoc inelhuayohua huan yeca ayecmo temacas más itajca. Huan sinta quinpiyase más ininconeua, na niqinmictis masque tahuel quinicnelíaj.”

¹⁷ NoTeco Dios quintahuelcahuas nopa masehualme ipan tali Israel pampa amo quinequij quitacaquilise, yon amo quinequij quitepanitase. Elise nejnemini campá huéli ipan sequinoc talme huan amo cana quipiyase ininchaj.

10

TOTECO quinsosolo inintaixpa teteyome

¹ Tali Israel eltoya quej se xocomeca tzonti cati moxoyajqui campá huéli, pero san para ya. Quema más moricojchihuayayaj, más quinchijchihuiluyaj taixpame nopa teteyome. Huan quema noja más nijmacayaya pixquísti, noja más yejectzitzit teteyome quinchijchihuayayaj. ² Iniyolo nopa israelitame amo nelía motatzquilijtoc san ipan Toteco pampa ome ojti quitoquilíaj. Huajca quihuicaj tajtacoli huan quinamiqui quiselise tatzacuiliti. TOTECO quisosolos nochi inintaixpahua huan quitapanas ininteteyohua. ³ Huan huajca quiijtose: “Amo tijpiyaj totanahuatijca pampa amo tiquimacisque TOTECO. Pero masque tijpiyasquíaj se totanahuatijca, amo teno huélisquía techchihuilisquía ama. ⁴ Tanahuatiani quiijtouhuaj miyac camanali cati yejectzitzit, pero amo teno ipati. Huan quitaajtolcahuaj miyac tamanti, pero amo quichihuaq cati quiijtouhuaj. Huajca yeca cualanti

* **9:11** 9:11 O Efraín. Xijtachili Os. 4:17.

mopanextis campa inijuanti quej xihuit cati pajyo panquisa iseltitzi ipan mila.”

⁵ Nopa tali Israel * ehuani huihuipicase ica majmajti por cati ininpantis nopa becerro teteyome cati quinhueyichihuayayaj ipan Bet Avén†. Nochi nopa masehualme huan totajtitzti mocuese por nopa teteyome pampa quimatij ayecmo aqui quintepanitas. ⁶ Asiria ehuani quinhucase nochi nopa teteyome ten becerro hasta inintal huan quimacatij quej se nemacti nopa Tanahuatijquet Jareb. Huan tali Israel ehuani pinahuase por nopa teteyome cati ipan motemachiyayaj. ⁷ Quimictise amotanahuatijca cati mosehuía ipan Samaria campa más oncayaya amoteteyohua. Huan nopa altepet ixpolihuis quej hueyi at quihuica se cuapetat. ⁸ Huan quisosolose nopa taixpame para amoteteyohua ipan Avén campa anisraelitame antajtacolchijque. Huan nopona ixhuas huitzti huan sahua mecat. Huan nopona israelitame quihuhise nopa cuatitamit: “Techtati ten icualancayo Toteco.” Huan nopa tepeme quinihuse: “Xihuetzica topani para yaya amo techajsis.”

⁹ Huan TOTECO quijtos: “Hasta quema amohuejcapan tatahua, anisraelitame, tajtacolchijque nepa ipan altepet Gabaa huan hasta ama, amo quema anquicajtoque antajtacolchihua. San tajtacoli anquimatij. Huajca ¿amo anquijat para quinamiqui para nopa soldados quintehuijque inijuanti cati fiero cati itztoyaj ipan Gabaa? ¹⁰ Huan ama nojquiya quinamiqui nimechtatzacuiltis amojuanti ipan ni tali quema nijnequi. Huan niquinsentilis soldados ten nochi talme para amechtatzacuiltise por nochi amotajtacolhua cati tahuel hueyi.

¹¹ “Tali Israel † ehuani itztoque quej se cone huacax cati quimati para ipan moquejquetzas trigo para quiyolquixtis. Pero ama nijchihualtis ma tequiti ipan tequit cati ohui. Nijtalilis ipan iquechta cati yamanic se cuahuit cati etc. Hasta tali Judá ehuani nojquiya monequi tapoxonise. Huan nochi israelitame quipayatztiyase nopa taltolomit pampa ya huala tonali cati más ohui. ¹² Nimechilhujtoc: ‘Xijchihuaca cati xitahuac huan anquiselise notaicnelijcayo. Ximoyolyamanilica pampa ama nopa tonali para anquitemose TOTECO. Huan yaya temacht hualas huan amechtiochihuas miyac. Se cati quipayaxohua tali cati tetic huan quitoca cuali xinacht temacht quipixcas cati cuali.’

¹³ “Pero san anquichijtoque cati amo cuali huan yeca anquipixcatoque tajtacolot huan istacatili. Anmotemachijtoque ipan amotatehuijca carros huan amosoldados, huan amo ipan na huan ama anquiselijtoque cati quinamiqui.

¹⁴ “Huajca ama tatehuilisti hualas ipan amojuanti. Huan senquisa huetzise nopa calme cati más tilahuac para ipan anmomanahuisquiáj. Elis quej panoc quema Salmán § quisosolo altepet Bet Arbel huan quincocototzque hasta nopa sihuame huan nopa coneme. ¹⁵ Quej nopa nojquiya amopantis antali Israel ehuani pampa miyac tajtacoli anquichijtoque ica amoteteyohua ipan Betel. Quema pehuas nopa tonali ten tatzacuiltili, quitzontamiltise amotanahuatijca ipan tali Israel.

11

TOTECO quintasojta imasehualhua cati tetic iniyo

¹ “Quema nopa israelitame ayemo eliyayaj miyaqui masehualme, pejqui niquinicnelía. Niqunitac quej nocone huan nijnotzqui nocone ma quisa

* **10:5** 10:5 Xijtachili Os 8:5. † **10:5** 10:5 Xijtachili Os 4:15. ‡ **10:11** 10:11 O Efraín. Xijtachili Os 4:17. § **10:14** 10:14 Xijtachili 2 R. 17:1-6.

ipan tali Egipto. ² Pero quema na más niquinnotzayaya, injuanti noja más mohuejcataliyayaj ten na. Huan quinmacayayaj tacajcualisti nopa tetyome ten Baal huan quintatiliyayaj copali nopa taixcopincayome. ³ Quej se tetaj quimatilana icone huan quinextilía ma nejnemi, na niquinpalehuiyaya israelitame, pero amo quimatque sinta niquinmocuitahuiyaya. ⁴ Quej se tacat quiyacana ihuacax, niquinyacanqui noisraelita masehualhua ica miyac taicnelijcayot. Nojquiya niquincaxanili inincamailpica para ma tacuaca. Huan ica nochi noyolo niquintamacac ica nomax.

⁵ “Pero ama, pampa amo anquinejque anmocuepase ica na, anyase an-tetequipanotij san tapic quej amohuejcapan tatahua tetequipanotij ipan tali Egipto. Pero ama noja más ohui elis pampa nopa fiero tanahuatijquet ten tali Asiria elis amotanahuatijca. ⁶ Amocualancaitacahua calaquise huan oncas tatehuilisti ipan amoaltepehua. Huan amechsolhuilise nopa barras ipan amocaltehua cati ipan anmotemachijque para amechmanahuis. Huan tamis nochi cati ica anmohueyimatiyayaj huan anmoilhuiyayaj para anquichihuase. ⁷ Huan nochi ya ni amopantis pampa senquisa anmosisini-jtoque ica na. Masque antechtocaxtiyayaj Toteco Cati Más Hueyi, amo aqui quinequiyaya techhueyichihuas.

⁸ “Pero ¿quenicatza nimechtahuelcahuas, annomasehualhua ipan tali Israel? Amo huelis nimechcahuilis anyase huan senquisa amechtontamil-tise. Amo hueli nimechixpolihuiltis quej huejcajquiya nijchijqui ica altepeme Adma huan Zeboim cati tataque ihuaya altepet Sodoma. Tahuel techyolpitzahua pampa tahuel nimechicnelía. ⁹ Yeca amo nimechtatzacuiltis ica nochi nocualanayo. Amo quema nijsosolos nochi tali Israel * huan imasehualhua sempa. Melahuac cati nimechilhuía pampa na niDios huan amo nimasehuali. Na niitztoc cati niTatzejtzolotic huan niitztoc tatajco ten amojuanti. Amo nihualas sempa para nitasosolos.

¹⁰ “Teipa nochi nopa masehualme techtoquilise niininTECO. Huan ninanalcas quej se león cati quinajhuas icualancaitacahua. Huan ica majmajti nomasehualhua huihuipicatihualase ten nopa talme campa calaqui tonati. ¹¹ Hualase ten tali Egipto quej miyac totome cati patantihualase. Huan ten tali Asiria huihuipicatihualase quej palomajme. Huan niquinchihuas ma itztoca ipan ininchajchaj. Quej nopa niqijtohua niininTECO.

Inintajtacolhua Israel ehuaní

¹² “Tali Israel ehuaní san techilhuíaj istacatili huan quinequij nechcaj-cayahuase. Huan tali Judá ehuaní nojquiya mohuejcanectinemij ten na cati niininTeco Dios. Talojtzitzi nechcahuaj na cati niTatzejtzelolitic huan nitemachti.

12

¹ “Tali Israel ehuaní mojmosta mososolohuaj quej se cati motamaca san ica ajacat. Quitemohuaj tamanti cati quinixpolihuiltis quej se cati quitoquilía nopa huac ajacat cati más tetatía. Huihuitique para quichihuaj camanali ica tali Asiria para ma quinpalehui. San tapic para tali Israel ehuaní quititanise aceite ten olivos ipan tali Egipto pampa quinequisquiáj ma quinmacaca se tapalehuili. Tahuel quinpectía tacajcayahuaj huan motehuáj se ica seyoc.”

² Pero TOTEKO nojquiya quipiya se cualanti inihuaya israelitame cati tali Judá ehuaní. Quintatzacuiltis nochi israelitame * quej quinamiqui ica

* 11:9 11:9 O Efraín. Xijtachili Os 4:17.

* 12:2 12:2 Jacob nica quinequi quiijtos nochi israelitame cati amo cuali quichihuaj.

nochi tajtacoli cati quichijtoque. ³ Hasta quema ayemo tacatiyaya Jacob huejcajquiya, motehui ihuaya iicni. Huan quema motacachijqui, motehui ihuaya TOTECO. ⁴ Quena, motehui ihuaya nopa ilhuicac ejquet huejcajquiya huan quitanqui. Huan teipa Jacob chocac huan chichahuac quiihui ma quitiocihua. Huan sempa mopanti ihuaya TOTECO nopa ipan Betel, huan nopona TOTECO quicamanalhui tohuejcapan tata Jacob huan ica tojuanti por ya. ⁵ Mocamanalhui ihuaya TOTECO Cati Quinyacana ilhuicac ecahua Ma Tatanitij, yaya cati itoca TOTECO cati nochipa itztoya huan nochipa itztos. ⁶ Huajca ama ximocuepaca ica Toteco Dios. Xiteicnelica huan xijchihuaca cati xitahuac. Nochipa ximotemachica ipan amoTeco Dios huan amo ipan seyoc.

⁷ Pero amo anquichihua ya nopa. Antanamacani anquihuicaj amomaco tatamachihuali cati amo ajsi pampa amechpactia anquincajayahuase huan anquintajyohuiltise sequinoc. ⁸ Antali Israel † ehuan, anmohueyimatij huan anquijtohuaj: “Tahuel nimoricojchijtoc huan nochi nijtantoc noseltitzi. Amo aqui huelis quijtos para nitaixpanotoc ica nochi cati nijtantoc. Amo nijpiya tajtacoli.”

⁹ [Huan TOTECO quijtohua:] “Na nielqui niamoteco Dios hasta quema nimechquixti ipan tali Egipto. Huan ama nijsosolos amoaltepehua huan nijchihuas para sempa anitzose ipan pilxajcaltitzi quej anquichihuayayaj ipan nopa tonalme quema anilhuichihuayayaj. ¹⁰ Na nimechtitanili miyac tajtolpanextiani para amechcamanalhuise. Niqinmacac miyac tanextili huan miyac tatenpohualisti para amechilhuisse ximoyolcuepa ica na.”

¹¹ Pero altepet Galaad noja temitoc ica masehualme cati huihuitique huan huinhuayichihuaq teteyome. Huan ipan altepet Gilgal anquinmictiaj miyac huacaxme para tacajcualisti. Nopona anquintecpantoque tahuel miyac taixpame hasta nesi quej elisquia se mili. Huan nochi nopa taixpame anquintequihuaq para anquinmacase tacajcualisti amoteteyohua.

¹² Xiquelnamiguica para Jacob, amohuejcapan tata, nojquiya tetequipanoto quema cholo huan yajqui ipan tali Aram. Nopona yaya ‡ monejqui tequtis chichahuac para motanilis isihua. Quena, monejqui quinmocuitahuis borregoime para quiselis nopa ichpocat. ¹³ Teipa quema sempa tetequipanoyayaj amohuejcapan tathua, niamoteco nijtequihui se tajtolpanextijquet para niqinquixtis ten tali Egipto. Huan niqinmocuitahui ica se tajtolpanextijquet. ¹⁴ Pero ama antali Israel § ehuan tahuel antechualancamacatoque niamoteco. Yeca niamoteco nimechcauilis antetequipanotij para antaxtahuase por amotajtacolhua. Huetzis amopani nopa tatzacuilti cati quinamiqui ica nochi cati amo cuali anquichijtoque.

13

TOTECO quintatzacuilti quej quijtojtoya

¹ Huejcajquiya quema imasehualhua nopa hueyi familia Efraín camanaltiyayaj, nopa sequinoc huejhueyi familias ten israelitame huihuipicayayaj ica majmajti pampa nopa hueyi familia eliyaya tayacanquet ten sequinoc familias huan quipiyayaya chichualisti. Pero teipa imasehualhua nopa familia Efraín pejque quinhueyichihuaq nopa teteyome ten Baal huan por nopa tajtacoli temacht nochi ixpolihuise.

† **12:8** 12:8 O Efraín. Xijtachili Os. 4:17. ‡ **12:12** 12:12 Jacob teipa itoca elqui Israel. § **12:14** 12:14 O Efraín. Xijtachili Os. 4:17.

² Huan ama nopa masehualme noja más tajtacolchihuaaj. Quitanehui se tacat cati talnamiqui ma quimoloni ininplata huan ma quinchijchihua taixcopincayome huan teteyome. Pero nopa taixcopincayome huan teteyome amo teno ininpati pampa san tamachijchihualme. Huan teipa quinihuáj nopa israelitame: “Anmasehualme cati antemacaj tacajcahualisti, xiquintzoponica nopa becerro teteyome.” Quej nopa quijtohuaj. ³ Yeca ama nopa masehualme ixpolihuisse quej nopa mixti cati monextía ica ijnaloc, o quej nopa ajhuechti cati nimantzi huaqui, o quej nopa tasoli cati quihuica ajacat, o quej nopa pocti cati quisa campá ventana.

⁴ “Pero san na niitztoc niamoTECO Dios cati nimechquixti ipan tali Egipto campá antetequipanohuayayaj. Amo xijtepanitaca seyoc quej elisquía Dios, san na. Amo aquí seyoc temaquixtijquet, san na. ⁵ Pampa nielqui na cati niquinmocuitahui amotatahua huejcajquiya ipan nopa huactoc tali campá amo oncayaya at huan campá amo teno eliyaya. ⁶ Na niquintamacac huan cuali ixhuique, pero quema ya anixhuitoyaj huan anmomiyaquilijtoyaj, anmohueyimatque huan antechtahuelcajqe. ⁷ Yeca na nihualas campá amojuanti quej se león para nimechtzontamiltis. Nimechchiyas ipan ojti quej se hueyi tecuani. ⁸ Quema hualase nopa soldados cati niquintitanis campá amojuanti elise quej se tenan osa cati quinpolojtoc iconehua. Huan amechitzquise huan amechcocototzase huan quitzayanase amoyolo. Hua-jca nopona nimechtzontamiltis quej se león cati temictía huan tetolohua. Nimechhuejhuelos quej quichihua se tapiyali cati nemi cuatita ica cati quitzquitoc.

⁹ “Temachti anmotzontamiltijtoque, antali Israel ehuaní, pampa anmosinijtoque ica na cati niamotapalehuíca. ¹⁰ ¿Canque itztoc amotanahuatijca*? ¡Yaya amo hueli amechmanahuis ica nochi amoaltepehua! ¿Canque itztoque nopa tequichihuani cati antechilhuijqe ma nimechmaca? Anquijtojqe: ‘Techmaca tanahuatiani huan tayacanani.’ Pero ama ¿Canque itztoque? Ma amechpalehuica sinta huelij. ¹¹ Huan masque nicualaniyaya, nimechmacac se amotanahuatijca huan ama ica cualanti nimechquixtilijtoc.

¹² “Nochi amotajtacolhua, antali Israel † ehuaní, eltoc ijcuilijtoc huan cuali ajoctoc huan nimechtatzacuiltis ica sesentzitzí. ¹³ Nimechtencahuilijtoc, anisraelitame, para huelis antacatise sempa sinta anmoyolcuepasquíaj, pero anitztoque quej se conet cati tahuel huíhuític. Huan quema huala tacualcualocayot huan ajsi tonali ma tacati, yaya amo quinequi tacatis. ¹⁴ Pero na nimechcohuan amojuanti ten nepa micta. Quena, nimechmaquixtis. Nijtanis miqulisti para ayecmo teno huelis amechchihuilis. Huan nijsosolos nopa ostome campá tetalpachohuaaj para amo huelis amechpixtose. Amo nimoyolpatas ica cati nimoilhujtoc para nijchihuas.

¹⁵ “Pero masque iixhuihua nopa hueyi familia Efraín ‡ quipiyase ome hueltas ininpixquis campá iniicnihua, niininTECO nijchihuas ma huala se huac ajacat ininpani huan ininpan nochi tali Israel ehuaní. Huan nopa huac ajacat ten nopa huactoc tali quitamihuatzas iniamelhua huan nochi at nopona. Huan inincualancaitacahua quinichtequilise nochi iniricojyo huan nochi cati pajpatiyo cati quipixtose. ¹⁶ Huaíca nopa masehualme ipan

* **13:10** 13:10 Inintanahuatijca cati nojquiya itoca Oseas itztoya ipan tatzacti. Xijtachili 2 R. 17:4.

† **13:12** 13:12 O Efraín. Xijtachili Os. 4:17. ‡ **13:15** 13:15 Efraín quinequi quijtos ‘temaca pixquisti’. Nojquiya nopa hueyi familia Efraín elqui cati más quipixqui tequiticayot ten nopa majtacti huejhueyi familias cati mochijque tali Israel. Yeca teipa pejqe quitocaxtíaj nochi nopa tali Israel ica Efraín.

Samaria § quiselise nopa tatzacuiltli cati quinamiqui pampa mosisinijque ica na cati niininTECO. Yeca inincualancaitacahua quinmictise ica macheta huan ininconehua ininca tacuatatzcose talchi huan quiniititapose nopa sihuame cati tanemiltíaj.”

14

Oseas quinilhuía israelitame ma moyolcuepaca

¹ ¡Ay antali Israel ehuan! Ximocuepaca ica amoTECO Dios. Por amotajta-colhua, anhuetztoque hasta más tatzinta. ² Ximocuepaca ica amoTECO Dios huan xiquilhuitij: “Techquixtli nochi totajtacolhua. Xijpiya hueyi moyolo ica tojuanti huan techseli. Ica tocamac, timitzhueyichihuase. ³ Pampa tali Asiria ehuan amo huelis techmaquixtise, yon nopa tatehuilisti cati tijchi-huaj amo techpalehuis. Nojquiya ayecmo quema tiquintocaxtise ‘toTeco’ nopa teteyome cati tiquinmachijchijtoque pampa san ta tiquintasojta cati icnotzitzí.” Quej nopa xiquilhuica.

TOTECO quinmacas yancuic nemilisti

⁴ TOTECO quijitohua: “Pampa anquinhueyichijtoque teteyome, miyac amehcocojtoc, pero na nijchicahuas nochi cati fiero amechchihuiljtoc nopa miyac tajtacoli. Na nimechicnelis ica nochi noyolo pampa nocualan-cayo ya amechtalahuijtoc para nochipa. ⁵ Na nimechmacas yancuic chic-ahualisti quej ajhuechti ica ijnaloc. Huan nijchihuas para amotal Israel ma xochiyohua quej se lirio. Huan elis quej nopa tiocuame cati monel-huayotíaj ipan tali Líbano. ⁶ Tali Israel elis quej se yejectzi cuahuit cati moxacalos imacuayohua. Nesis nelpano cuali quej nopa cuahuit cati itoca olivo. Huan ni tali mijyotis ajhuiyac quej nopa cuatitamit cati onca ipan tali Líbano. ⁷ Israelitame sempa mocuepase para itztose ipan ni inintal. Ica temachili mosiyajquetzase itantita cuame cati taecahuilise. Mocuepase ten nopa sequinoc talme campa quihuicase para tetequipanotij. Maséhualme moscaltise nica quej se cuali trigo huan quej xochiyohua se xocomecat. Mijyotise ajhuiyac quej nopa xocomecat at cati onca nepa ipan tali Líbano.

⁸ “Nimechilhuis antali Israel * ehuan, ximohuejcalica ten nopa tetey-ome pampa eltoc na cati nimechtacaquilia quema antechtazajtzilíaj huan na cati nimechmocuitahuía. Na niitztoc quej se cuahuit cati nochipa xoxohuix-toc. Nimechmacas notajca nochi tonali ipan se xihuit.” Quej nopa quijito TOTECO.

Itamiya tamachtli ni amat

⁹ Cati talnamiqui, ma quimachili huan ma quitacaquili ni tamanti cati nica ijcuilijtoc pampa iojhui TOTECO nelía xitahuac. Huan nopa masehualme cati xitahuaque nejnemij nopona, pero cati mosisiníaj nopona motepotaniáj huan huetzij.

§ 13:16 13:16 Samaria eltoya nopa tayacanca altepet ipan tali Israel ica norte huan quemantica quitocaxtíaj nochi tali Israel ica Samaria. * 14:8 14:8 O Efraín. Xijtachili Os 4:17.

Joel

Nopa chapolime quitamicuase tatocti

¹ Ya ni nopa camanali cati TOTECO techmacac na, niJoel niitelpoca Petuel para ma nifayolmelahua.

² Xijtacaquilica cuali ni camanali anhuehue tacame ten anisraelitame. Quena, xijtacaquilica nochi cati anitztoque ipan ni tali. Amo quema anquitztoque se hueyi tamanti quej cati nimechpohuilis. Yon amotatahua amo quema quitztoque se taohuicayot quej ni cati oncas. ³ Teipa anquinpohuilise amoconehua cati amechajsic, huan inijuanti quinpohuilise ininconehua huan iniixhuihua cati tacajiyase. ⁴ Hualahui chapolime cati tatejctehualahui huan quicuase itajca amomil. Huan cati inijuanti quicahuase, hualase chapolime cati patantinemij huan quicuase. Huan teipa hualase chapolime cati huitontihualahui huan quicuase nopa pilquentzi cati mocajtos. Huan teipa hualase nopa tamanti chapolime cati quitamicuaj senquisa nochi xihuit cati onca, huan quitamiltise nopa quentzi cati nopa sequinoc chapolime quicajtose.

⁵ ¡Anihuintini, xiisaca! Quena, xichocaca amojuanti cati anquij xocomeca at cati cococ pampa amechquixtilise nochi itajca xocomecat cati ica anquichihuayayaj xocomecat iayo. ⁶ Quej soldados cati hualahui para techtanise, hualahui nopa chapolime para quicuase nochi cati eltoc ipan ni total. Amo aqui huelis quinpohuas quesqui inimiyaca. Huan inintancoch tatequi quej inintancoch tecuanime. Quena, ica inintancoch quitamicuase cati onca quej se sihua león cati mayana. ⁷ Quitamiltise nochi xocomeca mili huan nochi itajca tohiguera mil. Huan quinximase nopa cuame hasta chipahuac mocahuase imacuayohua.

⁸ Xichocaca chichahuac quej choca se ichpocat huan moyoyontia yayahuic pampa mictoc cati ihuaya monamictisquia. ⁹ Ama ayecmo onca tacajcahualisti ten harina, yon xocomeca at cati quitoyahuaj iixpa TOTECO. Chocase totajtztzi cati moquetzaj iixpa TOTECO, pampa mayantinemise. ¹⁰ Nochi mili eltos sosoltic. Amo teno oncas. San oncas tequipacholi campa hueli. Nochi toquisti ya polijtos. Nopa xocomeca mili ya huactos, huan nopa olivos pilinise, yeca ayecmo oncas aceite. ¹¹ Amojuanti cati antequitij ipan mila huan ipan xocomeca mili, anchocase ica cuesoli pampa nopa trigo huan cebada polihuis huan amo oncas pixquisti. ¹² Huaquis nochi xocomeca milme. ¹³ Pilinise nochi higuera cuame, huan huaquise nopa cuame cati temaca granadas, cocos huan manzanas. Senquisa nochi cuame polihuisse. Huan nojquiya ihuaya polihuis ininpaquilis nochi masehualme.

¹³ Amojuanti antotajtztzi cati anquitequipanohuaj noTeco Dios campa taixpamit, ximoyoyontica ica yoyomit cati fiero. Huan xichocaca ica cuesoli pampa ipan tiopamit ayecmo quihualicase harina huan xocomecat iayo para tacajcahualisti para ya. ¹⁴ Xiquinnotzaca nochi masehualme ma mosentilica iixpa TOTECO huan ma mosahuaca. Ma hualaca ipan itiopa nochi huehue tacame huan nochi masehualme cati itztoque ipan ni tali. Huan ma quitajtjanica itapalehuil TOTECO huan ma chocaca iixpa.

Ni tatzacuiliti elis fiero quej ipan itonal TOTECO

¹⁵ Nopa tonali cati itoca itonal TOTECO monechcahuia huan tahuel fiero elis para masehualme. Quena, ipan nopa tonali TOTECO Cati Quipiya Nochi Chichahualisti quitamisosolos cati onca campa hueli. ¹⁶ Toixpa techquixtilise

totacualis huan tamis nochi paquilisti ipan itiopa Toteco Dios. ¹⁷ Nopa xinachti cati tijtocase tamihuaquis ipan mili. Nopa chiqueros para sinti tiquinsosolose pampa amo teno oncas para ipan tijtalise. ¹⁸ Tzajtze nochi huacaxme ica mayanti pampa amo oncas sacat. Huan nelía taijyohuise nochi borreojme.

¹⁹ TOTECO, techpalehuiqui. Quena, nimitznotza TOTECO pampa nopa tit quitamitatis nochi xihuit huan nochi cuame ipan cuatitamit. ²⁰ Huaquis nochi pilatajtzitzi hasta nopa tapiyalme ipan cuatitamit mitztzajtzilise para xiquinmaca at. Huan tamihuaquis nochi sacat.

2

¹ Xijpitzaca nopa tapitzali cati ica antayolmelahuaj ipan altepet Jerusalén*, itepe TOTECO cati tatzetzelolitic. Ma huihuipicaca nochi cati itztoque ipan tali Judá pampa ya huala nopa tonali cati itoca itonal TOTECO. Quena, monchcahuá nopa tonali cati itoca itonal TOTECO quema yaya tetatzacuiltis. ² Elis se tonali ten tzintayohuilot, ten tatzacuilti huan tequipacholi. Nopa tonali tamixtentos huan tayayahuiyas. Ayecmo nesis tonati.

Hualahui nopa chapolime

Quej quema pehua tanestihuala huan teipa campá hueli onca taahuili, quej nopa tiqunitase nopa chapolime cati hualase quej elisquij tachel miyaqui soldados. Tachel miyac chichahualisti quipiyase. Amo aquí amo quema quiitztoc se tamanti quej ni, yon amo quema sempa quiitase cati tacatise teipa ipan ni taltipacti. ³ Inijuanti itztoque quej tilelemecti cati quipipitzohua nochi cati eltoc inechca. Quitzontamiltise nochi cati eltoc iniixmelac. Huan campá panose mocahuas quej amo teno eltoya. Ni tali eliyaya quej ixochimil TOTECO quema ayemo ajsiyayaj. Pero quema ya panotose, mocahuas quej se huactoc tali campá amo teno eli, pampa yon se pilxihuitzi amo hueli momanahuis. ⁴ Nopa miyaqui chapolime nesise quej pilcahuayojtitziti cati motalohuaj chichahuac. ⁵ Quema huitonise, tacaquistis chichahuac quej carrojme cati yahuij ipan tatehuilisti. Huan caquistis quej xaxamaca tasoli cati huactoc ipan miyac tit o quej miyaqui soldados cati yahuij para tatehuise ica miyac chichahualisti.

⁶ Nochi masehualme huihuipicase quema quinitase. Nochi inixayac istalihuis. ⁷ Nopa miyaqui chapolime motalojtihualase quej tacame cati mooquichmatij huan amo majmahuij. Tejcosé ipan tepamit ipan altepeme quej soldados cati momachtijtoque tatehuise. Sese inijuanti quimati iohui huan huala xitahuac. ⁸ Amo mocuatopehuase. Sese nemis ipan iohui. Amo hueli timomanahuise ten inijuanti pampa yon se macheta amo quinasis. ⁹ Ajsiquij ipan altepet, huan tejcoquij ipan tepamit huan calaquise ipan calme. Quena, calaquise ipan ventanas quej calaquise se tachtejquet. ¹⁰ Quema noja itztose ipan ojtí para ajsise, ni taltipacti huihuipicas iniixpa. Elis quej ilhuicacti momajmatis pampa tonati huan metzti ayecmo tatanex-tise huan sitalime ayecmo cahuanise. ¹¹ TOTECO quinyacanas huan quinnahuatis taya ma quichihuaca. Inijuanti elise isoldados huan quicaquise itoscac cati caquisti quej se tatomonilot. Itztose tachel miyaqui hasta amo aquí huelis quinnpohuas quesqui. Huan quineltoquilise cati quinnahuatía. Tachel temajmati huan tachel fiero elis ni tonali cati itoca itonal TOTECO. Amo aquí huelis quijyohuis.

Itasojtacayo TOTECO

* 2:1 2:1 Tepet Sion eltoc seyc itoca Jerusalén.

¹² Huan yeca TOTECO quiijtohua: “Hua jca ama ximoyolcuepaca ica na huan nochi amoyolo. Ximosahuaca, xichocaca huan xitahuejchihuaca por amotajtacolhua.”

¹³ Amo san xijtzayanaca amoyoyo, pero xijtzayanaca amoyolo. Ximocuepaca ica amoTECO Dios, pampa yaya quipiyas hueyi iyolo huan tetasojtas. Yaya nelía tahuel mochiya huan amo nima cualani. Tahuel teicnelía huan amo quinegui tetatzacuiltis. ¹⁴ Nohueli motepotztocas huan moyolcuepas huan amechcahuilijtehuas se tatiocihualisti huan amo se tatzaucuilti. Huelis amechmacas harina huan xocomecat iayo para anquipiyase tacajchualisti para anquimacase ya quej achtohuiya anquipixtoyaj pampa nopa tacajchualisti yaya iaxca huan quinamiqui quiselis.

¹⁵ Xijpitzaca tapitzali ipan altepet Jerusalén†. Xiquinyolmelahuaca nochi masehualme para ma mosahuaca. Ma mosentilica TOTECO imasehualhua ipan se tasentili cati tatzejtelolitic. ¹⁶ Xiquilsentilica nopa huehue tacame huan nopa coneme, hasta nojquiya nopa pilconetzitzi cati noja chichij. Cati sanoc mosihuajtjtoc ma quisa ipan nopa calijtic campa itztoc huan ma quihualica isihua. Nochi ma motapajpacchihuaca iixpa TOTECO.

¹⁷ Ma chocaca nopa totajtzitzi cati tequipanohuaj iixpa TOTECO. Ma moquetzaca tatajco taixpamit huan nopa miyaqui masehualme nechca caltemit huan ma motatajtica ica TOTECO huan quiijtose: “TOTECO, techtapojpolhui timomasehualhua. Amo aqui xijcahuili ma toca huetzca pampa timoaxcahua. Amo xiquincahuili masehualme cati ehuan ipan sequinoc talme cati amo mitzhueyichihuaj ma ten hueli camanaltica ten tojuanti huan quiijtose: ‘¿Canque itztoc amoTECO Dios? ¿Amo hueli amechpalehuis?’”

TOTECO tananquilis

¹⁸ Hua jca TOTECO quitasojtas ital huan quintapojpolhuis imasehualhua, ¹⁹ huan quiijtos: “Xiquitaca, nimechtitanilis trigo, xocomecat iayo huan aceite para ica xiixhuica. Ayecmo quema nijcahuas para masehualme cati amo techneltoaj ma amo huetzcaca. ²⁰ Teipa niquinhuejcatalis nopa chapolime cati hualahui neca norte quej soldados. Huan niquinmajcahuas ipan nopa huactoc tali campa amo teno eli huan nozona miquise. Niquinisahuiltis cati quinyacana ipan nopa Hueyi At Mictoc campa hualquisa tonati, huan cati yahuiyayaj inintepotzco misahuisse ipan Hueyi At Mediterráneo campa oncalaqui tonati. Huan inintacayohua palanise huan mijyotise, pampa na nijchihuas huejhueyi tamanti.”

²¹ Amojuanti cati anitztoque ipan ni tali, amo ximomajmatica. Xipaquica miyac pampa TOTECO amechchihuilijtoc huejhueyi tamanti. ²² Huan antapiyalme cati campa hueli annejnemij, amo ximajmahuica pampa sacapatat sempa moseliltis. Cuame sempa temacase inintajca huan oncas higos huan xocomecat iayo ica imiyaca.

²³ Anmasehualme ten Jerusalén, xipaquica. Xipaquica ipan TOTECO pampa yaya quichihuas ma taquiyahui quema monequi quema achtohui antocase. Quena, quichihuas ma huetzi at senquisa quema achtohui mon-equis para cati anquitoctoque huan sempa quema teipa monequis, senquisa quej achtohuiya quichihuayaya. ²⁴ Hua jca oncas se cuali pixquisti ten trigo huan oncas miyac xocomecat iayo huan aceite.

²⁵ Huan TOTECO quiijtos: “Na nimechcuelipilis nochi nopa pixquisti cati quicuaque nopa chapolime cati patantihualajque, huan cati taso solojque, huan cati tatejtectihualajque huan cati huitontihualajque. Quena, nimechmacas sempa nochi cati quitamicuajque nopa miyaqui chapolime cati na

† 2:15 2:15 O tepet Sion.

nimechtitanili. ²⁶ Huan antacuase hasta anixhuise, huan antechhueyichi-huase na, niamoTECO Dios pampa na nimechchiuilis huejhueyi tamanti. Huan amo aqui sempa amechpinahuaitis, annomasehualhua. ²⁷ Huan quej ni anisraelitame anquimatise para na, niamoTECO Dios, niitztoc tatajco ten amojuanti. Huan anquimatise para na, niamoTECO Dios huan amo aqui seyoc. Huan amojuanti cati annomasehualhua amo aqui sempa amechpinahuaitis.

Hualas Itonal TOTECO cati tatzejtzolotic

²⁸ “Huan teipa nijtitanis noTonal ipan nochi masehualme. Amoconehua, tacame huan sihuame, tayolmelahuase nocamanal quej tajtolpanextiani. Huan nopa huehuentzitzitampa amojuanti quipiyase femicti. Huan amotelpocahua quiiitase tanextili cati na niquinnextilis. ²⁹ Huan nojquiya ipan nopa tonali niquinmacas noTonal cati tatzejtzolotic amotequipanojcahua, tacame huan sihuame.

³⁰ “Nijnnextis ipan ilhuicac huan ipan taltipacti huejhueyi tanextilijcayot cati masehualme san quitachilise. Monextis esti huan tit. Huan oncas poci cati moquetzas quej taquetzalme. ³¹ Tonati mocuepas yayahuic huan metzti mocuepas quej esti quema ayemo ajsi nopa hueyi tonal huan nopa tonal cati nelia fiero quema na, niamoTECO nitetajtolsecahuas. ³² Pero nochi cati technojoztase na, niamoTECO, para ma niquinpalehui, niquinmaquixtis. Pampa itztose ipan tepet Sion huan ipan altepet Jerusalén sequij masehualme cati niquinmaquixtis quej nimechilhuijtoc. Nopona mocahuase yoltoque inijuanti cati niquintapejpenijtoc.”

3

TOTECO quintajtolsecahuas cati amo israelitame

¹ Huan TOTECO nojquiya quiijto: “Quema ajsis nopa tonali, nijchihuas ma mopata ininemilis nopa masehualme ten tali Judá huan ten altepet Jerusalén huan sempa quipiyase nochi tamanti cati cuali. ² Teipa niqunsentilis nochi talme inisoldados huan niquinhuicas ipan nopa tamayamit ten Josafat campaa niquintajtolsecahuas ica cati quinchihuilijtoque noisraelita masehualhua. Pampa quinsemanque israelitame cati noaxcahua ipan nochi talme ipan taltipacti huan momajmacaque notal.

³ “Nojquiya momajmacaque nomasehualhua hasta mahuiltijque ica pil-tetzitzi para quiiitase ajquiya quiselis sese ten inijuanti. Temacaque inioquichpilhua para huelque itztose se talojtzi ica se ahuilnenca sihuat. Huan quinnamacaque sihuapilme para se quentzi taili para moiहुaintise.

TOTECO quintajtolsecahuas nochi talme

⁴ “¿Taya anquinequij ica na, amojuanti cati anehuani Tiro, Sidón huan tali Filistea? ¿Anquinequij anmomacuepase ica na por se tenijqui? Sinta quej nopa anquinequij anquichihuase, nimantzi nimechmacuepilis por cati anquichijtoque. ⁵ Amojuanti anquichitejque nooro huan noplata. Anquihuicaque nochi nopa tamantzitzi cati yejyetzitzi nijpixtoya huan anquicalaquijtoque ipan inintiopahua amoteteyohua. ⁶ Anquinhuicaque nomasehualhua ten tali Judá huan altepet Jerusalén huejca huan anquinamacaquequiltijque griego masehualme para quantequipanose san tapic. ⁷ Pero na niquinquixtis ten campaa anquinamacaque huan nimechchihuas xitaijyohuica quej inijuanti taijyohuijque. ⁸ Na nojquiya niqunnamacquiltis amoconehua ica tali Judá ehuan huan inijuanti quinnamacaquequiltise nopa sabeo masehualme cati tahuel huejca ehuan.” Quej nopa quiijto TOTECO.

⁹ “Xiquinmatiltica nochi masehualme ipan nochi talme para ma hualaca huan ma mocualtalica para tatehuilisti. ¡Xiquinisihuiltica amosoldados cati mooquichmatij ma tayacanaca para tatehuisse! ¹⁰ Amoazadones xijchihuaca machetas huan xijtalica ipan tit amohuingaros para anquisencahuase amocuataminhua cati huejhuehueyac. Huan cati amo quipiya fuerza ma momachtis quenicatza tatehuis hasta quipiyas chicahualisti. ¹¹ Nochi amojuanti cati añehuani ipan nochi talme campa hueli, ximoisihuiltica huan nopona ximosentilica.”

↓ Joel quijtohua: ↓ Huan ama TOTECO, nojquiya xiquinsentili nochi moilhuicac ejcahua cati más motemacaj.

¹² ↓ TOTECO quinanquilia: ↓ “Ma mocualtalica nochi tacame ipan nochi talme para tatehuilisti huan ma yaca ipan nopa tamayamit ten Josafat pampa nopona nimosehuis para niquintajtolsencahuas nochi talme campa hueli. ¹³ Nopona nijchihuas notequi quej tacame quitequij trigo cati icstitoc ica inihueyi tepos. Quej masehualme ipan moquejquetzaj xocomecat itajca para quiquixtilise iayo, na niquinxacualos pampa nelpano fiero inintajta-colhua.”

¹⁴ Itztose millones huan millones ten tacame cati quichiyase ipan nopa tamayamit cati itoca Tapejpenilisti pampa monechcahuía nopa tonali cati itoca itonal TOTECO. Huan nopona ica sempa ipan nopa tamayamit TOTECO quitapejpenis catijqui elis inintatzacuiltil.

¹⁵ Tonati huan metzti tzintayohuilis, huan sitalime ayecmo cahuanise. ¹⁶ Huan itoscac TOTECO cati caquistis ten nopa tepet Sion elis quej nanalca se hueyi tecuani cati cualantoc. Quena, quema TOTECO camanaltis ten Jerusalén itoscac caquistis quej se tatomonilot, huan ilhuicacti huan taltipacti tahuel huihuipicase. Pero israelitame motemachise ipan TOTECO pampa yaya elis ininchicahualis huan quinmanahuis imasehualhua.

Tatiochihualisti para tali Judá ehuaní

¹⁷ “Huajca quena, anquimatise para na, niDios amoTECO. Anquimatise para niitztoc ipan Sion, notepe cati tatzejtzeltoc. Huan altepet Jerusalén elis se altepet cati tatzejtzeltoc huan sequinoc talme ehuaní ayecmo quema calaqueise nopona para quitehuisse.

¹⁸ “Ipan nopa tonali nochi quipiyase nochi tamanti cati cuali. Nopa tepeme quipiyase xocomecat iayo hasta mocahua. Huan nopa tachiquilme quipiyase tapiyalme cati temacaj tahuel miyac lechi. Nochi atajme ipan tali Judá quitemohuisse miyac at. Huan ten notiopa, niamoTECO, taameyas cati quiatequis tali campa hueli hasta nopa tamayamit cati eltoc huejca ipan Sitim. ¹⁹ Pero tali Egipto mososolos huan tali Edom mocahuas quej se huactoc tali campa amo teno eli pampa injuanti amechtehuijque anJudá ehuaní huan ipan amotal quitoyajque inieso israelitame cati amo teno quichijtoyaj.

²⁰ “Huan tali Judá huan altepet Jerusalén sempa quinpiyase miyaqui masehualme cati nopona itztose hasta iniixhuihua quinpiyase iniixhuihua huan para nochipa. ²¹ Huan na niquintapojpolhuis nomasehualhua cati ayemo niquintapojpolhuijtoc. Huan na, niamoTECO, nimocahuas para niitztos ipan tepet Sion.”

Amós

TOTECO quintajtolsencahuas nopa talme nechca tali Israel

¹ Ya ni nocamanal na, ni Amós. Na se nitamocuitahuijquet ten borregojme ipan altepet Tecoa. Toteco techilhui nochi ni tamanti cati teipa hualas ipan tali Israel. Techilhui nochi ipan tanextili ipan nopa tonali quema quihuicayaya tequit Tanahuatijquet Uzías ipan tali Judá huan quihuicayaya tequit Tanahuatijquet Jeroboam, icone Joás, ipan tali Israel. Elqui ipan nopa tonali quema noja polihuiyaya ome xihuit para mohuisos tali.

² Huan ipan nopa tanextili niquitac TOTECO. Huan yaya eliyaya quej se tecuani cati nanalcatihualayaya ipan tepet Sion ipan Jerusalén pampa tahuel cualantoya. Iixpa nimantzi polihuiyaya nopa yejyetzzi sacamili. Huan nochi sacat cati eltoya ipan tepet Carmelo huaquiyaya. Inintamocuitahuijcahua borregojme pehuayayaj chocaj.

TOTECO quitatzacuultis Damasco

³ Huan TOTECO quijjtohua: “Pampa tahuel miyac huella tajtacolchijtoque nopa masehualme cati altepet Damasco, temachti niquintatzacuultis. Quintajyohuiltijtoque nomasehualhua ipan tali Galaad ica teposti quej se cati quihuitequi trigo ica teposti para quiyolquixtis. ⁴ Huajca nijtitanis tit ipan ichaj Tanahuatijquet Hazael. Nojquiya nijtatis nopa cali cati tilahuac huan yejyetzzi cati quisencajtoc Tanahuatijquet Benhadad para ipan momanahuis. Nochi tamitatas. ⁵ Nijxitinis nopa caltemit ipan nopa tepamit cati quiyahualo altepet Damasco, huan nijtzontamiltis nochi hasta cati itztoque ipan nopa Tamayamit Avén. Niqixpolihuiltis cati tanahuatía ipan altepet Bet Edén. Huan nochi cati itztoque ipan tali Siria yase ilpitoque para tetequipanotij ipan tali Kir.” Quej nopa quijjto TOTECO.

TOTECO quitatzacuultis filisteos

⁶ Huan TOTECO quijjtohua: “Pampa tahuel miyac huella tajtacolchijtoque nopa masehualme cati itztoque ipan altepet Gaza, temachti niquintatzacuultis. Quinichtectoque nomasehualhua ipan campa huella altepeme huan quinhuicaque quinnamacatoj ipan tali Edom para ma tetequipanotij san tapic. ⁷ Yeca na nijtitanis tit ipan nopa tepamit cati quiyahualojtoc altepet Gaza, huan nijtamisosolos nopa calme cati tilahuac huan yejyetzzi cati ipan momanahuisquáj. ⁸ Huan niquintamimictis cati itztoque ipan altepeme Asdod, Ascalón huan Ecrón inihuaya cati tanahuatíaj nozona. Nochi filisteos cati mocahuaj nozona, niquintamimictis.” Quej nopa quijjto TOTECO Cati Más Quipiya Tanahuatili.

⁹ Huan TOTECO quijjtohua: “Pampa tahuel miyac huella tajtacolchijtoque nopa masehualme cati ehuan ipan altepet Tiro, temachti niquintatzacuultis. Quiixpanoque nopa camanal sencahuali cati quichijque ica israelitame para moitase quej icnime. Huan hualajque huan quintanque, huan quinnamacaque para tetequipanotij ipan tali Edom. ¹⁰ Na nijtitanis tit ipan nopa tepamit cati ica quiyahualojtoque inialtepe, huan nochi nopa huejhueyi calme cati yejyetzzi tamitase.”

TOTECO quitatzacuultis Edom

¹¹ Huan TOTECO quijjtohua: “Pampa tahuel miyac huella tajtacolchijtoque nopa masehualme cati ehuan ipan tali Edom, temachti niquintatzacuultis. Masque inihueyi tata elqui icni inihueyi tatahua israelitame,

nopa Edom ehuaní quinquixtíjque israelítame ica inimacheta ica miyac cualanti huan amo quintasojtaque. ¹² Huajca na nijtitanis tit ipan altepet Temán ica tatzinta. Nopa tit quitamisosolos nochi ten nopona hasta ipan nopa altepet Bosra ica norte campa eltoc nopa huejhueyi calme para ipan momanahuise.”

TOTECO quitatzacuultis Amón

¹³ Huan TOTECO quijjtohua: “Pampa tahuel miyac huela tajtacolchijtoque iixhuihua Amón, temachti niquintatzacuultis. Pampa quema quinequiyayaj quihueyilise inintal, quichijque miyac tamanti cati fiero hasta quinjtitapojque israelita sihuame cati cone huejque eliyayaj ipan tali Galaad. ¹⁴ Yeca nijtitanis tit ipan itepa Rabá, nopa altepet cati más hueyi. Huan niquintamitatis nopa calme cati tilahuac huan yejyetzitzi cati ipan momanahuisquíaj. Huan caquistis nopona quej quema chicahuac motehuíaj soldados, o quej quema tatomoni, o quej quema huala se ajacat chicahuac quema pehua huetzi at. ¹⁵ Huan inintanahuatijca quihuicase ilpitoc para tetequipanoti ipan seyoc tali, yaya huan nochi sequinoc tequichihuaní cati quipalehuiyayaj.” Quej nopa quijjto TOTECO.

TOTECO quitatzacuultis Moab

2

¹ Huan TOTECO quijjtohua: “Pampa tahuel miyac huela tajtacolchijtoque nopa masehualme cati ehuaní tali Moab, temachti niquintatzacuultis. Quitatijque iomiyo nopa tanahuatijquet ipan tali Edom hasta mocajqui cuajnexti. ² Huajca nijtatis tali Moab, huan nijtamisosolos nochi nopa huejhueyi calme ipan altepet Queriot. Miyaqui masehualme tahuejchiuase huan tapitzase ica toro cuacuajti quej quema pehua tatehuíaj, pero san tapic pampa nochi nijtamisosolos. ³ Huan injuez cati tanahuatía nopona nijmictis. Huan niqinmictis nochi cati ihuaya quipiyaj tequiticayot.” Quej nopa quijjto TOTECO.

TOTECO quintatzacuultis israelítame ipan tali Judá

⁴ Huan TOTECO quijjtohua: “Pampa tahuel miyac huela tajtacolchijtoque nopa israelítame ipan tali Judá, temachti niquintatzacuultis. Quihuejca-majcajque notanahuatilhua na, niinintECO, huan amo quichijque cati notanahuatilhua quijjtohua. Mocuapolojque ica taixcopincayome cati amo quipiyaj chicahualisti. Quena, quitoquillijque istacafili quej inintatahua quichijque. ⁵ Huan yeca na nijtitanis tit ipan tali Judá. Huan ni tit quitamitatis nochi huejhueyi calme para ipan momanahuise ipan altepet Jerusalén.”

TOTECO quintatzacuultis israelítame ipan tali Israel

⁶ Huan TOTECO quijjtohua: “Pampa tahuel miyac huela tajtacolchijtoque israelítame ipan tali Israel, temachti niquintatzacuultis. Amo quinchihuíaj ten cuali nopa masehualme cati xitahuaque. Quitatzacuultíaj cati amo teno quichijtoc por nopa tomi cati quiselíaj ten yaya cati quihuica tajtocoli. Masque se teicneltzi san pilquentzi noja tahuica cati motanejtoc para mocohuis itecac, amo quichiyaj, nimantzi quinamacaj nopa teicneltzi para ma tetequipanoti san tapic. ⁷ Quintahuisohuaj teicneltzitzi ipan taltepochi huan ininpa moquejquetzaj. Amo tetajtolsencahuaj xitahuac quej monequi quema sequinoc quintajiyohuítíaj cati amo quipiyaj chicahualisti.

“Tetatme huan telpocame cochij ica san se ahuilnenca sihuat huan quej nopa techixpanoj na cati nitatzejzelolitic. ⁸ Huan nechca taixpame campa

quinhueyichihua ininteteyohua, motecaj ipan taquemit cati teicneltziti quincahuilijteque. Huan ica nopa tomi cati quinichtequilijtoque teicneltziti, quicohuaj xocomecat iayo para quise inixpa ininteteyohua.

⁹ “Pero ximoilhua ten nopa miyac tamanti cati cuali cati na nimechchi-huilijtoc anisraelitame. Amoixpa niquinmicti nopa amorreos masque injuanti eliyayaj huejcapantique quej tiocuame huan tetique quej ahua cuame. Senquisa niquintamilti nochi injuanti. ¹⁰ Nijchijqui xiquisaca ipan tali Egipto campa antequipanohuayayaj san tapic. Nimechyacanqui 40 xihuit ipan nopa huactoc tali para huelis ancalaquise huan annoax-catise inintal nopa amorreos. ¹¹ Niquintapejpeni sequij amotelpocahua, anisraelitame, para ma elica notajtolpanextijcahua huan sequij para ma elica nazareo tacame cati senquisa taiyocatalilme para techtoquilise na. Por amojuanti na nijchijqui nochi ni tamanti cati nimechilhúa. ¿Ax que?” Quej nopa quijto TOTECO.

¹² “Pero amojuanti anquinchihualtijque nopa nazareo tacame ma quica xocomecat iayo huan anquinnahuatijque nopa tajtolpanextiani ma ayecmo camanaltica nopa camanali cati na niquinmacayaya pampa amo anquinequiyayaj anquicaquise.

¹³ “Huaaja por amotajtacolhua, na nimechchihuas xitanhuehuehocaca quej se cuacarro cati quihuica tahuel miyac pixquisti huehuehocatiya.

¹⁴ Huan masque se cuali hueli motalohua, amo huelis cholos ten na. Masque se itzoc nelía tetic, ayecmo quipalehuis ichicahualis. Yaya ten amojuanti cati más motemaca ipan tatehuilisti, yon amo huelis quimanahuis inemilis.

¹⁵ Cati quimati tamelac itas ica icuatamin, ayecmo huelis tatehuis. Cati quimati motalos chichahuac, ayecmo huelis momaquixtis, yon cati tejco cahuaajtipa, amo huelis quimanahuis inemilis. ¹⁶ Ipan nopa tonali quema nitetatzacuiltis, amosoldados cati más motemacaj, quitepejtehuase nochi inintepos cati ica momanahuiyayaj huan motalojtehuase.” Quej nopa quijto TOTECO.

3

TOTECO quinnotzqui testigos para ma quintatelhuiquij israelitame

¹ Anisraelitame, xijtacaquilica ni camanali cati TOTECO quijtohua ten nochi amojuanti ipan tali Israel huan tali Judá cati aniteipa ixhuihua cati niqinquixti ipan tali Egipto. ² “Ten nochi masehualme cati itztoque ipan ni faltipacti, san amojuanti nimechtapejpenijtoc para anelise annoaxcahua. Yeca nimechtatzacuiltis por nochi amotajtacolhua.” ³ Ome masehualme amo hueli nejnemise san sejo sinta amo san se moilhúaj para canque yase.

⁴ Amo nanalca se León hasta ya quitzquitoc se tapiyali huan ya itztoque para quicuas. Na ya niitztoque para nimechtzontamiltis, huan yeca nitahuejchihua.

⁵ Se totot amo majsis ipan se taquetzti sinta amo aqui quitelijtoc se tenijqui para quinotzas ma calaqui ipan nopa taquetzti. Na nijtalijtoc tatzacuilti cati amechchia quej se taquetzti. Pero nopa taquetzti amo motzacua iselti. Eltoc amotajtacolhua cati quichijtoc para nopa tatzacuiltisti ma amechajsi.

⁶ Quema masehualme quicaquij cati tapitzaj ipan inialtepe para quinyolmelahuase para huala tatehuilisti, momajmatiaj huan huihuipicaj nochi cati itztoque nozona. Quema huala taohuicayot ipan se altepet, ¿amo pampa niamoTECO nijchijqui ma huala? ⁷ Pero nochipa na, niamoTECO Cati Más Nijpiya Tanahuatili, nimechylmelahua achtohui ica notajtolpanextijcahua para ajsis nopa tatzacuilti. Huan quema ajsis, huajca anquimatise para na nijtitantoc.

⁸ Quema se león nanalca, monequi nochi ximomajmatica. Huan na, niamoTECO Cati Más Nijpiya Tanahuatili nicamanaltitoc ten nopa tatzacuiliti cati hualas huan monequi nochi anquiimacasisse cati nimechtitanilia. Huan monequi nochi tajtolpanextiani teyolmelahuase cati nimantzi oncas.

Mososolos altepet Samaria

⁹ Xiquinyolmelahuaca injuanti cati tanahuatíaj ipan tali Egipto huan ipan altepet Asdod: “Ximosentilica ipan nopa tepeme cati quiyahualojtoque Samaria para anquiitase nochi cati fiero cati nopa israelitame nozona quichihuaaj. ¹⁰ Nopa israelitame amo quimatij quenicatza quichihuase cati xitahuac. Ininchajchaj cati huejhueyi temitoque ica tamanti cati yejyetzitzi cati teichtequilijtoque huan tecocojque para tecuilijque.” ¹¹ Yeca TOTECO Cati Más Quipiya Tanahuatili quijtohua: “Hualas se amocualancaitaca ica isoldados huan amechyahualose. Huan quitahuisose nochi nopa calme cati tilahuac huan yejyetzitzi cati anquinchijchijque para ipan amomanahuise. Injuanti motamicuilise nochi cati anquipiyaj calijtic.”

¹² Quej ni quijtohua TOTECO: “Amojuanti ipan tali Israel, amo ximoilhuica para na nimechmanahuis. Amo teno mocahuas nozona. Se tamocuihahijquet cati quichiya para quimanahuis iborrego icamaco se león, san quipantis imetzhua huan inacas itapiyal. Huan quej nopa elis ica amojuanti ipan altepet Samaria quema niasis para nimechmanahuis. San mocahuas se iicxi amotapech o tajco ten se amosiya yejyetzitzi. Nochi cati anquipiyayaj quitamisosolose.

¹³ “Nochi anisraelitame, xijcaquica huan xiquinmachiltica sequinoc para quej nopa niamoTECO Cati Niquinyacana Nohlhuicac Ejcahua Ma Tatanitij nitanahuatijtoc para panos. ¹⁴ Ipan nopa tonali quema nimechtatzacuilitis amojuanti ipan tali Israel, nojquiya nijosolos nopa taixpame ipan Betel campa anquinhueyichihuayaj amoteteyohua. Quena, nijxitinis sesen taixpamit huan nijpostequis inincuacua nopa taixpame huan nochi huetzis talchi.

¹⁵ “Nojquiya nijosolos nopa huejhueyi calme cati nopa tominpiyani quichijchijtoque. Nijosolos ininchajchaj cati yejyetzitzi campa yahuij quema tatotoniya huan nojquiya ininchajchaj campa yahuij quema taseseya. Nijxitinis nochi nopa yejyetzitzi calme cati tahuel patiyto hasta quichijtoque ica marfil. Nochi tami polihuis.” Quej nopa quijto TOTECO.

4

TOTECO quicualancaita inintacajcahualis

¹ Xijcaquica ni camanali ansihuame cati antominpiyaj ipan altepet Samaria. Anitztoque quej huacaxme cati tomahuague pampa nochi anquipiyaj. Anquintachtequilíaj cati teicneltzitzitzi huan anquintajyohuilitíaj cati amo teno quipiyaj. Nochipa anquinilhuíaj amohuehuejhua ma quicuitij seyoc taili para antaise. ² TOTECO Cati Más Quipiya Tanahuatili quej ni quijtohua: “Ajsis tonali quema amechhuicase ica teposchijcoli ipan amoyacatzol. Huan amoixhuihua quinhuicase quej quinchihuaaj quema quinhuahuatatzitziyahuij michime cati quinmasilitijtoque ica pilteposchijcoltzitzi. ³ Quema amechquixtise ipan nopa calme cati yejyetzitzi, amechhuicase ipan ten hueli piltojtzi cati quicoyonijtose ipan tepamit huan anmotecpaniyase.” Quej nopa quijto TOTECO.

Masque ama quimatij para huala tatzacuiliti, amo moyolcuepaj

4 “Huajca anisraelitame, cualtitoc, xijchihuaca cati anquinequij ama. Noja xiyaca Betel huan más xitajtacolchihuaca. Ximoicancuepaca ica na huan xijmiyaquilica achi más amotajtacolhua nepa Gilgal sinta anquinequij. Ica ijnaloc xijhualicaca tacajcahalisti, huan xijhualicaca amodiezmos ihuihuictaca quej amechpactía. ⁵ Xijtalica pantzi cati quipiya tasonejcaoy quej antechmacasquiá se tacajcahalisti ten tascamatili. Teipa ximohueyimatoca huan xiteyolmelahuaca campa hueli ten nochi nopa tacajcahalisti cati antechmacatoque pampa quej nopa, amojuanti ipan tali Israel, amechpactía anquichihuj. Pero amo ya nopa cati na nijnequi.” Quej nopa quiijto TOTECO Cati Más Quipiya Tanahuatili.

Israelitame amo quinequij moyolcuese

6 “Na nimechtitanili se hueyi mayanti ipan nochi amoaltepehua, huan amo anquipixque tucalisti ipan yon se pilalpetzi. Pero masque quej nopa nijchijqui, amo anmotepotzocaque huan amo anmoyolcuetque para antechhueyichihuase.” Quej nopa quiijto TOTECO.

7 “Na nijchijqui ma amo huetzi at quema más monequiyaya para cati anquitojque. Ipan se altepet nijchijqui ma huetzi at huan ipan seyoc amo. Ipan se mili huetzi at huan ipan seyoc tahuajaj. ⁸ Masehualme huetziyahuiyayaj ten se altepet hasta seyoc pampa anmictinemiayaj, pero amo quiajsique at para aixhuise. Huan masque panoc nochi ni tamanti, amo anmotepotzocaque huan amo anmoyolcuetque para antechhueyichihuase.” Quej nopa quiijto TOTECO.

9 “Nimechtitanili se huac ajacat, huan cocolisti huan chapolime campa anquitoctoyaj xocomecat, higos, tocti huan olivos para amoaceite. Huan nochi quitamiltijque, pero noja amo anmonejnehuilijque para anmocuepase ica na huan antechhueyichihuase.” Quej nopa quiijto TOTECO.

10 “Nijtitanqui huejhueyi cocolisti ipan amojuanti quej nijchijqui ipan tali Egipto achtohuiya. Nojquiya nijchijqui amotelpocahua ma miqica quema yajque ipan tatehuilisti huan inincahuayojhua niquinmicti. Nojquiya nijchijqui ma ajsi se ajacat potehui ten miqulisti hasta campa anitztoque. Pero masque nochi ni tamanti nimechtitanili, amo anmotepotzocaque huan amo anmocuetque para antechhueyichihuase.” Quej nopa quiijto TOTECO.

11 “Nojquiya nimechsosolhuili amoaltepehua quej niquinsosolo nopa altepeme Sodoma huan Gomorra huejcayquiya. Nopa israelitame cati noja mocajque yoltoque eliyayaj quej se ticuahuit cati tami ipan tit. Pero masque nijchijqui nochi ni tamanti, amo anmotepotzocaque huan amo anmocuetque para antechhueyichihuase.” Quej nopa quiijto TOTECO.

12 Huan nojquiya quiijtohua: “Huajca ama nojquiya nimechchihuilis nochi ni tamanti cati nimechilhujtoc. Yeca ximocualtalica para anmopan-tise nohuaya niamoTECO Dios, anisraelitame.”

13 [Amós camanalti.] Xijtaquilica cati amechilhujtoc TOTECO pampa yaya quinchijchijqui tepeme huan yaya quiyolilita ajacat. Yaya quinihuía masehualme cati injuanti moilhuyayaj ipan inintalnamiqúlis. Quichihua ma tayohuiya huan quichihua ma tanesi. Yaya nemi ipan nopa tepeme cati más huejcapantique pampa yaya nochi quinahuatía. Itoca: TOTECO Cati Quinyacana Iilhuicac Ejcahua Ma Tatanitij.

5

TOTECO quinnotzqui israelitame para ma moyolcuese

1 Xijcaquica ni camanali ipan ni mijcahuicat cati nihuicas ica tequipacholi para amojuanti ipan tali Israel:

2 “Tali Israel ehuan ya huetztoque ipan tatehuilisti. Nopa masehualme cati eliyayaj yejyetzitzi quej se ichpocat ayecmo quema huelise motananase.

Huilantoque iniselti ipan inintal campa miquise. Amo aquí huelis quinpalehuis.”

3 TOTECO Cati Más Quipiya Tanahuatili quiijtouhua: “Quema se altepet ipan Israel quintitanis 1,000 inisoldados para tatehuitij, teipa san mocuepase 100 tacame. Nochi nopa sequij miquise. Huan quema se quintitanis 100 tacame para ma tatehuitij, san mocuepase ininchajchaj 10 tacame.”

4 Huajca quej ni TOTECO quinilhuía masehualme ipan tali Israel: “Tecte-moca huan anyoltose. 5 Amo xiyaca campa teteyome ipan Betel, yon amo xiyaca Gilgal, yon Beerseba. Pampa nopa Gilgal ehuan quinhuicase ilpitoque para tetequipanose san tapic. Huan nopa Betel ehuan quin-tampolose.”

6 Quena, xijtemoca TOTECO huan anquipyase se nemilisti cati cuali. Huan sinta amo anquitemose amojuanti cati aniteipa ixhuihua José, TOTECO hualas amopani quej se hueyi tit cati nochi quitamitatis, huan yon se teteyot ipan altepet Betel amo huelis quisehuis. 7 ¡Anfiero masehualme! Quema antetajtsencahuayayaj huan monequiyaya anquichijtsosquía cati xitahuac ica se cati teicneltzi, nochipa anquichijque cati más chiotic. Amo anquipatiitaj cati melahuac huan cati cuali anquimajcajqe talchi.

8 Xijtemoca TOTECO cati quichijchijqui nochi cati onca. Quinchijchijqui nopa chicome sitalime cati motzquitoque huan itoca Míyaquet huan no-jquiya nopa sitalime cati sentic nemij cati itoca Orión. Yaya quichihua tzintayohuilot ma eli tonaya huan quichihua tonaya ma eli tzintayohuilot. Yaya cati quinojnotza nopa at ipan hueyi at para ma tejco huan ma mose-jcotili ipan mixti. Teipa quichihualtía ma huetzi at ipan nochi taltipacti. Yaya cati quichihua nochi ni tamanti, itoca TOTECO. 9 Ica ihueyi chicahualis nimantzi quisosolohua nochi tepame huan calme cati más tilahuac que cati masehualme quichijchijque para ipan momanahuse.

10 Pero amojuanti anquincualancaitaj jueces cati tetajtolsencahuaj xi-tahuac. Anquincualancaitaj cati quiijtouhuaj cati melahuac. 11 Ininpa an-nejnemij cati teicneltzitzitzi. Anquinichtequilijtoque nopa quentzi sinti cati quiipiyaj ica impuestos. Huajca masque ama anquinchijchihuaj amocha-jchaj ica tet cati yejyetzitzi, amo quema ininpa anitztose. Masque anquitojqe xocomecat ipan amoxocomeca milhua, amo quema anquise iayo. 12 Pampa na nijmati para anquipyaj miyac amotajtacolhua huan tahuel fiero nochi cati anquichijtoque. Anquintaijyohuiltíaj masehualme cati xitahuac que huan antetajtaniáj se taxtahuil cati amo monequi. Quema se teicneltzi itztoc iixpa se juez, nochipa anquichihuaj ma quipolo huan ma amo tatani. 13 Huajca cati talnamiquij amo moliníaj pampa quimatij san tapic. Amo aquí huelis amechtanis.

14 Amojuanti xijtemoca cati cuali huan xijchihuaca. Xijtalcahuica cati amo cuali para huelis anyoltose. Quej nopa TOTECO Cati Más Quipiya Tanahuatili itztos amohuaya quej anquijtohuaj. 15 Amo teno xijpiyaca ica cati amo cuali. Xiquicnelica cati cuali huan xijchihuaca. Xiquinchihualtica jueces ipan amotal para ma tetajtolsencahuaca xitahuac. Sinta quej nopa anquichihuase, TOTECO Cati Quinyacana Iilhuicac Ejchahua Ma Tatanitij huelis amechtasojtas amojuanti ipan tali Israel cati noja anmocajtoque anyoltoque.

¹⁶ Yeca quej ni quijtohua TOTECO Cati Quinyacana Iilhuicac Ejcahua Ma Tatanitij: “Hualas tatzacuiliti huan ipan nochi tianquis oncas choquisti. Huan campa hueli ipan ojti axtise. Anquinnotzase miltequipanohuani ma chocaquij amohuaya. Nojquiya anquintanehuise masehualme cati chocaj huan tahuejchihuaj por se taxtahuili para ma chocaquij amohuaya. ¹⁷ Campa hueli hasta ipan nochi xocomeca mili, nochi chocatose pampa na nipanoti huan tahuel nimechtatzacuilitis.” Quej nopa quijto TOTECO.

Nopa tonali cati itoca itonal TOTECO

¹⁸ «Amós camanalti.» Nelía fiero amopantis nochi amojuanti cati anquinequij ma ajsi nopa tonali cati itoca itonal TOTECO. ¿Amo anquimatij quenicatza elis nopa tonali para amojuanti? Anmoilhúaj elis se tonali ten taahuili huan paquillisti, pero amo. Elis se tonali ten tzintayohuilot huan taijyohuilisti pampa TOTECO amechtatzacuilitis. ¹⁹ Ipan nopa tonali anelise quej se tacat cati cholohua ten se león huan teipa quinamiquiti se oso cati nojquiya tecua. Teipa quema nopa tacat momanahuijtosa ten nopa oso, calaquis ipan ichaj huan motatzquilis ipan tapepecholi se talotzi para mosiyajquetzas, pero nozona quitzacanis se cohuat cati temictía. ²⁰ Quena, nopa tonali ten TOTECO elis senquisa tzintayohuilot pampa quinextis icualancayo. Yon quentzi amo oncas paquillisti huan taahuili.

²¹ TOTECO quijtohua: “Amo nijnequi niqutas quema anilhuichihuaj huan anquijtohuaj antechpanitaj na, pampa amo neli. Amo hueli niqijyohuía nopa tasentili cati anquichihuaj quej elisquía tonali cati tatzejtzolotique. ²² Masque antechmacaj amotacajcahualis cati tatatili huan ten harina, amo nijselía. Yon amo nijchihuilia cuenta quema antechhualiquiliaj amotacajcahualis ten tapiyalme cati más tojtomahuaque cati antechmacaj para ma timoyoltalica. ²³ Techtalcahuica nochi amojuanti cati anquijtohuaj antechhuicatíaj. Yon amo nijnequi nijcaquis quema antatzotzonaj para na. ²⁴ Na nijnequi nochi amojuanti xijchihuaca senquisa cati xitahuac ipan amotal. Nijnequi ma onca cati melahuac huan cati cuali campa hueli. Quej se hueyi hueyat cati mocojcoxonía chichahuac huan amo quema huaqui, quej nopa ma eli cati xitahuac huan cati cuali campa amojuanti.

²⁵ «Xiquelnamiquica, anisraelitame, quenicatza huejcajquiya amohuejcapan tatahua itztoyaj ipan nopa huactoc tali para 40 xihuit pampa niqintatzacuiliti. Nojquiya injuanti quijtohuayayaj techmacayayaj tacajcahualisti huan ofrendas. ²⁶ Pero amo cana. Na nijmati achi más quinicneliyayaj sequinoc dioses. Quihuicayayaj ipilchaj Moloc huan ipilchaj Quiún inintaixcopincayo ten se sitali cati quinchijchijque ica inimax. ²⁷ Huan ama nojquiya nimechtatzacuilitis amojuanti huan nimechquixtis huan nimechhuicas anlipitoque hasta más huejca para campa hualquisa tonati ten altepet Damasco huan nozona antequipanose san tapic.” Quej nopa quijto TOTECO, yaya cati itoca TOTECO Cati Quinyacana Iilhuicac Ejcahua Ma Tatanitij.

6

Sequinoc talme ehuaní quisosolose Israel

¹ «Amós camanalti.» Nelía fiero elis para amasehualme cati anmosiyajquetzaj ipan altepet Jerusalén * huan Samaria. Anquipiyaj nochi cati jejectzi huan anmoilhúaj anitztoque temacti. Nochi amechixmatij huan amotal elqui cati más ipati que sequinoc talme. Pero masque achtohuiya nochi yahuiyayaj campa amojuanti para xiquinpalehuica, fiero amopantis.

* 6:1 6:1 Sion eltoc seyoc itoca Jerusalén.

² Xiyaca altepet Calne huan xiquitaca cati panotoc nopona. Teipa xiyaca ipan nopa hueyi altepet Hamat huan hasta altepet Gat campa itztoque nopa filisteos. Xiquitaca nopa tastosololisti cati quinajsic. ¿Anmoilhuáj más ancuajcualme que inijuanti? ¡Amo! Huan ¿amotal anquiitaj más cuali que inintal? ¡Amo neli! San se amopantis. ³ Amo anquineltocej sinta hualas tatzacuiltli, pero nopa tajtacoli cati antechchihuiljtinemij quichihua para más nimantzi ma ajsi nopa tonali ten amotatzacuilitlis.

⁴ Ancohij ipan cuajcualtzi tapechti cati tahuel patiyó huan anmosiyaj-quetzaj campa tatzotzoltic. Anquincuj nopa borregojme cati más yamanic ininacayo huan nopa pilhuacaxtzitzi cati más tomahuaque. ⁵ Anhuicaj ten hueli camanali masque amo ipati. Huan anquinchijchihuj tatzotzonaliquej David quichihua yaya, pero amo na antechhueyichihuj.

⁶ Amojuanti antaj ipan nopa huejhueyi caxit cati eltoyaj ipan tiopamit huan anmopolohuj nopa taajhuiyacayot cati más patiyó pampa nochi anquipiyaj, pero amo anmotequipachohuj para tanti amotal cati iconehua José huejcaquiya quiselijque para iniaxca. ⁷ Huan yeca ama, amojuanti achtohui amechhuicase anlipitoque para antetequipanotij san tapic. Huan nochi nopa paquilisti cati anquipiyaj nimantzi tamis.

TOTECO amo quipactia cati mohueyimati

⁸ Huaaja TOTECO Dios ica ya iselti motestigojquetztoc. Quena, TOTECO Cati Quinyacana Iilhuicac Ejchua Ma Tatanitij quijtojtoc ya ni: “Amo nijnequi niqunitas israelitame pampa tahuel mohueyimati. Yon amo nijnequi niqunitas nopa huejhueyi calme cati quisencajtoque nelia jejectz-itzi. Yeca inialtepe huan nochi tamantzitzi cati quipiyaj, na niqinmactilis inincualancaitacahua.”

⁹ Amós camanalti. Huan yeca, masque mocahuase san se pilmajtacti tacame ipan se cali, inincualancaitacahua quinmictise. ¹⁰ Huan quema hualas se initeixmatca cati quipiya itequi para quintatis nopa mijcatzitz, quipantis se cati noja yoltoc, huan quitatzintoquillis: “¿Mocahua seyoc mohuaya cati noja yoltoc?” Huan yaya quinanquillis: “¡Amo!” Huan iteixmatca quihuis: “¡Huaaja amo ximolini! Yon amo xijtoxacti itoca TOTECO para timotatajtis pampa yaya mitzcaquis huan mitzmictis nojquiya.” ¹¹ Pampa TOTECO temacas se tanahuatili huan quintamisosolose nochi calme masque cati huejhueyi o cati pisiltzitz huan san mocahuas payaxtic. ¹² ¿Anquiitaj cuali para cahuayojme motalose ipan teme? O ¿anquiitaj cuali para se quinhucas torojme nopona para tapoxonise? Pero anquichijtoque se huuiyot pampa anquinpataque jueces cati tetajtolsencahuayayaj xitahuac huan anquinchihualtijque ma temacaca se pajti cati temictia. Cati cuali oncayaya, anquinpataque ica cati chichic. ¹³ Nojquiya anhuihuitique amojuanti cati anpaquij ica cati amo teno ipati huan anquijtohuaj: “Ica toselti timochijtoque titetique huan ica tochicahualis titatantoque.”

¹⁴ Pampa TOTECO Dios Cati Quinyacana Iilhuicac Ejchua Ma Tatanitij quijtohua: “Xiquitaca amojuanti ipan tali Israel, na niquintananas miyac soldados ma hualaca ten se tali cati tahuel quipiyaj chichahualisti, huan nijchihuas ma amechtajyohuiltica nochi amojuanti ten amonepa ica norte campa Hamat huan hasta amonepa campa sur campa nopa hueyat Arabá.”

7

Tanexili ten pilchapoltzitz

¹ TOTECO Cati Más Quipiya Tanahuatili technexili ya ni ipan se tanexili. Niquitac TOTECO quincualtaliyaya chapolime para quintitanis ipan

tosacamilhua quema nopa tanahuatijquet ya quicuitoya nopa sacat cati iaxca huan pehuayaya sempa moscaltis. ² Huan teipa quema niqitac para ya quitamicuajtoya nochi nopa sacat cati elisquía para timasehualme, huajca niqijto:

—Ay TOTECO Cati Más Tijpiya Tanahuatili, techtapojpolhui tiisraelitame. Amo xijtitani ni tatzacuiltli pampa amo huelis tiqijyohuise. Ama tiisraelitame * amo timiyaqui timasehualme huan nochi titamimiquise ica ni tatzacuiltli.

³ Huan TOTECO moyolcuetqui ten nopa tamanti cati quinectoya quichihuas, huan quijto:

—Cualtitoc, huajca amo nijchihuas.

Nopa temicti ten tit

⁴ Teipa TOTECO Dios technextili seyoc tamanti ipan seyoc tanextili. Niquitac TOTECO Dios quicualtalijtoya se hueyi tit para techtatzacuiltis. Nopa tit quitamihuatzqui nopa hueyi at cati más huejcata huan quintamitayaya nochi talme. ⁵ Huajca na niquilhui:

—¡Amo, TOTECO ta Cati Más Tijpiya Tanahuatili, amo techtatzacuilti tiisraelitame ica tit! Amo huelis tiqijyohuise pampa amo timiyaqui.

⁶ Huajca TOTECO Dios sempa moyolcuetqui ica cati moilhuyiyaya quichihuas huan quijto:

—Huajca yon ya nopa amo nijchihuas.

Tanextili ten se plomada

⁷ Huan Toteco technextili seyoc tamanti. Niquitac TOTECO ijcatoya nechca se tepamit cati quiquetztoyaj nelía xitahuac pampa quichijchijtoyaj ica se tepanchijquet iplomada. Huan TOTECO ipan imax quipixtoya se plomada huan quitayaya sinta xitahuac. ⁸ Huajca TOTECO quej ni techilhui:

—¿Taya tiquita, Amós?

Huan na nijnanquili:

—Niquita se plomada quej cati quitequiuhúaj tepanchihuani para quiitase sinta xitahuac inintequi.

Huan TOTECO quijto:

—Xiquita, na niqinyeyecos Israel ehuan para niqitas sinta xitahuac ininemilis. Huan sinta amo, huajca amo niquintapojpolhuis, yon ayecmo nijchiyas para niquintatzacuiltis. ⁹ Huan nijtamisosolos nochi nopa taixpame ipan tepet cati Isaac huejcajquiya quinchijchijqui para techhueyitalis huan ama, anIsrael ehuan, anquintequiuhúaj para anquinhueyichihuase amoteteyohua. Huan nijsosolos nochi nopa tamanti cati tatzejzeloltique. Huan Tanahuatijquet Jeroboam huan nochi iixhuilhua niquintzontamiltis ica macheta.

Amós iixpa Amasías, se totajtzi cati quicajtoya TOTECO

¹⁰ Quema nopa totajtzi Amasías ipan altepet Betel quicajqui cati na, niAmós, niqijtoya, tatitanqui ma quilhuitij Tanahuatijquet Jeroboam ipan tali Israel ni camanali: “Amós quintajtolmaca israelitame nica tatajco ten motal para ma mitzmictica, huan tojuanti ayecmo hueli tiqijyohuúaj nochi cati quijtojtoc. ¹¹ Tepohuilla para se ma mitzmicti ta, Jeroboam, ica macheta, huan quijtohua nochi tiisraelitame techhuicase tiilpitoque huejca ipan seyoc tali para titetequipanotij san tapic.” Quej nopa Amasías quitanqui camanali para nopa tanahuatijquet.

* 7:2 7:2 Quemantica quitequiuhúaj Jacob o Israel para nochi israelita masehualme sentic.

¹² Huan nojquiya Amasías techtitanili se camanali na, niAmós, huan techilhui:

—Xiya sejcoyoc, titajtolpanextijquet. Ximochololti hasta tali Judá. Nepa huelis tiqúitas cati teipa panos huan titomintanis. ¹³ Ayecmo tijnequij xitepohuili nica ipan altepet Betel cati timoilhúa para panos teipa, pampa nica huala nopa tanahuatijquet para quinhueyichihuas iteteyohua ipan inintiopa huan nojquiya nica quiipiya ichaj.

¹⁴ Huajca na, niAmós, nijnanquili Amasías huan quej ni niquilhui:

—Na amo nelía nise tajtolpanextijquet quej sequinoc cati ica ya nopa quitaniy ten ica panose. Yon amo nimomachtijtoc imaco seyoc para nielis se nitajtolpanextijquet. Na notequi niquinmocuitahuía borregojme huan nijsentilía higos cati campa hueli moscaltía. ¹⁵ Pero TOTECO technotzqui para ma niquincahua noborregojhua huan techilhui: ‘Xiya ipan tali Israel huan xiquinpohuili nocamanal huan xiquinilhui taya ininpantis.’ Quej nopa techilhui TOTECO.

¹⁶ “Huajca Amasías, xijtacaquili TOTECO icamanal pampa masque ta techilhúa ma amo niquincamanalhui Israel ehuan ten icamanal TOTECO, huan ma amo niquinilhui cati tamanti fiero quinchuya, ¹⁷ huajca ya ni cati TOTECO mitzilhuía ta: ‘Pampa amo tijnequi tijtacaquilis nocamanal, mosihua mocuepas se tacanenca sihuat ipan nopa altepet. Huan motelpocahua huan moichpocahua nochi miqúise ica macheta. Quitamachihuase motal sequinoc talme ehuan huan quixejxeloise para moaxcatise. Huan ta timiqúis ipan seyoc tali campa masehualme amo techixmatij. Huan nochi sequinoc Israel ehuan nojquiya quinhucase ilpitoque para tetequipanose san tapic huejca ten inintal.’”

8

Se chiquihuit ten cuatacti cati icsitoc

¹ Teipa TOTECO Dios technextili se chiquihuit ica miyac tamanti cuatacti cati icsitoc.

² Huan TOTECO techtatzintoquili:

—¿Taya tiqúita, Amós?

Huan na nijnanquili:

—Niqúita se chiquihuit temitoc ica cuatacti cati icsitoc.

Huan TOTECO technanquili: “Quiijtosnequi nomasehualhua ipan Israel ya chicajtoque huan ayecmo nijchiyas más para niquintatzacuultis. ³ Ipan nopa tonali nopa huicani cati itztose ipan tiopamit axtise huan tahuejchi-huase. Tahuel miyaqui masehualme miqúise huan inintacayohua mocahuase tepejtoque campa hueli. Huan cati quinhucase nopa mijcatzitzí, san quintepehuase itepanteno nopa altepet huan amo aqui quichoquilis pampa ayecmo aqui itztos. ¡San tatzitzicatos!”

TOTECO quintelhuía Israel ehuan

⁴ Huan na niAmós niquijto: “Xijcaquica amajuanti cati anquintachte-quiliaj huan anquintajyohuiltiaj cati teicneltzitzí ipan amotal. ⁵ Yon se tonal, amo anquinequij anquicahuase cati fiero anquichihuaj. Anquijtohuaj: ‘¿Hasta quema tamis ni ilhuit ten yancuic metzti huan ni tonali para ma timosiyajquetzaca? ¿Hasta quema huelis sempa tijnamacase trigo huan itecajcayahuase?’ Antatamachihuaj ica tamamachihuaj cati achi pisiltzi huan antenamaquiltiaj patiyó. Amobalanza cati anquitequihuía nojquiya amo xitahuac para huelis antacajcayahuase. ⁶ Anquinchihualtiaj cati teicneltzitzí ma elica tequipanohuani. Masque san tahuica se pilplatatomintzi,

o nopa piltomintzi quej cati ipati se tecac anquinamacaj nopa teicneltzitz para tefequipanose san tapic. Huan nochi nopa trigo itasolo cati huetztoc talchi anquimanelohuaj ica nopa trigo cati anquinamacaj huan quej nopa antacajcayahuaj.

7 “Pero TOTECO motestigojquetzqui ica ya iselti ten taya cati amechchihuilis aniixhuihua Jacob. Quena, yaya cati elqui topaquilis huan ica cati nochi tiisraelitame timohueyimatiyayaj, ama quijtojtoc: ‘Na amo quema niquelcahuas cati amo cuali anquichijtoque. 8 Nochi taltipacti huihuipicas ica majmajti. Nochi masehualme chocase por cati panos. Ni tali mohuisos, huan tejcos huan temos. Elis quej quema tejco nopa atenti Nilo ipan tali Egipto quema tatemí huan temajmatía huan teipa temo.’ 9 Huan TOTECO Dios quijtohua: ‘Ipan nopa tonali quema panos ni tamanti, na nijchihuas para ma temo tonati masque san tajcotona. Huan masque tonaya nijchihuas ma tzintayohuiyas. 10 Huan niquincuepas nopa miyac ilhuit cati anquichihuaj para ma quipiyaca san choquisti. Huan nopa tatzotzonali huan huicat nijchihuas ma mocuepa cuesihuili. Huan nimechchihualtis ximoquentica amoyoyo ten tequipacholi quej elisquía mijqui se acayja. Huan nochi anmotzonhuatanise para nesis anmotequipachohuaj. Quena, anmotequipachose quej mijqui amocone cati iyojtzi pampa nopa tayacapan tonali elis nelfiero. Elis quej se tamanti cati tahuel chichic.’

11 “Huan TOTECO Dios quijtohua: ‘Xiquitaca, hualas nopa tonali quema nijtitanis se mayanti ipan ni tali. Pero amo mayanase masehualme ten pantzi, yon amo amiquise ten at. Mayanase pampa tahuel quinequise quicaquise sempa nocamanal, pero ayecmo huelis. 12 Campa hueli mohuatanijnemise ten se nali hasta seyoc para quitemose. Yase ten norte huan hasta campa hualquisa tonati para quitemose nocamanal, pero ayecmo huelis quipantise.

13 “ ‘Ipan nopa tonali yejyetzitzi ichpocame huan telpocame tapolose pampa tahuel apismictinemise huan quitemojtinemise nocamanal, pero amo quipantise. 14 Huan nochi israelitame cati quinhueyichihuaj nopa teteyome cati mopantíaj ipan altepeme Samaria, Dan huan Beerseba, huetzise huan ayecmo quema huelise motananase.’ ”

9

Sequinoc talme ehuaní quisosolose tali Israel

1 Teipa ipan nopa tanextili niquitac para Toteco moquetztoya campa nopa taixpamit, huan yaya quijto: “Xijmaquili inintzonpac nopa taquetzalme ipan tiopamit hasta mohuisos itzinpehualtil. Xijosolo nopa taquetzalme huan xiquinchihua cuechtic para ma huetzi nopa itzontzajca ipan inintzonteco nopa masehualme huan ma quintzonpechi. Huan cati mocahuase yoltoque, nijchihuas para ma miquica ica macheta ipan tatehuilisti. Amo aquí huelis cholos.

2 “Masque Israel ehuaní taxahuasquíaj huejcata hasta campa itztoque nopa mijcatzitz para motatise noixpa, na niyas huan niquincuiti nozona. Masque tejcosquíaj ipan ilhuicacti, na nitejcos huan niquintemohuis sempa.

3 Sinta quinequisquíaj motatitij itzompac nopa tepet Carmelo, nozona niyas niquintemoti huan niyas niquincuiti. Masque yasquíaj campa más huejcata ipan se hueyi at para motatise noixpa, nozona nijtitanis nopa hueyi cohuat cati itztoc ipan hueyi at para quintzacaniti huan quinmictiti.

4 Huan sinta motemacase ica inincualancaitacahua para quinhucase para tefequipanose san tapic ipan seyoc tali, na nijhuicas nomacheta nozona

huan niqinmictiti. Pampa ya nimoyolilhujtoc huan nimotemacatoc para niqinchihuulis cati más fiero. Ayecmo niqinchihuulis cati cuali.”

⁵ TOTECO Cati Más Quipiya Tanahuatili huelis quitális imax ipan ni taltipacti, huan ni taltipacti san atiyas huan nochi imasehualhua tahuel chocase. Por imax motanana tali quej tejco ne hueyi hueyat Nilo ipan Egipto quema tatemí miyac, huan teipa por ya sempa temo nopa tali. ⁶ TOTECO quichijchijqui ichaj huejcapa nepa ilhuicac. Pero itzinpehualtil moquetzqui ipan taltipacti. TOTECO quinojnotza nopa at ipan hueyi at para ma tejco huan teipa quichihua ma huetzi sempa ipan taltipacti quema quichihua ma huetzi at. Yaya itoca TOTECO.

⁷ Huan TOTECO quijtohua: “Anisraelitame ipan tali Israel, san se aneltoyaj noixpa quej nopa masehualme cati Etiopía ehuaní. Masque nimechquixti ten tali Egipto nojquiya huelis nimechtatzacuiltis. Nojquiya niqinmanahujtoc sequinoc. Amo anquimatij para niqinquixti nopa filisteos ten Caftor huan nopa amorreos ten Kir.

⁸ “Na, niamoTECO Dios, huan ica cuidado nimechtachilía amojuanti, antajacolchijca masehualme huan huelis nijsosolos amotal. Huan nimechquixtis ten amotal huan campa hueli nimechsemanas ipan taltipacti. Pero niqintencahuilijtoc para amo quema niqintamimictis senquisa nochi israelitame ipan tali Judá. Quej nopa quijto TOTECO.

⁹ “Na nitanahuatis para cati ehuaní sequinoc talme ma amechtaijy-ohuiltica huan ma amechtzejtzeloca quej sinti, pero quej se amo quicahuilía ma huetzi talchi yon se iyol sinti, nijmocuitahuis sesen tacat cati cuali. ¹⁰ Pero nochi cati tajtacolchijtoque huan quijtojtoque para amo quema niqintatzacuiltis, nochi miqwise ica macheta.”

TOTECO sempa quicualtis Israel

¹¹ “Huan ipan nopa tonali na sempa nijtananas itanahuatijcayo Tanahuatijquet David ten huejcajquiya cati ama sosolijtoc. Sempa nijquetzas itanahuatijcayo quej se quiquetza se cali. Huan nijquetzas nopa tepamit cati quiyahualos ialtepe. Quena, sempa nijchijchihuas ica nochi iyejca cati achtohuiya quipixqui. ¹² Huan nochi cati techhueyimajtose quiselise cati mocahua ten tali Edom huan nochi nopa sequinoc talme cati noaxcahua.” Quej nopa quijto TOTECO Dios cati quichihuas nochi ni tamanti.

¹³ Huan TOTECO quijtohua: “Hualas tonali quema nochi tatocti huan xocomecat moscaltis nelía nimantzi. Sanoc tamise masehualme pixcase, quema sempa pehuase tocace. Huan campa hueli quipiyase xocomecat iayo hasta mocahuas. ¹⁴ Huan na niqinhualicas noisraelita masehualhua ten talme cati huejca campa quinhuicaque inincualancaitacahua. Huan sempa quicualchijchihuase inialtepehua cati nochi polijtoya huan sempa itztose nozona. Huan quitocase miyac xocomecat huan cuame. Huan quicuase ten nopa mili cati quitocoque huan quise ten injuanti inixocomeca iayo.

¹⁵ Huan na sempa niqintalis ipan ni tali cati niqinmacatoc huan ayecmo quema niqinquixtis ipan ininfal.” Quej nopa quijto Dios amoTECO.

Abdías

TOTECO queichcapantali altepet Edom

¹ Ya ni nopa tanextili cati na niAbdías niquitac. Ipan ni tanextili TOTECO cati toDios quinexti taya panos teipa ica tali Edom huan cati nozona ehuani.

Tijcactoque se camanali cati huala ten TOTECO cati quijtohua para quitantoya se itatitanil ipan nochi talme para quinilhuiti: “Ximoquetzaca huan ximocualtica para anquitehuitij tali Edom huan imasehualhua. Ma tijtamisosolose.”

TOTECO quej ni quinilhuía tali Edom ehuani; ² “Nijchihuas para amotal elis pisiltzi ipan nochi sequinoc talme huan nochi tahuel amechcualancaitase. ³ Nelía anmohueyimatij pampa anmochantijtoque nozona huejcapa ipan huejhueyi teme. Ipan amoyolo anmoilhuíaj para amo aqui quiptiya chichahualisti para huelis amechtepexihuis hasta talchi. Pero nelía hueyi anmocajcayajtoque. ⁴ Pampa masque anpatanise tahuel huejcapa quej se cuatojti huan anquitalise amotepasol campa sitalime, na nimechtepexihuis ten nozona.” Quej nopa TOTECO quijtohua.

⁵ “Sinta hualajtosquíaj tachtequini ica tayohua para amechtachtequilise, amo quihuicatosquíaj nochi cati anquiptiyaj. Quema masehualme cati pixcaj ipan se xocomeca mili, nochipa quicajtehuaj se ome quehti. Pero amo quej nopa elis ica amotal. Quema amocualancaitacahua hualase, quitamisosolose amotal hasta amo teno mocahuas. ⁶ Amechtachtequilise ipan nochi cati anquiptiyaj masque amo nesi. Huan nochi tamanti cati pajpatiyo cati anquitatijtoque quitemose hasta quipantise huan quihuicase. ⁷ Nochi talme cati amechpalehuiyayaj amechcualancaitase huan quinpalehuise para amechquixtise ten amotal. Achtohui amechilhuise para amechpalehuise para anquiptiyase tasehuilisti, pero amo cana. Inijuanti ya mocualtalíaj para amechtazontamiltise. Amohuampoyohua amechcajcahuase. Cati tacuayayaj amohuaya amechtallilise taquetzti para ximasica. Eltoc pampa amojuanti cati anEdom ehuani tahuel anhuihuitique huan amo anquimatij taya onca.

⁸ “Ipan nopa tonali quema nimechtatzacuultis ayecmo itztos yon se talnamijca tacat ipan tali Edom pampa nochi talnamiquini niquintamiltis ten nopa tepeme campa hueli ipan amotal.” Quej nopa TOTECO quijtohua.

⁹ “Huan amojuanti cati anehuani ipan altepet Temán ica nochi amosoldados cati tahuel motemacaj, anhuihuipicase ica majmajti. Huan nochi masehualme ten nopa tepeme ipan tali Edom, nochi miquise.

Inintajtacolhua nopa Edom ehuani

¹⁰ “AnEdom ehuani anquiselise tatzacuultili pampa amosisinijque ica amoteixmatcahua cati iteipa ixhuihua Jacob. Yeca nochi amotajtacolhua mopanextis para nochi ma quitaca. Huan amojuanti anhuetzise ipan se hueyi pinahualisti huan nimechixpolihuiltis para nochipa. ¹¹ Pampa anquintahuelcajque amoisraelita icnihua quema itztoyaj ipan taohuijcajot. Amo anquinpalehuijque quema nopa tatehuiani hualajque para quinichtequilise nochi cati quipixtoyaj; huan quema mahuiltijque huan moxelhuilicajque nopa altepet Jerusalén. Amojuanti san anmochijque quej se inincualancaitaca.

¹² “Amo quinamiquiyaya anquichijosquíaj cati anquichijque. Amo quinamiqui san antachixtoyaj huan amo teno anquichijque quema seyoc

tali ehuani quintachtequiliyayaj israelitame. Amo quinamiquiyaya anquinhuetzquilijqe nopa israelitame cati tali Judá ehuani quema quite-mohuayayaj tapalehuili. Amo quinamiquiyaya anmoteparanitase quema injuanti tachel taijyohuiyayaj. ¹³ Amo quinamiqui ancaltajque ipan inintal noisraelita masehualhua para anquinichtequilijqe quema quinajsiyaya cati fiero. Amo quinamiqui anquinmahuisojque quema sequinoc quisosolohuayayaj nochi cati quipixtoyaj. Amo quinamiqui anquinichtequilijqe iniricojyo cati mocajtoya para anmoricojchihuase por inintaohuijcajo. ¹⁴ Amo quinamiqui anmoquetzque campa ojmaxali para anquintzontamiltise israelitame cati cholohuayayaj. Huan ipan nopa tonali quema quinitzquiyayaj, amo quinamiquiyaya anquinitzquise nomasehualhua cati noja mocajtoyaj yoltoque huan anquintemactilijque inimaco inincualancatacahua.”

Se tonali TOTECO quitamiltis Edom huan quicualtalis Israel

¹⁵ [TOTECO quijtohua:] “Nechcatitoc nopa tonali ten noaxca, niininTECO israelitame, nimonextis huan nitetajtolsencahuas, huan anEdom ehuani anquiselise amotaxtahuil. Ipan nopa tonali niquincuepilis nochi talme ica cati fiero quichijtoque. Huan amojuanti ipan tali Edom, amechchihuilise san se quej anquinchihuiliytoque israelitame. Nochi cati anquichijtoque, nojquiya amechajsis amojuanti. ¹⁶ Amojuanti ten tali Edom anquintamiltijque nomasehualhua ipan notepe tatzejtzeloltic ipan Jerusalén. Huajca ama amojuanti huan nochi sequinoc talme ehuani quiselise amotatzacuilitil. Quej se ihuintiquet cati tai, eltos quej anquise nopa tatzacuilitili huan anmomimilojtinemise quej anihuintini huan antamiixpolihuse. Elis quej amo quema anitztoyaj.

¹⁷ “Pero Jerusalén * elis campa momanahuse se quesqui israelitame cati noja mocahuase yoltoque, huan nozona elis tatzejtzeloltic. Huan israelitame sempa moaxcatise inintal huan iniricojyo. ¹⁸ Ipan nopa tonali israelitame quipiyase chichahualisti quej se tit o se hueyi tilelemecti, pero teipa amojuanti cati anixhuihua Esaú anelise quej tasoli cati huactoc huan amechtamitise hasta anelise san cuajnexti. Huan amo mocahuas yoltocon se cati iteipa ixhuihua amohuejcapan tata Esaú pampa quej nopa quijtojtoc TOTECO.

¹⁹ “Huan huajca nopa israelitame cati itztoque ipan tali Neguev moaxcatise nopa tepeme ten tali Esaú. Huan israelitame cati itztoque campa tamayamit ipan tali Judá moaxcatise inintal nopa filisteojme. Nojquiya moaxcatise tali Efraín huan Samaria. Huan iteipa ixhuihua Benjamín moaxcatise tali Galaad. ²⁰ Huan israelitame cati quinitzquijque inincualancatacahua mocuepase huan moaxcatise inintal nopa cananeos hasta tali Sarepta. Huan nopa israelitame cati quinitzquijque ten altepet Jerusalén mocuepase huan moaxcatise nopa altepeme ten tali Neguev. ²¹ Pampa nopa tamanahuiani itztose ipan tepet Sion huan tanahuatise ipan nochi tali Edom. Huan na cati niininTECO israelitame nielis nitanahuatijquet.”

* 1:17 0:17 O tepet Sion.

Jonás

Jonás cholo iixpa TOTECO

¹ TOTECO quinojnotzqui Jonás cati elqui itelpoca Amitai, huan quiilhui:
² “Xiya ipan altepet Nínive huan nopona xiteyolmelahua para nijpolihuiltis nopa altepet huan nochi cati itztoque nopona pampa niquita tahuel tajtacolchihua.”

³ Pero Jonás cholojtejqqui iixpa TOTECO huan yajqui altepet Jope iteno hueyi at. Huan nepa campa quisaj cuaacalme, quipanti se cuaacali cati quisayaya para se altepet cati itoca Tarsis cati huejca mocahuayaya ten Nínive. Huajca Jonás taxtajqui huan calajqui para nojquiya yas pampa quinequiyaya cholos iixpa TOTECO.

⁴ Pero TOTECO quichijqui ma huala se hueyi ajacat ipan nopa hueyi at huan taajacayaya hasta nopa cuaacali sosolihuisnequiyaya. ⁵ Huan nopa tacame cati quinejnemiltiyayaj nopa cuaacali majmahuiyayaj, huan sesen injuanti quitzajtziliyayaj idios. Huan teipa, para ma amo moetilis nopa cuaacali, quimajcajque nochi tamamali ipan hueyi at. Pero Jonás temotoya tatzinta ipan nopa cuaacali campa quicahuayayaj tamanti huan quema nopa hueyi ajacat panoyaya, tahuel cochtaya. ⁶ Huajca nopa tacat cati tayacanayaya ipan nopa cuaacali yajqui campa itztoya Jonás huan quiilhui:

—¿Taya tijchihua nica, ticochquet? ¡Ximijquehua huan xijnojnotta moDios! Nohueli quipiyas taicnelili por tojuanti huan techmanahuis.

⁷ Huan nopa tacame cati tequitiyayaj ipan nopa cuaacali moilhuijqque se ica seyoc:

—Ma timahuiltica ica piltetzitzi para tiquitase ajquiya quipiya tajtacoli para pano ni tamanti.

Huajca mahuiltijque, huan nopa piltetzitzi quinexti para elqui Jonás cati quipixqui tajtacoli. ⁸ Huajca quiilhuijqque:

—Techilhui para ten tijpantijtoque ni tamanti. ¿Para ten tiitztoc nica? ¿Canque tihualá? ¿Taya itocá motal? ¿Huan taya itoca moaltepe?

⁹ Huan Jonás quinnanquili:

—Na nihebreo tacat huan nijhueyichihua TOTECO, yaya nopa Dios cati itztoc ipan ilhuicac. Yaya cati quichijtoc hueyi at huan taltipacti.

¹⁰ Huan Jonás quinpohuili nopa tacame para cholohuayaya iixpa TOTECO. Huan quema quicajque cati quijto huan quiitaque nopa hueyi at noja más mocojcoxonyaya, nelía majmajque, ¹¹ huan quitatzintoquilijqque:

—¿Para ten ya nopa tijchijqui? ¿Taya huelis timitzchihuilise para ayecmo mocojcoxonis ni hueyi at?

¹² Huan Jonás quinnanquili:

—Techmajcahuaca atita, huan nopa hueyi at ayecmo mojmolinis. Nijmati notajtacol na para hualajqui ni ajacat cati tahuel temajmatía.

¹³ Pero nopa tacame cati tapalehuiyayaj ipan nopa cuaacali amo quinequiyayaj quimajcahuase huan achi más quichijque fuerza quinejnemiltise nopa cuaacali para ma ajsiti ipan tali. Pero amo huelque pampa nopa at tahuel más mocojcoxonyaya. ¹⁴ Huajca camanaltique ica TOTECO huan quiilhuijqque: “TOTECO, amo techcahuili ma timiquica ica itajtacol ni tacat. Huan sinta ni ajacat amo hualajtoc por itajtacol, amo techtajtacolti sinta miquis ipan at pampa ta, TOTECO, tijchijtoc nochi ni ajacat pampa quej nopa mopaquilis.”

¹⁵ Huan quema quiijtojque ya ni, quimajcajque Jonás atita, huan nopa hueyi at moquetzqui. ¹⁶ Huan quema nopa tacame cati tapalehuiyayaj ipan cuaacali quitaque ten panoc, quiimacasque TOTECO huan quihueyitepanitaque. Quimacaque se tacajcahualisti huan quitencahuilijque para quitequipanose.

¹⁷ Pero TOTECO quicualtalijtoya se hueyi michi para ma quitolo Jonás. Huan Jonás itztoya iijtico nopa michi eyi tonati huan eyi yohuali.

2

Jonás motatajti

¹ Huajca quema Jonás itztoya iijtico nopa michi, motatajti ica TOTECO Dios,

² huan quiijto:

“Quema nitaijyohuiyaya, nimitztzajtzi, noTECO,

huan ta technanquili huan techpalehui.

Quema nechca eltoya para nimitzqui,
nimitznojnnotzqui huan techtacaquili.

³ Techmajcajqui hasta tatzinta campa más huejcata ipan hueyi at.

Techtitanqui campa tahuel tatilana at.

Huan nopa at cati ta tijtiantoya panoyaya nopani ica nochi ichicahualis.

⁴ Hasta nimoilhuiyaya para techtahuelcajtoya.

Nimoilhui amo quema sempa niquitasquía motiopa cati tatzejzeloltic.

⁵ Techatzonpolihuilti hueyi at hasta campa más huejcata,

huan nopa cuameca xihuit cati moscaltía huejcata techtamihuijconqui.

⁶ Nitemotoya hasta itzinta nopa tepet cati eltoc tatzinta ten hueyi at.

Huan techtzacuulijtoya para ma amo nitejco campa onca ajacat huan nemilisti.

Niitztoya quej se cati ilpitoc ipan nopa at cati techmictisnequiyaya.

Pero ta, noTECO DIOS, cati nimitzhueyichihua. Ta techmanahui imaco miquilisti pampa techtejcolti.

⁷ Quema nimoilhui tamisquía nonemilis, nimitzelnamijqui, noTECO. Huan quema nimotatajti, techcajqui hasta ipan mochaj nozona campa tatzejzeloltic.

⁸ Huihui masehualme cati quinhueyichihua taixcopincayome cati amo Dios mitztahuelcajtoque, TOTECO, ta cati tiquinchiya ica taicnelijcayot.

⁹ Pero na nimitztascamati por cati techchihuilijtoc.

Amo quema njihueyichihuas seyoc, san ta, TOTECO. Huan nijtamichihuas cati nijtencajtoc para nijchihuasquía.

San ta, TOTECO, hueli titemanahuía.”

¹⁰ Huajca quema Jonás ya tantoya motatajtía, TOTECO quinhuaati nopa hueyi michi ma quisisota Jonás xalixco. Huan quej nopa quichijqui.

3

Masehualme ipan altepet Nínive moyolcuetque

¹ Huajca TOTECO sempa quicamanalhui Jonás huan quiihui: ² “Xiya ipan nopa hueyi altepet Nínive huan xitayolmelahuati cati nimitzilhuis.”

³ Huajca Jonás quineltoquili cati TOTECO quiihui huan nimantzi moquetztiquisqui huan yajqui Nínive. Nínive eliyaya se hueyi altepet huan para se tacat taminemis, monequiyaya eyi tonati. ⁴ Huan Jonás calajqui ipan nopa altepet huan quema ya nejntoyaya se tonal, pejqqui fayolmelahua chichahuac: “¡Ica 40 tonati TOTECO quitamisosolos ni altepet, huan nochi amajuanti cati anitztoque nica anmiquise!”

⁵Huan nochi cati itzttoyaj ipan nopa altepet, masque pisiltziti o huejhueyi, quineltocaque Toteco Dios. Huan sentic motananque para nochi mosahuase huan moquentise yoyomit cati fiero quej se tanextili para tahuel mocueso-huayayaj ica cati quichijtoyaj. Huan nochi quej nopa quichijque.

⁶Quema nopa hueyi tanahuatijquet ten Nínive quicajqui ni tamanti, nojquiya moquetztiquisqui campa tanahuatiyaya. Huan moquixtili nopa yoyomit cati tanahuatiani quitequihúaj, huan moquenti yoyomit cati fiero huan mosehui talchi. ⁷Huan nopa tanahuatijquet quichijqui se tanahuatili para nochi masehualme ipan altepet Nínive ma quimatica. Quiijto:

“Ica notequiticayo na, niamotanahuatijca, huan ica inintequiticayo ni tacame cati tanahuatíaj nohuaya, nimechnahuatia amo aqui ma quicua yon se tamanti. Yon amo xiquincahuilica huacaxme, borregojme, o sequinoc amotapiyalhua ma tacuaca o ma atica. ⁸Monequi nochi masehualme huan tapiyalme ma moyoyontica ica yoyomit cati fiero para quinextise mocuesohuaj. Huan monequi nochi amojuanti ximotatajtica ica Toteco Dios ica nochi amoyolo. Sesen ten tojuanti ma quitahuelcahua cati fiero quichihua. Ma ayecmo tijchihuaca cati fiero huan ma ayecmo timosisinica. ⁹Pampa nohueli Toteco Dios quicahuas icualancayo. Pampa hueyi itaicnelilis, huelis moyolpatas huan amo techmictis.”

¹⁰Huan Toteco Dios quiitac cati quichihuayayaj nochi nopa masehualme ipan altepet Nínive huan quenicatza quitahuelcajttoyaj cati fiero quichihuayayaj. Huajca moyolcuetqui para ayecmo quinajsis nopa tatzacuiliti cati quinilhujtoya.

4

Jonás cualanqui

¹Pero quema TOTECO moyolcuetqui, Jonás amo quicualitac. Huan nelía cualanqui. ²Huajca motatajti ica TOTECO, huan quiilhui:

—Xiquita TOTECO, na cuali nijmatiyaya para panosquía ya ni quema noja niitztoya ipan notal. Yeca nimantzi nijnequiyaya nicholos huejca hasta altepet Tarsis. Nijmatiyaya para ta se tiDios cati titetasojta huan titeicnelía. Amo nimantzi ticualani, huan nelhueyi motaicnelilis hasta titayolmelahua se tatzacuiliti huan teipa timoyolcuepa. ³Yeca ama TOTECO nimitztajtanía techmicti na. Más cuali para nimiquis huan amo niitztos.

⁴Pero TOTECO quinanquili:

—¿Cuali tiquita para quej nopa ticalani?

⁵Huan quisqui Jonás ipan Nínive huan yajqui imelac nopa altepet campa hualquisa tonati. Huan nozona quichijqui se pilxajcaltzi ica xihuit. Teipa mosehui itantita para moecahuilis huan quiitas taya panos ica nopa altepet.

⁶Huan teipa ixihuiyo nopa xajcali huajqui pampa tahuel tonayaya. Pero TOTECO Dios quichijqui para nimantzi ma moscalti se pilacuacualachtzi itzonta Jonás para ma quiecahuili ica ixihuiyo patahuac huan quipalehuis para ma amo tahuel taijyohui. Huan Jonás nelía paquiyaya ica nopa pilacuacualachtzi. ⁷Pero hualmosta, Toteco Dios quichijqui para se ocuili ma quicualolti nopa imacuayo huan yeca huajqui. ⁸Huan quema quisqui tonati, Toteco Dios quichijqui ma huala ten campa hualquisa tonati se huac ajacat cati tahuel totonic. Huan tonati quitatiyaya Jonás ipan itzonteco huan quimatqui para tapolosquía. Huan quinequiyaya cualancamiquis pampa huajqui nopa pilacuacualachtzi. Huan quiijto:

—Más cuali ma nimiqui huan ayecmo nitaijyohuis ipan ni nemilisti.

⁹ Pero Toteco Dios quinanguili:

—¿Cuali tiquita para noca ficualanis quej ni pampa nijchijqui ma huaqui nopa pilacuacualachtzi cati mitzeca huiliyaya?

Huan Jonás tananguili:

—¡Quena, cuali niquita! ¡Nicalani mohuaya hasta nijnequi nimiquis!

¹⁰ Huajca TOTECO quiilhui:

—¿Ticalantoc pampa tijtasojtac nopa pilacuacualachtzi cati na nijmicti? Pero na nijtojqui huan nijchijqui ma moscalti, amo ta. Huan masque amo nijmictijtosquía, amo huejcajtosquía. ¹¹ Huan sinta ya nopa ipati moixpa, ¿amo tiquita noja más ipati nochi nopa miyaqui masehualme ipan ni hueyi altepet Nínive huan monequi niquintasojtas? Nozona itztoque quipano 120 mil coneme cati ayemo teno quimachilíaj. Huan iyoca itztoque miyac tapiyalme. Quena, monequi niquintasojtas.

Miqueas

TOTECO quintatelhui israelitame

¹ Ya ni nopa camanali cati TOTECO techmacac niMiqueas ipan nopa tonali quema Jotam, Acaz huan Ezequias eliyayaj tanahuatiani ipan tali Judá. NiMiqueas cati niehua altepet Moreset niquitac nochi ni tamanti ipan tanextili cati TOTECO techmacac para nochi ma quimatica taya ininpantis altepeme Samaria huan Jerusalén. Huajca nica eltoc cati techilhui ma niteyolmelahua.

² Ma quitacaquilica nochi cati itztoque ipan ni taltipacti. TOTECO Cati Más Quipiya Tanahuatili camanalti ten ichaj cati tatzejtzeloltic huan quintatelhuía israelitame ica miyac tamanti.

³ ¡Xiquitaca! NiamoTECO nihualtemos ten nochaj huan ninejnentihualas ipan tepeme campa quinhueyitalíaj teteyome. ⁴ Huan campa niamoTECO nimoquetzas, nopa tali atiyas, huan moxitanis quej cera cati atiya pampa quitalljtoque tixijco. Huan temos hasta campa tamayamit huan nochi nopa tamayamit motajcoitase. Huan nopa tepeme hualtemose quej at cati mosejcotilía para motepexihuis hasta tatzinta tepexit.

⁵ Huan ya ni panos por ininfiero tajtacol israelitame * ipan talme Judá huan Israel, pampa miyac tajtacoli quichijtoque. Huan israelitame tatzintocase: “¿Taya totajtacol cati fiero?”

Huan TOTECO quinnanquillis: “Anquinhueyichijntintoque nopa taixcopincayome ipan altepet Samaria. Ya nopa amotajtacol cati fiero. Huan nopa israelitame ipan tali Judá ¿canque quinhueyitepanitaj taixcopincayome más? Eltoc ipan altepet Jerusalén.”

⁶ “Yeca nijchihuas altepet Samaria ma eli quej tasoli. Nesis quej se mili campa quimontonoftoque itasolo para teipa huelis quichihuase se xocomeca mili. Yeca nijxitinis nopa tepamit cati quiyahualojtoc altepet Samaria para quimanahuis ten icualancaitacahua huan nijmajcahuas nopa tet tatzinta ipan nopa tamayamit. Nijpanextis nochi itatzinpejya.

⁷ Niquintapanas nochi iteteyohua. Huan nijtatis nochi iricojyo cati quitantoc ica nopa ahuilnenca sihuame cati motemacatoque quej tacajcahualisti ica nopa teteyome. Quena, nopa altepet quitantoc iricojyo ica ahuilnenca sihuame. Huan inincualancaitacahua cati quinichtequilise nopa ricojyot, teipa quinhuicase ipan inintalhua huan quinmacase ahuilnenca sihuame cati quintequipanohuaj ten injuanti ininteteyohua.”

Miqueas camanaltic huan chocac

⁸ Niquita nopa tatzacuiltili cati quinajsis israelitame, huan yeca nimochoquilía huan niaxti. Nitzajtzi quej se tepechichi. Huan nichoca quej nopa hueyi totot cati choca ica tayohua. Ninejnemi nitajcoxolot huan san noicxipa ica miyac tequipacholi huan pinahualisti. ⁹ Pampa nopa tatzacuiltili cati tali Israel ehuan quiselise elis quej se cocot cati huejcata huan amo huelis pachihuis. Huan nopa tatzacuiltili cati quipantise Israel ehuan nojquiya ajsis hasta ipan tali Judá. Quena, ajsis hasta noaltepe Jerusalén. ¹⁰ Amo xiquinilhica tocalancaitacahua ipan altepet Gat cati fiero topantis tiisraelitame pampa techhuetzquilise. Amo xichocaca iniixpa. Pero anisraelitame ipan altepet Bet Le Afra ximomimiloca ipan taltepociti ica hueyi tequipacholi. ¹¹ Amojuanti cati anehuani ipan nopa yejyectzi altepet

* 1:5 1:5 lixhuihua Jacob.

Safir amechhuicase anxlome para antetequipanotij ica miyac pinahualisti. Imasehualhua altepet Zaanán motatijtoque altepeijtic pampa majmahuij huan moilhúaj quej nopa momanahuisse, pero amo cana. Amo hueli momanahuisse ten nopa taijyohuilisti cati hualas. Nopa altepet Bet Esel ehuan cati amechmanahuiyayaj, ama mochoquilise iniselti por nopa tatzacuiliti cati quinajsis. ¹² Cati itztoque ipan altepet Marot huihuipicase ica nopa hueyi tacuajcualoli cati quinajsis. Quichixtoque ajguiya quinpalehuiqui, pero amo aquí huala pampa itzazacuiliti TOTECO quisosolojtoc nochi huan ajsitoc hasta ipan icalte altepet Jerusalén.

¹³ AnLaquis ehuan, anquinpiyaj cahuayojme cati chichahuac motalohuaj para quihuicase amocarros. Huajca xiisihuica huan xiquincualtica nopa cahuayojme cati más chichahuac motalohuaj para ancholose ten itzazacuiliti TOTECO sinta anhuelise. Pero san tapic, pampa anelque nopa achtohui altepet ipan tali Judá cati anquitoquilijque itajtacol tali Israel. Quena, anquinnextilijque Jerusalén ehuan ma quinhueyichihuaca tamanti cati amo ya Dios.

¹⁴ Huajca xijchihuaca quej se tacat cati quinmaca se nemacti quema quinnahuatijtehuas iichpoca ihuaya nopa telpocat cati mocuilijtoc. Xiquinmacaca amocualancaitacahua altepet Moreset Gat quej se nemacti pampa inijuanti quihuicase ipan inimax nopa altepet ehuan para iniaxcahua. Masehualme ipan altepet Aczib quincajcayajtoque nopa tanahuatiani ipan tali Israel. Quintencahuilijtoque tapalehuili però amo hueli quinpalehuisse.

¹⁵ [TOTECO quijtohua:] “Nijhualicas se tatanquet para quinitzquiqui Maresa ehuan para elise itequipanojcahua. Quena, nopa masehualme cati más yejyetzitzi ipan tali Israel motatij ipan nopa ostot nechca Adulam, pero nopa noca quinitzquise huan quihuicase ilpitoque.

¹⁶ “Xichocaca huan ximotzonhuatanica para anquinnexitise anmotequipa-chohuaj. Quena, ica amocuesol, ximotzonhuatanica hasta annessise quej nopa tzojpilome cati tzonpepestique. Xiquinchoquilica amopilcanehua cati amechmacayayaj hueyi paquilisti. Pampa ama amechcuilijij huan quihuicase para tetequipanotij san tapic ipan seyoc tali. Huan ayecmo quema anquinitase.”

2

Tatzacuiliti ipan tacame cati tetique

¹ Teicneltique cati motecaj ipan inintapech huan ipan inintalnamiquilis mosenilhuáj taya fiero tamanti hueli quichihuase. Huan quema tanesi, ya nopa quichihuaj pampa quipiyaj chichahualisti para quichihuase cati quinequij. Teicneltique pampa ya ajsitihuala inintatzacuiliti. ² Inijuanti quixtocaj seyoc imil huan quichtequij masque ya quipiyaj miyac. Quiitaj se cali cati seyoc iaxca huan moaxcatíaj. Ica istacatili quintacuicuilíaj inincal-nechcahua huan iniicnihua ininchajchaj masque piliyojtzí quipixque. Hasta nojquia quincuilíaj nopa tali cati quiselijtoque ten inintatahua.

³ Huajca TOTECO quijtohua: “Na nojquia Nimoihujtoc taya niquinchi-huilis. Niquintitanilis se taijyohuilisti huan amo huelis momanahuisse. Huan ipan nopa tonali ayecmo mohueyimatise huan mooquichmajtine-mise. Itztose ipan se hueyi taohuijcajot.”

⁴ Ipan nopa tonali para amechhuetzquilise amocualancaitacahua, inijuanti huicase ni huicat quej elisquá amojuanti anhuicaj: “TOTECO techtamisosolojtoc. Techcuilijtoc nochi cati toaxca huan quinmajmacatoc tachtequini.

Quena, nochi totalhua quinmacatoc masehualme cati fierojtique.”

⁵ Huan ayecmo itztos yon se israelita ica tequiticayot iixpa TOTECO para quixejxelos tali huan mahuiltis ica piltetzitzi iixpa TOTECO para quimatis ajquiya quiselis. Nochi cati quipixque tequiticayot ya itztose ipan seyoc tali pampa ya quinhuicatose.

Istacatica tajtolpanextiani

⁶ Nopa israelita tajtolpanextiani cati istacatij techilhuíaj: “Amo xiteyolmelahua para hualas tatzacuiliti. Amo xiquijto para tiisraelitame tipinhuase pampa amo quema techajsis tojuanti.”

⁷ ¡Ay amojuanti, aniixhuihua Jacob! ¿Amo anquimatij TOTECO Itonal huelis amechnojnnotzas chicahuac? ¿Anmoilhuíaj amo quema quichihuasquía ya nopa?

TOTECO quijtohua: “Nochi nocamanal quinchiuiliá cuali cati nemij xitahuac, huajca sinta anquichihuayayaj cati cuali, amo anquicuesijca-caquisquíaj cati niqijtohua.

⁸ “Pero nochi amojuanti cati anomasehualhua, ama anmocuctoque quej annocualancaitacahua. Anquinichtequilíaj cati ica mopantzacua se tacat, masque se israelita huan amoicni. Anquiquixtilíaj iyoyo masque huala ten tatehuilisti huan paqui para ajsis ichaj huan amo quitemohua cualanti, huan san amechpano.

⁹ “Anquinqixtilijtoque ininchajchaj huan anquintojtocatoque cahual sihuame cati paquiyayaj masque nelía pilquentzi quipiyayayaj. Anquinqixtilijque ininconeua nochi cati na niininTeco niqinmacatoya. ¹⁰ Huajca ximotaloca huan xitetequipanotij ipan seyoc tali pampa ya nopa quinamiqui. Ya ni ayecmo amochaj, yon ni tali ayecmo amotal, pampa pano antajta-colchijtoque huan pano anquinenpolojtoque ni tali huan anquichijtoque amo tapajpacti noixpa.

¹¹ “Anquiselíaj cati hueli masehuali quej amotajtolpanextijca masque san icamac. Masque se amechilhuisquía: ‘Na niquita ten cuali amopantis, huan anquipantise paquili huan miyac tailisti’. Masque quej nopa amechistacahuisquíaj, anquiselisquíaj quej elisquía melahuac, pero amo quej nopa elis.

Hualas se tamanahuilisti

¹² “Pero se tonali teipa niqoinsentilis nochi iixhuihua Jacob. Quena, nochi israelitame cati noja mocahuase yoltoque niqoinsentilis quej se tamocuitahuijquet quinsejcotilía iborregojhua campá tatzacti. Huan quej paqui miyaqui borregojme campá sacapetayo, ni tali temis ica tahuel miyac nomasehualhua cati ya niqinhualicatos ten campá hueli talme. Huan nochi tahuejchitose ica paquillisti. ¹³ Huan ipan nopa tonali hualas se tayacanguet cati quitapos amoojhui huan amechyacañas. Quena, amechpostequilis nopa caltemit campá antactose huan amechquixtis. Huan niamotanahuatijca nitayacanas huan antechtoquilise. Huan na niamoTECO nijpiyas tanahuatili ipan amotal.

3

Inintajtacol nopa tayacanca israelitame

¹ “Xijtacaquilica amojuanti cati antayacanani ipan tali Judá huan tali Israel. Monequisquía más anquimatise cati xitahuac que nochi sequinoc. ¿Amo neli? Huan quinamiqui antayacanani antamocuitahuisquíaj para oncas cati xitahuac ipan amotal. ² Pero anquihuejcamajcahuaj cati xitahuac huan anquinequij cati amo cuali. Anquinqixtilíaj nomasehualhua cati

inixca, quej se tecuani quiquixtilía icuetaxo cati quimictijtoc. Eltoc quej anquicuaj ininacayo huan hasta iniomiyo nomasehualhua cati anquintahuijsojtoque talchi. ³ Quena, amojuanti quej antecuanime, anquicuaj nomasehualhua ininacayo huan anquinqixtilíaj inincuetaxo. Anquinpojpостequilíaj iniomiyo huan anquinhuejhuelohuaj quej nacat cati anquinequij cuechtic para se tacialisti. Antayacanani, anquincuijcuilíaj nomasehualhua nochi cati quipiyaj. ⁴ Huan yeca ipan nopa tonali quema anquitemose TOTECO para ma amechpalehui, amo amechnanquilis. Yaya san moixtatis pampa anquichijtoque tahuel miyac tamanti cati amo cualí.”

⁵ Quej ni TOTECO quinilhuía nopa tajtolpanextiani: “Antajtolpanextiani, anquincuapolojque nomasehualhua. Anistacatij huan anquijjtohuaj se quipiyas paquillisti sinta amechtamacas. Pero sinta se masehuali amo quipiya teno para amechmacas, anquiyolmelahuaj para hualas tatehuilisti para anquimajmatise.

⁶ “Huajca hualas tatzacuiliti amopani huan ayecmo huelis anquitasé ipan tanextili para anquimatise taya hualas. Tamis amotequi, antajtolpanextiani, pampa amo anteyolmelajtoque para hualas tatzacuiliti. Elis quej sejtos tonati huan oncas tzintayohuilot campa amojuanti. ⁷ Huan antajtolpanextiani tahuel anpinahuase pampa amo anquimatiyayaj taya hualayaya. Huan amojuanti cati antetonalitayayaj ayecmo anquimatise taya anquichihuase. San anmocatatzacuase huan anmopinahuase pampa amo nimechnanquilis.”

⁸ Pero na niMiqueas, amo quej nopa niitztoc. Nijpiya miyac ichichahualis Itonal TOTECO. Amo nimajmahui niquinyolmelahuas masehualme ipan talme Judá huan ipan Israel para TOTECO quintatzacuilitis israelitame por inintajtacolhua pampa ya nopa xitahuac.

⁹ Huajca xijtacaquilica ya ni antayacanani ipan Israel huan Judá. Anquicuesijcaitaj cati melahuac huan anquichihuaj huijcoltic nochi cati xitahuac. ¹⁰ Anquitemitijtoque Jerusalén ica temictiani huan nochi tamanti tajtacoli. ¹¹ Antayacanani, anquinequij masehualme ma amechtaxtahuica para antatajtolsencahuase. Antotajtzitzi, san antamachtíaj sinta anquitanij tomi. Antajtolpanextiani, san antemachiltíaj TOTECO icamanal sinta amechtaxtahuaj. Teipa anquichihuaj quej annotatzquillíaj ipan TOTECO. Huan anmohueyimati huan anquijjtohuaj: “TOTECO itztoc tohuaya huan yeca amo teno cati fiero techajsis.” ¹² Huan por amojuanti amotajtacolhua, amocualancaitacahua quisosolose altepet Jerusalén. Canactzi mocahuas quej se mili tapoxonili huan canactzi elis quej se tamontomit campa cal-sosolohuaj. Huan nopa tachiquili campa ijcatoc tiopamit, teipa elis se cuatitamit.

4

Nopa tepet ten TOTECO ipan itamiya tonali (Is. 2:2-4)

¹ Pero teipa, ipan itamiya tonali, Jerusalén elis más taixmatili que nochi sequinoc altepeme ipan nochi taltipacti pampa nozona mosehuis cati quin-nahuatis nochi talme. Huan masehualme cati ehuani campa hueli ipan taltipacti talojtzitzi quipaxalose.

² Quena, masehualme cati ehuaní ipan campa hueli talme moilhuse se ica seyoc: “Ma tiyaca tijpaxalotij itepe Toteco Dios. Ma tiquitatij itiopa ininTECO nopa israelitame. Yaya technextilis iojhui huan taya cuali para tijchihuase huan tijneltoquilise.” Pampa ipan nopa tonali TOTECO quinahuatis nochi taltipacti ten altepet Jerusalén huan ten nozona quisas icamanal.

³ Yaya tetajtolsencahuas quema oncas cualanti tatajco ten nopa miyac tamanti masehualme campa hueli. Quena, quema mocualanis se tali cati tetic ica seyoc cati nojquiya tetic, yaya motajcoquetzas para quinyoltalis. Huan oncas tasehuilisti. Masehualme quitejtejtzonase inintepos cati ica tatehuyayaj para ica quichihuase azadones. Huan inincuataminhua quitejtejtzonase para quichihuase huíngaros. Yon se tali ayecmo motananas para quitehuis seyoc tali, yon ayecmo aqui momachtis quenicatza tatehuis.

⁴ Huan sesen masehuali mosiyajquetzas ica paquillisti itantita se icuatatoc huan sesen ixocomecamil temacas hasta mocahuas. Ayecmo aqui quin-temajmatis pampa TOTECO Cati Quinyacana Iilhuicac Ejcahua Ma Tatanitij quej nopa quiijttojoc. ⁵ Huajca masque nochi sequinoc talme ama ipan ni tonali quinhueyichihuaj teteyome, tiisraelitame fijtoquilise TOTECO, yaya cati eliyaya toDios ten ipejya huan elis para nochipa.

TOTECO sempa quinsentilis israelitame ten campa hueli talme

⁶ TOTECO quiijttohua: “Ipan nopa tonali niquinhualicas nomasehualhua cati metzcototique huan cati tahuel taijyohuijfoque campa quinhuicatoque. Quena, niquinsentilis nochi cati amo teno quipiyaj pampa niquintatzacuilitjoc. ⁷ Huan ica injuanti sempa nijchihuas se tali ica masehualme cati tetjettique. Huan na, niamoTECO, nielis niinintanahuatijca huan nitanahuatis ipan tepet ten nopa tonali huan para nochipa. ⁸ Huajca Jerusalén elis temachtí quej se tamocuitahuíjquet quintachilía iborregojhua ten huejcapa. Huan Jerusalén sempa quipiyas se tanahuatijquet ica hueyi tanahuatili campa hueli quej achtohuiya oncayaya.”

Achtohui israelitame chocase por nopa tatzacuiliti cati hualas

⁹ Pero ama ipan ni tonali antahuejchihuase quej sihuame quema quinajsi inintacuajcualol para conepiyase. Amo anquipiyase se amotanahuatijca o se amotalnamictijca pampa ya mictose. Amo aqui amechmanahuas para amo amechajsis amotacuajcualol. ¹⁰ Huajca anJerusalén ehuaní, xihuihuipicaca quej se sihuat cati taijyohuía para tatacatilís. Xitahuejchihuaca pampa anquijyohuise nopa hueyi tacuajcualoli cati amechajsis. Amantzi monequi anquisase ipan ni amoaltepe huan anitztotij mila. Teipa amechhuicase ipan tali Babilonia. Pero nozona TOTECO yas para amechcohuati huan amechmajcahuas. Quena, hasta nepa se tonali TOTECO amechmaquixtiti inimaco amocualancaitacahua.

¹¹ Pero ama monechicojtoque inimasehualhua miyac talme cati amoca cualanij anJerusalén ehuaní. Quiijtohuaj: “Tijnequij tiqititase quema quixitinanise huan quisosolose amoaltepe huan tahuel nempolijtoc mocahuas. Tijnequij tiqititase quema anmopinahuase.” ¹² Pero injuanti amo quimatij TOTECO italnamiqulís, yon amo quimachilíaj nopa tatzacuiliti cati yaya moilhuijtoc para quinchihuilis teipa. Se tonali yaya ininpa moquejquetzas amocualancaitacahua quej se quisentilía trigo huan ininpa nejnemi, huan quihuítequi chicahuac para quiquixtilis iyol.

¹³ Huajca ipan nopa tonali TOTECO amechilhuis anisraelitame: “Ximotanacana huan ximoquejquetzaca ininpani amocualancaitacahua. Na niamoTECO nimechmacas chicahualisti. Anquipiyase chicahualisti quej se tapiyali ica icuacua ten teposti huan iisti ten bronce. Huan anquinhuejhuelose miyaqui masehualme huan nochi iniricojyo amocualancaitacahua cati quitantoque ica istacatili, se tonali anquiselise para antechmacase. Quena, antechmacase quej se tacajchualisti, niamoTeco, cati noaxca nochi taltipacti.”

5

Inincualancaitacahua ajsitoque

¹ AnJerusalén ehuaní, xiquinsentilica amosoldados para anmomanahuisse ama, sinta anhuelij. Amocualancaitacahua ya quiyahualojtoque ni altepet Jerusalén. Quipinahualtise inintayacanca tali Israel ehuaní. Quimaquílise ica se cuahuit ipan icampa.

Tacatis se tanahuatijquet ipan pilaltepetzí Belén

² Masque amo más hueyi pilaltepetzí Belén Efrata quej sequinoc altepeme ipan tali Judá, pero nopona se tonali tacatis para na se hueyi Tanahuatijquet cati quinnahuatis israelítame. Yaya nejnentihualajtoc hasta huejcajqúiya pampa nochipa itztoc.

TOTECO quintahuelcahuas imasehualhua hasta seyoc tonali

³ Huajca TOTECO quintahuelcahuas imasehualhua inimaco inincualancaitacahua hasta nopa tonali quema nopa sihuat cati monequi tatacatiltis, quitacatiltis icone. Teipa quena, iisraelita icnihua cati noja mocahuase ipan sequinoc talme campá quínhuicaque, sempa hualase ipan inintal.

Quema tanahuatis TOTECO

⁴ Huan ipan nopa tonali yaya motananas ica ichicahualis TOTECO huan quinmocuitahuis imasehualhua ica ichicahualis TOTECO. Huan quihuicas itoca TOTECO iDios. Huan imasehualhua itztose ica temachili huan pajcaitztose. Huan campá hueli ipan taltipacti tahuel quihueyitepanitase. ⁵ Huan ten ya hualas tasehuilisti.

Quema nopa tali Asiria ehuaní quinequise calaquise ipan total para quisosolose tocalhua cati más cuali tasencahuali, ica ya tiguentalise tahuel miyaquí israelita tayacanani huan tamocuitahuiani cati tejtetique para quintanise. ⁶ Huan ica macheta quínahuatise tali Asiria cati elquí ital Nimrod. Yaya techmanahuis inimaco Asiria ehuaní quema hualase para quítehuise total huan quípanose tonepa.

⁷ Huan ipan nochí taltipacti ipan nopa tonali, nopa israelítame mocahuase campá hueli quej quema TOTECO techtitanilía ajhuechti cati tasejseltía o at cati quixolonía xihuime. Nopa at cati techmaca amo quichiya hasta masehualme quinequij ma huetzi, yon amo mocahua quemá masehualme quinequij ma mocahua. ⁸ Quena, nopa israelítame itztose ipan campá hueli talme inihuaya ten hueli tamanti masehualme. Huan nopa masehualme quínimacasise quej sequinoc tapiyalme ipan cuatitamit quiimacasij nopa hueyi tecuani león. Huan nopa israelítame cati mocahuase ipan nopa tonali tanahuatise campá hueli huan amo aquí huelis momanahuis iniixpa pampa itztose quej se tecuani cati nemi tatajco ten borregojme cati quínmictijtinemi huan quínhuejhuelojtinemi cati quinequi. ⁹ Quena, TOTECO quínmatananas israelítame huan quíntzontamiltise nochí inincualancaitacahua.

¹⁰ Huan TOTECO quíijtohua: “Ipan nopa tonali níquinsosolos nochí amotatehuijca carrojhua huan amocahuayojhua cati ipan anmotemachijtose para anmomanahuisse. ¹¹ Nojqúiya nítanahuatis ma quisosoloca amoaltepehua cati annoilhuíaj temachtí cati ipan annotatíaj quema onca tatehuilisti. Quena, níjxitinis sesen tepamit cati quiyahualojtoc amoaltepehua pampa ayecmo monequis. ¹² Huan níjssosolos cati ica antenahualhuíaj huan ayecmo itzto yon se tenahualhuijquet campá amojuanti. ¹³ Huan níquinsosolos nochí teteyome huan taixcopincayome cati anquínhueyichihuaj. Huan ayecmo quema anmotancuaquetzase para anquínhueyichihuase se tamanti

cati tamachijchihuali. ¹⁴ Niquinquixtis nochi nopa taixcopincayome ten nopa teteyot Asera cati mopantía amohuaya huan niquinsosolos. Nojquiya nijxitinis nochi altepeme campa quinhueyichihuj teteyome. ¹⁵ Huan nopa talme cati amo techneltoquilise quimachilise nocualancayo, pampa niquintatzacuiltis chichahuac huan ica miyac cualanti.”

6

TOTECO quintatelhui israelitame

¹ TOTECO quijtohua: “Xijtacaquilica, anisraelitame, ximotananaca huan techcamajixnamiquica sinta amo cuali nijchijtoc. Tacactoque nochi huehuyi tepeme huan nochi tachiquilme cati antechilhuisse.

² “Quena, nochi huehuyi tepeme huan hasta campa motatzquilijtoc tali ma quitacaquilica cati na niamoTECO nijpiya para ica nimechtatel-huis anisraelitame. Pampa annomasehualhua, huan amohuaya nijpiya se cualanti. ³ Nomasehualhua, ¿taya fiero nimechchihuilijtoc para antech-tahuelcahuase? ¿Ica taya nimehcuesojtoc? ¡Technanquilica! ⁴ Pampa na nimechquixti ten tali Egipto campa san tapic antetequipanohuayayaj. Nopona quema anitztoyaj aniaxcahua sequinoc masehualme, na nimechcojqui para nimechtotomas. Huan nimechtitanili Moisés huan Aarón huan María para amechyacanase.

⁵ “Nomasehualhua, amo anquielnamiquij Balac nopa tanahuatijquet ten tali Moab cati quinequiyaya amechsosolos huan quitajtani nopa tajtolpanextijquet Balaam icone Beor ma amechtatelhui. Pero na nijfuerzajhui Balaam ma amechtiochihua. ¿Amo anquielnamiquij nochi cati yejyetzni nimechchihuilu quema anitztoyaj ipan ojti ten Sitim hasta Gilgal? Nijchijqui para anquimatque para na, niamoTECO, huan nijchihua cati xitahuac.”

Cati TOTECO quinequi para nopa tacame ma quichihuaca

⁶ ¿Quenicatza hueli tiajsitij iixpa TOTECO Cati Más Hueyi para tijhueyichihuae ica nochi cati amo cuali tijchijtoque? ¿Cuali tihualase iixpa ica becerros cati quiaxitijtoque se xihuit para tijmacase quej tacajcahualisti?

⁷ ¿Paquis TOTECO ica miyac mil tacajcahualisti sinta amo tijchihuj cati cuali? Masque nijmacasquía miles ten borregojme o tahuel miyac aceite cati quitemitisquía majtati mil atajti, amo ya nopa quinequi. Masque nijmacasquía noachtohi cone por notaixpanolhua, yaya cati quisqui ipan notacayo por tajtacoli cati eltoc ipan noyolo, amo ica ya nopa paquis.

⁸ TOTECO techilhujtoc catijqui cuali huan taya quinequi ma tijchihuaca. San quinequi ma tijchihuaca cati xitahuac, ma titetasojtaca huan ma tine-nemica ihuaya huan ma timoehcapanoca iixpa.

Ma amo tacajcayahuaca

⁹ TOTECO camanalti chichahuac para nochi altepet Jerusalén ehuan. Masehualme cati talnamiquij quiimacasiy huan quitepanitaj. Huan TOTECO quijtohua: “Xijtacaquilica taya tatzacuiltili hualas huan xijmatica na nijtiantoc. ¹⁰ Pero amojuanti, amo ya nopa anquichihuj. Anmoricojchihuj ica tamanti cati pajpatiyo cati tachtecti. Huan quema antanamacaj, amo antemacaj ajsitoc quej monequi. ¹¹ Temacht monequi nimechtatzacuiltis pampa anquitequihuij se tatamachihuali cati amo ajsi huan anquipiyaj teme cati quinpolohua para anquitalise ipan amobalanzas. ¹² Nopa tominpiyan quitemitijtoque ininchajchaj ica miyac tamanti tachtecti huan nochi ininchaj ehuan istacatij huan tacajcayahuaj. ¹³ Yeca na nojquiya nijchihuas ximocococa huan nimechtahuisos. Nimechchihuas ximocahuaca san

amomax por amotajtacolhua. ¹⁴ Antacuase, pero amo quema anixhuise. Cati fiero amo quema amechcahuas. Masque miyac anpixcase, amo huelis anquiajocuisse para teipa. Huan cati anquiajocuisse, niamoTeco niquinmactilis amocualancaitacahua cati amechtanise para ma quihuejhueloca. ¹⁵ Antocase, pero amo anpixcase. Masque ipan anmoquejquetzase olivos para anquiquixtilise aceite, amo anquipyase yon se quentzi aceite para anmopolose pampa cati amechtanise quitequihuise. Huan anmoquejquetzase ipan xocomecat, pero amo oncas xocomeca at para anquiise, pampa nochi cati amoaxca niquinmacas sequinoc. ¹⁶ Anquitoquillitoque itanahuatilhua nopa fiero tanahuatijquet Omri huan ifiero ojhui tanahuatijquet Acab. Yeca na nijchihuas para ma quisosoloca amoaltepe. Huan nochi sequinoc masehualme amechhuetzquilise por cati amopanti, anJerusalén ehuan. Annomasehualhua, tahuel anmopinahuase.”

7

Israelitame quimachilijque para amo cuajcualme

¹ Nelía fiero nijmati. Nijmati quej se cati quinequisquía quicuas se quesqui higos cati achtohui taicsi huan yahui campa cuame para quitequis huan yon se amo quipantía. Nijmati quej se cati yahui para quitequis xocomecat huan yon se quechti amo onca, yon setzi amo mocahua para quicuasquía. ² Ica na, masque nijtemohua se cati tetasoja ipan total, yon setzi ayecmo aquí. Amo aquí yon se tacat cati xitahuac. Nochi san tachixtoque para temictise huan quitoyahuase esti. Sesen quichihua taquetzti para quimasiltis huan quimictis iicni.

³ Nochi quiپیay miyac yajatili para tajtacolchihuase hasta ica nochi inchichahualis. Totayacanhua huan tojueces quintajtaníaj nochi ma quintaxtahuica para tetajtolsencahuase quej injuanti quinequij. Cati tominpiyaj quiniñhuíaj taya quinequij ma quinchihuilica huan ya nopa quichihuaj nopa tequichihuani masque amo nesi sinta tasencajtoque. ⁴ Amo aquí yon se tequitiquet cati cuali. Cati más cuali itztoque quej huitzti cati tecocohua. Huan cati más xitahuac itztoque quej sahua mecat cati temasiltía. Pero nechcatitoc huala inintatzacuilti. Ajsis nopa tonali cati amotajtolpanextijcahua cati temachtí tachixtoyaj amechyolmelajtoque para hualas. Huan ayecmo anquimatise taya anquichihuase.

⁵ Huajca amo xijneltoquili mohuampo, yon amo ximotemachi ipan cati ihuaya ticochi pampa nojquiya mitzcaycahuas. Más cuali amo ximolini iixpa. ⁶ Pampa ininconeuhua masehualme quinixpanose inintatahua. Huan ichpocame amo quitepanitase ininanahua, yon tseyehua amo quintepanitase iniyexnahua. Huan icualancaitacahua se masehuali, elise injuanti cati itztoque ipan ichaj.

Miqueas motemachi ipan TOTECO Dios

⁷ Pero na nijtachilis TOTECO Dios para techpalehuis. Nimotemachis ipan yaya cati techmaquixtía. Quena, noTeco techtacaquilis.

Se tonali Israel tatanis

⁸ Amojuanti annocualancaitacahua, amo xipaquica ica na. Pampa masque nihuetztoque, sempa nimotanas. Masque niitztoque ipan tzintayohuilot ama, teipa TOTECO techtaahuilis. ⁹ Huajca ama niquiyohuis icualancayo TOTECO pampa nitajtacolchijot ica ya. Nijchিয়া hasta yaya camanaltis para techmanahuis. Nijpiyas noyolo hasta yaya quichihuas cati quinamiqui ica na. Se tonali techquixtis ten ni tzintayohuilot huan

techtalis campá taahuili. Huajca quena, níquitas para yaya quichihua san cati xitahuac. ¹⁰ Huan nojquiya nocualancaitacahua quiitase huan TOTECO quinpinahuáltis cati techilhuiyayaj: “¿Canque itztoc moTECO Dios?” Huan na níquitas quema TOTECO ininpa moquejquetzas nocualancaitacahua quej soquit cati eltoc callejtípa.

¹¹ Hualas tonali quema sempa tijcualchijchihuase toaltepe huan mohueyilis nopa tali cati toxca. ¹² Ipan nopa tonali cati ehuaní ipan miyac talme quiitaquíj altepet Jerusalén. Hualase tali Asiria ehuaní huan hasta cati ehuaní nopa altepeme cati moyahualojque ica tepamit; ten tali Egipto hasta cati itztose nechca hueyat Eufrates. Hualase nóchi cati ehuaní ipan nopa talme ten ixalteno se hueyi at hasta ixalteno seyoc ixalteno hueyi at. Quiitaquíj nochi cati ehuaní ipan talme ten ipejya tepeme cati nechca hasta cati ehuaní itamiya tepeme cati huejca. Nochi quipaxaloquíj ipan toaltepe. ¹³ Pero tatzitziatoc elis nopa talme por nochi fiero tamanti cati quichijtoque cati nopna ehuaní.

Miqueas motatajti ica TOTECO

¹⁴ TOTECO, techyacana pampa timomasehualhua. Techmocuitahui quej se tamocuitahuijquet quinmocuitahuía iborregojhua huan quintilana ica icuachijcol huehueyac quema calaquisnequíj campá mahuilili. Techcahuili tojuanti cati tiitztoque toselti campá cuatítamit, sempa ma tiitztoqa campá temachtí. Techtamaca cuali quej tiquintamaca borregojme ica sacat cati sejselic quej eltoc ipan tali Basán huan Galaad. Quena, sempa ma tiitztoqa ica yejyectzi quej achtohuiya.

TOTECO tananquili

¹⁵ [TOTECO camanalti:] “Na sempa nimechnextilis huejhueyi tamanti quej nopa tiochicahualnescayot cati nijchijqui quema anquisque ipan tali Egipto.”

Miqueas sempa camanalti

¹⁶ Sequinoc talme quiitase cati tijchihuas huan pinahuase pampa quiitase amo teno ipati ininchicahualis. Pinahuase hasta mocamatzacuase huan monacastzacuase. ¹⁷ Quipipitzone nopa talcuajnexti quej cohuame. Quej cohuame cati mohuahuatatzaj, huihuipicatihualase ten campá motatíyayaj huan monextise ica hueyi majmajti moixpa ta, TOTECO Dios.

¹⁸ Amo aquí seyoc Dios quej ta. Ta titetapojpolhuía taixpanoli huan masque fiero quichijtoque momasehualhua cati mocahuaj yoltoque, tiquelcahua inintajtacolhua. Amo tijtalía moyoltípa cualanti pampa ta mitzpactía titeicnelía.

¹⁹ Sempa tijpiyas hueyi moyolo ica tojuanti huan tijtaltocas totaixpanolhua. Quena, TOTECO, ticatzonpolihuiltis nochi totajtacolhua campá más huejcata ipan hueyi at. ²⁰ Techtiochihuas quej tiquilhui tohuejcapan tata Jacob para tijchihuasquíj huan techtasojtas quej tiquilhui Abraham. Nochi cati tiquintencahuili tohuejcapan tatahua huejcajúya para tijchihuasquíj, ya nopa tijtamichihuas.

Nahúm

TOTECO cualani ica altepet Nínive

¹ Ya ni nopa camanali cati TOTECO techmacac na, niNahúm, cati niehua ipan pilaltepetzí Elcos, quema technextili cati ipantis altepet Nínive.

² TOTECO itztoc se Dios cati quintasomati masehualme pampa quinamiqui san ya ma quitequipanoca. Yeca quintatzacuilitía huan quincualancaita quema amo quitepanitaj. TOTECO momacuepa huan nelía cualani ica cati moyoltetilíaj ica ya. Ica miyac cualanti quintzontamiltía nochi icualancaitacahua. ³ TOTECO tahuel quichiya para pehuas cualanis. Pero nelía hueyi ichichualis huan yaya quita para nochi cati tajtacolchijtoque temachtí quiselise inintatzacuilitil. TOTECO quinextía ichichualis quema onca ajcomalacat huan quema chichahuac taajaca. Nopa mixti cati motalohua eltoc quej taltepocti iixita. ⁴ Quema yaya quimaca tanahuatili para ma huaqui, huaqui nochi nopa hueyi at, atajme huan sacamilme ipan tali Basán. Ica icamanal nopa cuatitamit Carmelo huan nochi nopa cuame ipan Líbano mososolohuj. ⁵ Quema TOTECO itztoc nechca, nopa tepeme huihuipicaj huan nopa tepexime atiyaj. Mojmolinía tali huan nochi cati itztoque ipani tahuel momajmatíaj.

⁶ Amo aquí huelis quiijyohuis quema TOTECO mototonilijtoc ica cualancayot. Iqualancayo eltoc quej nopa tilelemecti cati nochi quitamitatía. Quema yaya cualani, nochi nopa tepexime huehuelocaj.

⁷ TOTECO hueyi iyolo. Quema se mocuesohua, ma yahui campa ya huan yaya quimanahuis. Yaya quinixmati cati quineltoquiliáj huan cati eli iaxcahua. ⁸ Pero yaya quitamiltía icualancaitacahua quej quema huala se hueyi at huan nochi quihuica. Iqualancaitacahua quintotocatinemi hasta tayohua.

⁹ ¿Taya anmoilhuíaj anquichihuilise TOTECO para anquitanise ya? Yaya amechtzontamiltis san ica se huelta. ¹⁰ Cati mochihuaj icualancaitacahua itztoque quej huitzti cati moxinepalojtoque. Itztoque quej ihuintini cati huetztihualahuij pampa tahuel taitoque. TOTECO quintatis quej xihuime cati cuali huactoc. ¹¹ Amojuanti ipan altepet Nínive anmoilhuíaj anquichihuase se tamanti ica TOTECO, pero cati quej nopa moilhuía nelía sentamic. ¹² Ya ni cati TOTECO quinilhui imasehualhua: “Masque nopa Asiria ehuani quipiyaj tetili huan itztoque nelía miyaqui, na niqintzontamiltis huan ayecmo quema nesise.

“Masque miyac nimechtaijyohuiltijtoc, ama ayecmo nimechtaijyohuiltis más. ¹³ Huan na nimechtojtomas campa anitztoque anilpitoque ica tepos cadenas huan ayecmo nimechcahuas para xiitztoca quej anilpitoque por nopa asirios.”

¹⁴ Huan ya ni cati TOTECO tanahuati ten nopa tanahuatijquet ten tali Asiria cati mosehui ipan Nínive. TOTECO quiijto: “Ta ayecmo tiquinpiyas moixhuihua para mocahuas motoca. Ten amotiopahua niquintapanas nochi nopa teteyome huan taixcopincayome. Huan nopona timiquis huan nimitztocas pampa miyac tajtacoli tijchijtoc huan amo quinamiqui para tiitzos.”

Altepet Nínive tamisosolihuis

¹⁵ ¡Xiquitaca! Nepa campa tepet huala ne tayolmelajquet cati quihualica se cuali camanali. Techhualiquilis camanali ten tasehuilisti. Xiilhuichihuaca antali Judá ehuani. Xijtamicihuaca nochi cati anquiijtoque para anquichihuase. Amocualancaitacahua cati hualahuij ten Nínive ayecmo quema mocuepase pampa nochi ya niqintzontamilti.

2

¹ ¡Pero amojuanti ipan altepet Nínive, xijtacaquilica! Amocualancaitacahua ya amechyahuajojtinemij. Campa tepamit xitamocuitahuica. Ipan ojti xitajtachiyaca pampa nimantzi hualase para amechtehuise. Xiquincualtalica nochi tacame cati quimatij tatehuíaj. ² Anquitamitachtequiliijtoque tali Israel huan anquicajtoque quej se xocomeca tzonti cati amo quiipya imaxihuiyo. Huajca ama TOTECO amechtatzacuiltis. Nojquiya ama TOTECO sempa quitananas tali Israel. Quihuejcapantalis nopa tali hasta quiipyas miyac tatepanitacayot huan chichahualisti quej quema Jacob mohueyimatiyaya ica iyejca nopa tali.

³ Nopa tatehuiani chichilihuis inintepos cati ica motehuíaj. Huan xiquitaca nochi nopa tatehuiani moyoyontijtoque chichiltic. ¿Amo anquinitaj? Inincarrojhua eltoc quej ticuahuit huan quema ya monemilijtoque para tatehuise, huihuipicase hasta nopa huejhueyi cuame. ⁴ Nopa carrojme ejelihuis nentinemise ipan amocalles huan campa amotianquis. Caquistis quej tatonomi huan nesise quej tilelemecti. Motalose chichahuac quej quema tapetani. ⁵ Amotanahuatijca quintzajtzilic itatehujcahua para ma hualaca quimanahuquij amoaltepe. Pero quema inijuanti moisihuiltise para hualase, motepotanise. Quinequise ajsitij campa nopa tepamit para tacualtalise huan tamocuitahuise. ⁶ Pero ayecmo oncas caquiuhui pampa nopa caltemit cati ica motzactoya amoaltepe ya tapojtos. Huan quej huala chichahuac se hueyat, ya calactose amocualancaitacahua. Nopa hueyi cali ten amotanahuatijca ya sosolijtos.

⁷ Huan quiitzquise nopa sihua tanahuatijquet huan quinahuatise ma tejco ipan tepeme para yas. Huan isihua tequipanojcahua ihuaya yase huan axtitiyase quej pilpalomajtizti. Moyoltejtontiyase ica tequipacholi huan chocatiyase pampa ama nochi inijuanti quinquippanose seyoc tali ehuani ica cati ohui. ⁸ Nínive ama eltoc quej se pileta cati nimantzi quiquixtía nopa at cati nozona quitcaj. Quej nopa at, amosoldados nojquiya cholojtehuaj. Se quintzajtzilía: “¡Ximoquetzaca! ¡Ximoquetzaca!” Pero amo aqui mocuetqui ihuaya.

⁹ Se quiijtouhua: “¡Xiquichtequica nopa plata huan nopa oro! Iricojo Nínive nesiyaya quej amo quema tamisquía. Tahuel miyac tamanti cati patiyó quiipixtoya nozona.” ¹⁰ Pero nimantzi altepet Nínive mocahuas cactoc. Tatzitizcatoc mocahuas huan tahuel iseltitzi. Yolmajmácamictoque huan tancuahuihuipicatoque cati nozona itztoque. Campa hueli quincocohua huan mocajtoque ixistaltique.

¹¹ ¿Canque eltoc altepet Nínive ama? Nopa altepet nochi quinahuatiyaya quej se hueyi león. Nimantzi quinequiyaya tatehuis pampa yolchicajtoya huan motemacayaya. Nozona itztoyaj huehuentzitzti cati ayecmo tetique huan coneme. Nojquiya itztoyaj telpocame huan cati motemacayayaj huan nochi itztoyaj ica femachili. Amo teno ica mocuesohuayayaj.

¹² Quena, amojuanti ipan altepet Nínive achtohuia aneltoyaj quej huejhueyi leones cati yolchicajtoque. Anquinmictiyayaj amocualancaitacahua huan ica cati anquinichtequiliyayaj anquintamacayayaj amoconehua huan

amosihuajhua. Huan anquitemitiyayaj amochajchaj ica tequipanohuani cati tacohualme huan miyac tamanti cati pajpatiyo.

Sosolihuis nochi altepet Nínive

¹³ Pero Toteco Cati Quinyacana Iilhuicac Ejcahua Ma Tatanitij quiiyto: “Amantzi nimochijtoc niamocualancaitaca. Nochi amocarros nimitztatilis, huan nochi amoconehua miquise ipan tatehuilisti. Nochi cati anquichtec-toque na nijtamiltis huan ayecmo quema quipiyas tanahuatili ni altepet para quintitanis tayolmelahuani campa hueli.”

3

¹ Antecnelztitzi amojuanti cati anitztoque ipan ni altepet Nínive. Se tialtepet cati titemictía huan tiistacati. Temitoc amoalpepe ica ricojyot cati quichiya ajquiya amechichtequilis. Amo quema anquinequiyayaj anquicahuase para amo anmosisinise. ² Xijcaquica nopa lazo. Amocualancaitacahua quinmaquilíaj inincahuayojhua para más nimantzi ma ajisca campa amojuanti. Xijcaquica nopa carrojme cati huehuechocatihualahuij huan iniicxi nopa cahuayojme. Nopa carrojme cati chicahuac motalojtihualahuij san pepetacatoque. ³ Xiquitaca nopa machetas tamintoque, huan nopa tepos cuataminti cahuanij ica tonati pampa nopa miyac soldados quintanantoque. Miyac cocojtoque huan campa hueli cati mictoque mocahuaj ica tamontome. Campa hueli tepejtoque mijcatzitzi hasta ipan motepotanijtinemij.

⁴ Nochi ya ni panotoc pampa Nínive ehuan inihuaya mohuicayayaj incualancaitacahua TOTECO. Ni altepet yejectzi eltoya, pero cati nozona ehuan yajque huan inihuaya mohuicaque cati amo quitepanitaj TOTECO. Pejque tahuel tacajcayahuaj huan pejque quinmachtíaj sequinoc ipan sequinoc talme ma tenahualhuica. Huan quinmachtijque quenicatza ma quichihuaca para momecatise huan quinhueyichihuase teteyome cati amo melahuac huan quicahuase TOTECO.

⁵ Huajca TOTECO Cati Quinyacana Nochi Iilhuicac Ejcahua Ma Tatanitij quiijtouha: “Ama nimitztajtolsencahuas huan tahuel nimitzpinahualtis. Quej se quitanana mocuex para mitzpinahualtis, na nijchihuas para nochi ma mitzitaca tixolotic huan para amo teno chicahualisti tijpiya. Tanahuatiani mitzitase ica nochi mopinahualis. ⁶ Huan nimitzpolos cati más soquiyo huan nijchihuas xipinahuas huan miyac mitzmahuisose. ⁷ Huan nochi cati mitzitase mitzcalchahise huan quiijtose: ‘Nínive tamosolijtoc. Pero amo aquí amechtasojtas.’ Huan yon se amo monechcahuis para amechyoltalis ipan Nínive.” ⁸ Huelis ta timoihuía para achi ticuali que Tebas, nopa altepet cati eltoya nechca hueyat Nilo. Tebas quipixtoya at cati quiyahualojtoya. Nopa at quimanahuiyaya quej se tepamit cati quiyahualojtoya. ⁹ Tali Etiopía huan Egipto quimacayayaj chicahualisti huan nopa talme Fut huan Libia quipalehuiyayaj. ¹⁰ Pero Tebas huetzqui inimaco sequinoc huan injuanti quinhuicaque nopa Tebas ehuan huejca para tetequipanotij. Ininpilcanehua quintzontatapatzque ipan tet ipan ojtí. Huan nopa soldados quirifarojque para quiiitase catijqui tayacanquet ten Tebas quihuicasquía para quitequipanos. Huan nochi quintatatzojque ica tepos cadena huan quinhuicaque para taijyohuise hasta miquisquíaj.

¹¹ Amojuanti nojquiya cati anehuani Nínive san anhuihuipicatose quej se ihuintiquet. Anquinequise annotatitij pampa anquinimacasise amocualancaitacahua cati amechtehuiquij. ¹² Nochi nopa tepamit cati ica anmanahuíaj sosolihuis. Anhuetzise quej se higo cati tahuel icsitoc huan

huetzi icamaco cati quitamicuas. Tacame amechtamtise nochi amojuanti. ¹³ Nochi amosoldados elise quej sihuame cati amo quipiyase fuerza huan ayecmo huelis momanahuse. Se tit quitamitatis amocaltehua huan nopa barras cati ica ancaltzacuayayaj. Huan amoaltepe tapohuis huan amocualancaitacahua calaquise. ¹⁴ Huajca ximocualtalica para nopa tonali quema hualase soldados. Xicajocuica miyac at para huelis anquijyohuise quema amo oncas más huan nochi huactos. Huan xijcualchijchihuaca sempa nopa tepamit cati ica anmotzajtactoque para anmomanahuse. Xijxacualoca miyac soquit para soqui tabiques huan xijchihuaca tapepecholi. Xijchihuaca adobe huan xijcacatzoca. ¹⁵ Pero quema antacualtalijtime-mise huajca nopa tit ajsiqui campa amojuanti huan tatas amoaltepe huan nopa machetas amechmictise. Quej hualahui miles ten chapolime huan quitamicuaj cati eltoc ipan amomil, hualase cati amechtamihuejhuelose. Masque anmomiyaquilise quej pilchapoltzitzi, amo hueli anmomanahuse. ¹⁶ Anquinpiyaj tahuel miyac tacohuani ipan amoaltepe cati momiyaquil-ijtoque quej sitalime ipan ilhuicac, pero amocualancaitacahua noja más miyaqui. Inijuanti miyaqui quej inimiyaca pilchapoltzitzi. Amechtami-huicase nochi amojuanti huan nochi cati anquipiyaj. ¹⁷ Nopa tayacanani cati ama amechmocuitahuíaj huan amechyacanaj mosejcotilise quej mosejcotilíaj pilchapoltzitzi ipan tepamit quema taseseya. Huan quema quisa tonati nopa pilchapoltzitzi quisaj huan yahuij huan amo aqui quimati canque yajtoque. Quej nopa nojquiya yase amotayacancahua huan ayecmo anquinittase.

¹⁸ Ta titanahuatijquet ipan tali Asiria, motelpocahua nochi mictoque huan nesi quej cochoque pampa tepejtoque campa hueli. Nochi mosoldados cati más mosemacayayaj san mosiyajquetztoque. Momasehualhua moseman-toque campa hueli campa tepeme huan ipan cuatita huan amo aqui quinsentilía sempa. ¹⁹ Eltoc quej timotamipojpostectoque huan ayecmo onca pajti. Eltoc quej mitzajsitoc se hueyi cocolisti huan ayecmo quema huelis timochicahuas. Nochi cati quicaquise cati mopantitoc momatajtatzinise huan san moca paquise, pampa amo aqui hueli quipantis se tacat cati ta amo tijtaijyohuilti ica miyac tamanti.

Habacuc

Campa hueli nochi tajtacolchihuaj

¹ Ya ni nopa camanali cati TOTECO technextili na niHabacuc, nitajtolpanextijquet.

² Na niquijto: „TOTECO, ¿hasta quema tamis nimitztzajtzilis techpalehuiqui huan amo techacaquilis? ¿Hasta quema tamis nimitztzajtzilis para ayecmo ma mosisinica tacame, huan amo cati hualas para techmaquixtis?

³ ¿Para ten tijchihua ma niquita tajtacoli huan cati amo xitahuac mojmosta? Campa hueli techyahualohuaj masehualme cati tasesolohuaj huan cati temajmatíaj. Mojmosta mosencualanijtoque huan motehuía. ⁴ Huan yeca nopa tanahuatilme ayecmo quichihuaj inintequi huan nopa tequichihuani ayecmo tetajtolsencahuaj xitahuac quej tanahuatíaj. Masehualme cati fiero ininemis momiyaquilijtoque hasta quipano inimiyaca cati cuajcualme huan yeca tayacanani ayecmo quichihuaj cati xitahuac. San tacajcayahuaj por se taxtahuili.”

TOTECO tananquili

⁵ Huan TOTECO quijto: „Xiquintachilica nopa sequinoc talme cati amechyahualohuaj huan ximomajmatica pampa nijchihuas se tamanti ipan ni tonali pero amo anquineltocase masque se amechpohuilis para panotoc. ⁶ Quena, na niquintanas nopa caldeojme cati itztoque ipan se tali ten masehualme cati fiero ininemis huan cati mosisiníaj. Inijuanti quinpacktia nentinemise campa hueli ipan nochi taltipacti para moaxcatise calme huan talme cati sequinoc iniaxca. ⁷ Inijuanti tahuel mahuililme huan temajmatíaj. Quichihuaj san cati quinequij huan amo aqui hueli quintacahualtia. ⁸ Inincahuayojhua motalohuaj más chichahuac huan amo quej nopa tecuanime cati inintoca leopardos. Tacame cati nopona ehuaní achí más mosisiníaj que nopa lobos cati nemij ica tayohua. Nopa tacame cati tejcotocahuayojtipa hualahui nelchichahuac ten se tali cati huejca. Temotihuetzij nelchichahuac quej se cuatojti para quitzquis se piyo huan nimantzi quistehuas para quicuati.

⁹ “Nochi inijuanti hualahui para tatehuse. Campa hueli yahuij nochi temajmatíaj. Quinitzquitihualahui masehualme quej imiyaca xali para quinhuicase quinquipanoltij.

¹⁰ “Quinpinahualtia tanahuatiani huan tayacanani. Quinhuetzquilíaj nochi altepeme cati moyahualojtoque ica tepamit cati tilahuac para quinmanahuis. Huan san quimontonohuaj tali iica nopa tepamit huan ipan tejoj para calaquise ipan nopa altepet huan quinitzquise imasehualhua. ¹¹ Teipa panoj huan yahuij quej elisquía se ajcomalacat, pampa senquisa tasesolohuaj. Quihuicaj miyac tajtacoli pampa ininchichualis quiitaj quej elisquia ininteco.”

Habacuc sempa quipohuilía TOTECO itequipachol

¹² Na niquijto: „¡TOTECO, hasta huejcaiquiya ta tiitztoya huan nochipa tiitztoc! ¡Ta tinoTeco Dios cati tiTatzetzeltolitic! Amo timiquise. Melahuac ta tiquinpalehuijtoc nopa caldeojme para techatzacuiltise huan techxihuaase por nopa huejhueyi tajtacoli cati tijchijtoque. Pero ta, tiTOTECO, titemachti huan techmanahuis. ¹³ Ta senquisa titapajpactic huan amo tijnequi tiquitas cati amo cuali. Ta amo tijnequi tiquitas tajtacoli. Huajca

¿para ten san tiquintachilijtoc quema amo cuajcualme techtaijyohuiltíaj?
¿Para ten amo teno tijchihua quema nopa amo cuajcualme quintzontamiltíaj
cati más cuajcualme que inijuanti?

¹⁴ “¿Para ten techitaj quej tielisquíaj timichime cati itztoque ipan hueyi at para masehualme ma quinitzquica huan ma quinmictica? Tijcahuilía cati hueli techmictis. Techchijtoc quej cohuame cati amo quiپیay inintanahuatijca para quinmanahuis. ¹⁵ Tali Babilonia ehuan quinquinxtíaj nochi masehualme ica ininteposchijcol huan quinsentilíaj nochi ipan inimata. Huan ica ya nopa tahuel mopaquilismacaj. ¹⁶ Teipa quihueyichihua inimata huan quitatílíaj copali. Moilhuíaj para ica inimata moricojchijtoque huan cuali tacuajtoque.

¹⁷ “¿Tijcahuilis para quej nopa ma quichihuaca para nochipa? ¿Tiquincahuilis ma quisehuiquilica quintzontamiltise talme ehuani campa hueli ica nochi inincualancayo?”

2

¹ “Nimoquetzas huejcapa ipan ni tepamit campa nitamocuitahuía. Huan nitachixtos taya TOTECO techilhuis. Nijchiyas quenecatza technanquilis por notequipachol.”

TOTECO quinanquili Habacuc

² Huan TOTECO technanquili huan techilhui: “Nochi nopa tanextili cati nimitznexstilis para nimitznanguilis, xiquijcuilo ipan se huapali ica tajcuiloli cati huejhueyi huan cati cuali nesi. Quej nopa aqui hueli cati quipohuas huels nimantzi motalos para quinpo huiliti sequinoc. ³ Pero ni tamanti cati nimitzyolmelahuas amo panos nimantzi. Pero ica yolic monechcahuijtiyas nopa tonali quema temachtí panos cati nimitzilhuís ipan ni tanextili. Sinta tiquitas para amo pano nimantzi, amo ximocueso pampa temachtí panos. Xijpiya hueyi moyolo pampa ni tamanti panos senquisa quej nimitzilhuía ipan nopa tonali cati niqixquetztoc.

⁴ “Xiquijcuilo: ‘Se tacat cati amo cuali, mohueyimati miyac huan san motemachía ipan ya iselti, pero se cati itztoc xitahuac iixpa TOTECO, itztos para nochipa pampa quineltoca TOTECO.’”

Taya ininpantis inincualancaitacahua

⁵ “Nojquiya nopa taili cati quinactía quij quincajcayahua huan quinchihua ma mohueyimatica. Pero amo huejcahuase. Iniyolo nopa amo cuajcualme tahuel quixtocaj miyac tamanti cati sequinoc quiپیay. Pero masque quinsentilise miyac masehualme ten miyac talme para iniaxcahua, amo paquij. Noja quinequij quiپیayase más. Itztoque quej miqulisti huan micta cati amo quema temí. Nochipa quinequij más. ⁶ Pero ajsis tonali quema nochi cati quinitzquitoque san quinhuetzquilise huan quijitose: ‘Anteicneltziti amojuanti cati anmoricojchijtoque ica tamanti cati amo amoaxca huan anquimiyaquilijtoque tamanti cati amechprendajcahuilijtoque. Ya ajsico amotatzacuil. Ama anquiselise amotaxtahuil pampa antetaijyohuiltijtoque huan antetachtequilijtoque.’”

⁷ “Quema amo anquichiyaj, motananase cati anquintahuilquiliíaj huan tahuel amechmajmatiquij pampa hualase campa amojuanti ica nochi inincualancayo huan quihuicase nochi cati anquipiayaj.

⁸ Anquintachtequilijtoque tahuel miyac talme huan yeca ama inijuanti cati noja mocahuaj nojquiya amechtachtequilise. Tahuel miyac masehualme anquinmictijque. Tahuel chicahuac anquitechuijque ni tali, huan ni altepet huan imasehualhua.

⁹ “Nelía anteicneltique amojuanti cati anquitemitijtoque amochajchaj ica tamanti cati san anquiichtectoque. Anmoilhuíaj para cati anquiapiyaj amechsehuis huejcapa huan amechmanahuis ten nochi tamanti taohuicayot. ¹⁰ Anquichijtoque tamanti cati quihualicatoc pinahualisti ipan amochajchaj. Anquinmictijtoque miyac masehualme ipan tahuel miyac altepeme, yeca anquihuicaj miyac tajtacoli hasta ayecmo quinaimiqui anitztose. ¹¹ Pampa hasta nopa teme huan nopa apechme cati eltoc ipan inintepa huan inintzonco nopa calme cati anmoaxcatijtoque techtzajtzilíaj para ma nimechtatzacuiliti.

¹² “Anteicneltizti cati anquicualtalíaj se altepet ica tomi cati anquitan-toque pampa antemictijque huan ica tomi ten tamanti cati anteichtequilijtoque. ¹³ TOTECO Cati Quinyacana Iilhuicac Ejcahua Ma Tatanitij quitalijtoc para elis san tapic antequititoque huan san tapic anmosiyahuiltijtoque pampa nochi cati anquiichtectoque tatas huan elis san cuajnexti quema yaya tetajtolsencahuas. ¹⁴ Pampa monechcahuía tonali quema ihueyitilis TOTECO quitemitis ni taltipacti huan senquisa nochi masehualme quiiatase huan quimatise. Temis taltipacti quej nopa miyac at quitemitía hueyi at.

¹⁵ “¡Nelía anteicneltique cati anquimacaj taili se cati amocalnechca huan teipa anquihuintíaj ica cati chicahuac hasta huetzis talchi huan momimilos para anquitachilise itacayo xolot! ¹⁶ Pero ica se talojtzi amohueyitilis elis pinahualisti pampa TOTECO amechtatzacuilitis ica inejmat. Huan amojuanti nojquiya anhuetzise huan anmomimilose huan tanemijya elis amotacayo huan anpinahuase. ¹⁷ Quej anquinsosolojtoque cati eltoya ipan tali Libano, ama nojquiya mocuepas ipan amojuanti. Anquintzontamiltijtoque miyac tapiyalme huan ama nojquiya anmomajmatise pampa amechtazontamiltise. Quej nopa elis pampa anquinmictijtoque miyac masehualme huan anquinsosolojtoque miyac altepeme ipan ni taltipacti, inihuaya nochi inimasehualhua.

Amo teno ininpati teteyome huan taixcopincayome

¹⁸ “Amo teno quipalehuía se tacat cati quihueyichihua se taixcopincayot cati san tamachijchihuali. Amo teno ipati se teteyot cati quichijchijtoque ica teposti cati quimolonijque ipan tit. San quichihua para se ma quineltoaca se istacatili huan moilhuis para ya nopa se dios, pero amo cana. Nelía huihuitic se cati quinchihua teteyome cati amo huelise camanaltise huan teipa motemachis ipan cati yaya quinchijchijtoc. ¹⁹ Fiero elis para nopa masehuali cati quicamanalhuía se tamanti ten cuahuit huan quuilhuía: ‘¡Xi-itzto!’ O quuilhuía se tamanti ten tet cati amo hueli camanalti: ‘¡Xiisa!’ ¿Huelis camanaltise nopa teteyome huan quimachtise para ma quichihua cati cuali? ¡Amo! Masque quinaltijtoque nopa teteyome ica oro huan plata, amo teno hueli quichihuase pampa amo quipiyaj nemilisti.

²⁰ “Pero TOTECO itztoc ipan itiopa cati tatzejtzeloltic. Monequi ma amo molinica iixpa nochi cati itztoque ipan ni taltipacti pampa tahuel monequi tijtepanitase.”

3

Inetatajtíl Habacuc

¹ Ya ni inetatajtíl Habacuc cati yaya huicac iixpa TOTECO:

² TOTECO, na nijcactoc mocamanal huan nelía nimomajmatía huan nim-itzhueyitepanita por nochi nopa huejhueyi tamanti cati tijchijtoc. Ipan ni tonali quema tahuel titaijyohuíaj sempa xijchihua nopa huejhueyi tamanti huan techpalehui quej tijchijqui ipan nopa tonali ten huejcajquiya. Masque

nelía ticualantoc ica tojuanti, xiquelnamiqui para ta hueyi moyolo huan techtasojta.

³ Niquita para Toteco Dios cati Tatzejtzeloltic huala ten altepet Temán huan ten tepet Parán. Itatanex huan ihueyitilis quitemitijtoc ilhuicacti, huan quihueyitalíaj masehualme cati itztoque ipan nochi taltipacti. ⁴ Yaya petantihuala huan taahuili quisa ipan imax quej tapetanilot. Huan quinxetia nopa hueyi chichahualisti cati motatijtoc imaco. ⁵ Iixpa tayacanajocolisme cati temictíaj. Huan campa iicxihua panotiyahuj mocahua ticoli xaxahuacatoc. ⁶ Quema yaya moquetza se talojtzi, nopa tali mohuijhuishua. Huihuipicaj talme quema yaya quintachilía. Iixpa ya huelonij nopa tepeme cati nochipa moquetztoyaj huan ixpolihuj tachiquilme cati eltoque ten huecrajquiya. Pero yaya nochipa itztoque. Nejnentihualajtoc ten ipejya tonali. ⁷ Niquita para nopa masehualme ten talme Cusán huan Madián nelía majmahuj pampa quimatij nopa taijyohuillisti cati quinajsis.

⁸ TOTECO, ¿huelis ticualaniyaya ica nopa atajme huan hueyame quema huecrajquiya tiquintapo? ¡Amo cana! Ta tiquinmaquixti momasehualhua quema tihualajqui ipan nopa tatehujca carrojme ica inincahuayojhua para techpalehuis. ⁹ Ta tijnexti mohueyi chichahualis quema ticamanaltic. Tijpixtoya mocuahuitol huan mocuataminhua momaco pampa quej nopa tiquintencahuilijtoya momasehualhua para tiquinpalehuis. Tijtejtejqui nopa tali ica miyac hueyat. ¹⁰ Nopa tepeme huihuipicaj quema mitzitaj, huan huetzi ten ilhuicac tahuel miyac at. Tejco nopa at cati eltoc tatzinta tali ipan nopa huejhueyi at. Nelía caquisti quej se cati tzajtzi chichahuac huan eltoc quej nopa at momatanana moixpa. ¹¹ Ne tonati huan metzti moquetzque nepa ilhuicac. Mocuataminhua cati tahuel cahuaniyaya huan petaniyaya quinximictijque.

¹² Ica hueyi cualanti tinejnenqui ipan ni taltipacti, huan ininpa timoquejquetzqui nochi talme. ¹³ Tihuala para tiquinmaquixtis momasehualhua cati tiquintapejpenijtoc huan nopa Tanahuatijquet cati ta ticaltijtoc. Tiquintzonxamanis nopa tajtacolchihuani huan tiquintamixolehuilis ten iniicxi hasta inintzonteco.

¹⁴ Ica injuanti inintepos, tiquinmictía nopa tatehuiani cati hualayayaj quej se hueyi ajcomalacat para techsemanase tiisraelitame. Moilhuyayaj amo ohui techzontamiltise. ¹⁵ Tinejnenqui ipan hueyi at ica mocahuayojhua. Huan nopa at tijmontono ipan sesen lado.

¹⁶ Quema nijcrajqui nochi ni tamanti, nelía nimajmajqui. Notenxipal pejqui huihuipica ica majmajti. Noomiyohua huan noicxihua ayecmo quipiyaj tetili para nimoquetzas. Na nijpiyas noyolo huan nijchiyas nopa tonali quema TOTECO hualas huan quintatzacuiltis nopa masehualme cati amantzi techtaijyohuillíaj.

¹⁷ Huajca nipaquis masque amo xochiyohuas nopa higo, huan amo taquis xocomecat, huan amo temacase inintajca nopa olivo cuame. Nijpiyas paquillisti masque amo oncas pixquisti ipan mila, huan miquise nochi borregojme huan amo itztose huacaxme ipan corral. ¹⁸ Masque amo teno oncas, na nimopaquilismacas ipan TOTECO. Quena, niyolpaquis ipan Toteco cati techmaquixtis. ¹⁹ TOTECO Dios techmacas chichahualisti. Huan por ichichahualis techchihuas na ma ninejnemi chichahuac quej se masat ipan nopa tepeme cati más huejcapa.

Sofonías

Nopa tonali quema ajsis ihueyi cualancayo Toteco

¹ Ya ni nopa camanali cati TOTECO techmacac niSofonías, na niicone Cusi, huan niixhui Gedalías, huan niompaca ixhui Amariás cati elqui icone Ezequías cati huejcajqüiya itztoya. TOTECO techmacac ni camanali quema Josías, icone Amón, eliyaya tanahuatijquet ipan tali Judá.

² Quej ni quijtohua TOTECO: “Niquixpolihuiltis nochi tamanti cati onca ipan ni taltipacti. ³ Niquinixpolihuiltis masehualme huan nochi tapiyalme. Niquinixpolihuiltis totome cati patantinemij ipan ilhuicac huan nopa michime cati itztoque ipan at. Nochi amo cuajcualme niquintahuisos huan niquintamiixpolihuiltis masehualme ten ni taltipacti.” Quej nopa quijtohua TOTECO. ⁴ “Niquintatzacuilitis nochi masehualme ipan tali Judá huan nochi ipan altepet Jerusalén. Niquinsolos nochi taixcopincayome ten Baal huan nochi cati quinhueyichihua. Nochi totajtzi cati quinquipanohuayayaj teteyome niqunxpolihuiltis huan ayecmo aqui quinelnamiquis. ⁵ Nojqüiya niqunxpolihuiltis injuanti cati tejcoj inincalcuitapa huan motancuaquetzaj para quihueyichihuase tonati, metzti huan sitalime. Niquinmictis nochi cati quijtohuaj techhueyichihua na, pero nojqüiya quihueyichihua nopa teteyot Milcom. ⁶ Nojqüiya niqunxpolihuiltis injuanti cati achtohüya techhueyichihuayayaj na cati niinTECO, pero ama mohejcatalijtoque ten na. Ayecmo quitemohuaq cati nopaquilis, yon ayecmo techtanjaij ma niquintiochihua.”

⁷ Xijtepanitaca huan xiquimacastica TOTECO. Amo ximolini iixpa. Ya monechcahuá itonal TOTECO, nopa tonali quema yaya tetatzacuilitis. Yaya ya quicualtalijtoc para quichihuas se tacajcualisti huan elis imasehualhua cati miquise. Ya quinnottoc cati hualase quinmictiqüij. ⁸ TOTECO quijtohua: “Ipan nopa tonali quema nitetajtolsecahuas, niquintatzacuilitis nochi itapalehuijcahua nopa tanahuatijquet huan nochi iconehua huan nochi cati moyoyontiaj quej nopa masehualme ten sequinoc talme. ⁹ Nojqüiya niqunxpolihuiltis injuanti cati amo quinequij ipan moquetzase caltencuahuit pampa quinteapanitaj teteyome. Huan niqunxpolihuiltis cati tecajcayahuaj huan tetachtequilij para quitemitise ininchaj ininteteyohua ica tamanti tachtecti. Teipa quitemitiaj ininchajchaj inintecohua ica cati tachtecti.” ¹⁰ Nojqüiya TOTECO quijtohua: “Ipan nopa tonali chicahuac tzajtzi nopa masehualme cati itztoque campa hueli ipan altepet Jerusalén. Tzajtzi ten nopa caltemit cati itoca Michi hasta campa nopa colonia cati yancuic. Huan caquistis chicahuac quema huelonis nopa taixtejcolis. ¹¹ Huajca xiastica nochi anmasehualme ipan nopa colonia campa tianquis pampa nochi tanamacani huan nochi cati amechtanejtiyayaj tomi ya mijque.

¹² “Ipan nopa tonali nijtequihuis se taahuili ipan altepet Jerusalén huan niquntemos hasta niqunpantis nochi masehualme cati mosiyajquetztoque ica paquilisti ipan tajtocoli. Nochi niqunxpolihuiltis pampa quijtohuayayaj: ‘TOTECO amo teno techchihuilis. Amo techchihuilis cati cuali, yon cati amo cuali.’ ¹³ Yeca inincualancaitacahua quinichtequilise nochi cati quipixtoque, huan ininchajchaj quinsosolhuilise. Masque mochantise, amo huelis itztose nopona huan masque quitocase xocomecat, amo huelis quiise iayo.

14 “Nechcatitoc nopa tonal quema niininTECO nitetajtolsencahuas. Quena, tahuel nimantzi monechcahuijti huala quema nitetatzacuiltis. Nelfiero elis nopa tonali hasta tacame cati más motemacaj chocase huan tahuejchi huase. 15 Ipan nopa tonal nesis quenicatza niininTECO ninelcualantoc huan nochi majmahuise huan ayecmo quimatise taya quichihuase, san motamipasolose. Huan quema tamis nopa tasosololisti, ayecmo teno mocahuas. Elis se tonali ten tequipacholi huan taohuijca yot. Elis se tonali quema tamixtentos huan tzintayohuiyas. 16 Ipan nopa tonal molinis tapitzali huan miyac tzajtize pampa sosolihuis inintepa nopa altepeme cati moyahualojtoque. Huan huetzise nopa huejcapantique torres campa tachiyayaj huejca para tamocuitahuise.

17 “Niquintajyohuiltis nopa masehualme huan nemise quej popoyotziti pampa tajtacolchijque ica na niininTECO. Inieso mosemanas campa hueli quej quema mosemana taltepocti, huan ininacayo palanis quej cuitat.”

18 Ipan nopa tonali yon ininplata tomi, yon inioro tomi amo huelis quinmanahuis ten ihueyi cualancayo TOTECO pampa nochi tali tamitatas ica icualancayo. Huan nochi masehualme ipan taltipacti polihuise ica se talojtzi.

2

Nopa tonali quema TOTECO quintatzacuiltis nochi talme

1 Ximosentilica huan ximoilhuica quenicatza anitztoque cati amo anpinahuaj iixpa TOTECO. 2 Xijchihuaca amantzi. Amo xijcahuilica ma pano tonali quej tasoli cati quihuica ajacat. Amo xijchiyaca hasta ajsis nopa tonali cati niquijtojtoc hualas quema TOTECO tahuel cualanis amohuaya huan ajsis amopani ihueyi cualancayo. 3 Xijtemoca TOTECO nochi amojuanti cati anteicneltziti ipan ni taltipacti huan amojuanti cati anquichihuaj cati quijtohua itanahuatilhua. Xijchihuaca cati xitahuac huan ximoicnonequica pampa quej nopa huelis anmomanahuise quema TOTECO tetatzacuiltis ica nochi icualancayo.

TOTECO quintelhuía filisteos

4 Ipan inintal nopa filisteos nopa altepeme Gaza, Ascalón huan Asdod mocahuase nochi sosolique. Quitamitachtequilise huan cati nozona ehuani quintamiixpolihuiltise. 5 Nelfiero elis para amojuanti ancereteo masehualme cati anitztoque iteno hueyi at ipan tali Canaán pampa TOTECO amechtajtolsencahuas. TOTECO amechtazontamiltis nochi cati anitztoque ipan nopa tali ten nopa filisteos huan amo aqui mocahuas. 6 Nopa tali cati eltoc nechca hueyat elis se sacamili. Nozona mosentilise tamocuitahuiani ten borregojme huan quichihuase tatzacti para ininborregojhua.

7 Huan nopa tali Judá ehuani cati noja mocahuase yoltoque moaxcatise nopa tali huan nozona tacuase ininborregojhua. Ica tayohua cochise ipan nopa calme cati eltoc ipan Ascalón pampa TOTECO ininDios hualas quinpaaloxi imasehualhua huan quinquixtis ten campa tequipanotoj ipan talme cati huejca.

TOTECO quintatzacuiltis moabitame huan amonitame

8 Yaya quijtohua: “Na nijcactoc quenicatza nopa moabitame huan amonitame quintajilhuijtoque nomasehualhua. Quinpinajtijtoque huan quincuilijtoque inintal.” 9 Quej ni quijtohua TOTECO Cati Quinyacana ilhuicac Ejcahua Ma Tatanitij yaya cati ininDios israelitame: “Nimotestigojquetza ica na noselti huan niquijtohua para niquinixpolihuiltis nochi ipan tali Moab huan Amón quej nijchijqui ica altepeme Sodoma huan Gomorra huejcajquiya.

Ipan Moab huan Amón san oncas tejtzonquilit huan miyac istat. Sosolijtos para nochipa. Huan noisraelita masehualhua cati noja mocahuase yoltoque ipan nopa tonali calaquise para moaxcatise nopa talme.”¹⁰ Quej nopa in-pantís Moab huan Amón pampa mohueyimatque, huan quintajilhuijque huan quinhuetzquilijque imasehualhua TOTECO Cati Quinyacana Iilhuicac Ejcahua Ma Tatanitij.¹¹ TOTECO quinchihuilis cati fiero huan nelía tahuel quinmajmatis. Quinixpolihuiltis nochi teteyome cati quinhueyichihua ipan nopa talme. Quej nopa nochi talme ipan taltipacti quinhueyichihuae TOTECO. Sesen quinhueyichihuas ipan ya ital.

TOTECO quitatzacuilitis Etiopía huan Asiria

¹² Huan TOTECO quijtohua: “Huan amojanti ten tali Etiopía nojquiya nimechtzontamiltis ica nomacheta.”¹³ Ica ihueyi chichualis TOTECO nojquiya quintatzacuilitis nopa talme cati mopantíaj ica norte. Quitatzacuilitis tali Asiria huan ihueyi altepe, Nínive, quicahuas sosolijtoc quej se huactoc tali campa amo teno onca.¹⁴ Nopona mosiyajquetzase borreojme huan miyac tamanti tapiyalme ten campa hueli hualase para quipiyase ininchaj nopona. Miyac tamanti cuamojmojme cochise ipan nopa taquetzalme ten nopa caltanahuatilme cati achtohui eltoyaj yejyetzitzi. Tzojpilome itztose ipan iniventhua huan ipan inincaltenhua san oncas miyac tajsoli. Huan nochi cuatetomit ten tiocuahuit mocahuas tanemijya.

¹⁵ Quej ni ipantic nopa altepet cati san pactoaya huan cati eltoya temachtí. Nopona nochi mohueyimatiyayaj ipan iniyolo huan quijtohuayayaj: “Ipan nochi taltipacti amo onca seyoc altepet cati tahuel cuali quej ni.” Pero ama xiquitaca quenicatza mocajqui tasosololi huan mochijqui ininchaj tapiyalme. Nochi cati panose nopona san quihuetzquilise huan quiojolinise inintzonteco para quipinajtise.

3

Itajtacol Jerusalén huan quenicatza Toteco quimanahuis

¹ Nelfiero elis para altepet Jerusalén. Nelmosisinijtoque cati ehuaní nopona. Ayecmo tapajpactique iixpa TOTECO ipampa inintajtacolhua. Tahuel tetajyohuiltíaj quej quinequij.² Cati nopona itztoque amo quitacaquilíaj TOTECO icamanal quema quinilhuía cati monequi quichihuae. Amo quema quinequij quichihuae cati xitahuac. Amo motemachíaj ipan TOTECO yaya cati ininDios, yon amo quitemohuaj.

³ Itayacanhua nopa altepet itztoque quej leones cati san nanalcatoque huan quichiyaj ajquiya hueltis quitzquise. Ijueces itztoque quej lobos cati nemij tayohua para quimasiltise huan quitamicuase nochi cati quitzquise hasta yon se iomiyo amo mocahuas para ijnaloc.⁴ Cati motocaxtíaj tajtolpanextiani nopona senquisacacajyahua huan moijixpataj. Totajtzitzi nopona quimahuisspolohuaj nochi tamanti cati tatzejtzelohtic huan quixpanoj itanahuatil TOTECO.⁵ Pero TOTECO itztoc ipan Jerusalén huan yaya quichihua cati xitahuac. Amo teno cati amo cuali quichihua. Mojmosta quinextía para xitahuac nochi cati quijtohua huan quichihua. Huan nochipa nochi masehualme hueli quimatíj cati xitahuac. Pero amo aquí quichihua cuenta. Amo cuajcualme nopona, yon amo pinahuaj ica cati quichihua.

⁶ TOTECO quijtohua: “Niquinixpolihuiltijtoc miyac talme huan inimasehualhua. Nochi calme nopona mocajque sosolijtoque huan inincalles mocajqui tatzitziatoc. Inialtepehua tamisosolijtoc hasta ayecmo mocajqui yon se masehuali.”⁷ Huan niquijto para ama quena, techimacacise huan

techtacaquilise quema niquintacahualtis. Huan quej nopa ayecmo mon-
equis niquintatzacuultis sempa quej achtohuiya. Pero amo moyolcuetque.
Inijuanti noja más pejque quichihuaq cati fiero.”⁸ Huajca ama TOTECO
quijtohua: “Xijpiyaca amoyolo huan techchiyaca hasta nopa tonali quema
na nimoquetzas para niquintajtolsencahuas. Pampa na ya nijtaljtoc quema
niquinsentilis nochi talme ehuan huan nochi inintanahuatijcagua huan
inipa nijtoyahuas nohueyi cualancayo. Huan nocualancayo elis quej se tit
cati quintamitatis nochi ipan taltipacti.

⁹ “Ipan nopa tonali na niquinpajpaquilis inincamac nochi masehualme
huan nochi inijuanti sentic huelise techhueyichihuase, niininTECO, ica
san se iniyolo. ¹⁰ Nochi nomasehualhua cati mosemantoque campa hueli
hasta ipan seyoc nali ten nopa hueyame ten tali Etiopía techtajtanise
para sempa ma nieli ininTECO huan hualase para techmacase inintacajc-
ahualis. ¹¹ Huan ipan nopa tonali ayecmo anquipanose pinahualisti por
nochi nopa fiero tamanti cati ica antechixpanoque pampa ipan nopa tonali
ayecmo anmosisinise ica na. Huan niqunijcuenis ten campa amojuanti
nochi masehualme cati mohueyimatij huan motepanitaj, huan quej nopa
ayecmo aqui mohueyimatis ipan notepe cati tatzejzelolitic. ¹² Huan ten
amojuanti niqunacahuas ma mocahuaca yoltoque se quesqui masehualme
cati teicneltzitz huan cati moicnonequij pampa inijuanti cati más nimantzi
motemachíaj ipan na, niamoTECO. ¹³ Huan nopa masehualme cati moc-
ahuase yoltoque amo quichihuase tamanti cati amo cuali, amo istacatise,
yon amo tacajcayahuase. Nozona tacuase huan cochise ica tasehuilisti,
huan amo aqui quinhemajmatis.”

¹⁴ Xihuicaca amojuanti cati anitztoque ipan altepet Sion. Xitzajtzica ica
paquilisti nochi anisraelitame. Ximopaquilismacaca ica nochi amoyolo
nochi ipan altepet Jerusalén. ¹⁵ Pampa TOTECO ayecmo más amechtatza-
cuultis huan yaya quinquixtis nochi amocualancaitacagua. Huan TOTECO
iseltziti itztos amohuaya, yaya cati Tanahuatijquet ipan tali Israel. Huan
huajca ayecmo quema anquiritase cati amo cuali.

¹⁶ Ipan nopa tonali masehualme quinilhuse Jerusalén ehuan: “Amo
ximajmahuica amojuanti ipan altepet Sion, yon amo ximahuihuipicaca.
¹⁷ Pampa TOTECO cati quipiya nochi chicahualisti hualajtoc para itztos
amohuaya. Yaya amechmaquixtis. Yaya nelía yolpaquis ica amojuanti.
Amechyoltalis ica iteicnelijcayo huan por amojuanti, huicas ica miyac
paquilisti.” ¹⁸ Huan TOTECO quijtohua: “Nimechsentilis amojuanti cati an-
motequipachohuaj pampa amo hueliyaya anmosentilíaj ipan nopa tasentili
cati tatzejzelolitic huan ayecmo aqui amechpinahualtis sempa. ¹⁹ Ipan
nopa tonali na niquintatzacuultis cati mitztajyohuilitiyayaj. Niqunmaquix-
tis nomasehualhua cati amo quipiyaj chicahualisti huan cati amo hueli
momanahuise iniselti. Niqunquixtis nomasehualhua cati tetequipanoy-
ayaj ipan nochi talme huan niqunhualicas. Huan niqunhueyitalis huan
quipiyase tatepanitacayot ipan nochi taltipacti.

²⁰ “Ipan nopa tonali na nimechsentilis huan nimechhualicas ipan amotal.
Huan nimechmacas seyoc amotoca. Nimechhueyitalis huan nochi talme
ipan taltipacti amechtepanitase. Ica amoixteyol anquiritase para sempa
nimechcualtis huan sempa nimechmacas nochi cati anquipiyayaj.”
Quej nopa quijto TOTECO.

Hageo

TOTECO teyolchicahua para sempa ma quicualtica itiopa

¹ Ipan nopa achtohui tonal ten nopa chucuase metzti * ipan toisraelita calendario quema Tanahuatijquet Darío yahuiyaya para ome xihuit tanahuatis, TOTECO technoynotzqui na, niHageo cati nitajtolpanextijquet. Techilhui ma nijmaca ni camanali Zorobabel, icone Salatiel, cati elqui hueyi tequitiqet ipan tali Judá, huan Josué, icone Josadac, cati eliyaya nopa hueyi totajtzi. Huan ya ni nopa camanali cati niquinmacac: ² “Quej ni quijtohua TOTECO Cati Quinyacana Iilhuicac Ejchahua Ma Tatanitij: ‘Nochi nomasehualhua quijtohuaj para noja ayemo ajsi tonali para sempa anquicualtise nochaj niamotoTECO.’”

³ Huajca por na niHageo, nitajtolpanextijquet, TOTECO quinnanquili nopa masehualme cati quej nopa moilhuiyayaj huan quej ni quinilhui: ⁴ “¿Huelis anmoilhuij quinamiqui anitztoze ipan calme cati yejectzitzitacualchijchihuali ica huapalme quema nochaj eltoc tasololi? ⁵ Huajca niamotoTECO Cati Niqinyacana Noilhuicac Ejchahua Ma Tatanitij niqijtohua: ‘Xijtajtachilica cuali nopa ojti cati ipan anejnemij huan quenicatza quisa cati anquichihuj. ⁶ Amojuantí antocaj miyac, pero pilquentzi temaca pixquisti. Antacuj, pero amo anixhuj. Anquij at, pero anquisenhuiquilíaj anamiquij. Amoqueñtiaj yoyomit, pero amo amechpalehuía para anquitotonilise amotacayo. Huan nochi amotomi san polihui. Eltoc quej anquitemasquíaj ipan se bolsa cati coyontoc huan nochi tepehui.’”

⁷ Ya ni cati quijtohua TOTECO Cati Quinyacana Iilhuicac Ejchahua Ma Tatanitij: “Xijtajtachilica nochi cati anquichihuj para anquimatise sinta cuali o amo cuali amoojhui. ⁸ Teipa xiyaca ipan cuatitamit huan xijcuitij cuahuit para sempa xijcualtica nochaj. Huan na nelá nipaquis ica nochaj huan nopona nimonextis ica nochi nohueyitilis.” Quej nopa quijtohua TOTECO.

⁹ “Amojuantí anquichiyaj anquiselise miyac tamanti, pero anquiselíaj pilquentzi. Huan quema nopa tamanti anquihuicaj ipan amochaj, na niseamana ica noijyoyo, huan yeca amo amechaxilía. ¿Para ten? Eltoc pampa nochaj sosolijto huan amo anmocuatoníaj para anquicualtise. San anmocuatoníaj para anquicualtise cati amojuantí amochajchaj.” Quej nopa quijtohua TOTECO Cati Quinyacana Iilhuicac Ejchahua Ma Tatanitij.

¹⁰ “Yeca nijchijqui para mixti ma ayecmo quihualica at amopani huan ne tali ma ayecmo taelilti. ¹¹ Nijchijqui para ma tahuáqui ipan milchahuali huan ipan cuatitamit, ipan trigo mili huan ipan xocomeca mili, ipan olivo mili huan ipan itajca. Nijchijqui ma tahuáqui para xijpanoca mayanti nochi amojuantí, masehualme huan tapiyalme, huan para ma quisosolo nochi tamanti tequit cati anquichijtoque.”

Sempa quipehualtisque quicualtíaj ichaj TOTECO

¹² Huajca Zorobabel, icone Salatiel, huan nopa hueyi totajtzi Josué, cati icone Josadac, huan nochi nopa masehualme cati noja mocajtoyaj, quicajque icamanal TOTECO Dios, cati na, niHageo nitajtolpanextijquet, niquinpohuili pampa quimachilijque para TOTECO Dios techitiantoya. Huan injuantí pejqque quimacasij huan quihueyitepanitaj TOTECO. ¹³ Huajca

* 1:1 1:1 Ipan 29 itequi agosto ipan tocalendario ten ama.

TOTECO nojquiya technahuati ma sempa niqincamanalhui nopa masehualme ten ya. Huan na, niHageo, niqinilhui: “TOTECO quijtohua: ‘Na niitztos amohuaya.’ ” Quej nopa quijto TOTECO. ¹⁴ Huan TOTECO quiyoltacani Zorobabel, nopa tequitiquet ten tali Judá, huan Josué, nopa hueyi totajtzi, huan nochi nopa masehualme cati noja mocajtoyaj, para ma hualaca huan ma pehuaca tequitise. Huan hualajque huan pejqe quicuualtalíaj ichaj TOTECO Dios Yaya Cati Quinyacana Iilhuicac Ejcahua Ma Tatanitij. ¹⁵ Huan mosentilijque ipan 24 itequi nopa chucuase metzti†, quema Tanahuatijquet Darío yahuiyaya para ome xihuit tanahuatis.

2

Icualnesca nopa yancuic tiopamit

¹ Ipan 21 itequi nopa chicome metzti * ipan toisraelita calendario, TOTECO nechcamanalhui na, niHageo nitajtolpanextijquet, huan techilhui: ² “Xijcamanalhui Zorobabel, icone Salatiel, cati itztoc nopa tequitiquet ipan tali Judá, huan xijcamanalhui Josué, icone Josadac, nopa hueyi totajtzi, huan xiquincamanalhui nopa masehualme cati noja mocajtoque ipan nopa tali, huan quej ni xiquinilhui: ³ ‘Ajquiya ten amojuanti hueli quielnamiquis quenicatza nesiyaya ni tiopamit achtohuiya quema nesiyaya tahuel yejyectzi? ¿Quenicatza ama anquijtaj? ¿Amo anquijtaj para ama nesi quej amo teno ipati? ⁴ Pero ama ta tiZorobabel, huan ta tiJosué cati tihueyi totajtzi, huan nochi anmasehualme cati noja anmocahuaj ipan ni tali, ximoyolchichahuaca huan xitequitica pampa na niitztoc amohuaya.’ ” Quej nopa quijtohua TOTECO Cati Quinyacana Iilhuicac Ejcahua Ma Tatanitij.

⁵ “Quema anquisque ipan tali Egipto, na nimechtajtolcahuili para noTonal mocahuas amohuaya para nochipa. Huajca amo ximajmahuica.

⁶ “NiamoTECO Cati Niquinyacana Noilhucac Ejcahua Ma Tatanitij quej ni niqijtohua: ‘Ayecmo miyac tonali polihui para nijchihuas ma mojmolini taltipacti, ilhuicacti, hueyi at huan nochi huactoc tali. ⁷ Nojquiya nijchihuas ma mojmolinica nochi masehualme ipan nochi talme huan yaya cati nochi quinelnequij, hualas nica. Huan masehualme quicuualtise ni tiopamit huan nijtemitis ni tiopamit ica tatanexti.’ ” Quej nopa quijtohua TOTECO Cati Quinyacana Iilhuicac Ejcahua Ma Tatanitij. ⁸ “Nochi tomi noaxca masque ten plata o ten oro.” Quej nopa quijtohua TOTECO Cati Quinyacana Iilhuicac Ejcahua Ma Tatanitij. ⁹ “Yeca ihueyitilis ni tiopamit teipa nesis más yejyectzi huan amo quej nopa cati achtohuiya eltoya. Huan nijchihuas ma onca tasehuilisti ipan ni lugar.” Quej nopa quijtohua TOTECO Cati Quinyacana Iilhuicac Ejcahua Ma Tatanitij.

Totec quinajhuac nopa totajtzitzi cati amo tapajpactique iixpa

¹⁰ Ipan 24 itequi nopa chichahui metzti † ipan toisraelita calendario, quema Tanahuatijquet Darío yahuiyaya para ome xihuit tanahuatis, TOTECO nechcamanalhui na, niHageo cati nitajtolpanextijquet, huan techilhui: ¹¹ “Ya ni cati niqijtohua niamoTECO Cati Niquinyacana Noilhucac Ejcahua Ma Tatanitij: ‘Xiquintatzintoquili nopa totajtzitzi sinta quixmatij quentzi cati quijtohua nopa tanahuatili. ¹² Sinta se ten amojuanti quihuica ipan iyoyo se nacat cati taiyocatalili para na, huan sinta iyoyo quitoxomas

† **1:15** 1:15 Ipan 21 itequi septiembre 520 a.C. ipan tocalendario ten ama. * **2:1** 2:1 Ipan 17 itequi octubre 520 a.C. ipan tocalendario ten ama. † **2:10** 2:10 Ipan 18 itequi diciembre 520 a.C. ipan tocalendario ten ama.

se pantzi, o se tacualisti, o xocomeca at, o aceite o seyoc tamanti tacualisti, huajca, nopa tamanti, ¿nojquiya mocuepas tatzejtzeltic?” ”

Huan nopa totajtzitzi quinanquilijque: “¡Amo!”

¹³ Huan Hageo quijito: “Sinta acaya quitzquis se mijcatzi huan mochi-huas amo tapajpacti huan teipa quitoxomas se tenijqui, nopa tamanti ¿mochihuas amo tapajpacti nojquiya?”

Huan nopa totajtzitzi quinanquilijque: “Quena, mochihuas amo tapaj-pacti.”

¹⁴ Huajca Hageo quinilhui: “Ya ni cati quijitohua Toteco: ‘Quej nopa eltoc ica nochi amojuanti cati anitztoque noixpa ten ni tali. Nochi cati anquichihuj huan nochi cati antechtencahuilíaj nica, eltoc amo tapajpacti noixpa. ¹⁵ Huajca ama ipan ni tonali xiquitaca para amo quisayaya cuali cati anquichihuayayaj. Amo cuali eliyaya amonemilis quema ayemo anquihualtiyayaj anquitecpichohuj tet para anquicualtalise notiopa, ni-amotECO. ¹⁶ Quema se moilhuyaya para yahuyaya para quipantis 20 tatamachihuali ten xinacti ten trigo, san quipantiyaya 10 tatamachihuali. Huan quema se yahuyaya para quiselis 50 comit ten xocomecat iayo, san quiseliyaya 20. ¹⁷ Antequitique ica amomax para antatojtocase. Pero nochi cati anquitojqque nijchijqui ma huaqui ica se huac ajacat, o tesihuit o ica miyac tamanti cati amo cuali cati nimechtitaniliyaya. Pero masque nimechchiuili ya nopa, amojuanti amo anquinejqque anmocuepase ica na.’ ” Quej nopa quijitohua TOTECO.

¹⁸ “Huajca ten ama ni tonali ximomacaca cuenta quenicatza nochi mopatas. Pampa ten ni 24 itequi ni chicnahui metzti † ipan toisraelita calendario, quema anquihualtiyque anquitalíaj itzinpehualtil notiopa ni-amotECO, nimechtajtolcahuilis ten nimechchiuilis. ¹⁹ Amantzi ayemo antoctoque huan nopa xinacti noja eltoc calijtic. Ayemo temaca itajca nopa xocomecat, huan ayemo taqui nopa higuera, huan ayemo xochiyohua nopa granada huan olivo cuahuit, pero ten ama ni tonali nochi quipiyas itajca pampa na nimechtiochihuas.”

Cati Toteco Quitajtolcahuili Zorobabel

²⁰ Ipan 24 itequi nopa chicnahui metzti, Toteco nechcamanahui na, niHageo, huan techmacac ni ompa camanali, techilhui: ²¹ “Xijcamanahui Zorobabel, nopa tequitiquet ipan tali Judá huan xiquilhui para na niquijto-hua: ‘Nechcatitoc para nijchihuas ma mojmolini taltipacti huan ilhuicacti. ²² Nijsoyolos inintanahuatijcayo tanahuatiani ipan nochi talme ipan talti-pacti huan nijtamiltis ininchicahuilis. Niquinixcuepas inintatehuijca car-rojhua huan cati ininpa yahuij. Miquise nopa cahuayojme huan cati ininpa tejcotoque pehuas momictise se ica seyoc. ²³ Pero quema panos nochi ya ni, nimitznextilis hueyi tatepanitacayot tinotequipanojca Zorobabel cati tiicone Salatiel. Huan tiitztos nonechca quej nopa anillo cati nijhuica ipan nomacpil cati quipiya nosello. Na nimitztapejpenijtoc.’ ” Quej nopa quijitohua TOTECO Cati Quinyacana Ilhuicac Ejcahua Ma Tatanitij.

† 2:18 2:18 Ipan 18 itequi diciembre ipan tocalendario ten ama.

Zacarías

TOTECO quinnotzqui imasehualhua

¹ Ipan metzti chicnahui ipan tocalendario * quema Tanahuatijquet Darío yahuiyaya para ome xihuit tanahuatis, TOTECO techmacac niitajtolpanextijca se camanali. Na niZacarías cati niicone Berequías cati eliyaya icone Iddo. Huan yaya quijto: ² “NiamotoTECO nicualanqui chichahuac ica mohuejcapan tatahua. ³ Yeca ama nijnequi xiquinmaca israelitame ni camanali. Na, niininTECO Cati Niquinyacana Noilhuicac Ejchahua Ma Tatanitij niquijtohua: ‘Ximonechcahuica campa na, huan na nimonechcahuis campa amojuanti.’ ⁴ Amo ximochihuaca quej amohuejcapan tatahua quichijque quema nopa achtohui tajtolpanextiani quinilhuijque para ma mocuepaca ten nopa fiero ojti cati quitocaxtiyajaj. Quena, quinilhuijque ma quicahuaca nochi nopa tamanti cati amo cuali cati quichihuayayaj, pero injuanti amo techta-caquilijque, yon amo quichihuilijque cuenta nopa camanali.” Quej nopa quijtohua TOTECO Cati Quinyacana Ilhuicac Ejchahua Ma Tatanitij.

⁵ “Ama nochi amohuejcapan tatahua huejcajquiya mijque. Huan amojuanti nojquiya quej amohuejcapan tatahua huan nopa tajtolpanextiani ten huejcajquiya san anitzose se talojtzi. ⁶ Pero nocamanal cati niquinilhui ipan nopa tonali ica notajtolpanextijcahua cati techtequipanohuayayaj amo mijque. Senquisa nochi nopa camanali huan tanahuatili cati niquinilhui nopa israelitame mochijque ipan amohuejcapan tatahua quej niquijto para panos. Huajca teipa moyolcuetque amohuejcapan tatahua huan quijtojqe: ‘TOTECO, Ta Cati Tiquinyacana Moilhuicac Ejchahua Ma Tatanitij, techtatzaacuiltjotc senquisa quej techilhuijtoya techchihuilisquía. Huan quitanamiqui cati tijchijqui por nopa tamanti amo cuali cati tijchihuayayaj huan nopa fiero ojti ipan cati tinemiyayaj.’ ”

Tanextili ten tacame ipan cahuayojme

⁷ Huan sempa TOTECO techmacac se camanali ipan nopa xihuit quema Tanahuatijquet Darío yahuiyaya para ome xihuit tanahuatis. Elqui ipan 24 itequi nopa metzti once ipan tocalendario†. Nopa metzti quitocaxtiyaj Sebat. Huan TOTECO sempa nechcamanalhui na, niZacarías, niitajtolpanextijca huan niicone Berequías cati eliyaya icone Iddo. ⁸ Quena, ipan nopa yohuali niquitac se tanextili huan ipan nopa tanextili niquitac se tacat tejcotoya ipan se cahuayo chichiltic cati moquetztoya tepequespa campa tafiero ica miyac cuame cati inintoca mirtos. Huan iica itztoyaj sequinoc cahuayojme. Sequij ten nopa cahuayojme eliyayaj chichiltique, sequij costique huan sequinoc chipahuaque. Huan ipan sesen cahuayo tejcotoya se tacat. ⁹ Huan nijtatzintoquili: “¿Tate, aiquiya injuanti huan para ten tejcotocque ipan cahuayojme? ¿Taya quinequi quijtos?” Huan nopa ilhuicac ejuquet cati nechcamanalhuiyaya techilhui: “Na nimitzilhuis ajquiya injuanti.”

¹⁰ Huajca nopa tacat cati tejcotoya ipan nopa cahuayo chichiltic ipan nopa mirtos huan cati elqui iilhuicac ejca TOTECO techilhui: “Ni cahuayojme huan cati ininpa tejcotocque itztoque cati TOTECO quinhualtitanotc para nemise campa hueli ipan faltipacti para quitachilise taya onca.”

* **1:1** 1:1 Ipan octubre o noviembre ipan tocalendario ten ama. † **1:7** 1:7 Ipan 15 itequi febrero ipan tocalendario ten ama.

¹¹ Huan huajca nopa sequinoc cati tejcotoyaj ipan cahuyoyjme quiyolmelajque iilhuicac ejca TOTECO cati itztoya campa nopa mirtos cati quiitaque, huan quej ni quiilhuique: “Ya tijyahualojtoque nochi taltipacti huan campa hueli onca tasehuilisti huan temachili.”

¹² Huan iilhuicac ejca TOTECO motatajti ica TOTECO huan quiijto: “Ay, TOTECO, Ta Cati Tiquinyacana Moilhuicac Ejcahua Ma Tatanitij, ya quipiya 70 xihuit para ticualantoc ica altepet Jerusalén ehuani huan ica masehualme cati hualahui ten altepeme ipan tali Judá. ¿Quesqui tonali noja polihui para sempa tiquinnextilis motaicnelijcayo?”

¹³ Huan TOTECO camanaltic para quinanquili iilhuicac ejca huan quiilhui cati moquetztoya nonechca camanali cati cuali huan cati teyolchicahua.

¹⁴ Huajca nopa ilhuicac ejquet techilhui ma nitayolmelahua ni camanali: “Quej ni quiijtohua TOTECO Cati Quinyacana Iilhuicac Ejcahua Ma Tatanitij: ‘Tahuel niquinicnelía huan niqintasomati nopa masehualme ipan altepet Jerusalén huan ipan tali Judá huan nijnequiyaya san na ma techicnelica.

¹⁵ Nojquiya tahuel nicualantoc ica nopa talme cati ama mosiyajquetzaj pampa quema na nicualantoya san se quentzi ica nomasehualhua, nopa talme noja achi más fiero quinchihuilijque.’ ” ¹⁶ Huajca TOTECO quiijto: “Temachtí nimocuepas huan sempa nijtasojtas altepet Jerusalén. Huan nopona sempa quicualtalise notiopa huan tepanchihuani quitamachihuase nopa altepet huan sempa quicualchijchihuase.” ¹⁷ Nojquiya techilhui noja ma niqijto: “Quej ni quiijtohua TOTECO Cati Quinyacana Iilhuicac Ejcahua Ma Tatanitij: ‘Nijchihuas para noaltepehua huan nomasehualhua sempa ma quipiyaca nochi cati cuali hasta mocahuas. Huan nijmocuitahuis Sion † ica nohueyi taicnelijcayo. Quena, niqijtos para Jerusalén eltoc nopa altepet cati nijtapejpenijtoc.’ ”

Tanextili ten nahui cuacuajti

¹⁸ Teipa niajcotachixqui huan niquitac nahui cuacuajti.

¹⁹ Huajca nijtatzintoquili nopa ilhuicac ejquet cati nechcamanalhuyaya, huan niquilhui: “¿Taya quiixnextíaj ne nahui cuacuajti?”

Huan techilhui: “Nopa nahui cuacuajti quiixnextíaj ininchicahualis nopa talme cati quiipiyaj chichahualisti cati quinsemanque cati ehuyayaj tali Judá, tali Israel huan altepet Jerusalén.”

²⁰ Teipa TOTECO technextili nahui teposchihuani. ²¹ Huan na niqijto: “¿Taya ica hualajtoque quichihuaquij ne teposchihuani?”

Huan iilhuicac ejca TOTECO techilhui: “Nopa teposchihuani hualajtoque para quintejtequilise inincuacua nopa talme cati quinsemanque tali Judá ehuani. Quinquixtilise ininchicahualis hasta ayecmo huelise moquetzase xitahuac. Quena, quinchihuase ma huihuipicaca ica majmajti nopa masehualme ten nopa talme cati nopa cuacuajme quinextíaj.”

2

Tanextili ten se cinta para tatamachihuase

¹ Teipa niajcotachixqui huan niquitac se tacat huan ipan imax quiipiyayaya se cinta cati ica tatamachihua. ² Huan nijtatzintoquili: “¿Canque tiya?”

Huan ya techilhui: “Nijtamachihuati altepet Jerusalén para nijmatis quesqui ihuehuyaca huan quesqui ipatajca.”

† 1:17 1:17 Sion huan Jerusalén quinequi quiijtos san se altepet.

³ Huan niquitac nopa ilhuicac ejquet cati nechcamanalhujtoya quis-tejqui para monamiquiti ihuaya seyoc ilhuicac ejquet cati hualayaya quínamiqiqui. ⁴ Huan nopa ilhuicac ejquet cati hualayaya quíilhui: “Ximotalo campa ne telpoca tacat huan xiquilhui para teipa altepet Jerusalén quínpiyas miyac masehualme huan miyac tapiyalme hasta ayecmo quincuis tepan calijtic huan miyac masehualme huan tapiyalme mocahuase icalixpa nopa tepamit. Pero inijuanti itztose ica temachili, ⁵ pampa na, quíijtohua TOTECO, nielis quej se tepamit ten tit cati quiyahualos altepet Jerusalén para nijmocuitahuis. Huan nijtemitis nopa altepet ica notatanex.”

Ilhuicac ejquet TOTECO camanaltic por TOTECO

⁶⁻⁷ Huan TOTECO quíijto: “¡Xijtaquilica anisraelitame! Nimechsemanqui campa hueli quej se chichahuac ajacat tasemana, pero ama nimechilhui: ‘Xicholojtehuaca ten nopa tali ica huejcapa campa ama anitztoque quej anseyoc tali ehuaní. Quena, anJerusalén ehuaní, xijtalcahuica tali Babilonia huan ximomanahuica.’ ”

⁸ Pampa ya ni cati quíijtohua TOTECO Cati Quinyacana Iilhuicac Ejchahua Ma Tatanitij. “Quema monextis nohueyitilis, yaya TOTECO techtitanis na ica ni camanali para ma niquintehuis nopa talme cati ten hueli amechchihuilijue. Pampa TOTECO quíijtohua para cati hueli cati amechcuatoniá, animasehualhua, eltoc quej quicocohua iixteyol sital, nopa cati iaxca cati achi más quimocuitahuía. ⁹ Yeca na noseltitzi niquintepachos nopa talme huan nijchihuas para inintequipanojchahua ma quintamitachtequilica hasta amo teno quipiyase. Huan huajca quimachilise para TOTECO Cati Quinyacana Iilhuicac Ejchahua Ma Tatanitij techtitanqui na.

¹⁰ “Huajca xihuicaca huan xipaquica, amojuanti ten altepet Jerusalén, pampa na nihualas para niitztos tatajco ten amojuanti.” Quej nopa quíijto TOTECO. ¹¹ “Huan ipan nopa tonali nojquiya masehualme cati ehuaní ipan miyac talme mosejcotilise ica TOTECO. Huan masque amo israelitame, mochihuase nomasehualhua huan na nimocahuas para niitztos tatajco ten amojuanti. Huan huajca anquimachilise para TOTECO Cati Quinyacana Iilhuicac Ejchahua Ma Tatanitij techtitanqui campa amojuanti. ¹² Huan TOTECO iyancuiyaj moaxcatis tali Judá cati mopantía ipan nopa tali cati tatzejtzeloltic huan sempa teyolmelahuas para quitapejpenijtoc altepet Jerusalén.”

¹³ Ipan nochi taltipacti ma amo aquí molini iixpa TOTECO pampa quistejqui ipan ichaj tatzejtzeloltic ipan ilhuicac huan ya ajsitoc ipan taltipacti.

3

Tanextili ten iyoyo tapajpactic Josué

¹ Teipa ipan nopa tanextili, nopa ilhuicac ejquet technextili nopa hueyi to-tajtzi cati itoca Josué. Yaya moquetzayaya iixpa iilhuicac ejca TOTECO. Huan campa inejmat Josué, moquetzayaya Amocualtacat huan quitatelhuiyaya Josué ica miyac tamanti.

² Huan iilhuicac ejca TOTECO quíilhui Amocualtacat: “Ma TOTECO mitz-tatelhui, Amocualtacat. Yaya amo quiselía cati ica tijtelhuía ni tacat. Pampa TOTECO ya quitapejpenijtoc para quitasojtas Jerusalén. Huan yaya quitahuelcahuas cati ica tijtatelhuijtoc ni totajtzi. Ni tacat itztoc quej se cuapipitzi cati nijmanahuía ten se hueyi tit huan ya tajo tatatoc.”

³ Huan quema Josué moquetztoya iixpa iilhuicac ejca TOTECO, moquenti-toya yoyomit cati tahuel soquiyó.

⁴ Huajca iilhuicac ejca Toteco quinilhui nopa sequinoc cati moquetztoyaj nopona: “Xijquixtilica Josué nopa yoyomit cati taniel soquiyoy.”

Huan teipa iilhuicac ejca TOTECO quiilhui Josué: “Xiquita, ya ni quiijsnesqui ya nimitzquixtilijtoc nochi motajtacolhua. Huan yeca ama nijchihuas para ma mitzquenticca yoyomit cati nelía yejyectzi.”

⁵⁻⁶ Teipa nopa ilhuicac ejquet quincamanalhui nopa sequinoc cati nopona itztoyaj huan quinnahuatí ma quitallilica ipan itzonteco se cuatzajcayot cati yancuic. Huan quitallilijque. Huan quiquentijque iyoyo cati yancuic huan iilhuicac ejca TOTECO moquetztoc inechca. Huan iilhuicac ejca TOTECO quicamanalhui Josué huan quiilhui: ⁷ “Quej ni quiijtóhua TOTECO Cati Quinyacana Iilhuicac Ejcahua Ma Tatanitij: ‘Sinta tijtoquilis noojhui huan tijchihuas nochi cati nimitznahuatía, huajca nimitztequimacas quej titayacanquet cati quiipya más tequiticayot ipan notiopa huan icalixpahua. Huan na nimitzcahuilis para ticalaquis huan tiquisas ten na noixpa quej ni ilhuicac ehuaní quichihua.’”

⁸ “Ta tijosué cati tihuej totajtzi inihuaya ni totajtzitzi cati mosehuíaj moixpa, xijtacaquilica cuali ya ni, pampa nochi amojuanti anquiixnextíaj nopa cuajcuali tamanti cati hualas teipa. Temachtí na nijhualtitanis notequipanojca cati itoca Chamanquet. ⁹ Quena, xijtachelica nopa tet cati más ipatí cati nimitztcenahuilis, Josué. Nopa tet quiipyas chicome iixteyol cati quinxetis para nochi quimatis. Huan ipan nopa tet na nitajcuilos. Huan san ipan se tonalí nijtamiquixtis nochi tajtacoli ten ni tali.’” Quej nopa quiijtó TOTECO Cati Quinyacana Iilhuicac Ejcahua Ma Tatanitij.

¹⁰ “‘Huan anquinnotzase amohuampoyohua para ma mosehuica amohuaya amocalixpa ininantantita xocoméca tzontí huan inimatita higuera cuame. Huan anpaquise san sejco ica tasehuilisti huan temachili.’” Quej nopa quiijtó TOTECO Cati Quinyacana Iilhuicac Ejcahua Ma Tatanitij.

4

Tanextili ten taahuil quetzali huan omel olivo cuame

¹ Huajca nopa ilhuicac ejquet cati nechcamanalhuijtóya, techixití quej quixitíaj se tacat cati cochtoc. ² Huan techilhui: “¿Taya tiquita?”

Huan na niquilhui: “Niquita se taahuil quetzali cati tachijchihuali ica oro, huan quiipya chicome taahuilme. Huan ica huejcapa ten nopa taahuilme onca se caxit campa quitecaj aceite. Huan yahualtic nopa caxit, onca chicome taahuilme huan tubos quisayayaj ten nopa caxit para quipanoltise aceite ipan sesen taahuili. ³ Huan ipan sese lado nopa caxit onca se olivo cuahuit. Se ipan inejmat nopa caxit huan seyoc ica iarraves.” ⁴ Na nijsenhuiquili nicamanaltic. Huan nijtatzintóquili nopa ilhuicac ejquet cati camanaltiyaya nohuaya, niquilhui: “Tata, ¿taya nochi ya nopa? Huan ¿Taya quixnextíaj?”

⁵ Huan nopa ilhuicac ejquet techilhui: “¿Melahuac amo tijmati taya quixnextíaj?”

Huan na niquilhui: “Melahuac amo nijmati, tata.”

⁶ Huajca yaya techilhui: “Ya ni quixnextíaj nopa camanali cati TOTECO quinequi quimacas nopa tequichijquet Zorobabel ten quenicatza quitamiltis nopa tiopamit: ‘Amo por mosoldados, yon por mochicahuilis. San por na notonaltzi mochihuas.’” Quej nopa quiijtóhua TOTECO Cati Quinyacana Iilhuicac Ejcahua Ma Tatanitij.

⁷ “Huan miyac tamanti taohuijcajot cati nesis quej se hueyi tepet para quitzacuilis itequi Zorobabel, mocuepas ica se tamayamit cati amo más

ohui. Huan quema quitalis itamiya tet cati nelía yejectzi ipan itzonatipa nopa tiopamit, nochi israelitame tzajtise ica paquillisti huan quiijtose: ‘¡Ma TOTECO quitiochihua! ¡Ma TOTECO quitiochihua!’ ”

Zorobabel quisencahuas nopa tiopamit

⁸Huan TOTECO techmacac ni camanali: ⁹“Zorobabel quitali itzinpehualtil nopa tiopamit huan yaya quisencahuas. Huan huajca anquimachilise para TOTECO Cati Quinyacana Iilhuicac Ejcahua Ma Tatanitij techtitanqui campa ta. ¹⁰Ma amo aqui moilhui para amo teno ipati nopa tamanti pisiltzitzi cati quichihuas para ica quipehualtis nopa tiopamit, pampa paquise quema quuitase nopa plomo imaco Zorobabel quema nopa tequit cuali yahui. Huan nopa chicome iixteyolhua TOTECO cati tachiyaj campa hueli ipan nochi taltipacti quipalehuise ma quitamisencahua nopa tiopamit.”

¹¹Na sempa nicamanaltic huan nijtatzintoquili: “¿Taya quixnextíaj ne ome olivo cuahuit cati eltoque ipan sesen lado ten ne taahuil quetzali?” ¹²Huan nojquiya niquilhui: “¿Taya quixnextíaj ne ome inimacuayohua ne olivo cuame cati quitoyahuj nopa aceite cati eltoc quej oro ipan nopa ome tubos ten oro?”

¹³Huan yaya techilhui: “¿Amo tijmati taya quixnextíaj?”

Huan na niquilhui: “¡Amo, tata, amo nijmati!” ¹⁴Huajca yaya techilhui quej ni: “Quixnextíaj nopa ome tacame cati quinajaltijtoque huan quintequimacaque para quitequipanose TOTECO cati quinahuatía nochi taltipacti.”

5

Tanextili ten nopa amatajcuiloli cati patani

¹Huan sempa niajcotachixqui huan niquitac patanti se amat cati quipiya tajcuiloli. ²Huan nopa ilhuicac ejquet techilhui: “¿Taya tiquita?”

Huan na niquilhui: “Niquita patanti se hueyi amat cati quipiya tajcuiloli. Huelis quipiya chicnahui metros ihuehueyaca huan nahui metro huan tajco ipatajca.” ³Huajca techilhui: “Ipan nopa amat ijcuilijtoc nopa tatechihualisti cati TOTECO quititani ipan ni tali. Ipan se lado ijcuilijtoc para nochi cati tachtequij, quinquixtise. Huan ipan nopa seyoc lado ijcuilijtoc para nochi cati quitestigojquetzaj cati amo melahuac ayecmo hueli itztose nozona. ⁴Ya ni cati quiijtohua TOTECO Cati Quinyacana Iilhuicac Ejcahua Ma Tatanitij: ‘Na nijtitanis ni tatechihualisti ipan ininchajchaj nochi cati tachtequij huan ipan ininchajchaj nochi masehualme cati tatestigojquetzaj ipan notoca ica tamanti cati amo melahuac. Huan nopa tatechihualisti cati nijtitantoc mocahuas ipan sesen cali hasta tamosolihuis ica nochi inincuatetonyo huan nochi tet tatecpicholi.’ ”

Tanextili ten se sihuat ipan se tatamachihuali

⁵Huajca nopa ilhuicac ejquet cati nechcamanalhuyaya nechcajtejqui se talojtzi. Teipa sempa hualajqui huan techilhui: “Ama xiajcotachiya huan xijtachili cati monextijtoc.”

⁶Huan nijtatzintoquili: “¿Taya ya nopa?”

Huan yaya techilhui: “Ya ne eli se chiquihuit cati eli se tatamachihuali para trigo huan temitoc ica nochi inintajtacolhua nochi masehualme cati itztoque ipan ni tali.”

⁷ Nopa chiquihuit quipixtoya itepos tzajca ten plomo cati nelía etic. Huan teipa quitananque iixtzajca huan ipan nopa chiquihuit niquitac mosehuitoc se sihuat. ⁸ Huan nopa ilhuicac ejquet techilhui: “Nopa sihuat quiixnextía tajtacolot huan nochi cati amo cuali.” Huan teipa quicuatopejqui nopa sihuat para sempa quicalaquis ipan nopa chiquihuit huan quiixtzajqui ica iixtzajca cati tahuel etic.

⁹ Teipa sempa nijtachili huan niqunitac ome sihuame cati patanti-hualayayaj campa tojuanti ipan nopa ajacat ica inieltapalhua. Huan ni sihuame quipiyayayaj inieltapal quej ieltapal nopa totot cati quitocaxtiaj cigüeña. Huan injuanti quicuicoj nopa chiquihuit huan patantiyajque huan quihuaicque ipan ajacat.

¹⁰ Huan nijtatzintoquili nopa ilhuicac ejquet cati nechcamanalhuiyaya: “¿Canque quihuaicaj ne chiquihuit?”

¹¹ Huan yaya techilhui: “Quihuicaj ipan tali Babilonia para quichijchi-huilitij itiopa. Huan quema ya quisencajtose nopa tiopamit, quitalise nopa chiquihuit nopona ipan se mesa para quinextise.”

6

Tanextili ten nopa nahui carrojme

¹ Sempa niajcotachixqui huan niqunitac nahui tatehujca carrojme cati quisayayaj tafaico ten nopa ome huejhueyi tepeme cati eltoc quej nopa teposti bronce. ² Nopa achtohui tatehujca carro quinpixtoya cahuayoyme cati chichiltique cati quitilanayayaj. Nopa ompa tatehujca carro quinpixtoya cahuayoyme cati yayahuique. ³ Nopa expa tatehujca carro quinpixtoya cahuayoyme cati chipahuaque. Huan nopa najpa tatehujca carro quinpixtoya cahuayoyme cati tenextique.

⁴ Huajca niqilhui nopa ilhuicac ejquet cati nechcamanalhuiyaya: “Tata ¿taya quiixnextiaj ne tatehujca carrojme?”

⁵ Huan yaya techilhui: “Inijuanti quinixnextiaj nopa nahui ilhuicac ehuan cati itztoque iixpa TOTECO cati quinahuatia nochi taltipacti. Huan hualahui para quichihuaquij nopa tequit cati TOTECO quinilhuitoc ma quichihuaca.

⁶ Nopa carro ica cahuayoyme cati yayahuique, yahuij ipan nopa tali cati mocahua ica huejcapa. Huan nopa carro ica cahuayoyme chipahuaque, yahuij ipan nopa tali campa calaqu tonati. Huan nopa carro ica cahuayoyme cati tenextique yahuij ipan nopa tali cati mocahua ica tani.”

⁷ Pero nopa cahuayoyme nelía moyoltetiliyayaj pampa quinequiyayaj yase para nemise ipan nochi taltipacti. Huan nopa ilhuicac ejquet quinilhui: “¡Cualtitoc! Xiyaca huan xinemica campa hueli ipan nochi taltipacti.” Huan injuanti nimantzi quisque huan yajque ipan inintequi.

⁸ Huajca iilhuicac ejca TOTECO techmacac na, niZacarias, ni camanali, techilhui: “Xiquita, injuanti cati yajque ipan nopa tali ica huejcapa, quitalitoj tatzacuiliti nopona. Huan yeca mosiyajquetzco noTonal nepa huan techyoltali ten nohueyicalancayo.”

Se corona ipan itzonteco Josué

⁹ Huan TOTECO techmacac ni camanali, quiijto: ¹⁰ “Xiya ama ipan ichaj Josías, icone Sofonías huan xijselili nopa plata huan oro cati quihualica Heldai, Tobías huan Jedaías cati mocuetoque ten tali Babilonia. ¹¹ Huan ica nopa plata huan oro, xijchijchihua se corona, huan teipa xijtalili ipan itzonteco nopa hueyi totajtzi Josué cati icone Josadac. ¹² Huan teipa xiquilhui Josué: ‘Quej ni quiijtohua TOTECO Cati Quinyacana lillhuicac Ejcahua Ma Tatanitij: Teipa hualas nopa tacat cati itoca Chamanquet. Yaya chamanis ica

iselti huan quichijchihuas TOTECO itiopa. ¹³ Quena, elis ya cati quichihuas itiopa TOTECO huan yaya quipiyas ihueyitilis huan mosehuis quej tanahuatijquet ipan isiya campa tanahuatía. Huan yaya nojquiya elis se totajtzi cati mosehuía ipan nopa siyaj ten tanahuatijquet para tanahuatis. Huan oncas tasehuilisti ica nopa ome itequi.’

¹⁴ “Teipa nopa corona xijtalica ipan tiopamit para amechelnamiquiltis ten cati temacaque Heldai, Tobías, Jedaias huan Josías icone Sofonías. ¹⁵ Huan miyac masehualme cati huejca ehuan hualase para quipalehuise para quicuaitalise itiopa TOTECO. Huan quema mochihuas ya nopa, anquimachilise para TOTECO Cati Quinyacana Iilhuicac Ejcahua Ma Tatanitij techtitanqui campa amujuanti. Nochi ya ni panos quema amujuanti anquicaquise itoscac amoTÉCO Dios huan anquinelto case.”

7

Quenicatzá monequi mosahuase para quisas cuali

¹ Quema Tanahuatijquet Darío yahuiyaya para nahui xihuit tanahuatis sempa hualajqui se camanali ten TOTECO para na, niZacarías. Techmacac nopa camanali ipan 4 itequi nopa metzti cati itoca Quisleu, cati eltoc metzti chicnahui ipan tocalendario*. ² Ipan nopa tonali nojquiya nopa masehualme ten altepet Betel quititanque Regem Melec, Sarezzer huan inimasehualhua ma yaca hasta itiopa TOTECO ipan Jerusalén para ma quitajtanitij TOTECO itatiochihual. ³ Huan nojquiya quinejque ma quitajtanitij nopa totajtzi sinta noja quisenhuiquilise chocase huan mosahuase iuxpa TOTECO sesen xihuit ipan metzti macuili quej quichijtoyaj para miyac xihuit.

⁴ Huan teipa sempa techmacac se camanali TOTECO Cati Quinyacana Iilhuicac Ejcahua Ma Tatanitij, huan yaya quijito:

⁵ “Xiquincamanalhui nochi masehualme ipan ni tali huan nochi totajtzitzi huan xiquinilhui: ‘Ipan nochi nopa 70 xihuit quema anchocayayaj huan anmosahuayayaj ipan metzti macuili huan anilhuichihuayayaj ipan metzti chicome, zanmoilhuyayaj anquichihuayayaj para antechtepanitase huan para nelía anquicahuase amotajacolhua huan anmonechcahuise campa na? ¡Amo! ⁶ Huan ama ipan ni tonali nojquiya, quema anquichihuaj ilhuime, amo anmoilhuíaj ten na. Anquichihuaj para antacuse huan antaise san sejco, huan para anixhuise. ⁷ Nelía san se ni camanali cati nimechilhuía ama ica nopa camanali cati huejcajquiya nimechmacac ica notajtolpanextijcahua. Ipan nopa tonali Jerusalén huan nochi ipilaltepehua huan nopa Neguev huan Sefela quinpiyayayaj tahuel miyac masehualme huan quipiyayayaj tasehuilisti pampa ayemo niquintatzacuiltiyaya.’ ”

Para ten TOTECO amo quinnanquilá

⁸ Teipa sempa TOTECO techmacac na, niZacarías, se camanali huan quijito: ⁹ “NiamoTECO Cati Niquinyacana Noilhuicac Ejcahua Ma Tatanitij huan niquijtohua: ‘Xitajtolsecahuaca xitahuac. Monequi sesen ten amujuanti ximotasojtaca huan ximoicnelica se ica seyoc quej elisquía anicnime. ¹⁰ Amo xiquintajyohuiltica sihuame cati ya mijqui inihuehue, yon icnotzitzi, yon teicnelzitzi, yon masehualme cati hualahui ten seyoc talí. Amo ximoilhuica ipan amoyolo para anquicocose seyoc masehuali.’

¹¹ “ ‘Pero quema niquinilhui ya ni, amohuejcapan tatahua amo quitacaquilijque nocamanal. Moicancuetque huan quitzajque ininacas ica inimacpil para amo quicaquise cati niquinilhuyaya. ¹² Inijuanti tahuel

* 7:1 7:1 Ipan 7 itequi diciembre ipan tocalendario ten ama.

moyoltetilijque pampa amo quinejque quitacaquilise nopa camanali huan nopa tanahuatili cati niininTECO niqinilhuiyaya ica noTonal cati nijtitanqui ipan nopa tajtolpanextiani. Huan pampa amo quitacaquilijque nocamanal, hualajqui ininpani nohueyi cualancayo niininTECO Cati Niqinyacana Noilhuicac Ejcahua Ma Tatanitij.

13 “ ‘Huan pampa amo quitacaquilijque quema na niqinnojnotzqui, nojquiya ayecmo niquintacaquili quema injuanti techtzajtziyayaj.’ Quej nopa niqijtohua niamoTECO Cati Niqinyacana Noilhuicac Ejcahua Ma Tatanitij. 14 ‘Huan niqinsemanqui amohuejcapan tathua quej se chichahuac ajacat quisemana tasoli. Niqinchihualti ma yaca ipan nochi talme campa hueli ipan taltipacti. Huan inintal mocajqui quej se tamanti cati quitahuelcajtoque huan sosoltic. Huan pampa ayecmo aqui panoc nopona, nopa tali mocajqui quej se huactoc tali.’ ”

8

TOTECO quintajtolcahuili para quintiochihuas

1 Huan sempa techmacac se camanali TOTECO Cati Quinyacana Iilhuicac Ejcahua Ma Tatanitij, huan quijito: 2 “Quej ni niamoTECO niqijtohua, na Cati Niqinyacana Noilhuicac Ejcahua Ma Tatanitij: ‘Tahuel niquintasomati nomasehualhua ipan Jerusalén pampa niqunicnelía miyac. Nijnequi san na ma technelica huan nicualaní miyac sinta amo techicnelíaj.’ ” 3 Huan nojquiya TOTECO quijtohua: “Temachtí na nimocuepas ipan Sion huan nimocahuas para niitztos ipan altepet Jerusalén. Huan nopa altepet quitocaxtise Altepet ten Cati Melahuac. Huan quitocaxtise Itepe TOTECO Cati Quinyacana Iilhuicac Ejcahua Ma Tatanitij. Huan quitocaxtise Tepet Cati Tatzejteloltic.”

4 Quej ni quijtohua TOTECO Cati Quinyacana Iilhuicac Ejcahua Ma Tatanitij: “Altepet Jerusalén sempa quipiyas paquilisti huan tasehuilisti. Se tonali huehuentzitzí huan nanatzitzí sempa nejnemise ipan icalles. Huan sesen ten injuanti quihuicas icuatopil pampa miyac xihuit quipiyase. 5 Huan nopa calles temise ica miyac oquichpilme huan sihuapilme cati mahuiltise nopona.”

6 Quej ni quijtohua TOTECO Cati Quinyacana Iilhuicac Ejcahua Ma Tatanitij: “Ipan nopa tonali nopa masehualme cati noja mocahuase, san quitachilise quema sempa oncas miyac masehualme quej elisquía se tiochichualnescayot o se tamanti cati hueyi, pero amo ohui para na, pampa amo teno ohui para nijchihuas.” Quej nopa quijtohua TOTECO.

7 Ya ni cati quijtohua TOTECO Cati Quinyacana Iilhuicac Ejcahua Ma Tatanitij: “Na niqinmaquixtis nomasehualhua inimaco ininculancaitacahua cati itztoque ipan nopa talme campa hualquisa tonati huan campa calaquí tonati. 8 Niqinhualicas ten campa hueli huan mocahuase para itztose ipan altepet Jerusalén. Huan injuanti elise nomasehualhua huan na nielis niiniDios cati nelía xitahuac huan temachtí.”

9 Quej ni quijtohua TOTECO Cati Quinyacana Iilhuicac Ejcahua Ma Tatanitij: “Xijpiyaca chichahualisti, amojuanti cati anquicaquij ni camanali ica nopa tajtolpanextiani huan anitztoyaj nopona quema quitaliijque nopa tatzinpehualtili. Xitequitica chichahuac huan xijfamiltica nopa tiopamit.

10 Achtohuiya quema ayemo anquipehualtiyayaj para anquichihuase nopa tequit, amo oncayaya tequit, yon tomi para se quitaxtahuis seyoc por itequi o por itequi itapiyal. Huan amo aquí huelqui quisa ipan altepet huan quimati temachtí para mocuepas pampa nochi anquinpíxque miyac amoculancaitacahua pampa nijchijfoya nochi amojuanti ximoculancaitaca se ica

seyoc. ¹¹ Pero ama ayecmo niquinchiuilis nomasehualhua cati noja mocahuase quej niquinchiuili achtohui.” Quej nopa quijjtohua TOTECO Cati Quinyacana Iilhuicac Ejcahua Ma Tatanitij. ¹² “Ama nijchihuas para pehuas para oncas tasehuilisti campa amojuanti huan nijchihuas para xiitzoca ica paquilisti. Nochi tamanti cati anquitocase, temacase cuali inintajca. Huan xocomeca mili temacas cuali itajca. Huan nopa tali achi más taeliltis. Huan nopa mixti quichihuas ma huetzi miyac at. Nochi ni tatiochihualisti quiselise nopa masehualme cati noja mocahuase ipan nopa tali. ¹³ Nopa talme cati amo quixmatij TOTECO quijjtohuayayaj para anisraelitame ten tali Israel huan tali Judá anquixtiyayaj se tamanti cati tatechihuili. Pero ama nimechmaquixtis huan nochi amechitase para anitztose se tatiochihualisti. Huajca amo ximajmahuica. Ximoyolchicahuaca huan xijpiyaca fuerza huan xijtamiltica nopa tiopamit.”

¹⁴ Quej ni quijjtohua TOTECO Cati Quinyacana Iilhuicac Ejcahua Ma Tatanitij: “Huejcajquiya quema amohuejcapan tatahua techcualancamacaque, nimotemacac para niquintatzacuultis huan, quena, niquintatzacuulti. Amo nimoyolpatac. ¹⁵ Huan ama nojquiya cati niqijjtohua para nijchihuas, temachtij nijchihuas. Huan ya nimotemacac para nijtiochihuas nochi altepet Jerusalén huan tali Judá, huan quena nijchihuas. Huajca amo ximajmahuica. ¹⁶ Ya ni cati monequi anquichihuase amojuanti: ‘Ximocamanalhuica se ica seyoc ica camanali cati melahuac. Xitetajtolsencahuaca xitahuac. Huan xijtemoca tamanti cati amechhualiquilis tasehuilisti. ¹⁷ Ma amo aqui moilhu ipan iyolo para quichihuilis seyoc se tamanti cati amo cuali. Ayecmo xijtestigojquetzaca para melahuac se tamanti cati anquimatij para amo melahuac quej ama amechpactia anquichihuaj. Ya nopa amo nijnequi niquitas.’ ” Quej nopa quijjtohua TOTECO.

¹⁸ Huan ajsic seyoc camanali ten TOTECO huan quijjto: ¹⁹ “Quej ni quijjtohua TOTECO Cati Quinyacana Iilhuicac Ejcahua Ma Tatanitij: ‘Nopa tonali quema ammosahuayayaj ipan nopa ilhuime ipan metzti nahui, macuili, chichome huan majtacti mocuepase tonali quema antamahuisotij. Nopa ilhuime mocuepase tonali ten paquilisti huan nochi israelitame ma paquica quema quinelnamiquise nopa tonali. Huajca xijnequica tamanti cati melahuac cati quichihuas ma onca tasehuilisti.’ ²⁰ Huan TOTECO Cati Quinyacana Iilhuicac Ejcahua Ma Tatanitij quijjto: ‘Masehualme cati itztoque ipan miyac altepeme huan talme campa hueli ipan taltipacti hualase ipan Jerusalén. ²¹ Masehualme ten se altepet yase quinitatij nopa masehualme cati itztoque ipan seyoc altepet huan quinilhuilitij: Ma tiyaca ipan altepet Jerusalén para tijtemotij TOTECO Cati Quinyacana Iilhuicac Ejcahua Ma Tatanitij. Timotatajtise iixpa huan tijtatanise ma techtiochihuas. Huan huajca quijjtose: Tojuanti nojquiya tiyase. ²² Huan hualase ipan Jerusalén miyac masehualme ten miyac altepeme huan ten talme cati quipiyaj miyac chichahualisti. Huan quitemose TOTECO Cati Quinyacana Iilhuicac Ejcahua Ma Tatanitij huan motatajtise iixpa huan quitajtaniquij itapalehuil huan itatiochihualis.’

²³ “Huan quej ni quijjtohua TOTECO Cati Quinyacana Iilhuicac Ejcahua Ma Tatanitij: ‘Ipan nopa tonali tahuel miyac masehualme cati ehuan ipan nochi talme huan cati camanaltij nochi tamanti camanali, quiiitzquise ipan iyoyo se israelita huan quiiilhuise: Tiyase mohuaya pampa tijmatij para TOTECO Dios itztoc mohuaya.’ ”

1 Ya ni nopa camanali cati TOTECO teyolmelajqui ten nopa tatzacuiliti cati quinajsis altepet Damasco huan tali Hadrac ehuaní. Yaya quijito: “Ipan nopa tonali nochi masehualme ipan nochi altepeme huan nochi nopa huejhueyi familias ten israelitame techtachilise na, niininTECO. 2 Nojquiya altepet Hamat cati mopantía nechca Damasco quipantis cati amo cuali huan altepeme Tiro huan Sidón nojquiya. Quena, quiselise tatzacuiliti masque neltalnamiqij. 3 Masque ipan altepet Tiro quichijchijtoque huejhueyi calme cati tilahuac para ipan momanahuse huan masque quipiyaj tomi ten plata huan ten oro quej imiyaca taltepoti cati onca ipan calles, 4 Toteco quiquixtis nochi cati quipiyaj. Huan nochi nopa tamanti cati quuitayaya para ichicahualis, Toteco quichihuas para ma huetzi ipan hueyi at. Huan nopa altepet tamitatas.

5 “Huan quema nopa masehualme cati itztoque ipan altepet Ascalón quuitase para huetzqui altepet Tiro, momajmatise miyac. Huan nopa masehualme cati itztoque ipan altepet Gaza nelia mocuese. Huan nopa masehualme cati itztoque ipan altepet Ecrón huihuipicase pampa quuitase para altepet Tiro ayecmo huelis quinmanahuis ten inincualancaitacahua. Huan quinmictilise inintanahuatijca nopa masehualme ten altepet Gaza. Huan altepet Ascalón mochahuas quej tali cati quitahuelcajtoque pampa ayecmo mochahuas yon se masehuali.

6 “Huan seyoc tali ehuaní hualase para itztose ipan altepet Asdod. Huan por injuanti nijtamiltis nochi cati ica mohueyimatiyayaj nopa filisteo masehualme. 7 Nijchihuas para ayecmo quicuase se tapiyali ica ieso. Huan ayecmo niqincahuilis ma quicuaca sequinoc tamanti cati amo quinamiqui quicuase yon quinhueyichihuase ininteteyohua. Huan nochi injuanti cati nopa mochahuase yoltoque nepa, quihueyichihuase Toteco Dios, huan mochihuase tequichihuani ipan tali Judá. Huan masehualme nozona quinselise quej se familia cati yanquic. Quena, nopa filisteos ten Ecrón mochihuase san se ica israelitame quej huejcajquiya nopa jebuseome mochijque san se inihuaya. 8 Huan na niqinyahualos nomasehualhua quej se tamocuitahuijquet huan amo niqincahuilis nopa miyac soldados cati panoque ma mocuepaca para quintehuiquij. Yon se cati quintaijyohuiltisquía ayecmo quema panos nica pampa ama na nitachixtoc huan niqinmocuitahuía.”

Hualas inintanahuatijca israelitame

9 ¡Xipaquica miyac, anmasehualme ipan Jerusalén! ¡Xitzajtzica ica paquilisti, nochi anisraelitame campa hueli! Amotanahuatijca neca huala. Yaya senquisa xitahuac huan temaquixtia. Moicnonequi huan huala ipan se pilburrojtzí. Quena, yaya huala ipan icone se sihua burro.

Taya quichihuas inintanahuatijca

10 Huan nopa Tanahuatijquet quijtohua: “Niquinsolos nopa tatehujca carrojme cati quinpiyaj ipan tali Israel campa itztoyaj iixhuihua Efraín huan nopa tatehujca cahuayojme cati itztoque ipan altepet Jerusalén. Nijposteqis nopa cuahuitolme cati quitequihuaj ipan tatehuilisti.” Quena, quej nopa quichihuas. Huan quinmacas tasehuilisti nochi talme. Huan itanahuatijcayo ajsis ten se hueyi at hasta seyoc hueyi at. Huan ten nopa hueyat Eufrates ajsis campa hueli hasta itamiya taltipacti. 11 TOTECO quijtohua: “Huan pampa nijchijqui se camanal sencahuali amohuaya, anisraelitame, cati quisellojhuijque ica esti huejcajquiya, yeca nimechmanahuis cati anitztoque ipan tatzacti san se quej nijchololti José cati itztoya ipan nopa aostot cati amo quipixqui at huejcajquiya. 12 Amojuanti

cati antatzacme, ximocuepaca ipan na cati niitztoc quej se cali cati tahuel quipiya chichahualisti. Ipan na anitztose temachti. Ipan na ximotemachica quema noja onca tonali. Huan nimechyolmelahuas para nimechtiochihuas ome huela por sesen taohuicayot. ¹³ Pampa se tonali nijtequihuis tali Judá ehuan quej nocuahuitol. Huan imasehualhua tali Efraín o Israel elis quej se cuataminti ipan nocuahuitol cati ica nitatehuis. Nopa telpocame ipan Jerusalén mooquichmatise huan elise quej se macheta nomaco cati niquinhuicas ipan tatehuilisti ica nopa soldados ten tali Grecia.”

TOTECO monextis para quinmanahuis imasehualhua

¹⁴ Huan ipan nopa tatehuilisti, TOTECO monextis iniixpa imasehualhua. Huan nopa cuataminti cati quintequihuis motalose quej tapetanilot. Huan TOTECO Dios quiipitzas nopa tapitzali huan quisas para motehuis ihuaya icualancaitacahua. Huan yaya quiipiyas chichahualisti quej se hueyi ajacat cati temajmatia nopona ica tatzinta. ¹⁵ Huan TOTECO Cati Quinyacana ilhuicac Ejcahua Ma Tatanitij quinmanahuis imasehualhua. Huan imasehualhua quintzontamiltise inincualancaitacahua. Huan ininpa nejnemise quej teme para tatehuitatzti. Elise quej se tecuani cati quicua cati quitantoc huan quii ieso. Quema ya tatantose, imasehualhua tzajtziise ica paquillisti quej se cati quiiitoc xocomeca at cati cococ. Quema inijuanti quintzontamiltise nochi inincualancaitacahua elise quej nopa caxit ipan tiopa cati temitoc ica ieso nopa tapiyali para ica quiatzejtzelhuiaj icuacua nopa taixpamit. ¹⁶ Huan ipan nopa tonali, TOTECO Dios quinmaquixtis imasehualhua quej se tamocuitahuijquet quinmanahuia iborregojhua. Huan ipan nopa tonali imasehualhua petanise ipan ital quej piltetzitzi cati yejyectziti cati quintatzquiltiyoque ipan se corona. ¹⁷ Tahuel cuajcualtzi elis nopa tali huan nochi elis nelia yejyectzi. Huan pampa oncas miyac trigo huan miyac xocomecat, nopa telpocame huan ichpocame moscaltise yejyectzi huan quiipiyase miyac chichahualisti.

10

TOTECO quinmaquixtis imasehualhua

¹ Xijtajtanica TOTECO ma huetzi at quema ajsi tonali para seliyas cuame. Huan yaya cati quichihua ma tapetani huan ma onca huejhueyi mixti amechmacas at hasta mocahuas. Quej nopa nochi tocti ipan nochi mila temacas cuali itajca. ² Pero quema anquintatzintoquiliaj teteyome se tenijqui, san tapic cati amechnextilise. Huan masque tetonalitani quiijtouhaj para quiPIXque tanextili campa quitaque cati panos teipa, nochi inincamanal san istacatili. Tayoltaliaj ica camanali cati amo melahuac huan quiijtouhaj para amo huala tatzacuiliti. Yeca nochi israelitame yahuij ipan iniojhui quej borregojme cati amo quiPIYAJ se cati melahuac inintamocuitahuijca para quinmanahuisquia huan yeca nelia taijyohuise.

³ Huajca TOTECO quiijtouhua: “Tahuel nicualantoc ica nopa tamocuitahuani huan ica nopa tayacanani cati amo melahuac huan yeca niquintatzacuilitis. Pero niamoTECO Cati Niquinyacana Noilhuicac Ejcahua Ma Tatanitij nihualas huan niquintiochihuas nomasehualhua cati iixhuihua Judá ten huejcajquiya. Quena, niqinchihuas chichahuaque huan yejyectziti quej nocahuayo cati más mocualtalijtoc para tatehuis huan más quiPIYA tatepanitacayot. ⁴ Huan se iteipan ixhui Judá elis quej nopa tet cati más monequi para ipan quiquetzase se cali ten tet pampa itztoc cati más monequi ipan nopa cali cati na nijchihua. Yaya elis quej nopa taquetzali cati ipan quiquetzaj se yoyon cali. Elis quej nopa cuahuitoli cati más cuali para

tatehuilisti. Huan iixpa ya cholojtehuase nochi tayacanani cati quinequij tetaijyohuiltise. ⁵ Iteipan ixhuihua Judá elise soldados cati más motemacaj ipan tatehuilisti huan nejnemise ipan inincualancaitacahua quej elisquaij soquij ipan calles. Huan tatehuise chicahuac pampa niininTECO niitztos inihuyaya. Huan quintanise nochi ipan tatehuilisti hasta quinpinahualtise inincualancaitacahua cati tejcoj ipan cahuayojme.

⁶ “Huan na niquinmacas chicahualisti ininteipan ixhuihua Judá huan José huan niquinmaquixtis. Huan pampa niquintasojtas, niquinchihuas sempa ma mocuepaca huan itztose ipan inintal. Huan elis quej amo quema niquin-tahuelcajtoc pampa na niDios niininTECO huan nijtacaquilis nochi cati qui-ijtose quema motatajtise ica na. ⁷ Huan iteipan ixhuihua Efraín mochihuase quej tatehuiani cati tahuel motemacaj huan quipiyaj miyac chicahualisti. Huan paquise miyac quej paquij tacame cati quiitoque miyac xocomeca at. Huan ininconeuhua quitase quenicatza niininTECO niquinicnelía huan yolpaquise noixpa. ⁸ Huan niquiquisis para niquinnotzas ma hualaca huan nimantzi hualase mosentiliquij pampa ya niquinmaquixtijtoc. Huan nopa quentzi israelitame cati noja mocahuase yoltoque, pehuase momiyaquilise huan sempa mochihuase nelmiyaqui masehualme quej eliyayaj achtohuiya. ⁹ Masque niquinsemantoc nopa israelitame campá hueli ipan talme cati nel-huejca, nopona sempa techelnamiquise huan techtemose. Huan inijuanti huan ininconeuhua mocuepase para sempa itztose ipan inintal. ¹⁰ Quena, niquinchihuas ma mocuepaca ten tali Egipto huan ten tali Asiria. Huan niquinhualicas hasta ipan tali Galaad huan ipan tali Líbano. Huan itztose nelía miyaqui ten inijuanti cati mocuepase hasta ayecmo quipiyase campá mochihuase. ¹¹ Huan masque quiapanose taohuijcajot quej huejcajquiya quema quiapanoque nopa Hueyi At Chichiltic, na nijtacaquilis ichichualis nopa at para ma amo quincocos. Nopa hueyat Nilo ipan tali Egipto, nijchi-huas ma huaqui para huelis quisase ipan nopa tali. Huan niquinpinahualtis nopa tayacanani ipan tali Asiria cati tahuel mohueyimatiyaya huan nij-tamiltis nopa tequiticajot cati tali Egipto quipixqui.

¹² “Huan nijchihuas para nomasehualhua ma quipiyaca chicahualisti noixpa. Huan inijuanti nejnemise nica huan neca campá quinequise huan quihuicase notoca na.” Quej nopa quiijto TOTECO.

11

Quihuejcamajcahuase inintamocuitahuijca

¹ ¡Xiquitaca! Nopa tali ipan Israel cati itoca Líbano quiselis se hueyi tatzacuiltili. Elis quej quitapos icaltehua para ma calaqui se hueyi tit huan nopa tit quintamitatis nochi tiocuame cati más yejyetzzi. ² Huan nochi masehualme nopona tahuel mocuesose huan hasta elis quej nopa cuame ten ocot chocase pampa quimatise san se ininpantis. Ama ya huetztoque nopa tiocuame masque eliyayaj nelía yejyetzzi huan huejcapantique. Eltoc quej nopa ahua cuame nopona campá itoca tali Basán chocaj ica majmajti pampa nochi cuatitamit cati quipiyayaya miyac cuame hasta amo aquí huelqui pano nopona, ama ya quintahuisojtoque talchi. ³ Xijtacaquilica quenicatza chocaj nopa tamocuitahuiani ten borregojme ipan tali Israel pampa nochi nopa sacapetat campá quinnemiltijque inintapiyalhua ya sosolijtoque. Ama san caquisti cone tecuanime cati nanalcá pampa ya tanqui nochi nopa yejyetzzi cuatitamit nechca hueyat Jordán campá mocajque para itztose.

Ome tamanti tamocuitahuiani

⁴ Quej ni techilhui NoTECO Dios: “Xiya huan xiquinmocuitahui nomasehualhua cati itztoque quej borreojme cati taiyocatalilme para miquise. ⁵ Quej tacohuani cati quincohuaj borreojme huan quinmictíaj huan amo teno moilhuíaj, nopa israelita tayacanani quinmictíaj nomasehualhua huan amo quiiatj sinta quihuicaj tajtacoli. Huan quej tanamacani quinnamacaj borreojme huan san quiijtohuaj: “Tascamati TOTECO pampa ya nimochijtoc nitominpixquet”, nopa israelita tayacanani cati itztoque quej tamocuitahuiani cati amo melahuac quintemactiliaj nomasehualhua ma miquise huan amo quintasojtaj. ⁶ Para na ayecmo niquintapojpolhuis cati fiero itztoque ipan ni tali. Nijchihuas para sese ten injuanti ma huetzica inimaco inihuampoyohua huan imaco inintanahuatijca huan injuanti quinquechtzontequise. Huan nopa amo cuajcualme quichihuase para nopa tali ma mocahua quej huactoc tali, pero na amo niqinmanahuis nomasehualhua ten nopa amo cuajcualme.”

⁷ Huajca na nimotali para niqinmocuitahuis nopa israelitame cati quichiyayaj tatzacuiltili huan itztoyaj quej borreojme cati ya taiyocatalilme para miquise. Ni borreojme quixnextiyaj cati más teicneltzitzitzi ten nopa masehualme. Huan teipa nijcuic ome cuatopili. Se nijtocaxtali “Itasojtacayo”. Huan nopa seyoc nijtocaxtali “Quinchijtoc San Se”. Huan quej nopa, niqinmocuitahui nopa borreojme quej se cuali tamocuitahuijqet quichihuasquía huan quej TOTECO technahuatijtoya. ⁸ Huan ipan se metzti, niqintzontamilti eyi tamocuitahuiani. Pero amo nijpixqui noyolo ica nopa borreojme, yon ica masehualme ten nopa tali, huan yeca injuanti techcualancaitaque.

⁹ Huajca quej ni niqinilhui masehualme ten nopa tali cati itztoyaj quej nopa borreojme: “¡Ayecmo nielis niamotamocuitahuijca yon ayecmo nimechtamacas! Sinta anquinequij anmiquise, huajca ximiquica. Sinta se quinequi amechmictis, huajca ma amechmicti. Huan cati noja mocahuase, ma motzontamiltica se ica seyoc.”

¹⁰ Teipa nijcuic nopa cuatopili cati itoca: “Itasojtacayo” huan cati quinextía notecneltijcayo huan nijtajcopostejqui. Ya nopa nijchijqui para nijsosolos nopa camanal sencahuali cati nijchijtoya ica nochi talme. ¹¹ Huajca quej nopa ipan nopa tonali tanqui nopa camanali cati nijchijtoya inihuaya. Huan nochi nopa masehualme cati teicneltzitzitzi techtachilijtoyaj huan quimachilijque para ica nopa tamanti cati nijchijqui quinnextiliyaya cati TOTECO quinequiyaya quinyolmelahuas.

¹² Huan niqinilhui nopa tayacanani: “Sinta amechpactía huajca techtaxtahuica ten cati anquiiatj nitequititoc. Huan sinta amo amechpactía, huajca san xijcahuaca.”

Huajca injuanti techpatiitaque huan techmacaque 30 plata tomi.

¹³ Huan TOTECO techilhui: “Xijcui nopa piltaxtahuiltzi cati mitzmacaque quej motaxtahuil huan xijmajahua ipan itiopa TOTECO para ma quicahuaca campa quiajocuij tomi.” Huajca nijcuic nopa piltomintzitzitzi huan nijcuamajajqui ipan itiopa TOTECO para quitalise campa quiajocuij tomi.

¹⁴ Teipa nijtajcopostejqui nopa seyoc cuatopili cati itoca: “Quinchijtoc San Se”. Huan quej nopa, niqixnexti para tali Judá huan tali Israel cati achtohuiya eltoyaj san se, ya motajcoitaque.

¹⁵ Huan TOTECO techilhui: “Xijchihuati sempa nopa teguit ten se tamocuitahuijqet pero ama ximochihua quej se tamocuitahuijqet cati amo cuali huan xijcui nopa tamanti cati yaya quihuicasquía. ¹⁶ Ya ni quinnextilia para nijtalis ipan ni tali se tamocuitahuijqet cati amo quintemos nopa

pillborregoitzitzi cati mocuapolojtoque, yon amo quinmocuitahuis cati on-tacajtoque, yon amo quinpajtis cati mometzpostectoque, huan yon amo quiquechpanos nopa borrego cati más siyajtoc. Pero quena, quicuas ini-nacayo nopa borregojme cati más tomahuaque. Huan hasta iniisti nojquiya quitzazana huan quicuas. ¹⁷ Fiero ipantis nopa tamocuitahuijquet cati amo teno ipati huan cati quintahuelcahua nopa borregojme. Ica imacheta TOTECO quimaquilis ipan iajcol huan iixteyol cati inejmat. Huan imax cati quinpalehujtosquía iborregojhua mocahuas senquisa huactoc. Huan iixteyol cati quintachilijtosquía mocahuas popoyotzi.”

12

TOTECO quimanahuis altepet Jerusalén

¹ Ya ni nopa camanali cati TOTECO techmacac ten taya ininpantis israelitame. Quena, TOTECO cati quipatajqui ilhuicacti, huan quitalili itzin-pehualtil ni taltipacti, huan quichijqui nopa tonaltzi cati eltoc ipan iyolo sesen masehuali quej ni, quijtohua: ² “Nijchihuas altepet Jerusalén para elis quej se caxit cati femitoc ica nocualancayo para nochí sequinoc talme. Elis quej temitoc ica se pajti cati tahuel cococ huan fiero. Huan quinchihuas ma moihiuintica huan ma huihuipicaca nochí cati ehuaní ipan talme cati quinequise quintehuisse tali Judá huan altepet Jerusalén. ³ Quena, ipan nopa tonali nijchihuas Jerusalén ma eli quej se hueyi tet cati tahuel etic. Huan masque nochí talme mosentilise para quitehuisse, nochí cati quinequise quiolinise, quintamitzonpechis.” ⁴ Quej ni quijtohua TOTECO: “Ipan nopa tonali, na niqintemajmatis nochí cahuyojme cati quinhualicaj soldados para quitehuisse altepet Jerusalén. Huan nopa soldados cati ipan tejcotoque ni quinchihuas ma tapoloca. Pero na niquinmocuitahuis nochí tali Judá ehuaní. Huan nochí cahuyojme cati ininpa tejcotoque para tatehuisse mocuepase popoyotziti.

⁵ “Huan nopa tayacanani ipan tali Judá quuitase ya ni huan quijtose: ‘Xiquitaca, Jerusalén ehuaní quipantiaj chichahualisti ipan TOTECO Cati Quinyacana Iilhuicac Ejcahua Ma Tatanitij pampa yaya cati ininTeco.’

⁶ “Ipan nopa tonali nijchihuas nopa tayacanani ipan tali Judá elise quej se ticuahuit cati quichihua ma tata miyac cuame ipan se cuatitamit. Itztose quej ticuahuit cati quichihua ma tata trigo pixquisti cati huactoc huan nopa tayacanani quintatise nochí talme cati mocahuañ nechca ten ininejmat hasta iniarraves. Pero ipan nopa tonali quema Judá ehuaní quintanise nopa talme, altepet Jerusalén sempa temis ica masehualme ica miyac paquilisti para itztose ipan inialtepe.

⁷ “Pero na, niamoTECO, achtohui niquinmaquixtis nopa masehualme cati itztoque ipan tali Judá huan teipa niquinmaquixtis cati ehuaní ipan altepet Jerusalén. Nijchihuas ya nopa para nopa masehualme cati ehuaní ipan altepet Jerusalén cati iteipan ixhuihua David amo quiselise más tatepanitacayot que ne sequinoc cati itztoque ipan sequinoc altepeme ipan tali Judá.

⁸ Ipan nopa tonali TOTECO quinmanahuis nopa masehualme cati itztoque ipan altepet Jerusalén. Huan yeca se cati amo quipiyas más chichahualisti ipan nopa tonali quipiyas chichahualisti quej Tanahuatijquet David. Huan cati hualahui ipan iteipan ixhuihua David elise quej Toteco Dios huan quej iilhuicac ejcahua TOTECO cati yahuij iniixpa nomasehualhua. ⁹ Huan ipan nopa tonali nimotalis para niqintzontamiltis nochí ten nochí talme cati hualase para quitehuisse altepet Jerusalén.

Moyolcuepase israelitame

¹⁰ “Huan ipan nopa tonali niquinmacas iteipan ixhuhua David huan nochi cati itztoque ipan Jerusalén nopa Tonaltzi cati quinpalehuis para moicnelise huan motatajtise. Huan inijuanti techitase na cati techtapohuilijque noelchiquicanahuiya huan techchoquilise quej chocaj tetajme quema miqui se conet cati iyojtzi. Huan motequipachose por na quej motequipachohuaj quema miqui se achtohui ejquet. ¹¹ Huan ipan nopa tonali, ipan altepet Jerusalén chocase huan mocuesose achi más huan amo quej panoc quema mijqui nopa cuali tanahuatijquet cati itoca Josías huejcajquiya nechca Hadad Rimón ipan nopa tamayamit cati itoca Meguido.

¹² “Nochi israelitame campa hueli ipan ni tali chocase miyac ica cati techchihuilijtoque. Sesen huejhueyi familia chocase iyoca. Tacame cati itztoque iteipan ixhuhua David yase iyoca. Huan inisihuahua nojquiya moyocaquixtise para mocuesose. ¹³ Huan chocase huan mocuesose iniselti nochi iteipan ixhuhua Leví. Huan iniselti mocuesose iteipan ixhuhua Simeí. Huan sihuame mocuesose iyoca ten inihuehujhua. ¹⁴ Huan chocase nochi ipan nochi sequinoc huejhueyi familias ten israelitame. Huan sesen hueyi familia chocas huan mocuosos iyoca por cati techchihuilijtoque. Huan sesen tacat chocas iyoca ten isihua.

13

¹ “Ipan nopa tonali nijtapos se ameli campa meya miyac at para nochi iteipan ixhuhua David huan nochi Jerusalén ehuaní. Huan nopa at quinpapacas ten inintajtacolhua huan ten nochi tamanti cati ica mochijtoque amo tapajpactique. ² Ipan nopa tonali niqintamiixpolihuiltis nochi teteyome huan taixcopincayome cati quinhueyichihuaj ipan nopa tali huan ayecmo quema quielnamiquise inintoca. Nojquiya niqintamiixpolihuiltis nopa tacajcayajca tajtolpanextiani huan nochi nopa ajacame ten Amocualtacat cati quinyacana.” Quej nopa quijtohua TOTECO Cati Quinyacana Iilhuicac Ejcahua Ma Tatanitij. ³ “Huan sinta noja motananas se huan camanaltis quej se tajtolpanextijquet, itata huan inana quihuisse: ‘Monequi timiquis pampa tiistacatitoc. Tiquijtohua para TOTECO mitzmacatoc mocamanal, pero yaya amo quijtojtoc.’ Huan ipan nopa talojtzi itatahua quicuaxahuase huan quimictise.

⁴ “Ipan nopa tonali nochi cati quiitase ipan tanextili quej tajtolpanextiani, pinahuase pampa quimatisa para amo melahuac huala ten na. Amo aqui mohueyimatis huan quijtos para yaya se tajtolpanextijquet pampa quimatis para amo cana. Huan ayecmo aqui quinequis tacajcayahuas huan moquentis nopa yoyomit cati fiero quej quemantica moquentiaj tajtolpanextiani cati melahuac ipan ni tonali. ⁵ Huan teipa se tacat cati quiselis camanali cati amo melahuac, quijtos: ‘Na amo nitajtolpanextijquet. Na se nimilchijquet. Hasta quema noja eliyaya nioquichpil, san nitequiti mila.’

⁶ “Huan se quihuis: ‘Huajca ¿para ten lijlipintic momax?’ Huan yaya quijtos: ‘Ya ni pampa techcocojque ipan ininchaj nohuampoyohua.’ ”

Quimaquilise itamocuitahujca TOTECO

⁷ Quej ni quijtohua TOTECO Cati Quinyacana Iilhuicac Ejcahua Ma Tatanitij: “Nijcahuilis ma quimictica nopa Tamocuitahujquet cati na nijtiantoc, yaya cati más nonechca huan cati san se quej na. Quena, nijchihuas ma quimictica nopa tamocuitahujquet huan nochi nopa borregoyme mosemanase. Huan na nijtananas nomax ica nopa masehualme cati itztoque quej pilborregojtitzti huan nojquiya taijyohuisse. ⁸ Ipan sesen eyi israelitame,

ome miquise huan setzi mocahuas ipan ni tali. ⁹ Huan nopa pilquentzi israelitame cati noja mocahuase ipan ni tali, niquinpanoltis ipan se hueyi tit para niquinyejyecos huan niquintapajpacchihuas hasta itztose quej plata huan oro cati senquisa cuali. Huan injuanti techtzajtzilise, huan na niquintacaquilis, huan niqijtos: ‘Ya ni nomasehuahua.’ Huan injuanti quijitose: ‘TOTECO yaya toDios tojuanti.’ ”

14

TOTECO mocuepas ipan taltipacti

¹ ¡Xijtachilica! Ya monechcahuía nopa tonali cati itoca itonal TOTECO quema yaya tetatzacuilitis. Huan tacame amechquixtilise cati amoaxca huan motajcoxelhuilise amoixpa. ² Quena, ipan nopa tonali TOTECO quichihuas para nochi talme ma mosentilica para quiyahualose altepet Jerusalén. Huan quitehuis huan moaxcatise nopa altepet. Calaquise ipan nochi calme para quicuisse nochi cati quinequise huan para quinchihuilise ten hueli nopa sihuame. Huan quinichtequise tajco nopa masehualme huan quinhuicase ilpitoque ipan seyoc tali. Huan nopa seyoc tajco mocahuase ipan altepet Jerusalén.

³ Pero teipa hualas TOTECO huan iseltitzi quintehuis inisoldados nochi talme. Quena, tatehuis quej tatehui ipan nopa tonali quema oncac hueyi tatehuilisti. ⁴ Ipan nopa tonali TOTECO hualas huan moquetzas ipan nopa tepet cati itoca Olivos cati mocahua iixmelac altepet Jerusalén ica campa hualquisa tonati. Huan nopa tepet Olivos motajcoitas huan mochihuas se hueyi tamayamit cati ajsis hasta campa hualquisa tonati huan hasta campa oncalaqui. Huan quej nopa, tajco ten nopa tepet mocahuas ica huejcapa, huan tajco mocahuas ica tatzinta. ⁵ Huan ipan nopa tamayamit amojuanti anmochololtise pampa nopa tamayamit cati mochijtoc ten noepe ajsis hasta Azal. Quena, ancholose quej huejcajquiya cholojque amohuejcapan tatahua quema mojmolini tali ipan nopa tonali quema quihuicayaya tequit Tanahuatijquet Uzías ipan tali Judá. Huan huajca hualas TOTECO, yaya cati noDios, inihuaya iilhuicac ejcagua huan inihuaya nochi itatzeltzeloltica masehualhua.

⁶ Huan ipan nopa tonali, tonati, metzti huan sitalime ayecmo taahuse huan amo oncas se taahuili cati chichahuac yon amo oncas tzintayohuilot.

⁷ Elis se tonali cati senquisa seyoc tamanti pampa amo quema oncac se tonali quej nopa. San TOTECO iseltitzi quimati quenicatza elis nopa tonali pampa amo oncas tzintayohuilot yon cati nelía tatanexti. Ica tiotac ipan nopa tonali quema quinamiqui pehuas para tayohuiyas, oncas taahuili quej elisquía tonaya. ⁸ Huan ipan nopa tonali quisas ipan altepet Jerusalén at cati temacas nemilisti cati yancuic. Huan tajco nopa at ajsis ipan nopa Hueyi At Mictoc huan nopa seyoc tajco ajsis ipan nopa Hueyi At cati itoca Mediterráneo. Huan ne seyoc tajco nopa at quisas sesen xihuit ipan nopa tonalme quema pano taseseya huan ipan nopa tonalme quema tatotoniya.

⁹ Huan TOTECO elis Tanahuatijquet ipan nochi taltipacti. Quena, ipan nopa tonali quimachilise para onca san setzi Dios, yaya cati TOTECO. Huan san yaya nochi quixmatise huan quihueyichihuase. ¹⁰ Nochi ni tali mopatas miyac quema chichahuac molinis tali. Mochihuas quej se hueyi tamayamit cati pehuas ipan altepet Geba ica huejcapa ten tali Judá huan ajsis hasta altepet Rimón cati mocahua ica tatzinta ten altepet Jerusalén. Huan altepet Jerusalén sempa motananas huan tejos más huejcapa pero mocahuas campa ama eltoc. Huan altepet Jerusalén sempa mohueyichihuas. Quipiyas

miyac masehualme ten nopa caltemit cati eliyaya iniaxca ininteipan ixhuihua Benjamín hasta nopa caltemit ipan esquina campa eltoya nopa achtohui caltemit. Teipa Jerusalén yas campa nopa Huejcapantic Cali Hananeel campa tachiyaj hasta campa quichihuaix xocomeca ayo nopa tanahuatijquet. ¹¹ Huan altepet Jerusalén temis ica masehualme huan ayecmo quema mososolos. Nochi nopa altepet huan imasehualhua itzose temachme.

¹² Huan ya ni elis nopa tatzacuiltli cati TOTECO quintitanis nochi nopa masehualme ten nopa talme cati hualajque para quitehuisse altepet Jerusalén: Inintacayohua nochi inimasehualhua nempolihuis huan lochonnis masque noja yoltoque huan moquetztoque ica iniicxihua. Huan lochonise iniixteyolhua huan ininenepil ipan inincamac.

¹³ Ipan nopa tonali TOTECO quititanis se hueyi majmajti huan nochi masehualme majmahuisse hasta amo quimatise taya quichihuase. Huan iniselti tacame quitananase inimax para momaquilise se ica seyoc. ¹⁴ Huan iixhuihua Judá nojquiya tatehuitij por altepet Jerusalén ica cati ehuanip ipan sequinoc talme. Huan quintamiichtequilise nopa masehualme nochi tamantí cati tachijchihuali ica oro, plata huan yoyomit. ¹⁵ Huan nopa cocolisti cati TOTECO quititanis ipan masehualme nojquiya quinajsis cahuayojme, mulas, camellos, burrojme huan nochi tamanti tapiyalme cati nopa tatehuaniani ten sequinoc talme quinpixtose campa mochihuase.

¹⁶ Huan nopa masehualme ten nopa talme cati quitehuijque Jerusalén huan cati noja mocahuase yoltoque, yase sesen xihuit ipan Jerusalén para quihueyichihuatij nopa Tanahuatijquet cati nozona itztoc. Huan nopa Tanahuatijquet elis TOTECO Cati Quinyacana Iilhuicac Ejcahua Ma Tatanitij. Quena, yase para quichihuatij nopa ilhuit ten nopa pilxajcaltzitzí. ¹⁷ Huan sinta sequij masehualme ten nopa sequinoc talme amo quinequise yase ipan altepet Jerusalén para quihueyichihuatij nopa Tanahuatijquet cati itztos TOTECO Cati Quinyacana Iilhuicac Ejcahua Ma Tatanitij, huajca TOTECO quichihuas para ma amo huetzi at ipan inintal. ¹⁸ Huan sinta tali Egipto ehuaní amo quinequise yase, huajca TOTECO quichihuas ma amo huetzi at ipan nopa tali. Huan inimasehualhua quiselise nopa cocolisti cati TOTECO quintitanis nopa sequinoc talme cati amo quinequij yase para quichihuatij nopa ilhuit ten pilxajcaltzitzí. ¹⁹ Nopa cocolisti elis nopa tatzacuiltli cati quiselise tali Egipto ehuaní huan nochi sequinoc talme cati amo yase para quichihuase nopa ilhuit ten pilxajcaltzitzí.

²⁰ Ipan nopa tonali quitalise se tajcuiloli ipan nochi tamantzitzí huan quijtos: “Ya ni taiyocatalili para TOTECO” pampa nochi tamanti elis taiyocatalili para TOTECO. Huan nochi tamanti quipiyase nopa tajcuiloli hasta ininteposcachalcahuayojme huan hasta nopa chachapalme ipan itiopa TOTECO cati ipan quisencahuaj tacualisti. Nochi elise taiyocatalilme quej nopa huejhueyi caxit cati eltoque nechca taixpamit. ²¹ Nochi tamantzitzí hasta cati ipan quisencahuaj tacualisti ipan altepet Jerusalén huan altepet Judá elise taiyocatalilme para TOTECO. Huan injuanti cati yahuij huan quihuicaj se tapiyali para quimictise, quicuisse nopa chachapalme cati quitequihuisse para ipan quicixtitise inacayo nopa tapiyali. Huan ipan nopa tonali ayecmo oncas masehualme cati fiero o cati tanamacaj ipan itiopa TOTECO, Yaya Cati Quinyacana Iilhuicac Ejcahua Ma Tatanitij.

Malaquías

TOTECO quinexti iteicnelijcayo ica nopa israelitame

¹ Ya ni nopa camanali cati TOTECO techmacac na, niMalaquías, huan techilhui ma niquinpohuili israelitame.

²⁻³ TOTECO quijjito: “Na nimechicnelía miyac.”

Pero anquijjtohuaj: “¿Quenicatza techicnelijjto?”

Huan TOTECO quijjtohua: “Nimechicnelía pampa nimechtapejpeni quema nijtapejpeni para niquicnelis amohuejcapan tata Jacob*, masque iicni, Esaú, cati achtohui tacatqui, amo nijnejqui. Huan pampa nijtahuelcajqui Esaú, nijchijqui nochi cuatitamit cati eliyaya iaxca ma eli quej huactoc tali. Huan nochi italhua niquinmactili tapiyalme cati mosisiniáj para nopona ma tacuaca.”

⁴ Huan huelis iixhuihua Esaú quijjtose: “Masque quitamisosolos total, sempa tijcualtalise.”

Pero TOTECO Cati Quinyacana Iilhuicac Ejcahua Ma Tatanitij quijjtos: “Sinta nopa edomitame sempa quicualtalise, na sempa nijsosolos. Huan masehualme quitocaxtise inintal: ‘Inintal masehualme cati quichihuaj cati fiero.’ Huan masehualme quintocaxtise iixhuihua Esaú: ‘Masehualme cati amo quipiyase tapojpolhuili ica TOTECO para nochipa.’ ⁵ Pero amo quej nopa nimechchihuilía, anisraelitame. Anquuitase nopa tasosololisti ica amoixteyol huan anquijjtose: ‘Tahuel hueyi TOTECO huan ihueyitilis quipano inepa total Israel.’”

TOTECO quintatelhui totajtzitzi

⁶ Huan TOTECO Cati Quinyacana Iilhuicac Ejcahua Ma Tatanitij quinilhuía nopa totajtzitzi: “Se conet quitepanita itata huan se tequipanojquet quimacasi iteco. Huajca sinta na nieli niamoTata, ¿para ten amo antechtepanitaj? Huan sinta na nieli niamoTECO, ¿para ten amo antechimacasis? Pero amojuaniti antotajtzitzi cati antechcualancaitaj.”

Huan nopa totajtzitzi quitatzintoquilíaj: “¿Quenicatza timitzhuejcamajcajtoque?”

⁷ Huan TOTECO amechnanquilía: “Nijmati antechhuejcamajcajtoque pampa antechmacaj tacajcualisti cati amo cuali ipan notaixpa.”

Huan antechtatzintoquilíaj: “¿Taya tacajcualisti cati amo cuali timitzmacatoque?”

Huan TOTECO amechilhuía: “Anquinextíaj antechcualancaitaj quema anteyolmelahuaj para ma amo techmacaca inintapiyalhua cati más cuali. Ma san techmacaca ten hueli tapiyali cati metzcototic, popoyotzi, o mococohua. ¿Anmoilhuíaj para ya nopa cuali para antechmacase? ⁸ Sinta anquitencahuaj se tapiyali para tacajcualisti cati metzcototic, o popoyotzi o cati mococohua, huajca nelía amo cuali anquichijtoque. Xijhuiquilia amotanahuatijca se nemacti quej nopa huan anquuitase sinta quipactis huan quiselis.” Quej ni quijjtohua TOTECO Cati Quinyacana Iilhuicac Ejcahua Ma Tatanitij.

⁹ “Huajca ximotatajtica huan techtajtanica ma nimechtasojta quema antechmacaj tacajcualisti cati fiero huan anquuitase sinta nimechtasojtas.

* 1:2-3 1:2-3 O Israel.

¿Para ten nimechtasojtas quema quej nopa amo cuali antechchihuillaj?” Quej ni quijtohua TOTECO Cati Quinyacana Iilhuicac Ejchahua Ma Tatanitij.

¹⁰ “¿Cuali elisquía sinta itzotzquía se totajtzi cati quitzacuasquía icalte nopa tiopamit para ayecmo quitatis nopa taixpamit huan ayecmo quiselis tacajchahualisti quej nopa! Nelía nicalantoc ica amojuanti huan yeca ayecmo nijselis amotacajchualis.” Quej ni quijtohua TOTECO Cati Quinyacana Iilhuicac Ejchahua Ma Tatanitij.

¹¹ “Pero ica sequinoc masehualme cati amo israelitame, quena, ipan campa hueli talme techhueyitepanitase masehualme cati amo israelitame. Ica ijnaloc huan hasta tiotac techhueyichihuase huan techmacase tacajchahualisti ten copali cati mijyotía ajhuiyac huan techmacase tacajchahualisti cati tapajpacti.” Quej ni quijtohua TOTECO Dios Cati Quinyacana Iilhuicac Ejchahua Ma Tatanitij.

¹² “Pero amojuanti miyac antechixpanoj. Amo anquipatiitaj notaixpa. San anquijtohuaj: ‘TOTECO itaixpa amo tapajpacti huan huélis tijmacase ten huéli tamanti cati ayecmo tijnequij.’ ¹³ Huan anquijtohuaj: ‘Nelía ohui tijtequipanose TOTECO huan ohui para tijchihuase cati yaya quinequi.’ Huan anquihuejcamajchahuj nopa tanahuatili para tacajchahualisti. Quej nopa antechcualancaitaj.” Quej ni quijtohua TOTECO Cati Quinyacana Iilhuicac Ejchahua Ma Tatanitij.

“Huan quema antechmacaj tacajchahualisti huan anquihualicaj se tapiyali cati anquichtectoque, o cati metzcotoc o cati mococohua, ¿anquiiitaj cuali nimechsellis? ¡Amo! ¡Amo nimechsellis! ¹⁴ Ma eli tatechihuáli nopa masehuali cati miyacapa quijtohua para techmacas se oquich borrego cati cuali huan teipa quipata ica seyoc cati cocoxquetzi. Quena, yaya tatechihuali, pampa na, niTanahuatijquet Cati Tahuél niHueyi huan quinamiqui para nochí masehualme ipan campa huéli talme ma techimacásica huan ma techtepanitaca.” Quej ni quijtohua TOTECO Cati Quinyacana Iilhuicac Ejchahua Ma Tatanitij.

2

Quintatelhui totajtzitzi ica cati amo cuali quichihuayayaj

¹⁻² “Nochi antotajtzitzi xijtaquilica cuali ni tanahuatili cati nimechilhúa: Sinta amo anquitacaquilise, huan amo anmotemacase ica nochí amoyolo para antechhueyitalise, huajca nijtitanis ipan amojuanti se hueyi tatza-cuiliti huan nimechtelchihuas. Quena, masque nijnequisquía nimechti-ochihuas, nimechtelchihuas pampa amo antechtepanitztoque. Nelía ya nimechtelchijtoc.” Quej ni quijtohua TOTECO Cati Quinyacana Iilhuicac Ejchahua Ma Tatanitij.

³ “Por nopa tajtacoli cati anquichijtoque, niqunquixtilis inintequit-icayo amoixhuihua para elise totajtzitzi. Huan nimechixpolos inincuit ni tapiyalme cati antechmacaj para tacajchahualisti. Huan amechhuicase nochí amojuanti para amechmajchahuase quej cati quihuicaj cuitat. ⁴ Huan huajca anquimatise para elqui na cati nimechymelajqui xijtoquilica nopa tanahuatili cati nijmacac amohuejcapan tata Leví.” Quej ni quijtohua TOTECO Cati Quinyacana Iilhuicac Ejchahua Ma Tatanitij.

⁵ “Nopa camanali cati huejcaiquiya nijchijqui inihuaya iixhuihua Leví elqui para ma quipiyaca nemilisti huan tasehuilisti. Huan niqunmacac para ma techtepanitaca huan ma techimacásica. Huan techimacasiyayaj huan noixpa moechcapanohuayayaj. ⁶ Inijuantu quinnextiliyayaj israeli-tame nochí nopa tanahuatilme cati xitahuac cati na niqunmacac. Amo quema quinstacahuayayaj, yon amo quema quincajcayahuayayaj. Nochipa

nejnenque xitahuac noixpa huan quipixque tasehuilisti ica na. Huan quichi-jqui para miyac masehualme ma quicahuaca inintajtacol. ⁷ Quinamiqui para totajtztzi ma tenexilica quenicatza techixmatise na, niamoTECO. Monequi quinmachtise nopa tanahuatilme cati nimechmacatoc pampa se totajtzi eli notayolmelajca, niamoTECO Cati Niquinyacana Noilhuicac Ejcahua Ma Tatanitij.

⁸ “Pero ama, antotajtztzi, anquicajteytoque noojhui, niamoTECO. Huan ica amotamachtli, miyac anquinchihualtijoque ma motepotanica huan ma huetzica ipan tajtacoli. Quena, miyac anquixpanotoque nopa camanali cati nijchijqui ihuaya amohuejcapan tata Levi.” Quej ni quijtohua TOTECO Cati Quinyacana Iilhuicac Ejcahua Ma Tatanitij.

⁹ “Huajca yeca iniixpa nopa masehualme na nimechehcapanalijtoc huan nijchijtoc para injuanti ma amechijiyaca quej se tamanti cati amo cuali. Ya ni nijchihua pampa amo anquitoquilijtoque noojhui. San anquitapepenijtoque catijqui notanahuatilhua anquinequij anquineltocase. Huan cati amo anquinequij anquitoquilise, san anquixpanoj.” Quej ni quijtohua TOTECO Dios Cati Quinyacana Iilhuicac Ejcahua Ma Tatanitij.

Malaquías quinnojtza israelitame

¹⁰ Nochi tojuanti tijpiyaj san se totata. Huan setzi Toteco Dios techchijchijqui nochi tojuanti. Huajca ¿para ten timochihuilij miyac tamanti cati amo cuali huan tiquixpanoj nopa camanali cati TOTECO quichijqui ica tohuejcapan tatahua? ¹¹ Ipan tali Israel, israelitame quichijtoque tajtacoli cati amo cuali iixpa TOTECO. Quena, nojquiya ipan tali Judá huan hasta ipan altepet Jerusalén, israelitame tahuel taixpanotoque. Quena, israelitame ipan tali Judá quichijtoque amo tapajpacti itiopa TOTECO cati tatzejzeloltic huan cati yaya tahuel quicnelía. Pampa tacame nozona mosihuajtijoque inihuaya sihuame cati quinhueyichihuj taixcopincayome huan teteyome. ¹² TOTECO ma quitzontamilti ten hueli tacat cati itztoc ipan total cati quichihua ya nopa huan ayecmo itztos tohuaya tiisraelitame. Quena, ma quitzontamilti masque se totajtzi cati quitencahua tacajcualisti iixpa TOTECO Cati Quinyacana Iilhuicac Ejcahua Ma Tatanitij.

¹³ Nojquiya anquichihuj para TOTECO itaixpa ma xoloni ica amoixayo. Anchocaj huan antahuejchihuj pampa TOTECO ayecmo quichihuilía cuenta nopa tacajcualisti cati anquimacaj, yon ayecmo amechselía ica paquilisti. ¹⁴ Anmotatzintoquilij: “¿Para ten TOTECO techtahuelcajtoc?” Na nimechilhuis para ten. Eltoc pampa TOTECO quiitac quema anquina-jtejqe amosihuajhua cati anmosencajtoyaj inihuaya ica tajcuiloli quema antelpocatixtoyaj, yeca yaya amechtelhuía. Quena, masque sesen ten nopa sihuame eliyayaj temachme amohuaya, anquintahuelcajqe. ¹⁵ TOTECO amechsejcotili sesen ten amojuanti ica amosihua huan amechchijqui san se amotonal. Huan amechchijqui quej setzi pampa quinequiyaya xiquinpiyaca coneme cati tatzejzeloltique para ya. Huajca nimechilhuis sesen ten amojuanti, para monequi xijmocuitahuica amoyolo huan ipan amoyolo amo xijnequica cati amo cuali. Sesen ten amojuanti ma quitepanita isihua cati mocuili quema eliyaya telpoca tacat huan ma mochihua temachti ihuaya.

¹⁶ Pampa TOTECO Dios ten tiisraelitame quijtohua: “Amo nijnequi niquitas quema se tacat huan isihua mososolohuj, o se quicahua seyoc. Amo nijnequi niquitas quema se tacat mocuili isihua huan teipa quixpano huan yahui ica seyoc. Yeca monequi ximomocuitahuica ipan amotalnamiquilis para ayecmo ximosihuacahuaca.” Quej ni quijtohua TOTECO Cati Quinyacana Iilhuicac Ejcahua Ma Tatanitij.

Nopa tonal quema TOTECO tetajtolsencahuas

¹⁷ Anquichijtoque para TOTECO ma siyahui ica miyac amocamanal.

Pero antatzintocaj: “¿Ica taya tamanti tijchihualtijtoque ma siyahui TOTECO?”

Anquisiyahuiltijtoque pampa anmoilhuiaj amo quichihua cati xitahuac huan amo quema quintatzacuilitia amo cuajcualme. Anquijtohuaj para TOTECO más quipactiaj cati tajtacolchihua. Antatzintocaj: “¿Canque itzotc Toteco Dios cati quichihua cati xitahuac?”

3

Monechahuia nopa tonali quema TOTECO tetatzacuilitis

¹ “¡Xijtachelica! Na nijtitanis notayolmelajca ma yahui noixpa para quicualtalis noojhui. Huan teipa ajstitihuetzis amohueyiteco cati anquitemohuaj. Ipan se talojtzi ajstitihuetzis ipan Itiopa nopa tayolmelajquet ten nopa camanal sencahualí cati nijchijqui amohuaya. Yaya itzotc cati anquichiyaj huan tahuel anquinequij ma huala.” Quej ni quijtohua TOTECO Cati Quinyacana Iilhuicac Ejcahua Ma Tatanitij.

² “Pero ¿ajquiya huelis quijyohuis huan mocahuas para itzots ipan nopa tonali quema yaya hualas? ¿Ajquiya huelis moquetzas para quixnamiquis quema yaya monextis? Yaya elis quej se tit cati nelia temajmati cati quiatilis ten hueli teposti. Elis quej se xapo cati más chichahuac cati hueli quichipahualtia ten hueli yoyomit cati soquiyo. ³ Yaya mosehuis quej se juez para tatajtolsencahuas. Huan quej se teposchijquet quitapajpacchihua nopa plata ipan tit, yaya quintapajpacchihuas nochi levitame. Quena, nochi totajtzitzi quinyeyectis quej quieyeyectiaj oro o plata ipan tit huan quinextis inintajtacolhua. Huan teipa nochi totajtzitzi elise notequipojcahua ni-amoteCO huan nemise xitahuac noixpa huan techmacase tacajcahualisti cati cuali quej quinamiqui. ⁴ Huan huajca na ni-amoteCO sempa nijcualitas nopa tacajcahualisti cati anquihualicase anisraelitame cati anitztoque ipan tali Judá huan ipan altepet Jerusalén. Sempa elis nochi quej eliyaya huejcaquiya.

⁵ “Ipan nopa tonali na nihualas para niquintajtolsencahuas nochi israelitame. Huan nimantzi niquintelhuis huan niquintatzacuilitis tenahualhuiani huan cati momecatiaj huan nochi cati istacatij quema tatestigojquetzaj huan cati quinichtequilíaj inintequipojcahua inintaxtahuil. Niquintatzacuilitis cati quintajyohuiltiaj cahual sihuame huan icnotzitzí, huan cati amo quichihua ten cuali ica seyoc tali ehuan huan cati amo techimacasij na.” Quej ni quijtohua TOTECO Cati Quinyacana Iilhuicac Ejcahua Ma Tatanitij

Diezmos huan ofrendas

⁶ “Ni-amoteCO, amo nimoyolpata, yeca ayemo nimechtzontamilitia anisraelitame*.” ⁷ Anquitahuelcajtoque notanahuatilhua hasta ipan nopa tonali quema itztoyaj amohuejcapan tatahua. Pero noja hueli anmocuepase ica na. Quena, xihualaca campa na huan na sempa nimocuepas campa amojuanti huan nimechtzopojpolhuis. Pero anquijtohuaj: ‘Amo quema timohuejcatilijtoque ten ta.’

⁸ “Pero nimechtatzintocuilía: ‘¿Se tacat quitachtequilisquía Dios?’

“Huan anquijtohuaj: ‘Amo, amo aqui quichihuasquía.’

“Pero amojuanti, quena, antechtachtequilijtoque.

“Huan anquijtohuaj: ‘¿Ipan taya tamanti timitztachtequilijtoque?’

* 3:6 O anixhuihua Jacob.

“Antechtachtequilijtoque ipan nopa diezmos huan ipan nopa ofrendas cati quinamiqui antechmacasquía. ⁹ Nochi amojuanti ipan ni tali antechtachtequilijtoque huan yeca nimechtelchijtoc. ¹⁰ Huajca xijhualicaca nochi diezmos campa taajocuij tiopan calijtic para sempa oncas nopa tacualisti cati monequi ipan nochaj. Quej nopa xijchihuaca huan techyeyecoca huan anquuitase para nijtapos nopa ventanas ipan ilhuicacti huan nimechtitanilis miyac tatiochihualisti hasta mocahuas.” Quej ni quuijtohua TOTECO Cati Quinyacana Iilhuicac Ejcahua Ma Tatanitij.

¹¹ “Quena, na nijmocuitahuis amotatoc para nopa oculilime ma ayecmo quicuaca, huan nijchihuas para amoxocomecamil ayecmo quitepehuas itajca quema ayemo icsitoc.” Quej ni quuijtohua TOTECO Cati Quinyacana Iilhuicac Ejcahua Ma Tatanitij. ¹² “Huan masehualme ipan nochi sequinoc talme amechtocaxtise antatiochihualme pampa nochi anquipyase ipan amotal.” Quej ni quuijtohua TOTECO Cati Quinyacana Iilhuicac Ejcahua Ma Tatanitij.

TOTECO quinicnelia imasehualhua

¹³ “Anquuijtojtoque ten na miyac camanali cati amo cuali huan cati techyolcocojtoc”, quuijtohua TOTECO Cati Quinyacana Iilhuicac Ejcahua Ma Tatanitij.

Pero anquuijtohuaj: “¿Taya camanali tiquijtojtoque?”

¹⁴ “Anquuijtojtoque: ‘San tapic para tijtequipanose Toteco Dios. Amo teno techpalehuía para tijchijtinemise nochi cati quuijtohua itanahuatilhua. ¿Para ten ma timocuesojtinemica ica totajtacolhua iixpa TOTECO Cati Quinyacana Iilhuicac Ejcahua Ma Tatanitij? ¹⁵ Tiquitaj para masehualme cati mohueyimatij, paquij, huan cati amo cuali ininemilis, quisaj cuali. Quiyeyecojtoque TOTECO, huan yaya amo quintitanilijtoc yon se tatzacuilti.’ Quej nopa anquuijtojtoque.”

TOTECO quintasojtas imasehualhua

¹⁶ Huan quema nopa masehualme cati quimacasiyayaj huan quicneliyayaj TOTECO quicajque nochi ya ni, mocamanalhuijque huan mopohuilijque cati cuali TOTECO quinchihuilijtoya. Huan TOTECO quintacaquili huan quijcuilo cati quijtojque ipan se amatapohuali nepa iixpa ipan ilhuicacti campa quipiya nochi inintoca nopa masehualme cati quimacasiy huan moyolilhuij ten ya.

¹⁷ Huan TOTECO Cati Quinyacana Iilhuicac Ejcahua Ma Tatanitij quuijto: “Inijuanti elise nomasehualhua ipan nopa tonali quema niquintapejpenis ajquiya injuanti más niquinicnelia. Huan ipan nopa tonali niquintapojpolhuhis cati techicneliaj huan amo niquintatzacuiltis, quej se tacat quitapojpolhuía icone cati quitepanita huan quichihua nochi cati quinahuatía.

¹⁸ Huajca quena, ipan nopa tonali quema nitetajtolsencahuas, anquuitase taya tamanti cati cuali niqunchihuilis masehualme cati quipiyaj ininemilis xitahuac noixpa. Huan anquuitase taya tamanti amo cuali niqunchihuilis cati amo cuali ininemilis. Huan anquimatise para amo san se tamanti quipantise masehualme cati techhueyitepanitaj ica masehualme cati amo techtepanitaj.”

4

Monechahuía nopa tonali quema TOTECO tetajtolsencahuas

¹ “Monechahuía nopa tonali quema nitetajtolsencahuas. Nopa tonal elis quej se tit cati nelia totonic. Huan nopa tonali nochi cati mohueyimatij huan nochi cati amo cuali ininemilis tatase quej sacat cati huactoc. Quena, elis

quej tamitatas se hueyi cuahuit hasta yon inelhuayo amo mocahuas.” Quej ni quijtohua TOTECO Cati Quinyacana Iilhuicac Ejcahua Ma Tatanitij.

² “Pero para amjuanti cati antechimacasij huan antechicnelíaj, monextis se cati elis quej se tonati. Huan campa ajsis itaahuil nochi elis xitahuac huan quichicahuas nochi cati monequi. Huan amechtojtomas para anhuitontine-mise ica paquilisti quej pilbecerrojtzitzi cati quinquixtijtoque ten campa quintzactoyaj. ³ Huan ancuajcualme anmoquetzase ininpa amocujcualme pampa amo cuali masehualme elise san quej cuajnexti amoicxita.” Quej ni quijtohua TOTECO Cati Quinyacana Iilhuicac Ejcahua Ma Tatanitij.

⁴ “Huajca xiquelnamiyuica para xijtamichihuaca nochi nopa tanahu-atilme huan leyes cati nijmacac notequipanojca Moisés huejcajquiya ipan nopa tepet Horeb para ma amechmaca nochi anisraelitame.

Elías hualas quema ayemo tetajtolsencahua

⁵ “¡Xiquitaca! Na nijtitanis nopa tajtolpanextijquet Elías quema ayemo ajsi nopa tonali ten na, niamoTECO. Quema ajsis nopa tonal, elis nelía hueyi huan temajmati pampa nitetajtolsencahuas huan tahuel nitetatzacuiltis.

⁶ Pero quema ayemo ajsi nopa tonal, ajsis Elías huan quichihuas para tetajme ma moyolcuepaca ten inintajtacolhua huan moyoltalise ica inincone-hua. Huan quichihuas para telpocame ma moyolcuepaca huan ma moyoltalica ica inintatahua. Pampa sinta amo moyolcuepase masehualme, na ni-hualas huan nijtelchihuas inintal huan nijtamisosolos.” Quej ni quijtohua TOTECO.

Icamanal Toteco Cati Quiijcuilo Mateo

Ihuejcapan tatahua Jesucristo

(Lc. 3:23-38)

- ¹ Ni amat quipiya inintoca ihuejcapan tatahua Jesucristo. Yaya se iteipan ixhui David huan se iteipan ixhui Abraham.
- ² Abraham cati itztoya huejcajquiya quipixqui se icone cati quitocaxti Isaac. Huan Isaac quipixqui se icone cati quitocaxti Jacob. Huan Jacob quipixqui majtacti huan ome iconehua huan se ten ini-juanti elqui itoca Judá.
- ³ Judá huan nopa sihuat Tamar quinpixque ome inincone huan quintocaxtalijque Fares huan Zara. Huan Fares quipixqui se icone cati quitocaxti Esrom. Esrom quipixqui se icone cati quitocaxti Aram.
- ⁴ Aram quipixqui se icone cati quitocaxti Aminadab. Huan Aminadab quipixqui se icone cati quitocaxti Naasón. Naasón quipixqui se icone cati quitocaxti Salmón.
- ⁵ Huan Salmón huan isihua Rahab quipixque se inincone cati quitocaxtijque Booz. Booz huan isihua Rut quipixque se inincone cati quitocaxtijque Obed. Obed quipixqui se icone cati quitocaxti Isaí.
- ⁶ Huan Isaí quipixqui se icone cati quitocaxti David cati moscalti huan elqui nopa hueyi tanahuatijquet. Huan nopa hueyi tanahuatijquet David quipixqui se icone cati quitocaxti Salomón. Huan inana Salomón achtohui eltoya isihua Urías.
- ⁷ Huan Salomón quipixqui se icone cati quitocaxti Roboam. Roboam quipixqui se icone cati quitocaxti Abías. Huan Abías quipixqui se icone cati quitocaxti Asa.
- ⁸ Asa quipixqui se icone cati quitocaxti Josafat. Huan Josafat quipixqui se icone cati quitocaxti Joram. Joram quipixqui se icone cati quitocaxti Uzías.
- ⁹ Huan Uzías quipixqui se icone cati quitocaxti Jotam. Jotam quipixqui se icone cati quitocaxti Acaz. Acaz quipixqui se icone cati quitocaxti Ezequías.
- ¹⁰ Huan Ezequías quipixqui se icone cati quitocaxti Manasés. Manasés quipixqui se icone cati quitocaxti Amón. Amón quipixqui se icone cati quitocaxti Josías.
- ¹¹ Huan Josías quipixqui se icone cati quitocaxti Jeconías, huan nojquiya quipixqui más iconehua. Josías huan iconehua itztoyaj ipan nopa tonali quema hualajque tali Babilonia ehuan huan quinhuicaque nechca nochi israelitame ilpitoque para quintequipanotij ipan inintal.
- ¹² Huan teipa nopa ipan tali Babilonia Jeconías quipixqui se icone cati quitocaxti Salatiel. Huan Salatiel quipixqui se icone cati quitocaxti Zorobabel.
- ¹³ Huan Zorobabel quipixqui se icone cati quitocaxti Abiud. Abiud quipixqui se icone cati quitocaxti Eliaquim. Eliaquim quipixqui se icone cati quitocaxti Azor.

¹⁴ Huan Azor quipixqui se icone cati quitocaxti Sadoc.

Sadoc quipixqui se icone cati quitocaxti Aquim.

Aquim quipixqui se icone cati quitocaxti Eliud.

¹⁵ Huan Eliud quipixqui se icone cati quitocaxti Eleazar.

Eleazar quipixqui se icone cati quitocaxti Matán.

Matán quipixqui se icone cati quitocaxti Jacob.

¹⁶ Huan Jacob quipixqui se icone cati quitocaxti José cati moscalti huan mosihuahti ihuaya María.

Huan María elqui inana Jesús.

Huan Jesús elqui nopa Cristo cati Toteco Dios quititanqui ipan ni taltipacti.

¹⁷ Huajca majtacti huan nahui huejhueyi tatame quinpixque inincone-hua ten quema Abraham itztoya ipan taltipacti hasta quema Tanahuati-jquet David itztoya. Huan seyoc majtacti huan nahui huejhueyi tatame quinpixque inincone-hua ten quema David itztoya ipan taltipacti hasta quinhuaicaque nechca nochi israelitame ipan tali Babilonia. Huan seyoc majtacti huan nahui huejhueyi tatame quinpixque inincone-hua ten quema quinhuaicaque israelitame ipan tali Babilonia hasta quema tacatqui Cristo cati Toteco Dios quititanqui ipan taltipacti.

Quenicatza tacatqui Jesucristo

(Lc. 2:1-7)

¹⁸ Quej ni panoc quema tacatqui Jesucristo. Inana Jesús quitocaxtiyayaj María huan ya quijtantoya José huan quisencajtoyaj ipan amat para moculis quej momatque quichihua. Huan ipan nopa xihuit quema polihuiyaya para motoquilise, José quimatqui para María ya tanemiltiyaya, pero elqui ichichualis Itonal Toteco cati quichijqui ma conecui. ¹⁹ Huan José cati ya eltoya ihuehue María ipan amat, eliyaya se tacat xitahuac, huan amo quinequiyaya quipinahuatlis iniixpa masehualme, huajca moilhui más cuali moamasosolos ihuaya María ixtacatzi huan mocahuase. ²⁰ Huan quema José moilhuiyaya quichihuas ni tamanti, quiiac ipan se temicti se iilhuicac ejca Toteco cati quiilhui: “Xitacaqui José, ta tiiteipan ixhui David cati huejcajquiya. Amo ximajmahui para timoculis María, mosihua, pampa nopa conet cati quinemiltia ijtico, pejqui ica ichichualis Itonal Toteco. ²¹ Huan María quitacatiltis se oquichpil huan tijtocaxtis: ‘Jesús’ cati quijtosnequi: ‘Temaquixtijquet’, pampa quinmaquixtis imasehualhua ten inintajtacolhua.”

²² Huajca nochi ya ni panoc para ma tami cati Toteco Dios techilhui ica tajtolpanextijquet huejcajquiya para teipa panos. Yaya techilhui:

²³ “Xiquita se cuali ichpocat cati amo quema itztoya ihuaya se tacat tane-miltis,

huan quitacatiltis se oquichpil huan quitocaxtis: Emanuel.

Emanuel quijtosnequi: ‘Toteco itztoc tohuaya.’”

²⁴ Huajca quema José isac, quichijqui senquisa cati iilhuicac ejca Toteco quiilhuijtoya. Quicuito María quej isihua, ²⁵ huan José amo quinechcahui hasta tacatqui icone. Huan María quitacatilti iachtohui cone, se piloquich-piltzi. Huan José quitocaxti Jesús.

2

Hualajque nopa tacame cati momachtijque sitalime

¹ Huan Jesús tacatqui ipan altepet Belén ipan estado Judea ipan nopa tonali quema Tanahuatijquet Herodes * quipixqui tequiticayot ipan nopa tali. Huan ipan nopa tonali ajsicoj ipan altepet Jerusalén sequij talnamijca tacame cati momachtijque sitalime huan hualajque ten campa quisa tonati.

² Huan quema ajsicoj, tatzintocaque:

—¿Canque itztoc yaya cati tacatqui para elis inintanahuatijca israelitame? Hasta nepa campa quisa tonati, tiquitztoque isital cati pejqui cahuani quema tacatqui. Huan tihualajtoque tihueyimatise.

³ Huan quema Tanahuatijquet Herodes quicajqui cati nopa tacame quijtohuayayaj, momajmati. Huan nojquiya momajmatijque nochi masehualme ten altepet Jerusalén. ⁴ Huajca Herodes quinsentili nochi tayacanca totajtzitzi, huan tamachtiani ten itanahuatil Moisés, huan quintatzintocuili canque tacatisquía nopa Cristo cati ijcuiljtoc para Toteco Dios quititanisquía ipan taltipacti. ⁵ Huan injuanti quinanquiliijque:

—Cristo tacatis ipan altepet Belén nica ipan estado Judea pampa quej nopa quijjcuilo itajtolpanextijca Toteco huejcajquiya campa quijtohua:

⁶ Masque nopa pilaltepetzi Belén amo más hueyi quej sequinoc altepeme ipan tali Judá,

se hueyi tanahuatijquet tacatis nepa.

Yaya quinnahuatis noisraelita masehualhua.

Quej nopa quijjcuilo nopa tajtolpanextijquet.

⁷ Huajca Herodes ixtacatz quinnotzqui nopa tacame cati momachtíaj sitalime. Huan quintatzintocuili miyac ipan taya tonali pejqui nesi nopa yancuic sitali. ⁸ Teipa Herodes quintitanqui ma yaca ipan pilaltepetzi Belén huan quinilhui:

—Xiyaca Belén, xijtemotij nopa piloquichpiltzi, huan quema anquipan-tise, techilhuiquij canque itztoc para na nojquiya niyas nijhueyimatiti.

⁹ Teipa quema nopa tacame ya quicactoyaj icamanal Tanahuatijquet Herodes, quistejque Jerusalén. Huan nimantzi sempa quiiataque nopa sitali cati achtohui quitztoyaj nepa campa quisa tonati. Huan quinyacantiyajqui hasta moquetzato itzompac nopa cali campa itztoya nopa piloquichpiltzi.

¹⁰ Huan quiiataque para moquetzqui nopa sitali huan nelia pajque. ¹¹ Huajca calaquitoj ipan nopa cali huan quiiataque nopa piloquichpiltzi ihuaya inana cati itoca María. Huan motancuaguetzque huan moixtapachojque iixpa huan quihueyitalijque nopa conet. Huan quitapojque cati nelpajpatiyo quihuiquiliyayaj. Huan quimacaque oro, cuali copali huan se taajhuiyacayot cati itoca mirra cati tahuel patiyó. ¹² Huan Toteco Dios quinyolmelajqui nopa tacame ipan temicti para ma amo mocuepaca para quihuitij Tanahuatijquet Herodes canque itztoya nopa piloquichpiltzi. Huajca injuanti yajque ipan seyoc ojti huan mocuetque inintal.

Herodes quinnicti miyac coneme san tapic

¹³ Quema ya quistoyaj nopa tacame cati momachtíaj sitalime, José quiiatc ipan temicti se iilhuicac ejca Toteco cati monexti iixpa huan quihui: “Xim-ijquehua huan xijhuica nopa piloquichpiltzi ihuaya inana huan xicholoca huejca hasta tali Egipto. Ximocahuaca nepa hasta nimitzilhuis pampa nopa Tanahuatijquet Herodes quitemos nopa piloquichpiltzi para quimictis.”

¹⁴ Huajca José mijquejqui huan ipan nopa tayohua quihucac nopa piloquichpiltzi ihuaya inana huan cholotejque tajco yohual para yase Egipto.

¹⁵ Huan injuanti mocajque nepa hasta mijqui Tanahuatijquet Herodes.

* 2:1 2:1 Herodes el Grande.

Toteco quinilhuytoya ma yaca tali Egipto para ma tamis cati itajtolpanextijca Toteco quijto huejcajquiya campa quijto: “Na nijnotzas Nocone ma quisas tali Egipto.”

¹⁶ Teipa Tanahuatijquet Herodes momacac cuenta para nopa tacame cati momachtiaj sitalime san quicajcayajtoyaj pampa amo mocuetque para quiyolmelahuase canque itztoya nopa conet. Huajca nelia cualanqui, huan quintitanqui soldados ma yaca altepet Belén huan pilaltepetzitzi nejnechca para ma quinmictica nochi piloquichpiltzitzi cati ayemo quipiyayayaj ome xihuit. Ya ni quichijqui pampa quinequiyaya quimictis Jesús, pampa nopa tacame quilhuytoyaj ayemo quipiyayaya ome xihuit para nestoya nopa yancuic sitali. ¹⁷ Huajca nochi ipan Belén motequipachojque, huan quej nopa panoc senquisa quej nopa tajtolpanextijquet Jeremías quijcuilo huejcajquiya, huan quej ni quijto:

¹⁸ “Nepa ipan altepet Ramá o Belén nochi quicaquise cati chocase huan tahuejchihuase.

Israelita tename chocase pampa quinmictilise ininconeua. Huan amo aqui huelis quinyoltalis pampa ya mictose.”

¹⁹ Teipa quema ya mictoya Tanahuatijquet Herodes, nepa ipan tali Egipto, José quitac ipan temicti se iilhuicac eja Toteco cati quilhui: ²⁰ “Ximijquehua huan xijhuica nopa piloquichpiltzi ihuaya inana huan sempa xiyaca tali Israel, pampa ya mijque inijuanti cati quinequiyayaj quimictise.”

²¹ Huajca José mijquejqui huan quihuicac Jesús ihuaya inana, huan sempa mocuetque tali Israel. ²² Pero José quicajqui para ipan estado Judea tanahuatiyaya Herodes Arquelaos, icone Herodes, huajca majmajqui ajsiti nepa. Huan Toteco Dios quilhui ipan temicti para ma yaca estado Galilea, huajca yajque nepa. ²³ Huan ajsitoy ipan se altepet cati itoca Nazaret ipan estado Galilea, huan nepa mocajque. Quej nopa tanqui cati nopa tajtolpanextiani huejcajquiya quijtojque ten Cristo: “Masehualme quitocaxtise se Nazaret ejquet.”

3

Juan cati tecuaalti tacamanalhui ipan huactoc tali (Mr. 1:1-8; Lc. 3:1-9, 15-17; Jn. 1:19-28)

¹ Ipan nopa tonali Juan cati tecuaaltiyaya ajsico ipan nopa huactoc tali campa amo teno eli nepa ipan estado Judea. Huan pejqui tacamanalhuía, ² huan quinilhuía masehualme: “Ximoyolpataca huan xijcahuaca cati amo cuali anquichihuaaj para huelis ancalaquise campa tanahuatia Toteco cati itztoc ilhuicac pampa amechnechahuía ama huan amechnotza xicalaquica.”

³ Juan eliyaya nopa tacat cati nopa tajtolpanextijquet Isaías huejcajquiya quijcuilo para hualasquía. Isaías quijcuilo ya ni: “Masehualme quicaquise se cati camanaltis chicahuac ipan nopa huactoc tali campa amo teno eli.

Huan quijtos: ‘Xijcualtica amoyolo pampa hualas Tohueyiteco. Xijxitaahuaca amonemilis quej anquisencahuaj ojti para hualas se hueyi tequichijquet.’ ”

⁴ Juan moquentiyaya iyoyo cati tachijchihuali ica itzoncal camello, huan quipiyayaya itzinquechilpica ten cuetaxti. Huan quincuayaya pilchapoltziti huan necti cati quipantiyaya campa nentinemiyaya campa amo onca calme. ⁵ Huan yahuiyayaj campa Juan miyac masehualme cati quisayayaj altepet Jerusalén huan sequinoc altepeme ipan estado Judea huan miyac cati

ehuayayaj nechca hueyat Jordán. ⁶ Huan nochi quipohuiliyayaj Toteco Dios inintajtacolhua, huan huajca Juan quincuaaltiyaya ipan hueyat Jordán.

⁷ Huan quema Juan quinitac para nojquiya ajsiyayaj miyac fariseos huan saduceos cati quinequiyayaj mocuaaltise, quinilhui: “Anitztoque quej ancohume. ¿Ajquiya amechilhujitoc para Toteco Dios amo amechtazacuiltis teipa sinta anmocuaaltise? ¡Amo quej nopa! ⁸ Nimechilhúa monequi anquichihuase cati cuali para ma nesi tanemijya para anmoyolpatatoque huan anquicajteitoque amoojhui cati fiero. ⁹ Amo ximoilhuica para ancuajcualme pampa anitztoque aniteipan ixhuhua Abraham ten huejcajquiya itztoya. Nimechilhúa Toteco huelis quichihuas ni teme cati eltoc nica para ma mocuepaca iteipan ixhuhua Abraham sinta yaya quinequis. ¹⁰ Amojuanti anitztoque quej cuame cati amo taquij, huajca ximotachilica pampa Toteco ya quicualtalijtoc ihacha para amechtazontequis huan amechtatis quej aneltoquíaj cuame.

¹¹ “Quena, nelía niquincuaaltía ica at nochi cati ya moyolpatatoque huan quicajteitoque tajtacoli. Pero teipa seyoc hualas cati más quipiyas tequiticayot huan amo quej na. Na amo nicaxilía para nielis itequipanojca yon para nijquixtilis itecac. Yaya quinmacas sequij masehualme Itonal Toteco huan sequinoc quintatzacuiltis ica tit. ¹² Yaya huala mocualtalijtoc para quiniyocatalis masehualme quej se quichihua quema quitequihúa itajacapehuilol para quiyeyectis trigo. Huan cati itztoque quej nopa trigo cati cuali, quinajocuis. Huan nopa masehualme cati itztoque quej nopa tasoli, quintatis ica se tit cati amo quema sehuis.”

Juan quincuaalti Jesús
(Mr. 1:9-11; Lc. 3:21-22)

¹³ Teipa Jesús quisqui ipan estado Galilea huan ajsico hueyat Jordán campa itztoya Juan para ma quicuaalti. ¹⁴ Pero Juan amo quinequiyaya quicuaaltis Jesús, huan quiilhui:

—Más quinamiqui ta techcuaaltisquía, huajca ¿para ten tijnequi ma nimtzcuaalti?

¹⁵ Huan Jesús quiilhui:

—Para amantzi, techcuaalti na pampa monequi tijchihuase nochi cati xitahuac senquisa quej Toteco Dios quinequi.

Huajca Juan quicaquili icamanal Jesús huan quicuaalti. ¹⁶ Huan quema Jesús ya mocuaaltijtoya huan quisayaya ten nopa at, nimantzi tapojqui ilhuicacti huan quiitac Itonal Toteco temotihualayaya quej se paloma huan ajsic ipan ya. ¹⁷ Huan Toteco Dios camanaltic ten ilhuicac huan quijto: “Ya ni Nocone cati niquicnelía. Nijpiya miyac paquili ica cati quichihua.”

4

Amocualtacat quinejqui quiyoltlanas Jesús
(Mr. 1:12-13; Lc. 4:1-13)

¹ Teipa Itonal Toteco quihucac Jesús campa nopa huactoc tali campa amo teno eli para Amocualtacat ma quiyoltlana Jesús ma tajtacolchihua.

² Huan Jesús mosajqui cuarenta tonali, huan teipa nelía mayanayaya.

³ Huan ajsico Amocualtacat huan quiilhui Jesús:

—Sinta nelía tiIcne Dios, huajca xijnahuati ni teme ma mocuepa pantzi.

⁴ Huan Jesús quinanquili:

—Ijcuilijtoc ipan Icamanal Toteco campa quiijtouhua: ‘Amo san pantzi monequi para itztose masehualme. Nojquiya monequi tijneltoctiyase nochi Icamanal Toteco.’

⁵ Huajca Amocualtatcat quihuicac Jesús hasta altepet Jerusalén, ialtepe Toteco Dios, huan quiquetzqui iixco nopa hueyi tiopamit, ⁶ huan quiilhui:

—Sinta nelía tilcone Dios, huajca xihuitoni hasta talchi pampa ijcuilijtoc ipan Icamanal Toteco campa quiijtouhua:

‘Toteco Dios quintitanis iillhuicac ejcagua para ma mitzmocuitahuica, huan inijuanti mitzmatzacuilise para amo timoicxicocos ica yon se tet.’

⁷ Huan Jesús quiilhui:

—Nojquiya ijcuilijtoc ipan Icamanal Toteco campa quiijtouhua: ‘Amo xijyeyeco Toteco Dios san para tiquitas taya quichihuas.’

⁸ Teipa Amocualtatcat quihuicac Jesús ipan se huejcapantic tepet huan quinextili nochi masehualme cati iniaxca nochi tanahuatiani cati itztoque ipan nochi talme ipan taltpacti. Huan quinextili nochi iniricojyo huan nochi cati cuajcualtzi quipixque, ⁹ huan quiilhui:

—Nochi ya ni nimitzmacas sinta timotancuaquetzas huan techhueyimatís.

¹⁰ Huajca Jesús quiilhui Amocualtatcat:

—Techtalcahui Amocualtatcat. Pampa ijcuilijtoc ipan Icamanal Toteco campa quiijtouhua: ‘San Toteco Dios xijhueyimatí huan san ya xijtepanita.’

¹¹ Huajca quisqui Amocualtatcat huan quicajtejqui Jesús. Huan hualajque ilhuicac ehuan huan quipalehuijque.

Jesús pejqui itequi ipan estado Galilea
(Mr. 1:14-15; Lc. 4:14-15)

¹² Teipa quemá Jesús quicajqui para Juan itztouya ipan tatzacti, quisqui ten estado Judea, huan mocuetqui altepet Nazaret ipan estado Galilea.

¹³ Huan teipa quisqui altepet Nazaret, huan yajqui para itztoti ipan altepet Capernaum cati mocahua nechca nopa hueyi at campa monamiqui estado Zabulón ihuaya estado Neftalí. ¹⁴ Quichijqui ya ni para ma tami cati Toteco quiilhuijtoya nopa tajtolpanextijca Isaías huejcajquiya huan ya ni cati quiijto:

¹⁵ “Nopa talme Zabulón huan Neftalí mopantíaj iteno hueyi at ipan nopa seyoc nali hueyat Jordán ipan estado Galilea.

Nepa itztoque masehualme cati amo israelitame.

¹⁶ Huan nochi nopa masehualme cati itztouyaj ipan tzintayohuilot, ama quiiztouque se hueyi taahuili.

Itztouyaj quej miquisnequiyayaj,

huan ama cahuantoc se hueyi taahuili para quitaahuilis inintalnamiquilis.”

¹⁷ Huajca ipan nopa tonali Jesús pejqui tacamanalhuía huan quinilhuiyaya masehualme: “Ximoyolpataca huan xijcahuaca cati amo cuali anquichihuaj sinta anquinequij ancalaquise campa tanahuatía Toteco Dios cati itztoc ilhuicac pampa yaya amechnechcahuía ama.”

Jesús quinnotzqui nahui michtajtamani
(Mr. 1:16-20; Lc. 5:1-11)

¹⁸ Huan Jesús nejnemiyyaya iteno nopa hueyi at cati itoca Galilea huan quinuitac ome icnime: se itoca eliyaya Simón, huan nochi quitocaxtiyayaj Pedro, huan ne se itoca eliyaya Andrés. Inijuanti quimajcahuayayaj matat atita pampa eliyayaj michtajtamani. ¹⁹ Huan Jesús quinilhui:

—Techtoquilica. Ama anmichtajtamani, pero seyoc tequit nimechmacas. Nimechnextilis quenicatza antajtamase ica masehualme para ma nechtoquilica.

²⁰ Huan inijuanti nimantzi quicajtejqe inimata huan quitoquilijque.

²¹ Teipa Jesús nejnenqui achi más huan quinitac seyoc ome icnime: se cati itoca Jacobo huan ne se itoca Juan. Itztoyaj ipan se cuaacali ihuaya inintata Zebedeo quitatamaniyayaj inimata. Huan Jesús nojquiya quinnotzqui ma yaca ihuaya. ²² Huan nimantzi quicajtejqe nopa cuaacali huan inintata, huan quitoquilijque Jesús.

Jesús quinmachi miyac masehualme

(Lc. 6:17-19)

²³ Huan Jesús panotinemiyaya campa hueli ipan nochi estado Galilea, tamachtijtinemiyaya. Huan ipan sese altepet calajqui ipan iniisraelita tiopa huan quinmachi masehualme nopa cuali tamachtili ten quenicatza eltos quema Toteco tanahuatis. Huan Jesús quinchicahuayaya cati mococohuaj ica ten hueli cocolisti. ²⁴ Huajca campa hueli ipan nochi tali Siria nochi masehualme quicajque ten Jesús, huan quinhualicaque campa ya nochi cati quipixque tacuajcualoli huan miyac tamanti cocolisti. Nojquiya quinhualicaque cati taijyohuiyayaj pampa quinpixque iajacahua Amocualtat, huan cati huetziyayaj ica ajaca cocolisti huan cati metzhuapactique. Huan nochi Jesús quinchicajqui. ²⁵ Huan quitoquiliyayaj tahuel miyac masehualme cati hualajque ten estado Galilea, huan ten tali Decápolis, huan ten altepet Jerusalén, huan ten estado Judea huan sequij cati hualajque seyoc nali hueyat Jordán.

5

Jesús tamachi ipan se tepet

¹ Huan Jesús quiiac ya ajsicoj miyac masehualme, huan huajca yaya tejoc quentzi ipan se tepet huan mosehui. Huan tojuanti tiimomachtijcahua timonechcahuijqe campa ya inihuaya nopa masehualme. ² Huan Jesús pejqui tamachtiá huan quijito:

Ajquiya paqui

(Lc. 6:20-23)

³ “Xipaquica amajuanti cati anmoehcapanohuaj iixpa Toteco, huan anquimatij anteicneltziti por amotajtacollhua. Pampa Toteco cati itztoc ilhuicac amechcahuilis xicalaquica campa yaya tanahuatia.

⁴ Xipaquica amajuanti cati anmotequipachohuaj, pampa Toteco amechyoltalis.

⁵ Xipaquica amajuanti cati amo anmohueymatij iniixpa sequinoc. Pampa Toteco amechaxcatis nochi taltipacti.

⁶ Xipaquica amajuanti cati ica nochi amoyolo anquitemohuaj quenicatza anquichihuase cati xitahuac.

Anitztoque quej masehualme cati mayanaj huan amiquij para quichihuase cati cuali.

Toteco amechixhuitis para melahuac anhuelise anquichihuase cati xitahuac.

⁷ Xipaquica amajuanti cati antetasojtaj huan antepalehuáj, pampa Toteco nojquiya amechtasojtas huan amechpalehuis.

⁸ Xipaquica amajuanti cati anyoltapajpactique,

pampa anquuitase Toteco.

⁹ Xipaquica amojuanti cati anquinyoltalíaj cati cualanij, pampa Toteco amechtocaxtis aniconehua.

¹⁰ Xipaquica sinta sequinoc amechtaijyohuiltíaj pampa anquichihuj cati xitahuac, pampa Toteco Dios cati itztoc ilhuicac amechcahuilis ancalaquise campaya tanahuatía.

¹¹ “Xipaquica quema sequinoc amechtelchihuj huan amechtatzacuiltíaj huan amechistacahuíaj pampa antechneltočaj.”

¹² Quena, xipaquica huan amo ximotequipachoca pampa Toteco hueyi amechtaxahuis nepa ilhuicac. Quej nopa masehualme nojquiya quintatzacuiltijque nopa tajtolpanextiani huejcajquiya.

Anitztoque quej istat huan taahuili ipan ni taltipacti

(Mr. 9:50; Lc. 14:34-35)

¹³ “Istat quipalehuía nacat para ma amo palani. Amojuanti nojquiya anhuelij anquinpalehuise masehualme para ma amo tajtacolchihuaca pampa anitztoque quej istat ipan ni taltipacti. Pero sinta istat ayecmo poyec, huajca amo teno ipati. Huan amo aquí huélis quipoyeltisoc sempa. Yon ayecmo huélis tijtequihuse. San monequi tijtepehuase, huan huajca ipan moquejquetzase masehualme.

¹⁴ “Amojuanti anitztoque itaahuil ni taltipacti, pampa anquintaahuilíaj masehualme. Anitztoque quej se altepet cati eltoc ipan se tepet huan cahuani para nochi huéli quuitase. ¹⁵ Amo aquí quitatía se taahuili, huan quitatía cajo tzinta. Quitatía ipan se taahuil quetzali para ma taahui nochi ipan calijtic. ¹⁶ Quej nopa xijcahuaca ma cahuani amotaahuili iniixpa masehualme. Huan quuitase cati cuali anquichihuj huan quihueyichihuase amoTata cati itztoc ipan ilhuicac.

Jesús tamachtí ten itanahuatil Moisés

¹⁷ “Amo ximoilhuica nihualajtoc para niquiniyocatalis itanahuatil Moisés huan cati quiijuulojtoque nopa tajtolpanextiani. Nihualajtoc para nijtamichihuas nochi cati quiijtohuj. ¹⁸ Melahuac nimechilhuía hasta tamis ilhuicacti huan taltipacti amo aquí quixpolos yon se letra, yon se punto cati ijcuilijtoc ipan nopa tanahuatilme. Nochi panos quej quiijtohua nepa. ¹⁹ Sintá acajya amo quitepanita se itanahuatil Moisés, huan quinmachtis sequinoc ma nojquiya amo quitepanitaca, masque nopa tanahuatili amo hueyi, nopa masehuali elis pilquentzi quema Toteco cati itztoc ipan ilhuicac tanahuatis. Quema tanahuatis Toteco, elise huejhueyi nopa masehualme cati quineltocaj itanahuatil huan quinnextilíaj sequinoc ma nojquiya quitepanitaca. ²⁰ Pampa nimechilhuía, sinta anquinequij ancalaquise campaya tanahuatía Toteco cati itztoc ilhuicac, monequi más xijneltocaca cati Toteco quiijtohua huan amo quej quineltocaj nopa fariseos huan nopa tamachtiani ten itanahuatil Moisés.

Jesús camanaltic ten cualanti

(Lc. 12:57-59)

²¹ “Anquicactoque para itanahuatil Moisés quinmachtiyaya masehualme huejcajquiya para ma amo temictica. Huan cati quimictis se masehuali yas iniixpa tequichihuani para quitajtolsencahuase huan quitatzacuiltise. ²² Na nimechilhuía, cati huéli cati cualanis ica iicni, tequichihuani quitajtolsencahuase. Huan sinta se acajya quitelchihuas iicni, nopa tasentilisti ten

tequichihuani cati más quipiya tequiticayot mosentilis para quitajtolsencahuas huan quitatzacuilitis. Huan cati quitocaxtis seyoc ica camanali cati fiero, quihuicas tajtacoli para yas ipan tit nepa micta.

²³ “Huajca sinta timoquetza campa itaixpa para tijmacas Toteco se tacajchualisti huan ipan nopa talojtzi tiquelnamiqi para moicni cualani mohuaya, huajca amo xijmaca nopa tacajchualisti. ²⁴ Xijcahua motacajchualis ipan taixpamit huan xiya achtohui para anmotapojpolhuise huan ximoyoltali ihuaya moicni. Huan huajca, quena, ximocuepa para tijmacas Toteco nopa tacajchualisti.

²⁵ “Huan sinta se moculancaitaca quinequi mitztelhuis ica cati amo cuali tijchihuilitoc, huajca ximoyoltali ihuaya nimantzi quema noja itztoc ipan ojti para mitztelhuis. Ma amo mitzhuicas iixpa tequichijquet, pampa nopa tequichijquet mitztemactilis ica policías huan inijuanti mitztzacuase.

²⁶ Melahuac nimitzilhuía, amo tiquisas ipan tatzacti hasta titaxtahuas senquisa nochi cati nopa tequichijquet quijtos xitaxtahuá.

Jesús camanaltic ten cati momecatíaj

²⁷ “Anquicactoque para itanahuatil Moisés quijto para amo ximomecat-ica. ²⁸ Na nimechilhuía, sinta se tacat quiita se sihuat huan ipan italnamiqulis quinequi ten hueli quichihuas ihuaya, ya momecati ihuaya ipan iyolo.

²⁹ “Huajca sinta se moixteyol quinequi quitachilis tajtacoli, xijquixti huan xijtahuiso, masque eliyaya moixteyol cati más cuali. Pampa más cuali para tijpolos san se pilquentzi motacayo, huan amo tiyas nepa micta ica motacayo yajmactic. ³⁰ Huan sinta momax cati monejmat mitzchihualtía xitajtacolchihua, huajca más cuali xijzontequi huan xijtahuiso, pampa más cuali para tijpolos san se pilquentzi motacayo huan amo tiyas nepa micta ica motacayo yajmactic.

Amo cuali cati quicahuas isihua (Mt. 19:9; Mr. 10:11-12; Lc. 16:18)

³¹ “Nojquiya itanahuatil Moisés quijto para cati quinequi quicahuas isihua, monequi ma quimaca se amat cati quijtohua para ayecmo iaxca. ³² Na nimechilhuía, sinta se tacat quicahuas isihua cati amo momecatijtoc ica seyoc, yaya quichihualtía nopa sihuat ma momecatis quema monamictis. Huan nojquiya yaya cati teipa mosihuajtis ihuaya nopa sihuat, momecatis.

Amo xitatestigojquetza

³³ “Anquicactoque para itanahuatil Moisés quijto sinta se quitestigoj-quetzas Toteco quema quitajtolcahua se tamanti, huajca monequi quichihuas cati quijtojtoc. ³⁴ Na nimechilhuía, amo xitatestigojquetzaca. Amo xijtestigojquetzaca ilhuicacti pampa ilhuicacti eltoc campa Toteco tanahuatía. ³⁵ Amo xijtestigojquetzaca taltipacti pampa iicxita Toteco cati yaya nojquiya quinahuatía. Amo xijtestigojquetzaca altepet Jerusalén, pampa Jerusalén ialtepe Toteco nopa Hueyi Tanahuatijquet. ³⁶ Yon amo xijtestigojquetzaca amotzonteco pampa amo anquinahuatíaj amotzonteco. Amo hueli anquichipahuilíaj yon se amotzoncal, huan sinta ya chipahuac, amo hueli anquiyayahuilíaj. ³⁷ Quema ancamanaltij, xiquijtoxa xitahuac sinta hueli anquichihuase se tamanti. Xiquijtoxa ‘quena, nijchihuas’ o ‘amo nijchihuas’. Sinta antatestigojquetzaj, amo cuali anquichihuaj, huan quej nopa Amocualtacat quinequi xijchihuaca.

Jesús quiijto ma amo timomacuepaca

(Lc. 6:29-30)

³⁸ “Anquicactoque para itanahuatil Moisés quiijto sinta se acajya mitzexteyolcocos, huajca xixixteyolcoco. Huan sinta se acajya mitztancochtepehuas, huajca xijtancochtepehua nojquiya. ³⁹ Na nimechilhúa, amo ximomacuepaca ica cati amechchihuilía cati amo cuali. Sinta se mitzixtatzinis mocampa cati monejmat, huajca xijnextili seyoc mocampa para nojquiya ma mitzixtatzini. ⁴⁰ Sinta tijtahuiquillía tomi se acajya huan yaya mitzhuicas iixpa tequichijquet huan quinequi xijmacas mocamisa por cati titahuica, huajca nojquiya xijmaca mochamarra. ⁴¹ Sinta se soldado mitznahuatis xijhuica itamamal para se kilómetro, xijhuiquili ome kilómetros ipan iojhui. ⁴² Sinta se mitztajtanis se tamanti, xijmaca. Sinta se quinequi xijtanejti se tamanti, xijtanejti.

Xiquinicnelica amocualancaitacahua

(Lc. 6:27-28, 32-36)

⁴³ “Anquicactoque itanahuatil Moisés huejcajquiya quiijto xiquinicnelica amohuampoyohua huan xiquincualancaitaca amocualancaitacahua. ⁴⁴ Na nimechilhúa, xiquinicnelica amocualancaitacahua huan xijtajanica Toteco ma quintiochihua cati amechtajiyohtilíaj. ⁴⁵ Huan quej nopa, nochi quimatisé para melahuac anitztoque iconehua Toteco amoTata cati itztoc ilhuicac, pampa yaya quichihua tonati ma taahui ipan cati amo cuajcualme huan ipan cati cuajcualme. Huan yaya quichihua ma huetzi at ipan inimil cati itztoque xitahuacae iixpa huan ipan inimil cati amo xitahuacae iixpa. ⁴⁶ Pampa sinta san anquinicnelíaj masehualme cati amechicnelíaj, amo teno cati cuali anquichijtoque para Toteco amechtatahúis teipa. Hasta nopa tacame cati tainamaj impuesto huan tahuel tacajcayahuaj nojquiya ya nopa quichihua. ⁴⁷ Huan sinta san anquintajpalohua amohuampoyohua, amo teno cati cuali anquichijtoque. Masehualme cati amo quixmatij Toteco nojquiya ya nopa quichihua. ⁴⁸ Monequi xiitztoca senquisa cuali ipan nochi cati anquichihua quej amoTata cati itztoc ipan ilhuicac itztoc senquisa cuali.

6

Jesús tamachti quenicatza ma tijchihuaca cati cuali

¹ “Ximotachilica para amo anquichihuase tamanti cati cuali san para masehualme ma amechitaca. Sinta anquichihua quej cati cuali para anmohueyimatisé iniixpa sequinoc, huajca Toteco amoTata cati itztoc nepa ilhuicac amo amechtatahúis. ² Huajca quema anquinpalehuíaj cati teicneltziti, amo xijnequica para sequinoc ma quimatica. Amo xitapitzaca quej masehualme cati ome inixayac quichihua ipan tiopamit huan callejtípa. Inijuantí quinequij sequinoc ma quinítaca ica cati cuali quichihua para ma quinhueyimatica. Sinta masehualme quinhueyimatisé, san ya nopa quiselise pampa Toteco amo quintaxtahúis más. ³ Quema anquinmacaj se tenijqui cati teicneltziti, ma amo quimati yon se masehuali quesqui anquinmacaque. Yon moarraves ma amo quimati taya temaca momanejmat. ⁴ Huajca quema anquinmacaj se tamanti se cati teicneltzi, xijmacaca ixtacatzí, huan Toteco amoTata cati quíita nochi cati ixtacatzí, yaya amechtatahúis miyacapa.

Jesús tamachti quenicatza ma timotatajtica

(Lc. 11:2-4)

⁵ “Huan quema anmotatajtíaj ica Toteco, amo xijchihuaca quej masehualme cati ome inixayac quichihuaj. Inijuanti quinpactía moquetzase tiopan calijtic o callejtípa huan nepa motatajtíaj ica Toteco san para sequinoc ma quinitaca. Sinta masehualme quinhueyimatise, san ya nopa quiselise pampa Toteco amo quintaxtahuis. ⁶ Amojuanti quema anmotatajtíaj ica Toteco Dios, xiyaca campá más calijtic huan xijtzacuaca nopa caltemit huan Toteco amoTata cati itztoc nepa calijtic amohuaya quitas huan amechtaxtahuis miyacapa.

⁷ “Huan quema anmotatajtíaj ica Toteco Dios, amo xijchihuaca quej masehualme cati amo quiixmatij Toteco. Inijuanti san quiompahuíaj miyac huelta camanali cati quitzontecomajtoque pampa moilhuíaj sinta huejcahuase camanaltise, Toteco quincacuis. ⁸ Huajca amo xijchihuaca quej inijuanti, pampa amoTata ya quimati taya amechpolohua hasta quema ayemo anquitajtaníaj. ⁹ Huajca quema anmotatajtise ipan Toteco, xiquilhuica quej ni:

‘Toteco Totata cati tiitztoc nepa ilhuicac.

Ma quihueyichihuaca motoca* nochí masehualme.

¹⁰ Xihuala, xitanahuatiquí nica.

Ma quichihuaca mopaquilis ipan ni taltipacti quej mochijtoc nepa ilhuicac.

¹¹ Techmaca nopa tacualisti cati monequi mojmosta.

¹² Techtapojpolhui totajtacolhua,

quej tojuanti nojquiya tíquintapojpolhuíaj cati techixpanoj.

¹³ Amo aquí xijxahua ma techyoltilana para titajtacolchihuase.

Techmanahui ten yaya cati amo cuali.

Pampa ta moselti tíjpiya tequiticayot para nochí tijnahuatis.

Ta tíjpiya nopa chichualisti cati más hueyi.

Huan san ta tíjpiya motatanex.

Huan quej nopa elis para nochípa.

San ya nopa.’

¹⁴ “Pampa sinta anquintapojpolhuise masehualme cati amechixpanotoque, huajca amoTata cati itztoc nepa ilhuicac nojquiya amechtapojpolhuis amotaixpanolhua. ¹⁵ Sinta amo anquintapojpolhuíaj masehualme cati amechixpanoj, huajca amoTata amo amechtapojpolhuis amotaixpanolhua.

Jesús tamachti quenicatza ma timosahuaca

¹⁶ “Quema anmosahuaj, amo xijcahuilica ma nesi sinta anmosahuaj quej masehualme cati ome inixayac quichihuaj. Inijuanti quinequij ma nesi fiero inixayac quej taijyohuíaj miyac para masehualme ma quinitaca para mosahuaj. Sinta masehualme quinhueyimatij, san ya nopa quiselise pampa Toteco amo quintaxtahuis. ¹⁷ Huajca amojuanti quema anmosahuase, ximoxilhuica cuali huan ximixamica. ¹⁸ Quej nopa masehualme amo quimatis sinta anmosahuaj, pero Toteco amoTata cati quimati nochí cati eltoc ixtacatzí ten sese amojuanti, yaya quimatis anmosahuaj, huan yaya amechtaxtahuis.

Xijtemoca quenicatza huelis anquipiyase cati ipati nepa ilhuicac

(Lc. 12:33-34)

¹⁹ “Amo xicajocuica miyac tomi, o miyac tamanti cati ipati nica ipan ni taltipacti pampa huelis cualos, o poiyahuis, o moxixas. O huelis calaquise tachtequini huan quiichtequise. ²⁰ Más cuali xicajocuica cati nelía ipati ipan ilhuicac para amechchiyas cati cuajcualtzi nepa. Nopona amo teno cualos,

* 6:9 6:9 O ma mitzhueyichihuaca.

yon amo pojyahuis, yon amo moxixas, yon amo aquijme tachtequini para tachtequise. ²¹ Pampa sinta anquimatise cati nelía ipati amechchiya nepa ilhuicac, huajca ipan amoyolo anquinequise anitztose nepa.

Jesús camanaltic ten toixteyol
(Lc. 11:34-36)

²² “Toixteyol eltoc quej se taahuili ipan totacayo huan sinta cuali toixteyol, quicahuilía taahuili ma ajsi ipan toyolo para tijtachilise cati cuali, huan huajca tonemilis nojquiya elis cuali. ²³ Pero sinta amo cuali toixteyol, quitza-cuilis taahuili para amo tijtachilise cati cuali huan taahuili amo calaquis ipan toyolo, huajca quej nopa tinemij ipan tzintayohuilot. Huan sinta timoillhuiaj tijpiyaj taahuili ipan toyolo huan nelía cati tiquitaj para taahuili, eltoc tzintayohuilot, nelía melahuac nelpano tiitzoque ipan tzintayohuilot pampa yon quentzi amo tijmatij cati cuali.

Toteco huan totomi
(Lc. 16:13)

²⁴ “Amo aqui huelis quintequipanos ome itecohua, pampa quicualan-caitas se huan quicnelis ne se. Huan ica se elis temachtí, huan ne seyoc quitahuelcahuas. Amo hueli anquitequipanose Toteco sinta anquicahuilíaj ma amechyoltilana tomi.

Toteco quinmocuitahuía iconehua
(Lc. 12:22-31)

²⁵ “Yeca nimechilhuía, amo ximotequipachoca ten amonemilis huan sinta oncas taya anquicuase huan taya anquise. Amo ximoillhuica ten amotacayo huan sinta oncas ica cati anmoyoyontise, pampa Toteco amechmacatoc nemilisti, huan ya nopa cati achi más ipati; huan yaya nojquiya amechmacas tacualisti. Yaya amechmacatoc amotacayo, huan ya nopa cati achi más ipati, huan yaya nojquiya amechmacas cati ica anmoyoyontise. ²⁶ Xiquintachilica totome cati patantinemij. Injuanti amo momilchiuhaj, huan amo pixcaj, yon amo quiajocuij inintacualis. AmoTata cati itztoc nepa ilhuicac quin-tamaca. Huan Toteco nojquiya amechtamacas pampa más amopati iixpa que totome. ²⁷ San tapic para anmotequipachose. Sinta anmotequipachose pampa amo anhuejcapantique, ¿huelis anmoscaltise seyoc ome místit pampa anmotequipachojtoque? Amo anhuelij.

²⁸ “Huan ¿para ten anmotequipachohuaj ica cati anmoyoyontise? Xij-tachilica xochime cati moscaltíaj campá hueli. Amo tequitij, yon amo tajt-zomaj. ²⁹ Huan nimechilhuía, nopa hueyi Tanahuatijquet Salomón ica nochi ihueyitilis amo quema quipixqui icualnesca quej nopa xochit. ³⁰ Quena, Toteco quinmacatoc xochime inincualnesca masque cahuantoque san se talojtzi ama huan tonilis pilintoque. Huajca más miyac amechyoyontis amojuanti, masque ohui anquineltocase para amechmacas cati amechpolo-hua. ³¹ Huajca amo ximotequipachoca. Amo xiquijtoca: ‘¿Taya tijcuase? o ¿taya tiquise? o ¿ica taya timoyoyontise?’ ³² Pampa quej nopa moillhuíaj nopa masehualme cati amo quixmatij Toteco. AmoTata cati itztoc nepa ilhuicac, ya quimati para monequi nochi ni tamanti para ica anpanose. ³³ Achtohui xijtemoca para ancalaquise ipan itanahuatilis Toteco huan para anquipiyase se nemilisti cati xitahuac iixpa. Huan yaya amechmacas nojquiya nochi ni tamanti cati monequi. ³⁴ Huajca amo ximotequipachoca por cati huelis panos mosta. Pampa mojmosta onca tequipacholi para tijpanose. Ximoillhuica san ten ama pampa ica nopa cati ama tijpiyaj quichihuaya.

7

*Amo xiquintequitachilica sequinoc**(Lc. 6:37-38, 41-42)*

¹ “Amo xiquintajtolsencahuaca sequinoc, huan sequinoc amo amechtajtolsencahuase. ² Pampa sequinoc nojquiya amechtequitachilise ica san se nopa tayejeocoli quej anquitequihuaj para anquitequitachilise. ³ ¿Para ten anquiiatj nochi piltajacolztizti cati quichihua amoicni huan amo anquiiatj para achi más miyac tajtacoli anquichihuaj? Eltoc quej tiquita se piltejtzi ipan iixteyol moicni, huan amo tijmati para ta tijpiya hasta se apechti moixteyol ijtic. ⁴ ¿Quenicatza huelis tiquilhuis moicni: ‘Techcahuili nimitzquixtilis nopa piltejtzi cati calactoc ipan moixteyol’, quema ta tijpiya se apechti moixteyol ijtic? ⁵ Tijpiyaj ome moxayac. Achtohui ximoquixtili nopa apechti, huan quej nopa titachiyas cuali para tijquixtilis nopa piltejtzi cati quipiya moicni iixteyol ijtic.

⁶ “Amo xiquinmaca amo cuajcualme cati tatzejtzeloltic pampa quej chichime amechtanquechise. Yon amo xiquinmaca cati tahuel patiyon nopa masehualme cati itztoque quej pitzome, pampa san ipan moquejquetzase.

*Xijtajtanica Toteco cati amechpolohua**(Lc. 11:9-13; 6:31)*

⁷ “Xijtajtanica Toteco cati amechpolohua huan yaya amechmacas. Xijtemoca para anquixmatise Toteco huan anquipantise. Xijnojnnotzaca Toteco huan yaya amechcaltapos. ⁸ Pampa nochi cati quitajtaníaj se tenijqui, quiselíaj. Huan nochi cati quitemohuaj para quixmatise Toteco, quipantíaj. Huan nochi cati quinojnnotzaj Toteco, yaya quincaltapohua huan quinchihuilíaj cati tajtanij.

⁹ “Ica amojuanti antetatme, sinta amocone amechtajtanis se pantzi para quicuas, amo anquimacase se tet. ¹⁰ Huan sinta amocone amechtajtanis se michi para quicuas, amo anquimacase se cohuat, ¹¹ pampa masque antajta-colchihuani anquimatij anquimacase amoconehua cati cuali. Huajca achi más Toteco amoTata cati itztoc ilhuicac quimati quinmacas cati cuali cati quitajtanise.

¹² “Huajca xiquinchihuilica sequinoc, san se quej anquinequij sequinoc ma amechchihuilica. Pampa quej ni anquichihuase nochi cati itanahuatil Moisés huan nopa tajtolpanextiani technahuatijque ma tijchihuaca.

*Nopa caltemit cati pitzactzi**(Lc. 13:24)*

¹³ “Xicalaquí ipan nopa caltemit pitzactzi huan xinejnemi ipan nopa ojti cati xitahuac, pampa nopa ojti huan nopa caltemit cati patahuac yahui micta huan miyac calaquij nozona. ¹⁴ Pitzactzi nopa caltemit huan pitzactzi nopa ojti cati yahui ilhuicac campa onca nemilisti para nochipa huan amo miyaquí quipantíaj.

*Anquinixmatise masehualme por cati quichihuaj**(Lc. 6:43-44)*

¹⁵ “Xitachixtoca pampa ajsise tacajcayahuani cati quiijtose para injuanti itajtolpanextijcahua Toteco, pero amo melahuac. Nesise quej cuajcualme, pero amo. Itztoque quej tepechichime cati moyoyontíaj quej borregojme. ¹⁶ Quej se masehuali quixmati se cuahuit por itajca, anquinixmatise ajquiya injuanti sinta anquifachilise cati quichihuase. Anquimatij se tejtzonquilit amo hueli temaca xocomecat. Se sahuamecat amo temaca se tamanti cati cuali para tijcuase. ¹⁷ Quena, nochi cuali cuame quipiay inintajca cati

cuali. Huan se cuahuit cati amo cuali temaca cati amo cuali, cati amo aqui huelis quitequihuis. ¹⁸ Se cuali cuahuit amo hueli temaca itajca cati amo cuali, yon amo hueli temaca itajca cati cuali se cuahuit cati amo cuali. ¹⁹ Huan nochi cuame cati amo temacaj se itajca cati cuali para quitequihuis, quinzontequij masehualme huan quintatíaj. ²⁰ Huaíca anquinxmatise nopa tacajcayahuani ica cati quichihuaí.

Monequi xijchihuaca cati Toteco quinequi
(Lc. 13:25-27)

²¹ “Miyac masehualme nechtocaxtíaj: ‘Tohueyiteco’, pero amo nochi injuanti calaquise campa Toteco cati itztoc ilhuicac tanahuatía. San yase cati nelía quichihuaí ipaquilis noTata cati itztoc ilhuicac. ²² Quema aj-sis tonali para Toteco fetájtolsencahuas, miyac masehualme nechilhuis: ‘Tohueyiteco, ipan motoca tiquinilhuijque masehualme mocamanal cati techyolmelahua taya mochihuas teipa, huan ica motoca tiquinquixtijque iajacahua Amocualtacat cati calactoyaj ipan masehualme, huan ica motoca tijhijtoque miyac tiochichahualnescayot’ ²³ Huan na niquinilhuis: ‘Xiyaca. Amo quema nimechixmatqui. San cati amo cuali anquichijque.’

Ome tacame quichijque ininchaj
(Mr. 1:22; Lc. 6:47-49)

²⁴ “Nochi cati quicaquij nocamanal huan quichihuaí cati niquijtohua itztoque quej ni talnamijca tacat. Yaya pejqú quichihua ichaj huan quizezqui ipan tet huan quitamilti. ²⁵ Huan pejqú huetzi at, huan tatemic hueyame, huan se ajacat chichahuac quuilpitztiquisaco, pero amo teno ipantic ichaj pampa quiquetztoya ipan tet. ²⁶ Pero nochi amojuanti cati anquicaquij nocamanal huan amo anquichihuaí cati nimechilhúa, anitztoque quej ni huihui tacat. Yaya nojqúiya quichijqui ichaj, huan quiquetzqui xalpani. ²⁷ Teipa huetzqui at chichahuac huan tatemic campa hueli. Huan chichahuac quuilpitztiquisaco ajacat huan huetzqui ichaj, huan nochi semanqui.”

²⁸ Quema Jesús tanqui quinmachtía nopa miyac masehualme, injuanti quietzaitayayaj por itamachtíl, ²⁹ pampa yaya quinmachtiyaya quej se cati quiyiya tequiticayot. Amo quinmachtiyaya quej nopa tamachtiani ten itanahuatíl Moisés.

8

Jesús quichicajqui se tacat cati tacayo palaniyaya
(Mr. 1:40-45; Lc. 5:12-16)

¹ Teipa Jesús temoc ten nopa tepet huan miyac masehualme qutoquili-
jque. ² Huan hualajqui campa ya se tacat cati tacayo palaniyaya ica nopa
cocolisti cati itoca lepra. Yaya motancuaquetzqui iixpa Jesús huan quillhui:
—Tohueyiteco sinta tijnequi, tihueli techchichahuas.

³ Huan Jesús quitali imax ipani huan quillhui:
—Quena, nijnequi. Ximochichahua amantzi.

Huan nimantzi mochicajqui nopa tacat cati tacayo palaniyaya. ⁴ Huan
Jesús quillhui:

—Amo aqui xiquillhui. San xiya ximonextiti ica nopa totajtzi huan xijmaca
Toteco nopa tacajchualisti cati itanahuatíl Moisés techilhui ma quimacaca
cati ayecmo quiyipaj inintacayo palantoc para quej nopa nochi quimatise ya
timochicajqui.

Jesús quichicajqui itequipanojca se soldado
(Lc. 7:1-10; Jn. 4:43-54)

⁵ Teipa Jesús ajsito altepet Capernaum, huan hualajqui campa ya se capitán romano cati elqui inintayacanca soldados. Huan quitajtani Jesús se cualtilonil, ⁶ quijto:

—Tate, notequipanojca huetztoc huan huapahuixtoc imax huan imetz huan tahuel taijyohúa.

⁷ Huan Jesús quilhui:

—Niyas huan nijchicahuati.

⁸ Huan nopa capitán ten soldados quilhui:

—Tate, amo monequi tiyas pampa amo nihueyi quej ta, huan amo quinamiqui ticalaquis nochaj. San xiquijto se camanali para ma mochicahua notequipanojca huan yaya mochicahuas, pampa ta tijpiya tequiticayot ⁹ Nojquiya nijpiya notecohua cati quipiayaj tequiticayot ica na huan nijchihua inincamanal. Huan na nojquiya niininteco sequinoc. Huan sinta niquilhuis se notequipanojca: ‘Xiya’, yaya yas, huan sinta niquilhuis: ‘Xihuala’, yaya hualas. Sinta niquilhuis notequipanojca: ‘Xijchihua ya ni’, yaya quichihuas. Ta nojquiya cati tiquijtohua, mochihuas.

¹⁰ Quema Jesús quicajqui ten quijto nopa capitán, quitetzaitac, huan quinhui nopa masehualme cati quitoquiliyayaj:

—Melahuac nimechilhúa, amo nijpantijtoc yon se israelita masehuali cati nelia temachti quineltoaca cati nihueli nijchihua quej ni seyoc tali ejquet.

¹¹ Huan nimechilhúa, miyac masehualme cati amo israelitame quej ni capitán hualase ten talme campa quisa tonati huan campa oncalaqui tonati huan calaquise campa tanahuatía Toteco cati itztoc ilhuicac. Nepa injuanti tacuase inihuaya nopa huejhueyi israelitame: Abraham, Isaac huan Jacob.

¹² Huan miyac israelitame cati Toteco quinequiyaya ma calaquica ipan itanahuatilis, yase campa tzintayohuilot pampa amo quinejque calaquise. Quena, Toteco quinmajahuas hasta nepa campa masehualme chocaj huan tanhuehuechocaj pampa tahuel taijyohúaj.

¹³ Huajca Jesús quilhui nopa capitán ten soldados:

—Xiya mochaj. Ya nijchijqui nopa cati ta tijneltocayaya nijchihuas.

Huan ipan nopa talotzi quema Jesús quijto ni camanali, mochicajqui itequipanojca nopa capitán.

Jesús quichicajqui imona Pedro

(Mr. 1:29-31; Lc. 4:38-39)

¹⁴ Teipa Jesús yajqui ichaj Pedro huan imona huetztoya ipan itapech pampa totoniyayaya. ¹⁵ Huan Jesús quimaitzqui huan nimantzi caxanqui nopa tatotoncayot huan yaya moquetzqui huan pejqqui quintamaca.

Jesús quinchicajqui miyac cocoyani

(Mr. 1:32-34; Lc. 4:40-41)

¹⁶ Huan quema tayohuatinemiyaya, ajsicoj campa Jesús cati quinhualicaj miyac cocoyani ica iajacahua Amocualtat. Huan Jesús san camanaltic huan quinquixtili ica icamanal. Huan yaya quinchicajqui nochi cati mococohuayayaj. ¹⁷ Quema Jesús quinchicahuayaya cocoyani, quitamichihuayaya cati nopa tajtolpanextijquet Isaías huejcajquiya quijto: “Yaya ica iselti quihuicac tocolis huan nochi totacuajualol.”

Ome tacame quinequiyayaj quitoquilise Jesús

(Lc. 9:57-62)

¹⁸ Teipa quema Jesús quinitac nopa miyac masehualme cati quitetzopayayaj, techilhui tiimomachtijcahua ma tijhuicaca ipan cuaacali huan ma

tiquixcotonaca nopa hueyi at para seyoc nali. ¹⁹ Huan nepa ajsico campa Jesús se tamachtijquet ten itanahuatil Moisés huan quihlhi:

—Tamachtijquet, nijnequi niyas mohuaya campa hueli tiyas.

²⁰ Huan Jesús quihlhi:

—Cayochime quipiyaj ininchaj huan totome quipiyaj inintepasol, pero na cati nimocuetqui Masehuali amo cana nijpiya campa nimotzontecas.

²¹ Huan seyoc itatoquilijca quihlhi:

—Tate, techcahuili ma nimocahua nochaj para nijtalpachos notata quema miquis, huan teipa nimitztoquilis.

²² Huan Jesús quihlhi:

—Ta techtoquili nimantzi, huan xiquinchahuili masehualme cati mictoque iixpa Toteco ma quintalpachoca inimijcahua.

Jesús quitacahualti nopa ajacat huan hueyi at
(Mr. 4:35-41; Lc. 8:22-25)

²³ Huajca Jesús tejoc sempa ipan cuaacali huan tiimomachtijcahua tiyajque ihuaya. ²⁴ Huan quema ya tiitztoyaj tatajco hueyi at, pejqui taajaca chicahuac huan nopa at tahuel calaquiyaya ipan cuaacali, pero Jesús cochtaya.

²⁵ Huajca tojuanti tiquixititoyaj huan tiquilhuijque:

—Tohueyiteco, techmanahui pampa ya timisahuijtinemij.

²⁶ Huajca Jesús techilhui:

—¿Para ten anmajmahuij? Tahuel pilquentzi antechnehtocaj.

Huan yaya mijquejqui huan quitacahualti nopa ajacat huan nopa hueyi at huan ayecmo molinjque. ²⁷ Huan tiimomachtijcahua san tijtetzaitaque huan timoilhuijque se ica seyoc:

—Ni Jesús, ¿ajquiya nelía ya? Yaya quiapiya tequiticayot hasta ica ajacat huan hueyi at.

Nopa tacame ipan tali Gadara cati quinpixtoyaj iajacahua Amocualtacat
(Mr. 5:1-20; Lc. 8:26-39)

²⁸ Huan teipa tiajsitoyaj nepa seyoc nali hueyi at ipan se tali cati itoca Gadara. Huan hualajque ome tacame cati quinpixtoyaj iajacahua Amocualtacat huan quinamiquicoj Jesús. Quisayayaj ipan ostot ipan se tepet campa quintaliyayaj mijcatzitzitzi, pampa nepa mocahuayayaj. Huan nelía mosisiniyayaj huan temajmatiyayaj tahuel hasta amo aqui hueliyaya pano ipan nopa ojti.

²⁹ Huan nopa tacame chichahuac quihlhiujque:

—Jesús, ta tiIcane Dios. ¿Tihualajtoc nica campa tojuanti para techtaijy-ohuultis quema noja polihui tonali?

³⁰ Huan ica huejca itztoyaj miyac pitzome cati tacame quinhuaticatoyaj ma tacuajtinemica. ³¹ Huan iajacahua Amocualtacat cati itztoyaj ipan nopa tacame pejque quitajtaníaj Jesús:

—Sinta tijnequi ma tiquistehuaca ipan ni tacame, techcahuili ma ticalaquica ipan nochi ne miyac pitzome.

³² Huan Jesús quinilhui iajacahua Amocualtacat:

—Huajca xiyaca.

Huajca nopa ajacame quisque huan calajque ipan inintacayo nopa pitzome. Huan nochi nopa pitzome motalojtejque. Motepexihuijque ipan se tepexit, huan huetzque ipan hueyi at, huan misahuijque.

³³ Huan nopa tacame cati quinmocuitahuuyayaj nopa pitzome motalojtejque hasta nopa altepet huan teyolmelajque nochi masehualme cati panoc ica nopa tacame cati quinpixtoyaj iajacahua Amocualtacat. ³⁴ Huajca nochi

masehualme ipan nopa altepet hualajque campa Jesús huan quema qui-
itaque, quiilhuique ma quisa ipan inintal.

9

Jesús quichicajqui se tacat cati huapahuixtoc

(Mr. 2:1-12; Lc. 5:17-26)

¹ Huajca Jesús sempa tejcoc ipan cuaacali tohuaya huan tipanoque hasta seyoc nali campa ialtepe. ² Huan ajsicoj campa Jesús sequij tacame cati quihualicayayaj ipan tapechti se tacat cati huapahuixtoc. Huan Jesús quiitac para nopa tacame quineltoayayaj para huelis quichicahuas, huajca quiilhui nopa cocoxquet:

—Nohuampo, xipaqui. Nimitztapojpolhuijtoc motajtacolhua.

³ Huajca sequij tamachtiani ten itanahuatil Moisés moilhuijque Jesús tahuel tajtacolchijqui pampa camanalti quej yaya elisquía Toteco Dios.

⁴ Huan Jesús quimatqui taya moilhuyayaj, yeca quinilhui:

—¿Para ten anmoyolilhuáj nijchijtoc cati amo cuali? ⁵ Amo ohui para na niquilhuis ni cocoxquet: ‘Nimitztapojpolhuía motajtacolhua’, o niquilhuis: ‘Ximijquehua huan xinejnemi’, pampa nimantzi mochihuas cati niquijtohua. ⁶ Huan pampa nijnequi xijmatica na cati niMocuetqui Masehuali nijpiya tequiticayot ipan taltipacti para nitetapojpolhuis tajtacoli, huajca nimechnextilis para mochihuas nochi cati niquijtohua.

Huajca Jesús quiilhui nopa cocoxquet:

—Ximijquehua, xijtanana motapech huan xiya mochaj.

⁷ Huan nopa cocoxquet mijquejqui huan yajqui ichaj. ⁸ Huan nochi quitetzaitaque quema quiitaque ten mochijqui. Huan quihueyichijque Toteco Dios pampa quimacac Jesús nopa chicalualisti.

Jesús quinotzqui Mateo

(Mr. 2:13-17; Lc. 5:27-32)

⁹ Teipa Jesús quisqui nepa huan panoc tequicalco campa na, niMateo, niitzoaya. Nimosehuijtoya ipan tequicali huan nitainamayaya impuesto. Huan Jesús nechilhui:

—Xihuala, techtoquili.

Huan nimoquetzqui huan niyajqui ihuaya.

Jesús tacuajqui inihuaya tacame cati tajtacolchihuaj

¹⁰ Jesús huan tojuanti tiimomachtijcahua titacuayayaj nepa nochaj. Huan hualajque miyac tacame cati tainamayayaj impuesto huan tacame cati miyac tajtacoli quichijtoyaj. Huan mosehuicoj huan tacuajque ihuaya Jesús huan tiimomachtijcahua. ¹¹ Huan nopa fariseos quiitaque, huan techtatzin-toquilijqe tiimomachtijcahua:

—¿Para ten amotamachtijca tacua inihuaya tainamani cati mojmosta tacacayahuaj huan inihuaya tacame cati miyac tajtacoli quichihuaj?

¹² Huan Jesús quincajqui huan quinilhui:

—Se tetic tacat amo quimonequillá se tepajtijquet, se cocoxquet, quena.

¹³ Ximomachtica taya quijtosnequi ni camanali cati ijcuilijtoc ipan Icananal Toteco: ‘Amo nijnequi techmacaca tapiyalme para tacajchualisti. Nijnequi xitetasojtaca.’ Amo nihualajtoc para ninquinnotzas masehualme cati moilhuijaj ya itztoque xitahuaque iixpa Toteco. Nihualajtoc para niquinnotzas ma moyolpataca cati quimatij quiipiyaj inintajtacolhua.

Jesús quinilhui para ten amo mosahuaj imomachtijcahua

(Mr. 2:18-22; Lc. 5:33-39)

14 Huan se tonali hualajque imomachtijcahua Juan campa Jesús huan quitatzintoquilijque:

—¿Para ten momomachtijcahua amo mosahuaj, pero nopa fariseos huan tojuanti cati tijtoquilíaj Juan miyac huelta timosahuaj?

15 Huan Jesús quinilhui:

—¿Anmoilhúaj quinamiqui mosahuase huan motequipachose ihuampoyohua se mosihuajtijquet quema tacuaj ihuaya ipan se nenamictili? Huajca nojquiya amo hueli mosahuase nomomachtijcahua quema na niitztoc inihuaya. Ajsis hora quema nocualancaitacahua nechhuicase, huan huajca, quena, mosahuase nomomachtijcahua.

16 “Amo aqui quitatamania se yoyomit cati sosoltic ica se yoyomit cati yancuic*. Pampa cati yancuic motzocoyolos huan nimantzi tzayanis ne yoyomit cati sosoltic huan achi más fiero elis. 17 Nojquiya amo aqui quiteca xocomeca at cati yancuic ipan se cuetaxti sosoltic, pampa quema nopa yancuic xocomeca at xocoyas, mohueyilis, huan tzayanis nopa cuetaxti sosoltic. Huan nopa masehuali quinenpolos nopa xocomeca at huan nopa cuetaxti. Yeca nopa xocomeca at cati yancuic monequi quitecas ipan se cuetaxti cati yancuic huan quej nopa amo quinenpolos yon nopa xocomeca at, yon nopa cuetaxti.”

Jesús quichicajqui isihuapil Jairo huan nopa sihuat cati quiajsic iyoyo
(Mr. 5:21-43; Lc. 8:40-56)

18 Quema Jesús tanqui quinilhúa masehualme ni camanali, ajsico se tequichijquet ten se israelita tiopamit. Yaya motancuaquetzqui iixpa Jesús huan quilhui:

—Amantzi onmijqui nosihuapil, pero sinta tiyas tijtaliti momax ipan ya, moyolcuís.

19 Huan Jesús moquetzqui huan yajqui ihuaya nopa tacat huan tiomomachtijcahua nojquiya tiyajque ihuaya. 20 Huan ipan ojti tijpantijque se sihuat cati mojmosta esotemoyaya para majtacti huan ome xihuit. Huan nopa sihuat monechcahuico iica Jesús huan quiajsic iyoyonteno. 21 Pampa yaya moyolilhuiyaya sinta san huelis quiajsis iyoyo, mochicahuas. 22 Huajca Jesús moicanitac huan quilhui:

—Nane, xipaqui. Pampa techneltoca, ya timochicajtoc.

Huan nopa sihuat mochicajqui ipan nopa talojtzi.

23 Teipa Jesús ajsito ichaj nopa tayacanquet huan quinitac tapitzani cati quichihuayayaj mijcahuicat huan nojquiya quinitac miyac masehualme cati tahuejchihuayayaj por nopa mijcatzi. 24 Huan Jesús quinilhui:

—Xíquísaca, pampa ni sihuapil amo mictoc, san cochtoc.

Huan injuanti pejque quihuetzquilíaj. 25 Pero Jesús quinquixti huan teipa calajqui campa quitectoyaj nopa sihuapil. Huan yaya quimaitzqui huan nopa sihuapil nimantzi mijquejqui. 26 Huan campa hueli ipan nopa tali nochi quicajque ten panoc.

Jesús quinchicajqui ome popoyotzitzi

27 Teipa Jesús quisqui ten nepa huan quitoquilijque ome tacame cati popoyotzitzi huan quitzajtzilijtiyahuiyayaj:

—Tehtasojta, ta tiiteipan ixhui David ten huejcajquiya.

* 9:16 9:16 Jesús quinilhui ni tatenpohualisti para quinnexilis amo cuali quimanelose itamachtil ica cati huejcajquiya quinelocayayaj masehualme, pampa itamachtil eltoya se tamanti cati yancuic.

²⁸ Huan Jesús calajqui ipan se cali, huan nopa popoyotzitzi nojquiya calajque huan Jesús quintatzintoquili:

—¿Antechnelto caj para nihueli nimechchicahuas?

Huan inijuanti quilhuijque:

—Quena, Tohueyiteco.

²⁹ Huajca quintalili imax ipan iniixteyolhua huan quinilhui:

—Pampa antechnelto catoque para nihueli nimechchicahuas, huajca ya anmochicajtoque.

³⁰ Huan motapo iniixteyolhua huan nimantzi huelque tachiyaj. Huan Jesús quinnahuati chicahuac, quinilhui:

—Amo aqwi xiquilhuica cati nimechchihuilijtoc.

³¹ Pero nopa tacame quisque huan pejqque quinilhuijtinemij nochi masehualme cati Jesús quinchihuili.

Jesús quichicajqui se nonotzi

³² Quema ya quistoyaj nopa tacame cati achtohui eliyayaj popoyotzitzi, ajsicoj masehualme cati quihualicayayaj campa Jesús se nonotzi cati quipixtoya se iajacayo Amocualtacat. ³³ Huan Jesús quiquixtili iajacayo Amocualtacat, huan nopa tacat pejqqui camanalti. Huajca nopa miyac masehualme quitetzaitaque huan quijijtoque:

—Amo quema tiqiztoque se tacat cati hueli quichihua tamanti quej ni ipan nochí total Israel.

³⁴ Pero nopa fariseos quijijtoque:

—Yaya quinquixtilía ajacame ica itapalehuil Amocualtacat cati quinyacana nochi ajacame.

Onca se hueyi pixquisti

³⁵ Huan Jesús tacamanalhuijtinenui campa hueli ipan nochi altepeme huan pilaltepetzitzi, huan tamachtiyaya ipan sesen israelita tiopamit. Quinilhuiyaya masehualme nopa cuali tamachtili ten quenicatza huelis calaquise campa tanahuatía Toteco. Huan quinchicahuayaya masehualme cati quipixtoyaj nochi tamanti cocolisti huan tacuajcualoli. ³⁶ Huan quema quintac nochi nopa miyac masehualme cati hualajtoyaj campa ya para ma quinpalahui, quintasojtac pampa nelía miyac tequipacholi quipixtoyaj hasta moilhuijque ayecmo teno ininpati. Itztoyaj quej borregojme cati amo quipixque inintamocuitahuija.

³⁷ Huajca Jesús techilhui tiimomachtijcahua:

—Itztoque miyac masehualme cati quichiyaj para quicaquise nocamanal, pero san itztoque pilquentzi masehualme para yase quinpohuilij. Eltoc quej se hueyi pixquisti pero san itztoque se ome tequipanohuani para quisentilise. ³⁸ Huajca xijtajtanica Toteco ma quintitani más tequipanohuani para teilhuise icamanal pampa nopa pixquisti iaxca.

10

Jesús quinnotzqui imomachtijcahua

(Mr. 3:13-19; Lc. 6:12-16)

¹ Jesús technotzqui ma timosentilica timajtacti huan ome tiimomachtijcahua. Huan techmacac tequiticayot para tiquinquixtise iajacahua Amocualtacat huan tiqinchicahuase masehualme cati mococohuaj huan cati quipiyayayaj nochi tamanti cocolisti huan tacuajcualoli.

² Nica eltoc totoca timajtacti huan ome tiimomachtijcahua. Yaya cati achtohui: Simón cati nojquiya quitocaxtíaj Pedro, huan iicni cati itoca

Andrés, teipa Jacobo huan iicni, Juan, cati itelpocahua Zebedeo. ³ Teipa Felipe, Bartolomé, Tomás huan na niMateo cati achtohuiya nitainamayaya impuesto. Teipa Jacobo itelpoca Alfeo. Teipa Judas*, iicni Jacobo, ⁴ teipa Simón cati moiycanequiyaya ica partido cananista, huan teipa Judas Iscariote cati teipa quitemactili Jesús.

Jesús quintitanqui imomachtijcahua campa itztoyaj israelitame
(Mr. 6:7-13; Lc. 9:1-6)

⁵ Huan quema Jesús ya itztoya para techtitanis timajtacti huan ome tiimomachtijcahua, techilhui: “Amo xiyaca campa itztoque masehualme cati amo israelitame huan amo xicalaquica ipan yon se altepet ipan estado Samaria.

⁶ San xiyaca campa israelitame, pampa inijuanti itztoque quej borregojme cati mocuapolojtoque. ⁷ Xiquinyolmelahuatij para quinnchcahuá Toteco cati itztoque ilhuicac huan tanahuatía. ⁸ Nojquiya xiquinchcahuaca cocoyani huan masehualme cati tacayo palanij ica nopa cocolisti cati itoca lepra. Huan xiquinyolcuica cati mictoque. Xiquinquixtica iajacahua Amocualtacat cati calactoque ipan masehualme. San tapic nimechmaca ni chichahualisti, huajca amo quema xitainamaca quema antepalehuise.

⁹ “Amo xijhuicaca tomi campa anyase, yon ten oro, yon ten plata, yon ten cobre. ¹⁰ Amo xijhuicaca se yoyon coxtali, yon yoyomit cati ica anmopatase. Amo xijhuicaca sequinoc tecacti, yon amo xijhuicaca cuatopili, pampa anitequipanojcahua Toteco huan quinamiqui para masehualme amechmacase cati amechpolohua.

¹¹ “Huan quema anajsitij ipan se altepet o ipan se rancho, xitajtanica sinta itztoque se cuali tacat nopona, huan xiquitaca sinta huelis anmocaquise ipan ichaj. Huan nopona ximocahuaca hasta anquisase ten nopa altepet. ¹² Huan quema ancalaquise ipan se cali, xiquijtoca: ‘Ma Toteco amechtiochihua cati anitzoque nica.’ ¹³ Huan sinta cuajcualme cati itztoque ipan nopa cali, huajca Toteco quintiochihuas; huan sinta amo cuajcualme, Toteco amo quintiochihuas. Huan nopa tatiochihualisti mocahuas ipan amojuanti. ¹⁴ Sinta masehualme amo amechselise huan amo quinpactis amocamanal, huajca xiquisaca ipan nopa cali, o nopa altepet, huan xijtzejteloca amotecac para ma tepehui nopa taltepecti. Huan ya nopa quinnexilis para nopa masehualme ten nopa altepet quiselise se hueyi tatzacuilitisti. ¹⁵ Melahuac nimechilhui, quema Toteco quintajtolxitahuas, nopa masehualme cati amo quiselíaj amocamanal, taijyohuise más miyac huan amo quej nopa masehualme cati itztoyaj ipan altepeme Sodoma huan Gomorra huejcajquiya.

Imomachtijcahua Jesús taijyohuise

¹⁶ “Nimechtitani campa masehualme cati amo cuajcualme. Huan quej mahuilili para borregojme mopantise inihuaya tepechichime, nojquiya elis mahuilili para amojuanti. Huajca ximochihuaca antalnamiqini quej cohuame, pero nojquiya xiitztoca quej palomajme cati amo quichihuaj cati amo cuali. ¹⁷ Ximomocuitahuica ten masehualme, pampa amechhuicase iniixpa nopa tasentilisti ten tequichihuani huan amechhuitequise ipan israelita tiopame. ¹⁸ Huan hasta amechhuicase iniixpa gobernadores huan huejhueyi tanahuatiani pampa antechnehtocaj. Huan quej nopa huelis anquinyolmelahuase ten na iniixpa masehualme cati israelitame huan iniixpa cati amo israelitame. ¹⁹ Huan quema amechhuicase para amechtzuacase, amo ximotequipachoca ten taya anquijitose para anmomanahuise, pampa ipan nopa talojtzi Toteco Dios amechmacas nopa camanali cati monequi

* 10:3 10:3 Nojquiya itoca Tadeo huan Lebeo.

anquijitose. ²⁰ Amo amojuanti cati ancamanaltise nepa. Elis Itonal Toteco cati camanaltis ipan amojuanti.

²¹ “Ipan nopa tonali masehualme cati amo nechneltocaj quintemactilise ma quinmictica hasta iniicnihua cati nechneltocaj. Sequinoc cati amo nechneltocaj quintemactilise ma quinmictica hasta ininconeuhua cati nechneltocaj. Huan sequij telpocame huan ichpocame cati amo nechneltocaj quintemactilise ma quinmictica hasta inintatahua pampa nechneltocaj.

²² Nochi masehualme amechcualancaitase pampa anechnehtocaj, huan Toteco quinmanahuis nochi cati quijiyohuise hasta itamiya ni tamanti.

²³ Huan quema masehualme amechtaijyohuiltise ipan se altepet, ximotaloca hasta seyoc altepet. Melahuac nimechilhúa, amo anajsise ipan nochi altepeme ipan tali Israel hasta quema na cati niMocuetqui Masehuali sempa nihualas.

²⁴ “Se momachtijquet amo quiselía cati más cuali que itamachtijca. Huan se tequipanojquet amo quipantía cati más cuali que quipantía cati iteco.

²⁵ Anitztoque annomomachtijcahua huan annotequipanojcahua, huajca quinamiqúi para amopantis quej na nopantis. Masehualme nechtocaxtijtoque niAmocualtacat † na cati nitetaj ipan nochaj, huajca más amo cuali amechchihuilise amojuanti cati anitztoque quej annoconeuhua.

Amo xiquinimacasica masehualme

(Lc. 12:2-7)

²⁶ “Amo xiquinimacasica masehualme, pampa nochi ten amechchihuilise ixtacatzí, teipa monextis. Huan cati motatijtoc ama, teipa nochi quimactise. ²⁷ Ni camanali cati ama nimechilhúa tzintayohuaya, xitayolmelahuaca campa hueli quema tonaya. Cati nimechixtacailhua ama, monequi chichahuac xitayolmelahuaca ten calcuitapa para nochi ma quicaquica.

²⁸ Amo xiquinimacasica masehualme cati quinequij amechmictise, pampa san huelise quimictise amotacayo, huan amo teno huelis quichihuilise amoalma. Monequi xiquinimacasica san Toteco Dios pampa yaya quipiya chichahualisti para quitzontamiltis amoalma huan amotacayo nepa micta.

²⁹ “Masque pilquentzi ininpati piltototziti nica ipan taltipacti huan quinamacaj ome para se centavo, inijuanti ininpati miyac iixpa Toteco huan yon se amo miqui sinta Toteco amo quicahuilía. ³⁰ Más miyac Toteco amechmocuitahuía amojuanti huan yaya quimati quesqui amotzoncal anquipiyaj.

³¹ Huajca amo ximomajmatica. Más miyac amopati iixpa Toteco que miyac totome.

Xiquinilhuica masehualme antechnehtocaj

(Lc. 12:8-9)

³² “Cati nechneltoca huan teyolmelahua para nechneltoca, na nojquiya niquilhuis noTata nepa ilhuicac para yaya noaxca. ³³ Pero cati teyolmelahua para amo nechneltoca, huajca na nojquiya niquilhuis noTata nepa ilhuicac para yaya amo noaxca.

Jesús quinxejxeloehua masehualme

(Lc. 12:51-53; 14:26-27)

³⁴ “Amo ximoilhuica nihualajtoc para oncas tasehuilisti ipan ni taltipacti. Eltoc quej nihualajtoc ica macheta. ³⁵ Nihualajtoc para niquinxelos masehualme. Por na tacame moyocatalise ten inintata, huan ichpocame moyocatalise ten ininanahua. Huan yeyojme moyocatalise ten iniyexna.

³⁶ Huan se tacat cati nechneltoca quinpiyas icualancaitacahua ipan ichaj.

† 10:25 10:25 Nopa masehualme quitocaxtijque Amocualtacat, Beelzebú.

³⁷ “Sinta se quicnelía inana o itata más que na nechicnelía, huajca amo quinamiqui para elis noaxca. Sinta se quicnelía isihuapil o ioquichpil más que na, huajca amo quinamiqui para elis noaxca. ³⁸ Monequi se masehuali nechtoquilis mocualtalijtoc para miquis para na quej se cati quihuica icuamapel para ipan miquis. Huan cati amo quej nopa nechtoquillijtiyas, amo quinamiqui elis noaxca. ³⁹ Yaya cati quinequi quimanahuis inemilis para amo miquis por na, quipolos ialma. Pero yaya cati miquis por na huan quipolos inemilis nica ipan taltipacti, quipantis nemilisti para nochipa.

Toteco tetaxtahuis ica cati quichijtoque

(Mr. 9:41)

⁴⁰ “Masehualme cati amechselise, nojquiya nechselíaj. Huan cati nechselía, quiselía noTata cati nechtitantoc. ⁴¹ Huan sinta se masehuali quipalehuis se tajtolpanextijquet pampa yaya quitequipanohua Toteco, yaya quiselis taxtahuili quej Toteco quimacas nopa tajtolpanextijquet. Huan sinta se masehuali quipalehuis se cuali tacat, san pampa quimachilía yaya se cuali tacat, teipa quiselis itaxtahuil quej Toteco quimacas nopa cuali tacat. ⁴² Sinta se masehuali san mitzmacas san se taza ten sesec at para tiquis pampa tinomomachtijca, huan masque amo tihueyi iniixpa masehualme quej sequinoc nomomachtijcahua, nimitzilhuía Toteco quitaxtahuis.”

11

Juan quintitanqui ome imomachtijcahua ma quicamanalhuitij Jesús

(Lc. 7:18-35)

¹ Quema Jesús tanqui techmachtía timajtacti huan ome tiimomachtijcahua huan techtamihlui ten taya tijchihuasquíaj, tiyajque ipan totequi. Huan yaya quisqui nepa huan yajqui tamachtito huan tacamanalhuito ipan altepeme cati eltoyaj nechca.

² Huan quema Juan cati tecuaalti itztoya ipan tatzacti huan quicajqui cati Cristo quichihuayaya, quintitanqui imomachtijcahua ma quicamanalhuitij.

³ Huajca imomachtijcahua Juan quitajtanelijque Jesús:

—¿Ta tiCristo cati Toteco techilhui hualasquía o monequi noja timochiyase para ma huala?

⁴ Huan Jesús quinnanquili: “Xiyaca, xijyolmelahuatij Juan cati anquicac-toque huan anquitztoque. ⁵ Xiquilhuitij, ica nochicahualis cati popoyotzitzí, ama tachiyaj. Huan cati metzcuachotique, ya cuali nejnemij. Huan masehualme cati tacayo palantoyaj ica lepra, ya mochicajtoque. Cati nacastzac-toque, ama ya tacaquij huan cati mictoyaj, ya moyolcuitoque huan cati más teicneltzitzí quicaquij icamanal Toteco pampa niqincamanalhuía. ⁶ Huan nojquiya xiquilhuitij para Toteco quitiochihuas cati quimachilis ajquiya na huan nechtoquilis.”

⁷ Huan teipa quema ya quistoyaj imomachtijcahua Juan, Jesús pejqui quincamanalhuía ten Juan itequi nopa miyac masehualme cati quiyahualojtoyaj. Quiijto: “Quema achtohui anyajque ipan tali huactoc campa amo teno eli para anquiiatij Juan, ¿taya anmoilhuiyayaj anquitasquíaj? ¿Anmoilhuiyayaj anquitasquíaj se tacat cati yamanic quej se pilacatzí cati moojolinía quema taajaca? ¡Amo ya nopa! ⁸ Yon amo anmoilhuiyayaj anquitasquíaj se tacat cati moyoyontijtoc ica se yoyomit cati nelcuali. Ya anquimatij cati moquentíaj yoyomit cati nelcuali itztoque ipan ininchaj tanahuatiani. Nimechilhuis para ten anyajque. ⁹ Anyajque ipan nopa tali huactoc campa itztoya Juan pampa anquimatiyayaj yaya se tajtolpanextijquet. Huan nimechilhui para

Juan amo san ten hueli tajtolpanextijquet. Yaya nopa tajtolpanextijquet cati más hueyi. ¹⁰ Ipan Icamanal Toteco camanalti ten Juan campa ijcuilijtoc: 'Xiquita, nijtitanis notayolmelajca ma mitzyacanas. Yaya quicualtis iniyolo masehualme para ma mitzselise.'

¹¹ Melahuac nimechilhuía, amo aqúi secoc cati tacajtoc ipan ni taltipacti cati más hueyi iixpa Toteco que Juan cati tecuaaltía. Huan nopa masehuali cati itztoc más pilquentzi ipan itanahuatilis Toteco cati itztoc ilhuicac, yaya elis más hueyi que Juan.

¹² "Huan ten nopa tonali quema nejnemiyaya Juan cati tecuaaltiyaya huan hasta ama, miyac quinequij tatehuse ten quenicatza tanahuatis Toteco cati itztoc ipan ilhuicac, pampa Toteco quisencajtoc quenicatza tanahuatis, pero itanahuatilis amo elis quej inijuanti quinequij. Huan yeca quinequij ica ininchicahualis ma quichihuaca ma quipiya seyoc tamanti tanahuatili.

¹³ Nochi itanahuatil Moisés huan nochi tajtolpanextiani cati hualajque achtohui quema ayemo tacatiyaya Juan, techpohuiliyayaj cati panosquía ipan ni tonali. ¹⁴ Quiijtojque hualasquía se Elías, huan sinta anquinequij anquimatise, inijuanti camanaltiyayaj ten Juan, pampa Juan yaya Elías.

¹⁵ Anquipiyaj amonacas, huajca xijcaquica cati nimechilhuía.

¹⁶ "¿Ica taya nimechhuicalotis anmasehualme cati ama anitztoque? Anitztoque quej coneme cati mosehuíaj tianquis huan quinnotzaj sequinoc coneme ma mahuiltica inihuaya huan nopa sequinoc amo quinneltocaj.

¹⁷ Huajca nopa coneme cualanij huan quijtohuaj: 'Titapitzque para ximijtotica, pero amo anmijtotijque. Tihuicaque se mijca huicat ten tequipacholi quej mictoya se acajya, pero amo anchocaque.' ¹⁸ Huajca anitztoque quej nopa coneme cati amo paquij sinta nochi tamanti amo mochihua quej inijuanti quinequij. Pampa hualajqui Juan huan mosajqui huan amo quic xomeca at huan anquijtojque quipixtoya se iajacayo Amocualtat. ¹⁹ Huan na cati niMocuetqui Masehuali nihualajtoc, huan nijcua huan nigui cati onca huan anquijtojque nineltacuajquet huan nineltaiquet. Anquijtojque ninejnemi inihuaya tacajcayahuani cati tainamaj impuesto huan inihuaya tacame cati miyac tajtacoli quichijtoque. Pero sinta Toteco nechmacatoc cuali notalnamiqulis, teipa tanemijya nesis para nijchihua cati xitahuac."

*Toteco quintajtolsecahuas cati amo quicualitase
(Lc. 10:13-15)*

²⁰ Teipa Jesús pejqui quijtohua para amo cuali cati quichijque masehualme ipan altepeme campa quichijtoya miyac tiochichahualnescayot inixpa, pampa amo moyolpataque. ²¹ Quiijto: "Anteicnelitque cati anehuani altepet Corazín pampa Toteco amechtatzacuultis. Anteicnelitque cati anehuani Betsaida, pampa amo antechneltoaque quema nijchijqui huejhueyi tiochichahualnescayot amoixpa. Sintá masehualme cati huejcajquiya itztoyaj ipan altepeme Tiro huan Sidón quijtoztoquía nochi nopa tiochichahualnescayot cati nijchijqui amoixpa, moyolpatatosquía nimanntzi huan nochi masehualme quimajtosquía. ²² Pero nojquiya nimechilhuía, ipan nopa tonali quema Toteco tetajtolsecahuas, más chicahuac amechtatzacuultis amojuanti cati anquicactoque nocamanal, pero amo anquineque amoyolpatase, huan amo quej quintatzacuultis nopa amo cuajcualme cati itztoyaj ipan Tiro huan Sidón huejcajquiya. ²³ Amojuanti cati anehuani altepet Capernaum, anmohueyimati huan anmoilhuíaj anmotananase hasta ilhuicac, pero amo. Antemose hasta micta pampa amo amoyolpatatoque. Sintá Sodoma ehuan cati itztoyaj huejcajquiya quijtoztoquía nopa tiochichahualnescayot cati anquijtoque, moyolpatatosquía huan noja mocahuasquía

inialtepe hasta ama. ²⁴ Huan ipan nopa tonali quema Toteco tetajtolsenc-ahuas, más amechtatzacuiltis anCapernaum ehuan huan amo quej quinzatatzacuiltis nopa amo cuajcualme cati huejcajquiya itztoyaj ipan Sodoma.”

Jesús quinnotzqui masehualme ma yaca campa ya
(Lc. 10:21-22)

²⁵ Huan ipan nopa tonali nojquiya Jesús quicamanalhui Itata, Toteco Dios, huan quiihuhui: “Notata, ta tiToteco Dios cati titanahuatía ipan ilhuicacti huan ipan taltipacti. Nimitzhueyimatí pampa tijtatitjoc ni tamanti para ma amo quimachilica masehualme cati moilhuáj talnamiquini huan miyac quimachilíaj. Huan ama tiquinnextilijtoc masehualme cati itztoque quej coneme huan amo mohueyimatij. ²⁶ Quena, quej nopa tijchijtoc pampa quej nopa elqui mopaquilis.”

²⁷ Huan Jesús quinilhui nopa masehualme: “NoTata nechmacatoc tequiticayot ipan nochi tamanti. Amo aquí cuali nechixmati, san Toteco noTata, quena, yaya cuali nechixmati. Huan amo aquí quixmati Toteco noTata, san na, quena, cuali niqixmati. Huan nojquiya quixmatise nopa masehualme cati nijnequi para niquinnextilis ajquiya ya. ²⁸ Xihualaca campa na nochi amojuanti cati ansiyahuij huan antamamajtiyahuij etic, huan na nimechquixtilis amotamamal para ximosiyajquetzaca. ²⁹ Techcahuilica ma nieli niamoTeco huan xinemica nohuaya. Ximomachtica ten na, pampa na nijpiya noyolo. Amo nimohueyimatí huan ica na anquipantise cati amoalma quitemohua para ma mosiyajquetzas. ³⁰ Amo ohui nopa tequit cati nimechmacas. Eltoc quej se tamamali cati amo etic.”

12

Jesús hueli quinilhuis masehualme taya monequi quichihuase ipan sábado
(Mr. 2:23-28; Lc. 6:1-5)

¹ Ipan nopa tonali, ipan se sábado quema tiisraelitame timosiyajquetzaj, Jesús panoyaya ipan se mili cati quipixqui tocti ten trigo. Huan tiimomachtijcahua pejqúi timayanaj huan tijquehcocotzotzque quentzi trigo huan tijcaujaque. ² Huan nopa fariseos techítaque huan quiihuhijque Jesús:

—Xijtachili taya quichihuaj momomachtijcahua. Inijuanti tequitij, pampa quicuij trigo huan ama sábado. Huan itanahuatil Moisés technahuatía tiisraelitame para san ma timosiyajquetzaca ipan ni tonal.

³ Huajca Jesús quinilhui:

—Huelis amo anquipojtoque cati David huan ihuampoyohua quichijque quema tahuel mayanayaj huan amo elqui se tajtacoli. ⁴ Calajque ipan ichaj Toteco huan quicuajque nopa pantzi cati totajtzitzi quitaliyayaj iixpa Toteco. Huan itanahuatil Moisés amo quincahuiliyaya para David, yon cati itztoyaj ihuaya ma quicuaca, pampa quijto san totajtzitzi huelis quicuase nopa pantzi. ⁵ Nojquiya huelis amo anquipojtoque ipan itanahuatil Moisés campa quijto para nopa totajtzitzi monequi quixpanose nopa tanahuatili para mosiyajquetzase ipan sábado, pampa monequi tequitise ipan tiopamit huan amo se tajtacoli. ⁶ Huan nimechilhúia na niitztoc más nihueyí iixpa Toteco que nopa tiopamit. ⁷ Huelis amo anquimachilíaj Icamanal Toteco campa quijtohua: ‘Nijnequi xiquintasojtaca masehualme, amo nijnequi san techmacaca tapiyalme para tacajchualisti.’ Sinta anquimachilijtosquíaj, anquintasojtatosquíaj nomomachtijcahua cati mayanaj, huan amo anquintelhuijtosquíaj pampa amo teno cati amo cuali quichijtoque. ⁸ Na cati niMocuetqui Masehuali nijpiya tequiticayot para niquinilhuis masehualme

taya huelis quichihuase ipan sábedo, ni tonali para timosiyajquetzase tiisraelitame.

Jesús quichicajqui se tacat cati mahuactoc

(Mr. 3:1-6; Lc. 6:6-11)

⁹ Jesús quistejqui nopa huan yajqui inintiopa. ¹⁰ Huan nopa itztoya se tacat cati mahuactoya. Huan nopa fariseos quitemohuayayaj cati ica quitelhuisquíaj Jesús, huajca quitatzintoquilijque:

—¿Quicahuilía itanahuatil Moisés para tijchicahuas se tacat ama ipan ni tonali quema tiisraelitame monequi timosiyajquetzase?

¹¹ Huan Jesús quinilhui:

—Sinta se ten amojuanti quipiyasquía se borrego cati huetzisquía ipan ostot ipan sábedo ni tonali para timosiyajquetzase, ¿amo quiquixtisquía? ¹² Se masehuali ipati más que se borrego. Huajca quena, quicahuilía tijchihuase cati cuali ipan ni tonali para timosiyajquetzase.

¹³ Huajca Jesús quilhui nopa tacat cati mahuactoya:

—Xijxitahua momax.

Huan yaya quixitajqui huan mocualtili quej nopa seyoc imax. ¹⁴ Huajca nopa fariseos quisque huan mocamanalhuijque san sejco quenecatza quichihuase para quimictise Jesús.

Icamanal Toteco huejcajquiya camanaltic ten Jesús

¹⁵ Jesús quimatiyaya cati nopa tacame quisencahuayayaj quichihuase, huajca quisqui nozona. Huan quitoquilijque miyac masehualme, huan quinchicajqui nochi cati mococohuayayaj. ¹⁶ Quinilhui ma amo quinilhui ca sequinoc aiquiya ya. ¹⁷ Ica nochi ni tamanti cati Jesús quichijqui, tanqui nopa camanali cati Toteco quijito huejcajquiya huan cati nopa tajtolpanextijquet Isaías quijcuilo. Quiijto:

¹⁸ “Xijtachili ni notequipanojca cati nijtapejpenijtoc.

Niquicnelía miyac, yaya quichihua cati tahuel nechpactía.

Na nijtalis Notonal ipan ya,

huan yaya quinilhuis masehualme cati amo israelitame ten nopa tonal quema Toteco tetajtolsencahuas.

¹⁹ Yaya amo tatehuis, yon amo tzajtzis.

Amo tahuejchihuas miyacapa ipan calle.

²⁰ Quipiyas iyolo ica cati amo quipiyaj chicahualisti, huan quinpalehuis cati amo quimatij taya quichihuase.

Quena, yaya iselti tanahuatiqui nica huan quichihuas ma tatani cati xitahuac.

²¹ Huan masehualme ten nochi talme mochiyase ipan ya * para ma quinmaquixti.”

Fariseos quijtojqe Amocualtacat quipalehuía Jesús

(Mr. 3:19-30; Lc. 11:14-23; 12:10)

²² Teipa quihualicaque campa Jesús se tacat cati quipixtoya iajacayo Amocualtacat ipan itacayo. Huan nopa ajacat quichijtoya para ma amo hueli tachiya huan ma amo hueli camanalti. Huan Jesús quichicajqui huan yaya huelqui camanalti huan huelqui tachiya. ²³ Huan nochi nopa miyac masehualme quitetzaitaque quema quitaque cati Jesús quichijqui huan moilhuyayaj se ica seyoc: “¿Huelis yaya iteipan ixhui Tanahuatijquet David cati Toteco techilhui tectitanilisquía?”

* 12:21 12:21 Ipan itoca.

²⁴ Huan nopa fariseos quicajque cati injuanti quijtohuayayaj huan quijtoque: “Ni Jesús quinquixtia ajacame ica ichichualis Amocualtat cati quinyacana nochi ajacame.”

²⁵ Pero Jesús quimatiyaya nochi cati nopa masehualme moilhuyayaj, huan huajca quinihui: “Sinta se tanahuatijquet ipan se tali quimpiya imasehualhua cati moxelo huaj huan motehuíaj ica seyoc tajco, tamis ichichualis nopa tali. Nojquiya sinta se altepet, o se familia ipan san se ininchaj motehuise, amo huejcahuase san sejco. ²⁶ San se elisquía sinta nopa Amocualtat nechmacasquía fuerza para niquinquixtisquía cati yaya iajacahua ipan masehualme quej anquijtohuaj. Sinta quiyampa elisquía, motajcoxelosquía huan amo huejcahuasquía itanahuatilis ten iajacahua. ²⁷ Anquijtoque niquinquixtia iajacahua ica itapalehuil Amocualtat†, pero injuanti cati amechoquillíaj nojquiya quinquixtia iajacahua Amocualtat cati calactoque ipan masehualme. ¿Huelis anmoilhuíaj nopa Amocualtat quinpalehuía nojquiya? Hasta amotatoquillíaj hua amechilhise para anmocupolotoque. ²⁸ Ximoilhuica. Sinta na niquinquixtia iajacahua Amocualtat ica ichichualis Itonal Toteco, huajca xijmática para ajsicoya amohuaya Toteco cati huelis tanahuatis ipan amoyolo.

²⁹ “Ximoilhuica, amo aqui huelis calaquis ichaj se tacat cati tetixtoc quej Amocualtat huan quiquixtilis cati iaxca sinta achtohui amo quitanis huan quijlpis. Huajca quena, huelis quiquixtilis cati quipiya quej na niquinquixtia iajacahua Amocualtat.

³⁰ “Se masehuali cati amo itztoc nohuaya, yaya nocualancaitaca. Cati amo nechpalehuía para niquinnotzas masehualme campa na, quinsemana cati hualahui nohuaya.

³¹ “Nimechilhúa, Toteco huelis quintapojpolhuis masehualme nochi tajtacoli cati quichihuj huan nochi camanali amo cuali cati quijtohuaj, pero sinta se quitelchihuas Itonal Toteco, Toteco amo quema quitapojpolhuis.

³² Huajca sinta se camanaltis ten hueli ten na cati niMocuetqui Masehuali, Toteco huelis quitapojpolhuis, pero sinta quitelchihuas Itonal Toteco, Toteco amo quitapojpolhuis ipan ni tonali, yon ipan nopa tonali cati hualas.

Tiquixmatise se cuahuit por itajca

(Lc. 6:43-45)

³³ “Masehualme quixmatij se cuali cuahuit pampa temaca itajca cati cuali. Monequi anquijtose cuali se cuahuit pampa cuali itajca o xiquijtoaca amo cuali se cuahuit pampa amo cuali itajca. ³⁴ Amojuanti anitztoque quej ancohume, huajca ¿quenicatza hueli anquijtose cati cuali? Pampa se masehuali camanalti cati eltoc ipan iyolo. ³⁵ Se cuali masehuali quijtohua cati cuali pampa cuali iyolo, pero fiero masehualme quijtohuaj camanali cati fiero pampa fiero iniyolo. ³⁶ Huan nimechilhúa, quema Toteco tetajtolsenahuas, yaya nojquiya quintatzacuiltis masehualme por nochi fiero camanali cati quijtoque. ³⁷ Quena, sinta anquijtoque cati cuali ama, Toteco amechilhuis amo anquihuicaj tajtacoli. Pero sinta anquijtohuaj cati fiero ama, Toteco amechtatzacuiltis.”

Fiero masehualme quineqij se tanextili

(Mr. 8:12; Lc. 11:29-32)

³⁸ Teipa seqij fariseos huan tamachtiani ten itanahuatil Moisés quitajtanjque Jesús:

† 12:27 12:27 Nopa masehualme quitocaxtijque Amocualtat, Beelzebú.

—Tamachtijquet, tojuanti tijnequij xijchihua se tanextili para technextilis nelía tijpiya chicahualisti.

³⁹ Huan Jesús quinnanquili:

—Amojuanti cati anitztoque ama, nelía anfiero masehualme huan anquicajtejqtoque Toteco. San amojuanti antechtajaníaj más tanextili para antechneltoque. Pero amo nimechmacas seyoc tanextili. San nopa tanextili cati tajtolpanextijquet Jonás techmacac elis se tanextili para amojuanti.

⁴⁰ Pampa quej Jonás itztoya eyi tonati huan eyi yohuali iijtico nopa hueyi michi ipan hueyi at, na nojqúiya cati niMocuetqui Masehuali, niitztos ipan mijca ostot para eyi tonati huan eyi yohuali. ⁴¹ Ipan nopa tonal quema Toteco tetajtolsencahuas, nopa masehualme cati huejcajúiya itztoyaj ipan altepet Nínive moquetzase huan amechtelhuise. Pampa nopa Nínive ehuan moyolpataque quema Jonás quinilhuito icamanal Toteco, pero xiquitaca, na niitztoc más hueyi que Jonás huan amo anquinequij antechneltoque.

⁴² Nojqúiya ipan nopa tonali quema Toteco tetajtolsencahuas, nopa hueyi síhua tanahuatijquet ten sur moquetzas huan amechtelhuis cati anitztoque ama. Pampa nopa síhua tanahuatijquet hualajqui huejca para quicaquis icamanal Salomón pampa quimatquí tachel talnamiquí. Huan na niitztoc más hueyi que Salomón, huan amo anquinequij antechtacaquilese.

Ajacame tacuepilise ipan masehualme

(Lc. 11:24-26)

⁴³ “Quema se iajacayo Amocualtat quisa ipan se masehuali, nopa ajacat nemi campa tahuactoc huan campa hueli quitemojtinemi canque mosehuis, huan sinta amo teno quipantía, ⁴⁴ huajca quiihtohua: ‘Nitacuepilis ipan nopa masehuali cati nijcajtejqú.’ Huan tacuepilis huan quipantis cactoc huan amo aquí itztoc ipan iyolo nopa masehuali. Eltoc quej se cali cati tachpanti huan cati quiپیya nochi tacualtalili. ⁴⁵ Huajca nopa ajacat yas huan quinhualicas sequinoc chicome ajacame cati achi más fierojtique que ya. Huan nopa masehuali elis más fiero teipa ica chicome ajacame huan amo quej eltoya achtohuiya ica san setzi. Quej nopa nojqúiya elis ica amojuanti cati ama anitztoque, teipa anitztose más anfierojtique que ama.”

Ajsicoy inana huan iicnihua Jesús

(Mr. 3:31-35; Lc. 8:19-21)

⁴⁶ Quema Jesús quincamanalhuyaya nopa masehualme, hualajqui inana huan iicnihua huan moquetzacoj calteno. Quinequiyayaj quicamanalhuise.

⁴⁷ Huajca se tacat quiihui Jesús:

—Monana huan moicnihua itztoque calteno huan quinequij mitzcanalhuise.

⁴⁸ Huan Jesús quinnanquili:

—¿Ajquiya nonana?, huan ¿ajquiya noicnihua?

⁴⁹ Huan Jesús techmanexti tiimomachtijcahua huan quiihui nopa tacat:

—Xiquita, ni masehualme cati itztoque nica niquinita quej nonana huan quej noicnihua. ⁵⁰ Pampa cati quichihua ipaquilis noTata cati itztoc ilhuicac, yaya noicni huan nonana.

13

Se tacat quiihtzeloto xinachtí

(Mr. 4:1-9; Lc. 8:4-8)

¹ Teipa ipan san se nopa tonal, Jesús quisqui ipan nopa cali campa itztoya huan mosehuito nechca hueyi at. ² Huan mosentilijque miyac masehualme

nepa campa itztoya. Huajca Jesús tejcoc ipan se cuaacali cati eltoya atenti huan mosehui, huan nopa miyac masehualme moquetzttoyaj xalixco. ³Huan quinmachi miyac tamanti ica tatenpohualisti, quinilhui: “Se tacat yajqui quijtzelo to trigo ⁴huan quema quijtzelo huayaya, sequij xinachi tepejqui ojtipa huan hualajque totome huan quicuacoj. ⁵Sequij xinachi tepejqui tetzala campa amo oncayaya miyac tali, huan nimantzi ixhuac pampa amo huejcata nopa tali. ⁶Pero quisqui tonati, huan quitati huan nimantzi huajqui, pampa amo huelqui motatzquili inelhuayo. ⁷Huan sequij xinachi tepejqui huitztzala huan moscalti, pero nopa huitzti quijyomicti nopa tocti. ⁸Huan sequinoc xinachi tepejqui ipan cuali tali huan moscalti huan temacac itajca. Sequij tocti ten trigo temacac cien xinachi, huan sequij tocti temacac sesenta xinachi, huan sequij temacac treinta xinachi. ⁹Nochi amojuanti anquiyaj amonacas, huajca xijcaquica cati nimechilhuía.”

Para ten Jesús quitequihui tatenpohualisti
(Mr. 4:10-12; Lc. 8:9-10)

¹⁰Huan tiimomachtijcahua Jesús timonechcahuicoj huan tijtatzintoquilijque: “¿Para ten tiquincamanalhuía masehualme ica tatenpohualisti cati ohui quimachilise?”

¹¹Huan Jesús technanquili: “Amechcahuilijtoc amojuanti xijmachilica quenicatza tanahuatis Toteco cati itztoc ipan ilhuicac. Achtohuiya amo aquí quimatiyaya, huan ama yaya noja amo quincahuilía para ne sequinoc ma quimatica. ¹²Pampa yaya cati quimachilía nocamanal, Toteco quipalehuis para quimachilis más huan yaya cuali quimatis. Pero yaya cati amo quichihuilía cuenta nocamanal, Toteco quiquixtilis nopa pilquentzi cati quicactoc. ¹³Yeca niquincamanalhuía ica tatenpohualisti para masque ni masehualme quitachilise cati nijchihua, elis quej amo teno quijitaj. Huan masque quicaquij nocamanal, elis quej amo teno quicaquij huan amo teno quimachilíaj. ¹⁴Ica inijuanti tami nopa camanali cati nopa tajtolpanextijquet Isaías huejcajquiya quijcuilo, campa quijitohua:

‘Antacactinemij, pero amo teno anquimachilíaj.

Huan antachixtinemij, pero amo anquimatij taya anquijitaj.

¹⁵Quej ni eltoc pampa ni masehualme yoltetique.

Amo quicalcaquij nocamanal.

Huan ijcoctoque para amo teno quijitase.

Yeca amo quinequij quimachilise nocamanal ipan iniyolo,

huan amo quinequij moyolpatase huan nechneltocase,

para niquinchicahuas ten inintajtolhua.’

¹⁶“Pero Toteco amechtiocijtoc, annomomachtijcahua, pampa anquimachilijtoque cati anquijitaj huan cati anquicaquij. ¹⁷Melahuac nimechilhuía, miyac itajtolpanextijcahua Toteco huan cuajcuali masehualme huejcajquiya quinequiyayaj quitase cati ama anquijitaj, huan quinequiyayaj quicaquise cati ama anquicaquij, pero amo huelque.

Taya quijitosnequi nopa tatenpohualisti
(Mr. 4:13-20; Lc. 8:11-15)

¹⁸“Xijtacaquilica taya quijitosnequi nopa tatenpohualisti ten nopa tacat cati quijtzelo xinachi. ¹⁹Sequij masehualme itztoque quej nopa xinachi cati tepejqui ojtipa. Inijuanti quicaquij quenicatza Toteco tanahuatía huan amo quimachilíaj, huajca Amocualtacat huala huan quinquixtilía nopa quentzi tamachtili cati calactoc ipan iniyolo. ²⁰Sequinoc masehualme

itztoque quej nopa xinachti cati huetzqui tetzala. Inijuanti quicaquij icamanal Toteco huan nimantzi quiselíaj ica paquilisti. ²¹ Pero amo temachme. Itztoque quej se xinachti cati amo motatzquilíaj inelhuayo. Huajca quema huala taohuijcyot o sequinoc quintatzacuiltíaj pampa quineltocaj icamanal Toteco, nimantzi quicajtehuaj. ²² Sequinoc masehualme itztoque quej nopa xinachti cati tepejqui huitztzala. Inijuanti quicaquij icamanal Toteco, pero más mocuatotoníaj ica miyac tamanti ipan ni taltipacti. Quinequij quiipyase miyac tomi, yeca nopa tamanti cati quinequij quiijyomictíaj icamanal Toteco huan amo quipiya itajca. Nopa masehualme amo nelnelíaj quinequij quitequipanose Toteco. ²³ Sequinoc masehualme itztoque quej nopa xinachti cati tepejqui ipan cuali tali. Inijuanti quicaquij icamanal Toteco huan quimachilíaj. Inijuanti, quena, temacaj inintajca. Sequij nopa masehualme itztoque quej nopa xinachti cati temacac cien hueltas imiyaca nopa xinachti cati quitocoyaj, huan sequij quej cati temacac sesenta hueltas imiyaca, huan sequij quej cati temacac treinta hueltas imiyaca nopa xinachti cati quitocoyaj.”

Nopa tatenpohualisti ten nopa amo cuali xihuit

²⁴ Jesús quinilhui seyoc tatenpohualisti, quijto: “Quema Toteco cati itztoque ipan ilhuicac tanahuatis ipan ni taltipacti, elis quej imil ni tacat cati nimechilhuis. Se tacat quitojqui trigo cati cuali ipan imil. ²⁵ Pero quema cochtoya, hualajqui icualancaitaca huan quitojqui seyoc tamanti xinachti cati nesqui nojquiya quej trigo, pero amo teno ipati itajca. Huan icualancaitaca quitoctejqui huan yajqui. ²⁶ Teipa nopa trigo cati cuali ixhuac huan temacac itajca, huan nojquiya nesqui para oncayaya sequinoc tzonti cati amo cuali. ²⁷ Huan itequipanojcahua yajque quicamanalhuitoj ininteco, quihuhijque: ‘Toteco, tijtojque cuali xinachti ipan momil. Huajca ¿para ten nojquiya quipiya nopa cati amo cuali?’

²⁸ “Huan ininteco quinilhui: ‘Se nocualancaitaca quitojqui cati amo cuali.’

“Huan quitatzintocquijque: ‘¿Tijnequi ma tijmacuica nopa cati amo cuali?’

²⁹ “Huan ininteco quinilhui: ‘Amo, pampa huels anquimacuisse ihuaya notrigo. ³⁰ Xijcahuilica nochí ome ma moscaltica san sejo hasta ajsis pixquisti. Huan huajca niquinilhuis cati pixcase para achtohui ma quisentilica cati amo cuali huan ma quihilpica huan quitatise. Huan teipa nopa cuali trigo quipixcase huan quitemase ipan cuacali.’ ”

Nopa xinachti ten mostaza

(*Mr. 4:30-32; Lc. 13:18-19*)

³¹ Teipa Jesús quinilhui seyoc tatenpohualisti, quijto: “Quema Toteco cati itztoque ilhuicac tanahuatis ipan taltipacti momiyaquilise masehualme ipan itanahuatilis quej ni. Eltos quej se pilxinachti ten mostaza cati se tacat quitocato ipan imil. ³² Nopa xinachti mostaza eltoc cati más pilquentzi ten nochí sequinoc xinachti, pero quema moscaltíaj, eli más hueyi que sequinoc tzonti huan mochihua se cuahuit campa totome huels quichihua inintepasol ipan imacuayo.”

Se tatenpohualisti ten tasonejcyot

(*Lc. 13:20-21*)

³³ Huan Jesús quinilhui seyoc tatenpohualisti: “Momiyaquilise masehualme cati quicahuilíaj Toteco cati itztoque ilhuicac para quinnahuatis. Elis quej momiyaquilíaj eyi tatamachihuali harina quema se sihuat quitatíaj tasonejcyot ipani. Teipa mosonehua huan quichihua tahuel miyac pantzi.”

Quenicatza Jesús quitequihui tatenpohualisti
(Mr. 4:33-34)

³⁴ Nochi ni tamanti Jesús tamachti ica tatenpohualisti, pampa nochipa quema quincamanalhuyaya masehualme, quinilhuyaya tatenpohualisti. ³⁵ Huan quichijqui ya ni para ma tami cati nopa tajtolpanextijquet huejcajquiya quijcuilo. Yaya quijto: “Niquincamanalhuis masehualme ica tatenpohualisti. Niquinilhuis tamanti cati amo aqui quimatiyaya hasta quema pejqui taltipacti.”

Taya quinequi quijtos nopa cuali trigo huan nopa cati amo cuali

³⁶ Teipa Jesús quincajtejqui nopa miyac masehualme huan yajqui ichaj, huan tuimomachtijcahua tiquilhuijqe: “Techilhui taya quijtosnequi nopa tatenpohualisti ten nopa amo cuali xinachti cati icualancaitaca quitojqui ipan imil.”

³⁷ Huan Jesús technanquili: “Yaya cati quitojqui nopa cuali xinachti ipan imil, eltoc na cati niMocuetqui Masehuali. ³⁸ Nopa mili quinequi quijtos ni taltipacti. Nopa cuali xinachti quijtosnequi masehualme cati iaxcahua Toteco. Nopa xinachti cati amo cuali quijtosnequi masehualme cati iaxcahua Amocualtatcat. ³⁹ Huajca icualancaitaca cati quitojqui nopa xinachti cati amo cuali, yaya Amocualtatcat. Nopa pixquisti quijtosnequi quema tamis taltipacti. Huan nopa pixcani quijtosnequi ilhuicac ehuan. ⁴⁰ Huan quema quisentilise nopa tzonti cati amo cuali huan quitatise, technextilía cati panos quema tamis ni taltipacti. ⁴¹ Quema tamis ni taltipacti, na cati niMocuetqui Masehuali niquintitanis noilhucac ejcahua ma yaca campa hueli ipan notanahuatil, huan quinquixtise nochi masehualme cati quichihuj sequinoc ma tajtacolchihuaca huan nochi cati quichihuj cati amo cuali. ⁴² Huan noilhucac ejcahua quinmajcahuase ipan tit nopa amo cuajcualme huan nepa chocase huan tanhuehuechocase pampa tahuel taijyohuise. ⁴³ Pero nochi nopa masehualme cati itztoque xitahuaque iixpa Toteco Totata cahuanise quej tonati nepa campa Toteco tanahuatía. Anquipiyaj amonacas, huajca xijtacaquilica cati nimechilhuía.

Nopa tatenpohualisti ten tomi cati taltita calactoc

⁴⁴ “Nel cuali eltoc quema Toteco cati itztoc ilhuicac tanahuatía. Huan quema masehualme quimachilíaj para nelía cuali nepa, quichihuase quej se tacat cati quipantía miyac tomi ipan se mili. Huan quema quipanti, nimantzi sempa quitalpacho. Teipa ica paquilisti yajqui huan quinamacac nochi cati quipixtoya huan quicojqui nopa mili.

Nopa tatenpohualisti ten nopa perla cati nelía ipati

⁴⁵ “Quena, nelía ipati cati quipantise masehualme cati quinequij calaquise campa tanahuatía Toteco cati itztoc ilhuicac. Nopa masehualme itztoque quej se tanamacaquet cati quitemohua nopa perla cati más patiyó para moaxcatis. ⁴⁶ Huan quema quipantis nopa perla cati tahuel miyac ipati, yahui huan quinamacac nochi cati quipixtoc para quicohuas.

Michime ipan matat

⁴⁷ “Masque masehualme quicahuilíaj Toteco cati itztoc ilhuicac ma quinhuaui, noja itztose nica inihuaya amo cuajcualme. San se que michtajtamani cati quimajcahuaj inimata ipan hueyi at huan quinitzquíaj nochi tamanti michime. ⁴⁸ Huan quema cuali temitoc inimata, quitálíaj xalixco huan mosehuíaj huan nopa cuali michime quintemaj ipan chiquihuit huan

cati amo cuali quintepehuaj. ⁴⁹ Quej ni nojquiya elis quema tamis taltipacti. Ilhuicac ehuaní hualase huan quinquixtise nopa amo cuajcualme cati itztoque inihuaya injuanti cati xitahuacae iixpa Toteco. ⁵⁰ Huan nopa amo cuajcualme quinmajcahuase campa tit huan nepa chocase huan tanhuehuechocase pampa tahuel taijyohuise.”

Tamanti sosoltic huan yancuic

⁵¹ Huan Jesús techtatzintoquili:

—¿Anquimachilijque nochi cati nimechilhuijtoc?

Huan tiquilhuijque:

—Quena.

⁵² Huan Jesús techilhui:

—Nochi tamachtiani ten itanahuatil Moisés cati mochihuase imomachticahua Toteco huan quicahuilise ma quinnahuati ipan ininemilis, quichihuase quej se tetaj cati quinajocui sequij tamanti cati sosoltic huan sequij cati yancuic cati ipati para quitequihuis teipa. Nopa tamachtiani quiquixtise para quitequihuse ipan inintamachtitil sequij tamachtitli sosoltic cati ipa quimatiyayaj huan sequij cati yancuic cati sanoc quicactoque.

Masehualme ipan ialtepe Jesús amo quineltocaque

(Mr. 6:1-6; Lc. 4:16-30)

⁵³ Huan quema Jesús tanqui quinilhuía ni tatenpohualisti, quisqui ten nepa, ⁵⁴ huan yajqui ialtepe. Nepa pejqui tamachtia ipan toisraelita tiopa. Huan masehualme cati quicajque icamanal quitetzaitayayaj huan motatzintoquiliyayaj:

—¿Ajquiya quimaca Jesús ni talnamiquilisti para tamachtis quej ni, huan para hueli quichihua ni huejhueyi tiochicahualnescayot? ⁵⁵ Yaya san icone se cuatejquet. Inana itoca María huan itaca icnihua inintoca Jacobo, José, Simón huan Judas. ⁵⁶ Huan nochi isihua icnihua itztoque nica tohuaya. Huajca ¿canque momachtit Jesús nochi ni tamanti?

⁵⁷ Huajca yeca nopa masehualme quicualancaitaque. Pero Jesús quinilhui:

—Ichampoyohua se tajtolpanextijquet huan masehualme cati san sejco ehuaní ihuaya, amo quema quiselíaj. Cati sejcoyoc ehuaní, quena.

⁵⁸ Huajca Jesús amo quichijqui miyac tiochicahualnescayot nepa pampa masehualme cati ehuaní ipan ialtepe amo quineltocayayaj.

14

Quenicatza Herodes quimicti Juan cati tecuaaltiyaya

(Mr. 6:14-29; Lc. 9:7-9)

¹ Ipan nopa tonali Tanahuatijquet Herodes Ántipas cati quinahuatiyaya estado Galilea quicajqui para Jesús quichihuayaya miyac tiochicahualnescayot. ² Huan quinilhui itequipanojcahua: “Ni tacat Jesús, yaya Juan cati tecuaaltiyaya. Nijmicti, però ama moyolcuitoc huan yeca quipiya chichahualisti quichihuas huejhueyi tiochicahualnescayot.”

³⁻⁴ Quej ni mijqui Juan. Nepa tonaliya Tanahuatijquet Herodes mocuili se sihuat cati itoca Herodías cati achtohuiya eliyaya isihua Herodes Felipe I, iicni Herodes. Huan hualajqui Juan cati tecuaaltiyaya huan quiilhui para amo cuali itztoc ihuaya ihuejpol, huajca Tanahuatijquet Herodes quitzqui Juan, quiilpi huan quitzajqui.

⁵ Huan Herodes quinequiyaya quimictis Juan, però quinimacasiyaya nopa miyac masehualme cati quitayayaj Juan para se tajtolpanextijquet. ⁶ Pero

teipa quema quiaxiti ixihui Tanahuatijquet Herodes, ilhuichijqui huan itepotz ichpoca mijtotico iixpa ya huan itanotzalhua. Yaya eliyaya iichpoca Herodías cati ama isihua. Huan Tanahuatijquet Herodes nelía quipacti quej mijtoti. ⁷ Huajca Tanahuatijquet Herodes quitencahuili quimacasquía nopa ichpocat ten hueli tamanti cati quitajtanisquía. ⁸ Huan inana nopa ichpocat, yaya cati itoca Herodías, ya quilhuijtaya iichpoca taya ma tajtani. Huajca nopa ichpocat quiilhui nopa tanahuatijquet:

—Techmaca amantzi ipan se hueyi plato itzonteco Juan cati tecuaaltía.

⁹ Huan masque motequipacho nopa tanahuatijquet, tanahuati ma quimacaca pampa quitencahuilijtoya quimacas ten quitajtanisquía iniixpa itanotzalhua cati tacuayayaj ihuaya. ¹⁰ Huajca tatitanqui ma quiquechtzontequitij Juan ipan tatzacti. ¹¹ Huan quihualicaque itzonteco ipan se hueyi plato, huan quimacaque nopa ichpocat, huan nopa ichpocat quimactili inana.

¹² Huan hualajque imomachtijcahua Juan huan quihuicaque itacayo huan quitapachotoj. Teipa yajque quiyolmelahuatoj Jesús para mijqui Juan cati tecuaaltiyaya.

Jesús quintamacac macuili mil tacame
(Mr. 6:30-44; Lc. 9:10-17; Jn. 6:1-14)

¹³ Huan quema Jesús quicajqui para ya mijqui Juan, quisqui nepa campa itztoya, huan yajqui iselti ipan cuaacali hasta seyoc lugar campa tatzitzicaya. Huan nopa miyac masehualme quicajque canque yahuiyaya. Huan quisque inialtepehua huan quitoquilijque icxinejnemiyayaj huan quimacaque se huela campa nopa hueyi at hasta campa Jesús ajsiti ipan icuaacal. ¹⁴ Huan quema Jesús temoc ipan cuaacali, quinitac nopa miyac masehualme huan quintasojtac. Huan quinchicajqui nopa cocoyani cati quihualiquilijayaj. ¹⁵ Huan quema pejqui tayohuiya, tiimomachtijcahua tiajsicoj huan tiquilhuijque:

—Ya tayohua huan nica amo onca calme. Huajca xiquintitani ni masehualme ma yaca, pampa monequi quicohuatij ten quicuase campa pillaltepetzitzí.

¹⁶ Huan Jesús techilhui:

—Amo monequi ma yaca. Amojuanti xiquintamacaca.

¹⁷ Huan tiimomachtijcahua tiquilhuijque:

—Tojuanti san tijpiyaj nica macuili pantzi huan ome michime.

¹⁸ Huan Jesús techilhui:

—Techhualiquilica cati anquipiyaj.

¹⁹ Huan Jesús quinilhui nochí nopa masehualme ma mosehuica sacapetaixco. Huan quitzqui nopa macuili pantzi huan nopa ome michime, huan ajcotachixqui ilhuicac, huan quitascamatqui Toteco. Teipa quitajcotapanqui nopa pantzi huan techmacac tojuanti tiimomachtijcahua huan tiquinmajmacaque nopa miyac masehualme. ²⁰ Huan nochí injuanti tacuajque huan cuali ixhuique. Huan teipa tijsentilijque nopa pantatapatzti huan michtatapatzti cati mocajqui, huan tijtemitijque majtacti huan ome chiquihuit. ²¹ Huan itztojaj nepa nechca macuili mil san tacame cati tacuajque huan amo tiquinpojque quesqui sihuame huan coneme.

Jesús nejnenui aixco
(Mr. 6:45-52; Jn. 6:16-21)

²² Huan nimantzi Jesús techilhui tiimomachtijcahua ma ticalaquica ipan cuaacali huan ma tifayacanaca hasta seyoc nalí, huan yaya mocajqui para

quinnahuatijtehuas nopa miyac masehualme. ²³ Huan Jesús quinnahuatijtejqüi, huan tejoc iselti ipan se tepet para motatajtis. Huan quema tayohuixqui, itztoya nepa iselti. ²⁴ Huan tocuuacal cati ipan tiahuiyayaj nejnentoya hasta tajco ipan hueyi at, quema pejqüi taajaca chichahuac. Huan pejqüi quicuatopehua tocuuacal, huan nopa at techhuilanayaya huan ayecmo huelqui tiahuij para seyoc nali. ²⁵ Huan quema tanestihualayaya, Jesús monechcahuico campa tojuanti nejnentihualayaya aixco. ²⁶ Huan tiimomachtijcahua tiquitaque nejnemiayaya aixco, huan timomajmatijque huan titzajtzi que:

—Huala se animajtzi.

Huan nelía timomajmatijque.

²⁷ Pero Jesús nimantzi technojnotzqui huan techilhui:

—Ximoyolchichahuaca. Na ni Jesús. Amo ximomajmatica.

²⁸ Huan Pedro quiilhui Jesús:

—NoTeco, sinta nelía ta, huajca xijchihua ma ninejnemi aixco hasta campa tiitztoc.

²⁹ Huan Jesús quiilhui:

—Xihuala.

Huan Pedro quisqui ipan cuaacali huan nejnenqui aixco para ajsis campa Jesús. ³⁰ Pero quema quicajqui nopa ajacat cati hualayaya chichahuac, nelía momajmati huan pejqüi atzonpolihui, huan tzajtzi:

—NoTeco techmanahui.

³¹ Huan nimantzi Jesús quimaitzqui huan quiilhui:

—¿Para ten timomajmati? ¿Para ten pilquentzi techneltoca?

³² Huan quema Jesús huan Pedro tocoque ipan tocuuacal, nopa ajacat moquetzqui. ³³ Huan tiimomachtijcahua tijhueyimatque huan tiquilhuijque:

—Nelía ta tiIcane Toteco.

Jesús quinchicajqui masehualme ipan tali Genesaret

(Mr. 6:53-56)

³⁴ Huan teipa quema Jesús huan tiimomachtijcahua tiquixcotonque nopa hueyi at, tiajsitoj tali Genesaret. ³⁵ Huan nopa masehualme nepa quiixmatque Jesús huan campa hueli tayolmelahuatoj ipan inintal para ya ajsito. Huajca masehualme quinhualicaque campa ya nochi cati mococohuj para ma quinchicahua. ³⁶ Huan nopa cocoyani quitajtaniyayaj Jesús ma quinchahuili quiajsise iyoyo, huan nochi cati quiajsiyayaj iyoyo, mochicahuayayaj.

15

Nopa cati quichihua se masehuali amo tapajpactic

(Mr. 7:1-23)

¹ Huan teipa ajsicoj campa Jesús seqüij fariseos huan tamachtiani ten itanahuatil Moisés cati hualajtoyaj Jerusalén. Inijuanti quilhuijque:

² —¿Para ten momomachtijcahua taixpanoj? Quicajtoque nopa tamachtili cati tohuejcapan tatahua techmacaque ten quenicatza monequi timomajtequise. Amo momajtequíaaj miyac huelta quej monequi quema tacuaj.

³ Huajca Jesús nojqüiya quintatzintoquili se tamanti:

—Huan amojuanti ¿para ten antaixpanoj huan anquicajtehuaj itanahuatil Toteco san para anquitoquilis inintalnamiquilis masehualme ten huejcajqüiya? ⁴ Toteco quijto: ‘Xiquintepanitaca amotatahua huan amonanahua.’ Huan nojqüiya quijto: ‘Ma miqüi cati quitaijilhuía inana o itata.’ ⁵⁻⁶ Pero anquinmachtíaj masehualme ma amo quintepanitaca ininanahua huan inintatahua. Anquinmachtíaj ma quinilhüica para amo hueli quinpalehuise ica

cati quinpolohua pampa ya quimacatoque Toteco nochi cati quipiyaj. Hua-
jca anquicahuaj ni tanahuatili cati Toteco techmacac para anquitoquilise
cati masehualme momajtoque quichihuase. ⁷ Anquiapiyaj ome amoxayac.
Nelía melahuac cati nopa tajtolpanextijquet Isaías quiiicuilo huejcajquiya
cati Toteco quiijtojtoya ten amojuanti:

⁸ ‘Ni masehualme quiijtohuaj nechtepanitaj, pero amo neli,
pampa ipan iniyolo amo nechelnamiqij.

⁹ Amo teno quichihuaj quema nechhueyimatij,

pampa tamachtíaj san inincamanal masehualme quej eltosquía nocamanal.’

¹⁰ Huajca Jesús quinnotzqui nopa miyac masehualme ma monechcahuica
huan quínilhui:

—Xijcaquica cuali cati nimechilhuía huan xijmachilica nocamanal. ¹¹ Cati
se masehuali quicua amo hueli quichihua amo tapajpacti iixpa Toteco, pero
quema quiijtohua camanali cati amo cuali, quena, icamanal quichihua amo
tapajpactic iyolo.

¹² Huan tojuanti tiimomachtijcahua Jesús timonechcahuicoj huan tijtatz-
intoquilijque:

—¿Tijmati nopa fariseos cualanque ica cati tiqijto amantzi?

¹³ Huan Jesús technanquili huan techilhui:

—Nochi tzonti cati amo quitococ noTata cati itztoc ilhuicac, yaya qui-
huihuitas ica nochi inelhuayo, pampa amo iaxca. ¹⁴ Xiquincahuaca nopa
fariseos. Itztoque quej popoyotziti. Huan masehualme cati quintoquilíaj
nojquiya itztoque popoyotziti. Huan sinta se popoyotzi quiyacana seyoc
popoyotzi, nochi ome huetzise osto ijtc.

¹⁵ Huan Pedro quiihui Jesús:

—Techixtomili nopa tatenpohualisti.

¹⁶ Huan Jesús quiihui:

—¿Yon amojuanti, amo anquimachilíaj? ¹⁷ Nochi cati quicua se masehuali
san pano ipan iijti huan teipa quisa ipan itacayo. ¹⁸ Pero quema se quiijtohua
camanali cati fiero, huajca quisa ipan iyolo huan ya nopa, quena, quichihua
amo tapajpactic nopa masehuali. ¹⁹ Pampa nochi talnamiquilisti cati amo
cuali quisa ipan iniyolo masehualme. Quema se masehuali temictía, o
momecatía, o sihuanemi, o tachtequi, o istacati, o tetajilhuía, huajca quisa
ipan iyolo. ²⁰ Huan ya nopa, quena, quichihua amo tapajpactic. Pero sinta
se tacuas huan amo momajtequijtoc quej quiiito tanahuatili, amo.

Se sihuat quitajtani Jesús ma quipalehui

(Mr. 7:24-30)

²¹ Teipa Jesús quisqui nepa huan yajqui ipan nopa tali nechca altepeme
Tiro huan Sidón. ²² Huan monechcahuico campa ya se sihuat cati amo
israelita. Yaya ehuyaya tali Canaán, huan quiihui:

—Toteco, ta tiiteipan ixhui David, techtasojta. Noichpoca quiapiya se
iajacayo Amocualtat cati quitajiyohuiltía miyac. Se favor xijtasojta huan
xijchicahuati.

²³ Huan Jesús amo teno quiihui nopa sihuat. Huan tiimomachtijcahua
tiajsicoj campa ya huan tiquilhuijque:

—Xiquilhui ne sihuat para ma ya yahui huan ma ayecmo techtaztzilijti-
huala.

²⁴ Huajca Jesús quiihui nopa sihuat:

—Toteco nechtitantoc ma niquinpalehui israelitame, pampa itztoque quej
borregoyme cati mocuapolojtoque.

²⁵ Huan nopa sihuat quinechcahuico huan motancuaquetzqui iixpa huan quiilhui:

—Toteco, techpalehui.

²⁶ Huan Jesús quiilhui:

—Sinta nimitzpalehuis ta achtohui cati amo tiisraelita, elis quej se cati quinquixtilía inintacualis iconehua para quinmacas chichime.

²⁷ Huan nopa sihuat quinanquili:

—Quena, Toteco, pero chichime quicuj nopa pantatapatzti cati tepehui mesa tantita quema tacuaj inintecohua.

²⁸ Huajca Jesús quiilhui:

—Nane, pampa miyac timotemachijtoc ipan na, ya mochicajtoc moich-poca quej tijnequiyaya.

Huan iichpoca nimantzi mochicajqui.

Jesús quinchicajqui miyac masehualme

²⁹ Huan Jesús quisqui nepa, huan sempa yajqui campa se tepet nechca hueyi at Galilea huan tejoc ipani huan mosehui. ³⁰ Huan quinechcahuicoj nelmiyac masehualme cati quinhualicayayaj cati metzhuilpachtique, popoyotziti, metzcototique, nonotziti, huan cati quipixque sequinoc cocolisti. Huan nochi quintejqe nopa cocoyani iicxita Jesús huan yaya nochi quinchicajqui. ³¹ Huajca nopa masehualme quitetzaitaque quema quinitaque cati nonotziti, camanaltiyayaj huan tacaquiyayaj; huan cati metzhuilpachtique, cuali nejnemiyayaj; huan cati metzcototique, yajmaxtic inimetz; huan cati popoyotziti, ya tachiyayayaj; huan yeca nochi quihueyimatque Toteco ten tiisraelitame.

Jesús quintamacac nahui mil tacame

(Mr. 8:1-10)

³² Huan Jesús technotzqui tiimomachtijcahua huan techilhui:

—Niquintasoja ni miyac masehualme pampa ya mocajtoque nohuaya eyi tonati huan amo teno quipiyaj para quicuase. Amo nijnequi niquintitanis ma yaca ininchajchaj, pampa tahuel mayanaj huan huelis yamaniyase ipan ojtí.

³³ Huan tiimomachtijcahua tiquilhuijqe:

—¿Canque tijpantise miyac pantzi quej monequi para nochi ni masehualme nica ipan ni huactoc tali pampa injuanti nelía miyaqui?

³⁴ Huan Jesús techtatizintoquili:

—¿Quesqui pantzi anquipiyaj?

Huan tijnanquilijqe:

—Chicome pantzi huan se quesqui pilmichtiziti.

³⁵ Huan Jesús quinilhui nopa masehualme ma mosehuica talchi. ³⁶ Teipa quiitzqui nopa chicome pantzi huan nopa pilmichtiziti huan quitasmatqui Itata huan quitajcotapanqui huan pejqui techmajmaca tiimomachtijcahua para ma tiquinmajmacaca nopa masehualme. ³⁷ Huan nochi tacuajque huan cuali ixhuique. Huan tiimomachtijcahua tijsentilijque nopa pantatapatzti cati mocajqui huan tijtemitijque chicome chiquihuit. ³⁸ Huan tacuajque nahui mil tacame, huan amo tiquinpojque nopa sihuame huan coneme. ³⁹ Huajca Jesús quinnahuatijtejqe nopa miyac masehualme, huan tejoc ipan nopa cuaacalí ipan hueyi at huan yajqui tali Magdala.

16

Fariseos quinejqe quítase se tanextili

(Mr. 8:11-13; Lc. 12:54-56)

¹ Huan hualajque nopa fariseos huan nopa saduceos para quimasiltise Jesús ica inincamanal. Huan quitajtaniyque Jesús ma quichihua se tanextili ten ilhuicac para quiitase sinta quipiya ichicahualis Toteco. ² Huan Jesús quinilhui: “Quema temo tonati anquijtohuaj para mosta cuali tonas pampa tachichilijtoc nopa ilhuicac. ³ Huan sinta ica ijnaloc nesi hasta yayahuic tamixtentoc, anquijtohuaj para ama huetzis at chicahuac. ¡Anquipiay ome amoxayac! Anquimatij taya quijjosnequi nopa mixti ten ilhuicac, pero amo anquimachilíaj taya quijjosnequi nochi cati anquitztoque pano ipan ni tonali. ⁴ Amojuanti cati ama anitztoque nelía anfiero masehualme cati anquicajtejtoque Toteco. San amojuanti antechtajtaniáj ma nijchihua se tanextili para antecheltocase. Amo nimechmacas seyoc tanextili. San nopa cati panoc ica Jonás eltoc quej se tanextili para amojuanti.”

Huan Jesús quincajtejqui huan yajqui.

Imomachtijcahua ma amo quitoquíllica inintamachtíl fariseos
(Mr. 8:14-21)

⁵ Huan teipa quema Jesús huan tiimomachtijcahua tiajsitoyaj ipan ne seyoc nali hueyi at, tiimomachtijcahua timomacaque cuenta para tiquelcajtoyaj tijhualicase pantzi para tijcuase. ⁶ Huan Jesús techilhui:

—Ximotachilica para amo anquiselise inintasonejcayo fariseos huan saduceos.

⁷ Huan tiimomachtijcahua timoilhuiyque se ica seyoc:

—Techilhuía ya ni pampa tiquelcajque tijhualicase pantzi para tijcuase.

⁸ Huan Jesús quimatiyaya taya tiquijtohuayaj, huan huajca techilhui:

—¿Para ten anmotequipachohuaj pampa amo anquihualicaque pantzi? Amojuanti san pilquentzi antecheltocaj. ⁹ ¿Noja ayemo anquimachilíaj nochicahualis? ¿Amo anquielnamiquij ten panoc quema niquintamacac macuili mil tacame ica macuili pantzi? ¿Amo anquielnamiquij quesqui chiquihuit tacualisti mocajqui quema ya tacuajtoyaj? ¹⁰ ¿Amo anquielnamiquij quesqui chiquihuit tacualisti mocajqui quema sempa niquintamacac nahui mil tacame ica chicome pantzi? ¹¹ ¿Quenicatza huelis anmoilhuíaj para nimotequipachohua pampa anquielcajque pantzi? Nimechilhuiyaya ximotachilica para amo xijselica inintasonejcayo fariseos huan saduceos.

¹² Huajca tiimomachtijcahua tijmachilijque para Jesús amo techcamanalhuiyaya ten tasonejcayot para pantzi. Yaya techilhuiyaya ma timotachilica para amo tijselise inintamachtíl nopa fariseos huan nopa saduceos.

Pedro quijto para Jesús yaya nopa Cristo cati Toteco quítitantoc
(Mr. 8:27-30; Lc. 9:18-21)

¹³ Teipa Jesús ajsito nechca altepet Cesarea de Filipo. Huan yaya techtatzintocuili tiimomachtijcahua:

—Quema masehualme camanaltij ten na cati niMocuetqui Masehuali, ¿ajquiya quijtohuaj para na?

¹⁴ Huan tiquilhuiyque:

—Sequij quijtohuaj ta tiJuan cati tecuaaltiyaya. Sequij quijtohuaj ta tiElías. Huan sequinoc quijtohuaj ta tijeremías o se nopa tajtolpanextiani.

¹⁵ Huan Jesús techtatzintocuili:

—¿Huan amojuanti? ¿Ajquiya anquijtohuaj para na?

¹⁶ Huan Simón Pedro quinanquili:

—Ta tiCristo cati Toteco techilhui techtitanilisquía. Ta tiCone Toteco Dios yaya cati nelía itzto.

¹⁷ Huan Jesús quiilhui:

—Toteco mitztiochijtoc Pedro, tiicone Jonás, pampa amo elqui se masehuali cati mitznextili ajquiya na, elqui noTata cati itztoc ilhuicac. ¹⁸ Huan nojquiya nimitzilhuía ta tiPedro cati quuijtosnegui se tipiltetzi. Huan ipan ni hueyi tepactati nijquetzas notiopa. Huan nochí chichacalisti ipan micta, amo quema huelis quitanis. ¹⁹ Nimitzmacas tequiticayot para tijtapos campa tanahuatía Toteco cati itztoc ilhuicac, pampa tiquinpohuilis masehualme quenicatza huelis calaquisse nepa. Huan nochí cati tiquilpis nica ipan taltipacti, moilpis nepa ilhuicac. Huan cati tijtojtomas ipan taltipacti, nojquiya motojtomas nepa ilhuicac.

²⁰ Huan Jesús chichahuac techilhui tiimomachtijcahua ma amo aqui tiquilhuica para yaya elqui nopa Cristo cati Toteco techtitanilijtoya.

Jesús techilhui miquis huan moyolcuis
(Mr. 8:31–9:1; Lc. 9:22-27)

²¹ Huan elqui ipan nopa talojtzi quema Jesús pejqui techilhúa tiimomachtijcahua para monequi yas Jerusalén, huan nepa quitaijyohuiltsquiáj miyac nopa huehue tacame ten israelitame, huan nopa tayacanca totajtztzi, huan tamachtiani ten itanahuatil Moisés. Quiijto para quimictise huan teipa ica eyi tonati, moyolcuis. ²² Huan Pedro quihuicac iyoca huan quitacahualti, quiilhui:

—Ma Toteco Dios mitzpalehui, noTeco, para ni taijyohuilisti ma amo mitzajsi.

²³ Pero Jesús mocuetquisqui huan quiilhui Pedro:

—Techtalcahui, Amocualtat. Tijnequi techtahuisos para ma amo nichihua ipaquilis Toteco. Amo timoilhuía quej Toteco Dios moilhuía, san timoilhuía quej masehualme.

²⁴ Huajca Jesús techilhui tiimomachtijcahua:

—Sinta se masehuali quinequi nechtoquilis, ma quitahuelcahua cati yaya quinequi. Huan ma quitanana icuamapel huan mā nechtoquili mocualtalijtoc para miquis por na. ²⁵ Pampa cati quinequi momanahuis para amo miquis por na, quipolos ialma. Pero cati nechtoquilis masque monequi miquis por na, quipantis nemilisti yancuic para nochipa. ²⁶ Amo quipalehuis se masehuali masque moaxcatisquía nochí ni taltipacti, sinta quipolos ialma. Pampa amo onca teno cati se huelis taxtahuas para quimanahuis ialma quema ya quipolojtos nepa micta. ²⁷ Pampa na cati niMocuetqui Masehuali nitacuepilis ica itatanex noTata Dios, huan hualase nohuaya iilhuicac ehuan huan niquintaxtahuis nochí masehualme quej quinamiqui ica cati quichijtoque. ²⁸ Nelía nimechilhúa, sequij ten amojuanti cati anmoquetztoque nica, amo anmiquise hasta anquiitase quenicatza na cati niMocuetqui Masehuali nimonextis quema nihualas para nitanahuatis.

17

Jesús quipatac itachiyalis huan quinnextili itatanex
(Mr. 9:2-13; Lc. 9:28-36)

¹ Huan quema panotoya chicuase tonati, Jesús quihuicac Pedro huan Jacobo ihuaya iicni Juan, huan tejcoque iniselti ipan se huejcapantic tepet.

² Huan nepa Jesús quipatac itachiyalis iniixpa huan ixayac cahuanqui quej tonati huan iyoyo mocuetqui chipahuac quej taahuili. ³ Huan nimantzi monextijque Moisés huan Elías huan pejque quicamanalhuía Jesús. ⁴ Huajca Pedro quiilhui Jesús:

—NoTeco, nelía cuali para tiitztoque nica. Sinta tijnequi, tijchihuase eyi pilxajcaltzitzí. Se para ta, seyoc para Moisés, huan seyoc para Elías.

⁵ Huan quema Pedro noja quicamanalhuyaya Jesús, temoc se mixti cati cahuaniyaya huan quintzajqui. Huan camanaltic Toteco Dios ipan nopa mixti huan quijito: “Ya ni Nocone cati ni quicnelía. Nijpiya miyac paquillisti ica cati quichihua. Xijtaquílca cati yaya quijitohua.”

⁶ Huan quema imomachtijcahua quicajque ni camanali, moixtapachojque huan nelía momajmatijque. ⁷ Huan Jesús quinnechahuico huan quinitzqui sese injuanti huan quínlhui:

—Ximoquetzaca huan amo ximajmahuica.

⁸ Huan quema injuanti ajcotachixque, amo aquí más quitaque, san Jesús iselti.

⁹ Huan quema temoyayaj ten tepet, Jesús quinnahuati:

—Amo aquí xiquilhuica cati anquitztoque hasta na cati niMocuetqui Masehuali ni quincajtehuas cati mictoque huan nimoyolcuis sempa.

Jesús quijito para ya hualajtoc Elías

¹⁰ Huan imomachtijcahua Jesús quitatzintoquillijque:

—¿Para ten nopa tamachtiani ten itanahuatil Moisés quijitohuaj para achtohui monequi hualas Elías huan teipa hualas nopa Cristo?

¹¹ Huan Jesús quínlhui:

—Nelía Elías huala achtohui para quicualtalis nochi tamanti. ¹² Pero nimechilhuía, Elías ya hualajqui huan masehualme amo quixmatque huan san ten hueli quichihuilijque. Huan na cati niMocuetqui Masehuali nojuiya san se nitaijyohuis inimaco.

¹³ Huajca imomachtijcahua quimachilijque para Jesús quincamanalhuyaya ten Juan cati tecuaaltiyaya para yaya eltoya Elías.

Jesús quichicajqui se oquichpil cati quipiyayaya se iajacayo Amocualtatcat (Mr. 9:14-29; Lc. 9:37-43)

¹⁴ Huan injuanti sempa ajsoj campa itztoyaj nopa miyac masehualme, huan hualajqui se tacat huan motancuaquetzqui iixpa Jesús huan quínlhui:

¹⁵ —Tío, xijtasojta nocone huan xijchicahua pampa tapolohua huan taijyohuía miyac. Quemantica huetzi tixijco huan quemantica huetzi atita.

¹⁶ Ni quinhualiquili momomachtijcahua pero amo huelque quichicajque.

¹⁷ Huan Jesús quínlhui nopa tacame cati moquetztoyaj nopona:

—¡Ay anmasehualme cati ama anitztoque, amo antehnelto! ¿Taya nijchihuas ica amojuanti? Amo xitahuac amotalnamiquilis. ¿Quesqui tonali monequi nimocahuas amohuaya? ¿Quesqui tonali monequi nimechijyohuis?

Huan Jesús quínlhui nopa tacat:

—Techhualiquili mocone.

¹⁸ Huan Jesús quinnahuati ma quisa iajacayo Amocualtatcat cati calactoya ipan itacayo, huan yaya quisqui. Huan nopa oquichpil nimantzi mochicajqui.

¹⁹ Huajca tiimomachtijcahua iyoca tijcamanalhuitoj Jesús huan tijtatzin-toquillijque:

—¿Para ten amo tihuelque tijchihuaj ma quisa nopa ajacat?

²⁰ Huan Jesús techilhui:

—Amo anhuelque pampa noja pilquentzi antehnelto. Nelía nimechilhuía, sinta amotaneltoquilis moscaltisquía quej quichihua se ipilxinacho mostaza, huelis anquinnahuatise ni tepet: ‘Ximijcueni huan xiya nepa’, huan

nopa tepet mijcuenis huan mochihuas amocamanal. Sinta cuali antanel-tocase, nochi anhuelise anquichihuase. ²¹ Pero ni tamanti ajacame amo quisase sinta amo timosahuase huan timotatajtise ipan Toteco para ma quisaca.

Jesús sempa quiijto miquis huan moyolcuís

(Mr. 9:30-32; Lc. 9:43-45)

²² Huan quema ya tiajsitoyaj ipan tali Galilea, Jesús techilhui tiimomachtijcahua:

—Nechtemactilise na cati niMocuetqui Masehuali inimaco tacame, ²³ huan nechmictise, pero ica eyi tonati nimoyolcuís.

Huan tiimomachtijcahua nelía timotequipachojque.

Jesús taxtajqui nopa tomi para tiopamit

²⁴ Teipa Jesús huan tiimomachtijcahua tiajsicoj altepet Capernaum, huan hualajque campa Pedro itztoya nopa tacame cati quisentiliyayaj nopa tomi cati tainamaj para tiopamit huan quitatzintoquilijque:

—¿Amotamachtijca taxtahua nopa tomi cati tainamaj para tiopamit o amo?

²⁵ Huan Pedro quinanquili:

—Quena, taxtahua.

Teipa Pedro yajqui quiitato Jesús campa itztoya ipan se cali. Huan quema Pedro noja ayemo teno quillhuiyaya, Jesús quitatzintoquili:

—¿Quenicatza tiquita, Pedro? Quema tanahuatiani ipan ni taltipacti tainamaj impuesto, ¿ajquiya quininamaj? ¿Quininamaj ininconeuhua o seyoc tali ehuaní?

²⁶ Huan Pedro quinanquili:

—Quininamaj seyoc tali ehuaní.

Huan Jesús quillhui:

—Huajca amo monequi para tojuanti cati tiiconeuhua nopa tanahuatijquet ma titaxtahuaca. ²⁷ Pero para amo titecualancamacase, nojquiya titaxtahuase. Xiya nepa campa hueyi at huan xijmajcahua se tepos cuachijcoli para michime. Xijtanana nopa michi cati achtohui tijmasiltis, huan ipan icamac tijpantis se tomi cati quiaxilís para titaxtahuase cati tainamaj para tiopamit. Huajca xijhuicas huan xitaxtahuati para na huan para ta.

18

Ajquiya más hueyi iixpa Toteco

(Mr. 9:33-37; Lc. 9:46-48)

¹ Ipan nopa tonali tiimomachtijcahua tijtatzintoquilijque Jesús:

—¿Ajquiya elis más hueyi campa tanahuatis Toteco cati itztoc ilhuicac?

² Huajca Jesús quinetzqui se conet huan quiquetzqui tatajco tojuanti, ³ huan techilhui:

—Nelía nimechilhuía sinta amo anmoyolpatase huan anmochihuase quej coneme, amo huelis ancalaquise campa tanahuatía Toteco cati itztoc ilhuicac. ⁴ Pampa nepa campa tanahuatía Toteco cati itztoc ilhuicac elis más hueyi cati moechapanos quej se conet. ⁵ Huan cati quiselía se conet ipan notoca * nechselía nojquiya.

Ma tiquimacásica titajtolchihuase

(Mr. 9:42-48; Lc. 17:1-2)

⁶ “Huan Toteco tahuel quitatzacuultis cati quichihuas se conet ma ayecmo nechneltoaca. Más cuali elisquía sinta quema ayemo quichihua nopa hueyi

* 18:5 18:5 O pampa nechneltoaca.

tajtacoli, moilpilisquía se metat ipan iquechcuayo huan moisahuiliti ipan hueyi at. ⁷ Nelía teicneltique masehualme pampa onca miyac tamanti cati quinyoltilana ma tajtacolchihuaca huan masehualme tajtacolchihuaq mojmosta. Pero teicnelti se masehuali cati quichihualtía seyoc ma tajtacolchihua, pampa Toteco quitatzacuiltis.

⁸ “Sinta momax o moicxi mitzchihualtía xitajtacolchihua, huajca xijzontequi huan xijtahuiso. Pampa más cuali para ticalaquis nepa campa onca nemilisti ica setzi momax o setzi moicxi, huan amo mitzmajcahuase nepa micta ica motacayo yajmaxtic. Pampa nepa micta amo quema sehuis nopa tit. ⁹ Huan sinta moixteyol quinequi quitachilis tajtacoli, más cuali xijquixiti huan xijtahuiso. Pampa achi más cuali ticalaquis nepa campa onca nemilisti ica setzi moixteyol huan amo mitzmajcahuase ica nochi ome moixteyol ipan tit nepa micta.

Nopa borrego cati mocuapolojtoc
(Lc. 15:3-7)

¹⁰ “Ximomocuitahuica para amo xiquiniyocacahuaca ni coneme pampa nopa ilhuicac ehuan cati quinmocuitahuíaj, mojmosta quiixtachilíaj noTata nepa ilhuicac. ¹¹ Pampa na cati niMocuetqui Masehuali nihualajtoc para niqinmaquixtis cati mocuapolojtoc.

¹² “¿Quenicatza anquiitaj? ¿Taya quichihuasquía se masehuali sinta quinpixtoc cien borregoyme huan se mocuapolosquía? ¿Amo anmoilhuíaj para quincahuasquía nopa noventa y nueve cuali tzactoque huan yas ipan tepet quitemoti nopa cati mocuapolojtoc? ¹³ Huan sinta quipantis, paquis más ica nopa borrego cati mocuapolojtoc huan amo quej ica nopa noventa y nueve cati amo mocuapolojtoc. ¹⁴ Nojquiya san se ica amoTata cati itztoc nepa ilhuicac. Yaya amo quinequi ma mocuapolo yon se ni coneme.

Quema moicni mitzixpano, xitapojpolhui
(Lc. 17:3)

¹⁵ “Sinta se moicni ipan Toteco mitzixpano, xiya xijcamanalhuiti iselti huan xiquilhui ten mitzchihuilijtoc para san ta huan ya anquimatise. Sinta mitzcaquis huajca sempa elis quej moicni. ¹⁶ Huan sinta amo mitzcaquis, xijhuica se o ome mohuaya quej testigos para tijcamanalhuis para ma quimachili cati mitzchihuilijtoc, pampa ijcuilijtoc para nelía temachti sinta ome o eyi testigos tayolmelahuaj san se tamanti ica cati panoc. ¹⁷ Huan sinta moicni amo quintacaquilía nopa masehualme cati tiquinhuicac mohuaya, huajca xiquinpohuili nochi nopa tiopamit ten taneltocani cati moicni mitzchihuilijtoc. Huan sinta nopa taneltocani quiitaj para xitahuac cati tiqijtohua, pero nopa moicni amo quintacaquilis, huajca xiquitaca quej se masehuali cati amo quiixmati Toteco huan fiero inemilis quej se cati tainama impuesto.

¹⁸ “Pampa nelía nimechilhuía, nochi cati anquiilpise nica ipan taltipacti, moilpis nepa ipan ilhuicac. Huan cati anquitojtomase ipan taltipacti nojquiya motojtomase nepa ilhuicac.

¹⁹ “Huan nojquiya nimechilhuía ya ni, sinta ome amojuaniti ipan taltipacti anmocaahuaj ica san se camanali para anquitajtanise Toteco se tamanti, huajca yaya noTata cati itztoc nepa ilhuicac amechmacas. ²⁰ Pampa campa mosentilíaj masehualme ipan notoca†, masque san mosentilíaj ome o eyi, na niitztoc inihuaya.”

† 18:20 18:20 O masehualme cati nechneltoaj.

Nopa tetequipanojquet cati amo quitapojpolhui ihuampo

²¹ Huajca Pedro monechcahuico campa Jesús huan quitatzintoquili:

—NoTeco, ¿hasta quesqui huelta monequi nijtapojpolhuis se noicni cati talojtitzti nechchihuilia cati amo cuali? ¿Monequi nijtapojpolhuis hasta chicompa?

²² Huan Jesús quiilhui:

—Amo san xijtapojpolhui chicompa. Monequi tijtapojpolhuijtinemis hasta chicompa setenta huelta.

²³ “Quena, monequi tijtapojpolhuijtinemis pampa Toteco cati itztoc ilhuicac huan cati tanahuatis eltoc quej ni tanahuatijquet ipan ni tatenpohualisti. Se tonali se tanahuatijquet quinequiyaya quichihuas cuentas ica itequipanojcahua cati quitahuiquiliyayaj. ²⁴ Huan quema pejqui, quihualicague campa ya se itequipanojca cati quitahuiquiliyaya majtacti mil bolsas ten tomi. ²⁵ Huan nopa tacat amo teno quipiyayaya para quicuepilis. Huajca nopa tanahuatijquet tanahuati ma quinamacaca nopa tacat ihuaya isihua huan iconehua huan nochi cati iaxca, huan ica nopa tomi taxtahuasquia se quentzi ten cati quitahuiquiliyaya.

²⁶ “Huan quema itequipanojca quicajqui, moixtapacho iixpa nopa tanahuatijquet huan ica nochi iyolo quiilhui: ‘Techchiya huan nimitztaxtahuas nochi cati nimitztahuiquilia.’ ²⁷ Huan nopa tanahuatijquet quitasojtac huan quiixpolo nochi itahuiquilis para amo teno monequi taxtahuas.

²⁸ “Teipa nopa tetequipanojquet yajqui huan quipantito se cati tequipanohuayaya ihuaya huan quitahuiquiliyaya pilquentzi tomi, huan quiquechpatzcato hasta ayecmo hueliyaya tajjyotilana huan quiilhui: ‘Techtaxtahui amantzi.’

²⁹ “Huan ihuampo motancuaquetzqui iixpa huan ica nochi iyolo quiilhui: ‘Techchiya huan nimitztaxtahuas nochi.’

³⁰ “Pero nopa tetequipanojquet amo quinejqui quichiyas. Huajca quihuicac ihuampo ipan tatzacti huan quitzajqui hasta nochi quitamitaxtahuasquia. ³¹ Huan sequinoc itequipanojcahua nopa tanahuatijquet quiitaque nopa tacat cati ininteco quiixpolo itahuiquilis huan quiitaque ten quichihuiliytoya ihuampo cati pilquentzi quitahuiquiliyaya. Huajca tahuel motequipachojque huan yajque quiilhuitoj nopa tanahuatijquet.

³² “Huajca nopa tanahuatijquet quinotzqui nopa itequipanojca huan quiilhui: ‘Ta tifiere tacat. Na niquixpolo motahuiquilis huan nochi cati techtahuiquiliyaya pampa ica nochi moyolo techtajtani. ³³ Huajca ¿para ten amo tijtasojtac mohuampo cati nechtequipanohua mohuaya quej na nimitztasojtac?’ ³⁴ Huajca iteco cualanqui huan quitemactili inimaco tacame cati quitajjyohuiltisquiaj hasta taxtahuasquia nochi cati tahuicayaya achtohuiya. ³⁵ Huan nojquiya quej nopa quichihuas noTata cati itztoc nepa ilhuicac sinta amojuanti amo anquintapojpolhuisse ica nochi amoyolo se amoicni cati amechchihuilia cati amo cuali.”

19

Se tacat ma amo quicahua isihua

(Mr. 10:1-12; Lc. 16:18)

¹ Huan quema Jesús tanqui quinilhua nopa masehualme ni camanali, quisqui estado Galilea huan yajqui estado Judea nechca nopa seyoc nali hueyat Jordán campa calaqui tonati. ² Huan quitoquilijque miyac masehualme, huan quinchicajqui nochi cati mococohuayayaj nozona.

³ Huan hualajque sequij fariseos campa ya para quicajcayahuase Jesús para ma quijtos cati amo cuali. Huan inijuanti quitatzintoquilijque:

—¿Nopa tanahuatili quicahuilla se tacat ma quicahuas isihua ica ten hueli tamanti?

⁴ Huan Jesús quinnanquili:

—¿Amo anquipojtoque cati ijcuilijtoc ipan Icamanal Toteco campa technextilia quenicatza Toteco quinchijchijqui ipan ipejya? Quijtohua: ‘Yaya quichijchijqui tacat huan sihuat’. ⁵ Huan nojquiya quijtohua: ‘Yeca se tacat quicahuas itata huan inana huan mosejcotilis ihuaya isihua huan nopa ome itztose quej san se inintacayo.’ ⁶ Huajca ayecmo itztose quej ome. ¡Amo! Nopa ome mochihuase quej san setzi inintacayo. Toteco yaya quisejcotilia se tacat ihuaya isihua; huajca amo aqui ma quintajcoxelo.

⁷ Huan nopa fariseos quitatzintoquilijque:

—Huajca ¿para ten Moisés huejcajquiya quijto se tacat ma quimaca isihua se amatajcuiloli campa quijtos para nopa sihuat ayecmo iaxca huan quej nopa quicahuas?

⁸ Huan Jesús quinnanquili:

—Pampa anyotetique, Moisés amechcahuili antacame para anquicahuase amosihua ica se amat, pero Toteco amo quej nopa quisencajqui ma eli ipan ipejya. ⁹ Huan nimechylmelahua, sinta se tacat quiptiya isihua cati amo quiixpanotoc ica seyoc tacat huan nopa tacat quicahuas huan mosejcotilis ica seyoc, huajca nopa tacat momecatía. Huan sinta se tacat mosejcotilis ica nopa sihuat cati ihuehue quicajtejtoc, huajca nopa tacat nojquiya momecatía.

¹⁰ Huan tojuanti tiimomachtijcagua tiquilhuijque:

—Sinta quej nopa monequi para se tacat itztos ihuaya isihua, huajca más cuali ma amo mosihuajti se tacat.

¹¹ Huan Jesús quinilhui:

—Amo nochi quiptiyaj nopa yajatili para itztose iniselti. San hueli itztoque iniselti cati Toteco quinmacatoc nopa chichahualisti. ¹² Sequij tacame ten quema tacatque quimatque para amo quema huelis quiptiyase inisihua. Sequinoc amo huelis quiptiyase inisihua pampa quincaparojtoque. Huan itztoque sequinoc tacame cati amo quiptiyaj inisihua pampa ipan iniyolo quimatij quej nopa achi más huelis tequitise ipan itanahuatilis Toteco cati itztoc ilhuicac. Huajca cati hueli cati quimachilia para huelis itztos iselti, ma itzto iselti.

Jesús quintiochijqui coneme

(Mr. 10:13-16; Lc. 18:15-17)

¹³ Teipa masehualme quinhualicaque ininconehea campa Jesús para ma quitali imax ipan inijuanti huan ma motatajti. Huan tiimomachtijcagua tiquinajhuaque.

¹⁴ Pero Jesús techilhui:

—Xiquincahuaca coneme ma hualaca campa na huan amo xiquintzacuilica, pampa Toteco cati itztoc nepa ilhuicac quinnahuatis masehualme cati nechseliaj quej ni coneme.

¹⁵ Huajca Jesús quitali imax ipan nopa coneme huan quintiochijqui, teipa quisqui huan yajqui.

Nopa telpoca tacat cati tominpixquet

(Mr. 10:17-31; Lc. 18:18-30)

¹⁶ Huan hualajqui se telpoca tacat campa Jesús huan quitatzintoquilijque:

—Ticuali tamachtijquet, ¿taya cati cuali monequi nijchihuas para Toteco nechmacas nemilisti yancuic para nochipa?

¹⁷ Huan Jesús quiilhui:

—¿Para ten techtocaxtía nicuali? ¿Ta tijmachilía para amo aqui nelía cuali, san Dios? Sinta tijnequi Toteco ma mitzmaca nemilisti yancuic para nochipa, huajca xijneltoca itanahuatil.

¹⁸ Huan nopa tacat quitatzintoquili:

—¿Catijqui itanahuatilhua Toteco monequi niquinchihuas?

Huan Jesús quiilhui:

—Amo xitemicti, amo ximomecati, amo xitachtequi, amo aqui xiquistacahui. ¹⁹ Xiquintepanita motata huan monana, huan xiquinicneli sequinoc quej timoicnelía.

²⁰ Huan nopa telpoca tacat quiilhui:

—Nochi ya ni nijtoquilijtihualajtoc hasta quema niconetzi nieltoya. ¿Taya polihui para nijchihuas?

²¹ Huan Jesús quiilhui:

—Sinta tijnequi tijchihuas senquisa cati Toteco quinequi, xiya huan xijnamacati nochi cati tijpiya huan xiquinmaca nopa tomi cati teicneltzitzitzi huan tijpiyas cati ipati para moaxca nepa ilhuicac. Teipa xihuala huan techtoquili.

²² Huan quema nopa telpoca tacat quicajqui cati Jesús quiilhui, motequipacho huan quistejqui pampa nelía tapijpixtoya.

Toteco nochi hueli quichihua

²³ Huan Jesús techilhui tiimomachtijcahua:

—Nelía nimechilhuía, nelía ohui para tominpiyani calaquise campa tanahuatía Toteco cati itztoc ilhuicac. ²⁴ Sempa nimechilhuía, más ohui para se tominpixquet calaquise ipan ilhuicac campa Toteco tanahuatía huan amo que para se hueyi tapiyali quej se camello ma pano ipan iixteyol se huitzmalot.

²⁵ Quema tiimomachtijcahua tijcajque ni camanali, nelía tijtetzaitaque huan tiquilhuijque:

—Huajca ¿ajquiya huelis momaquixtis ten itajtacolhua?

²⁶ Huan Jesús techtachili huan techilhui:

—Masehualme amo huelis momaquixtise iniselti, pero Toteco, quena, hueli. Pampa yaya nochi hueli quichihua.

²⁷ Huajca Pedro quiilhui Jesús:

—Xiquita, tojuanti tijcajtejtoque nochi cati tijpixtoyaj para timitztoquilise. Huajca ¿taya tijpiyase?

²⁸ Huan Jesús techilhui:

—Nelía nimechilhuía quema ajsis nopa tonali quema Toteco yancuic quichihuas nochi taltipacti huan quema na cati niMocuetqui Masehuali ni-mosehuis ipan nosiya cati yejyetzzi para nitanahuatis ica nochi nohueyitilis, amojuanti cati antechtoquilijtoque anmosehuisse ipan majtacti huan ome siyas cati yejyetzitzi. Huan anquintajtolsencahuase nopa majtacti huan ome huejhueyi familias ten masehualme cati hualajque ten itelpocahua Israel. ²⁹ Huan nochi cati quicajtejtoc ichaj, o itaca icnihua, o isihua icnihua, o inana, o itata, o iconehua, o imil, o isihua por notoca*, quiselis cien huelta imiyaca cati quicajtoc huan nojquiya Toteco quimacas nemilisti cati yancuic para nochipa. ³⁰ Pero miyac masehualme cati nochi quintepanitaj ama,

* 19:29 19:29 Pampa nechneltoca.

ayecmo aquí quintepanitas ipan nopa tonali. Huan miyac cati amo aquí quintepanita ama, nochi quitepanitase ipan nopa tonali.

20

Nopa tequipanohuani ipan mili

1 “Quema tanahuatis Toteco cati itztoc ilhuicac, yaya tetaxtahuis. Yaya itztoc quej ni tetaj cati quipixtoya miyac tali huan se tonali quisqui ica ijnaltzi huan quintemoto tequipanohuani para ma tequititij ipan ixocomecamil. 2 Huan quinilhui quintaxtahuisquía ten ipati se tonali tequit. Huajca injuanti tequititoj ipan ixocomecamil. 3 Huan nechca las nueve ica ijnaloc, nopa teteco yajqui tianquis huan quinait sequinoc tacame cati amo tequitiyayaj. 4 Huajca quinilhui: ‘¿Amo anquinequij antechpalehuisse ama ipan noxocomecamil? Xihualaca huan nimechtaxtahuis quej quinamiqui.’ Huajca injuanti nojquiya yajque. 5 Huan nopa tacat sempa yajqui tianquis tajco tona huan sempa quinpanti sequinoc para ma quipalehuica. Huan sempa yajqui tianquis nechca las tres huan quinpanti sequinoc, huan nojquiya quintitanqui ma tequititij imila. 6 Quema san quentzi polihuiyaya para las cinco, sempa yajqui huan quinpanti sequinoc cati amo tequitiyayaj huan quinilhui: ‘¿Para ten san anmoquetztoque nica huan san anquipolohuaj tonali?’

7 “Huan quilhuijque: ‘Pampa amo aquí techtanehui ma tijpalehuica.’

“Huajca quinilhui: ‘Techpalehuiquij nojquiya ipan noxocomecamil, huan nimechtaxtahuis quej quinamiqui.’

8 “Huan ica tapoyahui, nopa tacat quinotzqui itayacanca huan quilhui: ‘Xiquinnotza nopa tequipanohuani huan xiquintaxtahui. Achtohui xiquintaxtahui cati más tiotac ajsicoj, huan hasta teipa xiquintaxtahui cati hualajque ijnaltzi.’

9 “Huan quema injuanti cati tequiticoj a las cinco monechcahuicoj, quintaxtahui quej ipati senquis se tonal tequit. 10 Huan quej nopa quintaxtahuijtijayaj hasta ajsic campá nopa cati ajsicoj ijnaltzi, huan nopa masehualme moilhuiyayaj para ininteco quintaxtahuisquía quentzi más, pero nojquiya quinmac se tonal taxtahuili. 11 Huan quema ya quiselijtoyaj inintomi, mocualanijque ica ininteco. 12 Huan quilhuijque: ‘Ni tacame cati teipa hualajque san tequitique se hora huan quitanque san se quej tojuanti cati titequitique chichahuac nochi se tonali quema chichahuac eltoya tonati.’

13 “Huan ininteco quinilhui: ‘Nohuampoyohua, amo nimechcayajtoc. Nimechilhui nimechtaxtahuisquía ten ipati se tonali tequit huan quej nopa nimechtaxtahui. 14 Xijcuica amotomi huan xiyaca. Na nijnequi níquintaxtahuis ni tacame cati hualajque tiotac san se quej amojuanti. 15 ¿Amo nijpiya tanahuatili nijchihuas cati nijnequi ica notomi? Huelis san anquinchicoitaj pampa nelía cuali níquintaxtahui.’

16 “Quej nopa ica masehualme cati ama tayacanaj, teipa elise cati mochahuac tatepotzco. Huan cati hasta tatepotzco itztoque ama, teipa elise cati tayacanase, pampa Toteco quinnotzas miyac masehualme pero san sequij quintapejpenis para iaxcahua.”

Jesús sempa techilhui para miquis huan moyolcuís

(Mr. 10:32-34; Lc. 18:31-34)

17 Teipa Jesús tejcotiyahuiyaya para altepet Jerusalén, huan ipan ojti techhuicac timajtaci huan ome tiimomachtijcahua iyoca huan techilhui:

18 —Xiquitaca. Amantzi tiyahuij altepet Jerusalén huan nepa nechtemac tilise na cati niMocuetqui Masehuali ica nopa tayacanca totajtitzti huan ica

nopa tamachtiani ten itanahuatil Moisés. Huan injuanti quiijtose para ma nimiqui. ¹⁹ Huan nechtemactilise inimaco seyoc tali ehuaní. Huan injuanti nechhuihuiitase huan nechhuijhuitequise, huan nechcuamapeloltise. Pero ipan eyi tonati nimoyolcuís.

Ininana Juan huan Jacobo quitajtani Jesús ma quinmaca tequiticayot (Mr. 10:35-45)

²⁰ Huan ininana Juan huan Jacobo monechcahuico campa Jesús inihuaya nopa ome itelpocahua. Ni telpocame eliyayaj iconehua Zebedeo. Huan ininana motancuaquetzqui iixpa Jesús para quitajtani se favor.

²¹ Huan Jesús quiihlui:

—¿Taya tijnequi?

Huan nopa sihuat quiihlui:

—Xitanahuati para ni ome notelpocahua ma mosehuica, se ipan monejmat huan seyoc ipan moarraves quema titanahuatis.

²² Huan Jesús quinilhui:

—Amo anquimatij taya antechtajtaniáj.

Huan Jesús quintatzintoquili itelpocahua:

—¿Anquimachilíaj para anhuelise antaijyohuise quej na nitaijyohuis ica se ome tonali?

Huan quinanquiliijque:

—Quena, tihuelise.

²³ Huan Jesús quinilhui:

—Nelía cati anquiijtohuaj, antaijyohuise miyac quej na nitaijyohuis, pero amo notequi para niqijtos ajquiya mosehuis ipan nonejmat huan ipan noarraves. NoTata, quena, yaya quimati ajquiya mosehuis nozona.

²⁴ Huan timajtacti tiimomachtijcahua tijcajque cati quiijtojque huan ticualanque inihuaya nopa ome icnime. ²⁵ Huajca Jesús technotzqui nochi ma timonechcahuica campa ya itztoya, huan techilhui:

—Anquimatij para tanahuatiani ipan ni taltipacti nelía tanahuatíaj chichahuac. Huan huejhueyi tacame quinequij inimasehualhua nimantzi ma quinneltocaca inincamanal. ²⁶ Pero ica amojuanti amo quej nopa elis para amojuanti anmochihuase anhuejhueyi. ²⁷ Sinta se ten amojuanti quinequi mohueyichihuas, monequi elis inintequipanojca nochi sequinoc.

²⁸ Xijchihuaca quej na cati niMocuetzqui Masehuali. Amo nihualajtoc para niquinahuatis masehualme ma nechtequipanoca huan nihualajtoc para niquinquipanos masehualme, huan para nimotemactilise huan nimiquis para nitaxtahuas cati monequi para niquinmaquixtis miyac masehualme ten inintajtacolhua.

Jesús quinichicajqui ome popoyotziti (Mr. 10:46-52; Lc. 18:35-43)

²⁹ Huan quema Jesús quisayaya altepet Jericó, miyac masehualme quitoquilijtihuyiyayaj. ³⁰ Huan mosehuiyayaj ojtenti ome tacame cati popoyotziti. Huan quema quicajque para panotihualayaya Jesús, pejque quiijtohuaj chichahuac:

—¡Toteco, tiiteipan ixhui David, techtasojta!

³¹ Huan nopa miyac masehualme chichahuac quintacahuaitiyayaj para ma ayecmo tahuejchihuaca. Pero nopa popoyotziti achi más tzajtziyayaj:

—¡Toteco, tiiteipan ixhui David, techtasojta!

³² Huan Jesús moquetzqui huan quinilhui:

—¿Taya anquinequij ma nimechchihuili?

³³ Huan quiilhuijque:

—Toteco, tijnequij titachiyase.

³⁴ Huan Jesús quintasojtac huan quitali imax ipan inixteyolhua huan nimantzi tachixtejqe huan quitoquilijqe ipan ojti.

21

Jesús calajqui Jerusalén ipan se sihua burro

(Mr. 11:1-11; Lc. 19:28-40; Jn. 12:12-19)

¹ Huan Jesús huan nochi tojuanti cati tinejnemiyayaj ihuaya timonechcahuuyayaj altepet Jerusalén. Huan tiajsitoj ipan se pilaltepsetzi cati itoca Betfagé, nechca nopa tepet cati itoca Olivos. Huan Jesús quinnotzqui ome imomachtijcahua para quintitanis ipan se pilaltepsetzi nechca. ² Huan quinilhui:

—Xiyaca ipan ne pilaltepsetzi cati mocahua toixmelac. Nepa anquipantise se sihua burro ilpitoc ihuaya icone. Xiquintojtomaca huan techhualiquilica. ³ Huan sinta se masehuali amechtajtanic taya anquichihuj, xiquilhuica: ‘Toteco quinequi quintequihuis para se talojtzi huan nimantzi mitzcahuiliqui sempa.’

⁴ Quichijqui ya ni para ma pano cati huejcajquiya quuijcuilo nopa tajtolpanextijquet para teipa panos. Quej ni quuijto huejcajquiya:

⁵ “Xiquinilhui altepet Jerusalén* ejque ni camanali:

‘Xiquitaca, ya huala amotanahuatijca.

Yaya amo mohueyimati.

Mosehujtihualas ipan se pilburrojtzi.

Quena, mosehujtihualas ipan icone se burra cati quimati tamama.’ ”

Quej nopa quuijcuilo nopa tajtolpanextijquet huejcajquiya.

⁶ Huan nopa ome imomachtijcahua Jesús yajque huan quichijque quej Jesús quinilhui. ⁷ Huan quihualicaque nopa burra ihuaya icone. Huan tijtalijque totaque ininpani huan Jesús tejcoc. ⁸ Huan itztoyaj tohuaya tahuel miyac masehualme huan quisojqe inintaque ipan ojti. Sequinoc quipostejque inimacuayo apachijti huan quitenque ipan ojti para ma ipan nejnemi ipilburro Jesús. ⁹ Huan nochi nopa miyac masehualme cati quiyacanayayaj Jesús huan nochi sequinoc cati yahuiyayaj itepotzco chichahuac tahuejchihuayayaj huan quuijtohuayayaj:

“¡Timitzhueyichihuaj ta cati tiiteipan ixhui Tanahuatijquet David!

¡Ma Toteco Dios mitztiochihua ta cati tihuala ica itequiticayo Toteco!

¡Ma tijhueyichihuaca Toteco Dios cati itztoc ilhuicac por cati techchihuilijtoc!”

¹⁰ Huan quema Jesús calajqui ipan altepet Jerusalén, nochi hualajque quitachilicoj taya panoyaya huan motatzintoquiliyayaj:

—¿Ajquiya huala?

¹¹ Huan masehualme quuijtojqe:

—Yaya nopa tajtolpanextijquet Jesús cati ehua Nazaret ipan estado Galilea.

Jesús quinquixti tanamacani ipan tiopamit

(Mr. 11:15-19; Lc. 19:45-48; Jn. 2:13-22)

¹² Huan Jesús calajqui ipan nopa hueyi israelita tiopamit huan quinquixti nochi cati tanamacayaj huan tacohuayayaj tiopan calijtic. Huan quintepehuili inimesacati quipatayayaj tomi cati huala seyoc tali, huan

* 21:5 21:5 Altepet Jerusalén nojquiya itoca Sion.

nojquiya quintepehuili inisiyas cati quinnamacayayaj palomas. ¹³ Huan Jesús quinilhui:

—Ijcuilijtoc ipan Icamanal Toteco campa yaya quiihtohua: ‘Nochi masehualme quitocaxtise nochaj: Nopa Cali Campa Masehualme Motatajtáj.’ Pero anquichijtoque campa mosentilíaj tachtequini para quintachtequilise cati hualahui.

¹⁴ Huan hualajque campa Jesús nepa tiopan calijtic cati popoyotzitzi huan cati metzcuachotique, huan yaya quinchicajqui. ¹⁵ Pero nopa taya-canca totajtzitzi huan nopa tamachtiani ten itanahuatil Moisés quiitaque nopa tióchicahualnescayot cati Jesús quichihuayaya, huan nojquiya quini-taque nopa coneme tiopan calijtic cati chichahuac quiihtohuayayaj: “Tim-itzhueyichihuaj, ta tiiteipan ixhui David.”

Huajca cualanque, ¹⁶ huan quiihluijque Jesús:

—¿Amo tijcaquí cati quiihtohuaj ten ta?

Huan Jesús quinilhui:

—Quena, nijcaqui. Huelis amo anquipojtoque ipan Icamanal Toteco campa quiihtohua:

‘Toteco ta tijchijtoc para coneme huan pilconetzitzi ma mitzhueyichihuaca.’

¹⁷ Huan Jesús quincajtejqui huan yajqui altepet Betania huan nepa tonilito.

Jesús quiajhuac se higuera cuahuit

(Mr. 11:12-14, 20-26)

¹⁸ Huan tonili ica ijnaloc quema Jesús tacuepiliyaya para Jerusalén, pejqui mayana. ¹⁹ Huan ojenti Jesús quiitac se higuera cuahuit huan monechcahuito huan quiitac amo quiipiya itajca. San ixhuiyo quiipiayaya. Huan Jesús quiihlui ten nopa cuahuit:

—Ni cuahuit ayecmo quema temacas motajca.

Huan nimantzi huajqui nopa cuahuit. ²⁰ Huan quema tiimomachtijcahua tiquitaque para huajqui nopa cuahuit, timotetzaitaque huan tijtatzingoquilijqe:

—¿Quenicatza elqui para nimantzi huajqui ni cuahuit?

²¹ Huan Jesús technanquili:

—Nelía nimechilhuía, quema anquitajtaníaj Toteco se tamanti, monequi xijneltocaca ica nochi amoyolo para temachtí Toteco amechmacas, huan quena amechmacas. Sinta san anmoilhuíaj huelis amechmacas o huelis amo, huajca amo teno amechmacas. Nojquiya huelis anquichihuase sequinoc tamanti cati más huejhueyi ten nijchijtoc ica ni cuahuit. Huelis anquiihluisse ten se tepet: ‘Ma mijcueni ni tepet huan ma momajcahua ipan hueyi at’, huan quej nopa elis. ²² Huan nochi cati anquitajtanise Toteco huan anquinelto-case temachtí Toteco amechmacas, anquiselise.

Nopa tayacanani quitatzintoquilijque Jesús ten itequiticayo

(Mr. 11:27-33; Lc. 20:1-8)

²³ Huan quema Jesús sempa ajsico ipan nopa hueyi tiopamit huan tamachtiyaya, hualajque nopa tayacanca totajtzitzi huan nopa huehue tacame ten israelitamé huan quiihluijqe:

—¿Taya tequiticayot tijpiya para tijchihua nochi ni tamanti cati tijchitiniemi? ¿Ajquiya mitzmacatoc tequiticayot?

²⁴ Huan Jesús quinilhui:

—Nojquiya nimechtatzintoquilis se tamanti. Sinta xitahuac antechnanquili-se, huajca nojquiya nimechilhuis ajquiya nechmacac tequiticayot para

nijchihuas cati nijchihua. ²⁵ ¿Ajquiya quititanqui Juan para ma tecuaaltiqui? ¿Toteco quititanqui o san masehualme?

Huajca injuanti pejque mocamanalhuíaj quenicatza quinanquilise. Quijtoque:

—Sinta tiquijtose Toteco quititanqui Juan, huajca Jesús techtatzintoquilis para ten amo tijneltoaque. ²⁶ Huan sinta tiquijtose san masehualme quimaque Juan itequiticayo, ni masehualme techchihuilise cati fiero, pampa injuanti quineltoaj para Juan eliyaya se tajtolpanextijquet.

²⁷ Huajca quiilhuijque Jesús:

—Tojuanti amo tijmatij ajquiya quititanqui Juan.

Huajca Jesús quinilhui:

—Amo antechnanquilijque xitahuac, huajca na nojquiya amo nimechilhuis ajquiya nechmacatoc tequiticayot para nijchihuas cati nijchihua.

Se tacat huan ome itelpocahua

²⁸ Jesús quinilhui:

—¿Taya anmoilhuíaj ten ni tatenpohualisti cati nimechpohuilis? Se tacat quinpixtoya ome itelpocahua. Huan nopa tacat yajqui campa nopa achtohui ejquet huan quiilhui: ‘Nocone, xiya ama xitequititi nepa ipan toxocomecamil.’ ²⁹ Huan yaya quinanquili: ‘Amo, notata, amo nijnequi niyas.’ Pero teipa moyolpatac huan yajqui tequitito. ³⁰ Huan teipa nopa tetaj yajqui campa ne se itelpoca huan nojquiya quiilhui ma tequititi. Huan yaya quiilhui: ‘Quena, notata, ya niyas.’ Pero amo yajqui. ³¹ Huajca, ¿catijqui ten nopa ome iconehua quichijqui cati itata quinequiyaya ma quichihua?

Huan quinanquilijque:

—Nopa telpocat cati achtohui.

Huan Jesús quinilhui:

—Nelía nimechilhuiá nopa fiero tacame cati tainamaj impuesto huan nopa tacaenaca sihuame más nimantzi calaquise nepa campa Toteco tanahuatía que amojuanti. ³² Pampa achtohuiya Juan cati tecuaaltiyaya tamachtico nopa ojti cati xitahuac, huan amo anquineltocaque. Pero nopa tacame cati tainamaj impuesto huan sihuame cati tacanemij, quena, quineltoaque. Huan masque anquitaque quenicatza quipataque ininemilis, noja amo anmoyolpatatoque para huelis anquineltocase.

Se tatenpohualisti ten tequipanohuani cati amo cuajcualme

(Mr. 12:1-12; Lc. 20:9-19)

³³ Huan Jesús quinilhui:

—Xijtacaquilica ni tatenpohualisti cati nimechpohuilis. Itztoya se tacat cati quitojqui xocomecat ipan imil huan quitzajqui yahualtic huan tacoyoni campa tepejpechtita para ipan quipatzcas itajca xocomecat. Huan nojquiya quichijqui se tepancali cati huejcapantic para ipan tejcos para quimocuitahuis nochi imil. Huan quincahuilijtejqqui inimaco sequinoc tacame para ma quimocuitahuica huan teipa ma quitajcoitasquíaj itajca nopa mili. Huan teipa nopa tacat cati iaxca nopa xocomeca mili quisqui huan yajqui huejca. ³⁴ Huan quema ajsic tonali para tatequisti, nopa tacat cati iaxca nopa xocomeca mili quintitanqui se ome itequipanojcahua para ma quinitatij nopa tacame para ma quinmacaca cati ya iaxca elis ten nopa tatequisti. ³⁵ Pero nopa tacame cati inimaco eltoya nopa mili quintizquijque itequipanojcahua; huan se quimaquilijque, huan seyoc quimictijque, huan seyoc quitepachojque. ³⁶ Huan nopa tacat cati iaxca nopa xocomeca mili

sempa quintitanqui achi miyaqui itequipanojcahua huan san se quinchihuilijque.

³⁷ “Teipa nopa cati iaxca nopa xocomeca mili quititanqui itelpoca pampa moilhui: ‘Temachtí quitepanitase notelpoca’.” ³⁸ Pero quema nopa tequipanohuani cati amo cuajcualme quiitaque itelpoca, moilhuijque se ica seyoc: ‘Yaya ni cati teipa quiselis ni xocomeca mili para iaxca. Huajca ma tijmictica huan teipa ni mili elis toaxca.’ ³⁹ Huajca quiitzquijque itelpoca ininteco huan quitahuisojque xocomeca milteno huan quimictijque.

⁴⁰ “Huajca, ¿taya anmoilhuiáj quichihuas nopa tacat ica nopa fiero tacame quema yaya mocuepas?”

⁴¹ Huan nopa masehualme quinancuilijque Jesús:

—Nopa tacat cati iaxca nopa xocomeca mili quinmictis nopa fiero tacame, yon amo quintasojtas. Huan teipa quincahuilis sequinoc ma quimocuitahuica ixocomecaml cati nelía quicuepilise cati iaxca quema oncas tatequisti.

⁴² Huan Jesús quinilhui:

—¿Amo anquipojtoque campa ijcuilijtoc ipan Icamanal Toteco campa camanalti ten na quej nise hueyi tet? Quej ni quiijtohua:

‘Nopa hueyi tet cati calchihuani amo quinejque quitequihuse, huan quitahuisojque,

teipa elqui cati más monequiyaya para yas calesquina, huan ipan quiquetzase nopa cali.

Eltoc yaya Toteco cati quichijtoc quej nopa ma eli, huan nelía yejectzi tiquitaj cati quichihua.’

⁴³ Huajca nimechilhuía Toteco quichihuas quej nopa tacat cati iaxca nopa xocomeca mili huan ayecmo amechahuilis ancalaquise campa Toteco tanahuatía pampa amo antechnequij. Quincahuilis ma calaquica masehualme cati nechselise huan quichihuase cati cuali quej cati quinamiqui para cati itztoque ipan itanahuatilis. ⁴⁴ Huan cati amo nechnequi eltos quej se cati huetzis ipan nopa hueyi tet huan tahuel mococos. Huan na nihueyi tet quema nihuetzis ipani se cati amo nechselía, nijchihuas tatixtic.

⁴⁵ Huan quema nopa tayacana totajtzitzi huan nopa fariseos quicajque ni eyi tatenpohualisti, quimachilijque para Jesús camanaltiyaya ten inijuanti.

⁴⁶ Huan masque quinequiyayaj quiitzquise Jesús para quitzacuase, quinimacasiyayaj nopa miyac masehualme cati quitepanitayayaj Jesús huan quiitayayaj para se tajtolpanextijquet.

22

Se tatenpohualisti ten se hueyi tacualisti (Lc. 14:15-24)

¹ Huan Jesús sempa pejqui quincamanalhuía nopa miyac masehualme ica tatenpohualisti huan quinilhui: ² “Campa tanahuatis Toteco cati itztoc ipan ilhuicac, eltos quej se fanahuatijquet cati quichijqui se hueyi tacualisti ten tasihuajtlisti quema mosihuajti itelpoca.” ³ Huan quintitanqui itequipanojcahua ma quinyolmelahuatij nochí tanotzalme ma hualaca campa nopa tacualisti ten tasihuajtlisti, pero nopa tanotzalme amo quinejque hualase.

⁴ “Huajca nopa tanahuatijquet sempa quintitanqui sequinoc itequipanojcahua ma yaca, quinilhuitij: ‘Xiquinilhuica nopa tanotzalme para ya nisencajtoc ni tacualisti. Ni quinmictijtoc nohuacaxhua cati más tomahuaque, huan nochí ya eltoc para titacuase. Xiquinilhuica ma hualaca ipan ni tacualisti ten tasihuajtlisti.’” ⁵ Pero nopa tanotzalme amo quichihuilijque

cuenta inincamanal huan nochi yajque ipan inintequi. Se yajqui imila huan seyoc yajqui tanamacato. ⁶ Huan hasta sequij quinitzquijque itequipanojcahua nopa tanahuatijquet. Sequij quincocojque huan sequij quinmictijque. ⁷ Huajca nopa tanahuatijquet nelía cualanqui inihuaya huan quintitanqui isoldados huan quinmictijque nopa temictiani huan quitatiji inialtepe.

⁸ “Teipa nopa tanahuatijquet quinilhui itequipanojcahua: ‘Ya eltoc ni hueyi tacualisti ten tasihuaajtlisti, pero nopa tanotzalme amo quinamiqui para hualase. ⁹ Huajca xiyaca nepa ipan ojojti huan nochi cati anquinpantij, xiquinnotzaca ma hualaca ipan ni tacualisti ten tasihuaajtlisti.’ ¹⁰ Huajca nopa tetequipanohuani yajque campa hueli ojojti huan quinsentilijque nochi cati quinpantijque, sequij cuali masehualme huan sequij amo cuali. Huan ichaj nopa tanahuatijquet temic ica tanotzalme para nopa hueyi tacualisti.

¹¹ “Huan nopa tanahuatijquet calajqui para quitachiliti nopa tacualisti huan ajquiya injuanti itztoyaj, huan quiitac se tacat cati amo moquentijtoya iyoyo cati quinamiqui para quema masehualme yahuij ipan se tasihuaajtlisti. ¹² Huajca nopa tanahuatijquet quitatzintoquili: ‘Tinohuampo, ¿ipan taya caltemit ticalaquico nica? Amo ticalajqui campa notequipanojcahua teyoyontíaj ica se cuali yoyomit cati quinamiqui ipan ni nenamictili.’ Pero nopa tacat amo teno huelqui tananquili. ¹³ Huajca nopa tanahuatijquet quinilhui itequipanojcahua: ‘Xiquilpica ipan iicxi huan ipan imax ni tacat huan xijtahuisoca calteno campa tzintayohua huan campa masehualme chocase huan tanhuehuechocase pampa tahuel taijyohuise.’ ¹⁴ Pampa niqinnotza miyaqui para ma hualaca, pero amo miyaqui niqintapejpenitoc.”

Tacame quinejque quimasiltise Jesús
(Mr. 12:13-17; Lc. 20:20-26)

¹⁵ Teipa yajque nopa fariseos huan quisencajque san sejco quenicatza quimasiltise Jesús para ma quijto se camanali amo cuali para huelis quitelhuise. ¹⁶ Huajca quintitanque sequij inihuampoyohua cati yajque ihuaya ihuampoyohua Tanahuatijquet Herodes campa Jesús huan quilhuijque:

—Tamachtijquet, tijmatij tiquijtohua cati melahuac. Titamachtía cati nelía iojhui Toteco huan cati quinequi ma tijchihuaca. Amo tiquinimacasi masehualme huan cati quijtose ten ta, yon amo aqui tijchicoicnelía. ¹⁷ Huajca techilhui ya ni. ¿Tiquita cuali titaxtahuase nopa tomi cati techtajtania totanahuatijca César, o amo?

¹⁸ Jesús quimachili para amo cuali inintalnamiqulis nopa tacame huan san quinequiyayaj quicajcayahuase. Huajca quinilhui:

—¿Para ten anquinequij antechajcayahuase, anquipiyaj ome amoxayac?

¹⁹ Technextilica se tomi cati ica antaxtahuaj nopa cati ne tanahuatijquet tajtani.

Huan injuanti quinextilijque se tepos tomi. ²⁰ Huan Jesús quinilhui:

—¿Ajquiya iixcopinca eltoc ipan ni tomi? Huan ¿ajquiya itoca ijcuilijtoc ipani?

²¹ Huan injuanti quilhuijque:

—Iixcopinca huan itoca Tanahuatijquet César.

Huan Jesús quinilhui:

—Huajca xijmacaca César cati ya iaxca huan nojquiya xijmacaca Toteco Dios cati Toteco iaxca.

²² Huan quema nopa fariseos quicajque icamanal, motetzaitaque pampa amo huelque quicajcayahuaj, huan quistejque.

Jesús quiijto sempa moyolcuise mijcatzitzi
(Mr. 12:18-27; Lc. 20:27-40)

²³ Ipan nopa tonali yajque sequij saduceos quicamanalhuitoj Jesús. Saduceos tamachtíaj para amo quema hueli moyolcuise mijcatzitzi. Huan inijuanti quitatzintzoquilique Jesús:

²⁴ —Tamachtijquet, itanahuatil Moisés quiijtohua sinta se tacat miquis huan amo quicajtejtoc yon se conet, huajca itaca icni nopa tacat cati mijqui monequi mosihuajtis ihuaya nopa cahualtzi para quipiyase se conet cati elis quej icone yaya cati mijqui huan quej nopa cati mijqui quinpiyas iteipan ixhuihua para quiselis ital. ²⁵ Se tonali itztoyaj chicome icnime ipan total, huan nopa cati achtohui ejquet mosihuajti huan teipa mijqui huan amo quipixqui se conet. Huajca itaca icni cati teipa tacatqui mosihuajti ihuaya nopa cahualtzi. ²⁶ Huan nojquiya mijqui huan amo quinpixqui iconehua. Huajca más itaca icnihua cati teipa tacatque mosihuajtijque ihuaya nopa sihuat hasta ajsic chicome icnime cati mosihuajtijque ihuaya nopa sihuat, huan sese ten inijuanti mijqui. ²⁷ Teipa nopa sihuat nojquiya mijqui. ²⁸ Huajca ipan nopa tonali quema moyolcuise nochi cati mictoque, ¿catijqui ten nopa chicome tacame quipiyas nopa sihuat para iaxca pampa nochi quichijque inisihua?

²⁹ Pero Jesús quinillhui:

—Anmocajcayajtoque pampa amo anquimatij Icamanal Toteco huan amo anquimachilíaj para nelía hueyi ichicahualis. ³⁰ Quema moyolcuise nochi masehualme cati mictoque, ayecmo mosihuajtise, yon monamictise, yon quisencahuase para iniichpocahua monamictise. Nochi itztose para nochípa quej iilhuicac ejcahua Toteco ipan ilhuicac cati amo miqij huan yeca amo monequi mosihuajtise para quinpiyase ininconeua. ³¹ Pero quema, masehualme sempa moyolcuise. ¿Amo anquipojtoque cati Toteco quiijto quema ya mijque tohuejcapan tatahua? Yaya quiijto: ³² ‘Na niiTeco Abraham, Isaac huan Jacob.’ Huan pampa Toteco quiijto yaya ininTeco Abraham, Isaac huan Jacob quema inijuanti ya mictoyaj nica, huajca quiijtosnequi inijuanti noja itztoque huan yoltoque nepa ilhuicac iixpa Toteco.

³³ Huan quema nochi nopa miyac masehualme quicajque quenecatza Jesús quinnanquili, nelía motetzaitaque.

Catijqui tanahuatili más monequi tijnelto case
(Mr. 12:28-34)

³⁴ Huan nopa fariseos quicajque para Jesús quintanqui nopa saduceos ica icamanal, huajca quisencajque seyoc tamanti para quitatzintzoquilise.

³⁵ Huan se ten inijuanti cati eliyaya se tayacana tamachtijquet ten itanahuatil Moisés tahuel quinequiyaya quimasiltis Jesús. Huajca quitatzintzoquili:

³⁶ —Tamachtijquet, ¿taya tanahuatili ipan itanahuatil Moisés achi más monequi tijchihuase?

³⁷ Huan Jesús quinnanquili:

—Nopa tanahuatili cati quiijto: ‘Xiquicneli Toteco Dios ica nochi moyolo, huan ica nochi moalma, huan ica nochi motalnamiqulis.’ ³⁸ Ya ni nopa tanahuatili cati más hueyi huan cati más monequi tijchihuase. ³⁹ Huan nopa ompa tanahuatili no san se: ‘Xiquicneli sequinoc quej timoicnelía moselti.’

⁴⁰ Ni ome tanahuatili eltoc inintzinpehualtl nochi sequinoc tanahuatilme cati ijcuilijtoc ipan itanahuatil Moisés huan ipan iniamo nopa tajtolpanexiani.

*Nopa Cristo yaya Dios**(Mr. 12:35-37; Lc. 20:41-44)*

⁴¹ Huan quema nopa fariseos noja quiyahualojtoyaj, ⁴² Jesús quintatzintozquili:

—Anquimatij Toteco techilhui quititanis nopa Cristo ipan ni taltipacti. ¿Taya anmoilhuiáj? ¿Ajquiya icone elis Cristo?

Huan injuanti quinanquilijqque:

—Yaya elis se iteipan ixhui Tanahuatijquet David ten huejcajquiya.

⁴³ Huan Jesús quintatzintozquili:

—Huajca, ¿para ten Tanahuatijquet David quitocaxti Cristo ‘noTeco’? Pampa huejcajquiya Itonal Toteco quichijqui David ma quijito:

⁴⁴ ‘Toteco Dios quicamanalhui noTeco Cristo huan quijito:

Ximosehui nica ipan nonejmat hasta nimitzmactilis mocualancaitacahua para xiquinnahuati.’

⁴⁵ Huajca sinta Tanahuatijquet David quitocaxti Cristo ‘noTeco’ huan technextili para Cristo eli Dios, ¿quenicatza nojquiya elisquía ya iteipan ixhui?

⁴⁶ Huajca amo aqui quimatiyaya quenicatza quinanquilis, huan yeca ipan nopa tonali huan teipa nochi majmahuiyayaj para más quitatzintozquilise.

23*Masehualme ma amo quitoquilica cati fiero quichihuj nopa fariseos**(Mr. 12:38-40; Lc. 11:37-54; 20:45-47)*

¹ Teipa, Jesús quincamanalhui nopa miyac masehualme cati quitoquiliyayaj huan techcamanalhui tiimomachtijcahua huan techilhui: ² “Nopa fariseos huan tamachtiani ten itanahuatil Moisés quipiyaj tequiticayot san se quej Moisés para tamachtise taya quijitosnequi itanahuatil. ³ Huajca amo xiquelcahuaca xijchihuaca cati amechilhuiáj xijchihuaca. Pero amo xijtoquilica cati yaya quichijqui cati fiero, pampa injuanti amo quichihujaj cati tamachtíaj. ⁴ Pampa injuanti amechmacaj miyac tanahuatilme cati injuanti quisencahuaj para anmochihuase ancajcuahme, pero amo aqui hueli quintamichihuas. Eltoc quej amechilpilíaj tamamali cati tahuel etic para anquimamajtiyase, pero nopa tamachtiani amo quinequij quinpalehuse cati tamamajtiyahuij yon ica se inimacpil. ⁵ Nochi cati nopa tamachtiani huan fariseos quichihujaj, san quichihujaj para masehualme ma quinitaca. Moilpilíaj ipan inimax huan ipan inincujtol nopa piltajcuiloltziti ica Icanal Toteco, para nesise tatzetzeloltique. Nojquiya quinpactía quipiyase iniyoyo itenhuaxo nelhuehueyac para ma ajsi falchi para nochi quítase. ⁶ Quinequij mosehuse ipan nopa siyas campa achtohui quintequilise tacuali ipan se tacualisti, huan quinequij mosehuse ipan nopa siyas cati más cuali ipan tiopamit. ⁷ Quinpactía quema masehualme quintajpalohuaj ica cuali ipan tianquis. Quinpactía quema masehualme quintocaxtíaj tamachtiani.

⁸ “Amo xijnequica amojuanti para anmohueyichihuase huan para sequinoc ma amechtocaxtica ‘Rabí’ o ‘Tamachtijquet’, pampa san na niCristo niamotamachtijca, huan nochi amojuanti san sejco anitztoque quej anicnime. ⁹ Huan amo aqui ipan ni taltipacti xijhueyimatica huan xijtocaxtica ‘Totata’, pampa san setzi itztoc amoTata huan yaya Totata Dios cati itztoc ilhuicac. ¹⁰ Huajca amo xijcahuilica sequinoc ma amechtocaxtica ‘Tayacanquet’ pampa san na niCristo cati Toteco nechititanqui ipan taltipacti niamotayacanca. ¹¹ Huan cati hueli ten amojuanti cati quinequi mochihuas más hueyi, ma mochihua amotequipanojca. ¹² Pampa nochi cati mohueyimati

ama, teipa Toteco quinehcapanos, pero nochi cati ama moechcapanohuaj, teipa Toteco quinhuejcapantalis.

Cati quichijque nopa fariseos huan tamachtiani

¹³ “¡Anteicneltique anfariseos huan antamachtiani ten itanahuatil Moisés, pampa Toteco tahuel amechtatzacuiltis! Anquipiyaj ome amoxayac. Anquintzacuiliáj masehualme para amo ma calaquica campa Toteco cati itztoc ilhuicac tanahuatía. Amo anquinequij ancalaquise amojuanti, yon amo anquincahuiláj ma calaquica sequinoc cati quinequij.

¹⁴ “¡Anteicneltique anfariseos huan antamachtiani ten itanahuatil Moisés, pampa Toteco tahuel amechtatzacuiltis! Anquipiyaj ome amoxayac. Anhuejcahuaj anmotatajtíaj ica Toteco miyacapa para antacajcayahuase, pero iyoca anquinqixtilíaj ininchajchaj cahual sihuame. Huajca nopa tatzacuilti cati anquiselise elis más hueyi que cati sequinoc quiselise.

¹⁵ “¡Anteicneltique anfariseos huan antamachtiani ten itanahuatil Moisés, pampa Toteco tahuel amechtatzacuiltis! Anquipiyaj ome amoxayac. Campa hueli ipan taltipacti anyahuij. Anquipanotinemij hueyi at huan hasta campa hueli tali para anquintemose ajquiya quitoquilis nopa camanali cati antamachtíaj. Huan quema ya anquiyolpatatoque se masehuali para ma quitoquili amocamanal, anquichihuaj ma eli noja más fiero que amojuanti. Huajca nopa tit nepa micta quichiya, quej nojquiya amechchiya amojuanti.

¹⁶ “¡Anteicneltique amojuanti, Toteco tahuel amechtatzacuiltis! Anitztoque quej popoyotziti cati tenextilíaj catijqui ojti ma quitoquilica. Anquijtohuaj: ‘Sinta se quitestigojquetzas tiopamit para quichihuas se tamanti, amo monequi quichihuas cati quijto quichihuasquía. Pero sinta se quitestigojquetzas nopa oro cati eltoc tiopan calijtic, huajca, quena, monequi quichihuas cati quijto.’ ¹⁷ ¡Nelía anhuihuitique huan anpopoyotique! Nopa oro amo más ipati que nopa tiopamit cati quitatzejtzololchihua nopa oro. ¹⁸ Huan nojquiya anquijtohuaj: ‘Aqui quitestigojquetzas nopa taixpamit para quichihuas se tamanti, amo monequi quichihuas cati quitencajtoc quichihuas, pero sinta se quitestigojquetzas nopa tacajcahualisti cati eltoc ipan taixpamit, huajca quena, monequi quichihuas cati quitencajqui quichihuas.’ ¹⁹ ¡Anhuihuitique huan amo teno anquimachilíaj! Anitztoque quej popoyotziti. Nopa tacajcahualisti cati masehualme quihualicaque amo más hueyi que nopa taixpamit cati quitatzejtzololchihua nopa tacajcahualisti. ¡Amo cuali amotalnamiquilis! ²⁰ Nelía yaya cati quitestigojquetza nopa taixpamit nojquiya quitestigojquetza nochi cati eltoc nopona. ²¹ Huan cati quitestigojquetza nopa tiopamit, quitestigojquetza nopa tiopamit huan Toteco cati nopona itztoc. ²² Huan yaya cati quitestigojquetza ilhuicacti, nojquiya quitestigojquetza isiyaj yejyetzti campa Toteco mosehuía huan nojquiya quitestigojquetza Toteco cati mosehuía nopona.

²³ “¡Anteicneltique anfariseos huan antamachtiani ten itanahuatil Moisés, pampa Toteco tahuel amechtatzacuiltis! ¡Anquipiyaj ome amoxayac! Anquimacaj Toteco majtacti por ciento ten nochi cati anquipiyaj hasta nopa alojhueno, anís huan cominos, pero cati más ipati ten itanahuatil Moisés techilhuía ma tijchihuaca, amo anquitoquilíaj. Itanahuatilhua quijtohuaj ma tijchihuaca cati xitahuac iixpa Toteco, huan ma titetasojtaca, huan ma tiitzoca titemachme. Ni tamanti achi más monequi xijchihuaca, huan nojquiya monequi amo anquicahuase anquimacase Toteco se majtacti por

ciento ten nochi cati anquippiyaj. ²⁴ Anitztoque quej popoyotzitzi cati tenex-tíliáj catijqui ojti ma quitoquilica. Anquitoquilíaj nopa camanali cati quentzi ipati, pero nopa camanali cati hueyi ipati, amo anquichihuilíaj cuenta.

²⁵ “¡Anteicneltique anfariseos huan antamachtiani ten itanahuatil Moisés, pampa Toteco tahuel amechtatzacuiltis! Anquippiyaj ome amoxayac. Amopani annesij quej ancuajcualme, pero ipan amoyolo san anmoilhuíaj nochi cati antachtectoque huan cati fiero anquichijtoque. ²⁶ ¡Anteicneltique anfariseos! Achtohui ximoyolpajpacaca, huan quej nopa nelía anelise antapajpactique ipan amoyolo huan amopani quej se vaso cati tapajpacti iijtc huan icuitapa.

²⁷ “¡Anteicneltique anfariseos huan antamachtiani ten itanahuatil Moisés, pampa Toteco tahuel amechtatzacuiltis! Anquippiyaj ome amoxayac. Anitztoque quej mijca calme cati nesij yejyectzitzi ininpani pampa quinnex-huijtoque, huan iijtc nelía fiero pampa temitoc ica iniomiyo mijcatzitzi. ²⁸ Amojuanti annesij quej ancuajcualme para masehualme ma amech-tachilica, pero amo neli, pampa ipan amoyolo antacajcayahuaj huan anquichihuaj nochi cati fiero.

²⁹ “Anteicneltique anfariseos huan antamachtiani ten itanahuatil Moisés, pampa Toteco tahuel amechtatzacuiltis. ¡Anquippiyaj ome amoxayac! Anquinchijchihuaj mijca calme campa quintoctoque itajtolpanextijcahua Toteco cati quinmictijque huejcajquiya. Huan anquinoxchitemíaj ininpan-teones nopa tacame cati itztoyaj huejcajquiya huan eliyayaj xitahuaque iixpa Toteco. ³⁰ Huan anquijjtohuaj para sinta anitztosquíaj huejcajquiya quema tohujcapan tatahua itztoyaj, amo anquinpalehujjtosquíaj quema quinmictijque nopa tajtolpanextiani. ³¹ Quej nopa ica amocamanal antenex-tíliáj para anelij anininteipan ixhuihua nopa tacame cati quinmictise itajtolpanextijcahua Toteco. ³² Huan san polihui para nojquiya anquichihuase quej injuanti quichijque huan antemictise para anquippiyase miyac tajtacoli iixpa Toteco quej amotatahua quipixtoyaj.

³³ “Anitztoque quej miyac cohuame ipan san se tepasoli. Amo huelis ancholose. Temachtí anyase ipan tit nepa micta campa antaijyohuise. ³⁴ Yeca nimechtitanilis tajtolpanextiani, huan talnamijca masehualme, huan tamachtiani. Sequij anquinmictise, sequij anquincuamapeloltise, huan sequij anquinhuitequise tiopan calijtic, huan sequij anquinqixtijtine-mise ten se alpetet hasta seyoc para anquintatzacuiltise. ³⁵ Huajca quej nopa amechajsis nopa hueyi tatzacuiltilisti cati quinamiqui, huan anquihuicase tajtacoli pampa anquinmictijque nochi cuajcualme ten huejcajquiya quema mijqui Abel hasta teipa quema anquinmictijque Zacarías icone Berequías tata-jco tiopamit huan taixpamit. ³⁶ Nelía nimechilhuía nochi ni tatzacuiltilisti amechajsis amojuanti cati ama anitztoque.

Jesús quintapojpolhujjtosquía Jerusalén ehuani
(Lc. 13:34-35)

³⁷ “¡Anteicneltique anJerusalén ehuani! Amojuanti cati anquinmictíaj tajtolpanextiani huan anquintepachohuaj nopa tacame cati Toteco amechtitanilía. Nelía miyac huelta nijnequiyaya nimechsentilis nomaco quej se tenanpiyo quinsentilía ipilconeuhua huan quintzacua ica ieltapal, pero amo anquinejqe. ³⁸ Huajca xijtachilica, amotiopa eltoc quej se cali cati tatzitziatoc pampa Toteco ayecmo itztoc nozona. ³⁹ Huan nelía nimechilhuía

ayecmo antechitase hasta nopa tonal quema antechilhuisse: ‘Ma Toteco quitiochihua ya ni cati huala ipan itoca*.’”

24

Se tonali masehualme quisemanase tiopamit

(Mr. 13:1-2; Lc. 21:5-6)

¹ Huan quema Jesús quisayaya ipan nopa hueyi tiopamit para yas, tiimomachtijcahua timonechcahuitoj huan tijmanextijque nopa huejhueyi calme cati iaxca tiopamit. ² Huan Jesús techilhui:

—Anquuitaj nochi ni huejhueyi tiopan calme cati eltoc nica, nelía nimechilhúa, asjis se tonali quema masehualme quisosolose nochi, huan yon se tet amo mocahuas campa eltoya.

Taya panos ipan itamiya tonali

(Mr. 13:3-23; Lc. 21:7-24; 17:22-24)

³ Teipa Jesús mosehuito ipan nopa tepet cati itoca Olivos iixmelac tiopamit, huan iyoca tiimomachtijcahua timonechcahuitoj huan tiquillhuijque:

—Techilhui quema quisosolose nopa tiopamit. Huan techilhui taya tanex-tili oncas quema sempa timocuepa huan nechca para tamis ni tonali.

⁴ Huan Jesús techilhui:

—Ximotachilica para amo aqui ma amechcajcahuas. ⁵ Pampa miyac tacame hualase huan quijitose: ‘Na niCristo.’ Huan quincajcahuase miyac. ⁶ Huan anquicaquise para onca tatehuilisti o anquicaquise para nechca pehuas se tatehuilisti. Amo ximajmahuica pampa monequi panos nochi ni tamanti. Ya ni amo quijitosnequi para itamiya. ⁷ Masehualme campa hueli ipan se tali motananase huan motehuisse ica seyoc tali. Tanahuatiani tatehuisse inihuaya sequinoc tanahuatiani huan ica inisoldados. On-casocolisti cati fiero, huan hueyi mayanti, huan campa hueli mohuisos tali. ⁸ Pero ica nochi ni tamanti quijitosnequi para sanoc pehua nopa fiero tamanti cati masehualme quijyohuisse.

Imomachtijcahua Jesús taijyohuisse

⁹ “Huan huajca, quena, amechtemactilise para sequinoc ma amechtatza-cuiltica huan amechmictise. Campa hueli tali masehualme amechcualan-caitase pampa antechneltoaj*.” ¹⁰ Huan ipan nopa tonali miyac cati quinel-tocaj Toteco, quicahuase huan pehuase quincualancaitase cati eliyayaj ini-huampoyohua huan quintemactilise ica amo cuajcualme.

¹¹ “Huan motananase miyac cati quijitose para injuanti itajtolpanextij-cahua Toteco, pero amo neli, huan quincajcahuase miyac masehualme. ¹² Momiyaquilise masehualme cati amo teno quitepanitase huan nelpano tajtacolchihuae. Huan miyac masehualme cati quineltoaj Toteco ayecmo quipiyase teicnelijcayot ¹³ Pero cati quijyohuis nochi hasta itamiya, nij-maixitst. ¹⁴ Huan masehualme tepohuilij ni cuali camanali ten queni-catza eltos quema Toteco tanahuatist, huan quihuicase hasta campa hueli techaj ipan nochi talme ipan ni taltipacti para nochi masehualme ma quimatica. Huan teipa hualas itamiya nochi cati onca.

Miyac tacajcahuani hualase

¹⁵ “Huan se tonal anquuitase mochihuas cati nopa tajtolpanextijquet Daniel quijito mochihuas teipa. Yaya quijito quiquetzase cati tahuel fiero ipan nopa cuarto cati Más Tatzejzeloltic ipan nopa hueyi tiopan calijitc para

* 23:39 23:39 Ica itequiticayo. * 24:9 24:9 Por notoca.

quichihuas amo tapajpactic nopa tiopamit. (Amojuanti cati anquipohuaj ya ni, xijmachilica taya quiiijosnequi.)¹⁶ Huajca quema panos ya ni, nochi cati itztose ipan estado Judea ma choloca ipan tepeme.¹⁷ Huan cati itztos icalcuitapa ma amo calaquis sempa ipan ichaj para quicuis se tenijqui, san ma temos huan ma cholos nimantzi.¹⁸ Huan cati tequiti imila, ma amo mocuepa para quicuiti itaque, san nimantzi ma cholo.¹⁹ ¡Pero teicneltziti sihuame cati cone huejque huan cati quinchichitíaj coneme ipan nopa tonali!²⁰ Xijtajtanica Toteco para ma amo panos ni tamanti quema taseseya o ipan se tonali para timosiyajquetzase pampa más ohui elis ancholose.²¹ Pampa oncas se hueyi taijyohuilisti quej cati amo quema oncatoc hasta quema pejqui taltipacti huan amo quema oncas seyoc quej ni.²² Sinta Toteco amo quichihuasquia cototzi nopa tonali ten taijyohuilisti, nochi miquisquaj. Pero yaya quichihuas nopa tonali ma eli cototzi pampa quinicnelía nopa masehualme cati quintapejpenijtoc.

²³ “Huajca sinta amechilhuisse: ‘Nica itztoc Cristo’, o quiijtose: ‘Nepa itztoc’, amo xiquinneltocaca.²⁴ Pampa hualase miyac tacajcayahuani cati quiijtose inijuanti Cristo, o inijuanti tajtolpanextiani. Huan quichihuase huejhueyi tanextili huan tamanti cati quinextilis chichahualisti para tacajcayahuase. Sinta huelis, quincajcayahuasquiaj nojquiya inijuanti cati Toteco quintapejpenijtoc.²⁵ Xiquitaca, ya nimechilhuijtoc ama nochi cati panos teipa.

²⁶ “Huajca sinta amechilhuisse: ‘Xiquitatij Cristo itztoc ipan huactoc tali’, amo xiyaca. Huan sinta amechilhuisse: ‘Xiquitatij Cristo itztoc calijtic’, amo xiquinneltocaca.²⁷ Pampa quema na cati niMocuetqui Masehuali nihualas, nochi nechitase. Elis quej quema onca tapetanilot cati chichahuac cati quisa campa quisa tonati huan yahui hasta campa oncalaquí tonati huan nochi hueli quitaj. San se elis ipan nopa tonal quema nitacuepilis.²⁸ Quej nochi quiiitaj quema mosentilíaj tzojopilome campa huetztoc cati mictoc, nochi quiiitase quema sempa nihualas.

Sempa hualas Jesús

(Mr. 13:24-37; Lc. 17:26-30, 34-36; 21:25-33)

²⁹ “Huan nimantzi quema panotosa nopa hueyi taijyohuilisti, tonati zintayohuiyas huan metzti ayecmo taahuis huan sitalime huetzise ten ilhuicac. Huan nochi chichahualisti cati eltoc ipan ilhuicacti tahuel mojmolinise.

³⁰ Huajca ipan ilhuicacti monextis notanextilis na cati niMocuetqui Masehuali, huan nochi masehualme cati huejchihuaj nochi tamanti camanali ipan taltipacti tahuel chocase quema nechitase. Huan nihualajtihualas ipan mixti ten ilhuicacti ica nohueyi chichahualis huan ica notatanex.³¹ Huan na niquintitanis noilhuicac ecahua ica tapitzali huan inijuanti quinsentilise cati Toteco quintapejpenijtoc ten campa hueli ipan taltipacti huan ilhuicacti.

³² “Xijmachilica cati nimechilhúa ipan ni tatenpohualisti. Quema moseliltía se higuera cuahuit, huan pehua quisa ixihuiyo, huajca anquimatij para monechcahuía tonali para tatotonyas.³³ Huajca nojquiya quema anquiiitase nochi ni tamanti, xijmachilica monechcahuía nopa tonal para nitacuepilis. Huan ya nimonechcahuijtos campa caltemit.³⁴ Nelía nimechilhúa, masehualme cati quiiitase mochihuas nochi ni tamanti amo miquise hasta nihualas.³⁵ Ilhuicacti huan taltipacti panotehuas, pero nocamanal nochipa motamichijtiyas.

³⁶ “Amo aqii quimati taya tonali, yon taya hora nitacuepilis. Amo quimatij nopa ilhuicac ehuan huan yon na niIcane amo nijmati; san noTata, quena. San yaya quimati.

³⁷ “Pampa quema na cati niMocuetqui Masehuali nihualas, nochi eltos quej eltoya ipan nopa tonali quema Noé itztoya huejcajquiya. ³⁸ Pampa ipan nopa tonali quema ayemo huetziyaya nopa at cati quínatzonpolihuilti nochi masehualme, masehualme tacuayayaj huan taiyayaj. Sequij mosihua-jtiyayaj huan sequinoc quisencahuayayaj para iniichpocahua ma monamic-tica. Nochi quichihuayayaj cati ipa quichihuaj hasta nopa tonal quema Noé calajqui ipan nopa cuaacali. ³⁹ Amo quimatiyayaj taya ininpantisquía hasta quema hualajqui nopa at cati quínatzonpolihuilti nochi huan quínhuicac. Quej nopa amo aqui quimatis quema na cati niMocuetqui Masehuali sempa nihualas. ⁴⁰ Ome tacame tequititose ipan se mili huan Toteco tatitanis ma quihuicaca se ten nopa ome huan nopa seyoc quicajtehuas. ⁴¹ Ome sihuame tistose san sejco huan Toteco tatitanis ma quihuicaca se, huan nopa seyoc quicajtehuas.

⁴² “Huajca xitachixtoca pampa amo anquimatij ipan taya tonal niamoTeco sempa nihualas. ⁴³ Ximoilhuica ten ni tacat ipan ichaj. Sinta quimajtosquía ipan taya hora ica tayohua hualasquía nopa tachtejquet, tachixtosquía huan amo quicahuilisquía ma calaqui ipan ichaj para tachtequis. ⁴⁴ Huajca amojuanti nojquiya, xitachixtoca pampa na cati niMocuetqui Masehuali sempa nihualas ipan se hora quema amo antechchijaj.

*Nopa tetequipanojquet cati temachtí huan cati amo temachtí
(Lc. 12:41-48)*

⁴⁵ “Ximoilhuica catijqui itequipanojca se tecojti quitequimacas para quinyacanas nochi sequinoc ipan ichaj huan para quintamacas quema ajsis hora. Quema quisas para yas huejca, quitequimacas se talnamijca tetequipanojquet cati nelía temachtí. ⁴⁶ Huan nelía paquis nopa tequipanojquet cati iteco quipantis tequiti cuali quema tacuepilis, huan san se Toteco quitiochihuas cati quipantis tequiti cuali quema nitacuepilis. ⁴⁷ Nelía nimechilhuía, quitequimacas para ma quimocuitahui nochi cati iaxca. ⁴⁸ Pero fiero elis para se tayacanca tetequipanojquet cati pehua moilhuía ipan iyolo cati amo cuali huan quiijtos para huejcahuas iteco para tacuepilis. ⁴⁹ Huelis pehuas quinmaquilis nopa sequinoc tetequipanohuani huan pehuas tacua-jtinemis huan taitinemis inihuaya ihuintini. ⁵⁰ Huan teipa iteco tacuepilis ipan se tonal quema nopa amo cuali tequipanojquet amo quichiyayaya huan ipan se hora quema amo moilhuyaya. ⁵¹ Huan iteco tahuel quitatzacuiltis huan quihuicas campa itztoque cati quiyijaj ome inixayac. Nepa chocas huan tanhuehuechocas pampa tahuel taijyohuis, huan san se nijchihuas ica cati amo temachme quema sempa nihualas.

25

Nopa tatenpohualisti ten nopa majtacti ichpocame

¹ “Huelis tiquinhuicalotise masehualme cati quinequij calaquisse campa tanahuatía Toteco cati itztoc ilhuicac ica ni ichpocame. Itztoyaj majtacti ichpocame cati quicuique inintaahuil huan yajque ihuaya nopa ichpocat para quichiyase hasta quema hualasquía itajtanil huan quihuicasquía para monamicitise. ² Huan macuilti ichpocame eliyayaj talnamiquini huan macuilti huihuitique. ³ Huan nopa macuilti cati huihuitique quihuicaque inintaahuil, pero amo quihuicaque aceite para sempa quitemitise para ma taahuijtos se yohual. ⁴ Pero nopa macuilti cati motalnamictijque, quena, quihuicaque inintaahuil, huan nojquiya iyoca quihuicaque más aceite. ⁵ Huan

nopa mosihuajtijquet amo hualajqui nimantzi huan nochi nopa ichpocame cochisnejque huan pejque cochij.

⁶ “Huan tajco yohual quicajque tzajtzi cati quiyacanayaya nopa mosihuajtijquet, quijtohuayaya: ‘Ya huala ne mosihuajtijquet, xihualaca xij-namiquica.’ ⁷ Huajca nochi nopa ichpocame mijquejque, huan cati quihualicaque más aceite quitemitijque inintaahuil huan quicualtalijque imechajyo nopa taahuilme para yase ipan nopa tacualisti. ⁸ Huan nopa ichpocame cati huihuitique quinilhujijque cati talnamiquini: ‘Techmacaca quentzi amoaceite pampa totaahuil sehuisnequi.’

⁹ “Pero nopa talnamijca ichpocame quinilhujijque: ‘Amo, pampa amo techaxilis para tojuanti huan amojuanti hasta tanesis sinta timechmacase. Más cuali xiyaca xijcohuatij cati anquitequihuse.’

¹⁰ “Huajca injuanti yajque quicohuatoj. Huan ipan nopa talojtzi ajsico nopa telpocat huan nopa ichpocame cati mocualtalijtoyaj yajque ihuaya. Huan nochi calaquitoj ipan nopa tacualisti ten nenamicituli huan caltazajque. ¹¹ Teipa nopa sequinoc ichpocame cati amo quipixtoyaj aceite tanojnotzque: ‘Tate, tate, techcaltapo.’

¹² “Pero nopa mosihuajtijquet quinnanquili: ‘Nelía nimechilhúa, amo nimechixmati.’

¹³ “Quej nopa nojquiya elis quema nitacuepilis. Huajca xitachixtoca pampa amo anquimatij taya tonal, yon taya hora, na cati niMocuetqui Masehuali nihualas.

Se teteco quintanejti tomi itequipanojcahua
(Lc. 19:11-27)

¹⁴ “Huelis tijhuicalotise itanahuatilis Toteco cati itztoc ilhuicac, ica ni tacat cati nimechpohuilis. Se tacat mocualtalijyaya para quisas para yas huejca. Huan quinnotzqui itequipanojcahua huan quinmacac itomi para quitequihuse quema yaya amo aquí.

¹⁵ “Huan nopa teteco quimacac sese nopa tomi quej moilhui para yajatis quitequihuis. Se quimacac macuili bolsas ten itomi, huan seyoc quimacac ome bolsas ten itomi, huan seyoc quimacac se bolsa. Teipa quisqui huan yajqui huejca. ¹⁶ Huan nopa tetequipanojquet cati quiselijtoya macuili bolsas ten itomi iteco nimantzi yajqui quitequihuito nopa tomi para tacohuas huan tanamacas, huan quema panotiyajqui tonali, quitantoya seyoc macuili bolsas. ¹⁷ Huan nopa tetequipanojquet cati quiselijtoya ome bolsas ten itomi nojquiya quitequihui nopa tomi para tacohuas huan tanamacas huan quema panotiyajqui tonali, quitanqui seyoc ome bolsas. ¹⁸ Pero nopa cati san quiselijtoya se bolsa ten itomi, amo ya nopa quichijqui. Yaya yajqui taxahuato huan quitalpacho nopa tomi cati iteco quimacatoya.

¹⁹ “Huan quema ya panotoya miyac tonali, ininteco tacuepili para quichihuas cuentas inihuaya. ²⁰ Huan hualajqui nopa tacat cati quiselijtoya macuili bolsas ten itomi huan quimacac nopa tomi huan nojquiya quimacac nopa seyoc macuili cati ya quitantoya. Huan ne tetequipanojquet quihuihui: ‘Noteco, techcahuilijtequi macuili bolsas ten motomi, huan xiquita ya nijtantoc seyoc macuili bolsas.’ ²¹ Huan iteco quihuihui: ‘Nelía cuali. Ta tinotequipanojca cati temachti. Cuali techtequipano ica nopa quentzi cati nimitzmacac. Huajca ama más miyac nimitzcahuilis momaco. Xicalaquinochaj nohuaya huan nochipa tipaqueise san sejco.’

²² “Huan hualajqui nopa tacat cati quiselijtoya ome bolsas ten tomi huan quihuihui: ‘Noteco, techmacac ome bolsas ten motomi huan ya nijtanqui seyoc ome bolsas.’

23 “Huan iteco quiilhui: ‘Nelía cuali. Tinotequipanojca cati temacti. Cuali techtequipano ica nopa quentzi cati nimitzmacac. Huajca ama más miyac nimitzcahuilis momaco. Xicalaquí nochaj nohuaya huan nochipa tipaquise san sejco.’

24 “Huan yaya cati quiselijtoya se bolsa ten itomi iteco hualajqui huan quiilhui nopa teteco: ‘Noteco, na nijmatqui para chichahuac titanahuatía. Timoaxcatijque tomi cati amo tijtantoc huan tipixca campa amo tijtoctoc.

25 Yeca nimitzimacasqui huan niyajqui nijtalpachoto motomi. Xiquita nica eltoc.’

26 “Huan iteco quiilhui: ‘Ta tiamo cual tetequipanojquet. Nelía titatzihui. Tijmatqui nimoaxcatía tomi cati amo nijtantoc huan nipixca campa amo nijtoctoc. 27 Huajca tijtaljitosquí notomi ipan se banco para nechmacatosquíaj itanca quema nimocuetqui.’

28 “Huajca nopa teteco quiilhui seyoc: ‘Xijquixtili nopa bolsa ten notomi cati nijcahuilijtejqei imaco huan xijmaca yaya cati quipiya majtacti bolsas. 29 Pampa cati quitequihúa cuali cati quipiya masque miyac, iteco quimacas más. Huan cati amo quitequihúa cuali cati quipiya, masque quentzi quipiya, iteco quiquixtilis nopa quentzi cati quipixtoya. 30 Huan ni tetequipanojquet cati amo quitequihui cati quipixqui, xijmajchua campa nelpano tzintayohua, campa masehualme chocaj huan tanhuehuechocaj pampa tahuel taijyohuíaj.’

Toteco tetajtolsencahuas quema tacuepilis

31 “Na cati niMocuetqui Masehuali sempa nihualas ipan taltipacti ipan tatanexti huan nohuaya hualase nopa ilhuicac ehuan cati tatzejtzelolitiqei. Huan quema nihualas, nimosehuis ipan nosiya cati yejyectzi huan nitetajtsencahuas. 32 Huan mosentilise noixpa nochi masehualme ten nochi talme huan na niqiniyocatalis cati cualme huan cati amo cualme quej se tamocuitahuijqei quiniyocalía borregojme huan chivojme. 33 Huan nopa borregojme niqintalis ipan nonejmat huan nopa chivojme ipan noarraves. 34 Huan na nitanahuatijquet niquinilhuis nopa masehualme cati itztose ipan nonejmat: ‘Xihualaca amojuanti cati noTata amechtiochijtoc. Xicalaquica campa yaya tanahuatía, pampa huejcajqeiya quema ayemo oncayaya taltipacti, yaya quisencajqui ya nopa para teipa anquiselise. 35 Pampa nimayanayaya huan amojuanti antechtamacaque, huan quema niamicuiyaya, amojuanti antechamacaque. Huan nielijaya se sejqoyoc ejquet ipan amoaltepe, huan antechselijque ipan amochajchaj. 36 Amo nijpiyayaya cati nimoquentis huan antechmacaque noyoyo. Nimococo-huayaya huan antechmocuitahuitoj. Niitztoya ipan tatzacti huan anyajque antechitatoj.’

37 “Huan teipa nopa cati xitahuaque iixpa Toteco nechtatztintoquilise: ‘Toteco, ¿quemaya timitzitaque timayanayaya huan timitztamacaque, o quema tiamicuiyaya huan timitzamacaque? 38 Huan ¿quemaya timitzpanti-jque quej se sejqoyoc ejquet ipan toaltepe, huan timitzselijque ipan tocha-jchaj, o amo tijpiyayaya moyoyo huan timitzyoyontijque? 39 Huan ¿quemaya timococohuayaya o tiitztoya ipan tatzacti huan timitzitatoj?’

40 “Huan na niTanahuatijquet niquinilhuis: ‘Nelía nimechilhúa, quema anquipalehuiyayaj se ten ni noicnihua cati teicneltziti, niqitac quej elisquá na antechpalehuiyayaj.’

41 “Huan teipa niquinilhuis injuanti cati itztoque ipan noarraves: ‘Tech-talcahuica anamo cuajcualme. Xiyaca ipan nopa tit cati amo quema sehuis

cati Toteco quisencajtoc para Amocualtacat huan iajacahua. ⁴² Pampa ni-mayanayaya huan amo teno antechmacaque ma nijcua, huan niاميقييaya huan amo antechamacaque. ⁴³ Huan nielijayaya se sejcayoc ejquet ipan moaltepe, huan amo antechselijque ipan amochajchaj. Antechitaque quema amo nijpiyayaya noyoyo para nimoquentis, huan amo antechmacaque noyoyo. Nimococohuayaya huan niitztoya ipan tatzacti, huan amo antechpalehuijque.’

⁴⁴ “Huan injuanti nojquiya nechtatzintoquilise: ‘Toteco, ¿quemaya timitzitaque timayana, o tiamiqui, o sejcayoc tiejquet, o amo tijpiya moyoyo? ¿Quemaya timitzitaque timococohua o ipan tatzacti huan amo timitzpalehuijque?’”

⁴⁵ “Huan na niqinnanquilis: ‘Nelía nimechilhuía, pampa amo anquinpalehuijque ni noicnihua cati teicneltitzi, huajca niqita quej elisquía amo antechpalehuijque na.’”

⁴⁶ “Huan nopa masehualme yase campa Toteco quintatzacuilitis para nochipa, huan nopa masehualme cati xitahuaque iixpa Toteco yase ilhuicac campa itztose para nochipa.”

26

Quisencajque quenicatza quiitzquise Jesús (Mr. 14:1-2; Lc. 22:1-2; Jn. 11:45-53)

¹ Quema Jesús tanqui quiijtohua nochi ni camanali, techilhui tiimomachticahua:

² —Anquimatij san polihui ome tonati para nopa ilhuit cati itoca Pascua campa nechtemactilise na cati niMocuetqui Masehuali para nechcuamapeloltise.

³ Huan ipan nopa tonal nojquiya nopa tayacanca totajtzitzi huan nopa huehue tacame ten israelitame mosentilijque ichaj Caifás nopa hueyi totajtzi. ⁴ Huan san sejco quisencajque quenicatza huelis quicajcayahuase huan quiitzquise Jesús para quimictise. ⁵ Pero quiijtohuayayaj:

—Ma amo tiqitzquica ipan ni ilhuit pampa huelis nopa miyaqui masehualme sentic motananase huan techtehuise.

Se sicut quitequili taajhuiyacayot Jesús (Mr. 14:3-9; Jn. 12:1-8)

⁶ Huan Jesús mocajtoya ipan altepet Betania ipan ichaj Simón cati achtohuiya tacayo palantoya. ⁷ Huan Jesús tacuayaya campa mesa huan ajnico se sicut cati quihualicayaya se taajhuiyacayot cati tahuel patiyto ipan se frasco cati quicoyonijtoya ten se tet itoca alabastro. Huan quitequili ipan itzonteco Jesús. ⁸ Huan quema tiimomachtijcagua tiqitaque, ticualanque huan tiqijtojque:

—¿Para ten quinenpolohua ne taajhuiyacayot cati tahuel patiyto?
⁹ Hueltosquía tijnamacatosquíaq para miyac tomi huan tiquinmacatosquíaq cati teicneltitzi.

¹⁰ Huan Jesús quimatqui cati tiqijtojque, huajca techilhui:

—Amo xijcuatotonica ni sicut, pampa nechchihuilijtoc se cuali tamanti.

¹¹ Mojmosta itztose teicneltitzi amohuaya, pero na amo. Ayecmo huejcahuas niitztos amohuaya. ¹² Ni sicut nechtequili ni taajhuiyacayot pampa quej nopa quisencahua notacayo para quema nechtalpachose. ¹³ Nelía nimechilhuía, campa hueli ipan taltipacti campa masehualme tepohuilise icamanal Toteco, nojquiya teilhuise cati ni sicut nechchihuilijtoc para nochi quielnamiquire.

Judas quinejqui quitemactilis Jesús

(Mr. 14:10-11; Lc. 22:3-6)

¹⁴ Huan se ten tojuanti tiimomachtijcahua Jesús cati quitocaxtiyayaj Judas Iscariote, yajqui quinitato nopa tayacanca totajtztitzi. ¹⁵ Huan quintatzintozintocquili:

—¿Quesqui antechmacase sinta nimechmactilis Jesús?

Huan nopa tayacanani quimacaque Judas treinta plata tomi. ¹⁶ Huan ipan nopa hora Judas pejqui quitemohua quema huelis quitemactilis Jesús.

Itacualis Tohueyiteco

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Ipan nopa achtohui tonali ten nopa ilhuit, quema nochi quicuaj pantzi cati amo quipiya tasonejcaoyot, tiimomachtijcahua tihualajque campá Jesús itztoya huan tijtatzintocquilique:

—¿Canque tijnequi ma tijsencahuaca nopa Pascua tacualisti para nochi tijcuase?

¹⁸ Huan Jesús techilhui:

—Xiyaca ipan ne altepet huan anquipantise se tacat huan anquihuisse para niamotamachtijca niquijtohua ya monechcahuía nohora. Xiquilhuica monequi nijcuas nopa Pascua tacualisti nepa ichaj ihuaya nomomachtijcahua.

¹⁹ Huan tiimomachtijcahua Jesús tiyajque campá Jesús techilhui huan tijsencajque nopa Pascua tacualisti.

²⁰ Huan quema tayohuixqui, Jesús mosehui campá mesa tohuaya timajtacti huan ome tiimomachtijcahua. ²¹ Huan quema titacuayayaj, yaya techilhui:

—Nelia nimechilhuía, se ten amojuanti nechtemactilis.

²² Huan nochi tojuanti tahuel timotequipachojque huan pejqui tijtatzintocquiliaj:

—¿Huelis na, noTeco?

²³ Huan Jesús technanquili:

—Nechtemactilis yaya cati nohuaya quixolonía ipantzi ipan ni plato.

²⁴ Melahuac monequi na cati niMocuetqui Masehuali nimiquis quej ijcuilijtoc ipan Icamanal Toteco, pero teicnelti yaya cati nechtemactilis. Tahuel hueyi nopa tatzacuiltilisti cati quiselis. Más cuali eltosquía para nopa tacat amo tacajtosquía.

²⁵ Huan Judas cati quitemactilisquía quitatzintocquili Jesús:

—¿Huelis na, Tamachtijquet?

Huan Jesús quinanquili:

—Quena, ta.

²⁶ Huan quema titacuayayaj, Jesús quiitzqui se pantzi huan quitasamatqui Itata huan quitapanqui, huan techmacac tiimomachtijcahua huan techilhui:

—Xijcuica ni pantzi huan xijcuaca. Ni notacayo.

²⁷ Teipa quicuic se taza ica xocomeca at, huan quitasamatqui Itata huan techmacac, techilhui:

—Nochi amojuanti xiquica ipan ni taza, ²⁸ pampa ni noeso cati nijtoyahuas para nijpehualtis nopa yancuic camanal sencahuali cati Toteco quichihua ica masehualme. ²⁹ Huan nimechilhuía, ayecmo niquis xocomecat iayo hasta nopa tonal quema yancuic tiquise san sejco nepa campá noTata tanahuatía.

Pedro quiijtos amo quiixmati Jesús
(Mr. 14:26-31; Lc. 22:31-34; Jn. 13:36-38)

³⁰ Teipa quema titanque tihuicaj se tiohuicat, tiquisque huan tiyajque campa nopa tepet cati itoca Olivos. ³¹ Huan Jesús techilhui:

—Nochi amojuanti antechcajtehuase ni tayohua pampa ijcuilijtoc ipan Icamanal Toteco cati noTata quiijto: ‘Nijmictis nopa tamocuitahuijquet huan nopa iborregojhua mosemanase.’ Quej nopa quiijtohua. ³² Pero teipa quema ya nimoyolcuitos, niyas hasta estado Galilea huan timonamiquise nozona.

³³ Huan Pedro quinanquili, quiilhui:

—Masque nochi sequinoc mitzcajtehuase, na amo quema nimitzcajtehuas.

³⁴ Huan Jesús quiilhui:

—Nelía nimitzilhuía, ni yohuali quema ayemo tzajtzi se cuapele, tiquinilhuis masehualme expa para amo techixmati.

³⁵ Huan Pedro sempa quiilhui:

—Masque monequi nimitzixmati, amo quema niqijtos para amo nimitzixmati.

Huan nochi tiimomachtijcagua nojquiya ya nopa tiquilhuijque.

Jesús motatajti ica Itata nepa Getsemaní
(Mr. 14:32-42; Lc. 22:39-46)

³⁶ Huan Jesús techhuicac hasta campa itoca Getsemaní huan techilhui tiimomachtijcagua:

—Ximosehuica nica huan na niya nimotatajtiti.

³⁷ Huan Jesús quinhuicac Pedro huan nopa ome imomachtijcagua cati eliyayaj itelpocahua Zebedeo. Huan yaya pejqui tahuel motequipachohua huan taijyohuía. ³⁸ Huan quinilhui nopa eyi:

—Tahuel nimoyoltequipachohua hasta nijmati huelis nimitzixmati amantzi san ica tequipacholi. Ximocahuaca nica. Xitachixtoca nohuaya.

³⁹ Huan Jesús yajqui se quentzi iniixmelac huan moixtapacho talchi huan pejqui motatajtía huan quiijto:

—Notata, sinta tihuelisquía, techquixtili ni taijyohuilisti cati huala para ma amo nechajsi. Pero amo xijchihua cati na nijnequi, san xijchihua cati ta mopaquilis.

⁴⁰ Huan quema tanqui motatajtía ica Itata, mocuetqui campa itztoyaj nopa eyi imomachtijcagua huan quinpanti cochoque. Huajca Jesús quiilhui Pedro:

—¿Amo anhuelque antachixtoque nohuaya para se hora? ⁴¹ Xitachixtoca huan ximotatajtica para amo amechyoltlanas tajtacoli. Amotonal quinequi quichihuas cati nimechnahuatía, pero amotacayo amo quiipiya tetili.

⁴² Huan Jesús sempa yajqui se quentzi huan motatajti huan quiijto:

—Notata, sinta amo tihueli techijcuenilis ni taijyohuilisti huan monequi niqijyohuis, huajca xijchihua cati ta mopaquilis.

⁴³ Huan sempa mocuetqui Jesús campa nopa eyi imomachtijcagua huan quinpanti cochoque pampa nelía cochisnequiayaj. ⁴⁴ Huan sempa quincajtejqui huan sempa yajqui motatajtito ica expa. Huan sempa quiilhui Itata cati quiilhui achtohuiya. ⁴⁵ Huan sempa mocuetqui campa imomachtijcagua, huan quinilhui:

—¿Noja ancochoque huan anmosiyajquetzaj? Xiquitaca, ya ajsic hora para masehualme nechtemactilise na cati niMocuetqui Masehuali inimaco

amo cuajcualme. ⁴⁶ Ximoquetzaca huan ma ya tiyaca. Xiquitaca, ya huala
yaya cati nechtemactilis.

Tacame quiitzquijque Jesús
(Mr. 14:43-50; Lc. 22:47-53; Jn. 18:2-11)

⁴⁷ Huan quema Jesús noja camanaltiyaya, ajsico Judas se ten timajtacti
huan ome tiimomachtijcahua. Yaya hualayaya inihuaya miyac tacame cati
quihualicayayaj machetas huan cuahuit cati quintantoyaj nopa tayacanca
totajtztzi huan nopa huehue tacame ten israelitame. ⁴⁸ Huan Judas cati
quitemactiliyaya Jesús, ya quinmacatoya nopa tacame se tanextili para
cati quitzoponisquía, yaya elisquía Jesús cati quitemohuayayaj, huajca ma
quiitzquica.

⁴⁹ Huajca Judas nimantzi monechcahuico campa Jesús huan quiilhui:

—Ya tapoyahui, tamachtijquet.

Huan quitzoponi. ⁵⁰ Huan Jesús quiilhui:

—Nohuampo, nimantzi xijchihua cati tihualajtoc para tijchihuas.

Huan nopa tacame monechcahuijque huan quiitzquijque Jesús, huan
quihuicaque.

⁵¹ Huan se imomachtijca Jesús cati itztoya ihuaya quiquixti imacheta huan
quimaquili itequipanojca nopa hueyi totajtzi, huan quitzontequili incas.

⁵² Huajca Jesús quiilhui:

—Xijcalaqui momacheta ipan icuetaxo pampa cati tatehuíaj ica macheta,
nojquiya quinmictise ica macheta. ⁵³ ¿Amo anquimatij nihuelisquía ni-
motatajtisquía ica noTata huan yaya nimantzi nechtitanilisquía quipano
setenta mil ilhuicac ehuan para nechmanahuiquij? ⁵⁴ Pero sinta quej nopa
nijchihuas, ¿quenicatza mochihuas cati ijcuilijtoc ipan Icamanal Toteco para
mochihuas?

⁵⁵ Huan teipa Jesús quinilhui nopa tacame cati hualajtoyaj:

—¿Para ten anhualajtoque nica para antechitzquise ica machetas huan ica
cuahuit quej nielisquía se tachtejquet? Mojmosta nitamachtiyaya ipan nopa
hueyi tiopamit huan amo quema antechitzquijque. ⁵⁶ Pero masque amo
anquimatij taya anquichihuaip ipan ni tonali, anquichihuaip nochi ni tamanti
para ma motamichihua cati itajtolpanextijcahua Toteco quiijcuilijque hue-
cajquiya ipan Icamanal Toteco.

Huan nochi tiimomachtijcahua tijcajtejque huan ticholojque.

Jesús iniixpa tayacanani
(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Huan nopa tacame cati quiitzquijque Jesús quihuicaque ichaj Caifás,
nopa hueyi totajtzi. Nopona mosentilijtoyaj nopa tamachtiani ten itanahu-
atil Moisés huan nopa huehue tacame ten israelitame. ⁵⁸ Huan Pedro no-
jquiya quinhuejcatocuiliijtiyajqui hasta ajsitoj campa caltemit cati calaqui
ipan icalixpa Caifás. Huan Pedro nojquiya calajqui, mosehuito inihuaya
tetequipanohuani para quiitas taya panosquía.

⁵⁹ Huan nopa tayacanca totajtztzi huan huehue tacame ten israelitame
huan nochi nopa tasentilisti ten tequichihuani cati más huejhueyi quitemo-
huayayaj se para tatestigojquetzas ica se istacatili para ica quitelhuise Jesús
huan quej nopa huelisquíaj quitemactilise para ma miqui. ⁶⁰ Huan amo teno
quipantijque cati ica huelisquitelhuise, masque miyac testigos hualajtoyaj
para quiistacahuise. Pero teipa ome tacame moquetzque, ⁶¹ huan quiijto-
jque:

—Ni tacat Jesús quijto para huelis quisosolos itiopa Toteco huan sempa quichihuas ica eyi tonati.

⁶² Huan nopa hueyi totajtzi moquetzqui huan quitatzintoquili Jesús:

—¿Amo teno títananquílía? ¿Tiquijto cati ica mitztelhuíaj o amo tiquijto?

⁶³ Huan Jesús amo molini. Huan nopa hueyi totajtzi quíilhui:

—Nimitznahuatía xijtestigojquetza Toteco Dios cati itztoc, huan techilhui sinta tiCone Toteco huan sinta tiCristo cati Toteco quijto techtitanilisquía.

⁶⁴ Huan Jesús quíilhui:

—Quena, na niCristo. Huan nojquiya nimitzilhuía, teipa antechitase na cati niMocuetqui Masehuali quema nimosehujtos inejmat Toteco Dios cati quipiya nochí chichualisti. Huan antechitase quema sempa nihualas ipan mixti ten ilhuicac.

⁶⁵ Huajca nopa hueyi totajtzi quitzayanqui iyoyo para quinextilis para tahuel temajmati ica cati Jesús quíijto. Huajca quíilhui nopa sequinoc:

—Xijcaquica, yaya mochihua quej Toteco Dios pampa yon quentzi amo quíita para ipati. ¿Para ten monequi más testigos? Anquicactoque para mochihua yaya Toteco Dios. ⁶⁶ ¿Taya tatzacuiltilisti anmoilhuíaj quínamiqúi para quiselis?

Huan quíinanquíilijque:

—Monequi ma míqui.

⁶⁷ Huajca quíixchajchaque, huan quíimaquíilijque ica inimatolo. Huan sequinoc quíixtajtatzinijque, ⁶⁸ huan quíílhuijque:

—Sinta nelía ta tiCristo, xicamanalti quej se tajtolpanextijquet huan techilhui ajquiya mitzmaquílía.

Pedro quíijto amo quíixmati Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Huan Pedro noja mosehujtoya calixpa huan se ichpoca tequipanojquet quíinechahuico huan quíilhui:

—Ta nojquiya tíitztoya ihuaya Jesús cati ehua estado Galilea.

⁷⁰ Huan Pedro istacatqui iniixpa nochí cati itztoyaj nepa. Quíijto:

—Amo, amo níjmati taya tiquíjtohua.

⁷¹ Huan Pedro yajqui calteno campa caltemit huan seyoc ichpoca tequipanojquet quíitac huan quíílhui nochí cati mosehujtoya nozona:

—Ni tacat nojquiya itztoya ihuaya Jesús cati ehua altepet Nazaret.

⁷² Huan Pedro sempa quíijto para amo, huan quíitestigojquetzqui Toteco huan quíijto:

—Amo níquixmati ne tacat.

⁷³ Huan quentzi teipa monechahuicoj campa Pedro nopa tacame cati itztoyaj nozona huan quíílhuijque:

—Nelía ta tíitztoya se tíimomachtijca pampa quej ticamanalti mitznexítía canque tiehua.

⁷⁴ Huan Pedro pejqúi tatlchihua huan quíitestigojquetza Toteco, huan quíijto:

—Amo níquixmati ne tacat.

Huan nímantzi tzajtzic se cuapele. ⁷⁵ Huajca Pedro quíielnamijqui cati Jesús quíílhui para quema ayemo tzajtzíyaya se cuapele, Pedro quíílhuisquía masehualme expa para amo quíixmati. Huajca Pedro quisquí huan tahuel chocac.

27

*Jesús iixpa Pilato**(Mr. 15:1; Lc. 23:1-2; Jn. 18:28-32)*

¹ Huan quema tanesqui, nochi nopa tayacanca totajtzitzi huan huehue tacame ten israelitame quisencajqque quenicatza quichihualtise nopa hueyi tequichijquet para quijitos para monequi miquis Jesús. ² Huan nopa soldados quilpijqque Jesús huan quihuicaque iixpa gobernador Poncio Pilato.

Mijqui Judas

³ Huan quema Judas cati quitemactilijtoya quiiitac para inijuanti quitemactiliyayaj Jesús para ma miqui, tahuel motequipacho ica cati quichijtoya. Huan quihuicac nopa treinta plata tomi, huan quincuepili nopa tayacanca totajtzitzi huan huehue tacame ten israelitame, ⁴ huan quinihui:

—Nitajtacolchijtoc pampa nimechmactili yaya cati amo quipiya tajtacoli.

Pero inijuanti quinanquilijqque:

—Para tojuanti amo teno. Ta tijmati.

⁵ Huan Judas quitepejqque nopa plata tomi tiopan calijtic. Teipa quistejqque huan yajqui moquechcuapiloto hasta mijqui.

⁶ Huan nopa tayacanca totajtzitzi quicuique nopa plata tomi huan quijtojqque:

—Amo cuali para tijmanelose ni tomi ihuaya ne seyoc ipan nopa caja tiopan calijtic pampa ica ni tomi tijtaxtahuijqque cati techmactili Jesús para ma miqui, huajca ni tomi quihuica esti.

⁷ Teipa quisencajqque taya quichihuasquíaj ica nopa tomi huan quicojqque ital se chachapalchijquet para nozona quintaltocasquíaj cati seyoc tali ehuan. ⁸ Huajca nopa tali quitocaxtijque Tali ten Esti. Huan quej nopa itoca hasta ama. ⁹ Huajca ya ni quitamilti cati tajtolpanextijquet Jeremías huejcajqque quijcuilo para teipa mochihuas. Yaya quijto: “Nopa israelita tacame quitalise para ipati treinta plata tomi para ya nopa quixtahuase. ¹⁰ Teipa quicuisse nopa tomi huan ica quicohuase ital se chachapalchijquet pampa quej nopa Toteco quinnahuatis ma quichihuaca.”

*Pilato quitatzintoquili Jesús**(Mr. 15:2-5; Lc. 23:3-5; Jn. 18:33-38)*

¹¹ Huan Jesús moquetztaya iixpa gobernador huan yaya quitatzintoquili:

—¿Ta tiinintanahuatijca israelitame?

Huan Jesús quinanquili:

—Quena, na.

¹² Huan quema nopa tayacanca totajtzitzi huan nopa huehue tacame ten israelitame quitelhuyayaj Jesús iixpa nopa gobernador, yaya amo molini.

¹³ Huajca Pilato quitatzintoquili Jesús:

—¿Amo tijcaqui ica quesqui tamanti mitzelhuíaj?

¹⁴ Pero noja Jesús amo teno tananquili, huan yeca nelía quitetzaitac nopa gobernador.

*Pilato quijto para ma miqui Jesús**(Mr. 15:6-20; Lc. 23:13-25; Jn. 18:38-19:16)*

¹⁵ Sese xihuit ipan nopa Pascua ilhuit, Gobernador Pilato ya momajtoya quiquixtia se cati tzactoc ipan tatzacti para ma yahui ichaj. Huan quiquixtisquí cati nopa miyac masehualme quitapejpenisquíaj. ¹⁶ Huan ipan nopa tonali itztoya ipan tatzacti se tacat itoca Barrabás cati nochi quimatiyayaj

para se fiero tacat. ¹⁷ Huajca mosentilijque nopa miyac masehualme, huan Pilato quintatzintoquili:

—¿Ajquiya anquinequij ma nijquixtis ipan tatzacti para yas ichaj? ¿Nimech-macas Barrabás o ni Jesús cati masehualme quitocaxtiaj nopa Cristo?

¹⁸ Pilato quiiito ya ni pampa quinequiyaya quiquixtis Jesús. Quimatiyaya para nopa tayacanani quihualiquilijque san pampa quichicoitayayaj pampa nochi masehualme quitoquiliyayaj.

¹⁹ Huan quema Pilato mosehuijtaya ipan isiyaj ipan nopa lugar para tetajtolsencahuas, isihua quititanili se camanali huan quiilhui: “Amo teno xijchihuili Jesús pampa yaya se tacat xitahuac. Tayohua niqitac tamanti fiero ten ya ipan se temicti.”

²⁰ Pero nopa tayacanca totajtzitzi huan nopa huehue tacame ten israeli-tame quinchihualtijque nopa miyac masehualme cati itztoyaj nopona ma tajtanica para ma quiquixtis Barrabás huan ma quimicti Jesús. ²¹ Huajca nopa gobernador sempa quintatzintoquili:

—¿Ajquiya nijquixtis ten ne ome tacame?
Huan nopa masehualme quiilhuijque:

—Barrabás.

²² Huan Pilato quintatzintoquili:

—Huajca ¿taya nijchihuas ica Jesús cati quitocaxtiaj nopa Cristo?

Huan quinanquiliijque:

—Xijcuamapelolti.

²³ Huan Pilato quintajtani sempa:

—Pero ¿para ten? ¿Taya tajtacoli quichijtoc?

Pero nopa masehualme más tzajtziziyayaj:

—Xijcuamapelolti.

²⁴ Huan Pilato quiitac para amo huelis quimanahuis Jesús pampa nopa miyac masehualme ya pejque más mosisiníaj. Huajca tajtanqui se achi at para momajtequis, huan momajtequi iniixpa nochi nopa masehualme, huan quinilhui:

—Na amo nijhuica tajtacoli sinta miquis ni tacat cati cuali. Anquihuicase tajtacoli amojuanti sinta anquimictise.

²⁵ Huan nochi nopa masehualme quinanquiliijque huan quiilhuijque:

—Ma miqui huan ma tijhuicaca tajtacoli tojuanti huan toconehua.

²⁶ Huajca quincahuili ma yas Barrabás quej injuanti quinequiyayaj, huan tanahuati ma quihuitequica Jesús huan quinmactili para quicuamapeloltise.

²⁷ Huan nopa soldados quihuicaque Jesús ipan nopa hueyi cali cati iaxca gobernador, huan quej seiscientos soldados mosentilijque huan quiyahualojque Jesús. ²⁸ Huan quiquixtilijque iyoyo huan quiquentijque se yoyomit cati chichiltic quej tanahuatiani momatij moquentíaj. ²⁹ Huan quix-inepalojque se huitzcorona huan quitallilijque ipan itzonteco Jesús. Huan quitallilijque se ojta cuahuit ipan inejmat quej quiapiya se tanahuatijquet huan pejque quihuihuitaj. Motancuaquetzque iixpa huan quiilhuijque:

—¡Ma itzto miyac tonali ni inintanahuatijca israelitame!

³⁰ Huan teipa quichajcha huan quiquixtilijque nopa ojta cuahuit huan pejque ica quimaquilaj itzonteco. ³¹ Huan teipa quema tanque quihuihuitaj, quiquixtilijque nopa yoyomit cati huehueyac huan quiquentijque cati ipa iyoyo huan quihuicaque quicuamapeloltitoj.

Quicuamapeloltijque Jesús
(Mr. 15:21-32; Lc. 23:26-43; Jn. 19:17-27)

³² Huan quema injuanti ya quistoyaj ipan altepet Jerusalén, quipanti-
jque se tacat itoca Simón cati ehua tali Cirene huan quichihualtijque ma
quiquechpano icuamapel Jesús.

³³ Huan teipa ajsitoj ipan nopa lugar cati itoca Gólgota (cati quinequi
quijitos “Campa Onca Mijcatzontecomit”). ³⁴ Huan nepa nopa soldados
quiltijque Jesús vinagre ihuaya se pajti cati chichic para ma tapolo. Pero
Jesús san quiyeco huan quema quimachili taya quipixtoya, amo quaic.

³⁵ Huan quema nopa soldados quimalavoshujque Jesús ipan icuamapel,
momajmacaque iyoyo huan mahuiltijque ica piltetzitzi para quiiase
ajquiya quihuicasquía. Huajca quitamiltijque icamanal nopa tajtolpanex-
tijquet cati quiiucilo huejcajquiya campa quijtohua: “Injuanti momaj-
macase noyoyo huan mahuiltise para quiiase ajquiya quihuicas cati nimo-
quentía.”

³⁶ Huan teipa nopa soldados mosehujque para tamocuitahuse quema
Jesús ya itztoya ipan icuamapel. ³⁷ Huan quitallijque se tajcuiloli itzonta Jesús
campa nesiyaya taya ica quitelhujtoyaj. Huan nopa tajcuiloli quijto: NI
JESÚS, YAYA ININTANAHUATIJCIA ISRAELITAME.

³⁸ Huan quincuamapeloltijque ome tachtequini ipan inincuamapelhua
nechca Jesús. Se ipan inejmat huan seyoc ipan iarraves. ³⁹ Huan nochi mase-
hualme cati panoyayaj nozona nojquiya quihuihuiitayayaj. Quiojolinyayaj
inintzonteco, ⁴⁰ huan quiihuiyayaj:

—Ta tiqijto tijsosolosquía nopa tiopan cali huan sempa tijchijchihuas ica
eyi tonati. Huajca ximomaquixti. Sinta ta tiIcane Toteco, xitemo ten nopa
cuamapeli.

⁴¹ Nojquiya quihuihuiitayayaj nopa tayacanca totajtzitzi, nopa
tamachtiani ten itanahuatil Moisés, nopa fariseos huan nopa huehue
tacame ten israelitame. Quijtohuayayaj:

⁴² —Yaya quinmaquixti sequinoc pero amo hueli momaquixtía iselti.
Sinta nelía yaya nopa tanahuatijquet ten tiisraelitame, huajca ma temo
nimantzi ipan icuamapel huan huajca, quena, tijneltocase. ⁴³ Yaya nochipa
motemachi ipan Toteco, huajca ma Toteco quimanahui amantzi, sinta
quinequi, pampa yaya quijto para Icone Toteco.

⁴⁴ Huan nopa tachtequini cati itztoyaj inechca ipan inincuamapel, no-
jquiya quihuihuiitayayaj.

Mijqui Jesús

(Mr. 15:33-41; Lc. 23:44-49; Jn. 19:28-30)

⁴⁵ Huan ica tajco tona tzintayohuixqui campa hueli ipan taltipacti hasta
las tres ica tiotac. ⁴⁶ Huan nechca las tres Jesús camanaltic chichahuac huan
quijto:

“Elí, Elí, ¿lama sabactani?”

Ni camanali quinequi quijtos: “NoTeco, noTeco, ¿para ten techtahucaj-
toc?”

⁴⁷ Huan sequij tacame cati moquetztoyaj nechca quicajque icamanal huan
amo quimachilijque taya quijto, huan injuanti quijtojque:

—Ni tacat quinqotza tajtolpanextijquet Elías.

⁴⁸ Huan nimantzi se injuanti motalo huan quicuito se tamanti cati tzot-
zoltic huan quiapacho ipan xocomeca at cati xococ huan qitali ipan se
oita cuahuit huan quitenamiquilti Jesús para ma quichichina. ⁴⁹ Pero nopa
sequinoc tacame quiihuijque:

—Xijcahua. Ma tiquitaca sinta hualas Elías para quimanahuicui.

⁵⁰ Huan Jesús sempa camanaltic chichahuac huan quitemactili Itonal imaco Toteco. ⁵¹ Huan ipan nopa talojtzi, tzayanqui nopa hueyi cortina cati ica quitzactoyaj nopa cuarto campa Más Tatzeltzeloltic tiopan calijtic. Tzayanqui oncac, huejcapa hasta tatzinta. Huan mohuiso tali huan nochi huejhueyi teme motajcoitaque. ⁵² Huan ipan campo santo motapojque campa quintalpachojtoyaj mijcatzitzitzi huan moyolcuique miyac mijcatzitzitzi cati iaxcahua Toteco. ⁵³ Quisque ipan iniostohua huan teipa quema Jesús ya moyolcuitoya, injuanti calajque ipan altepet Jerusalén huan miyac masehualme quinitaque.

⁵⁴ Huan se capitán ihuaya isoldados cati quimocuitahuiyayaj Jesús quiitaque quema mohuiso tali, huan quiitaque nochi sequinoc tamanti cati panoyaya, huan tahuel momajmatijque huan quiijtojque:

—Nelía ni tacat elqui Icone Toteco.

⁵⁵ Huan itzttoyaj nopona miyac sihuame cati quitetzaitayayaj Jesús ica huejca. Injuanti quitoquilijtoyaj Jesús ten estado Galilea para quipalehuise ica ten monejqui. ⁵⁶ Ipan nopa sihuame itzttoyaj María Magdalena, María ininana Jacobo huan José, huan nojquiya ininana itelpocahua Zebedeo.

*Quitelijque Jesús ipan ostot ipan se tepet
(Mr. 15:42-47; Lc. 23:50-56; Jn. 19:38-42)*

⁵⁷ Huan quema tiotaquixqui, ajsico se tominpixquet cati quitocaxtiyayaj José. Yaya ehuayaya altepet Arimatea huan quitoquili Jesús quej se imomachtijca. ⁵⁸ Yaya yajqui quiitato gobernador Pilato huan quitajtani ma quicahuili quicuis itacayo Jesús. Huajca Pilato tanahuati para ma quimacaca. ⁵⁹ Huan José quicuic itacayo Jesús huan quipijqui ica se hueyi yoyomit cati yancuic. ⁶⁰ Huan quitali ipan se mijca ostot cati yancuic quicoyonijtoya ipan se hueyi tepexit para yaya iselti quitequihuisquía quema miquis. Huan quimimilo se hueyi tet para ica quitzajqui huan teipa quistejqui. ⁶¹ Huan María Magdalena huan nopa seyoc María mosehuijtoyaj imelac nopa ostot ipan se tepet quitachiliyayaj.

Soldados quimocuitahuijque campa quitelijtoyaj itacayo Jesús

⁶² Huan tonili quema ya panotoya nopa tonali para tacualtalise para nopa ilhuit, mosentilijque nopa tayacanca totajtzitzi huan fariseos iixpa Pilato, ⁶³ huan quiilhuijque:

—Tate, tiquelnamiqij quema noja itztoya, nopa tacajcayajquet Jesús quiijto para quema miquis, ica eyi tonati moyolcuis. ⁶⁴ Huajca xiquintitani soldados ma cuali quitzacuaca nopa ostot ipan nopa tepet huan quimocuitahuisse hasta panos eyi tonati para amo hualase imomachtijcahua huan quihucase itacayo huan teipa nochi masehualme quiijtose para moyolcuitoc. Quej nopa achi más tacajcayahuase teipa, huan amo quej achtohui quichihuayajaj.

⁶⁵ Huajca Pilato quinilhui:

—Nica itztoque nosoldados. Xiquinhuicaca huan xijchihuaca nochi cati anquimatij anquichihuaj para ma mocahua neltemachtí.

⁶⁶ Huajca quinhucaque nopa soldados huan quitzajque nopa ostot ipan tepexit huan quitelijque se sello ipan nopa tet para quimatisquía sinta se masehuali calaquisquía. Huan nopa soldados mocajque tamocuitahuijtoyaj.

28

*Jesús moyolcuic**(Mr. 16:1-8; Lc. 24:1-12; Jn. 20:1-10)*

¹ Huan teipa panoc sábado, nopa tonali para ma mosiyajquetzaca. Huan quema ayemo quisayaya tonati ipan domingo nopa achtohui tonali ipan semana, María Magdalena huan nopa seyoc María yajque quiitatoj nopa ostot ipan nopa tepet. ² Huan quema itztoyaj ipan ojti, chicahuac mohuiso taltipacti pampa se ilhuicac ejquet hualtemoc ten ilhuicac, huan quijcueni nopa hueyi tet huan ipan mosehui. ³ Huan nopa ilhuicac ejquet cahuaniyaya quej quema tapetani, huan iyoyo elqui nelchipahuac quej nexti. ⁴ Huan nopa soldados pejqe huihuipicaj pampa tahuel quiimacasiyayaj. Teipa talolojqe huan huetzque quej mictoque.

⁵ Huan nopa ilhuicac ejquet quinilhui nopa sihuame cati ajsiyayaj:

—Amojuanti amo ximomajmatica. Nijmati anquitemohuaj Jesús cati quicuamapeloltijque. ⁶ Amo aqui nica. Ya moyolcuic quej quijto quichihuas. Xihualaca, xijtachiluij campá quitejqe itacayo Tohueyiteco. ⁷ Huan teipa xiyajtihuetzica huan xiquinilhuitij imomachtijcahua para ya moyolcuic cati mictoya. Huan tayacantiyas hasta estado Galilea, huan nepa anquiiatase. Ya ni nochi cati monequi nimechylmelahuas.

⁸ Huan nopa sihuame nimantzi quisque ipan ostot ipan nopa tepet huan masque momajmatiyayaj, nojquiya tahuel paquiyayaj huan motalojtejqe para quinyolmelahuatij imomachtijcahua. ⁹ Huan quema nopa sihuame yahuiyayaj ipan ojti para tayolmelahuatij, nimantzi quinamijque Jesús huan yaya quintajpalo, huan quinilhui:

—Ya tanesqui.

Huan nopa sihuame monechcahuitoj huan quitzquijque iicxi huan quihueyimatque. ¹⁰ Huan Jesús quinilhui:

—Amo ximomajmatica. Xiyaca, xiquinyolmelahuatij noicnihua para ma yaca estado Galilea huan nepa timopantise.

Quintaxtahuijqe soldados

¹¹ Huan quema nopa sihuame yahuiyayaj ipan iniojhui, sequij nopa soldados yajque altepet Jerusalén huan quinilhuitoj nopa tayacanca totajtzitzi ten panotoya. ¹² Huajca inijuanti mosentilijque ica nopa huehue tacame ten israelitame huan quisencajque san sejco para quinmacasquaj miyac tomi nopa soldados para ma istacatica. ¹³ Quinilhui:

—Monequi anquijitose para imomachtijcahua Jesús hualajque tayohua huan quicuicoj itacayo quema ancochtoyaj. ¹⁴ Huan sinta nopa gobernador quicaquis para ancochtoyaj huan cualanis amohuaya, huajca tijsencahuase para amo teno amopantís.

¹⁵ Huajca nopa soldados quiselijque nopa tomi huan quinilhuitoj masehualme quej nopa tayacanani quinilhuijqe ma quijitoca. Huan hasta ama ya ni nopa camanali cati mosemantinemi campá israelitame.

*Jesús quinquimacac imomachtijcahua**(Mr. 16:14-18; Lc. 24:36-49; Jn. 20:19-23)*

¹⁶ Huan teipa timajtacti huan se tiimomachtijcahua Jesús tiyajque estado Galilea hasta ipan nopa tepet campá Jesús technahuati ma timosentilica. ¹⁷ Huan quema tiquitaque Jesús ijcatoc nozona, tijhueyimatque, pero para sequij achi ohui para quineltocaque para nelía eliyaya Jesús cati itztoya tohuaya. ¹⁸ Huan Jesús technechcahuico huan techilhui:

—Toteco nechmacatoc nochi tanahuatili ipan ilhuicacti huan ipan taltipacti. ¹⁹ Huajca xiyaca ipan nochi talme huan xiquinmachtica masehualme ma elica nomomachtijcahua. Huan xiquincuaaltica ica itoca* Totata, huan ica notoca† na niIcane, huan ica itoca ‡ Itonal Toteco. ²⁰ Xiquinmachtica ma quichihuaca nochi cati nimechilhujtoc. Huan xijmatica ya ni, na niitztos amohuaya nochi tonali hasta tamis taltipacti. San ya nopa.

* **28:19** 28:19 O ica itequiticayo. † **28:19** 28:19 O ica notequiticayo. ‡ **28:19** 28:19 O itequiticayo.

Icamanal Toteco Cati Quijcuilo Marcos

Juan tecuaalti huan tepohuili icamanal Toteco
(Mt. 3:1-12; Lc. 3:1-9, 15-17; Jn. 1:19-28)

¹ Quej ni pejqui nopa cuali tamachtili ten Jesucristo, Icone Toteco Dios.

² Huejcajquiya Isaías, itajtolpanextijca Toteco, quiijcuilo cati Toteco quihui Jesús. Quijcuilo:

“Xiquita nijtitanis notayolmelajca ma mitzyacanas.

Yaya quicualtis iniyolo masehualme para ma mitzselica.

³ Notayolmelajca camanaltis chichahuac ipan nopa huactoc tali campa amo teno eli,

huan quinilhuis masehualme:

‘Xijcualtalica amoyolo pampa hualas Tohueyiteco.

Xijxitahuaca amonemilis quej anquisencahuaj ojti para hualas se hueyi tequitiquet.’ ”

⁴ Ni tayolmelajquet cati Toteco quititanqui ma tayacana elqui Juan cati tecuaaltiyaya ipan nopa huactoc tali. Tacamanalhuyiyaya para masehualme ma mocuaaltica para quinextise para ya moyolcuetoque huan ya quicajte-
jtoque tajtacoli. Huan Toteco quintapojpolhuyiyaya inintajtacolhua. ⁵ Miyac masehualme ten estado Judea huan ten altepet Jerusalén yahuyiyaj para quicaquise Juan. Huan quema quihuhuyiyaj Toteco inintajtacolhua, Juan quincuaaltiyaya ipan hueyat Jordán.

⁶ Juan moquentiyaya iyoyo ten taxinepaloli ten itzoncal camello huan quipixqui se itzinquechilpica ten cuetaxti. Quincuayaya pilchapoltziti huan necti cati onca ipan nopa huactoc tali. ⁷ Quincamanalhuyiyaya masehualme ten Jesús huan quinilhuyiyaya: “Teipa hualas se tacat cati quipiyas más miyac itequiticayo que na. Na amo nihueyi quej ya. Amo nicaxilia para nielis niitequipanojca, yon para nijquixtilis itecac. ⁸ Na nimechcuaaltia san ica at, pero yaya amechmacas Itonal Toteco ipan amoyolo.”

Juan quicuaalti Jesús
(Mt. 3:13-17; Lc. 3:21-22)

⁹ Ipan nopa tonali Jesús quisqui altepet Nazaret ipan estado Galilea huan yajqui campa Juan itztoya, huajca Juan quicuaalti ipan hueyat Jordán.

¹⁰ Huan teipa, quema Jesús quisayaya ipan at, quitiac motapo ilhuicacti huan Itonal Toteco hualtemoc ipan ya quej se paloma. ¹¹ Huan quicajqui Toteco Dios camanaltic ten ilhuicac huan quiijto: “Ta tiNocone, nimitzicnelia miyac huan nijpiya miyac paquilisti ica cati tijchihua.”

Amocualtacat quiyoltilanqui Jesús ma tajtacolchihua
(Mt. 4:1-11; Lc. 4:1-13)

¹² Teipa Itonal Toteco quiyacanqui Jesús ma yahui hasta nopa tali huactoc
campa amo teno eli. ¹³ Huan Jesús itztoya nozona cuarenta tonali huan Amocualtacat quiyoltilanqui para ma tajtacolchihua. Nojquiya nozona itztoyaj tecuanime cati mosisiniáj, huan itztoyaj ilhuicac ehuaní cati quite-
quipanohuayaj Jesús.

Juan pejqui tequiti ipan estado Galilea
(Mt. 4:12-17; Lc. 4:14-15)

¹⁴ Quema nopa tanahuatijquet ya quitzactoya Juan cati tecuaaltiyaya, Jesús ajsito ipan estado Galilea para tepohuilis nopa cuali tamachtili ten

quenicatza masehualme huelis calaguise campa tanahuatía Toteco. ¹⁵ Huan quinilhuiyaya masehualme: “Ya ajsic nopa tonali huan ama, amo huejcahuas pehuas tanahuatis Toteco. Xijpataca amoyolo huan xijneltocaca icamanal Toteco.”

Jesús quinnotzqui nahui michtajtamani

(Mt. 4:18-22; Lc. 5:1-11)

¹⁶ Teipa Jesús nentinemiyaya iteno nopa hueyi at Galilea huan quinitac Simón ihuaya iicni, Andrés. Inijuanti michtajtamani huan quimajc-ahuayayaj se matat ipan at. ¹⁷ Huan Jesús quinilhui:

—Techoquilica. Ama anmichtajtamani, pero na nimechnextilis quenicatza anquinnotzase masehualme ma nechtoquilica.

¹⁸ Huan quicajtejque inimata huan yajque ihuaya. ¹⁹ Teipa Jesús nejnenqui se quentzi huan quinitac Jacobo ihuaya iicni, Juan. Inijuanti iconehua Zebedeo, huan itztoyaj ipan se cuaacali quijtzomayayaj inimata. ²⁰ Huan nimantzi Jesús quinnotzqui. Huan quicajtejque inintata Zebedeo ipan cuaacali inihuaya itequipanojchahua huan quitoquilijque.

Se tacat cati quipixqui se iajacayo Amocualtacat

(Lc. 4:31-37)

²¹ Teipa Jesús huan cati itztoyaj ihuaya ajsitoy alpetep Capernaum. Huan ipan se tonali para ma mosiyajquetzaca israelitame, Jesús calajqui ipan nopa israelita tiopamit, huan pejqui tamachtía. ²² Huan masehualme san quitachiliyayaj ica itamachtul, pampa quinmachtiyaya quej se cati quipixqui tequiticayot. Amo quinmachtiyaya quej tamachtiani ten itanahuatil Moisés.

²³ Nojquiya ipan tiopamit itztoya se tacat cati quipixqui se iajacayo Amocualtacat cati calactoya ipan itacayo. Yaya quiitac Jesús huan chicahuac quijito:

²⁴ —Jesús ta tiNazaret ejquet, ¿taya techchihuilis? ¿Tihualajtoc para techzontamiltis? Na nimitzixmati. Ta cati titatzejzelolitic cati Dios quititanqu nica.

²⁵ Huan Jesús quiajhuac nopa iajacayo Amocualtacat huan quilhui:

—Ayecmo ximolini. Xiquisa ipan ni tacat.

²⁶ Huajca iajacayo Amocualtacat quichijqui nopa tacat ma huetzi ica se ajaca cocolisti. Huan tzajtztitejqui chicahuac huan quisqui ipan itacayo.

²⁷ Huan nochi momajmatijque huan moilhujique:

—¿Taya panoc? ¿Huelis ya ni se yancuic tamachtili? ¡Ni tacat Jesús quiptiya tequiticayot para quinnahuatis iajacahua Amocualtacat huan inijuanti quineltoquilíaj!

²⁸ Huajca nimantzi nochi masehualme campa hueli ipan estado Galilea quimatque ten quichijqui Jesús.

Jesús quichicajqui imona Simón Pedro

(Mt. 8:14-15; Lc. 4:38-39)

²⁹ Quema ya quistoyaj ipan tiopamit, Jesús yajqui ihuaya Jacobo ihuaya Juan hasta ininchaj Simón huan Andrés. ³⁰ Huan imona Simón Pedro huetztaya ipan cocolisti pampa totoniyayaya. Huan nimantzi quilhujique Jesús para mococohua. ³¹ Huajca Jesús quinechchahui nopa sihuat huan quimaitzqui. Quitananqui huan nimantzi quicajqui nopa cocolisti. Huan nopa sihuat pejqui quintamaca.

Jesús quinchicajqui miyac cocoyani

(Mt. 8:16-17; Lc. 4:40-41)

³² Quema ya calajqui tonati huan tayohuixtoya, masehualme pejque quinquicaj campa Jesús nochi cati mococohuayayaj huan cati quinpiyayayaj

iajacahua Amocualtatcat. ³³ Huan nochi masehualme ten nopa altepet mosentilijque calteno. ³⁴ Huan Jesús quinchicajqui miyac cocoyani cati quipiyayaj miyac tamanti cocolisti. Huan quinquixtili miyac iajacahua Amocualtatcat. Pero Jesús amo quincahuiliyaya iajacahua Amocualtatcat ma camanaltica, pampa quixmatiyayaj para yaya eliyaya nopa Cristo cati Toteco Dios quititantoya.

*Jesús tepohuili icamanal Toteco ipan estado Galilea
(Lc. 4:42-44)*

³⁵ Huan tonili ijnaltzi quema noja tatayohua, Jesús mijquejtejqqui huan yajqui campa tatzitzica para motatajtis ica Toteco Dios. ³⁶ Huan teipa Simón ihuaya ihuampoyohua yajque quitemotoj. ³⁷ Huan quipantijque Jesús, huan quiilhuijqque:

—Nochi masehualme mitztemohuaj.

³⁸ Pero Jesús quinilhui:

—Ma tiyaca ipan nopa pilaltepertzitzi cati nechca para nitepohuilis nopa nojquiya pampa yeca nihualajtoc.

³⁹ Huajca Jesús panotinenqui campa hueli ipan nochi estado Galilea, huan tepohuiliyaya icamanal Toteco ipan sese israelita tiopamit. Huan quema quinpantiyaya masehualme cati quipiyayaj iajacahua Amocualtatcat, Jesús quinchihualtiyaya ma quisaca.

*Jesús quichicajqui se tacat cati tacayo palaniyaya
(Mt. 8:1-4; Lc. 5:12-16)*

⁴⁰ Huan quinechcahuico Jesús se tacat cati tacayo palaniyaya ica se cocolisti cati itoca lepra. Huan motancuaquetzqui iixta Jesús huan quiilhui:

—Jesús, sinta tijnequi, huelis techchicahuas.

⁴¹ Huan Jesús quitasojtac huan quitali imax ipan ya huan quiilhui:

—Quena, nijnequi. Ximochicahua amantzi.

⁴² Huan ipan nopa talojtzi nopa cocolisti quicajqui. ⁴³ Huajca Jesús quinahuati:

⁴⁴—Ximomocuitahui para amo aqui xiquilhui. San xiya ximonextiti iixpa nopa israelita totajtzi, huan xijmaca Toteco nopa tacajchualisti cati Moisés tanahuati ma quimacaca cati ayecmo quipiyaj inintacayo palantoc para quej nopa nochi quimatise ya timochicajtoc.

⁴⁵ Pero nopa tacat yajqui huan pejqqui quinilhuía nochi masehualme taya ipantiz huan nelía momajqui icamanal. Yeca Jesús ayecmo huelqui calaqui tonaya ipan altepeme. San nejnemiyaya campa tatzitzica huan nozona nojquiya quipantiyayaj miyac masehualme cati hualajque ten campa hueli pilaltepertzitzi.

2

*Jesús quichicajqui se tacat cati metzhuapactic
(Mt. 9:1-8; Lc. 5:17-26)*

¹ Quema ya panotoya se ome tonati, Jesús sempa yajqui hasta altepet Capernaum, huan nochi quimatque para itztoya ipan se cali. ² Huan nimantzi mosentilijque miyac masehualme nozona huan yeca ayecmo aqui huelqui calaqui, yon ayecmo aqui huelqui monechahuía campa caltemit. Huan Jesús quincamanalhuyaya ten icamanal Toteco. ³ Huan teipa ajsicoj sequij tacame cati quihualicayayaj campa Jesús se cocoxquet cati metzhuapactic, huan nahui tacame quiquechpanojtihualayayaj. ⁴ Huan amo huelque ajsique campa Jesús pampa itztoyaj tahuel miyac masehualme,

huajca tejcoque calcuitapa huan quijcuenijque sequij tzontzajcayot itzonta Jesús. Teipa quitemohuijque nopa cocoxquet motectoc ipan itapech. ⁵ Huan Jesús quitac para quinelto cayayaj, huajca quilhui nopa cocoxquet:

—Nohuampo nimitztapojpolhuía motajtacolhua.

⁶ Huan sequij tamachtiani ten itanahuatil Moisés cati mosehuijtayaj calitic moyolilhuijque: ⁷ “¿Para ten camanalti Jesús quej nopa? Mochihua quej elisquía Toteco, pampa amo aqui hueli tetapojpolhuía tajtacoli, san Toteco.”

⁸ Huan Jesús nimantzi quimatqui taya moyolilhuiyayaj, huan quinilhui:

—¿Para ten anmoyolilhuij quej nopa? ⁹ Nochi cati ni quijtohua mochihuas masque ni quilhuis ni cocoxquet: ‘Nimitztapojpolhuía motajtacolhua’, o ni quilhuis: ‘Ximijquehua, xijtanana motapech huan xinejnemi.’ ¹⁰ Pero pampa nijnequi xijmatica na cati ni Mocuetqui Masehualí, nijpiya tequiticayot ipan taltipacti para melahuac nitetapojpolhuis tetajtacolhua, huajca nimechnextilis para mochihuas cati ni quijtohua.

Huan nimantzi Jesús quilhui nopa cocoxquet:

¹¹ —Nimitzilhuía, ximijquehua, xijtanana motapech huan xiya mochaj.

¹² Huajca mijquejqui huan quitanantejqui itapech iniixpa huan quisato. Huan nochi cati quitaque san quitachilijque huan quihueyichijque Toteco Dios huan quijtoque:

—Amo quema ti quitztoque se tamanti quej ni.

Jesús quinoxqui Leví cati nojquiya itoca Mateo

(Mt. 9:9-13; Lc. 5:27-32)

¹³ Teipa Jesús sempa yajqui iteno hueyi at, huan quinechcahuijque miyac masehualme huan yaya quimachtí. ¹⁴ Huan teipa Jesús panotinemiyaaya campa se mesa ten tequicali, huan nozona mosehuijtaya se tacat itoca Leví* cati elqui icone Alfeo. Tequitini quitequitalijtoyaj ma quiselis nopa tomi cati nochi monequi taxtahuase quej impuesto. Huan Jesús quilhui:

—Techtoquili.

Huajca Leví moquetztiquisqui huan quitoquili Jesús.

¹⁵ Teipa Jesús tacuayaya ipan ichaj Leví huan ajsicoj nozona miyac tacame cati tainamaj impuesto huan cati miyac tajtacoli quichihua. Nopa tacame nojquiya tacuayayaj ihuaya Jesús huan imomachtijcahua pampa miyac ten injuanti quitoquiliyayaj. ¹⁶ Huan nojquiya itztoyaj nozona sequij fariseos huan tamachtiani ten itanahuatil Moisés. Huan quema quitaque Jesús tacuayaya inihuaya nopa amo cuajcualme, quintatzintoquiliyque imomachtijcahua:

—¿Para ten tacua huan ati Jesús inihuaya tacame cati tainamaj impuesto huan inihuaya cati miyac tajtacoli quichihua?

¹⁷ Huan Jesús quicajqui inincamanal huan quinilhui:

—Se tetica tacat amo quinequilía se tepajtijquet, pero se cocoxquet, quena. Na amo nihualajtoc para ni quinnotzas cati moilhuij cuajcualme iixpa Toteco Dios. Nihualajtoc para ni quinnotzas masehualme cati quimatij para quipiyaj inintajtacolhua.

Quitatzintoquiliyque Jesús para ten amo mosahuaj imomachtijcahua

(Mt. 9:14-17; Lc. 5:33-39)

¹⁸ Se tonal imomachtijcahua Juan huan inintatoquiliycahua fariseos mosahuayayaj para motajtise ipan Toteco Dios. Huajca yajque tacame campa Jesús huan quitatzintoquiliyque:

* 2:14 2:14 Leví nojquiya itoca Mateo.

—¿Para ten mosahuaj itatoquilijcahua Juan huan inintatoquilijcahua fariseos, pero momomachtijcahua amo mosahuaj?

¹⁹ Huan Jesús quinnanquili:

—¿Quenicatza huelis mosahuase ihuampoyohua se mosihuajtijquet ipan nopa talojtzi quema tacuaj ihuaya ipan nenamictili? Sinta iztoque iixpa nopa mosihuajtijquet, amo quinamiqui para mosahuase. San se eltoc quema na niitztoc inihuaya nomomachtijcahua, amo quinamiqui mosahuase. ²⁰ Pero se tonal hualase tacame huan nechhuicase. Ipan nopa tonali, quena, mosahuase nomomachtijcahua. ²¹ ‘Amo aqui† quitatamanía se yoyomit cati sosoltic ica se yoyomit cati yancuic, pampa nopa cati yancuic motzocoyolos huan nimantzi tzayanis nopa yoyomit cati sosoltic huan achi más fiero nesis. ²² Nojquiya amo aqui quiteca xocomeca at cati yancuic ipan bolsas ten cuetaxti sosoltic, pampa quema nopa yancuic xocomeca at xocoyas, mohueyilis. Quej nopa tzayanis nopa cuetaxti sosoltic huan san quinenpolos nopa xocomeca at huan nopa cuetaxti. Huajca monequi quitecase xocomeca at cati yancuic ipan bolsas ten cuetaxti yancuic.’

Imomachtijcahua Jesús quiquehcocototzque trigo ipan sábado
(Mt. 12:1-8; Lc. 6:1-5)

²³ Ipan sábado, nopa tonali para ma mosiyajquetzaca israelitame, Jesús nejnemiyaya ipan se mili campa quitoctoyaj trigo, huan imomachtijcahua pejque quiquehcocototzaj trigo iyol huan quicuaj. ²⁴ Huajca nopa fariseos quilhuijqe Jesús:

—Xiquita, momomachtijcahua quichihujaj cati amo monequi ipan ni tonali para ma timosiyajquetzaca, yeca tajtacolchihujaj.

²⁵ Huan Jesús quinilhui:

—¿Amo anquipojqtoque cati quichijqui David huejcajquiya quema yaya ihuaya ihuampoyohua nelia mayanayayaj huan amo quipixque ten tacuase? ²⁶ David calaquito ipan ichaj Toteco quema Abiatar eliyaya hueyi totajtzi, huan quicuajqui nopa pantzi cati elfoya ipan mesa iixpa Toteco. Teipa David quinmajmacac nopa pantzi nopa tacame cati itztoyaj ihuaya masque itanahuatil Moisés amo quincahuilía sequinoc ma quicuaca nopa pantzi. San eltoya para totajtzitzi ma quicuaca.

²⁷ Huan nojquiya Jesús quinilhui:

—Toteco Dios quisencajqtoc ni tonali para masehualme ma mosiyajquetzaca para quinpalehuis. Amo quisencajqtoc masehualme para ma quihueyitalica nopa tonali. ²⁸ Na cati niMocuetqui Masehuali, nijpiya tequiticayot para niquinilhuis masehualme taya huelis quichihuase ipan sábado, ni tonali para ma timosiyajquetzaca.

3

Jesús quichicajqui se tacat cati mahuactoc

(Mt. 12:9-14; Lc. 6:6-11)

¹ Jesús sempa calajqui ipan se israelita tiopamit, huan nozona itztoya se tacat cati mahuactoc. ² Huan nopa fariseos san quitachiliyayaj sinta Jesús quichicahuasquía para quitelhuise pampa elqui se tonali para ma timosiyajquetzaca tiisraelitame. ³ Huajca Jesús quilhui nopa tacat cati mahuactoc:

—Ximoquetza huan xihuala nica tatajco ni masehualme.

† 2:21 2:21 Jesús quinilhui ni tatenpohualisti para quinnextilis amo cuali quimanelose itamachtil ica cati huejcajquiya quineltoayayaj masehualme, pampa itamachtil eltoya se tamanti cati yancuic.

⁴ Huan nimantzi Jesús quintatzintoquili nopa fariseos, quinilhui:

—¿Ipan ni tonali para timosiyajquetzase anquiitaj quinamiqui ma tijchi-huaca cati cuali o cati amo cuali? ¿Ma tiquinpalehuica masehualme o ma tiquinmictica?

Pero nopa fariseos amo molinjique. ⁵ Huajca Jesús quintachili huan cualanqui. Motequipacho pampa nopa fariseos tahuel yoltetique. Huajca Jesús quihlhi nopa tacat:

—¡Xijxitahua momax!

Huan quixitajqui imax huan cuali mochicajqui. ⁶ Huajca quisque nopa fariseos, huan nimantzi pejqe quisenchahuj ica sequinoc tacame cati quitoquiliyayaj Herodes quenicatza huelis quimictise Jesús.

Mosentilijque miyac masehualme iteno hueyi at

⁷ Huan Jesús quisqui ihuaya imomachtijcahua huan yajque iteno hueyi at. Huan quintoquilijqe tahuel miyac masehualme ten estado Galilea huan estado Judea. ⁸ Nojquiya itztoyaj masehualme ten altepet Jerusalén huan ten estado Idumea, huan ten nopa tali cati mocahua ipan seyoc nali ten nopa hueyat Jordán. Nojquiya hualajque masehualme cati ehuyayaj nechca altepeme Tiro huan Sidón. Nelmiyaqui masehualme quicactoyaj nochí cati Jesús quichihuayaya, huan yeca yahuiyayaj campa yaya itztoya. ⁹ Huan Jesús quinilhui imomachtijcahua ma quichiyaca ica se cuaacali para ipan tejcos para amo quitetzopase nopa masehualme. ¹⁰ Pampa Jesús quinchicajtoya miyac cocoyani huan nochí cati mococohuj nochipa quicuatopejtiyahuiyayaj chichahuac para quitzquise. ¹¹ Huan quema masehualme cati quiptiyayaj se iajacayo Amocualtcat quiitayayaj Jesús, motancuaquetzayayaj iixpa huan chichahuac nopa ajacame quijjtohuayayaj:

—¡Ta tilcone Dios!

¹² Pero Jesús chichahuac quinnahuatiyaya ma amo quinilhui masehualme ajquiya yaya.

Jesús quintapejpeni majtacti huan ome imomachtijcahua

(Mt. 10:1-4; Lc. 6:12-16)

¹³ Teipa Jesús tejcoc ipan se tepet huan quinnotzqui san nopa tacame cati quinequiyaya ma yaca ihuaya, huan injuanti yajque campa ya. ¹⁴ Huan Jesús quintapejpeni majtacti huan ome imomachtijcahua para ma itztoca ihuaya huan para quintitanis ma tepohuiltij icamanal Toteco. ¹⁵ Nojquiya Jesús quintapejpeni para ma quiptiyaca tequiticayot quinchicahuase cocoyani huan quinquixtise iajacahua Amocualtcat cati calactoyaj ipan masehualme. ¹⁶ Huajca nica eltoc inintoca nopa tacame cati quintapejpeni: Simón, cati Jesús quitocaxti Pedro, ¹⁷ Jacobo ihuaya iicni, Juan, cati eliyayaj iconehua Zebedeo. Jesús quintocaxtiyaya nopa ome Boanerges, cati quinequi quijjtos tacame cati itztoque quej se tatomonilot pampa mosisináj. ¹⁸ Nojquiya quintapejpeni Andrés, Felipe, Bartolomé, Mateo, Tomás, Jacobo icone Alfeo, Tadeo*, huan Simón cati moiycataliyaya ica nopa partido cananista, ¹⁹ huan quitapejpeni Judas Iscariote cati teipa quitemactili Jesús.

Quitelhuijqe Jesús para quipixtoya se iajacayo Amocualtcat

(Mt. 12:22-32; Lc. 11:14-23; 12:10)

Teipa Jesús ihuaya imomachtijcahua mocuetque huan sempa calajque ipan se cali. ²⁰ Huan sempa mosentilijque miyac masehualme, huan yeca Jesús ihuaya imomachtijcahua amo quiptiyayaj yon se talojtzi para

* 3:18 3:18 Nojquiya itoca Judas huan Lebeo.

tacuase. ²¹ Huan quema quicajque iteixmatcahua Jesús para amo quipixqui se talojtzi para tacuas, hualajque para quihuicase pampa quiijtohuayayaj: “Tzontapolojtoc.”

²² Pero ajsicoj ten Jerusalén sequij tamachtiani ten itanahuatil Moisés, huan inijuanti teilhuiyayaj para Jesús quipixtoya Amocualtatcat † ipan ya cati quinyacana nochi ajacame, huan yeca quimacatoya Jesús chichahualisti para quinquixtis ajacame cati calactoque ipan sequinoc.

²³ Huajca Jesús quinnotzqui nopa tamachtiani ten itanahuatil Moisés huan quincamanalhui ica tatenpohualisti, quijto: “¿Quenicatza huelis Amocualtatcat quinquixtis ajacame cati iaxcahua? ²⁴ Sintá se tali imasehualhua motajcoxelose, amo huejcahuas nopa tali pampa seyoc tali huelis quitanis nimantzi. ²⁵ Huan sintá ihuicalhua se tacat ipan se cali motajcoxelohuaj, amo huejcahuase san sejco. ²⁶ Huan sintá Amocualtatcat mocualanía ica cati ya iaxcahua, huan motajcoxelohuaj, amo huejcahuas, pampa yaya iselti quintzontamiltis cati iaxcahua.

²⁷ “Amo aquí huelis calaquís ichaj se cati tetixtoc quej Amocualtatcat huan quiquixtilis cati iaxca sintá achtohui amo quiilpis. Huajca quena, hueli quiquixtilis cati iaxca.

²⁸ “Melahuac noTata huelis quintapojpolhuis nochi inintajtacolhua masehualme huan nochi cati fiero quiijtohuaj, ²⁹ pero cati quitajilhuis itequi Itonal Toteco huan quiijtos para cati yaya quichijtoc eltoc se tamanti cati fiero, Toteco amo quema quitapojpolhuis. Nopa masehuali quihuicas nopa tajtacoli para nochipa.”

³⁰ Jesús quijto ya ni pampa inijuanti quiijtohuayayaj para yaya quipixtoya se iajacayo Amocualtatcat.

Hualajque inana huan iicnihua Jesús

(Mt. 12:46-50; Lc. 8:19-21)

³¹ Teipa ajsico inana ihuaya iicnihua Jesús, pero mocajque calteno huan tatitanque ma quinoztatij Jesús. ³² Huan nopa masehualme cati mosehuijtoyaj yahualtic ten Jesús, quiilhuijque:

—Xiquita, monana huan moicnihua itztoque calteno huan mitztemohuaj.

³³ Pero Jesús quinnanquili:

—¿Ajquiya nonana?, huan ¿ajquiya noicnihua?

³⁴ Huan quintachili nopa masehualme cati quiyahualojtoyaj huan quinilhui:

—Xiquitaca ni masehualme cati itztoque nica, inijuanti niquinita quej nonana huan noicnihua, ³⁵ pampa cati quichihua ten Toteco Dios quinequi, yaya niquita quej noicni huan nonana.

4

Se tacat quiijzeloto xinachtí

(Mt. 13:1-9; Lc. 8:4-8)

¹ Jesús sempa pejqui tamachtía iteno hueyi at, huan mosentilijque miyac masehualme cati quiyahualocoj. Huajca Jesús calajqui ipan se cuaacali ipan hueyi at huan mosehui, huan nochi masehualme mocajque xalixco nechca iteno hueyi at. ² Huan Jesús tamachtiyaya miyac tamanti ica tatenpohualisti huan quinilhui: ³ “¡Xijtaquilica! Se tacat yajqui quiijzeloto trigo. ⁴ Huan quema quiijzelohuayaya, sequij xinachtí tepejqui ipan ojti huan hualajque totome huan quicuajque. ⁵ Sequinoc xinachtí tepejqui tetzala campa amo

† 3:22 3:22 Nopa masehualme quitocaxtijque Amocualtatcat, Beelzebú.

oncayaya miyac tali. Nopa xinachti nimantzi ixhuac pampa amo huejcata nopa tali. ⁶ Pero quisqui tonati, huan tonaltatac huan nimantzi huajqui pampa amo huelqui motatzquilia inelhuayo. ⁷ Sequinoc xinachti tepejqui huitztzala huan nopa huitzti quiiyjomicti nopa tzonti, yeca nopa xinachti amo temacac itajca. ⁸ Pero sequinoc xinachti huetzqui ipan cuali tali. Taixhuac cuali, huan moscali, huan cuali temacac itajca. Sequij nopa tzonti ten trigo temacac treinta xinachti, huan sequinoc tzonti temacac sesenta xinachti, huan sequinoc tzonti temacac se ciento xinachti.”

⁹ Huan teipa Jesús quinilhui: “Nochi amojuanti ya antechcactoque. Huajca xijneltocaca cati nimechilhuía.”

Jesús quinilhui para ten tamachtía ica tatenpohualisti
(Mt. 13:10-17; Lc. 8:9-10)

¹⁰ Teipa quema quistoyaj nopa miyac masehualme, Jesús huan nopa majtacti huan ome imomachtijcahua huan sequinoc cati itztoyaj ihuaya quinechahuijque huan pejque quitatzintoquilia taya quiiijosnequi nopa tatenpohualisti. ¹¹ Huan Jesús quinilhui: “Toteco Dios, amechahuilijtoc xijmachilica quenicatza yaya tanahuatía masque achtohuiya amo aqui quicahuiliyaya ma quimachili. Huan ama nojquiya ica masehualme cati nech-huejcamajcahuaj, niquinilhúa nochi tamanti ica tatenpohualisti. ¹² Quej nopa masque quitase cati nijchihua, amo quimatise taya quinequi quiiijos. Huan masque quicaquise nocamanal, amo quimachilise. Huan quej ni amo moyolpatase, huan amo quipantise tapojpolhuili ten inintajtacolhua.”

Jesús quinilhui taya quiiijosnequi nopa tatenpohualisti
(Mt. 13:18-23; Lc. 8:11-15)

¹³ Huan Jesús quinilhui nojquiya: “¿Sinta amo anquimachilíaj ni tatenpohualisti, quenicatza huelis anquimachilise sequinoc tatenpohualisti? ¹⁴ Nopa tacat cati quiijtzelo nopa xinachti quichihua quej se tacat cati quinilhúa masehualme icamanal Toteco. ¹⁵ Sequij masehualme itztoque quej nopa xinachti cati tepejqui ipan ojti. Quicaquij icamanal Toteco, pero nimantzi huala Amocualtatcat huan quinquixtilía cati Toteco quitallijtoc ipan iniyolo. ¹⁶ Sequinoc masehualme itztoque quej nopa xinachti cati tepejqui tetzala. Quicaquij icamanal Toteco huan nimantzi quiselíaj ica paquilisti. ¹⁷ Pero quej nopa xinachti cati amo hueli motatzquilia inelhuayo, amo quipiyaj chichahualisti. San itztoque para se talojtzi, pampa quema huala taohuijcyatot huan sequinoc quintazacuilitíaj pampa quiselijtoque icamanal Toteco, nimantzi quicajtehuaj. ¹⁸ Sequinoc masehualme itztoque quej nopa xinachti cati tepejqui ipan huitzti. Quicaquij icamanal Toteco, ¹⁹ pero mocuatotóníaj miyac ica nochi tamanti cati onca ipan ni tonali. Mocajcayajtoque pampa moilhuíaj paquise sinta quipiyase miyac tomi. Tahuel quinequij miyac tamanti cati onca. Huan nochi ni tamanti cati quinequij quiiyjomictíaj icamanal Toteco, huan yeca amo temaca itajca. ²⁰ Pero sequinoc masehualme itztoque quej nopa xinachti cati tepejqui ipan cuali tali huan inijuanti, quena, quicaquij icamanal Toteco huan quiselíaj, huan temacaj inintajca. Sequij ten inijuanti itztoque quej se trigo tzonti cati temaca treinta xinachti, huan sequinoc quej cati temaca sesenta xinachti, huan sequinoc itztoque quej se trigo tzonti cati temaca se ciento xinachti.”

Nopa tatenpohualisti ten taahuili
(Lc. 8:16-18)

²¹ Nojquiya Jesús quinilhui: “Amo aqui quitatía se taahuili huan quitatía cajo ijtic, yon amo quitatía itantita se cuatapechti. Nochi quimatij quitatise se taahuili huejcapa ipan se taquetzali para ma tatanexti. ²² Quej nopa nojquiya ica nochi tamanti cati ama motatijtoc. Teipa mocahuas tanemijya huan nochi anquimachilise. Huan tamanti cati masehualme amo hueli quimachilíaj ama pampa nimechmachtía ica tatenpohualisti, teipa nochi campa hueli quimatise. ²³ Nochi amojuanti ya antechcactoque, huajca xijneltocaca cati nimechilhúa.”

²⁴ Nojquiya Jesús quinilhui: “Ximotachilica quenecatza anquicaquij. Sinta anquicaquij huan anquineltoqaj pilquentzi, huajca anquimachilise pilquentzi. Pero sinta anquicaquij cuali huan anquineltoqaj nochi, huajca cuali anquimachilise. Huan hasta noja más Toteco amechpalehuis xijmachilica. ²⁵ Pampa se masehuali cati quipiya italnamiqulis para quicaquis nocamanal, Toteco quimacas más talnamiqulisti. Pero se masehuali cati amo quinequi quicaquis nocamanal, Toteco quiquixtilis nopa pilquentzi cati quicactoc.”

Itanahuatilis Toteco moscaltía ixtacatzí

²⁶ Jesús nojquiya quinilhui: “Moscaltía inimiyaca nopa masehualme cati Toteco quinnahuatía masque amo aqui quiita. Eltoc quej se tacat cati quiijtzelohua xinachtí ipan tali. ²⁷ Yaya cochis ica tayohua huan mijquehuas ica ijnaloc. Panos se ome tonati huan teipa nopa xinachtí ixhuas huan moscaltí, pero nopa tacat amo quimati quenecatza moscaltí. ²⁸ Achtohui sesen tzontí panquisa, huan quisa ixihuiyo. Teipa panquisa ipiloloyo, huan teipa itancoch ipan ioloyo. ²⁹ Huan quema nopa simolot ya chicajtos, nopa tacat pehuas quipixcas, pampa ya quimacatoc itajca.”

Nopa tatenpohualisti ten nopa xinachtí mostaza

(Mt. 13:31-32; Lc. 13:18-19)

³⁰ Nojquiya Jesús quijto: “¿Quenecatza huelis nimechilhuis para pehua tanahuatía Toteco Díos ipan iniyolo masehualme ipan se yancuic lugar? ³¹ Quema yaya tanahuatía, pehua quej se ixinacho mostaza cati se tacat quitoca. Nopa xinachtí eltoc más pilquentzi ten nochi xinachtí cati onca ipan taltipacti. ³² Pero quema se tacat quitoca nopa xinachtí mostaza, moscaltía huan mochihua más hueyi ten nochi xihuitzontí huan mochihuas se cuahuit. Huan imacuayohua mochihuase huejhueyi hasta nozona hueli mosiyajquetzase totome pampa cuali icahuilo.”

Quenecatza Jesús quitequihui tatenpohualisti

(Mt. 13:34-35)

³³ Huan Jesús quinmactiyaya masehualme icamanal Toteco ica miyac tatenpohualisti quej ni. Quinilhui nochi cati huelque quimachilíaj. ³⁴ Huan nochi nopa tamachtíli quinilhuyaya ica tatenpohualisti. Pero quema itztoya san ica imomachtícahua, quinixtomiliyaya taya quiijtosnequiyaya sesen tatenpohualisti.

Jesús jitacahuatli nopa ajacat huan nopa hueyi at

(Mt. 8:23-27; Lc. 8:22-25)

³⁵ Quema tatayohuixqui ipan nopa tonali, Jesús quinilhui imomachtijcahua:

—Ma tiquixcotonaca ni hueyi at hasta ne seyoc nali.

³⁶ Huajca quincajteque nopa miyac masehualme cati itztoyaj hueyatenti huan imomachtijcahua quihuicaque Jesús ipan cuaacali campa mosehuijtoya para yas seyoc nali. Huan nojquiya itztoyaj sequinoc masehualme cati

yajque inihuaya ipan ten inijuanti inincuaacal. ³⁷ Huan nimantzi hualajqui se ajacat cati tahuel chicahuac. Huan motananqui hueyi at huan pejqui acalaqui inincuaacal hasta temisnequiyaya. ³⁸ Huan Jesús cochtaya iniica ipan cuaacali, motzontectoya ipan se piltzontetontzi. Huajca imomachtijcahua quixitijque huan quihlujque:

—¡Tamachtijquet! ¿Amo timotequipachohua pampa timisahuíaj?

³⁹ Huajca Jesús mijquejtiquisqui huan quitacahualti nopa ajacat huan quihlui hueyi at:

—Amo ximolini, san xielto.

Huan nopa ajacat moquetzqui huan nopa hueyi at ayecmo mojmolini.

⁴⁰ Huajca Jesús quinilhui imomachtijcahua:

—¿Para ten tahuel anmajmahuij? ¿Amo anquineltoaj cati hueli nijchihua?

⁴¹ Huan nelía imomachtijcahua pejque quimacasij huan moilhujque se ica seyoc:

—¿Ajquiya nelía ni Jesús? Hasta nopa ajacat huan hueyi at quineltoaj icamanal.

5

Nopa Gadara ejquet cati quipiyayaya se iajacayo Amocualtatcat (Mt. 8:28-34; Lc. 8:26-39)

¹ Ajsitoj Jesús huan imomachtijcahua nopa seyoc inaliyo hueyi at campa tali Gadara. ² Huan Jesús quisqui ipan cuaacali huan nimantzi ajsico se tacat campa ya cati quisqui ipan campo santo huan quinpiyayaya iajacahua Amocualtatcat. ³ Nopa tacat itztoya ipan campo santo, huan amo aqui hueliyaya quihlpa para quihuicas, masque quihlpisquía ica tepos cadena. ⁴ Miyac huelta quihlpitoyaj ica tepos cadena ipan iicxi huan ipan imax, pero quicocototzqui nopa tepos cadena, huan san cuehtic quichijqui. Huajca amo aqui huellqui quitanis. ⁵ Nochi tonali tonaya huan tayohua nopa tacat tzajtztinemiyaya ipan campo santo huan campa tepeme huan iselti mococohuayaya ica tet. ⁶ Pero quema quita Jesús ica huejca, motalo huan motancuaquetzqui iixpa. ⁷⁻⁸ Huan Jesús quihlui:

—Aniajacahua Amocualtatcat, xiquisaca ipan ni tacat.

Huan nopa tacat quihlto chicahuac:

—¿Taya tijpiya ica na? Tijesús, tiIcane Dios Cati Más Quipiya Tanahuatili. Xijtestigojquetza Dios para amo techtajyohuiltis.

⁹ Huan Jesús quitatzintoquili:

—¿Quenicatza motoca?

Huan quinanquili:

—Notoca, Miyac, pampa nelía timiyaqui tiajacame.

¹⁰ Huan nopa ajacame quitajtanjque Jesús chicahuac ma amo quintitani hasta seyoc tali. ¹¹ Huan nozona nechca itztoyaj miyaqui pitzome cati tacuayayaj ipan se talquespamit. ¹² Huan iajacahua Amocualtatcat quitajtanjque:

—Techtitani ma ticalaquica ipan ne pitzome.

¹³ Huajca Jesús quincahuili. Huan nochi nopa iajacahua Amocualtatcat quisque ipan nopa tacat huan calajque ipan nopa pitzome. Huan itztoyaj nechca ome mil pitzome nozona. Huan nopa pitzome motalojtejque campa se taixtemolis, huan huetzque ipan hueyi at, huan nimantzi misahujque.

¹⁴ Huajca nopa tacame cati quinmocuitahuiyayaj nopa pitzome motalojtejque huan quinpoihlitoj cati panoc nopa masehualme cati itztoyaj ipan nopa altepet huan ipan ranchos nechca. Huan nopa masehualme ten nopa

altepēt quisque quitachilicoj taya ininpantic nopa pitzome. ¹⁵ Huan quema ajsicoj campa Jesús, quitaque nopa tacat cati achtohuiya quinpixtoya nopa miyaqui ajacame ten Amocualtacat. Huan ama nopa tacat san locotzijtoya, huan moyoyontijtoya, huan quipixtoya cuali italnamiqulis. Huan nopa masehualme momajmatijque. ¹⁶ Huan nopa masehualme cati quitzttoyaj ten panoc sempa quinpohuilijque cati ajsiyayaj nochi cati panotoya ica nopa tacat cati quinpixtoya ajacame, huan nojquiya quinpohuilijque ten panoc ica nopa pitzome. ¹⁷ Huajca nopa masehualme pejque quitajtaniáj Jesús ma quisa ipan inintal.

¹⁸ Huan Jesús calajqui ipan nopa cuaacali para quisas, huan nopa tacat cati achtohuiya quinpuyayaya iajacahua Amocualtacat quitajtani ma quicahua para yas ihuaya. ¹⁹ Pero Jesús amo quicahuili. Quiilhui:

—Xiya mochaj, xiquinpohuili moteixmatcahua nopa hueyi tamanti cati Toteco mitzchihuilijtoc huan quenecatza mitzicnelía.

²⁰ Huajca nopa tacat quisqui huan pejqui quinpohuilía masehualme ipan nochi altepeme ten Decápolis nopa huejhueyi tamanti cati Jesús quichihuilijtoya. Huan nochi cati quicajque san quitachiliyayaj huan quitetzaitayayaj.

Jesús quinichicajqui isihuapil Jairo huan nopa sihuat cati quiajsic iyoyo
(Mt. 9:18-26; Lc. 8:40-56)

²¹ Jesús sempa quixcotonqui hueyi at ipan cuaacali hasta seyoc nali. Huan mosentilijque miyac masehualme cati quiyahualojque, huan yaya itztoya hueyatenti. ²² Huan ajsico se tequichijquet ten nopa israelita tiopamit cati itoca eliyaya Jairo. Huan quema Jairo quiitac Jesús, motancaquetzqui, ²³ huan ica nochi iyolo, quiilhui:

—Nosihuapil ya miqisnequi. Xiya, xijtaliliti momax para mochicahuas huan itztos.

²⁴ Huajca Jesús yajqui ihuaya, huan miyac masehualme quintoquiliyayaj huan quicuatetzopayayaj. ²⁵ Huan itztoya nozona se sihuat cati mojmota esotemoyaya para majtacti huan ome xihuit. ²⁶ Quiijyohuijtihualajtoya miyac tamanti inimaco miyac tepajtiani para quichicahuasquiáj pero san quisosolojtoya nochi tomi cati quipixtoya, huan amo teno quipalehui. San achi más quiajsiyaya icocolis. ²⁷ Huan quema nopa sihuat quicajqui ten Jesús, hualajqui huan monechcahui iica inihuaya nopa masehualme, huan quiajsic iyoyo. ²⁸ Pampa nopa sihuat moilhuiyaya: “Sinta san huelisquiá nicajsis iyoyo, nimochicahuas.” ²⁹ Huan nimantzi huajqui icocolis, huan quimatqui para ya mochicajtoya. ³⁰ Huan Jesús nimantzi quimachili para quistoya chichualisti ipan ya huan quichicajtoya se masehuali. Huajca moicancuetqui huan quintachili nopa miyaqui masehualme huan quintatzintoquili:

—¿Ajquiya quiajsic noyoyo?

³¹ Huan imomachtijcahua quilhuijque:

—Ta tiquita ni masehualme mitzcuatetzopaj, ¿para ten titatzintoca, ajquiya quiajsic moyoyo?

³² Pero Jesús moicancuettoya huan tachiyayaya campa hueli para quitas ajquiya quiajsitoya. ³³ Huajca nopa sihuat cati quimatqui ya mochicajtoya momajmatiyaya huan huihuipicayaya. Huan yajqui motancaquetzato iixpa Jesús, huan quiilhui xitahuac ten quichijqui. ³⁴ Huan Jesús quiilhui:

—Nane, timochicajqui pampa techneltocatoc. Xiya ica paquillisti, pampa ayecmo tijpiya mococolis.

³⁵ Jesús noja quicamanalhuiyaya nopa sihuat quema ajsicoj sequij tacame cati hualajque ten ichaj nopa hueyi tequitiquet ipan nopa israelita tiopamit. Huan quilhuijque itata nopa sihuapil:

—Mosihuapil ya mijqui. Ayecmo xijcuatotoni ni tamachtijquet.

³⁶ Pero Jesús quicajqui cati quilhuijque, huan quilhui nopa tequitiquet ten tiopamit:

—Amo ximomajmati, san techneltoca.

³⁷ Huan Jesús amo quincahuili sequinoc ma yaca ihuaya. San quincahuili Pedro, Jacobo huan iicni, Juan. ³⁸ Huan quema ajsitoj ichaj nopa hueyi tequichijquet ten tiopamit, quinpanti masehualme tahuejchihuayajaj, chocayaj huan tzajtziyayaj. ³⁹ Huajca Jesús calaquito campa nopa mijcatzi, huan quinilhui:

—¿Para ten antahuejchihuaj huan anchocaj? Ni sihuapil amo mictoc, san cochtoc.

⁴⁰ Pero nopa masehualme nepa san quihuetzquilijque Jesús. Huajca Jesús quinquixti nopa masehualme. Teipa quinhuicac itata huan inana nopa sihuapil huan nopa eyi imomachtijcahua huan calajque campa quitectoyaj.

⁴¹ Huan Jesús quimaitzqui nopa sihuapil huan quilhui:

—Talita, cumi (quiijtosnequi: ‘Sihuapil, nimitzilhuía, ximijquehua.’)

⁴² Huan ipan nopa talojtzi nopa sihuapil cati quipixtoya majtacti huan ome xihuit, mijquejqui huan pejqui nejnemi, huan nochi cati itztoyaj ihuaya nelia momajmatijque. ⁴³ Huan Jesús quinnahuati chichahuac amo aqui ma quilhui. Huan quinilhui ma quitamacaca nopa sihuapil.

6

Jesús itztoya ipan altepet Nazaret (Mt. 13:53-58; Lc. 4:16-30)

¹ Jesús quisqui nozona huan mocuetqui ialtepe huan imomachtijcahua yajque ihuaya. ² Ipan sábado, nopa tonali para israelitame ma mosiyajquetzaca, Jesús pejqui tamachtía ipan israelita tiopamit huan miyac masehualme cati quicajque quitachilijque huan quiijtojque:

—¿Ajquiya quimachtijtoc nochi ya ni? ¿Taya tamanti talnamiquilisti quimacatoque? ¿Quenicatza hueli quichihua ni huejhueyi tiochicahualnescayot? ³ Yaya san se cuaxinquet. Yaya icone María huan iicni Jacobo, José, Judas, huan Simón. Isihua icnihua nojquiya iztoque nica tohuaya.

Huan yeca cati san sejco ehuan ihuaya Jesús amo quinejque quitacaquilise icamanal. ⁴ Huan Jesús quinilhui:

—Nochipa masehualme cati san sejco ehuan se tajtolpanextijquet amo quitepanitaj. Yon amo quitepanitaj iteixmatcahua huan ihuicalhua, pero seyoc tali ehuan, quena, quitepanitaj.

⁵ Huajca yeca Jesús amo huelqui quichijqui yon se tiochicahualnescayot ipan ialtepe. San quitali imax ipan se ome cocoyani huan quinchicajqui.

⁶ Huan Jesús san quintachili nopa masehualme ten ialtepe pampa amo quineltocaque. Teipa Jesús panotinenqui ipan miyac pilaltepertzitzi cati nejnechca para tamachtis.

Jesús quintitanqui imomachtijcahua ma tepohuilica icamanal Toteco (Mt. 10:5-15; Lc. 9:1-6)

⁷ Teipa Jesús quinnotzqui nopa majtacti huan ome imomachtijcahua huan pejqui quintitani ma yaca ojome para tepohuilij icamanal Toteco. Huan quinmacac tequiticayot ica iajacahua Amocualtat cati calactoque ipan masehualme. ⁸ Huan Jesús quinnahuati para amo teno ma quihuicaca ipan

ojti. Ma amo quihuicaca se yoyon coxtali, yon pantzi, yon tomi. Ma quihuicaca san setzi cuatopili huan amo teno más. ⁹ Quinilhui huelis motalilise tecati, pero ma amo quihuicase yoyomit cati ica mopatase. ¹⁰ Huan Jesús quinilhui:

—Quema anajsise ipan se altepet huan se amechnotzas para ximocahuaca ichaj, ximocahuaca ipan ichaj hasta anquisase ipan nopa altepet. ¹¹ Huan sinta anajsitij ipan se altepet huan amo amechseliaj huan amo amechta-caquiliaj, xiquisaca, huan ximotecactzejtzeloza para anquiuxitilise nopa taltepotci. Ica nopa tanescayot anquinextise para ipan nopa tonali quema Toteco tetajtoltahuas, nopa masehualme ipan nopa altepet cati amo amechselijque quiselise se tatzacuiliti cati más hueyi que altepeme Sodoma huan Gomorra.

¹² Huajca imomachtijcahua quisque huan tepohuiltoij para masehualme ma moyolpataca huan ma quicahuaca inintajtacolhua. ¹³ Huan quinquixti-jque miyac iajacahua Amocualtacat cati calactoyaj ipan masehualme huan quinaltijque ica aceite miyac cocoyani huan quinchicajque.

Quenicatza mijqui Juan cati tecuaaltiyaya
(Mt. 14:1-12; Lc. 9:7-9)

¹⁴ Nopa Tanahuatijquet Herodes Ántipas quicajqui ten Jesús pampa nochi masehualme campa hueli quimatiyayaj ten quichihuayaya. Huan Herodes quijto para Jesús eliyaya Juan cati mijqui, huan ama moyolcuitoya, huan yeca huelqui quichihua huejhueyi tiochicahualnescayot. ¹⁵ Sequinoc quijtohuayayaj para Jesús eliyaya nopa tajtolpanextijquet Elías. Huan sequinoc quijtohuayayaj para Jesús eliyaya se tajtolpanextijquet quej nopa tajtolpanextiani cati itztoyaj huejcajquiya.

¹⁶ Pero quema quicajqui Tanahuatijquet Herodes cati Jesús quichihuayaya, quijto para Jesús eliyaya Juan cati tecuaaltiyaya huan cati yaya tanahuati ma quiquechtzontequica. Moilhui para ama Juan ya moyolcuitoya.

¹⁷ Tanahuatijquet Herodes Ántipas achtohui quintitanqui isoldados ma quitzquica Juan huan ma quitzacuaca. Quichijqui ya nopa para ma paqui Herodías cati eltoya isihua. Nopa sihuat Herodías achtohui eltoya isihua Herodes Felipe I cati iicni Tanahuatijquet Herodes Ántipas, pero teipa Tanahuatijquet Herodes Ántipas mocuili para isihua. ¹⁸ Huan yeca Juan quihuijtoya Tanahuatijquet Herodes para amo cuali mocuilis ihuejpol.

¹⁹ Huajca yeca nopa sihuat, Herodías, quicalancaitayaya Juan. Quinequiyaya quimictis, pero amo hueliyaya. ²⁰ Tanahuatijquet Herodes quimacasiyaya Juan pampa quimatiyaya eliyaya se tacat cati xitahuac huan tatzetzeloctic, yeca quimocuitahui para amo teno ipantis. Quema Herodes quicajqui itamachtil Juan, amo quimachili. San moyolilhui miyac ten cati quijto. Pero nochipa quicacuiyaya ica paquilisti. ²¹ Pero se tonali nopa sihuat Herodías quipanti quenicatza huelis quimictis Juan quema nopa Tanahuatijquet Herodes quichijqui se ilhuit pampa quixiti ixihui. Quipixqui se tacualisti huan quinnotzqui itequichijcahua ihuaya itanahuatijcahua huan cati tominpiyani ipan ital. ²² Huan hualajqui iichpoca nopa sihuat Herodías huan mijtoti iselti iniixpa nopa tanotzalme. Huan quinpacti Tanahuatijquet Herodes huan nopa masehualme cati tacuayayaj ihuaya. Huajca Herodes quilhui nopa ichpocat:

—Tachtajtani cati tijnequis huan nimitzmacas.

²³ Huan Herodes tatestigojquetzqui chichahuac iniixpa nochi itanotzalhua huan quillhui nopa ichpocat:

—Nimitzmacas nochi cati techtajtanis masque techtajtanis tajco ni talme campa nijpiya tanahuatili.

²⁴ Huan nopa ichpocat quisqui huan quicamanalhuito Herodías, cati eliyaya inana huan quitatzintoquili taya cuali para quillhuis para quinequi.

Huan inana quinanquili:

—Xiquillhui tijnequi itzonteco Juan cati tecuaaltía.

²⁵ Huan nimantzi mocuetqui nopa ichpocat ipan nopa ilhuit campa itztoya Herodes huan quillhui:

—Nijnequi amantzi techmaca itzonteco Juan, nopa tecuaaltijquet. Techmaca ipan se hueyi plato.

²⁶ Huajca nelía motequipacho nopa tanahuatijquet. Pero tatestigojquetztoya huan quicacoyaj itanotzalhua ipan nopa tacualisti, huan yeca amo quinejqui quillhuis para amo. ²⁷ Huajca nimantzi quititanqui se itequichijca huan quinahuati ma quihualica itzonteco Juan. ²⁸ Huajca yajqui itequichijca campa tzactoya Juan huan quitzontequili itzonteco. Huan quihualiac ipan se hueyi plato, huan quimacac nopa ichpocat, huan nopa ichpocat quimacac inana.

²⁹ Huan quema quimatque itatoquiliقاحua Juan para ya quimictijtoyaj, hualajque quitananacoj itacayo huan quitalpachojque.

Jesús quintamacac macuili mil tacame
(Mt. 14:13-21; Lc. 9:10-17; Jn. 6:1-14)

³⁰ Teipa imomachtijcahua Jesús mocuetque ten campa hueli nejnentoyaj huan mojecotilijque ihuaya Jesús. Huan quipohuilijque nochi cati quichijtoyaj huan cati tamachtijtoyaj. ³¹ Huan Jesús quinilhui imomachtijcahua:

—Xihualaca nohuaya ma timosiyajquetzatiq quentzi campa tatzitica. Quinilhui ya nopa pampa talojtitzí miyac masehualme hualayayaj o yahuiyayaj, huan Jesús ihuaya imomachtijcahua amo quipiyayayaj yon se talojtzi para tacuase.

³² Huajca Jesús inihuaya imomachtijcahua yajque san sejco ipan se cuaacali hasta campa amo onca calme. ³³ Pero miyac masehualme quinitaque quema yajque ipan cuaacali huan quiixmatque para eliyaya Jesús. Huan quisque ten nopa altepeme huan motalojque hasta campa Jesús huan imomachtijcahua ajsisquíaj, huan inijuanti achtohui ajsitoyaj nozona.

³⁴ Huan quema Jesús temoc ipan cuaacali huan quiitac para ya ajsitoyaj nopa miyac masehualme, quintasojtac pampa itztoyaj quej borregojme cati amo quipiyayayaj se tamocuitahuijquet. Huan Jesús pejqqui quinmachtía miyac tamanti. ³⁵ Huan quema tatayohuatinemiyaya, imomachtijcahua monechcahuijque huan quillhuijque:

—Ya tiotaquixqui huan nica amo teno onca. ³⁶ Xiquinnahuatijtehua ni masehualme para ma yaca ipan ranchos ipan pilaltepetzitzi cati nechca para quicohuatij pantzi pampa amo teno quipiyaj para quicuase.

³⁷ Pero Jesús quinnanquili huan quinilhui:

—Xiquintamacaca amojuanti.

Huan imomachtijcahua quillhuijque:

—¿Tijnequi tiquijtos ma tiyaca tijcohuatij pantzi ten ome ciento tonali tequit para tiquintamacase nochi ni masehualme?

³⁸ Huan Jesús quinilhui:

—¿Quesqui pantzi anquipiyaj? Xijtachilitij.

Huan quema quimatque, quillhuijque:

—Macuili pantzi huan ome michime.

³⁹ Huajca quinnahuati imomachtijcahua ma quinilhuica nopa masehualme ma mosehuica ica monto ipan nopa xoxohuic sacapetat. ⁴⁰ Huan mosehujque ica monto ten cien huan ten cincuenta masehualme. ⁴¹ Huajca Jesús quitzqui nopa macuili pantzi huan ome michime. Huan ajcotachixqui ilhuicac huan quitascamatqui Toteco. Huan quitajcotapanqui nopa pantzi huan quinmacac imomachtijcahua para ma quinmajmacaca nochi nopa masehualme. Nojquiya Jesús quinmajmacac nopa ome michime nochi masehualme. ⁴² Huan nochi tacuajque huan cuali ixhuique. ⁴³ Huan teipa quisentilijque nopa pantatapatzi huan michtatapatzi cati mocajtoya huan quitemitiqque majtacti huan ome chiquihuit. ⁴⁴ Huan ten nopa miyaqui masehualme cati tacuajque, eliyayaj macuili mil san tacame.

Jesús nejnenqui aixco

(Mt. 14:22-27; Jn. 6:16-21)

⁴⁵ Huan nimantzi Jesús quinilhui imomachtijcahua ma calaquica ipan cuaacali huan ma tayacanaca para quiixcotonase nopa hueyi at hasta seyoc nali campa altepet Betsaida, huan yaya mocajqui para quinnahuatijtehuas nopa miyac masehualme. ⁴⁶ Huan teipa quema Jesús tanqui quinnahuatijtehua, yajqui ipan se tepet para motatajtis. ⁴⁷ Huan quema tayohuixqui, nopa cuaacali ica imomachtijcahua san ajsitoya tajco ipan hueyi at, huan Jesús mocajtoya iselti ipan tali. ⁴⁸ Huan quiitac para imomachtijcahua siyajtoyaj pampa tequitiyayaj chichahuac para quinejnemiltise inincuaacal ipan at huan chichahuac taajacayaya. Huajca quej las tres ica tayohua, Jesús monechcahui campa imomachtijcahua, nejnemiyaya aixco, huan quinequiyaya quinpanos para quinyacanas. ⁴⁹ Pero quema imomachtijcahua quitaque nejnemiyaya aixco, moilhujque huala se animajtzi, huan tzajtzi, ⁵⁰ pampa nochi quiitaque huan momajmatiyayaj. Huajca nimantzi Jesús quincamanalhui huan quinilhui:

—Ximoyolchichahuaca. Na nijesús. Amo ximomajmatica.

⁵¹ Huan Jesús calajqui ipan cuaacali inihuaya imomachtijcahua huan nimantzi moquetzqui nopa ajacat, huan moilhujque ten cati panoc huan nelía quitachilijque huan quitetzaitaque. ⁵² Ayemo quimachiliyayaj ichicahualis Jesús cati quinnexxtili quema quimiyaquili nopa pantzi, pampa noja itztoyaj voltetique.

Jesús quinchicajqui cocoyani nepa tali Genesaret

(Mt. 14:34-36)

⁵³ Jesús huan imomachtijcahua quiixcotonque nopa hueyi at huan ajsitoyaj atenti ipan altepet Genesaret, huan nepa quiilpijque inincuaacal. ⁵⁴ Huan quema quisque ipan cuaacali, nimantzi masehualme nepa quiixmatque Jesús. ⁵⁵ Huajca nopa masehualme motalojtijajque ipan nochi inintal huan pejque quinquechpanojtihualahui nochi cocoyani ipan inintapech hasta campa quicaquiyayaj para Jesús itztoya. ⁵⁶ Huan campa hueli quema Jesús calaquiyaya ipan ranchos o ipan altepeme o campa calme, masehualme quintecayayaj nochi cocoyani campa panosquía. Huan nopa cocoyani quitajtaniyayaj ma quincahuili san quiajsise iyoyo, huan nochi cati quiajsique iyoyo, mochicajque.

7

Amo tapajpactique masehualme iixpa Toteco Dios pampa tajtacolchihuj
(Mt. 15:1-20)

¹ Huajca mosentilijque campa Jesús nopa fariseos huan sequij tamachtiani ten itanahuatil Moisés cati hualajtoyaj ten altepet Jerusalén. ² Huan quitaque para sequij imomachtijcahua Jesús tacuayayaj huan amo momajtequijtoyaj miyac huelta quej momajtoyaj israelitame para motapajpacchi-huase, huajca quintatelhuijque. ³ Nopa fariseos huan nochi israelitame quitoquiliyayaj cati quijtojtoyaj tohuejcapan tatahua. Moilhuyiyaj sinta amo momajtequise miyac huelta, amo hueli tacuase. ⁴ Huan nojquiya moilhuyiyaj quema mocuepaj ten tianquis, monequi quicalaquise inimax ipan at huan momajtequise achtohui huan teipa tacuase. Huan quitoquiliyayaj miyac tamachtili cati huejcajquiya. Quipajpacayayaj inintazas, inixarro huan inintepospaila quej quijtojque tohuejcapan tatahua. ⁵ Huajca nopa fariseos huan tamachtiani ten itanahuatil Moisés quitatzintoquiliijque Jesús:

—¿Para ten momomachtijcahua amo quitoquiliáj inintamachtil tohuejcapan tatahua? Inijuanti tacuaj masque amo momajtequijtoque quej quijtohua nopa tanahuatili.

⁶ Huan Jesús quinnanquili:

—¡Anquippiyaj ome amoxayac! Melahuac nopa camanali cati Toteco quimacac nopa tajtolpanextijquet Isaías para ma quijcuilo ten amujuanti campa Toteco quijto:

‘Ni masehualme quijtohuaj nechtepanitaj, pero amo neli.

Ipan iniyolo amo quema nechelnamiqij.

⁷ Huajca san tapic para nechhueyimatij,

pampa tamachtijaj san inincamanal masehualme quej eltosquía nocamanal.’

⁸ Amujuanti nojquiya san se anquithuelcajtoque itanahuatil Toteco para anquitoquillise inintamachtil masehualme. Anquitoquiliáj nopa tanahuatili para quenicatza monequi anquipajpacase xarros huan tazas cati ipan antaise, huan anquitoquiliáj más miyac tamanti quej nopa.

⁹ Huan Jesús nojquiya quinilhui:

—Ya anquinelcajtoque itanahuatil Toteco pampa anquinequij anquitoquillise inintamachtil masehualme. ¹⁰ Pampa Moisés quijto: ‘Xijtepanita motata huan monana’, huan nojquiya quijto: ‘Sinta se quitelchihuas itata o inana, ma miqui.’ ¹¹ Pero anquijtohuaj se tacat hueli quilhuis itata o inana para amo huelis quinpalehuis ica cati quinplohua pampa nochi cati quipiyaj mocahua Corbán o taiyocatalili para quimactilise Toteco, masque amo melahuac nopa camanali. ¹² Huajca ayecmo anquincahuiliáj masehualme ma quinpalehuica inintatahua huan ininanahua. ¹³ Huajca quej nopa anquithuelcajtoque icamanal Toteco para anquitoquillise inintamachtil masehualme. Huan anquichihuj miyac tamanti quej ni cati amo xitahuac.

¹⁴ Sempa Jesús quinnottzqui nopa miyac masehualme nepa huan quinilhui:

—Techtacaquilica nochi amujuanti, huan xijmachilica cati nimechilhuía.

¹⁵ Amo teno cati quicua se masehuali hueli quichihua amo tapajpactic iixpa Toteco Dios. Pero cati quisa ipan iyolo se masehuali quej cati amo cuali quijtohua huan quichihua, ya nopa cati quichihua se masehuali amo tapajpactic iixpa Toteco. ¹⁶ Nochi antechtacaquilijque, huajca xijneltocaca cati nimechilhuía.

¹⁷ Huan teipa quema Jesús ya quincajtejtoya nopa miyac masehualme huan calactoya ipan se cali, imomachtijcahua quitatzintoquiliijque taya quijtosnequi nopa tatenpohualisti. ¹⁸ Huan Jesús quinilhui:

—¿Para ten amojuanti nojquiya amo anquimachilíaj? ¿Amo anquimatij amo teno cati se masehuali quicuas huelis quichihuas amo tapajpactic iixpa Toteco? ¹⁹ Pampa itacualis amo calaquis ipan iyolo. San calaquis iijtico huan teipa quisas ipan itacayo.

Quej nopa Jesús quinilhui para tapajpactic iixpa Toteco nochi tacualisti. ²⁰ Pero Jesús quinilhui:

—Amo tapajpactique masehualme iixpa Toteco Dios pampa ipan iniyolo quisa cati amo cuali. ²¹ Amo tapajpactique iixpa Toteco pampa quipiyaj inintalnamiquilis cati fiero, o quichihuaj ten hueli ica ichpocame, o tachtequij, o temictíaj, o momecatíaj. ²² O pampa tahuel quinequij cati iniaxca sequinoc, o se fiero ojti quitoquilíaj, o tacajcayahuaj, o quinequij cati amo cuali. Amo tapajpacme iixpa pampa tachicoitaj, o teistacahuíaj, o mohueyimatij, o mohuihuinequij. ²³ Nochi ni tajtacoli quinchihua masehualme amo tapajpactique iixpa Toteco. Pero cati quicua se masehuali amo hueli quichihuas amo tapajpactic iixpa.

Se sihuat cati ehua seyoc tali quineltocac Jesús

(Mt. 15:21-28)

²⁴ Jesús quisqui nozona huan yajqui nechca altepeme Tiro huan Sidón huan calajqui ipan se cali. Amo quinequiyaya masehualme ma quimatica sinta itztoya nozona, pero amo huelqui motatía. ²⁵ Itztoya se sihuat cati quipixqui se isihuapil cati quipiyayaya iajacayo Amocualtacat. Huan nopa sihuat quicajqui para Jesús itztoya nozona. Huan nimantzi hualajqui huan motancuaquetzqui iixpa Jesús. ²⁶ Pero nopa sihuat amo eliyaya se israelita. Yaya camanaltiyaya griego huan ehuyaya se lugar itoca Fenicia ipan tali Siria. Huan nopa sihuat hualajqui huan chichahuac quihhui Jesús ma quiquixti nopa ajacat cati quipixtoya isihuapil.

²⁷ Pero Jesús quihhui:

—Achtohui niquinpalehuis israelitame. Teipa niquinpalehuis sequinoc tali ehuaní. Sinta amo, elis quej niquinmaca pilchichime inintacualis coneme.

²⁸ Huan nopa sihuat quinanquili:

—Quena, tate, pero quema coneme tacuaj, huetzi se quentzi pantatapatzi mesa tantita huan pilchichime quipejpenaj. Huajca techpalehui se quentzi.

²⁹ Huan Jesús quihhui:

—Cuali technanquili, huajca xiya mochaj; nopa ajacat ya quistejqui ipan mosihuapil.

³⁰ Huan quema nopa sihuat ajsito ichaj, quipanti isihuapil ayecmo quipiyayaya nopa ajacat, san mosiyajquetzayaya ipan itapech.

Jesús quichicajqui se nonotzi

³¹ Huan Jesús quisqui campa itztoya nechca altepet Tiro huan panoc altepet Sidón. Teipa ajsico hueyi at Galilea huan teipa panoc hasta tali Decápolis. ³² Nozona masehualme quihualicaque se tacat cati nacastactoc huan nonotzi, huan quitajtanijqe Jesús ma quitali imax ipan nopa cocoxquet para ma quichicahua. ³³ Huan Jesús quihuicac nopa tacat iyoca campa amo aqui itztoya, huan quincasmayahuili. Teipa chajchac huan quitallí ichajchal ipan inepil nopa tacat. ³⁴ Huan Jesús ajcotachixqui ilhuicac huan mojiyocuilí huan quihhui nopa nonotzi: “¡Efata!” (quinequi quijjtos: “¡Xitapohuí!”)

³⁵ Huajca ipan nopa talojtzi tapojqui inacas huan motojtonqui inepil huan huelqui camanalti cuali. ³⁶ Huan Jesús quinnahuati nopa masehualme

ma amo aqui quiilhuica. Pero masque chichahuac quinnahuati, achi más tepohuiliyayaj cati Jesús quinchihuiliytoya. ³⁷ Huan nopa masehualme nelia quitachiliyayaj huan quitetzaitayayaj Jesús huan moijilhuiyayaj: “Yaya quichihua nochi cati cuali. Quinchihua ma tacaquica cati nacastapaltziti huan ma camanaltica cati nonotziti.”

8

Jesús quintamacac nahui mil tacame

(Mt. 15:32-39)

¹ Ipan nopa tonali sempa mosentiliytoyaj tahuel miyac masehualme campa itztoya Jesús. Huan amo quiptiyayaj taya quicuase, huajca Jesús quinnotzqui imomachtijcagua huan quinilhui:

² —Ni quintasojta ni masehualme pampa quiptiya eyi tonati itztoque nohuaya huan amo quiptiyaj taya quicuase. ³ Sinta ni quintitanisquía ma yaca ininchajchaj huan amo tacuajtoque, huelis huetzise ipan ojti, pampa sequij huejca hualajtoque.

⁴ Huan imomachtijcagua quiilhuijque:

—¿Canque huelis tijpantise tacualisti para huelis ti quintamacase nochi ni masehualme nica ipan ni huactoc tali campa amo teno onca?

⁵ Huan Jesús quintatzintoquili:

—¿Quesqui pantzi anquiptiyaj?

Huan quiilhuijque:

—Chicome.

⁶ Huajca Jesús quinnahuati nopa masehualme ma mosehuica talchi. Huan quiitzqui nopa chicome pantzi huan quitascamatqui Toteco. Teipa quitajcotapanqui huan quinmacac imomachtijcagua para ma quinmajmacaca nopa miyac masehualme. Huan quinmajmacaque. ⁷ Huan nojquiya quipixtoyaj se ome pilmichtziti, huan Jesús sempa quitascamatqui Toteco huan nojquiya quinnahuati ma temajmacaca. ⁸ Huan nopa miyac masehualme tacuajque huan cuali ixhuique. Teipa quisentilijque nopa pantatapatzi huan michtatapatzi cati mocajqui huan quitemitijque chicome chiquihuit.

⁹ Huan nopa masehualme cati tacuajtoyaj eliyayaj nechca nahui mil. Huan teipa Jesús quinnahuatijtejqui. ¹⁰ Huan nimantzi calajqui ipan cuaacali ihuaya imomachtijcagua, huan yajqui ipan at hasta nechca campa itoca Dalmanuta.

Nopa fariseos quitajtanijqe Jesús ma quichihua se tanextili

(Mt. 16:1-4; Lc. 12:54-56)

¹¹ Huan hualajque nopa fariseos huan pejque quitatzintoquiliáj Jesús para quimasiltise ica inincamanal. Huan para quiyejyecose Jesús, quitajtanijqe ma quinnextili ichicahualis ica se tanextili cati huala ten ilhuicac. ¹² Huan Jesús axtic chichahuac huan quiijto:

—¿Para ten masehualme cati ama itztoque tajtanij para ma ni quinnextili se tanextili? Melahuac nimechilhuía amo ni quinnextilis yon se tanextili.

¹³ Huan Jesús quincajtejqui nopa masehualme, huan sempa calajqui ipan cuaacali huan yajqui hasta nopa seyoc nali hueyi at.

Inintasonejcayo nopa fariseos quiijosnequi inintamachtli

(Mt. 16:5-12)

¹⁴ Huan imomachtijcagua Jesús quielcajteytoyaj ten quicuase, huan san quihuicayayaj setzi pantzi ipan cuaacali. ¹⁵ Huan Jesús quinilhui:

—Ximotachilica para amo xijselica inintasonejcayo Tanahuatijquet Herodes huan nopa fariseos.

16 Huan imomachtijcahua pejqe moilhuíaj se ica seyoc: “Techilhuía ni pampa amo tijhualicaque pantzi.”

17 Huan Jesús quimatqui ten quijtohuayayaj huan quinilhui:

—¿Para ten anquijtohuaj nimotequipachohua pampa amo anquihualicaj pantzi? ¿Ayemo anquimachilíaj nochicahualis? ¿Noja tetic amoyolo? 18 ¿Amo anquiiatj ica amoixteyol? ¿Amo anquicaquij ica amonacas? ¿Amo anquiel-namiqij taya nijchijqui quema techpolohuayaya pantzi? 19 Quema niquintamacac macuili mil masehualme ica macuili pantzi, ¿quesqui chiquihuit pantatapatzti huan michtatapatzti anquisentilijque cati mocajtoya?

Huan quinanquijque:

—Majtacti huan ome.

20 Huan Jesús quijto:

—Huan quema niquintamacac nahui mil tacame ica chicome pantzi, ¿quesqui chiquihuit pantatapatzti huan michtatapatzti anquisentilijque cati mocajtoya?

Huan quiilhuijque:

—Chicome.

21 Huajca quinilhui:

—¿Ayemo anquimachilíaj cati nihueli nijchihua?

Jesús quichicajqui se popoyotzi ipan altepet Betsaida

22 Teipa Jesús huan imomachtijcahua ajsitoj altepet Betsaida. Huan quihualicaque campa Jesús se tacat popoyotzi. Huan quitajtaniyayaj ma quitalili imax para ma quichicahua. 23 Huan Jesús quiiatzqui imax nopa popoyotzi huan quihucac altepeteno. Huan quialaxo iixteyol ica ichajchal huan quitali imax ipan nopa popoyotzi huan quitajtani sinta hueli tachiya qentzi.

24 Huan nopa popoyotzi tachixqui huan quijto:

—Niquinita masehualme cati nesij quej cuame, pero nejnemij.

25 Huan Jesús sempa quitali imax ipan iixteyol huan quichijqui ma tachiya. Huan nopa tacat mochicajqui huan tachixtejqui. Cual quítayaya nochi.

26 Huajca Jesús quinahuati ma yahui ichaj huan quiilhui:

—Amo xicalaqui ama ipan ni altepet yon amo aqui xiquilhui nopona.

Pedro quijto para Jesús yaya nopa Cristo

(Mt. 16:13-20; Lc. 9:18-21)

27 Teipa Jesús yajqui inihuaya imomachtijcahua ipan ranchos nechca altepet Cesarea ten Filipino. Huan ipan ojti quintatzintoquili imomachtijcahua:

—¿Ajquiya quijtohuaj masehualme para na?

28 Huan quinanquijque:

—Sequij quijtohuaj ta tijuan cati tecuaaltiyaya. Sequinoc quijtohuaj titajtolpanextijquet cati huejcaquiya mijqui.

29 Huajca Jesús quintatzintoquili:

—Huan amojuanti, ¿ajquiya anquijtohuaj para na?

Huan Pedro quinanquili:

—Ta tiCristo cati Toteco Dios techilhui techtitanilisquía.

30 Huan Jesús quinnahuati para amo aqui ma quillhuica.

Jesús quinilhui imomachtijcahua para yaya miquis huan moyolcuís

(Mt. 16:21-28; Lc. 9:22-27)

31 Huajca Jesús pejqqui quinmactía imomachtijcahua quenecatza taijy-ohuisquía. Quiijto:

—Na cati niMocuetqui Masehuali monequi nitaijyohuis miyac. Amo nechselise nopa huehue israelitame, huan nopa tayacanca totajtzitzi, huan nopa tamachtiani ten itanahuatil Moisés. Nechmictise, pero ica eyi tonati nimoyolcuis.

³² Quej nopa Jesús quinilhui xitahuac ten ipantisquía. Huajca Pedro quiiyocaquixti huan pejqui quitacahuatlía. ³³ Pero Jesús moicancuetqui huan quintachili imomachtijcagua huan quiajhuac Pedro, huan quiihui:

—Techtalcahui, Amocualtatcat. Ta amo tijtemohua cati Toteco quinequi ma mochihua, ta tijtemohua san cati masehualme quinequij.

³⁴ Huan Jesús quinnotzqui imomachtijcagua inihuaya nopa miyac masehualme, huan quinilhui:

—Sinta se quinequi nechtoquilis, monequi quitahuelcahuas cati yaya quinequi. Huan ma quitanana ícuamapel huan nechtoquilis mocualtalijtoc para miquis por na. ³⁵ Pampa cati quinequi momanahuis para itztos, quema miquis, quipolos nochi. Pero cati nechtoquilis masque monequi miquis pampa nechneltoaca na huan icamanal Toteco, yaya quimaquixtis ialma huan itztos para nochipa. ³⁶ Pampa amo teno huelis quipalehuis se masehuali cati quipolos ialma huan yas micta. Amo quipalehuis masque quipiyas nochi cati onca ipan ni taltipacti para iaxca. ³⁷ Pampa amo onca teno cati ica se masehuali huelis taxtahuas para quimanahuis ialma. ³⁸ Huan sinta se masehuali pinahuas para quiiptos nechixmati na huan nocamanal, pampa itztoc inihuaya ni tajtacolchijca masehualme cati ama itztoque, huajca na cati niMocuetqui Masehuali nojquiya niquiptos amo niquixmati ipan nopa tonali quema nihualas ica itatanex noTata huan nohuaya hualase ilhuicac ehuan cati tatzejzeloltique.

9

¹ Nojquiya Jesús quinilhui:

—Nelía nimechilhuía, sequij amojuanti cati anitztoque nica amo aniquise hasta anquinitase hualase ica chicahualisti cati itztoque ipan itanahuatilis Toteco.

Jesús quipatac itachiyalis iniixpa Juan, Pedro huan Jacobo
(Mt. 17:1-13; Lc. 9:28-36)

² Quema ya panotoya chicuase tonati, Jesús quinhuicac Juan, Pedro huan Jacobo huan tejoc ipan se huejcapantic tepet. Nepa quipatac itachiyalis iniixpa. ³ Huan iyoyo mocuetqui nelchipahuac hasta cahuaniyaya. Amo aqui se tachicuenijquet ipan taltipacti cati hueli quichipahuatlía yoyomit quej nopa. ⁴ Huan monextijque iniixpa Elías huan Moisés huan quicamanal-huiyayaj Jesús. ⁵ Huajca Pedro quiihui Jesús:

—Tamachtijquet, cuali para tojuanti ma tiitztoaca nica. Ma tijchihuaca eyi pilxajcaltzitzitzi: se para ta, se para Moisés, huan seyoc para Elías.

⁶ Imomachtijcagua momajmatiyayaj huan Pedro quiipto ya ni pampa amo quimatqui taya quiiptos. ⁷ Teipa temoc se mixti ininpani huan quintzajqui, huan ipan nopa mixti quicajque itoscac Toteco Dios huan yaya quiipto: “Ya ni Nocone cati niquicnelía, xijtacaquilica cati quiiptohua.”

⁸ Huan ipan nopa talotzti imomachtijcagua quitachilijque huan ayecmo aqui quiiptaque, san Jesús iselti.

⁹ Huan quema ixtemoyayaj ipan nopa tepet, Jesús quinnahuati amo aqui ma quipohuilica cati quiiptoyaj hasta yaya cati Mocuetqui Masehuali moyolcuisquía ten campa mijcatzitzitzi.

¹⁰ Huajca amo aqui quihuijque, pero motatzintoquiliyayaj taya quij-tosnequi para moyolcuís ten campa mijcatziti. ¹¹ Huan imomachtijcahua quitatzintoquijque Jesús:

—¿Para ten quijtohuaj nopa tamachtiani ten itanahuatil Moisés para achtohui monequi hualas nopa tajtolpanextijquet Elías huan teipa hualas nopa Cristo?

¹² Huan Jesús quinnanquili huan quinilhui:

—Melahuac ijcuilijtoc ipan Icamanal Toteco para Elías monequi hualas achtohui huan quicualtalís nochi tamanti. Pero masque ya nopa quichihuas, xijmachilica para nojquiya ijcuilijtoc ipan Icamanal Toteco para na cati niMocuetqui Masehuali nitajyohuis miyac huan nechhuejcamajcahuase masehualme. ¹³ Huan nimechilhuía ya hualajqui nopa tacat cati eliyaya nopa Elías, huan masehualme quichihuilijque nochi cati amo cuali cati quinejque. Quichijque senquisa quej ijcuilijtoc ipan Icamanal Toteco para quichihuilisquíaj.

Jesús quichicajqui se oquichpil cati quipixqui se iajacayo Amocualtacat (Mt. 17:14-21; Lc. 9:37-43)

¹⁴ Teipa Jesús, Juan, Pedro huan Jacobo mocuetque campa itztoyaj nopa sequinoc imomachtijcahua. Huan quinitaque tahuel miyac masehualme inihuaya. Nojquiya nozona itztoyaj tamachtiani ten itanahuatil Moisés cati mocamaijxnamiquiyayaj inihuaya. ¹⁵ Huan nimantzi nopa masehualme quitaque Jesús huan san quitachilijque huan motalojtejque para quitaj-palotij. ¹⁶ Huajca Jesús quintatzintoquili:

—¿Taya tamanti anquinnajnanquiliáj nomomachtijcahua?

¹⁷ Huan se tacat cati itztoya nozona quinnanquili:

—Tamachtijquet, nica nijhualica nooquichpil. Quipiya se iajacayo Amocualtacat cati quichijtoc ma eli nonotzi. ¹⁸ Huan campa hueli quema nopa ajacat quitzquía, quitahuisohua talchi huan camaposoni. Huan motancochhuehuechotza huan huapahuía. Niquintajtani momomachtijcahua ma quiquixtilica nopa ajacat, pero amo huelque.

¹⁹ Huan Jesús quinnanquili:

—¡Ay, anmasehualme cati ama anitztoque! ¡Amo antechnehtocaj! ¿Quesqui tonali monequi niitztos amohuaya? ¿Quesqui tonali monequi nimechijyohuis huan amo antechnehtocaj? ¡Techhualiquilica nopa oquichpil!

²⁰ Huan quihualicaque. Huan quema nopa ajacat quiitac Jesús, nimantzi quimaquili se ajaca cocolisti nopa oquichpil. Huan huetzqui talchi huan pejqui momimilohua huan camaposoni. ²¹ Huajca Jesús quitatzintoquili itata:

—¿Quemaya pejqui quiapiya ni ajacat?

Huan itata quijto:

—Pejqui quema conetzi eltoya. ²² Huan miyac huelta nopa ajacat quitahuisojtoc tixijco huan atita para quimictis. Huajca sinta tihueli tech-palehuis, techtasojta.

²³ Huan Jesús quihui:

—¿Para ten techtajtanía sinta hueli nimitzpalehuis? Nochi hueli mochihua para cati nechnehtoca.

²⁴ Huan nimantzi itata nopa oquichpil camanaltic chicahuac huan quihui:

—¡Nijneltoca! ¡Techpalehui para más ma nijnehtoca!

²⁵ Huan Jesús quiitac para mosentiliyayaj miyac masehualme, huajca quiajhuac iajacayo Amocualtatcat, huan quiilhui:

—Tiajacat cati tiquinchihua masehualme ma monacastzacuaca huan ma elica nonotziti, nimitznahuatía xiquisa ipan ni oquichpil huan ayecmo xicalaquí ipan ya.

²⁶ Huan nopa ajacat tzajtzc, huan quimacac nopa oquichpil seyoc ajaca cocolisti cati chicahuac, huan quisquí. Huan nopa oquichpil mocajqui quej mictoc. Huan miyac quijitohuayayaj para ya mictoc. ²⁷ Pero Jesús quimaitzqui huan quitananki huan nopa oquichpil moquetzqui.

²⁸ Teipa Jesús calaquito ipan se cali huan ixtacatzi imomachtijcahua quitatzintoquilijque:

—¿Para ten amo tihuelque tijquixtilijque nopa ajacat?

²⁹ Huan ya quinilhui:

—Ni tamanti ajacat amo quisaj sinta amo timotatajtise huan timosahuase.

Jesús sempa quinilhui imomachtijcahua para miquis huan moyolcuís

(Mt. 17:22-23; Lc. 9:43-45)

³⁰ Jesús huan imomachtijcahua quisque nozona huan panotiyajque ipan estado Galilea. Huan Jesús amo quinequiyaya masehualme ma quimat-ica canque itztoya, ³¹ pampa quinmactiyaya imomachtijcahua. Quinil-huiyaya:

—Nechtemactilise na cati niMocuetqui Masehuali inimaco tacame. Inijuantí nechmictise, pero quema nimiquis, ica eyi tonatí nimoyolcuís.

³² Pero imomachtijcahua amo quimachiliyayaj icamanal huan momaj-matíyayaj quitatzintoquilise taya quijitosnequi.

¿Ajquiya elis más hueyi iixpa Toteco?

(Mt. 18:1-5; Lc. 9:46-48)

³³ Teipa Jesús huan imomachtijcahua ajsitoj altepet Capernaum, huan quema itztoyaj calijtic, Jesús quintatzintoquili:

—¿Taya anmonajnanquiliyayaj ipan ojti?

³⁴ Pero amo teno quijitajque pampa ipan ojti monajnanquiliyayaj para quimatise ajquiya ten injuanti quipiyayaya achi más tequiticayot. ³⁵ Huajca Jesús mosehui huan quinnotzqui nopa majtacti huan ome imomachtijcahua, huan quinilhui:

—Sinta se masehuali quinequi elis cati más quiپیya tequiticayot iixpa Toteco Dios, ma mochihua quej amo quiپیya tequiticayot huan ma quinte-quipano nochi sequinoc.

³⁶ Huan Jesús quiitzqui se conet huan quitali tatajco campá injuanti. Huan quinahuajqui huan quinilhui:

³⁷ —Sinta se masehuali quiselis se conet quej ya ni pampa nechnehtoca, huajca yaya nechselía. Huan cati nechselía, amo san na nechselía, nojquiya quiselía noTata cati nechtitanki ipan ni taltipacti.

Cati amo techcualancaita itztoc tohuaya

(Mt. 10:42; Lc. 9:49-50)

³⁸ Huan Juan quiilhui Jesús:

—Tamachtijquet, tiquitaque se tacat cati quinquixtiyaya iajacahua Amocualtatcat ica ichicahualis motoca. Tiquilhuijque ma ayecmo quichihua pampa amo techtoquilia.

³⁹ Pero Jesús quinilhui:

—Amo xijtzacuilica, pampa amo aquí hueli quijitos notoca, huan quichihuas se tiochicahualnescayot huan teipa camanaltis fiero ten na. ⁴⁰ Pampa

sinta se tacat amo techcualancaita, huajca yaya itztoc tohuaya. ⁴¹ Cati amechmacas se quentzi at ipan notoca pampa quimati antechoquilíaj na niCristo, nimechilhuía para temachti noTata quitaxtahuis cuali.

Toteco Dios quintatzacuilitis cati tajtacolchihuaqj
(Mt. 18:6-9; Lc. 17:1-2)

⁴² “Sinta se acajya quinextilis ma tajtacolchihua se ten ni coneme cati nech-neltocaj, Toteco nelía quitatzacuilitis. Más cuali sinta achtohui quiquechilpil-isquíaj nopa masehuali se hueyi metat huan quimajcahuasquíaj ipan hueyi at para ma misahui para amo quichihuas nopa hueyi tajtocoli. ⁴³ Sinta tijnequi titajtacolchihuas ica se momax, más cuali xijtzontequi. Pampa achi cuali ticalaquis ilhuicac ica setzi momax, huan amo tiyas ica ome momax campa nopa tit cati amo quema sehuis. ⁴⁴ Nepa nopa oculilime amo miquise huan amo quema sehuis nopa tit. ⁴⁵ Huan sinta moicxi mitzhuica para titajtacolchihuas, más cuali xijtzontequi. Pampa achi cuali ticalaquis ilhuicac timetzcuachotic, huan amo mitzmajcahuase ica ome mometz ipan micta campa nopa tit cati amo aqui hueli quisehuis. ⁴⁶ Nepa oculilime amo miquise huan amo quema sehuis nopa tit. ⁴⁷ Huan sinta moixteyol quinequi quitachilis tamanti cati mitzchihuas xitajtacolchihua, achi cuali xijquixti. Pampa más cuali ticalaquis campa tanahuatía Toteco ica san setzi moixteyol huan amo mitzmajcahuase ipan micta ica ome moixteyol. ⁴⁸ Nepa amo miquise nopa oculilime huan amo quema sehuis nopa tit.

⁴⁹ “Quej quicualtalíaj se tacajcahualisti para Toteco ica istat huan ica tit, nojquiya monequi nochi masehualme quipanose taohuijca yot pampa Toteco quincualtalía para ma quitequipanoca. ⁵⁰ Istat eltoc se tamanti cuali, pero sinta quipolohua ipoyeca, amo aqui huelis quipoyeltis sempa. Xiitzoca quej se tacualisti cati cuali poyec, huan xiitzoca cuali se ica seyoc.”

10

Jesús tamachti para se tacat ihuaya isihua ma amo mocahuaca
(Mt. 19:1-12; Lc. 16:18)

¹ Teipa Jesús quisqui nepa huan yajqui estado Judea. Teipa yajqui seyoc nali hueyat Jordán, huan miyac masehualme sempa mosentilijque campa itztoya. Huan Jesús sempa pejqui quinmachtiá quej momajtoya. ² Huan hualajque sequij fariseos para quimasiltise Jesús ica cananali. Huan qui-tzaintoquilijque sinta cuali para se tacat quicahuas isihua. ³ Huajca Jesús quinilhui:

—¿Taya amechnahuati Moisés?

⁴ Quiilhuijque:

—Moisés quicahuili se tacat ma quimaca isihua se amatajcuiloli cati quijito para nopa sihuat ayecmo iaxca. Quej nopa se tacat huelqui quicahua isihua.

⁵ Pero Jesús quinilhui:

—Moisés quinmacac nopa tanahuatili pampa ipan nopa tonali masehualme nelía eliyayaj yoltetique, ⁶ pero achtohuiya quema Toteco quichijqui taltipacti, yaya quichijqui ‘tacat huan sihuat para ma itztoca san sejco.’ ⁷ Yeca se tacat quicahuas itata huan inana huan mosejcotilis ihuaya isihua, ⁸ huan nopa ome mochihuase san se ininacayo. Yeca ayecmo elise ome, elise san setzi. ⁹ Huajca cati Toteco Dios quinsejcotilijtoc amo ma quintajcoxelo se masehuali.

¹⁰ Huan calijtc imomachtijcahua sempa quitatzintoquilijque Jesús cati quijtojtoya ten tacame huan sihuame cati mocahuaj. ¹¹ Huan Jesús quinilhui:

—Sinta se tacat quicahua isihua huan mosejcotilis ica seyoc, huajca nopa tacat momecatía pampa quixpano isihua cati achtohui. ¹² Huan sinta se sihuat quicahuas ihuehue huan mosejcotilis ica seyoc tacat, yaya nojquiya momecatía.

Jesús quintiochijqui coneme
(Mt. 19:13-15; Lc. 18:15-17)

¹³ Teipa quinhualicaque coneme campa Jesús para ma quintalili imax para ma quintiochihua, pero imomachtijcahua quinajhuayayaj cati quinhualicayayaj. ¹⁴ Huan Jesús quuitac ten panoyaya, huan cualanqui huan quinilhui imomachtijcahua:

—Xiquincahuaca ni coneme ma hualaca campa na. Amo xiquintzacuilica, pampa Toteco quinselia masehualme ipan itanahuatilis cati nechseliaj quej ni coneme nechseliaj. ¹⁵ Nelía nimechilhúa, sinta se masehuali amo nechselía huan nechcahuilía ma nijnahuati ipan iyolo quej se conet quichihua, amo quema huelis calaquis campa tanahuatía Toteco.

¹⁶ Huan Jesús quinnahuajqui nopa coneme, huan quitali imax ininpani huan quintiochijqui.

Se telpocat cati quipixtoya miyac tomi
(Mt. 19:16-30; Lc. 18:18-30)

¹⁷ Quema Jesús quistehuayaya para yas ipan iojhui, ajsico se tacat cati motalojtihualajqui huan motancuaquetzqui iixpa. Huan nopa tacat quitatzintoquili:

—Ticuali tamachtijquet, ¿taya monequi nijchihuas para Toteco nechmacas nemilisti yancuic para nochipa?

¹⁸ Huan Jesús quihlhu:

—¿Para ten techtoaxti nicuali? ¿Ta tijmachilía para amo aqui seyoc cati cuali, san Dios? ¹⁹ Ta tijmati itanahuatil Toteco: ‘Amo xitemicti; amo ximomecati; amo xitachtequi; amo xiteistacahui quema tieli se testigo; amo xitacajyahua; xijtepanita motata huan monana.’

²⁰ Huan nopa tacat quihlhu:

—Tamachtijquet, nóchi ni tanahuatilme niquinneltocatihualajtoc hasta quema nieltoya niconetzi.

²¹ Huan Jesús quitachili nopa tacat huan quicneli, huan quihlhu:

—Se tamanti mitzpolohua. Xiya, xijnamacati nóchi cati tijpiya huan xiquinmajmaca cati feicneltziti. Huan Toteco mitztaxtahuis nepa ilhuicac. Teipa xihuala, techtoquili quej se tacat cati quihuicatiya icuamapel mocualtíjtoc para ipan masehualme ma quimictica.

²² Pero quema nopa tacat quicajqui icamanal, quiyolcoco huan motequipachojtiyajqui, pampa nelía quipixtoya miyac tamanti cati pajpatiyo.

²³ Huajca Jesús moicancuetqui huan quintachili imomachtijcahua huan quinilhui:

—¡Nelía ohui para masehualme cati tominpiyaj calaquise campa tanahuatía Toteco!

²⁴ Huan imomachtijcahua quitachilijque ica nopa camanali. Huan Jesús sempa quinilhui:

—Nohuampoyohua, nelía ohui para calaquise campa tanahuatía Toteco masehualme cati motemachiaj ipan inintomi. ²⁵ Ohui para se hueyi tapiyali

quej se camello panos ipan iixteyol se huitzmalot, pero noja más ohui para se masehuali cati quipiya miyac tomi calaquis campa Toteco tanahuatía.

²⁶ Huan imomachtijcagua achi más quitachilijque huan quitetzaitaque quitatzintoquilijque:

—Huajca ¿ajquiya huelis momaquixtis ten itajtacolhua?

²⁷ Huan Jesús quintachili huan quinilhui:

—Masehualme amo hueli momaquixtise, pero Toteco, quena, huelis quinmaquixtis pampa nochi hueli quichihua Toteco.

²⁸ Huan Pedro quilhui:

—Xiquita, tojuanti tijcajteytoque nochi cati tijpixtoyaj para timitztoquilise.

²⁹ Huan Jesús quinilhui:

—Nelía, sinta se masehuali quicajteytoque ichaj, o itaca icnihua, o isihua icnihua, o itata, o inana, o isihua, o iconehua, o imilhua, pampa nechnehtoca na huan icamanal Toteco, Toteco quitaxtahuis. ³⁰ Quena, Toteco quimacas ama ipan ni taltipacti cien imiyaca más ichaj, itaca icnihua, isihua icnihua, inanahua, iconehua huan imilhua, masque taijyohuis por na. Huan ipan nopa taltipacti cati huala, nopa masehuali itzto para nochipa. ³¹ Pero miyac cati ama quipiyaj tequiticayot, amo teno quipiyase teipa; huan miyac cati ama itztoque hasta tateipa, quipiyase miyac tequiticayot nepa.

Jesús sempa quinilhui imomachtijcagua para yaya miquis huan sempa moyolcuís

(Mt. 20:17-19; Lc. 18:31-34)

³² Jesús huan imomachtijcagua nejnemiyayaj ipan ojti ixtejcoyayaj para altepet Jerusalén huan Jesús quinyacanayaya. Huan imomachtijcagua quitachiliyayaj ica cati quinilhuiyaya, huan nopa masehualme cati quintoquiliyayaj momajmatiyayaj. Huan sempa Jesús quinnotzqui iyoca nopa matjacti huan ome imomachtijcagua huan pejqui quinilhua taya ipantisquía.

³³ Quinilhui: “Xiquitaca, ama titejcotiyahuij para altepet Jerusalén. Nepa nechtemactilise inimaco nopa tayacanca totajtzitzi huan nopa tamachtiani ten itanahuatil Moisés. Huan injuanti quijitose para monequi para na cati niMocuetqui Masehuali ma nimiqui, huan teipa nechtemactilise ica tacame cati amo israelitame. ³⁴ Huan injuanti nechhuihuiitase huan nechxchajchase. Teipa nechhuitequise huan nechmictise. Pero ipan eyi tonati, nimoyolcuís.”

Jacobo ihuaya Juan quitajtanijqe Jesús se favor

(Mt. 20:20-28)

³⁵ Huajca Jacobo ihuaya Juan, nopa ome iconehua Zebedeo, monechcahuijqe campa Jesús huan quilhuijqe:

—Tamachtijquet, tijnequij techchihuilis se favor cati timitztajtanise.

³⁶ Huajca quinilhui:

—¿Taya anquinequij ma nimechchihuii?

³⁷ Huan quilhuijqe:

—Techcahuilis para quema titanahuatis nepa campa tajejyectzi, tojuanti ma timosehuise se ipan monejmat huan seyoc ipan moarraves.

³⁸ Huajca Jesús quinilhui:

—Amo anquimatij taya antechtajtaniáj. ¿Huelis antaijyohuise quej na? ¿Huelis anquipanose miyac tequipacholi quej na nijpanos?

³⁹ Huan injuanti quilhuijqe:

—Quena, tihuelise.

Huan Jesús quinilhui:

—Nelía antaijyohuise quej na. Huan nelía anquipanose miyac tequipacholi quej na nijpanos. ⁴⁰ Pero amo notequi na para niqijtos ajquiya ini-juanti mosehuise campa nonejmat huan campa noarraves. San mosehuise napa cati Toteco quintapejpenijtoc.

⁴¹ Huan quema nopa sequinoc majtacti huan se imomachtijcahua quica-
jqe cati quitajtanijttoyaj, pejqe caluanij ica Jacobo huan Juan. ⁴² Huan
Jesús quinnotzqui huan quinilhui:

—Anquimatij para tacame cati tayacanaj ipan nochi talme tanahuatíaj
chicahuac, huan huejhueyi tacame quipiyaj nochi tequiticayot para techi-
huilíaj cati quinequij. ⁴³ Pero amo quej nopa elis ica amojuanti. Pampa
ica amojuanti, cati quinequi mochihuas hueyi, monequi amechtequipanos.
⁴⁴ Huan cati quinequi amechyacanas, monequi ma mochihua quej amote-
quipanojca cati anquicojtoque para amoaxca. ⁴⁵ Pampa yon na cati ni-
Mocuetqui Masehuali, amo nihualajtoc para sequinoc ma nechtequipanoca.
Nihualajtoc para niquntequipanos sequinoc, huan para nitemactilis none-
milis quej se taxtahuili para niquintojtomas miyac masehualme ten inintaj-
tacolhua.

Jesús quichicajqui Bartimeo cati eltoya popoyotzi

(Mt. 20:29-34; Lc. 18:35-43)

⁴⁶ Jesús huan imomachtijcahua ajsitoj altepet Jericó. Huan teipa quema
quisayayaj, quintoquiliyayaj miyac masehualme. Huan mosehuijtoya oj-
tenti se popoyotzi cati quitocaxtiyayaj Bartimeo cati elqui icone Timeo huan
yaya motaejhuiyaya cati ica panos. ⁴⁷ Huan quema Bartimeo quicajqui
para monechcahuiyaya Jesús ten Nazaret, pejqui tahuejchihua huan quiijto:

—¡Jesús, ta tiiteipan ixhui David, techtasojta!

⁴⁸ Huan miyac masehualme quiajhuaque nopa popoyotzi para ma ayecmo
tahuejchihua, pero yaya achi más tahuejchijqui:

—¡Jesús, tiiteipan ixhui David, techtasojta!

⁴⁹ Huajca quema Jesús quicajqui, moquetzqui huan quiijto:

—Xiquilhui ma huala nopa tacat.

Huajca quinotzque nopa popoyotzi huan quiilhuijqe:

—Ximotemachi huan ximoquetza, pampa Jesús mitznotza.

⁵⁰ Huajca Bartimeo quicuamajcajqui ipantzajca, huan moquetztiquisqui,
huan quinechcahuico Jesús. ⁵¹ Huan Jesús quiilhui:

—¿Taya tijnequi ma nimitzchihuili?

Huan nopa popoyotzi quinanquili:

—Tamachtijquet, nijnequi nitachiyas sempa.

⁵² Huan Jesús quiilhui:

—Xiya mochaj, ya timochicajqui pampa techneltocac.

Huan ipan nopa talojtzi nopa tacat tachixtejqui cuali, huan quitoquili
Jesús ipan ojtí.

11

Jesús calajqui Jerusalén ipan se pilburrojtzi

(Mt. 21:1-11; Lc. 19:28-40; Jn. 12:12-19)

¹ Teipa Jesús inihuaya imomachtijcahua ajsitoj nechca Jerusalén campa
nopa altepeme Befagé huan Betania, cati mocahua iixmelac nopa tepet cati
itoca Olivos. Huan nozona Jesús quintitanqui ome imomachtijcahua, ² huan
quinhui:

—Xiyaca campa nopa pilaltepetzti cati mocahua amoixmelac huan quema anajsitij, anquipantise se pilburrojtzti ilpitoc, cati amo aqui ipan tejcotoc. Xijtojtomaca huan techhualiquilica. ³ Huan sinta se acaya amechtatzintouquilis para ten anquichihuaq ya nopa, xiquilhuica: ‘Tohueyiteco quinequi quitequihuis huan nimantzi quicahuacqui.’

⁴ Huajca imomachtijcahua yajque huan quipantitoj nopa pilburrojtzti ilpitoc caltempa imelac ojti huan quitojtonque.

⁵ Huan nopa masehualme cati itztoyaj nopona quintatzintouquillijque:

—¿Taya anquichihuaq? ¿Para ten anquitojtomaj nopa pilburrojtzti?

⁶ Huajca imomachtijcahua quinnanquillijque quej Jesús quinilhuijtoya. Huan nopa masehualme quincahuillijque ma quihuicaca. ⁷ Huajca quihuicaque nopa pilburrojtzti campa Jesús huan quitallilijque iniyoyo icuitapa, huan Jesús tejoc ipani. ⁸ Huan miyac masehualme quisosojque iniyoyo ipan ojti, huan sequinoc quitzontejque imacuayo apachijti huan quitallijque ipan ojti.

⁹ Huan masehualme cati tayacanayayaj huan nojquiya cati hualayayaj ica taica pejque tahuejchihuaq ten Jesús, quijtohuayayaj:

—¡Ma tijhueyichihuaca Toteco! Toteco Dios ma mitztiochihua ta cati tihuala ica itequiticayo. ¹⁰ Hueyi tatiochihualisti tijpantise quema titanahuatis ipan total quej tohuejcapan tata David tanahuati huejcajquiya. ¡Ma tijhueyichihuaca Toteco Dios cati itzoc ilhuicac!

¹¹ Huan Jesús calajqui ipan altepet Jerusalén huan yajqui ipan nopa hueyi israelita tiopamit. Huan nepa quitachili nochi tamanti cati oncayaya calijtic. Teipa mocuetqui altepet Betania inihuaya nopa majtacti huan ome imomachtijcahua, pampa tayohuatinemiyaya.

Jesús quiajuac se higuera cuahuit

(Mt. 21:18-19)

¹² Huan tonili Jesús huan imomachtijcahua quisque Betania, huan nelía mayanayayaj. ¹³ Huan Jesús quihuejcaitac se higuera cuahuit cati quipixtoya ixihuiyo, huan yajqui quitachilito sinta quipiyayaya itajca. Pero quema ajsito, amo teno quipantili, san ixihuiyo, pampa ayemo eliyaya ipohual para taquis. ¹⁴ Huajca Jesús quihui nopa cuahuit:

—Ma amo aqui sempa quicuas motajca. Huan imomachtijcahua quicajque cati quijto.

Jesús quinquixti cati tanamacayayaj tiopan calijtic

(Mt. 21:12-17; Lc. 19:45-48; Jn. 2:13-22)

¹⁵ Teipa ajsitoj Jerusalén huan Jesús calajqui ipan nopa hueyi israelita tiopamit. Huan nopona pejqui quinquixtia nopa masehualme cati tanamacayayaj o tacohuayayaj tiopan calijtic. Quintahuisoli inimesas cati tomimpatayayaj huan inisiyas injuanti cati quinnamacayayaj palomas. ¹⁶ Huan Jesús quintzacuili masehualme cati panoyayaj tatajco nopa hueyi tiopan calijtic ica inintamamal, huan ayecmo quincahuili ma panoca. ¹⁷ Huan Jesús pejqui quinnmachtia masehualme huan quinilhui:

—¡Jcuilijtoc ipan Icamanal Toteco campa quijtohua: ‘Nochaj eltoc nopa cali campa masehualme cati ehuan nochi talme huelis motatajtise’, pero amojuanti anquichijtoque para elis campa mosejcotilaj tachtequini para tachtequise.

¹⁸ Huan nopa tayacanca totajtzitzi huan nopa tamachtiani ten itanahuatil Moisés quicajque ten quichijqui Jesús huan pejque quitemohuaj quenecatza quimictise. Quiimacasiyayaj pampa nochi masehualme san quitachiliyayaj

huan quitetzaitayayaj cati Jesús quinmactiyaya. ¹⁹ Pero quema tay-ohuixqui, Jesús inihuaya imomachtijcahua quisque ten nopa altepet.

Nopa higuera cuahuit cati huajqui
(Mt. 21:20-22)

²⁰ Tonili ica ijnaloc Jesús huan imomachtijcahua panoque campa nopa higuera cuahuit cati quitelchijtoya huan quiitaque cuali huactoc hasta ipan inelhuayo. ²¹ Huajca Pedro quielnamijqui huan quuilhui Jesús:

—Tamachtijquet, xiquita ne higuera cuahuit cati tijtelchijqui para ma ayecmo quema temacas itajca, ya huactoc.

²² Huan Jesús quinnanquili:

—Ximotemachica ipan Toteco, ²³ huan melahuac, cati hueli masehuali cati quihluis ni tepet: ‘Ximoquixti huan ximomajcahua ipan hueyi at’, sinta quineltocasa para mochihuas cati quijtojtoc, Toteco quichihuilis. ²⁴ Yeca nimechilhuía, nochi cati anquitajtanise Toteco quema anmotatajtíaj, xineltocaca para anquiselise huan Toteco amechmacas. ²⁵ Huan quema anmotatajtíaj ica Toteco, xijtapojpolhuica cati hueli cati ica ancualanij para quej nopa amoTata cati itztoc ilhuicac nojquiya amechtapojpolhuis amo-taixpanolhua. ²⁶ Pampa sinta amo anquintapojpolhuíaj sequinoc, huajca Toteco amoTata cati itztoc ilhuicac nojquiya amo amechtapojpolhuis amo-taixpanolhua.

Itequiticayo Jesús
(Mt. 21:23-27; Lc. 20:1-8)

²⁷ Huajca mocuetque sempa ipan altepet Jerusalén. Huan teipa quema Jesús nejnemiyaya tiopan calijtic, quinechcahuijque nopa tayacanca totajtziti, huan nopa tamachtiani ten itanahuatil Moisés, huan nopa huehue tacame ten israelitame. ²⁸ Huan quitatzintoquillijque Jesús:

—¿Taya tequiticayot tijpiya para tijchihua nochi ni tamanti? ¿Ajquiya mitzmacatoc tanahuatili?

²⁹ Huan Jesús quinnanquili:

—Na nojquiya nimechtatzintoquilis se tamanti. Sinta xitahuac antechnanquillise, huajca nimechilhuis ajquiya nechmacatoc tequiticayot para nijchihua ni tamanti. ³⁰ ¿Ajquiya quititanqui Juan para tecuaaltis? ¿Toteco quititanqui o san masehualme? Technanquilica.

³¹ Huajca pejque mocamanalhuíaj huan moijilhuijque:

—Sinta tiquijtose Toteco quititanqui Juan, yaya technanquilis: ‘Huajca, ¿para ten amo anquineltoaque?’ ³² Huan sinta tiquijtose san masehualme quititanque Juan, huajca mahuilili, pampa nochi ni masehualme cualanise ica tojuanti, pampa nochi quineltocaj para Juan eliyaya se tajtolpanextijquet.

³³ Huajca quihluijque Jesús:

—Tojuanti amo tijmatij ajquiya quititanqui Juan.

Huan Jesús quinhui:

—Huajca na nojquiya amo nimechilhuis ajquiya nechmacatoc tequiticayot para nijchihua ni tamanti.

12

Nopa tequichihuani cati amo cuajcualme
(Mt. 21:33-46; Lc. 20:9-19)

¹ Huajca Jesús pejqui quincamanalhuía ica se ome tatenpohualisti. Quinhui: ‘Itztoya se teteco cati quitojqui xocomecat ipan imil. Huan

quitajtzajqui ica se tepamit huan tacoyoni campa tesohuali para ipan quipatzcas xocomecat. Nojquiya quichijqui se huejcapantic tepancali para ipan quimocuitahuis ixocomeca mil. Huan quintanejti ixocomeca mil sequinoc tacame ma quimocuitahuica huan teipa moajachihuisquiáj cati temacasquiá. Huan huajca nopa teteco quincahuilijtejqui inimaco huan huejca yajqui paxaloto. ² Huan teipa ajsic tonali para tatequisti, huan nopa teteco quititanqui se itequipanojca ma quinitati nopa tacame para ma quimacaca cati ya iaxcatis ten nopa tatequisti. ³ Pero nopa tacame cati inimaco eltoya nopa mili quitzquijque huan quimaquilijque, huan quimajcajqe san quiaja. ⁴ Huajca nopa teteco sempa quititanqui seyoc itequipanojca, pero nopa tacame quitepachojque ica tet huan quicuacocojque huan ten fiero quichihuilijque huan quititanque ma yahui. ⁵ Teipa nopa teteco sempa quititanqui seyoc itequipanojca, huan quimictijque. Teipa quintitanqui más miyac itequipanojcahua, pero nopa amo cuajcualme quinmaquilijque sequij huan sequij quinmictijque.

⁶ “Huajca nopa teteco quipixtoya san setzi para quititanis, eltoya itelpoca cati quicneli. Huajca teipa nojquiya quititanqui campa ixocomeca mil, pampa nopa teteco moilhuiyaya para quitepanitasquiáj itelpoca. ⁷ Pero nopa tacame cati inimaco eltoya nopa mili moilhuijque se ica seyoc: ‘Ya ni cati teipa quiselis ni xocomeca mili. Ma tijmictica huan teipa ni mili elis toaxca.’ ⁸ Huajca quitzquijque, huan quimictijque, huan quicuamajcajqe itacayo xocomeca milteno.”

⁹ Huan Jesús quintatzintoquili: “¿Taya anquijtajq quichihuas nopa teteco cati iaxca nopa xocomeca mili ica nopa amo cuajcualme? Nimechilhuis, yaya hualas, huan quinmictis nopa fiero tacame huan quicahuas imil inimaco sequinoc. ¹⁰ ¿Amo anquipojqtoque campa jcuilijtoc ipan Icamanal Toteco campa camanalti ten na quej se nihueyi tet? Quej ni quijtohua: ‘Nopa hueyi tet cati calchihuani quicuamajcajqe pampa amo quinejqe quitequihuse,

teipa elqui cati más monequiyaya para yas calesquina, huan ipan quiquetzase nopa cali.

¹¹ Toteco quichijqui ma pano quej nopa huan nelía tiquitaj cuajcualtzi cati quichijqui.”

¹² Huajca nopa tayacanani ten israelitame quinequiyayaj quitzquise Jesús pampa quimachiliyayaj para ni tatenpohualisti cati quinpohuili camanaltiyaya ten injuanti huan injuanti eliyayaj nopa fiero tequipanohuani. Pero amo huelque quitzquijque pampa quinimacasiyayaj nochí nopa masehualme cati quitoquiliyayaj. Yeca quicajtejqe Jesús huan yajque.

¿Cuali titaxtahuase cati techtajtania César?

(Mt. 22:15-22; Lc. 20:20-26)

¹³ Teipa nopa tayacanani quintitanque campa Jesús sequij fariseos huan sequinoc cati quitoquilijque Herodes para quimasiltise Jesús ica camanali.

¹⁴ Huan monechahuilijque huan quihuilijque:

—Tamachtijquet, tojuanti tijmatij ta se titacat cati tixitahuac, huan amo tiquimacasi cati se masehuali quijtohua. Amo aqui tijchicoicnelía, huan titamachtía nelxitahuac cati Toteco quinequi ma tijchihuaca. ¿Ta tiquita cuali titaxtahuase cati techtajtania Tanahuatijquet César, o amo? ¿Titaxtahuase o amo titaxtahuase?

¹⁵ Pero Jesús quimatiyaya para san quichihuayayaj ome inixayac ica cati quitatzintoquilijque. Huajca quinilhui:

—¿Para ten anquinequij antechcajyahuahe? Techhualiquilica se tomi para niquitas.

¹⁶ Huan quihualiquilijque se tomi, huan Jesús quintatzintoquili:

—¿Ajquiya iixcopinca quipiya ni tomi huan ajquiya itoca ijcuilijtoc ipani? Huan quinanquilijque:

—Quipiya iixcopinca Tanahuatijquet César.

¹⁷ Huajca Jesús quinilhui:

—Xijmacaca César cati César iaxca, huan xijmacaca Toteco cati Toteco iaxca.

Huan san quitachilijque ica cati Jesús quiijto.

Quitatzintoquilijque Jesús sinta moyolcuisse masehualme

(Mt. 22:23-33; Lc. 20:27-40)

¹⁸ Teipa hualajque campa Jesús sequij saduceos. Saduceos tamachtíaj para amo quema moyolcuisse masehualme cati mictoque. Huan nopa saduceos pejque quitatzintoquilíaj Jesús, quihuilijque:

¹⁹ —Tamachtijquet, Moisés techtajcuilhui se tanahuatili cati quijtohua sinta miquis se tacat cati quipiya isihua huan amo quinpixqui iconehua, huajca iicni monequi mosihuajtis ihuaya nopa cahualtzi, huan quipiyase se conet para quiselis ital iicni. ²⁰ Itztoyaj chicome icnime. Nopa cati achtohui ejquet mosihuajti huan teipa mijqui huan amo quincajtejqui iconehua. ²¹ Teipa iicni cati teipan ejquet mosihuajti ihuaya nopa cahualtzi. Nojquiya yaya mijqui, huan amo quincajtejqui iconehua. Huan teipa san se ipantic seyoc iicni. ²² Huan quej nopa nochi chicome icnime mosihuajtijque ihuaya huan amo quicajtejque yon se inincone. Teipa mijqui nopa sihuat. ²³ Huajca, quema moyolcuisse nochi masehualme cati mictoque, ¿ajquiya ten nopa icnime elis ihuehue nopa sihuat pampa nochi chicome mosihuajtijque ihuaya?

²⁴ Huan Jesús quinilhui:

—Anmocuapolojtoque pampa amo anquimatij Icamanal Toteco, yon amo anquimatij Toteco ichicahualis. ²⁵ Quema moyolcuisse nochi masehualme cati mictoque, ayecmo monequi mosihuajtise, yon monamictise para quincahuase inincone. Nochi itztose para nochipa quej ilhuicac ehuaní ipan ilhuicac cati amo miquij. ²⁶ Pero nelía moyolcuisse masehualme cati mictoque. ¿Amo anquipojtoque nopa amatapohuali cati quijcuilo Moisés cati quijtohua quenicatza Toteco quínotzqui ten nopa xihuitzonti cati tatayaya? Toteco quihui Moisés quej ni: ‘Na níTeco Abraham, huan níTeco Isaac, huan níTeco Jacob.’ ²⁷ Huajca pampa Toteco quijto para yaya noja eliyaya ininTeco Abraham, Isaac, huan Jacob quema ya mictoyaj, tijmatij noja itztoque nopa ilhuicac iixpa ya masque huejcajquiya mijque ipan taltipacti. Yeca ansaduceos nelía anmocuapolojtoque quema anmoilhuíaj amo aqui moyolcuis.

Nopa tanahuatili cati Toteco techmacac cati más monequi

(Mt. 22:34-40)

²⁸ Itztoya nozona se tamachtijquet ten itanahuatil Moisés cati quicactoya Jesús quema quincamanalhuyaya saduceos, huan quimatqui para Jesús cuali tananquilijtoya. Huajca monechahui huan quitatzintoquili:

—¿Taya tanahuatili ipan itanahuatil Moisés cati más monequi tijchihuase?

²⁹ Huan Jesús quinanquili:

—Nopa tanahuatili cati más monequi tijchihuase eltoc ya ni: ‘Xitacaquica israelitame, san Toteco itztoc Dios huan amo aquí seyoc. ³⁰ Huan monequi

xiquicneli Toteco Dios ica nochi moyolo huan ica nochi moalma huan ica nochi motalnamiquilis, huan ica nochi mochichualis.’ ³¹ Huan nopa ompa tanahuatili cati nojquiya monequi eltoc ya ni: ‘Xiquicneli sequinoc quej timoicnelía.’ Amo onca seyoc tanahuatili cati Toteco temacatoc cati más monequi que ni ome.

³² Huan nopa tamachtijquet ten itanahuatil Moisés quihui:

—Cualtitoc tamachtijquet. Xitahuac cati tiquijtohua. Toteco Dios san yaya iyojtzi cati itzto Dios, huan amo aquí seyoc. ³³ Huan monequi tiquicnelise Toteco ica nochi toyolo huan nochi totalnamiquilis, huan nochi toalma huan ica nochi tochichualis. Huan monequi tiquicnelise sequinoc quej timoicnelíaj. Huan sinta titeicnelíaj quej nopa, ipati más iixpa Toteco que nochi tacajchualisti tatatili huan nochi tapiyalme cati masehualme quimacaj Toteco.

³⁴ Huan Jesús quicajqui nopa tacat quinanquili xitahuac, huan quihui:

—Amo miyac mitzpolohua para huelis ticalaquis ipan itanahuatilis Toteco.

Huajca teipa amo aquí motemacac para más quitatzintoquilis Jesús.

David quitocaxti Cristo “noTeco”

(Mt. 22:41-46; Lc. 20:41-44)

³⁵ Jesús tamachtiyaya ipan hueyi tiopan calijtic huan quijto:

—¿Para ten quijtohuaj nopa tamachtiani ten itanahuatil Moisés para nopa Cristo cati ijcuilijtoc para hualas elis se iteipan ixhui David? ³⁶ David iselti quitocaxti Cristo iTeco ica ichichualis Itonal Toteco, pampa David quijcuilo ni camanali ipan Icamanal Toteco:

‘Toteco Dios quihui noTeco Cristo ni camanali:

Ximosehui nica nonejmat hasta nimitzmactilis mocualancaitacahua para tiquinnahuatis.’

³⁷ Huajca Tanahuatijquet David iselti quinzotzqui nopa Cristo iTeco. Ya ni technextilía Cristo eli Dios. Huajca ¿quenicatza huelisquía para yaya nojquiya elis se iteipan ixhui David?

Huan nopa miyac masehualme quicaquiyayaj Jesús ica paquilisti.

Jesús quintelhui tamachtiani ten itanahuatil Moisés

(Mt. 23:1-36; Lc. 11:37-54; 20:45-47)

³⁸ Jesús quinmachtiyaya masehualme itamachtil huan quinilhui: “Ximotachilica para amo xijtoquilica inintamachtil nopa tamachtiani ten itanahuatil Moisés. Quinactia nentinemij ica iniyoyo huehueyac. Quinequij nochi masehualme ipan tianquis ma quintajpaloca ica tatepanitacayot.

³⁹ Quinequij mosehuse campa tacualca ipan israelita tiopame. Nojquiya quinequij mosehuse campa más cuali ipan hueyi tacualisti. ⁴⁰ Pero amo pinahuaj quinquixtilíaj ininchajchaj sihuame cati icnotzitzi. Huejcahuaj motatajtíaj ica Toteco para tacajcayahuase pampa quinequij para masehualme ma quinitaca huan ma quintepanitaca. Huajca Toteco quintatza-cuiltis más que sequinoc.”

Se toahui cati icnotzi quimacac Toteco ome piltomintzitzi

(Lc. 21:1-4)

⁴¹ Teipa Jesús mosehujtoya tiopan calijtic iixmelac nopa pilcajatzitzi campa nochi quitalíaj inintomi. Quintachiliyaya nopa miyac masehualme cati quitemayayaj tomi nozona. Huan miyaqui masehualme cati tapijpixtoyaj quitemayayaj miyac tomi. ⁴² Huan hualajqui se toahui cati icnotzi

huan teicneltzi huan quitenqui ome piltomintzitzitzi cati ipati nechca macuili centavo. ⁴³ Huan Jesús quinnotzqui imomachtijcahua huan quinilhui:

—Nelía nimechilhua, ni toahui cati icnotzi huan teicneltzi quitajitoc más ten nochi sequinoc cati quitajitoque tomi ipan nopa pilcajatzitzi. ⁴⁴ Pampa nochi sequinoc quitemayayaj cati mocahuayaya, pero yaya cati tahuel teicneltzi, quitenqui nochi cati iyojtzi quipixtoya. Temacatoc nochi cati quitequihuisquía para itacualis.

13

Jesús quiijto para quisosolose nopa hueyi tiopamit

(Mt. 24:1-2; Lc. 21:5-6)

¹ Jesús quisayaya ipan hueyi israelita tiopamit huan se ten imomachtijcahua quiilhui:

—¡Tamachtijquet, xiquita! Nelía yejyectzitzitzi ni huejhueyi tet ipan tepamit huan nelyejyectzitzitzi ni calme cati iaxca tiopamit.

² Huan Jesús quiilhui:

—Quena, xijtachili ni huejhueyi tiopan calme cati eltoc nica. Teipa amo mocahuas yon se tet campa eltoya pampa tacame quisosolose nochi.

Tanextili cati hualas

(Mt. 24:3-28; Lc. 21:7-24; 17:22-24)

³ Teipa Jesús mosehui ipan nopa tepet cati itoca Olivos iixmelac nopa hueyi israelita tiopamit, huan Pedro, Juan, Jacobo huan Andrés quitatzintoquiliq-ue ixtacatzitzi:

⁴ —Techilhui, ¿quema hualase tасosolohuani? ¿Taya tanextili oncas quema ya monechahuijtos para mochihuas nochi nopa tamanti?

⁵ Huan Jesús quinilhui: “Ximotachilica para amo aqui amechajcayahuas.

⁶ Miyac tacame hualase ica notoca, huan quiijtose para inijuanti Cristo, huan quincajcahuase miyac masehualme.

⁷ “Huan anquicaquise para onca tatehuilisti nica huan neca, pero amo ximomajmatica, pampa nochi ni monequi panos. Pero amo nimantzi hualas itamiya. ⁸ Pampa se tali imasehualhua motananase huan motehuise ica seyoc tali ehuani. Se tanahuatijquet ica isoldados motanas huan motehuise ica seyoc tanahuatijquet. Mohuisos tali campa hueli huan oncas huejhueyi mayanti. Huan campa hueli masehualme moyolajcomanase. Ica ni tamanti san onpejtos cati masehualme quiijyohuijtiyase.

⁹ “Quema pehuas mochihuas ni tamanti, ximotachilica pampa masehualme amechtemactilise campa tequicali, huan amechhuitequise ipan toisraelita tiopahua. Huan pampa antechnehtocaj na, amechtemactilise campa gobernadores huan tanahuatiani. Quej ni huели anquinilhuisse noca-manal. ¹⁰ Pero achtohui monequi masehualme tepohuilise icamanal Toteco ipan nochi talme. ¹¹ Huan quema amechhuicase huan amechtemactilise campa tequicali, amo ximotequipachoca ica cati anquijtose para anmo-manahuise. Yon amo ximoyolilhua. San xiquijtoya cati Toteco amechilhuis ipan nopa talojtzi, pampa amo elis amojuanti cati ancamanaltise, elis Itonal Toteco cati camanaltis.

¹² “Huan sequij masehualme quintemactilise iniicnihua ma miquica. Nojquiya sequij tetajme quintemactilise ininconeua. Sequij coneme motananase huan quintemactilise inintatahua huan ininanhua huan quichihuase para tacame ma quinmictica. ¹³ Nochi masehualme tahuel amechcualancaitase pampa antechnehtocaj, pero sinta antaijyohuise hasta itamiya, Toteco Dios amechmaquixtis.

14 “Pero ajsis se tonal quema anquuitase mochihuas cati nopa tajtolpanextijquet Daniel huejcajquiya quijto mochihuasquía, pampa cati fiero moquetzas campa amo quinamiqui ma itzto Campa Más Tatzejtzelolitic ipan nopa hueyi israelita tiopamit. Huan tahuel quichihuas amo tapajpactic nopa tiopamit. (Cati quipohuaj ya ni, ma quimachilica taya quijtosnequi.) Huajca quema panos ya ni, nochi cati itztose ipan estado Judea ma choloca ipan tepeme. 15 Huan cati itztose calcuitapa ma temoca huan ma choloca nimantzi; ma amo calaquica ininchajchaj para quiquixtise cati onca quema temose. 16 Huan cati itztose ipan inimila ma amo tacuepilica para quicuitij iniyoyo huehueyac. 17 ¡Pero teicneltique nopa sihuame cati nechcatitoc para conepiyase huan nopa sihuame cati tachichitise ipan nopa tonali! 18 Xijtajtanica Toteco ma amo huala nopa tequipacholi huan monequi ancholose quema taseseya, 19 pampa ipan nopa tonali oncas taijyohuilisti quej amo quema oncatoc ten quema Toteco quichijqui taltipacti huan yon hasta ama. Huan teipa amo quema oncasoc seyoc tequipacholi quej nopa. 20 Huan sinta Toteco amo quichihuasquía cototzi nopa tonali, nochi miquisquaj. Pero yaya quichihuas nopa tonali ma eli cototzi pampa quinicnelía cati quintapejpenijtoc.

21 “Huajca sinta se acajya amechilhuis para nica itztoc Cristo, o Cristo itztoc nepa huan monequi anquuitatij, amo xijneltocaca. 22 Pampa motananase tacajcayahuaní cati quijtose para inijuanti Cristo, huan sequinoc quijtose para inijuanti itajtolpanextijcahua Toteco, pero amo neli. Inijuanti quinextise miyac tanextili huan huejhueyi tiochichahualnescayot para ica quincajcayahuase masehualme. Huan sinta huelise, hasta nojquiya quincajcayahuase masehualme cati Toteco quintapejpenijtoc. 23 Pero ximotachilica, ya nimechilhui achtohui nochi cati panos teipa.

Quenicatza sempa hualas Icone Toteco ipan taltipacti

(Mt. 24:29-35, 42-44; Lc. 21:25-36)

24 “Pero ipan nopa tonali, quema tantosa nopa taijyohuilisti, tzintayohuilis tonati, huan metzti ayecmo tatanextis. 25 Sitalime huetzise ten ilhuicac, huan sequinoc tamanti cati eltoc ipan ilhuicacti chicahuac mohuisos. 26 Teipa masehualme nechitase na cati niMocuetqui Masehuali quema nihualas ipan mixti ica hueyi chicahualisti huan ica notatanex. 27 Huan huajca niquinnahuatis noilhuicac ejcahua ma quinsentilica nopa masehualme cati Toteco quintapejpenijtoc ten campa hueli ipan taltipacti huan ilhuicacti.

28 “Xijmachilica ni tatenpohualisti ten se higuera cuahuit. Quema selía imacuayo huan quisa ixihuiyo, anquimatij ya monechcahuía tonali ten tatonilot. 29 San se ica amojuanti nojquiya. Quema anquuitase ni tamanti cati nimechilhuijtoc, xijmatica ya nechca para nihualas, ya nimechcahuijtos ipan caltemit. 30 Nelia nimechilhúa, nopa masehualme cati quitase ni tamanti amo miquise hasta quema panos nochi ni tamanti. 31 Ilhuicacti huan taltipacti panotehuas, pero nocamanal nochipa motamichijtiyas.

32 “Pero amo aquí quimati taya tonal huan taya hora sempa nihualas ipan ni taltipacti. Amo quimatij nopa ilhuicac ehuaní, yon na nilcone Toteco amo nijmati. San yaya Totata, quena quimati.

33 “Ximotachilica, xitachixtoca cuali huan ximotatajtica pampa amo anquimatij quema ajsis nopa tonali quema sempa nihualas. 34 Na niyas huan sempa nihualas quej ni tacat cati yajqui paxaloto. Yaya achtohui quinmacac tequiticayot itequipanojcahua huan quimacac sese itequi. Huan quinnahuati ma quimocuitahuica caltemit. Huan quisqui ichaj huan yajqui

paxaloto, pero itequipanojcahua monejqui mojmosta tachixtose pampa amo quimatiyayaj taya tonali tacuepilisquía. ³⁵ Huajca xitachixtoca cuali san se quej nopa tequipanohuani cati quichiyaj ininteco ma tacuepili pampa amojuanti nojquiya, amo anquimatij quema na nitacuepilis. Huelis nihualas tayohua, o tajco yohual, o quema tzajtzis cuapele, o ica ijaloc. ³⁶ Sinta nihualas nimantzi, ma amo nimechpantiqui ancochtoque. ³⁷ Huan cati nimechilhuía amojuanti, nojquiya niquinilhuía nochi masehualme, xitachixtoca cuali para quema nihualas.”

14

Nopa tayacanani tasencajque para quiitzquise Jesús (Mt. 26:1-5; Lc. 22:1-2; Jn. 11:45-53)

¹ Polihuiyaya ome tonati para nopa israelita ilhuit cati itoca Pascua quema israelitame quicuaj pantzi cati amo quiipiya tasonejcyot. Huan nopa tayacanca totajtzitzi inihuaya tamachtiani ten itanahuatil Moisés quitemo-huayayaj quenicitza huelisquíaj quicajcayahuase Jesús para quiitzquise huan quimictise. ² Pero moilhuiyayaj amo huelis quiitzquise ipan nopa ilhuit para nopa masehualme amo moyolajcomanase huan quintehuisse.

Se sihuat quitequili taajhuiyacayot ipan itzonteco Jesús (Mt. 26:6-13; Jn. 12:1-8)

³ Jesús itztoya ipan nopa altepet Betania ipan ichaj Simón cati achtohuiya quipixtoya nopa tacayo palancaocolisti cati itoca lepra. Huan Jesús mosehuittoya campa mesa, huan ajsico se sihuat cati quihualicayaya se frasco cati quicoyonijtoya ten se tet cati itoca alabastro. Nopa taajhuiyacayot elqui cati tahuel patiyo huan itoca senquisa nardo cati momajtoyaj quinpolohuaj mijcatzitzí. Huan nopa sihuat quiquechpostejqui nopa frasco huan quitequili ipan itzonteco Jesús. ⁴ Huan sequij cati itztoyaj nozona yolcualanque huan moilhuijque:

—¿Para ten san quinenpolohua ne taajhuiyacayot? ⁵ Hueltosquía quina-macatosquía para miyac tomi quej taxtahuaj para eyi ciento tonali ten tequit huan nopa tomi hueltosquía quinmacatosquíaj cati teicneltzitzí.

Quej nopa quiajhuayayaj nopa sihuat.

⁶ Pero Jesús quiijto:

—Xijcahuaca, ¿para ten anquicuatotoníaj? Ni sihuat nechchihuilía cati cuali. ⁷ Nochipa itztose masehualme cati teicneltzitzí amohuaya, huan huelis anquinpalehuise quema anquinequise, pero na, amo niitztos nica más miyac tonali. ⁸ Ni sihuat quichijqui cati huelqui. Nechpolo ni taajhuiyacayot para quicualtalis notacayo para quema nimiquis huan nechtalpacose, masque noja polihui para nimiquis. ⁹ Nelía nimechilhuía, campa hueli ipan nochi taltipacti campa masehualme tacamanalhuise icamanal Toteco, nojquiya tepohuilise cati nechchihuilí ni sihuat para nochi masehualme ma quielnamiqica.

Judas quitencajqui para quitemactilis Jesús (Mt. 26:14-16; Lc. 22:3-6)

¹⁰ Teipa Judas Iscariote, se ten nopa majtacti huan ome momachtiani, yajqui quinitato nopa tayacanca totajtzitzí para quisencahuas quenicitza quitemactilis Jesús. ¹¹ Huan quema nopa tayacanca totajtzitzí quicajque ya nopa, nelía pajque huan quiilhuijque para quixtahuise. Huajca Judas pejqui quitemohua canque huelis quiitzquise Jesús huan ipan taya hora para Jesús para huelis quitemactilis inimaco.

*Itacualis Tohueyiteco**(Mt. 26:17-29; Lc. 22:7-23; Jn. 13:21-30; 1Co. 11:23-26)*

¹² Ajsico nopa achtohui tonali ten nopa ilhuit quema tiisraelitame tijcauj pantzi cati amo quiipya tasonejcajot huan monequi tijmictise nopa pilbor-regojtzi para tiquelnamiquise nopa Pascua. Huan imomachtijcahua Jesús quitatzintoquilijque:

—¿Canque tijnequi ma tijcualtalitij nopa Pascua tacualisti para ta?

¹³ Huajca Jesús quintitanqui ome imomachtijcahua ma yaca, quinilhui:

—Xiyaca ipan nopa altepet huan amechnamiquis se tacat cati quihuica at ipan se comit. Xijtoquilica. ¹⁴ Xiquilhuica cati iaxca nopa cali campa yaya calaquis para nopa tamachtijquet quinequi quimatis canque eltoc nopa hueyi cuarto campa huelis quicuas nopa Pascua tacualisti inihuaya imomachtijcahua. ¹⁵ Huan amechnextilis se hueyi cuarto ya tacualtalili ipan se cali cati quiipya ome piso. Nepa xijcualtalica nopa tacualisti para nochitjuanti.

¹⁶ Huajca yajque imomachtijcahua huan calajque ipan nopa altepet, huan quipantijque nochit quej Jesús quinilhuijtoya. Huan nepa quisencajque nopa Pascua tacualisti.

¹⁷ Huan quema tayohuixqui, Jesús inihuaya nopa majtacti huan ome imomachtijcahua yajque nozona. ¹⁸ Huan injuanti mosehujtoyaj campa mesa huan tacuayayaj, huan Jesús quinilhui:

—Nelía nimechilhuía, se ten amojuanti cati tacua nohuaya, nechtemactilis.

¹⁹ Huajca pejque motequipachohuaj huan sesentzitzit injuanti pejque quitatzintoquilíaj Jesús:

—¿Huelis na?

Huan seyoc nojquiya quijto:

—¿Huelis na?

²⁰ Huan Jesús quinilhui:

—Elis se ten amojuanti anmajtacti huan ome. Elis se ten injuanti cati tacua huan quiapachohua ipantzi nohuaya ipan ni plato. ²¹ Nelía na cati niMocuetqui Masehuali nimiquis quej ijcuilijtoc ipan Icamanal Toteco huejcajquiya, pero nopa tacat cati nechtemactilis quiselis se hueyi tatzacuiltilisti. Eltosquía más cuali para ya sinta amo tacajtosquía.

²² Huan quema tacuayayaj, Jesús quitzqui pantzi, huan quitascamatqui iTata huan quitajcotapanquí. Teipa quinmajmacac imomachtijcahua huan quinilhui:

—Xijcuaca, ni notacayo.

²³ Huan Jesús quitzqui se taza huan quitascamatqui iTata. Teipa quinmacac imomachtijcahua huan nochit quique ipan nopa taza. ²⁴ Huan Jesús quinilhui:

—Ya ni noeso cati nijtoyahuas para miyac masehualme quema nimiquis. Ica ya nopa pehuas itequiticayo nopa yancuic camanali cati Toteco Dios quichihua ica masehualme. ²⁵ Melahuac, ayecmo niquis xocomeca at hasta nopa tonali quema sempa niquis campa tanahuatía Toteco.

*Pedro quijtos amo quixmati Jesús**(Mt. 26:30-35; Lc. 22:31-34; Jn. 13:36-38)*

²⁶ Huan teipa quema huicaque se tiohuicat, yajque ipan nopa tepet Olivos.

²⁷ Huan Jesús quinilhui:

—Ni yohuali nochi amojuanti anmomajmatise huan antechtahuelcahuase na, pampa ijcuilijtoc ipan Icamanal Toteco: ‘Nijmictis nopa tamocuitahuijquet, huan iborregojhua mosemanase.’²⁸ Pero quema nimoyolcuis, teipa nitayacanas hasta estado Galilea, huan nepa timopantise.

²⁹ Huajca Pedro quihlhuí Jesús:

—Masque nochi sequinoc mitztahuelcahuase, na, amo quema.

³⁰ Huan Jesús quihlhuí:

—Melahuac nimitzilhuía, ipan ni tayohua quema noja polihui para tzajtzis se cuapele ica ompa, ta tiquinilhuis masehualme expa para amo techixmati.

³¹ Pero Pedro noja más chichahuac quijito:

—Masque monequi nimiquis mohuaya, amo quema niqijitos para amo nimitzixmati.

Huan nochi injuanti nojquiya ya nopa quijitojqe.

Jesús motatajti ica iTata nepa Getsemani

(Mt. 26:36-46; Lc. 22:39-46)

³² Teipa nochi ajsitoj campa se cuamili cati itoca Getsemani huan Jesús quinilhui imomachtijcahua:

—Ximosehuica nica huan nimotatajtiti ica noTata.

³³ Huan Jesús quinhuicac Pedro, Jacobo, ihuaya Juan huan pejqui motequipachohua miyac.³⁴ Huan quinilhui:

—Nelía tahuel nimotequipachohua hasta nijmati nimiquis amantzi san ica tequipacholi. Ximocahuaca nica huan xitachixtoca.

³⁵ Huajca Jesús moquixti se quentzi huan moixtapacho hasta talchi. Huan pejqui motatajtía ica Itata huan quitajtania sinta huelis, ma amo quipanos nopa fiero taijyohuilisti cati hualayaya.³⁶ Quihlhuí: “Notata, ta nochi tihueli tijchihua. Techquixtili ni taijyohuilisti cati huala, pero amo xijchihua cati na nijnequi, san xijchihua cati ta mopaquilis.”

³⁷ Teipa Jesús mocuetqui campa itztoyaj imomachtijcahua huan quinpan-tito cochtoque huan quihlhuí Pedro:

—Simón, ¿ticoctoc? ¿Amo huelqui titachixqui yon se hora?³⁸ Xitachixtoca huan ximotatajtica para amo amechyoltlanas tajtacoli, pampa nelía amonaltzi quinequi quichihuas cati Toteco quinequi, pero amotacayo siyahui.

³⁹ Huan Jesús sempa yajqui huan motatajtito. Quihlhuí Itata san se quej achtohui quihlhuijtoya.⁴⁰ Teipa sempa mocuetqui campa imomachtijcahua huan sempa quinpan-tito cochtoque, pampa amo huelque quijyohuise para amo cochise. Huan imomachtijcahua amo quimatiyayaj quenicatza quinanquilise.⁴¹ Sempa ica expa Jesús yajqui motatajtito huan teipa mocuetqui campa imomachtijcahua, huan quinilhui:

—¿Noja ancochtoque huan anmosiyajquetztoque? San ya nopa. Ya ajsic ni hora para nechtemactilise na cati niMocuetqui Masehuali inimaco tajta-colchihuani.⁴² Ximoquetzaca, ma tiyacajya. Xiquitaca, nepa ya huala cati nechtemactilis.

Tacame quiitzquijque Jesús

(Mt. 26:47-56; Lc. 22:47-53; Jn. 18:2-11)

⁴³ Huan nimantzi quema Jesús noja camanaltiyaya, ajsico Judas, se ten nopa majtacti huan ome imomachtijcahua. Huan ihuaya hualayayaj miyac tacame cati quihualicayayaj machetas huan cuahuit. Quintantoyaj nopa tayacana totajtiziti, inihuaya nopa tamachtiani ten itanahuatil Moisés, inihuaya nopa huehue tacame ten israelitame.⁴⁴ Huan Judas cati quitemactiliyaya Jesús quinmacatoya se tanextili pampa quinilhuijtoya para cati

quitzoponis, yaya Jesús. Huajca ma quiitzquica, huan ma quihuicaca cuali ilpitoc.

⁴⁵ Huan nimantzi quema Judas ajsico, quinechcahuico Jesús huan quiilhui:

—¡Tamachtijquet!

Huan quitzoponi. ⁴⁶ Huajca nopa tacame quiitzquijque Jesús huan quihuicacae.

⁴⁷ Pero se tacat cati itztoya nozona quiquixti imacheta huan quimaquili itequipanojca nopa hueyi totajtzi, huan quitzontequili se inacas. ⁴⁸ Huan Jesús quinilhui:

—¿Para ten anhualajtoque nica para antechitzquise ica machetas huan ica cuahuit quey nielisquía se nitachtejquet? ⁴⁹ Mojmosta nitamachtiyaya ipan nopa hueyi tiopamit campá anitztoyaj huan amo quema antechitzquijque. Pero ya ni monequi ma pano para mochihuas cati huejcaiquia ijcuilijtoc ipan Icamanal Toteco para panos. ⁵⁰ Huan nimantzi nochi imomachtijcahua quicajtejque Jesús huan cholojque.

Se telpocat cati cholojtejqwi

⁵¹ Huan quitoquiliyaya se telpoca tacat cati motzactoya san ica se yoyomit hueyi. Huan nopa tacame quiitzquijque, ⁵² pero nopa telpocat quicajtejqwi iyoyo inimaco, huan cholojtejqwi xolot.

Jesús iixpa nopa tasentilisti ten tequichihuani

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Teipa quihuicacae Jesús campá nopa hueyi totajtzi. Huan mosentilijque nochi tayanca totajtzitzi, nopa huehue tacame ten israelitame, huan nopa tamachtiani ten itanahuatil Moisés. ⁵⁴ Huan Pedro quitoquili Jesús ica huejca huan calajqui ipan icalixpa nopa hueyi totajtzi. Teipa Pedro mosehuijtaya inihuaya cati quimocuitahuayayaj nopa cali, huan nochi inijuanti moscohuayaya titeno.

⁵⁵ Nopa tayanca totajtzitzi inihuaya nochi nopa tasentilisti ten tequichihuani quintemohuayayaj ome tacame para quitelhuse Jesús ica cati amo cuali quiitztoyaj quichihua para huelis quimictise, pero amo quinpanti-jque. ⁵⁶ Miyaqui istacatiyayaj ten ya huan quiijtohuayayaj para quichijtoya tamanti cati amo neli quichijtoya, pero amo elqui san se inincamanal. ⁵⁷ Seqwij moquetzque huan quiistacahuijque Jesús, huan quiijtojqque:

⁵⁸ —Tojuanti tijcajqque quema quiijto para quisolosquía ni tiopamit cati masehualme quichijtoque, huan ica eyi tonati quichihuas seyoc tiopamit cati amo tamachijchihuali. ⁵⁹ Pero yon ica ya nopa, amo elqui san se inincamanal.

⁶⁰ Huan nopa hueyi totajtzi moquetzqui huan monechcahui campá Jesús huan quitatzintoquili:

—¿Amo teno tiquinnanquilia cati ica mitztelhuiaj? ¿Quenicatza timo-manahuis?

⁶¹ Pero Jesús amo molini huan amo teno quinanquili. Huajca sempa nopa hueyi totajtzi quiilhui:

—¿Ta tiCristo, tiCone Toteco cati nochi tijhueyimatij?

⁶² Huan Jesús quiilhui:

—Quena, na. Huan antechitase na cati niMocuetqui Masehuali nimosehuijtos ipan inejmat Toteco Dios cati quiipiya nochi chichahualisti. Huan antechitase quema nihualas ipan nopa mixti ipan ilhuicacti.

⁶³ Huajca nopa hueyi totajtzi motzayanili iyoyo pampa quiitac para se hueyi taixpanoli cati quiijto Jesús. Huan quiijto:

—¿Para ten tiquintemose sequinoc masehualme ma techilhuica taya quichijtoc ni tacat? ⁶⁴ Ya anquicajque para tahuel amo quitepanita Toteco pampa mochihua para yaya Toteco Dios. ¿Taya anquiijtohuaj ma tijchi-huaca? Huan nochi quiilhuijque quinamiqui para ma miqui.

⁶⁵ Huajca sequij pejque quiixchajchaj Jesús. Teipa quiixztajque huan pejque quiixtatziníaj huan quiilhuíaj:

—¡Techilhui ajquiya mitzixtatzeni! Huan nopa soldados quimaquiliyayaj ipan ixayac.

Pedro quiijto amo quiixmati Jesús

(Mt. 26:69-75; Lc. 22:56-62; Jn. 18:15-18, 25-27)

⁶⁶ Huan Pedro itztoya calixpa nepa tatzinta, huan ajsico nepa se ichpcocat cati tequipanohuayaya ipan ichaj nopa hueyi totajtzi. ⁶⁷ Huan nopa ichpcocat quiitac Pedro moscohuayaya iteno, huan quitachili huan quiilhui:

—Ta nojquiya tinemiyaya ihuaya Jesús nopa Nazaret ejquet.

⁶⁸ Pero Pedro quitati para quiixmati, huan quiijto:

—Amo niquixmati, yon amo nijmachilía cati techilhuía.

Huan Pedro quisqui calteno, huan nimantzi tzajtzc se cuapele. ⁶⁹ Huan nopa ichpoca tetequipanojquet quitachili sempa huan pejqui quinilhuía cati itztoyaj nopona:

—Ni tacat, yaya se injuanti cati nejnemiyayaj ihuaya Jesús ten Nazaret.

⁷⁰ Pero sempa Pedro quiijto para amo quiixmatqui. Huan quentzi teipa, nopa masehualme cati itztoyaj nepa sempa quiilhuijque:

—Nelía ta tiitztoc se injuanti. Nesi tiehua estado Galilea pampa tica-manalti quej cati nepa ehuaní.

⁷¹ Huajca Pedro pejqui tatechihua huan pejqui quitestigojquetza Toteco Dios huan quinilhui:

—Amo niquixmati nopa tacat ten ica antechcamanalhuíaj.

⁷² Huan ipan nopa talojtzi se cuapele tzajtzc ica ompa. Huajca Pedro quielnamijqui cati Jesús quiilhuijtoya. Quiijto para quemá noja polihui para tzajtzis se cuapele ica ompa, Pedro quiijtosquía expa para amo quiixmati Jesús. Huan Pedro moilhui cati quichijqui huan pejqui choca.

15

Quihuicaque Jesús iixpa Pilato

(Mt. 27:1-2, 11-14; Lc. 23:1-5; Jn. 18:28-38)

¹ Huan tonili tayohuayoc nopa tayacanca totajtzitzi, nopa huehue tacame ten israelitame, huan nopa tamachtiani ten itanahuatil Moisés, mosentili-jque ica nochi nopa tasentilisti ten tequichihuani para mocamanalhuise ten taya quichihuase. Teipa quiilpijque Jesús huan quihuicaque. Quitemactili-jque ica Pilato cati quipixqui tequiticayot ipan estado Judea. ² Huan Pilato quitatzintoquili Jesús:

—¿Ta tiinintanahuatijca israelitame?

Huan Jesús quinanquili:

—Quena. Melahuac cati tiquijto.

³ Huan nopa tayacanca totajtzitzi quitelhuijque Jesús ica miyac tamanti.

⁴ Huajca Pilato sempa quitatzintoquili Jesús, huan quiilhui:

—¿Amo teno tiquinnanquilis? Xiquita, mitztelhuijtoque ica miyac tamanti.
 5 Pero Jesús amo teno quinanquili, huan Pilato san quitachili huan quitetzatitac.

Ma quicuamapeloltica Jesús

(Mt. 27:15-31; Lc. 23:13-25; Jn. 18:38–19:16)

6 Sese xihuit ipan nopa ilhuit Pilato momajtoya quiquixtía se tacat cati tzactoc para ma yahui ichaj. Quiquixtiyaya cati nopa miyac masehualme quitajtanisquíaj. 7 Itztoya se tacat ipan tatzacti cati quitocaxtiyayaj Barrabás. Barrabás huan ihuampoyohua temictijque quema motehuijque ica nopa gobierno ipan nopa tali. 8 Huan nopa miyac masehualme ajsicoj iixpa Pilato huan pejque quitajtaníaj ma quimajcagua se tacat quej nochipa quichihujaj. 9 Huan Pilato quinnanquili:

—¿Anquinequij ma nimechmajcahuili Jesús, amotanahuatijca anisraelitame?

10 Pilato quimatiyaya nopa tayacanca totajtzitzi quitemactilijtoyaj Jesús san pampa quichicoitayayaj. 11 Pero nopa tayacanca totajtzitzi quinchihualtijque masehualme para ma quitajtanica Pilato ma quiquixti Barrabás para ma yahui huan amo Jesús. 12 Huajca Pilato sempa quintatzintoquili:

—¿Huajca taya anquinequij ma nijchihua ica Jesús cati anquitocaxtiyaj nopa tanahuatijquet ten israelitame?

13 Huan chicahuac quiiijtoque:

—¡Xijcuamapelolti!

14 Pero Pilato quintatzintoquili:

—¿Para ten? ¿Taya tamanti amo cuali quichijtoc?

Pero nopa masehualme sempa camanaltique más chicahuac:

—¡Xijcuamapelolti!

15 Huajca pampa Pilato quinequiyaya cuali mocahuas inihuaya nopa miyac masehualme, quicajqui ma yahui Barrabás. Huan tanahuati ma quihuihuitequica Jesús, huan teipa quinmactili soldados cati Roma ehuan para ma quicuamapeloltica.

16 Huajca nopa soldados quihuicaque Jesús campa nopa hueyi tequicali huan calajque ipan icalixpanyo. Huan nepa mosentilijque nochi soldados. 17 Huan quiquentijque Jesús se yoyomit huehueyac cati itachiyalis morado quej momatque quitequihuíaj tanahuatiani. Huan quisencajque se huittzonyahuili huan quitallilijque itzontecontipa Jesús. 18 Huan pejque quihuihuiitaj huan quiilhuijque:

—¡Ma itzto miyac tonali ni inintanahuatijca israelitame!

19 Huan quimaquiliyayaj Jesús ipan itzonteco ica se ohuat, huan quiixchajchayayaj. Motancuaquetzayayaj iixpa quej elisquía quihueyimatiyayaj, pero amo. 20 Quema tanque quihuihuiitaj, quiquixtilijque iyoyo cati morado huan quiquentijque cati ya iyoyo. Teipa quihuicaque para quicuamapeloltij.

Quicuamapeloltijque Jesús

(Mt. 27:32-44; Lc. 23:26-43; Jn. 19:17-27)

21 Huan san panoyaya se tacat cati itoca Simón pampa ajsitihualayaya ten ital. Huan nopa soldados quinahuatijque ma quihua icuamapel Jesús. Simón ehuyaya altepet Cirene huan elqui inintata Alejandro huan Rufo.

22 Huan nopa soldados quihuicaque Jesús campa se lugar cati itoca Gólgota (cati quinequi quiiijos: “Campa Onca Mijcatzontecomit”). 23 Huan quisencajque xocomeca at maneltic ihuaya se tamanti cati chichic cati itoca mirra

para quimacase Jesús, pero amo quic. ²⁴ Huan quema quicuamapeloltijtoyaj Jesús, nopa soldados momajmacaque iyoyo. Huan mahuiltijque ica piltetzitzi cati yejectitzi para quimatise taya quihuicas sesen ten inijuanti.

²⁵ Ica ijnaloc a las nueve quicuamapeloltijque Jesús. ²⁶ Huan quitelijque se tajcuiloli ipan icuamapel itzonta Jesús para ma temachilti taya ica quitelhuitoyaj para ma miqui. Huan nopa tajcuiloli quijito: NI ININTANAHUATIJCA ISRAELITAME.

²⁷ Huan quincuumapeloltijque ome tachtequini ihuaya Jesús, se ica inejmat, huan seyoc ipan iarraves. ²⁸ Quej nopa panoc pampa quej nopa ya ijcuilijtoya ipan Icamanal Toteco campa quijito:

“Quichihuilise quej elisquía se taixpanoquet.”

²⁹ Huan masehualme cati panoyayaj quihuihuiitayayaj. Quiojolinayayaj inintzonteco huan quihuihuiyayaj:

—¡Mitzpantijtoc cati monequi! Ta tiquijto tijsosolosquía nopa tiopamit huan ica eyi tonati tijchihuasquía sempa. ³⁰ Huajca ama ximomaquixti huan xitemo ipan mocuamapel, sinta tihueli.

³¹ Quej nopa nojquiya nopa tayacanca totajtzitzi huan nopa tamachtiani ten itanahuatil Moisés quihuihuiitayayaj Jesús. Quijito huayayaj:

—Yaya quinmaquixti sequinoc, pero ama amo hueli momaquixtia. ³² Sinta nelía tiCristo cati Toteco techtitanilisquía huan nelía titanahuatijquet ten israelitame xitemo nimantzi ten nopa cuamapeli huan tiquitase huan tijnel-tocase.

Huan nopa tachtequini cati quincuumapeloltijtoyaj ihuaya, nojquiya quihuihuiitayayaj.

Jesús mijqui

(Mt. 27:45-56; Lc. 23:44-49; Jn. 19:28-30)

³³ Huan ica tajco tona tzintayohuixqui ipan nochi nopa tali hasta las tres ica tiotac. ³⁴ Huan a las tres Jesús chichahuac quijito:

“Eloi, Eloi, ¿lama sabactani?”

(Ya ni quinequi quijitos: “NoTeco, noTeco, ¿para ten techtahuclcahua?”)

³⁵ Sequij cati itztoyaj nozona quicajque camanalti, pero amo quimachili-que icamanal, huan quijitojque:

—¡Xijcaquica! Yaya quinotza nopa tajtolpanextijquet Elías.

³⁶ Huan se tacat motalo huan quixoloni se tamanti tzotzoltic ica xomeca at cati xococ. Teipa qitali ipan se ojtat huan quimacac Jesús ma quiachichina. Quijito:

—Ma tiquitaca sinta hualas Elías quitemohuiqui.

³⁷ Huan Jesús tzajtzic chichahuac huan mijqui. ³⁸ Huan ipan nopa talojtzi tzayanqui nopa hueyi cortina cati ica quitzactoyaj Campa Más Tatzejtzeloltic ipan nopa hueyi israelita tiopamit. Tzayanqui ten hueycapa hasta tatzinta huan mochijqui ome yoyomit. ³⁹ Huan nopa tayacanquet ten soldados cati itztoya iixpa Jesús quiitac quenecatza mijqui, huan quijito:

—Nelía ni tacat Icone Toteco.

⁴⁰ Nojquiya itztoyaj nozona sequij sihuame cati quitachiliyayaj Jesús ica huejca. Inihuaya itztoyaj María Magdalena, Salomé huan María ininana José huan Jacobo cati teipan ejuet. ⁴¹ Ni sihuame quitoquiliyayaj Jesús huan quipalehuiyayaj quema itztoya ipan estado Galilea. Teipa inijuanti huan más miyac sihuame ajsicoj ihuaya Jesús ipan altepet Jerusalén.

Quitelijque itacayo Jesús ipan ostot ipan se tepet

(Mt. 27:57-61; Lc. 23:50-56; Jn. 19:38-42)

⁴² Eltoya nopa tonal para quicuualtalise nochi para nopa seyoc tonali quema israelitame mosiyajquetzaj. Huan quema tayohuixqui, ⁴³ hualajqui José se Arimatea ejquet. Yaya elqui se tequitiquet ipan nopa hueyi tasentilisti huan nochi masehualme quitepanitayayaj. Huan yaya nojquiya quichiyayaya ma tanahuati Toteco ipan taltipacti. Huajca José mosemacac huan calaquito campá Pilato huan quitajtanito itacayo Jesús. ⁴⁴ Huan Pilato amo huelqui quineltoaca para nelía ya mictoya Jesús. Huajca quinzotzqui nopa tayacanquet ten soldados huan quitatzintoquili sinta ya mictoya. ⁴⁵ Huan nopa tayacanquet quiilhui para quena. Huajca Pilato quicahuili José para ma quihuica itacayo. ⁴⁶ Huan José quicojqqui se yoyomit cati cuali huan cati hueyi, huan quitemohuito itacayo Jesús ipan cuamapeli huan quihuijconqui ica nopa yoyomit. Teipa quitali itacayo ipan se ostot ipan se tepet cati quicoyonijtoya ipan tet, huan quimimilo se hueyi tet para quitzacuas nopa ostot ipan nopa tepet. ⁴⁷ Huan María Magdalena ihuaya María inana José quitachiliyayaj campá quitallijque itacayo.

16

Moyolcuic Jesús

(Mt. 28:1-10; Lc. 24:1-12; Jn. 20:1-10)

¹ Sábado ica tiotac quema ya tantoya nopa tonal quema tiisraelitame timosiyajquetzaj, María Magdalena, María inana Jacobo, huan Salomé quicojqque taajhuiyacayot para quitallise itacayo Jesús. ² Huan ijnaltzi ipan domingo, nopa achtohui tonali ipan samano, yajque campá ostot ipan nopa tepet quema quistihualayaya tonati. ³ Huan motatzintoquiliyayaj:

—¿Ajquiya techijcuenilis nopa hueyi tet cati ica quitzactoque nopa ostot ipan nopa tepet?

⁴ Pero quema ajsitoj nozona, quitachilijque, huan quitaque para ya quiijcuenijtoya nopa tet masque nelía hueyi. ⁵ Huan calajque ipan nopa ostot ipan nopa tepet, huan nozona ica ininejmat quitaque mosehuijtoya se telpoca tacat cati moquentijtoya iyoyo cati chipahuac huan huehueyac. Huan nopa sihuame momajmatijque. ⁶ Pero nopa telpoca tacat quinilhui:

—Amo ximomajmatica. Nijmati anquitemohuaj Jesús, nopa Nazaret ejquet cati quicuamapeloltijque. Pero ayecmo aquí nica, ya moyolcuitoc. Xijtachilica campá quitectoyaj. ⁷ Huan xiyaca, xiquinilhuitij imomachtijcagua ihuaya Pedro para Jesús amechyacanas hasta nepa estado Galilea. Nepa anquiiatase quej yaya amechilhui achtohui.

⁸ Huajca nopa sihuame motalojtejqque ten nopa ostot ipan nopa tepet huan huihuipicayayaj huan momajmatiyayaj. Huan amo aquí quiilhuijqque teno pampa tahuel majmahuiyayaj.

Jesús monexti campá María Magdalena

(Jn. 20:11-18)

⁹ Huan quema Jesús moyolcuitoya ijnaltzi ipan domingo nopa achtohui tonali ipan samano, achtohui monexti campá María Magdalena cati achtohuiya quinpiyayaya chicome iajacahua Amocualtacat huan yaya quinquixtijtoya. ¹⁰ Huan María Magdalena yajqui quinyolmelahuato imomachtijcagua cati nejnentoyaj ihuaya Jesús. Huan quema ajsito, quinpanti motequipachohuayayaj huan chocayayaj. ¹¹ Huan imomachtijcagua amo quineltoaque quema quinilhui para ya moyolcuitoc Jesús huan ya quiiiztoya.

Jesús monexiti campa ome imomachtijcahua

(Lc. 24:13-35)

¹² Teipa Jesús monexiti achi quipatatoc itachiyalis elisquía seyoc tacat quema ome imomachtijcahua yahuiyayaj ipan se ojtí huejca ten campa calme. ¹³ Huan nopa ome tacame yajque huan quinyolmelahuatoj nopa sequinoc itatoquilijcahua, pero nojquiya injuanti amo quinneltoquilijque.

Jesús quinquimacac imomachtijcahua

(Mt. 28:16-20; Lc. 24:36-49; Jn. 20:19-23)

¹⁴ Huan teipa Jesús monexiti campa nopa majtacti huan se imomachtijcahua quema tacuayayaj. Huan Jesús quinajhuac pampa nelía yoltetique, huan amo quinneltocatoyaj para moyolcuitoya. Yon amo quinneltocatoyaj inincamanal cati quiitztoyaj para ya moyolcuitoc. ¹⁵ Huan Jesús quinilhui: “Xiyaca ipan nochi taltipacti huan xitepohuilica icamanal Toteco ica nochi masehualme. ¹⁶ Cati quinneltocas huan mocuaaltis, Toteco quimaquixtis. Pero cati amo quinneltocas, Toteco quitatzacuiltis. ¹⁷ Huan cati quinneltocase quipantijtihualase ni tanextili. Ica notequiticayo quinquixtise iajacahua Amocualtacat. Camanaltise ica yancuic camanali. ¹⁸ Sinta quinneltocase cohuame o quiise se tamanti cati pajyo, amo teno quinchihuilis. Nojquiya quitalise inimax ipan cocoyani huan mochicahuase.”

Jesús tejcoc ilhuicac

(Lc. 24:50-53)

¹⁹ Huajca quema Tohueyiteco Jesús tanqui quincamanalhuía, tejcotejqui ilhuicac huan mosehuito inejmat Toteco. ²⁰ Huan imomachtijcahua yajque, huan tepohuilitoj icamanal Toteco campa hueli techaj. Huan Tohueyiteco quinpalehuiyaya huan tenextiliyaya para melahuac inincamanal pampa ica injuanti quichihuayaya huejhueyi tanextili. San ya nopa.

Icamanal Toteco Cati Quiijcuilo Lucas

Lucas quitajcuilhui Teófilo cati Jesús quichijqui

¹ Noicni Teófilo, miyaqui tacame quichijtoque campeca quiijcuilose nochí nopa tamanti cati panotiyajque toixpa ipan inemilis Jesucristo. ² Quiijcuilojtoque cati nopa tacame cati tepohuilijque icamanal techilhuijque para quuitziyajque ten quema pejqe nejnemij ihuaya Jesús. ³ Huan huajca na nojquiya nimoilhui cuali para nimitztajcuilhuis nochí cati panoc ten quema tacatqui Jesús huan quenicatza panotiyajqui hasta itamiya, pampa ica yolíc nijtemojtoc cati melahuac ica nochí ni tamanti. Huajca noicni Teófilo cati nochí mitztepanitaj miyac, ama nimitztajcuilhuis nochí ⁴ para tijmachilis nelía temachtí nopa tamanti cati masehualme ya mitzmachtijtoque.

Tacatis Juan cati tecualtis

⁵ Ipan nopa tonali quema tanahuatiyaya Herodes el Grande ipan estado Judea, itztoya se totajtzi itoca Zacarías cati tequitic ipan nopa Abías pamit ten totajtzitzi. Zacarías quipixqui isihua cati itoca Elisabet huan nochí ome eliyayaj iteipan ixhuhua nopa totajtzi Aarón cati huejcajquiya itztoya. ⁶ Zacarías huan Elisabet itztoyaj xitahuaque iixpa Toteco. Quintoquilijque itanahuatilhua Toteco huan nochí cati yaya quinnahuati ma quichihuaca. Yeca amo aqú huelqui quintajilhui ica yon se tamanti fiero. ⁷ Pero amo quipiyayaj yon se conet pampa Elisabet amo hueliyaya quinpiya coneme, huan injuanti ya huehuejixtoyaj.

⁸ Huan se tonali Zacarías quichihuayaya itequi nepa tiopan calijtic iixpa Toteco, pampa quitocaró se ipan nopa Abías pamit ten totajtzitzi ma tequitica. ⁹ Huan quej momatque quichihuaq totajtzitzi, mahuiltijque ica piltetzitzi para quuitase ajquiya ten injuanti Toteco quitapejpenisquía para quitatis nopa copali iixpa Toteco ipan nopa hueyi israelita tiopamit. Huan quinexti para elqui Zacarías cati monequi quitatis. ¹⁰ Huan ipan nopa hora quema Zacarías quitatiyaya nopa copali tiopan calijtic, moquetzayayaj calteno miyaqui masehualme cati motatajtiyayaj ica Toteco. ¹¹ Huan nimantzi monexti se iilhuicac ejca Toteco iixpa Zacarías. Moquetzaco ica inejmat nopa taixpamit campa quitatiyaya copali. ¹² Huan Zacarías tahuel momajmati quema quitac. ¹³ Pero nopa ilhuicac ejquet quihui:

—Zacarías, amo ximomajmati. Toteco quicactoc cati tijtajtaniyaya, huan mosihua Elisabet quipiyas se piloquichpiltzi huan tijtocaxtis Juan. ¹⁴ Tahuel anpaquise quema tacatis huan paquise amohuaya miyaqui masehualme, ¹⁵ pampa yaya quipiyas se hueyi tequit iixpa Toteco. Amo quíis xocomeca at, yon amo quíis se taili nelcococ. Yaya elis temitoc ica Itonal Toteco hasta quema noja itztos ipan inana. ¹⁶ Huan yaya quichihuas para miyaqui israelitame ma moyolpataca huan ma quitoquilica Toteco Dios. ¹⁷ Juan quipiyas italnamiqúilis huan ichicahualis quej nopa tajtolpanextijquet Elías huejcajquiya quipixtoya. Huan yaya quiyacanas Tohueyiteco para quincualtalilis iniyolo masehualme para ma quiseica. Quichihuas para tetajme ma moyolalica huan ma itztoca ica cuali ica ininconeua. Huan quichihuas para masehualme cati amo teno quitepanitaj, ma tatepanitaca.

¹⁸ Huan Zacarías quitatzintoquili nopa ilhuicac ejquet:

—¿Quenicatza huelis nijmatis para temachti cati techilhúia? Nosihua huan na ya tihuehujixtoque.

¹⁹ Huan nopa ilhuicac ejquet quinanquili:

—Na niGabriel. Nochipa nimoquetza iixpa Toteco. Yaya nechttanqui ma nimitzcamanalhuiqui huan ma nimitzylmelahua ten icamanal Toteco.
²⁰ Pero pampa amo tijneltoac nocamanal, tielis tinonotzi huan amo huelis ticamanaltis hasta tacatis mocone. Huan nochi ni tamanti panos quema ajsis nopa tonali cati Toteco quitajitoc.

²¹ Huan nopa miyaqui masehualme noja quichiyayayaj calteno quema nopa ilhuicac ejquet quicamanalhuyaya Zacarías. Moilhuyayaj para ten Zacarías huejcahuayaya tiopan calijtic. ²² Huan quema Zacarías quisqui, amo hueliyaya camanalti. Huajca quimatque para quiiiztoya se tanextili ten Toteco tiopan calijtic. Huan Zacarías san tamanexti, pampa eltoya nonotzi.

²³ Teipa tanqui nopa tonali cati quitocaro Zacarías para tequitis quej totajzi, huan yaya mocuetqui ichaj. ²⁴ Huan isihua Elisabet conecuc, huan teipa senitztoya calijtic huan amo cana yajqui para macuili metzti. Huan isihua moilhuyaya: ²⁵ “Toteco nechtiuchijtoc miyac, pampa ama niconehue huan ayecmo nipinahuas iniixpa sequinoc pampa amo nijpixtoya se nocone.”

Ilhuicac ejca Toteco quiyolmelajqui María para tacatis Jesucristo

²⁶ Elisabet ya quipixtoya icone ipan itacayo se chicuase metzti quema Toteco quititanqui ilhuicac ejca cati itoca Gabriel ma yahui hasta altepet Nazaret ipan estado Galilea ²⁷ para quimacas se ichpocat itoca María se camanali. Huan María itztoya se cuali ichpocat cati amo quema quiixmajtoya se tacat huan ya quiijtantoya se telpocat cati itoca José cati eliyaya iteipan ixhui Tanahuatijquet David ten huejcajquiya. ²⁸ Huan Gabriel calajqui campa María itztoya huan quiilhui:

—Xipaqui ta cati Toteco mitzqualita. Toteco itztc mohuaya huan achi más mitztiochijtoc que sequinoc sihuame.

²⁹ Pero quema María quiiitac nopa ilhuicac ejquet, san quitachili huan quitetzaitac huan moilhui taya quiiijosnequi para quej nopa quitajpalo.

³⁰ Huan nopa ilhuicac ejquet quiilhui:

—Amo ximomajmati María. Toteco mitztapejpenijtoc para mitztiochihuas tahuel miyac. ³¹ Nimantzi ticonehue tielis huan teipa tijtacatiltis se oquichpil huan tijtcoaxtalís Jesús. ³² Yaya elis hueyi iixpa Toteco. Huan masehualme quiixmatise para Icone Toteco Dios Cati Más Quipiya Tanahuatili. Huan Toteco quichihuas ma mosehuis huan tanahuatis campa tanahuatiyaya ihuejcapan tata David. ³³ Huan quipiyas tequiticayot ica israelitame para nochipa huan amo quema tamis itanahuatilis.

³⁴ Huajca María quitatzintoquili nopa ilhuicac ejquet:

—¿Quenicatza niconehue nielis, huan amo quema niitztoya ihuaya se tacat?

³⁵ Huan nopa ilhuicac ejquet quinanquili:

—Itonal Toteco hualas ipan ta, huan ichicahualis Toteco Dios Cati Más Quipiya Tanahuatili mitzixtzacuas huan ticonehue tielis. Huan yeca mocone elis nelía tatzejzelolitic, huan masehualme quiixmatise para Icone Toteco. ³⁶ Huan momachicni Elisabet nojquiya quipiyas icone masque ya nanatzi. Huan masque masehualme quijfohuaj amo hueli conepiya, ama ya quipixtoc icone ipan itacayo chicuase metzti. ³⁷ Amo onca yon se tamanti cati Toteco amo hueli quichihuas. Yaya nochi hueli.

³⁸ Huajca María quijito:

—Na niixca Toteco. Nica niitztoc para nijchihuas nochi cati nechnahuatis ma nijchihua. Ma nochi mochihua quej techilhujitoc.
Huajca ica ya ni, quistejqui nopa ilhuicac ejquet.

María quipaxaloto Elisabet

³⁹ Teipa María mocuatali huan moisihuilti yajqui se altepet ipan estado Judea campa onca miyac tepeme, ⁴⁰ campa ichaj Zacarías. Huan calaquito huan quitajpalo Elisabet. ⁴¹ Huan quema Elisabet quicajqui para María quinojnotzqui, icone Elisabet mojmolini iijtico. Huan Itonal Toteco quitemiti Elisabet, ⁴² huan chicahuac Elisabet quilhui María:

—Ipan nochi sihuame achi más Toteco mitztiochijtoc ta, huan nojquiya quitiochijtoc mocone. ⁴³ Nelía se hueyi tatepanitacayot para na, pampa ta tiinana nohueyiTeco techpaxaloco. ⁴⁴ Quema technojnotzqui, nimantzi nocone mojmolini ica paquilisti noijtico. ⁴⁵ Toteco mitztiochijtoc pampa tijneltocac para temachti quichihuas cati quijtojtoc.

⁴⁶ Huan María quijto:

“Tahuel nijhueyichihua Tohueyiteco ipan noyolo.

⁴⁷ Quena, nipaqui miyac ipan Toteco Dios, yaya cati notemaquixtijca.

⁴⁸ Pampa masque san niitequipanojca, huan san niteicneltzi, yaya nechelnamijqui, huan ama masehualme cati tacajtiyase para nochipa quijtose para Toteco nechtiochijtoc.

⁴⁹ Quena, Toteco Cati Quipiya Nochi Chicahualisti nechchihuilijtoc huejhueyi tamanti.

Tahuel tatzejtzeltic ya.

⁵⁰ Toteco quintasojta nochi masehualme cati quitepanitaj ama, huan nochi cati teipa tacajtiyase huan quitepanitase.

⁵¹ Quena, quichijtoc huejhueyi tamanti ica ihueyi chicahualis. Quintzontamiltijtoc cati mohueyimatiyayaj ipan iniyolo.

⁵² Toteco quinquixtilijtoc inintequiticayo tacame cati tanahuatiyayaj, huan quinhueyitalijtoc masehualme cati moechcapanohuj iixpa.

⁵³ Miyac tatiochihualisti Toteco quinmacatoc masehualme cati mayanayajaj, pampa quinixhuiti.

Huan masehualme cati quipixque miyac tomi quinmajcayaj san inimax.

⁵⁴ Miyac techpalehujitoc tiisraelitame pampa tiitequipanojcahua. Techtasojtatoc huan amo techelcajtoc.

⁵⁵ Quitencahuili Abraham, tohuejcapan tata, para quitasojtasquía ya inihuaya iteipan ixhuhua para nochipa, huan yeca techtasojtatoc tojuanti.”

Quej nopa quijto María.

⁵⁶ Huan María mocajqui ihuaya Elisabet nechca eyi metzti, huan teipa mocuetqui ichaj.

Tacatqui Juan cati tecuaaltis

⁵⁷ Teipa ajsic tonali para Elisabet conepiyas, huan quitacatilti se oquichpil. ⁵⁸ Huan nochi icalnechcahua huan ihuicalhua quicajque quenicaatza Toteco tahuel quitasojtatoya Elisabet huan quimacatoya icone, huan huajca nochi paquiyayaj ihuaya. ⁵⁹ Huan quema nopa pilocohpiltzi quipixqui chicueyi tonati, nochi hualajque para quipiltequillise nopa machiyot cati itoca circuncisión ipan ipiltacayo quej momajtoyaj quichihuj. Huan nochi quinequiyayaj quitocaxtise Zacarías quej itata. ⁶⁰ Pero inana quijto:

—Amo tijtocaxtise Zacarías, tijtocaxtise Juan.

⁶¹ Huan quiilhuijque:

—¿Para ten? Yon se amotata amo quipixqui itoca Juan.

⁶² Huan quimanextilijque itata para quimatise taya itoca quinequiyaya quitailis. ⁶³ Huan Zacarías quintajtani ma quihualiquilica cati ipan tajcuilos. Huan Zacarías quijcuilo: “Itoca elis Juan.” Huan nochi inihuampoyohua san quitachilijque huan quitetzaitaque. ⁶⁴ Huan nimantzi pejqui quiolinía inepil Zacarías, huan pejqui camanalti huan quipaquilismaca Toteco. ⁶⁵ Huan inincalnehcahua quitaque ten panoc, huan nochi tahuel momajmatijque. Huan teipa nochi masehualme cati itztoyaj campa hueli campa tepeyo nipa ipan estado Judea mocamanalhuyayaj se ica seyoc cati panoc. ⁶⁶ Huan nochi cati quicajque cati panoc moilhuyayaj: “¿Taya elis ni piloquichpiltzi quema moscaltis?”

Quej nopa quijtohuayayaj pampa quiitayayaj para Toteco nelía quitailijtoya imax ipan nopa oquichpil para quitiochihuas.

Icamanal Zacarías

⁶⁷ Huan nimantzi Itonal Toteco quitemiti Zacarías, itata nopa pilconetzi, huan yaya pejqui quijtohua ni camanali cati Toteco quimacac. Quiijto:

⁶⁸ “Ma tijhueyichihuaca Toteco Dios ten tiisraelitame, pampa hualajtoc techmaquixtis tiimasehualhua.

⁶⁹ Techtitanilía se Temaquixtijquet cati quipiya hueyi chichualisti.

Yaya elis se iteipan ixhui Tanahuatijquet David cati huejcajquiya eliyaya itequipanojca.

⁷⁰ Quej Toteco techtencahuili huejcajquiya ica itajtolpanextijcahua cati tatzejzeloltique,

⁷¹ ama yaya techmaquixtis ten tocualancaitacahua huan ten injuanti cati amo quinequij techitase.

⁷² Quintasojtac tohuejcapan tatahua,

huan quielnamijqui nopa camanali tatzejzeloltic cati quitencahuili Abraham.

⁷³ Quena, Toteco Dios motestigojquetzqui huan quitencahuili Abraham, tohuejcapan tata,

⁷⁴ para techmanahuisquía ten tocualancaitacahua para huelis tijtequipanose ya huan amo timajmahuise.

⁷⁵ Huelis tiitztose titatzejzeloltique iixpa huan tijchihuase cati cuali hasta timiquise.”

⁷⁶ Huan teipa Zacarías quiilhui ipiloquichpil:

“Tinopilcone, Toteco Cati Más Quipiya Tanahuatili mitztequitalijtoc tiitajtolpanextijca,

huan ta titayacanas huan tijcualtijtiyas iojhui Tohueyiteco cati hualas teipa.

⁷⁷ Tiquinyolmelahuas iisraelita masehualhua para yaya cati hualas quinmaquixtis,

pampa quintapojpolhuis inintajtacolhua.

⁷⁸ Quena, Toteco techtasojta miyac,

huan yeca techtitanilijtoc yaya cati elis quej tonati,

yaya cati hualas ten ilhuicac para techtaahuilis.

⁷⁹ Quintaahuilis ipan iniyolo nochi masehualme cati nemij ipan tzintayohuilol huan campa onca miqilisti.

Huan quinnextilis quenicatza quipiyase tasehuilisti ihuaya Toteco.”

Quej nopa Zacarías quijto.

⁸⁰ Huan nopa piloquichpiltzi Juan moscaltijtiyajqui huan motacachijqui huan Toteco quimacac chichahualisti ipan itonal. Huan teipa yaya itztoya ipan nopa tali huactoc campa amo teno elqui hasta ajsic tonali para monextis huan para israelitame ma quixmatica.

2

Tacatqui Jesucristo (Mt. 1:18-25)

¹ Ipan nopa tonali itztoya se hueyi tanahuatijquet cati itoca Augusto César huan yaya tanahuati para nochi masehualme ipan taltipacti ma moijcuiloca para taxtahuase impuesto. ² Ipan nopa xihuit Cirenio itztoya gobernador ipan tali Siria, huan ya ni eltoya iniachtohui censo ipan nopa tonali. ³ Huan monequiyaya nochi masehualme ma yaca campa inialtepe para moijcuilose. ⁴ Huajca José quisqui altepet Nazaret ipan estado Galilea huan yajqui altepet Belén ipan estado Judea pampa nepa tacatqui Tanahuatijquet David ten huejcajquiya, huan José eltoya se iteipan ixhui. ⁵ Huan María, cati ya quijtantoya, yajqui ihuaya para moijcuilose, huan ya conehue eliyaya. ⁶ Huan quema noja itztoyaj nepa Belén, ajsic tonali para conepiyas María. ⁷ Huan quitacatilti iachtohui cone, se piloquichpiltzi huan quipijqui ica peseli huan quitejqui ipan se cuacajo campa tacuaj tapiyalme pampa amo quipantijque campa cochise ipan se cali para paxalohuani.

Iilhuicac ejcahua Toteco quinyolmelahuacoj tamocuitahuiani

⁸ Huan ipan nopa tayohua itztoyaj sequij tamocuitahuiani cati quinmocuitahuiyayaj ininborregojhua campa potrero nechca Belén. ⁹ Huan nimantzi se ilhuicac ejquet monexti iniixpa huan itatanex Toteco yahualtic quintaahuili huan injuanti tahuel momajmatijque. ¹⁰ Pero nopa ilhuicac ejquet quinilhui: “Amo ximomajmatica. Nihualajtoc para nimechyolmelahuas se cuali camanali cati quinmacas hueyi paquilisti nochi masehualme ipan taltipacti. ¹¹ Amantzi nepa ipan Belén, ialtepe David, ya tacatqui amotemaquixtijca. Yaya nopa Cristo cati Toteco Dios quijto techtitanilisqueña. Yaya Tohueyiteco. ¹² Huan ica ni tanextili anquixmatise. Anquipantise nopa piloquichpiltzi pictoc ica peseli huan quitectoque ipan se cuacajo campa tacuaj tapiyalme.”

¹³ Huan nimantzi monextijque tahuel miyaqui ilhuicac ehuaní ihuaya ya cati achtohui hualajqui, huan nochi injuanti quipaquilismacayayaj Toteco huan quijtohuayayaj:

¹⁴ “Ma tijhueyichihuaca Toteco cati itztoc ilhuicac. Huan ipan taltipacti ma onca tasehuilisti ipan iniyolo nochi masehualme cati quichihuaj cati Toteco quipactía.”

¹⁵ Huan nopa ilhuicac ehuaní tacuepilijque ilhuicac, huan nopa tamocuitahuiani moilhuijque:

—Ma tiyacajya Belén nimantzi. Ma tiquitatij cati panoc cati Toteco techyolmelahuaco.

¹⁶ Huan nopa tamocuitahuiani moisihuiltijtiyajque huan quipantijque María ihuaya José ica nopa pilconetzi cati quitectoyaj ipan cuacajo. ¹⁷ Huan quema quitaque, quisque huan quinpohuilijque nochi masehualme cati nopa ilhuicac ejquet quinilhuijtoya ten nopa pilconetzi. ¹⁸ Huan nochi masehualme cati quicajque ten quijtojque san quintachilijque huan quitetzaitaque. ¹⁹ Pero María quiajojqui nochi inincamanal ipan iyolo huan moyolilhui ten nochi cati quijtojque. ²⁰ Huan teipa nopa tamocuitahuiani tacuepilijque quihueyichijtiyajque, huan quipaquilismacatiyajque Toteco

por nochi cati quicactoyaj huan quiitztoyaj, pampa nelía quipantijque nochi quej nopa ilhuicac ejquet quinilhuijtoya.

Quinextijque Jesús ipan hueyi israelita tiopamit

²¹ Quema Jesús quipixtoya chicueyi tonati, quipiltequilijque nopa machiyot cati itoca circuncisión ipan ipiltacayo. Huan quitocaxtijque Jesús quej quitocaxti nopa ilhuicac ejquet quema quipaxaloto María huan noja ayemo conehe eliyaya.

²² Huan quema tanqui nopa tonali cati monejqui para María ma mocahua ichaj para motapajpacchihuas quej quijtojque itanahuatil Moisés, José huan María quihuicaque Jesús hasta altepet Jerusalén para quinextitij iixpa Toteco. ²³ Pampa ijcuilijtoc ipan itanahuatilhua Tohueyiteco campa quijtohua: “Nochi oquichpilme cati achtohui ehuan elise taiyocatalilme para iaxcahua Toteco.” ²⁴ Huajca José huan María yajque para quicahuatij nopa tacajcahualisti cati quijtojque itanahuatilhua Toteco para quicohuasquíaj ininpilcone sempa ica inintacajcahualis. Monequi quincahuasquíaj ome piltototzitzi o ome palomas.

²⁵ Huan itztoya nepa Jerusalén se cuali tacat itoca Simeón cati quinneltocac nochi itanahuatilhua Toteco, huan quichiyayaya ma ajsi inintemaquixtijca israelitame. Huan Itonal Toteco mocahuayaya ipan Simeón. ²⁶ Huan Itonal Toteco quinextilijtoya para amo miquisquía hasta quitaasquía nopa Cristo cati Toteco quititanisquía. ²⁷ Huajca Itonal Toteco quititanqui Simeón ma yahui ipan nopa hueyi israelita tiopamit ipan nopa tonali quema itatahua pilconetzi Jesús quihuicaque ipan nopa hueyi israelita tiopamit para ma quinextica iixpa Toteco huan quichihuase nochi cati quijtojque itanahuatil Moisés. ²⁸ Huan Simeón quita nopa pilconetzi, huan quinahuajqui huan quihueyimatqui Toteco huan quihui:

²⁹ “NoTeco, ama nihueli nimiquis ica tasehuilisti ipan noyolo, pampa ya niquitztoc ya ni cati techtencahuili para niquitasquía.

³⁰ Niquitztoc ica noixteyol yaya cati techtitanilijtoc para techmaquixtis ten totajtacolhua.

³¹ Yaya ni cati tijtalijtoc iniixpa nochi masehualme ipan ni taltipacti.

³² Yaya elis quej se taahuili cati quintaahuilis nochi masehualme huan quinnextilis Toteco,

masque amo israelitame huan itztoque ipan cati hueli tali.

Yaya elis tohueyitilis timoisraelita masehualhua.”

³³ Huan José huan María quitachilyayaj cati quijtohuayaya Simeón ten nopa pilconetzi Jesús. ³⁴ Huan Simeón quintiochijqui huan quihui María:

—Xiquita, Toteco quitalijtoc ni oquichpil para elis quej se tanextili ten Toteco cati miyaqui masehualme quihuejcamajcahuase huan yeca injuanti huetzise. Pero sequinoc miyac masehualme tahuel paquise ica ya huan Toteco quinhueyitalis. ³⁵ Huan quej nopa tanemijya nesis cati moilhuíaj masehualme ipan iniyolo. Huan pampa yaya mocone, tijpantis se hueyi tequipacholi huan tijmachilis quej mitzvolquechilisquíaj se macheta.

³⁶ Nojquiya tiopan calijtic itztoya se sihua tajtolpanextijquet cati itoca Ana. Ana eliyaya ichpoca Fanuel, cati itztoya se iteipan ixhui Aser ten huejcajquiya. Huan quema noja eliyaya se ichpocat, Ana monamicti, huan itztoya ihuaya ihuehue san chícome xihuit huan ihuehue mijqui. ³⁷ Huan ama Ana ya quipixqui ochenta y cuatro xihuit para mijqui ihuehue. Huan amo cana yajqui, senitztoya hueyi tiopan calijtic. Quitequipanohuayaya Toteco tonaya huan tayohua, mosahuayaya huan motatajtuyaya. ³⁸ Huan

ipan nopa talojtzi quema Simeón quitachiliyaya Jesús, ajsico Ana, huan pejqui quitascamati Toteco por nopa piloquichpiltzi. Huan pejqui camanalti ten ya ica nochi nopa masehualme ipan Jerusalén cati quichiyayaj ma ajsi nopa israelita Temaquixtijquet huan quinilhuiyaya para ya tacatqui nopa pilconetzi.

José huan María tacuepiliyque ipan altepet Nazaret

³⁹ Huan quema José huan María ya quichijtoyaj nochi nopa tamanti cati itanahuatilhua Toteco quinilhuiyque ma quichihuaca, tacuepiliyque inialtepe Nazaret ipan estado Galilea. ⁴⁰ Huan nopa piloquichpiltzi Jesús moscaltijtiyajqui huan quipixtiyajqui chichahualisti. Huan quipixtiyajqui miyac italnamiqulis huan Toteco Dios quipixqui hueyi iyolo ica ya huan quitiochijqui miyac.

Nopa oquichpil Jesús ipan hueyi tiopamit

⁴¹ Huan itatahua Jesús momatque yahuij altepet Jerusalén sesen xihuit ipan nopa ilhuit cati itoca Pascua*. ⁴² Huan quema Jesús quipixtoya majtacti huan ome xihuit, yajqui ipan ilhuit inihuaya itatahua quej momatque quichihuaj. ⁴³ Huan quema tantoya nochi tonali ten nopa ilhuit, Jesús mocajqui ipan altepet Jerusalén huan itatahua quisque huan tacuepiliyayaj ininchaj huan amo quimatque para mocajtoya. ⁴⁴ Inijuanti moilhuiyayaj hualayaya ica nopa miyaqui masehualme cati nejnemiayaj san sejco. Huan quema ya nejnentoyaj sé tonal, pejque quitemohuaj campa inihuicalhua huan inihuampoyohua, ⁴⁵ pero amo quipantijque. Yeca tacuepiliyque ipan Jerusalén para quitemotij.

⁴⁶ Huan ica eyi tonati itatahua quipantijque Jesús hueyi tiopan calitit, mosehuiyaya tatajcotipa ten nopa huejhueyi tamachtiani cati más momachtijtoyaj itanahuatil Moisés. Huan Jesús quintacaquiliyaya huan quintatzintoquiliyaya. ⁴⁷ Huan nochi tacame cati quicaquiyayaj cati Jesús quijitohuayaya san quitachiliyayaj huan quitetzaitaque por italnamiqulis huan por icamanal pampa nelía cuali quinnanquiliyaya. ⁴⁸ Huan quema itatahua quipantijque, quitetzaitaque. Huan inana quitatzintoquili:

—Nocone, ¿para ten timocajqui? Na ihuaya motata nelía timocuesojtoque huan timitztemojtinentoque.

⁴⁹ Huajca Jesús tananquili:

—¿Para ten antechtemojque? ¿Amo anquimatij para monequi nimotequihuis ica itequi noTata?

⁵⁰ Pero itatahua amo quimachilijque cati yaya quinilhui.

⁵¹ Huan Jesús mocuetqui inihuaya hasta altepet Nazaret, huan quin- neltoquilitijtiyajqui nochi cati quinahuatitayaj. Huan inana Jesús quitali ipan iyolo nochi tamanti cati panoc. ⁵² Huan Jesús talnamictiyajqui huan motacachijtiyajqui, huan Toteco Dios quipacti nochi cati quichijqui huan nojquiya quinpactiyaya masehualme.

3

Juan cati tecuaaltiyaya tayolmelajqui para hualas Cristo

(Mt. 3:1-12; Mr. 1:1-8; Jn. 1:19-28)

¹ Toteco quinotzqui Juan quema Tiberio César yahuiyaya para castoli xihuit tanahuatis ipan Roma huan ipan nochi talme cati Roma iaxcahua. Huan Poncio Pilato eltoya gobernador ipan estado Judea, huan Herodes

* 2:41 2:41 Nopa ilhuit quema israelitame quielnamiyque quenicatza Toteco quinchololti inihuejcapan tatahua ipan tali Egipto.

Ántipas ipan estado Galilea. Huan iicni Herodes cati itoca Herodes Felipe II eltoya gobernador ipan estados Iturea huan Traconite. Huan Lisaniás eltoya gobernador campa itoca Abilinia. ² Huan Anás huan teipa Caifás eltoyaj huejhueyi totajtzitzi. Huan ipan ni tonali Toteco quinzotzqui Juan, itelpoca Zacarías, huan quimacac icamanal para tayolmelahuas quema yaya itztoya ipan nopa huactoc tali campa amo teno eli. ³ Huajca Juan pejqui nejnemi campa hueli ipan nopa tali nechca hueyat Jordán, huan tepohuilitinemiya icamanal Toteco. Quinilhuyaya masehualme ma moyolpataca, huan ma quicahuaca inintajtacolhua huan ma mocuaaltica para Toteco quintapojpolhuis. ⁴ Cati Juan quichihuayaya quitamiltiyaya cati nopa tajtolpanextijquet Isaías huejcajquiya quiiijcuilo para Juan quichihuasquia. Isaías quiiito:

“Masehualme quicaquise se cati camanaltis chichahuac ipan nopa huactoc tali campa amo teno eli.

Quiijtos:

‘Xijcualtalica amoyolo pampa hualas Tohueyiteco.

Xijsencahuaca huan xijxitaahuaca iojhui para ipan nemis.

⁵ Xijtemitica nochi campa taostotic.

Xijsepanoca campa tafiero,

huan xijxitaahuaca nochi ojhuijhuijcoli,

huan xicalaxoca nochi talcojcomoli.

⁶ Pampa hualas yaya cati Toteco Dios techtitanilijtoc para techmaquixtis ten totajtacolhua,

huan nochi masehualme quiiitase.’ ”

Quej nopa quiiijcuilo Isaías huejcajquiya.

⁷ Huan miyaqui masehualme ajsiyayaj campa Juan para ma quincuaalti, huan yaya quinilhuyaya:

—Ancohuame. ¿Ajquiya amechilhuijtoc para Toteco amo amechtatza-cuiltis teipa sinta anmocuaaltise? ⁸ Amo quej nopa. Monequi xijchihuaca cati cuali para nochi quimatise sinta nelia ya anmoyolpatatoque huan anquicajtejtoque amotajtacolhua. Amo ximoilhuica para amo teno amechajsis pampa aniteipan ixhuhua tohuejcapan tata Abraham, pampa Toteco hueli quincuepas ni teme iteipan ixhuhua Abraham sinta quinequi quichihuas.

⁹ Quej tacame quitzontequij cuame cati amo temacaj inintajca huan quitatíaj, Toteco nojquiya ya itztoc para amechtzontamiltis huan amechcuamajahuas ipan tit.

¹⁰ Huan nopa masehualme quitatzintoquilijque:

—Huajca, ¿taya monequi tijchihuase?

¹¹ Huajca Juan quinilhui:

—Xijchihuaca cati cuali. Cati quiptiya ome iyoyo ma quimaca se cati amo teno quiptiya. Huan cati quiptiya tacualisti nojquiya ma temajmaca.

¹² Huan nojquiya hualajque para mocuaaltise sequinoc tacame cati tainamaj impuesto, huan nochi masehualme quimatque para taniel tacajyahuj, huan nopa tainamani quitatzintoquilijque:

—Tamachtijquet, ¿taya monequi tijchihuase tojuanti?

¹³ Huajca Juan quinilhui:

—San xiquininamaca masehualme cati quiiijtohua nopa tanahuati.

¹⁴ Huan hualajtoyaj sequij soldados cati quitatzintoquilijque:

—Huan tojuanti, ¿taya monequi tijchihuase?

Huajca Juan quinilhui:

—Amo xiquinchihualtica masehualme ma amechtamaajmacaca. Amo aquí xijtelhuica ica cati amo nelía melahuac huan xipaquica san ica cati anquitani.

¹⁵ Huan amo molinijque nopa masehualme cati itztoyaj nozona. Nochi san quichiyayaj huan moyolilhuyayaj sinta huelis Juan eliyaya nopa Cristo cati Toteco quitencajqui techtitanilisquía.

¹⁶ Huajca Juan quinilhui nochi nopa masehualme:

—Na nimehcuaaltía san ica at, pero yaya cati hualas teipa quiipiyas más chichahualisti que na. Ya nimechilhuijtoc ten ya. Amo nicaxilía para nijtequipanos, yon amo para nijquixtilis itecac. Yaya amechmacas sequij amojuanti Itonal Toteco huan sequinoc amechtatzacuiltis ica tit. ¹⁷ Yaya quiniyocatalis masehualme cati iaxcahua ica injuanti cati amo. Quena, Toteco quichihuas quej se tacat cati quitequihuía itaajacapehuilol para quiyejectis trigo. Quinhuicas masehualme cati iaxcahua quej se facat quitatis itrigo ipan icuacalhua. Huan nopa sequinoc masehualme quintatis ipan tit cati amo quema sehuis quej se tacat quitatis itasolo trigo.

¹⁸ Quej nopa, Juan quinyolmelajqui nochi nopa masehualme miyac tamanti quema quincamanalhuyaya ten icamanal Toteco. ¹⁹ Huan teipa Juan quitelhui Gobernador Herodes Ántipas pampa mocuili ihuejpol cati itoca Herodías para elis isihua. Herodías eliyaya isihua icni cati itoca eliyaya Herodes Felipe II. Nojquiya Juan quitelhui Herodes Ántipas ica sequinoc tamanti cati fiero quichihuayaya. ²⁰ Huajca nopa Gobernador Herodes Ántipas noja más fiero quichijqui huan quitzajqui Juan.

Juan quicuaalti Jesús

(Mt. 3:13-17; Mr. 1:9-11)

²¹ Pero quema ayemo quitzactoyaj Juan, quincuaaltiyaya miyaqui masehualme, huan Jesús nojquiya hualajqui campa itztoya huan mocuaalti. Huan ipan nopa talojtzi quema mocuaaltiyaya, Jesús motatajtiyaya huan tapojqui ilhuicac, ²² huan hualtemoc Itonal Toteco ipan ya. Huan Itonal Toteco nesiya quej se paloma. Huan Toteco Dios camanaltic ten ilhuicac huan quihhui Jesús:

—Ta tiNocone cati nimitzicnelía huan nipaqui miyac ica cati tijchihua.

Ihuejapan tatahua Jesús

(Mt. 1:1-17)

²³ Huan Jesús quipixtoya se treinta xihuit quema quipehualti itequi huan pejqui nentinemi para tepohuilis icamanal Toteco. Huan masehualme moilhuyayaj para eliyaya icone José.

Huan José eliyaya icone Elí,

²⁴ cati eliyaya icone Matat,

cati eliyaya icone Leví,

cati eliyaya icone Melqui,

cati eliyaya icone Jana,

cati eliyaya icone José,

²⁵ cati eliyaya icone Matatías,

cati eliyaya icone Amós,

cati eliyaya icone Nahúm,

cati eliyaya icone Esli,

cati eliyaya icone Nagai,

²⁶ cati eliyaya icone Maat,

cati eliyaya icone Matatías,
cati eliyaya icone Semei,
cati eliyaya icone José,
cati eliyaya icone Judá,
²⁷ cati eliyaya icone Joana,
cati eliyaya icone Resa,
cati eliyaya icone Zorobabel,
cati eliyaya icone Salatiel,
cati eliyaya icone Neri,
²⁸ cati eliyaya icone Melqui,
cati eliyaya icone Adi,
cati eliyaya icone Cosam,
cati eliyaya icone Elmodam,
cati eliyaya icone Er,
²⁹ cati eliyaya icone Josué,
cati eliyaya icone Eliezer,
cati eliyaya icone Jorim,
cati eliyaya icone Matat,
³⁰ cati eliyaya icone Leví,
cati eliyaya icone Simeón,
cati eliyaya icone Judá,
cati eliyaya icone José,
cati eliyaya icone Jonán,
cati eliyaya icone Eliaquim,
³¹ cati eliyaya icone Melea,
cati eliyaya icone Mainán,
cati eliyaya icone Matata,
cati eliyaya icone Natán,
³² cati eliyaya icone David,
cati eliyaya icone Isaí,
cati eliyaya icone Obed,
cati eliyaya icone Booz,
cati eliyaya icone Salmón,
cati eliyaya icone Naasón,
³³ cati eliyaya icone Aminadab,
cati eliyaya icone Aram,
cati eliyaya icone Esrom,
cati eliyaya icone Fares,
cati eliyaya icone Judá,
³⁴ cati eliyaya icone Jacob,
cati eliyaya icone Isaac,
cati eliyaya icone Abraham,
cati eliyaya icone Taré,
cati eliyaya icone Nacor,
³⁵ cati eliyaya icone Serug,
cati eliyaya icone Ragau,
cati eliyaya icone Peleg,
cati eliyaya icone Heber,
cati eliyaya icone Sala,
³⁶ cati eliyaya icone Cainán,
cati eliyaya icone Arfaxad,
cati eliyaya icone Sem,

cati eliyaya icone Noé,
 cati eliyaya icone Lamec,
³⁷ cati eliyaya icone Matusalén,
 cati eliyaya icone Enoc,
 cati eliyaya icone Jared,
 cati eliyaya icone Mahalaleel,
 cati eliyaya icone Cainán,
³⁸ cati eliyaya icone Enós,
 cati eliyaya icone Set,
 cati eliyaya icone Adán,
 cati eliyaya icone Toteco Dios.

4

Amocualtacat quinejqui quiyoltlanas Jesús (Mt. 4:1-11; Mr. 1:12-13)

¹ Huan Jesús quisqui hueyat Jordán temitoc ica Itonal Toteco. Huan Itonal Toteco quihuicac hasta nopa huactoc tali campa amo teno eli. ² Huan mocajqui nepa para cuarenta tonali huan Amocualtacat quiyoltlanayaya para ma tajtacolchihua. Huan ipan nochi nopa tonali amo teno quicujqui, huan quema tanqui nopa tonali, nelía mayanayaya. ³ Huan hualajqui Amocualtacat quiilhuico:

—Sinta nelía tilCone Toteco, xijnahuati ni tet ma mocuepa pantzi.

⁴ Huan Jesús quinanquili:

—Ijcuilijtoc ipan Icamanal Toteco campa quijtohua: ‘Amo san ica pantzi itztose masehualme. Nojquiya monequi quitoquilijtinemise nochi Icamanal Toteco.’

⁵ Huan Amocualtacat quihuicac Jesús ipan se tepet huejcapantic, huan ipan nopa talojtzi quinextili iniricojyo nochi tanahuatiani ipan taltipacti, huan nochi talme cati iniachahua. ⁶ Huan Amocualtacat quiilhui:

—Nimitzmacas tequiticayot tijnhuatis nochi ni talme ipan nochi taltipacti huan nimitzmacas nochi iniricojyo, pampa nochi nechmacatoque na huan huelis nijmacas cati nijnequis. ⁷ Huan nochi nimitzmacas ta sinta san timotancuaquetzas huan techhueyimatis.

⁸ Huan Jesús quinanquili:

—Techtalcahui, Amocualtacat, pampa ijcuilijtoc ipan Icamanal Toteco campa quijtohua: ‘Xijhueyimati san Toteco Dios huan san ya xijtequipano.’

⁹ Huan Amocualtacat quihuicac Jesús altepet Jerusalén, huan quiquetzqui hasta iixco nopa hueyi israelita tiopamit huan quiilhui:

—Sinta nelía tilCone Toteco Dios, xihuitoni nica para tatzinta, ¹⁰ pampa ijcuilijtoc ipan Icamanal campa quijtohua:

‘Toteco quinnahuatis ilhuicac ejchahua ma mitzmocuitahuica.

¹¹ Inijuanti mitzmanniquise para amo timoicxicocos ica yon se tet.’

¹² Huan Jesús quinanquili:

—Nojquiya Icamanal Toteco quijtohua: ‘Amo xijyejyeco Toteco Dios san para tiquitas taya quichihuas.’

¹³ Huan quema Amocualtacat ya quichijtoya campeca para quiyoltlanas Jesús ma tajtacolchihua, quicajtejqui hasta seyoc huelta.

Jesús pejqui tamachtía ipan estado Galilea (Mt. 4:12-17; Mr. 1:14-15)

¹⁴ Teipa Jesús tacuepili ipan estado Galilea temitoc ica ichicahualis Itonal Toteco, huan campa hueli ipan nochi nopa tali nochi masehualme

quicaquiyayaj ten ya. ¹⁵ Huan pejqui quinmachtijtine mi masehualme ipan israelita tiopame campa hueli huan nochi quihueymatiyayaj.

Jesús itztoya ipan pilaltepetzí Nazaret
(Mt. 13:53-58; Mr. 6:1-6)

¹⁶ Huan Jesús ajsito pilaltepetzí Nazaret campa moscaltí huan ipan sábado, nopa tonali para ma mosiyajquetzaca israelítame, yaya calajqui ipan israelita tiopamit quej momajtoya quichihua. Huan moquetzqui ipan tasentilisti para quipohuas Icamanal Toteco. ¹⁷ Huan quimacaque nopa amatapohuali cati huejcajquiya quiijuilo nopa tajtolpanextijquet Isaías. Huan Jesús quitapo huan quipanti campa ijcuilijtoc ni camanali, huan pejqui quipohua:

¹⁸ “Itonal Toteco itztoc ipan na, pampa Toteco nechtequimacatoc para ma niquinilhui masehualme cati teicneltziti icamanal Toteco.

Nechtitantoc ma niquinchicahua masehualme cati mocuesohuaj, huan para ma niquinyolmelahua masehualme cati Amocualtacat quinilpitoc para nihueli niquintojtomas.

Nechtequimacac para niquinchicahuas popoyotziti para huelise tachiyase. Huan niquintojtomas nochi cati taijyohuáj inimaco cati quintaijyohuítáj.

¹⁹ Nechtitantoc ma niquinyolmelahuas nochi para ya ajsic nopa tonal, quema Toteco quinchihuilis masehualme se cuali tacayot.”

²⁰ Huan Jesús quitzajqui nopa momimilojtoc amatapohuali huan quimacac nopa tiopan tapalehuijquet, huan mosehui para tamachtis. Huan nochi nopa masehualme cati itztoyaj ipan nopa tasentilisti quitachiliyayaj.

²¹ Huan Jesús pejqui quincamanalhuía huan quinilhui:

—Ni camanali cati nijpojqui moijcuilo huejcajquiya huan camanalti ten na cati nimoquetza amoixpa. Huajca ama motamichihua cati quiijtohua.

²² Huan nochi nopa masehualme camanaliyayaj cuali ten Jesús huan quitetzaitayayaj huan quitachiliyayaj ica icamanal cati nelía yejyetzí, pero motatzintequiliyayaj:

—¿Amo ya ni icone José?

²³ Huan Jesús quinilhui:

—Nijmati se tonali antechilhuisse ni camanali: “Tepajtijquet ximopajti, huan tímizneltocase.” Anquijitose para anquicactoque nopa tiotchicahualnescayot cati nijchijtoc ipan alpetet Capernaum, huajca san se ma nijchihua nica ipan ni amoalpe. ²⁴ Pero masehualme cati san sejco ehuaní cati hueli tajtolpanextijquet amo quiseláj. ²⁵ Huan quema itztoya Elías, nopa tajtolpanextijquet ten huejcajquiya, itztoyaj miyac israelita sihuame cati mictoyaj inihuehuejhua ipan tali Israel campa yaya ejqui. Huan nochi nopa sihuame icnotziti quinquolohuayaya inintacualis pampa amo huetzqui at para eyi xihuit huan tajco ipan tali Israel huan oncac se hueyi mayanti.

²⁶ Pero Toteco amo quititanqui Elías ma yahui ica se israelita toahui cati icnotzi cati san sejco ehuaní. Quititanqui ma quipalehuiti nopa toahui cati icnotzi ipan pilaltepetzí Sarepta ipan seyoc tali cati itoca Sidón. ²⁷ Huan itztoyaj miyaqui masehualme ipan tali Israel cati tacayo palaniyayaj ica lepra quema itztoya tajtolpanextijquet Eliseo, pero Eliseo yon se injuanti amo quichicajqui. San quichicajqui Naamán cati hualajqui ipan seyoc tali cati itoca Siria.

²⁸ Huajca nelía cualanque nochi nopa israelítame cati quitacaquiliyayaj Jesús ipan nopa israelita tiopamit. ²⁹ Huan motananque huan quiquixtijque Jesús ten inialpe. Teipa quihuicaque hasta iixco nopa tepet cati ipan

quichijchijtoyaj nopa altepet. Quinequiyayaj quicuamimilose, ³⁰ pero Jesús san panotiquisqui tatajco ten injuanti huan yajqui.

Se tacat ica iajacayo Amocualtatcat
(Mr. 1:21-28)

³¹ Huan Jesús ajsito altepet Capernaum ipan estado Galilea huan pejqui tamachtía ipan israelita tiopamit sese sábado, nopa tonal para israelitame ma mosiyajquetzaca. ³² Huan nochi cati quitacaquiliyayaj san quitachiliyayaj huan quitetzaitayaj ica itamachtíl, pampa icamanal quípixqui tequiticayot.

³³ Huan itztoya se tacat ipan nopa israelita tiopamit cati quípixqui ipan itacayo se iajacayo Amocualtatcat. Huan yaya tzajtzc chichahuac huan quiilhui Jesús:

³⁴ —Jesús, tiNazaret ejquet, techcahua. Amo huelis timomatise mohuaya. ¿Tihualajtoc para techtzontamiltis? Tojuanti timitzixmatij ajquiya ta. Ta titatzejtzeltolitic. Ta tiIcane Dios.

³⁵ Huan Jesús quitacahualti iajacayo Amocualtatcat huan quiilhui:

—Amo ximolini. Xiquisa ipan ni tacat.

Huan nopa ajacat quimajcajqui nopa tacat talchi iniixpa nochi nopa masehualme, huan teipa quisqui ipan itacayo huan amo teno más quichihuili.

³⁶ Huan nochi nopa masehualme quitachiliyayaj huan quitetzaitayaj huan pejque motatzintoquilíaj se ica seyoc:

—¿Taya tamanti ya ni? Tanemijya nesi para icamanal Jesús quiapiya tanahuatili huan chichahualisti pampa quema quinnahuatía iajacahua Amocualtatcat, nopa ajacame quineltoquilíaj huan quisaj.

³⁷ Huan campa hueli ipan nopa tali nechca altepet Capernaum nochi masehualme quimatque cati Jesús quichihuayaya.

Jesús quichicajqui imona Simón Pedro
(Mt. 8:14-15; Mr. 1:29-31)

³⁸ Huan Jesús moquetzqui huan quisqui ipan tiopamit huan yajqui ichaj Simón Pedro. Huan quipanti imona Pedro mococohua pampa chichahuac totoniyayaya, huan nochi cati itztoyaj nepa quitajtanijqe Jesús ma quichicahua. ³⁹ Huajca Jesús mohuijtzonqui campa huetztoya huan quinnahuati nopa tatotonilot ma quisa. Huan nopa tatotonilot quicajtejqui, huan nímantzi moquetzqui nopa sihuat huan pejqui quintamaca.

Jesús quinchicajqui miyac cocoyani
(Mt. 8:16-17; Mr. 1:32-34)

⁴⁰ Huan ica tiotac nochi masehualme cati quinpixtoyaj cocoyani ipan ininchajchaj quinhualicaque campa Jesús. Huan itztoyaj cocoyani cati quípixque miyac tamanti cocolisti. Huan Jesús quitali imax ipan sesen nopa cocoyani huan quinchicajqui. ⁴¹ Huan miyac masehualme nepa quinpixtoyaj iajacahua Amocualtatcat huan nopa ajacame quisayayaj huan chichahuac quiiijtohuayayaj ten Jesús:

—Ta tiIcane Dios.

Pero Jesús quinnahuati nopa ajacame ma ayecmo camanaltica pampa injuanti quiixmatiyayaj yaya itztoya nopa Cristo cati Toteco quiiijto quititanisquía.

Jesús tepohuili ipan estado Galilea
(Mr. 1:35-39)

⁴² Huan quema tanestihualayaya, Jesús quisqui nepa, huan yajqui ipan nopa huactoc tali campa amo teno eli. Huan miyaqui masehualme quitemo-huayayaj huan quema quipantijque, quihuijque ma mocahua ipan inintal.

⁴³ Pero Jesús quinilhui:

—Monequi nojquiya niyas ipan sequinoc altepeme para niquinilhuis masehualme icamanal Toteco huan niquinnotzas ma calaquica campa yaya tanahuatía, pampa ya nopa nechtitantoc ma nijchihua.

⁴⁴ Huan Jesús tepohuiljinenqui icamanal Toteco ipan israelita tiopame ipan campa hueli altepet ipan estado Galilea.

5

Jesús quichijqui ma quinitzquica miyac michime (Mt. 4:18-22; Mr. 1:16-20)

¹ Huan nopa miyaqui masehualme nelía quicuatetzopayayaj Jesús pampa quinequiyayaj quicaquise icamanal Toteco. Huan Jesús moquetzayaya iteno hueyi mantoc at cati itoca Genesaret*, ² huan quinitac ome cuaacalme atenti cati nopa michtajtamani quincajtejoyaj pampa quipajpacayayaj inimata. ³ Huajca Jesús tejcoc ipan icuaacal Simón Pedro huan quihui ma quinejnemilti nopa cuaacali quentzi ipan at. Huan Jesús mosehui ipan nopa cuaacali huan pejqui quimachtía nopa miyac masehualme cati itztoyaj talpani huan nochi huelque quitachilíaj. ⁴ Huan teipa quema tanqui quincamanalhuía nopa masehualme, Jesús quihui Simón:

—Xijnejnemilti ni cuaacali hasta campa achi huejcata huan nepa xijmajcahuaca amomata para anquinitzquise michime.

⁵ Huan Simón quinanquili huan quihui:

—Tamachtijquet, titajtamaque seyohual huan yon se michi amo tiq-uitzquijque. Pero sinta quej nopa techilhuía ma nijchihua, huajca sempa nijmajcahuas tomatá.

⁶ Huan quimajcajque inimata, huan quinitzquijque tahuel miyaqui michime hasta quinequiyaya tzayanis inimata. ⁷ Huan quinmanotzque inihuampoyohua cati itztoyaj ipan nopa seyoc cuaacali para ma quinpalehuiquij. Huan hualajque huan quitemitijque nochi ome cuaacalme ica michime hasta san quentzi misahuisquíaj. ⁸ Huan quema Simón Pedro quiitac cati panotoya, motancuaquetzqui iixpa Jesús huan quihui:

—Toteco, techcajtehua pampa na se nitajtacolchijca tacat.

⁹ Simón quihui Jesús ya ni pampa yaya huan nochi ihuampoyohua san motachiliyayaj pampa quitaque nopa miyaqui michime cati quinitzquijque. ¹⁰ Huan nojquiya san quitachilijque Jacobo huan Juan cati eliyaya itelpocahua Zebedeo huan eliyayaj ihuampoyohua Simón. Huan Jesús quihui Simón:

—Amo ximomajmati. Ama timichtajtamaquet, pero na nimitznextilis quenecatza tiquinnotzas masehualme para ma techtoquilica na.

¹¹ Huan quinejnemiltijque inincuaacal hasta atenti, huan quicajtejque nochi cati quipixtoyaj huan quitoquilijque Jesús.

Jesús quichicajqui se cati tacayo palaniyaya (Mt. 8:1-4; Mr. 1:40-45)

* ⁵ 5:1 San se ica nopa Hueyi At Galilea. Nelía amo elqui se hueyi at, pero elqui se hueyi mantoc at cati quipixqui 22 kilómetros ihuehuyaca huan 13 kilómetros ipatajca.

¹² Huan Jesús itztoya ipan se altepet, huan hualajqui se tacat cati itacayo palaniyaya ica nopa cocolisti lepra. Huan quema quiitac Jesús, motancua-quetzqui iixpa huan chicahuac quuilhui:

—Toteco, sinta tijnequi, huelis techchicahuas.

¹³ Huajca Jesús quitallili imax huan quuilhui:

—Quena, nijnequi. Ximochicahua amantzi.

Huan nimantzi icocolis quicajqui. ¹⁴ Huan Jesús quinahuati ma amo tepohuili ten panoc, quuilhui:

—San xiya ximonextiti ica nopa totajtzi huan xijmaca Toteco nopa tacajc-ahualisti cati Moisés tanahuati ma quimacaca para ma motapajpacchihuaca cati ayecmo tacayo palantoque. Quej nopa quimatise ya timochicajtoc.

¹⁵ Pero campa hueli miyaqui más masehualme quicaquiyayaj ten ichic-ahualis Jesús huan huajca miyaqui mosentilijque campa itztoya para quicaquise icamanal huan para ma quinchicahua ten inincocolis. ¹⁶ Pero miyac huelta Jesús moyocaquixti iselti huan yajqui campa tatzitzicaya para huelis motatajtis ica Toteco.

Jesús quichicajqui se tacat cati huapahuixtoc
(Mt. 9:1-8; Mr. 2:1-12)

¹⁷ Se tonali Jesús quinmactiyaya masehualme ipan se cali, huan itzttoyaj nozona sequij fariseos huan huejhueyi tamachtiani ten itanahuatilhua Moisés cati hualajque ipan nochi ranchos ipan estados Galilea huan Judea, huan ten hueyi altepet Jerusalén. Huan Jesús quipixqui ichicahualis Toteco para quinchicahuas cocoyani. ¹⁸ Huan ajsicoj sequij tacame cati quihual-icayayaj se cocoxquet cati metzhuapactic. Huan quinequiyayaj calaquise calijtic campa itztoya Jesús para quitalise nopa cocoxquet iixpa, ¹⁹ pero amo onca campa calaquise pampa itzttoyaj tael miyaqui masehualme. Huajca nopa tacame tejcoque calpani huan quijcuenijque se ome tzontzajcayot. Teipa quitemohuijque nopa cocoxquet huilantoc ipan itapech tatajco nochi nopa masehualme huan quitalijque iixpa Jesús. ²⁰ Huan Jesús quiitac para nopa tacame quineltocayayaj, quuilhui nopa cocoxquet:

—Nohuampo, nimitztapojpolhuía motajtacolhua.

²¹ Huan nopa tamachtiani ten itanahuatil Moisés huan nopa fariseos pe-que moyolilhuaj: “¿Ajquiya nelía ni Jesús? Yaya yon quentzi amo quitepanita Toteco Dios pampa mochihua quej ya elisquía Toteco. Amo aqui hueli tetapojpolhuía tajtocoli, san Toteco.”

²² Pero Jesús quimatiyaya cati injuanti moyolilhuiyayaj huan quinilhui:

—¿Para ten anmoilhuaj amo nijtepanita Toteco Dios? ²³ Sinta niquilhuis ni cocoxquet: ‘Ximijquehua huan xinejnemi’ huan mochihuas nocamanal, nojquiya motapojpolhui quema niquilhui: ‘Nimitztapojpolhuía motajtacol-hua.’ ²⁴ Nijnequi xijmatica na cati niMocuetqui Masehuali nijpiya tequit-icayot ipan taltipacti para nitetapojpolhuis, huajca nimechnextilis para mochihuas cati niqijtohua.

Huan nimantzi Jesús quuilhui nopa cocoxquet:

—Nimitzilhuía, ximijquehua huan xijtanana motapech huan xiya mochaj.

²⁵ Huan nimantzi nopa cocoxquet moquetzqui huan quitanantejqui itapech huan yajqui ichaj, quihueyichijtiyajqui Toteco Dios. ²⁶ Huan nochi nopa masehualme san quitetzaitaque huan momajmatijque. Huan teipa pejque quihueyichihua Toteco huan quijtohua:

—Nelía se hueyi tiochicahualnescayot tiquitztoque ama.

Jesús quínotzqui Mateo
(Mt. 9:9-13; Mr. 2:13-17)

²⁷ Teipa quema Jesús quisayaya ten nopa altepet, quítac se tacat cati tainanqui impuesto. Yaya itoca Mateo huan nojquiya itoca Leví, huan mosehujtoya campa nopa mesa para quiselis impuesto. Huan Jesús quíilhui:
—Techtoquili.

²⁸ Huan Mateo quicajtejqui nochi cati quípíxtoya, huan moquetztiquisqui huan yajqui ihuaya Jesús.

²⁹ Huan Mateo quichijqui se hueyi ilhuit nepa ichaj. Huan tacuayayaj ihuaya Jesús campa mesa miyac tacame cati tainanque impuesto huan momajtoyaj tacajcayahuj, huan nojquiya itztoyaj sequinoc masehualme.

³⁰ Huan hualajque fariseos huan tamachtiani ten itanahuatilhua Moisés huan quítaque. Huajca pejqe quitatelhuíaj Jesús iniixpa imomachtijcahua huan quinilhuijqe:

—¿Para ten antacuj huan anatiq inihuaya ni tacame cati tainamaj impuesto huan tacajcayahuj huan inihuaya ni sequinoc cati miyac tajtacoli quichihuaj?

³¹ Huan Jesús quinnanquili nopa fariseos huan quinilhui:

—Se tetica tacat amo quimonequílía se tepajtíjqet, pero se cocoxquet, quena. ³² Na amo nihualajtoc para níquinnotzas masehualme cati moilhuíaj para cuajcualme iixpa Toteco. Nihualajtoc para níquinnotzas ma moyolpataca cati quimatij quípiyaj inintajtacollhua.

Jesús quinilhui para ten amo mosahuaj imomachtijcahua
(Mt. 9:14-17; Mr. 2:18-22)

³³ Huan hualajque seqíjq tacame cati quíilhuijqe Jesús:

—Imomachtijcahua Juan cati tecuaaltía talojtitzí mosahuaj para motatajtise ica Toteco Dios. Huan san se quichihuaj cati quitoquílíaj inintamachtíl nopa fariseos, pero momomachtijcahua amo. Nochípa tacuaj huan atíq.

³⁴ Huan Jesús quinilhui:

—Amo quínamiqí ma mosahuaca ihuampoyohua se mosihuajtíjqet ípan nopa talojtzi quema tacuaj ihuaya ípan inenamictíl. San se eltoc quema na níitztoc inihuaya nomomachtijcahua, iníjuanti amo huéli mosahuaj pampa itztoque nohuaya. ³⁵ Pero ajsis tonali quema hualase nocualancaítacahua huan nechhuícase huan huajca quena, nomomachtijcahua mosahuase.

³⁶ Huan nojquiya quínpohuili se tatenpohualístí†, quíilhui:

—Amo aquí quítequi se quentzi yoyomit yancuic para quítatamanis se yoyomit cati sosoltic, pampa tzocoyolihuis nopa cati yancuic, huan ayecmo quínamiqis cati sosoltic. ³⁷ Huan amo aquí quíteca xocomeca at cati yancuic ípan cuetaxti cati sosoltic. Pampa nopa yancuic xocomeca at xocoyas, huan mohueyilis, huan tzayanis nopa cuetaxti sosoltic. Quej nopa toyahuis nopa xocomeca at huan nojquiya quínenpolos nopa cuetaxti. ³⁸ Monequi tíjtecas xocomeca at cati yancuic ípan cuetaxti cati yancuic. ³⁹ Huan amo aquí cati quítoc xocomeca at cati achtohui tasencahuali quínequis cati yancuic, pampa nochi quíijtohuaj: ‘Achi cuali nopa cati achtohui tasencahuali.’

† **5:36** 5:36 Quíilhui ni tatenpohualísti para quínnexístis amo cuali químanelose ítamachtíl ica cati huejcajquiya quíneltocayayaj masehualme, pampa ítamachtíl eltoc se tamanti cati yancuic.

6

Nopa tonali para israelitame ma mosiyajquetzaca
(Mt. 12:1-8; Mr. 2:23-28)

¹ Ipan se sábadó, nopa tonali para mosiyajquetzase israelitame, Jesús huan imomachtijcahua panoyayaj ipan se mili campa quitocoyaj trigo. Huan imomachtijcahua pejuque quichecocotzaj huan quimaoyaj quentzi trigo tancochti huan quicuayayaj. ² Huajca nopa fariseos moilhuijque para taixpanoyayaj huan quitatzintoquilijque Jesús:

—¿Para ten tequitij momomachtijcahua ipan ni tonali para ma timosiyaj-quetzaca? Inijuanti tajtacolchihua.

³ Huan Jesús quinilhui:

—¿Amo anquipojtoque cati monejqui quichijqui David quema yaya huan ihuampoyohua mayanayayaj? ⁴ Calajqui ichaj Toteco huan quicuic nopa pantzi cati totajtzitzi quitentoyaj iixpa Toteco. Huan David quicuajqui huan no quinmajmacac nopa tacame cati itztoyaj ihuaya huan nojquiya quicua-jque. Huan itanahuatil Moisés quijtohua, san totajtzitzi hueli quicuase nopa pantzi.

⁵ Huan nojquiya Jesús quinilhui:

—Na cati niMocuetqui Masehuali nijpiya tequiticayot para niquinilhuis masehualme taya huélis quichihuase ipan sábadó, ni tonal para ma timosiyaj-quetzaca tiisraelitame.

Jesús quichicajqui se cati huactoya imax
(Mt. 12:9-14; Mr. 3:1-6)

⁶ Ipan seyoc sábadó, nopa tonali para ma mosiyajquetzaca israelitame, Jesús calajqui ipan se israelita tiopamit huan pejqui tamachtía. Huan itztoya tiopan calijtic se tacat cati huactoc imanejmat. ⁷ Huan nopa fariseos huan tamachtiani ten itanahuatil Moisés talojtzitzi quitachiliyayaj sinta quichicahuasquia nopa tacat ipan nopa tonali para mosiyajquetzase israelitame para quipiyasquia ica taya quitelhuisquia. ⁸ Pero Jesús quimatqui cati moilhuiyayaj huan quilhui nopa tacat cati huactoc imax:

—Ximoquetza huan xihuala nica tatajco tojuanti.

Huan yaya moquetzqui huan yajqui. ⁹ Huan Jesús quinilhui nopa fariseos:

—Nimechchihuilis se tatzintoquili: ¿Taya quijtohuaj nopa tanahuatilme para onca caquihuilis para tijchihuase ipan sábadó? ¿Huélis tijchihuase cati cuali o cati amo cuali? ¿Ma tiquinmaquixtica masehualme o ma tiquinmica?

¹⁰ Huan Jesús quintachili nopa tacame cati quiyahualojtoyaj, pero amo aqui molini. Huajca Jesús quilhui nopa tacat:

—Xijxitahua momax.

Huan yaya quixitajqui huan nimantzi mochicajqui. ¹¹ Huan tahuel cualanque nopa fariseos huan nimantzi pejuque mocamanalhuaj taya huélis quichihuilise Jesús.

Jesús quintapejpeni imomachtijcahua
(Mt. 10:1-4; Mr. 3:13-19)

¹² Huan ipan nopa tonali Jesús yajqui iselti ipan se tepet huan mo-cajqui nepa seyohual para motatajtis ica Toteco Dios. ¹³ Huan quema tanesqui, quinnotzqui imomachtijcahua ma hualaca campa ya huan quintapejpeni majtacti huan ome inijuanti huan quintocaxti itayolmelajcahua.

¹⁴ Quitapejpeni Simón cati nojquiya quitocaxti Pedro, huan Andrés cati eliyaya iicni. Nojquiya quintapejpeni Jacobo, Juan, Felipe, Bartolomé,

¹⁵ Mateo huan Tomás. Quitapejpeni Jacobo icone Alfeo huan nopa Simón cati moyocatali ica partido cananista. ¹⁶ Huan quitapejpeni Judas, iicni Jacobo huan Judas Iscariote cati teipa quitemactili.

Jesús quinmacthi miyaqui masehualme

(Mt. 4:23-25)

¹⁷ Huan teipa Jesús temoc ipan tepet inihuaya imomachtijcahua, huan moquetzque campa se tamayamit huan mosentilijque miyaqui masehualme cati quitoquiliyayaj. Hualajtoyaj ten campa hueli pilaltepertziti ipan estado Judea huan ipan altepet Jerusalén huan ten talme Tiro huan Sidón nechca hueyi at. Nochi nopa masehualme hualajtoyaj para quicaquise icamanal Jesús huan para ma quinchicahua ten inincocolis. ¹⁸ Huan nojquiya quinchicajqui cati quinpixtoyaj ajacame cati quintajyohuiltiyayaj. ¹⁹ Huan nochi nopa masehualme quinequiyayaj monechcahuise campa Jesús para quiitzquise, pampa ichicahualis quinajsiyaya cati quiitzquiyayaj huan quinchicahuayaya.

Xipaquica

(Mt. 5:1-12)

²⁰ Huan Jesús quintachili imomachtijcahua huan quinilhui:

“Xipaquica amojuanti cati anteicneltziti, pampa ancalaquise campa Toteco tanahuatía.

²¹ Xipaquica amojuanti cati anmayanaj ama, pampa anixhuise.

Xipaquica amojuanti cati anchocaj ama, pampa anhuetzcase.

²² Xipaquica quema masehualme amechcualancaitaj huan amechquixtíaj. Xipaquica quema amechtelchihuaj huan amechtocaxtíaj amocuanajcualme,

pampa antechtoquiliay na cati niMocuetqui Masehuali.

²³ Xipaquica, quena, xijpiyaca hueyi paquilisti quema quej nopa amopantis, pampa Toteco miyac amechtatahuís nepa ilhuicac.

San se quichihuayayaj inihuejcapan tatahua huejcajquiya ica itajtolpanextijcahua Toteco.

²⁴ Pero tahuel anteicneltique amojuanti cati miyac antominpiyaj, pampa ya anquipiyaj nochi cati cuali cati elis amoaxca.

²⁵ Tahuel anteicneltique cati anixhuij ama, pampa teipa anmayanase.

Tahuel anteicneltique cati anhuetzcaj ama, pampa teipa anchocase huan antahuejchihuase.

²⁶ Tahuel anteicneltique quema nochi masehualme camanaltij cuali ten amojuanti.

Inintatahua nojquiya camanaltique cuali ten nopa istacatica tajtolpanextiani ten huejcajquiya.

Xiquinichelica amocualancaitacahua

(Mt. 5:38-48; 7:12)

²⁷ “Pero nimechilhuía amojuanti cati antechtacaquiliay: Xiquinichelica amocualancaitacahua. Xiquinchihuilica cati cuali injuanti cati amechcualancaitaj. ²⁸ Xijtajtanilica Toteco ma quintiochihua cati amechtelchihuaj. Ximotatajica ica Toteco por injuanti cati amechtajilhuíaj ica cati fiero. ²⁹ Sinta se mitzmaquilis mocampa, xijnextili ne seyoc mocampa para nojquiya ma mitzmaquili nozona. Sinta se mitzquixtilis

motaque, xijcahua ma quihuica mocamisa nojquiya. ³⁰ Sinta se mitztajtania se tenijqui, xijmaca. Sinta se mitzquixtilia se tenijqui, amo xiquilhui ma mitzcuepili. ³¹ Xiquinchihuilica sequinoc quej anquinequij sequinoc ma amechchihuilica.

³² “Sinta san anquinicneliaj masehualme cati amechicneliaj, Toteco amo quiita para anquichihuj cati cuali. Hasta amo cuajcualme quinicneliaj injuanti cati nojquiya quinicneliaj. ³³ Sinta san anquinchihuiliaj ten cuali masehualme cati amechchihuiliaj ten cuali, amo teno ipati iixpa Toteco. Amo cuajcualme nojquiya san se quichihuj. ³⁴ Huan sinta san anquintanejtiaj tomi masehualme cati anquimatij temacht amechtatahuise, amo teno ipati iixpa Toteco, amo cuajcualme nojquiya quintanejtiaj tomi cati quincuepilise teipa. ³⁵ Na nimechihua, xiquinicnelica amoculancaitacahua. Xiquinchihuilica nochi cati cuali. Xiquintanejtica masque amo anmoilhuiaj sinta amechcuepilise. Huan Toteco hueyi amechtatahuis. Huan quej nopa anquichijtose quej quichihua Toteco Cati Más Quipiya Tanahuatili, pampa yaya quinchihuilica cati cuali nochi masehualme, masque amo cuajcualme o amo motascamatij. ³⁶ Huajca xitetasojtaca quej amoTata, Toteco Dios, tetasoja.

Amo xiquintequitachilica sequinoc

(Mt. 7:1-5)

³⁷ “Amo xiquintequitachilica sequinoc, huan sequinoc amo amechtequitachilise. Amo xitetatelhuica, huan sequinoc amo amechtatelhuise. Xitetaojpolhuica, huan sequinoc amechtataojpolhuise. ³⁸ Xitemacaca huan anquiselise. Quena, Toteco amechmacas miyac sinta antemacaj miyac. Yaya quichihuas quej se cuali tanamacaquet cati quitema se tatamachihuali sinti, huan cuali quiojolinis, huan más quitema hasta motzontis. Pampa san se tayejeicoli cati ipan titatamachihuas ta, yaya quitequihuis para tatamachihuas cati elis para ta.”

³⁹ Huan Jesús quinilhui se tatenpohualisti: “Se popoyotzi amo hueli quiyacana seyoc cati popoyotzi, pampa nochi ome huetzise ostoco. ⁴⁰ Se momachtijquet amo quimati más que itamachtijca, pero nochi momachtiani cati tamimomachtiaj elise quej inintamachtijca.

⁴¹ “¿Para ten anquijta nochi piltajtacoltzitzitzi cati quichihuj amohuampoyohua huan amo anquimatij para achi más miyac tajtacoli anquichihuj? Eltoc quej tiquita se piltejtzi ipan iixteyol moicni, pero amo tijmati para ta tijpiya hasta se apechti moixteyolijtic. ⁴² ¿Quenicatza huelis tiquilhuis seyoc: ‘Noicni, nimitzquixtilis nopa piltejtzi ipan moixteyol’, quema ta tijpiya se apechti moixteyolijtic? Tijpiya ome moxayac. Timoilhuia amo cuali cati yaya quiapiya, pero cuali cati ta tijpiya. Achtohui ximoquixtili nopa apechti huan quej nopa titachiyas cuali para tijquixtilis nopa piltejtzi cati quiapiya iixteyolijtic mohuampo.

Nochi quiixmatij se cuahuit ica itajca

(Mt. 7:17-20; 12:34-35)

⁴³ “Se cuali cuahuit temaca itajca cati cuali, huan cati amo cuali, amo. Yon se cuahuit cati amo cuali amo temaca itajca cati cuali. ⁴⁴ Huajca nochi masehualme quiixmatij se cuahuit ica taya itajca temaca. Se huitzmeocat amo temaca cuaselcayot. Huan se sahuameocat amo temaca xocomecat. ⁴⁵ San se nojquiya ica se cuali masehuali, quisa cati cuali ipan iyolo. Huan sinta amo cuali se masehuali, quisa cati amo cuali ipan iyolo. Pampa se masehuali camanalti cati eltoc ipan iyolo huan cati más moilhuia.

Ome Calme
(Mt. 7:24-27)

⁴⁶ “¿Para ten anquijtohuaj niamoTeco huan amo anquichihuj cati nimechilhuía? ⁴⁷ Nochi cati hualahuij campá huan quicaquij nocamanal huan quichihuj cati niqijtohua, itztoque quej ni talnamijca tacat cati nimechpohuilis. ⁴⁸ Se tacat quinequiyaya quichihuas ichaj huan taxajqui huejcatá huan quitzinpehualti ica tet huan quiquetzqui. Huan teipa huetzqui at miyac huan tatemíc hasta quiajsic ichaj, pero amo teno ipantic nopa cali pampa nopa tacat quiquetztoya ipan tet. ⁴⁹ Pero masehualme cati quicaquij nocamanal huan amo quichihuj cati quijtohua, quichihuj quej ni huíhuí tacat. Yaya quichijqui ichaj ipan tali huan amo teno ica quitzinpehualti. Teipa tafemíc huan nopa at quiajsic ichaj, huan nimantzi huetzqui huan tamisosolijqui.”

7

Jesús quichicajqui itequipanojca se soldado
(Mt. 8:5-13)

¹ Huan Jesús tanqui quinmachtía nochi nopa masehualme, huan yajqui altepet Capernaum. ² Huan nepa itztoya se capitán ten soldados cati quipixtoya se itequipanojca cati quiicneli, huan itequipanojca ya tahuel mococo-huayaya. ³ Huan nopa capitán quicajqui ya ajsico Jesús, huajca quintitanqui nopa huehue israelita tacame ma quitajtaniñij ma huala quichicahuajqui itequipanojca. ⁴ Huan nopa tacame yajque campá Jesús huan ica nochi iniyolo quitajtaniñique ma quichicahuati huan quiilhuijque:

—Cuali para tijchihuilis se cuali tacayot ni capitán, ⁵ pampa nelía techicnelía tiisraelitame huan taxtajqui nochi cati monejqui para techsencahuili se toisraelita tiopa.

⁶ Huajca Jesús quisqui inihuaya para yas ichaj nopa capitán, pero quema monechahuiyaya, nopa capitán quintitanqui ihuampoyohua ma quicamanalhuica Jesús huan ma quiilhuica:

—NoTeco, amo ximocuatotoni más. Nopa capitán quijtohua para yaya amo hueyi quej ta, huan amo quinamiqui para ticalaquís ichaj. ⁷ Nojquiya yaya quimati amo quinamiqui mitznechcahuis, yon mitzcamanalhuis. Pero yaya quijtohua, san xiquijto se camanali huan xijnahuati para mochicahuas itequipanojca huan nimantzi mochicahuas. ⁸ Quijtohua yaya quimati cati ta tiquijtos, ya nopa mochihuas, pampa yaya nojquiya quipiya iteco cati quinahuatía. Huan nojquiya quinpiya soldados cati yaya quinnahuatía. Huan sinta yaya quiilhuis se soldado ma yas nepa, yaya nimantzi yas. Huan sinta quiilhuis seyoc ma huala nica, yaya nimantzi hualas. Huan sinta quiilhuis itequipanojca ma quichihua se tequit, yaya quichihuas. Huan nopa capitán quimati ta nojquiya tijpiya san se tequiticayot para nimantzi mochihuas mocamanal.

⁹ Huan quema Jesús quicajqui icamanal nopa capitán cati ihuampoyohua quiilhuicoj, quitetzaitac. Huan Jesús moicancuetqui huan quinilhuí nopa miyaqui masehualme cati qitoquiliyayaj:

—Nelía nimechilhuía, yon se israelita masehuali amo nechneltoca nelcuali quej ni capitán cati seyoc tali ejquet.

¹⁰ Huan ihuampoyohua nopa capitán tacuepilijque ichaj, huan ya mochicajtoya itequipanojca.

Jesús quiyolcuic icone se toahui cati icnotzi

¹¹ Huan teipa Jesús nejnemiyaya ipan ojti para se altepet cati itoca Naín huan imomachtijcahua huan miyaqui masehualme yahuiyayaj ihuaya.

¹² Huan quema Jesús monechahui campa icalte nopa altepet, quinnamijqui miyaqui masehualme cati quiquechpanojtihualayayaj se mijcatzi. Huan nopa mijcatzi eliyaya iyojtzi icone se toahui cati icnotzi. ¹³ Huan Jesús quuitac nopa toahui cati icnotzi, huan quitasojtac, huan quiilhui:

—Amo xichoca.

¹⁴ Huan Jesús yajqui campa nopa mijcatzi huan quiitzqui nopa caja, huan cati quihuicayayaj moquetzque. Huan Jesús quiilhui nopa mijcatzi:

—Telpocat, nimitzilhuía, ximijquehua.

¹⁵ Huan nopa telpocat cati mictoya mosehui huan pejqui camanalti. Huan Jesús quimactili inana. ¹⁶ Huan nochi nopa masehualme cati quitaque quitetzaitzque huan san quitachilijque huan pejque quihueyichihuj Toteco Dios, huan quiijtojque:

—Ni Jesús cati itzotc tohuaya, se hueyi tajtolpanextijquet.

Huan nojquiya quiijtojque:

—Toteco Dios hualajtoc para techpalehuis tiisraelitame pampa tiimasehualhua.

¹⁷ Huan nochi masehualme cati itztoyaj ipan estado Judea huan ipan sequinoc talme nechca quicajque para Jesús quiyolcuitoya nopa mijcatzi.

Hualajque imomachtijcahua Juan cati tecuaaltiyaya

(Mt. 11:2-19)

¹⁸ Huan imomachtijcahua Juan cati tecuaaltiyaya quiilhuijque nochi cati Jesús quichihuayaya. Huajca Juan quinnotzqui ome imomachtijcahua,

¹⁹ huan quintitanqui ma yaca quitatzintoquilitij Jesús sinta nelía yaya nopa Cristo cati Toteco Dios quiijto hualasquía, o monequi noja quichiyase ma huala. ²⁰ Huan ajsicoj campa Jesús, huan quiilhuijque:

—Juan cati tecuaaltia techtitantoc ma timitztatzintoquiliqij sinta ta tiCristo cati Toteco quiijto hualasquía o monequi noja tijchiyase para hualas.

²¹ Huan ipan nopa hora quema imomachtijcahua Juan itztoyaj ihuaya Jesús, yaya quinchicajqui miyac cati mocochuaj ica miyac tamanti cocolisti. Quinchihualti ma quisaca iajacahua Amocualtacat cati calactoyaj ipan masehualme huan quintachiyalti miyac popoyotziti. ²² Huajca Jesús quinilhui imomachtijcahua Juan:

—Xijyolmelahuatij Juan cati anquuitztoque huan anquicactoque. Xiquilhuitij masehualme cati itztoyaj popoyotziti, ama tachiyaj, huan cati itztoyaj metzcuchotique, ama nejnemij cuali. Cati quiipiyayayaj nopa tacayo palanca cocolisti, ya mochicajtoque, huan inijuanti cati nacastapaltziti, ama ya tacaquij. Masehualme cati mictoyaj ya moyolcuitoque, huan cati teicneltziti quicakuqij icamanal Toteco, pampa niquincamanalhuía.

²³ Xiquilhuitij para paquij nopa masehualme cati nechselaj huan nechel-tocaj.

²⁴ Huajca quistejque nopa tacame cati quintitantoya Juan cati tecuaaltía, huan teipa Jesús pejqui quincamanalhuía nopa miyaqui masehualme ten Juan, huan quintatzintoquili: “¿Taya anmoilhuiyayaj anquitasquía quema anyajque anquiattoj Juan ipan nopa huactoc tali campa amo teno eli? ¿Anmoilhuiyayaj Juan elisquía se tacat cati amo temachti quej se ohua cuahuit cati huihuipica quema quentzi taajaca? ²⁵ ¿Ximoilhualca? ¿Taya anmochiyayayaj anquitasque? ¿Anquichiyayaj para Juan elisquía se tacat ica iyoyo nelcuali? Amo. Ya anquimatij tacame cati motalilaj iniyoyo nelcuali, tominpixtoque

huan itztoque ipan ininchaj tanahuatiani. ²⁶ Huaajca, ¿taya anyajque anquiritatoj? ¿Anyajque pampa anquitasnequiyayaj se itajtolpanextijca Toteco? Huan nimechilhuía yaya más hueyi que nochi sequinoc tajtolpanextiani ²⁷ pampa ipan Icamanal Toteco ijcuilijtoc cati Toteco Dios nechilhui ten Juan huan quej ni quijito:

‘Xiquita, na nijtitanis notayolmelajca ma mitzyacanas.
Yaya quicualtalis iniyolo masehualme para ma mitzselica.’

²⁸ Huan nimechilhuía amo aqui seyoc cati tacajtoc ipan ni taltipacti itztoc más hueyi iixpa Toteco que Juan cati tecuaaltía, pero cati hueli masehuali cati itztoc ipan itanahuatilis Toteco elis más hueyi que Juan.”

²⁹ Huan nochi nopa miyaqui masehualme huan nopa tacame cati tainamayayaj impuesto cati quicactoyaj icamanal Juan, quinejque ma quincuaalti, pampa quiitztoyaj para xitahuac cati Juan quijito ten Toteco. ³⁰ Pero nopa fariseos huan tamachtiani ten itanahuatil Moisés amo quicualcajque cati Toteco quinejqui ma quichihuaca. San mohueyimatiyayaj, huan yeca Juan amo quincuaalti.

³¹ Huan sempa Jesús quinilhui: “¿Quenicatza huelis nimechilhuis quej mochihuaj masehualme cati ama itztoque? ³² Cati ama itztoque mochihuaj quej coneme cati mosehuía tianquis huan amo paquij pampa amo nochi pano quej quinequij ma pano. Quinnotzaj inihuampoyohua huan quinilhuij: ‘Titapitzque para ximijtotica, huan amo anmijtotijque. Tihuicaque se huicat quej mictoya se mijcatzi, pero amo anchocaque.’ ³³ Huan masque Juan cati tecuaaltiyaya hualajqui huan amo quicuaajqui pantzi huan amo quiic xocomeca at, anquijtojqque para quipixtoya se iajacayo Amocualtat. ³⁴ Huan na cati niMocuetqui Masehuali nihualajqui huan nijcua huan niqui cati onca, huan anquijtohuaj nineltacujquet huan nineltaquet. Anquijtohuaj san ninemi inihuaya tacajcayahuani cati tainamaj impuesto huan masehualme cati miyac tajtacoli quichihuaj. ³⁵ Pero amo ipati cati anquijtohuaj. Nochi masehualme cati talnamictoque quimachilíaj na ihuaya Juan tijchihuaj cati xitahuac.”

Jesús yajqui ichaj se fariseo cati itoca Simón

³⁶ Monechcahui se fariseo campa Jesús huan quiilhui ma tacuati ichaj. Yeca Jesús yajqui ichaj huan mosehui campa mesa, ³⁷ huan ajsico se tacanenca sihuat cati nojquiya ehua nopa altepet. Huan quicajqui para Jesús tacuayaya ipan ichaj nopa fariseo huan quihualicac se taajhuayacayot ipan se frasco cati quicoyonijtoya ten se tet itoca alabastro. ³⁸ Huan moquetzqui chocayaya iicxita Jesús. Huan pejqui quixolonía iicxi ica iixayo cati huetziyaya huan quihuatzayaya ica itzoncal. Quitzoponili iicxi huan quitequili nopa taajhuayacayot cati quihualicac. ³⁹ Huan nopa fariseo cati quinotzqui ma tacuati ichaj quuitac nochi ya ni, huan molihui ipan italnamiqulis: “Sinta ni Jesús nelía itztosquía se itajtolpanextijca Toteco, quimatisquía para amo cuali ni sihuat cati quuitaquía iicxi. Quimatisquía miyac tajtacolchijtoc.” ⁴⁰ Huan yeca Jesús quinancuili cati Simón moyolilhuyaya ipan italnamiqulis huan quiilhui:

—Simón, nijpiya se tatenpohualisti cati nijnequi nimitzilhuis.

Huan Simón quiilhui:

—Cualtitoc, Tamachtijquet, techilhui.

⁴¹ Huan Jesús quiilhui:

—Itztoya se tacat cati momatqui tetanejtía tomi. Huan ome tacame quitahuiquiliyayaj. Se quitahuiquiliyaya tomi para san cincuenta tonali

tequit, pero nopa seyoc quitahuiquiliyaya tomi para quinientos tonali.
⁴² Huan nopa ome amo huelque quicuepilíaj nopa tomi. Huajca nopa tacat ica ipaquilis quintapojpolhui cati sesen quitahuiquiliyaya huan quiiyto amo teno monequi quitaxtahuisse. Huajca Simón, ¿catijqui ten ni ome tacame achi más quicneli?

⁴³ Huan Simón quinanquili:

—Huelis yaya cati más quitahuiquiliyaya.

Huan Jesús quiilhui Simón:

—Quena, melahuac cati tiqijto.

⁴⁴ Huan Jesús quitachili nopa sihuat huan quiilhui Simón:

—¿Ta tiquita cati quichihua ni sihuat? Quema nicalajqui ipan mochaj, amo techmacac at para nimoicxipajpacas quej ipa tijchihua, pero yaya nechxolonili noicxihua ica iixayo huan quihuatzqui ica itzoncal. ⁴⁵ Ta amo techzoponi quej timomajtoque titeselíaj, pero hasta quema nica nicalajqui, yaya amo quicajtoc nechzoponilia noicxihua. ⁴⁶ Ta amo techtequili aceite ipan notzonteco quej timomajtoque, pero yaya quitejqui taajhuiyacayot hasta ipan noicxihua. ⁴⁷ Yeca nimitzilhuía, masque miyac itajtacolhua, nochi nijtapojpolhuijtoc huan huajca miyac nechicnelía. Pero seyoc cati quipanti tapojpolhui ica san pilquentzi cati tahuicayaya, san pilquentzi quicnelía yaya cati quitapojpolhuijtoc.

⁴⁸ Huan Jesús quiilhui nopa sihuat:

—Nimitztapojpolhuijtoc nochi motajtacolhua.

⁴⁹ Huan masehualme cati mosehuiyayaj campa mesa ihuaya Jesús pejque moilhuíaj:

—¿Ajquiya nelía ni tacat Jesús cati moilhuía quiapiya tequiticayot para tetapojpolhuis tetajtacolhua?

⁵⁰ Huan Jesús quiilhui nopa sihuat:

—Pampa techneltoc, nimitzmaquixtijtoc ten motajtacolhua. Hueli tiyas mochaj ica paquilisti.

8

Sihuame cati quipalehuique Jesús

¹ Teipa Jesús nejnemiyaya campa hueli ipan altepeme huan ranchos tayolmelajtinemiyaya icamanal Toteco huan tenotzayaya ma calaquica ipan itanahuatilis Toteco Dios. Huan nopa majtacti huan ome imomachtijcahua yahuiyayaj ihuaya. ² Huan nojquiya nemiyayaj inihuaya Jesús sequij sihuame cati achtohui quipixqueocolisti o iajacahua Amocualtacat, huan quinchicajtoya. Se ten nopa sihuame cati nejnemiqui ihuaya Jesús itoca María Magdalena. Achtohuiya quinpixtoya chicome iajacahua Amocualtacat huan Jesús quinquixti. ³ Huan seyoc sihuat itoca eliyaya Juana, huan yaya elqui isihua Chuzta cati quitequipano Tanahuatijquet Herodes. Huan nojquiya nejnemiqui inihuaya se sihuat itoca Susana, huan más miyac sihuame cati quimacayayaj inintomi para quipalehuisse Jesús ica cati monequiyaya.

Se tacat quiiytzeloto xinachti

(Mt. 13:1-9; Mr. 4:1-9)

⁴ Huan mosentilijque miyaqui masehualme cati ehuaní campa hueli altepeme para quiiytase Jesús, huan quincamanalhui ica se tatenpohualisti, huan quiniilhui:

⁵ “Se tacat quiiytzeloto xinachti huan quema quiiytzelohuayaya, sequij xinachti tepejqui ojtipa. Huan masehualme ipan moquejquetzque, huan

totome quitamicuajque. ⁶ Sequinoc xinachti tepejqui tetzala campa amo onca miyac tali. Nopa xinachti ixhuac, pero nimantzi huajqui pampa amo quiajsiyaya at. ⁷ Huan sequinoc xinachti tepejqui huitztzala huan nopa huitzti moscalti ihuaya huan quiiyomicti. ⁸ Sequinoc xinachti tepejqui ipan cuali tali huan moscalti huan temacac cien hueltas más ten cati quitoctoya.”

Huan quema Jesús tanqui quinilhúa ni tatenpohualisti, achi más chicahuac quinilhui:

—Nochi anquipyaj amonacas, huajca xijcaquica cati nimechilhúa.

Para ten Jesús tamachti ica tatenpohualisti

(Mt. 13:10-17; Mr. 4:10-12)

⁹ Huan imomachtijcahua Jesús quitatzintoquilijque taya quiijosnequi nopa tatenpohualisti. ¹⁰ Huan Jesús quinnanquili: “Toteco amechcahuiljtoc xijmachilica quenicatza yaya tanahuatía. Achtohuiya amo aquí quimatiyaya ya ni, huan ama noja amo quincahuilía ne sequinoc ma quimachilica. Yeca niquincamanalhúa ica tatenpohualisti para masque inijuanti quitaj cati nijchihua, mochihuaj quej amo teno quitaj. Huan masque quicaquij nocamanal, amo hueli quimachilíaj.

Jesús quinilhui taya quiijosnequi nopa tatenpohualisti

(Mt. 13:18-23; Mr. 4:13-20)

¹¹ “Ya ni cati quiijosnequi nopa tatenpohualisti ten nopa tacat cati quiitzeloto xinachti. Nopa xinachti quiijosnequi icamanal Toteco. ¹² Sequij masehualme itztoque quej nopa xinachti cati tepejqui ojtípa. Inijuanti quicaquij icamanal Toteco huan nimantzi Amocualtacat huala huan quinquixtilía icamanal Toteco cati eltoc ipan iniyolo para ma amo quineltoaca huan ma amo momaquixtica ten inintajcolhua. ¹³ Sequinoc itztoque quej nopa xinachti cati tepejqui tetzala. Inijuanti quicaquij icamanal Toteco huan quiselíaj ica paquilisti. Pero itztoque quej nopa xinachti cati amo hueli motatzquilía campa tetzala. Nopa masehualme san quinelto-caj icamanal para se talojtzi. Huan quema huala taohuijcajot, nimantzi quicajtehuaj. ¹⁴ Sequinoc masehualme itztoque quej nopa xinachti cati tepejqui campa huitzti. Quicaquij icamanal Toteco, pero mojmosta ipan ininemis mocuesohuaj miyac huan quinequij moricojchihuase ipan ni taltipacti huan quinequij quipiyase nochi cati quinpactía. Huan nochi ni tamanti quiiyomictía icamanal Toteco para amo hueli moscaltía cuali huan quipiyas itajca. ¹⁵ Pero sequinoc masehualme itztoque quej nopa xinachti cati tepejqui ipan cuali tali. Nopa masehualme quicaquij icamanal Toteco huan ica paquilisti quiselíaj ica nochi iniyolo. Quiicnelíaj icamanal huan mojmosta quitoquilijtinemij cati quiijtóhua. Inijuanti, quena, quipiyaj inintajca.

Nopa tatenpohualisti ten nopa taahuili

(Mr. 4:21-25)

¹⁶ “Amo aquí quitatía se taahuili huan quitatía cajonijtic o tapechtzinta. ¡Amo! Sinta se masehuali quitatía se taahuili, quitatía ipan se taahuil quetzali para nochi cati calaquise nozona huelis tachiyase. ¹⁷ Quej nopa ica nocamanal. Nochi cati motatijtoc ama, tanemijya nesis teipa. Huan nochi cati eltoc ixtacatzi ama, nochi quimatise huan cuali quimachilise teipa.

¹⁸ “Huajca ximotachilica cuali quenicatza anquicaquij nocamanal, pampa nochi masehualme cati quimachilíaj, Toteco quinpalehuis para ma quimachilica más. Huan ica cati amo quimachilíaj, hualas se cati quinquixtilis nopa quentzi cati moillhuaj quimachilíaj.”

Inana huan iicnihua Jesús
(Mt. 12:46-50; Mr. 3:31-35)

¹⁹ Huan hualajque inana huan iicnihua Jesús huan amo huelque monechc-ahuíaj campa itztoya pampa nelmiyaqui masehualme quiyahualojtoyaj. ²⁰ Huan hualajqui se tacat huan quiilhui Jesús:

—Monana huan moicnihua mitzchiyaj calteno huan quinequij mitzcanalhuise.

²¹ Huan Jesús tananquili:

—Ni masehualme nica cati quicaquij icamanal Toteco huan quichihuaq cati quiijtohua, inijuanti niqunita quej nonana huan noicnihua.

Jesús quitacahualti ajacat huan hueyi at
(Mt. 8:23-27; Mr. 4:35-41)

²² Se tonali Jesús huan imomachtijcagua tejcoque ipan se cuaacali, huan Jesús quinilhui:

—Ma tiyaca hasta seyoc nali ni hueyi at.

Huan quistejque. ²³ Huan imomachtijcagua quinejnemiltiyayaj nopa cuaacali para seyoc nali, huan Jesús cochqui. Huan nimantzi pejqui taajaca chichahuac ipan hueyi at, huan calaquiyaya at ipan cuaacali hasta san quentzi misahuisquíaj. ²⁴ Huan imomachtijcagua hualajque campa Jesús, quiixitijque, huan quiilhuijque:

—Tamachtijquet, xiquita, timisahuijtinemij.

Huajca Jesús mijquejqui huan quiajhuac nopa ajacat huan nopa hueyi at, huan nimantzi moquetzqui huan ayecmo mojolini. ²⁵ Huan Jesús quinilhui imomachtijcagua:

—¿Para ten nelquentzi antechneltoaj na?

Huan imomachtijcagua momajmatiyayaj huan san quitetzaitaque huan moilhuijque se ica seyoc:

—¿Ajquiya nelía ni tacat Jesús? Yaya hueli quitacahualtia ajacat huan hueyi at, huan inijuanti quineltoquílíaj icamanal.

Se Gadara ejquet ica iajacahua Amocualtatcat
(Mt. 8:28-34; Mr. 5:1-20)

²⁶ Huan teipa Jesús huan imomachtijcagua ajsique tali Gadara ipan inin-
cuaacal. Gadara mocahua iixmelac estado Galilea. ²⁷ Huan quema inincuaa-
cal ajsiyaya atenti, hualajqui quinamiquico se tacat cati ehua nopa altepet
cati ya huejcajtoya quinpixtoya iajacahua Amocualtatcat ipan itacayo. Huan
amo teno moquentiyaya huan amo mocahuayaya ichaj. Senitztoya ipan
campo santo ipan ostot ipan se tepet campa quintalíaj mijcatziti. ²⁸ Huan
quema quiitac Jesús, motancuaquetzqui iixpa huan quiijto chichahuac:

—¿Taya nijpiya mohuaya? Ti Jesús. Ti Icone Dios Cati Más Quipiya Tanahu-
atili. Nimitztajtania, amo techtaijyohuiliti.

²⁹ Quiijto ni pampa Jesús quinnahuatiyaya nopa ajacame ma quisaca
ipan nopa tacat. Talojtziti nopa ajacame quiitzquiyayaj para ten hueli
quichihuilise. Huan masque masehualme quiilpiyayaj imax huan iicxihua
ica tepos cadena para quimocuitahuise, san quicocototzayaya nochi tepos
cadena huan nopa ajacame quinejnemiltiyayaj hasta campa nopa tahuel
huactoc tali campa amo teno eli.

³⁰ Huan Jesús quitatzintoquili:

—¿Taya motoca?

Huan yaya quinanquili:

—Notoca Miyac.

Quej ni quijto pampa miyaqui ajacame calactoyaj ipan itacayo. ³¹ Huan nopa ajacame quitajtanijqe Jesús ma amo quintitani ipan nopa ostot cati tahuel huejcata. ³² Huan nozona nechcatzi itztoyaj miyaqui pitzome cati tacame quinhualicaque para ma tacuajtinemica. Huan yeca nopa ajacame quitajtanijqe Jesús ma quincahuili calaquisse ipan nopa pitzome huan yaya quincahuili. ³³ Huan nopa ajacame quisque ipan nopa tacat huan calajque ipan pitzome. Huan nochi nopa miyaqui pitzome motalojtejqe campa taixtemolis huan huetzque ipan nopa hueyi at huan misahuijqe.

³⁴ Huan nopa tacame cati quinmocuitahuiyayaj nopa pitzome quiitaque ten panoc, huan yajque huan quinyolmelahuatoj nochi masehualme ipan nopa altepet huan campa hueli ipan nopa tali. ³⁵ Huan nochi nopa masehualme hualajque quiitacoj ten panotoya. Huan quema ajsicoj campa Jesús, quiitaque nopa tacat cati achtohui quinpixtoya iajacahua Amocualtacat ama mosehuijtoc iixpa Jesús. Ya moquentijtoya iyoyo huan quipixtoya cuali italnamiqulis. Huan nopa masehualme momajmatijque, ³⁶ ica cati quiitaque. Huan injuanti cati quiitaque quinpohuilijque cati ajsiyayaj quenicata Jesús quichicajtoya nopa tacat cati quinpixtoya ajacame. ³⁷ Huan yeca nochi nopa miyaqui masehualme cati ehuan ipan tali Gadara huan nozona nechcatziti quitajtanicoj Jesús ma quisa ten inintal, pampa nelía momajmatijque. Huajca Jesús tejoc ipan cuaacali para tacuepilis. ³⁸ Huan nopa tacat cati achtohui quinpixtoya ajacame, chichahuac quitajtani Jesús ma quicahuili ma yahui ihuaya, pero Jesús amo quicahuili, san quiilhui:

³⁹ —Xitacuepili mochaj huan xiquinilhuiti masehualme nochi nopa huejhueyi tamanti cati Toteco mitzchihuilijtoc.

Huan quistejqe nopa tacat, huan ipan nochi nopa altepet quinpo-huiliyaya nochi masehualme cati Jesús quichihuilijtoya.

Isihuapil Jairo huan nopa sihuat cati quiajsic iyoyo Jesús
(Mt. 9:18-26; Mr. 5:21-43)

⁴⁰ Quema Jesús tacuepili seyoc nali nopa hueyi at, miyaqui masehualme quiselijque ica paquillisti pampa quichiyayayaj ma ajsi. ⁴¹ Huan hualajqui se tacat cati itoca Jairo, se tequitiquet ten israelita tiopamit. Huan yaya motancuaquetzqui iicxita Jesús huan chichahuac quitajtani ma yahui ichaj. ⁴² Quipixtoya setzi isihuapil cati quipiyayaya majtacti huan ome xihuit huan tahuel mococohuayaya. Huan quema Jesús itztoya ipan ojti para ichaj, miyaqui masehualme quicuatetzopayayaj.

⁴³ Huan itztoya nozona inihuaya se sihuat cati quipixtoya se cocolisti para majtacti huan ome xihuit. Mojmosta esotemoyaya. Huan quitamiltijtoya nochi cati quipixtoya ica tepajtiani huan yon se amo huelqui quipalehui para ma mochicahua. ⁴⁴ Huan nopa sihuat monechcahui iica Jesús huan quiajsic iyoyonteno huan nimantzi mochicajqui.

⁴⁵ Huan Jesús quijto:

—¿Ajquiya quitoxonqui noyoyo?

Huan nochi masehualme quijtohuayayaj para amo quichijtoyaj. Huan Pedro quiilhui Jesús:

—Tamachtijquet, nochi ni miyaqui masehualme cati mitzyahualohuaj mitzcuatetzopaj.

⁴⁶ Pero Jesús quijto:

—Se masehuali nechitzqui pampa nijmatqui quisqui chichahualisti ten na huan quichicajqui se masehuali.

⁴⁷ Huan quema nopa sihuat quimatqui para Jesús quimatiyaya ten panoc, hualajqui huihuipicayaya huan motancuaquetzqui iixpa Jesús. Huan iniixpa nochi nopa masehualme quipohuili Jesús para ten quiajsitoya iyoyo huan para nimantzi mochicajtoya. ⁴⁸ Huan Jesús quiihni:

—Nane, timochicajqui pampa techneltocac. Xiya ica paquilisti.

⁴⁹ Huan quema camanaltiyaya Jesús, ajsico se tetequipanojquet ten ichaj nopa tequitiquet ten tiopamit, huan quiihni:

—Mosihuapil ya mijqui. Ayecmo xijcuatotoni ni tamachtijquet.

⁵⁰ Pero Jesús quicajqui cati nopa tetequipanojquet quiihto, huan quiihni nopa tequitiquet:

—Amo ximajmahui, san techneltoca na huan mosihuapil mochicahuas.

⁵¹ Huan quema nochi injuanti ajsitoj ichaj, Jesús quincahuili Juan, Pedro, Jacobo huan inana huan itata nopa sihuapil ma itztoca calijtic ihuaya, pero sequinoc amo quincahuili ma itztoca. ⁵² Huan nochi chocayayaj huan tahuejchihuayayaj pampa ya mictoya nopa sihuapil, pero Jesús quinihni:

—Ayecmo xichocaca. Amo mictoc, san coctoc.

⁵³ Huan nopa masehualme pejque quihuetzquiliáj pampa quimatque para ya mictoya. ⁵⁴ Pero Jesús quimaiztqui nopa sihuapil, huan quiihni:

—Sihuapil, ximijquehua.

⁵⁵ Huan itonal tacuepili ipan itacayo, huan nopa sihuapil mijquejtiquisqui. Huan Jesús quinnahuati ma quitamacaca. ⁵⁶ Huan inana huan itata nelía quitachilijque huan quitetzaitaque, pero Jesús quinihni amo aqui ma quiihni ten panoc.

9

Jesús quintitanqui imomachtijcahua

(Mt. 10:5-15; Mr. 6:7-13)

¹ Jesús quinnotzqui nopa majtacti huan ome imomachtijcahua ma mosenilica, huan quinmacac chichahualisti huan tequiticayot para quinquixtise ajacame ipan masehualme huan para quinchicahuase cocoyani ica ten hueli cocolisti. ² Teipa quintitanqui ma quinchicahuaca cati mococohuaj huan ma tepohuilij que nicatza tanahuatía Toteco ipan iniyolo masehualme.

³ Quinihni:

—Amo teno xijhuicaca ipan ojti. Amo xijhuicaca cuatopili, yon yoncoxtali, yon pantzi, yon tomi. Huan amo xijhuicaca yoyomit cati ica anmopatase. ⁴ Huan quema ancalaquise ipan se cali para anmoca huase, ximocahuaca nozona hasta anquisase ten nopa altepet. ⁵ Huan sinta anyase ipan se pilaltepetzi campa masehualme amo amechselise, huajca quema anquisase nozona, ximotectactzejzeloca para anquiquixtilise nopa taltepotci. Huan ica nopa, anquinnexise anquintahuelcahuaj nopa pilaltepetzi ehuan para ma quiselica se hueyi tatzacuutilisti.

⁶ Huajca imomachtijcahua Jesús quisque huan nejnenque campa hueli ipan nochi pilaltepetzi cati nechca. Huan tepohuilijque icamanal Toteco huan que nicatza Toteco temaquixtía ten inintajtacolhua. Huan campa hueli quinchicahuayayaj masehualme cati mococohuaj.

Mijqui Juan cati tecuaaltiyaya

(Mt. 14:1-12; Mr. 6:14-29)

⁷ Nopa Gobernador Herodes Antipas quicajqui nochi cati Jesús quichi huayaya, huan amo quimatiyaya taya moilhuis pampa sequij quiihto huayayaj Jesús elqui Juan cati achtohui tecuaaltiyaya pero ama moyolcuitoc.

⁸ Huan sequinoc quijtohuayayaj sempa monextijtoya nopa tajtolpanextijquet Elías ten huejcajquiya. Huan sequinoc quijtohuayayaj moyolcuitoya se ten nopa tajtolpanextiani cati huejcajquiya mictoyaj. ⁹ Pero Herodes quijto: —Juan ya mictoc pampa nitanahuati ma quiquechtzontequica, pero ¿ajquiya ni tacat cati ama nijcaqui quichijtinemi huejhueyi tiöchichahualnescayot?

Huan Herodes quitemohuayaya quenecatza huelis quitas Jesús.

Jesús quintamacac macuili mil tacame
(Mt. 14:13-21; Mr. 6:30-44; Jn. 6:1-14)

¹⁰ Huan tacuepilijqe itayolmelajcagua Jesús, huan quipohuilijque nochi cati quichijtoyaj huan campa yajtoyaj. Huan Jesús quiniyocaquixti itayolmelajcagua ten nopa miyaqui masehualme huan quinhucac hasta huactoc tali nechca altepet Betsaida. ¹¹ Pero nopa miyaqui masehualme quimatque canque yahuiyayaj huan quintoquilijque. Huan Jesús quinseli ica cuali huan quinilhui quenecatza tanahuatía Toteco ipan iniyolo masehualme. Huan Jesús quinchicajqui cati mococohuayayaj.

¹² Huan ica tiotac monechcahuijqe itayolmelajcagua Jesús huan quihuijqe:

—Xiquintitani ni masehualme ma yaca ipan pilaltepetzni nechca quitemotij cãpa cochise huan cati quicuase pampa nica cãpa tiitztoque amo teno onca.

¹³ Pero Jesús quinilhui:

—Amojuanti xiquintamacaca.

Huan imomachtijcagua quihuijqe:

—San tijpiyaj macuili pantzi huan ome michime, o ¿tijnequi ma tijcohuatij cati quicuase nochi ni masehualme?

¹⁴ Itztoyaj nopona nechca macuili mil tacame huan Jesús quinilhui imomachtijcagua:

—Xiquinilhuitij ni masehualme ma mosehuica ica tamontomit, ica cincuenta ipan sese monto.

¹⁵ Huan imomachtijcagua quinilhuijqe huan nopa masehualme quej nopa mosehuijqe. ¹⁶ Huan Jesús quicuic nopa macuili pantzi huan nopa ome michime, huan tachixqui ilhuicac huan quitascamatqui iTata. Teipa quintajcotapanqui huan pejqui quinmajmaca imomachtijcagua para ma quinmajmacaca nopa miyaqui masehualme. ¹⁷ Huan nochi nopa miyaqui masehualme tacuajque huan cuali ixhuique. Huan quisentilijque nochi pantatapatzti cati mocajtoya huan ica quitemitijque majtacti huan ome chiquihuit.

Pedro quijto Jesús yaya Cristo
(Mt. 16:13-19; Mr. 8:27-29)

¹⁸ Se tonali Jesús huan imomachtijcagua moyocaquixtijtoyaj huan yaya yajqui motajtito iselti. Huan teipa tacuepili cãpa imomachtijcagua huan quintatzintoquili:

—¿Ajquiya quijtohuaj masehualme para na?

¹⁹ Huan imomachtijcagua quihuijqe:

—Seqij quijtohuaj ta tiJuan cati tecuaaltiyaya, pero sequinoc quijtohuaj ta tiElías. Huan sequinoc quijtohuaj ta tise tajtolpanextijquet cati huejcajquiya itztoya huan ama timoyolcuitoc.

²⁰ Huan Jesús quintatzintoquili:

—Huan, ¿amojuanti? ¿Ajquiya anmoilhuáj para na?

Huan Pedro quinanquili:

—Ta tiCristo cati Toteco Dios techilhui techtitanilisquía.

Jesús quinilhui miquis

(Mt. 16:20-28; Mr. 8:30-9:1)

²¹ Huan Jesús quinnahuati amo aquí ma quipohuilica, ²² huan quinilhui: —Monequi para na cati niMocuetqui Masehuali nitajyohuis miyac. Amo nechselise nopa tayacanca totajtitziti, huan nopa tamachtiani ten itanahuatíl Moisés, huan nopa huehue israelita tacame. Huan masehualme nechmictise, pero ica eyi fonati nimoyolcuis sempa.

²³ Huan nojquiya quinilhui:

—Sinta se quinequi nechtoquillis, monequi quielcahuas cati ya quinequi huan nechtoquillis mojmosta mocualtalijtoc para tajyohuis huan miquis pampa nechneltoaca. Monequi elis quej se tacat cati quihuica icuamapel para ipan miquis. ²⁴ Pampa cati quinequi momanahuis huan amo quinequi tajyohuis pampa nechneltoaca, quema miquis quipolos nochi. Pero sinta se tajyohuis o miquis pampa nechneltoaca, momaquixtis itonal huan itztos nepa ilhuicac para nochipa. ²⁵ Huan amo ipati masque se masehuali quipiyasquía para iaxca nochi cati onca ipan ni taltipacti, pampa amo teno huelis quipalehuis quema miquis huan polihuis nepa micta. ²⁶ Sinta se masehuali pinahua ica na huan ica nocamanal huan quijitos amo nechixmati, huajca na cati niMocuetqui Masehuali nipinahuas ica ya huan niqijtos amo niqixmati quema nifacuepilis ipan taltipacti ica notatanex, huan ica itatanex noTata, Toteco Dios. Huan ipan nopa tonali nohuaya hualase itatzetzeltolica ilhuicac ejchua ica inintatanex. ²⁷ Pero nimechilhúa, sequij amjuanti nica amo anmiquise hasta anquiitase quenicatza eltoc nepa campá tanahuatía Toteco.

Jesús quipatac itachiyalis inixpa

(Mt. 17:1-8; Mr. 9:2-8)

²⁸ Jesús quijto ya ni huan hualchicueyi quinhuicac Juan, Jacobo huan Pedro huan tejcoque ipan se tepet para motatajtise. ²⁹ Huan quema Jesús motatajtiyaya, ixayac mopatac huan iyoyo mocuetqui chipahuac huan cahuaniyaya. ³⁰ Huan nesque ome tacame cati quicamanalhuyayaj. Elque Moisés huan Elías. ³¹ Huan quinyahualojtoya se tatanexti cati tahuel cahuaniyaya. Huan quicamanalhuyayaj Jesús ten quenicatza quitamisencahuas para miquis huan quistehuas ten ni taltipacti ipan Jerusalén. ³² Achtohui Pedro huan ihuampoyohua tahuel cochisnequiyayaj, pero teipa cuali tachixque huan quiitaque itatanex Jesús huan nopa ome tacame cati moquetzayayaj ihuaya. ³³ Huan quema nopa ome ya itztoyaj para quisase, Pedro quilhui Jesús:

—Tamachtijquet, cuali tiitztose nica. Ma tijchihuaca eyi pilxajcaltizti. Se para ta, seyoc para Moisés, huan seyoc para Elías.

Pero Pedro nelía amo quimachiliyaya cati quijtohuayaya. ³⁴ Huan quema Pedro quijtohuayaya nopa camanali, temoc se mixti huan quintzajqui huan nelía momajmatijque, pampa quiitaque temoyaya nopa mixti ipan injuanti. ³⁵ Huan quicajque se cati quincamanalhui ipan nopa mixti huan quijto: “Ya ni Nocone cati niquicnelía. Xijcaquica cati quijtohua.”

³⁶ Huan quema Toteco Dios tanqui camanalti, quitaque Jesús itztoya iselti. Huan para miyac tonali nopa eyi imomachtijcahua mocamatzajque huan amo teno quijtojqque ten cati quiztoyaj ipan nopa tepet.

Jesús quiquixti se iajacayo Amocualtacat

(Mt. 17:14-21; Mr. 9:14-29)

³⁷ Tonili Jesús huan nopa eyi imomachtijcahua temoque ten nopa tepet, huan quinnamijque tahuel miyaqui masehualme. ³⁸ Huan camanaltic chicahuac se tacat cati itztoya campa nopa miyaqui masehualme huan quijito:

—Tamachtijquet, nimitztajtanía xijtacheliqui nooquichpil pampa piliyojtz. ³⁹ Huan se iajacayo Amocualtacat quitzquía, huan tzajtzi, huan nimanntzi quitahuisohua ica se ajaca cocolisti, huan quichihua ma huihuipica chicahuac huan ma camapostoni. Quitaijyohuiltía nocone miyac huan amo quema quicahua. ⁴⁰ Huan niquintajtani momomachtijcahua ma quiquixtilica, huan amo huelque.

⁴¹ Huan Jesús quinanquili huan quijito:

—¡Ay amojuanti cati amo antechnehtocaj! Chicotic amotalnamiquilis. ¿Quesqui tonali monequi nimocahuas amohuaya? ¿Quesqui tonali monequi nimechijyohuis? Techhualiquili mooquichpil.

⁴² Huan quema monechcahuiyaya ioquichpil, nopa ajacat quitahuiso talchi huan quimacac se ajaca cocolisti, huan pejqui chicahuac huihuipica. Pero Jesús quinahuati nopa ajacat ma quisa huan mochicajqui nopa oquichpil. Huan Jesús sempa quimactili itata. ⁴³ Huan nochi quitachiliyayaj huan quitetzaitayayaj ihueyitilis Toteco.

Jesús quinilhui imomachtijcahua yaya miquis

(Mt. 17:22-23; Mr. 9:30-32)

Pero quema nochi noja san quitachiliyayaj ica cati Jesús quichijtoya, yaya quinilhui imomachtijcahua:

⁴⁴ —Xijtacaquilica cuali ni camanali cati nimechilhuía ama huan amo xiquelcahuaca. Nechtemactilise na cati niMocuetqui Masehuali inimaco amo cuajcualme.

⁴⁵ Pero imomachtijcahua amo quimachilijque cati quijito pampa amo quincahuili para ma quimachilica cuali, huan majmahuiyayaj para quitatzintoquilise taya quijitosnequi.

Ajquiya elis más hueyi iixpa Toteco

(Mt. 18:1-5; Mr. 9:33-37)

⁴⁶ Huan imomachtijcahua Jesús pejqque monajnanquillaj catijqui ten injuanti quipiyas más tequiticayot. ⁴⁷ Huan Jesús quimatiyaya cati moilhuiyayaj ipan inintalnamiquilis, huan yeca quihualicac se conet huan quiztzqui inechca. ⁴⁸ Huan quinilhui:

—Cati quiselía se conet quej ni pampa nechnehtoca, yaya nechselía na. Huan cati nechselía na, nojquiya quiselía noTata cati nechtitantoc. Huan yaya ten amojuanti cati más moechcapanos, yaya más quipiyas tequiticayot.

Cati amo techcualancaita itztoc tohuaya

(Mr. 9:38-40)

⁴⁹ Huan teipa Juan quihui:

—Tamachtijquet, tiquitaque se cati quinquixtiliyaya masehualme iajacahua Amocualtacat ica motoca*, huan tiquihuijque ma ayecmo quichihua pampa amo nemi tohuaya.

⁵⁰ Pero Jesús quihui:

—Amo xijzacuilica pampa se cati amo techcualancaita itztoc tohuaya.

Jesús quinajhuac Jacobo ihuaya Juan

⁵¹ Huan quema ya monechcahuiyaya nopa tonali para yas ilhuicac, Jesús quielcajqui nochi sequinoc tamanti huan motemacac para yas Jerusalén

* 9:49 9:49 O quijitohuayayaj para quipixtoyaj motequiticayo.

huan quistejqui. ⁵² Huan quintitanqui se ome tacame ma tayacanaca para quitemotij campá mocahuasquíaj ipan ojti. Huan inijuanti calajque se pilaltepetzí ipan estado Samaría para quisencahuasquíaj. ⁵³ Pero masehualme no pona amo quinselijque pampa quimatque Jesús motalijtoya para yas altepet Jerusalén. ⁵⁴ Huan quema quitaque Juan huan Jacobo para amo quinselijque, quitatzintóquiliqque Jesús:

—Toteco, ¿tijnéqui ma tijnahuatíca tit ma huetzi ten ilhuicac quej quichijqui Elías huan ma quintamitati ni masehualme?

⁵⁵ Huan Jesús moicancuetqui huan quinajqhuac:

—Se ajacat amechchihuilia quej nopa xicamanaltíca huan amo anquixmatij. ⁵⁶ Na cati niMocuetqui Masehuali nihualajtoc para niquinmaquixtis masehualme. Amo nihualajtoc para niquintzontamiltis.

Huan nochi inijuanti yajque seyoc pilaltepetzí.

*Masehualme cati quinejqque quitoquilise Jesús
(Mt. 8:19-22)*

⁵⁷ Huan quema nochi yahuiyayaj ipan ojti, se tacat quiilhui Jesús:

—Toteco, nimitztoquilis campá huéli tiyas.

⁵⁸ Huan Jesús quiilhui:

—Cayochime quiipiyaj ininchaj huan totome quiipiyaj inintepasol, pero na cati niMocuetqui Masehuali amo cana nijpiya para nimitzontecas.

⁵⁹ Huan Jesús quiilhui seyoc:

—Techtoquili.

Pero yaya quiilhui:

—NoTeco, achtohui techcahuili ma nijtalpachos notata quema miquis.

⁶⁰ Pero Jesús quiilhui:

—Xiquincahuili inijuanti cati mictoque iixpa Toteco ma quintalpacoca inimicahua. Pero ta xiya huan xiquinyolmelahuati masehualme quenicatza Toteco tanahuatía.

⁶¹ Huan seyoc tacat quiilhui Jesús:

—Nimitztoquilis, noTeco, pero achtohui techcahuili niyas niquinnahuatiti cati itztoque nocalijtic.

⁶² Pero Jesús quiilhui:

—Se tacat cati talpoxonía ica tapiyalme huan moicanita quichihua isurco huijcoltic, huan nojquiya se cati pehua quitoquilía iojhui Toteco huan taloztizti moillhuía cati quicajejtoc, amo quinamiqui calaquis campá Toteco tanahuatía.

10

Jesús quintitanqui setenta itatoquilijcahua ma tequítica

¹ Huan teipa Jesús quintequimacac seyoc setenta tacame huan quintitanqui ma yaca ojome para tayacanase ipan nochi altepeme huan pilaltepetzitzi campá Jesús ajsisquía. ² Huan yaya quinilhui: “Itztoque miyaqui cati quichiyaj para quicaquise nocamanal, pero amo miyaqui para yase huan quinilhuitij. Eltoc quej onca se hueyi pixquisti huan san itztoque se o ome masehualme para quisentilise. Xijtajtanica Toteco Dios ma quintitani más tequipanohuani para ma teilhuica icamanal pampa nopa pixquisti iaxca. ³ Amojuanti anelise quej borregoyme cati mopantíaj ica tepechichime ipan nopa tequit campá nimechtitani. ⁴ Amo xijhuicaca se morral, yon se payo para anmotominpiqueise. Amo xijhuicaca seyoc amotecac huan amo ximoquetziyaca ipan ojti para antetajpalose. ⁵ Huan quema ancalaquise ipan se

cali, xijtajtanica Toteco ma quintiochihua cati itztoque nozona. ⁶ Huan sinta quinamiqúi para cati nozona itztoque quiselise se tatiochihualisti, Toteco quintiochihuas. Huan sinta amo quinamiqúi, Toteco amo quintiochihuas. ⁷ Huan ximocahuaca ipan nopa cali campa amechseliaj, huan xijcuaca huan xiquica cati amechmacase pampa quinamiqúi se tequipanojquet quiselise itaxtahuil ten itequi. Ximocahuaca ipan san se cali ipan sese altepet, huan amo san campa hueli xicochtinemica. ⁸ Huan quema anajstij ipan se altepet campa amechselise, xijcuaca cati amechmacase. ⁹ Huan xiquinchicahuaca cati mococohuaj huan xiquinilhuica: ‘Toteco Dios cati tanahuatía ipan iniyolo masehualme amechnechcahuijtoc ama.’ ¹⁰ Huan quema ancalaquise ipan se altepet huan masehualme nozona amo amechselise, xiyaca ipan ojti huan xiquijtoaca: ¹¹ ‘Nochi ni taltepocti ten amoaltepe cati tatzquitoc ipan totecac tijtzejtzeloahuaj para quinextis nopa tatzacuiliti cati amechajsis pampa amo antechselijque. Pero xijmatica para melahuac ama Toteco amechnechcahuijtoc para amechnotzas xicalaquica campa yaya tanahuatía.’ ¹² Huan nimechilhuía, quema Toteco tetajtolsencahuas, nopa masehualme ipan nopa altepet cati amo amechselise, quiselise se tatzacuiliti cati más hueyi huan amo quej cati quiselijque nopa masehualme cati itztoyaj ipan altepet Sodoma huejcajqúya.

Teicneltique cati amo quitepanitaj Toteco

(Mt. 11:20-24)

¹³ “Anteicneltique anCorazín ehuani pampa Toteco amechtatzacuilitis. Anteicneltique anBetsaida ehuani, pampa amo antechnehtocaque quema nijchijqui huejhueyi tiochichahualnēscayot amoixpa. Sinta nopa masehualme cati huejcajqúya itztoyaj ipan altepeme Tiro huan Sidón quiitztosquíaaj cati nijchijqui amoixpa, moyolpatatosquíaaj nimantzi, huan nochi masehualme quimajtosquíaaj. ¹⁴ Huajca quema Toteco tetajtolsencahuas, más chichahuac amechtatzacuilitis huan amo quej nopa amo cuajcalme cati itztoyaj ipan Tiro huan Sidón huejcajqúya. ¹⁵ Nojqúya anCapernaum ehuani anmo-hueyimatij huan anmoilhuíaaj anmotananase hasta ilhuicac, pero amo neli. Antemose hasta micta pampa amo anmoyolpatatoque.”

¹⁶ Huan Jesús sempa quinilhui imomachtijcahua: “Masehualme cati quicaquise amocamanal ica cuali, cuali nechtaquilise, huan cati amech-huejcamajcahuase, nojqúya nechhuejcamajcahuase huan quihuejcamajcahuase yaya cati nechtitantoc.”

Mocuetque nopa setenta

¹⁷ Huan teipa nopa setenta cati Jesús quintitantoya tacuepilijque ica paquilisti huan quiilhuijque:

—Toteco, hasta iajacahua Amocualtatcat techneltocaque quema tiquin-nahuatijque ipan motoca*.

¹⁸ Huan Jesús quinilhui:

—Quena, niqúitac Amocualtatcat huetzqui ten ilhuicac quej nesi quema huetzi se tixochit quema tapetani. ¹⁹ Xiquitaca, nimechmacatoc tequiticayot para ipan anmoquejquetzase cohuame huan colome, huan para anquitanise nochi ichichahualis Amocualtatcat. Amo teno huélis amechcocos. ²⁰ Pero amo tahuel xipaquica pampa ajacame amechchihuiliaj amocamanal. Más quinamiqúi xipaquica pampa ya ijcuilijtoc amotoca ipan iama Toteco nepa ilhuicac.

* 10:17 10:17 Ica motequiticayo.

*Jesús quipaquilismacac Toteco
(Mt. 11:25-27; 13:16-17)*

²¹ Huan ipan nopa talojtzi Itonal Toteco quimacac Jesús miyac paquilisti huan Jesús quiilhui iTata: “Nimitzpaquilismaca, noTata, ta tiToteco Dios cati títanahuatía ipan ilhuicac huan taltipacti. Tijtatijtoc motalnamiquilis para amo ma quimachilica masehualme cati mohueyimati huan cati moilhuíaj talnamiquij. Pero ama tiquinnextilía motalnamiquilis masehualme cati moechcapanohuaj quej coneme moixpa. Quena, Notata, quej nopa tijchijqui pampa quej nopa mopaquilis.”

²² Huan Jesús quinilhui nopa masehualme: “NoTata nechmacatoc tequiticayot ica nochi tamanti. Amo aquí cuali nechixmati na cati nilcone Toteco, san noTata, quena, cuali nechixmati. Huan amo aquí cuali quiixmati noTata, san na nilcone huan cati nijnequi nijnextilía ajquiya ya.”

²³ Huan teipa moicancuetqui Jesús huan quintachili imomachtijcahua huan iyoca quinilhui: “Xijpiyaca paquilisti ica nochi cati anquiitaj.

²⁴ Nimechilhuía, miyaqui tajtolpanextiani huan tanahuatiani cati huejcajquiya itztoyaj quinejque quiitase cati ama anquiitaj, pero amo quiitaque. Inijuanti quinequiayaj quicaquise cati ama anquicaquij, pero amo huelque.”

Nopa cuali Samaria ejquet

²⁵ Huan se tamachtijquet ten itanahuatil Moisés moquetzqui para quimasiltis Jesús ica icamanal huan quitatzintoquili:

—Tamachtijquet, ¿taya monequi nijchihuas para najselis nopa nemilisti cati amo quema tamis?

²⁶ Huan Jesús quiilhui:

—¿Taya ijcuilijtoc ipan itanahuatil Moisés? ¿Quenicatza tijmachilía ta?

²⁷ Huan yaya quinanquili:

—Xiquicneli Toteco Dios ica nochi moyolo, huan ica nochi moalma, huan ica nochi mochicahualis, huan ica nochi motalnamiquilis, huan xiquicneli sequinoc quej timoicnelía.

²⁸ Huan Jesús quiilhui:

—Cuali technanquilijtoc. Huajca xijchijtinemi nochi ya ni huan tiitztos.

²⁹ Pero nopa tacat quinequiayaya monextis cuali iniixpa nopa masehualme, huajca quitatzintoquili Jesús:

—¿Ajquiya ne sequinoc cati monequi niquinicnelis quej nimoicnelía?

³⁰ Huan Jesús quinanquili:

—Se tacat quisqui altepet Jerusalén huan temoyaya ipan nopa taixtemolis cati ajsi altepet Jericó. Huan tachtequini quipantijque, huan quiquixtilijque iyoyo huan nochi cati quipixqui. Huan teipa quihuítejque huan quicajtejque quej mictoc. ³¹ Huan panoc se totajtzi ipan ojti huan quiitac nopa tacat huilantoc, pero quitalcahui huan quichijqui quej amo quiitac. ³² Huan nojquiya hualajqui se levita cati tapalehui ipan israelita tiopamit. Huan yaya ajsico campa huilantoya huan quiitac, pero nojquiya san quipanoc huan quichijqui quej amo quiitac. ³³ Pero hualayaya ipan ojti se Samaria

ejquet†, huan ajsico nozona huan quiitac nopa tacat huetztoc, huan quitasojtac. ³⁴ Quinechcahuito huan quipajpaquili campa cocojtoya ica xocomeca at, huan teipa quitequili aceite, huan quihuijconqui ica se yoyomit. Huan

† 10:33 10:33 Israelitame tahuel quincualancaitayayaj nochi tali Samaria ehuan huan amo quema quinnojnnotzayayaj.

quitejcolti ipan iburro huan quihuicac ipan se cali campa cochij paxalohuani huan quimocuitahui. ³⁵ Huan tonili quiquixti tomi para ome tonati ten tequit, huan quimacac nopa tacat cati quinmocuitahuía paxalohuani huan quiilhui: ‘Xijmocuitahui ni cocoxquet huan sinta tijyaltis más tomi para tijmocuitahuís, huajca quema nitacuepilis, nimitztaxtahuis.’

Huajca Jesús quitatzintozquili nopa tamachtijquet ten itanahuatil Moisés: ³⁶ —¿Catijqui ten ni eyi tacame cati hualajque ipan ojti quiicneli nopa tacat cati quitachtequilijque quej yaya moicnelía?

³⁷ Huan nopa tamachtijquet ten itanahuatil Moisés quiiyto:

—Yaya cati quitasojtac.

Huan Jesús quiilhui:

—Quena, nelía. Xiya ta huan quej nopa nojquiya xijchihua.

Jesús ipan ichaj Marta huan María

³⁸ Teipa Jesús yajqui ipan ojti hasta se pilaltepetzi, huan se sihuat itoca Marta quiseli ica cuali ipan ichaj. ³⁹ Yaya quipixtoya se iicni cati itoca María cati mosehuico iicxita Jesús huan quitacaquiliyaya icamanal. ⁴⁰ Huan Marta quipixtoya miyac tequit huan san ya nopa quichihuayaya, pampa quisencahuayaya miyac tacualisti para Jesús. Huajca Marta quinechcahuico huan quiilhui:

—Toteco, ¿amo tiquita noicni nechcajtejtoc para noselti ma nijsencahua nochí cati tijcuase? Xiquilhui ma nechpalehuiqui.

⁴¹ Pero Tohueyiteco Jesús quinanquili:

—Marta, Marta, timocuesohua huan timotequihuía ica miyac tamanti cati tijchihua, ⁴² pero san setzi tamanti monequi. María quitapejpenijtoc para quicaquis nocamanal, huan ya nopa achi cuali, huan amo aquí huelis quiquixtilis.

11

Jesús techilhui quenicatza ma timotatajtica

(Mt. 6:9-15; 7:7-11)

¹ Se tonali Jesús moiyoqaquixti huan motatajtito campa momatqui yahui. Huan teipa quema tanqui, se imomachtijca quinechcahuico huan quiilhui:

—Tohueyiteco, techmacti quenicatza ma timotatajtica quej Juan quinmacti imomachtijcahua.

² Huan Jesús quinilhui:

—Quema annotatajtíaj ica Toteco Dios, xiquilhuica:

Toteco Totata, ta cati tiitztoc nepa ilhuicac.

Nochi masehualme ma mitzhueyichihuaca*.

Xihuala xitanahuatiqiqui nica.

Nochi masehualme ma quichihuaca cati ta tijnequi nica ipan ni taltipacti, quej nochí quichihuaj mopaquillis nepa ilhuicac.

³ Techmaca nopa tacualisti cati monequi mojmosta.

⁴ Techtapojpolhui totajtacolhua

quej nojquiya tiquintapojpolhuíaj cati techixpanoj.

Amo aquí xijcahuili ma techyoltilana para titajtacolchihuase.

Techmanahui ten yaya cati amo cuali.

⁵ Huan Jesús quinilhui nojquiya:

—Ximoilhuica sinta tajco yohual se ten amojuanti yas ichaj se amohuampo huan quiilhuis: ‘Nohuampo, techtanejti se ome pantzi, ⁶ pampa se

* 11:2 11:2 Ma quihueyichihuaca motoca.

nohuampo ajsico huan huejca huala, huan amo teno nijpiya para nijmacas.’
 7 Huan huelis mohuampo mitznanquilis ya caltactoc huan mitzilhuis: ‘Amo techcuatotoni. Ya nimocaltactoc, huan noconehua ya itztoque nohuaya ipan tapecti. Huan amo hueli nimijquehuas para nimitzmacas cati tijnequi.’
 8 Nimechilhúa, huelis yaya amo mijquehuas para mitzmacas cati tijtajanía pampa tiihuampo, pero sinta amo tijcahua tijtajanía cati tijnequi, yaya mijquehuas huan mitzmacas nochi cati tijtajanía san pampa quinequis ayecmo xijcuatotoni más.
 9 Huajca nimechilhúa, xijtajanica Toteco ten amechpolohua, huan yaya amechmacas. Xijtemoca cati amechpolohua huan anquipantise. Xijnotzaca Toteco huan yaya amechcaltapos.
 10 Pampa nochi cati tajtanij, quiselíaj. Huan nochi cati quitemohuaj cati quinpolohua, quipantíaj. Huan nochi cati quinqotzaj Toteco, yaya quincaltapohua huan quinmaca cati quitajaníaj.

11 “Huan amojuanti cati anquinpiyaj amoconehua, sinta se mocone mitztajtanis se pantzi para quicuas, amo tijmacas se tet. Huan sinta mocone mitztajtanis se michi para quicuas, amo tijmacas se cohuat.
 12 Huan sinta mocone mitztajtanis se tecstisi, amo tijmacas se colot ma quicua.
 13 Pampa masque antajacolchihuani, anquimatij anquinmacase amoconehua cati cuali. Huajca achi más Totata cati itztoc ilhuicac quimati quinmacas iconehua cati cuali, huan yaya quinmacas Toteco Itonal nochi cati quitajanise.”

Moilhuique para Jesús quipixqui se ajacat

(Mt. 12:22-30; Mr. 3:20-27)

14 Huan Jesús quiquixti se iajacayo Amocualtatcat ipan se tacat cati quichijtoya ma elí nonotzi. Huan quisqui nopa ajacat, huan nopa tacat camanaltic huan nochi nopa masehualme san quitachilijque.
 15 Pero se quij injuanti quijtojqe: “Amocualtatcat † yaya cati inintayacanca nochi ajacame quimaca chicahualisti ni Jesús ma quinquixti ajacame.”

16 Huan sequinoc masehualme quinequiyayaj quijejecose Jesús huan quitajtaníayaj ma quichihua se tanextili cati huala ten ilhuicac para ma quinnextili ichicahualis.
 17 Pero Jesús quimatqui inintalnamiqulilis huan quinilhui: “Sinta masehualme ipan se talí ica se tanahuatijquet motajcoxelohuaj, huajca amo hueli huejcahuas inintal. Sinta masehualme ipan se cali motajcoxelohuaj, amo hueli itztose san sejco.
 18 Huan sinta Amocualtatcat motehuis ica ajacame cati iaxcahua, ¿quenicatza huejcahuas itequiticayo? Anquijtohuaj niquinquixtia ajacame ica chicahualisti cati Amocualtatcat nechmaca.
 19 Pero sinta niquinquixtisquía ajacame ica ichicahualis, huajca ¿ica ajquiya ichicahualis quinquixtíaj ajacame nopa masehualme cati amechoquillíaj? Inijuanti nojquiya amechilhuisse para se huihuiyot cati ammoilhúaj.
 20 Pero xijmachilica, sinta yaya Toteco Dios cati nechmaca ichicahualis para niquinquixtis ajacame, huajca Toteco cati tanahuatía ipan iniyolo masehualme ya ajsico amohuaya.

21 “Sinta se tetica tacat quej Amocualtatcat quiyiya teposti huan cuali quimocuitahuía ichaj, huajca nochi cati quiyiya eltoc temachti imaco,
 22 hasta quema hualas se quej na cati más tetic que ya huan quitanis. Huajca quena, huelis quicuilis nochi itepos ipan cati motemachía, huan huelis quihucas nochi cati iaxca para quixelos ica sequinoc.

23 “Se cati amo quinequi techpalehuis, yaya nocalancaitaca. Huan se cati amo quinsentilía masehualme campa na, quinsimana

† 11:15 11:15 Nopa masehualme quitocaxtijque Amocualtatcat, Beelzebú.

Ajacame huelis tacuepilise

(Mt. 12:43-45)

²⁴ “Quema quisa se ajacat ipan se masehuali, nemi ipan huactoc tali quite-mojtinemi canque mosiyajquetzas, huan sinta amo teno quipantis, moil-huis: ‘Nitacuepilis nochaj ipan nopa masehuali campa niitztoya.’ ²⁵ Huan quema tacuepilis, quipantis iyolo nopa masehuali eltoc quej se cali cati tachpanti huan cati quipiya nochi cuali tacualtalili. ²⁶ Huajca nopa ajacat yas huan quinhucas chicome ajacame cati más fierojtique que ya huan nochi nopa ajacame itztotij ipan nopa masehuali. Huan nopa masehuali mocahuas más fiero que achtohuiya.”

Ajquiya quipantía cati cuali

²⁷ Huan quema Jesús tamachtiyaya ya ni, camanaltic se sihuat cati itztoya ica nopa miyaqui masehualme, huan chicahuac quiiyto: “Cuali quipanti nopa sihuat cati mitztacatilti huan mitzchichiti.

—Cuali quipanti nopa sihuat cati mitztacatilti huan mitzchichiti.

²⁸ Pero Jesús quinanquili:

—Más cuali quipantíaj nopa masehualme cati quicaquij icamanal Toteco huan quineltoquiliáj.

Amo cuajcualme quinejque se tanextili

(Mt. 12:38-42; Mr. 8:12)

²⁹ Huan nopa masehualme pejque momiyaquilíaj huan Jesús quinilhui:

—Anmasehualme cati ama anitztoque amo ancuajcualme. Anquinequij ma nimechchiuhili se tanextili para nimechnextilis ajquiya na. Pero amo nijchihuas. San Jonás eltoc quej se tanextili para amojuanti. ³⁰ Pampa quej Jonás elqui se tanextili para masehualme ipan altepet Nínive huejcajquiya, na cati niMocuetqui Masehuali nieltoc se tanextili para anmasehualme cati ama anitztoque. ³¹ Ipan nopa tonali quema Toteco tetajtolsencahuas, nopa sihua tanahuatijquet ten Sur † moyolcuís huan amechtelhuis cati ama anitztoque, pampa yaya hualajqui tahuel huejca quema itztoya ipan taltipacti pampa quinejqui quicaquis italnamijsa camanal Tanahuatijquet Salomón. Pero na más nihueyi que Salomón huan amo antechchiuhilíaj cuenta. ³² Huan quema Toteco tetajtolsencahuas, masehualme cati huejcajquiya itztoyaj ipan altepet Nínive moyolcuise huan amechtatelhuse, pampa injuanti moyolpataque quema Jonás quincamanalhui ten icamanal Toteco, pero na más nihueyi que Jonás huan amo antechcaquij.

Nopa taahuili ipan totacayo

(Mt. 5:15; 6:22-23)

³³ “Amo aquí quitatía se taahuili huan quitatía campa amo nesi. Amo aquí quitalis cajo tzinta. Sinta se masehuali quitatía se taahuili, quitatía ipan se taahuil quetzali para nochi cati calaquise ma quuitaca. ³⁴ Moixteyol eltoc quej itaahuilo motacayo. Sinta cuali moixteyol, hueli calaqui taahuili ipan moyolo. Pero sinta amo cuali moixteyol, tiitztoc quej se cati tzactoc iyolo. Amo hueli tijmachilía nocamanal huan motalnamiqulís mocahua ipan tzintayohuilot. ³⁵ Huajca ximotachili cati tijchihua ica nopa taahuili cati tijiya pampa tijcactoc cati melahuac. Xijcahua ma mitzyolpata para amo sempa titacuepilis ipan tzintayohuilot. ³⁶ Pero sinta nelía senquisa tijselía nocamanal, huajca nochi motacayo huan motalnamiqulís quipiyas taahuili huan amo oncas tzintayohuilot ipan ta. Quena, elis quej se taahuili cati mitztaahuilijtos ipan motalnamiqulís.”

† 11:31 11:31 Sabá.

*Jesús quintelhui fariseos**(Mt. 23:1-36; Mr. 12:38-40; Lc. 20:45-47)*

³⁷ Huan quema Jesús tanqui tamachtía, itztoya nepa se fariseo cati quinotzqui ma yahui tacuati ichaj. Huan Jesús yajqui huan mosehui campa mesa. ³⁸ Huan nopa fariseo quitachili quema Jesús amo momajtequi miyac huela quej quijitoque itanahuatil Moisés ma quichihuaca masehualme.

³⁹ Pero Tohueyiteco quiihuhui:

—Anfariseos anquipajpacaj amotacayo, pero amoyolo amo anquipajpacaj. Ipan amoyolo san anmoyolilhuíaj ten tachtequisti huan cati amo cuali hueli anquichihuase. ⁴⁰ ¡Anhuihuitique! Toteco quichijqui amotacayo, pero nojquiya quichijqui amoyolo. ⁴¹ Xijchijtinemica cati cuali ica nochi amoyolo huan amoyolo elis senquisa tapajpactic.

⁴² “¡Anteicneltique anfariseos! Toteco tahuel amechtatzacuiltis. Anquimacaj Toteco majtacti por ciento ten nochi cati anquipiyaj hasta nopa tacualpajyot cati más pilquentzi ipan amoxochimil, pero amo anquichihuaj cati xitahuac huan amo anquichihuilíaj cuenta quenicatza Toteco quinicnelía masehualme. Ni tamanti achi más ipati iixpa Toteco. Huajca monequi anquichihuase cati más ipati huan nojquiya amo anquicahuase anquimacase Toteco se majtacti por ciento.

⁴³ “¡Anteicneltique anfariseos! Toteco tahuel amechtatzacuiltis. Amehpactía anmosehuise campa cuali siyaj campa onca más tatepanitacayot ipan tiopamit. Amehpactía para masehualme ma amechtajpaloca ica cuali ipan tianquis.

⁴⁴ “¡Anteicneltique anfariseos huan antamachtiani ten itanahuatil Moisés! Toteco tahuel amechtatzacuiltis. Anitztoque quej nopa mijca ostome cati amo nesi sinta mijca ostot huan yeca masehualme nemij ipani huan amo quimatij sinta ipan moquejquetzaj.”

⁴⁵ Huan camanaltic se ten nopa tacame cati tamachtíaj taya quinequij quijitose itanahuatil Moisés huan quiihuhui Jesús:

—Tamachtijquet, quema tiqintelhuía fariseos, nojquiya techixcohuía tojuanti cati titamachtíaj taya quijitosnequij itanahuatil Moisés.

⁴⁶ Huan Jesús quinanquili:

—Nojquiya anteicneltique cati antamachtíaj taya quijitosnequij itanahuatil Moisés. Toteco tahuel amechtatzacuiltis. Antemacaj miyac tanahuatilme cati anquijtohuaj monequi nochi quitoquilise hasta amo aqui hueli quitamitoquilis. Eltoc quej anquinmamaltíaj masehualme cati etic, pero amo anquinequij anquinpalehuise ica yon se amomacpil.

⁴⁷ “¡Anteicneltique! Toteco tahuel amechtatzacuiltis. Anquinchihuilíaj mijca calme para itajtolpanextijcahua Toteco para sequinoc ma moilhuica anquintepanitaj, pero amojuanti amotatahua cati quinmictijque, ⁴⁸ huan anpaquij ica cati quichijque. Quena, amohuejcapan tatahua quinmictijque huan ama anquinchihuilíaj inimijca calhua.

⁴⁹ “Yeca Toteco cati quipiya nochi talnamiquilisti huejcajquiya quijito ten amojuanti: ‘Niquintitanilis notajtolpanextijcahua, huan notayolmelajcahua huan sequij quinmictise, huan sequinoc quintajiyohuiltise.’ ⁵⁰ Huan yeca Toteco amechita anmasehualme cati ama anitztoque huan quijitohua para anquihuicaj tajtacoli por nochi inieso nopa tajtolpanextiani cati masehualme quinmictijque hasta quema pejqui taltipacti. ⁵¹ Quena, san sejo anquihuicaj tajtacoli por nochi cati temictijtoque ten huejcajquiya quema mijqui Abel huan hasta amanoc quema masehualme quimictijque

Zacarías tatajco ten nopa taixpamit huan nopa hueyi tiopa. Nochi ni tajtacoli nimechilhuía anquihiucaj cati ama anitztoque.

⁵² “¡Anteicneltique cati antamachtiaj taya quijitosnequij itanahuatil Moisés! Toteco tahuel amechtatzacuiltis. Anquintzacuilíaj cati quinequij quimatise italnamiqulis Toteco. Amo anquimachilíaj italnamiqulis huan amo anquincahuilíaj ma quimachilica sequinoc cati quinequij quimachilise.”

⁵³ Huan quema Jesús tanqui quijito ya ni, nopa fariseos huan tamachtiani ten itanahuatil Moisés tahuel cualanque ihuaya huan pejque quitatzintoquílíaj miyac tamanti cati nelohui. ⁵⁴ Quinequiyayaj ma quijito se tenijqui cati ica huelis quitatelhuise.

12

Ma amo tijpiyaca ome toxayac

(Mt. 10:26-27)

¹ Quema Jesús quijtohuayaya nochi ni camanali, mosentilijtoyaj miyac miles ten masehualme huan tahuel mocuatetzopayayaj. Huan Jesús quincamanalhui imomachtijcagua iniixpa nopa miyaqui masehualme huan quinilhui: “Ximotachilica para amo anquiselise inintasonejcayo fariseos pampa injuanti san quipiyaj ome inixayac huan huelis amechchiuualtise nojquiya anquipiyase ome amoxayac. ² Nochi cati masehualme quichihuaaj ixtacatzí ama, teipa monextis. Huan nochi cati ama amo nesi, teipa nochi quimatise. ³ Huan nochi cati anquijtojtoque quema tayohua, nochi quicaquise tonaya. Huan cati ixtacatzí anmoilhuijtoque ipan amocalijtic, teipa masehualme moquetzase inintzonixco calme huan chichahuac tayolmelahuase.

Amo xiquinimacastica masehualme

(Mt. 10:26-31)

⁴ “Nohuampoyohua ya ni nimechilhuía. Amo xiquinimacastica masehualme. Injuanti san hueli amechmictise, pero amo teno más hueli amechchiuilise. ⁵ Pero nimechilhuis ajquiya monequi xiquimacastica. Xiquimacastica Toteco, pampa yaya huelis amechmictis huan nojquiya quipiya tanahuatili para quifitanis amoalma nepa micta. Quena, nimechilhuía, yaya cati monequi anquimacacise.

⁶ “Masque quinamacaj macuilti piltototzitzí para ome centavos, Toteco amo quielcagua yon se ten injuanti. ⁷ Huan ica amojuanti más miyac Toteco amechmocuítahuía hasta quimati quesqui amotzoncal anquipiyaj. Huajca amo ximomajmatica. Tahuel más amopati iixpa Toteco que miyac totome.

Ajquiya itztoque iaxcagua Jesucristo

(Mt. 10:32-33; 12:32; 10:19-20)

⁸ “Huan nimechilhuía, nochi masehualme cati nechneltocej huan tepohuilíaj para nechneltocej, na cati niMocuetqui Masehuali, niquinilhuis iilhucac eicagua Toteco para nopa masehualme noaxcagua. ⁹ Pero sinta se teilhuía para amo nechneltoce, huajca na nojquiya niquinilhuis iilhucac ehuaní Toteco para yaya amo noaxca.

¹⁰ “Sinta se nechtaijilhua na cati niMocuetqui Masehuali ica cati amo cuali, Toteco huelis quitapojpolhuis. Pero sinta se quitaijilhuis Itonal Toteco, amo quema oncas tapojpolhuili.

¹¹ “Huan quema masehualme amechhuicase iniixpa tayacanani ipan toisraelita tiopahua huan iniixpa sequinoc tanahuatiani huan tequichihuani, amo ximotequipachoca taya anquijtose huan quenecatza anmomanahuise,

12 pampa Itonal Toteco amechnextilis ipan nopa talojtzi taya monequi anquijtose.”

Mahuilili para se masehuali moricojchihuas

13 Huan se ten nopa miyaqui masehualme quihui Jesús:

—Tamachtijquet, xiquihui noicni ma nechmaca cati noaxca ten cati totata techahuilijetoc.

14 Huan Jesús quihui:

—Tate, amo aqui nechtequimacatoc para nielis se juez campa amojuanti para nijtajcoxelos cati anquipiyaj.

15 Huan teipa Jesús quinilhui nopa miyaqui masehualme:

—Ximomocuitahuica para amo tahuel xijnequica tamanti cati onca, pampa amo aqui quipantis nemilisti cati yancuic pampa quipiya miyac tamanti para iaxca.

16 Huan Jesús quinilhui se tatenpohualisti: “Ital se tacat cati tominpixqui nelnelia temacac miyac itajca. 17 Huan nopa tacat moilhui: ‘¿Taya nijchihuas?, pampa amo nijpiya más cuacalme para ipan nicajocuis ni pixquisti.’ 18 Huan teipa quijto: ‘Nijmati taya nijchihuas. Niqinsosolos nopilcuacalhua huan nijchihuas cati más huejhueyi huan ipan nicajocuis nochi ni pixquisti huan nochi cati nijpiya.’ 19 Huan teipa nimoyolihuis: ‘Nijpiya miyac tomi huan tacualisti cati nechaxilis para miyac xihuit, huajca san nimosiyajquetzas, huan nitacuas huan nitais quej na nijnequis huan nitamahuisos.’ Quej nopa moilhuyaya nopa tacat cati tominpixqui. 20 Pero Toteco Dios quihui: ‘Tacat ta tihuhuitic. Ama ni yohuali monequi timiquis, huan ¿ajquiya quiselis nochi cati timoajocuilijtoc?’ 21 Huihuitique masehualme cati quiajocuij miyac tamanti para iniaxca ipan ni taltipacti, pero mocaahuaj teicneltziti iixpa Toteco.”

Toteco quinmocuitahuia iconehua

(Mt. 6:25-34)

22 Huan Jesús quinilhui imomachtijcahua: “Yeca nimechilhuia, amo ximotequipachoca ica cati amechmonequilía. Amo ximocuesoca ten taya anquicuase huan anquiise huan ica taya anmoyoyontise. 23 Toteco amechmacatoc nemilisti huan ya nopa más ipati huan amechmacas tacualisti nojquiya. Yaya amechmacatoc amotacayo cati más ipati huan amechmacas nojquiya cati ica anmoyoyontise. 24 Xiquintachilica totome. Amo momiltíaj, huan amo pixcaj huan amo quipiyaj inincuacalhua para ipan quitemase inintacualis, pero Toteco quintamaca. Huan Toteco nojquiya amechtamacas pampa tahuel más amopati iixpa que totome. 25 San tapic para anmotequipachohuaj. Sinta anmotequipachohuaj pampa amo anhuejcapantique, ¿huelis anmoscaltise seyoc ome mistit san pampa miyac anmotequipachohuaj? Amo huelis. 26 Huan sinta amo anhuelij anquichihuaj se tamanti pilquentzi, ¿para ten anmotequipachohuaj ica sequinoc tamanti?

27 “Xijtachilica nopa xochit cati moscaltía campa hueli. Amo tequitij huan amo tajtzomaj, pero nimechilhuia, nopa hueyi Tanahuatijquet Salomón ica nochi iricojyo amo quipixqui iyejyejca quej se xochit. 28 Toteco quinmacatoc xochime iniyejyejca masque san yoltoque se talojtzi, huan quema tonilis pilinise huan quintatise. Huan más miyac Toteco amechyoyontis masque pilquentzi anquineltoaj. 29 Huajca amo ximocuesoca ten taya anquicuase huan taya anquiise, 30 pampa quej nopa motequipachohuaj masehualme cati amo quixmatij Toteco, pero Toteco amo Tata quimati monequi nochi ni

tamanti para anmopanoltise. ³¹ Achtohui xijtemoca para ancalaquise ipan itanahuatilis Toteco huan yaya amechmacas nochi ni tamanti cati monequi.

Cati ipati nepa ilhuicac

(Mt. 6:19-21)

³² “Amo ximomajmatica masque amo anmiyaqui cati antechnehtocaj na, pampa ica paquilsti Toteco amechcalaquise campa yaya tanahuatía. ³³ Huajca xijnamacaca cati amoaxca huan xiquinmajmacaca teicneltziti para anquijajocuisse cati ipati nepa ilhuicac. Cati anquijajocuisse nepa amo sosolihuis huan amo quicuase mejtolime, yon tachtequini amo huelis quihuicase. ³⁴ Huan sinta anquimatij cati yejyetzti amechchiya ipan ilhuicac, huajca ipan amoyolo anquinequise anitztose nepa.

Ximocualtalijtoaca

³⁵ “Xiitztoca ximocualtalijtoaca huan xijpixtoaca amotaahuilhua tatatoque para quema nihualas masque niasjis tonaya o tayohua. ³⁶ Xiitztoca quej tetequipanohuani cati quichiyaj ininteco ma tacuepili ten itacualis ten nenamictili. Inijuanti amo cochij para huelis quicaltapose nimantzi quema yaya ajsis huan quinnojnnotzas. Huan quej nopa nijnequi ximocualtalijtoaca huan xitachixtoaca para quema nihualas. ³⁷ Cuali quipantise nopa tetequipanohuani cati tachixtoque quema tacuepilis ininteco. Nelía nimechilhúa, ininteco moyoyontis quej se tetequipanojquet huan quinsehuis campa mesa huan quintamacas. ³⁸ Huan masque ininteco tacuepilis tajcoyohual o ya tanestihuala, sinta nopa tetequipanohuani tachixtoque, cuali ininpantis. ³⁹ Anquimatij sinta se masehuali quimatisquía ipan taya hora ajsisquía se tachtejquet, quichixtosquía huan amo quicahuilisque quía ma calaqui para tachtequis ipan ichaj. ⁴⁰ Huajca amojuanti nojquiya ximocualtalijtoaca pampa na cati niMocuetqui Masehuali nihualas ipan se hora quema amo antechchiyaj.”

Nopa tetequipanojquet cati temachtí

(Mt. 24:45-51)

⁴¹ Huan Pedro quitatzintzoquili Jesús:

—Tohueyiteco, ¿techilhujtoc ni tatenpohualisti para tojuanti timomomachtijcahua ma timitzchiyaca o para nochi ni masehualme nojquiya ma mitzchiyaca?

⁴² Huan Tohueyiteco quilhui: “Nijcamanalhuía cati hueli tayacanca tequipanojquet cati temachtí huan talnamiqui cati se caltanahuatijquet quitali para quinmocuitahuis itequipanojcahua huan quintamacas cati itztoque ipan ichaj. ⁴³ Cuali ipantis nopa tequipanojquet sinta quema iteco hualas, quipantis ya quitamichijtoc nochi cati quilhui. ⁴⁴ Nimechilhúa iteco quitequitális ma quimocuitahuis hasta nochi cati iaxca. ⁴⁵ Pero sinta se tayacanquet quijtohua: ‘Noteco huejcahuas.’ Huan sinta pehuas quihuitequis nopa sequinoc tetequipanohuani, huan pehuas neltacuas huan neltais huan ihuintis, ⁴⁶ huajca iteco nimantzi hualas ipan se tonali quema nopa tayacanca tetequipanojquet amo quichiya, huan ipan se hora quema amo quimati. Huan chicahuac quitatzacuiltis itayacanca tequipanojca huan quitaahuelcahuas campa quinamiqui para cati amo taneltoaj.

⁴⁷ “Huan se tayacanca tetequipanojquet cati quimatqui cati iteco quinequiyaya huan amo mocualtali huan amo quineltoquili, iteco quihuitequis nelchicahuac. ⁴⁸ Pero seyoc tetequipanojquet cati amo quimatqui cati iteco quinequiyaya, huan quichijqui cati amo cuali, iteco amo más chicahuac quihuitequis. Pampa nochi cati Toteco miyac

quintamajmaca, quintajtania ma quichihuaca miyac cati cuali. Huan sinta Toteco quicahua miyac tequit imaco se itequipanojca, miyac tequit monequi quichihuas.

Jesús quinxejxehua masehualme

(Mt. 10:34-36)

⁴⁹ “Nihualajtoc ipan ni taltipacti para nijlemenaltis se tit. Huan nijneq-uissquia ya tantosquia notequi. ⁵⁰ Nijpiya se taijyohuulisti cati monequi niquijyohuis huan nitaijyohuis hasta panos. ⁵¹ Amo ximoilhuica nihualajtoc para ma onca tasehuulisti ipan ni taltipacti. ¡Amo neli! Por na, moxexelose masehualme. ⁵² Para ama huan teipa campa itztoque macuilti masehualme ipan se cali, moxexelose. Eyi mocualanise ica nopa ome, huan nopa ome ica nopa eyi. ⁵³ Moxexelose tetajme ica inintelpocahua huan tename ica iniichpocahua. Yexme moxexelose ica iniyexnahua, huan yexname ica iniyexhua.”

Tanextili ten ni tonali

(Mt. 16:1-4; Mr. 8:11-13)

⁵⁴ Huan Jesús nojquiya quinilhui nopa miyaqui masehualme: “Quema anquiiitaj se mixti cati tejcos campa temo tonati, huajca nimantzi anquiiitohuaj: ‘Huetzis at’, huan quej nopa eli. ⁵⁵ Huan quema anquimachilíaj huala se ajacat ten sur, huajca anquiiitohuaj: ‘Nelia tatotonyas ama.’ Huan quej nopa eli. ⁵⁶ Amojuanti san anquiiiyaj ome amoxayac. Anquimatij taya quiiijosnequi cati nesi ipan taltipacti huan ilhuicacti, huajca ¿para ten amo anquimachilíaj taya quinequi quiiijos cati pano ipan ni tonali?”

Ximoyoltali ica mocualancaitaca

(Mt. 5:25-26)

⁵⁷ “Huan, ¿para ten amo anquiiitaj cati xitahuac amoselti huan xijchihuaca? ⁵⁸ Quema mocualancaitaca mitztelhuisnequi ica se tequitiquet huan noja anitztoque ipan ojti para anajsitij, achi cuali xijcamanalhui para anquisenc-ahuase nopa tamanti san amojuanti. Pampa sinta amo, yaya mitzhuicas iixpa tequitiquet huan nopa tequitiquet mitztemactilis ica policías, huan nopa policías mitztalise ipan tatzacti. ⁵⁹ Huan sinta quej nopa panos, amo tiquisas hasta titaxtuahas sesen centavo.”

13

Monequi masehualme moyolpatase

¹ Sequij tacame cati itztoyaj nozona ipan nopa tonali quiihuijque Jesús para Pilato quinmictijtoya sequij Galilea ehuani quema nopa Galilea ehuani quinmictiyayaj tapiyalme para tacajcualisti. Huan yeca inieso momanelo ica inieso nopa tacajcualisti.

² Huan Jesús quinnanquili: “¿Anmoilhuíaj nopa Galilea ehuani quipixtoyaj más tajtacoli que sequinoc Galilea ehuani pampa quej nopa ininpantic?”

³ Nimechilhuía, amo. Amo más tajtacoli quipixtoyaj, huan amojuanti nojquiya anpolihuse sinta amo anmoyolpataj. ⁴ Huan quema nopa huejcapantic cali ipan Siloé huetzqui ipan majtacti huan chicueyi tacame huan inijuanti mijque, huelis anmoilhuíaj inijuanti quipixtoyaj más tajtacoli que nochi sequinoc ipan altepet Jerusalén. ⁵ Nimechilhuía, amo. Amo más tajtacoli quipixtoyaj que sequinoc, huan nochi amojuanti nojquiya anpolihuse, sinta amo anmoyolpatase.”

Se cuahuit cati amo temacac itajca

⁶ Huan Jesús pejqui quinilhuía ni tatenpohualisti nojquiya: “Se tacat quipixtoya se higuera cuahuit cati quitojqúi ipan ixocomeca mil huan se tonali quitemoco itajca, pero amo teno quipixqui. ⁷ Huan quiilhui cati quimocuitahuía ixocomecamil: ‘Ya quiپیای eyi xihuit nijhualtemohua higos ipan ni cuahuit, huan yon se amo quiپیای, huajca xijtzontequi pampa san tapic ijcatoc.’ ⁸ Huan cati quimocuitahuiyaya ixocomecamil quinanquili: ‘Noteco, xijcahua para ni xihuit huan nijtzinxahuas huan nijtalilis yamanic tali, ⁹ huan sinta quiپیای itajca ipan se xihuit, cualtitoc, huan sinta amo, huajca quena, tijtzontequise.’”

Jesús quichicajqui se sihuat cati cuitapanponpentic

¹⁰ Huan Jesús tamachtiyaya ipan se israelita tiopamit ipan sábado nopa tonali para mosiyajquetzase israelitame, ¹¹ huan hualajqui se sihuat cati quipixtoya se ajacat para majtacti huan chicueyi xihuit cati quicuitapanponponchijtoya huan ayecmo huelqui momelahuac. ¹² Huan quema Jesús quiitac, quinojnotzqui huan quiilhui:

—Nane, nimitzquixtilía mococolis.

¹³ Huan Jesús quitallili imax huan nimantzi nopa sihuat huelqui mome-lajqui huan pejqui quihueyichihua Toteco. ¹⁴ Huan nelía cualanqui nopa tiopan tayacanquet pampa Jesús quichicajtoya ipan sábado, nopa tonali para israelitame ma mosiyajquetzaca. Huajca nopa tayacanquet quinilhui nopa miyaqui masehualme:

—Onca chicuase tonali ipan se samano para ma titequitica, huajca xihualaca ipan seyoc tonali sinta anquinequij para Jesús ma amechchicahua. Ayecmo xihualaca ipan sábado.

¹⁵ Huan Tohueyiteco Jesús quinanquili:

—Tijپیای ome moxayac. Sesen amojuanti anquitojtomaj amohuacax o amoburro quema ilpitoc ipan sábado, huan anquihuicaj ma atiti. ¹⁶ Para majtacti huan chicueyi xihuit Amocualtacat quipixtoya ilpitoc ni sihuat cati nojquiya se iteipan ixhui tohuejcapan tata Abraham. ¿Amo tiquita cuali nojquiya nijtojtomaj ten icocolis ipan sábado?

¹⁷ Huan quema Jesús quiilhui ya ni, nochi icualancaitacahua mopina-jque iniixpa nopa miyaqui masehualme, pero nopa masehualme nelía paquiyayaj ica nopa huejhueyi tamanti cati quichihuayaya.

Nopa xinachtí ten mostaza

(Mt. 13:31-32; Mr. 4:30-32)

¹⁸ Huan Jesús quiijto: “¿Quenicatza huelis nimechilhuis ten quenicatza eltoc ipan itanahuatilis Toteco? ¹⁹ Eltoc quej se ixinacho mostaza cati se tacat quitoca. Huan nopa xinachtí ixhuas huan moscaltis hasta mochihuas se cuahuit campa totome quichihuase inintepasol ipan imacuayo.”

Tatenpohullisti ten tasonejcyot

(Mt. 13:33)

²⁰ Nojquiya Jesús quiijto: “¿Quenicatza huelis nimechilhuis para momiyaquilise masehualme cati quicahuillaj Toteco ma tanahuati ipan iniyolo? ²¹ Inijuanti momiyaquilise quej mosonehua pantzi quema se sihuat quitallía se quentzi tasonejcyot ipan eyi kilos harina, huan teipa nopa tasonejcyot quisonehuas nochi nopa pantzi.”

Nopa caltemit pitzactzi

(Mt. 7:13-14, 21-23)

²² Jesús noja nejnemiyaya ipan ojti hasta altepet Jerusalén huan quinpan-otiyajqui altepeme huan pilaltepetz huan tamachtijyahuyaya. ²³ Huan se quilhui:

—Tohueyiteco, ¿nelquentzi masehualme quinmaquixtis Toteco Dios ten inintajtacolhua?

Huan Jesús quinanquili:

²⁴ —Xijchihuaca campeca ancalaquise ipan nopa pitzactzi caltemit cati yahui ilhuicac, pampa miyaqui masehualme quinequise calaquise nozona huan amo huelise. ²⁵ Pampa ajsis se tonali quema motzacuas caltemit. Huan nielis quej se tetaj cati quitzacua caltemit ipan ichaj ica tayohua huan ayecmo aqui quicahuilis ma calaqui. Huan anmoquetzase calteno, huan antechnotzase na huan antechilhui: ‘Toteco, techcaltapo’, huan na nimechnanquilis: ‘¡Amo! Amo nimechixmati, yon amo nijmati canque anehuani.’ ²⁶ Huan antechilhui: ‘Titacuajque huan tiatique mohuaya, huan titamachtí ipan toaltepe’, ²⁷ pero na nimechilhuis: ‘Amo nimechixmati, yon amo nijmati canque anehuani. Techtalcahuica amojuanti cati anquichihuaq cati amo cuali.’ ²⁸ Huan anchocase huan antanhuehuechocase ica tatzacuiltli huan calijtic campa Toteco tanahuatía anquilitase Abraham, Isaac, Jacob huan nochi tajtolpanextiani, huan anmocaquise calteno. ²⁹ Huan masehualme hualase campa quisa tonati huan campa oncalaqui, huan hualase ten norte huan ten sur huan mosehuise campa mesa campa tanahuatía Toteco. ³⁰ Huan sequij cati ama teicneltique, Toteco quinhueyitalis ipan nopa tonal, huan sequij cati tayacanaj ama, Toteco quinechcapantalis.

Jesús quintapojpolhuijtosquía Jerusalén ehuaní

(Mt. 23:37-39)

³¹ Huan ipan nopa talojtzi hualajque sequij fariseos huan quilhuique Jesús:

—Xiquisa nica huan xiya sinta tijnequi tiitztos, pampa Tanahuatijquet Herodes Antipas quinequi mitzmictis.

³² Huan Jesús quinilhui:

—Xiquilhuitij nopa cayochi Herodes para ama huan mosta nijsenhuiquilis niquinquixtis iajacahua Amocualtacat huan niqinchicahuas masehualme, huan huicta nijtamiltis notequi. ³³ Huajca ama, mosta huan huicta niitztos ipan ojti para niajsis Jerusalén, pampa san ipan altepet Jerusalén quinmictíaj cati itajtolpanextijcahua Toteco.

³⁴ “¡Anteicneltique anJerusalén ehuaní! Anquinmictíaj itajtolpanextijcahua Toteco, huan anquintepachohuaj injuanti cati yaya amechtitanilijtoc. Miyac huelta nijnequiyaya nimechsentilis ica amoconehua para nimechnajnahuas quej se tenanpiyo quinsentilía ipilconeuhua ieltapaltzala, pero amo anquinejque. ³⁵ Xiquita, Toteco Dios ayecmo mocahua ipan amotiopa, huan nimechyolmelahua amo antechitase sempa hasta ajsis tonali quema antechilhui: ‘Ma Toteco Dios mitztiochihua ta cati tihuala ipan itoca*.’”

14

Jesús quichicajqui se tacat cati tejtemiyaya

¹ Huan se sábadu quema israelitame mosiyajquetzaj, Jesús yajqui tacuato ichaj se tayacanca fariseo, huan sequinoc fariseos quitachiliyayaj talojtitzti.

² Huan itztoya nepa iixpa Jesús se tacat cati tejtemiyaya. ³ Huan Jesús quintatzintoquili nopa tamachtiani ten itanahuatil Moisés huan nopa fariseos:

* 13:35 13:35 Ica itequiticayo.

—¿Itanahuatilhua Moisés techcahuilíaj ma tiquinchicahuaca masehualme ipan nopa tonali para ma timosiyajquetzaca o ma amo tiquinchicahuaca?

⁴Huan injuanti amo molinjique. Huan Jesús quimaitzqui nopa tacat huan quichicajqui, huan quilhui ma yahui. ⁵Huan teipa Jesús quinilhui:

—Sinta amoburro o amotoro cati quimati tapoxonía huetzisqueía ipan se pozo, ¿amo anquiuxtisquíaj nimantzi masque ipan sábado?

⁶Huan injuanti amo teno quinanquilijque.

Tanotzalme ipan se nenamictili

⁷Huan Jesús quiitac nopa masehualme quitapejpeniyayaj nopa siyas cati más quipixqui tatepanitacayot campa mesas, huajca pejqui quinpohuíla se tatenpohualisti ten se tacat cati quinnotztoya masehualme ipan se tacualisti. Quinilhui:

⁸—Quema se amechnotzas ipan se tacualisti ten nenamictili, amo xijtemoca nopa siyaj campa quipiya más tatepanitacayot pampa huelis teipa ajsis seyoc tanotzali cati achi más monequi quitepanitase que ta. ⁹Huan huelis monequis para yaya cati amechnotzoc hualas campá ta huan mitzilhuis: ‘Xijmaca mosiyaj ni tacat cati ajsico.’ Huan nelía tipinahuas huan monequis tijtemoti ten hueli siyaj para ipan timosehuis. ¹⁰Quema se amechnotza xiyaca ipan se tacualisti, achi cuali ximosehuica campa amo más cuali huan teipa huélis hualas yaya cati mitznotzqui huan mitzilhuis: ‘Nohuampo, ximosehuíqui ipan nopa siya cati achi cuali.’ Huan quej nopa mitzhueyitalis inhiixa nochi cati mosehuíaj campa mesa. ¹¹Pampa masehualme cati mohueyimatij ica iniselti ama, teipa Toteco quinpinahualtis. Huan cati moechcapantalíaj ama, Toteco teipa quinhueyitalis.

¹²Huan nojquiya Jesús quilhui nopa tacat cati quinnotztoya para ma tacuaca ichaj:

—Quema titemaca se tacualisti, amo xiquinnotza mohuampoyohua, o moicnihua, o mohuicalhua, o mocalnechcahua cati más quipiyaj tomi, pampa injuanti teipa mitznotzase ipan se tacualisti para mitzcuepilise.

¹³Pero quema tijpiya se tacualisti, xiquinnotza cati teicneltziti huan cati metzcototique huan cati metzhuilpachtique huan cati popoyotziti,

¹⁴pampa injuanti amo hueli mitzcuepilise. Huan Toteco mitztiochihuas huan mitztaxtahuis quema moyolcuise nochi masehualme cati itztoque xitahuaque iixpa.

Nopa hueyi tacualisti

(Mt. 22:1-10)

¹⁵Huan se tacat cati mosehuiyaya campa mesa ihuaya Jesús quicajqui cati quiijto huan quilhui:

—Cuali ipantis cati mosehuis huan tacuas nepa campa Toteco Dios tanahuatía.

¹⁶Huan Jesús quilhui:

—Se tacat temacayaya se hueyi tacualisti huan quinnotzqui miyac ma tacuatij. ¹⁷Huan quema ya cualtitoya nochi tacualisti, quititanqui itequipanojca ma yahui ma quinilhuiti nopa tanotzalme: ‘Xihualaca pampa nochi eltojca.’ ¹⁸Huan nochi nopa tanotzalme pejque motechtíaj. Nopa cati achtohui quilhui nopa tetequipanojquet: ‘Nijcojqui se tali, huan monequi niyas níquitati. Techtapojpolhui, pero amo huelis niyas.’ ¹⁹Huan seyoc quilhui: ‘Niquincojtoc macuili pares torojme para tapoxonise, huan monequi niyas níquinyejyecoti sinta tequitij cuali. Techtapojpolhui, pero amo

huelis niyas campa nopa tacualisti.’ ²⁰ Huan seyoc quiilhui: ‘Nel amanoc nimosihuahti huan yeca amo huelis niyas.’

²¹ “Huan nopa tetequipanojquet tacuepili huan quiyolmelajqui iteco nochi cati quiijtojtoyaj. Huan nopa tetaj cualanqui pampa amo aqii hualajqui. Huajca quiilhui itequipanojca: ‘Nimantzi xiya tianquis huan xiya ipan nochi callejtipa ipan toaltepe, huan xiquinhualica nochi cati teicneltzitzitzi, huan cati metzcototique, huan cati metzhuilpachtique huan cati popoyotzitzitzi para ma hualaca ipan totacualis.’ ²² Huan nopa tetequipanojquet yajqui huan teipa tacuepili, huan quiilhui: ‘Noteco, ya nijchijqui cati techilhui huan miyac niquinhualicac, pero noja mocahua siyas.’ ²³ Huan nopa tacat quiilhui itequipanojca: ‘Xiya ipan nopa icxiojti huan ipan mila huan xiquinfuerzajhuiti masehualme ma hualaca para ma temi nochaj. ²⁴ Huan nimitzilhuía, yon se inijuanti cati achtohui niquinnotzqui amo quiyecos notacualis.’”

Taijyohuise cati quitoquilise Cristo

(Mt. 10:37-39)

²⁵ Huan tahuel miyaqui masehualme nejnemiyayaj ihuaya Jesús ipan ojti, huan yaya moicancuetqui huan quinilhui: ²⁶ “Sinta se quinequi nechtoquilis, monequi nechicnelis tahuel miyac huan amo quej quiicnelía itata, huan inana, huan isihua, huan iconehua, huan iicnihua. Quena, monequi tahuel nechicnelis más miyac quej ya moicnelía, pampa sinta amo quej nopa nechicnelía, amo huelis elis nomomachtijca. ²⁷ Se nomomachtijca monequi elis quej se masehuali cati quihuicatiya ícuamapel para ipan miquis. Sinta amo quej nopa nechtoquilia mocualtalijtoc para miquis pampa nechneltoaca na, amo huelis elis nomomachtijca.

²⁸ “Sinta se ten amojuanti quinequi quichihuas se hueyi cali, huajca achtohui monequi mosehuis huan quipohuas quesqui tomi monequis para quimatis sinta quiaxilía para quitamiltis. ²⁹ Pampa sinta amo moilhuía quesqui ipati achtohui, huelis san quitzinpehualtis nopa cali huan tamis itomi. Huan nochi quiitase para amo huelqui quitamiltis, huan quihuihui-itase. ³⁰ Quiijitose: ‘Ne tacat pejqui quichihua se cali, pero amo huelqui quitamilti.’

³¹ “Huan sinta itztoc se tanahuatijquet cati quinequi motehuis ihuaya seyoc, ¿amo mosehuis huan moilhuis achtohui sinta nopa majtacti mil soldados cati quinpiya huelis quitanise nopa seyoc tanahuatijquet cati quinixtoc veinte mil soldados? ³² Huan sinta quitas para amo huelis quintanise, quema quihuejcaitas nopa tanahuatijquet huala ica isoldados, nimantzi quintitanis tacame ma quicamanalhuitij, huan san sejco quisencahuase quenicatza huelis moyoltalise. ³³ Huajca ximoilhuica, monequi xijcahuaca nochi cati anquipiyaj para anmochihuase annomomachtijcahua.

Istat amo ipati sinta amo poyec

(Mt. 5:13; Mr. 9:50)

³⁴ “Istat nelía cuali, pero sinta ayecmo poyec, ¿quenicatza huelis tapoyeltisoc sempa? ³⁵ Sinta ayecmo poyec amo hueli tijtequihuise para tacualisti. Yon amo hueli tijtequihuise ipan tali, o ipan yamanic tali para tatociti. San monequi tijtepehuase. Nochi amojuanti anquipiyaj amonacas, huajca xijtaquilica cati nimechilhua.”

¹ Huan monechcahuiyayaj campa Jesús para quitacaquilise nochi nopa tacame cati tainaque impuesto huan cati miyac tajtacoli quichijtoyaj. ² Huajca fariseos huan tamachtiani ten itanahuatil Moisés pejque quitelhuíaj huan quijtojqe:

—Ni tacat Jesús quinselía tacame cati tahuel tajtacolchihujaj, huan hasta yaya tacua inihuaya.

³ Huajca Jesús quinpohuili ni tatenpohualisti: ⁴ “Sinta se ten amojuanti quinpíasquía cien borregojme huan se polihuisquía, ¿amo quincahuasquía nopa noventa y nueve campa potrero huan contemosquía nopa cati polijtoc hasta quipantis? ⁵ Huan quema quipantis, quiajcolpantalis ica paquili para quihueicas ichaj. ⁶ Huan quema ajsiti ichaj, quinnotzas ihuampoyohua huan icalnechahua, huan quinilhuis: ‘Xipaquica nohuaya pampa ya nijpanti nopilborrego cati mocuapolojtoya.’ ⁷ Nimechilhuía, san se eltoc nepa ilhuicac. Nepa onca más paquilisti ica se tajtacolchijquet cati moyolpata huan quicahua itajtacolhua, que ica noventa y nueve cati moilhuíaj ya itztoque xitahuaque iixpa Toteco, huan amo monequi moyolpatase.

Nopa tomi cati poli

⁸ “Huan sinta se sihuat quipiyasquía majtacti plata tomi huan quipolosquía se, ¿amo quitatisquía se taahuili huan tachpanasquía cuali calijtic, huan quitemosquía cuali hasta quipantis? ⁹ Huan quema quipantis, huajca quinnotzas ihuampoyohua huan icalnechahua huan quinilhuis: ‘Xipaquica nohuaya pampa ya nijpanti nopa tomi cati nijpolojtoya.’ ¹⁰ Huan nimechilhuía, quej nopa paquij ilhuicac ehuan quema se tajtacolchijquet moyolpata huan quicajtehua itajtacolhua.”

Nopa telpocat cati monejnencaquixti

¹¹ Huan Jesús quinilhui: “Se tacat quinpixtoya ome itelpocahua, ¹² huan yaya cati teipan ejquet quihui itata: ‘Notata, techmaca ama nochi cati elis noaxca quema timiquis.’ Huajca nopa tetaj quitajcoxelo cati quipixtoya, huan quimacac cati iaxcatisquía. ¹³ Huan amo huejcajqei nopa telpocat teipan ejquet quisentili nochi cati iaxca, huan quistejqei para yas huejca ipan seyoc tali. Huan nepa san quinempolo nochi itomi ica tamanti cati fiero. ¹⁴ Huan quema ya quitamiltijtoya nochi itomi, ajsico se hueyi mayanti ipan nopa tali, huan nopa telpocat amo quipixqui tomi para itacualis. ¹⁵ Huan quitemoto tequit ica se cati nepa ehua, huan yaya quititanqui ma quintamacati ipitzohua. ¹⁶ Huan nopa telpocat nelía mayanayaya, hasta quinequiyaya quicuas nopa epetat cati quicuayayaj pitzome, pampa amo aqei quimacayaya cati quicuas. ¹⁷ Pero quema pejqui moyolilhúa, quielnamijqui quenecatza eltoya nepa ichaj, huan moilhui: ‘Nochi itequipanojcahua notata quipiyaj hasta mocahua cati quicuase, huan na nica nimayancamictinemi. ¹⁸ Niquisas nica huan niyas campa notata huan niquilhuis: Notata, na nitajtacolchijtoc iixpa Toteco Dios huan moixpa. ¹⁹ Ayecmo quinamiqui para techitas quej nimocone. San techcahuili ma nimiztequipano. Quej nopa moilhui para quihuis itata.’ ²⁰ Huan yaya quistejqei huan yajqui ichaj itata.

“Pero quema ayemo onajsiyaya ichaj, itata quihuejcaitac huan quitasojtac. Huan itata motalojtejqei huan quicuanajnahujajqui huan quitzoponi. ²¹ Huan nopa telpocat quihui: ‘Notata, nitajtacolchijtoc iixpa Toteco Dios huan moixpa, huan ayecmo quinamiqui para techitas quej nimocone.’ ²² Pero itata quinnotzqui itequipanojcahua, huan quinilhui: ‘Nimantzi, xijhualicaca nopa yoyomit cati achi cuali para moquentis notelpoca, huan

xijhualicaca se anillo para imax huan xijhualicaca tecacti para ma motalili. ²³ Huan xijhualicaca nopa pilhuacaxtzi cati achi más tomahuac, huan xijmictica. Ma tijcuase huan ma tiilhuichihuase, ²⁴ pampa ni nocone eltoya quej mictoya, huan ama quej moyolcuitoc. Polijtoya huan ama ya tijpantijque.’ Huajca inijuanti pejque ilhuichihuaj.

²⁵ “Huan icone cati achtohui ejquet tequitiyaya mila, huan quema monchcahuico ichaj, quicajqui tatzotzonal huan masehualme cati mijtotiyayaj. ²⁶ Huan quinotzqui se tequipanojquet huan quitatzintoquili taya oncayaya ipan ichaj. ²⁷ Huan itequipanojca quihlhu: ‘Moicni tacuepili huan motata quimicti nopa pilhuacaxtzi cati achi más tomahuac pampa ya tacuepili ica cuali, huan amo teno más fiero ipantic.’ ²⁸ Huan nopa achtohui ejquet nelía cualanqui, huan amo quinequiyaya calaquis ichaj. Huan itata hualajqui huan quihlhu ica cuali ma calaqui. ²⁹ Pero nopa achtohui ejquet quihlhu itata: ‘Xiquita, nimitztequipanojtoc para miyac xihuit, huan nochipa nijchijtoc cati technahuatijtoc, pero amo quema techmacatoc se chivo para ma niilhuichihua ica nohuampoyohua. ³⁰ Pero quema tacuepili ne motelpoca cati quinempolo noch motomi ica ahuilnenca sihuame, ta tijselia ica cuali, huan tijmictijtoc nopa pilhuacaxtzi cati achi tomahuac para ma quicua.’

³¹ “Huan itata quihlhu: ‘Nocone, noch tonali tiitztoc nohuaya huan noch cati nijpiya moaxca. ³² Pero monequi tiilhuichihuase huan tijpiyase paquilsti, pampa eltoya quej ya mictoya moicni, huan ama eltoc quej moyolcuitoc sempa, huan polijtoya huan ama ya tijpantijque.’ ”

16

Nopa tayacanquet ipan ichaj iteco

¹ Huan Jesús nojquiya quincamanalhui imomachtijchahua huan quinilhui: “Itztoya se tominpixquet cati quipixtoya se itayacanca tequipanojca ipan ichaj cati quimocuitahui noch cati iaxca. Huan sequinoc quiyolmelajque para itayacanca tequipanojca san quinempolohuayaya noch cati quipixqui. ² Huajca nopa rico quinotzqui itayacanca tequipanojca huan quihlhu: ‘¿Taya ya ni cati ica mitztelhuiaj masehualme? Techsencahuili se amat ica noch cuentas huan ica noch cati tijchijtoc, pampa ayecmo huelis techtequipanos ipan nochaj.’

³ “Huajca nopa tayacanca tequipanojquet moilhui: ‘¿Taya nijchihuas para ica nipanós? Noteco ayecmo nechcahuilis ma nijtequipano. Amo nijpiya tetili para nitequitis chichahuac, huan nipinahu para nimotaejehuis. ⁴ Ya nijmati taya nijchihuas. Nijsencahuas para masehualme ma nechselica quej niinihuampo quema ayecmo huelis nijtequipanos noteco.’

⁵ “Huan nopa tayacanquet quinnotzqui sesen nopa tacame cati quitahuiquiliyayaj iteco, huan pejqü ica yaya cati achtohui, huan quihlhu: ‘¿Quesqui tijtahuiquilía noteco?’ ⁶ Huan quijto: ‘Nitahuica cien tambores ten aceite.’ Huan nopa tayacanquet quihlhu: ‘Xijhuica nopa mocuenta ama huan nimantzi xijsencahua seyoc mocuenta cati quijtos san tijtahuiquilía cincuenta tambores.’ ⁷ Huan nopa tayacanquet quihlhu seyoc: ‘¿Quesqui tijtahuiquilía noteco?’ Huan quijto: ‘Nijtahuiquilía cien tatamachihuali ten trigo.’ Huan nopa tayacanquet quihlhu: ‘Xijhuica nopa mocuenta huan techmaca seyoc amat campa tijquicuillo san tijtahuiquilía ochenta tatamachihuali.’ ⁸ Teipa iteco quimatqui taya quichijtoya huan quijto para itayacanca tequipanojca nelía monexti talnamiqui para tacajcayahuas para huelis mohuicas cuali ica sequinoc. Huan ama nojquiya sequinoc

masehualme monextíaj más talnamiquij ica cati quinchihuillíaj sequinoc que anmasehualme cati anquipiyaj taahuili.

⁹ “Huan nimechilhuía achi cuali xijtequihuica amotomi nica ipan ni taltipacti para xiquinpalehuica cati teicneltitzi huan para anmohuicase ica cati cuajcualme. Huan teipa quema tamis amotomi, amechselise campa masehualme itztose para nochipa.

¹⁰ “Se masehuali cati elis temachti ica pilquentzi cati seyoc quicahua imaco, nojquiya elis temachti quema quicahuas miyac imaco. Huan sinta se quichtequis quema quicahuillíaj pilquentzi imaco, nojquiya quiihtequis quema quicahuilise miyac imaco. ¹¹ Huan sinta amo antemachme para cuali anquitequihuise nopa tomi cati anquipiyaj ipan ni taltipacti, Toteco amo amechcahuilis amomaco tamanti cati nelía ipati. ¹² Huan sinta amo antemachme quema anquitequihuíaaj tomi cati iaxca seyoc, ¿ajquiya amechmacas cati elis amoaxca amojuantí?”

¹³ “Amo aquí huelis quintequipanos ome itecohua pampa quicualancaitas se huan quicnelis ne se. Huan se quitoquilis, pero ne se quitahuelcahuas. San se, amo huelis anquitequipanose Toteco Dios huan tomi.”

¹⁴ Huan quicaquiyayaj icamanal nopa fariseos cati tahuel quinejque moricojchihuase, huan injuanti pejque quihuihuiitaj. ¹⁵ Huan Jesús quinilhui: “Iniixpa masehualme anfariseos anmochihuaj quej ancuajcualme, pero Toteco quimati para fiero amoyolo. Tamanti cati masehualme quitepanitaj, Toteco amo quinequij quitaas.

Quisas melahuac cati nopa tanahuatilme quijtohuaj

¹⁶ “Quipixque tequiticayot itanahuatil Moisés huan inintajcuilol itajtolanextijcahuia Toteco hasta ajsico Juan cati tecuaaltiyaya. Pero Juan pejuqui tepohuillía ten itanahuatilis Toteco huan hasta ama noja ya nopa titepohuillíaj. Huan eltoc quej nochi masehualme mocuatetzopaj pampa tahuel quinequij calaquise ipan itanahuatilis.

¹⁷ “Pero ya nopa amo quinequi quijtos para itanahuatil Moisés ayecmo quipiyaj inintequi. Noja quisas melahuac sesen piltamantitzi cati quijtohua itanahuatil, masque panotehuas ilhuicac huan taltipacti.

Se tacat ma amo quicahua isihua

(Mt. 19:1-12; Mr. 10:1-12)

¹⁸ “Sinta se tacat quicahuas isihua huan mosejcotilis ica seyoc, huajca nopa tacat momecatía. Huan sinta se tacat mosejcotilis ica se sihuat cati quicajtejtoc ihuehue, huajca nopa tacat nojquiya momecatía.

Se tominpixquet huan Lázaro

¹⁹ “Itztoya se tominpixquet cati mojmosta moquentiyaya iyoyo morado cati nelía patiyó, huan mojmosta quipiyayaya se hueyi tacualisti ica nochi cati ajhuiyac quinequiyaya. ²⁰ Huan nojquiya itztoya se motaejehuijquet teicneltzi cati itoca Lázaro cati mojmosta mosehuiyaya icalteno nopa tominpixquet. Huan Lázaro quinpixtoya miyac cocome ipan itacayo. ²¹ Huan hualayayaj chichime huan quipipitzohuayayaj icocohua. Huan tahuel mayanayaya huan quinequiyaya quicuas nopa pantatapatzi cati huetziyaya imesamatita nopa tominpixquet. ²² Huan quema ajsic tonali, Lázaro cati teicneltzi mijqui huan hualajque ilhuicac ehuaní huan quihuicaque campa tayejectzi campa Abraham itztoc. Huan nojquiya mijqui nopa tominpixquet huan masehualme quitalpachojque. ²³ Huan teipa ipan tit nepa micta, tahuel taijohuiyaya nopa tominpixquet, huan ica huejca

quitachili Abraham ihuaya Lázaro. ²⁴ Huajca camanaltic chicahuac nopa tominpixquet huan quiilhui: ‘Notata Abraham, techtasojta, huan xijtitani Lázaro ma quixoloni imacpilyacapa, huan ma quiseseliqui nonenepil pampa nelnelía nitaijyohuía miyac ipan ni tit.’ ²⁵ Pero Abraham quiilhui: ‘Nocone, xiquelnamiqui quema tiitztoya ipan taltipacti huan tijpixtoya miyac tamanti cati cuali, huan Lázaro quipanoc miyac taohuijcayoť. Ama yaya quipiya paquilisti, huan ta titaijyohuía. ²⁶ Nojquiya onca se hueyi talostot tatajco tojuanti huan sinta se cati nica quinequisquía yas campa tiitztoc, amo huelis. Huan amo aqui cati itztoc nopona huelis hualas nica campa tojuanti tiitztoque.’

²⁷ “Huan nopa tominpixquet nepa micta quiilhui: ‘Huajca, tinotata, nim-itztajtania ica nochi noyolo, xijtitani Lázaro nepa ichaj notata. ²⁸ Pampa niqunpiya macuulti noicnihua. Ma quinilhuiti quenicatza eltoc nica para ma amo hualaca campa masehualme taijyohuía miyac.’ ²⁹ Pero Abraham quiilhui: ‘Moicnihua quipiyaj nopa amatapohuali ten Icamanal Toteco cati Moisés huan itajtolpanextijcahua quiijuilojqque. Ma quitacaquílca cati quiijtohua.’ ³⁰ Pero nopa tominpixquet quiilhui: ‘¡Amo! Notata Abraham, amo quichihuilíaj cuenta. Pero sinta se cati mictoya moyolcuís huan quincamanalhuis, huajca moyolpatase huan quicahuase inintajtacolhua.’ ³¹ Pero Abraham quiilhui: ‘Sinta inijuanti amo quitacaquílíaj cati Moisés huan itajtolpanextijcahua quiijuilojqque, nojquiya amo quichihuilise cuenta icamanal se cati ya mictoc huan moyolcuís.’ ”

17

Masehualme ma amo tajtacolchihuaca

(Mt. 18:6-7, 21-22; Mr. 9:42)

¹ Huan Jesús quinilhui imomachtijcahua: “Nochipa oncas tamanti cati teyoltílanas ma tajtacolchihuaca. Pero se hueyi tatzacuilitli quichiyas nopa masehuali cati quiyoltílanas seyoc. ² Más cuali quema ayemo quichihua nopa miyac tajtocoli, ma moquechilpi imet huan ma misahuiti ipan hueyi at para amo quichihualtis ma tajtacolchihua se cati noaxca huan ayemo quipiya tetili. ³ Xijtachilica taya anquichihua.”

“Sinta moicni mitzixpanos, huajca xiquilhui cati quichijtoc. Huan sinta yaya moyolpatas, huajca xijtapojpolhui. ⁴ Huan sinta yaya mitzixpanos chicompa ipan se tonal huan sese huelta sempa hualas huan quiijtos: ‘Techtapojpolhui cati amo cuali nimitzchihuilijtoc’, huajca sese huelta xijtapojpolhui.”

Monequi más tijnelto case Toteco

⁵ Huan itayolmelajcahua Tohueyiteco Jesús quiilhuijqque:

—Techpalehui ma moscalti totaneltoquilis.

⁶ Huan Tohueyiteco quinilhui:

—Sinta tijpiya taneltoquilisti cati moscaltía quej se ipilxinacho mostaza, huelis tiquilhuis ni hueyi cuahuit: ‘Ximoquixti huan ximotoca ipan hueyi at’, huan ni cuahuit amechneltoquilis.

Quinamiqui ma tijtequipanoca Toteco

⁷ “Sinta itequipanojca se tacat tamehua ipan imil o quinmocuitahuía iborregojhua, huan teipa quitamiltis itequi huan tacuepilis ichaj, iteco amo quiilhui: ‘Xihuala huan ximosehui para titacuas.’ ⁸ ¡Amo! Quema yaya hualas, iteco quiilhuis: ‘Xijsencahua cati nijcuas huan techtequili huan teipa ta titacuas.’ ⁹ Huan teipa iteco amo monequi quitascamatis pampa

quichijqui cati quinahuati, pampa ya nopa itequi para quichihuas mojmota. ¹⁰ Huan quej nopa eltoc ica amojuanti, pampa anitequipanojcahua Toteco, huan quema anquichihuaj nochi cati amechnahuatía, xiquilhuica: ‘Toteco, amo quinamiqui techtascamatis pampa tojuanti timoaxcahua huan san tijchijtoque cati quinamiqui tijchihuase.’”

Jesús quinchicajqui majtacti tacame

¹¹ Huan Jesús noja nejnemiyaya ipan ojti para altepet Jerusalén huan panotinenqui inepantipa estado Galilea huan estado Samaria. ¹² Huan calajqui ipan se pilaltepetzi huan hualajque quinamiquicoj majtacti tacame cati tacayo palaniyayaj. Inijuanti mohuejcaquetzque quej monequiyaya ica ininocolis, ¹³ huan quitzajtzilijque:

—Jesús, titamachtijquet, techtasojta huan techchicahua.

¹⁴ Huan quema Jesús quinitac, quinilhui:

—Xiyaca ximonextitij iixpa nopa totajtzi para ma quimati anmochicajtoque.

Huan quema yahuiyayaj ipan ojti, nochi mochicajque ten ininocolis masque eltoya nelfiero. ¹⁵ Huan se ten nopa tacame quiitac para Jesús ya quichicajtoya, huajca tacuepil, chichahuac quihueyichijtihualayaya Toteco Dios. ¹⁶ Huan motancaquetzqui iicxita Jesús huan quitascamatqui. Huan nopa tacat eliyaya se Samaria ejquet. ¹⁷ Huan Jesús quijito:

—¿Amo niquinchicajqui majtacti masehualme? ¿Canque itztoque nopa seyoc chichnahui? ¹⁸ ¿Amo aquí más quinequiyaya tacuepilis para quihueyichihuas Toteco, san ni seyoc tali ejquet?

¹⁹ Huan Jesús quiilhui nopa tacat:

—Ximoquetza huan xiya mochaj. Timochicajqui pampa techneltocac.

Quema Toteco tanahuatis

(Mt. 24:23-28, 36-41)

²⁰ Huan sequij fariseos quitatzintoquilijque Jesús quema hualas Toteco para tanahuatis ipan ni taltipacti. Huan Jesús quinnanquili huan quinilhui: —Quema Toteco tanahuatis, amo oncas tanextili cati huelis anquuitase.

²¹ Huan amo aquí quijitos: ‘Xiquitaca, nica Toteco tanahuatía’, o ‘Nepa Toteco tanahuatía’; pampa Toteco tanahuatía ipan iniyolo masehualme.

²² Huan Jesús quinilhui imomachtijcahua:

—Ajsis se tonali quema anquinequise antechitase na cati niMocuetqui Masehuali huan anquinequise sempa anitztose nohuaya, pero amo huelis antechitase. ²³ Huan masehualme amechilhuisse: ‘Xijtachilitij nepa itztoc’, o ‘Xijtachilijquij nica itztoc’, pero amo cana xiyaca techtemotij. ²⁴ Quej nochi hueli quitaj quema tapetani ipan ilhuicacti huan taahuía campa hueli, quej nopa nojquiya nochi nechitase na cati niMocuetqui Masehuali ipan nopa tonali quema sempa nihualas ipan taltipacti. ²⁵ Pero achtohui monequi para tahuel nitaijyohuis, huan para masehualme cati ama itztoque nechuejcamajcahuase.

²⁶ “Quema nitacuepilis ipan taltipacti elis quej eltoya quema Noé itztoya.

²⁷ Ipan nopa tonali, masehualme tacuayayaj, taiyayaj, mosihuajtiyayaj huan quisencahuayayaj para iniichpocahua ma monamictica. Quichihuayayaj nochi cati ipa momajtoyaj quichihuaj hasta nopa tonali quema Noé calajqui ipan cuaacali. Huan nopa tonal pejqui tahuel huetzi at huan tatemic campa hueli hasta quintamimicti nochi masehualme.

²⁸ “Huan san se panoyaya quema Lot itztoya ipan taltipacti. Masehualme tacuayayaj, taiyayaj, tacohuayayaj, tanamacayayaj, tatojtocayayaj huan

quichihuayayaj ininchajchaj. ²⁹ Pero ipan nopa tonali quema Lot quisqui altepet Sodoma, huetzqui tit ihuaya azufre huan quintamitati nochi nopa masehualme cati itzttoyaj nozona. ³⁰ Huan san se elis nojquiya ipan nopa tonali quema na cati niMocuetqui Masehuali nimonextis, amo oncas tanex-tili para amechilhuis sinta se tenijqui panos.

³¹ “Ipan nopa tonali sinta se itzto icalcuitapa, ma cholo nimantzi. Ma amo temo huan calaquis calijtic para quihuicas cati iaxca. Huan cati itztose campa inimila ma amo tacuepilise ininchajchaj. ³² Xiquelnamiquica cati quipanoc isihua Lot. ³³ Nojquiya nimechilhuía sinta se momanahuisnequi para amo miquis por na, quipolos ialma. Huan cati amo majmahuis para miquis por na, quimaquixtis ialma.

³⁴ “Huan nimechilhuía, quema ajsis nopa tayohua, ome itztose ipan se tapechti, huan notequipanojca quihuicas se huan nopa seyoc quicajtehuas nozona. ³⁵ Huan ome sihuame tistose san sejco, huan quihuicas se huan nopa seyoc quicajtehuas. ³⁶ Huan ome tacame tequitinemise ipan mili, huan nojquiya quihuicas se huan nopa seyoc quicajtehuas.”

³⁷ Huan inijuanti quitatzintoquilijque:

—Tohueyiteco, ¿canque panos ya ni?

Huan Jesús quinnanquili:

—Quej nochi quiitaj quema mosentilíaj tzojopilome campa huetztoc se mijcatzi, nochi quiitase ya ni.

18

Se cahual toahui huan se tequitiquet

¹ Huan Jesús quinilhui imomachtijcahua se tatenpohualisti para quinnex-tilis cuali ma quisenhuiquilica motatajtíaj ica Toteco hasta yaya quinmacas cati quitajtaniaj. ² Huan quinilhui: “Ipan se altepet itztoya se tequitiquet cati amo quitepanitayaya Toteco huan amo quinchihuilijaya cuenta masehualme. ³ Nojquiya itztoya se toahui cati icnotzi ipan nopa altepet cati talojtitziti quitajtaniyaya ma quitajtolsecahua ica cati fiero icualan-caitacahua quichihuilijtoyaj. ⁴ Huan miyac huelta quitajtani nopa tequitiquet huan amo quinequiyaya quipalehuis, pero teipa nopa tequitiquet moilhui: ‘Masque amo nijtepanita Dios huan amo niquinchihuilía cuenta masehualme, ⁵ pampa ni toahui cati icnotzi tahuel nechcuatotonía, monequi nijchihuas cati xitahuac. Monequi nijtajtolsecahuas quej quinamiqui pampa talojtitziti huala nechajtania, huan ya nechylaxiti.’”

⁶ Huan Tohueyiteco quinilhui: “Xijmachilica quenicatza nopa amo cual tequitiquet moilhui quema quiijto quipalehuis nopa toahui cati icnotzi.

⁷ Noja más nimantzi Toteco quintajtolsecahuas cuali imasehualhua cati quintapejpenijtoc sinta inijuanti motatajtíaj ica ya tayohua huan tonaya. Yaya amo quiijtos para mosta quichihuas. ⁸ Nimechilhuía, nimantzi quin-palehuis. Pero quema na cati niMocuetqui Masehuali sempa nihualas, ¿quesqui masehualme noja nechnehtocatose huan motatajtijtose ipan ni talti-pacti?”

Ome tacame motatajtitoj

⁹ Huan Jesús quinilhui ni tatenpohualisti para masehualme cati mohuey-imatiyayaj. Moilhuyiyayaj ya itzttoyaj xitahuaque iixpa Toteco, huan yeca quincualancaitayayaj sequinoc pampa quinitayayaj para amo cuajcualme. Huan Jesús quiijto: ¹⁰ “Ome tacame yajque ipan hueyi tiopamit para motatajtij ica Toteco. Se eliyaya se fariseo huan seyoc se tacat cati tainanqui

impuesto huan momatqui tacajcayahua. ¹¹ Huan nopa fariseo moquetzqui huan motatajti huan quiiyto: 'Toteco Dios, nimitztascamati pampa amo nitztoc quej sequinoc. Inijuanti tachtequij, momecatíaj huan quichihuj cati amo cuali. Nojquiya nipaqui pampa amo niitztoc quej ni tacat cati nonechca itztoc cati tainama impuesto huan tacajcayahua. ¹² Na nimosahua ompa ipan se samano huan nimitzmaca majtacti por ciento ten nochi cati nijpiya.' ¹³ Pero nopa tacat cati tainanqui impuesto moquetzqui ica huejca huan mohuijtzonqui pampa pinahuayaya quitananas itzonteco para quitachilis ilhuicac. Huan yaya moyolixtejtetzonayaya ica tequipacholi huan quiiyto: 'Toteco techtasojta pampa miyac nijhuica tajtacoli moixpa.' ¹⁴ Na nimechilhuía, Toteco quitapojpolhui nopa tacat cati tainanqui impuesto huan yaya yajqui ichaj xitahuac iixpa Toteco, pero nopa fariseo, amo. Pampa nochi cati mohueymatij, Toteco quinechcapantalis huan nochi cati moechcapanohuj iixpa Toteco, Toteco quinhueyitalis."

Jesús quintiochijqui coneme
(Mt. 19:13-15; Mr. 10:13-16)

¹⁵ Huan sihuame quinhualicayayaj campa Jesús ininpilconehua para ma quintalili imax ininpani para quintiochihuas. Huan imomachtijcagua Jesús quinitaque huan quinajhuaque. ¹⁶ Pero Jesús quinnojnnotzqui imomachtijcagua huan quiniilhui:

—Xiquincahuilica coneme ma hualaca campa na. Amo xiquintzacuilica, pampa Toteco tanahuatis ipan iniyolo masehualme cati nechselíaj quej ni coneme nechselíaj. ¹⁷ Huan aquí amo nechselía quej ni coneme quichihuj, amo calaquis campa Toteco tanahuatía.

Se tominpixquet quicamanalhui Jesús
(Mt. 19:16-30; Mr. 10:17-31)

¹⁸ Huan hualajqui se tominpixquet huan quitatzintoquili Jesús:

—Ticuali tamachtijquet, ¿taya cati cuali monequi nijchihuas para Toteco nechmacas nemilisti para nochipa?

¹⁹ Huan Jesús quiiilhui:

—¿Tijmati taya quiijtosnequi para techtocaxtía nicuali? ¿Tijmachilía para san Dios nelía itztoc cuali? ²⁰ Tijmati nopa tanahuatilme: 'Amo ximomecati, amo xitemicti, amo xitachtequi, huan amo quema xiteistacahui quema timochihua testigo. Xiquintepanita motata huan monana.'

²¹ Huan yaya quiiilhui Jesús:

—Nochi ya ni nijchijtihualajtoc hasta quema niconetzi nieliyaya.

²² Huan quema Jesús quicajqui ni, quiiilhui:

—Sinta nelía ten tiquijtohua, huajca san se tamanti noja mitzpolohua. Xijnamacati nochi cati moaxca huan xiquinmaca nopa tomi cati teicneltziti huan quej nopa tijpiyas cati ipati para moaxca nepa ilhuicac. Huan teipa xihuala huan techtoquili.

²³ Pero quema nopa tacat quicajqui cati Jesús quiiilhui, pejqui motequipachohua miyac pampa nelía quipixtoya tomi. ²⁴ Huan Jesús quitachili huan quiiyto:

—Nelía ohui para masehualme cati tominpiyaj quicahuilise Toteco ma quinnahuati ipan iniyolo. ²⁵ Ohui para se hueyi tapiyali quej se camello panos ipan iixteyol se huitzmalot, pero noja más ohui para se masehuali cati tominpiya calaquis ipan itanahuatilis Toteco.

²⁶ Huan inijuanti cati quicajque quiiilhuique:

—Huajca ¿ajquiya huelis momaquixtis ten itajtacolhua?

²⁷ Huan Jesús quinilhui:

—Nopa tamanti cati masehualme amo hueli quichihua, Toteco quena, yajati quichihua.

²⁸ Huan Pedro quiilhui:

—Xiquita, tijcajtejtocue nochi cati tijpixtoyaj para timitztoquillise.

²⁹ Huan Jesús quinilhui:

—Nelía nimechilhúa cati hueli cati quicajtejtoc ichaj, o isihua, o iicnihua, o itatahua, o iconehua para tepohuilis ten itanahuatilis Toteco, ³⁰ quiselis más miyac ipan ni tonali huan ipan nopa tonali cati huala, quipiyas nemilisti cati yancuic para nochipa.

Jesús quiijo para masehualme quimictise

(Mt. 20:17-19; Mr. 10:32-34)

³¹ Huan Jesús quinhuicac nopa majtacti huan ome imomachtijcagua iyoca huan quinilhui: “Xiquitaca, amantzi tiyahuij altepet Jerusalén campa panos nochi cati nopa tajtolpanextiani huejcajquiya quiijuilojque para nopantis na cati niMocuetqui Masehuali. ³² Masehualme nechtemactilise inimaco seyoc tali ehuan huan nechhuihuiitase huan nechchihuilise cati fiero. Nechixchajchase, ³³ huan nechhuijhuitequise, huan nechmictise, pero ica eyi tonati nimoyolcuís.”

³⁴ Huan imomachtijcagua amo quimachilijque cati quinilhuyaya pampa Toteco quitatiyaya cati Jesús quiijtohuayaya para ma amo quimachilica.

Jesús quichicajqui se popoyotzi

(Mt. 20:29-34; Mr. 10:46-52)

³⁵ Huan quema Jesús monechcahuiyaya altepet Jericó, itztoya nozona se popoyotzi cati mosehuiyaya ojtenti motaejehuyaya. ³⁶ Huan quema nopa popoyotzi quincajqui nochi nopa miyaquí masehualme cati panoyayaj ihuaya Jesús, huajca quintatzintoquili ajquiya huala. ³⁷ Huan masehualme quiihujque para hualayaya Jesús cati ehua altepet Nazaret. ³⁸ Huan huajca nopa popoyotzi chicahuac quiijo:

—¡Jesús, tiiteipan ixhui Tanahuatijquet David ten huejcajquiya, techtasojta!

³⁹ Huan nopa masehualme cati tayacanayayaj quiajhuaque huan quiilhuijque ma ayecmo molini, pero noja más tzajtzi:

—¡Jesús tiiteipan ixhui David, techtasojta!

⁴⁰ Huan Jesús moquetzqui huan quinahuati se ma quihualiquili nopa popoyotzi. Huan quema ajnico, Jesús quitatzintoquili:

⁴¹ —¿Taya tijnequi ma nimitzchihui?

Huan nopa tacat quiilhui:

—NohueyiTeco, nijnequi nitachiyas sempa.

⁴² Huan Jesús quiilhui:

—¡Xitachiya! Ya timochicajtoc pampa techneltoac.

⁴³ Huan nimantzi tachixtejqui, huan quitoquili Jesús ipan ojti, quihueyichijtiyajqui Toteco Dios. Huan nochi nopa masehualme cati quitaque ten panoc nojquiya quipaquilismacayaj.

19

Jesús huan Zaqueo

¹ Huan Jesús calajqui ipan altepet Jericó, pero san panotiquisato. ² Huan itztoya nozona se tacat cati itoca Zaqueo. Yaya eliyaya se tayacanquet cati tainamayaya impuesto huan quipixqui miyac tomí. ³ Huan Zaqueo

quichihuayaya campeca para quiitas Jesús, pero amo huelqui pampa itztoyaj miyaquí masehualme cati quiyahualojtoyaj, huan Zaqueo amo huejcapantic. ⁴ Huajca Zaqueo motalo huan tayacanqui huan tejcoto ipan se cuahuit para huelis quiitas Jesús quema panos ojtipa. ⁵ Huan quema Jesús ajsico nozona, ajcotachixqui ipan nopa cuahuit huan quiitac Zaqueo huan quiilhui:

—Zaqueo, ximoisihuiti huan xitemo, pampa ama nimocahuas nepa mochaj.

⁶ Huajca nimantzi temoc, huan ica paquilisti quiseli Jesús ipan ichaj.

⁷ Huan quema masehualme quiitaque cati panoc, pejque quiejelnamiqij Jesús pampa yajqui quipaxaloto se tacat cati tahuel tajtacolchihua. ⁸ Huan teipa Zaqueo moquetzqui iniixpa nochi huan quiilhui Tohueyiteco:

—Tohueyiteco, amantzi nimoyolpatatoc. Nipehuas niquinmacas tajco cati nijpiya ica injuanti cati teicneltziti. Huan ica nochi cati niquincajayajtoc huan niquinquixtili miyac tomi, niquincuepilis najpa imiyaca cati niquinquixtili.

⁹ Huan Jesús quinilhui nopa masehualme nozona:

—Ama momaquixti ni tacat ten itajtacolhua pampa nechneltocac quej nojquiya Abraham nechneltocac. ¹⁰ Na cati niMocuetqui Masehuali nihualajtoc ipan ni taltipacti para niquintemos huan niquinmaquixtis masehualme cati mocuapolojtoyaj ipan inintajtacolhua.

Se teteco huan majtacti tetequipanohuani
(Mt. 25:14-30)

¹¹ Huan nopa masehualme nochi quicaquiyayaj. Huan Jesús quinilhui se tatenpohualisti pampa monechcahuiyaya Jerusalén, huan miyaquí masehualme moilhuiyayaj Toteco pehuasquí tanahuatis nimantzi ipan ni taltipacti. ¹² Huan Jesús quiijto: “Se tacat cati itztoya ipan se familia ten tanahuatiani quisayaya para yas ipan seyoc tali cati huejca para quiselis tequiticayot para tanahuatis, huan teipa tacuepilisquí. ¹³ Huan achtohui quinnotzqui majtacti itequipanojcahua huan quinmacac sese imiyaca tomi quej se tacat quitanisquí ipan eyi metzti ten tequit. Quinilhui ma tacohuaca huan ma tanamacaca para quitanilise más tomi hasta yaya sempa hualas. ¹⁴ Huan miyaquí masehualme nepa campa quisqui quicualancaitaque nopa tanahuatijquet huan quititanque se amatasencahuali campa ajsisquí huan nopa amat quiijto: ‘Amo quema tijnequij ni tacat ma technahuatiqui nica.’

¹⁵ “Pero nopa tanahuatijquet quiseli itequiticayo para tanahuatis. Teipa quema tacuepili ipan ital quinnahuati ma mosentilica nopa tetequipanohuani cati quintominmacatoya para quimatis taya quantantoyaj ica itomi. ¹⁶ Huan nopa tetequipanojquet cati achtohui monexti, quiilhui: ‘Noteco, ica nopa tomi cati techcahuilijtejqui ya nijtantoc majtacti huelta más imiyaca tomi.’ ¹⁷ Huan iteco quiilhui: ‘Cualtitoc, ninacualtequipanojca. Temachtí tiitzoaya ica pilquentzi tomi cati nimitzmacac, huan ama nimitztalis xijnahuati majtacti altepeme.’ ¹⁸ Huan nopa ompa tetequipanojquet monexti huan quiilhui: ‘Noteco, ica nopa tomi cati techcahuilijtejqui, ya nijtantoc macuili hueltas más imiyaca tomi.’ ¹⁹ Huan san se quiilhui nopa ompa tetequipanojquet, nojquiya quiilhui: ‘Nimitztalis xijnahuati macuili altepeme.’

²⁰ “Huan seyoc itequipanojca hualajqui huan quiilhui: ‘Noteco, nica eltoc nopa tomi cati techmacac. Nicajojqui ipan se payo. ²¹ Nimitzimacasiyaya sinta nijpolojtosquí motomi ica tanamaquilisti, pampa nijmati chichahuac titanahuatía. Tijcui tomi cati amo tijtantoc huan tipixca campa amo titococ.’

²² Huan iteco quihui: ‘Ta tiferro tetequipanojquet, nimitztajtolsencahuas ica cati ta mocamanal. Tijmatqui chichahuac nitanahuatía. Nijcui tomi cati amo nijtantoc huan nipixca campa amo nitococ. ²³ ¿Para ten amo tijtali notomi ipan se banco para ma quitequihuicaj, huan quema nihualasquía, nopa banco nechmacasquía se quentzi itanca?’

²⁴ ‘Huan nojquiya iteco quinilhui nopa masehualme cati ijcatoyaj nechca: ‘Xijquixtilica nopa tomi cati nijmacac, huan xijmacaca yaya cati quitanqui majtacti huelta.’ ²⁵ Huan nopa masehualme quihuijque: ‘Toteco, yaya ya quipiya majtacti huelta itomi.’

²⁶ ‘Pero ininteco quinilhui: ‘Nimechilhuía, nochi cati quitequihuíaaj cuali cati quipiyaj, niqinmacas más, huan cati amo quitequihuíaaj cati quipiyaj, masque pilquentzi, niqinquinixtilis nopa pilquentzi cati quipixtoyaj. ²⁷ Huan nocualancaitacahua cati amo quinequiyayaj ma niqinnahuatiqui, ama xiquinhualicaca huan xiquinmictica nica noixpa.’ ”

*Jesús calajqui altepet Jerusalén ipan burro
(Mt. 21:1-11; Mr. 11:1-11; Jn. 12:12-19)*

²⁸ Quema Jesús quinilhuijtoya ni tatenpohualisti, sempa pejqui yahui ipan ojti para Jerusalén. ²⁹ Huan quema monechcahuiyaya altepeme Betfagé huan Betania huan nopa tepet cati itoca Olivos, quintitanqui ome imomachtijcahua ipan se tequit, ³⁰ quinilhui:

—Xiyaca nopa pilaltepetz cati mocahua amoixmelac huan quema ancalaquise nepa anquipantise se pilburrojtzit ilpitoc cati ayemo aquí tejcotoc ipani. Xijtojtomaca huan techhualiquilica. ³¹ Huan sinta amechtatzintoquilis para ten anquitojtomaj, xiquinilhua: ‘Toteco quinequi quitequihuis.’

³² Huan nopa ome imomachtijcahua yajque huan nelía quipantijque nopa pilburrojtzit quej Jesús quinilhuijtoya. ³³ Huan quema quitojtomayayaj, iteco quintatzintoquili:

—¿Para ten anquitojtomaj nopa pilburrojtzit?

³⁴ Huan quihuijque:

—Toteco quinequi quitequihuis.

³⁵ Huan quihuicaque campa Jesús, huan ipani niquitalilijque inintaque, huan Jesús ipan tejcoc. ³⁶ Huan miyaqui masehualme quisohuayayaj inintaque ipan ojti campa Jesús nejnemiyaya. ³⁷ Huan quema monechcahuijque campa itaixtemolis nopa tepet Olivos, nochi nopa miyaqui masehualme cati quitoquiliyayaj pejqe quipaquilismacaj Toteco por nochi nopa ti-ochichualnescayot cati quitztoyaj Jesús quichihua. Huan ica paquilisti, ³⁸ injuanti tahuejchihuayayaj huan quijtohuayayaj:

“¡Toteco Dios ma quitiocihua ni tanahuatijquet cati huala ipan itoca*!
Oncas tasehuilisti ipan ilhuicacti.

¡Ma tijhueyichihua Toteco Dios hasta tacaquistis ipan ilhuicac campa más huejcapa!”

³⁹ Huan sequij fariseos cati nejnemiyayaj ica nopa miyaqui masehualme quihuijque Jesús:

—Tamachtijquet, xiquinajhua momomachtijcahua pampa quijtohuaj tamanti cati amo quinamiqui.

⁴⁰ Huan Jesús quinnanquili:

* 19:38 19:38 Ica itequiticayo.

—Nimechilhuía sinta nomomachtijcahua amo molinisquíaj para nechhueyitalisquíaj, huajca ni teme camanaltisquíaj huan nechhueyichihuasquíaj.

⁴¹ Huan quema Jesús monechcahui nepa Jerusalén, quitachili nopa alpetet huan chocac por nopa masehualme cati nozona itztoyaj, ⁴² huan quijto: “AnJerusalén ehuaní, sinta anquimachilijtosquíaj ten pano ama ni tonali, anhueltosquíaj anquipantisquíaj tasehuilisti. Pero tzactoc amoixteyol huan ya tanqui hora. ⁴³ Huajca se tonali amocualancaitacahua hualase huan amechyahualose huan amechojtzacuase para amo aquí huelis cholos. ⁴⁴ Huan quisosolose amoaltepe huan amechmictise nochí amojuanti cati anitztoque nica. Huan amo teno ten amoaltepe mocahuas quej eltoya, pampa amo antechchihuilijque cuenta quema ná nimechpaxaloco.”

Jesús quinquixti tanamacani tiopan calijtic
(Mt. 21:12-17; Mr. 11:15-19; Jn. 2:13-22)

⁴⁵ Huan Jesús calajqui ipan nopa hueyi israelita tiopamit huan pejqui quinquixtia nopa tanamacani cati itztoyaj calijtic. ⁴⁶ Huan quinilhui:

—Ijcuilijtoc ipan Icamanal Toteco campa quijtohua: ‘Nochaj eltoc nopa cali campa masehualme motatajtise ica Toteco.’ Pero anquichijtoque campa anquintachtequilíaj masehualme cati hualahuij.

⁴⁷ Huan Jesús tamachti mojmosta ipan nopa hueyi tiopamit, pero nopa tayacanca totajtitziti, huan tamachtiani ten itanahuatil Moisés, huan injuanti cati quihuicayayaj tequit quinequiyayaj quimictise. ⁴⁸ Pero amo quimatiyayaj quenicatza quichihuase pampa nochí masehualme nelía quitacaquiliyayaj icamanal.

20

Itequiticayo Jesús
(Mt. 21:23-27; Mr. 11:27-33)

¹ Se tonali Jesús tamachtiyaya huan tepohuilijyaya icamanal Toteco ipan nopa hueyi israelita tiopamit, huan hualajque nopa tayacanca totajtitziti, huan tamachtiani ten itanahuatil Moisés, huan nopa huehue tacame ten israelitame para quitatzintoquilise. ² Huan quihuilijque:

—Techilhui ica taya tequiticayot tijchihua ni tamanti. ¿Ajquiya mitzmacatoc tequiticayot?

³ Huan Jesús quinnanquili:

—Na nojquiya nimechtatzintoquilis se tamanti. Technanquilica ya ni.

⁴ ¿Ajquiya quititanqui Juan para tecuaaltis? ¿Toteco quititanqui o san masehualme quititanque?

⁵ Huajca injuanti iyoca pejque mocamanalhuíaj ten quenicatza quinnanquilise. Quiijtoque: “Sinta tiquijtose Toteco quititanqui Juan, huajca technanquilis ¿para ten amo tijneltocaque icamanal? ⁶ Huan sinta tiquijtose san masehualme quititanque, nochí ni masehualme techtehuise pampa injuanti quineltočaj para Juan eliyaya se itajtolpanextijca Toteco.”

⁷ Huan yeca injuanti quinnanquilijque, huan quihuilijque amo quimatiyayaj ajquiya quititanqui Juan. ⁸ Huan Jesús quinilhui:

—Huajca na nojquiya amo nimechilhuis ajquiya nechmacatoc tequiticayot para nijchihuas nochí ni tamanti.

Se tatenpohualisti ten tequipanohuani cati amo cuajcualme
(Mt. 21:33-44; Mr. 12:1-11)

⁹ Huan Jesús pejqui quinilhuía ni tatenpohualisti, quijto: “Itztoya se tacat cati quitojqui xocomecat ipan imil huan quincahuilijtejqui inimaco sequij tacame para ma quimocuitahuica huan teipa momajmacasquíaq cati temacasquía. Huan teipa yaya huejca yajqui. ¹⁰ Huan teipa quema ajsic tonali para tatequisti, nopa tacat quititanqui se itequipanojca ma quinifati nopa tacame para ma quimacaca cati ya iaxca ten nopa tatequisti. Pero nopa tacame cati inimaco eltoya nopa mili quimaquilijque itequipanojca huan san ica imax quimajcajqe. ¹¹ Huajca nopa tacat cati iaxca nopa mili sempa quititanqui seyoc itequipanojca, huan nojquiya quimaquilijque, huan fiero quichihuilijque, huan amo teno quimacaque. ¹² Huan ica expa nopa tacat sempa quititanqui seyoc itequipanojca, huan nopa tacame quicocojque, huan quiquixtjqe.

¹³ “Huan nopa tacat cati iaxca nopa xomeca mili moyolihui: ‘Ama nijmati taya nijchihuas. Nijtitanis notelpoca cati niqicnelía, huan temachti quitepanitase.’ ¹⁴ Pero quema nopa tacame cati inimaco eltoya nopa mili quiitaque nopa telpocat, huajca moilhuijqe se ica seyoc: ‘Yaya ni cati teipa quiselis ni xomeca mili. Ma tijmictica huan teipa ni mili elis toaxca.’ ¹⁵ Huan injuanti quitehuijqe xomeca milteno huan quimictjqe.

“Huajca ¿taya anmoilhúaj quichihuas nopa tacat cati iaxca nopa xomeca mili ica nopa fiero tacame? ¹⁶ Yaya hualas huan quinmictis huan quicahuas imil inimaco sequinoc.”

Huan quema nopa fariseos quicajque ni, quimachilijque para injuanti eliyayaj nopa fiero tacame ipan nopa tatenpohualisti, huajca quilhuijqe Jesús:

—¡Amo quema ma quicahuili Toteco panos ya nopa!

¹⁷ Huan Jesús quintachili huan quintatzintoquili:

—Huajca ¿taya quijtosnequi cati ijcuilijtoc ipan Icamanal Toteco campa camanalti ten na quej nise hueyi tet? Quej ni quijtohua: ‘Calchihuani amo quinejqe quitequihuse se hueyi tet, huan quitahuisojque.

Pero teipa nopa hueyi tet cati quitahuisojtoyaj, elqui cati más monequiyaya para yas calesquina huan ipan quiquetzase nopa cali.’

¹⁸ Na ninopa hueyi tet huan nochi cati amo nechnequij itztoque quej cati motepotanise huan huetzise ipan nopa hueyi tet, huan tahuel mococose. Huan quema na nihuetzis ininpani cati amo nechselíaj, huajca niqinchihuas tatixtic.

Ajquiya taxtahuia impuesto

(Mt. 21:45-46; 22:15-22; Mr. 12:13-17)

¹⁹ Huan ipan nopa tonali nopa tamachtiani ten itanahuatil Moisés huan nopa tayacanca totajtzitzi quimachilijque para injuanti itztoyaj nopa fiero tacame ipan nopa tatenpohualisti. Huan yeca quinequiyayaj quitzacuase Jesús nimantzi, pero quinimacasiyayaj nopa miyaqui masehualme.

²⁰ Huajca san quintitanque tacame ixtacatzí para ma nesica quej cuaqualme huan ma quitachilijtinemica para quicaquisquíaq se camanali cati ica quitelhuisquíaq Jesús iixpa nopa gobernador. ²¹ Huan se ten injuanti quitatzintoquili Jesús:

—Tamachtijquet, tojuanti tijmatij tiquijtohua huan titamachtía cati xitahuac huan amo aquí tijchicoicnelía. San titamachtía cati melahuac

quinequi Toteco Dios ma tijchihuaca. ²² Huajca ¿tiqitica cuali tiquixtahuase cati techtajtanía totanahuatijca César o amo?

²³ Huan Jesús quitiac para quinequiyayaj quimasiltise ica icamanal, huajca quinilhui:

—¿Para ten anquinequij antechajcayahuase? ²⁴ Technextilica se tomi cati ica antaxtahuaj nopa impuesto. ¿Ajquiya iixcopinca quiptiya ni tomi? Huan ¿ajquiya itoca ijcuilijtoc ipani?

Huan injuanti quinanquilijque:

—Iixcopinca huan itoca Tanahuatijquet César.

²⁵ Huan Jesús quinilhui:

—Huajca xijmacaca César cati iaxca huan nojquiya xijmacaca Toteco cati Toteco iaxca.

²⁶ Huan amo huelque quicajcayahua Jesús o quimasiltise ica cati quiijto iniixpa nopa masehualme. San quitachilijque quenicatza quinnanquiliyaya, huan ayecmo molinijque.

Jesús quiijto sempa moyolcuise mijcatzitz

(Mt. 22:23-33; Mr. 12:18-27)

²⁷ Huan hualajque campa Jesús sequij saduceos. Injuanti amo quineltocaj para sempa moyolcuise mijcatzitz. ²⁸ Huan nopa saduceos quihuijque:

—Tamachtijquet, Moisés quijcuilo huejcajquiya sinta se tacat miquis huan amo quicajtehuas yon se conet, huajca iicni cati teipa ehua monequi mosihuajtis ihuaya ihuejpal para quiptiyase se conet cati quimacas iteipan ixhuihua yaya cati mijqui. ²⁹ Itztoyaj chicome icnime huan nopa cati achtohui ejquet mosihuajti huan teipa mijqui, huan amo quipixqui yon se conet.

³⁰ Huan nopa ompa tacat mosihuajti ica nopa cahuali huan nojquiya mijqui, huan amo quinpixqui coneme. ³¹ Huan nopa expa tacat mosihuajti ihuaya huan quej nopa panotiyajque hasta nochi chicome icnime mosihuajtijque ihuaya nopa sihuat, huan amo quipixque ininconeuhua. ³² Huan teipa nojquiya mijqui nopa sihuat. ³³ Huajca ipan nopa tonali quema moyolcuise nochi cati mictoque, ¿ajquiya ten injuanti quiptiyas nopa sihuat para iaxca?, pampa nochi chicome quichijque inisihua.

³⁴ Huan Jesús quinilhui:

—Ipan ni tonali nica ipan taltipacti tacame mosihuajtíaj, huan quisencahuaj para iniichpocahua ma monamictica. ³⁵ Pero quema masehualme moyolcuise huan injuanti cati quinamiqui calaquise ilhuicac, ayecmo mosihuajtise, yon monamictise para quintacatiltise coneme, ³⁶ pampa nepa ayecmo aqui miquis. Nochi itztose para nochipa quej ilhuicac ehuan. Itztose iconehua Toteco cati yaya quinyolcuic para itztose para nochipa. ³⁷ Pero quena, mijcatzitz moyolcuic pampa Moisés technextili ya nopa quema quitac nopa xihuitzontzi cati tatayaya huan quijcuilo para Toteco quihui para yaya ininTeco Abraham, Isaac huan Jacob. ³⁸ Huan pampa Toteco quiijto yaya noja eliyaya ininTeco Abraham, Isaac huan Jacob masque injuanti ya mictoyaj huejcajquiya quema quiijto nopa camanali, huajca tijmatij injuanti noja yoltoque nepa ilhuicac iixpa Toteco, pampa iixpa Toteco nochi yoltoque.

³⁹ Huan sequij tamachtiani ten itanahuatil Moisés quihuijque:

—Tamachtijquet, nelía cuali tijnanquili.

⁴⁰ Pero amo aqui motemacac para más quitatzintoquilis.

Cristo iteipan ixhui David

(Mt. 22:41-46; Mr. 12:35-37)

⁴¹ Huajca Jesús quintatzintoquili:

—¿Para ten masehualme quijtohuaj para nopa Cristo cati Toteco quijto hualasquia elis se iteipan ixhui Tanahuatijquet David ten huejcajquiya?
⁴² Pampa David iselti quitocaxti Cristo ‘noTeco’ ipan Salmos campa quijcuilo:

‘Toteco Dios quicamanalhui noTeco Cristo huan quihhui:

Ximosehui nica ipan nonejmat,

⁴³ hasta nimitzmactilis mocualancaitacahua para tiquinnahuatis.’

⁴⁴ Huajca Tanahuatijquet David quitocaxti Cristo ‘noTeco’ huan ya nopa technextilia Cristo yaya Dios, huajca ¿quenicatza elisquia nojquiya se masehuali cati iteipan ixhui David?

Jesús quintelhui nopa tamachtiani ten itanahuatil Moisés

(Mt. 23:1-36; Mr. 12:38-40; Lc. 11:37-54)

⁴⁵ Huan quema nochi nopa masehualme quitacaquiliyayaj, Jesús quinilhui imomachtijcahua: ⁴⁶ “Ximomocuitahuica ica nopa tamachtiani ten itanahuatil Moisés cati quinpactia moquentise iniyoyo huehueyac. Quinpactia quema masehualme quintajpalohuaj ica cuali ipan tianquis. Quinequij mosehuse ipan nopa siyas cati más quipiya tatepanitacayot huan quinequij tacuase achtohui ipan se tacualisti. ⁴⁷ Pero iyoca injuanti quinquixtilíaj sihuame icnotziti ininchajhaj. Huejcahuaj quema motatajíaj ica Toteco para sequinoc ma quintepanitaca, pero san tacajcayahuaj, huajca achi más Toteco quintatzacuiltis que sequinoc.”

21

Nopa tomi cati se toahui cati icnotzi quimacac Toteco

(Mt. 12:41-44)

¹ Huan nepa tiopan calijtic Jesús quintachilijtoya quenicatza masehualme cati tominpiyayaj quitaliyayaj inintomi ipan nopa caxa para quimacase Toteco. ² Huan nojquiya quuitac se toahui cati icnotzi nelteicneltzi temacac ome centavos. ³ Huan Jesús quijto:

—Nimechilhuía para melahuac ni toahui cati icnotzi huan teicneltzi quimacatoc Toteco más huan amo quej nochi ne sequinoc. ⁴ Pampa nochi injuanti quimacaque cati mocahuayaya ten inintomi, pero yaya nelía teicneltzi, huan quimacatoc Toteco nochi cati quipixtoya para ica mopanoltsiquía.

Masehualme quisosolose tiopamit

(Mt. 24:1-2; Mr. 13:1-2)

⁵ Huan itztoyaj sequij cati camanaltiyayaj ten iyejeyca nopa hueyi tiopamit huan quenicatza quinyejecchijtoyaj nopa teme cati masehualme temacatoyaj. Huan Jesús quinilhui:

⁶ —Ajsis se tonali quema masehualme quisosolose nochi ni tamanti yejyetzti cati ama anquitachilíaj, huan yon se tet amo mocahuas campa eltoya.

Tanextili cati mochihuas ipan itamiya tonali

(Mt. 24:3-28; Mr. 13:3-23)

⁷ Huan injuanti quitatzintoquilijque:

—Tamachtijquet, ¿quema paños ni tamanti? ¿Taya tanextili oncas quema monechcahuis?

⁸ Huan Jesús quinilhui: “Ximotachilica. Ma amo aqui amechcayahuas pampa miyac tacame hualase huan quiijtose para na. Quiijtose: ‘Na niCristo’, huan ‘Ya ajsic hora’, pero amo xiquinnechahuica. ⁹ Huan anquicaquise para oncas tatehuilisti huan para miyaqui tahuel mosisináj, pero amo ximajmahuica pampa achtohui monequi panos nochi ni tamanti, pero noja polihuiyoc para tamis taltipacti.”

¹⁰ Huan Jesús noja quincamanalhui huan quinilhui: “Masehualme ipan se tali motananase huan quintehuisse cati itztoque ipan seyoc tali. Tanahuatiani motehuisse inihuaya sequinoc tanahuatiani huan inisoldados. ¹¹ Huan campa hueli tahuel mohuisos tali, huan oncas huejhueyi mayanti, huan huejhueyi cocolisti. Huan ipan ilhuicac monexis huejhueyi tanextili huan tamanti cati temajmatis.

¹² “Pero achtohui, quema noja polihui nochi ni tamanti, masehualme amechitquise huan amechtajiyohtitise. Huan amechtemactilise iniixpa tequichihuani ipan tiopame, huan amechtzaquase. Huan amechhuicase iniixpa tanahuatiani huan gobernadores para amechtelhuisse pampa antechnehtocaj. ¹³ Huan quej nopa huели anquinpohuilise ten na. ¹⁴ Huan amo ximoilhuica quenicatza anquinnanquilise o quenicatza anmomanahuise, ¹⁵ pampa ipan nopa hora na nimechmacas talnamiquilisti huan nimechmacas nopa camañali cati monequi anquinilhuisse, huan yon se amoculancaitaca amo huели amechnanquilis. ¹⁶ Huan hasta amotatahua, o amoicnihua, o amohuicalhua, o amohuampoyohua amechtemactilise ica amo cuajcualme. Huan injuanti amechmictise sequij ten amojuanti. ¹⁷ Huan nochi masehualme amechcualancaitase pampa antechnehtocaj na. ¹⁸ Pero amo teno huели amechchihuilise, yon amo anquipolose yon se amotzoncal. ¹⁹ Huan sinta anquipyase amoyolo huan nochi anquijyohuisse, anitztose para nochipa.

²⁰ “Pero quema anquinitase soldados ten miyac talme cati quiyahualojtose ni altepet Jerusalén, huajca xijmatica para ya ajsico tonali para quisosolose. ²¹ Huajca ipan nopa hora, injuanti cati itztoque ipan estado Judea ma choloca ipan tepeme, huan injuanti cati itztoque ipan Jerusalén ma quisaca. Huan masehualme cati itztoque ipan mili ma amo tacuepilica para calaquise ipan ni altepet, ²² pampa ipan nopa tonali Toteco nelía quinxtilis masehualme icualancayo. Huan nochi panos quej ijcuilijtoc para ma pano. ²³ Teicnelitque sihuame cati tanemiltijtose huan cati quinchichitijtose coneme ipan nopa tonali pampa ohui cholose. Huan oncas hueyi taijyohuilisti ipan ni tali, huan Toteco quintatzacuiltis ni masehualme. ²⁴ Huan tacame quinxmictise miyaqui ica machetas huan miyaqui quinxhuicase hasta ten hueli talme ipan taltipacti para ma tetequipanose san tapic. Huan cati amo israelitame ten cati hueli talme quitanise huan ipan moquejquetzase altepet Jerusalén huan quichihuilise ten quinequise hasta tamis nopa tonali cati Toteco quixquetztoc para cati amo israelitame ma tatanica.

Quema Jesús tacuepilis

(Mt. 24:29-35, 42-44; Mr. 13:24-37)

²⁵ “Huan teipa oncas tanextili ipan tonati huan ipan metzti huan ipan sitalime huan ipan taltipacti. Huan masehualme amo quimatise taya quichihuase pampa nelnelía momajmatise, pampa tahuel motananas hueyi at huan nelía ajcahuacas. ²⁶ Huan masehualme tapolose pampa tahuel majmahuise ica nochi cati quilitase huala ipan taltipacti, pampa quilitase para tonati, metzti, sitalime huan nochi cati eltoc nepa ipan ilhuicacti huihuicase. ²⁷ Huan huajca quena, nechitase na cati niMocuetqui Masehuali

sempa nihualas ipan se mixti ica nohueyi chichahualis, huan ica notatanex cati tahuel yejyectzi. ²⁸ Huajca quema pehuas mochihuas nochi ni tamanti, ximoyolchichahuaca huan xiajcotachiyaca ica paquilisti pampa nechcatzi nopa hora quema nimechmaquixtis.”

²⁹ Huan nojquiya Jesús quinilhui se tatenpohualisti: “Ximoilhuica cati pano ica se higuera cuahuit huan nochi sequinoc cuame. ³⁰ Quema nopa cuame moseliltáj, huajca anquimatij ya ajsis tatotonilot. ³¹ Huajca nojquiya quema anquuitase panotos nochi ni tamanti, xijmatica ya nechca para Toteco tanahuatis ipan ni taltipacti.

³² “Huan nimechilhúa melahuac para amo miquise nopa masehualme cati quiitase ni tanextili hasta nihualas. ³³ Ilhuicacti huan taltipacti panotehuas, pero nocamanal nochipa motamichijtiyas.

³⁴ “Xitachixtoca para nopa tonal. Ma amo nimechpantiqui ipan tajtacoli. Yon amo nimechpantiqui anihuintitoque, yon ma amo nimechpantiqui anmocatotonijtoque ica tamanti ten ni nemilisti nica, pampa sinta san ya nopa anmoilhuáj, amo anmocualtalise, huan nopa tonali nimantzi amechajis quej se taquetzi. ³⁵ Huan nopa tonali quinajsis nochi masehualme cati itztose campá hueli ipan taltipacti. ³⁶ Pero ximocualchijhijtoque mojmota para quema nihualas. Xijtajtanica Toteco Dios para amo monequi anpanose ipan nochi nopa tamanti cati hualas huan para huelis anmoquetzase noixpa na cati niMocuetqui Masehuali.”

³⁷ Huan mojmota quema tonaya, Jesús tamachtiyaya ipan hueyi israelita tiopamit huan ica tayohua quisayaya para toniliti ipan nopa tepet cati itoca Olivos. ³⁸ Huan tahuel miyaqui masehualme mijquehuayayaj ijnaltzi para yase ipan hueyi israelita tiopamit para quitacaquilise.

22

Quinejque quiitzquise Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Huan monechcahuiyaya nopa ilhuit cati itoca Pascua quema quicuaj pantzi cati amo quiptiya tasonejcaoyot. ² Huan nopa tayacanca totajtzitzi huan tamachtiani ten itanahuatil Moisés quitemohuayayaj quenicatza huelis quimictise Jesús, pero quinimacasiyayaj nopa miyaqui masehualme cati quitoquiliyayaj.

³ Huan Amocualtacet calajqui ipan iyolo Judas Iscariote cati eltoya se ten nopa majtacti huan ome imomachtijcahua Jesús. ⁴ Huan Judas yajqui quincamanalhuito nopa tayacanca totajtzitzi huan ininteco nopa soldados ipan tiopamit, huan quisencajqui inihuaya quenicatza huelis quinmactilis. ⁵ Huan injuanti paquiyayaj ica itapalehuil huan quiijtoque para quitax-tahuisse. ⁶ Huan quipecti Judas huan pejqui quitemohua quenicatza huelis quinmactilis Jesús quema amo itztoyaj miyaqui masehualme.

Itacualis Tohueyiteco

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Huan ajsic nopa tonali para quicuase pantzi cati amo quiptiya tasonejcaoyot, huan para quimictise nopa pilborregoitzzi para Pascua. ⁸ Huan Jesús quintitanqui Juan ihuaya Pedro huan quinilhui:

—Xiyaca huan xijsencahuaca nopa Pascua tacualisti para nochi tojuanti titacuatij.

⁹ Huan injuanti quiilhuijque:

—¿Canque tijnequi ma tijsencahuatij?

¹⁰ Huan Jesús quinilhui:

—Quema ancalaquise ipan nopa altepet, anquinamiquise se tacat cati quihuica iajcoltipa se comit at. Xijtoquilijtiyaca hasta nopa cali campa calaquis. ¹¹ Huan nozona anquilhuisse cati iaxca nopa cali: ‘Nopa tamachtijquet quijtohua ma timitztazintocuilquij, ¿canque eltoc nopa hueyi cuarto campa quicuas nopa Pascua tacualisti ihuaya imomachtijcahua?’ ¹² Huan yaya amechnextilis se cali cati quiyiya ome piso campa eltoc se hueyi cuarto, huajca nozona xisencahuaca nopa tacualisti.

¹³ Huan injuanti quisque huan quipantijque nochi quej Jesús quinilhui-toya huan nozona quisencajque nopa Pascua tacualisti.

¹⁴ Huan quema ajsic hora, Jesús ajsico ica nochi imomachtijcahua huan mosehuijque campa mesa. ¹⁵ Huan Jesús quijto:

—Nelía miyac nijnequiyaya nijcuas ni Pascua tacualisti amohuaya pampa ya nechca para nitaijyohuis. ¹⁶ Nimechilhuía, amo nijcuas sempa hasta tiitztose nepa campa Toteco tanahuatía huan ya panotos nochi cati quinextía ni tacualisti.

¹⁷ Huan Jesús quicuic se taza ica xocomeca at huan quitascamatqui Toteco huan quijto:

—Xiquica ipan ni taza huan ximomajmacaca nochi amojuanti. ¹⁸ Pampa nimechilhuía, amo niquis xocomeca at sempa hasta nopa tonali quema tanahuatis Toteco.

¹⁹ Huan quitzqui se pantzi huan quitascamatqui Toteco. Huan quitapanqui huan quinmajmacac imomachtijcahua huan quinilhui:

—Ni notacayo cati nitemactilis por amojuanti. Xijchihuaca ya ni para anquixnextise annehelnamiquij.

²⁰ Huan quema ya tacuajtoyaj, sempa quichijqui san se, quitzqui nopa taza, huan quinilhui:

—Ni noeso. Ica noeso cati nijtoyahuas para amojuanti nijpehualtis itequitico nopa yancuic camanal sencahuali ica masehualme huan Toteco.

²¹ Pero xiquitaca, yaya cati nechtemactilis tacua nohuaya ipan ni mesa.

²² Quena, na cati niMocuetqui Masehuali nimiquis pampa quej nopa Toteco quitelijtoc, pero teicnelti nopa tacat cati nechtemactilis pampa tahuel taijyohuis.

²³ Huan imomachtijcahua pejqe mocamanalhuíaaj para quimatise ajquiya huelis quitemactilis.

Ajquiya achi hueyi iixpa Toteco

(Mt. 20:25-28; Mr. 10:42-45)

²⁴ Huan imomachtijcahua Jesús nojquiya pejqe monajnanquilíaj ajquiya elisquía más hueyi iixpa. ²⁵ Huan Jesús quinilhui: “Tanahuatiani nica ipan ni taltipacti tahuel tanahuatíaj chichahuac huan masque ya nopa quichihuaj monequi inimasehualhua ma quintocaxtica ‘cuajcualme’. ²⁶ Pero amo quej nopa amojuanti anmochihuase anhuejhueyí iixpa Toteco. Cati ten amojuanti quinequi elis más hueyi, monequi mochihuas quej se cati más telpocat ten nochi. Huan cati quinequi elis amotayacanca, ma eli amotequipanojca. ²⁷ ¿Catijqui anquitaaj para más hueyi, yaya cati mosehuía campa mesa o yaya cati quintequipanohua? Anmoilhuíaaj yaya cati mosehuía achi hueyi. Pero xiquitaca na amo nimohueyimati. Na niitztoc amohuaya quej niamotequipanojca.

²⁸ “Amojuanti anitztoque cati anmocajtoque nohuaya quema nijpanotoc taohuijcyot. ²⁹ Huan yeca nimechmacas tequiticayot antanahuatise quej noTata nechmacatoc tequiticayot nitanahuatis. ³⁰ Huan antacuase nohuaya

campa na nitanahuatis, huan nimechsehuis ipan siyas cati yejyetzti para anquintajtolsencahuase nopa majtacti huan ome huejhueyi familias ten israelitame.”

Pedro quiijos amo quiixmati Jesús
(Mt. 26:31-35; Mr. 14:27-31; Jn. 13:36-38)

³¹ Huan nojquiya Toteco quiilhui Pedro:

—Simón, Simón, ximotachili. Amocualtat ya tajtanqui caquihuili para mitztzejtzelos quej se quitzejtzelo hua trigo, ³² pero nimotatajtijtoc ica Toteco para amo tijcahuas techneftocas. Huan teipa quema timoyolpatas ica cati amo cuali tijchijtoc, xiquinyolchicahua ni moicnihua, huan xiquinmaca tetili.

³³ Huan Simón Pedro quiilhui:

—Tohueyiteco, nimocahuas mohuaya masque nechtzacuase o nechmic-tise.

³⁴ Huan Jesús quiilhui:

—Nimitzilhuía Pedro, amo tzajtzis se cuapele ica ijnaloc hasta expa tiqui-jtos para amo techixmati.

Ama xijhuicaca amobolsa

³⁵ Huan Jesús quinilhui nochi imomachtijcahua:

—Quema nimechtitanqui huan nimechilhui amo xijhuicaca tomi, yon morral, yon tecacti, ¿taya amechpolo?

Huan quinanquilijqe:

—Amo teno techpolo.

³⁶ Huan Jesús quinilhui:

—Pero ama, nimechilhuiá sinta anquipiyaj tomi, xijhuicaca. Huan nojquiya xijhuicaca se morral, huan sinta se amo quiipya se macheta, ma quinamaca itaque huan ma quicohua. ³⁷ Pampa nimechilhuiá, ama tamis cati quiijcuilojqe huejcajquiya ten na campa quiijtohua: ‘Masehualme quiitase quej amo cuali pampa quiitase inihuaya amo cuajcualme.’

³⁸ Huan injuanti quiijtojqe:

—Tohueyiteco, xiquita nica tijpiyaj ome machetas.

Huan Jesús quiijto:

—Ya cuali.

Jesús motatajti nepa Getsemani
(Mt. 26:36-46; Mr. 14:32-42)

³⁹ Huan Jesús quisqui huan yajqui campa nopa tepet Olivos quej moma-tjoya, huan imomachtijcahua quitoquilijqe. ⁴⁰ Huan quema ajsitoj nepa, quiilhui:

—Ximotatajtica ica Toteco para amo amechyoltilanas tajtacoli.

⁴¹ Huan yaya sempa moiyoacaxixti. Huan motancuaquetzqui huan pejqui motatajtía, ⁴² huan quiijto: “Notata, sinta mopaquilis, huajca techquixtili ni hueyi taijyohuulisti cati huala, pero amo xijchihua cati na nijnequi, san xijchihua cati ta mopaquilis.”

⁴³ Huan hualajqui se ilhuicac ejquet ten ilhuicac huan quimacac tetili.

⁴⁴ Jesús nelía taijyohuiyaya, huan chichahuac motatajtiyaya. Mitoniyaya miyac huan iitonal elqui quej esti cati chipiniyaya.

⁴⁵ Huan quema tantoya motatajtía, moquetzqui huan tacuepili campa itztoyaj imomachtijcahua, huan quinpantito cochtocque pampa tahuel siyaj-toyaj ica tequipacholi. ⁴⁶ Huan Jesús quinilhui:

—¿Para ten ancochtocque? Ximoquetzaca huan ximotatajtica para amo aqi amechyoltilanas antajtacolchihuase.

*Quiitzquijque Jesús**(Mt. 26:47-56; Mr. 14:43-50; Jn. 18:2-11)*

⁴⁷ Huan quema Jesús noja quincamanalhuyaya, ajsicoj miyaqui tacame. Huan Judas se imomachtijca quinyacanayaya. Huan yaya monechcahui campa Jesús huan quitzoponi. ⁴⁸ Huan Jesús quiilhui:

—Judas, ¿ta techtzoponi para techtemactilis na cati niMocuetqui Masehuali?

⁴⁹ Huan injuanti cati itzttoyaj ihuaya Jesús quiitaque ten panoyaya, huan huajca quitatzintoquilijque:

—Tohueyiteco, Tohueyiteco, ¿tjnequi ma titatehuica ica tomacheta?

⁵⁰ Huan se cati itztoya ihuaya Jesús, quimaquili itequipanojca nopa hueyi totajtzi huan quitzontequili inacas ten inejmat. ⁵¹ Huan Jesús quiilhui:

—¡Xijcahua! Ayecmo xitatehui.

Huan Jesús quiitzqui inacas huan quichicajqui. ⁵² Huan hualajtoyaj nopa tayacanca totajtzi huan ininteco nopa soldados ipan nopa hueyi israelita tiopamit huan nopa huehue tacame ten israelitame. Huan Jesús quinilhui:

—¿Para ten anhualajtoque nica para antechitzquise ica machetas huan ica cuahuit quej nelisquía se nitachtejquet? ⁵³ Mojmosta niitztoya amohuaya ipan nopa hueyi tiopamit, huan amo quema antechitzquijque. Pero nelía ni hora amoaxca huan iaxca Amocualfacat cati quiipya chicalualisti para tanahuatis ipan tzintayohuilot.

*Pedro quiijto amo quiixmati Jesús**(Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

⁵⁴ Huan injuanti quiitzquijque Jesús, huan quihuicaque hasta ichaj nopa hueyi totajtzi huan Pedro quihuejcatuquili. ⁵⁵ Huan masehualme tipitztoyaj tajco calixpamit pampa taseseyayaya huan mosehujtoyaj san sejco, huan Pedro nojquiya mosehuito inihuaya. ⁵⁶ Huan se sihua tequipanojquet quiitac Pedro mosehuyaya titeno huan quitachili huan quiijto:

—Ni tacat nojquiya itztoya ihuaya Jesús.

⁵⁷ Huan Pedro quiijto para amo. Quiijto:

—Nane, amo niquiixmati.

⁵⁸ Huan quentzi teipa seyoc quitachili huan quiijto:

—Ta tiitztoya nojquiya tiimomachtijca.

Huan Pedro quiijto:

—¡Amo, Tate! ¡Amo na!

⁵⁹ Huan panoc se hora huan seyoc tacat quiijto:

—Temachti ni tacat nejnenqui ihuaya pampa yaya se Galilea ejquet nojquiya.

⁶⁰ Huan Pedro quiijto:

—Tate, amo nijmati taya tiquijtohua.

Huan nimantzi quema noja camanaltiyaya Pedro, tzajtzic se cuapele.

⁶¹ Huan Tohueyiteco moicanuetqui huan quitachili. Huan Pedro quielnamijqui cati Tohueyiteco quiilhujtoya: “Amo tzajtzis se cuapele ica ijnaloc hasta tiquijtos expa para amo techixmati.” ⁶² Huan Pedro quisqui calteno huan tahuel mochoquili.

*Tacame quimaquilijque Jesús**(Mt. 26:67-68; Mr. 14:65)*

⁶³ Huan nopa soldados cati quimocuitahuyayaj Jesús quihuihuiitayayaj huan quimaquilijayaj. ⁶⁴ Huan quiixtajque huan quitatzintoquilijque:

—Sinta titajtolpanextijquet, techilhui, ¿ajquiya ten tojuanti timitzmaquilíaj? ⁶⁵ Huan quiilhuyayaj miyac tamanti cati fiero.

Jesús iniixpa nopa hueyi tasentilisti ten tequichihuani
(Mt. 26:59-66; Mr. 14:55-64; Jn. 18:19-24)

⁶⁶ Huan quema tanesqui, mosentilijque nopa huehue tacame cati qui-huicayayaj tequit ica israelitame, huan nopa tayacanca totajtztzi, huan nopa tamachtiani ten itanahuatil Moisés, huan quihuicaque Jesús iniixpa nopa tasentilisti cati más quipixqui tanahuatili. Huan nopa tacame quiilhui-que:

⁶⁷ —Sinta ta tiCristo cati Toteco techilhui techtitanilisqueá, huajca techil-hui.

Huan Jesús quinilhui:

—Sinta nimechilhuisquía, amo antechnehtocasquíaj. ⁶⁸ Huan sinta nimechtatzintoquilisqueá tamanti para ica nimomanahuis, amo antechnan-quilisqueáj, yon amo antechmajcahuasquíaj. ⁶⁹ Pero ama, amo huejcahuas para na cati niMocuetqui Masehuali nimosehuiti inejmat Toteco Dios cati quiipiya nochi chicalualisti.

⁷⁰ Huan injuanti quitatzintoquilijque:

—Huajca ¿ta tilcone Toteco Dios?

Huan Jesús quinilhui:

—Quena, na nilcone.

⁷¹ Huan injuanti moilhuijque se ica seyoc:

—Huajca amo aqui más monequi quitelhuis, pampa tojuanti ya tijcac-toque cati ya quijtojtoc. San ya nopa monequi.

23

Jesús iixpa Pilato

(Mt. 27:1-2, 11-14; Mr. 15:1-5; Jn. 18:28-38)

¹ Huajca nochi injuanti moquetzque huan quihuicaque Jesús iixpa Pilato.

² Huan pejque quitelhuíaj huan quiilhuijque Pilato:

—Tijpantijque ni tacat quincajcayahuayaya masehualme ipan total huan quinilhuiyaya ma amo taxtahuaca impuesto cati Tanahuatijquet César tech-tajtania. Huan quinilhuiyaya masehualme para yaya nopa Cristo, huan yaya se tanahuatijquet.

³ Huan Pilato quitatzintoquili Jesús:

—¿Ta tiinintanahuatijca israelitame?

Huan Jesús quinanquili:

—Quena, na niinintanahuatijca quej tiquijtohua.

⁴ Huan Pilato quinilhui nopa tayacanca totajtztzi, huan nochi nopa miyaqui masehualme:

—Amo nijpantilía cati amo cuali quichijtoc.

⁵ Pero injuanti achi más tahuejchijque huan quiilhuijque:

—Yaya quinyolajcomantinemi masehualme campa huéli ica itamachtil. Pejqui ipan estado Galilea huan ajsico hasta nica ipan Judea.

⁶ Huan quema Pilato quicajqui ya ni, quintatzintoquili sinta Jesús ehua estado Galilea. ⁷ Huan quicajqui para quena, huan quimatqui para quito-carohuayaya Herodes Antipas quitajtolsencahuas pampa yaya quipixqui tanahuatili ipan Galilea. Huajca quititanqui Jesús campa ya para ma quitajtolsencahua, pampa Herodes paxalohuayaya ipan altepet Jerusalén ipan nopa tonali.

Jesús iixpa Herodes

⁸ Huan quema Herodes quiitac Jesús, yaya nelía paquiyaya pampa miyac tonali quinequiyaya quiitas. Quicactoya miyac famanti ten ya huan quinequiyaya para Jesús ma quichihua se tiöchichahualnescayot iixpa. ⁹ Huajca Tanahuatijquet Herodes quitatzintoquili Jesús miyac, pero Jesús amo quinanquili. ¹⁰ Huan nopa tayacanca totajtzitzi huan tamachtiani ten itanahuatil Moisés moquetztoyaj nopona, huan chichahuac quitelhuuyayaj. ¹¹ Huajca Herodes huan isoldados pejque quihuihuiitaj huan quihuetzquilaj. Huan quiyoyonti ica se yoyomif cati cuajcualtzi quej moquentíaj tanahuatiani, huan sempa quititanqui ica Pilato. ¹² Huan ipan nopa tonali Herodes huan Gobernador Pilato sempa moyoltalijque pampa achtohui nelía mocualaniyayaj.

Quiijtojque ma miqui Jesús

(Mt. 27:15-26; Mr. 15:6-15; Jn. 18:39-19:16)

¹³ Huan Pilato quinnotzqui nopa tayacanca totajtzitzi, huan nopa tequichi-huani, huan nopa miyaqui masehualme ¹⁴ huan quinilhui:

—Antechhualiquilijque ni tacat huan antechilhuaj para quinyacana masehualme ma motananaca. Pero nijtatzintoquili amoixpa, huan nijpanti para amo quichijtoc yon se tajtacoli cati ica anquitelhuijtoque. ¹⁵ Huan nojquiya Herodes amo teno quipantili, huan yeca nechtitanili sempa. Amo teno quichijtoc para ma tijmictica. ¹⁶ Huajca nijtatzacuiltis huan nijmajcahuas para ma yahui.

¹⁷ Sesen xihuit ipan nopa Pascua Ilhuit monejqui para Pilato quimajcahuas se cati itztoya ipan tatzacti. ¹⁸ Pero nochi nopa masehualme chichahuac quiijtojque:

—¡Xijmicti Jesús! ¡Xijmajcahua Barrabás!

¹⁹ Huan Barrabás quitzactoyaj pampa quintananqui masehualme ma tatehuica ica gobierno, huan nojquiya pampa temicti. ²⁰ Huan Pilato sempa quincamanalhui nopa masehualme pampa quinequiyaya quimajcahuas Jesús, ²¹ pero nopa miyaqui masehualme achi más tzajtziyayaj:

—¡Xijcuamapelolti! ¡Xijcuamapelolti!

²² Huan Pilato ica expa quinilhui:

—¿Para ten? ¿Taya amo cuali quichijtoc? Amo teno nijpantili cati quichijtoc para ma tijmictica. San nijtatzacuiltis huan teipa nijmajcahuas ma yahui.

²³ Pero nopa miyaqui masehualme huan tayacanca totajtzitzi achi más tahuejchijque huan quitajtanijyayaj ma quicuamapelolti, huan yeca quiferzajhuijque Pilato. ²⁴ Huajca Pilato motemacac para quichihuas cati injuanti quinequiyayaj. ²⁵ Huan quinmalacanili nopa tacat cati tzactoya pampa tatehui ica gobierno huan temicti pampa yaya cati quitajtanijque. Huan quinmactili Jesús inimaco para ma quichihuaca ihuaya cati injuanti quinequiyayaj.

Quicuamapeloltijque Jesús

(Mt. 27:32-44; Mr. 15:21-32; Jn. 19:17-27)

²⁶ Huan nopa soldados quihuicaque Jesús. Teipa quiitzquijque se tacat cati itoca Simón cati ejqui tali Cirene. Yaya ajsitinemiyaya ten ital huan nopa soldados quiquechpanoltijque nopa cuamapeli para ma quihuica iica Jesús.

²⁷ Huan tahuel miyaqui masehualme quitoquiliyayaj, huan miyac sihuame chocayayaj huan tahuejchihuayayaj pampa quicuamapeloltise Jesús. ²⁸ Huan Jesús moicancuetqui huan quinilhui:

—Naname cati anehuaj Jerusalén. Amo xichocaca por na, pero ximochoquilica por amojuanti huan por amoconehua. ²⁹ Pampa ajsis tonali quema masehualme tahuel taijyohuise huan quiijtose para cuali ininpantis sihuame cati amo huelque conepiyaj huan amo quema quinchichitijque coneme. ³⁰ Ipan nopa tonali masehualme quinilhuise nopa tepeme ma huetzi ininpani huan ma quintati. ³¹ Pampa sinta monequi nitaijyohuis quej ni, huan amo nitajtacolchijtoc, ¿quenicatza monequi taijyohuise masehualme cati miyac tajtacoli quihuicaj?

³² Huan quinhuicayayaj ome tachtequini nojquiya para quincumapelol-tise ihuaya Jesús. ³³ Huan nochí ajsitoj campá itoca Mijcatzontecomit, huan quicuumapeloltijque Jesús ica nopa tachtequini, se ipan inejmat huan seyoc ipan iarraves. ³⁴ Pero Jesús motatajti huan quiihui iTata: “Notata, xiquintapojpolhui pampa amo quimatij taya quichihuaj.”

Huan nopa soldados mahuiltijque ica piltetzitzi cati yejyectzi huan momajmacaque iyoyo Jesús. ³⁵ Huan nopa miyaqui masehualme moqetztoyaj nopona huan quitachilijtoyaj. Huan nojquiya nopa tequichihuani quihuihuiitayayaj Jesús huan quiijtohuayayaj ten ya:

—Quinmaquixti sequinoc, huajca ma momaquixti sinta nelía yaya nopa Cristo cati Toteco quitapejpenijtoc para techtitanilis.

³⁶ Huan nopa soldados nojquiya quihuihuiitaque huan monechcahuijque campá yaya quej elisquía quitequipanohuaj huan quitenamiquiltijque xomeca at cati ya xocoxtoya, ³⁷ huan quiihuijque:

—Sinta nelía ta tiinintanahuatijca israelitame, huajca ximomaquixti.

³⁸ Quitalijtoyaj se tajcuiloli ipan icuamapel itzontá Jesús cati quiijto: NI JESÚS ININTANAHUATIJCA ISRAELITAME.

³⁹ Huan se ten nopa tachtequini cati quicuumapeloltijtoyaj nojquiya ica paquiyaya Jesús huan quiihui:

—Sinta nelía ta tiCristo cati Toteco techtitanilijtoc, huajca ximomaquixti huan techmaquixti nojquiya.

⁴⁰ Huan ne se tachtejquet quiajhuac ica cati quiijto, huan quiihui:

—¿Amo tiquimacasi Toteco, masque amantzi timiquis? ⁴¹ Quinamiqui para ta huan na ma timiquica pampa amo cuali cati tijchijtoque, pero ni Jesús amo teno quichijtoc cati amo cuali.

⁴² Huan teipa nopa tachtejquet nojquiya quiihui Jesús:

—Jesús, techelnamiquis quema tihualas para titanahuatis.

⁴³ Huan Jesús quiihui:

—Nimitzilhuía para temachtí, ama ni tonali tiitztoti nohuaya nepa campá tahuel tayejyectzi.

Jesús mijqui

(Mt. 27:45-56; Mr. 15:33-41; Jn. 19:28-30)

⁴⁴ Huan nechca tajco tona, tzintayohuixqui campá hueli ipan taltipacti huan quej nopa mocajqui hasta las tres ica tiotac. ⁴⁵ Ayecmo taahui tonati, huan tzayanqui ica ome nopa hueyi cortina cati quitzacuayaya nopa cuarto Campa Más Tatzejtelolitic hueyi tiopan calijtic. ⁴⁶ Huan Jesús camanaltic chicahuac, huan quiihui iTata:

—Notata, nimitzmactilía notonal momaco ta.

—Huan quema Jesús quiijto ya ni, mijqui.

⁴⁷ Huan nopa capitán ten soldados quiiitac cati Jesús quichijqui, huan pejqui quihueyichihua Toteco Dios huan quiijto:

—Nelía ni Jesús eltoya se tacat cati amo teno quichijtoc.

⁴⁸ Nochi nopa miyaqui masehualme mosentilijtoyaj para quimatise taya ipantis Jesús, huan quema quiitaque nochi ten panoc, tacuepilijque ininchajchaj moyoltejtejtzontiyajque pampa tahuel motequipachohuayayaj. ⁴⁹ Huan nochi ihuampoyohua Jesús huan nopa sihuame cati hualajtoyaj ihuaya ten estado Galilea moquetzttoyaj ica huejca, quitachiliyayaj nochi ni tamanti.

Quitelijque Jesús ipan ostot ipan se tepet
(Mt. 27:57-61; Mr. 15:42-47; Jn. 19:38-42)

⁵⁰ Huan itztoya se tacat cati itoca José cati ehuyaya altepet Arimatea ipan estado Judea. Yaya nojquiya eliyaya se tequitiquet ipan nopa tasentilisti cati más quipixqui tanahuatili cati quitatzintoquili Jesús huan quiijtojqque para monequi miquis. José eltoya se cuali tacat huan xitahuac iyolo iixpa Toteco. ⁵¹ Yaya quichiyayaya para Toteco Dios ma tanahuatis ipan taltpacti huan yeca amo quipacti cati quichijque nopa tasentilisti. ⁵² Huan ni José yajqui quiiatato Pilato huan quitajtani ma quimaca itacayo Jesús. ⁵³ Huan quitemohuito itacayo huan quimimilo ica se hueyi yoyomit. Huan quitejqui ipan se ostot ipan se tepet cati yancuic quicoyonijtoya ipan tet campa ayemo quitelijtoyaj se mijcatzi. ⁵⁴ Huan eltoya nopa tonali para quicualtalise nochi cati monequi pampa a las seis ica tiotac pehuayaya nopa seyoc tonali quema nochi israelitame monequi mosiyajquetzase.

⁵⁵ Huan nopa sihuame cati hualajque ten estado Galilea ihuaya Jesús quitoquilijque José huan quiitaque nopa ostot ipan nopa tepet huan quenicatza quitelijtoya itacayo. ⁵⁶ Huan teipa tacuepilijque ininchaj huan quisencajque taajhuiyacayot cati atic huan cati tatixtic. Huan ipan nopa tonal para mosiyajquetzase israelitame, inijuanti mosiyajquetzque quej quiiyto nopa tanahuatili.

24

Moyolcuic Jesús
(Mt. 28:1-10; Mr. 16:1-8; Jn. 20:1-10)

¹ Ipan domingo, nopa achtohui tonali ipan samano, nelía ijnaltzi nopa sihuame yajque campa ostot ipan nopa tepet huan quihuicaque nopa taajhuiyacayot cati quisencajtoyaj. Huan sequinoc sihuame nojquiya yajque inihuaya. ² Huan quema ajsicoj, quiitaque ya quiijcuenijtoyaj nopa hueyi tet cati quiiixtactoya nopa ostot ipan nopa tepet. ³ Huan calajque, pero amo quipantijque itacayo Tohueyiteco Jesús. ⁴ Huan san motachilijque huan san moilhuyiyaj taya panotoya. Huan nimantzi moquetzque ininechca ome tacame cati moquentijtoyaj iniyoyo cati nelía cahuaniyaya. ⁵ Huan tahuel momajmatijque huan mohuijtzonque huan nopa tacame quinilhuijque:

—¿Para ten anquitemohuaj se cati itztoc nica campa quincahuaj mijcatziti? ⁶ Jesús amo aqui nica. Ya moyolcuic. Xiquelnamiquica quema noja itztoya ipan Galilea amechilhui para moyolcuisquía. ⁷ Amechilhui para monequi quitemactilisquía yaya cati Mocuetqui Masehuali inimaco tajtacolchijca masehualme huan quicuumapeloltisquía huan ica eyi tonati yaya moyolcuisquía sempa.

⁸ Huajca nopa sihuame quielnamijque icamanal, ⁹ huan quisque ipan ostot ipan nopa tepet huan quinyolmelahuatoj nopa majtacti huan se imomachtijcahua huan nochi sequinoc ihuampoyohua Jesús cati quiiiztoyaj. ¹⁰ Huan nopa sihuame cati quinyolmelahuatoj itayolmelajcahua Jesús ten

quitzttoyaj inintoca eliyaya María Magdalena, Juana, huan María inana Jacobo huan nojquiya itzttoyaj sequinoc sihuame inihuaya. ¹¹ Pero imomachticahua moilhuijque san ahuilcamanaltiyayaj huan amo quineltocaque cati quinilhuicoj.

¹² Pero Pedro moquetztiquisqui huan motalo hasta nopa ostot ipan nopa tepet. Huan quitachili iijtic huan quiitac san eltoya nopa hueyi yoyomit cati ica quipijque itacayo Jesús. Huan teipa tacuepili ichaj huan tahuel quitetzaitayaya ten panotoya.

Ipan ojti para Emaús
(Mr. 16:12-13)

¹³ Huan nojquiya ipan nopa tonali itzttoyaj ome ihuampoyohua Jesús cati nejnemiyayaj ipan ojti hasta se pilaltepetzti cati itoca Emaús cati mocajqui nechca majtacti huan se kilómetros ihuejcaca ten altepet Jerusalén. ¹⁴ Huan mocamanalhuyiyaj se ica seyoc ica nochi ten panotoya. ¹⁵ Huan quema mocamanalhuyiyaj, Jesús iselti monechcahuico huan pejqui inihuaya nejnemi. ¹⁶ Pero Toteco amo quincahuili ma quiixmatica sinta ya. ¹⁷ Huan Jesús quintatzintoquili:

—¿Taya anmocomanalhuijtiyahuij ipan ojti? ¿Para ten tahuel anmotequipachohuaj?

¹⁸ Huan se ten injuanti cati itoca Cleofas quinanquili Jesús:

—¿Huelis san ta ipan nochi altepet Jerusalén amo tijmati nochi tamanti ten panotoc nica ipan ni tonali?

¹⁹ Huan Jesús quinilhui:

—¿Taya tamanti?

Huan quiilhuijque:

—Nopa tamanti ten panoc ica Jesús cati ehua Nazaret. Yaya eltoya se tajtolpanextijquet cati quipixqui chichahualisti quichihuas huejhueyi ti-ochichahualnescayot. Tamachtí ica chichahualisti huan quipacti Toteco Dios huan quinpacki masehualme. ²⁰ Huan nopa tayacanca totajtzitzi huan tequichihuaní quitemactilijque para ma quimictica. Huan quicuamapeloltijque. ²¹ Tojuanti timotemachiyayaj ipan ya para techmaquixtis tiisraelitame. Huan quiapiya eyi tonati quicuamapeloltijque. ²² Ama nojquiya san timotachiliyayaj pampa sequij sihuame yajque ijnaltzi hasta campá ostot ipan nopa tepet, ²³ huan amo quipantijque itacayo. Techilhuicoj quinitaque ilhuicac ehuaní cati quinilhuijque para Jesús ya itztoc. ²⁴ Huan sequinoc cati itzttoyaj tohuaya nojquiya yajque campá ostot ipan nopa tepet huan quipantijque nochi quej nopa sihuame quijtojtoyaj, pero amo quitaque Jesús.

²⁵ Huan Jesús quinilhui:

—¿Amo anquimachilíaj? Nelía ohui para anquineltojac nochi cati quijtojqque itajtolpanextijcagua Toteco. ²⁶ ¿Amo anquimachilíaj para monejqui Cristo taijyohuis ica nochi ni tamanti huan teipa yas ilhuicac campá quipiyas ihueyitilis?

²⁷ Huan Jesús pejqui ica cati quijcuilo Moisés huan panoc inintajcuilol nochi sequinoc itajtolpanextijcagua Toteco, huan quinpohuili nochi cati ijcuilijtoc ten ya campá hueli ipan Icamanal Toteco.

²⁸ Huan quema monechcahuiyayaj nopa pilaltepetzti campá yahuij, Jesús mochijqui quej achi más huejca yasquía. ²⁹ Huan nopa ome tacame chichahuac quiilhuijque:

—Ximocahua tohuaya pampa nimantzi calaquis tonati huan tayohuiyas.

Huan Jesús yajqui para mocahuas inihuaya. ³⁰ Huan quema mosehujtoya inihuaya campa mesa, quiitzqui pantzi huan quitascamatqui Toteco, teipa quitajcoitac huan quinmajmacac. ³¹ Huajca elqui quej tapojqui iniixtey-olhua huan quiixmatque, huan nimantzi Jesús ayecmo monexti iniixpa. ³² Huan huajca quiijtojque se ica seyoc:

—¿Amo tijmachiliyaya quej yejyetzti eliyaya ipan moyolo quema yaya techcamanalhuyaya ipan ojti huan techilhuyaya cati quiijtosnequi Icamanal Toteco?

³³ Huan huajca nopa ome tacame moquetzque nimantzi huan tacuepil-ijque Jerusalén. Huan quinpantijque nopa majtacti huan se imomachtijcahua Jesús ya mosentilijtoyaj ica sequinoc ³⁴ cati quiijtohuayayaj para To-hueyiteco nelía moyolcuitoc huan monextijtoya ica Simón Pedro. ³⁵ Huajca nopa ome nojquiya pejque quinyolmelahuaj ten ininpantac ipan ojti huan quenicatza quiixmatque Jesús quema quitajcoitac nopa pantzi.

Jesús monexti iniixpa imomachtijcahua
(Mt. 28:16-20; Mr. 16:14-18; Jn. 20:19-23)

³⁶ Huan quema noja quinilhuyayaj ni tamanti, Jesús moquetzqui tatajco ten inijuanti huan quinilhui:

—Xijpiyaca tasehuilisti ipan amoyolo.

³⁷ Huan inijuanti san quitachilijque huan momajmatijque huan moilhuijque quiitayayaj se ajacat. ³⁸ Huan Jesús quinilhui:

—¿Para ten anmajmahuij huan ohui anquinelto caj para melahuac na?

³⁹ Xiquitaca nomax huan noicxihua campa calajqui lavos. Nelía na. Techitzquica huan xijmachilica. Se ajacat amo qui piya inacayo huan iomiyo quej anquijtaj nijpiya.

⁴⁰ Huan quema quiijtohuayaya ni camanali, quinnnextili imax huan iicxihua. ⁴¹ Huan amo quinelto cayayaj pampa tachel paquiyayaj huan san quitachiliyayaj huan quitetzaitayayaj. Huan yeca Jesús quinilhui:

—¿Amo teno anquipiyaj nica para nijcuas?

⁴² Huan inijuanti quimacaque se michi cati tacacatzoli huan se quentzi necti. ⁴³ Huan quiitzqui huan quicuajqui iniixpa. ⁴⁴ Huan quinilhui:

—Quema noja niitztoya amohuaya, nimechilhui monequiyaya para ma panos nochi cati ijcuilijtoc ten na ipan itanahuatil Moisés, huan ipan Salmos, huan ipan iniamahua nopa tajtolpanextiani.

⁴⁵ Huan teipa Jesús quintapohuili inintalnamiqulils para ma quimachilica Icamanal Toteco. ⁴⁶ Huan quinilhui:

—Quej ni ijcuilijtoc para nopantisquía na niCristo. Monejqui nitaijyohuis huan nimiquis huan ica eyi tonati monejqui nimoyolcuis sempa, huan quej nopa elqui. ⁴⁷ Huan ama monequi amojanti xijpehualtica nica Jerusalén huan xitepohuilica ni camanali ica notequiticayo. para masehualme ma moyolpataca huan ma quicahuaca inintajtacolhua huan Toteco quintapojpolhuis. Huan teipa xitepohuilij ipan nochi talme ipan taltipacti.

⁴⁸ Anquijtztoque ni tamanti huan ama monequi anteyolmelahuase cati anquijtztoque. ⁴⁹ Nechcatitoc para nijtitanis Itonal Toteco ipan amojanti quej noTata amechtecahuilijtoc amechmacas. Huajca ximocahuaca ipan altepet Jerusalén hasta yaya ajsis huan amechtemitis ica chichahualisti ten ilhuicac.

Jesús tejcoc ilhuicac
(Mr. 16:19-20)

⁵⁰ Huan Jesús quinhuicac imomachtijahua hasta Betania huan momatananqui huan quintiochijqui. ⁵¹ Huan quema noja quintiochihuayaya, quistejqui huan tejcoc ilhuicac. ⁵² Huan imomachtijahua quihueyichijque huan teipa tacuepilijque altepet Jerusalén ica hueyi paquillisti. ⁵³ Huan mojmosta itztoyaj ipan nopa hueyi israelita tiopamit quipaquilismacayayaj huan quihueyichihuayayaj Toteco Dios. Quej nopa ma eli.

Icamanal Toteco Cati Quiijcuilo Juan

Cristo Mocuetqui Masehuali

¹ Cristo, yaya cati tenextilía Toteco Dios, ya ipa itztويا quema ayemo oncayaya nochi cati onca. Cristo senitztويا ihuaya Toteco Dios huan yaya nojquiya Dios. ² Yaya itztويا ihuaya Toteco Dios ipan ipejya nochi cati onca. ³ Cristo quichijchijqui nochi tamanti huan yon se tamanti cati onca amo yolqui iselti. ⁴ Yaya nopa nemilismacaquet huan quinmaca nemilisti nochi cati itztoque. Yaya nopa taahuili cati quintaahuilía masehualme ipan iniyolo. ⁵ Ni taahuili taahuía campa onca tzintayohuilot huan nopa tzintayohuilot amo hueli quisehuía.

⁶ Itztويا se tacat cati Toteco Dios quitantoya cati itoca eliyaya Juan. ⁷ Juan hualajqui quipanextico Cristo cati itztoc nopa taahuili para nochi masehualme ma quineltocaca Cristo quema quicaquisquía cati Juan quinilhuiyaya. ⁸ Juan amo ya nopa taahuili. San hualajqui quipanextico nopa taahuili. ⁹ Cristo yaya nopa taahuili cati nelía temachti huan hualajqui ipan taltipacti para techtaahuilis nochi timasehualme ipan toyolo.

¹⁰ Cristo itztويا ipan taltipacti huan yaya quichijqui taltipacti, pero masehualme nica amo quiixmatque ajquiya ya. ¹¹ Yaya hualajqui ica tojuanti tiisraelita masehualhua, pero miyac tojuanti amo tijselijque. ¹² Pero nochi masehualme cati quiselijque Cristo, quinequi quiijtos nochi cati quineltocaque*, yaya quinmacac tequiticayot para elise iconehua Toteco. ¹³ Inijuanti amo mochijque iconehua Toteco pampa tacatque ipan se cuali xinachti masehualme. Yon amo iconehua quej tiiconehua totatahua, yon amo iconehua pampa quinejqui se tacat. Inijuanti iconehua Toteco Dios pampa Toteco quinejqui ma elica.

¹⁴ Huan Cristo cati tenextilía Toteco Dios mocuetqui masehuali ica itacayo quej tojuanti huan itztويا tohuaya nica san se talochti. Huan tiquitaque ihueyitilis huan tiquixmatque para yaya iyojtzí Icone Toteco Totata. Nelía hueyi iyolo ica tojuanti huan yaya itztoc cati senquisa melahuac. ¹⁵ Juan teyolmelajqui ten Cristo huan quiijto: “Yaya ni cati nimechilhuiyaya quema niqumto para teipa hualas se cati quiipya más itequiticayo que na. Pampa quema ayemo nitacatiyaya, yaya ya ipa itztويا.”

¹⁶ Nochi tojuanti tijselijtoque miyac tatiocihuali ten iricojyo Cristo pampa hueyi iyolo ica tojuanti. Huan mojmosta más techtiochihua. ¹⁷ Quena, Toteco techmacac itanahuatilhua ica Moisés, pero ica Jesucristo technextilijtoc para hueyi iyolo ica tojuanti. Huan ica ya techmachti cati nelía temachti. ¹⁸ Amo aquí quiitztoc Toteco Dios, pero Jesucristo, iyojtzí Icone cati mocahua inechca, technextilico nochi ten ya.

Juan cati tecuaaltiyaya camanaltic ten Jesucristo (Mt. 3:11-12; Mr. 1:7-8; Lc. 3:15-17)

¹⁹ Huan ya ni cati Juan quinilhui nopa israelitame ten altepet Jerusalén quema israelita totajtzitzi huan levitame quintitanque ma quitatzintoquilitij Juan ajquiya yaya. ²⁰ Juan quinilhui xitahuac:

—Na amo niCristo.

²¹ Huan inijuanti quitatzintoquilitijque:

* 1:12 1:12 Quineltocaque itoca.

—¿Huajca ajquiya ta? ¿Ta tiElías?

Huajca Juan quiijto:

—Amo na niElías.

Huan quitatzintoquilijque:

—¿Ta tuitzotoc nopa tajtolpanextijquet cati Toteco techilhui techititanil-isquia?

Juan quinnanquili:

—¡Amo cana!

²² Huajca injuanti quiilhuijque:

—Techilhui ajquiya ta para huelis tiquinyolmelahuase cati techtitan-toque. ¿Taya motequi?

²³ Huajca Juan quinnanquili ica ni camanali cati quiijcuilo nopa tajtolpanextijquet Isaías cati huejcaquiya itztoya. Quinilhui:

—Na san nise tacat cati Toteco quitequihuía para nicamanaltis chichahuac ipan nopa huactoc tali campa amo teno eli huan niqijtohua: ‘Xijpataca amoyolo pampa hualas Tohueyiteco. Xijsencahuaca huan xijxitahuaca iojhui para ipan nemis.’

²⁴ Huan nopa tacame cati fariseos quintitantoyaj, ²⁵ quiilhuijque:

—Huajca, ¿para ten titecuaaltía sinta amo tiCristo huan amo tiElías, huan amo ta nopa tajtolpanextijquet cati hualas?

²⁶ Huajca Juan quiijto:

—Na san nitecuaaltía ica at, pero itztoc seyoc tatajco ten amojuanti cati ayemo anquiixmatij. ²⁷ Yaya hualas teipa huan yaya quiipiya más tequiticayot que na. Na amo nicaxilía para nielis niitequipanojca, yon para nijquixtilis itecac.

²⁸ Nochi ya ni panoc campa Juan tecuaaltiyaya ipan altepet Betábara ipan ne seyoc nali hueyat Jordán para campa quisa tonati.

Jesús ipilborrego Toteco

²⁹ Huan hualmosta Juan quiitac Jesús hualayaya campa itztoya huan quinilhui nopa masehualme: “Ne tacat, yaya cati Toteco techtitanilij-toc. Yaya itoca ipilborrego Toteco pampa elis nopa tacajcualisti cati techquixtilis nochi totajtacolhua nochi timasehualme ipan ni taltipacti.

³⁰ Nimechilhuiyaya ten ya quema nimechilhui para teipa hualas se tacat cati quiipiya más tequiticayot que na pampa quema ayemo nitacatiyaya, yaya ya ipa itztoya. ³¹ Achtohui amo nijmatiyaya catijqui ya, pero nihualajqui para nitecuaaltis para niqinextilis nochi israelitame.”

³² Nojquiya Juan quinyolmelajqui: “Niquitac Itonal Toteco hualtemoc ten ilhuicac quej se paloma huan mocahuaco ipan ya. ³³ Huan amo nijmaj-tosquía sinta yaya, pero Toteco Dios cati nechitanqui para nitecuaaltis ya nechilhuijtoya para quema niqitasquía Itonal hualtemos huan mocahuas ipan se tacat, huajca yaya cati temacas Itonal. ³⁴ Huajca ya nopa niqitac huan yeca nimechyolmelahua para ni tacat, yaya Icone Toteco Dios.”

Nopa achtohui imomachtijcahua Jesús

³⁵ Huan hualmosta sempa moquetzayaya Juan ihuaya ome imomachtijc-ahua. ³⁶ Huan quiitac Jesús quema panoyaya nechca huan quiijto:

—Xiquitaca ne tacat, yaya ipilborrego Toteco.

³⁷ Huan nopa ome imomachtijcahua Juan quicajque cati quiijto huan quitoquilijque Jesús. ³⁸ Huan Jesús moicancuetqui, huan quinitac quito-quiiluyayaj huan quinilhui:

—¿Taya anquinequij?

Huan quijtojqe:

—Tamachtijquet, ¿canque tiitztoc?

³⁹ Huan quinilhui:

—Xihualaca, xiquitaquij canque nimocahua.

Huajca yajque huan quitatojqe campa mocahuayaya huan mocajque ihuaya pampa eliyaya las cuatro ica tiotac.

⁴⁰ Se ten nopa ome cati quicajqui cati Juan quijto huan yeca quitoquili Jesús, itoca eliyaya Andrés. ⁴¹ Huan Andrés yajqui xitahuac quitemoto iicni, Simón, huan quillhui:

—Tijpantijque nopa Mesías. (Pampa inijuanti quitocaxtiyayaj nopa Cristo cati Toteco quijto para quititanisquía ‘Mesías’ ipan inincamanal.)

⁴² Huan Andrés quihuicac Simón campa Jesús. Huan Jesús quitachili huan quijto:

—Ta tiSimón, tiicone Jonás, pero nimitztocaxtalis tiCefas. (Cefas ica tocamanal quijtosnequi Pedro.)

Jesús quinnotzqui Felipe huan Natanael

⁴³ Huan hualmosta Jesús quinejqe yas estado Galilea. Huajca quipanti Felipe huan quillhui:

—Techtoquili.

⁴⁴ Felipe ehuyaya ipan altepet Betsaida campa nojquiya ehuyayaj Andrés huan Pedro. ⁴⁵ Huan Felipe quipantito Natanael huan quillhui:

—Tijpantijtoque nopa tacat cati ica Moisés quijcuilo huejcajquiya ipan itanahuatilhua. Nojquiya quijcuilojqe ten ya nopa tajtolpanextiani huejcajquiya huan quijtojqe para teipa hualasquía. Yaya Jesús, icone José, huan ehua altepet Nazaret.

⁴⁶ Huan Natanael quijto:

—¿Quenicatza huelis? Amo aqui cati cuali huelis hualas ten altepet Nazaret.

—Pero Felipe quijto:

—Xihuala, xiquitaqui.

⁴⁷ Huan quema Jesús quiiac Natanael ajsiyaya, quijto ten ya:

—Xiquitaca, ya huala se israelita cati temachi huan cati amo quema tacajcayahua.

⁴⁸ Huajca Natanael quitatzintoquili Jesús:

—¿Quenicatza techixmati?

Huan Jesús quinanquili:

—Quema noja tiitztoya itzinta nopa higuera cuahuit huan ayemo mitznotzayaya Felipe, na nimitzitic.

⁴⁹ Huan Natanael quillhui:

—Tamachtijquet, ta tiicone Toteco. Ta titotanahuatijca cati technahuatis tiisraelitame ipan ni total.

⁵⁰ Huan Jesús quinanquili:

—¿Techneltoca ajquiya na san pampa nimitzilhui nimitzitic quema noja tiitztoya itzinta nopa higuera cuahuit? Tiquitas tamanti cati noja más huejhueyi que ni. ⁵¹ Nelía nimitzilhúa, tiqitas motapos ilhuicacti huan tiqunitas nopa ilhuicac ecahua Toteco cati tejcotiyase hasta ilhuicac huan temotihualase ipan taltipacti campa na cati niMocuetqui Masehuali para nechtequipanose.

¹ Huan hualhuicta oncac se tacualisti ten nenamictili ipan altepet Caná ipan estado Galilea, huan yajqui inana Jesús. ² Huan nojquiya quinotzque Jesús huan technotzque tiimomachtijcagua, huan nochí tiyajque. ³ Huan tanqui xocomeca at huan inana Jesús quiilhui:

—Ayecmo quipiyaj xocomeca at.

⁴ Huan Jesús quiilhui:

—Nane, ¿para ten techilhuía na? Ayemo ajsi nohora para nimonextis.

⁵ Huan inana yajqui quinilhuito nopa tatequipanohuani ipan nopa tacualisti:

—Xijchihuaca nochí cati Jesús amechilhuis.

⁶ Huan nepa eltoya chicuase huejhueyi comit cati quicoyonijtoyaj ten tet huan ipan atecayayaj para masehualme ma momajtequica quej toisraelita tanahuatilhua quijitohuaj. Huan sesen nopa comit huelis quicuisquía ochenta hasta cien litros ten at. ⁷ Huajca Jesús quinilhui nopa tatequipanohuani:

—Xijtemitica nochí ne comit ica at.

Huan cuali quintejtemitijque. ⁸ Huan Jesús quinilhui:

—Ama xijcuica quentzi huan xijhuiquilica nopa ilhuichijquet.

Huajca quihuiquilijque. ⁹ Huan nopa ilhuichijquet quiyeco nopa at cati ya mocuctoya xocomeca at huan moilhui nelía se cuali xocomeca at, pero amo quimatqui canque quicuitoyaj. San nopa tatequipanohuani, quena, quimatque canque quiquixttoyaj. Huajca nopa ilhuichijquet quinotzqui nopa mosihuajtijquet, ¹⁰ huan quiilhui:

—Nochí cati temacaj se tacualisti achtohui temacaj xocomeca at cati cuali, huan teipa quema nochí tanotzalne ya achi taitoque, quinmacaj xocomeca at cati amo nelnelía cuali. Pero ta, amo tijhijtoc ya nopa. Ta ticajojqui ni xocomeca at cati más cuali para titetailtis amantzi.

¹¹ Jesús quichijqui ni tanextili ipan altepet Caná ipan estado Galilea. Huan ya ni elqui nopa achtohui tanextili cati quichijqui para technextilis ihueyitilis. Huan tiimomachtijcagua más tijneltocaque para yaya nopa Cristo cati Toteco techtitaniliscuía.

¹² Teipa Jesús temoc hasta altepet Capernaum ica inana, iicnihua teipan ehuan huan tojuanti cati tiimomachtijcagua. Huan timocajque nepa se quentzi tonali.

Jesús quinquixti cati tanamacayayaj ipan tiopamit
(Mt. 21:12-13; Mr. 11:15-18; Lc. 19:45-46)

¹³ Ya nechca eltoya nopa ilhuit cati itoca Pascua*, huan Jesús yajqui hueyi altepet Jerusalén. ¹⁴ Huan nepa quinpanitito masehualme cati mosentilijtoyaj calijtic ipan nopa hueyi tiopamit huan quinnamacayayaj huacaxme, borregojme huan palomas para ma quitencahuilica Toteco quej tacajcahualisti. Huan nojquiya mosehuiyayaj tiopan calijtic masehualme cati quipatayayaj sequinoc talme inintomi ica israelita tomi para quitaniliscuía se quentzi. ¹⁵ Huajca Jesús quichijqui se cuarta ten cuetaxti huan ica quinquixti nochí nopa masehualme inihuaya ininborregojhua huan inihuacaxhua. Huan quintepehuili inintomi cati quipatayayaj tomi ten sequinoc talme huan quintahuisoli inincuamesas. ¹⁶ Huan quinilhui cati quinnamacayayaj palomas:

* **2:13** 2:13 Ipan nopa Pascua Ilhuit sesen xihuit israelitame quielnamiqij quenicatza Toteco quinquixti tohuejcapcan tathua ten tali Egipto huejcajquiya.

—Xijhuicaca cati amoaxcahua. Ayecmo xijchihuaca amotianquis tiopan calijtic pampa ni tiopamit ichaj noTata.

¹⁷ Huan tiimomachtijcahua tiquelnamijque cati ijcuilijtoc ipan Icamanal Toteco campa quijtohua para Cristo quitepanitas itiopa iTata ica nochi iyolo, masque ica ya nopa monequi miquis.

¹⁸ Huan nopa tayacanca israelitame nepa quitatzintoquilijque Jesús:

—¿Taya tanextili hueli tijchihuas para technextilis tijpiya itequiticayo Toteco Dios para tiquinquixti cati itztoyaj ipan ni tiopamit?

¹⁹ Huan Jesús quinnanquili:

—Xijsoyoloca ni tiopamit huan ica eyi tonati sempa nijsencahuas quej ipa eltoya.

²⁰ Huan nopa israelitame quillhuijque:

—Miyac tacame tequipanojque para cuarenta y seis xihuit para quichijque ni tiopamit; ta amo huelis tijchihuas sempa ica eyi tonati.

²¹ Pero quema Jesús quijto eyi tonati, quincamanalhuyaya ten itacayo cati eliyaya se tiopamit. ²² Huan teipa quema panotoya miyac metzti huan Jesús mijqui huan ipan eyi tonati sempa moyolcuic, tiimomachtijcahua tiquelnamijque nopa tonali quema quijto ni ten itacayo. Huajca tijneltoaque cati ijcuilijtoc ipan Icamanal Toteco huan tijneltoaque cati yaya techilhuijtoya.

Jesús quimati iniyolo nochi masehualme

²³ Huan Jesús itztoya ipan altepet Jerusalén ipan nopa Pascua Ilhuit. Huan quitaque miyaqui masehualme nopa huejhueyi tanextili cati quichihuyaya huan quineltocaque para nelía yaya nopa Mesías. ²⁴ Pero Jesús amo motemachi ipan nopa masehualme pampa cuali quixmatiyaya quenicatza eltoc iniyolo. ²⁵ Huan amo monejqui seyoc quillhuis Jesús quenicatza itzto se masehualme pampa yaya iselti cuali quimatiyaya cati eltoc ipan iniyolo nochi masehualme.

3

Jesús huan Nicodemo

¹ Itztoya se tacat itoca Nicodemo cati elqui se fariseo huan se tayacanquet ten israelitame. ² Yaya hualajqui ica tayohua quitaque Jesús huan quillhui:

—Tamachtijquet, tojuanti tijmatij Toteco Dios mitztitanqui nica para techmachtis pampa amo aqui hueli quichihua huejhueyi tanextili cati technextilía ichicahualis Toteco quej tijchihua sinta Toteco amo itzto squía ihuaya.

³ Huan Jesús quillhui:

—Nelía nimitzilhuía, sinta se masehualme amo tacatis sempa huan quiapiyas nemilisti cati yancuic, amo quema huelis yas campa tanahuatía Toteco.

⁴ Huan Nicodemo quillhui Jesús:

—¿Quenicatza hueli se tacat cati ya quiapiya miyac xihuit calaquis ipan inana para tacatis sempa?

⁵ Huan Jesús quinnanquili:

—Nelía nimitzilhuía, sinta amo tacatis sempa ica at huan ica Itonal Toteco, amo huelis yas campa Toteco tanahuatía. ⁶ Se conet cati inana quitacatiltía quiapiya inacayo huan iomiyo quej inana quiapiya. Pero Itonal Toteco quitacatiltía cati itonal se masehualme. Huan elis itonal nopa masehualme cati quiselis nopa nemilisti yancuic. ⁷ Amo san techtachili quema nimitzilhuía monequi sempa titacatis. ⁸ Xiquita quenicatza eltoc ica ajacat. Tojuanti tijcaquij nopa ajacat cati pano, pero amo tijmatij canque quistejqui, yon

amo tijmatij canque ajsiti. Nojquiya quema Itonal Toteco quitacatlítia se masehuali, tijmatij quipiya nemilisti yancuic, pero amo hueli tijmachilíaj quenicatza elqui.

⁹ Huan Nicodemo quilhui Jesús:

—Amo nijmachilía cati techilhuía.

¹⁰ Huan Jesús quilhui:

—Tiitztoc se hueyi tamachtijquet ten Icamanal Toteco ipan ni tali Israel.

¿Para ten amo tijmachilía cati niqijtohua? ¹¹ Nelía nimitzilhuía, nimitzy-olmelahua cati nijmati huan cati niqiztzc, pero amo tijneltoaca nocamanal.

¹² Sinta nimitzilhuijtoc cati pano nica ipan taltipacti huan amo techneltoca, huajca ¿quenicatza huelis techneltocas quema nimitzilhuis cati eltoc ipan ilhuicac?

¹³ “Amo aquí yajtoc ilhuicac huan mocuetoc nica para amechilhuiqui quenicatza eltoc. San na cati niMocuetqui Masehuali cati nihualtemoc ten ilhuicac hueli nimitzilhuía cati eltoc nepa. ¹⁴ Tiquelnamiqij quenicatza Moisés huejcajquiya quiquetzqui se cuahuit ipan nopa huactoc tali campa amo teno eli huan ipani quitananqui se tepos cohuat. Huan nochi masehualme cati quintzacanijttoyaj cohame hueliyayaj quitachilise nopa tepos cohuat huan mochicahuase. Quej nopa nojquiya ica na. Masehualme nechtananase na cati niMocuetqui Masehuali ipan se cuamapeli. ¹⁵ Huan nochi cati nechneltocase quiselise nemilisti yancuic para nochipa.”

Toteco quinicnelía masehualme ipan taltipacti

¹⁶ Toteco nelía miyac quinicnelía nochi masehualme ipan ni taltipacti huan yeca quititanqui Icone iyojtzi para miquis por inijuanti. Huan quiyampa nochi cati quineltoCase, amo polihuisse, pero quipiyase nemilisti cati yancuic para nochipa. ¹⁷ Toteco amo quititanqui Icone ipan ni taltipacti para tetatzacuilitis. Quititanqui para ma temaquixtis.

¹⁸ Toteco amo quitatzacuilitis cati quineltoaca Icone. Pero cati amo quineltoaca, quena, Toteco ya motemacatoc quitatzacuilitis pampa amo quineltoaca itoca* Icone iyojtzi. ¹⁹ Huan quitatzacuilitis pampa Icone hualajqui ipan taltipacti para quitaahuilis ininfalnamiquilis masehualme, pero masehualme más quicnelíaj tzintayohuilot que taahuili pampa fiero cati quichihuj. ²⁰ Nochi masehualme cati quichihuj cati amo cuali quicualancaitaj taahuili huan amo quinequij monechcahuise campa taahuili pampa quimatij quinextis para amo cuali cati quichihuj. ²¹ Pero masehualme cati quichihuj cati cuali, hualahuij campa nopa taahuili ica paquillisti para monextis para Toteco quinpalehuía ica nochi nopa cuali tamanti cati quichihuj.

Juan cati tecuaaltiyaya camanaltic sempa ten Jesús

²² Teipa Jesús huan tiimomachtijcagua tiyajque sejcayoc ipan estado Judea huan nepa timocajque más tonali pampa masehualme hualayayaj para mocuaaltise. ²³ Huan ipan nopa tonali Juan tecuaaltiyaya nechca altepet Enón cati eltoya nechca altepet Salim pampa nozona oncaiyaya miyac at, huan masehualme yahuiyayaj campa ya para ma quincuaalti. ²⁴ Ya ni panoc quema ayemo quitzacuayayaj Juan.

²⁵ Huan sequij itatoquijcagua Juan pejque mocamaixnamiquij inihuaya sequij tayacanani ten israelitame ica catijqui tacuaaltilisti achi cuali para tepajpacas iixpa Toteco. ²⁶ Huajca imomachtijcagua Juan yajque campa ya huan quilhuijque:

* 3:18 3:18 Itequiticayo.

—Tamachtijquet, ¿tiquelnamiqui nopa tacat Jesús cati itztoya mohuaya ipan nopa seyoc nali hueyat Jordán campa quisa tonati? Tiquinilhuiyaya nochi para yaya nopa Cristo. Ama nochi masehualme yahuij campa ya para mocuaaltise.

²⁷ Huajca Juan quinnanquili:

—Toteco Dios quimaca sesen tacat nopa tequit cati quinequi ma quichihua. ²⁸ Anquimatij nimechilhui xitahuac para amo na nopa Cristo, pero Toteco nechtitantoc ma nihuala achtohui para nijcualtalis iojhui. ²⁹ Quema onca se nenamictili, nopa ichpocat yahui campa nopa mosihuajtijquet, pero ihuampo nopa mosihuajtijquet quicaqui quema quinotza nopa ichpocat ma huala, huan nelía paqui nojquiya. Na niitztoc quej ihuampo nopa mosihuajtijquet. Na ninelpaqui pampa masehualme yahuij campa Jesús. ³⁰ Monequi yaya elis más hueyi huan na, amo.

Cristo hualajqui ten ilhuicac

³¹ “Cristo hualajqui ten huejcapa huan yaya más hueyi que nochi sequinoc. Na san niehua ipan ni taltipacti huan san nijmati cati eltoc ipan ni taltipacti. Pero yaya hualajqui ten ilhuicac huan quiptiya tanahuatili ica nochi tamanti. ³² Huan yaya tayolmelahua cati quiitztoc huan quicactoc nepa ilhuicac, pero miyaqui masehualme amo quineltocaj cati quinilhuía. ³³ Pero aqui quineltoca cati Cristo quiijtohua, quipanextía para Toteco quiijtohua cati melahuac, ³⁴ pampa Toteco Dios quititanqui Jesús huan yaya camanalti camanali ten Toteco. Pampa Toteco quimacatoc Itonal huan amo quimacac san se quentzi. Quimacatoc Itonal ica nochi ichicahualis. ³⁵ Toteco Dios quicnelía Icone huan quimacatoc tequiticayot ica nochi cati onca. ³⁶ Sinta se masehuali quineltoca Icone Toteco, yaya quiptiya nemilisti para nochipa. Pero sinta se amo quineltoca Icone Toteco, amo quiptiyas nopa nemilisti, huan Toteco temachtí quitatzacuiltis.”

4

Jesús quicamanalhui se sihuat ten estado Samaria

¹ Huan teipa Jesús quisqui estado Judea pampa quicajqui para nopa fariseos ya quimatiyayaj para nelía momiyaquilliyayaj imomachtijcahua huan para tojuanti tiquincuaaltiyayaj más masehualme que Juan. ² Nelía Jesús amo aqui quicuaalti, pero elque tojuanti tiimomachtijcahua cati tiquincuaaltijque cati ajsiyayaj campa ya. ³ Huan yeca tiquisque estado Judea campa itztoyaj nopa fariseos huan tiyahuiyayaj para estado Galilea.

⁴ Huan ipan ojti monequiyaya tijpanose estado Samaria. ⁵ Huan Jesús ajsito ipan se altepet cati itoca Sicar ipan Samaria cati eltoya nechca nopa mili cati tohuejcapan tata Jacob huejcajquiya quicahuilijtejqui icone, José. ⁶ Huan nozona eltoya se ameli cati Jacob quixajqui huejcajquiya. Huajca Jesús mosehui amelteno pampa siyajtaya. Nejnentoya huejca huan ya eliyaya tajco tona. ⁷⁻⁸ Huan tiimomachtijcahua tiyajtayaj ipan nopa altepet para tijcohuatij tacualisti. Huan atacuico se sihuat ten tali Samaria, huan Jesús quiihlui:

—Techmaca se achi moa para niquis.

⁹ Pero tiisraelitame amo tiquinnojnótzaj Samaria ehuaní. Huajca nopa sihuat Samaria ejquet san quitachili Jesús huan quiihlui:

—¿Para ten ta cati tiisraelita techtajtania ma nimitzamaca huan na niSamaria ejquet?

¹⁰ Huan Jesús quinnanquili:

—Sinta tijmatisquía cati Toteco Dios quinequi mitzmacas huan ajquiya na cati nimitztajtania at, techtajtansiquía huan nimitzmacasquía at cati temaca nemilisti yancuic.

¹¹ Huan nopa sihuat quiilhui:

—Tate, amo teno tijpiya para ica tijquixtis at huan huejcata ni ameli. ¿Canque tijcuis at cati temaca nemilisti yancuic? ¹² ¿Ta tiitztoc más hueyi que tohuejcapan tata Jacob cati huejcajquiya quiic at ten ni ameli huan nojquiya quiique iconehua huan itapiyalhua, huan teipa techcahuilijtejqui?

¹³ Huan Jesús quinanquili:

—Nochi cati quiise at ipan ni ameli sempa amiquise. ¹⁴ Pero aqui quiiis nopa at cati na nitemaca, ayecmo quemá amiquis pampa nopa at cati nitemaca elis quej se ameli cati meyas ipan iyolo huan químacas nemilisti yancuic para nochipa.

¹⁵ Huajca nopa sihuat quiilhui:

—Tate, techmaca nopa at para ayecmo niamiquis huan ayecmo niat-acuiqui ipan ni ameli.

¹⁶ Huan Jesús quiilhui:

—Xiya, xijnotzati mohuehue ma huala.

¹⁷ Huan nopa sihuat quinanquili:

—Amo nijpiya nohuehue.

Huan Jesús quiilhui:

—Melahuac cati techilhujtoc, amo tijpiya mohuehue. ¹⁸ Pampa tiquin-pixqui macuiliti mohuehuejhua huan yaya cati ama mohuaya itztoc, amo mohuehue. Huajca techilhujtoc cati melahuac.

¹⁹ Huan nopa sihuat quiilhui Jesús:

—Tate, nimoilhuía ta se titajtolpanextijquet cati quipanextía icamanal Toteco. ²⁰ Huajca techilhui ya ni. Tohuejcapan tatahua cati ejque ni tali Samaria quiiijtojqe monequi ma tijhueyimatice Toteco ipan ni tepet, pero anisraelitame anquiiijtohuaj monequi masehualme yase quihueyimatitij Toteco ipan altepet Jerusalén. ¿Ajquiya quiiijtohua cati melahuac?

²¹ Huan Jesús quiilhui:

—Nane, techneltoquili cati nimitzilhuía. Ajsis tonali quema ayecmo monequis anhuilase ipan ni tepet, yon ayecmo monequis anyase Jerusalén para anquihueyimatise Toteco Totata. ²² AnSamaria ehuaní amo anquixmatij ajquiya anquihueyimatij. Pero tiisraelitame, quena, tiquixmatij Toteco Dios cati tijhueyimatij. Huan Toteco temaquixtis ica se cati israelita. ²³ Ajsis tonali, quena, melahuac ya ajsico nopa tonali, quema nochi cati nelía quinequij quihueyimatise Toteco Totata quihueyimatise ipan iniyolo huan inintonal huan quiilhuisse cati melahuac, pampa quej nopa Totata huanequi ma quihueyimatice nochi masehualme. ²⁴ Toteco Dios yaya se tonaltzi cati amo aquí huéli quiita, huan masehualme cati quinequij quihueyimatise monequi quihueyimatise ica inintonal huan monequi quiilhuisse cati melahuac.

²⁵ Huan nopa sihuat quiilhui:

—Nijmati hualas nopa Mesías, yaya cati quitocaxtiáj nopa Cristo cati Toteco techtitanilis. Huan quema yaya hualas, techmachtis nochi tamanti.

²⁶ Huan Jesús quiilhui:

—Na cati nimitzcamanalhuía, na niCristo.

²⁷ Huan quema Jesús noja quicamanalhuyaya nopa sihuat, tiimomachticahua tiajsicoj huan san tijfachilijque huan tijtetzaitaque pampa quicamanalhuyaya se sihuat Samaria ejquet, pero amo aquí quitatzintoquili:

“¿Taya tijtemohua?” o “¿Para ten tijcamanalhuía?” ²⁸ Huajca nopa sihuat quicajte ico campa ameli huan yajqui ipan altepet huan quinilhuito masehualme:

²⁹ —Xihualaca nohuaya, xiquitaj se tacat cati nechilhuitoc nochi cati nijchijtoc. Xiquitaj sinta amo ya nopa Cristo.

³⁰ Huan nopa masehualme quisque ipan nopa altepet huan hualajque campa tiitztoyaj. ³¹ Huan quema ayemo ajsiyayaj nopa masehualme, tiimomachtijcahua tiquilhuijque Jesús:

—Tamachtijquet, xitacuaya.

³² Huan Jesús technanquili:

—Nijpiya notacualis cati amo anquimatij.

³³ Huan timocamanalhuijque se ica seyoc:

—¿Huelis se acajya quihualiquili itacualis?

³⁴ Pero Jesús techilhui:

—Quema nijchihua ipaquilis noTata cati nechtitanqui huan quema nijtamichihua itequi, nechmaca chichualisti quej tacualisti nechmacasquía.

³⁵ Anquijtohuaj polihui nahui metzti para pixquisti. Pero xiquitaca ama ne miyaqui masehualme cati hualahuij. Nimechilhúa, injuanti itztoque quej se pixquisti cati ya cualtitoc. Sinta tiquinpalehuise nechneltocase, injuanti quena, nechneltocase. ³⁶ Masehualme cati quinpalehuía sequinoc para ma nechneltocaca quiselise inintaxtahuil. Huan nopa pixquisti cati quinsentilise elise masehualme cati itztose para nochipa. Quema oncas pixquisti, paquise san sejco cati quitojqui xinachti ipan se mili huan seyoc cati quipixcas. Quej nopa nojquiya se cati achtohui quilhuis se tacat nocamanal, yaya paquis ihuaya nopa seyoc cati teipa quipalehuis para nechneltocas. ³⁷ Quej ni quisas melahuac nopa camanali cati quijtohua: ‘Se quitoca xinachti huan seyoc quisentilis nopa pixquisti.’ ³⁸ Nimechtitanqui para anquinpalehuise masehualme para nechneltocase. Pero amo amojuanti cati achtohui anquinilhuijque nocamanal. Sequinoc quitojque nocamanal ipan iniyolo achtohuiya huan amojuanti anquixcase cati elqui inintequi.

³⁹ Huan nopa sihuat cati quicamanalhui Jesús amelteno quinilhuitoya miyaqui Samaria ehuan ipan altepet Sicar para Jesús quihuitoya nochi cati quichijtoya ipan inemilis. Huan miyac injuanti quineltocaque para Jesús itztoya nopa Cristo pampa nopa sihuat quijto para Jesús quihuitoya nochi cati quichijqui ipan inemilis. ⁴⁰ Huajca miyaqui Samaria ehuan ajsicoj campa tiitztoyaj huan chichahuac quitajtanjique Jesús ma mocahua inihuaya, huan yeca mocajqui inihuaya ome tonati. ⁴¹ Huan más miyac quineltocaque Jesús ica cati yaya iselti quinilhui. ⁴² Huan quihuitojque nopa sihuat:

—Ayecmo tijneltocej Jesús san ica cati ta techilhui, pampa tojuanti toselti tijcactoque cati yaya techilhui, huan tijmatij yaya nelía nopa Cristo cati huelis quinmaquixtis nochi masehualme ipan taltipacti ten inintajtacolhua.

Jesús quichicajqui icone se tequitquet

(Mt. 8:5-13; Lk. 7:1-10)

⁴³ Huan hualhuicta Jesús quisqui estado Samaria huan yajqui ipan Galilea nopa estado campa ehua. ⁴⁴ Huan masque Jesús quijtoya para masehualme cati san sejco ehuan se tajtolpanextijquet amo quitepanitaj, ⁴⁵ nochi Galilea ehuan quiselijque Jesús ica paquilisti quema ajsito inintal, pampa injuanti yajtoyaj ipan nopa Pascua Ilhuit ipan altepet Jerusalén huan quitztoyaj nochi nopa huejhueyi tamanti cati Jesús quichijtoya nozona.

⁴⁶ Huan teipa Jesús tacuepili altepet Caná ipan estado Galilea campa achtohuiya quicuetqui at para ma mochihua xocomeca at. Huan nechca Caná ipan altepet Capernaum itztoya se hueyi tequichijquet ten nopa hueyi tanahuatijquet ipan altepet Roma. Huan nopa tequitiquet quipixqui se icone cati mococohuaya. ⁴⁷ Huan quema nopa tacat quicajqui Jesús ya quistoya estado Judea huan ajsico ipan estado Galilea, yajqui campa Jesús huan quitajtani ma yahui ichaj ma quichicahuati ioquichpil pampa motahueliyaya. ⁴⁸ Huan Jesús quiilhui:

—¿Monequi talojtitzti nijchihuas tanextili huan tiochicahualnescayot para antechnehtocase ajquiya na?

⁴⁹ Huan itequichijca nopa tanahuatijquet quiijto:

—Tate, ma tiyaca nimantzi pampa nocone ya miquis.

⁵⁰ Huan Jesús quiilhui:

—Ya xiya mochaj. Ya mochicajqui mooquichpil.

Huan nopa tacat quineltocac cati Jesús quiilhui huan quistejqui. ⁵¹ Huan hualmosta ipan ojti quinnamijqui itatequipanojcahua huan quiilhuijque:

—Ya mochicajqui mocone.

⁵² Huajca nopa tequichijquet quintatzintoquili taya hora pejqui caxani nopa cocolisti, huan quiilhuijque:

—Yalohua quema panotoya tajco tona caxanqui nopa tatotonilot.

⁵³ Huan itata nopa oquichpil quimachili para mochicajqui ipan nopa hora quema Jesús quiilhui para ya mochicajqui icone. Yeca yaya huan nochi ihuicalhua quineltocaque Jesús.

⁵⁴ Ya ni eli nopa ompa tanextili cati Jesús quichijqui ipan estado Galilea quema ya quistoya ipan estado Judea.

5

Jesús quichicajqui se tacat cati amo hueli molinía

¹ Teipa tiisraelitame tijpixque se ilhuit huan Jesús yajqui altepet Jerusalén.

² Huan eltoya se hueyi ameli ipan Jerusalén cati temitoc ica at huan quito-caxtiyayaj Betesda ipan camanali hebreo. Nopa ameli eltoya nechca nopa caltemit cati itoca “Borregoyme” ipan nopa tepamit cati quiyahualtzactoya altepet. Huan nopa ameli quipixtoya macuili icalmapanyo. ³ Huan ipan nochi nopa calmapamit itztojaj miyac cocoyani; sequij popoyotzitzti, sequij metzcuachotique huan sequij masehualme cati amo huelij moliníaj, san huapactique inintacayo. ⁴ Nochi quineltocayaj para quemantica hualayaya se ilhuicac ejquet para quiolinis nopa at, huan moilhuijque san mochicahuasquía nopa achtohui cocoxquet cati calaquisquía ipan nopa at.

⁵ Huan nepa itztoya se tacat cati quipixqui treinta y ocho xihuit para huetztoc ica icocolis. ⁶ Huan Jesús quiitac motectoya, huan quimachili ya quipixtoya nopa cocolisti miyac xihuit, huan huajca quiilhui:

—¿Tijnequi timochicahuas?

⁷ Huan nopa tacat quinanquili:

—Tate, amo aqui nijpiya para nechpalehuis nicalaquis ipan ni ameli quema molinía nopa at. Huan masque nijchihua campeca nicalaquis, seyoc nechpano nimantzi huan calaqui achtohui.

⁸ Huan Jesús quiilhui:

—Ximoquetza, xijtanana mopet huan xinejnemi.

⁹ Huan nimantzi nopa tacat mochicajqui, huan quitananqui ipet huan pejqui nejnemi. Huan eltoya sábado, nopa tonali para tiisraelitame ma

timosiyajquetzaca. ¹⁰ Huajca nopa tayacanca israelitame quiilhuijque nopa tacat cati mochicajtoya:

—Ama sábadó huan itanahuatilhua Moisés amo mitzcahuilía para tijhuicas mopet.

¹¹ Huan yaya quinilhui:

—Nopa tacat cati nechchicajqui, nechilhui ma nijtanana nopet huan ma ninejnemi.

¹² Huajca quitatzintoquiliijque:

—¿Ajquiya mitzilhui para tijtananas mopet huan xinejnemi?

¹³ Pero yaya cati mococohuayaya amo quimatiyaya ajquiya quichicajtoya pampa Jesús quistejtoya huan nejnemiyaya inihuaya nopa miyaqui masehualme cati itztójaj nopona. ¹⁴ Pero teipa Jesús quipanti nopa tacat ipan tohueyi israelita tiopa huan quiilhui:

—Xiquita, ya tiitztoc cuali, huajca ayecmo xitajtacolchihua para amo mitzajsis cati noja más ohui.

¹⁵ Huan nopa tacat yajqui huan quinilhui nopa tayacanca israelitame para elqui Jesús cati quichicajtoya. ¹⁶ Huan yeca nopa tayacanca israelitame pejqe qutoquiliijünemij Jesús para quimictise pampa quichihuayaya tamanti quej nopa ipan sábadó quema tiisraelitame san timosiyajquetzaj. ¹⁷ Huan Jesús quinilhui:

—NoTata, Toteco Dios noja tequiti, huajca nojquiya monequi na nitequitis.

¹⁸ Ica ya ni nopa tayacanca israelitame más quinequiyayaj quimictise Jesús, pampa amo san quichicajtoya se tacat ipan sábadó pero ama quitocaxti Toteco Dios: “NoTata”, quej elisquía itztoc san se ica Toteco.

Itequiticayo Icone Toteco

¹⁹ Huajca Jesús quinilhui: “Nelía nimechilhuía, na cati niIcone amo teno hueli nijchihua noselti. Nijchihua san cati niquita noTata quichihua. Nochi tamanti cati noTata quichihua, ya nopa na niIcone nojquiya nijchihua, ²⁰ pampa noTata nechicnelía huan nechnextilía nochi cati yaya quichihua. Huan noTata nechnextilis tamanti cati noja más huejhueyi que ni cati nijchijqui quema nijchicajqui ni tacat, huan amojuanti san anquitachilise huan anquitetzaitase. ²¹ Pampa quej noTata quintanana cati mictoque huan quinmaca nemilisti, na niIcone quej nopa nojquiya niquinmaca nemilisti cati yancuic nopa masehualme cati nijnequi. ²² Pero noTata amo quintajtolsencahuas masehualme. Yaya nechmacac na nopa tequit para nitetajtolsencahuas. ²³ Quichijqui ya ni para nochi ma nechtepanitaca san se quej quitepanitaj ya. Cati amo nechtepanitaj na niIcone, amo quitepanitaj noTata cati nechtantoc.

²⁴ “Nelía nimechilhuía, sinta se masehuali quicaqui nocamanal huan quineltoca yaya cati nechtitanqui, quipiyas nemilisti yancuic para nochipa. Huan Toteco amo quema quitatzacuiltis pampa ya panotoc ten campa nochi mictoque hasta campa nochi quipiyay nemilisti yancuic. ²⁵ Nelía nimechilhuía hualas tonali, quena, melahuac ya ajsico nopa tonali quema masehualme cati mictoque nechtoscaquise na cati niIcone Toteco Dios, huan injuanti cati nechtaquilise, itztose. ²⁶ Pampa quej noTata quiapiya nemilisti ipan ya huan hueli quinyolcui masehualme, nojquiya nechmacatoc ma nijpiya nemilisti ipan na huan para niquinyolcuis. ²⁷ Huan nechmacac tequiticayot para nitetajtolsencahuas pampa na niitztoc niIcone cati niMocuetqui Masehuali. ²⁸ Amo san techtachilica ica cati nimechilhuía. Ajsis se tonali quema nochi masehualme cati mictoque huan cati quintalpachojtoque, nechtoscaquise huan panquisase. ²⁹ Masehualme cati quichijtoque

cati cuali niquinyolcuis huan itztose para nochipa, pero cati quichijque cati amo cuali niquinyolcuis para quiselise tatzacuilitlisti para nochipa.

Jesús yaya Cristo

³⁰ “Noselti amo teno hueli nijchihua. Quej noTata nechnahuatía, niquintajtolsencahua masehualme. Na nitetajtolsencahua xitahuac pampa amo nijchihua san cati na nijnequi, nijchihua ipaquilis noTata cati nechtitantoc nica. ³¹ Sinta san na nimechyolmelahua ten na noselti, amo anquimate sinta melahuac nocamanal. ³² Pero itztoc seyoc cati amechyolmelahua ajquiya na huan nijmati melahuac cati yaya quijtohua ten na. ³³ Anquintitanque tacame ma yaca campa Juan para anquitzintocquise ten na, huan yaya amechilhui cati melahuac. ³⁴ Pero amo ipati miyac para se cati san se masehuali ma amechilhui ajquiya na. Nimechelnamiquiltía ten cati Juan amechilhui para xijneltocaca cati yaya quijto huan para quej nopa anmomaquixtise ten amotajacolhua. ³⁵ Juan itztoya quej se taahuili cati cahuaniyaya huan tatanextiyaya, huan para se talojtzi anpaquiyayaj ica cati amechnextiliyaya. ³⁶ Pero na nijchijtoc tanextili cati más amechnextilis ajquiya na que icamanal Juan, pampa noTata nechtequimacac para ma nijchihua tiochicahualnescayot para nimechnextilis melahuac yaya nechtitantoc. ³⁷ Nojquiya noTata cati nechtitantoc teyolmelahua para cuali cati nijchihua. Pero amo quema anquitzitocque, yon amo quema anquicac-toque cati yaya quijtohua. ³⁸ Amo anquipiay icamanal ipan amoyolo pampa amo antechneltoaj, huan na niitztoc cati yaya amechtitanilijtoc. ³⁹ Anmomachtíaj Icamanal Toteco pampa anmoilhuíaj anquipiyase nemilisti yancuic pampa anquipiay nopa amat. Pero Icamanal Toteco amechilhuía ten na, ⁴⁰ huan amo anquinequij anhualase antechnelto case para nimech-macas nopa nemilisti yancuic para nochipa.

⁴¹ “Para na, amo ipati sinta amojuanti cati san anmasehualme antech-hueyichihua o amo, ⁴² pampa nijmati amo anquicnelíaj Toteco. ⁴³ Masque na nihualajtoc ica itequiticayo noTata, amo antechselijque. Pero sinta seyoc hualas ica san ya itequiticayo, quena, anquiselise. ⁴⁴ ¿Quenicatza huelis antechnelto case? San anquitemóhuaj para amohuampoyohua ma amechtepanitaca. Amo quema anmoilhuíaj taya monequi anquichihuase para ma amechtepanita Toteco huan itztoc san setzi Toteco. ⁴⁵ Amo ximoilhuica nimechtelhuis iixpa noTata. Itanahuatilhua Moisés cati ipan anmotemachíaj para amechmaquixtis, nopa tanahuatilme amechtelhuis. ⁴⁶ Pampa sinta nelía anquinelto catoyaj icamanal Moisés, antechnelto-catosquíaj na nojquiya pampa yaya quijcuilo ten na. ⁴⁷ Pero amo nelía an-quineltocaj cati Moisés quijcuilo; huajca ¿quenicatza huelis anquinelto case cati nimechilhuía?”

6

Jesús quintamacac macuili mil tacame (Mt. 14:13-21; Mr. 6:30-44; Lc. 9:10-17)

¹ Teipa Jesús quiixcotonqui nopa Hueyi At Galilea cati nojquiya quito-caxtíaj Hueyi At Tiberias huan ajsito neca nali. ² Huan quitoquiliyayaj miyaqui masehualme pampa ya quijtozoyaj nopa tanextili cati quichijqui quema quinchicajqui cocoyani. ³ Huan Jesús huan tiimomachtijcagua titejcoque ipan se tepet, huan yaya mosehui tohuaya. ⁴ Huan monechc-ahuiyaya nopa israelita ilhuit itoca Pascua. ⁵ Huan yaya quitac nelmiyaqui

masehualme ajsitihualayayaj campa tiitztoyaj huan huajca quitatzintoquili Felipe:

—¿Canque tijcohuase cati quicuase nochi ni masehualme?

⁶ Jesús quiijto ya ni san para quimatis taya quuijtosquía Felipe, pampa ya quimatiyaya cati quichihuasquía para quintamacas. ⁷ Huajca Felipe quinanquili:

—Sinta se quipiyasquía itaxtahuil para dos cientos tonali ten tequit, amo quiaxilisquía para ica tijcohuasquíaj pantzi para sese inijuanti quicuasquía se quentzi.

⁸ Huajca Andrés, iicni Simón Pedro, cati nojquiya eliyaya imomachtijca Jesús quiijto:

⁹ —Nica itzotc se oquichpil cati quiipya ome pilmichtzitzi huan macuili pantzi, pero ya ni neltahuel pilquentzi para nochi ni masehualme quicuase.

¹⁰ Huajca Jesús quiijto:

—Xiquinilhuica nochi ni masehualme ma mosehuica sacapeta ixco.

Nopona oncayaya miyac xihuit huan nochi nopa miyaquí masehualme mosehuijque. Huan san nopa tacame cati itztoyaj nopona quiaxitijque macuili mil. ¹¹ Huan Jesús quiitzqui nopa macuili pantzi huan quitascatqui Toteco. Teipa techmajmacac tojuanti tiimomachtijcahua para ma tiquinmajmacaca nochi cati mosehuijtoyaj. Huan nojquiya quichijqui san se ica nopa michime. Huan nochi nopa masehualme quicuajque nochi cati quinequiyayaj. ¹² Huan quema nochi ixhuitoyaj, Jesús techilhui tiimomachtijcahua:

—Xijsentilica nochi ne pantatapatzti huan ne michtatapatzti cati mocajqui para amo teno polihuis.

¹³ Huajca tijpejpenque nochi pantatapatzti huan tijtemitijque majtacti huan ome chiquihuit ica cati mocajqui ten nopa macuili pantzi.

¹⁴ Huajca quema nopa masehualme quiitaque ni hueyi tanextili quema Jesús quimiyaquili nopa pantzi, quiijtojque para melahuac yaya eliyaya nopa tajtolpanextijquet cati Toteco quiijto quititanisquía ipan taltipacti.

¹⁵ Huan Jesús quimatqui para sequij inijuanti quinequiyayaj quiitzquise ica chichahualisti huan quitalise quej inintanahuatijca, huajca sempa tejcoc achi más huejcapa ipan nopa tepet para itztos iselti.

Jesús nejnenuqui aixco

(Mt. 14:22-27; Mr. 6:45-52)

¹⁶ Huan quema tayohuixtinemiyaya, tiimomachtijcahua Jesús titemoque hasta campa hueyi at, ¹⁷ huan ticalajque ipan cuaacali huan tipejque tiquixcotonaj nopa hueyi at para tiajsitij altepet Capernaum. Ya tayohuixtoya huan Jesús ayemo ajsitoya campa tiitztoyaj, ¹⁸ Huan pejqui motanana nopa hueyi at pampa taajacayaya chichahuac. ¹⁹ Huan quema ya tijnejnemiltijtoyaj tocuacal se macuili o chicuase kilómetros ipan hueyi at, tiquitaque ajsitihualayaya Jesús nejnentihuala aixco huan timomajmatijque. ²⁰ Pero yaya techilhui:

—Na, amo ximomajmatica.

²¹ Huajca ica paquilisti tijselijque Jesús ipan tocuacal huan quema tejcoc, nimantzi tiquitaque ya tiajsitoyaj ipan nopa tali campa tijnequiyayaj tiajsitij.

Masehualme quitemojque Jesús

²² Huan hualmosta nochi nopa masehualme sempa mosentilijque ipan seyoc nali campa achtohui tiitztoyaj pampa quimatiyayaj tiimomachtijcahua tiquisque nopona san toselti ipan cuaacali huan Jesús amo quisqui

tohuaya. Nojquiya quimatque amo oncayaya seyoc cuaacali nepa para ipan quisas Jesús. Huajca quitemohuayayaj Jesús ipan neca nali.

²³ Teipa ajsitoj nopona sequinoc cuaacalme cati hualajtoyaj ten altepet Tiberias. Huan ajsitoj nechca campa Jesús quitascamatqui iTata para nopa pantzi huan tetamacac. ²⁴ Huajca quema nopa masehualme quiitaque amo aqciyaya Jesús neca nali huan amo tiaquiyayaj tiimomachtijcahua, injuanti tejcoque ipan nopa cuaacalme cati ajsitojay huan hualajque hasta nica nali campa altepet Capernaum campa tiitztoyaj para quitemose Jesús.

Jesús yaya nopa tacualisti cati temaca nemilisti

²⁵ Huan quema injuanti ajsicoj nica nali hueyi at, quipantijque Jesús huan quitatzintoquilijque:

—Tamachtijquet, ¿quemaya tiajsico nica?

²⁶ Huan Jesús quinnanquili:

—Nelia nimechilhúa, san antechtemohuaj pampa anquicujque pantzi huan anixhuique cuali. Amo antechtemohuaj pampa anquimachilijque nimechnextiliyaya ajquiya na ica nopa hueyi tanextili. ²⁷ Amo tahuel ximocuatotonica san para anquitanise tacualisti cati anquicujaj mojmosta huan cati nimantzi tami. Más cuali ximocuatotonica para anquipantise nopa tacualisti cati huejcahuas huan cati amechmacas nemilisti yancuic para nochipa ten na cati niMocuetqui Masehuali hueli nimechmacas. Pampa noTata, Toteco Dios, nechtequimacatoc ya nopa ma nijchihua.

²⁸ Huajca quitatzintoquilijque:

—Sinta tijnequi tijchihuase ipaquilis Toteco, ¿taya monequi tijchijtiyase?

²⁹ Huan Jesús quinnanquili:

—Ya ni cati Toteco quinequi xijchihuaca. Quinequi techneltocaca pampa yaya nechtitantoc.

³⁰⁻³¹ Huan injuanti sempa quihuijque:

—Quema tijchihuas más tanextili para tiqitase, huajca timitzneltocase. ¿Huelis techtamacas quej Moisés huejcajquiya quintamacayaya tohuejcapan tatahua mojmosta ipan nopa huactoc tali campa amo teno eli? Ijcuilijtoc ipan nopa amat para yaya quinmacac tacualisti cati huetzqui ten ilhuicacti.

³² Huan Jesús quinihui:

—Nelia nimechilhúa, amo yaya Moisés cati quinmacac nopa tacualisti cati huetzqui ten ilhuicacti. NoTata, quena, yaya quinmacac. Yaya temaca nopa tacualisti cati nelia temacht huan cati huala ten ilhuicac. ³³ Pampa niitztoc nopa tacualisti cati temoc ten ilhuicac cati temaca nemilisti yancuic.

³⁴ Huajca injuanti quihuijque:

—Tate, techmaca nopa tacualisti mojmosta.

³⁵ Huan Jesús quinihui:

—Na nieltoc nopa tacualisti cati nitemaca nemilisti yancuic para nochipa. Cati hualas campa na huan nechnehtocas, amo teno más quitemos pampa ipan iyolo ayecmo mayanas, yon ayecmo amiquis. ³⁶ Pero quej nimechilhui, masque anquitztoque cati nijchihua, amo antechnehtocaj. ³⁷ Nochi masehualme cati noTata quintapejpenijtoc para nechmacas, hualase campa na, huan cati hualase campa na, na amo quema niquincuepaltis. ³⁸ Amo nihualtemoc ten ilhuicac para nijchihuas cati nopaquilis. Nihualtemoc para nijchihuas cati noTata quinequi pampa yaya nechtitantoc. ³⁹ Huan ya ni ipaquilis noTata cati nechtitantoc, quinequi para amo ma nijpola yon se cati nechmacatoc. Yaya quinequi para nochi ma niquinyolcuis quema ajsis itamiya tonali. ⁴⁰ Huan ya ni ipaquilis noTata. Quinequi nochi masehualme cati quimachilise para na niIcane huan nechnehtocase, ma

quipyaca nemilisti yancuic para nochipa. Huan quinequi ma niquinyolcuis quema ajsis itamiya tonali.

⁴¹ Quema Jesús quinilhui para yaya nopa tacualisti cati hualtemoc ten ilhuicac, miyaqui israelitame pejque quiejelnamiqij. ⁴² Huan quijtojqque:

—¿Quenicatza hueli quijtohua hualtemoc ten ilhuicac? Yaya Jesús, icone José. Tiquixmatij itata huan inana nojquiya.

⁴³ Huajca Jesús quinilhui:

—Amo techejelnamiquica se ica seyoc. ⁴⁴ Amo aqui hueli nechtoquilis ica iselti. San noTata cati nechttanqui huelis quiyoltlanas se masehuali para nechtoquilis, huan cati nechtoquilis nijyolcuis ipan itamiya tonali.

⁴⁵ Ijcuilijtoc ipan nopa amatini cati nopa tajtolpanextiani huejcajquiya quijcuiljqque campa quijtohua: ‘Toteco quinmachtis nochi injuanti.’ Huan huajca nochi injuanti cati quicaquij cati noTata quinilhúa ipan iniyolo huan quimachilíaj, nechtoquilise.

⁴⁶ “Amo aqui quitztoc noTata, Toteco Dios, san na cati nihualtemoc ten campa yaya. ⁴⁷ Nelía nimechilhúa, sinta se masehuali nechneltoacas, quipiyas nemilisti yancuic para nochipa. ⁴⁸ Na niitztoc nopa tacualisti cati temaca nemilisti. ⁴⁹ Amohuejcapan tatahua mijque masque quicuaque nopa tacualisti cati huetzqui ten ilhuicac ipan nopa huactoc tali. ⁵⁰ Na niitztoc nopa tacualisti cati hualtemoc ten ilhuicac huan sinta se nechselis na quej niitacualis, yaya quipiyas nemilisti yancuic para nochipa. ⁵¹ Na niitztoc nopa tacualisti cati itztoc huan cati temaca nemilisti yancuic para nochipa huan nihualtemoc ten ilhuicac. Sinta se quicuas ni tacualisti, yaya itztos para nochipa. Huan ni tacualisti eltoc notacayo cati nitemacas para masehualme ipan ni taltipacti ma itztoca para nochipa.”

⁵² Huajca nopa israelitame pejque moijilhúaj huan quijtohuaj se ica seyoc:

—¿Quenicatza huelis techmacas itacayo para tijcuase?

⁵³ Huajca Jesús quinilhui:

—Nelía nimechilhúa na niitztoc cati niMocuetqui Masehuali, huan sinta amo antechselise quej elisquía anquicuase nonacayo huan anquiise noeso, amo anquipyase nopa nemilisti cati yancuic. ⁵⁴ Yaya cati nechselis quej se cati quicuas nonacayo huan quiis noeso quipiyas nemilisti yancuic para nochipa huan nijyolcuis ipan itamiya tonali. ⁵⁵ Pampa nonacayo eltoc nopa tacualisti cati nelnelía huan noeso nopa taili cati nelía. ⁵⁶ Huan cati quicuas nonacayo huan quiis noeso huan nechselis quej niitacualis, yaya senitztos ipan noyolo huan na nisenitztos ipan iyolo. ⁵⁷ NoTata cati itztoc nechttantoc huan na niitztoc pampa nechmaca ichichualis. Quej nopa nojquiya cati nechselis quej niitacualis, itztos pampa nijmacas nochichualis. ⁵⁸ Na niitztoc nopa tacualisti cati hualtemoc ten ilhuicac. Amo nieltoc quej nopa tacualisti cati amohuejcapan tatahua quicuaque huan amo quipantijque nopa nemilisti para nochipa. Nochi cati nechselise quej niintacualis, queña, itztose para nochipa.

⁵⁹ Huan Jesús tamachtí ya ni ipan israelita tiopamit ipan altepet Capernaum.

Camanalí ten nemilisti para nochipa

⁶⁰ Huajca seqij imomachtijcahua Jesús quicajque cati quinilhujtoya, huan quijtojqque para nelía ohui icamanal huan amo aqui hueli quimachilía.

⁶¹ Huajca Jesús quimatqui para seqij imomachtijcahua quiejelnamiquiyayaj huan quinilhui:

—¿Anquiohujimatij para anquimachilise cati niqijtohua? ⁶² Huajca noja más anquiohujimatise quema antechitase na, cati niMocuetqui Masehuali, nitejcos ilhuicac campá niitztoya achtohuiya. ⁶³ Niqijtohuayaya para san Itonal Toteco hueli temacas nemilisti yancuic cati amo quema tamis. Sinta se quicuasquía cati nelía nonacayo amo quimacasquía nemilisti. Nimechilhujitoc ni camanali para xijmachilica ipan amotonaltzitzí pampa nozona ipan amotonaltzitzí nocamanal amechmacas nemilisti yancuic para nochipa. ⁶⁴ Pero sequij amojuanti amo antechneltocej.

Ten ipejya Jesús ipa quimatiyaya ajquiya amo quineltocasquía huan ajquiya quitemactilisquía. ⁶⁵ Huan Jesús quinilhui:

—Ya nimechilhujitoc amo aquí huelis nechtoquilis sinta noTata amo quiyoltlanas para ma nechneltoce.

⁶⁶ Huan yeca miyac masehualme cati nejnemiyayaj ihuaya Jesús quistejque huan ayecmo yajque ihuaya. ⁶⁷ Huajca Jesús techtatzintoquili nochí timajtacti huan ome timomachtijcahua:

—¿Nojquiya anquinequij antechtahuelcahuase amojuanti?

⁶⁸ Huan Simón Pedro quinanquili:

—Tohueyiteco, san tapic elisquía sinta seyoc tijtoquilisquíaj. San ta titamachtía nopa camanali cati hueli quinmaca nemilisti yancuic para nochipa nopa masehualme cati quineltocaj. ⁶⁹ Tojuanti timitzneltocatoque huan cuali tijmatij ta cati titatzejtzeltoc. TiIcone Toteco Dios yaya cati itztoc para nochipa.

⁷⁰ Huan Jesús quinnanquili:

—Na nimechtapejpenijtoc anmajtacme huan ome, pero se ten amojuanti nelía iaxca Amocualtat.

⁷¹ Jesús techcamanalhuyaya ten Judas Iscariote, icone Simón, pampa teipa quitemactili masque Judas itztoc se ten timajtacti huan ome timomachtijcahua.

7

Icnihua Jesús amo quineltocaque

¹ Teipa Jesús nejnemiyaya campá hueli ipan estado Galilea campá ehua. Amo quinejqui yas estado Judea pampa nozona nopa tayacanca israelitame quinequiyayaj quimictise. ² Ya ajstihualayaya nopa israelita ilhuit quema nochí israelitame tijsencahuaj pilxajcaltzitzí para ipan tiitztose huan tijtas-camatij Toteco para nopa pixquisti cati techmacac. ³ Huan icnihua Jesús quihuihuiitacque huan quiilhujijque:

—Amo ximocahua nica. Xiya estado Judea para motatoquilijcahua nozona huelis quiitase nopa tanextili cati tijchihua. ⁴ Amo aquí mocahua campá ixtacatzí sinta quinequi nochí masehualme ma quiixmatica quej ta tijnequi. Sinta nelnelía tihueli tijchihua tiochicahualnescayot, ximonextiti iniixpa nochí nopa miyaquí masehualme cati itztose ipan nopa ilhuit.

⁵ Icnihua quiijtojque ya ni pampa yon inijuanti, amo quineltocayayaj.

⁶ Huajca Jesús quinilhui:

—Noja ayemo ajsi nopa tonali cati Toteco quiixquetztoc para nimonextiti nozona. Para amojuanti, hueli anyase ten hueli tonali. ⁷ Masehualme ten ni faltipacti cati amo quiixmatij Toteco, amo amechualancaitaj amojuanti. Pero na, quena, nechcualancaitaj pampa niqinixcoilhuía cati amo cuali quichihua. ⁸ Xitayacanaca campá nopa ilhuit pampa ayemo ajsi hora para niyas na.

⁹ Quema Jesús quinilhuijtoya iicnihua ya ni, noja mocajqui quentzi más ipan estado Galilea.

Jesús tamachti ipan nopa ilhuit

¹⁰ Huan quema iicnihua ya yajtoyaj, Jesús nojquiya quisqui para yas ipan nopa ilhuit. Pero amo yajqui inihuaya nopa miyaqui masehualme cati yahuiyayaj, san ixtaca yajqui. ¹¹ Huan nopa israelita tayacanani quitemo-yayayaj Jesús ipan ilhuit huan tetatzintoquiliyayaj:

—¿Canque itztoc nopa tacat?

¹² Huan miyaqui masehualme quiejelnamictinemiayaj Jesús se ica seyoc. Sequij quijtohuayayaj: “Yaya se cuali tacat.” Sequinoc quijtohuayayaj: “Yaya amo cuali, san tacajcayahua.” ¹³ Huan amo aqui quinequiyaya camanaltis cuali ten Jesús miyacapa pampa quinimacasiyayaj nopa tayanani ten israelitame.

¹⁴ Huan quema noja polihuiyaya tajco nopa ilhuit, Jesús tejoc tachiquiltipa hasta campa nopa hueyi tiopamit huan pejqui tamachtía. ¹⁵ Huan nopa tayacanca israelitame san quitachiliyayaj huan quitetzaitayayaj huan quijtohuayayaj se ica seyoc:

—¿Quenicatza más talnamiqui ni Jesús que sequinoc huan amo momachtitoc?

¹⁶ Huan Jesús quinnanquili:

—Amo nitamachtía san cati na nimoilhuía. Nitamachtía cati quijtohua noTata cati nechtitantoc. ¹⁷ Sinta se masehuali quinequi quichihuas ipaquilis noTata, quimatis sinta nitamachtía cati Toteco icamanal o san na nocamanal. ¹⁸ Se cati san camanalti cati ya moilhuía iselti quinequi para sequinoc ma quihueyimatica. Pero na nijnequi nijhueyimatis yaya cati nechtitantoc, huan niqijtohua cati melahuac huan amo quema niistacati.

¹⁹ “Moisés amechmacac nopa tanahuatili, pero yon se amojuantí amo anquitoquilíaj nopa tanahuatili pampa anquinequij antechmictise.”

²⁰ Huan nopa masehualme quinanquilijqe:

—Ta tijpiya se iajacayo Amocualtat. Amo aqui quinequi mitzmictis.

²¹ Huan Jesús quinilhui:

—Quema nijchicajqui nopa tacat ipan sábado nopa tonali para timosiya-jquetzase, san antechtachilijque huan anquitetzaitaque pampa anquij-tojqe nitequitiyaya. ²² Pero Moisés amechmacti para xijtequica nopa machiyot cati itoca circuncisión ipan ipiltacayo se piloquichipiltzi quema quiyiya chicueyi tonati tacajtoc. (Masque amo pejqui ni tamanti ica Moisés pampa tohuejcapan tatahua ya ipa quichihuayayaj quema Moisés ayemo tacatiyaya.) ²³ Huan sinta se oquichpil quixaxitia chicueyi tonati ipan sábado, nojquiya antequitij pampa anquitequilíaj nopa machiyot. Huan quej nopa monequi para anquitoquiliise itanahuatilhua Moisés, huajca ²⁴ para ten antechcualancaitaj pampa nijchicajqui nopa tacat ipan sábado? ²⁴ Amo nimantzi xijtelhuica se masehuali pampa san nesi quichijtoc cati amo cuali. Achtohui xijmatica sinta temachtí cati amo cualí quichijtoc para huelis anquitajtolsencahuase xitahuac.

Jesús quinilhui canque hualajqui

²⁵ Sequij nopa masehualme cati ehuaní altepet Jerusalén pejque quijtohuaj:

—¿Amo yaya ne Jesús cati nopa israelita tequichihuani quinequij quimictise? ²⁶ Xiquitaca, moquetza nepa miyacapa huan camanalti iniixpa nochi ni masehualme. ¿Para ten amo teno quijtohuaj nopa tequichihuani? ¿Huelis

inijuanti ya quimatij para yaya nopa Cristo cati Toteco quiiyto techtitanil-isquía?

Huan sequinoc quiiytohuayayaj:

²⁷—Pero tojuanti tijmatij canque ehua ni Jesús, huan quema Cristo hualas cati Toteco techtitanilis, amo aquí quimatis canque hualajqui.

²⁸ Huajca Jesús cati tamachtiyaya ipan nopa hueyi tiopamit camanaltic chicahuac huan quinilhui:

—Anquiiytohuaj antechixmatij huan anquimatij canque niehua. Pero amo nihualajqui san pampa na nijnejqui. Yaya cati nelía temachti nechtitanqui huan amojuanti amo anquixmatij ya. ²⁹ Na quena, niquixmati pampa niitzyo ya ihuaya huan yaya nechtitantoc.

³⁰ Huajca sequij nopa masehualme quinequiyayaj quitzquise Jesús para quitzacuase, pero amo aquí huelqui quiiizqui pampa noja ayemo ajsiyaya nopa hora cati Toteco quitajitoyá ma quiiizquica. ³¹ Huan miyac nopa masehualme cati itztoyaj nepa quineltocaque para Jesús eliyaya nopa Cristo, huan yeca quiiytojque:

—Ijcuilijtoc para quema nopa Cristo hualas, quichihuas huejhueyi tanextili. Pero amo aquí hueli quichihuas tanextili cati más huejhueyi que ni Jesús quichihua. Huajca nelía ni Jesús yaya Cristo.

Nopa fariseos quintitanque policías ma quitzacuati Jesús

³² Quema nopa fariseos quicajque cati nochi masehualme quiiytohuayayaj ten Jesús, inijuanti huan nopa tayacanca totajtzitzi quinnahuatijque ma yaca policías ten nopa tiopamit para ma quiiizquiti huan ma quitzacuati.

³³ Huan Jesús noja quincamanalhuyaya nopa masehualme huan quinilhui:

—Noja nimocahuas amohuaya se quentzi más huan teipa nitacuepilis campa itztoc yaya cati nechtitantoc. ³⁴ Antechtemose, pero amo huelis antechpantise. Huan campa na niitzyoti amo huelis anyase.

³⁵ Huajca nopa israelitame pejqque quiiytohuaj se ica seyoc:

—¿Canque yas huan amo huelis tiyase, yon amo tijpantise? ¿Huelis yas campa nopa israelitame cati mosemantoque huejca campa masehualme camanaltij griego? ¿Huelis quinmachtiti nojquiya nopa griego masehualme?

³⁶ ¿Taya quiiytosnequi quema yaya quiiytohua para tijtemose, pero amo huelis tijpantise? ¿Canque huelis yas huan amo huelis tiyase? Amo tijmachiláj taya quiiytosnequi.

Hueyame cati temaca nemilisti yancuic

³⁷ Huan ipan itamiya tonali nopa ilhuit, nopa tonali cati más hueyi, Jesús moquetzqui tatajco nochi nopa masehualme huan camanaltic chicahuac. Huan quinilhui:

—Sinta se amiqui ipan iyolo, ma huala campa na ma atiqui. ³⁸ Yaya cati nechnehtocas quipiyas quej se ameli ipan iyolo campa quisas at quej ipan hueyame huan temacas nemilisti yancuic para nochipa. Quej nopa ijcuilijtoc ipan Icamanal Toteco.

³⁹ Jesús quiiyto ya ni pampa moilhuyaya cati teipa panosquía quema Itonal Toteco calaquisquía ipan masehualme cati quineltocasquíaj. Pero quiiyto ya ni quema noja polihuyaya para ajsis Itonal Toteco ipan taltipacti pampa Jesús ayemo tacuepiliyaya ilhuicac campa Toteco quihueyitalisquía.

Motajcoxelojque nopa masehualme

⁴⁰ Sequij nopa masehualme cati quicajque icamanal Jesús quijtohuayayaj para yaya temachti eliyaya nopa tajtolpanextijquet cati Toteco techtitanilisquía. ⁴¹ Huan sequinoc quijtohuayayaj para Jesús eliyaya nopa Cristo cati Toteco quijto techtitanilisquía. Pero sequinoc quijtohuayayaj para Jesús amo huelis elis nopa Cristo, pampa Cristo amo ehua estado Galilea. ⁴² Quijtohuayayaj para Icamanal Toteco quijtohua Cristo elis se iteipan ixhui nopa hueyi tanahuatijquet David cati huejcajquiya itztoya huan Cristo tacatis ipan Belén, ialtepe David. ⁴³ Huajca quej nopa masehualme moxejxelojque ica cati moilhujque ten Jesús. ⁴⁴ Huan sequij quinequiyayaj quitzquise huan quitzacuase, pero amo quichijque.

Nopa tequichihuani amo quineltocaque Jesús

⁴⁵ Huan nopa policías ten tiopamit mocuetque campa itztoyaj nopa fariseos huan nopa tayacanca totajtzitzi. Huan nopa tequichihuani quintatzintoquilijque nopa policías:

—¿Para ten amo anquihualicaque Jesús?

⁴⁶ Huan nopa policías ten tiopa quijtojqque:

—Amo quema tijcactoque se tacat cati camanalti nelía cuali quej ya camanalti.

⁴⁷ Huajca nopa fariseos quijtojqque:

—¿Yaya amechcajcajajtoc nojquiya? ⁴⁸ Amo xijneltocaca pampa yon se israelita tequichijquet huan yon se fariseo amo quineltocac. ⁴⁹ Ni miyaqui masehualme cati qitocquillaj, amo teno quimatij ten itanahuatilhua Moisés, huajca ma itztoca tatechihualme.

⁵⁰ Huan Nicodemo cati achtohuiya quicamanalhuito Jesús ica tayohua itztoya se ten nopa fariseos huan quinilhui nopa sequinoc:

⁵¹ —Totanahuatilhua amo techcahuilaj ma tijtatzacuiltica se tacat sinta amo tijcaquise cati quijtohua para tijmatise sinta nelía quipiya tajtacoli.

⁵² Huajca nopa sequinoc quihuhijque:

—Nesi quej ta nojquiya tiehua estado Galilea campa itztoque masehualme cati huihuitique. Xijpohua Icamanal Toteco huan tiquitas para amo quema motanantoc se tajtolpanextijquet cati ehua Galilea.

⁵³ Huan sese ten injuanti yajqui ichaj.

8

Se sihuat cati tacanemiyaya

¹ Huan Jesús yajqui ipan se tepet cati itoca Olivo, ² huan hualmosta ijnaltzi tacuepili campa nopa hueyi tiopamit ipan Jerusalén. Huan hualajque miyaqui masehualme campa Jesús huan yaya mosehui huan pejqui quinmactía. ³ Huan nopa tamachtiani ten itanahuatilhua Moisés huan nopa fariseos quihualicaque se sihuat cati quipantijque quichihuayaya tehueli ihuaya se tacat cati amo ihuehue. Huan quiquetzque nopa sihuat tatajco nopa masehualme iixpa Jesús. ⁴ Huan quihuhijque Jesús:

—Tamachtijquet, tijpantijque ni sihuat quichihuayaya tehueli ica se tacat cati amo ihuehue. ⁵ Itanahuatilhua Moisés technahuatíaj ma tiquinmictica ica tet sihuame cati quej ni quichihuaj. Huan ta, ¿quenicatza tiquijtohua?

⁶ Quitatzintoquilijque Jesús ni para quimasiltise huan para huelis quitelhuise sinta amo quineltocasquía itanahuatilhua Moisés. Huajca Jesús molotczechui huan tajcuilo ipan tali ica se imacpil. ⁷ Pero injuanti noja

quitzintzoquiliyayaj quenicatza quuijtos. Huajca Jesús moquetzqui huan quuijto:

—Cualtitoc. Nopa masehuali cati amo quema tajtacolchijtoc, achtohui ma quimajcahuili se tet.

⁸ Huan sempa molocotzsehui huan tajcuilo ipan tali. ⁹ Huan quema injuanti cati quitelhuyayaj nopa sihuat quicajque cati Jesús quuijto, pejque yajtiyahuij sesentziti. Achtohui yajqui cati más huehuentzi huan teipa quej nopa yajtiyajque hasta san mocajqui nopa sihuat iixpa Jesús. ¹⁰ Huajca Jesús moquetzqui huan quuilhui:

—¿Canque itztoque cati mitztelhuyayaj? ¿Amo aquí cati quinequi mitztepachos?

¹¹ Huan nopa sihuat quuijto:

—Amo, tate, amo aquí itztoc.

Huajca Jesús quuijto:

—Yon na amo nimitztelhuis. Xiya huan ayecmo xitajtacolchihua.

Jesús yaya nopa taahuili ipan ni taltipacti

¹² Sempa Jesús quincamanalhui nopa masehualme cati quiyahualojtoyaj huan quinihui:

—Na niitztoc quej nopa taahuili ipan ni taltipacti huan nitetaahuilia ipan iniyolo. Cati nechtoquillise ayecmo quipiyase tzintayohuilot ipan iniyolo, pero quipiyase nopa taahuili cati temaca nemilisti cati yancuic.

¹³ Huajca nopa fariseos quilhuijque:

—Ticamanalti ten ta moselti, huajca amo melahuac mocamanal.

¹⁴ Pero Jesús quinnanquili:

—Masque nimechilhuia ten na, melahuac cati niquijtohua pampa nijmati canque nihualajqui huan canque niyas. Pero amojuanti amo anquimatij canque nihualajqui huan canque niyas teipa. ¹⁵ Amojuanti antetajtolsencahua san quej masehualme. Na amo aquí nijtajtolsencahua amantzi. ¹⁶ Pero sinta nitetajtolsencahuasquia, nijchihuasquia xitahuac pampa amo san na nijchihua, pero nitetajtolsencahuasquia ihuaya noTata cati nechtitantoc. ¹⁷ Ipan amotanahuatilhua ijcuilijtoc sinta itztoque ome cati quitztoque cati panoc huan quijtohuaj san se tamanti, huajca xiquitaca para temachti cati quijtohuaj. ¹⁸ Ama nimechilhuia ten na huan nojquiya noTata cati nechtitantoc amechilhuia ten na, huajca temachti cati tiome timechyolmelahuaj.

¹⁹ Huan injuanti quitzintzoquiliyajque:

—¿Canque itztoc motata?

Huan Jesús quinnanquili:

—Amojuanti amo antechixmatij huan amo anquixmatij noTata. Sinta antechixmatisquiaj, nojquiya anquixmatisquiaj noTata.

²⁰ Nochi ni camanali Jesús quinmachi ipan nopa hueyi tiopan calijtic nechca campa masehualme temacaj inintomi para tiopamit, huan amo aquí quitzqui pampa ayemo ajsiyaya ihora para quitzquise.

Amojuanti amo huelis anyase campa na niyas

²¹ Huan Jesús sempa quinihui:

—Na niyas huan teipa antechtemose. Huan quema anmiquise, noja anquiyase amotajtacolhua pampa amo aquí amechtapojpolhuijtos. Campa na niyas, amojuanti amo huelis anyase.

²² Huajca nopa tayacanani ten israelitame pejque motatzintzoquiliaj se ica seyoc:

—¿Para ten quiiyto para amo huelis tiyase campa yas? ¿Huelis san momic-tis?

²³ Huan Jesús quinilhui:

—Anehuani nica tatzinta, na niehua huejcapa ipan ilhuicac. Anehuani ipan ni taltipacti, pero na amo niehua ipan ni taltipacti. ²⁴ Huajca nimechil-huía anmiquise huan noja anquipyase amotajtacolhua huan anyase campa tit. Pampa sinta amo antechnehtocase para na niCristo, huajca anmiquise ipan amotajtacolhua.

²⁵ Huajca quilhuijque:

—¿Ajquiya ta? ¿Taya tequiticayot tijiya?

Huan Jesús quinilhui:

—Niitztoc senquisa cati nimechilhuyaya nochi ni tonali hasta quema nipejqui nitamachtía. ²⁶ Onca más miyac camanali cati huelisquía nimechil-huisquía huan onca miyac tamanti cati ica nihuelis nimechtajtolsencahuas. Pero san niquinilhúa masehualme ipan ni taltipacti cati yaya cati nechtitantoc nechilhuijtoc ma niquinilhui, huan yaya nelía temachtí.

²⁷ Huan nopa israelita tequichihuani amo quimachiliyayaj para quincamanalhuyaya ten iTata, Toteco Dios. ²⁸ Huajca Jesús quinilhui:

—Quema antechcuamapeloltise na cati niMocuetqui Masehuali, huajca anquimachilise niitztoc cati nimechilhúa. Huan anquimachilise amo teno nijchihua noselti, pero nimechilhuijtoc cati noTata nechmachtijtoc. ²⁹ Huan noTata cati nechtitantoc itztoc nohuaya huan amo nechcajtejtoc pampa mojmosta nijchihua cati quipactía.

³⁰ Quema Jesús quiiyto ni tamanti, miyaqui israelitame quineltocaque para yaya nopa Cristo.

Nopa cati melahuac amechchihuas anmajajtoque ten tajtacoli

³¹ Huajca Jesús quinilhui nopa israelitame cati quineltocaque:

—Sinta mojmosta anquichijtiyase cati nimechilhúa, huajca nelía anitz-tose annomomachtijcahua. ³² Huan anquimatise cati melahuac, huan nopa cati melahuac amechtojtomas para anelise anmajajtoque.

³³ Huan nopa tayacanca israelitame quinanquiliijque:

—Tojuanti tiiteipan ixhuihua Abraham huan amo quema techcojtoc se toteco para tiaxcahua. ¿Para ten techilhúa techtojtomas para tielise timaj-jajtoque?

³⁴ Huan Jesús quinnanquili:

—Nimechilhúa, yaya cati tajtacolchihua melahuac monamacatoc ica taj-tacolot huan tajtacolot iteco. ³⁵ Se tequipanojquet cati iaxca iteco amo quiyiya tequiticayot para mocahuas para nochipa ipan ichaj iteco sinta iteco ayecmo quinequisquía; pero icone nopa cati chane, quena, quiyiya tanahuatili para mocahuas nochipa pampa ya icone. ³⁶ Na nilcone Toteco huan sinta nimechtojtomas para anelise anmajajtoque, nelía anelise sen-quisa anmajajtoque. Huan ayecmo monequis anquichihuase cati tajtacolot amechnahuatis xijchihuaca. ³⁷ Cualí nijmati anitztoque aniteipan ixhuihua tohujcapan tata Abraham, pero masque anitztoque aniteipan ixhuihua, anquitemohuaj quenicatza huelis antechmictise pampa amo anquiselíaj nocamanal. ³⁸ Nimechilhúa cati niqiztctoc nepa iixpa noTata. Huan anquichihuaj cati amojuanti amotata amechilhúa.

Amojuanti aniaxcahua Amocualtacat

³⁹ Huan quinanquiliijque:

—Abraham yaya totata.

Huan Jesús quinilhui:

—Sinta nelía anitztosquíaj iconehua Abraham, huajca anquichihuasquíaj cati cuali quej Abraham quichijqui. ⁴⁰ Pero ama amojuanti anquinequij antechmictise na cati nimechilhuijtoc cati melahuac huan cati Toteco nechilhuijtoc. Abraham amo quichijqui tamanti quej nopa. ⁴¹ Anquichihuaq quej yaya cati nelía amotata quichihua.

Huan nopa tayacanca israelitame quilhuijque:

—Amo xiquijto para san tiichtaca coneme. Tijpiyaj se totata, yaya Toteco Dios.

⁴² Huan Jesús quinilhui:

—Sinta Toteco Dios nelía elisquía amotata, huajca antechicnelisquíaj pampa nihualajqui ten iixpa. Amo nihualajqui pampa san nijnejqui. Yaya nechtitantoc. ⁴³ Amo anquinequij anquitacaquilise nocamanal, huajca amo hueli anquimachilíaj cati nimechilhui. ⁴⁴ Amojuanti amotata nopa Amocualtacat huan anquinequij anquichihuase cati ya ipaquilis. Nopa Amocualtacat ipa se temictijquet hasta ipejya huan quicualancaita nochi cati melahuac. Amo hueli quijtohua cati melahuac. Senquisa istacatinemi pampa quej nopa iyolo. Yaya se istacatiquet huan nochi istacaticayot pehua ica ya. ⁴⁵ Nimechilhui senquisa cati melahuac, huajca ¿para ten amo antechneltoaj? ⁴⁶ Yon se ten amojuanti hueli nechtelhuis ica se tajtacoli. Huajca sinta nimechilhui cati melahuac, ¿para ten amo antechneltoaj? ⁴⁷ Masehualme cati iconehua Toteco quitacaquilíaj icamanal, pero amo anquinequij anquitacaquilise icamanal pampa amo aniconehua Toteco.

Cristo ipa itztoc

⁴⁸ Huajca nopa tayacanani ten israelitame quinanquilihque Jesús huan quilhuijque:

—Melahuac cati tojuanti tiquijtojqque ten ta. Tiitztoc se tacat cati amo cuali quej cati ehuan estado Samaria huan tijpiya se iajacayo Amocualtacat.

⁴⁹ Huan Jesús quinnanquili:

—Na amo nijpiya se iajacayo Amocualtacat. Na nijtepanita noTata huan amojuanti amo antechtepanitaj. ⁵⁰ Pero amo nijtemohua masehualme ma nechhueyimatica. NoTata, quena, quinequi masehualme ma nechhueyimatica. Ma tijcahuilica ya ma quitajtolsencahuas ni tamanti. ⁵¹ Nelía nimechilhui, cati quichihuas cati niquilhui, amo quipantis miquilisti.

⁵² Huan nopa israelitame quilhuijque:

—Amantzi tijmatij tijpiya se iajacayo Amocualtacat pampa Abraham mijqui huan nopa tajtolpanextiani nojquiya. Huan ta tiquijtohua cati quichihuas cati tiquilhui, amo quipantis miquilisti. ⁵³ Ta timoilhui tiitztoc más hueyi que totata Abraham cati mijqui huan nopa tajtolpanextiani cati nojquiya mijque. ¿Ajquiya timoilhui para tiitztoc ta?

⁵⁴ Huajca Jesús quinilhui:

—Sinta san na nimohueyimati, huajca amo teno ipati cati niquijtohua. Pero noTata, Toteco Dios, nechhueyimati huan anquijtohuaq yaya amoTeco. ⁵⁵ Nelía amo anquixmatij noTata. Pero na, quena, niquixmati. Sinta niquijosquía amo niquixmati, huajca niistacatisquía quej amojuanti anistacatij. Pero, quena, na niquixmati huan nijchihua cati nechilhui. ⁵⁶ Huejcaquiya tohuejapan tata Abraham pajqui quema quimatqui para teipa nihualasquía, huan nechitac quema nihualajqui huan nelía quipixqui paquilisti.

⁵⁷ Huan nopa tayacanca israelitame quilhuijque:

—Ta amo quema tiquitztoc Abraham. Ayemo tijpiya yon cincuenta xihuit.

⁵⁸ Huan Jesús quinilhui:

—Melahuac ya ni cati nimechilhuía, quema polihuiyaya para tacatis Abraham, ya ipa niitztoya.

⁵⁹ Huajca injuanti quitananque sesen tet para quitepachosquíaj, pero Jesús ixtaca quistejqui ipan nopa hueyi tiopamit huan panotiyajqui tatajco ten injuanti.

9

Jesús quichicajqui se popoyotzi

¹ Jesús nejnemiyaya ipan ojti, huan quiitac se tacat cati eliyaya popoyotzi hasta quema tacatqui. ² Huan tiimomachtijcagua tijtatzintoquilijque:

—Tamachtijquet, ¿ajquiya itajtacol para elqui popoyotzi ne tacat? ¿Eltoya itajtacol inana o itata o san ya itajtacol?

³ Huan Jesús techilhui:

—Amo tacatqui popoyotzi pampa ya itajtacol, yon pampa itajtacol inana, yon itata. Tacatqui quej nopa para monextis ipan ya cati Toteco ica ihueyi chichualis hueli quichihua. ⁴ Monequi nijchihuas nopa tequit cati Toteco nechtitantoc ma nijchihua amantzi quema noja tonaya huan onca tonali, pampa san quentzi polihui para tayohuiyas huan ayecmo aqui huelis tequitis. ⁵ Ama quema noja niitztoc ipan ni taltipacti, niitztoc itaahuil ni taltipacti huan niquintaahuilijtos masehualme ipan inintalnamiqulis.

⁶ Huan quema quiiijtojtoya ni camanali, Jesús chajchac huan quichijqui soquit ica ichajchac huan quitallili nopa soquit ipan iixteyol nopa tacat cati popoyotzi. ⁷ Huan quiilhui:

—Xiya, ximoixteyolpajpacati ipan nopa ameli cati itoca Siloé. (Siloé quinequi quiiijtos: ‘Tatitanili’.)

Huajca nopa popoyotzi yajqui moixteyolpajpacato huan quema tacuepili, cuali hueliyaya tachiya. ⁸ Huajca nochi icalnechcagua huan nochi cati quixmatiyayaj quema noja itztoya popoyotzi moilhuijque:

—¿Amo yaya ni tacat cati mosehuiyaya ojtipa huan motaejehuiyaya?

⁹ Huan sequij quiiijtojque:

—Quena, yaya.

Sequinoc quiiijtojque:

—Amo ya, pero elisnequi quej ya.

Pero nopa tacat iselti quiiijto:

—Quena, na cati achtohuiya nieltoya nipopoyotzi.

¹⁰ Huajca quitatzintoquilijque:

—¿Quenicatza huelqui titachixqui?

¹¹ Huan quinnanquili:

—Se tacat cati itoca Jesús quichijqui soquit, huan nechtalili ipan noixteyol huan nechilhui ma niya nimoixteyolpajpacati ipan nopa ameli cati itoca Siloé. Huajca niyajqui huan nimoixteyolpajpajqui huan huajca huelqui nitachixqui.

¹² Huan quitatzintoquilijque:

—¿Canque itztoc nopa tacat Jesús?

Huan nopa tacat cati eltoya popoyotzi quinilhui:

—Amo nijmati.

Nopa fariseos quitatzintoquilijque nopa tacat cati Jesús quitachiyalti

¹³ Huan quihuicaque nopa tacat cati eltoya popoyotzi iniixpa nopa fariseos. ¹⁴ Huan eltoya sábado nopa tonali quema tiisraelitame timosiyaj-quetzaj quema Jesús quichijqui soquit huan quichicajqui nopa tacat, huan nopa fariseos moilhuijque eliyaya se tequit. ¹⁵ Huajca injuanti nojquiya quitatzintoquilijque quenicatza huelqui fachiya. Huan quinilhui:

—Nechtalili soquit ipan noixteyol huan nimoixteyolpajpacato, huan huajca nitachixtehua.

¹⁶ Huajca sequij ten nopa fariseos quijtojqque para Toteco amo quititan-toya nopa tacat cati quichijqui ya ni pampa tequitic ipan sábado quema mon-equi timosiyajquetzase. Pero sequinoc moilhuiyayaj para se taixpanoquet amo hueloscuía quichijtoscuía se hueyi tanextili quej ni. Huajca motajcox-elojque. ¹⁷ Huan sempa nopa fariseos quitatzintoquilijque nopa tacat cati mochicajtoya:

—¿Taya tiquijtohua ta ten yaya cati mitztachiyalti?

Huan nopa tacat quijto:

—Yaya se tajtolpanextijquet.

¹⁸ Nopa israelita tayacanani amo quineltocayayaj sinta nelía nopa tacat eliyaya cati achtohuiya eltoya popoyotzi huan cati ama hueli tachiya, huajca quinnotzque inana huan itata. ¹⁹ Huan nojquiya quintatzintoquilijque:

—¿Nelía, ni amotelpoca? ¿Nelía tacatqui popoyotzi? Huajca, ¿quenicatza hueli tachiya ama?

²⁰ Huan inana huan itata quinnanquilijque:

—Tojuanti tiquixmatij ni totelpoca huan tijmatij tacatqui popoyotzi.

²¹ Pero amo tijmatij quenicatza hueli tachiya ama, yon amo tijmatij ajquiya quichicajqui iixteyol. Xijtatztintoquilica ya, pampa ya motacachijtoc huan yaya huelis amechilhuis quenicatza elqui.

²² Inana huan itata quijtojqque ya ni pampa quinimacasiyayaj nopa tay-acanani ten israelitame cati ya teyolmelajtoyaj sinta se masehuali quij-tozcuía para Jesús eltoya nopa Cristo cati Toteco quijto para quititanisquía, huajca ayecmo quicahuiliscuía ma calaqui ipan tiopamit. ²³ Huajca inana huan itata quijtojqque:

—Xijtatztintoquilica ya, pampa ya motacachijtoc.

²⁴ Huajca ica ompa quinnotzque nopa tacat cati achtohuiya eltoya popoy-otzi huan quiilhuijque:

—Xijhueyichihua Toteco Dios huan techilhui yaya mitztchicajqui, huan amo Jesús, pampa tojuanti tijmatij ni Jesús se tajtacolchijquet.

²⁵ Huajca nopa tacat quinnanquili:

—Amo nijmati sinta yaya se tajtacolchijquet o amo. San ya ni cati nijmati. Achtohuiya niittoyaya nipopoyotzi huan ama hueli nitachiya.

²⁶ Yeca injuanti sempa quitatzintoquilijque:

—¿Taya mitztchihuili? ¿Quenicatza mitztachiyalti?

²⁷ Huan nopa tacat quinilhui:

—Ya nimechilhui huan amo antechajque. ¿Para ten anquinequij ma nimechilhui sempa? ¿Huelis anquinequij anquitoquilise nojquiya?

²⁸ Huan nopa tayacanani quiajhuaque nopa tacat cati achtohuiya eltoya popoyotzi huan quiilhuijque:

—Ta tijtoquilía Jesús, pero tojuanti tijtoquilíaj Moisés. ²⁹ Tijmatij Toteco quicamanalhui Moisés, pero nopa Jesús amo tijmatij canque huala.

³⁰ Huajca nopa tacat quinilhui:

—¿Taya ya ni? Amo anquimatij canque hualajqui, pero yaya nech-tachiyalti. ³¹ Nochi tijmatij para Toteco amo quintacaquilía huan quinpale-huía amo cuajcualme. Pero sinta se masehuali quitepanita Toteco huan quichihua cati ipaquilis, huajca quena, Toteco quitacaquilis cati quitajtanic. ³² Hasta ten quema pehua taltipacti huan hasta ama, amo aqui quicactoc ten se acayja cati hueli quitachiyaltía se cati tacatqui popoyotzi. ³³ Sinta Toteco amo quititantosquía ni Jesús, huajca amo huelisquía nechchicajtosquía.

³⁴ Huajca nopa israelita tayacanani quihuhijque:

—¡San tiixtaca conet! ¿Tijnequi techmachtis tojuanti?

Huan quicuatopejtiyajque tiopan calteno.

Masehualme cati popoyotziti ipan iniyolo

³⁵ Huan Jesús quicajqui para quiquixtijtoyaj ipan tiopamit nopa tacat cati eltoya popoyotzi, huajca yajqui quitemoto. Huan quema quipanti, quihui: —¿Tijneltoca Icone Toteco?

³⁶ Huan nopa tacat quitatzintoquili:

—Tate, ¿ajquiya nopa? Techilhui pampa nijnequi nijneltocas.

³⁷ Huan Jesús quihui:

—Amantzi tiqita ajquiya, pampa na cati nimitzcamanalhuía, niIcone Toteco.

³⁸ Huan ni tacat quijto:

—NohueyiTeco, nimitzneltoca.

Huan nopa tacat motancuaquetzqui huan quihueyimatqui Jesús.

³⁹ Huan Jesús quihui:

—Nihualajtoc ipan taltipacti para nijsencahuas nochi para ma eli xi-tahuac. Nihualajqui para masehualme cati eliyayaj quej popoyotziti ma quita cati melahuac, huan para injuanti cati moillhuíaj ya quimachilíaj nochi tamanti ma mocahuaca popoyotziti ipan inintalnamiqulis.

⁴⁰ Huan sequij fariseos cati itztoyaj ihuaya quicajque cati quijto huan quitatzintoquiliqque:

—Huajca timoillhuía para tojuanti tipopoyotziti ipan totalnamiqulis. ¿Amo que?

⁴¹ Huan Jesús quihui:

—Sinta nelía anitztosquíaj anpopoyotziti huan amo anquitztosquíaj huan anquimachilijtosquíaj nochi cati nijchijtoc, huajca amo anquihuicatosquíaj tajtacoli. Pero pampa anquijtohuaj nelía cuali antachiyaj huan anquimachilíaj cati nijchijtoc, huajca nelía anquihuicaj tajtacoli pampa amo antechselijtoque na.

10

Se tatenpohuilisti ten se tatzacti para borregoyme

¹ Huan Jesús quijto: “Nelía nimechilhuía, tachtequini amo calaquij campa se caltemit para tachtequise ipan se tatzacti ten tet campa cochtoque borregoyme. Injuanti ixtacatzí tejcoj para panose iixco nopa tepamit huan calaquise pampa quinequij tachtequise. ² Pero se tamocuitahuijquet amo quej nopa calaqui. Yaya calaqui ipan caltemit. ³ Huan cati quimocuitahuía nopa caltemit quitapos, huan nopa tamocuitahuijquet quinnotzas iborregojhua ica sese inintoca para quisase. Huan iborregojhua quitoscamachilise huan quitoquilijiyase. ⁴ Huan quema nopa tamocuitahuijquet tamis quinnotzas nochi nopa borregoyme cati iaxchahua, quinyacantiyas huan injuanti quitoquilise pampa ya quitoscamachilijtoque. ⁵ Pero nopa borregoyme amo

quitoquilise se masehuali cati amo quiixmatij, san cholose pampa amo quitoscamaquiláaj.”

Jesús yaya nopa cuali tamocuitahuijquet

⁶ Jesús quinilhui ni tatenpohuilsti pero cati quicaquiyayaj amo quimachilijque taya quuijtosnequi. ⁷ Huajca Jesús sempa quinilhui: “Nelía nimechilhuía na niitztoc nopa caltemit campa masehualme huelis calaquise san se quej borregojme calaquij ipan se tatzacti campa itztose tamacti. ⁸ Nochi cati hualajque achtohuiya huan quinequiyayaj ma quintoquilica masehualme, itztoyaj quej tachtequini huan tacajayahuaní, pero masehualme cati noaxcahua amo quintoquilijque. ⁹ Na niitztoc nopa caltemit. Nochi cati calaquij ipan nopa tatzacti ica na notapalehuil, niquinmaquixtis. Se tamocuitahuijquet quinyacana iborregojhua ma calaquica ica tayohua huan ma quisaca tonaya para yase campa yaya quinpantilía tacualisti. Quej nopa nojquiya niquinmocuitahuis nomasehualhua huan niquinmacas nochi cati monequi.

¹⁰ “Se tachtejquet huala para tachtequis huan temictis huan tastosolos. Na nihualajtoc para nitemacas nemilisti yancuic huan para mojmosta masehualme ma quiipyaca hasta pano cati monequi ipan ininemis. ¹¹ Na niitztoc nopa cuali tamocuitahuijquet cati motemactilía por iborregojhua. Nimotemactilis huan nimiquis por cati noaxcahua. ¹² Pero amo san se ica se tequipanojquet cati san quinmocuitahuía borregojme para quitanis tomi. Quema yaya quiiats ajstitihuala se tepechichi, nimantzi cholos huan quincajtehuas nopa borregojme iniselti pampa amo iaxcahua. Huan nopa tepechichi quincuas sequij borregojme huan nopa sequinoc mosemanase huan yase campa hueli. ¹³ Cholos nopa tatequipanojquet pampa san tequiti para tomintanis. Amo quinicnelía nopa borregojme.

¹⁴ “Na niitztoc nopa cuali tamocuitahuijquet. Na niquinixmati cati itztoque noaxcahua huan injuanti nechixmatij, ¹⁵ san se quej noTata nechixmati huan na niquinixmati noTata. Huan nimotemactilis huan nimiquis por cati noaxcahua. ¹⁶ Itztoque sequinoc masehualme cati nojquiya noaxcahua cati amo itztoque nica. Huan injuanti nojquiya monequi niquinnotzati para ma nechtoquilica huan nechtoscaquise. Huan huajca nochi noaxcahua itztose san sejco huan nochi san na niquinmocuitahuis.

¹⁷ “NoTata nechicnelía pampa nimotemactilis para nimiquis huan teipa nimoyolcuis sempa. ¹⁸ Amo aquí huelisquía nechmictisquía sinta amo nimotemactilis. Pero ica nopaquilis nimotemactilis huan nimiquis. Nijpiya tanahuatili para nimiquis huan nijpiya tanahuatili para nimoyolcuis sempa pampa noTata quej nopa nechnahuatijtoc ma nijchihua.”

¹⁹ Huan nopa tayacanani ten israelitame quicajque ni cati Jesús quiiyto huan pejqe monajnanquillaj huan sempa moxelojque. ²⁰ Sequij quiiytohuayayaj:

—Yaya quiipyas se iajacayo Amocualtatcat huan tapolohua. ¿Para ten anquicaquij icamanal?

²¹ Pero sequinoc quiiytohuayayaj sinta quiipyasquía se iajacayo Amocualtatcat, amo huelisquía camanaltisquía nelcuali quej camanalti. Huan se cati quiipyas iajacayo Amocualtatcat amo hueli quitachiyaltis se popoyotzi.

Nopa israelitame quiajhuaque Jesús

²² Ipan nopa metzti quema onca tasesecayot, Jesús itztoya ipan altepet Jerusalén ipan nopa ilhuit para tiquelnamiquise quema tohuejcapan tatahua sempa quiyancuilijque huan quimactilijque Toteco nopa hueyi

tiopamit cati achtohuiya sequinoc quisosolojtoyaj. ²³ Huan Jesús nemiyaya ipan hueyi tiopan tamapa cati quitocaxtiyayaj Salomón. ²⁴ Huan nopa tayacanani ten israelitame quiyahualojque huan quihlhuijque:

—¿Hasta quema timochiyase para nelía tijmatise ten ta? Sinta ta tiCristo cati hualasquía, techilhui xitahuac.

²⁵ Huan Jesús quinnanquili:

—Ya nimechilhui huan amo antechneltoaque. Nopa huejhueyi tanextili cati nijchihua ica itequiticayo noTata amechnextilía ajquiya na. ²⁶ Pero amo antechneltoaj para na niCristo cati Toteco quititanqui pampa amo annoaxcahua quej ya nimechilhuijtoc. ²⁷ Noborregojhua nechtoscamachilíaj huan niquinixmati huan inijuanti, quena, nechtoquilíaj. ²⁸ Huan cati noaxcahua niquinmaca nemilisti yancuic para nochipa huan amo quema polihuse; yon amo aqui huelis nechquixtilis pampa itztoque nomaco. ²⁹ NoTata nechmacatoc inijuanti cati noaxcahua huan yaya quiyiya más chichahualisti que nochi sequinoc. Huan amo aqui huelis quiquixtilis cati noaxcahua pampa itztoque imaco nojquiya. ³⁰ Na huan noTata san se tiitztoque.

³¹ Huajca nopa israelita tayacanani quiiizquijque tet para quitepachose.

³² Huan Jesús quinilhui:

—Nijchijtoc amoixpa miyac cuali tanextili cati tepalehuía cati noTata nechilhuijtoc ma nijchihua. ¿Taya tanextili amo cuali nimechnextilijtoc para antechtepachose?

³³ Huan nopa tayacanani ten israelitame quihlhuijque:

—Amo timitztepachose pampa tijchijtoc cati cuali. Timitztepachose pampa tiquijtohua tiToteco Dios. Huajca tahuel tiquixpano Toteco, pampa ta san se titacat.

³⁴ Huan Jesús quinilhui:

—Ipan amotanahuatilhua ijcuilijtoc: ‘Niquijtohua para andioses.’

³⁵ Huajca sinta Toteco quintocaxti ‘dioses’ nopa masehualme cati quiseliyayaj icamanal, huan amo aqui huelis quiixpolos cati ijcuilijtoc ipan Icamanal Toteco, ³⁶ ¿para ten anquijtohuaj para na cati noTata nechiyocacajqui para se tequit tatzejtzeltoc huan nechtitanqui ipan ni taltipacti para nijchihuas, amo nijtepanita Toteco Dios pampa niquijto para niIcane Toteco? ³⁷ Sinta amo nijchihua huejhueyi tanextili quej noTata quichihua, amo techneltocaca. ³⁸ Pero sinta melahuac nijchihua huejhueyi tanextili quej noTata, huajca techneltocaca por nopa tamanti cati nijchihua masque amo antechneltoaj san por nocamanal. Sinta anquineltoease cati nijchihua, anquimachilise noTata itztoc ipan na huan na niitztoc ipan ya.

³⁹ Huajca nopa tayacanani sempa quinequiyayaj quiiizquise Jesús para quitzacuase, pero mochololti.

⁴⁰ Huan Jesús sempa quiixcotonqui nopa hueyat Jordán huan yajqui hasta nopa nali campa quisa tonati campa achtohuiya Juan tecuaaltiyaya.

⁴¹ Huan miyaqui masehualme yajque nepa para itztose ihuaya. Huan quijtohuayayaj se ica seyoc:

—Nelía Juan amo quichijqui huejhueyi tanextili quej Jesús quichihua, pero nochi cati Juan techilhui ten Jesús elqui melahuac.

⁴² Huan miyaqui masehualme quineltocaque Jesús nepa.

¹ Ipan altepet Betania itztoya se tacat cati itoca Lázaro cati quipixqui ichaj inihuaya isihua icnihua, María huan Marta. Huan Lázaro pejqui mococohua. ² (María, iicni Lázaro, eliyaya nopa sihuat cati teipa quitequili taajhuiyacayot ipan iicxihua Jesús huan quihuachili ica itzoncal.) ³ Huajca quema Lázaro mococo, isihua icnihua tatitanque ma quihuitij Jesús:

—Toteco, mococohua mohuampo Lázaro cati tiquicnelía.

⁴ Huan quema Jesús quicajqui ni, quijito:

—Nopaocolisti amo quiajsic para ma miqui. Quiajsic para tenextilis ihueyitilis Toteco Dios huan nojquiya nohueyitilis ná nilcone.

⁵ Huan Jesús nelía quinicneli Lázaro, María huan Marta. ⁶ Pero quema quicajqui mococohua Lázaro, mocajqui seyoc ome tonati campa itztoya.

⁷ Huan teipa techilhui tiimomachtijcahua:

—Ma tiyaca sempa estado Judea.

⁸ Huan tiimomachtijcahua tiquilhuijque:

—Tamachtijquet, nopa israelita tayacanani nepa quinequiyayaj mitztepa-chose. ¿Para ten sempa tiyase?

⁹ Huan Jesús technanquili:

—Ama ayemo teno nopantis. Onca majtacti huan ome horas quema tanestoc ipan se tonal. Se cati nejnemi quema tonaya amo teno ipantis pampa quitaahuilía nopa taahuili ipan ni taltipacti. ¹⁰ Pero sinta se nejnemi quema tzintayohua, motepotanis pampa amo onca taahuili. Huan quena, ajsis hora quema taijqui nopantis.

¹¹ Jesús quijito ya ni huan teipa techilhui:

—Tohuampo Lázaro cochtoc, pero niyas niqixititi.

¹² Huan tiimomachtijcahua tiquilhuijque:

—Toteco, sinta cochtoc, cualtitoc, pampa quema isas, huajca mochicahuas.

¹³ Pero Jesús nelía techilhuiyaya Lázaro ya mictoya, pero timoilhuiyayaj san cochtoya. ¹⁴ Huajca Jesús techilhui xitahuac:

—Lázaro ya mictoc. ¹⁵ Huan na nipaqui para amo niyajqui nimantzi pampa ama más cuali para amojuanti pampa más antechnehtocase na. Ma tiyaca tiquitatij.

¹⁶ Huan Tomás, cati quitocaxtiyayaj Cuate huan cati itztoya se ten tojuanti tiimomachtijcahua Jesús, techilhui:

—Ma tiyaca tojuanti para nojquiya ma techmictica tojuanti sinta quimictise Jesús.

Jesús yaya cati quinyolcui cati mictoque

¹⁷ Huan quema Jesús ajsito altepet Betania, ya quipixtoya nahui tonati quitajitoyaj itacayo Lázaro ipan ostot ipan se tepet. ¹⁸ Huan Betania mocahua nechca Jerusalén, huelis se eyi kilómetro ihuejcaca. ¹⁹ Huan miyac israelitame hualajtoyaj ten Jerusalén para quinyolchicahuase Marta huan María pampa mijqui iniicni. ²⁰ Huan quema Marta quicajqui para hualayaya Jesús, yajqui quinamiquito ipan ojti, pero María mocajqui calijtic. ²¹ Huan Marta quihuitio Jesús:

—NoTeco, sinta tihualajtosquía quema mococohuayaya, noicni amo mictosquía. ²² Huan masque ya mictoc, nijmati Toteco mitzchihuillis nochicati tijtajanis.

²³ Huan Jesús quihui:

—Moicni sempa moyolcuis.

²⁴ Huan Marta quijito:

—Quena, nijmati moyolcuis sempa quema nochi mijcatzitzitzi moyolcuise ipan itamiya tonali.

²⁵ Huan Jesús quiilhui Marta:

—Na cati niqunyolcui masehualme cati mictoque huan sempa niqin-maca nemilisti. Masque miqúis itacayo se cati nechneltoqa, quipiyas nemilisti yancuic para nochipa. ²⁶ Huan nochi masehualme cati itztoque huan nechneltoqaj amo miqúise para nochipa. ¿Tijneltoca cati nimitzilhuía?

²⁷ Huan Marta quiilhui:

—Quena, noTeco nijneltoqa ta tiCristo, tiIcne Toteco. Tiitztoc yaya cati tijchiyayayaj para ajsis ipan totaltipac.

Jesús chocac

²⁸ Huan quema Marta tanqui quijito ya ni, yajqui quinotzato María huan quiixtacailhui:

—Totamachtijca ya ajsico huan mitznotta.

²⁹ Huan quema María quicajqui ni, yajqui nimantzi para quinamiquiti.

³⁰ Huan Jesús noja ayemo ajsiyaya campa altepet pampa mocajtoya campa Marta quinamiquito. ³¹ Huan nopa israelitame cati itztoyaj calijtic para quiyolchicahuase María quiitaque quema quisqui nimantzi huan quitoquilijque pampa moilhuyayaj yahuiyaya quichoquiliti iicni campa quitoctoyaj.

³² Pero María yajqui campa itztoya Jesús huan quema quiitac, motancuaquetzqui iicxita huan quiilhui:

—NoTeco, noicni amo mictosquía sinta tihualajtosquía quema mococo-huayaya.

³³ Huan Jesús quiitac chocayaya María huan nojquiya chocayayaj nopa israelitame cati hualajque ihuaya, huan yaya no moyolpitzahuili huan motequipacho. ³⁴ Huan quintatzintoquili:

—¿Canque anquittoctoque?

Huan quiilhuijque:

—Xihuala, Toteco, ma tijtachilitij.

³⁵ Huan Jesús chocac. ³⁶ Huan nopa israelitame quiijtojque:

—Xiquitaca, Jesús nelía quiicneliyaya Lázaro.

³⁷ Huan sequij quiijtojque:

—Yaya quichicajqui nopa popoyotzi. ¿Amo hueltosquía nojquiya quichicajtosquía Lázaro para amo mictosquía?

Jesús quiyolcuic Lázaro cati mictoqa

³⁸ Huan sempa Jesús moyolpitzahuili huan yajqui campa quitoctoyaj. Quitaljtoyaj itacayo Lázaro ipan se ostot campa se tepet huan quiixztactoyaj ica se hueyi tepacti. ³⁹ Huan Jesús quiijto:

—Xiquijcuenica ne tepacti.

Huan Marta, iicni Lázaro, quiilhui Jesús:

—Pero ya quiapiya nahui tonati tijtojque huan huelis ya mijyotía.

⁴⁰ Huan Jesús quiilhui:

—¿Amo nimitzilhuijtoc sinta tijneltoqas, nimitznextilis ihueyitilis Toteco?

⁴¹ Huan quema quiijcuenijque nopa tet ten nopa ostot campa quitalijtoyaj nopa mijcatzi, Jesús ajcotachixqui huan quiijto:

—Notata, nimitztascamati pampa techtacaquilijtoc huan techchihuilia cati nimitztajtanía. ⁴² Nijmati nochipa techtacaquilía, pero nimitzcamanalhuía ama miyacapa para nochi cati nechyahualojtoque nica huelis nechneltoqase para techtiantoc ipan ni taltipacti.

⁴³ Huan quema tanqui quicamanalhuía iTata, camanaltic chicahuac huan quiiyto:

—Lázaro, xiquisa ten nopa ostot.

⁴⁴ Huan Lázaro cati mictoya quisqui huijcontoc yajmaxtic ica yoyomit ten imaco hasta nochi iicxico, huan se payo quixtzacuayaya.

Huan Jesús quinilhui nopa masehualme:

—Xijtojtomaca para huelis yas.

Tacame quisencajque para quimictise Jesús
(Mt. 26:1-5; Mr. 14:1-2; Lc. 22:1-2)

⁴⁵ Huan miyac israelitame cati itztoyaj ihuaya María quitaque cati Jesús quichijqui huan quineltocaque para yaya nopa Cristo cati hualasquia.

⁴⁶ Pero sequinoc israelitame cati amo quineltocaque yajque quinilhuitoj nopa fariseos taya quichijtoya Jesús. ⁴⁷ Huajca nopa tayacanca totajtztizi huan fariseos mosentilijque ica nopa hueyi tasentilisti ten tequichihuani huan quiiytojque:

—¿Taya tijchihuase? Pampa ni tacat Jesús quichihua miyac tanextili.

⁴⁸ Sinta tijcahuilise ma quichihuas más, huajca nochi quineltocase. Huan nopa tequichihuani ipan altepet Roma quicaquise huan techtitanilise soldados para techsosolhuiliquij totiopa huan techmictise nochi tiisraelitame ipan total.

⁴⁹ Huan Caifás nopa hueyi israelita totajtzi ipan nopa xihuit quinilhui:

—Amo teno anquimatij. ⁵⁰ ¿Amo anquimachilíaj más cuali quisas para ma miquis setzi tacat por nochi masehualme huan amo timiquise nochi tiisraelitame?

⁵¹ Huan Caifás amo quiiyto ya ni pampa iselti moilhuiytoya. Elqui pampa yaya itztoya nopa hueyi israelita totajtzi ipan nopa xihuit huan Itonal Toteco quimacac nopa camanali para tenextilis achtóhui taya mochihuas teipa quema Jesús miquis por nochi masehualme ipan total. ⁵² Huan amo san miquisquia Jesús por masehualme ipan total, pero nojquiya miquisquia para quinsentilise huan para ma itztoca san se iconehua Toteco cati mosemantoyaj ipan campa hueli tali. ⁵³ Huajca ten nopa tonali huan teipa nopa tayacanani ten israelitame pejque quisencahuaj quenicatza huelis quimictise Jesús.

⁵⁴ Huajca Jesús ayecmo huelqui nejnemi campa nopa tayacanca israelitame huelis quiitase. Yaya quisqui huan yajqui ica tojuanti tiimomachtijcahua ipan se pilaltepsetzi cati itoca Efraín nechca nopa huactoc tali campa amo teno eli.

⁵⁵ Huan ajstitihualayaya nopa tonali para nopa Pascua Ilhuit. Huan miyac masehualme hualayayaj ten campa hueli pilaltepsetziti huan yahuiyayaj hasta altepet Jerusalén quema noja polihuiyaya para pehuas nopa ilhuit pampa monequiyaya motapajpacchihuase quej quiiytohuaj totanahuatilhua para teipa quielnamiquise nopa Pascua Ilhuit. ⁵⁶ Huan nopa masehualme cati hualajtoyaj campa hueli moquetzayayaj tiopan calijtic quitemo-huayayaj Jesús. Motatzintoquiliyayaj se ica seyoc:

—¿Quenicatza tiquita? ¿Hualas nopa Jesús ipan ni ilhuit o amo?

⁵⁷ Huan nopa tayacanca totajtztizi huan nopa fariseos ya quinilhuiytoy masehualme sinta se quimatisquia canque itztoya Jesús, ma quinyolmelahuatij para huelise quiitzquitij.

12

*Se sihuat quitequili taajhuiyacayot ipan Jesús
(Mt. 26:6-13; Mr. 14:3-9)*

¹ Quema polihuiyaya chicuase tonali para pehuas nopa ilhuit cati itoca Pascua, Jesús sempa yajqui Betania campa itztoya Lázaro cati quiyolcuic quema ya mictoya. ² Huan injuanti quichihuilijque Jesús se tacualisti. Huan itztoyaj Lázaro huan sequinoc ihuaya Jesús campa mesa, huan Marta quinmacayaya inintacualis. ³ Huan María quihualicac tajco litro se taajhuiyacayot cati tasencahuali ica nopa xochit cati itoca nardo. Eliyaya taniel patiyó nopa taajhuiyacayot. Huan María quitequili ipan iicxihua Jesús huan quihuachili ica itzoncal. Huan nelía ajhuiyac mijyotiyaya calijtic. ⁴ Huan nopona nojquiya itztoya Judas Iscariote, icone Simón, se ten tojuanti tiimomachtijcahua Jesús. Yaya cati teipa quitemactilisquia para ma quimictica. Huan Judas quiijto:

⁵ —¿Para ten quinenpolo ne taajhuiyacayot? Hueltosquia quinamacatosquia ica miyac tomi quej taxtahuaj para tres cientos tonali tequit huan quinmacatosquia nopa tomi masehualme cati pilteicneltziti.

⁶ Judas amo quiijto ni pampa nelía quinicneliyaya cati teicneltziti. Quiijto pampa yaya elqui se tachtejquet. Quipixqui itequi para quihuicas nopa bolsa ica totomi nochi tiimomachtijcahua Jesús huan talojtztiti quiichtacacuiyaya. ⁷ Huajca Jesús quiilhui:

—Amo xijcuatotoni ni sihuat. Yaya quiajocotoc ni taajhuiyacayot hasta ama para nechcualtalilis notacayo para quema nimiquis huan nechtalpachose.

⁸ Nochipa itztose amohuaya cati pilteicneltziti para anquinpalehuise, pero na ayecmo nihuejcahuas niitstos amohuaya.

Quisencajque quenicatza huelis quimictise Lázaro

⁹ Huan miyaqui israelitame quicajque para Jesús itztoya ichaj Lázaro huan yeca hualajque quitachilicoj. Amo san quinequiyayaj quiitase Jesús. Nojquiya quinequiyayaj quiitase Lázaro cati mictoya huan Jesús sempa quiyolcuic. ¹⁰ Pero nopa tayacanca totajtztiti quisencahuayayaj quenicatza huelis quimictise Lázaro nojquiya, ¹¹ pampa miyaqui israelitame ayecmo quinneltoquiliijque inincamanal. Pejque quineltocej Jesús pampa quiyolcuic Lázaro.

Jesús calajqui Jerusalén ipan burro

(Mt. 21:1-11; Mr. 11:1-11; Lc. 19:28-40)

¹² Huan hualmosta nopa miyaqui masehualme cati ya ajsitoyaj para nopa Pascua Ilhuit quicajque para Jesús monechcahuiyaya Jerusalén. ¹³ Huan quicuique huejhuéyi apachijti imacuayo huan yajque quinamiquitoj. Huan pejque quiilhuíaj chicahuac:

“¡Timitzhueyichihuaj!

¡Ma Toteco mitztiochihua ta cati tihuala ipan itoca*!

¡Ta titotanahuatijca tiisraelitame!”

¹⁴ Huan Jesús quipanti se coneburro huan ipan tejcoc quej ijcuilijtoc ipan Icamanal Toteco para quichihuasquia. Ijcuilijtoc:

¹⁵ “Amo ximomajmatica anJerusalén ehuaní.

Xiquitaca amotanahuatijca ya huala ipan se coneburro.”

¹⁶ Achtohuiya tojuanti cati tiimomachtijcahua amo tijmachilijque para Jesús quitamiltiyaya cati ijcuilijtoc ipan Icamanal Toteco para mochihuas,

* 12:13 12:13 Ica itequitacayo.

pero quema Jesús mocuetoaya ilhuicac huan Toteco quihueyitalijtoya, tiquelnamijque quesqui tamanti mochijtoya cati ijcuilijtoc ipan Icamanal Toteco para yaya quichihuas o para masehualme ma quichihuilica.

¹⁷ Huan nojquiya nochi nopa masehualme cati itztoyaj ihuaya Jesús quema quinotzqui Lázaró ma quisa campá nopa ostot ipan tepet talojtz-itzi quinilhuiyayaj sequinoc cati panotoya. ¹⁸ Huajca yeca mosentilijque miyaqui masehualme para quinamiquitij Jesús ipan ojti. ¹⁹ Huan nopa fariseos moilhuijque se ica seyoc:

—Xiquitaca, amo teno hueli tijchihuase. Nochi masehualme cati campá hueli ehuaní ipan taltipacti ya quitoquiláaj.

Sequij tacame griegos quitemotoj Jesús

²⁰ Huan itztoyaj sequij masehualme cati ehuaní tali Grecia cati nojquiya yajque Jerusalén para quihueyimatise Toteco ipan nopa ilhuit. ²¹ Huan inijuanti yajque campá Felipe cati ehua altepet Betsaida ipan estado Galilea huan quilhuijque:

—Tate, tijnequij tiquixmatise Jesús.

²² Huan Felipe hualajqui quilhuiico Andrés cati quilhuijtoyaj, huan san sejo Felipe huan Andrés quilhuijque Jesús. ²³ Huan Jesús quijto:

—Ya ajsic hora para na cati niMocuetqui Masehuali nimiquis huan noTata nechhueyitalis. ²⁴ Nelía nimechilhuía, sinta amo aquí quitocas se xinachtí, nopa xinachtí mocahuas san se xinachtí. Pero sinta se quitocas taltita quej quitocaj se cati mictoc, iyoltzi nopa xinachtí ixhuas huan temacas miyac pixquisti. ²⁵ Cati quinequi quichihuas san cati quipactía, quipolos nochi quema miquis. Pero yaya cati quicahuas cati yaya quinequi ipan inemilis ipan ni taltipacti huan nechtoquilis na, quipiyas se nemilisti yancuic para nochipa. ²⁶ Sinta ni griegos o cati hueli masehuali quinequij elise notequipanojcahua, ma nechtoquilica. Huan campá na niitztos, nojquiya itztose notequipanojcahua. Huan sinta se nechtequipanos, noTata quitepanitas.

Jesús techilhui miquis

²⁷ “Ama tahuel nimotequipachohua, pero amo nijtajtanis noTata ma nechmanahui ten ni taijyohullisti cati hualas. Na nihualajtoc ipan ni taltipacti san para nitaijyohuis huan nimiquis ipan ni tonali.”

²⁸ Huajca Jesús quilhui iTata:

—Papá, xijchihua para nochi masehualme ma mitzhueyitalica † por cati nijchihua na.

Huan Toteco Dios cati itztoc ilhuicac quilhui Jesús:

—Ya nijchijtoc para ma nechhueyitalica huan sempa nijchihuas.

²⁹ Huan nopa miyaqui masehualme cati moquetzayayaj nepa quitoscajque, huan sequij quijtojqque tatomonqui huan sequinoc quijtojqque:

—Se ilhuicac ejquet quinojnotzqui Jesús.

³⁰ Pero Jesús techilhui:

—NoTata amo camanalti para na ma nijmati nechcajqui. Yaya camanaltic para amajuanti xijmachilica yaya quicajqui cati niquilhui. ³¹ Ama ajsitoc hora para Toteco quintajtolsencahuas cati itztoque ipan ni taltipacti. Ama nijquixtilis itequiticayo Amocualtatcat cati tanahuatía ipan ni taltipacti. ³² Huan quema nechtejcoltise ipan cuamapeli, niquinyoltilanas nochi masehualme para ma hualaca campá na.

³³ Techilhui ni para ma tijmatica quenicatza miquisquía. ³⁴ Huan nopa miyaqui masehualme quitatzintoquilijque:

† 12:28 12:28 Ma quihueyitalica motoca.

—Tojuanti tijcactoque ipan Icamanal Toteco campa quuijtohua nopa Cristo cati hualasquía itztos para nochipa. Pero tiquijtohua ta cati tiMocuetqui Masehuali, mitztejcoltise ipan cuamapeli para timiquis. ¿Ta cati tiMocuetqui Masehuali tiitztoc san se ica nopa Cristo cati hualasquía o amo?

³⁵ Huajca Jesús quinilhui:

—Na cati niquintaahuilía masehualme ipan iniyolo san niitztos amohuaya se ome tonati quentzi más. Xinejnemica ipan notaahuil ama quema noja anhuelij huan techneltocaca para amo anpolihuisse. Pampa huala tzintayohuilot quema ayecmo niitztos amohuaya. Masehualme cati nejnemij ipan tzintayohuilot huan amo nechcahuilíaj ma niquintaahuili, amo quimachilíaj canque yahuij, yon amo quimatij sinta polihuisse para nochipa.

³⁶ Techneltocaca ipan ni tonali quema na cati nitaahuili noja niitztoc amohuaya para anelise annoconehua huan para huelis annejnemise ipan notaahuil.

Huan quema Jesús quuijto ni, quisqui huan motatito ten inijuanti.

Nopa tayacanca israelitame amo quineltocaque Jesús

³⁷ Huan masque Jesús quichijtoya miyac huejhueyi tanextili iniixpa masehualme cati quinnextili ichicahualis, nopa tayacanca israelitame amo quineltocaque. ³⁸ Quej ni panoc para quitamiltis cati nopa tajtolpanextijquet Elías quuijcuilo huejcajquiya campa quuijto:

“Toteco, nel quentzi masehualme quineltocaj cati tiquinilhuíaj.

¿Tiquinnextilijtoc san se ome para hueyi mochicahualis?”

³⁹ Huajca amo huelque quineltocuilíaj pampa eltoc quej Isaías quuijtohua ipan iama:

⁴⁰ “Toteco quinixtzactoc huan quinyoltetilijtoc.

Quej nopa amo hueli quuitase huan quimachilise ten na, huan moyolpatase para huelis niquinmaquixtis.”

⁴¹ Huan Isaías quuijto ni pampa quuitztoya ihueyitilis Cristo huan techyolmelahuayaya ten ya. ⁴² Pero masque quej nopa quuijtohua, miyaqui masehualme quineltocaque Jesús para yaya nopa Cristo. Huan hasta sequij tayacanca israelitame nojquiya quineltocaque, pero amo aqui quiihuiyayaj pampa quinimacasiyayaj nopa fariseos. Quimatiyayaj ayecmo quincahuilise calaquise ipan israelita tiopamit. ⁴³ Huihuitique inijuanti pampa más quinequiyayaj quinpaquilismacase masehualme, huan amo Toteco.

Icamanal Jesús tetajtolsencahuas

⁴⁴ Huan Jesús pehua camanalti miyacapa ipan nopa ilhuit huan chichahuac quuijto: “Yaya cati nechnehtoca, amo san na nechnehtoca. Nojquiya quineltoca noTata cati nechtitantoc. ⁴⁵ Cati nechita, nojquiya quiita noTata cati nechtitantoc. ⁴⁶ Nihualajtoc ipan ni taltipacti quej se taahuili. Niquintaahuilía iniyolo nochi cati nechnehtocaj para ayecmo itztose ipan tzintayohuilot. ⁴⁷ Pero masehualme cati quicaquij nocamanal huan amo nechnehtocaj, amo niquintajtolsencahuas. Amo nihualajqui ipan taltipacti ama para nitetajtolsencahuas. Nihualajtoc para niquinmaquixtis ten intajtacolhua. ⁴⁸ Pero cati nechhuejcamajcahua huan amo quiselía nocamanal quipiyas cati quitajtolsencahuas ipan itamiya tonali, pampa ni camanali cati niquijtojtoc ipan taltipacti quitelhuis ipan itamiya tonali. ⁴⁹ Amo nicamanalti san ica na notequiticayo. NoTata cati nechtitantoc yaya nechnahuatijtoc taya ma niquijto huan taya ma nitamachtí. ⁵⁰ Huan nijmati cati quineltocas nocamanal cati noTata nechnahuatijtoc ma niteilhui, yaya

quipiyas nemilisti cati yancuic para nochipa. Pampa nochi cati niquijtohua eltoc cati noTata nechilhuitoc ma niquijto.”

13

Jesús quinicxipajpajqui imomachtijcahua

¹ Ayemo pehuayaya nopa Pascua Ilhuit, huan Jesús ya quimatiyaya para monechahuiyaya nopa hora para quisas ten ni taltipacti huan tacuepilis campá itztoc iTata. Mojmosta technextilijtoya tojuanti cati tiixachua nica ipan taltipacti para techicneliyaya, huan nopa tonali technextili sempa para tahuel techicnelía. ² Ajsitoya hora para nopa Pascua tacualisti huan Amocualtatcat ya quitallilijtoya ipan italnamiqullis Judas Iscariote, icone Simón, para quitemactilis Jesús inimaco amo cuajcualme.

³ Jesús quimatiyaya iTata quimacatoya tequiticayot para quinahuatis nochi tamanti. Huan quimatiyaya para hualajqui ten campá Toteco huan ica se ome tonati sempa tacuepilis iixpa. ⁴ Pero masque nochi nopa tequiticayot quipixtoya; ipan nopa tacualisti moquetzqui Jesús, huan quiquixti iyoyo huehueyac huan motzinquechilpi se toaya. ⁵ Huan quitequili at se huajcali, huan pejqqui techicxipajpaca huan techicxihuatza ica nopa toaya quej quichihua se tetequipanojqquet.

⁶ Huan quema Jesús pehua quicxipajpaca Simón Pedro, yaya quihui: —NoTeco, ¿para ten tijnequi techicxipajpacas?

⁷ Huan Jesús quinanquili:

—Amantzi amo tijmachilía taya quinequi quijtos cati nijchihua, pero teipa tijmachilis.

⁸ Huan Pedro quijto:

—Amo quema nimitzcahuilis techicxipajpacas.

Huan Jesús quinanquili:

—Sinta amo nimitzixipajpacas, huajca amo teno tijpiyas ica na.

⁹ Huajca Simón Pedro quihui:

—Huajca, noTeco, amo san noicxi techpajpaquili, nojqquiya techpajpaquili notzonteco huan nomax.

¹⁰ Huan Jesús quihui:

—Se masehuali cati maltijtoc san monequi cati quicxipajpacas pampa ya tapajpactic itacayo. Antapajpactique, pero amo nochi amojuanti.

¹¹ Huan Jesús quijto: “Amo nochi antapajpactique”, pampa quimatiyaya ajquiya quitemactilisquía.

¹² Quema tanqui techicxipajpaca nochi tojuanti, sempa moquenti iyoyo huehueyac huan mosehui nechca mesa. Huan techilhui:

—Huelis amo anquimachilíaj cati nimechchiuilijtoc. ¹³ Antechtocaxtíaj niamotamachtijca huan niamoTeco. Huan quinamiqui cati anquijtohuaj pampa melahuac. ¹⁴ Pero sinta na cati niamotamachtijca huan niamoTeco nimechicxipajpactoc, monequi san se anmotequipanose huan anmoicxipajpacase se ica sequinoc. ¹⁵ Pampa nimechmacatoc se taquejqquetzayot para anquichihuase quej na nimechchiuilijtoc. ¹⁶ Nelía nimechilhúa, se tequipanojqquet amo itztoc más hueyi que iteco. Huan se tatitanquet amo itztoc más hueyi que yaya cati quititanqui. Annotequipanojqhua huan anotayolmelajcahua huan amo más anhuejhueyi que na. ¹⁷ Ya anquimachilíaj para nimechilhuitoc ximotequipanoca se ica seyoc, huajca xijchihuaca huan amechmacas miyac paquilisti.

¹⁸ “Amo nicamanalti ten nochi amojuanti. Cualí nimechixmati anquesqui cati nimechtapepenijtoc. Ijcuilijtoc ipan Icamanal Toteco campá quijto

para se cati quixoloni ipantzi nohuaya ipan notacualis, mochijtoc nocualan-caitaca. Huan ni camanali nimantzi quisas melahuac. ¹⁹ Nimechilhuía ya ni ama quema noja polihui para panos, para teipa quema mochihuas, an-quineltocase para na niitztoc nopa Cristo cati hualasquía. ²⁰ Nelía nimechil-huía, cati amechselis amojuanti o cati hueli masehuali cati nijtitani, nojquiya nechselía. Huan cati nechselía, quiselía noTata cati nechtitantoc.²¹

Jesús quijto Judas quitemactilis

(Mt. 26:20-25; Mr. 14:17-21; Lc. 22:21-23)

²¹ Quema Jesús tanqui quijto ni, moyolpitzajqui huan techilhui tiimo-machtijcagua:

—Nelía nimechilhuía, se ten amojuanti nechtemactilis ica nocualancaitac-ahua.

²² Huan tiimomachtijcagua tipejque timoixtachilíaj se ica sequinoc pampa amo tijmatiyayaj ajquiya quichihuasquía. ²³ Na nitacuayaya inacasta Jesús pampa miyac nechicneliyaya. ²⁴ Huan Simón Pedro nechmanotzqui ma nijtatzintoquili Jesús ajquiya quitemactilis. ²⁵ Huajca na nimonechchahui achi más huan niquilhui:

—Toteco, ¿ajquiya mitztemactilis?

²⁶ Huan Jesús nechnanquili:

—Na nijxolonis ni pantzi ipan ni tacuali huan nijmacas ma quicua yaya cati nechtemactilis.

Huajca quixoloni nopa pantzi huan quimacac Judas, itelpoca Simón Iscar-iote. ²⁷ Huan quema Judas quiselijtoya nopa pantzi, Amocualtacat calajqui ipan iyolo. Huan Jesús quilhui:

—Nopa cati tijchihuas, xijchihua nimantzi.

²⁸ Huan yon se ten tojuanti cati tiitztoyaj ihuaya campa mesa amo tij-matiyayaj para ten quilhui ya nopa. ²⁹ Sequij san moilhuiyayaj Jesús qui-ilhuiyaya Judas ma quicohuati cati monequi para nopa ilhuit o quilhuiyaya ma quínmacas tomi cati pilteicneltziti pampa Judas quimocuitahuiyaya totomibolsa. ³⁰ Huajca Judas quiseli nopa pantzi cati Jesús quimacac huan nimantzi quistejqui. Huan ya tayohuixtoya.

Se yancuic tanahuatili

³¹ Quema ya quistoya Judas, Jesús techilhui:

—Ama ajsic hora para monextis nohueyitilis na cati niMocuetqui Mase-huali huan para monextis ihueyitilis noTata ipan cati nijchihuas. ³² Quema nitextilis ihueyitilis noTata, amo huejcahuas nopa tonal teipa quema no-Tata nechhueyitalis na. ³³ Noconeuhua, san niitztos amohuaya seyoc talojtzi huan monequi niquistehuas. Masque antechtemose, quej niquinilhui nopa israelita tayacanani, amo huelis antechoquilise campa niyas. ³⁴ Huajca nimechmaca se yancuic tanahuatili para xijchihuaca: Ximoicnelica se ica seyoc quej na nimechicnelía. Quena, quej nopa monequi ximoicnelica. ³⁵ Nochi masehualme quimachilise para nelía annomomachtijcagua sinta nelía annoicnelise.

Jesús quijto para Pedro amo mocahulis sinta quixmati

(Mt. 26:31-35; Mr. 14:27-31; Lc. 22:31-34)

³⁶ Huan Simón Pedro quitatzintoquili:

—NoTeco, ¿canque tiyas?

Huan Jesús quinanquili:

—Amantzi amo huelis techtoquilis campa niyas, pero teipa quena, techto-quilis.

³⁷ Huan Pedro quiilhui:

—NoTeco, ¿para ten amo huelis nimitztoquilis amantzi? Nimotemacasquía para nimitztoquilis por ta.

³⁸ Huan Jesús quinanquili:

—Techilhuía timotemacasquía para ma mitzmictica pampa techneltoaca. Pero nelía nimitzilhúia, ipan ni tayohua quema noja polihuis para tzajtzis se cuapele para tanesis, ta tiquijtojtos expa para amo techixmati.

14

Jesús yaya ojti hasta Toteco

¹ “Amo ximotequipachoca. Xijneltocaca Toteco huan techneltoaca nojquiya. ² Nepa ilhuicac campa ichaj noTata onca miyac calme para ipan anitztose. Sinta amo melahuac, nimechilhujitosquía. Na niyas nepa nimechhijchihuililiti amochaj campa anitztose. ³ Huan quema ya nimechsencahuilijtos amochaj, huajca sempa nihualas huan nimechhuicas para anitztose nohuaya nepa campa niitztos. ⁴ Anquimatij canque niyas huan anquimatij nopa ojti cati ipan anyase.”

⁵ Huan Tomás quiilhui:

—NoTeco, amo tijmatij canque tiyas, huajca ¿quenicatza huelis tijmatise nopa ojti para ipan tiyase?

⁶ Huan Jesús quiilhui:

—Na niojti, nitehuicas ilhuicac. Na niitztoc cati melahuac huan nitemaca nemilisti yancuic para nochipa. Amo aqui huelis ajsis campa itztoc noTata nepa ilhuicac sinta amo nechneltoaca. ⁷ Sinta nelía antechixmajtosquíaj na, nojquiya ya anquiixmajtosquíaj noTata. Pero para ama huan teipa xijmachilica ya anquiixmajtoque noTata huan ya anquiitztoque.

⁸ Huan Felipe quiilhui:

—NoTeco, technextili moTata, san ya nopa tijnequij.

⁹ Huan Jesús quiilhui:

—Felipe, ya quípiya miyac tonali niitztoc amohuaya. ¿Amo antechixmatij? Yaya cati nechitztoc, ya quíitztoc noTata. Huajca, ¿para ten tiquijtohua ma nimechnextili noTata? ¹⁰ ¿Amo anquineltoacaj niitztoc ipan noTata huan noTata itztoc ipan na? Nopa camanali cati nimechilhúia, amo san na nocamanal. Cati nimechilhúia huala ten noTata cati itztoc ipan na, huan yaya cati quichihua itequi ica na. ¹¹ Techneltoquilica nocamanal quema nimechilhúia niitztoc ipan noTata huan yaya itztoc ipan na. Huan sinta amo hueli antechneltoacaj por cati niquijtohua, techneltoaca por nopa huejhueyi tanextili cati nijchijtoc. ¹² Nelía nimechilhúia, se masehuali cati nechneltoacas quichihuas huejhueyi tequit quej nijchijtoc. Huan noja más huejhueyi tequit quichihuas pampa na nitacuepilis campa itztoc noTata. ¹³ Huan nochi cati anquijantise noTata ica notoca*, nimechihuilis pampa cati na niIcane nijchihua quihueyitalía noTata. ¹⁴ Quena, nochi tamanti cati antajantise ica notequiticayo, nimechihuilis.

Jesús quintitanilis taneltocani Itonal Toteco

¹⁵ “Sinta antechicnelíaj, xijchihuaca nopa tanahuatilme cati nimechmacatoc. ¹⁶ Huan nijtajtanis noTata ma amechitanili seyoc Tayoltalijquet huan yaya mocahuas amohuaya para nochipa. ¹⁷ Nopa Tayoltalijquet itztoc yaya

* 14:13 14:13 Ica notequiticayo.

Itonal Toteco cati tamachtía cati melahuac. Pero masehualme ten ni taltipacti cati amo noaxcahua amo huelis quiselise Itonal Toteco, pampa amo huelis quiitase huan amo quiixmatise. Pero amojuanti anquiixmatij Itonal Toteco pampa ama itztoc amohuaya huan teipa mocahuas ipan amoyolo.

¹⁸ “Amo nimechcajtehuas quej anicnotzitzí. Sempa nihualas para niitztos amohuaya. ¹⁹ Ayecmo huejcahuas para masehualme ten ni taltipacti cati amo noaxcahua ayecmo nechitase. Pero amojuanti, quena, antechitase. Huan pampa niitztoc, anitztose para nochipa. ²⁰ Quema hualas Itonal Toteco, anquimachilise na niitztoc ipan noTata, huan anitztoque ipan na huan na niitztoc ipan amojuanti. ²¹ Masehualme cati quimatij notanahuatilhua huan nelía quinchihuaj, injuanti cati nelía nechicnelíaj. Huan noTata quinicnelis cati nechicnelíaj, huan na nojquiya niquinicnelis huan nimonextis ica sese injuanti.”

²² Huan nopa seyoc Judas (amo Judas Iscariote) quiilhui Jesús:

—NoTeco, ¿para ten timonextis ica tojuanti, pero ica masehualme cati amo mitzneltocaj, amo?

²³ Huan Jesús quinanquili:

—Cati nechicnelía, quichihuas cati niquijtohua. Huan noTata quiicnelis huan na ihuaya noTata tihualase para timochantise ipan iyolo. ²⁴ Cati amo nechicnelía, amo quichihuas cati niquijtohua. Huan ni camanali cati nimechilhuía amo san na nocamanal, pero noTata cati nechititancoc nechilhujtoc cati monequi niquijtos.

²⁵ “Na nimechilhuía nochi ni quema noja niitztoc amohuaya. ²⁶ Pero Itonal Toteco, nopa Tayoltalijquet, cati noTata amechhualtitanis ipan notoca†. yaya amechmachtis nochi tamanti huan amechelnamiquiltis nochi cati nimechilhujtoc.

²⁷ “Nimechcahuilijtehua tasehuilisti ipan amoyolo. Huan notasehuilis cati nimechmaca amo quej temacaj cati itztoque ipan ni taltipacti. Amo ximotequipachoca huan amo ximomajmatica. ²⁸ Anquicactoque quema nimechilhui para niyas huan teipa sempa nihualas para niitztos amohuaya. Sinta nelía antechicnelíaj, anpaquisquíaj pampa niyas campa itztoc noTata, pampa noTata itztoc más hueyi que na. ²⁹ Nimechilhuía niyas ama quema noja ayemo niyajtoc para quema niyas, anquineltochase nocamanal.

³⁰ “San se talojtzi más huelis nimechcamanalhuis pampa ya hualas Amocualtatcat cati quinnahuatía masehualme ten ni taltipacti. Yaya amo quiipiya yon quentzi tequiticayot ica na. ³¹ Pero nijnequi nochi masehualme ipan ni taltipacti ma quimachilica niquicnelía noTata, huan cati noTata nechnahuatía, ya nopa nijchihua. Ximoquetzaca, ma tiyacajya.

15

Jesús yaya nopa xocomeca tzonti

¹ “Na niitztoc quej se xocomeca tzonti cati melahuac huan noTata itztoc quej nopa xocomeca mocuitahujquet. ² Nochi cati nechneltochaj itztoque quej noxocomeca macuayohua cati motatzquilijtoque ipan na. Sinta se cati nechneltocha amo quiipiya itajca, noTata quimatizontequis. Huan nochi noxocomeca macuayohua cati temacaj inintajca, noTata quinyeyjectis para huelis temacase más inintajca. ³ Amojuanti anitztoque quej se nomacuayo cati noTata ya quiyeyjectijtoc, pampa ya antapajpactique ica nopa camanali cati nimechmachtijtoc. ⁴ Ximocahuaca antatzquitoque ipan na huan na

† 14:26 14:26 Huan cati elis nopataca na.

nimocahuas nitatzquitoc ipan amojuanti. Se xocomeca macuayot amo hueli taqui sinta amo mocahua tatzquitoc ipan nopa xocomeca tzonti. Huan amojuanti amo hueli anquichihuase ipaquilis noTata sinta amo anmocahuase antatzquitoque ipan na.

⁵ “Na niitztoque quej nopa xocomeca tzonti huan amojuanti anitztoque quej noxocomeca macuayohua. Sinta anmocahuase antatzquitoque ipan na huan na nimocahuas nitatzquitoc ipan amojuanti, huajca quena, antemacase miyac amotajca. Pero sinta amo nimechpalehuis, amo teno huelis anquichihuase. ⁶ Masehualme cati amo mocahuaj tatzquitoque ipan na, noTata quinchihuulis quej se xocomeca mocuitahuijquet quinchihuulis nopa xocomeca macuayome cati amo taquij. Quintzontequis huan quincahuilis ma huaquica. Huan quinsentilis huan quintahuisos ipan tit para tatase.

⁷ “Sinta anmocahuase antatzquitoque ipan na huan nocamanal mocahuas ipan amoyolo, huajca anquijtanise cati anquinequij huan anquiselise. ⁸ Huan quema antemacaj miyac amotajca huan anquichihuaj miyac cati ipaquilis noTata, nesi más ihueyitilis noTata huan nesi nelía annomomachtijcahua. ⁹ Quej noTata nechicnelía miyac, na nojquiya nimechicnelía. Ximocahuaca ipan notaicnelijcayo. ¹⁰ Quema anquichihuase cati nimechnahuatis, anmocahuase ipan notaicnelijcayo quej nojquiya quema nijchihua cati noTata nechnhuatía, nimocahua ipan itaicnelijcayo.

¹¹ “Nimechilhuijtoc ni camanali para huelis anquikipiyase nopaquilis huan anpactose tahuel hasta mocahua. ¹² Huan ya ni nimechnahuatía, ximoicnelica se ica seyoc quej na nimechicnelía. ¹³ Se cati motemactilis huan miquis por ihuampoyohua, yaya más teicnelía que nochi masehualme. ¹⁴ Anitztoque annohuampoyohua sinta anquichihuaj cati nimechnahuatía. ¹⁵ Huajca ayecmo nimechtocaxtis annotequipanojcahua, pampa se teteco amo quinihuía itequipanojcahua cati quichihua. Pero nimechtocaxtis annohuampoyohua, pampa nochi cati noTata nechilhuijtoc nojquiya nimechilhuijtoc. ¹⁶ Amojuanti amo antechtapejpenijque na, pero na cati nimechtapejpeni amojuanti. Huan nimechtequitajitoc para anquikipiyase amotajca pampa anyase anquichihuatij itequi Toteco. Huan nopa tequit cati anquichihuase mocahuas. Huan nochi cati anquijtanise noTata ica notoca*, yaya amechnacas. ¹⁷ Huajca ya ni nimechnahuatía: ximoicnelica se ica seyoc.

Masehualme quicualancaitaj Jesús huan nochi cati iaxcahua

¹⁸ “Sinta masehualme ipan ni taltipacti cati amo quiixmatij Toteco amechcualancaitaj, xiquelnamiqica achtohuiya na nechcualancaitaque. ¹⁹ Sinta aneltosquía aniaxcahua ni taltipacti, injuanti amechicnelisquía. Pero amo aniaxcahua ni taltipacti pampa na nimechtapejpenijtoc huan nimechiyocacajtoc ten masehualme ten ni taltipacti cati amo quiixmatij Toteco, huan yeca amechcualancaitaj. ²⁰ Xiquelnamiqica cati nimechilhuijtoc. Se tequipanojquet amo más hueyi que iteco. Injuanti cati nechatzacuiltijtoque, nojquiya amechatzacuiltise pampa annoaxcahua. Huan cati quineltocatoque nocamanal nojquiya amechneltoquilise amocamanal. ²¹ Cati amechcualancaitase pampa antechneltocatoque, quej nopa quichihuaj pampa amo quiixmatij Toteco cati nechtitantoc.

²² “Sinta amo nihualajtosquía huan niquinmachtijtosquía, amo aqui quintelhuijtosquía. Pero ama ayecmo teno onca cati ica huelise motechtise iixpa Toteco pampa amo quineltoacaque nocamanal. ²³ Se cati nechcualancaita, nojquiya quicualancaita noTata. ²⁴ Sinta amo nijchijtosquía nopa huejhueyi

* 15:16 15:16 Ica notequitcayo.

tanextili iniixpa cati amo aqui seyoc hueltoq quichihua, amo oncatosquía inintajtacol. Pero ya quitztoque ajquiya na huan nechcualancaitztoque huan nojquiya quicualancaitztoque noTata. ²⁵ Yeca inijuanti quitamiltitjtoque cati ijcuilijtoc ipan inintanahuatilhua ten na campa quijtohua para nechcualancaitztoque masque amo teno cati amo cuali nijchijqui.

²⁶ “Pero quema ajsis nopa Tayoltalijquet cati nimechhualtitanilis quema niasiti icháj noTata, yaya amechmachtis nochi ten na. Yaya Itonal Toteco cati tamachtía cati melahuac huan hualas ten campa itztoc noTata. ²⁷ Huan teipa anquinyolmelahuase sequinoc ten na pampa anitztoyaj nohuaya hasta quema nipehua nitamachtía.

16

¹ “Nimechilhujtoc nochi ni achtohuiya para amo anquithuelcahuase no-camanal ica cati hualas. ² Pampa teipa ayecmo amechcahuilise xicalaquica ipan israelita tiopamit. Huan ajsis tonali quema masehualme cati amechmictise moilhuse quitequipanohuj Toteco. ³ Ya nopa quichihuase pampa amo quiixmatij noTata, yon amo nechixmatij. ⁴ Amantzi nimechilhúa nochi ni para anquielnamiquise cati niquijto quema nochi ni tamanti amechpanotiyas.

Itequi Itonal Toteco

“Achtohuiya amo nimechilhui ni tamanti cati amechpanos pampa nijmatiyaya niitztosquía amohuaya más tonali. ⁵ Pero ama niyas campa itztoc Toteco cati nechtitantoc. Huan amo aqui ten amojuanti nechtatztintoquilia canque niyas. ⁶ San anmotequipachohuj pampa nimechilhúa niyas. ⁷ Pero nimechilhúa cati melahuac. Más cuali para amojuanti sinta niyas. Pampa sinta amo niyas, amo hualas nopa Tayoltalijquet. Pero quema sempa niyas campa nihualajqui, nimechhualtitanilis. ⁸ Huan quema ajsiqui nopa Tayoltalijquet, quimachiltis sesen masehuali ipan ni taltipacti para quihuica tajtacoli iixpa Toteco, huan quimachiltis para monequi ma itzto xitahuac iixpa Toteco. Huan nojquiya quinyolmelahuas quenicatza Toteco tetajtolsencahuas. ⁹ Nopa Tayoltalijquet quinmachiltis masehualme ten ni taltipacti para ya quihuicaj tajtacoli iixpa Toteco pampa amo nechnehtocatoque. ¹⁰ Quinnextilis para huelis mochihuase xitahuaque iixpa Toteco pampa niya campa itztoc noTata huan ayecmo antechitase. ¹¹ Quinmachiltis masehualme para Toteco quintajtolsencahuas quej ya quitajtolxitajtoc Amocualtat cati tanahuatía ipan ni taltipacti.

¹² “Nijpiya más camanali cati nimechilhuisquía, pero elis miyac para anquimachilise amantzi. ¹³ Pero quema hualas Itonal Toteco cati tamachtía cati melahuac, yaya amechyacanas hasta anquimatise nochi cati melahuac. Amo amechilhuis cati ya italnamiqulis, pero amechmachtis nochi cati quicactoc ten noTata, huan nojquiya amechnextilis cati panos teipa. ¹⁴ Itonal Toteco nechhueyitalis na amoixpa pampa quicuis cati niquijtoctoc na huan cati nijchijtoc, huan amechnextilis cati quijtosnequi. ¹⁵ Nochi cati noTata quiipiya, nojquiya noaxca na. Yeca nimechilhúa Itonal Toteco quicuis cati na nijpiya huan amechnextilis cati quinequi quijtos.

Tequipacholi mocuepas paquilisti

¹⁶ “Ica se ome tonati niyas huan ayecmo antechitase. Pero teipa ica seyoc se ome tonati, sempa antechitase pampa niyas campa itztoc noTata.”

¹⁷ Huan sequij tiimomachtijcahua timotatzintoquiliyayaj:

—¿Taya quijtosnequi quema Jesús techilhuía ica se ome tonati ayecmo tiquitase, huan teipa ica seyoc se ome tonati sempa tiquitase? ¿Para ten techilhuía elis quej ni pampa yas campa itztoc iTata? ¹⁸ ¿Taya quijtosnequi 'ica se ome tonati'? Amo tijmachilíaj cati techilhuía.

¹⁹ Huan Jesús quimachili tijnequiyayaj tijtatzintoquilise cati techilhuijtoya, huajca techilhui:

—¿Para ten anmotatzintoquilíaj taya quijtosnequi quema nimechilhui ica se ome tonati na niyas huan ayecmo antechitase, huan teipa ica seyoc se ome tonati sempa antechitase? ²⁰ Nelía nimechilhúia anchocase huan amotequipachose, pero masehualme ten ni taltipacti cati amo nechneltocaj, paquise. Pero masque achtohui amotequipachose, teipa amotequipachol mocuepas paquillisti. ²¹ Quema se sihuat quinequi quitacatiltis icone, taijyohúia pampa ajsic nopa hora para tacuajcualoli, pero quema ya tacatqui icone, ayecmo moilhuis sinta taijyohui pampa nelía paqui para quíitas icone cati tacatqui. ²² San se elis ica amojuanti. Ama amotequipachohuaj, pero sempa timoitase huan nelía anyolpaquise, huan amo aqui huelis amechquixtilis amopaquilis.

²³ “Quema ajsis nopa tonali quema niitztos ihuaya Toteco, ayecmo teno monequis antechtajanise na. Nelía nimechilhúia ipan nopa tonali ya huelis anyase xitahuac ica noTata huan nochi cati anquitajanise ya ipan notoca*, yaya amechmacas. ²⁴ Hasta ama ayemo teno anquitajanijtoque noTata ipan notoca†. Pero ama xijtajtanica huan anquiselise para nelía anyolpactose.

Jesús quitani ni taltipacti

²⁵ “Nochi ni tamanti nimechilhuijtoc ica tatenpohuillisti cati achi ohui para anquimachilise, pero ajsis se tonali quema ayecmo teno nimechilhuis ica tatenpohuillisti, san nimechilhuis xitahuac ten noTata. ²⁶ Ipan nopa tonali anquitajanise noTata cati anquinequise ica notequiticayo. Huan amo nimechilhúia nijtajanis noTata ma amechchiuilli cati anquitajaníaj, ²⁷ pampa noTata nojquieya amechicnelía pampa antechicnelijtoque. Huan anquineltocatoque nihualajqui ten campa ya itztoc. ²⁸ Na niquisqui ten campa itztoc noTata huan niajsico ipan ni taltipacti. Huan ama niquisas ten ni taltipacti huan nitacuepilis campa itztoc noTata.”

²⁹ Huajca tiimomachtijcahua tiquilhuijque:

—Ama ticamanalti xitahuac huan tojuanti tijmachilíaj. Ayecmo ticamanalti ica tatenpohuillisti cati ohui. ³⁰ Huajca ama nelía tijmachilíaj ta tijmati nochi tamanti. Yon amo monequi timitztatzintoquilise cati tijnequij tijmatise pampa techilhuía quema ayemo timitztatzintoquilíaj, huan huajca tijneltocaj Toteco Dios mitztitantoc.

³¹ Huan Jesús techilhui:

—¿Hasta ama nelía antechneltocaj? ³² Monechcahuía nopa hora, quena, ya ajsico nopa hora quema nochi anmosemanase para sesen quitemos campa mochololtis. Huan antechcajtehuase noselti. Pero nelía amo niitztos noselti pampa noTata itztoc nohuaya. ³³ Nimechilhuijtoc ama nochi ya ni para anquipiyase tasehuillisti ipan na. Ipan ni taltipacti anquipiyase taijyohuillisti huan tequipacholi, pero ximoyolchicahuaca pampa nijtantoc ni taltipacti.

* **16:23** 16:23 Ica notequiticayo. † **16:24** 16:24 Ica notequiticayo.

17

Jesús quicamanalhui iTata por imomachtijcahua

¹ Quema Jesús tanqui quijtohua nochi ya ni, quiajcotachili ilhuicacti huan quijto: “Notata, ya ajsico nohora para nitaijyohuis. Xijnexi nohueyitilis, na cati nimocone, para nojquiya nihuelis nijnextilis mohueyitilis ta. ² Techmacatoc tequiticayot huan chichualisti ica nochi masehualme para niqunmacas nemilisti yanquic para nochipa nochi injuanti cati techmacatoc para noaxcahua. ³ Quipiyase nemilisti yanquic para nochipa sinta mitzixmatise ta cati melahuac tiDios huan amo aqui seyoc, huan nojquiya nechixmatise na niJesucristo cati techtitanqui ipan ni taltipacti.

⁴ “Na nimitzhueyitalijtoc ipan ni taltipacti pampa nijchijtoc nochi cati techilhujtoc ma nijchihua. ⁵ Ama, Notata, sempa techmaca nopa hueyitilisti cati nijpixtoya achtohuiya quema ayemo oncayaya taltipacti huan niitzoaya nozona mohuaya.

⁶ “Niquinnextilijtoc ajquiya ta ni masehualme cati techmacatoc ipan ni taltipacti para nechnehtocase. Inijuanti ipa itztoyaj moaxcahua huan techmacac huan ya quichijtinetoque mocamanal. ⁷ Ama injuanti quimachilíaj para elqui ta cati techmacac nopa tamanti cati niqunilhujtoc, ⁸ pampa nochi camanali cati techilhujtoc, niqunilhujtoc. Huan injuanti quiselijoque mocamanal huan ama quimachilíaj para temachtí nihualajtoc ten nozona campa tiitztoc. Huan quinehtocaj para techtitantoc.

⁹ “Huajca, Notata, nimitztajtania xiquinpalehui ni masehualme cati techmacatoc pampa injuanti moaxcahua. Amo nimitztajtania xiquinpalehui injuanti cati quitoquilíaj san cati eltoc ipan ni taltipacti huan amo nechnehtocaj. ¹⁰ Pero nochi ni masehualme cati noaxcahua nojquiya itztoque moaxcahua ta. Huan injuanti cati moaxcahua nojquiya itztoque noaxcahua huan nohueyitilis monextijtoc ipan injuanti.

¹¹ “Ama, na ayecmo niitztos ipan ni taltipacti, pero injuanti noja itztose nica. Na niyas sempa niitztoti mohuaya, Notata, ta cati titatzejtzeltoc, huajca nimitztajtania xiquinmocuitahui ica motequiticayo ni masehualme cati techmacatoc. Xiquinpalehui ma itztoca san se quej tojuanti tiitztocque san se. ¹² Quema niitzoaya nica inihuaya ipan taltipacti, niqunmocuitahuiyaya ica motequiticayo. Huan yon se amo polijqui, san yaya cati ipa quinejqui polihuis, huan quej nopa panoc para ma mochihua cati ijcuilijtoc ipan mocamanal.

¹³ “Notata, amo huejcahuas para niyas niitztoti nozona campa ta, pero ama, quema noja niitztoc ipan ni taltipacti, nimitztajtania para ni masehualme cati noaxcahua ma quiapiyaca se paquilisti cati ajsitoc ipan iniyolo quej na nijpiya. ¹⁴ Na niqunmacatoc mocamanal huan yeca masehualme cati quitoquilíaj cati eltoc ipan ni taltipacti, quincualancataj pampa injuanti amo iaxcahua ni taltipacti quej na nojquiya amo niiaxca. ¹⁵ Amo nimitztajtania xiquinquixti cati nechnehtocaj ipan ni taltipacti, pero nimitztajtania xiquinmanahui ten nopa Amocualtacat. ¹⁶ Inijuanti amo iaxcahua ni taltipacti quej na nojquiya amo niiaxca. ¹⁷ Xiquiniyocatali ten tajtacoli huan xiquinchihua tatzejtzeltocque ica mocamanal cati nelía melahuac. ¹⁸ Quej ta techtitantoc ma nihuala nica ica masehualme ipan ni taltipacti para nijchihuas mopaquilis, ama quej nopa nojquiya niquntitantoc ma yaca ica masehualme ipan ni taltipacti para quichihuase nopaquilis. ¹⁹ Huan na nimotemaca ica ta para nijchihuas cati tijnequi ama, para injuanti ma elica senquisa taiyocatalilme huan tatzejtzeltocque ica mocamanal cati nelía melahuac.

²⁰ “Amo nimitztajtania xiquinpalehui san inijuanti cati nechneltocej ama, pero nojquiya xiquinpalehuis nochi cati teipa nechneltocecase quema ni masehualme yase quinilhuitij nocamanal. ²¹ Xiquinpalehui para nochi inijuanti itztose san se quej niitztoc ipan ta huan ta tiitztoc ipan na. San se ma itztoca inijuanti ipan tojuanti. Quiyampa nopa masehualme ipan ni taltipacti quineltocase para techtitantoc. ²² Huan nopa hueyitilisti cati techmacac na, nojquiya niquinmacatoc para inijuanti ma itztoca san se quej tojuanti tiitztoque san se. ²³ Na niitztos ipan inijuanti huan ta tiitztos ipan na para inijuanti ma itztoca senquisa san se. Huan yeca nochi masehualme ipan ni taltipacti quimachilise para ta techtitantoc, huan para tiquinicnelijtoc cati nechneltocej quej ta techicnelijtoc.

²⁴ “Notata, nojquiya nijnequi inijuanti cati techmacatoc ma itztose nohuaya campa niitztos. Nijnequi ma quiitase nohueyitilisti cati techmacac pampa techicnelijtoc hasta quema ayemo oncayaya taltipacti. ²⁵ Notata, ta senquisa tixitahuac. Masque masehualme cati amo nechneltocej ipan ni taltipacti amo mitzixmatij, na quena, nimitzixmati. Huan ni masehualme cati noaxachua ya quimachilijtoque para ta techtitantoc. ²⁶ Na niquinilhujtoc ajquiya ta huan noja más niquinilhuis para inijuanti ma moicnelica quej ta techicnelia pampa na niitztos ipan iniyolo.”

18

Quimatatacatzojque huan quihuicaque Jesús (Mt. 26:47-56; Mr. 14:43-50; Lc. 22:47-53)

¹ Huan Jesús tanqui motatajtia huan yajqui tohuaya tiimomachtijcahua hasta seyoc nali nopa atajti cati itoca Cedrón campa eltoya se cuamili ten olivo cuame. Huan ticalajque napa. ² Huan Judas cati quitemactiliyaya Jesús nojquiya quimatiyaya cuali canque eltoc nopa cuamili pampa Jesús huan tojuanti tiimomachtijcahua miyac huelta timosentiliyayaj nopona. ³ Huan Judas ajsico quinyacanayaya se monto ten seis cientos soldados huan nopa policías ten tiopamit cati nopa tayacanca totajtitzti huan nopa fariseos quimacatojay. Nochi quihualicayayaj taahuili, huan ticualelemecti huan machetas. ⁴ Pero Jesús ya quimatiyaya nochi cati quipanosquia, huan yeca yajqui quinnamiquito huan quinilhui:

—¿Ajquiya anquitemohuaj?

⁵ Huan inijuanti quiilhujque:

—Tijtemohuaj Jesús cati ehua altepet Nazaret.

Huan quinilhui:

—Na niJesús.

Huan Judas cati quitemactiliyaya Jesús ijcatoya inihuaya. ⁶ Huan quema quinilhui: “Na niJesús”, motzinqixtijque nochi inijuanti huan ajquetzhuetzque.

⁷ Huajca sempa Jesús quinilhui:

—¿Ajquiya anquitemohuaj?

Huan sempa quiilhujque:

—Tijtemohuaj Jesús cati ehua Nazaret.

⁸ Huan Jesús quinilhui:

—Nimechilhui na niJesús. Huajca sinta antechtemohuaj na, xiquincahuaca ma yaca ni tacame cati itztoque nohuaya.

⁹ Jesús quiijto ya ni para ma mochihua cati quiilhui iTata achtohuuya para amo quipolosquia yon se masehuali cati quimacatoya. ¹⁰ Huan Simón Pedro cati quihuicayaya imacheta, quiquixti huan quitzontequili inacas ten

inejmat se tacat cati quitocaxtiyayaj Malco. Yaya eliyaya itequipanojca nopa hueyi totajtzi.

¹¹ Huajca Jesús quihui Pedro:

—Xijcalaquí momacheta ipan icuetaxo. Monequi nijselis nopa taijy-huulisti cati noTata nechmacatoc.

Jesús itztoya iixpa Anás

(Mt. 26:57-58; Mr. 14:53-54; Lc. 22:54)

¹² Huajca nopa soldados, huan inintayacanca huan israelita policías ten tiopamit quiitzquijque Jesús huan quihlijque. ¹³ Huan achtohui quihuaque hasta ichaj Anás cati eliyaya imontaj Caifás. Huan Caifás oncalactoya para elis hueyi totajtzi ipan nopa xihuit. ¹⁴ Huan elqui Caifás cati achtohuiya quihlijtoyaya israelitame para quinamiqui san setzi tacat miquis por nochi masehualme.

Pedro quijto amo quixmati Jesús

(Mt. 26:69-70; Mr. 14:66-68; Lc. 22:55-57)

¹⁵ Huan Simón Pedro huan na tijtoquihlijay Jesús. Huan nechixmati nopa hueyi totajtzi, yeca nechcahuili ma nicalaquí icalixpa ihuaya Jesús. ¹⁶ Pero Pedro mocajqui calteno nechca nopa caltemit. Huajca niyajqui nijcamanalhuito se ichpoca tatequipanojquet cati quimocuitahuiyaya caltemit, huan quicahuili Pedro ma calaquí. ¹⁷ Huan nopa ichpocat quihhui Pedro:

—Ta nojquiya tiimomachtijca ne tacat.

Huan Pedro quinanquili:

—Na, amo.

¹⁸ Huan moquetzayayaj nopona nopa tatequipanohuani huan nopa policías. Huan tipitztoyaj huan moscohuayayaj pampa taseseyayaya. Huan Pedro nojquiya itztoya inihuaya.

Nopa hueyi totajtzi quitatzintoquili Jesús

(Mt. 26:59-66; Mr. 14:55-64; Lc. 22:66-71)

¹⁹ Huan Anás cati onquistoya quej hueyi totajtzi quitatzintoquili Jesús taya inintoca nochi imomachtijcahua huan taya tamachtiyaya.

²⁰ Huan Jesús quinanquili:

—Nochipa nicamanaltitoc miyacapa iniixpa nochi masehualme. Mojmosta nitamachtiyaya ipan israelita tiopame ipan campa huili pilaltepertzitzi huan ipan nopa hueyi tiopamit nica ipan Jerusalén campa mosentilíaj nochi israelitame. Amo teno niquijtojtoc ixtacatzí. ²¹ ¿Para ten techtatzin-toquilia taya nitamachtí? Xiquintatzintoquili cati nechtaquihlijque quema nitamachtí. Inijuanti quimatij taya niquinilhujtoc.

²² Quema Jesús quijto ya ni, se policía ten israelita tiopamit quixtejtzonqui huan quihhui:

—Amo quej nopa xijnanquili ni hueyi totajtzi.

²³ Huan Jesús quinanquili:

—Sinta niquijto cati amo cuali, technextili canque nimocuapolojtoc. Huan sinta niquijto cati xitahuac, amo quinamiqui techixtejtzonas.

²⁴ Huajca Anás quititanqui Jesús ilpitoc campa Caifás nopa hueyi totajtzi cati yancuic calactoya.

Pedro sempa quijto para amo quixmati Jesús

(Mt. 26:71-75; Mr. 14:69-72; Lc. 22:58-62)

²⁵ Huan Pedro ijcatoya nechca campa tit moscojtoya huan quihlijque:

—Ta tiitztoc se imomachtijca nojquiya, ¿ax que?

Huan Pedro amo mocahuili, quijto:

—Na, amo.

²⁶ Huan itztoya nepa se itequipanojca nopa hueyi israelita totajtzi huan nopa tequipanojquet ihuicalhua nopa cati Pedro quitzontequilijtoya inacas. Huajca yaya quiilhui Pedro:

—Nimitzitac yehuaaja ipan nopa olivo cuamili ihuaya Jesús.

²⁷ Huan Pedro sempa paquijto para amo, huan nima tzajtzic se cuapele.

Jesús iixpa Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Huan quema tanestihualayaya quisque ichaj Caifás huan quihuicaque Jesús hasta campa nopa hueyi tequicali campa itztoya Gobernador Pilato. Pero nopa israelitame cati quitelhuiyayaj Jesús amo calajque ichaj Pilato, pampa toisraelita tanahuatilhua amo techcahuilía tiisraelitame matalaquisse ichaj se cati amo israelita. Huan sinta se calaquisquía, ayecmo elisquía tapajpacti iixpa Toteco, huan amo huelis quicuas nopa tactualisti ipan Pascua Ilhuit. ²⁹ Huan Pilato quisqui calteno huan quintatzintoquili:

—¿Taya ica anquitelhuáj ni tacat?

³⁰ Huan quinanquilijque:

—Sinta yaya amo elisquía se taixpanoquet, amo timitzhualiquilijtosquía.

³¹ Huan Pilato quinilhui:

—Xijhuicaca amojuanti huan xijtajtolsencahuaca quej quiijtohuaj amotanahuatilhua cati anquitoquilíaj.

Huan nopa tayacanani ten israelitame quinanquilijque:

—Tojuanti amo tijpiyaj tequiticayot para tijcuamapeloltise se masehuali, pero ta, quena.

³² Huajca ica ni camanali pehua nesi melahuac cati Jesús quiijtojtoya quema quiijo para masehualme quitejcoltisquía ipan cuamapeli para quimictise. ³³ Huan Pilato sempa calajqui ichaj huan quinztoqui Jesús huan quitatzintoquili:

—¿Ta tiinintanahuatijca israelitame?

³⁴ Huan Jesús quinanquili:

—¿Tijmachilía niinintanahuatijca, o techtatzintoquilía ya ni pampa sequinoc mitzilhuijtoque para nitanahuatijquet?

³⁵ Huan Pilato quiilhui Jesús:

—Tijmati na amo niisraelita. Amotayacanca totajtzitzi huan israelita masehualme cati san se amoeso elque cati mitztemactilicoj nomaco. ¿Para ten? ¿Taya tijchijtoc?

³⁶ Huajca Jesús quinanquili:

—Notanahuatilis campa na nitanahuatía amo eltoc ipan ni taltipacti. Sinta niitztosquía nitanahuatijquet nica, nomasehualhua ipan notanahuatilis tatehuijtosquía para amo nechtemactilijtosquía ica ni israelita tayacanani. Pero amo nitanahuatía nica.

³⁷ Huan Pilato quiilhui:

—¿Huajca melahuac titanahuatijquet?

Huan Jesús quiilhui:

—Quena, nitanahuatijquet senquisu quej tiquijtohua. Para ya nopa nita-catqui ipan ni taltipacti. Nihualajqui nica para nitamachtis cati melahuac, huan nochi cati quinequij quimatise cati melahuac nechtaquiliaj.

³⁸ Huan Pilato quiilhui:

—¿Taya eltoc melahuac?

Quitemactilijque Jesús para ma quicuumapeloltica

(Mt. 27:15-31; Mr. 15:6-20; Lc. 23:13-25)

Huan quema Pilato quiiyto ya ni, yajqui calteno campa nopa miyaqui israelitame itztoyaj huan quinilhui:

—Amo nijpantilia yon se itajtacol. ³⁹ Pero amojuanti anmomajtoque para sesen xihuit ipan ni Pascua Ilhuit, antechtajtanaj ma nijmajcagua se cati tzactoc. Huajca, ¿anquinequij ma nijmajcagua amotanahuatijca anisraelitame?

⁴⁰ Huan injuanti tahuejchijque chicahuac:

—¡Amo! ¡Amo tijnequij! Xijmajcagua Barrabás.

Huan nopa Barrabás eltoya se fiero taixpanoquet.

19

¹ Huajca Pilato tanahuati ma quihuihuitequica Jesús ica se cuarta cati iyecapa quipixtoya piltepostzitzitzi cati tatequij. ² Huan nopa soldados quixinepalojque se huitztzonyahuali huan quiihpahuiltijque Jesús quej se corona. Huan quiquentijque se yoyomit cati morado quej motalilaj tanahuatiani. ³ Huan pejque quihuihuítaj quej elisquía quitepanitayayaj, pero amocana. Huan quiihluiyayaj:

—¡Ma itzto miyac tonali ni cati inintanahuatijca israelitame!

Huan quixtejtejzonque.

⁴ Huan teipa Pilato yajqui calixpa iniixpa nochi israelitame huan quinilhui:

—Xijtachelica, amantzi nijhualica ni tacat amoixpa. Xijmatica na amo nijpantilia yon se itajtacol.

⁵ Huan quisqui calteno Jesús iniixpa nopa masehualme quiihpahuiti nopa huitzcorona huan iyoyo cati morado. Huan Pilato quiiyto:

—Xijtachelica ni tacat.

⁶ Huan quema quiiitaque nopa tayacanca totajtzitzitzi huan nopa policías ten tiopamit, tahuejchijque huan chicahuac quiiytojque:

—¡Xijcuamapelolti! ¡Xijcuamapelolti!

Huan Pilato quinilhui:

—Amojuanti xijhuicaca huan xijcuamapeloltitij, pero na amo nijpantilia yon se itajtacol.

⁷ Pero nopa tayacanca israelitame quinanquiliijque:

—Tojuanti tiisraelitame tijpiyaj se tanahuatili cati quiiytohua monequi miquis pampa quiiyto para yaya Icone Toteco.

⁸ Huan quema quicajqui Pilato para Jesús teilhuiytoya para yaya eliyaya Icone Toteco, achí más momajmati. ⁹ Huan sempa calaquito ipan tequicali huan quitatzintoquili Jesús:

—¿Canque nelía tiehua?

Pero Jesús amo quinanquili.

¹⁰ Huan Pilato quiihlui:

—¿Para ten amo technanquilia? ¿Amo tijmati nijpiya tequiticayot para nimitzcuamapeloltis o para nimitzquixtis para tiyas mochaj?

¹¹ Huan Jesús quinanquili:

—Yon se tequiticayot amo tijpiyasquía ica na sinta Toteco Dios amo mitzmacatosquía. Huajca yaya cati nechtemactilijtoc momaco más quipiya tajtacoli que ta.

¹² Quema Pilato quicajqui ya ni, pehua quitemohua quenicatza huelisquía quimajcaguas Jesús para ma yahui ichaj, pero nopa israelitame chicahuac tahuejchihuayayaj huan quiiytohuayayaj:

—Sinta tijquixtis ni tacat, ayecmo tiihuampo nopa hueyi tanahuatijquet César ipan altepet Roma. Pampa se cati mochihua tanahuatijquet quej mochihua ni Jesús, yaya icualancaitaca César.

¹³ Quema Pilato quicajqui ni, mosehui campa monequi para tetajtolsencahuas ipan nopa tepejpechti campa itoca Enlosado huan ica camanali hebreo itoca Gabata. Huan tanahuati ma quihualicaca Jesús. ¹⁴ Huan eliyaya ijnaloc ipan nopa tonali para quicualtalise nochi cati monequi para nopa Pascua tacualisti. Huan Pilato quinilhui nopa miyaqui israelitame:

—Xiquitaca nica itzotc amotanahuatijca.

¹⁵ Huan nopa israelitame chichahuac quijtojque:

—¡Xijquixti, xijquixti, xijcuamapeloltiti!

Huan Pilato quinilhui:

—¿Anquinequij ma nijcuamapeloltiti amotanahuatijca?

Huan nopa tayacanca totajtzitzi quuilhuijque:

—Amo aquí seyoc totanahuatijca, san César.

¹⁶ Huajca Pilato quinmactili Jesús para ma quiccuamapeloltica, huan qui-huicaque.

Quiccuamapeloltijque Jesús

(Mt. 27:32-44; Mr. 15:21-32; Lc. 23:26-43)

¹⁷ Huan quichijque Jesús ma quihuica icuamapel huan ma quisa para se lugar cati itoca “Mijcatzontecomit” (ipan camanali hebreo itoca Gólgota).

¹⁸ Nopona quiccuamapeloltijque Jesús huan nojquiya quincuuamapeloltijque seyoc ome tacame, se ipan inejmat huan seyoc ipan iarraves huan Jesús tatajco mocajqui. ¹⁹ Huan Pilato quichijqui se tajcuiloli huan quilavosminque ipan cuamapeli itzonta Jesús. Huan nopa tajcuiloli quijto: NI JESÚS CATI EHUA NAZARET, YAYA CATI ININTANAHUATIJCA ISRAELITAME.

²⁰ Huan miyac israelitame quipojque nopa tajcuiloli pampa quiccuamapeloltijque Jesús nechca altepet Jerusalén. Huan quijcuiloltojyay nopa tajcuiloli ica eyi camanali; hebreo, griego huan latín. ²¹ Huan nopa tayacanca totajtzitzi quuilhuijque Pilato:

—Amo xiquijcuilo: ‘Inintanahuatijca israelitame.’ Más cuali xiquijcuilo: ‘Yaya motocaxti inintanahuatijca israelitame.’

²² Huan Pilato quinilhui:

—Cati ni quijcuiloltojoc, quej nopa mocahuas.

²³ Huan nopa nahui soldados cati quiccuamapeloltijque Jesús quicuilijque iyoyo huan quichijque nahui tacocototzi, huan sese soldado quihucac se para iaxca. Nojquiya quicuilijque iyoyo huehueyac cati amo tajtzonti. San quichijchijtoyay nopa yoyomit yajmaxtic yahualtic ten iquechta hasta iicxico. ²⁴ Huajca nopa soldados moilhuijque:

—Ma amo tijtzayanaca. Más cuali ma tijrifaroca para tiquitase ajquiya quitanis huan quihuicas.

Huan ica ya ni mochijqui cati huejcajquiya quijcuilo nopa tajtolpanextijquet para nopa tacame quichihuasquíaj. Quijcuilo: “Momajmacaque sequij noyoyo, huan noyoyo cati huehueyac, quirifarojque.” Huajca quej nopa quichijque nopa soldados.

²⁵ Huan iicxita icuamapel Jesús moquetztoyay inana, huan iicni inana, huan María isihua Cleofas huan María Magdalena. ²⁶ Huan quema Jesús quuitac inana huan nechca nechitac na cati niimomachtijca cati más nechic-neliyaya, huajca quuilhui inana:

—Nane, ni tacat elis quej mocone.

²⁷ Huan nechilhui:

—Xijchihua nonana quej monana.

Huajca ten nopa hora quema tiquisque, nijhuicac inana hasta nochaj para nijmocuithuis.

Mijqui Jesús

(Mt. 27:45-56; Mr. 15:33-41; Lc. 23:44-49)

²⁸ Teipa Jesús quimatqui ya tantoya nochi itequi. Huajca para quitamiltis cati ijcuilijtoc ipan Icamanal Toteco, yaya quijito:

—Niamiqui.

²⁹ Huan eltoya nozona se xarro temitoc ica xocomeca at cati xococ. Huan ipan quixolonijque se tamanti cati tzotzoltic huan quitelijque iyecapa se huehueyac cuahuit cati itoca hisopo. Huan quitenamiquiltijque Jesús.

³⁰ Huan quema Jesús quic nopa xocomeca at cati xococ, quijito:

—Ya tanqui notequi cati noTata nechmacac ma nijchihua.

Huajca Jesús mohujtzonqui huan quititanqui itonal ma yahui huan mi-
jqui.

Se soldado quielchiquitapo ica se huehueyac cuataminti

³¹ Huan Jesús mijqui ipan nopa tonali quema tiisraelitame timomajtoque titacualtalaj nochi cati monequi para nopa Pascua Ilhuit cati hualmosta hualayaya huan elisquía se tonali para timosiyajquetzase. Huajca amo aqui quinequiyaya ma mocahuase nopa eyi mijcatzitzí ipan inincumapelhua hasta tonilis, pampa elis nopa hueyi tonali ten toilhui huan monequi timosiyajquetzase ica miyac tatepanitacayot. Huajca yajque nopa tayacanani ten israelitame huan quitajtani Pilato ma tanahuati para quinpostequilise inimetzomiyo cati itztoyaj ipan cuamapeli para más nimantzi ma miqica para huelis quinhuicase. ³² Huajca hualajque soldados huan quinpostequilijque inimetzomiyo cati quincumapeloltijtoyaj inejmat Jesús huan nojquiya nopa cati ipan iarraves. ³³ Pero quema ajsitoj campa icuamapel Jesús, quitaque ya mictoya, huajca amo quitapanilijque iomiyo.

³⁴ Huajca se soldado quitapohuili ielchiquicanahuiya ica icuatamin cati huehueyac huan quisqui esti maneltic ica at. ³⁵ Huan na niJuan nochi niquitac, huan nimechilhuiá cati nelía panoc pampa nijmati para melahuac cati nimechilhuiá huan huelis anquineltocase nocamanal. ³⁶ Nochi ya ni panoc para ma quitamilti cati ijcuilijtoc achtohuiya ipan Icamanal Toteco campa quijitohua para amo quipostequilise yon se iomiyo. ³⁷ Huan sejcoyoc ipan Icamanal Toteco quijitohua para quitachilise yaya cati tapojtoc ielchiquicanahuiya.

Quitelijque itacayo Jesús ipan ostot ipan se tepet

(Mt. 27:57-61; Mr. 15:42-47; Lc. 23:50-56)

³⁸ Teipa ajsico José cati ehua altepet Arimatea. Yaya quitoquili Jesús ictacatzí pampa quinimacasiyaya nopa tayacanca israelitame. Pero quema nochi ni panoc, José yajqui huan quitajtani Pilato ma quicahuili quihuicas itacayo Jesús. Huan Pilato quicahuili. Huajca nimantzi José yajqui huan quitemohuito itacayo ipan icuamapel. ³⁹ Huan nojquiya hualajqui Nicodemo cati achtohuiya yajqui quicamanalhuito Jesús ica tayohua. Yaya quihualicayaya nechca treinta kilos ten se pajti cati ajhuiyac maneltic ihuaya seyoc taajhuiyacayot cati tatixtic. ⁴⁰ Huan José ihuaya Nicodemo quihuicaque itacayo Jesús huan quipolojque nopa taajhuiyacayot, huan quipijque ica se yoyomit quej tiisraelitame timomatque tijchihua quema tijtocaj se mijcatzi. ⁴¹ Huan nechca campa quimictijque Jesús ipan icuamapel

eltoya se cuamili. Huan ipan nopa cuamili eltoya se ostot cati yancuic quicoyonijtoyaj ipan nopa tepet para ipan quintalise mijcatzitzí, huan yon se mijcatzi ayemo quitalijtoyaj nopona. ⁴² Huajca quitalitoy itacayo Jesús nopa pampa nopa ostot eltoya nechca campa quicuamapeloltijtoyaj, huan ya eliyaya nechca las seis ica tiotac cati eliyaya quema pehua nopa tonali ten Pascua huan monequi israelitame ma mosiyajquetzaca.

20

Moyolcuic Jesús

(Mt. 28:1-10; Mr. 16:1-8; Lc. 24:1-12)

¹ Ipan domingo nopa achtohui tonali ipan samano, yajqui María Magdalena ijnaltzi campa nopa ostot ipan se tepet quema noja tatayohua. Huan quiitac nopa hueyi tet ayecmo quiixtactoya nopa ostot. ² Huajca nimantzi motalojtejqe hasta campa itztoya Simón Pedro huan campa niitztoya na cati Jesús miyac nechicneliyaya. Huan María techilhui:

—Quiquixtijque itacayo Tohueyiteco ipan ostot huan quihuicaque, huan amo tijmatij canque quicahuatoj.

³ Huan Pedro huan na timotalojtejqe chicahuac para tijtachilitij nopa ostot. ⁴ San sejco timotalojque, pero achi más nimoisihuilti nimotalo que Pedro huan achtohui niajsito campa ostot. ⁵ Huan nimohuijtzonqui huan nitachixqui ostoco, huan niquitac quicajtejtaya nopa yoyomit cati ica quihuijcontoyaj itacayo, pero amo nicalajqui ostoco. ⁶ Teipa Simón Pedro cati nechtoquiliyaya, nojquiya ajsico. Huan yaya, quena, calaquico ostoco huan quitac quicajtejtaya nopa yoyomit cati ica quihuijcontoyaj itacayo. ⁷ Huan nojquiya quiitac nopa payo cati ica quiixtactoyaj, mimilijtoya huan quicajtoya iyoca ten nopa hueyi yoyomit. ⁸ Huajca na nojquiya cati niajsico achtohui nicalajqui huan niquitac quenicatza nopa tamanti. Huan nijneltocac para ayecmo aquiyyaya. ⁹ Pampa noja ayemo tijmachiliyyaj para ijcuilijtoc ipan Icamanal Toteco para monequi moyolcuic. ¹⁰ Huajca tiimomachtijcagua tiquisque huan tiyajque tochajchaj.

María Magdalena quiitac Jesús

(Mr. 16:9-11)

¹¹ Huan María Magdalena mocajqui nopona huan moquetztaya iteno nopa ostot chocayaya. Huan quema noja chocayaya, mohuijtzonqui huan tachixqui ostoco. ¹² Huan quinitac ome ilhuicac ehuan ica chipahuac iniyoyo cati mosehuijtoyaj campa achtohuiya eltoya itacayo Jesús. Se mosehuijtoya campa eltoya itzonta huan seyoc campa iicxita. ¹³ Huan quiilhuijqe:

—Nane, ¿para ten tichoca?

Huan María quinilhui:

—Pampa se acayja quiquixtico itacayo nohueyiteco huan amo nijmati canque quicahuato.

¹⁴ Huan quema quiijto ya ni, moicancuetqui María huan quiitac Jesús moquetztaya nopona, pero amo quiixmatqui sinta Jesús. ¹⁵ Huan Jesús quiilhui:

—Nane, ¿para ten tichoca? ¿Ajquiyaj tijtemohua?

Huan María moilhuijtoya san eliyaya cati quimocuitahuiyaya nopa cuamili, huajca quiilhui:

—Tate, sinta ta tijhuicatoc itacayo, techilhui canque tijtalito huan niyas nijcui.

¹⁶ Huan Jesús quiilhui:

—¡María!

Huan María moicancuetqui huan quiilhui:

—¡Raboni! (Ni camanali quinequi quijtos: ‘Tamachtijquet’.)

¹⁷ Huan Jesús quiilhui:

—Amo techitzqui pampa ayemo nitejcotoc campa itztoc noTata. Pero xiya campa noicnihua huan xiquinilhuiti nitejcos campa itztoc noTata cati nojquiya amoTata huan yaya cati noTeco huan nojquiya amoTeco.

¹⁸ Huan María Magdalena hualajqui techyolmelahuaco tiimomachtijcahua para quiitztoya Tohueyiteco. Huan techilhui nochi cati Jesús quiilhuijtoya.

Imomachtijcahua quiitaque Jesús

(Mt. 28:16-20; Mr. 16:14-18; Lc. 24:36-49)

¹⁹ Huan quema tayohuixqui nopa domingo, nopa achtohui tonal ipan samano tiimomachtijcahua timosentilijtoyaj ipan se cali huan cuali tijtzactoyaj nopa caltemit campa tiitztoyaj para amo aqui ma calaqui pampa tiquinimacasiyayaj nopa tayacanani ten israelitame. Huan Jesús san molhui monextico, moquetztoc tatajco tojuanti, huan techilhui:

—Xijpiyaca tasehuilisti ipan amoyolo.

²⁰ Huan quema quiijto ya ni, technextili nochi ome imax campa quimalavoshuijque huan technextili ielchiquicanahuiya. Huan tiimomachtijcahua nelía tipaquiayaj quema sempa tiqutaque Tohueyiteco.

²¹ Huan Jesús sempa techilhui:

—Xijpiyaca tasehuilisti ipan amoyolo. San se quej noTata nechtitantoc ma nijchihuas ipaquilis, na nojquiya nimechtitani xijchihuaca cati nopaquilis.

²² Huan quema quiijto ya ni, techilpitzqui huan techilhui:

—Ama xijselica Itonal Toteco. ²³ Sinta anquitapojpolhuise se masehuali itajtacolhua, huajca Toteco quitapojpolhuis. Huan sinta amo anquitapojpolhuise se masehuali, huajca noja quihuicas tajtacoli.

Tomás amo quineltocac sinta moyolcuitoya Jesús

²⁴ Pero amo aquiyaya Tomás quema Jesús ajsico ipan nopa tasentilisti. Yaya itztoya se ten timajtacti huan ome tiimomachtijcahua Jesús, huan tijto-caxtiyayaj Cuate. ²⁵ Huan teipa tiquilhuijque para tiqiztoyaj Tohueyiteco. Pero Tomás techilhui:

—Sinta amo niqitas imax, huan nijcalaquis nomacpil campa lipintic ica nopa lavos huan nijcalaquis noma ipan ielchiquicanahuiya campa quitapohuilijque, amo nijneltocas sinta nelía yaya.

²⁶ Huan hualchicueyi ipan seyoc domingo tiimomachtijcahua timosentilijtoyaj huan cuali tijtzactoyaj nopa caltemit huan Jesús sempa san molhui monextico, moquetztoc tatajco tojuanti. Huan techilhui:

—Xijpiyaca tasehuilisti ipan amoyolo.

²⁷ Huan nimantzi quiilhui Tomás:

—Xijcalaqui momacpil nica huan xicajsi nomaixco huan xijcalaqui momax campa noelchiqui. Ayecmo más xijchiya. Xijneltoca para temachtinimoyolcuitoc.

²⁸ Huan Tomás quiilhui:

—Ta tinohueyiTeco huan tinoDios.

²⁹ Huan Jesús quiilhui Tomás:

—Pampa techitac, techneltocac. Más paquilisti quiipiyase masehualme cati nechneltocase masque amo nechitase.

Ijcuilijtoc ni amat para anquineltocase Jesús

³⁰ Huan más miyac tanextili Jesús quichijqui toixpa tiimomachtijcahua cati amo ijcuilijtoc ipan ni amat. ³¹ Pero ni huejhueyi tanextili cati ijcuilijtoc ipan ni amat, niqijcuilijtoc para xijneltocaca para Jesús yaya nopa Cristo cati hualasquía huan yaya Icone Toteco Dios. Huan pampa anquineltocase, anquipiyase nemilisti yancuic para nochipa.

21

Jesús monexti ica chicome imomachtijcahua

¹ Teipa Jesús sempa monextico ica tojuanti tiimomachtijcahua nechca campa nopa hueyi at cati itoca Tiberias o Galilea huan quej ni panoc. ² Nochi tojuanti tiitztoyaj san sejco: Simón Pedro, Tomás cati tijtocaxtijque Cuate, Natanael cati ehua Caná ipan estado Galilea huan na ihuaya noicni cati tiiconehua Zebedeo. Huan nojquiya tohuaya itztoyaj seyoc ome imomachtijcahua. ³ Huan Simón Pedro techilhui:

—Na niyas nimichtajtamati.

Huajca tiquilhuijque:

—Nojquiya tiyase mohuaya.

Huan tiyajque atenti huan titejcoque ipan se cuaacali. Huan timichtajtamajque seyohual, pero yon se michi amo tiqiztziqijque. ⁴ Huan quema tanestihualayaya, san molhui monextico Jesús, moquetztoc xalixco, pero amo tiquixmatque sinta Jesús. ⁵ Huajca technojnatzqui:

—Nohuampoyohua, ¿anquinitzquitoque michime?

Huan tiquilhuijque:

—Amo, amo teno.

⁶ Huan techilhui:

—Xijmajcahuaca amomata ipan inejmat amocuaacal huan anquinitzquise.

Huan tijchijque huan amo tihueliyayaj tijquixtíaj tomatata ipan at pampa nelía miyac michime tiquinmasiltijque. ⁷ Huajca na cati Jesús nechicneli niquilhui Pedro para ya nopa eliyaya Tohueyiteco.

Huajca quema Pedro quicajqui para eliyaya Tohueyiteco, moquenti icamisa pampa moquixtilijtoya, huan huitonqui ipan hueyi at huan ajquitiyajqui hasta campa itztoya Jesús. ⁸ Huan teipa tisequinoc imomachtijcahua tiajsicoj atenti ipan tocuaacal pampa amo huejca tiitztoyaj ten tali, huelis san cien metros. Huan tihualajque tijhuahuatatzihualajque tomatata cati temitoya ica michime. ⁹ Huan quema tiajsicoj campa talpani, tiqitaque para Jesús ya tipitztoya huan quicacatzohuayaya se michi ipan ticoli. Huan nojquiya eltoya pantzi. ¹⁰ Huan techilhui:

—Techhualiquilica se ome michime cati anquinitzquijque.

¹¹ Huan Simón Pedro tejcoc ipan cuaacali huan quitzqui nopa matat huan iselti quihuahuatatzqui hasta talpani. Huan nopa matat quinpixtoya ciento cincuenta y tres huejhueyi michime. Pero masque nelía miyac quinpixtoya, amo tzayanqui tomatata. ¹² Huan Jesús techilhui:

—Xihualaca, ma titacuaca.

Huan yon se ten tojuanti tiimomachtijcahua amo monejqui tijtatzintoquilijque sinta nelía eliyaya Tohueyiteco pampa nochi tiquixmatque para ya.

¹³ Huajca Jesús quicuito pantzi huan michime, huan techmacac ma tijcuaca.

¹⁴ Ya ni ya eliyaya ica expa para Jesús monexti ica tojuanti tiimomachtijcahua quema ya mictoya huan sempa moyolcuitoya.

Pedro ma quinmacthi masehualme

¹⁵ Huan quema titanque titacuj, Jesús quiilhui Simón Pedro:

—Simón, tiicone Jonás, ¿techicnelía más que ne sequij?

Huan Pedro quiilhui:

—Quena, noTeco, tijmati na nimitzicnelía.

Huan Jesús quiilhui:

—Xiquinmachi nomasehualhua nocamanal. Itztoque quej pilborregoitz-
itzi.

¹⁶ Huan Jesús ica ompa quitatzintoquili:

—Simón, tiicone Jonás, ¿techicnelía?

Huan Simón Pedro quiilhui:

—Quena, noTeco, tijmati nimitzicnelía.

Huajca Jesús quiilhui:

—Xiquinmocuitahui nomasehualhua quej se quinmocuitahuía iborrego-
jhua.

¹⁷ Huan Jesús ica expa quitatzintoquili:

—Simón, tiicone Jonás, ¿techicnelía?

Huan Pedro motequipacho pampa expa quitatzintoquiliytoya sinta quiic-
nelía, huajca quiilhui Jesús:

—NoTeco, ta tijmati nochi tamanti. Tijmati nimitzicnelía.

Huan Jesús quiilhui:

—Xiquinmachi nomasehualhua nocamanal quej se quintamaca iborre-
gojhua. ¹⁸ Nelía nimitzilhuía, quema tieliyaya titelpocat, timoyoyontiyaya,
timotajcoilpiyaya huan tiyahuiyaya campa tijnequiyaya, pero quema tihue-
huejtiyas, tijxitahuas momax huan seyoc mitzyoyontis huan mitzhuicas
campa amo tijnequi tiyas.

¹⁹ Ica ni camanali, Jesús techilhuyaya quenicatza Pedro miquisquía ipan
cuamapeli nojquiya, huan ica imiquilis más quinextisquía ihueyitilis Toteco.
Huan teipa Jesús quiilhui Pedro:

—¡Techtoquili!

Na cati Toteco más nechicneli

²⁰ Huan Pedro moicancuetqui huan nechitac na cati Jesús más nechicneli
niquintoquiliyaya. Na nieliyaya cati nimosehuiytoya inacasta Jesús ipan
nopa tiotac quema nochi titacuayaj san sejo huan nijtatzintoquili Jesús
ajquiya quitemactilis. ²¹ Huan quema Pedro nechitac niquintoquiliyaya,
quitatzintoquili Jesús:

—NoTeco, ¿taya panos ica ya?

²² Huan Jesús quiilhui Pedro:

—Sinta nijnequisquía ma itztos hasta quema sempa nihualas, amo
mocuenta Pedro. Ta techtoquili.

²³ Huajca ica masehualme cati quineltocaj Jesús nemiya nopa camanali
para amo nimiquisquía. Pero Jesús amo quiilhui Pedro para amo nim-
iquisquía. San quiilhui para sinta quinequisquía ma niitztos hasta quema
yaya sempa hualas, amo icuenta.

²⁴ Huan na nopa nitayolmelajuet cati niqijcuilojtoc nochi ni tamanti cati
niquitac. Huan nijmati para melahuac nochi cati nimechilhuijtoc.

²⁵ Huan onca más miyac tamanti cati Jesús quichijqui cati amo niqui-
cuilojtoc nica. Sinta niqijcuilojtosquía senquisa nochi cati Jesús quichijqui,
nimoilhuía para ipan nochi taltipacti amo quicuisquía nochi nopa amame.
San ya nopa.

Ni Amatapohuali Techilhuía Cati Quichijque Itayolmelajcahua Tohueyiteco Jesús

Jesús quintencahuili para ajsis Itonal Toteco

¹ Noicni Teófilo, achtohuí nimitztajcuilhui huan nimitzilhui nochi cati Jesús quichijtiyajqui huan nochi cati tamachtijtiyajqui ten quema quipehualti itequi, ² hasta nopa tonali quema tejcoc ilhuicac. Nimitzilhui quenicatza quintapejpeni nopa tacame para elise itayolmelajcahua huan quenicatza quinnahuati ica ichicahualis Itonal Toteco taya tequit monequi ma quichihuaca. ³ Jesús nelía taijyohui huan mijqui, pero teipa monexti iniixpa itayolmelajcahua miyac huelta para 40 tonali. Huan ipan nopa tonali quichijqui miyac tamanti para quinnextilis para nelía itztoc huan quinilhuijtinemiyaya quenicatza elis quema Toteco tanahuatis. ⁴ Huan quema Jesús noja itztoya inihuaya itayolmelajcahua, quinnahuati ma mocahuaca ipan altepet Jerusalén hasta hualas Itonal Toteco. Quinilhui:

—Ximochiyaca nica hasta hualas Itonal Toteco cati Notata amechtencahuili amechtitanilis. Xiquelnamiquica na nojquiya nimechilhuijtoc ten ya. ⁵ Juan nelía tecuaalti ica at, pero ica se ome tonali Toteco amechmacas Itonal para ma itzto ipan amoyolo.

Jesús tejcoc ilhuicac

⁶ Huan quema itayolmelajcahua noja itztoyaj ihuaya Jesús quitatzintoquilijque:

—Tohueyiteco, ¿ipan ni tonali techchihuas tiisraelitame timajcajtoque ten Roma cati ama technahuatía? ¿Sempa tijchihuas para tijpiyase toisraelita tanahuatijca para technahuatis ipan nochi ni total quej tijpiyayayaj huejcaquiya?

⁷ Huan Jesús quinnanquili:

—NoTata cati quipiya nochi tanahuatili quitallijtoc taya tonali mochihuas nochi ni tamanti huan amo monequi anquimatise amojuanti taya hora, yon taya tonal quichihuas. ⁸ Pero quema ajsis Itonal Toteco ipan amoyolo, anquipiyase chichahualisti. Huan anyase anteilhuitij ten na ipan ni altepet Jerusalén, huan ipan estado Judea huan Samaria. Huan teipa anteilhuitij ten na hasta campa más huejhuejca pilaltepertzitzi ipan ni taltipacti.

⁹ Huan Jesús tanqui quincamanalhuía, huan teipa tejcoc ilhuicac. Huan itayolmelajcahua noja quitachilijtoyaj quema hualajqui se mixti cati quitamitzacuaco. Huan ayecmo quiitaque. ¹⁰ Huan itayolmelajcahua noja tachixtoyaj ilhuicac campa tejcotoya huan nimantzi monextijque ome ilhuicac ehuan cati quipixtoyaj iniyoyo nelchipahuac. ¹¹ Huan quinilhuijque:

—Xijtacaquilica anGalilea ehuan, amo anmoquetzose nica para antachixtose ilhuicac. Yaya ni Jesús cati ama tejcoc ilhuicac teipa sempa hualas san se quej anquizztoque yajqui.

Quitapejpenijque Matías para quichihuas itequi Judas

¹² Huajca nopa tayolmelahuani quisque campa nopa tepet cati itoca Olivos, huan tacuepillijque altepet Jerusalén. Jerusalén eltoc quej se kilómetro ihuejcaca ten tepet Olivos. Eliyaya quej ihuejcaca itanahuatilhua Moisés quincahuilíaj israelitame ma nejnemica ipan se tonali para mosiyajquetzase. ¹³ Huan itayolmelajcahua ajsitoj ipan Jerusalén huan tejqoque ipan se

cali cati quipixqui ome piso campa mocahuayayaj. Itztoyaj nozona Pedro, Jacobo, Juan, Andrés, Felipe, Tomás, Bartolomé, Mateo, Jacobo icone Alfeo, Simón cati moiyocanequiyaya ica partido cananista huan Judas, iicni Jacobo. ¹⁴ Huan nojquiya itztoyaj sihuame huan María, inana Jesús, huan iicnihua Jesús. Huan nochi inijuanti talojtzitzi motatajtijayaj san sejco ica san se iniyolo.

¹⁵ Huan se tonali quema mosentilijtoyaj quej 120 taneltocani, Pedro moquezqui tatajco inijuanti huan quijito: ¹⁶ “Noicnihua, monejqui mochihuas nochi cati tiqiztzoque ica Judas para ma mochihuas nochi cati ijcuiljotoc ipan Icamanal Toteco huejcajquiya ten ya. Pampa Itonal Toteco huejcajquiya quihui tohujcapan tata David ma quijcuilo nochi cati quichihuasquia Judas cati quinyacanqui nopa tacame cati quiztzi que Jesús para quimictijque. ¹⁷ Judas eliyaya se ten tojuanti cati tiimomachtijcahua Jesús huan tequitic tohuaya. ¹⁸ Ica nopa tomi cati quitaxtahuijque Judas para quitemactilis Jesús, yaya quicojqui se tali huan huetzqui nozona ica itzonteco. Huan tzayanqui iijti huan quisqui nochi icuetaxcol. ¹⁹ Huan quema nochi Jerusalén ehuan quimatque ten panoc, quitocaxtijque nopa tali ‘Acéldama’, huan ipan inincamanal quinequi quijitos ‘Tali ten Esti’.”

²⁰ Quej nopa panoc pampa ya ijcuiljotoc ipan nopa amat Salmos ipan Icamanal Toteco campa quijitohua:
‘Ichaj nopa tacat ma eli tatzitzi catoc huan ma ayecmo aquí itzto nozona.’
Nojquiya quijitohua:

‘Seyoc tacat ma quiseli nopa tequit cati quichihuayaya.’
²¹ “Huajca ma tijtapejpenica seyoc tacat para quihuicas itequi. Ma elis se cati nejnentoc tohuaya nochi tonali quema Tohueyiteco Jesús itztoya tohuaya. ²² Ma tijtapejpenica se tacat cati itztoya tohuaya ten quema Juan quicuaalti Jesús hasta teipa quema Jesús tejoc ilhuicac. Huan cati tijtapejpenise tequitis tohuaya para teilhuis para nelía moyolcuicoc Jesús.”

²³ Huan quintalijque ome tacame. Se tacat quipixqui eyi itoca. Quitocaxtijayaj José, Barsabás huan Justo. Nojquiya quitalijque seyoc tacat cati quitocaxtijayaj Matías. ²⁴ Huan motatajtijque huan quijitojque: “Tohueyiteco, ta cati cuali tiquixmati iniyolo nochi masehualme. Technextili ajquiya ten ni ome tacame tijtapejpenijotoc ta, ²⁵ para quichihuas ni tequit quej motayolmelajca ipataca Judas cati huetzqui ipan tajtacoli huan cati ya yajqui campa quinamiqui yas.”

²⁶ Huajca mahuiltijque ica piltetzitzi cati yejectziti para quimatise ajquiya Toteco quinequiyaya ma quichihua nopa tequit. Huan quinexti para Toteco quinejqui Matías. Huajca Matías pejqui tequiti inihuaya nopa sequinoc majtacti huan se tayolmelahuani.

2

Ajsico Itonal Toteco

¹ Huan teipa ajsic nopa tonali para nopa israelita ilhuit cati itoca Pentecostés. Huan nochi taneltocani mosentilijtoyaj san sejco. ² Huan nimantzi nochi quicajque cati elqui quej se tatomonilot cati hualajqui ten ilhuicac. Huan tahuel chicahuac taajacac. Huan chicahuac caquistic calijtic campa mosehuijtoyaj. ³ Huan monexti cati elqui quej miyac piltetzitzi cati mosexjelojque huan quinajsic ipan inintzonteco sese inijuanti. ⁴ Huan Itonal Toteco calajqui ipan iniyolo nochi nopa taneltocani huan quintemiti. Huan pejque

camanaltij ica sequinoc tamanti camanali cati amo momachtijtoyaj pampa Itonal Toteco quinmacayaya ichicahualis ma camanaltica.

⁵ Ipan nopa tonali paxalohuayayaj ipan altepet Jerusalén miyac israelitame cati quitepanitayayaj Toteco. Inijuanti hualajtoyaj ten nochi talme ipan taltipacti. ⁶ Huan quema nochi inijuanti quicajque taajcahuaca chicahuac, nimantzi mosentilicoj campá itztoyaj nopa taneltocani. Huan amo quimatiyayaj taya panoc pampa quicaquiyayaj sesen ten nopa taneltocani camanaltiyayaj inincamanal ten sese inintal campá nopa paxalohuani hualajtoyaj. ⁷ Huan nopa masehualme san quintachilijque huan moilhuijque se ica seyoc:

—Xiquitaca, nochi ni masehualme cati camanaltij ehuan estado Galilea.

⁸ ¿Quenicatza hueli tiquinaquij camanaltij ica sesen tocamanal ten sesen total campá tiehuani? ⁹ Tojuanti tihualajtoque campá hueli talme. Itztoque nica masehualme cati hualahui: Partia, Media, Elam, Mesopotamia, Judea, Capadocia, Ponto, Asia, ¹⁰ Frigia, Panfilia, Egipto huan altepeme ten tali Libia nechca altepet Cirene. Nojquiya itztoque nica paxalohuani cati hualahui nopa hueyi altepet Roma. Sequij ni masehualme cati ajsicoj nica itztoque israelitame, huan sequinoc san quiselijtoque nopa israelita tajcuiloli ten Toteco. ¹¹ Nojquiya itztoque tohuaya masehualme cati hualahui tali Creta huan Arabia. Huan nochi tojuanti tijcaquij ni masehualme camanaltij sesen tocamanal huan techpohuilía miyac huejhueyi tamanti cati Toteco quichijtoc. ¿Quenicatza huélis quimatij tocamanal?

¹² Huan nochi san quintetzaitayayaj huan amo quimatiyayaj taya quijitose. Motatzintoquiliyayaj:

—¿Taya quinequi quijitos nochi ya ni cati ama pano?

¹³ Pero sequinoc masehualme nozona quinhuihuiitayayaj nopa taneltocani. Quijtohuayayaj para quitojay miyac xocomeca at cati xococ huan yeca ihuintitoque.

Pedro pejqui quincamanalhuía nopa masehualme

¹⁴ Huajca Pedro moquetzqui inihuaya nopa sequinoc majtacti huan se tayolmelahuani, huan camanaltic chicahuac huan quinhuihui nopa masehualme: “Noisraelita icnihua huan nochi amojuanti cati anpaxalohuaj ipan ni altepet Jerusalén, techtacaquílca huan xijneltocaca cati nimechilhuis.

¹⁵ Ni masehualme cati nohuaya itztoque amo ihuintitoque quej anmoilhuíaj pampa sanoc las nueve ica ijnaloc. ¹⁶ Pero mochijtoc ama cati nopa tajtolpanextijquet Joel quijcuilo huejcajquiya para teipa panos. Yaya quijito:

¹⁷ Ipan itamiya tonali, Toteco quijtohua, nijtitanis Notonal ipan nochi masehualme.

Niquinmacas amotelpocahua huan amoichpocahua nocamanal para teilhuisse cati panos teipa.

Huan nijchihuas para amotelpocahua ma quitaca tanextili quej temicti cati na niquinnextilis,

huan nopa huehue tacame campá amojuanti, niquinnextilis tamanti ipan temicti.

¹⁸ Huan ipan nopa tonali nijtalis noTonal para itztos ipan notequipanojcahua, tacame huan sihuame,

huan inijuanti teilhuisse camanali cati niquinmacas.

¹⁹ Huan nijchihuas huejhueyi tamanti ipan ilhuicacti.

Huan ipan taltipacti nijchihuas tanextili.

Oncas esti, tit huan pocti.

²⁰ Tonati tzintayohuilis huan metzti mochihuas chichiltic quej esti.

Nochi ni tamanti mochihuase huan teipa ajsis nopa tonal cati itoca “itonal Toteco” quema sempa hualas Tohueyiteco ipan taltipacti.

Nelía hueyi huan nelía temajmati elis nopa tonal.

²¹ Huan nochi masehualme cati quinoztase Tohueyiteco para ma quinmaquixti,

yaya, quena, quinmaquixtis.’

Quej nopa quiijuico nopa tajtolpanextijquet Joel cati tematiltiyaya nopa camanali cati quiseliyaya ten Toteco.’

²² Huan Pedro quinilhui: “Noisraelita icnihua, xijtacaquilica cati nimechilhuía. Toteco Dios quinexti amoixpa nochi amojuanti para yaya itztoya ihuaya Jesús, nopa Nazaret ejquet, huan para quipacti cati quichijqui. Ica Jesús, Toteco quichijqui miyac huejhueyi tamanti para masehualme ma quitachilica huan quichijqui miyac fanextili huan miyac tiochicahualnescayot, quej ya anquimatij. ²³ Huan amojuanti anquichijque sesen tamanti cati Toteco Dios ya quitallijtoya huan ya quimatiyayaj para anquichihuasquiáj. Anquitzquijque Jesús huan anquitemactilijque ica amo cuajcualme para ma quimictica. Huan injuanti quicuamapeloltijque.

²⁴ Pero Toteco Dios quiyolcuic. Quena, quitamilti nopa taijyohuilisti ten miquilsti pampa miquilsti amo quipixqui chicahualisti para quipixtos Jesús. ²⁵ Nopa hueyi tanahuatijquet David huejcajquiya quiijuico ten Jesús quema quijto:

‘Toteco, mojmosta nimitzita noixteno.

Ta tiitztoc nohuaya campá nonejmat para amo aquí huelis nechmajmatis.

²⁶ Huajca nelía niyolpaqui huan chicahuac nimitzpaquilismacas ica noca-mac.

Huan quema nimiquis, ica paquilisti notacayo mitzchiyas.

²⁷ Pampa amo nechtahuacahuas campá mijcatzitzí,

yon amo tijcahuas ma palani itacayo yaya cati tatzetzeloltic huan moaxca ta.

²⁸ Technextilijtoc nopa ojti cati quipiya nemilisti cati yancuic, huan tahuel miyac paquilisti techmacas quema niajsiti moixpa.’
Quej nopa ijcuilijtoc ipan icamanal Toteco.’

²⁹ Huan Pedro quinilhui: “Noicnihua, nimechilhuía cati xitahuac. To-huejcapan tata David mijqui huan quitallijque itacayo ipan se ostot ipan se tepet huan nopa ostot nojá eltoc nica nechca hasta ama. Huajca David amo camanaltiyaya ten ya iselti. ³⁰ Pero David nelía eliyaya se tajtolpanextijquet cati camanaltiyaya ten cati panos teipa. Huan David quimatiyaya para Toteco tatestigojquetzqui huan quicajqui icamanal para se ten ya iteipan ixhui elisquiá nopa Cristo ica itacayo quej se masehuali. Huan nopa Cristo quipiyas tanahuatili ica israelitame huan mosehuis para tanahuatis campá David mosehuiyaya huejcajquiya. ³¹ Huajca David huejcajquiya quiiyaya para nochi ni panosquiá teipa huan yeca quiijuico quenicatza Toteco Dios quiyolcuiscuía Cristo. Quiijto Toteco amo quitahuacahuasquiá ialma Cristo campá mijcatzitzí, yon amo quicahuiliscuía para palanis itacayo. ³² Huajca Toteco Dios quiyolcuic Jesús, huan nochi tojuanti tiquitaque quema ya moyolcuitoya huan huelis timechilhuisse cati melahuac panoc. ³³ Huan Jesús ama mosehuijtoc nepa ipan ilhuicac ipan inejmat Toteco campá quipiya nopa tanahuatili cati más hueyi. Huan quej ya quitencahuilijtoya, Itata quimacac Jesús Itonal para Jesús ma techmaca tojuanti. Huan Itonal Toteco quichijtoc nochi ni tamanti cati ama anquiiatij huan anquicaquij. ³⁴ Pampa amo David cati tejcoc ilhuicac, pero elqui David cati quijto:

‘Toteco Dios quilhui noTeco Cristo:

Ximosehui nica ica nonejmat,

³⁵ hasta quema niquintanis nochi mocualancaitacahua, huan nimitzmactilis para ininpa mosiyajquetzas moicxihua.’

³⁶ “Huajca xijmatica nochi anisraelitame, Toteco quitequimacac ni Jesús cati anquicuamapeloltijque para yaya elis Tohueyiteco. Huan yaya elis nopa Cristo cati Toteco quijto techtitanilisquía.”

³⁷ Quema nopa masehualme quicajque nopa camanali, moyoltequipa-chojque ica cati quichijtoyaj, huan quitatzintoquilijque Pedro huan nopa sequinoc tayolmelahuani:

—Tacame, ama ¿taya monequi tijchihuase?

³⁸ Huan Pedro quinnanquili:

—Ximoyolcuepaca huan xijcahuaca tajtacoli huan ximocuaaltica sese amojuanti ipan itoca* Jesucristo para Toteco amechtajtacolquixtis huan quej se nemacti amechmacas Itonal cati tatzejzeloltic. ³⁹ Toteco quitencaj-toc amechmacas Itonal huan nojquiya quinmacas amoconehua, huan hasta quinmacas masehualme cati amo israelitame cati huejca ehuan. Quinmacas nochi masehualme cati yaya quinnotztoc para ma elica iaxcahua.

⁴⁰ Huan ica más miyac camanali Pedro nelía quinilhui nopa masehualme ten Jesús huan quinyolchicajqui ma quiselica, quinilhui:

—Ximomaquixtica ten nopa tatzacuutilisti cati quinajsis ni amo cua-juahme cati ama itztoque.

⁴¹ Huajca miyac ten nopa masehualme quineltocaque cati Pedro quinilhui, huan yajque mocuaaltitoj. Huan ipan nopa tonali nechca eyi mil más masehualme quineltocaque Jesús. ⁴² Huan mojmosta nochi nopa taneltocani quitacaquiliyayaj nochi cati nopa tayolmelahuani tamachtiyayaj huan nochi quipiyayaj san se inintalnamiqulis. Huan san sejo nopa taneltocani motatajtuyayaj huan quitajcotapanayayaj nopa pantzi para quielnamiquise quenicatza Jesús mijqui por tojuanti.

Quenicatza monejnemiltiyayaj nopa achtohui taneltocani

⁴³ Huan nochi nopa taneltocani san quitachiliyayaj huan quitetzaitayayaj cati Toteco quichihuayaya. Huan nopa tayolmelahuani quichihuayayaj miyac tanextili huan huejhueyi tamanti. ⁴⁴ Huan nochi masehualme cati quineltocatoyaj Jesús itzttoyaj san sejo. Huan momajmacayayaj nochi tamanti cati quipixtoyaj se ica seyoc. ⁴⁵ Huan pejque quinamacaj inintal huan tamanti cati iniaxca huan quinmajmacaque nopa tomi sequinoc cati quinpolohuayaya ten ica panose huan quinmacayayaj quej quinmonequiliyaya. ⁴⁶ Huan mojmosta nopa taneltocani mosentiliyayaj ipan hueyi israelita tiopamit ica san se iniyolo. Huan ipan calme quitajcotapanayayaj pantzi, huan tacuayayaj ihuaya iniicnihua ipan Cristo ica miyac paquilisti huan ica san se iniyolo. ⁴⁷ Mojmosta quipaquilismacayayaj Toteco, huan nochi sequinoc masehualme quintepanitayayaj. Huan mojmosta Tohueyiteco quinmaquixtiyaya sequinoc masehualme cati quintapejpeni-tyaya. Huan quiyampa momiyaquilijtuyahuyayaj nopa taneltocani cati itzttoyaj ipan itiopa.

3

Mochicajqui se metzcuachotic

¹ Se tonali Pedro huan Juan yajque ipan nopa hueyi israelita tiopamit a las tres ica tiotac. Eliyaya nopa hora quemá masehualme momajtoyaj

* **2:38** 2:38 Ica itequitcayo.

motatajtáaj ica Toteco. ² Huan nozona itztoya se tacat metzcuaachotic cati quej nopa tacatqui. Sequinoc tacame mojmosta quihuicayayaj huan quisehuyayaj campa tiopan caltemit cati itoca Yejectzi para motajtania tomi ica cati calaquiyayaj ipan tiopamit para ica panos. ³ Huan quema quinitac Pedro huan Juan hualayayaj para calaquise tiopan caljitic, quintajtani tomi. ⁴ Huan Pedro huan Juan quitachilijque nopa tacat cati metzcuaachotic huan Pedro quihhui:

—Tehtachili.

⁵ Huan nopa tacat quintachili pampa mochixtoya para ma quimacaca se tomi. ⁶ Pero Pedro quihhui:

—Amo nijpiya tomi, yon ten plata, yon ten oro, pero nimitzmacas cati nijpixtoc. Ipan itoca* Jesucristo ten Nazaret, ximoquetza huan xinejnemi.

⁷ Huan nimantzi Pedro quimaitzqui ica inejmat huan quitananqui. Ipan nopa talojtzi moxixitajqui iicxihua huan iicxiacayo. ⁸ Huan nopa tacat huitontejqui, huan moquetztiquisqui huan pejqui nejnemi. Calaquito tiopan caljitic inihuaya, huan nejnentinemiyaya, huan huitontinemiyaya huan quipaquilismacayaya Toteco. ⁹ Huan nochi masehualme cati itztoyaj nozona quitaque nopa tacat nejnemiyaya huan quipaquilismacayaya Toteco. ¹⁰ Huan quixmatque para yaya cati mosehuyaya huan tajtaniyaya tomi campa tiopan caltemit cati itoca Yejectzi. Huaajca san quitachilijque hasta momajmatijque ica cati ipantic nopa tacat.

Pedro quincamanalhui miyac masehualme iixpa nopa hueyi tiopa

¹¹ Huan nopa tacat cati eltoya metzcuaachotic quitzquitoya Pedro huan Juan huan amo quinequiyaya quincajtehuas. Huan nochi nopa masehualme motalojque, huan mosentilijque campa inijuanti huan noja san quitachiliyayaj huan quitetzaitayayaj ica cati panotoya. ¹² Huan Pedro quinitac para hualajtoyaj nopa miyac masehualme, quinilhui: “Anisraelitame, ¿para ten anquitachilíaj ni tamanti? ¿Para ten antechtachilíaj tojuanti? ¿Anmoilhuiáj ni tacat mochicajqui ica tochicahualis tojuanti o anmoilhuiáj titatzejtzololtique pampa tihuelque tijchijque ma nejnemi? ¡Amo! ¹³ Toteco Dios, yaya cati nojquiya ininTeco Abraham, Isaac, Jacob, huan nochi sequinoc tohuejcapan tatahua, yaya cati quichijtoc para ma monextis ihueyitilis Icone, Jesús ipan ni cati quichijtoc nica. Huan elqui san se ni Jesús cati anisraelitame anquitemactilijque inimaco tequichihuani. Huan quema Pilato quinequiyaya quicahuilis Jesús ma yohui, amo anquinejque. ¹⁴ Anquihuejcamajcajque Jesús cati tatzejtzololtic huan cati senquisa xitahuac. Huan antajtanque ma amechmajcahuili se temictijquet. ¹⁵ Huan anquimictijque Jesús, yaya cati hueli temaca yancuic nemilisti cati amo quema tamis. Pero Toteco Dios quiyolcuic quema ya mictoya. Huan tojuanti tiquitaque huan ama timechyolmelahuaj para nelía moyolcuitoc. ¹⁶ Huan pampa tijneltocaj itoca† Jesús, yaya quimacatoc tetili ma nejnemi ni tacat cati anquítaj nica huan cati anquixmatij. Huan pampa tijneltocaj, ni tacat cati itztoc nica amoixpa ya senquisa mochicajtoc quej anquítaj.

¹⁷ “Nohuampoyohua, na nijmati quema amojuanti huan amotequichicahua anquimictijque Jesús, nelía amo anquimatiyayaj taya anquichihuyayaj. ¹⁸ Pero Toteco quichihuayaya para ma mochihuas nochi cati yaya huejcajquiya quijto para panos teipa. Pampa Toteco teyolmelajtoya por itajtolpanextijcahua para Cristo monequiyaya taijyohuia yaya yeca taijyohui

* 3:6 3:6 Ica itequitacayo. † 3:16 3:16 Itequitacayo.

ipan ni tonali. ¹⁹ Huajca ama monequi ximoyolpataca huan ximocuepaca ica Toteco Dios. Huan yaya amechtapojpolhuis amotajtacolhua huan ten nepa iixpa amechtitanilis yancuic tonali cati quipiyas miyac paquilisti. ²⁰ Huan nojquiya sempa amechtitanilis Jesús, nopa Cristo cati quitapejpeni ten huejcajquiya para amojuanti. ²¹ Pero ipan ni tonali monequi Jesucristo itztos nepa ilhuicac hasta quema Toteco yancuic quicualtalis nochi tamanti quej quinilhui itatzejtzeloltica tajtolpanextijcahua ma quiijquloca huejcajquiya. ²² Eltoc quej Moisés quinilhui tohuejcapan tatahua: 'Toteco quitananas se tajtolpanextijquet campá amojuanti. Yaya elis se israelita cati Toteco quitapejpenis huan quitequimacas quej nechtapejpeni na ni Moisés huan nechtequimacac. Huan monequi anquitacaquilise cuali nochi cati yaya amechilhuis. ²³ Huan nochi cati amo qitoquilise icamanal nopa tajtolpanextijquet, Toteco quiniyocaquixtis ten imasehualhua huan quin-tamiltis.'

²⁴ "Huan nochi tajtolpanextiani cati teyolmelajque icamanal Toteco ten quema Samuel itztoya huan hasta teipa, quiijtojqe taya panosquía ipan ni tonali. ²⁵ Huan nelía anininteipan ixhuihua nopa tajtolpanextiani. Huan quema Toteco quinmacac icamanal ica amohuejcapan tatahua eltoya para amojuanti nojquiya. Pampa Toteco quiiilhui Abraham: 'Na niquintiochihuas nochi masehualme ipan ni taltipacti ica moteipan ixhui.' ²⁶ Huajca quema Toteco quiyolcuic Icone, Jesús, quititanqui achtohui para anisraelitame. Amechtitanili para Jesús ma amechtiochihua huan ma amechchihua ximoyolpataca huan xijcajtehuaca amotajtacolhua."

4

Totajtzitzi quinhuicaque Pedro huan Juan iniixpa nopa hueyi tasentilisti

¹ Pedro huan Juan noja quincamanalhuyiyaj nopa masehualme, huan hualajque totajtzitzi, huan nopa tayacanquet ten soldados cati quimocuitahuijqe nopa israelita tiopamit huan sequij saduceos. ² Inijuanti cualaniyayaj pampa Pedro huan Juan quinmachtiyayaj masehualme huan quinilhuyiyaj para masehualme cati mictoque sempa moyolcuise pampa Jesús moyolcuic. ³ Huajca quinitzquijque Pedro huan Juan huan quintzajque hasta seyoc tonali pampa ya tzintayohuixtoya. ⁴ Pero miyac cati quitacaquilijtoyaj cati Pedro quinilhuyiyaya, quineltocaque. Huajca ica inijuanti, nopa taneltocani momiyaquilijtoyaj hasta san taca taneltocani mochijque macuili mil.

⁵ Huan tonili mosentilijque ipan altepet Jerusalén nopa israelita tequichihuani, inihuaya huehue tacame huan nopa tamachtiani ten itanahuatilhua Moisés. ⁶ Nojquiya itztoyaj nozona Anás, nopa hueyi totajtzitzi, huan Caifás, Juan, Alejandro huan nochi inihuicalhua nopa tayacanani ten totajtzitzi. ⁷ Huan quinqetzque Pedro huan Juan tatajco campá inijuanti huan quintatzintozquilijque:

—¿Ajquiya amechmacatoc chichualisti para anquichicajque ni tacat metzcuachotic? ¿Ica ajquiya itequiticayo anquichijtoque ni tamanti?

⁸ Huajca Pedro temitoc ica Itonal Toteco, quinilhui:

—Tequichihuani huan huehue tacame ten israelitame, ⁹ ama antechtatzintozquilij ica nopa tamanti cuali cati tijchihuilijtoque ni tacat cati moco-cohuayaya. Anquinequij anquimatise quenicatza mochicajqui. ¹⁰ Huajca nimechilhuis xitahuac para ma quimatica nochi masehualme ten tali Israel. Ni tacat cati itzto nica amohuaya mochicajtoque ica itoca* Jesucristo, nopa

* 4:10 4:10 Ica itequiticayo.

altepēt Nazaret ejquet. Yaya cati anquicuamapeloltijque, pero Toteco quiy-olcuic quema ya mictoya. ¹¹ Jesús yaya nopa hueyi tet cati ancalchihuani amo anquinejque anquitequihuse ipan amochaj. Pero teipa yaya elqui cati senquisa cuali para yas calesquina huan ipan quiquetzase nopa cali cati Toteco quichihua. Huan ama amoixpa Toteco quimacatoc Jesús nopa tequiticayot cati más hueyi que nochi. ¹² Amo aquí seyoc† cati huelis techmaquixtis ten totajtacoluha, pampa Toteco Dios amo quitajitoc seyoc cati quiptiya tequiticayot ipan ni taltipacti para techmaquixtis, san Jesucristo.

¹³ Huajca nopa tequichihuani quitaque quenicatza Pedro huan Juan moneltaliyayaj para camanaltise ica chicahualisti iniixpa nochi cati itztoyaj nopona huan quimatque amo momachtijtoyaj, huan eliyaya tacame teicneltziti; huajca san quintachilijque. Huan momacaque cuenta para injuanti cati nentoyaj ihuaya Jesús. ¹⁴ Nojquiya nopa tequichihuani quitaque moquetzayaya nepa nopa tacat cati mochicajtoya, huajca yeca amo huelque quintelhuaj. ¹⁵ Pero quinnahuatijque Pedro huan Juan ma quisaca calteno ipan nopa tasentilisti para se talojtzi huan nopa tequichihuani iniselti pejqe monajnanquilaj. ¹⁶ Quiijtohuayayaj:

—¿Taya tijchihuase ica ni tacame? Nochi cati ehuan ni altepēt Jerusalén quimatij quichijtoque se hueyi tanextili huan amo hueli tiquijtohuaj para amo neli mochicajtoc nopa tacat. ¹⁷ Pero para ma ayecmo momahuas ni tamanti, ma tiquinmajmatica para ma ayecmo aquí quicamanalhuise, yon quimachtise ten Jesús.

¹⁸ Huajca nopa tequichihuani sempa quinnotzque Pedro huan Juan huan quinnahuatijque ma ayecmo camanaltica ten itequiticayo Jesús. ¹⁹ Pero Pedro huan Juan quinnanquilijque:

—Ximoyolilhuica sinta cuali para timechneltocase o sinta achi más cuali tijneltocase Toteco. ²⁰ Pero para tojuanti amo tihuelij tijcahuase tiquinpohuilise masehualme cati tiqiztoque huan cati tijcactoque quema Jesús itztoya tohuaya.

²¹ Huajca nopa tequichihuani sempa quinmajmatijque Pedro huan Juan ica cati huelis quinchihuilise huan quinmajcajqe ma yaca. Amo huelque quintatzacuilitijque, pampa nochi masehualme quipaquilismacayayaj Toteco Dios ica cati quichijtoyaj. ²² Huan nopa tacat cati mochicajqui quixtoya quipano cuarenta xihuit.

Nopa taneltocani motatajtijque ica Toteco

²³ Huan nopa tasentilisti quinquixti Pedro huan Juan, huan injuanti yajque campá itztoyaj nopa sequinoc taneltocani. Huan quinpohuilitoj nochi cati nopa tayacanani ten totajtziti inihuaya nopa huehue tacame ten israelitame quinilhijtoyaj. ²⁴ Huan quema nopa taneltocani quicajque cati quiijtojqe, nochi san sejco motatajtijque ica Toteco Dios huan quihijque: “Toteco, ta nelía tijchijijqui ilhuicacti huan taltipacti, huan nochi hueyi at huan nochi tamanti cati onca. ²⁵ Ta, ica Motonal, ticamanaltic huejcajquiya ica tohuejcapán tata David cati elqui motequipanojca huan tiqijto: ‘San tapic mocualanise masehualme ipan nochi altepeme. San tapic moilhuse cati amo quema huelis quichihuase.

²⁶ Huejhueyi tanahuatiani ten ni taltipacti mocualanise, huan tequichihuani ipan altepeme mosentilise para motehuse ica Toteco Dios huan ica Cristo cati yaya quitapejpenjitoc.’

† 4:12 4:12 Seyoc tocoyot.

²⁷ “Huan panotoc ipan ni tonali nopa tamanti cati huejcajquiya quijto David. Pampa amanoc nelía mosentilijque Herodes, Poncio Pilato, israelitame huan cati amo israelitame huan cualanque ica Mocone Jesús cati tatzelzoltic cati ta, Toteco, tijtapejpeni huan ticajalti para tijtequimaca quej totemaquixtija. ²⁸ Huan quichihuilijque Mocone Jesús nochi cati ta napa tonaliya tiquijtojtoya para quichihuilisquía. ²⁹ Huan ama, Toteco, xijcaqui cati nopa tequichihuani quijtohuaj para techmajmatise huan techmaca tetili timotequipanojcahua para ma amo timajmahuica ticamanaltise mocamanal. ³⁰ Huan nojquiya, Toteco, ica mochicahualis huan ica itequiticayo Mocone Jesús cati tatzelzoltic, xiquinchicahua cocoyani, huan xijchihua tanetili huan tiochicahualnecayot.”

³¹ Huan quema Pedro huan Juan tanque motatajtiaj, mohuiso nopa cali campa mosentilijtoyaj. Huan Itonal Toteco quinajsic nochi injuanti huan quintemiti. Huan achi más moneltalijque teyolmelahuase icamanal Toteco.

Taneltocani moxejxelhuilijque nochi cati iniaxca

³² Huan nochi nopa miyaqui masehualme cati quineltocatoyaj Jesús quipiyayayaj san se iniyolo huan san se inintalnamiqulis. Amo aqui moaxcatí cati achtohui eliyaya iaxca, pero moxejxelhuilijayaj nochi tamanti cati iniaxca ica sequinoc. ³³ Huan ica hueyi chichahualisti nopa tayolmelahuani teilhuiyayaj para quitzttoyaj para nelía moyolcuic Tohueyiteco Jesús. Huan Toteco tahuel miyac quintiochiuayaya nochi nopa taneltocani pampa nelía quipixqui hueyi iyolo ica injuanti. ³⁴ Huan ayecmo aqui ten injuanti quipolohuayaya ten ica panos. Pampa nochi cati quipixtoyaj inintal o inincalhua quinamacayayaj, ³⁵ huan quinmacayayaj nopa tomi nopa tayolmelahuani. Huan injuanti quinxejxelhuilijayaj nochi taneltocani quej cati quinpolohuayaya sese injuanti para quipiyase ajsitoc ten ica panose.

³⁶ Huan itztoya se tacat cati itoca José, cati ehuyaya nopa tali Chipre. Yaya se iteipan ixhui nopa totajtzi Leví cati itztoya huejcajquiya. Huan nopa tayolmelahuani quitocaxtijque nojquiya Bernabé, cati quijjosnequi “tayoltalijquet”. ³⁷ Huan José quinamacac se tali cati quipixtoya huan quihualicac nochi nopa tomi huan quinmacac nopa tayolmelahuani.

5

Ananías huan Safira tajtacolchijque

¹ Pero itztoya seyoc tacat cati itoca Ananías huan isihua itoca Safira cati nojquiya quinamacaque se tali. ² Huan Ananías quiajojqui achi nopa tomi para injuanti, huan quihuicac cati mocajqui huan quinmacac nopa tayolmelahuani quej elisquía nochi nopa tomi. Huan isihua quimatiyaya nochi cati quichijqui. ³ Huajca Pedro quihui:

—Ananías, ¿para ten tijcahuilijtoc Amocualtacat ma quitemiti moyolo ica italnamiqulis hasta tiistacatitoc ica Itonal Toteco? Ticajojqui achi tomi cati mitztaxtahijque para momilcahual. ⁴ Huan ¿para ten timoilhui tijchihuas ya ni? Nopa tali eliyaya moaxca. Huan quema tijnamacac, nopa tomi nojquiya eliyaya moaxca ta. ¿Para ten timoilhujitoc para tiistacatis? Amo san techistacahuilijtoc tojuanti titacame, tiquistacahuilijtoc Toteco Dios.

⁵ Huan quema quicajqui Ananías cati Pedro quihui, huetzqui huan mijqui. Huan nelía momajmatijque nochi cati quicajque cati panó. ⁶ Huan hualajque se ome telpoca tacame, quihuijconque nopa mijcatzi ica se yoyomit, huan quihuicaque, quitalpachotoj.

⁷ Teipa panoc eyi hora huan hualajqui isihua Ananías. Yaya amo quimatiyaya taya ipantitoya ihuehue. ⁸ Huan Pedro quitatzintoquili:

—Techilhui, ¿anquinamacaque amotal quej antechilhuijque ipati?

Huan nopa sihuat quihlhu:

—Quena, quej nopa tijnamacaque.

⁹ Huajca Pedro quihlhu:

—¿Quenicatza huelqui anmoyolilhúaj para anquiejyeycose Itonal Toteco para anquuitase sinta amechtatzacuultis? Xiquita, amantzi ne hualahui nopa tacame cati quitalpachotoj mohuehue. Huan injuanti mitzhuicase nojquiya.

¹⁰ Huan nimantzi, huetzqui Safira huan mijqui iixpa Pedro. Huan nopa telpeca tacame sempa calajque huan quitaque ya mictoya, huajca quihuaque quitalpachotoj nechca ihuehue. ¹¹ Huan nelía momajmatijque nochi nopa taneltocani ipan nopa tiopamit. Huan nojquiya momajmatijque nochi sequinoc masehualme cati quicajque.

Miyac tanextili huan tiochicahualnescayot

¹² Huan nopa tayolmelahuani quichijque miyac tanextili huan tiochicahualnescayot iniixpa masehualme. Huan nochi taneltocani momajtoyaj mosentilíaj mojmosta campa israelita tiopamit icalmapa cati itoca Portal ten Salomón. ¹³ Huan nochi masehualme quintepanitayayaj miyac, pero momajmatiyayaj mosentilise inihuaya. ¹⁴ Huan tahuel momiyaquiljtinemiyayaj nopa taneltocani pampa tahuel miyac tacame huan sihuame quinelto-cayayaj Tohueyiteco. ¹⁵ Huan masehualme quinhuicayayaj inincocoxcahua campa oiti huan quintecayayaj ipan tapechti o ipan petat para quema panosquía Pedro, iecahuilo ma quinajsi nopa cocoyani. Huan ica ya nopa mochicahuasquíaj. ¹⁶ Nojquiya miyac masehualme cati ehuyayaj ipan pilaltepetziti cati nechcatzi ajsiyayaj ipan altepet Jerusalén, quinhuicayayaj cocoyani, huan masehualme cati quinpiyayaj iajacahua Amocualtacat huan nochi mochicajque.

Sempa quintzajque nopa tayolmelahuani

¹⁷ Huajca nopa hueyi totajtzi huan nochi ihuampoyohua cati eliyayaj sa-duceos pejque quinchicoitaj nopa tayolmelahuani. ¹⁸ Huan quinitzquijque huan quintzajque ipan nopa hueyi tatzacti ten nopa altepet. ¹⁹ Pero Tohueyiteco quititanqui se iilhucac ejca ica tayohua huan quitapo nopa tepos caltemit ten nopa tatzacti. Huan quinixti nopa tayolmelahuani huan quihlhu: ²⁰ “Xiyaca ximoquetzati ipan nopa hueyi israelita tiopamit huan xiquinilhucac masehualme quenicatza huelis quipantise yancuic nemilisti ipan Jesucristo.”

²¹ Huan nopa tayolmelahuani quicajque icamanal huan yajque ipan nopa hueyi tiopamit quema tanestihualayaya, huan pejque tamachtíaj.

Huan ica ijnaloc ajsico nopa hueyi totajtzi huan nochi cati itztoyaj ihuaya, huan quinnotzque ma mosentilica ipan nopa tasentilisti ten tequichihuani cati quipiyayaj más tequiticayot inihuaya nopa huehue tacame ten israelitame. Huan tanahuatijque ma quincuitij nopa tayolmelahuani campa tatzacti. ²² Huan yajque nopa soldados cati quimocuitahuyayaj tiopamit, pero amo aqui quipantijque. Huajca tacuepiliijque, ²³ huan quihlhuicoj:

—Tijpantitoj cuali tzactoc nopa tatzacti, huan nopa soldados moquetztoyaj tamocuitahuijtoyaj campa tepos caltemit, pero tijtapojque huan yon se amo tijpantijque.

²⁴ Huajca quema quicajque ni camanali, nopa hueyi totajtzi huan nopa tayacanquet ten soldados ten tiopa amo quimatiyayaj taya quiijtose. Huan moyolilhuyiyaj taya panos teipa ica ni tamanti. ²⁵ Huan nimantzi ajsico se tacat cati quinyolmelajqui:

—Xiquitaca nopa tacame cati anquintzajque, amantzi itztoque ipan hueyi tiopamit, quinmachtíaj masehualme.

²⁶ Huajca nopa tayacanquet ten soldados yajqui inihuaya isoldados cati quimocuitahuyiyaj nopa hueyi israelita tiopamit huan quinhuualicaque nopa tayolmelahuani. Pero amo quinmaquilijque pampa quinimacasiyayaj nopa miyaqui masehualme cati mosentilijtoyaj nozona. Moilhuijque para huelis quintepachosquíaj. ²⁷ Huan quinhuicaque nopa tayolmelahuani huan quinnextijque iniixpa nopa hueyi tasentilisti ten tequichihuani. Huan teipa nopa hueyi totajtzi quinilhui:

²⁸ —Tojuanti timechnahuatijque ayecmo xitamachtica ten Jesús. Pero ama amotamachtil ya momajtoc ipan nochi ni altepet Jerusalén. Huan antechahuilíaj para tijmictijque Jesús.

²⁹ Huajca Pedro inihuaya nopa tayolmelahuani quinnanquilijque:

—Monequi tijneltoquilise Toteco Dios achtohui huan amo masehualme.

³⁰ Pampa Toteco cati tohuejcapan tatahua quineltocaque quiyolcuic Jesús cati anquimictijque quema anquicuamapeloltijque. ³¹ Huan Toteco Dios quihueyitalijtoc Jesús huan quisehuijtoc nepa inejmat campa más onca tatepanitacayot pampa yaya Tohueyiteco huan Totemaquixtija. Toteco quichijqui ya ni para anisraelitame huelis anmoyolpatase huan anquipan-tise tapojpolhuili por amotajtacolhua. ³² Huan tiquinilhuíaj masehualme para melahuac nochi ni tamanti cati tiquitztoque huan nojquiya Itonal Toteco teyolmelahua para melahuac. Huan Toteco Dios quinmacas Itonal nochi masehualme cati quichihuaj icamanal.

³³ Huan quema quicajque cati Pedro quiijto, tahuel cualanque, huan quinequiyayaj quinmictise nopa tayolmelahuani. ³⁴ Pero moquetzqui se fariseo cati itoca Gamaliel ipan nopa hueyi tasentilisti ten tequichihuani. Yaya eltoya se tamachtijquet cati más ajsitoc momachtijtaya itanahuatilhua Moisés ten nochi sequinoc huan nochi masehualme quitepanitayayaj miyac. Huan Gamaliel quinnahuati ma quisaca nopa tayolmelahuani se talojtzi, ³⁵ huan pejqqui quinilhuía nopa tequichihuani:

—Noisraelita icnihua, ximotachilica ica cati anquinchihuilise ni tacame.

³⁶ Anquielnamiquij nepa tonaliya itztoya se tacat Teudas cati quiijto-huayaya quipixtoya tequiticayot, huan se cuatrocientos tacame mosentilij-que ihuaya. Huan sequinoc quimictijque Teudas, huan nopa tacame cati quitoquiliyayaj mosemanque, huan nochi itequi tantiyajqui. ³⁷ Teipa ipan nopa tonali quema quichihuayayaj nopa censo, motananqui se tacat Judas ten estado Galilea, huan miyac masehualme quitoquiliyayaj. Pero nojquiya sequinoc quimictijque Judas, huan nochi cati quitoquiliyayaj mosemanque.

³⁸ Yeca nimechilhuía, xiquincahuaca ni tacame huan amo xiquincuatotonica más, pampa sinta masehualme quinmacatoque inintamachtil, nimantzi tantiyas. ³⁹ Pero sinta Toteco quinnahuatía huan quinmacatoc inintamachtil, amo huelis anquitamiltise inintequi. Huan sinta ni itequi Toteco, ximotachilica amojuanti para amo ximotehuica ihuaya Toteco.

⁴⁰ Huan nochi tequichihuani quitacaquilijque cati quiijto. Huan quin-notzque nopa tayolmelahuani huan quinhuitejque, huan quinnahuatijque chichahuac para ma ayecmo más camanaltica ten Jesús, huan teipa quinma-cajque ma yaca. ⁴¹ Huan nopa tayolmelahuani quisque ipan nopa hueyi

tasentilisti ten tequichihuani yolpactoque pampa Toteco quincahuilijtoya taijyohuise pampa quineltocaj itequiticayo Jesús. ⁴² Huan mojmosta nopa tayolmelahuani tamachtijtinenque ipan hueyi israelita tiopamit huan ipan calme para Jesús eliyaya nopa Cristo cati Toteco Dios quijto huejcajquiya para quititanisquía.

6

Quintequitalijque chicome tapalehuiani

¹ Ipan nopa tonali momiyaquilijtiyahuiyayaj nopa taneltocani huan achi mocualanijque nopa israelitame cati camanaltiyayaj griego ica ne sequinoc israelitame cati camanaltiyayaj hebreo. Quijtohuayayaj nopa sihuame cati camanaltij griego cati mijque inihuehue amo quiseliyayaj ajstitoc cati quinpolohuayaya quej sihuame cati israelitame cati mijque inihuehue quiseliyayaj quema nopa taneltocani quinmajmacayayaj tacualisti mojmosta. ² Huajca nopa majtacti huan ome tayolmelahuani mosentilijque inihuaya nochi taneltocani huan quinilhuijque:

—Amo cuali tijcahuase titepohuilise Icamanal Toteco san para tiquintamacase toicnihua. ³ Huajca, noicnihua, xiquintapejpenica chicome toicnihua cati nochi quintepanitaj. Xiquintapejpenica tacame cati temitoque ica Itonal Toteco huan cati quiipiyaj cuali inintalnamiquilis. Huan tiquintalise ma quiyacanaca ni tequit para temajmacase tacualisti. ⁴ Huan tojuanti titayolmelahuani, noja timotatajtise ica Tohueyiteco huan titamachtise Icamanal.

⁵ Huan nochi nopa taneltocani quinpacti cati quijtojque. Huan quitapejpenijque Esteban cati motemachi miyac ipan Tohueyiteco huan itztoya temitoc ica Itonal. Nojquiya quintapejpenijque Felipe, Prócoro, Nicanor, Timón huan Parmenas. Huan nojquiya quitapejpenijque Nicolás se tacat ten altepet Antioquía huan yaya amo israelita. Achtohui quiselijtoyaj inintajcuilol ten Toteco nopa israelitame huan ama quineltocatoya Jesucristo.

⁶ Huan nopa taneltocani quinnextijque nopa chicome iniixpa nopa tayolmelahuani. Huan nopa tayolmelahuani motatajtijque ipan Toteco huan quitelijque inimax ininpani para ma quipehualtica inintequi.

⁷ Huan más momoyajqui icamanal Toteco huan tahuel más momiyaquilijtiyahuiyayaj taneltocani nopona ipan altepet Jerusalén. Huan nojquiya miyac israelita totajtzitzi quineltocaque Jesucristo.

Tacame quitaijyohuiltijque Esteban

⁸ Tahuel hueyi iyolo Toteco ica Esteban huan quimacac miyac chichahualisti para quichihuas tiochicahualnescayot huan tanextili iniixpa masehualme. ⁹ Pero se tonali sequij masehualme ten nopa israelita tiopamit cati inintoca Tequipanohuani Cati Majcajtoque monechcahuijque campa Esteban huan pejqque quinajnanquilíaj. Inijuanti itztoyaj israelitame cati ehuaní altepeme Cirene, Alejandría, Cilicia huan campa hueli ipan tali Asia.

¹⁰ Huan Esteban camanaltiyaya ica miyac talnamiquilisti cati Itonal Toteco quimacayaya huan inijuanti amo huelque quitanij. ¹¹ Huajca quintemojqque tacame huan quintaxtahuijque para ma quiistacahuica. Huan nopa istacatini quijtojque quicactoyaj quema Esteban quintajilhuijtoya Moisés huan Toteco. ¹² Huan quinyolajcomanque nopa israelitame, huan nopa huehue tacame huan tamachtiani ten itanahuatilhua Moisés. Huan quiztziqijque Esteban huan quihuicaque iniixpa nopa hueyi tasentilisti ten israelita tequichihuani. ¹³ Huan quintalijque nopa istacatini para quitelhuise huan quijtojque:

—Ni tacat Esteban talojtzitzi quitajilhuía ni hueyi tiopamit huan itanahu-
atilhua Moisés. ¹⁴ Nojquiya tijcactoque quema Esteban quijto para Jesús
cati ehuyaya altepet Nazaret quisosolosquía ni hueyi tiopamit huan
quipatasquía nopa tamachtili cati Moisés techcahuilijtejqei huejcajquiya.

¹⁵ Huan ipan nopa talojtzi nochi nopa tacame ipan nopa tasentilisti ten
tequichihuani quitachilijque ixayac Esteban huan quiiatque nesiyya quej
ixayac se ilhuicac ejquet.

7

Esteban tananquili

¹ Huajca camanaltic nopa hueyi totajtzi huan quitatzintoquili Esteban:

—¿Nelía tiquijtojtoc nochi ni tamanti?

² Huan Esteban quinanquili: “Noicnihua huan notatahua, techtacaquil-
ica. Toteco Dios, yaya cati quipiya ihueyitilis, monexti huejcajquiya iixpa
tohuejcapan tata Abraham quema itztoya ipan tali Mesopotamia, quema
ayemo yajtoya ipan altepet Harán. ³ Huan Toteco quiihui Abraham: ‘Xiquisa
ipan ni motal huan xiquinchahua mohuicalhua. Xiya ipan nopa tali campa
nimitznextiliti para tiitztos.’

⁴ “Huajca Abraham quisqui ipan nopa tali cati itoca Caldea, huan yajqui
altepet Harán. Huan nozona mijqui itata, huan Toteco Dios quihualicac
Abraham hasta ni tali campa tiitztoque ama. ⁵ Huan Toteco amo quimacac
Abraham se tali para iaxca, yon se pilquentzi. Pero Toteco quiténcahuili
quinmacasquía ni tali iteipan ixhuihua Abraham masque Abraham noja
ayemo quipiyyaya yon se icone. ⁶ Huan Toteco nojquiya quiihui Abraham
para iteipan ixhuihua itztose ipan seyoc tali para nahui ciento xihuit huan
amo quema huelis mochihuase quej cati nozona ehuan. Huan quijto
para masehualme cati nozona ehuan quintequipanoltisquía chicahuac
quej tequipanohuani cati iniaxchahua. Huan quiihui para cati nozona
ehuan tahuel quintaijyohuiltise. ⁷ Pero nojquiya Toteco quiihui Abraham:
‘Niquintatzacuiltis cati ehuan ipan nopa tali, huan teipa sempa quisase
mofeipan ixhuihua ten nopa tali huan injuanti nechhueyimatiqij nica.’

⁸ “Huan Toteco Dios quichijqui se camanal sencahuali ica Abraham huan
quimacac se tamachtili cati itoca circuncisión para ma quinquili ininpil-
tacayo nochi ioquichpilhua. Nopa machiyot quinextis para quinheltojac cati
Toteco quintencahuilijtoya. Huajca quema tacatqui Isaac, icone Abraham,
huan quipixtoya chicueyi tonati, quinquili nopa machiyot circuncisión ipan
ipiltacayo. Huan quema Isaac motacachijqui, tacatqui icone, Jacob. Huan
quema Jacob motacachijqui, tacatque majfacti huan ome iconehua. Huan
injuanti tohuejcapan tatahua nochi tiisraelitame.

⁹ “Huan iconehua Jacob quichicoitayayaj ica José, se iniicni, huan quin-
namaquiltijque sequij tacame cati quihuicaque ipan tali Egipto. Pero
Toteco Dios itztoya ihuaya José, ¹⁰ huan quimanahui quema taijyohuiyaya
huan quimacac miyac italnamiqulis. Huan Toteco quichijqui para nopa
Tanahuatijquet Faraón, cati tanahuatiyaya ipan nochi nopa tali Egipto,
ma quicualita José. Huan nopa tanahuatijquet quitali José para ma eli
gobernador ipan nopa tali Egipto hasta nojquiya quinnahuati nochi cati
itztoyaj ipan ichaj Faraón.

¹¹ “Teipa pejqei se hueyi mayanti ipan tali Egipto huan tali Canaán, huan
nochi taijyohuiyayaj. Huan tohuejcapan tatahua amo huelque quipantijque
cati quicuase. ¹² Pero Jacob quicajqui oncayaya tacualisti ipan tali Egipto,
huan quintitanqui itelpochahua, injuanti cati tohuejcapan tatahua, para ma

yaca nepa. Ya nopa elqui quema iyojyoc yajque tali Egipto. ¹³ Huan teipa inijuanti sempa yajque ica ompa. Huan José quinilhui para yaya iniicni huan quinnexiti iixpa Tanahuatijquet Faraón para yaya ma quinxmati iicnihua. ¹⁴ Huan José quinilhui iicnihua ma quinzatij inintata huan nochi ihualchua para ma hualaca tali Egipto. Huan setenta y cinco masehualme hualajque. ¹⁵ Yeca quej nopa tohuejcapan tata Jacob yajqui huan mocajqui ipan tali Egipto. Huan teipa Jacob mijqui nozona. Huan nojquiya teipa mijque nozona nochi tohuejcapan tatahua cati eliyayaj iconehua Jacob. ¹⁶ Huan teipa nopa israelitame quihuicaque nochi iniomiyo hasta altepet Siquem. Nepa quintalijque ipan se oston ipan tepet cati eltoya iaxca Abraham pampa quincouhili iconehua Hamor.

¹⁷ “Huan monechahuiyaya nopa tonali para Toteco quichihuas cati huejcayquiya quitencahuilijtoya Abraham para quichihuas huan quinxquixtis nopa masehualme ipan Egipto. Huan nopa israelitame nelia itztoyaj miyaqui pampa momiyaquilijtoyaj tahuel ipan Egipto. ¹⁸ Huan pejqui tanahuatia seyoc tanahuatijquet ipan Egipto cati amo quema quicactoya ten José pampa ya quipixtoya miyac xihuit ica mijqui José. ¹⁹ Huan nopa yancuic tanahuatijquet quincajcayajqui nopa israelitame cati itztoyaj tohuejcapan tatahua huan quintajyohuiliti miyac. Quinnahuati ma quinzahuelcahuaca ininpiloquichpilhua para ma miyuica.

²⁰ “Huan ipan nopa tonali tacatqui Moisés cati quipacti Toteco. Huan inana huan itata quiscaltijque eyi metzti ipan ininchaj. ²¹ Huan quema inana Moisés monejqui quitahuelcahuas ioquichpil para ma miqui, iichpoca nopa yancuic tanahuatijquet Faraón quipanti huan quihuicac ichaj huan quiscalti quej icone. ²² Yeca Moisés momachti nochi talnamiquilisti cati nopa egipcios quimatiyayaj. Huan Moisés hueliyaya camanalti cuali huan quipixqui yajatili quichihuas miyac tamanti tequit.

²³ “Pero quema Moisés quiaxiti cuarenta xihuit, quinequiyaya quinpaxaloti israelita icnihua. ²⁴ Huan quilitac se egipcio tacat quihuictequiyaya se tacat israelita. Huan Moisés quimanahui nopa israelita huan quimicti nopa tacat egipcio. ²⁵ Huan Moisés moilhuiyaya para nopa israelitame quimachilisquiaj para Toteco quititanto ya para quinxquixtisquia campata tetequimpanohuayaj san tapic, pero inijuanti amo quimachilijque. ²⁶ Huan tonili Moisés sempa yajqui quinpaxaloto nopa israelitame. Huan quinpancito ome israelita tacame motehuiyayaj. Huan quinequiyaya quinyoltalis huan quinilhui: ‘Tacame, anicnime, ¿para ten anmotehuiaj?’

²⁷ “Pero nopa tacat cati quimaquiliyaya ihuampo quicuatopejqui Moisés huan quihui: ‘¿Ajquiya mitztequimacatoc para technahuatiqui huan techtajtolsencahuajqui? ²⁸ ¿Tijnequi techmictis quej yalohua tijmicti nopa egipcio?’ ²⁹ Huan quema Moisés quicajqui cati nopa tacat quijto, cholotzejqui tahuel huejca hasta tali Madián. Mocajqui ipan nopa tali quej se sejoyoc ejquet, huan mosihuajti huan nozona tacatque ome iconehua.

³⁰ “Huan quema Moisés quipixtoya cuarenta xihuit ipan tali Madián, se tonali nejnemiyaya ipan nopa huactoc tali nechca nopa tepet cati itoca Sinaí. Huan monexiti se ihuicac ejquet iixpa ipan itilelemecyo se tit ipan se xihuitzontati cati tatayaya. ³¹ Huan quema Moisés quilitac, quitachili huan monechahui para cuali quitachilis. Huan nimantzi quicajqui itoscac Toteco cati quihui: ³² ‘Na niininTeco mohuejcapan tatahua. Na niininTeco Abraham, Isaac huan Jacob.’ Huan Moisés pejqui huihuipica pampa nelia

momajmati huan ayecmo quinejqui quitachilis. ³³ Huan Toteco Dios qui-ilhui: 'Xijquixti motecac pampa ni tali campa timoquetztoc tatzejtzeltoc pampa nica nojquiya na niitztoc. ³⁴ Na niquinita quenicatza taijyohuía j nomasehualhua nozona ipan tali Egipto, huan nijcactoc quema chocaj huan nitemotoc ten ilhuicac para niquinmanahuis. Huajca xiquita, ama nimitztitanis ipan tali Egipto para tiquinmaquixtis.'

³⁵ "Huajca Toteco sempa quititanqui ma yas Egipto nopa tacat Moisés cati nopa israelitame achtohui amo quinejque quiitase huan quiilhujtoyaj: '¿Ajquiya mitztequimacatoc para technahuati huan techtajtolsencahua?' Quena, ica se ilhuicac ejquet cati monexti iixpa ipan nopa xihuitzont, Toteco quititanqui Moisés ma yahui Egipto, pero ama quej se tanahuatijquet huan se tamanahuajquet. ³⁶ Huan Moisés quichijqui miyac tiochicahualnescayot huan tanextili ipan nopa tali Egipto, huan ipan nopa Hueyi At Chichiltic huan ipan nopa huactoc tali para cuarenta xihuit. Huan quinyacanqui nopa israelitame ma quisaca. ³⁷ Huan ni Moisés quinilhui nopa israelitame huejcajquiya: "Toteco amechtitanilis se tajtolpanextijquet quej nechtitantoc huan yaya elis se toisraelita icni." ³⁸ Yaya ni Moisés nojquiya cati itztoya ipan nopa tasentilisti ten tohuejcapan tatahua ipan nopa huactoc tali campa amo teno eli. Huan Moisés motajcoquetzqui ica nopa ilhuicac ejquet cati quicamanalhui ipan tepet Sinai huan tohuejcapan tatahua. Huan Moisés quiseli nopa camanali cati temaca nemilisti para ma techilhui tojuanti.

³⁹ "Pero tohuejcapan tatahua amo quinejque quitacaquilise Moisés huan moilhujque para cuali tacuepilisquía j ipan tali Egipto. ⁴⁰ Huajca tohuejcapan tatahua quiilhujque Aarón: "Techsencahuili dioses para techyacanase ipan ojti, pampa tojuanti amo tijmatij taya ipantic nopa Moisés cati techquixti ipan tali Egipto." ⁴¹ Huajca quichijque se tamanti ten oro para quihueyimatise huan quipixqui itachiyalis quej se pilhuacaxtzi. Huan quimacaque tacajcahualisti nopa teteyot huan quinpacti cati mosencahuilijtoyaj. ⁴² Huajca Toteco moiycatali ten injuanti huan quincahuili ma quinhueyimatica nopa sitalime ten ilhuicac. Eltoc quej nopa tajtolpanextiani quijcuilojque ipan nopa amatapohuali campa Toteco quinilhui: "Quema anisraelitame anquinmictiyayaj tapiyalme, huan antemacayayaj tacajcahualisti para cuarenta xihuit ipan nopa huactoc tali, amo na cati antechmacayayaj.

⁴³ Cati achi más anquicnelijque elqui amotaixcopincayo Moloc cati anquinejnemiltijque amohuaya ipan ipilchaj.

Huan anquihuicayayaj se sítali cati anmoilhujque eliyaya iaxca amoteteyo Renfán.

Pero san elqui taixcopinalme cati anquichijque ica amomax para anquinhueyimatise.

Huajca nimechquixtis ipan amotal huan nimechcahuati ipan seyoc nali nopa altepet Babilonia.' "

⁴⁴ Huan Esteban noja camanaltiyaya iniixpa nopa tequichihuani huan quinilhui: "Tohuejcapan tatahua quipixtoyaj nopa Yoyon Tiopamit cati quihuicaque inihuaya ipan nopa huactoc tali. Quisencajtoyaj nopa tiopamit senquisa quej nopa iixcopinca cati Toteco quinextili Moisés para ma quichihua. ⁴⁵ Huan teipa mijqui Moisés huan tohuejcapan tatahua quiselijque nopa Yoyon Tiopamit. Huan injuanti quihualicaque quema Josué quinyacanqui ma moaxcatca ni tali. Huan Toteco quinquixti nopa masehualme cati amo israelitame cati itztoyaj nica. Huan Toteco quinmacac ni tali tohuejcapan tatahua. Huan quipixtoyaj nopa Yoyon Tiopamit hasta nopa

tonali quema tanahuatiyaya David. ⁴⁶ Huan Toteco quicualitac David, huan David quinejqui quichihuas se hueyi cali para ma ipan itzto Toteco, cati iDios tohuejcapan tata Jacob. ⁴⁷ Pero elqui Salomón, icone David, cati quichijqui nopa cali para Toteco. ⁴⁸ Pero tijmatij nelía Toteco Cati Más Hueyi amo mocahua ipan se tiopamit cati masehualme quichijchijtoque ica inimax. Eltoc quej quijito se tajtolpanextijquet cati huejcajquiya quijcuilo ni camanali cati Toteco quijito:

⁴⁹ ‘Na nijtemitía ilhuicacti huan taltipacti.

Amo quema oncas se cali cati nechaxilis para ipan niitztos pampa ninel-hueyi.

¿Quenicatza huelis anquichihuase se cali para ipan nimosiyajquetzas?

⁵⁰ Na ica nomax nijchijqui nochi tamanti ipan ilhuicacti huan taltipacti.’

Quej nopa quijito Toteco.”

⁵¹ Huan Esteban quinilhui nopa tequichihuani: “¡Anyoltetique! Ipan amoyolo amo anquiixmatij Toteco. Amo anquinequij anquicaquise cati melahuac. Nochipa anquihuejcamajcahuaj Itonal Toteco. Anquichihuaj cati amo cuali san se quej tohuejcapan tatahua quichijque huejcajquiya.

⁵² Tohuejcapan tatahua quintaijyohuiltijque senquisa nochi nopa tajtolpanextiani. Quinmictijque nopa tajtolpanextiani cati quinyolmelajque para teipa hualasquía Yaya Cati Xitahuac cati Toteco techtitanilisquía. Huan quema nopa Cristo ajsico, anquitemactilijque ica fiero masehualme huan anquimictijque. ⁵³ Amo anquinequij anquintoquilise itanahuatilhua Moisés masque elque ilhuicac ehuan cati techmacaque nopa tanahuatilme.”

Mijqui Esteban

⁵⁴ Huan quema quicajque nopa tequichihuani cati Esteban quijito, tahuel cualanque hasta motanhuehuechotzque. ⁵⁵ Pero Esteban temitoc ica Itonal Toteco, tachixqui ilhuicac. Huan quitaic ihueyitilis Toteco Dios huan quitaic Jesús ijcatoya ica inejmat Toteco. ⁵⁶ Huajca Esteban quijito:

—¡Xijtachelica! Na niquita tapojtoc ilhuicac huan Jesús cati Mocuetqui Masehuali ijcatoc ica inejmat Toteco Dios.

⁵⁷ Pero nopa tacame tzajtziqque chichahuac huan monacastzajque para ayecmo quicaquise cati Esteban quijitohuayaya. Huan nochi motalojque huan quitzquijque. ⁵⁸ Huan quihuicaque Esteban altepeteno huan quitepachojque. Huan nopa tacame cati quitelhuijtoyaj para ma miqú quicajtejqque iniyoyo ica se telpoca tacat cati itoca Saulo para ma quimocuitahui. ⁵⁹ Huan noja quitepachohuayayaj quema Esteban quitzajtzilí Tohueyiteco huan quihui: “Tohueyiteco Jesús, xijseli notonal.”

⁶⁰ Huan teipa Esteban motancuaquetzqui huan chichahuac quijito: “Tohueyiteco, xiquintapojpolhui ni tajtacoli cati nechchihuiliáj.” Huan quema Esteban tanqui camanalti, mijqui.

8

Saulo quincualancaitac taneltocani

¹ Huan Saulo quinyolchichahuayaya nopa tacame cati quimictijque Esteban. Huajca ipan nopa tonali miyac masehualme pejque quintaijyohuiltíaj cati itztoyaj ipan nopa tiopamit ten taneltocani ipan altepet Jerusalén. Huajca nopa taneltocani mosejsemanque campa hueli ipan nopa estado Judea huan ipan estado Samaria. Huan mocajque ipan altepet Jerusalén san nopa tayolmelahuani. ² Huan sequij tacame cati quiiicnelíaj Toteco quitalpachojque Esteban huan choaque miyac pampa mijqui. ³ Pero Saulo

pejqui quintojtoca huan chichahuac quintaijyohuiltía nochi Toteco itiopa ten taneltocani. Calaquiyaya ipan sesen cali campa mosentiliyayaj huan quinquahuatatzayaya tacame huan sihuame para quinquhuicase quintzacuase.

Felipe tepohuili icamanal Toteco ipan Samaria

⁴ Huan nopa taneltocani cati mosejsemantoyaj ten Jerusalén, yajque campa hueli altepeme huan teilhuijque icamanal Toteco huan quenicatza Jesús temaquixtía. ⁵ Huan Felipe yajqui altepet Samaria huan quincamanalhui miyac masehualme para Jesús itztoya nopa Cristo cati Toteco quititan-toya. ⁶ Huan Felipe tamachtiyaya huan quichihuayaya miyac huejhueyi tanextili. Huan miyac masehualme mosentiliyayaj para quicaquise cati quijitohuayaya huan quitachilise cati quichihuayaya. ⁷ Huan quinchicahuayaya miyac cati quinpixtoyaj iajacahua Amocualtat. Huan nopa ajacame tzajtzayaj chichahuac quema quisayaj ipan inintacayo masehualme. Huan quinchicajqui miyac masehualme cati metzhuapactique huan cati metzcuachotique. ⁸ Huan yeca oncac se hueyi paquilisti ipan nopa altepet.

⁹ Huan itztoya nozona se tacat itoca Simón cati ten huejcajquiya momajtoya tequití quej se tenahualhuijquet ipan nopa altepet. Huan quincacajtoyaya miyac masehualme ipan nopa estado Samaria. Teilhuiyaya para quipiyayaya hueyi tequiticayot. ¹⁰ Huan nochi tacame huan sihuame nozona masque teicneltzitzí o tominpiyani momajtoyaj quitacaquilíaj huan quijitohuaj ten ya: “Ni Simón yaya nopa Hueyi Chichahualisti Ten Toteco.”

¹¹ Huan nochi quitoquilijque Simón pampa para miyac xihuit quincacajtoyaya ica cati quichihuayaya quema tenahualhuiyaya. ¹² Pero quema Felipe ajsico, masehualme quicajque nopa cuali camanali ten Jesucristo huan itequiticayo huan quenicatza elis ipan itanahuatilis Toteco. Huan miyac masehualme quineltoaque huan miyac mocuaaltijque, tacame huan sihuame. ¹³ Huan Simón nojquiya quineltoac huan nojquiya mocuaalti huan pejqui nemi ihuaya Felipe. Huan Simón san quitachiliyaya nopa tanextili huan huejhueyi tiotchichahualnescayot cati Felipe quichihuayaya.

¹⁴ Huan quema nopa tayolmelahuani ipan altepet Jerusalén quicajque para miyac masehualme ipan estado Samaria quiselijtoyaj icamanal Toteco, quintitanque Pedro huan Juan ma yaca nozona. ¹⁵ Huan Pedro huan Juan ajsitoj huan motatajtijque para nopa taneltocani ma quiselica Itonal Toteco. ¹⁶ Ayemo ajsitoya Itonal Toteco ipan iniyolo, pampa san mocuaaltijque ica itequiticayo Jesús para quitoquilise ya. ¹⁷ Huajca Pedro huan Juan pejqe quintalilíaj inimax ininpani huan nopa taneltocani quiselijayaj Itonal Toteco ipan iniyolo.

¹⁸ Huan Simón quitiac quenicatza nopa tayolmelahuani quintaliliyayaj inimax ininpani masehualme huan quiselijayaj Itonal Toteco, huan nojquiya quinejqqui quichihuas. Huajca quincuitahuiltili tomi Pedro huan Juan para ma quimacaca nopa chichahualisti. ¹⁹ Quinilhui:

—Techmacaca ni chichahualisti nojquiya para nihuelis nijtalis nomax ipan ten hueli masehuali huan yaya quiselis Itonal Toteco.

²⁰ Huan Pedro quihui:

—Ma Toteco mitztzontamilti ihuaya motomi pampa timoilhuía huelis tijcohuas nopa cati san Toteco hueli temaca quej se nemacti. ²¹ Amo teno tijpiya ihuaya ni tequit pampa amo cuali moyolo iixpa Toteco. ²² Huajca xijpata moyolo huan xijcahua nopa tajtacoli. Huan xijtajtani Toteco ica nochi moyolo sinta huelis mitztaojpolhuis ica cati timoyolihuijtoc ipan moyolo,

²³ pampa niquita taniel tucalancamictinemi huan tajtacoli moilpitoc ipan moyolo.

²⁴ Pero Simón quihui Pedro:

—Xijtatanica Toteco ma nechtaojpolhui para amo nechzontamiltis quej tiqijtojtoc.

²⁵ Huan nopa tayolmelahuani tepohuilijque icamanal Toteco huan teilhuijqe cati quihuitoyaj. Huan teipa tacuepilijqe ipan altepet Jerusalén. Huan ipan ojti quipanotiyajque miyac pilalfepetzitzi ipan estado Samaria huan nepa nojquiya tayolmelahuayaj icamanal Toteco.

Felipe ihuaya se tacat cati ehua Etiopía

²⁶ Teipa ajsico se ihuicac ejquet ten Toteco huan quihui Felipe: “Xiya ica tatzinta hasta nopa ojti cati quisa Jerusalén huan pano ipan nopa huactoc tali huan yahui hasta Gaza.”

²⁷ Huajca Felipe nima quistejqei. Huan nozona quipanti se eunuco tacat cati elqui se ihueyi tequitica nopa sihua tanahuatijquet Candace ipan tali Etiopía. Yaya cati quimocuitahui nochi itomi nopa hueyi tali. Nopa tacat yajtoya Jerusalén para quihueyimatis Toteco, ²⁸ huan tacuepiliyaya ital ipan se cuacarro cati cahuayojme quitlanayaj. Huan ipan ojti quipojtiyahuiyaya nopa amat cati quihuculo nopa tajtolpanextijquet Isaías huejcajquiya. ²⁹ Huan Itonal Toteco quihui Felipe:

—Xiya, xijnechcahui nopa cuacarro.

³⁰ Huan Felipe quinechcahui huan quicajqui quipohuayaya iama Isaías. Huan Felipe quitatzintoquili:

—¿Tijmachilía cati tijpohua?

³¹ Huan nopa tacat quihui:

—Amo huelis nijmachilis sinta amo aqui nechxtomilis.

Huan quihui Felipe ma tejqo huan ma mosehui ihuaya ipan icuacarro.

³² Huan yaya quipohuayaya ipan Icamanal Toteco campa quihitohua:

“Tacame quihucase quej quihucicaj se borrego para quimictise.

Huan quej se pilborregoxtzi amo tzajtzi quema masehualme quiximaj, nojquiya amo teno quihitjos quema quihucase para quimictise.

³³ Quipinahualtise huan amo quichihuilise cati xitahuac.

Amo aqui huelis camanaltis ten iteipan ixhuihua,

pampa amo quinpiyas.

Quimictise huan yaya quisas ipan totaltipac.”

³⁴ Huan nopa eunuco tacat quitatzintoquili Felipe:

—Techihui sinta nopa tajtolpanextijquet camanaltiyaya ten ya ipan-tisquía, o camanaltiyaya ten seyoc ipantis.

³⁵ Huajca Felipe pejqei campa quipohuayaya ipan Icamanal Toteco huan quiyolmelajqui nopa cuali camanali ten Jesús. ³⁶ Huan yajtiyahuiyayaj ipan ojti, huan ajsitoj campa se mantoc at huan nopa tacat quihui Felipe:

—Xiquita, nica onca at. ¿Huelis techcuaaltis?

³⁷ Huan Felipe quinanquili:

—Sinta tijneltoca ica nochi moyolo, nimitzcuaaltis.

Huan nopa tacat quihito:

—Nijneltoca para Jesucristo yaya Icone Toteco.

³⁸ Huajca Felipe quihui ma quiquetza icuacarro. Huan temoque nochi ome san sejqo huan calajque ipan nopa at huan Felipe quicuaalti. ³⁹ Huan quema injuanti quisayayaj ipan at, Itonal Toteco quihucac Felipe, huan nopa tacat ayecmo quihitac, pero yajqui ipan iojhui ica paquilisti. ⁴⁰ Huan

Felipe mopanti ipan altepet Azoto. Huan quinpanotiyajqui miyac altepeme tepohuilijtijajqui icamanal Toteco hastaajsito altepet Cesarea.

9

Saulo quineltocac Tohueyiteco (Hch. 22:6-16; 26:12-18)

¹ Huan Saulo noja huejchijtinemiyaya campa hueli para quintemajmatis taneltocani. Quinequiyaya quinmictis nochi cati quinpanitayaya. Huajca yajqui quiitato nopa hueyi israelita totajtzi. ² Huan quitajtani ma quimaca amatajcuiloli para nochi israelita tiopame ipan altepet Damasco. Nopa amatajcuiloli quimacac tequiticayot para quintemos nochi tacame huan sihuame cati quitoquiliyaya “Nopa Ojti”, quinequi quijitos masehualme cati quineltocayayaj Jesús, huan quinhualicas ilpitoque hasta altepet Jerusalén. ³ Huajca teipa Saulo nejnemiyaya ipan ojti ipan itequi huan monechcahuiyaya Damasco, huan nimantzi tatanexti se hueyi taahuili ten ilhuicac cati tatanexti yahualticampa ya. ⁴ Huan Saulo huetzqui talchi huan quicajqui se cati quicamanalhui huan quihui: “Saulo, Saulo, ¿para ten techtaijyohuiltía?”

⁵ Huan Saulo quitatzintoquili: “¿Ajquiya ta, noTeco?”

Huan yaya quihui: “Na niJesús cati techtaijyohuiltía. Nelía timotaijyohuiltía moselti.”

⁶ Huan Saulo momajmatiyaya hasta huihuipicayaya huan quijto: “NoTeco, ¿taya tijnequi ma nijchihua?”

Huan Toteco quihui: “Ximoquetza huan xicalaqui ipan nopa altepet. Huan se tacat mitzilhuis taya monequi tijchihuas.”

⁷ Huan nopa tacame cati itztoyaj ihuaya Saulo momajmatijque hasta amo huelque moliníaj, pampa quicajque itoscac yaya cati quicamanalhui, pero amo aqui quiitaque. ⁸ Huajca Saulo moquetzqui, huan ixtapojqui, pero amo hueliyaya tachiya. Huajca nopa tacame cati itztoyaj ihuaya quimaitzquijque huan quihuicaque Damasco. ⁹ Huan mocajqui popoyotzi eyi tonati huan amo teno quicujajqui, yon amo teno quic.

¹⁰ Huan itztoya nopona Damasco se taneltocaquet cati itoca Ananías. Huan Tohueyiteco quinotzqui ipan se temicti huan quihui: “Ananías.”

Huan ya quinanquili: “Nica niitztoc, Toteco.”

¹¹ Huan Tohueyiteco quihui: “Ximoquetza huan xiya ipan nopa calle cati itoca ‘Xitahuac’. Huan xijtemoti se tacat cati itoca Saulo cati ehua altepet Tarso. Yaya itzoc ichaj Judas huan ama motatajtía ica na. ¹² Huan ipan se temicti Toteco quinextilijtoc paraajsiti se tacat itoca Ananías huan quitalis imax ipani para huelis tachiyas sempa.”

¹³ Pero Ananías quinanquili:

—Tohueyiteco, nijcactoc miyac tamanti cati quichijtoc nopa Saulo, pampa quintaijyohuiltijtoc miyac taneltocani nepa Jerusalén. ¹⁴ Huan ama nopa tayacanani ten totajtzi quimacatoque tequiticayot nica ipan toaltepe para ma techilpi nochi tojuanti cati timotatajtíaj ica ta.

¹⁵ Pero Tohueyiteco quihui Ananías:

—Xiya, pampa nijtapejpenijtoc para nijtequihuis Saulo para quinilhuis masehualme cati amo israelitame nocamanal. Nojquiya quinilhuis huejhueyi tanahuatiani huan israelitame ten na. ¹⁶ Huan na nijnextilis Saulo quenicatza monequi taijyohuis miyac pampa necheltoca*.

* 9:16 9:16 Por notoca.

¹⁷ Huajca yajqui Ananías huan calaquito ipan nopa cali campa Saulo itztoya, huan quitali imax ipani huan quihhui:

—Noicni Saulo, Tohueyiteco Jesús cati monexti moixpa ipan ojti campa tihualayaya, nechtitanqui nica para huelis titachiyas sempa huan para miztemitis ica Itonal Toteco.

¹⁸ Huan ipan nopa talojtzi huetzqui se tamanti cati quitzacuayaya iixteyol, huan sempa huelqui tachiya cualí. Huajca Saulo moquetzqui huan yajqui mocuaalito. ¹⁹ Teipa tacuajqui huan sempa quipixqui tetili. Huan mocajqui se ome tonal ipan altepet Damasco inihuaya taneltocani.

Saulo tacamanalhui ipan Damasco

²⁰ Huan Saulo nima pejqui tacamanalhuía ipan israelita tiopame. Quinilhuiyaya para Jesús yaya Icone Toteco.

²¹ Huan nochi cati quicajque san quitachilijque huan quijtohuayayaj: —¿Amo ya ni Saulo cati quintajyohuiltiyaya nochi cati quineltocaj Jesús ipan altepet Jerusalén? ¿Amo ya cati hualajtoc nica para quinitzquis taneltocani huan quinhuicas ilpitoque hasta Jerusalén para quintemactilis inimaco nopa tayacanani ten tofajtzitzi?

²² Huan mojmosta Saulo quipixqui más chichahualisti para quinyolmelahuas israelitame ipan altepet Damasco ten Jesús. Huan quinnextili ica miyac tamanti para Jesús itztoya nopa Cristo cati Toteco quijto quititanisquía. Huan nopa israelitame amo quimatiyayaj taya moilhuse.

Saulo quisqui Damasco huan cholo

²³ Huan quema panoc miyac tonali, nopa tayacanca israelitame quisencajque san sejco quenecatza quimictisquíaj Saulo. ²⁴ Pero Saulo quicajqui cati nopa tacame moyolilhuiyayaj huan quimatqui quichiyayayaj tonaya huan tayohua ipan icalte nopa altepet para quimictise. ²⁵ Huajca nopa taneltocani quitajijque Saulo ipan se hueyi cuachiquihuit huan ica tayohua quitemohuijque campa coyontoya nopa tepamit cati quiyahualtzajqui nopa altepet. Huan ijquiya nopa Saulo huelqui cholo.

Saulo ajsito ipan Jerusalén

²⁶ Huan Saulo ajsito altepet Jerusalén huan quinequiyaya mosentilis inihuaya taneltocani nopona, pero nochi quimacasiyayaj pampa amo quineltocaque sinta nelía Saulo ama quineltocatoya Jesús. ²⁷ Huajca Bernabé quihuicac Saulo inixpa nopa tayolmelahuani huan quinilhui quenecatza quijtoya Tohueyiteco ipan ojti. Quinilhui nochi cati Jesús quihhuijtoya huan quenecatza Saulo ica miyac chichahualisti tepohuilijyaya ten Jesús ipan altepet Damasco. ²⁸ Huan nopa tayolmelahuani quiselijque Saulo, huan teipa yaya mocajqui Jerusalén huan mojmosta nejnenqui campa hueli inihuaya nopa tayolmelahuani. ²⁹ Huan Saulo moneltali para quinilhuis nochi masehualme ten Tohueyiteco Jesús. Huan miyacapa Saulo quincamanalhui huan quinnajnanquili nopa israelitame cati camanaltij griego; pero injuanti quitemohuayayaj quenecatza huelisquía quimictise. ³⁰ Huan quema quicajque nopa taneltocani taya quisencahuayayaj, quihuicaque Saulo hasta altepet Cesarea huan teipa quititanque hasta altepet Tarso.

³¹ Huajca oncac tasehuilisti para nochi tasentilisti ten taneltocani nepa ipan estados Judea, Galilea, huan Samaria. Huan nopa taneltocani moscajtijyahuiyayaj ipan Tohueyiteco huan quimacasiyayaj para quixpanose. Huan más momiyaquiliyayaj pampa Itonal Toteco quinyolchichahuayaya.

Mochicajqui Eneas

³² Huan Pedro quinpaxalojtinenci taneltocani campa hueli huan nojquiya yajqui quinpaxaloto nopa taneltocani cati itztoyaj ipan se pilaltepetzti cati itoca Lida. ³³ Huan nozona quipanti se tacat cati itoca Eneas. Yaya quipixqui chicueyi xihuit huilantoya ipan itapech pampa metzhuapactic. ³⁴ Huan Pedro quihui:

—Eneas, Jesucristo mitzchicahua. Ximijquehua huan xijcualtali moapech.

Huan nimantzi mijquejqui, ³⁵ huan quitaque nochi nopa masehualme cati itztoyaj ipan nopa pilaltepetzti Lida huan Sarón. Huan yeca nochi moyolpataque huan quitoquilijque Tohueyiteco Jesús.

Moyolcuic Dorcas

³⁶ Huan ipan nopa tonali itztoya ipan altepet Jope se sihuat cati quito-caxtiyayaj Tabita cati quineltocac Tohueyiteco huan ipan camanali griego itoca eliyaya Dorcas. Yaya nochipa quichihuayaya miyac tamanti cati cuali para quinpalehuis sequinoc cati quinpolohuayaya cati ica panose.

³⁷ Huan ipan nopa tonali pejqqui mococohua Dorcas huan teipa mijqui. Huan quipajpajque itacayo huan quitallitaj ipan se cuarto ipan seyoc piso ipan nopa cali. ³⁸ Huan nopa altepet Jope mocahua nechca pilaltepetzti Lida, huan nopa taneltocani quicajque para Pedro itztoya ipan Lida. Yeca quintitanque ome tacame ma quihuitij Pedro ma huala nimantzi.

³⁹ Huajca Pedro hualajqui inihuaya hasta altepet Jope. Huan nimantzi quihuaicque ipan nopa cuarto campa quicajtoyaj nopa mijcatzi. Huan itztoyaj nozona miyac sihuame cati mijque inihuehue cati chocayayaj huan quinextiliyayaj nochi yoyomit cati Dorcas quiniptomilijtoya. ⁴⁰ Huajca Pedro quinihui ma quisaca, huan motancuaquetzqui huan motatajti ica Toteco. Teipa moicancuetqui huan quitachili nopa mijcatzi huan quihui:

—Tabita, ximijquehua.

Huan Dorcas quitapo iixteyol, huan quiitac Pedro huan mosehui. ⁴¹ Huan Pedro quimaitzqui huan quitananqui para ma moquetza. Huan quinnotzqui nopa taneltocani huan nopa sihuame icnotziti, huan quinnextili para ya yoltoc. ⁴² Huan nochi masehualme ipan altepet Jope quicajque ten panoc huan miyac quineltocaque Tohueyiteco. ⁴³ Huan Pedro mocajqui miyac tonali nozona Jope ipan ichaj se cuetaxhuatzquet cati quitocaxtiyaya Simón.

10

Pedro ihuaya Cornelio

¹ Huan itztoya ipan altepet Cesarea se tacat cati itoca Cornelio cati quinahuatiyaya se pamit ten cien soldados cati quitocaxtiyayaj Pamit Italiano. ² Huan yaya huan ihuicalhua quitepanitaque Toteco Dios huan momocuitahujque para amo quixpanose. Quinmacac miyac tomi israelitame cati teicneltziti masque yaya amo israelita. Huan yaya talojtziti motatajtiyaya. ³ Huan se tonali nechca las tres ica tiotac Cornelio tanemijya quiitac se ihuicac ejca Toteco ipan se tanextili quej se temicti huan nopa ihuicac ejquet calajqui ipan nopa cuarto campa Cornelio itztoya huan quijto: “¡Cornelio!”

⁴ Huan Cornelio quitachili ica majmajti huan quitatzintoquili: “¿Taya tijnequi, tate?”

Huan nopa ihuicac ejquet quihui: “Toteco quicactoc quema motatajtía ica ya huan quiitztoc nochi cati tijchihua para tiquinpalehuis cati teicneltziti. ⁵ Ama xiquintitani tacame ma yaca ipan altepet Jope, huan ma

quintozaca se tacat cati quitocaxtiyayaj Simón Pedro. ⁶ Yaya mocahua nechca hueyi at ipan ichaj se cuetaxhuatzquet cati nojquiya itoca Simón. Huan yaya mitzilhuis taya monequi tijchihuas.”

⁷ Huan yajqui nopa ilhuicac ejquet. Huan nimantzi Cornelio quinnotzqui ome itequipanojcahua, huan quinnotzqui se soldado cati eliyaya itamocuitahuijca huan cati quitepanitayaya Toteco nojquiya. ⁸ Huan Cornelio quinilhui nochi cati quiitztoya huan quintitanqui altepet Jope.

⁹ Huan tonili quema nopa tacame monechcahuiyayaj campa nopa altepet, Pedro tejcoc calcuitapa campa tzontamayantic pampa eliyaya nechca tajcotona, nopa hora para motatajtis ica Toteco. ¹⁰ Huan Pedro mayanayaya huan tahuel quinequiyaya tacuas, pero nopa sihuame noja quichihuayayaj nopa tacualisti. Huan elqui quej Pedro pejqui cochi huan quiitac se tanextili quej se temicti. ¹¹ Huan quiitac tapojtoc ilhuicac huan hualtemoc talchi se tamanti quej se hueyi yoyomit ilpitoc najcac ipan iyecapa. ¹² Huan nopa hueyi yoyomit quinpixtoya miyac tamanti tapiyalme cati nejnemij talchi ica nahui iniicxihua, huan miyac tamanti cohuame huan miyac totome. ¹³ Huan Pedro quicajqui se cati quicamanalhui ten ilhuicac huan quiilhui: “Ximoquetza Pedro, xiquinmicti nopa tapiyalme huan xiquincua.”

¹⁴ Huan Pedro quinancuili: “¡Amo, Toteco! Amo quema niquincuajtoc tapiyalme cati toisraelita tanahuatilhua quiijtohua amo tapajpacme huan amo cuali tijcuase.”

¹⁵ Huan sempa quicamanalhui ten ilhuicac huan quiilhui: “Sinta nimoTeco nijtapajpacchijtoc se tamanti, amo xiquijto para amo tapajpacti.”

¹⁶ Huan quej nopa panoc expa huan nimantzi nopa hueyi yoyomit sempa tejcoc ilhuicac. ¹⁷ Huan quema Pedro noja moyolilhuiyaya taya quiijtosnequi nopa tanextili, ajsicoj calteno nopa tacame cati Cornelio quintitan-toya huan tatzintocatinemiyayaj canque ichaj Simón. ¹⁸ Huan tanojnotzque huan tatzintocaque: “¿Nica mocahua se tacat cati quitocaxtiaj Simón Pedro?”

¹⁹ Huan Pedro noja moilhuiyaya ten nopa temicti huan Itonal Toteco quiilhui: “Xiquita, eyi tacame mitztemohuj. ²⁰ Ximoquetza huan xitemo huan xiya inihuaya. Amo ximajmahui pampa na niquinhualiac nica.”

²¹ Huajca Pedro temoc hasta campa itztoyaj nopa tacame cati Cornelio quintitantoya huan quinilhui:

—Na cati antechtemohuj. ¿Para ten anhualajtoque?

²² Huan injuanti quinancuilijque:

—Cornelio, se tayacanquet ten cien soldados, techhualtitantoc. Yaya se cuali tacat cati quitepanita Toteco amoDios anisraelitame huan nochi israelitame quiicneliaj miyac. Huan hualajqui se ilhuicac ejquet cati tatzejtzeloltic huan quiilhui Cornelio para ma mitznotzaqui, Pedro, para tiyas ichaj para huelis quitacaquilis cati tiquilhuis.

²³ Huajca Pedro quinilhui nopa tacame ma panoca. Huan nozona tonilitoj. Huan tonili Pedro yajqui inihuaya. Huan nojquiya yajque sequij taneltocani cati ehuan altepet Jope.

²⁴ Huan ipan seyoc tonali ajsitoj altepet Cesarea huan Cornelio quinchixtoya. Yaya quinnotztoya ihuicalhua huan ihuampoyohua cati más quinixmatiyaya huan nochi quinchiyayayaj san sejco. ²⁵ Huan quema Pedro ajsito, Cornelio quinamijqui huan motancaquetzqui iicxita para quihueyimatis.

²⁶ Pero Pedro quitananqui huan quiilhui:

—Ximoquetza, amo ximotancaquetza noixpa pampa na nojquiya nitacat quej ta.

²⁷ Huajca Cornelio moquetzqui, huan mocamanalhuijque huan calajque ichaj. Huan Pedro quinitac ya mosentilijtoyaj miyac masehualme. ²⁸ Huajca Pedro quinilhui:

—Anquimatij itanahuatilhua Moisés quijtohuaj amo cuali para se israelita quej na ma mosentili inihuaya cati amo israelitame quej amojuanti. Yon amo techcahuilía para se israelita calaquis ipan ichaj se masehuali cati amo israelita. Pero Toteco nechnextilijtoc ayecmo ma nimoilhui para yon se masehuali amo tapajpacti iixpa. ²⁹ Yeca nihualajqui nimantzi quema antechnotzque huan amo teno niqijto. Huan ama nijnequi nijmatis para ten antechnotztoque.

³⁰ Huan Cornelio quilhui:

—Nayopaya nimosahuayaya huan ni nimotatajtiyaya ica Toteco quej ni hora, huan teipa a las tres monexti noixpa se ilhuicac ejquet cati quipixtoya iyoyo cati cahuaniyaya. ³¹ Huan yaya nechilhui: ‘Cornelio, Toteco quicactoc quema timotatajtía ica ya huan quiitztoc quenicatza tiquinpalehuía masehualme cati teicneltziti. ³² Huajca ama xiquintitani motequipanojcahua hasta altepet Jope ma quinotztajij Simón Pedro. Yaya itztoc ipan ichaj se cuetaxhuatzquet cati nojquiya itoca Simón cati quipiya ichaj nechca hueyi at.’ ³³ Huajca nimitznotzqui nimantzi huan nimitztascamati pampa tihualajqui. Huajca ama nochi tiztzoque nica iixpa Toteco pampa tijnequij tijaquise nochi cati Toteco mitzilhuijtoc para techilhuis.

Pedro camanaltic ipan ichaj Cornelio

³⁴ Huajca Pedro quinilhui:

—Nelía nijmati Toteco amo techchicoicnelía timasehualme. ³⁵ Huan ipan campa hueli tali yaya quinselía nopa masehualme cati quitepanitaj huan cati quichihuj cati cuali. ³⁶ Huelis anquimatij para Toteco techitaniili tiisraelitame ni cuali camanali cati quijtohua para ama onca tasehuilisti ica Toteco Dios. Huan onca nopa tasehuilisti por cati quichijqui Jesucristo, yaya cati inihueyiTeco nochi masehualme. ³⁷ Ya anquimatij quenicatza pejqui ni camanali achtohui ipan estado Galilea quema Juan tepohuiliyaya huan tecuaaltiyaya huan anquimatij cati teipa panoc ipan nochi estado Judea. ³⁸ Nojquiya anquimatij ten Jesús ten altepet Nazaret cati Toteco quialti huan quitequitali, huan quimacac Itonal huan miyac chichahualisti. Huan anquimatij quenicatza Jesucristo campa hueli tepalehuijtinengui huan quenicatza quinchicajqui cati taijyohuiyayaj ica iajacahua Amocualtatcat pampa Toteco Dios itztoya ihuaya Jesús.

³⁹ “Tojuanti titayolmelahuani toselti tiquitaque nochi cati Jesús quichijqui ipan tali Judea huan ipan altepet Jerusalén, huan yeca titeyolmelahuaj cati panoc. Huan tacame quicuamapeloltijque Jesús huan yaya mijqui. ⁴⁰ Pero quema panotoya eyi tonati, Toteco Dios quiyolcuic, huan quicahuili Jesús ma monexti. ⁴¹ Pero amo quincahuili nochi masehualme ma quiitaca. San techcahuili tojuanti cati Toteco Dios techtapejpenijtoya huejcajquiya para tiquitase. Huan titacuajque huan tiatique ihuaya quema ya moyolcuitoya. ⁴² Huan teipa Jesús technahuati ma tiquincamanalhuitij nochi masehualme ten ya. Techilhui ma tiquinyolmelahuaca para yaya Jesús cati Toteco Dios nelía quitequitalijtoc para elis nopa Juez cati quintajtolsencahuas masehualme cati itztoque huan cati mictoque. ⁴³ Yaya Jesús cati ica tajcuilojque nochi nopa tajtolpanextiani. Inijuanti quijtojque, por Jesús, Toteco Dios quintapojpolhuisquía inintajtacolhua nochi masehualme cati quineltocase.”

Masehualme cati amo israelitame quiselijque Itonal Toteco

⁴⁴ Huan quema Pedro noja quinilhuyaya ni camanali, Itonal Toteco hualajqui huan calajqui ipan iniyolo nochi nopa masehualme cati quitacaquiliyayaj. ⁴⁵ Huan nochi israelita taneltocani cati hualajtoyaj ihuaya Pedro san quintachilijque huan quitetzaitayaya pampa Toteco Dios quinmacayaya Itonal quej se nemacti nochi nopa masehualme cati amo israelitame. ⁴⁶ Huan quimatque para temacti elqui Itonal Toteco pampa quicaquiyayaj nopa masehualme camanaltiyayaj ica sequinoc camanali cati amo momachtijtoyaj huan quipaquilismacayayaj Toteco. ⁴⁷ Huajca Pedro quinilhui nopa israelitame cati hualajtoyaj ihuaya:

—¿Ajquiya huelis quijtos ma amo tiquincuaaltise ni masehualme cati quiselijtoque Itonal Toteco ipan iniyolo quej tojuanti nojquiya tijselijque achtohuiya?

⁴⁸ Huan Pedro quinnahuati ma quincuaaltica ipan itoca* Jesucristo. Huan teipa nopa masehualme quitajtanijqe Pedro ma mocahua inihuaya se ome tonali.

11

Pedro quincamanalhui taneltocani nopona Jerusalén

¹ Teipa nopa tayolmelahuani huan sequinoc taneltocani cati itztoyaj campa hueli ipan estado Judea quicajque quenicatza masehualme cati amo israelitame nojquiya quiselijtoyaj icamanal Toteco. ² Huan quema Pedro tacuepili ipan altepet Jerusalén, sequij nopa israelita taneltocani pejqe quinajnanquilíaj. ³ Quiilhuyayaj:

—¿Para ten tiquinpaxoloto huan ticalajqui ipan ininchaj masehualme cati amo israelitame huan hasta titacujqui inihuaya?

⁴ Huajca Pedro pejqe quinpoahuilí nochi cati panotoya huan quinilhui:

⁵ —Niitzoaya ipan altepet Jope huan nimotatajtiyaya ica Toteco. Huan niqitac ipan se tanextili quej se temicti, hualtemoyaya ten ilhuicac se hueyi yoyomit ilpitoc najcac iyecapa huan nechnechahui. ⁶ Huan nijtachili huan niqunitac miyac tapiyalme cati nejnemij ipan tali ica nahui iniicxihua, huan miyac cuatitan tapiyalme, huan cohuame huan totome. ⁷ Huan nijcajqe se cati nechcamanalhui huan nechilhui: ‘Ximoquetza Pedro, xiquinmicti nopa tapiyalme huan xiquincua.’

⁸ “Huan na nijnanquili: ‘¡Amo, noTeco! Amo quema niquincuaajtoc tapiyalme cati amo tapajpacme o cati totanahuatilhua tiisraelitame quijtohuaq amo cuali tiquincuaase.’

⁹ “Huan ica ompa nopa cati nechcamanalhui ten ilhuicac nechilhui: ‘Amo xiquijto para amo tapajpacti cati nimoTeco nijtapajpacchijtoc.’ ¹⁰ Huan quej ni panoc expa huan sempa tejcoc ilhuicac nopa hueyi yoyomit.

¹¹ “Huan ipan nopa talojtzi ajstitoj eyi tacame cati amo israelitame ipan nopa cali campa nimocahuayaya pampa se tacat cati ehuyaya Cesarea quintiantoya ma nechnotzajij. ¹² Huan Itonal Toteco nechilhui ma niya inihuaya huan ma amo nimajmahui. Huan nojquiya yajque nohuaya ni chucuase taneltocani huan ticalaquitoj ichaj nopa tacat. ¹³ Huan yaya techilhui quenicatza quiitzoaya se ilhuicac ejquet cati hualajqui huan moquetzqui icalijti huan quilhui ma quintitani tacame ma yaca altepet Jope, huan ma nechnotzajij na huan quilhui notoca, Simón Pedro, huan quilhui para ma niya ichaj. ¹⁴ Huan nopa ilhuicac ejquet quilhui para na niquilhuis taya

* 10:48 10:48 Ica itequiticayo.

monequi quichihuase para Toteco quinmaquixtis ten inintajtacolhua, yaya huan nochi ihuicalhua.

¹⁵ “Huajca niajsito nepa huan quema nipejqqui niquincamanalhuía, Itonal Toteco hualajqui huan calajqui ipan iniyolo quej calajqui ipan toyolo achtohuiya. ¹⁶ Huajca niquelnamijqui cati Tohueyiteco Jesús quiijto quema itztoya tohuaya, quema techilhui: ‘Juan tecuaalti san ica at, pero Toteco amehmacas Itonal ipan amoyolo.’ ¹⁷ Huajca nijmachili, Toteco quinmacatoya Itonal quej nojquiya techmacac quema tijneltoaque Tohueyiteco Jesucristo. Huan ¿ajquiya na para niquilhuis Toteco Dios ma amo quichihua?”

¹⁸ Huajca quema nopa israelita taneltocani cati itztoyaj ipan Jerusalén quicajque icamanal Pedro, ayecmo teno quinanquilijque. San pejque quipaquilismacaj Toteco huan quiijtoque:

—Nelia temachtit Toteco Dios nojquiya quincahuilia masehualme cati amo israelitame ma quicahuaca inintajtacolhua para ma quiselica nopa nemilisti cati amo quema tamis.

Nopa taneltocani nopona Antioquía

¹⁹ Huan miyac taneltocani cati mosejsemantoyaj ten altepet Jerusalén quema tacame taminctijque Esteban huan pejque quintaijyohuiltiaj sequinoc, ama yajtoyaj hasta tali Fenicia, huan hasta tali Chipre huan hasta altepet Antioquía ipan Siria. Huan nepa quincamanalhuiyayaj san israelitame icamanal Toteco. ²⁰ Pero sequij taneltocani cati ehuan tali Chipre huan sequij ehuan ipan nopa hueyi altepet Cirene, yajque altepet Antioquía huan nopona nojquiya quinyolmelajque masehualme cati amo israelitame ten nopa cuali camanali ten Tohueyiteco Jesús. ²¹ Huan Tohueyiteco quinmacac ichicahualis, huan miyac masehualme moyolcuetque huan quineltoaque Jesús nopona.

²² Huan nopa taneltocani ipan nopa tiopamit ten altepet Jerusalén quicajque taya oncayaya ipan altepet Antioquía, huan yeca quititanque Bernabé ma yahui nopona. ²³ Huan Bernabé ajsito nopona huan quiiatc quenicatza hueyi iyolo Toteco inihuaya nopa Antioquía ehuan. Huajca nelia pajqui huan quinyolchicajqui para ma quitoquilica Tohueyiteco ica nochi iniyolo huan ma amo quema quicajtehuaca. ²⁴ Nopa Bernabé itztoya se cuali tacat cati temitoc ica Itonal Toteco huan tahuel motemachi huan quineltoac Tohueyiteco. Yeca quema Bernabé itztoya ipan Antioquía tahuel miyac masehualme quineltoaque Tohueyiteco ica cati ya quinilhui.

²⁵ Huan teipa quisqui Bernabé huan yajqui altepet Tarso quitemoti Saulo. ²⁶ Huan quema quipanti, san sejco hualajque altepet Antioquía. Huan Bernabé huan Saulo mocajque ica nopa tiopamit ten taneltocani nopona para se xihuit huan quinmachtijque nelia miyac masehualme. Huan elqui nopona ipan altepet Antioquía campa masehualme achtohui pejque quincocaxtiaj nopa taneltocani “cristianos”, quiijtosnequi, cati quitoquiliaj Cristo.

²⁷ Ipan nopa tonali ajsicoj ipan Antioquía sequij tajtolpanextiani cati hualajtoyaj altepet Jerusalén. ²⁸ Huan se ten inijuanti cati itoca Agabo moquetzqui ipan tasentilisti huan quinilhui nopa taneltocani para hualas se hueyi mayanti ipan nochi talme. Itonal Toteco quimachiltijtoya ten nopa mayanti quema noja ayemo ajsiyaya. Huan teipa nelia panoc nopa mayanti quema tanahuatiyaya Claudio. ²⁹ Huajca nopa taneltocani ipan altepet Antioquía moilhuijque cuali quisentilise tomi quej imiyaca sesen quipixtoya para temacas. Huan quititanque para quinpalehuisse taneltocani cati teicneltizti ipan estado Judea. ³⁰ Huajca quisentilijque nopa tomi huan

quititanque ica Bernabé huan Saulo. Huan injuanti quihuicaque campa itztoyaj nopa huehue taca taneltocani ipan estado Judea.

12

Herodes quimicti Jacobo huan quitzajqui Pedro

¹ Ipan nopa tonali Tanahuatijquet Herodes Agripa I* pejqui quinitzquía huan quintajyohuiltía sequij taneltocani ipan itioa Toteco. ² Huan yaya tanahuati ma quimictica ica macheta nopa tayolmelajquet Jacobo cati eltoya iicni Juan. ³ Huan quema Herodes quiitac para cati quichijqui quinpacti nopa tayacanca israelitame cati amo taneltocani, quiitzqui Pedro nojquiya huan quitzajqui. Nochi ya ni quichijqui ipan nopa israelita ilhuit cati itoca Pascua quema nochi quicuajque pantzi cati amo quipixqui tasonejcaoyot. ⁴ Huan quema quitzajqui Pedro, quinnahuati nahui pamit ica nahui soldados ipan sesen pamit ma quipatañemica para talojtitzti quimocuitahuse. Herodes moilhui para quema tamisquía Pascua, quitemactilis Pedro iniixpa nochi nopa masehualme para quitajtolsencahuase huan quimictise. ⁵ Yeca quema Pedro itztoya ipan tatzacti, nochi nopa tiopa ten taneltocani motatajuyayaj ica chichahualisti ipan Toteco para ma quimocuitahui.

Toteco quiquixti Pedro ten ipan tatzacti

⁶ Huan ipan nopa tayohua quema para tonili quiquixtisquía, Pedro cochtoya tatajco ome soldados. Quiilpitoyaj ica tepos cadena ica nopa soldados ipan sesen iguespa. Huan ne seyoc ome soldados ijcatoyaj calteno nechca tepos caltemit, quimocuitahuiyayaj nopa tatzacti. Huan monechcahuiyaya nopa hora ica ijnaloc quema Herodes quiquixtisquía Pedro para quitajtolsencahuasquía. ⁷ Huajca nimantzi tatanexti se taahuili chichahuac ipan nopa tatzacti huan ajsico se ilhuicac ejquet huan moquetzqui iixpa Pedro. Huan nopa ilhuicac ejquet quiajcs ilchiquitipa Pedro para quiixitis huan quiilhui: “Ximijquehua nimantzi.”

Huan nimantzi huetzque nopa ome tepos cadenas cati ica quimailpitoyaj. ⁸ Huan nopa ilhuicac ejquet quiilhui: “Ximoquenti moyoyo, huan ximotalili motecac.”

Huan Pedro quichijqui, huan nopa ilhuicac ejquet quiilhui: “Ximopiqui ica motaque huan techtoquili.”

⁹ Huan Pedro quitoquili huan quisque, pero moilhui huelis san temiquiyaya huan amo quimatqui sinta nelía panoyaya. ¹⁰ Huan injuanti panoque ipan nopa achtohui caltemit campa itztoyaj soldados, huan teipa panoque nopa ompa caltemit campa itztoyaj sequinoc soldados. Huan teipa ajsitoj campa nopa hueyi caltemit campa quisaj para ajsise ipan alpetet, huan nopa tepos caltemit tapojqui iselti. Huan injuanti quisque huan yajque ipan se calle. Huan nimantzi nopa ilhuicac ejquet quicajtejqui. ¹¹ Huajca Pedro quimachili cati panotoya, huan moilhui: “Nelía, Tohueyiteco quititanqui iilhuicac ejca para ma nechmanahui para amo teno nechchihuilis Tanahuatijquet Herodes huan nopa israelitame cati quichiyayaj nechmictise.”

¹² Huan teipa quema Pedro quiitac cati panotoya, yajqui ichaj María, inana Juan Marcos, pampa nopona mosentilijtoyaj miyac taneltocani para motatajtise ica Toteco. ¹³ Huan Pedro quitajtacani caltemit, huan hualajqui se ichpocat cati itoca Rode quitachilico ajquiya itztoya calteno. ¹⁴ Huan nopa Rode quitoscacajqui huan quitoscachili para Pedro, pero pampa nelpano

* 12:1 12:1 Iixhui Herodes el Grande.

paquiyaya, amo quicaltapo. San motalo calijtic para quinilhuiti nochi para Pedro itztoya calteno. ¹⁵ Huan injuanti quinanquilijqque:

—¡Tihuihuitic!

Pero Rode ica más temachili quinilhui para melahuac Pedro itztoya calteno. Huan quilhuijqque:

—Amo ya. Huelis nopa ilhuicac ejquet cati quimocuitahuía.

¹⁶ Pero Pedro noja quitajtacaniyaya caltemit. Huajca injuanti yajque quicaltapotoj huan san quitetzaitaque quema quitaque. ¹⁷ Pero Pedro quinmachihui para ma amo molinica huan quinpohuili quenicatza Tohueyiteco quiquixtjtoya ipan tatzacti. Huan quinilhui:

—Xiquinpohuilica Jacobo huan nochi toicnihua cati panotoc.

Huan Pedro quisqui huan yajqui sejcayoc.

¹⁸ Huan quema tanesqui, amo quimatque taya moilhuse nochi nopa soldados pampa amo quimachilijque ten panotoya ica Pedro. ¹⁹ Huan Herodes quintitanqui tacame ma quitemotij campa hueli huan amo quipantijque. Huan quintatzintoquili nopa soldados cati quimocuitahuiyayaj tatzacti taya panoc. Huan amo quimatiyayaj taya quinanquillise, yeca Herodes tanahuati ma quinmictica. Huan teipa quisqui Herodes ipan estado Judea, huan temotiyajqui ipan ojtí hasta altepet Cesarea iteno hueyi at huan mocajqui nopona.

Mijqui Herodes

²⁰ Huan Herodes nelía cualaniyaya ica nochi masehualme cati ehuyayaj altepeme Tiro huan Sidón, yeca nopa masehualme moilhuijqque cuali para nochi ma yaca san sejo quitatij para moyoltalise ihuaya. Huan mohuampojchijque ica Blasto, itequipanojca Herodes, para ma quicamanalhui Herodes para ma ayecmo cualani inihuaya, pampa inintacualis hualajqui ten ital. ²¹ Huajca Herodes quitali se tonali para quincamanalhuis nopa Tiro huan Sidón ehuan huan motalili iyoyo cati más cuajcualtzi para se tanahuatijquet. Huan mosehuito iniuxpa ipan ihueyi siyaj huan pejqqui quincamanalhuía. ²² Huan quema camanaltic Herodes, nochi nopa Tiro huan Sidón ehuan pejqque quihueyimatij Herodes huan pejqque quitzajtzilíaj: “Tijcaqui techcamanalhuía se dios huan amo se masehuali.”

²³ Huajca ipan nopa talojtzi hualajqui se ilhuicac ejquet huan quichijqui ma mococo Herodes pampa quincahuili ma quihueyichihuaca quej Dios. Amo quinilhui para san Toteco Dios quinamiqui para ma tijhueyichihuase. Huan miyac ocuילה quicaujque itacayo huan mijqui.

²⁴ Huan más momajqui icamanal Toteco huan más momiyaquilijqque taneltocani.

²⁵ Bernabé huan Saulo quintamimacaque nopa taneltocani ipan estado Judea nopa tomi cati taneltocani ipan Antioquía quititantoyaj. Huan teipa quisque Jerusalén huan sempa yajque altepet Antioquía. Huan quihuicaque Juan Marcos inihuaya.

13

Bernabé huan Saulo quipehualtijque inintequi

¹ Itztoyaj sequij tajtolpanextiani huan tamachtiani ipan nopa tiopamit ten taneltocani ipan altepet Antioquía. Itztoyaj Saulo, Bernabé, Simón cati nojquiya itoca Niger. Huan itztoyaj Lucio cati ejqui Cirene huan Manaén cati moscaltí ica Herodes cati quipixqui tequiticayot ipan estado Galilea.

² Huan se tonali nochi quihueyimatijyayaj Toteco huan motatajtiyayaj huan mosahuayayaj, huan Itonal Toteco quinilhui: “Xiquiniyocalica Bernabé

huan Saulo para ma yaca ipan se tequit cati niquintapejpenijtoc ma quichihuaca.”

³ Huajca mosajque huan motatajtijque, huan quintalilijque inimax ininpani Bernabé huan Saulo para ma quiselica inintequi. Huan quintitanque ma yaca tequititij.

Bernabé huan Saulo yajque tali Chipre

⁴ Huajca Itonal Toteco quintitanqui Bernabé huan Saulo huan injuanti yajque altepet Seleucia. Nepa calajque ipan se hueyi cuaacali huan yajque hasta tali Chipre. ⁵ Huan ajsitoj ipan altepet Salamina huan pejque tepohuilfaj icamanal Toteco ipan israelita tiopame. Huan Juan Marcos yajqui inihuaya para quinpalehuis. ⁶ Bernabé huan Saulo panotiyajque campa hueli ipan nopa piltaltzi Chipre cati mocahua tatajco hueyi at huan teipa ajsitoj altepet Pafos. Huan nozona quipantijque se israelita cati itoca Barjesús cati eliyaya se tenahualhuijquet huan se istacatica tajtolpanextijquet. ⁷ Huan Barjesús itztoya ihuaya se hueyi tequitiquet cati itoca Sergio Paulo, cati quipixqui miyac italnamiqulis. Huan nopa tequitiquet quinnotzqui Bernabé huan Saulo ma hualaca ichaj pampa quinequiyaya quicaquis icamanal Toteco. ⁸ Pero nopa tenahualhuijquet Barjesús, cati itoca Elimas ica camanali griego, quintzacuili pampa amo quinequiyaya nopa tequitiquet ma quineltoca icamanal Toteco. ⁹ Huajca Saulo, cati nojquiya itoca Pablo, temitoya ica Itonal Toteco, quitachili nopa tenahualhuijquet, ¹⁰ huan quihui:

—Elimas, tiicone Amocualtacat. San tijmati titacajcayahua huan tijchihua nochi cati amo cuali. Tiicualancaitaca nochi cati xitahuac. Nochipa tiquintzacuili cati quinequij calaquise ipan icualojhui Toteco. ¹¹ Huajca xiquifa, amantzi Tohueyteco mitztaijyohuiltis huan timocahuas tipopoyotzi huan amo titachiyas para miyac tonali.

Huan nimantzi ixtzintayohuili huan mocajqui popoyotzi huan pejqui quimatemohua ajquiya quimatilanasquia. ¹² Huan nopa hueyi tequitiquet Sergio quiitac cati panoc ica Elimas, huan quineltocac icamanal Toteco huan quitachili ica nochi cati quicajqui ten Jesús.

Pablo huan Bernabé yajque Antioquia ipan tali Pisidia

¹³ Teipa Pablo inihuaya ihuampoyohua calajque ipan cuaacali huan quisque Pafos huan ajsitoj nopa altepet Perge ipan tali Panfilia. Huan nozona Juan Marcos quincajtejqui huan tacuepili ipan altepet Jerusalén. ¹⁴ Huan teipa Pablo huan Bernabé quisque altepet Perge huan yajque seyoc altepet cati nojquiya itoca Antioquia pero ni Antioquia elqui ipan tali Pisidia. Huan ipan sábado, nopa tonal para mosiyajquetzase israelitame, Pablo huan Bernabé calajque ipan nopa israelita tiopamit nozona huan mosehuijque. ¹⁵ Huan nopa tequichihuani ten tiopamit quipojque ten itanahuatilhua Moisés huan ten nopa amatapohuali cati quijcuilojtoyaj nopa tajtolpanextiani. Huan teipa nopa tequichihuani quinnotzque Pablo huan Bernabé huan quinihuijque:

—Toicnihua, sinta anquipiay se camanali para ica antechyolchicahuase, huajca techilhua ama.

¹⁶ Huajca Pablo moquetzqui huan quinmachihuili nopa masehualme para ma amo molinica. Quijto:

—Xijtacaquilica anisraelitame huan nochi cati anquitepanitaj Toteco. ¹⁷ Toteco, yaya cati toDios tiisraelitame, quintapejpeni tohuejcapan tatahua, huan quinchihuili para ma momiyaquilijtiyaca quema itztoyaj ipan nopa

tali Egipto huejcajquiya. Teipa Toteco quinquixti ipan Egipto ica ihueyi chichahualis. ¹⁸ Huan para cuarenta xihuit Toteco quiiyohui nochi cati tohuejcapan tatahua quichihuayayaj ipan nopa huactoc tali campa amo teno eli. ¹⁹ Huan Toteco quinmicti chicome inieso masehualme cati itztoyaj ipan tali Canaán, sese ica seyoc tamanti inincamanal huan Toteco quinmacac nopa tali tohuejcapan tatahua. ²⁰ Nochi ni panoc para cuatrocientos cincuenta xihuit.

“Huan teipa Toteco quintali jueces para tetajtolsencajqe hasta monexti nopa tajtolpanextijquet Samuel. ²¹ Huan teipa tohuejcapan tatahua quitajtanijqe Toteco ma quitali se hueyi tanahuatijquet. Huan Toteco quitali Saúl, icone Cis, yaya cati se iteipan ixhui tohuejcapan tata Benjamín. Huan Saúl tanahuati para se cuarenta xihuit. ²² Huan teipa Toteco quiquixti Saúl huan quitali David para elis tanahuatijquet. Huan Toteco quiiyto: ‘Nijpantijtoc David, icone Isaí, para eli se tacat cati tahuel nechylpactía. Yaya quichihuas nochi cati nijnequi ma quichihua.’ ”

²³ Pablo noja quincamanalhuyaya nopa masehualme ten Antioquía huan quinilhui:

—Toteco techtitanili se iteipan ixhui nopa Tanahuatijquet David quej techtencahuili para quichihuas, huan yaya Jesús, Totemaquixtjca tiisraelitame. ²⁴ Pero quema ayemo hualayaya Jesús, hualajqui Juan quinilhuico israelitame ma quipataca iniyolo huan ma mocuaaltica. ²⁵ Huan quema Juan ya quitamiltiyaya itequi, quinilhui masehualme para amo ya Cristo cati injuanti moilhuyayaj. Quinilhui para Cristo hualasquía teipa. Huan Juan quiiyto para yaya amo quinamiqui itztos itequipanojca Cristo, yon para quiquixtilis itecac.

²⁶ “Annoisraelita icnihua cati aniteipan ixhuihua tohuejcapan tata Abraham, xijtacaquilica. Nojquiya xijtacaquilica amojuanti cati amo anisraelitame pero anquitoquiláj Toteco, toDios tiisraelitame. Toteco techmacatoc tojuanti nochi ni camanali para techmaquixtis. ²⁷ Pero quema ajsico Jesús ipan Jerusalén, nopa masehualme huan inintequichijcahua, amo quixmatque, masque sese sábado momajtoyaj yahuij israelita tiopa huan quitacaquiláj nopa camanali cati nopa tajtolpanextiani quiijuilojqe ten ya. Injuanti amo quimachiljqe nopa camanali quinilhuyaya ten Jesús. Huajca quichijque senquisa nóchi cati nopa tajtolpanextiani quiiytojtoyaj achtohuiya para quichihuasquía. ²⁸ Huan masque amo quipantilijque yon se itajtacol, quitajtanijqe Pilato ma quimicti. ²⁹ Huajca nochi panoc quej cati ijcuilijtoc huejcajquiya ipan iniama nopa tajtolpanextiani para teipa panos. Huan quitemohuijqe itacayo ipan nopa cuamapeli, huan quitailjqe ipan se mijca ostot cati quichijtoyaj tepetzinta. ³⁰ Pero Toteco Dios quiyolcuic Jesús quema ya mictoya, ³¹ huan para miyac tonali Jesús monexti inixpa nopa masehualme cati ipan ipejya itequi quisque ipan estado Galilea ihuaya huan yajque hasta Jerusalén. Huan injuanti cati quiiataque Jesús quema moyolcuitoya, ama tayolmelajtinemij ten ya.

³² “Huan tojuanti nojquiya timechilhufaj ni cuali camanali cati Toteco quintencahuili tohuejcapan tatahua achtohuiya para teipa techmacas. ³³ Huan Toteco techchihuilijtoc tiininteipan ixhuihua quej quinilhuijtoya tohuejcapan tatahua quichihuasquía pampa quiyolcuic Jesús. Eltoc quej ijcuilijtoc ipan nopa Salmo ome: ‘Ta tiNocone. Ama nitayolmelahua miyacapa para na nimoTata.’ ³⁴ Huan Toteco huejcajquiya quiiyto quiyolcuic Jesús huan amo palanis itacayo. Quej ni ijcuilijtoc ipan Icamanal Toteco

campa Toteco quiilhui Jesús: ‘Temachti nimitzmacas nopa tatiochihualisti cati nijtencahuili David para nijmacas.’ ³⁵ Ipan seyoc Salmo David quiijto: ‘Ta tiToteco, amo tijcahuilis ma palani itacayo Motequipanojca Cati Tatzeletolitic.’

³⁶ ‘Pero ni camanali amo camanalti ten David pampa David tequitic ica imasehualhua huan teipa mijqui huan quitapachojque huan palanqui itacayo. ³⁷ Ni camanali camanalti ten Jesús cati Toteco quiyolcuic huan itacayo amo palanqui. ³⁸ Huajca noicnihua, xijmatica san yaya Jesús cati timechylmelahuaj huelis amechtapolpohuis amotajtacolhua. ³⁹ Nochi masehualme cati quineltocaj Jesús, yaya quinchihua xitahuaque iixpa Toteco Dios, pero itanahuatilhua Moisés amo quema huelque quichihuase se acayja xitahuac iixpa Toteco. ⁴⁰ Huajca xijtaquilica ni camanali ten Jesús huan xijneltocaca. Ximomocuitahuica para amo amopantis cati nopa tajtolpanextiani huejcajquiya quiijcuilojqque campá Toteco quiijto:

⁴¹ ‘Xiquitaca, amajuanti cati antechtajilhuijtoque.

Ximosentachilica ica cati nijchihua huan teipa anmiquise,

Pampa na niDios nijchihuas huejhueyi tamanti ipan ni tonali cati amo anquineltocase masque sequinoc amechpohuilise para quitztoque.’

Huajca Pablo tanqui quincamanalhuía nopa masehualme.

⁴² Huan quema Pablo ihuaya Bernabé quisayayaj ipan nopa israelita tiopamit nopa tonal, nopa tiopa tequichihuani quintajtanijque ma sempa hualaca hualchicueyi huan sempa ma quincamanalhuise ten Jesús. ⁴³ Huan quema hualque nochi masehualme ipan nopa tasentilisti, quintoquilijque Pablo huan Bernabé miyac israelitame huan miyac cati amo israelitame pero quiselijtoyaj inintiotajtol israelitame. Huan Pablo huan Bernabé quinilhuijqque ma quitoquilijtiyaca Toteco pampa nella hueyi iyolo ica nochi tjuanti.

⁴⁴ Huan hualchicueyi sempa ajscio nopa tonali para mosiyajquetzase israelitame, huan mosentilijque nechca nochi masehualme cati itztoyaj Antioquía para quicaquise icamanal Toteco. ⁴⁵ Pero nopa tayacanca israelitame quiitaque para hualajtoyaj miyac masehualme para quicaquise icamanal Toteco huan pejqque quichicoitaj Pablo. Quiijtojque para amo melahuac cati quiijtohuayayaj huan quintajilhuijqque. ⁴⁶ Huajca Pablo huan Bernabé moneltalijque huan camanaltique ica miyac chicahualisti huan quinilhuijqque:

—Monequiyaya achtohui timechilhuisse anisraelitame ni camanali ten Toteco. Pero amo anquinequij anquineltocase. Anmoilhuíaj amo quinamiqui para anquiselise ni nemilisti cati amo quema tamis. Yeca amantzi timechcajtehuase huan tiquincamanalhuij san masehualme cati amo israelitame, ⁴⁷ pampa Toteco quej nopa technahuati campá ijcullijtoc: ‘Nimitztapejpeni para tiquinnextilis ni camanali masehualme cati amo israelitame ipan campá hueli tali ipan taltipacti.

Quej nopa quiixmatise cati monequi para nochi huelise momaquixtise ten inintajtacolhua hasta campá más huejca ipan taltipacti.’

⁴⁸ Huan injuanti cati amo israelitame nozona quicajque cati Pablo quiijto huan tahuel pajque. Huan quitascamatque Toteco por icamanal. Huan quineltocaque nochi injuanti cati Tohueyiteco ipa quintapejpenijtoya para itztose para nochipa. ⁴⁹ Huajca quej nopa momajqui icamanal Toteco ipan nochi nopa tali. ⁵⁰ Pero nopa tayacanca israelitame quinylajcomanque

tequichihuani ipan nopa altepet huan sequij sihuame cati tahuel quitoquilijque inindioses huan cati nochi quinixmatiyayaj. Huan nochi injuanti mosisinijque san sejo huan quintaijyohuiltiaj Pablo huan Bernabé huan quinixquixtijque ten inialtepe. ⁵¹ Huajca Pablo huan Bernabé quitzejtzelojque inixcixhua para quinnextilise amo cuali cati nopa israelitame quinchihuiltijtoyaj huan teipa yajque altepet Iconio. ⁵² Pero nopa taneltocani cati mocajque ipan Antioquia quipixque hueyi paquilisti huan temitoya iniyolo ica Itonal Toteco.

14

Pablo huan Bernabé ipan Iconio

¹ Huan teipa ipan altepet Iconio Pablo huan Bernabé calajque san sejo ipan nopa israelita tiopamit huan tecamanalhuijque ica tahuel miyac chicahualisti hasta quineltocaque Jesús miyac israelitame huan miyac cati amo israelitame huan camanaltique griego. ² Pero israelitame cati amo quineltocaque pejqque quinyolajcomanaj masehualme cati amo israelitame para ma cualanica ica Pablo huan Bernabé. ³ Pero Pablo huan Bernabé motemachijque ipan Toteco, huan mocajque nozona miyac tonali, huan tepohuilijayaj ica miyac chicahualisti huan quiniilhuiyayaj para nelhueyi iyolo Toteco ica masehualme. Huan Tohueyiteco quinmacac chicahualisti ma quichihuaca tanextili huan tiochicahualnescaoyot para tenextilise para Toteco Dios quinmacayaya inincamanal. ⁴ Pero nopa altepet Iconio ehuan motajcoxelojque huan sequij quintoquiliyayaj nopa tayaanca israelitame, huan sequinoc quintoquiliyayaj nopa tayolmelahuani. ⁵ Huan nopa tayaanca israelitame, inihuaya cati amo israelitame huan inintequichijcahua, moyolilhuijque san sejo quenicatza quinitzquisquíaaj Pablo huan Bernabé huan quintepachosquíaaj. ⁶ Pero Pablo huan Bernabé quicajque cati quinequiyayaj quinchihuilise huan cholojtejqque. Yajque hasta tali Licaonia campa mocahuaj altepeme Listra huan Derbé huan calajque ipan miyac altepeme huan pilaltepetzitzi cati nechcatzitzitzi. ⁷ Huan nozona tepohuilijque icanamal Toteco.

Tacame quitepachojque Pablo ipan Listra

⁸ Huan ipan altepet Listra itztoya se tacat cati amo quema nejnentoya hasta quema tacatqui pampa eltoya metzcuachotic. ⁹ Huan nopa tacat mosehuiyaya huan quicaquiyaya cati Pablo quijito. Huan Pablo quitachili huan quilitac quineltoca para huelis mochicahuas. ¹⁰ Huajca Pablo nelchicahuac quihui:

—Ximoquetza huan xijxitahua moicixhua.

Huan yaya moquetzqui, huitontejqui huan pejqui nejnemi. ¹¹ Huan quitaque nopa masehualme cati Pablo quichijtoya, huan pejqque tzajtzi ica inincamanal Licaonia. Quijitojqque:

—Ome dioses mocuetoque masehualme huan ajsicoj nica.

¹² Huan quitocaxtiyayaj Bernabé nopa taixcopincayot Júpiter huan Pablo nopa taixcopincayot Mercurio, pampa Pablo miyac camanaltiyaya. ¹³ Huan eltoya se tiopamit iteno altepet Listra campa masehualme quihueyimatque Júpiter. Huan se totajtzi cati quitequipano Júpiter nozona quinhualiac torojme huan xochi mecat. Huan yaya inihuaya nochi nopa masehualme quinequiyayaj quinnemictise nopa torojme huan quinmacase Pablo huan Bernabé quej tacajchualisti para quinhueyimatisquíaaj. ¹⁴ Pero quema Pablo huan Bernabé quitaque cati quichihuayayaj, quitzayanque iniyoyo para ma quimatica nopa masehualme amo cuali cati quichihuasnequiyayaj.

Huan Pablo ihuaya Bernabé motalojque campa itztoyaj nopa masehualme, ¹⁵ huan tzajtzi que:

—Tates, amo quinamiqui cati anquichihujaj. Tojuanti nojquiya timasehualme quej amojuanti. San tihualajque timechilhise para monequi anquicajtehuase amotaixcopincayohua huan amoteteyohua cati amo teno amechpalehuíaj. Monequi xijneltocaca Toteco cati nelía itztoc, cati quichijqui ilhuicacti, taltipacti, nochi hueyi at, huan nochi tamanti cati ininpan itztoque. ¹⁶ Huejcajquiya Toteco Dios quincahuili nochi masehualme ma nemica quej quinpackiyaya. ¹⁷ Pero noja Toteco quinnextiliyaya ajquiyaya yaya huan quinchihuiyaya masehualme cati cuali. Quichijqui ma huetzi at huan ma onca pixquisti cati cuali. Huan temacayaya nochi cati monequiyaya para ma tacuaca huan para ma yolpaquica.

¹⁸ Huan masque Pablo quinilhui nochi ni camanali, noja quinequiyayaj quinmictise torojme para quinmacase quej se tacajcualisti. Ica ohui quinztacuilijque para ma amo quichihuaca.

¹⁹ Pero teipa ajsicoj sequij tayacanca israelitame cati hualajtoyaj altepeme Antioquía huan Iconio campa Pablo huan Bernabé cholojtejttoyaj. Huan tahuel quinylajcomanque nopa miyac masehualme ipan Listra huan sentic quitepachojque Pablo. Huan moilhuijque ya mictoc, huajca quihuilanque hasta altepetenno huan quicajtejqe. ²⁰ Pero nopa taneltocani quiyahualocoj Pablo, huan nimantzi mijquejqe huan sempa calaquito ipan nopa altepet. Huan tonili, Pablo huan Bernabé quisque Listra huan yajque altepet Derbe.

²¹ Huan tepohuilijque icamanal Toteco ipan Derbe, huan miyac quineltoaque Jesús. Huan teipa Pablo huan Bernabé sempa yajque Listra, Iconio, huan Antioquía. ²² Huan ipan nopa altepeme quinylchicajque nopa taneltocani huan quinmacaque tetili para más ma motemachijtinemica ipan Tohueyiteco, quinilhuijque: “Monequi tijpanotiyase miyac taohuijcyot nica, huan teipa ticalaquise campa Toteco tanahuatía.”

²³ Huan Pablo huan Bernabé quintapejpenijque huehue taca taneltocani campa hueli ipan sesen tiopamit ten taneltocani. Huan mosajque, huan motatajtijque inihuaya huan quincajque imaco Toteco cati ipan motemachijtoyaj.

Pablo huan Bernabé sempa yajque Antioquía ipan tali Siria

²⁴ Teipa Pablo huan Bernabé quisque nozona huan panoque ipan tali Pisidia huan ajsitoj tali Panfilia. ²⁵ Huan tepohuilijque icamanal Toteco ipan altepet Perge huan teipa yajque altepet Atalia. ²⁶ Nepa calajque ipan cuaacali huan sempa yajque ipan altepet Antioquía ipan tali Siria campa nopa taneltocani achtohuiya quintapejpenijtoyaj huan quincajtoyaj imaco Toteco cati hueyi iyolo ica tojuanti para ma quichihuaca nopa tequit cati ama ya quitamichijtoyaj. ²⁷ Huan quema Pablo huan Bernabé ajsitoj Antioquía, quinsentilijque nopa taneltoca ten nopa tiopamit nozona. Huan Pablo huan Bernabé quinpohuilijque nochi cati Toteco quichijtoya ica inijuanti. Huan quinilhuijque quenicatza tapojqui se caltemit para masehualme cati amo israelitame ma nojquiya quineltoaca Jesús. ²⁸ Huan mocajque Antioquía inihuaya nopa taneltocani para miyac tonali.

15

Nopa tasentilisti ten tayacanca taneltocani ipan Jerusalén

¹ Huan quema Pablo huan Bernabé noja itztoyaj ipan Antioquía ipan tali Siria, ajsicoj sequij tacame cati hualajque estado Judea. Inijuanti

pejque quinmachtíaj nopa taneltocani para masehualme cati amo israelitame amo huelis momaquixtise ten inintajtacol sinta amo motequilise nopa machiyot cati itoca circuncisión ipan inintacayo quej tamachtí Moisés.

² Huan Pablo huan Bernabé chicahuac quincamanalhujque nopa tacame para amo melahuac inintamachtíl. Huájca nopa taneltocani ipan Antioquía moilhujque para elisquía cuali sinta Pablo huan Bernabé inihuaya sequinoc tacame ma yaca hasta altepet Jerusalén para quincamanalhuitij nopa tayolmelahuani huan huehue tacame ten taneltocani, huan san sejco quisencahuase ni tamanti.

³ Huajca nopa tiopamit ten taneltocani ipan Antioquía quititanque Pablo huan Bernabé huan nopa sequinoc tacame ma yaca. Huan inijuanti quisque huan panotiyajque talme Fenicia huan Samaría. Huan nopona quinyolmelajque taneltocani para masehualme cati amo israelitame quicajtehuayayaj inintamachtíl cati huejcajquiya huan quinelto cayayaj Jesús. Huan nochi taneltocani nopona pajque miyac quema quicajque ni camanali.

⁴ Teipa Pablo huan Bernabé ajsitoy Jerusalén huan nopa tiopamit ten taneltocani nepa, huan nopa tayolmelahuani huan huehue tacame quinselijque ica paquilisti. Huan Pablo huan Bernabé quinpohuilijque nochi cati Toteco quinpalehujtoya ma quichihuaca ica cati amo israelitame.

⁵ Pero moquetzque ipan nopa tasentilisti sequij fariseos cati quinelto cayoy Jesús huan quijijtoque para monequi cati amo israelitame ma motequilica nopa machiyot cati itoca circuncisión huan nojquiya monequi quintoquilise itanahuatilhua Moisés para Toteco quinmaquixtise ten inintajtacolhua.

⁶ Huajca nochi tayolmelahuani huan huehue tacame ten taneltocani mosentilijque iniselti para quisencahuase nopa tamanti. ⁷ Huan monajnanquijque para miyac hora, huan teipa Pedro moquetzqui huan quinilhui:

—Noicnihua, anquimatij quenicatza huejcajquiya Tohueyiteco nechtapejpeni na ma niquinilhui masehualme cati amo israelitame icamanal Toteco para huelis quinelto case. ⁸ Huan Toteco yaya cati quiixmati iniyolo nochi masehualme quinexti para quinselijtoya nopa masehualme cati amo israelitame pampa nojquiya quinmacac Ítonal quej techmacac tiisraelitame achtohuiya. ⁹ Yaya quinchihuili san se quej techchihuilijtoya tojuanti, huan quinyolpajpajqui quema quinelto caque Jesús. ¹⁰ Huajca ¿para ten amo anquiselíaj cati Toteco quinchihuili? ¿Para ten anquinequij para nopa taneltocani cati amo israelitame ma quintoquilica tanahuatilme cati nelpano ohui cati yon tojuanti, yon tohuejcapan tatahua, amo tihuelque tiquintoquilijque? ¹¹ Tijmatij para hueyi iyolo Toteco ica nochi tojuanti. Huan Toteco techtajtacolquixti tiisraelitame huan cati amo israelitame quema tijnelto caque Tohueyiteco Jesús.

¹² Huajca nochi nopa taneltocani ayecmo teno más quijijtoque. San achi más quitacaquilijque quema Bernabé huan Pablo pejque quinpohuilíaj quenicatza Toteco Dios quinpalehujtoya quichihuase huejhueyi tanextili huan tiotchicalhualnes cayot inixpa nopa masehualme cati amo israelitame.

¹³ Huan quema Pablo huan Bernabé tanque camanaltij, Jacobo quijito:

—Noicnihua, techtacaquilica. ¹⁴ Simón Pedro ya techilhujitoc quenicatza Toteco achtohuiya pejqui quinnotza masehualme cati amo israelitame para quinyocaquixtise sequij inijuanti para quihueyimatise. ¹⁵ Huan masehualme cati amo israelitame monequi quiixmatise Toteco para quitamiltis cati nopa tajtolpanextiani huejcajquiya quijcuilojque para teipa panos. Pampa huejcajquiya Toteco quijito:

¹⁶ Quema tamis nochi ni tamanti,

teipa na nihualas huan sempa nijsencahuas campa David tanahuatiyaya cati ama eltoc quej se cali cati huetzotc.

Quena, masque tamisosolijtoc campa David tanahuati, nijcualtalis huan nijsencahuas quej ipa eltoya para nozona nitanahuatis.

¹⁷ Para nopa israelitame cati mocahuase ipan nopa tonali ma nechtemoca para nechixmatise,

inihuaya nochi nopa masehualme cati amo israelitame cati nechneltoease.

¹⁸ Quej ni na niqijtohua, niamoTeco.

Na cati nihueli nimechmatiltis ten huejcajqüiya cati panos teipa.’

¹⁹ Jacobo noja quincamanalhui huan quinihui:

—Huajca na nimoilhuía ayecmo tiquincuatotonise cati amo israelitame cati quinequij qüitoquulise Tohueyiteco. ²⁰ Cualí tiquintajcuilhüise huan tiquinihüise ma amo quicuaca tacualisti cati sequinoc quitalijtoque iniixpa taixcopincayome. Huan ma amo quichihuaca tamanti ihuaya se cati amo intahuical. Nojqüiya ma amo quincuaca tapiyalme cati san quinquechpatzcatoque. Yon ma amo quicuaca esti, ²¹ pampa ten huejcajqüiya huan hasta ama ipan sese altepet itztoque israelitame cati tacamanalhuíaj itanahuatilhua Moisés ipan sesen tonali para mosiyajquetzase huan injuanti tahuel quijiyaj cati quicua esti.

²² Huajca nochi tayolmelahuani, huan nopa huehue tacame huan nochi sequinoc taneltocani ipan nopa tiopamit ipan Jerusalén quijijtoque cualtitoc cati quijto Jacobo. Huan moilhüijque cuali para quintapejpenise se ome tacame ma yaca Antioquía inihuaya Pablo huan Bernabé. Huan quintapejpenijque ome tacame cati tayacanayayaj, se itoca Silas huan seyoc itoca Judas cati nojqüiya itoca Barsabás. ²³ Huan inihuaya quititanque ni amatajcuiloli cati quej ni quijto:

Tojuanti titayolmelahuani huan tihuehue tacame ten taneltocani nica ipan Jerusalén timechtajcuilhüíaj ica ni amatajcuiloli.

Timechtajpalohüaj amajuanti antoicnihua cati amo anisraelitame ipan altepet Antioquía huan ipan tali Siria huan Cilicia.

²⁴ Tijcactoque sequij tacame quisque nica huan yajque nozona huan amechcuatotonijque huan amechcuesolmacaque ica cati amechilhüiyayaj, pero xijmatica para tojuanti amo tiquintitantoque. ²⁵ Yeca san sejco tiquitaque cuali tiquintapejpenisquíaj sequij tacame ma yaca nepa inihuaya Pablo huan Bernabé cati tiquinicnelíaj miyac.

²⁶ Injuanti quipanotoque miyac taohüijcayot hasta san quentzi miqisquíaj pampa quineltoaj* Tohueyiteco Jesucristo. ²⁷ Huan ama timechtitanilíaj Judas para amechilhüise cati tiqijtoque nica. ²⁸ Itonal Toteco technextilijtoc para amo cuali timechtalilise miyac tanahuatilme cati nelía ohui para anquineltoease. San timechilhüise ni tanahuatilme cati más monequi: ²⁹ Amo xijcuaca tacualisti cati sequinoc quitalijtoque iixpa se taixcopincayot. Amo xijcuaca esti, yon tapiyalme cati san quinquechpatzcatoque. Huan amo xijchihuaca tamanti ihuaya se cati amo amotahuical. Sinta anquichihuase nochi ni tamanti, anquichihuase cati cuali.

Ma xiitztoca ica cuali.

Quej nopa quijto nopa amat.

* 15:26 15:26 Por notoca.

³⁰ Huajca quej ni nopa tasentilisti ipan Jerusalén quintitanque Pablo, Bernabé, Judas huan Silas hasta Antioquía. Huan mosentilijque nochi taneltocani cati ehuan nepa huan quinmactilijque nopa amatajcuiloli. ³¹ Huan nopa taneltocani ipan Antioquía quipojque huan nelía pajque ica cati quijcuiltojtoyaj. ³² Huan pampa Judas huan Silas nojquiya eliyayaj tajtolpanextiani, injuanti quincamanalhijque nopa taneltocani miyac, huan quinyolchicajque huan quinmacaque más tetili ipan Toteco. ³³ Huajca Judas huan Silas mocajque ipan Antioquía se quentzi tonali, huan teipa nopa taneltocani quintitanque ica paquilisti para ma yaca Jerusalén ica nopa taneltocani cati quintitantoyaj. ³⁴ Pero teipa Silas quinejqm mocahuas ipan Antioquía. ³⁵ Huan Pablo, Bernabé huan miyac sequinoc taneltocani mocajque ipan Antioquía. Inijuanti quisenhuiquijque tamachtíaj icamanal Toteco huan quinpo huilíaj miyac masehualme nopa cuali camanali ten Tohueyiteco Jesús.

Pablo ica ompa quinpaxaloto taneltocani campa hueli

³⁶ Teipa panoc miyac tonali, huan Pablo quihui Bernabé:

—Ma tiyaca sempa, tiquinpaxalotij nochi cati quineltocaque Jesús ipan sese altepet campa titepohuilijque icamanal Toteco achtohuia. Ma tiqitij quenicatza itztoque nopa taneltocani.

³⁷ Huan Bernabé quinequiyaya quihuicas Juan Marcos inihuaya, ³⁸ pero Pablo amo quinequiyaya Juan Marcos ma yahui, pampa yaya quincajtejtoya ipan tali Panfilia quema achtohui yajque ipan ojti. Amo mocajqui inihuaya ipan nopa tequit. ³⁹ Huajca Pablo huan Bernabé tahuel monajnanquijque ica ni tamanti hasta moyocacajque. Huan Bernabé quihuicac Juan Marcos huan calajque ipan cuaacali huan yajque tali Chipre. ⁴⁰ Huan Pablo quitapejpeni Silas ma yahui ihuaya. Huan nopa taneltocani ten Antioquía quintalijque imaco Toteco cati hueyi iyolo para ma quintiochihuas. Huan teipa Pablo huan Silas quisque. ⁴¹ Huan Pablo huan Silas nejnentiyajque, huan panoque talme Siria huan Cilicia huan quiyolchicajtiyajque sesen tiopamit ten taneltocani.

16

Timoteo yajqui inihuaya Pablo huan Silas

¹ Teipa Pablo huan Silas ajsitoj altepet Derbe huan altepet Listra campa itztoya se taneltocaket cati itoca Timoteo. Inana Timoteo elqui se israelita cati quineltocatoya Jesús huan itata Timoteo amo ya se israelita, yaya se tacat griego. ² Huan nochi taneltocani ipan Listra huan Iconio camanaltique cuali ten Timoteo. ³ Huan Pablo quinequiyaya quihuicas Timoteo para ma quipalehuis ipan itequi, pero achtohui quitequili nopa machiyot cati itoca circuncisión ipan itacayo Timoteo. Pablo quichijqui ya nopa pampa quimatiyaya itztoyaj miyac israelitame ipan nopa altepeme campa yahuiyayaj. Huan quinequiyaya ma quiselica Timoteo, huan nochi quimatiyayaj para itata Timoteo eltoya se tacat griego. ⁴ Huan Pablo, Silas huan Timoteo panotiyahuiyayaj ipan nochi nopa altepeme huan quinilhuijtiyahuiyayaj nopa taneltocani cati quijtojtoyaj nopa tayolmelahuani huan huehue tacame cati itztoyaj ipan altepet Jerusalén. ⁵ Huajca quinyolchicajque nopa tiopame ten taneltocani nozona huan quinmacaque más tetili para quineltocase Toteco. Huan mojmosta Toteco quinmiyaquiyaya más nopa masehualme cati quineltocayayaj Jesús.

Pablo quiitac ipan temicti se Macedonia ejquet

⁶ Itonal Toteco amo quincahuili Pablo huan ihuampoyohua ma tepohuilica icamanal Toteco ipan tali Asia ipan nopa tonali. Huajca panotiyajque ipan talme Frigia huan Galacia para tecamanalhuise. ⁷ Teipa ajsitoj iteno tali Misia huan moilhuiyayaj yasquáj tali Bitinia, pero Itonal Jesús amo quincahuili ma yaca. ⁸ Huajca panoque ipan tali Misia huan ixtemotoj hasta altepet Troas cati mocahua nechca hueyi at. ⁹ Nepa se tayohua Pablo quiitac se tanextili quej se temicti. Huan quiitac para se tacat cati ehua tali Macedonia moquetztoya inechca huan ica nochi iyolo quitajtaniyaya: “Nojquiya xihuala ipan notal Macedonia huan techpalehuiqui.” ¹⁰ Huan quema Pablo quiitac ni tanextili, nimantzi yaya huan Silas huan na niLucas timocualchijchijque para tiyase tali Macedonia, pampa tijmatiyayaj Toteco technotzayaya nojquiya ma titepohuilijit icamanal nopona.

Pablo huan Silas itztoque Filipos

¹¹ Huan ticalajque ipan cuaacali ipan altepet Troas huan tiyajque xitahuac hasta nopa piltaltzi Samotracia cati mocahua tatajco ipan hueyi at, huan tonili tiajsitoj altepet Neápolis. ¹² Huan teipa tiquisque huan tiyajque Filipos, se altepet hueyi ipan tali Macedonia cati altepet Roma quinahuatia. Huan timocajque nopona se quentzi tonali.

¹³ Ipan se tonali para mosiyajquetzase israelitame, tiquisque ipan nopa altepet huan tiyajque hasta se hueyat campa israelitame momajtoyaj yahuij motajitij ica Toteco. Huan timosehuijque huan pejqui tiquincamanalhuáj sequij sihuame cati mosentilijtoyaj nopona. ¹⁴ Huan se sihuat cati techtacaquiliyaya itoca Lidia huan ehua altepet Tiatira. Yaya eliyaya se yoyon namacaquet ten se cuali yoyomit cati ixmorado. Nopa sihuat quihueyimatqui Toteco toDios tiisraelitame huan ipan nopa hora Toteco quitapohuili iyolo para ma quimachili cati Pablo tamachtiyaya. ¹⁵ Huan Lidia inihuaya nochi cati itztoyaj ipan ichaj mocuaaltijque. Huan teipa Lidia techilhui:

—Anquimatij temachti nijneltocatoc Jesús, huajca xihualaca, ximocahuaca nochaj.

Huan tahuel techchihualti ma timocahuatij ichaj. Huajca timocahuatoj.

¹⁶ Huan se tonali tiyahuiyayaj campa timomajtoyaj timotatajtíaj ica Toteco huan tijpantijque se ichpoca tequipanojquet cati quipixqui se fiero ajacat ten Amocualfacat cati quimacac chichahualisti para ma teyolmelahua cati panosquía teipa. Huan itecohua nopa ichpocat quitantoyaj miyac tomi ica ya. ¹⁷ Huan nopa ichpocat pejqui techtoquillijtinemi huan chichahuac quijtohua:

—Ni tacame quitequipanohuaj Toteco Dios Cati Más Quipiya Tanahuatili. Amechilhuiáj quenicatza amechmaquixtis ten amotajtacolhua.

¹⁸ Huan quej nopa quichijqui miyac tonali. Huajca ica teipa Pablo mocueso ica ya huan icantachixqui huan quillhui nopa ajacat cati itztoya ipan itacayo nopa ichpocat:

—Nimitznahuatia ipan itoca * Jesucristo, xiquisa ipan ni ichpocat.

Huan nimantzi nopa ajacat quistejqui ipan itacayo.

¹⁹ Huan quema itecohua quiitaque ayecmo quipixqui nopa ajacat para quinilhuis masehualme inisuertes huan ayecmo huelque quitanij tomi, quinitzquijque Pablo huan Silas huan quinhuicaque iniixpa tequichihuani ipan tequicali. ²⁰ Huan quinixnextijque iniixpa nopa tequichihuani cati más huejhueyi huan quinilhuijque:

* 16:18 16:18 Ica itequiticayo.

—Ni israelitame quinyolajcomanaj miyac masehualme ipan toaltepe. ²¹ Tamachtíaj miyac tamanti cati totanahuatilhua tiromanos amo techcahuilíaj ma tijselica.

²² Huajca nochi nopa miyac masehualme nozona nojquiya motananque por Pablo huan Silas. Huan nopa tequichihuani tanahuatijque ma quinquixtilica iniyoyo, huan ma quinhuiteguica ica cuahuit. ²³ Huan quema ya tantoyaj quinhuitequij miyac, quintzajque huan tanahuatijque ma quimocuitahuica miyac para amo cholose. ²⁴ Huajca nopa tetzajquet quincalaqui ipan nopa cuarto cati más calijtic huan más temachti ipan tatzacti. Huan quinmetzcuapachojque ica ome huejhueyi cuahuit.

²⁵ Huan tajco yohual Pablo huan Silas motatajtuyayaj huan huicayayaj tiohuicac huan quintacaquiliyayaj nopa sequinoc tatzacme. ²⁶ Huan nimantzi tahuel mohuisoj tali huan mohuisoj hasta itzinpehualtil nopa tatzacti. Huan ipan nopa talojtzi tapojque nochi caltemit nopa tatzacti huan huetzqui nochi tepos cadenas cati ica ilpitoyaj nopa tatzacme. ²⁷ Huan isac nopa tetzajquet, huan quitiac tapojtoc nochi caltemit huan quiquixti imacheta para momictis. Moilhuiyaya cholojtoyaj nochi tatzacme. ²⁸ Huajca Pablo chichahuac tzajtzc huan quilhui:

—Amo ximomicti. Nochi tiitztocque nica.

²⁹ Huan nopa tetzajquet tajtanqui se taahuili huan motalo más calijtic hasta campa itztoyaj Pablo huan Silas. Huan motancuaquetzqui huihuipicayaya iniixpa. ³⁰ Teipa quinquixti más calteno huan quintatzintoquili:

—Tates, ¿taya monequi nijchihuas para nimomaquixtis ten notajtacolhua?

³¹ Huan quinanquiliyque:

—Xijneltoca Tohueyiteco Jesucristo huan yaya mitzmaquixtis, ta huan nochi mohuicalhua.

³² Huajca Pablo huan Silas yajque quinilhuitoj icamanal Toteco nochi cati itztoyaj ichaj nopa tetzajquet. ³³ Huan tajco yohual nopa tetzajquet quinhuicac huan quinpajpaquili campa quincocojtoyaj. Huan teipa Pablo huan Silas quicuaaltijque nopa tetzajquet ihuaya nochi cati itztoyaj ichaj. ³⁴ Huan sempa quinhuicac Pablo huan Silas ichaj huan quintamacato. Huan nopa tetzajquet ihuaya ihuicalhua nelía pajque pampa quineltoaque Tohueyiteco Jesucristo.

³⁵ Huan ica ijnaloc nopa huejhueyi tequichihuani quintitanque policías para ma quilhuitij nopa tetzajquet ma quicahuili Pablo huan Silas ma yaca.

³⁶ Huajca nopa tetzajquet quilhui Pablo:

—Nopa tequichihuani nechilhuijtoque ma nimechcahuili anyase. Huajca ya huelis anquisase. Xiyaca ica cuali.

³⁷ Pero Pablo quinilhui nopa policías:

—Inijuanti techhuitejque ica cuahuit iniixpa nochi ni altepet. Amo techtatzintoquiliyque taya tijchijtoque, san techtzajque. Amo quinquixti cati quichijque pampa tojuanti tiromanos. Huan ama quinequij ma tiyaca itxatatzí, pero amo quej nopa tiyase. Ma hualaca nopa tequichihuani ma techquixtiyque.

³⁸ Huajca nopa policías quinilhuitoj nopa huejhueyi tequichihuani cati Pablo quijto. Huan momajmatijque quema quicajque para Pablo huan Silas quipixque nopa tequiticayot cati Roma ehuan quipiyaj. ³⁹ Huajca nopa tequichihuani yajque campa tatzacti huan quintajtanitaj tapojpolhuli Pablo huan Silas ica cati quinchihuiliytoyaj. Huan quinquixtijque ipan tatzacti huan ica cuali quintajtanijque ma quisaca inialtepe.

⁴⁰ Huajca quema Pablo huan Silas quistejque ipan tatzacti, yajque ichaj Lidia. Huan Pablo quinitac nochi taneltocani huan quinyolchicajqui ipan Toteco. Huan teipa quistejque.

17

Masehualme moyolajcomanque ipan Tesalónica

¹ Huan Pablo huan Silas panotiquisque ipan altepeme Anfípolis huan Apolonia huan teipa ajsitoj altepet Tesalónica campa eltoya se israelita tiopamit. ² Huan Pablo calajqui ipan nopa tiopamit quej momajtoya quichihua, huan sese sábado para eyi samano quincamanalhuito israelitame cati mosentilijque nopona. ³ Quinnextiliyaya ipan Icamanal Toteco quenicatza monequiyaya taijyohuis nopa Cristo cati Toteco quititanisquía huan mon-quiyaya para yaya miqíus huan sempa moyolcuis. Huan quinilhui:

—Ni Jesús cati nimechyolmelahua amantzi, yaya nopa Cristo.

⁴ Huan quineltocaque Jesús sequij israelitame huan miyac griego masehualme cati ya momatque quitepanitaj Toteco. Nojquiya quineltocaque miyac griega sihuame cati tominpixque huan nochi pejque nejnemij ica Pablo huan Silas. ⁵ Huajca nopa israelitame cati amo quineltocatojay Toteco pejque quinchicoitaj. Huan quinhuicaque sequij amo cuajcualme cati nochipa mosehuiyayaj tianquis, huan ica inijuanti quinyolajcomanque nochi cati itztoyaj ipan altepet Tesalónica. Huan miyac masehualme mosentilijque. Huan teipa nochi yajque ichaj Jasón para quintemotij Pablo huan Silas huan quinxixtise iniixpa nochi nopa masehualme. ⁶ Pero amo quinpantijque. Huajca quinhualicaque Jasón inihuaya sequinoc taneltocani, huan quinhuahuatatzque iniixpa nopa tequichihuani cati ehuan nopa altepet huan tzajtziq:

—Ni tacame cati quiyolajcomantoque nochi taltipacti ya hualajque nica nojquiya. ⁷ Huan ni Jasón quinselijtoc ipan ichaj. Inijuanti quihuejcamajcajtque totanahuatijca César. Quiijtuhauj itztoc seyoc tanahuatijquet cati más hueyi cati itoca Jesús.

⁸ Huan quinyolajcomanque nopa tequichihuani huan masehualme cati itztoyaj nopona ica cati quiijtjque. ⁹ Huajca nopa tequichihuani quincahuilijque Jasón huan nopa sequinoc taneltocani ma quicahuaca se tomi cati quincuepilisquíaaj sinta monextise ipan nopa tonali quema quintajtolsencahuasquaj. Huan teipa quincahuilijque ma yaca ininchajchaj.

Pablo huan Silas yajque Berea

¹⁰ Huan nopa tayohua nopa taneltocani ipan Tesalónica quintitanque Pablo huan Silas hasta altepet Berea, huan quema ajsitoj Berea, yajque campa nopa israelita tiopamit. ¹¹ Nopa israelitame ipan Berea quipixque más tapojtoc inintalnamiquilis que masehualme ipan Tesalónica, pampa quitacaquilijque icamanal Toteco ica paquillisti huan teipa mojmosta quite-mohuayayaj ipan Icamanal Toteco para quimatise sinta melahuac cati Pablo quinilhui o amo. ¹² Huajca miyac nopa israelitame quineltocaque Jesús. Nojquiya quineltocaque miyac sihuame huan tacame griegos cati taniel tapijpixtoyaj. ¹³ Pero sequij israelitame ipan altepet Tesalónica quicajque para Pablo tepohuilijaya icamanal Toteco ipan altepet Berea. Huajca yajque Berea huan nopona nojquiya quinyolajcomanque masehualme. ¹⁴ Huajca nimantzi nopa taneltocani ipan Berea quititanque Pablo ma yahui hasta iteno hueyi at, huan san Silas huan Timoteo mocajque ipan Berea. ¹⁵ Huan sequij taneltocani yajque ihuaya Pablo huan quicahuatoj hasta altepet

Atenas. Huan Pablo quinilhui ma quinilhuitij Silas huan Timoteo ma moisihuiltica para yase hasta Atenas para quipantise nopona. Huan nopa taneltocani tacuepilijque Berea.

Pablo itztoc altepet Atenas

¹⁶ Quema Pablo quinchixtoya ipan altepet Atenas, nelía mocueso pampa nochi masehualme nopona quinhueymatiyayaj miyac taixcopincayome huan teteyome cati quinchijtoyaj. ¹⁷ Huajca yajqui ipan nopa israelita tiopamit mojmosta para quincamanalhuis israelitame huan masehualme cati amo israelitame cati quitepanitaque Toteco tiisraelitame. Nojquiya mojmosta quincamanalhui cati quinpantiyaya ipan tianquis. ¹⁸ Huan sequij talnamijca tacame cati inintoca epicúreos huan estoicos pejque camanaltij ten Pablo. Sequij quijtohuayayaj:

—¿Taya quinequi techilhuis nopa tacat cati camanalti miyac?

Sequinoc quijtohuayayaj:

—Quinequi techilhuis ten sequinoc dioses.

Quijtojque ni pampa Pablo quinilhuijtoya ten Jesús huan quenicatza moyolcuitoya. ¹⁹ Huajca quihuicaque Pablo ipan se tepet cati itoca Areópago campa masehualme momajtoyaj mosentilíaj para mocamanalhuise huan nopona quiilhuijque:

—Techilhui taya quijjosnequi ni tamachtili yancuic ten cati ticamanalti, ²⁰ pampa titamachtilía tamanti cati amo quema tijcactoque huan tijnequij tijmatise cuali taya quijjosnequi.

²¹ Huan nochi Atenas ehuaní huan cati paxalohuaj nopona san quinpactiyaya camanaltise huan quicaquise tamanti cati yancuic.

²² Huajca Pablo moquetzqui tatajco injuanti ipan nopa tepet Areópago huan quinilhui: “AnAtenas ehuaní, niquita tahuel anquintepanitaj amotaixcopincayohua huan amoteteyohua. ²³ Quema ninemiyaya, nijtachiliyaya nochi nopa taixpamit cati anquinchijtoque para anquinhueymatise. Huan nijpanti se taixpamit campa éltoc ni camanali: ‘Para nopa dios cati ayemo tiqixmatij.’ Huajca ama nijnequi nimechilhuis ten yaya cati anquitepanitaj masque ayemo anquixmatij.

²⁴ “Yaya Toteco Dios cati quichijqui taltipacti huan nochi tamanti cati onca ipani. Quinahuatía nochi ilhuicacti huan taltipacti. Yaya amo mocahua ipan se tiopamit cati tamachijchihuali. ²⁵ Amo teno huelis tijchihuase para ya, pampa yaya amo teno quimonequilía. Iselti quinmaca nemilisti nochi cati itztoque. Quena, yaya quichihua para nochi cati titaijyotilanaj ma titaijyotilanaca.

²⁶ “Yaya quinchijqui nochi tamanti masehualme ipan nochi talme ipan ni taltipacti ica san se inieso pampa hualajque ten san se tacat. Nojquiya quitaijtoc ipan taya tonali itztosquíaj nochi masehualme huan quitaijtoc hasta canque tamis inepa inintal. ²⁷ Toteco quinchijqui masehualme para ma quitemoca ya para quixmatise, masque eltoc quej ica yolic quimatemose. Pero nelía yaya amo itztoc huejca ten sesen tojuanti. ²⁸ Pampa ica itapalehuil Toteco tiiztoque, tinejnemij huan tijchihuaj nochi cati tijnequij. Eltoc quej sequij tajcuilohuani nica ipan amotal quijcuilojtoque: ‘Tojuanti tiiteipan ixhuhua Toteco.’ ²⁹ Huajca pampa tiiteipan ixhuhua Toteco, amo cuali para timoilhue para Toteco Dios nesi quej se taixcopincayot o se tamanti cati masehualme quichihuaj ica oro, o plata o tet. Masehualme san quichihuaj se taixcopincayot quej moyolilhuij itachiyalis Toteco. ³⁰ Huejcajquiya Toteco amo quichihuili cuenta cati masehualme quichihuayayaj pampa quimatqui amo quimachiliyayaj ten ya. Pero ama Toteco quinnahuatía

nochi masehualme campa hueli ma moyolpataca huan ma quincahuaca nopa taixcopincayome para quitoquilise san ya. ³¹ Pampa Toteco Dios quitajitoc se tonali quema xitahuac quintajtolsencahuas nochi masehualme ica se tacat, yaya Jesús cati quitapejpenijtoc. Huan Toteco quiyolcuic Jesús quema mictoya para technextilis nelía yaya itztoc cati quitapejpenijtoc para ica quintajtolsencahuas nochi masehualme.”

³² Huan quema nopa altepet Atenas ehuan quicajque quenicatza Jesús moyolcuic quema ya mictoya, sequij san pejque quipinajtíaj, pero sequinoc quihhuijque:

—Tijnequij techcamanalhuis más ten ni tamanti ipan seyoc tonal.

³³ Huajca Pablo quincajtejqui. ³⁴ Huan sequij cati itztoyaj nozona quineltoaque Jesús, huan yajque ihuaya. Se cati quineltoac itztoya se tacat itoca Dionisio. Dionisio eliyaya se tequichijquet huan yaya ica sequinoc quisencahuayaya taya tasentilisti mochihuas ipan nopa tepet Areópago campa nochi momajtoyaj mosentilíaj. Nojquiya quineltoac se sihuat cati itoca Dámaris huan sequinoc masehualme.

18

Pablo itztoya ipan Corinto

¹ Teipa Pablo quisqui altepet Atenas huan yajqui altepet Corinto. ² Nepa quipanti se israelita tacat cati itoca Aquila cati ejqui tali Ponto huan yajqui quipaxaloto ichaj. Aquila ihuaya isihua Priscila yancuic huajajtoyaj ten altepet Roma ipan tali Italia pampa Tanahuatijquet Claudio ipan Roma tanahuati ma quisaca ipan ialtepe nochi israelitame. ³ Huan Pablo quimatiyaya quenicatza quijtzomas filahuac yoyomit para quichihuas yoyon calme. Huan Aquila ihuaya isihua nojquiya san se tequit quichihuayaj. Yeca Pablo mocajqui ininchaj huan tequitique san sejco. ⁴ Huan ipan sese sábado Pablo yajqui ipan nopa israelita tiopamit huan quincamanalhuyaya israelitame huan griegos cati mosentiliyayaj nozona para ma quineltoaca Jesús.

⁵ Pero quema Silas huan Timoteo ajsicoj altepet Corinto ipan tali Macedonia, Pablo quicajqui itequi para quichihuas yoyon calme huan senquisa motemactili para tepohuilis icamanal Toteco mojmota. Quinilhuyaya israelitame ica chichahualisti para Jesús nelía itztoya nopa Cristo cati Toteco quititanqui. ⁶ Pero quema nopa israelitame amo quiselijque icamanal huan quitajilhuijque, Pablo san quitzejtzelozelo iyoyo para quinnextilis quincajtehuayaya, huan quinilhui:

—Amotajtacol amojuanti sinta anmiquise huan anyase micta. Amo notajtacol na, pampa ya nimechilhui cati melahuac cati amechmanahuijtosquía. Ama huan teipa san niquincamanalhuiti masehualme cati amo israelitame.

⁷ Huan Pablo quincajtejqui huan yajqui ichaj se tacat cati amo israelita. Yaya itoca Justo huan yaya momatqui motatajtía huan quitepanita Toteco, huan quipixtoya ichaj nechca nopa israelita tiopamit. ⁸ Huan Crispo, se tayacanquet ipan inintiopa israelitame, nojquiya quineltoac Toteco ihuaya nochi ihuicalhua. Huan miyac masehualme ipan Corinto quicajque icamanal Pablo huan quineltoaque huan mocuaaltijque. ⁹ Huan se tayohua Tohueyiteco quihhui Pablo ipan se tanextili quej se temicti: “Amo ximajmahui. Xitepohuilijtinemi ten na huan amo xijcahua. ¹⁰ Na niitztoc mohuaya, huan amo aquí huélis mitzchihuilis teno, pampa niquinpiya miyac masehualme ipan ni altepet cati nechneltocase.”

¹¹ Huajca Pablo mocajqui altepet Corinto para se xihuit huan tajco tamachtiyaya icamanal Toteco.

¹² Teipa ipan nopa tonali quema Galión elqui gobernador ipan tali Acaya, mosentülijque sequij israelitame cati quicualancaitaque Pablo. Quiitzqui-que huan quihuihuacque iixpa Galión para quitelhuise. ¹³ Huan quiilhuijque:

—Ni tacat quinmachtiá masehualme ma quihueyimatca Toteco, pero amo quej totanahuatilhua quiijtohuaj monequi tijchihuase.

¹⁴ Huan quema Pablo pehuayaya camanaltis, Galión achtohui quinilhui israelitame:

—Sinta anquitelhuisquíaj ni tacat ica se hueyi taixpanoli o se tamanti cati fiero quichijtoc, huajca notequi para nimechcaquis. ¹⁵ Pero amo quej nopa quichijtoc. San ancualanij pampa tamachtía cati amo quej quiijtohuaj amotanahuatilhua, huajca xijsencahuaca amoselti nopa tamanti. Amo notequi para nijsencahuas tamanti quej nopa.

¹⁶ Huan quincoxiti ten nopa tequicali. ¹⁷ Huan miyac cati amo israelitame quiitzqui-que Sóstenes, nopa tayacanquet ten israelita tiopamit nopona. Huan quimaquilijque iixpa Gobernador Galión, pero yaya quichijqui quej amo quiitac.

Pablo mocuetqui Antioquía

¹⁸ Pablo mocajqui altepet Corinto más miyac tonali huan teipa quinnahuatijtequi nopa taneltocani, huan yajque ipan nopa hueyi cuaacali inihuaya Aquila huan Priscila hasta tali Siria. (Achtohui ipan Cencrea Pablo moxinqui pampa tanqui quichihua cati quitencahuilijtoya Toteco quichihuasquí que israelitame quimatij quichihuaj.) Huan teipa calajque ipan cuaacali huan yajque tali Siria. ¹⁹ Huan quema ajsitoj altepet Éfeso, Pablo quincajqui Aquila huan Priscila. Huan Pablo yajqui ipan nopa israelita tiopamit huan quincamanalhui nopa israelitame cati mosentilijtoyaj. ²⁰ Huan nopa israelitame quinequiyayaj Pablo ma mocahua más tonali ipan Éfeso huan yaya quinilhui para amo. ²¹ San quinnahuatijtequi huan quinilhui: “Monequi niitztos ipan Jerusalén para nopa ilhuit cati itoca Pascua, pero sempa nihualas nica teipa sinta Toteco quinequis.”

Huan Pablo calajqui ipan se hueyi cuaacali huan quisqui altepet Éfeso. ²² Huan nopa cuaacali nejnenqui ipan hueyi at hasta Cesarea. Huan ten nopona yajqui quinpaxaloto nopa tiopamit ten taneltocani ipan altepet Jerusalén. Huan teipa nejnenqui hasta altepet Antioquía.

Pablo ica expa yajqui tepohuiliti Icamanal Toteco campa hueli

²³ Pablo mocajqui ipan altepet Antioquía se quentzi tonali huan quisqui huan panotiyajqui ipan nopa talme Galacia huan Frigia. Huan campa hueli quinyolchicajtinenqui nochi taneltocani cati nopona itztoyaj.

Apolos tepohuli icamanal Toteco ipan Éfeso

²⁴ Teipa ajsito altepet Éfeso se israelita cati itoca Apolos cati ehua altepet Alejandría. Yaya quipixqui miyac yajatili para camanaltis ica chichahualisti huan cuali quimatqui Icamanal Toteco. ²⁵ Sequinoc quimachtijtoyaj cuali quenicatza iojhui Tohueyiteco Jesús. Huan ica paquilisti camanaltiyaya huan tamachtiyaya xitahuac ajquiya Jesús, pero san mocuaaltijtoya quej Juan tecuaalti achtohuiya. ²⁶ Huan Aquila huan Priscila quicajque quema Apolos camanaltic ica chichahualisti ipan nopa israelita tiopamit. Huan teipa quihuicaque iyoca huan quiilhuijque Apolos quentzi más xitahuac quenicatza eltoc iojhui Toteco. ²⁷ Huan Apolos quinequiyaya yas tali

Acaya, huan nopa taneltocani cati ehuaní altepet Éfeso quiyolchicajque ma yahui. Huan quiijcui lojque se amatajcuiloli para quinilhuisse taneltocani ipan Acaya ma quiselica. Huan Apolos ajsito nozona huan quinpalehui miyac masehualme cati quineltocatoyaj Jesús pampa hueyi iyolo inihuaya. ²⁸ Huan ica chichahualisti Apolos monajnanquili miyacapa inihuaya israelitame campa miyac masehualme mosentilijtoyaj. Huan quinnextili ipan Icamanal Toteco para Jesús nelía nopa Cristo cati israelitame quichiyayayaj ma huala.

19

Pablo itztoya ipan altepet Éfeso

¹ Huan quema Apolos noja itztoya ipan altepet Corinto, Pablo panotiyajqui ipan pilaltepzetitzi ipan tepeme huan ajsito altepet Éfeso. Nepa Pablo quinpanti sequij taneltocani, ² huan quintatzintoquili:

—¿Anquiselijque Itonal Toteco quema anquineltocaque?

Huan quinanquiliijque:

—¡Amo! Amo tijcactoque sinta itztoc se Itonal Toteco.

³ Huan Pablo quintatzintoquili:

—¿Ica ajquiya itequiticayo anmocuaaltijque?

Huan quinanquiliijque:

—Elqui Juan cati techcuaalti.

⁴ Huajca Pablo quinilhui:

—Juan quincuaalti masehualme cati moyolpatatoyaj ten inintajtacolhua. Quinilhuiyaya masehualme monequi quineltocase yaya cati hualasquía teipa, quijitosnequi Jesús. Yaya cati itztoc nopa Cristo cati Toteco quijito quititanisquía.

⁵ Huajca quema nopa taneltocani quicajque ya ni, mocuaaltijque ipan itoca ^{*} Tohueyiteco Jesús. ⁶ Huan Pablo quintalili imax ininpani huan Itonal Toteco calajqui ipan iniyolo. Huan camanaltique seyoc tamanti camanali cati amo quema momachtijtoyaj. Huan nojquiya camanaltique quej tajtolpanextiani huan quijitojque camanali cati Toteco quinmacac. ⁷ Huan itztoyaj quej majtacti huan ome tacame cati quineltocaque Jesús nozona.

⁸ Huan para eyi metzti Pablo yahuiyaya ipan israelita tiopamit huan ica chichahualisti tepohuiluyaya icamanal Toteco huan quinilhuiyaya ten itanahuatilis Toteco. ⁹ Pero sequij israelitame moyoltetilijque huan amo quineltocaque. Quitaijilhuijque iojhui Toteco inixpa nochi nopa miyac masehualme cati mosentilijtoyaj para ma amo quineltocaca. Yeca Pablo quincajtejqui huan yajqui inihuaya cati quineltocatoyaj huan pejqui quinmactía mojmosta ipan icaltamachtil Tiranno. ¹⁰ Nepa Pablo tamachtí para ome xihuit huan yeca nochi israelita huan griego masehualme ipan tali Asia quicajque nopa camanali ten Jesucristo. ¹¹ Huan Toteco quimacac Pablo chichahualisti ma quichihua huejhueyi tiotchahualnescayot. ¹² Hasta masehualme quicuiyayaj payos o yoyome cati ica quitoxontoya itacayo Pablo huan quihuicayayaj campa cocoyani huan campa cati quinpixtoyaj iajacahua Amocualtatcat huan nopa cocoyani mochicahuayayaj huan nopa ajacame quisayayaj.

¹³ Huajca itztoyaj sequij israelitame cati nejnentinemiyayaj campa hueli para quinquixtise iajacahua Amocualtatcat. Huan injuanti nojquiya quinejque quitequihuisse itoca Tohueyiteco Jesús para quinquixtise huan huajca

* 19:5 19:5 Ica itequiticayo.

pejque quinilhúaj ajacame: “Timitznahuatíaj ipan itoca † Jesús cati Pablo tepohuilía, xiquisa ipan ni tacat.”

¹⁴ Itztoyaj chicome tacame cati quichihuayayaj ni tamanti. Inijuanti eliyayaj iconehua Esceva, se tayacanquet ten israelita totajtztizi. ¹⁵ Huan se tonali quicamanalhuyiyaj se ajacat ipan se masehuali huan nopa iajacayo Amocualtacat quinnanquili: “Niquixmati Jesús huan nijmati ajquiya Pablo, pero ¿ajquiya amojuaniti?”

¹⁶ Huan nopa tacat cati quipixtoya iajacayo Amocualtacat ipan itacayo, huitonqui ipan nopa tacame cati quiquixtilisquíaj huan quinmaquili huan quintanqui. Huajca nopa tacame cholojque ipan nopa cali, xolome huan cocojtoque. ¹⁷ Huan nimantzi nochi masehualme campa hueli ipan nochi altepet Éfeso, masque israelitame o griegos, nochi quimatque ten panoc. Huajca nochi momajmatijque miyac huan más quihueyitepanitaque Tohueyiteco Jesús‡.

¹⁸ Huan miyac masehualme cati quineltocatojay Jesús hualajque huan iniixpa nochi sequinoc, tepohuilicoj nopa tamanti cati amo cuali cati quichihuayayaj achtohuiya. ¹⁹ Huan miyac tenahualhuiani nojquiya quihualicaque iniamatapohual huan quitatijque iniixpa nochi masehualme. Huan nochi nopa tamanti cati quitatijque para quitoquilise Toteco ipati eliyaya quej cincuenta mil ten ininplata tomi huan ya nopa elqui tomi para tahuel miyac xihuit ten tequit. ²⁰ Huajca quej ni noja más momajqui icamanal Toteco campa hueli huan nochi quitaque para nelía quipiya chicahualisti.

²¹ Quema panotoya nochi ni tamanti, Pablo quimachili para Itonal Toteco quihhuiyaya ma quinpaxaloti taneltocani ipan tali Macedonia huan tali Acaya. Huan teipa Pablo quinequiyaya yas altepet Jerusalén. Huan nojquiya moilhui quema tamisquía quipaxalohua Jerusalén, yasquía hasta altepet Roma. ²² Huajca quintitanqui Timoteo huan Erasto cati quipalehuiyayaj ma tayacanaca hasta tali Macedonia. Huan Pablo mocajqui se quentzi más tonali ipan tali Asia.

Moyolajcomanque masehualme ipan Éfeso

²³ Ipan nopa tonali moyolajcomanque miyac masehualme cati amo quitoquiliyayaj Nopa Ojti ica nochi cati quitoquiliyayaj, quinequi quiiijos, nochi cati quineltocayayaj Jesús. ²⁴ Quinyacanayaya se tacat cati itoca Demetrio cati quinchijqui pilcaltztizi ica plata cati nesqui quej itiopa nopa tonantzi Diana. Yaya huan nochi tacame cati tequitique ihuaya quitaniyayaj miyac tomi ica nopa tonantzi pampa miyac masehualme nepa quihueyimatiyayaj. ²⁵ Yeca Demetrio quinsentili nochi nopa tacame cati tequitique ihuaya, inihuaya nochi sequinoc tacame cati ehuan nopa altepet cati san se tequit quichijque huan quinilhui: “Tacame, anquimatij tijtanij miyac tomi ica totequi. ²⁶ Huan anquiiitaj huan anquimatij ni Pablo quiijttohua para taixcopincayome cati tamachijchihuali amo ya nopa dios. Huan miyac masehualme nica altepet Éfeso huan ipan nochi tali Asia quineltocaj cati yaya quiijttohua. ²⁷ Huajca amo san mahuilili pampa huelis tijpolose totequi ica cati yaya tamachtía, pero nojquiya huelis masehualme ayecmo quitepanitase itiopa Diana, tohueyi tonantzi cati nochi ipan tali Asia huan ipan nochi taltipacti quihueyimajtoque hasta ama.”

† 19:13 19:13 Ica itequiticayo. ‡ 19:17 19:17 Itoca Tohueyiteco Jesús.

²⁸ Huan nopa masehualme quicajque ya ni, huan pejque tahuel cualanij, huan pejque tzajtzi chicahuac: “¡Nelhueyi Diana totonantzi nochi tiÉfeso ehuani!”

²⁹ Huajca nochi masehualme ipan nopa altepet amo quimatiyayaj taya quichihuase huan motalojqe sentic ipan se hueyi calijit campa motatque mosentilíaj ipan inialtepe. Huan quinhuaatatziyajque Gayo huan Aristarco cati ehuani tali Macedonia. Huan Pablo quinequiyaya yas ipan nopa tasentilisti, ³⁰ pero nopa taneltocani amo quicahuilijque ma yahui. ³¹ Huan nojquiya sequij tequichihuani cati ehuani tali Asia cati elque ihuampoyohua Pablo quititanilijque se amacamanali para ma amo yahui ipan nopa tasentilisti.

³² Huan ipan nopa tasentilisti sequij tzajtziyayaj se tamanti huan sequinoc seyoc tamanti, pampa tahuel mocuapolojtoyaj. Huan quipano tajco nopa masehualme amo quimatiyayaj para ten mosentilijtoyaj. ³³ Huan sequij israelitame quicuatopehuayaj Alejandro ma yahui iniixpa nochi nopa masehualme para quinilhuis nochi ten panoc. Huajca Alejandro quinmachihuii ma ayecmo tahuejchiuaca pampa quinequiyaya camanaltis para quinmanahuis Pablo huan Silas cati eliyayaj israelitame quej ya. ³⁴ Pero quema nochi nopa masehualme quimatque para Alejandro elqui se israelita huan yeca amo quitapanita inintonantzi, huajca pejque chicahuac tzajtzi san sejco: “¡Nelhueyi Diana totonantzi nochi tiÉfeso ehuani!” Huan para ome horas quej nopa tahuejchijque.

³⁵ Huan teipa hualajqui nopa tequitiquet cati ehuani nopa altepet huan quinmachihuii nopa masehualme ma ayecmo molinica. Quiijto: “¡AnÉfeso ehuani! Nochi masehualme campa hueli tali quimatij tiÉfeso ehuani tijmocuitahuíaj itiopa Diana, totonantzi cati más hueyi, huan tijmocuitahuíaj itaixcopincayo cati huetzqui ten ilhuicac. ³⁶ Amo agui huelis quijtos amo neli ni tamanti; huajca ayecmo xitahuejchiuaca huan amo teno xijchiuaca hasta anmoilhuse cati xitahuac para mochihuas ica totanahuatil. ³⁷ Ni tacame cati anquinhualicaque nica amo quitachtequilijtoque itiopa Diana huan amo quitaijilhuijtoque totonantzi. ³⁸ Huajca sinta Demetrio huan nopa sequinoc tacame cati ihuaya tequitij quinequij quintelhuse, iztoque tequichihuani campa tequicali cati quincacquilise huan quincacjtolscncahuase, pero san nozona huelis antetelhuitij. ³⁹ Huan sinta anquinequij seyoc tamanti, monequi anquiscncahuase ipan se tasentilisti ica tequichihuani quej totanahuatilhua quijtohuaj. ⁴⁰ Pampa neli mahuilili sinta quitelhuse toaltepe iixpa nopa tanahuatijquet pampa nochi anmoyolajcomanque ama. Amo huelis títananquilise sinta tequichihuani ipan altepet Roma quinequise quimatise para ten panoc ni tasentilisti cati amo quinamiqui para panos.”

⁴¹ Huajca nopa tequitiquet tanqui camanalti huan quinnahuatijtejqui. Huan nochi yajque ininchajchaj.

20

Pablo yajqui Macedonia huan Grecia

¹ Quema tantoyaj moyolajcomanaj nopa Éfeso masehualme huan nochi moyoltalijque, Pablo quinnotzqui taneltocani ma mosentilica huan quinyolchicajqui huan quincuanajnahuaajqui. Teipa quinnahuatijtejqui huan yajqui tali Macedonia. ² Quinpaxaloto nochi taneltocani campa hueli ipan

nopa altepeme campa achtohui yajqui huan ica miyac camanali quinyolchicajqui. Teipa ajsito ipan tali Grecia, ³ huan para eyi metzti mocajqui nopona. Huan Pablo itztoya para calaquis ipan se hueyi cuaacali huan yas xitahuac hasta tali Siria, pero quicajqui para sequij israelitame quichiyayaj para quimictise ipan ojti, yeca tacuepili achtohui ipan tali Macedonia ipan Asia campa hualajtoya. ⁴ Huan ihuaya yahuyayaj para tali Asia, Sópater cati ehua altepet Berea, Aristarco huan Segundo cati ejqui altepet Tesalónica, Gayo cati ejqui altepet Derbe, huan Timoteo, Tiquico huan Trófito cati ejque tali Asia. ⁵ Huan injuanti tayacangue huan techchixque ipan altepet Troas. ⁶ Pero Pablo huan na niLucas, tijchixque hasta tanqui nochi tonali ten nopa Pascua Ilhuit quema tiisraelitame tijcuaj pantzi cati amo quiptiya tasonejcyot. Huan teipa tiquisque altepet Filipos ipan se hueyi cuaacali. Huan ica maculi tonati tiajsitoj altepet Troas campa nopa taneltocani techchiyayaj huan timocajque nepa chicome tonati.

Pablo itztoya ipan Troas

⁷ Huan ipan domingo, nopa tonali cati achtohui ipan samano, nochi cati tijtoquilíaj Tohueyiteco timosentilijque para tijtajcotapanase pantzi para tiqelnamiquire. Huan Pablo pejqui quincamanalhuia nochi taneltocani, moilhuyaya para tonili tiquisasquíaj. Huan tajco yohual Pablo noja quincamanalhuyaya. ⁸ Timosentilijtoyaj ipan se cuarto ten se cali cati quiptiya eyi piso. Huan oncayaya miyac taahuili ten aceite ipan nopa cuarto campa tiitztoyaj. ⁹ Huan se telpocat cati itoca Eutico mosehujtoya ipan se ventana tapojtoc huan tahuel cochisnequiyaya pampa Pablo huejajqui camanaltic. Huan ica más icamanal Pablo, Eutico pejqui cochi. Huan mocuatepexihui ten nopa expa cuarto ipan nopa cali cati quiptiya eyi piso huan huetzito hasta talchi. Huan quema masehualme ajsitoj tatzinta para quitananase, quitaque ya mictoya. ¹⁰ Huajca Pablo temoc huan motejqui ipan ya huan quicuanajnahujqui. Huan quinilhui nopa taneltocani:

—Amo ximomajmatica. Ya yoltoc.

¹¹ Huan Pablo sempa tejcoc ipan tasentilisti huan quitajcotapanqui pantzi para tiqelnamiquire Toteco, huan tijcuajque. Teipa quincamanalhui nopa taneltocani nopona hasta tanesqui, huan tiyajque. ¹² Huan nopa taneltocani quihuaque nopa telpocat ichaj huan nelía ya yoltoya huan nochi tahuel paquiyayaj.

Tiyajque Mileto

¹³ Huan titayacantiyajque hasta altepet Asón ipan se hueyi cuaacali campa tijnamiquisquíaj Pablo pampa Pablo quinejqui icxinejnemis hasta Asón. ¹⁴ Huajca teipa tijpantijque Pablo ipan altepet Asón huan yaya tejcoc ipan cuaacali tohuaya, huan san sejco tiajsitoj altepet Mitlene. ¹⁵ Huan teipa tocuaacal quisqui nepa huan ipan seyoc tonal tiajsitoj piltaltzi Quío. Huan tonili tiajsitoj piltaltzi Samos, huan ipan seyoc tonali tiajsitoj altepet Mileto. ¹⁶ Pero amo tiyajque Éfeso pampa Pablo amo quinequiyaya mocahuas ipan tali Asia para miyac tonali. Quinequiyaya moisihiultis para ajsiti ipan altepet Jerusalén sinta huelisquía para itzto ipan nopa israelita ilhuit cati itoca Pentecostés.

Pablo quincamanalhui nopa huehue taneltocani ipan Éfeso

¹⁷ Huan quema tojuanti noja tiitztoyaj Mileto, Pablo quintitanqui tacame hasta altepet Éfeso ma quinnotzati nopa huehue tacame ten nopa tiopamit ten taneltocani ipan Éfeso. ¹⁸ Huan nopa huehue tacame

ajsicoj altepet Mileto huan Pablo quinilhui: “Anquimatij ten quema achtohuiya niajsico nica tali Asia huan hasta ama, ninejmentoc quej Toteco quinequi ica amojuanti. ¹⁹ Nimoechcapanojtoc huan nijtequipanojtoc Tohueyiteco ica nochi noyolo hasta quemantica nichocayaya ica cati nechpanotihualayaya. Nitaijyohuijtoc miyac pampa nopa israelitame quisencahuayayaj quenicatza huelis nechmictise. ²⁰ Pero amo nijcajtejqui notequi para nimechilhuis nochi cati xitahuac huan nochi cati monequiyaya xijmatica. Nitamachtiyaya miyacapa ipan amoaltepe huan nojquiya nipanotinemiyaaya ipan sesen cali campa anmösentiliyayaj para nimechmachtis. ²¹ Niquinilhuiyaya israelitame huan cati amo israelitame para monequi quipatase iniyolo iixpa Toteco Dios huan motemachise ipan Tohueyiteco Jesucristo. ²² Pero amantzi niyas altepet Jerusalén pampa eltoc quej Itonal Toteco nechtilana ma niya. Huan amo nijmati taya nechpanos nepa. ²³ Ipan sese altepet Itonal Toteco nechilhuijtoc para nechzacuase huan nechtaijyohuiltise miyac. ²⁴ Pero amo nimajmahui huan amo quenijqui masque nechmictise. Amo ipati nonemilis sinta amo nijtamiltis notequi ica paquilisti. Huan nopa tequit cati Tohueyiteco nechmacatoc ma nijchihua eltoc para niquinilhuis nochi masehualme icamanal huan para neliá hueyi iyolo Tohueyiteco ica nochi tojuanti.

²⁵ “Huan ama nijmati yon se amojuanti cati nimechilhuijtoc ten itanahu- atilis Toteco ayecmo quema antechitase nica ipan ni taltipacti. ²⁶ Yeca nijnequi nimechilhuis ama para amo notajtacol sinta sequij amo quinelto- catoque Jesús huan yase micta. ²⁷ Pampa ya nimechyolmelajtoc senquisa nochi cati Toteco quinequi xijmatica. ²⁸ Huajca ximotachilica para cuali xiquinmocuitahuica nochi taneltocani ipan nopa tasentilisti nopona campa amojuanti pampa Itonal Toteco amechtequimacatoc anhuehue tacame para anquinmocuitahuise cati itiopa Toteco pampa yaya quincojqui para ma elica iaxcahua quema quitoyajqui ieso por inijuanti. ²⁹ Na nijmati quema nimech- cajtehuas, hualasé tacame cati itzfose quej tepechichime cati tecuaj. Quineq- uise amechcajcayahuase pampa quinequise xijcajtehuaca Jesús. ³⁰ Huan sequij taneltocani ipan amoaltepe Éfeso nojquiya pehuase tamachtise cati amo melahuac pampa quinequise taneltocani ma quintoquilica. ³¹ Huajca xitachixtoca para ma amo aquí amechcajcayahuas. Huan xiquelnamiquica nimechmachtijtoc tonaya huan tayohua para eyi xihuit, huan nimechtal- namictijtoc hasta quemantica nichocac pampa tahuel nimechicnelia.

³² “Huan ama noicnihua, nimechtalis imaco Toteco huan nimechcahua ica icamanal cati techilhuia quenicatza hueyi iyolo ica tojuanti. Ica- manal amechtetalis huan amechpalehuis anmoscaltise ipan Toteco huan pampa anmotemachijaj ipan icamanal, anquiselise cati amechtencahuilij- toc nepa ilhuicac inihuaya nochi sequinoc cati taiyocatalilme para elise itatzejtzeloltica masehualhua Toteco. ³³ Amo niquixtocatoc seyoc masehuali itomi o iyoyo. ³⁴ Anquimatij iyoca nitequitiyaya para cati nechmonequi- liyaya huan nojquiya para cati quinmonequihuiyaya nopa tacame cati itztoyaj nohuaya. ³⁵ Quej nopa nimechnextilijtoc monequi titequitise chicahuac para techaxilis totomi para tiquinpalehuise cati amo teno quipiyaj. Xiquel- namiquica cati Tohueyiteco Jesucristo quijto: ‘Más paquilisti quiselia cati temaca se nitejqui, huan amo quej yaya cati quiselia.’ ”

³⁶ Quema Pablo tanqui quincamanalhuia nopa huehue tacame ten altepet Éfeso, motancuaquetzqui huan motatajti ica Toteco inihuaya. ³⁷ Huan nochi inijuanti chocaque miyac huan quicuanajnahuaque Pablo huan quitzoponijque para quinahuatijtehuase. ³⁸ Tahuel motequipachohuayayaj

pampa quinilhуйtoya ayecmo quema quitasquíaj ipan ni taltipacti. Huan teipa yajque ihuaya Pablo hasta campa nopa hueyi cuaacali.

21

Pablo yajqui altepet Jerusalén

¹ Huan teipa tiquincajtejqe nopa huehue tacame huan ticalajque ipan nopa hueyi cuaacali huan tiyajque xitahuac hasta piltaltzi Cos. Huan tonili tiajsitoj piltaltzi Rodas huan teipa tiyajque altepet Pátara. ² Nepa ipan Pátara tijpantijque seyoc hueyi cuaacali cati yahuiyaya tali Fenicia. Huajca ticalajque huan tiyajque. ³ Huan tiquitaque nopa piltaltzi Chipre cati mocahua tatajco hueyi at huan mocajqui ica toma arravez. Pero san tijpanoque huan tiyajque hasta altepet Tiro ipan tali Siria pampa tohueyi cuaacal quihucayaya tamamali para quicahuas nopona. ⁴ Huan tiquinpantijque taneltocani nopona huan timocajque inihuaya para chicome tonati. Huan quihuhijque Pablo ma amo yahui Jerusalén. Quihuhijque ya nopa pampa Itonal Toteco quinnextilijtoya taya quipanosquía nopona. ⁵ Pero tanqui nopa chicome tonati huan tiquisque. Huan nochi taneltocani nejnenque tohuaya. Yajque tacame, inihuaya inisihuhajhua, huan ininconehua hasta campa techcajtehuasquíaj huan tiquisque inialtepe. Huan quema tiajsitoj iteno hueyi at, timotancuaquetzque san sejco ipan xali huan timotatajtijque ica Toteco. ⁶ Huan teipa timocuanajnahujque para timonahuatijtejqe. Huan tojuanti ticalajque ipan nopa hueyi cuaacali huan inijuanti tacuepilijque ininchajhaj.

⁷ Quej nopa tiquisque altepet Tiro huan tiyajque ipan hueyi cuaacali hasta tiajsitoj altepet Tolemaida campa titemoque huan tiquintajpalotoj toicnihua huan timocajque inihuaya se tonal. ⁸ Tonili Pablo huan tojuanti cati tinejnenque ihuaya tiixcinejnenque hasta altepet Cesarea. Nepa tijpaxalotoj Felipe cati quipixqui yajatili para quinnotza masehualme ma quitoquilica Toteco. Yaya nojquiya eltoya se ten nopa chicome tapalehuiani cati quinmacayayaj tacualisti nopa achtohui taneltocani. Huan timocajque ihuaya. ⁹ Quinpixqui nahui iichpocahua cati ayemo monamictijtoyaj huan itztoyaj tajtolpanextiani.

¹⁰ Huan timocajque ichaj para miyac tonali. Huan hualajqui ten estado Judea se tacat cati itoca Agabo cati nojquiya elqui se tajtolpanextijquet. ¹¹ Huan yaya hualajqui techpaxaloco, huan quitojtomili itzinquechilpica Pablo huan mometzijilpi huan momajilpi huan quihuhui:

—Pablo, Itonal Toteco nechilhujtoc para nopa israelitame ipan Jerusalén quej ni mitzijilpise ta cati tiaxca ni tzinquechilpicayot. Huan mitztemactilise inimaco masehualme cati amo israelitame.

¹² Huan quema tijcajqe nopa camanali, tojuanti cati tihualajtoyaj ihuaya Pablo, inihuaya nopa Cesarea ehuan, nochi tiquilhujque ma amo yahui Jerusalén. ¹³ Pero Pablo technanquili:

—¿Para ten anchocaj huan antechtequipacholmacaj? Na niitztoc para nimotemactilis para nechilpise huan nojquiya para nechmictise pampa niiaxca Tohueyiteco Jesús sinta quej nopa monequi ipan Jerusalén.

¹⁴ Huan tiquitaque amo teno más huelqui tijchihuj, huajca tiquijtojqe: —Ma mochihua cati quinequi Tohueyiteco.

¹⁵ Teipa timocualchijchijque huan tiyajque Jerusalén. ¹⁶ Huan sequij taneltocani cati ehuani Cesarea yajque tohuaya huan techhualicaque hasta ichaj Mnasón cati achtohui ejqui nopa piltaltzi Chipre huan cati quineltocatoya Jesús para miyac xihuit. Huan timocajque nopona.

Pablo quicamanalhui Jacobo

¹⁷ Huan quema tiajsitoj altepet Jerusalén, nopa taneltocani techselijque ica paquilisti. ¹⁸ Huan tonili tiyajque ihuaya Pablo tijpaxalotoj Jacobo, huan nopona itztoyaj nojquiya nochi nopa huehue tacame ten taneltocani. ¹⁹ Huan Pablo quintajpalo, huan quinilhui sesen tamanti cati Toteco quichijtoya ica masehualme cati amo israelitame cati yaya quinmachtijtoya. ²⁰ Huan nopa huehue taneltocani ten Jerusalén quicajque cati quijito. Huan pejque quihueyichihuaq Toteco, huan nojquiya quihuhijque Pablo:

—Toicni Pablo, ta tijmati itztoque miles ten israelitame cati nojquiya quineltocatoque Jesús, huan nochi injuanti miyac quintepanitaj itanahuatilhua Moisés. ²¹ Huan israelita taneltocani quicactoque tiquinmachtía israelitame cati itztoque ipan altepeme ica masehualme cati amo israelitame para nojquiya ma quincajtehuaca itanahuatilhua Moisés. Quiijtohuaj tiquinilhuía israelitame ma amo motequilica inintacayo, yon inintacayo inioquichpilhua, ica nopa machiyot circuncisión. Huan quijtohuaj tiquinilhuía ma amo quitoquilica totamachtitl tiisraelitame. ²² Huajca ¿taya tijchihuase? Temachtí miyac israelitame mosentilise pampa quicaquise ya tiajsico nica. ²³ Achi cuali tijchihuas ni cati timitzilhuíaj. Itztoque nica nahui tacame cati quitencahulijtoque Toteco quichihuase se tamanti huan quicahuayayaj ma moscalti huehueyac inintzoncal hasta quitamichihuase. Huan ya nechcatitoc para quitamiltise nochi cati quitencajtoque quichihuase. ²⁴ Huajca para ten amo tiquinhuicas huan timotapajpacchihuas inihuaya huan xitaxtahua cati monequi para inintacajhualis cati monequi temacase para huelis moximase. Quej nopa nochi israelitame cati quicactoque nopa tamanti, quimatise para amo melahuac cati quijtohuaj ten ta. Huan quiitase noja tijtoquilía cati quijtohuaj itanahuatilhua Moisés. ²⁵ Pero para masehualme cati amo israelitame cati quineltocaj Tohueyiteco, ya tiquintajcuilhuijtoque huan tiquinilhuijque san ma quichihuaca cati más monequi. Ma amo quicuaca tacualisti cati sequinoc quitaliijtoque iniixpa taixcopincayome huan teteyome. Huan ma amo quicuaca esti, yon tapiyalme cati san quinquechpatzcatoque. Huan amo aqui ma quichihua tamanti ihuaya se cati amo itahuical.

Quiitzquijque Pablo ipan hueyi israelita tiopamit

²⁶ Huajca Pablo quinhuicac nopa nahui tacame huan tonili motapajpacchijqui inihuaya quej quijtojtoque itanahuatilhua Moisés. Huan yajqui ipan hueyi israelita tiopamit para quinilhuiti nopa totajtzitzi taya tonali nopa nahui tacame quitamiltisquíaj cati quitencahulijque Toteco para quichihuase. Quej nopa quimatisquíaj nopa totajtzitzi taya tonali sempa hualase para quimacase Toteco inintacajhualis.

²⁷ Pero se tonali quema monechcahuiyaya para quitamiltise nopa chicome tonati quema quichihuayayaj nochi cati itanahuatilhua Moisés quijtojtoque, Pablo itztoya ipan hueyi tiopamit. Huan quiitaque sequij israelitame cati hualajtoyaj tali Asia huan injuanti pejque quinyolajcomanaj miyac masehualme. Huan quiitzquijque Pablo, ²⁸ huan tzajtzique: “Anisraelita tacame, techpalehuica. Ya ni nopa tacat cati nemi campa hueli huan quinmachtía nochi masehualme ma amo quichihuaca cati tiisraelitame timomajtoque tijchihuaq. Quiijtohua ma amo tiquintoquilica itanahuatilhua Moisés, yon ma amo tijtepanitaca ni totiopa. Huan nojquiya quinhuacatoc sequij tacame cati amo israelitame nica tiopan calijit huan yeca quichijtoc amo tapajpacti ni tiopamit cati tatzejzelofitic.”

²⁹ Quiijtojqque ya ni pampa achtohuiya quitaque Trófimo quema nemiyaaya ihuaya Pablo ipan altepet Jerusalén. Huan yaya ehuyaya altepet Éfeso huan amo se israelita. Yeca moilhuijqque para Pablo quihuicac Trófimo ipan hueyi israelita tiopamit, pero amo cana.

³⁰ Huan nochi masehualme ipan altepet Jerusalén moyolajcomanque huan nimantzi nochi motalajtihualajque huan quiitzquijqque Pablo huan quihuahuatatzque iteno nopa hueyi tiopamit. Huan nimantzi quitzajque icalte nopa tiopamit. ³¹ Huan nopa israelitame quinequiyayaj quimictise Pablo quema nopa hueyi tayacanquet ten soldados romanos quicajqui para tahuel moyolajcomantoyaj nochi masehualme ipan Jerusalén. ³² Huajca nimantzi quinhuailicac isoldados huan inintayacanhua huan motalojqque hasta campa itztoyaj nochi nopa masehualme. Huan nopa tacame quitaque huala nopa hueyi tayacanquet inihuaya isoldados huan ayecmo quimaquiljqque Pablo.

³³ Huan nopa hueyi tayacanquet hualajqui huan quiitzqui Pablo huan quinilhui isoldados ma quiilpicá ica ome tepos cadena. Huan teipa pejqui quitatzintoquilía ajquiya Pablo huan taya amo cuali quichijtoya. ³⁴ Huan sequij nopa masehualme chicahuac quitzajtziyayaj se tamanti huan sequinoc seyoc tamanti. Huan nopa tayacanquet amo hueliyaya quimati taya nelía quichijtoya Pablo pampa miyac masehualme tahuejchihuayayaj. Huajca quinnahuati isoldados ma quihuicaca Pablo hasta cuartel campa mocajque soldados. ³⁵ Huan ajsitojqque nopa escalones ipan cuartel, huan nopa soldados quiquechpanojque Pablo para amo quiajsise nopa masehualme pampa nelía cualaniyayaj. ³⁶ Inijuanti quintoquiliyayaj huan tzajtziyayaj: “¡Xijmictica ne tacat!”

Pablo quincamanalhui nopa masehualme

³⁷ Huan quema quicalaquiayaj Pablo ipan cuartel, yaya quitatzintoquili nopa tayacanquet ten soldados:

—¿Huelis nicamanaltis ica ta se talojtzi?

Huan nopa tayacanquet quiijto:

—¿Ta tihueli ticamanalti tocananal, griego? ³⁸ Huajca ta amo tinopa tacat egipcio cati timoilhuyayaj. ¿Amo ta nopa tacat cati quinvolajcomanqui masehualme nozona tonaliya, huan quinycanqui nahui mil temictiani huan quinhuicac ipan nopa huactoc tali?

³⁹ Huan Pablo quiilhui:

—Na amo ya. Na niisraelita huan niehua campa nopa hueyi altepet Tarso ipan tali Cilicia. Techchihuili se favor, nijnequi niquincamanalhuis ni masehualme.

⁴⁰ Huan nopa tayacanquet quicahuili, huan Pablo moquetzqui ipan nopa escalones huan quinmachihuili ma ayecmo molinica. Huan quema ayecmo moliniyayaj, Pablo quincamanalhui ica hebreo, inincamanal israelitame. Quinilhui:

22

¹ “Noicnihua huan notatahua, xijtacaquilica cati nimechilhuis para nimanahuis pampa amo nijchijtoc nopa taixpanoli cati ica antechtelhujjqque.”

² Huan quema nopa masehualme quicajque quincamanalhui ica hebreo, inincamanal israelitame, ayecmo aqui molini, yon quentzi. Huan Pablo quinilhui:

³ “Na niisraelita. Nitacatqui altepet Tarso ipan tali Cilicia, pero nimoscalti nica ipan altepet Jerusalén. Huan nopa hueyi tamachtijjqque Gamaliel

nechmacthi xitahuac nochi nopa tanahuatilme ten tohuejcapan tatahua. Nochi tonali nijtoquilijitihualajtoc Toteco Dios ica nochi noyolo quej anquichihuaj ama. ⁴ Huan tahuel niquintaijyohuiltiyaya nochi ipan Nopa Ojti, quinequi quijitos nochi cati quineltocayayaj Jesucristo, hasta nijnequiyaya niqunimictis nochi. Niqunilpitinemyaya tacame huan sihuame huan niquintzacuayaya. ⁵ Huan nopa hueyi totajtzi inihuaya nopa huehue tacame ten israelitame huelis amechilhuisse para melahuac nocamanal. Inijuanti nechmacayayaj miyac amatajcuiloli cati quiijuilojtoyaj para toisraelita icnihua campa hueli ma nechcahuilica ma niqunintzqui taneltocani huan ma niqunihualica nica Jerusalén para inijuanti quintatzacuultisquíaj. Huan ipan nopa tequit se tonali niyajqui altepet Damasco para niquintemoti.

Pablo quinilhui quenicatza quineltocac Jesucristo
(Hch. 9:1-19; 26:12-18)

⁶ “Huan ipan nopa tonali quej tajco tona ninejnemyaya nechca altepet Damasco, huan nimantzi tatanexti se taahuili cati nelía chichahuac cati hualajqui ten ilhuicac huan nechyahualo. ⁷ Huan nihueztzqui talchi huan nijcajqui se cati nechcamanalhui huan nechilhui: ‘Saulo, Saulo, ¿para ten techtajyohuiltía?’

⁸ “Huan nijnanquili: ‘¿Ajquiya ta, noTeco?’

“Huan ya nechnanquili: ‘Na nijesús cati niehua Nazaret. Na cati techtajyohuiltía.’

⁹ “Huan cati itzttoyaj nohuaya quitaque nopa taahuili huan momajmatijque, pero amo quimachilijque cati Jesús nechilhuyiyaya. ¹⁰ Huan nijtatzintoquili: ‘Noteco, ¿taya tijnequi ma nijchihua?’

“Huan Jesús nechnanquili: ‘Ximoquetza huan xiya altepet Damasco huan nopona mitzilhuise nochi cati nijnequi xijchihua.’

¹¹ “Huan nechixmictijtoya nopa taahuili huan ayecmo huelqui nitachiya pampa nelía chichahuac eliyaya nopa taahuili. Huan cati itzttoyaj nohuaya nechmatilantijajque hasta altepet Damasco.

¹² “Huan itzttoya nopona se tacat cati itoca Ananías. Yaya nochipa quitoquiliyaya totanahuatilhua tiisraelitame, huan nochi israelitame nopona camanaltiyayaj cuali ten ya. ¹³ Huan Ananías hualajqui campa niitzttoya huan nechilhui: ‘Noicni Saulo, nimantzi huelis titachiyas.’

“Huan quena, nimantzi niquitac Ananías. ¹⁴ Huan yaya nechilhui: ‘Toteco, yaya cati ininDios tohuejcapan tatahua, mitztapejpenijtoc para tijmatis ipaquilis, huan para tiqutas Jesús, yaya cati senquisa xitahuac iixpa, huan para tijcaquis quema yaya mitzcamanalhuis. ¹⁵ Huan teipa tielis itayolmelajca huan tiqunilhuis nochi masehualme cati tiquitztoc huan cati tijcactoc. ¹⁶ Huajca amo ximochiya. Ximoquetza huan ximocuaalti. Xijtajtani Jesucristo huan yaya mitzpajpacas ten motajtacolhua.’

Pablo quinilhui quenicatza Toteco quititanqui

¹⁷ “Teipa nitacuepili nica Jerusalén huan se tonali nimotatajtiyaya ipan Toteco ipan tohueyi israelita tiopa huan niquitac se tanextili cati eliyaya quej se temicti. ¹⁸ Huan niquitac Jesús cati nechilhui: ‘Ximoisihuiti huan nimantzi xiquisa ipan ni altepet Jerusalén pampa masehualme nica amo quineltocaxe cati tiqijtos ten na.’

¹⁹ “Huan niquilhui: ‘NohueyiTeco, nopa masehualme quimatij quenicatza niquintzacuayaya huan niqunihuitequiyaya nochi cati mitzneltocaj ipan

nochi israelita tiopame ipan campa hueli altepeme. ²⁰ Huan quema quimictijque Esteban, na nojquiya niitztoya nopona. Huan nipaquiyaya ica cati quichihuilijque huan nijmocuitahui iniyoyo nopa tacame cati quimictijque.’

²¹ “Pero Tohueyiteco nechilhui: ‘Xiya. Nimitztitanis huejca para tiquinilhuis masehualme cati amo israelitame ni nocamanal.’ ”

Pablo iixpa nopa hueyi tayacanquet ten soldados romanos

²² Huan nochi nopa israelitame quitaquiliyayaj cati Pablo quinilhuyaya hasta quitenquixti nopa camanali ten “masehualme cati amo israelitame.” Huan ica nopa nimantzi cualanque huan chichahuac quijijtojqe: “¡Xijmictica ni tacat! ¡Amo cuali para itzto!”

²³ Huan chichahuac tzajtziyayaj huan moquixtilijque inintaque quej para tetehuisquíaj huan pejqe quiajcomanaj taltepecti pampa tahuel cualaniyayaj. ²⁴ Huan nopa hueyi tayacanquet ten nochi soldados quijto ma quihuicaca Pablo calijtic. Huan quinnahuati soldados ma quihuitequica Pablo ica cuahuasasti quema quitatzintoquiliyayaj hasta quinilhuisquía para ten nochi israelitame nelchichahuac quicualancaitayayaj. Quej nopa qimpantise cati melahuac. ²⁵ Huajca nopa soldados quipilijque imax huan imetz para quihuitequisquíaaj, huan Pablo quitatzintoquili se tayacanquet ten sequij soldados cati itztoyaj nechca:

—¿Tijpiya tequiticayot ica toley tiromanos para tijhuitequis se cati romano quej na quema ayemo techhuicatoc ica tequichihuaní para ma techtajtolsencahuaca?

²⁶ Huan nopa tayacanquet quicajqui ini, huan yajqui quicamanalhuito nopa hueyi tayacanquet ten nochi soldados, quilhui:

—Ximotachili taya tijchihuas ica ni tacat pampa yaya se romano.

²⁷ Huajca nopa hueyi tayacanquet hualajqui quitatzintoquilico Pablo:

—Techilhui xitahuac. ¿Ta tiromano?

Huan Pablo quijto:

—Quena.

²⁸ Huan nopa tayacanquet quilhui:

—Na nitaxtajqui miyac tomi para nimochijqui niromano.

Huan Pablo quinanquili:

—Pero na quema nifacatqui, ya niitztoya niromano.

²⁹ Huajca nopa soldados cati quihuitequisquíaaj Pablo nimantzi quicajtejqe. Huan nopa hueyi tayacanquet momajmati quema quimatqui para Pablo eliyaya se romano, pampa ya quipitoyaj ica tepos cadena huan nopa tanahuatilme ten Roma amo quincahuilía ma quichihuilica quej nopa se cati romano.

Pablo iniixpa israelita tasentilisti ten tequichihuaní

³⁰ Huan tonili nopa hueyi tayacanquet ten soldados quinequiyaya quimatis para ten nopa israelitame quitelhuyayaj Pablo. Huajca quiquixtili nopa tepos cadena, huan quinnahuati nopa tayacanani ten totajtzitzi huan nochi nopa israelita tasentilisti ten tequichihuaní ma mosentilica nopona. Huan quiquixtijque Pablo ipan tatzacti huan quihuicaque iniixpa nopa israelitame.

23

¹ Huan Pablo quintachili nopa huejhueyi israelita tequichihuaní huan quinilhui:

—¡Noicnihua! Hasta ama ni tonali ninejntoc ica notalnamiqulis cuali iixpa Toteco Dios huan amo nijchijtoc teno cati ica antechtelhuíaj.

² Huajca Ananías, nopa hueyi totajtzi quinnahuati cati itztoya nechca Pablo ma quimaquilica ipan icamac. ³ Huan Pablo quiihui:

—Toteco mitzmaquilis ta, tijpiya ome moxayac. Tiitztoc nica para techtaj-tolsencahuas quej quiijtouhaj tanahuatilme. Pero tiquixpano nopa tanahuatilme pampa titanahuati ma nechmaquilica. Huan yon se tanahuatili amo mitzcahuilía ya nopa xijchihua.

⁴ Huan sequij cati itztoyaj nopona quiihuique Pablo:

—¿Quej nopa tijcamaijixnamiqui ne hueyi totajtzi cati iaxca Toteco?

⁵ Huan Pablo quiijto:

—Noicnihua, amo nijmatiyaya sinta yaya eliyaya nopa hueyi totajtzi. Sinta nijmajtosquía, amo niquiijtojosquía pampa ijcuilijtoc ipan Icamanal Toteco: ‘Amo xijtaijilhui se cati quiipiya tequiticayot ica momasehualma.’

⁶ Huan Pablo quiiac itztoyaj ipan nopa tasentilisti sequij saduceos huan sequij fariseos, yeca quiijto chicahuac ipan nopa tasentilisti:

—Noicnihua, na nifariseo. Notata nojquiya eltoya se fariseo. Nechhualicatoque nica huan nechtelhuíaj pampa nijneltoaca para se tonal nochi masehualme cati mictoque, moyolcuise.

⁷ Huan quema quicajque cati Pablo quiijto, nopa fariseos huan saduceos pejque mocualaníaj huan monajnanquilíaj, huan nopa tasentilisti motaj-coxelo. ⁸ Pampa nopa saduceos moilhuíaj amo aqui moyolcuise, huan amo aquiyme ilhuicac ehuan huan moilhuíaj amo aqui quiipiya itonal. Pero nopa fariseos quineltoacaj nochi nopa tamanti. ⁹ Huan nelía chicahuac tahuejchijque nopa masehualme. Huajca sequij fariseos moquetzque huan pejque tanajnanquilíaj chicahuac, huan quiijtojque:

—Amo teno cati amo cuali quichijtoc ni tacat. Huelis se acajya itonal o se ilhuicac ejquet quicamanalhuijtoc, pero sinta quej nopa panotoc, ma amo ticualanica ica cati Toteco quichijtoc.

¹⁰ Huan tahuejchijque nopa masehualme pampa taniel cualaniyayaj hasta nopa tayacanquet ten soldados quimacasiyaya quihuejhuelosquíaj Pablo. Yeca quinnahuati isoldados ma quihuicaca ipan cuartel huan quitza-cuase.

¹¹ Huan nopa tayohua Tohueyiteco monexti iixpa Pablo huan quiihui: “Amo ximajmahui. Quej titeyolmelajtoc ten na nica ipan Jerusalén, nojquiya monequi tijchihuas ipan altepet Roma.”

Tacame quinejque quimictise Pablo

¹² Huan quema tanesqui mosentilijque sequij israelitame huan tates-tigojquetzque para quimictisquíaj cati hueli ten inijuanti cati tacuasquía o atisquía quema ayemo mictoc Pablo. ¹³ Huan quipano cuarenta tacame cati quej nopa motajtolmacatoyaj. ¹⁴ Huan yajque iniixpa nopa tayacanani ten totajzitzi huan nopa huehue tacame huan quinihuijque:

—Timotajtolmacatoque amo titacuase huan amo tiatise hasta tijmictise Pablo. Sinta titacuase o tiatise huan ayemo mictoc, ma techmictica.

¹⁵ Huajca amojuanti inihuaya nochi nopa tasentilisti ten tequichihuani xiquilhuica nopa tayacanquet ten soldados ma amechhualiquilica Pablo nica. Xiquilhuica anquinequij más anquitatzintoguilise. Huan tijchiyase ipan oji huan tijmictise quema noja polihui para ajsis.

¹⁶ Huan imachcone Pablo quicajqui cati nopa tacame quiijtohuayayaj quichihuase huan yajqui tequicalco quiihuito Pablo. ¹⁷ Huan Pablo quinotzqui se tayacanquet ten soldados huan quiihui:

—Xijhuica ni oquichpil hasta campa nopa hueyi tayacanquet pampa quinequi quihuis se tamanti.

¹⁸ Huajca quihuicac hasta campa nopa hueyi tayacanquet ten nochi soldados huan quihuis:

—Pablo cati tzactoc, nechnotzqui huan nechajtani ma nimitzhualiquili ni oquichpil pampa quinequi mitzilhuis se tamanti.

¹⁹ Huajca nopa hueyi tayacanquet quimaitzqui nopa oquichpil huan quihuicac sejoyoc para amo aqui ma quicaqui huan quitatzintoquili:

—¿Taya tijnequi techilhuis?

²⁰ Huan quinanguili:

—Nopa israelitame san sejco quisencajtoque mitztajtanise para mosta xijhuica Pablo iixpa nopa hueyi tasentilisti ten tequichihuani para más quitatzintoquillise ten itaixpanol, pero amo cana. ²¹ Amo xiquinneltoquili pampa quipano cuarenta tacame quichiyaj para quimictise ipan ojti. San sejco motajtolmacatoque amo tacuase, yon amo atise, hasta quimictise Pablo. Huan amantzi mocualtalíaj pampa moilhuíaj para quena, tijhuicas.

²² Huajca nopa hueyi tayacanquet ten nochi nopa soldados quinahuatijtejqui nopa oquichpil huan quihuis:

—Amo aqui xiquilhui sinta techyolmelahuaco.

Huan nopa oquichpil yajqui.

Quititanqui Pablo hasta Gobernador Félix

²³ Huan nopa hueyi tayacanquet ten nochi soldados quinnotzqui ome tayanca soldados huan quinilhui:

—Ma mocualtica doscientos amosoldados cati san icxinejnemise, huan setenta cati yase cahuayojtipa huan ome ciento cati quihuicase tepos taminti. Nochi anyase altepet Cesarea a las nueve ica tayohua.

²⁴ Nojquiya quinilhui ma quincualtica cahuayojme para ipan tejcos Pablo, huan quinilhui ma quihuica ica cuali hasta campa itztoc Gobernador Félix. ²⁵ Huan nopa hueyi tayacanquet quitajcuilhui Félix se amatajcuiloli cati quijto:

²⁶ Tohueyi Gobernador Félix, na niClaudio Lisias nimitztajpalohua.

²⁷ Ica ni amatajcuiloli nijtani ni tacat Pablo. Tijpantijque quema sequij israelitame quiitzquitoyaj huan quinequiyayaj quimictise. Huan niqunquixtili pampa nijcajqui yaya se romano. ²⁸ Huan nijnequiyaya nijmatis taya faixpanoli quichijtoya huan yeca nijhuicac ipan nopa hueyi israelita tasentilisti ten tequichihuani. ²⁹ Huan nijpanti para quitelhuijque ica se tamanti ten inintanahuatilhua israelitame, pero amo teno quichijtoya cati amo cuali para ma quimictica, yon para ma quitzacuaca. ³⁰ Nojquiya nijcactoc, sequij israelitame motajtolmacaque san sejco para quimictise; huajca yeca nimantzi nimitzitanilía. Niqunilhujtoc nopa tacame cati quinequij quitelhuise ma yaca moixpa. Ma yahui nochi cuali campa ta. San ya nopa.

³¹ Huajca nopa soldados quihuicaque Pablo hasta altepet Antípatris ica tayohua quej inintayacanca quinilhujtoya. ³² Huan tonili nopa soldados cati icxinejnemiyayaj quincajtejqe huan tacuepillijque cuartel ipan Jerusalén, pero nopa sequinoc cati yajque cahuayojtipa quihuicaque Pablo hasta campa Gobernador Félix. ³³ Huan quema ajsitoj altepet Cesarea, quitemacilitoj Pablo ica Gobernador Félix, huan quimacaque nopa amatajcuiloli.

³⁴ Huan Gobernador Félix quipojqui nopa amatajcuiloli huan quitatzintoquili Pablo canque ehua. Huan Pablo tananquili para ehuyaya ipan tali Cilicia, ³⁵ huan quillhui:

—Nimitztacaquilis teipa quema hualase cati mitztelhuiquij.

Huajca quinnahuati isoldados ma quimocuitahuica Pablo ipan nopa hueyi tequicali campa nopa Tanahuatijquet Herodes tequitic.

24

Pablo quicamanalhui Gobernador Félix

¹ Huan teipa quema panotoya macuili tonati, ajsico altepet Cesarea Ananías nopa hueyi totajtzi. Huan nojquiya ihuaya hualajque sequinoc huehue tacame ten israelitame huan se tatempahuijquet cati itoca Tértulo. Huan nochi yajque iixpa Gobernador Félix para quitelhuítj Pablo. ² Huan quema nopa soldados quihualicaque Pablo, Tértulo pejqui quitelhuía huan quillhui nopa gobernador:

—Timitztajpalohuaj, Gobernador. Timitztascamatij miyac pampa nochi tiitztoque cuali, huan ica motalnamiquilis miyac tamanti nejnemi cuali ipan total. ³ Félix, timitztascamatij miyac por nochi ni tamanti cati techchihuilijtoc. Nochi campa hueli paquij ica motequi. ⁴ Amo nijnequi nimitzcuatotonis ica miyac camanali, pero techchihuili se favor huan techtacaquili se talojtzi.

⁵ “Nelía ni tacat Pablo se tepasolojquet. Ipan campa hueli tali, yaya yahui campa israelitame huan tamachtía seyoc tamachtili para techxejxelos. Nojquiya quinyacana masehualme cati quineltoaj Jesús cati ejqui altepet Nazaret. ⁶ Huan se tonali ipan altepet Jerusalén Pablo quinejqui quichihuas amo tapajpacti tohueyi tiopa tiisraelitame huan yeca tiquitzquijque. Huan tijnequiyayaj tijtajtolsencahuasquíaq quej quijtohuaj totanahuatilhua tiisraelitame, ⁷ pero ajsico Lisias, nopa hueyi tayacanquet ten miyac soldados huan quitzqui ica miyac chicalualisti huan techquixtili. ⁸ Huan techilhui sinta tijnequiyayaj tijtelhuise, ma tihualaca hasta nica. Huan quema tijtatzintoquilis tijmatis xitahuac nochi cati timitzilhuíaq.”

⁹ Quej nopa quijto Tértulo, huan nopa israelitame cati itztoyaj ihuaya nojquiya quillhuijqque Félix para melahuac cati quijto. ¹⁰ Huajca nopa tequitiquet quimachihuili Pablo ma camanalti huan Pablo quijto:

—Nipaqui miyac pampa techcahuilijtoc nimitzilhuis cati panoc pampa nijmati ya quipiya miyac xihuit titequichijtoc ipan ni total. ¹¹ Ni tacame huelis mitzilhuise san quipiya majtaci huan ome tonali nijaisto ipan Jerusalén para nijhueyimatis Toteco. ¹² Huan amo aqui nechpantijtoc nitanajnanquilia, yon nitepasolohua nozona. Amo nijchijqui cati amo cuali ipan nopa hueyi tiopamit, yon ipan sequinoc tiopame, yon ipan nopa altepet. ¹³ Ni tacame amo huelis mitznexutilise para nelía nijchijtoc nopa taixpanoli ica cati nechtelhuíaq pampa amo nijchijtoc. ¹⁴ Pero nimitzyolmelahua para quena, nijtoquilia Nopa Ojti. Quinequi quijtos nijhueyimati Toteco Dios quej Jesús tamachtí, huan ya nopa injuanti quitocaxtía se taneltoquili cati amo cuali. Pero quej nopa nijhueyimati Toteco Dios cati tohuejcapan tatahua titoquilijque. Huan nijneltocha nochi cati ijcuilijtoc ipan totanahuatilhua tiisraelitame huan nochi cati nopa tajtolpanextiani quijcuiljojque. ¹⁵ Nojquiya nijneltocha Toteco quinyolcuis masehualme cati ya mictoque, cati cuajcualme huan cati amo cuajcualme. Huan ni tacame nica nojquiya ya nopa quineltoaj. ¹⁶ Yeca ica nochi nochicalualis nijchihua cati cuali

para notalnamiqulis amo nechtatelhuis para nijchijtoc cati amo cuali iixpa Toteco, yon iniixpa masehualme.

¹⁷ “Quema tanqui niquinpaxalojtinemi sequinoc talme para se ome xihuit, sempa nihualajqui Jerusalén para niquinmacato tomi nopa cati teicneltziti huan para nijmacas Toteco tacajcahalisti. ¹⁸ Huajca nijchijqui nochi cati monequi para nimotapajpacchihuas iixpa Toteco, huan niyajqui tiopan calijtic huan nijmacayaya Toteco se tacajcahalisti quema sequij israelitame ten tali Asia nechitaque. Pero amo aquí mosentiliyaya nohuaya huan amo aquí nijyolajcomanayaya. ¹⁹ Monequi nopa israelitame cati nelía nechitaque nozona para hualaca nica para nechtelhuisse sinta moilhuáj nijchijqui cati amo cuali. ²⁰ O ma quijitoca ni tacame nica taya notaixpanol quipantijque ipan nopa hueyi tasentilisti ten israelita tequichihuani quema nimonexti iniixpa. ²¹ San ipan nopa tasentilisti chicahuac niqijito: ‘Antechtelhuáj ama pampa nijneltoca para nochi masehualme cati mictoque, teipa moyolcuise.’

²² Huajca Félix nimantzi quinejqui quicahuas ni cualanti hasta seyoc tonali pampa cuali quimatqui quenicatza taneltocani quineltocaque Nopa Ojti, quinequi quijitos Jesús. Huajca Félix quinilhui:

—Nijtajtolsencahuas Pablo quema hualas Lisias nopa hueyi tayacanquet ten soldados.

²³ Huajca Félix quilhui nopa tayacanquet ten soldados cati quimocuitahuiyaya Pablo ma quicahuili ma quichihua cati quinequi huan para ma quipaxaloca ihuampoyohua huan ma quimacaca cati quimonequila.

²⁴ Huan panoc se ome tonali huan sempa ajsico Félix ipan altepet Cesarea ihuaya isihua Drusila cati eliyaya se israelita. Huan quifitanqui se tacat ma quicuiti Pablo pampa quinequiyayaj quicaquise para ten motemachía ipan Jesucristo. ²⁵ Huan Pablo pejqui quinilhuía quenicatza Toteco Dios quipactía san cati xitahuac. Huan quinequi para nochi ma monahuatica para ma amo quichihuaca cati amo cuali. Huan nojquiya quinilhui para se tonali nochi masehualme monextise iixpa Toteco para yaya quijitajtolsencahuas. Huajca ica nopa camanali momajmati Félix huan quilhui Pablo:

—Xiya ama huan seyoc tonali quema amo teno nijchihua, nimitznotzas techcamanalhuiqui.

²⁶ Nojquiya Félix quichiyayaya para Pablo ma quitaxtahuisquía para quicahuilis ma yahui, yeca miyac huelta quinotzayaya para quicamanalhuis. ²⁷ Huan panoc ome xihuit, huan tanqui itequi Félix quej gobernador huan pejqui tanahuatía Porcio Festo. Huan Félix quinequiyaya mocahuas cuali ica israelitame, huajca quicajtejqqui Pablo ipan tatzacti.

25

Pablo iixpa Festo

¹ Huajca teipa Porcio Festo ajsico Cesarea para quiselis itequi, huan mocajqui nozona eyi tonati, huan teipa quisqui huan tejcotiyajqui hasta altepet Jerusalén. ² Huan nozona mosentilijque ihuaya nopa tayacanani ten totajtziti huan nopa israelitame cati más quipixque tequiticayot, huan nochi quilhuijque cati ica quitelhuiyayaj Pablo. ³ Huan quitajtanijque Festo ma quinchihuili se favor huan ma quihualica Pablo hasta altepet Jerusalén pampa nopa israelitame ya mocualtijtoyaj para quimictisquáj ipan ojti. ⁴ Pero Porcio Festo quinilhui amo huelis pampa Pablo itztoya ipan tatzacti

ipan altepet Cesarea huan yaya nojquiya tacuepilisquía nozona ica se ome tonali. ⁵ Huan quinilhui:

—Sinta amojuanti cati anquipiyaj tequiticayot huelis antemose nohuaya hasta altepet Cesarea, huelis anquitelhuise nepa sinta quichijtoc se taixpanoli.

⁶ Huajca Porcio Festo mocajqui Jerusalén seyoc chicueyi o majtacti tonati huan teipa tacuepili hasta altepe Cesarea. Huan tonili mosehuyaya ipan tequicali campa tetajtolsencahua huan tanahuati ma quihualicaca Pablo. ⁷ Huan quema Pablo hualajqui, nopa israelitame cati hualajtoyaj ten Jerusalén moquetzque huan quitelhuijque ica miyac taixpanoli cati huejhueyi, pero amo huelque quinextilíaj para nelnelía quichijtoya nopa fiero tamanti. ⁸ Huan teipa Pablo camanaltic para momanahuis huan quinilhui:

—Amo nijchijtoc yon se taixpanoli ica totanahuatilhua tiisraelitame, yon ica tohueyi tiopa, yon amo teno nijchijtoc ica nopa hueyi tanahuatijquet César ipan altepet Roma.

⁹ Pero Porcio Festo quinequiyaya mocahuas cuali ica nopa israelitame, huajca quiilhui Pablo:

—¿Tijnequi tiyas Jerusalén huan nepa nimitztajtolsencahuas ica nochi ni tamanti cati mitzelhuíaj?

¹⁰ Huan Pablo quinanquili:

—Ama nimoquetza moixpa, ta cati tijpiya itequiticayo Tanahuatijquet César. Huan nica campa quinamiqui para techtajtolsencahuas. Amo teno niquinchiuilijtoc israelitame huan ya tijmati para nelía xitahuac cati nimitzilhuía. ¹¹ Sinta nijchijtosquía se hueyi taixpanoli huan quinamiqui ma nimiqui, techmicti. Pero amo melahuac cati nopa tacame ica nechtelhuij huan amo aqui quiipya tequiticayot nechtemactilis inimaco para nechmictise. Na nijnequi nopa hueyi tanahuatijquet, César, ma nechtajtolsencahua.

¹² Huajca Porcio Festo quincamanalhui sequinoc tequichihuani cati mosehuyayaj ihuaya, huan teipa quiilhui Pablo:

—Techtajtaniytoc para tiyas iixpa nopa hueyi tanahuatijquet César, huajca quena, nimitztitanis iixpa.

Pablo iixpa Agripa

¹³ Huan panoc se quesqui tonali ajsicoj Cesarea nopa tanahuatijquet ten israelitame cati itoca Herodes Agripa II* ihuaya iicni Berenice. Hualajque para quitajpalose Porcio Festo. ¹⁴ Huan mocajque nozona miyac tonali. Huan Festo quicamanalhui Agripa ten Pablo huan quinilhui:

—Itzoc se tacat nica cati Gobernador Félix quicajqui ipan tatzacti quema tanqui itequi. ¹⁵ Huan quema niitzyo ipan altepet Jerusalén, nopa tayacanani ten totajtzitzi huan huehue tacame ten israelitame quitelhuijque noixpa huan nechilhuijque monequi para miquis.

¹⁶ “Huan niquinilhui amo onca tequiticayot ipan ni tali cati iaxca Roma para nitemactilis se tacat ma miqui quej nopa. Monequi achtohui masehualme ma quitelhuica iixpa huan teipa tijcahuase nopa tacat ma camanalti para momanahuis iniixpa cati quitelhuíaj. ¹⁷ Yeca quema nopa israelitame hualajque nica Cesarea, amo nijpolo yon se talojtzi. Huan tonili nimosehui ipan notequi campa tequicali huan nitanahuati ma nechhualiquilica Pablo.

¹⁸ Pero injuanti cati quitelhuyayaj amo quitelhuijque ica se hueyi taixpanoli quej nimoilhui para huelis quichijtoya. ¹⁹ San quitelhuijque pampa

* 25:13 25:13 Icone Herodes Agripa I ipan Hechos 12:1.

amo qitoquiliyaya iniisraelita tamachtil quej quinequiyayaj. Nojquiya nechcamanalhuijque ten se tacat Jesús cati nopa israelitame quijtohuaj mictoc, huan Pablo quijtohua para itztoc. ²⁰ Huan amo nijmatiyaya taya nijchihuas ica ni tamanti; yeca nijtatzintoquili Pablo sinta quinequisquía yas Jerusalén para nijtajtolsencahuas nopona ica cati quitelhuíaj. ²¹ Pero Pablo quijto quinequi quichiyas hasta nopa hueyi tanahuatijquet Augusto César quitajtolsencahuasquía. Huajca niqijto ma mocahua ipan tatzacti hasta nijtitanis Roma campá itztoc César.”

²² Huan Agripa quihui Festo:

—Na nojquiya nijnequi nijtacaquilis nopa tacat.

Huan Festo quinanquili:

—Mosta tijcaquis ten quijtos.

²³ Huajca tonili ajsitoj Agripa huan Berenice huan calajque ipan nopa hueyi tequicali ica miyac tatepanitali huan moquentiyayaj iniyoyo cati más cuali. Huan calajque inihuaya miyac tayacanani ten soldados huan miyac masehualme cati fominpiyani ipan altepet Cesarea. Huan Festo tanahuati ma quihualicaca Pablo. ²⁴ Huan teipa Festo quihui nopa masehualme:

—Tanahuatijquet Agripa huan nochi amojuanti cati anmosentilijtoque nica, xiquitaca ni tacat cati itztoc amoixpa. Miyac israelitame ipan altepet Jerusalén huan nica ipan altepet Cesarea quitelhuíaj ica miyac tamanti huan chicahuac nechtajtaníaj para ma miqui. ²⁵ Pero amo teno nijpanti cati amo cuali quichijtoc para ma miqui, huan ama yaya quinequi yas iixpa

nopa hueyi tanahuatijquet César huan yeca niqijtojtoc nijtitanis nopona. ²⁶ Pero amo nijmati taya nijtajcuilhuis nopa hueyi tanahuatijquet para ma quimati itaixpanol. Huajca nijhualicatoc moixpa, Tanahuatijquet Agripa, para achtohui ta tijtatzintoquilis taya quichijtoc ica nopa israelitame. Quej nopa nijmatis taya nijtajcuilhuis César. ²⁷ Pampa nelía se huihuiyot sinta nijtitanis se tacat cati tzactoya hasta César huan amo niquilhuis taya ica quitelhuijtoque.

26

Pablo camanaltic iixpa Agripa

¹ Huajca Agripa quihui Pablo:

—Ama tihuelis techcamanalhuis para timomanahuis.

Huajca Pablo momatananqui huan pejqui camanalti: ² “Tanahuatijquet Agripa, nipaqui ama pampa nihuelis nimitzcamanalhuis para nimo-manahuis, pampa amo nijchijtoc cati ica nechtelhuíaj nopa israelitame. ³ Ta cuali tijmati nojquiya nochi totamachtil tiisraelitame huan nochi tamanti cati ica timonajnanquiliíaj. Huajca nimitztajtanía xijtacaquili cati nimitzil-huis.

Quenicatza Pablo itztoya achtohuiya

⁴ “Nochi israelita tayacanani quimatij ten quema niitztoya nipilquentzi huan hasta quema nimochijqui nitelpocat, nimomachtí ica israelita tamachtiani ipan notal campá niehuayaya huan teipa ipan Jerusalén.

⁵ Nechixmajtoque miyac xihuit huan sinta quinequisquíaj, huelis mitzilhuise para nieliyaya se fariseo, nopa israelitame cati achi más chicahuac qitoquiliíaj nochi cati quijtohuaj toisraelita tanahuatilhua.

⁶ Pero ama injuanti nechtelhuíaj nica pampa nijneltocha Toteco Dios techtamichihuilis nochi cati quintencahuilijtoc tohuejcapan tatahua huejcajquiya para quichihuas huan techyolcuís quema timiquise. ⁷ Nochi

tohuejcapan tatahua, nopa majtacti huan ome iconehua Jacob, huan ininteipan ixhuihua nojquiya quineltocaj quitamichihuas icamanal, yeca quitequipanohuaj Toteco tonaya huan tayohua pampa quipiyaj ni taneltoquili. Pero pampa na nijpiya ni taneltoquili, Tanahuajtiquet Agripa, nopa israelitame ama nechtelhuáj. ⁸ ¿Para ten amo hueli anquineltocaj para Toteco Dios quinyolcuís masehualme cati mictoque?

⁹ “Achtohui na nojquiya nimoilhui para monequiyaya niquintaijyohuiltis cati quineltocaque Jesús ten Nazaret. ¹⁰ Huajca quej nopa nijchijqui ipan Jerusalén. Huan nopa tayacanani ten totajtzitzi nechmacayayaj tequiticayot ma niquintzacua miyac cati quineltocaque Jesús. Huan nojquiya quematacama quinmictiyayaj taneltocani, na niquinyolchichahuayaya para quichihuase. ¹¹ Miyac huelta nitanahuati ma quinhuiteguica taneltocani ipan toisraelita tiopahua campahueli pampa nijnequiyaya ma quitelchihuaca Cristo huan ma quicahuaca. Yeca niquintoquili jinengui taneltocani campahueli yajtoyaj hasta niyajqui ipan altepeme ipan sequinoc talme para niquintemos.

*Pablo sempa quijtohua para ten moyolpatac
(Hch. 9:1-19; 22:6-16)*

¹² “Huan se tonali ipan notequi ninejnemiyaya ipan ojti nechca altepet Damasco. Nopa tayacanani ten totajtzitzi nechtequimacatoyaj ma niquintemoti cati quineltocaj Jesús nozona huan nijhuicayaya amatajcuiloli cati quinextía para nechmacatoyaj tequiticayot ma nijchihuas nopa tequit. ¹³ Pero, Tanahuatijquet Agripa, ica tajco tona niquitac se taahuili más chichahuac que tonati. Nopa taahuili hualajqui ten ilhuicacti huan nechyahualo huan quinyahualo nochi cati nohuaya yahuiyayaj. ¹⁴ Huan nochi tihuetzque talchi huan nijcajqui se cati nechcamanalhui ica tohebreo camanal huan nechilhui: ‘Saulo, Saulo, ¿para ten techtaijyohuiltía? San moselti timococonequi.’

¹⁵ “Huan niqijto: ‘¿Ajquiyá ta, noTeco?’

“Huan Tohueyiteco quijto: ‘Na niJesús cati tijtaijyohuiltía. ¹⁶ Ximoquetza nimantzi. Ama nimonexti moixpa para nimitztequimacac tiitztos tinotequipanojca huan tinotayolmelajca. Nijnequi tiqinilhuis masehualme nochi cati tiqiztoc ama huan cati tiqitas quematacama nimonextis moixpa teipa.’

¹⁷ “Huan yaya quijto: ‘Nimitzmanahuis inimaco israelitame huan cati amo israelitame. Quena, ama nimitztitanis para tiqinilhuis cati amo israelitame nocamanal. ¹⁸ Huan tijchihuas ma tapohui iniixteyol para ma quicahuaca nopa tzintayohuilot huan ma nejnemica ipan taahuili. Huan quej nopa ayecmo itztose itantita ichicahualis Amocualfacat, ama quiixmatise Toteco. Quena, masehualme cati amo israelitame nojquiya nechnelto-case huan quipantise tapojpolhuili ten inintajtcolhua. Huan teipa pampa nechnelto-case, quiselise cati iniacxa nozona ipan ilhuicac inihuaya nochi sequinoc cati Toteco quiniyocatalijtoc para elise itatzejtzeloltica masehualhua.’ Quej nopa nechilhui Jesús.

Pablo quichijqui cati Toteco quinejqui

¹⁹ “Huan yeca, Tanahuatijquet Agripa, nijnelto-cac cati Toteco nechilhui ten ilhuicacti. ²⁰ Huan achtohui niyajqui Damasco para niteilhuis huan teipa niyajqui Jerusalén huan ipan nochi ni estado Judea. Nojquiya niqinilhuijtoc masehualme cati amo israelitame para ma quipataca iniyolo, huan ma quitoquilica Toteco huan ma quichihuaca cati cuali para nochi quimatise ya quipatatoque iniyolo. ²¹ Huan yeca nopa israelitame nechitzquijque ipan

tohueyi tiopa huan quinequiyayaj nechmictise. ²² Pero Toteco nechpalehui ipan nopa tonal huan nechmanahuijtoc hasta ama, huan yeca niquinca-manalhuía masehualme cati tapijpixtoque huan cati teicneltzitz, pero san niquinilhuía cati nopa tajtolpanextiani huan Moisés huejcajquiya quijto-que para teipa panosquía. ²³ Niquinilhuía quenicatza monejqui taijyohuis huan miquis nopa Cristo cati Toteco Dios quititanqui. Huan monejqui yaya elqui cati achtohui moyolcuic quema ya mictoya para elis cati quintaahuilis israelitame huan cati amo israelitame ipan iniyolo huan quinmaquixtis ten inintajacolhua.”

Pablo quinequi Agripa ma quineltoqa Jesús

²⁴ Huan Pablo noja quincamanalhuyaya, huan Festo quijto chichahuac: —¡Pablo tilocojti! Miyac timomachtijtoc huan yeca mitzlocojmacatoc.

²⁵ Pero Pablo quinanquili:

—Amo nilocojti, tihueyi tequichijquet Festo. Nimitzilhuía cati nelía xitahuac huan temachtí. ²⁶ Huan nica itztoc ni Tanahuatijquet Agripa cati cuali quimachilia nochi cati panoc ica Jesús huan yeca nimoneltalia para nicamanaltis xitahuac iixpa ten ni tamanti. Nijmati yaya quicactoc nochi ni tamanti cati Jesús quichijqui pampa nochi masehualme quimatque nochi cati panoc ica ya.

²⁷ Huan Pablo quilhui Agripa:

—Tanahuatijquet Agripa, ¿tijneltoca cati nopa tajtolpanextiani quijcuilo-que? Nijmati para tijneltoca.

²⁸ Huan Agripa quilhui Pablo:

—Ica seyoc se pilquentzi techchihuas ma nijneltoca Jesucristo.

²⁹ Huan Pablo quinanquili:

—Ma Toteco mitzpalehui para ta huan nochi cati itztoque nica xijneltocaca Cristo quej na nijneltoca masque ica se pilquentzi o ica miyac camanali. Pero amo niqijtohua para cuali amechilpise quej na nechilpitoque ica ni tepos cadena.

³⁰ Huajca moquetzque Tanahuatijquet Agripa, Gobernador Festo, huan Berenice huan nochi cati mosehuijtoyaj inihuaya. ³¹ Huan moiycatalijque huan pejque mocamanalhuiaj iniseltitzitz. Huan nochi quijtojque:

—Amo teno quichijtoc ni tacat para quimictise, yon para tzactos.

³² Huan Agripa quilhui Festo:

—Sinta Pablo amo tajtanosquía para yas iixpa César para quitajtolsenc-ahuas, huelisquía tijmajcajtosquía para yas ichaj.

27

Quititanque Pablo ipan Roma

¹ Huan quema nopa tequichihuani quijtojque ajsic nopa tonali para quititanise Pablo hasta tali Italia, quitemactilijque ya huan sequinoc tatzacme imaco se tayacanquet ten soldados itoca Julio. Huan nopa pamt ten soldados cati yaya quinyacanqui inintoca eliyaya nopa Pamt Augusta. ² Huajca nochi ticalajque ipan se hueyi cuaacali cati hualajqui ten altepet Adramitio huan yahuiyaya ipan hueyi at hasta nopa altepeme iteno tali Asia. Huan tiquisque nepa huan nojquiya yajqui tohuaya toicni Aristarco cati ehuyaya altepet Tesalónica ipan tali Macedonia.

³ Huan tonili tiajsitoj altepet Sidón. Huan Julio quitasojtac Pablo huan quicahuili ma quinpaxaloti ihuampoyohua huan para injuanti ma quimacaca nochi cati quimonequiliyaya. ⁴ Teipa tiquisque Sidón huan

tiyajque ipan hueyi at nechca tali Chipre huan tipanoque ica norte pampa nelía tahuel taajacayaya. ⁵ Huan teipa tiquixcotonque nopa hueyi at cati mocahua iteno tali Cilicia huan tali Panfilia. Huan tiajsitoj Mira, se altepet ipan Licia.

⁶ Huan nepa nopa tayacanquet Julio quipanti se hueyi cuaacali cati hualayaya ten altepet Alejandría huan yahuiyaya tali Italia, huan tech-nahuati ma ticalaquica ipan nopa cuaacali. ⁷ Huan para miyac tonali nopa hueyi cuaacali nejnenqui yolic, huan ica ohui tiajsitoj ipan nopa tali nechca Gnido. Huan tahuel taajacayaya huan amo techcahuiyaya ma tinejnemica, yeca tijyahualojque nochi iteno tali Creta campá amo más taajacayaya chichahuac huan tijpanoque Salmón. ⁸ Huan ica miyac tequit tipanotiyajque iteno Creta huan tiajsitoj campá se pilaltepetzi cati itoca Buenos Puertos nechcatzi altepet Lasea.

⁹ Ya miyac tonali tijpolojtoyaj ipan hueyi at pampa yolic tiyahuiyayaj huan ajstitnemiyaya nopa metzti quema taseseya huan más mahuilili tijnejnemiltise tohueyi cuaacal ipan hueyi at. Huajca Pablo quinilhui nochi nopa tacame para moilhuiyaya para fiero ininpantis. ¹⁰ Quiijto:

—Tacame, nimoilhuía toojhui elis nelmahuilili sinta tiquisase nica huan más tijnejnemiltise tohueyi cuaacal ipan hueyi at. Huelis polihuis tocuaacal ica nochi no miyac tamamali cati tijhuicaj huan nojquiya huelis tojuanti timisahuisse.

¹¹ Pero nopa tayacanquet Julio amo quitacaquili cati Pablo quiijto. Quinel-tocac inincamanal itayacancahua huan iteco nopa cuaacali. ¹² Inijuanti moilhuijque para más mahuilili sinta mocahuasquía tocuaacal nozona ipan pilaltepetzi Buenos Puertos para nopa nahui metzti quema taseseya pampa chichahuac taajaca nepa. Yeca inijuanti huan miyac tacame cati itztoyaj tohuaya quinequiyayaj para tiquisase. Quinequiyayaj sinta tihuelisquíaj tiajsisquíaj ipan altepet Fenice ipan tali Creta pampa nopa altepet san tapojtoc ipan se lado para ajacat quiajsis huan yeca nozona eliyaya más temachti para mocahuase nopa huejhueyi cuaacalme. Huajca quinequiyayaj ma timocahuaca nepa para nopa se quesqui metzti quema taseseya huan amo hueli nejnemij huejhueyi cuaacalme ipan hueyi at.

Nopa hueyi ajacat ipan hueyi at

¹³ Huan quema pejqui taajaca se quentzi ten sur, moilhuijque huelis tiajsise campá tijnequiyayaj. Yeca tiquisque nepa ipan tohueyi cuaacal huan tiyajque nechca iteno nopa tali Creta. ¹⁴ Pero san quentzi teipa, hualajqui se ajacat tahuel chichahuac. Nopa ajacat hualajqui ten tali Creta huan itoca Norte ajacat huan techhuicac huejca ten tali ipan hueyi at. ¹⁵ Huan nopa ajacat techcuatopehuayaya chichahuac, huan ayecmo tihuelque tijcuepase tohueyi cuaacal para elis nechca tali. Yeca san tijmajcajque tocuaacal ma yas campá nopa ajacat quinequiyaya techhuicas. ¹⁶ Huan tijpanoque se piltaltzi tatajco hueyi at cati itoca Claudia. Nepa quema amo tahuel chichahuac nopa ajacat, ica miyac tequit, tijtanorque nopa pilcuaacaltzi cati quitilanayaya tohueyi cuaacal. Tijhualicayayaj para ipan momanahuisquíaj sequij sinta tapanis tocuaacal. ¹⁷ Huan quema tijtanorque nopa pilcuaacaltzi, tijtalijque ipan tohueyi cuaacal. Huajca nopa tacame quiyahualilpijque tocuaacal ica lazo cati tahuel tomahuac para amo tapanisquía. Huan quitemohuijque nopa achtohui ejetic teposti, pampa momajmatiyayaj para nopa ajacat quicuatopehuasquía tocuaacal campá se lugar cati itoca Sirte campá onca miyac xali, huan nelía mahuilili. Pero masque quitemohuijque nopa teposti, nopa ajacat san quihuicayaya tohueyi cuaacal campá hueli. ¹⁸ Huan tonili

nopa ajacat huan hueyi at noja tahuel chicahuac quicuatopehuayaya tohueyi cuaacal. Huajca nopa tacame cati quinejnemiltiyayaj tohueyi cuaacal pejqe quitepehuaj ipan hueyi at nopa tamamali cati tijhualicayayaj para ayecmo elisquía etic tohueyi cuaacal. ¹⁹ Huan hualhuicta nochi tojuanti tiqinpalehuijqe quitepehuase ipan hueyi at cuasiyas, cuamesas, huan nochi cati eltoya ipan tocuaacal. ²⁰ Huan para miyac tonali amo tiquitaque tonati, yon sitalime. Huan nochi timoilhuiyayaj timisahuisquíaj pampa nelía chicahuac nopa ajacat techcuatopehuayaya.

²¹ Huan quipixqui miyac tonali amo tacuajtoyaj nopa tacame, huajca Pablo moquetzqui iniixpa huan quijjto:

—Tacame, achi cuali eltosquía sinta anquitacaquilijtosquíaj cati nimechilhui huan amo tiquistosquíaj tali Creta. Amo tijpolojtosquíaj nochi nopa tamanti cati tijtepejqe ipan hueyi at. ²² Pero ama nimechilhúia ximoyolchicahuaca, amo ximajmahuica pampa amo aqui miquis, san polihuis tohueyi cuaacal. ²³ Na niiaxca Toteco Dios huan yaya cati nijtequipanohua. Huan tayohua nechtitanili se iilhuicac ejca cati nechilhui: ²⁴ ‘Amo ximajmahui, Pablo, monequi tiajsiti Roma huan timonextis iixpa Tanahuatijquet César, huan pampa ta tiiaxca Toteco, yaya nojquiya quinmanahuis nochi ni masehualme cati itztoque mohuaya ipan ni cuaacali huan amo aqui miquis.’ ²⁵ Huajca nohuampoyohua, ximoyolchicahuaca pampa na nimotemachía ipan Toteco Dios huan nijmati para nochi panos quej nechilhuijtoc. ²⁶ Pero ni ajacat quihuicas tocuaacal huan cuatacanis ipan se piltaltzi tatajco hueyi at.

²⁷ Tantoya ome samano tiitztoyaj ica nopa ajacat cati tahuel chicahuac ipan hueyi at. Huan timopantijque ipan se hueyi at cati itoca Adria huan nopa ajacat noja quicuatopehuayaya tohueyi cuaacal campa hueli. Huan ipan tajco yohual nopa tacame cati tequitiyayaj ipan tohueyi cuaacal quitaque para tiajsiyayaj nechca tali. ²⁸ Huajca quitamachijque para quimatise quesqui ihuejcatanca nopa atatzinta tohueyi cuaacal, huan san quipixqui treinta y seis metros ihuejcatanca. Huan ica seyoc talojtzi sempa quitamachijque huan san quipixqui veintiseis metros. ²⁹ Huan nopa tacame momajmatiyayaj para nopa ajacat quicuatacanaltisquía tohueyi cuaacal ipan nopa huejhueyi teme nechca tali. Huajca ica iica tocuaacal quinmajcajqe nopa lazos cati quinpixtoyaj nahui huejhueyi teposti cati ejetic para motatzquilise atatzinta huan para ma ayecmo nejnemi tohueyi cuaacal ica nopa ajacat. Huan nochi majmahuiyayaj huan tahuel quinequiyayaj ma tanesi para huelis tachiyase. ³⁰ Huan nopa tacame cati tequitiyayaj ipan tocuaacal quinequiyayaj cholose ipan nopa pilcuaacaltziti cati tijhualicayayaj pampa moilhuijqe nochi timiquisquíaj ipan tohueyi cuaacal. Yeca quitemohuijqe nopa pilcuaacaltziti ipan hueyi at, huan istacatique huan quijjtojqe san quinejqe quiiipise más teposti iixpa tohueyi cuaacal. ³¹ Pero Pablo quimatqui para cholosquíaj, yeca quinilhui nopa tayacanquet inihuaya isoldados:

—Sinta nopa tacame amo mocahuaj nica, amojuanti anmiquise.

³² Huajca nopa soldados quitzontejque nopa mecat cati nopa tacame ica quitemohuiyayaj nopa pilcuaacaltzi. Huan huetzqui nopa pilcuaacaltzi ipan hueyi at huan yajqui.

³³ Huan quema tanesqui, Pablo quincamanalhui nochi cati itztoyaj ipan tohueyi cuaacal huan quinilhui ma tacuaca. Quinilhui:

—Ama ya ticaxitijque ome samano para anmotequipachojtoque huan amo anquinequiyayaj antacuase. ³⁴ Yeca chicahuac nimechtajtania xitacuaca cuali para anquippiyase chichahualisti para timomanahuise. Huan najmati yon se ten tojuanti amo miquis, yon amo aqui quipolos se itzoncal.

³⁵ Huan quema Pablo quincamanalhui quej nopa, yaya quitzqui se pantzi huan quitascamatqui Toteco iniixpa nochi injuanti. Huan quitajcotapanqui huan pejqui quicua. ³⁶ Huajca nochi injuanti achi más quipixque paquillisti, huan nochi tacuajque. ³⁷ Huan nochi tojuanti tiitztoyaj doscientos setenta y seis ipan nopa hueyi cuaacali. ³⁸ Huan quema tanque tacuaj cuali, huajca quitepejque ipan hueyi at hasta itamiya nopa tamamali ten trigo cati tihuicayayaj para ayecmo elis más etic tohueyi cuaacal.

Atzonpolijqui tocuacal

³⁹ Huan quema tanesqui, nopa tacame cati quinejnemiltijque tohueyi cuaacal quitaque tiitztoyaj nechca tali, pero amo quixmatque taya itoca. Huan teipa quitaque campa oncayaya xali ateno, huan moilhuijque huelis quinejnemiltise tocuacal tatajco huejhueyi teme hasta nozona. ⁴⁰ Huajca quintzontejque nopa lazos cati ica quillpitoyaj nopa ejetic teposti ipan atatzinta, huan quincajtejque ipan hueyi at. Huan quintemohuijque nopa huapalme cati quichihua para ma nejnemis tohueyi cuaacal para campa tijnequij. Huan quitananque nopa hueyi yoyomit iixpa tohueyi cuaacal para nopa ajacat ma quicuatopehua, huan nimantzi pejqui techcuatopehua chicahuac huan timonechahuijtiyajque para campa onca xali. ⁴¹ Pero tocuacal cuatacanqui ipan se hueyi tet cati eltoya atatzinta. Huan nopa at ayecmo eliyaya huejcata para quihuicas tohueyi cuaacal. Huajca nelá cuatacanqui iixpa tocuacal huan ayecmo huelqui nejnemi. Huan iica pejqanipani pampa nopa at chicahuac quimaquillyaya.

⁴² Huajca nopa soldados moilhuyiyaj quinmictise nochi tatzacme para amo ajquisquiáj hasta tali huan cholosquiáj. ⁴³ Pero nopa tayacanquet ten soldados amo quinequiyaya ma quimictica Pablo, yeca amo quincahuili para ma quinmictica. Yaya tanahuati para nochi cati huelque ajquij ma timomajcahuaca achtohui ipan at huan ma tiajquica hasta campa tali. ⁴⁴ Huan sequinoc cati amo huelque ajquij ma quicuica huapali o tamanti cati quipantise ipan hueyi cuaacali para amo misahuise. Quej nopa nochi quichijque huan nochi tojuanti tiajsitoj cuali ipan tali.

28

Pablo ipan piltaltzi Malta

¹ Huajca nochi tojuanti tiajsitoj ica cuali, huan tijpantijque para nopa piltaltzi itoca Malta huan quipixqui hueyi at yahualtic. ² Huan nopa Malta ehuanitechselijque ica paquillisti. Huan tipitzque para timoscose pampa taseseyayaya huan huetziyaya at. ³ Huan Pablo quisentiliyaya cuahuit huan quitemayaya ipan tit. Huan nimantzi quisqui ipan tit se cohua cati itztoya ipan nopa cuahuit, huan quimahuijconqui. ⁴ Huan nopa Malta ehuan quitaque nopa cohua huiyontoc imaco Pablo huan moilhuijque se ica sequinoc: “Huelis ne tacat se temictijquet cati momaquixti ipan nopa hueyi at, pero Dios amo quicahuilía ma itzto pampa amo cuali cati quichijtoc.”

⁵ Pero Pablo san quitzejtelo imax huan nopa cohua huetzqui ipan tit, huan amo teno ipantic. ⁶ Huan nopa masehualme quichiyayaj para ma semahuia Pablo o ma huetziqua mictoc. Pero quichixque miyac hora, huan amo teno quipanoc Pablo. Yeca quipataque inintalnamiqulis huan quijtoque para Pablo eliyaya se dios.

⁷ Huan nechca campa tiajsitoj ipan tali, eltoya ichaj huan nochi italhua se tacat itoca Publio cati elqui se hueyi tayacanquet ipan nopa piltaltzi. Huan yaya techseli ica cuali huan techtamacac para eyi tonati. ⁸ Huan huilantoya itata Publio ipan itapech pampa totoniyayaya huan moxixayaya esti. Yeca Pablo calajqui campa itztoya, huan motatajti huan quitali imax ipan ya huan quichicajqui. ⁹ Huan teipa nochi nopa piltaltzi ehuan quicajque cati panoc, huan hualajque nochi cati mococohuaj campa itztoya Pablo huan nochi mochicajque. ¹⁰ Huan yeca nopa piltaltzi ehuan techtepanitaque miyac huan techmacaque miyac tamanti. Huan teipa quema ajsic tonali para tiquisase, techmacaque nochi cati monequi para ipan toojhui.

Pablo ajsic Roma

¹¹ Huan timocajque ipan tali Malta para eyi metzti. Huan teipa ticalajque ipan seyoc hueyi cuaacali cati hualajtoya ten altepet Alejandría huan cati nojquiya mocajtoya ipan nopa piltaltzi Malta nopa se quesqui metzti quema taseseya. Huan ipan iixpa nopa hueyi cuaacali quinpixtoya ome taixcopincayome cati inintoca Cástor huan Pólux. Huajca sempa tiquisque ten nopa tali huan tinejnenge ipan hueyi at. ¹² Huan teipa tiajsitoj altepet Siracusa huan timocajque nozona eyi tonati. ¹³ Huan teipa tiquisque huan tiyajque nechca iteno nopa tali hasta tiajsitoj altepet Regio. Huan tonili hualajqui se ajacat ica sur huan techcuatopejqui hasta hualhuicta tiajsitoj altepet Puteoli. ¹⁴ Nepa tiquinpantijque sequij toicnihua ipan Cristo huan techilhuijque ma timocahuaca inihuaya. Huan timocajque inihuaya chichome tonati. Huan teipa tiquisque huan tiicxinejnenge para tiajsitij Roma. ¹⁵ Huan ya quimajtoyaj toicnihua ipan Cristo ipan Roma para tiajsitinemiyayaj. Yeca quisque Roma icxinejnemiyayaj huan technamiquicoj ipan ojtí campa se tianquis cati itoca Foro de Apio. Huan teipa sequinoc technamijque ipan pilaltepetzí Tres Tabernas. Huan quema Pablo quinítac nopa taneltocani, quitascatqui Toteco huan moyolchicajqui ipan ya. ¹⁶ Teipa tiajsitoj altepet Roma huan nopa sequinoc tatzacme quintemactilijque campa tatzacti, pero nopa hueyi tayacanquet ten soldados quicahuili Pablo ma mocahua iyoca ipan se cali. Huan ihuaya mocajqui san se soldado para quimocuitahuis.

Pablo tepohuili icamanal Toteco ipan Roma

¹⁷ Huan quema Pablo quipixtoya eyi tonati nozona ipan altepet Roma, quinnotzqui nopa tayacanani ten israelitame cati nozona ehuan. Huan quema hualajtoyaj, quinilhui:

—Annoisraelita icnihua, nopa israelitame ipan Jerusalén nechitzquijque huan nechtemactilijque ica romano tequichihuani masque amo niquinixpanotoc israelitame, yon totamachtíl cati tohuejcapan tatahua techcahuilijtejque. ¹⁸ Teipa nopa Roma tequichihuani nechtajtolsencajque huan quijtojqque amo teno nijchijtoya para nimiquis. Huan quinequiyayaj nechcahuilise para niyas nochaj. ¹⁹ Pero nopa israelitame amo quinequiyayaj, yeca nitajtanqui para ma nechhualicaca nica Roma para César ma nechtajtolsencahua, pampa amo nijnequiyaya más niqintelhuis noicnihua israelitame. ²⁰ Yeca nimechnotzqui para nimechitas huan nimechamanalhuis. Niilpitoc ica ni tepos cadenas pampa nijneltoca nopa Cristo cati nochi israelitame quichixtoyaj ma ajsi.

²¹ Huan nopa israelitame nepa quihlhuijque:

—Nopa israelitame ipan estado Judea amo techtitanilijtoque yon se amatajcuifoli para techilhuisse ten ta. Huan yon se toicni amo hualajtoc para techcamanalhuis sinta tijchijtoc cati amo cuali. ²² Pero tojuanti tijnequij tijaquise taya tijneltoca ten Jesús. Campa huili tali tijcactoque para miyac

quijtohuaj para amo cuali para masehualme ma quineltocaca Jesús. Pero san ya nopa tijmatij.

²³ Huan quitelijque se tonali quema hualasquíaj, huan ipan nopa tonalajsi-coj nelmiyac israelitame ipan nopa cali campa Pablo mocahuayaya. Huan Pablo quincamanalhui quenicatza Toteco tanahuatía huan quincamanalhui ten Jesús. Ica itanahuatilhua Moisés huan ica cati quiijcuilojtoyaj nopa tajtolpanextiani, Pablo quinnextili para Jesús elqui nopa Cristo cati Toteco quititantoya. Yaya pejqui quincamanalhuía ica ijnaloc huan amo tanqui hasta tiotaquixqui. ²⁴ Huan sequij inijuanti quiselijque cati Pablo quinilhui, huan sequinoc amo quineltocaque. ²⁵ Inijuanti san pejque monajnanquilíaj se ica seyoc huan pejque yahuij. Huajca Pablo quinilhui nopa tacame ni camanali:

—Xitahuac nopa camanali cati Itonal Toteco quimacac nopa tajtolpanextijquet Isaiás para ma quinilhui tohuejcapan tatahua. Quilhui:

²⁶ Xiya campa ni masehualme huan xiquinilhuiti ni camanali.

Toteco quijtohua: Nelía anquicaquise nocamanal, pero amo anquimachilise.

Nelía anquilitase cati nijchihuas,

Pero amo anquimachilise cati quinequi quijtos.

²⁷ Pampa ni israelitame yoltetique.

Mochijtoque quej nacastzactoque huan quej cati popoyotzitzi.

Amo quinequij quiitase huan amo quinequij nechcaquise.

Amo quinequij quimachilise nocamanal ica iniyolo,

Huan amo quinequij moyolpatase para niquintajtacolquixtis.

Quej nopa ijcuilijtoc ipan Icamanal Toteco.

Huan Pablo quinilhui:

²⁸ —Huajca anisraelitame, techtacaquilica. Ama Toteco quinmacas icamanal masehualme cati amo israelitame. Huan inijuanti quicaquise huan quiselise.

²⁹ Huan quema Pablo quijto ni camanali, nopa israelitame quisque huan chichahuac monajnanquilijtiyajque se ica seyoc.

³⁰ Huan Pablo mocajqui nozona ome xihuit ipan se cali cati quitanejtiyaya ica se taxtahuili. Huan ica paquilisti quinseliyaya nochi cati quipaxalohuayayaj. ³¹ Huan tanemijya quincamanalhuiyaya quenicatza Toteco Dios tanahuatía, huan quinmachtiyaya ten Tohueyiteco Jesucristo. Amo quema pinahuayaya, huan amo aqui quitzacuiliyaya.

Nopa Amatajcuiloli cati Pablo Quintajcuilhui Taneltocani ipan Altepet Roma

Pablo quintajpalo taneltocani ipan Roma

¹ Na niPablo. Niitequipanojca Jesucristo. Toteco nechtequitalli ma nieli tayolmelajca huan nechiyocatali ma nitacamanelhuiti icamanal cati cuali.

² Ipan Itatzejtzeloitjca Camanal cati quiiijcuilojque nopa tajtolpanextiani huejcajquiya, Toteco techtajtolcahuili para teipa oncas ni cuali camanali.

³ Huan ni cuali camanali techilhuiá ten Tohueyiteco Jesucristo, Icone Toteco Dios cati teipa tacatisquía ica itacayo quej se masehuali. Techilhui para yaya elisquía se iteipan ixhui Tanahuatijquet David. ⁴ Huan nojquiya quinxeti para temachti Tohueyiteco Jesucristo itztoc Icone Toteco quema moyolcuic ten campa mijcatzitzí ica ichicahualis Itonal Toteco cati tatzejtzeloitlic.

⁵ Hueyi iyolo Jesucristo ica na huan nechmacac tequiticayot para niqunyolmelahuas nochi masehualme cati amo israelitame cati Cristo quinchihuilijtoc. Quej nopa huelise quinelto case huan quichihuae ipaquilis pampa quicnelíaj. ⁶ Huan amojuanti anitztoque ipan nopa masehualme cati Toteco quinnottzoc para anelise iaxcahua Tohueyiteco Jesucristo.

⁷ Huajca nimechtajcuilhuía anRoma ehuan cati Toteco amechicnelía, huan amechnotzoc, huan amechiyocatalijtoc para anelise itatzejtzeloitica masehualhua. Toteco Totata huan Tohueyiteco Jesucristo ma quipiyaca hueyi iniyolo ica amojuanti huan ma amechmacaca tasehuilisti.

Pablo quinejqui quinpxaloti Roma ehuan

⁸ Achtohui nijnequi nijtascamatis Toteco Dios ica Jesucristo para nochi amojuanti, pampa hasta campa hueli ipan taltipacti, nochi quicactoque quenicatza nelía cuali anquinelto caj. ⁹ Toteco quimati para talojtzitzí nimechelnamiqú iixpa huan amo nijcahua nimotatajtía para amojuanti. Quena, nimotatajtía ica Toteco cati nijtequipanohua ica nochi noyolo quema niquinilhuiá masehualme ten ni cuali camanali ten Icone. ¹⁰ Huan nochipa nijtajanía Toteco para ma amo huejcahuas huelis nimechpxaloti sinta ya ipaquilis.

¹¹ Nelía nijnequi nimechitas para nimechpanoltilis se yajatili cati Itonal Toteco temaca para anquipiyase más chicahualisti ipan Toteco Dios.

¹² Quinequi quijtos nijnequi nimechylchicahuas huan para antechylchicahuase nojquiya. Pampa quema tiquitaj quenicatza ne se cuali quinelto ca Tohueyiteco, noja más tijpiyase chicahualisti tijnelto case.

¹³ Noicnihua, nijnequi xijmatica para miyac huelta nimoilhujtoc niyas nimechitati pampa nijnequi nijchihuas itequi Toteco campa amojuanti quej nijchijntencoc ica sequinoc masehualme cati amo israelitame, pero hasta ama amo hueltoc niyas nozona. ¹⁴ Ipan noyolo tahuel nijnequi niquinmachtis cati camanaltij griego huan cati camanaltij sequinoc camanali. Monequi niquinilhuis icamanal Toteco masehualme cati momachtijtoque huan cati amo momachtijtoque. ¹⁵ Huajca nelía nijnequi niyas nitepohuiliti icamanal Toteco campa amojuanti ipan altepet Roma nojquiya.

Icamanal Toteco quipiya chicahualisti

¹⁶ Amo nipinahua nicamanaltis icamanal Toteco, pampa quipiya ichichualis Toteco para quinmaquixtis ten inintajtacolhua nochi cati quineltoaj. Achtohui quinmaquixtia israelitame huan teipa nojquiya quinmaquixtia cati amo israelitame. ¹⁷ Ni cuali camanal technextilia quenicatza Toteco techchihua tixitahuacque iixpa sinta san tijneltoaj. Eltoc quej ijcuilijtoc ipan Icamanal Toteco: “Se cati xitahuac iixpa Toteco, itztos para nochipa pampa quineltoja ya.”

Nochi masehualme quipiyaj tajtacoli

¹⁸ Toteco Dios quinextia ihueyi cualancayo ten ilhuicac ica nochi masehualme cati quichihuaj cati amo quipactia huan cati amo xitahuac, pampa masque inijuanti quimatij cati melahuac, quichihuaj cati amo cuali, huan quitzacuiliaj cati melahuac para sequinoc amo quixmatise. ¹⁹ Nochi masehualme ya quimatij cati melahuac ten Toteco pampa Toteco iselti ya quitalijtoc nopa tamachiltili ipan iniyolo. ²⁰ Hasta quema pejque tonali quema Toteco quichijqui taltipacti, nochi masehualme quitztoque ilhuicacti huan taltipacti cati yaya quichijtoc. Huan tanemijya quitztoque para Toteco itztoc, huan quiapiya hueyi chichahualisti, huan para nochipa noja quiapiyas. Huajca ica cati tiquitaj para quichijtoc, amo aqui hueli motectis huan quijtos amo quimati sinta itztoc Toteco Dios.

²¹ Pero masque masehualme quimatque para itztoc Toteco, amo quihueyimatque quej quinamiqui para Dios, yon amo quitascamatque. Inijuanti san pejque moilhuiaj ipan inintalamiquilis cati amo melahuac ten quenicatza itztoc Toteco, huan yeca ipan iniyolo achi más mocuetque huihuitique huan ipan tzintayohuilot. ²² Masque nopa masehualme quijtohuaj talnamiquij, mochijque huihuitique, ²³ pampa amo quihueyimatque Toteco Dios cati nelpano hueyi huan cati amo hueli miqui. Inijuanti quinhueyimatque taixcopincayome ten masehualme, totome, tapiyalme huan cohume. Masque nopa masehualme huan nochi nopa tapiyalme miquij.

²⁴ Huajca Toteco quintahuelcajqui para ma quichihuaca nopa fiero tamanti cati iniyolo quinequi quichihuas. Se hueyi pinahualisti cati nopa fiero masehualme mochihuiliaj se ica seyoc ipan inintacayo. ²⁵ Amo quineltoaque cati quimatque para melahuac ten Toteco. Pero ica ininpaquilis quitapejpenijque para quineltoque se istacatili. Huajca quitepanitaque huan quihueyichijque cati Toteco quichijqui huan amo Toteco Dios cati quichijqui nochi cati onca, yaya Toteco Dios cati quinamiqui para nochi masehualme ma quihueyichihuaca para nochipa. Ya nopa melahuac.

²⁶ Huajca Toteco quintahuelcajqui. Quinchahuilia ma quichihuaca nochi cati fiero cati inintacayo quinequi, masque se pinahualisti. Huan hasta inisihuahua ayecmo quinequij itztose inihuaya tacame quej Toteco quinchijtoc, pero inijuanti yahuij inihuaya sequinoc sihuame para ten hueli mochihuilise. ²⁷ Huan tacame nojquiya san se quichihuaj cati fiero. Ayecmo quinequij itztose inihuaya sihuame quej Toteco quinchijtoc, pero quintemohuaj sequinoc tacame huan quichihuaj miyac tamanti inihuaya cati eli se pinahualisti. Huajca quej quinamiqui, quiseliaj ipan inintacayohua nopa tatzacuiltilisti cati quinpantiaj tacame cati quej nopa quichihuaj.

²⁸ Huan pampa nopa fiero tacame ayecmo quinejque quielnamiquise Toteco, yaya quintahuelcajqui huan quinchahuili ma quichihuaca cati más fiero moilhuiaj. Nochi cati amo quinamiqui, ya nopa quichihuaj. ²⁹ Quichihuaj nochi cati amo cuali. Quichihuaj ten hueli ica cati amo inintahuacal. Quichihuaj tamanti ica inintacayo cati Toteco amo techchijtoc para ma tijchihuaca. Nelia quinequij moaxcatise nochi cati onca. Quichihuaj

miyac tamanti cati amo monequi. Techicoitaj, temictíaj, nimantzi tatehuíaj, tacajcayahuaj, huan teejelnamiqij. ³⁰ Camanaltij fiero ten sequinoc. Quicualancaitaj Toteco Dios. Sentamique. Mohueyimatiq camanaltij huan mocualneqij. San cati fiero quitemohuaj para quichihuase. Amo quinlentoquilíaj inintatahua. ³¹ Amo quipiyaj inintalnamiqulis. Amo temachtinincamanal masque quijcuilohuaj ipan se camanal sencahuali. Amo aqui quicnelíaj. Amo tetapojpolhuíaj huan amo tetasojtaj. ³² Cualí quimatij itanahuatilhua Toteco huan quimatij para itanahuatil quijtohua monequi ma quinmictica nochi cati quichihuaj ni tamanti fiero. Pero injuanti amo san quichijtinemij cati fiero, nojquiya nelía paquij quema sequinoc ya nopa quichihuaj.

2

Toteco xitahuac tetajtolsencahuas

¹ Nojquiya amojuanti amo hueli anmotechitise huan anquijitose amo anquimatij sinta amo cuali cati anquichihuaj. Anquijtohuaj para nelía fiero nopa masehualme ten cati nimechilhuía, huan monequi Toteco quintatzacuiltis, pero quema anquijtohuaj para amo cuali cati quichihuaj sequinoc, anmotelchihuaj ica amoselti, pampa amojuanti san se anquichihuaj huan yeca Toteco nojquiya amechtatzacuiltis. ² Huan tijmatij para xitahuac cati quichihua Toteco quema quintajtolsencahua huan quintatzacuiltia masehualme cati quichijtinemij tamanti quej nopa. ³ ¿O huelis anmoilhuíaj Toteco quintatzacuiltis nopa sequinoc cati quej nopa tajtacolchihuaj huan amo amechtatzacuiltis? ¡Amo quej nopa! ⁴ Huelis amo anquimachilíaj para ten Toteco amo amechtatzacuiltia nimantzi quema antajtacolchihuaj. Amo nimantzi amechtatzacuiltia pampa nelía hueyi iyolo Toteco ica nochi masehualme. Huan yaya amechchiya huan quipiya iyolo, pampa quinequi quej nopa amechpalehuis ximoyolpataca huan xijcahuaca amotajtacolhua.

⁵ Pero anyoltetique huan amo anquineqij anmoyolpatase huan anquicajtehuase amotajtacolhua. Yeca anquimiyaquilíaj nopa tatzacuiltilisti cati amechchiya ipan nopa tonal quema Toteco quinextis ihueyi cualanayo huan xitahuac tetajtolsencahuas. ⁶ Huan Toteco quintaxtahuis nochi masehualme quej cati quichijtoque ipan ni taltipacti. ⁷ Toteco quinmacas nemilisti yancuic para nochipa nopa masehualme cati quichijtinemij cati cuali, sinta quitemohuaj para Toteco quinhueyitalis, huan para yaya ma quintepanita, huan para yaya quinmacas nopa nemilisti para nochipa. ⁸ Pero Toteco tahuel cualanis huan quintatzacuiltis nopa masehualme cati quitemohuaj san cati injuanti ininpaquilis huan san quitoquilíaj cati amo xitahuac. ⁹ Oncas hueyi taohuijcyot huan tajjyohuilisti para nochi masehualme cati quichihuaj cati amo cuali. Ni tajjyohuilisti achtohui quinajsis israelitame huan nojquiya quinajsis cati amo israelitame. ¹⁰ Pero Toteco quinhueyitalis huan quinmacas tatepanitacayot huan tasehuilisti nochi masehualme cati quichihuaj cati cuali, masque israelitame o amo israelitame. ¹¹ Pampa Toteco amo techicoicnelía; yaya quintajtolsencahuas nochi masehualme.

¹² Quema tajtacolchihuaj masehualme cati amo israelitame huan amo quimatij itanahuatil Moisés, Toteco quintajtolsencahuas quej cati cuali quimatiyayaj ipan iniyolo para quichihuasquíaj huan amo quichijque. Pero nochi masehualme cati tajtacolchijtoque huan quimatiyayaj itanahuatil Moisés, Toteco quintajtolsencahuas quej cati quijtohua nopa tanahuatilme.

¹³ Pampa Toteco amo quinita masehualme para xitahuaque iixpa pampa quimatij nopa tanahuatilme. San quinita para xitahuaque iixpa masehualme cati quichijtinemij cati nopa tanahuatilme quijjtohuaj. ¹⁴ Huan quema masehualme cati amo israelitame huan amo quimatij itanahuatil Moisés quichihuaq cati cuali cati nopa tanahuatilme tanahuatíaj ma tijchi-huaca, quinextíaj para ipan iniyolo quimatij cati cuali huan cati amo cuali quej nopa tanahuatilme quijjtohuaj. ¹⁵ Tanemijya nesi ni masehualme quin-piyaj nopa tanahuatilme ipan iniyolo pampa iniyolo quintatelhuía quema quichihuaq cati amo cuali, huan amo quintatelhuía quema quichihuaq cati cuali. ¹⁶ Huan hualas nopa tonali quema Toteco quintajtolsencahuas nochi masehualme ica Jesucristo. Huan Jesucristo quintajtolsencahuas quej cati ixtacatzí quipixtoque ipan iniyolo. Ya ni icamanal Toteco cati nitepohuila.

Israelitame huan itanahuatil Moisés

¹⁷ Amojuanti cati anisraelitame cati anmotemachíaj ipan itanahuatil Moisés, anmohueyimatij pampa Toteco Dios amechicnelía. ¹⁸ Anquijjtohuaj anquimatij cati Toteco quinequi anquichihuase huan ya anquichihuaq cati cuali pampa anmomachtijtoque itanahuatil Moisés. ¹⁹ Anmoilhuíaj huelis anquinmactise sequinoc cati itztoque quej popoyotzitzí. Huan anquinequij anquintaahuilise masehualme cati nemij ipan tzintayohuilot pampa amo quixmatij Toteco. ²⁰ Anmoilhuíaj para antamachtiani huan huelis anquintalnactise cati huihuitique huan cati coneme ipan iojhui Toteco, pampa anmoilhuíaj anquipiyaj ipan nopa tanahuatilme nochi tal-namiquilisti huan nochi cati melahuac. ²¹ Pero anisraelitame cati anquin-machtíaj sequinoc, ¿para ten amo anmomachtíaj para anquichihuase cati xitahuac? Anquinihuíaj sequinoc ma amo tachtequica, pero monequi ximotachilica sinta amojuanti amo antetachtequílíaj. ²² Anquijjtohuaj amo aquí ma momecatí, pero monequi ximotachilica sinta amojuanti amo an-momecatijque. Anquijjtohuaj anquincualancatíaj nopa taixcopincayome huan teteyome, pero ximotachilica pampa sequij amojuanti anquichitequij cati eltoc ipan inintiopahua nopa taixcopincayome. ²³ Anmohueyimatij huan anquijjtohuaj cuali anquimatij cati nopa tanahuatilme quijjtohuaj, pero amo anquichihuaq cati nopa tanahuatilme tanahuatíaj. Huan yeca anquipinahualtíaj Toteco Dios. ²⁴ Yeca eltoc quej ijcuilijtoc ipan Icamanal Toteco huejcajquiya: “Ica cati amo cuali anquichihuaq, anquinchihualtíaj masehualme cati amo israelitame ma quitaijilhuica Toteco Dios.”

²⁵ Tahuel ipatí para anelij anisraelitame huan amechtequilijtoque nopa machiyot circuncisión ipan amotacayo sinta nelía anquichihuaq nochi cati quijjtohuaj itanahuatil Moisés. Pero sinta amo anquichihuaq nochi cati quijjtohuaj itanahuatil, huajca iixpa Toteco anisraelitame san se anitztoque ica cati amo israelitame. ²⁶ Huan sinta masehualme cati amo israelitame quichijtinemise nochi cati quijjtohuaj nopa tanahuatilme, ¿amo anmoilhuíaj para Toteco quinchihuas ma elica imasehualhua quej israelitame? ²⁷ Huan quema se cati amo israelita quichihua nochi cati quijjtohuaj itanahuatil Moisés, yaya quinextía para hueyi amotajacolhua anisraelitame pampa cuali anquinmatij nopa tanahuatilme, pero amo anquichihuaq cati quijjto-huaj.

²⁸ Pero se masehuali amo elis iaxca Toteco san pampa tacatqui israelita huan quitequilijtoque nopa machiyot circuncisión ipan itacayo. ²⁹ Cati nel-nelía se israelita huan iaxca Toteco, eltoc yaya cati quipiya iyolo cuali iixpa. Huan amo elis se machiyot ipan itacayo nopa masehuali cati quinextis para

iaxca Toteco, elis se iyolo cati Itonal Toteco quipatatoc. Huan se masehuali ica iyolo quej nopa amo quitemohua masehualme ma quipaquilismacaca, yaya quinequi quipaquilismacas Toteco.

3

¹ Pero amo ximoilhuica amo teno ipati para tojuanti tiisraelitame huan para techtequilijtoque nopa machiyot circuncisión ipan totacayo quej Toteco quijto. ² Nelía miyac ipati. Achtohui ipati pampa Toteco techc-ahuilijto tiisraelitame Icamanal. ³ Huan ama, masque sequij israelitame quitahuelcajtoque cati quijtoque para quichihuase huan ayecmo quineltocaj Toteco, amo quinequi quijtos para amo temachtí Toteco Dios, huan para yaya amo quichihuas cati quijtoque. ⁴ ¡Amo ya nopa! Toteco yaya temachtí huan masque nochi sequinoc istacati, yaya amo quema istacati. Eltoc quej ijcuilijto ipan Icamanal Toteco campa quijtohua: “Tanemijya monextis para xitahuac cati tiquijtohua. Huan sinta masehualme mitzhuicase iixpa se juez por cati tiquijtoque, ta titatanis.”

⁵ Pero huelis se moilhuía para inintajtacolhua masehualme quipalehuía Toteco. Huelis se moilhuía quema masehualme istacati huan quichihuaj cati amo cuali, quinextíaj para amo quiyampa quichihua Toteco. Quinextíaj para Toteco itztoc nelía iyoca ten tajtocoli huan yaya nelía temachtí. Huajca huelis se moilhuis para amo xitahuac para Toteco tetatzacuiltis pampa inintajtacolhua quipalehuía Toteco para quinextis para yaya nelpano xitahuac. Quej nopa moilhuíaj sequij masehualme, pero amo melahuac. ⁶ Amo huelis tiquijtose ya nopa. Pampa Toteco yaya senquisa xitahuac, huan yeca yaya quintajtolsencahuas nochi masehualme ipan ni taltipacti.

⁷ Pero huelis sequij ten amojuanti noja anquijtohua para quema se masehuali istacati, quinextía para Toteco nelpano xitahuac huan nelía temachtí. Huan yeca anmoilhuíaj amo cuali para Toteco quitatzacuiltis nopa masehuali cati istacati pampa iistacaticayo quipalehui Toteco para sequinoc ma quihueyichihuaca. ⁸ Pero amo cana. Aquí moilhuía quej nopa nelía huihuitic. Huelis yaya nojquiya quijtos ma titajtacolchihuaca noja más para ma nesi noja más cuali Toteco Dios. Huan sequij tacame cati istacati huan techtaijilhuíaj, quijtohua nitamachtía ya nopa. Quinamiqui para masehualme cati camanaltij quej nopa ma quiselica nopa tatzacuiltilisti cati quinchia.

Senquisa nochi masehualme quipiyaj tajtocoli iixpa Toteco

⁹ Huajca tojuanti tiisraelitame amo cana tiitztoque achi cuali iixpa Toteco que sequinoc xinachtí masehualme. Nimechnextilijtoque para nochi masehualme, masque israelitame o amo israelitame, nochi quihuicaj tajtocoli iixpa. ¹⁰ Eltoc quej ijcuilijtoque ipan Icamanal Toteco campa quijtohua: “Amo aquí quichihua cati cuali iixpa Toteco, yon se.

¹¹ Amo aquí nelía quimachilía Toteco.

Amo aquí nelía quitemohua.

¹² Nochi masehualme mocuapolojtoque.

Nochi quichijtoque cati amo quinamiqui quichihuase.

Amo aquí quichihua cati nelía cuali.

Yon se.

¹³ Cati quijtohua nochi masehualme eltoc fiero quej quema quitapohuaj campa quitoctoque se mijcatzi.

Quej nopa fiero inincamac masehualme.

Ica ininenepil nochi istacatij.

Inincamanal nelcococ quej quema tetzacanía se cohuat cati temictía.

¹⁴ Masehualme san tatelechijtinemij huan san cuajcualantoque.

¹⁵ San quinejnectoque temictise.

¹⁶ Campa hueli yahuij, quintaijyohuilitíaj huan quintequipacholmacaj sequinoc.

¹⁷ Amo quimatij nopa ojti ten tasehuilisti cati Toteco temaca.

¹⁸ Amo moilhuíaj sinta monequi ma quiimacasica Toteco Dios.”

Quej nopa ijcuilijtoc ipan Icamanal Toteco.

¹⁹ Tojuanti tijmatij para nochi cati itanahuatil Moisés tamachtía, eltoc para techmachtis tiisraelitame para ma tijmachilica para tijhuicaj tajtacoli iixpa Toteco, huan para ayecmo huelis timohueyimatise quema ticamanaltij quej tiitztosquíaj ticuajcualme, pampa amo melahuac. Nochi cati itztoque ipan ni taltipacti quichiyaj para Toteco quintajtolsencahuas pampa quihuicaj tajtacoli iixpa. ²⁰ Amo aqui se masehuali cati mochijtoc xitahuac iixpa Toteco san pampa quineltocatinemi nochi cati quijtohuaj nopa tanahuatilme. Pampa quema achi más tiquixmatij itanahuatil, achi más nopa tanahuatilme techmachilitíaj totajtacolhua huan para amo tijchihuaj nochi cati quijtohuaj.

Jesucristo techmaquixti ten totajtacolhua

²¹ Pero ama Toteco Dios technextilijtoc seyoc ojti para techchihuas tixitahuac iixpa huan amo ica nopa tanahuatilme. Icamanal Toteco ten huejcajquiya techyolmelahua quenicatza quichihuas. ²² Toteco Dios techchihua tixitahuac iixpa quema tijneltoque Jesucristo. Quena, nochi masehualme cati quineltocaj mochihuaj xitahuac iixpa Toteco pampa Toteco amo quinicnelía san sequij inieso masehualme. ²³ Pampa nochi masehualme tajtacolchijtoque. Amo aqui senquisa cuali quej Toteco cati nelía cuajcualtzi hasta quiipiya itatanex. ²⁴ Pero hueyi iyolo Toteco ica tojuanti huan yaya san tapic techchihua ma tiitzoca tixitahuac iixpa, pampa Jesucristo ya taxtajqui por totajtacolhua quema mijqui. ²⁵ Quena, Toteco Dios quitali Jesucristo para quiselis nopa tatzacuilitilisti por totajtacolhua, para ica ya nopa ma quitamiltis icualancayo Toteco ica tojuanti. Huan Toteco techchihua tixitahuac iixpa quema tijneltoque para Cristo mijqui huan quitoyajqui ieso por tojuanti. Huejcajquiya nesiyaya para Toteco Dios amo quichihuayaya cati xitahuac pampa quipixqui iyolo huan amo quitachili inintajtacolhua nopa masehualme. Pero ama tiquitaj para nelía xitahuac Toteco, pampa yaya san quichiyayaya ma huala Cristo cati nelía taxtahuas por inintajtacol nochi masehualme. ²⁶ Ipan ni tonali Toteco technextilijtoc para yaya nelía xitahuac, huan yaya cati quinchihua masehualme ma itztoca xitahuac iixpa sinta quineltocaj cati Jesús quichijqui por injuanti.

²⁷ Huajca ¿huelis timohueyimatise huan tiquijtose taya tijchijtoque para timochihuase tixitahuac iixpa Toteco? Amo hueli. Pampa amo tiitzoque tixitahuac iixpa pampa tijchijtoque cati cuali, pero Toteco techchihua tixitahuac iixpa quema tijneltoque Jesucristo. ²⁸ Huajca tijmachilíaj para Toteco techchihua ma tiitzoca tixitahuac iixpa sinta tijneltoque Jesucristo, masque amo tijchijtoque nochi cati quijtohuaj itanahuatil Moisés.

²⁹ ¿Huan Toteco san toTeco tiisraelitame, pero amo ininTeco masehualme cati amo israelitame? ¡Amo cana! Yaya Toteco tiisraelitame huan nojquiya ininTeco cati amo israelitame. ³⁰ Pampa Toteco Dios san setzi huan san se ojti para tiitzose tixitahuac iixpa. Yaya techchihua tixitahuac iixpa tiisraelitame huan cati amo israelitame quema tijneltoque Cristo. ³¹ Huan

ama pampa tijneltočaj Cristo, ¿huelis tiqijjtose ayecmo tijchihuase cati cuali technahuatía nopa tanahuatilme? ¡Amo! ¡Amo ya nopa! Ama, achi más tijchihuase nochi cati cuali cati nopa tanahuatilme quinequiyayaj technextilise.

4

Quenicatza Abraham mocuetqui xitahuac iixpa Toteco

¹ Huajca ¿taya tiqijjtose ten tohuejcapan tata Abraham cati ica ya pejque nochi israelitame? ¿Quenicatza mochijqui xitahuac iixpa Toteco? ² Sinta Toteco quijjtostosquía para Abraham itztoya xitahuac iixpa pampa Abraham quichijtosquía miyac tamanti cati cuali, huajca Abraham huelis mohueyimajtosquía ica cati quichijtosquía. Pero amo. Iixpa Toteco amo teno quichijqui Abraham cati nelía cuali ica cati huelisquía mohueyimatisquía. ³ Pampa Icamanal Toteco quijjtohua: “Abraham quineltoac para temachtí mochihuas cati Toteco quilhui para mochihuas, huan yeca Toteco quichijqui xitahuac iixpa.” ⁴ Sinta se tacat tequiti huan iteco quitaxtahuía, huajca amo san tapic quimaca itaxtahuil, pampa quitantoc. ⁵ Pero Toteco quijjtohua masehualme itztoque xitahuaque iixpa sinta motemachise ipan ya huan amo pampa quichihuaj miyac tamanti tequit cati cuali. Quena, monequi quineltoacase Toteco cati quinchihua tajtacolchihuani xitahuaque iixpa. ⁶ San se nojquiya quijjto Tanahuatijquet David huejcajquiya, quema camanaltic ten quenicatza tahuel paquij masehualme cati Toteco quinchihua ma elica xitahuaque iixpa, masque amo hueli quichihuaj cati senquisa cuali. ⁷ Quiijto: “Nelía paquij nochi masehualme cati Toteco quintapojpolhuijtoc inintaixpanolhua huan inintajtacolhua. ⁸ Nelía paquij injuanti cati Toteco quijjtohua para ayecmo quipiyaj tajtacoli iixpa.”

Quej nopa quijjto David.

⁹ Huan ¿ajquiya injuanti cati quiyampa paquij? ¿Huelis san tiisraelitame cati tijpiyaj nopa machiyot cati itoca circuncisión ipan totacayo? ¡Amo! Nojquiya quej nopa paquij masehualme cati amo quipiyaj nopa machiyot. Pampa ya nimechilhui para Abraham quineltoac Toteco para temachtí panosquía cati Toteco quihui, huan yeca Toteco quiseli huan quijjto para elqui xitahuac iixpa. ¹⁰ ¿Huan quenicatza eltaya Abraham quema Toteco quichijqui xitahuac iixpa? ¿Quichijqui xitahuac quema Abraham ya motequijjtoya nopa machiyot circuncisión, o quema ayemo motequijjtoya? Nimechilhuía, Toteco quichijqui Abraham xitahuac iixpa quema ayemo motequiliyaya nopa machiyot. ¹¹ Huan teipa Toteco quimacac Abraham nopa machiyot circuncisión ipan itacayo quej se tanextili para Toteco ya quichijjtoya xitahuac iixpa pampa quineltoac para temachtí cati Toteco quijjtostoya. Huajca yeca Abraham mochijqui quej totata, o yaya cati achtohui taneltoac ten nochi taneltoacani cati amo quipiyaj nopa machiyot, pero Toteco quinchijtoc xitahuaque iixpa pampa quineltoacque. ¹² Huan Abraham nojquiya eltoc totata tiisraelitame cati techtequijjtoque nopa machiyot ipan totacayo sinta amo san timotemachíaj ipan nopa machiyot, pero nelía tijtoquilíaj iojhui Abraham huan tijneltočaj para temachtí cati Toteco quijjtohua quej Abraham quineltoac quema ayemo motequiliyaya.

Cati Toteco quitencahuili Abraham

¹³ Toteco amo quitencahuili Abraham huan iixhuihua para quiselisquíaq ni taltpacti para iniaxca pampa quinneltoquilijque nopa tanahuatilme.

Toteco quijto quichihuasquía pampa quineltoaque ya, huan yeca itztoyaj xitahuaque iixpa. ¹⁴ Huan sinta nopa masehualme cati motemachíaj ipan nopa tanahuatilme ya quiselijtoyaj cati Toteco quintencahuilijtoc, huajca san tapic para ma tijneltoaca Tohueyiteco. Huan san tapic elisquía para Toteco techtencahuilisquía techmacas se tenijqui pampa amo aqui hueli quichihua nochi cati itanahuatil Moisés quijtohuaj. ¹⁵ Quema onca se tanahuatili, san quichihua para ma tijcualanica Toteco pampa amo tiyajatij tijtamichihua, huan tiquixpanoj. San hueli tiiztose huan amo tiquixpanose se tanahuatili, sinta amo oncasquía se tanahuatili para ma tiquixpanoca.

¹⁶ Huajca monequi tijneltoase Toteco para tijselise nopa cati techtencahuilijtoc techmacas san tapic pampa hueyi iyolo ica tojuanti. Huan temachti tijselise cati techtencahuilijtoc masque tiquintoquilíaj nopa tanahuatilme quej israelitame o amo, sinta nelía tijneltoaj Toteco quej Abraham quichijqui. Pampa nochi masehualme cati taneltocaj quej Abraham, masque israelitame, o amo israelitame, nochi itztoque quej iteipan ixhuihua. ¹⁷ Ya nopa cati quinequi quijtos campá ijcuilijtoc huejcajquiya cati Toteco quilhui Abraham, huan ya ni cati quilhui: “Nimitzchijtoc tielis tiinintata nelía miyac inieso masehualme ipan miyac talme campá hueli.” Ya ni panoc pampa Abraham quineltoac Toteco cati quinyolcui cati mictoque huan quinnahuatía ma yolica cati ayemo yolij.

¹⁸ Quema Toteco quilhui Abraham para elis inintata tahuel miyac inieso masehualme campá hueli ipan miyac talme, Abraham quineltoac para temachti mochihuas cati Toteco quilhui. Quineltoac masque amo quimachili quenicatza huelis panos, pampa Toteco quilhuijtoya para quipiyas iteipan ixhuihua quej inimiyaca sitalime. ¹⁹ Huan Abraham amo quicaxani quineltoaca Toteco masque quimatqui ya panotoya xihuit para quipiyas se icone pampa nechca eliyaya para quipiyas cien xihuit. Huan isihua Sara nojquiya huejcajquiya quipanotoya nopa xihuit para huelis quipiyas se icone. ²⁰ Pero Abraham, yon quentzi amo quicaxani quineltoacas para mochihuas nochi cati Toteco quitencahuili. San achi más quineltoac cati Toteco quilhui, huan achi más motemachi ipan ya, huan ica ya nopa más monexti ihueyitilis Toteco. ²¹ Abraham quimatiyaya para temachti Toteco quipiya chichahualisti para quichihuas nochi tamantí cati quitencahuilijtoya. ²² Huan yeca pampa quineltoac Toteco, Toteco quijto para Abraham itztoya xitahuac iixpa.

²³ Pero amo san para ya ijcuilijtoc ipan Icamanal Toteco para Toteco quiseli Abraham huan quijto para xitahuac iixpa. ²⁴ Ijcuilijtoc nojquiya para tojuanti ma tijmatica para Toteco nojquiya techselis, huan quijtos miyacapa para tixitahuaque iixpa sinta timotemachíaj ipan ya cati quiyolcuic Tohueyiteco Jesucristo quema ya mictoya. ²⁵ Quema, motemactili Jesucristo para miquis para quixtahuas totajacolhua huan teipa moyolcuic para Toteco Dios hueli techchihuas tixitahuaque iixpa.

5

Taya oncas pampa tiiztoque tixitahuaque iixpa Toteco

¹ Ama, pampa Toteco Dios techchijtoc tixitahuaque iixpa quema tijneltoaque Jesucristo, timoyoltalijtoque ihuaya Toteco Dios por nochi tamanti cati Tohueyiteco Jesucristo techchihuilijtoc. ² Nojquiya pampa tijneltoaque Jesucristo, yaya techcalaqui campá timoquetzaj ama campá hueyi topati iixpa Toteco pampa hueyi iyolo ica tojuanti. Huan ama tijpiyaj temachili ipan Toteco. Huan tipaquij miyac ipan ni tonali pampa tijchixtoque nopa

tonali quema tiitztose ipan tatanexti ica Toteco. ³ Huan amo san ya nopa, nojquiya tijpiyaj paquillisti quema tijpanoj taohuicayot, pampa tijmatij taohuicayot techpalehuía para achi más tijpiyase toyolo ica nochi tamanti cati techpanotihuala. ⁴ Huan sinta tijpiyaj toyolo ica cati techpanotihuala, techmaca tetili. Huan nopa tetili techchihua para más timotemachise para tijselise nochi cati Toteco techtencahuiljtoc. ⁵ Huan quema timotemachíaj ipan Toteco, yaya amo techcajcayahua. Temachti tijselise nochi cati tijchijyaj pampa tijmatij tahuel miyac Toteco techicnelía pampa techmacatoc Itonal Toteco para quitemitis toyolo ica itaicnelijcayo.

⁶ Nojquiya tijmatij Toteco techicnelía pampa quema amo teno hueliyaya tichihujaj para timomaquixtise ten totajtacolhua, ajsic nopa cuali hora quema Cristo mijqui por nochi titajtacolchihuani. ⁷ Amo aqui quinequi miquis por seyoc masehuali masque ne se masehuali eli se masehuali cati xitahuac. Huelis se ome miquisquíaj por se masehuali cati nelía cuali iyolo. ⁸ Pero Toteco technextili para nelía miyac techicnelía pampa Cristo mijqui por nochi tojuanti quema noja tieliyayaj tajtacolchihuani. ⁹ Huan sinta Toteco techchijtoc tixitahuaque iixpa pampa Jesucristo mijqui huan quitoyajqui ieso por tojuanti, temachti nojquiya Jesucristo techmanahuis ten ihueyi cualancayo Toteco Dios. ¹⁰ Quema tojuanti noja tieliyayaj tiicualancaitacahua Toteco, Cristo icone Toteco mijqui por tojuanti. Huan ica imiquilis, Toteco moyoltali ica tojuanti huan techchijqui tihhuampoyohua. Huajca ama tijmatij temachti Cristo techmanahuis ten tatzacuiltili pampa Cristo itztoc para nochipa. ¹¹ Huajca ama tojuanti tijpiyaj paquillisti ica Toteco pampa yaya moyoltali ica tojuanti ica cati quichijqui Tohueyiteco Jesucristo.

Adán huan Cristo

¹² Quema pejqui taltipacti, Adán tajtacolchijqui huan tajtocoli pejqui ipan taltipacti pampa se tacat tajtacolchijqui. Huan pampa pejqui tajtocoli, nojquiya pejqui miquillisti. Huajca ama miquillisti techajsi nochi timasehualme, pampa nochi tajtacolchijtoque. ¹³ Tajtacolchijque nochi masehualme cati íztoyaj ipan taltipacti quema ayemo oncayayaj nopa tanahuatilme, pero amo quiixpanoque se tanahuatili pampa amo oncayaya tanahuatili. ¹⁴ Pero masque amo quiixpanoque se tanahuatili, nochi masehualme tajtacolchijque huan nochi mijque cati íztoyaj ipan taltipacti ten quema Adán itztoya huan hasta teipa quema itztoya Moisés, yaya cati quijcuilo nopa tanahuatilme. Huajca nelnelía eltoc iyoca Adán cati achtohui itztoya huan Cristo cati hualajqui teipa.

¹⁵ Adán techhualiquili tatzacuiltilisti, pero ica Jesucristo, Toteco techmacatoc se nemacti. Pampa quema nopa tacat Adán tajtacolchijqui, yaya quichijqui para ma timiquica nochi titaltipac ehuan cati teipa titacatise. Pero pampa hueyi iyolo Toteco Dios, yaya san techmacatoc miyaqui ten tojuanti se nemacti. Huan techmacac nopa nemacti ica se tacat, yaya Jesucristo cati techchihuili se hueyi favor. ¹⁶ Huan cati tijselijtoque ica Jesucristo amo san se ica cati tijselijtoque ica Adán cati tajtacolchijqui. ¡Amo, yon quentzi! Adán techchijqui para ma tijhuicaca tajtocoli, huan para ma tijpantica tatzacuiltilisti. Pero masque miyac titajtacolchijtoque, ica Jesucristo Toteco techmacatoc se nemacti huan techchihua tixitahuaque iixpa. ¹⁷ Quema san se tacat, Adán, tajtacolchijqui, quichijqui para ma miquica nochi masehualme. Pero nochi masehualme cati quiselíaj nopa nemacti huan quicahuilíaj Jesucristo ma quinchihua xitahuaque iixpa pampa hueyi iyolo ica tojuanti, nochi tojuanti tiitztose huan titatanise por san se tacat, yaya Jesucristo.

¹⁸ Quena, san se tacat, Adán, tajtacolchijqui huan techhualiquili nochi timasehualme tatzacuilitlisti. Huan nojquiya san se tacat, yaya Jesucristo, quichijqui cati senquisa cuali huan ica ya nopa quisencajqui quenicatza nochi masehualme huelis quipiyase nemilisti yancuic, huan quenicatza nochi huelis mochihuase xitahuaque iixpa Toteco Dios. ¹⁹ Pampa Adán amo quichijqui cati Toteco Dios quihlhi, nochi masehualme mocuetque tajtacolchihuani, pero Jesucristo quena, quitamichijqui nochi cati quihlhi Toteco Dios, huan yeca ama miyac timasehualme huelis timochihuase tixitahuaque iixpa.

²⁰ Huan Toteco temacac nopa tanahuatilme ica Moisés para ma tijmatica para miyac tajtacoli tijhuicaj. Huan ama pampa miyac tajtacoli tijhuicaj, noja más nelpano Toteco quipixqui hueyi iyolo ica tojuanti, huan quej nopa elis para nochipa. ²¹ Huajca quej tajtacoli achtohui quipixqui tequiticayot huan techchijqui ma timiquica, ama hueyi iyolo Toteco ica tojuanti huan itaicnelijcayo quiptiya tequiticayot para techchihuas tixitahuaque iixpa. Huan quiptiya tequiticayot para techmacas nemilisti cati yancuic para nochipa ica Tohueyiteco Jesucristo.

6

Ma ayecmo titajtacolchihuaca

¹ ¿Huajca taya monequi tijchihuase ama? ¿Anquilitaj cuali para ma tijchihuaca más tajtacoli para noja más hueyi elis iyolo Toteco ica tojuanti? ² ¡Amo ya nopa! Ma amo titajtacolchihuaca. Tojuanti quej timijcatzitzitzi cati titanquejya ica tajtacoli. Huajca ¿quenicatza huelis tijchihuase? ³ ¿Amo anquimatij quema se masehual quiselía Cristo Jesús huan Itonal Toteco quitatzquiltía ipan Cristo, nopa masehual mochihua tatzquitoc ipan imiquilis huan eltoc quej mijqui ihuaya Cristo? ⁴ Quena, elqui quej timijque tojuanti huan techtalpachoque ihuaya Jesucristo quema Itonal techtatzquilti ipan Cristo. Huan quej Toteco, ica ihueyi chichahualis, quiyolcuic Cristo quema mictoya, nojquiya eltoc quej techyolcuic tojuanti huan techchijqui ma tinemica cuali pampa ama tijpiyaj nemilisti cati yancuic.

⁵ Pampa techtatzquiltij ipan Jesucristo quema yaya mijqui para ma quihuica totajtacol, nojquiya tiitztoyaj titatzquitoque ipan Jesucristo quema yaya moyolcuic para ama huelis tijpiyase se nemilisti cati yancuic ihuaya.

⁶ Pampa tijmatij quema quicuamapeloltijque Cristo, elqui quej nojquiya quicuamapeloltijque nopa totajtacolchijca nacayo cati san quinequi tajtacolchihuas. Yeca nopa totajtacolchijca nacayo cati tijpiyaj pampa tajtacolchijca masehualme, ayecmo quiptiya chichahualisti para technahuatis ma tajtacolchihuaca, pampa ayecmo tiitequipanojcahua. ⁷ Pampa quema timijque ica Cristo, techtojtongui ten ichichahualis tajtacoli quej se mijcatzi ayecmo quinequi tajtacolchihuas.

⁸ Huan ama pampa timijque ihuaya Cristo, tijmatij nojquiya tijpiyase nopa nemilisti yancuic ihuaya quej cati yaya quiptiya. ⁹ Huan pampa Cristo moyolcuic quema mictoya, tijmatij ama ayecmo quema miquisoc pampa miqulisti ayecmo teno hueli quichihuilis. ¹⁰ Cristo mijqui sempatzi para quitzontamiltis nochi ichichahualis tajtacoli para nochi timasehualme. Huan ama yaya itztoc huan quiptiya se nemilisti cati quinextía ihueyitilis Toteco Dios. ¹¹ Nojquiya ica tojuanti san se. Ma timomatica quej timijcatzitzitzi quema tajtacoli techyoltilana, pero ma timomacaca cuenta para tiitztoque tyoltoque para tijnextise ihueyitilis Toteco Dios ica ichichahualis Jesucristo.

¹² Huajca ayecmo xijcahuilica tajtacoli ma amechnahuati huan ma amechyoltilana xitajtacolchihuaca quema anitztoque ipan ni taltipacti ica

totacayohua cati miquij. Amo xijneltocaca cati amo cuali amonacayo quinequi quichihuas. ¹³ Amo xijtequihiuca amotalnamiquilis, amocamac o amotacayo para ma tajtacolchihuaca. Pero ximotemacaca senquisa ica Toteco pampa eltoya quej anmictoyaj, pero ama ya anquipiyaj nemilisti cati yancuic. Huajca sesen amojuantí ma quitequihiuitalnamiquilis, icamac, imax huan sesen tamanti cati quipiya ipan itacayo para quichihuas cati nelía xitahuac quej Toteco quinequi. ¹⁴ Tajtacoli ayecmo quipiya tequiticayot para amechnahuatís ipan amoyolo quej se amoteco, pampa itanahuatil Moisés ayecmo quipiyaj tequiticayot ica tojuanti. Ama tiitztoque itantita itaicnelijcayo Toteco cati hueyi iyolo ica tojuanti.

Tacame cati tetequipanohuaj

¹⁵ Huan ama ¿taya tijchihuase? ¿Anquittaj cuali ma noja titajtacolchihuaca pampa Toteco techmanahujtoc para nopa tanahuatilme ma ayecmo technahuatíca huan ama Toteco techtalijtoc itantita itaicnelilís pampa hueyi iyolo ica tojuanti? ¡Amo! Ma amo quema titajtacolchihuaca. ¹⁶ ¿Amo anquimatij quema anmotemactilíaj ica se para anquichihuase cati amechnahuatía, huajca ya nopa mochihuas amoteco? Sínta timotemactilís ica tajtacoli para tijchihuas cati mitzilhuía, huajca timochihua tiitequipanojca tajtacoli huan quiyampa tijpantis miqulisti. Pero sinta timotemactilise ica Toteco para tijneltoquillise, yaya techchihuas ma tiitztoque tixitahuaque iixpa. ¹⁷ Nijtasacamati Toteco Dios pampa masque aneltoyaj imaco tajtacoli huan anquichihuayaj cati amechyoltlanayaya xijchihuaca, teipa ica nochi amoyolo anmotemactilijque para anquineltoquillise huan anquichihuase nopa tamachtíli cati Toteco amechmacac. ¹⁸ Huan Toteco amechtojtomas ten tajtacoli cati achtohui elqui amoteco, huan ama huelís anquitequipanose Toteco huan anquichihuase nochi cati xitahuac.

¹⁹ Na nimechcamanalhuía ni ica tatenpohuilisti ten masehualme cati tetecome huan initequipanojcahua para amo elís ohui anquimachilise cati nimechilhuía. Achtohui anquitemactilijque amotalnamiquilis, amocamac, amomax huan nochi amotacayo para antaixpanose huan para anquichihuase cati amo cuali, pero ama xijtemactilica nóchi amotacayo para anquitequipanose cati xitahuac para anelise antatzejtelollique.

²⁰ Quema anitztoyaj imaco tajtacoli huan tajtacoli amechnahuatíyaya, amo anmoilhuyayaj para monequi anquichihuase cati xitahuac. ²¹ Huan ¿quenicatza amechpalehui nopa tamantí cati amo cuali anquichihuayajaj? Amo teno amechpalehui. San anpinahuaj ama ica cati anquichihuayajaj. Nopa tamanti san tehualiquilía miqulisti nepa micta. ²² Pero ama Toteco amechmaquixtíjtoc huan amechtojtónqui ten tajtacoli para ayecmo huelís amechnahuatís. Huan anmochijtoque anitequipanojcahua Toteco Dios huan ya nopa, quena, amechpalehuía pampa ama hueli anquichihuaj nopa cuali tamanti cati amechihua antaiyocatalilme para Toteco huan yeca anquiselise nemilisti cati yancuic para nochipa. ²³ Sínta se tacat tajtacolchihua, quipantía miqulisti quej itaxtahuil, pero Toteco Dios techmaca se nemacti quema tijneltocej Tohueyiteco Jesucristo, huan nopa nemacti eltoc nemilisti yancuic para nochipa.

7

Se ejemplo ten sihuame cati monamictíaj

¹ Xijtacaquilica noicnihua cati anquimatij itanahuatil Moisés. ¿Amo anquimatij para nopa tanahuatilme san quipiyaj tequiticayot ica se masehuali quema noja itztoque? ² Quej nopa eltoc ica se sihuat cati quipiya ihuehue.

Nopa tanahuatili quijitohua se sihuat monequi itzots ihuaya ihuehue nochi inemilis. Pero sinta ihuehue miquis, huajca nopa tanahuatili ten nenamictili ayecmo quiipya tequiticayot, huan nopa sihuat mocahua majcajtoc. ³ Sinta nopa sihuat mosejcotilisquía ihuaya seyoc tacat quema noja itztoya ihuehue, yaya momecatijtosquía. Pero quema ya mijqui ihuehue, nopa tanahuatili ayecmo quitzacuilla huan yaya amo momecatis masque monamictis ica seyoc tacat.

⁴ Ica amojuanti nojquiya san se. Nopa tanahuatilme ayecmo quiipiyaj chicahualisti ica amojuanti. Ximomacaca cuenta para anmijque iniixpa nopa tanahuatilme quema anmijque ipan nopa cuamapeli ihuaya Cristo. Huajca ama anmocahuaj anmajcajtoc ten nopa tanahuatilme cati achtohui amechnahuatiyaya. Ama anitztoque quej se sihuat cati sempa monamictia quema ya mijqui ihuehue. Ama anmochijtoque san se ica Cristo cati Toteco Dios quiyolcuic quema mictoya. Huan ama hueli tijchihuase nopa cuali tamanti cati Toteco quinequi ma tijchihuaca. ⁵ Achtohui totajtacolchijca nacayo technahuatiyaya. Huan quema tijmatque nopa tamanti cati nopa tanahuatilme quijitajque ma amo tijchihuaca, achi más techchijqui ma tijnequica tijchihuase nopa tamanti. Huan nopa tajtacoli san tehualiquilla miqulisti. ⁶ Pero ama pampa timijque ica Cristo, yaya tech-tonqui ten nopa tanahuatilme para tielise timajcajtoc huan yeca nopa tanahuatilme ayecmo techpixtoc imaco para ma tijtequipanoca. Ama hueli tijtequipanohuaj Toteco Dios ipan seyoc tamanti ojtí cati yancuic quej Itonal techpalehuía ma tijchihuaca. Ayecmo tijtequipanohuaj pampa tiquimacasiq cati quijitajque nopa tanahuatilme huejcajquiya.

Tajtacoli eltoc ipan toyolo

⁷ Huajca ¿taya quijitosnequi ya ni? ¿Anmoilhujaj niqijitohua para amo cuali nopa tanahuatilme cati Moisés temacac? ¡Amo ya nopa! Cualí nopa tanahuatilme. Amo quema nijmachilijtosquía taya se tajtacoli sinta nopa tanahuatilme amo nechnextilijtosquía. Amo nijmajtosquía sinta amo cuali niqixtocas cati seyoc iaxca sinta nopa tanahuatili amo quijitajtosquía: “Amo xiquixtoca cati sequinoc iniaxca.” ⁸ Huan pampa se nitajtacolchijca masehualí, quema nijmatqui nopa tanahuatili quijitohua ma amo nitajixtoca, huajca achi más nijnequiyaya nochi cati sequinoc quipixtoyaj. Huan sinta amo oncasquía nopa tanahuatili, nopa tajtacoli amo quiipiyasquía más chicahualisti ica na. ⁹ Ica na quema ayemo nijmatiyaya taya quijitohua nopa tanahuatili, nimoilhui ninemiyaya cuali, pero quema nijmatqui nopa tanahuatili, huajca nimomatqui para nise tajtacolchijquet huan nijmatqui miqulisti huan tatzacuilitilisti nechchiyayaya. ¹⁰ Yeca para na, nopa cuali tanahuatili cati eltoya para nechnextilis se nemilisti cati cuali, nechnextili para quinamiqui nimiquis. ¹¹ Huajca notajtacolchijca yolo quichijqui ma amo nijmachili, huan quitequihui nopa cuali tanahuatili para nechcayahuas huan para nechchihuas ma nijhuica tajtacoli para nimiquis.

¹² Huajca tatzetzeltollique itanahuatil Moisés. Huan tatzetzeltollic, xitahuac huan cuali nochi cati technahuatía. ¹³ Huan amo huelis tiqijitose nopa cuali tanahuatilme quichijque ma nimiqui. ¡Amo ya nopa! Timiquise pampa totajtacolchijca yolo quitequihui nopa cuali tanahuatilme para ma techhualiquili tatzacuiliti. Yeca technextilía para nelía fiero totajtacolchijca yolo. Huan nopa tanahuatilme cati cuali technextilíaj para nelía miyac titajtacolchijca masehualme.

¹⁴ Tijmatij para cuali nopa tanahuatilme huan amo inintajtacol nopa tanahuatilme para nijpantis miqulisti. Eltoc notajtacol na, pampa san

nitajtacolchijca masehuali. Eltoc quej nimotemactili para nijtequipanos notajtacolchijca yolo. ¹⁵ Amo nijmachilía taya nijchihua. Nelía nijnequi nijchihuas cati cuali, pero amo nijchihua. Huan nopa cati nijcualancaita, ya nopa nijchihua. ¹⁶ Quema nijmati ipan noyolo para amo cuali cati nijchihua, nijnextía para nijmati para cuali nopa ojti cati nopa tanahuatilme techmachitaj. ¹⁷ Huan niquita amo na cati nijchihua cati amo cuali, pero eltoc notajtacolchijca talnamiquilis cati eltoc ipan na cati quichihua cati fiero. ¹⁸ Huan nijmati ipan notajtacolchijca yolo, amo teno onca cati cuali, pampa nijnequi nijchihuas cati cuali, pero amo nihueli. ¹⁹ Amo nijchihua nopa cuali tamanti cati nijnequi nijchihuas, pero ajachica nijchihua cati amo cuali cati amo nijnequi nijchihuas. ²⁰ Huajca, sinta nijchihua cati amo nijnequi nijchihuas, nijmachilía para amo nelía na nimochihuilía ma nitajtacolchihua. Eltoc nopa tajtacoli cati nijpiya ipan noyolo pampa nitajtacolchijca masehuali, ya nopa cati nechchihua ma nitajtacolchihua.

²¹ Huajca niquita quiyampa eltoc ica timasehualme. Onca tajtacoli ipan toyolo, huan masque tijnequij tijchihuase cati cuali, tijchihuj cati amo cuali. ²² Pampa ipan noyolo nechpactía nijchihuas nopa cati cuali cati quijtohuaj itanahuatil Toteco, ²³ pero nochipa ipan na onca tajtacoli cati quitehuía cati cuali nijnequi nijchihuas ipan notalnamiquilis. Huan quej se tequipanojquet monequi quineltocas iteco, nopa tajtacoli nechchihua ma nitajtacolchihua.

²⁴ ¡Tahuel niteicnelti! ¿Ajquiya nechmaquixtis ten ni nemilisti ten tajtacoli cati nechhualiquilía miqulisti? ²⁵ Tascamati Toteco Dios. Tohueyiteco Jesucristo yaya quichihuas. Huajca na ica notalnamiquilis nijtequipanohua Toteco huan nopa tanahuatilme, pero notajtacolchijca nacayo noja quinequi tajtacolchihuas.

8

Nopa nemilisti cati Itonal Toteco techmaca

¹ Huajca ama ayecmo techchiya tatzacuilitlisti tojuanti cati timocuetoque san se ica Cristo Jesús, pampa ayecmo tijchijtinemij cati totajtacolchijca nacayo technahuatía. Ama tijchihuj cati Itonal Toteco quinequi. ² Huan ichicahualis Itonal Toteco cati quimaca nemilisti yancuic cati mochihua san se ica Cristo Jesús, ya nechtojttonqui ten ichicahualis tajtacoli huan miqulisti. ³ Quena, itanahuatil Moisés amo huelque techmaquixtise, pampa amo quipixque chichahualisti para quitanise totajtacolchijca nacayo. Pero Toteco Dios quisencajqei seyoc ojti. Quititanqui cati ya Icone para mocuepas masehuali ica itacayo quej tojuanti, masque yaya amo quipixqui tajtacoli. Huan Jesucristo mijqui quej se tacajchahualisti por totajtacolhua huan yeca quisosolo ichicahualis nopa tajtacoli cati eltoc ipan tojuanti. ⁴ Quichijqui ya ni para quej nopa, nochi nopa tamanti cati itanahuatil Moisés techtaj-taniyayaj ma tijchihuaca, ma tamis para tojuanti cati ayecmo tinemij quej techilhuía totajtacolchijca nacayo. Ama tijchihuj cati Itonal quinequi ma tijchihuaca.

⁵ Masehualme cati quitoquilíaj inintajtacolchijca yolo san moilhuíaj cati-
jqe tajtacoli quinequij quichihuase inintacayohua. Pero masehualme cati quitoquilíaj Itonal Toteco moilhuíaj ten nopa cuali tamanti cati Itonal Toteco quinequi quichihuas. ⁶ Pampa sinta timosenilhuíaj ten cati totajtacolchijca nacayo quinequi, tijpantise miqulisti. Pero sinta timosenilhuisse ten cati Itonal Toteco quinequi, huajca tijpantise tasehuilisti huan nemilisti cati

yancuic. ⁷ Pampa totajtacolchijca talnamiqulils quicualancaita Toteco huan amo quinequi qutoquulils cati technahuatía. Nelía totajtacolchijca nacayo amo hueli quichihua cati nopa tanahuatilme quijtohuaj. ⁸ Huajca cati qutoquilía cati itajtacolchijca nacayo quinequi quichihuas, amo quema huelis quipactis Toteco Dios.

⁹ Pero amojuanti amo anquitoquilíaj amotajtacolchijca nacayo. Ama anquitoquilíaj Itonal Toteco, pampa nelía Itonal mocahua ipan amoyolo. Huan sinta se amo quiapiya Itonal Cristo ipan iyolo, huajca yaya amo iaxca Cristo. ¹⁰ Huan pampa Cristo itztoc ipan amoyolo, masque amotacayo miquls por tajtocoli, amotonal itztoc huan quiapiya nemilisti cati yancuic pampa Toteco amechhijtoc anxitahuaque iixpa. ¹¹ Itonal Toteco Dios itztoc ipan amojuanti, huan huajca Toteco Dios cati quiyolcuic Jesús quema ya mictoyo, nojquiya quiyolcuis amotacayohua ica Itonal cati mocahua ipan amojuanti.

¹² Huajca noicnihua, amo monequi tijchihuase cati totajtacolchijca talnamiqulils technahuatía ma tijchihuaca. ¹³ Pampa sinta anquitoquilitine-mise amotajtacolchijca tacayo, anmiquise huan anyase micta. Pero sinta ica itapalehuil Itonal Toteco anquitamiltise ichicahualis amotajtacolchijca talnamiqulils, anquipantise nemilisti yancuic para nochipa.

¹⁴ Pampa nochi cati quicahuilíaj Itonal Toteco ma quinyacana, injuanti iconehua Toteco. ¹⁵ Amojuanti amo monequi anquiimacasisse Toteco quej tequipanohuani cati ininteco quincojtoc para iaxcahua quimacasin ininteco pampa quimatij fiero quinchihuilis. Pero amojuanti anquiselijtoque Itonal Toteco cati amechhijtoc aniconehua Toteco, huan ica Itonal Toteco ipan tojuanti ama hueli anquinojnotzaj Toteco Dios: “Papá.” ¹⁶ Huan Itonal Toteco techyolmelahua ipan toyolo huan ipan totonal para tojuanti tiiconehua Toteco. ¹⁷ Huan pampa tojuanti tiiconehua Toteco Dios, teipa tijselise ten iricojyo, pampa nochi cati Toteco quimacas Icone, Cristo, elis toxca nojquiya. Huan sinta ama titaijyohuise ihuaya, teipa techhueyitalis ihuaya nopona campá monextis ihueyitilis.

¹⁸ Pero tiquitaj para amo teno nopa pilquentzi cati titaijyohuíaj ama, quema timoilhuíaj quenicatza tielise teipa quema Toteco techhueyitalis para nochi quiitase. ¹⁹ Huan nochi tapiyalme huan tamanti cati Toteco quinchijtoc tahuel quichiyaj nopa tonali quema Toteco techixnextis para tojuanti tiiconehua. ²⁰ Pampa quema Adán tajtacolchijqui, Toteco quitelchijqui ni taltpacti huan nochi cati itztoyaj ipani huan quichijqui ma onca miqulisti huan para nochi tamanti ma sosolihui. Quej nopa eltoc masque taltpacti huan cati itztoyaj ipani amo quinequiyayaj para quiyampa ma eli. ²¹ Huan ama nochi tapiyalme huan nochi cati onca quichiyaj, huan tahuel quinequij ma ajsi nopa tonali quema injuanti nojquiya itztose quej tojuanti cati tiiconehua Toteco. Huan nochi tiitztose timajcaytoque ten nopa tatelechihuali, huan nochi elis tahuel yejyetzzi. ²² Pampa hasta ama nochi tapiyalme huan tamanti cati Toteco quichijtoc ipan taltpacti axtij huan taijyohuíaj quej se sihuat cati tatacatiltía. ²³ Huan tojuanti titaneltocani cati tijpiyaj Itonal Toteco ipan toyolo quej se tanextili para huala más miyac tamanti cati cuali, tojuanti nojquiya tiactij quej nopa tapiyalme huan tamanti cati Toteco quichijtoc. Huan tijnequij para ma tami taohuijcaoyot. Tahuel tijchiyaj para Toteco quinnextilis nochi masehualme para tojuanti tiiconehua, huan tijchiyaj nopa tonali quema Toteco quichihuas yancuic totacayo. ²⁴ Huan pampa tijnequij tijselise nochi ni tamanti cati Toteco quijto, timomaquixtijtoque. Pero sinta ya tijpiyasquíaj se tamanti, amo

monequi tijchiasquíaj. Amo aqui quichiya para quiselis cati ya quipiya. ²⁵ Pero tojuanti tahuel tijchiyaj cati ayemo tiquitaj, huan yeca monequi ma tiquiyohuica nochi cati techpanotihuala, huan ica paquilisti ma tijchiyaca nopa cuali tonali cati tijmatij temachtí oncas teipa.

²⁶ Huan nojquiya Itonal Toteco techpalehuía pampa amo tijmachilíaj nochi huan amo tijmatij taya monequi tijtajanise Toteco quema timotatajtíaj. Huan Itonal Toteco iselti motatajtía chicahuac ica Toteco Dios por tojuanti huan Itonal axti pampa quiilhuía Toteco cati amo aqui hueli quijtohua ica camanali. ²⁷ Huan Toteco Dios cati quitachilía iniyolo nochi masehualme, quimati cati Itonal quinequi para tojuanti, pampa Itonal Toteco quitajtanía tamanti cati Toteco Dios no quinequi ma tijpiyaca tojuanti cati yaya techiy-catalijtoc para tiaxcahua.

Tijanise nochi

²⁸ Huan tijmatij nochi tamanti cati techpanotihuala, masque cuali o amo cuali, nochi quisas cuali para tojuanti cati tiquicnelíaj Toteco, cati Toteco technotzoc para tiaxcahua pampa quiyampa quitalijtoya. ²⁹ Pampa huejcajquiya Toteco techixmajtoya huan techtapejpeni para ma tielica quej Icone, Jesucristo, pampa quinejqui para yaya elis nopa achtohui ejquet huan tojuanti tielise timiyaqui tiicnihua teipan ehuaní. ³⁰ Huan ica tojuanti cati Toteco techtapejpeni huejcajquiya, teipa technotzqui. Huan ica tojuanti cati Toteco technotzqui, nojquiya techchijqui tixitahuaque iixpa. Huan ica tojuanti cati techchijtoc tixitahuaque iixpa, nojquiya techhueyitalijtoc para se tonali tiitztose ihuaya campa tahuel onca taahuili.

³¹ Huajca ¿taya huelis tiquijtose ica nochi ya inon? Tiquitaj Toteco itzoc tonechca para techpalehuis, huan yeca amo aqui huelis techtanis. ³² Pampa Toteco amo quitasomatqui Icone, pero quitemactili para ma miqui por nochi tojuanti timasehualme. Huan yeca tijmatij ica Jesucristo, Toteco nojquiya techmacas nochi cuali tamanti pampa hueyi iyolo ica tojuanti. ³³ ¿Ajquiya huelis techtelhuis tojuanti cati Toteco techtapejpenijtoc? ¿Huelis Toteco techtelhuis? ¡Amo! Pampa yaya Toteco Dios iselti cati techchijtoc tixitahuaque iixpa. ³⁴ ¿Ajquiya techtatzacuiltis? ¿Huelis Cristo? ¡Amo! Pampa yaya Cristo Jesús cati mijqui huan nojquiya moyolcuic por tojuanti. Ama yaya itzoc nepa inejmat Toteco Dios campa quitajtanía Toteco por tojuanti quej se totatempalehuijca. ³⁵ Huajca ¿ajquiya hueli techiyocacahuas ten itaicnelijcayo Cristo? ¡Amo aqui! Masque tijpanoj taohuijca, yaya techicnelía. Masque tijpanoj tequipacholi, o sequinoc techtazacuiltíaj, yaya techicnelía. Masque amo tijpiyaj taya tijcuase o taya timoquentise, yaya techicnelía. Masque mahuilili campa tiitztoque o masehualme quinequij techmictise, yaya techicnelía. ³⁶ Eltoc quej ijcuilijtoc ipan Icamanal Toteco campa quijtohua: “Pampa timitzneltocaj, Toteco, masehualme mojmota quinequij techmictise.

Techitaj quej taborregojme cati quichiyaj ajquiya quinmictis.”

³⁷ Pero masque tijpanoj nochi ni tamanti, Cristo techmaca chicahualisti ma titatanica pampa yaya techicnelía. ³⁸ Pampa nijmati para temachtí amo teno hueli techiyocacahuas ten itaicnelijcayo Toteco. Masque timiquise o tiitztose, techicnelía. Masque quinequisquíaj quitzacuiltise itaicnelijcayo ilhuicac ehuaní, o ajacame, o ajacame cati quiipiyaj tequiticayot o cati quiipiyaj chicahualisti, yaya techicnelía. Amo teno cati ama onca, yon amo teno cati teipa oncas huelis techiyocacahuas ten itaicnelijcayo. ³⁹ Amo

teno cati hualas ten huejcapa, o cati hualas ten tatzinta, yon amo teno cati tachijchihuali, huelis techiyocacahuas ten itaicnelijcayo Toteco cati technextlijtoc ipan Tohueyiteco Cristo Jesús.

9

Toteco Dios quintapejpenijtoc israelitame

¹ Iixpa Cristo nimechilhuía cati nelía, huan amo niistacati. Ipan noyolo nijmati para melahuac cati nimechilhuía huan Itonal Toteco quimati para melahuac. ² Nijpiya hueyi tequipacholi ipan noyolo cati amo quema tami ³ por nomasehualhua cati san se toeso tijpiyaj, pampa injuanti amo quineltocaj Cristo. Sinta huelisquía niquinmanahuisquía na, nijchihuasquía pampa taniel nijnequi niquinpalehuis. Sinta quinpalehuisquía para ni-moiyocacahuasquía ten Cristo huan nimocuapolosquía nepa micta quej ininpataca, nijchihuasquía. Pero amo hueli. ⁴ Toteco Dios quintapejpeni israelitame para elise iconehua. Quinnextili itatanex. Quisencajqui camanali inihuaya. Quinmacac itanahuatil. Quinnextili quenicatza ma quihueyimatica. Huan Toteco quintencahuili miyac tamanti para teipa quinmacas. ⁵ Huan tiisraelitame tiquinpixque tohuejcapan tatahua ten huejcajquiya cati taixmatilme para huejhueyi masehualme iixpa Toteco. Huan ten nopa hueyi israelita masehualme tacatqui Cristo quej se masehuali, masque yaya Toteco huan quinahuatía nochi cati onca. Ma tijhueyichihuaca Cristo para nochipa. Quej nopa ma eli.

⁶ Pero amo hueli timoilhuisse para amo quisqui melahuac nochi cati Toteco quintajtolcahuilijtoc israelitame. ¡Amo ya nopa! Pampa amo nochi iteipan ixhuhua Israel nelía itztoque israelitame huan iconehua Toteco. ⁷ Toteco amo quintapejpeni nochi iteipan ixhuhua Abraham para elise iteipan ixhuhua cati quiselisquíaj nopa tatiochihualisti. Pero Toteco quihui Abraham: “Niquintapejpenis iteipan ixhuhua motelpoca Isaac huan niquinatas quej moconehua.” ⁸ Huajca tiquitaj para Toteco amo quinita para iconehua nochi nopa coneme cati tacatque ten itacayo Abraham. Toteco quitencahuili Abraham para quipiyasquía Isaac. Huan quijto san quintapejpenisquía iteipan ixhuhua Isaac para quiselise itatiochihualis pampa Isaac tacatqui pampa Abraham quineltocac cati Toteco quitencahuilijtoya. ⁹ Huan ya ni cati Toteco quijto quema quitencahuili Abraham ten quimacasquía, quihui: “Se xihuit quej ama sempa nihualas huan mosihua Sara quipixtos se conet.”

¹⁰ Huan icone elqui Isaac, tohuejcapan tata, cati teipa mosihuajti ihuaya Rebeca. Huan teipa Rebeca quinnemiltiyaya cuateme ipan itacayo. ¹¹ Huan quema ayemo tacatiyayaj nopa cuateme, Toteco quimacac Rebeca se camanali para quinnextilis para yaya ica ipaquilis quitapejpenía ajquiya quti-ochihuas, huan nochi pano quej yaya quitapejpenía ma eli. Amo quti-ochihua por cati cuali o amo cuali quichijtoc nopa masehuali. ¹² Huajca Toteco quihui Rebeca para Esaú tacatisquía achtohui, pero Jacob, nopa teipan ejquet, quinahuatisquía. ¹³ Pampa ijcuilijtoc campa Toteco quihui Rebeca: “Niquicnelía Jacob, pero Esaú, amo.”

¹⁴ Huajca ¿huelis tiquijtose para amo xitahuac cati Toteco quichihua pampa quitapejpeni se huan nopa seyoc, amo? Amo ximoilhuaica quiyampa. ¹⁵ Pampa Toteco quipiya tequiticayot para quichihuas cati yaya quinequi. Eltoc quej Toteco quihui Moisés huejcajquiya: “Niquintasojtas cati nijnequi niquintasojtas, huan ica injuanti cati nijnequi, na nijpiyas hueyi noyolo.”

¹⁶ Huajca Toteco amo quitasojta se masehuali pampa nopa masehuali quej

nopa quinequi, o pampa nopa masehuali tequiti chichahuac para quichihualtis Toteco ma quitasojta. ¡Amo ya nopa! Toteco iselti quitapejpenía ajquiya quitasojtas. ¹⁷ Yeca ijcuilijtoc ipan Icamanal Toteco cati Toteco quihui nopa Tanahuatijquet Faráon: “Nimitztalijtoc títanahuatijquet para nichihuas tanextili moixpa para ma monexti nochichahuas huan yeca nochi masehualme ipan taltipacti quimatise ten na.” ¹⁸ Huajca tiquitaj Toteco quitasojta cati quinequi quitasojtas. Huan sinta quinequi quiyoltetilí se masehuali, quiyoltetilí.

¹⁹ Huajca huelis antechtatzintoquilise: “¿Para ten Toteco quintelhuía masehualme pampa amo aquí hueli quichihua seyoc tamanti cati amo quej Toteco quitapejpenijtoc ma quichihua?” ²⁰ Huan nimechnanquilisquía: “Ta san timasehuali. Amo huelis timocamajixnamiquis ihuaya Toteco.” Se comit amo huelis quitatzintoquilis nopa conchijquet, ¿para ten techchijqui quej ni? ¡Amo! ²¹ Nopa conchijquet quiyiya tequiticayot para quichihuas ten ya quinequi. Huelis ica se quentzi soquit quichihuas se comit para se tequit cati yejyectzi huan ica seyoc quentzi soquit quichihuas se comit para ten hueli tequit.

²² Toteco san se quiyiya tequiticayot. Huan huelis Toteco quinequiya quinnextilis fiero masehualme icualancayo para nochi ma quimatica ichichahuas, pero amo nimantzi quichijqui. Yaya tahuel quipixqui iyolo ica injuanti masque quinamiquiya para quintatzacuilitis. ²³ Quej nopa quichijqui pampa quinequiya quichiyas para nochi masehualme ma quimatica tahuel hueyi ihueyitilis, huan itaicnelijcayo ica tojuanti cati techtapejpenijtoc, huan techcualtijtoc para teipa techhuicas ilhuicac campa tatanexti. ²⁴ Huan amo technotzqui san tojuanti cati tiisraelitame para techtasojtas, pero nojquiya amechnotzoc anmasehualme cati amo anisraelitame. ²⁵ Ica anmasehualme cati amo anisraelitame, Toteco quichijqui cati huejcajquiya quijto para quichihua ipan iama nopa tajtolpanextijquet Oseas. Quijto: “Niquintocaxtis masehualme nomasehualhua cati amo eliyayaj nomasehualhua.

Huan injuanti cati achtohui amo niquinicneliyaya, ama niquinicnelis.

²⁶ Huan ipan nopa tali campa achtohui Toteco quinilhui para injuanti amo imasehualhua, teipa nochi quijtose: ‘Anicnehua Toteco Dios cati itztoc.’ ”

²⁷ Huan ica israelitame elis quej nopa tajtolpanextijquet Isaías chichahuac quijto huejcajquiya: “Masque israelitame mochihuase tahuel miyac masehualme quej imiyaca xali nechca hueyi at, san sequij israelitame momaquixtise.

²⁸ Pampa Toteco xitahuac quintajtolsenahuas masehualme huan nimantzi quintatzacuilitis.”

²⁹ Huan sejcayoc Isaías quijto:

“Sinta Toteco cati quiyiya nochi chichahualisti amo quiyiasquía iyolo ica toteipan ixhuihua,

huan amo quinequisquía quincahuilis sequij ma itztoca, techtamiltijtosquía nochi tiisraelitame quej panoc ica nopa masehualme cati itztoyaj ipan altepeme Sodoma huan Gomorra huejcajquiya.”

Israelitame huan icual camanal Toteco

³⁰ Huajca ¿taya quijtosnequi ya nopa? Injuanti cati amo israelitame huan amo quitemohuayayaj quenecatza mochihuase xitahuacque iixpa Toteco, quisque xitahuacque pampa quineltoaque cati Toteco quinilhui huan yaya

quinchijqui xitahuaque iixpa. ³¹ Pero nopa israelitame cati quinequiyayaj mochihuase xitahuaque iixpa Toteco pampa quichihuayayaj cati nopa tanahuatilme quijjtohuayaya, amo quisque xitahuaque iixpa. ³² ¿Para ten amo quisque xitahuaque iixpa Toteco? Amo quisque xitahuaque pampa quinequiyayaj mochihuase xitahuaque iixpa ica miyac cuali tequit. Amo quinequiyayaj para san quineltocase Cristo. Huajca injuanti motepotanijqe huan mocuapolojque pampa Cristo eltoc quej se tet ipan ojti ica cati masehualme motepotaniáj. ³³ Eltoc quej ijcuilijtoc ipan Icamanal Toteco campa quijjtohua:

“Xiquitaca, ipan altepet Jerusalén* nijtalis se masehuali cati elis quej se tet campa masehualme motepotamise.

Motepotamise pampa amo quinequise quineltocase, pero aquí quineltocas amo quemá pinahuas pampa quineltocac.”

10

¹ Noicnihua, ipan noyolo tahuel nijnequi para israelitame ma momaquixtica ten inintajtacolhua. Huan nijtajtania Toteco ma quinmaquixti. ² Nijmati injuanti quinpactia qutoquiliaj Toteco Dios, pero amo quimatij cati yaya quinequi ma quichihuaca. ³ Israelitame amo quimachiliaj quenecatza Toteco quinchihua masehualme xitahuaque iixpa. Injuanti san quitemohuaj mochihuase xitahuaque iixpa ica nopa tanahuatilme, huan yeca amo quicahuiliaj Toteco ma quinchihua xitahuaque iixpa. ⁴ Pero Cristo quitamilti inintequi itanahuatil Moisés. Ama nochi masehualme hueli mochihuase xitahuaque iixpa Toteco sinta quineltocase Cristo.

⁵ Moisés huejcajquiya quijcuilo sinta se masehuali nelia huelisquia mochihuasquia xitahuac iixpa Toteco ica nopa tanahuatilme, monequisquia quitamichihuasquia nochi cati nopa tanahuatilme quijjtohuaj. ⁶ Pero para Toteco techchihuas tixitahuaque iixpa quemá tijnellocaj Cristo, amo ohui. Amo monequi tijtemose se para tejcos ihuicac para quicuiti Cristo, pampa yaya ya hualajtoc. ⁷ Amo monequi tijtemose se para yas micta quiyolcuiti pampa yaya ya moyolcuitoc. ⁸ Icamanal Toteco quijjtohua para amo ohui para se quicahuilis Toteco ma quichihua xitahuac iixpa. Nelia amonechca eltoc icamanal cati monequi anquineltocase. Ancamanaltij ten nopa camanali huan eltoc ipan amoyolo. Nopa camanali eltoc cati tiquinpohuiliaj masehualme ma quineltocaca. ⁹ San monequi ica mocamac tiquinilhuis sequinoc para Jesús itztoc mohueyiteco. Huan monequi tijnellocas ipan moyolo para Toteco quiyolcuic quemá ya mictoya. Huan Toteco mitzmaquixtis ten motajtacolhua. ¹⁰ Pampa quemá ipan toyolo tijnellocaj Jesucristo, Toteco techchihua tixitahuaque iixpa. Huan quemá ica tocamac tiquinilhuis sequinoc para tijnellocaj Tohueyiteco Jesucristo, yaya techmaquixtis ten tojtacolhua.

¹¹ Eltoc quej ijcuilijtoc ipan Icamanal Toteco campa quijjtohua: “Cati motemachia ipan Jesucristo, amo quemá pinahuas pampa quineltocac.”

¹² Pampa san se tamanti monequi quichihuase nochi masehualme masque israelitame, o amo israelitame. Itztoc san se Tohueyiteco para nochi tojuanti, huan yaya quipiya hueyi iyolo para quinmacas tatiocihualisti hasta mocahua nochi masehualme cati quitajtaniaj. ¹³ Pampa nochi cati quinojnotzase Tohueyiteco, yaya quinmaquixtis ten inintajtacolhua. ¹⁴ Pero ¿quenecatza huelis se acajya quinojnotzas Cristo ma quipalehui sinta amo quineltoca? Huan ¿quenecatza huelis se acajya quineltocas Cristo sinta amo quicactoc

* 9:33 9:33 Altepet Jerusalén nojquiya itoca Sion.

ten yaya? Huan ¿quenicatza huelis quicaquis se masehuali ten Cristo sinta amo aqui quicamanalhuía ten ya? ¹⁵ Huan ¿ajquiya huelis quincamanalhuiti masehualme ten Cristo sinta amo aqui quititanis ma yahui tayolmelahuati? Yeca ijcuilijtoc ipan Icamanal Toteco campa quijijtohua: “Nelía cuajcualtzi iniicxi nopa masehualme cati yahuij tayolmelahuatij nopa cuali camanali cati temaca tasehulisti ica Toteco.”

¹⁶ Pero amo nochi masehualme cati quicaquij nopa cuali camanali, quineltocej. Nopa tajtolpanextijquet Isaiás quijijto ya nopa huejcajquiya campa quijijcuilo: “Toteco, ¿ajquiya quineltojatoc ten niquinjolmelajtoc?” ¹⁷ Pero nochi cati quineltocej icamanal Toteco, quineltocej pampa quicactoque.

¹⁸ Pero ¿huelis tiqijjotose para israelitame cati amo quineltocej Cristo amo quicactoque nopa camanali ten ya? Quena, israelitame quicactoque, pampa Icamanal Toteco quijijtohua:

“Ni camanali ya quimajtoque campa hueli ipan taltipacti. Tayolmelajtoque ni camanali hasta campa hueli techaj.”

¹⁹ Pero anquijijotose: “¿Huelis israelitame amo quimachilijque quenicatza Toteco quiniyocacahuasquía sinta amo quiselisquíaj Cristo?” Quena, nimitzilhuía quimachilijque, pampa Moisés quijijcuilo huejcajquiya ipan Icamanal Toteco cati Toteco quinilhui israelitame, quijijto:

“Nimechchihuas xiquinchicoitaca quema niquinmaquixtis masehualme cati amo israelitame cati anquinijaj para amo teno ininpati.

Nopa masehualme cati ama amo quimachilíaj ten na, niquinchihuas ma quimachilica huan anisraelitame ancualanise.”

²⁰ Huan Isaiás motemacac para quijijcuilos xitahuac cati Toteco quillhui huan ya ni cati Toteco quijijto:

“Masehualme cati achtohui amo nechtemohuayayaj, teipa nechpantise.

Huan nimonextis ica masehualme cati amo tajtaniyayaj ica na.”

²¹ Huan nojquiya Toteco quijijto ten israelitame:

“Mojmosta niquinnotza israelitame huan nimomaxitajtoc para niquinselis, pero san moyoltetilíaj ica na huan nechnajnanquilíaj.”

11

Nopa quentzi israelitame cati quineltocatoque Cristo

¹ Pero amo ximoilhuica para Toteco quintahuelcajtoc nochi israelitame. Inijuanti imasehualhua, huan amo quema quintahuelcahuas. Na nojquiya niisraelita. Na se niiteipan ixhui Abraham huan nitacatqui ipan nopa hueyi familia ten iteipan ixhui Benjamín. ² Toteco amo quintahuelcajtoc israelitame pampa hasta huejcajquiya quintapejpenijtoya para elise imasehualhua. Huelis anquielnamiqij cati quijijtohua Icamanal Toteco quema Elías quintelhui israelitame iixpa Toteco, huan quijijto: ³ “Toteco, nopa israelitame quinmictijtoque motajtolpanextijcahua huan quisosolojtoque motaixpahua. Huan san na nimocahua cati noja nimitzhueyimati huan israelitame nojquiya quinequij nechmictise.” ⁴ Pero Toteco quinanguili: “¡Amo cana! Amo san ta tiitztoc cati techhueyimati. Nojquiya niquinpixtoc chicome mil israelitame cati san na nechhueyimati huan amo quihueyimajtoque nopa taixcopincayot Baal.” ⁵ Huajca ama nojquiya ipan ni tonali itztoque sequij israelitame cati Toteco quinmaquixtijtoc pampa hueyi iyolo ica injuanti huan quintapejpenijtoc para iaxcahua. ⁶ Pero sinta Toteco quinmaquixtijtoc nopa israelitame pampa hueyi iyolo ica injuanti, huajca amo quichijqui pampa nopa israelitame quichijque tamanti cati cuali huan

quitanque. ¡Amo! Sinta quinmaquixti por cati cuali quichijtoyaj, huajca quema na niqijtohua para Toteco quinmaquixtijtoc san tapic, pampa hueyi iyolo ica injuanti, amo elisquía melahuac. Pero quena, melahuac yaya quinmaquixti san tapic, san pampa quintasojtatoc.

⁷ Huajca miyac israelitame amo quipantijque quenicatza mochihuase xitahuague iixpa Toteco, masque nelía quichijque campeca quipantise. Pero injuanti cati Toteco quintapejpenijtoya, quena, quipantijtoque. Huan nopa sequinoc moyoltelijque ica Toteco. ⁸ Ijcuilijtoc ipan Icamanal Toteco campa quijtohua: “Eltoc quej Toteco quinchijtoc ma cochica para ma amo quimachilica. Injuanti quijtaj, pero amo quimachilíaj cati quijtaj, huan quicaquij Icamanal Toteco, pero amo quimachilíaj, huan quiyampa eltoc hasta ama.” ⁹ David quijto san se tamanti ipan Icamanal Toteco campa quijtohua:

“Ma quincajcayahua israelitame huan ma quinmasilti nochi nopa ilhuit cati quichihujaj para quitoquilise nopa tanahuatilme.

Ma motepotanica huan ma quinchihua ma quiselica tazacuultilisti.

¹⁰ Pampa tzactoc iniixteyol huan amo hueli quijtaj cati quipactía Toteco. Huajca israelitame itztoque quej tetequipanohuani cati huihuipicaj iniixpa nopa tanahuatilme cati eltoc quej ininteco.”
Quej nopa quijto David ten israelitame.

Toteco quinmaquixtía cati amo israelitame

¹¹ Masque israelitame amo quimachilijque iojhu Toteco huan motepotanjique, amo ximoilhuica moyocacajtoque ten Toteco Dios para nochipa. Pero ama, pampa israelitame tajtacolchijtoque, Toteco quinmaquixtía masehualme cati amo israelitame. Huan teipa israelitame quinchicoitase huan quinequise momaquixtise. ¹² Ama israelitame tajtacolchijtoque huan amo quinequij quiselise Cristo huan yeca itatiochihualis Toteco quinajsic masehualme cati amo israelitame campa hueli ipan taltipacti. Pero ximoilhuica quesqui más tatiochihualisti oncas para nochi masehualme quema nochi israelitame quiselise nochi cati Toteco quinequi quinmacas. Nelía yejectzi elis.

¹³ Na nimechcamanalhuía cati amo anisraelitame. Toteco nechtitantoc ma nimechilhui Icamanal huan nelía niquita para hueyi ni tequit cati Toteco nechmacatoc. ¹⁴ Pampa nijnequi niqunnextilis israelitame cati san se inieso quipiyaj nohuaya para ma quijitaca cati Toteco amechchihuilis amojuanti cati amo anisraelitame. Quej nopa huelis sequij ten injuanti quinequise cati anquipiyaj, huan quineltocase Cristo, huan Toteco quinmaquixtis. ¹⁵ Sinta quema nopa israelitame moyocacajque ten Toteco para se talojtzi, Toteco moyoltali ica masehualme cati amo israelitame, ¿taya panos quema israelitame quiselise Cristo? Elis quej masehualme cati ya mictoque moyolcuise. ¹⁶ Abraham huan nopa achtohui israelitame itztoyaj tatzejtzeloitque para Toteco, huajca nopa israelitame cati teipa tacatise nojquiya elise iaxcahua. Sinta inelhuayo nopa cuahuit elqui tatzejtzeloitic, quej nopa nojquiya elis imacuayo.

¹⁷ Pero eltoc quej Toteco quitzontejqui sequij imacuayo se cuali cuahuit olivo, nopa israelitame, quema moyocatalijque miyaqui israelitame ten itatiochihualis. Huan eltoc quej quisalo nopa cuahuit huan iijtc amechtatzquilti amojuanti cati amo anisraelitame quej se quitatzquiltía ichamanca se cuahuit olivo cati san cati hueli tamanti olivo. Huajca nopa yancuic ichamanca quiselía iayo ten inelhuayo nopa cuali cuahuit, quej amojuanti nojquiya anquiselise nopa tatiochihualisti cati onca para itepan

ixhuhua Abraham. ¹⁸ Huajca amojuanti, amo ximohueyimatica iniixpa israelitame cati moiycatalijtoque huan yeca Toteco amechcalaqui quej ininpataca. Amojuanti san ichamanca nopa cuahuit huan inelhuayo nopa cuahuit amechmaca nemilisti. Amojuanti cati animacuayohua nopa cuahuit amo hueli anquimacaj nemilisti nopa inelhuayo.

¹⁹ Huelis amojuanti cati amo anisraelitame anmoilhuíaj achi más ancualme que israelitame pampa Toteco quitzontejqui imacuayo para huelis amechtalis. ²⁰ Quena, quintzontejqui huan amechtali, pero Toteco quintzontejqui pampa amo quineltoaque huan amechtali san pampa anquineltocej. Huajca amo ximohueyimatica, pero ximotachilica. ²¹ Sinta Toteco quintatzacuiliti israelitame pampa amo quineltoaque Cristo, nojquiya san se quichihuas ica amojuanti sinta amo anquineltoatinemise.

²² Huajca xijmatica para Toteco hueyi iyolo ica masehualme, pero nojquiya chichahuac quintatzacuiliti. Quintatzacuiliti nopa israelitame cati tajtacolchijque, pero quipixtoc hueyi iyolo ica amojuanti cati anquineltocej sinta noja anquineltoquilijtinemise. Pero sinta amo, nojquiya amechtatzacuilitis. ²³ Huan nopa israelitame, sinta injuanti moyolpatase huan quineltoace Cristo, Toteco sempa quintalis quej iconehua pampa Toteco quiqiya chichahualisti para sempa quintalis ipan nopa cuahuit campa itatiochihualis.

²⁴ Amo ohui para sempa qutalis imacuayo se cuali cuahuit campa quiquixti pampa nopona tacatqui. Ica amojuanti cati amo anisraelitame, yaya quichijqui cati más ohui huan amechtali ipan se cuali cuahuit masque aneltoyaj quej animacuayohua se cuahuit cati amo cuali. Huajca amo ohui para Toteco sempa quinselis israelitame para iaxcahua huan quincalaquis campa itztoyaj achtohui.

Teipa Toteco quinmaquixtis israelitame

²⁵ Xijtaquila noicnihua, nijnequi nimechilhuis se tamanti cati achtohuiya amo aquí quimatiyaya para amo anmohueyimatise amojuanti cati amo anisraelitame quej más ancualme que israelitame. Toteco quinchitoc israelitame quentzi yoltetique hasta yaya quinmaquixtis nochi cati amo anisraelitame. ²⁶ Pero teipa Toteco quinmaquixtis nochi israelitame cati itztose ipan nopa tonali. Elis quej ijcuilijtoc ipan Icamanal Toteco campa quijtohua:

“Nopa Tamanahuijquet hualas ten altepet Jerusalén*.

Huan yaya quiniyocatalis israelitame ten cati amo cuali.

²⁷ Huan nijtamichihuas nocamanal cati niquintencahuilijtoc nopa israelitame huan niqunquixtilis inintajtacolhua.”

²⁸ Huajca ama sequij israelitame quicualancaitaj nopa cuali camanali ten Cristo, huan yeca amojuanti cati amo anisraelitame huelis anquineltoce. Pero pampa Toteco quintapejpenijtoc israelitame, noja quinicnelía pampa quej nopa quintencahuili inintatahua. ²⁹ Huan Toteco amo moyolpata. Cati yaya temaca, amo quema tequixtilía. Huan quema Toteco quinnotzas masehualme para iaxcahua, amo quema moyolpatas huan quintahuelcahuas.

³⁰ Achtohui anmasehualme cati amo anisraelitame amo anquineltoaque Toteco, pero quema israelitame mosisinijque iixpa Toteco, yaya amechtasojtac amojuanti. ³¹ Huan ama quej israelitame amo quineltocej huan yeca Toteco amechtasojtatoc, hualas se tonali quema nojquiya quintasojtas injuanti. ³² Huajca Toteco quinita nochi masehualme masque israelitame o amo israelitame para tajtacolchihuani, huan para masehualme cati amo taneltocej. Huan Toteco quinita nochi masehualme, masque israelitame

* 11:26 11:26 Altepet Jerusalén nojquiya itoca Sion.

o amo israelitame, para monequi itaicnelilis, huan yeca nochi ica sempa quintasojta.

³³ Nelia hueyi Toteco Dios huan nelpano hueyi italnamiqulis huan nochi cati yaya quimati.

Amo aqui huelis quimachilis cati Toteco motalijtoc quichihuas.

Yon amo hueli tijpehualtise tijmatise quenicatza quichihuas tamanti, yon nopa ojti cati quitoquilá.

³⁴ ¿Ajquiya quimachilía italnamiqulis Toteco?

¿Ajquiya quimachtis Toteco taya ma quichihua?

¡Amo aqui!

³⁵ Toteco amo aqui quitahuiquilá pampa amo aqui quitanehuilijtoc para monequi ma quicuepili.

³⁶ Pero Toteco quichijqui nochi cati onca.

Nochi cati onca mocahua campá eltoc ica ichicahualis.

Huan nochi tamanti eltoc para ya ipaquilis huan para quinextis ihueyitilis.

Ma tijhueyichihuaca Toteco para nochipa. Quej nopa ma eli.

12

Ximotemacaca ica Toteco

¹ Huajca noicnihua, nimechtajtanía ica nochi noyolo, ximotemacaca ica Toteco Dios pampa tahuel miyac Toteco amechtasojtatoc. Ximoilhuica amotacayohua elfoc quej se tacajcahualisti para ya. Huan ma eli se tacajcahualisti cati yoltoc huan cati tatzetzelotlic, pampa quiyampa quipactía Toteco. Quena, ya nopa cati quinamiqui para anquichihuase para anquihueyimatise ica nochi cati amechchihuilijtoc. ² Ayecmo xijchihuaca quej ama quichihuaj masehualme ipan ni taltipacti. Pero xijcahuilica Toteco ma amechyolpata huan ma amechchihua anyancuique masehualme pampa anquipatayahuij amotalnamiqulis ica cati cuali. Huan quiyampa anquimatise taya ipaquilis Toteco. Huan anquiritase para amechpactis cati yaya quinequi xijchihuaca, huan quisas cuali huan yejyectzi huan cati nelia quinamiqui para amojuanti.

³ Huan pampa Toteco nechtequimacatoc ma nieli niitayolmelajca nimechilhúa sese amojuanti, amo ximoilhuica para más anhuejhueyi iixpa Toteco huan amo quej quinamiqui. San ximoilhuica cati melahuac. Ximoilhuica para anhuejhueyi quej imiyaca amotaneltoquilis cati Toteco amechmacatoc sese amojuanti. ⁴ Quej ipan itacayo se masehuali onca miyac tamanti, huan sesen tamanti quiapiya itequi, ⁵ quej nopa nojquiya eltoc ica tojuanti cati tijneltočaj Cristo. Tojuanti timiyaqui, pero san sejco timochihuaj tiitacayo Cristo. Huan sesen tamanti iaxca nochi sequinoc partes.

⁶ Toteco techmacatoc sesen tojuanti nopa yajatili cati monequi para tijchi-huase nopa tequit cati yaya quinequi sesen tojuanti ma tijchihuaca. Toteco quinmacatoc sequij nopa yajatili quej tajtolpanextiani para ma quipanextica icamanal cati yaya quinmacatoc. Huajca monequi ma quipanextica nopa camanali quema quineltocaj para quej nopa Toteco quinequi ma quichihuaca. ⁷ Quinmacatoc sequij nopa yajatili para ma quinpalehuica sequinoc, huajca monequi miyac ma quinpalehuica. Toteco quinmacatoc sequij nopa yajatili para ma tamachtica icamanal, huajca monequi ma tamachtica cuali. ⁸ Quinmacatoc sequij nopa yajatili para ma quinyolchicahuaca sequinoc, huajca monequi ma tayolchicahuaca ica nochi iniyolo. Toteco quinmacatoc sequij nopa yajatili para ma quinmajmacaca sequinoc

cati quinmonequilía para ica panose, huajca monequi ica paquilisti ma quinmacaca. Toteco quinmacatoc sequij nopa yajatili para ma tayacanaca campa mosentilíaj taneltocani, huajca monequi ma tayacanaca quej quinamiqui. Toteco quinmacatoc sequij nopa yajatili para ma quintasojtaca sequinoc, huajca ica paquilisti ma tetasojtaca.

Cati monequi ma quichihuaca taneltocani

⁹ Amo san ximochihuaca quej anquinicnelíaj sequinoc, nelía xiquinicnelica. Xijtahuelcahuaca cati amo cuali huan xijtoquilijtinemica cati cuali. ¹⁰ Ximoicnelica se ica seyoc quej icnime moicnelíaj. Huan xiquintepanitaca sequinoc amoicnihua ipan Cristo achi más cuali huan amo quej anmotepantaj.

¹¹ Xitequitica chicahuac ipan nopa tequit cati amechmacatoc xijchi-huaca. Amo xitatzihuaca. Ica nochi amoyolo xijtequipanoca Tohueyiteco.

¹² Xipaquica miyac para nochi cati yejectzi cati techchiya nepa ilhuicac. Xijpiyaca amoyolo quema antaijyohuíaj. Ica nochi amoyolo mojmosta ximotatajtica ica Toteco.

¹³ Xiquinpalehuica sequinoc imasehualhua Toteco cati amo quipiyaj ten ica panose. Xiquinselica sequinoc taneltocani ipan amocalijtic ica cuali.

¹⁴ Xijtajtanica Toteco ma quintiochihua masehualme cati amechtatzacuilitíaj. Quena, xijtajtanica ma quinchihuili cati cuali, amo xijtajtanica ma quintelchihua.

¹⁵ Xipaquica ica masehualme cati paquij, huan xichocaca inihuaya cati chocaj. ¹⁶ Xiitztoaca ica cuali se ica seyoc quej san se amoyolo. Amo ximohueyimatica, pero ica paquilisti ximohuampojchihuaca ica masehualme cati teicneltziti. Amo ximoilhuica para miyac amotalnamiquilis.

¹⁷ Amo quema xiquincuepilica cati amechchihuiliytoque cati amo cuali. Ximotachilica para xijchihuaca cati nochi masehualme quimatij para cuali.

¹⁸ Hasta campa anhuelij, xiitztoaca ica cuali ica nochi masehualme.

¹⁹ Noicnihua cati nimechicnelía. Amo quema ximomacuepaca ica cati amechchihuiliytoque cati amo cuali. Xijcahuilica Toteco ma quintatzacuiliti. Pampa ijcuilijtoc ipan Icamanal campa Toteco quiiyto: “Na notequi para niquncuepilis masehualme cati fiero quichihuaj, huan quena, niquncuepilis.” ²⁰ Huajca xijchihuaca cati Icamanal Toteco quiiytohua: “Sinta amocualancaitaca mayana, xijtamacaca. Sinta amiqui, xicamacaca. Pampa sinta quej nopa anquichihuase, anquichihualtise ma pinahua ica cati fiero amechchihuiliyto.”

²¹ Ma amo amechtani cati amo cuali. Pero amojuanti xijtanica cati amo cuali ica cati cuali anquichihuaj.

13

Xiquinneltocaca tequichihuani ten gobierno

¹ Monequi nochi anmasehualme xiquinneltocaca tequichihuani ten gobierno, pampa Toteco quintequimacatoc. Huan yon se tequichijquet cati quipiya tequiticayot amo iselti motalijtoc, pero Toteco yaya quitalijtoc para ma tanahuati. ² Huajca sinta se amo quinneltocaca tequichihuani, quihuejcamajcahua cati Toteco quitalijtoc para quipiyas tequiticayot. Huan Toteco quitatzacuilitis cati quej nopa quichihua. ³ Pampa tequichihuani amo quinmajmatíaj masehualme cati quichihuaj cati cuali, quinmajmatíaj cati amo cuali quichihuaj. Sinta amo anquinequij anquinimacasisse tequichihuani, huajca xijchihuaca cati cuali huan amechtapanitase.

⁴ Pampa tequichihuani itztoque itequipanojcahua Toteco para amechpalehuise. Pero sinta anquichihuaj cati amo cuali, huajca ximomajmatica pampa nopa tequichihuani amo san tapic quihuicaj inintepos. Inijuanti quiipyaj tequiticayot para amechtatzacuiltise. Huan pampa se tequitiquet itequipanojca Toteco, yaya quichihua itequi Toteco quema quintatzacuiltia cati amo cuali quichihuaj. ⁵ Huajca monequi tiquinneltocase tequichihuani para ma amo techtatzacuiltica huan nojquiya pampa toyolo techilhuia para quej nopa xitahuac. ⁶ Huan nojquiya monequi titaxtahuase impuesto. Pampa quinamiqui quiselise inintaxtahuil nopa tequichihuani pampa quitequipanohuaj Toteco mojmosta ipan inintequi cati quintocarohua ma quichihuaca.

⁷ Huajca xiquintaxtahuica nochí cati anquintahuiquilíaj. Xitapalehuica quema monequi antapalehuise. Xiquintaxtahuica cati tainamaj impuesto. Xiquintepanitaca nochí cati monequi anquintepanitase. Huan xiquinhueyitalica inijuanti cati quinamiqui anquinhueyitalise. ⁸ Sinta antahuicaj, nimantzi xitaxtahuaca para amo teno antahuicatose iyoca ten nopa taicnelijcayot cati antahuicaj, pampa monequi tiquinichelise nochí sequinoc masehualme. Huan cati quinicnelía sequinoc, nojquiya quichihua nochí cati itanahuatil Moisés technahuatía ma tijchihuaca. ⁹ Pampa nopa tanahuatilme cati quiijtohuaj amo ximomecatica, amo xitemictica, amo xitachtequica, amo xiquixtocaca cati sequinoc quiipyaj huan nochí sequinoc tanahuatilme cati oncaj, nochí eltoc ipan ni tanahuatili cati quiijtohua: “Xiquinichelica sequinoc quej anmoicnelíaj.” ¹⁰ Pampa sinta se quiiicnelía seyoc, amo quichihuilis cati amo cuali. Yeca se cati quinicnelía sequinoc quitamichihua nochí cati quiijtohuaj nopa tanahuatilme.

¹¹ Huajca nojquiya monequi xijchihuaca ni tamanti cati nimechilhuijtoc pampa ya tiotac. Ya ajsic tonali para tiisase huan tijcahuase tajtacoli. Ama nopa tonali quema Toteco hualas huan techmaquixtis para nochipa, eltoc más nechca huan amo quej quema tijneltocaque. ¹² Eltoc quej ya panotoc tayohua huan ama ya tanestihuala. Tantiya nopa tonali para tiiztose ipan ni taltipacti huan nechca tiyase ilhuicac. Huajca ma tijtahuelcahuaca tajtacoli quej se quiiyocacahua iyoyo cati soquiyo. Ama ma tijchihuaca nochí cati cuali. ¹³ Ma tijchihuaca nochí cati xitahuac pampa tiiztoque cati tinemij ipan taahuili. Ma amo tinemica quej ihuintini ipan tehueli ilhuit cati amo cuali. Ma amo tijchihuaca cati fiero totalnamiquilis quinequi quichihuas. Ma amo tijchihuaca ten hueli ica cati amo totahuical. Ma amo timocualanica ica sequinoc. Ma amo tiquixtocaca cati sequinoc quiipyaj. ¹⁴ Ama ma timoyoyontica ica Tohueyiteco Jesucristo, huan ma tijchihuaca ya ipaquilis. Ma ayecmo tijchihuaca cati amo cuali cati tonacayo quinequi quichihuas.

14

Amo xiquinejlamiqui sequinoc taneltocani

¹ Xiquinselica nopa taneltocani cati ayemo nelcuali quinneltocaj Toteco, huan ayemo nochí quimachilíaj ten nopa camanali. Huan amo xiquinnajnanquilica cati inijuanti moillhuíaj para cuali huan amo cuali ma tijchihuaca.

² Pampa itztoque sequij taneltocani cati quimachilíaj hueli tijcuase nochí tacualisti, pero itztoque sequinoc taneltocani cati ayemo cuali quimachilíaj, huan moillhuíaj quinchihuas amo tapajpacme iixpa Toteco sinta quicuase nacat, yeca san quicuaq cuatajcajot. ³ Taneltocani cati quicuaj nochí tamanti tacualisti ma amo quincualancaitaca inijuanti cati amo huelij. Huan taneltocani cati amo quicuaq nochí tamanti ma amo moillhuise ipan

iniyolo para amo cuajcualme nopa masehualme cati quicuaaj nacat, pampa Toteco nojquiya quinselijtoc. ⁴ ¿Ajquiya ta para tiquinejelnamiquis sequinoc itequipanojcahua huan tiquijtos amo cuali inintequi? Inijuanti itequipanojcahua Toteco huan amo amojuanti. IninTeco quijtos sinta cuali cati quichihuaj o amo. Huan Toteco quipiya chichahualisti para quinpalehuis ma quichihuaca cati cuali.

⁵ Nojquiya sequij taneltocani moilhuíaj onca tonali cati achi más tatzelztelolitic iixpa Toteco. Pero sequinoc taneltocani quijtohuaj san se nochi tonali. Monequi para nochi quitepanitase cati ipan iniyolo quitaj para xitahuac. ⁶ Taneltocani cati quiiyocatalíaj se tonali para más quitepanitase, quichihuaj pampa quitepanitaj Tohueyiteco. Huan cati amo quiiyocatalíaj se tonal, amo quichihuaj pampa nojquiya quitepanitaj Toteco. Taneltocani cati quicuaaj nochi tacualisti, quicuaaj nochi tamanti para quitepanitase Toteco pampa quitascamatij Toteco por nochi cati quicuaaj. Huan taneltocani cati amo quicuaaj nochi tacualisti, amo quicuaaj pampa quinequij quitepanitase Toteco huan injuanti nojquiya quitascamatij Toteco por cati quicuaaj.

⁷ Pampa amo aqui hueli quinahuatía inemilis iselti. Amo aqui hueli itztos san pampa quinequi itztos. Amo aqui miqui san pampa quinequi miquis. ⁸ Pampa sinta tiitztoque ipan ni taltipacti, monequi tiitztose para Toteco pampa yaya cati quitajitoc ma tiitztoca. Huan sinta timiquise, timiquise huan tiitztotij ihuaya pampa yaya quijto ma timiquica. Huajca masque tiitztoque o timictoque, tiaxcahua Toteco, huan yaya quijtohua taya topantis. ⁹ Huan yeca Cristo mijqui huan sempa moyolcuic para ma eli Tohueyiteco cati quipiya nochi tanahuatili, masque timictoque o tiitztoque.

¹⁰ Huajca amojuanti ¿para ten anquintatelhuise amoicnihua ipan Cristo ica cati quichihuaj? Amo cuali para anquintachilíaj quej amo teno ininpati. Nochi tojuanti monequi timonextise iixpa Tohueyiteco Cristo ipan isiyaj yejectzi para yaya techtajtolsencahuas. ¹¹ Pampa Icamanal Toteco quijtohua:

“Quej senquisa temachti na niamoTeco niitztoc, nojquiya senquisa temachi nochi masehualme motancuaquetzase noixpa.

Huan nochi masehualme tayolmelahuase miyacapa para na niDios cati nijpiya nochi chichahualisti.”

¹² Huajca sesen tojuanti monequi tijchihuase cuentas ica Toteco Dios ica cati tijchijtoque.

¹³ Huajca ma ayecmo timoejelnamiquica se ica seyoc ica cati amo cuali. Huan ma tijpiyaca cuidado para amo tijchihuase cati quitahuisos o quiyoltilanas ma tajtacolchihua seyoc toicni. ¹⁴ Na nijmati temachti ica itequiticayo Tohueyiteco Jesús para amo onca se tacualisti cati techchihua amo titapajpacme iixpa Toteco. Pero sinta se masehuali moilhuis se tacualisti amo tapajpacti, huajca quena, para ya elis amo tapajpacti nopa tacualisti. ¹⁵ Huan sinta se ten amojuanti quicuas se tacualisti, huan ica ya nopa quiyolcocos iicni, pampa moilhuía se tajtacoli, huajca amo quinextilía sinta quicnelía iicni quema quicua. Huajca amo xijyolcoco huan xijchihua ma huetzi moicni ica cati tijcua, pampa nojquiya Cristo mijqui por ya. ¹⁶ Amo xijchihuaca tamanti cati sequinoc quijtose para amo cuali, masque anquimatij, quena, hueli anquichihuase. ¹⁷ Pampa cati tijcuaaj huan cati tiquij amo ya nopa cati ipati para tojuanti cati tiyahuij campa Toteco tanahuatia. Para tojuanti, más ipati tiitztose tixitahuaque iixpa Toteco, huan tijpiyase tasehuilisti ipan toyolo huan tijpiyase nopa paquillisti cati Itonal Toteco

techmaca. ¹⁸ Sinta tijtequipanos Cristo ica moyolo cuali iixpa, quipactis Toteco Dios huan nochi masehualme quicualitase.

¹⁹ Huajca ma tijchiuaca senquisa nochi cati monequi para tiitztose ica cuali ica sequinoc. Ma timopalehuica se ica seyoc para ma tiitztoca más titemachme ipan Toteco. ²⁰ Amo xixsoloca itequi Toteco san ica se tacualisti. Melahuac Toteco techcahuilla ma tijcuaca nochi. Pero amo cuali tijcuase cati quichihuas seyoc ma huetzi. ²¹ Huajca más cuali ma amo tijcuaca nacat, o ma amo tiquica xocomeca at cati ya xocoxqui, yon amo teno ma tijchiuaca, sinta quichihuas ma huetzi se toicni. ²² Huelis anquimatij para amo tajtacoli yon se tamanti cati anquicuj. Pero amo ximonajnanquilica ica ni tamanti. Ma mocahua san ica ta huan Toteco. Paquij nopa masehualme cati amo quichihuaj se tamanti, masque elisquía se tamanti cati cuali, sinta teipa quichihuas sequinoc ma mitztatelhuica. ²³ Pero sinta se masehuali amo quimati para temachtí amo se tajtacoli para quicuas se tenijqui, ma amo quicua, pampa iyolo quitatelhuis ica cati quichihua, pampa amo quichijqui ica temachili para cuali iixpa Toteco. Huajca nochi cati tijchiuaj, ma tijchiuaca pampa tijneltocaque para ya nopa ipaquillis Toteco, pampa sinta tijchiuaj se tamanti cati ya tijmatij para yaya amo quinequi tijchiuase, huajca se tajtacoli.

15

Xijchiuaca cati Cristo quichijqui

¹ Tojuanti cati tijpiyaj tetili huan cuali tijmachilíaj ten Toteco, monequi ma tijpiyaca toyolo huan monequi ma tiquinpalehuica cati ayemo cuali quimachilíaj. Amo hueli tijchiuase san cati techpactía. ² Ma tijchiuaca cati quinpactía sequinoc taneltocani huan cati quinpalehuis para más quipiyase yoltetili para quineltocase Toteco. ³ Pampa Tohueyiteco Cristo amo quichijqui cati quipacti. Ijcuiijtoc ipan Icamanal Toteco campa Jesucristo quiihui Itata: “Masehualme cati quinequiyayaj mitztajilhuise, nechtaijilhuijque na.” ⁴ Nochi cati quiijcuiljoque huejcajquiya, quiijcuiljoque para techmachtis para huelis tiquijyohuise cati techpanotihuala. Nojquiya ijcuiljtoc Icamanal para techyolchicahuas para ma tijchiyaca nochi cati techilhuía para tijselise teipa. ⁵ Toteco cati techyolchicahua huan cati techpalehuía ma tiquijyohuica cati techpanotihuala, ma amechpalehui para xijpiyaca san se amotalnamiquilis se ica seyoc. Sesen ma quipiya italnamiqulilis Jesucristo ica ne sequinoc. ⁶ Quej nopa san sejco huan ica san se amoyolo huelis anquipaquilismacase Toteco Dios, yaya cati iTata Tohueyiteco Jesucristo.

Toteco quinselía israelitame huan nojquiya cati amo israelitame

⁷ Huajca ximoselica se ica seyoc ica cuali quej Cristo nojquiya amechselijtoc, pampa quej nopa hueli tijhueyichihuase Toteco. ⁸ Nimechilhuía Cristo hualajqui quej inintequipanojca israelitame para quinpalehuis ma quimatica para nelía melahuac Toteco Dios quinmacas nochi cati quintencahuili inihuejcapan tatahua. ⁹ Huan Cristo nojquiya hualajqui para masehualme cati amo israelitame ma quipaquilismacaca Toteco pampa miyac quintasojtatoya. Eltoc quej ijcuiljtoc ipan Icamanal Toteco cati Cristo quijto:

“Huajca nimitzpaquilismacas nopona inihuaya masehualme cati amo israelitame.

Na nihuicas tiohuicat para nimitzhueyitalis.”

¹⁰ Huan nojquiya Icamanal Toteco quijtohua:

“Xipaquica amojuanti cati amo anisraelitame inihuaya imasehualhua Toteco, nopa israelitame.”

¹¹ Huan nojquiya ijcuilijtoc:

“Nochi amojuanti cati amo anisraelitame xijpaquilismacaca Toteco Dios. Ma quipaquilismacaca nochi xinachti masehualme.”

¹² Huan sejoyoc ipan Icamanal Toteco, Isaías camanaltic ten Cristo huan quijto:

“Teipa tacatis se iteipan ixhui Isaí cati mochihuas inintanahuatijca nochi xinachti masehualme.

Huan masehualme cati amo israelitame mochiyase ipan ya para ma quinmaquixtis ten inintajtacolhua.”

¹³ Ma Toteco Dios ipan cati timochiyaj, amechmaca hueyi paquilisti, huan hueyi tasehuilisti pampa anquineltocaj. Huan achi más ximotemachica ipan ya pampa Itonal Toteco amechmacatijas ichichualis.

¹⁴ Noicnihua, nijmati temachti para ancuajcualme. Nijmati cuali anquimatij nochi ni tamanti hasta anhuelij anmoyolchicahuase se ica seyoc.

¹⁵ Pero, noicnihua, masque ya anquimatij ni tamanti, nimechtajcuilhujtoc nica ica camanali cati quentzi chichahuac para sempa nimechelnamiquiltis pampa Toteco nechmacatoc nopa tequit para ma nijchihua. Quena, pampa hueyi iyolo ica na, ¹⁶ nechtalijtoc niitequipojca Tohueyiteco Cristo Jesús por amojuanti cati amo anisraelitame para nimechilhuis ni cuali camanali ten Jesucristo. Huan amojuanti cati amo anisraelitame anitztoque quej se tacaichualisti cati nijmaca Toteco cati quiyolpactia, pampa Itonal Toteco amechchijtoc antatzejzeloltique iixpa.

¹⁷ Huan cuali para na ma nijpiya hueyi paquilisti ica nochi cati Cristo Jesús nechtequihujtoc ma nijchihua para Toteco Dios ipan ni tequit cati nechmacatoc.

¹⁸ Pero amo nimohueyimatis, yon amo nimoilhuis ten seyoc tamanti. San nicamanalti ten cati Cristo quichijtoc ica na para masehualme cati amo israelitame ma quineltocaca Cristo ica nopa camanali cati niquinilhui huan ica nopa tamanti cati quitaque cati nijchijqui inixpa. ¹⁹ Huan Toteco quinmacac chichualisti para ma quineltocaca pampa nijchijqui huejhueyi tanextili huan tiochichahualnescayot iniixpa cati Itonal Toteco nechmacayaya chichualisti ma nijchihua. Huajca ten altepet Jerusalén huan hasta campa hueli ipan nopa tali Ilírico nochi niquinilhujtoc nopa cuali camanali ten Cristo cati quinmaquixtis ten inintajtacolhua.

²⁰ Nijchijtoc campeca niquinilhuis masehualme icamanal Toteco ipan nopa altepeme campa amo aqui quicactoc ten Cristo, para amo elis quej nicalchihuas ipan itatzinpehualfil seyoc masehuali pampa nitequiti campa sequinoc ya pejtoque. ²¹ Nitequititoc campa amo aqui yajtoc pampa ijcuilijtoc ipan Icamanal Toteco campa quijtohua:

“Masehualme cati amo aqui quinilhujtoc ten ya, quicaquise. Huan injuanti cati amo quema quicactoque, quimachilise.”

Pablo quinequiyaya yas altepet Roma

²² Yeca pampa ninejntoc campa hueli para niteyolmelahuas icamanal Toteco, amo huelqui niyajqui nimechitati. ²³ Pero ama, amo onca más campa monequi nitequitis ipan nopa talme. Huan pampa nijchixtoc miyac xihuit para nimechitas, tahuel nijnequi nimechitati, ²⁴ huajca quema niyas España, nijnequi nimechpaxaloti nepa ipan altepet Roma. Huan quema tipactose se talojtzi, teipa huelis antechpalehuise para huelis niyas ipan nojhui. ²⁵ Pero achtohui monequi niyas altepet Jerusalén para nijhuicas se tapalehuili para taneltocani nopona. ²⁶ Pampa taneltocani ipan tali Macedonia huan ipan tali

Acaya ica paquillisti quisentilijtoque tomi para ma niqinhuiquili cati iaxcahua Toteco ipan altepet Jerusalén huan ama amo teno quipiyaj. ²⁷ Quena, nopa masehualme cati amo israelitame quinequij quinpalehuise nopa israelita taneltocani cati teicneltzitzí, pampa quimachilíaj quinhuiquilíaj. Amojuanti cati amo anisraelitame anquiselijtoque miyac tatiochihualisti ipan amoyolo ten israelitame cati amechpanoltijque icamanal Toteco, huajca ama injuanti moilhuyayaj para cuali quinpalehuise israelitame ica inintechmonequi. ²⁸ Huajca quema ya nijcajtejos nopa tomi huan nijtamiltis nopa cuali tequit cati quichijtoque, nimechpaxalojtiquisati quema niiztos ipan ojti para tali España. ²⁹ Huan nijmati quema niajsiti nepa amohuaya, niajsiti ica miyac tatiochihualisti cati nopa cuali camanali ten Cristo nechmaca para nimechmajmacas amojuanti.

³⁰ Pero noicnihua, chichahuac nimechtajtanía ipan itoca Tohueyiteco Jesucristo, ximotatajtica para na. Nimechtajtanía pampa nijmati Itonal Toteco amechpalehuijtoc para antechicnelíaj huan sinta anmotatajtise para na nelía nechpalehuise ica cati nijchihua. ³¹ Xijtajtanica Toteco para yaya ma nechmanahui ica injuanti ten estado Judea cati amo quineltoaj. Nojquiya xijtajtanica Toteco por nopa taneltocani ipan Jerusalén para ma quiselica nopa tomi cati niqinhuiquilis. ³² Huan quej nopa sinta Toteco quinequi, niajsiti nozona campa amojuanti ica hueyi paquillisti, huan timoyolchichahuase se ica seyoc. ³³ Toteco cati techmaca tasehuilisti ipan toyolo ma izto amohuaya. Quej nopa ma eli.

16

Pablo quinhualtajpalo sesen ten injuanti

¹ Se tosihua icni, itoca Febe, yas nozona amechitati. Yaya se tapalehuijquet ipan nopa tiopamit ten taneltocani ipan altepet Cencrea. Nijnequi xiquixmatica, ² huan xisjelica ipan Tohueyiteco quej quinquamiqui para tojuanti cati tiixcahua Toteco ma timoselica. Huan xijpalehuica Febe ica ten hueli tamanti cati quipolohua pampa yaya quinpalehuijtoc miyac taneltocani huan nojquiya nechpalehuijtoc na.

³ Xiquintajpaloca Priscila huan Aquila cati tequitij nohuaya ipan itequi Cristo Jesús. ⁴ Injuanti mosemacaque huan nechmanahuijque, masque huelosquíaj mictosquíaj nohuaya. Huan niquintascamati ica cati quichijque. Huan nojquiya quintascamatilíaj nochi tiopame ten taneltocani cati amo israelitame cati mosentilíaj campa hueli. ⁵ Nojquiya xiquintajpaloca nochi ipan nopa tiopa ten toicnihua cati mosentilíaj ipan ininchaj Priscila huan Aquila. Xijtajpaloca Epeneto cati niquicnelía. Yaya nopa achtohui tali Acaya ejquet cati quineltoac Cristo. ⁶ Xijtajpaloca María cati tequititoc miyac por amojuanti. ⁷ Xiquintajpaloca nohuicahua Andrónico huan Junias cati itztoyaj nohuaya ipan tatzacti. Nochi itayolmelajcahua Toteco nelía quintepanitaj miyac. Injuanti tayacanque motemachijque ipan Cristo quema ayemo nijneltoayaya.

⁸ Xijtajpaloca Amplias cati niquicnelía ipan Toteco. ⁹ Xijtajpaloca Urbano cati tequití nohuaya ipan itequi Cristo Jesús. Huan xijtajpaloca Estaquis cati niquicnelía. ¹⁰ Xijtajpaloca Apeles cati quistoc cuali iixpa Toteco. Xiquintajpaloca nopa taneltocani cati mosentilíaj ipan ichaj Aristóbulo. ¹¹ Xijtajpaloca Herodión, noteixmatca. Xiquintajpaloca cati quineltoaj Tohueyiteco ipan ichaj Narciso. ¹² Xiquintajpaloca nopa sihuame Trifena huan Trifosa cati

miyac tequitij para Toteco. Xijtajpaloca Pérsida cati nochi tojuanti tiquicnelíaj. Yaya tequitic miyac ipan itequi Tohueyiteco. ¹³ Xijtajpaloca Rufo cati Toteco quitapejpenijtoc para elis iaxca. Nojquiya xijtajpaloca inana cati mochijtoc quej nonana. ¹⁴ Xiquintajpaloca Asíncrito, Flegonte, Hermas, Patrobas, Hermes huan toicnihua cati itztoque inihuaya. ¹⁵ Nojquiya xiquintajpaloca Filólogo, Julia, Olimpas, Nereo huan iicni huan nochi cati itztoque inihuaya cati iaxcahua Toteco.

¹⁶ Ximotajpaloca huan ximotzoponica ica se tatepanitacayot cati tatzejtzeloltic pampa anmoicnelíaj ipan Cristo. Nochi itiopahua Cristo cati mosentilíaj campa hueli amechontajpalohuaj.

¹⁷ Nojquiya, nimechilhuía, noicnihua, xijtachilica ajquiya inijuanti cati quinequij amechtoxelose huan quinequij quintahuisose taneltocani. Inijuanti tamachtíaj tamanti cati amo quej anmomachtijtoque. Ximohuejcatolica ten inijuanti huan xiquinhuejcahuaca. ¹⁸ Pampa masehualme cati quej nopa amo quitequipanohuaj Tohueyiteco Cristo, pero san quichihuaj cati inijuanti quinequij ipan iniyolo. Camanaltij yejyetzti huan quinyejyetalíaj cati amo quimatij icamanal Toteco para huelis quincajcayahuase. ¹⁹ Pero ica amojuanti, nochi quicactoque para anquichihuaj cati Toteco quinequi, huan antechchihuaj ma nipaqui miyac. Nijnequi xielica anneltalnamiquini para nimantzi anquichihuase nochi cati cuali, pero ximochihuaca quej anhuihuime cati amo anquimatij quenicatza anquichihuase cati amo cuali. ²⁰ Amo huejcahuas para Toteco Dios cati techmaca tasehuilisti quitzonpechis Amocualitacat amoicxi tantita. Tohueyiteco Jesús ma quipiya hueyi iyolo ica amojuanti.

²¹ Timoteo cati tequiti nohuaya amechontajpalohua. Huan nojquiya amechontajpalohuaj nohuicalhua Lucio, Jasón huan Sosípater.

²² Na niTercio cati niquijcuilohua cati Pablo nechilhuijtijajqui, nojquiya nimechtajpalohua ipan Tohueyiteco.

²³ Nojquiya amechontajpalohua Gayo cati nechcahuilía ma nimocahua ipan ichaj. Huan nojquiya quincahuilía nochi nopa tiopamit ten taneltocani cati nica éhuani ma mosentilica nica. Erasto, nopa tomiajoquet ten toaltepe, amechontajpalohua huan nojquiya toicni Cuarto.

²⁴ Tohueyiteco Jesucristo ma quipiya hueyi iyolo ica nochi amojuanti. Quej nopa ma eli.

Pablo quipaquilismacac Toteco

²⁵ Ma tijpaquilismacaca Toteco cati huelis amechchihuas antemachme quej quijjtohua ni cuali camanali ten Jesucristo cati nimechilhuijtoc. Pampa nimechnextilijtoc para Toteco quinequi quinmaquixtis cati amo israelitame huan huejcajquiya amo aqui quimatiyaya ya ni pampa noja eltoya ixtacatzí.

²⁶ Pero ama Toteco technextilijtoc ni tamanti cati huejcajquiya itajtolpanextijcahua quijcuilojque para panos. Huan ama tanahuatijtoc Toteco cati itztoc para nochipa para nochi inieso masehualme ipan nochi talme ma quimatica ni camanali quenicatza Jesucristo quinmaquixtis para inijuanti huelis quinelto case huan quichihuase cati yaya quinequi.

²⁷ ¡Ma tijhueyichihuaca Toteco Dios pampa san ya iyojtzti itztoc Dios, huan san ya nochi quimachilía! Ma tijhueyichihuaca para nochipa ica itapalehuil Jesucristo. Quej nopa ma eli.

Nopa Achtohui Amatajcuiloli Cati Pablo Quintajcuilhui Taneltocani ipan Altepet Corinto

Pablo quintajcuilhui taneltocani ipan Corinto

¹ Na niPablo cati Toteco Dios nechnotzqui ica ipaquilis huan nechtequimacac ma nieli niitayolmelajca Jesucristo. Na ihuaya toicni Sóstenes ² timechtajcuilhuíaj amojuanti cati anitztoque itiopa Toteco ipan altepet Corinto. Toteco amechnotztoc para anelise itatzetzeltolteca masehualhua. Amechchijqui antatzetzeltolteque ipan Cristo Jesús san se quej quinchijqui tatzetzeltolteque nochi sequinoc taneltocani campa hueli techaj. Quena, ihuical quiniyocatalijtoc nochi masehualme cati quihueyimatij Tohueyiteco Jesucristo, pampa yaya ininTeco ne sequinoc quej yaya nojquiya toTeco tojuanti. ³ Toteco Totata huan Toteco Jesucristo ma quipiyaca hueyi iniyolo ica amojuanti huan ma amechmacaca tasehuilisti ipan amoyolo.

Pablo quitascamatqui Toteco por nopa taneltocani

⁴ Nochipa nijtascamati Toteco pampa hueyi iyolo ica amojuanti ipan Cristo Jesús. ⁵ Ipan Cristo, Toteco amechricojchijqui ica miyac tamanti hasta ama cuali anhuelij ancamanaltij icamanal huan amechchijtoc para cuali anquimachilíaj nochi cati melahuac. ⁶ Huajca ya ni quinextía para melahuac nopa camanali cati timechilhuijque ten Cristo, pampa motatzquili ipan amoyolo. ⁷ Huajca ama anquipiyaj nochi yajatlili cati monequi para anmoscaltise ipan Toteco ipan ni tonali quema anquichiyaj para monextis Tohueyiteco Jesucristo quema yaya sempa hualas. ⁸ Huan yaya Toteco cati amechchihuas antemachme hasta itamiya tonali para amo aqui huélis amechtelhuis ica yon se tamanti ipan nopa hueyi tonali quema Tohueyiteco Jesucristo sempa hualas. ⁹ Toteco yaya temachtli huan yaya cati amechnotztoc para annejnemise huan anmohuampochihuase ihuaya Icone, Tohueyiteco Jesucristo.

Motajcoxelojtoyaj nopa taneltocani

¹⁰ Huan ama, toicnihua, nimechtajtania ica itequiticayo Tohueyiteco Jesucristo para nochi amojuanti ximoyolilhuica san se tamanti. Amo ximotajcoxeloca, pero xijchihuaca quej san se masehuali. Xijpiyaca san se amotalnamiquilis huan san se amoyolo. ¹¹ Noicnihua, nimechilhúa ni tamanti pampa ihuicalhua Cloé nechylmelajque para anmocamaijixnamiquij. ¹² Sequij amojuanti anquijtohuaj antechtoquilíaj na niPablo. Sequij amojuanti anquijtohuaj anquitoquilíaj Apolos. Sequij quijtohuaj quitoquilíaj Pedro. Huan sequinoc quijtohuaj quitoquilíaj Cristo.

¹³ Amo cuali cati anquichihuaj. ¿Anmoilhúaj para huélis anquijtohuaj Coxelose Cristo? Amo nechcuamapeloltijque na niPablo por amojuanti. Huan quema amechcuaaltijque, amo aqui quijto amechcuaaltiyaya ica notoca* na niPablo. ¹⁴ Nijtascamati Toteco pampa amo aqui nijcuaalti campa amojuanti, san Crispo huan Gayo. ¹⁵ Huajca amo aqui huélis quijtos anmocuaaltijque ica notequiticayo para antechtoquilise. ¹⁶ Nojquiya niquincuaalti ihuicalhua Estéfnas, pero amo niquelnamiqui sinta nijcuaalti seyoc. ¹⁷ Pampa

* 1:13 1:13 Ica notequiticayo.

Cristo amo nechtitanqui para ma nitecuaalti. Nechtitanqui para ma nitepohuili nopa cuali camanali ten Jesucristo. Amo nitepohuilia ica yejectzi camanali cati huala ipan notalnamiqulis. Sinta ya nopa nijchijtosquia, huelis masehualme quinpaictijosquia nocamanal huan quielcajtosquia para Cristo mijqui por tojuanti huan para san yaya quiptiya chichahualisti para techmaquixtis.

Cristo quiptiya nochi chichahualisti huan talnamiqulisti

¹⁸ Nijmati para masehualme cati mocuapolose para nochipa quiitaj quej se huihuiyot ni camanali ten imiqulis Cristo para techtajtacolquixtis. Pero para tojuanti cati Toteco techmaquixtijtoc, tijmatij para ni camanali quipanextia ichichahualis Toteco. ¹⁹ Pampa ijcuilijtoc ipan Icamanal Toteco campa yaya quiijto:

“Nijososolos inintalnamiqulis talnamiquni ipan ni taltipacti.

Huan niqunquixtilis masehualme cati moyolilhuijtoque quichihuase, huan nijcuamajcahuas.”

²⁰ Huajca ¿taya quiijtohua Toteco ten nochi talnamijca tacame? ¿Taya quiijtohua ten nopa tamachtiani ten itanahuatlhua Moisés? ¿Taya quiijtohua ten nopa huejhueyi tacame cati ipan ni tonali monajnanquiliaj miyacapa para tenextilise para quiptiyaj miyac inintalnamiqulis? Toteco quipanextijtoc para nochi tamanti talnamiqulisti cati eltoc ipan ni taltipacti eltoc quej se huihuiyot cati amo teno ipati. ²¹ Huan Toteco cati quiptiya nochi talnamiqulisti ya quisencajtoc para amo aqui huelis quiixmatis ajquiya ya pampa talnamiqui quej ipan ni taltipacti moilhuiaj talnamiqij. Quipactia Toteco para quinmaquixtis masehualme cati quicaquij icamanal huan quineltocaj, masque sequinoc quiijtohuaj ya ni se huihuiyot.

²² Pero israelitame amo quinequij quineltocase icamanal se cati san quinpohuiliaj. Inijuanti quinequij quititase tiochichahualnescayot para quineltocase para melahuac se tamanti. Huan masehualme cati amo israelitame huan camanaltij griego san quitemohuaj cati melahuac ica inintalnamiqulis. ²³ Pero tojuanti san tiquinilhuiaj nochi masehualme para Cristo quicuamapeloltijque huan mijqui por tojuanti. Nelia ohui para israelitame ma quineltocaca ni camanali. Huan masehualme cati amo israelitame quiijtohuaj ni camanali eltoc se huihuiyot. ²⁴ Pero para tojuanti, masque tiisraelitame, o amo tiisraelitame, sinta Toteco technotzotoc para ma tiitzotoca tiixachua, tiquixmatij Cristo para yaya cati nelia quipanextia ichichahualis huan italnamiqulis Toteco. ²⁵ Huan ni talnamiqulisti cati Toteco quisencajqui para quichihuas ica Cristo huan cati sequinoc quitocaxtiaj se huihuiyot, nelpano inintalnamiqulis nochi masehualme. Huan masque sequinoc quiijtohuaj Cristo amo quipixqui chichahualisti pampa quicuamapeloltijque, ichichahualis quema miqiyaya ipan nopa cuamapeli nesqui para hueyi hasta quipano nochi ininchichahualis masehualme.

²⁶ Huajca noicnihua, xiquelnamiquica para quema Toteco amechnotzqui, amo miyac amojuanti tahuel antalnamiquiyayaj quej quinpaictia taltipac masehualme. Amo miyac amojuanti anquiptiyayaj chichahualisti, yon tequiticayot. Amo miyac anquiptiyayaj miyac tomi, yon amo anquiptiyayaj hueyi tatepanitacayot. ²⁷ Pero Toteco ica ipaquilis quintapejpeni masehualme cati ni taltipac ehuan quinijta para huihuijtoque para quinpinahualtis masehualme cati moilhuiaj talnamiqij. Huan Toteco

amechtapejpenijtoc amojuanti cati amo anquipiyaj chichahualisti quej sequinoc ipan ni taltipacti, para anquinpinahualtise masehualme cati moilhuaj quipiyaj chichahualisti. ²⁸ Quena, Toteco quintapejpenijtoc cati teicneltziti ipan ni taltipacti huan cati masehualme quincualancaitaj huan moilhuaj para amo teno ininpati para ica injuanti quisosolos cati masehualme moilhuaj para más hueyi ipati. ²⁹ Toteco quichijqui ya ni para amo aqui huelis mohueyimatis iixpa Toteco. ³⁰ Pampa Toteco iselti amechtatzquiltijtoc ipan Cristo Jesús. Huan pampa tiitztoque san se ica Cristo Jesús, yaya mochijtoc totalnamiquilis. Huan yaya techchijqui tixitahuaque huan titatzelzeloitque iixpa Toteco. Huan yaya techcojtoc para techtojtomas ten tajtacoli para huelis tiyase timajcajoque. ³¹ Huajca eltoc quej ijcuilijtoc ipan Icamanal Toteco: “Sinta se masehuali quinequi mohueyimatis, ma quihueyimati ten cati Tohueyiteco techchihuilitoc.”

2

Nopa camanali ten Jesucristo cati mijqui por tojuanti

¹ Huajca, noicnihua, quema achtohui niyajqui campa amojuanti para nimechilhuis icamanal Toteco, amo nimehcamanalhui ica huejhueyi camanali, yon amo nimochijqui quej nineltalnamiqui. ² Nimoilhui para más cuali para san nimehcamanalhuis ten Jesucristo huan quenicatza yaya mijqui ipan cuamapeli por tojuanti huan amo teno más nimechilhuisquía. ³ Huan quema niitztoya amohuaya, amo nijpixqui chichahualisti. Nimomajmatiyaya huan nihuihuipicayaya amoixpa. ⁴ Huan amo nimehcamanalhuyiyaya ica yejyetzti camanali cati quinextia italnamiquilis se masehuali, pero quema nimehcamanalhuyiyaya, ichichahualis Itonal Toteco monexti ipan nocamanal. ⁵ Amo nijnequiyaya ximotemachica ipan initalnamiquilis masehualme, nijnequiyaya ximotemachica ipan Toteco.

Itonal Toteco technextilia italnamiquilis Toteco

⁶ Pero quena, quema tiquincamanalhuaj taneltocani cati chichajoque, tiquincamanalhuaj ica camanali cati quinextia miyac talnamiquilisti. Huan tocamanal amo quinextia nopa talnamiquilisti cati eltoc ipan ni tonali, yon amo quinextia nopa talnamiquilisti cati quinpactia tayacanani cati itztoque ama pampa injuanti san tantiyahuij. ⁷ Pero tiquincamanalhuaj masehualme ica camanali cati quinextia italnamiquilis Toteco cati achtohuiya amo aqui quimachiliyaya. Quena, huejcajquiya quema ayemo pehuayaya taltipacti, Toteco moyolilhui huan quisencajqui nochi nopa cuajcualtzi tamanti cati techchihuilisquía teipa ipan Cristo, pero amo quincahuili masehualme ma quimatica hasta amanoc. ⁸ Huan yon se tayacanquet ipan ni taltipacti amo quimachili cati quichihuayaya Toteco, pampa sinta quimachilijtosquíaj, amo quicuamapeloltijtosquíaj Tohueyiteco cati pano quipiya ihueyitilis. ⁹ Eltoc quej ijcuilijtoc ipan Icamanal Toteco campa quijtohua:

“Amo aqui quuitzoc, yon quicactoc, yon moilhujtoc, quenicatza nelpano yejyetzti nopa tamanti cati Toteco quisencajtoc para quinnmacas nopa masehualme cati quicnelíaj.”

¹⁰ Pero tojuanti tijmatij ten nopa yejyetzti tamanti pampa Toteco technextilijtoc ica Itonal, pampa Itonal quimati huan quitachilia nochi cati moilhuaj Toteco huan technextilia hasta nopa tamanti cati más hueyi cati moilhuaj Toteco.

¹¹ Amo aqui hueli quimati cati seyoc masehuali moilhuía, pero itonal nopa masehuali, quena, quimati nochi cati eltoc ipan iyolo. Nojquiya amo aqui quimati cati moilhuía Toteco, san Itonal Toteco, quena, quimati. ¹² Huan Toteco amo techmacac se tonaltzi cati huala ten ni taltipacti. Yaya techmacatoc ten ya Itonal para huelis tijmatise nochi nopa tamanti cati yaya techmacac san quiaia quema techmaquixti. ¹³ Huan tiquinilhuíaj masehualme ten nopa tamanti quema titepohuilíaj icamanal. Pero quema tiquincamanalhuíaj masehualme, amo tijtequihuíaj camanali cati huala ipan totalnamiquilis timasehualme, san tijtequihuíaj camanali cati Itonal Toteco techmachtía. Quena, quej nopa tijtequihuíaj camanali cati Itonal Toteco techmaca para tiquinmachtise masehualme nochi cati melahuac para inintonaltziti.

¹⁴ Pero masehualme ipan ni taltipacti cati ayemo quineltocaj Toteco huan ayemo quiipiyaj Itonal ipan iniyolo amo quimachilíaj, yon amo quiselíaj, cati Itonal Toteco tamachtía, pampa quicaquij para san se huihuiyot. Nelía injuanti amo hueli quimachilise cati Itonal Toteco tamachtía pampa monequi quiipiyase Itonal Toteco ipan iniyolo para quiyecose huan quimachilise.

¹⁵ Pero se masehuali cati quiipiya Itonal Toteco ipan iyolo, quena, yaya hueli quiyecos huan quimachilis nochi ni tamanti cati Itonal Toteco tamachtía, pero sequinoc masehualme ipan ni taltipacti amo hueli quimachilíaj nopa masehuali. ¹⁶ ¿Quenicatza huelis quimachilise? Ipan Icamanal Toteco icculij-toc campa quijtohua:

“¿Ajquiya hueli quimachilía italnamiqulis Toteco?

Amo aqui hueli quimachtis Toteco taya monequi quichihuas.”

Pero tojuanti, quena, tijmachilíaj ni tamanti pampa tijpiyaj italnamiqulis Cristo.

3

Nopa sequinoc cati tequitique ihuaya Pablo

¹ Noicnihua, quema niitztoya nepa amohuaya, amo nihuelqui nimechcamanalhui quej niquincamanalhuisquía taneltocani cati chicajtoque ipan Toteco huan cati quicahuilíaj Itonal Toteco ma quinyacana. Monejqui nimechcamanalhui quej niquincamanalhuía masehualme cati quichihuaj san cati injuanti quinequij. Anitztoyaj quej anpilconetzitzi cati sanoc anpejtoyaj anquineltoaj Cristo. ² Nimechmachtí cati amo ohui ten Toteco, quej se acajya quimaca se pilconetzi lechi pampa ayemo hueli quicua nacat. Ayemo anhueliyayaj anquimachilíaj cati ohui, huan ama noja ayemo hueli anquimachilíaj, ³ pampa noja amechyacana cati amo cuali amotalnamiquilis quinequi xijchihuaca. Anmochicoitaj huan anmonajnanquilíaj huan anmo-tajcoxelohuaj. Quej nopa quichihuaj masehualme cati san quinyacana cati injuanti quinequij. Anmochihuaj quej masehualme ten ni taltipacti cati ayemo quiixmatij Toteco. ⁴ Pampa quema se ten amojuanti quijtohua para yaya nechtoquilia na niPablo, huan seyoc quijtohua quitoquilia Apolos, anquichihuaj quej quichihua ten hueli masehuali cati amo quiixmati Toteco.

⁵ ¿Taya chichualisti quiipiya Apolos para amechpalehuisquía huan taya nijpiya na, niPablo? ¡Amo teno! Tojuanti san titeequipanojcahua Toteco huan ica tojuanti Toteco amechnotztoc xijneltocaca, pero san tijchihuaj nopa tequit cati Toteco techmacatoc ma tijchihuaca. ⁶ Quema na nimechillhui icamanal Toteco, nijchijqui quej se cati quitojqui se xinachtí, huan itequi Apolos elqui quej se cati quiatequi, pero elqui Toteco cati quichijqui nopa

xinachti ma moscaltí. ⁷ Huajca amo ipati ajquiya quitojqui nopa xinachti, yon ajquiya quiatequi, san hueyi ipati Toteco cati quichijqui ma moscaltí. ⁸ San se iixpa Toteco na cati nijtojqqui huan Apolos cati quiatequi, huan Toteco techtaxtahuis sesen tojuanti quej quinamiqui ica nopa tequit cati tijchijtoque. ⁹ Pampa Apolos huan na san sejco titequitij ihuaya Toteco. Huan amojuanti anitztoque quej imil Toteco campa titocaj, pero amo amojuanti tomil.

O huelis tiquijtose anitztoque quej se cali cati Toteco techilhui ma tijchi-huaca, pero amo antochaj. ¹⁰ Eltoc quej ni. Toteco, pampa hueyi iyolo ica na, nechtequimacac ma nijtali nopa tatzinpehualtili ipan ichaj quej quichihua se talnamijca calchijquet. Huan eltoc quej sequinoc cati amechmachtíaj Icamanal peytoque quiscaltíaj nopa tepancali ipan nopa tatzinpehualtili. Pero monequi nochí cati tequitij ipan nopa cali cati Toteco quichihua, ma motachilica sinta cuali inintequi o amo. ¹¹ Quema nicalajqui campa amojuanti, san nimechilhui ten Jesucristo. Huan ichaj Toteco amo hueli quipiya seyoc tatzinpehualtili. ¹² Pero se calchijquet huelis quichihuas nopa tepancali ica tamanti cati huejcahuas quej oro, plata, o yeyectzitzit tet cati patiyó, o nojquiya huelis quichihuas ica cati amo huejcahuas quej cuahuit, xihuit o sacat. ¹³ Pero teipa ajsis se tonali quema Toteco quiyeyecos totequi ica tit para quitas taya tamanti tequit tijchijque. Huan ica nopa tit monextis quenicatza elqui totequi huan sinta cuali huan huejcahuas cati tijchijtoque o amo. ¹⁴ Sinta se masehuali quichijtoc se tequit ipan nopa cali ten Toteco huan itequi mocahuas huan amo tamitatas, yaya quiselis itaxtahuil. ¹⁵ Pero sinta tamitatas itequi se masehuali, huajca quipolos itaxtahuil, pero Toteco quimaquixtis nopa masehuali masque elis quej se cati quixcotonqui se tit para huelis momanahuis.

¹⁶ ¿Amo anquimatij para amojuanti san sejco anitztoque ichaj Toteco huan Itonal Toteco mocahua ipan amojuanti? ¹⁷ Sinta se masehuali quisosolos ichaj Toteco, huajca Toteco tahuel quitatzacuultis, pampa ichaj eltoc tatzelzoltic huan amojuanti anitztoque nopa tatzelzoltic cali.

¹⁸ Amo ximocajcayahuaca. Sinta se campa amojuanti moita para miyac quimati quej nopa talnamiquilisti cati eltoc ipan ni taltipacti, huajca ma mocuepa quej se cati ni taltipacti quita para amo teno quimati. Quej nopa huelis quimachilis Icamanal Toteco huan ya nopa quichihuas ma eli cati nelía talnamiqui iixpa Toteco. ¹⁹ Pampa nopa talnamiquilisti cati masehualme ipan ni taltipacti quipiyaj eltoc quej se huihuiyot iixpa Toteco. Icamanal Toteco quijtohua:

“Ica masehualme cati moilhuíaj talnamiquij,
Toteco quitequihuía inintalnamiquilis para quinmasiltis.”

²⁰ Nojquiya sejcoyoc ipan Icamanal Toteco quijtohua:

“Toteco quimati taya moilhuíaj masehualme cati talnamiquij ica nopa talnamiquilisti cati eltoc ipan ni taltipacti,
huan amo teno ipati cati moilhuíaj.”

²¹ Huajca amo aqui ma mohueyimati ica taya tacat quimachtijtoc, masque elqui Apolos, o na, o seyoc, pampa nochí tojuanti tiamoaxcahua. ²² Na niPablo, Apolos, Pedro, ni taltipacti, nemilisti, miqulisti, huan tamanti cati ama onca, huan tamanti cati oncas teipa; nochí ya ni eltoc amoaxcahua.

²³ Huan amojuanti aniaxcahua Cristo huan Cristo iaxca Toteco Dios.

¹ Huajca quema anmoilhuáj ten Apolos huan na, xijmachilica para tojuanti san tiitequipanojcahua Tohueyiteco Cristo cati yaya techtequimacatoc para ma titayacanaca para titamachtise nopa tamanti cati achtohuiya amo aqui quimatiyaya ten Toteco. ² Anquimatij quema se teteco quitequimaca se itequipanojca ma eli se tayacanquet ipan se tequit, monequi nopa tequipanojquet ma eli temachti huan quitamichihuas nochi cati iteco quilhuitoc ma quichihua. ³ Huelis antechitaj para na niütztoya temachti ipan notequi, o huelis amo. Para na, amo hueyi ipati taya amojuanti o tequichihuani moilhuáj quema nechtequitachilíaj. Na, yon amo nimotemachía ipan cati na nimoilhuía ten notequi, ⁴ pampa masque noyolo amo nechtelhuía para nijchijtoc cati amo cuali, amo ya nopa cati ipati. San ipati cati Toteco quijjtos quema yaya nechtequitachilis. San yaya quijjtos sinta cuali o amo cuali cati nijchihua. ⁵ Huajca ayecmo xijajtolsencahuaca huan xiquijtoaca ajquiya quichihua cati cuali huan cati amo cuali ipan itequi Toteco quema noja ayemo ajsi hora. Xijchiyaca hasta hualas Tohueyiteco para tetajtolsencahuas. Quema Toteco hualas, yaya quipanextis tamanti cati ama motatijtoc ipan iyolo sesen masehuali, pampa ipan nopa tonali Toteco quipanextis nochi cati sesen masehuali moilhuyiyaya ipan iyolo huan para ten quichijqui cati quichihuayaya. Huajca ipan nopa tonal, quena, Toteco quinhueyitalis nopa masehualme sinta quinamiqui.

⁶ Huajca noicnihua, nica nicamanaltiyaya ten Apolos huan na quej se ejemplo para xijmachilica amo cuali para miyac anquihueyitalise se masehualí hasta quipano cati ijcuilijtoc ipan Icamanal Toteco. Amo cuali para anquichicoicnelise se itamachtijca Toteco huan anmohueyimatise pampa amechmachtijtoc huan anquiechcapantalise seyoc. ⁷ ¿Ajquiya amechhui para achi más anquimatij que sequinoc? Nochi cati anquimatij, Toteco amechchijtoc xijmatica. Nochi cati anquipiyaj anquiselijoque ten ya. Huajca, ¿para ten anmohueyimatij quej anquipantijtosquíaj se talnamiquilisti san amoselti?

⁸ Nesi quej anmoilhuáj anquipiyaj nochi cati anquinequij ten Toteco. Anmoilhuáj antapijpixtoque. Masque tojuanti ayemo titanahuatíaj, anmoilhuáj ya antanahuatiani. Nipaquisquía sinta nelía ya ajsitosquía nopa tonali quema Toteco amechchihuas antanahuatiani, pampa ipan nopa tonali tojuanti nojquiya tiütztose titanahuatiani huan tijpiyase tequiticayot quej amojuanti. ⁹ Pero quemantica nimoilhuía para Toteco techtalijtoc tiitayolmelajcahua iniicantzi nochi sequinoc taneltocani. Tiütztoque quej masehualme cati se tatanquet quinnextía miyacapa para quintantoc ipan tatehulisti huan san quichiyaj ajquiya quinmictis. Eltoc quej techmahuisohuaj nochi cati itztoque ipan taltipacti, masque masehualme o ilhuicac ehuaní. ¹⁰ Masehualme techitaj tiitayolmelajcahua quej tihuihuitique pampa tiquicnelíaj Cristo, pero amojuanti anmochihuaj quej cati más antalnamiquij. Tojuanti amo tijpiyaj chichahualisti, pero amojuanti quena, anmochihuaj quej miyac anquipiyaj. Masehualme ipan ni taltipacti amechtepanitaj, pero techhuihuiitaj tojuanti. ¹¹ Hasta ama tiitayolmelajcahua Toteco techpolohua ten ica tipanose. Timayanaj, tiamiquij huan amo tijpiyaj cati ica timopiquise. Amo tijpiyaj tochaj cati nelía toxca huan miyac huelta tacame techhuitequij. ¹² Tojuanti ica miyac taijyohuili titequititoc ica tomaj para tijtanise cati ica tipanose. Quema masehualme techtelchihuaj, tijtajaníaj Toteco ma quintochihua. Quema techtaijyohuilitíaj, tiquijyohuáj. ¹³ Tijpiyaj toyolo huan tiquincamanalhuáj ica cuali nopa masehualme cati toca camanaltij cati amo cuali. Masehualme techitaj quej titasolme ipan ni

taltipacti. San quinequij techtepehuase pampa moillhuáj amo teno topati. Quena, quej nopa eltoc hasta ama.

¹⁴ Amo nimechtajcuilhúa ni tamanti para nimechpinahualtis, pero nignequi nimechmatiltis cati melahuac pampa anitztoque quej annoconeuhua cati nimechicnelía. ¹⁵ Huan masque anquinpiyaj diez mil tamachtiani cati amechmachtíaj ten Cristo, amo anquinpiyaj miyac amotatahua, pampa san na niamotata ipan Cristo Jesús pampa achtohui nimechilhui icamanal Toteco huan anquineltocaque. ¹⁶ Huajca ica nochi noyolo nimechtajtanía, xijtoquilica cati nimechilhui huan xijchihuaca quej na nijchihua.

¹⁷ Huan yeca nijtintantoc Timoteo ma yahui amechitati para amechpalehuis anquichihuase quej na nijchihua. Yaya quej nocone cati niquicnelía miyac huan yaya temachtí quitequilía Toteco. Huan yaya amechelnamiqultis cati nijchijtinentoc para nijtoquilis Cristo Jesús. Huan cati yaya amechilhuis elis cati niquinmachtía taneltocani ipan nochi tiopame cati mosentilíaj campá huéli. ¹⁸ Sequij amojuanti anmohueyimatij huan anmoillhuáj amo quema niyas sempa nepa campá anitztoque para nijmatis taya anquichihua. ¹⁹ Pero, quena, amo huejcahuas para niyas nopona, sinta quej nopa quinequi Toteco. Huan niqitas sinta injuanti cati mohueyimatij nelía quipiyaj ichicahualis Toteco o sinta san quinpactía mohueyimatca camanaltise. ²⁰ Masehualme cati itztoque ipan itanahuatilis Toteco amo monextíaj pampa camanaltij yejyectzi, pero monextíaj pampa quipiyaj chicahualisti. ²¹ Huan ¿taya anquinequij ma nijchihua? ¿Anquinequij ma niya nimechtacahualtiti ica cati amo cuali anquichihua? O ¿anquinequij anquichihuase cati cuali huan nimehcamanalhuiti ica cuali huan ica taicnelijcayot?

5

Momecatiyaya se cati mosentiliyaya inihuaya nopa taneltocani

¹ Nijcactoc para melahuac itztoc se cati mosentilía amohuaya cati quichihua se tamanti tajtacoli cati nelía fiero, huan hasta quipano nopa tajtacoli cati quichihua. Masehualme cati amo quixmatij Toteco huan amojuanti amo anquichihuilíaj cuenta. Nechilhuijtoque para itztoc se tacat cati mosejcotilijtoc ica itepotznaj. ² ¿Quenicatza huéli anmohueyimatij? ¿Para ten amo anchocaj ica cuesoli? ¿Para ten amo anquiquixtijtoque yaya cati quichijtoc ni tajtacoli para ma ayecmo mosentili amohuaya? ³ Masque amo niitztoc amohuaya ica notacayo, niitztoc amohuaya ica notonal, huan ya nijtajtolsenajtoc yaya cati quichijtoc ni tamanti quej niitztosquía nopona. ⁴ Huajca ximosentilica ipan itoca* Tohueyiteco Jesucristo huan na niitztos amohuaya ica notonal, huan nojquiya itztos amohuaya ichicahualis Tohueyiteco ipan nopa tasentilisti. ⁵ Huan xijmajcahuaca nopa tacat imaco Amocualtacat para ma quitzontamilti inacayo cati quinequi tajtacolchihuas para itonal nopa tacat momaquixtis ipan nopa tonali quema Tohueyiteco Jesús sempa hualas.

⁶ Amo cuali para anmohueyimatij quej ancuaicualme iixpa Toteco huan noja anquicahuilíaj ma itzto amohuaya se cati quej nopa fiero quichihua. ¿Amo anquimachilíaj masque san anquicahua. setzi masehuali ma tajtacolchijtinemi, yaya quinmahuas nochi sequinoc san quej se quentzi tasonejca. ¿quisonehua miyac pantzi? ⁷ Huajca ama xijquixtica nochi tajtacoli para anitztose senquisa antapajpacme quej huejcaquiyá ipan nopa Pascua Ilhuit anquiquixtiyayaj nochi tasonejca. ¿yot ipan amochajchaj pampa

* 5:4 5:4 Ica itequitcayo.

anquichihuayayaj se yancuic tixti taxacualoli para pantzi cati amo quipixqui tasonejcyot. Huan quej huejcajquiya mijqui nopa pilborregoijtzi ipan Pascua Ilhuit, ama Cristo ya mijqui quej topataca tojuanti para techmaquixtis ten totajtacolhua. ⁸ Huajca ma tiitzoca titapajpacme huan ma tijchihuaca se yancuic ilhuit quej quinamiqui pampa tojuanti tijmatij cati melahuac. Israelitame quimatij moiycacahuaj ten tasonejcyot pampa ya nopa eltoc quinextia tajtacoli, huan tojuanti nojquiya ma amo aqui tijcualancaitaca, yon ma amo tijchihuaca cati amo cuali. Eltoc quej tijcuaj se yancuic pantzi cati amo quiapiya tasonejcyot pampa amo teno tijpiyaj ica tajtacoli.

⁹ Ipan nopa achtohui amatajcuiloli cati nimechtajcuilhui, nimechilhui para amo inihuaya ximomatica masehualme cati quichihuaj tamanti ica cati amo inintahuical. ¹⁰ Pero amo nijnequi nimechilhuis para amo ximomatica inihuaya masehualme cati amo quineltocaj Toteco sinta injuanti quichihuaj tamanti ica cati amo inintahuical, o sinta quixtocaj cati sequinoc quiapiyaj, o tachtequij, o quinhueyichihuaj taixcopincayome, pampa injuanti ayemo quixmatij Toteco. Sinta ayecmo anmomatisquiáj inihuaya masehualme quej nopa, monequisquiá anquisase ipan ni taltipacti. ¹¹ Nimechtajcuilhui quej nopa pampa nijnequiyaya nimechilhuis para amo ihuaya ximomatica se cati quijtohua para yaya se toicni ipan Cristo pero noja ten hueli quichihua ica seyoc, o taixtoca, o quinhueyichihua taixcopincayome, o quipactia tatehuia, o moiuintia, o tachtequi. Sinta se masehuali quijtohua para yaya se toicni huan quej nopa tachihua, yon amo xitacuaca ihuaya. ¹² Pampa amo notequi para niquintajtolsecahuas cati itztoque huejca huan amo quineltocaj Tohueyiteco. Pero quena, amotequi para anquintajtolsecahuase cati itztoque ipan itiopa Toteco. ¹³ Pampa cati itztoque huejca huan amo taneltocaj, Toteco Dios quintajtolsecahuas. Pero ica se cati quijtohua para se taneltocaquet, monequi amojuanti xijquixtica nopa fiero tacat para ayecmo ma mosentili amohuaya.

6

Taneltocani ma amo motelhuica iniixpa tequichihuani

¹ Quema se ten amojuanti quiapiya se cuesoli pampa seyoc taneltocaquet quichihuilijtoc se tamanti cati amo xitahuac, amo quinamiqui para yaya yas iixpa se tequitiquet cati amo itztoc xitahuac iixpa Toteco para quitelhuis iicni pampa quinequi nopa tequitiquet ma quisencahua. Monequi ma yas iniixpa sequinoc taneltocani para injuanti ma quixitahuaca. ² ¿Amo anquimatij tojuanti cati Toteco techiyocajtoc para tiaxcahua tiquintajtolsecahuase cati itztoque ipan ni taltipacti? Huajca, sinta tiquintajtolsecahuase cati itztoque ipan taltipacti, ¿para ten amo hueli anquisencahuaj ni tamanti cati pilquenzitzi? ³ ¿Amo anquimatij para titaneltocani tiquintajtolsecahuase ilhuicac ehuan? Huajca amo nelohui para anquisencahuase ni piltamantzitzi cati mopantia ipan tonemilis ipan ni taltipacti. ⁴ Huajca sinta anquipiyaj tamanti cati amechtajcoxelohua huan monequi se tequitiquet para amechtajtolsecahuas, amo xijtemoca se tequitiquet cati amo teno quiapiya ipan itiopa Toteco para yaya quisencahuas. ⁵ Nimechilhui ni para nimechpinahualtis. Itztoque taneltocani amohuaya cati talnamiquij huan huelis quisencahuase ni tamanti cati amechtajcoxelohua. ⁶ Huan amo cuali para anquihucase se amoicni ipan Toteco iixpa se tequitiquet cati amo taneltoca.

⁷ Nelia tepinajti para amojuanti anmonajnanquilíaj piltamantzitzi hasta anquinequij anquitelhuse se amoicni miyacapa iixpa se juez. Achi cuali san xiquijyohuica nopa cati moicni amechchihuilijtoc. ⁸ Pero amo quej nopa

anquichihuaaj. Nojquiya amojuanti anquichihuilíaj cati amo cuali, huan sempa anquicajcayahuaj masque yaya amoicni ipan Cristo.

⁹ ¿Amo anquimatij para amo cuajcualme amo huelis calaquise ipan itanahuatilis Toteco? ¿Amo ximocajcayahuaca! Yon amo calaquise nepa cati quichihuaaj tamanti ica cati amo inintahuical, o cati quinhueyimatij taixcopincayome, o cati momecatíaj, o tacame cati mosihuanequij. Amo calaquise nepa tacame cati quichihuaaj ten hueli ica sequinoc tacame, ¹⁰ o cati tachtequij, o cati quiixtocaj cati sequinoc quiipiyaj, o moihiuntíaj, o cati tatehuíaj huan cati tacajcayahuaj huan quihuicaj cati sequinoc iniaxca. ¹¹ Achtohuiya sequij amojuanti anitztoyaj quej nopa, pero ama Toteco amechpajpajqui ten amotajtacolhua huan amechiyocacajtoc para anelise aniaxcahua. Huan Itonal Toteco amechchijtoc anxitahuaque iixpa ipan itoca* Tohueyiteco Jesucristo.

Amo xitajtacolchihuaca ica amotacayo

¹² Onca sequij tamanti cati yon se tanahuatili amo technahuatía para ma amo tijchihuaca, pero noja tijmatij para amo quinamiqui ma tijchihuaca, pampa sequij tamanti amo teno techpalehuía. Huan masque nimajcajtoc, amo cuali nijcahuilis se tajtacoli ma nechnahuati. ¹³ Huelis anquijitose: “Toteco quichijqui tojti para quiselis tacualisti huan quichijqui tacualisti para tojti, huajca ma tijcuaca quema totacayo technotza.” Ica ya nopa anmoilhuíaj nojquiya huelis anquichihuase ten hueli tamanti quema amotacayo amechnotza xijchihuaca, pero xiquelnamiquica para ajsis se tonal quema Toteco quitamiltis nochi tacualisti huan tojti nojquiya. Toteco amo quichijqui totacayo para ma tijchihuaca ten hueli ica cati amo totahuical. Toteco quichijqui totacayo para ica tijtequipanose, huan Toteco mijqui para totacayo ma quiipiyas nemilisti para nochipa. ¹⁴ Quena, Toteco Dios cati quiyolcuic Tohueyiteco Cristo itacayo, nojquiya ica ihueyi chichahualis quiyolcuic totacayo tojuanti ten campa mijcatzítzi.

¹⁵ ¿Amo anquimatij amotacayo eltoc se quentzi ten itacayo Cristo? Huajca pano fiero para se quicuilis se parte ten itacayo Cristo huan quisejcotilis ica se tacanenca sihuat. Ma amo aqui quichihua ya nopa, amo quema. ¹⁶ ¿Amo anquimatij cati itztoc ihuaya se tacanenca sihuat quiipiya san se itacayo ihuaya? Pampa Icamanal Toteco quijtohua se tacat huan se sihuat mochihuaaj san se inintacayo. ¹⁷ Pero quema timochihuaaj san se ica Tohueyiteco, timochihuaaj san se totonal ica ya.

¹⁸ Huajca ximotaloca para ancholose quema anquinequij anquichihuase ten hueli ica cati amo amotahuical. Masehualme cati quichihuaaj sequinoc tamanti tajtacoli amo quicocohuaaj inintacayo quej se cati quichihua ni tajtacoli. Pampa cati quichihua ten hueli ica cati amo itahuical quicocohua ten ya itacayo ica nopa tajtacoli. ¹⁹ ¿Amo anquimatij amotacayo eltoc ichaj Itonal Toteco? ¿Amo anquimatij Itonal Toteco mocahua ipan amotacayo pampa Toteco Dios quitatanqui ma itzto nopona? Huajca amojuanti ayecmo anamoaxcahua para anmonahuatise. Ama aniaxcahua Toteco, ²⁰ pampa Jesucristo taxtajqui cati patiyu para amechcohuaas huan amechchihuaas aniaxcahua. Huajca ica nochí cati anquichihuaaj ipan amotacayo huan ipan amotonal, monequi xijchihuaca para ihueyitilis Toteco.

7

Nopa nenamictili

* 6:11 6:11 Ica itequiticayo.

¹ Ama nimechnanquilis cati antechtajtanijque na quema antechtajcuilhuijque. Cualtitoc sinta se tacat amo quema quipiyas isihua. ² Pero, pampa itztoque miyac masehualme cati ten hueli quichihua ica cati amo inintahuical, achi cuali sinta sesen tacat quipiyas isihua, huan sese sihuat quipiyas ihuehue. ³ Huan monequi sesen tacat ma quichihua nochi cati quinamiqui ihuaya isihua huan ma amo quilhuis para amo. Huan monequi sese sihuat ma quichihua nochi cati quinamiqui ihuaya ihuehue huan ma amo quilhuis para amo. ⁴ Sihame ayecmo quinahuatíaj inintacayo pampa inintacayo iaxca inihuehue. Huan san se ica tacame, inijuanti ayecmo quinahuatíaj inintacayo pampa inintacayo iaxca inisihua. ⁵ Sesen ten amojuanti amo xitzacuili motahuical quema quinequi itztos mohuaya. San quena, cualtitoc sinta anome anmoilhuíaj para amo anitztose san sejco para se ome tonati para senquisa anmotatajtise. Pero teipa sempa xipehuaca xiitzoca san sejco para Amocualtatcat amo huelis amechyoltlanas xitajacolchihuaca ica seyoc cati amo amotahuical pampa ayecmo anhuelij anmoijyohuáaj.

⁶ Huaja nimechilhuía para cuali ximotahuicaltica, pero amo nimechilhuía quej se tanahuatili para nochi monequi ximotahuicaltica. ⁷ Na nimoilhuía quisasquía más cuali sinta nochi itztosquíaj iniselti quej na. Pero Toteco quimacatoc sesen nopa yajatili quej cati quinequi ma quipiya. Quinequi sequij ma mocahuaca quej na, huan quinequi sequinoc ma quipiyaca inintahuical.

⁸ Niquinilhuía cati amo quipiyaj inintahuical huan cati ya mijqui inintahuical para cualtitoc sinta mocahuase iniselti quej na. ⁹ Pero sinta Toteco amo quimacatoc nopa yajatili huan ohui para monemiltise xitahuac pampa iniselti, huaja ma motahuicaltica. Quena, achi más cuali ma motahuicaltica para amo mojmosta quinequise tajtacolchihuase.

¹⁰ Pero amojuanti cati ya anmotahuicaltitoque, nimechilhuía ini. Se sihuat ma amo quicahua ihuehue huan se tacat ma amo quicahua isihua. Nelía amo san na nimechilhuía, pero Toteco amechnahuatía ni tamanti. ¹¹ Pero sinta se sihuat ya quicajtejtoc ihuehue, ma amo monamicti sempa. Ma mocahua iselti o ma mosejcotili ica cati ipa ihuehue. Huan se tacat ma amo quicahua isihua.

¹² Huan ama nimechcamanalhuía ne sequinoc ten amojuanti cati ya anquiapiyaj amotahuical. Na nimechilhuía ya ni masque Tohueyiteco amo camanaltic ten ni tamanti quema itztoya ipan taltipacti. Sintá ama se tacat quineltoca Toteco huan quiapiya isihua cati amo quineltoca, huan isihua quinequi itztos ihuaya, ma itzto. Nopa tacat ma amo quicajtehua. ¹³ Huan sinta se sihuat cati ama quineltoca Toteco quiapiya ihuehue cati amo quineltoca, huan ihuehue quinequi itztos ihuaya, ma itzto. Nopa sihuat ma amo quicajtehua. ¹⁴ Pampa Toteco quiyocacahuas nopa tacat cati amo taneltoca para elis iaxca por isihua cati quineltoca Toteco. Huan Toteco quiyocacahuas nopa sihuat cati amo taneltoca para elis iaxca por ihuehue cati quineltoca Toteco. Sintá amo, amonehua elisquíaj quej cati amo tapajpacme iixpa Toteco, pero ama Toteco quinchijtoc amonehua tapajpactique.

¹⁵ Pero sinta se tehuehue o tesihua cati amo quineltoca Toteco quinequi quisas huan ayecmo itztos ihuaya itahuical cati quineltoca Toteco, ma quisa. Nopa totaca icni o toshua icni cati elqui itahuical amo mocahua ilpitoc ica cati quisqui. Ama eli majcajtoc pampa Toteco quinequi ma tiitzoca san sejco ica tasehuilisti. ¹⁶ Pampa se sihuat cati quineltoca Toteco, amo quimati

sinta huelis quipalehuis ihuehue para momaquixtis ten itajtacolhua. Huan se tacat cati quineltoca Toteco, amo quimati sinta huelis quipalehuis isihua para momaquixtis ten itajtacolhua.

¹⁷ Sesen ma itzto quej Toteco quimaca yajatili para ma itzto. Ximocahuaca quej anitztoyaj quema Toteco amechnotzqui para xijneltocaca. Quej nopa niquinilhuía nochi taneltocani cati mosentilíaj ipan tiopame campa hueli.

¹⁸ Sinta ya amechtequillijtoyaj nopa machiyot cati itoca circuncisión quema Toteco amechnotzqui xijneltocaca, amo ximocuesoca pampa anquipiayaj. Pero sinta amo anquipixque nopa machiyot ipan amotacayo quema Toteco amechnotzqui, amo ximotequilica. ¹⁹ Amo ipati sinta anquipiayaj nopa machiyot o amo anquipiayaj, san ipati sinta anquinchijtinemij itanahuatil Toteco. ²⁰ Huajca sese masehuali ma mocahua quej itztoya quema Toteco quinotzqui ma quineltoca. ²¹ Sinta se eltoya iaxca iteco cati quicojtoya para ma quitequipano, ma amo motequipacho pampa iaxca se tacat huan amo majcajtoc para ya campa quinequi. Pero sinta huelis mochihuas majcajtoc para ayecmo elis iaxca iteco, ma quichihua. ²² Pampa se tetequipanojquet cati iaxca se iteco quimachilis ayecmo ilpitoc quema quiselis Cristo. Huan se cati amo eliyaya ilpitoc huan amo iaxca se iteco quema quiseli Cristo, quimachilis para yaya ama se tetequipanojquet cati iaxca Cristo. ²³ Toteco taxtajqui patiyot para amechcohuas, huajca ama xijmatica para anitequipanojcahua Toteco huan ayecmo ximoilhuica para san anitequipanojcahua se masehuali. ²⁴ Huajca noicnihua, ximocahuaca quej anitztoyaj quema Toteco amechnotzqui huan nopona campa anmopantíaj, xijtoquilica Toteco.

²⁵ Ica cati ayemo monamictíaj, Toteco amo nechmacatoc se tanahuatili, pero nimehnanquilis quej nimoilhuía cuali xijchihuaca. Huelis an-motemachise ipan na quej se cati temachtí pampa Toteco quipixtoc hueyi iyolo ica na. ²⁶ Nimoilhuía achi cuali sinta sesen tacat mocahuas quej itzto ama por ni taohuicayot cati ama tijpanoj. ²⁷ Sinta tijpiya mosihua, amo xijcahua. Sinta amo tijpiya mosihua, amo xijtemo. ²⁸ Pero sinta se tacat mosihuajtis ama, amo tajtacolchihuas. Huan sinta se ichpocat monamictis, amo tajtacolchihuas. Pero cati monamictíaj quipiyase más tequipacholi ipan ni taltipacti huan nijnequisquía amo xijpanoca ya nopa.

²⁹ Nijnequi nimechilhuis ya ni, noicnihua. Amo mocahua miyac tonali. San quentzi más tonali huan tacame cati quipiyaj inisihua amo quipiyase yon se talojtzi para itztose inihuaya inisihua por nopa tonali cati hualas. ³⁰ Huan masehualme cati chocaj monequis quicahuase inintequipachol. Cati paqui, ayecmo quipiyase se talojtzi para huetzcase. Huan cati quicojtoque miyac tamanti ipan ni taltipacti, ayecmo quipiyase tonali para quitequihuse. ³¹ Nochi cati tijtequihuíaj tamanti ipan ni taltipacti, monequi ma timotachilica para ma amo techitzquili toyolo nopa tamanti, pampa panotehuas ni taltipacti cati ama monextía huan nochi cati quipiya.

³² San nijnequi xiitztoaca anyolpactoque huan amo monequi ximotequipachoca por se amotahuical. Se cati amo quipiya itahuical huelis moilhuis ten itequi Toteco huan quenicatza huelis quichihuas cati quipactía Toteco, ³³ pero se tacat cati quipiya isihua, monequi moilhuis ten tamanti ipan ni taltipacti huan taya monequi quichihuas para ma paqui isihua. Yeca ome tamanti quiyoltilana. ³⁴ Nojquiya amo san se, se sihuat cati quipiya ihuehue huan se cati amo. Pampa se sihuat cati ayecmo quipiya ihuehue, o se ichpocat cati ayemo monamictijtoc huelis moilhuis ten itequi Toteco huan huelis moyocacahuas senquisa para quichihuas ipaquilis Toteco ipan

itacayo huan ipan itonal. Pero se sihuat cati ya quiapiya ihuehue monequi moilhuis ten tamanti ipan ni taltipacti huan quenecatza monequi quichihuas para quipactis ihuehue.

³⁵ Nimechilhúa ni tamanti para nimechpalehuis. Amo nijnequi nimechnahuatis amo xijchihuaca se tamanti. Nijnequi xijchihuaca cati anquiritaj más amechpalehuis para ica nochi amoyolo huelis anquitequipanose Toteco.

³⁶ Sinta se tacat quiapiya se iichpoca huan moilhúa para amo quichihua cati cuali ica ya pampa ayemo quicahuilía ma monamicti, huajca ma quichihua cati quinequi. Sinta iichpoca motanquiya huan itzotc se tellocat cati quinequi mosihuajtis ihuaya, huajca ma motahuicaltica. Amo se tajtacoli sinta itata quincahuilis ma motahuicaltica. ³⁷ Pero sinta seyoc tacat moilhúa más cuali amo quicahuilis iichpoca ma monamicti, huan sinta amo quiyoltilana nopa ichpocat para monamictis, huan nopa tacat quiapiya tasehuilisti ipan iyolo, huajca cuali para iichpoca mocahuas ichaj pampa itata quej nopa moilhúa ipan iyolo. ³⁸ Huajca yaya cati quicahuilía iichpoca ma monamicti quichihua cati cuali, huan yaya cati amo quicahuilía ma monamicti quichihua cati achi cuali.

³⁹ Se sihuat mocahuas monamictijtoc ica ihuehue hasta yaya miquis huan ipan nochi inemilis amo quiapiya caquihuilli para monamictis ica seyoc. Pero sinta ya mijqui ihuehue, huajca ayecmo ilpitoc nopa sihuat huan huelis sempa monamictis ica cati quinequi, pero san ma monamicti ica se tacat cati nojquiya quineltoca Tohueyiteco. ⁴⁰ Pero na niquta huelis se toahui cati ya mijqui ihuehue más paquis sinta amo monamictis sempa, huan nimoilhúa itonal Toteco nechmacatoc ni camanali cati nimechilhúa.

8

Tacualisti cati quitajtoque iniixpa taixcopincayome

¹ Ama nimechcamanhuis ten tacualisti cati sequinoc quitajtoque iniixpa taixcopincayome. Anmoilhúaj ya anquimatij taya monequi anquichihuase ipan ni tamanti, pero tamatilisti techchihua ma timohueyimat-ica. Pero quema titenextilíaj taicnelijcayot, tiquinpalehuíaj sequinoc ma moscaltica ipan Tohueyiteco. ² Sinta se moilhúa ya quimati nochi, quinextía para amo teno quimati quej monequi quimatis. ³ Pero sinta se nelía quicnelía Toteco, Toteco quixmati.

⁴ Pero ¿taya tijchihuase? ¿Cuali para tijcuase nopa tacualisti cati sequinoc quitajtoque iniixpa taixcopincayome, o amo? Tojuanti tijmatij nopa cati injuanti quinitaj para taixcopincayome, amo teno ininpati, pampa amo itztoque. Itzotc san se Dios huan amo aqui seyoc. ⁵ Huan masque sequij masehualme quijtohuaj itztoque miyac cati quintocaxtíaj “dioses” ipan ilhuicacti huan ipan ni taltipacti onca miyac cati quintocaxtíaj “tetecome”, ⁶ tojuanti tijmatij san itzotc setzi Dios, yaya Totata, ica cati pejqui nochi cati onca. Huan tijmatij tiitztoque para ma tijchihuaca ipaquillis. Huan itzotc san se cati nelía teteco huan yaya Jesucristo ica cati Toteco Totata quichijqui nochi cati onca huan tojuanti tijpiyaj nemilisti por ya.

⁷ Pero sequij taneltocani ayemo cuali quimachilíaj para itzotc san se Dios. Injuanti momajtoyaj quinhueyimatij taixcopincayome huan moilhúaj itztoque. Ama quema injuanti quicuaaj se tacualisti cati sequinoc quitajtoque iniixpa taixcopincayome, quixpanoj cati iniyolo quinilhúa para amo cuali pampa amo quiapiyaj tetili. ⁸ Toteco amo techcualita más por cati tijcuaj. Amo

tiitztose más cuali iixpa sinta tijcuase se tamanti, yon amo tiitztose más fiero iixpa sinta amo tijcuase.

⁹ Pero ximotachilica para amo teno cati anquipiay caquihuili anquichihuse, quiyoltilanas ma tajtacolchihua se amoicni cati ayemo cuali quineltoaca Toteco. ¹⁰ Pampa se cati moilhuía amo cuali quicuas cati sequinoc quitalijtoque iixpa se teteyot huelis mitzitas quema titacuati ipan nopa lugar cati quichijtoque para nopa teteyot. Huan mitzitas para ta tijmati cati cuali para tijchihuas, huajca pampa amo quiapiya tetili, yaya nojquiya quicuas cati quitalijtoque iixpa nopa teteyot, huan tajtacolchihuas ipan iyolo. ¹¹ Huajca pampa ta achi más tijmati, mococos moicni cati amo quiapiya tetili huan Cristo nojquiya taxtajqui por itajtacolhua ya quema mijqui. ¹² Huan quema tijyoltilana ma tajtacolchihua se moicni cati ayemo quiapiya tetili ipan Cristo huan tijcocoahua ipan iyolo, huajca titajtacolchihua iixpa Cristo. ¹³ Huajca sinta se tacualisti quichihuas para se noicni ma tajtacolchihua, amo quema nijcuas sempa para amo nijchihuas ma huetzi noicni.

9

Itequiticayo se itayolmelajca Toteco

¹ Na niitayolmelajca Toteco huan nimajcajtoc. Na niqiztloc Tohueyiteco Jesús. Amojuanti antatzquitoque ipan Tohueyiteco por nopa tequit cati nijchijqui campa amojuanti. ² Sinta sequinoc quijjtohuaj amo niitayolmelajca Toteco, amojuanti anquimatij para quena, nelía niitayolmelajca. Nimechilhui icamanal Toteco huan anquineltocaque, huan yeca amojuanti antenextilíaj para niitayolmelajca Tohueyiteco.

³ Ica injuanti cati quichihuaj tatzintoquili taya tequiticayot nijpiya, quej ni niquinnanquilis. ⁴ ¿Amo anquimatij na huan cati nohuaya yahuij tijpiyaj tequiticayot para tijselise san quiaja cati monequi tiquise huan tijcuase campa titepohuilíaj icamanal Toteco? ⁵ ¿Amo anquimatij tijpiyaj tequiticayot para tijpiyasquíaj tosihua cati quineltoaca Toteco huan tijhuicasquíaj tohuaya ipan totequi quej sequinoc itayolmelajcahua Toteco quichihuaj, huan quej quichihua Pedro huan iicnihua Tohueyiteco Jesús? ⁶ ¿O huelis anmoilhuíaj para san Bernabé huan na amo tijpiyaj tequiticayot para tijcahuase totequi cati ica tipanotiyahuíaj para timopanoltise ica ofrendas ten itequi Toteco?

⁷ ¿Taya soldado monequi quichihuas seyoc tequit para quiixtahuas itacualis? ¿Ajquiyá quitoaca xocomecat ipan imil huan teipa amo quiapiya tequiticayot quicuas? ¿Ajquiyá quinmocuitahuía chivojme huan amo quiapiya tequiticayot quii inilechi? ⁸ Amo san niqijtohua ni pampa quej nopa nimoilhuía, pero itanahuatil Moisés nojquiya quej nopa quijjtohuaj. ⁹ Ijcuilijtoc ipan itanahuatil Moisés campa quijjtohua: “Amo xijcamaílpi nopa huacax cati ipan moquejquetza trigo para quiyolquixtis.” ¿Anmoilhuíaj Toteco techmacac ni camanali pampa moilhuiyaya san ten huacaxme huan ten quicuaj? ¡Amo cana! ¹⁰ Yaya moilhuiyaya nojquiya ten tojuanti cati tiitequiapanojcahua. Quena, Toteco quiita para quinamiqui se cati tapoxonía ipan mila, o se cati pixca, ma tequití cuali pampa quimati quiselis se parte ten nopa pixquisti. Huan quinamiqui para tojuanti tiitequiapanojcahua, ma tijselica cati ica tipanose ten nopa masehualme cati tiinquinpalehuíaj. ¹¹ Tojuanti tijtoctoque icamanal Toteco campa amojuanti huan ya nopa cati tahuel monequi para amotonaltizti, huajca amo se hueyi tamanti sinta antechmacasquíaj ten ica tipanose. ¹² Sinta quinamiqui anquinmacase

nopa sequinoc cati amechmachtíaj cati ica panose, achi más quinamiqui antechmacase tojuanti.

Pero masque tijpiyaj tequiticayot para tijselise cati techpolohua, amo tijtequihuijtoque nopa tequiticayot. San tiquiyohuíaj, huan amo timechilhúaj quema techpolohua cati monequi. Tijchihuaj ya ni pampa amo tijnequij tijchihuase yon se tamanti cati huelis quitzacuilis nopa cuali camanali ten Cristo. ¹³ ¿Amo anquimatij nopa israelitame cati tatequipanohuaj ipan ichaj Toteco ica nopa tamanti cati tatzejtzeltollique, quicujaj nopa tacualisti cati masehualme quihuicaj ipan itioipa Toteco? Nojquiya cati tatequipanohuaj nepa iixpa nopa taixpamit, quicujaj ten nopa tacajcahualisti cati masehualme temacaj ipan taixpamit. ¹⁴ Quej nopa nojquiya Toteco quisencajtoc para tojuanti cati titepohuilíaj icamanal Toteco ma tijselica cati ica tipanose ten nopa masehualme cati icamanal quinpalehuijtoc.

¹⁵ Pero amo nijtequihuijtoc yon se ten ni tequiticayot cati itequipanojcahúa Toteco quipiyaj. Huan amo nimechtajcuilhúia ya ni para nimechtajtanis techpanoltica. Nechmaca miyac paquilisti para nitepohuilis icamanal huan amo teno nijselia ten cati quicaquij. Iyoca nitequiti para nijpiyas cati nechpolohua. Huan nijnequisquía nimiquis sinta se masehuali nechzacuilisquía para ma ayecmo nimopanolti noselti.

¹⁶ Amo hueli nimohueyimatis pampa nitepohuilía icamanal Toteco pampa yaya Toteco nechtequimacac huan nechilhui ma nijchihua. Nelía niteicnelti na sinta amo nitepohuilis icamanal. ¹⁷ Sinta nitepohuilis icamanal san ica nopaquilis, nijselis notaxtahuil. Pero masque amo nijnequisquía, noja monequi nitepohuilis icamanal, pampa Toteco quitali nomaco ni tequit huan monequi nijchihuas. ¹⁸ Huan ¿taya taxtahuili nijselia? Notaxtahuil eltoc nopa paquilisti cati nijpiya pampa amo aqui monequi taxtahuas cati ica nipanós quema nitepohuilía icamanal, masque nelía nijpiya tequiticayot para sequinoc nechpanoltisquíaj pampa niitequipanojca Toteco.

¹⁹ Masque nimajcajtoc huan amo niaxca yon se masehuali cati nechcojtoc para ma nieli niitequipanojca, na nimochijtoc niimintequipanojca nochi masehualme para huelis niquintanis más masehualme para Cristo. ²⁰ Quema niitztoc inihuaya sequinoc israelitame, nimochihua quej se ten injuanti para huelis niquintanis para Cristo. Quema niitztoc inihuaya cati quintoquilíaj itanahuatil Moisés, san se nijchihua. Quena, masque nopa tanahuatilme ayecmo quipiyaj tequiticayot ica na, ica nopaquilis niquintoquilía para huelis niquintanis masehualme cati quintoquilíaj nopa tanahuatilme. ²¹ Quema niitztoc inihuaya masehualme cati amo quinmatij itanahuatil Moisés, amo nicamanalti quej se cati quinmati. Pero amo nijchihua tamanti cati amo cuali cati itanahuatil Toteco techilhúiaj ma amo tijchihuaca. San nijtoquilía nopa tanahuatili cati Cristo techmacatoc para huelis niquintanis para Cristo nopa masehualme cati amo quinmatij itanahuatil Moisés. ²² Quema niitztoc inihuaya masehualme cati sequinoc quintajyohuiltíaj pampa amo quipiyaj chichahualisti, nimochihua quej se cati amo quipiya chichahualisti para huelis niquintanis para Cristo. Huan san se nijchihua ica nochi masehualme. Miyac nimoyolilhuía quenicatza nimochihuas ica sese masehuali hasta campa nihueli para ica ni ojti, o ne ojti huelis niqunpalehuis sequij para ma momaquixtica. ²³ Huan nochi ya ni nijchihua para ma momahua nopa cuali camanali, huan para huelis na nijselis nojquiya nopa tatiochihualisti cati icamanal temaca.

²⁴ Campa masehualme motalohuaj para quitiase ajquiya tatanis, masque miyaqui tacame motalohuaj, san setzi quitanis nopa taxtahulli cati quitencajtoque quimacase nopa tatanquet. Huajca amojuanti nojquiya xitequica chichahuac ipan Toteco para antatanise. ²⁵ Nochi masehualme cati motalohuaj miyacapa para quitiase ajquiya tatanis, nelia monahuatíaj huan quicahuaj miyac tamanti cati hueli quinquixtilis inintetilis. Quej nopa quichihuaj pampa quinequij quitanise nopa xochi yahuali masque teipa nopa xochi corona pilinis. Pero ica tojuanti, titequitij chichahuac ipan itequi Toteco pampa yaya techmacas se corona cati amo quema pilinis. ²⁶ Huajca na nimochihua quej se cati motalohua xitahuac hasta campa ontami ojti. Quej se cati itequi para tatehuis miyacapa, quichihua ica nochi ichichualis, na nitequiti ica nochi noyolo quema nijchihua itequi Toteco. ²⁷ Quej cati tatehuia quichihua para itacayo ma eli tetic, na nijnahuatia notacayo huan nijchihua ma eli notequipanojca. Niquinilhuitoc miyaqui masehualme quenicatza ma quitoquilica ipaquilis Toteco, huan amo nijnequi nijchihuas se tamanti cati amo senquisa cuali huan quichihuas para amo hueli nijselis cati Toteco quitencajtoc para quimacas nopa tatanquet.

10

Pablo quinconsejomacac

¹ Noicnihua, amo xiquelchahuaca ten panoc ica tohuejcapan tatahua cati itztoyaj ihuaya Moisés huecayquiya. Toteco quinyacanqui ica se mixti cati tayacantiyajqui iniixmelac. Huan nojquiya quintapohuilli nopa hueyi at para nochi huelque panoque ipan se ojti huactoc. ² Huan ipan nopa mixti huan nopa hueyi at, nochi nopa masehualme mochijque san se ica Moisés cati ipan motemachijque para quitoquilise quej quema timocuaaltíaj tijnextíaj para tijtoquilíaj Toteco. ³ Nochi inijuanti quicaujque san se nopa tacualisti cati Toteco quichijqui ma huetzi ten ilhuicacti ica se tiotchichualnescayot. ⁴ Nochi quique ten san se nopa at cati Toteco quichijqui ma quisa iijtic nopa hueyi tet ica se tiotchichualnescayot. Huan nopa tet eliyaya Cristo cati nejnenqui inihuaya tohuejcapan tatahua campa hueli yajque. ⁵ Pero masque Toteco quintiochijqui miyac, nechca nochi inijuanti quichijque tamanti cati amo quipacti. Huan yeca Toteco quinchihualti ma miquica ipan nopa huactoc tali campa amo teno eli.

⁶ Huan nochi ni tamanti panoque para elis se ejemplo para tojuanti para technextilis ma amo tijnequica tamanti cati amo cuali quej inijuanti quinequiyayaj. ⁷ Yon ma amo tiqinhueyimatica teteyome huan taixcopincayome quej sequij ten inijuanti quichijque, pampa ijcuilijtoc ipan Icamanal Toteco campa quijtohua: "Inijuanti ilhuichijque ica hueyi tacualisti huan miyac taili, huan teipa mijtotijque huan ten hueli quichijque cati amo cuali huan mopaquilismacaque inixpa taixcopincayome." ⁸ Nojquiya ma amo tijchihuaca ten hueli ica cati amo totahuacal quej sequij ten inijuanti quichijque huan Toteco quichijqui ma miquica veintitres mil ten inijuanti ipan se tonal. ⁹ Yon ma amo tijjejyecoca Toteco para tiquitase taya quichihuas quej sequij ten inijuanti quichijque huan cohuame quintzacanjque huan miyac mijque. ¹⁰ Nojquiya ma amo tijtaijilhuica Toteco quej sequij ten inijuanti quichijque huan Toteco quititanqui iilhuicac ejca cati temictia huan yaya quimicti.

¹¹ Nochi ni tamanti quinpanoque para elise ejemplos para tojuanti huan ijcuilijtoc para techmachtis cati tiitztoque ama ipan ni itamiya tonali.

¹² Huajca amojuanti cati annoilhuíaj annoquetztoque cuali huan antetique

ipan Toteco, ximotachilica para amo xihuetzica ipan tajtacoli. ¹³ Amo quema amechyoltlantoc yon se tajtacoli cati amo quinyoltlantoc sequinoc masehualme. Pero Toteco, yaya temachti, huan amo quicahuilis ma amechyoltlana se tajtacoli hasta campa ayecmo huelis anquiiyohuise. Nochipa ipan nopa talojtzi amechnextilis quenecatza huelis anholose para amo antajacolchihuase.

¹⁴ Huajca noicnihua cati nimechicnelía, xicholoca ten campa masehualme quinhueymatij teteyome huan taixcopincayome. ¹⁵ Amojuanti cati nimechcamanalhuía, antalnamiqij, huajca ximoilhuica sinta cuali nocamanal cati ama nimechilhuis o amo. ¹⁶ Quema tojuanti tijtjantíaj Toteco ma quitiochihua nopa taza ipan itacualis Toteco, ¿amo titenextilíaj tijpiyaj toparte ipan Cristo cati quitoyajqui ieso por tojuanti? Huan quema tijtapanaj nopa pantzi, ¿amo titenextilíaj para tijpiyaj toparte ipan Cristo cati temacac itacayo para miquis por tojuanti? ¹⁷ Huan nochi tijcuaj ten san se pantzi ipan nopa tacualisti huan ya nopa quinequi quiiytos masque timiyaqui, tiitztoque partes ten san se tacayot, ya nopa cati itacayo Cristo.

¹⁸ Ximoilhuica ten nopa israelitame. Inijuanti cati quipixque caquiuhili para quicuase ten nopa tacajcahalisti cati quitencajque ipan itaixpa Toteco, quinextiyayaj para inijuanti san sejco nojquiya itztoyaj iaxcahua Toteco cati iaxca nopa taixpamit. ¹⁹ ¿Huajca taya nimechilhúa ica ya ni? Amo ximoilhuica para nimechilhúa para nelía itztoque nopa taixcopincayome, yon amo nimechilhúa quiapiya chichahualisti nopa tacajcahalisti cati masehualme quitálíaj iixpa se teteyot, pampa amo cana. ²⁰ Pero nijnequi nimechilhuis para quema masehualme cati amo quineltocaj Toteco temacaj tacajcahalisti, melahuac quinmacaj tacajcahalisti iajacahua Amocualtcat. Amo quimacaj Toteco Dios nopa tacajcahalisti. Huan amo nijnequi xijpiyaca yon se parte ica ajacame. ²¹ Amo hueli anquiise ipan nopa taza cati iaxca Toteco huan nojquiya anquiise ipan nopa tazas cati eltoque inixpa ajacame. Amo hueli anquipyase se parte ica cati eltoc ipan imesa Toteco ipan itacualis huan nojquiya anquicuase cati eltoc ipan inimesa ajacame huan anquipyase se parte inihuaya. ²² Amo ximoilhuica para cuali anquichihuase cati ica cualanis Toteco amohuaya. ¿Anmoilhuíaj para anitztoque más antetique que Toteco huan huelis anquichihuase para amo amechtatzacuiltis?

Ma tiquinicnelica sequinoc

²³ Quena, ayecmo techzacuilíaj tanahuatilme cati technahuatíaj ma amo tijchihuaca se tenijqui, pero sequij tamanti amo techpalehuía. Huan masque ayecmo techzacuilíaj tanahuatilme, onca miyac tamanti cati amo techmaca más tetili ipan Toteco. ²⁴ Amo aquí ma quitemo san cati cuali para ya iselti, pero ma tijchihuaca cati quinpalehuis sequinoc.

²⁵ Huajca xijcuaca nochi cati quinamacaj ipan tianquis huan amo aquí xijtatintzoquica sinta quitaltijtoyaj nopa nacat iixpa se teteyot o amo, para amo anquimatise, ²⁶ pampa ni taltipacti iaxca Toteco ihuaya nochi cati ipani eltoc huan nochi tamanti yaya techmacatoc para tijtequihuise.

²⁷ Nojquiya sinta se cati amo quineltoca Toteco amechnotzas para xitacuatij ihuaya huan anquinequij anyase, huajca xiyaca. Huan xijcuaca nochi cati amechmacas huan amo teno xijtatintzoquica ten nopa tacualisti para amo anquimatise huan amo amechyolcocos. ²⁸ Pero sinta se amechilhuis para nopa nacat achtohui eltoya se tacajcahalisti para nopa taixcopincayome, huajca amo xijcuaca para amo anquicocose yaya cati amechilhuijtoc, yon amo anquicocose iyolo. Xiquelnamiqui para ni taltipacti huan nochi

cati eltoc ipani nelía iaxca Toteco. ²⁹ Huelis amojuanti amo anquicocosquíaj amoyolo sinta anquicuasquíaj, pero niquijtohua anquiylcocosquíaj ne seyoc tacat pampa moilhuis ipan iyolo para amo cuali cati anquichihuaaj quema anquicuaaj.

Huelis seqij ten amojuanti anmoilhúaj: “¿Para ten seyoc masehuali quijtos amo nijchihua cati cuali huan moyolcocos quema nijchihua se tenijqui cati nijpiya caquihuili nijchihuas? ³⁰ Huan sinta nijtascamati Toteco por nopa cati nechmacatoc ma nijcua, ¿para ten nechtatelhuis seyoc por nopa cati nijcua, sinta tijtascamatqui Toteco por nopa tacualisti?”

³¹ Pero nimechilhuía, ica nochi cati anquicuaaj, o anquij, o nochi sequinoc tamanti cati anquichihuaaj, monequi xijchihuaca nochi para ihueyitilis Toteco. ³² Amo teno xijchihuaca cati quiyoltilanas ma tajtacolchihua se israelita, o se cati amo israelita, o cati hueli masehuali cati quineltoca Toteco huan itztoc ipan itiopa. ³³ Huajca xijchihuaca quej na nijchihua. Nijnequi nijchihuas cati quinpactis nochi masehualme. Amo nijchihua cati quisas cuali san para na. Nijnequi ma quisas cuali para miyac masehualme para injuanti ma quineltocaca Cristo cati quinmaquixtis ten inintajtacolhua.

11

¹ Huajca xijchihuaca quej na nijchihua pampa na nijchihua nochi cati nihueli para nijchihuas cati Cristo quichijqui.

Sihuame ipan tasentilisti

² Noicnihua, nipaqui pampa nijcaqui antechelnamiqij ica cuali huan anquitoquílíaj nopa tamachtili cati nimechmachtijtoc. ³ Pero onca se tamanti cati nijnequi nimechilhuis para xijmachilica. Se tacat quiyiya tequiticayot ica isihua o itztoc itzonteco quej Cristo quiyiya tequiticayot ica nochi tacame, huan quej Toteco Dios quiyiya tequiticayot ica Cristo o huelis tiquijtose Toteco itzonteco Cristo. ⁴ Sinta se tacat motatajtía ica Toteco ipan tasentilisti o camanalti icamanal Toteco huan quicpahujtoc itzonecahul, huajca amo quinextía sinta quitepanita Cristo. ⁵ Pero sinta se sihuat motatajtía ica Toteco ipan tasentilisti o tamachtía camanali cati Toteco quimacatoc huan amo motzontactoc, huajca amo quinextía sinta quitepanita ihuehue. Eltoc quej moxintoc nopa sihuat. ⁶ Huajca sinta se sihuat amo quinequi motzontzacuas, ma moxima. Pero sinta pinahua para moximas, ma motzontzacua. ⁷ Amo cuali para se tacat motzontzacuas quema amosentilíaj, pampa Toteco quinchijtoc tacame quej ya iixcopinca huan tacame quinextíaj Toteco ihueyitilis, pero se sihuat tenextilía ihuehue ihueyitilis. ⁸ Pampa quema Toteco quichijqui nopa achtohui tacat, Adán, yaya amo hualajqui ipan se sihuat, pero nopa achtohui sihuat, Eva, hualajqui ipan nopa tacat. ⁹ Huan Toteco amo quinchijchijqui tacame para quinpalehuise sihuame, pero quinchijchijtoc sihuame para quinpalehuise tacame. ¹⁰ Huajca monequi se sihuat ma motzontzacua para quinextis iniixpa ilhuicac ehuan para ihuehue quiyiya tequiticayot ica ya.

¹¹ Pero masque eltoc quej nopa, nochi tojuanti tiitztoque san se ipan Jesucristo, huan yon tacame, yon sihuame amo hueli mohueyimatise quej achi huejhueyi. ¹² Huan masque melahuac nopa achtohui sihuat quisqui ipan itacayo nopa tacat, teipa sihuame quintacatiltíaj nochi tacame, huan yaya Toteco cati techchijchijqui nochi tojuanti.

¹³ Huajca ximoilhua, amojuanti. ¿Cuali para se sihuat motatajtis ica Toteco, sinta amo motzontactoc? ¡Amo! ¹⁴ Ipan amoyolo anquimatij para

nelía tepinajti sinta se tacat sinta quipiyas huehueyac itzoncal, ¹⁵ pero quema se sihuat quipiya itzoncal huehueyac, huajca se paquilisti huan yejectzi para ya pampa Toteco quimacatoc itzoncal para ica ya nopa ma motzontzacua. ¹⁶ Pero sinta sequij quinequij monajnanquilese ica ni camanali, ma quimataca para tojuanti san ya ni titamachtíaj. Nojquiya san quej ni quichihuaq nochi sequinoc toicnihua ipan itipahua Toteco cati mosentilíaj campá hueli.

Quichihuayayaj cati amo cuali ipan itacualis Toteco

¹⁷ Pero monequi nimechilhuis seyoc tamanti cati amo nechchihua ma nipaqui amohuaya ica cati anquichihuaq. Nijcaqui amo amechpalehuía quema anmosentilíaj, san achi más amechnenpolohua. ¹⁸ Pampa nijcaqui quema anmosentilíaj, anmotajcoitziyahuij, huan ica quentzi nijneltoca para melahuac. ¹⁹ Ya nopa cuali, para ma nesi ajquiya injuanti nelía quichihuaq cati quipactía Toteco. ²⁰ Huajca sinta anmotajcoitaj quema anmosentilíaj, ya nopa amo anquicuaq Toteco itacualis, ²¹ pampa nijcaqui miyac ten amojuanti anmotayacanalíaj huan anquitalochcuaj cati anquihualica-toque ipan nopa tacualisti cati achtohui onca. Yon amo anquichiyaj para ma ajsica sequinoc taneltocani para anquixelose cati anquihualicaque ica nochi. Huajca sequij cati teipa ajsij amo teno quiselíaj huan mayanaj. Huan sequinoc cati cualca ajsique moixhuitíaj huan hasta moihuintíaj. ²² ¿Amo anquipiyaj amochajchaj campá huelis antacuase huan antaise? ¿Para ten anquimacaj pinahualisti itiopa Toteco huan anquinpinahualíaj amoicnihua cati teicneltziti huan cati amo teno quipiyaj para quihualicase? ¿Anmoilhuáj para na nipaqui ica cati anquichihuaq? ¡Amo! ¡Ica ya ni, amo nipaqui!

Itacualis Tohueyiteco

(Mt. 26:26-29; Mr. 14:22-25; Lc. 22:14-20)

²³ Pampa elqui yaya Tohueyiteco cati nechnextili nopa cati nimechmachtitoc ten itacualis, huan ya ni cati nimechilhuijtoc. Tohueyiteco Jesús quiitzqui se pantzi ipan nopa tayohua quema Judas quitemactili, ²⁴ huan quema quitascamatqui iTata, quitajcoitac, huan quinilhui imomachtijcahua: “Xijcuica ten ni pantzi huan xijcuaca. Ni notacayo cati nitemacas quema nimiquis por amojuanti. Xijchijtiyaca ni para antechelnamiquire na.” ²⁵ San se Tohueyiteco Jesús quichijqui ica nopa taza. Quema injuanti ya tantoya tacuaj ica tiotac, quiitzqui se taza ica xocomeca at huan quiijto: “Ni taza tenextilía noeso cati nijtoyahuas para quipehualtis nopa yancuic camanal sencahuali cati Toteco quichihua ica masehualme. Quema anquitiyase ipan se taza quej ni, xijchihuaca pampa anquielnamiquise nimijqui por amojuanti.” ²⁶ Huan nochipa quema anquicuase ni pantzi huan anquiise ni xocomeca at, anteyolmelahuase para Tohueyiteco mijqui por tojuanti huan quej nopa monequi xijchijtiyaca hasta yaya sempa huas.

Quenicatza monequi quicuase Itacualis Tohueyiteco

²⁷ Huajca sinta se quicuas nopa pantzi o quiiis ten nopa taza ipan nopa tacualisti cati Toteco technextilijtoc, huan amo quichihua quej quinamiqui, yaya quihuicas tajtacoli pampa tajtacolchihuas ica ieso huan itacayo Tohueyiteco. ²⁸ Huajca achtohui monequi sese masehuali ma moyoltachili para momacas cuenta sinta eltoc cati amo cuali ipan iyolo. Huan quema quimatis para amo teno cati amo cuali eltoc ipan iyolo, ma quicua nopa pantzi huan ma quii ten nopa taza quej quinamiqui. ²⁹ Pampa Toteco quitatzacuiltis cati hueli masehuali sinta quiiis huan quicuas itacualis Toteco

huan amo moyolilhúa para nelía hueyi ipati itacayo Tohueyiteco huan cati yaya techchihuilijtoc. ³⁰ Yeca miyac ten amojuanti ama amo anquipiyaj tetili, huan anmococohuaj, huan hasta sequij ya mictoque pampa Toteco amechtatzacuilitía. ³¹ Pero sinta cuali timoyoltachilise huan amo tijcuase ica tajtacoli ipan toyolo, huajca Toteco amo techtatzacuilitis. ³² Quema Toteco techtatzacuilitía, techxitahua para ma timoyolpataca huan ma amo tijselica tatzacuilitisti ica sequinoc masehualme ten ni taltipacti.

³³ Huajca noicnihua, quema anmosentilise para anquicuase nopa tacualisti cati Toteco technextilijtoc, ximochiyaca se ica seyoc. ³⁴ Huan sinta se nelía mayana, ma tacuajtehua ichaj para amo antajtacolchihuase quema anmosentilíaj. Huan ica nopa sequinoc tamanti cati antechtajtanijoque, nijsencahuas nochi quema niajsiti nozona campa amojuanti.

12

Yajatili cati Itonal Toteco quimaca sesen taneltocaquet

¹ Huan ama noicnihua, nijnequi nimechilhuis se quentzi ten nopa tamanti yajatili cati Itonal Toteco quinmaca taneltocani pampa nijnequi achi más cuali xijmachilica.

² Ya anquimatij quema ayemo anquineltoayayaj Tohueyiteco, anquinhueyimatiyayaj taixcopincayome cati amo huelij camanaltij huan anquintoquiliyayaj nopa taixcopincayome campa hueli huan san anmocupolotjinemiyayaj. ³ Yeca ama nijnequi nimechilhuis quenicatza anquinxmatise masehualme cati nelía camanaltij ica ichicahualis Itonal Toteco huan inijuanti cati san quinequij amechcuapolose. Xijmatica para yon se cati camanalti ica ichicahualis Itonal Toteco huelis quiiijos para tatelchihuali Jesús. Huan yon se amo huelis quiiijos para Jesús itztoc Tohueyiteco sinta amo camanalti ica ichicahualis Itonal Toteco.

⁴ Onca miyac tamanti yajatili o talnamiquilisti cati masehualme quiselíaj para huelis quichihuase itequi Toteco. Pero itztoc san se Itonal Toteco cati temaca nochi nopa yajatili cati taneltocani quiselíaj. ⁵ Onca miyac tamanti tequit ica cati huelis tijtequipanose Tohueyiteco, pero itztoc san se Tohueyiteco cati tijtequipanohuaj. ⁶ Toteco tequiti ipan inemilis sesen taneltocaquet quej quiiita cuali para ya, pero san se Toteco cati quichihua itequi ica nochi tojuanti.

⁷ Huan Itonal Toteco quinextía para itztoc ipan sesen taneltocaquet pampa quimaca nochi nopa yajatili cati monequi para ica quinpalehuis nochi sequinoc taneltocani. ⁸ San se Itonal Toteco quinmaca sequij taneltocani camanali cati quipiyaj miyac talnamiquilisti, huan sequinoc quinmacatoc camanali cati quipiya miyac tamatilisti. ⁹ San se Itonal Toteco quinmacatoc sequij masehualme nopa yajatili para ma quipiyaca miyac taneltoquili huan quinmacatoc sequij nopa yajatili para ma quinchicahuaca cocoyani. ¹⁰ Huan Itonal Toteco quinmacatoc sequij nopa chichahualisti para quichihuase tichichahualnescayot. Sequij quinmacatoc yajatili quej tajtolpanextiani para camanaltise icamanal Toteco. Sequij masehualme quiselíaj yajatili para quimatise sinta Itonal Toteco quinmacatoc se tacat icamanal o sinta se iajacayo Amocualtacat quinmacatoc. Sequij taneltocani quiselíaj yajatili para camanaltise camanali cati amo momachtijtoque. Huan sequinoc quiselíaj yajatili para teyolmelahuase cati quiiijtohuaj inijuanti cati camanaltij ica camanali cati amo momachtijtoque. ¹¹ Pero itztoc san se Itonal Toteco cati

quinmajmaca nochi ni tamanti yajatili huan san yaya quitapejpenía catijque taneltoquet ma quiseli sese yajatili.

Nochi taneltocani itztoque ipan itacayo Cristo

¹² Masque se masehuali quipiya san se itacayo, itacayo quipiya miyac partes huan nochi nopa miyac partes quipiyaj inintequi huan san sejco mochihuaj itacayo. Huan quej nopa nojquiya eltoc ica itacayo Cristo.

¹³ Itztoc san se Itonal Toteco cati techtatzquiltijtoc tojuanti cati tijneltocaj Cristo ipan itacayo. Sequij ten tojuanti tiitztoque tiisraelitame, sequinoc amo. Sequij taneltocani quipiyaj ininteco ipan ni taltipacti cati quincojtoc para iaxca, sequinoc amo, san majcajtoque, pero nochi tojuanti tijselijtoque san se Itonal Toteco ipan toyolo.

¹⁴ Itacayo se masehuali amo san se tamanti quipiya, pero quipiya miyac.

¹⁵ Huan ¿taya panos sinta se iicxi se masehuali huelisquía camanaltis huan quijijosquía: “Na amo niimax ni masehuali, huajca amo nise parte ten itacayo”? Cati quijijosquía ya ni amo teno quipatasquía pampa iicxi nopa tacat noja mocahuasquía se parte ipan itacayo. ¹⁶ Huan nojquiya amo teno mopatas sinta se inacas quijijosquía: “Na amo niixteyol ni masehuali, yeca amo nise parte ten itacayo.” Pampa masque quej nopa moilhuisquía inacas, noja mocahuasquía se parte ipan itacayo. ¹⁷ Huan sinta campa hueli ipan itacayo se masehuali quipixtosquía senquisa iixteyolhua, huajca ¿quenicatza tacaquisquía? O sinta campa hueli quipixtosquía senquisa inacashua, huajca ¿quenicatza taijnecuisquía? ¹⁸ Pero amo quej nopa. Toteco quichijqui totacayo ica miyac tamanti huan sesen parte quitali campa yaya quinejqui. ¹⁹ Sinta se masehuali quipiyasquía senquisa iicxihua, ¿quenicatza tiqijjotose quipiya itacayo? ²⁰ Pero Toteco quisencajtoc para tijpiyase miyac partes ipan totacayo, pero san se totacayo tijpiyaj.

²¹ Huan iixteyol se masehuali amo huelis quihuis imax: “Ta amo timonequi”, yon itzonteco amo huelis quihuis iicxi: “Ta amo timonequi”.

²² ¡Amo! Pampa nochi tamanti ipan totacayo tahuel monequi, huan achi más monequi nopa partes cati nesi para amo tetic huan amo más ipati quej ne sequinoc. ²³ Nopa partes ipan totacayo cati timoilhuíaj amo senquisa cuali, achi más tiquinmocuitahuíaj. Huan nopa partes cati amo cuali para ma tiquinnextica, achi más tiquinoyontíaj. ²⁴ Huan nopa tamanti cati cuali monextíaj, amo más tiqintzacuaj. Huajca Toteco quisencajtoc totacayo para achi más tiquinmocuitahuse nopa partes cati timoilhuíaj quipolohuaj. ²⁵ Quichijqui ni pampa amo quinejqui ma moxelot totacayo. Quinequi sesen parte ma quimocuitahui nopa sequinoc partes. ²⁶ Sinta se parte mococohua, huajca nochi partes taijyohuíaj ihuaya. Huan sinta se parte ipan totacayo quiselía se tatepanitali, nochi partes ipan totacayo paquij.

²⁷ Ama anitztoque itacayo Cristo huan sese amojuanti anitztoque quej se tamanti ten itacayo cati tahuel monequi. ²⁸ Huan ipan itacayo Cristo, o itiopa, Toteco techmacatoc totequi sesen ten tojuanti. Achtohui quin-tequimacac tayolmelahuani huan, teipa tajtolpanextiani. Teipa quin-tequimacac tamachtiani huan teipa cati quipiyaj yajatili para quichihuase tiotchahualnescayot. Teipa quin-tequimacac cati quipiyaj yajatili para quin-chihuase cocoyani, huan teipa cati quipiyaj yajatili para tepalehuise. Teipa quin-tequimacac cati quipiyaj yajatili para tayacanase ipan nochi tamanti cati quichihua itiopa. Huan teipa quin-macac sequij nopa yajatili para camanaltise sequinoc camanali cati amo momachtijtoque.

²⁹ Pero xijmachilica, amo nochi quipiyaj nopa tequit quej tayolmelahuani. Amo nochi tajtolpanextiani. Amo nochi tamachtiani ten Icamanal Toteco. Amo nochi huelij quichihuaaj tiochicahualnescayot. ³⁰ Amo nochi huelij quinchicahuaaj cocoyani. Amo nochi huelij camanaltij sequinoc camanali cati amo momachtijtoque. Amo nochi huelij teyolmelahuase cati quijjtosnequi nopa camanali cati sequinoc quijjtohuaj. ³¹ Pero sinta anquite-mohuaaj se yajatili ten Itonal Toteco, huajca ica nochi amoyolo xijnequica nopa tamanti yajatili cati achi más quinpalehuía sequinoc. Pero ama nimechilhuis ten seyoc ojti cati noja más cuali para anquitoquilise.

13

Taicnelijcayot

¹ Masque nihuelisquía nicamanaltisquía camanali cati masehualme huan ilhuicac ehuani camanaltij, amo teno nopati sinta amo niteicnelía. Quema nicamanaltisquía nopa camanali elisquía quej san nitamborhuijhuitequi o niteposhuijhuitequi. ² Masque nijpiyasquía yajatili para nicamanaltisquía camanali ten Toteco quej se tajtolpanextijquet, huan masque nijmatisquía nochi cati ohui huan masque nijpiyasquía miyac taneltoquili hasta nihuelisquía niquilhuisquía se tepet ma mijcueni huan nelía mijcuenisquía, sinta amo niteicnelía, amo teno nopati. ³ Masque nitemasquía nochi cati nijpextoc para oncas inintacualis teicneltziti, o masque nitemasquía notacayo para ma quitatica, sinta amo niteicnelía, amo teno nechpalehuisquía iixpa Toteco.

⁴ Se cati teicnelía quipiya iyolo inihuaya sequinoc huan quinchihuilía cati cuali. Yaya amo quinequi cati sequinoc quipiyaj. Amo mohueyimati, yon amo momachilía achi cuali que sequinoc. ⁵ Se cati teicnelía moyolilhuía achtohui quema tananquillía. Amo camanalti san quej hueli. Amo itzcuimit huan amo yolquentzi. Yon amo quichihuilía cuenta quema seyoc quichihuilía cati amo cuali. ⁶ Cati teicnelía amo quema paqui ica cati amo cuali, san paqui ica cati melahuac. ⁷ Se cati teicnelía quijyohuía nochi tamanti cati huala, huan motemachía para ajsis cati cuali. Nochipa quichiya para sequinoc ma quichihuaca cati cuali, huan mocahua temachtí masque ten hueli quipanotihuala.

⁸ Taicnelijcayot nochipa eltos huan amo quema tamis. Pero ajsis hora quema masehualme ayécmo camanaltise camanali cati Toteco quinmacas quej quichihuaaj tajtolpanextiani. Ajsis hora masehualme ayecmo camanaltise camanali cati amo momachtijtoque. Ajsis hora quema Itonal Toteco ayecmo quinmachiltis masehualme cati ohui. ⁹ Ama san se quentzi tijmatij, huan quema se camanalti icamanal Toteco quej se tajtolpanextijquet, san huelis camanaltis se quentzi. ¹⁰ Pero quema hualas cati senquisa cuali, nochi cati pilquentzi tamis.

¹¹ Quema niitztoya niconetzi nicamanaltiyaya quej se conet, nimoilhuiyaya quej se conet, huan nijmachiliyaya tamanti quej se conet. Pero quema nimotacachijqui, niquiyocajqui nopa tamanti cati coneme quichihuaaj. ¹² San se ica tojuanti. Ama eltoc quej tijtachilíaj Toteco ipan se tescatampa tzintayohua huan amo hueli tiquitaj cuali, pero teipa quema yaya sempa hualas, timoixtachilise. Amantzi niquixmati se quentzi, pero teipa niquixmatis senquisa quej Toteco senquisa nechixmati. ¹³ Huajca onca eyi tamanti cati huejcahuase. Monequi tijpiyase taneltoquili. Monequi timotemachise para panos nochi cati Toteco quijjto panosquía, huan monequi

titeicnelise, pero nopa cati más hueyi ipati ten ni eyi tamanti eltoc ya ni, monequi titeicnelise.

14

Masehualme cati camanaltique ica sequinoc camanali

¹ Huajca achi más xijchihuaca fuerza xiquinichelica sequinoc, pero no-juqiya xijnequica miyac para xijselica se yajatili cati Itonal Toteco temaca. Huan achi más xijnequica para Itonal ma amechmaca yajatili quej se tajtolpanextijquet para ancamanaltise icamanal Toteco. ² Pampa se cati quipiya yajatili para camanaltis ica seyoc camanali cati amo momachtijtoc, quicamanalhuía Toteco, pero amo quincamanalhuía masehualme pampa masehualme amo hueli quimachilíaj. Yaya san camanalti tamanti cati ixtacatzí cati Itonal Toteco quimacatoc para ma quijito. ³ Pero se tajtolpanextijquet camanalti icamanal Toteco huan quinpalehuía masehualme para ma moscaltica ipan Toteco, huan quinfuerzajmaca huan quinyolchicahua taneltocani. ⁴ Huajca se cati camanalti ipan seyoc camanali, mopalehuía iselti para achi más quineltoacas, pero se cati camanalti para Toteco, quinpalehuía nochi nopa tiopamit ten taneltocani para achi más quineltoacas Tohueyiteco.

⁵ Na nipaquisquía sinta nochi amojuanti anhuelisquíaaj ancamanaltise ica sequinoc camanali, pero achi más nipaquisquía sinta anquipiyasquíaaj yajatili quej se tajtolpanextijquet para ancamanaltisquíaaj para Toteco, pampa achi más ipati se cati camanalti para Toteco que se masehuali cati camanalti seyoc camanali sinta amo aquí hueli quixtomas cati quijitohua para huelis quinpalehuis ma moscaltica nochi nopa tiopamit ten taneltocani. ⁶ Noicnihua, sinta niyasquía campa amojuanti huan nicamanaltisquía ica seyoc camanali cati amo anquimachilíaj, ¿quenicatza nimechpalehuis? Pero quena, nimechpalehuis sinta nimechilhuis nopa cati Toteco nechnextijtoc, o nimechmachiltis achi más cati melahuac, o nicamanaltis icamanal Toteco cati yaya nechmacatoc, huan nochi nimechilhuisquía ipan amocamanal cati anquimachilíaj.

⁷ Nimechmacas se ejemplo. Sinta se tapitza o tatzotzona, huan amo aquí hueli quimachilía taya huicat quitzotzona, huajca san tapic. ⁸ Huan ipan se tatehullisti sinta yaya cati tapitza amo quimati quipitzas nopa huicat para quinnotzas tacame ma mosentilica, huajca amo aquí quimatis sinta monequi mosentilise para tatehuise, o amo. ⁹ San se ica amojuanti. Sinta amo anquijitohuaj camanali cati nochi huelis quimachilise, amo aquí quimatis taya anquijitohuaj huan san tapic amocamanal. ¹⁰ Melahuac onca miyac tamanti camanali cati masehualme camanaltij ipan ni taltipacti. Huan sese camanali quipiya cati quinequi quijitoc para cati quimachilíaj. ¹¹ Pero sinta amo nihueli nijmachilía cati sequinoc quijitohuaj, cati camanaltij nechitase quej nise huejca ejquet huan na nojquiya niqunitas quej huejca ehuaní. ¹² Huajca amojuanti cati tahuel anquinequij yajatili cati Itonal Toteco temaca, xijnequica nopa tamanti yajatili cati achi más quinpalehuía sequinoc ipan itiopa Toteco para más ma moscaltica.

¹³ Sinta se hueli camanalti camanali cati amo momachtijtoc, ma quitajtani Toteco para nojquiya huelis quixtomas cati quijitotoc. ¹⁴ Pampa sinta nimotatajtía ica Toteco ica camanali cati amo nijmachilía, huajca eltoc quej notonal motatajtía pero notalnamiqulis amo teno quichihua. ¹⁵ ¿Huajca taya más cuali nijchihuas? Más cuali nimotatajtis ica notonal huan nijtequihuis

camanali cati nijmachilía. Huan nihuicas ica notonal huan nihuicas ica camanali cati nijmachilía. ¹⁶ Pampa sinta anquipaquilismacaj Toteco ica amotonal pampa ancamanaltij camanali cati amo anmomachtijtoque, nopa masehualme cati itztoque ipan tasentilisti amonechca amo huelis quijitose: “Quej nopa ma eli”, huan quihueyichihuase Toteco amohuaya, pampa amo quimachilíaj taya anquijitohuaj. ¹⁷ Huajca, masque anquitascamatij Toteco ica yejectzi ica nopa camanali cati anhuelij ancamanaltij, amo teno quin-palehuía sequinoc para ma moscaltica ipan Toteco. ¹⁸ Nijtascamati Toteco para achi más nicamanalti ica camanali cati amo nimomachtijtoc que nochi amojuanti. ¹⁹ Pero quema niitztoc ipan tasentilisti ipan tiopa, más cuali niqijitosquía san macuili camanali ica notalnamiqullis huan ica camanali cati nochi quimachilisquíaj huan niquinpalehuis sequinoc, huan amo para niqijitosquía majtacti mil camanali cati amo aqui huelis quimachilis.

²⁰ Noicnihua, amo ximoilhuica quej coneme, pampa coneme san se quentzi quimachilíaj. Cuali para xiitztoque quej coneme ica tamanti cati amo cuali, pampa coneme san pilquentzi quimatij ten cati amo cuali, pero ipan sequinoc tamanti ximoilhuica quej huejhueyi masehualme cati quipiyaj cuali inintalnamiqullis. ²¹ Ipan Icamanal Toteco ijcuilijtoc campa Toteco quijito:

“Niquincamanalhuis ni nomasehualhua cati amo nechneltoque ica camanali cati amo quimachilise,

pampa elis huejca ehuan cati quincamanalhuisse nocamanal, pero masque quej nopa elis, ni masehualme amo nechchihuilise cuenta.”

Quej nopa quijito Tohueyiteco. ²² Huajca quema Itonal Toteco temaca yajatili para camanaltise sequinoc camanali, amo se tanextili para taneltocani, pero eltoc se tanextili para cati amo quineltocaj. Pero quema Itonal Toteco temacas yajatili quej se tajtolpanextijquet para se masehuali camanaltis icamanal Toteco cati yaya quimacatoc, amo elis se tanextili para cati amo quineltocaj, ya nopa para taneltocani. ²³ Huan quema nochi nopa tiopamit ten taneltocani mosentilíaj, sinta nochi camanaltise camanali cati amo aqui quimachilía, huan sinta ajsise masehualme cati amo quineltocaj Tohueyiteco, o cati amo quema hualajtoque ipan nopa tasentilisti, huajca inijuanti moilhuse para antzontapolohuaj. ²⁴ Pero sinta nochi cati camanaltij ipan tasentilisti, camanaltise icamanal Toteco ica camanali cati nochi quimachilíaj, huan calaquise masehualme cati amo quineltocaj Toteco, o cati amo quema hualajtoque ipan tasentilisti, huajca quena, quicaquise huan quimachilise para quipiyaj inintajtacolhua pampa icamanal Toteco quintelhuisquía. ²⁵ Tanemijya inijuanti quiitase cati quitatiyayaj ipan iniyolo huan quenecatza fiero moilhuyayaj. Yeca nopa masehualme cati san paxalohuaj motancuaquetzase para quihueyichihuase Toteco huan quijitose para nelía itztoc Toteco nopona amohuaya.

Ma amo camanaltica ica sempa

²⁶ Huajca noicnihua, ¿taya nimechilhuía monequi anquichihuase ipan amotasentilis? Quema anmosentilíaj, itztoque sequij cati quinequij huicase se tiohuicat ten Salmos, itztoque sequij cati quinequij tamachtise Icamanal Toteco, huan itztoque sequij cati quinequij teilhuse nochi cati Toteco quinnextilijtoc. Itztoque sequij cati quinequij camanaltise ica camanali cati amo momachtijtoque, huan itztoque sequij cati quinequij taixtomase cati quinequij quijtos nopa camanali. Cualtitoc nochi ya ni, pero monequi nochi cati anquichihuaj quinpalehuis nochi taneltocani para ma moscaltica ipan Toteco. ²⁷ Huajca sinta sequij quinequij camanaltise camanali cati amo

momachtijtoque, ma camanaltica san ome o eyi, pero amo más. Huan ma camanaltica sesentzitzí, huan nojquiya monequí itztos se cati quipiya yajatili para quiixomas nopa camanali para quinilhuis nochi nopa masehualme taya quijtojtoque. ²⁸ Huan sinta amo aquí hueli quinixtomilis sequinoc cati quinequí quijtos nopa camanali, huajca amo aquí ma camanalti camanali ipan se tasentilisti cati sequinoc amo quimachilíaj. Inijuanti cati quinequiyayaj camanaltise ica seyoc camanali ma amo teno quijtose ipan nopa tasentilisti ten nopa tiopamit, o inijuanti huélis motatajtise ica Toteco ipan iniyolo. ²⁹ Nojquiya san ome o eyi tajtolpanextiani ma camanaltica camanali ten Toteco, huan nochi sequinoc ma moyolilhuaica ten cati quijtohuaj huan ma moilhuica sinta Itonal Toteco nelíaj quinmacatoc inincamanal o amo. ³⁰ Pero teipa sinta itztoc seyoc cati mosehuía nopona huan Toteco quinextilíaj se tamanti para quijtos, huajca ma ayecmo molinis yaya cati camanaltiyaya achtohui. Ma quicahuili camanaltis ne seyoc. ³¹ Quej nopa, san sesentzitzí, nochi tajtolpanextiani huélis camanaltise. Huan nochi sequinoc masehualme huélise quicaquise huan quimachilise más huan nopa camanali quinyolchicahuas. ³² Pampa se tajtolpanextijquet cati quipiya yajatili para camanaltis para Toteco, hueli quinahuatíaj itonal huan mochiyas hasta quema quitocaros para camanaltis. ³³ Pampa ipan se tasentilisti, Toteco amo quinequí para nochi san ma quichihuaca ten quinequise huan tahuejchiuase san sejco. Yaya quinequí ma onca tasehuilisti huan quinequí sesentzitzí panotiyase quej tasencahuili para panos.

Huan quej quichihuaj itatzejtzeloltijca masehualhua Toteco cati mosentilíaj ipan nochi sequinoc tiopame, ³⁴ amo xiquincahuilica sihuame ma camanaltica ipan tasentilisti pampa amo quinamiqui. Monequí sihuame quincahuilise inihuehuejhua ma quinyacanaca quej quijtohuaj itanahuatil Toteco. ³⁵ Huan sinta sihuame quinequij quimatise se tamanti, ma quintatzintoquilica inihuehuejhua ipan ininchajchaj, pampa amo quinamiqui pampa se sihuat camanaltis ipan tasentilisti.

³⁶ Amo ximoilhuica para Icamanal Toteco pejqui ica amojuanti huan san amojuanti cati anquineltocaj. ¡Amo! Itztoque miyac cati quiselijoque icamanal campá hueli. ³⁷ Huajca sinta sequij ten amojuanti annoilhuíaj para antajtolpanextiani, o annoilhuíaj Itonal Toteco achi más amechyacana que sequinoc, xijmachilica para ni cati nimechtajcuilhuía nica eltoc cati Toteco tanahuatíaj. ³⁸ Huan sinta se amo quimachilíaj para ya ni cati Toteco tanahuatíaj, ma amo aquí quichihuili cuenta ya.

³⁹ Huajca noicnihua, xijnequica para Itonal Toteco ma amechmaca yajatili para anelise antajtolpanextiani para ancamanaltise para Toteco, pero nojquiya amo xiquintzacuilica cati quinequij camanaltise camanali cati amo momachtijtoque. ⁴⁰ Pero ipan tasentilisti xijchihuaca nochi quej quinamiqui huan nochi ma camanaltica sesentzitzí quej anquisencajtoque para ma pano.

15

Jesucristo moyolcuic

¹ Ama noicnihua, nijnequí nimechelnamiquiltis ten nopa cuali camanali ten Cristo cati nimechilhui achtohuiya. Anquiselijque nopa cuali camanali huan hasta ama noja anquineltocaj, ² huan ya nopa cati amechmaquixtjtoc ten amotajacolhua sinta anmotatzquilijtoque ipan nopa camanali. Sinta amo, huajca san tapic anquineltocaque.

³ Nimechilhui nopa camanali cati achi más ipati cati Toteco nechmachilti. Nimechilhui quenicatza Tohueyiteco Cristo mijqui por totajtacolhua quej quijto Icamanal Toteco para quichihuasquía. ⁴ Huan tacame quitzajque itacayo ipan se ostot ipan se tepet para mijcatzitzitzi, huan nimechilhui ica eyi tonati yaya moyolcuic quej quijto Icamanal Toteco para quichihuasquía. ⁵ Huan teipa yaya monexti ica Pedro huan teipa ica nochi nopa majtacti huan se itayolmelajcahua. ⁶ Teipa Tohueyiteco Jesucristo monexti ica quipano quinientos toicnihua san sejco. Nechca nochi nopa quinientos taneltocani noja itztoque hasta ama, pero sequij ya mijque. ⁷ Teipa Tohueyiteco monexti iixpa Jacobo, huan teipa nochi sequinoc itayolmelajcahua quitaque.

⁸ Huan hasta nelteipa, quema panotoya más miyac tonali, monexti ica na. Elqui quej amo nitacatzitzi ipan nopa tonali cati cuali huan amo niquitac quema nemiyaya nica. ⁹ Na niitztoc más nipilquentzi ten nochi itayolmelajcahua huan amo quinamiqui para nechtocaxtise niitayolmelajca Toteco quej quintocaxtiaj nopa sequinoc, pampa niquintaijyohuiliti cati itztoque ipan itiopa Tohueyiteco. ¹⁰ Pero pampa hueyi iyolo ica na, Toteco nechmacac ni itequi para nielis niitayolmelajca. Pero amo san tapic Toteco quipixqui hueyi iyolo ica na, pampa nitequititoc achi más que nochi sequinoc. Pero amo nitequiti noselti, pampa yaya Toteco cati tequiti ipan na pampa hueyi iyolo ica na. ¹¹ Huajca amo ipati sinta na cati nicamanalti icamanal o nopa sequinoc. San ipati para timechcamanalhuijque icamanal Toteco huan anquineltoaque.

Mijcatzitzitzi moyolcuise

¹² Huan tojuanti timechhyolmelajque quenicatza Cristo moyolcuic quema ya mictoya huan anquineltoaque. Huajca ama ¿para ten sequij ten amojuanti anquijtohuaj para masehualme cati mictoque amo quema moyolcuise? ¹³ Pampa sinta masehualme cati ya mictoque amo huelis moyolcuise, huajca yon Cristo amo huelosquía moyolcuitosquía. ¹⁴ Huan sinta Cristo amo moyolcuitosquía, huajca san tapic cati timechilhuijtosquíaj ten yaya huan san tapic anquineltoatosquíaj. ¹⁵ Nojquiya elisquía quej tiistacatini quema timechilhuijque ten Toteco, pampa timechilhuijtoque para Toteco Dios quiyolcuic Toteco Cristo, pero Toteco Dios amo quiyolcuitosquía sinta nelía cati mictoque amo huelis moyolcuise quej anquijtohuaj. ¹⁶ Pampa sinta inijuanti cati ya mictoque amo huelisquíaj moyolcuise, huajca yon Cristo amo moyolcuitosquía. ¹⁷ Huan sinta nelía Tohueyiteco Cristo amo moyolcuic quej anquijtohuaj, huajca san tapic anquineltoatoque huan noja anquihaicaj amotajtacolhua. ¹⁸ Nojquiya cati anquijtohuaj quinequi quijtos para taneltocani cati ya mictoque, mocuapolojtoque. ¹⁹ Huajca sinta san techpalehuía tojuanti cati timotemachiaj ipan Cristo quema noja tiitztoque huan amo teno techpalehuisquía quema timiquise, huajca achi más titeicnelti que nochi sequinoc masehualme. Pero amo, amo quej nopa.

²⁰ Nopa cati melahuac eltoc ya ni. Cristo nelía moyolcuic quema ya mictoya quej nopa achtohui pixquisti cati tenextilia para teipa oncas se hueyi pixquisti. Quena, pampa moyolcuic ya, technextilia nochi sequinoc cati mictoque nojquiya moyolcuise teipa. ²¹ Eltoc quej ni. Ica san se tacat, Adán, miqulisti pejqui ipan taltipacti, huan nojquiya ica cati quichijqui san se tacat, Jesucristo, ama masehualme hueli moyolcuise. ²² Pampa Adán tajtacolchijqui huejcajquiya, nochi masehualme monegui miquise. Pero nojquiya pampa san se tacat, Jesucristo, moyolcuic, nochi masehualme huelis

moyolcuise. ²³ Pero sese moyolcuis quema quitocaros. Quena, achtohui Cristo moyolcuic quej nopa achtohuí ejemplo, huan teipa quema Cristo sempa hualas, nochi cati iaxcahua moyolcuise. ²⁴ Huan ica teipa Toteco Cristo quintanis nochi icualancaitacahua cati motocaxtiaj cati quipiyaj tanahuatili, huan cati quipiyaj tequiticayot huan cati quipiyaj chichahualisti. Huan nochi imasehualhua cati itztoque ipan itanahuatilis Toteco Cristo quimacas Toteco Dios, iTata, para yaya ma quinnahuati. ²⁵ Pero monequi para Cristo tanahuatis hasta quintanis nochi icualancaitacahua. ²⁶ Huan icualancaitaca cati hasta más teipa Cristo quitamiltis elis miqulisti. Huan quema yaya quitzontamiltis miqulisti, amo aqui más miquis. ²⁷ Toteco Dios quimacatoc Cristo tanahuatili ica nochi masehualme huan nochi tamanti. Pero amo quinequi quiijtos para Cristo quipiya tanahuatili para quinnahuatis Toteco Dios, pampa yaya Toteco Dios cati quimacac Cristo tanahuatili. ²⁸ Huan quema nochi tamanti huan nochi icualancaitacahua mocahuase imaco Cristo para quinnahuatis, huajca ica ipaquilis Cristo cati Icone motemactilis ica iTata cati quitajitoc nochi imaco Cristo. Huan yeca ipan nopa tonali Toteco Dios quipiyas nochi tanahuatili ica nochi cati onca.

²⁹ Nojquiya, sinta inijuanti cati mictoque amo moyolcuisquiáj, ¿para ten sequij mocuaaltiaj para masehualme cati ya mictoque? San tapic para quichihua sinta amo anquineltoaj para moyolcuise.

³⁰ Huan sinta amo timoyolcuise teipa, ¿para ten niyas nechca miqulisti mojmosta ipan itequi Toteco? ³¹ Melahuac cati nimechilhuía, mojmosta eltoc quej ajsi nopa hora para nimiquis. Ya ni melahuac quej nojquiya melahuac na nijpiya miyac paquilisti por nochi cati Cristo Jesús quichijtoc ipan amojuanti. ³² San tapic para nimotehujitoc ica nopa fiero tacame ipan altepet Éfeso cati itztoyaj quej tecuanime sinta amo nimoyolcuis. Sinta mijcatziti amo quema moyolcuise, achi cuali ma tijchihuaca quej sequinoc quiijtohuaj: “Ma titamahuisoca, ma titacuaca huan ma tiquica nochi cati tijnequij pampa mosta timiquise.”

³³ Amo xiquincahuilica sequinoc ma amechcayahuaca. Onca se camanali cati quiijtohua: “Sinta se tacat nemi ica fiero masehualme, quinempolose nochi cati cuali cati yaya quinequiyaya quichihuas.”

³⁴ Ximotalnamictica huan ayecmo xitajacolchihuaca. Itztoque sequij ten amojuanti cati ayemo anquixmatij Tohueyiteco. Nimechilhuía ni para xipinahuaca.

Quenicatza moyolcuise mijcatziti

³⁵ Huelis sequij ten amojuanti anquinequij antechtatzintoquilise: “¿Quenicatza huelis moyolcuise mijcatziti? ¿Taya tamanti inintacayo quiipiase quema moyolcuise?” ³⁶ Huihuitic cati quichihua nopa tatzintoquili. ¿Amo anquimatij quema anquitocaj se xinachti, achtohui monequi palanis quej se tamanti mictoc huan teipa xihuiyo panquisas? ³⁷ Huan nopa xinachti cati anquitojque amo quipixqui itachiyalis quej ixihuiyo cati chamanqui. Anquitojque se xinachti. Huelis se xinachti ten trigo o seyoc tamanti xinachti, pero nopa xinachti cati anquitojque amo nesqui quej nopa ixihuiyo cati ixhuac. ³⁸ Ica nochi tamanti xinachti Toteco quichihua ma ixhuaca huan ma quipiyaca nopa tamanti inixihuiyo o huelis tiqijitose nopa tamanti inintacayo cati yaya quinequi ma quipiyaca. Huan sesen tamanti xinachti quipiya cati ya iselti ixihuiyo huan amo onca seyoc quej ya. ³⁹ San se eltoc ica masehualme huan tapiyalme. Masehualme quipiyaj se tamanti ininacayo, huan tapiyalme seyoc, huan totome seyoc, huan michime seyoc. ⁴⁰ Nojquiya

quippiyaj se tamanti inintacayo nopa ilhuicac ehuan huan cati itztoque ipan ilhuicac. Huan inintacayo amo quej cati tojuanti ipan ni taltipacti tijpiyaj. Yon iniyejyejca cati itztoque ipan ilhuicac amo nesi san se quej toyejyejca cati tiitztoque ipan taltipacti. ⁴¹ Itaahuil tonati amo nesi san se quej nopa taahuili cati tamina metzti, yon amo nesi san se quej inintaahuil sitalime. Huan nochi sitalime amo cahuanij ica san se ininchicahualis.

⁴² Quej nopa elis quema mijcatzitzitzi moyolcuise. Masehualme quitalpachohuaj se mijcatzi ica itacayo cati palani, pero Toteco quiyolcuise ica se itacayo cati amo palanis. ⁴³ Quema masehualme quitalpachohuaj se mijcatzi, fiero itacayo, pero quema Toteco quiyolcuise, elis yejyectzi. Nopa cati masehualme quitalpachohuaj amo quippiya tetili, pero nopa cati Toteco quiyolcuise miyac tetili quippiyas. ⁴⁴ Quema tiquintalpachohuaj mijcatzitzitzi, quippiyaj se inintacayo quej masehualme ipan ni taltipacti, pero quema moyolcuise, quippiyase seyoc tamanti inintacayo quej se tonaltzi, o quej masehualme ipan ilhuicac quippiyaj. Quena, onca inintacayo masehualme ten ni taltipacti huan nojquiya onca inintacayo masehualme cati itztoque ipan ilhuicac.

⁴⁵ Quiijtohua ipan Icamanal Toteco: “Ica Adán, nopa achtohui tacat ipan taltipacti, Toteco quisencajqui itacayo huan quitali ialma huan quichijqui ma itzto.” Pero Cristo, cati eltoc seyoc tayacanquet quej Adán, ajsico teipa huan yaya mochijqui se tonaltzi cati temaca nemilisti. ⁴⁶ Ama, amo tijpiyaj se totacayo ten ilhuicac, pampa achtohui monequi tijpiyase totacayohua ten ni taltipacti huan teipa tijpiyase totacayohua ten ilhuicac. ⁴⁷ Adán cati itztoya achtohui, quipixqui itacayo cati Toteco quisencajtoya ica tali ten ni taltipacti. Pero Cristo cati teipa hualajqui, hualajqui ten ilhuicac. ⁴⁸ Nochi masehualme cati itztoque ipan ni taltipacti quippiyaj inintacayohua quej cati Adán quipixtoya, pero quema tijpiyase totacayo ten ilhuicac, elis san quej cati Cristo quippiya. ⁴⁹ Huan quej ama totacayo nesi quej itacayo Adán cati elqui ten ni taltipacti, teipa tijpiyase totacayo cati nesis quej itacayo Cristo cati ehua ilhuicac.

⁵⁰ Cati nijnequi nimechilhuis noicnihua eltoc ya ni. Totacayo cati ama tijpiyaj ica toeso huan tonacayo, amo huelis itztoz nepa ipan itanahuatilis Toteco. Ni totacayo miqui huan amo huelis yas campa nochi itztoze para nochipa. ⁵¹ Pero xitacaquica se quentzi huan nimechilhuis se tamanti yejyectzi cati hasta ama masehualme amo quimatiyayaj. Amo nochi tojuanti timiquise, pero nochi tojuanti Toteco techpatilis totacayo ica cati yancuic. ⁵² Quema tapitzas nopa itamiya tapitzali, Toteco techpatilis totacayo. Ya nopa panos ica se talojtzi quej quema tiixjcopij huan titachixtehuaj. Pampa quema quipitzas nopa tapitzali, taneltocani cati mictoque, moyolcuise ica inintacayo cati amo quema huelis miquis, huan tojuanti cati noja tiitztoque, Toteco san techpatilis totacayo ica cati yancuic. ⁵³ Pampa totacayo cati ama amo huejcahua, mopatas ica cati huejcahuas para nochipa, huan masque ni totacayo miqui, totacayo cati tijpiyase teipa, amo quema huelis miquis. ⁵⁴ Huajca, quema totacayo cati ama amo huejcahua mopatas ica cati huejcahuas para nochipa, huan mopatas ni totacayo cati ama miqui ica cati amo quema miquis, ipan nopa talojtzi panos quej ijcuilijtoc ipan Icamanal Toteco campa quiijtohua: “Cristo quitantoc miquijlisti huan yeca miquijlisti ayecmo quippiya chicahualisti. ⁵⁵ Huajca ¿quenicatza huelis techtanis miquijlisti? ¿Quenicatza huelis techcocos? Ayecmo teno huelis techchihuilis.”

⁵⁶ Miquijlisti hasta ama hueli techtani pampa tijpixtoyaj totajtacolhua, huan tijpixtoyaj totajtacolhua pampa amo huelqui tijchihuaj cati quiijtojque

itanahuatil Toteco. ⁵⁷ Pero ama ma tijtascamatica Toteco pampa yaya techmacac chichahualisti ma tijtanica miqulisti ica cati Tohueyiteco Jesucristo techchihuilijtoc.

⁵⁸ Huajca noicnihua cati nimechicnelía, xiitztoca antemachme ipan Toteco. Amo xijcahuaca yon se tamanti ma amehijcuenis ten ya. Nochipa xijchihuaca nochi nopa tequit cati Tohueyiteco amehmaca xijchihuaca para ya. Huan xijmatica nopa tequit cati anquichihuaq quema anmotatzquiljtoque ipan Jesús, amo san tapic.

16

Xijsentilica tomi para sequinoc

¹ Ama nimechilhuis ten nopa tomi cati anquinequij anquisentilise para toicnihua cati taijyohuíaj. Xijchihuaca quej niquinilhujtoc taneltocani cati mosentilíaj ipan tiopame ipan tali Galacia para ma quichihuaca. ² Ipan nochi domingo, nopa achtohui tonali ipan samano, monequi sese ten amojuanti xiquiyocatalica se parte ten nopa tomi cati anquitantoque. Huan nopa tomi xicajocuica para nopa ofrenda quema niajsiti para amo monequis anquisentilise san ipan se talojtzi. ³ Huan nojquiya ama xiquintapejpenica nopa tacame cati anquinequij ma quihuicaca nopa tomi. Quej nopa quema niajsiti nozona, niquntitanis nopa tacame ica amatajuiciloli para quihuicase nopa tomi hasta toicnihua cati taijyohuíaj ipan altepet Jerusalén. ⁴ Huan sinta quinamiqui para niyas nojquiya, huajca inijuanti hueli yase nohuaya.

Pablo yas tali Macedonia

⁵ Niyas nimechpaxaloti quema nimocuepas ten tali Macedonia pampa nijnequi achtohui niyas nozona. ⁶ Huan huélis nimocahuas se quesqui tonali amohuaya. Nojquiya huélis nimocahuas amohuaya hasta panos nopa metzti ten tasesecayot. Huan teipa huélis antechpalehuise ica cati monequi ipan noojhui para campa monequi niyas. ⁷ Pero amo nijnequi san nimechitziquisati ama, pampa sinta Tohueyiteco nechcahuilis, nijnequi nimocahuas amohuaya para se quesqui tonali. ⁸ Pero nijnequi nimocahuas nica ipan altepet Éfeso ama hasta tamis nopa Ihuit Pentecostés. ⁹ Pampa niqúita Toteco nechmacatoc se hueyi tequit nica huan miyac masehualme quiselíaj nocamanal, masque nojquiya itztoque miyac cati nechcualancaitaj.

¹⁰ Sinta Timoteo ajsis nozona campa amojuanti, xijselica ica cuali pampa yaya quichihua itequi Toteco quej na nijchihua. ¹¹ Xiquitaca para nochi nozona ma quitapanitaca. Nojquiya quema Timoteo quisas nozona, xijpalehuica ica cati monequi huan xijtitanica ipan iojhui ica cuali pampa nijchiya para ma ajsi nica inihuaya sequinoc cati hualase ihuaya.

¹² Miyac huelta niqulhui toicni Apolos para ma yahui inihuaya nopa sequinoc cati yahuij campa amojuanti, pero amo quinequi yas amantzi. Yaya yas amechitati quema huélis.

Pablo quinnahuatijtejqui

¹³ Xitachixtoca. Xiitztoca antemachme ipan cati anquineltojac ten Toteco. Ximoneltalica quej tacame cati quipiyaj fuerza huan ximotetilica. ¹⁴ Huan nochi cati anquichihuaq, xijchihuaca ica taicnelijcayot.

¹⁵ Anquimatij Estéfanas huan ihuicalhua elque cati achtohui quineltoque Tohueyiteco ipan amotal Acaya. Huan ama inijuanti motemacatoque para quinpalehuise imasehualhua Toteco. ¹⁶ Huajca nijnequi xiquincahuilica inijuanti huan sequinoc cati quichihuaq itequi Toteco quej inijuanti para

ma amechyacanaca. ¹⁷ Ninelpaqui pampa ya ajsicoj nica Estéfanas, Fortunato, huan Acaico. Inijuanti nechpalehuijtoque ica nopa cati amujuanti amo anhuelij anquichihuj, pampa amo anaquiyayaj. ¹⁸ Inijuanti nechyolchicajtoque quej amechyolchicajtoque amujuanti. Xiquintepanitaca tacame cati quichihuj quej inijuanti.

¹⁹ Taneltocani ipan tiopame cati mosentilíaj campá hueli ipan tali Asia amechontajpalohuj. Huan Aquila huan Priscila huan nopa tiopamit ten taneltocani cati mosentilíaj ipan ininchaj nojquiya amechontajpalohuj miyac ipan Tohueyiteco. ²⁰ Nochi toicnihua nica nojquiya amechontajpalohuj. Ximotajpaloca se ica seyoc huan ximotzoponica ica se tatepanitacayot cati tatzejtzeloltic pampa anmoicnelíaj ipan Toteco.

²¹ Na niPablo nimechtajcuilhuía ni camanali nica ica nomax para nimechtajpalos.

²² Sinta se amo quicnelía Tohueyiteco, ma itzto tatechihuali para nochipa. Ma huala Tohueyiteco.

²³ Tohueyiteco Jesucristo ma quiapiya hueyi iyolo ica amujuanti.

²⁴ Nimechicnelía nochi amujuanti cati anmotatzquiliytoque ipan Tohueyiteco Cristo Jesús. Quej nopa ma eli.

Nopa Ompa Amatajcuiloli cati Pablo Quintajcuilhui Taneltocani ipan Altepet Corinto

Pablo quintajcuilhui taneltocani ipan Corinto

¹ Na niPablo cati niitayolmelajca Jesucristo pampa Toteco ica ipaquilis nechtapejpeni para niteilhuis icamanal. Na ihuaya toicni Timoteo timechta-cuilhuíaj amojuanti cati anitiopa Toteco ipan altepet Corinto huan nojquiya tiquintajcuilhuíaj nochi taneltocani cati itztoque ipan amotal Acaya. ² Toteco Totata huan Toteco Jesucristo ma quipiyaca hueyi iniyolo ica amojuanti huan ma amechmacaca tasehuilisti ipan amoyolo.

Pablo taijyohuijtoc miyac

³ Ma tijtascamatica Toteco Dios, yaya cati iTata Tohueyiteco Jesucristo. Yaya cati techtasojta huan talojtzitzi techyoltalia. ⁴ Yaya techyoltalia ipan nochi nopa taohuijcaoyot cati techpanotihuala huan quej nopa quichihua para tojuanti nojquiya tihuelise tiquinyoltalise sequinoc cati itztoque ipan taohuijcaoyot san se quej Toteco techyoltalijtoc.

⁵ Quema tojuanti miyac titaijyohuíaj pampa tiaxchahua Cristo, Toteco miyac techtiochihua huan Cristo miyac techyoltalia. ⁶ Huan tojuanti titaijyohuijtoque miyac pampa tijnequij amojuanti xiyolpactoca huan para nelía ximomaquixtica ipan Jesucristo. Huan quema Toteco techyolchicahua, quej nopa quichihua para tojuanti nojquiya huelis timechyolchicahuase huan timechpalehuise para anquipiyase yoltetili huan amo anhuetzise quema anpanose ipan taijyohuilisti quej tojuanti. ⁷ Tojuanti timotemachíaj ipan Toteco para yaya amechyolchicahuas quej techyolchicajtoc pampa amojuanti nojquiya antaijyohuíaj quej tojuanti.

⁸ Noicnihua, nijnequi xijmatica para tojuanti tijpanoque miyac taohuijcaoyot ipan tali Asia. Tahuel miyac taohuijcaoyot tijpixque hasta ayecmo tijpixque chichahualisti para huelis tiquiyohuise. Tijmatiyayaj para timiquisquíaj. ⁹ Quena, timoilhuiyayaj para temachti nimantzi techmictisquíaj. Ya nopa techpano para ma amo timotemachica ipan tojuanti toselti, pero para ma timotemachica ipan Toteco cati quinyolcui mijcatzitziti. ¹⁰ Quena, Toteco techmanahui quema nopa masehualme mocualtaliyayaj para techmictise. Huan yaya mojmosta techmanahuía. Huan timotemachíaj ipan ya para teipa techmanahuis ten nopa miqulisti cati más mahuilili. ¹¹ Huan amojuanti nojquiya antechpalehuíaj ica amonetatajtil. Sinta miyac ten amojuanti anmotatajtíaj ica Toteco por tojuanti, huajca quema Toteco techmanahuijtosa, miyac ten amojuanti nojquiya anquihueyimatise huan anquitascamatise.

Pablo amo yajqui altepet Corinto

¹² Ica miyac paquilisti huan ica se toyolo cati amo techtelhuía, nimechilhuía para nochipa tijchijtoque cati senquisa cuali huan cati xitahuac iixpa Toteco. Yon se tamanti amo tijchijtoque san ica totalnamiqulisti tojuanti. Pero Toteco quena, pampa hueyi iyolo ica na, nechpalehuijtoc para nijchihuas cati nelía xitahuac ica masehualme ten ni taltipacti cati amo quineltocaj Toteco huan achi más nijchijtoc cati xitahuac ica amojuanti.

¹³ Ipan noamatajcuilol san nimechtajcuilhuía xitahuac cati amo ohui para anquipohuase huan anquimachilise. Amo teno nijtatiya para san sequij ma quimachilica. Nijnequi se tonali xijmachilise nochi ten tojuanti, ¹⁴ masque ama san se pilquentzi anquimachilíaj ten tojuanti. Huan quej nopa ipan nopa tonali quema sempa hualas Tohueyiteco Jesucristo, huelis anpaquise pampa antechixmatij tojuanti, quej nojquiya tipaquise pampa timechixmatij amojuanti.

¹⁵ Huan pampa nijpiya temachili para sempa anpactoque ica tojuanti, nijnequiyaya niyas nimechitati ome huelta, para ome huelta anquiselijtosquíaj tatiocihualisti. ¹⁶ Nijnequiyaya nimechitasquíaj quema niyahuiyaya para tali Macedonia huan teipa quema nitacuepiliyaya. Nimoilhui para quej nopa antechpalehuisquíaj ica cati monequiyaya ipan ojti para tali Judea, pero amo huelqui. ¹⁷ Huajca huelis antatzintocase para ten nijpatac notalnamiquilis sinta nelía nimoilhuiyaya para niyas nozona. O huelis anmoilhuíaj para nicamanalti quej masehualme ipan ni taltipacti cati quijtohuaj, “quena”, pero ipan iniyolo quijtohuaj, “amo”.

¹⁸ Pero amo quej nopa, noicnihua. Toteco Dios quimati para na amo niqijtosquíaj, quena, nijchihuas se tamanti, sinta ya nijmati para amo nijchihuas. ¹⁹ Pampa Jesucristo, Icone Toteco, yaya cati Timoteo, Silvano huan na timehcamanalhujtoque, yaya amo quema quijtosquíaj quichihuas se tamanti cati quimati ipan iyolo para amo quichihuas. Yaya nochipa quijtohua quichihuas huan, quena, quichihua. ²⁰ Huan nojquiya Jesucristo temachti quichihuas senquisa nochi cati Toteco techtencahuilijtoc para quichihuas. Yeca tijhueyichihuaj huan tijtascamatij Toteco pampa tiquitaj para nelía temachti. Yeca quema tijhueyichihuaj Toteco huelis tiqijtose: “Quej nopa ma eli” ica nochi nopa tamanti cati yaya techtencahuilijtoc. ²¹ Huan Toteco Dios yaya techchijtoc tojuanti huan amojuanti para ma tielica titemachme ipan Tohueyiteco Cristo. Yaya nojquiya techajalti ica Itonal para techiyocacahuas para ma tielica tiixcahua.

²² Quena, Toteco quitelijtoc imachiyo ipan tojuanti para ma nesi tiixcahua. Huan yaya techmacatoc Itonal ipan toyolo quej se tayacanca tomi cati technextilía para temachti techmacas nochi cati techtencahuilijtoc masque noja polihui para techmacas.

²³ Nijtajtania Toteco ma nechtatzacuiliti sinta amo senquisa melahuac cati nimechilhuía ama. Melahuac amo niyajqui nimechitato ipan altepet Corinto pampa amo nijnejqui nimechtacahualtiti ica camanali cati nelchicahuac. ²⁴ Amo nijnequi nimechnahuatis quenicatza monequi xijneltocaca quej nielisquíaj niamoteco. Tojuanti tijnequij titequitise san sejco ica amojuanti huan timechpalehuise para noja más xipaquica huan ximochihuaca antemachme.

2

¹ Huajca nimoyolihui achi cuali para amo más nimoyolcocos, amo nimechitati nimantzi huan nimechtequipacholmacas quej nijchijqui achtohui.

² Pampa sinta na nimechtequipacholmacas, huajca ¿ajquiya nechyoaltis na? ¿Quenicatza huelis antechyoaltise amojuanti cati nimechtequipacholmacac?

³ Yeca nimechtajcuilhui nopa amatajcuiloli para xijxitahuaca nochi cati monequi quema ayemo niajsi. Quej nopa amo nimatequipachos quema niajsiti ica amojuanti cati achi más monequi antechchihuilisquíaj para ma nipaqui. Anquimatij para na nipaquis quema nijmatis para nochi amojuanti nojquiya anpaquij. ⁴ Nelía nechyoalcoco quema nimechtajcuilhui

nopa amatajcuiloli. Nimotequipacho huan nimochoquili miyac, pampa amo nimechtajcuilhuiyaya para nimechtequipacholmacas, pero nijnequiyaya xijmatica para nelía miyac nimechicnelía.

Xijtapojpolhuica yaya cati quichijqui cati amo cuali

⁵ Yaya nopona amohuaya cati quichijqui nopa tajtacoli cati ica nimechtajcuilhui ahtohui, amo san na nechtequipacholmacac, pero nojquiya amechtequipacholmacatoc nochi amojuanti. Amo niquijtohua para yaya nelmiyac amechtequipacholmacatoc pampa amo nijnequi nijchihuas más hueyi que monequi. ⁶ Miyac ten amojuanti ya anquitatzacuilitjtoque yaya cati tajtacolchijqui. Huan nimoilhúa para ya cuali ica ya nopa. ⁷ Ya ajsic hora para xijtapojpolhuica huan xijyoltalica para amo motzinqixtis. Amo nijnequi para yaya ma motequipacho miyac hasta ayecmo quimatis taya quichihuas. ⁸ Huajca ama xijnexilica para noja anquicnelíaj miyac. ⁹ Ahtohui quema nimechtajcuilhui para xijtatzacuilitica, nojquiya nijnequiyaya nimecheyjecos para niqitas sinta anquichihuasquíaj nochi cati nimechilhui o amo. Huan, quena, antechnehtocaque. ¹⁰ Huajca ama quema anquitapojpolhuise, na nojquiya nijtapojpolhuis, sinta onca se tamanti cati monequi nijtapojpolhuis. Huan quema nijtapojpolhuis, nijchihuas iixpa Cristo pampa nimechicnelía. ¹¹ Monequi tijtapojpolhuise para Amocualtacat amo quitequihuis ya ni quej se ojti para calaquis campa tojuanti huan techcayahuas. Cualí tijmatij quenicatza yaya mosenilhuijtoc quenicatza huelis techcayahuas.

Pablo motequipacho ipan altepet Troas

¹² Quema niajsito altepet Troas para nitepohuilis nopa cuali camanali ten Tohueyiteco Cristo, nijpanti Toteco techtapohuilijtoya se ojti para ma nijchihua itequi nopona, ¹³ pero nimotequipachohuayaya miyac pampa amo nijpanti toicni Tito cati niquilhui para ma nechnamiquis nepa quema quisqui ten campa amojuanti. Huajca niquinnahuatijtejqui cati itztoyaj nepa Troas huan niyajqui tali Macedonia para nijpantis.

Titatanij ipan Cristo

¹⁴ Tijtascamatij Toteco Dios pampa Cristo ya tatantoc huan ama techyacana quej timasehualme cati moaxcatijtoc. Huan techtequihúa para titepohuilise icamanal campa hueli techaj, para icamanal ma momoyahua quej se taajhuiyacayot cati campa hueli ajsi. ¹⁵ Quena, eltoc quej tonemilis quipiya se taajhuiyacayot ten Cristo pampa Cristo itztoc topani huan nopa taajhuiyacayot cati tijpiyaj quipactía Toteco Dios. Pero amo san se quiselíaj nopa taajhuiyacayot masehualme cati momaquixtíaj ten inintajtacolhua huan inijuanti cati yahuij micta. ¹⁶ Ica masehualme cati polihuse, eltoc quej timijyotíaj quej se tamanti pajti cati se masehuali quiijnecuis huan miquis. Pero ica masehualme cati momaquixtise, timijmijyotíaj quej se tamanti cati se masehuali quiijnecuis huan quipantis nemilisti para nochipa. Nelía hueyi nopa tequit cati tijchihua. Amo aqui hueli quichihua iselti. ¹⁷ Tojuanti amo tiztotoque quej tacame cati quitequihuíaj icamanal Toteco para tacajcayahuase para quitanise tomi. Tojuanti titepohuilíaj icamanal ica toyolo xitahuac iixpa Toteco Dios cati techtachilía huan cati techtequimacatoc ma tijchihuaca. Quena, titepohuilía ica itequiticayo Cristo pampa timotatzquilijtoque ipan ya.

3

Nopa yancuic camanal sencahuali

¹ Amo ximoilhuica tiquijtojqe ya ni para timohueyimatise. Amo monequi timechnextilise se amat cati quijtohua para cuali cati titepohuilájqe quej nopa tacajcayajca tamachtiani quichihuj. Yon amo monequi timechtajtanise techmacaca se amatajcuiloli para tiqunnnextilise sequinoc. Anquimatij para tiquijtohuaj san cati cuali. ² Anitztoque quej se amatajcuiloli cati ijcuilijtoc ipan toyolo huan cati nochi masehualme hueli quipohuase huan quimatise para nelía cuali nopa tequit cati tijchijque campa amojuanti. ³ Quena, anitztoque quej se amatajcuiloli cati tojuanti tijhuicaj para titenextilíjqe tijchihuj se cuali tequit. Huan Cristo quijcuilo nopa amatajcuiloli para masehualme ma techximatise ajquiya tojuanti, pero amo ijcuilijtoc ica lápiz. Quijcuilo ica Itonal Toteco cati yoltoc. Huan amo quijcuilo ipan tet quej Moisés quichijqui huejcajquiya. ¡Amo! Yaya quijcuilo nopa amatajcuiloli ipan iniyolo masehualme quema quitali Itonal ipan iniyolo taneltocani.

⁴ Tojuanti tijpiyaj ni temachili ipan amojuanti pampa timotemachíjqe ipan Toteco Dios cati tequititoc ipan amoyolo por cati Cristo techchihuilijtoc.

⁵ Tijmatij para toseli amo teno hueli tijchihuase para Toteco, pero yaya Toteco Dios techmaca talnamiquilisti para cuali tijchihuase itequi. ⁶ Huan yaya techchijtoc tiitequipanojcahua para ma titeyolmelahuaca ten nopa yancuic camanal sencahuali cati quichijtoc ica masehualme. Amo titeyolmelahuaj ten nopa achtohui camanal sencahuali cati quijcuilo ipan tet, pero tojuanti titeyolmelahuaj ten nopa camanal sencahuali cati Itonal Toteco ama quichihua ipan teyolo. Nopa camanal sencahuali cati tajcuiloli huejcajquiya tehualiquili miqulisti, pero ama Itonal Toteco temaca nemilisti cati yancuic.

⁷ Huan quema Toteco quimacac Moisés nopa achtohui camanal sencahuali cati quihualica miqulisti cati quijcuilo ipan tet, ajsico ica itatanex Toteco. Huan cahuanqui ixayac Moisés hasta nopa israelitame amo hueliyayaj quitachilíjqe, huan teipa ica yolic sejtijajqui itatanex hasta ixayac mocajqui quej eltoya. ⁸ Pero ama noja más quipiya itatanex nopa nemilisti cati Itonal Toteco temaca. ⁹ Quena, melahuac quipixqui inintatanex nopa tanahuatilme huejcajquiya cati quinnextilijque masehualme para quipiyayaj tajtacoli iixpa Toteco. Pero para tojuanti achi más cuajcualtzi ni yancuic camanal sencahuali cati techchihua tixitahuaque iixpa Toteco. ¹⁰ Huan masque nopa tanahuatilme cati ajsicoj huejcajquiya hualajque ica itatanex Toteco, eltoc quej amo teno quipixque inintatanex quema timoilhuáj quenicatza tahuel nelpano más cuajcualtzi eltoc ni yancuic camanal sencahuali cati temaca nemilisti. ¹¹ Sinta nopa achtohui camanal sencahuali elqui cuajcualtzi masque mocajqui san para se talojtzi huan teipa panotijajqui, nelpano quipiya itatanex ni yancuic camanal sencahuali cati huejcahuas para nochipa.

¹² Huan pampa timotemachíjqe ipan ni yancuic camanal sencahuali cati huejcahuas para nochipa, timoneltalíjqe quema titeyolmelahuaj ten Cristo.

¹³ Tojuanti amo tijchihuj quej Moisés cati quitzajqui ixayac ica se yoyomit para nopa israelitame ma amo quitaca quenicatza sejtijahuiyaya itatanex. ¹⁴ Nelía yoltetique nopa israelitame cati itztoyaj huejcajquiya huan amo quimachiliyayaj. Huan hasta ama quema se israelita quipohua nopa achtohui camanal sencahuali ipan Icamanal Toteco, eltoc quej noja tzactoc italnamiqulis para ma amo quimachili cati melahuac. Huan san Cristo hueli quinquitilis cati quitzactoc inintalnamiqulis sinta quineltocase.

¹⁵ Melahuac hasta ama noja tzactoc iniyolo israelitame quema quipohuaj cati Moisés quijcuilo huan amo quimachilíaj inintequi nopa tanahuatilme. ¹⁶ Pero quema se israelita quiselía Tohueyiteco, huajca Toteco quitapohuilía italnamiqulis para ma quimachili cati quipohua. ¹⁷ Tohueyiteco Jesucristo yaya san se ica Itonal Toteco, huan quema Itonal Tohueyiteco mocahua ipan iyolo se masehuali, nopa masehuali ayecmo ilpitoc ipan tajtacoli, ya majcajtoc. ¹⁸ Pero ica nochi tojuanti, amo tzactoc toxayac. Tiitztoque quej tescame cati ipan taahuía itatanex Tohueyiteco. Huan yeca mojmosta Itonal Toteco tequiti ipan tojuanti huan techpatatiya para más tijpiyase itachiyalis Tohueyiteco. Yeca mojmosta techmacatiya más itatanex para ma tiitztoaca achi más quej ya.

4

¹ Huajca pampa Toteco Dios techicnelía miyac huan techmacatoc ni yejyetzti tequit para titepohuilise icamanal Toteco, amo quema tijcahuase. ² Huan amo teno tijpiyaj ica nopa fiero tamanti cati sequinoc quichihuaj ixtacatzí, yon ica fiero tamanti cati quihualica pinahualisti. Amo aqui tijcaycahuaj. Amo quema titamachtíaj para Icamanal Toteco quijtohua se tamanti cati amo quijtohua. Pero titepohuilíaj camanali cati senquisa melahuac para nochi masehualme cati cuali iniyolo ma quimatica para xitahuac cati tiqijtohuaj iixpa Toteco Dios. ³ Sinta onca sequij cati amo quimachilíaj ni cuali camanali cati titepohuilíaj, eltoc pampa tzactoc inintalnamiqulis huan yahuij micta. ⁴ Ica injuanti cati amo quineltocaj Cristo, nopa Amocualtacat cati quinahuatía ni taltipacti ipan ni tonali, quitzactoc inintalnamiqulis pampa amo quinequi ma quimachilica nopa cuali camanali cati huellis quinmacas taahuili ipan iniyolo. Amo quincahuilía ma quiyitaca ihueyitilis Cristo yaya cati iixcopinca Toteco Dios.

⁵ Huajca amo titepohuilíaj ten tojuanti, titepohuilíaj ten Cristo Jesús huan tiquinymelahuaj masehualme para yaya Dios cati itztoc Tohueyiteco nochi timasehualme. Huan nojquiya tiquinilhuíaj para tojuanti timotequipanojcahua para timechpalehuise quej tihuelij, pampa quej nopa tijtequipanohuaj Tohueyiteco Jesús. ⁶ Pampa Toteco Dios cati huejcajquiya tanahuati para ma onca taahuili campa oncayaya tzintayohuilot, nojquiya techtaahuilijtoc ipan toyolo para ma tijmachilica para nochi ihueyitilis Toteco monextía ipan ixayac Jesucristo.

Quenicatza ma timonejnemiltica sinta tijneltocej Toteco

⁷ Tojuanti cati titepohuilíaj ni camanali tijpiyaj iricojoyo Toteco ipan ni totacayohua cati amo quipiyaj chichahualisti. Tiitztoque quej tisoquichachapalme cati amo huejcahuaj. Huan yeca nochi masehualme huéli quititaj para nopa hueyi chichahualisti cati tijpiyaj, huala ten Toteco. Amo huala ten tojuanti.

⁸ Campa huéli masehualme techchihuilíaj cati amo cuali, pero noja amo techtantoque. Quemantica ayecmo tijmatij taya tijchihuase, pero amo tijcajtoque totequi. ⁹ Masehualme techquixtíaj, pero Toteco Dios amo quema techcahua toseli. Quemantica techcocoahuaj, pero amo techzontamiltijtoque. ¹⁰ Campa huéli tiyahuij tijtemactilíaj totacayo para ma techmictica san se quej Tohueyiteco Jesús temacac itacayo para miquis. Huan ya nopa tijchihuaj para ma nesi ipan tojuanti para nojquiya tijpiyaj nopa yancuic nemilisti cati Jesús ama quipiya. ¹¹ Masehualme mojmosta quinequij techmictise tojuanti cati tiyoltoque huan cati tijtequipanohuaj Tohueyiteco

Jesús. Huan pampa tinemij nechca miqulisti, quipalehuía para ma nesi ipan ni totacayo cati miqij para tojuanti amantzi ya tijpiyaj inemilis Jesús ipan tojuanti. ¹² Quena, techajsi taijyohuiliisti huan masehualme quinequiyayaj techmictise pampa titepohuilíaj ten Cristo, pero amo tijcajteoque totequi, huan yeca ama amojuanti anquippiyaj nemilisti cati yancuic para nochipa.

¹³ Ipan Icamanal Toteco nopa tajcuilojquet quijito: “Nijneltoca nopa camanali huan yeca nicamanali.” Huan tojuanti nojquiya san se nopa taneltoquili tijpiyaj. Tijneltoyaj ni camanali huan yeca ticamanaltij huan titeyolmelahuaj ten Cristo. ¹⁴ Huan amo tiquimacasij timiquise pampa tijmatij Toteco Dios cati quiyolcuic Tohueyiteco Jesús, nojquiya techyolcuis tojuanti san sejco ica amojuanti, huan yaya nojquiya technextis nopona iixpa.

¹⁵ Nochi taohuijcyot cati tiquijyohuíaj, tiquijyohuíaj para huelis timechpalehuise amojuanti huan sequinoc para más anquineltocatiyase Tohueyiteco. Tijnequij ma momoyahuas ni camanali para hueyi iyolo Toteco Dios ica masehualme huan para ma momiyaquilica nopa masehualme cati quixmatise Toteco Dios. Huan quej nopa nojquiya momiyaquilise masehualme cati quitascamatise Toteco por itaicnelilis, huan nochí ya ni quichihuas para ma nesis más ihueyitilis Toteco. ¹⁶ Yeca amo tijcuesihuilíaj totequi, pampa masque tantinemi tonemilis, mojmosta Toteco techmaca yancuic chichahualisti ipan tonal. ¹⁷ Masque titaijyohuíaj se pilquentzi para se talojtzi ipan ni taltipacti, ya ni amo teno. Tijmatij ica ni taijyohuiliisti, Toteco techmacas cati tahuel yejyectzi cati huejcahuas para nochipa. ¹⁸ Yeca tojuanti amo timoilhuíaj ten ni taijyohuiliisti huan tamanti cati ama tiqitaj, pero timoilhuíaj ten nopa tamanti cati amo aquí hueli quiita ama. Pampa nochi cati ama tiqitaj eltos san para se talojtzi, pero nopa tamanti cati ama noja amo hueli tiqitaj cati Toteco techtencahuilijtoc techmacas, ya nopa eltos para nochipa.

5

¹ Totacayo eltoc quej se cali para ipan tiitztoque ipan ni taltipacti. Huan quema tamis hora para ni totacayo, huajca Toteco techmacas seyoc totacayo nepa ilhuicac. Huan totacayo cati yancuic amo elis quej se cali cati masehualme quichijchijtoque ica inimax. Elis se totacayo cati huejcahuas para nochipa nepa ilhuicac. ² Ama quema noja tiitztoque ipan ni totacayo ipan ni taltipacti, nelía tiaxtij pampa ya tijnequij ma techpatili totacayo ica cati yancuic. ³ Huan ipan nopa tonali tijpiyase totacayo cati yancuic para ipan tiitztoque, pampa amo aquí itzto nepa ilhuicac cati amo quipiyas itacayo cati yancuic. ⁴ Amantzi pampa tiitztoque ipan ni taltipacti ipan totacayo cati tantiya, techchihua ma tiaxtica, pero amo pampa tijnequij ma miqij totacayo. Tiaxtij pampa tijnequij para Toteco ma techpatili ni totacayo cati tamis ica se totacayo cati quipiyas nemilisti yancuic para nochipa. ⁵ Eltoc yaya Toteco Dios cati techualchijchijtoc para teipa techmacas totacayo cati yancuic, huan yaya techmacatoc Itonal quej se tayacanca tomi para techmachiltis para temachtí tijejse.

⁶ Huajca ama mojmosta tiyolpaquij pampa timotemachíaj ipan cati panos teipa, masque tijmatij para quema noja tiitztoque ica totacayo ipan ni taltipacti, ayemo tiitztoque ipan tohaj nepa ilhuicac ihuaya Tohueyiteco Jesucristo. ⁷ Nica san tijneltocatinemij para panos nochí cati techtencahuilijtoc masque noja ayemo hueli tiqitaj. ⁸ Pero timotemachíaj para temachtí nochí panos. Tijnequij tijcajtehuase ni totacayo cati miqij huan

tiyase tiitztotij ipan tochaj nepa ilhuicac ihuaya Tohueyiteco. ⁹ Yeca masque tiitztose ipan ni taltipacti o amo, cati más tijnequij eltoc para tijchihuase cati quipactía Tohueyiteco, ¹⁰ pampa se tonali nochi tojuanti monequi timoquetzati iixpa Cristo campa yaya mosehuis para techtajtolsencahuas. Huan yaya techtaxhais sesen ten tojuanti quej quinamiqui por nochi cati cuali o cati amo cuali cati tijchijque quema tiitztoyaj ipan totacayo ipan ni taltipacti.

Camanalí para quenicatza ma moyoltalica ica Toteco

¹¹ Tojuanti nelía tiquimacasij huan tijtepanitaj Tohueyiteco, huan yeca tijchihuaj nochi cati tihuelij para tiquintanse masehualme ma quineltocaca. Toteco quimati para titequitiq ica toyolo xitahuac iixpa, huan nimotemachía para amojuanti nojquiya anquimatij. ¹² Amo sempa timechilhuíaj ten tojuanti toselti para timohueyimatise amoixpa, timechilhuíaj cati xitahuac para xipaquica ica tojuanti. Nojquiya tijnequij timechmacase se ome camanalí cati amechpalehuis anquinnanquílise nopa masehualme cati san mohueyimatij quenicatza nesij, yon amo motachilíaj sinta cuali iniyolo. ¹³ Sinta masehualme moilhuíaj tilocojtij ica cati tijchihuaj, xijmatica para nochi tijchihuaj para ihueyitilis Toteco. Sinta sequinoc moilhuíaj cati tijchihuaj quinextía para cuali totalnamiquilis, xijmatica tijchihuaj cati timoilhuíaj quisas cuali para amojuanti. ¹⁴ Huan pampa Tohueyiteco Cristo techicnelía miyac, itaicnelijcayo techchihua ma titequítica chichahuac. Cualí tijmatij Cristo mijqui por nochi masehualme, huan quema Cristo mijqui, elqui quej nochi mijque ica ya. ¹⁵ Quena, Cristo mijqui pampa quinequiyaya para nochi tojuanti cati tiitztoque ma ayecmo tiitztoca para tijchihuase cati tijnequij toselti. Mijqui para ma tiitztoca para tijchihuase cati quipactía Tohueyiteco pampa Cristo mijqui ipan cuamapeli huan moyolcuic por nochi tojuanti.

¹⁶ Huajca ma ayecmo tiquintachilica taneltocani quenicatza nesij, quej quichihuaj masehualme ipan ni taltipacti. Achtohuiya nimoilhuyaya para Cristo nojquiya itztoya se tacat san se quej na pampa quej nopa moilhuyayaj nochi masehualme, pero ama ayecmo nimoilhuía ya nopa ten ya. ¹⁷ Pampa quema se acajya quineltoca Cristo, motatzquilía ipan ya, huan mochihua se yancuic masehuali. Inemilis cati achtohuiya tami. Nopona pehua se yancuic nemilisti.

¹⁸ Nochi ni yancuic nemilisti huala ten Toteco Dios. Quena, Toteco Dios techhualicac campa ya iselti para ma timoyoltalica ihuaya por cati Tohueyiteco Cristo quichijqui. Huan ama yaya techtequimacatoc para ma tiquinhualicaca nochi masehualme campa ya para ma timoyoltalica ihuaya. ¹⁹ Quinequi ma tiquinilhuica masehualme para yaya Toteco Dios itztoya ipan Cristo huan tequitiyaya para ma moyoltalica nochi masehualme ipan taltipacti ica ya. Yaya amo quipohuayaya sese inintajacolhua masehualme. Huan ama techtequimacatoc ma tiquinilhuica masehualme ni cuali camanalí para quenicatza Cristo huelis quinyoltalis ica Toteco Dios.

²⁰ Huajca tojuanti tiitatitanilhua Cristo, huan Toteco Dios techtequihuía para timechnotzase para xiyaca campa ya. Yeca ica itequiticayo Cristo chichahuac timechtajtaníaj, ximoyoltalica ica Toteco Dios cati amechicnelía miyac. ²¹ Huan masque Cristo amo quema tajtacolchijqui, Toteco Dios quicuc nochi tojuanti totajtacolhua huan quitali ipan Tohueyiteco Cristo quej nochi eltosquía iaxca ya para yaya ma taxtaqua. Quej nopa quichijqui Toteco para huelis techchihuas tojuanti tixitahuaque por cati Cristo quichijqui.

6

1 Tojuanti cati tiitequipanojcahua Toteco, ica nochi toyolo timechtajtaníaj xijselica ica yejyectzi ni cuali camanali para hueyi iyolo Toteco ica masehualme. Amo xiquiyocacahuaca quej elisquíaj amo teno, 2 pampa ijcuilijtoc ipan Icamanal Toteco campa yaya quijitohua:

“Quema ajsis nopa hora cati cuali, nimechcaquis.

Ipan nopa tonali nimechpalehuis huan nimechmaquixtis.”

Quej nopa quijito Toteco Dios. Pero xiquitaca, ama ya ajsico hora para anquitajtanise Toteco ma amechpalehui. Ama ni tonali eltoc quema Toteco quinequi amechmaquixtis ten amotajacolhua.

3 Tijchihuaj campeca para tijchihuase nochi cati cuali para amo aqui ma quihuejcamajcahua Toteco por cati tijchihuaj tojuanti. Amo tijnequij para se acayja tehejelnamiquis, yon quitajilhuis totequi pampa tijchijtoque cati amo monequi. 4 Quena, nochi cati tijchihuaj, quinextía para melahuac tiitequipanojcahua Toteco. Tijpiyaj toyolo masque techtaijyohuilitíaj masehualme, o amo tijpiyaj ten ica tipanose, o tijpanoj miyac taohuijcajot.

5 Tiquijyohuíaj masque masehualme techmaquilitíaj, techtzacuaj, o mosisiníaj ica tojuanti. Quemantica titequitij hasta campa ayecmo tihuelij. Quemantica amo techcahuaj ma ticochica huan quemantica timayanaj pampa amo teno tijpiyaj para tijcuase. 6 Pero tojuanti titenextilíaj para tijpiyaj se tonemilis cati tapajpactic huan para cuali tiquixmatij Icamanal Toteco.

Nochi quitaj para tijpiyaj toyolo ica nochi masehualme huan tiquinchi-huilitíaj cati cuali. Tanemijya nesi para Itonal Toteco tequiti ipan toyolo huan para titeicnelíaj miyac. 7 Ica cuali toyolo titeyolmelahuaj cati senquisa melahuac, huan masehualme quiitaj para ichicahualis Toteco Dios tequiti ipan tonemilis. Huan pampa tiitztoque tixitahuaque iixpa Toteco, tijpiyaj nochi cati monequi para titatehuise huan timomanahuise ica yaya cati amo cuali. 8 Tojuanti tijtequipanohuaj Toteco masque masehualme techtepanitaj, o techcualancaitaj. Amo tijtilquetzaj totequi masque masehualme camanaltij cuali ten tojuanti huan techtasacamatilíaj, o techtaijilhuíaj.

Masque sequij masehualme techitaj quej titacajcayahuani, tojuanti ticamanaltij cati senquisa melahuac. 9 Masque nochi masehualme campa hueli techixmatij, miyac techitaj quej elisquíaj amo techixmatij. Quemantica timopantíaj nechca miquilisti, pero noja tiitztoque. Quemantica miyac techatzacuilitíaj huan quinequij techtzontamiltise, pero noja amo techmic-tijtoque. 10 Masque tijpanoj tequipacholi, nochipa tipactoque. Masque titeicneltziti, tiquiricojchihuaj miyac masehualme para ma quipiyaca cati tahuel ipati nepa iixpa Toteco. Quemantica nesi para amo teno tijpiyaj, pero tijpiyaj nochi tamanti cati más monequi.

11 Noicnihua cati anitztoque ipan altepet Corinto, nimechcamanalhujtoc cati senquisa melahuac, huan amo teno nijtatijtoc. Huan nijnequi xijmatica para nelía nimechicnelía ica nochi noyolo. 12 Sinta amo cuali timoahuicaj, amo totajacol tojuanti, pampa miyac timechicnelíaj. Elisquíaj amotajacol amojuanti pampa san pilquentzi antechicnelíaj. 13 Na nimechcamanalhuía quej anelisquíaj anconeme. Nijnequi techicnelica san se quej tojuanti timechicnelíaj.

Tojuanti tiitiopa Toteco cati yoltoc

14 Amo ximosejcotilica ihuaya se cati amo quineltoca Toteco, pampa masehualme cati quichihuaj cati xitahuac, amo teno quipiyaj inihuaya cati motemactilijtoque ica tajtacoli. Huan cati nemij ipan taahuili amo teno

quippiyaj ica cati nemij ipan tzintayohuilot. ¹⁵ Tohueyiteco Cristo amo teno quippiya ica Amocualtacat. Huan se cati quineltocha Tohueyiteco Cristo amo teno quippiya ica se cati amo quinequi quineltochas. ¹⁶ Nojquiya itiopa Toteco amo teno quippiya ica taixcopincayome cati masehualme quinmachijchijtoque. Nochi tojuanti tiitztoque tiitiopa Toteco cati yoltoc pampa yaya mocahua ipan toyolo. Eltoc quej Toteco Dios quijito ipan Icamanal campa ijcuilijtoc:

“Nimochantis ipan masehualme cati nechneltochaj,
huan ninejnemis tatajco ten injuanti.
Na nielis niininTeco,
huan injuanti elise nomasehualhua.”

¹⁷ Yeca Toteco Dios quijitohua:

“Xiquintalcahuica masehualme cati amo quineltochaj Toteco.
Ximoiyocalica.

Amo xijnechcahuica cati amo cuali cati injuanti quichihuaaj.

Huan na nimechselis ica cuali.

¹⁸ Huan na nielis niamoTata,

huan amojuanti anelise annotelpocahua huan annoichpocahua.

Quej nopa quijitohua Toteco Dios Cati Quippiya Nochi Tanahuatili.”

7

¹ Huajca noicnihua cati nimechicnelía, pampa Toteco Dios techtencahuilijtoc para techchihuilis nochi nopa huejhueyi tamanti, ma timoiyocalica ten nochi tamanti cati quichihuasquía amo tapajpactic totacayo o toyolo iixpa Toteco. Ma tijchihuaca campeca para tijchijtinemise cati senquisa tatejtzeltolitic iixpa Toteco pampa tiquimacasij huan tijtepanitaj.

Taneltochani nepa Corinto moyolpatatoque

² Sempa techitaca ica cuali huan ximoyoltalica ica tojuanti pampa anquimatij amo aqui tijchihuilijtoque cati fiero. Amo aqui tijyacantoque ipan se ojti cati amo cuali, yon amo aqui tijcayajtoque. ³ Amo nimechilhúa ya ni para nimechajhuas quej anquichijtosquíaj cati amo cuali. Eltoc quej ya nimechilhui. Na miyac nimechicnelía huan nipaquisquía para nimequisquía amohuaya o niützotsquía nepa amohuaya. ⁴ Nelía nimotemachía ipan amojuanti. Nicamanalti yejyetzti ten amojuanti pampa anquichihuaaj cati cuali. Nijpiya miyac paquilisti pampa annejnemij xitahuac huan tahuel antechyolchicahuaj quema nimopantía ipan taohuijcajot.

⁵ Quema huijcajcoj nica ipan tali Macedonia, amo huelqui timosiyajquetzaj. Campa hueli tijpantiyayaj taijyohuilisti. Masehualme techtehuyayaj huan ipan toyolo timajmahuyayaj miyac. ⁶ Pero Toteco Dios cati quinyolchicahua cati quippiyaj tequipacholi, techyolchicajqui miyac ica Tito quema yaya ajsico. ⁷ Pero amo san nipajqui pampa sempa niqitac Tito, pero nojquiya nipajqui pampa nechilhui quenicatza anquiyolchicajtoyaj quema yaya ajsito nopona campa amojuanti. Huan nechilhui quenicatza tahuel anquiequij antechitase sempa, huan quenicatza anmotequipachojque ica cati anquichijtoyaj. Nechilhui para tahuel antechicnelíaj, yeca nelía nipajqui miyac.

⁸ Masque amechtequipacholmacac nopa seyoc noamatajcuilol, huan nojquiya na nimotequipacho quema nimechtitanili, ama ayecmo nimotequipachohua. Ama niqitaca para nopa amatajcuiloli san amechmacac tequipacholi para se talojtzi. ⁹ Huajca ama nelía nipaqui. Amo nipaqui pampa amechtequipacholmacac noamatajcuilol, pero nipaqui pampa nopa

tequipacholi amechpalehui para anmoyolcuetque ica cati amo cuali anquichihuayayaj. Quena, eltoc ipaquilis Toteco Dios para imasehualhua ma motequipachoca hasta moyolpatase. Huajca quijjosnequi para nopa amatajcuiloli amechpalehui miyac. ¹⁰ Sinta se masehuali motequipachohua quej Toteco Dios quinequi, moyolcuepa ten itajtacolhua, huan momaquiixtia huan nochipa paquis pampa quej nopa quichijtoc. Pero quema se masehuali san motequipachohua huan amo moyolcuepa quej miyac quichihuaj ipan ni taltipacti, nopa tequipacholi san quihualica miquilisti. ¹¹ Huajca xiquitaca quenicatza amechpalehui nopa tequipacholi cati amechpanti pampa anmotequipachojque quej Toteco quipactia. Chichahuac anquinequiyayaj anmomanahuisse huan yeca ancualanque ica nopa tacat cati tajtacolchijtoya. Cati panoc quichijqui para anquimacasisse Toteco huan para anquinequise ma niya nimechpalehuiti. Huan amoselti anmotemacaque para anquitatza-cuilitise nopa tajtacolchijca tacat. Anquichijque nochi cati anhuelque para anquixitahuase nopa tamanti para ama ma nesi amojuanti amo anquihuicaj tajtacoli.

¹² Huajca quema nimechtajcuilhui nopa amatajcuiloli, amo elqui san para cati tajtacolchijqui o san para cati tajjyohui, pero nijnequiyaya para huelis xijnetalica iixpa Toteco para antechicneliaj miyac.

¹³ Quema tijmatque para tahuel antechicneliaj, nelia tipajque miyac. Huan achi más tipajque quema tijmatque quenicatza anquiselijque Tito ica miyac paquilisti quema amechpaxaloto. Nelia anquiyolchicajque huan anquimacaque tetili. ¹⁴ Achtohuiya niquilhuijtoya para anquiselisquiaj ica cuali, huan quena, amo antechpinahualtijque. Quej nochipa nimechilhuijtoc nochi cati melahuac, nojquiya quisqui melahuac cati cuali niquilhui Tito anquichihuasquiaj. ¹⁵ Yeca ama Tito noja más amechicnelia pampa quielnamiqui quenicatza anquineltoaque nochi cati amechilhui. Huan anquiselijque ica miyac tatepanitacayot huan anhuihuipicayayaj pampa anquinequiyayaj anquichihuase cati senquisa cuali. ¹⁶ Huajca nelia nipaqui pampa nijmati nihueli nimotemachia ipan amojuanti, huan nijmati anquichihuase nochi cati xitahuac.

8

Nopa tomi cati anquisentilijque para sequinoc taneltocani

¹ Ama noicnihua nijnequi nimechpohuilis cati Toteco Dios quinchihuilitoc taneltocani ipan tiopame ten taneltocani cati mosentiliaj campa hueli ipan tali Macedonia, pampa nelia hueyi iyolo ica inijuanti. ² Masque inijuanti quipamotoque miyac taohuijcaoyot, quipiyaj miyac paquilisti. Masque teicneltzitzitzi, hueyi iniyolo huan nelia miyac tomi temacatoque para quinpalehuise sequinoc taneltocani cati amo teno quipiyaj. ³ Nijmati temacaque nochi cati hueltque huan teipa ica ininpaquilis temacaque noja más hasta pilquentzi mocajqui para inijuanti. ⁴ Huan ica nochi iniyolo techtajtanijque ma tijselica iniofrenda huan ma tiquinhuilica imasehualhua Toteco cati tajjyohuaaj pampa quinequiyayaj nopa paquilisti para huelis quinpalehuise. ⁵ Pero inijuanti noja más quichijque huejhueyi tamanti huan amo quej tojuanti tijchiyayayaj. Pampa achtohui motemacaque iniseltzitzitzi ica Toteco huan teipa motemacaque ica tojuanti para techpalehuise pampa quitaque para ya nopa ipaquilis Toteco.

⁶ Yeca quema niquitac cati nopa taneltocani ipan tali Macedonia temacatojay, niquilhui Tito ma yahui amechitati. Yaya cati amechpalehui achtohui

quema pejq̄ui anquisentilíaj nopa tomi huan nijnequiyaya ma amechyolchichahuati para anquitamisentilise nochi nopa tomi cati anquinequiyayaj anquinmacase sequinoc. ⁷ Nijmati nelcuali anquichihuaj nochi tamanti. Nelía anquineltocaj Toteco. Nelcuali antamachtíaj Icamanal. Miyac anquimatij. Nochi cati anquichihuaj, anquichihuaj ica nochi amoyolo. Huan miyac antechicnelíaj quej timechnextilijque xiteicnelica. Huajca ama nojq̄uiya ipan ni ofrenda, nimechylchicahua para xijpiyaca nelhueyi amoyolo huan xitemacaca miyac tomi para toicnihua cati taijyohuíaj.

⁸ Amo cana nimechnahuatía xijchihuaca. San nijnequi xijmatica para sequinoc tiopame tahuel quinequij quinpalehuse toicnihua cati amo teno quipiyaj. Sinta nojq̄uiya antemacaj miyac, anquinextise para nelía anteicnelíaj. ⁹ Ya anquimatij para hueyi iyolo Tohueyiteco Jesucristo ica masehualme huan teicnelía miyac, huan masque yaya itztoya tahuel tapijpixtoya, mochijqui teicneltzi por amojuanti, para amojuanti huelis anmoricojchihuase ica cati nelía ipati por cati yaya quichijqui.

¹⁰ Huajca nimechmaca se camanali para xijtamisentilica nopa ofrenda cati anquipehualtijque anquisentilíaj se xihuitaya, pampa elqui amojuanti cati achtohui pejq̄ui anquisentilíaj tomi. ¹¹ Huajca xijchihuaca nochi cati anhuelij ama para xijtamisentilica nopa ofrenda ica san se nopa paquilisti cati anquimatque quema achtohuiya anquinequiyayaj antemacase. ¹² Pampa sinta se masehuali temaca iofrenda ica iyolo, huajca Toteco quiselis nopa ofrenda quej cati nopa masehuali quipiya, masque miyac o pilquentzi. Yaya amo amechtajtania xitemacaca cati amo anquipiyaj.

¹³ Pero amo nimechihuía xitemacaca nelmiyac hasta moricojchihuase nopa sequinoc toicnihua huan amojuanti antaijyohuise hasta amo anquipiyase ten ica anpanose. ¡Amo! ¹⁴ San nijnequi para ama xiitztoca san se huan yon se amo mayanas. Amantzi quema anquipiyaj miyac, hueli anquinpalehuse cati amo teno quipiyaj. Huan quej nopa, quema amechpolos cati monequi, inijuanti nojq̄uiya amechpalehuse. ¹⁵ Eltos quej ijcuilijtoc ipan Icamanal Toteco campa quijtohua: “Yaya cati quisentili miyac pixquisti, amo mocahui miyac pampa quinpalehui sequinoc. Huan yaya cati quentzi quisentili, amo teno quipolo pampa sequinoc quipalehuijque.”

Quititanque Tito ipan altepet Corinto

¹⁶ Nelía nijtascamati Toteco Dios, pampa quichijtoc para Tito ma amechicneli huan ma amechpalehui san se quej na nijnequi nijchihuas. ¹⁷ Quema niq̄uilhui ma yahui sempa amojuanti, nelía paquiyaya pampa yaya iselti quinequiyaya sempa amechitati. ¹⁸ Huan ihuaya Tito nojq̄uiya nijtitani ma amechpaxaloti seyoc toicni cati nochi taneltocani ipan tiopame campa hueli quihueyimatij pampa yejyetzti tepohuilía icamanal Toteco. ¹⁹ Huan nojq̄uiya toicnihua ten campa hueli tiopame quiteqitalijtoque ni toicni para ma nejnemi tohuaya para tijhuicase nopa tomi cati quisentilijtoque huan tiq̄uinnmacase toicnihua cati taijyohuíaj. Ni tequit elis para ihueyitilis Tohueyiteco huan quinnnextilis quenicaatza monequi timopalehuse. ²⁰ Tiyase san sejco para amo aqui huelis techtelhuis para amo tijchijtoque cati xitahuac ica nopa hueyi ofrenda cati toicnihua quisentilijtoque. ²¹ Tijchihuaj campeca para tijchihuase cati xitahuac iixpa Toteco huan iniixpa nochi masehualme.

²² Ica ni ome nojq̄uiya nijtitani seyoc toicni cati technextilijtoc miyac huelta ipan miyac tamanti tequit para yaya nochipa quichihua cuali itequi Toteco. Huan ama noja más yaya quinequi yas amechitati ihuaya Tito pampa

miyac motemachía ipan amojuanti para anquichihuase nochi cati cuali ica ni ofrenda.

²³ Sinta se acajya amechtatzintoquilis ajquiya Tito, xiquilhuica para yaya nohuampo cati tequiti nohuaya para san sejco timehpalehuise. Nojquiya xiquinilhuica para nopa tacame cati yahuij ihuaya elij inintatitanilhua taneltocani ipan tiopame campa hueli. Cati injuanti quichihuaj eltoc para ihueyitilis Tohueyiteco Cristo. ²⁴ Huajca xiquinselica ica cuali para toicnihua cati itztoque ipan nochi tiopame ma quimatica quenicatza anquinicnelíaj sequinoc taneltocani, pampa ya tiquinilhuijtoque para amojuanti miyac anteicnelíaj.

9

Ma titemacaca totomi ica paquilisti

¹ Amo monequi nimechtajcuilhuis ipan ni amatajcuiloli para xiquin-palehuica ica tomi toicnihua cati taijyohuíaj, ² pampa ya nijmati para tahuel anquinequij anquinpalehuise. Huan ica paquilisti niquinilhuijtoc taneltocani ipan tali Macedonia para amojuanti ipan tali Acaya anpejque se xihuijtaya para anmoilhuisse quenicatza huelis anquinpalehuise. Yeca nechca nochi injuanti cati quicajque cati anquichihuayajaj, quinequiyayaj quinpalehuise toicnihua nojquiya. ³ Huajca nimechtitanilía ni toicnihua para ma quisa melahuac cati niqijto ten amojuanti. Huajca nijnequi xijsentilica nopa tomi huan ximocualtica para anquinmactilise. ⁴ Nelía nipinahuasquía na huan amojuanti nojquiya, sinta sequij ten tali Macedonia yase nohuaya hasta amotal huan timechpantitij amo anquisentilijtoque nopa tomi. Ya niquinilhuijtoc para tahuel anquinequiyayaj anquinpalehuise cati teicneltziti. ⁵ Yeca nimoilhui más cuali ma yaca achtohui ni toicnihua para amechpalehuise anquisentilise se hueyi ofrenda cati antechtencahuilijtoque antemacase. Quej nopa nesis antemacaj ica paquilisti huan amo pampa amechchihualtijtoque.

⁶ Xiquelnamiqica ini: Cati tocas pilquentzi, pixcas pilquentzi. Huan cati tocas miyac, nojquiya miyac pixcas. ⁷ Sesen ten amojuanti monequi temacas quej ipa moilhuijtoc ipan iyolo para temacas. Amo xitemacaca ica tequipacholi, yon pampa seyoc amechfuerzajhuía, pampa Toteco quicnelía cati temaca ica paquilisti. ⁸ Huan Toteco Dios quiipya nochi chichahualisti para amechmacas tahuel miyac tatiochihualisti hasta mocahua para nochipa anquipayase nochi cati monequi, huan nojquiya anquipayase miyac para ica anquinpalehuise sequinoc. ⁹ Ijcuilijtoc ipan Icamanal Toteco campa quiijtohua:

“Se cuali masehuali quinpalehuía miyac cati teicneltziti.
Nopa cuali tamanti cati quichihua mocahuas para nochipa.”

¹⁰ Pampa yaya Toteco Dios cati temaca xinachtí para tijtocase huan quitiochihua cati tijtocaj para ma oncas ten tijcuase. Huan yaya nojquiya amechmacas tahuel miyac xinachtí para anquitocase huan quimiyaquilis para anquipayase se hueyi pixquisti para anquipayase nelía miyac para ica anquichihuase miyac tamanti cati cuali para anquinpalehuise sequinoc.

¹¹ Quena, Toteco amechmacas tahuel miyac para huelis antemacase miyac. Quej nopa, quema tiquinmactilise cati teicneltziti nopa cuali ofrenda cati anquisentilijtoque, injuanti quitascamatise huan quipaquilismacase Toteco Dios.

¹² Huajca quema anquintitanilise nopa tomi, amo san tiquinmacase cati quinpolohua nopa taneltocani, pero tijchihuase para ma quitascamatica

Toteco ica nochi iniyolo. ¹³ Quena, quema quiselise nopa tapalehuili, quipaquilismacase Toteco pampa anquinmacaque hasta mocahua cati mon-equiyyaya. Huan nojquiya quema antemacaj miyac, antenextilíaj para nelía anquitepanitaj nopa cuali camanali ten Tohueyiteco Cristo. ¹⁴ Nojquiya ica miyac teicnelijcayot injuanti motatajtise ica Toteco por amojuanti, pampa quiiitase para nelía hueyi iyolo ica amojuanti huan amechtichijtoc miyac, huan yeca hueli anquinpalehuíaj.

¹⁵ Ma tijtascamatica Toteco Dios pampa techmacatoc Cristo, nopa nemacti cati nelía hueyi hasta amo hueli tijtamipohuase ten ya.

10

Itequiticayo Pablo

¹ Na niPablo nimechtajtania se tamanti huan nitajtani ica yolic huan ica miyac teicnelijcayot quej Cristo quichihuasquia. Amojuanti anquijtohuaj nimechnojnotza nelchicahuac quema nimechtajcuilhuía, pero quema niitztoc amohuaya, nimoechcapantalia huan nimechnojnotza ica cuali. ² Nimechtajtania para quema niajsiti campa amojuanti, amo techchihualtica ma nicamanaltis chicahuac ica nopa masehualme cati quijtohuaj san nichihua tamanti para nimohueyimatis quej sequinoc masehualme ipan ni taltipacti quichihuaj.

³ Quena, na san nieli se masehuali cati ninemi ipan ni taltipacti, pero quema nimotehuía ica cati amo cuali, amo nitatehuía quej masehualme quichihuaj ipan ni taltipacti. ⁴ Huan amo nijtequihuía teposti quej masehualme quitequihuíaj nica, pero nijtequihuía ichicahualis Toteco Dios cati quisosolohua nochi nopa chichahuac tamanti ten Amocualtatoc. ⁵ Niquintani nochi talnamiquilisti cati amo cuali cati quinchihualtíaj masehualme ma mohueyimatica huan cati quintzacuilíaj para amo ma quiixmatica Toteco. Huan nochi cati se masehuali moyolilhuía, tijyejyecoahuaj huan tijchihualtíaj para nopa talnamiquilisti ma mopata ica cati Cristo quijtohuaj para melahuac huan nopa nopa masehuali ma quineltocas ya. ⁶ Huajca quema amojuanti anquitamichihuase cati quijtohuaj Toteco huan anmotamixitahuase quej monequi, tiquintatzacuiltise injuanti nopona cati noja ayemo tatepanitaj.

⁷ San anquitachilíaj quej nesi se tamanti. Anquitachilíaj itachiyalis se masehuali, pero amo anquiiitaj quenicatza eltoc ipan iyolo. Sinta se cati itz-toc nopona amohuaya moilhuía para temacti yaya iaxca Cristo, huajca ma quimachili para tojuanti nojquiya tiiaxcahua san se quej ya. ⁸ Huan masque sequij quijtose nimohueyimati miyac ica nopa tequiticayot cati Tohueyiteco Jesús nechmacatoc, amo nipinahua. Pampa nelía nijpiya tequiticayot para nimechpalehuis para achi más ximoscaltica ipan Tohueyiteco Jesús, pero nopa tequiticayot amo eltoc para nimechsosolos. ⁹ Nimechilhuía ya nopa para amo ximoilhuica nijnequi nimechtemajmatis ica noamatajcuilol. ¹⁰ Nijmati sequij nopona quijtohuaj para amo aqui ma quichihuili cuenta noamatajcuilol. Quijtohuaj para ipan noamatajcuilol nimechnojnotza nelchicahuac, pero quema niitztoc amohuaya, amo nijpiya tetili, yon amo nijmati nicamanaltis cuali. ¹¹ Pero ma quimatica cati quej nopa camanaltij para quej nimechnojnotza chichahuac ipan amatajcuiloli quema amo niitztoc amohuaya, nojquiya nimotalis chicahuac quema niitztos amoixpa.

¹² Na amo nimohueyimatis huan niquijtos niitztoc nel nihueyi quej nopa sequinoc cati amechilhuíaj para injuanti más cuajcualme. Injuanti san

motachilíaj huan moilhuíaj para nelía cuajcualme. Amo quintachilíaj se-quinoc cati nelía nemij xitahuac. Inijuanti motamachihuaj iniselti ica tatamachihuali cati injuanti quisencajtoque. ¡Nelía huihuitique! ¹³ Pero tojuanti, amo timohueyimatij ica se tequiticayot cati amo tijpiyaj. ¡Amo! San tijnequij tijchihuase nochi nopa tequit cati Toteco quiyocacajtoc para tojuanti huan techmacatoc ma tijchihuaca. Huan se quentzi ten nopa tequit eltoc nopona campa amojuanti para timechpalehuise.

¹⁴ Amo tijpanoltilíaj cati totequi tojuanti quema timechilhuíaj para tijpiyaj tequiticayot ica amojuanti, pampa tojuanti tielij cati achtohui tiyajque hasta campa amojuanti huan timechilhuijque nopa cuali camanali ten Cristo.

¹⁵ Nojquiya amo timohueyimatijtoque huan tiquijtoque para tijchijtoque se tequit campa amojuanti cati sequinoc quichijtoque. ¡Amo! Tojuanti san tijchiyaj para quema más chichahuac anquineltocase Toteco, noja más huelis titequitise nopona campa amojuanti, pero san tijchihuase nopa tequit cati Toteco techmacatoc tijchihuase. ¹⁶ Huan nojquiya tijchiyaj para huelis titepohuilise icamanal Toteco ipan sequinoc altepeme cati más huejca ten amojuanti campa amo aqui tequitoc. Quej nopa amo aqui huelis quijtos timohueyimatij ica se tequit cati sequinoc ya quipehualtijtoyaj.

¹⁷ Huajca sinta se acayja quinequi mohueyimatca camanaltis, huajca ma mohueyimatca camanalti ica nochi cati Tohueyiteco quichihuilijtoc. ¹⁸ Amo ipati quema tojuanti timohueyimatij, san ipati quema techhueyimatí Toteco.

11

Pablo huan nopa tacajcayajca tayolmelahuani

¹ Nijnequi techijyohuica na se talojtzi huan techcahuilica ma nimohueyimatís se quentzi quej se cati huihuitic. ² Nelía nimechtasojmati miyac quej Toteco Díos amechtasoymati. Eltoc quej se nitetaj cati nijsencajqui para nimechtemactilis para anelise aniaxchahua Cristo. Huan nijnequi nimechnextis iixpa huan nijmati anelise quej se cuali ichpocat cati amo quema nejnentoc ica seyoc, huan nijnequi xiquicnelica san ya. ³ Pero niquimacasi para Amocualtacat huelis amechajcayahuas quej huejcajquiya quicajcayajqui Eva. Huelis quichihuas amo tapajpactic amotalnamiqulís para ayecmo anquicnelise san Cristo ica se amoyolo cati cuali iixpa.

⁴ Pampa nijmati quema ajsij sequinoc tacame campa amojuanti cati tamachtíaj seyoc camanali para anmomaquixtise cati amo quej timechilhuijtoque, anquinselíaj ica cuali. Masque ajsij cati tamachtíaj seyoc tamachtíli ten Jesús cati amo quej timechmachtijtoque, o quinequij xijselica seyoc tamati itonal cati amo Itonal Toteco, amojuanti nima anquinneltoquilíaj.

⁵ Pero na nimoilhuía para nopa tayolmelahuani cati anmoilhuíaj quipiyaj más tanahuatili, amo más huejhueyi que na. ⁶ Pampa masque amo nimo-machtijtoc para nicamanaltis miyacapa ica camanali cati tahuel yejectzi, na cuali nijmati cati nitamachtía, huan miyac huelta nimechnextilijtoc para melahuac notamachtíli.

⁷ ¿Anmoilhuíaj nitajtacolchijqui quema nimechpohuili icamanal Toteco huan amo nimechtajtani techmacaca ten ica nipanós? Nimoechcapantali para huelis anmohueyichihuase amojuanti. ⁸ Eltoc quej “niquintachtequili” toicnihua ipan sequinoc tiopame para huelis nimechpalehuis, pampa nijseli inintomi para ica nimopanolti quema nitequitiyaya campa amojuanti.

⁹ Huan quema niitztoya amohuaya huan nechpolohuayaya ten ica nipanós, amo nimechtajtani amojuanti techpalehuica. Elqui nopa taneltocani ten tali Macedonia cati ajsicoj huan nechhualiquilijque nochi cati monequiyaya.

Nochipa nimomocuitahui para amo nimechcuatotoni huan quej nopa noja nijchijtiyas pampa amo quema nijnequi nimechcuatotonis ica cati nechpolohua. ¹⁰ Quej temachti nijmati para Cristo itztoc ipan na, nojquiya temachti nijmati para amo nijselis tomi ten amojuanti, yon ten sequinoc ipan nochi tali Acaya, pampa amo nijnequi para se acaya nechcamatzacuas. Nijnequi para huelis niqijtos para amo teno nijselia ten amojuanti quema nitequiti nopona amohuaya. ¹¹ Pero amo ximoilhuica para amo nijselia amotomi pampa amo nimechicnelia. ¡Amo! Toteco Dios quimati para nelia nimechicnelia miyac. ¹² Amo nijselia amotomi pampa nijnequi niquinocamatzacuas nopa sequinoc tacame cati tahuel quinequij quijitose para quichihuaj san se quej na. Amo neli tequitij quej na, pampa inijuanti amo tamachtiaj sinta masehualme amo quintaxtahuiaj. ¹³ Inijuanti san istacatij. Amo cana itayolmelajcahua Toteco. Mochihuaj quej itayolmelajcahua Toteco san para amechcayahuaya.

¹⁴ Huan amo teno ximoilhuica ica cati quichijtoque, pampa Amocualtacat nojquiya mopata huan mochihua quej se ilhuicac ejquet cati huala nepa campa onca taahuili. ¹⁵ Huajca amo teno ximoilhuica sinta itequipanojcahua Amocualtacat nojquiya monextiaj quej tamachtiani cati cuajcualme. Pero teipa quinchiya se tatzacuiltlisti quej quinamiqui por cati amo cuali quichijtoque.

Pablo taijyohujtoc pampa yaya itztoc itayolmelajca Toteco

¹⁶ Sempa nimechilhua para ma amo aqui moilhui nihuihuitic o se nilocojtacat para quej ni nicamanalti. Pero masque annoilhuiaj nihuihuitic, techcahuilica ma nicamanalti ten na noselti para nimohueyimatis se quentzi. ¹⁷ Quema nimohueyimati, amo nicamanalti quej Tohueyiteco camanalti. Nicamanalti quej se cati huihuitic cati quipactia mohueyimati ica icamanal. ¹⁸ Pero pampa nopa sequinoc tacame cati amechmachtiaj mohueyimatij por cati quichijtoque, huajca na nojquiya nijchihuas. ¹⁹ Nijmati para amojuanti annoilhuiaj para tahuel antalnamiqij, huajca ¿para ten amechpactia anquintacaquilise cati huihuitique? ²⁰ Anquitacaquilij cati hueli cati amechnahuatia quej anitequipanojcahua. Anquincahuilij ma amechquixtilica amotomi huan ma amechcayahuaca. Anquincahuilij ma mohueyimatica huan ma amechixtatzinica. ²¹ Nipinhua nimechilhuis para amo nijpiya chicahualisti para quej nopa nimechchihuilisquia. Pero sinta monequi nimohueyimatis para antechitase quej inijuanti, cuali hueli nimohueyimatis. (Nicamanalti quej se huihui tacat.)

²² Inijuanti quijitohuaj para hebreo tacame, huan na nojquiya nihebreo. Quijitoahuaj para israelitame, nopa masehualme cati Toteco quintapejpenijtoc, huan na nojquiya niisraelita. Inijuanti quijitohuaj para iixhuihua Abraham, huan na nojquiya niixhui. ²³ Quijitoahuaj para quitequipanohuaj Tohueyiteco Cristo, pero na achi más nijchijtoc hueyi tequit que inijuanti. (Nijsenhuiquilia nicamanalti quej se huihui tacat.) Na nitequititoc más chichahuac que inijuanti. Nelia miyac huelta nechcaquilijtoque masehualme. Miyac huelta nechtzactoque ipan tatzacme, huan miyac huelta masehualme quinectoque nechmictise. ²⁴ Macuili huelta israelitame nechhuijhuitectoque hasta nopa treinta y nueve hueltas cati quicahuilia totanahuatil. ²⁵ Eyi huelta nechmajmaquilijtoque ica cuamayit. Se huelta nechtepachoque ica tet. Eyi huelta niutzoya para nimisahuis ipan hueyi at pampa atzonpolijqui nopa cuaacali cati ipan nyahuiyaya. Semilhuit huan seyohual niutzoya tatajco hueyi at pampa atzonpolijqui tocaacal. ²⁶ Ninejntoc tahuel

miyac para nitepohuilía icamanal Toteco campa hueli masque mahuilili noojhui o tahuel huejca. Niqunixcotontoc miyac hueyame cati mahuilili. Nimopantijtoc inihuaya tachtequini. Nimopantijtoc campa mahuilili iniixpa israelitame cati nomasehualhua huan iniixpa masehualme cati amo israelitame. Nijpanotoc cati mahuilili ipan altepeme, huan ipan huactoc tali campa tatzítzicatoc, huan ipan hueyi at. Huan nimopantijtoc campa mahuilili quema nimopanti inihuaya masehualme cati quijtohuaj para taneltocani, pero amo cana. ²⁷ Nitequititoc chichahuac hasta tahuel nisyajtoc. Quemantica amo nijpixqui yon se talojtzi para nicochis. Miyac huelta nimayanayaya huan niamiquiyaya miyac pampa amo nijpixqui tacualisti. Quemantica nisesecuiyaya pampa amo nijpixqui ten nimoquentis.

²⁸ Huan amo san ni tamanti cati nechtequipacholmaca, nojquiya mojmosta nimatequipachohua por nochi inintequipacholhua nochi taneltocani ipan campa hueli tiopame. ²⁹ Quema se taneltoquet mococohua o amo quiyiya tetili ipan Toteco, na nojquiya nijmati para nimococohua. Sinta se acayja quiyoltilana se taneltoquet ma tajtacolchihua, na nojquiya nipinahua huan nicualani ica cati quicajcayajqui.

³⁰ Sinta monequi nimohueyimatis, san nimohueyimatis ica tamanti cati tenextilía para amo na cati nijpiya chichualisti. ³¹ Toteco Dios, yaya cati iTata Toteco Jesús huan cati quinamiqui ma tijhueyichihuaca para nochipa, yaya quimati para senquis melahuac cati nimechilhúa. ³² Quema niitzoaya ipan altepet Damasco, nopa gobernador cati quitequitalijtoya Tanahuatijquet Aretas, quintali soldados campa icalte itepa nopa altepet para ma nechitzquica. ³³ Pero noicnihua nechtatijque ipan se hueyi chiquihuit huan nechtemohuijque ipan se ventana cati eltoya ipan nopa tepamit cati quiyahualtzacua nopa altepet. Quej nopa huelqui nicholo ten nopa gobernador.

12

Cati Toteco quinextilijtoc Pablo

¹ Na nijmati para san topic más nicamanaltis ten na, pero noja nijchihuas. Ama nijnequi nimechilhuis ten nopa tanextili cati niqiztoc huan nopa tamanti cati Toteco nechnextilijtoc.

² Quiyiya majtacti huan nahui xihuit Toteco nechhuicac ipan nopa expa ilhuicac cati más huejcapa campa yaya mocahua. Amo nijmati sinta quihuicac notacayo o amo, san Toteco Dios quimati, pero ya nijneltoayaya Cristo quema panoc ya nopa. ³ Pero amo nijmati sinta niyajqui ica notacayo o amo. San Toteco quimati. ⁴ Pero, quena, nijmati nechtilanqui hasta ilhuicac campa tahuel tayejyectzi. Huan nozona nijcayqui camanali cati pano ixtacatzí hasta amo hueli niqijtos pampa amo nechcahuilíaj. ⁵ Na nihuelisquía nimohueyimatis ica nochi cati niqitac nozona, pero amo nijchihuas. Sinta nijnequisquía nimohueyimatisquía ica se tamanti, nimechpohuilisquía tamanti cati amechnextilis para amo nijpiya chichualisti na. ⁶ Huan sinta nijnequisquía nimohueyimatis ten na, amo nesisquía sinta huihuitic, pampa san nimechilhuisquía camanali cati melahuac. Pero amo nijnequi nicamanaltis ten na. Amo nijnequi masehualme nelpano ma nechtepanitaca. Nijnequi san ma nechtepanitaca por cati quiztoque nijchihua huan por cati quicactoque nitamachtia.

⁷ Huan Toteco amo quinejqui ma nimohueyimati ica nochi nopa huejhueyi tamanti cati nechnextili, huan yeca nechmac se tamanti cati eltoc quej se huitzi ipan notacayo. Eltoc se itatitanil Amocualtat cati ajsitoc para ma nechtaijyohuilti para ma amo nimohueyimati ica noselti quej amo

quinamiqui. ⁸ Expa nijtajtanjtoc Tohueyiteco para ma nechquixtili, ⁹ pero yaya nechilhui: “¡Amo nijchihuas! Hueyi noyolo ica ta huan san ya nopa monequi. Nochicahualis achi más mopanextía quema se masehuali amo quipiya tetili.” Huajca yeca nipaqui pampa amo nitetic, pampa quej nopa monextía ipan na ichicahualis Cristo. ¹⁰ Quena, nipaqui pampa amo nitetic huan nipaqui quema masehualme nechtaijilhuáj. Nipaqui quema amo nijpiya ten ica nipanos huan quema masehualme nechtaijyohuiltíaj. Nipaqui quema nijpano taohuijgayot pampa niquixmati Cristo, pampa quema amo nijpiya tetili, nimocuepa nitetic pampa Cristo nechmaca ten ya ichicahualis.

Pablo motequipacho por nopa taneltocani ipan Corinto

¹¹ Nicamanaltitoc ten na noselti quej se nihuihui tacat. Pero eltoc pampa amojuanti antechchihualtjitoque ma nijchihua. Monequiyaya ancamanaltitotsequíaj cuali ten na, pero amo ya nopa anquichijtoque. Masque na noselti ya nimechilhuijtoc para amo teno nopati, melahuac amo niitztoc más nipilquentzi iixpa Toteco que nopa tacame cati itztoque campa amojuanti cati quijtohuaj para injuanti itayolmelajcahua Toteco cati más huejhueyi. ¹² Quema niitztoya amohuaya nimechnextili para melahuac niitayolmelajca Toteco pampa nijchijqui miyac tanextili, huan tiochicahualnescayot, huan tamanti cati ica san anmotachiliyayaj. ¹³ Amo huelis anquijitose para niquinchihuilijtoc sequinoc más cuali huan amo quej nimechchihuili amojuanti. San, quena, nijseli iniofrendas huan ica amojuanti amo nijnejqui nimechcahuilis techpanoltica amojuanti. Techtapojpolhuica sinta ya ni elqui se tamanti amo cuali.

¹⁴ Ama nimocualtía para nimechpaxaloti ica expa. Pero amo teno ica nimechcuatotonis pampa amo nijnequi amotomi, na nimechnequi amojuanti. Amojuanti annoconehua huan anquimatij amo inintequi coneme para quiajocuisse tomi para inintatahua, pero inintequi tetatme quiajocuisse tomi para quinpanoltise ininconehua. ¹⁵ Huajca ica paquilisti nijtamiltis nochí cati nijpiya huan hasta na nojquiya nimotemactilis para nimechpalehuis para anquisase cuali iixpa Toteco. Huan nimotemactilis para nimechpalehuis masque nesi para quema más nimechicnelía, ayecmo más antechicnelíaj na.

¹⁶ Pero masque anquimatij amo nimechtajtani para antechpanoltise, itztoque sequij campa amojuanti cati quijtohuaj nimechajcayajqui. Quijtohuaj nise tacajcayajquet cati tahuel nijmati nitacajcayahuas. ¹⁷ Pero ¿quenicatza huelis quijitose ya nopa? ¿Anmoilhúaj amechquixtili se tenijqui se tacat cati nimechtitanilijtoc? ¡Amo! ¹⁸ Nijtajtani Tito ma yahui amechitanti huan nijtitanqui seyoc toicni ihuaya, pero injuanti amo teno amechtajtanijqe. ¿Amo ijquino? Inijuantí huan na san se tamanti tijchihuaj. San se ojti tijtoquilíaj huan san se Itonal Toteco tijpiyaj.

¹⁹ Huelis anmoilhúaj nimechilhúa nochi ya ni para timomanahuisse amoixpa, pero amo, amo quej nopa. Toteco Dios huan Toteco Cristo quimatij para nochi cati nimechilhuijtoc eltoc para nimechpalehuis anmoscaltise más ipan Toteco. ²⁰ Pero niquimacasi para quema niajsiti campa amojuanti, huelis amo nimechpantiti quej na nijnequi, huan yeca amo anpaquise ica cati monequis nimechilhuis. Niquimacasi nimechpantiti anmonajnanquilijtoque, anmoiyocanectoque, ancualantoque, anmotajcoxelojtoque, anmotajilhuijtoque, anmoiejelnamictoque, anmohueyimajtoque huan anmoiyocacajtoque para sese quichihuas san cati yaya quinequi. ²¹ Quena, niquimacasi pampa huelis quema niyas nozona, noTeco sempa nechchihuas ma nimopinahuaiti ica quenicatza anitztoque. Huelis monequis

nichocas. Huelis miyac cati mosentilíaj amohuaya cati achtohui tajtacolchique ayemo moyolcuetoque. Huelis quisenhuiquilíaj amo tapajpactique iixpa Toteco, huan noja ten hueli quichihuj ica cati amo inintahuical, huan quichihuj sequinoc tamanti cati amo cuali.

13

Pablo quinnahuatijtejqü

¹ Ama ica expa nimechpaxaloti. Icamanal Toteco quiijtóhua sinta monequi tijnextise para melahuac se tamanti, monequi ome o eyi masehualme cati quiihtoque cati panoc para tenextilise miyacapa cati melahuac panoc.

² Quema nimechpaxaloto ica ompa, niqincamanalhui inijuanti cati tajtacolchijtoyaj, huan ama, quej niitztosquía nozona amohuaya, sempa niqincamanalhuía inijuanti huan nochi sequinoc, huan nimechymelahuaya para quema niyas nozona ni huelta, ayecmo aquí nijcahuas para amo nijtálnamictis.

³ Anquitemohuayayaj se tanextili para anquimatise sinta Tohueyiteco Cristo camanalti ipan ná o amo, huan quena, Cristo amechnextilis. Huan quema yaya amechnextilis amo elis se tamanti yamanic cati quichihuas, amechnextilis ihueyi chicahualis. ⁴ Masque nesqui quej itacayo Cristo amo quipixqui chicahualisti quema quicuamapelolijque huan yaya mijqui, ama yaya itztoz huan quiyiya ihueyi chicahualis Toteco. Ama tojuanti nojqüya tiitztoque quej yaya elqui huan amo tijpiyaj chicahualisti. Pero pampa timotatzquilijtóque ipan Cristo, tiyoltoque ipan ya, huan tijpiyaj nemilisti, huan tijpiyaj ichichahualis Toteco. Huan quena, tijtequihuse nopa chicahualisti quema niitztos nozona amohuaya.

⁵ Huajca ximotajtachilica cuali sinta nelía antaneltocani o amo. Ximoyeyecoca sinta anquichihuj tamanti cati quinextíaj para nelía anquineltozaj Tohueyiteco o amo. Ximotatzintoquílca sinta temachtí anquimatij para Jesucristo itztoz ipan amoyolo. Pampa sinta amo, huajca amo nelía anquineltozaj. ⁶ Na nijchiya xijmatica para tojuanti ticalquistoque ipan ni tayejyecoli huan nelía tiiaxahuaya Cristo.

⁷ Timotatajtíaj ica Toteco para quema tiajsise, tijpantise para amo anquichihuj yon se tamanti cati amo cuali. Amo timotatajtíaj para masehualme ma techitaca huan quiijtose para ticuajcualme. Nijnequi xijchihuaca cati xitahuac masque ayecmo monequis notequi para nitetálnamic-tis nozona huan nimechnextilis nochichahualis quej itayolmelajca Toteco.

⁸ Pampa sinta nochi amujuanti nozona ya anquichihuj cati xitahuac, amo teno más monequi nijchihuas. Pero sinta noja polihui anquichihuase cati xitahuac, huajca monequi nitequitis para xijchihuaca cati xitahuac.

⁹ Tojuanti nelía tipaquise sinta quema tiajsitij, nochi elis cuali huan ya anquiyase chicahualisti. Quej nopa ayecmo monequis timechnextilise tochichahualis. Huajca timotatajtíaj ica Toteco para xielica antaneltocani cati ya anquichihuj nochi cati senquisa cuali iixpa.

¹⁰ Yeca nimechtajcuilhui ni amatajcuiloli para xijcualtalica nochi cati monequi para amo monequis nimechnextilis nochichahualis quema nimechpaxalos. Huan nopa tequiticayot cati Toteco nechmacac, amo nijnequi nijtequihuis para nimechtatzacuiltis huan nimechcocos, pero nijnequi para huelis nijtequihuis para nimechpalehuis para anmoscaltise ipan Toteco.

¹¹ Huajca ama, noicnihua, para nijtamiltis nijnequi nimechilhuis, xijpiyaca paquilsti. Xijsencahuaca nochi cati amo cualí campa amujuanti para

nochi eltos senquisa cuali. Ximoyolchicahuaca. Xijpiyaca san se amotal-namiquilis huan xiitztoca ica tasehuilisti ipan amoyolo. Huan quej nopa, Toteco Dios cati teicnelía huan cati temaca tasehuilisti itztos amohuaya.

¹² Ximotajpaloca se ica sequinoc huan ximotzoponica ica se tatepanitacayot cati tatzejtzeltic pampa anmoicnelíaj ipan Toteco. ¹³ Nochi itatzejtzeltica masehualhua Toteco amechontajpalohuj.

¹⁴ Ma itztoca amohuaya Tohueyiteco Jesucristo cati hueyi iyolo ica amojuanti, huan Toteco Dios cati amechicnelía, huan Itonal Toteco cati nemi ica amojuanti para amechyantiyas. Quej nopa ma eli.

Nopa Amatajcuiloli cati Pablo Quintajcuilhui Taneltocani ipan Tali Galacia

Pablo quintajcuilhui taneltocani ipan tali Galacia

¹ Na niPablo, niitayolmelajca Jesucristo nimechtajcuilhui. Amo nechtequitalijque masehualme para nielis niitayolmelajca Jesucristo, yon amo nechilhuijque sequinoc quema Toteco nechtequitali. Nechtequimacac Jesucristo huan Toteco Totata cati quiyolcuic Jesús quema mictoya. ² Na huan nochi toicnihua ipan Cristo cati itztoque nica nohuaya timechtajpalohuaj amojuanti cati anitztoque ipan itiopa Toteco ipan tali Galacia. ³ Toteco Totata huan Toteco Jesucristo ma quipiyaca hueyi iniyolo ica amojuanti huan ma amechmacaca tasehuilisti ipan amoyolo. ⁴ Jesucristo motemacac huan mijqui para techmaquixtis ten totajacolhua huan para techtojtomas ten cati amo cuali cati onca ipan ni tonali pampa ya ni elqui ipaquilis Toteco Totata para ma quichihua. ⁵ Huajca ma tijhueyimatica Toteco nochi tonali para nochipa. ¡Quej nopa ma eli!

Amo onca seyoc tamachtli cati huelis techtajacolquixtis

⁶ Nelía amo hueli nijneltoca para nimantzi anquicajtejque Toteco cati quipiya hueyi iyolo ica amojuanti ipan Jesucristo huan cati amechnotzqui para aniaxcahua. Ama ya anquitoquilíaj seyoc tamanti tamachtli cati amo quej cati nimechilhui huan anmoilhuíaj ya nopa amechtajacolquixtis. ⁷ Pero amo cana onca seyoc tamachtli cati huelis amechtajacolquixtis. Pero itztoque sequij tacame cati san amechcuapolhuilíaj amotalnamiquilis, huan quinequij quipatase nopa cuali camanali ten Cristo. ⁸ Sinta cati hueli masehuali amechilhui seyoc tamachtli cati quijitohua para huelis amechtajacolquixtis, ma quiajisi ihueyi cualancayo Toteco. Quena, masque na niasquía campá amojuanti o masque se ilhuicac ejquet hualasquía ten ilhuicac huan amechmachtisquía seyoc tamachtli huan amo ya cati timechmachtijtoque, ma quiajisi ihueyi cualancayo Toteco. ⁹ Sempa nimechilhúa cati ya nimechilhujtoc. Sinta se acajya amechilhuis seyoc tamachtli cati amo ya nopa cati anquiselijtoque, ma quiajisi ihueyi cualancayo Toteco.

¹⁰ Amo nimechilhúa ya ni pampa nijnequi nimechpactis, o nijnequi ma nechcualitaca masehualme. Nimechilhúa ni pampa nijnequi nijpactis Toteco Dios. Sinta nijtemosquía ma nechcualitaca masehualme, huajca ayecmo niitztosquía niitequipanojca Cristo.

Quenicatza Pablo mochijqui itayolmelajca Toteco

¹¹ Noicnihua, nijnequi xijmática para nopa cuali camanali cati nimechilhujtoc amo san masehualme quisencajtoque ica inintalamiquilis. ¹² Amo elqui se masehuali cati nechilhui nopa cuali camanali, elqui Jesucristo cati nechnextli.

¹³ Ya anquicactoque quenicatza eltoya nonemilis achtohuiya quema nijtoquiliyaya toisraelita tamachtli. Anquicactoque quenicatza tahuel niquintatzacuiltiyaya nochi cati quineltocayayaj Tohueyiteco. Quena, nijnequiyaya niquintamiltis nochi cati itztoyaj ipan itiopa Toteco. ¹⁴ Ten nochi israelitame ipan notal cati nohuaya moscaltiyayaj na nielqui cati más nimomachtli toisraelita tamachtli. Huan ica nochi noyolo nijchijqui campeca para nijchihuas senquisá nochi cati quijitohua inintamachtli tohuejapan

tatahua. ¹⁵ Pero Toteco ya nechiyocatalijtoya para nielis niitayolmelajca quema ayemo nitacatiyaya, huan yaya nechnotzqui pampa quipixqui hueyi iyolo ica na. ¹⁶ Huan nechnextili Icone Cristo huan nechtequimacac para ma niquinilhui masehualme cati amo israelitame ten Cristo. Huan quema monextijtoya ica na, amo niyajqui nijcamanalhui se masehuali para ma nechtalnamicti taya nijchihuas. ¹⁷ Yon amo niyajqui ipan hueyi altepet Jerusalén para niqunitati nopa tayolmelahuani cati Toteco quinintozqui quema ayemo nijneltocayaya. Niyajqui huejca hasta tali Arabia para niitztos noselti. Huan más teipa quema niquisqui Arabia, sempa nimocuetqui ipan altepet Damasco.

¹⁸ Amo niyajqui Jerusalén hasta ya panotoya eyi xihuit. Huajca quena, niyajqui niqunitato Pedro huan nimocajqui ome samano ihuaya. ¹⁹ Pero nopa sequinoc itayolmelajcahua Toteco, amo niqunitac. San niqunitac Jacobo, iicni teipan ejquet Tohueyiteco Jesús. ²⁰ Toteco quimati xitahuac para nochi cati nimechtajcuilhuitoc nica huan amo niistacati.

²¹ Teipa niyajqui ipan tali Siria huan tali Cilicia. ²² Pero nopa tiopame ten taneltocani cati mosentilíaj campa hueli ipan tali Judea noja ayemo quema nechitztoyaj. ²³ Inijuanti san quicajque quijtohuaj para nopa tacat cati achtohuuya quintatzacuilitiyaya huan quinequiyaya quitamilis nopa tamachtli ten Jesucristo cati injuanti quineltocaj, ama quinilhuía nochi masehualme para ma quineltocaca Jesucristo. ²⁴ Huajca nochi injuanti quihueyimatiyayaj Toteco pampa quipatatoya nonemilis.

2

Sequinoc itayolmelajcahua Toteco quiselijtoyaj Pablo

¹ Huan teipa quema ya panotoya seyoc majtacti huan nahui xihuit, sempa niyajqui altepet Jerusalén ihuaya Bernabé. Huan nojquiya nijhuicac Tito.

² Niyajqui pampa Toteco nechnextili ma niya. Huan quema niitztoya nepa, nimosentili inihuaya nopa tayacanani ten taneltocani para huelqui ticamanalitique san tojuanti. Nijnequiyaya niquinilhuis nopa cuali camanali cati niqunpohuiliyaya masehualme cati amo israelitame para amo oncas se tamanti cati techiyocatalisquía huan quisas san tapic nochi cati tijchijtoque. ³ Huan injuanti quicualcajque cati nitamachtiyaya. Huan amo quijtojque para Tito cati itztoya nohuaya ma motequili nopa machiyot circuncisión, masque yaya se griego cati amo quixmati nopa tamanti.

⁴ Nopa talnamiquilisti para motequilise nopa machiyot pejqui quema hualajque seqij istacatini cati quijtojque para itztoyaj taneltocani, pero amo neli. Inijuanti ixtacatzí pejqe quitachilíaj tonemilis huan quitaque quenicatza Cristo Jesús techtojtontoya ten itanahuatilhua Moisés. Huajca quinequiyayaj techchihuase quej tiinintequipanojcahua para ma tiquintoquilica itanahuatilhua Moisés huan ma tiqinchihualtica nochi tacame cati amo israelitame ma motequilica nopa machiyot cati itoca circuncisión ipan inintacayo. ⁵ Pero yon se talojtzi amo tiqintacaquilijque. Pampa tijnejque para amojuanti cati amo anisraelitame san xijmatica cati melahuac para Toteco quimaquixtía aqui quineltoca Cristo, huan amo monequi motequilis itacayo.

⁶ Huan nopa tayacanani ten taneltocani amo nechilhijque yon se tamachtli cati yancuic para ma niquinilhui masehualme. (Para na amo teno ipati sinta miyac masehualme quinixmatij para huejhueyi tayacanani, pampa iixpa Toteco san se topati.) ⁷ Pero nima nopa tayacanani quitaque

para Toteco nechtequimacatoya ma niquinilhui masehualme cati amo israelitame quenicatza Toteco tetajtacolquixtía, quej quitequimacatoya Pedro ma quinilhui israelitame. ⁸ Quena, san se Toteco cati quititanqui Pedro quej itayolmelajca ica israelitame, nechtitantoc na quej niitayolmelajca ica masehualme cati amo israelitame.

⁹ Quema Jacobo, Pedro huan Juan cati más taixmatilme quiitaque nopa tequit huan tatiocihualisti cati Toteco nechmacatoya, sempa nechmatajpalojque huan quimatajpalojque Bernabé quej se tanextili para techselijque quej tiicnime cati san sejco ica injuanti tijchihuj itequi Toteco. Quiijtojqque para Bernabé huan na ma tiyaca ica masehualme cati amo israelitame huan injuanti ica israelitame. ¹⁰ San nojquiya nechilhuijqque ma tiquelnamiquica tiquinpalehuisse cati pilteicneltziti quej nochipa tijchihuj campeca tijchiuase.

Pablo quiajhuac Pedro nepa Antioquía

¹¹ Pero teipa, quema Pedro ajsico altepet Antioquía, monejqui niquixcoilhuis miyacapa pampa quichihuayaya cati amo cuali. ¹² Achtohui tacuayaya inihuaya taneltocani cati amo israelitame cati amo quipiyaj nopa machiyot san se quej tacuayaya inihuaya cati israelitame. Pero teipa, ajsicoj se ome israelita tacame cati ihuampoyohua Jacobo cati quinequiyayaj nochi taca taneltocani cati amo israelitame ma motequilica nopa machiyot para momaquixtise. Huajca Pedro quinimacasqui nopa tacame cati ajsicoj huan pejqqui moyocacahua ten taneltocani cati amo israelitame, huan ayecmo tacuayaya inihuaya. ¹³ Teipa nojquiya quichijque ome inixayac nopa sequinoc israelita taneltocani cati itztoyaj nozona pampa nojquiya moyocatalijque ten taneltocani cati amo israelitame. Hasta Bernabé nojquiya moyocatali ten cati amo israelitame quej Pedro quichihuayaya. ¹⁴ Huajca quema niquitac Pedro amo nejnemiyaya xitahuac quej quijtohua icamanal Toteco, nicajhuac huan iniixpa nochi nopa taneltocani, niquilhui: “Xijcaqui Pedro, ta tiisraelita tacat huan mitztequilijtoque motacayo, pero ama tinejnemi quej se masehuali cati amo israelita pampa ayecmo tijtoquilía sequinoc tamanti cati quijtohuaj itanahuatilhua Moisés. Huajca, ¿para ten ama tijnequi ni tacame cati amo israelitame ma nejnemica quej israelitame? Amo xitahuac cati tijchihua.”

Toteco quintajtacolquixtilía nochi cati quineltocaj

¹⁵ Tojuanti tiisraelitame hasta quema titacatque. Amo “titajtacolchihuani” quej quintocaxtíaj masehualme cati amo israelitame. ¹⁶ Pero tiisraelita taneltocani ya tiquitztoque para amo aqui hueli mochihuas xitahuac iixpa Toteco pampa quintoquilía itanahuatilhua Moisés. Ya tijmachillíaj para san cati quineltocaj Jesucristo itztose xitahuaque iixpa. Yeca tojuanti nojquiya tijneltocaj Jesucristo para Toteco Dios ma techchihua tixitahuaque iixpa pampa tijneltocatoque ya. Tiquitaque amo teno eliyaya ipati cati quintocuiliyaya itanahuatilhua Moisés huan cati amo, pampa amo aqui huelis mochihuas xitahuac iixpa Toteco pampa quintoquilía nopa tanahuatilme.

¹⁷ Huan sinta tijnequij ma techchihuas tixitahuaque iixpa Toteco quema tijneltocaj Cristo, tijnextíaj para tiisraelitame nojquiya titajtacolchihuani iixpa Toteco. ¿Elqui Cristo cati techchijqui titajtacolchihuani? ¡Amo! Amo quej nopa ximoilhica. ¹⁸ Pero sinta nipehuasquía nitamachitis para masehualme hueli momaquixtise ten inintajtacolhua sinta quitoquilisquíaj se tanahuatili cati ayecmo quipiya chicahualisti, huajca quena, nimochihua ni-taixpanoquet. ¹⁹ Pampa ica na, masque miyac nimomachti huan nijchijqui

campeca niquintoquilis itanahuatilhua Moisés, niquitac para nopa tanahuatilme amo quema huelqui nechchihua nixitahuac iixpa Toteco, pampa amo nihuelqui nijtamichihua cati quijtohuaj. Nopa tanahuatilme ayecmo quinahuatíaj cati mictoque, huan huajca nimochijtoc quej se nimijcatzi para nopa tanahuatilme ma ayecmo nechnahuatica. Nijchijqui ni para huelis niyoltos para Cristo. ²⁰ Nelía nechcuamapeloltijque ihuaya Cristo huan nepa nimijquí. Huan yeca ama na ayecmo niitztoc, pero quena, ama Cristo itztoc ipan na. Huan ni nemilisti cati ama nijpiya huala pampa nijneltoaca Icone Toteco cati nechicneli huan motemactili huan mijqui por na. ²¹ Niquita tahuel hueyi ipati cati Toteco quichijqui quema techtasojtac huan quititanqui Cristo ma miqui por tojuanti, huan na amo nijhuejcamajcahua cati quichijtoc. Sinta itanahuatilhua Moisés cati tiisraelitame tiquintoquiliyayaj techchijtosquíaj tixitahuaque iixpa Toteco huan techmaquixtijtosquíaj, huajca san tapic mictosquía Cristo.

3

Xijtapejpenica itanahuatilhua Moisés o Cristo

¹ ¡Nelía anhuihuitique amojuanti cati anGálata ehuan! ¿Ajquiya amechajcayajtoc para ayecmo xijneltocaca cati melahuac? Tanemijya nimechihui quenicatza injuanti quicuamapeloltijque Jesucristo quema niitztoya amoixpa. ² San se tamanti nimechtatzintozquilis. ¿Toteco amechmac Itonal pampa anquintoquilijque itanahuatilhua Moisés? ¡Amo! Itonal Toteco hualajqui ipan amoyolo quema anquicajque cati Jesucristo amechchihuilijtoya huan anmotemachijque ipan ya para ma amechmaquixti. ³ Huajca amo ximohuihuichihuaca. Sinta monequiyaya Itonal Toteco para amechmacas nemilisti cati yancuic pampa nopa tanahuatilme amo huelqui, amo ximoilhuica para huelis anquisencahuase achi cuali itequi Toteco san ica amotetilis pampa sempa anquichihuaj campeca anquintoquillise nopa tanahuatilme. ⁴ Ya antaijyohuijtoque miyac pampa anquineltocaj Cristo. ¿Huan anmoilhuíaj para antaijyohuijtoque san tapic? ¡Amo! Na nijmati para amo san tapic. ⁵ Nimechtatzintozquilía: ¿Toteco amechmac Itonal huan quichijqui huejhueyi tiochicahualnescayot nepa amoixpa pampa anquintoquilijque itanahuatilhua Moisés? ¡Amo! Anquimatij Toteco quichijqui nopa tamanti pampa anquicajque icamanal Toteco huan anquineltocaque.

⁶ Eltoc quej ijcuilijtoc ipan Icamanal Toteco campa quijtohua: “Abraham quineltoac Toteco, huan yeca Toteco quitac para itztoc xitahuac iixpa.” ⁷ Huajca monequi xijmachilica para nochi nopa masehualme cati quineltoacaj Toteco, injuanti itztoque cati nelía iconehua Abraham. ⁸ Ten huejcajquiya mocajtoc ijcuilijtoc ipan Icamanal Toteco quenicatza Toteco miyac xihuit teipa quinchihuasquía xitahuaque iixpa masehualme cati amo israelitame sinta quineltoacasquíaj. Huan Toteco Dios quihui Abraham ya ni quema quijto: “Ica ta, Abraham, niquintiochihuas nochi tamanti masehualme cati itztoque ipan campa hueli tali ipan taltipacti.” ⁹ Quena, nochi cati motemachise ipan Cristo, Toteco quintiochihuas quej Toteco quitiochijqui Abraham por itaneltoquilis.

¹⁰ Pero nochi masehualme cati quintoquilíaj itanahuatilhua Moisés para momaquixtise, quipantise ihueyi cualancayo Toteco pampa amo huelij quichihuaj nochi cati quijtohuaj nopa tanahuatilme. Huan ijcuilijtoc ipan Icamanal Toteco campa quijtohua: “Tatelchihualtique nochi masehualme cati amo quichihuaj senquisa nochi cati ijcuilijtoc ipan ni tanahuatilme.”

¹¹ Huajca tanemijya nesi para Toteco Dios amo quinita masehualme xitahuacque iixpa pampa quitoquilíaj itanahuatilhua Moisés. Icamanal Toteco quijjtohua: “Se cati itztoc xitahuac iixpa Toteco, itztos para nochipa pampa quineltocha ya.” ¹² Ya ni nopa ojti cati cuali. Quena, sinta se quineltochas Toteco, yaya quimaquixtis ten itajtacolhua. Pero se cati quinequi quintoquilis itanahuatilhua Moisés para momaquixtis quipiya seyoc tamanti talnamiquilisti. Pampa itanahuatilhua Moisés quijjtohuaj: “Cati quinequi quipantis nemilisti pampa quintoquilía ni tanahuatilme, monequi quitoquilis senquisa nochí cati quijjtohuaj.”

¹³ Pero Cristo taxtajqui cati monequiyaya para techmaquixtis ten nopa tatechihuali cati nopa tanahuatilme quijjtojqe techajsisquía. Quema yaya mijqui ipan cuamapeli por tojuanti, yaya quiseli nopa tatechihuali cati techajsisquía, pampa Icamanal Toteco quijjtohua: “Tatechihualme nochí masehualme cati quincupilohuaj ipan cuamapeli.” ¹⁴ Yeca ama ica cati Cristo Jesús quichijqui por tojuanti, Toteco Dios hueli quintiochihuas nochí masehualme hasta nojquiya masehualme cati amo israelitame san se quej quitiocijqui Abraham. Huan quema tojuanti tijneltočaj Toteco, tijselíaj Itonal Toteco cati yaya techtencahuilijtoc para techmacas.

Itanahuatilhua Moisés huan cati Toteco quitencahuili Abraham

¹⁵ Xiquitaca noicnihua. Nimechilhuis se taquejquetzcayot para más anquimachilise cati nimechilhúa. Quema masehualme quichihuaj se camanal sencahuali ipan se amat huan quifirmarohuaj, huajca quipiya tanahuatili. Huan amo aquí huelis moquixtis para amo quitamichihuas cati quitajtolcajtoc quichihuas ipan nopa amat. Huan nojquiya amo aquí huelis quixpolos cati quijjtohua, yon quitalis más tamanti ipan nopa amat. ¹⁶ Nojquiya Toteco quichijqui se camanal sencahuali huejcajquiya cati quijjto cati quichihuas para Abraham huan se iteipan ixhui. Pero nopa camanal sencahuali amo quijjto: “Abraham huan iteipan ixhuihua”, quej camanaltisquía ten miyac iteipan ixhuihua. ¡Amo! Nopa camanal sencahuali quijjto: “Abraham huan iteipan ixhui.” Quinequi quijjtos Abraham huan iteipan ixhui cati elqui Cristo. ¹⁷ Huajca ya ni cati nimechilhúa: Toteco quichijqui nopa camanal sencahuali ica Abraham huan quitencahuili quenicatza quitiocihuasquía. Huajca itanahuatilhua Moisés cati ajsicoy teipa quema panotoya nahuí ciento huan treinta xihuit, amo huelqui quisosolo nopa camanal sencahuali cati Toteco ya quichijtoya ica Abraham. ¹⁸ Huan sinta Abraham monectosquía quintoquilis itanahuatilhua Moisés para quiselijtosquía nopa tatiocihualisti cati Toteco quitencahuili quimacasquía, amo huelosquía quiselijtosquía, pampa ayemo oncayayaj itanahuatilhua Moisés para quintoquilisquía. Pero Toteco quimacac Abraham nopa tamanti san pampa quitencahuili quimacas.

¹⁹ Huajca, ¿para ten hualajque itanahuatilhua Moisés? ¡Xitacaquica! Toteco temacac nopa tanahuatilme para quinnexilis masehualme quesqui tajtacoli quichihuayayaj huan quesqui tajtacoli quipiayayaj iixpa Toteco. Pero nopa tanahuatilme san quipixque inintequi hasta tacatisquía Cristo, yaya cati iteipan ixhui Abraham cati Toteco quitencajqui para quitiocihuas. Nojquiya amo san se ipati nopa tanahuatilme huan Cristo. Pampa Toteco quinmacac nopa tanahuatilme ica ilhuicac ehuaní cati teipa quimacac Moisés cati motajcoquetztojaj ica Toteco huan masehualme. ²⁰ Pero amo aquí monequi motajcoquetzas quema se quitencahua iselti para quimacas seyoc se tamanti. Huan amo aquí motajcoquetzqui quema Toteco iselti quitencahuili Abraham cati quimacasquía.

Itanahuatilhua Moisés eltoya quej totamachtijca

²¹ Huajca amo ximoilhua para itanahuatilhua Moisés quitamiltijque nopa cati Toteco quitencahuili Abraham para quimacascuía. ¡Amo! Nopa tanahuatilme huan nopa cati Toteco quitencahuili Abraham, nochí ome quiپیای inintequi, huan amo elqui inintequi nopa tanahuatilme para techmacas nemilisti. Sinta Toteco techmacatoscuía tanahuatilme cati temacatoscuíaj nemilisti para nochipa, huajca tiquintoquiliptoscuíaj nopa tanahuatilme, huan techchijoscuíaj tixitahuaque iixpa Toteco. ²² Pero Icamanal Toteco quijtohua para nochí timasehualme tiipitoque ipan taj-tacolot, huan san hueli timomaquixtise ten totajtacolhua sinta tijnelto-case Jesucristo.

²³ Huecayquiya quema ayemo hualayaya Cristo para ma tijnelto-caca, itanahuatilhua Moisés techilpitoyaj huan techyahualtzactoya tiisraelitame. Huan quej nopa elqui hasta ajsic tonali para Toteco technextili ma tijnelto-caca Cristo. ²⁴ Huajca itanahuatilhua Moisés eltoyaj quej nopa tetequipanojquet ipan techaj cati quiپیای itequi para quinmocuitahuis huan quintalnamictis nopa coneme hasta mochiuase huejhueyi; o ica tojuanti elqui hasta hualajqui Cristo cati nelía huelqui techchihuas tixitahuaque iixpa Toteco. ²⁵ Pero ama, ya ajsico Cristo para ma tijnelto-caca, huan ayecmo tiitztoque imaco nopa tetequipanojquet cati elque itanahuatilhua Moisés, pampa ayecmo quiپیای inintequi ica tojuanti.

²⁶ Huajca ama nochí amojuanti aniconehua Toteco pampa anquinelto-catoque Cristo Jesús. ²⁷ Huan Itonal Toteco techantzquiltijtoc nochí tojuanti ipan Cristo, huan techchijtoc ma tiitzto-ca quej Cristo. ²⁸ Huan Toteco ayecmo techita quej titacame, tisihuame, titetecome, titetequipanohuani, tiisraelitame, o cati amo tiisraelitame, pampa nochí san se tiitztoque ipan Cristo. ²⁹ Ama sinta aniaxachua Cristo, huajca nelnelía aniteipan ixhuihua Abraham. Huan yeca nojquiya anquiselise cati Toteco quitencahuili Abraham.

4

¹ Ximoilhua ten ni taquejquetzcayot cati nimechilhuis. Ma tijtalica para se tacat cati tapijpaxtoc miquis huan quicajtehuas miyac tamanti para ipilcone. Pero masque nelía nochí iaxca nopa ipilcone, yaya mocahua quej se tetequipanojquet pampa noja pilquentzi. ² Huan mojmota monequi quin-neltoquilis nopa tetequipanohuani cati quimocuitahuij hasta moscaltis huan quiaxitis nopa xihuit cati quijto itata para quiselis nochí cati iaxca. ³ Quej nopa nojquiya eltoya ica tojuanti quema ayemo hualayaya Cristo. Tiitztoyaj quej tipilconetzitzi huan titetequipanohuani cati tijtoquiliyayaj inintalnamiquilis ajacame cati itztoque ipan ni taltipacti. ⁴ Pero quema ajsic nopa tonali cati Toteco Dios quixquetztoya, yaya quititanqui Icone cati quitacatilti se israelita sihuat cati quintepanitac itanahuatilhua Moisés pampa nopa tanahuatilme quipixqui tanahuatili ica ya. ⁵ Toteco quititanqui Icone para techcohuas para tiaxachua huan para techtojtomas ten itanahuatilhua Moisés, para Toteco ma techseli quej tiiconehua.

⁶ Huajca ama nochí tojuanti timochijtoque tiiconehua Toteco, huan yeca Toteco techmacatoc Itonal Icone ipan toyolo. Huan ama tijquijtohuaj: “Notata”, quema tijnojnotzaj Toteco Dios pampa tahuel tiquicnelíaj. ⁷ Huajca ayecmo tiitztoque quej titetequipanohuani. Ama tiiconehua Toteco cati timoscaltijtoque. Huan pampa tiiconehua cati timoscaltijque, nojquiya

tijselise nochi cati Toteco quicualtalijtoc para quinmacas iconehua. Huan tijselise nochi por cati Cristo techchihuilijtoc.

Pablo motequipacho por nopa taneltocani

⁸ Achtohuiya quema ayemo anquiixmatiyayaj Toteco, amojuanti cati amo anisraelitame anquintequipanohuayayaj taixcopincayome cati masehualme quinchijtoque cati amo nelía Dios. ⁹ Pero ama ya anquiixmatij Toteco o más xitahuac tiquijtose, Toteco ya amechixmati, ¿para ten anquinequij anquicajtehuase Toteco para sempa anmochihuase inintequipanojcahua cati quipiyaj chichahualisti ipan ni taltipacti cati ayecmo quipiyaj tetili? ¹⁰ Ama anquichihuaaj campeca para anquintoquilise nopa tanahuatilme pampa anilhuichihuaaj quema yancuic metzti, huan quema sesen tamanti ipohual, huan quema yancuic xihuit, huan quema onca israelita ilhuit, pampa amnoilhuaj quej nopa anquipactise Toteco. ¹¹ Nelía miyac nitequititoc para nimechmactis cati melahuac, huan ama nimomajmatía miyac pampa huelis san tapic notequi ica amojuanti.

¹² Noicnihua, nimechtajtanía ica nochi noyolo para xiquincajtehuaca itanahuatilhua Moisés quej na nijchijtoc. Ama ayecmo nechilpiáj nopa tanahuatilme. Ninemi iyoca ten nopa tanahuatilme quej nojquiya achtohuiya amojuanti aneliyayaj iyoca pampa amo anisraelitame. Nochipa antechchihuilijtoque cati cuali huan nijmati antechtacaquilise. ¹³ Anquimatij quema achtohui niyajqui nimechilhuito icamanal Toteco, eltoya pampa nimococohuayaya. ¹⁴ Pero masque nitaijyohuiyaya ica se cocolisti cati fiero, amo antechijixque huan amo antechhuejcamajcajque, pero antechselijque quej anquiselisquíaj se ilhuicac ejquet ten Toteco. Quena, antechselijque quej anquiselisquíaj Cristo Jesús iselti. ¹⁵ ¿Canque yajqui nopa paquilisti cati anquixque quema nimechcamanalhuito achtohuiya? Nelía sinta anhueltosquíaj, amnoquixtilijtosquíaj amoixteyolhua huan antechmacatosquíaj para nimochicajtosquíaj. ¹⁶ Pero ama, huelis nimochijtoc niamocualancaitaca pampa nimechilhúa cati melahuac.

¹⁷ Nopa tacame cati tamachtíaj nopa tamachtili cati amo xitahuac mochi-huaaj quej amohuampoyohua, pero amo nelía quinequij mohuampojchihua para amechchihuilise cati cuali huan cati amechpalehuis. Inijunti san quinequij amechiyocatalise ten na para xiquintoquilica huan xijtacaquilica inintamachtil. ¹⁸ Cuali sinta sequinoc quinequij elise amohuampoyohua masque niitztoc amohuaya o amo, sinta nelnelía quinequij amechchihuilise cati cuali. ¹⁹ Annopilconeua cati nimechicnelía. Sempa nitaijyohuíja ica amojuanti quej se sihuat cati quitacatiltía icone. Huan nitaijyohuis hasta nopa tonali quema amonemilis nesis quej inemilis Cristo. ²⁰ Nelía tahuel nijnequi niitztosquíaj nozona amohuaya para nimechcamanalhuis ica notoscac cati cuali, pero ama nelía nimotequipachohua huan amo nijmati taya nimechilhuis.

Agar huan Sara

²¹ Techilhuica ya ni, amojuanti cati anquinequij anquitoquilise nochi cati quijitohuaaj itanahuatilhua Moisés. ¿Nelía anquimachilíaj cati quijitohuaaj nopa tanahuatilme? ¡Huelis amo! ²² Icamanal Toteco techilhúa para Abraham quinxqui ome ioquichpilhua. Se ioquichpil quinxqui ica inelsihua huan seyoc quinxqui ica se isihua tequipanojca cati quicojtoya. ²³ Nopa sihua tetequipanojquet quinxqui cuali itacayo huan yeca nimantzi conepixqui. Pero inelsihua Abraham eliyaya se sihuat cati amo hueliyaya

conepiya. Pero teipa, masque ya nanatzi tacatqui icone ica ichichualis Toteco pampa Toteco quitencahuilijtoya Abraham para tacatisquía.

²⁴ Huelis tiquijtose para nopa ome sihuame quinextía nopa ome camanal sencahuali cati Toteco quisencajtoc ica masehualme. Nopa sihua tetequipanojquet cati itoca Agar quinextía nopa camanal sencahuali cati Toteco quichijqui ica israelitame ipan tepet Sinaí quema quinmacac itanahuatilhua Moisés huan nochi mochijque tetequipanohuani para quintoquilise nopa tanahuatilme. ²⁵ Quena, Agar itequipanojca Abraham quinnextía israelitame cati huejcajquiya itztoyaj ipan tepet Sinaí ipan tali Arabia huan nopa israelitame cati ama itztoque ipan nopa hueyi altepet Jerusalén nica ipan ni taltipacti. Nochi ni masehualme quintoquilíaj itanahuatilhua Moisés huan itztoque quej tetequipanohuani cati ilpitoque ipan nopa tanahuatilme. ²⁶ Pero tojuanti cati tijneltocej Cristo tiehuani ipan nopa yancuic Jerusalén cati temos ten ilhuicac. Huan Sara inelshua Abraham cati amo elqui tetequipanojquet, itztoc tonana tojuanti cati amo tiquintoquilíaj itanahuatilhua Moisés. ²⁷ Huan ijcuilijtoc ipan Icamanal Toteco quenicatza ichichualis hueli quipata inemilis se sihuat cati amo hueli conepiya. Quiijtohua:

“Ta tishuat cati amo hueli ticonepiya, xipaqui.

Masque amo quema tacatqui mocone, xijpiya paquilisti.

Pampa masque ama amo tiquinpiya moconehua,

teipa tiquinpiyas más moconehua que sequinoc sihuame.”

²⁸ Huajca ama noicnihua, tiitztoque quej Isaac cati Toteco quitencahuili Abraham para tacatisquía masque isihua amo huelqui conepiya. Huan na huan amujuanti tiiconehua Toteco pampa yaya quitencajqui techchihuas tiiconehua sinta tijneltoacasquíaj Jesucristo. ²⁹ Huan quej huejcajquiya icone Agar, nopa tetequipanojquet, quitaijyohuilti nopa oquichpil Isaac cati Itonal Toteco quitacatilti, ama nojquiya inijuanti cati quinequij ma tiquintoquilica itanahuatilhua Moisés techtaijyohuiltíaj tojuanti cati Itonal Toteco techcatilti. ³⁰ Pero Icamanal Toteco techilhuía san se quej Toteco quiilhui Abraham huejcajquiya: “Xijquixti Agar, nopa sihua tetequipanojquet ihuaya ioquichpil, pampa ioquichpil nopa sihuat cati motequipanojca amo huélis quiselis cati ta tijcajtehuas. San quiselis mocone Isaac cati mosihua Sara quitacatilti.” ³¹ Huajca noicnihua, amo tiitztoque quej tiiconehua nopa sihua tetequipanojquet cati iaxca iteco. Tojuanti tiiconehua Sara cati eltoya isihua Abraham huan quipixqui tequiticayot para ma nemi ica cuali quej se cati majcajtoc.

5

Xijtoquilica cati amechojtomas ten nopa tanahuatilme

¹ Cristo techtojttonqui para ma tinejnemica quej masehualme cati timajcajtoque. Amo quinequi ma tiitztoaca tiitequipanojcahua nopa tanahuatilme huan nozona timocahuase tiilpitoque. Huajca ama ximomocuitahuica para ximocahuaca antojtontoque.

² Xijtacaquilica cati na niPablo nimechilhuía. Sinta antacame anmotequilíaj iyecapa cuetaxo amotacayo pampa anmoilhuíaj para ica ya nopa Toteco amechtajtacolquixtis ten amotajacolhua, huajca amo teno ipati Cristo para amujuanti. ³ Sempa nimechyolmelahuas, sinta anmotequilise nopa machiyot ipan amotacayo pampa anmoilhuíaj ica ya nopa Toteco

amechcualitas, huajca monequi anquichihuase senquisa nochi cati quiij-tohuaj itanahuatilhua Moisés. ⁴ Quena, sinta anmoilhuíaj monequi anquintoquilise nopa tanahuatilme para anelise anxitahuaque iixpa Toteco, ya anmohuejcatilijtoque ten Cristo cati quiipiya hueyi iyolo ica tojuanti. ⁵ Pero tojuanti cati timotemachíaj ipan Cristo, ica miyac paquilisti huan ica itapalehuil Itonal Toteco timochiyaj hasta nopa tonali quema yaya techchihuas senquisa tixitahuaque iixpa. ⁶ Para tojuanti cati titatzquitoque ipan Jesucristo, amo quenijqui sinta techtequilijtoque totacayo o amo. San ipati sinta nelia tijneltocej Cristo huan tiquinicnelíaj toicnihua.

⁷ Achtohuiya anmonejnemiltiyaj cuali. ¿Ajquiya amechtzacuilijtoc para ayecmo anquitoquilijtiyahuj cati melahuac? ⁸ Nopa talnamiquili cati amechmacatoque, amo huala ten Toteco cati amechnotztoc para anelise anmajcajtoque. ⁹ Quemantica se masehuali cati fiero inemilis huelis quincajcayahuas miyac masehualme. Eltoc quej nopa camanali cati quiijtohua: “San se quentzi tasonejayot quisonehuas miyac pantzi.” ¹⁰ Na nimotemachía ipan Tohueyiteco para amechpalehuis para ayecmo ximoilhuica ten nopa tamachtili cati amo melahuac. Huan Toteco quitatzacuiltis cati hueli masehuali cati quinequis amechcajcayahuas.

¹¹ Sinta niqunilhuisquía masehualme cati amo israelitame para monequi motequilise inintacayo para Toteco quinselisquía, amo aquí nechcualancaitasquía. Pero nechcualancaitaj miyac israelitame pampa nitamachtía para Toteco quinmaquixtía masehualme san pampa Jesús mijqui ipan icuamapel por injuanti. ¹² Cualis elisquía sinta injuanti cati quinequij ximotequilica amotacayo, ma motequilica injuanti inintacayo hasta tami mococose.

¹³ Noicnihua, Toteco amechnotzqui para amechchihuas anmajcajtoque. Pero masque anmajcajtoque, amo xijtoquilica amotacayo cati quinequi tajtacolchihuas. Pero ximotequipanoca se ica seyoc pampa anmoicnelíaj. ¹⁴ Quena, nochi itanahuatilhua Moisés eltoc ipan ni camanali: “Xiquinicneli sequinoc quej timoicnelía.” ¹⁵ Pero sinta amojuanti anmonajnanquilíaj huan anmoejlnamiquij, huajca ximomocuitahuica para amo anmotzontamiltise.

Xinejnemica ica Itonal Toteco

¹⁶ Ya ni nimechilhúa: Ximonejnemiltica cuali ica itapalehuil huan ichicahualis Itonal Toteco huan amo xijtoquilica itanequilis amotacayo cati quinequi tajtacolchihuas. ¹⁷ Pampa itanequilis amotacayo quinequi xitajtacolchihuaca, huan Itonal Toteco quinequi xijchihuaca cati cuali. Huajca quema anquinequij anquichihuase se tamanti, sesen ten ni ome talnamiquilisti amechnojnotta para xijchihuaca quej nopa talnamiquilisti quinequi. Huan sesen injuanti amechtehuíaj quema anquinequij anquichihuase cati italnamiquilis ne seyoc pampa ni ome mocualancaitaj. ¹⁸ Huajca monequi xijcahuilica Itonal Toteco ma amechyacana, huan quej nopa ayecmo elis itanahuatilhua Moisés cati quiipiyase tequiticayot ipan amonemilis.

¹⁹ Tanemijya nesi nopa fiero tamanti cati masehualme quichihuaj quema quitoquilíaj itanequilis inintacayo. Quichihuaj ten hueli ica cati amo inintahuical. Moilhuíaj miyac tamanti cati amo cuali. Quichihuaj cati fiero pampa ya nopa tahuel quinequij quichihuase. ²⁰ Quihueyichihuaj cati masehualme quichijtoque huan quitaj quej se dios. Tenahualhuíaj, tecualancaitaj, mosisiníaj, huan quinchicoitaj masehualme. Nojquiya masehualme cualancahuejchihuaj, monajnanquilíaj, motajcoxelohuaj, huan tamachtíaj

cati amo xitahuac. ²¹ Masehualme quiixtocaj cati sequinoc quiipiyaj, temictíaj, moiuintíaj huan quichihuaj cati fiero pampa ihuintij. Huan inijuanti cati quitoquilíaj itanequilis inintacayo quichihuaj sequinoc tamanti cati amo cuali. Sempa nimechilhuía cati ya nimechilhujtoc. Masehualme cati quichijtinemij ni tamanti cati amo cuali, amo huelis calaquise campá tanahuatía Toteco.

²² Pero quema tijpiyaj Itonal Toteco ipan toyolo huan tijcahuilíaj ma techyacantiya, ya ni cati tijchihuaj: Titeicnelíaj, tipaquij, tijpiyaj tasehuilisti ipan toyolo, tijpiyaj toyolo inihuaya sequinoc, titetasojtaj, tiquinchihuilíaj sequinoc cati cuali, tiitztoque titemachme, ²³ timoechcapantalíaj huan timonahuatíaj cuali para amo titajtacolchihuase. Masehualme cati quichihuaj ni cuali tamanti amo monequi se tanahuatili. ²⁴ Quena, tojuanti cati tiiaxcahua Cristo Jesús tijmictijque itanequilis totacayo cati quipactía tajtacolchihuas pampa tijtalijque ipan icuamapel quema timijque ihuaya Jesús. ²⁵ Huajca, sinta ama pampa ya tijpiyaj nopa nemilisti cati yancuic cati Itonal Toteco techmacac, nojquiya ma tijcahuilica Itonal Toteco ma techyacantiya ipan sesen tamanti cati tijchihuaj. ²⁶ Ma ayecmo tijtemoca ajquiya techhueyimatís. Ma ayecmo timonajanquilica. Huan ma ayecmo tiquixtocaca cati sequinoc quiipiyaj.

6

Ximopalehuica

¹ Noicnihua, sinta anquuitaj se amoicni cati huetztoc ipan se tajtacoli, huajca amojuanti cati anmonemiltíaj ica ichicahualis Itonal Toteco xijchihuaca para ma motalnamicis para ma nejnemi xitahuac. Quena, ica cuali xiquilhuica ma ayecmo tajtacolchihuaca. Pero ximomocuitahuica para amo amechyoltlanas huan nojquiya amojuanti antajtacolchihuase.

² Ximopalehuica se ica seyoc ica amotequipacholhua huan nochi tamanti cati huala amopani huan quej nopa anquichihuase cati Cristo technahuatijtoc.

³ Sinta se masehuali moilhuía yaya más hueyi que sequinoc huan amo quipalehuía se cati huetztoc, huajca yaya nelía mocajcayahua. ⁴ Monequi sesen ten tojuanti ma timotequitachilica para tiquitase sinta iixpa Toteco nelía cuali cati tijchihuaj o amo. Huan sinta cuali tonemilis, huajca ma tipaquica, pero amo aquí ma paqui san pampa quichijtoc cati achi más cuali que se iicni cati tajtacolchijtoc. ⁵ Pampa sesen ten tojuanti tijpiyaj totequi para ma tijmocuitahuica cati tojuanti tonemilis.

⁶ Nochi amojuanti cati amechmachtíaj icamanal Toteco, monequi xiquin-palehuica amotamachtijcahua ica tomi huan ica nochi nopa cuali tamanti cati anquipiyaj.

⁷ Amo ximocajcayahua pampa amo aquí hueli quicajcayahuas Toteco. Cati anquitocase, ya nopa anquixcase. ⁸ Sinta anquichihuaj cati amo cuali pampa anquitoquilíaj amotanequilis cati quipactía tajtacolchihuas, anquipantise se nemilisti cati fiero. Pero sinta anquichihuaj cati cuali quej Itonal Toteco techilhuía ma tijchihuaca, huajca Itonal Toteco amechmacas se nemilisti cati yancuic huan huejcahuas para nochipa. ⁹ Ma amo tisiyahuica para tijchihuase cati cuali, pampa sinta amo tijcahuase tijchihuase cati cuali, Toteco techtaxtahuis miyac quema ajsis tonali. ¹⁰ Huajca ama, quema noja tihuelij, ma tiquinchihuilica cati cuali nochi masehualme. Huan achi más monequi ma tiquinchihuilica cati cuali cati toicnihua ipan Cristo.

Pablo quinnahuatijtejqui

¹¹ Xiquitaca para na noselti nitajcuilohua amantzi ica nomax huan nelía huejhueyi notajcuilol. ¹² Nopa tacame cati quinequij ximotequilica nopa machiyot san quinequij quinpactise iniisraelita huampoyohua para ma amo quintaijyohuiltica quej techtaijyohuiltíaj. Huan anquimatij techtaijyohuiltíaj pampa titamachtíaj para san Cristo hueli techtajacolquixtis, pampa yaya cati mijqui ipan icuamapel por tojuanti. ¹³ Pero nopa israelita tacame cati quinequij amechmachtise ten nopa machiyot, yon injuanti amo quichihuaaj nochi cati quiiytohuaj itanahuatilhua Moisés. San quinequij ximotequilica amotacayo para mohueyimatise huan quiiytose quinpíaj masehualme cati quitoquiliáj inintamachtíl. ¹⁴ Pero na san nimotepanita por cati Jesucristo quichijqui ipan icuamapel para nechmaquixtis huan sinta nimotepanitas ica seyoc tamanti, Toteco ma techtatzacuilti. Huan ipan nopa cuamapeli mijqui notanequilis cati quinequiyaya tamanti cati onca ipan ni taltipacti. Huan niquita nochi tamanti cati amo cuali ipan taltipacti quej mictoc para na. ¹⁵ Huajca amo ipati sinta timotequilijtoque nopa machiyot o amo. San ipati sinta tijpiyaj nemilisti cati yancuic ipan Cristo. ¹⁶ Ma Toteco amechtasojta huan ma amechmaca tasehuilisti ipan amoyolo nochi amojuanti cati annejnemij quej nimechilhujitoc huan nochi anisraelitame cati nelía animasehualhua Toteco.

¹⁷ Huajca ama huan teipa ayecmo nijnequi timonajnanquulise ica nochi ni tamanti. Huan ayecmo aqui ma nechtatzintoquili sinta nelía niitequipanojca Toteco, pampa lijlipintic notacayo campa nechcocojtoque tacame cati quicualancaitaj Jesucristo. Huan ya nopa mocahua quej se machiyot cati quinextía tanemijya para niitequipanojca.

¹⁸ Noicnihua, Tohueyiteco Jesucristo ma quiipya hueyi iyolo ica amojuanti. Quej nopa ma eli.

Nopa Amatajcuiloli cati Pablo Quintajcuilhui Taneltocani ipan Altepet Éfeso

Pablo quintajcuilhui taneltocani cati mosentilijque ipan Éfeso

¹ Na niPablo niitayolmelajca Jesucristo pampa Toteco ica ipaquilis nechtapejpeni huan nechtequitali para niteilhuis icamanal. Nimechtajcuilhuía amojuanti ipan altepet Éfeso cati temachti anquineltocej Jesucristo huan cati anitztoque anitatzejzeloltica masehualhua. ² Toteco Totata huan Toteco Jesucristo ma quipiyaca hueyi iniyolo ica amojuanti, huan ma amechmacaca tasehuilisti ipan amoyolo.

Cati cuali tijpiyaj ica Cristo

³ Ma tijpaquilismacaca Toteco Dios, yaya cati iTata Toteco Jesucristo, pampa techtiochijtoc ica nochi tamanti tatiochihuali cati cuali nepa ilhuicac pampa titatzquitoque ipan Jesucristo. ⁴ Huejcajquiya quema polihuyaya para quichihuas taltipacti Toteco Dios techtapejpeni para teipa techatzquiltis ipan Cristo. Quinejqui ma tiitzoca titatzejzeloltique huan para ma amo tijpiyaca yon se totajtacol iixpa. ⁵ Huan pampa Toteco miyac techicneli, huejcajquiya quema quisencahuayaya taya quichihuas teipa, quijto para teipa techselis quej tiiconehua por cati Jesucristo techchihuilis. Huan ya nopa Toteco quichijqui pampa elqui ipaquilis para quichihuas. ⁶ Huajca ma tijpaquilismacaca Toteco pampa nelpano hueyi iyolo ica tojuanti huan yeca techselijtoc ipan Jesucristo cati yaya quiiicnelía. ⁷ Quena, pampa tahuel hueyi iyolo Toteco ica tojuanti, taxtajqui cati monejqui para techtojtomas ten totajtacolhua ica ieso Icone. Huan ama tijpiyaj tapojpolhuili ten totajtacolhua. ⁸ Huan pampa hueyi iyolo ica tojuanti techmacac cuali talnamiquilisti huan tamachilisti. ⁹ Huan techmachiltijtoc taya ipaquilis cati amo aqui quimatiyaya. Quena, quipacti Toteco technextilis cati huejcajquiya quitallijtoya quichihuas. ¹⁰ Huan ya ni cati Toteco quixquetztoc se tonali para quichihuas quema ajsis hora. Quinsentilis nochi masehualme huan nochi tamanti, huan Cristo quipiyas tanahuatili ica nochi. Huan Cristo quinnahuatis nochi ipan ilhuicac huan nochi ipan taltipacti.

¹¹ Huan nojquiya ten huejcajquiya Toteco quitallijtoc para tijpiyase nopa tatiochihualisti cati tijselisquía quema techatzquiltisquía ipan Cristo. Huan nochi ni tamanti panotihuala senquisa quej Toteco quisencajtoc pampa yaya quichihua ma pano nochi quej ipaquilis. ¹² Pampa hasta huejcajquiya Toteco quinejqui para tiisraelitame cati achtohui timotemachijque ipan Cristo, ma tijpaquilismacaca Toteco Dios pampa yaya itztoc tahuel hueyi. ¹³ Huan ama amojuanti nojquiya cati amo anisraelitame anquicactoque icamanal Toteco cati melahuac huan amechilhuijtoc quenicatza Cristo hueli amechmaquixtis ten amotajtacolhua. Huajca quema anquineltoceaque Cristo, Toteco amechmachiyoti huan amechtatzquilti ipan Cristo. Quena, amechtalili iseyo pampa amechmacac Itonal Toteco quej quitencajtoya achtohuiya para quichihuas para ma nesi aniaxcahua. ¹⁴ Huan Itonal Toteco eltoc quej se tayacanca tomi para technextilis para temachti tijselise nochi cati techtencahuilijtoc techmacas nepa ilhuicac. Quena, yaya taxtajqui cati monejqui para techcohuas para tiiaxcahua huan para techtojtomas ten

tajtacoli. Quichijqui ya nopa para ma tijpaquilismacaca Toteco pampa yaya nel pano hueyi.

Pablo quitajtani Toteco por nopa taneltocani

¹⁵ Huajca pampa Toteco amechmacatoc nochi ni tatiochihualisti, quema nijcajqui quenicatza tahuel anquineltocaj Tohueyiteco huan anquinicnelíaj nochi masehualme cati iaxcahua, ¹⁶ pejqui nijtascamati Toteco por amojuanti. Huan amo nijcahua nimotatajtía talojtitziti por amojuanti. ¹⁷ Nijtajtanía Toteco Dios, yaya nopa Tetaj cati más quipiya ihueyitilis. Quena, nijtajtanía yaya cati Iteco Tohueyiteco Jesucristo para ma amechmaca talnamiquilisti huan tamachilisti para achi más xiquixmajtiyaca. ¹⁸ Nijtajtanía Toteco ma quitaahuili amotalnamiquilis para xijmatica nopa cati temachtí Toteco techmacas tojuanti cati technotzqui para ma tielica tiiaxcahua. Quena, nijnequi xijmatica para nelía yejyetzti huan cuajcualtzi nochi nopa huejhueyi tamanti cati yaya quicualtalijtoc para tojuanti cati titatzejtzeltotijca masehualhua huan techmacas nepa ipan ilhuicac. ¹⁹ Huan nijtajtanía xijmatica quenicatza nelía pano hueyi ichichualis Toteco cati tequiti ipan tojuanti cati tijneltoaj. Huan ni chichahualisti techpalehuía huan techmaca tetili. ²⁰ Elqui ica ni hueyi chichahualisti Toteco quiyolcuic Cristo quema mictoya, huan quitananqui hasta ilhuicac huan quisehui nepa inejmat campa onca más tatepanitacayot. ²¹ Huan Toteco quimacac Cristo nopa tanahuatili cati más hueyi pampa quitalijtoc para ma quinnahuati nochi masehualme. Quinnahuatía ilhuicac ehuan huan ajacame masque quintocaxtíaj: cati quipiyaj tanahuatili, cati quipiyaj tequiticayot, cati quipiyaj chichahualisti, o cati quipiyaj hueyitilisti; huan nojquiya quinnahuatía nochi sequinoc cati quipiyaj se inintoca. Quena, quinnahuatis nochi cati itztoque ipan ni taltipacti o cati itztose ipan nopa taltipacti cati hualas. ²² Huan Toteco quintalijtoc nochi cati itztoque huan nochi tamanti cati onca iicxita Cristo para san ya ma quipiya tanahuatili. Huan Toteco quitalijtoc Cristo ma quipiya tanahuatili ica itiopa, quinequi quijitos ica nochi titaneltocani. ²³ Quena, nochi titaneltocani tiitztoque tiitacayo Cristo huan quej Toteco quimacac Cristo nochi tamanti, Cristo quitemitía taneltocani ipan itiopa ica nochi tatiochihualisti. Quena, quinmaca nochi cati yaya quinchijchijtoc, nochi cati injuanti quinmonequilia.

2

Toteco techmaquixtijtoc pampa hueyi iyolo

¹ Toteco amechmacac nemilisti amojuanti cati achtohuiya anitztoyaj quej annijcatzitziti iixpa Toteco ipan amotaixpanolhua huan amotajtacolhua. ² Quena, achtohuiya annemiyayaj ipan tajtacoli san se quej sequinoc ipan ni taltipacti. Anquichijtinenque cati quinequiyaya Amocualfacat, nopa hueyi ajacat cati tequiti ajacatipa. Yaya cati tequiti ipan iniyolo nochi masehualme cati amo quinequij quitepanitase Toteco, yon amo quichihuaaj cati yaya quijitohua. ³ Achtohuiya nochi tojuanti nojquiya tiitztoyaj quej injuanti. Tijchijtinenque san cati fiero quej quinequi totacayo cati quipactía tajtacolchihua. Quena, tijchihuayayaj cati tonacayo huan totalnamiquilis quinequiyaya ma tijchihuaca, pampa hasta quema titacatque, quej nopa tiitztoyaj. Huan yeca Toteco san quichiyayaya para techtatzacuiltis tojuanti inihuaya nopa sequinoc masehualme cati amo cuajcualme. ⁴ Pero Toteco cati nelía miyac tetasoja, techicneli quema tijchihuayayaj cati amo cuali

pampa quipiya hueyi itaicnelijcayo ica tojuanti. ⁵ Huan quema noja timicotoyaj iixpa Toteco ipan totajtacolhua, Toteco techmacac nemilisti yancuic san sejo ihuaya Cristo. Quena, techmaquixti san pampa hueyi iyolo ica tojuanti. ⁶ Huan Toteco techyolcuic ica Cristo huan techsehui ihuaya Cristo nepa ilhuicac. Huan ama Toteco techita para ya tiitztoque nepa ilhuicac pampa techtatzquilti ipan Cristo Jesús. ⁷ Techsehujitoc ipan ilhuicac para technextilis quenecatza nelpano hueyi iyolo ica tojuanti para nochipa por cati Cristo Jesús techchihuilijtoc. ⁸ Huajca pampa nelia hueyi iyolo Toteco Dios, yaya amechmaquixti ten amotajtacolhua quema anquineltoacaque Jesucristo. Huan amo anquineltoacaque Jesucristo anmoseltitizti, pero elqui Toteco cati amechmacac nopa taneltoquili quej se nemacti. ⁹ Huan amo amechmaquixti pampa anquichijtoyaj se tamanti cati cuali para quej nopa amo aqui huelis mohueyimatis iixpa. ¹⁰ Toteco yaya cati techchijchijtoc huan tojuanti tiitztoque tiitequij ya. Huan techmacatoc nemilisti yancuic ipan Cristo Jesús para huelis tijchihuase tamanti cati cuali pampa quej nopa hasta ten huejajquiya quitallijtoc para ma tijchijtinemica.

Nopa tasehuilisti cati tijpiyaj

¹¹ Huajca xiquelnamiquica quenecatza elqui achtohuiya ica amojuanti cati amo anisraelitame. Tojuanti tiisraelitame timechcualancaitayayaj pampa amo anmotequillijtoyaj nopa machiyot cati itoca circuncisión ipan amotacayo quej tiisraelitame timomajtoque tijchihuaj. ¹² Ipan nopa tonali anitztoyaj huejca ten Cristo. Amo teno anquipixque ica tiisraelitame cati tiimasehualhua Toteco. Amo anquipixque tanahuatili para anquiselise cati Toteco techtencahuillijtoya tiisraelitame. Amo anquixmatiyaj Toteco. Ipan taltipacti amo anquipiyayaj ajquiya para ipan anmotemachise para amechmaquixtis. ¹³ Pero amojuanti cati achtohuiya anitztoyaj huejca ten Cristo, ama antatzquitoque ipan ya pampa amechnechcahuilti quema quitoyajqui ieso huan mijqui por amojuanti. ¹⁴ Huan elqui Cristo cati quisencajqui tasehuilisti ica amojuanti cati amo anisraelitame huan ica tojuanti cati tiisraelitame, pampa Cristo techsejcotili huan techchijqui san se tiimasehualhua. Quena, yaya quisosolo nopa tamanti cati techtajcoxelohuayaya. ¹⁵ Huan quema Cristo mijqui, quichijqui para ma ayecmo timocualancaitaca, pampa quinquixtili ininchicahualis itanahuatilhua Moisés huan nochi nopa tamantzitzi cati technahuatiyaya tiisraelitame. Huajca amantzi tiisraelita masehualme huan amojuanti cati amo anisraelitame, nochi tiitztoque quej san se tacat cati yancuic. Huan yeca ama onca tasehuilisti. ¹⁶ Quema Cristo mijqui ipan cuamapeli para quiyoltalis Toteco ica tiisraelitame huan amojuanti cati amo anisraelitame, yaya quitamilti nopa cualanti cati tijpixtoyaj se ica seyoc huan quichijqui ma tiitztoqa ipan san se totacayo ipan Toteco.

¹⁷ Cristo hualajqui huan teyolmelajqui ten nopa cuali camanali ten tasehuilisti cati eltoc para amojuanti cati amo anisraelitame cati anitztoyaj huejca ten ya huan para tojuanti tiisraelitame cati tiitztoyaj más nechca ten Toteco. ¹⁸ Yeca ama, cati hueli masehual masque israelita o amo israelita huelis quinechcahuis Toteco Totata ica itapalehuil setzi Itonal Toteco por cati Jesucristo techchihuilijtoc. ¹⁹ Huajca amojuanti cati amo anisraelitame ayecmo anitztoque quej anseyoc tali ehuani cati amo quipiyaj yon se tequiticayot. Ama ya san se anehuani ica nochi sequinoc tojuanti cati Toteco techchijtoc tiitatzetzeloltica masehualhua. Quena, ama anitztoque ichampoyohua Toteco. ²⁰ Tiitztoque quej se tiopamit cati Toteco quichijti-hualajtoc ica masehualme cati quineltoacaj. Itayolmelajcahua Toteco huan

nopa tajtolpanextiani quej itzinpehualtil nopa itiopa. Cristo Jesús itztoc quej nopa hueyi tet cati yahui calesquina cati ipan quiquetzase nopa tiopamit. ²¹ Huan ipan Cristo nochi titaneltocani timonechicohuaj quej teme ipan se tepancali. Huan mojmosta mochihua más hueyi itepa huan timochijtiyahuij itatzejzeloltica tiopa Toteco cati yaya quichihua ica masehualme cati quineltocaj Cristo. ²² Huan ama amojuanti nojquiya cati amo anisraelitame anitztoque quej teme ipan itepanyo nopa tiopamit, huan Toteco mocahua ipan amojuanti pampa Itonal itztoc ipan amoyolo.

3

Toteco quitequimacatoc Pablo ica masehualme cati amo israelitame

¹ Yeca nitzactoc, pampa quej nopa quinejqui Cristo Jesús huan pampa nimechilhuiyaya amojuanti huan sequinoc cati amo israelitame icamanal. ² Huelis ya anquicactoque quenicatza Toteco, pampa hueyi iyolo ica na, nechtequimacatoc ma nimechilhui icamanal amojuanti huan sequinoc cati amo israelitame. ³ Huan ya nimechtajcuilhui quentzi ipan ni amatajcuiloli para elqui Toteco iselti cati nechnextili cati yaya quichihuyaya ipan Cristo. ⁴ Huan quema anquipojtiyase cati nimechtajcuilhuijtoc, anquimachilise quenicatza nijmati ni tamanti ten Cristo. ⁵ Quena, huejcajquiya Toteco amo aqui quinextiliyaya ni tamanti, pero ama Toteco ica Itonal ya quinnextilijtoc itayolmelajcahua huan itajtolpanextijcahua cati quiniyocatalijtoc para iaxcahua. ⁶ Huan ¿taya tamanti cati achtohuiya Toteco amo tenextiliyaya? Elqui para nochi amojuanti cati amo anisraelitame san sejco anquiselise amoparte ica tojuanti tiisraelitame ipan nopa tatiocihualisti cati Toteco techmacas tojuanti cati tiiconehua. Huan ama tiitztoque san sejco ipan itacayo. Huan nopa cati tatencahuali ipan Cristo Jesús cati Toteco techmacas tiisraelitame, nojquiya anquiselise amojuanti pampa anquineltocaj nopa cuali camanali ten ya.

⁷ Huajca ama pampa hueyi iyolo ica na, Toteco quej se nemacti nechmacatoc notequi para ma nieli niitequichijca. Huan por ihueyi chichahualis cati tequitit ipan na, ama niquinilhuía masehualme nopa cuali camanali. ⁸ Masque na más nipilquentzi iixpa Toteco que nochi sequinoc itatzejzeloltica masehualhua, yaya nechmacatoc ni paquilisti para ma niquinilhui masehualme cati amo israelitame ten Cristo. Huan masque amo aqui hueli quitamipohulis nochi cati Cristo quiipya pampa yaya tahuel tapijixtoc, na niquinyolmelahua nopa cuali camanali para Cristo quiipya tahuel miyac tamanti tatiocihualisti para quinmacas. ⁹ Quena, Toteco cati quichijchijtoc nochi tamanti nechmacatoc ni notequi para niquinilhuis nochi cati yaya quisencajqui ten huejcajquiya. Huan italnamiqulis cati amo aqui quimatuyaya elqui para yaya quinmaquixtis israelitame huan cati amo israelitame ipan Cristo. ¹⁰ Toteco quichijqui ya ni para ama ipan ni tonali nochi injuanti cati quiipiyaj tanahuatili, huan cati quiipiyaj chichahualisti huan cati quiipya tequiticayot nepa ajacatipa ma quiitaca para nelhueyi italnamiqulis. Quinequi ma quiitaca para itiopa cati amo nesi mochijtoc ica taneltocani cati israelitame huan cati amo israelitame. ¹¹ Pampa hasta ten huejcajquiya Toteco ipa moilhuijtoya para quichihuas ya ni ica Cristo Jesús, Tohueyiteco. ¹² Yeca pampa tijneltoaj Cristo huan por cati techchihuilijtoc, tijpiyaj tequiticayot para tijnechcahuise huan tijcamanalhuise Toteco; huan tijmatij temacti techselis ica paquilisti. ¹³ Huajca amo ximotzinquixtica

sinta ama nitaijyohuía ipan tatzacti pampa nimechilhuijtoc icamanal amouanti huan sequinoc cati amo israelitame. Nochi ni quipanextía para miyac amopati iixpa huan se tatepanitacayot para amouanti.

Jesucristo nelnelía techicnelía

¹⁴ Quema nimoilhuía ten ihueyi talnamiquilis para quisencahuas nochi ni tamanti, nimotancuaquetza huan nimotatajtía iixpa Totata, yaya cati iTata Tohueyiteco Jesucristo. ¹⁵ Yaya inineltata senquisa nochi nopa familia ten masehualme huan ilhuicac ehuaní cati itztoque ipan ilhuicac huan ipan taltipacti pampa yaya cati quinchijchijqui huan quintocaxtali. ¹⁶ Huan pampa Toteco nelía tapijpixtoc huan quiyiya nopa chichahualisti cati más hueyi, nijtajtanía para Itonal ma amechmaca miyac chichahualisti ipan amoyolo. ¹⁷ Nimotatajtía ica Toteco para xijcahuilica Cristo ma mochanti ipan amoyolo pampa anquineltoaj. Nijtajtanía Toteco para yaya ma pajcaitzto ipan amoyolo pampa quiyiya tanahuatili ica nochi cati eltoc nozona. Huan quej se tzonti quiselía chichahualisti ten inelhuayo, nijtajtanía para mojmota xijselica amochichahualis ten itaicnelijcayo. ¹⁸ Nijnequi amouanti huan nochi sequinoc itatzetzeltolica masehualhua Toteco xijmachilica quenicatza ihuexca itaicnelijcayo Toteco. Pampa tahuel hueyi itaicnelijcayo huan ajsi campa más huejcapa, huan campa más tatzinta, huan ajsi ten campa quisa tonati hasta campa oncalaqui. ¹⁹ Quena, nijnequi xiquixmatica itaicnelijcayo Cristo cati amo aquí huéli quitamiixmatis. Nijnequi xiitztoca quej se tatamachihuali cati temitoc ica se quentzi ten ihueyitilis Toteco.

²⁰ Ma tijhueyimatica Toteco Dios cati quiyiya chichahualisti para quichihuas más miyac huan amo quej nochi cati huéli tijtajtaníaj o huéli timoilhuía. Huan quichihuas ica ichichahualis cati ya tequití ipan tojuanti. ²¹ Quena, tojuanti cati timochihuaj tiitiopa ten taneltocani ma tijhueyichihuaca Totata san sejco ica Jesucristo para nochipa, huan ma amo quema tami. Quej nopa ma eli.

4

Itonal Toteco techchijtoc san se

¹ Na cati nitzactoc pampa quej nopa ipaquilis Tohueyiteco, nimechtajtanía xijpiyaca se amonemilis cati nelía cuali quej quinamiqui quiyiyase masehualme cati Toteco quinnotzqui para elise iaxcahua. ² Ximoechcapanoca huan ximocamanalhuica ica cuali quej masehualme cati cuali monahuatíaj. Xijpiyaca amoyolo se ica seyoc, huan sese amouanti xiquiyoyhuica quema seyoc amoicni quichihua o quijjtohua se tamanti pampa yaya ayemó cuali tamachilía. Quej nopa anquinextilise anquiicnelíaj. ³ Ica itapalehuil Itonal Toteco xijchihuaca campeca anquiuyiyase san se amotalnamiquilis. Huan quej nopa anquiuyiyase tasehuilisti. ⁴ Pampa nochi tojuanti cati tijneltoaj Toteco tiitztoque quej san setzi totacayo iixpa Toteco. Tijpiyaj san setzi Itonal Toteco. Huan quema technotzqui, quijjto ma tijchiyaca para senquisa techmaquixtis nepa ilhuicac san se quej quinmaquixtis nochi sequinoc cati quinnotztoc. ⁵ San itztoc setzi Tohueyiteco Jesucristo. Huan nochi tijneltoaj san setzi camanali. Onca san setzi tacuaaltilisti. ⁶ Itztoc setzi Toteco Dios, yaya cati Totata nochi tojuanti. Yaya quiyiya tanahuatili ica nochi tojuanti. Huan yaya itztoc por nochi tojuanti, huan itztoc ipan nochi tojuanti.

⁷ Huan Cristo techmacatoc sesen ten tojuanti nopa nemacti o yajatili cati quinequi ma tijtequihuica para ya. ⁸ Huajca quisa quej ijcuilijtoc ipan Icamanal para Toteco quichihuasquía, quijjtohua:

“Quema yaya tejcoc ilhuicac quinyacantiyas injuanti cati quintantoc. Huan quinmacas miyac nemacti nopa masehualme.”

⁹ Pero ¿yaya quinequi quijtos “yaya tejcoc ilhuicac”? Quinequi quijtos para yaya achtohuiya temotoya ten ilhuicac hasta ni taltipacti. ¹⁰ Huajca yaya cati hualtemoc ipan ni taltipacti eltoc nojquiya yaya cati tejcoc hasta nepa ilhuicac campa más huejcapa. Quichijqui ya nopa para ma nesi ya itztoc campa hueli huan quitemitía nochi taltipacti huan ilhuicacti. ¹¹ Huan sequij quinmacac nopa nemacti o yajatili para ma elica tayolmelahuani, huan sequij para ma elica tajtolpanextiani, huan sequij para ma teyolmelahuaca quenicatza Cristo teltajacolquixtia. Huan sequij quinmacac nopa yajatili para ma elica tayacanani ten taneltocani huan sequij para ma elica tamachtiani ten Icamanal Toteco. ¹² Pero Tohueyiteco techmacac sesen tojuanti toyajatil para ica tiquincualtalise nochi sequinoc itatzejzeloltijca masehualhua para quichihuase itequi. Huan teipa monequi tojuanti cati tiimasehualhua ma timotequipanoca se ica seyoc para tijmacase tetili nochi itacayo Cristo, quinequi quijtos nopa tasentilisti cati amo moita ten nochi imasehualhua. ¹³ Monequi tijtequihuisse toyajatil huan timotequipanose se ica seyoc hasta nochi titaneltocani timochihuase san se ipan cati tijneltojay huan nelcuali tiquixmatise Icone Toteco. Quej nopa ayecmo tiitztose quej ticoneme. Ya tiitztose tihuejhueyi masehualme ipan Cristo. Huan monequi timoscaltijtiyase hasta tijpiyase se nemilisti quej Cristo quiipiya.

¹⁴ Huajca ma ayecmo tiitztoca quej coneme cati quipataj inintalnamiqulis talojtitzti huan quitoquilíaj ten hueli tamachtili pampa eltoc quej se ajacat quihuica campa hueli. Ma ayecmo amechcayahuaca tacame cati istacatij huan quisencahuaj ten hueli camanali para amechmacase, pampa injuanti neltalnamiquij para tacajcayahuase. ¹⁵ Pero tojuanti ma tijtoquilijtinemica cati melahuac ica taicnelijcayot. Huan ma timoscaltijtiyaca para tiitztose más quej Cristo, yaya cati toztonteco, huan cati technahuatía nochi titaneltocani quej toztonteco quinquahuatía totacayo. ¹⁶ Ipan itacayo se tacat nochi partes monechicohuaj huan tequitij san sejco. Huan Cristo quichihua para nochi tojuanti cati tiitztoque tiitacayo ma timonechicoca huan para ma titequitica cuali san sejco pampa sesen tojuanti tijchihuaj cati totequi ma tijchihuaca. Huan quema sesen taneltoquet ica miyac teicnelijcayot quichihua itequi huan timopalehuíaj se ica sequinoc, huajca quena, nochi itacayo Cristo moscaltía.

Nopa yancuic nemilisti ipan Cristo

¹⁷ Huajca ya ni nimechilhuía ica itequiticayo Tohueyiteco. Ayecmo xippiyaca amonemilis quej masehualme cati amo quineltojay Toteco pampa nelía fiero cati moilhuíaj huan amo teno ipati. ¹⁸ Tzactoc inintalnamiqulis huan itztoque huejca ten nopa nemilisti yancuic cati Toteco temaca. Amo quiipiyaj nopa nemilisti pampa moyoltetilijtoque para amo quixmatise Toteco. ¹⁹ Injuanti ya quipolojque ininpinahualis huan motemactilijtoque para quichihuase tamanti cati más fiero. Ayecmo moilhuíaj sinta cuali o amo cuali cati quichihuaj, san tajtacolchijtinemij, huan mojmosta quinequij quichihuase más cati amo cuali.

²⁰ Pero quema anquicajque ten Cristo, amo amechmachtijque xijchihuaca tamanti cati fiero. ²¹ Ama ya anquicactoque ten ya, huan ya anquimatij nopa cati xitahuac cati amechmachtijtoque ten ya. ²² Huan ya anquicajtejtoque nopa nemilisti cati anquixque achtohuiya quema antacajcayahuayayaj huan anquichijtinemiyayaj tamanti cati fiero cati itanequilis amotacayo quinequiyaya xijchihuaca. ²³ Ama anquipiyaj cati yancuic amopani para

quiyancuilis amotalnamiqulils huan amoyolo. ²⁴ Huajca monequi xijnnextica amotalnamiqulils cati yancuic pampa Toteco amechchijtoc se yancuic masehuali cati eltoc quej ya. Huan ama huelis anquichijtinemise cati xitahuac huan cati tatzejtelolitic.

²⁵ Huajca ayecmo ximoistacahuica. Xiquincamanalhuica sequinoc ica camanali cati melahuac pampa sesen ten tojuanti tiitztoque quej tipartes ipan san se totacayo ipan Cristo.

²⁶ Sinta ancualanij, amo xitajtacolchihuaca. Nimantzi ximoyoltalica quema ayemo calaquí tonati. ²⁷ Amo xijcahuilica Amocualtacat ma calaquí ipan amonemilis.

²⁸ Amojuanti cati aneliyayaj antachtequini, ayecmo xitachtequica. Monequi xitequitica. Monequi xijchihuaca tamanti cati cuali ica amomax para anquipiyase ten ica anpanose huan para nojquiya huelis anquinpalehuise sequinoc cati quinpolohua ten ica panose.

²⁹ Amo xicamanaltica ten hueli camanali. San xiquijitoca tamanti cati cuali cati quinylchicahuas huan quinhualiquilils tatiuchiuali cati quicaquise.

³⁰ Amo xijchihuaca cati quitequipacholmacas itatzejtelolitic Tonal Toteco. Pampa yaya cati amechtallijtoc imachiyo Toteco cati quinextia aniaxchahua huan para temachtí Toteco amechhuicas ilhuicac quema ajsis tonali.

³¹ Ayecmo ximoyolchichicachuaca. Ayecmo ximochihuaca anyolquentziti. Ayecmo xicualanica. Ayecmo xiquijitoca fiero camanali cati tecocohua. Ayecmo xitetaijilhuica. Ayecmo xitecualancaitaca.

³² Más cuali ximochihuilica cati cuali se ica seyoc. Ximotasojtaca huan ximotapojpolhuica se ica seyoc quej Toteco amechtapojpolhuijtoc ipan Cristo.

5

Quenicatza monequi timonejnemiltise

¹ Amojuanti aniconehua Toteco, huajca xijchihuaca quej yaya quichihua. ² Mojmosta xiquinicnelica masehualme quej Cristo techicnelia hasta motemactili para miqus para techtajtacolquixtis. Quena, yaya mochijqui nopa tacajchualisti cati Toteco quiseli pampa tahuel quipacti.

³ Pero amojuanti cati anitatzejtelolitic masehualhua Toteco, amo quinamiqui xijchihuaca cati amo cuali. Amo xijnequica para anmoaxcatise más tamanti mojmosta. Amo quema xijchihuaca tamanti ica se cati amo amotahuical. Amo quema xijchihuaca nopa tamanti tajtacoli. ⁴ Amo xiquijitoca camanali cati fiero. Amo xiahuilcamanaltica, yon amo xiquijitoca camanali cati quinpinahualtia sequinoc pampa amo quinamiqui para amojuanti. Más cuali xijtascamatica Toteco por nochi nopa cuali tamanti cati amechchihuilijtoc. ⁵ Ya anquimatij para amo huelis calaquis campa Cristo huan Toteco tanahuatia se masehuali cati quichijtinemi cati amo cuali, o cati quichijtinemi ten hueli ica cati amo itahuical, o cati quinectinemi más tamanti mojmosta. Pampa se cati tahuel quinequi moaxcatis más tamanti, itztoc san se quej se cati quinhueyimati taixcopincayome. ⁶ Ma amo aquí amechcaycayahua huan amechilhui amo teno amopantis sinta anquichihuase ni tajtacoli, pampa Toteco tahuel quintatzacuiltis cati amo quitepanitaj. ⁷ Huajca ximoiyocatalica ten amo cuajcualme huan amo quema xitajtacolchihuaca inihuaya.

⁸ Achtohuia anitztoyaj ipan tzintayohuilot, pero ama pampa anmotatzquilijtoque ipan Tohueyteco, anitztoque ipan taahuili, huajca xijchijtinemica cati cuali para ma nesi annejnemij ipan taahuili. ⁹ Quema Toteco

quitaahuilía italnamiqulis se tacat, yaya itztoc cuali, nejnemi xitahuac, huan quijtohua cati melahuac. ¹⁰ Huajca xijchijtinemica campeca para anquimachilise cati quipactia Toteco. ¹¹ Ximoiyocatalica ten nochi nopa tamanti cati sequinoc quichihuaj ipan tzintayohuilot pampa nopa tamanti amo quipiyaj inintajca. Pero quena, xiquintalnamictica cati quej nopa quichihuaj huan xiquinhuicaca campaa taahuili. ¹² Se pinahualisti para ticamanaltise ten nopa fiero tamanti cati sequij quichihuaj campaa amo aqui quinista. ¹³ Pero quema se taahuili quintaahuilía, tanemijya quinextía para fiero cati quichihuaj pampa se taahuili quinextía nochi. ¹⁴ Yeca nopa camanali quijtohua:

“Xiisa ta cati ticochtoc.

Xiquincajtehua cati itztoque quej mijcatzitzipampa san tajtacolchihuaj. Quena, xiisa huan Cristo mitztaahuilís.”

¹⁵ Huajca ximotachilica para ximonemiltica ica miyac tamocuitahuili. Amo xinemica quej injuanti cati huihuitique. Xinemica quej talnamiquini pampa anquixmatij cati melahuac. ¹⁶ Amo ximotonalpoloca, peromosta xitequitica para Toteco pampa ipan ni tonali masehualme quichihuaj miyac tamanti cati fiero. ¹⁷ Huajca amo ximohuihuinequica. Monequi ximotalnamictica huan xijchihuaca campeca para anquimachilise cati Toteco quinequi xijchihuaca. ¹⁸ Amo ximoihuintica ica taili pampa ya nopa amechcuapalos, pero xijcahuilica Itonal Toteco ma amechtemifi huan ma amechyacantinemi ica ichicahualis. ¹⁹ Huan quej nopa ancamanaltise ica nopa cuajcuali camanali ten Salmos, huan ica tiohuicat huan huicat cati quisa ipan amoyolo. Quena, anhuicase huan anquipaquilismacase Toteco ica nochi amoyolo. ²⁰ Huan nochipa ica itequiticayo Tohueyiteco Jesucristo, anquitascamatise Toteco Totata por nochi tamanti.

Quenicatza ma monejnemiltica se familia

²¹ Nojquiya para monextis anquitepanitaj Cristo, monequi nochi amojuanti xiquincahuilica sequinoc ma quipiyaca tanahuatili ica amojuanti huan monequi injuanti nojquiya ma amechcahuilica amojuanti anquipiyase tanahuatili ica injuanti.

²² Xitacaquica sesen ten ansihuame cati anquipiyaj amohuehuejhua. Xijcahuili mohuehue ma quipiya tanahuatili ica ta quej nochi tojuanti monequi tijcahuilise Tohueyiteco ma quipiya tanahuatili ica tojuanti. ²³ Pampa se tacat quipiya tanahuatili ica isihua quej Cristo quipiya tanahuatili ica itiopa, quinequi quijtos nochi tojuanti cati tijneltocaj. Nopa tiopamit eltoc itacayo Cristo huan yaya motemactili para elis totemaquixtjica. ²⁴ Yeca quej tojuanti cati tiitiopa Cristo tijcahuilíaj ma quipiya tanahuatili ica tojuanti, nojquiya sihuame monequi quicahuilise inihuehuejhua ma quipiyaca tanahuatili ica injuanti ipan nochi tamanti.

²⁵ Xitacaquica antacame cati anquipiyaj amosihuajhua. Xiquinicnelica amosihuajhua quej Cristo quicnelijtoc itiopa huan mijqui para quimaquixtis. ²⁶ Quena, yaya mijqui para quitatzejtzololchihuas itiopa huan quitapajpacchihuas ica nopa at ten icamanal Toteco. ²⁷ Huan quinequi para itiopa ten taneltocani cati amo moita huan cati yaya quicualtalía para ya iselti, ma eli nelía cuajcualtzi ipan nopa tonal quema moquetzas iixpa. Quinequi sesen masehuali ipan itiopa ma eli nelía tapajpacti huan amo quipiyase yon se itajtacol o yon se tamanti cati amo melahuac. Quinequi ma eli tatzetzololchihuac huan para amo aqui huelis quitatelhuís ica yon se tamanti cati amo cuali. ²⁸ Huan quej nopa nojquiya monequi se tacat quicnelis isihua quej moicnelía. Yaya cati quicnelía isihua, moicnelía. ²⁹ Pampa amo aqui

quitahuelcahua itacayo. Nochi masehualme quitamacaj inintacayo huan quimocuitahuíaj ica taicnelijcayot. Huajca quej tijmocuitahuíaj totacayo huan quej Cristo quimocuitahuía itiopa, quej nopa xijmocuitahui mosihua. ³⁰ Huan tojuanti cati tijneltocej tiitztoque quej tipartes ipan itacayo. Quena, tiitztoque quej inacayo huan iomiyo. ³¹ Huajca yeca quema se tacat mosihuajtis, quicajtehuas itata huan inana huan motatzquilis ica isihua huan nopa ome mochihuase quej elisquía setzi inintacayo. ³² Ya ni achi quentzi ohui para anquimachilise, pero ya ni technextilía quenicatza Cristo mohuica ihuaya itiopa cati mochijtoc ica nochi taneltocani. ³³ Huajca sempa nimechilhuis; sesen tacat monequi ma quicneli isihua quej moicnelía, huan se sihuat monequi ma quitepanita ihuehue.

6

¹ Xitacaquica anconeme cati anquineltocej Tohueyiteco. Xijchihuaca cati amotata huan amonana amechilhuía pampa ya nopa cati xitahuac. ² Xijtepanitaca amotata huan amonana pampa ya ni nopa achtohui tanahuatili cati amechtencahuilía cati Toteco amechmacas sinta anquichihuase. ³ Quena, sinta tiquintepanitase tonana huan totata, techtencahuilijtoc para tijpiyase se tonemilis cati cuali huan tiitztose miyac xihuit ipan ni taltipacti.

⁴ Huan antetajme, xitacaquica. Amo xiquincualancamacaca amoconehua. Xiquiniscaltica cuali. Xiquintalnamictica ica taicnelijcayot huan xiquinmactica cati Tohueyiteco quinequi ma quimatica.

⁵ Xitacaquica antequipanohuani cati amoteco amechcojtoc. Xijchihuaca cati amechilhuíaj amotecohua nica ipan ni taltipacti. Xiquintepanitaca huan xiquinimacastica para amo anquichihuase cati amo quinpactía. Xiquinchihuilica se cuali tequit quej anquitequipanosquíaj Cristo.

⁶ Amo xitequitica cuali san quema amoteco amechtachilijtoc quej sequinoc quichihuaj cati quinequi ma quincualitaca masehualme. Monequi nochipa xitequitica cuali pampa anelij itequipanojcahua Cristo. Huajca ica nochi amoyolo xitequitica quej anquimatij quipactía ya. ⁷ Xitequitica ica paquilisti quej anquitequipanosquíaj Tohueyiteco. Amo ximoilhuica sinta san anquintequipanohuaj masehualme. ⁸ Xiquelnamiquica para Toteco Dios yaya techtaxtahuis por nochi cati cuali tijchihuaj ipan ni taltipacti masque titequipanohuani cati tiiaxca se teteco o tiitztoque timajcajtoque huan amo aqui techcojtoc para iaxca.

⁹ Huan nojquiya xitacaquica antetecome cati anquincojtoque amotequipanojcahua. Xiquinchihuilica amotequipanojcahua cati cuali. Ayecmo xiquintemajmatica. Xiquelnamiquica amojuanti huan injuanti anitztoque anitequipanojcahua Tohueyiteco cati itztoc napa ihuicac huan yaya amo techchicoicnelía. San se techicnelía nochi tojuanti.

Quenicatza Toteco techcualtalijtoc

¹⁰ Amantzi para nijtamiltis ni amatajcuiloli, ya ni nimechilhuía. Nochi amojuanti, annoicnihua, xielica antetique ica nopa chichahualisti cati Toteco amechmacatoc. ¹¹ Xijtequihuica cati Toteco amechmacatoc para ica anmomanahuse huan para anquitanise Amocualtacet pampa yaya san mosenyolilhuía quenicatza hueli techcayahuas. ¹² Pampa tojuanti amo timotehuíaj inihuaya masehualme quej tojuanti cati quipiyaj inieso huan ininacayo. Timotehuíaj inihuaya ajacame cati amo quipiyaj inintacayo, pero quipiyaj inintequi ipan ni taltipacti campa tzintayohuilot. Sequij motocaxtíaj cati quipiyaj tanahuatili, sequij cati quipiyaj chichahualisti, huan sequij cati

quippiyaj tequiticayot. Ni ajacame itztoque campa hueli ajacatipa huan quinnotzaj masehualme ma quichihuaca cati amo cuali. Ica inijuanti, quena, tijpiyaj tatehuilisti. ¹³ Yeca quej se soldado mocualtalia para tatehuilisti, monequi amojuanti ximotalilica sesen tamanti cati Toteco amechmacatoc para ica anmomanahuisse. Quej nopa amo teno huelis amechchihuilise nopa ajacame quema hualase amechhuilanaquij huan anmoquetztose ica temachili iniixpa. ¹⁴ Quena, ximoquetztoca antemachme. Xiquijtoca san cati melahuac mojmosta huan ya nopa amechcualtalijtos quej se soldado cati cuali quitetzilohua itajcoilpica. Xijchihuaca san cati xitahuac mojmosta huan quej nopa ammocualtalijtose quej se soldado cati motalilia se teposti para moyolixtzacuas. ¹⁵ Huan para hueli anmoquetztose ica temachili quej se soldado cati cuali quiilpitoc itecac, monequi xijpiyaca nopa tasehuilisti ipan amoyolo cati temaca nopa cuali camanali ten Toteco. ¹⁶ Huan ipan nochi tatehuilisti monequi ximotemachica ipan Toteco. Quena, quej itepostzajca se soldado quisehuia nopa lemenca cuataminti cati icualan-caitaca quimajcahuilia, amotaneltoquilis quitzacuilis nochi nopa lemenca cuataminti cati Amocualtcat amechmajcahuilis. ¹⁷ Xijmatica para temacht Toteco amechmaquixtijtoc ten amotajtacolhua huan nopa talnamiquilisti quimocuitahuis amotzonteco quej se soldado cati motalilia itepostzontzajca. Huan para anquitechuisse Amocualtcat, xijtequihuica Icamanal Toteco cati eltoc quej se macheta cati Itonal Toteco techmacatoc. ¹⁸ Talojtzitzi huan quema pano ten hueli tamanti, ximotatajtica ica Toteco ica itapalehuil Itonal Toteco. Xitachixtoca huan xijsenhuiquilica ximotatajtica huan nochipa xijtajtanica Toteco ma quintiochihua nochi itatzejtzolofica masehualhua.

¹⁹ Nojquiya ximotatajtica por na. Xijtajtanica Toteco ma nechmaca nopa camanali cati quinamiqui huan para ma nimotemaca niquinilhuis masehualme nopa tamanti cati amo aqui quimatiyaya. Quena, ma nimotemaca niteilhuis quenicatza Cristo nojquiya quintajtacolquixtis masehualme cati amo israelitame san se quej tojuanti cati tiisraelitame. ²⁰ Yeca nitactoc huan niilpitoc ica tepos cadenas pampa Toteco nechtequimacatoc niitatitanca huan nimoneltaliyaya para niquinilhuis masehualme ni camanali quej monequi nijchihuas.

Pablo quinnahuatijtejqui nopa taneltocani

²¹ Tiquico, toicni cati tiquicneliaj yas amechilhuiti cati nechpanotihuala huan cati nijchihua. Yaya temacht nechpalehuia ipan itequi Toteco. ²² Yeca nimechtitanilijtoc para anquimatise ten tojuanti huan para yaya ma amechyolchicahua.

²³ Toicnihua, ma Toteco Totata huan Toteco Jesucristo amechmaca tasehuilisti ipan amoyolo. Ma amechpalehui ximoicnelica se ica seyoc huan más ximotemachica ipan ya. ²⁴ Ma Toteco quippiya hueyi iyolo ica nochi amojuanti cati anquicneliaj Toteco Jesucristo ica se taicnelijcayot cati amo quema mopata. Quej nopa ma eli.

Nopa Amatajcuiloli cati Pablo Quintajcuilhui Taneltocani ipan Altepet Filipos

Pablo ipan tatzacti quintajcuilhui taneltocani ipan Filipos

¹ Na niPablo huan Timoteo cati itztoc nohuaya, tojuanti tiitequipano-jachua Cristo Jesús cati techcojtoc para ma tielica tiaaxchua. Timechta-jcuilhuíaj nochi anitatzejtzeltolita masehualhua Toteco nepa ipan altepet Filipos cati yaya amechtatzquiltijtoc ipan Jesucristo. Nimechtajcuilhuía nochi amojuanti inihuaya amotayacancachua huan amotapalehujicahua ipan tasentilisti. ² Toteco Totata huan Toteco Jesucristo ma quipiyaca hueyi iniyolo ica amojuanti, huan ma amechmacaca tasehuilisti ipan amoyolo.

Pablo motatajtía por nopa taneltocani

³ Nochipa quema nimechelnamiqúi, nijtascamati Toteco. ⁴ Huan nochipa ninelpaqui quema nimotatajtía ica Toteco por amojuanti, ⁵ pampa hasta quema achtohui anquineltocaque Toteco huan hasta ama antepohuilij-toque ten Cristo huan antechpalehujitoc para ma momoyahua icamanal. ⁶ Huan temachti nijmati ya ni. Nopa cuali tequit cati Toteco quipehualti quichihua ipan amoyolo quema anquineltocaque, quisenhuiquilis quicaltalijtiyas mojmosta hasta quitamiltis ipan nopa tonali quema Jesucristo hualas. ⁷ Cualí para nimoilhuía quej ni ten amojuanti pampa nelía nimech-huica ipan noyolo. Hueyi iyolo Toteco ica nochi tojuanti sentic huan san sejco techtiochijtoc miyac. Huan masque niitztoc ipan tatzacti, o nimonextía iniixpa tequichihuani para nijmanahuis icamanal Toteco, o san niteilhuía icamanal, antechpalehujitihualahuj ipan nochi tamanti. ⁸ Toteco quimati nelía miyac nimechicnelía ica nochi nopa taicnelijcayot cati Jesucristo nech-macatoc. ⁹ Quema nimotatajtía, nijtajtania Toteco para noja más xijpiyaca taicnelijcayot ica sequinoc, huan para noja más xijmatica ten ya, huan xijpiyaca nelía cuali amotalnamiquilís. ¹⁰ Nijnequi xijmatica quenicatza anquitapejpenise cati nelía cuali para anitztose senquisa antapajpactique. Huan quej nopa amo aqui huelis amechtelhuis ama, yon quema Cristo sempa hualas. ¹¹ Nochipa xijchihuaca cati cuali huan cati xitahuac iixpa Toteco. Huan quema masehualme quitase nochi nopa cuali tamanti cati Jesucristo amechpalehuía xijchihuaca, quihueyimatise huan quipaquilis-macase Toteco.

Pablo noja quinejqui quitequipanos Cristo

¹² Noicnihua, nijnequi xijmatica para nochi ni taijyohuilisti cati nech-panotihualajtoc quipalehujitoc para más ma momoyahua icamanal Toteco. ¹³ Ama nochi cati itztoque nica quimatij nitzactoc san pampa nijnel-toca Cristo. Huan hasta nojquiya quimatij nochi nopa soldados cati quimocuitahuíaj nopa hueyi cali campa itztoc nopa hueyi tanahuatijquet. ¹⁴ Huan pampa nitzactoc, miyac taneltocani achi más mochijtoque tetique ipan Toteco, huan yeca ama más moneltalíaj para quinilhuse sequinoc icamanal.

¹⁵ Sequij nelía tepohuilíaj icamanal Toteco pampa nechchicoitaj huan quinequij mohueyimatise ica cati quichihuaj, pero sequinoc tepohuilíaj ten Cristo ica iniyolo cuali iixpa Toteco. ¹⁶ Inijuanti cati nechchicoitaj tepohuilíaj icamanal Toteco para masehualme ma quintepanitaca. Amo

quichihuaq neliá para Toteco. Huan moilhuiaj más nechylcocos nica ipan ni tatzacti quema nijmatis cati quichihuaq. ¹⁷ Pero nopa sequinoc masehualme, quena, tepohuilíaj icamanal Toteco pampa nechicnelíaj. Huan injuanti quimatij Toteco nechtequitalijtoc nica para nijmanahuís icamanal iniixpa tequichihuani. ¹⁸ Pero amo quenijqui. Masque sequij teilhuiaj icamanal ica nochi iniyolo huan sequinoc amo cuali iniyolo, noja nipaqui pampa miyaqui masehualme quinihuiaj sequinoc ten Cristo. Huan noja más nipaquis, ¹⁹ pampa nijmati nochi quisas cuali para na huan se tonali nimomanahuís pampa anquitajtaníaj Toteco por na huan Itonal Jesucristo nechpalehuía mojmosta. ²⁰ Amo quema nijnequi nijchihuas se tamanti cati ica nipinahuas iixpa. Ya nopa cati nijchiya. San nijnequi ma nimoremaca nijtequipanos Cristo nica campá niitztoc quej ipa nijchihuayaya achtohuia. Nijnequi masehualme ma quiitaca ihueyitilis Cristo ipan nonemilis, masque niitztos para más tonali o masque nechmictise. ²¹ Pampa sinta niitztos, niitztos para nijtequipanos Cristo. Huan sinta nimiquis, huajca nijtanis neliá miyac, pampa niitztoti ihuaya Cristo para nochipa. ²² Pero sinta noja niitztos, huajca noja más nitequitis para Toteco huan más masehualme quineltoacase Cristo. Yeca amo neliá nijmati taya nijtapejpenis. Amo nijmati sinta nijnequi niitztos o nijnequi nimiquis. ²³ Ohui para nijmatis catijque más cuali. Quemantica nimoilhuía huelis achi más cuali para niitztos. Huan quemantica nimoilhuía achi cuali para nimiquis huan niyas niitztoti ihuaya Cristo pampa ya nopa cati más cuali para na. ²⁴ Pero para amojuanti quisas más cuali sinta noja niitztos. ²⁵ Huajca nimoilhuía para noja niitztos para nimechpalehuís anmoscaltise ipan Toteco huan más anpactose pampa cuali anquineltoacaj. ²⁶ Sinta niitztos, huajca quema nimechpaxaloti sempa anquitascamatise Cristo Jesús pampa quichijtoc para ma niyusa ten ni tatzacti huan sempa niitztos amohuaya.

²⁷ Pero masque ten hueli ten ni ome tamanti nopantis, cati más ipati elis para ximonejnemiltica neliá cuali quej cati quijtohua icamanal Toteco. Quej nopa, sinta noja niyas nipa campá amojuanti o amo, nijcaquis quenicatza anitztoque antemachme ipan Toteco, huan anquipiayá san se amoyolo, huan chichahuac antequitij san sejco para masehualme ma quineltoacaca icamanal Toteco. ²⁸ Yon quentzi amo xiquinimacásica cati amechcualancaitaj. Huan quema noja más ammonelalise para Toteco, ya nopa elis se tanextili cati quinnextilis para Toteco amechmaquixitjtoc amojuanti huan para injuanti neliá polihuise. ²⁹ Pampa Toteco amo san amechmacatoc nopa paquilisti para xijneltocaca Cristo, nojquiya amechmacatoc nopa paquilisti xitaijyohuica pampa aniaxahuá. ³⁰ Tojuanti tiitztoque san sejco ipan ni hueyi tatehuilisti ica cati amo cuali. Antechitztoque quema nitaijyohuiyaya achtohuia huan anquimatij hasta ama noja nitaijyohuía.

2

Jesús cati hueyi, moechcapano

¹ Ya anquimatij Toteco amechicnelía huan amechchijtoc antatzquitoque ipan Cristo, huan anquimatij quenicatza ya nopa amechyolchicahuá huan amechyoltalía. Anquimatij Itonal Toteco itztoc amohuaya huan amechchihua ximoicnelica huan ximotasojtaca. ² Huajca xijchihuaca cati nechmacas hueyi paquilisti huan xijpiyaca san se amotalnamiquilis. Nochi amojuanti ximoicnelica miyac huan xitequitica san sejco quej aneliskuiaj san se tacat ica san se amoyolo. ³ Amo aquí ma quichihua se tamanti pampa quinequi

mohueyichihuas iniixpa sequinoc. Ma amo aqui mohueyimati. Más cuali ximoehcapanoca. Sese ten amojuanti xiquinitaca nochi sequinoc quej más huejhueyi que amojuanti. ⁴ Amo san ximoilhuica ten tamanti cati amechpalehuis amojuanti. Achtohui ximoilhuica cati quinpalehuis sequinoc.

⁵ Ximoyolilhuica quej Cristo Jesús moyolilhui. ⁶ Masque yaya Dios huan huelosquía mocajtosquía campá ipa itztoya ihuaya Toteco Dios, amo moilhui para monequi mocahuas nopona ica nopa hueyi tanahuatili cati quipixtoya. ⁷ Moilhui achi cuali quicahuas nochi cati eliyaya iaxca, huan yeca mochijqui quej se cati amo quipixqui yon quentzi tanahuatili. Moechcapano huan mochijqui se masehuali, quena, mochijqui quej se tetequipanojquet. ⁸ Huan quema ya itztoya se masehuali, más moechcapano para senquisa quichihuas cati iTata quinequiyaya. Quena, motemacac para miquis ipan se cuamapeli, nopa miquilisti cati más quipiya pinahualisti. ⁹ Huan pampa moechcapano, teipa Toteco quitejcolti huan quihueyitali nepa ipan ilhuicac huan quichijqui más hueyi que nochi sequinoc pampa quimacatoc nopa tanahuatili cati más hueyi. ¹⁰ Huan Toteco quichijqui ni para ma motancuaquetzaca iixpa Jesús nochi cati itztoque ipan ilhuicac, nochi ipan taltipacti huan nochi cati itztoque ipan micta pampa huelis quiitase para yaya cati más hueyi. ¹¹ Huan nochi masehualme cati camanaltij nochi tamanti camanali quiijtose miyacapa para Jesucristo, yaya Dios Tohueyiteco, huan ica ya ni quinextise ihueyitilis Toteco Totata.

Taneltocani itztoque quej se taahuili

¹² Noicnihua cati nimechicnelía, nochipa anquichijthualajtoque cati nimechilhujtoc quema niitztoya amohuaya huan quema amo. Huajca ama, quema amo niacui, achi más techcaquica. Xijchijtinemica tamanti cati xitahuac quej quinamiqui para ma mopanexti ipan amojuanti para Toteco nelía amechmaquixtijtoc ten amotajtacolhua. Xiitztoca quej cati huihuipicaj pampa tahuel quiimacasij quiixpanose Toteco Dios. ¹³ Pampa yaya Toteco cati tequti ipan amoyolo huan amechchihua xijnequica xijchihuaca ten ya ipaquilis, huan yaya amechmacas chicalhualisti para anquichihuase.

¹⁴ Ipan nochi cati anquichihuaj ximomocuitahuica para amo ximotajilhuica, yon amo ximonajnanquilica. ¹⁵ Huan quej nopa amo aqui huelis amechtelhuis ica yon se amotajtacol. Xijpiyaca se nemilisti cati tapajpactic quej quinamiqui para amojuanti cati aniconehua Toteco. Xiitztoca quej miyac taahuilme ipan ni taltipacti campá senquisa onca tzintayohuilot. Quena, masque anitztoque inihuaya miyac masehualme cati tahuel chicotic inintalnamiqulis huan cati tahuel quinpactia tajtacolchi-huaj, ma cahuani amotaahuil. ¹⁶ Huan mojmosta ximotatzquilitoca cuali ipan icamanal Toteco cati temaca nemilisti yancuic, huan quej nopa ipan nopa tonali quema Cristo sempa hualas, tahuel miyac nipaquis ica nochi cati anquichijtoque, huan nijmatis para amo san tapic notequi quema niyajqui nimechilhuito icamanal Toteco. ¹⁷ Nelía cuali anquineltocaj Toteco huan masque monequi nimiquis pampa nimechilhui icamanal, nipaquis. Quena, amotaneltoquilis eltoc quej se tacajchualisti cati anquimacaj Toteco huan sinta nimiquis, nonemilis elis quej se tacajchualisti tatoyahuili cati quicualtalía noja más cuajcualtzi nopa tacajchualisti cati anquimacaj Toteco. Huajca masque ten hueli nopantis, nipaquis huan nijnequi xipaquica. ¹⁸ Quena, nojquiya xiyolpactoca nohuaya sinta monequi nimiquis pampa nijtoquilia Cristo.

Epafrodito huan teipa Timoteo yase altepet Filipos

¹⁹ Sinta ipaquilis Tohueyiteco Jesús, nijnequi para amo huejcahuas nijtitanis Timoteo ma amechitati. Huan quema sempa hualas nica, nijpiyas paquilisti pampa nechpohuilis quenicatza anitztoque. ²⁰ Amo aquí seyoc cati quipiya se iyolo quej Timoteo. Yaya, quej na, motequipachohua para amojuanti xinejnemica ica cuali. ²¹ Nochi sequinoc cati itztoque nica san moilhuáj cati cuali para injuanti. Amo moilhuáj quenicatza huelis quipalehuisse itequi Cristo Jesús. ²² Pero amojuanti ya anquixmatij inemilis Timoteo pampa quej se oquichpil ica paquilisti quipalehuía itata, yaya nechpalehuijtoc para niquinilhuis masehualme icamanal Toteco. ²³ Huajca nijnequi achi nimantzi nijtitanis para ma amechitati. San achtohui monequi nijmatis taya nopantis nica. ²⁴ Huan nimotemachía ipan Toteco para amo huejcahuas na nojquiya niyas nimechitati.

²⁵ Pero para amantzi, nimoilhuía achi cuali sempa nimechtitanilis toicni Epafrodito. Na huan ya nelía timochijtoque tiicnime huan san sejco titequiti-toque ipan itequi Toteco. Yaya nelía temachtí. Mosemacatoc quej se soldado huan nechpalehuijtoc miyac. Antechtitanilijque ma nechhualiquili nopa tomi huan ma nechpalehui. ²⁶ Pero ama yaya tahuel quinequi sempa yas campa amojuanti pampa tahuel motequipacho pampa anquicajque para mococohuayaya. ²⁷ Huan nelía mococohuayaya hasta ya mictinemiyaya. Pero Toteco quitasojtac huan nojquiya nechtasojtac na huan yaya mochicajqui. Pampa sinta mictosquía, noja más nijpiyasquía tequipacholi ten cati nijpiya amantzi. ²⁸ Yeca achi más nimoisihuiltia nimechtitanilis para anpaquise quema sempa anquuitase, huan ica ya nopa na nojquiya nipaquis. ²⁹ Huajca xijselica Epafrodito ica cuali ipan Toteco huan ica miyac paquilisti. Nochipa xiquintepanitaca nochi sequinoc taneltocani cati monejnmiltíaj xitahuac quej ya. ³⁰ Quena, qitali inemilis para quichihuas itequi Cristo huan ica se quentzi mictosquía. Nechchihuiliyaya nopa tamanti cati amo anhuelque antechchihuiliijque pampa anitztoyaj huejca.

3

Se toyolo cati xitahuac iixpa Toteco

¹ Huan ama, noicnihua, xipactoca ipan Tohueyiteco. Para na amo ya se tequit para sempa nimechilhuis cati ya nimechilhuijtoc. Huan cuali para amojuanti sinta sempa nimechilhuis. ² Xitachixtoca ica nopa amo cuajcualme cati mosiniáj quej chichime huan quinpactía motequiliáj inintacayo. Amo melahuac inincamanal. Tamachtíaj para nochi tacame monequi ma motequilica nopa machiyot cati itoca circuncisión para huelis momaquixtise ten inintajtacolhua. ³ Pero nelía eltoc tojuanti cati tijpiyaj nopa machiyot o nopa circuncisión cati nelía ipati, pampa tojuanti tijhueyichihuaj Toteco Dios ica itapalehuil Itonal Toteco. Tojuanti amo timotemachíaj ipan cati se tacat quichihuilijtoc totacayo. Timotemachíaj ipan Cristo Jesús huan cati yaya techchihuilijtoc. ⁴ Na achi más que sequinoc nihueltosquía nimotemachijosquía ipan cati na niitztoya para nimotajta-colquixtilijosquía. Pampa na achi más nijchijtinemiyaya nopa tamanti cati israelitame moilhuáj temaquixtía. ⁵ Nechtequilijque nopa machiyot ipan notacayo quema nijpiyaya chicueyi tonati. Nitacatqui niisraelita pampa nitteipán ihui Benjamín, icone Israel ica cati pejqui nochi israelitame huejcajquiya. Nicamanalti hebreo pampa nelnelía nihebreo tacat. Huan teipa quema nimotacachijqui, nimochijqui se nifariseo, injuanti cati achi más quintoquilíaj itanahuatilhua Moisés. ⁶ Huan pampa tahuel niquintoquili

inintanahuatilhua nopa fariseos, nijtatzacuiltiyaya itioapa Toteco, o nochi masehualme cati quineltočaj Cristo. Huan amo aquí huelqui nechtatelhui ica itanahuatilhua Moisés, pampa nimomocuitahui para nijchihuas nochi cati nopa tanahuatilme quijtohuaj para xitahuac.

⁷ Pero nochi nopa tamanti cati achtohui nieliyaya nimoilhuyaya para tahuel ipati, teipa niquitac para amo teno ipati quema nijmachili cati Cristo nechchihuili. ⁸ Quena, niquita nochi sequinoc tamanti quej amo teno ipati. Ama san nijnequi niquixmatis Jesucristo, nohueyiTeco, huan san ya nopa niquita para hueyi ipati. Huajca ama nijtahuelcajtoc nochi cati nijchi-huayaya huan cati achtohui nieliyaya, huan niquita nochi nopa tamanti san quej tasoli para huelis nijpiyas Jesucristo, ⁹ huan nielis nitatzquitoc ipan ya. Ama nijmati para amo niitztoc xitahuac iixpa Toteco por cati nijchihuayaya quema niquntoquiliyaya nopa tanahuatilme. Pero Toteco nechchijqui nixitahuac quema nijneltocaj Cristo, pampa Toteco quinchihua masehualme xitahuac iixpa por inintaneltoquilis. ¹⁰ Huajca ama huelis niquixmatis Cristo huan nelia nijmachilis nopa hueyi chicahualisti ica cati moyolcuic. Ama pampa niiaxca, huelis nitajyohuis san se quentzi quej yaya tajyohui. Quej ni huelis niitztos ica noyolo nel cuali quej yaya quipixqui quema mijqui. ¹¹ Quena, huan nochi nijchihua pampa quema nimiquis, nijnequi nimoyolcuis huan niquisas campá mijcatzitzí.

Pablo quinejqui monejnemiltis noja más cuali

¹² Amo niqijtohua para ya nicaxili nochi ni tamanti, yon amo hueli niqijtos para amo nijpiya yon se notajtacol. Pero mojmosta nijchihua campeca para nijchihuas más cati tahuel cuali para se tonali nicaxilis nopa cati Jesús quinequiyaya ma nieli quema yaya nechmaquixti huan nechnotzqui para ma nieli niiaxca. ¹³ Noicnihua, amo ninemi nelia cuali quej nijnequi ninemis. Pero ya ni nijchihua: Mojmosta niquelcahua cati nijchijqui yalohua huan san nimoyolilhuía cati cuali huelis nijchihuas ama. ¹⁴ Mojmosta ica nochi noyolo nijchihua campeca para ninejnemis nelia cuali. Nijnequi nielis quej se tatanquet cati motalohua hasta itamiya huan teipa quínotzaj huejcapa para quiselis cati quitantoc. Nijnequi nijselis nopa tatancaiyot cati nechmacas Toteco Dios. Yaya cati technotzoc ipan Jesucristo para ma tiyaca huejcapa hasta ilhuicac para tijselise cati onca para tojuanti.

¹⁵ Nochi antaneltocani cati ya anquipiyaj tetili ipan Cristo monequi ximoiilhuica quej na huan xijtemoca mojmosta quenicatza anhuelise anmone-miltise noja más cuali. Huan sinta sequij amojuanti anmoilhuíaj para ayecmo teno más amechpolohua para anmonejnemiltise nelia cuali, huajca Toteco amechnextilis para ayemo anquixilíaj para anquichihuase nochi cati senquisa xitahuac. ¹⁶ Pero mojmosta ma tiitztoca nelia tixitahuac pampa tijmatij icamanal quijtohua para ya techchijtoc tixitahuac iixpa.

¹⁷ Noicnihua, nochi amojuanti xijchihuaca quej na nijchihua. Nojquiya xiquitaca ajquiya más monemiltia cuali quej tojuanti. ¹⁸ Nimechilhujtoc ya ni miyac huelta huan ama nichoca para sempa nimechilhuis. Itztoque miyaqui masehualme cati quijtohuaj quitoquilíaj Cristo, pero ica ininemilis quinextíaj para quicalancatíaj cati yaya quinchihuili quema mijqui ipan cuamapeli. ¹⁹ Nopa masehualme polihuse para nochipa. Amo quema moilhuíaj ten Toteco. San moilhuíaj cati quinequi inintacayo huan sentacua-toque se tonal. Monequi pinahuasquíaj ica nochi cati fiero quichijtoque, pero injuanti mohueyimati. Nopa masehualme san moilhuíaj cati eltoc ipan ni taltipacti. ²⁰ Pero tojuanti amo tiiztoque quej nopa. Tojuanti ayecmo tiehuaj nica, tiehuani nepa ilhuicac campá itzoc Tohueyiteco. Huan

titachixtoque para quema Totemaquixtija Tohueyiteco Jesucristo sempa hualas ten nepa. ²¹ Huan quema hualas, yaya techpatilis totacayo cati teicneltzi cati ama timasehualme tijpiyaj para elis quej ya itacayo cati yancuic cati eltoc nelpano cuajcualtzi. Huan Jesucristo huelis techpatilis totacayo pampa quipiya nopa chichahualisti cati más hueyi cati quimaca tanahuatili ica nochi masehualme huan nochi cati onca.

4

Xipactoca nochipa ipan Tohueyiteco

¹ Huajca, noicnihua, na nelía nimechicnelía miyac huan ica nochi noyolo nijnequi nimechitati pampa tael antechmacaj paquilisti. Anitztoque quej se tamanti para na cati nijtantoc pampa nimechilhui icamanal Toteco. Xijsenhuiquilica xiitztoca antemachme ipan Toteco. Nimechicnelía miyac.

² Nijnequi niquinilhuis nopa sihuame Evodia huan Síntique ma motapolhuica se ica seyoc huan ma quipiyaca san se inintalnamiqulis ipan Jesucristo. ³ Quena, huan nojquiya nimitztajtanía ta cati nelía titequiti nohuaya para xiquinpalehui nopa sihuame ma moyoltalica. Inijuanti tael tequititoque para nechpalehuijqe tiquinilhuijqe masehualme icamanal Toteco. Nojquiya Clemente huan sequinoc toicnihua quinpalehuijqe para teilhuise icamanal. Nochi inijuanti quipiyaj inintoca ijcuilijtoc ipan nopa amatapohuali nepa ilhuicac campa ijcuilijtoque nochi cati quipiyaj nemilisti yancuic para nochipa.

⁴ Nochipa xipactoca ipan Tohueyiteco. Sempa nimechilhúa, xipactoca.

⁵ Ma quítaca nochi masehualme quenicatza anquichihuíaj cati cuali cati hueli masehuali. Xiquelnamictoca ya monechahuía para sempa hualas Tohueyiteco.

⁶ Ayecmo ximotequipachoca ica yon se tamanti. Más cuali ximotatajtica ica Toteco ipan nochi cati amechpanotihuala. Xijtajtanica ma amechmaca nochi cati monequi huan xijtascamatica ica nochi cati amechchihuilijtoc.

⁷ Sinta quej nopa anquichihuj, Toteco amechmacas se tasehuilisti ipan amoyolo cati masehualme amo hueli quimachilise. Huan nopa tasehuilisti quiyahualtzacuas amoyolo huan amotalnamiqulis huan quinmocuitahuis pampa Toteco amechtatziqulijtoc ipan Cristo.

Ximoyolihuica ten cati cuali

⁸ Huan ama noicnihua, techtacaquilica. San ya ni para nijtamiltis ni tajculoli. Ipan amotalnamiqulis san ximoyolihuijtinemica ten tamanti cati melahuac huan cati nochi quitepanitaj. Ximoyolihuica ten nopa tamanti cati xitahuac huan cati tapajpactic. Ximoyolihuica ten tamanti cati tepalehuía huan cati nochi masehualme quicualitaj. Quena, sinta anquicaquij ten cati hueli tamanti cati nelía cuali huan cati nochi masehualme quihueyitalíaj, ipan ya nopa ximoyolihuica.

⁹ Xijsenhuiquilica xijchihuaca nochi nopa tamanti cati nimechmachtijtoc o nimechijcuilhuilijtoc. Quena, nochi cati anquicactoque huan anquiztoque para nijchihua, ya nopa xijchihuaca huan itztos amohuaya Toteco Díos cati temaca paquilisti.

Altepet Filipos ehuaní quimacaque tomi Pablo

¹⁰ Na nipaqui miyac huan nijtascamati Toteco pampa sempa antechelnamijque huan antechtitanilijque se quentzi ten ica nimopanoltis. Nijmati para nochipa anquinectoque antechpalehuise, pero panoc tonali quema amo anquipixque quenicatza antechpalehuisquíaj. ¹¹ Amo nimechilhúa para nimotequipachohuayaya pampa nechpolohuayaya ten ica nipanos.

Ya nimomatqui para nijpiyas paquilisti ica ten hueli cati nechpanotihuala. ¹² Nipaqui quema tahuel pilquentzi nijpiya ten ica nipanós huan nojquiya nipaqui quema nijpiya hasta mocahua. Nipaqui quema nimayana huan quema niixhuitoc. Nipactoc ica miyac o ica pilquentzi. ¹³ Nochi nihueli nijchihua pampa Cristo nechmaca chichahualisti. ¹⁴ Pero masque nipaqui ica cati onca, anquichijtoque cuali quema antechpalehuijque ipan ni taohuij-cayot.

¹⁵ Ya anquimatij para yon se tiopamit ten taneltocani amo nechpalehuij ica tomi quema achtohuiya nimechilhui icamanal Toteco huan teipa quema niquisqui amotal Macedonia para niyajqui ipan sequinoc talme. San amojuanti cati anehuani altepet Filipos, quena, antechpalehuijque, huan yeca anquiselijque itatichihualis Toteco. ¹⁶ Nojquiya quema nimocahuayaya ipan altepet Tesalónica, ompa o expa antechtitanilijque tomi para ica nimopanoltis. ¹⁷ Amo nipaqui san pampa antechmacaque ten ica nipanós, más nipaqui pampa nijmati Toteco paqui ica nopa cuali tequit cati anquichijtoque. Huan yeca yaya quitalis ipan amocuenta huan amechtax-tahuis huan amechtiochihuas. ¹⁸ Ama ica ni tomi cati antechtitanilijque ica Epafrodito, nijpiya nochi cati monequi. Nelía nijpiya hasta mocahua. Cati antechmacatoque quipactía Toteco quej anquimacatosquiáj se tacajc-ahualisti huan itaajhuiyacayo nopa tacajc-ahualisti mijyotía ajhuiyac huan tejco hasta ilhuicac. ¹⁹ Huan Toteco cati nechmocuitahuía na, amechmacas amojuanti nochi cati amechpolohua pampa tahuel miyac iricojyo nepa ipan ilhuicac huan techmacas por cati Cristo Jesús techchihuilijtoc. ²⁰ Ma tijhueyichihuaca Toteco Dios yaya cati Totata para nochipa. Quena, ma amo quema tijtamiltica tijhueyichihuaj. Quej nopa ma eli.

Pablo quinhualtajpalo

²¹ Xiquintajpaloca nochi cati tatzejtzeloltique ipan Cristo Jesús. Toicnihua cati itztoque nica nohuaya amechontajpalohuaj. ²² Huan nochi sequinoc cati iaxc-ahua Toteco nica ipan ni altepet amechontajpalohuaj. Huan achi más amechontajpalohuaj cati iaxc-ahua Toteco cati tequitij ipan nopa hueyi cali para nopa hueyi tanahuatijquet, César.

²³ Tohueyiteco Jesucristo ma quipiya hueyi iyolo ica amojuanti. Quej nopa ma eli.

Nopa Amatajcuiloli cati Pablo Quintajcuilhui Taneltocani ipan Altepet Colosas

Pablo quintajcuilhui taneltocani ipan Colosas

¹ Na niPablo. Toteco Dios ica ipaquilis nechtequitali ma nieli niitayolmela-jca Jesucristo. Na ihuaya toicni Timoteo, ² timechtajcuilhuíaaj amojuanti cati anitatzeltzoltica masehualhua Toteco ipan altepet Colosas, amojuanti cati temachti antoicnihua ipan Cristo. Toteco Totata huan Toteco Jesucristo ma quipiyaca hueyi iniyolo ica amojuanti huan ma amechmacaca tasehuilisti ipan amoyolo.

Pablo motatajti por nopa taneltocani

³ Nochipa timotatajtíaj ica Toteco Dios, yaya cati iTata Tohueyiteco Jesucristo huan tijtascamatij por amojuanti. ⁴ Tijcactoque quenicatza nelía cuali anquineltocatoque Cristo Jesús huan quenicatza miyac anquinicnelíaj nochi itatzejtzeloltica masehualhua Toteco. ⁵ Nijmati anquichihuaaj nochi ya ni pampa anquichiyaj anquiselise nopa paquilisti cati Toteco quiajoctoc para amechmacas nepa ilhuicac. Ya nopa anquichixtihualajtoque hasta quema achtohuiya anquicajque icamanal Toteco cati melahuac, ⁶ cati ajsitoc campa amojuanti. Ama nopa camanali ajsitoc campa hueli ipan taltipacti huan moscaltia huan quipixtihuala itajca pampa más masehualme quineltocati-hualajtoque quej panoc ica amojuanti. Quena, moscaltitijyajtoc icamanal Toteco campa amojuanti ten nopa achtohui tonali quema anquicajque huan anquimachilijque para melahuac hueyi iyolo Toteco ica tojuanti. ⁷ Epafras cati tiquicnelíaj miyac elqui cati achtohui yajqui amechmachtitoc icamanal Toteco. Yaya se itequipanojca Cristo cati nelía temachti cati tijtitanij campa amo hueli tiyahuij. ⁸ Yaya cati techilhuitoc quenicatza Itonal Toteco amechpalehuitoc para miyac xiquinicnelica sequinoc.

⁹ Huajca, hasta quema achtohuiya tijcajque ten amojuanti timotatajtijtoque ica Toteco por amojuanti huan tijtajanijtoque ma amechnextili nochi cati yaya quinequi xijchihuaca. Tijtajaníaj ma amechmaca talnamiquilisti para cuali anquimachilise nochi cati Itonal Toteco tenextilia. ¹⁰ Huan quej nopa huélis anmonejnemiltise quej quinamiqui monejnemiltise masehualme cati iaxcahua Toteco huan anquipactise ipan nochi tamanti cati anquichihuase. Nojquiya anquichihuilise sequinoc tamanti cati cuali huan mojmosta más anquixmajtiyase Toteco. ¹¹ Tijtajaníaj Toteco para ica ihueyi chichualis ma amechmaca nopa tetili cati monequi para anquijyohuise nochi cati amechpanotihuala huan para noja más anquipiyase hueyi amoyolo ica nochi masehualme. ¹² Huan quej nopa ica paquilisti tijtascamatise Toteco Totata pampa techcualtalijtoc para ma tijselica nopa tatiochihualisti nepa campa taahuili inihuaya nochi sequinoc itatzejtzeloltica masehualhua Toteco. ¹³ Pampa Toteco techtojtonqui ten ichichualis Amocualtacat cati tanahuatía campa tzintayohuilot huan techtalijtoc campa tanahuatía Icone, Jesús, cati yaya tahuel quicnelía. ¹⁴ Huan Jesús techcojtoc ica ieso para huélis techtojtomas ten cati amo cuali huan techtapojpolhuijtoc nochi totajtacolhua.

Toteco temaca tasehuilisti ipan Jesucristo

¹⁵ Cristo cati tiquitztoque itztoc iixcopinca Toteco Dios cati amo aqui hueli quuita. Cristo ipa itztoya hasta quema ayemo teno oncayaya cati tachijchihuali. Huan yaya cati quipiya tanahuatili ica nochi tamanti cati Toteco teipa quichijqui. ¹⁶ Quena, Toteco quitequimacac Cristo ma quichijchihua nochi cati onca ipan ilhuicac huan nochi ipan taltipacti. Quichijchijqui nochi tamanti cati hueli tiquitaj huan nojquiya quinchijchijqui nochi cati amo hueli tiquinijta quej injuanti cati mosehuiaj campa más quipiyaj tequiticayot, huan cati quipiyaj hueyitilisti, huan cati quipiyaj tanahuatili huan quipiyaj chichahualisti. Nochi tamanti Tohueyiteco Jesucristo quinchijchijqui huan nochi iaxcahua para ma quichihuaca cati yaya quinequi. ¹⁷ Cristo ipa itztoya quema ayemo teno oncayaya huan nochi tamanti cati tachijchihuali motatzquilijtoc ica ichichahualis. ¹⁸ Jesucristo yaya itzonteco itacayo, quinequi quijtos itiopa, o nochi tojuanti cati tijneltojac. Quena, yaya totayacanca. Yaya cati achtohui moয়লুইক ten nochi mijcatziti para ipan nochi tamanti yaya elis cati más hueyi. ¹⁹ Toteco Totata ica nochi ihueyitilis itztoc ipan Cristo pampa ya ipaquilis para ma itztoca san se. ²⁰ Toteco quichijtoc para nochi cati itztoque ipan ilhuicac huan ipan taltipacti hueli moyoltalise ihuaya ya por cati Cristo quichijqui quema mijqui huan quitoyajqui ieso ipan cuamapeli. Huajca ama cati itztoyaj icualancaitacahua hueli quipiyase tasehuilisti ica ya.

²¹ Huajca amojuanti nojquiya cati achtohuiya anmohuejcatilijtoyaj ten Toteco Totata, huan ipan amotalnamiquilis anquicualancaitayayaj huan anquichijtinemiyayaj cati amo cuali, ²² ama Jesucristo amechyoltalijtoc ica ya. Pampa Jesucristo mocuetqui masehuali huan mijqui ipan cuamapeli para huelis technextis iixpa Toteco titatzejtzeltique huan ica yon se totajtacol. Ama amo aqui huelis techtelhuis iixpa ica yon se tamanti. ²³ Huajca monequi xijneltocatinemica huan ximocahuaca cuali anmotatzquilijtoque ipan cati anquineltojac. Amo xijcahuaca nopa temachili cati anquimatque quema achtohuiya anquicajque icamanal Toteco. Ama miyac masehualme tepohuilijtoque icamanal campa hueli techaj ipan ni taltipacti huan Toteco nechchijtoc na niPablo niitequipanojca para nojquiya ma niquinpohuili masehualme ni camanali.

Toteco quitequitalijtoc Pablo para itequipanojca

²⁴ Huan ama nipaqui pampa nitaijyohua se quentzi por amojuanti. Cristo miyac taijyohui por itacayo, itiopa, huan na nojquiya ipan notacayo nijtamiltia se quentzi nopa taijyohuilisti cati polihui pampa nijtequipanohua itiopa. ²⁵ Huan elqui Toteco cati nechtequitalijtoc ma nieli niitequipanojca itiopa. Quena, ni tequit nechmacatoc para ma nimechilhui cati amo anisraelitame nochi icamanal para ma nimechpalehui. ²⁶ Quena, monequi nitepohuilis ni camanali cati ten huejcajquiya amo aqui quimatiyaya pampa Toteco quitatijtoya, pero ama yaya technextilijtoc nochi tojuanti cati titatzejtzeltica masehualhua. ²⁷ Pampa Toteco quinejqui ma quimatica nochi taneltocani para iricojyo huan ihueyitilis Cristo eltoc nojquiya para amojuanti cati amo anisraelitame. Huan masque achtohui amo aqui quimatiyaya, quinequi xijmatica para ama Cristo nojquiya hualitztoc ipan amoyolo amojuanti cati amo anisraelitame, huan yeca amojuanti nojquiya huelis anquichiyase para anyase ilhuicac campa anquipiyase se parte ipan ihueyitilis.

²⁸ Yeca campa hueli campa tiyahuij tiquinilhuiaj nochi masehualme ten Cristo huan tiqintalnamictiaj huan tiquinmactiaj ica nochi nopa talnamiquilisti cati Toteco techmacatoc. Tijnequij nochi masehualme ma elica chicaoque huan senquisu cuajcualme ipan Cristo ipan nopa tonali

quema tiqunnexstise iixpa Toteco. ²⁹Yeca nitequiti chichahuac ica nochi nopa chichahualisti cati Cristo nechmaca.

2

¹ Nijnequi xijmatica quenicatza nimotequipachohua huan nimotajtatía por amojuanti huan nopa tiopamit ten taneltocani ipan altepet Laodicea huan por nochi sequinoc taneltocani cati amo quema nechitztoque. ² Nimotatajtía ica Toteco para ximoyolchicahuaca huan ximotatzquilica ipan itaicnelijcayo. Nojquiya nijtajtanía para xijpiyaca temachili pampa anquimachiliaj nochi cati Toteco quisencajqui para quichihuas cati achtohuiya elqui motatijtoc. Huan ya nopa elqui nochi cati quinchihuilisquía masehualme ica Cristo. ³ Ipan Cristo tijpantise nochi talnamiquilisti huan nochi tamachiliti. ⁴ Ya ni nimechilhuía para amo amechcajcahuase injuanti cati yejectzi camanaltij huan quinequij amechhuicase ipan seyoc tamachtili. ⁵ Masque niitztoc huejca ten amojuanti, noyolo itztoc amohua huan nipaqui pampa nijcaqui para anmonejnemiltiaj nella cuali huan temachti anquineltoaj Cristo ica nochi amoyolo.

Nopa yancuic nemilisti ipan Cristo

⁶ Huajca quej anquineltoaque Jesucristo huan anquiselijque quej amoTeco, ama quej nopa xinemica anmotatzquilitoque ipan ya. ⁷ Quej monequi inelhuayo se cuahuit ma motatzquiliti huejcata, amojuanti nojquiya ximotatzquilica ipan Cristo huan xijcahuaca para yaya ma amechchihua senquisa antemachme ipan cati anquineltoaj quej timechmachtijtoc. Huan nochipa xijtascamatica miyac Toteco ica nochi amoyolo por nopa cati amechchihuilijtoc.

⁸ Ximomocuitahuica para amo aqui amechcajcahuas ica miyac camanali yejectziti ten initalnamiquilis huan quej nopa amechilpise ipan cati amo melahuac huan cati amo ipati. Cati injuanti amechmachtiaj huala ten initalnamiquilis masehualme huan ten ajacame huan amo cati xitahuac. Injuanti amo amechmachtiaj ten Cristo.

⁹ Cristo itztoc senquisa Dios huan senquisa se tacat cati quiyiya itacayo. ¹⁰ Ama amechtatzquilitijtoc ipan ya, huan yeca ayecmo teno amechpolohua para anelise senquisa ancajcaualme. Yaya quiyiya tanahuatili ica nochi tamanti cati quiyij chichahualisti huan cati quiyij tanahuatili cati campa hueli itztoque. ¹¹ Huan quema anquiselijque Cristo, amo elqui se masehuali cati amechmachiyoti ica imax. Pero yaya Cristo amechmacac se machiyot cati amo nesi, pampa amechmachiyoti quema amechquixtili itequiticayo nopa cati fiero cati eltoya amopani cati san quinequiyaya tajtacolchihuas. ¹² Quema Itonal Toteco amechtali ipan Cristo, elqui quej anmijque huan amechtalpachojque ica Cristo. Huan teipa Toteco amechyolcuic pampa anmotemachijque ipan ihueyi chichahualis cati quiyolcuic Cristo quema yaya mictoya. Huan ya ni cati tijnextiaj quema timocuaaltiaj.

¹³ Achtohuiya anitztoyaj quej anmictoque iixpa Toteco pampa san anajtacolchijtinemiyayaj huan amo anquitemohuayayaj Toteco pampa amo anisraelitame. Pero ama quena, Toteco amechyolcuic ihuaya Cristo huan amechtapojpolhuijtoc nochi amotajtacolhua. ¹⁴ Sesen ten tojuanti tijpixtoyaj quej se amat cati techtelhuiyaya ten tajtacoli tijchijtoyaj huan cati titahuicayayaj iixpa Toteco. Pero Cristo qutali nopa amat ica totajtacolhua ipan icuamapel huan nepa quitamilti nochi cati ica techtelhuiyaya. Quichijqui ya ni quema mijqui por tojuanti. ¹⁵ Huan Cristo quiquixtili ichichahualis Amocualfacat huan iajacahua cati quiyij tanahuatili huan cati

quipiyaj chicahualisti huan quinpinahualti miyacapa quema quintanqui ipan icuamapel.

Xijtemoca tamanti cati ipati iixpa Toteco

¹⁶ Huajca amo xiquintacaquilica cati amechtelhuaj huan quijtohuaj para amo cuali cati anquicuaaj huan cati anquij. Quijtohuaj monequi anilhuichihuase para Toteco ipan yancuic metzti huan ipan sequinoc tonali quej israelitame quichihuaj huan monequi anquitepanitase nopa tonali quema mosiyajquetzaj israelitame. ¹⁷ Quema ayemo hualayaya Cristo, ni tanahuatilme elque quej se ecahuili cati quiyacanqui cati hualayaya teipa. Pero ama hualajtoc Cristo yaya cati más ipati, huan ayecmo ipati nopa tanahuatilme cati huejcajquiya. ¹⁸ Amo xiquintacaquilica nopa masehualme cati quinequij xiyaca ipan seyoc ojti para amo anquiselise nopa tatancayot cati amechchiya ipan ilhuicac. Nopa masehualme quichihuaj quej nelía moechcapantaliáj, pero amo cana. Quijtohuaj monequi xiquinhueyimatica ilhuicac ehuani huan para quiselijtoque ni tamachtili ipan tanextili huan temicti huan yeca más quipiyaj inintalnamiqulis. Inintajtacolchijca talnamiqulis quinchijtoc ma mohueyimatica miyac. ¹⁹ Pero inijuanti amo motatzquijtoque ipan Cristo, toztonteco nochi titaneltocani cati tiitztoque ipan itacayo. Pero tojuanti, quena, tiitztoque san sejco ipan itacayo huan timotatzquijtoque ica italijcho. Huan timoscaltíaj san quema tijselíaj nopa chicahualisti cati huala ten Toteco.

²⁰ Amojuanti anmijque quema Cristo mijqui, huan yaya amechtojttonqui ten inintamachtil ajacame ipan ni taltpacti. Huajca ayecmo xiquincahuilica ma amechnuhuatica nopa piltanahuatiltzitzti cati inijuanti quichijtoque, ²¹ cati quijtohuaj: “Amo xiquitzquica o amo xijnlechahuica ni tamanti, o amo xijcuaca ne tacualisti, o yon amo xijtoxomaca nopa.” Yon quentzi amo xiquinneltocaca ni tanahuatilme. ²² Inijuanti san amechmacaj tanahuatilme huan tamachtili cati masehualme quichijtoque. Nochi tacualisti tami quema tijtequihuaj huan amo hueli quichihuas amo tapajpacti amoyolo. ²³ Huelis ni tanahuatilme nesij para cuali pampa monequi se masehuali ma mosemaca para senquisa quintoquilis. Huan cati quitoquillíaj ni tanahuatilme motaijyohuiltíaj miyac, huan moechcapantaliáj miyac, huan tahuel monahuatíaj para amo quinixpanose ni tanahuatilme. Pero yon quentzi, amo teno ipati para se quintoquilis nopa tanahuatilme. Amo quema quipalehuis nopa masehuali ma quitani nopa tajtacoli cati inacayo huan itajtacolchijca talnamiqulis quinequi quichihuas.

3

¹ Pero Toteco amechyolcuitoc ihuaya Cristo, huajca ximoilhuica cati eltoc nepa ilhuicac campa Cristo mosehujtoc inejmat Toteco campa más onca tatepanitacayot. ² Quena, san ximoyolilhuica cati eltoc huejcapa, amo ximoilhuica ten cati eltoc ipan ni taltpacti. ³ Anmijque nica ihuaya Cristo huan ama amonemilis eltoc temachti nepa ica Cristo pampa ama ya anitztoque nepa ica Toteco. ⁴ Huan se tonali quema sempa monextiqui Cristo, yaya cati tonemilis, amojuanti nojquiya anmonextise ihuaya huan anquipyase amohueyitilis quej yaya quipiya.

Tonemilis cati achtohui huan tonemilis cati yancuic

⁵ Huajca xiquitaca quej ya mictoc amotajtacolchijca talnamiqulis huan ayecmo xijchihuaca cati amechnotza xijchihuaca. Amo xijchihuaca ten

hueli ica cati amo amonamic. Amo ximoilhauca cati amo cuali. Amo xijtoquilica ten fiero cati quinequi amotacayo. Amo ximoilhauca tamanti cati eli se pinahualisti. Amo xijnequica anquippiyase más tamantzitzi mojmosta, pampa masehualme cati quej nopa quichihuaaj, quihueyimatij cati quippiyaj quej elisquía se dios huan ayecmo quihueyimatij Toteco. ⁶ Huajca ihueyi cualancayo Toteco quinajsis nochi masehualme cati quichihuaaj ni tamanti pampa amo quitepanitaj. ⁷ Achtohuiya nojquiya anquichijtinemiyayaj nopa tamanti quema anitztoyaj quej nochi sequinoc masehualme ipan ni taltipacti. ⁸ Pero ama, ayecmo xijchihuaca. Ayecmo ximocualanica, ayecmo ximochihuaca anyolquentzitzí, ayecmo xitecualancaitaca, ayecmo xitetaijilhauca, huan ayecmo xiquijtoca fiero camanali. ⁹ Ayecmo ximoistacahuica se ica seyoc pampa quej se moquixtilía iyoyo sosoltic, ya anmoquixtilijtoque amotajacolchijca talnamiquillis cati amechnahuatiyaya huan anquicajtejtoque nochi nopa fiero tamanti cati quinequiyaya xijchihuaca. ¹⁰ Ama quej se tacat cati moquentía iyoyo cati yancuic cati se quimacatoc, Toteco amechmacatoc se amonemilis cati yancuic cati eltoc quej ya. Yeca mojmosta xijchihuaca campeca para más anquiixmajtinemise Cristo huan más amochihuase quej ya. ¹¹ Ipan ni yancuic nemilisti anquimatij para amo ipati iixpa Toteco sinta se masehuali itztoc se israelita o amo, sinta motequilijtoc nopa machiyot ipan itacayo o amo. Amo ipati sinta se masehuali amo teno quimati hasta san nemi cuatita, o sinta tequiti campá quitaxtahuíaj huan hueli yahui campá quinequi, o sinta monequi quisentequipanos iteco cati quicojtoc para iaxca. Amo ipati sinta se masehuali ehua se cuali tali cati nochi quipiyá, o seyoc tali campá amo teno cati cuali onca. San ipati sinta se masehuali quineltoca Cristo, pampa yaya Cristo cati ipati. Huan yaya hualitztoc ipan cati hueli masehuali. Huan quema yaya itztoc ipan toyolo, amo aquí ipati más iixpa que sequinoc, nochi tiitztoque san se.

¹² Huajca pampa Toteco amechtapejpenijtoc para anelise itatzeltzeloltojca masehualhua cati amechicnelía miyac, monequi xiquintasojtaca huan xiquinchihuica sequinoc cati cuali. Ximoechcapantolica huan xitecamanalhua ica cuali camanali. Xijpiyaca hueyi amoyolo ica nochi. ¹³ Xijpiyaca amoyolo ica cati amechchihuiliáj cati amo cuali huan xiquintapojpolhuica. Sinta se acayja quichihuiliijtoc seyoc se tamanti cati amo cuali, huajca ma quitapojpolhui san se quej Cristo amechtapojpolhuijtoc. ¹⁴ Huan cati más ipati para anquichihuase, monequi ximoicnelica huan quej nopa anitztose cuali, pampa taicnelijcayot techilpía san sejco para ma tijpiyaca san se toyolo. ¹⁵ Quema Cristo amechmaca tasehuilisti ipan amoyolo para cuali se tamanti, huajca ya nopa xijchihuaca, pampa Toteco amechnotztoc para xijmatica itasehuilis san sejco pampa anitztoque ipan san se tacayot. Huan nochipa ximotascamatica.

¹⁶ Ma mocahua ipan amoyolo nochi nopa camanali ten Cristo. Huan quej nopa elis quej anquipantijtoque cati tahuel ipati. Ximoyolchicahuaca ica icamanal Toteco huan ximomachtijtinemica se ica seyoc. Xihuicaca salmos, huan tihouicat, huan huicat cati quipalehuía amotonaltzi para anquipaquilismacase Toteco. Quena, xihuicaca huan xijtascamatica Toteco ica nóchi amoyolo. ¹⁷ Huan nochi cati anquichihuaaj huan nochi cati anquijtohuaaj, xijchihuaca pampa anquineltočaj Tohueyiteco Jesús huan aniaxcahua. Huan nochipa xijtascamatica Toteco Totata ipan Cristo.

Quenicatza ma itztoca familias cati quineltocaj Toteco

¹⁸ Xitacaquica ansihuame cati anquippiyaj amohuehue. Nochi amojuanti xiquincahuilica amohuehuejhua ma amechyacanaca quej quinamiqui para

cati iaxcahua Toteco. ¹⁹ Xitacaquica antacame cati anquikipiyaj amosihua-jhua. Nochi amojuanti xiquinicnelica amosihuaajhua huan amo ximocualan-ica inihuaya. ²⁰ Huan anconeme, xijchihuaca nochi cati amotata huan amonana amechilhuíaj pampa ya nopa cati quipactía Toteco. ²¹ Xitacaquica amojuanti cati anquikipiyaj amoconehua. Amo xiquincualancamacaca amoconehua para amo motequipachose.

²² Xitacaquica antetequipanohuani cati amechcojtoque amotecohua. Xi-jchihuaca nochi cati amoteco nica ipan taltipacti amechnahuatía. Amo xite-quitica chichahuac san quema amechtachilíaj. Mojmosta xitequitica ica nochi amoyolo huan xijchihuaca cati quipactía amoteco masque amo aqui amech-tachilía, pero xijchihuaca pampa anquimacasi huan anquitepanitaj Toteco. ²³ Xitequitica chichahuac huan ica paquilisti ipan ten hueli tamanti tequit cati anquichihuaj. Xijmachilica para anquitequipanohuaj Toteco, amo xi-moilhuica sinta san anquitequipanohuaj se masehuali. ²⁴ Xiquelnamiqica para yaya Toteco cati amechmacas nopa taxtahuili cati quinamiqui an-quiselise nepa ilhuicac, pampa nelía Cristo yaya amoTeco huan yaya cati anquitequipanohuaj. ²⁵ Pero sinta amo antequitij quej quinamiqui o sinta anquichihuaj cati amo cuali, Toteco amechmacas se taxtahuili cati amo nelía amechpactis, pampa Toteco amo techchicoicnelía huan nochi masehualme quiselise inintaxtahuil quej quinamiqui ica cati quichijtoque.

4

¹ Xitacaquica antetecome cati anquikipiyaj tetequipanohuani cati anquin-cojtoque para amoaxcahua. Xiquinchihuica amotequipanojcahua cati xitahuac huan cati cuali pampa anquimatij nojquiya anquikipiyaj amoTeco nepa ilhuicac.

Nochi toicnihua monequi ma timotatajtica miyac

² Huan nochi amojuanti nochipa ximotatajtijnemica ica Toteco. Quema anmotatajtíaj, xitachixtoca ipan amotalnamiqulis. Huan ipan amoyolo xij-tascamatica Toteco por nochi cati amechmacatoc. ³ Nojquiya amo xiquelc-ahuaca xijtajanica Toteco por tojuanti. Xijtajanica para ma techtapohuili se ojti para más tihuelise titepohuilise icamanal campá hueli. Nijnequi niquinilhuis más masehualme nopa tamanti ten Cristo cati huejcajquiya amo aquí quimatiyaya. Quej nopa nijchihuayaya huan yeca nechta-zjue. ⁴ Xijtajanica Toteco para huelis nitepohuilis icamanal xitahuac quej quinamiqui nijchihuas.

⁵ Ximomocuitahuica huan ximonejnemiltica ica talnamiqulisti inixpa cati amo quineltocej Toteco. Amo san ximotonalpoloca inihuaya. Xiquinil-huica icamanal Toteco. ⁶ Xiquincamanalhuica ica cuali camanali huan ica camanali cati echcapantzi, pero melahuac. Huan ximoilhuica quenecatza monequi anquinanquilise sесе masehuali itatzintoqulis.

Pablo quinnahuatijtejqui

⁷ Toicni Tíquico cati tiquicnelíaj yas amechilhuiti nochi cati nechpano nica. Yaya nelía se notapalehuijca cati temachtí quitequipanohua Toteco nohuaya. ⁸ Nimechtitanilía Tíquico para anquimatise quenecatza tiitztoque nica huan para yaya huelis amechyolchicahuas. ⁹ Nojquiya ihuaya Tíquico nimechtitanilía toicni Onésimo cati tiquicnelíaj. Yaya nojquiya se toicni cati temachtí huan itztoc se ten amojuanti. Inijuanti amechilhuisse nochi cati pano nica.

¹⁰ Amechtajpalohua Aristarco cati itztoc ipan tatzacti nohuaya huan Marcos imachicni Bernabé. Ya nimechilhuitoc para xijselica Marcos ica cuali sinta yas amechitati. ¹¹ Nojquiya amechtajpalohua Jesús cati tojuanti tijtocaxtíaj Justo. San ni eyi israelita taneltocani tequitij nohuaya para quinnotzase masehualme ma calaquica campa tanahuatía Toteco, huan inijuanti nelía nechylchicajtoque miyac. ¹² Nojquiya amechtajpalohua Epafra cati ehua nepa campa amojuanti. Yaya quitequipanohua Toteco nica ica nochi iyolo. Mojmosta ica miyac chicahualisti quitajtania Toteco por amojuanti. Quitajtania para xielica antemachme, huan para xielica quej masehualme cati motantoque ipan Toteco huan para ma xijmatica nochi ipaquilis Toteco. ¹³ Nimechylmelahua para nopa Epafra nelía motequipachohua miyac por amojuanti huan nojquiya por toicnihua cati itztoque ipan altepet Laodicea huan altepet Hierápolis. ¹⁴ Lucas, nopa tepajtijquet cati tiquicnelíaj, huan Demas nojquiya amechontajpalohuj.

¹⁵ Xiquintajpaloca inijuanti cati quineltocej Toteco nepa Laodicea. Nojquiya xijtajpaloca Ninfas huan nopa tiopamit ten taneltocani cati mosentilíaj ipan ichaj. ¹⁶ Quema ya anquipojtose ni amatajcuiloli, xiquinpanoltolica toicnihua cati mosentilíaj ipan altepet Laodicea para ma quipohuaca nepa nojquiya. Huan amojuanti xijpohuaca nopa amatajcuiloli cati niquintajcuilhuitoc taneltocani ipan Laodicea cati amechmacase teipa. ¹⁷ Xiquilhuica Arquipo ni camanali: “Ximotachili para tijchihuas nochi nopa tequit cati Toteco mitzmacatoc xijchihua.”

¹⁸ Nica na niPablo nimechtajcuilhuitoc ni camanali ica nomax para nimechtajpalos. Xiquelnamiquica niitztoc ipan tatzacti. Ma Toteco quiptiya hueyi iyolo ica amojuanti. Quej nopa ma eli.

Nopa Achtohui Amatajcuiloli cati Pablo Quintajcuilhui Taneltocani ipan Altepet Tesalónica

Pablo quintajcuilhui taneltocani ipan Tesalónica

¹ Na niPablo, ihuaya Silvano huan Timoteo, timechtajcuilhuíaj amojuanti ipan nopa tiopamit ten taneltocani ipan altepet Tesalónica. Antatzquitoque ipan Toteco Totata huan ipan Toteco Jesucristo. Toteco ma quipiya hueyi iyolo ica amojuanti huan ma amechmaca tasehuilisti.

Quenicatza panotihualajque nopa taneltocani

² Talajtztzi tijtascamatij Toteco por amojuanti huan tijtataníaj ma amechtiochihua. ³ Nochipa quema timotatajtíaj ica Toteco Totata por amojuanti, tiquelnamiqij quenicatza antequitij chicahuac pampa anquineltočaj, huan quenicatza anquitequipanohuaj pampa anquicnelíaj. Tiquelnamiqij nojquiya quenicatza mojmosta anquichiyaj para sempa hualas Tohueyiteco Jesucristo.

⁴ Toicnihua, tijmatij para temachtí Toteco amechicnelía huan amechtapejpenijtoc para anelise aniaxahua. ⁵ Huan quema titepohuilijque nopa cuali camanali campa amojuanti, amo san timechilhuijque camanali cati amo ipati. Timechilhuijque icamanal Toteco huan nopa camanali quipixqui chichahualisti pampa Itonal Toteco amechnextiliyaya ipan amoyolo para cati tiqijtohuayayaj nelía elqui melahuac. Huan quema tiitztoyaj amohuaya anquimatij quenicatza tonemilis amechnextiliyaya para melahuac tocamanal pampa tijnequiyayaj xijneltocaca Toteco.

⁶ Huan anquitoquilijque tojuanti huan Tohueyiteco, pampa masque amechtaijyohuiltiyayaj sequinoc masehualme, anquiselijque icamanal Toteco ica paquilisti cati Itonal Toteco amechmacac. ⁷ Huan yeca anquicajtoque se cuali ejemplo para ma quitoquilica nochi taneltocani ipan tali Macedonia huan ipan tali Acaya. ⁸ Huan ten campa amojuanti, ama icamanal Toteco momoyajtoc ipan talme Macedonia huan Acaya, huan yajtoc hasta ipan campa huéli tali, pampa campa huéli quitacaquilijtoque quenicatza ica nochi amoyolo anquineltočaj Toteco. Yeca ayecmo monequi tiquinilhuisse ten amojuanti, ⁹ pampa nopa masehualme iniseltitzi techpohuilíaj cati quicactoque para panoc quema timechpaxalajque. Techilhuijaj quenicatza anmoyolpataque huan anquinajque anquinhueyichihuaip nopa taixcopincayome cati masehualme quinmachijchijtoyaj, huan pejqui anquitequipanohuaj Toteco cati itztoc huan cati temachtí. ¹⁰ Huan techilhuijaj quenicatza ama anquichiyaj para Jesús, icone Toteco, sempa ma huala ten ilhuicac. Quena, Toteco Dios quiyolcuic Jesús quema mictoya, huan yaya Jesús cati techmanahuía para amo techajsis ihueyi cualancayo Toteco cati teipa monextis.

2

Quenicatza Pablo quitequipano Toteco nepa Tesalónica

¹ Noicnihua, anquimatij amo san tapic totequi quema timechhualiquilijque icamanal Toteco. ² Masque achtohuiya ipan altepet Filipos titaijyohuijque miyac huan masehualme fiero techchihuilijque, Toteco techpalehui ma

tiajsica campa amojuanti huan ma timosemacaca timechilhuisse icamanal Toteco masque tonechca itztoyaj miyac cati quinequiyayaj ma ayecmo aqui tiquilhuica. ³ Huan quema tiquinilhúaj masehualme icamanal Toteco, amo quema tiistacatij, amo quema tijchihuaj cati amo cuali, huan amo quema tinequij tiquinacjayahuase. ⁴ Amo quema tiquincamanalhuaj masehualme para tiquinipactise inijuanti. Tijnequij tijpactise Toteco cati techyoltachili huan techmacac icamanal para ma titepohuilica pampa motemachi ipan tojuanti para tijchihuase itequi. ⁵ Huan anquimatij amo quema timechcamanalhuijque para timechyejyectalise, yon amo quema timechcayajque para techmacaca tomi pampa timechilhuiyayaj icamanal. Toteco quimati para nelía xitahuac cati niqijtohua. ⁶ Amo quema tijtemojque para amojuanti, yon para sequinoc, ma techhueyichihuaca, masque tijpiyaj tequiticayot pampa tiitayolmelajcahua Jesucristo para tijselise cati quinamiqui por totequi. ⁷ Pero quema tiitztoyaj amohuaya, timechcamanalhuijque ica cuali camanali. Timechchihuilijque quej se tenanti cati quiniscaltía iconehua ica miyac teicnelili. ⁸ Huan pampa timechicnelíaj miyac, amo san tijnequiyayaj timechilhuisse icamanal Toteco cati cuali, pero nojquiya hasta timotemacatosquía para timiquise por amojuanti, pampa nelía timechicnelíaj. ⁹ Huan noicnihua, xiquelnamiquica quenicatza titequitiyayaj hasta tisiyahuiyayaj. Titequitiyayaj tayohua huan tonaya para tijtanise ten ica tipanose huan para amo timechcuatotonise quema timechilhuiyayaj Icamanal Toteco.

¹⁰ Anquiiataque huan Toteco nojquiya quiiatc quenicatza tinejnenque campa amojuanti cati anquineltoaj Toteco. Tijchijque cati senquisua cuali huan xitahuac, huan amo aqui huelis techtelhuis ica yon se tamanti amo cuali. ¹¹ Anquimatij quenicatza timechtalnamictijque huan timechylchicajque sese ten amojuanti quej se tetaj quinichuilía iconehua. ¹² Timechilhuijque para xinemica xitahuac quej quinamiqui pampa Toteco amechnotzqui para xicalaquica campa yaya tanahuatía huan para xijpiyaca amoparte ipan ihueyitilis.

¹³ Huajca yeca, amo tijcahuaj para tijtascamatij Toteco pampa anquitaquilijque cati timechilhuijque huan anquiselijque icamanal Toteco ica paquilisti. Amo anquiselijque san quej inincamanal masehualme. Anquiselijque quej icamanal Toteco pampa anquimachilijque para ya nopa cati melahuac elqui. Huan eltoc nopa icamanal Toteco cati noja quichihua itequi ipan amoyolo amojuanti cati anquineltoaj Tohueyiteco. ¹⁴ Huan amojuanti, toicnihua, anelque quej nopa tiopame ten taneltocani cati mosentilíaj ipan tali Judea pampa san se amechtaijyohuiltijque masehualme cati san sejco ehuan amohuaya quej quintaijyohuiltijque nopa israelitame cati amo quineltoaj Tohueyiteco ipan inintal. ¹⁵ Sequij nopa israelitame quimictijque Tohueyiteco Jesús, quinmictijque nopa tajtolpanextiani cati Toteco quintitanili, huan nojquiya techquixtijque tojuanti. Amo quichihuaj cati quipactía Toteco huan quincualancaitaj nochí masehualme. ¹⁶ Quinequiyayaj techtzacuilise para ma amo tiquincamanalhuica cati amo israelitame para amo ma momaquixtica ipan Toteco. Quej ni, nopa israelitame nochipa quichihuaj más tajtacoli hasta temitoc ininemilis ica tajtacoli, huan yeca ama ininpani eltoc icualancayo Toteco.

Pablo sempa quinejqui quinpaxalos nopa taneltocani nepa Tesalónica

¹⁷ Toicnihua, masque amo tiitztoque nopona amohuaya pampa monejqui tiquisque para se talojtzi, timechelnamiquij ipan toyolo huan tahuel

tijnequij sempa timechitatij. ¹⁸ Nelía tijnequiyayaj timechpaxalotij. Huan na niPablo nijchijqui campeca miyac huelta para niyas, pero Amocualcatat techzacuili. ¹⁹ Tijnequij timechitatij pampa antechmacaj hueyi paquilisti. Ipan nopa tonali quema Tohueyiteco Jesús sempa hualas, huan timoquetzase iixpa, tijpiyase hueyi paquilisti pampa anitztose nopa tohuaya. Quena, para timechitase nozona ipan nopa tonali elis quej se corona cati para tojuanti. ²⁰ Quena, amojuanti antechmacaj hueyi paquilisti huan yeca Toteco techhueyitalis nozona.

3

¹ Huajca yeca, quema ayecmo tihueliyayaj timochiyaj más para tijmatise quenicatza anitztoyaj, nimoilhui cuali para nimocahuas noselti ipan altepet Atenas, ² huan para Timoteo ma yahui campa amojuanti. Nijtitanqui para ma amechmaca tetili huan ma amechyolchicahua para más xijneltocaca Tohueyiteco. Nelía Timoteo se toicni ipan Cristo huan quitequipanohua Toteco tohuaya para tiquinilhuisse masehualme nopa cuali camanali ten cati Cristo techchihuilijtoc. ³ Yaya amechpalehuito para amo aqui quicaxanis para quineltocas Toteco pampa ya antaijyohuíaj por ya, pampa anquimatij Toteco quitailijtoc para titaneltocani ma tijpanoca taijyohuilisti. ⁴ Huan quema noja tiutztoyaj amohuaya, timechilhuyiyayaj para se tonali ajsis taijyohuilisti. Huan ama quej nopa panotoc quej anquilitaj. ⁵ Huajca yeca, quema ayecmo huelqui nimochixqui más, nijtitanqui Timoteo para quimatis sinta noja chichahuac anquineltočaj Tohueyiteco para yaya huelis hualas huan nechmatiltis. Nimotequipachohuayaya pampa huelis Amocualcatat amechcayajtosquía huan amechtantosquía, huan totequi eltosquía san tapic.

⁶ Pero ama ya ajsico Timoteo, huan techilhuijtoc nopa cuali camanali para noja chichahuac anquineltočaj Tohueyiteco huan para anteicnelíaj miyac. Techilhuijtoc quenicatza nochipa antechelnamiqúij tojuanti ica cuali, huan quijto para nelía anquinequij antechitase quej nojqúiya tojuanti tijnequij timechitase. ⁷ Yeca toicnihua, masque techpanotihualajtoc miyac taohuij-cayot huan taijyohuilisti nica, techyolchicajqui miyac quema tijmatque para noja cuali anquineltočaj Tohueyiteco. ⁸ Huan ama nelía tiyolpaquij huan techmaca yancuic chichahualisti pampa tijmatij anitztoque ica temachili ipan Tohueyiteco. ⁹ Yeca amo quema hueli tijtamitascamatise Toteco por amojuanti. Quema timoilhúíaj ten amojuanti, techmaca miyac paquilisti iixpa Toteco. ¹⁰ Huan tonaya huan tayohua tijtajtaníaj Toteco chichahuac para sempa timoixitase. Tijnequij timechpalehuisse xijneltocaca Tohueyiteco achi más cuali sinta oncasquía campa polihui se quentzi.

¹¹ Huajca Toteco Totata huan Toteco Jesús ma techyacana para huelis sempa timechpaxalotij. ¹² Huan Tohueyiteco ma amechpalehui para ximoicnelica huan xiquininelica nochí sequinoc masehualme hasta mocahuas amotacnelilis, quej nojqúiya tojuanti timechicnelíaj. ¹³ Huan Tohueyiteco ma amechmaca tetili ipan amoyolo para anitztose antatzejtzeltollique, huan amo aquí huelis amechtelhuis quema anmoquetzase iixpa Toteco Totata quema sempa hualas Tohueyiteco Jesús inihuaya nochí sequinoc itatzejzeloltica masehualhua.

4

Se nemilisti cati quipactía Toteco

¹ Huajca ama, toicnihua timechtajtáníaj chichahuac ximonejnemiltica quej quipactía Toteco quej tojuanti timechmachtijtoque. Ya anquichihua ya ni, pero tijnequij timechylchichahuase ipan Toteco para achi más xijchihuaca.

² Huan ya anquimatij nopa tanahuatilme cati timechmacaque ica itequit-icayo Tohueyiteco Jesús. ³ Pampa Toteco quinequi mojmosta más xiitz-toca antatzejtzeltoltique huan antaiyocatalilme ten tajtacoli. Yaya quinequi para amo aqui ten amojuanti ma quichihua tamanti ica se cati amo itahuical. ⁴ Quinequi sese ten amojuanti ma quinahuati itacayo. Quinequi ximonemiltica quej tatzejtzeltolme iixpa Toteco para nochi masehualme amechtepanitase. ⁵ Amo quinequi xijcahuilica amotajtacolchijca tanequilis ma amechnahuati quej quichihua masehualme cati amo quiixmatij Toteco. ⁶ Huan ma amo aqui quicajcayahua, yon quiixpano, iicni ipan Cristo ica ni tajtacoli, pampa Toteco chichahuac quitatzacuilitis cati ya nopa quichihuas. Ya timechilhuijque ya ni achtohuuya. ⁷ Pampa Toteco technotztoc para timochihuase titatzejtzeltoltique, amo technotztoc para ma tijchihuaca cati fiero iixpa. ⁸ Huajca sinta se masehuali quitahuelcahua ni tamachtili, amo quitahuelcahua se masehuali; yaya quitahuelcahua Toteco cati techmacatoc Itonal cati tatzejtzeltolitic.

⁹ Pero amo monequi timechtajcuilhise para timechilhise xiquinicnelica amoicnihua, pampa Toteco ya amechmachtijtoc quenicatza monequi annoicnelise se ica seyoc. ¹⁰ Huan nelía anquinicnelíaj nochi amoicnihua ipan nochi amotal Macedonia. Pero toicnihua, timechtajtáníaj para achi más xiquinicnelica. ¹¹ Xijchihuaca campeca para mojmosta anitztose anmoyoltalijtoque huan anejnemise ica yoltasehuilisti. Huan ximotequihua ica cati amojuanti amotequi. Xitequitica cuali ica amomax quej ya timechnahuatijque. ¹² Quej nopa masehualme cati amo quineltocaj Toteco amechtepanitase, huan amo monequi anquintajtanise sequinoc cati ica anpanose.

Jesucristo sempa hualas

¹³ Toicnihua, tojuanti tijnequij xijmachilica taya panos ica taneltocani cati ya mictoque para amo anmotequipachose quej ne sequinoc masehualme cati amo mochiyaj para itztose ihuaya Jesucristo. ¹⁴ Tojuanti tijmatij para Jesús mijqui huan sempa moyolcuic, yeca nojquiya tijneltocaj para Toteco Dios quichihuas para toicnihua cati ya mictoque ma hualaca ihuaya Jesús quema yaya sempa hualas.

¹⁵ Huan timechilhuij ya ni cati Tohueyiteco techilhui. Tojuanti cati noja tiitztose huan timocajtose ipan taltipacti quema sempa hualas Tohueyiteco, amo titejcase huan tiquinyacanase nopa taneltocani cati ya mictoque. ¹⁶ Pampa yaya Tohueyiteco tzajtzis ica hueyi tanahuatili huan hualtemos ten ilhuicac. Huan nopa ilhuicac ejquet cati más quiipiya chichahualisti camanaltis nelía chichahuac huan se quipitzas itapitzal Toteco para temachilitise taya onca. Huan achtohui moyolcuise inintacayohua nopa taneltocani cati ya mictoque. ¹⁷ Teipa Toteco techquixtis huan techtejcoltis tojuanti cati noja tiitztose ipan taltipacti san sejco ica injuanti para timopantise ihuaya Tohueyiteco nepa campa mixti ipan ilhuicacti. Huan quej nopa tiitztose para nochipa ihuaya Tohueyiteco. ¹⁸ Huajca ximoyolchichahuaca se ica seyoc ica ni camanali. Amo ximotequipachoca.

5

¹ Toicnihua, amo monequi timechtajcuilhise quenicatza huan quema nochi ya ni panos. ² Pampa cuali anquimatij taloch ajsis nopa tonali ten

iaxca Tohueyiteco. Ajsis quemasehualme amo moilhuse para ajsisquía, quej se tachtejquet calaquí san nima ica tayohua. ³ Masehualme quijtojtose ya onca tasehuilisti huan ya itztoque ica cuali, huan ipan nopa talojtzi quinajsis se hueyi tatzacuilti. Nimantzi hualas quej se sihuat quemasehualme itacuajcualol para tatzacuiltis huan amo aquí huélis cholos.

⁴ Pero amojuanti noicnihua, amo anitztoque ipan tzintayohuilot para nopa tonali amechmajmatis quej tamajmatía se tachtejquet ica tayohua. ⁵ Amojuanti ya anejnemij ipan taahuili o campa tona. Ya anquixmatij Toteco Jesucristo huan ayecmo anitztoque ipan tzintayohuilot. ⁶ Yeca ama ma ayecmo tiitztoque quej masehualme cati cochoque huan amo quimatij taya oncas. Ma titachitoca para quemasehualme ajsis nopa tonal. Ma tijpiyaca cuali totalnamiquilis. ⁷ Cati amo quixmatij Toteco itztoque quej masehualme cati cochoque o cati ihuintoque tayohua. ⁸ Pero ma tijpiyaca cuali totalnamiquilis pampa tiitztoque quej masehualme cati nemij tonaya. Ma tijneltoque Toteco ica nochi toyolo. Ma titeicnelica. Ma timochiyaca ica paquilisti para Toteco cati techmaquixtjoc techhuicas. Sinta tijchihuaj nochi ni tamanti, timocualtijtose quej se soldado cati motalilía se iyolixtepos tzajcayo huan itepos tzontzajca para quimocuitahuis itacayo ipan tatehuilisti. ⁹ Pampa Toteco Totata amo techtalijtoc para tijselise tatzacuiltisti. Techtalijtoc para techmaquixtis por cati Jesucristo techchihuilijtoc. ¹⁰ Yaya mijqui por tojuanti para ma tiitztoque ihuaya para nochipa masque timictoque o noja tiitztoque quemasehualme yaya hualas. ¹¹ Yeca noja más ximoyolchicahuaca ipan Toteco huan ximomacaca tetili se ica sequinoc quej ya nijmati para anquichijtiyahuij.

Pablo quinmacac miyac camanali nopa taneltocani

¹² Ama toicnihua, timechtajtaníaj para xiquintepanitaca miyac nopa tacame cati tayacanaj ipan itequi Toteco nepa campa amojuanti. Inijuanti tequitij chichahuac campa amojuanti huan amechmachtíaj pampa Tohueyiteco quinquimacatoc ma amechmocuitahuica para anejnemise cuali. ¹³ Huan monequi anquintepanitase huan anquicnelise miyac por nopa tequit cati quichihuaj. Xiitztoque san seico ica paquilisti.

¹⁴ Huan nojquiya timechtajtaníaj, toicnihua, para chichahuac xiquincamanalhuica nopa masehualme cati tatzihuij nozona campa amojuanti. Xiquinolchicahuaca inijuanti cati nimantzi pinahuaj huan amo quipiyaj tetili. Xiquinpalehuica cati ayemo nelcuali quineltocaj Toteco. Huan xijpiyaca amoyolo ica nochi masehualme.

¹⁵ Xijtachilica para amo aquí ma quicuepili seyoc cati amo cuali quichihuilijtoc. Nochipa xijchihuaca campeca ximochihuilica cati cuali se ica sequinoc huan ica nochi sequinoc masehualme.

¹⁶ Xipaquica mojmota. ¹⁷ Ximotatajtjinemica ica Toteco talojtzi. ¹⁸ Xijtasacamata Toteco ipan nochi tamanti pampa quej nopa Toteco quinequi xijchihuaca nochi amojuanti cati anitztoque aniaxcahua Cristo Jesús.

¹⁹ Amo xijsehuica itequi Itonal Toteco ipan amoyolo. ²⁰ Amo xijtajilhuica icamanal se tajtolpanextijquet Toteco. ²¹ Pero xijjeyecoca nochi cati quijtohuaj. Xijtoquilica cati cuali. ²² Xijtahuelcahuaca nochi tamanti cati amo cuali.

²³ Toteco, yaya cati iselti techmaca tasehuilisti ipan toyolo, ma amechchihuaca senquisá antatzejtelolique. Ma amechmocuitahuili Toteco amotonal, amoalma, huan amotacayo para amo aquí huélis amechtelhuis ica yon se

tamanti quema sempa hualas Tohueyiteco Jesucristo. ²⁴ Toteco cati amech-notzqui para anelise iaxcahua, yaya temachtí. Huan yaya quitamisencahuas ni cati tijtanjáaj.

Pablo tanqui tajcuilohua

²⁵ Toicnihua, ximotatajtica ica Toteco para tojuanti.

²⁶ Ximotajpaloca huan ximotzoponica ica se tatepanitacayot cati tatze-jtzeloltic pampa anmoicnelíaj ipan Cristo.

²⁷ Nimechnahuatía antayacanani ica itequiticayo Tohueyiteco para xijpo-huaca ni amatajcuiloli para ma quicaquica nochi toicnihua.

²⁸ Tohueyiteco Jesucristo ma quiapiya hueyi iyolo ica amojuanti. Quej nopa ma eli.

Nopa Ompa Amatajcuiloli cati Pablo Quintajcuilhui Taneltocani ipan Altepet Tesalónica

Pablo quintajcuilhui taneltocani ipan Tesalónica

¹ Na niPablo, ihuaya Silvano huan Timoteo, timechtajcuilhuilíaj ni amat amojuanti ipan nopa tiopamit ten taneltocani cati anmosentilíaj ipan altepet Tesalónica. Antatzquitoque ipan Toteco Totata huan ipan Toteco Jesucristo. ² Toteco Totata huan Toteco Jesucristo ma quiپیyaca hueyi iniyolo amohuaya huan ma amechmacca tasehuilisti.

Jesucristo quintajtolsecahuas tajtacolchihuani quema sempa hualas

³ Toicnihua, mojmosta tijtascamatij Toteco por amojuanti, pampa quej nopa quinamiqui. Tijtascamatij pampa mojmosta anquineltočaj Toteco ica más chichahualisti huan mojmosta más anmoicnelíaj. ⁴ Huajca, ica paquilisti tiquinilhuíaj taneltocani ipan sequinoc itiopahua Toteco cati cuali anquichihuj. Tiquinilhuíaj quenicatza anquipiayaj amoyolo huan quenicatza ica sesen taijyohuilisti huan taohuijcyot cati anquiiyohuíaj, más chichahuac anquineltočaj Toteco. ⁵ Toteco quitequihuis ni taijyohuilisti para tenextilis para yaya tetajtolsecahua xitahuac. Antaijyohuíaj ama pampa anquichihuíaj Toteco ma amechnahuati ipan amoyolo nica huan ya ni tenextilía para amechhijtoc quinamiqui ancalaquise ilhuicac campá yaya tanahuatis para nochipa.

⁶ Huan pampa Toteco itztoc xitahuac, yaya nojquiya quincuepilis ica taijyohuilisti nopa masehualme cati ama amechtaijyohuilitíaj. ⁷ Huan amojuanti cati ama antaijyohuíaj, amechchihuas ximosiyajquetzaca huan nojquiya techchihuas ma timosiyajquetzaca tojuanti quema ajsis nopa tonal quema Tohueyiteco Jesucristo monextiqui ten ilhuicac ihuaya iilhuicac ejcahua cati quiپیyaj huejhueyi chichahualisti. ⁸ Quena, hualas ipan tilelemecti para quintatzacuilitis nopa masehualme cati amo quiixmatij huan cati amo quinejque quichihuase cati icamanal Toteco Jesucristo quinilhui. ⁹ Inijuanti monequi taxtahuase cati quinamiqui por inintajtacol, huan yeca mocuapolojtose para nochipa nepa micta. Nepa itztose huejca ten campá itztoc Toteco ica nochi ihueyitilis huan ichichahualis. ¹⁰ Huan ya ni panos ipan nopa tonali quema Jesucristo sempa hualas ipan taltipacti huan nochi itatzejtzeloltica masehualhua quihueyichijtose huan san motachilijtose ica nochi cati motetzaitatose. Huan amojuanti nojquiya anitztose ihuaya cati quihueyichijtose pampa ya anquineltoacaque cati timechilhuijtoque ten ya.

¹¹ Huajca yeca mojmosta timotatajtíaj ica Toteco por amojuanti huan tijtajaníaj ma amechmacca chichahualisti para anquichihuase nochi itequi quej ya anquinequij anquichihuase pampa anquineltočaj Toteco. Huan nijtajanía ma quitachili amotequi huan ma paqui pampa amechnotzqui para aniaxcahua. ¹² Huan yeca sequinoc masehualme quihueyichihuase Toteco quema quiitase cati anquichijtoque, huan nojquiya amechhuyechihuase por cati anquichijtoque. Huan nochi ya ni panos pampa hueyi iniyolo Toteco Totata huan Toteco Jesucristo ica amojuanti.

2

Nopa tajtacol tacat cati amo quitepanita yon se tanahuatili

¹ Toicnihua, ama nijnequi nimechcamanalhuis ten nopa tonali quema Tohueyiteco Jesucristo sempa hualas huan timosentilise ihuaya. ² Ma amo aqui amechmajmati, noicnihua. Yon amo xiquincahuilica sequinoc ma amechtequipacholmacaca huan amechilhuse para ya ajsico nopa tonal ten Tohueyiteco. Masque amechilhuiaj para tojuanti timechtitanilijque se amatajcuiloli cati quijito ya ajsico, o se acajya quiselijtoc se camanali, o se tanextili quej se temicti ten Toteco para ya ajsico, amo xiquinneltoquilica. ³ Amo aqui ma amechcajcahaya. Achtohui, quema ayemo ajsi nopa tonali, miyac masehualme quicahuase quineltocase Toteco. Nojquiya monextis nopa tajtacol tacat cati amo quitepanita yon se tanahuatili, yaya cati mocuapolos nepa micta. ⁴ Nopa tajtacol tacat quicualancaitas Toteco huan nochi tamanti cati masehualme quinhueyimatij o quintocaxtiaj "dios". Quinequis nochi quinsosolos huan quintanis. Mohueyitalis huan quinequis nochi masehualme ma quihueyichihuaca san ya. Hasta yas huan mosehuis ipan nopa hueyi tiopamit ten Toteco huan quijitos para yaya Dios.

⁵ ¿Amo anquielnamiqij nimechilhui ni quema niitztoya amohuaya? ⁶ Nojquiya ya anquimatij ajquiya yaya cati amo quicahuilia ma monexti nopa tajtacol tacat hasta ajsis tonali para monextis. ⁷ Ya pejqui nopa tajtacoli cati quichihuas nopa tacat cati amo quitepanita yon se tanahuatili, pero yaya amo huelis monextis, pampa amantzi itztoc se cati amo quicahuilia ma monexti. Teipa Toteco quiquixtis yaya cati amo quicahuilia ma monexti, ⁸ huan huajca quena, mopanextis nopa tajtacol tacat cati amo quitepanita yon se tanahuatili. Huan teipa, quema ajsis Tohueyiteco cati tahuel quiyiya chichahualisti, nimantzi quimictis nopa tajtacol tacat san ica iijyoyo. Quena, Tohueyiteco quitzontamiltis ica itatanex cati monextis quema hualas. ⁹ Pampa nopa tajtacol tacat hualas para quichihuas itequi Amocualtacat, huan quiyiyas hueyi chichahualisti, huan nesis quej quichihua tanextili huan tiochichahualnescayot cati amo melahuac para ica tacajcahaya. ¹⁰ Quichihuas miyac tamanti cati amo cuali ica cati quincajcahaya masehualme cati mocuapolos para nochipa pampa amo quinequise quiselise icamanal Toteco huan quicnelise cati melahuac. Injuanti amo quinequise motajtacolquixtise. ¹¹ Yeca Toteco quinmacas nopa masehualme inintalnamiquilis para ma quineltocaca se istacatili. ¹² Huan Toteco quintalilis tatzacuiliti pampa amo quineltocaque cati melahuac. San mopaquilismacayayaj ica cati amo cuali quichihuayayaj.

Toteco amechtapejpeni para amechtajtacolquixtilis

¹³ Pero tojuanti, nochipa tijtascamatij Toteco por amojuanti, toicnihua, pampa Toteco amechicnelia miyac. Huan quema ayemo pehuayaya taltipacti, yaya ya amechtapejpenijtoya para amechtajtacolquixtis. Huan teipa Itonal Toteco amechiyocatali para anelise aniaxcahua quema anquineltocaque icamanal Toteco cati melahuac. ¹⁴ Huan quema timechilhuijque nopa cuali camanali, Toteco amechnotzqui para anquiyase cati elis amoaxca nepa campa itztoc Tohueyiteco Jesucristo ica nochi ihueyitilis.

¹⁵ Huajca, toicnihua, ximoquetzaca xitahuac huan ximotetilica. Xijneltocatiyaca san nopa tamachtli cati nimechmachtijtoc quema niitztoya amohuaya huan cati nimechijcuilhuilijtoc ipan amatajcuiloli. Amo xijcahuaca, yon amo xijtoquilica seyc tamachtli. ¹⁶ Toteco Jesucristo huan Toteco Totata techicnelia nochi tojuanti huan techyoltalijtoc para nochipa pampa hueyi iyolo ica tojuanti. Yaya cati techchihua ma tijchiyaca ica paquilisti

nochi nopa cuali tamanti cati techmacas teipa. ¹⁷ Huan ama Toteco Totata huan Toteco Jesucristo ma amechyolchicahuaca huan ma amechchihuaca antemachme para anquijitose huan anquichihuase nochi cati cuali.

3

Xijtajtanica Toteco ma techmocuitahui

¹ Huajca para tijtamiltise san ya ni, toicnihua. Nijnequi ximotatajtica ica Toteco por tojuanti. Xijtajtanica para ma momoyahua nimantzi icamanal Toteco huan para miyac masehualme ma quiselica huan ma quitepanitaca quej panoc quema amojuanti anquicajque. ² Xijtajtanica Toteco ma techmanahui ten amo cuajcualme huan masehualme cati fiero quichihuaj, pampa itztoque sequij cati amo quineltocej Toteco. ³ Pero Toteco yaya temachti huan yaya amechmacas tetili huan amechmanahuis ten Amocualtatcat. ⁴ Huan timotemachíaj ipan Toteco para ya anquichihuaj cati timechilhuijtoque, huan mojmosta más anquichijtiyase. ⁵ Ma Toteco amechpalehui para achi más xijmachilica hasta canque ontantoc itaicnelijcayo para amojuanti. Huan ma amechpalehuis anquipiyase amoyolo quej Cristo quipixqui ica cati amechpanotihuala.

Nochi taneltocani ma tequitica cuali

⁶ Ama toicnihua, timechnahuatíaj ica itequiticayo Tohueyiteco Jesucristo, ximoiyocatalica ica nochi taneltocani cati amo teno quichihuaj huan amo tequitij chichahuac quej timechmachtijtoque. ⁷ Pampa anquimatij quinamíqui para antechoquillise tojuanti huan cati tijchijque. Huan quema tiitztojaj amohuaya, amo titatzihuiyayaj. ⁸ Titaxtajque para totacualis cati tijcujque para amo timechcuatotonise. Huan chichahuac titequitiyayaj tonaya huan tayohua masque nelía ohui elqui totequi. ⁹ Tijpiyaj tequiticayot para timechtajtanjitosquíaj totacualis san tapic, pero amo tijnequiyayaj. Tijnejque timechcahuilise se cuali ojti para huelis anquitoquillise. ¹⁰ Huan quema noja tiitztojaj amohuaya timechmacaque se tanahuatili cati quijito: Sinta se amo quinequi tequitis, ma amo tacua. ¹¹ Pampa tijcactoque itztoque sequij campá amojuanti cati tatzihuij huan amo quichihuaj yon se tequit. San quinequij mocalaquise campá amo inintequi. ¹² Huajca ama tiquinnahuatíaj nopa taneltocani ica itequiticayo Tohueyiteco Jesucristo huan tiquinyolchicahua ma tequitica huan ma amo camanaltica. Huan ica inintequi ma quitanica cati inijuanti quinplohua.

¹³ Huan toicnihua, amojuanti cati ya antequitij cuali, amo xisiyahuica para anquichihuase cati cuali. ¹⁴ Huan sinta se taneltoquet amo quichihua cati timechilhuij ipan ni amatajcuiloli, xijtachilica ajquiya ya huan amo ximohuicaca ihuaya para ma pinahua. ¹⁵ Pero amo xiquitaca quej amoculancaitaca, pero xijtalnamictica pampa yaya amoicni.

Pablo quintajpalos

¹⁶ Toteco, yaya cati temaca tasehuilisti, ma amechmaca tasehuilisti mojmosta masque ten hueli amechpanotihuala. Toteco ma itzto amohuaya nochi amojuanti.

¹⁷ Nica na niPablo nimechtajcuilhuía ica nomax para nimechtajpalos. Quej ni nesi na notajcuilol campá tamis nochi noamatajcuilol, huan quema anquuitase notajcuilol, anquimatise para nelía na cati nimechtitanilía nopa amatajcuiloli. ¹⁸ Tohueyiteco Jesucristo ma quipiya hueyi iyolo ica nochi amojuanti. Quej nopa ma eli.

Nopa Achtohui Amatajcuiloli cati Pablo Quitajcuilhui Timoteo

Pablo quitajpalo Timoteo

¹ Na niPablo cati niitayolmelajca Jesucristo nimitztitanilia ni amatajcuiloli. Toteco Dios Totemaquixitjca huan Toteco Jesucristo yaya cati ipan timotemachiaj tanahuatijque ma nieli niitayolmelajca huan yeca nijchihua ni tequit. ²Noicni Timoteo, nimitztajcuilhuia ni amatajcuiloli. Nimitzicnelia ipan Toteco quej tinonelcone, pampa tijneltoctoc Toteco quej na nijneltoaca. Toteco Totata huan Toteco Jesucristo ma quipiyaca hueyi iniyolo ica ta, huan ma mitztasojtaca huan ma mitzmacaca tasehuilisti ipan moyolo.

Xiquintilquetza cati tamachtiaj cati amo melahuac

³ Timoteo, sempa nimitzilhuia cati nimitzilhui quema nimitzcajte para niyas tali Macedonia. Ximocahua nepa ipan altepet Éfeso huan xiquin-nahuati nopa tacame cati tamachtiaj cati amo melahuac ma ayecmo quichihuaca. ⁴Xiquinilhui taneltocani nepa ma ayecmo moilhuica ten cuentos ten huejcajquiya cati amo melahuac. Ma amo moilhuica monequi quitemose ajquiya elqui inihuejcapan tatahua huan sinta nopa sequinoc moilhuiaj para elque cuajcualme o amo, pampa nopa tamanti san quichihuaj para masehualme ma monajnanquilica huan amo teno quisencahuaj. Amo techpalehuia para más ma tijneltoctiyaca Toteco quej yaya quinequi ma tijchihuaca.

⁵ Pero quema tojuanti tiquinmacaj toicnihua tanahuatilme ma quichihuaca, tijchihuaj para tahuel ma teicnelica ica iniyolo cati tapajpactic iixpa Toteco huan para ma quipiyaca iniyolo cati amo quintatelhuia para quipiyaj ome inixayac. Tijnequij para nelia ma quineltocaca Toteco ica nochi iniyolo. ⁶Sequij tacame quicajtejque ni talnamiquilisti cati achtohui quineltocayayaj. Ama san monajnanquiliaj ica tamanti cati amo ipati. ⁷Quinequij elise tamachtiani ten itanahuatilhua Moisés para masehualme ma quinhueyitepanitaca, pero amo quimachiliaj taya quijtohuaj, yon taya inintequi itanahuatilhua masque tamachtiaj ica miyac chicahualisti.

⁸Pero tojuanti tijmatij para cuali itanahuatilhua Moisés sinta masehualme quintequihuaj quej Toteco quinejqui ma tiquintequihuica. ⁹Pero Toteco amo quinchijqui nopa tanahuatilme para masehualme cati itztoque xitahuacque iixpa. Toteco quinmacac nopa tanahuatilme para masehualme cati amo tatepanitaj, huan amo quintacaquilaj cati quipiyaj tequiticayot, huan san quichihuaj cati amo cuali. Itztoque masehualme cati tajtacolchitjinemij huan cati amo teno quineltocaj. Inijuanti ten hueli camanaltij ten Toteco huan quihuejcamajcahuaj nochi cati tatzejtelolitic. Itztoque cati quinmictiaj inintatahua huan cati quinmictiaj sequinoc masehualme. ¹⁰Toteco temacac nopa tanahuatilme para masehualme cati quichihuaj ten hueli ica cati amo inintahuical, huan para tacame cati nemij inihuaya tacame, huan sihuame cati nemij inihuaya sihuame para ten hueli quichihuase. Quinmacac nopa tanahuatilme para masehualme cati tachtejquij, huan istacatij, huan teilhuaj cati amo melahuac. Quena, quinmacac nopa tanahuatilme para inijuanti cati quichihuaj miyac tamanti cati nopa xitahuac tamachtili techilhuia ma amo tijchihuaca. ¹¹Huan nopa xitahuac

tamachtili huala ten nopa cuali camanali cati tahuel yejyetzti cati Toteco quicajtejtoc nomaco para ma nijmoyahua. Yaya cati quinamiqui ma tijhuey-italica.

Pablo quitascamatqui Toteco pampa hueyi iyolo

¹² Nijtascomati Tohueyiteco Jesucristo cati nechitac para nitemachti huan yeca nechmacac ni itequi huan nechmacatoc tetili ma nijchihua. ¹³ Masque yaya cuali quimatiyaya para achtohuiya nicahuilmatiyaya itoca Cristo. Achtohui niquintajyohuiliyaya imasehualhua huan nelía nimosisiniyaya. Pero masque quej nopa nielqui, Toteco nechtasojtac pampa ayemo nijneltocayaya huan amo nijmachiliyaya cati nijchihuayaya. ¹⁴ Nelía tahuel hueyi iyolo Toteco ica na. Yaya nechmacac nopa taneltoquili huan nopa taicnelijcayot cati tijpantiaj quema techtatzquiltía ipan Cristo Jesús.

¹⁵ Nelía temachti ni camanali cati nimechilhuis huan monequi nochi quineltocase: Jesucristo hualajqui ipan ni taltipacti para quintajacolquixtis tajtacolchihuani huan na achi más nitajtacolchijtoya ten nochi sequinoc masehualme. ¹⁶ Yeca Toteco nechtasojtac pampa Jesucristo quinejqui nech-talis quej se tacat cati ica quinextía hasta canque ontami para quiپیای iyolo ica tajtacolchihuani cati nelpano tajtacolchijtoque. Huan yeca ama sequinoc masehualme quimachilise para nojquiya huelis quineltocase Jesucristo huan quiselise nemilisti para nochipa. ¹⁷ Huajca ma tijhueyitepanitaca Toteco, yaya nopa Tanahuatijquet cati tanahuatis para nochipa huan amo quema tamis. Quena, ma tijhueyimatica yaya cati amo quema miqui, huan cati amo aqui hueli quiita, pampa san yaya Dios huan quiپیای nochi talnamiquili. Quej nopa ma eli.

¹⁸ Timoteo, nocone, ni tanahuatili nimitzmaca. Ximoneltali huan xitatehui chicahuac ica cati amo cuali quej nopa tajtolpanextiani quiijtoque tijchihuasquia. ¹⁹ Xijsenhuiquili xijneltoca icamanal Toteco ica moyolo tapajpactic iixpa quej ya tijmati tijchihuas. Sequij masehualme quiixpanotoque cati quimatij para xitahuac huan quisosolojque inintaneltoquilis. ²⁰ Himeneo huan Alejandro itztoque ome cati quej nopa quichijtoque. Niquinquixti ten campa taneltocani huan niquintemactilijtoc imaco Amocualtacat para ma quimatica para amo hueli camanaltise ten hueli ten Toteco.

2

Quenicatza monequi ma timotatajtica ica Toteco

¹ Timoteo, achtohui nimitztajtania chicahuac para nochi amojuanti ximotatajtica ica Toteco por nochi masehualme. Xijtajtantica Toteco ma quintiochihua huan ma quintasojta. Xijtajtantica ma quinmaca ten ica panose huan xitascamatica Toteco por sese injuanti. ² Xijtajtantica Toteco por tanahuatiani huan nochi cati quihuicaj tequiticayot para injuanti ma tequitica cuali huan huelis tiitztose ica cuali huan ica tasehuilisti. Huan quej nopa huelis tijtoquilise Toteco huan sequinoc techtepanitase. ³ Toteco yaya Totemaquixtijca quipactía ma timotatajtica por sequinoc quej nopa, ⁴ pampa yaya quinequi nochi masehualme ma momaquixtica huan ma quimatica cati nelía melahuac.

⁵ Pampa itztoc san se Dios.

Itztoc setzi cati motajcoquetza tatajco Dios huan masehualme para quinyoltalis se ica seyoc, huan yaya Jesucristo cati mocuetqui masehuali.

⁶ Jesucristo motemacac huan mijqui por nochi masehualme para taxtahuas cati monequiyaya huan para techtojtomas ten totajtacolhua.

Huan quema ajsic tonali Toteco technextili nochi cati quichijtoya.

⁷ Huan yeca Toteco nechtequitajitoc na para nielis niitayolmelajca. Nechtequimacac ma nitepohuili icamanal huan para ma niqinmacthi masehualme cati amo israelitame para ma quineltoaca huan ma quimatica cati melahuac. Nimitzilhuía cati xitahuac huan amo niistacati.

⁸ Huajca quema mosentilíaj taneltocani campa hueli, nijnequi para tacame ma motatajtica. Pero quema quitananaj inimax para motatajtise ma itztoca tatzetzeloltique iixpa Toteco. Ma amo quipiyaca cualanti, yon tanajnan-quilisti ipan iniyolo.

⁹ Huan nijnequi sihuame ma moyoyontica huan ma mocualnextica quej quinamiqui para sequinoc ma quintepanitaca. Ma amo mocualnextica ica miyac oro, huan perlas, huan yoyomit cati tahuel patiyo para masehualme ma qintachilica. ¹⁰ Achi cuali ma quintitaca sihua taneltocani para yejyetz-itzi pampa quichihuj miyac tamanti cati cuali quej quinamiqui sihuame cati quineltoaj Toteco.

¹¹ Ipan tasentili nopa sihuame ma quitacaquilica nopa tamachtili huan ma quiselica ica nochi iniyolo. ¹² Amo niqincahuilía sihuame ma quipiyaca nopa tequit para quinmacthise tacame ipan tasentilisti, yon para quipiyase tequiticayot ica tacame. Ma san tacaquica. ¹³ Pampa Toteco quichijqui Adán achtohui huan teipa quichijqui Eva. ¹⁴ Huan Amocualtacat quicajcayajqui Eva huan yaya tajtacolchijqui. Amo quicajcayajqui Adán. ¹⁵ Pero Toteco quinmaquixtis sihuame ica nopa conet cati quichijqui ma tacati sinta injuanti quineltoaca huan teicnelise huan quipiyase ininemilis cati tatzetzeloltic huan inintalnamiqulis cati cuali.

3

Xiquitequitali cuali tacame para quinyacanase taneltocani

¹ Nimitzilhuis se camanali cati temacthi. Sinta se tacat quinequi mochi-huas se huehue taneltoquet para tayacanas ipan tasentilisti, huajca quinequi se cuali tequit. ² Pero monequi se tayacanquet ten taneltocani ma eli se tacat cati amo aqui quitelhuis. Monequi ma quipiya setzi isihua huan san itztos ica ya. Monequi ma eli se tacat cati cuali monahuatía huan cati quitamichihua itequi. Ma eli se tacat cati nochi quitepanitaj, huan cati quipactía quinselis paxalohuani ipan ichaj huan cati nelía cuali tamachtía icamanal Toteco. ³ Monequi se tacat cati amo quema moihiuntía, yon amo mosisinía. Monequi se cati nelía quipiya iyolo ica masehualme huan amo quitemohua cualanti. Monequi se cati amo quinequi tomi cati amo iaxca. ⁴ Xijtequitali se tacat cati cuali quinyacana nochi ipan ichaj huan cati quinpiya iconehua cati quitacaquilía icamanal huan nelía quitepanitaj. ⁵ Pampa se tacat cati amo quimati quenicatza tayacanas ipan ichaj, ¿quenicatza huelis quinmocuitahuis taneltocani ipan itiopa Toteco? ⁶ Amo xijtequitalica se tacat para elis se tayacanquet sinta yancuic quineltoacatoc Toteco, pampa huelis mohueyimatis quej quichijqui Amocualtacat. Quej nopa quiselis se tatzacuilti quej yaya quiseli. ⁷ Nojquiya monequi xijтали se huehue taneltoquet cati quitepanitaj nochi masehualme hasta cati amo quineltoaj Toteco. Quej nopa amo aqui huelis quitelhuis ica se tamanti cati amo cuali huan nopa Amocualtacat amo quicajcayahuas.

Tapalehuiani ipan tiopamit ten taneltocani

⁸ Nojquiya nopa tacame cati quinequij mochihuase tapalehuiani ipan tiopamit ten taneltocani monequi elise tacame cati nochi quintepanitaj. Xiquintequitali tacame cati amo quiipiyaj ome inixayac, huan cati amo quema moihuintíaj huan cati amo tahuel quinequij tomi cati amo iaxca. ⁹ Xiquintalica tacame cati tapajpactic inintalnamiquilis huan cati senquisa quineltocaj nopa tamachtli ten Jesucristo cati amo aqui quimatiyaya hasta Toteco technextili. ¹⁰ Pero quema ayemo tiquintalijtoc quej tapalehuiani, monequi xiquinmacaca seyoc tequit ipan tasentilisti para tiquinyejyecos sinta quichihuase cuali nopa tequit iniixpa nochi o amo. Sinta, quena, cuali quichihuase, huajca xiquintequitalica quej tapalehuiani. ¹¹ Huan nojquiya nopa sihuame monequi elise cuali sihuame cati nochi quintepanitaj. Ma amo elica sihuame cati teejelnamiquij. Monequi ma elica sihuame cati cuali monahuatíaj huan cati itztoque temachme ipan nochi tamanti. ¹² Monequi sese taca tapalehuijquet ipan tiopamit ma quiipiya setzi isihua huan san itzto ica ya. Monequi taca tapalehuiani ma elica tacame cati cuali quimocuitahuíaj ininchaj huan cati quinyacana iconehua ica cuali. ¹³ Pampa se tacat cati quichihuas nelía cuali ni tequit ten tapalehuiani ipan tiopamit, quiselis más tatepanitacayot huan noja más mochihuas temachtli para quinpalehuis sequinoc ma quineltocaca Jesucristo.

Cati tojuanti tijneltoaj

¹⁴ Nimitztajcuilhuía ama masque nijnequi amo huejcahuas para nimechitanti. ¹⁵ Pero sinta amo hueli niyas nimantzi, nijnequi nimechmachiltis quenicatza monequi taneltocani ma mochihuaca ipan familia Toteco. Pampa nopa taneltocani cati mosentilíaj, inijuanti itiopa Toteco cati yolto huan eltoc quej taquetzalme cati quiiyohuíaj nopa cati melahuac. ¹⁶ Nochi quimatij para nelía hueyi nopa cati Toteco technextili para ma tijmachilica ten ya:
Cristo mochijqui masehuali huan monexti campa tojuanti.
Itonal Toteco technextili para yaya elqui xitahuac iixpa Toteco.
Ilhuicac ehuaní quitaque.
Huan taneltocani quinilhuijque miyac masehualme ipan campa hueli tali ten ya.
Miyac masehualme ipan ni taltipacti quineltocaque.
Huan teipa Toteco sempa quitejcolti huan quiseli ipan ilhuicac.

4

Sequij tacame quicahuase Jesucristo para quitoquilise sequinoc tamachtli

¹ Itonal Toteco techyolmelajtoc xitahuac para ipan nopa itamiya tonali sequij tacame quicahuase cati tijneltoaj. Quintacaquilise ajacame ten Amocaltacat cati san tacajcayahuaj huan quiselise inintamachtli. ² Ni tamachtiani san quiipiyaj ome inixayac huan istacatij. Huan pampa quiipiyaj iniyolo mictoc, ayecmo teno moilhuíaj quema quichihuaj cati amo cuali. ³ Quiijtohuaj para se taneltoacquet amo hueli quiipiyas itahuical. Quiijtohuaj ayecmo huelis tijcuase sequij tamanti tacualisti. Pero Toteco quichijtoc nopa tacualisti para tojuanti cati tijneltoaj Toteco huan tijmatij cati melahuac ma tijcuaca ica tascamatili. ⁴ Pampa nochi tacualisti cati Toteco quichijtoc eltoc cuali huan yon se amo monequi tijhuejcamajcahuase. Huelis tijtascamatise Toteco huan tijselise nochi, ⁵ pampa Icamanal Toteco quiijtohua yaya quitochihuas huan quitatzejtelolchihuas totacualis quema tijtascamatij.

Se cuali tatequipanojquet ten Jesucristo

⁶ Xiquinmacthi taneltocani nepa ni tamanti cati nimitzilhuijtoc, huan quej nopa fielis se cuali itequipanojca Jesucristo. Huan se cuali tequipanojquet monequi momachtis nopa camanali cati quineltoca. Quena, motamacas ica nopa cuali tamachtili cati quitoquilía quej elisquía itacualis. ⁷ Amo xijta-caquilí huíhui camanali huan camanali cati amo ipati cati camanaltij sequij tename, pero xijtequihui monemilis huan mochichualis para más timocualchijchihuas ipan Toteco. ⁸ Sinta tijcualchijchihuas motacayo, cualtitoc. Pero más ipati sinta timocualchijchihuas ipan Toteco, pampa mitzpalehuis para nochipa. Ipati ama quema tiitztoque ipan ni taltipacti huan achi más ipati elis teipa quema tiitztose ilhuicac. ⁹ Temacthi ni camanali cati nimitzilhuijtoc huan quinamiqui para nochi masehualme ma quiselica. ¹⁰ Huan yeca tojuanti chichahuac titequipanojtinemij huan titaijyohuijtinemij pampa tijnequij timochixtose ipan yaya Toteco cati yoltoc huan cati amo quema miqui. Yaya inintemaquixtija nochi masehualme huan quinmaquixtis para nochipa nochi cati quineltocaj.

¹¹ Xiquinmacthi nopa taneltocani nochi ni cati nimitzilhuijtoc huan xiquinnahuati ma quichihuaca. ¹² Ma amo aqui quiiyto para amo mitztacaquilis pampa noja titelpoca tacat. Pero xiquincahuili taneltocani se cuali ejemplo ica cati titamachtilía huan ica cati tijchihua. Xiquinnextili quenicatza ma teicnelica huan ma quineltocaca Toteco ica nochi iniyolo huan quenicatza ma quipiyaca ininemilis cati tapajpactic. ¹³ Hasta quema niasiti nepa, ya ni monequi xijchijtiya quema anmosentilíaj: Xijpohua Icamanal Toteco para nochi quicaquise. Xiquinmacthi cati quiiytosnequi. Huan xiquinolchichahua taneltocani ma quichihuaca cati quiiytohua. ¹⁴ Xijtequihui nopa yajatilí cati Toteco mitzmacac quema nopa huehue taneltocani qitalijque inimax ipan motzonteco huan Toteco quinmacac camanali para camanalitise ten nochi nopa cuali tequit cati tijchihuasquía teipa.

¹⁵ Ica nochi moyolo xijchijtinemi nochi ni tamanti cati nimitzilhuijtoc. San ya nopa xijmati para nochi taneltocani quitase para mojmosta tijchihua más cuali itequi Toteco. ¹⁶ Ximotachili para san cati xitahuac tijchihuas huan para san cati cuali titamachtis. Ximofatzquilis san ipan ya ni. Sinta quej ni tijchihuas, Toteco mitzmaquixtis ta huan inijuanti cati mitztacaquilise.

5

Quenicatza monequi Timoteo ma nemi inixpa taneltocani

¹ Amo xicajhua se tacat cati ya huehue quema quichihua cati amo cuali. Achi cuali xijnnojntza ica cuali quej elisquía motata. Huan cati san cuali chicaj tacame, xiquinnnojntza quej elisquíaj moicnihua. ² Xiquincamanalhui sihuame cati tename quej elisquíaj monanahua huan chicaj sihuame quej elisquíaj mosihua icnihua. Huan quema tiquincamanalhuía, xijpiya motalnamiquilis tapajpactic.

³ Monequi taneltocani quinmocuitahuse nochi sihuame icnotziti cati ya mijque inihuehue huan cati amo aqui quipiyaj para quinpalehuis. ⁴ Pero sinta se toahui cati icnotzi quinpiya iconehua o iixhuihua cati ya huejhueyi para quipalehuise, huajca monequi ma quipalehuica. Monequi iconehua quiiytase para Toteco quinmocatoc achtohui ma quichihuaca cati cuali ica inintatahua o cati itztoque inihuicalhua. Quena, monequi quicuepilise cati yejyectzi inintatahua quinchiuilijque quema quiniscaltijque, pampa Toteco quipactia quema se quinmocuitahua itatahua. ⁵ Pero ica sihuame cati mijque inihuehue huan cati nelía itztoque ininpilseltitziti huan amo aqui quipiyaj, huajca monequi xiquinpalehuica. Inijuanti san mochiyaj

ipan Toteco huan motatajtíaj huan quitajtaníaj ten ica panose tonaya huan tayohua. ⁶ Pero sequinoc sihuame cati mijque inihuehue san quitemohuaj cati quipactia inintacayo. Masque yoltoque, Toteco quinita quej cati ya mictoque. ⁷ Xiquinnahuati taneltocani ma quichihuaca nochi ya ni para amo aqui huelis quinejelnamiquis para amo quinpalehuíaj cuali sihuame cati icnotziti o para quinpalehuíaj sihuame cati amo nemij cuali. ⁸ Pero sinta se amo quinequi quimacas itata, o inana, o sequinoc ihuicalhua ten ica panose, huajca ica ya nopa quinextía para amo quineltoca Toteco. Huan quichijtoc más fiero que se tacat cati amo quema quineltocatoc Toteco.

⁹ Amantzi nimitzilhuis catijque sihuame icnotziti anquintapejpenise huan anquiniycuilose ipan tiopa. San xiquintapejpenica sihuame icnotziti cati ya quiپیay sesenta xihuit huan cati nochipa itztoyaj san ica setzi inihuehue, ¹⁰ huan cati nochi taneltocani quimatij para quichijtinentoque cati cuali. Quena, xiquiniycuilo toahuihua cati cuali quinscaltijtoque inincone-hua huan cati ica paquilisti quinselíaj paxalohuani. Monequi xiquiniycuilo cati quinpajpaquilijtoque inüicxihua taneltocani o ten hueli tamanti tequit cati monequi. Xiquintapejpeni cati amo quema mohueyimatij huan cati quimatque quinpalehuíaj cati taijyohuíaj. Quena, xiquintapejpeni nopa sihuame icnotziti cati ica nochi iniyolo quichijtoque cati cuali.

¹¹ Pero sihuame icnotziti cati ayemo quiپیay sesenta xihuit amo xiquiniycuilocat ipan tiopamit, pampa cati inintacayo quinequi, quiniyocatalis ten itequi Toteco huan sempa quinequise monamictise. ¹² Huan quej nopa Toteco quintatzacuultis pampa amo quichijque cati quitajtolcajqque para quichihuase quema moijcuilojque ipan tiopa. ¹³ Nojquiya huelis nopa sihuame cati icnotziti cati amo más quiپیay xihuit pehuase calnemise huan pehuase motatzcanequise. Nojquiya huelis teelnamiquise, huan tatzintocatinemise cati amo monequi. Huan quej nopa camanaltise cati amo quinamiqui quijitose. ¹⁴ Huajca nijnequi sihuame icnotziti cati amo más quiپیay xihuit ma sempa monamictica huan ma quiپیaca más inincone-hua. Nijnequi cuali ma quimocuitahuica ininchaj. Amo teno ma quichihuaca cati ica tocualancaitaca huelis quintatelhuis. ¹⁵ Pampa sequij sihuame icnotziti ya quicajtejtoque Toteco huan quitoquilíaj Amocualtatcat.

¹⁶ Nojquiya sinta se sihuat o se tacat cati quineltoca Toteco quinpiya sihuame icnotziti cati quinita quej iteixmatcahua, monequi quinpalehuis huan amo quincahuas para nopa tiopamit ten taneltocani ma quinpalehuica. Quej nopa, taneltocani huelise quinpalehuise san nopa sihuame icnotziti cati nelía amo aqui quiپیay.

¹⁷ Monequi nochi toicnihua ma quintepanitaca nopa huehue taneltocani cati tayacanaj ipan tiopamit sinta tequitij cuali. Huan monequi ma quintaxtahuica cuali. Pero achi más ma quintepanitaca huan ma quintaxtahuica nopa tayacanani cati ica nochi ininchicahuicis tepohuilíaj huan tamachtíaj Icamanal Toteco, ¹⁸ pampa Icamanal Toteco quijitohua: “Amo xijcamailpi nopa toro cati ipan moquejquetza trigo para quiyolquixtis.” Huan nojquiya quijitohua: “Quema se tacat tequiti, monequi quiselis itaxtahuil.”

¹⁹ Amo xijtacaquili se masehuali cati quitatelhuía se huehue tacat cati quinyacana taneltocani. Pero sinta ome o eyi quitatelhuíaj, huajca quena, xiquintacaquili. ²⁰ Huan sinta se huehue tacat quisenhuicuilía tajtacolchihua, xijtatelhuica inixpa nochi taneltocani para sequinoc quimacasis tajtacolchihuase. ²¹ Timoteo, nimitznahuatía iixpa Toteco Dios, huan iixpa Jesucristo, huan inixpa illhuicac ecahua cati quintapejpenijtoque para

iniacahua, xijchihua ni tamanti cati nimitzilhuijtoc iniixpa nochi taneltocani huan amo xiquinchicoicneli huehue taneltocani cati mohuampoyohua. ²² Amo xijtali momax ipan se tacat nimantzi para tijtequimacas quej se huehue taneltocaquet cati tayacanas. Pampa sinta tijtalis momax ipan itzonteco para tijtequitalis se tacat huan teipa tajtacolchihuas, huajca motajtacol nojquiya pampa amo tijpixqui tamocuitahuili achtohui ajquiya tijtequitali. Huajca ximotachili para tijchihuas cati nelía cuali huan amo titajtacolchihuas.

²³ Nojquiya nimitzyolmelahuas ten moijti huan nopa cocolisti cati tijpiya talojtitzti. Ayecmo xiqui san at, nojquiya xiqui quentzi xocomeca at para timochicahuas.

²⁴ Huan ica tacame cati tiquintapejpenía, xiquelnamiqui para itztoque sequij tacame cati tanemijya nesi inintajtacolhua huan nochi quimatij Toteco quintajtolsencahuas. Pero itztoque sequinoc tacame cati amo nesi inintajtacolhua hasta miyac tonali teipa huan huajca quena, nochi quimatise.

²⁵ San se ica se cuali tequit cati quichihuaaj masehualme. Sequij tamanti tequit nimantzi nesi para cati quichijqui quisencajqui se cuali tequit huan nochi quimatij. Pero itztoque sequinoc masehualme cati quichihuaaj se cuali tequit huan amo nesi nimantzi, pero teipa quena, nesis inintequi cati cuali pampa amo hueli huejcahuas motatijtóc. Huajca xijpiya tamocuitahuili para tijtachilis ajquiya injuanti tiquintalis para tayacanase.

6

¹ Toicnihua cati itztoque tatequipanohuani cati inintecohua quincojtoque para iniacxa monequi quintepanitase inintecohua ipan taltipacti para amo aqui huelis quitaijilhuis Toteco huan itamachtli. ² Huan sinta toicnihua cati tatequipanohuani quipiyaj ininteco cati nojquiya quineltocaj Toteco, ma amo quicahuaca quintepanitaj. Monequi achi más cuali ma quintequipanoca pampa ininteco nojquiya eli iniicni ipan Jesucristo. Huan inintequi cati cuali cati nopa tatequipanohuani quichihuaaj quipalehuis se taneltocaquet cati Toteco quiicnelía. Huajca Timoteo, xiquinmachtijtjinemi huan xiquincamanalhujtjinemi ten ni tamachtli.

Quenicatza paquise taneltocani

³ Sinta itztoc se masehuali cati tamachtía seyoc tamanti cati amo quej ni cuali tamachtili ten Tohueyiteco Jesucristo, huajca amo xitahuac icamanal, pampa ni tamachtili techpalehuía ma tijpiyaca tonemilis más quej Toteco. ⁴ Huan se cati tamachtía seyoc tamanti san mohueyimati huan amo teno quimati. San quipactía tanajnanguilis huan tecamajixnamiquis ica cati quinequi quijtos sesen pilcamanaltzitti cati masehualme quijtohuaj. Quej nopa masehualme pehuaj mochicoitaj, huan moyocaquixtiaj, huan quintaijilhúaj sequinoc, huan moilhúaj ne sequinoc tajtacolchijtoque. ⁵ Ni tamachtiani nochipa quichihuaaj para ma onca tatehuilisti ica inihuihui camanal cati huala ipan inintalnamiqulis cati nempolijtóc. Amo quijtohuaj cati melahuac. Mochihuaaj quej quitoquilíaj Toteco icamanal, pero san quinequij quitanise miyac tomi. Huajca xiquincajtehua nopa tamachtiani.

⁶ Pero sinta tojuanti nelía tijtoquilíaj Toteco icamanal huan tipaquij ica cati tijpiyaj, tijtantage miyac. Quena, tiitztoque quej tominpiyani. ⁷ Pampa amo teno tijhualicaque ipan ni taltipacti quema titacatque huan temachtí amo teno tijhuicase quema timiquise. ⁸ Huajca sinta tijpiyaj ten tijcuase huan ten timoquentise, ma tipaquica, ⁹ pampa masehualme cati tahuel quinequij miyac tomi, nimantzi huetzise, pampa tajtacoli quinyoltilanas.

Eltoc quej se taquetzti cati quinmasiltía. Huan injuanti pehuase quineq-
uise más tamantzitzi cati quinchihuas cati fiero para injuanti. Huan ya
nopa quinhuicas ipan se ojti cati quinempolos ininemis huan teipa hasta
polihuise. ¹⁰ Miyac tamanti tajtacoli pehua quema se masehuali quicnelía
tomi huan mojmosta quinequi quipiyas más. Sequij cati nelía quinequiyayaj
tomi ya quicajteoque quineltocaj Toteco huan yeca quipantijtoque miyac
tacuajcualoli.

Xieli quej se cuali soldado

¹¹ Pero ta Timoteo, ta tise tacat cati tiixca Toteco. Huajca xijtalcahui
nochi cati amo cuali quej ya nimitzilhui. Huan xijtoquili cati xitahuac.
Mojmosta xiitzo más quej Toteco. Más xijneltoca ya huan más xiquinicneli
mohuampoyohua. Mojmosta xijsentoquili motequi huan xijpiya moyolo ica
nochi masehualme. ¹² Ximoneltali para titatehuis ica cati amo cuali quej
quichihua se cuali soldado. Quena, tiitzoque ipan se tatehuilisti para ma
mocahua senquisa xitahuac totaneltoquilis huan para más masehualme ma
quicaquica huan ma quineltocaca. Ximoaxcati nopa nemilisti para nochipa
cati Toteco mitzmacatoc. Tiquijto iniixpa miyac masehualme quenicatza
tijneltoaca Jesús; huajca amo quema xijcahua. ¹³ Timoteo, nimitznahuatía
iixpa Totata cati quinmaca nemilisti nochi tamanti cati itztoque huan iixpa
Cristo Jesús cati quihui Poncio Pilato cati melahuac quema itztoya iixpa,
¹⁴ xiquinchihua nochi ni tanahuatilme cati nimitzilhuijtoc ica moyolo sen-
quisa tapajpactic para amo aqui huelis mitzelhuis pampa tijpatatoc nopa
tamachtli. Huan quej nopa xijchijtiya hasta monextis Jesucristo quema
sempa hualas. ¹⁵ Pampa quema ajsis nopa tonali cati cuali, Toteco Dios
quihuis Tohueyteco Jesucristo ma sempa huala ten ilhuicac. Pampa Toteco
Dios quinahuatía nochi cati onca huan yaya cati quinamiqui tijhueyitalise.
Yaya nopa Tanahuatijquet cati quinnahuatía nochi tanahuatiani ipan taltipacti
huan yaya ininTeco nochi tecomete. ¹⁶ San yaya quipiya nemilisti para
nochipa ipan ya. Yaya itztoc ipan nopa taahuili cati tahuel cahuani hasta
amo aqui huelis monechcahuis. Amo aqui se masehuali cati quiiitzoque Toteco
Totata huan amo aqui hueli quiiita. Ma tijnextilica nochi tatepanitacayot
pampa yaya quipiya nochi tanahuatili huan quipiyas para nochipa. Quej
nopa ma eli.

¹⁷ Xiquinilhui taneltocani cati quipiyaj miyac tomi nica ipan ni taltipacti,
ma amo mohueyimatica huan ma amo motemachica ipan inintomi pampa
nimantzi huelis quipolose nochi. Xiquinilhui ma motemachica ipan Toteco
cati itztoc huan techmaca nochi cati onca para ma tipactoca huan techmaca
hasta mocahua. ¹⁸ Xiquinilhui cati tominpiyaj amo san ma quipiyaca miyac
tomi, pero nojquiya ma quichihuaca miyac tamanti cati cuali. Ma amo
mochihuaca itzcuime, pero ica paquilisti ma quintemoca masehualme cati
amo quipiyaj tomi para quinpalehuise. ¹⁹ Quej ni quema noja itztoque nica
quitantiyase miyac tatancayot cati Toteco quiajoctiyas nepa ilhuicac huan se
tonali quinmacas. Quej nopa quipantise nopa nemilisti cati nelnelía cuali.

Cati monequi quichihuas Timoteo

²⁰ Ta Timoteo, xijmocuitahui nopa tamachtli cati Toteco mitzmacac
pampa motemachi ipan ta. Xiquincajtehua nopa tacame cati monajn-
quiliaj huan camanaltij ten cati amo cuali huan cati amo ipati. Quena,
xiquincahuan nopa tamachtiani cati quijtohua quimatij nochi, pero amo
neli, pampa huhiuitoque. ²¹ Sequij masehualme quitoquillijque ininta-
machtli huan quicajtoque cati quineltocayaj. Timoteo, Toteco ma quipiya
hueyi iyolo ica ta. Quej nopa ma eli.

Nopa Ompa Amatajcuiloli cati Pablo Quitajcuilhui Timoteo

Pablo quitajpalo Timoteo

¹ Na niPablo, niitayolmelajca Jesucristo nimitztajcuilhuía ni amatajcuiloli. Toteco Dios ica ipaquilis nechtequitali quej niitayolmelajca. Nechtequimacac ma niquinilhui masehualme ten nopa nemilisti cati quitencahuilijtoc quinmacas nochi cati tatzquitoque ipan Cristo Jesús. ² Noicni Timoteo, nimitzicnelía quej tinocone. Toteco Dios huan Toteco Jesucristo ma quiipiya hueyi iyolo ica ta. Ma mitzasojta huan ma mitzmaca tasehuilisti ipan moyolo.

Amo xipinahua xiteyolmelahua ten Jesucristo

³ Nochipa nimitzelnamiqui huan nijtascamati Toteco tayohua huan tonaya pampa tijneltoacatoc. Yaya cati nijtequipanohua ica noyolo tapapactic iixpa quej nohuejcapan tatahua nojquiya quichijque. ⁴ Nijnequi sempa nimitzitas pampa niquelnamiqui quenicitza tichocac quema timonahuatijteque huan nipaquis miyac quema sempa timoitase. ⁵ Nijmati ta tijneltoaca Toteco ica nochi moyolo quej achtohui quichijqui mohueyi nana, Loida, huan teipa monana, Eunice.

⁶ Huajca nimitzelnamiquiltía xijtequihui huan xijmaca tetili nopa yajatili cati Toteco mitzmamac quema nijtali nomax ipan motzonteco. ⁷ Pampa nopa tonaltzi cati Toteco techmacatoc amo techchihua ma timajmahuica. Yaya techmaca chichahualisti. Techchihua ma tiquinicnelica masehualme huan ma tijpiyaca cuali totalnamiquilis. ⁸ Huajca amo quema xipinahua xiquinyolmelahua masehualme ten Jesucristo huan xiquinilhui na nitzacatoc pampa nijneltoaca. Huan ica ichichahualis Toteco monequi xiquijyohui nochi cati monequi tiquijyohuis pampa titeilhuía icamanal. ⁹ Pampa yaya Toteco techmaquixti ten totajtacolhua huan technotzqui para ma tiitztoaca titatzejteloltique iixpa. Amo techmaquixti ten totajtacolhua pampa tijchijtoyaj cati cuali. Toteco techmaquixti san pampa quipixqui hueyi iyolo ica tojuanti huan quinejqui ya nopa quichihuas. Toteco quijto quema ayemo quichihuayaya taltipacti para teipa quipiyasquia hueyi iyolo ica tojuanti por cati Jesucristo techchihuulisquia. ¹⁰ Pero ama technextilijtoc nochi cati quisencajqui quichihuas pampa Totemaquixtijca Jesucristo hualajqui huan quitamilti ichichahualis miqulisti para ayecmo teno huelis techchihuilis. Huan yaya technextilijtoc para tiitztose para nochipa ihuaya ya sinta tijneltoase icamanal.

¹¹ Huan Toteco nechtequitalijtoc niitacamanalhujca huan niitayolmelajca huan niitamachtijca para ma niquinilhui masehualme cati amo israelitame ni cuali camanali. ¹² Yeca nitaijyohuía nica ipan tatzacti. Pero amo nipinahua, pampa niquixmati yaya cati nijneltoaca huan nijmati temachti para yaya quiipiya chichahualisti para quimocuitahuis cati nijcajtoc imaco hasta ajsis nopa tonali cati ya quitalijtoc.

¹³ Timoteo, quema tiquinilhua masehualme ni cuali camanali cati nimitzilhuijtoc, amo xijpata yon se quentzi. Xitenextili quenicitza tijneltoaca Toteco huan tiquinicnelía masehualme pampa tiitztoc ipan Jesucristo. ¹⁴ Ica itapalehuil Itonal Toteco cati itztoc ipan toyolo, xijmocuitahui nopa cuali camanali cati Toteco quicajtoc momaco, huan amo aqui xijcahuili ma quipata.

¹⁵ Huelis ya tijmati para nechcajtejque nochi taneltocani cati ajsicoj nica ten tali Asia, hasta nojquiya nechcajtejque Figelo huan Hermógenes. ¹⁶ San Onesiforo, amo. Toteco ma quitasoja ica nochi ihuicalhua pampa miyac huela yaya hualajqui para nechylchicahuas, huan amo pinajqui pampa niitztoya nica niilpitoc ica tepos cadena. ¹⁷ Huan quema Onesiforo itztoya ipan altepet Roma, amo moquetzqui nechtemojtinenqui hasta nechpanti. ¹⁸ Ma Toteco quitasoja ipan nopa tonali quema techtequitachilis. Ta cuali tijmati quenicatza techpalehui nojquiya nepa ipan altepet Éfeso.

2

Se cuali soldado ten Jesucristo

¹ Nocone Timoteo, tijmati para nelía hueyi iyolo Toteco ica ta ipan Cristo Jesús huan mitzmacatoc miyac yajatili. ² Nopa tamachtili cati tijcajqui nitamachti iniixpa miyac masehualme, ama xiquinmachi sequinoc cati temachme para teipa inijuanti nojquiya huelise quinmachtise sequinoc.

³ Nojquiya xiquijyohui taijyohuilisti nohuaya quej se cuali soldado ten Jesucristo. ⁴ Xijchihua quej se tacat cati mosoldadojchihua. Yaya amo hueli moyolilhúa quenicatza quipactis iteco cati quisoldadojchijqui. ⁵ Huan xijchihua quej se motalojquet cati motalohua ica sequinoc para quuitase ajquiya tatanis. Monequi motalos senquisa xitahuac quej quijtohua tanahuatili, pampa sinta amo, huajca amo huelis tatanis huan quiselis nopa xochitzonyahuali. ⁶ Eltoc san se quej se milchijquet. Yaya achtohui monequi tequitis chicahuac para huelis teipa quicuas cati quipixcas. ⁷ Huajca ximoyolilhui miyac ica cati nimitzilhuajtoc nica huan Toteco mitzpalehuis tijmachilis nochi.

⁸ Xiquelnamiqui Jesucristo quema titaijyohuía. Yaya cati tacatqui quej iteipan ixhui Tanahuatijquet David ten huejcajquiya huan yaya cati sempa moyolcuca quema mictoya. Ya ni nopa cuali camanali cati nitepohuilía, ⁹ huan yeca niquijyohuía miyac taohuijcyot huan niilpitoc ica tepos cadena quej se nitaixpanoquet cati temajmati. Pero masque na niilpitoc ica tepos cadena, Toteco icamanal amo ilpitoc. ¹⁰ Huan niquijyohuía nochi cati huala pampa niquinicnelía inijuanti cati Toteco quintapejpenijtoc nojquiya para iaxcahua. Nijnequi inijuanti ma momaquixtica ipan Cristo Jesús para huelis itztose para nochipa nepa campá tatanexti.

¹¹ Ya ni se camanali cati melahuac: Sinta timijque quema Cristo mijqui, nojquiya tiitztose ihuaya.

¹² Sinta tiquijyohuáj taohuijcyot pampa tiquixmatij, se tonali titanahuatise ihuaya.

Sinta tiquijtohuaj amo tijchihuase cati Cristo techilhúa, huajca yaya quijtos amo techmacas nopa tatancajot.

¹³ Sinta tojuanti amo tiitztoque titemachme, yaya itztoc temachti pampa amo hueli quijtos para amo moixmati iselti huan yaya itztoc ipan toyolo.

Xijchihua itequi Cristo ica nochi mochicahuais

¹⁴ Xiquelnamiquilti taneltocani ten ni tamanti. Xiquinilhui iixpa Toteco ma amo tananjanquilia ten taya quijtosnegi sesen camanali, pampa amo teno ipati huan san quitamisosolos ininemilis cati quitacaquilise.

¹⁵ Xitequiti chicahuac, huan quej nopa, quema ajsis nopa tonal quema timonextis iixpa Toteco, yaya hueli quijtos para tijchijqui cati quipactia.

Xiitzto se cuali tequipanojquet cati amo quipiyas yon se tamanti cati ica mopinahuas. Xiitzto quej se tequipanojquet cati cuali quimati quenicatza quitequihuis huan quixtomas Icamanal cati melahuac. ¹⁶ Xiquintalcahui masehualme cati tamachtíaj cati amo quinamiqui huan cati amo ipati, pampa ica inincamanal quinyacanañ masehualme ma quichihuaca más tamanti cati amo quipactía Toteco. ¹⁷ Inintamachtíl cati amo melahuac tamahua quej se cocolisti cati tamahua. Quej nopa itamachtíl Himeneo huan Fileto. ¹⁸ Inijuanti chicoquistoque ten nopa camanali cati melahuac. Ama tamachtíaj para ya moyolcuitoque nochi masehualme cati mictoque cati moyolcuise. Yeca sequij cati taneltocayayaj ayecmo quimatij taya quinelto-case. ¹⁹ Pero ipan ichaj Toteco quitallitoc se tatzinpehualtili cati temachtí huan nopa ijcuilijtoc ya ni: “Toteco quinixmati inijuanti cati nelía iaxcahua”; huan nojquiya quijtohua: “Nochi masehualme cati motemachijtoque ipan Tohueyiteco Jesucristo ma ayecmo quichihuaca cati amo cuali.”

²⁰ Ipan se hueyi cali cati iaxca se tacat cati tapijpixtoc onca miyac tamanti cati inijuanti quitequihuáj. Onca sequij tamanti cati amo patiyó quej huajcali huan soqui chachapali, huan nojquiya onca sequij cati patiyó cati quichijtoque ica oro huan ica plata. Nopa cati iaxca nopa cali quitequihuá huajcali huan tamanti ten soquit ipan se tequit cati quejhueltsi. Huan quitequihuá tamanti cati patiyó quema monequi cati yejectzi para masehualme quitepanitase. ²¹ Huajca sinta se tanelto-caquet mohuejcatalis ten inijuanti cati tamachtíaj cati amo cuali, yaya elis quej se tamanti cati nelía ipati ipan ichaj Toteco. Huan Toteco quiyocatalis para quitequihuis ipan cati huéli tequit cati cuali. Huan nochi masehualme cati quitase, quitepanitase Toteco.

²² Huajca xicholotehua quema mitzyoltilana se tamanti para xijchihua quej telpocame ten ni taltipacti quinpactía quichihuase. Xijtoquilli cati xitahuac. Xijneltoca Toteco ica nochi moyolo, xiquinicneli masehualme huan cuali ximohuica ica nopa taneltocani cati motemachíaj ipan Toteco ica iniyolo cuali iixpa. ²³ Xiquintalcahui tacame cati camanaltij huihui camanali pampa teipa san pehuaj mocamaijixnamiquij. ²⁴ Se cati itequipanojca Tohueyiteco ma amo quitemo para mocamaijixnamiquis ica sequinóc. Monequi ma quinchihuili nochi masehualme cati cuali. Monequi tamachtis cuali para masehualme ma quimachilica itamachtíl huan monequi ma quipiya iyolo ica nochi. ²⁵ Se itequipanojca Tohueyiteco monequi quinmachtis ica cuali camanali nopa masehualme cati quicualancaitaj. Huelis Toteco quinpatilis iniyolo para huélis moyolpatase huan quimatise cati melahuac. ²⁶ Huan quej nopa, cholose ten campa quintaquechilijtoc Amocualtat, pampa yaya quinmasiltijtoc para ma quichihuaca cati yaya queinequi.

3

Ipan itamiya tonali masehualme quichihuase más cati amo cuali

¹ Nojquiya monequi tijmatis ya ni. Quema hualas itamiya tonali elis nelía mahuilili. ² Masehualme san moicnelise iniselti huan tahuel quixtocase tomi. Tahuel motepanitase huan mohueyimatise. Quitaijilhuse Toteco huan amo quitepanitase ininanhua huan inintatahua. Amo motascamatise por cati quiselijtoque huan amo teno quitase para tatzetzeltoc. ³ Amo teicnelise. Amo tetasojtase. San teejlnamiquise, ayecmo huélise monahuatise huan yeca quichihuase san cati queinequise. Tetaijyohuiltise ica paquilisti, huan quicualancaitase nochi tamanti cati cuali. ⁴ Quena, ipan tayacapan tonali masehualme quincajcayahuase hasta inihuampoyohua

huan tahuel mosisinise huan quichihuase ten hueli tamanti. Moilhuse neltalnamiqij, pero amo neli. Quitemose san nopa tamanti cati ica hueli mopaquilismacase, pero amo quitemose Toteco. ⁵Sequij ten ni masehualme mochihuase quej elisquía quixmatij Toteco, pero amo. Ica cati quichihuase quinxetise para amo teno quinequij ten ichichualis.

Xiquintalcahui masehualme cati quej ni quichihuaj. ⁶Tacame quej injuanti quincajcayahuaj sihuame cati huihuitique para huelis calaquise ipan ininchaj para tamachtise cati amo melahuac. Huan quinmasiltiaj nopa sihuame para ma quitoquilica inintamachtil. Nopa sihuame ya quipiyaj miyac inintajtacolhua huan tahuel quinequij quichihuase san cati quinpactía. ⁷Nopa sihuame nochipa quinequij momachtise nochi tamachtilisti cati yancuic, pero amo quema hueli quimachilíaj cati melahuac. ⁸Nopa tamachtiani quinequij quitzacuilise nopa camanali cati melahuac quej Janes huan Jambres, itenahualhuijcahua Faraón huejcajqiya quinequiyayaj quitzacuilise nopa tiochichualnescayot cati Moisés quichihuayaya. Ya nenpolijtoc inintalnamiqulis nopa tamachtiani. San tacajcayahuaj quema quijtohuaj quineltoaj Toteco, pampa amo cana. ⁹Pero ayecmo huejca yase, pampa teipa nochi quinitase para huihuitique quej panoc ica Janes huan Jambres huejcajqiya.

Pablo quiilhui Timoteo más cati monejqui quimatis

¹⁰ Pero ta, Timoteo, tijtoquilijtoc cati nitamachtía huan cati na nijchihua. Tijmati cati nijnequij nijchihuas ipan nonemilis huan quenicatza nijneltoca Toteco. Tiquiztoc quenicatza niqijyohujtoc nochi cati nechpanotihualajtoc. Tijmati niteicnelía huan nijpiya noyolo ica sequinoc. ¹¹Tijmati quenicatza nechtaijyohuiltijque miyac huan quenicatza nimoyoltetili. Tijmati quenicatza nechtamicojque ipan altepet Antioquía, Iconio huan Listra, pero sese huela Toteco nechmanahui. ¹²Huan nochi taneltocani cati nelía quinequij monejnemiltise quej Cristo Jesús quinequi, quipanose taijyohuilisti ica masehualme. ¹³Pero amo cuajcualme huan nopa tacajcayajca tamachtiani noja más quichihuase cati fiero. Quisenhuiquilise tacajcayahuase más pampa Amocualtat quisenhuiquilis quincajcayahuas.

¹⁴ Pero ta, Timoteo, xijtoquilijtinemi cati timomachtijtoc huan cati tijmati para melahuac pampa tiquinixmati ajquiya injuanti mitzmachtijtoque. ¹⁵Pampa ta hasta quema ticonetzi ipa tiquixmatiyaya nopa Tajcuiloli cati tatzejtelolitic. Huajca amo xijcahua. Huan Icamanal Toteco mitzalnamiqijtoc huan mitznextilijtoc quenicatza huelqui timomaquixti ten motajtacolhua pampa tijneltocac Cristo Jesús. ¹⁶Toteco temacac nochi nopa Tatzejtelolitic Tajcuiloli, huan quiipiya itequi para techmachtis cati melahuac huan techtacahualtía quema tijchihuaj cati amo monequi. Huan Icamanal techalnamiqitía huan technextilía quenicatza timonejnemiltise xitahuac. ¹⁷Quena, Toteco techmacatoc Icamanal para techcualtalís nochi tojuanti cati tiixcahua para huelis tijchihuase nochi cati cuali.

4

Xitepohuili Icamanal Toteco

¹ Timoteo, nimitznahuatía iixpa Toteco Totata huan iixpa Toteco Jesu-cristo cati se tonali quintajtolsencahuas nochi masehualme cati yoltoque huan cati mictoque quema sempa hualas ipan taltipacti para tanahuatis, ²xitepohuili icamanal Toteco. Xiquinilhui masehualme icamanal nochipa masque ohui tijchihuas o amo ohui. Xiquinxitahua cati amo quimatij

taya monequi quichihuase huan xiquintacahualti cati ica ininpaquilis taj-tacolchihua. Xiquinolchicahua ma quichihuaca cati cuali huan nochipa xiquinmachtis ica camanali cati cuali. ³ Pampa ajsis se tonali quema masehualme ayecmo quinequise quitacaquilise nopa tamachtili cati xitahuac. Quinequise quitacaquilise san cati inijuanti quinpactia. Huan quintemose tamachtiani cati quinmachtise cati inijuanti quinequij. ⁴ Huan ayecmo quitacaquilise cati melahuac, san quitoquilise camanali cati quiyoliltitjtoque masehualme. ⁵ Pero ta, Timoteo, nochipa xijpiya cuali motalnamiquilis. Ximoyoltetili quema titaijyohuía. Xiquinilhui masehualme icamanal Toteco huan xiquinnotza ma quitoquilica. Xijtamichihua mojmosta nochi nopa tequit cati Toteco mitzmacatoc.

⁶ Pero ica na, ya nijtoyajtoc nonemilis para Toteco quej se tacajcahualisti cati atic, huan ya monechcahuijtihuala nopa tonali quema nimiquis. ⁷ Na nitatehuijtoc chichahuac quej se cuali soldado monequi quichihuas. Na ya nijtamiltitjtoc nochi notequi quej se motalojquet cati motalojtoc hasta campa ontami. Huan nimochijtoc temachtis ipan nopa tamachtili cati Toteco nechnextili ma nijnelto. ⁸ Huajca ama nechchiya ica se corona cati nijtantoc pampa nijchijqui cati xitahuac. Huan Tohueyiteco, nopa tequitiquet cati xitahuac, nechmacas nopa corona quema techtequitachilis nochi titaneltocani. Huan amo san na nijselis se corona, nojquiya quiselise nochi taneltocani cati tahuel quichixtoque ma huala.

Xihuala techpaxaloqui

⁹ Xijchihua campeca para nimantzi tihualas techpaxaloqui, ¹⁰ pampa Demas ya nechtahuelcajqui. Yaya yajqui altepet Tesalónica pampa tahuel quicnelia tamanti ten ni taltpacti. Crescente yajqui tali Galacia para quichihuas itequi Toteco, huan Tito yajqui tali Dalmacia. ¹¹ San toicni Lucas itztoc nohuaya. Xijtemo Marcos huan xijhualica pampa yaya nechpalehuis miyac ipan ni tequit. ¹² Nojquiya amo aqui Tíquico pampa nijtitanqui altepet Éfeso. ¹³ Quema tihualas, techhualiquili notaque cati nijcajtejqui ipan ichaj Carpo ipan altepet Troas. Nojquiya techhualiquili nopa amatapohuali, pero achi más nijnequi techhualiquili nopa amat cati ipan nitajcuilohuayaya.

¹⁴ Alejandro nopa teposchijquet nechchiuilijtoc miyac tamanti cati amo cuali. Toteco ma quicuepili quej quinamiqui ica cati quichijtoc. ¹⁵ Ximomocuitahui ica ya pampa nelia quinequi quitamiltis cati titamachtiaj.

¹⁶ Quema achtohui monejqui nimonextis iniixpa nopa tequichihuani, amo aqui hualajqui para nechtempalehuis. Nochi nechtahuelcajque. Ma amo quintatzacuilti Toteco por cati quichijque. ¹⁷ Pero Toteco, quena, yaya itztoya nohuaya huan nechmacac chichahualisti para cuali ma nitepohuili icamanal huan quicajque miyac masehualme cati amo israelitame. Huan Toteco nechmanahui quema tacame quinequiyayaj nechmictise. ¹⁸ Huan nijmati Toteco nechmaquixtis ten nochi cati amo cuali huan nechhuicas nopa ilhuicac campa yaya tanahuatia. Ma tijhueyichihuaca para nochipa. Quej nopa ma eli.

Pablo tanqui tajcuilohua

¹⁹ Xiquintajpalo Prisca huan Aquila. Huan xiquintajpalo nochi cati itztoque ipan ichaj Onesiforo. ²⁰ Mocajqui Erasto ipan altepet Corinto. Nojquiya nijcajtejqui Trófilo ipan altepet Mileto pampa moccohua. ²¹ Ximoisihuiti para huclis tiajsiqui nica quema ayemo taseseya. Mitzontajpalohuaj Eubulo, Pudente, Lino, Claudia huan nochi toicnihua ipan Cristo nica.

²²Tohueyiteco Jesucristo ma itzto ica motonal, Timoteo. Huan ma quiapiya hueyi iyolo ica nochi amojuanti nopona. Quej nopa ma eli.

Nopa Amatajcuiloli cati Pablo Quitajcuilhui Tito

Pablo quitajcuilhui Tito

¹ Noicni Tito, na niPablo niitequipanojca Toteco huan niitayolmelajca Jesucristo. Inijuanti nechtitantoque para ma niquinnotza masehualme cati Toteco huejcajquiya quintapejpeni ma quineltoaca. Quinequi ma niquinmacti para ma quimatica cati melahuac, pampa ya nopa quinnextilis quenicatza quiپیase ininemilis cati cuali quej quipactia Toteco. ² Ni tamachtili quinmacas temachili para ma quimatica ya quiپیay nopa nemilisti yancuic para nochipa cati Toteco, yaya cati amo hueli istacati, techtencahuili techmacas quema ayemo oncayaya taltipacti. ³ Huan ama quema ajsic tonali, Toteco tenextilia ni camanali ten ni nemilisti yancuic huan quichihua ica tojuanti cati campa hueli titepohuilijaj. Quena, Toteco Totemaquixtijca nechnahuati ma nijchihua ni tequit huan quicajqui nomaco. ⁴ Huajca na niPablo nimitztajcuilhuia ta tiTito ipan ni amatapohuali. Nelia tiitztoc quej tinocone pampa nimitzpalehui xijneltoca Toteco quej na nijchihua. Toteco Totata huan Tohueyiteco Jesucristo yaya cati Totemaquixtijca ma quiپیya hueyi iyolo ica ta huan ma mitztasojta huan ma mitzmaca tasehuilisti ipan moyolo.

Itequi Tito nepa Creta

⁵ Noicni Tito, nimitzcajtejqui ipan nopa piltaltzi Creta cati quiyahualojtoc hueyi at para tijtamisencahuas cati polihuiyaya ipan totequi nozona. Nimitzilhui xiquintali huehue tacame para tayacanase campa mosentilijaj taneltocani ipan sese altepet. ⁶ Nimitznahuati xiquintequitali huehue tacame cati nochi quijtohuaj quichihua cati cuali huan cati quiپیay setzi inisihua. Xiquintequitali tacame cati quinpiyaj coneme cati quineltoacaj Toteco huan cati tatepanitaj. Quena, xiquintequitali tacame cati amo aqui huelis quintelhuis ica cati amo monequi. ⁷ Pampa se tayacanquet campa taneltocani, yaya itequipanojca Toteco huan monequi elis se tacat cati amo aqui huelis quitelhuis. Amo xiquintali tacame cati mohueyimatij. Amo xiquintali cati yolquentzitzti, yon cati moihuintijaj. Amo xiquintali tacame cati mosisinijaj o cati tahuel quinequi tomi cati amo iniaxca. ⁸ Pero monequi xiquintali tacame cati quinpackia quinselijaj paxalohuani ipan ininchaj huan cati quicnelijaj nochi cati cuali. Xiquintali tacame cati quiپیay cuali inintalnamiqulilis huan cati quichihua cati xitahuac. Xiquintali tacame cati tatzetzelollique huan cati cuali monahuatijaj. ⁹ Xiquintali tacame cati motatzquilijtoque ipan nopa tamachtili cati melahuac cati nitamachtijtoc. Huan quej nopa, nopa tacame cuali huelis quinyolchicahuase sequinoc ica nopa cuali tamachtili ten Toteco. Nojquiya huelis quinnanquilise cati quijtohuaj para amo xitahuac totamachtil.

¹⁰ Xiquintequitali tacame cati quej nopa cuajcualme pampa itztoque miyac tananjanquilijca masehualme cati camanaltij quej cati huihuitique huan san tacajcayahua. Quej nopa quichihua miyac israelita tacame cati quijtohuaj quineltoacaj Toteco, pero moilhuaj monequi masehualme motequilise nopa machiyot circuncision para momaquixtise ten inintajtacolhua. ¹¹ Huajca nopa tayacanani ten taneltocani monequi quincamatzacuase nopa

tacajcayajca israelita tamachtiani pampa quincajcayajtoque nochi ipan sequij calme para ma ayecmo quineltocaca Toteco.

¹² Eltoc quej quiijuico se tacat cati ehuayaya nepa Creta campa tiitztoc, yaya quiiito: “Creta ehuan nochipa istacatij. Itztoque quej tecuanime cati mosisinja. Tahuel tatzihuij huan san quinequij sentacujtose.” Quej ni quiiito nopa tacat, ¹³ huan melahuac icamanal. Huajca, xiquinajhua chichahuac nopa taneltocani nepa tali Creta para injuanti ayecmo quichihuase quej sequinoc ipan inintal. Ma quineltocaca Toteco ica nochi iniyolo. ¹⁴ Ma ayecmo quintacaquilica inincamanal israelitame cati san tamachtiaj tatem-pohualisti huan tanahuatilme cati masehualme huejcajquiya quichijque. Nopa tacame ya quicajteytoque cati melahuac.

¹⁵ Masehualme cati yoltapajpactique quiiitaj tapajpactic nochi cati onca. Pero injuanti cati amo quineltocaj Toteco huan amo tapajpactic iniyolo, quiiita se tamanti huan quiiitohuaj amo tapajpactic pampa hasta inintal-namiquilis huan iniyolo nojquiya amo tapajpactic. ¹⁶ Quiiitohuaj quixmatij Toteco, pero ica cati quichihuaj, quinextiaj para amo quixmatij. Quichihuaj tamanti cati Toteco amo quinequi quiiitas. Amo tatepanitaj huan amo huelij quichihuaj yon se tamanti cati cuali.

2

Nopa cuali tamachtili

¹ Pero ta, Tito, xicamanalti san cati quinamiqui ica nopa cuali tamachtili. ² Xiquinilhui nopa huehue tacame ma monahuatica cuali, para quej nopa sequinoc quintepanitase. Ma quipiyaca cuali inintalnamiquilis. Xiquinilhui nopa tacame para chichahuac ma quineltocaca Toteco. Ma quinicnelica sequinoc miyac huan ma quipiyaca iniyolo ica nochi. ³ San se xiquinilhui nopa tename. Xiquinilhui ma monejnemiltica quej quipactia Toteco. Ma amo teejelnamictinematica. Ma amo ihuintica. Huan ma quinmactica sequinoc para nojquiya ma quichihuaca cati cuali. ⁴ Sihuame cati ya quipiyaj miyac xihuit ma quinmactica sihuame cati ayemo quipiyaj más xihuit para ma quinicnelica inihuehuejhua huan ininconeuhua. ⁵ Ma quinnextilica quenicatza quipiyase cuali inintalnamiquilis. Ma quinmactica para ma moyolilhuica cati nelia cuali. Cuali ma quimocuitahuica ininchajchaj. Ma tepalehuica. Ma quincahuilise inihuehuejhua para ma quinyacanaca para amo aqui huelis quitaijilhuis icamanal Toteco ica cati quichihuaj nopa sihua taneltocani.

⁶ Nojquiya, Tito, xiquinmacti nopa telpoca tacame para ma quipiya cuali inintalnamiquilis. ⁷ Xiquinmaca se cuali ejemplo ica nochi nopa cuali tamanti cati tijchihua ta. Ipan nochi cati titamactia, xijnexti para tijchihua cati xitahuac huan para cuali motalnamiquilis. ⁸ Huan quema titamactia, ximomocuitahui para mocamanal elis temacti para amo aqui huelis mitzejelnamiquis ica cati tiquijtohua. Huan quej nopa pinahuase cati techcalancaitaj pampa amo quipantise cati amo cuali para quiijtose ten tojuanti.

⁹ Xiquinilhui nopa taneltocani cati tetequipanohuaj ma quintepanitaca inintecohua ipan nochi tamanti. Ma quichihuaca nochi cati quinpactia inintecohua huan ma amo quincamajixnamiquica. ¹⁰ Xiquinilhui nopa tetequipanohuani amo teno ma quichtequica, pero ma quinnextilica inintecohua para nelia temachme. Huan quej nopa injuanti nojquiya quinequise quineltocase nopa camanali ten Toteco, yaya cati Totemaquixtijca, pampa quiiitase nochi cati cuali cati inintequipanocahua quichihuaj.

¹¹ Pampa Toteco technextilijtoc para hueyi iyolo ica nochi masehualme huan hueli quitajtacolquixtis cati hueli masehuali. ¹² Huan pampa Toteco quiپییا hueyi iyolo ica tojuanti, technextilía para monequi ma tijcajtēhuaca nochi cati amo quipactía huan nochi cati masehualme ten ni taltipacti tahuel quinequij. Yaya quinequi ma timonahuatica cuali ama ipan ni tonali. Ma tijchihuaca nochi cati xitahuac, huan ma tiitzotca más quej yaya. ¹³ Huan mojmosta ma titachixtoca para nopa tonali quema sempa hualas Jesucristo. Quena, nelía yejectzi elis quema monextis Tohueyiteco Jesucristo, Totemaquixtija, huan tiqitase ica nochi ihueyitilis huan itatanex. ¹⁴ Jesucristo motemacac ipan cuamapeli huan mijqui por tojuanti huan taxtajqui cati monequi para techtojtomas ten nochi cati amo cuali. Huan Toteco techyolpajpajqui para techchihuas tiimasehualhua cati tahuel tinequij tijchihuase nochi tamanti cati cuali. ¹⁵ Huajca Tito, xiquinilhuijtinemi masehualme ma quitoquilica nochi ni tamanti, huan xiquinolchicahua ma quichihuaca. Xiquintacahualti campa monequi ica miyac tequiticayot para nochi quitacaquilise mocamanal.

3

Cati monequi ma quichihuaca taneltocani

¹ Xiquinelnamiquilti nochi taneltocani nepa ma quintacaquilica tequichihuani huan tanahuatiani ipan inintal. Ma moisihuiltica para quichihuase nochi cuali tequit cati tequichihuani quinilhuíaj ma quichihuaca.

² Taneltocani ma amo quintajilhuica sequinoc. Ma amo tecamajixnamiquica, pero ma itztoca ica cuali ica nochi masehualme huan ma quinnojtzaca ica cuali.

³ Pampa nojquiya tojuanti cati ama titaneltocani, achtohuiya tihuhuitixtoyaj huan amo titaneltocayayaj, huan timocuapolojtoyaj. Achtohuiya technahuatiyaya cati totacayo quinequiyaya, huan tijchihuayayaj san cati techpactiyaya. Mojmosta tijchihuayayaj cati fiero huan tiquixtocayayaj cati sequinoc quiپییayayaj. Quena, titecualancaitayayaj quej nojquiya techcualancaitayayaj. ⁴ Pero teipa Toteco Totemaquixtija technextili quenicatza yaya quintasojta huan quinicnelía nochi masehualme, ⁵ huan yeca techmaquixti ten totajtacolhua. Amo techmaquixti pampa tijchijtoyaj cati cuali huan cati xitahuac, pero techmaquixti pampa techtasojtac. Quena, techyolpajpajqui huan techchijqui sempa ma titacatica, huan ica Itonal Toteco techmacac nemilisti cati yancuic. ⁶ Huan Toteco techmacatoc Itonal ica nochi ichicahualis por cati Jesucristo, Totemaquixtija, quichijqui. ⁷ Huan Toteco techchijtoc tixitahuaque iixpa pampa hueyi iyolo ica tojuanti. Huan ama tijchiyaj timoaxcatise nopa nemilisti yancuic cati amo quema tamis cati yaya techcahuilijtejtoc pampa tiiconehua.

⁸ Nelía melahuac nochi cati nimitzyolmelajqui, huajca nijnequi ximotetili huan xiquinilhui taneltocani para ma momocuitahuica para quichijtiyase miyac tamanti cati cuali. Nelía cuali ni tamachtili huan quinpalehuía nochi masehualme. ⁹ Pero amo ximonajnanquilica ica camanali cati amo ipati. Amo ximonajnanquilica ten tohuejcapan tatahua cati mijque huejcajquiya. Amo ximocamajixnamiquica, yon amo ximotehuica ica cati quiijtosnequij itanahuatilhua Moisés, pampa amo teno quinpalehuía cati quej nopa quichihuaj.

¹⁰ Sinta se tacat tamachtía se tamanti cati amechtajcoxelohua, huajca xijyolmelahua hasta ome huelta ma ayecmo quichihua. Pero sinta ica ompa amo mitztacaquilía, huajca xiquiyocacahua huan amo teno xijpiya ihuaya.

¹¹ Pampa tijmatij se tacat cati quej nopa amo mitztacaquilis, ya momajtoc tajtacolchijtinemi. Huan yaya no quimati para ica cati quichihua quiselis se hueyi tatzacuilti.

Cati Pablo quiilhui Tito ma quichihua

¹² Tito, nimitztitanilis Artemas o Tíquico huan quema se ten inijuanti ajsis nepa, xijchihua campeca para tiyas nimantzi ipan altepet Nicópolis para timopantise nepa. Nijnequi nimocahuati nepa quema taseseyas. ¹³ Xijchihua nochi cati tihueli para taneltocani nopona ma quipalehuica Apolos huan nopa tatepalehuijquet Zenas ica nochi cati monequi ipan iniojhui para amo teno quinpulos. ¹⁴ Toicnihua nopona monequi quimatise quichihuase nochi tamanti cati cuali, huan quinpalhuise sequinoc cati quinpolohua ten ica panose. Quej nopa, toicnihua amo itztose quej cuame cati amo temacaj inintajca.

Pablo quinahuatijtejqui Tito

¹⁵ Tito, nochi cati itztoque nica nohuaya mitzontajpalohuaj. Nojquiya xiquintajpalo nochi nopona cati quineltocaj Toteco huan techicnelíaj. Toteco ma quiapiya hueyi iyolo ica amajuanti. Quej nopa ma eli.

Nopa Amatajcuiloli cati Pablo Quitajcuilhui Filemón

Pablo quitajcuilhui Filemón

¹ Na niPablo cati niitztoc ipan tatzacti pampa nicamanaltiyaya nopa cuali camanali ten Jesucristo. Na niitztoc nica ihuaya noicni Timoteo. Nimitztajcuilhuía ni amatajcuiloli ta, tinoicni Filemón cati nimitzicnelía huan cati titequiti nohuaya ipan itequi Toteco. ² Nojquiya niquintajcuilhuía tosihua icni Apia cati nochi quiicnelíaj, huan Arquipo cati nojquiya se isoldado Toteco cati tequiti tohuaya para titepohuilise icamanal Toteco. Nojquiya tiquintajcuilhuíaj nochi nopa tiopamit ten taneltocani cati mosentilíaj ipan mochaj. ³ Toteco Dios Totata huan Toteco Jesucristo ma quipiyaca hueyi niyolo ica amojuanti huan ma amehmacaca tasehuilisti.

Filemón quineltocac Toteco

⁴ Filemón, nochipa nijtascamati Toteco por ta quema nimotatajtía, ⁵ pampa quejpa nijcaqui para chichahuac tijneltoca Tohueyiteco Jesucristo huan miyac tiquinicnelía nochi cati yaya quiniyocajtoc para iaxcahua. ⁶ Huan nijtajtania Toteco para huelis tiquinilhuis miyac masehualme quenecatza tijneltocatoc Jesucristo para inijuanti nojquiya huelise quineltocase. Quej nopa ta huan inijuanti huelise anquimachilise nochi nopa tatiachihuali cati tijpiyaj ipan Jesucristo. ⁷ Tinoicni Filemón, tijpiyaj hueyi paquilisti ica quenecatza titeicnelía. Huan miyac huelta techyolchicajtoc quej nojquiya tiqinyolchicajtoc nochi cati Toteco quiniyocatalijtoc para elise itatzejteloltica masehualhua.

Pablo quitajtani se favor para Onésimo, se tequipanojqet cati iaxca Filemón

⁸ Huajca nimitztajtania se favor. Masque nihuelisquía nimitznahuatisquía ica itequiticayo Cristo para xijchihua cati quinamiqui, amo nimitznahuatis. ⁹ Pero pampa nimitzicnelía, san nimitztajtania ni favor, na niPablo cati nijpiya miyac xihuit huan cati nitzactoc pampa nijtoquilía Cristo Jesús. ¹⁰ Nimitztajtania por Onésimo cati niquita quej nocone pampa niquilhui icamanal Toteco nica campa nitzactoc huan yaya quineltocac.

¹¹ Nijmati Onésimo amo más mitzpalehuiyaya quema ayemo cholo-huayaya momaco, pero sinta sempa tijselis quej motequipanojca, ama yaya mitzpalehuis miyac quej nojquiya nechpalehuía. ¹² Huajca nimitztitanilía Onésimo huan nijmachilía quej nimitztitanilía noyolo pampa nelía niquicnelía. ¹³ Nijnequisquía ma mocahua nohuaya quej se cati techtitanilisquía ta para nechtequipanos nica campa nitzactoc pampa nitepohuilía nopa cuali camanali ten Jesucristo. ¹⁴ Pero pampa amo tijmatiyaya sinta itztoya nohuaya, amo nijnequi ma mocahua huan ica tetili nimitzquixtilis se mocual tequipanojca. Nijnequi ica mopaquilis xijchihua cati tiquita cuali para tijchihuas. ¹⁵ Huelis timoilhuis para Onésimo mitzcajtejqei para se talojtzi para teipa huelis mocahuas mohuaya para nochipa. ¹⁶ Huan ama yaya ayecmo san se tequipanojqet cati tijcojtoc. Ama yaya toicni ipan Jesucristo cati niquicnelía huan cati nijmati tiquicnelis nojquiya quema sempa itztos mohuaya para mitztequipanos.

¹⁷ Huajca sinta techixmati quej nimoicni cati tequiti mohuaya ipan itequi Jesucristo, xijseli Onésimo quej techselisquía. ¹⁸ Huan sinta yaya

mitzichtequilijtoc se tenijqui o sinta mitztahuiquilía se tenijqui, xijтали ipan na nocuenta. ¹⁹ Na niPablo nimitztajcuilhuía ni camanali ica nomax: Nimitztaxtahuis. Pero amo nimitzilhuis quesqui techtahuiquilía pampa nimitzpalehui xijneltoca Jesucristo. ²⁰ Quena noicni, xijchihua ni favor huan sempa xijseli. Ya nopa techpalehuis na huan techyolchicahuas ipan Tohueyiteco.

²¹ Yeca nimitztajcuilhuilía ni amat pampa cuali nijmati tijchihuas cati nimitzilhuía. Quena, nelía nijmati para tijchihuas senquistoc nochi cati nimitztajtanía. ²² Nojquiya techchihuili se favor huan techsencahuili campa nicochis. Nijmati tijtajtanía Toteco para ma nechquixtica ipan ni tatzacti. Huan nijchiya para quej nopa elis para huelis niyas nimechpaxaloti.

Sequinoc tacame quitajpalojque Filemón

²³ Mitzontajpalohua Epafra cati nohuaya itztoc ipan tatzacti pampa camanaltiyaya ten Jesucristo. ²⁴ Nojquiya mitzontajpalohua Marcos, Aristarco, Demas huan Lucas cati nojquiya tequitij nohuaya ipan itequi Toteco.

²⁵ Toteco Jesucristo ma quiypiya hueyi iyolo ica amotonal. Quej nopa ma eli.

Nopa Amatajcuiloli para nopa Hebreo Taneltocani

Toteco technojnotztoc ica Icone, Jesucristo

¹ Huejcajquiya Toteco Dios quinnojnotzqui tohuejcapan tatahua miyac huelta ica itajtolpanextijcahua. Quemantica quinnojnotzqui itajtolpanextijcahua ipan temicti, quemantica ica tanextili huan quemantica itztoya nechca injuanti quema quincamanalhuyaya. ² Pero ama ipan ni itamiya tonali Toteco technojnotztoc ica Icone cati yaya techtitanili. Toteco Dios quitequimacac Icone ma quichijchihua nochi tamanti cati onca huan quijtojtoc para nochi cati onca eltoc iaxca. ³ Itatanex Toteco Dios cahuani ipan Icone pampa Icone itztoc san se ica ya. Quena, Jesucristo itztoc quej iixcopinca cati technextilia quenicatza itztoc Toteco Dios. Huan ica icamanal, Icone Toteco quichihua para nochi tamanti cati onca ipan taltipacti huan ilhuicacti ma mocahuaca motatzquiliytoque, pampa icamanal tahuel quipiya chichahualisti. Yaya mijqui para techpajpacas ten totajtocolhua huan teipa yajqui ilhuicac huan mosehuito inejmat Toteco Dios campa más onca tatepanitacayot.

Icone Toteco itztoc más hueyi que nochi ilhuicac ehuani

⁴ Ya ni technextilia para Icone Toteco itztoc más hueyi que nochi ilhuicac ehuani, pampa Toteco quimacac Icone se itoca* cati nelpano más hueyi que nopa cati iilhuicac ejcahua quipiyaj. ⁵ Toteco Dios amo quema quiihujitoc se iilhuicac ejca cati quiihui Icone quema quiiyto: “Ta tiNocone. Ama nitayolmelahua miyacapa para na nimoTata.” Huan amo quema quiiyto ten se iilhuicac ejca: “Na nielis iTata huan yaya elis Nocone.”

⁶ Huan ijcuilijtoc sejoyoc nopa cati Toteco Dios quiiytos quema quiihnextis ipan taltipacti Icone cati quipiya hueyi tatepanitacayot, huan ya ni cati quiiytos Toteco Dios:

“Ma quihueyichihuaca nochi noilhuicac ejcahua.”

⁷ Ijcuilijtoc ipan Icamanal Toteco taya inintequi iilhuicac ejcahua, huan ya ni cati quiiytohua:

“Toteco Dios quinchijqui iilhuicac ejcahua ma itztoca tonaltziti.

Quena, quinqeiquihua quej tayolmelahuani cati itztoque quej tilelemecti.”

⁸ Pero quema Toteco Dios quicamanalhui Icone, ijcuilijtoc para ya ni cati quiiyto:

“Ta tiDios, titanahuatis para nochipa huan amo quema tamis motanahuatilis.

Titatajtolsencahuas senquisa xitahuac huan temacti.

⁹ Mitzpactia nochi cati cuali huan tijcualancaita nochi cati amo cuali.

Yeca Toteco Dios, yaya cati moTeco,

mitztequitajitoc tiitanahuatijca huan mitzmacatoc más paquilisti que nochi sequinoc.”

¹⁰ Nojquiya Toteco Dios quiihui Icone:

“NoTeco, ipan ipejya nochi cati onca, ta tijchijchijqui itatzinpehualtil taltipacti.

Ta tijchijchijqui nochi ilhuicacti ica momax.

* 1:4 1:4 O se itequiticayo.

11 Nochi injuanti tamise, pero ta, tiitztos para nochipa.

Taltipacti huan ilhuicacti sosolihuisse quej sosolihui se yoyomit.

12 Tiquinnimilos quej elisquía se taquemit cati sosoltic huan ya ajsic hora para tantiyas.

Pero ta, noTeco, tielis san se para nochipa.

Amo quema tihuehuejtiyas, yon amo quema tamis monemilis.”

13 Huan Toteco Dios amo quema quihlhui se iilhuicac ejca quej quihlhui Icone ipan ni camanali:

“Ximosehui nica nonejmat campa onca más tatepanitacayot, hasta nijchihuas para tiquinnahuatis nochi mocualancaitacahua.”

14 Iilhuicac ejcagua Toteco itztoque san tonaltziti cati tetequipanohuaj. Quena, Toteco quintitantinemi para quinpalehuisse huan quinmocuitahuisse nochi masehualme cati Toteco quintapejpenijtoc para quinmaquixtis ten inintajacolhua.

2

Ma tijtacaquilica Toteco para timomaquixtise

1 Yeca pampa Icone Toteco itztoc más hueyi que nochi ilhuicac ehuani, monequí achi más tijtacaquilise nochi nopa tamachtili cati tijcactoque ten ya para amo quema tichicoquisase ten iojhui. ² Tijmatij nochi nopa tanahuatilme cati Toteco temacac ica iilhuicac ejcagua huejcajquiya quipixqui chichualisti. Huan cati amo quineltoaque huan amo quintepanitaque nopa tanahuatilme, quiselijque se tatzacuiliti quej quinamiquiyaya.

³ Huajca sinta quintatzacuiliti cati amo quitapanitaque cati quijtojqque iilhuicac ejcagua, noja más hueyi Toteco techtatzacuilitis tojuanti sinta amo tijchihuilíaj cuenta nopa hueyi tamanti cati techchihuilijtoc Icone quema techmaquixti ten totajacolhua. Pampa elqui yaya Tohueyiteco Jesús cati achtohui techilhuico para techmaquixtis ten totajacolhua, huan teipa nojquiya techilhuicoj nopa tacame cati quicajque icamanal Icone. Quena, injuanti no hualajque huan technextilijque para temachti techmaquixtis.

⁴ Huan nojquiya Toteco technextiliyaya para temachti inincamanal nopa tacame, pampa quema Itonal Toteco quinequiyaya, quinmacayaya nopa tacame yajatili ma quichihuaca tanextili, tiochichualnescayot huan miyac tamanti cati ica masehualme san quintachilijque.

Jesús Yaya Totemaquixtijca

⁵ Huan Toteco amo quinquimacatoc iilhuicac ejcagua para tanahuatise ipan nopa taltipacti cati teipa oncas cati ica ticamanaltij. ⁶ Pero masehualme tanahuatise nopona pampa ijcuilijtoc ipan Icamanal campa se masehuali quihlhuía Toteco:

“Toteco, ¿para ten techchihuilía cuenta tojuanti timasehualme?

¿Para ten timocuatotónia por tojuanti?

⁷ Para se talojtzi tijhijqui para timasehualme ma amo tiitztocha nel tihuejhueyi quej moilhuicac ehuani.

Pero teipa technextilis miyac tatepanitacayot huan techhueyitalis timasehualme.

Huan techmacas tequiticayot ica nochi cati tijhijtoc.

⁸ Quena, tijtali tomaco timasehualme para ma tijnahuatica nochi.”

Huan quema quijtohua quitali “nochi tamanti” tomaco quinequi quijtos amo onca yon se tamanti cati masehualme amo quinahuatise. Amantzi ayemo tiquitaj sinta masehualme quinahuatíaj nochi pampa noja polihui para mochihuas. ⁹ Pero tojuanti tiquitaj Jesús, yaya cati para se talojtzi

Toteco quichijqui ma eli tatzinta nopa ilhuicac ehuan para huelqui mijqui por nochi timasehualme pampa hueyi iyolo ica tojuanti. Huan ama pampa Jesús mijqui por tojuanti, Toteco Dios quihueyitalijtoc huan quinextilijtoc miyac tatepanitacayot.

¹⁰ Nochi cati onca, eltoc pampa quej nopa ipaquilis Toteco. Huan yaya quichijchijqui nochi cati onca. Huan ica cati Jesús taijyohui, Toteco quichijqui para yaya ma eli nopa tayacanquet cati senquisa quinamiqui para quinmaquixtis nochi masehualme cati mochihuase iconehua. ¹¹ Huajca ama Jesús huan nochi tojuanti cati techtatzetzelolchijtoc tijpiyaj san se totata, yaya, toTata Dios. Yeca Jesucristo amo pinahua para techilhuis tiiicnihua. ¹² Ipan Icamanal Toteco ijcuilijtoc campa Jesús quilhui iTata:

“Niquincamanalhuis noicnihua ten ta, huan ipan tasentilisti timitzpaquilismacase san sejco ica huicat.”

¹³ Huan nojquiya quijtohua:

“Na nimotemachis ipan Toteco Dios ihuaya noicnihua.”

Huan nojquiya Jesús quijto:

“Nica niitoc inihuaya iconehua Toteco cati yaya nechmacatoc.”

¹⁴ Huan pampa tojuanti cati Jesús technotzqui “tiiconehua” san timasehualme cati tijpiyaj toomiyo huan tonacayo, Jesús nojquiya tacatqui quej se masehual cati quipiya inacayo huan iomiyo. Huan pampa mochijqui se masehual, huelqui mijqui huan quitamilti ichicahualis nopa Amocualtacat cati quipixqui tanahuatili para ma onca miquilisti ipan taltipacti. ¹⁵ Quena, Jesús hualajqui quej se masehual para nochi masehualme cati mojmosta quiimacasiyayaj miquise, ma ayecmo majmahuica. Eltoc quej quintojtonqui masehualme campa ilpitoque para ma elica majcajtoque. ¹⁶ Tojuanti tijmatij Jesús amo hualajqui para quinpalehuis ilhuicac ehuan. Yaya hualajqui para techpalehuis nochi timasehualme cati tijneltoaj Toteco quej Abraham quineltocac. ¹⁷ Yeca monequiyaya para Jesús mochihuasquía quej tojuanti tiiicnihua para huelis mochihuas se tohueyi totajtzi cati tetasoja huan temacht techtenpalehuía iixpa Toteco. Huan quena, Jesús mocuetqui masehual para huelis motemactilis ica Toteco Dios por tojuanti quej nopa tacajcahualisti cati nelnelía techquixtilis totajtacolhua nochi timasehualme.

¹⁸ Huan pampa Jesucristo taijyohui huan Amocualtacat quiyoltlanqui ma tajtacolchihua, ama Jesús quipiya chichahualisti para techpalehuis quema titaijyohuaj huan quema Amocualtacat techyoltlan ma titajtacolchihuaca.

3

Jesús más hueyi que Moisés

¹ Noicnihua, amojuanti cati anitatzetzeloltica masehualhua Toteco huan cati amechtapejpenijtoc para anyase ilhuicac, ximoyolilhuica ten Jesús, yaya itayolmelajca Toteco huan tohueyi totajtzi tojuanti ipan totaneltoquilis.

² Jesús elqui temacht iixpa Toteco cati quitequimacac quej totajtzi. Quena, san se elqui temacht quej Moisés elqui temacht ipan nochi nopa tamanti tequit cati Toteco quimacac ma quichihua ipan ichaj Toteco huejcajquiya.

³ Pero Jesús itztoc más hueyi que Moisés, yeca quinamiqui para más tijtepanitase ya. Nochipa más tijtepanitaj se calchijquet huan amo nopa cali cati yaya quisencajqui. ⁴ Nochi calme quipiay ajquiya quinchijchijtoc, pero Toteco Dios, yaya quichijchijtoc nochi cati onca ipan taltipacti.

⁵ Huan Moisés elqui temacht para quichihuas nochi cati Toteco quilhui ipan nochi itequi ipan ichaj Toteco cati quiquetzqui huejcajquiya, pero yaya san elqui se tequipojquet. Huan nochi cati quichijqui ipan nopa cali

ten Toteco tenextili cati Toteco quichihuasquía teipa. ⁶ Pero Cristo, amo se tequipanójquet, yaya Icone Toteco huan yaya quipiya tanahuatili ica nochí ichaj Toteco. Huan tojuanti cati titaneltocani tuitztoque ipan ichaj Toteco sinta tijsenhuiquilíaj timoneltalíaj huan ica paquilisti timochiyaj ipan Toteco.

⁷ Huan ijcuilijtoc ipan Icamanal Toteco campa Itonal techilhuía:
 “Ama quema anquicaquij icamanal Toteco, xijtacaquilica.

⁸ Amo ximoyoltetilica quej huejcajqüiya moyoltetilijque nopa israelitame cati eliyayaj amohuejcapan tatahua.
 Pampa huejcajqüiya nopa campa huactoc tali injuanti quieyeyecojque Toteco para quiitase taya quichihuasquía.”

⁹ (Huan Toteco quijito:)

“Masque nijchihuayaya tiochicahualnescayot iniixpa amohuejcapan tatahua para cuarenta xihuit, injuanti quejpa nechyejyecohuayayaj huan mochiyayayaj quiitase taya más nijchihuasquía para nechneltoease.

¹⁰ Yeca nelía nicualanqui inihuaya nopa masehualme, pampa niqütac para ni masehualme nochipa yolchicoquisaj. Amo quiixmajtoque nopa cuali ojti cati na nijnequi ma quitoquilica.

¹¹ Huajca nicualanqui inihuaya huan nimotestigojquetzqui para amo quema calaquisse campa onca nopa tasiyajquetzalisti cati nitemaca.”

¹² Huajca noicnihua, ximomocuitahuica para amo anquiyase se amoyolo cati amo cuali cati ayecmo quinequis taneltocas. Amo xijpiyaca se amoyolo cati quinequi amechchicoquixtis ten Toteco cati nelía yoltoc. ¹³ Más cuali, ama quema noja onca tonalí, ximoyolchicahuaca se ica seyoc para más anquineltoease Toteco. Ma amo aqui moyoltetili ica Toteco pampa quicajcayajtoc tajtacoli. ¹⁴ Pampa sinta timochihuase titemachme hasta itamiya huan tijsenhuiquilise timotemachise ipan Toteco quej quema achtohuiya tijneltoaque Cristo, huajca temachti tijselise ihuaya Cristo nochí cati quinamiqui para elis toaxca. ¹⁵ Huan ijcuilijtoc ipan Icamanal Toteco campa quijitohua:

“Ama xijtacaquilica cati Toteco quijitohua.

Amo ximoyoltetilica ica ya quej nopa israelitame quichijque huejcajqüiya quema amo quitepanitaque.”

¹⁶ Huan ¿ajquiya injuanti eliyayaj nopa masehualme cati amo quitepanitaque masque quicajque cati yaya quinilhui ma quichihuaca? Elque nopa israelitame cati Moisés quinquixti ipan tali Egipto. ¹⁷ Huan san se injuanti elque cati nojqüiya tajtacolchijque huan quicualancamacaque Toteco para cuarenta xihuit, huan yeca quincahuili ma miquica nopa ipan huactoc tali huan para nopona ma quintalpachoca. ¹⁸ Huan Toteco quinilhui nopa israelitame cati amo quineltoaque para melahuac amo calaquisquíaj ipan nopa tali tatencahuali para ipan mosiyajquetzase. ¹⁹ Huajca tiqütaj para injuanti amo huelque calajque campa mosiyajquetzasquíaj pampa amo quineltoaque Toteco.

4

Imasehualhua Toteco mosiyajquetzase

¹ Huan ama ipan ni tonalí Toteco noja technotza ma ticalaquica ipan itasiyajquetzalis. Huajca ma timomocuitahuica para amo tiqüyocacahuase yon se camanali cati Toteco techtencahuilijtoc para quenicatza hueli timosiyajquetzase ipan ya. ² Pampa Toteco nojqüiya techilhujtoc tojuanti

nopa cuali camanali para huelis timosiyajquetzase san se quej huejcajquiya quinilhui nopa israelitame. Pero nopa cuali camanali cati Toteco quinilhui huejcajquiya amo quinpalehui, pampa amo quineltoaque. ³ Pampa san tojuanti cati nelía tijneltoaj Toteco huelis ticalaquire campa onca nopa tasiyajquetzalisti. Toteco Dios camanalti ten inijuanti cati amo quineltoaque huan quijito:

“Quema nicualanqui inihuaya,
nimotestigojquetzqui para amo calaquire campa onca nopa tasiyajquetzal-
isti cati nitemaca.”

Huajca inijuanti amo calajque campa Toteco quinequiyaya ma calaquica masque Toteco quitamilti itequi hasta quema quichijchijqui taltipacti huan quinchiyayaya para inijuanti ma mosiyajquetzaca ihuaya. ⁴ Pampa ijcuilij-
toc ipan Icamanal Toteco cati Toteco quichijqui ipan nopa chicompa tonali,
quijitohua:

“Toteco Dios mosiyajquetzqui ipan nopa chicompa tonali pampa ya quita-
miltijtoya nochi itequi.”

⁵ Pero sejcoyoc nojquiya techpohuilía ten nopa israelitame cati amo calajque
campa Toteco quinequiyaya, pampa Toteco Dios quijito:

“Amo calaquire campa nitemaca tasiyajquetzalisti.”

⁶ Huajca Toteco amo quincahuili nopa masehualme ma calaquica pampa
amo quineltoaque masque Toteco quinilhuijtoya icual camanal. Pero noja
polihui para sequij masehualme calaquire huan mosiyajquetzase ihuaya.

⁷ Yeca Toteco Dios quiixquetztoc seyoc tonali para ma calaquica campa
onca tasiyajquetzalisti, pampa Toteco quijito: “Ama ni tonal.” Huan teipa
quema ya panotoya miyac xihuit, David tayolmelajqui cati Toteco quijito
huejcajquiya, huan quijito:

“Ama ni tonali, sinta Toteco amechnotza para ximosiyajquetzaca ihuaya,
xijtacaquilica.

Amo ximoyoltelica, yon amo xjhtahuelcahuaca icamanal.”

⁸ Pero amo camanalti ten tali Canaán, pampa sinta Josué huelosquía quin-
macatosquía tohiejcapan tatahua tasiyajquetzalisti nopona, Toteco teipa
ayecmo quijitosquía para ama eltoc nopa tonali para masehualme ma
calaquica ipan itasiyajcuilil. ⁹ Huajca noja mocahua se tasiyajquetzalisti
para imasehualhua Toteco ipan ma calaquire. ¹⁰ Huan cati hueli cati calaqui
campa Toteco temaca tasiyajquetzalisti, mosiyajquetzas ten nochi itequi san
se quej Toteco mosiyajquetzqui quema quitamilti itequi para quichijchijqui
taltipacti.

¹¹ Huajca ma tijchihuaca campeca para ticalaquire campa timosiyajquet-
zase ihuaya Toteco. Ma amo timochihuaca quej nopa israelitame cati
huetzque pampa amo quitepanitaque Toteco huejcajquiya.

¹² Pampa Icamanal Toteco yoltoc huan quiptiya tahuel miyac chichualisti.
Más tatequi que se macheta cati oncac tatentili. Icamanal Toteco calaqui
hasta ipan tealma huan tetonal huan hasta campa más teyolijtic. Huan
quipanextía sinta cuali o amo cuali cati timoyolilhuiaj huan quipanextía cati
tijnequij tijchihuase. ¹³ Amo teno cati Toteco quichijtoc huelis motatis iixpa
para ma amo quita, pampa iixpa ya tanemijya nesi nochi cati tijchihuaj
huan cati timoyolilhuiaj. Huan se tonali monequi timoquetzase iixpa para
tijchihuase cuenta ihuaya ten nochi cati tijchijtoque.

¹⁴ Yeca tojuanti tijpiyaj se tohueyi totajtzi cati ya ajsito ipan ilhuicac, yaya Jesús, Icone Toteco. Huajca nochipa ma timotemachica ipan ya quej tiquijto-
jtoque miyacapa para tijchihuj. ¹⁵ Inon tohueyi totajtzi techtasojta quema
amo tijpiyaj tetili para tijchihuase cati xitahuac, pampa nochi tamanti
tajtacoli nojquiya quiyoltilancui Jesús quej tojuanti techyoltilana mojmosta,
pero yaya amo quema tajtacolchijqui. ¹⁶ Huajca ma timonechcahuica ica
temachili campa mosehujtoc Toteco cati nochi quinahuatía. Huan ma amo
timajmahuica tijtajanise itapalehuil, pampa temachti techtasojtas huan
techpalehuis ipan ten hueli talojtzi quema más monequi pampa hueyi iyolo
ica tojuanti.

5

¹ Nochi sequinoc huejhueyi israelita totajtzitzi elque tacame cati quin-
tapejpenique ten nochi masehualme. Huan quipixque tequiticayot para
moquetzase iixpa Toteco por nochi israelitime. Nojquiya quipixque ininte-
qui para quimacase Toteco tacajcahualisti huan inieso tapiyalme para qui-
ixtzacuulise inintajtacolhua nopa masehualme. ² Huan sesen ten nopa hueyi
totajtzi quipixqui hueyi iyolo ica nopa masehualme cati amo quimatque
taya cuali para quichihuase huan taya ica chicoquisasquiáj. Pampa nopa
totajtzitzi nojquiya itztoyaj san masehualme quej tojuanti, huan amo quip-
ixque miyac fuerza para quichihuase nochi cati cuali. ³ Yeca sese hueyi
totajtzi monequiyaya achtohui quimacas Toteco se tacajcahualisti para
quixtzacuulis ten ya itajtacolhua huan teipa quimacayaya Toteco se tacajc-
ahualisti para quixtzacuulis inintajtacolhua nochi masehualme.

⁴ Huan yon se hueyi totajtzi amo motapejpeni iselti para mochiuas
hueyi totajtzi huan quipiyas nopa tatepanitacayot, pero monejqui Toteco
Dios ma quitapejpeni sese ten inijuanti, san se quej Toteco quitapejpeni
Aarón huejcajquiya. ⁵ Yeca Cristo nojquiya amo motapejpeni ica iselti para
mochiuas tohueyi totajtzi. ¡Amo! Elqui Toteco Dios cati quitequitalli Cristo
quema quihlui:

“Ta tiNocone. Ama nitayolmelahua miyacapa para na nimoTata.”

⁶ Huan nojquiya ipan Icamanal, Toteco Dios quej ni quihlui Cristo:

“Ta tielis se totajtzi para nochipa ica san se nopa hueyi tequiticayot quej
Melquisedec quipixqui.”

⁷ Quema Cristo itztoya ipan ni taltipacti, yaya motatajti ica Toteco Dios.
Quitajtani Toteco cati quinequiyaya huan quicamanalhui ica nochi iyolo
hasta chocac. Pampa san Toteco quipiyayaya chicalhualisti para quimaquix-
tis ten nepa campa miqulisti. Huan Toteco Dios quitacaquili pampa Cristo
quitepanitayaya Toteco ica nochi iyolo. ⁸ Huan masque Cristo eliyaya Icone
Toteco, ica cati quihyohui, quitac para nelia miyac ipati para quitepanitas
casi Toteco quihlui ma quichihua. ⁹ Huan ica ya ni mochiqqui senquisa
nopa hueyi totajtzi cati Toteco Dios quinequiyaya. Huan mochiqqui nopa
Temaquixtijquet cati quinmaquixtia para nochipa nochi masehualme cati
quichihuj cati yaya quihyohua, ¹⁰ pampa Toteco Dios quitequimacac Cristo
para elis se hueyi totajtzi ica san se nopa hueyi tequiticayot cati quipixqui
Melquisedec huejcajquiya.

Mahuilili sinta ayecmo tijneltocase Toteco

¹¹ Onca más miyac ten ni tamanti cati nijnequisquia nimechilhuis,
pero ohui para nimechixtomilis pampa amo anquinequij anquicaquise.

¹² Quipiya miyac xihuit anquineltoaque Toteco huan quinamiqui ya
anelisquiáj antamachtiani, pero amo. Noja monequi para sequinoc ma

amechmachtica sempa nopa tamanti cati amo más ohui ipan Icamanal Toteco. Anitztoque quej coneme cati ya monequi tacuase, pero noja quinequij lechi. ¹³ Quena, nochi taneltocani cati san quinequij quicaquise cati amo más ohui ipan Icamanal Toteco itztoque quej pilconetzitzi cati amo moscaltijtoque ipan Toteco, huan amo hueli quimatij taya cuali huan taya amo cuali para quichihuase. ¹⁴ Pero tacualisti cati tetic eltoc para masehualme cati ya moscaltijtoque huan hueli quimachilíaj Icamanal Toteco cati más ohui. Ni masehualme quitequihuijtoque inintalnamiqulis para quixmatise cati cuali huan cati amo cuali para quichihuase.

6

¹ Huajca ma tijcahuaca taica nopa achtohui tamachtili ten Cristo cati ya anquicactoque. Ama nimechmachtis nopa tamachtili cati amechpalehuis anmoscaltise. Ayecmo monequi nimechilhuis sempa para amo aqui huelis momaquiixtis ten itajtacolhua pampa quichihua cati cuali, yon amo monequi nimechilhuis para monequi xijcahuaca amotajtacolhua huan xijneltocaca Toteco. ² Ayecmo monequi nimechilhuis nopa tamachtili ten tacuaaltili, yon taya quijtosnequi quema tayacanani ten taneltocani quitálíaj inimax ipan se taneltoacaque para quitequimacase. Ayecmo monequi nimechilhuis para moyolcuise nochi mijcatzitzí huan quenicatza Toteco tetajtolsencahuas huan tetatzacuultis para nochipa. Nochi ni tamanti ya anquimatij. ³ Huajca sinta Toteco quinequi, nimechmachtis sequinoc tamanti cati más monequi.

⁴ Pampa san tapic niquinmachtis masehualme cati quipixtoyaj taahuili ipan iniyolo huan teipa quicajteque. ¿Para ten sempa niquinmachtis cati ya quimachilijtoque cati cuali Toteco techmacas nepa ilhuicac huan cati ya quiselijtoque Itonal Toteco? ⁵ Sinta ya quimachilijtoque ipan iniyolo para cuali icamanal Toteco, huan quimatij para oncas miyac chichahualisti ipan nopa tali cati hualas teipa, ⁶ huan teipa chicoquisaj ten Toteco, amo huelis niquinyolchichahuas ma moyolcuepaca ica ya quema eltoc quej quicuamapelotíaj huan quipinahualtíaj Icone miyacapa. ⁷ Ni masehualme itztoque quej se mili cati quiselía miyac at quema huetzi at. Huan sinta cati quitoctoque ipan nopa mili temaca cuali itajca, huajca Toteco quitiochihuas. ⁸ Pero sinta nopa mili san temaca huitzti huan sahuamecat, huajca amo teno ipati. Nechcatitoc para Toteco quitelchihuas nopa mili. Huan temachtí quitatis cati temacatoc.

Camanali cati techpalehuía huan techyolchicahua

⁹ Pero amojuanti noicnihua cati nimechicnelía, masque nimechcamanalhuijtoc ten ni masehualme cati quicajtejoque Toteco, amo nijneltoca para amojuanti anquicajtejoque. Nimotemachía ipan Toteco para tamanti cati más cuali amechchiya amojuanti ipan nopa tonali, tamanti cati Toteco quinmacas masehualme cati quiselise tamaquixtilisti. ¹⁰ Toteco Dios nochipa quichihua cati xitahuac. Yaya amo quielcahuas nopa tequit cati anquichijtoque pampa anquicnelíaj. Amo quielcahuas quenicatza anquipalehuijque itatzejteloltica masehualhua huan hasta ama noja anquichihuaj. ¹¹ Pero nijnequi para sese ten amojuanti xiquicnelica Toteco hasta ajsis tonali para anmiquise. Quej nopa anquimatise ica temachili anquiselise nochi cati anmochiyaj para anquiselise. ¹² Amo tijnequij ximotatzcanequica. Tijnequij xiélica quej nopa taneltocani cati ica nochi iniyolo quineltocej nochi cati Toteco techilhuijtoc huan quipiyaj iniyolo para quichiyase hasta quiselise nochi cati Toteco techtencahuilijtoc para techmacas. Nelía Toteco techmacas nochi cati tijchiyaj

¹³ Nimechmacas se taquejquetzcayot. Quema Toteco quitencahuili Abraham cati quimacasquía, quinequiyaya Abraham ma quineltoca para temachti quiselisquía. Huan pampa amo aqui más hueyi que ya para quitestigojquetzas, Toteco Dios motestigojquetzqui iselti, ¹⁴ huan quihhui Abraham: “Temachti nimitziochihuas tahuel miyac. Nijchihuas para moteipan ixhuihua ma elica nelpano miyac millones hasta amo aqui huelis quinpohuas.” ¹⁵ Huan Abraham quipixqui iyolo huan quichixqui huan ajsic tonali quema Toteco quimacac Isaac quej quitencajtoya.

¹⁶ Quema masehualme quitencahuaj para quichihuase se tamanti, quites-tigojquetzaj se cati más hueyi que inijuanti para ma quinneltocaca para temachti inincamanal. Huan nochi quimatij quema se tatestigojquetza huajca ica ya nopa tami camanali huan monequi cati tatestigojquetzqui ma quichihua cati quijito. ¹⁷ Yeca Toteco Dios motestigojquetzqui pampa quinequiyaya quinnextilis nopa masehualme para temachti quiselisquaij nopa cati quitencahuayaya para quinmacas, huan para yaya amo quema moyolpatasquía ica cati moilhujitoya quichihuas.

¹⁸ Huajca Toteco techmacatoc ome tamanti cati amo hueli mopata, pampa Toteco amo hueli istacati. Achtohui techtencahuili cati techmacas huan teipa motestigojquetzqui para quichihuas cati quijitojtoc. Yeca ama nochi tojuanti cati timotalojoque campa ya para techmanahuis, huelis timoyol-talisse pampa tijmatij temachti yaya quichihuas nochi cati techtencahuili para quichihuas. ¹⁹ Huajca tijmatij temachti Toteco techmaquixtis quej tech-tencahuilijtoc quichihuas. Huan yeca eltoc quej tijpiyaj toalma cuáli ilpitoc hasta nepa ipan ilhuicac. ²⁰ Tohueyiteco Jesús ya calajqui ilhuicac para quitapos se ojti para tojuanti huelis ticalaquise nojquiya. Huan nozona yaya mochiqtoc nopa hueyi totajtzi cati nochipa itztos ica nopa hueyi tequiticayot cati quipixqui Melquisedec huejcajquiya.

7

Quihuicalotía totajtzi Jesús ica nopa totajtzi Melquisedec

¹ Huejcajquiya Melquisedec eliyaya tanahuatijquet ten altepet Salem huan eliyaya se totajtzi iixpa Toteco Cati Más Hueyi. Huan se tonali quema Abraham tacuepiliyaya ipan ichaj pampa quintantoya miyac tanahuatiani ipan tatehuilisti, Melquisedec quinamiquico huan quitiochijqui. ² Huan Abraham quimacac se diezmo ten nochi tamanti cati quitantoya ipan nopa tatehuilisti.

Nopa tocayot, Melquisedec, quijitosnequi “Tanahuatijquet Cati Xitahuac.” Huan nojquiya eliyaya tanahuatijquet ten Salem, huan Salem quijitosnequi “Tasehuilisti.” Huajca yaya se “Tanahuatijquet Ten Tasehuilisti.” ³ Amo cana ijcuilijtoc ajquiya itafa, o ajquiya inana, o ajquiya ihuejcapan tatahua Melquisedec. Amo cana techilhuía quema tacatqui o quema mijqui. Huajca tiquitaj para yaya itztoc quej Icone Toteco cati mochiqtoc se totajtzi para nochipa.

⁴ Xiquitaca quenicatza tijmatij para tahuel hueyi eliyaya Melquisedec. Achtohui Abraham, yaya cati elqui tohuejcapan tata nochi tuisraelitame, quitac para hueyi pampa quimacac Melquisedec se diezmo ten nochi cati quitantoya ipan tatehuilisti. ⁵ Miyac xihuit teipa itanahuatil Moisés quinmacac tequiticayot nopa iixhuihua Levi cati mochiqtoc totajtzi para quiselise diezmos ten israelitame masque inijuanti nojquiya itztoyaj inuicnihua huan iteipan ixhuihua Abraham. ⁶ Pero ni Melquisedec cati amo tijmatij ajquiya

itatahua amo eliyaya iixhui Leví, huan Abraham quimacac se diezmo ten nochi cati quipixqui.

Ica ompa, Melquisedec quitiochijqui Abraham, yaya cati Toteco ya quitencahuilijtoya taya quimacas. ⁷ Huan nochi masehualme quimatij para se cati tetiochihua quipiya más tequiticayot huan amo quej cati tatiochihuali.

⁸ Ica expa, nopa israelita totajtzitzi cati quiselijque nochi diezmos eliyayaj san tacame cati miquiyayaj huan teipa sequinoc quitzquijque inintequi. Pero ica Melquisedec amo tiquitaj sinta mijqui, pampa Icamanal Toteco camanalti ten ya quej noja itzto.

⁹ Huan ica najpa, tiquitaj más hueyi Melquisedec que israelita totajtzitzi cati teipa itztoyaj pampa eltoc quej inihuejcapan tata cati itoca eliyaya Leví, nojquiya itztoya nopona nopa tonal huan nojquiya quitaxthui Melquisedec quema Abraham quimacac idiezmo. ¹⁰ Pampa masque Leví ayemo tacatiyaya nopa tonali quema Melquisedec quinamijqui huan quiseli nopa diezmos, huelis tiquitose para Abraham quihuicayaya ipan itacayo nopa xinachtí ica cati teipa tacatisquía Leví, pampa Leví elqui se iteipan ixhui Abraham.

¹¹ Huan ama ica ya ni nijtamiltis. Nopa israelitame quiselijque itanahuatil Moisés cati quijto para totajtzitzi ma elica iteipan ixhuihua Leví. Pero sinta nochi cati nopa totajtzitzi quichijque huelosquía quinchijosquía masehualme xitahuaque iixpa Toteco, amo monectosquía para Toteco techtitanilijtosquía seyoc totajtzi, yaya Cristo, cati amo ininteipan ixhui Leví huan Aarón, pero quipiya tequiticayot quej Melquisedec quipixqui huejcajquiya.

¹² Huan ama pampa mopataque nopa totajtzitzi, Toteco nojquiya mon-ejqui quipatas nopa israelita tanahuatilde, ¹³ pampa tijmatij para Cristo amo huala ipan ihueyi familia Leví. Yaya huala ipan seyoc hueyi familia cati amo huelqui mochiuase totajtzitzi. ¹⁴ Quena, tanemijya nesi para Tohueyiteco Jesucristo huala ipan nopa hueyi familia cati mochijqui ica iteipan ixhuihua Judá. Huan Moisés amo cana quijcuilo sinta Judá o se iixhui huelis mochiuase totajtzi.

¹⁵ Huajca ama noja más tanemijya nesi para ya onca se yancuic tamanti totajtzi cati quipiya tequiticayot quej Melquisedec. ¹⁶ Quena, Cristo amo mochijqui totajtzi pampa hualayaya ipan ifamilia Leví cati itanahuatil Moisés quijtojqe ma elis totajtzi. ¡Amo! Cristo mochijqui totajtzi pampa quipiya chichahualisti para itzto para nochipa huan amo aquí huelis quitamiltis inemilis, ¹⁷ yeca ijcuilijtoc ipan Icamanal Toteco cati Toteco Dios quihui Cristo, huan quijto:

“Ta tielis se totajtzi para nochipa ica san se nopa hueyi tequiticayot quej Melquisedec quipixqui.”

¹⁸ Huajca Toteco quitamilti inintequi nopa tanahuatilde cati temacatoya achtohuiya pampa amo quipixqui chichahualisti, huan amo ipati eliyaya ¹⁹ para quinmaquixtis masehualme huan quinchihuas xitahuaque iixpa Toteco. Pero ama pejtoc seyoc camanali cati áchi cuali huan huelis tijnechahuisse Toteco pampa techchijtoc tixitahuaque iixpa.

²⁰ Quema Toteco quichijqui Jesucristo se totajtzi para nochipa, tatestigojqetzqui para ma tijmatise para temachtí, ²¹ pero quema quintequimacac nopa israelita totajtzitzi, amo aquí quitestigojqetzqui. San ica Jesucristo Toteco Dios quijto:

“Na nimoTeco Dios.

Nimotestigojqetza huan amo nimoyolcuepas:

‘Ta tielis se totajtzi para nochipa ica san se nopa hueyi tequiticayot quej Melquisedec quipixqui.’²²

²² Huajca tijmatij ica temachili para itequi Cristo quej totajtzi elis tahuel más cuali que nopa totajtzitzi cati achtohuiya, pampa itequi Cristo pejqui quema Toteco Dios tatestigjoquetzqui. ²³ Huan achtohuiya itztoyaj miyac totajtzitzi, pampa quema mijqui sese ten injuanti, monequiyaya seyoc ma quilitzqui itequi. ²⁴ Pero pampa Cristo itztos para nochipa, ayecmo monequis seyoc. ²⁵ Huan yeca Cristo hueli quinmaquixtis para nochipa nochi masehualme cati quinechcahuíaj Toteco por cati yaya quichijqui, pampa yaya itztos para nochipa huan talojtzitzi motatajtía ica Toteco Totata por injuanti.

²⁶ Jesucristo yaya senquisa nopa tamanti hueyi totajtzi cati monequiyaya para tojuanti. Yaya tatzejzeloltic huan amo quiptiya tajtacoli. Amo aqui huelqui quitelhuis ica yon se tamanti cati amo cuali. Huan ama yaya itztoz iyoca ten nochi titajtacolhijca masehualme, huan quitalijtoque campa más onca tatepanitacayot nepa ipan ilhuicac. ²⁷ Nopa israelita totajtzitzi mojmota quimacayayaj Toteco Dios tacajcahualisti. Achtohui quimacayayaj para inintajtacolhua injuanti, huan teipa quimacayayaj para inintajtacolhua nochi masehualme. Pero Cristo amo quej nopa quichijqui. Yaya sempatz motemactili huan mijqui quej se tacajcahualisti, yeca ayecmo monequi más tacajcahualisti. ²⁸ Huejcajquiya itanahuatil Moisés quinquemacac tacame para ma elica huejhueyi totajtzitzi masque tajtacolchihuani cati amo quipixque chichahualisti para quichihuase cati nelcuali. Pero masque ya eltoyaj itanahuatil Moisés, Toteco Dios motestigjoquetzqui huan quitequimacac Icone, Jesucristo cati senquisa cuali, para ma eli hueyi totajtzi para nochipa.

8

Jesús techcahuilijtejtoc se yancuic camanal sencahuali ica Toteco

¹ Ten nochi cati nimechilhuijtihualajtoc, ya ni cati más ipati: Tohueyi totajtzi Jesucristo ya mosehujtoc nepa ilhuicac inejmat Toteco Dios campa más onca tatepanitacayot. ² Nozona Jesucristo tequiti quej tohueyi totajtzi tiopan calijtic nepa ipan ilhuicac campa nelnelía eltoc Campa Más Tatzejzeloltic. Nopa tiopamit Toteco Dios iselti quichijqui. Amo tachijchihuali ica inimax masehualme.

³ Nochi huejhueyi totajtzitzi quipiyayayaj inintequi para quimacase Toteco Dios tacajcahualisti huan inieso tapiyalme. Huan Jesucristo nojquiya monequiyaya quimacas Toteco se tacajcahualisti. ⁴ Sinta Jesucristo itztosquía ipan taltipacti, amo elisquía se totajtzi, pampa nica ya itztoque totajtzitzi cati temacaj tacajcahualisti quej quijtohuaj itanahuatil Moisés. ⁵ Pero tijmatij nopa israelita totajtzitzi nica ipan ni taltipacti tequitij ipan se tiopamit cati san quixcopinaj nopa tiopamit cati nelnelía eltoc nepa ilhuicac, o huelis tiquijtose para san se ecahuilot ten nopa cati nelnelía. Pampa huejcajquiya quema Moisés quichihuayaya nopa tiopamit ten cuetaxti, Toteco quicamanalhui huan quihui: “Xijtachili cuali para tijchihuas senquisa quej nopa tiopamit nepa ilhuicac cati nimitznextili iixcopinca nepa ipan tepet Siná.” ⁶ Huan ama Cristo tohueyi totajtzi cati itztoz nepa ilhuicac nojquiya quipiya se tequit cati más cuali que injuanti cati tequipanohuaj ipan ni taltipacti, pampa yaya quisencajqui se camanal sencahuali ica Toteco Dios huan timasehualme cati achi más cuali. Huan nopa yancuic camanal sencahuali techtencahuilía miyac tamanti cati más cuali que nopa camanali achtohuiya.

⁷ Sinta nopa achtohui camanal sencahuali ica Toteco huan masehualme eltosquía senquisa cuali, huajca amo monectosquía seyoc. ⁸ Pero Toteco Dios iselti quuitac para masehualme cati quipixtoyaj nopa achtohui camanal sencahuali, amo hueliyayaj quichihuj cati quijtohua, huan yaya amo quipacti huan quijto:

“Ajsis se tonali quema nijchihuas se yancuic camanal sencahuali ica masehualme ipan tali Israel huan ipan tali Judá.

⁹ Amo elis quej nopa achtohui camanal sencahuali cati nijchijqui inihuaya inihuejcapan tatahua quema niquinmatilanqui huan niquinyacanqui para ma quisaca ipan tali Egipto.

Pampa injuanti amo quichijque cati quijto nopa achtohui camanal sencahuali huan yeca niquintalcahui.

¹⁰ Pero ya ni elis nopa yancuic camanal sencahuali cati nijchihuas ica israelitame.

Ajsis tonali quema nijtalis notanahuatilhua ipan inintalnamiqulis para ma quimatica taya nijnequi ma quichihuaca.

Quena, niqijcuilos ipan iniyolo para ma quitepanitaca.

Huan na nielis niininTeco huan injuanti elise nomasehualhua.

¹¹ Huan amo aqui monequisoc quihuis ihuampo o iicni para monequi quixmatis Tohueyifeco,

pampa nochi nechixmatise hasta cati más huejhueyi huan hasta cati más pilquentzitzí.

¹² Na niquintasojtas huan niquintapojpolhuis nopa taixpanoli cati quichijtoque,

huan ayecmo quema niquelnamiquis inintajtacolhua.”

¹³ Quema Toteco camanaltic ten se camanal sencahuali cati yancuic, quijtosnequi quichijqui para nopa achtohui camanal sencahuali ma ayecmo quipiya itequi. Huan cati ayecmo quipiya itequi sosolihuis huan teipa polihuis.

9

Nopa tiopamit ten taltipacti huan nopa ten ilhuicac

¹ Ipan nopa achtohui camanal sencahuali oncaiyaya miyac tanahuatilme cati quinilhuyaya masehualme quenicatza ma quihueyichihuaca Toteco huan nojquiya oncaiyaya se tatzejtzeloitc tiopamit ten cuetaxti nica ipan taltipacti. ² Nopa tiopamit ten cuetaxti quipixtoya ome cuartos. Nopa achtohui cuarto quitocaxtiyayaj “Campa Tatzejtzeloitc”, huan nozona eltoya nopa taahuil quetzali huan nopa mesa ica nopa pantzi cati tatzejtzeloitc.

³ Huan teipa oncaiyaya se cortina huan ica iica eltoya nopa seyoc cuarto cati quitocaxtiyayaj “Campa Más Tatzejtzeloitc”. ⁴ Huan nozona eltoya nopa taixpamit ten oro campa quitatíaj copali huan nopa caxa ten cuahuit cati quialtijtoyaj senquisa ica oro. Huan iijtic nopa caxa quipixtoya se xarro ten oro ica se quentzi ten nopa pantzi cati huetzqui ten ilhuicac cati itoca maná. Huan nojquiya quipixqui icuatopil Aarón cati chamanqui. Huan nojquiya quipixtoya nopa ome tepacti cati ipan quijcuilojtoya nopa majtacti tanahuatilme. ⁵ Nojquiya, ipan itzajca nopa caxa quinchijchijtoque ome iniixcopinca ten se tamanti ilhuicac ejquet cati inintoca querubines. Huan nopa taixcopincayome ten nopa ilhuicac ehuan quinchijchijtoyaj ica oro. Cati nelnelia querubines itztoque nopa campa itztoc Toteco huan campa nesi itatanex. Huan nopa taixcopincayome ten ilhuicac ehuan quipatajtoyaj inieltapal para quiecahuilise itzajca nopa caxa. Huan nopa ipan itzajca nopa

caxa quimacayayaj Toteco esti cati quiixtzacuiliyaya inintajtacolhua nopa masehualme. Pero ama amo nicaxilis para nicamanaltis más ten ni tamanti.

⁶ Quema ya quicualtalijtoyaj nochi nopa tamantzitzi tiopan calijtic, nopa israelita totajtzitzi talojtzitzi calaquiyayaj ipan nopa achtohui cuarto para quichihuase inintequi iixpa Toteco. ⁷ Pero ipan nopa cuarto cati más calijtic cati quitocaxiyayaj Campa Más Tatzejzelolitic, san huelyiyaya calaquis nopa hueyi israelita totajtzitzi sempatzi ipan se xihuit. Huan quema calaquiyaya, monequiyaya quihuicas ieso se tapiyali para quimacas Toteco. Achtohui quimacayaya esti por ya itajtacolhua huan teipa quimacayaya por nopa tajtacoli cati quichijtoyaj nochi masehualme masque amo quimachiliyayaj sinta tajtacoli. ⁸ Ica nochi ni tanahuatilme, Itonal Toteco technextilia para cati hueli masehuali amo huelyiyaya calaquis ipan nopa cuarto Campa Más Tatzejzelolitic, quinequi quijitos campa itztoc Toteco, quema noja quipiyayaya itequi nopa achtohui tiopan cuarto huan nopa israelita totajtzitzi talojtzitzi quimacayayaj Toteco tacajchualisti.

⁹ Ni tamanti technextilia quenicatza nochi mopatatoc ama. Pampa nopa tacajchualisti huan inieso tapiyalme cati masehualme quimacayayaj Toteco huejcajquiya, amo huelqui nelia quinyolpajpacca ten inintajtacolhua. ¹⁰ Nojquiya nopa achtohui camanal sencahuali quipixqui miyac tanahuatilme cati quinilhuuyayaj masehualme taya huelyiyaya quicuase o quise. Huan nopa tanahuatilme quinilhuuyayaj quenicatza monequi momajtequise, maltise huan mopajpacase para huelise quihueyimatise Toteco. Nochi ni tamanti quipixqui chicahualisti hasta oncac nopa yancuic camanal sencahuali.

¹¹ Pero ama Cristo mochijtoc nopa Hueyi Totajtzi cati techhualiquilia nochi nopa tamanti cati cuali cati ama tijpiyaj. Huan yaya amo calajqui Campa Más Tatzejzelolitic ipan se tiopamit cati tamachijchihuali ipan ni taltipacti, pero calajqui Campa Más Tatzejzelolitic nepa ilhuicac huan ya nopa más cuali. ¹² Huan quema calajqui Campa Más Tatzejzelolitic ipan ilhuicac amo quihuicac inieso chivojme o huacaxme quej quichihuayayaj israelita totajtzitzi ipan taltipacti, pero quimacac Toteco cati ya ieso. Huan Cristo calajqui sempatzi huan ayecmo más monejqui, pampa ica ieso techmaquixti ten totajtacolhua para nochipa. ¹³ Achtohuiya nopa esti ten chivojme huan torojme, huan inincuajnexo pilhuacaxtzitzi quipiyayaya chicahualisti para quintapajpacchihuas nopa masehualme cati mochijtoyaj amo tapajpacme iixpa Toteco. ¹⁴ Pero más miyac hueli quichihua ieso Cristo, pampa ieso quipiya chicahualisti para quitapajpacchihuas tonemilis huan toyolo ten tajtacoli cati techhuicasquía campa miqulisti. Huan techchihua ma tijtequipanoca Toteco cati nelia itztoc. Itonal Toteco cati itztoc para nochipa quipalehui Cristo cati amo quipixqui yon se itajtacol, para ma motemacili ica Toteco quej se tacajchualisti cati senquisa cuali para totajtacolhua.

¹⁵ Huajca yeca ama eltoc Cristo cati motajcoquetza ica masehualme huan Toteco Dios, huan yaya quisencajtoc nopa yancuic camanal sencahuali. Yeca ama nochi tojuanti cati Toteco technotztoc para ma tijneltocaca Cristo, huelis tijselise para nochipa nochi nopa cuali tamanti cati Toteco techencahuilijtoc techmacas. Tijselise nochi pampa Cristo techcojqui ica ieso quema mijqui por tojuanti. Quena, ieso techapojpolhuia totajtacolhua cati tijchique quema noja quipiyayaya itequi nopa achtohui camanal sencahuali.

¹⁶ Pero anquimatij sinta se tacat quichihua se amat cati quijitohua ajquiya quiselis sesen tamanti cati iaxca quema yaya miquis, amo aqui huelis moaxcatis cati teipa elis iaxca hasta quema ya mictos nopa tacat. ¹⁷ Pampa nopa amat amo quipiyas chicahualisti hasta ya mictos yaya cati

quijcuilo. ¹⁸ Quej nopa elqui huejcajquiya ica nopa achtohui camanal sencahuali, monequiyaya miquis se tapiyali para pehuas itequiticayo nopa camanal sencahuali. ¹⁹ Moisés quinpo huili nopa israelitame nochi nopa tanahuatilme. Huan teipa quicuic borrego ichcat cati chichiltic huan nopa xihuit itoca hisopo huan quixoloni ipan inieso torojme huan chivojme cati quimanelojtoya ica at. Huan teipa quijitzelo nopa esti ipan nochi nopa israelitame huan ipan nopa tajcuiloli cati quipixtoya nopa tanahuatilme. ²⁰ Huan quema quijitzelohuayaya nopa esti, Moisés quej ni quinilhui nopa masehualme: “Ni esti quipehualtia itequi nopa camanal sencahuali cati Toteco quichijtoc ica amojuanti.” ²¹ Nojquiya Moisés quijitzelo esti ipan nopa tiopamit ten cuetaxti huan ipan nochi nopa tamantzitzi cati quitequihuiyayaj para quihueyichihuase Toteco tiopan calijtic.

²² Huajca hueli tiquijtose para ipan nopa achtohui camanal sencahuali, quitapajpacchihuayayaj nochi tamanti ica esti. Huan amo onca tapojpol-huili sinta se amo quitoyahuas esti.

Itacajcahualis Cristo techquixtilia totajtacolhua

²³ Nopa tiopamit ten cuetaxti cati huejcajquiya oncac nica ipan taltipacti ihuaya nochi nopa tamantzitzi cati quitequihuijqe calijtic eltoya se iix-copinca ten nopa cati nelnelia eltoc nepa ilhuicac. Huan nojquiya Moisés monejqui quitequihui inieso tapiyalme para quitapajpacchihuas nochi tamantzitzi nopona, pero nochi nopa tamantzitzi cati onca nepa ilhuicac, Toteco quintapajpacchijqui ica se tacajcahualisti cati mas ipati. ²⁴ Pampa Cristo amo calajqui ipan nopa cuarto Campa Mas Tatzetzeltolc cati masehualme quichijchijtoque cati san technextilia quenicatza eltoc nepa ilhuicac. ¡Amo! Cristo calajqui nepa ilhuicac campa eltoc nopa tiopamit cati nelnelia huan nopona yaya itzotc iixpa Toteco para techpalehuis. ²⁵ Huan Cristo amo motemactili miyac huelta quej nopa huejhueyi israelita totajtzitzi calaquiyayaj sese xihuit Campa Mas Tatzetzeltolc para quimacase Toteco inieso tapiyalme. ¡Amo! ²⁶ Sinta quej nopa monectosquia, huajca Cristo monectosquia miyac miyac huelta ten quema pejqui taltipacti. ¡Pero amo! Cristo monexti ipan ni itamiya tonali huan motemactili sempatzi para miquis ipan cuamapeli quej se tacajcahualisti para quinquixtilis inintajtacolhua nochi masehualme huan yeca ayecmo teno monequi mas. ²⁷ Pampa Toteco Dios quitallitoc para monequi nochi masehualme ma miqica sempatzi huan teipa monextise iixpa para quintajtolc sencahuas. ²⁸ Huajca Cristo nojquiya mijqui sempatzi quema motemactili quej se tacajcahualisti para quintajtacolquixtis miyaqui masehualme. Huan yaya sempa hualas, pero amo hualas para tetajtacolquixtiqui. ¡Amo! Yaya hualas para quinquixtis para nochipa nochi cati talojtzitzi quichixtoque para ma huala.

10

¹ Itanahuatilhua Moisés huan nochi cati huejcajquiya quinnahuatijque masehualme ma quichihuaca elqui san quej se ecahuilot cati technescayotiliyaya nopa miyac cuali tamanti cati teipa nelia melahuac hualasquia ica Cristo. Pero nopa tanahuatilme amo temacac cati melahuac. Huan masque masehualme quimacayayaj Toteco tacajcahualisti sese xihuit, nopa tacajcahualisti amo huelqui quinchihua xitahuague iixpa Toteco. ² Sinta quinchijtosquia nopa masehualme xitahuague huan nelia quinyolpajpactosquia iixpa, amo monectosquia para talojtzitzi quimacase Toteco mas tacajcahualisti, pampa ayecmo quimachilijtosquiaj para noja quihuicaj tajtacoli iixpa. ³ ¡Pero amo! Pampa quema injuanti quihualicayayaj tacajcahualisti

sese xihuit, nopa tacajcahualisti quinnelnamiquiltiyaya ten inintajtacolhua.

⁴ Pampa inieso torojme huan chivojme amo hueli nelía tetajtacolquixtia.

⁵ Yeca Cristo, quema hualajqui ipan taltipacti, quiilhui Toteco Dios:

“Nopa tacajcahualisti huan inieso tapiyalme amo elqui cati nelía tinequiyaya,

huajca tijsenajqui notacayo para nitacatis quej se masehuali huan nimitzmacas nopa tacajcahualisti cati melahuac quinamiqui.

⁶ Pampa masque masehualme quinmictiyayaj tapiyalme huan quintatiyayaj yajmaxtique moixpa,

huan mitzmacayayaj sequinoc tamanti tacajcahualisti por inintajtacolhua, amo tijcualitac.

⁷ Huajca na niqijtohua:

‘Nica niitztoc noTeco.

Nijchihuas nochi mopaquilis pampa quej nopa ijcuiljtoc ipan nopa Amat-pohuali para ma nijchihua.’ ”

⁸ Achtohui Cristo quijto para Toteco amo quipactía tacajcahualisti, huan inieso tapiyalme, huan tapiyalme cati quintatiyayaj yajmaxtique ipan taixpamit por inintajtacolhua masque nochi ya nopa eltoya senquisaca cati quijtohuayayaj itanahuati Moisés para masehualme na quimacaca Toteco.

⁹ Huajca teipa Cristo quiilhui Toteco Dios: “Nica niitztoc noTeco. Nihualajtoc para nijchihuas mopaquilis.” Huajca ica ni quinextía para quitamiltía nopa achtohui camanal sencahuali huan quipehualtía seyoc cati más cuali.

¹⁰ Huan ipaquilis Toteco elqui para Cristo ma techtatzejtzeloelchihua para nochipa quema san se huelta motemactili huan mijqui ipan cuamapeli.

¹¹ Nochi nopa totajtzitzi ten itanahuatijcahua Moisés mojmosta quinmictiyayaj tapiyalme huan quimacayayaj Toteco quej tacajcahualisti. Pero nopa tacajcahualisti amo quema huelqui quintajtacolquixti. ¹² Pero Cristo motemacac para miquis sempatzi por totajtacolhua para nochipa, huan teipa yaya mosehui inejmat Toteco Dios campá más onca tatepanitacayot.

¹³ Nozona Cristo quichiya hasta Toteco Dios quimacas nochi icualancaitacahua para ma quinnahuati. ¹⁴ Pampa ica setzi tacajcahualisti cati temactili, techchijqui tixitahuaque iixpa Toteco nochi tojuanti cati techiyocacajtoya para tiaxcachua.

¹⁵ Tijmatij para melahuac ya ni, pampa Itonal Toteco techilhui san se ipan Icamanal Toteco campá quijtohua:

¹⁶ “Ya ni nopa yancuic camanal sencahuali cati nijchihuas ica israelitame.

Nijtalís notanahuatilhua ipan iniyolo para ma quimatica taya nijnequi ma quichihuaca.

Quena, niqijcuilos ipan inintalnamiquilis para ma quitepanitaca.”

¹⁷ Huan nojquiya Toteco quijto:

“Ayecmo quema niquelnamiquis inintajtacolhua huan inintaixpanolhua.”

Quej nopa quijtohua Icamanal Toteco.

¹⁸ Huajca pampa Toteco ya techtapojpolhuijtoc nochi totajtacolhua huan quinelcajtoc para nochipa, ayecmo monequi tijmacase tacajcahualisti para ma techtapojpolhui.

Ma timonechcahuica campá Toteco

¹⁹ Huajca ama noicnihua, nochi tojuanti huelis ticalaquis ica temachili nozona Campá Más Tatzejtelolitic ipan ilhuicac campá itztoc Toteco Dios, pampa Jesús quitoyajqui ieso por tojuanti. ²⁰ Quena, quema Jesús temactili itacayo huan mijqui, quitapo nopa cortina cati quitzacuayaya Campá Más Tatzejtelolitic ipan nopa hueyi tiopamit huan techtapohuili se ojti cati

yancuic huan cati temaca nemilisti. ²¹ Huan pampa tijpiyaj tohueyi totajtzi, Jesucristo, cati quipiya tanahuatili ica nochi imasehualhua huan techpalehuá iixpa Toteco, ²² ma timonechcahuica campa Toteco Dios ica toyolo cati xitahuac iixpa huan ica miyac taneltoquili pampa tijmatij para temachti techseli. Eltoc quej Toteco quiatzejtzelhujtoc toyolo cati elqui fiero ica ieso Cristo para ma tielica titapajpactique iixpa. Nojquiya quipajpactoc totacayohua ica at cati senquisa cuali. ²³ Huajca ma amo caxani totaneltoquil, pero ma tijneltocaca para temachti tijselise nochi nopa tatiochihualisti cati tiquinilhujtoc sequinoc para tijchiyaj tijselise, pampa Toteco temachti techmacas nochi cati techtencahuilijtoc.

²⁴ Ma tijtemoca quenicatza timoyolchicahuase se ica seyoc para más timoicnelise huan tijchihuase cati cuali. ²⁵ Ximomocuitahuica para amo anquicahuase anmosentilise inihuaya sequinoc taneltocani. Amo xijchihuaca quej sequinoc cati ayecmo mosentilíaj. Quinamiqui ximosentilica huan ximoyolchicahuaca achi más ama pampa ya anquilitaj monechcahuá para sempa hualas Jesucristo.

²⁶ Sinta se masehuali tajtacolchihuas ica ipaquilis quema ya quiixmajtoc cati melahuac, ayecmo oncas seyoc tacajcahualisti cati huelis quimacas Toteco por itajtacolhua. ²⁷ Quena, sinta quihuejcamajcahuas itacajcahualis Cristo, san hueli quichiyas ica tamajmatili para Toteco quitajtolsencahuas huan quitatzacuiltis ipan nopa hueyi tit cati quintzontamiltis icualancaitacahua Toteco. ²⁸ Huejcajquiya quema se masehuali quiixpanoyaya se itanahuatil Moisés huan ome o eyi masehualme quitayayaj, huajca quitelhuyiyaj huan nopa tequichihuani tanahuatijque ma quimictica, yon ma amo quitasojtaca. ²⁹ Pero ama se masehuali cati quihuejcamajcahuas Icone Toteco, monequi ma quiseli se tatzacuilti cati noja más hueyi. Quena, Toteco taniel quitatzacuiltis cati moilhuis amo teno ipati cati Cristo quichijqui quema quitoyajqui ieso para techtapajpacchihuas ten totajtacolhua huan para quipehualtis nopa yancuic camanal sencahuali ica Toteco. Nopa masehualme chicahuac quitajilhuíaj Itonal Toteco cati technextilíca quenicatza Toteco quipiya hueyi iyolo ica tojuanti. ³⁰ Tojuanti tijmatij para Toteco Dios quiijto: “Na cati nechnamiqui nitecuepilis cati amo cuali quichijtoque huan quena, niquintaxtahuis.” Huan nojquiya ijcuilijtoc ipan Icamanal Toteco campa quiijtohua: “Toteco quintajtolsencahuas imasehualhua.” ³¹ ¡Nelía temajmati elis para cati huetzis imaco Toteco cati yoltoc para ma quitatzacuilti!

³² Pero xiquelnamiquica nopa yejyectzi tonali quema anquicajque icamanal Toteco. Masque sequinoc amechtaijyohuiltiyayaj, amojuanti anmocajque antemachme ipan Toteco. ³³ Quemantica masehualme amechpinahualtiyayaj huan amechmaquiliyayaj miyacapa. Huan quemantica amechhuicayayaj para xijtachelica quema chicahuac quintajyohuiltiyayaj sequinoc amoicnihua. ³⁴ Quena, nojquiya antajyohuijque ica nopa taneltocani cati quintaxtojaj. Huan quema masehualme amechquixtiliyayaj tamanti cati amoaoca, anpaquiyayaj pampa anquimatiyayaj para nepa ilhuicac amechchiyayaya miyac tatiochihualisti cati más cuali huan cati más ipati. ³⁵ Huajca xijsenhuiquilica ximotemachica ipan Toteco masque antajyohuíaj, pampa yaya amechmacas se hueyi taxtahuili nepa ilhuicac. ³⁶ Pero ama, monequi xijpiyaca amoyolo huan xiquiyohuica nochi cati amechpanotihuala, huan quema ya anquichijtose nochi ipaquilis Toteco, yaya temachti amechmacas nochi cati amechtencahuilijtoc. ³⁷ Pampa Icamanal Toteco quiijtohua:

“Ica se quentzi tonali hualas yaya cati quiiyto tajcuiloli para hualasquía. Yaya, amo huejcahuas.

³⁸ Se cati itztoc xitahuac iixpa Toteco, itztoc para nochipa pampa quineltoaca. Pero sinta se moicancuepas, amo nipaquis ihuaya.”

³⁹ Pero tojuanti amo tiitztoque inihuaya cati moicancuepaj ten Toteco huan polihuisse. ¡Amo! Tojuanti tiitztoque inihuaya cati quineltocej Toteco para ma quinmaquixtili inialma.

11

Taneltoquili

¹ ¿Taya quiiytosnequi taneltoquili? Quinequi quiiytos tijneltocej para temachti panos nopa tamanti cati Toteco techtencahuilijtoc. Yeca senquisa tijmatij para temachti ya eltoc nopa tamanti cati ama yon quentzi ayemo hueli tiqunitaj.

² Huejcajquiya Toteco Dios tahuel camanaltic cuali ten tohuejcapan tatahua pampa quineltocaque ica temachili.

³ Pampa tijneltocej Icamanal Toteco, tijmatij para Toteco san quiiyto para ma onca taltipacti, ilhuicacti huan nochi tamanti, huan nochi nopa tamanti oncac. Huan tijmatij nochi tamanti cati ama tiquitaj, Toteco quisencajqui ten tamanti cati amo aqui huelqui quiiyac.

⁴ Abel quineltocec para temachti cati Toteco quiiyto huan yeca quimacac Toteco se tacajcahualisti cati más cuali huan amo quej itacajcahualis Caín. Huan pampa quineltocec, Toteco quiiyto para Abel itztoya xitahuac iixpa, huan quiiyto para quicualitac itacajcahualis. Huan masque quipiya miyac xihuit para mijqui Abel, itaneltoquilis eltoc se ejemplo para tojuanti para noja ma tijtoquilica.

⁵ Enoc quineltocec para temachti cati Toteco quiiyto, huan yeca se tonali Toteco quihuicac ilhuicac noja yoltoc. Huan ayecmo aqui quipanti itacayo, pampa amo mijqui, Toteco san quihuicac. Pero Toteco ya ipa quiiytojtaya para quipactiyaya inemilis Enoc. ⁶ Pero se masehuali amo hueli quipactis Toteco sinta amo quineltocec para temachti cati Toteco quiiytohua. Pampa cati hueli cati quinequi monechahuis campá Toteco, monequi quineltoacas para Toteco itztoc, huan para yaya quintaxtahuía masehualme cati nelía quitemohuaj ica se iniyolo cati cuali.

⁷ Noé quineltocec para temachti cati Toteco quiiyto, huan yeca quema Toteco quiyolmelajqui para huetzisquía miyac at hasta quinzonpolihuiltisquía nochi masehualme masque amo huelqui quiiita para hualayaya, Noé, ica majmajti, nimantzi pejqui quichijchihua nopa cuaacali quej quihui para ipan momanahuisquía ya huan ihuicalhua. Huan pampa Noé quineltocec Toteco, technextilía quenicatza nelía hueyi inintajtacol nopa sequinoc masehualme cati amo quineltocaque cati Toteco quiiyto. Huan yeca Toteco quichijqui Noé xitahuac iixpa pampa quineltocec.

⁸ Abraham quineltocec para temachti cati quiiyto Toteco. Yeca quema Toteco quihui ma quisa ipan ital huan ma yahui ipan se tali cati yaya quitencahuili para quimacas para iaxca, Abraham quisqui. Quicajtejqui ichaj huan yajqui masque amo quimatiyaya canque ajsiti o canque eltoya nopa tali. ⁹ Huan pampa Abraham quineltocec cati Toteco quiiyto, yaya ajsito ipan nopa tali cati Toteco quitencahuilijtoya quimacas. Huan nopona itztoya ipan yoyon calme quej se cati amo nepa ejquet. Huan teipa nojquiya san se quichijqui Isaac huan Jacob pampa quiselijque san se tatencahuali

ten Toteco huan quineltoacaue. ¹⁰ Abraham mocajqui ipan yoyon calme huan quipixqui iyolo pampa quineltoac para temachti cati Toteco Dios quihuhijtoya. Yaya quichiyayaya para itztos ipan nopa altepet nepa ilhuicac. Achtohui Toteco moyolihui quenecatza elis nopa altepet huan teipa quitamachijqui huan quisencajqui. Nopa altepet quiptiya cuali itzinpehualti huan huejcahuas para nochipa.

¹¹ Nojquiya Sara, isihua Abraham, quineltoac para temachti cati Toteco quijto, yeca masque amo hueliyaya conepiya, quiseli chichahualisti para conecuis. Huan teipa quitacatilti se icone masque ya nanatzi. Quena, quineltoac para eliyaya temachti Toteco cati quitencahuilijtoya para quiptiyas icone. ¹² Huan Abraham nojquiya quineltoac Toteco masque ya huehuejtixtoya huan ya panotoya tonali para huelis quimpiyas iconehua. Pero masque quej nopa elqui, quipixqui icone huan teipa icone motacachijqui huan quinpixqui iconehua. Huan ama iteipan ixhuihua Abraham tahuel momiyaquillijtoque hasta amo aqui hueli quinpohuas. Itztoque quej imiyaca sitalime huan quej imiyaca xali iteno hueyi at.

¹³ Nochi ni masehualme quineltoacaue para temachti cati Toteco quijto, pero quema mijque noja amo quiselijtoyaj cati Toteco quintencahuilijtoya para quinmacas. Pero inijuanti ica paquilisti quichiyayayaj pampa quimatiyayaj para Toteco temachti quinmacasquia. Yeca inijuanti quijtoque para itztoyaj quej seyoc tali ehuan huan san paxalohuani ipan ni taltipacti.

¹⁴ Huan quema inijuanti camanaltique quej nopa, tanemijya nesi para quitemohuayayaj se tali cati nelia elisquia iniaxca. ¹⁵ Pero amo moilhuyiyaj ten nopa tali campa quisque, pampa sinta quej nopa elisquia, huajca hueltosquiaj mocuectosquiaj nopona sinta quinctosquiaj. ¹⁶ Pero inijuanti quinequiyayaj se tali cati achi cuali, quiniqui quijtos quinequiyayaj itztose nepa ilhuicac. Yeca Toteco amo pinahua para motocaxtia ininDios, huan yaya ya quinsencahuilijtoc se altepet nepa ilhuicac.

¹⁷ Abraham quineltoac para temachti cati Toteco quijto, huan yeca quema Toteco quieyeyeco huan quihui ma quimactili Isaac, icone iyojtzi, quej se tacajchahualisti, nimantzi mocualtali para quimictis masque Toteco quitencahuilijtoya para quimacasia iteipan ixhuihua ipan ya. ¹⁸ Pampa Toteco ya quihuhijtoya: "Ipan Isaac tijpiyas miyac moteipan ixhuihua."

¹⁹ Quema Abraham ya itztoya para quimictis icone, quimatiyaya para Toteco quiptiya chichahualisti para quiyolcuisquia Isaac masque quimictisquia. Huan huelis tiqijitose para Toteco sempa quimacac icone nemilisti quema ya mictoc pampa quema quihui ma amo quimicti elqui nelnechca imiquilis.

²⁰ Isaac quineltoac para temachti cati Toteco quijto, yeca quintencahuili itelpocahua Jacob huan Esaú nopa tatiochihualisti cati quimatqui Toteco quinmacasquia teipa.

²¹ Jacob quineltoac para temachti cati Toteco quijto, yeca quema ya itztoya para miquis, quintencahuili sese itelpoca José quenecatza Toteco quintiochihuasquia teipa. Huan Jacob quihueyichijqui Toteco quema quincamanalhui, momataquechijtoya ipan icuatopil.

²² José quineltoac para temachti cati Toteco quijto. Yeca quema nechca eliyaya para miquis, quinihui nopa israelitame para melahuac se tonali Toteco quinquixtisquia ipan nopa tali Egipto huan quinihui ma quihucase iomiyohua inihuaya.

²³ Inana huan itata Moisés quineltocaque para temachti cati Toteco quiijto. Huajca quema quiitaque para nelía yejyectzi nopa pilconetzi cati Toteco quinmacatoya, quitatijque para eyi metzti, huan amo quiimacasque nopa tanahuatijquet cati tanahuatijtoya ma quinmictica nochi israelita oquich-pilme.

²⁴ Moisés quineltocac para temachti cati Toteco quiijto. Yeca quema motacachijqui amo quinejqui motocaxtis icone iichpoca Faraón. ²⁵ Quitapejpeni para taijyohuis inihuaya imasehualhua Toteco. Amo quinejqui mopaquilismacas ica tajtacoli cati san temaca paquilisti para se talojtzi. ²⁶ Moisés achi más quipatiitac para taijyohuis pampa iaxca nopa Cristo cati hualasquía huan amo para moaxcati nochi nopa tomi ten tali Egipto, pampa ya quitayaya nopa taxtahuili cati Toteco teipa quimacasquía.

²⁷ Huan pampa Moisés quineltocac Toteco, yaya quisqui tali Egipto, yon amo quiimacasqui icualancayo nopa tanahuatijquet, pampa quimatiyaya para Toteco itztoya ihuaya masque amo hueliyaya quiifa.

²⁸ Huan pampa quineltocac Toteco, Moisés quinilhui nopa israelitame para ma quisencahuaca nopa Pascua tacualisti, huan ma quimictica se pilborregoitzti huan ma quiijzeloca ieso ipan inincaltencua para nopa ilhuicac ejquet cati temictía, ma amo quimictis iniachtohui ejca quema panosquía.

²⁹ Moisés huan nochi nopa israelitame quineltocaque para temachti cati Toteco quiijto, yeca panoque ipan nopa Chichiltic Hueyi At quej elisquía ten hueli tali cati huactoc. Pero quema nopa egiptome quinejque panose, nopa at quinatzonpolihuilti.

³⁰ Nopa israelitame quineltocaque para temachti cati Toteco quiijto, yeca injuanti quiyahualojtinenque nopa altepet Jericó para chicomé tonati. Huan nopa hueyi tepamit cati quiyahualtactoya nopa altepet, huetzqui.

³¹ Nopa sihuat Rahab cati achtohuiya tacanemiyaya quineltocac Toteco huan yeca quinseli nopa achtohui israelitame cati hualajque tajtachiyacoj para quítase quenicatza huelise quitanise ialtepe. Huan yeca Rahab amo mijqui inihuaya nopa sequinoc Jericó ehuaní cati amo quitepanitaque Toteco.

³² ¿Huan taya más monequi niquijtos? Amo nicaxilis para nimechpohuilis quenicatza chicahuac quineltocaque Toteco nopa tacame quej Gedeón, Barac, Sansón, Jefé, David, Samuel huan nochi nopa tajtolpanextiani.

³³ Quena, nochi injuanti quineltocaque para temachti cati Toteco quiijto huan yeca quintanque tanahuatiani huan inisolados, tetajtolsenajque xitahuac, huan quiselijque cati Toteco quintencahuilijtoya. Huan masque quintzajque sequij ten injuanti inihuaya tecuanime, Toteco quincamatzajqui huan quinmanahui pampa quineltocaque. ³⁴ Huan quema quinmictis-nequiyayaj ipan tit xahuantoc, nopa tit sehuiyaya. Quema nechca itztoyaj para miquise sequij ica macheta, Toteco quinmanahui. Quema ayecmo quipiyayayaj fuerza, Toteco quinmacac tetili. Quipixque chicahualisti ipan tatehuilisti huan tatanque, huan quinquixtijque miyac soldados cati huejca ehuaní.

³⁵ Sequij sihuame quineltocaque Toteco huan yaya quinyolcuic ininconehua o inihuehuejhua cati ya mictoyaj.

Sequinoc taneltocani mijque pampa chicahuac quintaijyohuiltiyayaj para ma quicahuaca Toteco, pero amo quinejque momanahuise ten nopa taijyohuulisti, pampa quinequiyayaj quiselise cati nelcuali teipa quema nochi masehualme moyolcuise.

³⁶ Sequij taneltocani quinpinahuajtijque, sequij quinhuitejque ica cuartás ica omit, sequij quinilpijque ica tepos cadena ipan tatzacme cati fiero.

³⁷ Sequij taneltocani quinmictijque ica tet, sequij quinhuejhuelojque ica sierra, sequij quinmictijque ica machetas, sequij quinyejyecoique ica miyac tamanti para ma quitahuelcahuaca Toteco, pero amo quicajque. Sequinoc taneltocani nejnenque campa hueli huan amo cana quiipiyayaj para mosiyajquetzase. San quiipiyayaj inincuetaxo borregojme o chivojme quej iniyoyo. Eliyayaj tahuel teicneltzitzu huan tahuel mayanayayaj, huan masehualme san quincualancaitayaj huan ten hueli quinchihuilijayaj.

³⁸ Nochi ni taneltocani nelía itztoyaj cuajcualme huan amo quinamiquiyaya itzose ipan ni taltipacti. Motatijtineneque campa hueli ipan huactoc tali, ipan tepeme, ipan ostome cati eltoque ipan tepeme huan ipan huejhueyi ostome cati talchi.

³⁹ Toteco quipacti cati quichijque nochi ni masehualme huan camanaltic cuali ten inijuanti pampa chichahuac quineltocaque, pero quema mijque nopa masehualme, noja amo quiselijtoyaj nochi cati Toteco quintencahuilijtoya quinmacas. ⁴⁰ Pampa Toteco quicualtalijtoya cati achi cuali para inijuanti. Quinejqui para inijuanti ma quichiyaca cati quintencahuilijtoya hasta san sejco techchihuas tojuanti huan inijuanti senquisa cuali iixpa huan techmacas nochi cati quijtojtoc techmacas.

12

Ma timoilhuica ten Jesús

¹ Ama eltoc quej techyahuahualoj huan techyolchicahuaj nochi ni masehualme cati quineltocaque Toteco huan quijiyohuijque cati quinpanotihualajqui. Huajca quej se motalojquet quichihua, ma timoquixtilica nochi cati techztacuilia huan ma tijtahuelcahuaca nopa tajtacoli cati más techijlipia. Ma timoyoltetilia huan ma timotaloca ipan nopa ojti cati Toteco technextilijtoc. ² Ma tijpixtoca totachiyalis ipan Jesús cati technextili quenicatza ma tijneltocaca Toteco huan cati techpalehuia mojmota para más ma tijneltocaca. Yaya quijiyohui nopa hueyi pinahualisti para miquis ipan cuamapeli pampa quimatiyaya nopa hueyi paquilisti cati quichiyayaya teipa. Huan ama ya mosehujtoc inejmat Toteco campa más onca tatepanitacayot.

³ Ximoyolilhuica ten nochi cati Jesús quijiyohui huan ten nochi nopa fiero tamanti cati amo cuajcualme quichihuilijque para amo anyamanyase huan antapolose. ⁴ Hasta amantzi amo timictoque ipan nopa tatehuilisti ica nopa tajtacolchijca tacame cati techcualancaitaj. ⁵ ¿Huelis ya anquielcajtoque cati Toteco techilhui tojuanti tiiconehua?

Ijcuilijtoc ipan Icamanal Toteco campa yaya techilhua:

“Noconeua, amo xicualanica quema na niamoTeco nimechtalnamictía, yon amo ximotzinquixtica quema nimechtacahualtía.

⁶ Pampa nochi cati niquinicnelía, niquintalnamictía,

huan niquncuahuasashua nochi cati niquinselía para elise noconeua.”

⁷ Huajca xiquijyohuica quema Toteco amechtalnamictía pampa ica ya nopa amechnextilia para nelía anitztoque aniconehua. Quena, Toteco quichihua quej nochi tetajme cati quintalnamictíaj huan quinxitahuaj iniconehua quema quichihua cati amo cuali para quinnextilise quenicatza ma monejnemiltica cuali. Amo aqui se conet cati itata amo quema qitalnamictía.

⁸ Sinta Toteco amo amechtalmamictía huan amechxitahua quema anquichihuaaj cati amo cuali, huajca amo nelía aniconehua. Amo anitztoque ipan ifamilia huan yaya amo amoTata. ⁹ Nojquiya quema tiitztoyaj ticoneme, tiquinpixtoyaj totatahua ipan ni taltipacti cati techtalmamictiyayaj huan techtachualtiyayaj huan yeca tiquintepanitayayaj. Huajca noja más monequi tijtepanitase Toteco Totata para huelis se tonali tiitztose ihuaya. ¹⁰ Totatahua ipan ni taltipacti techtalmamictijque huan techtachualtijque para se ome xihuit quej quitaque para cuali pampa quinequiyayaj ma timonejnemiltica xitahuac. Pero quema Toteco techtalmamictía huan techxitahua, yaya quimati cati senquisa cuali para techpalehuis tielise titatzejtzeltoltime quej yaya tatzejtzeltolic. ¹¹ Quema se techtalmamictía o techxitahua, amo quema tijcualitaj ipan nopa talojtzi, pampa techcocohua. Pero sinta tijchihuilise cuenta para ten techxitahua, teipa tiquitase para nopa tatzacuiltili techpalehui miyac para tijchihuase cati xitahuac huan para ma tijpiyaca tasehuilisti ipan toyolo.

Monequi tijtacaquilise icamanal Toteco

¹² Huajca ximoyolchicahuaca ipan Toteco amojuanti cati ansiyahuij. Huan ximotetilica amojuanti cati anyamanixtoque ipan amotaneltoquilis. ¹³ Xijtoquilica se ojti cati xitahuac. Quej nopa, nochi masehualme cati yahuij amotepotzco masque pilquentzi quineltocej Toteco, amo motepotatise, yon amo huetzise. Inijuanti nejnemise xitahuac huan quipiyase chichahualisti.

¹⁴ Xijchihuaca campeca xiitztoaca ica cuali ica nochi masehualme huan xijpiyaca se nemilisti tatzejtzeltolic, pampa sinta amo anquipiyase se nemilisti tatzejtzeltolic, huajca amo huelis anquitasé Tohueyiteco.

¹⁵ Ximomocuitahuica se ica seyoc para amo aqui quielcahuas quenicatza Toteco nelía hueyi iyolo ica tojuanti. Ma amo aqui moyolchichicachihua, pampa sinta se cualantinemis, huelis quinmahuas miyac toicnihua huan huelis quintahuisos ipan tajtacoli. ¹⁶ Ximotachilica para amo aqui ma quichihua tamanti ica cati amo itahuical. Ma amo aqui quihuejcamajcahua cati Toteco techmacatoc quej Esaú quichijqui. Yaya quitahuelcajqui nochi nopa tatiocihualisti cati quinamiquiyaya para quiselis pampa eliyaya nopa achtohui ejquet. Quena, nochi quinamaquilti iicni ica se plato tacuali quema mayanayaya. ¹⁷ Huan tijmatij para teipa Esaú quinequiyaya quiselis itatiocihual itata, pero amo huelqui. Masque chocac miyac, ya panotoya tonali para moyolcuepas huan para moaxcatís cati quinamacatoya.

¹⁸ Amojuanti amo anmonechcahuíaj campa se tepet cati hueli anquitzquise quej nopa israelitame quichijque huejcajquiya quema Toteco quinmacac itanahuatilhua. Inijuanti quinechcahuijque se tepet cati tatayaya, huan iniixpa monexti se hueyi tzintayohuilot cati quinmajmati, huan quitaque se hueyi ajcomalacat. ¹⁹ Huan quicajque tapitzali huan quicajque quenicatza chichahuac Toteco quincamanalhuyaya. Huan inijuanti tahuel quimacacque icamanal huan yeca ica nochi iniyolo quitajtanijque Toteco para ma ayecmo quincamanalhui. ²⁰ Toteco quinmacac se tanahuatili para sinta cati hueli masehuali o tapiyali quinechcahuisquía nopa tepet, monequi quimictise ica tet o ica cuataminti. Huajca inijuanti tahuel momajmatijque. ²¹ Huan pampa tahuel temajmati cati quitaque ipan nopa tonali, Moisés nojquiya quijto: “Nelía nimajmahui huan nihuihuipica.”

²² Pero ica amojuanti amo quej nopa. Anajsitoque campa tepet Sion campa eltoc ialtepe Toteco cati yoltoc. Quena, anajsitoque ipan altepet Jerusalén cati eltoc nepa ilhuicac campa mosentilijtoque tahuel miyac miles ten ilhuicac ehuaní. ²³ Anajsitoque ipan nopa tasentilisti ten masehualme cati

temachti quiselise itatiochihualis Toteco pampa quipiyaj inintoca ijcuilijtoc nepa ilhuicac. Quena, anajsitocque campa Toteco itztoc, yaya cati quinta-
jtolsecahuas nochi masehualme. Nojquiya anmosentilijtoque inihuaya
inintonaltzitzu cuajcuali masehualme cati ama Toteco quinchijtoc senquisa
xitahuague iixpa. ²⁴ Anajsitocque campa Jesús cati quichijqui ni yancuic
camanal sencahuali ica Toteco huan masehualme. Anajsitocque campa eltoc
ieso ya cati tetapojpolhuía. Huan ieso Jesús cati tetapojpolhuía eltoc más
cuali que ieso Abel cati quinoztayaya Toteco para ma tetatzacuilti.

²⁵ Huajca xijchihuaca campeca para anquitamichihuase cati Toteco techil-
huía. Huejcajquiya nopa israelitame cati itztoc yaj ipan ni taltipacti quiseli-
jqque se hueyi tatzacuilti pampa amo quitepanitacque icamanal Toteco
cati Moisés quinpohuiliyaya. Huajca achi más tojuanti tijselise se hueyi
tatzacuilti sinta amo tijchihuase cuenta cati techcamanalhuía ten ilhuicac.

²⁶ Achtohuiya, quema Toteco quincamanalhui ipan nopa tepet Sinaí, itoscac
quichijqui ma mohuiso tali. Huan ama yaya techtencahuilijtoc sempa
mohuisos pampa quijtohua: “San se huela más nitecamanalhuis, huan sempa
mohuisos taltipacti. Pero ama nojquiya mohuisos ilhuicacti.” ²⁷ Quema
yaya quijto: “San se huela más”, quijtosnequi para mohuisos huan Toteco
quiquixtis nochi tamanti cati yaya quichijtoc. Huan san mocahuas nopa
tamanti cati eltoc para nochipa cati amo hueli mohuisohua. ²⁸ Huajca
pampa tijselise se altepet cati amo hueli mojolíná, ma tijtascamatica
Toteco. Nojquiya ma tijtequipanoca ica nochi toyolo, ma tijpaquilis-
macaca huan ma tijhueyichihuaca ica miyac majmajti huan tatapanita-
cayot, ²⁹ pampa Toteco yaya temajmati quej se tit cati quitamitatía nochi cati
onca.

13

Quenicatza monequi monejnemiltise taneltocani

¹ Amo quema xijcahuaca ximoicnelica quej anicnime. ² Amo xiquelc-
ahuaca para anquinselise ica cuali, nopa masehualme cati huejca ehuan
cati ajsij campa amochaj, pampa quej nopa sequij quinselijtoque ilhuicac
ehuan quej ininpaxalojcahua masque amo quimatiyayaj. ³ Amo xiquelc-
ahuaca xiquinpalehuica cati tzactocque pampa tepohuiliyayaj icamanal
Toteco. Ximoyolilhuica quenicatza taijyohuíaj quej amojuanti anitztosquíaj
ipan tatzacti inihuaya. Nojquiya xiquinelnamiquica nopa sequinoc toicni-
hua cati masehualme quinchihuiliáj cati fiero, pampa amojuanti nojquiya
anquipiyaj amotacayo cati se tonali huelis taijyohuis.

⁴ Nochi ma quitepanitaca se tacat huan se sihuat cati motahuicaltijtoque
huan xijmatica para tapajpactic cati quichihuaj san sejco. Pero Toteco Dios
quintatzacuiltis cati momecatíaj huan cati quichihuaj tamanti ica cati amo
inintahuical.

⁵ Amo xiquixtocaca anquipiyase miyac tomi. Más cuali xipaquica ica cati
anquipiyaj pampa Toteco Dios quijtojtoc: “Amo quema nimechcajtehuas,
nochipa niitztos amohuaya.” ⁶ Huajca ica miyac paquilisti sesen ten tojuanti
hueli quijtos:

“Toteco nechpalehuía.

Amo niquimacasis cati masehualme hueli nechchihuilise.”

⁷ Xiquinelnamiquica amotamachtijcahua cati achtohui amechyacanque
huan amechmactijque icamanal Toteco. Ximoyolilhuica ten nochi nopa
tatiochihualisti cati hualajqui ten ininemilis huan xijchihuaca campeca
para cuali anquinelto case Toteco quej injuanti quineltoaj.

⁸ Jesucristo itztoc san se yalohua huan ama huan san se itztos para nochipa. ⁹ Ma amo aqui amechcaycayahua ica miyac tamanti tamachtili cati yancuic o cati amo quema anquicactoque. Anquimatij para hueyi iyolo Toteco ica amojuanti, huajca más cuali ma tijcahuilica para ni talnamiquilisti ma techyolchicahua ipan Toteco. Amo xijtemoca para anmofuerzajmacase iixpa Toteco por amo anquicuaj sequij tacualisti. Nopa piltanahuatiltizti cati masehualme quichijtoque amo quinpalehuijtoc cati quintoquilaj.

¹⁰ Nopa totajtzitzi cati noja quimacaj Toteco tacajcahalisti para momaquitise, amo teno quipiyaj ipan nopa tacajcahalisti cati tojuanti tijpiyaj. Pampa Jesucristo mijqui ipan icuamapel quej totacajcahalisti ipan taixpamit huan yaya cati nelía tetajtacolquixtia.

¹¹ Sese xihuit nopa hueyi israelita totajtzitzi quicui ieso nopa tapiyali cati quimictijque huan quihuica tiopan calijtic Campa Más Tatzetzelolitic huan quitencahua quej se tacajcahalisti para quixtzacuas tajtacoli. Huan teipa quicui itacayo nopa tapiyali huan quisa ten nopa altepet huan nopona quitatia. ¹² Huajca quej nopa nojquiya elqui ica Jesús. Quena, yaya quisqui ten nopa altepet huan nepa taijyohui huan mijqui para tetapajpacchihuas ica ieso. ¹³ Huajca ma tiquisaca nojquiya huan ma tiyaca altepeteno campaya itztoc campa onca pinahualisti, masque monequis titaijyohuise pampa tiixcaxhua. ¹⁴ Pampa nica ipan ni taltipacti amo onca se altepet cati huejcahuas para nochipa. ¡Amo! Tojuanti tijchiyaj nopa yancuic altepet nepa ilhuicac cati teipa oncas.

¹⁵ Ma nochipa tijtascamatica Toteco ica itapalehuil Jesucristo. Ni tasamatli eltoc nopa tacajcahalisti cati ama quinamiqui tijmacase Toteco. Huajca ica tocamac ma tijhueyichihuaca Toteco talojtzitzi. ¹⁶ Amo xiquelcahuaca para xijchihuaca cati cuali. Xiquinpalehuica sequinoc cati amo teno quipiyaj, pampa ya nopa quicualita Toteco quej elisquía se tacajcahalisti.

¹⁷ Xiquintepanitaca amotayacanhua ipan Toteco huan xiquincahuilica ma quipiyaca tanahuatili ica amojuanti, pampa injuanti quimocuitahuaj amoalma. Injuanti quimatij para se tonali monequi moquetzase iixpa Toteco huan quichihuase cuenta ten nochi cati quichijtoque. Xiquincahuilica para ma quimacase cuenta ten amojuanti ica paquillisti iixpa huan amo ica cuesoli, pampa sinta amo, huajca amojuanti nojquiya antaijyohuise.

¹⁸ Ximotatajtica ica Toteco por tojuanti. Tijmatij ipan toyolo para tinemij xitahuac iixpa huan quej nopa tijnequisquij tijchihuase nochipa. ¹⁹ Huan achi más nijnequi ximotatajtica ica Toteco ama para amo huejcahuas niyas nimechitati.

Quintiochijqui huan quinmajcajqui

²⁰ Ma amechtiochihua Toteco Dios cati temaca tasehuilisti ipan teyolo huan cati quiyolcuic Tohueyiteco Jesucristo. Yaya nopa hueyi tamocuitahuijquet ten imasehualhua. Huan yaya cati quitoyajqui ieso para quipehualtis nopa yancuic camanal sencahuali cati huejcahuas para nochipa. ²¹ Ma amechmaca nochi yajatili cati monequi para anquichihuase nochi cati cuali cati ya ipaquilis. Toteco ica ichicahualis Jesucristo ma quichihua ipan amojuanti nochi cati quipactia. Ma tijhueyichihuaca para nochipa huan amo quema ma tijtamiltica. Quej nopa ma eli.

²² Noicnihua, ica nochi noyolo nimechtajtanía xijtacaquilica nochi cati nimechilhuía nica ipan ni amatajcuiloli para nimechylchicahuas, pampa amo quipiya miyac camanali.

²³ Nojquiya nijnequi xijmatica para ya quiquixtijque toicni Timoteo ten tatzacti. Huan sinta yaya nimantzi ajsis nica, nijhuicas nohuaya quema nimechpaxaloti.

²⁴ Xiquintajpaloca nochi cati amechyacanaj ipan Toteco huan nojquiya nochi sequinoc itatzejtzeloltijca masehualhua Toteco nozona. Toicnihua ipan tali Italia amechontajpalohuaj.

²⁵ Toteco ma quiptiya hueyi iyolo ica amojuanti. Quej nopa ma eli.

Nopa Amatajcuiloli cati Santiago Quiijcuilo

Santiago quintajcuilhui injuanti cati quineltocaque Toteco

¹ Na niSantiago, niinintequipanojca Toteco Dios huan Toteco Jesucristo. Nimechtajcuilhuía huan nimechtajpalohua annoisraelita icnihua ipan Cristo cati anitztoque ipan nopa majtacti huan ome huejhueyi familias ten iteipan ixhuhua Israel. Ama anmosemantoque campa hueli ipan taltipacti.

Nopa talnamiquilisti cati Toteco temaca

² Noicnihua, xipaquica miyac quema amechpanotihuala miyac tamanti taohuicayot. ³ Anquimatij para nopa taohuicayot quiyejyecohua amotaneltoquilis huan quichihua para más xijpiyaca amoyolo para antaijyohuise. ⁴ Huajca xijpiyaca amoyolo para cuali anquijyohuise nochi cati amechpanotihuala para anelise quej masehualme cati moscaltijtoque huan motacachijtoque ipan Toteco. Huan quej nopa anquippiyase senquisa cuali amotalnamiquilistis huan amo teno amechpolos.

⁵ Sinta se ten amojuanti quipolohua más talnamiquilisti para quimatis taya ipaquilistis Toteco ipan inemilistis, ma quitajtani Toteco huan yaya quimacas. Yaya temaca miyac talnamiquilisti huan amo quiajhuas pampa quitajtania. ⁶ Pero quema se quitajtania Toteco, monequi quineltocas para Toteco quipalehuis huan quej nopa, quena, Toteco quipalehuis. Ma amo moilhui: Huelis Toteco techpalehuis o huelis amo. Pampa cati moilhuia quej nopa itztoque quej nopa hueyi at cati yahui campa ajacat quicuatopehua. ⁷ Cati amo quineltoca para temachtitoteco quipalehuis, ma amo mochiya, pampa Toteco amo teno quimacas. ⁸ Nopa masehuali amo temachtitoteco pampa quipiyaca ome italnamiqulistis, huan amo quema quimatis taya melahuac para quichihuas ipan inemilistis.

⁹ Ma paquica toicnihua ipan Cristo cati teicneltzitzi pampa Toteco quinita para nelia miyac ininpati iixpa. ¹⁰ Huan toicnihua cati tominpiyaj ma paquica quema Toteco quinechcapanohua iixpa. Monequi quimachilise para amo huejcahuase ipan ni taltipacti ica inintomi. Itztoque san quej se xochit cati cahuantoc sacapetaixco huan nesi yejyectzi san se talojtzi. ¹¹ Pampa quema pehua tona chichahuac, nopa sacat huaqui. Huan nopa xochit nimantzi pilini huan huetzi, huan ayecmo nesi yejyectzi. Quej nopa nojquiya talochmiqui se masehuali cati tominpiya quema moneltequihua.

Xiqijyohui nochi cati mitzpanotihuala

¹² Toteco quintiochihuas nopa masehualme cati quijyohuiaj huan amo tajtacolchihua quema huala tayejyecoli huan taohuicayot. Toteco quinmacas se corona nepa ilhuicac. Quena, nopa corona eltoc nemilisti para nochipa cati yaya quinmacas quej quintencahuilijtoc quinmacas cati quicneliaj. ¹³ Huan quema se tajtacoli mitzyoltilana xijchihua, amo ximoilhui para Toteco yaya mitzyoltilana para xitajtacolchihua. ¡Amo quema! Amo aqui hueli quiyoltilanas Toteco ma tajtacolchihua huan yaya amo quema quinyoltilana masehualme ma tajtacolchihuaca. ¹⁴ Pero nopa tamanti fiero cati se tacat o se sihuat tahuel quinequi quichihuas ipan italnamiqulistis, ya nopa quiyoltilana huan quicajcayahua. ¹⁵ Huan pampa tahuel quinequi quichihuas cati fiero, teipa tajtacolchihua. Huan quema ya tajtacolchijtoc, teipa quiselia miqulisti.

16 Noicnihua cati nimechicnelía. Amo ximocajcayahuaca. 17 Nochi cati yejyetzti huan cati cuali tijselíaj, techmaca Toteco cati itztoc nepa huejcapa ipan ilhuicac. Yaya cati quichijqui tonati, metzti huan nochi sitalime. Yaya amo quema mopata. Yon amo quema ajsis tonali quema techchihuilis cati amo cuali. 18 Yaya ica ipaquilis techtacatilti quej tiiconehua quema tijneltoaque icamanal cati melahuac. Huan quichijqui para ma tielica quej nopa achtohui nemacti ten nochi masehualme cati teipa elise iconehua.

Quenicatza tijyolpactis Toteco

19 Huajca noicnihua cati nimechicnelía, nimantzi xijtacaquilica cuali quema seyoc amechcamanalhuía. Amo xicamanaltica nimantzi yon amo xicualanica nimantzi. 20 Pampa tocualancayo timasehualme amo techpalehua para tijyolpactise Toteco, o para tiitztose tixitahuaque iixpa Toteco. 21 Huajca xijcahuaca nochi cati fiero huan nochi cati amo cuali cati anquinequij anquichihuase. Ximoechcapanoca huan xixelica nopa cuali camanali cati Toteco quitelijtoc ipan amoyolo, pampa nopa camanali quiipiya chicahualisti para amechmaquixtis.

22 Pero monequi xijchihuaca nochi cati amechilhuía icamanal Toteco. Amo ximoilhuica para cuali para anquicaquise Icamanal Toteco pero amo monequi anquichihuase cati quijjtohua. Quej nopa san anmocajcayahuaj amoselti. 23 Cati quicaqui Icamanal Toteco huan amo quichihua, itztoc quej se cati san motescaita, 24 huan quema ya moitac, quistehua, huan nimantzi quielcahua quenicatza fiero nesiyaya. 25 Pampa itanahuatilhua Toteco eltoc senquisa cuali huan techtojtomaj para huelis timocahuase timajcajtoque. Huan sinta se acaya quintachilijtinemis itanahuatilhua huan amo quielcahuas, pero mojmosta quichijtinemis cati quijjtohuaj, huajca Toteco quitiochihuas nopa masehuali.

26 Sinta se acaya quijjtohua quineltoca Toteco, pero amo momocuitahuía ica cati quijjtohua; huan san ten hueli camanalti, huajca yaya san moyolcayahuaca. Amo teno ipati itaneltoquil. 27 Cati nelía quitepanitaj Toteco Dios huan quiipiyaj inintaneltoquilis cati senquisa cuali iixpa, quichihuaj ya ni: quinpalehuíaj coneme cati icnotzitzti, huan sihuame cati taijyohuíaj cati mijque inihuehuejhua, huan nojquiya momocuitahuíaj ica cati amo cuali ipan ni taltipacti para ma amo quinyoltilanas ma tajtacolchihuaca.

2

Ayecmo xiquinchicoicnelica masehualme

1 Noicnihua cati nimechicnelía, ¿quenicatza huelis anquijjtose para anquineltocatoque Tohueyiteco Jesucristo cati nelpano hueyi, huan noja anquinchicoicnelíaj masehualme? 2-3 Quema ajsi se masehuali ipan amotasentilis ica ianillo ten oro huan ica iyoyo cati cuali, anquiselíaj ica cuali huan anquihuíaj: “Ximosehui nica ipan ni cuali siyaj.” Pero quema ajsi seyoc masehuali cati teicneltzi ica iyoyo cati sosoltic, anquihuíaj: “Ximoretzto nozona o ximosehui talchi.” 4 ¿Amo anquijitaj para anquinchicoicnelíaj masehualme? Anmochihuaj quej se tetajtolsencajquet cati quijjtohua ajquiya cuali huan ajquiya amo cuali. Pero ya nopa amo cuali pampa anquicnelíaj se masehuali san por cati cuali motalilía.

5 Noicnihua cati nimechicnelía, xijtacaquilica. Toteco quintapejpenijtoc cati teicneltzitzti para achi más nimantzi quineltocase. Huan injuanti quiselise cati inintaxtahuil nepa campa Toteco tanahuatía, pampa yaya quej

nopa techtencahuilijtoc nochi tojuanti cati tiquicnelíaj. ⁶ Pero amojuanti anquinpinahuatlíaj cati teicneltziti. ¿Para ten? ¿Amo anquimachilíaj para nopa masehualme cati tominpiyaj itztoque cati achi más amechchihuillíaj cati amo cuali huan achi más amechhuahuatatzaj campa tequicali? ⁷ Injuanti cati tominpiyaj itztoque cati tahuel quitajilhúaj itoca yejyectzi Tohueyiteco Jesucristo cati amechchijqui aniaxcahua.

⁸ Nelía cuali sinta anquitoquillíaj nopa hueyi tanahuatili ipan Icamanal Toteco cati quijtohua: “Xiquinicneli sequinoc quej timoicnelía moselti.”

⁹ Pero sinta anquintapejpeníaj ajquiya injuanti anquinicnelise, huajca antajacolchihuaj huan anquinxpanoj itanahuatilhua Toteco, pampa Toteco quinequi xiquinicnelica nochi masehualme. ¹⁰ Sinta se masehuali quitoquillía nechca nochi cati quijtohua itanahuatilhua Toteco, huan san quixpano ipan se tamanti, nopa masehuali quihuica tajtacoli san se quej se cati quinxpanotoc nochi nopa tanahuatilme. ¹¹ Pampa Toteco cati quijto ma amo timomecatica, nojquiya quijto ma amo titemictica. Yeca sinta amo timomecatijtoc, pero titemictijtoc, huajca titaixpanoquet. Huan tijhuica tajtacoli ica nochi itanahuatilhua Toteco. ¹² Huajca ica nochi cati anquijtohuaj huan ica nochi cati anquichihuaj, xiquelnamiquica ajsis se tonali quema Toteco amechtajtolsencahuas. Quitachilis sinta cati tijchijtoque quiaxilía cati technahuatía ma tijchihuaca nopa tanahuatili ten taicnelijcayot. Huan nopa tanahuatili ten taicnelijcayot techtojtomas para huelis timocahuase timajcaytoque. ¹³ Huan sinta amo anquintasojtaj sequinoc masehualme, huajca Toteco amo amechtasojtas quema amechtajtolsencahuas. Pero sinta anquintasojtaj sequinoc, antatanise ipan nopa tonali quema Toteco tetajtolsencahuas.

Ajquiya quineltoca Toteco huan ajquiya quichihua cati cuali

¹⁴ Noicnihua, amo teno ipati iixpa Toteco sinta se masehuali san quijtohua quineltoca Toteco, pero amo quinpalehuía sequinoc huan quej nopa quinextía para nelía melahuac quineltoca Toteco. Toteco amo quimaquixtis se masehuali cati quej nopa quineltoca, huan amo teno más quichihua. ¹⁵ Sinta se toicni amo quipiya iyoyo o amo quipiya ten ica panos, monequi tijpalehuise. ¹⁶ Sinta san tiquilhuisse: “Xiya ica paquillisti, xitacua cuali, huan ximopiqui cuali pampa taseseya”, pero amo teno tijpalehuíaj ica cati monequi para itacayo, huajca san tapic tocamanal. Amo teno quipalehuijtoc. ¹⁷ Ijquiyampa nojquiya ica cati quijtohua quineltoca Toteco. Sinta amo quichijtinemi tamanti cati cuali, huajca amo teno ipati itaneltoquil pampa mictoc huan amo hueli quipiya itajca.

¹⁸ Sinta se quijtohua para sequij masehualme quipiya taneltoquili huan sequinoc quichihuaj tamanti cati cuali huajca na niquilhuis: ¿quenicatza hueli technextilis motaneltoquillis huan amo tijchihua cati cuali? Pero ica na, quena, huelis nimitznextilis nijneltoca Toteco por nopa cuali tamanti cati nijchijtihuala. ¹⁹ Ta tiquijtohua tijneltoca para itzotc setzi Dios. Cualtitoc. Pero nojquiya hasta iajacahua Amocualtatcat quimatij para itzotc setzi Dios huan huihuipicaj iixpa ica majmajti. ²⁰ ¿Amo tijmachilía? ¿Tihuihuitic? Sinta se quijtohua quineltoca Toteco huan amo quichihua tamanti cati cuali, huajca san tapic icamanal pampa amo melahuac quineltoca Toteco. ²¹ ¿Amo anquielnamiquij para tohuejcapan tata Abraham mochijqui xitahuac iixpa Toteco pampa quichijqui cati Toteco quihui? Yaya quineltocac hasta quimacatosquía icone, Isaac, quej se tacajcahualisti ipan taixpamit quej Toteco quinhuatijtoya. ²² Huajca Abraham quinexti para nelía

motemachiyaya ipan Toteco para nochi huelqui quiitase pampa quichijqui cati Toteco quiilhui huan yeca quinexti para nelía ajsitoc itaneltoquilis. ²³ Yeca quisqui melahuac campa ijcuilijtoc ipan Icamanal Toteco campa quijtohua para Abraham quineltocac Toteco, huan yeca Toteco quiitac para itztoya xitahuac iixpa. Huan sequinoc quitocaxtalijque Abraham “ihuampo Toteco”.

²⁴ Huajca xijmatica ya ni; Toteco quichihua se masehuali xitahuac iixpa pampa quichihua cati cuali. Amo mochihua xitahuac iixpa san pampa quijtohua quineltoca Toteco. ²⁵ Ijquiyampa nojquiya elqui ica Rahab cati itztoya huejcajquiya huan tacanemiyaya. Toteco quichijqui xitahuac iixpa por cati cuali quichijqui cati quinexti itaneltoquilis; pampa Rahab quinseli nopa israelitame cati yajque tachiyatoj ipan ital huan ixtacatzi quintitanqui ipan seyoc ojti para quinmanahuis. ²⁶ Ya anquimatij sinta se masehuali amo quipiya itonal ipan itacayo, huajca ya mictoc. Huan se masehuali cati quijtohua quineltoca Toteco, pero amo quichihua tamanti cati cuali, ya mictoc itaneltoqui.

3

Tonenepil

¹ Noicnihua, amo cuali para miyaqui ten amojuanti anquinequise anochihuase tamachtiani ten Icamanal Toteco. Achi más monequi para tojuanti cati titamachtía Icamanal ma tijchihuaca cati nelía cuali pampa Toteco techtequitachilis tojuanti cati titamachtíaj Icamanal achi más chichahuac que sequinoc taneltocani. ² Nochi timasehualme quemantica timocuapolohuaj. Pero sinta se masehuali hueli monahuatis para amo quema quiixpanos seyoc ica cati quijtohua, huajca yaya nelía se cuali masehuali huan nojquiya cuali hueli quinahuatía itacayo para amo tajtacolchihuas. ³ Ica se cahuayo tijtalilíaj se tepos camachali pisiltzi huan ica ya nopa, nopa hueyi cahuayo techneltoquilía huan yahui campa tijnequij ma yahui. ⁴ Nojquiya ica huejhueyi cuaacalme ipan hueyi at, masque taajaca chichahuac huan nopa ajacac quinequi quihuicas, nopa cuaacali san yahui campa iteco quinequi ma yahui, pampa iteco quinahuatía ica nopa teposti pisiltzi cati eltoc itantita nopa cuaacali. ⁵ Ijquiyampa nojquiya ica tonenepil, pampa masque pisiltzi ipan totacayo, mohueyimati ica cati hueli quichihua. Ica tonenepil huelis tiquijtose cati tahuel quincocos sequinoc. Se piltilemectzi cati pehua pilquentzi, huelis quiajsis se hueyi cuatitamit, huan quintamitatis nopa cuame. ⁶ Huan tonenepil eltoc quej nopa piltilemectzi. Masque pisiltzi tonenepil, cati tiquijtohuaj huelis quinnempolos miyaqui campa hueli. Huan masque tonenepil eltoc se piltamantzi ten totacayo, nopa cati quijtohua huelis quinenpolos nochi totacayo. Huan nopa Amocualcat ten napa micta techyolajcomana para ma tiquijtoja ten hueli, pampa quinequi ma titetajilhuaica hasta ma tijtamisosoloca tonemilis.

⁷ Masehualme huelij quinmaxojtilíaj nochi tamanti tapiyalme huan to-tome. Huan hasta quinmaxojtilijtoque nochi tamanti cohuame huan tamanti cati itztoque ipan hueyi at. ⁸ Pero amo aqui hueltoc quimaxojtilía ininenepil masehualme huan nochi cati quijtohuaj. Masehualme amo hueli quinahuatíaj ininenepil para ma amo molini pampa tahuel quinequij quijtose miyac tamanti cati fiero. Eltoc quej se cohuat cati temitoc ica itencococa. ⁹ Ica tonenepil tijhueyichihuaj Toteco Totata huan ya nopa nelía cuali, pero nojquiya ica tonenepil tiquintelchihuaj sequinoc masehualme cati Toteco quinchijchijtoc quej ya itachiyalis, huan ya nopa nelía fiero.

¹⁰ Huajca ica san setzi tonenepil tiqijtohuaj tamanti cati cuali huan tamanti cati fiero. Noicnihua, amo quinamiqui ya nopa. ¹¹ Ipan se ameli amo quisa cuali at se talojtzi huan teipa poyec at. ¹² Noicnihua, se lalax cuahuit amo hueli temaca mangos. Yon se xocomeca tzonti amo hueli temaca lalax. Campa meya poyec at, amo huelis meyas cuali at. Huajca amo quinamiqui para tonenepil quijtos cati amo cuali.

Yaya cati nelía talnamiqui iixpa Toteco

¹³ Sinta nelía antalnamiquij huan anquimachilíaj iojhui Toteco, huajca xijnexica para ancuajcualme huan xijchihuaca miyac tamanti cati cuali. Huan sinta nelía antalnamiquij, huajca amo ximohueyimatca ica cati anquichihua. Ijquiyampa quena, antenextilise nelía anquipiyaj talnamiquilisti. ¹⁴ Pero sinta anmoxicohuaj huan ipan amoyolo anquinequij anmohueyitalise, huajca amo ximohueyimatca huan amo ximoistacahuica pampa amo nelía anquipiyaj talnamiquilisti. ¹⁵ Toteco cati itztoc ilhuicac amo amechmacatoc se talnamiquilisti quej nopa. Nopa talnamiquilisti cati fiero hualajqui ten ni taltipacti. Quej nopa tachihuaj masehualme nica, pampa nopa Amocualtatcat quinmaca nopa tamanti talnamiquilis cati fiero. ¹⁶ Pampa quema masehualme moxichuaj huan san quinequi mohueyitalise iniseltitzitzi, huajca amo teno quisa cuali huan quichihua miyac tamanti cati amo cuali.

¹⁷ Pero nopa talnamiquilisti cati Toteco temaca amo quej nopa. Masehualme cati quipiya nopa talnamiquilisti cati Toteco temaca, quichihua cati senquisa cuali. Tayoltalía huan teicnelía. Quipiyaj iniyolo. Tetasojtaj huan techihuilíaj cati cuali. Cati quipiyaj italnamiquilis Toteco amo quinchicoicnelíaj masehualme, yon amo quichihua ome inixayac. ¹⁸ Huan campa ni masehualme yahuij onca tasehuilisti pampa tayoltalíaj quichihua cati cuali.

4

Amo xiquicnelica ni taltipacti

¹ Anmotehuíaj huan anmonajnanquílíaj se ica seyoc, pero ¿para ten quej nopa? ¿Ica taya pehua? Quej nopa anquichihua pampa ipan amotalnamiquilis anquinequij miyac tamanti cati amo cuali. ² Anquinequij cati sequinoc quipiyaj huan quema amo anhuelij anquincuilíaj, huajca anquimictíaj. Anquixtočaj pampa sequinoc quipiyaj tamanti cati anquinequij huan yeca pehua anquinnajnanquílíaj huan anmohuilanaj se ica seyoc. Pero amo anquipiyaj nopa cati anquinequij pampa amo anquítajtáníaj Toteco ma amechmaca. ³ Huan quemantica, masque anquítajtáníaj Toteco ma amechmaca se tamanti, yaya amo amechmaca pampa anquítajtáníaj ica se amoyolo amo cuali, huan san para anquiahuilsoyolose cati anquítajtáníaj huan san anquinequij anquitequihuse ica cati amechpactis.

⁴ Amojuanti ya anquicajtoque Toteco quej se tacat cati quicahua isihua para momecatis. ¿Amo anquimatij, sinta anmohuampojchihuase ica cati eltoc ipan ni taltipacti, huajca anmochihuase aniculancaitacahua Toteco? Sempa nimechilhuis, cati hueli cati quinequi mohuampojchihuas ica ni taltipacti, mochihua iculancaitaca Toteco. ⁵ ¿Huelis anmoilhuíaj amo teno quinequi quijtos campa Icamanal Toteco quijtohua: “Itonal Toteco cati Toteco quitaltitoc para ma mochahua ipan toyolo techtasomati huan quinequi ma amo tiquicnelica seyoc, san Toteco?” ⁶ Pero Toteco nelía hueyi iyolo ica tojuanti, huan yeca talojtzitzi techpalehuía para ma amo tihuetzica. Yeca Icamanal Toteco quijtohua: “Toteco amo quinequi quintas cati mohueyimatij,

pero quiptiya hueyi iyolo ica injuanti cati moechcapanohuaj iixpa.”⁷ Huajca ximotemacaca ica Toteco. Ximoquetzaca antemachme iixpa Amocual-tacat huan amo xijchihuaca cati yaya quinequi xijchihuaca, huan yaya amechtalcahuis.⁸ Ximonechcahuica campa Toteco huan yaya amechnechcahuis. Antajtacolchihuani, xijcahuaca amotajtacolhua. Huan amojuanti cati anquiptiyaj ome amotalnamiquilis, ximoyolpajpacaca.⁹ Ximocuesoca miyac huan xichocaca ica cati anquichihuaj. Anpaquiyayaj ipan amotajtacolhua, pero ama ma mocuepa amotahuetzquilis ica choquisti. Huan amopauilis ma mocuepa tequipacholi por nopa tajtacoli cati anquichijtoque.¹⁰ Ximoechcapanoca iixpa Toteco huan yaya amechhueyitalis.

Amo xiquintajtolsencahuaca amoicnihua

¹¹ Noicnihua, amo ximotajijlhuica se ica seycoc. Sinta se acajya quitajijlhuía iicni ipan Cristo huan quitocaxtía amo cuali, huajca quitajijlhuía itanahuatil Toteco cati techilhuía ma timoicnelica, huan quitocaxtía nopa tanahuatili amo cuali. Pero tojuanti amo tijpiyaj totequi para tijtajtolsencahuase nopa tanahuatili, huan tijquijtose sinta cuali o amo cuali. Tojuanti totequi para tijneltocase cati nopa tanahuatili technahuatía.¹² Itzoc san setzi cati techmaca nopa tanahuatili, yaya Toteco Dios, huan san yaya quiptiya tequiticayot para tetajtolsencahuas. San ya hueli temaquixtis o fetzontamiltis. Pero amojuanti, amo anquiptiyaj tequiticayot para anquintajtolsencahuase sequinoc.

Tojuanti amo tijmatij taya oncas mosta

¹³ Xijtacaquilica noicnihua. Sequij ten amojuanti anquijtohuaj: “Ama o mosta tiyase campa nopa altepet huan timocahuase nopona se xihuit. Tijpantise se tequit huan tijtanise cuali tomi.”¹⁴ Pero nelía amo cuali para ancamanaltij quej nopa. Pampa amo anquimatij yon quentzi taya amopantis mosta. Amonemilis san huejcahuas se talojtzi. Eltoc quej se mixti cati monextía se talojtzi ica ijnaloc huan teipa nimantzi ixpolihui.¹⁵ Huajca achi cuali anquijtohuaj: “Sinta Toteco quinequi, huajca tiitztose huan titequitise, o tijchihuase ni tamanti o nopa tamanti.”¹⁶ Pero ama, ancamanaltij quej cati nelía mohueyimatij huan tahuel anmotemachíaj ipan amojuanti amoselti, huan ya nopa amo cuali.¹⁷ Huan xiquelnamiquica, sinta se acajya quimati cati xitahuac para quichihuas, pero amo quichihua, huajca tajtacolchihua.

5

Santiago quincamanalhui cati tominpiyayaj

¹ Xijtacaquilica antominpiyani. Xichocaca huan xitahuejchihuaca por nopa taijyohuulisti cati amechajsis.² Nochi nopa tamanti cati anquiptiyaj, ya palantinemi; huan ya cualo nochi amoyoyo cati yejyectzi.³ Amotomi ten oro huan plata ya moxixtoc ipan amobolsas, huan ya nopa quinextía para amo anquinpalehuijtoque cati teicneltziti. Yeca amotomi amechpolihuiltis quej tit quitzontamiltia cati quitatía. Quena, anquiptiyaj miyac tamanti cati cuali nica, pero nopa miyac tamanti amechtatelhuis ipan nopa tayacapan tonali para amo antepalehuijtoque.⁴ Xijtacaquilica antominpiyani, amo ajsitoc anquintaxtahuijtoque cati amechpalehuijtoque para anpixcase ipan amomil. San anquincajcayajtoque. Huajca ama injuanti amechtelhuíaj iixpa Toteco Cati Quiptiya Nochi Chicahualisti.⁵ Ipan nochi amonemilis ipan ni taltipacti, san anquichijtoque cati amechpactía para ixhuis amotaneguilis. Antapijpiyani anitztoque quej pitzome cati quiptiyaj miyac tacualisti

mojmosta. Pero quej nopa eltoc para ma motomahuaca para nopa tonal quema ininteco quinmictis. ⁶ Anquintelhuijtoque huan anquinmictijtoque masehualme cati cuajcualme cati amo teno quichijtoque, yon amo monahuijtoque.

Xijpiyaca amoyolo huan ximotatajtica ipan Toteco

⁷ Pero amojuanti cati annoicnihua, xijpiyaca amoyolo ica nochi cati anquijyohuaj ipan ni tonali quema tijchiyaj para sempa hualas Tohueyiteco Jesucristo. Ximoilhica quej se tojquet cati quitoca xinachti ipan imil, huan quipiya iyolo hasta quema taquiyahuis achtohui para tocas huan teipa quipiya iyolo hasta sempa huetzis at para moscaltis. Huan teipa quichiya más tonali para oncas pixquisti. ⁸ Huajca amojuanti nojquiya xijpiyaca amoyolo huan ximoyolchicahuaca pampa amo huejcahuas para sempa hualas Toteco. ⁹ Noicnihua, amo ximotajilhica se ica seyoc para amo aqui monequis amechtajtolsencahuas, pampa nopa tetajtolsencajquet amo huejcahuas para ajsis. Ya monechahuijtoc campá caltemit. ¹⁰ Noicnihua, ximoilhica ten itajtolpanextijcahua Toteco cati huejcaquiya itztoyaj. Inijuanti tayolmelahuayayaj cati Toteco quinilhuyaya huan quipixque iniyolo masque taijyohuiyayaj. ¹¹ Tijmatij injuanti ama nelía paquij pampa quijyohuique cati quinpanoc. Ya anquimatij quenecatza Job faijyohui. Huan anquimatij para teipa Toteco nelía quichihuili cati cuali pampa Toteco tahuel teicnelía huan tetasoja.

¹² Pero noicnihua, seyoc camanali cati nelía ipati nimechilhúa. Amo xitatestigojquetzaca para sequinoc más amechnehtocase. Amo xijtestigojquetzaca ilhuicacti, yon taltipacti. Amo aqui xijtestigojquetzaca. ¡Amo! San xiquijtoaca “quena” quema anquinequij anquijjtose, “quena”. Huan xiquijtoaca “amo” quema anquinequij anquijjtose “amo”. Ijquiyampa Toteco amo amechtatazactilts por amocamanal.

¹³ Sinta itztoc campá amojuanti se cati taijyohuía, huajca ma motatajti ica Toteco. Huan cati paquij ipan Toteco, ma huicaca cati quihueyichihua Toteco. ¹⁴ Sinta itztoc se cati mococohua, ma quinnotza nopa huehue tacame cati tayacanaj ipan amotiopa ten taneltocani, huan ma motatajtica ica Toteco por ya cati mococohua, huan ma quipoloca aceite ipan itoca* Tohueyiteco Jesucristo. ¹⁵ Huan quema anmotatajtise ica Toteco para ma quichicahua nopa cocoxquet, xijneltocaca para temachti Toteco quichihuas, huan quichicahuas. Quena, Toteco quitananas nopa cocoxquet huan sinta nopa cocoxquet tajtacolchijtoc, Toteco quitapojpolhuis.

¹⁶ Huajca ximopohuilca se ica seyoc taya taixpanoli anquichijtoque. Huan se ica seyoc ximotatajtica ica Toteco para Toteco amechchicahuas. Pampa quema se masehuali cati itztoc xitahuac iixpa Toteco quitajtania Toteco chicahuac por se tamanti, Toteco quichihua. ¹⁷ Elías, itajtolpanextijca Toteco, nojquiya elqui se tacat quej tojuanti huan quitajtani Toteco chicahuac para ma amo huetzi at. Huan amo huetzqui at ipan ni taltipacti para eyi xihuit huan tajco. ¹⁸ Huan teipa sempa quitajtani Toteco ma huetzi at, huan huetzqui at chicahuac huan nochi tatocti sempa temacac itajca.

¹⁹ Noicnihua, sinta se quicajtejtoc Icamanal Toteco cati melahuac, huan seyoc quipalehuía ma tacuepili ica Toteco, ²⁰ huajca xijmatica para yaya cati quipalehuía nopa tajtacolchijquet para ma tacuepili huan ma quicajtehua iohui cati amo cuali, quimanahuijtoc ialma para amo quipantis miqulisti. Huan nopa masehuali quipantis tapojpolhuili pampa moyolpatatoc.

* 5:14 5:14 Ica itequiticayo.

Nopa Achtohui Amatajcuiloli cati Pedro Quiijcuilo

Pedro quintajcuilhui taneltocani cati mosemantoyaj campa hueli

¹ Na niPedro niitayolmelajca Tohueyiteco Jesucristo. Nimechtajcuil-huía amojuanti cati anquicajtejtoque amotal huan anyajtoque anitztotij campa hueli ipan talme Ponto, Galacia, Capadocia, Asia huan Bitinia. ² Huejcajquiya Toteco Totata amechtapejpeni pampa ipa quimatiyaya taya panosquía teipa. Huan Itonal Toteco amechiyocacajtoc para anelise antatzelolliquite iixpa. Yeca anquineltocatoque Jesucristo huan amechyolpaj-pactoc ica ieso cati quitoyajqui por nochi tojuanti. Ma Toteco quiyia hueyi iyolo ica amojuanti huan ma amechmaca miyac tasehuilisti ipan amoyolo.

Tonemilis ipan Jesucristo

³ Ma tijhueyichihuaca Toteco Dios yaya cati iTata Tohueyiteco Jesucristo pampa miyac techtasojta, huan yeca techcatiltijtoc sempa huan techhij-toc ma tijpiyaca tonemilis cati yancuic. Huan nochi cati tijpiyaj eltoc pampa yaya quiyolcuic Jesucristo quema mictoya. Huan ama timochixtoque taya techmacas teipa, ⁴ pampa nepa ilhuicac techchiya tamanti cati tahuel cuali cati Toteco quiajococ para techmacas teipa. Huan nopa tamanti huejcahuas para nochipa. Amo palanis, yon nenpolihuis, yon sosolihuis. ⁵ Ama pampa anquineltocaj Jesucristo, Toteco amechmocuitahuijtinemis ica ichicahualis hasta ajsis nopa itamiya tonali. Huan ipan nopa tonali amechnextilis nochi cati amechchiya nepa pampa Toteco amechmaquixtijtoc ten amotajtacol-hua.

⁶ Huajca xiyolpaquica, masque ama para se talojtzi monequi anquijjy-ohuise miyac tamanti tayejyecoli. ⁷ Quena, quej masehualme quiyejyecohuaj oro ipan tit para quiyiyase oro cati senquisa cuali, quej nopa Toteco nojquiya quichihua ica amojuanti. Yaya quicahuilía para ma huala taijy-ohuilisti para quiyejyecos amotaneltoquilis para quiitas sinta senquisa an-quineltocaj. Quema Toteco quiyejyecohua amotaneltoquilis, más quipatiita huan amo quej oro cati más cuali. Huan sinta Toteco quiitas para senquisa cuali anquineltocaj Jesucristo, huajca ipan nopa tonali quema sempa hualas Tohueyiteco Jesucristo yaya amechhueyimatis, amechhueyitalis huan yaya quinnexilis nochi quenecatza miyac amechtepanita.

⁸ Anquicnelíaj Jesucristo masque amo quema anquizztoque. Huan an-quineltocaj masque amo hueli anquijaj ama. Nelía hueyi nopa paquilisti cati anquiyiyaj ipan amoyolo hasta amo hueli anquinilhuise sequinoc quenecatza tahuel anpaquij. ⁹ Huan pampa anmotemachijtoque ipan ya, yaya quimaquixti amoalma para amo polihuis para nochipa.

¹⁰ Itajtolpanextijcahua Toteco huejcajquiya quiijcuilojque ten panosquía teipa huan techilhuijque quenecatza Toteco quiyiyasquía hueyi iyolo ica tojuanti ipan ni tonali. Pero itajtolpanextijcahua amo quimachiliyayaj cuali ten quiijcuilohuayayaj. Huajca quitemojque huan momachtijque para quimachilise quenecatza Toteco techtajtacolquixtisquía ama. ¹¹ Huan Itonal Tohueyiteco Cristo itztoya ipan injuanti, huan quinmacayaya inin-talnamiquilis para huelque quiijcuilojque huejcajquiya quenecatza Cristo taijyohuisquía ipan ni tonali. Huan huejcajquiya nojquiya quiijcuilojque

quenicatza Cristo quipiyasquía ihueyitilis teipa, quema tamisquía taijy-ohuía. Huan itajtolpanextijcahua Toteco quinequiyayaj quimatise ajquiya yaya cati taijyohuisquía teipa huan ipan taya xihuit. ¹² Toteco quinnextili para nopa tamanti cati quiijcuilohuayayaj amo panosquía ipan nopa tonali quema injuanti itztoyaj, pero elqui inintequi para tayolmelahuase cati panos miyac xihuit teipa ica nochi tojuanti. Huan yeca teipa Toteco quititanqui Itonal ten ilhuicac, huan nopa masehualme yajque ica ichicahualis Itonal para amechnextilise cati quinequi quiijtos Icamanal Toteco cati nopa tajtolpanextiani quiijcuilojque huejcajquiya. Amechnextilijque nochi nopa tamanti nelcujcualtzi cati Toteco techchihuilijtoc ipan Cristo huan hasta ama nopa ilhuicac ehuan no quinequij quitachilise quenicatza panotiya ni tamanti.

Toteco technotztoc ma tiyaca ipan se ojti xitahuac

¹³ Huajca xijmocuitahuica amotalnamiquilis para anmoyolilhuisse cati xitahuac. Cual ximonahuatica. Huan ica paquilisti ximochiyaca hasta anquiselise nochi nopa tatiochihualisti cati Toteco amechmacas quema sempa hualas Jesucristo. ¹⁴ Xijchihuaca cati Toteco amechchihuía pampa aniconehua. Amo xijchihuaca nopa tamanti amo cuali cati anquichihuayayaj achtohuiya quema amo feno anquimachiliyayaj ten icamanal Toteco. ¹⁵ Tatzejtzeltotico Toteco cati amechnotztoc para xiitzoca aniconehua; huajca amojuanti nojquiya xiitzoca antatzejtzeltotique huan xijchihuaca cati senquisa cuali.

¹⁶ Pampa ijcuilijtoc ipan Icamanal Toteco pampa yaya quiijto: “Monequi xiitzoca antatzejtzeltotique pampa na nitatzejtzeltotico.”

¹⁷ Sinta anquitocaxtíaj Toteco “Totata” quema anquinojnotzaj, cualtitoc, pero monequi nojquiya anquimacasisse anquiixpanose. Quej nopa monequi anquitepanitase nochi tonali quema noja annemij ipan ni taltipacti pampa anitztoque quej seyoc altepef ehuan. Yaya amo amechchicoicnelis quema tetajtolsencahuas. Quintajtolsencahuas nochi masehualme quej cati cuali huan cati amo cuali quichijtoque. ¹⁸ Achtohuiya anquitoquiliyayaj cati quichijque tohuejcapan tatahua, pero teipa anquimatij Toteco taxtajqui para amechmaquixtis ten nopa nemilisti cati amo ipati cati anquixtoyaj. Pero Toteco amo taxtajqui para amechmaquixtis ica tamanti cati panotehua quej tomi ten plata o ten oro. ¡Amo! ¹⁹ Yaya taxtajqui ica ieso Jesucristo cati quitoyajqui quema mijqui. Huan imiquilis Jesús nelpano hueyi ipati. Quena, quej masehualme quimictíaj se pilborregoxti cati amo teno quichijtoc para se tacacahualisti, nojquiya Cristo mijqui por amojuanti masque amo quipixqui yon se itajtacol. ²⁰ Huejcajquiya quema noja ayemo oncayaya taltipacti, Toteco Dios quitequimacac Cristo para ma huala ipan taltipacti huan ma miqui por tojuanti cati techicnelía miyac. Huan yeca quej nopa panotoc ipan ni tonali.

²¹ Por cati Cristo amechchihuilijtoc, anmotemachijtoque ipan Toteco Dios. Huan pampa Toteco quiyolcuic Cristo quema ya mictoya huan quimacac ihueyitilis, ama amojuanti hueli anquineltoxase Toteco huan anmochiyase ipan ya ica temachili.

²² Ama anquichihuaj cati quiijtouhua nopa camanali cati melahuac ten Toteco, huan yaya amechyolpajpactoc para huelis anquicnelise amoicnihua. Huajca nelía ximoicnelica se ica seyoc ica amoyolo cuali iixpa Toteco, ²³ pampa ya antacatque sempa. Se tonali tamis nopa nemilisti cati pejqui quema antacatque ten amonana, pero amo quema tamis nopa nemilisti yancuic cati ama anquipiyaj pampa anquineltoxatoque Icamanal Toteco,

pampa Icamanal Toteco yoltoc huan mocahuas para nochipa. ²⁴ Ijcuilijtoc ipan Icamanal Toteco quej ni:

“Nochi masehualme ipan ni taltipacti itztoque quej sacat cati amo huejcahua.

Huan nochi iniyejyejca tamantzitzi cati masehualme quiپیayaj eltoc quej xochime cati pilinij.

Nochi sacat huaqui huan nochi xochit huetzi,

²⁵ pero Icamanal Toteco mocahua para nochipa.”

Huan ya ni Icamanal cati amechcamanalhuijtoque.

2

¹ Huajca ayecmo xitecualancaitaca. Ayecmo xitacajcayahuaca. Ayecmo xijchihuaca ome amoxayac. Ayecmo xiquinchicoitaca sequinoc, yon ayecmo xiquintajilhua. ² Quej pilconetzitzi quinequij lechi, tahuel xijnequica Icamanal Toteco ica nochi ichicahualis para ica anmoscaltise ipan Toteco cati amechmaquixtijtjoc, ³ huan ya anquimatij para hueyi iyolo ica amojuanti.

Cristo nopa hueyi tet

⁴ Huajca ximonechcahuica campa Cristo, yaya cati quiپیay nemilisti ipan ya. Masque masehualme amo quiselijque, Toteco Dios quitapejpeni Cristo huan quijto para yaya cati más ipati. Quena, yaya itztoque quej nopa tet cati más hueyi huan más monequi quema masehualme quichihuaj se tepancali. Nopa hueyi tet monequi yas calesquina huan ipan ya tatzquise nochi sequinoc teme ipan nopa cali. ⁵ Titaneltocani ya tijپیayaj nemilisti yancuic huan tiitztoque quej nopa sequinoc teme cati ica Toteco quichihua nopa cali cati amo moita. Monequi timotatzquilise ipan Cristo cati mocahua calesquina. Tiitztoque titotajtizti cati titatzejtzeltollique. Huan totequi eltoc para tijmacase Toteco tacajcahualisti. Pero amo tijmacaj tacajcahualisti cati masehualme hueli quiiitase. Totacajcahualis eltoc para tijtequipanose, huan tijchihuase nochi cati technahuatía. Huan Toteco quiselis cati tijmacase pampa Jesucristo ya techpajpactoc. ⁶ Ijcuilijtoc ipan Icamanal Toteco campa Toteco quijto ya ni ten Cristo, huan quijtohua:

“Quej se calchijquet achtohui quitapejpenía nopa hueyi tet cati yas calesquina huan ipan quiquetzas ichaj,

na ya niquiyocatalijtjoc ipan altepet Jerusalén yaya cati nijtapejpenijtoc para elis cati más ipati ipan nochaj.

Huan cati quineltoacas amo quema pinahuas pampa quineltoctoc.”

⁷ Quena, tojuanti cati tijneltocej Cristo, tiquitaj para tahuel hueyi ipati. Pero sequinoc cati amo quineltocej, san quihuejcamajcahuaj Cristo quej amo teno ipati. Yeca elis quej ni cati Toteco quijtohua ipan Icamanal:

“Nopa hueyi tet cati nopa calchihuaní quicuamajcajque huan quijtojque amo teno ipati,

yaya nopa cati Toteco quitapejpeni para elis cati más monequi ipan ichaj huan yas calesquina para quimacas tetili nopa cali.”

⁸ Huan nojquiya Toteco camanalti ten Cristo ipan Icamanal campa quijtohua:

“Yaya elis quej se tet campa masehualme motepotanise huan huetzise.”

Quena, masehualme motepotanise huan polihuisse pampa amo quineltocej yon amo quichihuaj cati quijtohua Icamanal, huan quej nopa quipantise nopa tatzacuilitilisti cati Toteco ipa quitalijtoya para quinajsis.

Injuanti cati iaxcahua Toteco

⁹ Pero amojuanti amo anmotepotaniytoque ipan Icamanal. Anitztoque masehualme cati Toteco amechtapejpenijtoc ten huejcajquiya. Amechchitoc quej se hueyi grupo ten totajtztzi cati quitequipanohuaj. Anitztoque quej se hueyi altepet ten masehualme tatzetzelolliquite. Quena, animasehualhua cati Toteco amechcojtoc para anelise aniaxcahua. Huan amechtequimacatoc xiquinilhuica sequinoc masehualme quenicatza ihueyitilis Toteco cati amechnotzqui quema annejnemiyayaj ipan ojti cati amo cuali huan campa tzintayohuilof. Ama amechchijtoc xinejnemica campa itaahuil cati cuajcualtzi. ¹⁰ Achtohuiya amo aneliyayaj imasehualhua, pero ama quena, animasehualhua Toteco. Achtohuiya amo teno anquimatiyayaj ten itasojtacayo Toteco, pero ama anquiiatj para Toteco amechtasojta miyac.

Xinemica quej Toteco quinequi

¹¹ Noicnihua cati nimechicnelia. Anitztoque ipan ni taltipacti pero amo nica anehuani, san anpaxalohuani. Huajca amo xijchihuaca cati amo cuali cati anquinequij anquichihuase, pampa nopa tamanti quitehua amoyolo para xijcahuaca Toteco. ¹² Ximomocuitahuica miyac para annejnemise xitahuac inihuaya cati amo quineltocaj Toteco. Masque ama amechtaijilhuiaj huan quijtohuaj amo ancuajcualme, teipa quiiatase nochí cati cuali anquichijtinemij huan quineltocase Toteco. Quej nopa injuanti nojquiya quihueyichihuase Toteco ipan nopa tonali quema yaya hualas para tetajtolsencahuas.

¹³ Toteco quinequi xijtepanitaca nochí tequit ten gobierno huan nojquiya xijtepanitaca nopa hueyi tequitiquet cati quipiya tequiticayot. ¹⁴ Nojquiya xiquintepanitaca nochí tequichihuani pampa Toteco quinmacatoc tequiticayot quintatzacuilitise cati taixpanoj huan para quincualitase cati quichihuaj cati cuali. ¹⁵ Ipaquilis Toteco para xijchihuaca cati cuali para amo huelis amechejelnamiquire nopa masehualme cati ama camanaltij fiero ten amojuanti. Injuanti amo quipiyaj inintalnamiqulis huan san huilhuitique.

¹⁶ Ica Cristo amo anitztoque quej nopa tequipanohuani cati iniaxcahua inintecohua quej se inintapiyal. Amo anquipiyaj se amoteco cati amechnahuatia sese tamanti cati monequi anquichihuase. Anitztoque anmajcajtoque para anquitapejpenise, pero amo xijchihuaca quej sequinoc cati quitapejpeniaj tajtacolchihuase pampa majcajtoque. Ama xijtapejpenica para anquitequipanose Toteco ica nochí amoyolo. ¹⁷ Xiquintepanitaca nochí masehualme. Xiquinichelica amoicnihua ipan Cristo. Xiquimacastica para anquixpanose Toteco huan xijtepanitaca. Xijtepanitaca nopa hueyi tanahuatijquet ipan amotal.

Cristo taijyohui por tojuanti

¹⁸ Xijtacaquilica amojuanti cati antetequipanohuaj cati aniaxcahua se amoteco nica. Monequi xiquinneltocaca amotecohua huan xiquintepanitaca. Xiquintepanitaca cati cuajcualme huan quipiyaj iniyolo, huan nojquiya xiquintepanitaca cati fiero inintalnamiqulis. ¹⁹ Quema antaijyohuiaj huan amo teno anquichijtoque cati amo cuali, Toteco quicualitas sinta anquiselise nopa taijyohuilisti pampa anquitepanitaj Toteco ipan amoyolo. ²⁰ Pero amo ipati iixpa Toteco sinta antajtacolchijtoque huan yeca amechtatzacuilitiaj huan anquijyohuiaj huan anquiselaj nopa tatzacuiliti, pampa ya nopa quinamiqui anquiselise. Pero sinta anquichihuaj cati cuali huan anquijyohuiaj taijyohuilisti cati amo quinamiqui huan noja anquipiyaj amoyolo, huajca quena, Toteco quicualitas.

²¹ Toteco quitaltijtoc para quemantica ma titaijyohuica. Pampa Cristo taijyohuico por amojuanti huan amechcahuilijtejtoc se ejemplo para xijpiyaca

amoyolo quema antaijyohuíaj pampa quej nopa quichijqui ya. ²² Cristo amo quema tajtacolchijqui, yon amo aqui quicajcayajqui. ²³ Quema masehualme quitaijyohuiltiyaj Cristo, amo teno quinnanquiliyaya. Quema yaya taijyohuiyaya, amo quintemajmatiyaya para quincuepilis. Pero nochipa quincajqui cati fiero quichihuiliyayaj, imaco Toteco cati tetajtolsencahua xitahuac. ²⁴ Huan Cristo iselti quihuicac totajtacolhua ipan itacayo quema mijqui ipan nopa cuamapeli. Quichijqui ya ni para tojuanti ma tielica quej mijcatzitzitzi cati ayecmo hueli tajtacolchihua. Huan sinta timijcatzitzitzi huan ayecmo hueli technotza tajtacoli, huajca ama ma tijpiyaca tonemilis xitahuac. Quena, quicocojque Jesús huan yeca Toteco techchicajqui iixpa. ²⁵ Tinejnemiyayaj quej borregojme cati mocuapolojtoyaj, pero ama timocuetoque ica Toteco, yaya totamocuitahuijca cati quimocuitahuía toalma.

3

Quenicatza monequi itztose sihuame huan tacame

¹ Nojquiya xijtacaquilica ansihuame. Sinta se sihuat quiptiya ihuehue, ma quicahuili ihuehue ma quiyacana. Huan sinta quej nopa anquichihuase, masque se quiptiya ihuehue cati amo quineltoaca Toteco, ihuehue quiitas para cuali inemilis isihua huan ica yolíc quineltoacas Toteco masque amo teno isihua quiilhuía. ² Pampa ijquiyampa tacame quej nopa quiitase para senquisa cuali cati quichihua isihua huan quenicatza nelía tatepanitaj.

³ Amo tahuel ximocuatotonica por se amoyejezca cati anmotalilise amopani. Amo ximotequipachoca quenicatza anmoxilhuisse, huan taya tamanti oro anmotalilise huan taya yoyomit patriyo anmoquentise. ⁴ Más cuali xijtemoca para anquiptiyase se amoyejezca cati eltoc ipan amoyolo. Xijpiyaca teicnelili ica nochí masehualme huan nochipa ximoechcapanoca para quej nopa anquiptiyase amoyejezca cati amo quema tamis, pampa ya nopa cati ipati iixpa Toteco. ⁵ Sihuame cati tatzejteloltique huejcajquiya quej nopa quitemojque se inincualnesca cati elqui ipan iniyolo. Inijuantí mochixque ipan Toteco huan quinchahuilijque inihuehuejhua ma quinyacanaca. ⁶ Quej nopa nojquiya quichijqui Sara, pampa quineltoquili Abraham cati elqui ihuehue huan quinzotzqui “noteco”. Huan anitztose quej Sara sinta anquichihuase cati xitahuac. Huan quej nopa amo aqui monequis quimacasis cati ihuehue huelis quichihuilis.

⁷ Nojquiya xijtacaquilica antacame. Xiitztoca ica cuali inihuaya amosihuajhua huan xiquintepanitaca. Xijmachilica para inijuantí amo tetic in-itacayo quej titacame, pero Toteco quinselia sihuame san se quej techselia titacame huan nojquiya quinmaca nemilisti yancuic pampa hueyi iyolo ica nochí tojuanti. Sinta se amo quitepanitas isihua, Toteco amo quicauquis quema motatajtis.

Masehualme cati taijyohuíaj pampa quichihua cati cuali

⁸ Huajca para nijtamiltis, monequi nochí amojuanti xijpiyaca san se amoyolo. Xijpiyaca hueyi amoyolo se ica seyoc. Ximoicnelica quej anicnime. Ximotajotaca huan ximoechcapanoca. ⁹ Amo quincuepilica masehualme cati fiero amechchihuilíaj. Amo xiquintaijilhuica cati amechtaijilhuíaj, pero xiquinchihuilica cati cuali huan xijtajanica Toteco ma quintiochihua. Anquimatij Toteco amechnotztoc para aniaxachua para amechtiochijtinemis quema anquichijtinemij cati ipaquilis. ¹⁰ Ijcuilijtoc ipan Icamanal Toteco campa quiijtohua:

“Cati quinequi itztos ica cuali huan quiptiyas paquilisti ma amo tetaijilhui huan ma amo istacati.

11 Ma quicajtehua cati amo cuali huan ma quichihua san cati cuali. Ma quichihua campeca para itztos ica cuali ica nochi masehualme, huan nojquiya ma quinpalehui sequinoc ma itztoca ica cuali se ica seyoc.

12 Pampa Toteco quinmocuitahuía cati quichihuj cati xitahuac iixpa, huan yata quincacui quema motatajtíaj. Pero Toteco moicancuepa ica cati quichihuj cati amo cuali.”

13 Sinta anquichijtinemise cati cuali ica nochi amoyolo, amo aqui amechchihuilis se tenijqui. 14 Huan masque masehualme amechtaijy-ohuiltisquíaaj pampa anquichihuj cati cuali, Toteco amechtatahuis. Huajca amo xiquinimacasica sequinoc, yon amo ximotequipachoca ica cati pano. 15 San ya ni monequi xijchihuaca. Xijhueymatica Cristo ipan amoyolo huan san yaya xijmatica para amohueyiTeco. Ximocualchijchijtoca quenicatza antananquilise sinta se masehuali amechtatzintoquilis para ten an-motemachíaj ipan Cristo, pero xijnanquilica ica cuali huan ica tatepan-itacayot. 16 Xijpiyaca amoyolo ica nochi masehualme, huan quej nopa injuanti cati amechtajilhuíaj pinahuase, pampa quitase para cuali amone-milis pampa anquitoquilíaj Cristo. 17 Pampa achi más cuali antaijyohuise pampa anquichijtoque cati cuali, sinta quej nopa ipaquilis Toteco, huan amo antaijyohuise pampa anquichijtoque cati fiero.

18 Pampa Cristo nojquiya taijyohui huan mijqui sempatzi, huan ica imiquilis taxtajqui cati monejqui por totajtacolhua nochi timasehualme para nochipa. Quena, yaya cati senquisa cuali mijqui por tojuanti cati titaix-panoni, huan ya nopa quichijqui pampa quinejqui techhuicas campá Toteco. Huan masque masehualme quimictijque itacayo, itonal quichijqui para sempa ma moyolcui. 19 Huan elqui itonal Cristo cati yajqui huan quincamanalhui nopa tonalme cati tzactoque. 20 Ya ni inintonalhua injuanti cati huejcajquiya amo quitepanitaque Toteco ipan nopa tonali quema Toteco quipixqui iyolo huan quichixqui para miyac tonali para Noé ma quichihua nopa hueyi cuaacali. Momaquixtijque san chicueyi masehualme quema nopa at quitejcolti inincuaacal. 21 Huan nopa at techelnamiquiltía ten quenicatza ama timocuaaltíaj ipan at quema timomaquixtijaj. Amo timocuaaltíaj para ma quipajpaca cati soquiyo ipan totacayo, pero timocuaaltíaj para tijnextilise para ica nochi toyolo tijtajtaníaj Toteco ma techyolpajpaca. Huan quena, Toteco techmaquixtia por cati Jesús quichijqui quema mijqui huan moyolcuic. 22 Huan ama Jesucristo yajtoc ilhuicac huan mosehuijtoc inejmat Toteco Dios campá más quipiya tatepanitacayot. Huan nopona quichihuj ipaquilis nochi ilhuicac ehuan huan nojquiya cati inintoca “cati quipiay tequiticayot” huan “cati quipiay chichahualisti”.

4

Ayecmo xijchihuaca cati amo cuali

1 Cristo taijyohui ipan itacayo quema mijqui, huajca ma timoyolilhuica quej ya taijyohui huan ma amo tiquimacasica sinta monequi taijyohuise. Masehualme cati ipan iniyolo mocualtalijtoque para taijyohuise pampa iaxcahua Toteco ayecmo quinequij tajtacolchihuase. 2 Ayecmo motonalpolo-huaj para quitoquilise cati amo cuali inintacayo quinequij quichihuase. Pero ipan ni tonali cati mocahuaj para noja itztose ipan taltpacti, quichi-jtinemise cati ipaquilis Toteco. 3 Ya anpanotoque miyac tonali quema anquichihuayayaj miyac tajtacoli quej quichijtinemij masehualme cati amo quixmatij Toteco. Anquichihuayayaj miyac tajtacoli cati quinequiyaya

amotacayo. Anihuintiyayaj, huan antahuejchihuayayaj, huan anyahuiyayaj ipan ilhuit campa tahuel anontaiyayaj. Anquintepanitayayaj tamanti cati masehualme quinchijtoque, huan anquinitayayaj quej dioses, huan ya nopa Toteco amo quinequi quitas.

⁴ Pero ama ayecmo anquichihuj. Ayecmo antajacolchijtinemij ica cati eliyayaj amohuampoyohua, huan yeca injuanti san amechtachiliaj huan amechtajilhuiaj. ⁵ Pero Toteco quintajtolsencahuas pampa yaya mocualtalijtoc para quintajtolsencahuas cati yoltoque huan cati mictoque. ⁶ Yeca quinyolmelajqui cati ama ya mictoque nopa cuali camanali ten Toteco para masque inintacayohua quiselijtoque nopa tatzacuiltlisti ten miqulisti quej nochí timasehualme timiquij, ama itztoque ipan inintonal quej Toteco itztoc.

⁷ Ya monechcahuía nopa tonali quema tamis taltipacti. Huajca monequi xijpiyaca cuali amotalnamiquilis huan ximonahuática cuali para huelis anmotatajtise ica Toteco quej monequi. ⁸ Huan cati achi más ipati, monequi ximoicnelica miyac se ica seyoc, pampa se cati quiicnelía ne seyoc quitapopolhuía masque nopa seyoc quiixpano miyac huelta. ⁹ Ximoselica se ica seyoc quema anmopaxalohuj. Xiquintamacaca huan xiquinmacaca campa mocahuase taneltocani cati ajsij campa amojuanti, huan amo ximocuesij-caitaca.

¹⁰ Toteco amechmacatoc sese ten amojuanti amoyajatil cati monequi para anquichihuase sesen tamanti amotequi ipan nopa tasentlisti ten taneltocani. Huajca ica nopa yajatili cati anquiselijtoque pampa hueyi iyolo Toteco, ximopalehuica se ica seyoc para anitztose anicualtequipanojcahua.

¹¹ Sinta se ten amojuanti quiapiya itequi para camanaltis icamanal Toteco, ma camanalti quej elisquía Toteco cati camanalti ipan ya. Sinta se ten amojuanti quiapiya itequi para quinpalehuis sequinoc, ma quinpalehui ica nopa chichualisti cati Toteco quimaca. Quej nopa nochí cati anquichihuj elis para ihueyitilis Toteco Dios, huan huelis tijhueyitalise por cati Jesucristo techchihuilijtoc. Yaya quiapiya nochí hueyitlisti huan nochí tequiticayot para nochipa. Huan itequiticayo amo quema quiapiyas itamiya. Quena, quej nopa eltos.

Taijyohuilisti cati amechpanotihuala

¹² Noicnihua cati nimechicnelía, amo ximosentachilica pampa tahuel antaijyohuiaj. Amo san ximoilhuica para san amojuanti cati quej nopa amechpano. ¹³ Pero xipaquica quema antaijyohuiaj pampa Cristo nojquiya taijyohui huan amechcahuilijtoc xijpanoca se quentzi taijyohuilisti quej ya quipanoc. Huan yeca quema yaya hualas huan nochí amojuanti anquiiatase ihueyitilis, nelía miyac anpaquise.

¹⁴ Sinta sequij amechtajilhuiaj pampa anquineltocej Cristo, xijpiyaca paquilisti huan xijmatica nopa cuajcualtzi Itonal Toteco mocahua ipan amoyolo. Huan xijmatica masque injuanti quitajilhuiaj Toteco, amojuanti anquihueyichihuj. ¹⁵ Sinta antaijyohuiaj, ma amo eli pampa antemictijtoque o antachtectoque. Ma amo eli pampa anquichijtoque cati amo cuali o pampa ancalactoque campa amo monequi. ¹⁶ Pero sinta antaijyohuiaj pampa aniaxcahua Cristo, amo xipinahuaca. Xijpaquilismacaca Toteco pampa masehualme quimatij aniaxcahua.

¹⁷ Ya ajsic tonali para Toteco quintajtolsencahuas nochí masehualme. Achtohui techajtolsencahuas tojuanti cati tiiconehua. Huan sinta monequi techajtolsencahuas tojuanti cati tiiconehua, san ximoilhuica quenicatza

tahuel quintatzacuiltis inijuanti cati amo quema quineltocaque cati tech-nahuatía icamanal. ¹⁸ Quisas quej ijcuilijtoc ipan Icamanal Toteco campa quijjtohua:

“Sinta ica ohui momaquixtise masehualme cati itztoque xitahuaque iixpa Toteco, huajca nelía fiero elis para cati amo quitepanitaj Toteco huan tajtacolchihuaj miyac.”

¹⁹ Huajca sinta ama antaijyohuíaj pampa quej nopa ipaquilis Toteco, ximotemacaca ipan Toteco, yaya cati techchijchijqui huan cati senquisa temachtí. Huan teipa xijsenhuiquilica xijchijtinemica cati cuali.

5

Camanali para taneltocani

¹ Ama nimechcamanalhuis anhuehue tacame cati antayacanaj ipan tiopame ten taneltocani. Na nojquiya nise huehue tacat cati nitayacanquet quej amojuanti. Huan niquitac Cristo quema taijyohui huan mijqui. Nojquiya nijselis cati quinamiqui para na ipan nopa tonali quema Cristo sempa hualas huan nochi quitase ihueyitilis. ² Quej masehualme quinmocuitahuíaj ininborregojhua, monequi anhuehue tacame xiquinmocuitahuica imasehualhua Toteco cati itztoque amomaco. Xiquinmocuitahuica ica paquillisti huan ica cuali amoyolo, pampa ya nopa quipactía Toteco. Amo ximoilhuica para Toteco amechchihualtía xijchi-huaca, pampa amo cana. Yon amo xijchihuaca pampa anquinequij anquitanise tomi. Xijchihuaca pampa tahuel anquinequij anquitequipanose Toteco. ³ Amo xiquinnahuatica cati itztoque amomaco quej anelisqueuíaj inintecohua. Pero xiquinnexutilica se cuali ojti para ma quitoquilica. ⁴ Huan quema Toteco, nopa Hueyi Tamocuitahuijquet hualas, yaya amechmacas se corona cati tahuel yejyectzi huan cati amo nenpolihuis.

⁵ Antelpocame, nojquiya xiquincahuilica nopa huehue tacame ma amechyacanaca. Huan nochi amojuanti ximoechcapanoca huan ximopalehuica se ica seyoc pampa ijcuilijtoc ipan Icamanal Toteco campa quijjtohua:

“Toteco amo quincualita cati mohueymatij, pero hueyi iyolo ica cati moechcapanohuaj iixpa.”

⁶ Huajca ximoechcapanoca iixpa Toteco cati quipiya hueyi chichahualisti huan yaya amechhueyitalis quema yaya quijjtos para ya ajsic tonali.

⁷ Xiquilhuica Toteco nochi amotequipachol huan xijcahuaca imaco, pampa yaya amechmocuitahuía.

⁸ Nochipa ximotalnamictica huan xitachixtoca, pampa Amocualtacat, yaya amocualancaitaca, nemi campa hueli quej se tecuani cati quitemojtinemi ajquiya huelis quitzontamiltis. ⁹ Ximoquetzaca xitahuac iixpa ica temachili quema yaya quinequi amechtehuis. Ximotetilica huan xijneltocaca Toteco ica nochi amoyolo. Xiquelnamiquica toicnihua ipan Cristo campa hueli ipan ni taltipacti nojquiya taijyohuíaj san se quej amojuanti.

¹⁰ Huan quema ya antaijyohuitose se quentzi, Toteco cati hueyi iyolo ica amojuanti amechchihuas anchicajtoque huan antemachme. Huan amechmacas yancuic chichahualisti huan tetili pampa anmotatzquilijtoque ipan ya. Yaya Toteco cati amechnotzqui para anquippiyase amoparte ipan ihueyitilis cati huejcahuas para nochipa nepa campa tayejyectzi. Huan nochi quichijqui pampa anitztoque ipan Jesucristo. ¹¹ Yaya quipiyo nochi hueyitilisti huan nochi tequiticayot para nochipa. Huan itequiticayo amo quema quipiyas itamiya. Quena, quej nopa eltos.

Pedro quinnahuatijtejqwi

¹² Ica itapalehuil Silvano nimechtajcuilhuijtoc ni pilamatajcuiloltzi. Yaya se toicni cati temachtí ipan Cristo. Nimechtajcuilhuijtoc para nimechy-olchicahuas huan nimechilhuis para melahuac hueyi iyolo Toteco ica tojuanti masque ten hueli taohuijcayot techpanotihuala.

¹³ Amoicnihua cati itztoque ipan nopa tiopa ten taneltocani ipan altepet Babilonia amechontajpalohuj. Toteco nojqwiya quintapejpenijtoc quej amechtapejpenijtoc amojuanti. Nojqwiya Marcos cati niqwiya quej nocone, amechontajpalohua. ¹⁴ Ximotajpaloca huan ximotzoponica ica se tatepanitacayot cati tatzejzeloltic pampa anmoicneliaj ipan Cristo.

Toteco ma amechmaca tasehuilisti ipan amoyolo nochi amojuanti cati anitztoque ipan Jesucristo. Quej nopa ma eli.

Nopa Ompa Amatajcuiloli cati Pedro Quiijcuilo

Pedro quintajcuilhui taneltocani

¹ Na niSimón Pedro. Na niitequipanojca huan niitayolmelajca Jesucristo. Nimechtajcuilhuía amojuanti cati Jesucristo amechpalehuijtoc xijneltocaca ica nochí amoyolo quej tojuanti tijchihuaj. Huan Jesucristo amechmacatoc taneltoquilisti pampa yaya xitahuac, huan yaya itztoc Dios huan Totemaquixtija. ² Toteco noja más ma quipiya hueyi iyolo ica amojuanti huan mojmosta ma amechmaca miyac tasehuillisti ipan amoyolo para más anquixmajtiyase Toteco Totata huan Toteco Jesús.

Taya monequi quichihuase taneltocani

³ Tohueyiteco Cristo ica ihueyi chichualis techmacatoc nochí cati monequi para huelis tinejnemise cuali huan tiiztose más quej ya. Ya tijpiyaj nochí cati monequi pampa tiquixmatij Cristo, yaya cati technotztoc para se tonali tijselise ten ihueyitilis huan para se tonali ma tiiztoca cuali quej ya. ⁴ Huan pampa yaya quipiya ihueyitilis huan yaya senquisa cuali, techtencahuilijtoc miyac tamanti cati tahuel hueyi huan cati tahuel cuali. Quiijtojtoc para yajati techmaquixtis ten nopa fiero tamanti cati masehualme ipan ni taltipacti quichijtinemij pampa tahuel quinequi tajtacolchihuase. Huan quiijtojtoc techmacas se nemilisti yancuic quej Toteco quipiya. Quena, quej nopa techtencahuili.

⁵ Yeca amo san xijneltocaca Toteco, pero mojmosta xijpixtiyaca amone-milis más xitahuac. Huan quema annemij nelía xitahuac, pero nojquiya mojmosta más xijmajtiyaca cati Toteco quinequi xijchihuaca. ⁶ Huan quema anquimatij cuali cati Toteco quinequi xijchihuaca, nojquiya más monequi ximonahuatica huan ximotachilica para amo antajtacolchihuase. Huan amo san ximonahuatica para amo antajtacolchihuase, pero nojquiya xijpiyaca amoyolo para anquijyohuise cati huala. Huan quema ya anquijyohuía cati huala, nojquiya xiiztoca más quej Toteco. ⁷ Huan quema anitztoque más quej Toteco, nojquiya monequi más ximoilhujtinemica ten sequinoc huan quenicatza huelis anquinpalehuise. Huan amo san xiquinpalehuijtiyaca sequinoc, nojquiya nelía xiquinichelica quej Toteco quinequi.

⁸ Sinta quej ni anmoscaltijtiyase ipan nochí ni tamanti, huajca cuali anquixmatise Tohueyiteco Jesucristo. Huan Toteco amechtequihuis ipan itequi huan nochí cati anquichihuase para Toteco quisas cuali. ⁹ Pero se cati amo moscaltía ipan Toteco huan amo hueli quichihua ni tamanti itztoc quej se popoyotzi o quej se cati amo hueli tachiya huejca. Yaya ya quielcajtoc para Toteco quipajpaquili iyolo ten nopa tajtacoli cati achtohuiya quichihuayaya. ¹⁰ Huajca noicnihua, xinemica nelía cuali para anquinextise para Toteco temachtí amechtapejpenijtoc huan amechnotztoc para anelise aniaxahua. Sinta anquichijtinemij ni tamanti cati nimechilhujjtoc, amo quema anhuetzise ipan tajtacoli. ¹¹ Huan Tohueyiteco Jesucristo, yaya Totemaquixtija, cati tanahuatis para nochipa, amechcaltapos nepa ilhuicac huan amechselis ica paquilisti quema anajsitij.

¹² Nochipa nimechelnamiquiltis ten ni tamanti masque nelía ya anquimatij huan ya anmotatzquijtoque ipan nopa cati melahuac cati amechmactijtoque. ¹³ Pero nimoilhúa cuali para nimechelnamiquiltijtinemis

ten ni tamanti quema noja niitztos para amo quema anquielcahuase. ¹⁴ Pampa nijmati monechcahuía nopa tonali para nimiquis pampa quej nopa Tohueyiteco Jesucristo ya nechnextili. ¹⁵ Huajca nijchihuas campeca para nimechelnamiquiltis talojtzitzi quenicatza monequi annejnemise nelía cuali para amo anquielcahuase quema ya nimictos.

Pedro quíitztoya Cristo

¹⁶ Tojuanti amo timechpohuiliyayaj san camanali cati tijsencajtoyaj quema timechilhuijque ten ihueyi chicalualis Jesucristo huan para yaya sempa hualas ipan taltipacti. Na ihuaya ne sequinoc tiquitztoque ihueyitilis ica toixteyol. ¹⁷ Tojuanti tijcajque quema Toteco Dios quihueyimatqui Jesucristo ten ilhuicac huan quínexxtili miyac tatepanitacayof. Quena, Toteco Totata cati nelpano hueyi huan cuajcualtzi camanaltic ten nepa campa tayejyectzi huan quíijto: “Ya ni Nocone cati niquicnelía huan nipaqui miyac ica cati quichihua.” ¹⁸ Quema tiitztoyaj nepa ipan nopa tepet tatzejtzeltolitic campa technextili ihueyitilis, toselti tijcajque quema Toteco Dios quíijto ni camanali ten ilhuicac.

¹⁹ Huan para tojuanti cati tiquitaque, quichijqui noja más temachtí nopa camanali cati quíijcuilojque itajtolpanextijcahua Toteco huejcajquiya. Yeca monequi san fequit aníitztose para anquitacaquilise cati quíijcuilojtoque pampa inincamanal eltoc quej se taahuili cati tatanextía campa tzintayohua. Xijtacaquilica inincamanal hasta quema Jesucristo sempa hualas. Ipan nopa tonali yaya elis quej se taahuili cati nelía chicalhuac, huan elis quej yaya cahuantos ipan amoyolo. ²⁰ Pero xijmatica para yon se tamanti ipan ícamanal Toteco cati itajtolpanextijcahua quíijcuilojque huejcajquiya, amo hualajqui ten nopa tajtolpanextiani iniselti, ²¹ yon amo hualajqui pampa nopa tajtolpanextiani quínequiyayaj quíijto taya panos teipa. Elqui Itonal Toteco cati quínilhuijtiyajqui nopa tatzejtzeltolítique tacame cati Toteco quínequiyaya ma quíijcuiloca.

2

Masehualme cati tamachtíaj cati amo melahuac

(Judas 4-13)

¹ Huejcajquiya nojquiya itztoyaj israelitame cati istacatiyayaj huan motocaxtiyayaj itajtolpanextijcahua Toteco, pero amo cana. Huan quej nopa nojquiya itztose istacatica tamachtiani campa amojuanti. Huan ixtacatzí tamachtise cati amo melahuac huan cati quínsemanas nochí cati quiselise iníntamachtíl. Hasta quíijto amo quíixmatíj Tohueyiteco cati quíncojqui. Huan quípantise se hueyi tatzacuítíli cati nímantzí quíntzontamíltis.

² Huan miyac masehualme quíntoquílise nopa ístacatíni ipan ínimemílis cati fiero huan quíchihuase miyac tamantí ínhuaya cati amo íníntahuícal. Huan yeca sequínoc masehualme quítajílhíse nopa ojti cati melahuac cati Toteco techílhí ma tíjtoquílíca. ³ Huan pampa nopa ístacatíni quínequise amotomí, amechcajcahuase ica miyac camanali cati amo melahuac. Toteco huejcajquiya quíixquetztoc íníntatzacuítílis huan temachtí quínajsis. Nechca eltoc nopa tonali para quíntamíltis.

⁴ Toteco amo quíntapojpolhí nopa ílhuicac ehuaní cati tajtacolchíjque. Quínmajcajqui hasta micta, huan quíntzajqui ipan tzíntayohuílot huan nepa mochíyaj hasta nopa tonalí quema Toteco quíntajtolseñcahuas. ⁵ Nojquiya Toteco amo quíntapojpolhí nopa masehualme cati ítztoyaj huejcajquiya, pero quíchíjqui ma huétzi tahuel miyac at ípan nochí nopa amo cuajcualme para quínisahuí. San quínmaquíxti Noé huan chícome más. Huan Noé

quinyolmelahuayaya sequinoc quenicatza huelisquíaj itztose xitahuac iixpa Toteco. ⁶Huan Toteco nojquiya quintatzacuiliti nopa fiero masehualme ipan altepeme Sodoma huan Gomorra. Quintamitati inijuanti huan inialtepehua huan teipa san mocajqui cuajnexti. Ica cati quinchihuili, Toteco technextilijtejtoc se taquejquetzcayot ten quenicatza ininpantis nochi amo cuajcualme. ⁷Pero Lot Toteco quimaquixti ten altepe Sodoma pampa yaya elqui se tacat cati itztoya xitahuac iixpa. Huan nelia taijyohuiyaya miyac mojmosta por nopa fiero masehualme pampa san quichihuayayaj cati fiero cati inintacayo quinequiyayaj quichihuase. ⁸Huan Lot cati eliyaya se tacat cati cuali itztoya inihuaya nopa fiero masehualme, huan mojmosta quiyolcocoahuayaya cati fiero quitiyaya huan cati fiero quicaquiyaya. ⁹Yeca tiquitaj Toteco quimati quenicatza quinmaquixtis cuali masehualme ipan ten hueli tayejyecoli. Huan nojquiya Toteco quimati quenicatza quintatzacuilitijtiyas fiero masehualme hasta ajsis nopa tonal para quintajtolsencahuas.

¹⁰Huan achi más Toteco quintatzacuilitis fiero tacame cati quichihuaj san cati inintacayo quinequi huan inijuanti cati quincualancaitaj nochi cati quipiyaj tequiticayot. Nopa masehualme mohueyimatij huan mosisiníaj. San quichihuaj cati inijuanti iniselti quinequij. Amo majmahuij para quintajilhúaj ajacame cati quipiyaj más chicahualisti que inijuanti. ¹¹Pero yon ilhuicac ehuan cati quipiyaj más chicahualisti huan tequiticayot, amo quema quintajilhúaj ajacame quej nopa.

¹²Pero nopa istacatica tamachtiani itztoque quej tapiyalme cati amo quipiyaj inintalnamiqulils. Tapiyalme san quichihuaj cati inintacayo quinequi, huan amo hueli moyolilhúaj achtohui taya ininpantis, huajca yeca amo ohui tiquinmasiltíaj huan tiquinmictíaj. Huan san se eltoc ica nopa tamachtiani, nimantzi quintajilhúaj ajacame pampa amo quimachilíaj ininchichualis. Huan yeca nopa tamachtiani polihuisse san quej tapiyalme.

¹³Inijuanti quintaijyohuiltíaj cati quincajcayahuaj, huan yeca quej inintaxtahuil nojquiya taijyohuisse. Ica ininpaqulils quichijtnemij cati más fiero miyacapa quema tonaya. Inijuanti eltoque quej se mancha ipan yoyomit cati cuali. Inijuanti se pinahualisti campá amojuanti, pampa yahuij ipan amoilhui quej cuajcualme quema antacuj san sejco, pero quema itztoque campá mesa, amechhuetzquílíaj ten quenicatza amechcayajtoque.

¹⁴Inijuanti amo quema quitiy se sihuat huan amo quiixtocaj. Amo quema siyahuij para tajtacolchihuase. Quinyoltilanaj cati ayemo nelcuali quineltoaj Toteco para ma tajtacolchihuaca inihuaya. Nochi cati quitiy, quinequij moaxcatise. Tateljchihualme huan inintatzacuilitis ya quinchiya.

¹⁵Mocuapolojtoque pampa quicajtejtoque nopa ojti xitahuac. Quichijtoque quej Balaam icone Beor cati huejcajquiya quipactiyaya quitanis tomi ica nopa tamanti fiero cati quichijqui. ¹⁶Hasta iburro Balaam camanaltic huan quiajhuac pampa yahuiyaya para más tajtacolchihuati, masque burrojme amo hueli camanaltij. Pero Toteco quichijqui para nopa burro ma camanalti quej timasehualme ticamanaltij, huan quitilquetzqui nopa tajtolpanextijquet Balaam para amo quichihuas más tamanti cati amo xitahuac.

¹⁷Ni tacajcayahuani itztoque quej se ameli cati amo quipiya at. Itztoque quej mixti cati nesi para quihualica at, pero nopa ajacat san quihuica huan amo huetzi at. Huajca Toteco ya quinsencahuilijtoc inintatzacuilitis nopa tacajcayahuani huan mocahuase campá tahuel tzintayohua para nochipa.

¹⁸Inijuanti camanaltij para mohueyimatise, pero nochi quimatij para inincamanal eltoc se huilhuiyot huan amo melahuac. Para quincajcayahuase

masehualme cati yancuic quicajtejtoque tajtacoli, nopa fiero tacame quiijtohuaj para huelis tijchihuase ten hueli ica cati amo totahuical para quej nopa, nopa yancuini sempa ma calaquica ipan tajtacoli. ¹⁹ Inijuanti quiijtohuaj hueli quitojtomaj sequinoc, pero inijuantiya iniselti itztoque ilpitoque ipan cati inintacayo quinequi, pampa se masehuali mocahua quej itequipanojca nopa tajtacoli cati quichijtinemi. ²⁰ Miyac masehualme quicaquij ten Tohueyiteco Jesucristo, Totemaquixtija, huan quicajtehuaj tajtacoli cati eltoc ipan ni taltipacti. Pero sinta inijuanti teipa mocuepase huan sempa moipise ipan nopa tajtacoli huan nopa tajtacoli quintanis, huajca elise más fiero teipa que achtohuiya. ²¹ Achi cuali sinta amo quimajtosquía ten nopa ojti xitahuac, pampa nelía fiero sinta quimatij nopa ojti cati cuali huan teipa quinhuejcamajcahuaj nopa tanahuatilme tatzejzeloltique cati Toteco quinmacatoc. ²² Ica inijuanti eltoc quej nopa camanali cati quiijtohua: “Se chichi mocuepa huan sempa quicua cati quisiotatoc. Huan quema quipajpacaj se pitzo, nopa pitzo sempa yahui huan momimilohua ipan soquit.”

3

Toteco sempa hualas

¹ Noicnihua cati nimechicnelía, ya ni nopa ompa amatajcuiloli cati nimechtajcuilhujtoc. Ica ni ome nijnequi nimechylchicahuas para ximoyolilhuica xitahuac. Huan nijnequi nimechelnamiquiltis cati ya anquimatij. ² Quena, nijnequi xiquelnamiquica cati quiijtojque nopa tatzejzeloltique profetas huejcajquiya. Nojquiya nijnequi xiquelnamiquica cati Tohueyiteco Jesús, Totemaquixtija, technahuati tiitayolmelajcahua huan teipa tojuanti titechilhujque.

³ Achtohui xijmatica ya ni. Ipan itamiya tonali hualase masehualme cati san quihuetzquilise nochi cati tijneltocej, huan quichihuase ten hueli tamanti tajtacoli cati inintacayo quinequi quichihuase. ⁴ Amechilhuise: “Anquijtohuaj Cristo quiijto sempayano hualas. ¿Canque itztoc? Amo hualajtoc. Pampa nochi tamanti panotihuala quej ipa panoyaya. Xiquitaca hasta ten quema pejqui taltipacti, huan teipa quema mijque tohuejcapan tatahua, huan teipa hasta ama nochi panotihuala san se huan amo hualajtoc Cristo.” Quej nopa amechilhuise.

⁵ Pero inijuanti quinequij quielcahuase para Toteco huejcajquiya quichi-ji ilhuicacti ica icamanal, huan teipa quichijqui tali ipan ni taltipacti ma tejco ten at, huan quichijqui ica at. ⁶ Huan inijuanti quielcahuaj quenicatza Toteco huejcajquiya quintzontamilti cati itztotay ipan taltipacti ica at quema at quipacho ni taltipacti. ⁷ Huan Toteco nojquiya ica icamanal ya quiniyocatalijtoc nopa ilhuicacti huan ni taltipacti cati ama eltoc para teipa quitamiltis ica se tit ipan nopa tonali quema quintajtolsencahuas masehualme. Huan inijuanti cati fierojtique yase campa tit campa taijyohuise para nochipa.

⁸ Huajca amo xiquelcahuaca ya ni, noicnihua cati nimechicnelía: Toteco quiita se tonali quej elisquía se mil xihuit. Huan nojquiya Toteco quiita se mil xihuit quej elisquía san se tonal. ⁹ Toteco amo quielcajtoc cati quiijtojtoc quej sequij moilhuaj. Techtencahuilijtoc para sempa hualas, huan temacht hualas. Pero ama yaya quichiya pampa nelía quipiya iyolo ica tojuanti huan quinequi nochi ma timoyolpataca huan ma tijcahuaca totajtacolhua. Amo quinequi yon se ma polihui para nochipa.

¹⁰ Huan nimantzi ajsis nopa tonali quema tiquitase itequiticayo Tohueyiteco. Quena, quej se tachtejquet calaquí ipan amochaj quema amo antachixtoque, nojquiya quema amo anmoilhuíaj, ilhuicacti tamis. Huan anquicaquise quema ajcahuacas quej se hueyi tit, huan nochi cati onca ipan ilhuicacti campa sitalime tamitatas. Huan tatas taltipacti huan nochi cati quipiya.

¹¹ Huajca pampa ya anquimatij quej ni Toteco quitamiltis nochi cati onca, monequi xiitztoaca antatzetzeloltique huan xijchihuaca cati senquisa cuali para más tiitziyase quej Toteco. ¹² Xitachixtoaca para nopa tonali quema nesis itequiticayo Toteco huan nojquiya xijchihuaca cati monequi para ma moisihuili para ajsis nopa tonali. Quena, ipan nopa tonali nochi ilhuicacti campa sitalime huan nochi cati eltoc nozona tatas huan sosolihuis, huan nochi cati onca atiyas pampa nopa tit elis tahuel tononic. ¹³ Pero tojuanti tijchiyaj nopa yancuic ilhuicacti huan taltipacti yancuic cati Toteco techtencahuilijtoc campa nochi quichihuase san cati xitahuac.

¹⁴ Huajca noicnihua cati nimechicnelía, pampa amochiyaj para mochi-huas ni tamanti, xijchihuaca campeca para amo antajtacolchihuase. Xielica senquisa tapajpactique iixpa Toteco para amo aquí huelis amechtathuis. Quej nopa Toteco amechpantis ica tasehuilisti ipan amoyolo quema sempa hualas. ¹⁵ Huan xiquelnamiquica para Toteco quipiya iyolo huan quichiya para hualas pampa quinequi ma onca más tonali para quinmaquixtis masehualme ten inintajtacolhua. Toicni Pablo cati nochi quiicnelíaj miyac nojquiya amechtajcuilhujtoc huan amechilhui san se tamanti ica nopa talnamiquilisti cati Toteco quimacac. ¹⁶ Yaya camanaltitoc ten iyolo Toteco ipan nechca nochi iamatajcuilol masque quemantica onca cati ohui para tijmachilise. Huan sequij cati amo momachtíaj Icamanal Toteco huan ayemo motatzquiliytoque ipan ya, quipataj icamanal Pablo huan nochi sequinoc amame ipan Icamanal Toteco, yeca injuanti polihuisse.

¹⁷ Pero ica amojuanti annoicnihua cati nimechicnelía, ya anquimatij ni tamanti hasta amantzi quema ayemo pano. Huajca monequi xitachixtoaca para ni masehualme cati fiero ininemilis cati quinequij amechcayahuase ica istacatili amo amechhuicase ipan se ojti cati amo cuali. Ya anmotatzquiliytoque ipan Toteco, huajca amo aquí ma amechtahuiso. ¹⁸ Pero ximomachtijtiyaca más ten Tohueyiteco Jesucristo yaya cati Totemaquixtijca. Huan más xijmachilijtiyaca quenicatza yaya quipiya hueyi iyolo ica tojuanti. Ma tijhueyichihuaca ama huan para nochipa. Quej nopa ma eli.

Nopa Achtohui Amatajcuiloli cati Juan Quiijcuilo

Nopa camanali cati temaca nemilisti cati yancuic

¹ Timechtajcuilhuiaj ten Jesucristo, yaya cati ipa itztoya hasta ipejya nochi cati onca. Timechilhuisse cati tijcactoque quema yaya techcamanalhui huan cati tiqiztzoque ica toixteyol. Quena, tiqiztzoque Jesucristo huan ticajsique ica tomax. Yaya quitocaxtiaj nopa "camanali" cati temaca nemilisti. ² Quema yaya hualajqui, technextili nopa nemilisti, huan tiqiztaque. Huajca ama timechpohuilise ten Jesucristo cati quipiya nemilisti para nochipa ipan ya para temacas. Achtohui yaya itztoya nepa ihuaya Totata huan teipa hualajqui nica campa tojuanti. ³ Huajca timechilhuisse cati tiqiztzoque huan cati tijcactoque para amojuanti huan tojuanti huelis tijpiyase paquilisti se ica seyoc ipan Toteco. Huan para nochi san sejco hueli timohuampochihuase ica Toteco Totata huan Icone Jesucristo. ⁴ Ama nimechtajcuilhuia ni tamanti nica para san sejco ma tijpiyaca se hueyi paquilisti.

Toteco yaya taahuili

⁵ Huan ya ni nopa camanali cati Jesucristo techmacti huan ya nopa timechilhuija ama. Toteco Dios yaya taahuili, yaya senquisa cuali. Amo onca tzintayohuilot o cati amo cuali ipan ya. ⁶ Sinta tiqijtohuaj timohuampochijtoque ica Toteco Dios huan noja tinejnemij ipan tzintayohuilot, huajca tiistacatij huan amo tijchihuaj cati melahuac. ⁷ Pero sinta tinemij ipan taahuili huan tijchihuaj cati cuali pampa Toteco cati itztoc taahuili nemi tohuaya, huajca tijpiyase paquilisti se ica seyoc, huan ieso Jesucristo, Icone Toteco, techyolpajpactinemis ten nochi tajtacoli.

⁸ Sinta tiqijtohuaj amo tijpiyaj tajtacoli, huajca timocajcayahuaj ica toselti huan amo tijnequij tiqijtose cati melahuac. ⁹ Pero sinta tiquilhuisse Toteco totajtacolhua cati tijchijtoque, huajca yaya temacti huan quichihua san cati xitahuac, huan techtapojpolhuis totajtacolhua huan techyolpajpacas ica nochi cati amo cuali tijchijtoque. ¹⁰ Pero sinta tiqijtohuaj amo titajtacolchijtoque, huajca tijtocaxtiaj Toteco se istacatiquet huan amo tijpiyaj icamanal ipan toyolo pampa Toteco ya quiijtojtoc tijpiyaj tajtacoli.

2

Cristo totatempalehuajca

¹ Noconehua cati nimechicnelia, nimechtajcuilhuia nochi ni tamanti para amo xitajtacolchihuaca. Pero sinta se acayja tajtacolchihuas, tijpiyaj se totatempalehuajca cati itztoc iixpa Toteco Totata. Totatempalehuajca yaya Jesucristo cati quichihua san cati senquisa cuali. ² Quema Jesucristo mijqui ipan cuamapeli, yaya elqui nopa tacajchualisti cati taxtajqui por totajtacolhua. Huan amo mijqui san por tojuanti totajtacolhua. Nojquiya mijqui por inintajtacolhua nochi masehualme ipan taltipacti.

³ Huan tijmatij temacti tiquixmatij Jesucristo, sinta tijchihuaj cati Toteco technahuatia. ⁴ Pero sinta se quiijtohua quiixmati Toteco huan amo quichihua cati Toteco technahuatia, yaya se istacatiquet huan amo quinequi quiijtos cati melahuac. ⁵ Pero cati quichihua cati quiijtohua icamanal,

quinextía para quicnelía Toteco ica se teicnelijcayot cati senquisa cuali. Huan sinta quej nopa tiquicnelíaj huan tijchihuaj cati technahuatía, huajca tijmatij tiitztoque ipan Toteco. ⁶ Huan sinta tiquijtohuaj tiitztoque san se ihuaya Jesucristo, monequi tinejnemise cuali quej yaya nejnenqui.

Se tanahuatili cati yancuic

⁷ Noicnihua, ni cati nimechtajcuilhuía amo ya se tanahuatili cati yancuic. Ni tanahuatili para ximoicnelica eltoc cati Toteco ipa amechnahuati hasta ipejya quema achtohui anquineltoacaque Cristo. Huajca ya anquicactoque.

⁸ Pero eltoc quej nimechtajcuilhuía ica se yancuic tanahuatili. Huan nelía monexti ipan inemilis Cristo para quitoquili ni tanahuatili quej nojquiya nesi para amojuanti anquitoquilijque. Huan yeca eltoc quej ama panotij tzintayohuilot campa hueli huan ya cahuani se taahuili cati quinextía cati melahuac.

⁹ Sinta se masehuali quijtohua nemi ipan taahuili huan quichihua cati cuali, pero noja quicualancaita iicni ipan Cristo, huajca amo melahuac cati quijtohua. Pampa nopa masehuali noja nejnemi ipan tzintayohuilot huan quichihua cati amo cuali. ¹⁰ Pero se cati quicnelía sequinoc iicnihua ipan Cristo, nejnemi ipan taahuili huan amo huetzis ipan tajtacoli. ¹¹ Pero se cati quicualancaita seyoc iicni ipan Cristo, itztoc quej se cati nentinemi ipan tzintayohuilot, yon amo quimati canque yahui pampa cati amo cuali quitzacuiljtoc italnamiqulis.

¹² Noconehua cati nimechicnelía, nimechtajcuilhuía ni amatajcuiloli pampa Toteco ya amechtapojpolhuijtoc amotajtacolhua por cati Jesucristo quichijqui.

¹³ Amojuanti antetajme, nimechtajcuilhuía ni amatajcuiloli pampa ya anquixmatij Jesucristo cati ipa itztoc ten ipejya nochi cati onca.

Telpocame, nimechtajcuilhuía ni amatajcuiloli pampa ya anquitantoque Amocualtatat.

Noconehua, nimechtajcuilhujtoc pampa anquixmatij Toteco Totata.

¹⁴ Tetajme, nimechtajcuilhujtoc pampa ya anquixmajtoque yaya cati ipa itztoc hasta quema ipejya nochi cati onca.

Telpocame, nimechtajcuilhujtoc pampa antetique.

Icamanal Toteco mocahua ipan amoyolo huan ya anquitantoque Amocualtatat.

¹⁵ Ayecmo xiquicnelica cati masehualme ipan ni taltipacti quicnelíaj, yon amo xiquicnelica nopa tamanti cati eltoc ipan ni taltipacti. Sinta se masehuali quicnelía tamanti ten ni taltipacti, huajca amo nelía quicnelía Toteco Totata. ¹⁶ Pampa nochi tamanti cati onca ipan ni taltipacti technotza ma tijchihuaca san cati totajtacolchijca nacayo quinequi quichihuas. Techyoltilana ma tijnequica timoaxcatise nochi cati tiquitaj, huan techchihua ma timohueyimatica ica cati tijpiyaj ipan tonemilis nica. Pero ni tamanti amo huala ten Toteco Dios, ya ni huala ten masehualme ipan ni taltipacti cati amo quicnelíaj Toteco. ¹⁷ Pero panoti ni taltipacti huan nochi cati itztocque ipani, huan nochi nopa tamanti cati injuanti quinequij. Pero aqui quichihua cati Toteco quinequi, itztos para nochipa.

Nopa cati melahuac huan cati amo melahuac

¹⁸ Noconehua cati nimechicnelía, ya tiitztoque ipan itamiya tonali. Huan ya anquicactoque para hualas yaya cati quitoxactíaj Iqualancaitaca Cristo, huan ama nelía ya monextijtoque miyac icualancaitacahua. Huan ya nopa techmachiltía para ya monechcahuía nopa itamiya tonali ipan ni taltipacti.

¹⁹ Ni masehualme cati quicualancaitaj Jesucristo quisque ten tojuanti cati

tijneltocaj, pero nelía amo quema quineltocaque quej tojuanti. Sinta itz-tosquíaaj tohuaya ipan Cristo, huajca mocajtosquíaaj tohuaya, pero quisque para ma nesi nochí cati mosentilíaj tohuaya amo san se ica tojuanti.

²⁰ Pero amojuanti, amo anitztoque quej inijuanti, pampa Toteco amech-macatoc Itonal huan anquimatij nochí cati melahuac. ²¹ Huajca amo nimechtajcuilhuía ya ni pampa amo anquimatij cati melahuac. Nimech-tajcuilhuía pampa anquimatij, huan amo onca yon se istacatili ipan cati melahuac.

²² Nochí tojuanti tijmatij ajquiya istacati. Istacatij cati quiijtohuaj Jesús amo ya nopa Cristo cati Toteco techilhui techtitanilisquía. Cati quej nopa quiijtohuaj nelía icualancaitacahua Cristo huan amo quixmatij Toteco Dios, yon amo quixmatij Icone. ²³ Sinta se masehuali quiijtohua amo quixmati Icone Toteco, huajca nojquiya amo quixmati iTata. Pero sinta se acajya tayolmelahua para quineltoca para Jesucristo nelía itztoc Icone Toteco, huajca nopa masehuali nojquiya quixmati Toteco Dios.

²⁴ Huajca xijcahuilica ma mocahua ipan amoyolo nopa camanali cati an- quicactoque hasta quema achtohuiya anquineltoaque Cristo. Huan sinta nopa camanali mocahua ipan amoyolo, anmocahuase ihuaya Icone Toteco huan nojquiya ihuaya Toteco Totata. ²⁵ Huan ya ni cati Jesucristo techtenc- ahuilijtoc; techilhuijtoc techmacas nemilisti yancuic cati amo quema tamis.

²⁶ Nimechtajcuilhuijtoc pampa nijnequi xijmatica para nemij mase- hualme cati quinequij amechcayahuase. ²⁷ Pero Toteco amechmacatoc amojuanti Itonal, huan Itonal mocahua ipan amoyolo huan amo mon- equi seyoc amechmachtis pampa Itonal Toteco iselti amechmachtía nochí tamanti. Huan cati yaya amechmachtía ya nopa nelía melahuac. Amo se istacatili. Huan monequi xijchihuaca quej yaya amechmachtijtoc, huan ximocahuaca anmotatzquilijtoc ipan Jesucristo.

²⁸ Huajca ama noconehua, ximocahuaca anmotatzquilijtoc ipan Cristo para huelis anquipyase temachili huan amo anpinahuase quema yaya hualas. ²⁹ Anquimatij Jesucristo yaya senquisa cuali, huan nochí cati quichijtinemij cati cuali itztoque iconehua.

3

Iconehua Toteco

¹ Ximomacaca cuenta quesqui techicnelía Toteco Totata pampa techtocax- tijtoc tiiconehua. Huan yeca masehualme cati amo cuajcualme amo techix- matij pampa amo quixmatque ya. ² Huajca noicnihua cati nimechicnelía, ama ya tiitztoque tiiconehua Toteco, huan ayemo technextilijtoc quenicatza tiitztose teipa. Pero tijmatij quema Jesucristo sempa hualas, tielise quej yaya pampa tiquitase quenicatza yaya itztoc. ³ Huan nochí tojuanti cati timochiyaj para tielise quej Jesucristo timoiyocatalíaj ten cati amo cuali ama, para ma tiitztoca senquisa cuali quej Cristo itztoc senquisa cuali.

⁴ Quema se masehuali tajtacolchihua, quixpano se itanahuatil Toteco, pampa tajtacoli eli quema se quixpano se tanahuatili. ⁵ Huan anquimatij Cristo hualajqui ipan taltipacti para techquixtilis totajtacolhua, huan yaya amo quipixqui yon se tajtacoli. ⁶ Huajca amo aqui cati mocahua tatzquitoc ipan Jesucristo noja tajtacolchijtinemi. Masehualme cati tajtacolchijtinemij amo quimachilíaj ajquiya Jesucristo huan amo quixmatij. ⁷ Noconehua cati nimechicnelía, amo aqui ma amechcayahuaca ica ya ni. Se masehuali cati quichijtinemi cati xitahuac, yaya itztoc xitahuac quej Cristo itztoc xitahuac.

⁸ Pero se masehuali cati tajtacolchijtinemi, yaya iaxca Amocualtacat, pampa Amocualtacat tajtacolchijtinencoc hasta ipejya. Huajca yeca hualajqui Icone Toteco ipan ni taltipacti para quisosolos itequi Amocualtacat.

⁹ Cati tacatqui ipan Toteco huan Toteco quichijtoc icone amo tajtacolchijtinemi, pampa iixcopinca iTata, yaya Toteco Dios, mocahua ipan ya. Huan amo hueli noja tajtacolchijtinemis pampa yaya icone Toteco. ¹⁰ Huajca huélis tiqunitase ajquiya inijuanti iconehua Toteco huan ajquiya inijuanti iconehua Amocualtacat. Yaya cati amo quichihua cati cuali huan amo quinicnelía iicnihua ipan Cristo, yaya amo iaxca Toteco.

Ximoicnelica se ica seyoc

¹¹ Huan ya ni nopa camanali cati anquicactoque hasta quema achtohui anquineltocaque Cristo: monequi timoicnelise se ica seyoc. ¹² Ma amo tijchihuaca quej Caín cati eltoya iaxca Amocualtacat huan quimicti iicni, Abel. Huan ¿para ten quimicti iicni? Caín quimicti pampa yaya quichihuayaya cati amo cuali huan iicni quichihuayaya cati xitahuac. ¹³ Huajca noicnihua, amo teno ximoilhuica sinta amo cuajcualme ipan ni taltipacti amechcualancaitaj.

¹⁴ Tojuanti tiquinicnelíaj toicnihua, huan yeca tijmatij ya tiquisque ten toojhui cati achtohui campa nochi mictoque. Ama tinemij ipan seyoc ojti campa tijpiyaj nemilisti cati yancuic. Yaya cati amo quicnelía iicni ipan Cristo noja mictoc iixpa Toteco. ¹⁵ Cati quicualancaita iicni ipan Cristo itztoc quej se temictijquet. Huan anquimatij se temictijquet amo quiapiya nemilisti cati yancuic para nochipa. ¹⁶ Tijmatij taya quichihua se cati nelía quicnelía seyoc, pampa Cristo motemactili huan mijqui por tojuanti. Huan yeca tojuanti nojquiya, monequi timotemactilise por toicnihua. ¹⁷ Pero sinta titapijpiya miyac ipan ni taltipacti, huan tiqita se moicni cati quipolohua ten ica panos, huan timoyoltetilía huan amo tijpalehuía, huajca amo hueli tiqijtos tiquicnelía moicni. ¹⁸ Noconeua cati nimechicnelía, ma amo san tiqijtoaca tiquinicnelíaj toicnihua, monequi ma tiquinchihuilica cati cuali para tijnextise melahuac tiquinicnelíaj.

Ma timotemachica ipan Toteco

¹⁹ Sinta tiquinicnelíaj sequinoc huan tiquinpalehuíaj, tijnextiaj para melahuac tiiacahua Toteco. Huan quej nopa hueli tijpiyase temachili ipan toyolo quema timoquetzaj iixpa Toteco, ²⁰ masque toyolo quemantica techtatelhuía para amo tijchijtoque senquisa nochi cati tihuelosquíaj. Pero nopa cati Toteco quijtohua ten tojuanti ipati más que nopa cati toyolo techilhuía, pampa yaya quimati nochi tamanti. ²¹ Huan noicnihua cati nimechicnelía, sinta toyolo amo techtatelhuía, huajca noja más hueli tijpiyase temachili quema tijnechcahuíaj Toteco. ²² Huan Toteco techmacas nochi cati tijtajtanise pampa tijneltocaj itanahuatilhua huan tijchihuaj nopa tamanti cati quipactía. ²³ Huan ya ni itanahuatil: Monequi ma tijneltocaca itoca* Icone, Jesucristo, huan yaya eltoc cati quiapiya tequiticayot. Huan monequi ma timoicnelica se ica seyoc quej technahuatijtoc. ²⁴ Masehualme cati quichihuaj cati Toteco technahuatía mocahuaj tatzquitoque ipan Toteco huan Toteco itztoc ipan inijuanti. Huan tijmatij Toteco mocahua ipan tojuanti pampa tijpiyaj Itonal cati yaya techmacatoc.

* 3:23 3:23 O itequiticyo.

4

Ajquiya quipiya Itonal Toteco huan ajquiya amo quipiya

¹Noicnihua cati nimechicnelía. Amo xiquinneltocaca nochi masehualme san pampa quijtohuaj quipiyaj Itonal Toteco huan yaya quinmacatoc inin-tamachtíl. Monequi xijeyyecoca ten quijtohuaj ica Icamanal Toteco para anquuitase sinta melahuac nopa tonaltzi cati quipiyaj huala ten Toteco, o amo. Pampa miyac tacajcayahuani nemij campá huéli, huan quijtohuaj para itajtolpanextijcahua Toteco, pero san istacatij. ²Nimechilhuis queni-catza anquimatise ajquiya quipiya Itonal Toteco huan ajquiya amo. Nochi masehualme cati quijtohuaj para Jesús yaya nopa Cristo cati Toteco techil-hui techititanilisquía ica itacayo ten masehuali, huajca injuanti quipiyaj Itonal Toteco. ³Huan nochi masehualme cati quijtohuaj para Jesús amo ya nopa Cristo cati mocuetqui masehuali, amo nelí quipiyaj Itonal Toteco. Nopa masehualme amo hualahuij ten Toteco. Injuanti quipiyaj se iajacayo Icalancaitaca Cristo cati ya anquicactoque ajsis ipan taltipacti huan nelía ya ajsico.

⁴Noconehua cati nimechicnelía, amojuanti aniaxcahua Toteco huan ya anquitantoque nopa tatehuilisti ica nopa istacatica tajtolpanextiani pampa Itonal Toteco cati mocahua ipan amojuanti quipiya más chichahualisti que Amocualtat cati itztoc ipan masehualme cati iaxcahua ni taltipacti. ⁵Nopa istacatica tajtolpanextiani itztoque iaxcahua ni taltipacti. Huajca injuanti camanaltij quej amo cuajcualme ten ni taltipacti, huan amo cuajcualme ten ni taltipacti quintacaquilíaj. ⁶Pero tojuanti tiiaxcahua Toteco, huan nochi cati quiixmatij Toteco Dios quitacaquilíaj cati tiquijtohuaj. Pero injuanti cati amo iaxcahua Toteco, amo quinequij techtacaquilise. Huajca quej nopa huélis tijmatise ajquiya quipiya Itonal Toteco cati melahuac, huan ajquiya quinpiya ajacame cati istacatij.

Toteco yaya taicnelijcayot

⁷Nohuampoyohua cati nimechicnelía, ma timoicnelijtinemica se ica seyoc pampa taicnelijcayot huala ten Toteco. Huan nochi cati nelía teicnelíaj, injuanti iconehua Toteco huan quiixmatij Toteco. ⁸Cati amo teicnelía amo quiixmati Toteco, pampa Toteco, yaya taicnelijcayot. ⁹Toteco technextili hasta canque techicnelía pampa techititanili Icone iyoytzi para ma huala ipan ni taltipacti para ma tijpiyaca nemilisti yancuic por ya. ¹⁰Ya ni technextilijtoc se teicnelijcayot cati melahuac. Amo tojuanti tiquicnelijque Toteco huan yeca Cristo hualajqui. Elqui Toteco Dios cati techicneli huan yeca techititanili Icone para yaya elis nopa tacajchahualisti cati taxtahuas por totajtacolhua.

¹¹Nohuampoyohua cati nimechicnelía, sinta Toteco techicnelijtoc quej nopa, huajca monequi ma timoicnelica. ¹²Yon se masehuali amo quema quiitztoc Toteco Dios, pero sinta timoicnelíaj, huajca Toteco mocahuas ipan tojuanti huan mojmosta itaicnelijcayo monextis ipan tojuanti ica cati cuali tijchihua. ¹³Tijmatij para melahuac timocahuaj ipan Toteco huan yaya mocahua ipan tojuanti pampa yaya techmacatoc Itonal. ¹⁴Huan tiquitz-toque Icone Toteco huan timechyolmelahuaj para melahuac Toteco Dios quititanqui Icone para ma eli inintemaquixtijca nochi cati itztoque ipan ni taltipacti. ¹⁵Huan cati quinneltoca huan quinyolmelahua masehualme para Jesús nelía Icone Toteco, Toteco mocahua ipan ya huan ya mocahua ipan Toteco.

¹⁶ Tojuanti ya tiqiztzoque quenecatza Toteco techicnelía huan ipan iteicnelijcayo tojuanti timotemachijtoque. Toteco yaya taicnelijcayot. Huan cati mojmosta teicnelía mocahua motatzquilijtoc ipan Toteco huan Toteco mocahua ipan ya. ¹⁷ Huan quema timocahua j timotatzquilijtoc ipan Toteco, nopa taicnelijcayot qui piya itajca para tojuanti pampa techmacas temachili iuxpa ipan nopa tonal quema Toteco techtequitachilis. Tijpiyase nopa temachili ipan nopa tonali pampa ipan taltipacti tiitztoyaj quej Jesús. ¹⁸ Amo monequi tiquimacasise yaya cati tahuel techicnelía, pampa ita icnelilis quitamiltía nochi majmajti. Sinta tojuanti timajmahuij, huajca ti-jnextíaj tiquimacasij se tatzacuiliti huan ya nopa quinextía para ayemo senquisu cuali moscaltijtoc iteicnelilis Toteco ipan tojuanti.

¹⁹ Tojuanti tiquicnelíaj Toteco, pampa yaya achtohui techicneli. ²⁰ Sinta se masehuali quiijtohua: “Niquicnelía Toteco”, pero yaya quicualancaita se iicni, huajca yaya se istacatiquet. Pampa cati amo quicnelía se iicni cati quiiztoc, amo huelis quicnelis Toteco cati amo quiiztoc. ²¹ Huan Toteco techmacatoc ni tanahuatili: Yaya cati nelía quicnelía Toteco, monequi nojquiya ma quinicneli iicnihua.

5

Ya tijtanque cati amo cuali ipan ni taltipacti

¹ Nochi cati quineltocaj para Jesús itztoque iconehua Toteco. Huan nochi cati quicnelíaj Toteco Dios, nojquiya quinicnelíaj nopa sequinoc cati Toteco quinchijtoc iconehua. ² Huan tijmatij tiquinicnelíaj iconehua Toteco quema tiquicnelíaj Toteco huan tijtoquilíaj cati yaya technahuatijtoc. ³ Huajca para tiquicnelíaj Toteco quinequi quiijtos tijtoquilíaj itanahuatilhua, huan itanahuatilhua amo ohuij. ⁴ Huan nochi iconehua Toteco quitanij cati amo cuali ipan ni taltipacti quema motemachíaj ipan Toteco para quinpalehuis ma tatanica. ⁵ ¿Ajquiya inijuanti nopa masehualme cati quitanij cati amo cuali ipan ni taltipacti? Quitanij inijuanti cati quineltocaj para Jesús itztoque Icone Toteco.

Cati Itonal Toteco quiijtohua ten Cristo

⁶ Huan nesqui para Jesucristo eltoc nelía Icone Toteco quema mocuaalti huan quema quitoyajqui ieso huan mijqui. Jesucristo amo san mocuaalti, pero mocuaalti, huan quitoyajqui ieso huan mijqui. Huan Itonal Toteco nojquiya teyolmelahua para ya ni cati melahuac. ⁷ Pampa itztoque eyi cati teyolmelahuaj cati melahuac nepa ilhuicac. Itztoque Toteco Totata, itztoque Icone cati itoca nopa “camanalí” pampa tenextilía Totata, huan itztoque Itonal Toteco. Huan ni eyi elij san setzi. ⁸ Huan onca eyi tamanti ipan ni taltipacti cati techilhuíaj para melahuac Jesucristo yaya icone Toteco. Achtohui Itonal Toteco techilhuía ipan toyolo para melahuac. Ica ompa tijcayque quema Toteco Dios tayolmelajqui para yaya Icone quema Jesús mocuaalti, huan ica expa nojquiya tanemijya nesqui para eli Icone quema quitoyajqui ieso huan mijqui. Huan nochi ni eyi tamanti technextilía para Jesucristo yaya Icone Toteco. ⁹ Sinta se masehuali teyolmelahua cati nelía quiiztoc, tijneltoque icamanal. Huajca monequi achi más tijneltoquiliise Toteco Dios pampa yaya iselti techyolmelajtoc ajquiya Icone. ¹⁰ Huan cati quineltoca Icone Toteco quimati ipan iyolo para melahuac cati quineltoca pampa nojna Toteco quiyolmelajtoc ajquiya icone. Huan nopa masehualme cati amo

quineltocaj cati Toteco quijito ten Icone, quitocaxtiáj Toteco se istacatiquet, pampa amo quineltocaj cati quijito para ajquiya Icone. ¹¹ Huan ya ni cati Toteco techyolmelahua: Toteco techmacatoc nemilisti cati yancuic huan ni nemilisti cati yancuic eltoc ipan Icone Jesucristo. ¹² Yaya cati quipiya Icone Toteco ipan iyolo quipiya nemilisti cati yancuic, pero cati amo quipiya Icone, amo quipiya nopa nemilisti.

Juan quinnahuatijtejqui

¹³ Nimechtajcuilhuía amojuanti cati anquineltocaj itoca* Icone Toteco. Nijnequi xijmatica temachti ya anquipiyaj nemilisti yancuic cati amo quema tamis, huan para más xijneltocaca ya.

¹⁴ Huan tijmatij temachti sinta tijtajaníaj Toteco cati quinamiqui ica cati yaya quinequi, yaya techtacaquilía. ¹⁵ Huan sinta tijmatij para temachti techcaquilía nochi cati tijtajaníaj, tijmatij temachti yaya techmacas nopa cati tijtajanijtoque.

¹⁶ Sinta acajya quiita iicni ipan Cristo tajtacolchihua, pero amo se tajtacoli cati nima quihualicas nopa tatzacuiliti para ma miqúi, huajca ximotatajtica para ya huan Toteco quimacas nemilisti, sinta amo quichijtoc tajtacoli cati quihualica miqúilisti. Se masehuali huelis quichihuas tajtacoli cati quihualicas miqúilisti, huan amo nimechilhuía para xijtajanica Toteco por cati quej nopa quichihua. ¹⁷ Nochi cati amo cuali, eltoc tajtacoli, pero onca tajtacoli ica cati se amo miqúis por cati quichijtoc.

¹⁸ Tijmatij iconehua Toteco amo tajtacolchijtinemij pampa Icone Toteco quinmocuitahuía para nopa Amocualtatcat ma amo hueli quinitzqui ica imax.

¹⁹ Tojuanti tijmatij temachti tiiconehua Toteco huan nochi sequinoc masehualme campá hueli ipan taltipacti mocahuaj ipan ichicahualis Amocualtatcat.

²⁰ Huan tijmatij temachti hualajtoc Icone Toteco huan techmacatoc tamachiliti para huelis tiquixmatise Toteco yaya cati melahuac Dios. Huan tiitztoque san se ica ya cati melahuac, pampa tiitztoque ipan Icone, Jesucristo. Yaya temachti Toteco huan yaya cati temaca nemilisti cati yancuic. ²¹ Nocodehua cati nimechicnelía, ximotachilica para amo xiquintepanitaca taixcopincayome o tamanti cati masehualme quinchijtoque ica inimax huan quinitaj quej elisquía Dios. Quej nopa ma eli.

* 5:13 1 Jn. 5:13 O itequiticayo.

Nopa Ompa Amatajcuiloli cati Juan Quiijcuilo

Ma timoicnelica se ica seyoc

¹ Na ninopa huehue tacat niquijcuilohua ni amatajcuiloli para nopa sihuat cati Toteco quitapepenijtoc. Nojquiya niquintajcuilhuía iconehua. Nimechicnelía nochi amojuanti. Nojquiya amechicnelíaj nochi masehualme cati quimatij cati melahuac. ² Nochi tojuanti timechicnelíaj pampa tijselijtoque cati melahuac ipan toyolo huan nopa cati melahuac mocahuas tohuaya para nochipa. ³ Toteco Totata huan Tohueyiteco Jesucristo cati Icone Totata ma quipiyaca hueyi iniyolo ica nochi tojuanti cati tijtoquilíaj cati melahuac huan tiquinicnelíaj toicnihua. Ma techtasojtaca huan ma techmacaca tasehuillisti.

Xijtoquilica nopa cuali tamachtalisti ten Cristo

⁴ Nipaqui miyac pampa niqitac sequij moconehua nemij ipan cati melahuac quej Toteco Totata technahuati ma tijchihuaca. ⁵ Huajca nosihuaicni, ama xijchihua cati nimitztajtania. Amo nimitztajcuilhuía para nimitzmacas se yancuic tanahuatili. San nimitzilhuía nopa tanahuatili cati Toteco technahuati quema achtohuiya tijneltocaque Cristo. Ma timoicnelica se ica seyoc. ⁶ Teicnelijcayot quijtosnequi tijchijtnemis nochi cati Toteco technahuatijtoc. Huan ya ni nopa tanahuatili cati Toteco technahuatijtoc: Ma tiquinicnelijtnemica masehualme quej techilhui ma tijchihuaca hasta quema achtohui tijneltocaque Cristo.

Nopa tacajcayahuani

⁷ Itztoque miyac tacajcayahuani cati ajsitoque campa hueli ipan taltipacti huan quijtohuaj Jesucristo amo mocuetqui masehuali ica itacayo quej tojuanti. Cati quijtohua ya nopa, yaya nopa tacajcayajquet. Yaya se icualancaitaca Cristo. ⁸ Titequititoque chichahuac nozona campa amojuanti para huelis anquiselise se taxtahuili ipan nopa tonali quema Toteco temacas. Ximotachilica para amo xijpoloca. Ximotachilica huan Toteco ajsitoc amechtaxtahuis.

⁹ Sinta se masehuali pehua quineltoca seyoc tamachtili huan amo mocahua tatzquitoc san ipan nopa tamachtalisti ten Cristo, huajca yaya amo quipiya Toteco. Pero se cati mocahua tatzquitoc san ipan nopa cati Cristo tamachtli, yaya quipiya Toteco Totata huan Icone ipan ya. ¹⁰ Sinta se acajya, ajsi campa anitztoque huan amo tamachtía cati melahuac ten Cristo, amo xijselica ipan amocalijtic huan amo xijvolchichahuaca ica cati quichihua. ¹¹ Pampa sinta se quiyolchichahuas, quipalehuis ica nopa cati amo cuali quichihua.

Juan quinnahuatijtejqui

¹² Onca miyac tamanti para nimechilhuis, pero amo nijnequi niquijcuilos nochi ipan amat pampa nijchiya para niyas nozona campa anitztoque. Huan timoixtachilijtose timocamanalhuse huan tahuel miyac tipaquise san sejco. ¹³ Iconehua mosihuaicni cati Toteco nojquiya quintapepenijtoc mitzontajpalohuaj. Quej nopa ma eli.

Nopa Expa Amatajcuiloli cati Juan Quiijcuilo

Nochi camanaltique cuali ten Gayo

¹ Na ninopa huehue tacat nimitztajcuilhuía, tinohuampo Gayo, cati nelía nimitzicnelía.

² Noicni cati nimitzicnelía, quema nimotatajtía, nijtajanía Toteco para nochi tamanti ipan monemilis ma yahui cuali. Nijtajanía Toteco para xiitzto cuali ipan motacayo quej nojquiya moalma eltoc cuali iixpa. ³ Nelía nipajqui quema hualajque toicnihua huan techilhuijque quenicatza tijtoquilía cati melahuac huan tijchihua cati xitahuac. ⁴ Amo teno huelis nechmacas más paquilisti, pampa miyac nipaqui quema nijcaqui para noconehua nemij ipan se ojti cati xitahuac.

Gayo quinmocuitahui tamachtiani ten icamanal Toteco

⁵ Noicni Gayo cati nimitzicnelía, nelía tijchihua cati cuali quema tiquin-selía huan tiquinpalehuía toicnihua cati tamachtijtinemij, huan quema tiquinselía cati sejoyoc ehuaní. ⁶ Inijuanti techyolmelahuacoj titaneltocani nica ipan ni totiopa quenicatza titeicnelía. Cualí para tiquinpalehuis ipan iniojhui cati quitequipanohuaj Toteco, pampa ya nopa quinamiqui ma tijchihuaca ica cati quitequipanohuaj Toteco. ⁷ Pampa nopa tamachtiani yahuij campa huéli pampa quicnelíaj Toteco. Huan amo teno quiselíaj ten sequinoc cati amo quineltocaj Toteco. ⁸ Huajca monequi tiquinpalehuise cati quitequipanohuaj Toteco para quej nopa inijuanti huan tojuanti san sejo tijchihuase para ma momoyahua cati melahuac.

Amo cuali cati Diótfefes quichijqui

⁹ Na niquijcuilo para xiteselica ipan seyoc amatajcuiloli huan nijtitanqui nopona ipan nopa tiopamit ten taneltocani. Pero Diótfefes cati quipactía tayacanas nopona, amo quiselía totequiticayo huan amo quitacaquilía cati tiquijtohuaj. ¹⁰ Quema niajsiti nopona, nimechilhuis nopa cati fiero quichihua, pampa yaya techejelnamictinemi huan techistacahuijtinemi. Huan amo san ya nopa quichihua, nojquiya yaya amo quinselía toicnihua cati tamachtijtinemij icamanal Toteco. Huan quintzacuilía sequinoc cati quinequij quinselise, huan sinta acajya quinselía totamachtijcahua, quin-quixtía ipan tiopa.

¹¹ Noicni cati nimitzicnelía, amo xijtoquili se cati amo cuali. Xijtoquili cati cuali. Cati quichihua cati cuali quinextía para yaya iaxca Toteco, huan cati quichihuaj cati amo cuali quinextíaj amo quixxmatij Toteco.

Demetrio quitoquili cati cuali ojti

¹² Nochi taneltocani camanaltij cuali ten toicni Demetrio huan melahuac inincamanal. Tojuanti nojquiya timechyolmelahuaj para Demetrio quito-quilía se cuali ojti huan anquimatij melahuac cati tiquijtohuaj.

Juan quinahuatijtejqui

¹³ Nijpixtoc miyac tamanti cati nijnequiyaya nimitzilhuis, pero amo niqui-jcuilos nochi ipan ni amat. ¹⁴ Pampa nijnequi niyas nepa achi nimantzi huan timoixtachilijtose timocamanalhuise.

¹⁵ Ma Toteco mitzmaca tasehuilisti. Mitzontajpalohuaj mohuampoyohua nica. Techontajpalhuili sese tohuampo cati itztoc nopona.

Nopa Amatajcuiloli cati Judas Quiijcuilo

Judas quintajcuilhui taneltocani

¹ Na niJudas cati niicni Jacobo. Na niitequiapanojca Jesucristo. Nimechta-cuilhui amojuanti cati Toteco Dios amechnotztoc huan amechiyocacajtoc para anelise antatzejteloltique ipan Dios Totata pampa san se anitztoque ica Jesucristo. ² Ma Toteco amechtasojta miyac. Ma amechmaca miyac tasehuilisti ipan amoyolo. Ma amechicneli miyac hasta ma onmocahua.

Tacame cati tamachtiaj cati amo melahuac

(2 P. 2:1-17)

³ Nohuampoyohua cati nimechicnelia, tahuel nijnequiyaya nimechtajcuil-huis para nimechilhuis más ten quenicatza Toteco techtajtacolquixtjtoc nochi tojuanti masque tiisraelitamé o amo. Pero amantzi niquita monequi nimechtajcuilhuis para nimechylchicahuas para xitamachtica chichahuac huan chichahuac xijmanahuica icamanal Toteco cati Toteco quicajqui tomaco san se huelta para nochipa tojuanti cati tiitatzejteloltijca masehualhua.

⁴ Monequi xijmanahuica icamanal Toteco pampa nopona campa amojuanti calactoque ixtacatzí sequij tacame cati Toteco hasta huejcajquiya quisenca-jqui para ma quiselica nopa hueyi tatzacuiliti quej ijcuiljtoc ipan Icamanal, pampa inijuanti amo quiixmatij Toteco. Tamachtiaj para cuali tijchihuase ten hueli tajtacoli pampa hueyi iyolo Toteco ica tojuanti. Inijuanti amo quineltočaj para Jesucristo itztoc Tohueyiteco huan para yaya Dios Cati Quiipya Nochi Chichahualisti.

⁵ Masque ya anquimatij nochi ya ni, nijnequi nimechelnamiquiltis. Hue-jcajquiya Toteco quinmanahui imasehualhua ten tali Egipto, pero teipa quintzontamilti sesen ten nopa masehualme cati teipa ayecmo quitoquili-jque. ⁶ Nojquiya xiquelnamiquica taya Toteco quinchihuili iilhuicac ejcahua cati mocuetque amo cuajcualme. Inijuanti amo quitascamatque campa quipixque tequiticayot nepa ipan ilhuicac, pero quita huelcajtejque campa itztoyaj huan tajtacolchijque. Ama Toteco quinpixtoc ipan tzintayohuilot ilpitoque ica tepos cadenas. Nopona itztose para nochipa huan quichixtoque para quiselise inintatzacuilitis ipan nopa hueyi tonati quema Toteco quin-tajtolxitahuas. ⁷ Huan san se quej nopa ilhuicac ehuan cati tajtacolchijque, nojquiya quichijque san se tajtacoli quej quichijque nopa masehualme ipan altepeme Sodoma, Gomorra huan nopa sequinoc altepeme ininechca. Quichijque cati amo quinamiqui quichijosquiaj ica inintacayohua hasta tacame quichijque miyac tamanti ica tacame, huan sihuame ica sihuame. Huan Toteco quintamilti nopa altepeme ica tit para techcahuilis se ejemplo ten nopa tit cati amo quema sehuis cati quinchiya masehualme cati tajta-colchihuaj.

⁸ Nojquiya nopa fiero tacame cati calactoque campa amojuanti san se quichihuaj miyac tajtacoli. Inijuanti nemij quej ipan temicti, pampa ten hueli tajtacoli cati más fiero quichihuaj ica inintacayo. Amo quintepanitaj cati quipiyaj tequiticayot. Hasta nojquiya quinhuetzquiliaj nopa ajacame cati quipiyaj más chichahualisti. ⁹ Pero yon Miguel, nopa itayacanca ilhuicac ejca Toteco, amo quej nopa quitajilhui Amocualtacat quema monajnan-quiliyaya ihuaya ten itacayo nopa mijcatzi Moisés. Amo motemacac para san ten hueli quijtos, pero Miguel quihui Amocualtacat: “Ma Toteco mitzacahuati.” ¹⁰ Pero nopa huilhui tacame cati itztoque campa amojuanti

quintajilhüaj tamanti cati amo quimachilüaj. Itztoque quej tapiyalme cati nimantzi quichihüaj cati inintacayo quinequi pampa amo quipiyaj talnamiquilisti.

¹¹ Teicneltzitzitzi injuanti pampa Toteco quintatzacuilitis miyac. Quitoquilijtoque ifiero ojhui Caín. Huan quej Balaam cati itztoya huejcajqüiya, nopa tacame cati campa amojuanti ten hueli quinequij quichihuase para quitanise tomi. Yeca polihuisse quej Coré cati huejcajqüiya mosisini ica Toteco. ¹² Quema antacüaj san sejco pampa anquicnelüaj Tohueyiteco, nelüa se pinahualisti, pampa nopa fiero tacame amo pinahuaj tacuase tahuel miyac pampa san moilhüaj ten injuanti iniselti. Nopa tacame cati tacajcayahuani itztoque quej mixti cati amo techhualiquilüa at huan san quihuica ajacat. Itztoque quej cuame cati amo quema taquij. Ni tacame ompa mictoque pampa amo quipiyaj inintajca, huan nojqüiya itztoque quej cuame cati tziloncuejtoque. Yon quentzi amo quipiyaj nemilisti. ¹³ Itztoque quej se hueyi at cati tahuel moxoyahua huan mosisinia huan teipa san quihualcahua tasoli ipan xali. Nopa tacame nojqüiya san amechhuiquilüaj tajtacoli cati eli se pinahualisti. Itztoque quej sitalime cati quicajtejtoque iniojhui campa nejnemiyayaj, huan yeca Toteco quiiyocacajtoc se lugar cati quinchüya campa se tzintayohuilot cati tahuel yayahuic. Nopona mochahuase para nochüpa.

¹⁴ Huejcajqüiya Enoc nopa ichicumpa ixhui Adán quiijto taya panosquía teipa ica fiero masehualme quej cati itztoque amohuaya. Enoc quiijto: “Xiqüita, Tohueyiteco hualas ica miyac miles ten iaxcahua cati tatzejtzeltolique, ¹⁵ huan quintajtolcencahuase nochü masehualme ipan taltipacti. Huan quintalilis tatzacuilitilisti nochü amo cuajcualme por cati amo cuali quichijtoque pampa amo quitepanitaj Toteco. Quintatzacuilitis nochü tajtacolchihuani ica nochü nopa fiero camanali cati quiijtojtoque para quitajilhuisse Toteco.” ¹⁶ Nopa amo cuajcualme cati itztoque campa amojuanti quitajilhüaj nochü tamanti huan nochü masehualme. Quichihüaj ten hueli tajtacoli cati quinequij quichihuase. Mohueyimatij quema camanaltij. Quinhueyimatij sequinoc para quincajcayahuase, para ica ya nopa, ma quinchihuilica cati cuali.

Judas quinyolchicajqui taneltocani

¹⁷ Pero amojuanti cati nimechicnelüa, amo xijchihuaca quej nopa tacame. Xiquelnamiquica quej camanali cati itayolmelajcahua Tohueyiteco Jesucristo quiijtoque huejcajqüiya. ¹⁸ Pampa itayolmelajcahua amechilhüijque: “Ipan itamiya tonali oncas masehualme cati quihualme cati quihuetzquilise Toteco Ica-manal huan quitoquilise cati amo cuali quinequij quichihuase.” ¹⁹ Huan ama nopa masehualme ya ajsitoj campa amojuanti. Inijuanti quimatij quenicatza tetajcoxelohüaj pampa senquisa quitoquilüaj tamanti cati san injuanti ipan inintalnamiquililis quinequij quichihuase. Amo quipiyaj Itonal Toteco.

²⁰ Pero amojuanti cati nimechicnelüa, ximotetilica ipan cati anquinelto caj pampa tatzejtzeltolitic huan senquisa cuali cati tijnelto caj. Ximotatajtica ica ichicahualis Itonal Toteco. ²¹ Nochüpa xinemica cuali ica Toteco para huelis anquilitase quenicatza miyac amechicnelüa. Quej nopa xinemica ipan ni tonali quema tijchüyaj para Toteco techmacas nopa nemilisti cati amo quema tamis huan techmacas pampa techtasojta.

²² Xiquintasojtaca injuanti cati ayemo nelcuali quinelto caj Toteco huan xiquinpalehuica. ²³ Xiquinmaquixtica sequinoc ten nopa tatzacuiliti cati

huala quej anquinqxistisquíaj ipan tit. Huan itztoque sequinoc cati mon-
equi anquintasojtase, masque amo anquinequij anquiiitase nopa tajtacoli
cati injuanti quichihuj huan anquiiijyaj inintajtacolhua quej se quiiijyaj
quiiitzquis se yoyomit cati fiero.

Judas quinnahuatijtejqui

²⁴ Ma tijhueyichihuaca Toteco cati qui piya chichahualisti amech-
mocuitahuis para amo xitajtacolchihuaca. Yaya ica miyac paquillisti
amechixnextis iixpa nozona campa itatanex huan amo anquiiiyase yon
se amotajtacol. ²⁵ Ma tijhueyichihuaca yaya cati iselti itztoq Dios huan
amo aquí seyoc. Yaya cati techtajtacolquixtijtoc ica Tohueyiteco Jesucristo.
Quena, yaya ipa quipixtoc nochi hueyitilisti, tanahuatili, chichahualisti huan
tequiticayot, huan quipixtos para nochipa. Quej nopa ma eli.

Ni Amatapohuali Quipiya cati Jesucristo Technextilijtoc

Jesucristo technextiliya ni

¹ Ni amat techilhúia ni tamanti cati Toteco quipanextili Jesucristo para ma technextiliqui tojuanti tiitequipanojcahua. Huan ni tamanti panos ipan ten hueli talojtzi quema amo tijchiyaj ma pano. Jesucristo nechitanilisi se ilhuicac ejquet cati nechnextili ni tamanti para ma niquinpohuili sequinoc itequipanojcahua. Na niJuan huan niitequipanojca Jesucristo. ² Huan nica niqijcuilohua ni tamanti para nimechpohuilis nochi cati niqiztzc huan nochi icamanal Toteco cati Jesucristo techilhui.

³ Toteco quitiochihuas yaya cati quipohuas ni amatapohuali cati techilhúia ama cati panos teipa. Huan quintiochihuas nochi cati quicaquise ni camanali huan quichihuase cati techilhúia pampa nechcatitoc para panos ni tamanti.

Juan quintajpalo masehualme ipan chicome tiopame ten taneltocani

⁴ Na niJuan, nimechtajpalohua amojuanti ipan chicome tiopame ten taneltocani ipan tali Asia. Ma quipiya hueyi iyolo ica amojuanti Toteco Dios cati ama itztoc, huan ipa itztoya, huan itzto para nochipa; huan Itonal Toteco cati itztoc quej chicome taahuilme cati mocahua iixmelac ihueyi siyaj Toteco, ⁵ huan Jesucristo cati nochipa techilhúia cati temachti. Jesucristo itztoc cati achtohui moyolcuic ten nochi mijcatzitzi, huan yaya nopa tanahuatijquet cati quinnahuatía nochi tanahuatiani ipan taltipacti. Jesucristo techicnelía huan ica ieso cati quitoyajqui ipan cuamapeli, techyolpajajqui ten totajacolhua. Ni Toteco ma amechmaca tasehuilisti ipan amoyolo.

⁶ Jesús techchijtoc titanahuatiani huan titotajtzitzi iixpa iTata, Toteco Dios. Yaya cati ipa quipixtoc nochi hueyitilisti huan nochi tequiticayot huan quipixtos para nochipa. Quej nopa elis.

⁷ Xiquitaca, Jesucristo hualas ipan mixti.

Nochi masehualme quiitase hasta nojquiya quiitase injuanti cati quicuaxaque quema itztoya ipan cuamapeli.

Huan nochi tamanti masehualme ipan taltipacti cati camanaltij nochi tamanti camanali, chocase huan momajmatise quema quiitase ya huala.

Quena, quej nopa ma eli.

⁸ Toteco Dios quiijtohua: “Na niitztoc quej nopa letra A cati achtohui huan quej nopa letra Z cati itamiya. Na niipeja huan niitamiya nochi cati onca. Xiquitaca, na niitztoc ama huan ipa niitztoya huan para nochipa niitztos. Na niitztoc Cati Nijjya Acha Chichahualisti.” Quej nopa Toteco quiijto.

Juan quiitac Jesucristo ica itatanex

⁹ Na niJuan nimechtajcuilhúia. Na niamoicni. Toteco quipiya tanahuatili ipan noyolo quej nojquiya ipan amoyolo. San sejco titaijyohuíaj pampa tiiaxcahua Jesucristo huan monequi tijpiyase toyolo quej yaya quipixqui iyolo. Na niJuan niitztoya ipan se piltaltzi cati itoca Patmos tatajco ipan hueyi at campa techhuicaque huan techzajque pampa nitepohuiliyaya icamanal Toteco huan niquinilhuyaya masehualme ten Jesucristo. ¹⁰ Huan ipan se tonali cati taiyocatalili para Tohueyiteco, elqui quej ichichahualis Itonal Toteco hualajqui ipan na huan pejqqui niitztoc quej nitatemiquiyaya.

Huan nijcajqui se cati camanaltic chicahuac ica noica. Huan nijcajqui icamanal quej elisquía se tapitzali.

¹¹ Huan nechilhui: “Na niitztoc quej nopa letra A cati achtohui huan quej nopa Z cati itamiya. Na niipeya huan niitamiya nochi cati onca. Xiquijcuilo ipan se amatapohuali nochi cati tiquitas huan xiquintitanili nopa chicome tiopame ten taneltocani ipan tali Asia. Xiquintitanili nopa chicome tiopame ipan altepeme Éfeso, Esmirna, Pérgamo, Tiatira, Sardis, Filadelfia huan Laodicea.”

¹² Huan nimoicancuetqui para niqutas ajquiya nechcamanalhuiyaya. Huan quema nimoicancuetqui, niqutac chicome taahuil quetzalme ten oro.

¹³ Huan tatajco nopa taahuil quetzalme niqutac se cati nesiyaya quej yaya cati Mocuetqui Masehuali. Huan moquentijtoya iyoyo cati ajsic hasta iicxico huan ica oro motajcoilpitoya ica se tajcoilpicayot cati patahuac cati quitza-cuayaya iyolixco. ¹⁴ Itzonteco huan itzoncal eliyaya nelchipahuac quej ichcat o quej nexti. Huan iixteyol eliyaya quej tixochime cati quisaj ipan se tit. ¹⁵ Huan iicxi cahuaniyaya quej se teposti bronce cati cuali quiicxititjoque ipan tit huan cuali quipojpojtogue. Huan nijcajqui itoscac cati caquistiyaya chicahuac quej quema nopa hueyi at ajcahuaca ica nochi ichichualis.

¹⁶ Ipan inejmat quipixtoya chicome sitalime. Huan icamaco quisayaya se macheta huehueyac cati oncac tatequi, huan ixayac cahuaniyaya quej cahuani tonati ica tajco tona.

¹⁷ Huan quema niqutac Jesucristo quej nopa, nihuetzqui iicxita quej nimictoc. Huan yaya nechtalili imanejmat huan techilhui: “Amo ximomajmati. Na niipeya huan niitamiya nochi cati onca. ¹⁸ Na cati nijpiya nemilisti ipan na. Nimijqui, pero ama niitztoc para nochipa. Na nijpiya nopa llaves para miquilisti huan campa itztoque mijcatzitzli, pampa san na nijpiya tequiticayot para niqijtos ajquiya itztos nepa. ¹⁹ Xiquijcuilo cati ya tiqiztoc, huan cati ama eltoc, huan cati panos teipa. ²⁰ Ama nimitzilhuis taya quijtosnequi nopa chicome sitalime cati tiqutac nomaco huan taya quijtosnequi nopa chicome taahuil quetzali ten oro. Nopa chicome sitalime quijtosnequi nopa chicome ilhuicac ehuan cati quinyacanaj nopa chicome tiopame ten taneltocani. Huan nopa chicome taahuil quetzalme ten oro quijtosnequi nopa chicome tiopame ten taneltocani.”

2

Camanali para nopa tiopamit ipan altepet Éfeso

¹ Huan Jesucristo nechilhui: “Xijtajcuilhui nopa ilhuicac ejquet* ipan nopa tiopamit ten taneltocani cati eltoc ipan altepet Éfeso. Xiquilhui para na niJesucristo cati nijpiya nomaco nopa chicome ilhuicac ehuan cati tayacanaj ipan nopa chicome tiopame. Huan ninemi tatajco nopa chicome tiopame ten taneltocani. Xiquilhui quej ni niquilhuía:

² “Nijmati nochi cati anquichihuj. Nijmati para chicahuac antequitij huan anquipiyaj amoyolo ica nochi cati amechpanotihuala. Nijmati amo anquinijyohuíaj cati amo cuajcualme. Quema ajsitoj tacajcayahuani cati motocaxtíaj itayolmelajcagua Toteco, nijmati para anquinye-yyeojque huan anquinixmatque para istacatini. ³ Anquixtoque amoyolo quema anquipanotoque taohuijcyot pampa antechicnelíaj.

* **2:1** 2:1 Nojquiya huelis tijpatase ni camanali ica náhuat ica “itatitanil Toteco” o “nopa tayacanquet” ipan nopa tiopamit.

Antequititoque chichahuac huan amo ansiyajtoque, yon amo antechajtoque.

- 4 “Pero niquita se tamanti cati amo ijqui. Ayecmo antechicnelíaj huan ayecmo anmoicnelíaj quej achtohuiya. ⁵ Huajca xiquelnamiquica quenicatza antechicneliyayaj achtohuiya huan ximoyolpataca huan sempa quej nopa techicnelica. Sinta amo anmoyolcuépaj, huajca nimantzi niyas nopona huan nimechquixtilis amotaahuil quetzal campa eltoc. ⁶Nojquiya nijmati seyoc tamanti cati cuali anquichihujaj. Anquicualancaitaj cati quichihujaj nopa nicolaitame cati na nojquiya amo nijnequi niquitas.
- 7 “Nochi anquikipiyaj amonacas, huajca xijtacaquilica huan xijmachilica cati Itonal Toteco quinilhuía taneltocani ipan tiopame, pampa quijjtohua: Nochi masehualme cati quitanij cati amo cuali quicuase itajca nopa cuahuit cati temaca nemilisti para nochipa. Nopa cuahuit ijcatoc campa tahuel tayejyetzti nepa campa itztoc Toteco.”

Camanali para nopa tiopamit ipan altepet Esmirna

8 Huan Jesucristo nechilhui: “Xijtajcuilhui nopa ilhuicac ejquet ipan nopa tiopamit ten taneltocani ipan altepet Esmirna huan xiquilhui para na niipejya huan niitamiya nochi cati onca. Nimijqui huan sempa nimoyolcuic huan quej ni niquilhuía:

- 9 “Nijmati nochi cati anquichihujaj. Nijmati quenicatza antaijyohuíaj por na. Nijmati tahuel anteicneltziti, masque nelía antapijpixtoque iixpa Toteco. Nijmati quenicatza amechtajilhuíaj nopa masehualme cati quijjtohuaj para israelitame huan imasehualhua Toteco, pero amo cana. Cati itztoque ipan nopa israelita tiopamit, injuanti nelía iaxcahua Amocualtatcat pampa yaya cati injuanti quitequipanohujaj. ¹⁰Amo xiquimacasia cati monequi anquijyohuise. Amo huejcahuas injuanti cati quittoquilíaj Amocualtatcat amechtazacuse sequij ten amojuanti ipan tatzacti para amechyejyecose, huan antaijyohuise majtacti tonati. Pero xiitztoca antemachme huan amo techcahuaca masque monequi anmiquise. Huan na nimechmacas se corona cati eli nemilisti para nochipa.
- 11 “Nochi anquikipiyaj amonacas, huajca xijtacaquilica huan xijmachilica cati Itonal Toteco nica quinilhuía taneltocani ipan nochi tiopame. Cati quitanise cati amo cuali amo yase micta campa masehualme quijjyohuise nopa ompa miqulisti.”

Camanali para nopa tiopamit ipan altepet Pérgamo

12 Huan Jesucristo nechilhui: “Xijtajcuilhui nopa ilhuicac ejquet ipan nopa tiopamit ten taneltocani ipan altepet Pérgamo huan xiquilhui para na cati nijpiya se macheta cati oncac tatequi huan quej ni niquilhuía:

- 13 “Nijmati nochi cati anquichihujaj huan nojquiya nijmati anitztoque ipan nopa altepet campa nochi quihueyichihujaj Amocualtatcat. Pero noja antechtoquilíaj ica nochi amoyolo. Amo anquicajtoque antechneltocej masque itoquilijcahua Amocualtatcat quimictijque Ántipas cati quinpohuiliyaya masehualme ten na mojmosta.
- 14 “Pero niquita se ome tamanti cati amo ijqui. Anquincahuilíaj masehualme ma itztoca amohuaya cati quichihujaj cati Balaam quichijqui huejcajquiya. Balaam quihuihuil Balac ma quinmacti israelitame ma

quicuaca tacualisti cati quitallijtoyaj iniixpa taixcopincayome quej tacajcahualisti. Huan ica ya nopa quinchijqui ma huetzica ipan tajtacoli. Nojquiya quihlhuí ma quinmachi israelitame ma quichihuaca tamanti ica cati amo inintahuical, huan ya nopa cati quichihuaj nopa masehualme cati itztoque campa amojuanti. ¹⁵ Huan amojuanti nojquiya anquinpixtoque masehualme cati quitoquilíaj ininfiero tamachtilis nopa nicolaitame cati na amo nijnequi niquitas. ¹⁶ Huajca ximoyolcuepaca, pampa sinta amo anmoyolpatase, niyas nimantzi huan niquintehuis ica nocamanal cati eltoc quej se macheta cati quisa ipan nocamach.

¹⁷ “Nochi anquipiyaj amonacas, huajca xijtacaquilica huan xijmachilica cati Itonal Toteco nica quinilhuía taneltocani ipan tiopame. Cati quitanise cati amo cuali niquinmacas nopa tacualisti cati huala ten ilhuicac cati amo aqui huéli quuita. Huan nijmacas se piltetzi cati chipahuac huan quipiyas se tocayot cati yancuic cati ijculijtoc ipani huan amo aqui quimatis nopa yancuic tocayot cati Toteco quimacas, san yaya cati quiselía.”

Camanali para nopa tiopamit ipan altepet Tiatira

¹⁸ Huan Jesucristo nechilhui: “Xijtajuilhui nopa ilhuicac ejquet ipan nopa tiopamit ten taneltocani ipan altepet Tiatira huan xiquilhui para na niIcone Toteco. Na nijpiya noixteyol cati cahuani quej tixochit huan nijpiya noicxi cati nesi quej nopa teposti bronce cati nelía cuali quipojpojtque huan quej ni nijnequi niquihuis:

¹⁹ “Nijmati nochi cati anquichihuaj huan quenecatza miyac anteicnelíaj. Nijmati chicahuac antechneltočaj huan antechtequipanohuaj. Anquijyohuijtoque nochi cati amechpanotihuala, huan mojmosta más anquichijiyahuij cati cuali ama huan amo quej anquichihuayayaj achtohuiya.

²⁰ “Pero niquita se ome tamanti cati amo ijqui. Anquicahuilíaj nopa sihuat Jezabel ma quinmachi huan ma quinyacana ipan se fiero ojti notequipanojcahua. Yaya motocaxtía se itajtolpanextijca Toteco huan quijtohua tamachtía camanali cati Toteco quimacatoc, pero amo cana. Yaya quinmachtía taneltocani ma quichihuaca tamanti inihuaya cati amo itahuical. Quinmachtía ma quicuaca tacualisti cati sequinoc quitallijtoque quej se tacajcahualisti iniixpa taixcopincayome. ²¹ Nijchixqui miyac tonali para Jezabel ma moyolcuepa, pero amo quinequi quicahuas momecatía. ²² Huajca nijmacas se cocolisti cati ica huilantos ipan itapech huan taijyohuis miyac. Nojquiya taijyohuise nochi cati momecatiyayaj ihuaya sinta amo quicahuase inintajtacol. ²³ Huan niquinmictis nochi cati quitoquilíaj itamachtil Jezabel, sinta amo moyolpataj, pampa itztoque quej iconehua. Yeca taneltocani quimatise ipan campa huéli tiopame para na, niJesucristo, nijmati cati sese amojuanti anmoilhuiíaj ipan amotalnamiquilis huan nijmati cati eltoc ipan sese amojuanti amoyolo. Huan nimechcuepilis sese ten amojuanti quej quinamiqui. ²⁴ Pero nojquiya nijpiya se camanali para nopa sequinoc ten amojuanti ipan altepet Tiatira cati amo anquitoquilijtoque itamachtil nopa sihuat huan amo anquixmajtoque cati injuanti quitocaxtíaj nopa ‘tamachtilisti cati más huejcapa’

ten Amocualtatcat. Ica amojuanti amo teno más monequi nimechnahuatis. ²⁵ San nijnequi xijchijtinemica nopa cuali tamanti cati ama anquichihuj hasta quema nihualas. Amo xisiyahuica.

²⁶ “Nochi masehualme cati quitanise cati amo cuali huan quichijtinemise cati nimechilhujtoc hasta itamiya, nimechmacas tequiticayot anquinnahuatise masehualme ipan nochi talme. ²⁷ Chichahuac anquinnahuatise. Huan sinta masehualme amo amechtepanitase, anquinchihuilise quej elisquía se comit cati tatapaca. Anquippiyase san se tequiticayot quej noTata nechmacatoc na. ²⁸ Huan nojquiya nimechmacas nopa sitali cati cahuani chichahuac ica ijnaloc quema nechca para tanesis. ²⁹ Nochi anquippiyaj amonacas, huajca xijtacaquilica huan xijmachilica cati Itonal Toteco nica quinilhuía taneltocani ipan nochi tiopame.”

3

Camanali para nopa tiopamit ipan altepet Sardis

¹ Huan Jesucristo nechilhui: “Xijtajcuilhui nopa ilhuicac ejquet ipan nopa tiopamit ten taneltocani ipan altepet Sardis huan xiquilhui para na cati nijpiya nopa chicome itonalhua Toteco huan nopa chicome sitalime, huan quej ni niquilhuía:

“Nijmati nochi cati anquichihuj. Nijmati sequinoc quijtohuaj cuali anitzoque huan cuali anquitequipanohuj Toteco, pero amo cana. Eltoc quej anmictoque iixpa Toteco. ² Xiisaca huan xijmacaca tetili nopa tamanti cati noja anquichihuj cati quentzi cuali, pampa amo nijpantía para anquichihuj cati cuali iixpa Toteco. ³ Xiquelnamiquica icamanal Toteco cati anquicactoque huan anquiselijoque. Xijchihuaca nochi cati nopa camanali quijtohua. Ximoyolcuetepaca ica cati amo cuali anquichihuayayaj. Sintá amo, niyas campá amojuanti quema amo antechchijaj quej ajsi se tachtejquet. Huan amo anquimatise ipan taya hora nijsiti.

⁴ “Pero itztoque se quesqui taneltocani amohuaya ipan altepet Sardis cati amo quisoquihujtoque ica tajtacoli iniyoyo. Inijuanti moyoyontise ica cati chipahuac huan nejnemise nohuaya, pampa quej nopa quinamiqui cati itztoque tapajpactique iixpa Toteco. ⁵ Quena, nochi masehualme cati quitanise cati amo cuali Toteco quinyoyontis ica iniyoyo cati chipahuac. Huan amo quema niquixpolos inintoca ipan nopa amatapohuali cati quiypiya ajquiya inijuanti itztose para nochipa. Huan na niquijtos iixpa noTata huan iilhuicac ejchahua para nopa masehualme noaxchahua. ⁶ Nochi anquippiyaj amonacas, huajca xijtacaquilica huan xijmachilica cati Itonal Toteco nica quinilhuía taneltocani ipan nochi tiopame.”

Camanali para nopa tiopamit ipan altepet Filadelfia

⁷ Huan Jesucristo nechilhui: “Xijtajcuilhui nopa ilhuicac ejquet ipan nopa tiopamit ten taneltocani ipan altepet Filadelfia huan xiquilhui para na cati senquisa nitatzetzelolitic huan nitemachti. Xiquinilhui para na nijpiya illaves huan itequiticayo Tanahuatijquet David. Quema nijtapos se puerta, amo aquí huelis quitzacuas huan quema nijtzacuas se puerta, amo aquí huelis quitapos. Xiquilhui para quej ni nijnequi niquilhuis:

- 8 “Nijmati nochi cati anquichihuj. Masque pilquentzi amochichualis, anquitoquilíaj nocamanal huan amo anquicajtoque para anquinilhuíaj masehualme para annoaxcahua. Huajca nimechtapohuili se puerta amoixpa cati amo aqui hueli quitzacuas. 9 Xiquitaca, nijchihuas para nopa masehualme cati iaxcahua Amocualtatat ma hualaca huan ma motancaquetzaca amoicxiten, huan quiijtose para amajuanti nopa masehualme cati nimechicnelía. Nopa masehualme quiijtohuj para injuanti israelitame huan imasehualhua Toteco, pero amo cana. San istacatij.
- 10 “Nimechilhujtoc xijpiyaca amoyolo ica cati amechpanotihuala, huan nelía anquitacaquilijtoque nocamanal, huajca na nimechmocuitahuis para amo amechajsis nopa hora quema oncas taijyohuili ipan ni taltipacti para quinyeyecos cati itztoque nica. 11 Xiquitaca, ipan ten hueli talojtzi nihualas. Huajca xijtoquilijtinemica icamanal Toteco cati anquipiyaj para amo aqui amechquixtilis nopa corona cati anquixelise nepa ilhuicac. 12 Huan masehualme cati quitanise cati amo cuali niquinchihuas ma elica quej taquetzalme ipan ihueyi tiopa noTeco, huan amo quema quisase. Huan niquijcuilos ipan nopa masehualme itoca noTeco huan itoca nopa yancuic altepet Jerusalén, ialtepe noTeco cati temos ten ilhuicac campa yaya itzoc. Huan niquijcuilos ipan injuanti notoca cati yancuic. 13 Nochi anquipiyaj amonacas, huajca xijtacaquilica huan xijmachilica cati Itonal Toteco nica quinilhuía taneltocani ipan nochi tiopame.”

Camanal para nopa tiopamit ipan altepet Laodicea

14 Huan Jesucristo nechilhui: “Xijtajcuilhui nopa ilhuicac ejquet ipan nopa tiopamit ten taneltocani ipan altepet Laodicea huan xiquilhui para na cati nijpiya nochi tequiticayot. Na nitemachti huan na cati niquinilhuía masehualme cati nelía xitahuac. Xiquilhui ica na Toteco quichijqui nochi cati onca huan na nijnahuatía, huan quej ni niquilhuía:

- 15 “Nijmati cati anquichihuj. Amo antechcualancaitaj huan amo antechicnelíaj. Anitztoque quej se tamanti cati amo sesec, yon amo totonic. Más cuali sinta antechcualancaitaj o antechicnelisquíaj, 16 pero pampa anitztoque quej se at cati yamanca totonic, huajca monequi nimechisotas. 17 Anquijtohuaj antapijpixtoque huan amo teno amechpolohua, pero amo anquimachilíaj sinta iixpa Toteco fiero anitztoque. Yaya amechijiya. Anteicneltziti, anpopoyotziti huan anxolome iixpa ya. 18 Huajca nimechnotza xihualaca campa na para nimechmacas cati amechchihuas nelía cuali iixpa. Amo xijtemoca ten hueli oro, pero techcohuilica oro cati más cuali cati xipajpactoque ipan tit para nelía anmoricojtilise. Huan techcohuilica yoyomit cati nelía chipahuac quej Toteco quinmaca cati itztoque xitahuac iixpa, huan ya nopa anmoquentise para ayecmo anpinahuase pampa anxolome iixpa. Huan techcohuilica ixteyol pajti para anmotequilise ipan amoixteyol para anquiihase cati melahuac.
- 19 “Na cati niquintacahualtía huan niquintalnamictía nochi masehualme cati niquinicnelía, huajca ica nochi amoyolo ximoehcapanoca huan ximoyolpataca.

²⁰ “Xiquita, nimoquetza campa puerta huan nimitznotza. Sinta tech-toscaquis huan techcaltapos, nicalaquis huan nitacuas mohuaya huan tielis tinohuampo. ²¹ Huan nochi masehualme cati qui-tanise cati amo cuali niquincahuilis ma mosehuica nohuaya nepa campa nimosehuía para nitanahuatis, san se quej na nijtanqui cati amo cuali huan nimosehuía ihuaya noTata nepa campa yaya tanahuatía. ²² Nochi anquipiyaj amonacas, huajca xijtacaquilica huan xijmachilica cati Itonal Toteco nica quinilhuía taneltocani ipan tiopame.”

4

Juan quiita Toteco nepa ipan ilhuicac

¹ Teipa nijtachili huan niquitac se puerta cati tapojtoya nepa ilhuicac. Huan yaya cati nechcamanalhui achtohuiya huan cati quipixtoya itoscac quej se tapitzali chichahuac, sempa nechnotzqui huan nechilhui: “Xitejco nica huan nimitznextilis taya panos teipa.”

² Huan nimantzi elqui quej Itonal Toteco quihuicac notonal ihuaya quej ipan se temicti. Huan nepa ipan ilhuicac niquitac nopa hueyi siyaj quej cati iaxca se tanahuatijquet, huan Toteco Dios mosehujtoya nozona. ³ Huan yaya cahuaniyaya quej se tamanti cati nelpano cuajcualtzi. Cahuaniyaya más huan amo quej nopa tet cati tahuel patriyo cati itoca jaspe o cati itoca cornalina. Huan yahualtic ihueyi siyaj petaniyaya se acosamalot cati nesqui quej nopa tet cati tahuel patriyo cati itoca esmeralda. ⁴ Huan nopa veinticuatro siyas quej para tanahuatiani quiyahualojtoyaj ihueyi siyaj Toteco. Huan ipan nopa siyas niqunitac mosehujtoyaj veinticuatro huehue tacame cati moquentijtoyaj iniyoyo cati nelchipahuac. Huan nochi nopa huehue tacame quipiyayaj coronas ten oro ipan inintzonteco. ⁵ Huan ten nopa hueyi siyaj quisayaya tapetanilot huan tatomonilot huan tahuejchijcayot. Huan imelac ihueyi siyaj Toteco eltoya chicome taahuil quetzalme cati taahuijtoyaj. Huan ya quinescayotiyayaj nopa chicome itonalhua Toteco. ⁶ Huan iixmelac nopa hueyi siyaj oncaiyaya se tamanti cati nesqui quej hueyi at cati tzalantic quej tescat huan cahuaniyaya quej nopa tet cati itoca cristal.

Huan iixmelac nopa hueyi siyaj huan yahualtic itztoyaj nahui tamanti cati yoltoque huan campa hueli ininpani quipixtoyaj iniixteyolhua. Quipixtoyaj iniixteyolhua iniixpa huan iniica. ⁷ Huan nopa achtohui tamanti cati yoltoc nesiyaya quej se león huan nopa ompa nesqui quej se hueyi toro cati quimati taxahua. Huan nopa expa tamanti cati yoltoc quipixtoya ixayac quej se tacat, huan nopa najpa tamanti cati yoltoc eliyaya quej se hueyi cuatojti cati quipatajtoya ieltapalhua quej elisquía patantinemi. ⁸ Huan sesen ten nopa nahui tamanti cati yoltoque quipixtoyaj chucase inieltapalhua huan campa hueli ininpani quipiyayaj iniixteyolhua inieltapalijtic huan ininpani. Huan amo quema motilquetzayayaj tayohua huan tonaya, san quijtohuayayaj:

“Tatzetzelolitic, quena, senquisa tatzetzelolitic Toteco Dios Cati Quipiya Nochi Chichahualisti.

Yaya ipa itztoya,
huan ama itztoc,
huan itztos para nochipa.”

⁹ Huajca nochipa nopa tamanti cati yoltoque quej nopa quihueyichi-huayayaj, quihueyitascamatiyayaj huan quinxtiliyayaj inintatepanitacayo Toteco Dios cati mosehuía ipan nopa hueyi siyaj, yaya cati itztoc para nochipa huan amo quema tamis itztos. Huan sese huelta quema nopa

tamanti cati yoltoque quihueyimatij Toteco, ¹⁰ nopa veinticuatro huehue tacame nojquiya motancuaquetzaj iixpa yaya cati itztoe para nochipa, huan injuanti nojquiya quihueyimatij. Huan nopa huehue tacame nojquiya quitalaj inincoronas imelac ihueyi siyaj huan quijtohuaj:

¹¹ “Ta tiToteco Dios cati nelpano tihueyi.

Nochi chichahualisti tijpiya.

Quinamiqui ma timitznexutilica nochi tatepanitacayot.

Quinamiqui para san ta ma timitzhueyichihuaca.

Ta tijchijchijqui nochi cati onca.

Quena, nochi cati onca eltoe pampa elqui mopaquilis para ma onca, huan yeca tijchijchijqui.”

5

Juan quiitac nopa Pilborregoitz huan se amatapohuali cati mimilijtoe

¹ Huan niquitac se amatapohuali mimilijtoe ipan imanejmat Toteco Dios cati mosehujtoya ipan ihueyi siyaj. Huan nopa amatapohuali cati mimilijtoe quipixtoya tajcuiloli ijtice huan ipani huan quitzactoyaj ica chicome sellos. ² Huan niquitac se ilhuicac ejquet cati nelia tetic cati tzajtzayaya chichahuac huan quijtohuayaya: “¿Ajquiya senquisa cuali huan quinamiqui para quitapanas isellos ni amatapohuali huan quitapos?”

³ Pero amo aqui cati itztoya ipan ilhuicac, yon amo aqui cati itztoya ipan taltipacti, yon amo aqui cati itztoya tatzinta ten taltipacti huelqui quitapos nopa amatapohuali para quiitas cati ijcuilijtoe nozona. ⁴ Huajca pejqni nichoca miyac pampa amo aqui quipantijque cati senquisa cuali huan quinamiqui para quitapos nopa amatapohuali cati mimilijtoe huan quiitas cati ijcuilijtoe ipani. ⁵ Huan se ten nopa veinticuatro huehue tacame nechilhui: “Ayecmo xichoca. Xiquita, itztoe se cati huelis quitapos. Yaya quipiya hueyi tanahuatili quej se león. Yaya se iteipan ixhui Judá cati huejcajquiya itztoya huan nojquiya yaya se iteipan ixhui nopa hueyi tanahuatijquet David huan tanahuatis campa David tanahuatiyaya. Ya quitantoe cati amo cuali huan quinamiqui para quitapanas nopa chicome sellos cati quitzactoe nopa amatapohuali cati mimilijtoe huan quitapos.”

⁶ Huajca nijtachili huan niquitac se Pilborregoitz. Huan nopa Pilborregoitz tanemijya quihualicayaya campa quicocojqne quema masehualme quimictijque. Huan yaya moquetzayaya tatajco nopa hueyi siyaj campa itztoyaj nopa nahui tamanti cati yoltoque huan nopa veinticuatro huehue tacame. Huan nopa Pilborregoitz quipixtoya chicome icuacua huan chicome iixteyol cati quinescayotiyaya nopa chicome Itonalhua Toteco cati quintantoe campa hueli ipan taltipacti. ⁷ Huan nopa Pilborregoitz yajqui huan quicuito nopa amatapohuali cati mimilijtoe cati eltoya ipan inejmat Toteco Dios cati mosehujtoya ipan nopa hueyi siyaj cati yejyetzti. ⁸ Huan quema quicuic nopa mimilijtoe amatapohuali, nopa nahui tamanti cati yoltoque huan nopa veinticuatro huehue tacame motancuaquetzque iixpa nopa Pilborregoitz. Sesen ten injuanti quipixtoyaj se arpa ica icuerda para tatzotzonase. Huan quipixtoyaj miyac ticomit ten oro temitoe ica copali cati quijtosnequi nochi camanali cati masehualme cati iaxchahua Toteco quijtojttoyaj quema motatajtiyayaj. ⁹ Huan injuanti cati itztoyaj nepa iixpa nopa Pilborregoitz huicaque se tiohuicat cati yanquic, quijtojqne: “Ta senquisa ticuali.

Huan quinamiqui tijcuis nopa mimilijtoe amatapohuali huan tijtapanas isellos.

Pampa mitzmictijque huan ica moeso tijcohui Toteco tojuanti cati tihualahui ten nochi xinachti masehualme, huan cati ticamanaltij nochi tamanti camanali.

Tijcohui Toteco tojuanti cati tihualahuij ipan masehualme cati quipiyaj sesen tamanti inintalnamiqullis huan inincostumbres, huan cati tiehuani ipan nochi talme.

¹⁰ Huan techchijtoc ma tielica titanahuatiani huan titotajtzitzi iixpa Toteco Dios, huan para ma titanahuatica ipan taltipacti.”

¹¹ Nijtachili huan nijcajqui inincamanal tahuel miyac millones huan millones ten ilhuicac ehuan cati huicayayaj huan quiyahualojtoyaj nopa hueyi siyaj campa itztoya Toteco. Huan quinyahualojtoyaj nopa nahui tamanti cati yoltoque huan nopa veinticuatro huehue tacame. ¹² Huan nochi nopa ilhuicac ehuan huicayayaj chichahuac huan quijtohuayayaj:

“Senquisa cuali ni Pilborregoitz cati masehualme quimictijque.

Huan quinamiqui para nochi masehualme ma quinextilica nochi tatepanitacayot,

huan ma quihueyichihuaca huan ma quipaquilismacaca.

Yaya quipiya nochi chichahualisti huan nochi talnamiqullisti.

Huan quinamiqui para nochi cati ipati elis san ya iaxca.”

¹³ Huan nijcajqui cati quijtojque nochi masehualme, tapiyalme, michime, totome, huan nochi sequinoc tamantzitzi cati Toteco quinchijchijtoc ipan ilhuicac, huan ipan taltipacti, huan tatzinta ten taltipacti, huan ipan hueyi at. Huan nochi injuanti quijtohuayayaj:

“Ma tijpaquilismacaca nopa Pilborregoitz huan Toteco Dios cati mosehua ipan nopa hueyi siyaj cati yejyetzti.

Ma tiquinnextilica nochi tatepanitacayot, huan ma tiquinhueyichihuaca para nochipa.

Inijuanti quipiyaj nochi chichahualisti huan quipiyase nochi chichahualisti para nochipa huan amo quema tamis.”

¹⁴ Huan nopa nahui tamanti cati yoltoque quijtohuayayaj: “¡Quej nopa ma eli!”

Huan nopa huehue tacame motancuaquetzque huan quihueyimatque Toteco Dios huan nopa Pilborregoitz.

6

Nopa chicome sellos

¹ Huan quema nijtachilyaya, nopa Pilborregoitz quitapanqui nopa achtohui sello ten nopa chicome sellos ipan nopa mimilijtoc amatapohuali. Huan nijcajqui se ten nopa nahui tamanti cati yoltoque camanaltic huan icamanal caquistic quej quema tatomoni, huan yaya quijto: “¡Xihuala, xiquitaqui!”

² Huan nijtachili huan niquitac se cahuayo chipahuac, huan yaya cati tejcotoya ipani quipixtoya se cuahuitoli imaco para quimajcahuas cuataminti. Huan quimacaque se corona pampa elqui se tatanquet cati yajqui para más tataniti.

³ Huan nopa Pilborregoitz quitapanqui nopa ompa sello, huan nijcajqui nopa ompa tamanti cati yoltoc quijto: “¡Xihuala, xiquitaqui!”

⁴ Huan quisqui seyoc cahuayo cati chichiltic. Huan yaya cati tejcotoya ipani quipixqui tanahuatili para quiquixtilis tasehuilisti ten taltipacti. Yaya quipixqui tanahuatili para quichihuas ma onca miyaj tatehuilisti campa hueli ipan taltipacti huan para masehualme ma miyjmictica campa hueli. Huan se quimacac se hueyi macheta.

⁵ Huan nopa Pilborregoitzzi quitapanqui nopa expa sello, huan nijcayqui nopa expa tamanti cati yoltoc quuijto: “¡Xihuala, xiquitaqui!”

Huan nijtachili huan niquitac se cahuayo yayahuic, huan yaya cati tejcotoya ipani quipixtoya imaco se balanza. ⁶ Huan nijcayqui se cati camanaltic tatajco ten nopa nahui tamanti cati yoltoque, huan quuijto: “Tahuel ohui para masehualme mopanoltise pampa nochi tapatiyo. Se kilo trigo o eyi kilos cebada ipati cati se tacat hueli quitani ipan se tonal tequit, pero amo xijenpolo nopa aceite huan xocomecat iayo.”

⁷ Huan nopa Pilborregoitzzi quitapanqui nopa najpa sello, huan huajca nijcayqui nopa najpa tamanti cati yoltoc quuijto: “¡Xihuala, xiquitaqui!”

⁸ Huan nijtachili huan niquitac se cahuayo istaltic quej nesi ixayac se mijcatzi. Huan cati tejcotoya ipani itoca Miquilisti. Huan yaya cati quitoquiliyaya quinescayotiyaya nopa lugar campa yahuij mijcatzitzí. Huan quipiyayayaj tanahuatili para quimictise se ipan sese nahui masehualme ipan faltipacti. Quinchihuase ma miquica ipan tatehuilisti, o ica mayanti, o icaocolisti, o para ma quinmictica tecuanime cati itztoque ipan faltipacti.

⁹ Huan nopa Pilborregoitzzi quitapanqui nopa macuilpa sello, huan niquitac itantita taixpamit inalma nopa masehualme cati quinmictijtoyaj pampa quineltocayayaj icamanal Toteco huan pampa quinilhuyayaj sequinoc ten ya. ¹⁰ Huan chicahuac quuijtoque: “Tohueyiteco, ta cati titatzejtzeltic. Ta cati titemachtí. ¿Quesqui tonali más monequi tijchiyase para tiquintajtolsenahuas masehualme cati itztoque ipan faltipacti por cati fiero techchihuilijtoque? ¿Hasta quema tiquincuepilis cati techmictijque?”

¹¹ Huan Toteco quinmacac sese injuanti iniyoyo cati chipahuac huan huehueyac. Quinilhui ma mosiyajquetzaca quentzi más tonali pampa ayamo tecuepilis masehualme hasta quintamimictise nochi imiyaca nopa masehualme cati Toteco quixquetztoya para quinmictise pampa nojquiya quitequipanohuyayaj Toteco.

¹² Huan nijtachili quema nopa Pilborregoitzzi quitapanqui nopa chicuasempa sello. Huan chicahuac mohuiso tali, huan tonati mochijqui yayahuic quej se cati moyoyontía yayahuic quema acayja miqui. Huan metzti mochijqui chichiltic quej esti. ¹³ Huan nopa sitalime ten ilhuicac tepejque ipan faltipacti quej se lalax cuahuit tepelui itajca cati selic quema chicahuac taajaca. ¹⁴ Huan ilhuicacti motajcoitac huan sese lado momimilo huan patantejqui huan ayecmo nesqui. Huan nochi tepeme huan nochi piltaltzitzí ipan hueyi at mijcuenijque. ¹⁵ Huan motatijque nochi tanahuatiani ipan faltipacti, huan huejhueyi tequichihuaní, huan capitanes, huan masehualme cati tapijpixtoque, huan cati quipixque miyac chicahualisti. Motatijque tequipanohuani cati iniaxahua inintecohua, inihuaya masehualme cati amo quipixque inintecohua. Nochi san motatijque ipan ostome campa huejhueyi tet huan inintzala teme cati eltoc nechca tepeme. ¹⁶ Huan quinilhuyayaj nopa tepeme huan nopa huejhueyi teme: “Xihuetzica topani. Techtatica para amo techitas yaya cati mosehuía ipan nopa hueyi siyaj. Techtatica para amo techajsis icualancayo nopa Pilborregoitzzi. ¹⁷ Pampa ya ajsico nopa hueyi tonali quema techtatzacuiltis huan amo aquí huélis quuijyohuis.”

7

Toteco quinmocuitahuis miyaqui israelitame

¹ Teipa niqunitac nahui ilhuicac ehuaní cati moquetztoyaj ipan nahui inacasta faltipacti. Huan injuanti quitzacuiltiyayaj nopa nahui tamanti ajacat cati taajaca ipan faltipacti para amo ma taajaca ipan tali, yon ipan

hueyi at, yon ma amo taajaca ipan yon se cuahuit. ² Huan niquitac seyoc ilhuicac ejquet cati tejcoyaya campa quisa tonati huan quipixtoya isello Toteco Dios cati yoltoc. Huan nopa ilhuicac ejquet tzajtzc chicahuac para quincamanalhuis nopa nahui ilhuicac ehuaní cati quipixtoyaj tanahuatili para quinenpolose tali huan hueyi at. Huan nopa ilhuicac ejquet quinilhui nopa sequinoc: ³ “Amo xijnempoloca tali, yon hueyi at, yon cuame, hasta tiquintallise se sello ipan inincauixco cati quitequipanohuaj Toteco.”

⁴ Huan nijcajqui quesqui masehualme quintalilijque se sello para quinex-tise iaxcahua Toteco huan eltoyaj ciento cuarenta y cuatro mil masehualme cati eliyayaj ininteipan ixhuhua nochi majtacti huan ome itelpocahua Israel ten huejcajquiya. ⁵ Huan quintalili sello ipan:

12,000 iteipan ixhuhua Judá,

12,000 iteipan ixhuhua Rubén,

12,000 iteipan ixhuhua Gad,

⁶ 12,000 iteipan ixhuhua Aser,

12,000 iteipan ixhuhua Neftalí

12,000 iteipan ixhuhua Manasés,

⁷ 12,000 iteipan ixhuhua Simeón,

12,000 iteipan ixhuhua Leví,

12,000 iteipan ixhuhua Isacar,

⁸ 12,000 iteipan ixhuhua Zabulón,

12,000 iteipan ixhuhua José huan

12,000 iteipan ixhuhua Benjamín.

Tahuel miyaqui masehualme quihueyichihuaj Toteco

⁹ Teipa nijtachili huan niquinitac nelpano miyaqui masehualme hasta amo aqui hueli quinpohua. Hualajtoyaj ten campa hueli talme, huan ten nochi xinachtí masehualme, huan ten masehualme ica sesen tamanti inintalnamiqulil huan inincostumbres, huan masehualme cati camanaltij nochi tamanti camanali cati onca ipan taltipacti. Huan nochi inijuanti moquetzttoyaj imelac nopa hueyi siyaj huan iixpa nopa Pilborregojtzi. Moquentijtoyaj iniyoyo cati chipahuac huan cati huehueyac huan inimaco quipixtoyaj imacuayo apachijti, ¹⁰ huan tzajtziyayaj chicahuac huan quii-jtohuayayaj:

“¡Hueyi paquilisti!

Ya techmaquixti ni Pilborregojtzi huan Toteco Dios cati mosehuía ipan ihueyi siyaj cati yejyectzi.”

¹¹ Huan nochi ilhuicac ehuaní cati moquetzttoyaj yahualtic ten nopa nahui tamanti cati yoltoque huan nopa huehue tacame motancuaquetzque imelac nopa hueyi siyaj cati yejyectzi huan quihueyimatque Toteco. ¹² Quiijtojque:

“¡Paquilisti!

Ma tijpaquilismacaca huan ma tijhueyichihuaca Toteco Dios para nochipa huan amo quema ma tami.

Ma tijnextilica nochi tatepanitacayot,

huan ma tijhueyitascamatica para nochipa.

San yaya quipiya nochi talnamiqulisti, huan nochi tequiticayot,

huan nochi chicahualisti, huan yaya quipiyas para nochipa.

Quej nopa ma eli.”

¹³ Huan teipa se ten nopa veinticuatro huehue tacame nechtatzintoquili: “¿Ta tijmati ajquiya inijuanti ne cati moquentíaj iniyoyo chipahuac huan huehueyac, huan ten canque hualajtoque?”

¹⁴ Huan na niquilhui: “Tate, ta cati tijmati ya nopa.”

Huan yaya nechilhui: “Inijuanti hualajque ten nopa tonali ten hueyi taijyohuulisti huan quichicuenijtoque iniyoyo ica ieso nopa Pilborregojtzi, huan yeca quichijtoque chipahuac iniyoyo.

¹⁵ “Yeca moquetzaj imelac ihueyi siyaj Toteco huan quitequipanohuaj tay-ohua huan tonaya nepa ipan ichaj.

Huan Toteco Dios cati mosehuía ipan ihueyi siyaj cati yejyectzi quinmocuitahuía.

¹⁶ Ayecmo quema mayanase, yon amiquise.

Huan ayecmo quintatis tonati, yon ayecmo quimatise tatotoniya chichahuac.

¹⁷ Pampa nopa Pilborregojtzi cati itztoc tatajco nopa hueyi siyaj cati yejyectzi elis inintamocuitahuijca.

Huan quej se tamocuitahuijquet quichihua ica iborregojhua, yaya quinhuicas campa meya at cati yoltoc huan cati temaca nemilisti para nochipa.

Huan Toteco quinhuachilis iniixayo para ayecmo quema chocase.”

8

Nopa chicompa sello

¹ Huan nopa Pilborregojtzi quitapanqui nopa chicompa sello, huan amo aqui molini nepa ilhuicac nechca se tajco hora. ² Huan niqunitac chicome ilhuicac ehuaní cati moquetzttoyaj iixpa Toteco Dios huan quinmacaque chicome tapitzali, se para sese injuanti. ³ Huan seyoc ilhuicac ejquet hualajqui huan moquetzqui nechca taixpamit huan quipixtoya se ticomit ten oro. Huan quimacaque miyac copali para quitatis iixpa Toteco para ma tejcós ipocyo lhuaya nochi camanali cati masehualme cati iaxcahua Toteco quijitójque quema motatajtiyayaj. Huan nopa ilhuicac ejquet quitejqui nochi cati eltoya ipan itico ipan nopa taixpamit ten oro imelac nopa hueyi siyaj para quimacas Toteco. ⁴ Huan nopa pocti quisqui ipan nopa ticomit cati nopa ilhuicac ejquet quipixtoya imaco, huan tejcoc iixpa Toteco lhuaya nochi camanali cati motatajtiyoyaj masehualme cati iaxcahua Toteco. ⁵ Huan nopa ilhuicac ejquet quicuic nopa ticomit huan quitemiti ica ticoli cati eltoya ipan taixpamit, huan teipa quimajcajqui ipan taltipacti. Huan nimantzi pejqui tatomoni, huan taajcahuaca, huan tapetani, huan chichahuac mohuiso tali.

Nopa tapitzali

⁶ Huan nopa chicome ilhuicac ehuaní cati quipixtoyaj nopa chicome tapitzali mocualtalijque para tapitzase.

⁷ Huan quema nopa cati achtohui tapitzqui, quimajcajque ipan taltipacti tesihuit huan tit maneltic ica esti. Huan tatic se ipan eyi talme, huan se ipan eyi cuame, huan tatic nochi xihuime huan sacat.

⁸ Huan nopa ompa ilhuicac ejquet tapitzqui huan quimajcajque ipan hueyi at se tamanti quej se hueyi tepet cati tatayaya, huan se ipan eyi huejhueyi at mocuetqui esti. ⁹ Huan se ipan eyi michime huan tamantzitzi cati itztoque ipan hueyi at mijque, huan quisosolo se ipan eyi huejhueyi cuaacalme cati nemiyayaj ipan hueyi at.

¹⁰ Huan nopa expa ilhuicac ejquet tapitzqui huan se hueyi sitali cati tatayaya quej se ticuahuit huetzqui ten ilhuicac ipan se ten eyi hueyame huan amelme cati onca ipan taltipacti. ¹¹ Huan nopa sitali itoca eliyaya Cati Tahuel Chichic huan se parte ipan sese eyi partes ten nochi at mocuetqui chichic, huan miyac masehualme mijque pampa quique nopa chichic at.

¹² Huan nopa najpa ilhuicac ejquet tapitzqui huan quimaquilijque se parte ipan eyi partes ten tonati, huan se parte ipan eyi partes ten metzti, huan se ipan eyi sitalime. Huajca se parte ipan eyi partes ten tonati, huan metzti, huan sitalime mocuetque yayahuique. Huan ayecmo tonac se parte ipan eyi partes ten sesen tonal, huan ayecmo metztonayaya, yon ayecmo nesque sitalime ipan se parte ten eyi partes ten sesen tayohua.

¹³ Huan nijtachili huan niqitac se hueyi cuatojti cati patantinemiyaya nepa tatajco ilhuicacti. Huan nijcajqui quijtohuayaya chichahuac: “¡Temajmati, temajmati, temajmati para cati itztose ipan taltipacti quema quipitzase nopa eyi ilhuicac ehuan nopa eyi tapitzali cati polihuiyoc!”

9

¹ Huan nopa macuilpa ilhuicac ejquet tapitzqui huan niqitac se sitali huetzqui ten ilhuicacti hasta taltipacti. Nopa sitali quiixnextia se acayja. Huan quimacaque nopa llaves para nopa ostot cati tahuel huejcata hasta amo quipiya itzinta campa itztoque iajacahua Amocualtatcat. ² Huan quema quitapo nopa ostot, tejcoc pocti cati quisqui nozona quej ipocyo se hueyi tilelemecti. Huan ica nopa pocti cati quisqui ipan nopa ostot tzintayohuili tonati huan nochi ajacat cati quijyotilanaj masehualme. ³ Huan poc ijtic quisque chapolime cati ajsicoj ipan taltipacti huan quipixque chichahualisti para tetzacaniise quej tetzacaniaj colome cati nelia cococ ipan taltipacti. ⁴ Huan quinilhuijque nopa chapolime ma amo quinempoloca sacat ipan taltipacti, yon cuame, yon amo huelqui quinempolose yon se tamanti cati xoxohuic. San ma quincococa masehualme cati amo quipixque isello Toteco inincuaixco. ⁵ Huan quinilhuijque nopa chapolime cati tetzacaniyayaj para ma amo temictica. San ma tahuel tetajyohuiltica. Huan nopa masehualme cati amo quipiyaj isello Toteco tahuel taijyohuise para macuili metzti quej taijyohuiaj quema se colot tetzacania. ⁶ Huan ipan nopa tonali quema masehualme tahuel taijyohuise, tahuel quinequise miquise, pero amo huelise. Quichiyase huan moillhuise ama, quena, miquise, pero amo, pampa quej nopa Toteco quinequi ma taijyohuica.

⁷ Huan nopa chapolime nesiyayaj quej cahuayojme cati tacialchijchihualme para tatehuise. Huan inincuaixco quipixtoyaj coronas cati nesiyaya quej oro huan inixayac nesiyaya quej inixayac masehualme. ⁸ Huan quipixtoyaj inintzoncal quej inintzoncal sihuame, huan inintancoch quej inintancoch tecuanime. ⁹ Huan cati ica quinyolixtactoyaj nesiyaya quej teposti. Huan inieltapal caquistiyaya quej miyac cuacarros cati quintilantiyahuij miyac cahuayojme quema motalojtiahuij para tatehuitij. ¹⁰ Huan nopa chapolime quipixtoyaj inincuitapil quej colome ica inintecuayo. Huan quipixque tanahuatili para quintzopinise masehualme huan quinijyohuiltise para macuili metzti. ¹¹ Inintanahuatijca eliyaya ihueyi ilhuicac ejquet Toteco cati mocuetqui se fiero ajacat. Yaya cati tanahuatia ipan nopa ostot cati tahuel huejcata hasta amo quipiya itamiya. Yaya ipan camanali hebreo itoca Abadón. Huan ipan camanali griego itoca Apolión, huan itoca quijtosnequi Tasosoljquet.

¹² Nopa achtohui taijyohuillisti cati fiero huan temajmati ya panoc, pero noja polihui seyoc ome tamanti taijyohuillisti.

¹³ Huan nopa chicusasempa ilhuicac ejquet tapitzqui huan nijcajqui camanaltic se cati itztoya tatajco ten nopa nahui icuacua nopa taixpamit ten oro cati eltoc iixpa Toteco. ¹⁴ Huan yaya cati camanaltiyaya quinotzqui nopa chicusasempa ilhuicac ejquet huan quihui: “Xiquincahuili ma yaca

majcajtoque nopa nahui ajacame cati ilpitoque nechca nopa hueyi hueyat Éufrates.”

¹⁵ Huan quintohtonqui nopa nahui ajacame cati Toteco quinsencajtoya para nopa hora, ipan nopa tonali, ipan nopa metzti, huan ipan nopa xihuit cati yaya quitapejpenijtoya para ma quinmictica se ipan eyi masehualme cati noja itztoyaj. ¹⁶ Huan nijcajqui quesqui soldados nopa ajacame quinyacanayayaj para tatehuse. Huan elque ome ciento millones ten soldados cati tejcotoyaj ipan cahuayojme huan nopa ajacame quinyacanayayaj.

¹⁷ Huan ipan nopa tanextili cati eliyaya quej se temicti niqunitac nopa cahuayojme huan nopa tacame cati tejcotoyaj cahuayojtipa. Huan nopa tacame quihuicayayaj iniyolixco se teposti para quinmanahuis cati eliyaya chichiltic, azultic huan costic. Huan inintzonteco nopa cahuayojme eltoya quej inintzonteco nopa tecuanime cati inintoca leones. Huan ipan inincamac quisayaya tit, pocti huan azufre. ¹⁸ Huan nopa tit, pocti huan azufre cati quisayaya inincamac nopa cahuayojme quinmicti se ipan sese eyi masehualme cati itztoyaj ipan taltipacti. ¹⁹ Nopa cahuayojme quipixque chicahualisti ipan inincamac huan ipan inincuitapil para temictise. Inincuitapil nesque quej cohuame cati quipixtoyaj inintzonteco para ica tecocose.

²⁰ Pero nopa masehualme cati amo mijque ica ni tamanti cati fiero noja amo moyolpataque ten cati amo cuali quichihuayayaj. Quisenhuiquilijque quinhueyimatij iajacahua Amocualtacat huan nopa taixcopincayome huan teteyome cati quinchijchijtoque ica oro, plata, bronce, tet huan cuahuit, masque nopa taixcopincayome san quinmachijchijtoque huan amo hueli tachiyaj, yon amo hueli tacaquij, yon amo hueli nejnemij. ²¹ Huan nopa masehualme amo quinejque quicahuase temictiaj, tenahualhuiaj, momecatiaj huan tetachtequilaj.

10

Ilhuicac ejca Toteco huan nopa amatapohuali pilquentzi

¹ Huan niqunitac seyoc ilhuicac ejquet cati nelia tetec temoyaya ten ilhuicac, huan mohuijcontoya ica se mixti huan quipixtoya nopa acosamalot ipan itzonteco. Huan ixayac cahuaniyaya quej tonati huan iicxihua eltoya quej ome taquetzali ten tit. ² Huan nopa ilhuicac ejquet quipixtoya imaco se amatapohuali pilquentzi cati momimilohua huan tapojtoya nopa amatapohuali. Huan qutali iicxi ten nejmat ipan hueyi at huan iicxi ten iarraves ipan tali. ³ Huan nopa ilhuicac ejquet tzajztic chicahuac quej tzajtzi se tecuani cati itoca león. Huan quema ya tzajztitoya, tatomonijque nopa chicome tatomoniani. ⁴ Huan quema ya tahuejchijtoyaj nopa chicome tatomoniani, nimocualtali para niqijcuilos cati quijtojqe. Huan se acayja camanaltic ten ilhuicac huan nechilhui: “Amo xiquijcuilo cati quijtojqe nopa tatomoniani para amo aqui quimatis.”

⁵ Teipa nopa ilhuicac ejquet cati niqunitac moquetztoya ipan hueyi at huan ipan tali, quitejcolti imanejmat para ilhuicac. ⁶ Huan quitestigojtali Toteco cati itzoc para nochipa huan cati quichijchijqui ilhuicacti, huan taltipacti, huan hueyi at huan nochí cati itztoque ininpani. Huan nopa ilhuicac ejquet quijtojqe: “Toteco ayecmo quichiyas más. ⁷ Quema nopa chicompa ilhuicac ejquet pehuas para tapitzas, huajca panos nochí nopa tamanti cati Toteco huejcajquiya quinilhui itequipanojcahua, nopa tajtolpanextiani, para teipa panosquía.”

⁸ Huan sempa nijcajqui yaya cati achtohui nechcamanalhui ten ilhuicac, huan nechilhui: “Xiya huan xijcui nopa amatapohuali cati tapojtoc imaco nopa ilhuicac ejquet cati moquetztoc ipan hueyi at huan ipan tali.”

⁹ Huajca niyajqui campa nopa ilhuicac ejquet huan nijtajtani ma nechmaca nopa amatapohuali pilquentzi. Huan yaya nechilhui: “Xijcui huan xijcua. Huan ipan mocamac tijmatis tzopelic quej necti, pero quema tijtolos, tijmatis para chichic ipan moijti.”

¹⁰ Huajca niqitzqui nopa amatapohuali pilquentzi ten imaco nopa ilhuicac ejquet huan nijcajqui. Huan eltoya tzopelic ipan nocamac quej necti, pero ipan noijti mochiijqui chichic. ¹¹ Huan sempa nechilhui: “Mon-equi tiyas tiquinilhuiti masehualme cati Toteco mitzilhuis para teipa mochi-huas huan cati ininpantis masehualme cati quipiyaj sesen tamanti inintalnamiqulis huan inincostumbres, huan cati itztoque ipan miyac talme huan cati camanaltij miyac tamanti camanali huan inintanahuatijcahua.”

11

Nopa ome testigos ten Toteco

¹ Huan nechmacaque se ohuat cati nesqui quej se cuatopili para ica ma nitatamachihua, huan se nechilhui: “Ximoquetza huan xijtamachihuati ihuehueyaca ihueyi tiopa Toteco huan itaixpa. Huan xiquinphua quesqui masehualme cati quihueyimatij Toteco nepa. ² Pero amo xijtamachihua nopa calixpamit cati mocahua nopa seyoc lado ihueyi tiopa. San xijcahua, pampa ya nopa quinmacatoc sequinoc talme ehuan. Huan ipan moquej-quetzase nopa altepet tatzejtzolotic para eyi xihuit huan tajco. ³ Huan niquinmacas tequiticayot nopa ome notestigos huan camanaltise quej tajtolpanextiani para eyi xihuit huan tajco. Huan moquentise iniyoyo ten tequipacholi.”

⁴ Ni ome testigos, injuanti nopa cuame ten olivos huan nopa ome taahuil quetzali cati moquetzaj iixpa Toteco cati quinahuatia taltipacti. ⁵ Huan sinta se acajya quinequi quincocos nopa testigos, inincamaco quisas tit cati quintamitatis inincualancaitacahua. Quej nopa miquise cati quinequise quinmictise. ⁶ Injuanti quipiyase chicahualisti para quitzacuase ilhuicacti para ma amo huetzi at nochi nopa tonali quema quinilhuse masehualme nochi nopa camanali cati Toteco quinmacas pampa itztoque itajtolpanextijcahua. Nojquiya quipiyase chicahualisti para quichihuase nochi at ma mocuepa esti. Huan quipiyase chicahualisti para quititanise nochi tamanti taijyohuulisti cati más fiero ipan taltipacti. Huan ya nopa huelise quichihuase nochi hueltas quema quinequise quichihuase.

⁷ Huan quema nopa ome testigos tamise camanaltij para Toteco, quin-tehuis nopa fiero tapiyali cati quisas ipan nopa ostot cati tahuel huejcata hasta amo quipiya itamiya. Huan nopa fiero tapiyali quintanis huan quinmictis. ⁸ Huan inintacayo tepejtose callejtipa ipan nopa hueyi altepet Jerusalén campa masehualme quicuumapeloltijque Tohueyiteco. Huan ipan nopa tonali nopa altepet eltos fiero quej altepet Sodoma huan quej tali Egipto. ⁹ Huan nochi xinacht masehualme, huan nochi masehualme cati quipiyaj sesen tamanti inintalnamiqulis huan inincostumbres, huan cati camanaltij nochi tamanti camanali, huan cati ehuan ipan nochi talme quiitase inintacayo nopa mijcatzitzi para eyi tonati huan tajco. Huan amo aqui quicahuilise para ma quintalpacho. ¹⁰ Huan nochi masehualme cati iaxcahua ni taltipacti paquise, huan ilhuichihuase huan motamajmacase, pampa ya mictose nopa ome testigos cati camanaltiyayaj para Toteco huan quintaijyohuiltiyayaj. ¹¹ Pero ica eyi tonati huan tajco Toteco quinchihuas

nopa ome tayolmelahuani ma moyolcuica sempa huan moquetzase. Huan tahuel momajmatise nochi cati quinitase. ¹² Huan nopa ome testigos quicaquise se cati quinnotzas ten ilhuicac, huan quinilhuis: “Xihualaca nica huejcapa.” Huan tejcose ilhuicac ipan se mixti, huan inincualancaitacahua noja quintachilijtose. ¹³ Huan ipan nopa hora chichahuac mohuisos tali ipan nopa altepet huan huetzise se parte ipan sesen majtacti partes ipan nopa altepet huan chichahui mocahuase. Huan chicome mil masehualme miquise quema mohuisos tali. Huan cati amo miquise tahuel momajmatise huan quihueyichihuase Toteco cati itztoc ilhuicac.

¹⁴ Ya panoc nopa ompa tamanti cati fiero huan cati temajmati. Xiquita nopa expa tamanti cati fiero nimantzi ajsis.

Nopa chicompa tapitzali quihualica nopa expa tamanti cati fiero

¹⁵ Huan nopa chicompa ilhuicac ejquet tapitzqui huan nijcajqui miyac cati itztoyaj ipan ilhuicac cati tzajtzi que chichahuac, huan quijtojqque:

“Ama nochi taltipacti mochijtoc iaxca Toteco Dios huan iaxca Cristo para ma quinahuati.

Huan yaya tanahuatis para nochipa huan amo quema tamis.”

¹⁶ Huan nopa veinticuatro huehue tacame cati mosehuaj ipan inisiyas yejyectzitzi iixpa Toteco motancuaquetzque huan quihueyimatque Toteco Dios. ¹⁷ Huan quijtojqque:

“Timitzhueyitascamatij Toteco Dios cati tijpiya nochi chichahualisti.

Ta tiitztoya hasta quema ipejya nochi ten onca huan ama tiitztoc huan noja tiitztos para nochipa.

Timitztascamatij pampa ama ta tijcuitoc mochichahualis cati nelhueyi huan ya pejqui titanahuatia.

¹⁸ Tahuel mitzualancaitaque masehualme ipan nochi tualme cati amo mitzneltocej,

huan ama ya ajsic tonali para ta tiquincualancaitas huan tiquintatzacuiltis.

Ya ajsic tonali para ta, Toteco, tiquintajtolsencahuas cati mictoque.

Ya ajsic hora tiquintaxtahuis motajtolpanextijcahua cati mitztequipanohuayayaj,

huan momasehualhua cati tiquinchijtoc tatzejtzololtique.

Huan tiquintaxtahuis nochi masehualme cati mitztepanitaj ten cati huejhueyi masehualme hasta cati pisiltzitzi.

Huan ajsic hora para tiquintzontamiltis injuanti cati tasosolohuayayaj ipan taltipacti.”

¹⁹ Huan niquitac tapojtoya ihueyi tiopa Toteco cati eltoc nepa ilhuicac. Huan nepa calijtic nesqui nopa Caxa cati quipixqui nopa camanal sencahuali cati Toteco quichijqui ica imasehualhua huejcajquiya. Huan tapetaniyaya, huan tahuejchihuayaya, huan tatomoniyaya, huan mohuisohuayaya tali, huan huetziyaya huejhueyi tesihuit.

12

Nopa sihuat huan nopa dragón

¹ Huan nepa ilhuicac nesqui se hueyi tanextili, se sihuat cati mohuijcontoya ica tonati huan quipixtoya metzti iicxi tantita. Ipan itzonteco quipixtoya se corona ica majtacti huan ome sitalime. ² Huan nopa sihuat conehue eltoya huan tzajziyaya chichahuac pampa pejqui cuajcualo chichahuac para quitacatiltis icone. ³ Huan nimantzi niquitac seyoc tanextili cati nesqui nepa ilhuicac, se fiero tapiyali cati nesiyaya quej se hueyi dragón cati chichiltic. Quipixtoya chicome itzonteco, huan majtacti icuacua, huan se corona

quitalijtoya ipan sese itzonteco. ⁴ Huan icuitapil quintepexihui se ipan eyi sitalime ten ilhuicac huan quinmajcajqui ipan taltipacti. Huan nopa dragón moquetzqui iixpa nopa sihuat cati quitacatiltisquía icone para quicualilis icone quema tacatisquía. ⁵ Huan nopa sihuat quitacatilti se oquichpil cati quipiyas itequi para chichahuac quinnahuatis nochi masehualme ten nochi talme quej se cati tanahuatía ica se tepos barra imaco para ica quincocos cati amo quitepanitaj. Huan Toteco quitananqui nopa icone hasta ilhuicac campa ihueyi siyaj cati yejyetzzi para ma itzto nozona ihuaya. ⁶ Huan nopa sihuat cholo hasta nopa tali cati tahuel huactoc campa amo teno eli campa Toteco quisencajtoya se lugar para ma mocahua huan ma quimocuitahui para eyi xihuit huan tajco.

⁷ Huan teipa oncac se tatehuilisti nepa ipan ilhuicac. Huan nopa taya-canca ilhuicac ejquet, Miguel, huan nopa ilhuicac ehuan cati yaya quiny-acanayaya motehuijque ihuaya nopa dragón huan ilhuicac ehuan cati mocuetoyaj ajacame. ⁸ Pero nopa dragón huan iajacahua amo quipiyayaj chichahualisti quej nopa ilhuicac ehuan huan yeca ayecmo huélque itzto se ilhuicac. ⁹ Huan ilhuicac ehuan quicuamajcajque nopa dragón inihuaya nochi iajacahua hasta ipan taltipacti. Nopa hueyi dragón, yaya cati itoca Amocualtacat o nopa Yohualnenquet, huan yaya cati mocuetqui nopa co-huat huejcajquiya ipan nopa xochi mili. Yaya cati quincacayahua nochi masehualme cati itztoque campa hueli ipan taltipacti.

¹⁰ Huan nijcajqui se cati tzajtzizyaya chichahuac ten ilhuicac huan quijto-huayaya:

“Ya mochijtoc.

Toteco ya quinmaquixtjtoc imasehualhua.

Ya nestoc ichichahualis Toteco Dios huan nelía cuajcualtzi nochi campa yaya tanahuatía.

Ya nesqui itequiticayo Cristo yaya cati quitapejpenijtoya Toteco,

pampa ya quicuamajcajtoque tatzinta nopa Amocualtacat cati quintatel-huiyaya toicnihua.

Yaya elqui cati quintatelhuiyaya toicnihua iixpa Toteco tayohua huan tonaya.

¹¹ Huan imasehualhua Toteco quitantoque Amocualtacat ica ieso nopa Pilborregojtzi cati quitoyajqui quema mijqui,

huan pampa amo quiimacasiyayaj quínihuisse masehualme icamanal.

Quena, quitanque Amocualtacat pampa amo majmajque para miquise pampa itztoyaj iaxcahua nopa Pilborregojtzi.

¹² Huajca ama ma paquica nochi cati itztoque ilhuicac.

Pero ipan taltipacti tahuel temajmati para nochi masehualme cati itztoque ipan tali huan ipan hueyi at,

pampa ya ajsico nopa Amocualtacat amohuaya.

Yaya nelía mocualancamaca pampa quimati polihui pilquentzi tonali para Toteco quitajtolsencahuas.”

¹³ Huan quema nopa dragón quiitac para quimajcajtoyaj ipan taltipacti, qutoquili nopa sihuat cati quitacatilti nopa oquichpil. ¹⁴ Pero Toteco quimacac nopa sihuat ome ieltapal quej nopa hueyi cuatojti quipiya para ma mocholofti hasta nopa huactoc tali campa amo teno eli. Nepa Toteco quisencajtoya ajquiya quimocuitahuis para eyi xihuit huan tajco para nopa dragón amo teno huelis quichihuilis. ¹⁵ Huan nopa dragón quichijqui para ma quisa at icamaco cati mochijqui se hueyat cati chichahuac tatilana. Huan nopa at qutoquili nopa sihuat para ma quihuicas huan ma quisahuiti.

¹⁶ Pero taltipacti quipalehui nopa sihuat huan motapo huan quitolo nopa

at cati quisqui icamaco nopa hueyi dragón. ¹⁷ Huajca nopa hueyi dragón nelía cualanqui ihuaya nopa sihuat huan yajqui quintehuito nopa sequinoc iconehua, quinequi quijtos nochí sequinoc masehualme cati quintoquiliaj itanahuatilhua Toteco huan quinilhuiaj masehualme para inijuanti iaxcahua Jesucristo.

13

Ome fiero tapiyalme

¹ Huan ipan nopa tanextili quej se temicti cati niqutayaya, nimoquetztoya ipan xali iteno ipan hueyi at huan niqutac se fiero tapiyali cati tejcoyaya ten nopa hueyi at. Huan quipixtoya chicome itzonteco huan majtacti icuacua huan ipan sesen ten nopa majtacti icuacua quipixtoya se corona. Huan ipan sese itzonteco ijcuilijtoya itoca cati fiero ica cati quitelchihuayaya Toteco. ² Ni fiero tapiyali cati niqutac nesiya quej nopa tecuani cati itoca leopardo. Huan iicxi nesqui quej iicxihua se oso, huan icamac nesiya quej icamac se León. Huan nopa hueyi dragón quimacac ten ya iselti ichicahualis nopa fiero tapiyali, huan quicahuili ma tanahuati ipan ihueyi siyaj huan quimacac miyac tequiticayot. ³ Huan niqutac para tahuel quicocojtoyaj se itzonteco nopa fiero tapiyali hasta tanemijya nesiya para ica ya nopa miquis. Pero nesqui quej teipa mochicajqui ten nopa cocot. Huan quema masehualme quitaque pachijqui campa quicocojtoyaj huan ica mictoya, nochí san quitachilijque huan quitetzaitaque huan pejqe qutoquiliaj nopa fiero tapiyali. ⁴ Huan masehualme quihueyimatque nopa hueyi dragón cati quimacac itequiticayo nopa fiero tapiyali. Huan nojquiya quihueyimatque nopa fiero tapiyali huan quijtojque: “Amo aquí seoy quiya chichualisti quej ni fiero tapiyali. Amo aquí hueli moquetza iixpa para quitehuis.”

⁵ Huan quimacaque nopa fiero tapiyali tequiticayot para ma camanalti quej se masehualí. Huan camanaltic para mohueyimatís huan para quitelchihuas Toteco. Huan quipixqui caquihuili para quichihuas cati quinejqui para eyi xihuit huan tajco. ⁶ Huajca quijto ten hueli ten Toteco Dios, huan ihueyi tiopa huan nochí cati itztoque ipan ilhuicac. Huan quintelchijqui ica camanali cati más fiero. ⁷ Huan nopa fiero tapiyali quipixqui tequiticayot para quintehuis huan quintanis itatzejtzeltolica masehualhua Toteco. Huan quimacac tequiticayot ica nochí xinachtí masehualme, huan ica masehualme cati quipiyaj sesen tamanti inintalnamiqulis huan inincostumbres, huan ica masehualme cati camanaltij nochí tamanti camanali huan ica cati ehuaní nochí talme. ⁸ Huan nochí cati itztoque ipan taltipacti quihueyimatque nopa fiero tapiyali quej yaya elisquía Dios. Quena, quihueyimatque nochí masehualme cati inintoca amo ijcuilijtoc hasta quema pejqe taltipacti ipan nopa amatapohuali cati iaxca nopa Pilborregoitzí, pampa nopa Amatapohuali Ten Nopa Pilborregoitzí Cati Quimictijque quiya inintoca nochí masehualme cati quipiyase nemilisti para nochipa.

⁹ Nochí anquipiyaj amonacas, huajca xijtacaquilica ni camanali huan xijmachilica:

¹⁰ “Masehualme cati quinamiqui para yase ipan tatzacti, quinhuicase ipan tatzacti. Masehualme cati quinamiqui para miquise, quinmictise. Pero amo ximotequipachoca, amojuanti cati anitatzejtzeltolica masehualhua Toteco.

Ipan ni tonali monequi anquipayase amoyolo huan xiitztoca antemachme.”

¹¹ Huan ipan nopa tanextili niquitac seyoc fiero tapiyali cati quisayaya talijtic. Yaya quipixqui ome icuacua quej se pilborregoitz, pero camanaltic quej nopa hueyi dragón. ¹² Huan nopa ompa fiero tapiyali quipixtoya nochi itequiticayo nopa achtohui fiero tapiyali huan tequitic iixpa. Huan nopa ompa fiero tapiyali tanahuati para nochi masehualme campa hueli ipan taltipacti ma quihueyimatica nopa achtohui fiero tapiyali quej elisquía Dios, quinequi quijtos nopa achtohui fiero tapiyali cati quicocojtoyaj huan monejqqui mictosquía, pero teipa mochicajqui ten icoco. ¹³ Huan nopa ompa fiero tapiyali quichihuas huejhueyi tanextili huan tiochicahualnescayot. Huan quichihuas ma huetzis tit ten ilhuicac hasta taltipacti quema masehualme quitachilíaj. ¹⁴ Huan nopa ompa fiero tapiyali quincajcayahuas nochi masehualme cati itztoque ipan taltipacti ica nopa tanextili cati quipiya tequiticayot para quichihuas quema itztoc iixpa nopa achtohui fiero tapiyali. Huan nopa ompa fiero tapiyali quinnahuatis nochi masehualme cati itztoque ipan taltipacti ma quichihuaca se taixcopincayot cati nesis quej nopa achtohui fiero tapiyali cati quicocojtoyaj ica macheta huan mictosquía, pero teipa quej moyolcuic. ¹⁵ Huan huajca nopa ompa fiero tapiyali quipixqui chicahualisti para quimacas nemilisti nopa taixcopincayot huan para huelqui camanalti. Huan nopa taixcopincayot tanahuati ma quinmictica nochi masehualme cati amo quinejqque quihueyimatise ya quej elisquía Dios. ¹⁶ Huan nopa taixcopincayot nojquiya quinmacac nochi masehualme se machiyot ipan inincuaixco o ipan inimanejmat. Quinmacac nochi masehualme cati huejhueyi huan cati pilquentziti. Quinmacac cati tapijixtoque huan cati teicneltziti. Quinmacac cati tetequipanohuani cati inixca inintecohua huan cati amo quipiyaj ininteco. Necha nochi masehualme quiselise nopa machiyot, ¹⁷ pampa amo aqui huelis tacohuas o tanamacas sinta amo quipiyas nopa machiyot, o itoca nopa fiero tapiyali o nopa número cati quijtosnequi itoca. ¹⁸ Ya ni monequi talnamiquilisti para anquimachilise huan anquimatise quesqui quisa nopa número cati quijtosnequi nopa fiero tapiyali. Pampa inúmero eltoc inúmero se masehuali huan inúmero eltoc 666.

14

Inintiohuica nopa 144,000 masehualme

¹ Nijtachili huan niquitac nopa Pilborregoitz moquetztoya ipan Tepet Sion huan ihuaya moquetztoyaj ciento cuarenta y cuatro mil masehualme cati quipixtoyaj itoca nopa Pilborregoitz huan itoca iTata ijcuilijtoc ipan inincuaixco. ² Huan nijcayqui se tamanti ipan ilhuicac cati eliyaya quej caquisti miyac at cati motalohua chichahuac. Elqui quej miyac tatomonilot, o quej quema miyac masehualme tatzotzonaj ipan arpas ica sempa. ³ Nochi injuanti huicayayaj se tiohuicat cati yancuic iixpa nopa hueyi siyaj ten Toteco huan inixpa nopa nahui tamanti cati yoltoque huan nopa veinticuatro huehue tacame. Huan amo aqui más huelqui huicas nopa tiohuicat. San huelque huicase nopa ciento cuarenta y cuatro mil masehualme cati Toteco quinmaquixtijtoya inimaco cati fierojtique ipan taltipacti. ⁴ Injuanti itztoyaj yoltapajpactique quej cuali ichpocame cati ayemo quixmatij se tacat. Huan nopa masehualme quitoquilíaj nopa Pilborregoitz campa hueli campa yahui. Toteco quincojqqui huan quinmaquixti ni masehualme ten nopa sequinoc ipan taltipacti para ma elica quej nopa achtohui nemacti para Toteco huan nopa Pilborregoitz. ⁵ Amo aqui huelis quintelhuis para

istacatitoque o tacajcayajtoque pampa amo quichijque. Itztoque quej se tapiyali para tacajcahalisti para Toteco cati amo teno amo cuali quiyiya.

Eyi ilhuicac ehuan

⁶ Huan niquitac seyoc ilhuicac ejquet cati patantinemiyaya tatajco ilhuicacti huan quihuicayaya icamanal Toteco cati nochipa quiyiya chicahualisti. Huan yajqui campa hueli para quinilhuis masehualme cati itztoque ipan taltipacti icamanal. Yajqui ipan nochi talme, huan ipan nochi xinacht masehualme, huan hasta masehualme cati camanaltij nochi camanali, huan masehualme cati quiyiyaj sesen tamanti inintalnamiqulis huan inincostumbres. ⁷ Huan nopa ilhuicac ejquet tzajtzic chicahuac huan quijito: “Xiquimcasica Toteco. Xijhueyichihuaca pampa ya ajsic hora para yaya quintajtolsencahuas nochi masehualme. Xijhueyimatica yaya cati quichijqui ilhuicacti huan taltipacti, nopa hueyi at huan nochi amelme.”

⁸ Huan seyoc ilhuicac ejquet quitoquili huan yaya tzajtziyaya: “Ya huetzoc. Huetzqui nopa hueyi altepet Babilonia. Nopa Babilonia ehuan injuantijya quinnextilijque nochi sequinoc talme ehuan ma quintoquilica inintamachtli, huan ma quichihuaca cati fiero huan quinhueyichihuase itaxcopincayome huan cati amo nelia Dios.”

⁹ Huan seyoc ilhuicac ejquet, nopa expa, quintoquili huan chicahuac tzaiziyaya: “Sinta se masehuali quinhueyimatis nopa fiero tapiyali huan itaixcopincayo, o sinta quiselis imachiyo ipan icuaxco o ipan imax, ¹⁰ temachtli Toteco quitatzacuiltis ica nochi ichicahualis. Quena, quitatzacuiltis ica nochi icualancayo, huan yon se amo huelis cholos ten itatzacuilti. Cati quihueyimati nopa fiero tapiyali taijyohuise inixpa nopa ilhuicac ehuan huan iixpa nopa Pilborregoitz i pan nopa tit cati nelpano hueyi huan tahuel chicahuac pampa lemeni ica azufre. ¹¹ Huan para nochipa tejcoc nopa pocti cati quisas campa taijyohuaj huan amo quema tamis. Huan nopa masehualme cati quihueyimatque nopa fiero tapiyali huan itaixcopincayo, huan quiselijque imachiyo o itoca, amo quema mosiyajquetzase tayohua huan tonaya para nochipa.” ¹² Huajca pampa anquimatij cati quinchia cati amo iaxcagua Toteco, amojuanti cati anitatzeltzelolica masehualhua monequi anquijyohuise nochi cati amechpanotihuala huan anquipiyase amoyolo. Amo xijcaxanica xijchihuaca cati itanahuatilhua Toteco techilhuaj huan ximotemachica ipan Jesús.

¹³ Huan nijcajqui se ipan ilhuicac cati nechilhui ma niquijcuilo ni camanali: “Paquilisti para masehualme cati miguise ama huan teipa cati motatzquillijtoque ipan Toteco.” Huan Itonal Toteco quijitohua: “Quena, paquilisti pampa ya tanqui nochi nopa taijyohuillisti cati quinpanoyaya. Huan nochi nopa cuali tamanti cati quichijtinence momatis ipan ilhuicac, huan Toteco quintaxtahuis.”

Nopa pixquisti ten taltipacti

¹⁴ Nijtachili sempa huan niquitac se mixti cati chipahuac huan ipani mosehuijtaya yaya cati Mocuetqui Masehuali. Huan quiPIXQUI se corona ten oro ipan itzonteco huan quihuicayaya se hueyi teposti cati tatequi quej quitequihuaj para quiPIXCAJ trigo. ¹⁵ Huan seyoc ilhuicac ejquet quisqui ipan ihueyi tiopa Toteco huan chicahuac quinotzqui yaya cati mosehuijtaya ipan mixti, huan quilhui: “Xijcalaqui motepos quej quichihua se trigo PIXCAQUET huan xijzontequi nopa PIXQUISTI ipan taltipacti, pampa ya chicajtoc huan ya ajsic hora.” ¹⁶ Huan yaya cati mosehuijtaya ipan mixti quipanoltli itepos huan quitzontequi nopa PIXQUISTI ipan taltipacti.

¹⁷ Huan seyoc ilhuicac ejquet quisqui ten ihueyi tiopa Toteco nepa ilhuicac huan nojquiya quipixtoya se teposti cati tatequi para ica pixcas. ¹⁸ Huan teipa seyoc ilhuicac ejquet quisqui campa taixpamit, yaya cati quipixqui tanahuatili ica tit. Huan chicahuac quinoztzqui yaya cati quipixqui nopa teposti para pixcas. Quiilhui: “Xijtequihui motepos cati tatequi huan xijtequi nopa xocomecat itajca cati eltoc ipan taltipacti, pampa ya icstitoc. Quena, ajsic tonali para titetatzacuiltis.”

¹⁹ Huan nopa ilhuicac ejquet quipanolti itepos cati tatequi ipan taltipacti huan quisejcotili cati elqui quej xocomecat itajca ipan taltipacti huan quimajcayqui ipan nopa hueyi ostot campa quipatzcase para quiquixtilise iayo, pampa ajsic tonali para Toteco tahuel quintatzacuiltis masehualme. ²⁰ Huan moquejquetzque ipan nopa xocomecat itajca para quipatzcase campa nopa hueyi ostot iteno nopa altepet. Huan quema Toteco tetatzacuiltiyaya, esti quisqui campa quipatzcayaya. Huan nopa esti ajsic hasta ipan ininteposcamachal cahuayojme huan moxoyajqui quej se hueyat cati yajqui para tres cientos kilómetros.

15

Nopa chicome taijyohuilisti cati fiero

¹ Huan niquitac seyoc hueyi tanextili nepa ilhuicac huan nelía temajmati. Niqunitac chicome ilhuicac ehuan cati quipixtoyaj chicome tamanti taijyohuilisti cati fiero. Huan ica ni chicome tamanti taijyohuilisti quitamiltis icualancayo Toteco ica masehualme.

² Huan niquitac cati elqui quej se hueyi at neltzalanitic. Elqui quej tescat maneltic ica tit. Huan moquetztoyaj ipan nopa hueyi at ten tescat nochi nopa masehualme cati quitanque nopa fiero tapiyali huan itaixcopincayo, huan amo quiselijtoyaj nopa número cati quinescayoti itoca. Nopa masehualme quipixtoyaj arpas cati Toteco quinmacac. ³ Huan huicayayaj se tiohuicat quej cati Moisés, itequipanojca Toteco, huicatoya. Huan huicayayaj para nopa Pilborregojtzi, huan quiijtojque:

“Tahuel hueyi huan cuajcualtzi nochi cati ta tijchihua, Toteco Dios.

Ta Cati Tijpiya Nochi Chicahualisti.

Xitahuac huan temacht nochi moojhui.

Ta tiTanahuatijquet ten nochi talme.

⁴ ¿Ajquiya amo quiimacasis mitzixpanos, Tohueyiteco?

Nochi mitzhueyichihuase pampa san ta titatzejtzeltoc.

Quena, nochi masehualme ten nochi talme hualase moixpa huan mitzhueyimatise,

pampa quiiitzoque para san cati xitahuac tijchijtoc.”

⁵ Huan teipa nijtachili huan niquitac tapojtoc ihueyi tiopa Toteco nepa ilhuicac. Huan tapojtoya calijtic nopa cuarto Campa Más Tatzejtzeltocitoc campa eltoya nopa camanali tasencahuali cati Toteco quichijqui ica masehualme. ⁶ Huan nopa chicome ilhuicac ehuan cati quipixtoyaj nopa chicome taijyohuilisti cati fiero quisque ihueyi tiopa Toteco moyoyontijtoque ica iniyoyo chipahuac huan cati cahuaniyaya. Huan moilpiliytoque iniyolixco nopa tzinquechilpicayot ten oro. ⁷ Huan se ten nopa nahui tamanti cati yoltoque quinmajmacac nopa chicome ilhuicac ehuan chicome caxit ten oro temitoc ica ihueyi cualancayo Toteco Dios cati itztoc para nochipa huan amo quema tamis para itztos. ⁸ Huan nochi ihueyi tiopa Toteco temic ica pocti ten itatanex huan ichicahualis Toteco. Huan amo aqui huelqui calaqui calijtic ipan ihueyi tiopa Toteco hasta tamisquía nopa chicome taijyohuilisti cati fiero ipan taltipacti.

16

Nopa chicome caxit ica tatzacuultilisti

¹ Huan nijcajqui se cati tzajtziyaya ten itioipa Toteco huan quinilhuyaya nopa chicome ilhuicac ehuan: “Xiyaca ama huan xiquixcuetpatij ipan taltipacti nopa chicome caxit cati quiipiyaj ihueyi cualancayo Toteco.”

² Huajca nopa achtohui ilhuicac ejquet yajqui huan quiixcuetpato icaxi ipan taltipacti, huan ipan nochi masehualme cati quiselijtoyaj imachiyo nopa fiero tapiyali huan cati quihueyimatque itaixcopincayo. Huan quisqui ininpani miyac fiero cocome cati tahuel tecoco.

³ Huan teipa nopa ompa ilhuicac ejquet quiixcuetqui icaxi ipan hueyi at. Huan nopa hueyi at mocuetqui esti, quej ieso se mijcatzi cati onmijqui. Huan nochi cati itzttoyaj ipan hueyi at mijque.

⁴ Huan nopa expa ilhuicac ejquet quiixcuetqui icaxi ipan nochi hueyat, atajti huan amelme, huan nochi mocuetqui esti. ⁵ Huan nijcajqui nopa ilhuicac ejquet cati quiipixtoya tequiticayot ipan at, huan yaya quiijto: “Toteco, ta tiitztoc ama huan nochipa ipa tiitztoya.

Ta cati senquisa titatzejtzeltic.

Nelia tixitahuac quema titetajtolsenahua.

Huan xitahuac ni tatzacuultilisti cati titemacac.

⁶ Pampa nopa fiero masehualme quitoyajtoque inieso motatzejtzeltijca masehualhua,

huan ama tiquinmacatoc esti para ma quica nojquiya.

Ya ni cati quinamiqui.”

⁷ Huan nijcajqui se cati camanaltic ten taixpamit huan quiijto:

“Quena, Toteco Dios Cati Tijpiya Nochi Chichahualisti,

xitahuac titetajtolsenahua huan quinamiqui nopa tatzacuultilisti cati titemaca.”

⁸ Huan nopa najpa ilhuicac ejquet quiixcuetqui icaxi ipan tonati huan quichijqui tonati ma quintati masehualme quej elisquia se tit. ⁹ Huan tonati tahuel quintatziyaya nochi masehualme ipan taltipacti. Huan quitelchijque Toteco ica camanali más fiero pampa quintatatzacuultijtoya ica ni taijyohuilisti cati fiero. Pero amo quinejque moyolcuetpase ten inintajtacolhua huan amo quihueyichijque Toteco.

¹⁰ Huan nopa macuilpa ilhuicac ejquet quiixcuetqui icaxi ipan isiyaj campa nopa fiero tapiyali mosehuijtoya para tanahuatis. Huan nochi nopa talme cati yaya quinhahuatziyaya tziintayohuilijque. Huan nochi nopa talme ehuan cati yaya quinnahuatziyaya monenepil tanquechijque pampa tahuel taijyohuiyayaj. ¹¹ Huan quitelchijque huan quitaijilhuijque Toteco cati itztoc ipan ilhuicac ica camanali cati más fiero pampa quinchihuilijtoya ma taijyohuica huan ma quiipiyaca nopa fiero cocome, pero amo quinejque moyolpatase, yon amo quicajque cati fiero quichihuayayaj.

¹² Teipa nopa chिकासempa ilhuicac ejquet quiixcuetqui icaxi ipan nopa hueyi hueyat cati itoca Éufrates, huan nopa hueyat huajqui. Huan nepa campa eltoya nopa hueyat mochijqui se ojtj para ipan ajsise tanahuatiani cati hualase ica inisoldados ten nopa talme campa quisa tonati.

¹³ Huan niqunitac eyi fiero ajacame cati nesiyayaj quej temasolime. Se quisaco icamaco nopa hueyi dragón, huan se icamaco nopa fiero tapiyali, huan se icamaco nopa istacatica tajtolpanextijquet. ¹⁴ Huan nopa eyi huelque quichihuaj tanextili huan tiochicahualnescayot. Nopa eyi ajacame yahuij campa hueli ipan nochi taltipacti para quinsentilise tanahuatiani

inihuaya inisoldados ipan nopa hueyi tonali quema pehuas nopa hueyi tatehuilisti ica Toteco Cati Quipiya Nochi Chicahualisti.

¹⁵ Xiquelnamiquica cati quijitohua Jesús: “Xiquitaca na nihualas quema amo antechchijay quej quema ajsi se tachtejquet. Paquilisti para nopa masehualme cati tachixtose huan cati nemij cuali, huan quimocuitahuiaj iniyoyo chipahuac para amo nemise xolome, huan pinahuase quema masehualme quinitase.”

¹⁶ Huan nochi nopa tanahuatiani huan inisoldados mosentilise ipan se lugar cati itoca Armagedón ica camanali hebreo.

¹⁷ Teipa nopa chicompa ilhuicac ejquet quiixcuetqui icaxi ipan ajacat cati masehualme quijiyotilana. Huan se tzajtzc chicahuac ten isiyaj Toteco ipan ihueyi tiopa ipan ilhuicac huan quijito: “Ya quitamichijtoc.”

¹⁸ Huan pejqui tapetani, huan taajcahuaca, huan tatomoni. Huan teipa chicahuac mohuiso nochi talme campa hueli ipan taltipacti quej amo quema panotoc ten quema masehualme achtohui pejque itztose ipan taltipacti.

¹⁹ Huan nopa hueyi altepet ten Babilonia tapanqui huan eyi moitac. Huan sequinoc altepeme campa hueli ipan miyac falme nojquiya huetzque. Huan Toteco quielnamijqui nochi itajtacolhua nopa hueyi altepet Babilonia huan nopa masehualme cati itztoque nozona, huan tahuel quintatzacuiliti. Quena, quinajsic ihueyi cualancayo. ²⁰ Huan nochi piltaltzitzitzi cati eltoya tatajco ipan hueyi at huetzque atzinta. Huan nochi tepeme campa hueli temoque huan ayecmo nesque. ²¹ Huan teipa pejqui huetzi ten ilhuicac huejhueyi tesihuit ipan masehualme huan sesen tesihuit quipiyayaya cuarenta kilos ietica. Huan nochi masehualme quitelchijque huan quitajilhuijque Toteco ica camanali cati más fiero pampa quintitanilijtoya nopa tesihuit cati tahuel quincocojtoya.

17

Quitatzacuiliti nopa momecatijca sihuat

¹ Huan se ten nopa chicome ilhuicac ehuan cati quiixcuettoya nopa chicome caxit ipan taltipacti, nechcamanalhuico huan nechilhui: “Xihuala nica huan nimitznexitlis nopa tatzacuilitisti cati quiajsis altepet Babilonia cati mosehuia ipan miyac hueyi at huan cati itztoc quej se fiero momecatijca sihuat. ² Eltoc quej nochi tanahuatiani ipan taltipacti momecatijque ihuaya huan quicajtejtoc Toteco. Eltoc quej nopa altepet quinmacatoc nochi masehualme ipan taltipacti se taili para moihuintise ihuaya huan ihuaya quinhueyichihuase miyac tamanti taixcopincayome cati amo nelía Dios quej yaya quichihua.”

³ Huan elqui quej nopa ilhuicac ejquet quihuicac notonal ihuaya hasta nopa huactoc tali campa amo teno eli. Huan quej ipan se temicti niquitac se sihuat cati mosehujtoya ipan se fiero tapiyali chichiltic cati quipixtoya chicome itzonteco huan majtacti icuacua. Huan ipan nochi itacayo nopa fiero tapiyali ijcuilijtoc nochi tamanti camanali cati más fiero para ica quitelchihuas huan ica quitajilhuis Toteco. ⁴ Huan nopa sihuat moquentijtoya iyoyo morado huan chichiltic cati tahuel patiyó. Huan motalilijtoya costi, anillos, maquehcosti huan pijpiloli ten oro, perlas huan piltetzitzi cati tahuel patiyó. Huan imaco nopa sihuat quipixtoya se caxit ten oro cati temitoc ica nochi tamanti tajtocoli cati quichijtoya huan nochi tamanti camanali cati más fiero cati ica quitelchijtoya huan quitajilhuijtoya Toteco pampa tahuel quimatqui tajtacolchihua. ⁵ Huan ipan icuaixco quipixtoya se

tocayot ijcuilijtoc cati quijjosnequi se tamanti ixtacatz pampa quinescayotía se tamanti. Nopa itoca elqui: “Nopa hueyi Babilonia, ininana nochi cati momecatijtoque ica totaixcopincayohua, huan nochi cati fiero cati Toteco Dios amo quinequi quiiatas ipan taltipacti.”

⁶ Huan niqitac para ihuintitoc nopa sihuat pampa quiiyoa inieso itatze-jzelollica masehualhua Toteco huan quinmictijtoya nopa masehualme pampa quinilhuyayaj sequinoc ten Jesús.

Huan quema niqitac nopa sihuat, nijtachili miyac. ⁷ Huan nopa ilhuicac ejquet nechilhui: “¿Para ten tijtachili? Nimitzilhuis taya quijjosnequi nopa sihuat huan nopa tapiyali cati quiyiya chicome itzonteco huan majtacti icuacua cati quimamajtihuala nopa sihuat. ⁸ Nopa fiero tapiyali cati tiqitac achtohui yoltfoya huan ama ayecmo yoltoc. Pero teipa sempa tejcos ten nopa ostot cati tahuel huejcata hasta amo quiyiya itamiya. Huan teipa yas campá Toteco quitatzacuiltis para nochipa. Onca se amatapohuali cati hasta quema ayemo pehuayaya taltipacti ya quipixtoya ijcuilijtoc inintoca nochi masehualme cati quiyiyaj nemilisti yancuic para nochipa. Pero masehualme cati amo quiyiyaj inintoca ipan nopa amatapohuali huan cati quitoquiliáj cati eltoc ipan ni taltipacti motachilise quema sempa monextis nopa tapiyali cati itztoya, huan ama ayecmo itzto, huan teipa sempa itzto.

⁹ “Xijmachilica ya ni cati antalnamiqij. Nopa chicome itzonteco nopa fiero tapiyali quijjosnequi nopa chicome tepeme cati ipan mosehuía ni sihuat para tanahuatis. ¹⁰ Nojquiya nopa tepeme quinescayotíaj chicome tanahuatiani. Macuulti ten nopa tanahuatiani ya mictofoque, se ama tanahuatía huan seyoc noja polihui tanahuatis. Huan quema hualas yaya cati noja polihui, san tanahuatis para se quesqui tonali. ¹¹ Nopa fiero tapiyali cati itztoya huan mijqui, yaya nojquiya itzto nopa chicuexpa tanahuatijquet, masfoque nojquiya itztoya se ten nopa achtohui chicome. Yaya teipa yas campá Toteco quitatzacuiltis.

¹² “Huan nopa majtacti icuacua cati tiqitac quijjosnequi majtacti tanahuatiani cati noja polihui tanahuatise. Inijuanti quiselise campá tanahuatise huan tanahuatise ihuaya nopa fiero tapiyali para se talojtzi. ¹³ Ica san se inintalnamiquilis moilhuse para quimacase ininchicahualis huan inintequiticayo nopa fiero tapiyali. ¹⁴ Huan teipa inijuanti ica nopa fiero tapiyali quitehuse nopa Pilborregojtzi. Pero nopa Pilborregojtzi quintanis pampa yaya nopa Dios cati más hueyi que nochi cati masehualme quintocaxtíaj dioses. Yaya nopa Tanahuatijquet cati más hueyi que nochi tanahuatiani. Huan imasehualhua cati itztofoque ihuaya nopa Pilborregojtzi itztofoque cati Toteco quintapejpenijtoc huan quinnotztoc, huan inijuanti temachme.”

¹⁵ Huan nopa ilhuicac ejquet nechilhui: “Nopa miyac huejhueyi at cati ipan tiqitac mosehujtoya nopa momecatijca sihuat quijjosnequi para yaya quinnahuatis miyac masehualme cati hualahui ipan nochi xinachtí masehualme, huan masehualme cati quiyiyaj sesen tamanti inintalnamiquilis huan inincostumbres, huan cati itztofoque ipan nochi talme, huan cati camanaltij miyac tamanti camanali. ¹⁶ Huan nopa fiero tapiyali huan nopa majtacti icuacua cati tiqitac quinescayotía tanahuatiani cati tanahuatise ihuaya. Pero teipa nochi quicualancaitase nopa momecatijca sihuat. Inijuanti quitamicocose huan quicahuase sosoltic huan xolot. Elis quej quicuase inacayo huan quitamitatise cati mocahuas. ¹⁷ Pampa Toteco quintalilis ipan iniyolo nopa majtacti tanahuatiani para ma quimacaca inintequiticayo nopa fiero tapiyali, huan yeca mochihuas cati Toteco quinequi

ma mochihua. ¹⁸ Huan nopa sihuat cati tiquitac yaya nopa hueyi altepet cati quinnahuatía nochi tanahuatiani ipan taltipacti.”

18

Huetzis altepet Babilonia

¹ Quema tanqui nochi ya ni, niquitac seyoc ilhuicac ejquet cati temoyaya ten ilhuicac, huan yaya quipixqui hueyi tequiticayot. Huan yaya taminayaya hasta quimacac taahuili ipan taltipacti. ² Huan tzajtzc chicahuac huan quijto:

“Ya huetzqui nopa hueyi altepet Babilonia.

Nepa san elis ininchaj ajacame cati fierojtique.

Quena, fiero tonalme itztose ipan tatzacti nepa.

Huan nochi totome cati amo cuali huan cati masehualme quincualancaitaj quichihuase inintepasol campa eltoya nopa altepet.

³ Pampa masehualme ipan nochi talme quiselijtoque itamachtil para quichihuase cati fiero iixpa Toteco.

Nochi tanahuatiani ipan taltipacti momecatijtoque ihuaya huan quicajtejtouque Dios para quinhueyimatise taixcopincayome quej yaya quinxtili.

Miyac tanamacani ten campa hueli ipan taltipacti moricojchijtoque pampa nopa altepet Babilonia ehuan quinequiyayaj senquisa nochi tamanti cati onca.”

⁴ Huan teipa nijcajqui seyoc cati camanaltic ten ilhuicac huan quijto:

“Haujca annomasehualhua, pampa anquimatij para huetzis nopa altepet, ama xiquisaca ipan ya.

Xiquisaca para amo anquichihuase nopa tajtacoli cati quichihuaj cati nopona ehuan,

huan para amo anquiselise nopa fiero taijyohuilisti cati nopona ehuan quiselise.

⁵ Tahuel tajtacolchijtoque Babilonia ehuan huan inintajtacolhua ajsitoc hasta ilhuicac.

Huan Toteco quielnamiqui nochi inintaixpanolhua.

⁶ Toteco, xijmaca Babilonia cati fiero, san se quej yaya quinchihuilijtoc momasehualhua.

Xijcuepili ompa cati yaya quinchihuilijtoc sequinoc.

Xijsencahuili se fiero tatzacuiltilisti ome huelta imiyaca quej yaya quimacac sequinoc.

⁷ Yaya tahuel mohueyimatiyaya huan tahuel quinequiyaya nochi cati onca, huajca ama xijchihua ma tahuel taijyohui huan ma tahuel choca.

Babilonia quijto ipan iyolo:

‘Nica nimosehuijtoc quej se sihua tanahuatijquet.

Amo niitztoc quej se cahuali cati teicneltzi.

Huan amo quema hualas se tonali quema nitaijyohuis.’

⁸ Yeca, pampa quijto ya nopa, san ipan se tonal ajsis ipan nopa altepet ehuan se taijyohuilisti cati fiero.

Oncas choquisti, mayanti huan miquilisti.

Ipan nopa tonali nopa altepet tatas pampa Toteco Dios Cati Quipiya Nochi Chicahualisti quitajtolsencahuas.”

⁹ Huan nopa tanahuatiani ipan taltipacti cati momecatijque ihuaya, huan ihuaya quihuejcamajcajque Toteco, huan ihuaya quinequiyayaj nochi cati onca, quiitase nopa pocti quema tatas nopa altepet, huan chocase, huan

tahuejchihuase. ¹⁰ Mohuejcaquetzase pampa quiimacasisse nopa tatzacuiltlisti cati quiajsic, huan quijjtose: “¡Teicnelti, teicnelti ne hueyi altepet Babilonia cati quipixtoya chichahualisti! ¡Pampa san ipan se hora ajsic itatzacuiltlis!”

¹¹ Huan tanamacani cati ehuan campá huéli ipan taltipacti chocase huan tahuejchihuase pampa ya tamisemanqui nopa altepet huan ayecmo aquí quincóhuilis inintamamal. ¹² Babilonia ehuan quicóhuayayaj miyac tamamali ten oro, huan ten plata, huan perlas huan piltetzitzi cati patiyó. Quicóhuayayaj yoyomit cati senquisá lino, huan cati morado, huan cati chichilit huan cati seda. Quicóhuayayaj marfil, mármol, tiocuahuit huan miyac tamanti cuahuit cati patiyó. Huan quicóhuayayaj teposti ten cobre huan ten hierro. ¹³ Nojqúya quicóhuayayaj tamamali ten canela, tacualpajyot huan miyac tamanti copali. Quicóhuayayaj taajhuiyacayot cati itoca mirra, olíbano, xocomeca at, aceite, harina cati más cuali, huan trigo. Nojqúya quincóhuayayaj huacaxme, borregoyme, cahuayoyome, tatehuica carros huan masehualme. Quena, quinchihualtiyayaj masehualme ma quinqtequipanoca san tapic. ¹⁴ Huan nopa tanamacani motequipachose pampa ayecmo aquí yon se Babilonia ejquet. Huan quijjtose: “Nochi nopa tamanti cati tahuel patiyó cati más anquitasomtque, ya tanqui. Nochi amotomi huan cati tahuel cuajcualtzi anquixtoyaj, anquipojtoque huan ayecmo quema anquiyase sempa pampa ayecmo anaquijme.”

¹⁵ Nopa tanamacani cati quinnamaquiltiyayaj Babilonia ehuan nopa tamanti huan cati moricojchijtoque ica inintomi, quihuejcatachilise pampa quiimacasisse inintajyohuilis. Huan nopa tanamacani chocase huan tahuejchihuase, ¹⁶ huan quijjtose:

“¡Teicnelti, teicnelti ne hueyi altepet Babilonia huan imasehualhua!
Elqui nelía yejyectzi quej se sihuat cati moquentiyaya se cuali yoyomit cati morado o cati chichilit.

O elqui quej se sihuat cati mocualnextía ica tamanti ten oro, huan perlas, huan ica nopa piltetzitzi cati patiyó cati cahuani.

¹⁷ Pero ipan se talojtzi ya tanqui nochi iricojyo cati quipixtoya.
¡Nochi ya sosolijtoc!”

Huan mohuejcaquetzase nochi cati iniaxca huejhueyi cuaacalme, huan nochi tayacanani cati quinnemiltiyayaj, huan nochi cati tapalehuiyayaj, huan nochi masehualme cati monequiyaya nemise ipan hueyi at para yase quitanij tomi. ¹⁸ Nochi mohuejcaquetzase huan chocase quema quitiase ipocyo nopa altepet Babilonia cati tata huan quijjtose: “Amo oncayaya se altepet quej ni altepet.” ¹⁹ Huan chocase huan motzontaltemise para quixnextise inintequipachol. Tzajtise huan quijjtose:

“¡Teicnelti, teicnelti que cati ehuyaya nopa hueyi altepet Babilonia!
Tehricojchijtoque ica inintomi nochi tojuanti cati tijpixtoque huejhueyi cuaacalme,

huan san ipan se talojtzi nochi cati quipiyayayaj tanqui.”

²⁰ Pero ma paquica nochi cati itztoque ipan ilhuicac pampa ya sosoli. Nojqúya xipaquica nochi amojuanti cati anitatzetzelóitica masehualhua Toteco, huan anitayolmelajcahua huan anitajtolpanextijcahua. Xipaquica pampa Toteco quintajtolsecajqui nopa altepet ehuan por nochi cati amechchihuilijtoyaj.

²¹ Huan teipa se ilhuicac ejquet cati quipixqui miyac chichahualisti quicuic se hueyi tet quej se hueyi metat huan quimajcajqui ipan hueyi at. Huan yaya tzajtzic huan quijjto: “Quej ayecmo nesi ni tet cati nijcuamajcajtoc ipan hueyi at,

ayecmo nesis nopa hueyi altepet Babilonia pampa Toteco quisosolos huan ayecmo quema aquí quitas.

²² Nopa amo aquí sempa quicaquis cati tatzotzonas ipan arpa.

Yon amo aquí huicas,
yon amo aquí quipitzas flauta,
yon tapitzali ipan nopa altepet.
Amo aquí tequitis nepa,
yon amo aquí tisis.

²³ Ayecmo oncas yon se taahuili ipan nopa altepet,
yon ayecmo oncas nopa paquilisti nepa cati oncac quema oncayaya se nenamictili.

Nochi ya ni mochihuas pampa nopa tanamacani ipan nopa altepet cati eliyayaj más huejhueyi ipan taltipacti tahuel quimatiyayaj tenahualhuíaj.

Huan ica inintenhualhuil quincajcayajque cati ehuaní ipan nochi talme.”

²⁴ Babilonia ehuaní nojquiya quihuicaj tajtacoli iixpa Toteco pampa quinmicti itajtolpanextijcagua huan itatzetzeloltica masehualhua. Babilonia ehuaní quinmictijtoque imasehualhua Toteco campá hueli ipan nochi taltipacti.

19

¹ Teipa niqincajqui tahuel miyac masehualme nepa ilhuicac cati quijtohuayayaj:

“¡Hueyi paquilisti!

Toteco techmaquixtijtoc.

San yaya cati quipiya nochi hueyitilisti huan nochi chicahualisti.

Ma tijnextilica nochi tatepanitacayot para nochipa.

² Yaya tetajtolsencagua temachti huan xitahuac.

Quintatzacuilitjtoc cati ehuyayaj nopa altepet Babilonia cati itztoyaj quej se momecatijquet cati tahuel quinchijqui ma tajtacolchihuaca nochi masehualme ipan taltipacti.

Quinnextiliyayaj ma quihuejcamajcaguaca Toteco.

Toteco quicuepilijtoc nopa fiero sihuat pampa quinmicti itequipanojcahua.”

³ Huan sempa nopa miyaquí masehualme quijtojque:

“¡Hueyi paquilisti!

Toteco ya quisosolo nopa altepet huan ipocyo tejcos para nochipa.”

⁴ Huan teipa nopa veinticuatro tayacanani huan nopa nahui tamanti cati yoltoque motancuaquetzque huan quihueyimatque Toteco cati mosehuía ipan nopa hueyi siyaj huan quijtojque: “¡Quej nopa ma eli! ¡Ma tijpaquilismacaca Toteco!”

⁵ Huan nijcayajqui seyoc cati hualcamanaltic ten nechca nopa hueyi siyaj huan quijto:

“Ma tijpaquilismacaca Toteco Dios nochi tojuanti cati tijtepanitaj huan cati tiitequipanojcahua.

Masque tihuejhueyi masehualme o tipisiltitzi,
nochi ma tijpaquilismacaca Toteco.”

Nopa tacualisti ten nenamictili ten nopa Pilborregoxtzi

⁶ Huan nijcayajqui cati caquistic quej itztoyaj miyaquí masehualme cati camanaltiyayaj, huan cati caquistic quej miyac at cati ajcaguaca, o caquistic quej tatomoni chicahuac. Huan nochi san sejco quijtohuayayaj:

“¡Hueyi paquilisti!

Tohueyiteco Dios tanahuatía,

Quena, tanahuatía Toteco Cati Quipiya Nochi Chicahualisti.

⁷Ma tipaquica huan ma tijaquilismacaca huan ma tijhueyimatica.

Ya ajsc tonali para nopa nenamictili ten nopa Pilborregojtzi. Ya mocualchijchijtoc isihua.

⁸Huan quimacatoc ma moquenti cati más cuali yoyomit cati chipahuac huan neltapajpactic hasta cahuani.

Nopa cuali yoyomit cati chipahuac quinescayotía nochi nopa tamanti cati cuali cati quichijtoque itatzejtzeloltica masehualhua Toteco.”

⁹Huan nopa ilhuicac ejquet nechilhui ma niquijuilo: “Nelía paquij nopa masehualme cati Toteco quinnotzoc ma yaca campa nopa tacualisti ten nenamictili ten nopa Pilborregojtzi.”

Huan nechilhui: “Ni camanali nelía melahuac pampa ni camanali hualajqui ten Toteco.”

¹⁰Huan nimotancuaquetzqui iixpa para nijhueyimatisquía nopa ilhuicac ejquet. Huan yaya nechilhui: “Amo techhueyimati. Na nojquiya nijtequipanohua Toteco quej ta huan moicnihua cati anquitoquilíaj Jesús. San Toteco xijhueyimati. Quema Toteco quinmaca itajtolpanextijcahua camanali ten cati teipa panos para ma quinpohuilica sequinoc, quichihua para masehualme ma quihueyichihuaca Jesús quema nopa tamanti mochihuas.”

Yaya cati ipan mosehuis nopa cahuayo chipahuac

¹¹Huan niquitac tapojtoc ilhuicac huan moquetztoya nepa se cahuayo chipahuac. Huan yaya cati ipan tejcotoya quinescayotía Tohueyiteco huan quipixqui itoca: Cati Temachtí huan Melahuac. Quej nopa quitocaxtíaj pampa tetajtolsencahua huan tetalilía nopa tatzacuiliti cati xitahuac, huan quintehuía cati amo cuajcualme. ¹²Huan iixteyol yaya cati tecojtoyá eliyaya quej tilelemecti huan ipan itzonteco quipixtoyá miyac coronas cati quinextía itequiticayo. Huan ipani ijcuilijtoc se tocayot cati amo aqai quimachilia taya quijjtosnequi, san ya quimati. ¹³Huan moquentiyaya se iyoyo huehueyac cati quixolonijtoyá ica esti huan yaya itoca: Icamanal Toteco. ¹⁴Huan quitoquiliyayaj nochi soldados ten ilhuicac huan tejcotoyaj ipan cahuayojme cati chipahuaque. Huan nopa soldados moquentiyayaj iniyoyo cati más cuali, huan cati chipahuac huan tapajpacti. ¹⁵Huan yaya cati tayacanayaya quipixtoyá se cuachoso cati tatequi cati quisayaya icamaco para ica quinmaquilis masehualme ipan nochi talme. Huan chicahuac yaya quinnahuatis masehualme. Huan quej se masehuali chicahuac ipan moquejquetza xocomecat itajca para quiquixtilis iayo, quej nopa yaya ininpan moquejquetzas masehualme. Quena, Toteco Cati Quipiya Nochi Chicahualisti tahuel cualantoc ica masehualme huan quintatzacuilitis ica cati más fiero. ¹⁶Ipan iyoyo nopa tayacanquet huan ipan iquescuayo ijcuilijtoyá itoca: “Nitanahuatijquet ten nochi tanahuatiani huan niDios cati más hueyi que nochi cati masehualme quitocaxtíaj ‘dioses’.”

¹⁷Huan niquitac se ilhuicac ejquet cati moquetztoya ipan tonati cati quintzajtziyaya totome huan quinilhuiyaya: “Nochi antotome cati anpatantinemij ipan ilhuicacti, xihualaca pampa Toteco amechsencahuilis se hueyi tacualisti. ¹⁸Xihualaca, xijcuaquij ininacayo tanahuatiani. Xijcuaquij ininacayo inisoldados huan inintayacancahua cati más quimatque tatehuaj. Xijcuaquij ininacayo cahuayojme huan cati ininpan tejcotoyaj. Quena, xijcuaquij ininacayo nochi tamanti masehualme; sequij eliyayaj tetequipanohuani huan sequinoc amo. Sequij eliyayaj huejhueyi tacame huan sequij amo.”

¹⁹ Huan teipa niquitac nopa fiero tapiyali quinsentiliyaya nochi tanahuatiani ipan taltipacti ica inisoldados para quitehuisse Tohueyiteco cati tejcotoc ipan icahuayo chipahuac huan para quitehuisse isoldados cati quitoquiliyayaj. ²⁰ Huan cati tejcotoya ipan nopa cahuayo chipahuac quiitzqui nopa fiero tapiyali huan nopa istacatica tajtolpanextijquet, huan quincumajcayajqui ipan nopa tit cati nelpano hueyi. Nopa istacatica tajtolpanextijquet elqui cati quichijqui tiochicahualnescayot iixpa nopa fiero tapiyali huan quincajcayajtoya nochi masehualme cati quiselijque nopa machiyot ten nopa fiero tapiyali huan cati quihueyimatque itaixcopincayo. Huan nochi ome quincumajcayajqui noja yoltoque ipan nopa tit cati nelpano hueyi huan lemeni ica azufre. ²¹ Huan cati tejcotoc ipan nopa cahuayo chipahuac quinmicti nochi sequinoc cati quitehuiyayaj ica nopa cuachoso cati quisqui icamaco. Huan nochi totome tamiixhuique ica ininacayo nopa mijcatzitti.

20

Se mil xihuit quema Cristo tanahuatis

¹ Huan niquitac se ilhuicac ejquet cati temoyaya ten ilhuicac ica illaves nopa ostot cati tahuel huejcata hasta amo quiipiya itamiya. Huan nojquiya quipixtoya imaco se hueyi tepos cadena. ² Huan quiitzqui nopa hueyi dragón, yaya nopa cohuat ten huejcayquiya, huan nopa Yohualnenquet, huan nopa Amocualtacat. Huan quiilpi ica tepos cadenas huan quitzajqui para se mil xihuit. ³ Huan nopa ilhuicac ejquet quicuamajcayajqui nopa Amocualtacat ipan nopa ostot cati tahuel huejcata hasta amo quiipiya itamiya. Huan quitzajqui nopa ostot huan quitali se sello para amo huelis quisas huan ayecmo huelis quincajcayahuas masehualme ipan campa hueli talme hasta tamis nopa mil xihuit. Quema tamis nopa mil xihuit, huajca quitojtomos nopa Amocualtacat para se quentzi tonali.

⁴ Huan niquitac miyac siyas cati yejyetzitti quej para tanahuatiani huan cati ininpan mosehuijtoyaj quipixtoyaj tequiticayot para tetajtolsencahuase. Nojquiya niqunitac inialma nopa masehualme cati quinquechtzontectoyaj pampa quinilhuiyayaj sequinoc ten Jesús huan icamanal Toteco. Inijuanti eliyayaj cati amo quihueyichijque nopa fiero tapiyali, yon itaixcopincayo. Amo quiselijtoyaj imachiyo ipan inincuaixco, yon ipan inimax. Huan nochi nopa masehualme moyolcuique huan tanahuatijque ihuaya Cristo para mil xihuit. ⁵ Ya ni nopa masehualme cati achtohui moyolcuise. Pero nopa sequinoc cati mictoque amo moyolcuise hasta tamis nopa mil xihuit. ⁶ Tatiochihualme huan tatzejtzelolittica nopa masehualme cati achtohui moyolcuise. Nopa ompa miquilisti campa nopa hueyi tit amo teno hueli quinchihuilis. Inijuanti elise totajtzitti para Toteco huan Cristo. Huan nochi nopa masehualme tanahuatise ihuaya Cristo para mil xihuit.

⁷ Quema ya tantos nopa mil xihuit, Toteco quitapos campa tzactoc Amocualtacat huan quicahuilis ma quisa. ⁸ Huan nopa Amocualtacat yas quincajcayahuati masehualme ipan nochi talme ipan taltipacti. Quincajcayahuas imasehualhua Gog huan Magog para ma mosentifica huan quitehuisse Toteco. Quena, quinsentilis tahuel miyaqui masehualme hasta itztose quej imiyaca xali iteno hueyi at. ⁹ Huan nopa miyaqui masehualme hualase ten campa hueli tali huan quiyahualotij campa mocahuaj itatzejtzelolittica masehualhua Toteco huan nopa altepet Jerusalén cati Toteco quicnelía. Huan nimantzi huetzis tit ten ilhuicac huan quintzontamiltis nochi nopa soldados cati ajsicoy para quitehuisse Toteco. ¹⁰ Huan Toteco quimajcahuas nopa Amocualtacat cati tacajcayajqui ipan nopa tit cati nelpano hueyi huan

lemani ica azufre. Nepa mocahuas Amocualtacat ihuaya nopa fiero tapiyali huan nopa istacatica tajtolpanextijquet. Huan inijuanti taijyohuise nepa tayohua huan tonaya para nochipa huan amo quema tamis inintaijyohuilis.

Toteco tetajtolsencahuas ten ihueyi siyaj cati chipahuac

¹¹ Huan niquitac se hueyi siyaj cati chipahuac huan Toteco mosehujtoya nozona. Huan iixpa ya polijqui taltipacti huan nochi cati eltoya ipan ilhuicacti huan ayecmo mopanti yon cana. ¹² Huan niqunitac nochi mijcatziti cati huejhueyi huan pisiltziti moquetzttoyaj iixpa nopa hueyi siyaj. Huan quintapo nochi amatapohualme. Huan teipa quitapo seyoc amatapohuali cati quipixtoya inintoca masehualme cati itztose para nochipa. Huan Toteco quintajtolsencajqui nochi nopa mijcatziti ica cati quichijtoyaj quej cati ijcuilijtoc ipan nochi nopa amatapohualme. ¹³ Huan itztoyaj nozona nochi mijcatziti cati mictoyaj ipan tali huan quintalpachojque huan nochi cati mijque ipan hueyi at. Huan itztoyaj inialmas nochi cati itztoyaj ipan tit. Huan Toteco quintajtolsencajqui nochi quej quinamiqui ica nopa tamanti cati quichijtoyaj ipan taltipacti. ¹⁴ Huan nochi nopa mijcatziti inihuaya inialmas cati achtohui itztoyaj ipan tit, quincumajcaque ipan nopa tit cati nelpano hueyi. Huan nopa tit cati nelpano hueyi eltoc nopa ompa miqulisti. ¹⁵ Quena, nochi masehualme cati amo quipixque inintoca ijcuilijtoc ipan nopa amatapohuali cati quijtohua ajquiya inijuanti quipiyaj nemilisti yancuic para nochipa quincumajcaque ipan nopa tit cati nelpano hueyi.

21

Yancuic ilhuicacti huan yancuic taltipacti

¹ Huan niquitac se yancuic ilhuicacti huan se yancuic taltipacti pampa nopa achtohui ilhuicacti huan nopa achtohui taltipacti panotejqui huan nojquiya polijqui nochi hueyi at. ² Huan na niJuan niquitac nopa altepet tatzejtzelolitic, nopa yancuic Jerusalén temoyaya ten ilhuicac campa Toteco. Elqui nelía yejectzi quej se ichpocat cati mocualtalijtoc para ihuehue. ³ Huan nijcajqui se cati tzajtzi chicahuac ten nopa hueyi siyaj huan quijto: “Xiquitaca ama Toteco Dios mochanti inihuaya imasehualhua huan yaya mocahuas inihuaya. Inijuanti itztose imasehualhua huan Toteco iselti itztos inihuaya quej ininTeco. ⁴ Huan Toteco quinhuachilis nochi iniixayo. Huan ayecmo quema aqui miquis, yon motequipachos, yon chocas, yon mococos pampa ya panotoc nochi ni tamanti cati achtohuiya eltoya ipan nopa achtohui taltipacti.”

⁵ Huan Toteco cati mosehua ipan nopa hueyi siyaj cati yejectzi quijto: “Xiquita, na nijchihuas yancuic nochi cati onca.”

Huan yaya nechilhui: “Xiquijcuilo ya ni pampa ni camanali temacht huan melahuac.”

⁶ Huan teipa nechilhui: “Eltojca. Na niitztoc quej nopa letra A huan nopa letra Z. Na nipejya huan niitamiya nochi cati onca. Nochi masehualme cati amiquij ipan iniyolo, niqunahuilis na atica ipan nopa ameli cati temaca nemilisti yancuic para nochipa huan amo monequi quixtahuase nopa at.

⁷ Nochi masehualme cati quitanise cati amo cuali quiselise nochi ni tatiochihualisti cati nimechilhuijtoc nica. Huan na nielis niininTeco, huan inijuanti elise noconehua. ⁸ Pero para masehualme cati quimacasiq taijyohuise huan nechhuejcamajcahuaj, huan cati amo quinequij quineltofase nocamanal, huan cati fiero inintalnamiqulis, huan cati temictiaj, huan cati momecatiaj, huan cati tenahualhuaaj, huan cati quinhueyimatiq taixcopincayome, huan

cati tacajcayahuaj, nochi inijuanti yase ipan nopa tit cati nelpano hueyi huan lemeni ica azufre. Ya ni nopa ompa miqulisti.”

Nopa yancuic Jerusalén

⁹ Huan hualajqui se ten nopa chicome ilhuicac ehuan cati achtohuiya quipixtoyaj nopa chicome caxit ica nopa chicome taijyohuilisti cati fiero, huan nopa ilhuicac ejquet nechilhui: “Xihuala nohuaya huan nimitznextilis nopa ichpocat, yaya cati isihua nopa Pilborregojtzi.”

¹⁰ Huan nopa ilhuicac ejquet quihucac notonal quej ipan se temicti hasta se tepet cati nelía huejcapantic huan nechnextili nopa tatzejtzeloctic altepet, Jerusalén, cati temoyaya ten ilhuicac ten campa Toteco. ¹¹ Huan temitoya ica itatanex Toteco huan cahuaniyaya quej se piltetzi cati nelía patiyo; elqui senquisa tzalantic huan cahuan quej nopa piltetzi cati itoca jaspe. ¹² Huan nopa yancuic altepet Jerusalén quiyahualojtoya se tepamit cati patahuac huan huejcapantic. Huan nopa altepet quipixtoya majtacti huan ome puertas. Huan se ilhuicac ejquet quimocuitahuiyaya sesen puerta. Huan ipan nopa puertas ijcuilijtoc inintoca nopa majtacti huan ome itelpocahua Israel cati huejcajquiya itztoyaj huan cati ica quipehualti nopa familias ten israelitame. ¹³ Huan eltoya eyi puertas ica campa quisa tonati, huan eyi ica norte, huan eyi ica sur, huan eyi ica campa calaqui tonati. ¹⁴ Huan ipan itzinpehualtil nopa tepamit cati quiyahualojtoya nopa altepet eltoya majtacti huan ome huejhueyi teme huan ininpani ijcuilijtoc inintoca nopa majtacti huan ome itayolmelajcahua nopa Pilborregojtzi.

¹⁵ Huan nopa ilhuicac ejquet cati nechcamanalhui quipixtoya imaco se huehueyac ohuat ten oro para ica quitamachihuas nopa altepet, huan ipuertas, huan nopa tepamit cati quiyahualojtoya. ¹⁶ Huan quema quitamachijqui, quiitac para nopa altepet eliyaya cuadradojtic. Ihuehueyaca eltoya san se quej ipatajca. Huan yaya quitamachijqui quesqui ihuexca huan quipiyayaya ome mil ome ciento kilómetros. Huan ihuehueyaca huan ipatajca huan ihuejcapanca eltoya san se. ¹⁷ Huan quitamachijqui itepa cati quiyahualtactoy nopa altepet huan quipixqui sesenta y cinco metros ipatajca. Nopa ilhuicac ejquet quitamachijqui ica nopa tatamachihuali cati tijtequihuiáj timasehualme.

¹⁸ Huan nopa tepamit eliyaya nochi tet yejectzitzitzi cati itoca jaspe. Huan nopa altepet quichijchijtoya ica senquisa oro cati nesiyaya quej se tescat tapajpactic. ¹⁹ Huan nopa teme cati ica quitzinpehualtijtoyaj itepa nopa altepet quipixtoya sequinoc teme cati tahuel patiyo calactoc iniijtic para ica quicualchijchijtoque. Huan nopa achtohui tet ipan itzinpehualtil eltoya jaspe, huan nopa ompa zafiro, huan nopa expa ágata, huan nopa najpa esmeralda, ²⁰ huan nopa macuilpa ónice, huan nopa chicusempa cornalina, huan nopa chicompa crisólito, huan nopa chicuexpa berilo, huan nopa chicnajpa topacio, huan nopa majtacpa crisopraso, huan nopa majtacti huan se jacinto, huan nopa majtacti huan ome amatista. ²¹ Huan nopa majtacti huan ome puertas eliyaya majtacti huan ome perlas cati huejhueyi. Huan sesen puerta eltoya san se perla cati hueyi. Huan icalle nopa altepet eltoya senquisa oro cati nesiyaya quej tescat cati tzalantic.

²² Huan amo niquitac se tiopamit ipan nopa altepet pampa Toteco Dios Cati Quipiya Nochi Chicahualisti huan nopa Pilborregojtzi, inijuanti itiopa nopa altepet. ²³ Huan ipan nopa altepet amo monejqui tonati, yon metzi para quitaahuilis pampa inintatanex Toteco huan nopa Pilborregojtzi quitaahuilía. ²⁴ Huan masehualme cati momaquixtijtoyaj huan hualajtoque ten nochi talme ipan taltipacti nejnemise ipan itaahuil nopa altepet.

Huan nochi tanahuatiani ipan taltipacti calaquise ipan nopa altepet huan quimactilise inihueyitilis huan nochi inintatepanitacayo. ²⁵ Huan amo quema motzacuas ipuerta quema tayohua pampa amo quema oncas yohuali nepa. ²⁶ Huan nochi xinachtí masehualme cati itztoyaj ipan nochi talme quihucase nepa nochi cati cuajcualtzi cati quipiyaj, huan quihucase nochi inintatepanitacayo para quimactilise Toteco. ²⁷ Huan amo teno cati amo cuali calaquis nepa. Yon amo calaquis cati tacajcayahuaj o quichihuaj cati Toteco amo quinequi quuitas. San itztose ipan nopa altepet nopa masehualme cati quipixque inintoca ijcuilijtoc ipan nopa amatapohuali ten nopa Pilborregojtzi cati quipiya inintoca nochi cati quipiyaj nemilisti yancuic para nochipa.

22

¹ Huan nopa ilhuicac ejquet nechnextilis se hueyat cati tahuel tzalantic quej tescat cati quisayaya ten ihueyi siyaj Toteco huan nopa Pilborregojtzi. Huan nopa hueyat temacayaya nemilisti, ² huan motalohuayaya tatajco ten nopa hueyi calle cati eltoya tatajco ten nopa altepet. Huan ipan ome nali nopa hueyat moscaltiyaya se cuahuit cati femaca nemilisti para nochipa. Huan nopa cuahuit temacas majtacti huan ome tamanti itajca, se tamanti itajca para sese metzti ipan se xihuit. Huan ixihuiyo nopa cuahuit quitequihuse para mopajtise masehualme ten nochi talme. ³ Huan amo oncas yon se tamanti tatechihualisti quej cati oncayaya ipan nopa achtohuiya taltipacti cati Toteco quitelchijtoya. Huan ihueyi siyaj Toteco huan nopa Pilborregojtzi eltos ipan nopa altepet huan itequipanojcahua quitequipanose. ⁴ Huan itequipanojcahua quuitase ixayac ininTeco huan itoca ijcuilijtos inincuaixco. ⁵ Huan nepa amo quema oncas tzintayohuilot. Huan amo monequis se taahuili, yon tonati para taahuis pampa Toteco Dios quintaahuilis. Huan inijuanti cati itztoque nepa tanahuatise para nochipa huan amo quema tamis.

Amo huejcahuas para hualas Jesucristo

⁶ Huan nopa ilhuicac ejquet nechilhui: “Ni camanali temachtí huan melahuac. Toteco Dios cati quinilhuía itajtolpanextijcahua cati panos teipa, quititancoc iilhuicac ejca para mitznexstilis ta huan nochi itequipanojcahua cati nechca eltoc para panos.”

⁷ Huan Jesús quiijto: “Amo huejcahuas para nihualas. Hueyi paquilisti quipantis yaya cati quitacaquilía cati ijcuilijtoc ipan ni amatapohuali cati techilhuía taya panos teipa.”

⁸ Huan na niJuan nijcajqui huan niquitac nochi ni tamanti. Huan quema nijcajqui huan niquitac cati nechnextiliyaya, nimotancuaquetzqui iixpa nopa ilhuicac ejquet para nihueyimatisquía. ⁹ Pero yaya sempa nechilhui: “Amo techhueyimati. Xijhueyimati san Toteco. Na san niitequipanojca Toteco quej ta, huan quej moicnihua, nopa itajtolpanextijcahua Toteco, huan quej nochi sequinoc cati quitacaquilise cati eltoc ipan ni amatapohuali. Nochi tojuanti san sejco itequipanohuaj Toteco.”

¹⁰ Huan nechilhui: “Amo xijzacua, yon amo xijtati cati ijcuilijtoc ipan ni amatapohuali ten cati panos teipa pampa amo huejcahuas para panos.

¹¹ Huajca yaya cati amo cuali o cati fiero quichihua, huan amo quinequi quicaquis ni amatapohuali, ma quisenhuiquili quichihua cati amo cuali huan cati fiero. Huan yaya cati itztoc cuali huan tatzetzeloltic iixpa Toteco huan quicaqui ni amatapohuali, ma quisenhuiquili quichihua cati cuali huan ma itzto tatzetzeloltic iixpa Toteco.”

¹² Huan Jesucristo quijto:

“Xiquita amo huejcahuas para nihualas huan nijhualicas notaxthuil para nijtaxthuis sese masehuali quej quinamiqui ica cati quichijtoc. ¹³ Na niitztoc quej nopa letra A huan nopa letra Z. Na niipejya huan niitamiya nochi cati onca. Na ipa niitztoya quema nochi pejqui huan noja niitztos quema nochi cati onca tamis.”

¹⁴ Paquilisti para nochi masehualme cati quichicueníaj iniyoyo, quii-tosnequi, cati quicahuilía Toteco ma quinyolpajpaca. Inijuant quipiyase teguiticayot calaquise ipan ipuerta nopa altepet huan quicuase itajca nopa cuahuit cati temaca nemilisti para nochipa. ¹⁵ Pero mocahuase calteno ten nopa altepet nochi masehualme cati fiero inintalnamiqulis, huan tenahualhuíaj, momecatíaj, temictíaj, tacajcayahuaj huan cati quintepanitaj taxcopincayome.

¹⁶ Huan sempa Jesús quijto:

“Na niJesús, nijtitanqui noilhucac ejca para mitzilhuis ni tamanti para tiquinpanoltis nochi taneltocani ipan nochi tiopame. Na cati nijmacac chicahualisti Tanahuatijquet David huan na niiteipan ixhui cati nimosehuis ipan ihueyi siyaj para nitanahuatis. Na niitztoc quej nopa sitali cati cahuani chicahuac ica ijnaloc quema nechca para taneis.”

¹⁷ Huan Itonal Toteco huan isihua nopa Pilborregojtzi quijtohua: “Xihualaca.” Huan nochi cati quicaquij ni amatapohuali ma quinilhuica sequinoc: “Xihualaca.” Quena, ma hualaca nochi cati amiquij ipan iniyolo huan cati quinequij hualase. Ma quiiquij nopa at cati temaca nemilisti cati yancuic para nochipa. Huan cati quiiis nopa at amo monequi quixtahuas.

¹⁸ Huan ya ni cati nimechilhuía nochi anmasehualme cati anquicaquij ni camanali cati eltoc ipan ni amatapohuali cati techilhuía cati panos teipa. Sinta acajya quipihuilis ica más tamachtilisti cati amo mopantía nica, huajca Toteco quitatzacuiltis ica nopa fiero taijyohuilisti cati ijcuilijtoc ipan ni amatapohuali. ¹⁹ Huan sinta se acajya quiquixtilis se tamanti cati ijcuilijtoc nica cati quinilhuía masehualme taya panos teipa, Toteco quiquixtilis icaquihuil para quicuas itajca nopa cuahuit cati temaca nemilisti yancuic. Huan Toteco amo quicahuilis calaquis ipan nopa altepet tatzejtzeloltic ten cati techpohuilía ni amatapohuali.

²⁰ Huan Jesús cati techilhuía ni tamanti quijtohua:

“Quena, amo huejcahuas para nihualas.”

¡Quej nopa ma eli! ¡Xihuala Tohueyiteco Jesús!

²¹ Tohueyiteco Jesús ma quipiya hueyi iyolo ica nochi amojuanti. Quej nopa ma eli.